


परमप्रभु यावे आ
लौव



Bible in Sunwar (NP:suz:Sunwar)

परमप्रभु यावे आ लोव
Bible in Sunwar (NP:suz:Sunwar)

copyright © 2011 Wycliffe Bible Translators, Inc.

Language: Sunwar

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789937101646

The Bible without Deuterocanon

in Sunwar

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2014-04-30

PDF generated using Haiola and XeLaTeX on 7 Nov 2023 from source files dated 29 Jan 2022

27cd6a1c-0244-5add-a4e8-b4f0e5104473

Contents

उत्पत्ती	1
प्रस्थान	56
लेवी	105
गन्ती	139
ब्यवस्था	186
यहोसु	227
न्यायाधीस	254
रूथ	282
१ सामुएल	286
२ सामुएल	321
१ राजा	350
२ राजा	386
१ इतिहास	421
२ इतिहास	456
एज़ा	497
नेहेम्याह	509
एस्तर	526
अय्युब	535
भजन संग्रह	565
हितोपदेस	645
उपदेसक	669
ठेयब कुम्सो	678
यसैया	683
येरमीया	739
बिलाप	801
इजीकीएल	807
दानीएल	862
होसे	879
योएल	889
आमोस	893
ओबदिया	901
योना	903
मीका	906
नहुम	912
हबकुक	915
सेफन्याह	918
हागै	921
जकरिया	923
मलाकी	934
मत्ती	938
मर्कूस	979
लूका	1004
यूहन्ना	1048
प्रेरित	1079
रोमी	1122
१ कोरिन्थी	1140
२ कोरिन्थी	1158
गलाती	1169

एफिसी	1176
फिलिप्पी	1183
कलस्सी	1188
१ थिस्सलोनिकी	1193
२ थिस्सलोनिकी	1197
१ तिमोथी	1200
२ तिमोथी	1206
तीतस	1210
फिलेमोन	1213
हिब्रू	1215
याकूब	1228
१ पत्रुस	1233
२ पत्रुस	1238
१ यूहन्ना	1241
२ यूहन्ना	1247
३ यूहन्ना	1248
यहूदा	1249
प्रकाश	1251

उत्पत्ती

ब्रेक्ब मुर: यहूदी आन ब्रेक्ब मुर नु थमा सुइक्ब आन गुम्तीकेमी मेको किताब ब्रेक्ब मोसा बाक्ब, देंनीम। येसु ख्रीस्तमी यो मोसा आ ब्रेक्शो आ पर्बम लोत्र पशो बाक्त। यूहन्ना ५:४६; लूका २४:२७

गेना दुम्शो: एको किताब परमप्रभु यावेम नेल्ल सेला रे योसेफ आ बेक्ची ना सम्म डा लोत्र बाक्ब।

मार ब्रेक्शो: उत्पत्ती किताब आ शेंशो

१. परमप्रभु यावे रागी सेल्ब बाक्ब उत्पत्ती १:१-२:३

परमप्रभु यावे मुर कली सेल्ब बाक्ब उत्पत्ती २:४-१५

२. डोंइती सेल्शो मुर आस पशो ब्रेक्शो बाक्ब उत्पत्ती ३:-११:-

मुरुम परमप्रभु यावे आ देंशो मटितीके उत्पत्ती ३:-

काइन नु हाबील उत्पत्ती ४:१-२४

हाबील रे नोआह सम्म उत्पत्ती ४:२५-५:३२

रागी नेल्ल कली ब्वाक्कुम सुम्शो उत्पत्ती १०:-

बेबीलोन सहरम लाइशो खिं सेल्शो उत्पत्ती ११:१-९

किकी पिपी आन नें उत्पत्ती ११:१०-३२

३. यहूदा आ किकी पिपी उत्पत्ती १२:-५०:-

अब्राहाम उत्पत्ती १२:-२३:-

इसहाक उत्पत्ती २४:-२६:-

याकूब उत्पत्ती २७:-३६:-

योसेफ उत्पत्ती ३७:-५०:-

डोंइती डा लोत्र

उत्पत्ती २:४-२५; भजन संग्रह १०४

१ नेल्ल क्येडा डोंइती परमप्रभुमी सरीड नु रागी दुम्पदा बाक्त। २ मिनु खप, फश, ब्वाक्कु नेल्ल खाल्सीशा, मारेइ मवाशो बाक्माक्त। मिनु मेको तारी छिडछिड बाक्माक्त। परमप्रभु आ सोक्त ब्वाक्कु तारी फिल फिल पा हिम्सीशा बाक्बाक्माक्त।

परमप्रभुमी मारेइ मारेइ सेल्शो

उत्पत्ती ४-२५; भजन संग्रह १०४

३ मिनु परमप्रभुमी “छेडछेड दुमो” देंमेनु, छेडछेड दुम्माक्त। भजन संग्रह ३३:९; हिबू ११:३; यसैया ४५:७ ४ मेको तशा “रिम्शो दुम्त” देंमाक्त। मिनु छेडछेड नु छिडछिड फ्रादीम्सी बाक्त। ५ मिनु परमप्रभुमी छेडछेड कली नाक्ती नु छिडछिड कली नाक्दो, दे नें वोदा बाक्त। मिनु नां रिक्शा, नां सोत्रशा, मेको डोंइती डा नाक्ती दुम्माक्त।

६ मिनु परमप्रभुमी “ब्वाक्कु आ दातेमी फ्रातीक दुमो। ब्वाक्कु ब्राशा बाक्मल” देंमाक्त। ७ मोपा परमप्रभुमी सरीड आगा डा ब्वाक्कु नु सरीड तारी डा ब्वाक्कु फ्रादीम्सी बाक्त। मिनु ब्वाक्कु बुक्शा बाक्मा बाक्त। भजन संग्रह १९:२; भजन संग्रह १३६:६; भजन संग्रह १४८:४ ८ परमप्रभुमी मेको फ्रातीके कली सरीड, दे नें वोदा बाक्त। मिनु नां रिक्शा, नां सोत्रशा, मेको निक्शी नाक्त दुम्माक्त।

९ मिनु परमप्रभुमी “सरीड आगा डा ब्वाक्कु काथा दुमीन। सोत्रशो रू गूडो” देंमाक्त। मेको यो दुम्माक्त। अय्युब ३८:८-११; भजन संग्रह २४:२; २पत्रुस ३:५ १० मिनु परमप्रभुमी सोत्रशो रू कली रागी नु ब्वाक्कु देम्शा लीशो कली समुन्द्र, दे नें वोदा बाक्त। मिनु मेको आ सेल्शो तशा “रिम्शो दुम्त” देंमाक्त।

११ मिनु परमप्रभुमी रागी डा खप कली “घांस, फू नु रवापुकी दुम्मल। घांस नु फूपुकीम वांचेर बाक्मल। फल फुल सिम्ब रवापुकी वाशा, आंम आंम फल सिम्मल। मेको आन वांचेर चहिं आन फलपुकीम बाक्मल” देंमाक्त। मिनु मोदेशो दुम्माक्त। १२ रागीम घांस नु फूपुकी वाशा, आन वांचेर यो वामा बाक्त। फल फुल रवापुकी वाशा, आन वांचेर यो वामा बाक्त। मिनु परमप्रभुमी आ सेल्शो तशा “रिम्शो दुम्त” देंमाक्त। १३ मिनु नां रिक्शा, नां सोत्रशा, मेको सां नाक्ती दुम्माक्त।

14 मिनु परमप्रभुमी “नाक्ती नु नाक्दो फ्राचा कली सरीडमी छेडछेड पा ब्राइबपुकी दुमीन। मेको ब्राइबपुकीम हिंडद नु बर्खा, नाक्ती नु बर्स कली फ्रातीक गेय पामेक्ल। ब्यवस्था ४:१९; भजन संग्रह ७४:१६; यसैया ४७:१३ 15 मिनु मेको सरीड डा ब्राइबपुकीम रागी कली छेडछेड गेचा माल्नीम” देंमाक्त। मिनु मेको दुम्माक्त। 16 मोपा परमप्रभुमी ठेयब बत्ती निक्शी सेला बाक्त। शुश छेडछेड पा ब्राइब नाक्त कली नु इच्का छेडछेड पा ब्राइब बत्ती नाक्दो कली वोदा बाक्त। सोरुल यो सेल्मी बाक्त। भजन संग्रह १३६:७-९ 17 परमप्रभुमी रागी छेडछेड बाक्ल, दे मेको नेल्ल आन कली सरीडमी वोइक्मी बाक्त। 18 नाक्त नु नाक्दो कली फ्राचा नु छेडछेड छिडछिड रे फ्राचा कली सरीडम वोदा बाक्त। परमप्रभुमी मेको तशा “रिम्शो दुम्त” देंमाक्त। 19 मिनु नां रिक्शा, नां सोव्रशा, मेको ४ नाक्ती दुम्माक्त।

20 मिनु परमप्रभुमी “ब्वाक्कुमी मारेइ मारेइ ब्रोंइशा बाक्बपुकीम ब्रीमल। रागी तारी मारेइ मारेइ चिक्ब सरीडम बेरमल” देंमाक्त। 21 मोपा परमप्रभुमी ब्वाक्कुम बाक्ब ठेयब हिंचा डा जन्तु नु मारेइ मारेइ ब्रोंइशा बाक्ब सेल्मी बाक्त। मेको शुश दुम्शा, समुन्द्र ब्रीशा बाक्मा बाक्त। चिक्ब यो शुश दुम्मा बाक्त। मिनु परमप्रभुमी मेको तशा “रिम्शो दुम्त” देंमाक्त। भजन संग्रह ७४:१३-१४; १४८:७ 22 परमप्रभुमी मेको नेल्ल आन कली आसीक गेशा “सोशा बोशा, शुश दुमीन, समुन्द्र डा ब्वाक्कु ब्रीडीने” देंमाक्त। चिक्ब आन कली यो “सोशा बोशा, रागीमी शुश दुमीन” देंमाक्त। 23 मिनु नां रिक्शा, नां सोव्रशा, मेको ५ नाक्ती दुम्माक्त।

24 मिनु परमप्रभुमी “रागीम मारेइ मारेइ ब्रोंइशा बाक्ब गूचा माल्नीम। मार गूचा माल्नीम देंशा हना बी ब्यफ, खपीम गेशा गाक्ब आइक्च जन्तु नु मार मार ब्वाकी डा जन्तु दुमीन” देंमाक्त। मिनु मेको दुम्माक्त। 25 मोपा परमप्रभुमी मारेइ मारेइ ब्वाकी डा जन्तु, मारेइ मारेइ बी ब्यफ, खपीम गेशा गाक्ब नु मारेइ मारेइ आइक्च जन्तु सेल्मी बाक्त। मिनु परमप्रभुमी आ सेल्शो तशा “रिम्शो दुम्त” देंमाक्त।

26 मिनु नोले परमप्रभुमी “इं खोदेंशो पा मुर का सेल्य। मिनु समुन्द्र डा डांइ, सरीडम बेरब चिक्ब, बी ब्यफ, ब्वाकी डा जन्तु नु खपीम गेशा गाक्ब आइक्च जन्तु नेल्ल आन कली हुकुम पाइब दुम्ल” देंमाक्त। भजन संग्रह ८:६-९; एफिसी ४:२४; कलस्सी १:१५; याकूब ३:९ 27 मिनु परमप्रभुमी आ खोदेंशो तांइसीशो का सेला बाक्त। मेकोमी वोंइश मुर का नु मीश मुर का सेला बाक्त। उत्पत्ती ९:६; मत्ती १९:४ 28 मिनु परमप्रभुमी मुर आस कली आसीक गेशा “सोशा बोशा, तमी तौ थिशा, रागी प्रिंशा, रिम्शो पा हुकुम पस। समुन्द्र डा डांइ, सरीडम बेरब चिक्ब, रागीम बाक्ब जन्तु नेल्ल नु खपीम गेशा गाक्ब आइक्च जन्तु नेल्ल आन कली रिम्शो पा हुकुम पसे” देंमाक्त।

29 मिनु परमप्रभुमी “नेनीस, गो इस कली वांचेर सिप्ब, गिग खाइ, फल सिप्ब नु वांचेर सेल्ब रवा गेतन्सी। मेको इस कली जचा ब्वचा दुम्ब। मत्ती ६:२५-३४ 30 मिनु गो रागीम बाक्ब जन्तु, बी ब्यफ, रागी डा चिक्ब, खपीम गेशा गाक्ब आइक्च जन्तु नु मारेइ मारेइ ब्रोंइशा बाक्ब आन कली घांस, सुवा ब्वचा गेतामी” देंमाक्त। मिनु मोदेंशो दुम्माक्त। भजन संग्रह १४५:१६ 31 मिनु परमप्रभुमी आ सेल्शो नेल्ल तशा “शुश रिम्शो दुम्त” देंमाक्त। मिनु नां रिक्शा, नां सोव्रशा, मेको ६ नाक्त दुम्माक्त। मत्ती १९:१७; १तिमोथी ४:४

2

डोंइती डा नाइक्तीक नाक्त

1 मिनु मोपा परमप्रभुमी सरीड, रागी नु मार मार बाक्मा, मेको नेल्ल सेल्ने थुमा बाक्त। 2 मिनु ६ नाक्तीम आ गेय नेल्ल थुम्शा डा मिन ७ नाक्तीम नांइसे बाक्त। हिब्रू ४:४ 3 मिनु परमप्रभुमी नाइक्तीक नाक्त कली आसीक गेवा बाक्त। मिनु मेको नाक्त आंम कली नाइक्चा, दे वोदा बाक्त। मारदे हना मेको नेल्ल सेल्तीक गेय थुम्शा नांइसे बाक्त। प्रस्थान २०:११; भजन संग्रह ९५:११; इजीकीएल २०:१२; हिब्रू ४:९-१९

परमप्रभुमी मुर सेल्शो

4 एको परमप्रभुमी सरीड नु रागी सेल्ची ना डा लोव्र बाक्ब। परमप्रभु यावेमी रागी नु सरीड सेलानु, 5 मारेइ मारेइ घांस खपीम मवाशो बाक्मा बाक्त। कोव्रकेली यो मदाप्शो बाक्मा बाक्त। मारदे हना परमप्रभु यावेमी रागीम रेउ मयिपाइश्शो बाक्माक्त। मिनु रूम गेय पाइब मुर यो मबाक्मा बाक्त। 6 मेना रागी रे खोला गूशा, रागी नेल्ल डा खप जिप्पाइक्बाक्माक्त। 7 मिनु नोले परमप्रभु यावेमी रू डा खप के मुर का सेला बाक्त। मिनु मुर आ नेमी ब्रोंइतीक सोक्त मुइक्ता बाक्त। मिनु मुर सोक्त पाइश्शो दुम्माक्त। उत्पत्ती ३:१९; अय्युब १०:९; अय्युब ३३:४; भजन संग्रह १०४:२९-३०; १कोरिन्थी १५:४५,४७

परमप्रभुमी आ रू सेल्शो

8 मिनु नोले परमप्रभु यावेमी पूर्वम एदेन माइशो रू का सेला बाक्त। मेकेर आ सेल्शो मुर कली वोदा बाक्त।
9 मिनु परमप्रभु यावेमी मेकेर मार मार दारशो तांडसीब रवा नु जचा ब्वचा फल सिपब रवा वापदा बाक्त। ब्रोंडपाइक्ब का नु रिम्शो नु मरिम्शो तुइक्पाइक्ब रवा का यो रू आ दातेमी वापदा बाक्त। उत्पत्ती ३:२२; प्रकाश २:७; प्रकाश २२:२

10 मिनु रू कली जिप्पाइक्चा, दे एदेन रे खोला का ग्रूमाक्त। मेको खोला नोले ब्राशा, ४ ओटा खोला दुम्शो बाक्मा बाक्त। इजीकीएल ४७:१-१२ 11 डोंइती डा खोला आ नें पीशोन बाक्ब। मेको खोला हवीलाह रागी आ एर ओंथ रे लशो बाक्ब। मेको रागीमी सुन बाक्बाक्माक्त। 12 मेको रागी डा सुन रिम्शो बाक्बाक्माक्त। मेकेर गोकुल धूप नु ओनीक्स माइशो हीरा यो बाक्बाक्माक्त। 13 मेको आ नोले डा खोला आ नें गिहोन बाक्ब। मेको कूश माइशो रागी आ एर ओंथ हिरशो बाक्ब। 14 मिनु मेको आ नोले डा खोला आ नें टाइग्रीस बाक्ब। मेको खोला अस्सुर रागी आ पूर्व गे लशो बाक्ब। मिनु नेल्ल क्येडा नोले डा खोला आ नें युफ्रेटीस बाक्ब।

15 मिनु परमप्रभु यावेमी मुर कली लाइशशा, एदेन रू दोचा नु कोत्रचा कली वोदा बाक्त। 16 मिनु परमप्रभु यावेमी मेको मुर कली “नेल्ल रवा डा फल जने ब्वने चाप्नेवे। 17 तन्न रिम्शो नु मरिम्शो तुइक्पाइक्ब रवा रे ब्वचा मदुम्ब। तेको नाक्त ब्वाइनेवे, मेको नाक्तीन बेक्नेवे” दे अरेवा बाक्त। रोमी ६:२३

मुर आ गेय

18 मिनु परमप्रभु यावेमी “मुर का ला बाक्चा मरिम्शो दुम्ब। गो मेको नु बाक्चा कली वारच पाइब का सेल्लुड” देंमाक्त। उपदेसक ४:३०

19 मिनु परमप्रभु यावेमी आ खप के सेल्शो मार मार जन्तु नु सरीडम बेरब चिक्ब आन कली मुरुम मार मार नें वोइक्बाक्मे, दे मुर आ बाक्तीके चाक्मी बाक्त। मिनु मुरुमी ब्रोंडशा बाक्ब नेल्ल आन कली नें वोदा बाक्त। मार नें वोदा, मेको नें लीमा बाक्त। 20 मुरुमी बी ब्यफ, सरीडम बेरब चिक्ब नु ब्वाकी डा जन्तु नेल्ल आन कली नें वोदा बाक्त। तन्न मुर कली मेको नु बाक्चा कली वारच पाइब मबाक्शो बाक्माक्त।

परमप्रभुमी मुर आ वारच सेल्शो

21 मिनु परमप्रभु यावेमी आदम कली मारेइ मतुइक्चा डा पा निन्द्रा पपदा बाक्त। मिनु मेको के जेरी का शोला बाक्त। मिनु मेको पोत्रला कली श्येमी सुवा बाक्त। 22 मिनु परमप्रभु यावेमी मेको शोल्शो जेरी के मीश मुर का सेल्शा, मुर आ बाक्तीकेमी चाक्गा बाक्त। 23 मिनु आदममी “ओहो, एको रुश, आं रां डा रुश बाक्त। एको श्ये आं रां डा श्ये बाक्त” दे तुइक्ता बाक्त। मिनु मेकोमी “मेको आ नें मीश मुर वोइक्चा माल्ब। मारदे हना वोंडश मुर आ रां रे शोल्शो बाक्ब” देंमाक्त।

24 मोपतीके वोंडश मुरुमी आ आंम आफ आस कली प्रोंडशा, आ मीश नु काथा बाक्ब। मेको निक्शी रां का दुम्नीस। मत्ती १९:५-६; १कोरिन्थी ६:१६; एफिसी ५:३१ 25 मेना आदम नु आ मीश निम्फा शिश्रा बाक्सा बाक्त। मुने चहिं मतुइक्बाक्सा बाक्त।

3

मुरुम परमप्रभु आ देशो मटिशो

1 मिनु परमप्रभु यावे आ सेल्शो जन्तु आन दातेमी नेल्ल क्येडा निप्स पाइशो बुस्स दुम्माक्त। मिनु बुस्सुमी मीश मुर कली “परमप्रभुमी इस कली ‘एको रू डा रवा आन फल मारेइ मब्वसे’ देंमे?” दे हिल्लो पवा बाक्त। प्रकाश १२:९; प्रकाश २०:२ 2 मिनु मीश मुरुमी बुस्स कली “गो एको रू डा रवा आन फल ब्वचा दुम्नस्कु। उत्पत्ती २:१६ 3 तन्न रू आ दातेमी बाक्शो रवा आ फल आ पर्वम परमप्रभुमी ‘मब्वचा, मथिचा यो। ब्वाइतीसी हना, गे बेक्नीसी’ देंत” देंमाक्त। उत्पत्ती २:१७ 4 तन्न बुस्सुमी “गे बेक्सीन मबेक्नीसी। यूहन्ना ८:४४ 5 ब्वाइतीसी हना, इस कली रिम्शो नु मरिम्शो मार बाक्बा तुइक्पाइक्ब। मिनु गे परमप्रभु खोदेशो दुम्नीसी। मेकोन परमप्रभुमी तुइक्ताक्व” देंमाक्त। 6 मिनु मीश मुरुम मेको रवा तशा ब्वशोनु, ब्रोंडचा डा कोत्रशोनु, दारशो, रुप्तीक थुं गेचा डा तवा बाक्त। मोपतीके फल सेक्शा, ब्ववा बाक्त। मेको आ नेक्था बाक्ब आ वोंडश कली यो गेवा बाक्त। मेकोमी यो ब्ववा बाक्त। याकूब १:१४-१५; १तिमोथी २:१४ 7 मिनु नोले निम्फा शिश्रा बाक्शो तुइक्तसे बाक्त। मिनु फोत्रशी रवा आ सफा सेक्शा फेक्तीक सेल्से बाक्त। उत्पत्ती २:२५

8 मिनु नाकनाकदो मेको निक्कीमी परमप्रभु यावे रूमी हिरशो नेन्से बाक्त। मिनु “परमप्रभु यावेम मतचा डा पा खुइकचा” दे रवा आन दातेमी लशा, खुइक्ससा बाक्त। भजन संग्रह १३९:७-१०; येरमीया २३:२४ 9 मिनु परमप्रभु यावेमी आदम कली “ते बाकडे?” दे ब्रेता बाक्त। 10 मेकोमी “गो इन गाकशो नेता। मिनु गो शिश्रा बाक्तीके, हिंशा खुइकसाकयी” देंमाक्त। 11 मिनु “गे शिश्रा बाक्नेवे, दे दोपा तुइक्नेवे? मब्वचा देशो रवा आ फल ब्ववी?” दे हिल्लो पवा बाक्त। 12 मिनु मुरुमी “इन गेशो मीश मुरुमी आं कली मेको रवा आ फल गेती। मिनु गो ब्वाता” देंमाक्त। २कोरिन्थी ११:३

13 मिनु परमप्रभु यावेमी मेको मीश मुर कली “मार पवी?” दे हिल्लो पवा बाक्त। मीश मुरुमी “बुस्सुमी आं कली जोल पा ब्वपाइक्ती। मिनु गो ब्वाता” देंमाक्त। २कोरिन्थी ११:३

14 मिनु परमप्रभु यावेमी बुस्स कली “बी ब्यफ नु ब्वाकी डा जन्तु नेल्ल आन दातेम गे सराप राइनेवे। मारदे हना मोदेशो मरिम्शो पाप्तीवी। इ रांमी गेशा गाकचा माल्नेवे। इ ब्रोंइतीक नाक्त सम्म खप जशा, बाक्चा माल्नेवे। 15 गे नु मेको मीश मुर जिशा, बाक्चा मलीसे। मेको आ युइ नु इ युइ जिशा बाक्नीमी। मीश मुर आ युइ कामी इ पिया दिम्शा प्रोल्ब। गे चहिं मेको आ गेंग्रेम कोक्नेवे” दे सराप पदा बाक्त। प्रकाश १२:४-५, १५-१७

16 मिनु मेकोमी मेको मीश मुर कली “कोव्रज कुरशा, आल थिवेनु, इ कली ठेयब श्येत गेनुड। आल थिचा रोइ पाइनेवे। मो हना यो इ वोंइश कली माल्नेवे। मिनु मेकोमी इ कली हुकुम पाइब” देंमाक्त। एफिसी ५:२२-२३; १तिमोथी २:१२

17 मिनु आदम कली “मारदे हना गे इ मीश आ लोव्र नेंशा, मब्वचा देशो रवा आ फल ब्वाप्तीवी, इ पतीके आ पर्वम इ रू नेल्लेमी सराप ताइनीम। इ जचा थोव्रक श्येत पा खुम्चा माल्नेवे। उत्पत्ती ८:२१-२२; अय्युब ३१:३८-३९ 18 इ रूमी चू नु चोंक वानीम। मिनु गे गिगी खाइ ब्वचा माल्नेवे। 19 इ कुप्फी रे गाल यिपाइशशा शोब्ले जचा माल्नेवे। गे खप मदुमे सम्म मोदेशो पचा माल्नेवे। मारदे हना गो इ कली खप रे सेल्शो नड” दे परमप्रभु यावेमी आदम कली देंमाक्त। उत्पत्ती २:७; भजन संग्रह ९०:१०; भजन संग्रह १०४:२९; उपदेसक १२:७; २थिस्सलोनिकी ३:१०

20 मिनु आदममी आ मीश कली हव्वा नें वोदा बाक्त। मारदे हना मेको ब्रोंइब मुर नेल्ल आन ममा दुम्माक्त। 21 मिनु परमप्रभु यावेमी आदम नु आ मीश आस कली कुशुल के फेक्तीक सेल्शा, फेक्तीम्सी बाक्त।

22 मिनु परमप्रभु यावेमी “मुर इं खोदेशो दुम्त। रिम्शो नु मरिम्शो तुइक्ब दुम्त। मेको ब्रोंइपाइक्ब रवा आ फल यो सेक्शा, ब्वाप्तु हना, गेना हना यो ब्रोंइब, गेनायो मबेक्ब दुम्ब” देंमाक्त।

23 मोपतीके परमप्रभु यावेमी खप रे सेल्शो मुर कली एदेन माइशशो रू रे गुंइशा, अरु रूम गेय पथ सोइक्ता बाक्त। उत्पत्ती २:१५ 24 परमप्रभुमी मेको आस कली खेरसी बाक्त। मेको आस कली खेरशा, एदेन रू डा पूर्वमी आ स्वर्ग डा करूब माइशशो गेय पाइब वोदा बाक्त। मेकेर मी ब्रशो एर ओंथ हिरब तरवार का यो वोदा बाक्त। मेको ब्रोंइपाइक्ब रवा आ फल ब्वचा मताम्सेक्ल, दे कोव्रब वोदा बाक्त।

4

परमप्रभु रे डोन बाक्शो

1 मिनु नोले आदम आ मीश हव्वा नु इम्माक्त। मिनु हव्वाम कोव्रज कुरशा, तौ का थिमाक्त। हव्वामी “परमप्रभु यावेमी आं कली वारच पा आल का गेती” देंमाक्त। मिनु आ नें काइन वोदा बाक्त। 2 मिनु मेको आ नोले लेंशा अर्को तौ का यो थिमाक्त। मेको कली हाबील नें वोदा बाक्त। हाबील काइन आ लोकब बाक्माक्त। मेको आल निक्की कोल्शा, हाबील भेडा गोठला दुम्माक्त। काइन चहिं रू डा गेय पाइब दुम्माक्त।

3 काबु काइनमी आ रू डा सिशशो मारेइ मारेइ थोव्रक परमप्रभु यावे कली चढेवा बाक्त। प्रस्थान २३:१९ 4 हाबीलमी आ डोंइती गिक्शो पाठा आ श्ये नु बोंसो परमप्रभु यावे कली चढेवा बाक्त। मिनु परमप्रभु यावेमी हाबील आ चढेशो ब्रवा बाक्त। प्रस्थान ३४:१९; लेवी ३:१६ 5 तन्न काइन आ चढेशो मब्रवा बाक्त। मिनु काइन आ कुल राव किक्पा चुरमाक्त। प्रस्थान ३३:१९; हिब्रू ११:४ 6 मिनु परमप्रभु यावेमी काइन कली “मारदे चुरे? मारदे राव किक्डे? 7 गे रिम्शो पाप्तीवी हना, गो इ कली मब्राइनुडा डा? ब्राइनुड। गे मरिम्शो पाप्तीवी हना, मुर साइक्ब जन्तु खोदेशो पा, पाप इ लाप्चोमी बाक्ब। मिनु इ कली माल्ब। गे इ मरिम्शो थुं कली ग्राडो” देंमाक्त। गलाती ५:१७; रोमी ६:१२

8 मिनु काइनमी आ लोकब हाबील कली “रूमी लस” देंमाक्त। मिनु रूमी बाक्सानु, काइनमी हाबील कली सदा बाक्त। १यूहन्ना ३:१२, १५ 9 मिनु परमप्रभु यावेमी काइन कली “इ लोकब ते बाक्म?” दे हिल्लो पवा बाक्त। मिनु

काइनमी “डाद, गो आं लोकब आ गोठला नडा डा?” देंमाक्त। उत्पत्ती ३:१ 10 मिनु मेकोमी “नेनो, मार पवी? इ लोकब आ हुशेमी आं कली खप रे ब्रेशो नेंता। भजन संग्रह ९:१३; मत्ती २३:३५; हिब्रू १२:२४ 11 मुल गे सराप रशा, इ रू रे खेरचा पुंडसीनेवे। मारदे हना इ लोकब आ हुश मेकेर जारशो बाक्ब। गन्ती ३५:३३ 12 मुल रे गे रू डा गेय पवीनु, मारेइ मग्रेल्ब। रागी प्रोंइशा, गाक्ब मुर दुम्चा माल्नेवे” दे परमप्रभु यावेमी देंमाक्त।

13 मिनु काइनम परमप्रभु यावे कली “इन गेशो सजाइ ठेयब बाक्ब। मोमो श्येत गेतीनी हना, फाल्ने मचाप्नुड। 14 मुलाक्ती आं कली आं रू रे गुंडताक्यीनी। मिनु इन नेक्था बाक्चा मताइनुड। गो मुल रागी प्रोंइशा, गाक्ब मुर दुम्नुड। आं कली सुम थित्तेक्म हना यो, साइक्नीम” देंमाक्त। अय्युब १५:२०-२४ 15 मिनु परमप्रभु यावेमी “ममाइ, सुइमी इ कली साइक्तेमी हना, इ तशो सराप मेको कली ७ खेयप रचा माल्ब” देंमाक्त। मिनु परमप्रभु यावेमी “काइन कली सुइमी मसदमेक्ल” दे आ रांम चिनु वोदा बाक्त। इजीकीएल ९:६; प्रकाश ७:३-४ 16 मिनु नोले काइन परमप्रभु यावे आ डोंइती रे लमाक्त। मिनु एदेन आ पूर्व गे, नोद माइशो रागीम जाक्दीशशा बाक्माक्त।

मुर आन ठेयब लेशो

17 मिनु काइन आ मीश नु इम्माक्त। मिनु मेकोमी कोव्रज कुरशा, हनोक थिमाक्त। मिनु काइनम सहर का सेला बाक्त। मेको सहर कली आ तौ हनोक आ नें खोदेशो पा हनोक नें वोदा बाक्त। 18 हनोकमी इराद थिमाक्त। इरादमी मेहुयाएल थिमाक्त। मेहुयाएल मेथुशाएल आ आफ दुम्माक्त। मेथुशाएल लमेक आ आफ दुम्माक्त।

लमेकमी यो मुर साइशो

19 मिनु लमेकमी मीश निक्शी चाक्गा बाक्त। का आ नें आदाह नु अर्को आ नें चिल्लाह बाक्माक्त। 20 मिनु आदाहमी याबाल थिमाक्त। मेको ताम्बुम बाक्ब नु गोठम बाक्ब बस्तु योव्रब आन किकी पिपी बाक्माक्त। 21 मेको आ लोकब आ नें यूबाल बाक्माक्त। मेको बीना नु मुइक्तीके ताप्ब आन किकी पिपी बाक्माक्त। 22 मिनु चिल्लाहमी तूबल-काइन थिमाक्त। मेकोमी कांसा नु फलाम के मार मार सेल्टीक गेय पवा बाक्त। तूबल-काइन आ समी नामा बाक्माक्त। 23 मिनु लमेकमी आ मीश निक्शी आस कली “आदाह नु चिल्लाह, आं लोव्र नेनीस, गे लमेक आ मीश निक्शी, आं सेंदा नेंशा, होस पसे। गो मुर का साइक्ता। मारदे हना मेको ठिटांमी आं कली तुप्ती। 24 काइन साइक्ब ७ खेयप क्येक्क लेत्चा पुंडसीब हना, लमेक साइक्ब ७७ खेयप क्येक्क लेत्चा पुंडसीब” देंमाक्त। उत्पत्ती ४:१५; लेवी १९:१८; ब्यवस्था ३२:३५; मत्ती १८:२२

आदम नु हव्वा आस अर्को तौ

25 मिनु आदम लेंशा आ मीश नु इप्शा, तौ का थिमाक्त। मेको कली सेथ नें वोदा बाक्त। हव्वामी “परमप्रभुमी हाबील आ पा डा अर्को तौ का गेती। मारदे हना काइनमी हाबील कली साइक्तु” देंमाक्त। 26 मिनु सेथमी यो तौ का थिमाक्त। मिनु मेको कली एनोश नें वोदा बाक्त। मिनु मेना रे मुरपुकीमी परमप्रभु यावे कली पुंडचा नु ठेयब सेल्चा गोव्रमे बाक्त। उत्पत्ती १२:८

5

आदम आ चच युइ

१इतिहास १:१-४

1 एको आदम आ चच, युइ बाक्नीम। परमप्रभुमी मुर सेलानु, आ खोदेशो पा सेला बाक्त। लूका ३:३७-३८; उत्पत्ती १:२७ 2 वोंइश मुर का नु मीश मुर का सेला बाक्त। मिनु मेको आस कली आसीक गेशा, आस नें मुर वोंइसी बाक्त। 3 मिनु आदम सहे का ३० बर्स दुम्मेनु, आ खोदेशो तौ का थिमाक्त। मिनु मेको कली सेथ नें वोदा बाक्त। भजन संग्रह ५१:७; १कोरिन्थी १५:४५ 4 सेथ थिशा नोले आदम ८ सहे बर्स ब्रोंइमाक्त। अरु तमी तौ यो थिमाक्त। 5 मिनु आदम नेल्ल पा ९ सहे ३० बर्स ब्रोंइशा बेक्माक्त।

6 मिनु सेथ सहे का ५ बर्स दुम्मेनु, तौ का थिमाक्त। मेको कली एनोश नें वोदा बाक्त। 7 एनोश थिशा नोले ८ सहे ७ बर्स ब्रोंइमाक्त। अरु तमी तौ यो थिमाक्त। 8 मिनु सेथ नेल्ल पा ९ सहे १२ बर्स ब्रोंइशा बेक्माक्त।

9 मिनु एनोश ९० बर्स दुम्मेनु, तौ का थिमाक्त। मेको कली केनान नें वोदा बाक्त। 10 केनान थिशा नोले ८ सहे १५ बर्स ब्रोंइमाक्त। अरु तमी तौ यो थिमाक्त। 11 मिनु एनोश नेल्ल पा ९ सहे ५ बर्स ब्रोंइशा बेक्माक्त।

12 मिनु केनान ७० बर्स दुम्मेनु, तौ का थिमाक्त। मेको कली मा-हालालेल नें वोदा बाक्त। 13 केनान मा-हालालेल थिशा नोले ८ सहे ४० बर्स ब्रोंइमाक्त। अरु तमी तौ यो थिमाक्त। 14 मिनु केनान नेल्ल पा ९ सहे १० बर्स ब्रोंइशा बेक्माक्त।

15 मिनु मा-हालालेल ६५ बर्स दुम्मेनु, तौ का थिमाक्त। मेको कली यरेद नें वोदा बाक्त। 16 यरेद थिशा नोले ८ सहे ३० बर्स ब्रोंइमाक्त। अरु तमी तौ यो थिमाक्त। 17 मिनु मा-हालालेल नेल्ल पा ८ सहे ९५ बर्स ब्रोंइशा बेक्माक्त।

18 मिनु यरेद सहे का ६२ बर्स दुम्मेनु, तौ का थिमाक्त। मेको कली हनोक नें वोदा बाक्त। 19 यरेद हनोक थिशा नोले ८ सहे बर्स ब्रोंइमाक्त। अरु तमी तौ यो थिमाक्त। 20 मिनु यरेद नेल्ल पा ९ सहे ६२ बर्स ब्रोंइशा बेक्माक्त।

21 मिनु हनोक ६५ बर्स दुम्मेनु, तौ का थिमाक्त। मेको कली मेथुसेलाह नें वोदा बाक्त। हनोक कली हिब्रू लोव्रमी एनोक देंनीम। 22 हनोक आ थुंमी परमप्रभु आ नेक्था बाक्शो बाक्माक्त। हनोक मेथुसेलाह थिशा नोले सहे सां बर्स ब्रोंइमाक्त। अरु तमी तौ यो थिमाक्त। उत्पत्ती ६:९ 23 मिनु हनोक नेल्ल पा सहे सां ६५ बर्स दुम्माक्त। 24 हनोक परमप्रभु नु गाक्बाक्माक्त। मिनु परमप्रभुमी हनोक कली आ बाक्तीक लदा बाक्त। मुरपुकीम हनोक कली माल्शा, मथिदमे बाक्त। २राजा २:११; हिब्रू ११:५

25 मिनु मेथुसेलाह सहे का ८७ बर्स दुम्मेनु, तौ का थिमाक्त। मेको कली लमेक नें वोदा बाक्त। 26 मेथुसेलाह लमेक थिशा नोले ७ सहे ८२ बर्स ब्रोंइमाक्त। अरु तमी तौ यो थिमाक्त। 27 मिनु मेथुसेलाह नेल्ल पा ९ सहे ६९ बर्स ब्रोंइशा बेक्माक्त।

28 मिनु लमेक सहे का ८२ बर्स दुम्मेनु, तौ का थिमाक्त। 29 मेको कली नोआह नें वोदा बाक्त। मेको नें आ अर्थ थुं बारपाइक्तीक बाक्ब। मिनु लमेकमी “परमप्रभु यावेमी खप कली सराप पाप्तु। आं तौ रूम गेय पपाइक्तीके श्येत रे प्रोंइब बाक्ब” देंमाक्त। उत्पत्ती ३:१७-१९ 30 लमेक नोआह थिशा नोले ५ सहे ९५ बर्स ब्रोंइमाक्त। अरु तमी तौ यो थिमाक्त। 31 मिनु लमेक नेल्ल पा ७ सहे ७७ बर्स ब्रोंइशा बेक्माक्त।

32 मिनु नोआह ५ सहे बर्स दुम्मेनु, शेम हाम नु यफेथ थीमी बाक्त।

6

रागी ब्वाक्कुम सुम्शो

1 मिनु नोले रागीमी मुर शुश दुम्मा बाक्त। मेकोपुकीमी शुश तमी थीमा बाक्त। 2 मिनु परमप्रभु आ तौपुकीमी मुर आन तमी आन कली तशा “दारशो बाक्नीम” दे मिम्तमे बाक्त। मिनु मेको आन दाते रे योव्रशा चाक्मे बाक्त। अय्युब १:६; २पत्रुस २:४; यहूदा ६ 3 मिनु परमप्रभु यावेमी “आं सोक्त मुर आन कली शुश बर्स बाक्चा मगेनुड। मुर बेक्चा माल्नीम। आन ब्रोंइतीक सहे का २० बर्स ला दुम्ब” देंमाक्त।

परमप्रभु आ थुं मनुशो

4 मेना रागीमी नेफीलीम माइश्शो थम लाइश्शो मुरपुकी बाक्शो बाक्मा बाक्त। मिनु नोले परमप्रभु आ तौपुकीमी रागी डा तमी आन कली चाक्शा, आल थीमे बाक्त। मेको बोल्यो नु ठेयब लडाइ पाइब मुर दुम्मा बाक्त। इजीकीएल ३२:२७

5 मिनु परमप्रभु यावेमी “रागीम बाक्शो मुर आं अरेशो मटीब नु मरिम्शो पाइब ला बाक्नीम। मार मिम्ताक्म हना यो, मरिम्शो बाक्त” दे मिम्ता बाक्त। उत्पत्ती ८:२१ 6 मिनु परमप्रभु यावेमी आंम सेल्शो मुर आन कली तशा, शुश आ थुं मनुथु बाक्शो बाक्माक्त। १सामुएल १५:११-३५; येरमीया १८:७-१० 7 मिनु परमप्रभु यावेमी “आं सेल्शो मुर आन कली रागी रे क्याम्नुड। मुर नु जन्तु नेल्ल क्याम्नुड। खपीम ग्रेशा गाक्ब आइक्च जन्तु नु सरीडम बेरब चिक्ब यो क्याम्नुड। मारदे हना गो मेको आन कली सेल्शा यो, आं थुं मनुड” दे मिम्ता बाक्त। गन्ती २३:१९; रोमी ३:३-४; २तिमोथी २:१३ 8 मिनु परमप्रभु यावेमी नोआह तवानु, मेको कली दाक्ता बाक्त। हिब्रू ११:७

नोआह नु आ तौ

9 नोआह आ तौ सां बाक्मा बाक्त। नोआह शुश रिम्शो मुर बाक्माक्त। मुर नेल्लेमी “ठीक पाइब दोस मताइब मुर बाक्ब” दे तुइक्तमे बाक्त। नोआह परमप्रभु नु गाक्बाक्माक्त। उत्पत्ती ५:२२ 10 मिनु नोआह आ तौ सां आन नें शेम, हाम नु यफेथ बाक्मा बाक्त।

11 परमप्रभुमी मुर आन कली कोव्रडानु, नेल्ल मरिम्शो बाक्मा बाक्त। रागी नेल्ल हुश खाक्श पोक्तीकेमी ब्रीमाक्त। अर्को मरिम्शो पाइब यो बाक्मा बाक्त। 12 मिनु परमप्रभुमी रागीम बाक्ब मुर आन कली कोव्रडानु, शुश मरिम्शो बाक्मा बाक्त। मुर नेल्लेमी आन दला दाक्स पामे बाक्त। भजन संग्रह १४:२-३ 13 मिनु परमप्रभुमी नोआह कली “गो मुर नेल्ल आन कली क्याम्नुडमी। मारदे हना मेको आन पर्बम रागी हुश खाक्श पोक्तीकेमी ब्रीत। मुर नु रागी नेल्ल आन कली क्याम्नुड। आमोस ८:२ 14 गे चहिं खिं खोदेशो पा शी के ठेयब डोंगा का सेलो। मिनु आगामी कोठापुकी सेलो। ब्वाक्कु मओव्रचा डा पा आगा नु लाडगा अल्कत्राम सिल्लो” दे नोआह कली देंमाक्त।

नोआहमी परमप्रभु कली टिशो

15 मिनु परमप्रभुमी “डोंगा दोपा सेल्चा माल्नेवे देशा हना, मेको आ लाइशो सहे सां कुबीत दुम्चा माल्ब। आ ब्रेम्शो ५० कुबीत दुम्चा माल्ब। आ ग्येत्थ लाइशो ३० कुबीत दुम्चा माल्ब। कुबीत का ०.५ मिटर खोदेशो बाक्ब। 16 मिनु छाना रे हात का प्रोंइशा, फश ग्रीतीक बोखा का सेल्चा माल्नेवे। मिनु का पटटीम लाप्चो का वोइक्चा माल्नेवे। आगामी खप तला का, दाते तला का नु तला तारी बाक्तीक का सेल्चा माल्नेवे। 17 आं देशो रिम्शो पावो। मारदे हना गो मारेइ मारेइ साइक्चा कली रागी ब्वाक्कुम प्रिंनुड। रागीम मार मार सेस बाक्मा, मेको नेल्ल बेक्चा माल्नीम। 18 तन्न गो इन कली कोव्रनुड, गे नु आं कबल पाइनुड। मिनु गे, इ तौपुकी, इ मीश, नु इ चाइमीपुकी मेको डोंगामी ओव्रचा माल्नीनी। मेको नेल्ल गे नु ब्रोंइचा माल्नीम। मेको पोथी भाले, बी ब्यफ नेल्ल निक्निक्शी बाक्चा माल्नीम। उत्पत्ती ९:९ 19 गेपुकी नु मारेइ मारेइ सेस जन्तु निक्निक्शी ओव्रचा माल्नीम। 20 मारेइ मारेइ चिक्ब, मारेइ मारेइ जन्तु नु मारेइ मारेइ खपीम ग्रेशा गाक्ब आइक्च जन्तु निक्निक्शी ब्रोंइचा, दे गे नु डोंगामी ओव्रशा, बाक्चा माल्नीम। 21 मिनु इन कली, मार मार जचा ब्वचा ओइशा, उप्शा वोतो। मेको इन कली नु मेको आन कली जचा थोव्रक दुम्ब” दे परमप्रभुमी नोआह कली अरेवा बाक्त। 22 मिनु परमप्रभुमी मार मार मदा, नोआहमी नेल्ल टिशा, पवा बाक्त। हिब्रू ११:७

7

नोआह ठेयब डोंगाम ओव्रशो

1 मिनु परमप्रभु यावेमी नोआह कली “गे नु इ खिं डा मुर नेल्ल शी के ठेयब डोंगामी ओव्रडीन। मारदे हना एको पाला डा मुर आन दातेमी गे का ला ठीक पाइब बाक्नेवे। उत्पत्ती ६:८ 2 गे चढेचा दुम्ब बी ब्यफ, क्यारश बोका, भेडा सांड रे ७ जोड लतो। उत्पत्ती ८:२०; लेवी ११:- 3 मिनु चढेचा दुम्ब सरीडम बेरब चिक्ब यो ७ जोड लतो। भाले नु पोथी लतो। मारदे हना मेकोपुकी रागीमी ब्रोंइचा माल्नीम। 4 गो ७ नाक्त नोले ४० नाक्त नु ४० नाक्तो सम्म रेउ यिपाइक्नुड। मिनु आं सेल्शो रागीम मार मार ब्रोंइशा बाक्मा, मेको नेल्ल आन कली साइक्नुडमी” देंमाक्त। 5 मिनु परमप्रभु यावेमी मार मार अरेवा, नोआहमी नेल्ल टिशा पवा बाक्त।

6 रागीमी रेउ यिचा गोवानु, नोआह ६ सहे बर्स दुम्शो बाक्माक्त। 7 मिनु नोआहम मार पवा बाक्त देशा हना, डोंइती आ तौपुकी, आ मीश, आ चाइमीपुकी ब्वाक्कु रे प्रोंइचा कली ठेयब डोंगामी ओव्रपाइक्मी बाक्त। १ पत्रुस ३:२० 8 मिनु चढेचा दुम्ब बस्तु, चढेचा मदुम्ब बस्तु नु चिक्ब नु मारेइ मारेइ खपीम ग्रेशा गाक्ब आइक्च जन्तु, 9 निक्निक्शी बी ब्यफ, जोड जोड भाले पोथी नोआह नु ठेयब डोंगामी ओव्रमा बाक्त। परमप्रभुमी दोपा नोआह कली अरेवा, मोपा पवा बाक्त। उत्पत्ती ६:१९-२० 10 मिनु ७ नाक्त नोले रागीम ब्वाक्कु ब्रीचा गोवा बाक्त।

11 मिनु रेउ यिमेनु, उइ रे यो ब्वाक्कु बारशा कुचा गोवा बाक्त। मेना नोआह ६ सहे बर्स, महिना निक्शी १७ नाक्त दुम नाक्त मोदेशो दुम्माक्त। प्रकाश ९:१ 12 मिनु ४० नाक्त नु ४० नाक्तो शुश रेउ यिमाक्त।

13 मेको रेउ यिचा आ डोंइती नाक्ती नोआह नु आ तौ शेम, हाम, नु यफेथ सांफा, नोआह आ मीश नु आ चाइमी सांफा मेको डोंगामी ओव्रमा बाक्त। 14 मिनु मारेइ मारेइ जन्तु, मारेइ मारेइ बी ब्यफ, क्यारश भेडा, मारेइ मारेइ खपीम ग्रेशा गाक्ब आइक्च जन्तु नु मारेइ मारेइ फ्रां पाइशो, ब्रोंइशा बाक्ब जन्तु 15 जोड जोड पा नोआह नु ठेयब डोंगामी ओव्रमा बाक्त। 16 मिनु ब्रोंइशा बाक्ब नेल्ल जोड जोड पा, भाले पोथी नेल्ल ओव्रमा बाक्त। परमप्रभुमी नोआह कली दोपा अरेवा, मोपा नेल्ल टिशा पवा बाक्त। मेको नेल्ल ओव्रमा नोले परमप्रभु यावेमी लाप्चो चोकगा बाक्त। उत्पत्ती ६:१९

17 मिनु ब्वाक्कु ४० नाक्त सम्म रागीम ब्रीना ब्रीन बाक्माक्त। ब्वाक्कु शुश बारशा, ब्वाक्कुमी ठेयब डोंगा कली कुरा बाक्त। ब्वाक्कु रागीम शुश बारमाक्त। 18 मिनु रेउ यिना यिन, ब्वाक्कु बारना बारन लमेनु, मेको डोंगा ब्वाक्कु

तारी गाक्चा गोवा बाक्त। 19 रागी नेल्लेम ब्वाक्कु शुश दुम्शा, ठेयब डांडा यो सुमा बाक्त। 20 डांडा क्येडा यो १५ कुबीत सम्म ग्येत्थ सुमा बाक्त। कुबीत का ०.५ मिटर खोदेशो बाक्ब।

21 मिनु रागीम मार मार ब्रोंइशा बाक्मा, बी ब्यफ, क्यारश भेडा, ब्वाकी डा जन्तु, रागीम फोंइब, खपीम गेशा गाक्ब आइक्च जन्तु नु मुर नेल्ल बेक्मा बाक्त। २पत्रुस ३:५-६ 22 रागीम ब्रोंइशा बाक्ब नेल्ल बेक्मा बाक्त। 23 मोपा मेकोमी रागीम ब्रोंइशा बाक्ब मार मार बाक्मा, मुर, जन्तु खपीम गेशा गाक्ब आइक्च जन्तु नु सरीडम बेरब चिक्ब नेल्ल क्याम्दा बाक्त। नोआह नु आ खिं डा मुर ला प्रोंइमी बाक्त। 24 मिनु मेको ब्वाक्कु सहे का ५० नाक्त सम्म रागीम बारना बारन बाक्माक्त।

8

परमप्रभुम ब्वाक्कु सोत्रपाइशो

1 मिनु परमप्रभुमी नोआह नु ठेयब डोंगामी बाक्ब नेल्ल ब्वाकी डा जन्तु नु बी ब्यफ क्यारश भेडा आन कली मप्रेदीमी बाक्त। मिनु परमप्रभुमी रागीम फश पपदा बाक्त। मिनु ब्वाक्कु सोत्रमाक्त। 2 मिनु ब्वाक्कु बुक्तीके नेल्ल सोत्रना सोत्रन लमा बाक्त। रेउ यो देक्माक्त। 3 मिनु मेको ब्वाक्कु सोत्रना सोत्रन लशा, सहे का ५० नाक्त नोले शुश सोत्रमाक्त।

4 मिनु मेको बर्स डा ७ महिना डा १७ नाक्त मेको ठेयब डोंगा आरारात माइशो डांडामी जाक्दीशशा दिक्माक्त। उत्पत्ती ७:११ 5 मिनु मेको बर्स डा १० महिना सम्म ब्वाक्कु सोत्रना सोत्रन लमाक्त। १० महिना डा डोंइती नाक्ती अर्को पहाड डा डांडा तांडिसमा बाक्त।

6 मिनु ४० नाक्त नोले नोआहम आ सेल्शो डोंगा डा झेल रोकगा बाक्त। उत्पत्ती ७:१२, १७ 7 मिनु मेकेर रे खद का सोइक्ता बाक्त। मेको रागी डा ब्वाक्कु मसोत्रम सम्म एर ओथ बेरशा बाक्माक्त।

8 मिनु नोआहमी “ब्वाक्कु नेल्ल सोत्रमा कों” दे तुइक्चा कली दुकुर का यो सोइक्ता बाक्त। 9 मेको दुकुर चहिं जुक्तीक मथित्थु लेशशा, नोआह आ बाक्तीके जाक्माक्त। मारदे हना आ लतीकेमी ब्वाक्कुम सुम्शो बाक्माक्त। मिनु नोआहम गुइ दिंशा ताक्शा, मेको कली ओइदा बाक्त। 10 मिनु अर्को ७ नाक्ती रिम्शा, मेको दुकुर कली लेंशा डोंगा रे सोइक्ता बाक्त। 11 मिनु नाक्नाक्दो दुकुरमी आ तुंडमी नक वाशो तेल रवा आ सफा का कुरशा जाक्माक्त। मिनु नोआहमी “ब्वाक्कु नेल्ल सोत्रमाक्त” दे तुइक्ता बाक्त। 12 मिनु नोले यो ७ नाक्त रिम्शा, दुकुर कली सोइक्ता बाक्त। मिनु मेको दुकुर मलेम्माक्त।

ब्वाक्कु सोत्रशो

13 मेको नोआह ६ सहे बर्स का दुम्मे आ डोंइती डा महिना डा डोंइती डा नाक्तीम रागीमी ब्वाक्कु सोत्रमाक्त। नोआहमी ठेयब डोंगा आ छाना थूशा, कोत्रशा “लो, ब्वाक्कु नेल्ल सोत्रमाक्त” देंमाक्त। उत्पत्ती ७:११ 14 मिनु महिना का नु २७ नाक्त नोले खप नेल्ल सोत्रमाक्त।

15 मिनु परमप्रभुमी नोआह कली 16 “गे, इ मीश, इ तौपुकी नु इ चाइमीपुकी डोंगा रे गूडीन” देंमाक्त। 17 मिनु “मारेइ मारेइ ब्रोंइशा बाक्ब, चिक्ब, जन्तु नु खपीम गेशा गाक्ब आइक्च जन्तु नेल्ल आन कली यो गुंडो। मेकोपुकी सोशा बोशा रागीम शुश दुम्चा माल्नीम” देंमाक्त। 18 मिनु नोआह, आ तौपुकी, आ मीश नु आ चाइमीपुकी गूमा बाक्त। २ पत्रुस २:५ 19 मिनु जन्तु नेल्ल, खपीम गेशा गाक्ब आइक्च जन्तु नेल्ल, चिक्ब नेल्ल नु रागीम ब्रोंइशा बाक्ब मार मार नेल्ल डोंगा रे गूमा बाक्त।

परमप्रभु यावेमी गेशो लोत्र

20 मिनु नोले नोआहम परमप्रभु यावे कली चढेतीक का सेला बाक्त। मिनु चढेचा दुम्ब बस्तु नु चढेचा दुम्ब चिक्ब नेल्ल लाइशशा चोशा चढेतीक चढेवा बाक्त। उत्पत्ती ७:२ 21 मिनु परमप्रभु यावेमी मेको ब्रोंइशा रिना नाम्शा, ग्येरसे बाक्त। आ थुंमी “मुरुम मरिम्शो पतीकेम खप कली मुल सराप गेनायो मपाइनुड। मुर आ थुं मरिम्शो बाक्त हना यो, गेनायो सराप मपाइनुड। गो ब्रोंइशा बाक्ब नेल्ल आन कली साइशशा क्याम्ताक्ड। मोदेशो गेनायो लेंशा मपाइनुड। उत्पत्ती ६:५; अय्युब १४:४; भजन संग्रह १४:३; मत्ती १५:१९; रोमी ३:२३ 22 रागी बाक्म सम्म शोक्चा, खुम्चा नु रिक्चा तांडसीब। ग्यू पाइब, हुप्ब, हिंडद नु बर्खा दुम्ब। नाक्दो नाक्त दुम्ब” दे लोत्र पवा बाक्त। येरमीया ३३:२०, २५

9

परमप्रभुमी आसीक गेशो

1 मिनू परमप्रभुमी नोआह नु आ तौ आन कली आसीक गेमी बाक्त। मेकोमी “तमी तौ थिशा, सोशा बोशा शुश दुमीन। रागी प्रिंटीने। उत्पत्ती १:२८ 2 रागी डा जन्तु नेल्ल, सरीडम बेरब चिक्ब, खपीम गेशा गाक्ब आइक्च जन्तु नु समुन्द्र डा डांइ नेल्ल, इन कली तशा, हिंचा माल्नीम। मेको आन कली इन गुडमी गेता। 3 डोंइती इन कली गिगी खाइ ब्वचा गेता। मुल गो ब्रोंइशा बाक्ब जन्तु नेल्ल इन कली ब्वचा गेतन्नी। उत्पत्ती १:२९; कलस्सी २:१६ 4 क्योरशा हुश मचुइक्थु चहिं मब्वने। मारदे हना हुशेमी ब्रोंइतीक सोक्त बाक्ब। 5 मुरुमी मुर कली साइक्तु हना, जन्तुमी मुर कली साइक्तु हना, मेको यो साइक्चा पुंइसीब। मुरुमी आ लोक्ब साइक्तु हना, मेको यो साइक्चा पुंइसीब। लेवी ३:१७; लेवी १७:१०-१४; ब्यवस्था १२:२३ 6 सु सुमी मुर साइशा हुश जारबा, मेको यो मोपान साइशा, हुश जारचा पुंइसीब। मारदे हना गो मुर कली आं खोदेशो पा सेल्ला। प्रस्थान २१:१२; लेवी २४:१७; गन्ती ३५:३३; मत्ती २६:५२; रोमी १३:४; प्रकाश १३:१० 7 गे रागीम सोशा बोशा शुश दुमीने” दे परमप्रभुमी नोआह कली देंमाक्त।

परमप्रभुमी कबल पशो

8 मिनू नोले परमप्रभुमी नोआह नु आ तौ आन कली 9 “नेनीन, गे नु इन नोले डा चच युइ नु आं कबल पाइनुड। उत्पत्ती ६:१८ 10 डोंगामी ब्रोंइशा बाक्ब चिक्ब, बी ब्यफ, रागी डा जन्तु गे नु डोंगा रे ग्रूशो नेल्ल नु आं कबल पाइनुड। होसे २:२० 11 गो मार कबल पाइनुड देशा हना, ब्रोंइशा बाक्ब नेल्ल आन कली ब्वाक्कुम मसाइक्नुड। रागी बिग्रेचा कली गेनायो ब्वाक्कु मबारपाइक्नुड” देंमाक्त। 12 मिनू परमप्रभुमी “गे नु गे नु ब्रोंइशा बाक्ब नेल्ल इन कली आं कबल पतीके चिनु का गेनुड। मेको इन नोले डा पाला नेल्ल आन कली यो बाक्ब। 13 गो गोस्सुमी आं वाक्श वोइक्नुड। मेको गो रागी नु कबल पशो आ चिनु बाक्ब। 14 मिनू गो रागी तारी गोस्स सोइक्तुनु, मेको गोस्सुमी आं वाक्श तांइसीब। 15 मिनू गो गे नु मारेइ मारेइ ब्रोंइशा बाक्ब नु कबल पाता, दे मिम्नुड। गो गेनायो ब्रोंइशा बाक्ब नेल्ल आन कली ब्वाक्कुमी मसाइक्नुडमी। यसैया ५४:७-१० 16 मेको वाक्श गोस्सुम बाक्मेनु, गो मेको कली ताइनुड। मिनू गो रागीम बाक्ब मुर नु ब्रोंइशा बाक्ब नेल्ल नु गेना हना यो लीब कबल पाता, दे मिम्नुड” देंमाक्त। 17 मिनू परमप्रभुमी नोआह कली “मेको वाक्श कबल आ चिनु बाक्ब। गो गे नु रागीम ब्रोंइशा बाक्ब नेल्ल नु कबल पाता” देंमाक्त।

18 डोंगा रे ग्रूशो नोआह आ तौपुकी शेम, हाम नु यफेथ बाक्मा बाक्त। हाम चहिं कनान आ आफ बाक्माक्त। उत्पत्ती ५:३२ 19 मेको सांफा नोआह आ तौ बाक्मा बाक्त। मेको रे रागी नेल्ल ब्रीमा बाक्त।

नोआहम अडगुर रू सेल्शो

20 मिनू नोआह रूमी गेय पाइब दुम्शा, अडगुर रू सेला बाक्त। मेको नेल्ल क्येडा डोंइती अडगुर खुम्ब मुर दुम्माक्त। 21 मिनू अडगुर शांबु तूशा दुक्शा, आ ताम्बुमी शिश्रा इम्माक्त। 22 मिनू कनान आ आफ हामी आ आफ शिश्रा तशा, लाडगामी बाक्शो आ लोक्ब आस कली देंमाक्त। प्रस्थान २०:१२; हितोपदेस ३०:१७ 23 मेको नेंशा, शेम नु यफेथम वा का सुर सुरम ग्याइशा लाप्शा, नोले रे ग्रेना ग्रेन लशा, आस आफ आ ताम्बु ओव्रसा बाक्त। मिनू आस आफ आ भेत्रे रां सुम्से बाक्त। नोले रे ग्रेशा, आस आफ आ शिश्रा रां मताम्से बाक्त। 24 मिनू नोले नोआह आ दुक्शो रे सेंसे बाक्त। आ चचमी आ कली मार पवा, नेल्ल तुइक्ता बाक्त।

25 मिनू नोआहमी “कनान सराप रल। आ लोक्ब आस नेल्ल क्येडा आइक्च वाइल दुम्ल” दे सराप पवा बाक्त। 26 मिनू मेकोमी लेंशा “परमप्रभु, शेम आ परमप्रभु यावे ठेयब बाक्ब। कनान मेको आ नेल्ल क्येडा आइक्च वाइल दुम्ल” दे शेम कली आसीक गेवा बाक्त। 27 मिनू लेंशा “परमप्रभुमी यफेथ कली ‘सोशा बोशा शुश दुम्पदल। मेको शेम आ ताम्बुम बाक्चा तवल। कनान चहिं मेको आ वाइल दुम्ल’ ” दे लोव्र पवा बाक्त।

28 मिनू ठेयब ब्वाक्कु बारशा नोले, नोआह सहे सां ५० बर्स ब्रोंइमाक्त। 29 मिनू नोआह नेल्ल पा ९ सहे ५० बर्स ब्रोंइशा बेक्माक्त।

10

रागी नेल्ल डा मुर
१इतिहास १:५-२३

1 ब्वाक्कु बारम नोले नोआह आ तौपुकी शेम, हाम नु यफेथमी तौपुकी थीमा बाक्त। नोआह आ तौ आन चच युइ सु सु बाक्मा बाक्त देशा हना,

यफेथ आ चच युइ

2 यफेथ आ तौ गोमेर, मागोग, मादै, यावान, तूबल, मेशेक नु तिरास बाक्मा बाक्त। इजीकीएल २७:१३-२२; इजीकीएल ३८:२; इजीकीएल ३९:१,६ 3 गोमेर आ तौपुकी अश्केनज, रीफत नु तोगारमाह बाक्मा बाक्त। 4 यावान आ तौपुकी एलीशाह, कितीम, टारशीश नु दोदानीम बाक्मा बाक्त। 5 मेको मुरपुकी रे समुन्द्र आ नेक्था बाक्ब जरमेशो बाक्मा बाक्त। मेकोपुकी यफेथ आ चच युइ बाक्मा बाक्त। मेकोपुकी आंम रागीम बाक्शो बाक्मा बाक्त। मिनु आंम रागी रागीमी, आंम खिं खिं डा मुरुमी आंम लोव्र ब्वाक्मा बाक्त।

हाम आ चच युइ

6 हाम आ तौपुकी कूश, इजीप्त, पूत नु कनान बाक्मा बाक्त। 7 कूश आ तौपुकी शेबा, हवीलाह, साब्ताह, रामाह नु साब्तेका बाक्मा बाक्त। रामाह आ तौ निकशी शेबा नु देदान बाक्सा बाक्त।

निम्रोद सक्ति पाइशो दुम्शो

8 मिनु कूशमी निम्रोद यो थिमाक्त। मेको बोल्यो नु सक्ति पाइशो मुर दुम्माक्त। 9 मेको परमप्रभु यावे आ डोंइती सक्ति पाइशो सिखारी बाक्माक्त। मोपतीके मुरुमी बोल्यो मुर का तशा “परमप्रभु यावे आ डोंइती निम्रोद खोदेशो सक्ति पाइशो सिखारी बाक्बाक्त” दे देंतीके देंमा बाक्त। मत्ती ५:५ 10 मिनु आ डोंइती डा राज्य बेबीलोन बाक्माक्त। अरु एरेक नु अक्कद सहर बाक्मा बाक्त। मेको नेल्ल शिनार रागीम बाक्बाक्मा बाक्त। 11 निम्रोद मेको रागी रे अस्सुर जाक्शा, निनवे, रेहोबोथ-इर नु कालाह सहर सेला बाक्त। 12 निनवे नु कालाह सहर आस दातेमी रेसेन सहर सेला बाक्त। मेको ठेयब सहर बाक्माक्त।

13 इजीप्त, लूदीम, अनामीम, लेहाबीम, नफतुहीम, 14 पथुसीम, कस्लुहीम नु काफ्तोरीम आन आफ दुम्माक्त। मेकोपुकी रे पलिस्ती ग्रूमा बाक्त।

15 मिनु कनानमी आ डोंइती डा तौ सीदोन नु नोले हेथ थिमाक्त। 16 मिनु नोले यबुसी, एमोरी, गिरगाशी, 17 हिब्वी, अरकी, सिनी, 18 अरवादी, सेमारी नु हमार्थी थिमाक्त। नोले कनान रागी डा मुर शुश दुम्मा बाक्त। 19 कनान डा मुर आन रागी सीदोन रे गेरार गे नु गाजा सम्म दुम्माक्त। सोदोम नु गोमोररा गे अदमाह, सेबोयीम नु लाशा सहर सम्म दुम्माक्त। 20 मिनु हाम आ चच युइ आन खिं खिं डा मुर आन लोव्र, आन रू नु आन रागी बाक्मा बाक्त।

शेम आ चच युइ

21 शेम यफेथ आ लोकबमी यो तौपुकी थिमाक्त। शेम एबेर आ आल आन किकी पिपी बाक्माक्त। उत्पत्ती ११:१० 22 शेम आ तौ चच युइ सु सु बाक्मा बाक्त देशा हना, एलाम, अश्शुर, अरपक्शाद, लूद नु अराम बाक्मा बाक्त। 23 अराम आ तौपुकी ऊज, हुल, गेथेर नु माश बाक्मा बाक्त। उत्पत्ती २२:२१ 24 मिनु अरपक्शाद शेलाह आ आफ दुम्माक्त। शेलाह एबेर आ आफ दुम्माक्त। 25 एबेरमी तौ निकशी थिमाक्त। का आ नें पेलेग बाक्माक्त। मारदे हना मेना रागी योक्शो बाक्माक्त। पेलेग नें आ अर्थ भाग का बाक्माक्त। अर्को आ नें योकतन बाक्माक्त। उत्पत्ती ११:८-९; ब्यवस्था ३२:८ 26 मिनु योकतनमी अल्मोदाद, शेलेफ, हासार-मावेथ येराह 27 हदोराम, उजाल, दिकलाह, 28 ओबाल, अबीमा-एल, शेबा, 29 ओफीर, हवीलाह नु योबाब आन आफ दुम्माक्त। मेको नेल्ल योकतन आ तौ बाक्मा बाक्त। 30 मिनु आन बाक्तीक मेशा रे पूर्ब डा सेफार माइशो पहाड सम्म दुम्माक्त। 31 मिनु शेम आ चच युइ आन खिं खिं डा मुर आन लोव्र, आन रू नु आन रागी बाक्मा बाक्त। 32 मिनु मेको नोआह आ तौ नेल्ल आन खिं खिं डा मुर, आन चच युइ, आन आन रागी बाक्मा बाक्त। ब्वाक्कु बारशा नोले मेकोपुकी रे रागी नेल्ल ब्रीमा बाक्त।

11

बाबेल सहर डा लाइशो खिं

1 डोंइती रागी नेल्ल डा मुर लोव्र का ब्वाक्बाक्मा बाक्त। 2 मुरपुकी पूर्ब गे लना लन बाक्मानु, शिनार नें पाइशो रागीम ठेयब दिंम का थित्मे बाक्त। मिनु मेकेर खिं सेल्शा बाक्मा बाक्त। 3 मिनु मुरपुकीमी “लो, इंटा सेल्य। मिनु मीमी रिम्शो पा चोय” देंमा बाक्त। मिनु फुल्लु आ पा डा इंटा नु हिलो आ पा डा अल्कत्रा गुंइदमे बाक्त।

4 मिनु नोले मेकोपुकीमी “गोपुकी इं कली सहर का सेल्सीय, ठेयब लाइशो सरीड थिचा डा खिं का सेल्य। इं नें ठेयब सेल्सीशा, इं मुरपुकी रागी नेल्लेमी मब्राथु बाक्य” देंमुमा बाकत।

5 मिनु परमप्रभु यावे मेको मुरपुकीमी सेल्शो सहर नु सरीड थिचशो ठेयब लाइशो खिं कोवथ यिमाकत। उत्पत्ती १८:२१; भजन संग्रह १४:२ 6 मिनु परमप्रभु यावेमी “लो, मेको नेल्ल थुं का डा मुर नमी। मेको नेल्ल लोव्र का ब्वाक्नीम। मेको आन नक गोशो गेय ला बाकब। मार मार मिम्मे, मेको नेल्ल पने चाप्नीम। प्रेरित २:१-११ 7 मुल उड लय। मेको आन पशो लोव्र खाल्शा पपाइय्य। मिनु कामी अर्को आ लोव्र मरुबल” देंमाकत। 8 मोपा परमप्रभु यावेमी मुर आन कली नेल्ल रागीम फ्रादीमी बाकत। मिनु मेकोपुकीमी सहर सेल्चा प्रोन्मे बाकत। ब्यवस्था ३२:८; लूका १:५१ 9 मोपतीके मेको सहर आ नें बाबेल वोदमे बाकत। मारदे हना मेकेर रे परमप्रभु यावेमी रागी नेल्ल डा मुर आन लोव्र खाल्दा बाकत। मिनु परमप्रभु यावेमी मोपा मुर नेल्ल आन कली फ्रादीमी बाकत।

शेम आ चच युइ

10 शेम आ आ चच युइ सु सु बाक्मा बाकत देंशा हना, शेम सहे का बर्स दुम्मेनु, अरपक्शाद आ आफ दुम्माकत। मेना ब्वाक्कु बारशा सोव्रशो बर्स निक्शी दुम्शो बाक्माकत। १इतिहास १:२४-२७; लूका ३:३४-३६; उत्पत्ती १०:२१-२२ 11 मिनु शेम अरपक्शाद थिशा नोले ५ सहे बर्स ब्रोंइमाकत। अरु तमी तौ यो थिमाकत।

12 मिनु अरपक्शाद ३५ बर्स दुम्मेनु, शेलाह आ आफ दुम्माकत। 13 मिनु शेलाह थिशा नोले ४ सहे बर्स सां ब्रोंइमाकत। अरु तमी तौ यो थिमाकत।

14 मिनु शेलाह ३० बर्स दुम्मेनु, एबेर थिमाकत। 15 मिनु शेलाह एबेर थिशा नोले ४ सहे बर्स सां ब्रोंइमाकत। अरु तमी तौ यो थिमाकत।

16 मिनु एबेर ३४ बर्स दुम्मेनु, पेलेग आ आफ दुम्माकत। 17 मिनु एबेर पेलेग थिशा नोले ४ सहे ३० बर्स ब्रोंइमाकत। अरु तमी तौ यो थिमाकत।

18 मिनु पेलेग ३० बर्स दुम्मेनु, रेऊ आ आफ दुम्माकत। 19 मिनु पेलेग रेऊ थिशा नोले सहे निक्शी ९ बर्स ब्रोंइमाकत। अरु तमी तौ यो थिमाकत।

20 मिनु रेऊ ३२ बर्स दुम्मेनु, सेरूग आ आफ दुम्माकत। 21 मिनु रेऊ सेरूग थिशा नोले, सहे निक्शी ७ बर्स ब्रोंइमाकत। अरु तमी तौ यो थिमाकत।

22 मिनु सेरूग ३० बर्स दुम्मेनु, नाहोर आ आफ दुम्माकत। 23 मिनु सेरूग नाहोर थिशा नोले सहे निक्शी बर्स ब्रोंइमाकत। अरु तमी तौ यो थिमाकत।

24 मिनु नाहोर २९ बर्स दुम्मेनु, तेराह आ आफ दुम्माकत। 25 मिनु नाहोर तेराह थिशा नोले सहे का १९ बर्स ब्रोंइमाकत। अरु तमी तौ यो थिमाकत। 26 मिनु तेराह ७० बर्स दुम्मेनु, अब्राम, नाहोर नु हारान आन आफ दुम्माकत।

तेराह आ चच युइ

27 तेराह आ चच युइ सु सु बाक्मा बाकत देंशा हना, तेराह अब्राम, नाहोर नु हारान आन आफ दुम्माकत। हारानमी लोत थिमाकत। 28 हारान चहिं आ आफ तेराह क्येडा डोंइती आ जरमेशो कल्दी डा ऊर सहरमी बेक्माकत। 29 मिनु अब्राम नु नाहोर निम्फामी ग्युंवे पाम्से बाकत। अब्राम आ मीश आ नें साराइ बाक्माकत। नाहोर आ मीश आ नें मिल्का बाक्माकत। मिल्का हारान आ तमी बाक्माकत। हारान मिल्का नु यिस्का आस आफ बाक्माकत। उत्पत्ती २२:२०

30 साराइ आल मथीब बाक्माकत।

31 मिनु तेराहमी आ तौ अब्राम, आ चच लोत, हारान आ तौ, नु आ चाइमी, अब्राम आ मीश साराइ आन कली लाइशा, कल्दी रागी डा ऊर रे कनान रागी लचा गोव्रमे बाकत। मिनु हारान माइशो सहर जाक्दीशा बाक्मा बाकत। यहोसु २४:२; नेहेम्याह ९:७ 32 तेराह सहे निक्शी ५ बर्स दुम्शा, हारान सहरम बेक्माकत।

12

परमप्रभुमी अब्राम नु लोव्र पशो

1 मिनु परमप्रभु यावेमी अब्राम कली “इ रागी, इ खिं खिं डा मुर नु इ आफ आ खिं रे लावो। तेको रागी लचा माल्नेवे, गो इ कली कोइनन। गन्ती २३:९; प्रेरित ७:३; हिब्रू ११:८ 2 गो इ रे पा ठेयब जात डा मुर सेल्नुडमी। गो इ कली आसीक गेनन। इ नें ठेयब सेल्नुड। गे अर्को आन कली आसीक दुम्नेवे। उत्पत्ती २४:१,३५; भजन संग्रह ७२:१७ 3 सुमी इ कली आसीक गेवा, गो मेको कली आसीक गेनुड। सुम इ कली सराप पाइबा, गो मेको कली सराप

पाइनुड। इ पर्वम रागी डा मुर नेल्ल आसीक ताइनीम” देंमाक्त। उत्पत्ती १८:१८; उत्पत्ती २२:१८; उत्पत्ती २६:४; उत्पत्ती २८:१४; प्रस्थान २३:२२; प्रेरित ३:२५; गलाती ३:८

अब्राममी परमप्रभु कली टिशो

4 मिनु अब्राम परमप्रभु यावे आ लोत्र नेंशा, हारान सहर रे गाक्माक्त। लोत यो अब्राम नु गाक्माक्त। हारान सहर रे गाक्मेनु, अब्राम ७५ बर्स, दुम्शो बाक्माक्त। 5 अब्राममी आ मीश साराइ, आ लोकब आ तौ, लोत, आन मारेइ मारेइ, हारान सहरमी ग्याप्शो वाइलीम वाइल आन कली यो लदा बाक्त। मिनु मेको नेल्ल कनान रागी लचा गोत्रमे बाक्त। मिनु लशा कनान रागी जाक्दीम्मा बाक्त।

परमप्रभुमी अब्राम कली रागी कोंइशो

6 मिनु अब्राम कनान रागी जाक्दीशशा, शेकेम सहर आ नेक्था मोरेह माइशो मुर आ रवा आ नेक्था जाक्दीम्माक्त। मेना कनान डा मुरपुकी रागीम बाक्शो बाक्मा बाक्त। उत्पत्ती ३५:४; यहोसु २४:२५-२६ 7 मेकेर जाक्दीम्मेनु, परमप्रभु यावे अब्राम आ डोंइती गूशा, मेको कली “एको रागी इ चच युइ आन कली गेनुड” दे लोत्र गेवा बाक्त। मिनु अब्राममी “गो परमप्रभु यावे कली ताता” दे चढ़ेतीक का सेला बाक्त। उत्पत्ती १३:१५; उत्पत्ती १५:१८; उत्पत्ती १७:८; उत्पत्ती ३५:१२; प्रस्थान ६:४,८; प्रस्थान ३२:१३; यहोसु २१:४३; प्रेरित ७:५ 8 मेकेर रे लशा, बेथेल सहर आ पूर्व गे डा डांडामी आ ताम्बु याक्शा कीडा बाक्त। बेथेल सहर पच्छिम गे नु ऐ सहर पूर्व गे बाक्शा, मेकेर यो परमप्रभु यावे कली चढ़ेतीक का सेल्शा, परमप्रभु यावे कली लोत्र पा ठेयब सेला बाक्त। उत्पत्ती ४:२६

अब्राम इजीप्त रागीम लशो

उत्पत्ती २०:१-१८; उत्पत्ती २६:७-११

9 मेकेर रे लशा, नेगेब माइशो रागी आ दक्खिन गे लमाक्त। 10 मिनु मेको रागीम अन्काल बाक्माक्त। मोपतीके मेकेर रे लशा, इजीप्त रागीम बाक्थ, लमाक्त। मारदे हना ठेयब अन्काल बाक्माक्त। 11 मिनु इजीप्त ओत्रचा क्येडा डोंइती अब्राममी आ मीश साराइ कली “नेनो, गे दारशो मीश मुर बाक्नेवे। 12 मिनु इजीप्त डा मुरुम इ कली तशा ‘मेको आ मीश बाक्ब’ दे आं कली साइक्नीम। इ कली चहिं ब्रोंइचा गेनीम। 13 मोपतीके ‘आ समी नड’ देनो। मिनु इ मो देंशो आ पर्वम गो साइक्चा मपुंडसीनुड, ब्रोंइचा ताइनुड” दे आ मीश कली मदा बाक्त।

साराइ कली लाइशो

14 मिनु अब्राम इजीप्त रागीम जाक्दीम्मेनु, इजीप्त डा मुरपुकीमी साराइ आ पर्वम “मेरे मीश मुर थम दारशो बाक्ब” देंमुमा बाक्त। 15 मिनु फाराओ माइशो पिप आ मुरपुकीमी साराइ कली तशा “थम दारशो मीश मुर का ताइतक” दे मदमे बाक्त। मिनु साराइ कली फाराओ आ खिं लदमे बाक्त। 16 मिनु साराइ आ पर्वम अब्राम भेडा, ब्यफ, गधा, वाइलीम वाइल नु दलओठ मारेइ मारेइ गेचा पुंडसे बाक्त।

17 तन्न परमप्रभु यावेमी फाराओ नु आ खिं डा मुर आन कली अब्राम आ मीश साराइ आ पर्वम ठेयब श्येत गेवा बाक्त। 18 मिनु फाराओमी अब्राम कली ब्रेशशा “गे आं कली मार पवी? मारदे ‘इ मीश बाक्ब’ मदेने? 19 मारदे ‘आं समी बाक्ब’ देंने? गो हेरा आं मीश सेल्ता। मुल इ मीश लतो। एकेर रे लावो” दे मदा बाक्त। 20 फाराओमी मेको लोत्र आ मुर आन कली माइशशा, अब्राम, आ मीश नु आ नु बाक्ब नेल्ल आन कली मेकेर रे सोइक्तमे बाक्त।

13

अब्राम नु लोत ब्राशो

1 मिनु अब्राम, आ मीश, आ मारेइ मारेइ नेल्ल नु लोत यो लाइशशा इजीप्त रे नेगेब रागी लमाक्त। 2 अब्राम शुश बी ब्यफ क्यारश भेडा नु सुन चांदी पाइशो मुर बाक्माक्त। 3 मिनु दक्खिन डा नेगेब रे लशा, बेथेल सहर जाक्दीम्माक्त। मेकेर बेथेल सहर नु ऐ सहर आस दातेमी डोंइती आ ताम्बु कीतीकेम जाक्दीम्माक्त। 4 मिनु इजीप्त लचा क्येडा डोंइती मेकेर सेल्शो चढ़ेतीकेमी लेशशा जाक्दीशशा, परमप्रभु यावे कली लोत्र पा, ठेयब सेला बाक्त। उत्पत्ती १२:८

5 मिनु लोत के यो क्यारश भेडा, बी ब्यफ नु ताम्बु शुश बाक्माक्त। 6 मिनु अब्राम नु लोत आस मारेइ मारेइ शुश दुम्तीके मेको निक्शी काथा बाक्ने मचाप्से बाक्त।

7 मिनु अब्राम आ गोठलापुकी लोत आ गोठलापुकी नु जीमे बाक्त। मेना मेको रागीम कनानी नु परिज्जीपुकी बाक्मा बाक्त। 8 मिनु अब्राममी लोत कली “गो पोबु नस। जिचा मदुम्ब। इ गोठलापुकी नु आं गोठलापुकी यो जिचा

मदुम। 9 गे नु गो ब्राचा रिम्शो दुम्ब। एको रागी नेल्ल इ डोंइती बाक्ब। गे पेरा गे लते हना, गो ग्युरा गे लाइनुड। गे ग्युरा गे लते हना, गो पेरा गे लाइनुड” देंमाक्त।

10 मिनु लोतमी यर्दन खोला आ नेक्था ब्वाक्कु बाक्शो रिम्शो दिंम तवा बाक्त। मेको परमप्रभु यावे आ रू नु इजीप्त रागी खोदेशो दारशो तांडसे बाक्त। सोआर सहर सम्म मोदेशो दारशो तांडसे बाक्त। परमप्रभु यावेम सोदोम नु गोमोररा सहर मीम जेप्पाइक्चा क्येडा डोंइती मेकेर थाम्पा दारशो बाक्माक्त। उत्पत्ती २:८-१० 11 मिनु लोत यर्दन खोला डा दिंम योत्रशा, पूर्ब गे लमाक्त। मोपा लोत नु अब्राम ब्रासा बाक्त।

12 मिनु अब्राम कनान रागीम बाक्शो बाक्माक्त। लोत चहिं यर्दन खोला डा दिंमम बाक्शो सहर आन नेक्था बाक्शा, आ ताम्बु याक्ना याक्न सोदोम सहर सम्म जाक्दीम्माक्त। 13 सोदोम सहर डा मुरपुकी थम मरिम्शो बाक्मा बाक्त। मेकोपुकीमी परमप्रभु यावे आ डोंइती शुश मरिम्शो पामे बाक्त। उत्पत्ती १८:२०; उत्पत्ती १९:४-९

परमप्रभुम अब्राम कली लोत्र गेशो

14 लोत नु अब्राम ब्रासा नोले परमप्रभु यावेमी अब्राम कली “इ बाक्तीके रे पूर्ब, पच्छिम, उत्तर, दक्खिन गे कोत्रडो। 15 गे तेको तेको रागी ताइनेवे, मेकोन इ कली नु इ चच युइ आन कली गेना हना यो कली गेनुड। उत्पत्ती १२:७ 16 गो इ चच युइ खप डा फुरक खोदेशो पा शुश सेल्लुड। मुरुम फुरक हिक्ने चाप्तेक्म हना ला, इ चच युइ आन कली यो हिक्ने चाप्नीम। तन्न मचाप्नीम। उत्पत्ती २८:१४; गन्ती २३:१०; १राजा ४:२० 17 बोक्को, रागी नेल्ल हिरशा लावो। मेको नेल्ल इ कली गेनन” दे परमप्रभु यावेमी लोत्र गेवा बाक्त।

18 मिनु अब्राममी आ ताम्बु याक्शा, हेब्रोन रागी डा माप्ने माइशो ब्वाकीम कीडा बाक्त। मिनु मेकेर परमप्रभु यावे कली चढेतीक का सेला बाक्त। उत्पत्ती १४:१३-२४

14

अब्राममी लोत कली प्रोंइशो

1 मिनु शिनार डा पिप अम्नाफेल, एल्लासार डा पिप अरयोक्, एलाम डा पिप केदोर-लाओमेर नु गोयीम रागी डा पिप तिदालम सासन पामे ना, यहोसु १२:२३ 2 सोदोम डा पिप बेरा, गोमोररा डा पिप बिरशा, अदमाह डा पिप शिनाब नु सेबोयीम डा पिप शेमेबेर, बेला सहर डा पिप नु लडाइ पामे बाक्त। बेला सहर कली सोआर यो देंनीम। उत्पत्ती १९:२४ 3 मेको नेल्ल सिददीम दिंममी लडाइ पथ खुम्सीशो बाक्मा बाक्त। 4 मारदे हना मेकोपुकीमी लडाइ का ब्रुशा नोले, १२ बर्स सम्म श्येत जशा, पिप केदोर-लाओमेर कली मार मार गेचा माल्मा बाक्त। मोपतीके मेकोपुकीम १३ बर्समी “मगेय, लडाइ पय” दे सल्ला पामे बाक्त। 5 मिनु १४ बर्समी पिप केदोर-लाओमेर नु मेको आ वारच पिपपुकी अशतारोथ-कारनाइमम बाक्ब रेफाइमपुकी, हामम बाक्ब जूजीमपुकी, शावेह-किरयथ-थाइम बाक्ब एमीमपुकी, उत्पत्ती ३६:२०-३० 6 सेइर पहाडम बाक्ब होरी आ मुर नेल्ल आन कली एल-पारान मुर बाक्तीक आ नेक्था सम्म फ्रूमे बाक्त। 7 मेको ग्राब पिप आन लां लेशशा, एन-मिशपात जाक्शा, हासासोन-तामारम बाक्ब अमालेकी नु एमोरी आन कली फ्रूमे बाक्त। एन-मिशपात कली कादेश यो देंनीम।

8 मेना सोदोम डा पिप, गोमोररा डा पिप, अदमाह डा पिप, सेबोयीम डा पिप नु बेला डा पिप सल्ला पशा, बेला सहर कली सोआर यो देंनीम 9 सिददीम दिंममी एलाम डा पिप केदोर-लाओमेर गोयीम रागी डा पिप तिदाल, शिनार डा पिप अम्नाफेल नु एल्लासार डा पिप अरयोक् नु लडाइ पथ जाक्मा बाक्त। ४ जना पिपपुकीम ५ जना पिप नु लडाइ पशो बाक्मा बाक्त। 10 मिनु सिददीम डा दिंममी अल्कत्रा खाल्टा शुश बाक्मा बाक्त। मिनु सोदोम नु गोमोररा डा पिप प्रोक्शा, खाल्टा आगा दोक्सा बाक्त। लीशो मुरपुकी चहिं पहाड गे प्रोक्मा बाक्त। 11 मिनु केदोर-लाओमेर नु आ हुलमी सोदोम नु गोमोररा सहर डा मुर नु आन मार मार नेल्ल रोइशशा लदमे बाक्त। 12 मिनु मेकोपुकीमी सोदोम सहरम बाक्शो अब्राम आ लोक्ब आ तौ लोत नु आ मारेइ मारेइ नेल्ल यो लाइशशा लमा बाक्त। उत्पत्ती १३:१०-१२

13 मिनु पहाडम प्रोक्शो मुर कामी हिब्रू अब्राम कली मेको लोत्र शेंदा बाक्त। अब्राम चहिं एमोरी माप्ने आ ब्वाकीम बाक्शो बाक्माक्त। माप्ने एशकोल नु आनेर वोबु बाक्सा बाक्त। मेको अब्राम कली वारच पाइब बाक्मा बाक्त। 14 मिनु अब्राममी आ लोक्ब आ तौ ग्याइशशा नेंशा, आ खिंमी जरमेशो सहे सां १८ जना लडाइ पचा कली शेंसीशो मुर कली या गेशा, ठीक पवा बाक्त। मिनु मेकोपुकीमी रोइक्ब आन कली दान सहर सम्म खेदा पामे बाक्त। यहोसु १९:४७; न्यायाधीस १८:२९ 15 नाक्दोमी अब्राममी आ मुर आन कली हुल निक्शी पशा, रोइक्बपुकी नु लडाइ पशा ग्राशा, होबाह सम्म खेदा पामे बाक्त। होबाह दमस्कस सहर आ उत्तर गे बाक्ब। 16 मोदेशो पा अब्राममी सोदोम नु गोमोररा

रे रोइशशा मारेइ मारेइ नु आ लोक्ब आ तौ लोत आ मारेइ मारेइ नेल्ल, मीश मुर नेल्ल नु मेको निक्शी सहर डा मुर नेल्ल लेप्पदा बाक्त।

मेल्कीसेदेक नु अब्राम

17 मोपा अब्राम केदोर-लाओमेर नु आ वारच पिपपुकी नु लडाइ पशा ग्राशा, लेशशा नोले सोदोम डा पिप शावेह माइशशो दिंम जाक्शा, अब्राम कली गुमथ जाक्माक्त। शावेह माइशशो दिंम कली पिप आन दिंम यो देंनीम। हिब्रू ७:१-४ 18 मिनु सालेम डा पिप मेल्कीसेदेकम अब्राम नु आ मुर आन कली शोब्ले नु अडगुर शांबु चाक्गा बाक्त। मेको नेल्ल क्येडा ठेयब परमप्रभु कली चढेब बाक्माक्त। भजन संग्रह ११०:४; भजन संग्रह ७६:३ 19 मिनु मेकोमी अब्राम कली आसीक गेशा “सरीड नु रागी सेल्ब नेल्ल क्येडा ठेयब परमप्रभु आ आसीक इ कली रल। 20 मिनु नेल्ल क्येडा ठेयब परमप्रभु मान ताइब बाक्ब। मारदे हना इ जोरी सत्रु इ गुइमी गेशा, इ कली ग्रापाइक्तु” दे ठेयब सेला बाक्त। मिनु अब्राममी नेल्ल थोत्रक १० भाग डा भाग का मेल्कीसेदेक कली गेवा बाक्त। उत्पत्ती २८:२२; लेवी २७:३०-३२ 21 मिनु सोदोम डा पिपमी अब्राम कली “मुर ला गेयी। अरु मार मार इन कली दुम्ल” देंमाक्त। 22 मिनु अब्राममी सोदोम डा पिप कली “गो आं गुइ परमप्रभु यावे, नेल्ल क्येडा ठेयब सरीड नु रागी सेल्ब परमप्रभु गे पोक्शा कसम जाता। 23 गो इन के मारेइ मलाइक्नुड। श्येले का, जुत्ता आ डोरी का यो मलाइक्नुड। मिनु गेमी ‘गो अब्राम कली शुश शोप पाइशशो सेल्ला’ दे गेनायो देंने मचाप्नीनी। 24 आं गेय पाइब आन जशो चहिं लाइक्नुड। गो नु गाक्ब आनेर, एक्कोल नु माम्रे आन भाग चहिं लाइक्चा गेन” देंमाक्त।

15

अब्राम आ आल उत्पत्ती १७:-

1 मिनु नोले परमप्रभु यावेमी अब्राम कली डोमु खोदेशो पा कोइतीक कोइदा बाक्त। मिनु मेकोमी अब्राम आ नें थिशा “अब्राम महिनो। गो इ कली कोवनन। शुश आसीक गेनन” देंमाक्त। गन्ती २४:४,१६; भजन संग्रह ३:४ 2 तन्न अब्राममी “आं कली मार गेनीनी डा? आं के आल मबाक्नीम। आ अडस ताइब दमस्कस डा एलीएजर दुम्ब। 3 गे आं कली तमी तौ मगेयीनी। मुल आं खिंम जरमेशो वाइलम आं अडस ताइब दुम्त” देंमाक्त। 4 मिनु परमप्रभु यावेमी लेंशा “मेको मुरुम इ अडस मताइब। इ आंम रां डा इ तौमी इ अडस ताइब” देंमाक्त।

5 मिनु मेकोमी अब्राम कली ताम्बु रे गुंइशा “सरीड गे कोवडो, सोरुल आन कली हिक्को। मेको हिक्के चाप्नेवे? गिश बाक्मा, इ चच युइ यो मिश दुम्नीम” देंमाक्त। उत्पत्ती २२:१७; प्रस्थान ३२:१३; ब्यवस्था १:१०; हिब्रू ११:१२ 6 मिनु अब्राममी परमप्रभु यावे आ लोत्र थमा सुदा बाक्त। मिनु परमप्रभु यावेमी अब्राममी थमा सुइशशो तशा “ठीक पाइब मुर का बाक्त” दे तुइक्ता बाक्त। रोमी ४:३-५; याकूब २:२३

7 मिनु लेंशा अब्राम कली “गो परमप्रभु यावे नड। गो एको रागी इ कली गेचा कली कल्दी डा ऊर सहर रे गुंइताक्न” देंमाक्त। उत्पत्ती ११:३१; प्रस्थान ३:१४; यसैया ४५:५; यूहन्ना ८:२४-२९ 8 मिनु अब्राममी “परमप्रभु, परमप्रभु यावे, आं के रागी दुम्ब, दे दोपा तुइक्नुडा डा?” दे हिल्लो पवा बाक्त। 9 मिनु मेकोमी “आं कली बर्स सां डा बी का, बर्स सां डा क्यारश का, बर्स सां डा सांड का, ढुकुर का परवा आ चाइक्ब का चाक्ती” देंमाक्त। 10 मिनु अब्राममी मेको नेल्ल चाक्शा क्योरशा, फेके पा रिक्शा, फेके का एर गे, फेके का ओंथ गे पा वोदा बाक्त। ढुकुर नु परवा चहिं फेके मसेला बाक्त, येरमीया ३४:१८-१९ 11 मिनु ठेयब चिक्बपुकी मेको श्ये तशा, जुक्तमे बाक्त। तन्न अब्राममी “हाइ हाइ” दे ग्रीशा खेरमी बाक्त।

परमप्रभुमी कबल पशो

12 मिनु नां रिक्चवानु, अब्राम मारेइ मतुइक्चा डा पा निन्द्रा पवा बाक्त। मिनु शुश हिंचा माल्शो आ एर ओंथ नेल्ल छिडछिड दुम्माक्त। उत्पत्ती २:२१; १सामुएल २६:१२; यसैया २९:१० 13 मिनु मेकोमी अब्राम कली “इ तौ चच युइ अर्को रागीमी अर्को रागी डा मुर दुम्नीम। मेकेर बाक्मानु, वाइलीम वाइल यो दुम्नीम। मेकेर ४ सहे बर्स सम्म श्येत जाइनीम। प्रस्थान १:१३; प्रस्थान १२:४०; प्रेरित ७:६ 14 गो चहिं मेको आन बाक्शो रागी डा मुर आन कली निसाफ पा सजाइ गेनुड। मारदे हना इ मुर आन कली वाइलीम वाइल सेल्नीम। मिनु नोले इ मुरपुकीम मेको आन मारेइ मारेइ लाइशशा, मेको रागी रे गूशा लाइनीम। प्रस्थान ३:२१-२२; प्रेरित ७:७ 15 गे चहिं थुं नाइशशा इ किकी पिपी आन बाक्तीक लाइनेवे। शुश बर्स दुम्शा बेक्नेवे। उत्पत्ती २५:७-८ 16 इ मुरपुकी ४ पाला नोले ला एकेर लेशशा

जाकनीम। मारदे हना एमोरी आन मरिम्शो पशो मनुष्शो बाक्त” दे परमप्रभु यावेमी देंमाक्त। प्रेरित ७:७ 17 मिनु नाने रिक्शा, छिडछिड दुम्शा नोले मी ब्रशो चुप्लु का गूमाक्त। मिनु ब्रशो तोव्रशी का मेको श्ये आ एर ओंथ गाक्माक्त। प्रस्थान १९:१८ 18 मेको नाक्ती परमप्रभु यावेमी अब्राम नु कबल पशा “मेको रागी इ चच युइ आन कली गेनुड। मेको इजीप्त डा ठेयब खोला रे युफ्रेटीस सम्म बाक्ब। उत्पत्ती १२:७; १राजा ८:६५; १राजा ५:१ 19 मेकेर बाक्बपुकी केनी, केनीज्जी, कादमोनी, 20 हिती, परिज्जी, फाइम, 21 एमोरी, कनानी, गिरगाशी नु यबुसी आन रागी नेल्ल इ कली गेनुड” दे अब्राम कली लोव्र गेशा, कबल पवा बाक्त।

16

हागार नु इश्माएल

उत्पत्ती २१:९-२१

1 अब्राम आ मीश साराइ आल मथीब बाक्माक्त। मिनु साराइ नु इजीप्त डा वाइलीम का बाक्माक्त। मेको आ नें हागार बाक्माक्त। 2 मिनु साराइमी अब्राम कली “नेनीन, परमप्रभु यावेमी आं कली आल मगेयी। मोपतीके आं वाइलीम नु बाक्कीन। मोपा गो आल ताइनुडा, कों?” देंमाक्त। मिनु अब्राममी आ मीशमी मार देंमे, मेको पवा बाक्त। उत्पत्ती ३०:३,९ 3 मिनु अब्राम कनान रागीम १० बर्स बाक्म नोले, आ मीश साराइमी आ इजीप्त डा वाइलीम हागार लाइशा, आ वोंइश कली गोवा बाक्त। 4 मिनु अब्राम हागार नु इम्माक्त। मिनु हागार कोव्रज कुरशो दुम्माक्त। मेको तुइशा, ठेयब लेशो दुम्शा, आ होव्रपोक्म कली मटिवा बाक्त। 5 मिनु साराइमी अब्राम कली “आं कली मरिम्शो दुम्तीके इन कली दुम्ल। गो आं वाइलीम इन कली गेता। मुल आंम कली कोव्रज कुरशो तशा, आं कली आइक्च सेलती। परमप्रभु यावेमी गे नु गो, इस दातेम निसाफ पवल” देंमाक्त। 6 मिनु अब्राममी “नेनो, इ वाइलीम इ गुइमी बाक्ब। मेको कली इ दाक्शो पावो” दे साराइ कली देंमाक्त। मिनु साराइमी हागार कली हुइक्तानु, मेको प्रोक्माक्त।

हागार प्रोक्शो

7 मिनु परमप्रभु यावे आ स्वर्ग डा गेय पाइबमी हागार कली गोरशो रागी शुर लतीक लां डा ब्वाक्कु बुक्तीके आ नेक्था थिदा बाक्त। प्रस्थान १४:१९; प्रस्थान २३:२०; गन्ती २२:२२; १राजा १९:७; १राजा १९:७; २राजा १९:३५ 8 मिनु मेकोमी “हागार, साराइ आ वाइलीम, ते लशा पिनी?” दे हिल्लो पवा बाक्त। मिनु हागारमी “आं होव्रपोक्म साराइ आ डोंइती रे प्रोक्ती” दे लोव्र लेत्ता बाक्त। 9 मिनु परमप्रभु यावे आ स्वर्ग डा गेय पाइबमी मेको कली “इ होव्रपोक्म आ खिं लेतो। मिनु मेको आ अरेशो टिशा बाक्को” देंमाक्त। 10 मिनु परमप्रभु यावे आ स्वर्ग डा गेय पाइबमी लेंशा “इ चच युइ आन कली शुश दुम्पाइक्नुड। इ मुरपुकी सुइमी हिकने मचाप्चा डा पा शुश दुम्नीम” देंमाक्त। उत्पत्ती १७:२० 11 मिनु परमप्रभु यावे आ स्वर्ग डा गेय पाइबमी लेंशा “नेनो, गे कोव्रज कुरशो बाक्नेवे। तौ का थीनेवे। मेको कली इश्माएल नें वोइक्चा माल्नेवे। मारदे हना परमप्रभु यावेमी इ श्येत ताप्तु। प्रस्थान २:२३; अय्युब ३४:२८; भजन संग्रह ९:१३; यसैया ४१:१७; याकूब ५:४ 12 इ तौ जीब दुम्ब। मुर नेल्ल नु जीब। मुरपुकी यो मेको नु जीनीम। मेको आ लोकबपुकी नु यो जीब दुम्ब” देंमाक्त। उत्पत्ती २५:१८ 13 मिनु हागारमी आ नु लोव्र पाइब परमप्रभु यावे कली “गे आं कली ताइब परमप्रभु ननी। गो थमा पा आं कली ताइब कली ताता” देंमाक्त। उत्पत्ती २२:१४; प्रस्थान ३:७; २राजा १३:४ 14 मोपतीके मेको ब्वाक्कु बुक्तीक आ नें बेयर-लहाइ-रोइ वोदमे बाक्त। मेको कादेश नु बेरेद आस दातेम बाक्ब। उत्पत्ती २४:६२; उत्पत्ती २५:११

15 मिनु हागारम अब्राम के तौ का थिमाक्त। अब्रामम मेको कली इश्माएल नें वोदा बाक्त। 16 हागारम इश्माएल थिमेनु, अब्राम ८६ बर्स दुम्शो बाक्माक्त।

17

परमप्रभुमी अब्राम नु कबल पशो

1 मिनु अब्राम ९९ बर्स दुम्मेनु, परमप्रभु यावे अब्राम आ डोंइती गूशा, मेको कली “गो नेल्ल क्येडा सक्ति पाइशशो परमप्रभु नड। गे, गो नु बाक्शा, ठीक पाइब दुमो। उत्पत्ती ३५:११; प्रस्थान ६:३; ब्यवस्था १०:१२ 2 मिनु गो गे नु आं कबल पाइनुड। गो इ मुर हिकने मचाप्चा डा पा शुश सेल्लुडमी” देंमाक्त। 3 मिनु अब्राम खुम्की पा बाम्माक्त। परमप्रभुमी मेको कली 4 “नेनो, मेको गो, गे नु आं कबल पतीके बाक्ब। गे शुश रागी डा मुर आन किकी पिपी दुम्नेवे। 5 मुल रे इ नें अब्राम देंचा मदुम्ब। इ नें अब्राहाम दुम्चा माल्ब। मारदे हना गो इ कली शुश रागी डा मुर आन किकी

पिपी सेल्लतन। रोमी ४:११, १७ 6 गो इ रे शुश मुर सेल्लुडमी, रागी रागी डा मुर सेल्लुड। इ रे पिपपुकी यो दुम्नीम। 7 मिनु गो गे नु लोव पा आं कबल पाइनुड। गो इ चच युइ नु यो आं कबल पाइनुड। मेको गेना हना यो लीब कबल बाक्ब। गो इ परमप्रभु नु इ चच युइ आन परमप्रभु नड। 8 मुल गे इ बाक्तीक रागीमी अर्को रागी डा मुर बाक्नेवे। नोले गो एको कनान रागी गेना हना यो इन कली नु इ चच युइ आन कली गेनन्नी। गो चहिं मेको आन परमप्रभु दुम्नुड” दे अब्राहाम कली देंमाक्त। उत्पत्ती ३५:२७; हिब्रू ११:९-१०; प्रेरित ७:५

9 मिनु परमप्रभुमी अब्राहाम कली “आं कबल पशो डा लोव नेल्ल टिवो। मिनु इ नोले इ चच युइपुकीमी नेल्ल पालामी यो आं कली मिम्शा, टिचा माल्नीम। 10 गे नु इ नोले डा तौ चच युइ आन पचा माल्शो कबल मार बाक्त देंशा हना, इ चारतीक डा कुशुल कुल पा खोइक्चा माल्नेवे। गे नु इ चच युइ, वोंइश मुर नेल्ल कली कुशुल खोइक्तीक चिनु खोइक्चा माल्नीम। लेवी १२:३; यूहन्ना ७:२२ 11 मेको गे नु गो इस कबल पशो आ चिनु बाक्ब। इजीकीएल २०:१२; ब्यवस्था ३०:६; रोमी ४:११ 12 मुल रे इ पाला डा मुरुम आन तौ कली ८ नाक्ती दुम्मानु, खोइक्तीक चिनु खोइक्चा माल्नीम। इ खिंम जरमेशो वोंइश आल, तेको तेको रागी रे ग्याप्शो इ वाइल नु आन तौ नेल्ल आन कली यो खोइक्तीक चिनु खोइक्चा माल्नीम। 13 इ खिंम जरमेशो, इ चांदीम ग्याप्शो मुरपुकी कली यो खोइक्तीक चिनु खोइक्चा माल्नीम। मिनु आं कबल पशो डा चिनु इ रांम बाक्चा माल्ब। मेको गेना हना यो लीब कबल बाक्ब। 14 खोइक्तीक चिनु मखोइश्शो वोंइश मुर नु वोंइश आल आन मुर आन दाते रे तिल्ला पुंडसीनीम। मारदे हना मेकोपुकीमी आं कबल पशो प्रोंइशो बाक्नीम” देंमाक्त।

15 मिनु परमप्रभुमी अब्राहाम कली “गे इ मीश कली ‘साराइ’ मदेंचा, मुल रे मेको कली ‘सारा’ नें वोइक्चा माल्नेवे। 16 गो मेको कली आसीक गेनुड। गो इ कली मेको रे तौ का गेनुड। मिनु सारा रागी रागी डा मुर नु जात जात डा मुर आन पिप आन ममा दुम्ब” दे परमप्रभुमी देंमाक्त। उत्पत्ती १२:२-३ 17 मिनु अब्राहाममी खुम्की पा बाप्शा, रिशशा “सहे का बर्स डा मुरुम आल थीबा? सारा ९० बर्स दुम्शा, आल थिने चाप्बा?” दे आंम कली देंमाक्त। उत्पत्ती १८:१२; उत्पत्ती २१:६; लूका १:१८; रोमी ४:१९-२१ 18 मिनु अब्राहाममी परमप्रभु कली “इश्माएल इन डोंइती बाक्ल” देंमाक्त। 19 मिनु परमप्रभुमी “ममाइ, इ मीश सारामी थमा पा तौ का थीब। मेको आ नें इसहाक वोइक्चा माल्नेवे। मेको नु आं कबल पतीक गेना हना यो दुम्ब। मेको आ नोले डा आ तौ चच युइ नु यो लीब। 20 इश्माएल आ पर्बम मार देंने, गो मेको नेल्ल नेंता। नेनो, गो मेको कली आसीक गेनुड। मेको सोशा बोशा, शुश दुम्ब। गो मेको कली १२ जना पिप आन आफ सेल्लुड। गो मेको कली ठेयब जात दुम्पाइक्नुड। उत्पत्ती १६:१०; उत्पत्ती २१:१३, १८; उत्पत्ती २५:१६ 21 तन्न आं कबल इसहाक नु पाइनुड। सारामी बर्स का नोले इसहाक थीब” देंमाक्त। 22 मिनु परमप्रभु अब्राहाम नु लोव पने थुम्शा लमाक्त।

खोइक्तीक चिनु आ पर्बम शेंशो

23 मिनु परमप्रभुमी लोव पवा नाक्ती अब्राहाममी आ तौ इश्माएल, आ खिंमी जरमेशो नु ग्याप्शो वाइल नु आ खिं डा वोंइश मुर नेल्ल आन कली खोइक्तीक चिनु खोइक्पाइक्मी बाक्त। 24 अब्राहाममी खोइक्तीक चिनु खोदा नाक्ती ९९ बर्स दुम्शो बाक्माक्त। 25 आ तौ इश्माएल खोइक्तीक चिनु खोइक्तीक नाक्ती १३ बर्स दुम्शो बाक्माक्त। 26 मिनु अब्राहाम नु इश्माएल नाक्त कामी खोइक्तीक चिनु ताम्से बाक्त। 27 आ खिं डा वोंइश मुर नेल्ल, आ खिंम जरमेशो नु रागी रे ग्याप्शो वाइल नेल्लेम यो मेको नाक्ती खोइक्तीक चिनु तामे बाक्त।

18

परमप्रभु माम्रे आ ब्वाकीम गूशो

1 मिनु काबु नाक्ती अब्राहाम माम्रे आ ब्वाकीमी बाक्माक्त। आ ताम्बु आ लाप्चोमी निस्से बाक्त। मारदे हना शुश हुप्ता बाक्त। मेना परमप्रभु यावे मेको कली गुम्थ जाक्माक्त। 2 मिनु मुर सां गूशा, आ डोंइती राप्शो तवा बाक्त। मेको आन कली तशा, छुल बोक्शा बाप्शा, सेउ पवा बाक्त। हिब्रू १३:२ 3 मिनु अब्राहाममी “आं परमप्रभु, आं कली दाक्ताक्नी हना, इन गेय पाइब रे मो मलने। 4 इन खोइल चिक्चा कली ब्वाक्कु गेनन्नी। मिनु चिक्शा, रवा आगाम नांइसीन। 5 गो इन कली इक्का शोब्ले ब्रथ लाइनुड। लाम्ज जचा माल्नीनी। मारदे हना गेपुकी इन गेय पाइब कली गुम्थ जाक्शो बाक्नीनी” देंमाक्त। मिनु मेकोपुकीमी “इ देंशो खोदेंशो पावो” देंमा बाक्त।

6 मिनु अब्राहाम दोरशा, ताम्बुम लशा, सारा कली “गे रीब पा सेआह सां रिम्शो फस के शोब्ले चोवो” देंमाक्त। सेआह का ७ लिटर पुक्तीके बाक्ब। 7 अब्राहाम चहिं गोठमी दोरशा लशा, दोम्शो रिम्शो बाछा का चाक्शा क्योरपाइश्शा, गेय पाइब कली क्येपदा बाक्त। 8 मिनु दहि, दूध नु श्ये चाक्शा, मेको आन कली खेत्तीमी बाक्त। मिनु मेकोपुकीमी जामेनु, अब्राहाम मेको आन नेक्था रवा आ पुंम राप्शा बाक्माक्त।

9 मिनु मेकोपुकीमी “इ मीश सारा ते बाक्मे?” दे हिल्लो पामे बाक्त। मिनु अब्राहाममी “ताम्बुम बाक्ब” देंमाक्त। 10 मिनु कामी “गो एकेर लेंशा माइक्थ जाक्नुड। मेना इ मीशेमी तौ का थिशो बाक्ब” देंमाक्त। मिनु सारा ताम्बु आ लाप्चोम मेको लोव्र पाइब आ नोले खुइश्शा बाक्शा, मेको लोव्र नेना बाक्त। उत्पत्ती १७:१९; रोमी ९:९ 11 अब्राहाम नु सारा खाल्पा खाल्पी दुम्शो बाक्सा बाक्त। सारा आ रां ब्रोल्चा यो नुप्शो बाक्माक्त। 12 मोपतीके सारामी मेको लोव्र नेंशा “गो खाल्पी दुम्ती। आं वोंइश यो खाल्पा दुम्त। मिनु आल थीनुडा डा?” दे रिस्से बाक्त। उत्पत्ती १७:१७; १पत्रुस ३:६ 13 मिनु परमप्रभु यावेमी अब्राहाम कली “सारा मारदे ‘गो खाल्पी दुम्शा, आल थीनुडा डा?’ दे रिस्से? 14 गो परमप्रभु यावे नड। गो नेल्ल पने चाप्नुड। गो माइक्थ लेशशा जाक्डानु, सारामी तौ थिशो बाक्ब” देंमाक्त। मत्ती १९:२६; लूका १:३७ 15 सारामी चहिं “गो मरिस्सीड” दे जोल पवा बाक्त। मारदे हना हिंमाक्त। तन्न मेकोमी “गे थमा पा रिस्साक्वे” देंमाक्त।

16 मिनु मेको मुर सां बोक्शा, सोदोम सहर गे लमा बाक्त। अब्राहाममी मेको आन कली आइक्ची सम्म चोव्रथ लमाक्त। 17 मिनु परमप्रभु यावेमी “गो मार पचा चिक्तु, मेको मखुइक्थु अब्राहाम कली शेंनुड। आमोस ३:७ 18 अब्राहाम ठेयब नु बोल्यो रागी डा मुर आन आफ दुम्ब। मिनु रागी नेल्ल डा मुरपुकीमी मेको आ पबर्म आसीक ताइनीम। उत्पत्ती १२:३ 19 गो अब्राहाम कली तुइक्नुड, आ आल नु आ चच युइ आन कली परमप्रभु यावे आ लां गाक्पाइक्चा कली अरेब। मिनु मेकोपुकी परमप्रभु यावे आ लां खोइक्ब दुम्शा, ठीक नु रिम्शो पचा शेंसीशा पाइनीम। परमप्रभु यावेमी अब्राहाम कली मार लोव्र देंमे, मेको नेल्ल दुम्ल” देंमाक्त। ब्यवस्था ६:७; ब्यवस्था ३२:४६

अब्राहाममी परमप्रभु नु लोव्र पशो

20 मिनु परमप्रभु यावेमी “गो सोदोम नु गोमोररा सहर निक्शी आस पबर्म शुश मरिम्शो लोव्र नेंता। मारदे हना मेकेर डा मुर आन मरिम्शो पशो शुश हिंचा डा बाक्त। उत्पत्ती १९:१३ 21 मुल गो कोव्रथ यीनुड। एको नेंशो लोव्र थमा बाक्म कों, जोल बाक्म, गो तुइक्नुड” देंमाक्त।

22 मिनु परमप्रभु यावे आ स्वर्ग डा गेय पाइब निक्शी सोदोम गे लसा बाक्त। अब्राहाम परमप्रभु यावे आ डोंइती राप्शा बाक्माक्त। 23 मिनु अब्राहाम मेको आ नेक्था लशा “गे ठीक पाइब आन कली नु मरिम्शो पाइब आन कली खाल का डा पा क्याम्नीनी? गन्ती १६:२२ 24 मेको सहरमी ५० जना ठीक पाइब मुर बाक्तेक्म हना, सहर कली क्याम्नीनी? मेको ५० जना ठीक पाइब मुर आन पबर्म मेको सहर मप्रोंइनीनी? 25 ममाइ, गे मोदेशो पा मक्याम्नीनी। गे ठीक पाइब नु मरिम्शो पाइब आन कली खाल का डा पा मसाइक्नीनी। थमान, ठीक पाइब नु मरिम्शो मुर आन कली खाल का डा मपाइनीनी। गे रागी रागी डा निसाफ पाइब बाक्शा, ठीक निसाफ पाइनीनी” देंमाक्त। भजन संग्रह ८२:१; भजन संग्रह ९४:२ 26 मिनु परमप्रभु यावेमी “सोदोम सहरम ५० जना ठीक पाइब मुर बाक्तेक्म हना, गो मेको आन पबर्म सहर मक्याम्नुड” देंमाक्त। यसैया ६५:८; मत्ती २४:२२ 27 मिनु अब्राहाममी “गो फुरक नु पुलु रे दुम्शो मुरुमी परमप्रभु नु लोव्र पाता। 28 मेको सहरम ४५ जना मुर ला ठीक पाइब बाक्तेक्म हना, गे मेको ४५ जना मुर, ५ जना मजाक्दीतीके सहर क्याम्नीनी?” दे हिल्लो पवा बाक्त। मिनु मेकोमी “गो मेकेर ४५ जना ठीक पाइब मुर थित्तामी हना, गो सहर मक्याम्नुड” देंमाक्त। 29 मिनु अब्राहाममी लेंशा “४० जना ठीक पाइब बाक्तेक्म हना?” देंमेनु, मेकोमी “गो मेको ४० जना आन पबर्म यो सहर मक्याम्नुड” देंमाक्त। 30 मिनु अब्राहाममी “परमप्रभु, मगाइक्तीने, गो चिनु लोव्र पाइनुड। ३० जना ठीक पाइब मुर बाक्तेक्म हना?” देंमाक्त। मिनु परमप्रभुमी “३० जना बाक्तेक्म हना, मेको आन पबर्म यो मक्याम्नुड” देंमाक्त। 31 मिनु अब्राहाममी लेंशा “गो परमप्रभु इन कली लेंशा लोव्र पाइनुड, सहरमी २० जना ला ठीक पाइब मुर बाक्तेक्म हना?” देंमाक्त। मिनु मेकोमी “२० जना ठीक पाइब मुर बाक्तेक्म हना यो, मेको आन पबर्म सहर मक्याम्नुड” देंमाक्त। 32 मिनु अब्राहाममी “परमप्रभु, मगाइक्तीने। गो चिनु लोव्र हिल्लो पाइनुड। १० जना ला ठीक पाइब मुर बाक्तेक्म हना?” देंमाक्त। मिनु मेकोमी “गो मेको १० जना ठीक पाइब आन पबर्म यो सहर मक्याम्नुड” देंमाक्त। न्यायाधीस ६:३९ 33 मिनु अब्राहाम नु लोव्र पने थुम्शा, परमप्रभु यावे आ लां लमाक्त। अब्राहाम आ बाक्तीके लेम्माक्त।

19

सोदोम नु गोमोररा क्याम्शो

1 मेको परमप्रभु यावे आ स्वर्ग डा गेय पाइब निक्शी सोदोम सहरम नाक्नाक्दो जाक्दीस्सा बाक्त। मेना लोत सहर आ गारो डा ठेयब लाप्यो आ नेक्था निश्शा बाक्मेनु, ग्रुम्से बाक्त। मिनु लोतमी मेको आस कली तशा बोक्शा, खुम्की पा बाम्माक्त। उत्पत्ती १८:२२ 2 मिनु लोतमी “आं प्रभु निक्शी, नेनीसे, मुलाक्दो आं खिंम बाक्कीसे। इस खोइल चिक्सीसे। सुनी बोक्शा, इस लां लने चाप्नीसी” देंमाक्त। मेको निक्शीमी “ममाइ, गो मेरे लाडगाम इप्नस्कु” देंसा बाक्त। 3 मिनु लोतमी शुश लोत्र पवा नोले आ खिंमी बास बाक्सा बाक्त। लोतमी मेको आस कली ब्रोत्रब्रोत्रशो क्येशा, बोरब ओरुक्ती मसुप्शो शोब्ले सेला बाक्त। मिनु जाम्से बाक्त। 4 मिनु इप्चा क्येडा डोंइती सोदोम सहर डा वोंइश मुरपुकी खिं आ एर ओंथ खुम्सीशा बाक्मा बाक्त। खाल्पा, ठिटा सहर डा वोंइश मुर नेल्ल खुम्सीशा बाक्मा बाक्त। 5 मेकोपुकीमी लोत कली “नाक्नाक्दो इ खिंम जाक्शो वोंइश मुर ते बाक्सा। आंइ दाक्शो पचा कली लाडगाम सोइक्तो” देंमा बाक्त। लेवी १८:२२-२५; न्यायाधीस १९:२२-२४; रोमी १:२७ 6 मिनु लोत लाप्यो रे लाडगा गूशा, आ नोले लाप्यो चोक्शा वोदा बाक्त। 7 मिनु मेकोमी “आं लोकबपुकी, मोपा मरिम्शो मपने। 8 नेनीन, आं के कन्ने तमी निक्शी बाक्नीसी। मेको इन कली लाडगा सोइक्नुड। मार मार पचा दाक्नीनी, मेको निक्शी नु पने। आं खिंमी जाक्शो वोंइश मुर आस कली मारेइ मपने। मारदे हना बास बाक्चा कली आं खिंम जाक्ताक्से” देंमाक्त। 9 मेकोपुकीमी चहिं “गे लावो। गे ला एको सहरमी अर्को रागी डा मुर बाक्नेवे, आंइ कली हुकुम पचा माल्नेवे? लो, मेको निक्शी आस क्येडा इ कली श्येत गेनीकी” देंमा बाक्त। लोत कली शुश लोत्र पशा, लाप्यो रोक्चा माल्मे बाक्त। २ पत्रुस २:७-८ 10 तन्न आगा डा वोंइश मुर निक्शीमी आस गुइ लाडगा गुंइशा, लोत कली ग्याइश्शा आगा कीशा, लाप्यो चोक्गसे बाक्त। 11 मिनु मेको निक्शीमी लाडगाम बाक्शो मुर आन कली मिक्च मताइब सेल्से बाक्त। मिनु मेकोपुकीमी लाप्यो मथित्थु, माल्चा प्रोन्मे बाक्त। २राजा ६:१८

12 मिनु मेको निक्शीमी लोत कली “गे इ के सु सु बाक्नीमी? चांइवा, तमी तौ नु सहरम इ मुर सु सु बाक्नीमी? एको सहर रे गुंइदो। 13 मारदे हना गो एको सहर कली क्याम्नस्कु। परमप्रभु यावे आ डोंइती एको आन ग्रांग्रा दिचा डा गेय आ पर्बम शुश रेयके बाक्ब। परमप्रभु यावेमी आंस कली एको सहर क्याम्चा, दे सोइश्शो बाक्ब” देंसा बाक्त। उत्पत्ती १८:२० 14 मिनु लोतमी आ तमी आस कली ग्युंवे पचशो वोंइश आल आस कली गुम्शा “बोक्कीस, सहर रे लसे। मारदे हना परमप्रभु यावेमी सहर क्याम्ब” दे माइक्सी बाक्त। मेको निक्शीमी चहिं “रित्चा डा लोत्र बाक्त” दे मिम्तसे बाक्त। गन्ती १६:२१

15 मिनु भाले ग्रीमेनु, परमप्रभु यावे आ स्वर्ग डा गेय पाइब निक्शीमी लोत कली “बोक्को, इ मीश नु इ तमी निक्शी आस कली लाइश्शा, एको सहर रे प्रोक्कीन। मप्रोक्तीनी हना, एको सहर डा मुर खोदेशो पा क्याम्चा पुंइसीनीनी” देंसा बाक्त। 16 मिनु लोत कली ओंखां बोक्शो तशा, मेको कली आ तमी निक्शी नु आ मीशे आन कली गुइ रे कीशा, सहर रे गुंइदसे बाक्त। मोपा परमप्रभु यावेमी लोत नु आ खिं डा मुर आन कली दाक्शा प्रोंइमी बाक्त।

17 सहर रे गुंइशा, परमप्रभु यावे आ स्वर्ग डा गेय पाइब कामी “ब्रोंइचा दाक्नीनी हना, नोले मकोत्रथु प्रोक्कीन। दिंमम मबाक्कीन। पहाड गे प्रोक्कीन। मो मपाइतीनी हना, गे सहर डा मुर नु क्याम्चा पुंइसीनीनी” देंमाक्त। मत्ती २४:१६ 18 मिनु लोतमी “आं प्रभु, गो मचबु। 19 नेनीन, गो इन शिशी ताता। गो आंइ कली दाक्शा, बेक्चा रे प्रोंइतीनी। गो पहाड प्रोक्ने मचबु। पहाडमी अर्को श्येतमी आं कली साइक्बा, कों। 20 नेनीन, हयु उइ डा सहर प्रोक्चा कली आं नेक्था बाक्ब। आइक्च यो बाक्ब। मेकेर प्रोक्चा गेयीनी। मेको सहर आइक्च बाक्ब। मेकेर ब्रोंइने चाप्नुड” देंमाक्त। 21 मिनु मेकोमी “लो, गो इ पुंइशो गेनुड। इ देशो सहर मक्याम्नुड। 22 रीब पा प्रोक्कीन। गे मजाक्दीन्नी सम्म मारेइ पने मचाप्नुड” देंमाक्त। मेको सहर कली सोआर नें वोदा बाक्त। आइक्च कली सोआर देंसीब।

23 मिनु लोत सोआर सहर ओत्रची ना रागीमी नां दाप्ने थुम्शो बाक्माक्त। 24 मिनु नोले परमप्रभु यावेमी सोदोम नु गोमोररा सहर आस तारी सरीड रे गन्धक नु मी रेउ यिशो खोदेशो पा यिपदा बाक्त। ब्यवस्था २९:२२; भजन संग्रह ११:६; यसैया १:९-१०; यसैया १३:१९; आमोस ४:११; लूका १७:२९; २पत्रुस २:६; प्रकाश १४:१० 25 मिनु परमप्रभु यावेमी मेको सहर निक्शी, दिंम नेल्ल, सहर डा मुर नेल्ल नु रूम मार मार वाशो बाक्मे, मेको नेल्ल क्याम्दा बाक्त। 26 लोत नु आ मुर प्रोक्मानु, लोत आ मीशेमी नोले बिर लेशशा कोत्रडा बाक्त। मिनु मेको हिक्सी के थाम दुम्माक्त।

27 मिनु अब्राहाम नाक्त का डोंइती परमप्रभु यावे आ डोंइती राष्शा बाक्तीकेम लमाक्त। 28 मिनु सोदोम नु गोमोररा सहर डा दिंम डा रू नेल्ल कोव्रडा बाक्त। मिनु मेको सहर निक्शी नु रू नेल्ल रे ठेयब चुप्लु डा मी खोदेशो पा कुन गूशो तवा बाक्त।

29 मोपा परमप्रभुमी मेको दिंम, सहर निक्शी क्याम्दा बाक्त। मेना परमप्रभुमी अब्राहाम आ पुंडुशो लोव्र मिम्शा, लोत कली मेको सहर रे गुंडुशा प्रोना बाक्त। नोले मेकोमी मेको सहर नेल्ल खतम पोक्गा बाक्त।

लोत आ तमी निक्शी

30 मिनु लोत नु आ तमी निक्शी सोआर रे लशा, पहाड मेर लमा बाक्त। मारदे हना सोआर सहरम बाक्चा हिंमा बाक्त। मेको नु आ तमी निक्शी पहाड डा पुक्खीम बाक्शो बाक्मा बाक्त। 31 मिनु लोत आ डोंइती जरमेशो तमीमी “इस आफ खाल्पा दुम्त। नेल्ल रागीमी इस कली वोंइश मुर मबाक्म। 32 लो, इस आफ कली अडगुर शांबुमी दुक्पाइश्शा, इस आफ नु बाक्स। मोपा इस आफ कली चच युइ दुम्नीम” दे आ लोक्ब कली देंमाक्त। लेवी १८:७ 33 मेको नाक्दो आस आफ कली अडगुर शांबुम दुक्पदसे बाक्त। मिनु आ ठेयब तमी आ आफ नु इम्माक्त। लोतमी आ तमी आं नु इप्शो, बोक्शो मारेइ मतुइक्ता बाक्त। 34 मिनु आ दीसा ठेयब तमीमी आ लोक्ब कली “नेनो, गो सिनाक्दो आफ नु बाक्ती। गो लेशा आफ कली अडगुर शांबुमी दुक्पाइक्स। मुलाक्दो गे इपो। मोपा इस आफ रे चच युइ दुम्नीम” देंमाक्त। 35 मिनु मेको निक्शीमी आस आफ कली मेको नाक्दो यो दुक्पदसे बाक्त। मिनु कान्छी आ आफ नु इप्थ लमाक्त। मिनु लोतमी आ तमी आं नु इप्शो, बोक्शो मारेइ मतुइक्ता बाक्त। 36 मिनु लोत आ तमी निक्शीमी आस आफ के कोव्रज कुरसे बाक्त। 37 मिनु ठेयब तमीम तौ का थिमाक्त। मेको आ नें मोआब वोदा बाक्त। मेको मोआबी आन किकी पिपी बाक्माक्त। ब्यवस्था २:९ 38 कान्छीमी यो तौ का थिमाक्त। मेको आ नें बेन-अम्मी वोदा बाक्त। मेको अम्मोनी आन किकी पिपी बाक्माक्त। ब्यवस्था २:१९; ब्यवस्था २३:४

20

अब्राहाम नु अबीमेलेक

उत्पत्ती १२:१०-२०; उत्पत्ती २६:१-११

1 मेकेर रे अब्राहाम दक्खिनम बाक्ब नेगेब गे लमाक्त। मिनु कादेश नु शुर आस दाते गेरार सहरमी अर्को रागी डा मुर दुम्शा बाक्माक्त। उत्पत्ती १२:९; उत्पत्ती २६:१ 2 मेकोमी मुर आन कली आ मीश, सारा आ पर्बम “आं समी बाक्ब” देंमाक्त। मिनु गेरार डा पिप अबीमेलेकमी मेको कली ब्रथ सोइक्ता बाक्त। 3 मिनु अबीमेलेकम आ डोमुमी परमप्रभु आ डोंइती गूशो तवा बाक्त। मिनु “गे मीश चाक्शो आ पर्बम बेक्चा माल्नेवे। मारदे हना मेको ग्युंवे पशो मीश मुर बाक्ब” देंमाक्त। 4 मिनु अबीमेलेकम मेको नु मइप्तीके “परमप्रभु, गे दोस मताइब मुर आन कली यो साइक्नीनी? 5 मेकोमी आं कली ‘आं समी बाक्ब’ मदेम डा? आ मीशेमी यो ‘आं लोक्ब बाक्ब’ देंत। गो रिम्शो थुं नु थमा पा मतुइक्तीकेमी चाक्ता” देंमाक्त। 6 मिनु परमप्रभुमी मेको आ डोमुमी “गे रिम्शो थुंमी पाप्तीवी। गो तुइक्नुड। मोपतीके गो इ कली मेको कली थिचा मगेथु, आं डोंइती मरिम्शो पचा मगेड। 7 मुल मेको मुर आ मीश लेत्तो। मारदे हना मेको आं लोव्र पाइब का बाक्ब। मेकोमी इ पर्बम पुंडुब। मिनु गे ब्रोंइनेवे। गे आ मीश कली मलेत्ताक्वी हना, गे थमा पा बेक्चा माल्नेवे। इ मुर नेल्ल यो बेक्चा माल्नीमी, दे तुइक्तो” देंमाक्त। १राजा १३:६

8 मोपतीके अबीमेलेक सुनी कना बोक्शा, आ गेय पाइब नेल्ल आन कली ब्रेश्शा, आ डोमु नेल्ल शोव्रडा बाक्त। मिनु मुर नेल्ल शुश हिंमा बाक्त। 9 मिनु अबीमेलेकम अब्राहाम कली यो ब्रेत्ता बाक्त। मिनु मेको कली “मारदे आंइ कली ओदेशो पवी? गो नु आं रागी कली ओदेशो मरिम्शो पपाइक्चा कली गो इ कली मार मरिम्शो पाइक्ना? गे मपचा डा गेय पाप्तीवी। 10 गे मारदे ओदेशो पचा मिम्ती?” देंमाक्त। 11 मिनु अब्राहाममी “थमा पा, एको रागी डा मुरपुकी परमप्रभु कली मान पा महिनीमी। मिनु आं मीश आ पर्बम आं कली साइक्नीम, दे मिम्ताक्ड। 12 मेको थमा आं समी यो बाक्ब। आं आफ आ तमी बाक्ब। तन्न आं ममा आ तमी ममाइ। गो मेको कली चाक्ता। लेवी १८:९ 13 मिनु परमप्रभुमी आं कली आं आफ आ खिं रे गाक्पाइय्यीनु, गो आं मीश कली ‘आं कली दाक्नेवे हना, गो ते ते जाक्दीस्सा, मेक मेक एको आं लोक्ब बाक्ब, देनो’ दे माइक्ता” देंमाक्त। 14 मिनु अबीमेलेकमी भेडापुकी, बी ब्यफ नु वाइलीम वाइल आन कली लाइश्शा, अब्राहाम कली गेवा बाक्त। आ मीश सारा यो लेत्ता बाक्त। 15 मिनु “नेनीन, आं रागीमी ते ते बाक्चा दाक्नेवे, मेक मेक बाक्ने चाप्नेवे” देंमाक्त। 16 मिनु सारा कली “नेनो, इ लोक्ब कली हजार का चांदी टुक्रा गेता। मेको इन कली इ मुर आन डोंइती इ कली रिम्शो पचा कली गेता। मोपा नेल्ल आन डोंइती

इ कली ठीक पाता” देमाक्त। 17 मिनु अब्राहामम अबीमेलोक आ पर्बम परमप्रभु कली पुना बाक्त। मिनु परमप्रभुमी अबीमेलोक, आ मीश नु आ गेय पाइब नेल्ल आन पर्बम आल मथितीक रोइ रे सापदा बाक्त। 18 मारदे हना परमप्रभु यावेमी अब्राहाम आ मीश सारा आ पर्बम अबीमेलोक आ खिं डा मुर नेल्ल आन कली आल मथीब सेल्शो बाक्माक्त।

21

इसहाक जरमेशो

1 मिनु परमप्रभु यावेमी सारा कली मार देमे, मेकोन दुम्पदा बाक्त। उत्पत्ती १८:१० 2 मिनु सारामी खाल्पी दुम्शा, अब्राहाम के कोव्रज कुरशा, तौ का थिमाक्त। परमप्रभुमी गेना थीब देमे, मेना थिमाक्त। हिब्रू ११:११ 3 मिनु अब्राहाममी सारा आ थिशो तौ कली इसहाक नें वोदा बाक्त। उत्पत्ती १७:१९ 4 मिनु अब्राहाममी आ तौ इसहाक कली ८ नाक्ती दुम्मेनु, खोइक्तीक चिनु खोदा बाक्त। परमप्रभुमी डोंइती दोपा अरेवा, मोपा पवा बाक्त। उत्पत्ती १७:११-१२; प्रेरित ७:८ 5 अब्राहाम आ तौ इसहाक थिमेनु, सहे का बर्स दुम्शो बाक्माक्त। उत्पत्ती १७:१७

6 मिनु सारामी “परमप्रभुमी आं कली रिप्पाइक्ती। सु सुम एको नेंनीमी, मेको यो गो नु रित्नीम। उत्पत्ती १८:१२ 7 सु सुमी अब्राहाम कली ‘इ मीशमी आल कली दूध तुंडब’ देनीमी? गो खाल्पा दुम्शो अब्राहाम के तौ का थिती” देमाक्त।

हागार नु आ तौ खेरशो

8 मिनु आल कोल्शा, दूध तूचा प्रोना बाक्त। मिनु दूध तूचा प्रोना नाक्ती अब्राहाममी ठेयब भोज सेल्शा, मुर आन कली थुल्मी बाक्त। 9 मिनु सारामी इजीप्त डा हागार नु अब्राहाम आस थिशो तौ इश्माएलमी इसहाक कली शुक्शी पशो तवा बाक्त। 10 मिनु मेकोमी अब्राहाम कली “वाइलीम नु आ तौ आस कली खेरो। मेको वाइलीम आ तौ कली, आं तौ इसहाक नु अडस योक्शा गेचा मदुम्ब” देमाक्त। गलाती ४:३० 11 अब्राहामम आ लोव्र नेंशा, थुं मनुमाक्त। मारदे हना इश्माएल यो आ तौ बाक्माक्त।

12 तन्न परमप्रभुमी अब्राहाम कली “वोंइश आल नु इ वाइलीम आ पर्बम सुर्ता मपावो। सारामी मार मार देमे, मेको नेल्ल पावो। मारदे हना इसहाक आ चच युइ इ जात दुम्नीम। उत्पत्ती १७:२१; रोमी ९:७-८; हिब्रू ११:१८ 13 मिनु इ वाइलीम आ तौ इश्माएल आ चच युइ रे यो ठेयब जात का सेल्नुड। मारदे हना मेको यो इ तौ बाक्ब” देमाक्त। उत्पत्ती १७:२० 14 मिनु अब्राहाम सुनी कना बोक्शा, हागार कली शोब्ले नु ब्वाक्कु कुरपाइश्शा, आ तौ नु सोइक्ता बाक्त। मिनु हागार नु आ तौ लसा बाक्त। मिनु लशा, लां जाम्शा, बेयर-शेबा माइश्शो गोरशो रागीम हिरससा बाक्त। 15 मिनु ब्वाक्कु नुप्शा, आ आल कली बुटा आगाम वोदा बाक्त। 16 मिनु हागार चहिं आइदी लशा, निस्से बाक्त। मारदे हना मेकोमी “आं आल बेक्शो मतडल” दे मिम्ता बाक्त। मिनु ठेयब सेंदा पा डाक्माक्त। यसैया ४९:१५ 17 मिनु परमप्रभुमी आल आ डाक्शो सेंदा नेना बाक्त। मिनु परमप्रभु आ स्वर्ग डा गेय पाइबमी सरीड रे “हागार, मार दुमे? महिनो। मारदे हना परमप्रभुमी उइ बाक्शो इ तौ आ ब्रेशो नेंतु। 18 बोक्को, इ तौ लाइश्शा गाक्को। गो मेको रे ठेयब जात का सेल्नुड” देमाक्त। 19 मिनु परमप्रभुमी हागार आ मिक्च तपदानु, ब्वाक्कु बुक्तीके का तवा बाक्त। मिनु आ ब्वाक्कु कुरतीके प्रिंशा, आ तौ कली तूपदा बाक्त। २राजा ६:१७,२० 20 मिनु परमप्रभु मेको वोंइश आल नु बाक्मेनु, मेको कोल्शा, गोरशो रागीमी बाक्शा, लिब्रा आप्स शुश जोक्ब दुम्माक्त। 21 मेको गोरशो रागी आ नें पारान बाक्माक्त। मिनु आ ममामी आ तौ कली इजीप्त रागी डा तमी चाक्शा गेवा बाक्त। उत्पत्ती १६:३

अबीमेलोक नु अब्राहाम सल्ला पशो

उत्पत्ती २६:१५-३३

22 मिनु काबु अबीमेलोक नु आ फौज डा ठेयब कप्तान फीकोल अब्राहाम आ बाक्तीक जाक्शा, अब्राहाम कली “गे मार मार पाइनीनी, परमप्रभु गे नु बाक्ब। 23 मोपतीके गो इन कली मार पुंइनुड देशा हना, आं कली, आं तमी तौ नु आं चच युइ आंइ कली श्येत मगेकी। गो इन कली रिम्शो पशो खोदेशो पा, आं कली यो रिम्शो पने। इन बाक्शो रागी कली यो रिम्शो पने। ‘रिम्शो पाइनुड’ दे परमप्रभु आ नें थिशा, कसम जने” दे पुना बाक्त। उत्पत्ती २०:१५ 24 मिनु अब्राहाममी “गो कसम जाइनुड” देमाक्त।

25 मिनु अब्राहाममी अबीमेलोक कली हुइक्ता बाक्त। मारदे हना अबीमेलोक आ गेय पाइबपुकीमी अब्राहाम आ इनार आ पर्बम जिशा, रोइक्तमे बाक्त। 26 मिनु अबीमेलोकमी “गो मेको मतुइक्तु, सुम पवा? गे यो मशेंदीनी। मुलाक्त ला नेंता” देमाक्त। 27 मिनु अब्राहाममी भेडापुकी नु ब्यफपुकी अबीमेलोक कली गेवा बाक्त। मोपा मेको निक्शी

सल्ला पाम्से बाक्त। 28 अब्राहामम ७ ओटा पाठी चहिं बगाल रे गुंइशा, वोदा बाक्त। 29 मिनु अबीमेलोकम “मेको ७ ओटा पाठी मारदे वोइक्नी?” दे हिल्लो पवा बाक्त। 30 मिनु “मेको ७ ओटा पाठी आं गुइ रे लाइक्चा माल्नीनी। गो आं दोशो इनार आ सांकछी दुम्नीनी” देंमाक्त। 31 मिनु मेको बाक्तीके कली बेयर-शेबा, दे नें वोदसे बाक्त। मारदे हना मेको निक्शी मेकेर कसम जाम्से बाक्त। 32 मिनु बेयर-शेबामी मेको सल्ला पने थुम्शा, अबीमेलोक नु फीकोल आ ठेयब कप्तान पलिस्ती आन रागी लेस्सा बाक्त। 33 अब्राहाममी चहिं बेयर-शेबाम रवा का खुमा बाक्त। मिनु मेकेर परमप्रभु यावे, गेना हना यो बाक्ब परमप्रभु आ नें थिशा, मेको नु लोव पवा बाक्त। उत्पत्ती १२:८; रोमी १६:२६ 34 मिनु पलिस्ती आन रागीमी अब्राहाम अर्को रागी डा मुर दुम्शा, शुश नाक्त बाक्माक्त।

22

परमप्रभुमी अब्राहाम आ थुं नाक्शो

1 मिनु नोले परमप्रभुमी “अब्राहामम आं कली टीबाक्म कों, मटीबाक्म” दे मिम्शा “अब्राहाम” दे ब्रेत्ता बाक्त। अब्राहाममी “गो एक बाक्ती” दे परमप्रभु कली मदा बाक्त। प्रस्थान १५:२५; प्रस्थान १६:४; प्रस्थान २०:२०; ब्यवस्था ८:२; ब्यवस्था १३:४; न्यायाधीस २:२२; हिब्रू ११:१७; याकूब १:१३ 2 मिनु मेकोमी “इ तौ लतो। का ला बाक्शो दाक्शो इ तौ इसहाक लतो। मिनु मोरीयाह रागी लावो। मेकेर लशा, इ तौ कली चोशा चढ़ेयी। तेको डांडाम चढ़ेचा माल्नेवे, गो इ कली कोंइनन” देंमाक्त।

3 मिनु अब्राहाम सुनी कना बोक्शा, चढ़ेतीकेम चोचा कली शी चेशशा, आ गधा ठीक पवा बाक्त। मिनु ठिटा निक्शी नु आ तौ इसहाक कली लाइशा, परमप्रभुमी देशो पहाड लमा बाक्त। 4 लमा लमा नाक्त सां नोले परमप्रभु आ देशो बाक्तीके डोन रे तवा बाक्त। 5 मिनु अब्राहाममी आ गेय पाइब निक्शी आस कली “एकेर गधा नु बाक्कीसे। गो आं तौ नु मिरी आइक्था लशा, चढ़ेशा, इस बाक्तीक लेत्नस्कु” देंमाक्त। 6 मिनु अब्राहाममी चोशा चढ़ेतीक शी इसहाक कली कुरपदा बाक्त। मिनु मी नु चुक्ब आंमा कुरा बाक्त। मोपा निम्फा लसा बाक्त। 7 मिनु इसहाकम आ आफ कली “आं आफ” देंमाक्त। मिनु अब्राहाममी “गो नेंता” देंमाक्त। मिनु इसहाकमी “गो मी नु शी ला कुरशा गाक्तस, चोशा चढ़ेतीक पाठा चहिं ते बाक्म?” दे हिल्लो पवा बाक्त। 8 मिनु अब्राहाममी “चोशा चढ़ेतीक पाठा परमप्रभुमी गेब” देंमाक्त। मोपा निम्फा लसा बाक्त।

9 मिनु परमप्रभुमी देशो रागी जाक्दीस्सानु, अब्राहाममी फुल्लु चाक्शा, चढ़ेतीक सेला बाक्त। मिनु चढ़ेतीक तारी शी प्रोवडा बाक्त। मिनु आ तौ इसहाक कली गुइ खोइल फ्रेंशा, शी तारी वोदा बाक्त। 10 मिनु अब्राहाममी आ तौ क्योरचा कली चुक्ब शोइशा तरेवा बाक्त। मत्ती २६:३९; याकूब २:२१ 11 मिनु परमप्रभु यावे आ स्वर्ग डा गेय पाइबमी सरीड रे “अब्राहाम, अब्राहाम” दे ब्रेत्ता बाक्त। मिनु अब्राहाममी “गो नेंता” देंमाक्त। 12 मेकोमी “इ तौ कली मक्योरो। मेको कली मारेइ मपतो। मारदे हना गे परमप्रभु कली मान पा हिंबाक्ते। गो मुल तुइक्ताक्ड। गे इ का ला बाक्शो तौ आं कली गेचा ठीक पाप्तीवी। इ का ला तौ यो आं कली गेचा टीबाक्ते” देंमाक्त। रोमी ८:३२; हिब्रू ११:१७ 13 मिनु अब्राहाममी एर गे कोवडानु, सांड का आ गेव चू लहाराम रेशशा, बाक्शो तवा बाक्त। मिनु लशा सांड चाक्शा, आ तौ आ पा डा मेको सांड क्योरशा, चोशा चढ़ेतीक चढ़ेवा बाक्त। 14 मिनु अब्राहाममी मेको डांडा कली परमप्रभु यावे यीरेह, दे नें वोदा बाक्त। मोपतीके मुल सम्म मुरपुकीम “परमप्रभु यावे आ डांडाम परमप्रभु यावेमी माल्शो गेब” देंनीम। “परमप्रभु यावे यीरेह” आ अर्थ “परमप्रभु यावेमी आं माल्शो गेब” देशो बाक्ब। उत्पत्ती १६:१३

15 मिनु परमप्रभु यावे आ स्वर्ग डा गेय पाइबमी लेशा सरीड रे अब्राहाम कली 16 “परमप्रभु यावेमी ‘गो आं नेंमी कसम जाता। मारदे हना गे इ तौ आं कली गेचा ठीक पाप्तीवी। प्रस्थान ३२:१३; यसेया ४५:२३; आमोस ६:८; मीका ७:२०; लूका १:७३; हिब्रू ६:१३ 17 मार कसम जाता देशा हना, गो इ कली आसीक गेनुड। इ चच युइ आन कली सोरुल नु समुन्द्र आ नेक्था डा बाल्वा खोदेशो पा शुश सेल्लुडमी। मिनु मेकोपुकीमी आन जोरी सत्रु आन सहर आंम के सेल्लनीम। उत्पत्ती १३:१६; हिब्रू ११:१२ 18 इ चच युइ आन पबर्म रागी रागी डा मुर नेल्ल आसीक राइनीम। मारदे हना गे आं देशो टीब बाक्ते’ दे परमप्रभु यावेमी देंत” दे आ स्वर्ग डा गेय पाइबम अब्राहाम कली लोव पवा बाक्त। उत्पत्ती १२:३; गलाती ३:१६

19 मिनु अब्राहाम मेकेर रे लशा, आ गेय पाइब निक्शी आस रिम्तीके लेस्सा बाक्त। मिनु गुम्शा, बेयर-शेबा माइक्तीकेम लमा बाक्त। मिनु अब्राहाम मेक उइ बाक्माक्त।

नाहोर आ चच युइ

20 मिनु मेको नोले मुरुमी अब्राहाम कली “मिल्कामी यो इन लोकब नाहोर रे पा आल थिप्टु। उत्पत्ती ११:२९
21 आ डोंइती जरमेशो तौ ऊज, आ लोकब बूज, अराम आ आफ केमुएल, 22 केसेद, हाजो, पिल्दाश, यिदलाफ नु
आ कान्छा बेथुएल बाक्नीम। 23 बेथुएल चहिं रेबेका आ आफ बाक्त। मिल्कामी अब्राहाम आ लोकब नाहोर के ८
जना तौ थिप्टु। उत्पत्ती २४:१५ 24 नाहोर आ कान्छी मीश आ नें रूमा बाक्माक्त। मेकोमी तेबाह, गाहाम, ताहाश नु
माकाह थिमाक्त” देंमाक्त।

23

सारा बेक्शो

1 मिनु सारा सहे का २७ बर्स दुम्शो बाक्माक्त। आ ब्रोंइतीक नाक्त नेल्ल मोशोन बाक्माक्त। 2 सारा कनान रागी डा
किरयथ-अरबाम बेक्माक्त। मेको कली हेब्रोन यो देंनीम। मिनु अब्राहाम सारा आ पबर्म हिंशेक पा डाक्थ लमाक्त।
3 अब्राहाम सारा आ बेक्शो रां बाक्तीके रे लशा, हिती आ मुर आन कली 4 “गो इन दातेमी अर्को रागी डा मुर बाक्नुड।
गो थिम्तीक का ग्याप्चा दाक्नुड। मारदे हना आं बेक्शो मुर कली थिम्चा माल्नुड” देंमाक्त। उत्पत्ती १७:८ 5 मिनु
हिती आ मुरपुकीमी अब्राहाम कली 6 “प्रभु, आंइ लोव्र नेनीन, गे आंइ दातेमी परमप्रभुमी सेल्शो ठेयब मुर बाक्नीनी।
आंइ के बेक्शो मुर आन कली चोइक्तीक पुक्खी शुश बाक्नीम। तेको दाक्नीनी, मेकोमी इन बेक्शो मुर थिमीन। इन
बेक्शो मुर थिम्चा सुइमी मतेक्ब” देंमा बाक्त। 7 मिनु अब्राहाम बोक्शा, हिती आ मुर आन डोंइती सेउ पवा बाक्त।
8 मेको आन कली “आं बेक्शो मुर थिम्चा गेतीनी हना, आं पबर्म सोहार आ तौ एफ्रोन नु लोव्र पने। 9 मेको आ रू आ
नोले बाक्ब माक-पेला पुक्खी आं कली लेयड, दे पुंइदीन। गिश थाप्चा माल्नुडा, थाप्नुड। इन दातेमी आं बेक्शो मुर
थिम्तीके दुम्ल” देंमाक्त।

10 मेना एफ्रोन हिती आन दातेमी निश्शो बाक्माक्त। मेको आन सहर डा गारो डा ठेयब लाप्चो आ नेक्था बाक्शा,
अब्राहाम आ लोव्र नेन्मेनु, मेको हिती एफ्रोनमी अब्राहाम कली 11 “प्रभु, ममाइ, आं लोव्र नेनीन, गो इन कली मेको
रू नु पुक्खी गेनुड। आं मुरपुकी सांकछी बाक्नीम। गो इन कली गेनुड। इन बेक्शो मुर थिमीन” देंमाक्त। 12 मिनु
अब्राहाममी मेको मुर आन डोंइती सेउ पवा बाक्त। 13 मिनु मुर नेल्ल आन डोंइती अब्राहाममी एफ्रोन कली “आं लोव्र
नेनीन। गो मेको रू डा क्येट थाप्नुड। मेको ताक्कीन। गो आं मीश मेक थिम्नुड” देंमाक्त। 14 मिनु एफ्रोनमी अब्राहाम
कली 15 “प्रभु, आं लोव्र नेनीन, मेको रू ४ सहे शेकेल चांदी डा बाक्ब। मेको इस दातेमी मारेइ ममाइ। मोपतीके
थिमीन” देंमाक्त। शेकेल का ११.५ ग्राम बाक्ब। 16 मिनु अब्राहाममी एफ्रोन आ लोव्र बिस्से बाक्त। मेकोमी एफ्रोनमी
हिती आ मुर आन डोंइती देंशो खोदेंशो पा ४ सहे शेकेल चांदी नाक्शा, गेमी बाक्त। मेको ४ सहे शेकेल चहिं ग्याप्ब
लेयब आन दातेमी मोदेंशो रू कली ठीक बाक्माक्त। शेकेल का ११.५ ग्राम चांदी बाक्त।

17 माक-पेलामी बाक्शो एफ्रोन आ रू माम्रे आ पूर्व गे बाक्शो बाक्माक्त। मोपा रू नु पुक्खी, रूमी बाक्शो रवा
नेल्ल नु एर ओंथ सुरम खुम्शो रवा यो 18 हिती नेल्ल नु ठेयब लाप्चोम बाक्ब आन डोंइती अब्राहाम के दुम्माक्त।
19 मिनु नोले अब्राहाममी आ मीश सारा कली माम्रे आ नेक्था माक-पेलामी बाक्शो पुक्खीमी थिमा बाक्त। माम्रे चहिं
कनान रागी डा हेब्रोन सहर बाक्माक्त। 20 मिनु मेको रू नु मेक बाक्शो पुक्खी हिती आ मुरपुकी रे अब्राहाम आ मुर
थिम्तीक रू दुम्माक्त। उत्पत्ती २५:९-१०; उत्पत्ती ४७:३०; उत्पत्ती ४९:२९-३२; उत्पत्ती ५०:१३

24

रेबेका इसहाक आ मीश दुम्शो

1 मिनु अब्राहाम शुश बर्स दुम्शा, खूशो दुम्माक्त। परमप्रभु यावेमी अब्राहाम कली आ पतीक नेल्लेमी आसीक गेवा
बाक्त। उत्पत्ती १२:२ 2 मिनु अब्राहाममी आ रू खिं नेल्ल कोव्रब नु वाइल आन कली अरेब ठेयब वाइल कली “इ
गुइ आं फिला तारी वोतो। 3 गो इ कली परमप्रभु यावे, सरीड नु रागी डा परमप्रभु आ नेमी कसम जपाइक्नुड। मार
कसम जपाइक्नुड देंशा हना, आं तौ कली आं बाक्शो कनान रागी डा मीश आल मचाक्को। उत्पत्ती २८:१; प्रस्थान
३४:१६ 4 आं रागी नु आं जात डा मीश आल का चाक्को” दे अब्राहाममी वाइल कली मदा बाक्त। 5 मिनु वाइलमी
“मेको मीश आल एको रागी जाक्चा मबिस्साक्व हना, इन तौ इन जरमेशो रागीम लाइक्चा माल्नुडा?” दे हिल्लो पवा
बाक्त। 6 मिनु अब्राहाममी “मोदेंशो गेनायो मपावो। आं तौ कली मेक मलतो। 7 डोंइती परमप्रभु यावे, सरीड नु रागी

डा परमप्रभुम आं कली आं आफ आ खिं नु आं जात डा रागी रे गुंडशा, एक सोइक्ताक्यी। मेकोमी कसम जशा, आं कली लोव्र पाप्तु 'कनान रागी इ चच युइ आन कली गेनुडमी' दे माइक्ती। मेकोमी आ स्वर्ग डा गेय पाइब इ डोंइती सोइक्ब। आं तौ कली आं जात रे मीश आल का चाक्को। २इतिहास ३६:२३; नेहेम्याह २:२० ८ मेको मीश आल गे नु जाक्चा मबिस्साक्व हना, गे कसम मजशो खोदेशो दुम्नेवे। आं तौ कली चहिं मलतो” दे अब्राहाममी आ वाइल कली अरेवा बाक्त। ९ मिनु मेको वाइलमी आ होव्रप अब्राहाम आ फिला तारी गुइ वोइश्शा, आ देशो आ पबर्म कसम जवा बाक्त।

१० मिनु नोले मेको वाइलम आ होव्रप आ दलओंठ १० ओटा लाइश्शा, आ होव्रप के मारेइ मारेइ रिम्शो कोसेली कुरशा लमाक्त। मेकेर रे लशा, मेसोपोटामीया रागीमी नाहोर आ बाक्तीक सहर, अराम-नहराइम मेर जाक्दीम्माक्त। उत्पत्ती ११:२२-३१ ११ मिनु मेकेर जाक्दीश्शा, नाक्नाक्दो मीश मुरपुकी ब्वाक्कु दिथ जाक्की ना, सहर मओव्रथु, दलओंठपुकी इनार आ नेक्था नाइक्पदा बाक्त। १२ मिनु मेकोमी “परमप्रभु यावे, आं होव्रप अब्राहाम आ परमप्रभु, मुलाक्ती आं कली वारच पने। आं होव्रप कली इन गेना हना यो दाक्तीके कोंइदीने। मेकोन पुंडनुड। १३ गो इनार आ नेक्था बाक्नुड। मिनु सहर डा मुर आन तमी ब्वाक्कु दिथ जाक्नीम। १४ गो मीश आल कली ‘इ गाग्री डा ब्वाक्कु इच्का तूचा गेयी’ देंनुड। मेको मीश आलमी ‘तूडो। गो इ दलओंठ आन कली यो ब्वाक्कु तुंडनुड’ देंत हना, मेको मीश आल इन गेय पाइब इसहाक कली योव्रशो बाक्ल। मोदेशो दुम्त हना, गे आं होव्रप कली इन गेना हना यो दाक्तीके कोंइताक्नी, दे गो तुइक्नुड” दे परमप्रभु कली लोव्र पवा बाक्त।

१५ मोपा लोव्र पन पना, रेबेका माइश्शा मीश आल का गाग्री कुरशा जाक्माक्त। मेको रेबेका बेथुएल आ तमी बाक्माक्त। बेथुएल चहिं अब्राहाम आ लोकब नाहोर नु आ मीश मिल्का आस तौ बाक्माक्त। उत्पत्ती २२:२३ १६ रेबेका थम दारशो मीश आल बाक्माक्त। मिनु ग्युंवे मपथु, कन्ने बाक्शो बाक्माक्त। मिनु इनारम तोइश्शा, आ गाग्री प्रिंशा बेप मुप्शा डोंइसे बाक्त। १७ मिनु मेको वाइल रेबेका कली गुम्थ दोरमाक्त। मिनु “इ गाग्री डा ब्वाक्कु इच्का तूचा गेयी” दे पुना बाक्त। १८ मिनु रेबेकामी आ गाग्री रीब पा नाइश्शा, तूचा गेवा बाक्त। १९ मिनु तूचा गेने थुम्शा “गो इन दलओंठ आन कली यो ब्वाक्कु चाक्शा, मरूमा सम्म तुंडनुड” देंमाक्त। २० मिनु आ गाग्री डा ब्वाक्कु मेकेर बाक्शो शुंगुमी मोइश्शा, दोरशा ब्वाक्कु ब्रथ लमाक्त। दलओंठ नेल्ल आन कली मरूमा सम्म ब्वाक्कु तुंडदा बाक्त। २१ मिनु मेको वाइल छक लाक्शा, मेको कली कोव्रशा, परमप्रभु यावे आ योव्रशो मीश आल बाक्म कों मबाक्म, दे ब्वालेइ पा बाक्माक्त।

२२ मिनु दलओंठ रूथ्री ब्वाक्कु तूडमे नोले वाइलम आधी शेकेल सुन के मुन्द्री नु १० शेकेल सुन के चुरा निकशी शोल्शा, रेबेका कली गेवा बाक्त। शेकेल का ११.५ ग्राम बाक्ब। २३ मिनु वाइलमी “गे सु का आ तमी नवे? आं कली देनो। इ आफ आ खिंम आंइ कली बास बाक्चा गेनीमी कों?” दे हिल्लो पवा बाक्त। २४ मिनु रेबेकामी “गो बेथुएल आ तमी नड। बेथुएल चहिं नाहोर नु मिल्का आस तौ बाक्ब। २५ आंइ खिंम नल नु जचा थोव्रक शुश बाक्ब। बास बाक्तीक यो बाक्ब” दे मदा बाक्त। २६ मिनु वाइलमी खुम्की पा बाप्शा, परमप्रभु यावे आ डोंइती गु बाप्शा बाक्माक्त। २७ मिनु मेकोमी “परमप्रभु यावे, आं होव्रप अब्राहाम आ परमप्रभु, गे ठेयब बाक्नीनी। गे इन शिशी नु इन रिम्शो पशो मप्रोंइथु, आं होव्रप कली कोंइताक्नी। गे आं कली आं होव्रप आ लोकब आ खिं कोंइताक्नीनी” दे परमप्रभु यावे कली ठेयब सेला बाक्त।

२८ मिनु रेबेका दोरशा खिं लेशशा, आ ममा आ खिं डा मुर आन कली मार मार दुम्मे, मेको नेल्ल देंमाक्त। २९ मिनु लाबान माइश्शा, रेबेका आ लोकब का बाक्माक्त। मेको दोरशा, इनारम मेको मुर कली गुम्थ लमाक्त। ३० मारदे हना मेकोमी आ समी आ मुन्द्री नु चुरा तशा “मेको मुरुम आं कली मोदेशो लोव्र पाप्तु” देशो नेशा, लाबान मेको मुर कली गुम्थ लमाक्त। मेको मुर आ दलओंठ नु इनारम बाक्शो बाक्माक्त। ३१ मिनु लाबानम मेको कली “परमप्रभु यावे आ आसीक राइब, गे मारदे मेकेर बाक्नीनी? आंइ खिं पिने। गे नु इन दलओंठ आन कली मारेइ मारेइ ठीक पाता” देंमाक्त। ३२ मिनु वाइल खिं ओव्रमाक्त। लाबानमी दलओंठ तार वोइश्शा नेल्ल शोल्शा, थुल्चा कली नल लाप्ता बाक्त। मिनु मेको मुर नु आ गेय पाइब आन कली खोइल चिक्चा कली ब्वाक्कु यो गेवा बाक्त। ३३ नोले मेको आ डोंइती जचा थोव्रक खेत्मे बाक्त। मेकोमी चहिं “गो मारदे पिडा, इन कली मदेंडा सम्म मजाइनुड, मब्वाइनुड” देंमाक्त। मिनु लाबानमी “इन के मार लोव्र बाक्मे? लो देनीन” देंमाक्त।

३४ मिनु वाइलमी “गो अब्राहाम आ वाइल नड। ३५ मिनु परमप्रभु यावेमी आं होव्रप कली शुश आसीक गेप्तु। मिनु शुश शोंप पाइश्शा दुम्त। मेकोमी मेको कली क्यारश भेडा, सुन चांदी, वाइलीम वाइल, दलओंठ नु गधा शुश गेप्तु।

36 मिनु आं होवप आ मीश सारामी खालपी दुमशा, अब्राहाम के तौ का थिप्टु। मिनु अब्राहामम आ तौ कली आ मारेइ मारेइ नेल्ल गेप्टु। 37 मिनु आं होवपमी आं कली 'आं तौ कली आं बाकशो कनान रागी डा मुर आन तमी मचाक्को। 38 गे आं आफ आं खिं नु आं मुर आन खिं रे मीश आल का चाक्को' दे कसम जपाइक्ती। 39 मिनु गो आं होवप कली 'मीश आल एको रागी जाक्ने मबिप्बा, कोर में' देती। 40 मेकोमी चहिं 'गो परमप्रभु यावे आ डोंइती गाक्नुड। मेकोमी आ स्वर्ग डा गेय पाइब गे नु सोइक्ब। मेकोमी इ कली वारच पाइब। मिनु आं तौ कली आं मुर आन खिं नु आं आफ आं खिं रे मीश आल का चाक्को। 41 आं खिं डा मुर आन बाक्तीके जाक्दीशशा, मीश आल का मगेतेमी हना, गे कसम मजशो खोदेशो दुम्नेवे' दे आं होवपमी आं कली माइक्ती।

42 मिनु मुलाक्ती इनारम जाक्शा, गो 'परमप्रभु यावे, आं होवप, अब्राहाम आ परमप्रभु, गे आं कली वारच पने। 43 गो इनार आ नेक्था बाक्नुड। मिनु मीश आल ब्वाक्कु दिथ जाक्मानु, मीश आल कली इ गाग्री डा ब्वाक्कु इक्का तूचा गेयी, देंनुड। 44 मिनु मेको मीश आलमी तूडीन, गो इन दलओंठ आन कली यो ब्वाक्कु तुंडनुड, देंत हना, मेको मीश आल आं होवप आ तौ कली परमप्रभु यावेमी योव्रशो बाक्ल' देती।

45 मिनु गो आं थुमी लोव्र पने मथुमथु, रेबेका आ गाग्री मुप्शा पित। मिनु इनारम ब्वाक्कु कीथ तोंइसाक्व। मिनु गो 'आं कली इक्का तूचा गेयी' दे माइक्ता। 46 मिनु मेकोमी आ गाग्री रीब पा नाइशशा 'तूडो। गो इन दलओंठ आन कली यो तुंडनुड' देंत। मिनु गो तूता। मेकोमी आं दलओंठ आन कली ब्वाक्कु तुंडताक्व। 47 मिनु गो 'गे सु का आ तमी नवे?' दे हिल्लो पडानु 'गो बेथुएल आ तमी नड। बेथुएल नाहोर नु मिल्ला आस तौ बाक्ब' दे माइक्ती। मिनु गो आ नेमी मुन्दी पाइक्ताक्ड, आ गुइमी चुरा लिक्ताक्ड। 48 मिनु गो परमप्रभु यावे आ डोंइती गु बाप्शा 'परमप्रभु यावे, आं होवप अब्राहाम आ परमप्रभु, गे रिमशो पाइब बाक्नीनी' दे ठेयब सेल्ला। मारदे हना आं होवप आ लोक्ब आ खिं डा मुर रे आ तौ कली तमी चाक्का कली रिमशो लां कोंइताक्यी। 49 मिनु 'गे आं होवप कली शिशी नु रिमशो पचा मप्रोंइतीनी हना, आं कली देनीन। मेको पचा मदाक्नीनी हना यो देनीन। मारदे हना गो ग्युरा पेरा गे लचा माल्नुड' " दे लोव्र पवा बाक्त।

50 मिनु लाबान नु बेथुएलमी "मेको नेल्ल परमप्रभु यावे आ पशो बाक्ब। मार पाइनस्कु मार देंनस्कु डा। 51 लो, रेबेका कली लतो। मिनु लावो। इन होवप आ तौ आ मीश दुम्ल। दोपा परमप्रभु यावेमी लोव्र पवा, मोपा दुम्ल" देंसा बाक्त।

52 मिनु अब्राहाम आ वाइलम मेको लोव्र नेंशा, परमप्रभु यावे आ डोंइती खुम्की पा बाप्शा, मेको कली ठेयब सेला बाक्त। 53 मिनु आ गेय पाइबमी सुन नु चांदी के गहना नु दारशो वासी रेबेका कली गेमे बाक्त। आ लोक्ब नु आ ममा आस कली यो मार मार गेमे बाक्त। 54 मिनु जशा तूशा, आ गेय पाइबपुकी नु नाक्दो बाक्मा बाक्त। मिनु सुनी कना बोक्मानु, वाइलमी "आं होवप आ बाक्तीक लेत्चा गेयीनी" देंमाक्त। 55 मिनु रेबेका आ लोक्ब नु आ ममामी "रेबेका १० नाक्त सम्म बाक्ल, कोर में। मिनु नोले लन" देंसा बाक्त। 56 मिनु वाइलमी "परमप्रभु यावेमी आं कली आसीक गेशा, रिमशो पा वारच पाइक्ती। मोपतीके आं कली मक्योल्यीनी। आं होवप आ बाक्तीक लेत्चा गेयीनी" देंमाक्त। 57 मिनु मेको निक्शीम "रेबेकामी मार देंबा, मेको नेंय" देंसा बाक्त। 58 मिनु रेबेका कली ब्रेशशा "एको मुर नु लाइनेवे?" दे हिल्लो पाम्सेनु "गो लाइनुड" देंमाक्त। 59 मिनु नोले आ समी रेबेका नु आ कली वारच पाइब, अब्राहाम आ वाइल नु आ गेय पाइब आन कली सोइक्तमे बाक्त। 60 लचा डोंइती रेबेका कली आसीक गेशा "गे आं समी बाक्नेवे। सोशा बोशा, शुश दुमीने। इ चच युइ आन कली आन जोरी सत्रु आन कली ग्राडीन" दे आसीक गेमे बाक्त। उत्पत्ती २२:१७ 61 मिनु नोले रेबेका नु आ वारच पाइब बोक्शा, दलओंठ डोइशशा, मेको मुर नु लसा बाक्त। मोपा वाइलमी रेबेका कली लाइशशा, आ होवप आ खिं लेम्माक्त।

62 मिनु इसहाक बेयर-लहाइ-रोइ माइशशा ब्वाक्कु बुक्तीके रे पिमाक्त। मारदे हना दक्खिन रागी नेगेबम बाक्शो बाक्माक्त। उत्पत्ती १६:१४; उत्पत्ती २५:११ 63 मिनु नाक्नाक्दो रूमी हिरथ लमाक्त। मिनु कोव्रडानु, डोन रे दलओंठपुकी पिशो तवा बाक्त। 64 मिनु रेबेकामी इसहाक कली तशा, दलओंठ रे फ्रु तोंइसे बाक्त। 65 मिनु अब्राहाम आ वाइल कली "मेरे इं कली गुमथ पीब मुर सु में?" दे हिल्लो पवा बाक्त। मिनु वाइलमी "आं होवप बाक्ब" देंमाक्त। मेको नेंशा, रेबेकामी आ कुप्नीम कुल सुम्से बाक्त।

66 मिनु वाइलमी इसहाक कली मार मार दुम्मे, मार मार पवा, नेल्ल शेंदा बाक्त। 67 मिनु इसहाकम रेबेका कली आ ममा सारा आ ताम्बुम ओंइदा बाक्त। मिनु नोले ग्युंवे पाम्से बाक्त। मिनु इसहाकम आ मीश कली दाक्ता बाक्त। मोपा इसहाक आ ममा बेक्शो प्रेंदा बाक्त। उत्पत्ती २३:१-२

25

अब्राहाम आ चच युइ

1 मिनु अब्राहामम अर्को मीश चाकगा बाक्त। मेको आ नें केतुराह बाक्माक्त। 2 मिनु मेकोमी अब्राहाम रे जिग्रान, योकशान, मेदान, मिदयान, इशबाक नु शुआह थिमाक्त। 3 मिनु योकशानमी शेबा नु देदान थिम्सी बाक्त। देदान आ तौपुकी अशशुरीम, लेतुशीम नु ले-उम्मीम बाक्मा बाक्त। 4 मिनु मिदयान आ तौ एफाह, एफेर, हनोक, अबीदा नु एल्दाह बाक्मा बाक्त। मेको नेल्ल केतुराह आ चच युइ बाक्मा बाक्त। 5 मिनु अब्राहामम आ मार मार नेल्ल इसहाक कली गेवा बाक्त। 6 अब्राहाममी आ मबेक्थुन अर्को मीश आन तौ आन कली मार मार कोसेली गेमी बाक्त। मिनु आ तौ इसहाक रे फ्राशा, पूर्ब डा रागीम बाक्मल, दे पूर्ब गे सोइक्तीमी बाक्त।

अब्राहाम बेक्शो

7 मिनु अब्राहाम नेल्ल पा सहे का ७५ बर्स ब्रोंइमाक्त। उत्पत्ती १२:४ 8 मिनु नोले शुश बर्स डा खाल्पा दुम्शा बेक्शा, आ किकी पिपी नु लमाक्त। उत्पत्ती १५:१५ 9 मिनु इसहाक नु इश्माएल आ तौ निक्शीमी आ बेक्शो रां माक-पेला माइशो रू डा पुक्खीमी लाइशशा, वोदसे बाक्त। डोंइती मेको रू सोहार आ तौ एफोन आ रू बाक्माक्त। एफोन हिती का बाक्माक्त। मेको रू मात्रे आ पूर्ब गे बाक्माक्त। उत्पत्ती २३:१३-२० 10 अब्राहाममी मेको रू हिती आ मुर रे ग्याप्शो बाक्माक्त। मेकेर डोंइती आ मीश सारा कली नोले अब्राहाम कली वोदमे बाक्त।

11 मिनु अब्राहाम बेक्म नोले परमप्रभुमी इसहाक कली आसीक गेवा बाक्त। मेना इसहाक बेयर-लहाइ-रोइ माइशोमी बाक्शो बाक्माक्त। उत्पत्ती १७:१९; उत्पत्ती २४:६२

इश्माएल आ चच युइ

12 सारा आ वाइलीम इजीप्त डा हागार रे जरमेशो अब्राहाम आ तौ इश्माएल बाक्माक्त। उत्पत्ती २१:१३ 13 इश्माएल आ तौ सु सु बाक्मा बाक्त देशा हना, आ डोंइती जरमेशो तौ नेबायोथ बाक्माक्त। मिनु नोले थिशो आन नें केदार, अदबेल, मिब्साम, 14 मिश्मा, दुमा, मस्सा, 15 हादाद, तेमा, येतुर, नाफीश नु केदमा बाक्मा बाक्त। 16 एको इश्माएल आ तौ आन नें, आन बाक्तीके आन नें बाक्मा बाक्त। मेको नेल्ल आन थर डा ठेयब मुर बाक्शो बाक्मा बाक्त। उत्पत्ती १७:२०; गन्ती १:४४ 17 इश्माएल नेल्ल पा सहे का ३७ बर्स ब्रोंइमाक्त। मिनु बेक्शा, आ किकी पिपी नु लमाक्त। 18 आ तौपुकी हवीलाह रे इजीप्त लतीक लां शुर सम्म बाक्शो बाक्मा बाक्त। शुर रागी इजीप्त आ डोंइती अस्सुर गे बाक्ब। इश्माएल चहिं आ लोक्ब नेल्ल आन दातेमी बाक्माक्त। उत्पत्ती १६:१२

इसहाक आ तौ निक्शी

19 इसहाक अब्राहाम आ तौ बाक्माक्त। 20 इसहाक ४० बर्स दुम्मेनु, रेबेका चाकगा बाक्त। रेबेका चहिं अरामी पदान-अराममी बाक्ब बेथुएल आ तमी, लाबान आ समी बाक्माक्त। 21 मिनु इसहाकमी परमप्रभु यावे कली आ मीश आ पर्बम पुना बाक्त। मारदे हना आल मथीब बाक्माक्त। परमप्रभु यावेमी आ पुंइशो गेवा बाक्त। मिनु रेबेकामी कोव्रज कुरा बाक्त।

22 मिनु आल निक्शी आ कोव्रजम राम्शी पाम्से बाक्त। मिनु रेबेकामी “मुल ओदेशो दुम्ती हना, मार दुम डा? दोपा ब्रोंइनुडा डा?” दे मिम्ता बाक्त। मिनु परमप्रभु यावे कली “मार दुम्नुडा?” दे हिल्लो पवा बाक्त। 23 मिनु परमप्रभु यावेमी मेको कली “इ कोव्रजम जात निक्शी डा मुर बाक्नीसी। मेको जात निक्शी फ्राचा पुंइसीनीस। का अर्को क्येडा बोल्यो बाक्ब। डोंइती जरमेशो चहिं कान्छा आ गेय पाइब दुम्ब” दे शेंदा बाक्त। उत्पत्ती २७:२९; मलाकी १:२; रोमी ९:१०-१२

24 मिनु रेबेकामी आल थिमेनु, जौले बाक्सा बाक्त। 25 मिनु डोंइती डा आ रांम वा फेक्शो खोदेशो पा लल चां पाइशो वोइश आल का थिमाक्त। मिनु मेको कली एसाव नें वोदा बाक्त। 26 मिनु नोले आ लोक्बमी आ लोक्ब आ गेग्रे ग्याइशशा गूमाक्त। मोपतीके आ नें याकूब वोदा बाक्त। रेबेका आल थिची ना इसहाक ६० बर्स दुम्शो बाक्माक्त। होसे १२:४ 27 मिनु मेको तौ निक्शी कोल्सानु, एसाव जोक्ब सिखारी दुम्माक्त। नेल्ल नाक्त ब्वाकीम बाक्चा दाक्ता बाक्त। याकूब चहिं ताम्बुम बाक्ब नु रू डा गेय पा, सिक्सी पा बाक्ब दुम्माक्त। 28 इसहाकम एसाव कली दाक्ता बाक्त। मारदे हना आ चाक्शो सिखार ब्ववा बाक्त। रेबेकामी चहिं याकूब कली दाक्ता बाक्त।

डोंइती जरमेशो तौ आ अधिकार

29 मिनु काबु याकूबमी खोले क्येवानु, एसाव ब्वाकी रे शोत्रलु बेक्शा जाक्माक्त। 30 मिनु एसावमी याकूब कली “इ क्येशो लल दाल खोले इच्का गेयी। गो शोत्रलु बेक्ती” देंमाक्त। मोपतीके एसाव कली एदोम माइश्शो याइनी नें वोइश्शो बाक्माक्त। 31 मिनु याकूबमी “मुलाक्ती डोंइती जरमेशो तौ इ आसीक आं कली गेयी” देंमाक्त। 32 मिनु एसावमी “मुल गो बेक्चता डोंइती जरमेशो तौ आ तचा डा आसीकम मार दुम्बा डा?” देंमाक्त। 33 मिनु याकूबमी “गो मुलाक्ती गेतन, दे कसम जावो” दे मदा बाक्त। मिनु एसावमी याकूब कली “डोंइती जरमेशो तौ आं आसीक इ केन दुम्ल” दे कसम जवा बाक्त। उत्पत्ती २७:३६; हिब्रू १२:१६ 34 मिनु नोले याकूबमी एसाव कली शोब्ले नु दाल खोले ख्रेत्ता बाक्त। मिनु मेको जशा तूशा बोक्शा लमाक्त। मोपा एसावमी “डोंइती जरमेशो तौ आ ततीक आसीक ममाल्नुड” दे प्रोना बाक्त।

26

इसहाक गेरार सहर लशो

1 मिनु नोले रागीमी अन्काल दुम्माक्त। डोंइती अब्राहाम बाक्मेनु यो, अन्काल दुम्शो बाक्माक्त। मिनु इसहाक पलिस्ती आन पिप अबीमेलेक आ रागी डा गेरार सहर लमाक्त। 2 मिनु परमप्रभु यावेमी इसहाक आ डोंइती गूमाक्त। मिनु इसहाक कली “इजीप्त रागी मलावो। आं देंशो रागीम बाक्थ लावो। 3 मेको रागीमी अर्को रागी डा मुर दुम्शा बाक्को। गो गे नु बाक्शा, इ कली आसीक गेनुड। गो इ कली नु इ चच युइ आन कली एको रागी नेल्ल गेनुड। गो इ आफ अब्राहाम नु कबल पा, कसम जाता। मुल आं कबल खाप्नुड। उत्पत्ती १७:१९; उत्पत्ती २२:१६-१७ 4 इ चच युइ आन कली सरीड डा सोरुल खोदेंशो पा शुश सेल्लुड। मेको आन कली एको रागी नेल्ल गेनुड। मिनु इ चच युइ आन पबर्म रागी रागी डा मुर नेल्ल आसीक ताइनीम। 5 मारदे हना अब्राहामम आं देंशो टिशा, आ पचा माल्लो पाप्तु। आं शेंशो, आं फुल्लुम मुशा ब्रेक्शो लोत्र नु आं अरेशो नेल्ल पाप्तु” दे मदा बाक्त। उत्पत्ती १५:५

6 मिनु इसहाक गेरार सहर उइ बाक्माक्त। 7 मिनु अबीमेलेक आ मुरपुकीमी इसहाक कली आ मीश आ पबर्म लोत्र पामे बाक्त। मेकोमी चहिं “आं समी बाक्ब” दे लोत्र लेत्ता बाक्त। मारदे हना रेबेका शुश दारशो मीश मुर दुम्तीके “आं मीश बाक्ब” देंचा हिंमाक्त। मारदे हना “मेको कली तशा, लाइक्चा कली आ कली साइक्नीम” दे हिंशो बाक्माक्त। 8 मिनु इसहाक मेको रागीमी शुश बाक्शा, काबु पलिस्ती आन पिप अबीमेलेकमी झेल रे इसहाक नु आ मीश रेबेका चाल्लो तवा बाक्त। 9 मोपतीके अबीमेलेकमी इसहाक कली ब्रेश्शा “नेनो, एको थमा पा इ मीश बाक्ब। दोपा ‘आं समी बाक्ब’ देंने?” दे हुइक्ता बाक्त। मिनु इसहाकमी “एको आ पबर्म आं कली साइक्नीमी, कों, दे हिंती” देंमाक्त। 10 मिनु अबीमेलेकमी “आंइ कली मार पवी? आं मुर का मेको नु इप्शो हना, गे आंइ कली शुश मरिम्शो मपपदी वा?” दे मदा बाक्त। 11 मिनु अबीमेलेकमी आ मुर नेल्ल आन कली “सुम मेको नु आ मीश आस कली मरिम्शो पाइबा, मेको थमा पा साइक्चा पुंइसीब” दे माइक्मी बाक्त।

12 मिनु इसहाकमी मेको रागीमी मार मार शोक्शा, मेको बर्सम गेडा का के सहे का गेडा सम्म सिप्पाइश्शा खेला बाक्त। मारदे हना परमप्रभु यावेमी इसहाक कली आसीक गेवा बाक्त। हितोपदेस १०:२२ 13 मिनु शुश शोप पाइश्शो दुम्शा, दारना दारन शुश क्येट थीब दुम्माक्त। 14 मेको आ क्यारश भेडा नु बी ब्यफ शुश दुम्मा बाक्त। मिनु वाइलीम वाइलपुकी यो शुश दुम्मा बाक्त। मोपतीके पलिस्तीपुकीमी गेहे पामे बाक्त। 15 मिनु पलिस्तीपुकीमी अब्राहाम आ गेय पाइब आन दोशो इनार खपीम प्रिंशा, ब्वाक्कु तेक्गमे बाक्त। उत्पत्ती २१:२२-३४ 16 मिनु अबीमेलेकम इसहाक कली “आंइ क्येडा गे बोल्यो बाक्नीनी, मोपतीके एकेर रे लने” दे मदा बाक्त।

17 मिनु इसहाक नु आ मुरपुकी मेकेर रे लशा, गेरार डा दिंममी जाक्दीश्शा, आन ताम्बु कीशा बाक्मा बाक्त। 18 मिनु इसहाकमी डोंइती अब्राहाम आ दोशो इनारपुकी, लेंशा दोपाइश्शा, ब्वाक्कु गूपदा बाक्त। मारदे हना अब्राहाम बेक्म नोले पलिस्तीपुकीमी मेको इनार आन कली खपीम प्रिंशो बाक्मा बाक्त। मिनु मेको इनार आन कली आ आफ आ वोइश्शो नें लेंशा वोदा बाक्त। 19 मिनु इसहाक आ गेय पाइबपुकीमी मेको दिंममी दोशा, ब्वाक्कु बुक्तीके थित्मे बाक्त। 20 मिनु गेरार डा गोठलापुकीमी इसहाक आ गोठला आन कली “एको ब्वाक्कु आंइ के बाक्ब” दे जीमे बाक्त। मोपतीके इसहाकम मेको इनार कली एसेक नें वोदा बाक्त। मारदे हना मेकोपुकी आ मुर नु जीमे बाक्त। 21 मिनु लेंशा अर्को इनार का दोत्रमे बाक्त। मेको आ पबर्म यो जीमे बाक्त। मेको कली सित्ना नें वोदा बाक्त। 22 नोले मेकेर रे लशा, अर्को इनार का दोत्रमे बाक्त। मेको आ पबर्म सुइमी जिचा मपोक्गमे बाक्त। मिनु मेको आ

नें रेहोबोथ वोदा बाक्त। मिनु “मुल परमप्रभु यावेमी आंइ कली बाक्तीक गेवा बाक्त। गोपुकी एको रागीमी शुश दुम्कल” देमाक्त।

23 मिनु मेकेर रे लशा, बेयर-शेबा जाक्दीम्मा बाक्त। 24 मिनु मेको नाक्दो परमप्रभु यावे गूशा “गो इ आफ अब्राहाम आ परमप्रभु नड। महिनो। गो गे नु बाक्नुड, इ कली आसीक गेनन। आं गेय पाइब अब्राहाम आ पर्बम गो इ चच युइ आन कली शुश सेल्लुड” दे लोत्र पवा बाक्त। 25 मिनु इसहाकम मेकेर चढेतीक सेल्शा, परमप्रभु यावे आ नें थिशा ब्रेशशा, मेको नु लोत्र पवा बाक्त। मिनु आ ताम्बु मेक उइ कीडा बाक्त। आ गेय पाइबपुकीमी मेकेर इनार का दोत्रमे बाक्त। उत्पत्ती १२:८

इसहाक नु अबीमेलोक सल्ला पशो

26 काबु अबीमेलोक, आ अर्ती गेब अहुज्जाथ नु आ फौज डा ठेयब कप्तान फीकोल नु गेरार सहर रे जाक्शा, इसहाक कली गुम्मे बाक्त। 27 मिनु इसहाकमी “गेपुकी आं कली मदाक्थु, इन बाक्तीके रे सोइक्ताक्यीनी। मुल मारदे आं कली गुम्थ जाक्नी?” दे हिल्लो पवा बाक्त। 28 मिनु मेकोपुकीमी “परमप्रभु यावे गे नु बाक्ब, गो तुइक्नीकी। मोपतीके गोपुकीमी ‘गे नु कसम जशा, कबल पचा’ रिम्शो दुम्ब। ब्यवस्था २९:३; मत्ती १३:१३ 29 गे आंइ कली श्येत मगेने। गोपुकीमी यो इन कली श्येत मगेथु, रिम्शो पा लडाइ मपथु सोइक्ताक्क। गे परमप्रभु यावे आ आसीक राइब बाक्नीनी” दे इसहाक कली देमा बाक्त। 30 मिनु इसहाकम मेको आन कली भोज सेला बाक्त। मिनु मेकोपुकीम जामे, तूडमे बाक्त। 31 मिनु मेकोपुकी आ दीसा सुनी कना बोक्शा, कसम जामे बाक्त। मिनु नोले इसहाकमी मेको आन कली लचा गेवा बाक्त। मिनु आन थुं नाइशशा लमा बाक्त। 32 मेको नाक्ती इसहाक आ गेय पाइबपुकी जाक्शा, इसहाक कली “आंइ दोतीकेमी ब्वाक्कु गूत” दे शेंदमे बाक्त। 33 मिनु मेको इनार कली शिबा नें वोदा बाक्त। मोपतीके मेको सहर आ नें मुल सम्म बेयर-शेबा बाक्ब।

एसाव आ मीश निक्शी

34 एसाव ४० बर्स दुम्मेनु, हिती आ मुर बेयरी आ तमी युदीथ नु हिती आ मुर एलोन आ तमी बासेमाथ चाक्सी बाक्त। उत्पत्ती ३६:२-३ 35 मिनु मेको निक्शी आस पर्बम इसहाक नु रेबेका थुं मनुथु, शुश सुर्ता पाम्से बाक्त।

27

इसहाकमी आसीक गेशो

1 मिनु इसहाक खाल्पा दुम्शा, ब्राब्रा पा मिक्च मताइब दुम्माक्त। मिनु मेकोमी आ डोंइती जरमेशो तौ एसाव कली “आं तौ” दे ब्रेत्ता बाक्त। मिनु एसावमी “मार देनी?” दे लोत्र लेत्ता बाक्त। 2 मिनु इसहाकमी “नेनो, गो खाल्पा दुम्ती, आं बेक्ची ना मतुइक्नुड। 3 इ लिब्रा लाइशशा, सिखार ग्यारथ लावो। मिनु आं कली सिखार चाक्को। 4 मिनु नोले आं दाक्शो ब्रोत्रब्रोत्रशो क्येशा, गेयी। गो आं बेक्चा क्येडा डोंइती जशा ब्वशा, इ कली आसीक गेनुड” देमाक्त।

5 मिनु रेबेकामी इसहाक नु एसाव लोत्र पशो नेंशो बाक्माक्त। मिनु एसाव ब्वाकी सिखार ग्यारथ लमेनु, 6 रेबेकामी आ तौ याकूब कली “आं तौ नेनो, गो इ आफोमी एसाव कली लोत्र पशो नेंता। 7 मेकोमी एसाव कली ‘आं कली सिखार चाक्को। ब्रोत्रशो क्येवो। गो जशा ब्वशा नोले परमप्रभु यावे आ डोंइती आं बेक्चा क्येडा डोंइती इ कली आसीक गेनुड’ देत। 8 मोपतीके आं तौ, आं देशो टिवो। दोपा अरेना, मोपा पावो। 9 मुल गोठ लावो। क्यारश आन दाते रे रिम्शो पाठा निक्शी चाक्को। मिनु गो इ आफ कली आ दाक्शो ब्रोत्रशो क्येनुड। 10 मिनु गे चहिं लाइशशा, इ आफ कली खेततो। मेकोमी जशा ब्वशा, आ बेक्चा क्येडा डोंइती इ कली आसीक गेवल” देमाक्त। 11 मिनु याकूबम आ ममा कली “नेनीन, आं लोक्ब एसाव शुश चां पाइशशा बाक्ब। गो मोदेशो मनड। उत्पत्ती २५:२५ 12 मिनु आं आफोम आं कली थिशा, तुइक्ब। मिनु गो जोल पाइब दुम्शा, आसीक मतथु, सराप राइनुड” देमाक्त। 13 मिनु आ ममामी “इ कली पशो सराप गो रडल, आं तौ। गे आं देशो पावो। पाठा निक्शी ब्रथ लावो” देमाक्त। 14 मिनु याकूबम गोठ लशा, पाठा निक्शी चाक्शा, आ ममा कली गेवा बाक्त। मिनु आ ममामी आ आफ कली आ दाक्शो ब्रोत्रशो श्ये क्येवा बाक्त। 15 मिनु रेबेकामी आ खिंमी वोइशशा आ डोंइती जरमेशो तौ एसाव आ नक वा लाइशशा, आ कान्छा याकूब कली फेक्पदा बाक्त। 16 मिनु मेको पाठा आस कुशुल याकूब आ गुइ तारी नु आ शुर तारी क्येप्ता बाक्त। 17 मिनु आ क्येशो ब्रोत्रशो श्ये नु शोब्ले याकूब कली गेवा बाक्त।

18 मिनु याकूबम आ आफ बाक्तीके लशा, मेको कली “आं आफ” देंमाक्त। मिनु “गो बाक्ती। आं तौ, गे सु नवे” दे हिल्लो पवा बाक्त। 19 याकूबम आ आफ कली “गो इन डोंइती जरमेशो तौ, एसाव, नड। इन पुंइशो गो पाता। बोक्शा निश्शा, आं सिखार ब्वने। मिनु आं कली आसीक गेयीनी” देंमाक्त। लेवी १९:१४ 20 मिनु इसहाकमी “गिश रीब पा पवी, आं तौ?” दे हिल्लो पवा बाक्त। मिनु “परमप्रभु यावे, इन परमप्रभुमी सिखार आं नेक्था चाक्तु” देंमाक्त। 21 मिनु इसहाकम याकूब कली “आं नेक्था पिवो। इ कली थीनन, आं तौ। गे थमा पा, आं तौ एसाव नवे कों, मनवे” दे मदा बाक्त। 22 मिनु याकूब आ आफ आ नेक्था लमाक्त। इसहाकम मेको कली सुल्शा “आ सेंदा याकूब के बाक्त, आ गुइ चहिं एसाव के बाक्त” देंमाक्त। 23 मिनु मेको कली मतुइक्ता बाक्त। मारदे हना आ गुइ एसाव खोदेशो पा चां पाइश्शो बाक्माक्त। मोपतीके आसीक गेवा बाक्त। 24 मिनु “गे थमा पा आं तौ एसाव नवे?” दे हिल्लो पवानु “गो नड” देंमाक्त। 25 मिनु इसहाकम “लो, इ सेल्शो जचा ब्वचा थोव्रक चाक्को। इ कली आसीक गेनन” देंमाक्त। मिनु याकूबमी चाक्गा बाक्त। मिनु आ आफोम ब्ववा बाक्त। मिनु याकूबमी अडगुर शांबु यो चाक्शा, गेवा बाक्त। मिनु मेको यो तूडा बाक्त। 26 मिनु आ आफ इसहाकम “आं नेक्था पिवो, आं कली पुक्पु पावो, आं तौ” देंमाक्त। 27 मिनु आ नेक्था लशा, पुक्पु पवा बाक्त। इसहाकमी आ वा आ रिना नाम्शा, आसीक गेवा बाक्त। मिनु मेकोमी “आं तौ आ रिना परमप्रभु यावेमी आसीक गेशो रू आ रिना खोदेशो बाक्ब। 28 परमप्रभुमी इ कली सरीड डा सीत रे नु रिम्शो खप रे शुश चेरब नु अडगुर शांबु गेवल। 29 मुरपुकीम इ कली गेय पामेक्ल। रागी रागी डा मुरपुकी इ डोंइती खुम्की पा बाम्मल। इ लोकब आन दातेमी गे ठेयब दुमो। इ ममा आ तौपुकी इ डोंइती बाम्मल। सु सुम इ कली सराप पामे, मेको आंमान रमल। सु सुम इ कली आसीक गेमे, मेको आसीक रमल” दे आसीक गेवा बाक्त। उत्पत्ती २३:२५; उत्पत्ती १२:३

30 मिनु इसहाकमी आसीक गेवा नोले, याकूब आ आफ आ बाक्तीक रे लमेनु, आ लोकब एसाव आ सिखार ग्यारतीक रे जाक्माक्त। 31 मेकोमी ब्रोव्रशो श्ये क्येशा, आ आफ आ बाक्तीके जाक्शा, आ आफ कली “आं आफ बोक्कीन। आं सिखार ब्वशा, आं कली आसीक गेयीनी” देंमाक्त। 32 मिनु आ आफ, इसहाकमी मेको कली “गे सु नवे?” दे हिल्लो पवानु “गो इन डोंइती जरमेशो तौ, एसाव नड” देंमाक्त। 33 मिनु इसहाक शुश खिंखि पा “सुमी आं कली सिखार चाक्गा? इ जाक्चा क्येडा डोंइती गो जाता। मिनु आसीक गेता। आं आसीक लीब” देंमाक्त। 34 मिनु एसाव आ आफ आ लोव्र नेंशा, ठेयब सेंदा पा डाक्माक्त। मिनु आ आफ कली “आं आफ, आं कली यो आसीक गेयीनी” देंमाक्त। हिब्रू १२:१७ 35 मिनु “इ लोकब जाक्शा, जोल पशा, इ आसीक रोइक्ताक्व” देंमाक्त। 36 मिनु एसावमी “आ नें याकूब दुम्शो, ठीक बाक्ब। मुल आं कली निक्शी खेयप ठगेती। आं डोंइती जरमेशो तौ आ अधिकार रोइक्ताक्वी। मुल आं आसीक यो लाइक्तु। गे आं कली आसीक महेंदीनी?” दे डाक्शा, देंमाक्त। उत्पत्ती २५:२६; उत्पत्ती २५:३३ 37 मिनु इसहाकम एसाव कली “नेनो, गो मेको कली इ प्रभु सेल्ता। आ लोकब नेल्ल आन कली मेको आ गेय पाइब सेल्ता। चेरब नु अडगुर शांबु शुश ग्रेल्लमल, दे लोव्र पाता। मिनु इ कली मार गेनना डा, आं तौ?” दे लोव्र पवा बाक्त। 38 मिनु एसावमी आ आफ कली “इन के आसीक का ला बाक्बा डा, आं आफ? आं कली यो आसीक गेयीनी” दे शुश डाक्माक्त।

39 मिनु आ आफ इसहाकम “नेनो, मलिलो खप नु सरीड डा सीत इ बाक्तीक रे डोन बाक्ब। 40 इ तरवारम इ गेय पाइनेवे। इ लोकब कली गेय पाइनेवे। २राजा ८:२०,२२ गे बोल्यो दुम्ते हना, आ जुवा इ शुर रे ताइक्नेवे” दे एसाव कली यो आसीक गेवा बाक्त।

41 मिनु एसावमी आ आफोम याकूब कली गेशो आसीक लोव्र आ पर्वम, याकूब कली काइ मदाक्ता बाक्त। आ थुमी “आं आफ बेक्शा रोंका पने थुम्शो नोले, आं लोकब याकूब कली साइक्नुड” दे मिम्ता बाक्त। 42 मिनु रेबेकामी आ तौ आ लोव्र नेना बाक्त। मिनु मेकोमी याकूब कली ब्रेशशा “नेनो, इ लोकबमी इ कली साइक्चा कली मिम्ब। 43 मोपतीके आं तौ, गे आं देशो पावो। बोक्को, आं लोकब लाबान आ बाक्तीके, हारान सहर प्रोक्को। उत्पत्ती २४:२९ 44 इ लोकब आ गाइश्शो मनांइसे सम्म मेक उइ बाक्को। 45 मिनु इ लोकबमी इ पशो प्रेशा, मचुरत हना, गो इ कली ब्रथ सोइक्नुड। गो दोपा नाक्त कामी आं मुर निक्शी जाम्शो तने चाप्नुड डा?” दे आ तौ कली देंमाक्त।

46 मिनु रेबेकामी इसहाक कली “गो हित्ती आ तमी आस पर्वम बेक्चा डा दुम्ती। याकूबमी यो एको खोदेशो पा एको रागी डा हित्ती आ तमी का चाक्तु हना, गो ब्रोंइचा मदाक्नुड” दे मदा बाक्त। उत्पत्ती २६:३४-३५

28

याकूब कली सोइशो

1 मिनू नोले इसहाकमी याकूब कली अरेशा “गे कनान रागी डा मीश आल मचाक्को। उत्पत्ती २४:३ 2 साशा, पदान-अराम इम्मा आ आफ बेथुएल आ खिं लावो। मिनू इम्मा आ लोकब लाबान आ तमी का चाक्को। उत्पत्ती २२:२३; उत्पत्ती २४:२९ 3 मिनू नेल्ल क्येडा सक्ति पाइशो परमप्रभुमी इ कली आसीक गेवल। मिनू इ कली सोशा बोशा, शुश सेलल। हिक्ने मचाप्चा डा पा शुश दुम्पदल। 4 अब्राहाम कली गेशो आसीक मुल इ कली नु इ चच युइ आन कली गेवल। इ मुल बाक्शो रागीम अर्को रागी डा मुर बाक्ते, तन्न परमप्रभुमी अब्राहाम कली गेप्टु। मेको इ कली दुम्ल” दे आसीक गेवा बाक्त। 5 मोदेशो पा इसहाकमी याकूब कली पदान-अराम डा मुर बेथुएल आ तौ आ खिं सोइक्ता बाक्त। मेको याकूब नु एसाव आस ममा आ लोकब लाबान बाक्माक्त।

6 मिनू एसावमी, इसहाकम याकूब कली आसीक गेशा, मीश चाक्चा कली पदान-अराम गे सोइशो तुइशशा, आ आफ आ अरेशो “कनान रागी डा तमी मचाक्को” दे माइशो तुइक्ता बाक्त। 7 याकूबमी आम आफ आस कली टिशा, पदान-अराम गे लशो तवा बाक्त। 8 मिनू एसावम कनान रागी डा तमीपुकी आ आफ इसहाकम मदाक्शो तुइशशा, 9 इश्माएल आ बाक्तीके लमाक्त। मिनू मीश निक्शी बाक्शा यो, अब्राहाम आ तौ इश्माएल आ तमी नेबायोथ आ समी महलाथ चाक्गा बाक्त। उत्पत्ती १६:१६; उत्पत्ती २६:३४; उत्पत्ती २५:१३

याकूबमी डोमु तशो

10 मिनू याकूब बेयर-शेबा रे गाक्शा, हारान सहर गे लमाक्त। 11 मिनू बाक्तीके का जाक्दीशशा, नाक्दो मेकेर बाक्माक्त। मारदे हना नां रिक्माक्त। मिनू फुल्लु तार आ पिया वोइशशा इम्माक्त। 12 मिनू इम्मेनु, डोमुम खप रे सरीड थिशो क्रेसी का तवा बाक्त। मेको क्रेसीमी परमप्रभु आ स्वर्ग डा गेय पाइबपुकी तोइशो, डोइशो तवा बाक्त। यूहन्ना १:५१ 13 मिनू क्रेसी आ डरम परमप्रभु यावे राप्शा, याकूब कली “गो परमप्रभु यावे, इ बाजे अब्राहाम नु इ आफ इसहाक आस परमप्रभु नड। मुल इ इप्शा बाक्तीक रागी इ कली नु इ चच युइ आन कली गेनन्नी। 14 इ चच युइ खप डा फुरक खोदेशो पा शुश दुम्नीम। सोशा बोशा, शुश दुम्शा, पूर्व, पच्छिम, उत्तर, दक्खिनम ब्रशा बाक्नीमी। गे नु इ चच युइ आन पर्वम रागी नेल्ल डा मुर आसीक ताइनीम। उत्पत्ती १३:१४-१५ 15 गो गे नु बाक्शा, ते लाइनेवे, गो इ कली कोवन्नन। गो इ कली एको रागी लेप्पाइक्नन। मारदे हना गो इ कली मप्रोंइनन। इ कली मार मार देंडा, गो मेको नेल्ल पाइनुड” देंमाक्त।

16 मिनू याकूब आ निन्द्रा रे सेंसीशा “परमप्रभु यावे थमा पा एकेर बाक्ब। गो मतुइक्तु” देंमाक्त। 17 मिनू हिंशा “एको हिंशा डा बाक्तीके बाक्ब। परमप्रभु आ बाक्तीक खिं बाक्शा, सरीड डा लाप्चो बाक्ब” देंमाक्त। प्रस्थान ३:५

18 मिनू याकूब सुनी कना बोक्शा, आ पिया आगा डा वोइशो फुल्लु राप्पाइशशा तेल लुक्ता बाक्त। उत्पत्ती ३५:१४-१५ 19 मिनू मेको बाक्तीके कली बेथेल नें वोदा बाक्त। डोंइती मेको सहर आ नें लूज बाक्माक्त। 20 मिनू याकूबमी “परमप्रभु गो नु बाक्त हना, लां कोंइशा कोव्रती हना, जचा नु फेक्चा यो गेती हना, 21 थुं नाइशशा, आं आफ आ खिं लेत्चा गेती हना, परमप्रभु यावे आं परमप्रभु बाक्ब” दे कसम जवा बाक्त। 22 मिनू परमप्रभु कली “आं राप्पाइशशा वोइशो फुल्लु परमप्रभु आ खिं दुम्ल। आं कली मार मार गेनी, मेको के १० भागमी भाग का थमा पा इन कली गेनन्नी” देंमाक्त। उत्पत्ती ३५:१

29

याकूब लाबान आ खिं जाक्दीशो

1 मिनू याकूब लमे लमे, पूर्व डा मुर आन रागी जाक्दीम्माक्त। 2 मिनू कोव्रडानु, दिंम कामी इनार का तवा बाक्त। हुल सां भेडा मेकेर बाक्शो बाक्मा बाक्त। मारदे हना मेको आन कली मेको इनार डा ब्वाक्कु तुंइबाक्मा बाक्त। मेको इनार चहिं ठेयब फुल्लुमी सुम्शो बाक्माक्त। 3 मिनू भेडा आन हुल नेल्ल मेकेर खुम्सीशा, गोठलापुकीमी मेको इनार डा फुल्लु क्युक्शा, भेडा आन कली ब्वाक्कु तुंइशा, नोले लेंशा इनार सुम्शा वोइक्बाक्मा बाक्त।

4 मिनू याकूबमी मेको भेडा गोठला आन कली “आं लोकबपुकी गे ते डा बाक्नीनी?” दे हिल्लो पवा बाक्त। मिनू मेकोपुकीमी “हारान डा बाक्नीकी” देंमा बाक्त। 5 मिनू याकूबमी “गे नाहोर आ तौ लाबान तुइक्नीनी?” दे हिल्लो पवा बाक्त। मिनू “गो तुइक्नीकी” दे लोव्र लेत्मे बाक्त। उत्पत्ती २४:१०, २४ 6 याकूबमी “रिम्शो बाक्मे?” दे हिल्लो

पवानु, मेकोपुकीमी “रिम्शो बाक्ब। ह्यु आ तमी राहेल आ भेडा नु जाक्त” देंमा बाक्त। 7 मिनु याकूबमी “चोक्ची मजाक्शो, भेडा आन कली ब्वाक्कु तुंडशा, जोपाइक्थ लतीन” देंमाक्त। 8 मिनु मेकोपुकीमी “हुल नेल्ल मखुम्सीथु, इनार डा फुल्लु मयाक्थु, भेडा आन कली ब्वाक्कु तुंडने मचाप्नीकी” दे लोत्र लेत्मे बाक्त।

9 मिनु याकूब मेकोपुकी नु लोत्र पवा सम्म, राहेल आ आफ आ भेडा नु जाक्माक्त। मेको गोठाल्नी बाक्माक्त। 10 मिनु याकूबमी आ मामा, लाबान आ तमी राहेल तवा बाक्त। मिनु मेको कली गुम्थ लशा, इनार डा फुल्लु याक्ता बाक्त। मिनु आ मामा आ भेडा आन कली ब्वाक्कु तुंडदा बाक्त। 11 मिनु राहेल कली चुप पाइश्शा डाक्माक्त। 12 राहेल कली “गो इ आफ आ बहिनी रेबेका आ तौ नड” देंमाक्त। मिनु राहेल दोरशा लशा, आ आफ कली मेको लोत्र शेंदा बाक्त। 13 मिनु लाबानमी आ भानीच याकूब जाक्शो लोत्र नेंशा, दोरशा मेको कली गुम्थ जाक्माक्त। मिनु मुप्शा, पुक्पु पा, आ खिं लदा बाक्त। मिनु याकूबमी लाबान कली शुश लोत्र शोत्रडा बाक्त। 14 मिनु लाबानमी “गे थमा पा आं खिं डा मुर बाक्नेवे” देंमाक्त। मिनु याकूब महिना का खोदेंशो मेकेर बाक्माक्त।

15 मिनु लाबानमी याकूब कली “गे आं खिं डा मुर बाक्ते हना यो, आं कली मो गेय पचा ममाल्नेवे। मार पुंडनेवे, देनो” दे हिल्लो पवा बाक्त। 16 लाबान आ तमी निक्शी बाक्सा बाक्त। आ डोंडती जरमेशो आ नें लेआ नु कान्छी आ नें राहेल बाक्माक्त। 17 लेआ मदरशो बाक्माक्त। राहेल चहिं शुश दारशो बाक्माक्त। 18 याकूबम राहेल कली दाक्ता बाक्त। मिनु लाबान कली “इन कान्छी तमी राहेल आ पर्बम गो इन कली ७ बर्स गेय पाइनुड” देंमाक्त। 19 मिनु लाबानमी “अर्को मुर कली गेचा क्येडा इ कली गेचा रिम्शो बाक्ब। गो नु गेय पा बाक्को” देंमाक्त। 20 मिनु याकूबम राहेल आ पर्बम ७ बर्स गेय पवा बाक्त। मेको ७ बर्स याकूब कली नाक्त का निक्शी खोदेंशो पा लमाक्त। मारदे हना राहेल कली शुश दाक्ता बाक्त।

21 मिनु याकूबमी लाबान कली “आं मीश गेयीनी। ७ बर्स दुम्माक्त। मेको नु ग्युंभे पाइनुड” दे मदा बाक्त। 22 मिनु लाबानमी सहर डा मुर नेल्ल ब्रेशशा, भोज गेमी बाक्त। 23 मिनु नाक्नाक्दो लाबानमी आ तमी लेआ लाइश्शा, याकूब कली गेवा बाक्त। मिनु याकूब मेको नु इम्माक्त। 24 लाबानमी आ तमी लेआ कली आ गेय पाइब वाइलीम जिल्पा गेवा बाक्त। 25 मिनु याकूब सुनी कना बोक्शा, आ मीश कोत्रडानु, लेआ बाक्माक्त। मिनु गाइश्शा लाबान कली “गे आं कली मार पनी? गो इन कली राहेल आ पर्बम गेय मपडा डा? मारदे आं कली ठगेनी?” दे मदा बाक्त। 26 मिनु लाबानमी “आंइ रागीमी जेठी क्येडा डोंडती कान्छी मगेनीकी। 27 हप्ता का मेको नु बाक्को। नोले गो इ कली अर्को यो गेनन। गे अर्को ७ बर्स गेय पचा माल्नेवे” दे मदा बाक्त। 28 मिनु याकूब मेको बिश्शा, लेआ नु हप्ता का बाक्माक्त। मिनु नोले लाबानमी राहेल कली यो गेवा बाक्त। 29 लाबानमी आ तमी राहेल कली आ गेय पाइब वाइलीम बिल्हाह गेवा बाक्त। 30 मिनु याकूबम राहेल कली यो चाक्गा बाक्त। मिनु लेआ क्येडा राहेल कली शुश दाक्ता बाक्त। मिनु लाबान कली अर्को ७ बर्स गेय पवा बाक्त। लेवी १८:१८

परमप्रभुमी लेआ आ श्येत तशो

31 मिनु परमप्रभु यावेमी याकूबमी लेआ कली मदाक्शो तशा “आल थीब दुम्ल” दे आसीक गेवा बाक्त। तन्न राहेल आल मथीब बाक्माक्त। 32 मिनु लेआ कोत्रज कुरशा, तौ का थिमाक्त। मेको आ नें रूबेन वोदा बाक्त। मारदे हना “परमप्रभु यावेमी आं श्येत ताप्तु। मुल रे आं वोंइशेम आं कली दाक्ब” देंमाक्त। 33 मिनु लेंशा कोत्रज कुरशा, तौ का नु थिमाक्त। मिनु “परमप्रभु यावेमी आं कली मदाक्शो तशा, अर्को तौ का यो गेती” देंशा, मेको आ नें सिमियोन वोदा बाक्त। 34 मिनु लेंशा कोत्रज कुरशा, अर्को तौ का थिमाक्त। मिनु “मुल रे आं वोंइश गो नु बाक्ब। मारदे हना गो तौ सां थीतामी” देंमाक्त। मोपतीके आ नें लेवी वोदा बाक्त। 35 मिनु लेंशा कोत्रज कुरशा, तौ का नु थिमाक्त। मिनु “गो परमप्रभु यावे कली ठेयब सेल्लुड” दे मेको कली यहूदा नें वोदा बाक्त। मिनु आल थिचा नांइसे बाक्त।

30

याकूब आ अर्को आल

1 मिनु राहेलमी “आल मथीब बाक्डा बाक्त” दे तुइश्शा, आ लोक्ब कली गेहे पवा बाक्त। मिनु याकूब कली “गे आं कली आल मगेतीनी हना, गो बेक्नुड” देंमाक्त। 2 मिनु याकूबमी राहेल आ लोत्र आ पर्बम गाइश्शा “परमप्रभुमी इ कली आल मथीब सेल्लु। गो मेको क्येडा ठेयब नडा डा?” देंमाक्त। भजन संग्रह १२७:३ 3 मिनु राहेलमी “गो इन कली आं गेय पाइब बिल्हाह गेनुड। मेकोमी आं कली आल थिचा माल्ब। मिनु आं के आल दुम्मल” देंमाक्त। उत्पत्ती

१६:२ 4 मिनु मेकोमी याकूब कली आ गेय पाइब बिल्हाह गेवा बाक्त। मिनु याकूब मेको नु इम्माक्त। 5 मिनु बिल्हाह कोव्रज कुरशा, तौ का थिमाक्त। 6 मिनु राहेलमी “परमप्रभुमी आं कली नाक्शा, आं पुंइशो नेंतु। मिनु आं कली तौ का गेती” देंमाक्त। मोपतीके आ नें दान वोदा बाक्त। 7 मिनु राहेल आ गेय पाइब बिल्हाहमी लेंशा कोव्रज कुरशा, अर्को तौ का थिमाक्त। 8 मिनु राहेलमी “गो आं लोक्ब नु परमप्रभु खोदेशो पा जिशा ग्राती” देंमाक्त। मोपतीके मेको आ नें नाप्ताली वोदा बाक्त।

9 मिनु लेआमी “लेंशा आल मथीनुड” दे मिम्शा, याकूब कली आ गेय पाइब जिल्पा गेवा बाक्त। 10 मिनु लेआ आ गेय पाइब जिल्पामी तौ का थिमाक्त। 11 मिनु लेआमी “रिम्शो दुम्त” दे आ नें गाद वोदा बाक्त। 12 मिनु लेआ आ गेय पाइब जिल्पामी अर्को तौ का नु थिमाक्त। 13 मिनु लेआमी “गो ग्येरसाक्यी। मारदे हना मीश मुरपुकीमी आं पर्बम ‘आसीक राइब बाक्ब’ देंनीम” देंमाक्त। मिनु आ तौ कली आशेर नें वोदा बाक्त।

14 मिनु काबु रूबेनमी चेरब रिक्ची ना आल थिपाइक्ब फल थिदा बाक्त। मिनु आ ममा लेआ कली गेवा बाक्त। मिनु राहेलमी लेआ कली “इ तौ आ चाक्शो फल आं कली का निक्शी गेयी” देंमाक्त। 15 मिनु मेकोमी “गे आं वोंइश आ थुं रोइक्चा ला ममाइ, आं तौमी चाक्शो फल यो रोइक्नेवे?” देंमाक्त। मिनु राहेलमी “इ तौ आ फल आ पर्बम मुलाक्दो याकूब इ खिंम बाक्ल” देंमाक्त। 16 मिनु नाक्नाक्दो याकूब रू रे जाक्मेनु, लेआम ग्रुम्थ लशा “गे आं खिंम बाक्चा माल्नीनी। गो आं तौ आ चाक्शो फल इन पर्बम थाप्ताक्ड” देंमाक्त। मिनु मेको नाक्दो याकूब लेआ नु इम्माक्त। 17 मिनु परमप्रभुमी लेआ आ पुंइशो गेवा बाक्त। मिनु याकूब के ४ जना तौ थिशा नोले अर्को तौ का नु थिमाक्त। 18 मिनु लेआमी “परमप्रभुमी आं कली रिम्शो पाप्तु। मारदे हना गो आं गेय पाइब आं वोंइश कली गेता” देंमाक्त। मिनु आ नें इस्साकार वोदा बाक्त। 19 मिनु लेंशा कोव्रज कुरा बाक्त। मिनु ५ जना तौ थिशा यो, अर्को तौ का नु थिमाक्त। 20 मिनु “परमप्रभुमी आं कली रिम्शो पाप्तु। मुल आं वोंइश गो नु बाक्ब। मारदे हना गो ६ जना तौ थीतामी” देंमाक्त। मिनु मेको कली जबूलून नें वोदा बाक्त। 21 मिनु नोले तमी का यो थिमाक्त। मेको कली दीना नें वोदा बाक्त।

22 नोले परमप्रभुमी राहेल कली मिम्ता बाक्त। मिनु आ पुंइशो गेशा, आल थीब दुम्माक्त। १सामुएल १:१९ 23 मिनु कोव्रज कुरशा, तौ का थिमाक्त। मिनु “परमप्रभुमी श्येत रे प्रोंइती” देंमाक्त। यसैया ४:१; लूका १:२५ 24 मोपतीके आ नें योसेफ वोदा बाक्त। मिनु “परमप्रभु यावेमी आं कली अर्को तौ का नु गेयील” दे पुना बाक्त। उत्पत्ती ३५:१७-१९

याकूब शोंप पाइशो दुम्शो

25 मिनु राहेलमी योसेफ थिशा नोले याकूबमी लाबान कली “आं कली लचा गेयीनी। गो आं रागी, आं खिं लचा दाक्नुड। 26 आं मीशपुकी, आं आलपुकी नु आं कली लचा गेकी। गो एको तचा कली इन गेय पाता। गो इन कली दोदेशो रिम्शो गेय पडा, मेको गे तुइक्नीनी” देंमाक्त। उत्पत्ती २९:२०,३०; उत्पत्ती ३१:४३ 27 मिनु लाबानमी “गे आं कली दाक्नेवे हना, इक्का नु बाक्को। मारदे हना गे एक बाक्शा, परमप्रभु यावेमी इ गेय पतीके आं कली आसीक गेती, दे तुइक्नुड। उत्पत्ती ३९:५ 28 गे मार माल्नेवे, मेको इ कली गेनुड” दे मदा बाक्त। 29 मिनु याकूबमी “गो दोदेशो गेय पडा, इन बी ब्यफ गिश दुम्मा, गे तुइक्नीनी। 30 आं जाक्ची ना का निक्शी बाक्तेक्मे, मुल शुश दुम्तेक्म। मिनु गो जाक्डा रे परमप्रभु यावेमी इन कली आसीक गेप्तु। मिनु आं खिं गेना कोव्रनुडा?” दे मदा बाक्त। 31 मिनु लाबानमी “गो मार गेचा माल्नुडा?” देंमेनु, याकूबमी “आं कली मारेइ गेचा ममाल्नीनी। आं देशो पाइतीनी हना, गो लेंशा इन गोठला दुम्नुड। 32 गो मुलाक्ती इन क्यारश भेडा नेल्ल कोव्रथ लाइनुड। मिनु पुत्ले पाडग्रे नेल्ल गुंइनुड। क्यारश भेडा रे यो क्येर नु पुत्ले पाडग्रे गुंइनुड। मेको आं गाल्च दुम्नीम। 33 मोदेशो दुम्मेनु, आं ठीक पतीके तुइक्नीनी। तेको क्यारश आन दातेमी पुत्ले पाडग्रे मपाइशो नु पाठा आन दातेमी क्येर मबाक्मा, मेको आं खुइ पशो, दे तुइक्नीनी” दे मदा बाक्त। 34 मिनु लाबानमी “इ देशो खोदेशो दुम्ल” देंमाक्त। 35 मिनु मेको नाक्ती लाबानमी गोठ नेल्ल रे टाटे पाडग्रे क्यारश बोका नेल्ल नु पुत्ले पाडग्रे भेडा सांड गुंइदा बाक्त। तेक तेको इक्का बुश नु क्येर बाक्मा, मेको योव्रशा, आ तौ आन गुइमी गेवा बाक्त। 36 मिनु आ तौ आन गोठ नु याकूब आ गोठ नाक्त सां गाक्तीक लां डोन वोदा बाक्त। याकूबम चहिं लाबान आ अरु क्यारश भेडा कोव्रडा बाक्त।

37 मिनु याकूबमी ब्वाकीम पिपल, कटुस नु अर्को रवा आन क्येख राशी जिक्शा, बुश रेखा गुंइशा खेवा बाक्त। 38 मिनु मेको कोक्केपुकी क्यारश नु भेडा आन ब्वाक्कु तूतीकेमी वोदा बाक्त। मिनु ब्वाक्कु तूशा डा मिन ब्वांइसीमानु, 39 मेको आ टाटे पाडग्रे कोक्के तशा, टाटे पाडग्रे पाठापुकी जरमेसीमा बाक्त। 40 याकूबमी मेको

पाठा आन कली ग्रुंडशा फ्राशा आंम बगाल डा गोठ सेला बाक्त। आंम क्यारश भेडा लाबान आ गोठम मवोदा बाक्त। 41 मिनु गेना बोल्यो नु रिम्शो बोकापुकी माल्ची ना बाक्मा नु ब्वाक्कु तूथ जाक्मा, मेना मेको कोक्केपुकी तूतीकेमी आन डोंइती वोदा बाक्त। मिनु “कोक्के आन डोंइती ब्वाइसीमल” देंमाक्त। 42 बगाल डा मरिम्शो क्यारश भेडा जाक्तेक्म हना, कोक्के मवोदा बाक्त। मोदेशो पा मरिम्शो क्यारश भेडा लाबान कली, रिम्शो बोल्यो चहिं याकूब के दुम्मा बाक्त। 43 मिनु याकूब शुश शोंप पाइशो दुम्शा, क्यारश भेडा, वाइलीम वाइल, दलओंठपुकी नु गधा शुश पाइशो दुम्माक्त।

31

याकूबम लाबान कली प्रोंइशो

1 मिनु लाबान आ तौपुकीमी “याकूबमी आंइ आफ आ मारेइ मारेइ नेल्ल रोइक्ताक्व। आंइ आफ आ शोंप रे शोंप पाइशो दुम्त” देशो, याकूबमी नेना बाक्त। उत्पत्ती ३०:३५ 2 मिनु याकूबमी “लाबानम आं कली मदाक्ब दुम्त” दे तुइक्ता बाक्त। 3 मिनु परमप्रभु यावेमी याकूब कली “इ आफ आ रागी इ मुर आन बाक्तीक लेशशा लावो। गो गे नु बाक्नुड” देंमाक्त। उत्पत्ती २८:१५ 4 मिनु याकूबमी राहेल नु लेआ आस कली गोठीम ब्रेत्तीम्सी बाक्त। 5 मिनु मेको आस कली “इस आफोम डोंइती आं कली दाक्शो खोदेशो पा मुल मदाक्ब, दे तुइक्ताक्ड। आं आफ आ परमप्रभु गो नु बाक्शो बाक्त। 6 गो इस आफ कली दोदेशो पा आं बोल नेल्लेमी गेय पडा, मेको गे निक्शीम तुइक्नीसी। 7 इस आफोमी आं कली ठगेप्टु। आं गेय डा तचा माल्शो थोत्रक १० खेयप फाइक्तु। तन्न परमप्रभुमी मेको कली आं कली श्येत गेचा, मगेवा बाक्त। 8 इस आफोमी ‘पुत्ले पाइग्रे नेल्ल इ के दुम्ल’ देंमेनु, क्यारश भेडा नेल्लेमी पुत्ले पाइग्रे गिक्तेक्म। मेकोमी ‘रेखा पाइशो नेल्ल इ के दुम्ल’ देंमेनु, नेल्ल रेखा पाइशो गिक्तेक्म। 9 मोदेशो पा परमप्रभुमी इस आफ आ क्यारश भेडा बी ब्यफ रोइशशा, आं कली गेती।

10 क्यारश भेडा आन ब्वाइसीची ना गो डोमुमी बोका नेल्ल पुत्ले पाइग्रे, रेखा पाइशो नु खाल्शो रड डा तातामी। 11 मिनु परमप्रभु आ स्वर्ग डा गेय पाइबमी आं कली डोमुमी ‘याकूब’ दे ब्रेत्ताक्यी। ‘मिनु गो बाक्ती’ दे लोत्र लेत्ताक्ड। 12 मिनु मेकोमी आं कली ‘कोव्रडो, ब्वाइसीब बोका नेल्ल पुत्ले पाइग्रे, रेखा पाइशो नु खाल्शो रड डा बाक्नीम। मारदे हना लाबानमी इ कली मार पशो बाक्बा, गो नेल्ल ताता। 13 गो परमप्रभु नड। गो इ कली बेथेलम गुम्ता। गे मेकेर फुल्लु का कली तेल लुक्ताक्वी। मिनु आं कली कसम जाप्तीवी। मुल बोक्को, मेको रागी रे गूडो। इ जरमेशो रागी लेतो’ दे माइक्ती” दे आ मीश निक्शी आस कली देंमाक्त। उत्पत्ती २८:१८-२२ 14 मिनु राहेल नु लेआमी “आंस आफ आ खिंमी आस थेरशो रू नु शोंप बाक्मा डा? 15 आंस कली अर्को रागी डा मुर खोदेशो सेल्शा, लेयशा ताक्शो नेल्ल जाप्टु। उत्पत्ती २९:१८,२७ 16 परमप्रभुमी आंस आफ रे लाइशो शोंप, आंस कली नु आंस आल के दुम्त। परमप्रभुमी इन कली मार देंबा, मेकोन पने” देंसा बाक्त।

17 मिनु याकूब सुनी कना बोक्शा, आ आलपुकी नु आ मीशपुकी दलओंठ तारी डोइक्पदा बाक्त। 18 मिनु मारेइ मारेइ पदान-अराम रे आ गेय पा सेल्शो बस्तु भाव नेल्ल खुल्शा, आ शोंप लाइशशा, आ आफ इसहाक आ खिं कनान रागी लचा गोवा बाक्त।

19 लाबान आ भेडा आन ऊन खोइक्थ लशो बाक्माक्त। मेना राहेलमी आ आफ आ खिं डा मूर्तिपुकी खुइ पा कुरा बाक्त। न्यायाधीस १७:५; न्यायाधीस १८:१७; १सामुएल १९:१३; २राजा २३:२४; जकरिया १०:२ 20 याकूबमी अरामी लाबान कली “गो लशो” दे मदेथु, गाक्मा बाक्त। 21 मोदेशो पा याकूब आ मारेइ मारेइ कुरशा, प्रोक्माक्त। मिनु सुनी बोक्शा, युफ्रेटीस खोला शोक्समा बाक्त। मिनु गिलाद डांडा गे लमा बाक्त।

22 मिनु लमा आ नाक्त सां नोले मुरुमी “याकूब प्रोक्त” दे लाबान कली शेंदमे बाक्त। 23 मिनु लाबानमी आ लोक्ब आन कली ब्रेशशा, मेकोपुकी नु ७ नाक्ती सम्म याकूब कली माल्शा, गिलाद डांडाम गुमा बाक्त। उत्पत्ती ३१:४७ 24 मिनु परमप्रभुमी अरामी लाबान कली डोमुमी “गे होस पावो। याकूब कली मारेइ मपावो” देंमाक्त।

25 मिनु लाबानमी याकूब कली गुमानु, आ ताम्बु गिलाद डा पहाडम कीडा बाक्त। याकूबम चहिं आ ताम्बु आइक्था डा डांडाम कीशा, वोदा बाक्त। 26 मिनु लाबानमी याकूब कली “गे मार पवी? मारदे आं मतुइक्थु प्रोक्नी? आं तमीपुकी लडाइमी ग्याइशो खोदेशो पा लाइक्तीवी। 27 गे मारदे खुइशशा गाक्नी? मारदे आं कली मारेइ मदेनी? गो इन कली ग्येरशा, कुम्सो पशा, खैजडी नु बीना ताप्शा, लां सम्म चौवदीशा सोइक्तन्नी वा। 28 गे आं कली आं चचपुकी नु आं तमीपुकी नु पुक्पु पाइक्मुचा मगेवी। मरिम्शो पाइब बाक्ते। 29 इ कली श्येत गेचा आं गुइमी बाक्ब।

तन्न सिनाक्दो इ आफ आ परमप्रभुमी आं कली ‘गे होस पावो। याकूब कली मारेइ मरिम्शो मपावो’ दे लोव पाप्तु। 30 मिनु गे इ आफ गुम्चा शुश दाक्ताक्वी हना यो, मारदे आं खिं डा मूर्ति खुइ पा लदी?” दे हिल्लो पवा बाक्त। 31 मिनु याकूबमी लाबान कली “गे इन तमी निक्शी आं गुइ रे रोइक्नीनी, दे हिंती। उत्पत्ती ३१:१९ 32 इन मूर्तिपुकी चहिं सुका आ ताम्बुम थिल्लीनी, मेको मब्रोइल। इन लोकब आन डोंइती आं बाक्तीकेम इन के मार बाक्मे, कोव्रशा लतीन” देंमाक्त। मारदे हना याकूबमी राहेलम मेको मूर्तिपुकी खुइ पशो, दे मतुइक्ता बाक्त।

33 मिनु लाबानमी याकूब आ ताम्बु, लेआ आ ताम्बु, गेय पाइब निक्शी आस ताम्बु ओव्रशा, माल्शा मथिदा बाक्त। लेआ आ ताम्बु रे गूशा, राहेल आ ताम्बु ओव्रमाक्त। 34 मिनु राहेलम मेको खिं डा मूर्ति आन कली दलओंठ आ तारी डा नित्तीकेमी खुइश्शा, मेको आ तारी निस्से बाक्त। मिनु लाबानमी ताम्बु नेल्लेमी माल्शा मथिदा बाक्त। 35 मिनु राहेलमी “आं प्रभु, मगाइक्तीने, गो इन डोंइती बोक्ने मचाप्नुड, मारदे हना गो मथिचा दुम्ती” देंमाक्त। मोपतीके माल्शा मथिदा बाक्त। लेवी १५:१९-२०

36 मिनु याकूब चुरशा, लाबान कली “मार दूली पडा। आं कली मार मरिम्शो पशो आ पर्बम खेदा पनी? 37 आं मारेइ मारेइम माल्तीनी, इन थोव्रकी मार थिन्नी? इन लोकब नु आं लोकब आन डोंइती देनीन। एकोपुकीमी इस दातेमी निसाफ पामेक्ल। 38 गो गे नु २० बर्स बाक्ती। इन क्यारश भेडाम पाठा मशाम्देम। इन बगाल डा बोका का यो मब्वड। 39 जन्तुमी साइश्शो यो इन कली मचाक्गु। गो आंमा थाप्ताक्ड। नाक्दो, नाक्ती जन्तुमी साइक्तेक्म हना यो, गे आं कली थाप्पाइक्तीनी। प्रस्थान २२:११-१२ 40 नाक्ती हुप्शोम बाक्ती, नाक्दो ग्यू बेक्शा, यो मइप्थु, नां सोंइताक्ड। 41 मोदेशो पा गो इन खिंमी २० बर्स गेय पाता। इन तमी निक्शी आस पर्बम गो १४ बर्स गेय पाता। ६ बर्स इन क्यारश भेडा आन पर्बम गेय पाता। गे आं गेय डा तचा माल्शो थोव्रक १० खेयप फाइक्तीनी। उत्पत्ती २९:२०,३०; उत्पत्ती ३०:३१-३६ 42 आं आफ आ परमप्रभु, अब्राहाम आ परमप्रभु नु इसहाक आ मान पा हिंशो परमप्रभु गो नु मबाक्शो हना, गे आं कली मुल श्येतथ सोइक्तीनी वा। परमप्रभुमी आं श्येत नु आं गेय तशा, सिनाक्दो इन कली हुइक्ताक्व” देंमाक्त। उत्पत्ती ३१:२४,५१

43 मिनु लाबानमी याकूब कली “एको तमी निक्शी आं तमी बाक्नीस। एको आल आं आल बाक्नीम। एको क्यारश भेडा आं के बाक्नीम। इ तशो नेल्ल आं के बाक्ब। आं तमी आस कली मुलाक्ती गो मार पने चाप्नुडा डा? एको आस तौ आन कली गो मार पने चाप्नुडा डा? 44 मोपतीके गे नु गो कबल पस, इस डोंइती सांकछी बाक्मल” दे मदा बाक्त। 45 मिनु याकूबम फुल्लु का चाक्शा राप्पाइश्शा, 46 आ मुर आन कली यो “फुल्लु खुप्तीन” देंमाक्त। मिनु मेकोपुकीमी यो फुल्लु खुप्तमे बाक्त। मिनु मेकेर जामे बाक्त। 47 मिनु लाबानमी मेको कली येगार-सहादुता, दे नें वोदा बाक्त। याकूबम चहिं मेको कली गलेद, दे नें वोदा बाक्त। उत्पत्ती ३१:२३ 48 मिनु लाबानमी “एको फुल्लु खुप्तीके मुलाक्ती इस पशो कबल आ सांकछी बाक्ब” देंमाक्त। मोपतीके मेको कली गलेद देंनीम। गलेद आ अर्थ सांकछी डा फुल्लु खुप्तीके बाक्ब। यहोसु २४:२७ 49 मिनु मेको राप्पाइश्शो फुल्लु कली मिस्पा नें वोदा बाक्त। मारदे हना लाबानमी “परमप्रभु यावे गे नु गो इस ब्राची ना इस कली कोव्रब बाक्ल। न्यायाधीस ११:११ 50 गे आं तमी आस कली श्येत गेप्तीवी हना, अर्को मीश चाक्तीवी हना, गो इस दातेमी मुर सांकछी मबाक्तेक्म हना यो, परमप्रभु इस सांकछी बाक्ब” देंमाक्त।

51 मिनु लाबानमी लेंशा, याकूब कली “कोव्रडो, एको खुप्शो फुल्लु नु मेको लाइश्शो राप्पाइश्शो फुल्लु गो इस दातेमी बाक्ब। 52 एको खुप्शो फुल्लु गो रे इ बाक्तीके, गे रे आं बाक्तीके श्येत गेथ मलमल। 53 अब्राहाम आ परमप्रभु, नाहोर आ परमप्रभु नु आन किकी पिपी आन परमप्रभुम इस दातेमी निसाफ पवल” देंमाक्त। मिनु याकूबमी इसहाक आ मान पा हिंशो परमप्रभु आ नें थिशा, कसम जवा बाक्त। 54 मिनु मेको डांडामी याकूबमी चढ़ेतीके चढ़ेवा बाक्त। मिनु आ खिं डा मुर आन कली “शोब्ले जने” दे गेवा बाक्त। मिनु जशा, मेको नाक्दो मेक उइ बाक्मा बाक्त। उत्पत्ती ३१:४२ 55 मिनु लाबान सुनी कना बोक्शा, आ तमी नु आ चच आन कली पुक्पु पाइश्शा, आसीक गेशा, आ खिं लेम्माक्त।

32

याकूबम एसाव कली गुम्चा चिक्शो

1 मिनु याकूब लांमी लना लन बाक्मेनु, परमप्रभु आ स्वर्ग डा गेय पाइबपुकी याकूब कली गुम्थ जाक्मा बाक्त। 2 मिनु याकूबमी मेको आन कली तशा “एकेर परमप्रभु आ लडाइ पाइब आन बाक्तीके बाक्ब” देंमाक्त। मोपतीके मेको

ग्रुम्तीक रागी आ नें महा-नाइम वोदा बाक्त। महा-नाइम आ अर्थ चहिं “बाक्तीक निक्शी” बाक्ब। 3 मिनु याकूबमी आ लोकब एसाव ग्रुम्चा कली आ डोंइती मुरपुकी एदोम डा सेइर रागी सोइक्ता बाक्त। उत्पत्ती ३६:८ 4 मेको आन कली “गे आं प्रभु एसाव कली ‘इन गेय पाइब याकूबमी इन कली लोत्र सोइक्ताक्व। गो मुल सम्म लाबान नु आ रागीमी अर्को रागी डा मुर दुम्शा बाक्ती। 5 गो नु शुश ब्यफ, गधा, क्यारश भेडा, वाइलीम वाइल बाक्नीम। गो आं प्रभु, इन डोंइती शिशी तडल, दे मुर आन कली सोइक्ताक्ड’ देंत, देंचा माल्नीनी” दे अरेशा सोइक्तीमी बाक्त।

6 मिनु आ सोइश्शो मुरपुकी लेशशा जाक्शा, याकूब कली “गोपुकी इन लोकब एसाव आ बाक्तीक जाक्दीत्तक। मेकोमी ४ सहे मुर नु कुशा, इन कली ग्रुम्थ जाक्ब” दे शेंदमे बाक्त। 7 मिनु याकूब शुश हिंशा, सुर्ता पवा बाक्त। मेको नु बाक्ब मुर क्यारश भेडा, बी ब्यफ नु दलओंठ आन कली हुल निक्शी पा योक्गा बाक्त। 8 मेकोमी “एसावमी डोंइती डा हुल साइक्तु हना, अर्को प्रोक्ने चाप्नीम” दे मिम्ता बाक्त।

9 मिनु याकूबम “आं बाजे अब्राहाम आ परमप्रभु, आं आफ इसहाक आ परमप्रभु, आं कली लोत्र पाइब परमप्रभु यावे, गे आं कली ‘इ खिं डा मुर आन बाक्तीक, इ रागी लेतो। गो इ कली रिम्शो पाइनुड’ दे लोत्र पाइतीनी। उत्पत्ती ३१:३, १३ 10 गो, इन गेय पाइब आं कली पशो गेना हना यो दाक्तीक नु इन रिम्शो पचा मप्रोंइतीके मशिरनुड। गो कोक्के का ला कुरशा, यर्दन खोला शोक्शा लशो नड। मुल आं के हुल निक्शी दुम्शो बाक्नीम। २सामुएल ७:१८ 11 गो आं कली आं लोकब एसाव आ गुइ रे प्रोनीने। मारदे हना आं कली, आं मीश आन कली नु आल नेल्ल आन कली साइक्ब, दे हिंती। 12 गे आं कली ‘गो इ कली थमा पा रिम्शो पाइनुड। इ चच युइ आन कली समुन्द्र डा बाल्वा खोदेशो पा, हिकने मचाप्चा डा सेल्लुड’ देंतीनी” दे याकूबमी परमप्रभु कली लोत्र पवा बाक्त। उत्पत्ती २८:१३-१४

13 मिनु मेको नाक्दो मेकेर बाक्शा, आ मारेइ मारेइ रे एसाव कली कोसेली योव्रडा बाक्त। 14 मेकोमी सहे निक्शी ओटा क्यारश, २० ओटा बोका, सहे निक्शी ओटा भेडा नु २० ओटा सांड, 15 मिनु ३० ओटा दूध तूब चाइक्ब पाइश्शो दलओंठ, ४० ओटा बी नु १० ओटा ब्यफ, २० ओटा गधैनी नु १० ओटा गधा एसाव कली योव्रशा, ठीक पवा बाक्त। 16 मिनु आ गेय पाइब आन कली का का पा हुल हुल पा गेवा बाक्त। आ गेय पाइब आन कली “गे आं डोंइती हुल हुल पना पन गाक्कीन। हुल नेल्ल कालेमी मखुलीन। का अर्को क्येडा डोन खुल्चा माल्नीनी” दे माइक्मी बाक्त। 17 मिनु नेल्ल क्येडा ठेयब अरेतीके लोत्र “आं लोकब एसाव इन कली ग्रुम्थ जाक्त हना, मेकोमी इन कली ‘गे सुका आ मुर ननी? ते लाइनीनी? इन डोंइती गाक्ब बगाल सु के नमी?’ दे हिल्लो पाप्तु हना, 18 गेमी ‘एको इन गेय पाइब याकूब के नम। आ प्रभु एसाव कली कोसेली बाक्ब। आं यो खोइश्शा पिना पिन बाक्ब’ देंचा माल्नीनी” दे गेय पाइब आन कली माइक्मी बाक्त। 19 मोदेशो पा डोंइती गाक्ब, नोले गाक्ब नु नेल्ल क्येडा नोले गाक्ब नेल्ल आन कली अरेमी बाक्त। मिनु “मोदेशो पा एसाव नु ग्रुम्ची ना लोत्र पचा माल्नीनी। 20 मिनु ‘इन गेय पाइब आंइ नोले पिना पिन बाक्ब’ देंचा मप्रेंदीन” दे माइक्मी बाक्त। मारदे हना याकूबमी “गो आं डोंइती सोइश्शो कोसेलीमी गो मेको कली लेम्नुड। मिनु नोले मेको कली ग्रुम्नुड, आं कली ब्राइबा को” दे मिम्ता बाक्त। 21 मिनु आ कोसेली आ डोंइती लदमे बाक्त। आं चहिं मेको नाक्दो आ मुर बाक्तीकेमी बाक्माक्त।

याकूब यब्बोक खोलाम बाक्शो

22 मिनु मेको नाक्दो बोक्शा, आ मीश निक्शी, आ गेय पाइब मीश निक्शी नु आ ११ जना तौ आन कली लाइश्शा, यब्बोक खोला शोक्पाइक्मी बाक्त। 23 मिनु मेको आन कली शोक्पाइश्शा, आ मारेइ मारेइ यो सोइक्ता बाक्त। 24 मिनु आइक्ची हांबुम याकूब का ला बाक्माक्त। मिनु नां रिक्शा, नां मसोत्रम सम्म मुर का नु राम्शी पवा बाक्त। होसे १२:४-५ 25 मेको मुरुम याकूब नु राम्शी पा आं ब्रुचशो तशा, याकूब आ फिला डा बोंइसे थिवा बाक्त। मिनु आ फिला डा बोंइसे याक्ता बाक्त। 26 मिनु मेको मुरुमी “नां दाप्चावानु, मुल लचा गेयी” देंमाक्त। मिनु याकूबमी “आं कली आसीक मगेवी सम्म मप्रोंइनन” दे मदा बाक्त मती १५:२२-२८ 27 मिनु मेकोम “इ नें मार में?” दे हिल्लो पवानु, याकूबमी “याकूब” देंमाक्त। 28 मिनु मेकोमी “मुल डा मेरे इ नें याकूब ममाइ, इ नें इस्राएल देंचा माल्नीम। मारदे हना गे परमप्रभु नु राम्शी पा ग्राते, मुर नु राम्शी पा यो ग्राते” देंमाक्त। उत्पत्ती ३५:१०; येरमीया २०:७ 29 मिनु याकूबम “इन नें मार में?” दे हिल्लो पवा बाक्त। मिनु मेकोमी “आं नें मारदे माल्दे?” देंशा, मेको कली आसीक गेवा बाक्त। न्यायाधीस १३:१७-१८ 30 मिनु याकूबमी “गो परमप्रभु आ कुल तशा यो मबेक्ड” दे मेको बाक्तीके आ नें पेनीएल वोदा बाक्त। प्रस्थान ३३:२० 31 मिनु नां दाप्पेनु, याकूब पेनुएल रे खोड चेड पा गाक्माक्त। 32 मोपतीके

इसाएलीपुकीमी मुल सम्म मेको बोंइसे ग्याइक्ब नारी नु मेकेर डा श्ये मब्वाइनीमी। मारदे हना मेकोमी याकूब आ फिला डा बोंइसे याक्ता बाक्त।

33

याकूब नु एसाव गुम्शो

1 मिनू याकूबम लां गे कोव्रडानु, एसाव नु ४ सहे मुर पिन पिन पशो तवा बाक्त। मिनू आ आलपुकी लेआ, राहेल नु आस गेय पाइब मीश निक्शी नु गाकपाइक्मी बाक्त। उत्पत्ती ३२:७ 2 मेको गेय पाइब मीश नु आस आल आन कली नेल्ल क्येडा डोंइती गाकपदा बाक्त। मिनू मेको आन नोले लेआ नु आ आलपुकी, नेल्ल क्येडा नोले राहेल नु योसेफ गाकपदा बाक्त। 3 मिनू मेको नेल्ल आन डोंइती आंमा गाक्माक्त। मिनू मेको आ लोकब गुम्चा क्येडा डोंइती ७ खेयप खुम्की पा बाम्माक्त।

4 मिनू एसावमी मेको कली तशा, दोरशा गुम्थ जाक्माक्त। मिनू आ लोकब कली मुप्शा पुक्पु पदा बाक्त। मिनू निम्फा डाक्सा बाक्त। 5 मिनू एसावमी कोव्रशा, आलपुकी नु मीश मुर आन कली तशा “गे नु बाक्ब सु नमी?” दे हिल्लो पवा बाक्त। मिनू याकूबमी “परमप्रभुमी इन गेय पाइब कली शिशी पशा, गेशो आलपुकी नम” दे मदा बाक्त। भजन संग्रह १२७:३ 6 मिनू नोले मेको गेय पाइब मीश निक्शी नु आस आलपुकी जाक्शा, एसाव आ डोंइती खुम्की पा बाम्मा बाक्त। 7 मिनू लेआ नु आ आलपुकी जाक्शा, खुम्की पा बाम्मा बाक्त। मिनू नोले योसेफ नु राहेल जाक्शा, खुम्की पा बाप्सा बाक्त।

8 मिनू एसावमी “इ डोंइती गाक्शो मार मार मारदे सोइक्ती?” दे हिल्लो पवा बाक्त। मिनू “आं प्रभु, इन डोंइती शिशी तडल, दे सोइक्ताक्ड” दे लोव्र लेत्ता बाक्त। उत्पत्ती ३२:१४-२१ 9 मिनू एसावमी “आं लोकब, आं कली मारेइ मारेइ गाप्शो बाक्ब। इ कली वोंइसो” देंमाक्त। 10 मिनू याकूबमी “मदुम्ब। गो इन डोंइती शिशी ताता हना, आं कोसेली ताक्कीन। मारदे हना गो इन कुल तशा, परमप्रभु आ कुल तशो खोदेंशो पा ग्येरसाक्यी। गे आं कली दाक्शा ब्राइतीनी। उत्पत्ती ३२:३१ 11 इन कली गेशो आसीक लतीन। मारदे हना परमप्रभुमी आं कली शुश शिशी पाप्तु। आं के मारेइ मारेइ यो गाप्शो बाक्ब” दे एसाव कली मदा बाक्त। मिनू याकूबमी शुश लोव्र पा एसावमी मेको नेल्ल ताक्गा बाक्त।

12 मिनू एसावमी “लो, पिन। गो गे नु लाइनुड” देंमाक्त। 13 मिनू याकूबमी “आं प्रभु, आं आलपुकी आइक्च बाक्नीम। क्यारश भेडा, बी ब्यफ आन चाइक्ब बाक्नीम। मेको आन कली नाक्ती का ला शुश गाकपाइश्शा, श्येत गेता हना, नेल्ल बेक्नीम। 14 आं प्रभु, गे इन गेय पाइब क्येडा डोंइती गाक्कीन। गो बी ब्यफ नु आलपुकी चाप्चा डा पा गाक्नीकी। नोले आं प्रभु आ बाक्तीक सेइर सहर जाक्नीक” देंमाक्त।

15 मिनू एसावमी “आं मुर का निक्शी गे नु गाक्मल” दे मदा बाक्त। मिनू याकूबम “ममाल्नुड। मारदे आं प्रभुम आं कली मोदेंशो रिम्शो पचा मिम्बा?” देंमाक्त। 16 मिनू मेको नाक्ती एसाव सेइर गे लेम्माक्त। 17 याकूब चहिं सुक्कोथ गे लमाक्त। मेकेर खिं का सेल्शा, आ बी ब्यफ आन कली गोठपुकी सेला बाक्त। मोपतीके आ बाक्तीके आं नें सुक्कोथ वोदा बाक्त। 18 मोपा याकूब पदान-अराम रागी रे मारेइ मदुम्थु रिम्शो पा लेशशा, कनान रागी डा शेकेम सहर जाक्दीम्माक्त। सहर आ नेक्था आ बाक्तीक सेला बाक्त। 19 मिनू आ ताम्बु कीतीके रू हमोर आ तौ आन दाते शेकेम आ आफ रे सहे का केसीता थाप्शा, ग्यबा बाक्त। केसीता मेकेर डा क्येट बाक्त। सुन के बाक्बा कों, चांदी के बाक्बा कों, गिश हेल्शो बाक्ब मतुंडसीब।यहोसु २४:३२ 20 मिनू मेकेर चढेतीक का सेला बाक्त। मेको आ नें “एल-एलोहे-इसाएल” दे वोदा बाक्त। मेको आ अर्थ परमप्रभु, इसाएल आ परमप्रभु बाक्ब। उत्पत्ती १२:७-८

34

दीना शेकेम सहर कोव्रथ लशो

1 मिनू लेआ आ तमी, दीना मेको रागी डा मीश आल आन कली गुम्थ लमाक्त। 2 हिव्वी डा हमोर आ तौ शेकेम, मेको रागी डा पिप आ तौमी दीना कली तशा, ग्याइश्शा मेको नु इप्शा, बिथोलो पवा बाक्त। न्यायाधीस ९:२८ 3 मिनू याकूब आ तमी दीना कली शुश दाक्शा, रिम्शो लोव्र पवा बाक्त। 4 मिनू शेकेममी आ आफ कली “मेको मीश आल आं कली चाक्कीन” दे मदा बाक्त। 5 मिनू याकूबमी “शेकेममी इन तमी दीना कली बिथोलो पाप्तु” देंशो नेना बाक्त। आ तौपुकी चहिं रू डा गोठीम बाक्मा बाक्त। याकूब आ तौपुकी मजाक्मा सम्म सिक्सी पा बाक्माक्त। 6 मिनू शेकेम आ आफ हमोर याकूब नु लोव्र पचा कली जाक्माक्त। 7 मिनू मेको नेंशा, याकूब आ तौपुकी यो रू रे जाक्मा बाक्त।

आन थुं मनुथु, शुश चुरमा बाक्त। मारदे हना शेकेमम इस्राएल आ तमी नु इप्शा, बिथोलो पशो बाक्माक्त। मो पचा मडुम्शो बाक्माक्त। 8 मिनु हमोरमी इस्राएल कली “आं तौ शेकेममी इन तमी कली शुश दाक्ब, चाक्चा गेने। 9 मिनु आंइ तमीपुकी इन तौपुकीमी चाक्चमेक्ल। इन तमीपुकी आंइ कली चाक्चा गेने। 10 गे गोपुकी नु बाक्कीन। आंइ रागी इन कली ग्याप्चा लेयचा, बाक्चा कली गेनीकी” देमाक्त। 11 मिनु शेकेममी मीश आल आ आफ याकूब नु आ लोकब आन कली “इन डोंइती शिशी तडल। गे मार देनीनी इन कली गेनुड। 12 मेको मीश आल चाक्चा गेतीनी हना, गो इन माल्शो मारेइ मारेइ गेनुड” देमाक्त। प्रस्थान २२:१५ 13 याकूब आ तौपुकीमी आन समी कली बिथोलो पाइब, शेकेम नु आ आफ हमोर आस कली जोल पा 14 “गो आंइ समी खोइक्तीक चिनु मखोइश्शो मुर आन कली गेने मचाप्नीकी। मेको आंइ कली मशिरब। 15 गे आंइ खोदेशो पा वोंइश आल वोंइश मुर नेल्लेमी खोइक्तीक चिनु खोइक्तीनी हना, उत्पत्ती १७:१०-१४ 16 आंइ तमीपुकी इन कली लाइक्चा गेनीकी। मिनु इन तमीपुकी गो चाक्नीकी। मिनु गो गेपुकी नु बाक्शा, मुर का खोदेशो दुम्नीकी। 17 गेपुकी आंइ देशो मबिस्साक्नी हना, आंइ तमी लाइश्शा, गाक्नीकी” दे लोत्र पामे बाक्त। 18 मिनु हमोर नु आ तौ शेकेम मेको आस देशो नेंशा, ग्येरससा बाक्त। 19 मिनु मेको ठिटा मेको पचा बिस्से बाक्त। मारदे हना याकूब आ तमी कली शुश दाक्ता बाक्त। मेको आ आफ आ खिं डा नेल्ल क्येडा मान ताइब बाक्माक्त।

लेआ आ तौ निक्शी गाइश्शो

20 मिनु हमोर नु आ तौ शेकेम आस सहर डा लाप्चो ओव्रशा, मेको निक्शीमी मुर आन कली 21 “एको मुरपुकी गो नु दुशा बाक्चा दाक्नीम। मोपतीके एक बाक्चा गेने। मारदे हना इं रागी ठेयब बाक्ब। मेको आन कली यो गारब। गोपुकी मेको आन तमी चाक्च। इं तमी मेको आन कली गेय। 22 गो वोंइश मुर नेल्ल खोइक्तीक चिनु खोइक्साक्च हना ला, मेकोपुकी गो नु बाक्ने बिन्नीम। 23 मार, मेको आन बी ब्यफ, क्यारश भेडा नु आन शोंप नेल्ल इं के मडुम्बा डा? गो मेको आन लोत्र बिश्शा हना, इं दातेमी बाक्नीम” देसा बाक्त। 24 मिनु सहर डा मुर नेल्ल हमोर नु शेकेम आस लोत्र टिशा, खोइक्तीक चिनु खोइक्चा गेमे बाक्त। सहर नेल्ल डा वोंइश मुरुम मोदेशो पामे बाक्त।

25 मिनु नाक्त सां नोले आन खोइक्तीके नेल्ल क्येडा खाइक्मानु, याकूब आ तौ निक्शी, दीना आ लोकब, सिमियोन नु लेवी, आस तरवार लाइश्शा, सुइ आन मतुइक्थु, सहर ओव्रशा, सहर डा वोंइश मुर नेल्ल सदसे बाक्त। उत्पत्ती ४९:५-७ 26 मिनु मेको निक्शीमी हमोर नु शेकेम आस कली यो साइश्शा, दीना शेकेम आ खिं रे गुंइशा, लदसे बाक्त। 27 मिनु याकूब आ अर्को तौपुकी यो सहर ओव्रमा बाक्त। मेकोपुकीमी सहर डा मारेइ मारेइ लदमे बाक्त। मारदे हना शेकेममी आन समी कली बिथोलो पवा बाक्त। 28 मिनु आन क्यारश भेडा, बी ब्यफ, गधा नु मार मार सहर नु आन रूमी बाक्मा, मेको नेल्ल लदमे बाक्त। 29 आन शोंप नेल्ल, आन आलपुकी, आन मीश नु आन खिं डा मारेइ मारेइ नेल्ल लदमे बाक्त। 30 मिनु याकूबमी सिमियोन नु लेवी आस कली “गे आं कली श्येत गेतीसी। मुल एको रागी डा मुरुमी आं कली मदाक्नीम। कनानी नु परिज्जी आन दातेम आं कली मरिम्शो रिना पाइश्शो खोदेशो सेल्लतीसी। गोपुकी नु शुश मुर मबाक्नीम। इं कली लडाइ तोशा, इं खिं डा मुर नेल्ल साइक्नीम” दे मेको आस कली हुइक्तीम्सी बाक्त। 31 मिनु मेको निक्शीमी “मार, मेकोमी आंस समी कली तेल्लेम खोदेशो सेल्चा दुम्बा?” देसा बाक्त।

35

याकूबमी आसीक तशो

1 मिनु परमप्रभुमी याकूब कली “बोक्शा सासो। बेथेल सहर लावो। मिनु मेकेर बाक्को। इ लोकब एसाव रे प्रोक्डेनु, इ डोंइती गूशो परमप्रभु, आं कली, चढेतीक का सेलो” दे मदा बाक्त। उत्पत्ती २८:११-२२; उत्पत्ती ३१:१३ 2 मिनु याकूब आ खिं डा मुर नु आ बाक्शो मुर नेल्ल आन कली “इन गुइमी बाक्शो मूर्ति ताइक्तीन। इन फेक्शो वा पुइश्शा, चिक्शा, अर्को फेक्सीन। उत्पत्ती ३१:१९; ब्यवस्था २७:१५; यहोसु २४:२३ 3 मिनु बोक्च, बेथेल लय। गो मेकेर जाक्दीश्शा, परमप्रभु कली चढेतीक का सेल्लनुड। गो श्येत जडानु, आं पुंइशो गेपुतु। गो ते गाक्ती हना यो, मेको गो नु बाक्त” दे माइक्मी बाक्त। 4 मिनु मेकोपुकीमी याकूब कली आन मूर्ति नु आन पांइशो मारवाडी नेल्ल गेमे बाक्त। याकूबमी मेको नेल्ल शेकेम आ नेक्था बाक्शो रवा आगाम थिमा बाक्त। यहोसु २४:२६; न्यायाधीस ९:६ 5 मिनु मेकोपुकी लचा गोत्रमे बाक्त। परमप्रभुमी एर ओंथ डा सहर डा मुर आन कली हिंब सेल्मी बाक्त। मोपतीके मेकोपुकीमी मेको आन कली खेदा मपामे बाक्त। प्रस्थान २३:२७; यहोसु १०:१०

6 मिनू लशा, याकूब नु मेको नु बाकब मुर नेल्ल कनान रागी डा लूज सहर जाक्दीम्मा बाक्त। लूज सहर कली बेथेल नें वोइशो बाक्माक्त। 7 याकूबम मेकेर चढ़ेतीक का सेला बाक्त। मेको आ नें एल-बेथेल वोदा बाक्त। मारदे हना आ लोकब एसाव रे प्रोकमेनु, मेकेर परमप्रभुम तपांडसीशो बाक्माक्त। 8 मेना रेबेका कली कोव्रब देबोरा बेक्माक्त। मिनू मेको कली बेथेल आ नेक्था, रवा आगामी थिम्मे बाक्त। मेको कली याकूबम अल्लोन-बकुथ नें वोदा बाक्त। मेको आ अर्थ डाक्का डा रवा बाक्ब। उत्पत्ती २४:५९

परमप्रभुमी याकूब कली गुम्शो

9 पदान-अराम रे लेम्मेनु, परमप्रभुमी याकूब कली लेंशा गुम्शा, मेको कली आसीक गेशा 10 “इ नें याकूब बाक्ब। तन्न मुल रे याकूब मदेंचा, इ नें इस्राएल दुम्चा माल्ब” देंमाक्त। मोपतीके इस्राएल नें वोइशो बाक्माक्त। उत्पत्ती ३२:२९ 11 मिनू परमप्रभुमी मेको कली “गो नेल्ल क्येडा सक्ति पाइशो परमप्रभु नड। गे सोशा बोशा, शुश दुमीने। गे रे रागी का डा शुश मुर नु रागी रागी डा मुर यो दुम्नीम। गे रे पिपुकी दुम्नीमी। उत्पत्ती १७:१; उत्पत्ती २८:३-४; उत्पत्ती १७:६ 12 अब्राहाम नु इसहाक कली गेशो रागी गो इ कली नु इ चच युइ आन कली गेनुड” देंमाक्त। 13 मिनू परमप्रभुमी लोव्र पने थुम्शा, मेको आ बाक्तीक रे लमाक्त। 14 मिनू याकूबमी परमप्रभु नु लोव्र पशो मिम्चा कली मेकेर फुल्लु का राप्पदा बाक्त। मिनू मेको आ तारी तूचा थोव्रक चढ़ेतीक नु तेल लुक्ता बाक्त। उत्पत्ती २८:१८-१९ 15 याकूबमी परमप्रभु नु लोव्र पतीक सहर कली बेथेल नें वोदा बाक्त।

बेन्यामीन जरमेसेनु राहेल बेक्शो

16 मिनू बेथेल रे एफ्राथ जाक्दीत्चा कली गाक्शो बाक्मा बाक्त। मेना राहेल आल थिचा चिक्शो बाक्माक्त। 17 सुत्केरी रोइम शुश श्येत जवानु, आ वारच पाइब मीश मुरुमी “महिनो, गे अर्को तौ का नु थीनेवे” दे लोव्र पवा बाक्त। उत्पत्ती ३०:२४ 18 मिनू मेको मबेक्थु, आ सोक्त लची ना आ तौ आ नें बेन-ओनी वोदा बाक्त। आ आफोम चहिं आ नें बेन्यामीन वोदा बाक्त। मेको आ अर्थ आं श्येत डा तौ बाक्ब। 19 मिनू राहेल बेक्माक्त। मिनू एफ्राथ लतीक लांमी थिम्मे बाक्त। एफ्राथ बेथलेहेम सहरम बाक्ब। उत्पत्ती ४८:७; १सामुएल १०:२; येरमीया ३१:१५; मत्ती २:१८ 20 मिनू याकूबमी आ थिम्तीक तारी फुल्लु के थाम का राप्पदा बाक्त। मुल सम्म राहेल आ थिम्तीके तारी मेको ठेयब फुल्लु के थाम बाक्ब।

इस्राएल आ तौपुकी

21 मिनू इस्राएल लना लन, आ ताम्बु एदेर माइशो लाइशो खिं आ नेक्था कीडा बाक्त। 22 मिनू इस्राएल मेको रागीमी बाक्मेनु, आ तौ रूबेन आ आफ आ मीश बिल्हाह नु इम्माक्त। मिनू इस्राएलमी मेको नेना बाक्त। उत्पत्ती ४९:४

याकूब आ १२ जना तौ

१इतिहास २:१-२

23 लेआ आ तौ रूबेन, याकूब आ डोंइती जरमेशो तौ बाक्माक्त। सिमियोन, लेवी, यहूदा, इस्साकार नु जबूलून नेल्ल लेआ आ तौ बाक्मा बाक्त। 24 राहेल आ तौ योसेफ नु बेन्यामीन बाक्सा बाक्त। 25 राहेल आ गेय पाइब बिल्हाह आ तौ दान नु नाप्ताली बाक्सा बाक्त। 26 लेआ आ गेय पाइब जिल्पा आ तौ गाद नु आशेर बाक्सा बाक्त। मेको नेल्ल पदान-अराममी जरमेशो याकूब आ तौ बाक्मा बाक्त।

इसहाक बेक्शो

27 मिनू याकूब, आ आफ इसहाक आ खिं माप्पे जाक्दीम्माक्त। मेको कली किरयथ-अरबा सहर नु हेब्रोन यो देंनीम। मेको अब्राहाम नु इसहाक आस बाक्तीक रागी बाक्माक्त। 28 मिनू इसहाक सहे का ८० बर्स दुम्माक्त। 29 मिनू इसहाक शुश बर्स डा खाल्पा दुम्शा बेक्माक्त। आ क्येडा डोंइती बेक्शो किकी पिपी आन बाक्तीक लमाक्त। मिनू आ तौ एसाव नु याकूबम मेको कली थिम्से बाक्त।

36

एसाव आ तौ चच युइ

१इतिहास १:३५-५४

1 एको एसाव आ चच युइ बाक्नीम। एसाव कली एदोम यो देंनीम। उत्पत्ती २५:३०; ब्यवस्था २३:८ 2 एसावमी कनान रागी डा मीश निक्शी चाक्गा बाक्त। का हिती डा एलोन आ तमी आदाह, अर्को होर डा हिव्वी सिबोन आ तौ अनाह आ तमी ओहोली-बामा बाक्माक्त। उत्पत्ती २६:३४ 3 मिनु इश्माएल आ तमी बासेमाथ, नेबायोथ आ समी यो चाक्गा बाक्त। उत्पत्ती २८:९

4 मिनु आदाहमी एसाव के एलीफाज थिमाक्त। बासेमाथमी रूएल थिमाक्त। 5 ओहोली-बामामी येऊश, यालाम नु कोराह थिमाक्त। मेकोपुकी कनान रागीम जरमेशो एसाव आ तौ बाक्मा बाक्त।

6 मिनु एसावमी आ मीशपुकी, आ तौपुकी, आ तमीपुकी, आ खिं डा मुर नेल्ल, आ बी ब्यफ नु बस्तु भाव नेल्ल कनान रागीम चेम्शो शोंप नेल्ल लाइशशा, याकूब रे डोन अर्को रागी लमाक्त। 7 मारदे हना शुश शोंप दुम्तीके, बस्तु भाव शुश दुम्तीके, काथा बाक्ने मचाप्से बाक्त। मिनु आस बाक्शो रागीम शुश बस्तु भाव दुम्तीके थुल्ने मचाप्से बाक्त। उत्पत्ती १३:६ 8 मिनु मेको एदोम माइशो एसाव सेइर डा पहाड लशा बाक्माक्त।

9 एसाव आ चच युइ सेइर पहाड डा एदोमी माइशो सु सु बाक्मा बाक्त देंशा हना, 10 एसाव आ मीश आदाह आ तौ एलीफाज, आ मीश बासेमाथ आ तौ रूएल बाक्माक्त।

11 मिनु एलीफाज आ तौपुकी तेमान, ओमार, सेफो, गाताम नु केनाज बाक्मा बाक्त। 12 एसाव आ तौ एलीफाज आ कान्छी मीश तिम्ना बाक्माक्त। मेकोमी अमालेक थिमाक्त। मेकोपुकी एसाव आ मीश आदाह आ तौपुकी बाक्मा बाक्त।

13 मिनु रूएल आ तौपुकी नाहाथ, जेराह, शम्माह नु मिज्जा बाक्मा बाक्त। मेको एसाव आ मीश बासेमाथ आ तौपुकी बाक्मा बाक्त।

14 मिनु सिबोन आ तौ अनाह आ तमी, एसाव आ मीश ओहोली-बामा आ तौपुकी येऊश, यालाम नु कोराह बाक्मा बाक्त।

हुकुम पाइब एसाव आ तौपुकी

15 मिनु एसाव आ तौ आन दाते डा ठेयब मुर सु सु बाक्मा बाक्त देंशा हना, आ डोंइती जरमेशो तौ एलीफाज आ तौ तेमान, ओमार, सेफो नु केनाज, 16 कोराह, गाताम नु अमालेक, एलीफाजमी एदोम रागीमी थिशो आदाह आ तौ बाक्मा बाक्त।

17 मिनु एसाव आ तौ रूएल आ तौ आन दाते डा ठेयब मुर नाहाथ, जेराह, शम्माह नु मिज्जा बाक्मा बाक्त। मेकोपुकी रूएलमी एदोम रागीमी थिशो, एसाव आ मीश बासेमाथ आ तौ बाक्मा बाक्त। 18 मिनु एसाव आ मीश ओहोली-बामा आ तौ आन दाते डा ठेयब मुर येऊश, यालाम नु कोराह बाक्मा बाक्त। मेकोपुकी अनाह आ तमी, एसाव आ मीश ओहोली-बामाम, जरमेशो बाक्मा बाक्त। 19 मेकोपुकी एदोम माइशो एसाव आ तौ आन दाते डा ठेयब मुर बाक्मा बाक्त।

सेइर आ चच युइ

20 मिनु डोंइती मेको रागीम बाक्ब सेइर आ तौ होरीपुकी सु सु बाक्मा बाक्त देंशा हना, लोतान, शोबाल, सिबोन, अनाह उत्पत्ती १४:६; ब्यवस्था २:१२, २२ 21 दीशोन, एजेर नु दीशान बाक्मा बाक्त। मेकोपुकी एदोम रागी डा सेइर आ तौ होरी आन दाते डा ठेयब मुर बाक्मा बाक्त। 22 लोतान आ तौ होरी नु हेमान बाक्सा बाक्त। लोतान आ समी तिम्ना बाक्माक्त। 23 शोबाल आ तौपुकी अल्वान, मानाहाथ, एबाल, शेफो नु ओनाम बाक्मा बाक्त। 24 सिबोन आ तौ आइयाह नु अनाह बाक्सा बाक्त। मिनु अनाहमी आ आफ सिबोन आ गधा योव्रदीमेनु, गोरशो रागीमी होश ब्वाक्कु बुक्तीके थिदा बाक्त। 25 अनह आ आल दीशोन नु आ तमी ओहोली-बामा बाक्सा बाक्त। 26 मिनु दीशोन आ तौपुकी हेम्दान, एशबान, इथ्रान नु केरान बाक्मा बाक्त। 27 एजेर आ तौपुकी बिल्हान, जावान नु अकान बाक्मा बाक्त। 28 दीशान आ तौ ऊज नु अरान बाक्सा बाक्त। 29 होरी आन दाते डा ठेयब मुरपुकी लोतान, शोबाल, सिबोन, अनाह, 30 दीशोन, एजेर नु दीशान बाक्मा बाक्त। मेको सेइर रागी डा होरी आन ठेयब मुर बाक्मा बाक्त।

एदोम रागी डा पिपपुकी

31 डोंइती इस्राएल डा मुर आन पिप मबाक्शो बाक्माक्त। एदोम रागीमी चहिं सासन पाइब पिपपुकी बाक्मा बाक्त। 32 मिनु बेओर आ तौ बेलामी एदोम रागीमी सासन पवा बाक्त। मिनु मेको आ सहर आ नें दिनहाबा बाक्माक्त। 33 मिनु बेला बेक्शा नोले बोज्रा डा जेराह आ तौ योबाब मेकेर डा पिप दुम्माक्त। 34 मिनु योबाब बेक्शा नोले तेमान आ मुर आन रागी डा हुशाम पिप दुम्माक्त। 35 मिनु हुशाम बेक्म नोले बेदाद आ तौ हादाद पिप दुम्माक्त। मेकोमी मोआब

रागीमी मिदयानी नु लडाइ पशा ग्रामाक्त। आ सहर आ नें अवीथ बाक्माक्त। 36 मिनु हादाद बेक्म नोले मास्केकाह डा सम्ला पिप दुम्माक्त। 37 मिनु सम्ला बेक्म नोले युफ्रेटीस खोला आ नेक्था बाक्शो रेहोबोथ डा शावल पिप दुम्माक्त। 38 मिनु शावल बेक्म नोले आकबोर आ तौ बाल-हनान पिप दुम्माक्त। 39 मिनु आकबोर आ तौ बाल-हनान बेक्म नोले हादार पिप दुम्माक्त। आ सहर आ नें पाहु बाक्माक्त। आ मीश मेहेताबेल बाक्माक्त। मेको मात्रेद आ तमी बाक्माक्त। मात्रेद चहिं मे-जाहाब आ तमी बाक्माक्त।

एसाव रे पिशो थर

40 एसाव रे पिशो थर आन खिं नु आन बाक्तीके तेको बाक्मा बाक्त देंशा हना, तिम्ना, अल्वाह, येथेथ, 41 ओहोली-बामा, एलाह, पिनोन, 42 केनाज, तेमान, मिब्सार, 43 मग्दीएल नु यिराम बाक्मा बाक्त। मेको एदोम आ थर आन बाक्तीक बाक्मा बाक्त। एसाव एदोमी आन किकी पिपी बाक्माक्त।

37

याकूब आ तौ योसेफ आ कथा

1 याकूब आ आफ अर्को रागीम बाक्शो खोदेशो पा याकूब यो कनान रागीम बाक्शो बाक्माक्त। 2 एको याकूब आ खिं डा मुर आन कथा बाक्ब। योसेफ १७ बर्स दुम्शा आ लोकब आन क्यारश भेडा गोठ डा गोठला बाक्माक्त। आ आफ आ मीश बिल्हाह नु जिल्पा आस तौ कली चारच पाइब बाक्माक्त। मिनु योसेफमी मेको आन मरिम्शो पशो आ आफ कली शोत्रबाक्माक्त। 3 इस्राएलमी नेल्ल क्येडा योसेफ कली दाक्शो बाक्माक्त। मारदे हना मेकोमी खाल्पा दुम्शा थिमाक्त। मिनु योसेफ कली दारशो फेक्तीके का फेरपदा बाक्त। 4 मिनु आ लोकबपुकीमी “आफोम नेल्ल क्येडा योसेफ कली दाक्ताक्व” दे तुइश्शा, योसेफ कली मदाक्तमे बाक्त। मिनु योसेफ नु रिम्शो लोत्र यो मपामे बाक्त।

योसेफ आ डोंइती डा डोमु

5 काबु नाकदो योसेफमी डोमु का तवा बाक्त। मिनु योसेफमी आ लोकब आन कली शेंदीमी बाक्त। मिनु मेकोपुकीमी डोंइती क्येडा मदाक्तमे बाक्त। 6 योसेफमी मेको आन कली “गो सिनाकदो डोमु का ताता। 7 गो नेल्ल रूमी चेरब मुठा फ्रेंशा बाक्तय। मिनु आं मुठा बोक्शा राप्त। मिनु इन मुठापुकी एर ओंथ बाक्शा, आं मुठा कली सेउ पाम्तेक्मे” देंमाक्त। 8 आ लोकबपुकीम “गे आंइ कली अरेब दुम्नेवे? आंइ कली हुकुम पाइब दुम्नेवे?” दे गाइश्शा देंमा बाक्त। मिनु योसेफ कली आ डोमु नु आ देंशो आ पर्वम डोंइती क्येडा मदाक्तमे बाक्त।

योसेफ आ नोले डा डोमु

9 मिनु नोले योसेफम लेंशा अर्को डोमु तवा बाक्त। मिनु आ लोकब आन कली “नेनीन, गो अर्को डोमु का यो ताता। नां, तास्ला नु ११ ओटा सोरुलपुकीम आं कली सेउ पाइक्तीमी” देंमाक्त। 10 मेको डोमु आ आफ नु आ लोकब आन कली शेंदीमीनु, आ आफोमी “मार डोमु तवी? गो, इ ममा नु इ लोकबपुकी इ डोंइती थमा पा खुम्की पा बाप्चा माल्नीकी?” दे हुइक्ता बाक्त। 11 मिनु आ लोकबपुकीमी योसेफ कली मदाक्तमे बाक्त। आ आफोम चहिं योसेफ आ देंशो मिम्शा आ थुंमी वोदा बाक्माक्त।

योसेफ कली लेयशो

12 मिनु योसेफ आ लोकबपुकी क्यारश भेडा योत्रचा कली शेकेम माइश्शो रागीमी बाक्शो बाक्मा बाक्त। उत्पत्ती ३३:१८-१९ 13 इस्राएलमी योसेफ कली “इ लोकबपुकी शेकेम नेक्थान क्यारश भेडा योत्रनीम। गो इ कली शेकेम सोइक्नन” देंमाक्त। मिनु योसेफम “लो, गो लाइनुड” देंमाक्त। 14 मिनु “लावो, इ लोकब नु क्यारश भेडा नेल्ल रिम्शो बाक्मा कों, दोदेशो पा बाक्मा, कोत्रथ लावो। मिनु कोत्रशा, शेंदी” देंमाक्त। मिनु योसेफ कली हेब्रोन बेंसी रे सोइक्तानु, शेकेम गे लमाक्त। उत्पत्ती ३५:२७ 15 मिनु योसेफमी लेखमी मुर का ग्रुमाक्त। मिनु मेकोमी “गे मार मली?” दे हिल्लो पवा बाक्त। 16 मिनु योसेफमी “आं लोकब आन कली माल्थ गाक्ती। क्यारश भेडा ते योत्रशो बाक्मा, तुइक्ती?” दे हिल्लो पवा बाक्त। 17 मिनु मेको मुरुमी “मेकोपुकी एकेर रे लाम्तेक्मे। ‘दोथान लचा’ देंशो नेता” देंमाक्त। मिनु योसेफम आ लोकब आन कली दोथानम थिम्मी बाक्त।

18 मिनु आ लोकबपुकीम योसेफ कली डोन रे पिशो तशा, आन नेक्था जाक्चा क्येडा डोंइती “मेको कली साइक्चा” दे सल्ला पामे बाक्त। 19 मिनु मेकोपुकीमी “कोत्रडीन, डोमु ताइब जाक्त। 20 मुल मेको कली साइय्य। मिनु ढोडोडगा

कामी पिक्य। मिनु ‘जन्तुम साइशशा ब्वाप्तु’ देंय। आ डोमु तशो गाप्बाक्म कों, मगाप्बाक्म तुइक्नय” देंमुमा बाक्त। 21 मिनु रूबेनमी मेको आन लोव्र नेंशा, मेको कली “मसाइय्य” देंमाक्त। मेकोमी “आ लोकबपुकी रे प्रॉइनुड” दे मिम्ता बाक्त। उत्पत्ती ४२:२२ 22 रूबेनमी मेको आन कली “मसतीने। लेख डा ढोडोडगा कामी ताइक्चा” दे माइक्मी बाक्त। मारदे हना योसेफ कली आन गुइ रे प्रॉइशा, आफ आ खिं सोइक्नुड, दे मिम्ता बाक्त। 23 मिनु योसेफ आ लोकब आन बाक्तीके जाक्मेनु, मेकोपुकीमी आ नक फेरशो रिम्शो फेक्तीक वा पुइक्तमे बाक्त। 24 मिनु लेख डा ढोडोडगा कामी पिकगमे बाक्त। मेको ढोडोडगाम ब्वाक्कु मबाक्शो बाक्माक्त।

25 मिनु शोब्ले जथ निस्सीमा बाक्त। मिनु कोव्रडमेनु, गिलाद सहर रे इश्माएल जात डा ग्याप्ब लेयब मुर नु आन दलओठपुकी पिशो तामे बाक्त। मेको आन दलओठपुकीमी मस्लापुकी, खेक्तीकपुकी नु धूप इजीप्तमी लेयचा कली लाइक्बाक्मा बाक्त। 26 मिनु यहूदामी आ लोकब आन कली “इं लोकब साइशशा, जोल पचा, मार रिम्शो दुम्बा डा? 27 नेनीन, इश्माएल आ मुर आन कली लेयशा सोइक्तय, मसाइय्य। मारदे हना इं लोकब, इं आंम मुर बाक्ब” देंमाक्त। मिनु आ लोकबपुकी बिस्समा बाक्त। 28 मिदयान डा इश्माएली ग्याप्ब लेयब मुर पिना पिन बाक्मा बाक्त। मिनु योसेफ कली ढोडोडगा रे फेशशा, इश्माएली आन कली चांदी के २० शेकेलम लेयडमे बाक्त। मिनु मेकोपुकीमी योसेफ कली इजीप्त लदमे बाक्त। शेकेल का ११.५ ग्राम, तोला खोदेंशो बाक्ब। उत्पत्ती २५:२; लेवी २७:१-८

29 मिनु रूबेनमी योसेफ प्रॉइचा कली मेको ढोडोडगा लशा कोव्रडानु, योसेफ कली मथित्थु, सुर्ता पा, आ वा खाक्गा बाक्त। 30 मिनु आ लोकब आन कली “मेको आल मबा। दोपा आ आफ आ डोंइती जाक्दीत्नुडा?” दे लोव्र पवा बाक्त। 31 मिनु मेकोपुकीमी योसेफ आ फेक्शो वा लाइशशा, पाठा का क्योरशा, आ फेक्शो वा हुशेम खुम्मे बाक्त। 32 मिनु मेको फेरशो फेक्शो वा आन आफ कली लाइशशा गेमे बाक्त। मेकोपुकीमी आन आफ कली “कोव्रडीन, एको वा थित्तक। इन तौ आ फेक्शो वा कों?” दे हिल्लो पामे बाक्त। 33 मिनु मेको वा तशा “आं तौ आ फेक्शो वा बाक्त, दे तुइक्ता बाक्त। मिनु ब्वाकी डा जन्तुमी मेको कली साइशशा, नेक्मे बाक्त” दे डाक्माक्त। उत्पत्ती ३७:२० 34 मिनु याकूबम आ फेक्शो वा खाक्शा, अरन्डी फेक्शा, शुश नाक्ती रोंका पवा बाक्त। 35 आ तमी तौ आन आफ कली लेम्थ जाक्मा बाक्त। मिनु याकूबमी “गो आं बेक्ची ना सम्म आं तौ कली रोंका पाइनुड” दे लेम्चा मगेमी बाक्त। मोपा आ आफ योसेफ आ पर्बम डाक्माक्त।

36 मिनु मेको मिदयान डा मुरपुकीमी योसेफ कली इजीप्त रागी डा फाराओ आ नेल्ल क्येडा ठेयब गेय पाइब पोतीफर कली लेयडमे बाक्त।

38

यहूदा नु तामार

1 मिनु नोले यहूदा आ लोकबपुकी रे लशा, अदुल्लाम सहर डा हीरा माइशशो मुर आ बाक्तीक लमाक्त। 2 मेकेर बाक्शा, यहूदामी कनानी शुआ नें पाइशशो मुर आ तमी तवा बाक्त। मिनु मेको चाक्शा, मेको नु बाक्माक्त। 3 मिनु मेकोमी कोव्रज कुरशा, तौ का थिमाक्त। मेको आ नें एर वोदा बाक्त। 4 मिनु लेंशा कोव्रज कुरशा, अर्को तौ का नु थिमाक्त। मेको आ नें ओनान वोदा बाक्त। 5 मेकोमी लेंशा कोव्रज कुरशा, अर्को तौ का नु थिमाक्त। मेको आ नें शेलाह वोदा बाक्त। मेको आल थिची ना यहूदा केसीब माइक्तीकेमी बाक्शो बाक्माक्त। 6 मिनु यहूदामी आ डोंइती जरमेशो तौ एर कली मीश आल का चाक्गा बाक्त। मेको आ नें तामार बाक्माक्त। 7 यहूदा आ डोंइती जरमेशो तौ एरमी परमप्रभु यावे आ डोंइती मरिम्शो पना पन बाक्माक्त। मिनु परमप्रभु यावेमी मेको कली सदा बाक्त। 8 मिनु यहूदामी ओनान कली “रिउम पतीक गेय पा इ लोकब आ मीश नु बाक्को। इ लोकब कली आल सेलो” दे मदा बाक्त। ब्यवस्था २५:५-१० 9 मिनु ओनानमी आ आल मदुम्ब, दे तुइशशा, आ लोकब आ मीश नु बाक्ची ना आ लोकब आ आल मसेल्चा, दे आ वांचेर खपीम ताइक्बाक्माक्त। 10 मिनु मेको कली मो पशो तशा, परमप्रभु यावेमी मेको कली मदाक्शो बाक्माक्त। मोपतीके मेको कली यो सदा बाक्त। 11 मिनु यहूदामी आ चाइमी तामार कली “इ आफ आ खिंम बाक्शा, शेलाह मकोल्म सम्म रिम्दो” दे लेम्दा बाक्त। मारदे हना यहूदामी “मेको नु बाक्शा, आ लोकब निक्शी खोदेंशो पा, अर्को यो बेक्बा कों” दे मिम्ता बाक्त। मिनु तामार आ आफ आ खिं लमाक्त।

12 मिनु नोले शुआ आ तमी, यहूदा आ मीश बेक्माक्त। मिनु आ रोंका पतीक नुम नोले यहूदा आ भेडा आन कली ऊन खोइक्बपुकी गुम्चा कली आ वारच अदुल्लाम सहर डा मुर हीरा नु तिम्नाह लमाक्त। 13 मिनु मुर कामी तामार कली “इ शिउ आ भेडा ऊन खोइक्थ तिम्नाह कुइब” दे मदा बाक्त। यहोसु १५:५७ 14 मिनु आ वोंइश बेक्शो वा

प्रुइशशा, आ कुल तेल्लेम खोदेशो पा सुम्से बाक्त। मिनु मोदेशो पा तिम्नाह एनाइम लतीक लांमी निशशा बाक्माक्त। मारदे हना शेलाह कोल्शा यो, यहूदामी मेको नु ग्युबे मपाइक्ता बाक्त। 15 मिनु यहूदाम मेको कली लांम तशा “तेल्लेम का बाक्ब” दे मिम्ता बाक्त। मारदे हना आ कुल सुमा बाक्त। 16 मिनु मेको कली “आं कली ओव्रचा गेयी” देंमाक्त। मारदे हना आ चाइमी बाक्ब, दे मतुइक्ता बाक्त। मिनु तामारमी “गे गो नु बाक्शो डा आं कली मार गेनीनी?” दे हिल्लो पवा बाक्त। लेवी १८:१५ 17 मिनु “गो आं गोठ डा पाठा का सोइक्नन” देंमाक्त। मिनु तामारमी “मेको मसोइक्तीनी सम्म मार गेनीनी?” दे हिल्लो पवा बाक्त। 18 मिनु यहूदामी “मार पुंइनेवे?” दे हिल्लो पवा बाक्त। मिनु मेकोमी “इन छाप, इन डोरी नु इन गुइ डा कोक्के गेचा नड” दे मदा बाक्त। मिनु मेको नेल्ल गेशा नोले मेको नु बाक्माक्त। मिनु कोव्रज कुरा बाक्त। 19 मिनु तामार बोक्शा लशा, आ वोंइश बेक्शो डा वा लेंशा फेक्से बाक्त।

20 मिनु यहूदामी मेको पाठा गेचा नु आ छाप, डोरी नु कोक्के लेत्चा कली आ अदुल्लाम डा आ वारच कली सोइक्ता बाक्त। मेकोमी मेको मीश मुर कली मथिदा बाक्त। 21 मिनु मेकोमी मेकेर डा मुर आन कली “एकेर एनाइम डा लांम बाक्ब तेल्लेम ते लमे?” दे हिल्लो पामी बाक्त। मिनु मेकोपुकीमी “एकेर तेल्लेम मबाक्ब” देंमा बाक्त। 22 मिनु मेको यहूदा आ बाक्तीक लेशशा “मेको कली थिन्ने मचबु। मेकेर डा मुरपुकीमी ‘एकेर तेल्लेम मबाक्ब’ देंतेक्म” दे यहूदा कली शेंदा बाक्त। 23 मिनु यहूदामी “मेकोन बाक्ल। गो मुने मदोक्डल। गो पाठा का सोइक्ताकड। गे मेको कली मथिदी, मार पचा डा?” देंमाक्त।

24 मिनु महिना सां नोले मुर कामी यहूदा कली “इ चाइमी तामारम तेल्लेम पाप्नु। तेल्लेम पा कोव्रज कुरशो बाक्त” देंमाक्त। मिनु यहूदामी “मेको चोचा कली चाक्कीन” दे लोव्र लेत्ता बाक्त। 25 मिनु तामार कली चाक्गामेनु, मेकोमी आ शिउ कली “एको छाप, डोरी नु कोक्के सु के बाक्मे मेको रे पा कोव्रज कुरशो नड। एको छाप, डोरी नु कोक्के सु के बाक्मे, कोव्रडीन” दे लोव्र कुरब सोइक्ता बाक्त। 26 मिनु यहूदा मेको छाप, डोरी नु कोक्के तुइशशा, मेकोमी “आं क्येडा मेको ठीक पाइब बाक्त। मारदे हना गो मेको कली आं तौ शेलाह मगेड” देंमाक्त। तन्न तामार कली मचाक्गा बाक्त।

27 मिनु आल थिचा रोइ पची ना, आ कोव्रजम जौले आल बाक्सा बाक्त। 28 मिनु आल थिचावानु, आल कामी आ गुइ गुंइदा बाक्त। मिनु आ वारच पाइब मीश मुरुमी लल श्येले पाइशशा “एको डोंइती डा बाक्ब” देंमाक्त। 29 मिनु मेको आ गुइ ओंइशा, आ लोक्ब जरमेसे बाक्त। मिनु मेको वारच पाइबमी “इ गूची ना गिश ठेयब गार सेली” दे मदा बाक्त। मोपतीके आ नें पेरेस वोदा बाक्त। पेरेस आ अर्थ खाक्शो गार बाक्ब। रूथ ४:१८; मत्ती १:३ 30 मिनु नोले लल श्येले पाइशशा आल जरमेसे बाक्त। मिनु मेको आ नें जेराह वोदा बाक्त।

39

योसेफ पोतीफर आ खिंम बाक्शो

1 मेको इश्माएल जात डा ग्याप्ब लेयबपुकीमी योसेफ कली इजीप्त रागी चाक्दीत्मे बाक्त। मिनु इजीप्त रागी डा पिप आ नेल्ल क्येडा ठेयब गेय पाइब पोतीफरमी योसेफ कली ग्यबा बाक्त। उत्पत्ती ३७:२८, ३६

2 मिनु परमप्रभु यावे योसेफ नु बाक्शो बाक्माक्त। योसेफ इजीप्त डा होव्रप आ खिंम बाक्मेनु, मार मार पवा, मेको नेल्ल रिम्शो दुम्शा लमाक्त। उत्पत्ती २६:२४ 3 मिनु आ होव्रपमी “परमप्रभु यावे योसेफ नु बाक्माक्त। मिनु योसेफमी मार मार पवा, मेको नेल्ल परमप्रभु यावेमी रिम्शो दुम्पदा बाक्त।” दे तुइक्ता बाक्त। 4 मिनु योसेफ पोतीफर आ डोंइती शिशी तवा बाक्त। मिनु आ खिंमी गेय पवानु, आ ठेयब गेय पाइब सेला बाक्त। मिनु अर्को गेय पाइबपुकी कली अरेब यो सेला बाक्त। आ मारेइ मारेइ योसेफ कली कोव्रपदा बाक्त।

5 मिनु पोतीफरमी योसेफ कली आ खिं डा नेल्ल कोव्रब मुर सेलानु, परमप्रभु यावेमी योसेफ आ पर्बम मेको कली शुश आसीक गेवा बाक्त। पोतीफर आ खिंम मार मार बाक्मा, आ रूम मार मार ब्वारा, मेको नेल्ल कली परमप्रभु यावेमी आसीक गेवा बाक्त। उत्पत्ती ३०:२७ 6 मोपा पोतीफरमी आ मार मार नेल्ल योसेफ आ गुइमी जिम्मा गेवा बाक्त। आ जचा ब्वचा ला आंमा कोव्रडा बाक्त। योसेफ आ रां नु कुल थम दारशो बाक्माक्त। उत्पत्ती ४३:३२

7 मिनु पोतीफर आ खिंमी बाक्मेनु, आ होव्रपोकममी योसेफ कली दाक्शा, मेको नु बाक्चा मला बाक्त। मेको मीश मुरुम योसेफ कली “पिवो, गो नु बाक्को” दे मदा बाक्त। 8 योसेफमी “गो गे नु मबाक्नुड। आं होव्रपमी आ मार मार नेल्ल आं कली ‘कोव्रडो’ दे जिम्मा गेती। 9 आं कली आ खिं डा नेल्ल क्येडा ठेयब सेलती। मार मार बाक्मा, नेल्ल जिम्मा गेती। इन कली चहिं आं कली मगेयी। मारदे हना गे आ मीश ननी। गो दोपा परमप्रभु आ डोंइती मोदेशो मरिम्शो पाप पने चाप्नुडा? गो मपाइनुड?” दे मदा बाक्त। प्रस्थान २०:१४; लेवी १८:२० 10 मिनु मेको मीश मुरुमी

नाक्त किंत किंत योसेफ कली लोत्र पशा “पिवो, गो नु बाक्को” दे मदा बाक्त। योसेफम चहिं मेको आ लोत्र मटिवा बाक्त।

11 मिनु काबु योसेफ आ गेय पचा कली पोतीफर आ खिम बाक्माक्त। खिम गेय पाइब मुर सुइ मबाक्मा बाक्त। 12 मिनु मेको मीश मुरुमी योसेफ आ फेक्शो वा ग्याइश्शा कीशा “गो नु बाक्को” देमाक्त। मिनु योसेफ आ फेक्शो वा प्रोइशा, खिं रे दोरशा लाडगा गूमाक्त। 13 पोतीफर आ मीशेमी योसेफ आ फेक्शो वा आंम गुइमी प्रोइशा वोइश्शा, खिं रे प्रोक्शो तशा, 14 खिं डा मुर आन कली ब्रेशशा “कोवडीन, पोतीफरमी एको हिब्रू मरिम्शो पपाइक्चा कली चाक्तु। एकोमी आं कली ग्याइक्ताक्यी ‘गो नु बाक्को’ दे माइक्ती। गो चहिं ठेयब सेंदामी वाइ ब्रेत्ती। 15 मिनु आं कली वाइ ब्रेशशा तशा, आ वा प्रोइशा प्रोक्त” दे माइक्ती बाक्त। 16 मिनु मेकोमी योसेफ आ फेक्शो वा आ नेक्था वोइश्शा, आ वोइश मजाक्म सम्म रिम्दा बाक्त।

17 पोतीफर जाक्मेनु, आ मीशेमी “एको इन चाक्शो गेय पाइब हिब्रूमी आं कोठा ओव्रशा ‘गो नु बाक्को’ देंत। 18 गो चहिं वाइ ब्रेत्ती। मिनु आ फेक्शो वा प्रोइशा, खिं रे गूशा प्रोक्त” दे मदा बाक्त। 19 मिनु आ होव्रपमी आ मीश आ लोत्र नेंशा, चुरमाक्त। 20 योसेफ कली लाइश्शा, जेल्खानम चोक्पदा बाक्त। मेकेर पिप आ चोक्शो मुरपुकी यो बाक्मा बाक्त। मिनु योसेफ मेकोपुकी नु बाक्माक्त। 21 मिनु परमप्रभु यावेमी योसेफ कली वारच पशा, जेल्खान डा कोव्रब कली “योसेफ रिम्शो मुर बाक्ब” दे तुइक्पदा बाक्त।

22 मिनु मेको कोव्रब मुरुमी योसेफ कली जेल्खानम चोक्शो मुर आन कली कोव्रब सेला बाक्त। मिनु मेकेर बाक्शो गेय नेल्ल योसेफमी पवा बाक्त। 23 मेको जेल्खान डा कोव्रब मुरुमी योसेफ आ पशो यो मकोव्रडा बाक्त। मारदे हना परमप्रभु यावे मेको नु बाक्शो तुइक्ता बाक्त। मेको नेल्ल रिम्शो पाइब, दे थमा सुदा बाक्त। मिनु परमप्रभु यावे मेको नु बाक्मेनु, आ गेय नेल्ल रिम्शो दुम्माक्त।

40

योसेफमी डोमु आ अर्थ शेंशो

1 मिनु नोले मार दुम्माक्त देंशा हना, इजीप्त डा पिप फाराओ आ खिंमी पिप कली तूचा गेब आन ठेयब मुर नु पिप कली शोब्ले चोइब आन ठेयब मुरुमी आस प्रभु इजीप्त डा पिप कली मरिम्शो पाम्से बाक्त। 2 मिनु फाराओमी मेको तूचा गेब आन ठेयब मुर नु शोब्ले चोइब आन ठेयब मुर आस पबर्म गाइक्ता बाक्त। 3 मिनु मेको निम्फा आस कली नेल्ल क्येडा ठेयब गेय पाइब आ जेल्खानमी चोक्सी बाक्त। मेकेर योसेफ यो बाक्शो बाक्माक्त। 4 मिनु जेल्खान डा कोव्रब मुरुम योसेफ कली “मेको निम्फा आस कली वारच पावो” दे अरेवा बाक्त। मिनु वारच पवा बाक्त।

5 मिनु इजीप्त डा पिप आ गेय पाइब ठेयब मुर निक्शी जेल्खानमी बाक्सानु, काबु नाक्दो निम्फामी डोमु ताम्से बाक्त। मेको आस डोमु आस अर्थ निक्शी बाक्माक्त। 6 मिनु सुनी कना योसेफ मेको निक्शी आस कली वारच पथ, आस कोठा ओव्रमेनु, निम्फा सुर्ता पा बाक्शो ताम्सी बाक्त। 7 मिनु योसेफमी जेल्खानम बाक्शो फाराओ आ गेय पाइब आ ठेयब मुर निक्शी आस कली “मारदे सुर्ता पनी?” दे हिल्लो पाम्सी बाक्त। 8 मिनु मेको निक्शीमी “गो डोमु ताइतस्कु। मिनु मेको डोमु आ अर्थ मरुप्स्कु। शेंब मुर मबा” देंसा बाक्त। मिनु योसेफमी “परमप्रभुमी मेको डोमु मार बाक्बा दे शेंबा ममाइ डा? लो, आं कली देनीन” दे माइक्सी बाक्त। उत्पत्ती ४१:१५-१६; दानीएल २:२७-२८ 9 मिनु फाराओ कली तूचा गेब आन ठेयब मुरुमी “गो आं डोमुमी आं डोंइती अडगुर बोट का ताता। 10 मिनु मेको अडगुर बोटमी राशी सां बाक्तेक्म। मिनु मेको कोच्वा दाप्शा, फू यो बोइक्तेक्मे। बोइश्शा डा मिन अडगुर गेडा सिश्शा मीतेक्म। 11 मिनु आं गुइमी फाराओ आ कचौरा बाक्त। मिनु गो अडगुर आ गेडा आ रस फाराओ आ कचौरामी चिम्ता। मिनु कचौरा पिप कली गेता” दे लोत्र पवा बाक्त।

12 मिनु योसेफमी “इन तशो डोमु आ अर्थ मार बाक्ब देंशा हना, मेको राशी सां नाक्ती सां बाक्नीम। 13 मिनु सांबु नाक्ती फाराओम इन कली जेल्खान रे प्रोइशा डा मिन इन डोंइती पशो गेय लेंशा गेब। मिनु गे डोंइती डा खोदेशो पा फाराओ कली तूचा गेनीनी। लेंशा फाराओ कली कचौरा गेनीनी। इन तशो डोमु आ अर्थ एको बाक्ब। 14 इन कली रिम्शो दुम्मेनु, आं कली यो मप्रेंदीन। आं कली शिशी पने। फाराओ कली आं कली मेको जेल्खान रे गुंइचा, दे लोत्र पने। 15 डोंइती आं कली हिब्रू रागी रे खुइ पा चाक्तीमी। मुल जेल्खानम चोक्तीमी। गो मारेइ मरिम्शो मपड” देमाक्त। उत्पत्ती ३७:२८

16 मिनु फाराओ कली शोब्ले चोइब आन ठेयब मुरुम मेको डोमु आ अर्थ रिम्शो बाक्त, देंशा, योसेफ कली “गो यो डोमु का ताता। मेको डोमुम पिरीडगा सां बुश शोब्ले पियाम कुरशो बाक्ती। 17 नेल्ल क्येडा आ तार डा पिरीडगामी फाराओ कली शुश खाल डा चोशो शोब्ले बाक्तेक्मे। मेको पिरीडगा डा शोब्ले चिक्बीम खुइ पा जाम्तेक्म” दे मदा बाक्त। 18 मिनु योसेफमी “इन तशो डोमु आ अर्थ मार बाक्ब देंशा हना, मेको पिरीडगा सां, नाक्त सां बाक्नीम। 19 सांबु नाक्ती फाराओमी इन कली जेल्खान रे गुंडपाइशशा, रवाम क्याइक्पाइक्ब। मिनु चिक्बीम इन श्ये ब्वाइनीम। इन तशो डोमु आ अर्थ एको बाक्ब” दे शेंदा बाक्त।

20 मिनु आ सांबु नाक्ती फाराओ आ जरमेशो नाक्त बाक्माक्त। मिनु फाराओमी आ गेय पाइब नेल्ल आन कली भोज सेला बाक्त। मिनु आ कली तूचा गेब आन ठेयब मुर नु शोब्ले चोइब आन ठेयब मुर आस कली जेल्खान रे गुंडदीम्सी बाक्त। 21 मिनु आ कली तूचा गेब आन ठेयब मुर कली लेंशा डोंइती डा गेय पचा गेवा बाक्त। मिनु मेकोमी लेंशा फाराओ कली तूचा गेब दुम्माक्त। 22 शोब्ले चोइब आन ठेयब मुर कली चहिं क्याइशशा साइक्पदा बाक्त। योसेफमी दोदेशो देंमे, मोदेशो दुम्माक्त। 23 तन्न फाराओ कली तूचा गेब आन ठेयब मुरुमी योसेफ कली यु प्रेंदा बाक्त।

41

फाराओ आ डोमु आ अर्थ

1 मिनु बर्स निक्शी नोले फाराओमी डोमु निक्शी तवा बाक्त। मिनु डोमुमी मार तवा बाक्त देंशा हना, आंम कली नील खोला आ नेक्थान राप्शा बाक्शो तवा बाक्त। 2 मिनु नील खोला रे ७ ओटा दारशो दोम्शो बी गूशो तवा बाक्त। मेको बीपुकीमी बुदी मीलु घांस ब्वामे बाक्त। 3 मिनु नोले नील खोला रे ७ ओटा अर्को काइ मदारशो ग्येंशो बी गूशो तवा बाक्त। मिनु मेकोपुकी अर्को बी नु नील खोला आ नेक्था राप्शा बाक्मा बाक्त। 4 मिनु काइ मदारशो ग्येंशो बीपुकीमी दारशो दोम्शो बी आन कली ब्वामे बाक्त। नोले फाराओ सेंसे बाक्त। 5 मिनु फाराओ लेंशा निन्द्रा पवानु, लेंशा अर्को डोमु तवा बाक्त। मार तवा बाक्त देंशा हना, चेरब बोट कामी शुश आख पाइशशा ७ ओटा ग्रेल्शो बाला सिशशो तवा बाक्त। 6 मिनु नोले पूर्ब डा फशेम बुश सेल्शो ७ ओटा सोप्पीक्च आइक्च बाला तवा बाक्त। 7 मिनु मेको आइक्च बालामी मेको शुश आख पाइशशा ७ ओटा बाला आन कली दाक्मे बाक्त। नोले फाराओ सेंशा, आ डोमु तशो तुइक्ता बाक्त। 8 मिनु आ थुं मनुथु सुनी कना इजीप्त डा जादू पाइब नु जोक्ब तुइक्ब नेल्ल आन कली ब्रेत्थ सोइक्तीमी बाक्त। मेको जाक्मानु, आ डोमु मेको आन कली शेंदीमी बाक्त। तन्न सुइमी फाराओ कली मेको डोमु आस अर्थ देंने मचाप्मे बाक्त। दानीएल २:३

9 मिनु फाराओ कली तूचा गेब आन ठेयब मुरुमी आ पिप कली “मुलाक्ती आं मरिम्शो पशो मिम्ताक्ड। 10 फाराओमी आ गेय पाइब आस पबर्म चुरमेनु, गो नु शोब्ले चोइब आन ठेयब मुर नेल्ल क्येडा ठेयब गेय पाइब आ जेल्खानम चोक्सीशा बाक्स्कुनु, 11 गो निक्शीम काबु नाक्दो डोमु ताइतस्कु। मेको डोमु निक्शी के अर्थ निक्शी बाक्सा बाक्त। 12 मेना हिबू रागी डा ठिटा का यो जेल्खानम बाक्त। मेको इन नेल्ल क्येडा ठेयब गेय पाइब आ गेय पाइब बाक्त। गो निक्शीमी तशो डोमु मेको कली माइक्स्कुनु, योसेफमी डोमु आ अर्थ नेल्ल आंस कली शेंताक्स्की। आं तशो डोमु आ अर्थ शेंताक्यी। मिनु अर्को मुर आ तशो डोमु आ अर्थ यो शेंताक्व। 13 दोदेशो पा शेंदा, मोदेशोन दुम्त। आं गेय आं कली लेंशा गेतीनी। अर्को कली चहिं क्याइशशा साइक्तेक्म” देंमाक्त।

14 मिनु फाराओमी योसेफ कली ब्रथ सोइक्ता बाक्त। मेकोपुकीमी योसेफ कली रीब पा जेल्खान रे गुंडपदमे बाक्त। योसेफ कली चां प्रेक्शा, नक वा फेक्पा, फाराओ आ बाक्तीके चाक्मे बाक्त। 15 मिनु फाराओमी योसेफ कली “गो डोमु निक्शी ताता। सुइमी मेको आस अर्थ शेंने मचबेम। मिनु गो इ पबर्म लोत्र नेंता। गे मुर आन तशो डोमु आ अर्थ शेंने चाप्नेवे ने” देंमाक्त। 16 मिनु योसेफमी फाराओ कली “गो डोमु डा लोत्र मतुइक्नुड। परमप्रभुमी फाराओ कली थमा पा थुं नाइक्चा डा लोत्र तुइक्पाइक्ब” देंमाक्त। उत्पत्ती ४०:८ 17 मिनु फाराओमी “गो आं डोमुमी नील खोला आ नेक्था बाक्ती। 18 मिनु नील खोला रे ७ ओटा दारशो दोम्शो बी गूतेक्म। मिनु बुदी मीलु घांस ब्वाम्तेक्म। 19 मिनु नोले ७ ओटा मदारशो ग्येंशो बी गूतेक्म। गो इजीप्त रागी नेल्लेमी मोदेशो मदारशो बी गेनायो मतडमी। 20 मिनु मदारशो गेयशो बीपुकीमी डोंइती गूशो दोम्शो बी आन कली ब्वाम्तेक्म। 21 मिनु मेको आन कली ब्वशा यो, गेयशो बी मदोम्म। डोंइती डा खोदेशो पा गेयस डा गेयस बाक्तेक्म। बी ब्वाम्तेक्म, दे सुइमी थमा मसुदेम। मिनु नोले गो सेंसाक्यी। 22 मिनु लेंशा इप्ती। मिनु डोमु तडानु, चेरब बोट का रे ७ ओटा ठेयब रिम्शो बाला पाइशशा तातामी। 23 मिनु नोले अर्को बोट रे ७

ओटा पूर्व डा फशेम सोव्रशो इम्चीली सोप्पीक्च बाला ताता। 24 मिनु इम्चीली सोप्पीक्च बालापुकीमी मेको ७ ओटा रिम्शो बाला आन कली दाक्तेक्म। गो एको आं डोमु जादू पाइब आन कली माइक्तामी। मेकोपुकीम एको डोमुमी मार दुम्बा, दे देने मचबेम” दे योसेफ कली देंमाक्त। 25 मिनु योसेफमी फाराओ कली “इन डोमु निम्फा कांडचीक खोदेशो बाक्ब। परमप्रभुमी मार पचशो बाक्मे, मेको इन कली डोमुमी कोंइताक्व। 26 मेको ७ ओटा रिम्शो बी ७ ओटा बर्स बाक्नीम। मिनु मेको ७ ओटा रिम्शो बाला यो ७ बर्स बाक्नीम। डोमु निक्शी कांडचीक खोदेशो बाक्नीस। 27 मिनु मेको आ नोले गूशो ७ ओटा ग्येंशो बीपुकी ७ ओटा बर्स बाक्नीम। मिनु मेको ७ ओटा गेडा मसिश्शो, पूर्व डा फशेम सोव्रशो सोप्पीक्च बाला यो ७ ओटा बर्स बाक्नीम। मेको ७ बर्स डा अन्काल बाक्नीम। 28 आं देशो मार बाक्ब देशा हना, परमप्रभुमी मार पचा चिक्शो बाक्मे, मेको इन कली कोंइताक्व। मोदेशो बाक्ब। 29 नेनीन, इजीप्त रागी नेल्लेमी ७ बर्स सम्म शुश बाली नाली ग्रेल्शा, रिम्शो बर्स दुम्चा चिक्शो बाक्नीम। 30 मिनु आ नोले ७ बर्स सम्म अन्काल दुम्ब। मिनु मेको मरिम्शो ७ बर्सम इजीप्त रागीमी अन्न ग्रेल्शो नेल्ल प्रेंनीम। मिनु मेको अन्कालमी रागी कली थुम्पाइक्ब। 31 मिनु मेको ठेयब अन्काल दुम्शा, डोंइती अन्न ग्रेल्शो बर्स नेल्लेमी प्रेंनीम। मारदे हना मेको अन्काल शुश श्येत डा बाक्ब। 32 मिनु इन डोमु निक्शी खेयप ताइतीनी, मेको आ अर्थ मार बाक्ब देशा हना, परमप्रभुमी मेको थमा पा पाइब नु पचा चिक्शो बाक्ब। 33 मोपतीके फाराओमी निप्स पाइश्शो मुर का इजीप्त रागी डा ठेयब मुर सेलीन। 34 मिनु आं देशो पशा, कोव्रब मुरपुकी यो वोइक्चा माल्नीनी। मेकोपुकीमी फाराओ आ सासनमी रिम्शो ७ बर्सम इन रागी नेल्ल रे अन्न ५ भाग तिरो पोक्चा माल्नीम। 35 मेको रिम्शो बर्स डा अन्न खुप्शा, अन्काल डा बर्सम सहर डा मुर आन कली थुल्चा कली उप्शा वोइक्चा माल्नीम। 36 मेको उप्शा वोइश्शो अन्न इजीप्त रागीमी अन्काल मदुम सम्म उप्चा माल्ब। मोपा वोइश्शोनु, अन्कालमी मबेक्नीम” दे योसेफमी फाराओ कली मदा बाक्त।

योसेफ ठेयब मुर दुम्शो

37 मिनु फाराओ नु आ गेय पाइब नेल्लेमी “योसेफ आ देशो लोव्र रिम्शो बाक्ब” दे मिम्तमे बाक्त। हितोपदेस १४:३५ 38 मिनु फाराओम आ गेय पाइब आन कली “गो योसेफ खोदेशो मुर अर्को सु थिन्ने चाप्नया डा? परमप्रभु आ सोक्तीम ब्रीशो मुर का थिन्ने चाप्नया डा?” दे हिल्लो पामी बाक्त। प्रस्थान ३१:३; हितोपदेस २:६ 39 मिनु फाराओमी योसेफ कली “परमप्रभुमी मेको नेल्ल इ कली तुइक्पाइक्तु। इ खोदेशो जोक्ब तुइक्ब मुर सुइ मथिंसीब। 40 इ कली आं रागी डा मुर आन कली हुकुम पाइब सेलनन। इ देशो लोव्र मुर नेल्लेमी टिचा माल्नीम। गे आं सरकार डा गेय पाइब नेल्ल आन क्येडा ठेयब मुर दुम्नीनी। गो सिरपेचम पतीके ला इ क्येडा ठेयब बाक्नुड। भजन संग्रह ११३:७ 41 नेनीन, गो इ कली इजीप्त रागी नेल्ल डा ठेयब मुर सेलनन्नी” देंमाक्त। प्रेरित ७:१०

42 मिनु फाराओम आ छाप क्येप्तीक औठी आ ब्रेप्चो रे पुइश्शा, योसेफ आ ब्रेप्चोम लिक्ता बाक्त। मिनु योसेफ कली दारशो बुश वा फेक्पाइश्शा, सुन के माला रेल्ला बाक्त। एस्तर ३:३०; दानीएल ५:२९ 43 मिनु फाराओमी योसेफ कली आ नोले डा बग्गीमी डोइक्पदा बाक्त। मिनु योसेफ आ डोंइती बाक्बपुकीमी “योसेफ आ डोंइती पोक्च थेक्शा, सेउ पने” दे ब्रेम्मा बाक्त। मोपा इजीप्त रागी डा हुकुम पाइब सेला बाक्त। एस्तर १०:३ 44 मिनु फाराओमी “गो फाराओ नड। इजीप्त रागीमी गे मार पचा देंनी, मेको ला पचा माल्नीम” दे योसेफ कली देंमाक्त। 45 मिनु फाराओमी योसेफ कली साफेनाथ-पानेआह, दे नक नें वोदा बाक्त। मिनु योसेफ कली पोतीफेरा माइश्शो ओन सहर डा नाक्सो आ तमी आसेनाथ नु ग्युंवे पाइक्ता बाक्त। मिनु योसेफ इजीप्त रागी नेल्ल कोव्रथ हिरचा गोवा बाक्त। 46 योसेफ फाराओ पिप आ डोंइती लोव्र पवानु, ३० बर्स दुम्शो बाक्माक्त। मिनु फाराओ आ डोंइती रे लशा, इजीप्त रागी नेल्ल हिरथ लमाक्त। उत्पत्ती ३७:२

योसेफम इजीप्त कली गेय पशो

47 मिनु मेको रिम्शो बाली ग्रेल्लतीक ७ बर्समी इजीप्त नेल्ल डा रूमी थाम्पा अन्न ग्रेल्लमाक्त। 48 मिनु योसेफमी मेको बाली ग्रेल्शो ७ बर्स डा अन्न सहर सहरम उप्शा, वोदा बाक्त। मेको सहरम एर ओंथ सु सु आन रू बाक्मे, मेकेर डा अन्न मेको सहरम उप्शा वोदा बाक्त। 49 मिनु योसेफमी समुन्द्र डा बाल्वा खोदेशो पा अन्न उप्शा, शुश दुम्तीके पुक्चा यो प्रोना बाक्त। मारदे हना पुक्ने मचाप्चा डा पा शुश बाक्माक्त।

योसेफ आ तौ निक्शी

50 मिनु अन्काल दुम्चा डोंइती योसेफ आ मीश ओन सहर डा नाक्सो पोतीफेरा आ तमी आसेनाथमी तौ निक्शी थिमाक्त। 51 मिनु योसेफमी “डोंइती श्येत जडानु, परमप्रभुमी आं आफ आ सिं डा मुर आन कली प्रेंपाइक्ती” दे

मिम्शा, आ डोंइती जरमेशो तौ कली मनस्से नें वोदा बाक्त। 52 अर्को कली एफ्राइम नें वोदा बाक्त। मारदे हना “परमप्रभुमी आं कली रागीमी श्येत जडानु, शुश दुम्पाइक्ती” दे मिम्ता बाक्त। 53 मिनु इजीप्त रागीमी मेको रिम्शो अन्न ग्रेल्शो ७ बर्स नुम्माक्त। 54 मिनु योसेफ आ देशो ७ बर्स डा अन्काल दुम्चा गोवा बाक्त। मेको अन्काल रागी रागी नेल्लेमी दुम्माक्त। इजीप्त रागीमी चहिं अन्न थिंसे बाक्त। 55 मिनु इजीप्त रागीमी ठेयब अन्काल दुम्शा, मुरपुकीमी फाराओ कली “अन्न गेकी” दे पुन्मे बाक्त। मिनु फाराओम इजीप्त डा मुर आन कली “योसेफ नु पुंडथ लने। मेकोमी मार देंबा, मेको पने” दे माइक्मी बाक्त। 56 मिनु मेको अन्काल रागी रागी नेल्लेमी दुम्माक्त। मेना योसेफमी अन्न वोइक्तीक नेल्ल रोकचा गोवा बाक्त। इजीप्त डा मुर आन कली अन्न लेयपदा बाक्त। रागी नेल्लेमी ठेयब अन्काल दुम्माक्त। 57 मिनु अर्को रागी डा मुरपुकी यो इजीप्त रागीमी अन्न ग्यापथ, योसेफ आ डोंइती जाक्मा बाक्त। मारदे हना मेको अन्कालम रागी नेल्ल ग्रीइक्माक्त।

42

याकूब आ तौपुकी इजीप्त लशो

1 मिनु याकूबमी इजीप्त रागीमी अन्न बाक्ब दे तुइश्शा, आ तौ आन कली “गे मारदे कोव्रमुशा बाक्नीनी? मारेइ मपाइनीनी? 2 नेनीन, इजीप्त रागीमी अन्न बाक्ब। मिनु गोपुकी अन्कालमी मबेक्क्य, ब्रोंइय अन्न ग्यापथ लने” देंमाक्त। 3 मिनु योसेफ आ १० जना लोकबपुकी इजीप्त अन्न ग्यापथ लमा बाक्त।

4 याकूबमी योसेफ आ लोकब बेन्यामीन कली चहिं श्येत दुम्बा कों, दे हिंशा, आ लोकबपुकी नु मसोइक्ता बाक्त। 5 मोपा याकूब आ तौपुकी अर्को मुर नु इजीप्त अन्न ग्यापथ जाक्दीम्मा बाक्त। मारदे हना कनान रागीमी यो अन्काल दुम्माक्त।

6 मिनु योसेफ सरकार डा ठेयब मुर दुम्शा, रागी नेल्ल डा मुर आन कली अन्न लेयपदा बाक्त। योसेफ आ लोकबपुकी जाक्शा, योसेफ आ डोंइती खुम्की पा बाप्शा, सेउ पामे बाक्त। 7 मिनु योसेफमी आ लोकब आन कली तशा, तुइक्ता बाक्त। तन्न मतुइश्शो खोदेशो पा ठेयब सेंदामी “तेरे जाक्नी?” दे हिल्लो पामी बाक्त। मिनु मेकोपुकीमी “गो कनान रागी रे अन्न ग्यापथ जाक्तक” देंमा बाक्त। 8 योसेफम आ लोकब आन कली तुइक्ता बाक्त। मेकोपुकीमी चहिं योसेफ कली मतुइक्ते बाक्त। 9 मिनु योसेफम आ लोकब आन पर्वम आ डोमु मिम्ता बाक्त। मिनु मेको आन कली “गे क्यारी पाइब बाक्नीनी। एको रागीम ते रे ओव्रचा, दे कोव्रथ जाक्तीनी” दे आ लोकब आन कली माइक्मी बाक्त। उत्पत्ती ३७:५-९ 10 मिनु मेकोपुकीमी “ममाइ प्रभु, इन गेय पाइब अन्न ग्यापथ जाक्तक। 11 गो नेल्ल मुर का आ तौ नकी। गोपुकी ठीक पाइब बाक्नीकी। इन गेय पाइब, गो क्यारी पाइब मनकी” देंमा बाक्त। 12 मिनु योसेफमी “ममाइ, गे एको रागी ‘दोपा ओव्रचा’ दे कोव्रथ जाक्तीनी” देंमाक्त। 13 मिनु मेकोपुकीमी “गो इन गेय पाइब १२ जना लोकब बाक्नीकी। कनान रागी डा मुर का आ तौ नकी। नेनीन, कान्छा मुल आ आफ नु बाक्ब। का चहिं मबाक्ब” दे योसेफ कली मदमे बाक्त। 14 मिनु योसेफमी “आं देशो खोदेशो पा, गे क्यारी पाइब बाक्नीनी। 15 गो इन कली कोव्रनुड, फाराओ आ नेमी इन लोकब कान्छा मजाक्म सम्म गे एकेर रे लचा मताइनीनी। 16 इन दाते डा का कली इन लोकब कान्छा ब्रथ सोइक्तीन। मेना सम्म गे एक जेल्खानम बाक्नीनी। इन लोव्र थमा बाक्म कों, जोल बाक्म कों, नोले तुंडसीब। गे इन लोकब कान्छा मचाक्तीनी हना, फाराओ आ नेमी गे क्यारी पाइब बाक्नीनी” देंमाक्त। 17 मेको नेल्ल आन कली नाक्त सां सम्म जेल्खानम चोक्मी बाक्त। उत्पत्ती ३७:२४

18 मिनु नाक्त सां नोले योसेफमी “गो परमप्रभु कली मान पा हिंनुड। मोपतीके गेपुकी ब्रोंइचा कली आं देशो पने। 19 गे ठीक पाइब मुर बाक्तीनी हना, इन दाते डा का चहिं जेल्खानम बाक्कीने। अर्को अन्न कुरशा, इन खिं लने। 20 इन लोकब कान्छा कली एक चाक्कीन। मिनु इन लोव्र थमा बाक्ब, दे तुंडसीब। मिनु गे बेक्चा ममालनीनी” दे आ लोकब आन कली माइक्मी बाक्त। मिनु आ देशो पामे बाक्त।

21 मेकोपुकीमी “गो थमा पा इ लोकब आ पर्वम ठेयब पाप पाइतय। मेकोमी इ कली तशा, शुश हिंशा, पुनानु यो, मेको आ लोव्र मनैय। मोपतीके इ कली एको श्येत दुम्त” देंमुमा बाक्त। भजन संग्रह ५०:२१ 22 मिनु रूबेनमी “मेको आल कली मारेइ पाप मपने, दे गो इन कली मदेंडा डा? तन्न गे आं लोव्र मनैनी। मेको कली श्येत गेशो हुश आ क्येक्क लेत्चा पुंडसाक्क्य” दे आ लोकब आन कली देंमाक्त। उत्पत्ती ३७:२१-२२ 23 मिनु योसेफमी मेको आन लोव्र नेल्ल रुप्तु, दे मतुइक्ते बाक्त। मारदे हना योसेफमी मेकोपुकी नु लोव्र पवानु, आन लोव्र रुप्ब नु आ कली आ अर्थ देंब मुर का वोदा बाक्त। 24 मिनु योसेफ आ लोकबपुकी रे लशा डाक्माक्त। मिनु लेशशा जाक्शा, मेकोपुकी नु लोव्र

पशा, मेको आन डोंइती सिमियोन कली पाइक्ता बाक्त। 25 मिनू नोले योसेफमी आन धोक्रोम अन्न प्रिंपाइश्शा, आन गेशो क्येट यो लेंशा, आन धोक्रोम कुर पपाइश्शा, लां कली जचा थोव्रक यो गेपाइक्मी बाक्त। आ लोक्ब आन कली मोदेशो पाइक्मी बाक्त।

26 मिनू मेकोपुकी अन्न आन गधा तारी वोइश्शा लमा बाक्त। 27 मिनू लांमी बास बाक्मानु, आन दाते डा कामी आ गधा कली थुल्चा, दे आ धोक्रो रोक्गा बाक्त। मिनू आ धोक्रो आ शोव्रमी आ थाप्शो क्येट थिदा बाक्त। 28 मिनू मेकोमी आ लोक्ब आन कली “आं क्येट लेत्मे देय मार में? आं धोक्रो आ शोव्रम बाक्त, शां” दे लोव्र पवा बाक्त। मिनू नेल्लेमी सुर्ता पशा “परमप्रभुमी इं कली मार पवा” दे हिंमा बाक्त।

29 मेकोपुकीमी आन आफ याकूब आ खिं कनान रागी जाक्दीश्शा, मार मार दुम्मे, नेल्ल शोव्रडमे बाक्त। 30 मेकोपुकीमी “मेको रागी डा ठेयब मुरुम आंइ कली ठेयब सेंदामी लोव्र पशा, आंइ कली आन रागी क्यारी पाइब सुइक्तु। 31 गोपुकीमी ‘गो ठीक पाइब बाक्नीकी, गो क्यारी पाइब मनकी। 32 गो १२ लोक्ब, आफ का आ तौ नकी। का मुल मबाक्ब, कान्छा कनान रागीम आफ नु बाक्ब’ दे माइक्तक। 33 मिनू मेको रागी डा ठेयब मुरुम आंइ कली ‘गो दोपा तुइक्नुडा, गे ठीक मुर बाक्नीनी, दे इन लोक्ब का गो नु बाक्चा माल्ब। अरु चहिं अन्कालम जचा कली अन्न कुरशा, खिं लेशशा लने। उत्पत्ती ४२:२४ 34 मिनू इन लोक्ब कान्छा कली एक चाक्कीन। मेको नोले ला गेपुकी क्यारी पाइब मननी, दे तुइक्नुड। मेना इन लोक्ब कली प्रोंइशा, लचा गेनुड’ दे माइक्तीकी” दे आन आफ कली देंमा बाक्त।

35 मिनू नोले आन धोक्रो रोक्शा, नेल्लेमी आन थाप्शो क्येट आन धोक्रोमी थित्मे बाक्त। मिनू मेकोपुकी नु आन आफ मेको क्येट तशा, हिंमा बाक्त। 36 मिनू आन आफ याकूबमी “गे आं आल कली रोइक्ब बाक्नीनी। योसेफ लत। सिमियोन लत। मुल बेन्यामीन लाइक्चा माल्नीनी। एको नेल्ल आं कली श्येत गेचा कली बाक्ब” दे आ तौ आन कली देंमाक्त। 37 मिनू रूबेनमी “गो बेन्यामीन ठीक पा मलेत्ताक्ड हना, आं तौ निक्शी आस कली सतीन” दे आ आफ कली मदा बाक्त। 38 मेकोमी “आं तौ गे नु लचा मगेनुड। आ लोक्ब बेक्त, आ का ला बाक्ब। मेको कली लांमी मार मार दुम्मे चाप्ब। बेक्त हना, गेपुकीमी चां बोइश्शो आं कली ठेयब श्येत जपाइश्शा तुरसुम वोइक्चा माल्नीनी” दे याकूबम आ तौ आन कली माइक्मी बाक्त।

43

याकूब आ तौपुकी लेंशा इजीप्त लशो

1 मिनू मेको रागीमी अन्काल बारना बारन लमाक्त। 2 मिनू आन इजीप्त रे चाक्शो अन्न नेल्ल नुप्शा, आन आफोमी मेको आन कली “लेंशा इच्का जचा थोव्रक ग्याप्थ लने” दे माइक्मी बाक्त। 3 मिनू यहूदामी “मेको ठेयब मुरुमी ‘गे इन लोक्ब कान्छा मचाक्तीनी हना, आं कली गुम्थ मजाक्कीन’ दे आंइ कली हुइक्ताक्व। उत्पत्ती ४२:१५-३४ 4 गे आंइ लोक्ब कान्छा कली गोपुकी नु सोइक्ताक्नी हना, ला लाइनीकी। 5 गे मेको कली गो नु मसोइक्ताक्नी हना, मलाइनीकी। मारदे हना मेको ठेयब मुरुमी ‘गे इन लोक्ब कान्छा मचाक्तीनी हना, आं कली गुम्थ मजाक्कीन’ दे आंइ कली हुइक्ताक्व” दे आ आफ कली देंमाक्त। 6 मिनू इस्राएलमी “मारदे मेको मुर कली ‘आंइ लोक्ब कान्छा बाक्ब’ दे शेंदीनी? मिनू आं कली ओदेशो मरिम्शो पाइय्नीनी” दे माइक्मी बाक्त। 7 मिनू मेकोपुकीमी “मेको ठेयब मुरुमी ‘इन आफ मुल सम्म ब्रोंइशो बाक्बा? अर्को लोक्ब यो बाक्बा?’ दे आंइ कली खिं डा मुर आन पर्बम शुश हिल्लो पाप्तु। मिनू गोपुकीमी मेकोन देंतक। ‘इन लोक्ब कान्छा चाक्कीन’ देंब, दे गो दोपा तुइक्नीकी?” दे आन आफ कली देंमा बाक्त। उत्पत्ती ४२:७-१३ 8 मिनू यहूदामी “कान्छा गो नु सोइक्तीन। गे गो नु इं आइक्च आल यो मबेक्मल, दे गो लाइनीकी। 9 गो एको आ जमानी दुम्नुड। गो लेशशा जाक्डानु, गो एको कली चाक्शा, इन डोंइती मवोइक्ता हना, गेना हना यो आं पाप लील। 10 गो एको कली रिम्शा मबाक्शो नकी हना, गो खेयप निक्शी लने पिने थुम्क वा” दे आ आफ कली देंमाक्त।

11 मिनू आन आफ इस्राएलमी “मुल मो दुम्चा माल्शो बाक्त हना, गे मेको ठेयब मुर कली इं रागी डा नेल्ल क्येडा रिम्शो फल, इच्का खेक्तीक तेल, इच्का खुदो, मस्लापुकी, ब्रोंव्रशो रिना पाइब थोव्रक, फोरो नु देसी बदाम कोसेली लतीन। हितोपदेस १८:१६ 12 मिनू इन क्येट नु डोंइती डा इन धोक्रोम बाक्शो क्येट यो लतीन। प्रेंशा मो दुम, कों? मार दुम्मे? उत्पत्ती ४२:२७, ३५ 13 इन लोक्ब कान्छा लाइश्शा, मेको ठेयब मुर कली लेंशा गुम्थ लने। 14 नेल्ल क्येडा सक्ति पाइश्शो परमप्रभुमी मेको मुर आ डोंइती इन कली शिशी गेवल। मिनू इन अर्को लोक्ब नु बेन्यामीन यो

सोइक्तल। गो श्येत जचान माल्शो बाक्ती हना यो, श्येत जडल” दे आ तौ आन कली माइक्मी बाक्त। 15 मिनु आ तौपुकीमी मेको कोसेली, डोंइती डा क्येट, अर्को क्येट नु बेन्यामीन लाइशशा, इजीप्त रागी लशा, योसेफ आ डोंइती जाक्दीम्मा बाक्त।

16 मिनु योसेफमी मेकोपुकी नु बेन्यामीन कली तशा, आ खिं डा ठेयब गेय पाइब मुर कली “मेको मुर आन कली आं खिं लाइक्मी। बस्तु का क्योरशा, भोज ठीक पावो। मारदे हना मुलाक्ती मेकोपुकी गो नु जाइनीम” देंमाक्त। 17 मिनु मेको मुरुम योसेफ आ देंशो पशा, नेल्ल आन कली योसेफ आ खिं ओइदीमी बाक्त। 18 मेकोपुकी चहिं हिंमा बाक्त, मारदे हना योसेफ आ खिं आगा ओइदीमी बाक्त। मिनु मेकोपुकीमी “मारदे हना इं डोंइती डा क्येट इं धोक्रोम थित्तय। मिनु इं कली वाइल सेल्चा नु इं गधा रोइक्चा कली इं कली एके ओइताक्मे” देंमुमा बाक्त। उत्पत्ती ४२:२८ 19 मिनु योसेफ आ खिं डा ठेयब गेय पाइब आ नेक्था लशा, लाप्चो रे मेको नु लोत्र पामे बाक्त। 20 मिनु “हजुर, गोपुकी डोंइती खेयप का जचा थोत्रक ग्याप्थ जाक्तक। 21 मिनु गोपुकी बास बाक्तीके जाक्दीशशा, आंइ धोक्रो रोक्शा, कोत्रकानु, आंइ क्येट नेल्ल आंइ धोक्रो धोक्रोम थित्तक। 22 मुल गो लेंशा चाक्तक। अर्को जचा थोत्रक ग्याप्चा कली यो क्येट चाक्तक। सुम आंइ क्येट आंइ धोक्रोम कुर पवा, गो मतुइक्नीकी” दे ठेयब गेय पाइब कली देंमा बाक्त। 23 मिनु मेकोमी “इन थुं नाइक्तीने, महिनीने। इन परमप्रभु, इन आफ आ परमप्रभुमी इन क्येट इन धोक्रोम कुर पवा माइ। गो इन क्येट ताक्ता” देंमाक्त। मिनु मेकोमी सिमियोन कली चाक्गा बाक्त। उत्पत्ती ४२:२४ 24 मिनु मेको मुरुम मेको आन कली योसेफ आ खिं ओइशा, खोइल चिक्चा कली ब्वाक्कु गेवा बाक्त। आन गधा आन कली थुला बाक्त। 25 मिनु नाक्ती दुम्चा चिक्तानु, मेको नु काथा जचा माल्ब देंशो नेंशा, आन कोसेली गेचा कली ठीक पामे बाक्त।

26 मिनु योसेफ जाक्मेनु, मेकोपुकीमी आन कोसेली लाडगा रे ओइशा, मेको आ डोंइती वोइशशा, खुम्की पा बाप्शा खेत्मे बाक्त। 27 मिनु योसेफमी मेको आन कली “दोपा बाक्नी? इन आफ, इन देंशो खाल्पा, रिम्शो बाक्मे? मुल सम्म ब्रोंइमे?” दे हिल्लो पामी बाक्त। 28 मिनु मेकोपुकीमी “इन गेय पाइब आंइ आफ मुल सम्म ब्रोंइशो नु रिम्शो बाक्ब” देंशा, आन पिया खुक्शा, सेउ पामे बाक्त। उत्पत्ती ३७:७,९ 29 मिनु योसेफमी आ लोकब बेन्यामीन, आ ममा आ तौ तशा “इन देंशो इन लोकब कान्छा एकोन बाक्बा?” देंशा, बेन्यामीन कली “परमप्रभुमी इ कली शिशी पवल, आं तौ” देंमाक्त। 30 मिनु योसेफमी आ लोकब तशा, ग्येरसीशा डाक्चा कली ते लड, दे आ कोठा लशा डाक्माक्त। 31 मिनु आ कुल चिक्शा, लेम्माक्त। मिनु गेय पाइब आन कली “शोब्ले खेत्तीन” देंमाक्त। 32 मिनु योसेफ, आ लोकब नु मेको नु जाइब इजीप्त डा मुर नेल्ल आन कली आन पेवा पेवा जचा थोत्रक खेत्मे बाक्त। मारदे हना इजीप्त डा मुर हिबू नु जचा मदुम्बाक्माक्त। इजीप्त डा मुरपुकी ग्रान्रा दीबाक्मा बाक्त। उत्पत्ती ३९:६; उत्पत्ती ४६:३४; प्रस्थान ८:२२ 33 मिनु योसेफमी आ लोकब आन कली डोंइती जरमेशो, माइला, साइला पा कान्छा सम्म गार पा निप्पदा बाक्त। मिनु मेकोपुकी छक लाक्मा बाक्त। 34 मिनु योसेफ आ डोंइती रे जचा ब्वचा थोत्रक लाइशशा, मेको आन कली खेप्पदा बाक्त। बेन्यामीन आ भाग अरु आन क्येडा ५ भाग खोइ शुश बाक्माक्त। मिनु मेकोपुकी योसेफ नु जशा तूशा, ग्येरशा बाक्मा बाक्त।

44

योसेफ नु आ लोकबपुकी

1 मिनु योसेफमी आ खिं डा ठेयब गेय पाइब कली “मेको मुर आन धोक्रो प्रिंपतो। गिश कुरने चाप्नीमी, मिश प्रिंपतो। मिनु आन क्येट अन्न आ शोत्रम वोतो। 2 मिनु आं चांदी के कचौरा, आ क्येट नु मेको नेल्ल क्येडा ठिटा आ धोक्रो आ शोत्रम वोतो” दे मदा बाक्त। मिनु मेकोमी योसेफ आ देंशो खोदेंशो पा पवा बाक्त। 3 मिनु सुनी कना रिम्शो पा नां मसोत्रथु, मेको मुर नु आन गधा आन कली लचा गेमे बाक्त। 4 मिनु सहर रे लमानु, योसेफम आ ठेयब गेय पाइब कली “बोक्को, मेको आन नोले खोतो। मिनु मेको आन कली थिश्शा ‘मारदे गे रिम्शो पाइब कली मरिम्शो पनी? 5 मारदे आं प्रभु आ मार मार तूतीक नु लिंक्यु कोत्रतीक चांदी के कचौरा खुइ पनी? गे मरिम्शो पाइतीनी’ दे माइक्मी” दे मदा बाक्त। 6 मिनु मेको आन कली थिश्शा, मोदेंशो लोत्र पवा बाक्त। 7 मिनु मेकोपुकीमी “आंइ प्रभुम मारदे मोदेंशो लोत्र पाइबा? गो मो मपक। 8 नेनीन, आंइ धोक्रोमी थिश्शो क्येट कनान रागी रे लेंशा चाक्तक। गो दोपा इन प्रभु आ खिं रे सुन चांदी खुइ पाइनीकी? उत्पत्ती ४३:२१ 9 गो इन गेय पाइब सु नु मेको कचौरा बाक्मे, मेको बेक्ल। मिनु गोपुकी यो इन वाइल दुम्कल” दे मदमे बाक्त। 10 मिनु मेकोमी “इन देंशो खोदेंशो दुम्ल। सु आ धोक्रोम थिंसीबा, मेको आं वाइल दुम्ब। अरु मो लाइनीनी” देंमाक्त। 11 मिनु नोले मेकोपुकीमी रीब रीब पा आन धोक्रो गधा

रे शोल्शा, रोकशा कोवडमे बाक्त। 12 मिनु मेकोमी डोंइती जरमेशो आ धोक्रोमी, नोले नेल्ल आन धोक्रोमी का का पा मालशा, कान्छा ला लीमाक्त। मिनु कचौरा बेन्यामीन आ धोक्रोमी थिदा बाक्त। 13 मिनु मेकोपुकीमी आन वा खाक्शा, आन अन्न लेंशा गधा तार वोइशशा, सहर लेम्मा बाक्त।

14 मिनु यहूदा नु आ लोकबपुकी योसेफ आ खिं जाक्मानु, योसेफ मेक उइ बाक्माक्त। मेको आ डोंइती खुम्की पा बाम्मा बाक्त। 15 योसेफम मेको आन कली “गे मार पनी? आं खोदेशो मुरुम नेल्ल तुइक्ब, दे मतुइक्तीनी?” दे मेको आन कली हुइक्ता बाक्त। 16 मिनु यहूदामी “आंइ प्रभु कली मार देंनीकी? मार लोव्र पाइनीकी? गोपुकी ‘ठीक मुर बाक्नीकी’ दे दोपा देंने चाप्नीकी? परमप्रभुमी इन गेय पाइब आन मरिम्शो कोइताक्व। नेनीन, गोपुकी नु कचौरा धोक्रोम बाक्ब, गो नेल्ल आंइ प्रभु इन वाइल दुम्तक” देंमाक्त। उत्पत्ती ४२:२१-२२ 17 मिनु योसेफमी “ममाइ, मेको मपाइनुड। तन्न सु मुर नु आं कचौरा बाक्मे, मेको ला आं वाइल दुम्चा माल्ब। गेपुकी चहिं थुं नाइशशा, इन आफ आ बाक्तीक लने” देंमाक्त।

18 मिनु यहूदा मेको आ नेक्था लशा “आं प्रभु, लोव्र का पचा गेयीनी। इन गेय पाइब आ पबर्म मगाइक्तीने। गे फाराओ खोदेशो बाक्नीनी। 19 आं प्रभुमी डोंइती आ गेय पाइब आन कली ‘इन के आफ बाक्बा? अर्को लोकब यो बाक्बा?’ दे हिल्लो पाइतीनी। उत्पत्ती ४२:७,१३; उत्पत्ती ४३:७ 20 मिनु गोपुकीमी आंइ प्रभु कली ‘आंइ के आफ खाल्पा दुम्शो बाक्ब। मिनु खाल्पाम थिशो तौ का यो बाक्ब। मेको आ लोकब चहिं बेक्त। मेको लीशो आ ममा आ का ला तौ बाक्ब। मिनु आ आफोमी मेको कली शुश दाक्ब’ दे इन कली देंतक। 21 मिनु गेमी ‘आं कली कोइचा कली मेको एक चाक्कीन’ देंतीनी। 22 गोपुकीमी आंइ प्रभु कली ‘मेको वोइश आलमी आ आफ कली प्रोंइने मचाप्ब। प्रोंइतु हना, आ आफ बेक्ब’ देंतक। 23 मिनु गेमी इन गेय पाइब आन कली ‘इन लोकब कान्छा मचाक्तीनी हना, गे आं कली गुम्थ मपिने’ देंतीनी। उत्पत्ती ४२:१५; उत्पत्ती ४३:३-५ 24 गोपुकी आंइ आफ इन गेय पाइब आ बाक्तीके जाक्दीशशा, इन लोव्र नेल्ल माइक्तक। 25 आंइ आफोमी ‘लेंशा जचा थोव्रक ग्याप्थ लने’ देंत। 26 मिनु गोपुकीमी ‘आंइ लोकब कान्छा मलाइक्तक हना, गो लने मचाप्नीकी। मारदे हना आंइ कान्छा भाइ गोपुकी नु मलत हना, गुम्चा मदुम्ब’ देंतक। 27 मिनु इन गेय पाइब आंइ आफोम आंइ कली ‘आं मीशेम तौ निक्शी थिप्तु, गे तुइक्नीनी। 28 का आं बाक्तीक रे लत। जन्तुमी मेको कली ब्वाम्तेक्मे। गो मेको कली लेंशा मतड। उत्पत्ती ३७:३२-३३ 29 मिनु गे एको कली यो लाइक्तीनी हना, लांम बेक्बा कों, बेक्त हना, गे आं बोइशशा चां श्येतम प्रिंशा, तुरसुम वोइक्चा माल्नीनी’ दे लोव्र पाप्तु। उत्पत्ती ४२:३८ 30 मिनु गो इन गेय पाइब आंइ आफ आ बाक्तीक जाक्दीकानु, एको वोइश आल, आ आफ आ थुं नेल्लेमी दाक्ब। मोपतीके गोपुकी नु मबाक्त हना, 31 मेको तशा, आ आफ बेक्ब। मिनु गोपुकीमी आंइ आफ, चां बोइशशा इन गेय पाइब कली सुर्ता पपाइशशा, श्येत जपाइशशा तुरसुम वोइक्चा माल्नीकी। 32 गो मेको आ जमानी बाक्शो बाक्नुड। गो आफ कली ‘मेको आल मचाक्ता हना, आं मरिम्शो पशो गेना हना यो आं तारी लील’ देंती। उत्पत्ती ४३:९ 33 मोपतीके एको वोइश आल ममाइ, आं प्रभु, आं कली इन वाइल वोतीन। एको वोइश आल आ लोकबपुकी नु लचा गेने। 34 गो आं आफ आ डोंइती एको वोइश आल मलाइक्थु, दोपा लने चाप्नुडा? आं आफ आ श्येत तशा, गो यो फाल्ने मचाप्नुड” दे यहूदामी योसेफ कली देंमाक्त।

45

योसेफमी तुइक्पांइसीशो

1 मिनु नोले योसेफमी आ मुर नेल्ल आन डोंइती फाल्ने मचबा बाक्त। मिनु “आं गेय पाइब नेल्ल एकेर रे लने” दे सोइक्पदा बाक्त। मिनु योसेफमी आंम कली आ लोकब आन कली तुइक्पदानु, कोठामी सुइ मबाक्शो बाक्मा बाक्त। 2 मिनु ठेयब सेंदामी डाक्मेनु, फाराओ आ खिंम बाक्ब इजीप्त डा मुर नेल्लेम नेन्मे बाक्त। 3 मिनु योसेफमी आ लोकब आन कली “गो योसेफ नड। आं आफ मुल सम्म ब्रोंइमे?” देंमाक्त। आ लोकबपुकीमी लोव्र लेन्ने मचाप्मे बाक्त। मारदे हना शुश हिंमा बाक्त।

4 मिनु योसेफमी आ लोकब आन कली “आं नेक्था पिने” देंमाक्त। मिनु मेकोपुकी आ नेक्था जाक्मा बाक्त। मिनु योसेफमी “गो इन इजीप्त रागीम लेयशो लोकब योसेफ नड। 5 गे आं कली लेयशो आ पबर्म सुर्ता मपने। आंम कली दोस मगेने। मारदे हना परमप्रभुमी आं कली नेल्ल ब्रोंइमल, दे इन डोंइती सोइशशा बाक्त। उत्पत्ती ५०:२० 6 एको अन्काल मुल बर्स निक्शी दुम्त। मिनु मुल ५ बर्स सम्म तेइ वाक्शो नु रिक्शो मतांइसीब। 7 परमप्रभुमी आं कली गेपुकी ब्रोंइनील। रागीम जात का लीनील। इन पबर्म शुश ब्रोंइमल, दे इन क्येडा डोंइती एक सोइक्ताक्यी। एको ठेयब श्येत

रे प्रोंइतीके बाक्ब। 8 मोपतीके गेपुकीमी आं कली एक सोइशशो ममाइ, परमप्रभुमी सोइशशो बाक्त। मेकोमी आं कली फाराओ आ आफ खोदेशो सेल्शा, आ खिं डा होव्रप नु इजीप्त रागी नेल्ल डा हुकुम पाइब सेल्लती। 9 गेपुकी मुल रीब पा इं आफ आ बाक्तीके लने। मिनु मेको कली ‘परमप्रभुमी इन तौ योसेफ कली इजीप्त रागी नेल्ल डा ठेयब मुर सेला बाक्त। एक यिचा मरिम्दीन। 10 आं नेक्था बाक्चा कली गे, इन आल, इन चच, इन क्यारश भेडा, बी ब्यफ नु मारेइ मारेइ नेल्ल चाक्शा, गोशेन माइक्तीकेमी जाक्चा माल्नीनी। 11 आं नेक्था बाक्कीन। गो इन कली थुल्लुड। मारदे हना अन्काल मुल ५ बर्स सम्म दुम्ब। गे मयीतीनी हना, गे, इन खिं डा मुर नु गेपुकी नु बाक्ब नेल्ल शुश प्रुडग दुम्नीनी’ देंट, दे इं आफ कली माइक्चा माल्नीनी। 12 मिनु गेपुकी नु आं लोकब बेन्यामीनम तशो ‘गो योसेफ नड। गो इन कली लोव्र पाता’ दे तुइक्नीनी। 13 गो इजीप्त रागीमी गिश रिम्शो बाक्डा, इन तशो नेल्ल, गेपुकीमी इं आफ कली देंचा माल्नीनी। रीब पा इं आफ कली एक चाक्कीन” दे आ लोकब आन कली माइक्मी बाक्त। 14 मिनु आ लोकब बेन्यामीन कली मुप्शा डाक्माक्त। मिनु बेन्यामीन यो डाक्माक्त। 15 मिनु नोले आ लोकब नेल्ल आन कली मुप्शा, पुक्पु पाइशशा डाक्माक्त। मिनु नोले आ लोकबपुकीमी लोव्र पचा गोव्रमे बाक्त।

16 मिनु “योसेफ आ लोकबपुकी जाक्तेक्म” देशो लोव्र फाराओ आ खिंम यो जाक्दीम्माक्त। मिनु फाराओ नु आ गेय पाइब नेल्ल ग्येरसमा बाक्त। 17 मिनु फाराओमी योसेफ कली “गेमी इन लोकब आन कली ‘इन गधापुकीमी अन्न कुरपाइशशा, कनान रागी लने। 18 मिनु इन आफ नु इन खिं डा मुर नेल्ल आं नेक्था जाक्कीन। गो इजीप्त रागी डा नेल्ल क्येडा रिम्शो रू इन कली गेनुड। मिनु गे रागी डा नेल्ल क्येडा ब्रोव्रशो जचा ताइनीनी’ दे माइक्चा माल्नीनी। 19 इन कली अरेशो एकोन बाक्ब। इन आइक्च आल नु इन मीश आन कली डोइक्चा कली इजीप्त रागी रे बग्गीपुकी लतीन। इन आफ चाक्कीन। 20 ‘इन मारेइ मारेइ ममिम्तीन। मारदे हना इजीप्त डा रिम्शो नेल्ल इन के बाक्ब’ दे माइक्मी” दे योसेफ कली मदा बाक्त।

21 मिनु इस्राएल आ तौपुकीमी योसेफ आ देशो पामे बाक्त। मिनु फाराओम मार देंमे मेको पा, योसेफमी मेको आन कली बग्गी नु लां कली लाम्जी गेवा बाक्त। 22 मेको आन कली जोड का का फेक्तीक नक वा गेवा बाक्त। बेन्यामीन कली चहिं सहे सां चांदी के शेकेल नु ५ जोड फेक्तीक वा गेवा बाक्त। 23 मिनु आ आफ कली १० ओटा गधैनीमी इजीप्त रागी डा नेल्ल क्येडा ब्रोव्रशो जचा थोव्रक नु लांम जचा कली १० ओटा गधाम अन्न, शोब्ले नु श्ये कुर पा सोइक्ता बाक्त। 24 मिनु लचा डोंइती मेको आन कली “लांमी मजिने” दे अरेवा बाक्त। उत्पत्ती ४२:२२

25 मिनु मेकोपुकी इजीप्त रागी रे पा कनान रागी आन आफ याकूब आ बाक्तीके जाक्दीम्मा बाक्त। 26 मिनु आन आफ कली “योसेफ मुल यो ब्रोंइशो बाक्त। इजीप्त रागीम हुकुम पाइब मेको बाक्माक्त” दे लोव्र पामे बाक्त। याकूबम चहिं आन देशो थमा मसुदा बाक्त। 27 मिनु मेकोपुकीमी योसेफ आ लोव्र नेल्ल शोव्रडमे बाक्त। मिनु याकूबम आ कली डोइक्चा, दे योसेफमी सोइशशो बग्गी तशा, आ थुं लेत्ता बाक्त। 28 मिनु इस्राएलमी “आं तौ योसेफ ब्रोंइशो थमा बाक्ब। आं बेक्चा क्येडा डोंइती मेको आ कुल कौव्रनुड” देंमाक्त। उत्पत्ती ४६:३०

46

याकूब इजीप्त लशो

1 मिनु इस्राएल नु आ खिं डा मुर नेल्ल इजीप्त गे लमा बाक्त। मिनु बेयर-शेबा जाक्दीशशा, आ आफ इसहाक आ परमप्रभु कली चढ़ेवा बाक्त। उत्पत्ती २६:२३-२५ 2 मिनु मेको नाक्दो परमप्रभुमी इस्राएल कली “याकूब, याकूब” देंमाक्त। मिनु इस्राएलमी “गो नेंता” दे लोव्र लेत्ता बाक्त। 3 मिनु परमप्रभुमी “गो परमप्रभु, इ आफ आ परमप्रभु नड। इजीप्त लचा महिनो। मारदे हना गे उइ बाक्डेनु, इ रे पा ठेयब जात सेल्लुड। उत्पत्ती ४७:२७; प्रस्थान १:७ 4 गो गे नु इजीप्त रागी लाइनुड। मिनु इ कली थमा पा लेप्पाइक्नुड। बेक्शा नोले योसेफमी इ मिक्च ख्रेप्ब” दे परमप्रभुमी देंमाक्त। 5 मिनु याकूब बेयर-शेबा रे लमाक्त। मिनु इस्राएल आ तौपुकीमी आन आफ, आन आइक्च आल नु आन मीश फाराओमी सोइशशो बग्गीम डोइक्पदमे बाक्त। 6 मिनु आन बस्तु भाव, कनान रागीम आन चाक्शो मारेइ मारेइ नु याकूब नु आ मुर नेल्ल इजीप्त रागी जाक्दीम्मा बाक्त। 7 याकूबमी आ तौपुकी नु मेको आन तौपुकी, आ तमीपुकी नु आ तौ आन तमीपुकी नु चच युइ नेल्ल इजीप्त रागी चाक्दीम्मी बाक्त।

याकूब आ तौ नु चच युइ

8 मिनू इजीप्त रागीम जाकदीशो इस्त्राएल आ आल आन नें एको बाकनीमी। आ डोंइती जरमेशो तौ रूबेन बाकमाकत। प्रस्थान ६:१४-१६ 9 रूबेन आ तौपुकी हनोक, फल्लु, हेस्रोन नु कारमी बाकमा बाकत। 10 सिमियोन आ तौपुकी येमुएल, यामीन, ओहद, याकीन नु सोहार, कनान डा मीश रे जरमेशो शावल, नेल्ल सिमियोन आ तौ बाकमा बाकत। 11 लेवी आ तौपुकी गेरशोन, कोहाथ नु मेरारी बाकमा बाकत। 12 यहूदा आ तौपुकी एर, ओनान, शेलाह, पेरिस नु जेराह बाकमा बाकत। एर नु ओनान चहिं कनान रागीम बेक्स बाकत। पेरिस आ तौ हेस्रोन नु हामुल बाकसा बाकत। उत्पत्ती ३८:३,४,२९,३० 13 इस्साकार आ तौपुकी तोला, पुवा याशुब नु शिम्रोन बाकमा बाकत। 14 जबूलून आ तौपुकी सेरेद, एलोन नु याहलेल बाकमा बाकत। 15 मेको नेल्ल लेआमी याकूब के पदान-अराममी थिशो तौ बाकमा बाकत। आ तमी दीना यो बाकमाकत। याकूब नु आ तमी तौ नेल्ल पा ३३ जना बाकमा बाकत।

16 मिनू गाद आ तौपुकी सिफ्योन, हाग्गी, शुनी, एस्बोन, एरी, अरोदी नु अरेली बाकमा बाकत। 17 आशेर आ तौपुकी इम्नाह, इश्वाह, इश्वी, बेरीआ नु आ तमी सेराह बाकमा बाकत। मिनू बेरीआ आ तौ निक्शी हेबेर नु माल्कीएल बाकसा बाकत। 18 मिनू लाबान आ तमी लेआ कली गेशो गेय पाइब जिल्पाम याकूब के थिशो तौपुकी बाकमा बाकत। मेको १६ जना बाकमा बाकत। उत्पत्ती २९:२४

19 मिनू याकूब आ मीश राहेल आ तौ योसेफ नु बेन्यामीन बाकसा बाकत। 20 योसेफमी इजीप्त रागीमी मनस्से नु एफ्राइम थिमाकत। आ मीश ओन सहर डा नाक्सो पोतीफेरा आ तमी आसेनाथ बाकमाकत। 21 बेन्यामीन आ तौपुकी बेला, बेकेर, अशबेल, गेरा, नामान, एही, रोश, मुप्पीम, हुप्पीम नु आरद बाकमा बाकत। 22 मेको नेल्ल राहेल आ थिशो तौ बाकमा बाकत। मेको नेल्ल पा १४ जना बाकमा बाकत।

23 दान आ तौ हुशीम बाकमाकत। 24 नाप्ताली आ तौपुकी याहसेल, गुनी, येसेर नु शिल्लेम बाकमा बाकत। 25 मेको लाबानमी आ तमी राहेल कली गेशो गेय पाइब बिल्हाहम याकूब के थिशो तौ बाकमा बाकत। मेको नेल्ल ७ जना बाकमा बाकत। उत्पत्ती २९:२९

26 मिनू याकूब आ चाइमीपुकी महिक्थु, याकूब नु इजीप्त रागी जाकशो मुर नेल्ल पा ६६ जना बाकमा बाकत। 27 इजीप्त रागीमी योसेफमी तौ निक्शी थिमाकत। मोपा इजीप्त रागीमी जाकशो याकूब आ खिं डा मुर ७० जना बाकमा बाकत। याकूब नु योसेफ नु आ तौ निक्शी यो हिक्शो बाकमा बाकत।

याकूब नु योसेफ गुम्शो

28 मिनू याकूबमी यहूदा कली गोशेन लां शेंसीचा नु योसेफ गुम्चा, दे आन डोंइती गुम्थ सोइक्ता बाकत। मिनू मेकोपुकी गोशेन माइक्तीके जाकदीम्मानु, उत्पत्ती ४५:१० 29 योसेफ आंम बग्गी ठीक पा आ आफ इस्त्राएल कली गोशेनम गुम्थ जाकमाकत। मिनू मेको कली गुम्शा, मुप्शा शुश डाकसा बाकत। 30 मिनू इस्त्राएलमी योसेफ कली “मुल गो बेक्ने चाप्नुड। मारदे हना गे ब्रोंडशो बाक्ते, गो इ कुल कोव्रचा ताता” दे आ तौ कली देंमाकत। उत्पत्ती ४५:२८ 31 मिनू योसेफम आ लोकब नु आ आफ आ खिं डा मुर आन कली “गो फाराओ आ बाक्तीके लाइनुड। मिनू मेको कली ‘कनान रागीम बाकशो आं आफ, आं लोकबपुकी नु आं आफ आ खिं डा मुर नेल्ल जाक्तेक्म। 32 मेकोपुकी भेडा गोठला नु बस्तु भाव थुल्ब बाकनीम। मेको आन क्यारश भेडा, बी ब्यफ नु आन मारेइ मारेइ चाकशो बाक्तेक्मे’ देंनुड। 33 मिनू फाराओम इन कली ब्रेत्ताक्व हना, मिनू इन कली इन गेय आ पबर्म हिल्लो पाप्तु हना, 34 गेपुकीमी ‘इन गेय पाइब आन आल रेन मुल सम्म बस्तु भाव थुल्ब बाकनीम। आंइ किकी पिपी यो मोदेंशो गेय पशो बाकमा बाकत’ देंचा माल्नीनी। नोले मेकोमी इन कली गोशेनमी बाक्तीके गेब। मारदे हना इजीप्त डा मुर गोठला आन कली तशा ग्रांग्रा दीनीम” दे योसेफमी आ लोकब आन कली देंमाकत। उत्पत्ती ४३:३२

47

याकूब फाराओ आ डोंइती

1 मिनू नोले योसेफमी फाराओ कली “आं आफ, आं लोकबपुकी, आन क्यारश भेडा, बी ब्यफ, आन मारेइ मारेइ नेल्ल कनान रागी रे चाक्शा, गोशेनमी जाकशो बाकनीमी” दे शेंदा बाकत। 2 मिनू आ लोकब आन दाते रे ५ जना योव्रशा, फाराओ आ डोंइती राप्पदा बाकत। 3 मिनू फाराओमी मेको आन कली “इन गेय मार बाकबा?” दे हिल्लो पवा बाकत। मिनू मेकोपुकीमी “गो, इन गेय पाइबपुकी, भेडा गोठला बाकनीकी। गो आंइ किकी पिपी रे गोठला बाकतक” दे फाराओ कली देंमा बाकत। उत्पत्ती ४६:३३-३४ 4 मिनू लेंशा “कनान रागीमी ठेयब अन्काल दुम्तीके, गो

अर्को रागी डा मुर दुम्शा, एक बाक्थ जाक्तक। मारदे हना आंइ क्यारश भेडा आन कली जोतीके मबा। मोपतीके आंइ कली गोशेन माइक्तीकेमी बाक्चा गेने, दे पुंइनीकी” दे पुंइदमे बाक्त। 5 मिनू फाराओम योसेफ कली “इ आफ नु इ लोकबपुकी इ बाक्तीक रागी जाक्तेक्मे। 6 इजीप्त रागी इ रागी खोदेशो मिम्तो। नेल्ल क्येडा रिम्शो जोतीके गोशेनमी मेको आन कली बाक्पतो। मिनू मेको इ मुर आन दातेमी रिम्शो गेय पाइब बाक्तेक्म हना, आं बस्तु भाव आन कली यो कोव्रपतो” दे मदा बाक्त।

7 मिनू नोले योसेफमी आ आफ कली फाराओ आ डोंइती राप्पदा बाक्त। मिनू याकूबमी फाराओ कली आसीक गेवा बाक्त। 8 मिनू फाराओमी “गिश बर्स दुम्नी?” दे हिल्लो पवा बाक्त। 9 मिनू याकूबमी “गो मुल सम्म रागीम बाक्शो, सहे का ३० बर्स दुम्ती। आं किकी पिपी खोदेशो पा शुश बर्स मदुम्ड। गो मरिम्शो नाक्त यो ताता” देंमाक्त। हिब्रू ११:१३ 10 मिनू आसीक गेशा, फाराओ रे लमाक्त। 11 मिनू योसेफमी फाराओ आ देशो खोदेशो पा आ आफ नु आ लोकब आन कली इजीप्त रागीमी रू गेवा बाक्त। रागी डा नेल्ल क्येडा रिम्शो बाक्तीके रामेसेस आ रागी गोशेनमी बाक्पाइक्मी बाक्त। 12 मिनू योसेफम आ आफ, आ लोकब नु आ आफ आ खिं डा मुर नेल्ल आन कली आन खिं खिं कली गाप्चा डा पा जचा थोव्रक गेशा थुल्मी बाक्त। उत्पत्ती ४५:११

इजीप्त डा मुरपुकी पुडग दुम्शो

13 रागी नेल्लेमी जचा थोव्रक मथिदमे बाक्त। मारदे हना मेको अन्काल बारना बारन लमाक्त। मिनू इजीप्त नु कनान रागी डा मुर शुश श्येत जामे बाक्त। 14 मिनू योसेफमी इजीप्त नु कनान रागी डा अन्न ग्यापथ जाक्ब आन गुइ रे क्येट ताक्शा, फाराओ आ खिंमी वोदा बाक्त। 15 मिनू इजीप्त नु कनान डा मुर आन क्येट नुप्शा, योसेफ आ बाक्तीकेमी जाक्शा, मेकोपुकीमी “जचा थोव्रक गेकी। आंइ के क्येट नुप्त। गे जचा थोव्रक मगेतीनी हना, गो इन डोंइती बेक्चा माल्नीकी” दे मदमे बाक्त। 16 मिनू योसेफमी “इन के क्येट मबाक्त हना, इन बस्तु भाव चाक्कीन। मेको रे पा जचा थोव्रक ताइनीनी” देंमाक्त। 17 मिनू आन बस्तु भाव योसेफ आ बाक्तीके चाक्मे बाक्त। मिनू योसेफमी शारापुकी, क्यारश भेडा, बी ब्यफ, गधा ताक्शा, जचा थोव्रक गेमी बाक्त। मेको बर्समी मेको आन कली आन बस्तु भाव आन पा डा अन्न गेवा बाक्त। 18 मिनू मेको बर्स नुप्शा डा मिन, अर्को बर्स लेंशा जाक्शा योसेफ कली मेकोपुकीमी “गो आंइ प्रभु आ डोंइती आंइ क्येट नुप्त, आंइ क्यारश भेडा, बी ब्यफ नेल्ल आंइ प्रभु केन दुम्तेक्म। मुल आंइ के रूपुकी नु आंम रां ला लीब। 19 मारदे गो इन डोंइती बेक्नीकी? आंइ कली नु आंइ रू कली यो अन्न गेशा ग्यापीन। गोपुकी फाराओ आ वाइलीम वाइल दुम्नीकी। गोपुकी ब्रोंइचा नु आंइ रागीम मुरपुकी लीचा कली वांचेर गेने” देंमा बाक्त।

20 मिनू योसेफमी इजीप्त रागी नेल्ल फाराओ कली ग्यबा बाक्त। मारदे हना ठेयब अन्काल आ पबर्म इजीप्त डा मुरपुकीमी आन रू नेल्ल लेयडमे बाक्त। मिनू रू नेल्ल फाराओ के दुम्माक्त। 21 मुर नेल्ल आन कली वाइलीम वाइल सेल्शा, आन बाक्तीके रे याक्शा वोदा बाक्त। 22 नाक्सो आ रू चहिं मग्यबा बाक्त। मारदे हना आन जचा फाराओ आ गुइ रे तामे बाक्त। मोपतीके आन रू यो लेयचा ममाल्मा बाक्त। गन्ती १८:२०; यहोसु १३:१४; इजीकीएल ४४:२८; इजीकीएल ४५:१-५ 23 मिनू योसेफम मुर आन कली “नेनीन, मुलाक्ती रे गेपुकी नु इन रू नेल्ल फाराओ के दुम्त। गो ग्याप्ता। एको वांचेर लाइश्शा, शोक्कीन। 24 मिनू रिक्की ना ५ भाग डा भाग १ फाराओ कली गेचा माल्नीनी। अर्को ४ भाग वांचेर कली नु इन कली, इन खिं डा मुर नु आइक्च आल नेल्ल आन कली थुल्चा कली लीब” दे माइक्मी बाक्त। एफाह का २२ लिटर खोदेशो बाक्ब। 25 मिनू मेकोपुकीमी “गे आंइ कली बेक्चा रे प्रोंइतीनी। गे आंइ कली थम रिम्शो पाइतीनी। गो फाराओ आ वाइल बाक्नीकी” देंमा बाक्त। 26 मिनू योसेफमी इजीप्त रागी डा ऐन कानुनमी “फाराओ कली ५ भाग डा भाग का गेचा माल्नीम। नाक्सोपुकीमी चहिं गेचा ममाल्नीम। मारदे हना आन रू फाराओ के मदुम” दे ब्रेक्पदा बाक्त। मेको मुल सम्म मोदेशो बाक्ब।

27 मिनू इस्राएल इजीप्त रागी डा गोशेनमी बाक्मेनु, आन मारेइ मारेइ नु मुरपुकी सोशा बोशा, शुश दुम्मा बाक्त। उत्पत्ती ४६:३; प्रस्थान १:७,१२ 28 याकूब इजीप्त रागीमी १७ बर्स ब्रोंइमाक्त। मेको आ ब्रोंइतीक नेल्ल पा सहे का ४७ बर्स बाक्माक्त। 29 मिनू आ बेक्ची जाक्माक्त। मिनू आ तौ योसेफ कली ब्रेश्शा “गे आं कली शिशी पाप्तीवी हना, इ गुइ आं फिला तार वोइश्शा, जोल मपथु, आं कली रिम्शो पावो। आं कली इजीप्त रागीम मथिम्यी, दे पुंइनुड। उत्पत्ती ५०:५ 30 गो बेक्शा, आं कली इजीप्त रागी रे कुरशा, आं कली आं किकी पिपी आन तुरसुम थिम्यी” दे पुंइदा बाक्त। मिनू योसेफमी “इन देशो पाइनुड” देंमाक्त। उत्पत्ती २३:२० 31 मिनू मेकोमी “कसम जावो” दे मदा बाक्त। मिनू योसेफमी कसम जवा बाक्त। मिनू इस्राएल ब्राख्येम बाक्शा, खुम्की पांइसे बाक्त। हिब्रू ११:२१

48

याकूब, एफ्राइम नु मनस्से

1 मिनु नोले मुर कामी योसेफ कली “इन आफ रोइ पाप्तु” दे शेंदा बाक्त। मिनु योसेफमी मनस्से नु एफ्राइम आ तौ निक्शी लाइशा, गुमथ लमाक्त। 2 मिनु मुर कामी याकूब कली “नेनीन, इन तौ योसेफ इन कली गुमथ जाक्त” दे नेंपदा बाक्त। मिनु इस्राएल बोल पा बोक्शा, आ ब्राख्येम निस्से बाक्त। 3 मिनु याकूबमी योसेफ कली “नेल्ल सक्ति पाइशो परमप्रभुमी कनान रागी डा लूज सहरम गूशा, आं कली आसीक गेती। उत्पत्ती २८:१७-१९ 4 मेकोमी आं कली ‘नेनीन, गो इन कली सोशा बोशा, शुश सेल्लुड। गो इ रे शुश थर डा मुर सेल्लुड। इ कली नु इ चच युइ आन कली मेको रागी गेना हना यो इन केन बाक्ब, दे गेनुड’ देंत। उत्पत्ती ३५:११-१२ 5 आं जाक्चा डोंइती, इजीप्त रागीम जरमेशो एफ्राइम नु मनस्से, इ तौ निक्शी आं मुर दुम्या माल्नीस। रूबेन नु सिमियोन खोदेंशो पा आं केन दुम्या माल्नीस। उत्पत्ती ४१:५०-५२ 6 इ नोले थिशो आल चहिं इ के दुम्मल। मिनु आन लोकब आन जात डा नें वोइशो, इजीप्त रागीम अडस ताइब दुम्मल। 7 गो पदान रे गाक्डानु, कनान रागी डा एफ्राथ आ डोंइती राहेल बेक्त। मिनु गो मेको कली एफ्राथ माइशो बेथलेहेम सहर लतीक लांमी थिम्ता” देंमाक्त। उत्पत्ती ३५:१९ 8 मिनु इस्राएलमी योसेफ आ तौ निक्शी आस कली तशा “मेको निक्शी सु नसी?” दे हिल्लो पवा बाक्त। 9 मिनु योसेफमी आ आफ कली “परमप्रभुमी आं कली गेशो तौ बाक्नीसी” देंमाक्त। मिनु याकूबमी “मेको आस कली एक चाक्सी। मिनु गो मेको आस कली आसीक गेनुड” दे मदा बाक्त। 10 इस्राएल खाल्पा दुम्या, आ मिक्च रिमशो मताइब दुम्यो बाक्माक्त। मोपतीके मेको आस कली मतुइक्ता बाक्त। मिनु योसेफमी मेको आस नेक्था चाक्दीस्सी बाक्त। मिनु इस्राएलमी मेको आस कली पुक्पु पाइशो, मुबा बाक्त। 11 मिनु योसेफ कली “गो इ कुल ताइनुड दे ममिश्शो नड। तन्न परमप्रभुमी आं कली इ आल आन कली यो कोंइताक्यी” देंमाक्त। उत्पत्ती ३७:३३-३५; उत्पत्ती ४५:२६; भजन संग्रह १२८:६ 12 मिनु योसेफम मेको आस कली आ आफ आ थुकु रे याक्शा, खुम्की पा सेउ पवा बाक्त। 13 मिनु योसेफमी आ तौ निम्फा आस कली लाइशा, एफ्राइम आ ग्युरा गुइ नु मनस्से आ पेरा गुइ ग्याइशा लाइशा आ आफ आ डोंइती वोदा बाक्त। मोपा मनस्से याकूब आ ग्युरा गुइ नु एफ्राइम याकूब आ पेरा गुइ आ नेक्था वोदा बाक्त। उत्पत्ती ४१:५१-५२ 14 तन्न इस्राएलमी आ गुइ खाक्शा आ ग्युरा गुइ एफ्राइम आ पिया तारी नु आ पेरा गुइ मनस्से आ पिया तारी वोदा बाक्त। मनस्से चहिं योसेफ आ डोंइती जरमेशो तौ बाक्माक्त। 15 मिनु याकूबमी योसेफ कली आसीक गेशा “आं किकी पिपी अब्राहाम नु इसहाक परमप्रभु आ डोंइती गाक्शो बाक्ताक्से। मेको परमप्रभुमी आं कली आं ब्रोंइतीक नाक्त नेल्ल मुल सम्म कोवती। उत्पत्ती ३२:१०; भजन संग्रह २३:१ 16 आं कली श्येत रे प्रोंइब परमप्रभु यावे आ स्वर्ग डा गेय पाइबम एको वोंइश आल आस कली आसीक गेवल। मिनु एको आस पतीके आं नें नु आं किकी पिपी अब्राहाम नु इसहाक आस नें मपेंसेक्ल। एको निक्शी रे पा रागीमी शुश दुम्मल” दे आसीक गेम्सी बाक्त। उत्पत्ती ३२:२५-३०; यसैया ४१:१४ 17 मिनु योसेफमी आ आफ आ ग्युरा गुइ एफ्राइम आ पिया तारी वोइशो तशा, आ थुं मनुमाक्त। मिनु आ आफ आ गुइ एफ्राइम आ पिया रे शोल्ला, मनस्से आ पियाम वोइक्नुड, दे मिम्ता बाक्त। 18 मिनु योसेफम आ आफ कली “ममाइ आं आफ, मेको आं डोंइती जरमेशो बाक्ब। इन ग्युरा गुइ एको आ पिया तारी वोतीन” देंमाक्त। 19 तन्न आ आफ मबित्थु “गो तुइक्नुड, आं तौ, गो तुइक्नुड। एको यो थर का दुम्ब, एको यो ठेयब दुम्ब। तन्न एको क्येडा आ लोकब एफ्राइम ठेयब दुम्ब। मिनु आ चच युइ शुश ठेयब जात दुम्नीम” दे आसीक गेम्सी बाक्त। गन्ती १:३३, ३५; ब्यवस्था ३३:१७ 20 मिनु मेको नाक्ती मेको आस कली आसीक गेशा “इस नें थिशा इस्राएलीमी आसीक गेनीम। मेकोपुकीमी ‘परमप्रभुमी इ कली एफ्राइम नु मनस्से खोदेंशो सेलल’ दे आसीक गेनीम” देंमाक्त। मोपा याकूबमी मनस्से क्येडा एफ्राइम डोंइती वोदा बाक्त। हिबू ११:२१ 21 मिनु इस्राएलमी योसेफ कली “नेनो, गो बेक्नुड। मिनु परमप्रभु गे नु बाक्शा, इ कली लेंशा इ किकी पिपी आ रागी लाइक्ब। 22 गो इ कली इ लोकब आन क्येडा निक्शी अडस गेतन। आं तरवार नु लिब्रामी एमोरी आन गुइ रे रोइशो रू इ कली गेतन” दे याकूबमी योसेफ कली मदा बाक्त। यूहन्ना ४:५

49

याकूब आ तौ आन आसीक
ब्यवस्था ३३:-

1 मिनु याकूबमी आ तौ आन कली ब्रेशशा मेको आन कली “नोले इन कली मार मार दुम्बा, नेचा कली एकेर बुक्कीन। 2 याकूब आ तौपुकी बुक्शा, इन आफ इस्राएल, आं लोत्र नेनीन।

रूबेन

3 रूबेन, गे आं डोंइती जरमेशो तौ नवे। डोंइती डा आं बोल नु सक्ति बाक्नेवे। नेल्ल क्येडा शिरशो नु सक्ति पाइशशो डोंइती डा बाक्ते। उत्पत्ती २९:३२; ब्यवस्था २१:१७ 4 समुन्द्र डा छाल खोदेशो पा गे हिम्सीशो थुं पाइशशो मुर दुम्नेवे। मारदे हना गे इ आफ आ खाट डोइशशा, बिथोलो पाप्तीवी। आं इप्तीकेम बाक्ते। गे मान मताइब दुम्नेवे। उत्पत्ती ३५:२२

सिमियोन नु लेवी

5 सिमियोन नु लेवी वोबु बाक्नीसी। गे हुश खाक्श पोक्ब बाक्नीसी। उत्पत्ती ३४:२५ 6 आं थुं इस खुइशशा अरेशोम गेनायो मबिस्सेक्ल, आं नें इस गुम्तीकेमी गेनायो मदेमल। थुं का मदुमीसे। मारदे हना इस चुरतीकेमी मुर साइक्तीसी। महिंब दुम्शा, ब्यफ कली गाक्ने मचाप्ब सेलतीसी। 7 इस गाइशशोम सराप राइब। मारदे हना मेको ठेयब बाक्ब। इस चुरचाम सराप राइब। मारदे हना मेको शिशी मपाइशशो मरिम्शो बाक्ब। थुं का मदुमीस। इस्राएल रागीमी ब्राशा बाक्कीस। यहोसु १९:१-९; २१:१-४२

यहूदा

8 यहूदा, इ लोकबपुकीमी इ कली ठेयब सेल्मेक्ल। इ गुइमी इ जोरी सत्रु आन क्रोकक्रो निप्नेवे। इ आफ आ आल इ डोंइती खुम्की पा बाप्नीम। गन्ती १०:१४; न्यायाधीस १:१-२ 9 यहूदा गुप्स आ चाइक्ब खोदेशो बाक्ब। सिखार ब्वशा ठेयब दुम्ते। ठेयब गुप्स खोदेशो पा खुम बाप्ब। गुप्सनी खोदेशो पा इप्ब। सुम मेको कली बोक्पाइक्ने चाप्बा? गन्ती २३:२४; इजीकीएल १९:२; प्रकाश ५:५ 10 ठेयब श्येत रे प्रोंइब मजाक्म सम्म आ राज दन्ड आ सासन पतीके आ गुइमी लीब। जात जात डा मुर मेको आ नोले खोइक्नीम। गन्ती २४:१७; १इतिहास ५:२; हिब्रू ७:१४; इजीकीएल २१:३२ 11 मेकोमी आ गधा अडगुर आ बोटम पाइक्ब, आ गधा आ चाइक्ब नेल्ल क्येडा रिम्शो अडगुर बोटम पाइक्ब। आ फेक्तीक वा अडगुर शांबुम मुरब। आ वा अडगुर आ रसम खुम्ब। योएल ४:१८ 12 आ मिक्च अडगुर क्येडा रिम्शो रड डा बाक्ब। आ खुइ दूध क्येडा बुश बाक्नीम।

जबूलून

13 जबूलून समुन्द्र नु डोंगा वोइक्तीकेमी बाक्ल। सीदोन सहर सम्म आ बाक्तीके दुम्ल। यहोसु १९:१०-१६

इस्साकार

14 इस्साकार बोल्यो गधा दुम्शा, भारी आस दातेमी इप्ब। 15 मेकोमी नाइक्तीके रिम्शो नु रागी दारशो बाक्ब, दे ताप्तु। मेकेर कुरब दुम्शा, अर्को आन गेय पाइब दुम्त।

दान

16 दान इस्राएल आ जात डा ठेयब मुर दुम्शा, अरु आन कली निसाफ पाइब दुम्ल। न्यायाधीस १३:२, २४, २५ 17 दान लांमी बाक्शो बुस्स खोदेशो दुम्शा, मेको बीस पाइशशो बुस्स खोदेशो दुम्शा, आइक्च लांम बाक्ब। शारा डोइक्ब मुर तोक्चा कली शारा आ गेग्रेम कोक्ब। मिनु शारा डोइक्ब मुर नोले गे दोक्ब। 18 परमप्रभु यावे, गे आं मरिम्शो पशो रे प्रोंइनीनी, दे रिम्शा बाक्ती। भजन संग्रह ११९:१६६; हबकुक् २:३

गाद

19 रोइक्ब मुरपुकी गाद कली रोइक्चा कली जाक्नीम। गादमी मेको आन कली खेदा पा मेको आन के रोइक्ब।

आशेर

20 आशेर आ जचा थोत्रक शुश ब्रोत्रशो बाक्ब। पिपम खोदेशो पा ब्रोत्रशो जचा गेब। यहोसु १९:२४-३१

नाप्ताली

21 नाप्ताली प्रोंइशो रोकोश बाक्ब। मेकोमी दारदारशो चाइक्ब पाइब। न्यायाधीस ४:६-१०

योसेफ

22 योसेफ फल सिप्ब रवा का बाक्ब। आ राशी गारो तारी बाक्शा, ब्वाक्कु बुक्तीकेमी खुम्शो रवा का बाक्ब। 23 ब्रा आप्बपुकीमी मेको कली ब्रा आप्तेक्म। मेको कली आप्शा, खेदा पशा, काइ मदाक्तेम। 24 तन्न आ लिब्रा

बोल्थो बाक्ब, आ गुइ बोल्थो बाक्नीम। सक्ति पाइशशो याकूब आ परमप्रभु, इस्राएल आ गोठला नु सेरथे फुल्लुम, मेको कली वारच पाप्तु। ब्यवस्था ३२:१८ 25 इ आफ आ परमप्रभुमी इ कली वारच पाइब। नेल्ल क्येडा सक्ति पाइशशो परमप्रभुमी इ कली सरीड रे नु खप रे आसीक गोब। शुश आल थिचा डा आसीक यो गोवल। ब्यवस्था २८:३-६; ब्यवस्था ३३:१३ 26 गेना हना यो बाक्ब डांडा डा आसीक क्येडा इ आफ आ गेशो आसीक ठेयब बाक्ब। योसेफ आ लोकब खोदेशो मदुमथु, एको आसीक आ पिया तारी दुम्ल।

बेन्यामीन

27 बेन्यामीन बुष्शा ग्याइक्ब फर खोदेशो बाक्ब। मिनु सुनी आ सिखार ब्वाइब, नाक्दो आ रोइशशो योक्ब” दे याकूबम आ तौ नेल्ल आन कली आसीक गेमी बाक्त। न्यायाधीस २०:२५; १सामुएल ९:१-२

इस्राएल बेक्शो

28 एको इस्राएल आ १२ थर बाक्नीम। आन आफोम मेको आन कली आसीक गेशा पशो लोव्र एकोन बाक्ब। मेकोमी मेको आन कली का का पा आसीक गेवा बाक्त। 29 मिनु मेको आन कली “गो आं किकी पिपी आन बाक्तीके लाइनुड। हिती डा एफ्रोन आ रूमी बाक्शो पुक्खी, आं किकी पिपी आन कली थिम्तीकेमी आं कली वोतीन। उत्पत्ती २३:१३-२० 30 मेको पुक्खी कनान रागीमी माप्ने आ पूर्व डा माक-पेलामी बाक्ब। अब्राहाममी मेको थिम्तीक हिती डा एफ्रोन रे ग्यबा बाक्त। 31 अब्राहाम नु आ मीश सारा मेक थिम्शो बाक्नीस। इसहाक नु आ मीश रेबेका यो मेक थिम्शो बाक्नीस। मेकेर लेआ यो थिम्ता। उत्पत्ती २५:९; उत्पत्ती ३५:२९ 32 मिनु मेको रू नु पुक्खी हिती मुर रे ग्याप्शो बाक्त” देंमाक्त। 33 याकूबमी आ तौ आन कली मोदें लोव्र पशा नोले, खाटमी आ खोइल दिंशा, बेक्माक्त। मिनु आ किकी पिपी आन बाक्तीक लमाक्त।

50

याकूब कली थिम्शो

1 मिनु योसेफ आ आफ आ कुल तार गुर ब्वेशा, पुक्पु पाइशशा, डाक्माक्त। 2 मिनु आ गेय पाइब नु डाक्टर आन कली “आं आफ आ रां कली खेक्तीन” दे माइक्मी बाक्त। मिनु मेकोपुकीमी बेक्शो मुर आ रां खेक्तमे बाक्त। 3 मिनु ४० नाक्त खेक्तमे बाक्त। मारदे हना खेक्चा कली ४० नाक्ती माल्बाक्माक्त। इजीप्त डा मुरपुकी यो ७० नाक्ती रोंका पामे बाक्त। 4 मिनु रोंका पतीक नाक्ती नुम्मेनु, योसेफमी फाराओ आ खिं डा मुर आन कली “गो इन डोंइती शिशी ताइनुड हना, गे फाराओ कली आं पर्बम लोव्र पने। 5 आं आफोम आं कली ‘गो बेक्डानु, कनान रागीम आं कली थिम्तीके ठीक पाता, मेकेर थिम्चा माल्नेवे’ दे कसम जपाइक्ती। मोपतीके आं आफ थिम्चा कली मेकेर लचा गेयीनी। मिनु गो थिम्शा लेत्नुड। एको लोव्र फाराओ कली देनीन” दे मेको आन कली मदा बाक्त। उत्पत्ती ४७:२९-३० 6 मिनु फाराओमी “इ कसम जशो खोदेशो पा इ आफ कली थिमो” दे योसेफ कली देंमाक्त। 7 मिनु योसेफ, फाराओ आ गेय पाइबपुकी, मेको आन ठेयब मुरपुकी, इजीप्त रागी डा ठेयब मुरपुकी, 8 योसेफ आ खिं डा मुर नेल्ल, आ लोकबपुकी नु आ आफ आ खिं डा मुर नेल्ल आ आफ थिम्थ लमा बाक्त। आन आइक्च आलपुकी नु आन क्यारश भेडा, बी ब्यफ ला गोशेनमी बाक्मा बाक्त। 9 मिनु योसेफ नु बग्गी नु शारा डोइक्बपुकी लमा बाक्त। मिनु शुश मुर दुम्मा बाक्त। 10 मिनु मेकोपुकी आताद आ चेरब तुप्तीके यर्दन खोला आइक्ची हांबु जाक्दीशशा, ठेयब रोंका पामे बाक्त। मिनु योसेफमी आ आफ कली ७ नाक्त सम्म रोंका पवा बाक्त। 11 मिनु मेकेर बाक्ब कनान रागी डा मुरपुकीम आताद आ चेरब तुप्तीक खलाम मेको रोंका पाइब आन कली तशा “एको इजीप्त डा मुर आन ठेयब रोंका का बाक्ब” देंमा बाक्त। मोपतीके मेको यर्दन आइक्ची हांब डा बाक्तीके कली आबेल-मिस्रैम नें वोदमे बाक्त। आबेल-मिस्रैम आ अर्थ “ठेयब रोंका पतीके” बाक्ब। 12 मोपा याकूब आ तौपुकीमी आन आफ आ अरेशो खोदेशो पामे बाक्त। उत्पत्ती ४९:२९ 13 मिनु आ तौपुकीम आन आफ आ रां कनान रागी चाक्दीशशा, अब्राहाममी मुर थिम्चा कली हिती डा एफ्रोन रे ग्याप्शो माप्ने आ नेक्था माक-पेला डा रूमी थिम्मे बाक्त। उत्पत्ती २३:१३-२० 14 मिनु आ आफ थिम्शा नोले, योसेफ नु आ नु गाक्ब नेल्ल इजीप्त रागी लेम्मा बाक्त। 15 मिनु आन आफ बेक्म नोले योसेफ आ लोकबपुकीम “मुल योसेफमी इं कली क्येक्क लेप्बा कों। मारदे हना गोपुकीमी मेको कली मरिम्शो पाइतय” दे लोव्र पमुमा बाक्त। उत्पत्ती २७:४१ 16 मिनु आ लोकबपुकीमी लोव्र पचा कली मुर का योसेफ आ बाक्तीके सोइक्तमे बाक्त। मेकोमी “इन आफ आ बेक्चा क्येडा डोंइती मार अरेवा बाक्त देंशा हना, 17 गे योसेफ कली ‘इन लोकब आन मरिम्शो पशो आ पर्बम माफ गेने। मारदे हना इन कली मरिम्शो पाप्तेक्मे। मिनु इन आफ आ परमप्रभु आ गेय पाइब आन कली आन

पाप माफ गेने' दे माइक्चा" दे सोइशशो मुरुमी योसेफ कली देंमाक्त। मिनु योसेफमी मेको आ लोत्र नेंशा डाक्माक्त। 18 मिनु आ लोकबपुकी यो जाक्मा बाक्त। मिनु आ डोंइती खुम्की पा बाप्शा "इन वाइल नकी" दे सेउ पामे बाक्त। 19 मिनु योसेफमी "महिनीन, गो परमप्रभु मनड। 20 गेपुकीमी आं कली मरिम्शो पाइतीनी। परमप्रभुमी चहिं रिम्शो सेलती। मो दुम्शा परमप्रभुमी शुश मुर आन कली ब्रोंइचा गेपु। उत्पत्ती ४५:५,७ 21 मोपतीके महिनीन, गो इन कली नु इन आल आन कली कोव्रनुड" दे आ लोकब आन कली लेम्शा, रिम्शो लोत्र पवा बाक्त।

22 योसेफ नु आ खिं डा मुर नेल्ल इजीप्त रागीमी बाक्मा बाक्त। मिनु योसेफ सहे का १० बर्स ब्रोंइमाक्त। 23 मिनु आ तौ एफ्राइम आ चच युइ यो तवा बाक्त। आ डोंइती जरमेशो, मनस्से आ तौ माकीर आ तौ आ थुकुम वोदा बाक्त। 24 मिनु योसेफमी आ लोकब आन कली "गो बेक्नुड। परमप्रभुमी इन कली कोव्रब। परमप्रभुमी अब्राहाम, इसहाक नु याकूब कली 'इन कली कनान रागी लेप्पाइक्नुड' दे कसम जशा, लोत्र पशो बाक्ब" देंमाक्त। 25 मिनु योसेफमी आ लोकब आन कली "परमप्रभुमी इन कली थमा पा एकेर रे लेप्पाइक्ब। मेना आं रुश यो लतीने" दे कसम जपाइक्मी बाक्त। प्रस्थान १३:१९; यहोसु २४:३२ 26 मिनु योसेफ सहे का १० बर्स दुम्शा बेक्माक्त। मिनु आ रां कली मराक्चा डा पा ओरुती खेक्शा, इजीप्त रागीमी बाकसम कुर पा वोदमे बाक्त।

प्रस्थान

ब्रेक्ब मुर: एको किताब ब्रेक्ब मोसा बाक्ब, दे सां खेयप ब्रेक्शो बाक्ब। प्रस्थान १७:१४; प्रस्थान २४:४; प्रस्थान ३४:२७-२८

गेना ब्रेक्शो: एको किताब योसेफ बेक्म नोले रे परमप्रभु यावे आ ताम्बु सेल्ची ना सम्म इस्राएलीपुकीम इजीप्त रागीम श्येत जशो आ पर्बम बाक्ब। इस्राएलीपुकी ४३० बर्स सम्म इजीप्तम बाक्शो बाक्तेक्म। परमप्रभुम मेको आन श्येत जशो तशा, आ ठेयब सक्ति इजीप्त डा मुर आन कली कोंइशा, आ मुर इस्राएली आन कली श्येत रे प्रोना बाक्त। एको लोत्र गेना दुम्शो बाक्बा मेको मतुंडसीब। एको किताब मोसामी आ गेय पची ना ब्रेक्शो बाक्त।

मार ब्रेक्शो:

१. इस्राएलीपुकी इजीप्त रागीम बाक्शा श्येत जशो प्रस्थान १:-१२:३६
२. इजीप्त रे गुंडशा, आन श्येत रे प्रोंइशो प्रस्थान १२:३७-१८:२७
३. परमप्रभु यावेमी मेकोपुकी नु कबल पशो

इस्राएलीपुकीमी श्येत जशो

१ आन खिं खिं डा मुर लाइश्शा, याकूब नु इजीप्त लाइब इस्राएल आ तौ सु सु बाक्मा बाक्त देशा हना, उत्पत्ती ४६:८-२७ २ रूबेन, सिमियोन, लेवी, यहूदा, ३ इस्साकार, जबूलून, बेन्यामीन, ४ दान, नाप्ताली, गाद नु आशेर बाक्मा बाक्त। ५ मिनु याकूब आ तौ आन खिं खिं डा मुर नेल्ल पा ७० जना बाक्मा बाक्त। योसेफ चहिं इजीप्त रागीमी बाक्शो बाक्माक्त।

६ मिनु नोले योसेफ नु मेको आ लोकब आन पाला डा मुर नेल्ल बेक्मा बाक्त। उत्पत्ती ५०:२६ ७ मिनु इस्राएल आ चच युइ सोशा बोशा शुश दुम्मा बाक्त। शुश दुम्शा डा मिन, बोल्यो दुम्मा बाक्त। मिनु इस्राएल आ मुरपुकीमी रागी नेल्ल ब्रीमा बाक्त। प्रेरित ७:१७-१९

८ मिनु नोले योसेफ कली मतुंडक्ब पिप काम इजीप्त रागी कली सासन पवा बाक्त। ९ मेकोमी आ मुर आन कली “नेनीन, इं रागीमी बाक्शो इस्राएल डा मुरपुकी इं क्येडा शुश नु बोल्यो दुम्तेक्म। १० मेको आन पर्बमी शुश मिम्शा, सल्ला पय। मो मपाइतय हना, मेको शुश दुम्शा, नोले लडाइ दुम्मेनु, इं जोरी सत्रु आन कली वारच पाइश्शा, एक रे प्रोक्नीमी, कोर मे” दे आ मुर आन कली माइक्मी बाक्त। ११ मोपतीके मेकोपुकीमी इस्राएली आन कली श्येत गेशा, गेय पपाइक्चा कली कोत्रब ठेयब मुरपुकी वोदमे बाक्त। मिनु इस्राएलीपुकीमी फाराओ माइश्शो पिप आ मार मार वोइक्चा कली पिथोम नु रामेसेस सहर निक्शी सेल्ले बाक्त। उत्पत्ती १५:१३; उत्पत्ती ४७:११ १२ तन्न इस्राएली गिश श्येत जामे, मिश बारना बारन शुश दुम्शा, इजीप्त रागी ब्रीमा बाक्त। मिनु मेको आन कली तशा, इजीप्त डा मुर शुश हिंमा बाक्त। १३ मोपतीके इस्राएली आन कली डोंइती क्येडा यो शुश गेय पपदमे बाक्त। उत्पत्ती १५:१३ १४ शुश श्येत गेशा, शुश गेय पपदमे बाक्त। मार गेय पपदमे बाक्त देशा हना, हिलो निपदमे बाक्त, इंटा सेल्पदमे बाक्त, रू डा गेय यो पपदमे बाक्त। तेको गेय गेमे, मेको शुश श्येत डा गेय बाक्माक्त।

परमप्रभु कली मान पाइब मीश मुर

१५ मिनु इजीप्त डा पिपमी हिबू मीश मुर आन आल थिची ना वारच पाइब आन ठेयब मीश मुर आस कली लोत्र पवा बाक्त। मेको आन दाते डा का आ नें शिप्रा नु अर्को आ नें पुआ बाक्माक्त। १६ मिनु फाराओमी “गे निक्शी हिबू मीश मुर आन कली आल थिची ना वारच पाइनीसी। तौ थिम्तेक्म हना, सतीसे। तमी बाक्त हना, मसतीसे” दे माइक्सी बाक्त। १७ तन्न मेको मीश मुर आन कली वारच पाइब नेल्लेमी परमप्रभु कली मान पा हिंशा, इजीप्त डा पिपमी देशो मपथु, वोंइश आल आन कली यो मसदमे बाक्त। १८ मिनु इजीप्त डा पिपम मेको वारच पाइब मीश मुर आस कली ब्रेशशा “गे मारदे वोंइश आल आन कली यो ब्रोंइचा गेसी? मारदे मोदेशो पसी?” दे लोत्र पवा बाक्त। १९ मिनु मेको मीश मुरुमी “हिबू मीश मुरपुकी इजीप्त डा मीश मुर आन क्येडा बोल्यो बाक्नीम। मोपतीके गो जाक्दीत्चा क्येडा डोंइती आल थिने थुम्शो बाक्नीमी” देसा बाक्त। २० मोपतीके परमप्रभुमी मेको आल थिचा वारच पाइब मीश मुर आन कली आसीक गेवा बाक्त। मिनु इस्राएली शुश दुम्शा, बोल्यो दुम्मा बाक्त। २१ वारच पाइब मीश मुरपुकी परमप्रभु कली मान पा हिंतीके परमप्रभुमी मेको आन खिं कली यो आसीक गेवा बाक्त। २२ मिनु पिप फाराओमी आ मुर आन

कली “हिब्रूपुकीमी दोशो तौ थीमे, मेको नेल्ल नील खोलाम लाइशशा ताइक्तीन। आन तमी आन कली चहिं ब्रोंइचा गेने” दे हुकुम पवा बाक्त।

2

मोसा जरमेशो

1 लेवी आ थर डा मुर का बाक्माक्त। मिनु मेकोमी लेवी आ थर डा मीश आल का ग्युबे पवा बाक्त। प्रस्थान ६:२०
2 मिनु मेको मीश मुरुमी तमी का नु तौ का थिमाक्त। नोले लेंशा आल कुरशा, तौ का थिमाक्त। आ थिशो तौ कली तशा “शुश दारशो आल बाक्ब” दे महिना सां सम्म खुइशशा वोदा बाक्त। प्रेरित ७:२०; हिब्रू ११:२३ 3 मिनु नोले आल आ ममामी महिना सां डा आल कली खुइक्ने मचबा बाक्त। मिनु आल कली सुम्तीके पाइशशो ग्युर सेल्शा, ब्वाक्कु मओव्रचा डा पा अल्कत्राम सिल्दा बाक्त। मिनु मेको आ तौ कली ग्युरुम कुर पा खोला आ नेक्था डा बुदी मीलु घांस आगा, ब्वाक्कुम वोदा बाक्त। 4 मिनु मेको आल आ दिदी “आं लोकब कली मार दुम्मे” दे डोन रे कोव्रदीम्माक्त। गन्ती २६:५९

5 मेना पिप आ तमी खोलाम चिक्चा कली जाक्दीम्माक्त। आ गेय पाइबपुकी यो खोला आ नेक्था लमा बाक्त। मिनु पिप आ तमीमी बुदी मीलु घांस आगा, ब्वाक्कुमी मेको ग्युर तशा, आ गेय पाइब का कली “मेको ग्युर ब्रथ लावो” दे सोइक्ता बाक्त। 6 मिनु पिप आ तमीमी मेको सुम्तीक पाइशशो ग्युर रोकशा कोव्रडानु “ए, आल का बाक्त” देंमाक्त। मिनु आल डाक्माक्त। मेको आल तशा, शिशी पवा बाक्त। मिनु पिप आ तमीमी “एको हिब्रू डा मुर आ तौ का बाक्ब” देंमाक्त।

7 मिनु आल आ दिदीमी “गो इन कली हिब्रू दूध तुंडब मीश मुर का चाक्गु? आल कली दूध तुंडबा को” दे हिल्लो पवा बाक्त। 8 मिनु फाराओ आ तमीमी “लो, चाक्को” दे मीश आल कली देंमाक्त। मिनु मेको मीश आलम आ ममा ब्रथ लमाक्त। 9 मिनु फाराओ आ तमीमी मेको मीश मुर कली “एको आल आं कली थुलो। एको आल थुल्शो डा, इ कली क्येट गेनुड” दे लोव्र पवा बाक्त। मिनु मीश मुरुमी आल लाइशशा, थुला बाक्त। 10 मेको नोले आल कोल्माक्त। मिनु काबु मेकोमी मेको आल फाराओ आ तमी कली लाइशशा, गेवा बाक्त। मिनु आ तौ खोदेंशो दुम्माक्त। मिनु पिप आ तमीमी मेको आ नें मोसा वोदा बाक्त। मारदे हना “गो मेको कली ब्वाक्कु रे गुंडताक्ड” देंमाक्त। मोसा आ अर्थ हिब्रू लोव्रमी “ब्वाक्कु रे गुंडशो” देंशो बाक्ब।

मोसामी इजीप्त डा मुर साइशशो

11 मिनु नोले मोसा ठेयब दुम्शा, आ लोकब आन कली ग्रुथ लशा, आन श्येत जशो ताप्तु। मेकोमी इजीप्त रागी डा मुरुमी आ हिब्रू लोकब का कली तुप्शो ताप्तु। प्रेरित ७:२३-२९; हिब्रू ११:२४-२७ 12 मिनु मोसामी एर ओथ कोव्रशा, सुइ मबाक्शो तशा, इजीप्त डा तुप्ब मुर कली साइक्तु। मिनु बाल्वामी थिम्तु। 13 आ दीसा मोसा लेंशा हिरथ लमेनु, हिब्रू निक्शी जिशा तुम्मुशो ताप्तु। मिनु मोसामी मरिम्शो पाइब कली “मारदे आंम लोकब कली तुबी?” दे हिल्लो पाप्तु। 14 मिनु मेकोमी “सुमी इ कली आंस होव्रप नु निसाफ पाइब सेला? इजीप्त डा मुर कली साइशशो खोदेंशो पा आं कली यो सदु, देने?” देंत। मिनु मोसामी “मुल एको लोव्र, मुर नेल्लेमी तुइक्नीमी” दे मिम्शा हिंत। प्रेरित ७:३५ 15 मिनु फाराओमी “मोसाम इजीप्त डा मुर का साइक्तु” देंशो नेंशा, मोसा कली साइक्चा माल्तु। मोसा चहिं फाराओ आ बाक्तीक रे प्रोक्शा, मिदयान रागी जाक्दीशशा, इनार तारी निशशा बाक्त।

मोसा मिदयान रागी प्रोक्शो

16 मिनु मिदयान रागीमी ७ जना तमी बाक्शो नाक्सो का बाक्माक्त। मेको मीश आलपुकीमी आन आफ आ क्यारश भेडा आन कली ब्वाक्कु तुंडचा, दे शुंगु ब्वाक्कुम प्रिंचा कली, ब्वाक्कु कीतेक्म। प्रस्थान ३:१ 17 तन्न अरु गोठलापुकी जाक्शा, मेको आन कली श्येत गेम्तेक्म। मोसामी चहिं मेको मीश आल आन कली वारच पा, आन भेडा आन कली ब्वाक्कु तुंडताक्व। 18 मिनु मेको आन आफ रूएल आ खिं जाक्दीम्मानु, मेकोमी आ तमी आन कली “मुलाक्ती गे दोपा रीब पा जाक्नी?” दे हिल्लो पवा बाक्त। 19 मिनु मेको आ तमीपुकीमी “इजीप्त रागी डा वोंइश मुर कामी आंइ कली गोठला आन गुइ रे प्रोंइतु। मिनु शुश ब्वाक्कु कुर पा आंइ क्यारश भेडा आन कली तुंडताक्व” दे आन आफ कली मदमे बाक्त। 20 मेकोमी आ तमी आन कली “मेको मुर ते बाक्मे? एक मारदे मचाक्नी? मुल गो नु जथ ब्रेत्तीने” दे माइक्मी बाक्त।

21 मिनु मोसा मेकोपुकी नु बाक्चा बिस्साक्व। रूएलमी मोसा कली आ तमी सिप्पोरा ग्युंभे पा गेप्टु। गन्ती १२:१
22 मिनु नोले तौ का थिप्टु। मिनु मोसामी मेको आल आ नें गेरशोम वोइक्तु। मारदे हना “गो मतुइशो रागीमी अर्को
रागी डा मुर दुम्ती” देंत। प्रस्थान १८:४

परमप्रभुमी इस्राएली आन लोव्र नेंशो

23 मिनु शुश बर्स नोले इजीप्त रागी डा पिप बेक्माक्त। इस्राएल जात डा मुर इजीप्त रागीम वाइलीम वाइल खोदेशो
दुम्शा, शुश श्येत जशा, परमप्रभु कली “वारच पाइय्यीकी” दे पुंडशा डाक्मा बाक्त। मिनु परमप्रभुमी मेको आन डाक्शो
नेना बाक्त। 24 मिनु परमप्रभुमी अब्राहाम, इसहाक नु याकूब नु कबल पशो मिम्ता बाक्त। उत्पत्ती १५:१८; उत्पत्ती
२६:३; उत्पत्ती २८:१३-१४ 25 मिनु परमप्रभुमी आन श्येत जशो तशा शिशी पवा बाक्त।

3

परमप्रभुमी लोव्र पशो

1 मेना मोसा आ शिउ आ क्यारश भेडा योव्रथ लत। आ शिउ रूएल आ नें यित्री यो बाक्माक्त। यित्री चहिं मिदयान
रागी डा नाक्सो का बाक्माक्त। मोसामी क्यारश भेडा आन कली गोरशो रागी डा नां पेरतीके गे योव्रतु। मोपा योव्रना
योव्रन, होरेब माइशो परमप्रभु आ डांडा आ नेक्था जाक्दीत्त। प्रेरित ७:३०-३४ 2 मेकेर परमप्रभु यावे आ स्वर्ग डा
गेय पाइब मी ब्रशो बुटा रे गूत। डोंइती दोदेशो बाक्त देशा हना, मोसामी डोन रे कोव्रडानु, ब्रशो बुटा का कली मीम
काइ मनेक्शो ताप्टु। ब्यवस्था ३३:१६ 3 मिनु मोसामी “गो मेकेर लशा कोव्रचा माल्नुड। छक लाक्चा डा बाक्त।
मारदे मीम मेरे बुटा कली मनेक्गा?” दे आंमा लोव्र पाप्टु।

4 मिनु परमप्रभु यावेमी मोसा कली ब्रशो बुटा कोव्रथ पिशो तशा, परमप्रभुमी बुटा रे “मोसा, मोसा” दे ब्रेत्ताक्व।
मिनु मोसामी “गो एक बाक्ती” दे लोव्र लेत्ताक्व। 5 मिनु लेंशा “एक मपिवो। इ जुत्ता पुतो। मारदे हना इ राप्शा
बाक्तीके आं बाक्तीके बाक्ब। उत्पत्ती २८:१७; यहोसु ५:१५ 6 गो इ आफ आ परमप्रभु इ किकी पिपी अब्राहाम,
इसहाक नु याकूब आन परमप्रभु नड” दे मोसा कली लोव्र पाप्टु। मिनु मोसामी परमप्रभु कली तशा हिंशा, आ कुल
सुम्साक्व। उत्पत्ती १७:१; उत्पत्ती २८:१-४; उत्पत्ती ३५:९-११; मत्ती २२:३२

7 मिनु परमप्रभु यावेमी “गो इजीप्त रागीमी बाक्शो आं मुर आन श्येत ताता। मेको आन कली गेय पपाइक्ब आन
पबर्म डाक्नीमी। गो आन डाक्शो नेंता, ताता। गो आन श्येत जशो तुइक्ताक्ड। प्रस्थान २:२३ 8 मिनु मेको आन कली
इजीप्त रागी डा मुरपुकीम गेशो श्येत रे प्रोंइनुडमी। गो आं मुर आन कली रिम्शो नु ठेयब रागी लाइक्नुडमी। मेको
रागीम दूध नु खुदो शुश बाक्ब। मारेइ मारेइ यो शुश ग्रेल्ब। मेको रागी कनानी, हिती, एमोरी, परिज्जी, हिव्वी नु यबुसी
आन बाक्तीक रागी बाक्ब। 9 नेनो, गो इस्राएल जात डा मुर आन डाक्शो नेंता। इजीप्त रागी डा मुरुमी मेको आन
कली दिप्शा श्येत गेम्तेक्म। गो मेको यो ताता। 10 गो इ कली फाराओ आ बाक्तीके सोइक्नुड। गो इस्राएल जात डा
मुर आन कली इजीप्त रागी रे गुंडो” दे परमप्रभुमी मोसा कली माइक्तु। प्रस्थान ७:१६; न्यायाधीस ६:१४ 11 मिनु
मोसामी परमप्रभु यावे कली “गो दोपा मो पने चाप्नुडा? फाराओ आ बाक्तीकेमी लशा, इस्राएल जात डा मुर आन
कली इजीप्त रागी रे दोपा गुंडने चाप्नुडा?” दे परमप्रभु कली देंत। प्रस्थान ४:१०; उत्पत्ती ३२:११; २सामुएल ७:१८;
यसैया ६:५,८; येरमीया १:६ 12 मिनु परमप्रभुमी “गो थमा पा, गे नु बाक्नुड। इ कली सोइक्ब गो नड, दे चिन्ड का
कोइन्नन। मेको चिन्ड मार बाक्त देशा हना, गो इस्राएल जात डा मुर आन कली इजीप्त रागी रे गुंडशा नोले एको
परमप्रभु आ डांडामी आं कली ठेयब सेल्नीनी” दे माइक्तु। येरमीया १:८

परमप्रभुमी आ नें तुइक्पाइशो

13 मिनु मोसामी परमप्रभु कली “गो इस्राएल जात डा मुर आन बाक्तीके जाक्दीशशा, मेको आन कली ‘इन किकी
पिपी आन परमप्रभुमी आं कली इन बाक्तीके सोइक्ताक्यी’ देंडानु, मेकोपुकीमी चहिं ‘मेको आ नें मार में?’ दे हिल्लो
पाइनीम। मेना गो मार देंनुडा?” दे हिल्लो पाप्टु।

14 मिनु परमप्रभुमी मोसा कली “आं नें ‘गो नड’ बाक्ब। इस्राएल जात डा मुर आन कली ‘गो नड’ देंबमी आं
कली इन बाक्तीकेमी सोइक्ताक्यी, देंचा माल्नेवे” देंत। प्रस्थान ६:२; मलाकी ३:६; प्रकाश १:४,८ 15 मिनु लेंशा
परमप्रभुमी मोसा कली “इस्राएल डा मुर आन कली मार देंचा माल्नेवे देशा हना ‘परमप्रभु यावे, इन किकी पिपी

अब्राहाम, इसहाक नु याकूब आन परमप्रभुमी इन कली ग्रुमथ सोइक्ताकयी। आं नें गेना हना यो लीब। नेल्ल पाला डा मुरुम आं नें आन थुमी मिम्शा वोइक्चा माल्नीम' देंचा माल्नेवे। प्रस्थान ६:२-३; यसैया ४२:८

16 गे इस्राएल जात डा मुर आन खाल्पा आन कली खुपथ लावो। मिनु मेको आन कली 'परमप्रभु यावे इन किकी पिपी आन परमप्रभु आं डोंइती गूत। अब्राहाम, इसहाक नु याकूब आन परमप्रभुमी आं कली ग्रुमशा, लोव्र पापु'। मेकोमी आं कली 'गो थमा पा इन कली ग्रुमथ यिती, इजीप्त रागीम इन कली गिश श्येत गेमे, मेको ताता। 17 गो इन कली इजीप्त रागी डा मुर आन गेशो श्येत रे प्रोंइनुड। गो इन कली कनानी, हिती, एमोरी, परिज्जी, हिव्वी नु यबुसी आन बाक्शो रागी गेनुड। मेको रागीम दूध नु खुदो शुश बाक्ब, अन्न यो शुश ग्रेल्ब। गो आं देशो लोव्र खापुड' देंत, देंचा माल्नेवे।

18 इ देशो लोव्र नेंशा, टिम्टेक्म हना, गे नु इस्राएल डा मुर आन खाल्पापुकी इजीप्त रागी डा पिप आ बाक्तीक लशा, मेको कली लोव्र पचा माल्नीनी। गेमी इजीप्त रागी डा पिप कली 'परमप्रभु यावे हिब्रू आन परमप्रभुमी आंइ कली ग्रुमतीकी। आंइ कली नाक्त सां गोरशो रागीम लचा गेकी। मेकेर परमप्रभु यावे आंइ परमप्रभु कली चढेथ लाइनीकी' दे पिप कली देनीन। प्रस्थान ५:१, ३

19 मेको पिपमी चहिं इन कली लचा मगेब, गो तुइक्नुड। गो थम ठेयब सक्तिमी इन कली वारच पाता हना ला, लचा गेब। 20 मिनु गोमी इजीप्त रागी डा मुर आन दातेमी थम छक लाक्चा डा गेय कोंइशा, मेको आन कली श्येत गेनुड। मिनु नोले मेकोमी इन कली लचा गेब।

21 इजीप्त रागी डा मुरपुकीमी इन कली दाक्ब सेल्लुडमी। इजीप्त रे गूनीनु, श्येतथ गूचा ममाल्नीनी। प्रस्थान ११:२-३; प्रस्थान १२:३५-३६ 22 मीश मुर नेल्लेमी आन नेक्था डा इजीप्त रागी डा वारच रे सुन, चांदी नु वासी पुंइचा माल्नीम। आन तमी तौ आन कली पांइपाइक्चा माल्नीम। मोदेशो पा इजीप्त डा मुर आन शोप रोइक्चा माल्नीनी" दे परमप्रभु यावेमी मोसा कली देंत।

4

परमप्रभुमी मोसा कली चिन्ड कोंइशो

1 मिनु मोसामी परमप्रभु कली "मेकोपुकीमी आं देशो थमा मसुइक्थु, मटीनीमी को? 'परमप्रभु यावेमी इ कली मगुम' देंनीमी को" देंत। 2 मिनु परमप्रभु यावेमी "इ गुइमी मार कुरी?" दे हिल्लो पापु। मिनु मोसामी "कोक्के कुरता" देंत। 3 मिनु "खपीम ब्वारदो" देंत। मिनु मोसामी आ कोक्के ब्वारदानु, बुस्स दुम्त। मिनु मोसा मेको तशा प्रोक्त। प्रस्थान ७:१० 4 मिनु परमप्रभु यावेमी "आ मीलुम ग्याइक्तो" देंत। मिनु मोसामी आ गुइ दिंशा, बुस्स कली ग्याइक्दीमेनु, आ गुइमी लेंशा कोक्के दुम्त। 5 मिनु मेको तशा, मेकोपुकीमी "परमप्रभु यावे, आन किकी पिपी अब्राहाम, इसहाक नु याकूब आन परमप्रभुमी इ डोंइती गूशा, इ कली ग्रुमथु, दे थमा सुइक्नीम" देंत।

6 मिनु परमप्रभु यावेमी लेंशा "इ गुइ इ फेक्शो वा आगाम वोतो" देंत। मिनु मोसामी मो पापु। मिनु नोले आ गुइ गुंइशा कोव्रडानु, कोव्र मुशा बुश दुम्शो तापु। 7 मिनु मेकोमी "लेंशा, इ गुइ इ फेक्शो वा आगाम वोतो" देंत। मिनु वोइश्शा गुंइदानु, आ गुइ डोंइती डा खोदेशो पा सेस दुम्शो तापु। 8 "इ डोंइती डा चिन्ड तशा, इ लोव्र थमा मसुइक्थु, मटिम्टेक्म हना, नोले डा चिन्ड तशा, थमा सुइक्नीमी को? 9 तन्न मेकोपुकीमी चिन्ड निक्शी तशा यो, थमा मसुइक्थु, इ कली मटिम्टेक्म हना, गे नील खोला डा ब्वाक्कु लाइश्शा, सोव्रशो खप तारी मोतो। खोला रे लाइश्शो ब्वाक्कु सोव्रशो खप तारी मोदीनु, मेको हुश दुम्ब" दे परमप्रभु यावेमी देंत। प्रस्थान ७:१७-२१

10 मिनु मोसामी परमप्रभु यावे कली "आं परमप्रभु, गो लोव्र पस मजोक्नुड। गे, मुल इन गेय पाइब नु लोव्र पनीनु यो, आं कली लोव्र पचा मपी। गो थांइशो लें पाइश्शो मुर बाक्नुड" देंत। प्रस्थान ३:११; प्रस्थान ६:१२-३० 11 मिनु परमप्रभु यावेमी "सुमी मुर आ शोव्र सेला? सुम लोव्र पपाइक्ब, नोफा नेंब नु मनेंब, मिक्च ताइब नु मताइब सेला? गो, परमप्रभु यावे मनडा डा? भजन संग्रह ९४:९ 12 मुल लावो। गो इ कली लोव्र पपाइक्नुड, मार देंचा माल्बा, मेको इ कली शेंनुड" देंत। ब्यवस्था १८:१८; मत्ती १०:१९ 13 मोसाम चहिं "आं परमप्रभु, आं पा डा अरु कली सोइक्के चाप्नीनी को? तन्न आं कली मसोइक्तीनी" देंत। 14 मिनु परमप्रभु यावे मोसा आ पर्वम गाइश्शा "लेवी थर डा इ लोक्ब हारून रिम्शो लोव्र पस जोक्ब बाक्ब, गो मतुइक्नुडा डा? मिनु मुल इ कली ग्रुमथ जाक्ब। इ कली तशा शुश ग्येरब। 15 गो इ पचा माल्शो लोव्र नेल्ल शेंनुड। मिनु गे मेको हारून कली देंचा माल्नेवे। मिनु मेकोमी इ पा डा मुर आन कली लोव्र पचा माल्ब। मेको इ शोव्र खोदेशो दुम्ब। गो इ कली लोव्र पाइब परमप्रभु खोदेशो पा, गे हारून

कली लोव्र पाइब बाक्नीनी। 16 दोपा गो, परमप्रभुम इ कली लोव्र पाइनुडा, मोपा गे हारून कली लोव्र पचा माल्नेवे। मिनु मेकोमी मुर आन कली लोव्र पचा माल्ब। प्रस्थान ७:१-२ 17 मेको कोक्के लाइश्शा, आं देशो चिन्ड कोइदो” दे परमप्रभु यावेमी मोसा कली माइक्तु।

मोसा इजीप्त रागी लेशो

18 मिनु मोसा आ शिउ, यित्रो आ खिं लशा, मेको कली “इजीप्त रागीम बाक्शो आं लोकब आन कली गुमथ लचा गेयीनी। बेक्मा कों, ब्रोंडमा, गो तुइक्चा दाक्ती” दे पुंइतु। मिनु यित्रोमी “इ थुं नाइश्शा, लावो” देंत। प्रस्थान ३:१ 19 मिनु मोसा मिदयान रागीम बाक्मेनु, परमप्रभु यावेमी “लेंशा इजीप्त रागी लावो। मारदे हना इ कली साइक्चा माल्बपुकी बेक्तेक्मे” दे लोव्र पाप्तु। 20 मिनु मोसा आ मीश नु आ तौ निक्शी नु गधा डोइश्शा, इजीप्त रागी लेत्त। परमप्रभु आ गेशो कोक्के यो कुरतु। प्रस्थान १८:३-४

21 मिनु परमप्रभु यावेमी मोसा कली “इ नोफा दाइश्शा नेनो। गे इजीप्त रागी जाक्दीश्शा, गो इ कली पपाइश्शो छक लाक्चा डा गेय नेल्ल फाराओ आ डोंइती पावो। गो चहिं मुर आन कली लचा मगेचा डा पा फाराओ कली काइ मटीब सेल्लुड। प्रस्थान ७:३,१३; ब्यवस्था २९:३; यसैया ६:१०; रोमी ९:१८ 22 मिनु गे मेको कली ‘परमप्रभु यावेमी इन कली मार लोव्र पाप्तु देशा हना, इस्राएल आं डोंइती जरमेशो तौ बाक्ब। ब्यवस्था ३२:६ 23 आं तौ कली आं कली चढेतीक चढेथ लचा गेवो। गे मटिप्तीवी हना, गो इ डोंइती जरमेशो तौ कली साइक्नुड’ देंत, देनो” दे परमप्रभु यावेमी मोसा कली माइक्तु। प्रस्थान ११:५; प्रस्थान १२:२९

मोसा आ तौ कली चिनु खोइश्शो

24 मिनु लांम बास बाक्मानु, परमप्रभु यावेमी मोसा आ नेक्था जाक्शा, मेको कली साइक्चा माल्तु। उत्पत्ती १७:१४; उत्पत्ती ३२:२५ 25 मिनु सिप्पोरामी चहिं हेश्शो फुल्लु का गुप्शा, आ तौ कली खोइक्तीक चिन्ड खोदा बाक्त। मोपा मेकोमी आ तौ आ चारतीक डा कुशुल खोइश्शा, आ तौ आ कुशुलम मोसा आ रां थिशा “गे हुश के ग्युम्ले नवे” देंमाक्त। यहोसु ५:२ 26 मोदेशो पतीके, परमप्रभुमी मोसा कली मसाइक्थु, प्रोना बाक्त। सिप्पोरामी मारदे “हुश के ग्युम्ले” देंत देशा हना, खोइक्तीक चिन्ड रे हुश यिमाक्त।

मोसा नु हारून

27 डोंइती परमप्रभु यावेमी हारून कली “मोसा गोरशो रागीम जाक्चा चिक्शो बाक्ब। मेको कली गुमथ लावो” दे माइक्तु। मिनु लशा, परमप्रभु आ डांडाम मोसा कली गुमशा, पुक्पु पाइक्तु। 28 मोसामी आ कली सोइक्ब परमप्रभु यावे आ लोव्र नेल्ल नु आ पचा माल्शो चिन्ड यो हारून कली शेंताक्व।

29 मिनु मेको निक्शीमी इस्राएली आन खाल्पा नेल्ल आन कली खुप्ताक्से। 30 हारूनमी परमप्रभु यावेमी मोसा नु पशो लोव्र नेल्ल मेको आन कली शेंताक्व। मोसा कली कोइशो चिन्ड, हारूनमी मुर आन डोंइती कोइताक्व। 31 मिनु मुरपुकीमी थमा सुइक्तेक्म। मिनु परमप्रभु यावेमी इस्राएली आन कली गुमशा, आन श्येत तशा, वारच पचा चिक्शो तुइश्शा, मेकोपुकी बाप्शा, परमप्रभु कली ठेयब सेल्लेक्म। प्रस्थान ३:१६

5

मोसा नु हारून आस लोव्र

1 मिनु नोले मोसा नु आ लोकब हारून फाराओ गुमथ लाम्ताक्स। मिनु मेको कली “परमप्रभु यावे, इस्राएली आन परमप्रभुमी आंस कली लोव्र पाप्तु। मेकोमी ‘आं मुर आन कली गोरशो रागीमी आं पर्बम चाड मानेचा कली लचा गेवो’ दे परमप्रभु यावेमी इन कली देशो बाक्ब” देंताक्स। प्रस्थान ३:१८; प्रस्थान ७:१६, २६; प्रस्थान ९:१, १३ 2 मिनु फाराओमी “परमप्रभु यावे सु बाक्म, गो मतुइक्नुड। मार, आ देशो लोव्र टिचा माल्लुडा? गो इस्राएली आन कली मारदे लचा गेनुडा? गो परमप्रभु यावे कली मतुइक्नुड। मोपतीके इस्राएल डा मुर, इन कली लचा मगेनन्नी” देंत। 3 मिनु मेको निक्शीमी “हिबू मुर आन परमप्रभुमी आंस कली गुम्तु। आंइ कली लचा गेने, दे पुंइनस्कु। गोपुकी रोइमी, लडाइमी मबेक्कल, दे परमप्रभु यावे, आंइ परमप्रभु कली चढेथ नाक्त सां सम्म गोरशो रागीम लचा गेने” दे माइक्ताक्स। 4 मिनु इजीप्त डा पिपम मेको आस कली “मोसा नु हारून, गे मारदे मुर आन कली आन गेय क्योल्चा माल्नीसी? इस गेय पथ लस” देंत।

इस्राएली आन कली श्येत गेशो

5 मिनु फाराओमी लेंशा “नेनीस, इस जात डा मुर शुश दुम्तेक्म। गे मेको आन कली आन गेय रे नाइक्चा गेचा माल्सी?” दे मोसा नु हारून आस कली हुइक्ताक्व। प्रस्थान १:७,१२ 6 मोपतीके मेको नाक्ती रे फाराओमी गेय पपाइक्ब ठेयब मुर नु कोव्रब मुर आन कली 7 “मुल रे इस्राएली आन कली इंटा सेल्चा कली पराल मगेचा, आंमा गुप्थ लचा माल्नीम। 8 तन्न इंटा चहिं डोंइती दोशो सेल्मे, मुल यो मोशोन सेल्चा माल्नीमी। मिनु आन गेय डोंइती पशो खेदेंशो पा पचा माल्नीम। मारदे हना आन गेय मबाक्मेनु, मेकोपुकीमी ‘गोपुकी गोरशो रागीम आंइ परमप्रभु कली चढेचा दाक्नीकी’ दे लोव्र पशा ग्रीनीम। 9 मेको मुर आन कली शुश गेय पपाइश्शा श्येत गेचा माल्नीनी। मेकोपुकीम गेय पा बाक्मानु, दूली लोव्र मनेंनीम” दे आ मुर आन कली देंमाक्त।

10 मिनु इस्राएली आन कली गेय पपाइक्बपुकी नु कोव्रबपुकीमी मुर आन कली “फाराओमी ‘इन कली पराल मगेनुड’ देंशो बाक्ब। 11 मोपतीके ते खुप्ने चाप्नीनी, मेक डा खुप्तीन। इंटा चहिं डोंइती दोशो सेल्नी, मुल यो मोशोन सेल्चा माल्नीनी” दे मदमे बाक्त। 12 मोपा मेकोपुकी इजीप्त रागीमी पराल मथित्तीके पराल के टुटा गुप्थ ब्रशा गाक्मा बाक्त। 13 गेय पपाइक्बपुकीमी “पराल गेशो नाक्त दोशो इंटा सेल्नी, मुल यो मोशोन सेल्चा माल्नीनी” दे शुश गेय पपदमे बाक्त। 14 फाराओ आ गेय पपाइक्ब इस्राएली कोव्रबपुकी यो वोइश्शो बाक्मा बाक्त। मेको आन कली तुप्शा “डोंइती डा खेदेंशो पा सिनाक्ती मुलाक्ती इंटा मारदे मसेल्नी?” दे इस्राएली कोव्रब आन कली हुइक्तमे बाक्त।

15 मिनु इस्राएली कोव्रबपुकीमी फाराओ कली “मारदे इन वाइल आन कली ओदेंशो मरिम्शो पाइनीनी? 16 इन वाइल आन कली पराल मगेथु ‘इंटा सेलीने’ दे हुइक्नीनी। मेको ला ममाइ, इन मुरपुकीमी आंइ कली तुप्नीम। गे इन रागी डा मुर आन कली मरिम्शो पपाइक्नीनी” देंमा बाक्त। 17 मिनु फाराओमी “गे अल्सेपुकी, थम अल्से दुम्तीनी। मोपतीके गे ‘आंइ कली परमप्रभु यावे कली चढेथ लचा गेने’ देंतीनी। 18 मुल गेय पथ लने। पराल मगेंसीब, इंटा चहिं डोंइती दोशो सेल्नी, मोशोन सेल्चा माल्नीनी” देंमाक्त। 19 मिनु इस्राएली कोव्रबपुकीमी “इं कली मरिम्शो पशा, शुश श्येत गेनीम” दे तुइक्तमे बाक्त। मारदे हना “डोंइती नाक्त किंत किंत दोशो इंटा सेल्नी, मुल यो मोशोन सेल्चा माल्नीनी” देंशो बाक्मा बाक्त।

20 मिनु फाराओ आ बाक्तीके रे लमानु, मेकोपुकीमी लांमी रिम्शा बाक्शो मोसा नु हारून आस कली गुम्तेक्म। 21 मिनु मेको कोव्रबपुकीमी “परमप्रभु यावेमी इस कली सजाइ गेवल। मारदे हना गे निक्शीमी फाराओ नु आ मुर आन डोंइती आंइ कली मरिम्शो सेल्तीसी। आंइ कली साइक्चा, दे तरवार आन गुइमी गेतीसी” दे गाइश्शा हुइक्ताक्म।

22 मिनु मोसा परमप्रभु यावे आ नेक्था लशा “परमप्रभु, मारदे गे इन मुर आन कली मरिम्शो पाइनीनी? आं कली मारदे एक सोइक्तीनी? 23 गो इन नेंमी फाराओ नु लोव्र पडा नोले, मेकोमी इन मुर आन कली डोंइती क्येडा शुश श्येत गेपुतु। गे चहिं इन मुर आन कली मप्रोंइनी” देंत।

6

परमप्रभुमी मोसा नु लोव्र पशो

1 मिनु नोले परमप्रभु यावेमी मोसा कली “गो फाराओ कली मार पाइनुडा, गे मुल ताइनेवे। फाराओम मेको आन कली लचा गेचा ला ममाइ, ठेयब सक्तिमी फाराओ कली आं मुर आन कली आ रागी रे खेरपाइक्नुड” देंत। प्रस्थान ११:१; प्रस्थान १२:३३ 2 मिनु लेंशा परमप्रभुमी मोसा कली “गो यावे नड। प्रस्थान ३:१४-१५; उत्पत्ती १७:१ 3 गो अब्राहाम, इसहाक नु याकूब आन डोंइती गूशो ‘नेल्ल क्येडा सक्ति पाइश्शो परमप्रभु नड’ दे मेको आन कली तुइक्पाइक्ताक्मी। तन्न ‘आं नें यावे बाक्ब’ दे मतुइक्पदुमी। 4 गो मेको आन कली ‘गे मुल अर्को रागी डा मुर दुम्शा, हिरना हिरना बाक्शो कनानी आन रागी इन कली गेनुड’ दे अब्राहाम, इसहाक नु याकूब नु कबल पने थुम्शो नड। उत्पत्ती १७:८ 5 मिनु गो इजीप्त डा मुरपुकीमी इन कली गेय पाइब सेल्मेनु, श्येत जशो इस्राएली आन डाक्शो ताता। मिनु गो आं कबल पशो मिम्ताक्ड। 6 मोपतीके गो इस्राएली आन कली ‘गो परमप्रभु यावे नड। गो इजीप्त डा मुर आन गेशो श्येत नु इन वाइल दुम्शो गेय रे प्रोंइनन्नी। गो इजीप्त डा मुर आन कली ठेयब सजाइ गेशा, आं ठेयब सक्तिमी इन कली गृंइनुड। 7 मिनु गो इन कली आं मुर सेल्नुड। गो इन परमप्रभु दुम्नुड। मिनु गो इन कली इजीप्त डा मुर आन गेशो श्येत रे गृंइब, परमप्रभु यावे, इन परमप्रभु नड, दे तुइक्चा माल्नीनी। 8 मिनु गो अब्राहाम, इसहाक नु याकूब आन कली गेनुड, दे कसम जशो रागीम इन कली चाक्दीत्नुड। मिनु मेको रागी इन के दुम्ब। गो परमप्रभु यावे नड’ दे गे इस्राएली आन कली देंचा माल्नेवे” देंत। उत्पत्ती २२:१६

9 मिनु मोसामी मेको लोव्र इस्राएली आन कली नेंपदानु, वाइल दुम्तीके नु आन थुं लुकच लतीके मोसा आ लोव्र मनेनेम। 10 मिनु परमप्रभु यावेमी मोसा कली 11 “गे इजीप्त डा पिप फाराओ कली ‘इस्राएली आन कली इन रागी रे लचा गेने’ दे मतो” देंत। 12 मिनु मोसामी परमप्रभु यावे कली “इस्राएलीपुकीमी ला यो आं लोव्र मनेनेम हना, गो ब्वाक्स मजोक्ब मुर आं लोव्र फाराओम दोपा नेंबा?” दे लोव्र लेत्ताक्व। प्रस्थान ६:३०; प्रस्थान ४:१० 13 मोपा परमप्रभु यावेमी मोसा नु हारून आस कली इस्राएली आन पबर्म लोव्र पाप्तु। मिनु “गेमी इजीप्त डा पिप फाराओ कली ‘इस्राएली आन कली इन रागी रे लचा गेचा माल्नीनी’ दे रूप्पतीस” देंत।

मोसा नु हारून आस किकी पिपी

14 इस्राएली आन किकी पिपी आन दातेमी ठेयब दुम्शो, सु सु बाक्मा बाक्त देशा हना, इस्राएल आ डोंइती जरमेशो तौ रूबेन मेको आ तौपुकी हनोक, पल्लु, हेस्रोन नु कारमी बाक्मा बाक्त। मेको रूबेन आ खिं खिं डा मुर बाक्मा बाक्त। उत्पत्ती ४६:९-११

15 सिमियोन आ तौपुकी येमुएल, यामीन, ओहद, याकीन नु सोहार बाक्मा बाक्त। मिनु का कनानी मीश रे जरमेशो शावल बाक्माक्त। मेको सिमियोन आ खिं डा मुर बाक्मा बाक्त।

16 मिनु लेवी आ तौ आन खिं खिं डा मुर सु सु बाक्मा बाक्त देशा हना, गेरशोन, कोहाथ नु मेरारी बाक्मा बाक्त। मिनु लेवी सहे का ३७ बर्स ब्रोंइमाक्त। १इतिहास ५:२७-३०; १इतिहास ६:१-४ 17 गेरशोन आ तौ लिब्नी नु शिमेइ बाक्सा बाक्त। 18 कोहाथ आ तौपुकी अम्राम, इच्छार, हेब्रोन नु उज्जीएल बाक्मा बाक्त। मिनु कोहाथ सहे का ३३ बर्स ब्रोंइमाक्त। 19 मिनु मेरारी आ तौ माहली नु मुशी बाक्सा बाक्त। मेको लेवी आ खिं खिं डा मुर बाक्मा बाक्त।

20 मिनु अम्राममी आ आफ आ समी चाक्गा बाक्त। मेको आ नें योकेबेद बाक्माक्त। मेकोमी हारून नु मोसा थिमाक्त। अम्राम सहे का ३७ बर्स ब्रोंइमाक्त। प्रस्थान २:१; लेवी १८:१२

21 इच्छार आ तौपुकी कोराह, नेफेग नु जिक्री बाक्मा बाक्त। गन्ती १६:१ 22 उज्जीएल आ तौपुकी मीशाएल, एल-साफान नु सिथ्री बाक्मा बाक्त। लेवी १०:४ 23 मिनु हारूनम नहशोन आ समी अम्मीनादाब आ तमी एली-शेबा चाक्गा बाक्त। मेकोमी नादाब, अबीहु, एलाजर नु इथामार थिमाक्त। प्रस्थान २८:१ 24 कोराह आ तौपुकी अस्सीर, एल्काना नु अबी-आसाफ बाक्मा बाक्त। मेको कोराह आ खिं डा मुर बाक्मा बाक्त। 25 मिनु हारून आ तौ एलाजरम पुतीएल आ तमी चाक्गा बाक्त। मेकोमी फिनेहास थिमाक्त। मेकोपुकी लेवी आ खिं डा ठेयब मुर बाक्मा बाक्त। गन्ती २५:७ 26 मिनु परमप्रभु यावेमी हारून नु मोसा कली “गे इस्राएल डा मुरपुकी हुल हुल पा इजीप्त रागी रे ग्रुंडीस” देंत। प्रस्थान ६:१३ 27 मिनु मेको निक्शीमी इजीप्त डा पिप फाराओ कली “इस्राएल डा मुर आन कली लचा गेने” दे लोव्र पाम्ताक्से।

28 मिनु परमप्रभु यावेमी इजीप्त रागीमी मोसा कली 29 “गो परमप्रभु यावे नड। गो इजीप्त डा पिप फाराओ कली आं देशो लोव्र नेल्ल माइक्चा माल्नेवे” देंत। 30 मिनु मोसामी परमप्रभु यावे कली “गो ब्वाक्स मजोक्ब मुर नड। दोपा फाराओमी आं लोव्र नेंबा डा?” देंत। प्रस्थान ६:१२

7

मोसामी चिन्ड कोंइशो

1 परमप्रभु यावेमी मोसा कली “नेनो, गो इ कली फाराओ आ डोंइती परमप्रभु खोदेशो पा चिन्ड कोंइने चाप्ब सेल्लतन। इ लोक्ब हारून चहिं इ लोव्र पाइब दुम्ब। प्रस्थान ४:१६ 2 गो इ कली मार मार माइक्ना, गे मेको देंचा माल्नेवे। मिनु इ लोक्ब हारूनमी ‘इस्राएली आन कली इन रागी रे लचा गेन’ दे फाराओ कली देंचा माल्ब। 3 तन्न गो फाराओ कली काइ मटीब सेल्लनुड। मिनु गो इजीप्त रागीमी शुश चिन्ड नु छक लाक्चा डा गेय कोंइनुड। प्रस्थान ४:२१ 4 मिनु फाराओमी इस कली मटीब। मिनु गो इजीप्त डा मुर आन कली थाम्पान सजाइ गेशा, आं शुश मुर आन कली इजीप्त रागी रे ग्रुंडनुड। 5 गो इजीप्त डा मुर आन कली थाम्पान सजाइ गेशा, इस्राएली आन कली आन दाते रे ग्रुंडनुड ‘गो परमप्रभु यावे नड’ दे इजीप्त डा मुर आन कली तुइक्पाइक्नुड” देंत। प्रस्थान ७:१७; प्रस्थान ८:१८; प्रस्थान ९:२९; १सामुएल १७:४६; १राजा २०:२८; २राजा १९:१९; इजीकीएल २९:६ 6 मिनु मोसा नु हारूनमी परमप्रभु यावे आ देशो पाम्ताक्से। 7 मोपा फाराओ नु लोव्र पची ना, मोसा ८० बर्स दुम्शो बाक्त। हारून ८३ बर्स दुम्शो बाक्त।

कोक्के ब्वारशा बुस्स दुम्पाइशो

8 मिनू परमप्रभु यावेमी मोसा नु हारून आस कली 9 “फाराओमी इस कली ‘छक लाकचा डा चिन्ड कोंडदीसे’ देंमेनु, गेमी हारून कली ‘इ कोक्के बुस्स दुम्पाइक्चा कली फाराओ आ डोंइती ब्वारदो’ देंचा माल्नेवे। मिनू मेको कोक्के बुस्स दुम्ब” देंत। प्रस्थान ४:३ 10 मोपा मोसा नु हारूनमी परमप्रभु यावे आ देंशो पशा, फाराओ आ बाक्तीकेमी लाम्ताक्स। मिनू हारूनमी आ कोक्के फाराओ नु आ गेय पाइब मुर आन डोंइती ब्वारताक्व। मिनू मेको कोक्के बुस्स दुम्त। 11 मिनू फाराओमी इजीप्त रागी डा जादू नु टुना मुना पाइब आन कली ब्रेत्ताक्मी। मेकोपुकीमी यो आन टुना मुनामी हारून खोदेंशो पा आन कोक्के ब्वारशा, बुस्सपुकी सेल्लेक्म। प्रस्थान ७:२२; प्रस्थान ८:३; उत्पत्ती ४१:८; २तिमोथी ३:८ 12 तन्न हारून आ कोक्के रे दुम्शो बुस्सुमी मेको आन कोक्के रे दुम्शो बुस्स नेल्ल आन कली दाक्तीमी। 13 मिनू परमप्रभु यावेमी देंशो खोदेंशो पा फाराओ काइ मटीब दुम्शा, मोसा नु हारून आस देंशो लोव्र मबिस्से। प्रस्थान ४:२१

ब्वक्कु नेल्ल हुश सेल्शो

14 मिनू परमप्रभु यावेमी मोसा कली “फाराओ काइ मटीब दुम्त। आं मुर आन कली लचा मगेब। 15 गे दीसा सुनी फाराओ ग्रुथ लचा माल्नीसी। फाराओ ब्वक्कु आ नेक्था लमेनु, गे मेको आ क्येडा डोंइती खोला आ नेक्था जाक्दीशशा, रिम्शा बाक्चा माल्नीसी। बुस्स दुम्ब कोक्के यो लाइक्चा माल्नीसी। 16 मिनू गे मेको कली ‘परमप्रभु यावे, हिब्रू मुर आन परमप्रभुमी इन कली, आं मुर आन कली आं कली चढेतीक चढेथ गोरशो रागी लचा गेवो, देंती। तन्न गे मुल सम्म आं लोव्र मटिवी’ देंत” देनीस। प्रस्थान ५:१ 17 मोपतीके परमप्रभु यावेमी “गो परमप्रभु यावे नड। गे आं पतीकेमी तुइक्नेवे। गो आं कोक्केमी नील खोला डा ब्वक्कु तुप्नुड। मिनू मेको हुश दुम्ब। प्रस्थान ४:९ 18 मिनू खोला डा डांइ नेल्ल बेक्नीम। खोला शुश राक्शो रिना पाइब। मिनू इजीप्त डा मुरपुकी मेको ब्वक्कु तूचा ग्रांग्रा दीनीम” दे मोसा कली देंत।

19 मिनू परमप्रभु यावेमी मोसा कली “गेमी हारून कली ‘इ कोक्के इजीप्त रागी डा ब्वक्कु हुश दुम्पाइक्चा कली ब्वक्कु तारी दिंदो। नादी, खोला, कुवा नु इनार आन तारी दिंदो। मुर आन चाक्शो ठेका नु गरम बाक्शो ब्वक्कु यो हुश दुम्ब’ दे हारून कली देनो” देंत। प्रकाश ११:६

20 मिनू परमप्रभु यावेमी मोसा नु हारून कली दोदेंशो देंमे, मोदेंशो पाम्ताक्स। मोसामी फाराओ नु आ गेय पाइब आन डोंइती आ कोक्के खोला डा ब्वक्कु तार दिंशा तुबानु, हुश दुम्त। 21 मोपा नील खोला डा डांइ नेल्ल बेक्तेक्म। मिनू ब्वक्कु राक्शो रिना पाइशो दुम्त। इजीप्त रागी डा मुर नेल्लेमी नील खोला डा ब्वक्कु तूने मचबेम। इजीप्त रागी नेल्ल हुशेइ हुश दुम्त। 22 इजीप्त रागी डा ठेयब टुना मुना पाइबपुकीमी यो आन मन्तरमी आस पशो खोदेंशो पाम्तेक्म। फाराओ आ थुं चहिं डोंइती डा खोदेंशो पा काइ मटीब दुम्माक्त। मिनू मोसा नु हारून आस देंशो मटिवो। परमप्रभु यावेमी डोंइती दोदेंशो देंमे, मोदेंशो दुम्त। प्रस्थान ७:११ 23 मिनू फाराओ आ खिं लेम्माक्त। मार दुम्मे, मारेइ ममिम्ता बाक्त। 24 इजीप्त रागी डा मुरपुकीमी नील खोला आ नेक्था शुश कुवा दोम्तेक्म। मारदे हना नील खोला डा ब्वक्कु काइ तूचा मदुम। 25 मोपा परमप्रभु यावेमी नील खोला डा ब्वक्कु तुप्शा, हुश दुम्शो ७ नाक्ती दुम्त।

8

क्रुक्कु गूपाइशो

1 मिनू नोले परमप्रभु यावेमी मोसा कली “गे फाराओ आ बाक्तीक लावो। परमप्रभु यावेमी आ मुर आन कली लचा गेमी। प्रस्थान ५:१ 2 गे लचा मगेतीनी हना, क्रुक्कुपुकीमी इ रागी डा मुर नेल्ल आन कली श्येत गेपाइक्नुडमी। 3 नील खोलाम शुश क्रुक्कु गूपाइक्नुड। मेकोपुकी इन खिंम बाक्थ जाक्नीम। इन इप्तीक कोठामी यो ओव्रनीम। इन खाट तार डोइक्नीम। मिनू इन दरवार डा गेय पाइब आन खिंमी यो ओव्रनीम। मुर आन तार नु आन चुप्लुमी यो बाक्नीमी। आन फस नित्तीके बोस आगाम ओव्रनीम। 4 मेको क्रुक्कुपुकी इन तारी, इन मुर आन तारी नु इन दरवार डा गेय पाइब आन तारी जाक्नीम, दे परमप्रभु यावे आ देंशो लोव्र बाक्ब, दे मतो” दे मोसा कली देंत।

5 मिनू नोले परमप्रभु यावेमी मोसा कली “गेमी हारून कली ‘इ कोक्के खोला नेल्ल आन तार दिंदो। मोपा गे इजीप्त रागीम क्रुक्कु गूपाइक्नेवे’ दे हारून कली देनो” देंत। 6 मिनू हारूनमी आ गुइ इजीप्त डा ब्वक्कु तारी दिंताक्व। मिनू क्रुक्कुपुकी गूशा, इजीप्त रागी नेल्ल ब्रीतेक्म। 7 इजीप्त रागी डा जादू टुना मुना पाइबपुकीमी यो आन मन्तरमी हारून खोदेंशो पा क्रुक्कु गूपाइक्तेक्म। प्रस्थान ७:११

8 मिनु फाराओमी मोसा नु हारून आस कली ब्रेप्पाइशशा “आं पबर्म नु आं मुर आन पबर्म परमप्रभु यावे कली पुनीस। कुक्कु लमल, दे पुनीस। गोमी इस्राएल जात डा मुर आन कली परमप्रभु यावे कली चढेथ लचा गेनुड” दे मोसा नु हारून आस कली देंत। प्रस्थान ८:२४; प्रस्थान ९:२८; प्रस्थान १०:१७ 9 मिनु मोसामी फाराओ कली “हजुर, इन कली नु इन गेय पाइब आन कली, इन मुर आन खिं नु इन खिं रे कुक्कु लमल, नील खोलाम ला बाकमल, दे गेना पुंइचा मालनस्कु?” दे हिल्लो पाप्तु। 10 मिनु “दीसा कली पुनीस” दे लोत्र लेत्ताक्व। मोसामी “परमप्रभु यावे आंइ परमप्रभु खोदेशो सुइ मबा, दे तुइक्पाइक्चा कली इन देशो दीसा दुम्ब। प्रस्थान ९:१४; प्रस्थान १५:११; ब्यवस्था ३३:२६; २सामुएल ७:२२; येरमीया १०:६ 11 दीसा कुक्कुपुकी इन बाक्तीक, इन गेय पाइब नु इन मुर इन खिं नेल्ल रे गाक्नीमी। नील खोलाम ला बाक्नीम” देंत।

12 मोपा मोसा नु हारून फाराओ आ खिं रे लाम्ताक्स। मिनु मोसामी मेको परमप्रभु यावे आ सोइशशो कुक्कु आ पबर्म पुंइतु। 13 मिनु परमप्रभु यावेमी मोसामी पुंइशो नेंशा पाप्तु। खिंम, लाडगाम नु रूम बाक्शो कुक्कु नेल्ल बेक्तेक्म। 14 मुरुमी बेक्शो कुक्कु नेल्ल खुप्ताक्म। मिनु रागी नेल्ल थाम्पा रिना पाइक्तु। 15 इजीप्त रागी डा फाराओ चहिं मेको कुक्कु रे ब्रोंइशो तशा, आ थुं डोंइती डा खोदेशो पा काइ मटीब दुम्माक्त। मिनु मोसा नु हारूनम देशो लोत्र मपव। डोंइती परमप्रभु यावेमी मो देशो बाक्माक्त। प्रस्थान ४:२१

भुस्ना ग्रूपाइशशो

16 मिनु नोले परमप्रभु यावेमी मोसा कली “गेमी हारून कली ‘इ कोक्के दिंशा, फुरक तुपो’ दे मतो। मिनु मो पवानु, इजीप्त रागीमी फुरक नेल्ल भुस्ना दुम्शा फोंइनीम” दे मोसा कली माइक्तु। प्रस्थान 17 मिनु हारूनमी फुरक तुबानु, इजीप्त रागी नेल्लेमी मुर नु बस्तु भाव आन तारी भुस्ना शुश फोंइतेक्म। 18 इजीप्त रागी डा जादू टुना मुना पाइबपुकीम यो हारून खोदेशो पा भुस्ना ग्रूपाइक्चा माल्तेक्म। तन्न मचबेम। मुर नु बस्तु भाव आन तारी भुस्ना शुश जुक्ताक्म। प्रस्थान ७:११ 19 मिनु जादू टुना मुना पाइबपुकीमी फाराओ कली “एको परमप्रभुमी पाप्तु” देंमा बाक्त। फाराओ चहिं काइ मटीब दुम्माक्त। मिनु मोसा नु हारून आस देशो लोत्र मटिव। परमप्रभु यावेम डोंइती देशो खोदेशो दुम्त। भजन संग्रह ६४:१०; भजन संग्रह ७२:१८; लूका ११:२०

डांस ग्रूपाइशशो

20 मिनु परमप्रभु यावेमी मोसा कली “सुनी कना बोक्को। फाराओ खोला लमेनु, मेको कली गुम्थ लावो। मिनु फाराओ कली ‘परमप्रभु यावेमी, आं मुर आन कली आं कली चढेथ लचा गेवो। प्रस्थान ५:१ 21 नेनो, गे आं मुर आन कली लचा मगेप्तीवी हना, गो इ कली, इ गेय पाइब आन कली नु इ मुर नेल्ल आन कली श्येत जपाइक्चा कली इ खिंमी, इ रागी डा मुर आन खिंमी डांसम ब्रीपाइक्नुड। रू नेल्ल डांसम ब्रीपाइक्नुड। 22 मेको मो दुम नाक्ती आं मुर आन बाक्तीक गोशेनमी चहिं डांस मग्रूपाइक्नुड। अरु इजीप्त रागीमी ग्रूपाइक्नुड। आं पबर्म तुइक्पाइक्चा कली मो पाइनुड। मिनु गे आं पबर्म परमप्रभु यावे मेको रागीम बाक्ब, दे तुइक्चा माल्नेवे। प्रस्थान ७:५ 23 मोदेशो पा गो आं मुर आन बाक्तीकेमी डांस मग्रूपाइक्नुड। इ मुर आन बाक्तीकेमी ला डांस ग्रूपाइक्नुड। दीसा गे तुइक्नेवे, देनो’ देंत” दे परमप्रभु यावेमी मोसा कली देंत। 24 मिनु परमप्रभु यावेमी आ देशो पाप्तु। डांस शुश फोंइशा फाराओ आ खिं, आ दरवारम गेय पाइब आन खिं, इजीप्त रागी नेल्लेमी शुश डांस फोंइशा ब्रीतेक्म। मिनु डांसमी मेको रागी नेल्ल खतम सेल्लेक्म।

25 मिनु नोले फाराओमी मोसा नु हारून आस कली ब्रेप्पाइशशा “लने, इन परमप्रभु कली आं रागी उइ चढेने” देंत। 26 मोसामी चहिं “मो पचा मदुम्ब। मारदे हना परमप्रभु यावे, आंइ परमप्रभु कली चढेशो तशा, इजीप्त डा मुर ग्रांग्रा दीनीम। मोपा इजीप्त डा मुर आन डोंइती आन मदाक्शो गेय पकानु, मेकोपुकीमी आंइ कली फुल्लु आप्शा, साइक्नीम। उत्पत्ती ४३:३२; उत्पत्ती ४६:३४ 27 गोपुकी नाक्त सां डा लां गाक्शा, गोरशो रागीम लशा, परमप्रभु यावेम देशो खोदेशो पा चढेचा माल्नीकी” देंत। प्रस्थान ३:१८ 28 मिनु फाराओमी “गो इन कली गोरशो रागीम परमप्रभु यावे, इन परमप्रभु कली चढेथ लचा गेनुड। शुश डोन चहिं मलने। आं पबर्म यो पुनीस” देंत। 29 मिनु मोसामी “मुल गो एकेर रे लशा, परमप्रभु यावे कली पुंइनुड। मार पुंइनुड देशा हना ‘दीसा फाराओ, आ गेय पाइब नु रागी डा मुर नेल्ल आन बाक्तीक रे डांस प्रोक्पतीने’ दे पुंइनुड। तन्न लोत्र का पाइनुड। गे आंइ कली परमप्रभु यावे कली चढेचा दुम्ब, दे नोले ‘लचा मगेनुड’ देशा, जोल मपने” दे मोसामी फाराओ कली देंत। 30 मो देशा मोसा फाराओ आ खिं रे लशा, परमप्रभु यावे कली पुंइतु। प्रस्थान ८:८ 31 मिनु परमप्रभु यावेमी मोसा आ पुंइशो लोत्र नेंशा पाप्तु। मिनु डांस फाराओ

आ खिं, आ गेय पाइब नु मुर नेल्ल रे तिल्लु। काइ मलीम। 32 तन्न फाराओ लेंशा काइ मटीब दुम्शा, इस्राएली आन कली लचा मगेव। प्रस्थान ४:२१

9

बस्तु भाव बेक्पाइशो

1 मिनु परमप्रभु यावेमी मोसा कली “फाराओ आ बाक्तीके लावो। मिनु गे परमप्रभु यावे, हिब्रू मुर आन परमप्रभुमी इन कली ‘आं मुर आं कली चढेथ लचा गेवो। प्रस्थान ५:१ 2 नेनो, गे मेको आन कली लचा मगेथु, तेक्तीवी हना, यसैया १:२० 3 परमप्रभु यावेमी इन गोठम बाक्शो बस्तु भाव आन कली ठेयब रोइ पपाइक्ब। इन शारा, गधा, दलओंठ, बी ब्यफ नु क्यारश भेडा नेल्ल आन कली बेक्तीक रोइ पपाइक्ब। प्रस्थान ३:२० 4 तन्न इस्राएली आन बस्तु भाव आन कली रोइ मपपाइक्ब। इजीप्त डा मुर आन बस्तु भाव आन कली चहिं रोइ पपाइक्ब। इस्राएली आन बस्तु भाव मबेक्नीम’ दे फाराओ कली माइक्चा माल्नेवे” दे परमप्रभु यावेमी मोसा कली देंत। प्रस्थान ८:१८ 5 मिनु परमप्रभु यावेमी “गो दीसा इजीप्त रागीम मो पाइनुड” देंत। 6 मिनु आ दीसा परमप्रभु यावेमी आ देंशो पाप्तु। इजीप्त रागी डा मुर आन बस्तु भाव बेक्मा बाक्त। तन्न इस्राएली आन बस्तु भाव चहिं मबेक्म। 7 मिनु फाराओमी इस्राएल डा मुर आन बस्तु भाव यो बेक्मा कों, दे कोव्रथ मुर सोइक्ताक्व। तन्न का यो मबेक्शो बाक्तेक्म, दे तुइक्पाइक्तेक्म। मोपा यो फाराओ काइ मटीब दुम्शा, इस्राएली आन कली लचा मगेव। प्रस्थान ४:२१

परमप्रभुमी गार मुपाइशो

8 मिनु नोले परमप्रभु यावेमी मोसा नु हारून आस कली “गे चुप्लु डा पुलु हुइशशा कुरशा लस। मिनु मोसामी फाराओ आ डोंइती मेको पुलु सरीड गे फ्रचा माल्ब। 9 मेको पुलु फुरक दुम्शा, मुर नु बस्तु भाव आन कली मरिम्शो गार मुपाइक्ब। इजीप्त रागी नेल्लेमी मोदेंशो दुम्ब” देंत। ब्यवस्था २८:२७ 10 मिनु मोसा नु हारूनमी चुप्लु डा पुलु हुइशशा कुरशा, फाराओ आ डोंइती राप्ताक्स। मिनु मोसामी मेको पुलु सरीड गे फ्राप्तु। मिनु मुर नु बस्तु भाव नेल्ल शुश गार मुतेक्म। प्रकाश १६:२ 11 मिनु इजीप्त रागी डा जादू पाइबपुकी यो शुश गार मुशा, रोइ पशा, मोसा आ नेक्था बाक्ने मचबेम। 12 परमप्रभु यावेमी फाराओ कली काइ मटीब दुम्पदा बाक्त। मिनु मोसा नु हारून आस लोव्र मटिव। परमप्रभु यावेमी मोसा कली डोंइती दोदेंशो देमे मोदेंशो दुम्त। प्रस्थान ४:२१

ठेयब मुप्स यिपाइशो

13 मिनु परमप्रभु यावेमी मोसा कली “सुनी कना बोक्शा, फाराओ कली गुम्थ लशा, परमप्रभु यावे, हिब्रू मुर आन परमप्रभुमी इन कली ‘आं मुर आन कली आं कली चढेथ लचा गेवो। प्रस्थान ५:१ 14 मारदे हना मुल रे गेचशो श्येतम इ कली, इ गेय पाइब आन कली नु इ मुर नेल्ल आन कली सोइक्नुड। रागी रागीमी आं खोदेंशो सुइ मबाक्ब, दे इ कली तुइक्पाइक्नुड। प्रस्थान ८:६ 15 मुल गो इ कली नु इ मुर आन कली बेक्तीक रोइ पपदु वा। 16 तन्न गो आं सक्ति रागी नेल्लेम तुइक्पाइक्चा कली इ कली मुल सम्म ब्रोंइचा गेता। आ नें रागी नेल्ल डा मुर आन कली तुइक्पाइक्चा, दे इ कली ब्रोंइचा गेता। प्रस्थान १४:४; रोमी ९:१७ 17 गे आं मुर आन कली लचा मगेतीके, इ ठेयब लेशशो तुइक्ताक्ड। 18 नेनो, दीसा गो शुश मरिम्शो मुप्स यिपाइक्नुड। मुल सम्म इजीप्त रागीमी मुर बाक्चा गोव्रमे रे मोदेंशो ठेयब मुप्स गेनायो मयिशो बाक्ब। 19 मोपतीके इ बस्तु भाव आन कली खिं आगा ओंइदो। मारदे हना मुर नु बस्तु भाव, सु सु लाडगाम बाक्नीमी, मेको मुप्सीम तुप्शा बेक्नीम’ देनो देंत” दे परमप्रभु यावेमी मोसा कली देंपाइक्तु।

20 फाराओ आ गेय पाइब आन दातेमी सु सु परमप्रभु यावे क्येडा हिंमा, मेकोपुकीमी आन गेय पाइब नु आन बी ब्यफ, क्यारश भेडा आन कली खिं आगा ओंइताक्म। 21 सु सु परमप्रभु यावे आ देंशो लोव्र क्येडा महिंमा, मेकोपुकीमी चहिं आन गेय पाइब नु आन बस्तु भाव आन कली खिं आगा मओंइदेम।

22 मिनु नोले परमप्रभु यावेमी मोसा कली “इ गुइ सरीड गे दिंदो। मो पवीनु, इजीप्त रागी नेल्लेमी मुप्स यीब। मुप्स यिशा, मुर बी ब्यफ, क्यारश भेडा नु रू आन तारी देल्ब” दे परमप्रभु यावेमी मोसा कली देंत। 23 मिनु मोसामी आ कोक्के सरीड गे दिंदानु, बुंबु चिला पा, मुप्स यित। मोपा परमप्रभु यावेमी इजीप्त रागीमी मुप्स यिपाइक्तु। मिनु परमप्रभु यावेमी चिला दाप्पाइशशा, मुप्स यिपाइक्तु। प्रकाश १६:२१ 24 चिला पना पन मुप्स यित। मेको मुप्स थम कोल्कोल्शो बाक्तेक्म। इजीप्त रागीम मुर बाक्चा गोव्रमे रे मोमो कोल्शो मुप्स गेनायो मतशो बाक्तेक्म। 25 मिनु इजीप्त रागी डा रूम वाशो मारेइ मारेइ मुप्सीमी श्येत्थ पोक्तु। मुर नु बी ब्यफ, क्यारश भेडा आन कली साइक्तु।

रूम मार मार खुम्शो बाक्मे, मेको नेल्ल साइशशा, रवा आन कली यो जिक्तु। 26 इस्राएली आन बाक्तीके गोशेनमी ला मुप्स मयी। प्रस्थान ९:४; प्रस्थान ८:१८

27 मिनु फाराओमी मोसा नु हारून आस कली ब्रेत्ताक्मसी। मिनु मेको आस कली “मुल गो पाप पाता। परमप्रभु यावे ठीक पाइब बाक्ब। गो नु आं मुरपुकीम मरिम्शो पाइतक। 28 आंइ पबर्म परमप्रभु यावे कली पुनीस। एको बुंबु नु मुप्स मयिपदल। गो इन कली लचा गेनुड। मुल गे एकेर बाक्चा ममाल्नीनी” देंत। प्रस्थान ८:४ 29 मिनु मोसामी “गो सहर रे लशा, इन पबर्म आं गुइ पोक्शा, परमप्रभु यावे कली पुंइनुड। नोले बुंबु पचा नु मुप्स यिचा नाइक्ब। मिनु गे रागी नेल्ल परमप्रभु यावे केन बाक्ब, दे तुइक्नीनी। प्रस्थान ७:५ 30 तन्न गे नु इन दरवार डा गेय पाइबपुकी मुल सम्म परमप्रभु, परमप्रभु यावे कली महिंशो बाक्नीनी, दे तुइक्ताक्ड” दे फाराओ कली देंत। 31 मेको मुप्सीमी मार पाप्तु देशा हना, सनपाट नु क्योव्रज नेल्ल खतम सेल्लु। मारदे हना क्योव्रज बाला दुम्ने थुम्शो नु सनपाट बोइक्ने थुम्शो बाक्त। 32 तन्न चेरब नु अर्को अन्न चहिं नोले ला मीबाक्तेक्म। मोपतीके मसद। 33 मोदेशो दुम्शा मोसामी फाराओ आ बाक्तीके रे लशा, आ गुइ परमप्रभु यावे गे पोक्शा, फाराओ आ पबर्म पुंइतु। मिनु बुंबु पा, मुप्स नु रेड यिचा नाइक्ताक्व। 34 मिनु फाराओ नु आ गेय पाइबपुकीमी रेड, मुप्स यिचा नु बुंबु पचा नाइशशा तशा, लेंशा पाप पाम्तेक्म। मोपा मटीम। 35 फाराओ काइ मटीब दुम्शा, इस्राएली आन कली लचा मगेव। परमप्रभु यावेमी मोसा कली देशो खोदेशो दुम्त। प्रस्थान ४:२१

10

सल्हा माले गूपाइशशो

1 मिनु परमप्रभु यावेमी मोसा कली “गे फाराओ कली आं चिन्डपुकी कोंइचा कली ग्रुम्थ लसे। मारदे हना गो मेको नु आ गेय पाइब आन कली काइ मटीब दुम्पाइक्ता। 2 मिनु गे इ चच युइ आन कली ‘गो इजीप्त डा मुर आन कली मार मार पडा’ मेको शेंदो। गो मोदेशो चिन्ड कोंइब बाक्नुड। ‘गो परमप्रभु यावे नड’ दे नेल्लेमी तुइक्तमेक्ल” देंत। प्रस्थान ६:२-८ 3 मिनु मोसा नु हारून फाराओ आ बाक्तीके जाक्दीशशा, मेको कली “हिब्रू आंइ परमप्रभु यावे, हिब्रू मुर आन परमप्रभुमी इन कली ‘गेना सम्म गे आं डोंइती ठेयब लेशशा बाक्नेवे? आं मुर आन कली आं कली चढेथ लचा गेवो। प्रस्थान ५:३ 4 नेनो, गे आं मुर आन कली लचा मगेनेवे हना, दीसा इ रागीम शुश सल्हा माले जाक्पाइक्नुड। 5 मेकोपुकीमी रागी मतचा डा पा सुम्नीम। मिनु मुप्स रे पा गिग खाइ मार मार लीशो बाक्मा, मेको नेल्ल नेक्नीम। रवा आन सफा यो नेल्ल नेक्नीम। 6 मिनु मेकोपुकी इ खिं, इ दरवार डा गेय पाइब आन खिं नु नेल्ल इजीप्त डा मुर आन खिं खिंम ओव्रशा ब्रीनीम। इ किकी पिपीम मोदेशो गेनायो मतामे’ दे परमप्रभुमी इन कली देंत” दे मोसामी देंत। मिनु मोसा फो गूशा गाक्त। 7 मिनु फाराओ आ दरवार डा गेय पाइबपुकीमी फाराओ कली “मेको मुरुम आंइ कली गेना सम्म श्येत गेबा? मेको मुर आन कली परमप्रभु यावे, आन परमप्रभु कली चढेचा गेने। इजीप्त रागी मुल थुम्साक्व, दे मतुइक्नीनी?” देंमा बाक्त। 8 मिनु मेकोपुकीमी मोसा नु हारून आस कली फाराओ आ बाक्तीके लेशशा चाक्तेक्म। मिनु फाराओमी मेको आस कली “गे लने। परमप्रभु यावे, इन परमप्रभु कली गेय पने। सु सु लाइक्नीनी?” दे हिल्लो पाप्तु।

9 मिनु मोसामी “परमप्रभु यावे आ चाड मानेचा कली गो तमी तौ, खाल्पी खाल्पा, बी ब्यफ नु क्यारश भेडा नेल्ल लाइशशा, लचा माल्नीकी” देंत। प्रस्थान ५:१ 10 मिनु फाराओमी मेको आस कली “इन परमप्रभु यावे गे नु बाक्शो खोदेशो पा गो इन कली नु इन आल नु लचा मगेनुड। गे मरिम्शो पचा माल्नीनी, दे आंमा तुइक्नीसी। 11 मोदेशो मदुम्ब। वोंइश मुरपुकी ला परमप्रभु यावे कली चढेथ लने। मारदे हना एकोन इन माल्शो बाक्ब” दे हुइक्ताक्व। मिनु फाराओ आ डोंइती रे खेरतु।

12 मिनु परमप्रभु यावेमी मोसा कली “सल्हा माले गूपाइक्चा कली इ गुइ इजीप्त रागी तार दिंदो। मेकोपुकीम रागीमी मार मार गिग खाइपुकी मुप्सीम हेंशो बाक्मा, मेको ब्वाइनीमी” देंत। प्रस्थान ९:३२ 13 मिनु मोसामी आ कोक्के इजीप्त रागी तार दिंताक्व। मेको नाक्त रे आ दीसा सुनी सम्म परमप्रभु यावेमी पूर्व रे फश पपाइक्तु। मिनु सुनी नां सोव्रमेनु, पूर्व रे पिशो फशेमी सल्हापुकी चाक्तु। योएल १:२-१२; योएल २:१-११ 14 मिनु सल्हा मालेमी इजीप्त रागी नेल्ल सुम्तेक्म। डोंइती रे मोदेशो शुश सल्हा माले गेनायो मबाक्शो बाक्मा बाक्त। मिनु नोले यो मोदेशो गेनायो मदुम्माक्त। 15 मेको शुश सल्हा माले बेरमानु, नाक्ती यो नाक्दो खोदेशो पा छिडछिड दुम्त। मेको सल्हा

मालेमी मुप्स रे लीशो रू डा वाशो नु रवा डा फल नेल्ल नेक्तेक्म। मार मार गिग बाक्मा, मारेइ महेंदेम। इजीप्त रागी डा रवा नु गिग खाइ नेल्ल नेक्तेक्म।

16 मिनु फाराओमी रीब पा मोसा नु हारून आस कली ब्रेप्पाइक्तु। मिनु मेकोमी “गो परमप्रभु यावे, इन परमप्रभु आ डोंइती पाप पाता। मिनु इस कली यो मरिम्शो पाता। प्रस्थान ९:२७ 17 मुल खेयप का ला आं कली माफ गेयीसी, दे पुंडनुड। मिनु आं पबर्म परमप्रभु यावे, इन परमप्रभु कली पुनीस। सल्हा माले खेरशा, अन्काल रे मबेक्पाइक्चा नम, दे पुनीस” दे मोसा नु हारून आस कली माइक्तीम्सी। प्रस्थान ८:४ 18 मो देम नोले मोसा फाराओ आ डोंइती रे लशा, परमप्रभु यावे कली पुंडतु। 19 मिनु परमप्रभु यावेमी नां पेरतीक रागी रे ठेयब फश गिवार सोइक्ताक्व। मेको फश गिवारमी सल्हा माले आन कली हुरशा, लल समुन्द्रम ताइक्ताक्व। मिनु मोपा इजीप्त रागीम सल्हा माले काइ मलीम। 20 तन्न परमप्रभु यावेमी फाराओ कली मबिप्पाइक्चा कली काइ मटीब दुम्पाइक्तु। मोपतीके मेकोमी इस्राएली आन कली लचा मगेव। प्रस्थान ४:२१

छिडछिड दुम्पाइश्शो

21 मिनु परमप्रभु यावेमी मोसा कली “इ गुइ सरीड गे पोक्को। मो पवीनु, इजीप्त रागीम हिंचा डा पा छिडछिड दुम्ब” दे माइक्तु। 22 मिनु मोसामी आ गुइ सरीड गे पोक्कु। मिनु इजीप्त रागीमी नाक्त सां सम्म शुश छिडछिड दुम्त। मारेइ मतांइस। 23 मिनु मेकोपुकी मतमुथु, आन बाक्तीक रे बोक्ने मचबेम। तन्न इस्राएली आन बाक्तीकेमी चहिं छेडछेड बाक्त।

24 मिनु फाराओमी मोसा कली ब्रेश्शा “लने, परमप्रभु यावे कली गेय पने। इन आल नु मीश आन कली यो लाइक्ने चाप्नीनी। इन बी ब्यफ नु क्यारश भेडा चहिं मेकेरेन बाक्मल” देत। प्रस्थान १०:१० 25 मोसामी चहिं “आंइ चढेतीक नु चोशा चढेतीक बस्तु भाव नेल्ल लाइक्चा माल्नीकी। मेको ला परमप्रभु यावे, आंइ परमप्रभु कली चढेने चाप्नीकी। 26 गोपुकी आंइ बी ब्यफ, क्यारश भेडा नेल्ल लाइश्शा, लचा माल्नीकी। का यो मप्रोंइथु लाइक्चा माल्नीकी। परमप्रभु यावे, आंइ परमप्रभु कली मार चढेचा माल्नीकी मुल मजाक्दीश्शो सम्म मतुइक्नीकी” दे फाराओ कली माइक्तु।

27 परमप्रभु यावेमी चहिं फाराओ कली काइ मटीब दुम्पाइक्तु। मोपतीके फाराओमी इस्राएली आन कली लचा मगेव। प्रस्थान ४:२१ 28 मिनु फाराओमी मोसा कली “मुल एकेर रे लावो। आं कली ग्रुमथ मपिवो। गे लेंशा आं कली ग्रुमथ पिते हना, गो इ कली साइक्नन” देत। 29 मिनु मोसामी “दुम्ब, गो इन कली लेंशा ग्रुमथ मपीनुड” देत।

11

डोंइती जरमेशो तौ नेल्ल बेक्शो

1 मिनु परमप्रभु यावेमी मोसा कली “फाराओ नु इजीप्त रागी डा मुर आन कली नेल्ल क्येडा नोले डा बेक्चा डा श्येत का गेनुड। मिनु इन कली लचा गेब। लचा गेवानु, नेल्ल इन कली ब्रा बु खेरब। 2 गे मुल इ मुर आन कली ‘वोंइश मुर नु मीश मुरपुकीमी आन नेक्था बाक्ब इजीप्ती आन के सुन नु चांदी के पांइतीक शोंप पुंडचा माल्नीम’ दे शेंचा माल्नेवे” देत। प्रस्थान ३:२१-२२ 3 मिनु परमप्रभु यावेमी इजीप्त डा मुर आन कली इस्राएली आन कली दाक्ब सेल्लु। मिनु मोसा फाराओ आ गेय पाइब नु इजीप्त डा मुर नेल्ल आन डोंइती शुश ठेयब मुर दुम्त।

4 मिनु मोसामी फाराओ नु आ मुर आन कली “परमप्रभु यावे आ देशो लोव मार बाक्त देशा हना नाक्दो उइक्थ दुम्मेनु, इजीप्ती आन दातेम लाइनुड। 5 इजीप्त रागीमी सु सु डोंइती जरमेशो बाक्मा, मेको बेक्चा माल्नीम। फाराओ आ नोले सासन पाइब डोंइती जरमेशो तौ रे नेल्ल क्येडा आइक्च यात हिल्लब मीश मुर आन डोंइती जरमेशो तौ सम्म नेल्ल बेक्चा माल्नीम। बस्तु भाव आन के यो डोंइती जरमेशो बेक्चा माल्नीम। प्रस्थान ४:२३ 6 मिनु इजीप्त रागी नेल्लेमी ठेयब रेंका पा डाक्नीम। डोंइती मोदेशो गेनायो मदुम्शो बाक्त। मिनु नोले यो लेंशा मदुम्ब। 7 इस्राएली आन दातेमी चहिं मुर नु बस्तु भाव आन चां का यो महम्ब। परमप्रभु यावेमी इजीप्त डा मुर आन कली नु इस्राएल डा मुर आन कली खाल का डा मपाइब, दे तुइक्तमेक्ल। प्रस्थान ९:४ 8 मिनु नोले इन गेय पाइब नेल्लेमी आं डोंइती खुम्की पा बाप्शा, आं कली ‘गे नु इन नोले खोइक्ब मुरपुकी एक रे लने’ देंनीम। मिनु गो लाइनुड” दे मोसामी फाराओ कली देत। मिनु मोसा फाराओ आ बाक्तीके रे शुश गाइश्शा चुरशा गाक्त।

9 मिनु परमप्रभु यावेमी मोसा कली “इजीप्त रागीम आं छक लाक्चा डा शुश चिन्ड दुम्ल, दे फाराओम इ कली मटिपदु” देत। 10 मोसा नु हारूनमी फाराओ आ डोंइती मेको छक लाक्चा डा चिन्ड मार मार नेल्ल पाम्ताक्स। इस्राएल डा मुर आन कली लचा मगेवल, दे परमप्रभु यावेमी फाराओ कली काइ मटीब दुम्पाइक्तु। प्रस्थान ४:२१

12

डोंडती डा पास्सा चाड

गन्ती ९:१-१४; ब्यवस्था १६:१-८

1 मिनु मोसा नु हारून इजीप्त रागीम बाक्सानु, परमप्रभु यावेमी मेको आस कली 2 “मुल जाक्शो महिना बर्स डा डोंडती डा महिना दुम्चा माल्ब। प्रस्थान १३:४

3 मिनु गे इस्राएली नेल्ल आन कली ‘मेको महिना डा १० नाक्ती खिं का डा ठेयब मुरुमी पाठा का चाक्चा माल्नीम। 4 खिं का कली पाठा का आ श्ये शुश दुम्त हना, आ नेक्था बाक्शो मुर आन कली हिक्शा, दोशो ब्वाइनीमी योक्शा, ब्वचा कली ब्रेत्चा माल्नीम। 5 मेको पाठा मारेइ मदुम्शो थम रिम्शो नु बर्स का डा बोका बाक्चा माल्ब। भेडा के हना यो, क्यारश के हना यो दुम्ब। लेवी २२:२० 6 मिनु मेको महिना डा १४ नाक्ती सम्म मेको बोका कली ठीक पा वोइक्चा माल्नीनी। मिनु नां रिक्चावानु, इस्राएली नेल्लेमी मेको बोका क्योरचा माल्नीनी। 7 तेको खिंमी ब्वाइनीनी, मेको खिं डा मुरुमी बोका आ हुश इक्का लाइशशा, आ खिं डा थाम निक्शी नु लाप्चो आ पियाम खेक्चा माल्नीनी। प्रस्थान १३:२२ 8 मेको नाक्दो मेको बोका आ श्ये ब्वचा माल्नीनी। दोपा ब्वचा माल्नीनी देशा हना, मीम चोशा, बोरब ओख्ती मसुप्शो शोब्ले, कशो खाइ नु ब्वचा माल्नीनी। 9 मेको श्ये क्येख ब्वचा मदुम्ब, लोप्शा ब्वचा यो मदुम्ब। आ पिया, खोइली क्यी नेल्ल मी तारी चोचा माल्नीनी। ब्यवस्था १६:७ 10 सुनी सम्म मारेइ हेंत हना, मीम चोशा थुम्चा माल्नीनी।

11 मेको श्ये किप्शुर किप्शा, जुत्ता लिक्शा, गुइमी कोक्के ग्याइशशा, रीब पा ब्वचा माल्नीनी। मारदे हना मेको परमप्रभु यावे आ पास्सा चाड बाक्ब। ब्यवस्था १६:३; यसैया ५२:१२ 12 मेको नाक्दो गोमी इजीप्त रागी हिरशा, इजीप्त डा मुर आन डोंडती जरमेशो तौ नेल्ल साइक्नुडमी। बस्तु भाव आन के यो डोंडती जरमेशो नेल्ल साइक्नुडमी। इजीप्त डा देवी देवता नेल्ल आन कली सजाइ गेनुडमी। गो, परमप्रभु यावे मेकोन पाइनुड। गन्ती ३३:४ 13 मेको खेक्शो हुश इन खिं डा चिन्ड दुम्ब। तेको खिंम हुश खेक्शो तडा, मेको खिं कली हेरशा लाक्नुड। गो इजीप्त रागी डा मुर आन कली बेक्चा डा श्येत गेनुडमी। इन कली चहिं मेको श्येत मगेनुड। हिब्रू ११:२८; प्रस्थान ३०:१२ 14 मेको नाक्ती इन कली मिम्तीक नाक्ती दुम्चा माल्ब। मोपतीके आं नेंम भोज जचा माल्नीनी। गे बर्स बर्सम मेको चाड परमप्रभु यावे कली मानेचा माल्नीनी। इन पाला नेल्ल आन कली गेना हना यो अरेशो लोत्र बाक्ब।

बोरब ओख्ती मसुप्शो शोब्ले

15 गे ७ नाक्त सम्म बोरब ओख्ती मसुप्शो शोब्ले जचा माल्नीनी। ७ नाक्त डा डोंडती नाक्ती गे इन खिंम बाक्शो बोरब ओख्ती ताइक्चा माल्नीनी। सुम मेको ७ नाक्तीम बोरब ओख्ती सुप्शो शोब्ले जाइबा, मेको इस्राएली आन दाते रे तिल्ला पुंइसीब। प्रस्थान १३:७; प्रस्थान २३:१५

16 मिनु ७ नाक्त डा डोंडती नाक्ती नु नोले डा नाक्ती परमप्रभु आ नेंमी गुम्चा माल्नीनी। मिनु जचा थोव्रक सेल्चा क्येडा लाक्शा, अरु गेय काइ मपने। 17 बोरब ओख्ती मसुप्शो शोब्ले डा चाड मानेचा माल्नीनी। मारदे हना मेको नाक्ती गो इन हुल आन कली इजीप्त रागी रे गुंइताक्ड। मोपतीके इन पाला मुर नेल्ल आन कली गेना हना यो अरेशो लोत्र बाक्ब।

18 डोंडती डा महिना डा १४ नाक्ती डा नाक्दो रे २१ नाक्त डा नाक्दो सम्म गे बोरब ओख्ती मसुप्शो शोब्ले ला जचा माल्नीनी। 19 मेको ७ नाक्ती इन खिंमी बोरब ओख्ती काइ मवोइक्चा। सुमी बोरब ओख्ती सुप्शो शोब्ले जाइबा, मेको अर्को रागी डा मुर बाक्त हना यो, इस्राएली बाक्त हना यो इस्राएली आन दाते रे तिल्ला पुंइसीब। 20 इन बाक्तीक नेल्लेमी बोरब ओख्ती मसुप्शो शोब्ले ला जने, बोरब ओख्ती सुप्शो शोब्ले मजने’ दे माइक्मी” दे परमप्रभुमी देंत।

पास्सा डा पाठा आ हुश

21 मिनु नोले मोसामी इस्राएल डा खाल्पा नेल्ल आन कली ब्रेशशा “इन खिं डा ठेयब मुर आन कली पाठा का का चाक्कीन। मिनु मेको पाठा पास्सा चाड मानेचा कली क्योरीन। 22 मिनु गे हिस्सोप के ब्राक्स लाइशशा, हुश दाइक्तीक बोसुम खुम्शा, लाप्चो आ पिया नु थाम निक्शी कली खेक्तीन। मेको नाक्दो सुनी सम्म सुइ लाडगा मगूडीने। प्रस्थान १२:१३ 23 परमप्रभु यावे इजीप्त डा मुर साइक्चा कली हिरब। परमप्रभु यावेमी लाप्चो आ पिया नु थाममी हुश खेक्शो तशा, इं खिं हेरशा लाक्ब। मिनु साइक्ब कली इं खिंम ओव्रचा मगेब। 24 मुल रे इन तौ, चच युइ नेल्लेमी एको पास्सा

चाड बर्स बर्सम मानेचा माल्नीम। मेको गेना हना यो लीशो अरेशो लोत्र बाल्ब। 25 मिनु गे परमप्रभु यावेमी देशो खोदेशो पा इन कली गेशो रागी जाक्दीशशा, यो एको चाड मानेचा माल्नीनी। 26 इन आलपुकीम इन कली 'एको चाड आ अर्थ मार बाक्मे?' दे हिल्लो पाम्तेक्म हना, 27 गे मेको आन कली 'इसाएल डा मुरपुकी इजीप्त रागीम बाक्मानु, परमप्रभु यावेमी इजीप्त डा मुर आन कली साइक्ची ना इसाएली आन खिं चहिं हेरशा लत। एको हेरतीक आ पबर्म चढेशो बाक्ब' देंचा माल्नीनी" दे मोसामी देंत। मिनु मुरपुकीमी खुम्की पा बाप्शा, परमप्रभु यावे कली ठेयब सेल्लेक्म। 28 मिनु इसाएलीपुकीमी लशा, परमप्रभु यावेमी मोसा नु हारून आस कली दोदेशो देंमे, मोदेशो पाम्तेक्म।

डोंइती डा जरमेशो नेल्ल बेक्शो

29 मिनु नाक्दो उइक्थ दुम्नेनु, परमप्रभु यावेमी इजीप्त रागी डा मुर आन डोंइती जरमेशो तौ आन कली साइक्तीमी। फाराओ आ नोले सासन पाइब तौ रे जेल्लखानम बाक्ब मुर आन डोंइती जरमेशो तौ नेल्ल आन कली साइक्तीमी। बस्तु भाव आन डोंइती जरमेशो यो साइक्तु। प्रस्थान ४:२३ 30 मिनु मेको नाक्दो फाराओ, आ गेय पाइबपुकी नु इजीप्त रागी डा मुर नेल्ल बोक्तेक्म। इजीप्त रागीमी ठेयब रोंका पा डाक्तेक्म। मारदे हना खिं खिं नेल्लेमी मुर बेक्तेक्म। प्रस्थान ११:६-७

इसाएलीपुकी इजीप्त रे गूशो

31 मिनु मेको नाक्दो फाराओमी मोसा नु हारून आस कली ब्रेशशा "छुल छाल बोक्कीस। गे नु इसाएल डा मुर नेल्ल आं रागी डा मुर आन दाते रे गूडीन। इस देशो खोदेशो पा परमप्रभु यावे कली चढेथ लने। 32 इन बी ब्यफ नु क्यारश भेडा आन कली लाइशशा, फो फु गूडीने। आं कली आसीक गेयीसी" देंत। प्रस्थान १०:२६; एज्रा ६:१० 33 मिनु इजीप्त डा मुरपुकीमी मेको आन कली आन रागी रे ब्रा ब्रु खेरशा सोइक्ताक्म। मारदे हना "गो नेल्ल बेक्नय" दे हितेक्म। प्रस्थान ६:१ 34 मिनु मुरपुकीमी बोरब ओरुती मसुप्शो, निशो फस आन बोस वाम गिल्शा, बलाम लाप्शा कुरतेक्म। 35 मिनु इसाएलीपुकीम मोसा आ देशो खोदेशो पा इजीप्ती आन सुन चांदी नु वासी पुंडतेक्म। प्रस्थान ११:२ 36 मिनु परमप्रभु यावेमी इजीप्त डा मुर आन कली इसाएली आन कली दाक्पाइक्तीके, आन पुंडशो नेल्ल गेम्तेक्म। मोपा इजीप्त डा मुर आन शोप लाइशशा गाक्तेक्म। प्रस्थान ३:२१

37 मिनु इसाएल डा मुरपुकी रामेसेस सहर रे गाक्शा, सुक्कोथ सहर जाक्दीत्तेक्म। मेको आन मीश नु तमी तौ नेल्ल महिक्थु, वोंइश मुर ला ६ लाख बाक्तेक्म। 38 मिनु हिक्ने मचाप्चा डा पा इसाएली खोदेशो पा परमप्रभु यावे कली टीबपुकी यो, आन बी ब्यफ, क्यारश भेडा, शुश बस्तु भाव खुल्शा गाक्तेक्म। 39 मिनु इजीप्त रे कुरशो बोरब ओरुती मसुप्शो निशो फस रे शोब्ले चोम्तेक्म। मारदे हना इजीप्त रागी रे खेरचा पुंडसीतीके मेकेर लाम्जी सेल्ले मचाप्शो बाक्तेक्म।

40 इसाएलीपुकी ४ सहे ३० बर्स इजीप्त रागीमी बाक्शो बाक्मा बाक्त। उत्पत्ती १५:१३ 41 मिनु ४ सहे ३० बर्स गाम नाक्ती, परमप्रभु यावे आ योव्रशो इसाएली नेल्ल इजीप्त रागी रे गाक्मा बाक्त। 42 मेको नाक्दो इसाएलीपुकीमी परमप्रभु यावे आ डोंइती शुश मिम्तीक नाक्दो दुम्माक्त। मारदे हना मेको आन कली इजीप्त रागी रे गुंडदा बाक्त। मेको परमप्रभु यावे आ नाक्दो बाक्ब। इसाएल डा मुर आन पाला नेल्लेमी मेको मिम्तीक नाक्दो बाक्ब। यसैया ३०:२९

पास्सा चाड दोपा मानेचा

43 मिनु परमप्रभु यावेमी मोसा नु हारून आस कली "पास्सा दोपा पचा आं अरेशो लोत्र मार बाक्त देशा हना, अर्को रागी डा मुरुम मेको जचा ब्वचा मदुम्ब। 44 खोइक्तीक चिनु खोइशशो इन वाइलपुकीम चहिं जचा ब्वचा दुम्नीम। उत्पत्ती १७:१२-१३ 45 तन्न अर्को रागी डा मुर इन दातेमी बाक्त हना यो, गेय पाइब हना यो जचा ब्वचा मदुम्ब। 46 मेको पास्सा डा पाठा आन खिंमी ब्वचा माल्नीम। आ श्ये लाडगा गुंडचा मदुम्ब। आ रुश का यो जिक्चा मदुम्ब। यूहन्ना १९:३६ 47 इसाएली नेल्लेमी मोदेशो पचा माल्नीम। प्रस्थान 48 इन दातेमी अर्को रागी डा मुर काम परमप्रभु यावे कली पास्सा चाड मानेचा दाक्ताक्व हना, आ खिं डा गेय पाइब वोंइश मुर नु आ तौ आन कली खोइक्तीक चिनु खोइशशा ला, इसाएली आन नेक्था जाक्शा, पास्सा चाड मानेने चाप्ब। मोपा ला इन खोदेशो दुम्ब। मारदे हना खोइक्तीक चिनु मखोइशशो मुरुम जने ब्वने मचाप्नीम। 49 मेको इन कली नु इन दातेम बाक्ब अर्को रागी डा मुर आन कली अरेशो लोत्र का बाक्ब" दे परमप्रभुमी देंत। लेवी १९:३४; लेवी २४:२२ 50 मिनु परमप्रभु यावेमी मोसा नु हारून आस कली दोदेशो देंमे, मोदेशो इसाएली नेल्लेमी पाम्तेक्म। 51 मिनु मेको नाक्ती परमप्रभु यावेमी इसाएली थर आन कली हुल हुल पा इजीप्त रागी रे गुंडताक्व।

13

डोंइती डा तौ परमप्रभु के बाक्ब

1 मिनु परमप्रभु यावेमी मोसा कली 2 “इसाएलीपुकी, इन डोंइती जरमेशो तौ नु इन बी ब्यफ, क्यारश भेडा आन डोंइती जरमेशो बोहोर बोका योत्रशा गेयीनी। मारदे हना मेको आं के बाक्नीम, दे मुर आन कली देंचा माल्ब” देंत। प्रस्थान १३:१२, १३; प्रस्थान २२:२८

3 मिनु मोसामी मुर आन कली “गेपुकी इजीप्त रागीम वाइलीम वाइल दुम्शा, ब्रोंइशा, एक जाक्शो नाक्त मप्रेदीन। परमप्रभु यावेमी इन कली आ सक्तिमी गुंइताक्व। मोपतीके मेको नाक्त गे बोरब ओख्ती मसुप्शो शोब्ले ला जचा माल्नीनी। प्रस्थान १२:३३-३४ 4 गे मुलाक्ती आबीब महिनामी गूतीनी। प्रस्थान १२:२

5 मिनु परमप्रभु यावेमी इन किकी पिपी आन कली ‘कनानी, हिती, एमोरी, हिव्वी नु यबुसी आन रागी इन कली गेनुड’ दे कसम जशो बाक्माक्त। मेको रागीमी जाक्दीशशा, आबीब महिनामी पास्सा चाड मानेचा माल्नीनी। मेको रागीम दूध नु खुदो शुश बाक्ब, मारेइ मारेइ यो शुश ग्रेल्ब। उत्पत्ती १५:१८ 6 ७ नाक्त सम्म बोरब ओख्ती मसुप्शो शोब्ले जचा माल्नीनी। मेको आ नोले डा नाक्ती परमप्रभु यावे आ नेंमी चाड का मानेचा माल्नीनी। प्रस्थान १२:१५-१६ 7 मिनु बोरब ओख्ती मसुप्शो शोब्ले ७ नाक्त सम्म जचा माल्नीनी। इन बाक्तीके नेल्लेमी बोरब ओख्ती सुप्शो शोब्ले काइ वोइक्चा मदुम्ब। मिनु बोरब ओख्ती यो वोइक्चा मदुम्ब। १कोरिन्थी ५:८

8 मेको नाक्ती इन आल आन कली ‘परमप्रभु यावेमी इं कली इजीप्त रागी रे गुंइशो कोइचा, दे ओदेंशो पाइनय’ दे शेंचा माल्नीनी। 9 मेको पास्सा चाड इन गुइमी नु इन कुप्फीम मिम्तीके चिन्ड खोदेंशो पा बाक्चा माल्ब। मोपा परमप्रभु यावे आ अरेशो लोत्र गे नु बाक्ब। मारदे हना परमप्रभु यावेमी आ ठेयब सक्तिमी इन कली इजीप्त रागी रे गुंइताक्व। ब्यवस्था ६:८; ब्यवस्था ११:१८ 10 मोपा गेपुकी बर्स बर्समी मेको चाड ठीक नाक्तीम मानेशा आ अरेशो लोत्र पचा माल्नीनी।

11 मिनु परमप्रभु यावेमी इन कली नु इन किकी पिपी आन कली ‘गो मेको रागी इन कली गेनुड’ दे कसम जशो, कनानी आन रागीम चोत्रदीब। 12 गे इन डोंइती जरमेशो तौ नु इन बी ब्यफ, क्यारश भेडा आन डोंइती जरमेशो परमप्रभु यावे कली गेचा माल्नीनी। डोंइती जरमेशो बोहोर बोका परमप्रभु यावे केन नम। 13 तन्न इन गधैनी आ डोंइती जरमेशो बोहोर प्रोंइचा कली मेको आ पा डा पाठा का गेचा माल्नीनी। पाठा गेचा मदाक्ताक्नी हना, आ शुर जिक्चा माल्नीनी। इन डोंइती जरमेशो तौ आ पा डा क्येट गेचा माल्नीनी।

14 मिनु काबु इन आलपुकीमी ‘गे मारदे ओदेंशो पाइनीनी?’ दे हिल्लो पाइनीम। मेना गेपुकीमी ‘परमप्रभु यावेमी इं कली आ ठेयब सक्तिमी इजीप्त रागी रे गुंइताक्व। वाइलीम वाइल दुम्शो रे यो प्रोंइतु’ दे इन आल आन कली शेंचा माल्नीनी। प्रस्थान १२:२६, २९ 15 ‘फाराओम इं कली काइ लचा मगेतीके, परमप्रभु यावेमी इजीप्त रागी डा मुर आन डोंइती जरमेशो तौ नु बस्तु भाव आन दाते डा डोंइती जरमेशो नेल्ल साइक्तु। मोपतीके डोंइती जरमेशो बोहोर बोका परमप्रभु यावे कली चढ़ेनीकी। तन्न डोंइती जरमेशो तौ आ पा डा क्येट गेशा प्रोंइनीकी। 16 एको पतीके इन गुइमी नु इन कुप्फीम मिम्तीके चिन्ड खोदेंशो पा बाक्चा माल्ब। मारदे हना परमप्रभु यावेमी इं कली आ ठेयब सक्तिमी इजीप्त रागी रे गुंइताक्व’ दे इन आल आन कली शेंचा माल्नीनी” देंत।

गोस्स के थाम नु मी के थाम

17 मिनु फाराओमी इसाएली आन कली लचा गेवानु, परमप्रभुमी इसाएली आन कली आन नेक्था डा लां पलिस्ती आन रागी डा लां मकोइद। मारदे हना मुरपुकीमी “लडाइ पचा माल्तेक्म हना, हिंशा इजीप्त रागी लेत्नीमी, कों” दे लाइशो लां कोइताक्व। 18 मोपा परमप्रभुमी इसाएली आन कली गोरशो रागी रे लल समुन्द्र गे डा लां कोइताक्व। मिनु इसाएली इजीप्त रागी रे गाक्मानु, लडाइ पचा कली यो ठीक दुम्शो बाक्तेक्म।

19 मोसामी योसेफ आ रुश यो कुरतु। मारदे हना योसेफमी इसाएली आन कली “परमप्रभुम इन कली थमा पा एको रागी रे गुंइशा लाइब। मेना आं रुश यो लाइक्चा माल्नीनी” दे कसम जपाइशो बाक्माक्त। उत्पत्ती ५०:२५; यहोसु २४:३२ 20 मेकोपुकी सुक्कोथ सहर रे लशा, एथाम सहर डा गोरशो रागी आ नेक्थामी बास बाक्तेक्म। 21 मिनु परमप्रभु यावेमी मेकोपुकी नाक्दो नाक्ती गाक्ने चाप्मेक्ल, दे मेको आन कली लां कोइचा कली नाक्ती गोस्स के थाम नु नाक्दो मी के थाम दुम्शा, मेको आन डोंइडोंइती गाक्त। प्रस्थान ४०:३६-३८; गन्ती ९:१५-२३; भजन संग्रह ७८:१४; १कोरिन्थी १०:१ 22 नाक्ती गोस्स के थाम नु नाक्दो मी के थाम आन डोंइडोंइती गाक्चा मप्रोन।

14

लल समुन्द्र शोक्शो

1 मिनु परमप्रभु यावेमी मोसा कली 2 “इस्राएली आन कली ‘गेपुकी इच्का लेत्चा माल्नीनी। मिग्दोल नु लल समुन्द्र आस दातेम बाक्शो पी-हहीरोथ, बाल-सेफोन आ डोंइती इन बास बाक्तीके सेल्चा माल्नीनी। मेको लल समुन्द्र आ नेक्था बाक्ब’ देंचा माल्नेवे। 3 मिनु फाराओमी ‘गोरशो रागीमी आन लां जाम्शा, हेंथे गाक्नीम’ देंब। 4 मिनु गो फाराओ आ थुं काइ मटीब दुम्पाइक्नुड। मिनु फाराओमी इन कली खेदा पाइब। गो फाराओ नु आ फौज आन कली आं सक्ति कोंइनुड। मिनु इजीप्त रागी डा मुर नेल्लेमी ‘परमप्रभु यावे बाक्ब’ दे तुइक्नीम” देंत। मिनु मोदेशो पाम्तेक्म। प्रस्थान ४:२१; इजीकीएल २८:२२

5 मिनु इजीप्त रागी डा मुरपुकीम आन पिप कली “इस्राएली प्रोक्ने थुम्तेक्म। गो मार पया? मारदे गो इस्राएली आन कली गेय प्रोंइपाइश्शा, लचा गया?” दे थुं फाइश्शा, लोव्र पमुमा बाक्त। 6 मिनु पिपमी आ बग्गी ठीक पशा, आ लडाइ पाइबपुकी ठीक पवा बाक्त। 7 मिनु ६ सहे रिम्शो पा लडाइ पने चापब बग्गी नु इजीप्त रागी डा अरु बग्गी नु चलेब आन ठेयब मुर आन कली लाइश्शा, लमाक्त। 8 मिनु परमप्रभु यावेमी इजीप्त रागी डा फाराओ कली काइ मटीब दुम्पाइक्तीके इस्राएली आन कली खेदा पामे बाक्त। इस्राएली चहिं ठेयब सक्तिमी गूशा गाक्तेक्म। प्रस्थान ३:१९-२० 9 इजीप्त डा फाराओ आ शारापुकी, शारा डोइक्बपुकी, बग्गी नु लडाइ पाइब नेल्ल लल समुन्द्र आ नेक्था इस्राएली आन बास बाक्तीक पी-हहीरोथ सहर आ नेक्था बाल-सेफोन आ डोंइती जाक्तेक्म।

10 मिनु इस्राएलीपुकी फाराओ नु आ लडाइ पाइबम आंम कली खेदा पशो तशा, हिंशा खिंखि पाम्तेक्म। मिनु परमप्रभु यावे कली “वारच पाइय्यीकी” दे पुंइतेक्म। 11 मिनु मेकोपुकीम मोसा कली “गे आंइ कली मारदे इजीप्त रे ग्रुंइदीकी? इजीप्त रागीम मुर थिम्तीके मबाक्बा डा? मारदे गोरशो रागीम साइक्थ चाक्गी? 12 गोपुकी इजीप्त रागीम बाक्कानु, इन कली ‘आंइ कली श्येत मगेकी। इजीप्त डा मुर आन गेय पचा गेकी, मदेंका डा? गोरशो रागीम बेक्चा क्येडा इजीप्त रागी डा मुर आन गेय पक वा’ ” दे मोसा कली ग्रीतेक्म।

13 मिनु मोसामी मुर आन कली “महिनीन। मुलाक्ती परमप्रभु यावेमी दोपा इन कली इजीप्त डा मुर रे प्रोंइबा, कोव्रशा बाक्कीन। मुलाक्ती तशो इजीप्त डा मुर आन कली गे लेंशा गेनायो मताइनीनी। 14 इन पचा डा लडाइ परमप्रभु यावेमी पाइब। गे थुं नाइश्शा बाक्कीन” दे माइक्तीमी। ब्यवस्था १:३०; २इतिहास २०:१५,२९; यसैया ५१:९

15 परमप्रभु यावेमी मोसा कली “मारदे आं कली ठेयब सेंदा पा पुंइनेवे? इस्राएली आन कली ‘गाक्कीन’ दे मतो। 16 इ कोक्के लल समुन्द्र तार दिंदो। मो पवीनु, समुन्द्र ब्राशा, गाक्तीक लां दुम्ब। इस्राएलीपुकी हिलो मबाक्शो लांम गाक्ने चाप्नीम। 17 मिनु गोमी इजीप्त डा मुर आन कली काइ मटीब दुम्पाइक्नुड। मो दुम्मेनु, इस्राएली आन नोले खोइश्शा, लल समुन्द्र ओव्रशा, खेदा पाइनीम। मिनु गो फाराओ आ मुरपुकी, आ बग्गी नु आ शारा डोइक्ब नु लडाइ पा आं सक्ति कोंइशा ग्रानुड। 18 गो फाराओ, आ बग्गी नु आ शारा डोइक्ब आन कली आं सक्ति कोंइनुड। मिनु इजीप्त डा मुरपुकीमी ‘परमप्रभु यावेमी पाप्तु’ दे तुइक्नीम” देंत।

19 मिनु इस्राएली आन डोंइती गाक्शो परमप्रभु आ स्वर्ग डा गेय पाइब नोले गे लेशशा लशा, इस्राएली आन नोले खोइक्तु। मेको आन डोंइती गाक्शो गोस्स के थाम यो लेशशा, आन नोले गाक्त। उत्पत्ती १६:७; प्रस्थान १३:२१ 20 मेको गोस्स इजीप्त डा फौज आन कली छिडछिड दुम्माक्त। इस्राएली आन लडाइ पाइब आन कली चहिं छेडछेड दुम्त। मोपा मेको नाक्दो इजीप्त डा फौज इस्राएली आन नेक्था जाक्ने मचबेम। भजन संग्रह १०५:३९

21 मिनु मोसामी आ गुइ लल समुन्द्र तारी दिंदानु, परमप्रभु यावेमी नाक्दो नां दाप्तीके रे फश गिवार पपाइश्शा, समुन्द्र फ्राशा सोव्रशो गाक्तीक लां सेल्लु। 22 मिनु इस्राएलीपुकी समुन्द्र डा सोव्रशो लां लाम्तेक्म। समुन्द्र डा ब्वाक्कु चहिं आन ग्युरा नु पेरा गे गारो खोदेशो पा बाक्त। यहोसु ४:२३; २राजा २:८; यसैया ११:१५-१६; १कोरिन्थी १०:१; हिब्रू ११:२९

23 मिनु इजीप्त रागी डा लडाइ पाइब इस्राएली आन कली खेदा पा, मेको आन नोले लल समुन्द्र ओव्रतेक्म। पिप आ शारापुकी, आ बग्गीपुकी नु आ शारा डोइक्ब नेल्ल ओव्रतेक्म। 24 मिनु सुनी कना परमप्रभु यावे गोस्स के थाम नु मी के थामम बाक्शा, इजीप्त डा लडाइ पाइब आन कली कोव्रशा हिंपाइक्तु। 25 आन बग्गी डा गुगील पुइश्शा गेतीके, गाक्ने मचबेम। मिनु इजीप्त डा मुरपुकीमी “इस्राएली रे प्रोक्थ, परमप्रभु यावेमी मेको आन कली वारच पशा, इजीप्त डा मुरपुकी नु लडाइ पाइब” देंमा बाक्त।

26 मिनु परमप्रभु यावेमी मोसा कली “इजीप्त रागी डा मुर, आन बग्गी नु आन शारा डोइक्ब आन कली ब्वाक्कुम सुम्पाइक्चा कली इ गुइ लेंशा समुन्द्र तार दिंदो” देंत। 27 मिनु मोसामी आ गुइ समुन्द्र तार दिंदानु, नां सोव्रची ना समुन्द्र डोंइती डा खोदेशो दुम्त। मिनु इजीप्त डा लडाइ पाइब लेशशा प्रोक्ने मचबेम। मोपा परमप्रभु यावेमी इजीप्त डा लडाइ पाइब आन कली समुन्द्रमी खुम्तु। 28 मिनु ब्वाक्कु लेंशा डोंइती डा खोदेशो दुम्मेनु, इजीप्त डा बग्गी, शारा डोइक्बपुकी नु फाराओ आ लडाइ पाइब आन कली सुम्शा, समुन्द्रमी योल्ताक्व। सुइ यो मब्रोंडम। 29 तन्न इस्राएली चहिं सोव्रशो लां लशा, समुन्द्र शोक्साक्म। ब्वाक्कु गारो खोदेशो पा, आन ग्युरा नु पेरा गे बाक्त।

30 मोपा परमप्रभु यावेमी मेको नाक्ती इस्राएली आन कली इजीप्त रागी डा लडाइ पाइब रे प्रोंइतीमी। मिनु इस्राएलीपुकीमी इजीप्त डा मुर आन कली दिल दिल थिश्शा, समुन्द्र आ नेक्था बेक्शो ताम्तेक्म। 31 मिनु मुरपुकीमी “परमप्रभु यावेमी इजीप्त डा मुर आन कली साइक्तीमी” दे तुइश्शा, परमप्रभु यावे क्येडा हिंतेक्म। मिनु “परमप्रभु यावेमी नेल्ल पने चाप्ब। मोसा आ गेय पाइब बाक्ब” दे थमा सुइक्तेक्म। प्रस्थान १९:९; २इतिहास २०:२०

15

मोसा आ कुम्सो

1 मिनु नोले मोसा नु इस्राएलीपुकीमी परमप्रभु यावे कली कुम्सो पाम्तेक्म। “गो परमप्रभु यावे कली कुम्सो पाइनुड। मारदे हना मेकोमी आ ठेयब सक्ति कोंइशा, ग्रात। शारा नु शारा डोइक्ब आन कली समुन्द्रमी ताइक्ताक्व। प्रकाश १५:३

2 यावे आं सक्ति बाक्ब। आं कली कुम्सो पपाइक्ब। मारदे हना आं कली आ जोरी सत्रु रे प्रोंइती। मेको आं परमप्रभु बाक्ब। मिनु गो मेको कली ठेयब सेल्लुड। परमप्रभु आं आफ आ परमप्रभु बाक्ब। मिनु गो मेको कली मान पाइनुड। भजन संग्रह ११८:१४; यसैया १२:२ 3 परमप्रभु यावे लडाइ पाइब बाक्ब। मेको आ नें परमप्रभु यावे बाक्ब। प्रस्थान १४:१४; भजन संग्रह ४६:१०; प्रस्थान ३:१५

4 मेकोमी इजीप्त डा फाराओ आ बग्गीपुकी नु आ लडाइ पाइब आन कली लल समुन्द्रमी योल्पाइक्तु। ठेयब कप्तान नेल्ल आन कली ब्वाक्कुम गुम्पाइक्तु। 5 समुन्द्र डा ब्वाक्कुमी मेको आन कली सुम्तु। मेकोपुकी फुल्लु खोदेशो पा आगा गुम्तेक्म। 6 परमप्रभु यावे, इन सक्ति ठेयब बाक्ब। इन सक्तिमी इन जोरी सत्रु आन कली थुम्पाइक्तीनी। 7 इन जोरी सत्रुमी गे नु लडाइ पामेनु, गे इन ठेयब दुम्तीकेमी मेको आन कली ग्रातीनी। मिनु गाइश्शा मेको आन कली मीम भूस चोशो खोदेशो पा थुम्पाइक्तीनी। 8 इन नेंमी मुइश्शा, समुन्द्र डा ब्वाक्कु कली ग्येत्य गे पोक्तीनी। समुन्द्र गारो बुदी सोजो पा ग्येत्य गे बोक्शा, आ पुं चहिं सोव्रशो लां दुम्त। यसैया ५१:१० 9 आंइ जोरी सत्रुमी ‘मेको आन कली खेदा पा, ब्रो ब्रु थित्तनय। गो ग्येरशा, इं ग्राशो थोव्रक योक्मुइनय। इं तरवार शोइश्शा, नेल्ल आन कली साइक्नय’ देंतेक्म। 10 गे चहिं फश पपाइक्तीनी। मिनु समुन्द्रमी मेको आन कली सुम्तीमी। मेकोपुकी फलाम खोदेशो पा ठेयब समुन्द्रमी गुम्तेक्म।

11 परमप्रभु यावे, देवी देवता आन दातेमी इन खोदेशो ठेयब सुइ मबाक्नीम। इन खोदेशो सक्ति पाइश्शो, ठेयब मान ताइब सुइ मबाक्नीम। इन ठेयब गेय हिंचा डा बाक्ब। गे छक लाक्चा डा गेय पाइब बाक्नीनी। प्रस्थान ८:६; प्रस्थान १८:११; भजन संग्रह ८६:८

12 इन ग्युरा गुइ दिंनिनु, रागीम मेको आन कली दाक्तु।

13 गे इन गुंइशो मुर आन कली गेना हना यो शिशी पा, लां कोंइताक्नी। मेको आन कली इन सक्तिमी इन आंम बाक्तीकेम खुल्लतीनी।

14 जात जात डा मुरपुकी इन लोव्र नेंशा शुश हिंतेक्म। पलिस्ती रागी डा मुरपुकी हिंशा, खिंखि पाम्तेक्म। यहोसु २:९-११

15 मुल एदोम रागी डा ठेयब मुरपुकी हिंतेक्म। मोआब रागी डा ठेयब मुरपुकी हिंशा खिंखि पाम्तेक्म। कनान रागीम बाक्बपुकीम आन सक्ति साम्तेक्म।

16 परमप्रभु यावे, इजीप्त रागी रे इन गुंइशो मुरपुकी मजाक्दीम्मा सम्म मेको आन जोरी सत्रु इन सक्ति डा गेय तशा, हिंशा फुल्लु खोदेशो पा सिक्सी पा बाक्तेक्म। मोपा हिंशा मेको आन थुं लुक्च लत। 17 गे इन मुर आन कली आन रागी ओंइनीनी। मिनु इन आंम बाक्तीक डांडाम बाक्पाइक्नीनी। परमप्रभु यावे, मेको इन बाक्तीके आंमा सेल्लतीनी। इन आंम बाक्तीक खिं गे आंमा सेल्लतीनी। भजन संग्रह ७८:५४ 18 परमप्रभु यावे गेना हना यो पिप बाक्ब” दे कुम्सो पाम्तेक्म। भजन संग्रह ९३:१

19 फाराओ आ बग्गी नु शारा डोइक्बपुकी समुन्द्र डा लां लाम्तेक्म। परमप्रभु यावेमी समुन्द्र डा ब्वाक्कु लेंशा लेप्पाइश्शा, मेको नेल्ल आन कली योल्पाइक्तु। इस्राएली चहिं समुन्द्र डा सोव्रशो लां रे पा गाक्तेक्म। प्रस्थान १४:२२-२९

मिरयामम यो कुम्सो पशो

20 हारून आ समी मिरयाम परमप्रभु आ लोव्र पाइब यो बाक्त। मेकोमी खैजडी ताप्शा, कुम्सो पथ लमेनु, अरु मीश मुरपुकी यो खैजडी ताप्शा, सिल पना पन मेको आ नोले खोइक्तेक्म। भजन संग्रह ६८:२६

21 मिरयामम मेको आन कली कुम्सो पा लोव्र लेशशा “परमप्रभु यावे कली कुम्सो पने। मारदे हना मेकोम ठेयब लडाइ पा ग्रात। शारा नु शारा डोइक्ब आन कली समुन्द्रम ताइक्ताक्व” दे कुम्सो पाप्तु।

मारा डा कशो ब्वाक्कु

22 मिनु मोसामी इस्राएली आन कली लल समुन्द्र रे शुर माइश्शो गोरशो रागी कोंइताक्व। मिनु मेको गोरशो रागीमी नाक्त सां सम्म गाक्मानु, ब्वाक्कु मथिदेम। उत्पत्ती २०:१ 23 माराह माइश्शोमी जाक्दीश्शा, मेक डा ब्वाक्कु तूने मचबेम। मारदे हना मेको ब्वाक्कु कशो बाक्त। मोपतीके मेको कली माराह नें वोइक्तेक्म। हिब्रू लोव्रमी मारा देशो कशो रुम्सीब। 24 मिनु मुरपुकीमी मोसा कली “मुल मार तूचा?” दे गन गन पाम्तेक्म। प्रस्थान १६:२ 25 मोसामी चहिं परमप्रभु यावे कली पुंडस डा पुंडस बाक्त। मिनु परमप्रभु यावेमी मोसा कली रवा आ शी का कोंइताक्व। मिनु मोसामी मेको शी ब्वाक्कुम ब्वारताक्व। मिनु मेको ब्वाक्कु मकशो ब्रोव्रशो दुम्त। मेकेर इस्राएली आन कली आ फुल्लुम मुशा ब्रेक्शो नु आन पतीक लोव्र गेशो बाक्त। मोपा मेको आन कली नाक्ताक्व। उत्पत्ती २२:१ 26 मिनु मेकोमी “गे परमप्रभु यावे, इन परमप्रभु आं लोव्र नेंशा, आं डोंइती ठीक पाइतीनी हना, आं शेंशो लोव्र नेंशा, टिशा, आं अरेशो लोव्र टीतीनी हना, गो इजीप्त रागी डा मुर आन कली पपाइश्शो रोइ इन कली मपपाइक्नुड। मारदे हना गो इन कली सापाइक्ब परमप्रभु यावे नड” देंत। ब्यवस्था ७:१५; उत्पत्ती २०:१७; ब्यवस्था ३२:३९; भजन संग्रह ३०:३; यसैया ५७:१८

एलीम रागीमी जाक्दीश्शो

27 मिनु इस्राएली मेकेर रे लशा, एलीममी जाक्दीत्तेक्म। मेकेर १२ ओटा धारा नु ७० ओटा रवा बाक्तेक्म। मेकोपुकी मेको ब्वाक्कु आ नेक्था बाक्तेक्म।

16

इस्राएलीपुकीम गन गन पशो

1 मिनु इस्राएली नेल्ल एलीम रे लशा, सीन माइश्शो गोरशो रागी जाक्दीत्तेक्म। सीन माइश्शो गोरशो रागी एलीम नु सीनै डांडा आस दातेमी बाक्ब। इजीप्त रागी रे गाक्शा नोले मेकेर आबीब आ नोले डा महिना डा १५ नाक्तीम जाक्दीत्तेक्म। 2 मिनु इस्राएली नेल्ल मोसा नु हारून आस कली तशा गाइश्शा, प्रस्थान १७:२-३ 3 “इजीप्त रागी उइ परमप्रभु यावेमी आंइ कली सद हना, रिम्शो दुम वा। मेकेर श्ये नु शोब्ले शुश बाक्त। गे आंइ कली जचा मगेथु, साइक्चा कली एको गोरशो रागीमी चाक्तीसी” दे गन गन पाम्तेक्म। प्रस्थान १४:११

4 मिनु परमप्रभु यावेमी मोसा कली “नेनो, गो इन कली रेउ यिशो खोदेशो पा सरीड रे शोब्ले यिपाइक्नुड। मिनु मुरपुकीम नाक्त किंत किंत गुप्चा माल्नीम। खेयप का गुप्मेनु, नाक्त का कली ला गुप्चा माल्नीमी। आं अरेशो लोव्र पाइबाक्मा कों, मपाइबाक्मा, गो मेको आन कली नाक्नुड। प्रस्थान १६:१५; उत्पत्ती २२:१ 5 मुरुमी सुक्रबार आन गुप्शो शोब्ले नाक्त का कली ठीक पाम्तेक्म हना, नाक्त का कली गुप्शो यो, नाक्त निक्शी कली ठीक दुम्ब” देंत। 6 मिनु मोसा नु हारूनम इस्राएली आन कली “परमप्रभु यावेमी इन कली इजीप्त रागी रे प्रोंइता, दे आपो नाक्दो लेंशा मिम्पाइक्ब। 7 सुनी कना गे परमप्रभु यावे आ छेडछेड गूशो ताइनीनी। मारदे हना मेकोमी इन परमप्रभु यावे कली गन गन पशो तुइक्ताक्व। गो निक्शी सु नस्कु डा? गे आंस पबर्म गाइक्नीनी?” देंताक्स। 8 मिनु मोसामी इस्राएली आन कली “परमप्रभु यावेमी आपो नाक्दो इन कली श्ये गेब, सुनी कना रूथ्री शोब्ले गेब, इन गन गन पशो लोव्र नेंतु, दे तुइक्तीन। गो निक्शी सु नस्कु डा? इन गन गन पशो आंस कली ममाइ, परमप्रभु यावे नु कका गाइक्ताक्नी दे तुइक्तीन” देंत। 9 मिनु मोसामी हारून कली “गे मुर नेल्ल आन कली ‘परमप्रभु यावे आ डोंइती जाक्कीन। मारदे हना मेकोमी इन गन गन पशो नेंतु’ देंचा माल्नेवे” देंत। 10 मिनु हारूनमी इस्राएली नेल्ल आन कली लोव्र पवानु, मेकोपुकी

गोरशो रागी गे कोव्रतेकम। मिनु मेकेर गोस्सुमी परमप्रभु यावे आ छेडछेड गूशो ताम्तेकम। गन्ती १२:५; गन्ती १४:१०; गन्ती १६:१९

11 मिनु परमप्रभु यावेमी मोसा कली 12 “गो इस्राएली आन गन गन पा पशो लोव्र नेता। गे मेको आन कली ‘आपो नाकदो श्ये ब्वाइनीनी। मिनु सुनी कना रूथ्री शोब्ले जाइनीनी। गो परमप्रभु यावे, इन परमप्रभु नड, दे गे तुइक्नीनी’ दे माइक्मी” देत।

बटटाइ चिक्ब नु मन्ना शोब्ले गेशो

13 मिनु नाकदो बटटाइ गूमा बाक्त। मिनु इस्राएली आन बाक्तीक नेल्ल सुम्मे बाक्त। मिनु सुनी कना आन बाक्तीकेमी शुश सीत यिशो बाक्माक्त। गन्ती ११:३१ 14 मिनु सुनी कना सीत मजाम्म सम्म गोरशो रागी डा खपीम फुरश खोदेशो पा आइक्च गेडा बाक्त। 15 इस्राएलीपुकीमी मेको तशा “मार में?” देमुम्तेकम। मारदे हना मार बाक्मे, मतुइक्तम। मिनु मोसामी मेको आन कली “परमप्रभु यावेमी इन कली गेशो मन्ना शोब्ले एकोन बाक्ब। प्रस्थान १६:४; ब्यवस्था ८:३; यूहन्ना ६:३१; १कोरिन्थी १०:३ 16 परमप्रभु यावे आ अरेशो लोव्र मार बाक्ब देशा हना, इन मुर नेल्लेमी गिश जने चाप्नीमी, मिश गुपीन। इन ताम्बुमी गिश जना मुर बाक्नीमी, मिश गोमेर गुप्चा माल्नीनी” दे इस्राएली आन कली देत। गोमेर का २ लिटर कि ४ माना खोदेशो बाक्ब। 17 मोसामी इस्राएली आन कली दोदेशो देमे, मोदेशो पाम्तेकम। का निक्शीमी शुश, का निक्शीमी इक्कका ला गुप्तेकम। 18 तन्न पुक्गमेनु, मेको शुश गुप्ब नु इक्कका ला गुप्ब नेल्ल आन के उइक्थ उइक्थ दुम्माक्त। नेल्लेमी गिश जचा दाक्तमे, मिश गुप्तेकम। २कोरिन्थी ८:१५

19 मिनु मोसामी मेको आन कली “दीसा सुनी सम्म सुइमी मारेइ हेंचा मदुम्ब” दे माइक्तीमी। प्रस्थान १६:४; मत्ती ६:३४; लूका ११:३ 20 तन्न मेकोपुकीमी मोसा आ देशो मटीम। मिनु का निक्शीमी मेको मन्ना सुनी सम्म हेंदमे बाक्त। मिनु लुस्पु जोल्शा, शुश रिना पाइक्तु। मिनु मोसा शुश गाइक्ताक्व। 21 मिनु गिश माल्दमे, सुनी सुनी गुप्तेकम। नां चोक्तानु, मेको यत।

नाइक्तीक नाक्त कली मन्ना गुप्शो

22 मिनु सुक्रबार नाक्ती मुरपुकीम मुर का कली गोमेर निक्निक्शी मन्ना गुप्तेकम। इस्राएली आन कली कोव्रब मुरपुकीमी मो पाम्तेकम दे मोसा कली देतेकम। गोमेर का २ लिटर कि ४ माना खोदेशो बाक्ब। 23 मिनु मेकोमी “परमप्रभु यावेमी इन कली गे मार पचा माल्नीनी, मेको शेंशो बाक्ब। मारदे हना दीसा परमप्रभु यावे कली मिम्शा नाइक्तीक नाक्ती बाक्ब। मोपतीके मुलाक्त माल्शो जचा थोव्रक क्येने चोने। लीशो चहिं दीसा सुनी सम्म हेंचा दुम्ब” देत। उत्पत्ती २:२-३ 24 मिनु मोसा आ देशो खोदेशो पा आ दीसा सम्म हेंताकम। मिनु मेको रिना मपाइक्थु, लुस्पु यो मजोल।

25 मिनु मोसामी “गे मुलाक्ती जने। मारदे हना परमप्रभु यावे आ नाइक्तीक नाक्ती बाक्ब। मुलाक्ती लाडगाम मारेइ मथिंसीब। 26 गे ६ नाक्त गुप्चा माल्नीनी। ६ नाक्त आ दीसा डा नाक्त मारेइ मथिंसीब। मारदे हना नाइक्तीक नाक्त बाक्ब” देत। 27 मिनु सन्चरबार नाइक्तीक नाक्त का निक्शी मुर मन्ना गुप्थ लाडगा गूमानु, मारेइ मथिंदेम। 28 मिनु परमप्रभु यावेमी मोसा कली “गेपुकी आं शेंशो नु आं अरेशो गेना सम्म मटीनीनी? 29 नोफा दाइश्शा नेनीन ‘परमप्रभु यावेमी इन कली सन्चरबार नाइक्तीक नाक्ती गेपु। मोपतीके सुक्रबार इन कली नाक्त निक्शी कली जचा थोव्रक गेब। मिनु नाइक्तीक नाक्ती इन बाक्तीक बाक्तीकेमी बाक्कीन। इन खिं रे लाडगा मलने’ दे मुर आन कली देनो” देत। 30 मिनु मुरपुकी सन्चरबार नाक्ती नाइसाकम। 31 मिनु इस्राएलीपुकीम मेको गेडा कली मन्ना दे नें वोइक्तेकम। मेको बुश धन्या वांचेर खोदेशो बाक्त। मेको खुदोमी सेल्शो शोब्ले खोदेशो पा ब्रोवमाक्त।

मन्ना हेंशो

32 मिनु मोसामी “परमप्रभु यावे आ अरेशो लोव्र मार बाक्त देशा हना, मेकोमी ‘मेको जचा थोव्रक गोमेर का हेंचा माल्नीनी। इन कली इजीप्त रागी रे प्रोंइशा, चाक्गानु, गोरशो रागीमी गेशो जचा थोव्रक मेको बाक्ब दे शुश पाला डा मुर आन कली कोंइचा कली हेंदो। गो इन कली इजीप्त रे गोरशो रागीमी चाक्शा, दोपा थुलु, मेको नेल्लेमी तामेक्ल’ देत” देत। गोमेर का इस्राएली आन अन्न पुक्तीके का बाक्त। मेको २ लिटर रिक्ब बाक्त। मिनु ओमेर का ४ माना खोदेशो बाक्ब। 33 मिनु मोसामी हारून कली “बोस का लतो। मिनु ओमेर का मन्ना मेकेर कुर पावो। मेको नेल्ल पाला डा मुरपुकीम तचा डा पा परमप्रभु यावे आ डोंइती वोतो” देत। हिब्रू ९:४ 34 परमप्रभु यावेमी मोसा कली दोपा देमे, मोपा हारूनमी कबल पशो सन्दोस आ डोंइती वोइक्तु। 35 मिनु इस्राएलीपुकीमी ४० बर्स सम्म मन्ना जाम्तेकम।

मुर बाक्तीक कनान रागी डा सांद मजाक्मा सम्म मेको जाम्तेक्म। यहोसु ५:१२ 36 गोमेर का एफाह डा १० भाग बाक्ब। एफाह का ठेयब पुक्तीके बाक्ब।

17

इसाएली मस्साह नु मेरीबा जाक्शो

1 मिनु इसाएली नेल्ल सीन माइशशो गोरशो रागी रे गाक्शा, परमप्रभु यावे आ देशो बिशशा, रेफीदीम माइशशोमी बाक्तेक्म। मेकेर चहिं तूचा ब्वाक्कु मथिदम। गन्ती ३३:१२-१४ 2 मोपतीके “मोसामी आंइ कली मरिम्शो लां कोंइब” दे गाइशशा, मोसा कली “आंइ कली तूचा ब्वाक्कु गेकी” दे जिचा पोक्तेक्म। मिनु मोसामी मेको आन कली “गे आं कली मारदे जिचा तोइनीनी? मारदे परमप्रभु यावे सक्ति पाइशशो बाक्ब, दे थमा मसुइक्नीनी?” देंत। ब्यवस्था ६:१६ 3 मिनु मुरपुकी ब्वाक्कु तूतू दाक्शा, गाइक्ताक्म। मेकोपुकीमी मोसा कली “गे मारदे आंइ कली इजीप्त रागी प्रोंइपाइय्यीकी? आंइ कली, आंइ आल आन कली, आंइ बस्तु भाव आन कली तूचा ब्वाक्कु मबा, आंइ कली बेक्पाइक्चा कली इजीप्त प्रोंइपाइय्यीकी?” देंतेक्म। प्रस्थान १५:२४; प्रस्थान १६:२; गन्ती १४:-; गन्ती १७:६-२८ 4 मो देंमानु, मोसामी परमप्रभु यावे कली “गो एको मुर आन कली मार पाइनुडा? आं कली फुल्लु आप्शा, साइक्चा चिक्तायीमी। मुल मार पड?” देंत। गन्ती १४:१० 5 मिनु परमप्रभु यावेमी मोसा कली “इसाएल डा खाल्पा आन कली लाइशशा, इसाएली आन डोंइती गाक्को। नील खोला तुप्शो कोक्के यो लाइशशा लावो। प्रस्थान ७:२० 6 गो होरेब माइशशो डांडा आ नेक्था सेरथे फुल्लु तार इ डोंइती बाक्नुड। मिनु गे मेको सेरथे फुल्लु तुप्चा माल्नेवे। मिनु, सेरथे फुल्लु रे ब्वाक्कु यीब। मिनु मुरपुकीम तूने चाप्नीम” देंत। मिनु इसाएली आन खाल्पा आन डोंइती मोसाम मो पाप्तु। गन्ती २०:११; १कोरिन्थी १०:४ 7 मिनु मोसामी मेको सेरथे फुल्लु बाक्तीक कली मास्साह नु मेरीबा नें वोइक्तु। मारदे हना इसाएलीपुकीमी परमप्रभु यावे कली नाक्शा गाइशशा “परमप्रभु यावे आंइ दातेमी बाक्ब” दे थमा मसुदम। भजन संग्रह ९५:८-९; मीका ३:११

अमालेकी नु लडाइ पा ग्राशो

8 मिनु अमालेकी रेफीदीमम जाक्शा, इसाएली नु लडाइ पाम्तेक्म। उत्पत्ती ३६:१२-१६ 9 मिनु मोसामी यहोसु कली “इं मुरपुकी रे योव्रशा, अमालेकी नु लडाइ पथ लावो। गो परमप्रभु आ कोक्के शेशा, दीसा मेको डांडा तार राप्शा बाक्नुड” देंत। गन्ती १३:८,१६ 10 मिनु यहोसुमी मोसाम देशो खोदेशो पा अमालेकी नु लडाइ पाप्तु। मोसा, हारून नु हुर चहिं मेको डांडा डोंइसाक्म। प्रस्थान २४:१४ 11 मोसामी आ गुइ पोक्गानु, इसाएलीपुकी ग्रातेक्म। आ गुइ तोक्गानु, अमालेकीपुकी ग्रातेक्म। 12 मिनु मोसा आ गुइ योक्तीके हारून नु हुरमी फुल्लु का थांइशा, मेको तारी निप्पाइक्ताक्स। मिनु मोसा आ गुइ तिक्शा, वोइक्ताक्स। मोदेशो पा का ग्युरा गे, का पेरा गे बाक्शा, नां मपेरदा सम्म गुइ पोक्स डा पोक्स बाक्ताक्स। 13 मिनु यहोसु नु आ मुरुमी अमालेक नु आ मुर आन कली ग्राशा, तरवारम साइक्तेक्म।

14 मिनु परमप्रभु यावेमी मोसा कली “एको लडाइ गेना हना यो मिम्चा कली किताबम ब्रेक्तो। गो अमालेकी आन कली रागी रागी रे क्याम्नुडमी, दे यहोसु कली मिम्पतो” देंत। ब्यवस्था २५:१७-१९; १सामुएल १५:२-३ 15 मिनु मोसामी चढेतीक का सेल्शा “परमप्रभु यावे आं छेदर बाक्ब” दे नें वोइक्तु। 16 मिनु मेकोमी “यावे आ नित्तीक गे इन गुइ पोक्कीन! मारदे हना परमप्रभु यावेमी ‘अमालेकी नेल्ल आन पालामी मेकोपुकी नु लडाइ पाइनुड’ दे डोंइती देशो बाक्ब” देंत। येरमीया ३:१७

18

यित्रो मोसा कली गुम्थ जाक्शो

1 मिनु मिदयान रागी डा नाक्सो मोसा आ शिउ यित्रोमी परमप्रभुमी मोसा नु इसाएली आन पर्बम मार मार पवा नु परमप्रभु यावेमी मेको आन कली इजीप्त रागी रे दोपा गुंइदा, मेको नेल्ल नेना बाक्त। प्रस्थान ३:१ 2 डोंइती मोसामी आ मीश नु आ तौ निक्शी आस कली आ माइत सोइशशो बाक्माक्त। मुल यित्रोम मेको आन कली मोसा आ बाक्तीक चाक्तीमी। प्रस्थान ४:२० 3 मोसामी आ तौ का आ नें गेरशोम वोइशशो बाक्त। मारदे हना मेकोमी “गो मतुइशशो रागी डा मुर आन दातेमी अर्को रागी डा मुर दुम्ती” देंत। प्रस्थान २:२२ 4 मिनु अर्को कली एलीएजर नें वोइक्तु। मारदे हना

मेकोमी “आं आफ आ परमप्रभुमी आं कली फाराओ आ तरवार रे प्रोंइशा, वारच पाइक्ती” देशो बाक्त। १इतिहास २३:१५-१७

5 मिनु मोसा आ शिउ यित्रो, मोसा आ मीश नु आ तौ निक्शी गोरशो रागीमी मोसा कली गुमथ जाक्तेकम। मेना मोसामी आ ताम्बु परमप्रभु आ डांडा आ पुंमी कीतु। 6 मिनु यित्रोमी मोसा कली “इ शिउ यित्रो, इ मीश नु इ तौ निक्शी इ कली गुमथ जाक्तेक” दे लोत्र सोइक्ताक्व।

7 मिनु मोसा आ शिउ गुमथ जाक्शा, सेउ पशा, पुक्पु पशा “दोपा बाक्नी” दे ताम्बुम ओंइताक्व। 8 मिनु मोसामी परमप्रभु यावेमी इजीप्त डा फाराओ कली नु आ मुर आन कली मार मार पवा, लांमी मार मार श्येत जामे, दोपा परमप्रभु यावेमी मेको नेल्ल रे प्रोना, मेको नेल्ल आ शिउ कली शेंताक्व।

यित्रो थमा सुइक्ब दुमशो

9 मिनु यित्रोमी परमप्रभु यावेमी इस्राएली आन कली गिश रिमशो पवा नु इजीप्त डा मुर आन गुइ रे दोपा प्रोना मेको नेल्ल नेंशा, शुश ग्येरसाक्व। 10 मिनु मेकोमी “इन कली इजीप्त डा मुरपुकी नु फाराओ आ गुइ रे प्रोंइब परमप्रभु यावे कली ठेयब सेल्य। 11 देवी देवता आन क्येडा परमप्रभु यावे ला ठेयब बाक्ब, दे गो मुल तुइक्ताक्व। आ मुर आन कली इजीप्त डा मुर आन गुइ रे प्रोंइतु। मारदे हना इजीप्तीपुकीमी मेको आन कली ठेयब लेशशा दिप्शो बाक्तेकम” देंत। नेहेम्याह ९:१०; येरमीया ५०:२९ 12 मिनु मोसा आ शिउमी परमप्रभु कली चोशा चढ़ेतीक नु अरु चढ़ेतीक यो चढ़ेपुतु। मिनु हारून नु इस्राएल डा मुर आन खाल्पा नेल्ल मोसा आ शिउ नु परमप्रभु कली मान पा ठेयब सेल्लशा जाम्तेकम। उत्पत्ती ३१:५४

यित्रोम मोसा कली अर्ती गेशो

13 मिनु मोसा सुनी कना बोक्शा, मुर आन कली निसाफ पचा कली निस्साक्व। मुरपुकी सुनी रे जाक्शा, नाक्दो सम्म मोसा आ डोंइती बाक्तेकम। 14 मिनु मोसा आ शिउ मी मोसा कली मोदेशो पा मुर आन कली निसाफ पशो तशा “गे मुर आन कली मार पाइनेवे? गे मारदे इ का ला गेय पना पन बाक्नेवे? मुरपुकी सुनी रे नाक्दो सम्म जाक्शा, बाक्शो बाक्नीमी” देंत। 15 मिनु मोसामी आ शिउ कली “मुरपुकीमी परमप्रभु आ देशो तुइक्चा दाक्नीम, मोपतीके जाक्नीम। 16 मेको आन दातेमी मार मार निसाफ पाचा माल्शो बाक्मे, मेको गो गारपाइक्नुड। मोपा गो निसाफ पचा माल्नुड। मिनु मेको आन कली परमप्रभु आ फुल्लुम मुशा ब्रेक्शो लोत्र नु आ अरेशो लोत्र तुइक्पाइक्नुड” देंत। 17 मिनु आ शिउमी “इ पशो मरिमशो बाक्ब। 18 गे शेम्सीनेवे। गे नु बाक्ब मुरपुकी यो शेम्सीनीम। एको गेय इ मचाप्चा डा बाक्ब। गे ला पने मचाप्नेवे। गन्ती ११:१४; ब्यवस्था १:९ 19 आं लोत्र नेनो, गो इ कली अर्ती गेनुड। परमप्रभु गे नु बाक्ब। गे मुर आन पर्वम परमप्रभु कली पुंडदो। 20 परमप्रभु आ फुल्लुम मुशा ब्रेक्शो लोत्र नु आ अरेशो लोत्र मेको आन कली तुइक्पतो। मोपा गे मेको आन गाक्तीक लां नु आन पचा माल्शो गेय मेको आन कली शेंदो। 21 गे मुर नेल्ल आन दाते रे रिमशो गेय पने चाप्ब परमप्रभु कली मान पा हिंब, थमा सुइक्चा पुंडसीब नु खुइशशा मार मार ताक्शा मजाइब मुरपुकी योत्रचा माल्नेवे। नोले मेको मुर आन कली कोत्रब ठेयब मुर वोतो। मेको आन कली १० जना मुर आन कली कोत्रब, ३० जना मुर आन कली कोत्रब, सहे सहे जना मुर आन कली कोत्रब नु हजार हजार जना मुर आन कली कोत्रब ठेयब मुर आन कली योत्रडो। 22 मेको कोत्रब मुरपुकीमी नाक्त किंत किंत डा निसाफ पामेक्ल। ठेयब मुददा चहिं इ डोंइती चाक्गमेक्ल। आइक्च मुददा आंमा गारपदमेक्ल। मो पाप्तीवी हना, इ कली रिमशो दुम्ब। मिनु मेको कोत्रबपुकीमी इ गेय नु श्येत योक्शा पाइनीम। 23 गे आं देशो पाप्तीवी हना, परमप्रभुमी यो इ कली मोदेशो पचा गेब। गे मेको गेय फाल्ने चाप्नेवे। मिनु इ मुर नेल्ल दुशा गारशा, आंम आन बाक्तीके लाइनीम” दे यित्रोमी मोसा कली अर्ती गेपुतु।

24 मिनु मोसामी आ शिउ आ अर्ती नेंशा, आ देशो नेल्ल पापुतु। 25 मिनु इस्राएली आन दाते रे रिमशो गेय पाइब आन कली योत्रशा, मुर आन कली कोत्रब वोइक्तु। १०, १०, ३०, ३०, सहे सहे नु हजार हजार जना मुर आन कली कोत्रब वोतो। 26 मेको मुरपुकीमी मुर आन कली निसाफ पची ना, निसाफ पाइनीम। मिनु ठेयब मुददा बाक्त हना, मोसा कली ब्रेत्ताक्म। आइक्च मुददा चहिं आंमा निसाफ पाम्तेकम। 27 मिनु मोसामी आ शिउ कली लचा गेपुतु। मिनु मेको आ रागी लेत्त।

1 मिनू इस्राएलीपुकी इजीप्त रागी रे गूशा महिना सां नोले सीनै माइशशो गोरशो रागीमी जाक्तेक्म। 2 डोंइती रेफीदीम माइशशो रे लशा, सीनै माइशशो डांडा आ डोंइती आन ताम्बु कीतेक्म। मेको डांडा आ डोंइती बाक्शो बाक्तेक्म। 3 मिनू मोसा परमप्रभु नु लोत्र पचा कली डांडा डोंइसाक्व। मिनू डांडा रे परमप्रभु यावेमी मोसा कली “इ किकी पिपी याकूब आ खिं डा मुर, इस्राएली आन कली 4 ‘गो इजीप्त डा मुर आन कली मार मार पडा, मेको ताइतीनी। ककाकुली आ फ्रां तार कुरशो खोदेशो पा इन कली आं नेक्था वोइक्तन्नी। ब्यवस्था ३२:११ 5 गे आं देशो लोत्र पाइतीनी नु आं कबल पशो टीतीनी हना, गे नेल्ल जात जात डा मुर आन दातेमी आं योव्रशो मुर दुम्नीनी। मारदे हना रागी नेल्ल आं केन बाक्ब। ब्यवस्था ५:२; ब्यवस्था ७:६ 6 गे आं कली चढेब आन राज्य नु आं योव्रशो जात डा मुर दुम्चा माल्नीनी’ दे मेको लोत्र इस्राएली आन कली देंचा माल्नेवे” दे माइक्तु। यसैया ६१:६; १ पत्रुस २:९; प्रकाश १:६; लेवी १९:२

7 मिनू मोसामी इस्राएल आ थर डा मुर आन खाल्पा आन कली ब्रेशशा, परमप्रभु यावेमी देशो लोत्र मेको आन कली माइक्तीमी। 8 मिनू मुर नेल्ल का दुम्शा “परमप्रभु यावे आ देशो नेल्ल पाइनीकी” देतेक्म। मिनू मोसामी मेको मुर आन देशो लोत्र परमप्रभु यावे कली देंत। प्रस्थान २४:३-८ 9 परमप्रभु यावेमी मोसा कली “लो, गो मारेइ मतांइसीचा डा गोस्सुमी इ कली गुम्थ जाक्नुड। मोपा गो मुर आन कली, गे नु लोत्र पशा नेंपाइक्नुडमी। मिनू इ कली गेना हना यो थमा सुइक्नीम” देंत। मोसामी मुर नेल्ल आन देशो यो परमप्रभु यावे कली देंत। प्रस्थान १६:१०; प्रस्थान ३४:५; भजन संग्रह १८:१२; प्रस्थान १४:३१

10 मिनू परमप्रभु यावेमी मोसा कली “मुलाक्ती नु दीसा इस्राएली आन कली गो नु गुम्पाइक्चा ठीक पावो। आन फेक्शो वा मुरपतो। लेवी ११:४४; यहोसु ३:५; अय्युब १:५ 11 नित्थ नाक्त आं कली गुम्चा कली ठीक दुम्चा माल्नीमी। मारदे हना नित्थ नाक्ती गो सीनै डांडाम मुर नेल्ल आन डोंइती जाक्नुड। 12 मिनू गे डांडा आ एर ओंथ थरपु हिरचा माल्नेवे। गेमी मुर आन कली ‘डांडा मडोइक्चा, मथिचा डा पा थरपु हिरचा माल्नेवे। होस पा बाक्कीन! सुम डांडा आ पुं थीबा, मेको थमा पा साइक्चा पुंइसीब। प्रस्थान ३४:३ 13 मुर आन गुइमी थरपु थिचा मदुम्ब। मेको थरपु थीबा बस्तु भाव बाक्तेक्म हना यो, मुर बाक्तेक्म हना यो, मेको कली फुल्लु आप्शा हना यो ब्रा आप्शा हना यो साइक्चा माल्नीनी’ दे इस्राएली आन कली शेंचा माल्नेवे। तुराही आ ठेयब सेंदा नेंशा नोले ला, मेकोपुकी डांडा डोइक्चा माल्नीमी” देंत। हिब्रू १२:१८-२०

14 मिनू मोसा डांडा रे मुर आन बाक्तीके तोइशशा, मेको आन कली परमप्रभु नु गुम्पाइक्चा कली ठीक पाप्तु। मिनू मेकोपुकीमी आन फेक्शो वा मुरतेक्म। 15 मिनू मोसामी वोंइश मुर आन कली “नित्थ नाक्त ठीक दुम्शा बाक्कीने। मीश मुर नु मबाक्कीन” देंत। १सामुएल २१:४-५; १कोरिन्थी ७:५

परमप्रभु यावे गूशो

16 मिनू मेको आ नित्थ नाक्ती डांडा तार बुंबु पा, चिला पा, ठेयब गोस्स का गूत। मिनू तुराही का थम ठेयब सेंदा पा ग्रीत। मेको नेंशा, इस्राएलीपुकी हिंशा, डोन लशा, बाक्तेक्म। 17 मिनू मोसामी इस्राएली आन कली परमप्रभु कली गुम्थ जाक्कीन, दे आन बाक्तीक रे गुंइताक्व। मेकोपुकी डांडा आ पुंमी राप्शा बाक्शो बाक्तेक्म। 18 मिनू सीनै डांडा कुनै कुन दुम्त। मारदे हना परमप्रभु यावे मेकेर मीम तोंइसाक्व। मेको मार मार चोशो खोदेशो पा ठेयब कुन गूत। मिनू डांडामी ठेयब खिनु कुत। उत्पत्ती १५:१७ 19 तुराही आ सेंदा शुश ठेयब दुम्मेनु, मोसामी परमप्रभु नु लोत्र पाप्तु। मिनू परमप्रभुम बुंबु पशो खोदेशो पा मोसा कली लोत्र लेत्ताक्व। प्रस्थान ३३:११; प्रेरित ७:३८ 20 मिनू परमप्रभु यावे सीनै डांडा तारी जाक्त। मिनू परमप्रभु यावेमी मोसा कली “डांडा तार डोंइसो” दे ब्रेत्त। मिनू मोसा डोंइसाक्व। 21 मिनू परमप्रभु यावेमी मोसा कली “तोंइसो। मुर आन कली ‘होस पा मेकेर बाक्कीने। परमप्रभु यावे गे मलने’ दे अरेवो। आं कली कोव्रथ कुम्तेक्म हना, शुश मुर बेक्नीम। 22 आं कली गुम्थ कुइब चढेबपुकी यो आंम कली चिक्शा ठीक दुम्चा माल्नीम। मो मपाम्तेक्म हना, गो मेको आन कली यो साइक्नुडमी” देंत। 23 मिनू मोसामी परमप्रभु यावे कली “मुरपुकी सीनै डांडा डोइक्ने मचाप्नीम, मारदे हना गे आं कली ‘एर ओंथ थरपु हिरशा, इन के सेल्चा’ दे अरेतीनी” देंत। 24 मिनू परमप्रभु यावेमी मोसा कली “लावो, हारून कली डोइक्पतो। तन्न चढेबपुकी नु मुर आन कली चहिं मचाक्को। परमप्रभु यावे आ बाक्तीके कुम्तेक्म हना, गो मेको आन कली साइक्नुडमी” देंत। प्रस्थान २४:९-११ 25 मिनू मोसा मुर आन बाक्तीके तोइशशा, मेको लोत्र नेल्ल मुर आन कली माइक्तीमी।

20

परमप्रभु आ अरेशो १० ओटा लोव
ब्यवस्था ५:६-१८

1 मिनु परमप्रभुमी मार लोव पाप्तु देशा हना मत्ती ५:१७-२८ 2 “गो परमप्रभु यावे, इन परमप्रभु नड। गो इन कली वाइलीम वाइल दुम्शो इजीप्त रागी रे गुंडताक्नी। न्यायाधीस ६:८; येरमीया ३४:१३ 3 गे आं कली ला बाप्शा सेउ पने, देवी देवता आन कली बाप्शा सेउ मपने। ब्यवस्था ६:४-५; यसैया ४५:५-६; १कोरिन्थी ८:५-६ 4 मूर्ति मसेलीन। सरीडम बाक्ब, रागीम बाक्ब नु ब्वाक्कु गाम बाक्ब तेकोइ जन्तु आन मूर्ति मसेलीने। ब्यवस्था ४:१५-१९; ब्यवस्था २७:१५; यसैया ४०:१८-२६; रोमी १:२३ 5 मेको आन कली बाप्शा सेउ मपने। मेको आन कली ठेयब मसेलीने। मारदे हना गो परमप्रभु यावे, इन परमप्रभु नड। गो रुश पाइब परमप्रभु नड। आं कली काइ मदाक्ब नु आ अरेशो मटीब मुर आन आल, चच, युइ नु युइ आन युइ आन पाला सम्म यो सजाइ गेब परमप्रभु नड। प्रस्थान ३४:१४; ब्यवस्था ४:२४; ब्यवस्था ५:९; ब्यवस्था ६:१५; अय्युब २१:१९; येरमीया ३१:२९-३१; इजीकीएल १८:२५ 6 तन्न सु सुमी आं कली दाक्नीमी, आं शेशो लोव टीनीमी, मेको आन आल, चच युइ नु युइ आन युइ आन पाला सम्म कली ला ममाइ, हजार हजार पाला सम्म गेना हना यो शिशी पाइक्नुडमी। प्रस्थान ३४:७; ब्यवस्था ७:९

7 गे परमप्रभु यावे, इन परमप्रभु आं नें, मो मथिने। मारदे हना सुम परमप्रभु यावे आं नें मो थीबा, मेको कली सजाइ मगेथु, मप्रोंइब। लेवी १९:१२; लेवी २४:१६

8 सन्चरबार नाइक्तीक नाक्ती आं नाक्त बाक्ब। मानेचा माल्नीनी। प्रस्थान १६:२५-२९ 9 गे ६ नाक्त इन गेय नेल्ल पचा माल्नीनी। 10 तन्न मेको आ नोले डा नाक्त परमप्रभु यावे, इन परमप्रभु आ नाइक्तीक नाक्त बाक्ब। मेको नाक्ती गेपुकी काइ गेय मपने। इन तमी तौ, इन वाइलीम वाइल, इन बस्तु भाव, इन रागीम बाक्शो अर्को रागी डा मुर आन कली यो काइ गेय मपपतीन। प्रस्थान ३१:१३-१७; इजीकीएल २०:१२; मर्कूस २:२७-२८; कलस्सी २:१६-१७ 11 मारदे हना परमप्रभु यावेमी ६ नाक्तीमी सरीड नु रागी, ठेयब समुन्द्र नु ठेयब समुन्द्रमी बाक्शो नेल्ल आन कली सेल्लु। मिनु नोले डा नाक्त नांइसाक्ब। मोपतीके परमप्रभु यावेमी ‘मेको आं नाक्त बाक्ब’ दे मेको नाक्त कली आसीक गेशो बाक्ब। उत्पत्ती २:२-३

12 इन आम आफ आन कली मान पने। मो पाइतीनी हना, परमप्रभु यावेमी, इन परमप्रभु इन कली गेशो रागीम शुश ब्रोंइचा गेब। प्रस्थान २१:१७; ब्यवस्था २७:१६; मत्ती १५:४-६; एफिसी ६:२-३

13 मुर मसतीन। प्रस्थान २१:१२; उत्पत्ती ९:५-६; याकूब २:१०-११

14 मुर आन मीश वोंइश नु मइपीन। लेवी २०:१०; मत्ती १५:१९

15 खुइ मपने। प्रस्थान २१:१६; लेवी १९:११; एफिसी ४:२८

16 जोल पा सांक्छी मबाक्कीन। प्रस्थान २३:१; ब्यवस्था १९:१८-१९; एफिसी ४:२५

17 इन नेक्था बाक्ब मुर आ खिं, आ मीश आ वाइलीम वाइल, आ बी ब्यफ नु आ गधा, मेको के मार बाक्त हना यो, मेको तशा मबाल्दीन। एको परमप्रभु यावे आ अरेशो लोव बाक्ब” दे मोसामी इस्राएली आन कली देंत। रोमी ७:७; रोमी १३:९

परमप्रभु कली मान पा हिंशो

18 मिनु मुरपुकी डोन बाक्मानु, बुंबु पशो नेंशा नु चिला पशो तशा, तुराही ताप्शो नेंशा, डांडा रे कुशो कुन तशा, डोन लशा हिंशा खिंखि पा, कोवशा बाक्तेक्म। 19 मिनु मेकोपुकीमी मोसा कली “गे आंइ कली लोव पाइतीनी हना, गो नेंनीकी। तन्न परमप्रभुमी आंइ कली लोव पाप्तु हना, बेक्नीकी” देंतेक्म। 20 मिनु मोसामी “महिनीन। परमप्रभु इन कली नाक्थ जाक्त। गे परमप्रभु कली मान पा हिंचा डा बाक्ब, दे मिम्ताक्नी हना, पाप मपाइनीनी” देंत। उत्पत्ती २२:१ 21 मुरपुकी डोन बाक्शो बाक्तेक्म। मोसा चहिं परमप्रभु आ नेक्था क्येर गोस्सुम लत। १राजा ८:१२

22 मिनु परमप्रभु यावेमी मोसा कली “गे इस्राएली आन कली ‘आं कली सरीड रे लोव पशो नेंतीनी।

23 गे गो नु देवी देवता मसेलीन। गे आंम कली सुन नु चांदी के देवी देवता मसेलीने।

24 गे आं कली खप के चढ़ेतीके सेल्चा माल्नीनी। मेको तारी चोशा चढ़ेतीक चढ़ेचा माल्नीनी। इन दुशा बाक्चा आ पर्वम चढ़ेतीक चढ़ेन। भेडा, ब्यफ चढ़ेचा माल्नीनी। गो ते ते इन कली आं नें मिम्पाइक्नुडा, मेक मेक इन कली आसीक गेनुड। प्रस्थान १७:१५; प्रस्थान २७:१-८; ब्यवस्था १२:५ 25 गे आं कली फुल्लु के चढ़ेतीके सेल्चा दाक्ताक्नी हना, मप्रोल्लो फुल्लु के सेल्चा माल्नीनी। मेको फुल्लु फलामम प्रोल्लतीनी हना, मेको आं कली मडुम्ब।

ब्यवस्था २७:५; यहोसु ८:३१ 26 आं कली चढेतीकेम थेंका मडोंइसीने। इन मुने दोक्तीक मतांडसेकल' दे माइक्मी" देंमाक्त।

21

हिब्रू वाइलीम वाइल

1 मिनू परमप्रभुमी लेशा “मेको निसाफ पतीक लोत्र मुर आन कली शेंचा माल्नेवे। 2 ‘गेपुकीमी हिब्रू वाइल ग्याप्तीनी हना, ६ बर्स इन गेय पपाइशशा, नोले डा बर्स मो लचा गेचा माल्नीनी। लेवी २५:३९-४१; ब्यवस्था १५:१२-१७; येरमीया ३४:१४ 3 मेको वाइल आ का जाक्त हना, आ का लचा माल्ब। ग्युंवे पा जाक्त हना, आ मीश लाइशशा लचा माल्ब। 4 आ होत्रपम आ वाइल कली ग्युंवे पपाइक्तु हना, मेकोमी तमी तौ थित हना, मेको मीश मुर नु आलपुकी मेको होत्रप केन दुम्नीम। मेको वाइल आ का ला लचा माल्ब। 5 तन्न मेको वाइलम “आं होत्रप, मीश नु आं आल आन कली दाक्नुड, गो प्रोंइशा मलाइनुड” देंत हना, 6 आ होत्रपम आ वाइली कली परमप्रभु आ डोंइती लाइक्चा माल्ब। मिनू लाप्चो डा शीम आ नोफा ख्रित्चा कली राप्पाइक्चा माल्ब। मिनू आ होत्रपम लूजेमी आ वाइली आ नोफा ख्रित्चा माल्ब। मिनू मेको गेना हना यो वाइल दुम्शा बाक्ब। ब्यवस्था १:१७; भजन संग्रह ८२:१

7 सुइमी आ तमी कली वाइलीमी सेल्शा, लेयतु हना, मेको प्रोंइचा मपुंडसीब। 8 मेको होत्रपमी आंम कली चाक्गा नोले मेको कली मदाक्ताक्व हना, मेको कली क्येट ताक्शा प्रोंइचा माल्ब। आ होत्रपमी मेको वाइलीम कली अर्को रागी डा मुर आन कली लेयने मचाप्ब। मारदे हना मेको मीश मुर मरिम्शो पचा पुंडसीशो बाक्ब। 9 मिनू मेको होत्रपमी मेको ग्याप्शो मीश आल आ तौ कली गेपुतु हना, आ तमी खोदेशो पचा माल्ब। 10 मेकोमी अर्को मीश यो चाक्तु हना, डोंइती डा कली जचा, फेक्चा नु ग्युंवे पशो मीश मुर आन माल्शो नेल्ल गेचा माल्ब। 11 तन्न मेको आ माल्शो नेल्ल मगेपुतु हना, मो लचा गेचा माल्ब' देनो” देंत।

साइक्चा नु तुम्मुचा आ पबर्म लोत्र

12 मिनू “सुमी मुर कली मबेक्म सम्म तुप्बा, मेको मुर थमा पा साइक्चा पुंडसीब। प्रस्थान २०:१३; उत्पत्ती ९:६; मत्ती ५:२१-२२ 13 मुरुमी अरु कली खेदा मपथु, साइक्चा ममाल्शो बाक्त, तन्न परमप्रभुमी मेको मोदेशो दुम्पाइक्तु, गो इन कली मोदेशो मुर कली प्रोक्शा बाक्तीक का कोंइनुड। गन्ती ३५:६-२९; ब्यवस्था १९:४-१३ 14 तन्न मुर कामी अरु कली ‘गो साइक्नुड’ दे मेको कली साइक्तु हना, मेको मुर कली आं चढेतीक रे लाइशशा, साइक्चा माल्ब। १ राजा २:२९-३० 15 सुम आ आम आफ आस कली तुप्बा, मेको थमा पा साइक्चा पुंडसीब। 16 सुमी मुर कली लेयचा कली खुइ पाइबा, मिनू मेको आ खुइ पशो मुर कली आ ख्विम थित्तेक्म हना, मेको मुर थमा पा साइक्चा पुंडसीब। ब्यवस्था २४:७; १ तिमोथी १:१० 17 सुमी आ आम आफ आस कली सराप पाइबा, मेको थमा पा साइक्चा पुंडसीब। 18 मिनू मुरपुकी जिशा कामी अर्को कली फुल्लु आप्तु हना, आ गुइमी तुप्तु हना, तन्न मेको मुर मबेक्थु, आ बाक्तीकेम इप्शा, 19 बोक्मेनु, कोक्के तिकशा, गाक्ने चाप्ब दुम्त हना, मेको तुप्बमी मेको तुप्चा पुंडसीब नु गारचा माल्ब। तुप्चा पुंडसीब आ गेय मपशो डा ला थाप्चा ममाइ, मेको कली ठीक पा मसाम सम्म थाप्चा माल्ब। 20 मिनू सुइमी आ वाइलीम वाइल कली कोक्केमी तुप्तु हना, तुबानु बेक्त हना, मेको मुर थमा पा सजाइ ताइब। 21 तन्न मेको तुप्चा पुंडसीशो मुर का निक्शी नाक्त सम्म ब्रोंइत हना, मेको तुप्ब मुर सजाइ गेचा मपुंडसीब। मारदे हना आंम आ क्येटीम ग्याप्शो बाक्ब। 22 मिनू वोंइश मुर जिशा, राम्शी पा आन नेक्था बाक्शो कोव्रज कुरशो मीश मुर कली चुशा चिप्शा, मेको मीश मुरुम आ कोव्रज डा आल शाम्ताक्व हना, तन्न आ चहिं मारेइ मरिम्शो मदुम्त हना, आ वोंइशेमी देशो खोदेशो पा मेको डी डा चुशा चिप्ब मुरुम सजाइ ताइब। निसाफ पाइबमी गिश थाप्चा माल्ब देंबा, मिश थाप्चा माल्ब। 23 तन्न मेको मीश मुर नोले बेक्त हना, चुशा चिप्ब मुर साइक्चा पुंडसीब। लेवी २४:१९-२०; ब्यवस्था १९:२१; मत्ती ५:३८

24 सुइमी अरु आ मिक्ची का पुक्ताक्व हना, मेको यो आ मिक्च पुक्चा पुंडसीब। सुइमी अरु आ खुइ का जिक्ताक्व हना, मेको यो आ खुइ जिक्चा पुंडसीब। सुइमी अरु आ गुइ जिक्ताक्व हना, मेको यो आ गुइ जिक्चा पुंडसीब। सुइमी अरु आ खोइली का जिक्ताक्व हना, मेको यो आ खोइली जिक्चा पुंडसीब।

25 सुइमी अरु कली मीम चोशा, गार सेल्लु हना, मेको कली यो मीम चोशा गार सेल्लु माल्ब। सुइमी अरु कली तुप्तु हना, मेको तुप्ब यो तुप्चा पुंडसीब। सुइमी अरु कली क्योरशा गार सेल्लु हना, मेको यो क्योरशा गार सेल्लु पुंडसीब।

26 मिनु होवप कामी आ वाइलीम वाइल आन मिक्चीम तुप्तु हना, मेको मिक्च बुक्त हना, मेको होवपमी मेको मिक्च आ पर्बम मेको कली मोशा प्रोंइचा माल्ब।

27 आ वाइलीम वाइल कली तुप्शा, आ खुइ जिक्ताक्व हना, मेको होवपमी मेको खुइ आ पर्बम मोशा प्रोंइचा माल्ब।

28 मिनु ब्यफ कामी वोंइश मुर, मीश मुर, सुइ कली खुशा साइक्तु हना, मेको ब्यफ कली थमा पा फुल्लु आप्शा साइक्चा माल्नीनी। आ श्ये ब्वचा मदुम्ब। मेको ब्यफ आ होवप चहिं सजाइ मताइब। उत्पत्ती ९:५; गन्ती ३५:३३

29 तन्न मेको ब्यफ डोंइती रे खुइब बाक्त हना, मिनु आ होवपमी तुइश्शा यो, आ ब्यफ कली रिम्शो पा मवोइक्तु हना, मेको ब्यफोमी वोंइश मुर, मीश मुर, सुइ कली साइक्तु हना, मेको ब्यफ कली फुल्लु आप्शा, साइक्चा माल्ब। मिनु आ होवप कली यो साइक्चा माल्ब। 30 मसाइक्चा, दे क्येट पुंइतेक्म हना, दोशो पुन्मे मोशो गेचा माल्ब। 31 ब्यफोमी तमी तौ खुप्तु हना, मेको मोदेशोन पचा माल्ब। 32 ब्यफोम सुइ आन वाइलीम वाइल आन कली खुप्तु हना, मेको ब्यफ आ होवपमी वाइलीम वाइल आन होवप कली ३० शेकेल चांदी गेचा माल्ब। मिनु ब्यफ कली चहिं फुल्लु आप्शा साइक्चा माल्ब” देनो। शेकेल का ११.५ ग्राम, तोला खोदेशो बाक्ब। ३० शेकेल चांदी ३४५ ग्राम बाक्ब।

बस्तु भाव आन पर्बम अरेशो

33 मिनु “सुइमी लाइश्शो इनार रोक्तु हना, इनार दोप्तु हना, मिनु मेको मसुम्थु लत हना, नु ब्यफ हना यो गधा हना यो बिक्त हना, लेवी ७:२४; लेवी १७:१५ 34 मेको इनार आ होवपमी मेको गारपाइक्चा माल्ब। मेकोमी बस्तु भाव आ होवप कली क्येट गेचा माल्ब। मेको बेक्शो बस्तु चहिं इनार आ होवप के दुम्ब।

35 मिनु मुर का आ ब्यफोमी अरु मुर आन ब्यफ कली खुशा साइक्तु हना, मेको सेस ब्यफ कली लेयचा माल्ब। मेको ताक्शो क्येट मेको आस दातेमी योक्शा, बेक्शो ब्यफ यो आस दातेमी योक्चा माल्नीस। 36 तन्न मेको ब्यफ डोंइती रे खुइब बाक्ब, दे तुइश्शा यो, आ होवपमी मेको ब्यफ कली रिम्शो पा मवोइक्तु हना, मेको बेक्शो ब्यफ कली थमा पा थाप्चा माल्ब। मिनु बेक्शो ब्यफ मेको के दुम्ब” देनो।

22

खुइ आ पर्बम अरेशो

1 सुइमी ब्यफ, भेडा खुइ पशा, क्योरशा ब्वाप्तु हना यो, लेयतु हना यो, मेको मुरुमी ब्यफ का के ५ ओटा ब्यफ थाप्चा माल्ब। भेडा का के ४ ओटा भेडा थाप्चा माल्ब। २सामुएल १२:६; हितोपदेस ६:३१; लूका १९:८ 2 मिनु खुइ कली खुइ पना पन थित्तेक्म हना, मेको कली तुप्शा साइक्तेक्म हना, साइक्ब साइक्चा डा सजाइ गेचा मपुंइसीनीम। 3 तन्न नां दाप्शा नोले सम्म तुप्शा साइक्तु हना, मेको साइक्ब साइक्चा डा सजाइ ताइब। खुइ पाइब आ खुइ पशो नेल्ल लेत्चा माल्ब। थाप्ने मचाप्तु हना, वाइल सेल्चा पुंइसीब। 4 मेको खुइ आ खुइ पशो ब्यफ, गधा, भेडा आ बाक्तीकेम सेल थित्तेक्म हना, मार बाक्त हना यो का के निक्शी थाप्पाइक्चा माल्ब।

रू आ पर्बम अरेशो

5 मिनु “सुइमी आ बी ब्यफ, क्यारश भेडामी अरु मुर आन शोक्शो रू नेक्पाइक्तु हना, अडगुर रू डा अडगुर नेक्पाइक्तु हना, मेकोमी आ आंम रू डा नेल्ल क्येडा रिम्शो फल थाप्चा माल्ब। 6 सुइमी मी मुइक्तानु, मेको मीम चू नु रूमी बाक्शो मारेइ नेक्तु हना, मेको मी मुइक्बमी मीम नेक्शो नेल्ल थाप्चा माल्ब” देनो।

वोइक्चा गेशो आ पर्बम अरेशो

7 मिनु “सुइमी आ नेक्था डा मुर कली आ क्येट, अरु मारेइ वोइक्चा कली गेप्तु हना, वोइक्ब मुर आ खिं रे खुइ दुम्त हना, नु खुइ कली थित्तेक्म हना, मेको खुइमी का के निक्शी थाप्चा माल्ब। 8 खुइ मथित्तेक्म हना, मेको खिं डा ठेयब मुरुमी आंम नेक्था डा मुर आ मार मार खुइ पवा कों, दे परमप्रभु आ डोंइती राप्पाइक्चा माल्ब। 9 मिनु बी ब्यफ, गधा, भेडा नु वासी मार मार वोइक्बमी नु वोइक्चा गेब, निम्फामी ‘आं के बाक्ब’ देंताक्स हना, मेको निक्शी परमप्रभु आ डोंइती जाक्चा माल्नीस। परमप्रभुमी सुम खुइ सुइक्वा, मेकोमी का डा निक्शी थाप्चा माल्ब। 10 मिनु सुइमी आ नेक्था डा मुर कली गधा, ब्यफ, भेडा नु अरु बस्तु भाव वोइक्चा कली गेप्तु हना, मेको बस्तु भाव बेक्तेक्म हना, तुप्शा बिग्रेम्तेक्म हना, सुइम मतचा डा पा मुरुम खुइ पा लाइश्शो बाक्तेक्म हना, १राजा ८:३१-३२ 11 मेको वोइक्बम आ नेक्था डा मुर आ बस्तु भाव ‘खुइ मपड’ दे परमप्रभु यावे आ डोंइती कसम जचा माल्ब। मिनु बस्तु भाव आ होवपमी मेको थमा सुदानु, वोइक्ब मुरुमी मारेइ थाप्चा ममाल्ब। 12 तन्न आ खिं रे खुइ पशो बाक्त हना,

मेको वोइक्बमी मेको थाप्या माल्ब। 13 ब्वाकी डा जन्तुम मेको बस्तु कली ग्याइशशा साइशशो बाक्त हना, मेको वोइक्बम मेको साइशशो बस्तु दसी चाक्चा माल्ब। मेको ब्वाकी डा जन्तुमी साइशशो कली थाप्या ममाल्ब। उत्पत्ती ३१:३९ 14 मिनु सुइमी आ नेक्था डा मुर रे ब्यफ का परमा पचा कली पुंडतु हना, बस्तु आ होवप मबाक्थु, मेको ब्यफ खजा दुम्त हना, बेक्त हना, मेको थमा पा थाप्या माल्ब। 15 तन्न आ होवप यो बाक्त हना, मेको मारेइ थाप्या ममाल्ब। मारदे हना गेय पचा कली क्येट गेशो बाक्ब” देनो।

मीश आल आ पर्बम अरेशो

16 मिनु “वोंइश मुर कामी कन्ने मीश आल नु मिलो शिलो पा, मेको नु इप्त हना, मेको कली थमा पा ग्युंवे पा आ आफ कली मार मार थाप्या माल्ब। ब्यवस्था २२:२८-२९ 17 तन्न मीश आल आ आफोमी आ तमी मगेप्टु हना, मेको वोंइश मुरुम कन्ने ग्युंवे पशो खोदेशो पा, क्येट थाप्या माल्ब।

थमा पा साइक्चा पुंडसीब मुर

18 टुना मुना पाइब कली ब्रोंइचा मगेचा। लेवी २०:६,२७; लेवी १९:३१; ब्यवस्था १८:१०; १सामुएल २९:९; मलाकी ३:५

19 सु बस्तु नु इप्बा, मेको कली थमा पा साइक्चा माल्नीनी। लेवी १८:२३; ब्यवस्था २७:२१

20 सुमी देवी देवता कली पूजा पाइबा, मेको मुर थमा पा साइक्चा पुंडसीब। परमप्रभु यावे कली ला चढेचा माल्ब। प्रस्थान २०:३-५; ब्यवस्था १३:७-१९; ब्यवस्था १७:२-७

महिकसीशो मुर आन पर्बम अरेशो

21 अर्को रागी डा मुर आन कली श्येत मगेचा, मदिप्या। मारदे हना गे यो इजीप्त रागीमी अर्को रागी डा मुर दुम्शा बाक्तीनी। लेवी १९:३३-३४; ब्यवस्था १०:१८,१९ 22 आ वोंइश बेक्शो मीश मुर नु रोम रोइक्च आन कली श्येत मगेचा। ब्यवस्था २७:१९; यसैया १:१७; जकरिया ७:१० 23 गेपुकीमी श्येत गेतीनी हना, मेकोपुकीमी आं कली लोव्र पाम्तेक्म हना, गो थमा पा आन पुंडशो गेनुड। 24 मिनु गो गाइशशा, इन कली तरवारमी साइक्नन्नी। मिनु इन मीश वोंइश बेक्शो मीश दुम्ब। इन आलपुकी आफ बेक्शो आल दुम्नीम।

25 गेपुकीमी आं मुर आन दाते डा प्रुडग आन कली क्येट जेर गेतीनी हना, गे क्येट चेम्चा कली चाइक्ब ताक्ब मुर खोदेशो मदुमीन। लेवी २५:३६; ब्यवस्था २३:२०; हितोपदेस २८:८ 26 मिनु गेपुकीमी मेको आन सुम्तीक वासी क्येट आ पा डा लाइक्तीनी हना, नां पेरची ना मेको लेत्चा माल्नीनी। ब्यवस्था २४:१०-१३ 27 मारदे हना मेको आन रां डा सुम्तीक का ला बाक्ब। इप्ची ना दोपा सुम्सीनीमी? आं कली ब्रेत्तेक्म हना, गो आन पुंडशो गेनुड। मारदे हना गो शिशी पाइब नड।

परमप्रभु कली मान पा हिंचा

28 परमप्रभु आ पर्बम मरिम्शो लोव्र मपचा। इन कली सासन पाइब कली सराप मपचा। लेवी २४:१४-१६; प्रेरित २३:५ 29 गे इन रू डा डोंइती मीशो मारेइ मारेइ नु अडगुर रस चढेचा मरिम्दीन। मिनु इन डोंइती जरमेशो तौपुकी आं कली गेचा माल्नीनी। प्रस्थान २३:१९; ब्यवस्था १८:४; हितोपदेस ३:९-१०; प्रेरित १३:२,१३ 30 इन बी ब्यफ नु इन भेडा रे यो मोदेशो पचा माल्नीनी। ७ नाक्त आन ममा नु बाक्चा माल्नीमी। मेको नोले डा नाक्ती आं कली गेचा माल्नीनी। 31 गेपुकी आं मुर ला दुम्चा माल्नीनी। गे ब्वाकी डा जन्तुपुकीम साइशशो मब्वने। मेको कुचुम कली ब्वचा गेन” देनो। लेवी १९:२; १पत्रुस १:१५; लेवी ७:२४; ब्यवस्था १४:२१; इजीकीएल ४:१४; इजीकीएल ४४:३१

23

ठीक पतीके आ पर्बम अरेशो

1 “गेपुकी जोल लोव्र मब्रपतीने। मरिम्शो पाइब कली वारच मपने। जोल पा सांकछी मबाक्कीन। प्रस्थान २०:१६; लेवी १९:१६; भजन संग्रह १५:३; हितोपदेस १९:९ 2 मिनु ठेयब हुल का मरिम्शो पाइब बाक्तेक्म हना, मेको आन नोले मखोतीन। निसाफ पाइब आ डोंइती ‘ठेयब हुल डा मुर ठीक बाक्नीम’ मदेनीन। मोपा आं ठीक पतीके रे डोन मलने। 3 दूली पाइब मुर प्रुडग बाक्त हना यो मेको कली वारच मपतीन। लेवी १९:१५

4 मिनु गे इन जोरी सत्रु आन ब्यफ, गधा लां जाम्शा, हिरशो ताइतीनी हना, मेको कली वारच पा, लेशशा आ खिं चोवदीत्चा माल्नीनी। अय्युब ३१:२९; हितोपदेस २५:२१-२२; लूका ६:२७ 5 गे नु मदुइब मुर आ गधा आ भारीम

चिप्शो थित्तीनी हना, गे मेको पोक्ने मचाप्शो मुर ताइतीनी हना, मेको कली महेरदीन। मेको कली वारच पा मेको कली पोक्कीन। 6 मिन पुडग मुर का पित हना, मेको कली पुडग बाक्त हना यो, ठीक निसाफ पने। ब्यवस्था २५:१९; भजन संग्रह ८२:२-४; उपदेसक ५:७; यसैया १:१७ 7 जोल पा सांकछी माल्ब आन क्येडा डोन बाक्कीन। दोस मताइब नु ठीक पाइब कली मसतीन। मारदे हना गो मरिम्शो पाइब आ पबर्म ठीक पाइब बाक्ब मदेनुड। 8 गेपुकी खुइशशा मारेइ मताक्कीन। मारदे हना मेकोमी मिक्च सिल्लब। मिन खुइशशा ताक्शोमी ठीक पाइब आ मुददा लोकब। ब्यवस्था २७:२५; १सामुएल ८:३; हितोपदेस १७:२३ 9 मिन अर्को रागी डा मुर आन कली मदिपीन। मारदे हना गेपुकी यो इजीप्त रागीम अर्को रागी डा मुर दुम्शा, अर्को रागी डा मुर आन थुं तुइक्नीनी। प्रस्थान २२:२०

नाइक्तीक नाक्त नु बर्स

10 मिन ६ बर्स सम्म इन रूमी खुम्शा, सेक्शा खुप्तीन। लेवी २५:१-१७, १८-२४ 11 मिन मेको आ नोले डा बर्स चहिं मारेइ मशोक्थु, मो वोतीन। इन रागी डा पुडगपुकीमी मेको आंमा वाशो जामेक्ल। लीत हना, जन्तुपुकीम जामेक्ल। इन अडगुर रू नु इन तेल रवापुकी यो मेको खोदेशोन पने।

12 गेपुकी ६ नाक्त गेय पचा माल्नीनी। मेको आ नोले डा नाक्ती चहिं नांइसीन। मोपा इन ब्यफ नु गधा यो नाइक्ने चाप्नीम। मिन इन वाइलीम आ तौ नु इन खिंम बाक्शो अर्को रागी डा मुर यो नाइक्चा ताइनीम। प्रस्थान २०:८-११ 13 आं अरेशो नेल्ल पने। देवी देवता आन कली मारेइ मपुंइचा आन नें यो मथिचा। यहोसु २३:७; जकरिया १३:२

बर्स डा चाड सां

14 बर्सम आं पबर्म खेयप सां चाड मानेचा माल्नीनी। प्रस्थान ३४:१८-२६; लेवी २३:४-४४; ब्यवस्था १६:१-१७ 15 गो इन कली देशो खोदेशो पा, बोरब ओख्ती मसुप्शो शोब्ले डा चाड मानेचा माल्नीनी। गेपुकी ७ नाक्त सम्म बोरब ओख्ती मसुप्शो शोब्ले जचा माल्नीनी। मेको आबीब महिनामी पचा माल्नीनी। मारदे हना गेपुकी आबीब महिनामी इजीप्त रागी रे ग्रीतीनी। आं डोंइती श्येत्थ गुइ मजाक्कीन। प्रस्थान १२:१५-२० 16 मिन इन रूम खुम्शो डोंइती डा मीशो मारेइ मारेइ डा चाड मानेचा माल्नीनी। बर्स नुप्ची ना नेल्ल रिक्शा, खुप्शा, ओंइने थुम्शो डा चाड मानेचा माल्नीनी। प्रस्थान ३४:२२ 17 वोंइश मुर नेल्ल परमप्रभु, परमप्रभु यावे आ डोंइती बर्समी खेयप सां जाक्चा माल्नीनी। 18 गेपुकीमी चढ़ेनीनु, चढ़ेशो आ हुश नु बोरब ओख्ती सुप्शो मारेइ मारेइ कालेमी मचढ़ेन। मेको चढ़ेशो श्ये आ बोसो सुनी सम्म महेंचा। प्रस्थान १२:७-१०; प्रस्थान ३४:२५

19 मिन इन रू डा डोंइती मीशो नेल्ल क्येडा रिम्शो फल फुल नु अन्न परमप्रभु यावे, इन परमप्रभु आ बाक्तीकेम चाक्चा माल्नीनी। गेपुकीमी पाठा कली आ ममा आ दूधम लोप्शा मक्येने, देनो” दे परमप्रभु मोसा कली देंत। उत्पत्ती ४:४; ब्यवस्था २६:१-११; नेहेन्याह १०:३६; ब्यवस्था १४:२१

परमप्रभु आ अरेशो नु गेशो लोव

20 मिन परमप्रभुमी “नेनीन, गो इन डोंइती आं स्वर्ग डा गेय पाइब का सोइक्नुड। मेकोमी लांमी इन कली कोव्रशा नु आं देशो बाक्तीकेम चोव्रदीब। प्रस्थान १४:१९ 21 गेपुकी होस पा बाक्शा, आं देशो टिने। गेपुकी मेको कली मगाइक्पतीन। मारदे हना आं नें मेको नु बाक्ब। मिन मेकोमी इन हेंथे पतीक मक्याम्ब। यसैया ६३:१० 22 गेपुकी आ देशो नेनीन। आं देशो नेल्ल पाइतीनी हना, गो इन जोरी सत्रु आन जोरी सत्रु दुम्नुड। इन कली खेदा पाइब आन कली खेदा पाइब दुम्नुड। 23 आं स्वर्ग डा गेय पाइब थमा पा इन डोंइती लाइब। मिन इन कली एमोरी, हिती परिज्जी, नानी, हिव्वी नु यबुसी कनानी आन रागी चोव्रदीब। मिन गो मेको नेल्ल आन कली क्याम्नुड। 24 गेपुकी मेको आन खोदेशो मपने। मेको आन देवी देवता आन डोंइती बाप्शा सेउ मपने। मेको आन कली गेय मपने। तन्न मेको आन मूर्ति जिक्शा प्रोल्शा ताइक्तीन। प्रस्थान २०:५; ब्यवस्था १२:३०; लेवी १८:३ 25 गे परमप्रभु यावे, इन परमप्रभु कली गेय पाइतीनी हना, गो इन जचा तूचा थोव्रक कली आसीक गेनुड। मिन इन कली रोइ नेल्ल रे प्रोंइनुड। प्रस्थान १५:२६ 26 इन रागीमी मीश मुरपुकी आल शाम्ब नु आल मथीब मदुम्नीम। मिन गेपुकी खाल्पी खाल्पा दुम्चा सम्म ब्रोंइनीनी। 27 गो इन डोंइडोंइती हिंच कोंइनुडमी। मिन गे ते ते जाक्दीत्नीनी, गो मेक डा जात जात डा मुर आन थुं लुक्च लपाइक्नुड। मिन इन जोरी सत्रु इन कली तशा प्रोक्नीम। उत्पत्ती ३५:५; यहोसु २:९-११; १सामुएल १४:१५ 28 गो इन डोंइडोंइती हिकवा सोइशो खोदेशो पा हिंतीक सोइक्नुड। मिन हिव्वी, कनानी नु हिती इन डोंइती रे प्रोक्पाइक्नुड। ब्यवस्था ७:२०; यहोसु २४:१२ 29 तन्न बर्स कामी मेको आन कली मप्रोक्पाइक्नुडमी। मोपा प्रोक्पाइक्तामी हना, गोरशो रागी दुम्शा, इन क्येडा ब्वाकी डा जन्तु शुश दुम्नीम। 30 गे शुश दुम्शा, मेको रागी मब्रीनी सम्म, गो मेको आन कली इन

डोंइती रे का का पा ग्रुंडनुडमी। ब्यवस्था ७:२२ 31 गो इन रागी लल समुन्द्र रे पलिस्ती आन ठेयब समुन्द्र सम्म नु गोरशो रागी रे युफ्रेटीस खोला सम्म दुम्पाइक्नुड। मिनु गो मेको रागी डा मुर इन कली जिम्मा गेनुड। मिनु गे मेको आन कली खेरनीनी। उत्पती १५:१८ 32 गे मेकोपुकी नु मेको आन देवी देवता नु कबल मपमुने। प्रस्थान ३४:१२ 33 मेकोपुकीम इन कली पाप पपाइक्नीम। मोपतीके मेको आन कली इन रागीमी बाक्चा मगेने। गे मेको आन देवी देवता आन कली गेय पाइतीनी हना, आन ग्याइलीम रेट्चा पुंडसीनीनी” दे परमप्रभु यावेमी इस्राएली आन कली अरेवा बाक्त।

24

सीनै डांडाम कबल पशो

1 मिनु परमप्रभु यावेमी मोसा कली “गे, हारून, नादाब, अबीहु नु इस्राएली आन खाल्पा रे ७० जना मुर कुने। मिनु डोन रे आं कली सेउ पचा माल्नीनी। प्रस्थान २८:१; लेवी १०:१; गन्ती ११:१६ 2 गे ला आं नेक्था जाक्ने चाप्नेवे। अरु चहिं नेक्था मजाक्थु, बाक्चा माल्नीमी। मिनु मुरपुकी गे नु डांडा डोइक्चा मदुम्नीम” दे परमप्रभु यावेमी दैत।

3 मिनु मोसा डांडा रे तोइश्शा, मुर आन कली परमप्रभु यावेमी देशो नु अरेशो लोव्र नेल्ल नेंपाइक्तीमी। मिनु मुर नेल्लेमी मुर का खोदेशो पा “परमप्रभु यावेमी देशो लोव्र नेल्ल गो पाइनीकी” दैतेक्म। प्रस्थान १९:८ 4 मिनु मोसामी परमप्रभु यावे आ देशो लोव्र नेल्ल ब्रेक्ताक्व। मिनु सुनी कना बोक्शा, डांडा आ पुंमी चढेतीक का नु इस्राएल आ १२ थर मिम्चा कली १२ ओटा फुल्लु खुक्तु। प्रस्थान ३४:२७; यहोसु ४:२० 5 मिनु मोसामी इस्राएली ठिटा आन कली बोहोर क्योरशा, चोशा चढेतीक नु परमप्रभु यावे नु दुशा बाक्चा आ पर्बम चढेतीक चढेपपाइक्तु। न्यायाधीस १७:७ 6 मिनु चदेशो बस्तु आन हुश आधा लाइश्शा, बोसपुकीम कुर पाप्तु। मिनु लीशो हुश चढेतीकेम ब्रुइक्ताक्व। 7 नोले कबल डा लोव्र ब्रेक्शो किताब मुर आन कली नेंपाइक्चा कली पढेपु। मिनु मेकोपुकीमी “परमप्रभु यावे आ देशो नेल्ल पाइनीकी। आ लोव्र टीनीकी” दैतेक्म। 8 मिनु मोसामी बोस डा हुश लाइश्शा, मुर आन कली ब्रुइश्शा “नेनीन, परमप्रभु यावेमी गेपुकी नु कबल पाप्तु। मेको हुश परमप्रभु यावे आ कबल डा देशो लोव्र आ छाप बाक्ब” दैत। हिब्रू ९:१९-२७; मर्कूस १४:२४

9 मिनु मोसा, हारून, नादाब, अबीहु नु इस्राएली आन खाल्पा रे ७० जना मुर डांडा डोंइसाक्म। 10 मिनु मेकोपुकीमी इस्राएली आन परमप्रभु कली ताम्तेक्म। आ बाक्तीक बास साफीर माइश्शो हीरा खोदेशो दिंम का बाक्शो बाक्त। मेको हाक्शो सरीड खोदेशो नीलो बाक्त। इजीकीएल १:२६ 11 मिनु परमप्रभुमी इस्राएली आन खाल्पा आन कली मारेइ मपव। मिनु मेकोपुकीमी परमप्रभु कली तशा, जशा तूशा बाक्तेक्म। प्रस्थान १९:२१-२२; प्रस्थान ३३:२०-२३

मोसामी परमप्रभु आ अरेशो टिशो

12 मिनु परमप्रभु यावेमी मोसा कली “गे डांडा डोइश्शा, आं नेक्था जाक्शा रिम्शा बाक्को। गो आं अरेशो लोव्र नु आं शेंशो लोव्र इस्राएली आन कली शेंचा कली फुल्लु निक्शीम मुशा ब्रेक्ताक्व। गो मेको फुल्लु इ कली गेनन्न” दैत। प्रस्थान ३१:१८; २कोरिन्थी ३:६ 13 मिनु मोसा आ गेय पाइब यहोसु लाइश्शा, परमप्रभु आ डांडा डोंइसाक्व। प्रस्थान ३३:११ 14 तन्न डोंइती मोसामी इस्राएली आन खाल्पा आन कली “गो मलेस्कु सम्म, एकेर रिम्दीन। नेनीन, हारून नु हुर गेपुकी नु बाक्नीस। मार निसाफ पचा माल्नीनी, मेको निक्शीमी गारपाइक्नीस” दैत। प्रस्थान १७:१२ 15 मिनु मोसा डांडा डोंइसाक्व। मिनु गोस्सुम मेको डांडा सुम्तु। 16 मिनु परमप्रभु यावे आ छेडछेड सीनै डांडाम बाक्शो बाक्त। मेको गोस्सुम डांडा कली ६ नाक्त सम्म सुम्तु। मिनु नाक्त का नोले गोस्स आ दाते रे परमप्रभु यावेमी मोसा कली ब्रेत्ताक्व। प्रस्थान १६:१० 17 मिनु परमप्रभु यावे आ छेडछेड इस्राएली आन कली डांडा तारी थम ठेयब ब्रशो मी खोदेशो पा तांइसाक्व। ब्यवस्था ४:२४; ब्यवस्था ९:३; हिब्रू १२:२९ 18 मिनु मोसा गोस्स आगा ओव्रशा, डांडा डोइश्शा, ४० नाक्दो नु ४० नाक्ती बाक्त। प्रस्थान ३४:२८

25

ताम्बु सेल्चा कली शुश गेशो

1 मिनु परमप्रभु यावेमी मोसा कली 2 “इस्राएली आन कली ‘आं कली मार मार गेचा मिम्नीनी, मेको गेने’ दे मतो। आन थुंमी गेचा दाक्शो, नेल्ल आन चाक्शो गे नु इ कली वारच पाइबपुकीमी ताक्कीन। प्रस्थान ३५:४-७; १इतिहास २९:५; एज्रा २:६८, ६९ 3 आं कली मार मार ताक्चा माल्नीनी देशा हना, सुन चांदी नु कांसा, 4 नीलो, प्याजी नु लल

रड डा श्येले, रिम्शो पा किरशो सुती श्येले के प्रोवशो वा, क्यारश आ चां, 5 लल रड नुपुशो सांड आ कुशुल, नेल्ल क्येडा रिम्शो सेल्शो कुशुल, बोल्यो शी, 6 बत्ती दातीक तेल, लुक्तीक तेल नु धूप कली ब्रोवशो रिना पपाइक्ब थोव्रक, 7 निसाफ पतीके ऊरीम नु थुम्मीम वोइक्तीक झोला नु कुचु तार वोइक्तीक सेल्चा कली ओनीक्स माइशो हीरा नु अरु हीरा ताक्चा माल्नीनी। 8 मिनु गो मेको आन दातेमी बाक्चा कली आं बाक्तीक सेल्पतो। इजीकीएल ३७:२६-२८ 9 गो इ कली कोंइशो खोदेंशो पा ताम्बु सेल्पाइक्चा माल्नेवे। आगाम मार मार वोइक्चा माल्नेवे, मेको आं कोंइशो खोदेंशो पा सेल्पतो। प्रस्थान २५:४०; प्रस्थान २६:३०; प्रस्थान २७:८

कबल पशो सन्दोस प्रस्थान ३७:१-९

10 मेकोपुकीमी बोल्यो शी के सन्दोस का सेल्चा माल्नीम। मेको आ पित्थ लाइशो कुबीत निक्शी नु आधा, आ ब्रेम्शो कुबीत का नु आधा नु आ ग्येत्थ लाइशो कुबीत का नु आधा डा सेल्चा माल्नीम। कुबीत का ०.५ मिटर खोदेंशो बाक्ब। 11 मिनु गे मेको सन्दोस आ खिंडगा नु आ लाडगा नेल्ल क्येख सुनमी गिल्पाइक्चा माल्नेवे। मिनु एर ओंथ सुन के सुर सेल्पाइक्चा माल्नेवे। 12 मिनु सुन के ४ ओटा मुन्द्रा सेल्पाइक्चा माल्नेवे। का पटटी निक्शी नु अर्को पटटी निक्शी पा सन्दोस आ ४ सुरमी क्येप्चा माल्नीम। 13 मिनु बोल्यो शी के कुरतीक कोक्के निक्शी सेल्पाइक्चा, सुनमी गिल्पाइक्चा माल्नेवे। १राजा ८:८ 14 मिनु मेको कुरतीक कोक्के निक्शी मेको मुन्द्राम शुइक्चा माल्नेवे। मो पा मेको सन्दोस कली कुरने चाप्नीम। 15 मेको कोक्के निक्शी सन्दोसम बाक्शो मुन्द्राम शुइक्चा माल्नीस। मेको आस कली मशोल्चा। 16 मिनु गो इ कली गेचा चिक्शो कबल पा अरेशो लोव्र मेको सन्दोसमी कुर पा वोइक्चा माल्नेवे।

सन्दोस सुम्तीके

17 मिनु सन्दोस सुम्तीके क्येख सुन के चेम्शा सेल्चा माल्नेवे। मेकेर परमप्रभु आ शिशी बाक्ब। आ पित्थ लाइशो कुबीत निक्शी नु आधा नु आ ब्रेम्शो कुबीत का नु आधा बाक्चा माल्ब। कुबीत का ०.५ मिटर, कुबीत का खोदेंशो बाक्ब। लेवी १६:१२-१५; हिब्रू ४:१६; हिब्रू ९:५ 18 मिनु गे आं स्वर्ग डा गेय पाइब खोदेंशो सुन के करूब निक्शी चेम्शा सेल्पाइक्चा माल्नेवे। मेको सुम्तीकेम आ निम्फा पटटी का का करूब चेम्शा सेल्चा माल्नेवे। 19 का पटटी करूब का, अर्को पटटी करूब का चेम्शा सेल्चा माल्नेवे। मेको सुम्तीके नु करूब निम्फा मख्रोंइसीशो सुन का केन चेम्शा सेल्चा माल्नेवे। 20 मेको करूबम आस फ्रां हाम्शा, सुम्तीके फारचा माल्नीस। आस कुल कोव्रमुशा, सन्दोस सुम्तीके गे कोव्रचा माल्नीसी। 21 मेको सुम्तीके मेको कबल पशो सन्दोस तार वोइक्चा माल्नेवे। मिनु गो इ कली गेचा चिक्शो कबल पा अरेशो लोव्र मेको कबल पशो सन्दोसम कुर पा वोइक्चा माल्नेवे। प्रस्थान ३४:२९; १राजा ८:९

22 मिनु गो मेको सन्दोस सुम्तीके शिशी बाक्तीकेम गे नु ग्रुम्शा, लोव्र पाइनुड। मेको सुम्तीके आ तारी मेको करूब निक्शी आस दाते रे गो इस्राएली आन कली मार मार अरेचा माल्नुडा, मेको गो इ कली देनुड। गन्ती ७:८९; २सामुएल ६:२

शोब्ले वोइक्तीके टेबल प्रस्थान ३७:१०-१६

23 गे बोल्यो शी के टेबल का सेल्पाइक्चा माल्नेवे। मेको आ पित्थ लाइशो कुबीत निक्शी नु आ ब्रेम्शो कुबीत का नु आ ग्येत्थ लाइशो कुबीत का नु आधा दुम्चा माल्ब। कुबीत का ०.५ मिटर, खोदेंशो बाक्ब। 24 मिनु मेको कली क्येख सुनमी गिल्पाइक्चा माल्नेवे। सिरपेच खोदेंशो पा एर ओंथ नेल्ल सुन के सुर सेल्पाइक्चा माल्नेवे। 25 मेको एर ओंथ डा सुर नेल्ल ४ आंइची ब्रेम्शो दुम्चा माल्ब। मेको कली सिरपेच खोदेंशो पा बुटा आप्पाइक्चा माल्नेवे। 26 मिनु ४ ओटा सुन के मुन्द्रा चेम्शा, मेको आ ४ ओटा खोइलीम टेबल आगाम क्येप्पाइक्चा माल्नेवे। 27 टेबल कुरचा कली मुन्द्रापुकी टेबल आ सुर आ नेक्था क्येप्पाइक्चा माल्नेवे। 28 मिनु बोल्यो शी के कोक्के निक्शी सेल्शा, सुनमी गिल्पाइक्चा माल्नेवे। मेको टेबलम बाक्शो मुन्द्राम शुइक्चा कुरने चाप्नीम।

29 मिनु टेबलम वोइक्चा माल्शो थाल, लोटा नु बोस नेल्ल नु तूचा थोव्रक चढेतीक लुक्चा कली लोटा नेल्ल क्येख सुन के सेल्पाइक्चा माल्नेवे। 30 मिनु मेकेर गेना हना यो आं डोंइती कोंइतीक शोब्ले वोइक्चा माल्नेवे। लेवी २४:५-६

सुन के बत्ती दातीक प्रस्थान ३७:१७-२४

31 गे क्येख सुन के बत्ती दातीक का चेम्शा सेल्पाइक्चा माल्नेवे। आ थाम, आ राशी, आ दियारी, आ डल्ला नु फूपुकी ठेयब सुन का केन दुम्चा माल्नीम। 32 मिनु मेको बत्ती दातीक आ थाम रे ६ ओटा राशी गूचा माल्नीम। का पटटी रे सां नु अर्को पटटी रे सां गूचा माल्नीम। 33 मिनु मेको राशी कामी देसी बदाम आ फू खोदेशो बुटा पाइश्शो फू सां गूचा माल्नीम। अर्को राशीपुकी यो नेल्ल मोदेशोन दुम्चा माल्नीम। 34 मेको बत्ती दातीक आ थामम चहिं ४ ओटा देसी बदाम आ फू खोदेशो बुटा पाइश्शो गूचा माल्नीम। 35 थाम आ डोंइती डा डल्ला, आ दाते डा डल्ला नु नोले डा डल्ला रे निम्फा पटटी गे राशी निक्निक्शी गूचा माल्नीम। 36 मेको आ राशी नु डल्ला नेल्ल ठेयब क्येख सुन का केन चेम्शो दुम्चा माल्नीम। 37 गे क्येख सुन के ७ ओटा दियारी सेल्पाइक्चा माल्नेवे। मिनु सल्दो वोइश्शा, नेल्ल तांडसीचा डा पा दाचा माल्नेवे। मेको ब्रशा, छेडछेड दुम्ल। 38 मिनु आ कांडची नु आइक्च बोस क्येख सुन के दुम्चा माल्नीम। 39 गे मेको नेल्ल टलेन्ट का क्येख सुन के सेल्पाइक्चा माल्नेवे। 40 गे मेको नेल्ल गो इ कली डांडाम कोइशो खोदेशो पा सेल्पाइक्चा माल्नेवे। प्रस्थान २५:९; प्रस्थान २६:३०; प्रेरित ७:४४; हिब्रू ८:५

26

ताम्बु कली साप्तीके प्रस्थान ३६:८-३८

1 आं बाक्तीके सेल्चा कली रिम्शो पा किरशो सुती श्येले के १० ओटा ताम्बु साप्तीके प्रोत्रपाइक्चा माल्नेवे। मेको सुती श्येले नीलो, प्याजी नु लल रडम नुष्शो बाक्चा माल्ब। मिनु मेको वामी करूब बुटा आप्शा, थाम्पा रिम्शो प्रोत्रस जोक्ब मुर आन कली प्रोत्रपाइक्चा माल्नेवे। 2 वा का आ लाइश्शो २८ कुबीत नु आ ब्रेम्शो ४ कुबीत दुम्चा माल्ब। मेको १० ओटा वा नेल्ल मोदेशोन दुम्चा माल्नीम। कुबीत का ०.५ मिटर, खोदेशो बाक्ब। 3 मिनु ५ ओटा वा बोइश्शा, का सेल्पाइक्चा माल्नेवे। मिनु अर्को ५ ओटा वा यो बोइश्शा, का सेल्पाइक्चा माल्नेवे। 4 मिनु वा आ सुर कली नीलो रड डा श्येले के बोइक्तीके यो सेल्पाइक्चा माल्नेवे। मोपा वा निक्शी बोइश्शा का सेल्पाइक्चा माल्ब। 5 मिनु गे का का पा ताम्बु साप्तीके ५० ओटा सेल्पाइक्चा माल्नेवे। मेकोपुकी गारपाइक्चा कली सेल्पाइक्चा माल्नेवे। 6 मिनु ५० ओटा सुन के ग्याइक्पाइक्तीके सेल्पतो। मोपा मेको वापुकी बोइश्शा, आं बाक्तीक ताम्बु आगा साप्तीक कान दुम्ब। 7 मिनु आं बाक्तीक ताम्बु साप्चा कली क्यारश आ चां के ११ ओटा टुक्रा सेल्पाइक्चा माल्नेवे। 8 का आ लाइश्शो ३० कुबीत नु आ ब्रेम्शो ४ कुबीत दुम्चा माल्ब। मिनु मेको ११ ओटा टुक्रा नेल्ल खाल का डा दुम्चा माल्नीम। कुबीत का ०.५ मिटर खोदेशो बाक्ब। 9 गे ५ ओटा टुक्रा बोइश्शा का नु ६ ओटा बोइश्शा, अर्को का सेल्पाइक्चा माल्नेवे। ६ ओटा बोइश्शा टुक्रा ताम्बु आ डोंइती आ सुर तोक्तीके फेके का मुक्शा तोक्चा माल्ब। 10 मेको टुक्रा का आ सुरमी ५० ओटा बोइक्तीक सेल्पाइक्चा माल्नेवे। मिनु अर्को टुक्रा आ सुरमी यो ५० ओटा बोइक्तीक सेल्पाइक्चा माल्नेवे। 11 मिनु गे कांसा के ५० ओटा ग्याइक्पाइक्तीके सेल्पतो। मेको ग्याइक्पाइक्तीक बोइक्तीकेमी वोइश्शा, टुक्रा निक्शी के का दुम्चा माल्ब। मोपा टुक्रापुकी बोइश्शा, ताम्बु साप्तीक का दुम्ब। 12 ताम्बु आ साप्तीके आ दी गे आइदी सम्म तोक्चा डा पा साप्पाइक्चा माल्नेवे। 13 निम्फा पटटी साप्पाइक्चा कली कुबीत का का आइदी सम्म तोक्चा डा पा साप्पाइक्चा माल्नेवे। कुबीत का ०.५ मिटर खोदेशो बाक्ब। 14 ताम्बु आ साप्तीके निक्शी आस तारी लल रडम नुष्शो बोका आ कुशुल के सेल्पाइक्चा माल्नेवे। मिनु मेको आ तार अर्को साप्तीके नेल्ल क्येडा रिम्शो कुशुल के सेल्पाइक्चा माल्नेवे।

ताम्बु कली फलेक सेल्शो

15 गे आं बाक्तीक ताम्बु आ एर ओंथ थारचा कली फलेक सेल्पाइक्चा माल्नेवे। मेको फलेकपुकी बोल्यो शी के सेल्पाइक्चा माल्नेवे। 16 फलेक नेल्ल १० कुबीत ग्येत्थ लाइश्शो नु कुबीत का नु आधा ब्रेम्शो दुम्चा माल्नीम। कुबीत का ०.५ मिटर खोदेशो बाक्ब। 17 फलेक नेल्लेमी गुक्तीक निक्निक्शी आ पुं गे एर ओंथ पा सेल्पतो। आं बाक्तीक डा फलेक नेल्ल मोदेशो पा सेल्पाइक्चा माल्नेवे। 18 आं बाक्तीक कली मोदेशो फलेक सेल्पाइक्चा माल्नेवे। २० ओटा फलेक दक्खिन गे थारचा कली सेल्पाइक्चा माल्नेवे। 19 मिनु गे २० ओटा फलेक आन कली ४० ओटा चांदी के राप्पाइक्तीके सेल्पाइक्चा माल्नेवे। फलेक का कली गुक्तीक निक्शी गारचा डा पा ग्याइक्पाइक्तीक निक्शी माल्ब। अर्को फलेक आन कली यो गारचा डा पा गुक्तीक नु राप्पाइक्तीके निक्निक्शी सेल्पाइक्चा माल्नेवे। 20 मोदेशो पा उत्तर गे यो २० ओटा फलेक बाक्चा माल्नीम। 21 मिनु ४० ओटा राप्पाइक्तीक सेल्शा, फलेक कामी राप्पाइक्तीक निक्शी गुक्पाइक्चा माल्नेवे। फलेक नेल्ल मोदेशो पा सेल्चा माल्नेवे। 22 मिनु आं बाक्तीक ताम्बु आ नोले पटटी,

पच्छिम गे ६ ओटा फलेक सेल्पाइक्चा माल्नेवे। 23 नोले पटटी डा सुर निक्शी कली फलेक निक्शी सेल्पाइक्चा माल्नेवे। 24 मेको सुर डा फलेक आइक्था नु उइ अर्को फलेक नु गारचा डा दुम्चा माल्नीस। 25 नोले पटटी डा फलेक नु सुर डा फलेक नेल्ल पा ८ ओटा दुम्नीम। मेको फलेक नेल्ल आन कली १६ ओटा चांदी के राप्पाइक्तीके सेल्पाइक्चा माल्नेवे। फलेक का कली निक्शी माल्ब। फलेक नेल्ल मोदेशो पा सेल्चा माल्नेवे।

26 मिनु का पटटी डा फलेक आन कली बोल्यो शी के ५ ओटा लाइशो कोक्के, 27 अर्को पटटी कली यो ५ ओटा लाइशो कोक्के सेल्पाइक्चा माल्नेवे। मिनु पच्छिम गे नोले पटटी कली ५ ओटा लाइशो कोक्के सेल्पाइक्चा माल्नेवे। 28 मिनु फलेक ग्येत्थ आ दातेमी सुर का रे अर्को सुर सम्म लाइशो कोक्के बाक्चा माल्नीम। 29 मिनु गे मेको फलेकपुकी सुनम गिल्पाइक्चा माल्नेवे। मेको कोक्के शुइक्तीक मुन्द्रा सुन के सेल्पाइक्चा माल्नेवे। मेको लाइशो कोक्केपुकी यो सुनमी गिल्पाइक्चा माल्नेवे। 30 गो इ कली डांडामी कोइशो खोदेशो पा आं बाक्तीक ताम्बु सेल्पाइक्चा माल्नेवे। प्रस्थान २५:९

ताम्बु कली फारतीक

31 मिनु गे फारतीक सेल्चा कली नीलो प्याजी नु लल रड डा श्येले नु रिम्शो पा किरशो सुती श्येले के वा प्रोव्रपाइक्चा माल्नेवे। मेको वा करूब बुटा आप्शा थाम्पा रिम्शो प्रोव्रस जोक्ब मुर आन कली प्रोव्रपाइक्चा माल्नेवे। २इतिहास ३:१४ 32 मेको फारतीके बोल्यो शी के सेल्शो सुनम गिल्शो सुन के हेक्तीक पाइशो नु चांदी के राप्पाइक्तीक पाइशो ४ ओटा थामम क्युक्पाइक्चा माल्नेवे। 33 मिनु मेको फारतीके हेक्तीकेम हेक्पाइक्चा माल्नेवे। मिनु गे मेको आं अरेशो लोव्र आगाम वोइशो सन्दोस मेको फारतीके आगा गे वोइक्पाइक्चा माल्नेवे। मोपा मेको फारतीके चोव्रखो नु नेल्ल क्येडा चोव्रखो बाक्तीक कली फारब दुम्ब। मत्ती २७:५१; हिबू ९:३; प्रस्थान २६:६,११ 34 मिनु गे मेको सुम्तीक अरेशो लोव्र आगाम वोइशो सन्दोस तारी वोइशो, मेको फारतीक आ आगा गे नेल्ल क्येडा चोव्रखो बाक्तीकेमी वोइक्पाइक्चा माल्नेवे। प्रस्थान २५:२१ 35 कोइतीक शोब्ले वोइक्तीक टेबल चोव्रखो बाक्तीके उत्तर गे वोइक्पाइक्चा माल्नेवे। बत्ती दातीक चहिं दक्खिन गे वोइक्पाइक्चा माल्नेवे। प्रस्थान २५:२३-३०; प्रस्थान ४०:४२

36 मिनु ताम्बु ओव्रतीक कली नीलो प्याजी नु लल रड डा श्येले नु रिम्शो पा किरशो सुती श्येले के प्रोव्रशो वा, बुटा आप्शा ठेयब फारतीक सेल्पाइक्चा माल्नेवे। 37 मेको फारतीके हेक्चा कली ५ ओटा बोल्यो शी के थाम सेल्पाइक्चा माल्नेवे। मेको थाम सुनम गिल्पाइक्चा माल्नेवे। मेको थामम सुन के हेक्तीके यो सेल्पाइक्चा माल्नेवे। मेको थाम राप्पाइक्तीके ५ ओटा कांसा के सेल्पाइक्चा माल्नेवे।

27

चढेतीक सेल्शो प्रस्थान ३८:१-७

1 मिनु बोल्यो शी के चढेतीक का सेल्चा माल्नेवे। मेको ५ कुबीत लाइशो नु ५ कुबीत ब्रेम्शो दुम्चा माल्ब। ४ पाटे नु कुबीत सां ग्येत्थ लाइशो दुम्चा माल्ब। कुबीत का ०.५ मिटर देशो बाक्ब। 2 आ ४ सुरमी ४ ओटा ग्रोव्र गूपाइक्चा माल्नेवे। ग्रोव्र नु चढेतीक सेल्चा कली फलेक का केन दुम्चा माल्ब। मेको नेल्ल कांसाम गिल्पाइक्चा माल्नेवे। लेवी १६:१८; १राजा १:५; भजन संग्रह ११८:२७ 3 चढेतीके कली माल्शो मारेइ मारेइ कांसा के सेल्पाइक्चा माल्नेवे। पुलु वोइक्तीक बोसपुकी, पुलु ताप्तीकपुकी, ब्रुइक्तीक बोसपुकी, श्ये गुंडतीक कांटापुकी नु मी कोइला कुर पतीकपुकी सेल्पाइक्चा माल्नेवे। 4 मिनु गे मी तिक्तीक कांसा के जाली सेल्पाइक्चा माल्नेवे। मिनु जाली आ ४ सुरमी ४ ओटा मुन्द्रा सेल्पाइक्चा माल्नेवे। 5 मेको जाली चढेतीक उइ गे नु इर गे आ दातेम वोइक्पाइक्चा माल्नेवे। 6 मिनु चढेतीक कली यो बोल्यो शी के कांसाम गिल्शो कुरतीक कोक्के निक्शी सेल्पाइक्चा माल्नेवे। 7 मेको चढेतीक आ निम्फा पटटी डा मुन्द्रामी कोक्के शुइशो, कुरने चाप्नीम। 8 मेको चढेतीक फलेक के सेल्पाइक्चा माल्नेवे। पुं नु सुम्तीके मपाइशो सन्दोस खोदेशो पा सेल्पाइक्चा माल्नेवे। डांडामी इ कली कोइशो खोदेशो पा सेल्पाइक्चा माल्नेवे। प्रस्थान २६:३०;

ताम्बु आ लाडगा प्रस्थान ३८:९-२०

9 मिनु ताम्बु आ लाडगा थरपु हिरचा कली रिम्शो पा किरशो सुती श्येले के फारतीके प्रोव्रपाइक्चा माल्नेवे। मेको फारतीके दक्खिन गे सहे का कुबीत लाइशो दुम्चा माल्ब। कुबीत का ०.५ मिटर खोदेशो बाक्ब। 10 मेको फारतीक ग्याइक्पाइक्चा कली खाल का डा थाम, खाल का डा कांसा के राप्पाइक्तीके, मुन्द्रापुकी नु कोक्केपुकी चहिं चांदी

के सेल्पाइक्चा माल्नेवे। 11 मिनु मोदेशो पा उत्तर गे यो सहे का कुबीत लाइशो फारतीक प्रोव्रपाइक्चा माल्नेवे। मेको कली २० ओटा थाम, २० ओटा कांसा के राप्पाइक्तीके, मेको मुन्द्रापुकी नु कोक्केपुकी चहिं चांदी के सेल्पाइक्चा माल्नेवे।

12 लाडगा डा पच्छिम गे ब्रेम्शो कली ५० कुबीत लाइशो फारतीक माल्ब। आ थाम नु आ राप्पाइक्तीक १०, १० ओटा दुम्चा माल्नीम। कुबीत का ०.५ मिटर खोदेशो बाक्ब। 13 लाडगा आ पूर्व, नां दाप्तीके गे फारचा कली यो ५० कुबीत ब्रेम्शो दुम्चा माल्ब। 14 मिनु ओव्रतीक डा पटटी का कली १५ कुबीत डा फारतीक दुम्चा माल्ब। थाम नु आ राप्पाइक्तीके सां सां दुम्चा माल्नीम। 15 मिनु अर्को पटटी यो मोदेशो पा १५ कुबीत डा फारतीक, थाम नु राप्पाइक्तीके सां सां दुम्चा माल्नीम।

16 मिनु लाडगा ओव्रतीके कली २० कुबीत डा नीलो, प्याजी, श्येले नु रिम्शो पा किरशो सुती श्येले के प्रोव्रशो फारतीक माल्ब। मेको फारतीक कली लूजेम बुटा आप्पाइक्चा माल्नेवे। ओव्रतीके कली थाम नु राप्पाइक्तीके ४, ४ ओटा दुम्चा माल्नीम। 17 लाडगा एर ओथ डा थाम नेल्ल चांदीमी गिल्शो कोक्केमी ग्याइक्पाइशो दुम्चा माल्नीम। मुन्द्रा चांदी के नु आन राप्पाइक्तीक कांसा के दुम्चा माल्नीम।

18 मेको लाडगा आ पित्थ लाइशो सहे का कुबीत, आ ब्रेम्शो ५० कुबीत नु आ फारतीके ग्येत्थ ५ कुबीत दुम्चा माल्ब। मिनु फारतीक वा नेल्ल रिम्शो पा किरशो सुती श्येले के प्रोव्रशो वा के दुम्चा माल्ब। थाम आन राप्पाइक्तीके कांसा के दुम्चा माल्नीम। 19 मिनु ताम्बु डा नाक्त कित कित गेय पचा कली माल्शो मारेइ मारेइ कांसा के दुम्चा माल्नीम। किलापुकी नु लाडगा डा किला नेल्ल यो कांसा के दुम्चा माल्नीम।

बत्ती कली तेल

20 मिनु गे इस्राएली आन कली 'गे नेल्ल क्येडा रिम्शो तेल रवा आ फल के खाक्शो तेल चाक्कीन। मेको बत्ती गेना हना यो ब्रशा बाक्ल' दे माइक्मी। लेवी २४:२-४ 21 मिनु गुम्तीक ताम्बु आगामी, कबल डा सन्दोस बाक्शो नेल्ल क्येडा चोव्रखो कोठा फारतीक आ डोंइती हारून नु आ तौपुकीमी नाक्दो रे सुनी सम्म मेको बत्ती दातीक परमप्रभु यावे आ डोंइती ब्रशा बाक्ल, दे ठीक सेल्चा माल्नीम। मेको इस्राएली आन चच युइ आन कली गेना हना यो पतीके लीचा माल्ब। मेको गेना हना यो पचा माल्नीम।

28

चढ़ेब आन वासी प्रस्थान ३९:१-३१

1 मिनु इस्राएली आन दाते रे योव्रशा, इ लोकब हारून नु आ तौपुकी इ डोंइती राप्पाइक्चा माल्नेवे। मारदे हना हारून नु आ तौ नादाब, अबीहु, एलाजर नु इथामार आं कली चढ़ेब दुम्चा माल्नीमी। १इतिहास २३:१३; प्रस्थान ६:२३ 2 मिनु गे इ लोकब हारून कली आं गेय पची ना ला फेक्चा कली फेक्तीक वा फेरपाइक्चा माल्नेवे। मेको हारून कली ग्योम्शा दारपाइक्चा कली बाक्ब। 3 मिनु सु सुमी फेरस जोक्नीमी, मेको नु लोव्र पावो। मारदे हना गो मेको आन कली जोक्ब नु तुइक्ब सोक्तीम प्रिंताक्डमी। मेकोपुकीमी हारूनमी आं कली चढ़ेतीक गेय पचा कली वासी फेरचा माल्नीम। प्रस्थान ३१:५

4 मेकोपुकीमी मार वासी फेरचा माल्नीम देंशा हना, कुचु तार वोइक्तीके, निसाफ पतीके ऊरीम नु थुम्मीम वोइक्तीक झोला, आ तार फेक्तीके नु आगा फेक्तीक वा फेरचा माल्नीम। पियाम गुप्तीक नु किप्शुर यो सेल्चा माल्नीम। मेको आं कली गेय पची ना फेक्तीक बाक्ब। इ लोकब हारून नु आ तौपुकीमी आं कली गेय पामेनु, मेको वा फेक्चा माल्नीम। 5 फेरबपुकीमी सुन, नीलो, प्याजी नु लल रड डा श्येले नु रिम्शो पा किरशो सुती श्येले के प्रोव्रशो वा के सेल्चा माल्नीमी। प्रस्थान २६:१

चढ़ेब आ कुचु तार वोइक्तीके

6 कुचु तार वोइक्तीके सुन के, नीलो, प्याजी नु लल रड डा श्येले नु रिम्शो पा किरशो सुती श्येले के प्रोव्रशो नु बुटा आप्शो वा के सेल्पाइक्चा माल्नेवे। 7 मेको आ बला सुम्तीके निक्शी निम्फा पटटी बोइशो दुम्चा माल्ब। 8 मिनु आ पाइक्तीके मेको कुचु तार वोइक्तीके का रेन दुम्चा माल्ब। मिनु खाल का डा रिम्शो गेयम सेल्शो दुम्चा माल्ब। मेको पाइक्तीके सुन, नीलो, प्याजी नु लल रड डा श्येले नु रिम्शो पा किरशो सुती श्येले के प्रोव्रशो वा दुम्चा माल्ब। 9 मिनु गे ओनीक्स हीरा निक्शी चाक्शा, इस्राएल आ १२ जना तौ आन नें मेको आस तारी मुशा ब्रेक्पाइक्चा माल्नेवे।

प्रस्थान २५:७ 10 गे आन जरमेशो खोदेशो पा हीरा का तारी ६ जना आन नें नु अर्को हीरा तारी ६ जना आन नें मुशा ब्रेक्पाइक्चा माल्नेवे। 11 छाप सेल्बपुकीमी दोदेशो पा मुशा छाप सेल्नीमी, मोदेशो पा मुशा इस्राएल आ तौ आन नें ब्रेक्पाइक्चा माल्नेवे। मिनु मेको हीरा निक्शी सुनमी क्येप्पाइक्चा माल्नेवे। 12 मेको कुचु तार वोइक्तीक आ बला डा टुक्रा तारी क्येप्शा फेरपाइक्चा माल्नेवे। मिनु मेको हीरा कोव्रशा इस्राएली इन कली मिन्नुड, दे कोइतीक बाक्ब। हारूनम आं डोंइती मेको आन नें बलाम कुरानु, गो मेको आन कली मिन्नुड।

13 मिनु हीरा वोइक्चा कली गे सुन के क्येप्तीक सेल्पाइक्चा माल्नेवे। 14 मिनु गे क्येख सुन के डोरी खोदेशो पा सिक्की निक्शी चेम्पाइक्शा, हीरा क्येप्पाइक्शोमी वोइक्पाइक्चा माल्नेवे।

निसाफ पतीक झोला

15 गे निसाफ पतीक झोला सेल्पाइक्चा माल्नेवे। मेको कुचु तार वोइक्तीके खोदेशो पा, सेल्पाइक्चा माल्नेवे। सुन, नीलो, प्याजी, लल श्येले नु रिम्शो पा किरशो सुती श्येले के प्रोव्रपाइक्चा माल्नेवे। 16 मेको खेयप का मुक्शोनु, स्पान का लाइशो नु स्पान का ब्रेम्शो ४ पाटे दुम्चा माल्ब। स्पान का २३ सेन्ती मिटर खोदेशो बाक्ब। बिता खोदेशो बाक्ब को? 17 मिनु ४ लस्कर हीरा सुनम का का पा क्येप्पाइक्चा माल्नेवे। डोंइती डा लस्कर लल मानीक माइशो हीरा, हाव पुशराज माइशो हीरा नु गिगी बेरूज माइशो हीरा वोइक्पाइक्चा माल्नेवे। 18 मेको आ नोले डा लस्कर लल फिरोजा माइशो हीरा, बुश नीर माइशो हीरा नु बुश नु नीलो पन्ना माइशो हीरा वोइक्पाइक्चा माल्नेवे। 19 मेको आ नोले डा लस्कर गिगी नु नीलो रड ब्वाइशो रिम्शो टल्केशो नीलमनी माइशो हीरा, गिगी हाकीक माइशो हीरा नु प्याजी रड डा कटेला माइशो हीरा वोइक्पाइक्चा माल्नेवे। 20 मिनु नेल्ल क्येडा नोले डा लस्कर पीतमनी माइशो हीरा, लल रड डा ओनीक्स नु नीलो बिलौरा माइशो हीरा वोइक्पाइक्चा माल्नेवे। मोपा हीरा नेल्ल आन कली सुनम क्येप्पाइक्चा माल्नेवे। 21 मेको हीरा १२ ओटा दुम्चा माल्नीम। मिनु इस्राएल आ तौ आन नें का का पा मेको आन तार छाप थोक्शो खोदेशो पा मुशा ब्रेक्पाइक्चा माल्नेवे। हीरा का आ तारी थर का आ नें दुम्चा माल्ब।

22 गे मेको निसाफ पतीक झोला कली क्येख सुन के डोरी किरशो खोदेशो पा सिक्की निक्शी चेम्पाइक्चा माल्नेवे। 23 मिनु गे मेको निसाफ पतीक झोला कली सुन के मुन्द्रा निक्शी चेम्पाइक्चा माल्नेवे। मिनु मेको मुन्द्रा निसाफ पतीक झोला आ सुर निक्शीमी वोइक्पाइक्चा माल्नेवे। 24 मेको सुन के सिक्की निक्शी निसाफ पतीक झोला आ सुरम वोइशो मुन्द्रा निक्शीमी लिक्पाइक्चा माल्नेवे। 25 मेको सिक्की चढेब आ कुचु तार वोइशो वा आ बला डा हीरा क्येप्शो सुनम हेक्पाइक्चा माल्नेवे। 26 मिनु गे लेंशा सुन के मुन्द्रा निक्शी सेल्पाइक्चा माल्नेवे। मेको निक्शी निसाफ पतीक ऊरीम नु थुम्मीम वोइक्तीक झोला आ उइ आगा गे पाइक्चा माल्नेवे। मोपा कुचु तार वोइक्तीक वा आ तार बाक्ब। 27 मिनु गे लेंशा सुन के मुन्द्रा निक्शी सेल्पाइक्चा माल्नेवे। मेको कुचु तार वोइक्तीक आ बाला सुम्तीके उइ डा सुरम वोइक्चा माल्नेवे। मिनु दारपाइशो पाइक्तीके आ तारी क्येप्पाइक्चा माल्नेवे। 28 मिनु मेको निसाफ पतीक ऊरीम नु थुम्मीम वोइक्तीक झोला आ मुन्द्रामी नीलो डोरीम लिक्शा, कुचु तार वोइक्तीक वामी पाइक्पाइक्चा माल्नेवे। मोपा मेको निसाफ पतीक झोला दारपाइशो पाइक्तीक तार बाक्शा कुचु वोइक्तीक वा रे एर ओंथ मयाक्सीब। 29 मिनु मोदेशो पा हारून परमप्रभु यावे आ बाक्तीक ओव्रमेनु, इस्राएल आ तौ आन नें ब्रेक्शो निसाफ पतीक झोला आ कुचु तारी कुरचा माल्ब। मेको परमप्रभु यावेमी गेना हना यो मिन्चा कली बाक्ब। 30 मेको निसाफ पतीके झोलामी मेको ऊरीम नु थुम्मीम निक्शी कुर पचा माल्नेवे। हारून परमप्रभु यावे आ डोंइती लमेनु, इस्राएली आन निसाफ पतीके गेना हना यो आ कुचु तारी बाक्चा माल्ब। लेवी ८:८; गन्ती २७:२१; ब्यवस्था ३३:८

आगा डा फेक्तीक वा

31 मिनु मेको कुचु तार वोइक्तीके आगा फेक्तीके नेल्ल नीलो प्याजी रड डा वा के फेरपाइक्चा माल्नेवे। 32 मिनु पिया खीतीक पोव्रला वोइक्पाइक्चा माल्नेवे। मेको एर ओंथ मगाक्चा डा पा आ सुर थम बोल्यो पा प्रोव्रपाइक्चा माल्नेवे। 33 मेको फेक्तीके आ उइ डा सुर एर ओंथ गे नीलो, लल नु प्याजी रड डा श्येले के सेल्शो दारीम सेल्पाइक्चा माल्नेवे। मेको आन दातेम सुन के आइक्च आइक्च किडगो क्युक्पाइक्चा माल्नेवे। 34 किडगो का, दारीम का, किडगो का दारीम का पा मेको फेक्तीक नेल्ल आ एर ओंथ क्युक्चा माल्नीम। 35 मिनु हारूनमी मेको वा गेय पची ना फेक्चा माल्ब। मोपा परमप्रभु यावे आ नेल्ल क्येडा चोव्रखो बाक्तीके ओव्रमेनु, किडगो आ रेयके नेंपाइक्चा माल्ब। हारून मबेक्ल, दे मोदेशो दुम्चा माल्ब। प्रस्थान ३०:२१; लेवी १६:२, १३

कुप्फीम पांइतीके नु फेक्तीके वा

36 गे कुप्फीम पांइतीके क्येख सुन के फू खोदेशो पा चेम्पाइक्चा माल्नेवे। मेकेर छाप थोक्शो खोदेशो पा 'परमप्रभु यावे कली ला' दे मुशा ब्रेक्पाइक्चा माल्नेवे। जकरिया १४:२०; प्रस्थान ३९:३० 37 पियाम गुक्तीकेम आ डोंइती गे वोइक्चा कली नीलो प्याजी डोरीम फ्रेंपाइक्चा माल्नेवे। 38 मोपा मेको हारून आ कुप्फीम बाक्चा माल्ब। आ कुप्फीम पाइश्शा, इस्राएली आन मरिश्शो पशो कुरब। मिनु परमप्रभु कली चढेशो रिश्शो दुम्नीम। परमप्रभु यावेमी आन चढेशो ब्रवल, दे गेना हना यो आ कुप्फीम बाक्चा माल्ब।

39 नेल्ल क्येडा आगा फेक्तीके रिश्शो पा किरशो सुती श्येले के बुटा आप्शा प्रोव्रशो वा के सेल्पाइक्चा माल्नेवे। पियाम गुक्तीके रिश्शो पा किरशो सुती श्येले के प्रोव्रशो वा के सेल्पाइक्चा माल्नेवे। किप्तीके रड रड डा सेल्पाइक्चा माल्नेवे।

हारून आ तौ आन फेक्तीके

40 गे हारून आ तौ आन कली फेक्तीके किप्तीक नु आइक्च गुक्तीके सेल्पाइक्चा माल्नेवे। मेको हारून आ तौ आन कली ग्योम्शा दारपाइक्चा कली बाक्नीम। प्रस्थान २८:२ 41 गे मेको इ लोकब हारून नु आ तौ आन कली फेक्तीमी। मिनु तेल लुक्शा, आं कली ला गेय पचा कली योव्रशा वोइक्मी। मोपा आं कली चढेब दुम्नीम। प्रस्थान २९:९, २९-३६; प्रस्थान २९:२४; लेवी ८:१२, २२-३१ 42 गे मेको आन शिन्ना रां सुम्पाइक्चा कली सुती वा के कटटु फेरपाइक्चा माल्नेवे। मेको कम्बर रे पोक्च सम्म दुम्चा माल्ब। 43 मिनु हारून नु आ तौपुकी गुम्तीक ताम्बु ओव्रशा, चढेतीक आ नेक्था लमानु, मेको वा फेक्सीशो बाक्चा माल्नीम। मफेक्साक्म हना, दोस तशा बेक्नीम। हारून नु आ चच युइ आन पाला नेल्लेमी गेना हना यो मोदेशो पचा माल्नीम।

29

चढेब आन डोंइती डा पतीके

लेवी ८:-

1 गे हारून नु आ तौपुकी आं कली चढेब सेल्चा कली मार पचा माल्नेवे देशा हना, बोहोर का, मारेइ मदुश्शो थम रिश्शो सांड निक्शी चाक्को। 2 मिनु रिश्शो चेरब फस के बोरब ओरुती मसुप्शो शोब्ले, तेल ब्वाइश्शो जिज शोब्ले नु तेल खेक्शो बोरब ओरुती मसुप्शो शोब्ले सेल्पाइक्चा माल्नेवे। 3 मेको शोब्ले नेल्ल तोव्रलो कामी कुर पा, बोहोर नु सांड चाक्चा माल्नेवे। 4 मिनु हारून नु आ तौ आन कली गुम्तीक ताम्बु आ ओव्रतीकेमी चाक्चा नम। मिनु गे मेको आन कली चिक्चा माल्नेवे। 5 वासी चाक्शा, हारून कली आगा फेक्तीक वा, मेको आ तार डा फेक्तीके वा फेक्पाइश्शा, कुचु तार वोइक्तीक फेक्शा निसाफ पतीके ऊरीम नु थुम्मीम बाक्शो झोला रेल्ला माल्नेवे। मिनु मेको तारी बुटा आप्शो किप्तीके किप्पाइक्चा माल्नेवे। 6 आ पिया तारी गुक्तीके गुप्शा, मेको तारी 'परमप्रभु यावे कली ला' दे ब्रेक्शो कुप्फीम पांइतीके पांइपाइक्चा माल्नेवे। प्रस्थान २८:३६; प्रस्थान ३९:३० 7 मिनु लुक्तीक तेल लाइश्शा आ पियामी तेल लुक्तो। प्रस्थान ३०:२५ 8 मिनु हारून आ तौ आन कली यो चाक्शा, वा फेक्चा माल्नेवे। 9 मिनु आ तौ आन कली किप्तीके किप्चा माल्नेवे। मिनु आन पियाम गुक्तीके गुप्चा माल्नेवे। मिनु मेकोपुकी गेना हना यो आं कली चढेब गेय पाइब दुम्नीम। मोपा हारून नु आ तौ आन कली आं कली चढेब सेल्मी। प्रस्थान २८:४१

10 मिनु मेको बोहोर गुम्तीक ताम्बु आ डोंइती चाक्शा, हारून नु आ तौ आन कली आन गुइ मेको बोहोर आ पिया तारी वोइक्पाइक्चा माल्नेवे। 11 मिनु मेको बोहोर कली परमप्रभु यावे आ डोंइती, गुम्तीक ताम्बु आ ओव्रतीकेम राप्पाइश्शा क्योरचा माल्नेवे। लेवी १:४ 12 मिनु बोहोर आ हुश इक्का खोइ लाइश्शा इ ब्रेप्चोमी चढेतीक आ ग्रोव्रपुकीमी खेक्चा माल्नेवे। मिनु लीशो हुश नेल्ल चढेतीके आ पुंमी मोइक्चा माल्नेवे। 13 मिनु गे क्यी गिल्शो बोसो नेल्ल, आइदी तारी डा जाला, आ चिच निम्फा नु आ तार डा बोसो नेल्ल चढेतीकेम चोचा माल्नेवे। लेवी ३:१६-१७ 14 आ श्ये, आ कुशुल नु आ गोबर चहिं ताम्बु आ लाडगा रे गुंइशा, चोचा माल्नेवे। मेको पाप पशो आ पर्बम चढेशो बाक्ब। लेवी ४:११-१२

15 मिनु मेको सांड का चाक्शा, हारून नु आ तौ आन गुइ मेको आ पिया तार वोइक्पाइक्चा माल्नेवे। 16 मेको कली क्योरशा, मेको आ हुश चढेतीक नेल्ल बुइक्चा माल्नेवे। 17 मिनु मेको सांड आ श्ये कली टुक्रा टुक्रा पा चेक्शा, पिया नु वोइक्चा माल्नेवे। मिनु मेको आ क्यी नु आ खोइली नेल्ल मुरशा, मेको श्ये नु पियामी वोइक्चा माल्नेवे। 18 मोदेशो पा सांड नेल्ल चढेतीक तारी चोचा माल्नेवे। मेको परमप्रभु यावे कली चोशा चढेतीक बाक्ब। परमप्रभु यावे कली ब्रोव्रशो रिना पाइश्शो मीम चोशा चढेतीके बाक्ब। १ सामुएल २:२८

19 मिनु मेको लीशो सांड चाक्चा माल्नेवे। मिनु हारून नु आ तौ आन गुइ मेको सांड आ पिया तार वोइक्पाइक्चा माल्नेवे। 20 मिनु मेको सांड क्योरशा, आ हुशेम हारून आ ग्युरा नोफा डा लोव्रतीम नु आ तौ आन ग्युरा नोफा डा लोव्रतीम खेक्चा माल्नेवे। मिनु मेको आन ग्युरा गुइ डा ठेयब ब्रेचोम नु आन ग्युरा खोइली डा ठेयब ब्रेचोम खेक्चा माल्नेवे। मिनु लीशो हुश चढ़ेतीक तार नु आ एर ओंथ ब्रुइक्चा माल्नेवे। 21 मिनु चढ़ेतीकेम बाक्शो हुश नु लुक्तीक तेल लाइश्शा, हारून नु आ वा नु आ तौ आन वा तारी ब्रुइक्चा माल्नेवे। मोपा हारून नु आ वा, आ तौ नु मेको आन वा नेल्ल परमप्रभु यावे कली ला गेय पचा कली दुम्नीम।

22 मिनु सांड आ बोंसो, आ बोंसो पाइश्शो मीलु, आ क्यी गिल्शो बोंसो, आइदी तार डा जाला, आ चिच निम्फा, मेको तार डा बोंसो नु आ ग्युरा फिला लाइक्चा माल्नेवे। मारदे हना मेको चढ़ेब सेल्टीके सांड बाक्ब। लेवी ३:३-४ 23 मिनु परमप्रभु यावे आ डोंइती वोइश्शो बोरब ओरुत्ती मसुप्शो शोब्ले, तोव्रलो डा शोब्ले का, तेलम ब्वाइश्शो जिज शोब्ले का नु तेल खेक्शो शोब्ले का लाइश्शा, 24 मेको नेल्ल हारून नु आ तौ आन दाइश्शो गुइ गुइमी गेचा माल्नेवे। मेको परमप्रभु यावे आ डोंइती ग्येत्य लुक्च पा हिम्शा चढ़ेतीक चढ़ेचा माल्नीम। 25 मिनु गे मेको आन गुइ रे ताक्शा, परमप्रभु यावे आ डोंइती ब्रोव्रशो रिना पाइब चढ़ेतीके तारी चोशा चढ़ेचा माल्नेवे। मेको परमप्रभु यावे कली मीम चोशा चढ़ेतीक बाक्ब।

26 मिनु हारून कली चढ़ेब सेल्टीके सांड आ कुथु चाक्शा, परमप्रभु यावे आ डोंइती ग्येत्य लुक्च पा हिम्शा चढ़ेचा माल्नेवे। मेको चहिं इ के दुम्ब। 27 मिनु मेको हारून नु आ तौ आन कली चढ़ेब सेल्लो सांड आ ग्येत्य लुक्च पा हिम्शा चढ़ेशो कुथु नु क्युक्शा चढ़ेशो फिला मेको आन कली गेचा माल्नीम। गन्ती १८:१८ 28 मारदे हना इस्राएलीपुकीमी मेको हारून नु आ तौ आन कली गेना हना यो गेचा माल्लो भाग बाक्ब। मेको गेचा माल्लो चढ़ेतीके बाक्ब। इस्राएलीपुकीमी आन परमप्रभु यावे नु दुशा बाक्चा आ पर्बम चढ़ेतीके रे गेचा माल्लो मेकोन बाक्ब।

29 हारून आ चढ़ेची ना फेक्तीक मेको आ नोले चढ़ेब दुम्ब आ तौ के दुम्ब। मेको वा फेक्शा, तेल लुक्शा, चढ़ेब दुम्ब। प्रस्थान २८:४०-४१ 30 हारून आ पा डा चढ़ेब दुम्ब आ तौ गुम्तीक ताम्बु आगा परमप्रभु यावे आ बाक्तीकेम गेय पथ ओव्रमेनु, ७ नाक्त सम्म मेको वा फेक्चा माल्ब।

31 मिनु मेको चढ़ेब सेल्टीके सांड आ श्ये गुम्तीक ताम्बु आ लाडगाम क्येचा माल्नेवे। 32 मिनु नोले हारून नु आ तौपुकीमी मेको सांड आ श्ये नु तोव्रलो डा शोब्ले गुम्तीक ताम्बु आ ओव्रतीकेमी बाक्शा जचा माल्नीम। 33 मेको डोंइती आन पाप क्याम्चा कली चढ़ेशो थोव्रक आंम कली परमप्रभु यावे कली ला गेय पाइब दुम्चा, दे जचा माल्नीम। तन्न अरुमी मेको जचा मदुम्नीम। मारदे हना मेको परमप्रभु यावे के बाक्ब। लेवी १०:१७ 34 चढ़ेब सेल्टी ना डा श्ये नु शोब्ले सुनी सम्म हेंत हना, मेको हेंशो नेल्ल चोचा माल्नेवे। मेको मजचा मब्वचा। मारदे हना मेको चढ़ेब सेल्टी ना डा बाक्ब।

35 गोम इ कली अरेशो खोदेशो पा हारून नु आ तौ आन कली पाइक्मी। मेको आन कली ७ नाक्त सम्म मोदेशो चढ़ेब सेल्टीक गेय पचा माल्नेवे। 36 मिनु गे नाक्त किंत किंत बोहोर का पाप पशो आ पर्बम चढ़ेचा माल्नेवे। मेको पाप क्याम्तीक गेय पचा कली चढ़ेशो बाक्ब। मिनु चढ़ेतीक परमप्रभु के दुम्त, दे हुश ब्रुइश्शा, तेल लुक्चा माल्नेवे। 37 गे ७ नाक्त सम्म चढ़ेतीकेमी मो पशा पाप क्याम्तीक गेय पचा माल्नेवे। मिनु मेको चढ़ेतीके परमप्रभु कली ला दुम्ब। मेको चढ़ेतीक कली मार मारम थीनीमी, मेको यो परमप्रभु केन दुम्नीम। प्रस्थान ३०:२९

नाक्त किंत किंत डा चढ़ेतीक

गन्ती २८:३-८

38 मिनु गे चढ़ेतीकेमी मार चढ़ेचा माल्नेवे देशा हना, नाक्त किंत किंत बर्स का दुम्शो सांड निक्शी चढ़ेचा माल्नेवे। 39 मेको का सुनी का चहिं नाक्दो चढ़ेचा माल्नेवे। २राजा १६:१५; भजन संग्रह १४१:२ 40 डोंइती डा सांड नु रिम्शो चेरब फस १० भाग डा भाग का, ४ भाग डा हिन भाग का रिम्शो तेल मेको नु बुल्शा, ४ भाग डा हिन अडगुर शांबु भाग का तूचा थोव्रक चढ़ेचा माल्नेवे। चेरब फस एफाह का २२ लिटर खोदेशो बाक्ब। मेको के १० भाग का २ लिटर खोदेशो बाक्ब। हिन का ४ लिटर, ४ भाग डा भाग का लिटर का बाक्ब। प्रस्थान २७:२० 41 मिनु अर्को सांड नाक्दो चढ़ेचा माल्नेवे। मिनु मेको नु अन्न चढ़ेतीक नु आ तूचा थोव्रक चढ़ेतीक सुनी डा खोदेशो पा नाक्दो यो चढ़ेचा माल्नेवे। परमप्रभु यावे कली ब्रोव्रशो रिना पाइब मीम चोशा चढ़ेतीके मेकोन बाक्ब। 42 गे इ चच युइ आन पाला नेल्लेमी गेना हना यो परमप्रभु यावे आ डोंइती गुम्तीक ताम्बु आ ओव्रतीक आ नेक्था चोशा चढ़ेतीक चढ़ेचा माल्नीम। मेकेर गो गे नु लोव्र पचा कली गुम्नन। प्रस्थान ३३:७; प्रस्थान २५:२ 43 मिनु गो इस्राएली आन कली मेकेर गुम्नुड।

मिनु मेको ताम्बु आं छेडछेडम ब्रीशा आं के दुम्ब। प्रस्थान ३३:१०; प्रस्थान ४०:३४ 44 गो गुम्तीक ताम्बु नु चढ़ेतीक आं के सेल्लुड। हारून नु आ तौ आन कली यो आं कली चढ़ेब दुम्शा, आं गेय पपाइक्चा कली आं के सेल्लुडमी। 45 गो इस्राएली आन दातेमी बाक्नुड। मिनु मेको आन परमप्रभु दुम्ती। प्रस्थान २५:८; जकरिया २:१४; लेवी २६:१२ 46 गो मेको आन दातेमी बाक्चा कली मेको आन कली इजीप्त रे गुंडब मेको परमप्रभु यावे, आन परमप्रभु नड। गो मेको आन परमप्रभु यावे नड, दे मेकोपुकीम तुइक्चा माल्नीम। प्रस्थान २०:२

30

धूप चोशा चढ़ेतीके
प्रस्थान ३७:२५-२८

1 मिनु गे धूप चोचा कली बोल्यो शी के चढ़ेतीक का सेल्चा माल्नेवे। 2 मेको आ पित्थ लाइशो कुबीत का नु आ ब्रेम्शो कुबीत का डा ४ पाटे दुम्चा माल्ब। मिनु आ ग्येत्थ लाइशो कुबीत निक्शी दुम्चा माल्ब। मेको ग्रोव पाइशो दुम्चा माल्ब। ग्रोव नेल्ल मख्रोंइसीशो शी का केन दुम्चा माल्नीम। कुबीत का ०.५ मिटर बाक्ब। 3 मेको नेल्ल क्येख सुनमी गिल्चा माल्ब। मिनु मेको कली सिरपेच के खोदेशो पा सुन के सुर सेल्पाइक्चा माल्नेवे। 4 मिनु सुन के मुन्द्रा निक्निक्शी सेल्पाइक्चा माल्नेवे। मेको मुन्द्रा धूप चोतीके आ सिरपेच खोदेशो सुर आ दी निम्फा पटटी गे क्येप्पाइक्चा माल्नेवे। मेको कुरतीक कोक्के आन कली शुइक्तीक दुम्ब। 5 मिनु मेको कुरचा कली बोल्यो शी के कोक्के निक्शी सेल्शा, सुनमी गिल्पाइक्चा माल्नेवे। 6 मिनु मेको परमप्रभु यावे आ अरेशो लोव वोइशो कबल पशो सन्दोस नु सुम्तीके फारतीक वा आ डोंइती वोइक्चा माल्नेवे। गो मेकेर इ कली गुम्नुड। प्रस्थान २५:२१-२२

7 मिनु हारूनमी सुनी कुस कुस बत्ती दाचा कली सादानु, ब्रोवशो रिना पाइब धूप चोचा माल्ब। भजन संग्रह १४१:२ 8 नाक्दो हारूनमी बत्ती दाडानु यो धूप चोचा माल्ब। मेको परमप्रभु यावे आ डोंइती धूप चोतीक मेको आन चच युइ आन पालामी गेना हना यो पचा माल्नीम। 9 मेको धूप चोतीकेमी अरु धूप चोचा मदुम्ब। चोशा चढ़ेतीके नु जचा थोव्रक चढ़ेतीके मेकेर चढ़ेचा मदुम्ब। तूचा थोव्रक चढ़ेतीके यो मेकेर मोइक्चा मदुम्ब। लेवी १०:१-२ 10 बर्सम खेयप का हारूनमी चढ़ेतीक आ ग्रोवम हुश खेक्शा पाप क्याम्तीक गेय पचा माल्ब। मेको हुश पाप आ पर्बम चढ़ेशो बस्तु आ हुश बाक्चा माल्ब। मेको गेना हना यो बर्समी खेयप का इन चच युइ आन पाला सम्म मेको पाप क्याम्तीक गेय चढ़ेतीके आ हुशेमी पचा माल्ब। मेको परमप्रभु यावे आ डोंइती नेल्ल क्येडा चोव्रखो सेल्लुडके बाक्ब” दे परमप्रभु यावेमी मोसा कली देंत। लेवी १६:१८

क्येट पोक्चा शेंशो

11 परमप्रभु यावेमी मोसा कली 12 “गे इस्राएली वोंइश मुर आन कली हिक्गीनु, मेको आन कली मुर बेक्तीक रोइ मपामेक्ल, दे ब्रोंइचा कली नेल्लेमी परमप्रभु यावे कली क्येट गेचा माल्नीम। मिनु मेको आन कली हिक्शोनु, मारेइ मरिम्शो मदुम्ब। गन्ती १:३; २सामुएल २४:२-३ 13 गिश जना वोंइश मुर हिक्सीनीमी, मिश जना ताम्बु डा नाक्तीके डा आधा शेकेल गेचा माल्नीमी। शेकेल का २० गेराह चांदी बाक्नीम। मोपा परमप्रभु यावे कली गेशो क्येट आधा शेकेल गेचा माल्शो बाक्ब। शेकेल का ११.५ ग्राम खोदेशो बाक्ब। गेरा का ०.६ ग्राम बाक्ब। मत्ती १७:२७ 14 वोंइश मुर गिश जना २० बर्स गाप्शो नु मेको क्येडा लाक्शो बाक्मा, मिश जनाम परमप्रभु यावे कली गेचा माल्शो चढ़ेचा माल्नीम। 15 इन पाप क्याम्तीक गेय पचा कली थीबमी आधा शेकेल, मथीबमी यो आधा शेकेल परमप्रभु यावे कली गेचा माल्नीमी। 16 इस्राएली वोंइश मुरुमी आन गेशो प्रोंइतीक क्येट ताक्शा, गुम्तीक ताम्बु डा गेय पचा कली गेचा माल्नेवे। मिनु मेको क्येट परमप्रभु यावे आ डोंइती इस्राएली आन कली प्रोंइशो मिम्तीक चिन्ड दुम्ब” देंत।

चिक्तीक ठेयब बोस

17 मिनु लेंशा परमप्रभु यावेमी मोसा कली 18 “गे चिक्चा कली कांसा के ठेयब बोस का सेल्पतो। मेको आ निप्पाइक्तीके यो कांसा केन दुम्चा माल्ब। मेको गुम्तीक ताम्बु नु चढ़ेतीक आस दातेमी वोइशशा, ब्वाक्कु कुर पपाइक्चा माल्नेवे। प्रस्थान ३८:८ 19 मेको ब्वाक्कुमी हारून नु आ तौपुकीमी आन गुइ खोइली चिक्सीचा माल्नीम। 20 मेकोपुकी मबेक्कल, दे गुम्तीक ताम्बुम ओव्रचा क्येडा डोंइती चिक्सीचा माल्नीम। मिनु चढ़ेतीकेमी गेय पचा, दे परमप्रभु यावे आ डोंइती मीम चोशा चढ़ेतीक चढ़ेचा कली लमानु, मेको ब्वाक्कुम चिक्सीचा माल्नीम। ब्वाक्कुम चिक्सीमानु, मेको मबेक्नीम। 21 मेकोपुकी नु आन चच युइ आन पाला नेल्लेमी गेना हना यो पतीके लोव बाक्ब” देंत।

ताम्बु डा लुक्तीक तेल

22 मिनु लेंशा परमप्रभु यावेमी मोसा कली 23 “गेमी शुश क्येट लाइब ब्रोव्रशो रिना पाइब थोव्रक चाक्चा माल्नेवे। मार चाक्चा माल्नेवे देंशा हना, मूरे आ रस ५ सहे शेकेल, दाल चिनी सहे निक्शी ५० शेकेल नु ब्रोव्रशो रिना पाइब बोच सहे निक्शी ५० शेकेल चाक्चा माल्नेवे। शेकेल का ११.५ ग्राम चांदी के क्येट बाक्ब। ताम्बु डा शेकेल चहिं १२ ग्राम बाक्ब। 24 नु कस्सीया माइशो ब्रोव्रशो रिना पाइब फू ५ सहे शेकेल, ताम्बु डा नाक्तीकेमी नाक्शा, चाक्चा माल्नेवे। रिमशो तेल हिन का यो चाक्चा माल्नेवे। हिन का ४ लिटर खोदेशो बाक्ब। 25 मेको नेल्ल ब्वाइशशा थम रिमशो लुक्तीक तेल सेल्पाइक्चा माल्नेवे। मेको परमप्रभु यावे कली ला बाक्ब। मेको ब्रोव्रशो रिना पाइब सेल्स जोक्ब मुर कली सेल्पाइक्चा माल्नेवे। मेको थम रिमशो लुक्तीक तेल ताम्बु कली ला सेल्चा माल्ब। प्रस्थान ३७:२९ 26 मिनु गे ग्रुम्तीक ताम्बु नु कबल पशो सन्दोस, 27 टेबल नु मेकेर डा मार मार नेल्ल, बत्ती दातीके नु मेको आ मार मार नेल्ल नु धूप चोशा चढेतीके, 28 चोशा चढेतीके नु मेको आ मार मार नेल्ल नु चिक्तीके ठेयब बोस नु आ निप्पाइक्तीके नेल्ल खेक्पाइक्चा माल्नेवे। प्रस्थान ३०:१० 29 मोपा मेको मारेइ मारेइ नेल्ल खेक्तीनु, मेको ताम्बु डा गेय कली ला दुम्नीम। मेको कली मार मारम थीनीमी, मेको यो परमप्रभु कली दुम्नीम। 30 आं कली चढेब दुम्ब हारून नु आ तौ आन कली यो तेल खेक्शा, आं गेय पाइब सेल्चा माल्नेवे। प्रस्थान २९:७ 31 इस्राएली आन कली ‘मेको गेना हना यो इन चच युइ आन पाला सम्म लुक्तीक तेल दुम्चा माल्ब। मेको तेल परमप्रभु यावे के ला बाक्ब। 32 मेको अरु मुर आन कली खेक्चा मदुम्ब। मेको खोदेशो पा ब्वाइशशा तेल सेल्चा मदुम्ब। मेको परमप्रभु आ तेल ला बाक्ब’ दे मिम्चा माल्नीनी। 33 सुमी मेको खोदेशो पा ब्वाइशशा तेल सेल्बा नु अरु मुर आन कली खेक्बा, मेको मुर आ थर रे तिल्चा पुंडसीब” दे परमप्रभु यावेमी मोसा कली देंत।

धूप सेल्चा शेंशो

34 मिनु परमप्रभु यावेमी मोसा कली “ब्रोव्रशो रिना पाइब थोव्रक मार ब्वाइक्पाइक्चा माल्नेवे देंशा हना, चोव्रक, कुन्दापुरी, ब्रोव्रशो रिना पाइब रवा आ दूध नु मारेइ मब्वाइशशा मूरे, उइक्थ उइक्थ पा नाक्शा ब्वाइक्पाइक्चा माल्नेवे। 35 जोक्ब मुरुम मेको नेल्ल ब्वाइशशा, ब्रोव्रशो रिना पाइब धूप, हिकसी सुप्शा, अरु मब्वाइशशा परमप्रभु कली ला चढेतीक धूप सेल्पाइक्चा माल्नेवे। 36 मेको रे इक्का खोइ तुप्शा, फस सेलो। मिनु मेको फस ग्रुम्तीक ताम्बु डा नेल्ल क्येडा चोव्रखो कोठा कबल पशो सन्दोस आ डोंइती वोइशशा, मेको फस चोचा माल्नेवे। मेको इन कली नेल्ल क्येडा चोव्रखो दुम्ब। मेकेर गो इ कली ग्रुम्नुड। प्रस्थान ३०:६ 37 इन कली धूप सेल्नीनु, आं धूप खोदेशो पा मसेलीन। ‘मेको धूप परमप्रभु यावे आं धूप ला बाक्ब’ दे मिम्चा माल्नीनी। 38 सुइमी मेको नाम्चा कली सेल्तेक्म हना, मेको आन थर रे तिल्चा पुंडसीनीम” दे परमप्रभु यावेमी मोसा कली माइक्तु।

31

रिमशो पाइब आन कली योव्रशो

प्रस्थान ३५:३०-३५

1 मिनु परमप्रभु यावेमी मोसा कली प्रस्थान ३५:३०-३५ 2 “नेनो, गो यहूदा आ थर डा हुर आ चच ऊरी आ तौ बेचालेल आ नें थिशा आं गेय पचा कली योव्रता। 3 गो मेको कली आं सोक्तीमी प्रिशा, मार मार सेल्चा कली जोक्ब तुइक्ब सेल्ता। मिनु पने चाप्तीक सक्ति यो गेता। 4 मेकोमी नेल्ल मिम्शा, सुन, चांदी नु कांसा के मारेइ मारेइ चेम्ने चाप्ब। 5 हीरा खोइक्तीक नु सुनम क्येप्तीके, शी मुतीके नु मारेइ मारेइ सेल्स जोक्ब दुम्पाइक्ता। 6 गो दान आ थर डा अहीसामाक आ तौ ओहोली-आब कली बेचालेल नु गेय पचा कली योव्रता। गो इस्राएल डा जोक्ब रिमशो गेय पाइब मेको आस कली वारच पाइब यो योव्रतामी। गो इ कली मार मार देंडा, मेको नेल्ल आन कली सेल्ने चाप्तीक सक्ति गेतामी। 7 ग्रुम्तीक ताम्बु, कबल पशो सन्दोस, मेको आ तार डा सुम्तीके नु ताम्बु आ गा डा माल्शो मारेइ मारेइ, प्रस्थान ३५:११-१९ 8 टेबल नु मेको आ मारेइ मारेइ, बत्ती दातीके नु आ मारेइ मारेइ, धूप चोशा चढेतीके, 9 चोशा चढेतीके नु आ मारेइ मारेइ, ठेयब चिक्तीक बोस नु आ राप्पाइक्तीके, 10 आं कली चढेब दुम्तीके रिमशो प्रोव्रशो वा नेल्ल, चढेब हारून आ चढेची ना फेक्तीक वा नु आ तौ आन फेक्तीक वा, 11 लुक्तीक तेल नु ब्रोव्रशो रिना पाइब धूप गोम इ कली देंशो खोदेशो पा मेकोपुकीमी आं बाक्तीक कली सेल्चा माल्नीम” देंत।

नाइक्तीक नाक्त आ पर्बम अरेशो

प्रस्थान ३५:१-३

12 मिनु परमप्रभु यावेमी मोसा कली 13 “गे इस्राएली आन कली मार माइक्चा माल्नेवे देशा हना ‘गेपुकीमी थमा पा आं नाइक्तीक नाक्ती मानेचा माल्नीनी। मारदे हना मेको गेपुकी नु इन चच युइ सम्म कली चिन्ड लीब। गो, परमप्रभु यावेमी, इन कली आं मुर सेल्ता, दे गे तुइक्नीनी। प्रस्थान २०:८; इजीकीएल २०:१२ 14 मोपतीके गेपुकीमी नाइक्तीक नाक्त मानेचा माल्नीनी। मारदे हना मेको परमप्रभु आ नाक्त बाक्ब। सु सुमी मेको नाक्ती ममानेथु, गेय पाइनीमी, मेको मुर आ जात डा मुर रे तिल्शा, साइक्चा पुंइसीनीम। गन्ती १५:३२-३५; येरमीया १७:२१-२३ 15 मोपा ६ नाक्त सम्म गेय पामेक्ल, तन्न ७ नाक्त चहिं नाइक्तीक नाक्ती बाक्ब। मेको परमप्रभु यावे आ नाक्त बाक्ब। सु सुम मेको नाक्ती गेय पाइनीमी मेको थमा पा साइक्चा पुंइसीनीम। 16 मोपतीके इस्राएलीपुकीमी नाइक्तीक नाक्ती मानेचा माल्नीम। मेको नाक्ती गेना हना यो आन चच युइ सम्म कबल पतीके बाक्ब। मर्कूस २:२७-२८ 17 गो नु इस्राएली इन दातेमी मेको गेना हना यो लीब चिन्ड बाक्ब। परमप्रभु यावेमी ६ नाक्तीमी सरीड नु रागी सेल्ने थुम्तु। ७ नाक्ती चहिं नाइसीशा, आ दशो सात’ दे इस्राएली आन कली माइक्चा माल्नेवे” देंत। प्रस्थान १६:२३,२५; उत्पत्ती २:२

18 मिनु परमप्रभुमी मोसा नु सीनै डांडाम लोव्र पने थुम्शा, आ देशो फुल्लु निक्शीमी मुशा आंम ब्रेक्शो लोव्र मोसा कली गेपु। प्रस्थान २४:१२; प्रस्थान ३२:१५-१६; प्रस्थान ३४:२८; ब्यवस्था ४:१३; ब्यवस्था ५:२२; ब्यवस्था ९:१०; ब्यवस्था १०:१-५

32

इस्राएलीमी सुन के मूर्ति सेल्शो

1 मिनु इस्राएल डा मुरपुकीमी मोसा कली डांडा रे मयिशो तशा, हारून आ बाक्तीक जाक्शा, मेको कली “लो, इं डोंइडोंइती गाक्शा लां कोंइब देवता सेलो। आंइ कली इजीप्त रागी रे गुंइशा, एक चाक्ब मोसा मार दुम्मे? मतुइक्तक” दे हारून कली देंमा बाक्त। ब्यवस्था ९:८-२१ 2 मिनु हारूनमी मेको आन कली “इन मीश, इन तमी तौ आन पांइशो सुन पुइश्शा, आं बाक्तीके चाक्कीन” देंमाक्त। 3 मिनु मुर नेल्लेमी आन नोफामी पांइशो सुन पुइश्शा, हारून आ बाक्तीके चाक्गमे बाक्त। 4 मिनु हारूनमी मेको सुन आन गुइ रे ताक्शा, यपाइश्शा, बाछा का सेला बाक्त। मिनु इस्राएलीपुकीमी “इस्राएल डा मुरपुकी, एकोन इं देवता बाक्ब। एकोमी इं कली इजीप्त रागी रे गुंइताक्ब” दे मुमा बाक्त। १राजा १२:२८; भजन संग्रह १०६:१९-२०; प्रेरित ७:४१ 5 मिनु हारूनमी मेको आन कली तशा, बाछा आ डोंइती चढेतीक का सेला बाक्त। मिनु ठेयब सेंदा पा “दीसा परमप्रभु यावे कली चाड का मानेचा माल्ब” देंमाक्त। 6 मिनु आ दीसा मेकोपुकी सुनी कना बोक्शा चोशा चढेतीक नु दुशा बाक्चा आ पर्बम चढेतीक चढेमे बाक्त। मिनु मुरपुकी जचा तूचा कली निस्समा बाक्त। मिनु नोले जशा तूशा बोक्शा, आन दला दाक्स पामे बाक्त। १कोरिन्थी १०:७

7 मिनु परमप्रभु यावेमी मोसा कली “डांडा रे तोंइसो। इजीप्त रे गुंइशा चाक्शो इ मुरपुकीमी आन दला दाक्स पा पाप पाप्तेक्म। 8 मेकोपुकीमी आं शेंशो लोव्र थु था प्रोंइतेक्म। आंम कली सुन के बाछा का सेल्शा, मेको कली पूजा पशा ‘इस्राएल डा मुरपुकी, एकोन इं कली इजीप्त रागी रे गुंइब परमप्रभु बाक्ब’ देंतेक्म” दे परमप्रभु यावेमी मोसा कली देंत। प्रस्थान २०:४,२३ 9 मिनु लेंशा परमप्रभु यावेमी मोसा कली “गो मेको मुर आन कली ताता। काइ मटीब बाक्नीम, दे तुइक्ताक्ड। ब्यवस्था ९:६; यसेया ४८:४; प्रेरित ७:५१ 10 मोपतीके आं कली मतेक्यी। मेको आन कली तशा गाइक्ताक्यी। गो मेको आन कली साइक्नुडमी। मिनु गो इ लां पा ठेयब जात का सेल्नुडमी” देंत। गन्ती १४:११-२० 11 मिनु मोसामी परमप्रभु यावे कली “परमप्रभु यावे, आं परमप्रभु, इन मुर आन पर्बम मारदे गाइक्तीनी? गेमी इन ठेयब सक्तिमी मेको आन कली इजीप्त रागी रे गुंइताक्नी। 12 मो पाइतीनी हना इजीप्त रागी डा मुरपुकीमी ‘परमप्रभुमी मेको आन कली पहाडमी साइश्शा, रागी रे क्याम्चा कली एक रे गुंइताक्ब’ देंनीम। मोपतीके इन ठेयब गाइक्तीक प्रोनीन। इन मुर आन कली मसतीन। ब्यवस्था ९:२८; यहोसु ७:९ 13 इन गेय पाइब अब्राहाम, इसहाक नु याक्ब मिम्तीने। मेको आन पर्बम इन नेमी ‘गो इन कली सरीड डा सोरुल खोदेशो पा शुश सेल्नुड। आं देशो रागी इन चच युइ आन कली गेनुडमी। मिनु एको रागी गेना हना यो मेको आन के दुम्ब’ दे कसम जाइतीनी” देंत। उत्पत्ती १५:५; उत्पत्ती २२:१६-१७; उत्पत्ती २६:४ 14 मिनु परमप्रभु यावेमी आ थुं लेशशा, आ मुर आन कली मसाइक्मी। भजन संग्रह ८५:-

परमप्रभु आ ब्रेक्शो फुल्लु प्रोल्शो

15 मिनु मोसा परमप्रभु यावे आ देशो लोत्र ब्रेक्शो फुल्लु निक्शी कुरशा, डांडा रे ब्रुप्त। मेको फुल्लु निक्शी निम्फा पटटीम मुशा ब्रेक्शो बाक्त। 16 परमप्रभुमी मेको फुल्लु आंमा चेशशा सेल्शो बाक्माक्त। मिनु मुशा ब्रेक्शो बाक्त। प्रस्थान ३१:१८ 17 मिनु यहोसुमी मुर आन कली रेयके पशो नेंशा, मोसा कली “इस्त्राएल डा मुर आन बाक्तीकेमी लडाइ पशो रेयके खोदेशो नेंसाक्व” देंत। 18 तन्न मोसामी “एको रेयके लडाइ ग्राब आन रेयके ममाइ, बुइब आन रेयके यो ममाइ। गो कुम्सो पशो नेंता” देंत।

19 मिनु मोसा इस्त्राएली आन बाक्तीके आ नेक्था जाक्मेनु, बाछा नु बाछा आ एर ओंथ मुरपुकी सिल पशो तशा, शुश गाइशशा, फुल्लु निम्फा ताइशशा, डांडा आ पुंम प्रोल्लु। 20 मिनु मोसामी इस्त्राएली आन सेल्शो बाछा लाइशशा, मीम हुम्शा, तुप्शा फस सेल्शा, ब्वाक्कुम फुइशशा, इस्त्राएली आन कली तूपाइक्तीमी। 21 मिनु नोले मोसामी हारून कली “एको मुरपुकीमी इ कली मार पामे डा? मारदे मेको आन कली ओदेशो ठेयब पाप पपाइक्तीमी?” दे हिल्लो पाप्तु। 22 मिनु हारूनमी “आं पबंम मगाइक्तीन। गे एको मुर आन कली तुइक्तीनी। एकोपुकी दूली पाइब ला बाक्तीमी। 23 आं कली ‘आंइ डोंइडोंइती गाक्शा लां कोंइब देवता सेलो। मारदे हना आंइ कली इजीप्त रे ग्रुंइशा, एक चाक्ब मोसा कली मार दुम्मे, मतुइक्तक’ देंतेक्म। 24 मिनु गो मेको आन कली ‘सु सु इन के सुन बाक्मे, मेको पुइशशा, एक चाक्कीन’ दे माइक्तामी। मिनु मेकोपुकीमी चाक्तेक्म। मिनु गो मेको सुन मीम हुम्ताक्ड। मिनु एको बाछा दुम्त” देंत।

इस्त्राएली आन कली सजाइ

25 मोसामी मुर आन कली आन दला दाक्स पशो ताप्तु। मारदे हना हारूनमी आन दला दाक्स पचा गेवा बाक्त। मिनु आन जोरी सत्रु नेल्ल ग्येरसमा बाक्त। 26 मिनु मोसामी इस्त्राएली आन बाक्तीक ओव्रतीकेम राप्शा “सु सु परमप्रभु यावे गे बाक्ती, मेकोपुकी आं गे पिने” देंत। मिनु लेवी आ थर डा मुर नेल्ल मोसा गे लशा, आ एर ओंथ राप्तेक्म। 27 मिनु मोसामी मेको आन कली “परमप्रभु यावे, इस्त्राएली आन परमप्रभुमी ‘गे नेल्लेमी इन तरवार पिप्शा, मुर आन बाक्तीके लशा, इन लोक्ब, इन खिं डा मुर, इन वारच नु सु बाक्तेक्म हना यो, सतीन’ देंत” देंत। 28 मिनु लेवी आ थर डा मुरपुकीमी मोसा आ देशो खोदेशो पा पाप्तेक्म। मेको नाक्ती हजार सां मुर साइक्चा पुंइसाक्म। 29 मिनु मोसामी लेवी आ थर डा मुर आन कली “गेपुकीमी मुलाक्ती परमप्रभु यावे आ गेय पा, आंम आंम इन तौ नु आंम आंम इन लोक्ब आन कली मप्रोंइथु साइक्तीनी। मिनु मुलाक्ती गे आसीक राइनीनी” देंत। प्रस्थान २६:४१; गन्ती ३:६-१०; ब्यवस्था ३३:८-११

मोसामी परमप्रभु नु लोत्र पशो

30 आ दीसा मोसामी मुर आन कली “गेपुकीमी ठेयब पाप पाइतीनी। मिनु गो परमप्रभु यावे आ बाक्तीक डोइशशा, लाइनुड। गो इन पशो पाप क्याम्तीक गेय पने चाप्नुडा, कों?” देंत। 31 मिनु मोसा परमप्रभु यावे आ बाक्तीक लशा मेको कली “मुरपुकीमी थमा पा ठेयब पाप पाप्तेक्म। आंम कली सुन के देवता सेल्तेक्म। 32 मो हना यो गे मेको आन पाप क्याम्दीन, दे पुंइनुड। मक्याम्ताक्ती हना, इन ब्रेक्शो किताब रे आं नें क्याम्दीने” देंत। भजन संग्रह ६९:२९; लूका १०:२०; रोमी ९:३ 33 मिनु परमप्रभु यावेमी मोसा कली “सुमी आं देशो मटिथु पाप पाइबा, मेको आ नें आं ब्रेक्शो किताब रे क्याम्नुड। 34 तन्न मुल लावो। मेको मुर आन कली आं देशो रागी लाइक्ती। नेनो, आं स्वर्ग डा गेय पाइब इ डोंइडोंइती सोइक्नुड। तन्न काबु मेको आन कली पाप पशो आ पबंम सजाइ गेनुड” देंत। प्रस्थान ३३:२,१४; गन्ती १४:२७-३० 35 मिनु परमप्रभु यावेमी इस्त्राएल डा मुर आन कली बेक्तीक रोइ पपाइक्तु। मारदे हना मेकोपुकीमी हारून कली मेको सुन के बाछा सेल्पाइशशा बाक्तेक्म।

33

परमप्रभु आ शिशी पुंइशो

1 मिनु परमप्रभु यावेमी मोसा कली “इजीप्त रे ग्रुंइशा, एक चाक्शो मुरपुकी नु आं देशो रागी लावो। मेको रागी आ पबंम गो ‘इ चच युइ आन कली गेनुड’ दे अब्राहाम, इसहाक नु याक्ब नु कसम जाता। उत्पत्ती १२:७ 2 आं स्वर्ग डा गेय पाइब इन डोंइडोंइती सोइक्नुड। मिनु गो कनानी, एमोरी, हिती, परिज्जी, हि०वी नु यबुसी आन कली खेरनुडमी। प्रस्थान २३:२० 3 मेको रागीम दूध नु खुदो शुश बाक्ब। मारेइ मारेइ यो शुश ग्रेल्ब। गेपुकी काइ मटीब मुर बाक्तीनी। मोपतीके गो गेपुकी नु मगाक्नुड। गो गाक्ती हना, इन कली लांमीन साइक्नन्नी” देंत। प्रस्थान ३२:९-१०

4 मिनु मुरपुकीमी मेको मरिम्शो लोत्र नेंशा, सुर्ता पाम्तेक्म। सुइमी आन सुन चांदी मारेइ मपांडसम। 5 मारदे हना परमप्रभु यावेमी मोसा कली “इसाएली आन कली ‘गेपुकी काइ मटीब मुर बाक्नीनी। गो याम का गे नु गाक्ती हना, नेल्ल इन कली साइक्नन्नी। मुल इन सुन चांदी नेल्ल प्रुतीन। मिनु इन कली मार पचा माल्नुडा, दे मिम्नुड’ ” देंशो बाक्त। योएल २:१३ 6 मोपतीके होरेब डांडाम बाक्मा रे इसाएलीपुकीमी सुन चांदी मपांडसम।। योना ३:६

परमप्रभु नु लोत्र पतीक ताम्बु

7 मिनु मोसामी अरु आन बाक्तीक क्येडा डोन ताम्बु का कीशा वोइक्तु। मेको ताम्बु कली परमप्रभु नु लोत्र पतीक ताम्बु दैत। सु सु परमप्रभु यावे कली गुम्चा दाक्तेमे, मेको मुर आन बाक्तीक रे गूशा, मेको परमप्रभु नु लोत्र पतीक ताम्बु लाइबाक्तेक्म। प्रस्थान २९:४२ 8 मिनु मोसा मेको परमप्रभु नु लोत्र पतीक ताम्बु लमेनु, मुर नेल्ल बोक्शा, आन ताम्बु आ ओत्रतीकेम राप्शा, मोसा मेको ताम्बु मओत्रम सम्म, कोत्रशा बाक्तेक्म। 9 मिनु मोसा मेको ताम्बु आगा ओत्रमेनु, गोस्स के थाम यिशा, ताम्बु आ ओत्रतीकेम राप्शो ताम्तेक्म। मिनु परमप्रभु यावेमी मोसा नु लोत्र पाप्तु। गन्ती ११:२५; ब्यवस्था ३१:१५ 10 मुर नेल्लेमी मेको गोस्स के थाम, ताम्बु आ ओत्रतीकेम राप्शो ताम्तेक्म। मिनु मुर नेल्ल बोक्शा आंम आंम ताम्बु आ ओत्रतीकेमी बाप्शा, परमप्रभु कली मान पा ठेयब सेल्लेक्म। 11 मिनु परमप्रभु यावे नु मोसा कोत्रमुशा, लोत्र पाम्ताक्स। दोदेशो पा मुर आन वारच नु बाक्शा, लोत्र पाइनीमी, मोदेशो पा लोत्र पाम्ताक्स। मिनु मोसा लेशशा, आ ताम्बुम लत। आ गेय पाइब ठिटा, नून आ तौ यहोसु चहिं ताम्बु उइ बाक्त। प्रस्थान ३३:२०; गन्ती १२:८; ब्यवस्था ३४:१०

मोसाम परमप्रभु कली पुंडशो

12 मिनु मोसामी परमप्रभु यावे कली “कोत्रडीन, गे आं कली ‘एको मुर आन कली लतो’ देंतीनी, तन्न गो नु सु सु सोइक्नीनी, गे आं कली मतुइक्पाइय्यीनी। मो हना यो, गे आं कली ‘इ नें कली तुइक्नुड। मिनु इ कली दाक्नुड’ देंतीनी। प्रस्थान ३३:२,३,१७ 13 मोपतीके गे आं कली दाक्ताक्नी हना, आं कली इन लां कोइदीने। गो इन कली तुइक्ने चबुल। गो इन डोंइती शिशी तडल। एको जात डा मुरपुकी इन मुर नम, दे मिम्तीने” दैत। भजन संग्रह १०३:७ 14 मिनु परमप्रभुमी “गो गे नु लाइनुड। मिनु इ थुं नाइक्चा गेनुड” दैत। यसैया ६३:९; यहोसु २१:४४; हिब्रू ४:९ 15 मिनु मोसामी “गे गो नु मलाइतीनी हना, आंइ कली एक रे मसोइक्तीन। 16 गो नु इन मुरपुकीमी इन डोंइती शिशी तशो बाक्नीकी, दे गो दोपा तुइक्नीकी? गे गो नु लाइतीनी हना ला, तुइक्नीकी। मोपा ला गो नु इन मुरपुकी रागी डा मुरपुकी नु खाल का डा मदुम्नीकी” दैत। ब्यवस्था ४:६-८ 17 मिनु परमप्रभु यावेमी मोसा कली “गो इ देंशो पाइनुड। मारदे हना गो इ कली दाक्नुड। मिनु इ नें यो तुइक्नुड” दैत। प्रस्थान ३३:१२; यसैया ४३:१; २तिमोथी २:१९

मोसामी परमप्रभु कली तचा दाक्शो

18 मिनु मोसामी “गे आं कली इन छेडछेड तपाइय्यीनी” दे पुंडतु। यूहन्ना १:१४; २कोरिन्थी ३:१८ 19 मिनु मेकोमी “गो इ डोंइती रे लाइनुड, आं गेना हना यो दाक्तीक कोइनन। इ डोंइती आं नें ‘यावे, देना देंन गाक्नुड’ सु सु आन कली शिशी पचा दाक्डा, मेको आन कली शिशी पाइनुड। सु सु आन कली दाक्चा दाक्डा, मेको आन कली दाक्नुड” दैत। रोमी ९:१५ 20 मिनु मोसा कली “गे आं कुल कोत्रने मचाप्नेवे। मारदे हना आं कुल तामेनु, मुर बेक्नीमी” दैत। प्रस्थान २४:११; उत्पत्ती ३२:३१; न्यायाधीस ६:२२-२३; न्यायाधीस १३:२२-२३; यसैया ६:५; यसैया ३३:१४; १तिमोथी ६:१६ 21 मिनु लेंशा परमप्रभु यावेमी मोसा कली “कोत्रडो, आं बाक्तीकेम सेरथे फुल्लु का बाक्ब, गे मेको तार रपो। १राजा १९:८-१३ 22 आं छेडछेड मेकेर रे लमेनु, गो इ कली मेको सेरथे फुल्लु आ काक्पेमी खुइश्शा वोइक्नन। गो मलाक्गु सम्म इ कली आं गुइमी सुम्शा वोइक्नन। प्रस्थान ३४:५-६; प्रस्थान २४:११; 23 नोले आं गुइ क्युक्नुड। मिनु गे आं ची ताइनेवे। आं कुल चहिं मताइनेवे” दैत।

34

परमप्रभु आ अरेशो लेंशा ब्रेक्शो

1 मिनु परमप्रभु यावेमी मोसा कली “डोंइती डा खोदेशो पा फुल्लु निक्शी खोतो। गो मेको फुल्लुमी इ डोंइती प्रोल्शो फुल्लु डा लोत्र ब्रेक्नुड। प्रस्थान ३२:१९ 2 सुनी कना बोक्शा, सीनै डांडा डोइश्शा, आं डोंइती जाक्को। 3 गे नु सुइ डांडा डोइक्चा मदुम्नीम। बी ब्यफ, क्यारश भेडा यो डांडा गे जोचा मदुम्नीम” दे माइक्तु। प्रस्थान १९:१२-१३ 4 मिनु मोसामी परमप्रभु यावेमी देंशो खोदेशो पा डोंइती डा खोदेशो फुल्लु निक्शी खोइक्तु। मिनु सुनी कना बोक्शा, फुल्लु

कुरशा सीनै डांडा डोंइसाक्व। 5 मिनु परमप्रभु यावे गोस्स आगाम बाक्शा, तोंइसाक्व। मिनु मोसा नु राप्शा आ नें देना देन गाक्त। 6 मिनु परमप्रभु यावे मोसा आ नेक्था गाक्ना गाक्न “यावे, यावे, शिशी पाइब नु दाक्ब परमप्रभु बाक्ब। रीब पा मगाइक्ब। गेना हना यो शिशी पाइब नु आ दाक्चा मप्रोंइब बाक्ब। प्रस्थान ३३:१८-२६; गन्ती १४:१८; भजन संग्रह १०३:८; नहुम १:३; १यूहन्ना ४:१६ 7 मिनु हजार हजार आन पाला सम्म गेना हना यो दाक्ब। मुर आन ठीक मपशो, आन हेंथे पशो नु पाप पशो क्याम्ब। तन्न सजाइ मगेथु मप्रोंइब। आम आफ आन मरिम्शो पशो आन तमी तौ, चच, युइ नु युइ आन युइ सम्म सजाइ ताइनीम” देंत। प्रस्थान २०:५-६; ब्यवस्था ३२:९; भजन संग्रह २८:९ 8 मिनु मोसामी गु बाप्शा सेउ पा ठेयब सेल्लु। 9 मिनु “आं परमप्रभु, इन डोंइती शिशी तशो बाक्ती हना, गे परमप्रभु, गो नु गाक्कीन, दे पुंडनुड। एको काइ मटीब मुर बाक्तेक्म हना यो, आंइ ठीक मपशो नु पाप क्याम्दीन। आंइ कली आंम इन मुर सेल्ला ब्रकी” देंत।

10 मिनु मेकोमी “नेनो, गो कबल का पाइनुड। इ मुर नेल्ल आन डोंइती छक लाक्चा डा गेय पाइनुड। गो मोदेशो गेय रागी रागी आन दातेमी गेनायो मपड। मिनु गे नु बाक्ब मुर नेल्लेमी परमप्रभु यावे आ गेय बाक्ब, दे तुइक्नीम। आं पचशो गेय हिंचा डा नु छक लाक्चा डा बाक्ब। प्रस्थान १९:५

11 गो मुलाक्ती मार देनुडा, मेको लोव्र टिचा माल्नेवे। नेनो, गो इ डोंइती रे एमोरी, कनानी, हित्ती, परिज्जी, हिक्वी नु यबुसी आन कली खेरनुडमी। 12 गो इन कली गेनुड देशो रागी जाक्दीत्नीनु, मेको रागी डा मुरपुकी नु काइ कबल मपावो। होस पा बाक्को। कबल पाप्तीवी हना, मेकोपुकीमी इन कली दूली पाइब सेल्लनीम। प्रस्थान २३:३२-३३ 13 मेको आन चढ़ेतीकपुकी प्रेशशा, आन पूजा पचा कली खुक्शो फुल्लु प्रोल्शा, मूर्ति पाइश्शो थाम कली क्योरशा, तिम्चा माल्नीनी। प्रस्थान २३:२४ 14 गे मेको आन देवी देवता आन डोंइती बाप्शा सेउ मपने। मारदे हना आं नें रुश पाइब बाक्ब। मिनु गो रुश पाइब परमप्रभु बाक्नुड। 15 मेको रागी डा मुर नु काइ कबल मपने। मारदे हना मेको रागी डा मुरुमी आन देवी देवता आन कली पूजा पा क्योरशा चढ़ेनीमी। मिनु इन कली ब्रेम्मानु, गे मेको आन देवी देवता आन कली चढ़ेशो जाइनीनी। 16 मिनु गे आन तमी इन तौ आन कली चाक्नीनी। मिनु मेको आन तमीम आन देवी देवता आन कली पूजा पा चढ़ेनीम। इन तौ आन कली यो आन देवी देवता आन कली पूजा पा चढ़ेपपाइक्नीम। ब्यवस्था ७:३; न्यायाधीस ३:६; १राजा ११:२

17 गेपुकीमी आंम कली मूर्ति मचेम्सीन। प्रस्थान २०:४

18 बोरब ओख्ती मसुप्शो शोब्ले डा चाड मानेचा माल्नीनी। आं देशो खोदेशो पा आबीब महिनाम ७ नाक्त सम्म बोरब ओख्ती मसुप्शो शोब्ले जचा माल्नीनी। मारदे हना गे आबीब महिनाम इजीप्त रे गूशो ननी। प्रस्थान २३:१४-१९ 19 इन बस्तु भाव आन डोंइती जरमेशो बाछा, पाठा, नेल्ल आं के नम। उत्पत्ती ४:४ 20 डोंइती जरमेशो गधा आ बोहोर आ पा डा पाठा का गेशा प्रोंइचा माल्नीनी। मो मपाइनीनी हना, आ शुर जिक्शा, साइक्चा माल्नीनी। इन डोंइती जरमेशो तौ आ पा डा क्येट गेशा प्रोंइचा माल्नीनी। आं डोंइती सुइ श्येत्थ गुइ मजाक्कीन। प्रस्थान १३:१२-१६

21 मिनु ६ नाक्त इन गेय नेल्ल पचा माल्नीनी। ७ नाक्त चहिं नाइक्चा माल्नीनी। ब्यफ वाक्ची नु बाली नाली रुप्ची ना यो नाइक्चा माल्नीनी। 22 गेपुकीमी हप्ता डा चाड मानेचा माल्नीनी। मेको डोंइती मीशो चेरब आ चाड बाक्ब। बाली नाली रुप्शा ओंइतीक डा चाड यो मानेचा माल्नीनी। मेको बर्स नुप्ची ना डा चाड बाक्ब। लेवी २३:१५-१६; ब्यवस्था १६:९-१०

23 इस्राएल डा वोंइश मुर नु वोंइश आल नेल्ल बर्सम खेयप सां परमप्रभु आ डोंइती, परमप्रभु यावे, इस्राएली आन परमप्रभु आ डोंइती जाक्चा माल्नीम। 24 गो रागी रागी डा मुर आन कली इन डोंइती रे खेरशा, इन बाक्तीक रागी बारपाइक्नुड। बर्सम खेयप सां परमप्रभु यावे इन परमप्रभु आ डोंइती जाक्कीन। मिनु सुइम इन रागी तशा मवाल्नीम।

25 आं कली चढ़ेतीक हुश बोरब ओख्ती सुप्शो शोब्ले नु मचढ़ेन। पास्सा चाड डा चढ़ेशो श्ये सुनी सम्म मारेइ महेंचा। 26 इन रू डा डोंइती मीशो नेल्ल क्येडा रिम्शो थोव्रक परमप्रभु यावे, इन परमप्रभु आ खिंम चाक्चा माल्नीनी। क्यारश आ पाठा आ ममा आ दूधमी लोप्शा क्येचा मदुम्ब” दे मोसा कली देंत। प्रस्थान २३:१९

27 मिनु परमप्रभु यावेमी मोसा कली “गो, गे नु इस्राएली नेल्ल नु एको अरेशो लोव्र पा कबल पाता, मोपतीके ब्रेक्तो” देंत। प्रस्थान २४:४ 28 मिनु मोसा परमप्रभु यावे नु ४० नाक्दो नाक्ती बाक्त। मारेइ मजवो। ब्वाक्कु यो मतूड। मिनु कबल डा १० ओटा अरेशो लोव्र फुल्लुम ब्रेक्ताक्व। प्रस्थान २४:१८; मत्ती ४:२; प्रस्थान ३१:१८

मोसा आ कुल छेडछेड दुम्शो

29 मिनु नोले मोसा मेको परमप्रभु यावे आ कबल डा लोत्र ब्रेक्शो फुल्लु निक्शी कुरशा, सीनै डांडा रे तोंइसाक्व। मोसा परमप्रभु यावे नु लोत्र पतीके आ कुल परमप्रभु आ छेडछेडम छेडछेड दुम्शो बाक्ब, दे मतुइक्त। 30 मिनु हारून नु इस्राएली नेल्लेमी मोसा कली तामेनु, आ कुल छेडछेड दुम्शो ताम्तेक्म। मिनु आ नेक्था लचा हिंतेक्म। २कोरिन्थी ३:७-१८ 31 मिनु मोसामी मेको आन कली ब्रेत्तीमीनु, हारून नु ठेयब मुर नेल्ल आ नेक्था जाक्तेक्म। मिनु मेकोपुकी नु लोत्र पाप्तु। 32 मिनु नोले इस्राएलीपुकी यो मोसा आ नेक्था जाक्तेक्म। सीनै डांडाम परमप्रभु यावेमी आ कली मार मार मदा, मेको नेल्ल आन कली अरेम्तीमी। 33 मोसामी मेकोपुकी नु लोत्र पने थुम्शा, आ कुल वामी सुम्साक्व। 34 मोसा परमप्रभु यावे नु लोत्र पथ आ डोंइती लमेनु, लाडगा मग्रूम सम्म आ कुल हुक्साक्व। मिनु नोले गूशा, आ कुल सुम्सीशा मेको लोत्र इस्राएली आन कली नेंपाइक्तीमी। प्रस्थान ३३:८-९ 35 इस्राएलीमी मोसा आ कुल छेडछेड दुम्शो ततीके, मोसामी परमप्रभु यावे नु लोत्र पथ, आगा मओत्रम सम्म आ कुल सुम्साक्व।

35

नाइक्तीक नाक्त आ पबर्म अरेशो

प्रस्थान ३१:१२-१७

1 मोसामी इस्राएली नेल्ल आन कली ब्रेशशा “परमप्रभु यावेमी शेंशो इन पचा माल्शो गेय, मार मार बाक्ब देंशा हना, 2 गे ६ नाक्त सम्म गेय पने। ७ नाक्ती चहिं परमप्रभु यावे आ नाक्त दुम्तीके, मेको नाक्ती नाइक्तीक नाक्त बाक्ब। सु सुमी मेको नाक्ती गेय पाइनीमी, मेको साइक्चा पुंइसीनीम। प्रस्थान २०:८-११; प्रस्थान ३४:२१ 3 नाइक्तीक नाक्ती इन खिं नेल्लेमी मी मुइक्चा यो मदुम्ब” दे माइक्तीमी।

ताम्बु सेल्चा कली मार मार पोक्शो

प्रस्थान २५:३-९; प्रस्थान ३१:७-११

4 मिनु नोले मोसामी इस्राएली आन कली “परमप्रभु यावे आ शेंशो लोत्र मार बाक्ब, देंशा हना 5 ‘परमप्रभु यावे कली गुम्तीक ताम्बु सेल्चा कली चढ़ेतीक मार मार पोक्चा माल्नीनी। सु सुम ग्येरशा गेनीनी, मेकोमी परमप्रभु यावे कली मार चाक्चा माल्नीनी देंशा हना, सुन, चांदी, कांसा, प्रस्थान २५:२ 6 नीलो, प्याजी नु लल श्येले नु रिम्शो पा किरशो सुती श्येले के प्रोव्रशो वा नु क्यारश आ चां, 7 लल रड नुप्शो बोका आ कुशुल, नेल्ल क्येडा रिम्शो कुशुल नु बोल्यो शी, 8 बत्ती दाचा कली तेल, लुक्तीक तेल कली ब्वाइक्तीक नु धूप कली ब्वाइक्तीक, 9 निसाफ पतीके ऊरीम नु थुम्मीम वोइक्तीक झोला नु कुचु तार वोइक्तीक सेल्चा कली ओनीक्स माइशो हीरा नु अरु हीरा चाक्चा माल्नीनी’ ” देंत।

10 मिनु मोसामी “इन दातेम सु सु जोक्ब बाक्नी, मेको नेल्ल जाक्शा, परमप्रभु यावे आ देंशो थोव्रक नेल्ल सेल्चा माल्नीनी। 11 गुम्तीक ताम्बु नु ताम्बु कली सुम्तीक, ग्याइक्पाइक्तीकपुकी, फलेक नु लाइशो कोक्केपुकी, थामपुकी नु राप्पाइक्तीकपुकी, 12 कबल पशो सन्दोस नु आ कुरतीक कोक्के निक्शी, सन्दोस आ सुम्तीके, फारतीके, 13 टेबल नु आ कुरतीक कोक्के, ग्योब नेल्ल नु कोइतीक शोब्ले, 14 बत्ती दातीक नु मेको आ दियारीपुकी, बत्ती कली ठीक सेल्लेतीक थोव्रक नु बत्ती कली तेल, 15 धूप चोशा चढ़ेतीके नु मेको आ कुरतीक कोक्के, लुक्चा कली तेल नु ब्रोव्रशो रिना पाइशो धूप, ताम्बु ओव्रतीक डा फारतीक वा, 16 चोशा चढ़ेतीके नु आ एर ओंथ डा कांसा के थरपु, कुरतीक कोक्के नु आ मार मार, चिक्तीक ठेयब बोस नु मेको आ निप्पाइक्तीके, 17 ताम्बु आ लाडगा डा फारतीक वा, आ थामपुकी नु मेको आन राप्पाइक्तीकपुकी, ओव्रतीक डा फारतीक वा, 18 ताम्बु आ किला नु लाडगा थरपु डा किलापुकी नु डोरीपुकी, 19 नु हारून नु आ तौ परमप्रभु कली चढ़ेब दुम्चा कली फेक्तीक वासी सेल्चा माल्नीनी” दे मुर आन कली माइक्तीमी।

ताम्बु कली मार मार चाक्शो

20 मिनु नोले इस्राएली नेल्ल मोसा आ डोंइती रे लाम्तेक्म। 21 सु सु आन थुमी “गो चाक्नुड” देंमा, मेकोपुकीमी गुम्तीक ताम्बु सेल्चा कली नु मेकेर डा गेय पचा कली मार मार थोव्रक नु फेक्तीक वा कली मार मार माल्दा, मेको परमप्रभु यावे कली गेचा, दे चाक्तेक्म। १इतिहास २९:५-९; २कोरिन्थी ९:७ 22 मीश मुर, वोंइश मुर नेल्लेमी मार मार चाक्तेक्म देंशा हना, मुन्द्री, मारवाडी, औंठी, सुन के चुरा नु अरु सुन के थोव्रकपुकी परमप्रभु यावे कली चाक्तेक्म। 23 सु सु नु नीलो, प्याजी नु लल श्येले नु रिम्शो पा किरशो सुती श्येले के प्रोव्रशो वा, क्यारश आ चां, लल रड नुप्शो सांड आन कुशुल, नेल्ल क्येडा रिम्शो सेल्शो कुशुल बाक्मे, मेको चाक्तेक्म। 24 सु सु आन के चांदी

नु कांसा बाक्मे, मेकोमी परमप्रभु यावे कली चाक्तेक्म। सु सु नु गेय पचा कली ठीक पशो बोल्यो शी बाक्मे, मेको चाक्तेक्म। 25 मिनू मीश मुर आन दातेमी सु सु जोक्ब बाक्मा, मेकोपुकीमी आन पांइशो नीलो, प्याजी, लल श्येले नु रिम्शो पा किरशो सुती श्येले के प्रोव्रशो वा चाक्तेक्म। 26 सु सु जोक्ब बाक्मा, मेकोपुकीमी क्यारश आ चां पांइतेक्म। 27 मिनू ठेयब मुरपुकीमी ओनीक्स माइशो नु अरु हीरा कुचु तार वोइक्तीक नु निसाफ पतीक ऊरीम नु थुम्मीम वोइक्चा कली झोलाम क्येप्पाइक्चा कली चाक्तेक्म। 28 बत्ती कली तेल, लुक्चा कली तेल नु धूप कली ब्रोव्रशो रिना पाइब ब्वाइक्तीक थोव्रक चाक्तेक्म। 29 मोपा इस्राएली नेल्लेमी ग्येरशा, परमप्रभु यावे कली गेचा कली मारेइ मारेइ चाक्तेक्म। मीश मुर नु वोंइश मुरुमी मार मार माल्बा मेको नेल्ल चाक्तेक्म। परमप्रभु यावेमी मोसा कली अरेशो खोदेशो पा ताम्बु सेल्टीक गेय पचा कली मार मार चाक्तेक्म।

बेचालेल नु ओहोली-आब

प्रस्थान ३१:१-६

30 मिनू मोसामी इस्राएली आन कली “नेनीन, परमप्रभु यावेमी यहूदा आ थर डा हुर आ चच, ऊरी आ तौ बेचालेल कली आ नें थिशा, आ गेय पचा कली योव्रतु। 31 मेकोमी मेको कली परमप्रभुमी आ सोक्तीम प्रिंशा, मार मार सेल्चा कली जोक्ब तुइक्ब सेल्लु। मिनू पने चाप्तीक सक्ति यो गेप्लु। 32 मेकोमी नेल्ल मिम्शा, सुन, चांदी नु कांसा के मारेइ मारेइ चेम्ने चाप्ब। 33 हीरा खोइक्तीक नु सुनम क्येप्तीके, शी मुतीके नु मारेइ मारेइ सेल्चा जोक्ब दुम्पाइक्तु। 34 परमप्रभुमी बेचालेल नु दान आ थर डा अहीसामाक आ तौ ओहोली-आब आस कली अरु आन कली शेंतीक सक्ति गेशो बाक्ब। 35 मिनू मेको आस कली जोक्ब तुइक्ब थुं गेशा, गेय पतीक सक्ति नेल्ल गेशो बाक्ब। मार गेय पचा कली जोक्ब तुइक्ब सेल्लो बाक्ब देशा हना, दारशो मार मार गेय पाइब, मिम्शा ब्रेक्स ब्रेक्शा, नीलो प्याजी नु लल श्येले बुटा प्रोव्रचा नु रिम्शो पा किरशो सुती श्येले के प्रोव्रशो वामी बुटा आप्चा कली जोक्ब तुइक्ब सेल्लो बाक्ब।

36

परमप्रभु आ बाक्तीक सेल्चशो

प्रस्थान २६:-

1 मिनू परमप्रभु यावेमी बेचालेल, ओहोली-आब नु अरु आन कली आ बाक्तीक सेल्चा, दे जोक्ब तुइक्ब नु रुप्तीक थुं गेशो मुर नेल्लेमी, परमप्रभु यावेमी देशो खोदेशो पा गेय पचा माल्नीम” दे मोसामी इस्राएली आन कली देंत।

2 मिनू मोसामी, बेचालेल, ओहोली-आब नु परमप्रभुमी जोक्ब तुइक्ब सेल्लो मुर नेल्ल आन कली ब्रेत्ताक्नमी। सु सु आन थुंमी “गो यो मेको गेय पाइनुड” दे मिम्शो बाक्मा, मेको आन कली यो ब्रेत्ताक्नमी। 3 इस्राएलीपुकीमी परमप्रभु यावे आ बाक्तीक सेल्चा कली मार मार चाक्शो बाक्मा, आन थुंमी ग्येरशा गेशो नेल्ल मोसा आ गुइ रे ताक्तेक्म। मेना सम्म मुरपुकीमी सुनी कुस कुस मार मार चाक्स डा चाक्स बाक्तेक्म। 4 मिनू परमप्रभु यावे आ बाक्तीक सेल्ब जोक्ब तुइक्बपुकीमी आन गेय प्रोंइशा, मोसा आ बाक्तीक जाक्तेक्म। 5 मिनू मेकोपुकीमी मोसा कली “परमप्रभु यावेमी अरेशो सेल्चा कली माल्लो क्येडा यो शुश चाक्ना चाक्न बाक्नीम” देंतेक्म। 6 मिनू मोसामी “मुल रे परमप्रभु यावे आ बाक्तीक डा गेय कली सुइम मारेइ मचाक्कीन” दे मुर आन बाक्तीक बाक्तीकेमी नेंपाइक्थ मुर सोइक्ताक्मी। मोपा मारेइ मचाक्कीन, दे आन चाक्चा नाइक्पाइक्तेक्म। 7 मारदे हना आन चाक्शो मारेइ मारेइ गाप्शा, शुश दुम्शो बाक्त।

ताम्बु सेल्टीक गेय

8 मिनू जोक्ब गेय पाइब नेल्लेमी परमप्रभु यावे आ बाक्तीक कली १० ओटा सुम्तीक वा सेल्लेक्म। रिम्शो पा किरशो सुती श्येले के प्रोव्रशो वा के नु नीलो, प्याजी नु लल रड डा श्येलेमी शुश रिम्शो करूबपुकी बुटा आप्शा सेल्लेक्म। 9 मेको सुम्तीक वा का का पा २८ कुबीत दुइशो नु ४ कुबीत ब्रेम्शो, खाल का डा पा सेल्लेक्म। कुबीत का ०.५ मिटर खोदेशो बाक्ब। 10 मेकोपुकीमी ५ ओटा सुम्तीक वा बोइशशा, का सेल्लेक्म। मिनू अर्को ५ ओटा बोइशशा, अर्को का सेल्लेक्म। 11 सुम्तीक वा का आ एर सुर गे नीलो रड डा ५० ओटा बोइक्तीके सेल्लेक्म। अर्को सुम्तीक वा के यो ओंथ सुर गे ५० ओटा नीलो बोइक्तीक सेल्लेक्म। 12 सुम्तीक वा कामी ५० ओटा बोइक्तीके नु अर्को सुम्तीक वा कली यो ५० ओटा बोइक्तीके सेल्लशा, निक्शी कली का सेल्चा कली ठीक पा वोइक्तेक्म। 13 मिनू मेकोपुकीमी ५० ओटा सुन के ग्याइक्पाइक्तीके सेल्लशा, डोंइती डा नु नोले डा सुम्तीक वा आस कली बोइशशा, का सेल्लेक्म।

14 परमप्रभु यावे आ बाक्तीक साप्चा कली यो क्यारश आ चां के ११ ओटा सुम्तीके सेल्लेक्म। 15 मेको सुम्तीके का का पा ३० कुबीत लाइशो नु ४ कुबीत ब्रेम्शो खाल का डा पा सेल्लेक्म। कुबीत का ०.५ मिटर खोदेशो बाक्ब। 16 मेकोपुकीमी का सेल्चा कली ५ ओटा सुम्तीके बोइशशा का नु ६ ओटा सुम्तीके बोइशशा अर्को का सेल्लेक्म। 17 डोइती डा सुम्तीके आ एर सुर गे ५० ओटा बोइक्तीक सेल्लेक्म। मिनु अर्को सुम्तीके आ ओंथ सुर गे यो ५० ओटा बोइक्तीक सेल्लेक्म। 18 मिनु ताम्बु सुम्तीके का सेल्चा कली कांसा के ५० ओटा ग्याइक्पाइक्तीक सेल्लेक्म। 19 मेकोपुकीमी ताम्बु सुम्चा कली लल रड नुप्शो सांड आ कुशुल के सुम्तीक का सेल्लेक्म। मेको आ तारी नेल्ल क्येडा रिम्शो सेल्शो कुशुल के अर्को सुम्तीक का सेल्लेक्म।

20 मिनु नोले मेकोपुकीमी परमप्रभु यावे आ बाक्तीक सेल्चा कली बोल्यो शी के फलेक सेल्शा, थारतेक्म। 21 फलेक का का पा १० कुबीत लाइशो नु कुबीत का आधा ब्रेम्शो सेल्लेक्म। कुबीत का ०.५ मिटर, हात का खोदेशो बाक्ब। 22 फलेक का कामी, राप्पाइक्चा कली किला निक्शी गारपाइशशा, सेल्लेक्म। परमप्रभु यावे आ बाक्तीक सेल्चा कली फलेक नेल्ल मोदेशो पा सेल्लेक्म। 23 मिनु बाक्तीके आ दक्खिन गे कली २० ओटा फलेक सेल्लेक्म। 24 मिनु मेको २० ओटा फलेक आन पुं गे, ४० ओटा चांदी के राप्पाइक्तीके, फलेक का कली राप्पाइक्तीके निक्शी सेल्लेक्म। 25 उत्तर गे कली २० ओटा फलेक सेल्लेक्म। 26 मेको आन कली ४० ओटा चांदी के राप्पाइक्तीके, फलेक का कली राप्पाइक्तीके निक्शी सेल्लेक्म। 27 बाक्तीके आ पच्छिम गे कली ६ ओटा फलेक सेल्लेक्म। 28 पच्छिम डा सुर निक्शी कली, फलेक निक्शी सेल्लेक्म। 29 मेकोपुकीमी उइ रे ममाइ, इर गे मुन्द्रामी ग्याइक्पाइक्तेक्म। 30 मोपा मेको नेल्ल ८ ओटा फलेक दुम्तेक्म। मिनु १६ ओटा चांदी के राप्पाइक्तीके, फलेक का कली राप्पाइक्तीक निक्शी दुम्त। प्रस्थान २६:-

31 बोल्यो शी के लाइशो कोक्के सेल्लेक्म। परमप्रभु यावे आ बाक्तीक का पटटी कली फलेक ग्याइक्पाइक्चा कली ५ ओटा लाइशो कोक्के सेल्लेक्म। 32 अर्को पटटी कली यो फलेक ग्याइक्पाइक्चा कली ५ ओटा लाइशो कोक्के सेल्लेक्म। आ नोले पच्छिम गे कली ५ ओटा लाइशो कोक्के सेल्लेक्म। 33 मिनु फलेक ग्येत्थ आ दातेमी सुर का रे अर्को सुर सम्म कली लाइशो कोक्के सेल्लेक्म। 34 मिनु फलेक नु लाइशो कोक्के आन कली सुनम गिल्लेक्म। मिनु लाइशो कोक्के शुइक्चा कली सुन के मुन्द्रापुकी सेल्लेक्म।

35 मिनु नीलो, प्याजी नु लल श्येले नु रिम्शो पा किरशो सुती श्येले के प्रोव्रशो वा के नेल्ल क्येडा चोव्रखो कोठा फारतीक का सेल्शा, रिम्शो पा करूब बुटा आप्तेक्म। 36 मेकोमी मेको फारतीक कली बोल्यो शी के ४ ओटा थाम सेल्शा, सुनम गिल्लेक्म। मेको आन ग्याइक्तीके सुन के सेल्लेक्म। मेको आन कली ४ ओटा चांदी के राप्पाइक्तीके सेल्लेक्म।

37 मिनु नीलो, प्याजी नु लल श्येले नु रिम्शो पा किरशो सुती श्येले के प्रोव्रशो वा दारशो बुटा आप्शो ताम्बु आ ओव्रतीके कली फारतीक का सेल्लेक्म। 38 मेको फारतीक ब्वेक्चा कली ५ ओटा थाम सेल्लेक्म। मेको आन पिया, ब्वेक्तीक नु हाम्तीक कोक्के सुनम गिल्लेक्म। मेको ५ ओटा थाम आन राप्पाइक्तीके चहिं कांसा के सेल्लेक्म।

37

कबल पशो सन्दोस सेल्शो
प्रस्थान २५:१०-२२

1 मिनु बेचालेलमी बोल्यो शी के सन्दोस का सेल्लु। मेको आ लाइशो कुबीत निक्शी नु आधा, आ ब्रेम्शो कुबीत का नु आधा नु आ ग्येत्थ लाइशो कुबीत का नु आधा डा पा सेल्लु। कुबीत का ०.५ मिटर, हात का खोदेशो बाक्ब। 2 मिनु मेको आ खिंडगा नु आ लाडगा नेल्ल क्येख सुनमी गिल्लु। मिनु एर ओंथ नेल्ल सुन के सुर सेल्लु। 3 मिनु सुन के ४ ओटा मुन्द्रा सेल्लु। का पटटी निक्शी नु अर्को पटटी निक्शी पा सन्दोस आ ४ सुरमी क्येप्ताक्व। 4 मिनु बोल्यो शी के कुरतीक कोक्के निक्शी सेल्शा, सुनमी गिल्लु। 5 मिनु मेको कुरतीक कोक्के निक्शी मुन्द्रामी शुइशशा, सन्दोस कुरने चाप्तेक्म।

सन्दोस सुम्तीक सेल्शो

6 मिनु मेकोमी क्येख सुन के चेम्शा, सन्दोस सुम्तीके सेल्लु। मेको आ पित्थ लाइशो कुबीत निक्शी नु आधा नु आ ब्रेम्शो कुबीत का नु आधा सेल्लु। कुबीत का ०.५ मिटर, हात का खोदेशो बाक्ब। 7 मिनु परमप्रभु यावे आ स्वर्ग डा गेय पाइब खोदेशो सुन के करूब निक्शी चेम्शा सेल्लु। मेको सुम्तीके आ निम्फा पटटी डा का चेम्शा सेल्लु। 8 का पटटी करूब का, अर्को पटटी करूब का चेम्शा सेला बाक्त। मेको सुम्तीके नु करूब निम्फा मख्रोंइसीशो सुन का

रेन चेम्शा सेल्लु। 9 करूब आस फ्रां हाम्शा, सुम्तीके फारपाइशशा, खाल का डा पा सन्दोस सुम्तीके गे कोव्रपाइशशा चेम्शा सेल्लु।

शोब्ले वोइक्तीक टेबल सेल्लु

प्रस्थान २५:२३-३०

10 बोल्यो शी के टेबल का सेल्लु। मेको आ पित्थ लाइशशा कुबीत निक्शी नु आ ब्रेम्शो कुबीत का नु आ ग्येत्थ लाइशशा कुबीत का नु आधा डा पा सेल्लु। कुबीत का ०.५ मिटर खोदेशो बाक्ब। 11 मिनु मेको कली क्येख सुनमी गिल्शा, आ एर ओंथ नेल्ल सिरपेच खोदेशो पा सुन के सुर सेल्लु। 12 मेको आ एर ओंथ डा सुर नेल्ल ४ गुइ ब्रेम्शो सेल्लु, सिरपेच खोदेशो पा बुटा आप्शा सेल्लु। गुइ का ८ सेन्ती मिटर कि ३ आंइची खोदेशो बाक्ब। 13 मिनु ४ ओटा सुन के मुन्द्रा चेम्शा, मेको आ ४ ओटा खोइलीम टेबल आगाम क्येप्ताक्व। 14 टेबल कुरचा कली मुन्द्रापुकी टेबल आ सुर आ नेक्था क्येप्ताक्व। 15 मिनु टेबल कुरचा कली बोल्यो शी के कुरतीक कोक्के सेल्लु, सुनमी गिल्लु। 16 मिनु टेबलम वोइक्चा माल्लो थाल, लोटा नु बोस नेल्ल नु तूचा थोव्रक चढेतीक लुक्चा कली लोटा नेल्ल क्येख सुन के सेल्लु।

सुन के बत्ती दातीक सेल्लु

प्रस्थान २५:३१-४०

17 मेकोमी क्येख सुन के बत्ती दातीक का चेम्शा सेल्लु। आ थाम, आ राशी, आ दियारी, आ डल्ला नु फूपुकी ठेयब सुन का केन सेल्लु। 18 मिनु मेको बत्ती दातीक आ थाम रे ६ ओटा राशी गुंइशा, का पटटी रे सां नु अर्को पटटी रे सां राशी चेम्शा सेल्लु। 19 मिनु मेको राशी कामी देसी बदाम आ फू खोदेशो फू सां नु डल्ला सां रे गुंइशा सेल्लु। अर्को राशीपुकी यो नेल्ल मोदेशो पा सेल्लु। 20 मेको बत्ती दातीक आ थामम चर्हि ४ ओटा देसी बदाम आ फू खोदेशो आन डल्ला रे गूशो सेल्लु। 21 थाम आ डोंइती डा डल्ला रे, आ दाते डा डल्ला रे नु नोले डा डल्ला रे निम्फा पटटी गे राशी निक्निक्शी गूशो सेल्लु। 22 मेको आ राशी नु डल्ला नेल्ल ठेयब क्येख सुन का केन चेम्शा सेल्लु। 23 बत्ती दातीक ७ ओटा दियारी, आ कांइची नु आइक्च बोस नेल्ल क्येख सुन के चेम्शा सेल्लु। 24 मेको नेल्ल टलेन्ट का क्येख सुन के चेम्शा सेल्लु।

धूप चोशा चढेतीक सेल्लु

प्रस्थान ३०:१-५, २२-३८

25 धूप चोशा चढेतीके बोल्यो शी के कुबीत का लाइशशा नु कुबीत का ब्रेम्शो ४ पाटे पा सेल्लु। आ ग्येत्थ लाइशशा कुबीत निक्शी डा सेल्लु। मेको नु मेको आ ग्रोव्र नेल्ल मख्रोंइसीशो शी का केन सेल्लु। कुबीत का ०.५ मिटर, हात का खोदेशो बाक्ब। 26 मिनु मेको नेल्ल क्येख सुनमी गिल्शा, सिरपेच के खोदेशो पा सुन के सुर सेल्लु। 27 मेको आ सुर आगा निम्फा पटटी कली सुन के मुन्द्रा निक्निक्शी सेल्लु, आ सिरपेच खोदेशो सुर आ दी निम्फा पटटी गे क्येप्ताक्व। मिनु मेको कुरतीक कोक्के शुइक्तीक दुम्त 28 मिनु मेको कुरचा कली बोल्यो शी के कुरतीक कोक्के निक्शी सेल्लु, सुनम गिल्लु।

29 मिनु मेकोमी ताम्बु डा लुक्तीक तेल नु ब्रोव्रशो रिना पाइब धूप जोक्ब मुरुम सेल्लु खोदेशो पा सेल्लु।

38

चोशा चढेतीके सेल्लु

प्रस्थान २७:१-८; प्रस्थान ३०:१८-२१

1 मिनु बेचालेलमी बोल्यो शी के चोशा चढेतीके सेल्लु। मेको ५ कुबीत लाइशशा नु ५ कुबीत ब्रेम्शो, ४ पाटे नु कुबीत सां ग्येत्थ लाइशशा पा सेल्लु। 2 आ ४ सुरमी ग्रोव्र सेल्लु। मेको ग्रोव्रपुकी मेको चढेतीक फलेक का केन सेल्लु, कांसामी गिल्लु। 3 चढेतीके कली माल्लो मारेइ मारेइ कांसा के सेल्लु। पुलु वोइक्तीक बोसपुकी, पुलु ताप्तीकपुकी, बुइक्तीक बोसपुकी, श्ये गुंइतीक कांटापुकी नु मी कोइला कुर पतीकपुकी सेल्लु। 4 चोशा चढेतीक कली कुबीत का नु आधा डा पा ग्येत्थ पा मी तिक्तीक कांसा के जाली सेल्लु। कुबीत का ०.५ मिटर, हात का खोदेशो बाक्ब। 5 कुरतीक कोक्के शुइक्चा कली, ४ ओटा मुन्द्रा सेल्लु, आ ४ सुरमी क्येप्ताक्व। 6 बोल्यो शी के कुरतीक कोक्के निक्शी सेल्लु, कांसामी गिल्लु। 7 चढेतीक कुरचा कली मेको कोक्के मुन्द्राम शुइक्ताक्व। फलेक के सेल्लु चोशा चढेतीके आगाम श्येत्थ बाक्शो बाक्त।

चिकतीके ठेयब बोस सेल्शो

8 बेचालेलमी कांसा के चिकतीक ठेयब बोस नु आ निप्पाइक्तीके सेल्लु। मेको गुम्तीक ताम्बु ओव्रतीकेम गेय पाइब मीश मुर आन कांसा के ऐना के सेल्लु।

ताम्बु आ लाडगा प्रस्थान २७:९-१९

9 मिनु बेचालेलमी ताम्बु आ लाडगा थरपु हिरचा कली रिम्शो पा किरशो सुती श्येले के वा प्रोवपाइक्तु। मेको फारतीक दक्खिन गे सहे का कुबीत लाइशो पा सेल्लु। कुबीत का ०.५ मिटर खोदेशो बाक्ब। 10 मेको फारतीक ग्याइक्पाइक्चा कली खाल का डा थाम नु खाल का डा कांसा के राप्पाइक्तीके के सेल्लु। मुन्द्रापुकी नु कोक्केपुकी चहिं चांदी के सेल्लु। 11 मिनु मोदेशो पा उत्तर गे यो सहे का कुबीत लाइशो फारतीक प्रोवपाइक्तु। मेको कली २० ओटा थाम, २० ओटा कांसा के राप्पाइक्तीके सेल्लु। मुन्द्रापुकी नु कोक्केपुकी चहिं चांदी के सेल्लु। सहे का कुबीत ५० मिटर बाक्ब। 12 पच्छिम गे ५० कुबीत डा फारतीक सेल्लु। मेको कली १० ओटा थाम नु १० ओटा राप्पाइक्तीके सेल्लु। आन मुन्द्रा नु कोक्केपुकी चहिं चांदी के सेल्लु। 13 मिनु लाडगा आ डोंइती पूर्व गे कली ५० कुबीत डा फारतीक वा सेल्लु। 14 ओव्रतीके पटटी का कली १५ कुबीत डा फारतीक वा सेल्लु। थाम नु राप्पाइक्तीके सां सां सेल्लु। 15 मिनु ओव्रतीके डा अर्को पटटी कली यो १५ कुबीत डा फारतीक वा सेल्लु। थाम नु राप्पाइक्तीके सां सां सेल्लु। 16 लाडगा डा एर ओथ नेल्ल डा फारतीक रिम्शो पा किरशो सुती श्येले के प्रोवशो वा के सेल्लु। 17 मेको थाम आन राप्पाइक्तीक कांसा के बाक्तेक्म। थाम आन मुन्द्रा नु कोक्केपुकी चहिं चांदी के बाक्तेक्म। थाम आन पिया चांदीम गिल्शो बाक्तेक्म। थाम आन फ्रेंतीके नेल्ल चांदी के बाक्तेक्म।

18 मेको लाडगा डा ओव्रतीके डा फारतीक नीलो, प्याजी नु लल श्येले नु रिम्शो पा किरशो सुती श्येले के प्रोवशो वाम दारशो बुटा आप्शा सेल्लु। मेको आ लाइशो २० कुबीत नु आ ग्येत्थ ५ कुबीत डा पा अर्को फारतीक नु उइक्थ उइक्थ पा सेल्लु। कुबीत का ०.५ मिटर, हात का खोदेशो बाक्ब। 19 मिनु ओव्रतीक डा ४ ओटा थाम नु आन ४ ओटा राप्पाइक्तीके कांसा के बाक्तेक्म। मेको फारतीक कली ब्वेक्तीक, थाम आन पिया नु फ्रेंतीके चांदी के बाक्तेक्म। 20 मिनु परमप्रभु यावे आ बाक्तीके नु लाडगा डा किला नेल्ल कांसा के बाक्तेक्म।

सुन चांदी नु कांसा नाक्शो

21 परमप्रभु यावे आ बाक्तीक सेल्चा कली मार मार माल्दा, मेको ब्रेक्शो बाक्त। मेको बाक्तीके कबल पशो सन्दोस वोइक्तीके बाक्त। मोसामी “मेको नेल्ल ब्रेक्चा माल्ब” दे अरेशो बाक्त। चढेब हारून आ तौ इथामार लेवी आन कली गेय पपाइक्ब बाक्त। गन्ती ४:२८ 22 परमप्रभु यावेमी मोसा कली शेंशो खोदेशो पा, यहूदा आ थर डा हुर आ चच, ऊरी आ तौ बेचालेलमी मारेइ मारेइ सेल्लु। प्रस्थान ३१:१-११ 23 मेको नु दान आ थर डा अहीसामाक आ तौ ओहोली-आब यो बाक्त। मेको मार मार मुशा सेल्लु गेय जोक्ब, ब्रेक्स ब्रेक्शा सेल्चा जोक्ब नु नीलो, प्याजी नु लल रड डा रिम्शो पा किरशो सुती श्येलेम दारशो बुटा आप्तीक गेय यो जोक्ब बाक्त।

24 परमप्रभु यावे आ बाक्तीक नु मेकेर माल्शो मारेइ मारेइ सेल्चा कली मुर आन गेशो सुन गिश दुम्माक्त देशा हना, २९ टलेन्ट नु ७ सहे ३० शेकेल दुम्त। नेल्ल नाक्शा, हजार का किलो खोदेशो दुम्त। टलेन्ट का ३४ किलो बाक्ब। शेकेल का ११.५ ग्राम, तोला का खोदेशो बाक्ब। 25 डोंइती हिक्शो वोंइश मुर आन रें पोक्शो चांदी सहे का टलेन्ट नु हजार का ७ सहे ७५ शेकेल दुम्त। 26 मिनु २० बर्स गाप्शो नु मेको क्येडा लाक्शो वोंइश मुर ६ लाख हजार सां ५ सहे ५० जना बाक्तेक्म। मेको आन के का का पा आधा आधा शेकेल पोक्तेक्म। प्रस्थान ३०:१२-१६; गन्ती १:४६ 27 ताम्बु आन फलेक राप्पाइक्तीक नु नेल्ल क्येडा चोव्रखो कोठा कली फारतीक डा थाम आन राप्पाइक्तीक कली सहे का टलेन्ट माल्ताक्व। सहे का राप्पाइक्तीके कली सहे का टलेन्ट माल्ताक्व। का कली टलेन्ट का माल्ताक्व। 28 मेको हजार का ७ सहे ७५ शेकेल चांदीमी ब्वेक्तीक सेल्शा, थाम आन पिया गिल्तीक नु आन फ्रेंतीकपुकी सेल्लेक्म। 29 मुर आन चाक्शो कांसा ७० टलेन्ट नु हजार निकशी ४ सहे शेकेल दुम्शो बाक्त। 30 मेको के गुम्तीक ताम्बु डा ओव्रतीके डा थाम आन राप्पाइक्तीके, कांसा के चोशा चढेतीके, आ मी तिक्तीक जाली नु चढेतीक आ मारेइ मारेइ सेल्पाइक्तु। 31 मिनु लाडगा डा थाम आन राप्पाइक्तीकपुकी, ठेयब ओव्रतीके डा थाम आन राप्पाइक्तीकपुकी, ताम्बु नु लाडगा डा किला नेल्ल सेल्पाइक्तु।

39

चढ़ेब आन वा सेल्शो
प्रस्थान २८:-

1 परमप्रभु यावेमी मोसा कली दोपा अरेवा, मोपा बेचालेल नु आ मुरपुकीमी हारून कली परमप्रभु यावे आ बाक्तीकेमी गेय पचा कली नीलो प्याजी नु लल रड डा श्येले के प्रोव्रशो फेक्तीक वा सेल्तेक्म।

चढ़ेब आ कुचु तार वोइक्तीके

2 मेकोमी कुचु तार वोइक्तीके सुन के, नीलो, प्याजी नु लल रड डा श्येले नु रिम्शो पा किरशो सुती श्येले के प्रोव्रशो वा के सेल्तेक्म। 3 मिनु सुन तुप्शा, पात्लो सेल्शा, आइक्च पा खोइश्शा, श्येले खोदेशो सेल्तेक्म। मिनु नीलो, प्याजी नु लल श्येलेमी रिम्शो पा किरशो सुती श्येले के प्रोव्रशो वा दारशो बुटा आप्शा सेल्तेक्म। 4 मेको कुचु तार वोइक्तीकेमी बलाम सुम्तीके निक्शी सेल्शा, निम्फा पटटी बोइक्ताक्म। 5 मिनु आ पाइक्तीके मेको कुचु तार वोइक्तीके का रेन सेल्तेक्म। मेको खाल का डा पा रिम्शो पा सेल्तेक्म। मेको पाइक्तीके सुन, नीलो, प्याजी नु लल रड डा श्येले नु रिम्शो पा किरशो सुती श्येले के प्रोव्रशो वा के सेल्तेक्म। परमप्रभु यावेमी मोसा कली दोपा अरेवा, मोपा सेल्तेक्म।

6 मिनु मेकोमी ओनीक्स हीरा निक्शी चाक्शा, इस्राएल आ तौ आन नें छाप खोदेशो पा हीराम मुशा ब्रेक्शा सुनम क्येप्ताक्म। 7 मेको हीरा निक्शी कुचु तार वोइक्तीक आ बला डा टुक्रा तारी फेरतेक्म। मिनु मेको हीरा इस्राएल आ तौ आन कली मिम्चा कली बाक्ब। परमप्रभु यावेमी मोसा कली दोपा अरेवा, मोपा सेल्तेक्म। प्रस्थान २८:१२

निसाफ पतीक झोला

8 मेकोमी निसाफ पतीके ऊरीम नु थुम्मीम वोइक्तीक झोला सेल्पाइक्तु। कुचु तार वोइक्तीके खोदेशो पा सुन, नीलो, प्याजी नु लल श्येले नु रिम्शो पा किरशो सुती के प्रोव्रशो वा के दारशो पा सेल्तेक्म। 9 मेको खेयप का मुक्शोनु, बिक्ता का लाइश्शो नु बिक्ता का ब्रेम्शो ४ पाटे पा सेल्तेक्म। 10 मिनु ४ लस्कर हीरा सुनम का का पा क्येप्ताक्म। डोंइती डा लस्कर लल मानीक माइश्शो हीरा, हाव पुश्पराज माइश्शो हीरा नु गिगी बेरूज माइश्शो हीरा क्येप्ताक्म। 11 मेको आ नोले डा लस्कर लल फिरोजा माइश्शो हीरा, बुश नीर माइश्शो हीरा नु बुश नु नीलो पन्ना माइश्शो हीरा क्येप्ताक्म। 12 मेको आ नोले डा लस्कर गिगी नु नीलो रड ब्वाइश्शो रिम्शो टल्केशो नीलमनी माइश्शो हीरा, गिगी हाकीक माइश्शो हीरा नु प्याजी रड डा कटेला माइश्शो हीरा क्येप्ताक्म। 13 मिनु नेल्ल क्येडा नोले डा लस्कर पीतमनी माइश्शो हीरा, लल रड डा ओनीक्स नु नीलो बिलौरा माइश्शो हीरा क्येप्ताक्म। मोपा हीरा नेल्ल कली सुनम क्येप्ताक्म। 14 मेको हीरा १२ ओटा बाक्तेक्म। मिनु इस्राएल आ तौ आन नें का का पा मेको आन तार छाप थोक्शो खोदेशो पा मुशा ब्रेक्शो बाक्तेक्म। हीरा का आ तारी थर का आ नें ब्रेक्शो बाक्त। 15 मेको निसाफ पतीक झोला कली क्येख सुन के डोरी किरशो खोदेशो पा सिक्की सेल्तेक्म। 16 मेकोपुकीमी निसाफ पतीक झोला कली सुन के ग्याइक्तीक निक्शी नु मुन्द्रा निक्शी चेम्तेक्म। मिनु मेको मुन्द्रा निसाफ पतीक झोला आ सुर निक्शीमी वोइक्तेक्म। 17 मेकोपुकीम सुन के सिक्की निक्शी निसाफ पतीक झोला आ सुरम वोइश्शो मुन्द्रा निक्शीमी लिक्ताक्म। 18 मेको सिक्की निक्शी चढ़ेब आ कुचु तार वोइश्शो वा आ बला डा हीरा क्येप्शो सुनम हेक्ताक्म। 19 मेकोपुकीमी सुन के मुन्द्रा निक्शी सेल्तेक्म। मेको निक्शी निसाफ पतीके ऊरीम नु थुम्मीम वोइक्तीक झोला आ उइ आगा गे पाइक्ताक्म। मोपा मेको झोला कुचु तार वोइक्तीके वा आ तार बाक्त। 20 मेकोपुकीमी लेंशा सुन के मुन्द्रा निक्शी सेल्तेक्म। कुचु तार वोइक्तीके आ बला सुम्तीके उइ डा सुरम वोइक्तेक्म। दारपाइश्शो पाइक्तीके आ तारी क्येप्ताक्म। 21 मिनु मेको निसाफ पतीके ऊरीम नु थुम्मीम वोइक्तीक झोला आ मुन्द्रामी नीलो डोरीम लिक्शा, कुचु तार वोइक्तीक वामी पाइक्ताक्म। मोपा मेको निसाफ पतीके झोला दारपाइश्शो पाइक्तीक तार बाक्शो कुचुम वोइक्तीक वा रे एर ओंथ मयाक्सेक्ल, दे पाइक्ताक्म। परमप्रभु यावेमी मोसा कली दोपा अरेवा, मोपा सेल्तेक्म।

कुचु तार वोइक्तीके आगा डा वा

22 मिनु मेको कुचु तार वोइक्तीके आगा फेक्तीक नेल्ल नीलो प्याजी रड डा वा के फेरतेक्म। 23 मिनु पिया खीतीक पोव्रला सेल्तेक्म। मेको पोव्रला आ एर ओंथ मगाक्का डा पा आ सुर थम बोल्यो पा प्रोव्रतेक्म। 24 मेको फेक्तीके आ उइ डा सुर एर ओंथ गे नीलो, लल नु प्याजी रड नु रिम्शो किरशो सुती श्येले के प्रोव्रशो वा के सेल्शो दारीम क्युक्शा सेल्तेक्म। 25 मिनु मेकोपुकीम क्येख सुन के आइक्च किडगो सेल्तेक्म। फेक्तीक उइ गे किडगो का दारीम

का खाकशा क्युक्तेकम। 26 किडगो का दारीम का नु किडगो का दारीम का पा खाकशा, बिर हिरशा क्युक्तेकम। मेको परमप्रभु यावे आ डोंइती गेय पची ना फेक्तीक वा दुम्त। परमप्रभु यावेमोसा कली दोपा अरेवा मोपा सेल्लेकम।

आगा डा फेक्तीके सेल्लो

27 हारून नु आ तौ आन कली रिम्शो पा किरशो सुती श्येले के प्रोव्रशो वा के फेक्तीक यो सेल्लेकम। 28 रिम्शो पा किरशो सुती श्येले के प्रोव्रशो वा के पियाम रुक्तीक नु गुक्तीक ताकी नु सुरुवाल सेल्लेकम। 29 रिम्शो पा किरशो सुती श्येले के प्रोव्रशो वा के नीलो, प्याजी नु लल रड डा श्येलेमी दारशो बुटा आप्शो किप्तीकपुकी सेल्लेकम। परमप्रभु यावेमी मोसा कली दोपा अरेवा, मोपा सेल्लेकम।

कुप्फीम पांइतीके सेल्लो

30 मेकोपुकीमी क्येख सुन के फू खोदेंशो पा कुप्फीम पांइतीके चेम्तेकम। मेकेर छाप मुशो खोदेंशो पा “परमप्रभु यावे कली ला” दे मुशा ब्रेक्ताकम। प्रस्थान २९:६; प्रस्थान २७:३६; लेवी ८:९; जकरिया १४:२०; 31 कुप्फीम पांइतीके कली पियाम गुक्तीकेमी नीलो श्येलेमी फ्रेंताकम। परमप्रभु यावेमी मोसा कली दोपा अरेवा, मोपा सेल्लेकम।

मोसामी ताम्बु डा गेय कोव्रशो

32 मिनु परमप्रभु यावे आ बाक्तीक गुम्तीक ताम्बु डा गेय नेल्ल नुम्त। परमप्रभु यावेमी मोसा कली दोपा अरेवा, मोपा इस्राएल डा मुरपुकीमी नेल्ल सेल्लेकम।

33 मिनु मेकोपुकीमी परमप्रभु यावे आ बाक्तीक नु आ मारेइ मारेइ मोसा आ बाक्तीकेमी चाक्तेकम। मार मार चाकगमे बाक्त देंशा हना, ताम्बु नु आ ग्योब नेल्ल, ब्वेक्तीक, फलेक, लाइशो कोक्के, थाम नु राप्पाइक्तीकपुकी, 34 लल रडम नुप्शो सांड आ कुशुल के सुम्तीके, नेल्ल क्येडा रिम्शो कुशुल के सुम्तीके, फारतीके, 35 कबल पशो सन्दोस, मेको आ कुरतीक कोक्के नु सुम्तीके, 36 टेबलम वोइक्चा माल्शो मारेइ मारेइ नु कोंइतीक शोब्ले, 37 क्येख सुन के बत्ती दातीके नु आ दियारी आन कली ठीक सेल्लेके थोव्रक नु बत्ती कली तेल, 38 सुन के चढ़ेतीक, लुकचा कली तेल, ब्रोव्रशो रिना पाइब धूप, ताम्बु ओव्रतीके डा फारतीक वा, 39 कांसा के चढ़ेतीक, मेको आ कांसा के मी तिकतीक जाली, कुरतीक कोक्के नु चढ़ेतीक आ मारेइ मारेइ, चिकतीक ठेयब बोस नु मेको निप्पाइक्तीके, 40 ताम्बु आ लाडगा डा फारतीक नु थामपुकी, आन राप्पाइक्तीकपुकी, लाडगा ओव्रतीक डा फारतीक वा, आ फ्रेंतीकपुकी नु किलापुकी, मिनु परमप्रभु यावे आ बाक्तीक गुम्तीक ताम्बु डा गेय पचा कली मारेइ मारेइ नेल्ले, 41 परमप्रभु यावे आ बाक्तीक डा गेय पचा कली हारून कली फेक्तीक वा नु आ तौ आन कली परमप्रभु यावे कली चढ़ेब दुम्चा कली आन फेक्शा गेय पतीके वा नेल्ल चाक्तेकम। 42 परमप्रभु यावेमी मोसा कली दोपा अरेवा, मोपा इस्राएल डा मुरपुकीमी सेल्लेकम। 43 मिनु मोसामी मेको नेल्ल कोव्रतु। मिनु परमप्रभु यावेमी दोपा अरेवा, मोपा ठीक सेल्लो तशा, मोसामी मेको नेल्ल आन कली आसीक गेप्टु।

40

गुम्तीक ताम्बु कीचा शेंशो

1 मिनु परमप्रभु यावेमी मोसा कली 2 “डोंइती डा महिना डा डोंइती नाक्ती, आं बाक्तीके गुम्तीक ताम्बु कीडो। प्रस्थान ४०:१७; प्रस्थान १२:२; प्रस्थान १९:१ 3 गे कबल पशो सन्दोस आगाम वोइशशा, फारतीक वाम फारदो। 4 टेबल ओंइशा, मेको तारी मार मार वोइक्चा माल्बा, ठीक पा वोतो। मिनु बत्ती दातीके ओंइशा आ दियारी दाडो। 5 सुन के धूप चोशा चढ़ेतीके कबल पशो सन्दोस आ डोंइती वोतो। आं बाक्तीक आ ओव्रतीक डा फारतीक वा क्युक्को। 6 गुम्तीक ताम्बु आ ओव्रतीक आ डोंइती चोशा चढ़ेतीके वोतो। 7 गुम्तीक ताम्बु नु चढ़ेतीक आस दातेम चिकतीक ठेयब बोस वोइशशा, ब्वाक्कुम प्रिंदो। 8 लाडगा डा थाम वोइशशा, एर ओंथ हिरशा फारतीक वा नु ओव्रतीक डा फारतीक वा क्युक्को। 9 मिनु गे लुकचा कली तेल चाक्शा, आं बाक्तीक नु मेकेर डा मारेइ मारेइ आन कली ‘परमप्रभु यावे केन बाक्ब’ दे तेल लुकतो। मोपा मेको नेल्ल आं के दुम्नीम। 10 चोशा चढ़ेतीक नु मेको आ मारेइ मारेइ आन कली यो ‘परमप्रभु यावे केन बाक्ब’ दे तेल लुकतो। मोपा मेको नेल्ल यो आं के दुम्नीम। 11 चिकतीक ठेयब बोस नु मेको आ निप्पाइक्तीके कली यो तेल लुकतो। मिनु मोपा मेको आं के दुम्ब।

12 मिनु हारून नु आ तौ आन कली, गुम्तीक ताम्बु डा ओव्रतीकेम चाक्शा चिकतो। 13 आं कली चढ़ेब दुम्पाइक्चा कली हारून कली चढ़ेतीक वा फेक्पा, तेल लुकशा आं कली जिम्मा गेयी। 14 आ तौ आन कली यो चाक्शा, वा

फेक्तो। 15 आन आफ कली खोदेशो पा मेको आन कली यो तेल लुक्तो। मेकोपुकी यो चढ़ेब दुग्शा, आं गेय पचा माल्नीम। मेको तेल लुक्तीके आन चच युइ आन पाला नेल्लेमी गेना हना यो आं कली चढ़ेब दुग्नीम” देंत। 16 मिनु परमप्रभु यावेमी मोसा कली दोपा अरेवा, मोपा पाप्तु।

गुम्तीक ताम्बु कीशो

17 इजीप्त रे गाक्मा आ नोले जाक्शो बर्स आ डोंइती डा महिना, डोंइती डा नाक्ती परमप्रभु यावे आ बाक्तीक ताम्बु कीतेक्म। 18 मोसामी परमप्रभु यावे आ बाक्तीक ताम्बु कीशा, राप्पाइक्तीकपुकी वोइक्तु। मिनु फलेक थारशा, लाइशो कोक्के शुइशशा, थाम राप्पाइक्तु। 19 परमप्रभु यावे आ बाक्तीक तारी सुम्तीके यो कोप्ताक्व। परमप्रभु यावेमी मोसा कली दोपा अरेवा, मोपा पाप्तु।

20 मिनु मोसामी परमप्रभु यावे आ अरेशो लोव्र मुशा ब्रेक्शो फुल्लु कबल पशो सन्दोसम कुर पाप्तु। मिनु कबल पशो सन्दोसम कुरतीक कोक्के शुइक्ताक्व। मिनु मेको आ तार सुम्तीकेम सुम्तु। 21 मेको कबल पशो सन्दोस परमप्रभु यावे आ बाक्तीके ओंइशा, फारतीक वामी फारताक्व। परमप्रभु यावेमी मोसा कली दोपा अरेवा, मोपा पाप्तु।

22 मोसामी टेबल कली गुम्तीक ताम्बुम ओंइशा, फारतीक वा आ डोंइती उत्तर गे वोइक्तु। 23 टेबल तारी परमप्रभु यावे आ डोंइती कोइतीक शोब्ले वोइक्तु। परमप्रभु यावेमी मोसा कली दोपा अरेवा, मोपा पाप्तु।

24 टेबल नु एर ओंथ पा दक्खिन गे बत्ती दातीक कली गुम्तीक ताम्बुम वोइक्तु। 25 परमप्रभु यावे आ डोंइती दियारी दातु। मिनु परमप्रभु यावेमी मोसा कली दोपा अरेवा, मोपा पाप्तु।

26 मिनु मोसामी सुन के सेल्शो धूप चोशा चढ़ेतीके कली गुम्तीक ताम्बु डा फारतीक वा आ डोंइती वोइक्तु। 27 मिनु मेकेर ब्रोव्रशो रिना पाइब धूप चोप्तु। परमप्रभु यावेमी मोसा कली दोपा अरेवा, मोपा पाप्तु।

28 नोले ताम्बु डा ओव्रतीकेम फारतीक वा क्युक्तु। 29 मिनु चोशा चढ़ेतीके परमप्रभु यावे आ बाक्तीके गुम्तीक ताम्बु आ ओव्रतीकेमी वोइक्तु। मिनु मेकेर चोशा चढ़ेतीक नु अन्न चढ़ेतीके चढ़ेप्तु। परमप्रभु यावेमी मोसा कली दोपा अरेवा, मोपा पाप्तु।

30 मोसामी गुम्तीक ताम्बु नु चढ़ेतीक आस दातेमी चिक्तीक ठेयब बोस वोइशशा, चिक्चा कली ब्वाक्कुम प्रिंताक्व। 31 मिनु मोसा, हारून नु हारून आ तौपुकीमी आन गुइ खोइली चिक्साक्म। 32 गुम्तीक ताम्बुमी ओव्रशा चढ़ेतीकेम लमानु, आन गुइ खोइली चिक्चा माल्तेक्म। परमप्रभु यावेमी मोसा कली दोपा अरेवा, मोपा पाप्तु।

33 मोसामी गुम्तीक ताम्बु नु चढ़ेतीक आ लाडगा एर ओंथ नेल्ल थरपु हिरशा, आ ओव्रतीके डा फारतीक वा क्युक्तु। मोपा मोसामी गुम्तीक ताम्बु डा गेय नेल्ल थुम्तु।

परमप्रभु आ बाक्तीकेम जाक्शो

34 मिनु गोस्सुमी गुम्तीक ताम्बु सुम्तु। परमप्रभु यावे आ सक्ति नु छेडछेडमी मेको आ बाक्तीक ब्रीत। इजीकीएल ४३:१-९ 35 मिनु मोसा गुम्तीक ताम्बुमी ओव्रने मचब। मारदे हना मेको गोस्स मेको तारी बाक्शा, परमप्रभु यावे आ सक्ति नु छेडछेडमी आ बाक्तीक ब्रीत। गन्ती ७:८९ 36 मेको गोस्स परमप्रभु यावे आ बाक्तीक तारी रे ग्येत्थ बोक्मेनु, इस्राएलीपुकी गाक्चा गोम्तेक्म। प्रस्थान १३:२१; गन्ती ९:१५-२३; गन्ती १०:३४-३६; १राजा ८:१०-११; यसैया ४:५ 37 मेको गोस्स ग्येत्थ मबोक्म सम्म इस्राएली मेक उइ बाक्तेक्म। 38 नाक्ती परमप्रभु यावे आ गोस्स आ बाक्तीक तारी बाक्त। नाक्दो चहिं मेको गोस्स आगाम मी दुम्त। इस्राएली गोरशो रागीम गाक्मा सम्म मोदेशो दुम्स डा दुम्स पा नेल्लेमी ताम्तेक्म।

लेवी

ब्रेक्ब मुर: साइ परमप्रभु यावे आ मुर नु ख्रीस्त सेंसे नोले डा थमा सुइक्बपुकीमी एको किताब मोसामी ब्रेक्शो बाक्ब, देंनीम। मोसामी परमप्रभु यावे आ देंशो नेल्ल ब्रेक्शो बाक्त।

गेना ब्रेक्शो: एको किताब ५० नाक्त गोरशो रागीम गाक्तीक डा लोत्र ला बाक्ब। इस्राएली इजीप्त रे गूशो बर्स निकशी नोले, सीनै डांडा आ नेक्था बाक्तेक्म। मोसामी डांडाम बाक्शा, परमप्रभु यावे आ अरेशो नेल्ल ब्रेक्शो बाक्त। प्रस्थान ४०:१-१७; गन्ती १०:११

मार ब्रेक्शो: मुर दोपा परमप्रभु यावे नु गारचा डा दुम्नीम एको किताबमी ब्रेक्शो बाक्ब।

१. दोपा नु मार चढेचा, लेवी १:- ५:-

२. चढेब आन गेय, लेवी ६:- १०:-

३. ग्रांग्रा दिचा नु ग्रांग्रा मदिचा आ पर्बम शेंशो, लेवी ११:- लेवी १६:-

४. परमप्रभु यावे का बाक्ब। मेको आ नोले ला खोइक्चा, दे ब्रेक्शो बाक्ब। लेवी १७:- लेवी २७:-

चोशा चढेतीक

लेवी २६:१-६

१ मिनू परमप्रभु यावेमी गुम्तीक ताम्बु रे ब्रेशशा मोसा कली २ गे “इस्राएली आन कली ‘इन दाते डा सुइम परमप्रभु यावे कली इन बी ब्यफ, क्यारश भेडा चढेनीनु, आंम इन बगाल रे चढेने।

३ मेको चढेशो बी ब्यफ चोशा चढेतीक बाक्त हना, मेकोमी मारेइ मदुम्शो थमा रिम्शो बाछा चढेचा माल्ब। मेकोमी मेको गुम्तीक ताम्बु आ ओव्रतीकेम चाक्चा माल्ब। मिनू मेको इन पर्बम परमप्रभु आ डोंइती ब्रतीके दुम्ब। लेवी १७:४ ४ मेकोमी आ गुइ चोशा चढेतीक बस्तु आ पिया तारी वोइक्चा माल्ब। मिनू मेको परमप्रभु यावे आ डोंइती ब्रशा मेको मुर आ पर्बम पाप क्याम्तीक गेय बाक्ब। ५ मेकोमी मेको बाछा कली परमप्रभु यावे आ डोंइती क्योरशा साइक्चा माल्ब। मिनू चढेब हारून आ तौपुकीमी मेको हुश चढेतीक आ एर ओंथ बुइक्चा माल्नीम। मेको चढेतीक गुम्तीक ताम्बु आ ओव्रतीकेम बाक्ब। ६ मिनू मेको नोले मेकोमी मेको चोशा चढेतीक आ कुशुल उक्शा टुक्रा टुक्रा पा चेक्चा माल्ब। लेवी ७:८ ७ चढेब हारून आ तौपुकीमी चढेतीक तार मी सुइशशा मेको तार शी गारपाइशशा वोइक्चा माल्नीम। ८ मिनू चढेब हारून आ तौपुकीमी चढेतीके तारी वोइशशा शी आ तार मेको चेक्शो श्ये पिया नु बोंसो गार पा वोइक्चा माल्नीम। ९ मेकोमी मेको आ गा कयी नु खोइली चहिं ब्वाक्कुम मुरचा माल्नीम। मिनू चढेबपुकीमी मेको नेल्ल कली चढेतीकेमी चोचा माल्नीम। मेको परमप्रभु यावे कली आ दाक्शो ब्रोव्रशो रिना पाइशशा मीम चोशा चढेतीके बाक्ब। उत्पत्ती ८:२१; प्रस्थान २९:१८

१० मेको आ चोशा चढेतीक आ बगाल डा क्यारश भेडा बाक्तेक्म हना, मेकोमी मारेइ मदुम्शो थम रिम्शो बोका, सांड चढेचा माल्नीम। ११ मेकोमी परमप्रभु यावे आ डोंइती चढेतीक आ उत्तर गे मेको क्योरशा साइक्चा माल्ब। मिनू चढेब हारून आ तौपुकीमी मेको आ हुश चढेतीक आ एर ओंथ बुइक्चा माल्नीम। १२ मेको चढेबमी मेको चढेशो कली टुक्रा टुक्रा पचा माल्नीम। आ पिया बोंसो सुन्दा चेक्चा, श्ये नु काथा शी तारी गारपाइशशा, चढेतीक डा मी तारी वोइक्चा माल्ब। १३ मेकोमी मेको आ गा कयी नु खोइली चहिं ब्वाक्कुम मुरचा माल्नीम। मिनू चढेबपुकीमी मेको नेल्ल कली चढेतीकेमी चोचा माल्नीम। मेको परमप्रभु यावे कली आ दाक्शो ब्रोव्रशो रिना पाइशशा मीम चोशा चढेतीके बाक्ब।

१४ मिनू परमप्रभु यावे कली चोशा चढेतीके चिक्ब बाक्तेक्म हना, दुकुर कि परवा चढेचा माल्नीम। १५ चढेबमी मेको चढेतीक आ नेक्था मेको आ पिया प्रोइशशा साइक्चा माल्ब। मिनू मेको कली चढेतीकेमी चोचा माल्ब। मिनू आ हुश चहिं चढेतीक आ नेक्था चिरचा माल्ब। १६ मेकोमी मेको आ सोके फेशशा चढेतीक आ पूर्ब गे डा पुलु ताइक्तीकेम ताइक्चा माल्नीम। १७ मेकोमी मेको कली मचेक्थु, फ्रां आस दाते रे चेट्या माल्ब। मिनू चढेबमी चढेतीक डा मी तार डा शीम मेको चोचा माल्ब। मेको परमप्रभु यावे कली आ दाक्शो ब्रोव्रशो रिना पाइशशा मीम चोशा चढेतीके बाक्ब।

2

अन्न चढ़ेतीक

लेवी ६:७-११

1 मिनु सुइ मुरुमी परमप्रभु यावे कली अन्न चढ़ेचा थुं पाप्नु हना, मेको अन्न चढ़ेतीक थम रिम्शो फस बाक्चा माल्ब। मिनु मेकोमी मेकेर तेल लुक्शा, धूप सुप्चा माल्नीम। लेवी ७:१०; गन्ती १५:४ 2 मिनु मेकोमी मेको चढ़ेब हारून आ तौ आन बाक्तीके चाक्चा माल्ब। मिनु चढ़ेबमी मेको तेल नु धूप ब्वाइश्शो रिम्शो फस मुठी का हुइश्शा, मीम चोचा माल्ब। मिनु मेको परमप्रभु यावे कली आ दाक्शो ब्रोव्रशो रिना पाइश्शो मीम चोशा चढ़ेतीके बाक्ब। 3 मेको अन्न चढ़ेशो रे लीशो चहिं हारून नु आ तौ आन के दुम्ब। मेको परमप्रभु यावे कली मीम चोशा चढ़ेतीक डा नेल्ल क्येडा चोव्रखो चोशा चढ़ेतीक बाक्ब। लेवी ६:२२

4 अन्न चढ़ेतीक चाक्चा थुं पाम्तेक्म हना, चोशो शोब्ले चाक्चा माल्नीम। मेको शोब्ले रिम्शो फस के, तेलमी निशा बोरब ओख्ती मसुप्थु चोचा माल्नीम। बटुक तेलमी निशा बोरब ओख्ती मसुप्शो दुम्चा माल्नीम। तेलम मनिशो बाक्त हना, शोब्ले कली तेल खेक्शो बाक्चा माल्ब। लेवी ७:९ 5 मिनु इन चढ़ेतीक अन्न बाक्त हना, तेल ब्वाइश्शो बोरब ओख्ती मसुप्शो रिम्शो फस बाक्चा माल्ब। 6 मेको आइक्च आइक्च सेल्शा, तेल लुक्चा माल्ब। मेको अन्न चढ़ेतीक बाक्ब। 7 इन चढ़ेतीक दिउरेम क्येशो अन्न चढ़ेतीक बाक्त हना, मेको तेलम क्येशो रिम्शो फस के दुम्चा माल्ब। 8 मोपा चोशो क्येशो अन्न चढ़ेतीक परमप्रभु यावे आ बाक्तीक लाइक्चा माल्नीम। मिनु मेको चढ़ेब आन बाक्तीक चाक्मे नोले चढ़ेबमी मेको चढ़ेतीक आ नेक्था चाक्चा माल्ब। 9 मिनु चढ़ेबमी मेको अन्न चढ़ेतीक रे मुठी का हुइश्शा, मेको चढ़ेतीक डा मीम चोचा माल्ब। मेको परमप्रभु यावे कली आ दाक्शो ब्रोव्रशो रिना पाइश्शो मीम चोशा चढ़ेतीके बाक्ब। 10 मेको अन्न चढ़ेतीके आ लीशो चहिं हारून नु आ तौ आन के दुम्ब। मेको परमप्रभु यावे कली मीम चोशा चढ़ेतीक डा नेल्ल क्येडा चोव्रखो चोशा चढ़ेतीक बाक्ब।

11 गेपुकीमी परमप्रभु यावे कली अन्न चढ़ेतीकेमी गेनायो बोरब ओख्ती सुप्चा मदुम्ब। परमप्रभु यावे कली मीम चोशा चढ़ेतीकेमी बोरब ओख्ती नु खुदो गेनायो चोचा मदुम्ब। 12 खुदो नु बोरब ओख्ती सुप्शो चढ़ेतीक लाइश्शा परमप्रभु यावे कली चढ़ेने चाप्नीनी। तन्न मेको कली चढ़ेतीक मीम हुम्चा मदुम्ब। गन्ती १८:१२-१३; २इतिहास ३१:५ 13 गेपुकीमी इन अन्न चढ़ेतीक नेल्ल हिक्सी सुप्शा, हिक्सी डाम्शो सेलीन। इन परमप्रभु आ कबल डा अन्न चढ़ेतीकेमी हिक्सी मडाम्शो मदुम्ब। इन चढ़ेतीक नेल्लेमी हिक्सी सुप्शो चढ़ेचा माल्नीनी। गन्ती १८:१९; २इतिहास १३:५

14 परमप्रभु यावे कली डोंइती मीशो अन्न चढ़ेचा थुं पाइतीनी हना, इन डोंइती मीशो नक बाला आन अन्न मीम क्रोइश्शा चढ़ेन। ब्यवस्था २६:२-११ 15 मेको तारी तेल लुक्शा, धूप वोइक्चा माल्ब। मेको अन्न चढ़ेतीक बाक्ब। 16 मिनु चढ़ेबमी मेको तेल लुक्शा, धूप वोइश्शो रे मुठी का हुइश्शा, मीम चोचा माल्ब। मेको परमप्रभु यावे कली मीम चोशा चढ़ेतीक बाक्ब।

3

दुशा बाक्चा आ पर्बम चढ़ेतीक

लेवी ७:११-२१, २८-३४

1 सुइ आन चढ़ेतीके दुशा बाक्चा आ पर्बम बाक्त हना, मेकोमी बी ब्यफ रे का चढ़ेब हना, परमप्रभु यावे आ डोंइती मारेइ मदुम्शो थम रिम्शो बी कि ब्यफ चढ़ेचा माल्ब। 2 मेकोमी आ गुइ आ चढ़ेतीक बस्तु आ पिया तार वोइक्चा माल्ब। मिनु ग्रुम्तीक ताम्बु आ ओव्रतीक आ डोंइती मेको कली क्योरशा साइक्चा माल्ब। मिनु चढ़ेब हारून आ तौपुकीमी मेको आ हुश लाइश्शा चढ़ेतीक आ एर ओंथ बुइक्चा माल्नीम। 3 मेकोमी दुशा बाक्चा आ पर्बम परमप्रभु यावे कली मीम चोशा चढ़ेतीक चढ़ेचा माल्ब। गा क्यी आ तार डा नु मेको कली गिल्शो बोंसो नेल्ल चढ़ेचा माल्ब। 4 आ चिच निम्फा नु मेको आ तार नु आ क्रातोम बाक्शो बोंसो, नु आइदीम क्येप्शो बोंसो नेल्ल ग्रुंइचा माल्नीम। 5 मिनु हारून आ तौपुकीमी मेको नेल्ल कली चढ़ेतीके डा मी तार डा शीम वोइश्शा, चोचा माल्नीम। मेको परमप्रभु यावे कली आ दाक्शो ब्रोव्रशो रिना पाइश्शो मीम चोशा चढ़ेतीक बाक्ब।

6 मेकोमी आ दुशा बाक्चा आ पर्बम परमप्रभु यावे कली चढ़ेतीके क्यारश भेडा रे का चढ़ेब हना, मेकोमी मारेइ मदुम्शो थम रिम्शो क्यारश भेडा बाक्त हना यो, बोका सांड बाक्त हना यो, चढ़ेचा माल्ब। 7 मेको आ चढ़ेतीक भेडा

का बाक्त हना, मेको परमप्रभु यावे आ डोंइती चाक्चा माल्ब। 8 मेकोमी आ गुइ आ चढ़ेतीक भेडा आ पिया तार वोइक्चा माल्ब। मिनु गुम्तीक ताम्बु आ ओव्रतीक आ डोंइती मेको कली क्योरशा साइक्चा माल्ब। मिनु चढ़ेब हारून आ तौपुकीमी मेको आ हुश लाइशशा चढ़ेतीक आ एर ओंथ ब्रुइक्चा माल्नीम। 9 मेकोमी दुशा बाक्तीक आ पर्बम चढ़ेतीक भेडा आ बोंसो परमप्रभु यावे कली मीम चोशा चढ़ेचा माल्ब। मेको बोंसो पाइशशो मीलु नु क्रातो आ नेक्था रे नेल्ल गुंइचा माल्नीम। गा क्यी आ तार डा नु मेको कली गिल्शो बोंसो नेल्ल चढ़ेचा माल्नीम। 10 आ चिच निम्फा, मेको आ तार डा क्रातो डा बोंसो नेल्ल नु आ आइदीम क्येप्शो बोंसो नेल्ल गुंइचा माल्नीम। 11 मिनु चढ़ेबमी मेको परमप्रभु यावे कली मीम चोशा जचा थोव्रक चढ़ेतीक चढ़ेचा माल्नीम।

12 मिनु दुशा बाक्चा आ पर्बम परमप्रभु यावे कली चढ़ेतीक क्यारश का बाक्त हना, मेकोमी मेको परमप्रभु यावे आ डोंइती चाक्चा माल्ब। 13 मेकोमी आ गुइ मेको क्यारश आ पिया तारी वोइक्चा माल्ब। मिनु मेको कली गुम्तीक ताम्बु आ डोंइती क्योरशा साइक्चा माल्ब। मिनु हारून आ तौपुकीमी मेको आ हुश चढ़ेतीक आ एर ओंथ ब्रुइक्चा माल्नीम। 14 मिनु मेकोमी मेको आ चढ़ेतीके परमप्रभु यावे कली मीम चोशा चढ़ेचा माल्ब। गा क्यी सुम्शो नु गिल्शो बोंसो नेल्ले, 15 आ चिच निम्फा, मेको आ तार डा क्रातो डा बोंसो नेल्ले नु आ आइदीम क्येप्शो बोंसो नेल्ल गुंइचा माल्नीम। 16 मिनु चढ़ेबमी ब्रोव्रशो रिना पाइशशो जचा थोव्रक मेको मीम चोशा चढ़ेतीकेमी चढ़ेचा माल्ब। बोंसो नेल्ले परमप्रभु यावे के बाक्ब। 17 मिनु गेपुकीमी बोंसो नु हुश मब्वने। इन नोले डा पाला नेल्ल आन कली गेपुकी ते बाक्तीनी हना यो, गेना हना यो लीब अरेतीक बाक्ब' दे इस्राएली आन कली देनो" दे परमप्रभु यावेमी मोसा कली दंत। लेवी ७:२३, २७; लेवी १७:१०-१४; उत्पत्ती ९:४; ब्यवस्था १२:१६, २३; प्रेरित १५:२०-२९

4

पाप पशो आ पर्बम चढ़ेतीक

1 मिनु परमप्रभु यावेमी मोसा कली 2 "गे इस्राएली आन कली 'परमप्रभु यावेमी मपचा, दे शेंशो सुइ मुरुमी मतुइक्थु पाप पाप्तु हना, 3 मिनु तेल लुकुशो चढ़ेबमी पाप पा, मुर आन कली दोस ताइब सेल्लु हना, मेकोमी आ पशो पाप आ पर्बम मारेइ मदुम्शो थम रिम्शो ब्यफ का परमप्रभु यावे आ डोंइती पाप पशो आ पर्बम चढ़ेचा माल्ब। 4 मेकोमी मेको ब्यफ कली गुम्तीक ताम्बु आ ओव्रतीक आ नेक्था परमप्रभु यावे आ डोंइती चाक्चा माल्ब। मेकोमी आ गुइ मेको ब्यफ आ पिया तारी वोइक्चा माल्ब। मिनु मेको ब्यफ कली परमप्रभु यावे आ डोंइती साइक्चा माल्ब। 5 मिनु मेको तेल लुकुशो चढ़ेबमी ब्यफ आ हुश इक्का हुइशशा गुम्तीक ताम्बुमी चाक्चा माल्नीम। 6 मिनु चढ़ेबमी आ ब्रेप्चो हुशेम खुम्शा, मेको हुश परमप्रभु यावे आ ताम्बु आ आगा डा चोव्रखो कोठा आ बारेशो वाम आ नेक्था परमप्रभु यावे आ डोंइती ७ खेयप ब्रुइक्चा माल्ब। लेवी ९:९ 7 मिनु नोले चढ़ेबमी मेको हुश गुम्तीक ताम्बु आ आगामी बाक्शो धूप चढ़ेतीके आ ग्रोव्रपुकीमी खेक्चा माल्ब। मेको ब्रोव्रशो रिना पाइशशो धूप परमप्रभु यावे आ डोंइती चढ़ेतीके बाक्ब। मिनु लीशो हुश नेल्ले गुम्तीक ताम्बु आ ओव्रतीक डा चोशा चढ़ेतीक आ पुंम मोइक्चा माल्ब। प्रस्थान ३०:१, ६; प्रस्थान ४०:६ 8 मेकोमी पाप आ पर्बम चढ़ेशो ब्यफ आ बोंसो नेल्ल शोल्ला माल्ब। गा क्यी आ तार डा नु मेको कली गिल्शो बोंसो, 9 आ चिच निम्फा, मेको आ क्रातो तार डा बोंसो नेल्ले नु आ आइदीम क्येप्शो बोंसो नेल्ल गुंइचा माल्नीम। 10 दुशा बाक्चा आ पर्बम चढ़ेशो ब्यफ आ बोंसो गुंइशो खोदेंशो पा शोल्ला माल्ब। मिनु चढ़ेबमी मेको मीम चोशा चढ़ेतीकेमी चढ़ेचा माल्ब। लेवी ८:१७ 11 तन्न ब्यफ आ कुशुल, मेको आ श्ये नेल्ल, मेको आ पिया, खोइली नु मेको आ गा क्यी गोबर सुन्दा, 12 ब्यफ आ लीशो नेल्ले मुर बाक्तीके रे डोन चोव्रखो पुलु ताइक्तीकेमी लाइशशा, शी तार वोइशशा चोचा माल्नीम। लेवी ६:४

13 इस्राएल डा मुर नेल्लेमी मतुइक्थु पाप पशो बाक्तेक्म हना, परमप्रभु यावेमी मपचा दे शेंशो मारेइ पशो बाक्तेक्म हना, मेको पाप मेको मुर आन दातेमी खुइशशो बाक्त हना यो, मेकोपुकी दोस ताइब दुम्नीम। गन्ती १५:२२-२६ 14 मिनु मेको आन पशो पाप गूमेनु, मेको इस्राएली नेल्लेमी पाप आ पर्बम चढ़ेतीके ब्यफ चाक्शा गुम्तीक ताम्बु आ डोंइती जाक्चा माल्नीम। 15 मिनु इस्राएल डा खाल्पा नेल्लेमी परमप्रभु यावे आ डोंइती मेको आन गुइ ब्यफ आ पिया तारी वोइक्चा माल्नीम। मिनु मेको ब्यफ परमप्रभु यावे आ डोंइती साइक्चा माल्नीम। 16 मिनु नोले तेल लुकुशो चढ़ेबमी मेको ब्यफ आ हुश इक्का गुम्तीक ताम्बु आगा चाक्चा माल्नीम। 17 मिनु चढ़ेबमी मेको आ ब्रेप्चो हुशेमी खुम्शा, परमप्रभु यावे आ डोंइती बारेशो वा आ पुंमी ७ खेयप ब्रुइक्चा माल्ब। 18 मिनु नोले मेकोमी गुम्तीक ताम्बु आगाम बाक्शो धूप चढ़ेतीक आ ग्रोव्रपुकीम परमप्रभु यावे आ डोंइती खेक्चा माल्ब। मिनु लीशो हुश नेल्ल गुम्तीक ताम्बु

आ ओव्रतीके आ डोंइती बाक्शो चोशा चढेतीक आ पुंम मोइक्चा माल्ब। 19 मेकोमी मेको आ बोंसो नेल्ल शोल्शा, चढेतीकेम चोचा माल्ब। 20 मेकोमी पाप आ पर्बम चढेशो ब्यफ कली दोदेशो पामे, मेको ब्यफ कली यो मोदेशोन पचा माल्ब। मोपा चढेबमी मेको आन पर्बम पाप क्याम्तीक गेय पाइब। मिनु मेकोपुकीम माफ ताइनीम। 21 मेकोमी मेको ब्यफ कली मुर बाक्तीके रे डोन गुंइशा लाइक्चा माल्ब। डोंइती डा ब्यफ चोशा खोदेशो पा चोचा माल्ब। मेको इस्राएली आन पाप आ पर्बम चढेशो बाक्ब। लेवी ४:११-१२

22 मिनु सासन पाइब कामी मतुइक्थु, परमप्रभु यावेमी मपचा, दे शेंशो पाप पाप्तु हना, मेको दोस ताइब दुम्ब। 23 मिनु मेको आ पशो पाप तुइक्तमे नोले, मेकोमी मारेइ मदुम्शो थम रिम्शो बोका का चाक्चा माल्ब। 24 मिनु मेकोमी आ गुइ मेको बोका आ पिया तार वोइक्चा माल्ब। मिनु तेकेर परमप्रभु यावे आ डोंइती चोशा चढेतीक साइक्नीमी, मेकेर रेन मेको साइक्चा माल्ब। मेको पाप आ पर्बम चढेतीके बाक्ब। 25 मिनु चढेबमी आ ब्रेप्चो हुशेमी खुम्शा, चोशा चढेतीक आ ग्रोवपुकीम खेक्चा माल्ब। मेको लीशो हुश चोशा चढेतीक आ पुंम मोइक्चा माल्ब। 26 मेको आ बोंसो नेल्ले चढेतीक आ तार चोचा माल्ब। मेको दुशा बाक्तीक आ पर्बम चढेशो बोंसो खोदेशो पा चढेतीकेमी चोचा माल्ब। मोपा चढेबमी मेको आ पाप आ पर्बम पाप क्याम्तीक गेय पाइब। मिनु मेको माफ ताइब।

27 मिनु मुर आन दाते डा कामी मतुइक्थु पाप पाप्तु हना, परमप्रभु यावेमी मपचा, दे शेंशो पाप्तु हना, मेको दोस ताइब दुम्ब। 28 मिनु मेको आ पशो पाप तुइक्तमे नोले, मेकोमी आ पशो पाप आ पर्बम चढेचा कली मारेइ मदुम्शो थम रिम्शो क्यारश का चढेचा कली चाक्चा माल्ब। गन्ती १५:२७-२८ 29 मिनु मेकोमी आ गुइ मेको पाप आ पर्बम चढेतीक तार वोइक्चा माल्ब। मिनु मेको पाप आ पर्बम चढेतीके कली मेको चोशा चढेतीक आ नेक्था साइक्चा माल्ब। 30 मिनु चढेबमी आ ब्रेप्चो हुशेमी खुम्शा, चोशा चढेतीक आ ग्रोवपुकीम खेक्चा माल्ब। मेको लीशो हुश चोशा चढेतीक आ पुंम मोइक्चा माल्ब। 31 मेकोमी आ बोंसो नेल्ल दुशा बाक्चा आ पर्बम चढेशो आ बोंसो खोदेशो पा शोल्चा माल्ब। मिनु चढेबमी मेको चढेतीकेमी चोशा परमप्रभु यावे आ दाक्शो ब्रोवशो रिना पाइक्चा कली चोचा माल्ब। मोपा चढेबमी मेको आ पाप आ पर्बम पाप क्याम्तीक गेय पाइब। मिनु मेको माफ ताइब। लेवी ३:१४-१५

32 मेकोमी आ पाप आ पर्बम चढेचा कली भेडा चाक्तु हना, मारेइ मदुम्शो थम रिम्शो भेडा चाक्चा माल्नीम। 33 मिनु मेकोमी आ गुइ मेको पाप आ पर्बम चढेतीक तार वोइक्चा माल्ब। मिनु तेकेर चोशा चढेतीक साइक्नीमी, मेकेर मेको पाप आ पर्बम चढेतीके साइक्चा माल्ब। 34 मिनु चढेबमी आ ब्रेप्चो हुशेमी खुम्शा, चोशा चढेतीक आ ग्रोवपुकीम खेक्चा माल्ब। मेको लीशो हुश चोशा चढेतीक आ पुंम मोइक्चा माल्ब। 35 मेकोमी आ बोंसो नेल्ल दुशा बाक्चा आ पर्बम चढेशो आ बोंसो खोदेशो पा शोल्चा माल्ब। मिनु चढेबमी मेको चढेतीकेमी अरु चोशा चढेतीक नु परमप्रभु यावे कली चोचा माल्ब। मोपा चढेबमी मेको आ पशो पाप आ पर्बम पाप क्याम्तीक गेय पाइब। मिनु मेको माफ ताइब।

5

पाप आ पर्बम चढेतीक

1 मिनु मुर कामी मार मार तशा तुइश्शा यो, सांकछी दुम्चा कली ब्रेत्मेनु, सांकछी दुम्चा कली मजाक्बा, मेकोमी आ तशो तुइश्शो मदेंत हना, मेको आ पर्बम दोस ताइब दुम्ब। न्यायाधीस १७:२; हितोपदेस २९:२४ 2 मिनु सुइमी ग्रांग्रा दिशो थोव्रक, बेक्शो ब्वाकी डा जन्तु, बेक्शो बस्तु भाव, बेक्शो ग्रांग्रा दिशो आइक्च ग्रेक्शा गाक्ब जन्तु थिप्तु हना, मेकोमी मतुइक्ताक्व हना यो, मेको ग्रांग्रा दिशो दुम्शो बाक्ब। मिनु दोस ताइब दुम्शो बाक्ब। 3 मिनु मेकोमी मुर आन ग्रांग्रा दिशो थोव्रक थिप्तु हना, तेकोइ मुर आन ग्रांग्रा दिशो सेल्शो थोव्रक थिप्तु हना, मेकोम मेको मतुइक्ताक्व हना यो, मेको दोस ताइब दुम्ब। गन्ती १९:१३, २० 4 मिनु सुमी मारेइ रिम्शो मरिम्शो ममिम्थु कसम जाप्तु हना, मारेइ मतुइक्थु कसम जाप्तु हना, मिनु मेको रे मेको लोव्र खुइश्शो बाक्त हना यो, मेकोमी तुइक्ता नोले मेको दोस ताइब दुम्ब। 5 मिनु मेको मुर आ पशो पाप तुइक्ता नोले, मेकोमी आ पशो पाप शोव्रचा माल्ब। लेवी १६:२१; गन्ती ५:७; यहोसु ७:२० 6 मेकोमी परमप्रभु यावे आ डोंइती आ पशो पाप आ पर्बम चढेचा कली आ बगाल रे भेडा बाक्त हना यो, क्यारश बाक्त हना यो, का चाक्चा माल्ब। मिनु चढेबमी मेको आ पशो पाप आ पर्बम पाप क्याम्तीक गेय पचा माल्ब।

7 तन्न मेकोमी भेडा चाक्ने मचाप्तु हना, मेको आ पशो पाप क्याम्तीक गेय पचा कली ढुकुर निक्शी कि परवा निक्शी परमप्रभु यावे आ डोंइती चाक्चा माल्ब। मेको का पाप आ पर्बम चढेचा कली नु का चोशा चढेचा कली

चाकचा माल्ब। 8 मेकोमी मेको चढेब आन बाक्तीक चाकचा माल्नीम। मिनु चढेबमी का कली पाप आ पबर्म डोंइती चढेचा माल्ब। मिनु मेको कली आ शुर रोप्चा माल्ब। तन्न मेको कली प्रोइक्चा मदुम्ब। 9 मिनु मेको चढेबमी चढेशो परवा आ हुश चढेतीक आ एर ओंथ बुइक्चा माल्ब। मिनु लीशो हुश चढेतीक आ पुंम चिरचा माल्ब। 10 मिनु चढेबमी अर्को परवा चहिं परमप्रभु यावेमी डोंइती देशो खोदेशो पा चोशा चढेतीक चढेचा माल्ब। मोपा मेको चढेबमी मेको आ पाप आ पबर्म पाप क्याम्तीक गेय पचा माल्ब। मिनु मेकोम माफ ताइब।

11 तन्न दुकुर निक्शी नु परवा निक्शी यो चाक्ने मचाप्टु हना, मेकोमी मार पाप पशो बाक्मे, मेको पाप आ पबर्म एफाह का डा १० भाग थम रिम्शो फस चाकचा माल्ब। मेकोमी मेको फस तार तेल लुकचा नु धूप वोइक्चा मदुम्ब। मारदे हना मेको पाप आ पबर्म चढेतीके बाक्ब। एफाह पुक्तीके का बाक्ब। एफाह का २२ लिटर रिक्ब। मेको डा १० भाग २ लिटर नु इक्का खोइ खोदेशो बाक्ब। 12 मेकोमी मेको चढेब आन बाक्तीक चाकचा माल्ब। मिनु चढेबमी मेको मिन्चा कली मुठी का हुइश्शा, परमप्रभु यावे कली मीम चोशा चढेतीकेम अरु नु चोचा माल्ब। मेको पाप आ पबर्म चढेतीक बाक्ब। 13 मोपा मेको चढेबमी मेको आ पाप आ पबर्म पाप क्याम्तीक गेय पाइब। मिनु मेकोमी माफ ताइब। मेको रे लीशो चहिं अन्न चढेशो खोदेशो पा चढेब आन के दुम्ब' दे इस्राएली आन कली देनो" दे परमप्रभु यावेमी देंत। लेवी २:३

गारचा आ पबर्म चढेतीक

लेवी ७:१-१०

14 मिनु लेंशा परमप्रभु यावेमी मोसा कली 15 "सुइ मुरुमी प्रेंशा, परमप्रभु यावे आ देशो मटिथु, पाप पाप्टु हना, मेको आ बगाल रे मारेइ मदुम्शो थम रिम्शो ताम्बु डा चांदी के शेकेलम फाइक्चा कली सांड का मेको पाप आ पबर्म चढेचा कली परमप्रभु यावे आ डोंइती चाकचा माल्ब। मेको गारचा आ पबर्म चढेतीक बाक्ब। शेकेल का ११.५ ग्राम बाक्ब। चांदी नु सुन के क्येट बाक्त। 16 मेकोमी गारचा कली प्रेंशो बाक्त हना, परमप्रभु यावे कली गेतीकेम ५ भाग तेम्चा माल्ब। मिनु मेको चढेब कली गेचा माल्ब। मिनु चढेबम मेको पाप गारचा आ पबर्म चढेशो सांड लाइश्शा पाप क्याम्तीक गेय पचा माल्ब। मिनु मेको माफ ताइब दुम्ब। लेवी ५:२३-२४; लेवी २२:१४; लेवी २७:१३;

17 सुइ मुरुमी परमप्रभु यावेमी मपचा, दे शेंशो पाप्टु हना, मेकोमी मेको मतुइक्ताक्व हना यो, मेको दोस ताइब दुम्शो बाक्ब। मिनु मेको सजाइ ताइब दुम्ब। 18 मेकोमी चढेब आन बाक्तीकेम मारेइ मदुम्शो थम रिम्शो ठीक क्येट लाइब सांड का आ बगाल रे गारचा आ पबर्म चढेतीक चढेचा कली चाकचा माल्ब। मिनु चढेबमी मेको आ मतुइक्थु पशो पाप आ पबर्म पाप क्याम्तीक गेय पचा माल्ब। मिनु मेकोम माफ ताइब। 19 मेको गारतीक आ पबर्म चढेतीक बाक्ब। मेको परमप्रभु यावे आ डोंइती थमा पा दोस ताइब दुम्शो बाक्ब" दे मोसामी मुर आन कली देंत।

6

चढेब आन पचा माल्शो

1 मिनु लेंशा परमप्रभु यावेमी मोसा कली 2 "सुइ मुरुमी परमप्रभु यावे कली मटिथु, मेको आ डोंइती आ नेक्था डा मुर नु जाकटी वोइश्शो थोव्रक आ पबर्म जोल पाप्टु हना, सुइम गेनुड, दे कबल पा यो मगेप्टु हना, कि मेको थोव्रक रोइक्ताक्व हना, कि जोल पा आ नेक्था डा मुर आ मारेइ थोव्रक आंम के सेल्लु हना, गन्ती ५:६-८ 3 आ नेक्था डा मुर आन मार मार रोइक्ताक्व हना, जाम्शो थोव्रक थिश्शा यो, मथिदु, दे जोल पाप्टु हना, जोल पा कसम जाप्टु हना, मेकोमी पाप पशो बाक्ब। 4 मेको मोपा पाप पा दोस ताइब दुम्ब। मिनु मेकोमी आ रोइश्शो, आ खुइ पशो, आ ताक्शो थोव्रक मलेत्ताक्व हना, आ थिश्शो आ पबर्म जोल पाप्टु हना, इजीकीएल ३३:१५ 5 तेको थोव्रक आ पबर्म जोल पा कसम जशो बाक्मे, मेकोमी मेको थोव्रक नेल्लेमी ५ भाग तेम्शा, आ होव्रप कली लेशशा गेचा माल्ब। मेकोमी दोस आ पबर्म चढेतीक नाक्ती मेको सु के बाक्मे मेको आ नेक्था डा मुर कली लेशशा गेचा माल्ब। 6 मिनु मेकोमी परमप्रभु यावे आ डोंइती ठीक पा हिक्शो क्येट कि आ बगाल रे मारेइ मदुम्शो थम रिम्शो सांड का आ मरिम्शो पशो आ पबर्म चढेब आ नेक्था परमप्रभु यावे आ बाक्तीकेमी चढेचा कली चाकचा माल्ब। 7 मिनु मेको चढेबमी मेको आ पबर्म परमप्रभु यावे आ डोंइती पाप क्याम्तीक गेय पचा माल्ब। मिनु मेकोमी मार आ पबर्म दोस तशो बाक्मे, मेकोम माफ ताइब" देंत।

चोशा चढेतीक आ पबर्म अरेशो

8 मिनु परमप्रभु यावेमी मोसा कली 9 “गे हारून नु आ तौ आन कली चोशा चढेचा आ पर्वम अरेमी। मेको चोशा चढेतीक नाकदो रे सुनी सम्म चढेतीके शी तार बाक्या माल्ब। मिनु चढेतीक डा मी यो ब्रस डा ब्रस बाक्या माल्ब। 10 मिनु चढेबमी आ सुती के आगा फेक्तीक वा नु सुती के फेक्तीके फेक्चा माल्ब। मिनु मेकोमी मीम दाक्शो चोशा चढेशो आ पुलु हुइशशा चढेतीक आ नेक्था वोइक्चा माल्ब। प्रस्थान २८:४२ 11 मिनु नोले मेकोमी आ फेक्शो वा पुइशशा, अर्को वा फेक्शा, मेको पुलु ताम्बु रे गुंइशा चोव्रखो पुलु ताइक्तीकेमी लाइशशा ताइक्चा माल्ब। 12 चढेतीक डा मी चहिं ब्रस डा ब्रस बाक्या माल्ब। मेको काप्चा मदुम्ब। मिनु सुनी कुस कुस चढेबमी मेकेर शी तेम्चा माल्ब। मिनु चोशा चढेतीके मीम दुशा बाक्तीक आ पर्वम चढेशो आ बोंसो चोचा माल्ब। 13 चढेतीक डा मी ब्रस डा ब्रस बाक्या माल्ब। मेको गेनायो काप्चा मदुम्ब।

अन्न चढेशो आ पर्वम अरेशो

14 एको अन्न चढेतीक आ पर्वम अरेशो लोव्र बाक्ब। हारून आ तौपुकीमी परमप्रभु यावे आ डोंइती चढेतीक आ नेक्था चाक्चा माल्नीम। 15 मिनु मेकोपुकीम अन्न चढेतीके, तेल नु धूप आ तार वोइशशो रिम्शो फस रे मुठी का लाइशशा, मिम्चा कली परमप्रभु यावे कली आ दाक्शो ब्रोव्रशो रिना पाइशशो चढेतीकेमी चोचा माल्नीम। 16 मिनु लीशो हारून नु आ तौपुकीम जचा माल्नीम। तन्न मेको चोव्रखो बाक्तीकेमी बोरब ओरुती मसुप्थु, चोशा जचा माल्नीम। मेकोपुकीमी गुम्तीक ताम्बु आ लाडगाम बाक्शा, जचा माल्नीम। 17 मेकेर बोरब ओरुती सुप्शा शोब्ले चोचा मदुम्ब। आं कली मीम चोशा चढेशो रे मेको आन कली आं गेशो भाग बाक्ब। मेको पाप आ पर्वम चढेतीके नु गारपाइक्चा आ पर्वम चढेतीके खोदेंशो मेको थम चोव्रखो बाक्ब। 18 हारून आ खिं डा वोंइश मुर नेल्लेमी गेना हना यो परमप्रभु यावे कली मीम चोशा चढेशो रे जचा माल्नीम। परमप्रभु यावे कली मीम चोशा चढेशो रे मेको आ खिं डा मुर नेल्ल आन कली गेशो आन भाग बाक्ब। मेको थीब नेल्ल चोव्रखो दुम्नीम” देंत।

19 मिनु परमप्रभु यावेमी लेंशा मोसा कली 20 “हारून नु आ तौपुकीम तेल लुकचा पुंइसे नाक्ती परमप्रभु यावे कली मार नु दोपा चढेचा माल्नीम देंशा हना, एफाह का डा १० भाग थम रिम्शो फस नाकदो आधा नु सुनी आधा गेना हना यो चढेचा माल्नीम। एफाह पुक्तीके का बाक्ब। एफाह का २२ लिटर रिक्ब। मेको डा १० भाग २ लिटर नु इक्का खोइ ४ माना खोदेंशो बाक्ब। लेवी ७:३७; प्रस्थान २९:- 21 मेको शोब्ले तेलम चोचा माल्ब। गे मेको कली शुश तेलम चोशा, अन्न चढेतीके टुक्रा टुक्रा पा परमप्रभु यावे कली आ दाक्शो ब्रोव्रशो रिना पाइशशो चढेतीके चढेचा माल्नीम। 22 मोपा हारून आ नोले आ तेल लुकशो तौमी मोदेंशो पचा माल्ब। मेको गेना हना यो परमप्रभु यावे केन बाक्ब। मिनु मेको नेल्ल चोचा माल्ब। 23 मिनु चढेब आन अन्न चढेतीक नेल्ल चोचा माल्नीम। मेको जचा मदुम्ब” देंत।

पाप क्याम्चा कली चढेतीके

24 मिनु परमप्रभु यावेमी मोसा कली 25 “गे हारून नु आ तौ आन कली मार देंचा माल्नेवे देंशा हना “पाप क्याम्चा कली चढेतीक आ पर्वम अरेशो बाक्ब। पाप क्याम्चा कली चढेतीक परमप्रभु यावे आ डोंइती चोशा चढेतीक कली साइक्तीकेमी साइक्चा माल्ब। मेको थम चोव्रखो बाक्ब। लेवी ४:- 26 मेको पाप क्याम्चा कली चढेशो चढेबमी मेको रे ब्वचा माल्ब। मेकोपुकीमी गुम्तीक ताम्बु डा लाडगाम बाक्शा, ब्वचा माल्नीम। 27 मेको श्ये मारम थीबा, मेको यो चोव्रखो दुम्ब। मेको आ हुश वाम प्रेक्ताक्व हना, गेपुकीम मेको वा चोव्रखो बाक्तीकेमी मुरचा माल्नीनी। 28 मेको श्ये तेको खप के ग्योंबुम लोप्नीमी, मेको ग्योंब प्रोल्शा ताइक्चा माल्नीम। मेको कांसा के ग्योंबुम लोप्शो बाक्त हना, मेको सिक्स ब्वाक्कुम शेक्चा माल्नीम। 29 मेको चढेब आन दाते डा वोंइश मुर नेल्लेमी मेको ब्वचा माल्नीम। मेको थम चोव्रखो बाक्ब। 30 तन्न तेको पाप क्याम्चा कली चढेतीके आ हुश पाप क्याम्तीक गेय पचा कली गुम्तीक ताम्बु आ आगाम चाक्नीमी, मेको ब्वचा मदुम्ब। मेको चोचा माल्नीम।

7

गारचा आ पर्वम चढेशो

1 गारचा आ पर्वम चढेतीक थम चोव्रखो बाक्ब। एको दोपा पचा माल्ब देंशा हना, लेवी ५:१४-२६ 2 चोशा चढेतीक तेकेर साइक्नीमी, मेकेरेन गारचा आ पर्वम चढेतीक साइक्चा माल्ब। मेको आ हुश, चढेतीक आ एर ओंथ बुइक्चा माल्ब। 3 मेको आ बोंसो नेल्ले, बोंसो पाइशशो मीलु, गा क्यी सुम्शो बोंसो, लेवी ३:९-१० 4 चिच निम्फा, मेको आ तार डा नु क्रातो डा बोंसो, चिच सुन्दा आइदीम क्येप्शो बोंसो नेल्ल शोल्शा, चढेचा माल्ब। 5 चढेबमी परमप्रभु यावे

कली मीम चोशा चढेचा माल्ब। मेको गारचा आ पर्वम चढेतीके बाक्ब। 6 मेको चढेब आन खिं डा वोंइश मुर नेल्लेमी मेको ब्वचा माल्नीम। मेको चोत्रखो बाक्तीके ब्वचा माल्नीम। मेको थम चोत्रखो बाक्ब।

7 गारचा आ पर्वम चढेतीके पाप आ पर्वम चढेतीक खोदेशो बाक्ब। पतीक गेय यो कान बाक्ब। मिनु तेको चढेबम मेको पाप क्याम्तीक गेय पवा, मेको मेको केन दुम्ब। 8 मिनु तेको चढेबमी मुर आन चाक्शो चोशा चढेतीक चढेबा, मेको चोशा चढेशो आ कुशुल यो मेको केन दुम्ब। लेवी १:६ 9 मिनु चुप्लुम चोशो, दिउरेमी क्येशो नु तांवाम चोशो चढेशो नेल्ले मेको चढेब केन दुम्ब। लेवी २:४, ५, ७ 10 तन्न अरु अन्न चढेतीके तेलम ब्वाइशो नु मब्वाइशो नेल्ल हारून नु आ तौ आन कली योक्चा कली बाक्ब। लेवी २:१-३

दुशा बाक्चा आ पर्वम चढेशो

11 मिनु परमप्रभु यावे कली दुशा बाक्चा आ पर्वम चढेतीके दोपा चढेचा माल्ब, दे अरेशो बाक्ब देशा हना, लेवी ३:- 12 सुइमी परमप्रभु यावे कली “गे रिम्शो पाइब बाक्नीनी” दे ठेयब सेल्शा चढेप्टु हना, मेकोमी तेलम निशो बोरब ओरुत्ती मसुप्शो बटुक, बोरब ओरुत्ती मसुप्शो तेल खेक्शो शोब्ले नु थम रिम्शो फस के सेल्शो तेल वोइशो शोब्ले चढेचा माल्नीम। लेवी १९:५-८; लेवी २२:२९-३० 13 मेकोमी “गे रिम्शो पाइब बाक्नीनी” दे ठेयब सेल्शा नु दुशा बाक्चा आ पर्वम चढेशो नु बोरब ओरुत्ती सुप्शो शोब्ले यो चढेचा माल्ब। 14 मेकोमी चढेशो शोब्ले नेल्ल रे का का पा परमप्रभु यावे कली क्युकशा चढेचा माल्ब। दुशा बाक्चा आ पर्वम चढेतीके आ हुश तेको चढेबम बुइक्बा, मेको केन दुम्ब। 15 “गे रिम्शो पाइब बाक्नीनी” दे ठेयब सेल्शा नु दुशा बाक्चा आ पर्वम चढेशो श्ये मेको चढेशो नाक्तीन नेक्चा माल्नीम। सुनी सम्म मारेइ हेंचा मदुम्ब। 16 मेको चढेशो कसम जशो आ पर्वम नु ग्येरशा चढेशो बाक्त हना, मेको चढेशो नाक्ती ब्वचा माल्नीम। आ लीशो आ दीसा ब्वचा दुम्ब। 17 आ नित्थ नाक्त सम्म लीशो चढेशो श्ये चहिं मीम चोचा माल्ब। 18 मेको दुशा बाक्तीक आ पर्वम चढेशो आ श्ये आ नित्थ नाक्त सम्म सुइम ब्वाप्टु हना, मेको काइ मदुम्ब। मेको मुरुमी यो मचढेशो खोदेशो दुम्ब। मेको श्ये ब्वचा ग्रांग्रा दित्चा डा बाक्ब। मेको ब्वाइब मुर दोस ताइब।

19 मारेइ ग्रांग्रा दिशो थोत्रकम थिशो श्ये ब्वचा मदुम्ब। मेको चोचा माल्ब। तन्न सुइ चोत्रखो दुम्शो बाक्तेकम हना, अरु श्ये ब्वने चाप्नीम। 20 तन्न सुइ ग्रांग्रा दिशो दुम्शा, परमप्रभु यावे कली दुशा बाक्चा आ पर्वम चढेशो श्ये ब्वाप्टु हना, मेको आ खिं डा मुर रे तिल्ला पुंइसीब। 21 मिनु इन दातेमी सुमी मारेइ मारेइ ग्रांग्रा दिशो थोत्रक थिशा, मुर आन ग्रांग्रा दिशो, ग्रांग्रा दिशो जन्तु कि मारेइ ग्रांग्रा दिशो थिप्टु हना, नोले परमप्रभु यावे कली दुशा बाक्चा आ पर्वम चढेशो श्ये ब्वाप्टु हना, मेको आ खिं डा मुर रे तिल्ला पुंइसीब’ दे माइक्मी” दे परमप्रभु यावेमी मोसा कली देंत।

बोंसो नु हुश ब्वचा मदुम्ब

22 मिनु लेंशा परमप्रभु यावेमी मोसा कली 23 “गे इस्राएली आन कली ‘गेपुकीम ब्यफ, भेडा नु क्यारश आन बोंसो काइ मब्वने। लेवी ३:१७ 24 आंमा बेक्शो, मारेइमी साइशो बस्तु भाव आन बोंसो अर्को मारेइ गेयम चलेने चाप्नीनी। तन्न गेपुकीमी मेको ब्वचा मदुम्ब। प्रस्थान २२:३० 25 मिनु इन दातेमी सुमी परमप्रभु यावे कली मीम चोशा चढेतीके आ बोंसो ब्वाइबा, मेको आ खिं डा मुर रे तिल्ला पुंइसीब। 26 गेपुकी ते बाक्तीनी हना यो, तेकोइ चिक्ब नु बी ब्यफ, क्यारश भेडा आन हुश ब्वचा मदुम्ब। 27 मिनु सुमी हुश ब्वाइबा, मेको आ खिं डा मुर रे तिल्ला पुंइसीब’ माइक्मी” देंत।

चढेब आन भाग

28 मिनु परमप्रभु यावेमी मोसा कली 29 “गे इस्राएली आन कली ‘सुमी परमप्रभु यावे कली गे रिम्शो पाइब बाक्नीनी, दे ठेयब सेल्शा चढेतीक चाड सेल्बा, मेकोमी आ चढेशो रे परमप्रभु यावे आ बाक्तीकेम आंमान चाक्चा माल्ब। 30 मेकोमी परमप्रभु यावे कली मीम चोशा चढेचा कली बोंसो नु कुथु चाक्चा माल्ब। मिनु मेको कुथु परमप्रभु यावे कली क्युकशा चढेतीक चढेचा माल्ब। प्रस्थान २९:२४ 31 मिनु चढेबमी मेको बोंसो कली मीम चोचा माल्ब। तन्न मेको कुथु हारून नु आ तौ आन के दुम्ब। 32 मिनु इन दुशा बाक्चा आ पर्वम चढेतीके रे आ ग्युरा फिला चढेब कली क्युकशा चढेचा कली गेचा माल्नीनी। लेवी ९:२१ 33 हारून आ तौ तेकोम दुशा बाक्चा आ पर्वम चढेतीक चढेबा नु हुश बुइक्बा, ग्युरा फिला मेको के दुम्ब। 34 मारदे हना गो इस्राएली आन “गे रिम्शो पाइब बाक्नीनी” दे ठेयब सेल्शा चढेशो कुथु नु ग्युरा फिला गेपुकी रे ताक्शा चढेब हारून नु मेको आ तौ आन कली गेना हना यो कली गेतामी’ दे माइक्मी।

35 हारून नु आ तौपुकी तेको नाक्त रे परमप्रभु यावे कली चढ़ेब दुम्मा, मेको नाक्ती रेन परमप्रभु यावे कली मीम चोशा चढ़ेशो चढ़ेतीक रे मेको आन भाग नेतामी। 36 तेको नाक्ती रे मेकोमी मेको आन कली तेल लुक्ता, मेको नाक्त रेन मेको आन कली इस्राएलीपुकी रे ततीक भाग परमप्रभु यावेमी 'मेको आन के बाक्ब' दंशो बाक्ब। मेको आन कली गेना हना यो नेल्ल आन पाला सम्म आन भाग बाक्ब, देनो" देंत।

37 "मेको चोशा चढ़ेतीके, अन्न चढ़ेतीके, पाप आ पर्बम चढ़ेतीके, गारचा आ पर्बम चढ़ेतीके, नक गेय पचा आ पर्बम चढ़ेतीके नु परमप्रभु यावे कली 'गे रिम्शो पाइब बाक्नीनी' दे ठेयब सेल्शा चढ़ेतीक आ पर्बम पतीके बाक्ब। 38 मिनु परमप्रभु यावेमी मेको लोत्र मोसा कली सीनै डांडाम अरेशो बाक्ब। मेको नाक्ती परमप्रभु यावेमी सीनै डा गोरशो रागीम इस्राएली आन कली आन चढ़ेतीक आ बाक्तीक चाक्कीन" दे अरेशो बाक्ब।

8

हारून नु आ तौ चढ़ेब दुम्शो
प्रस्थान २९:-

1 मिनु परमप्रभु यावेमी मोसा कली 2 "गे हारून नु आ तौ आन कली, चढ़ेब आन फेक्तीक वा, आन कली लुक्चा कली तेल, पाप आ पर्बम चढ़ेतीक ब्यफ, सांड निक्शी नु बोरब ओरुक्ती मसुप्शो शोब्ले चाक्को। प्रस्थान २८:३९-४३ 3 मुर नेल्ल आन कली गुम्तीक ताम्बु आ ओव्रतीकेम पुक्मी" देंत। 4 मिनु मोसामी परमप्रभु यावेमी दोदेशो पा अरेवा, मोदेशो पा पाप्तु। मिनु मुरपुकी गुम्तीक ताम्बु आ ओव्रतीकेम बुक्तेकम।

5 मिनु मोसाम बुक्शो मुर आन कली "परमप्रभु यावेमी 'पावो' दे अरेशो लोत्र एकोन बाक्ब" देंत। 6 मिनु मोसामी हारून नु आ तौ आन कली चाक्शा चिक्ताक्मी। 7 मिनु मेकोमी हारून कली आगा वा फेक्ताक्व। मिनु किप्शुर किप्ताक्व। मिनु मेकोमी आ तार डा फेक्तीक फेक्ताक्व। मेकोमी क्रातो आ डोंइती क्युक्तीक वा क्युक्ताक्व। मिनु रिम्शो पा प्रोव्रशो बुटा आप्शो किप्शुर नु क्रातो डोंइती क्युक्तीक झोला मेको आ तार किप्ताक्व। 8 मिनु नोले मेकोमी हारून कली कुचुम रेलतीक झोला रेलताक्व, मिनु मेको आगा "ऊरीम नु थुम्मीम" कुर पाप्तु। ऊरीम नु थुम्मीम कली छेडछेड नु निसाफ पतीके देंसीब। परमप्रभु यावे आ देंशो कोंइब बाक्ब। प्रस्थान २८:३० 9 मिनु मेको आ पियाम गुप्तीके गुप्ताक्व। मिनु सुन के मुशो कुप्फीम पांडतीके "परमप्रभु यावे कली ला" दे मेको आ डोंइती गे पांडताक्व। परमप्रभु यावेमी मोसा कली दोदेशो पा अरेवा, मोदेशो पा पाप्तु। प्रस्थान २८:३६-३८; लेवी ३९:३०

10 मेको नोले मोसामी लुक्तीक तेल चाक्शा परमप्रभु यावे आ बाक्तीके नु मेकेर बाक्शो मारेइ मारेइ आन कली बुइशशा, "परमप्रभु यावे केन बाक्ब" दे चोव्रखो सेल्लु। 11 मिनु मेकोमी तेल इक्का चढ़ेतीकेम ७ खेयप बुइक्ताक्व। मोपा चढ़ेतीके, मेकेर बाक्शो चढ़ेचा कली माल्तीक नेल्ले नु चिक्तीक ठेयब ग्योंब नु आ नाइक्तीके, नेल्ल आन कली परमप्रभु यावे के सेल्चा कली तेल बुइक्ताक्मी। 12 मिनु मेकोमी हारून आ पियाम लुक्तीक तेल लुक्शा, मेको कली परमप्रभु यावे कली ला गेय पाइब सेल्लु। 13 मिनु मोसामी हारून आ तौ आन कली चाक्पाइशशा, आगा वा फेक्ताक्मी। मिनु किप्शुर किप्शा पियाम गुप्तीके गुप्ताक्मी। परमप्रभु यावेमी मोसा कली दोदेशो पा अरेवा, मोदेशो पा पाप्तु।

14 मिनु नोले मोसामी पाप आ पर्बम चढ़ेतीक ब्यफ चाक्तु। मिनु हारून नु आ तौपुकीम मेको पाप आ पर्बम चढ़ेतीक ब्यफ आ पिया तारी आन गुइ वोइक्तेकम। लेवी ४:१-१२ 15 मिनु मोसामी मेको ब्यफ कली साइक्तु। मिनु मेकोमी मेको इक्का हुश लाइशशा आ ब्रेचोमी चढ़ेतीक एर ओंथ डा ग्रोव्रम खेक्शा, चढ़ेतीक कली परमप्रभु यावे कली ला, चोव्रखो सेल्लु। मिनु लीशो हुश चहिं चढ़ेतीक आ पुंम मोइक्तु। मोपा मेको चढ़ेतीक कली पाप क्याम्तीक गेय पचा, दे चोव्रखो सेल्लु। 16 मिनु मोसामी गा क्यी गिल्शो बोंसो नेल्ल, आइदी क्येप्शो बोंसो नु चिच निम्फा नु आ बोंसो चढ़ेतीकेम चोप्तु। 17 मिनु ब्यफ, मेको आ कुशुल, आ श्ये नु गोबर मुर आ बाक्तीक क्येडा डोन मीम चोप्तु। परमप्रभु यावेमी मोसा कली दोदेशो पा अरेवा, मोदेशो पा पाप्तु।

18 मिनु नोले मोसामी चोशा चढ़ेतीक सांड चाक्तु। मिनु हारून नु आ तौपुकीमी आन गुइ मेको सांड आ पिया तार वोइक्तेकम। लेवी १:१०-१३ 19 मिनु मोसामी मेको सांड कली क्योरतु। मिनु मेकोमी आ हुश चढ़ेतीक एर ओंथ बुइक्ताक्व। 20 मिनु मोसामी मेको सांड कली टुक्रा टुक्रा पा चेक्तु। मेको आ पिया, चेक्शो श्ये नु बोंसो नेल्ल चोप्तु। 21 मेकोमी गा क्यी नु फिला मुरतु। मोपा मोसामी मेको सांड नेल्ल चढ़ेतीकेमी चोप्तु। मेको परमप्रभु यावे कली ब्रोव्रशो रिना पाइशशा मीम चोशा चढ़ेशो बाक्ब। मिनु परमप्रभु यावेमी मोसा कली दोदेशो पा अरेवा, मोदेशो पा पाप्तु।

22 मिनु नोले मोसामी अर्को चढेतीक सांड चाक्तु। मेको गेय गोचा कली चढेतीक डा सांड बाक्त। मिनु हारून नु आ तौपुकीम आन गुइ मेको सांड आ पिया तार वोइक्तेक्म। 23 मिनु मोसामी मेको सांड कली क्योरतु। मिनु मेकोमी मेको आ हुश हारून आ ग्युरा नोफा आ फेनेम, आ ग्युरा गुइ डा बोंग्ये नु आ ग्युरा खोइल डा बोंग्येमी खेक्ताक्व। 24 मिनु मोसामी हारून आ तौ आन कली चाक्पाइक्तु। मिनु मेकोमी मेको आन ग्युरा नोफा आन फेनेम, आन ग्युरा गुइ डा बोंग्ये नु आन ग्युरा खोइल डा बोंग्येमी खेक्ताक्व। मिनु मोसामी मेको हुश कली चढेतीके आ एर ओंथ बुइक्ताक्व। लेवी १७:११ 25 मिनु मेकोमी मेको सांड आ बोंसो, मेको बोंसो पाइशो मीलु, गा क्यीम गिल्शो बोंसो, आइदीम क्येप्शो बोंसो, चिच निम्फा नु मेक डा बोंसो नु ग्युरा फिला लाइक्तु। 26 मिनु परमप्रभु यावे आ डोंइती बाक्शो बोरब ओरूती मसुप्शो मार मार आ डालो रे बोरब ओरूती मसुप्शो हिरशो शोब्ले का, तेलम खुम्शो शोब्ले का नु बाबर का गुंइशा, मेको बोंसो नु ग्युरा फिला तार वोइक्तु। 27 मिनु मेको नेल्ल लाइशशा हारून नु आ तौ आन गुइमी वोइक्तु। मिनु परमप्रभु यावे आ डोंइती हिम्शा चढेतीके चढेप्तु। 28 मिनु मोसामी मेको आन गुइ रे लाइशशा, चोशा चढेशो आ तारी चोप्तु। मेको गेय गोचा कली चढेतीके परमप्रभु यावे कली ब्रोवशो रिना पाइशो मीम चोशा चढेतीक बाक्त।

29 मिनु मोसामी मेको सांड आ कुथु लाइशशा, परमप्रभु यावे आ डोंइती हिम्शा चढेतीके चढेप्तु। मेको गेय गोचा कली चढेशो सांड आ श्ये मोसा आ भाग दुम्त। परमप्रभु यावेमी मोसा कली दोदेशो पा अरेवा, मोदेशो पा पाप्तु।

30 मिनु मोसामी लुक्तीक तेल नु चढेतीकेम वोइशशो हुश लाइशशा, हारून नु आ तौ आन फेक्शो वाम बुइक्ताक्व। मोपा मोसामी हारून नु मेको आ फेक्शो वा, आ तौपुकी नु मेको आन फेक्शो वा नेल्ल परमप्रभु यावे कली ला गेय पाइब, दे चोवखो सेल्लु।

31 मिनु मोसाम हारून नु आ तौ आन कली “गे मेको श्ये कली गुम्तीक ताम्बु आ ओव्रतीकेम लोपीन। मिनु गेय गोचा कली चढेशो डालो डा शोब्ले नु मेक उइ जने ब्वने। आं देंशो खोदेंशो पा जचा ब्वचा मालनीनी। 32 हेंशो श्ये नु शोब्ले गे मीम चोचा मालनीनी। 33 मिनु नोले गे ७ नाक्त सम्म, इन कली गेय गोचा कली चढेशो ७ नाक्त मगाम सम्म गुम्तीक ताम्बु आ ओव्रतीक रे लाडगा मलने। मारदे हना ७ नाक्त मजाक्दीम सम्म इन गेय गोचा कली चढेतीक गेय ला थुम्सीब। 34 मुलाक्त मार पडा, मेको परमप्रभु यावेमी अरेशो इन कली पाप क्याम्तीक गेय बाक्त। 35 गेपुकी ७ नाक्त सम्म नाक्दो नाक्ती गुम्तीक ताम्बु आ ओव्रतीकेमी बाक्चा मालनीनी। गे परमप्रभु यावेमी अरेशो पने। मो मपाइतीनी हना, गे बेक्नीनी। मारदे हना आं कली मोदें अरेशो बाक्ब” दे माइक्तीमी। 36 मिनु परमप्रभु यावेमी मोसा रे पा अरेशो नेल्ल हारून नु आ तौपुकीम पाम्तेक्म।

9

हारून नु आ तौ आन गेय

1 मिनु ८ नाक्ती मोसामी हारून, आ तौ नु इस्राएल डा खाल्पा आन कली ब्रेत्ताक्मी। लेवी ८:३३ 2 मिनु मेकोमी हारून कली “गे पाप आ पर्बम चढेचा कली मारेइ मदुम्शो थम रिम्शो बाछा का नु चोशा चढेचा कली मारेइ मदुम्शो थम रिम्शो सांड का चाक्शा परमप्रभु यावे आ डोंइती चढेवो। 3 मिनु इस्राएली आन कली ‘गेपुकीमी पाप आ पर्बम चढेचा कली बोका का नु चोशा चढेचा कली बर्स का दुम्शा, मारेइ मदुम्शो थम रिम्शो बाछा का नु मारेइ मदुम्शो थम रिम्शो पाठा का चाक्कीन। 4 मिनु परमप्रभु यावे आ डोंइती दुशा बाक्चा आ पर्बम चढेचा कली ब्यफ का, सांड का नु तेलम निशो अन्न चढेतीक यो चाक्कीन। मारदे हना मुलाक्ती परमप्रभु यावेमी इन कली तपांडसीब’ माइक्मी” देंत।

हारूनम आंम आ पर्बम चढेशो

5 मिनु मोसामी अरेशो खोदेंशो पा मेकोपुकीमी मारेइ मारेइ गुम्तीक ताम्बु आ डोंइती चाक्तेक्म। मिनु मुर नेल्ले परमप्रभु यावे आ डोंइती जाक्शा राप्तेक्म। 6 मिनु मोसामी “गेपुकीमी परमप्रभु यावेमी अरेशो पचा माल्लो गेय एकोन बाक्ब। मिनु परमप्रभु यावे आ छेडछेडम इन कली तपांडसीब” देंत।

7 मिनु मोसाम हारून कली “चढेतीक आ नेक्था जाक्शा, इ पाप आ पर्बम चढेतीक नु इ चोशा चढेतीक चढेवो। मिनु आंम इ पर्बम नु मुर आन पर्बम पाप क्याम्तीक गेय पावो। परमप्रभु यावेमी अरेशो खोदेंशो पा मुर आन चाक्शो चढेतीक चढेशा, मुर आन पर्बम पाप क्याम्तीक गेय पावो” देंत। लेवी १६:६, ११, १५; हिब्रू ५:३; हिब्रू ७:२७

8 मिनु हारून चढेतीक आ नेक्था जाक्शा, आ पाप आ पर्बम चढेतीक बाछा क्योरतु। 9 मिनु हारून आ तौपुकीमी मेको आ हुश चाक्तेक्म। मिनु मेकोमी आ ब्रेप्चो हुशेम खुम्शा चढेतीक आ ग्रोवपुकीम खेक्ताक्व। मिनु लीशो हुश

कली चढ़ेतीक आ पुंम मोइवतु। 10 मिनु मेकोमी पाप आ पर्बम चढ़ेशो आ बोंसो, चिच नु आइदीम क्येप्शो बोंसो चढ़ेतीकेम चोप्तु। परमप्रभु यावेमी मोसा कली दोदेशो पा अरेवा, मोदेशो पा हारूनमी पाप्तु। लेवी ४:८-१२; लेवी ८:१४-१७ 11 तन्न श्ये नु कुशुल चहिं मुर आन बाक्तीके क्येडा डोन चोप्तु।

12 मिनु नोले हारूनमी चोशा चढ़ेतीक क्योरतु। मिनु मेको आ तौपुकीमी मेको आ हुश चाक्शा गेम्तेकम। मिनु मेकोमी मेको चढ़ेतीक आ एर ओंथ ब्रुइक्ताकव। लेवी १:१०-१३ 13 मिनु मेकोपुकीमी मेको चोशा चढ़ेतीके टुक्रा टुक्रा पा चेक्शा, पिया सुन्दा चाक्शा, मेको कली गेम्तेकम। मिनु हारूनमी मेको चढ़ेतीकेमी चोप्तु। 14 मिनु मेकोमी गा क्यी नु खोइल मुरशा, चोशा चढ़ेतीके नु चोप्तु।

हारूनम अरु आन पर्बम चढ़ेशो

15 मिनु नोले हारूनमी मुर आन पर्बम चढ़ेतीक चाक्शा, मेको आन पाप आ पर्बम चढ़ेशो बोका क्योरतु। मिनु डोंइती डा खोदेशो पा पाप आ पर्बम चढ़ेतीके चढ़ेप्तु।

16 मेको नोले चोशा चढ़ेतीक चाक्शा, अरेशो खोदेशो पा चढ़ेप्तु। 17 मिनु अन्न चढ़ेतीक चाक्शा, मुठी का हुइशशा, सुनी डा चोशा चढ़ेतीक नु चढ़ेप्तु।

18 मिनु हारूनमी मुर आन कली दुशा बाक्चा आ पर्बम चढ़ेतीके ब्यफ नु सांड क्योरतु। मिनु हारून आ तौपुकीम हुश चाक्शा, मेको कली गेम्तेकम। मिनु मेकोमी चढ़ेतीक आ एर ओंथ ब्रुइक्ताकव। 19 मिनु ब्यफ नु सांड आस बोंसो, बोंसो पाइशो मीलु, गा क्यी गिल्लो बोंसो, चिच निम्फा नु आइदीम क्येप्शो बोंसो लाइक्तेकम। 20 मिनु डोंइती कुथु तार वोइक्तेकम। नोले बोंसो चढ़ेतीकेम चोम्तेकम। 21 मिनु मोसाम अरेशो खोदेशो पा हारूनमी कुथु नु ग्युरा फिला चहिं परमप्रभु यावे आ डोंइती क्युक्शा हिम्शा चढ़ेतीके चढ़ेप्तु। लेवी ७:३०-३४;

22 मिनु हारूनमी आ गुइ मुर आन गे पोक्शा, आसीक गेम्तीमी। मोपा पाप आ पर्बम चढ़ेतीके, चोशा चढ़ेतीके नु दुशा बाक्चा आ पर्बम चढ़ेतीके चढ़ेशा, मेको उइ तोंइसाकव।

23 मिनु मोसा नु हारून गुम्तीक ताम्बु आगा ओव्रताकस। मिनु गूशा मुर आन कली आसीक गेम्ताकस। मिनु परमप्रभु यावे आ छेडछेड मुर नेल्लेमी ताम्तेकम। प्रस्थान १६:१०; प्रस्थान ४०:३४ 24 मिनु परमप्रभु यावे आ डोंइती रे मी गूशा, चढ़ेतीकेम बाक्शो चोशा चढ़ेतीक नु मेक बाक्शो बोंसो नेक्तु। मिनु मुरपुकीमी मेको तशा, ठेयब सेंदा पा ग्येरसीशा, खुम्की पा बाप्तेकम। न्यायाधीस ६:२१; १राजा १८:३८; १इतिहास २१:२६; २इतिहास ७:१

10

नादाब नु अबीहुम मटिशो

1 मिनु हारून आ तौ नादाब नु अबीहुम आस थनौरो लाइशशा, मी कुर पाम्ताकस। मिनु मी आ तारी धूप वोइक्ताकस। मोपा मेको निक्शी परमप्रभु यावेमी “अरु मी मलाइक्चा” दे अरेशो लोव्र मटिम्स, मेको परमप्रभु यावे आ डोंइती चढ़ेम्ताकस। प्रस्थान ६:२३; प्रस्थान २८:१; प्रस्थान ३०:९ 2 मिनु परमप्रभु यावे आ डोंइती रे मी गूशा, मेको आस कली ग्यु दाक्तु। मोपा मेको निक्शी परमप्रभु यावे आ डोंइती बेक्ताकस। 3 मिनु मोसामी हारून कली “परमप्रभु यावेमी देशो ‘आं नेक्था बाक्ब आन कली गो नेल्ल क्येडा ठेयब बाक्नुड’ दे कोइनुड। मिनु नेल्ल मुर आन डोंइती गो ठेयब सेल्चा पुंइसीनुड” देंत। मिनु हारून सिक्सी पा बाक्त।

4 मोसामी हारून आ बकान्छा उज्जीएल आ तौ एल-साफान नु मीशाएल आस कली ब्रेशशा “इस लोकब आस कली ताम्बु रे कुरशा गुंइदीस” देंत। प्रस्थान ६:२२ 5 मिनु मेको निक्शी जाक्शा, आस फेक्शो वा रे क्युक्शा मोसा आ देशो खोदेशो पा कुरशा गुंइताकस।

6 मिनु मोसाम हारून नु आ तौ एलाजर नु इथामार आन कली “रोंका पा इन पिया डा चां मप्रेक्कीन। इन वा मखाक्कीन। मो पाइतीनी हना, गेपुकी बेक्नीनी। मिनु परमप्रभु यावे आ गाइक्तीक नेल्ल मुर आन तारी जुक्ब। तन्न परमप्रभु यावे आ सोइशो मीम दुप्शा बेक्ब आस पर्बम इन खिं डा मुर नु इस्साएली डा मुर नेल्ल रोंका पचा दुम्ब। लेवी २१:१० 7 गेपुकी चहिं गुम्तीक ताम्बु रे लाडगा मलने। मो पाइतीनी हना, बेक्नीनी। मारदे हना परमप्रभु यावे आ लुक्शो तेल गे इन तार बाक्ब” देंत। मिनु मेकोपुकीमी मोसा आ देशो खोदेशो पाम्तेकम।

चढ़ेब आन कली लेंशा अरेशो

8 मिनू नोले परमप्रभु यावेमी हारून कली 9 “गे नु इ तौपुकी ग्रुम्तीक ताम्बुम ओवनीनु, अडगुर शांबु नु अरु दुक्तीक थोव्रक मतूडीन। तूतीनी हना, गेपुकी बेक्नीनी। मेको गेना हना यो इन पतीक दुम्ब। इजीकीएल ४४:२१; होसे ४:११; आमोस २:८ 10 आं थोव्रक नु मुर आ थोव्रक तिल्चा माल्नीनी। ग्रांग्रा दिशो थोव्रक नु चोव्रखो थोव्रक यो तिल्चा माल्नीनी। इजीकीएल २२:२६; इजीकीएल ४४:२३ 11 मिनू गो मोसा कली अरेशो नेल्ल, गे इस्राएली आन कली शेंचा माल्नीनी” देंत।

12 मिनू मोसामी हारून नु आ लीशो तौ एलाजर नु इथामार आन कली “परमप्रभु यावे कली मीम चोशा अन्न चढेशो रे लीशो बोरब ओरूती मसुप्थु चढेतीके आ नेक्था बाक्शा जने। मारदे हना मेको थम चोव्रखो बाक्ब। लेवी ९:१७,१८ 13 गेपुकीम मेको कली चोव्रखो बाक्तीकेमी जने। मारदे हना परमप्रभु यावे कली मीम चोशा चढेशो चढेतीक रे मेको गे नु इ तौ इन भाग बाक्ब। आं कली मोदें अरेशो बाक्ब। लेवी २:३ 14 तन्न क्युकशा चढेशो कुथु नु हिम्शा चढेशो फिला चहिं गे इन तौ नु इन तमीम चोव्रखो बाक्तीकेमी बाक्शा ब्वने। मारदे हना मेको इस्राएली आन दुशा बाक्चा आ पर्बम चढेशो रे गे नु इ तमी तौ इन भाग बाक्ब। लेवी ७:३४ 15 मिनू हिम्शो फिला, क्युकशो कुथु नु मीम चोशा चढेशो मार मार आन बोंसो परमप्रभु यावे आ डोंइती हिम्शा चढेचा कली चाक्चा माल्नीनी। मिनू परमप्रभु यावेमी अरेशो खोदेंशो पा गेना हना यो, गे नु इ तमी तौ इन भाग दुम्ब” देंत। लेवी ९:२०-२१

16 मिनू मोसामी पाप आ पर्बम चढेशो बोका माल्तु। तन्न मेको चोने थुम्शो बाक्माक्त। मिनू मेकोमी हारून आ लीशो तौ एलाजर नु इथामार आस कली गाइश्शा, लेवी ९:१५ 17 “गेपुकीमी मारदे पाप आ पर्बम चढेशो कली चोव्रखो बाक्तीकेम मब्वनी? मारदे हना मेको थम चोव्रखो बाक्ब। मिनू परमप्रभु यावेमी मुर आन पर्बम पाप क्याम्तीक गेय पचा, दे मेको इन कली गेशो बाक्ब। 18 मेको आ हुश ताम्बु आ आगामी मलाइश्शो बाक्त। गेपुकीम थमा पा आं देंशो खोदेंशो पा चोव्रखो बाक्तीकेम मेको श्ये ब्वचा माल्शो ननी” देंत। लेवी ६:१९, २२

19 मिनू हारूनमी मोसा कली “नेनीन, मुलाक्ती मेकोपुकीमी आन पाप आ पर्बम चढेतीक नु आन चोशा चढेतीक परमप्रभु यावे आ डोंइती चढेम्तेक्म। मिनू मुलाक्त गो गिश श्येत जशो बाक्नुड। गो मुलाक्ती मेको पाप आ पर्बम चढेशो ब्वशो नड हना, मार, मेको परमप्रभु यावे आ डोंइती रिम्शो दुम वा डा?” देंत। 20 मिनू मेको लोव्र नेंशा मोसा सिक्सी पाप्तु।

11

ग्रांग्रा दिशो नु मदिशो ब्यवस्था १४:३-२०

1 मिनू परमप्रभु यावेमी मोसा नु हारून आस कली 2 “गे इस्राएली आन कली ‘रागीम बाक्शो जन्तु, बस्तु भाव, चिक्ब तेक तेको ब्वचा दुम्बा, तेक तेको ब्वचा मदुम्बा, मेको शेंदीस। मिनू जन्तु नु बस्तु भाव तेको ब्वने चाप्नीनी देंशा हना, प्रेरित १०:१२-१५; कलस्सी २:१६; १तिमोथी ४:३-४ 3 गेपुकीमी आन गेंच जेशो नु शोंया हेक्बपुकी ब्वने चाप्नीनी।

4 मो हना यो गेंच जेशो ला कि शोंया हेक्ब दुम्शो ला ब्वचा मदुम्ब। दलओंठ मेको शोंया हेक्ब, तन्न आ गेंच मजेशो बाक्ब। मेको इन कली ग्रांग्रा बाक्ब। 5 मिनू शापन मब्वने। मारदे हना मेकोमी शोंया हेक्ब, तन्न आ गेंच मजेशो बाक्ब। मेको इन कली ग्रांग्रा बाक्ब। 6 मिनू खरायो मब्वने। मारदे हना मेकोमी शोंया हेक्ब, तन्न आ गेंच मजेशो बाक्ब। मेको इन कली ग्रांग्रा बाक्ब। 7 मिनू पोव्र मब्वने। मारदे हना मेको आ गेंच जेशो बाक्ब, तन्न शोंया महेक्ब। मेको इन कली ग्रांग्रा बाक्ब। यसैया ६५:४; यसैया ६६:१७ 8 गेपुकीमी मेको आन श्ये मब्वने। आन सिनु यो मथिने। मेको इन कली ग्रांग्रा बाक्ब।

9 ब्वाक्कु, खोला नु समुन्द्रम बाक्बपुकीमी फ्रां नु कत्ला पाइश्शो ब्वने चाप्नीनी। 10 तन्न समुन्द्र नु खोलाम बाक्ब फ्रां नु कत्ला मपाइश्शो ब्वचा मदुम्ब। मेको आइक्च ब्वाक्कुम बाक्ब जन्तु नु अरु नेल्ल सेल जन्तु इन कली ग्रांग्रा बाक्नीम। 11 मेको इन कली ग्रांग्रा बाक्तीके, मेको आन श्ये मब्वने। मिनू मेको आन सिनु इन कली ग्रांग्रा बाक्नीम। 12 मिनू ब्वाक्कुम बाक्ब नेल्ले फ्रां नु कत्ला मपाइश्शो जन्तु, इन कली ग्रांग्रा बाक्नीम।

13 मिनू चिक्ब आन दातेमी इन कली तेको तेको ग्रांग्रा दिशो नु ब्वचा मदुम्शो बाक्नीम देंशा हना, ककाकुली, गिद, क्येर गिद, 14 लल ब्वारदे नु नेल्ल खाल डा क्येर ब्वारदे, लेवी ५:२ 15 खद नेल्ले, 16 ठेयब हुहुचील, ग्रीब बुक्स, ब्वाक्कुम बाक्ब चिक्ब, मिनू बाज नेल्ले, 17 आइक्च हुहुचील, ब्वाक्कु डा खदी, भुल्का, 18 बुश हुहुचील, गोरशो

रागी डा हुहुचीलपुकी, डांड ब्वाइब ब्वारदे, 19 सारस, बोकुला नेल्ल, फाप्रे चिक्ब नु पकातिकती मब्वने। यसैया ६६:१७

20 फ्रां पाइश्शो, ४ ओटा खोइलीम ग्रेशा गाक्ब जन्तु नेल्ल इन कली ग्रांग्रा बाक्नीम। 21 मिनु ४ ओटा खोइलीम ग्रेशा गाक्ब, फ्रां पाइश्शो खपीम प्रेक्चा कली खोइल बोइश्शो नेल्ल मालेपुकी ब्वने चाप्नीनी। 22 गे सल्ला माले, खुइले माले, किथ्रो माले नु फटेडग्रापुकी ब्वने चाप्नीनी। 23 ४ ओटा खोइल पाइश्शो नु फ्रां पाइश्शो नेल्ल इन कली ग्रांग्रा बाक्नीम।

24 मेकोपुकी रे गेपुकी ग्रांग्रा दिशो दुम्नीनी। सुमी मेको आन सिनु थीबा, मेको नां मरिक्म सम्म ग्रांग्रा दिशो दुम्ब। 25 मिनु सुमी मेको सिनु रे इच्का कुरबा, मेकोमी आ वा मुरचा माल्ब। मिनु नां मरिक्म सम्म ग्रांग्रा दिशो दुम्ब।

26 मिनु तेको जन्तु आन गेंच जेशो बाक्बा, तन्न मब्राक्शो बाक्बा, मेको शोया महेक्बा, मेको इन कली ग्रांग्रा बाक्ब। मेको थीब नेल्ल ग्रांग्रा दिशो दुम्नीम। 27 मिनु ब्रेचोम थेक्शा ४ ओटा खोइलीम गाक्ब जन्तु नेल्ल इन कली ग्रांग्रा बाक्नीम। मेको आन सिनु थीब नेल्ल नां मरिक्म सम्म ग्रांग्रा दिशो दुम्नीम। 28 मेको सुमी आन सिनु कुरब मेकोमी आ वा मुरचा माल्ब। मिनु मेको नां मरिक्म सम्म ग्रांग्रा दिशो दुम्ब। मेको इन कली ग्रांग्रा दिशो बाक्नीम।

29 मिनु खपीम ग्रेशा गाक्ब आइक्च जन्तु तेको ग्रांग्रा दिशो बाक्नीम देंशा हना, कोचोम्बो, यिच, ठेयब नु आइक्च खोते नेल्ले, 30 माउसुली, घोरी, भाले मुडग्रा, बाल्वाम बाक्ब खोते नु रड फाइक्ब खोतेपुकी, 31 मेको ग्रेशा गाक्ब नेल्ल इन कली ग्रांग्रा बाक्नीम। सुमी मेको आन सिनु थीबा, मेको नां मरिक्म सम्म ग्रांग्रा दिशो दुम्ब। 32 मोदेंशो जन्तु बेक्शा, मार तारी दोक्बा, मेको थोत्रक ग्रांग्रा दिशो दुम्ब। शी के सेल्शो, वा, कुशुल, भाङग्रा नु मारेइ के बाक्ल, मेको थोत्रक ब्वाक्कुम नुच्चा माल्ब। मिनु मेको नां मरिक्म सम्म ग्रांग्रा दिशो दुम्ब। मिनु नोले ठीक दुम्ब। 33 मिनु मेको मार मार खप के बोसुम दोक्त हना, मेको बोस नेल्ल ग्रांग्रा दिशो दुम्ब। गेपुकीमी मेको बोस प्रोल्चा माल्नीनी। 34 मेको आगाम ब्वाक्कु बाक्त हना, मिनु मेको ब्वाक्कुम थिशो मारेइ मारेइ जचा थोत्रक ग्रांग्रा दिशो दुम्ब। मिनु मेको बोसुम बाक्शो तूचा थोत्रक नेल्ल ग्रांग्रा दिशो दुम्नीम। 35 मेको आन सिनु मारेइ थोत्रकम दोक्त हना, चुप्लुम बाक्त हना यो, मेको प्रेशा ताइक्चा माल्ब। मेको ग्रांग्रा दिशो बाक्ब। मेको गेना हना यो इन कली ग्रांग्रा बाक्ब। 36 मो हना यो ब्वाक्कु बुक्तीके, कुवा नु ब्वाक्कु वोइक्तीके चोत्रखो बाक्नीम। तन्न मेको आन सिनु थीब चहिं ग्रांग्रा दिशो बाक्ब। 37 मेको आन श्ये शोक्तीक वांचेरम दोक्त हना, मेको चहिं चोत्रखो लीब। 38 तन्न मेको आ सिनु शोक्चा कली ब्वाक्कुम वोइश्शो वांचेर तारी दोक्त हना, मेको इन कली ग्रांग्रा दिशो दुम्ब।

39 इन बस्तु भाव बेक्त हना, सुमी मेको कली थीब, मेको नां मरिक्म सम्म ग्रांग्रा दिशो दुम्ब। 40 मेको सुम ब्वाइबा, मेकोमी आ वा मुरचा माल्ब नु नां मरिक्म सम्म ग्रांग्रा दिशो दुम्ब। मेको सिनु कुरबमी यो आ वा मुरचा माल्ब। मिनु मेको नां मरिक्म सम्म ग्रांग्रा दिशो दुम्ब। प्रस्थान २२:३०

41 खपीम ग्रेशा गाक्ब जन्तु नेल्ल ग्रांग्रा दिशो बाक्नीम। मेको ब्वचा मदुम्ब। 42 कोत्रजीम ग्रेशा गाक्ब, ४ ओटा खोइलीम गाक्ब नु शुश खोइल पाइश्शो खपीम गाक्ब जन्तुपुकी ब्वचा मदुम्ब। मारदे हना मेकोपुकी ग्रांग्रा दिशो बाक्नीम। 43 मिनु गेपुकी तेकोइ ग्रेशा गाक्ब जन्तु रे ग्रांग्रा दिशो मदुमीन। मेकोपुकी रे इन कली ग्रांग्रा दिशो मसेलीन। 44 मिनु गो परमप्रभु यावे, इन परमप्रभु नड। मोपतीके गेपुकी ग्रांग्रा दिशो मदुम्थु मेको रे डोन बाक्कीन। मारदे हना गो ग्रांग्रा दिशो रे डोन बाक्नुड। गेपुकी खपीम ग्रेशा गाक्ब जन्तु रे ग्रांग्रा दिशो मदुमीन। लेवी १९:२ 45 गो परमप्रभु यावे, इन कली इजीप्त रागी रे गुंइशा एक चाक्ब, इन परमप्रभु नड। मोपतीके गेपुकी ग्रांग्रा दिशो रे डोन बाक्कीन। मारदे हना गो ग्रांग्रा दिशो रे डोन बाक्नुड' देनो" देंत।

46 एको रागी डा जन्तु, चिक्ब नु ब्वाक्कुम गाक्ब नु खपीम ग्रेशा गाक्ब जन्तु आन पर्बम अरेतीक बाक्ब। 47 मिनु ग्रांग्रा दिशो नु ग्रांग्रा मदिशो, ब्वचा दुम्ब नु मदुम्ब जन्तु आन पर्बम तिलीन।

12

सुत्केरी दोपा चोत्रखेचा, दे अरेशो

1 मिनु परमप्रभु यावेमी मोसा कली 2 “इस्राएली आन कली ‘कोत्रज कुरशा तौ थीब मीश मुर ७ नाक्त सम्म ग्रांग्रा दिशो बाक्ब। मेको आ रां ब्रोलम नाक्त डा खोदेंशो पा ग्रांग्रा बाक्ब। लेवी १५:१९ 3 मिनु ८ नाक्ती मेको आ तौ कली खोइक्तीक चिनु खोइक्चा माल्ब। उत्पत्ती १७:१०-१२; लूका २:२१; यूहन्ना ७:२२ 4 मिनु मेको मीश मुर आ हुश चोत्रखेचा कली ३३ नाक्त सम्म दुम्चा माल्ब। मिनु मेकोमी चोत्रखो दुम्तीक नाक्ती मगाम सम्म मारेइ चोत्रखो थोत्रक

थिचा मदुम्ब। मिनु गुम्तीक ताम्बु यो ओव्रचा मदुम्ब। 5 तन्न मेकोमी तमी थिप्तु हना, आ रां ब्रोल्म नाक्त डा खोदेशो पा १४ नाक्त सम्म ग्रांग्रा दिशो बाक्ब। मिनु आ हुश चोव्रखेचा कली ६६ नाक्त दुम्चा माल्ब।

6 मिनु मेको आ चोव्रखेतीक गाम नाक्ती, तौ आ पर्बम बाक्त हना यो, तमी आ पर्बम बाक्त हना यो, मेकोमी चोशा चढेचा कली बर्स का गाण्शो भेडा का नु पाप आ पर्बम चढेचा कली ढुकुर का कि परवा का गुम्तीक ताम्बु आ ओव्रतीकेम बाक्शो चढेब कली चाक्चा माल्ब। 7 मिनु चढेबमी परमप्रभु यावे आ डोंडती मेको चढेशा, मेको आ पर्बम पाप क्याम्तीक गेय पचा माल्ब। मिनु मेको आ हुश यिशी रे चोव्रखो दुम्ब। मेको मीश मुरुमी तौ कि तमी थिवा नोले, एको पचा माल्शो अरेतीक लोव्र बाक्ब। 8 मिनु मेकोमी भेडा चाक्ने मचाप्बाक्त हना, ढुकुर निक्शी कि परवा निक्शी चाक्चा माल्ब। मेको का चोशा चढेतीक नु का पाप आ पर्बम चढेतीक बाक्ब। मिनु चढेबमी मेको चढेशा मेको आ पर्बम पाप क्याम्तीक गेय पचा माल्ब। मिनु मेको ग्रांग्रा मदिशो दुम्ब' माइक्मी" देंत। लेवी ५:७; लूका २:२४

13

कोव्र पाइब आन कली पचा माल्शो

1 परमप्रभु यावेमी मोसा नु हारून आस कली गन्ती १२:१०-१२; ब्यवस्था २४:८-९; अय्युब १८:१३ 2 "सुइ मुर आन रां डा कुशुल बोरत हना, गार दुम्त हना, बुश दुम्त हना, मेको कोव्र खोदेशो दुम्त हना, मेको कली चढेब हारून कि आ तौ का आ बाक्तीके चाक्चा माल्ब। 3 मिनु मेको चढेबमी आ रांम दुम्शो गार कोव्रचा माल्ब। मिनु मेको आ गारम बाक्शो चां बुश बाक्त नु मेको आ गार इक्का लुक्च लशो बाक्त हना, मेको याक्सीब रोइ बाक्ब। मिनु चढेबमी मेको कली कोव्रडा नोले 'एको ग्रांग्रा बाक्ब' देंचा माल्ब। 4 तन्न मेको कुशुल डा बुश गार कुशुल लुक्च मलशो बाक्त हना, मिनु मेकेर वाशो चां यो बुश मदुम्शो बाक्त हना, चढेबमी मेको रोइ पाइब मुर कली ७ नाक्त सम्म तिल्शा वोइक्चा माल्ब। 5 मिनु चढेबमी ७ नाक्त नोले मेको गार लेंशा कोव्रचा माल्ब। मिनु मेको कुशुल डा गार एर ओंथ मबारशो बाक्त हना, चढेबम मेको कली अर्को ७ नाक्त सम्म तिल्शा वोइक्चा माल्ब। 6 मिनु लेंशा ७ नाक्त नोले चढेबमी कोव्रडानु, आ गार बारचा नांइसाक्व हना, आ कुशुलम मब्रशो बाक्त हना, चढेबम मेको कली ग्रांग्रा मदिशो बाक्ब, मेको गार ला बाक्ब, देंचा माल्ब। मेको मुर आ वा मुरचा माल्ब। मिनु मेको चोव्रखो दुम्ब। 7 तन्न चढेबमी 'चोव्रखो दुम्त' देंम नोले यो गार बारत हना, मेको लेंशा चढेब आ बाक्तीक जाक्शा, आ गार कोंइचा माल्ब। 8 मिनु चढेबमी लेंशा कोव्रचा माल्ब। आ गार कुशुलम बारशा लशो बाक्त हना, चढेबमी 'मेको कली ग्रांग्रा दिशो बाक्ब' देंचा माल्ब। मेको कोव्र खोदेशो याक्सीब रोइ बाक्ब।

9 मिनु सुइ मुर कली कोव्र खोदेशो याक्सीब रोइ दुम्शो बाक्त हना, चढेब आन बाक्तीकेम चाक्चा माल्ब। 10 मिनु चढेबमी मेको कली कोव्रचा माल्ब। मिनु आ कुशुल बुश दुम्शा बोरशो बाक्त हना, नु मेको आ गार डा चां बुश दुम्शा, बोरशो कुशुल डा गारम श्ये तांइसाक्व हना, 11 मेको शुश नाक्ती सम्म बाक्ब कुशुल डा रोइ कोव्र बाक्ब। मिनु चढेबमी मेको कली 'ग्रांग्रा दिशो बाक्ब' देंचा माल्ब। मेकोमी मेको कली तिल्शा वोइक्चा ममाल्ब। मारदे हना मेको ग्रांग्रा दिशो बाक्ब।

12 मिनु मेको आ रोइ कुशुलम बारना बारन लशा, चढेबमी कोव्रडानु, आ गार पिया रे खोइल सम्म बाक्त हना, 13 चढेबमी मेको कली रिम्शो पा कोव्रचा माल्ब। मिनु मेको कुशुल डा रोइम आ रां नेल्ल कली सुम्शो बाक्त हना, चढेबमी मेको कली 'ग्रांग्रा मदिशो बाक्ब' देंचा माल्ब। मारदे हना मेको आ रां नेल्ल बुश दुम्तीके, मेको मुर ग्रांग्रा मदिशो बाक्ब। 14 तन्न मेको मुर आ रांम श्ये तांइसाक्व हना, मेको ग्रांग्रा दिशो बाक्ब। 15 मिनु चढेबमी मेको तांइसीशो श्ये कोव्रशा, मेको कली 'ग्रांग्रा दिशो बाक्ब' देंचा माल्ब। मेको तांइसीशो श्ये ग्रांग्रा बाक्ब। मारदे हना मेको कोव्र बाक्ब। 16 तन्न मेको तांइसीशो श्ये लेंशा बुश दुम्त हना, मेको मुर लेंशा चढेब आ बाक्तीक लचा माल्ब। 17 मिनु मेको गार बुश दुम्शो बाक्त हना, मेको चढेबमी ग्रांग्रा मदिशो बाक्ब देंचा माल्ब। मिनु मेको मुर चोव्रखो बाक्ब।

18 सुइ मुर आ रांमी कान गूशा, सात हना, 19 मिनु मेको कान गूशा साशो गारम बुश दुम्शा, बोरत हना, कि लल दुम्शा बुश पा बोरत हना, मेको मुरुमी मेको आ गार चढेब कली कोंइचा माल्ब। 20 मिनु चढेबमी रिम्शो पा कोव्रडानु, मेको गार लुक्च लशो बाक्त नु चां यो बुश दुम्शो बाक्त हना, मेको कली 'ग्रांग्रा दिशो बाक्ब' देंचा माल्ब। मेको कोव्र खोदेशो रोइ कान रे गूशो बाक्ब। 21 तन्न चढेबमी रिम्शो पा कोव्रडानु, मेकेर बुश चां मगूशो बाक्त नु मेको कुशुल क्येडा लुक्च मलशो बाक्त हना, तन्न सोव्रना सोव्रन, जाम्ना जाम्न लशो बाक्त हना, चढेबमी मेको कली ७ नाक्त सम्म तिल्शा वोइक्चा माल्ब। 22 मेको गार कुशुलम बारना बारन लत हना, चढेबमी मेको कली 'ग्रांग्रा दिशो बाक्ब'

देंचा माल्ब। मारदे हना मेको याक्सीब रोइ बाक्ब। 23 तन्न मेको गार एर ओंथ मबारथु, मेक उइ ला बाक्त हना, मेको कान आ खत बाक्ब। चढ़ेबमी मेको कली 'ग्रांग्रा मदिशो बाक्ब' देंचा माल्ब।

24 सुइ मुर आन रांमी दुप्शा गार दुम्त नु मेको दुप्शो गारम नक श्ये गूशा, लल दुम्त हना यो, बुश दुम्त हना यो, 25 चढ़ेबमी मेको गार रिम्शो पा कोव्रचा माल्ब। मिनु मेको गार डा चां बुश दुम्शा, कुशुल क्येडा लुकच लशो बाक्त हना, मेको याक्सीब रोइ बाक्ब। मेको दुप्शो गार रे गूशो बाक्ब। मिनु चढ़ेबमी मेको कली 'ग्रांग्रा दिशो बाक्ब' देंचा माल्ब। मेको कुशुल डा याक्सीब रोइ बाक्ब। 26 तन्न चढ़ेबमी रिम्शो पा कोव्रडानु, मेको गार डा चां बुश मबाक्थु नु कुशुल क्येडा लुकच मलथु, सोव्रना सोव्रन बाक्त हना, चढ़ेबमी मेको मुर कली ७ नाक्त सम्म तिल्शा वोइक्चा माल्ब। 27 मिनु चढ़ेबमी मेको कली ७ नाक्त नोले रिम्शो पा कोव्रचा माल्ब। मिनु मेको कुशुलम एर ओंथ बारशो बाक्त हना, चढ़ेबमी मेको कली 'ग्रांग्रा दिशो बाक्ब' देंचा माल्ब। मेको याक्सीब कुशुल डा रोइ बाक्ब। 28 तन्न मेको गार एर ओंथ मबारथु, सोव्रना सोव्रन लशो बाक्त हना, मेको दुप्शो रे होम्शो ला बाक्ब। मिनु चढ़ेबमी मेको कली 'ग्रांग्रा मदिशो बाक्ब' देंचा माल्ब। मारदे हना, मेको दुप्शो गार आ खत ला बाक्ब।

29 सुइ मीश मुर, वोंइश मुर आन पियाम, गाल शोक्रेम मारेइ गार का बाक्त हना, 30 चढ़ेबमी मेको गार रिम्शो पा कोव्रचा माल्ब। मिनु मेको कुशुल क्येडा लुकच लशो बाक्त हना, नु मेको गार डा चां हाव जिशो नु आइक्च बाक्त हना, चढ़ेबमी मेको कली 'ग्रांग्रा दिशो बाक्ब' देंचा माल्ब। मेको रक सुइब आ पिया डा नु गाल शोक्रे डा याक्सीब रोइ बाक्ब। 31 मिनु चढ़ेबमी मेको रक सुइब रोइ रिम्शो पा कोव्रडानु, मेको कुशुल क्येडा लुकच मलशो नु मेकेर क्येर चां यो मबाक्तेक्म हना, चढ़ेबम मेको कली ७ नाक्त सम्म तिल्शा वोइक्चा माल्ब। 32 मिनु ७ नाक्त नोले चढ़ेबमी मेको कली रिम्शो पा कोव्रचा माल्ब। मिनु मेको रक सुइब रोइ मबारशो बाक्त हना, मेक डा चां हाव मजिशो बाक्त नु गार यो कुशुल क्येडा लुकच मलशो बाक्त हना, 33 मेकोमी गार प्रोंइशा आ चां प्रेक्चा माल्ब। मिनु चढ़ेबम मेको रोइ पाइब कली अर्को ७ नाक्त सम्म तिल्शा वोइक्चा माल्ब। 34 मिनु ७ नाक्त नोले चढ़ेबमी मेको रक सुइब गार रिम्शो पा कोव्रचा माल्ब। मिनु मेको मबारथु, कुशुल क्येडा लुकच मलशो बाक्त हना, चढ़ेबमी मेको कली 'ग्रांग्रा मदिशो बाक्ब' देंचा माल्ब। मिनु मेको मुर आ वा मुरशा, चोव्रखो दुम्ल। 35 तन्न मेको चोव्रखो दुम नोले यो मेको रक सुइब रोइ बारशा लत हना, 36 चढ़ेबमी मेको गार रिम्शो पा कोव्रचा माल्ब। मेको कुशुलम बारशा लशो बाक्त हना, चढ़ेबमी मेकेर डा चां हाव बाक्म कों मबाक्म, दे कोव्रचा ममाल्ब। मेको मुर ग्रांग्रा दिशो बाक्ब। 37 तन्न चढ़ेबमी मेको रक सुइब रोइ रिम्शो पा कोव्रडानु मेकेर क्येर चां वाशो बाक्त हना, मेको साशो बाक्ब। मेको ग्रांग्रा मदिशो बाक्ब। मिनु चढ़ेबम मेको कली 'ग्रांग्रा मदिशो बाक्ब' देंचा माल्ब।

38 सुइ मीश मुर, वोंइश मुर आन रांम बुश गारपुकी बाक्तेक्म हना, 39 चढ़ेबमी मेको रिम्शो पा कोव्रचा माल्ब। मिनु मेको आन रां डा गारपुकी बुश बाक्तेक्म हना, मेको कुशुल डा रोइ ला बाक्ब। मेको कुशुल रे ला गूशो बाक्ब। मेको मुर ग्रांग्रा मदिशो बाक्ब।

40 सुइ मुर आन पिया डा चां दुल्शो बाक्त हना, मेको ग्रांग्रा मदिशो बाक्नीम। 41 मेको आ चां कुप्फी रे दुल्शो बाक्त हना, मेको ग्रांग्रा मदिशो बाक्ब। 42 तन्न मेको आन कुप्फीमी लल बुश गार गूत हना, मेको कुप्फीम गूशो याक्सीब रोइ बाक्ब 43 मिनु चढ़ेबमी मेको कली रिम्शो पा कोव्रडानु, आ कुप्फीम होम्शो गार लल बुश नु कोव्र खोदेशो तांइसाक्व हना, 44 मेको मुर कोव्र पशो नु ग्रांग्रा दिशो बाक्ब। मिनु चढ़ेबमी मेको कली 'ग्रांग्रा दिशो बाक्ब' देंचा माल्ब। मेको रोइ आ पियाम बाक्ब।

कोव्र पाइबमी मार पचा माल्शो

45 कोव्र पशो मुरुम गाक्शो वा फेक्शा, आ पियाम मारेइ गुप्चा मदुम्ब। मेकोमी आ गाल शोक्रे कली सुम्शा 'ग्रांग्रा दिशो, ग्रांग्रा दिशो' दे ग्रीचा माल्ब। 46 मेको आ रोइ गेना सम्म लीबा, मेना सम्म मेको ग्रांग्रा दिशो दुम्ब। मेको आ कांइचीक बाक्चा माल्ब। मिनु मेको मुर आन बाक्तीक क्येडा डोन बाक्चा माल्ब। गन्ती ५:२-३; २राजा १५:५

बुंखी डाइशो थोव्रक

47 मिनु वाम बुंखी डाइक्ताक्व हना, ऊन के वासी बाक्त हना यो, सुती के वासी बाक्त हना यो, 48 फेक्तीक नेल्ल, कुशुल के सेल्शो मारेइ मारेइमी 49 बुंखी डाइशो गिगी लल लुम्सीशो बाक्त हना, वासी नेल्ल नु मारेइ मारेइ चढ़ेब कली कोंइचा माल्ब। 50 मिनु चढ़ेबमी मेको रिम्शो पा कोव्रचा माल्ब। मिनु मेको बुंखी डाइशो थोव्रक आन कली ७ नाक्त सम्म तिल्शा वोइक्चा माल्ब। 51 मिनु चढ़ेबमी ७ नाक्त नोले लेंशा रिम्शो पा कोव्रचा माल्ब। मिनु मेको वासी,

कुशुल के सेल्शो मारेइ थोवकीम बुंखी बारशा लशो बाक्त हना, मेको बिग्रेब बुंखी डाइशो बाक्ब। मेको थोवक ग्रांग्रा दिशो बाक्ब। 52 मिनु मेकोमी बुंखी डाइशो वासी कि कुशुल के सेल्शो मारेइ थोवक चोचा माल्ब। मारदे हना मेको राक्ब बुंखी बाक्ब। मेको मीम चोचा माल्ब।

53 तन्न चढेबमी रिम्शो पा कोव्रडानु, मेको वासी, कि कुशुल के सेल्शो मारेइ थोवकम मेको बुंखी मबारशो बाक्त हना, 54 मिनु चढेबमी मेको मुर कली 'मेको बुंखी डाइशो थोवक मुरचा माल्ब' दे अरेचा माल्ब। मिनु मेकोमी चिनु ७ नाक्त सम्म मेको वासी कली तिल्शा वोइक्चा माल्ब। 55 मेको मुरशो नोले चढेबम मेको कली रिम्शो पा कोव्रचा माल्ब। मिनु मेको बुंखी आ लुम्सीशो रड मफांडसीशो बाक्त हना यो, मेको ग्रांग्रा दिशो बाक्ब। मेको बुंखी आ तार गे बाक्त हना यो, आगा गे बाक्त हना यो, मेको कली मीम चोचा माल्ब। 56 तन्न चढेबमी मेको मुरशो नोले कोव्रडानु, बुंखी जाम्ना जाम्न लशो बाक्त हना, मेको वासी कि मारेइ मारेइ कुशुल के सेल्शो मेको लुम्सीशो ला खाक्शा ताइक्चा माल्ब। 57 तन्न मेको बुंखी, वासी, कुशुल के सेल्शो मारेइ मारेइमी लेंशा तांडसाक्ब हना, मेको बारना बारन लशो बाक्ब। मेको बुंखी डाइशो थोवक मीम चोचा माल्ब। 58 मिनु मेको वासी, कुशुल के सेल्शो मारेइ मारेइ थोवक मुरशोनु, मेको रे बुंखी लत हना, मेको लेंशा मुरचा माल्ब। मेको ग्रांग्रा मदिशो बाक्ब।

59 ऊन के सेल्शो वासीम, सुती के वासी नु कुशुल के सेल्शो मारेइ थोवकम बुंखी डाइशो आ पर्बम ग्रांग्रा दिशो नु मदिशो आन पर्बम पचा माल्शो गेय एकोन बाक्नीम, दे शेंचा” दे मोसा नु हारून आस कली देंत।

14

कोव्रर साम नोले पचा माल्शो

1 मिनु परमप्रभु यावेमी मोसा कली 2 “कोव्रर खोदेंशो पा रोइ पशो मुर कली आ रोइ साम नोले मार पचा माल्ब देंशा हना, मुरुमी मेको कली चढेब आन बाक्तीक चाक्चा माल्नीम। मत्ती ८:४ 3 मिनु चढेबमी मुर आन बाक्तीके रे लाडगा गूशा, मेको मुर कली रिम्शो पा कोव्रचा माल्ब। मिनु मेको कुशुल डा याक्सीब रोइ साशो बाक्त हना, 4 मेको चढेबमी मेको चोव्रखो सेल्चा पुंडसीशो मुर आ पर्बम 'सेस नु चोव्रखो चिक्ब निक्शी, लेबानोन डा लाइशो रवा आ शी, लल रडम नुप्शो ऊन नु हिस्सोप चाक्को' दे अरेचा माल्ब। लेवी ११:३-२०; गन्ती १९:६ 5 मिनु चढेबमी 'मेको चिक्ब निक्शीमी का खप के सिक्स ब्वाक्कुम ब्रीशो बोस तारी सतो' दे अरेचा माल्ब। 6 मिनु चढेबमी मेको सेस चिक्ब, मेको लेबानोन डा लाइशो रवा आ शी, मेको लल रडम नुप्शो ऊन नु हिस्सोप मेको सिक्स ब्वाक्कु तारी साइशो चिक्ब आ हुशेमी खुम्शा गुंडचा माल्ब। 7 मिनु मेकोमी रोइ रे साशो चोव्रखो सेल्चा पुंडसीब मुर कली ७ खेयप ब्रुइशो 'चोव्रखो बाक्ब' देंचा माल्ब। मिनु मेकोमी मेको सेस चिक्ब कली प्रोइशा बेरपाइक्चा माल्ब। लेवी १६:२२

8 मिनु मेको चोव्रखो सेल्चा पुंडसीशो मुरुम आ वा मुरचा माल्ब। आ चां नेल्ल प्रेक्शा, चिक्चा माल्ब। मिनु मेको ग्रांग्रा मदिशो चोव्रखो दुम्ब। मिनु नोले मुर आन बाक्तीके लचा दुम्ब। तन्न ७ नाक्त सम्म आ ताम्बु आ लाडगाम बाक्चा माल्ब। गन्ती ८:७ 9 मिनु ७ नाक्त नोले मेकोमी आ चां, गाल शोक्के, मुकुक्स नेल्ल प्रेक्चा माल्ब। मिनु नोले आ वा मुरशा, चिक्चा माल्ब। मिनु मेको मुर चोव्रखो दुम्ब।

10 मिनु ८ नाक्त नोले मेकोमी मारेइ मदुम्शो थम रिम्शो सांड निक्शी नु बर्स का दुम्शो मारेइ मदुम्शो थम रिम्शो पाठी का, अन्न चढेचा कली तेलम निशो थम रिम्शो फस एफाह का के ३० भाग नु लोग का तेल चाक्चा माल्ब। एफाह पुक्तीके का बाक्ब। एफाह का २२ लिटर रिक्ब। मेको डा ३० भाग ६.५ लिटर खोदेंशो बाक्ब। नेल्ल १२ माना खोदेंशो बाक्ब। लोग का पुक्तीके का बाक्ब। मेको ०.३ लिटर रिक्ब। 11 मिनु चढेबमी मेको चोव्रखो सेल्चा पुंडसीशो मुर नु मेको आ चाक्शो नेल्ल परमप्रभु यावे आ डोंइती गुम्तीक ताम्बु आ ओव्रतीकेम वोइक्चा माल्ब।

12 मिनु चढेबमी सांड का नु मेको लोग का तेल गारचा आ पर्बम चढेचा माल्ब। मिनु क्युक्शा हिम्शा चढेतीक परमप्रभु यावे आ डोंइती चढेचा माल्ब। लोग आइक्च पुक्तीके बाक्ब। मेको ०.३ लिटर रिक्ब। 13 मिनु मेकोमी पाप आ पर्बम चढेतीक नु चोशा चढेतीक साइक्तीके मेको चोव्रखो बाक्तीकेम साइक्चा माल्ब। मारदे हना गारचा आ पर्बम चढेशो नु पाप आ पर्बम चढेशो चढेब के दुम्ब। मेको थम चोव्रखो बाक्ब। लेवी ७:७ 14 मिनु चढेबमी मेको गारचा आ पर्बम चढेशो आ हुश लाइशा, मेको चोव्रखो सेल्चा पुंडसीशो मुर आ ग्युरा नोफा आ फेनेम, आ ग्युरा गुइ डा बोंगे नु आ ग्युरा खोइल डा बोंगेमी खेक्चा माल्ब। लेवी ८:२३; प्रस्थान २९:२० 15 मिनु चढेबमी मेको तेल रे इक्का लाइशा, आ पेरा गुइ डा ताप्लाम लुक्चा माल्ब। 16 मिनु चढेबमी आ ग्युरा गुइ डा ब्रेचोम आ पेरा गुइम बाक्शो तेलम खुम्शा, परमप्रभु यावे आ डोंइती ७ खेयप ब्रुइक्चा माल्ब। लेवी ४:६,१७ 17 मिनु चढेबमी आ

गुडम लीशो तेल चोव्रखो सेल्चा पुंडसीशो मुर आ ग्युरा नोफा डा फेनेम, मेको आ ग्युरा गुड डा बोंग्येमी नु आ ग्युरा खोइल डा बोंग्येमी नु गारचा आ पर्वम चढेशो आ हुश तारी खेक्चा माल्ब। 18 मिनु चढेबमी आ गुडम लीशो तेल मेको चोव्रखो सेल्चा पुंडसीशो मुर आ पियाम खेक्चा माल्ब। मिनु चढेबमी परमप्रभु यावे आ डोंइती मेको मुर आ पर्वम पाप क्याम्तीक गेय पचा माल्ब।

19 मिनु चढेबमी मेको आ पाप आ पर्वम चढेचा माल्ब। मोपा मेको चोव्रखो सेल्चा पुंडसीशो मुरुम पाप क्याम्तीक गेय पशो बाक्ब। मिनु नोले मेकोमी चोशा चढेतीक क्योरचा माल्ब। 20 मिनु चढेबमी मेको चोशा चढेतीक नु अन्न चढेतीक चढेतीकेम चढेचा माल्ब। मोपा मेको चढेबमी मेको आ पर्वम पाप क्याम्तीक गेय पचा माल्ब। मिनु मेको मुर ग्रांग्रा मदिशो चोव्रखो दुम्ब।

21 मिनु मेको मुर प्रुडग बाक्त हना, मोशो यो चाक्ने मचाप्बाक्त हना, मेकोमी आ पाप क्याम्तीक गेय आ पर्वम क्युक्शा हिम्शा चढेचा कली सांड का नु अन्न चढेचा कली तेलम निशो एफाह का के १० भाग थम रिम्शो फस नु लोग का तेल चाक्चा माल्ब। एफाह पुक्तीके का बाक्ब। एफाह का २२ लिटर रिक्ब। मेको के १० भाग २ लिटर नु इक्का खोइ बाक्ब। लोग आइक्च पुक्तीके का बाक्ब। मेको ०.३ लिटर रिक्ब। 22 मिनु आ चाप्शो खोदेशो पा परवा निक्शी कि ढुकुर निक्शी, का पाप आ पर्वम चढेचा कली नु का चोशा चढेचा कली चाक्चा माल्ब। लेवी ५:७

23 मिनु मेकोमी ८ नाक्ती आंम कली चोव्रखो सेल्पाइक्चा कली मेको निक्शी गुम्तीक ताम्बु आ ओव्रतीक परमप्रभु यावे आ डोंइती चढेब आ बाक्तीकेमी चाक्चा माल्ब। 24 मिनु चढेबमी गारचा आ पर्वम चढेचा कली मेको सांड नु लोग का तेल चाक्शा, क्युक्शा, हिम्शा, चढेतीके परमप्रभु यावे आ डोंइती क्युक्शा हिम्शा चढेचा माल्ब। लोग का इस्राएली आन आइक्च पुक्तीक का बाक्ब। मेको ०.३ लिटर रिक्ब। मेको माना का नु इक्का खोइ खोदेशो बाक्ब। 25 मिनु चढेबमी मेको गारचा आ पर्वम चढेतीक सांड क्योरशा, मेको आ हुश इक्का लाइशा, चोव्रखो सेल्चा पुंडसीब मुर आ ग्युरा नोफा डा फेनेम, आ ग्युरा गुड डा बोंग्ये नु आ ग्युरा खोइल डा बोंग्येमी खेक्चा माल्ब। 26 मिनु चढेबमी मेको तेल इक्का आ पेरा गुड डा ताप्लाम लुक्चा माल्ब। 27 मिनु आ ग्युरा गुड डा ब्रेप्चोम पेरा गुडम बाक्शो तेल परमप्रभु यावे आ डोंइती ७ खेयप ब्रुइक्चा माल्ब। 28 मिनु चढेबमी आ गुडम बाक्शो तेल मेको चोव्रखो सेल्चा पुंडसीब मुर आ ग्युरा नोफा आ फेनेम, आ ग्युरा गुड डा बोंग्ये नु आ ग्युरा खोइल डा बोंग्येमी गारचा आ पर्वम चढेशो आ हुश खेक्शो तार खेक्चा माल्ब। 29 मिनु चढेबमी आ गुडम लीशो तेल मेको चोव्रखो सेल्चा पुंडसीब मुर आ पियाम खेक्चा माल्ब। मोपा मेकोमी चोव्रखो सेल्चा पुंडसीब मुर कली परमप्रभु यावे आ डोंइती पाप क्याम्तीक गेय पाइब। 30 मिनु मेकोमी ढुकुर कि परवा आ चाप्शो खोदेशो पा चढेचा माल्ब। 31 मिनु का पाप आ पर्वम, का चोशा चढेचा कली अन्न चढेतीक नु चढेचा माल्ब। मोपा चढेबमी चोव्रखो सेल्चा पुंडसीब मुर आ पर्वम परमप्रभु यावे आ डोंइती पाप क्याम्तीक गेय पचा माल्ब।

32 कुशुल डा याक्सीब रोइ पशा, चोव्रखो दुम्तीक आ पर्वम प्रुडग आन पचा माल्शो गेय एको बाक्ब” देंत। लेवी १३:४७-५९

बुंखी डाइशो खिं

33 परमप्रभु यावेमी मोसा नु हारून आस कली 34 “मुल गो इन कली गेशो कनान रागीम जाक्दीशशा बाक्नीनु, इन आंम के सेल्नी नोले, गो मेको रागी डा तेकोइ खिंम बुंखी डाइक्पाइक्ता हना, 35 मेको खिं डा मुर जाक्शा चढेब कली ‘आं खिंम बुंखी डाइशो खोदेशो तांइसाक्व’ देंचा माल्ब। लेवी १३:२ 36 मिनु चढेबमी ‘आं जाक्शा रिम्शो पा कोव्रचा क्येडा डोंइती इ खिं कली श्येत्थ पावो। मो मपाइतीनी हना खिंम बाक्शो मारेइ मारेइ ग्रांग्रा दिशो दुम्ब’ दे अरेचा माल्ब। मिनु नोले मेको चढेब मेको खिं कोव्रथ लचा माल्ब। 37 मिनु मेकोमी मेको बुंखी डाइशो रिम्शो पा कोव्रचा माल्ब। मेको खिं डा गारो गिगी, लल दुम्शा, गारो क्येडा लुक्च लशो बाक्त हना, लेवी १३:३ 38 चढेब खिं रे लाडगा गूशा, ७ नाक्त सम्म लाप्चो चोक्शा वोइक्चा माल्ब। 39 मिनु मेको चढेब ७ नाक्त नोले जाक्शा, मेको बुंखी गारोम बारशो बाक्म कों मबाक्म रिम्शो पा कोव्रचा माल्ब। मिनु मेको गारोम बारशो बाक्त हना, 40 चढेबमी मेको बुंखी डाइशो फुल्लु गुंडपाइशशा, सहर क्येडा डोन ग्रांग्रा दिशो ताइक्तीकेमी ताइक्पाइक्चा माल्ब। 41 मेको खिं आगा तेइ तेइ खोतेर पपाइक्चा माल्ब। मिनु खोतेर पाइशशा खप सहर क्येडा डोन ग्रांग्रा दिशो ताइक्तीकेमी ताइक्पाइक्चा माल्ब। 42 मिनु नोले मेकोपुकीमी ताइशशा फुल्लु आ पा डा अर्को फुल्लु चाक्शा, मेको फुल्लु बाक्तीकेम प्रोव्रचा माल्नीम। मिनु नक खप चाक्शा, खिं सिल्चा माल्नीम।

43 मिनू फुल्लु गुंडशा, अर्को फुल्लु प्रोवशा, खप खोतेर पा गुंडशा, अर्को खप सिल्शा यो, मेको बुंखी लेंशा गूत हना, 44 चढेबमी लेंशा जाक्शा, रिम्शो पा कोव्रचा माल्ब। मिनू मेको बुंखी खिंम बारना बारन लशो बाक्त हना, मेको बारतीक बुंखी डाइशशो बाक्ब। मेको खिं ग्रांग्रा बाक्ब। 45 मिनू मेको खिं कली प्रेत्चा माल्ब। मेको आ फुल्लु, शी नु सिल्शो खप सहर क्येडा डोन ग्रांग्रा दिशो ताइक्तीकेमी ताइक्चा माल्ब।

46 मिनू सुइ मेको खिं चोक्शो नोले ओव्रत हना, मेको नां मरिक्म सम्म ग्रांग्रा दिशो दुम्ब। लेवी ११:२४ 47 मिनू सुइ मेको खिंमी इप्त हना यो, जाप्तु हना यो, मेकोमी आ वा मुरचा माल्ब।

48 तन्न चढेबमी मेको खिं रिम्शो पा कोव्रडानु, सिल्शा फिक्शा नोले मेको बुंखी डाइशशो मबारत हना, चढेबमी मेको खिं कली 'ग्रांग्रा मदिशो चोव्रखो बाक्ब' देंचा माल्ब। मारदे हना मेको बुंखी जाम्शा लत। 49 मिनू मेको खिं डा मुरुमी खिं कली चोव्रखो सेल्चा कली चिक्ब निक्शी, लेबानोन डा लाइशशो रवा आ शी, हिस्सोप नु लल श्येले चाक्चा माल्ब। 50 मिनू चढेबमी 'मेको चिक्ब निक्शीमी का खप के सिक्स ब्वाक्कुम ब्रीशो बोस तारी सतो' दे अरेचा माल्ब। लेवी १४:४-७ 51 मिनू चढेबमी मेको लेबानोन डा लाइशशो रवा आ शी, हिस्सोप नु लल रडम नुप्शो श्येले नु मेको सेस चिक्ब लाइशशा, मेको नेल्ल कली मेको सिक्स ब्वाक्कु तारी साइशशो चिक्ब आ हुशेमी खुम्शा गुंडचा माल्ब। मिनू मेकोमी मेको खिं कली ७ खेयप बुइक्चा माल्ब। 52 मोपा मेकोम चिक्ब आ हुश, सिक्स ब्वाक्कु, सेस चिक्ब, लेबानोन डा लाइशशो रवा आ शी, हिस्सोप नु लल रडम नुप्शो श्येलेमी मेको खिं ग्रांग्रा मदिशो चोव्रखो सेल्चा माल्ब। 53 मिनू मेकोमी मेको सेस चिक्ब कली सहर रे लाडगा प्रोइशा बेरपाइक्चा माल्ब। मोपा मेकोमी मेको खिं डा बुंखी क्याम्तीक गेय पचा माल्ब। मिनू मेको खिं ग्रांग्रा मदिशो चोव्रखो दुम्ब।

54 मिनू कुशुल डा याक्सीब रोइ नेल्ल, रक सुइब रोइ, 55 वासी नु खिं डा बुंखी डाइक्तीके, 56 होम्शो नु आइक्च गार नु बुश लुम्सीशो गारपुकी चोव्रखो सेल्लतीक गेय एकोन बाक्नीम।

57 ग्रांग्रा दिशो नु मदिशो तुइक्तीक एको बाक्ब। मेको कोव्रर नु कोव्रर खोदेशो रोइ नु बुंखी डाइशशो आन पर्बम पतीक गेय एकोन बाक्नीम" दे परमप्रभु यावेमी मोसा नु हारून आस कली माइक्तीम्सी।

15

वोंइश मुर आ रां डा ग्रांग्रा दिशो

1 परमप्रभु यावेमी मोसा नु हारून आस कली 2 "इस्राएली आन कली 'सुइ वोंइश मुर आन के मार मार यित हना यो, मेको यितीके मेको मुर ग्रांग्रा दिशो बाक्ब। गन्ती ५:२ 3 मेको आ रां रे यितीके मार बाक्ब देंशा हना, रां रे यित हना यो, देक्त हना यो, मेको मुर ग्रांग्रा दिशो बाक्ब। 4 मेको मुर इप्शो ब्राख्ये नेल्ल नु आ निश्शो नित्तीके नेल्ल ग्रांग्रा दिशो बाक्नीम। 5 सुमी मेको आ ब्राख्ये थीबा, मेकोमी आ वा मुरशा, चिक्सीचा माल्ब। मिनू मेको नां मरिक्म सम्म ग्रांग्रा दिशो दुम्ब। 6 मिनू सु मेको आ नित्तीकेमी निप्बा, मेकोमी आ वा मुरशा, चिक्सीचा माल्ब। मिनू मेको नां मरिक्म सम्म ग्रांग्रा दिशो दुम्ब। 7 सुमी मेको मुर कली थीबा, मेकोमी आ वा मुरशा, चिक्सीचा माल्ब। मिनू मेको नां मरिक्म सम्म ग्रांग्रा दिशो दुम्ब। 8 मेको मुरुमी चोव्रखो मुर कली तोक्ताक्व हना, मेको चोव्रखो मुर चिक्सीचा माल्ब। मेकोमी आ वा मुरचा माल्ब। मिनू मेको नां मरिक्म सम्म ग्रांग्रा दिशो दुम्ब। 9 मेको मुर तेको शारा तार ब्रतीके थेंकाम निप्बा, मेको ग्रांग्रा दिशो दुम्ब। 10 सुमी मेको आ नित्तीके थीबा, मेको नां मरिक्म सम्म ग्रांग्रा दुम्ब। सुमी मेको थोव्रक कुरबा, मेकोमी आ वा मुरशा, चिक्सीचा माल्ब। मेको नां मरिक्म सम्म ग्रांग्रा दुम्ब। 11 मेको मुरुमी आ गुइ मचिक्थु, सुइ कली थिप्तु हना, मेको थिचा पुंडसीब मुरुम आ वा मुरशा, चिक्सीचा माल्ब। मिनू मेको नां मरिक्म सम्म ग्रांग्रा दुम्ब। 12 मेको मुरुम तेकोइ खप के बोस थिप्तु हना, मेको प्रोल्चा माल्ब। तन्न शी के बाक्त हना, ब्वाक्कुम शेक्चा माल्ब। लेवी ११:३३

13 मेको मुरुमी आ ग्रांग्रा दिशो देक्म नोले, चोव्रखो दुम्चा कली ७ नाक्त रिम्चा माल्ब। मिनू आ वा मुरशा, आ रां नेल्ल ब्वाक्कुम चिक्सीचा माल्ब। मिनू मेको चोव्रखो दुम्ब। 14 मिनू मेकोमी ८ नाक्ती परवा निक्शी कि डुकुर निक्शी कुरशा, परमप्रभु यावे आ डोंइती गुम्तीक ताम्बु आ ओव्रतीक जाक्शा, मेको चढेब कली गेचा माल्ब। लेवी ५:७ 15 मिनू चढेबमी मेको का पाप आ पर्बम नु का चोशा चढेतीक चढेचा माल्ब। मोपा चढेबमी मेको ग्रांग्रा दिशो यिशो मुर आ पर्बम परमप्रभु यावे आ डोंइती पाप क्याम्तीक गेय पचा माल्ब।

16 मिनू सुइ वोंइश मुर आ बिउ मोशा यित हना, मेकोमी आ रां नेल्ल ब्वाक्कुम चिक्सीचा माल्ब। मिनू मेको नां मरिक्म सम्म ग्रांग्रा दुम्ब। लेवी २२:४ 17 मिनू आ बिउ तेको वा नु कुशुल के सेल्शो मारेइमी दोक्त हना, मेको मुरचा

माल्ब। मिनु मेको नां मरिक्म सम्म ग्रांग्रा दुम्ब। 18 सुइ वोंइश मुर मीश मुर नु इम्मेनु, बिउ दोक्त हना, मेको निम्फा चिक्सीचा माल्नीस। मिनु नां मरिक्म सम्म ग्रांग्रा दुम्नीस।

मीश मुर आ रां डा ग्रांग्रा दिशो

19 सुइ मीश मुर मथिचा दुम्त हना, मेको आ रां डा दुम्तीक बाक्ब। मेको ७ नाक्त सम्म ग्रांग्रा दिशो दुम्ब। सुम मेको कली थीबा, मेको नां मरिक्म सम्म ग्रांग्रा दिशो बाक्ब। लेवी १८:१९ 20 मेको मीश मुर ग्रांग्रा दिशो दुम्मेनु, आ इप्तीके नु नित्तीके नेल्ल ग्रांग्रा दिशो दुम्नीम। 21 सुम मेको आ ब्राख्ये थीबा, मेकोमी आ वा मुरशा, चिक्सीचा माल्ब। मिनु मेको नां मरिक्म सम्म ग्रांग्रा दिशो दुम्ब। 22 सुम मेको आ निश्शो थोव्रक थीबा, मेकोमी आ वा मुरचा माल्ब। मिनु चिक्सीचा माल्ब। मिनु मेको नां मरिक्म सम्म ग्रांग्रा दिशो दुम्ब। 23 सुइ मुरुमी आ ब्राख्ये कि आ निश्शो पीरा थिप्तु हना, मेको नां मरिक्म सम्म ग्रांग्रा दिशो दुम्ब। 24 मिनु वोंइश मुर मेको नु इप्त नु मेको आ ग्रांग्रा दिशो लुम्साक्व हना, मेको ७ नाक्त सम्म ग्रांग्रा दिशो दुम्ब। मिनु मेको आ इप्शो ब्राख्ये यो ग्रांग्रा दिशो दुम्ब।

25 मिनु सुइ मीश मुर आ रां ब्रोल्शो प्रोंइशा मेको क्येडा शुश नाक्त सम्म हुश यिस डा यिस बाक्त हना, आ मथिचा दुम्शो नडा खोदेशो पा ग्रांग्रा दिशो दुम्ब। मेको आ मथिचा नाक्त खोदेशो पा मेको ग्रांग्रा दिशो दुम्ब। 26 मेको आ हुश यिशो नाक्त, आ इप्शो ब्राख्ये आ मथिचा दुम्शो नडा खोदेशो पा ग्रांग्रा दिशो दुम्ब। आ निश्शो पीरा आ मथिची नडा खोदेशो पा ग्रांग्रा दिशो दुम्ब। 27 मेको थोव्रक थीब ग्रांग्रा दिशो दुम्ब। मेकोमी आ वा मुरशा, चिक्सीचा माल्ब। मिनु मेको नां मरिक्म सम्म ग्रांग्रा दिशो दुम्ब।

28 मेकोमी आ हुश यिचा देक्म नोले ७ नाक्ती रिम्चा माल्ब। मिनु मेको नोले मेको ग्रांग्रा मदिशो दुम्ब। 29 मिनु ८ नाक्ती मेकोमी हुकुर निक्शी कि परवा निक्शी चाक्शा, गुम्तीक ताम्बु आ ओव्रतीक चढेब आ डोंइती जाक्चा माल्ब। 30 मिनु चढेबमी का पाप आ पर्बम नु का चोशा चढेतीके चढेचा माल्ब। मोपा चढेबमी मेको आ हुश यिशो आ पर्बम परमप्रभु यावे आ डोंइती मेको आ पर्बम चोव्रखो दुम्तीक गेय पचा माल्ब।

31 मोपा गे निक्शीमी इस्साल डा मुर आन कली ग्रांग्रा दितीक रे डोन वोतीस। मो मपाइतीसी हना, मेकोपुकीम आं बाक्तीक ताम्बु ग्रांग्रा दिशो सेल्नीम। मिनु मेको आन ग्रांग्रा आ पर्बम बेक्नीम।

32 एको ग्रांग्रा दिशो यितीक कि बिउ दोक्शो ग्रांग्रा दिशो दुम्शो वोंइश मुर आ पर्बम चोव्रखो सेल्तीके गेय बाक्ब। 33 मिनु मथिचा दुम्शो, ग्रांग्रा यिशो वोंइश मुर कि मीश मुर नु ग्रांग्रा दिशो दुम्शो मीश मुर नु इप्ब वोंइश मुर आन कली ग्रांग्रा मदिशो सेल्तीक गेय एकोन बाक्नीम' देंचा माल्नीसी" देंत।

16

पाप क्याम्तीक नाक्त

लेवी २३:२६-३२; गन्ती २९:७-११; हिब्रू ९:७-१४

1 हारून आ तौ निक्शी परमप्रभु यावे आ डोंइती बेक्सा नोले परमप्रभु यावेमी मोसा नु लोव्र पाप्तु। लेवी १०:१-२; 2 मिनु परमप्रभु यावेमी मोसा कली "इ लोकब हारून कली 'इ दाक्शो खोदेशो पा, गेना हना यो फारशो वा आ आगा बाक्शो चोव्रखो कोठामी कबल पशो सन्दोस तार बाक्शो शिशी पतीके आ डोंइती मजाक्को। मटीतीनी हना, गे बेक्नेवे। मारदे हना गो शिशी बाक्तीकेम गोस्स आगाम बाक्शा जाक्नुड। प्रस्थान २६:३३-३४

3 हारून दोपा ओव्रने चाप्ब देशा हना, पाप आ पर्बम चढेचा कली ब्यफ का नु चोशा चढेचा कली सांड का चाक्शा ला ओव्रने चाप्ब। लेवी ४:३; लेवी १:१० 4 सुती के आं गेय पचा कली ला आगा फेक्तीक वा फेक्शा, सुती के आ तार फेक्तीक फेक्शा, सुती के किप्शुर किप्शा नु सुती वा के पियाम गुप्तीक गुक्शा ओव्रचा माल्ब। मेको वा आ गेय पचा कली ला बाक्त। मेकोमी चिक्सीशा ला मेको वा फेक्सीचा माल्ब। प्रस्थान २८:३९,४२; प्रस्थान २९:४; प्रस्थान ३०:१९-२० 5 मेकोमी इस्साल डा मुर आन गुइ रे पाप आ पर्बम चढेचा कली बोका निक्शी नु चोशा चढेचा कली सांड का ताक्चा माल्ब। लेवी ३:९,१५,१६

6 मिनु हारूनमी आंम पाप आ पर्बम चढेतीक ब्यफ चढेचा माल्ब। मिनु आ नु आ खिं डा मुर आन पर्बम पाप क्याम्तीक गेय पचा माल्ब। लेवी ९:२, ८-११; हिब्रू ७:२७ 7 मिनु मेकोमी मेको बोका निक्शी लाइश्शा, गुम्तीक ताम्बु आ ओव्रतीक परमप्रभु यावे आ डोंइती वोइक्चा माल्ब। 8 मिनु हारूनमी मेको बोका निक्शी आ पर्बम फेन्टे आप्चा माल्ब। मेकोमी परमप्रभु यावे कली का नु मो प्रोंइचा कली का फेन्टे आप्चा माल्ब। 9 मिनु हारूनमी परमप्रभु यावे कली दुम्शो बोका कली आ नेक्था चाक्शा पाप आ पर्बम चढेचा माल्ब। 10 फेन्टे आप्शा मो प्रोंइतीक बोका कली

सेसीन परमप्रभु यावे आ डोंइती चाक्चा माल्ब। मिनु मेको आ तारी पाप क्याम्तीक गेय पा, मेको बोका कली गोरशो रागीम प्रोंइशा सोइक्चा माल्ब।

11 मिनु हारूनमी आ आंम पाप आ पर्बम चढेतीके ब्यफ चाक्चा माल्ब। मिनु आ आंम कली नु आ खिं डा मुर आन पर्बम पाप क्याम्तीक गेय पचा माल्ब। मिनु मेकोमी आ पाप आ पर्बम चढेतीक ब्यफ क्योरचा माल्ब। रोमी ३:२५ 12 मिनु मेकोमी परमप्रभु यावे आ डोंइती चढेतीके रे ब्रशो कोइला धूप चोतीकेम कुर पा मुठी निक्शी चुशो ब्रोव्रशो रिना पाइशशो धूप कुरशा फारतीक वा चोव्रखो कोठा ओव्रचा माल्ब। 13 मिनु मेकोमी परमप्रभु यावे आ डोंइती बाक्शा, धूप चोचा माल्ब। मिनु धूप आ कुनम कबल पशो सन्दोस आ तार बाक्शो शिशी बाक्तीक कली सुमचा माल्ब। मोदेशो मपाप्तु हना, मेको बेक्ब। प्रस्थान २५:१७-२२ 14 मेको नोले मेकोम ब्यफ आ हुश इक्का ब्रेक्शा पिशशा, परमप्रभु यावे आ बाक्तीक तारी पूर्व गे ब्रुइक्चा माल्ब। मेकेर मेकोमी आ ब्रेचोमी मेको हुश कली ७ खेयप ब्रुइक्चा माल्ब।

15 मिनु मेकोमी मुर आन पाप आ पर्बम चढेतीक बोका क्योरचा माल्ब। मिनु मेको आ हुश फारशो वा आ आगा डा कोठा चाक्शा, ब्यफ आ हुश खोदेशो पा, शिशी बाक्तीक तार नु आ डोंइती ब्रुइक्चा माल्ब। हिब्रू ४:१६; हिब्रू ९:५ 16 मोपा मेकोमी मेको कोठा चोव्रखो दुम्ब। मिनु इस्राएल डा मुर आन ग्रांरा दिशो नु मरिम्शो पशो नु मेको आन पाप आन पर्बम पाप क्याम्तीक गेय बाक्ब। मिनु मेकोमी गुम्तीक ताम्बु कली यो पचा माल्ब। 17 मिनु हारूनमी चोव्रखो कोठामी पाप क्याम्तीक गेय पवानु, सुइ मुर गुम्तीक ताम्बु ओव्रचा मदुम्ब। मेकोमी आंम आ पर्बम, आ खिं डा मुर आन पर्बम नु इस्राएल डा मुर नेल्ल आन पर्बम पाप क्याम्तीक गेय मथुमा सम्म, सुइमी गुम्तीक ताम्बु ओव्रचा मदुम्ब।

18 मिनु नोले मेको लाडगा गूशा, परमप्रभु यावे आ डोंइती बाक्शो चढेतीकेम लशा, मेको आ पर्बम पाप क्याम्तीक गेय पचा माल्ब। मिनु मेकोमी ब्यफ आ हुश नु बोका आ हुश इक्का लाइशशा, चढेतीक आ एर ओंथ डा ग्रोव्र नेल्लेम खेक्चा माल्ब। प्रस्थान ३०:१० 19 मिनु इक्का हुश लाइशशा, आ ब्रेचोम ७ खेयप मेको चढेतीक तार ब्रुइक्चा माल्ब। मोपा मेको चढेतीके इस्राएली आन ग्रांरा दिशो रे चोव्रखो सेल्चा माल्ब।

20 मिनु हारूनमी चोव्रखो कोठा, गुम्तीक ताम्बु नु चढेतीके आ पर्बम पाप क्याम्तीक गेय पवा नोले, मेको सेस बोका चाक्चा माल्ब। 21 मिनु नोले हारूनम आ गुइ निम्फा मेको सेस बोका आ पिया तार वोइक्चा माल्ब। मिनु इस्राएली आन मरिम्शो पशो नेल्ल नु आन पशो पाप नेल्ल शोव्रशा, मोपा नेल्ल पाप बोका आ पियाम वोइक्चा माल्ब। मिनु नोले मुर काम मेको बोका कली गोरशो रागीम चोक्चा माल्ब। 22 मोपा मेको बोकाम मेको आन मरिम्शो पशो कुरशा, सुइ मबाक्शो गोरशो रागीम लाइक्चा माल्ब। मेको मुरुम मेको बोका कली गोरशो रागीम प्रोंइचा माल्ब।

23 मेको नोले हारून गुम्तीक ताम्बुम ओव्रशा, मेको आ डोंइती चोव्रखो कोठा ओव्रशा, फेक्शो सुती वा प्रुइशशा, मेक उइ वोइक्चा माल्ब। 24 मिनु मेकोमी चोव्रखो बाक्तीके लशा, चिक्सीचा माल्ब। मिनु आ वा फेक्शा लेत्चा माल्ब। मिनु आंम आ पर्बम नु मुर आन पर्बम चोशा चढेतीक चढेशा, आंम कली नु मुर आन कली पाप क्याम्तीक गेय पचा माल्ब। 25 मिनु मेकोमी पाप आ पर्बम चढेशो आ बोंसो चढेतीकेमी चोचा माल्ब।

26 मिनु प्रोंइचा पुंइसीब बोका कली चोव्रथ लाइब मुर आ वा मुरशा, चिक्सीचा माल्ब। मिनु मेको नोले मुर आन बाक्तीक जाक्ने चाप्ब। 27 मिनु पाप आ पर्बम चढेशो ब्यफ नु बोका आस हुशेमी मेको चोव्रखो कोठा कली पाप क्याम्तीक गेय पशा नोले मेको मुर आन बाक्तीक रे गुंइशा, मेको आस कुशुल, श्ये नु गोबर नेल्ल चोचा माल्ब। लेवी ४:१२; लेवी ६:२३; हिब्रू १३:११ 28 मिनु मेको चोइबमी आ वा मुरशा, चिक्सीचा माल्ब। मिनु मेको नोले मुर आन बाक्तीके लेन्ने चाप्ब।

29 एको नेल्ले इन कली गेना हना यो पतीके बाक्ब। ७ महिना डा १० नाक्ती परमप्रभु यावे आ नेक्था जाक्चा माल्नीनी। मेको नाक्ती गे, इस्राएली नु अर्को रागी डा मुर नेल्लेमी काइ गेय मपने। लेवी २३:२७-३२; गन्ती २९:७ 30 मारदे हना मेको नाक्ती इन पर्बम पाप क्याम्तीक गेय पाइनीम। मिनु परमप्रभु यावे आ डोंइती इन पाप क्याम्शो बाक्ब। 31 एको इन ठेयब नाइक्तीक नाक्ती बाक्ब। मोपतीके काइ गेय मपने। एको गेना हना यो कली पतीक बाक्ब।

32 तेल लुकशो नु आ आफ आ पा डा चढेब दुमचा कली सु योव्रसीशो बाक्मे, मेकोमी पाप क्याम्तीक गेय पचा माल्ब। मिनु मेकोमी मेको गेय कली ला वोइशशो सुती के फेक्तीके फेक्चा माल्ब। प्रस्थान २८:४१-४२ 33 मेकोमी चोव्रखो कोठा कली, गुम्तीक ताम्बु नु चढेतीक कली पाप क्याम्तीक गेय पचा माल्ब। मिनु मेकोमी चढेबपुकी नु मुर नेल्ल आन पर्बम पाप क्याम्तीक गेय पचा माल्ब।

34 मिनु बर्सम खेयप का इस्राएली नेल्ल आन कली पाप क्याम्तीक गेय पचा माल्ब। मेको इन कली गेना हना यो पतीक बाक्त। बर्सम खेयप का इस्राएली नेल्ल आन पाप आ पर्सम माफ पुंइचा माल्ब' दे हारून कली देनो" देंत। मिनु परमप्रभु यावेमी मोसा कली दोदेशो पा अरेवा, मोदेशो पा पाप्तु। प्रस्थान ३०:१०; हिब्रू १०:३

17

क्योरशा चढ़ेतीके

1 मिनु परमप्रभु यावेमी मोसा कली 2 "गे हारून, मेको आ तौपुकी नु इस्राएली नेल्ल आन कली 'परमप्रभु यावेमी अरेशो मार बाक्ब देशा हना, 3 सुमी इस्राएली आन बाक्तीकेमी ब्यफ, भेडा नु क्यारश क्योरबा, 4 मिनु परमप्रभु यावे आ डोंइती चढ़ेचा कली गुम्तीक ताम्बु आ ओव्रतीकेम मचाक्बा, मेको मुर साइशो आ पर्सम दोस ताइब। मेकोमी साइक्तीके आ मुर रे तिल्ला पुंइसीब। उत्पत्ती ९:६ 5 मोपतीके इस्राएलीपुकीमी आन क्योरशा चढ़ेतीके आन बाक्तीके रे गुंइशा, परमप्रभु यावे आ डोंइती चाक्चा माल्नीम। मेकोपुकीमी आन क्योरतीक बस्तु भाव चढ़ेब आ बाक्तीकेम, गुम्तीक ताम्बु आ ओव्रतीके आ डोंइती चाक्शा, दुशा बाक्तीक आ पर्सम चढ़ेचा माल्नीम। 6 मिनु चढ़ेबमी मेको आ हुश गुम्तीक ताम्बु आ ओव्रतीके आ डोंइती बाक्शो परमप्रभु यावे कली चढ़ेतीकेम ब्रुइक्चा माल्ब। मिनु बोंसो परमप्रभु यावे कली आ दाक्शो ब्रोंव्रशो रिना पपाइशो सेल्चा कली चोचा माल्ब। 7 मेकोपुकीमी मोपा वोल कली चढ़ेशा, आंम कली तेल्लेम खोदेशो सेल्ने मचाप्नीम। एकोम परमप्रभु यावे आ अरेशो लोव्र नेल्ल आन पाला सम्म गेना हना यो कली अरेतीके बाक्ब' देनो" देंत। ब्यवस्था १७:१७

8 मिनु परमप्रभुमी "मेको आन कली 'इस्राएली नु मेको नु बाक्ब अर्को रागी डा मुर चोशा चढ़ेतीके चढ़ेचा दाक्ताक्म हना, ब्यवस्था १२:१४ 9 मिनु मेको गुम्तीक ताम्बु आ ओव्रतीके मचाक्थु, परमप्रभु यावे कली मचढ़ेप्तु हना, मेको मुर कली आ मुर आन दाते रे तिल्ला माल्नीम' दे माइक्मी।

हुश मव्वचा, दे अरेशो

10 इस्राएली नु मेको आन दातेम बाक्ब अर्को रागी डा मुर सुइमी हुश ब्वाम्तेक्म हना, गो मेको हुश ब्वाइब कली मरिम्शो पाइनुड। मिनु मेको मुर कली आ मुर आन दाते रे क्याम्नुड। लेवी ३:१७ 11 मारदे हना मेको बस्तु भाव आन हुशेम ब्रोंइतीक सोक्त बाक्ब। मिनु गो मेको हुश इन कली चढ़ेतीकेमी इन पाप क्याम्तीक गेय पचा कली गेता। मारदे हना हुशेम पाप क्याम्तीके बाक्ब। हिब्रू ९:२२ 12 मोपतीके गेपुकी नु गेपुकी नु बाक्ब अर्को रागी डा मुर सुइमी हुश ब्वचा मदुम्ब, दे गो इस्राएली आन कली देशो बाक्नुड। 13 मिनु सुइ इस्राएलीपुकी नु गेपुकी नु बाक्ब अर्को रागी डा मुर सिखार ग्यारशा, ग्याइशशा मारेइ साइक्तीनी हना, मेको आ हुश नेल्ल जारशा, खपीम सुम्चा माल्ब।

14 मारदे हना मारेइ मारेइ के ब्रोंइतीक सोक्त हुशेमी बाक्ब। मोपतीके गो इस्राएली नेल्ल आन कली 'गे तेकोइ जन्तु, बस्तु भाव आन हुश ब्वचा मदुम्ब। मारदे हना नेल्ल जन्तु आन ब्रोंइतीके हुशेम बाक्ब। मेको सुमी ब्वाइबा, मेको क्याम्चा पुंइसीब। उत्पत्ती ९:४

15 मिनु इस्राएली नु अर्को रागी डा मुर नेल्लेमी, सुम आंमा बेक्शो मारेइ मारेइ नु ब्वाकी डा जन्तुम साइशो मार मार ब्वाम्तेक्म हना, मेको आन वा मुरशा, चिक्सीचा माल्नीम। मिनु नां मरिक्म सम्म ग्रांग्रा बाक्चा माल्नीम। मिनु नोले मेको ग्रांग्रा मदिशो दुम्नीम। लेवी ११:४०; लेवी २२:८; प्रस्थान २१:३३-३६; प्रस्थान २२:३०; प्रेरित १५:२० 16 तन्न मेकोपुकीमी आन वा ममुरथु, मचिक्साक्म हना, मेको आन पशो आ पर्सम मेको दोस ताइब दुम्नीम' दे हारून नु आ तौ आन कली देनो" दे परमप्रभु यावेमी देंत।

18

ग्रांग्रा दितीक गेय मपने

1 मिनु परमप्रभु यावेमी मोसा कली 2 "गे इस्राएली आन कली 'गो परमप्रभु यावे, इन परमप्रभु नड। 3 गेपुकी इजीप्त रागीम पशो खोदेशो मपने। मिनु गो इन कली कनान रागी लाइक्नन्नी। गेपुकीमी मेक डा मुर आन पशो खोदेशो मपने। प्रस्थान २३:२४ 4 गेपुकीमी आं पावो, दे अरेशो लोव्र नु आं फुल्लुम मुशा ब्रेक्शो लोव्र पचा माल्नीनी। मारदे हना गो परमप्रभु यावे, इन परमप्रभु नड। 5 सुमी आं फुल्लुम मुशा ब्रेक्शो लोव्र नु आं पावो, दे अरेशो लोव्र पाइबा, मेको ब्रोंइचा ताइब। मारदे हना गो परमप्रभु यावे नड। नेहेम्याह ९:२९; इजीकीएल २०:११; रोमी ७:१०; रोमी १०:५; गलाती ३:१२

6 गेपुकी सुइ आंम नेक्था डा नाता नु मइपीन। मारदे हना गो परमप्रभु यावे नड। 7 इन ममा नु इप्शा इन आफ कली मुने मतोककीन। इन ममा नु इप्चा मदुम्ब। 8 गे इ आफ आ अरु मीश नु मइपो। मो पाइतीनी हना, गेपुकीमी इन आफ कली मुने तोक्नीनी। उत्पत्ती ३५:२२; ब्यवस्था २७:२०; २सामुएल १६:२२; १कोरिन्थी ५:१ 9 गे इ दिदी, बहिनी नु मइपो। इ आफ आ तमी बाक्त हना यो, इ ममा आ तमी बाक्त हना यो नु आंम खिम जरमेशो बाक्त हना यो अर्को रागीम जरमेशो बाक्त हना यो, मेको नु इप्चा मदुम्ब। 10 मिनु तौ आ तमी बाक्त हना यो, इ तमी आ तमी बाक्त हना यो, इ चच बाक्त हना यो मेको नु मइपो। मो पाप्तीवी हना, गे आंमा मुने दोक्नेवे। 11 गे इ आफ आ अरु मीश आ तमी नु मइपो। मेको इन समी बाक्ब। 12 गे इन फुपु नु मइपो। मेको इन आफ आ समी बाक्ब। प्रस्थान ६:२० 13 गे इ ममा आ लोकब नु मइपो। मेको इन ममा आ नाता बाक्नीम। 14 इन बोडमा नु आमा कान्छी नु मइपो। मेको इन बोडमा नु आमा कान्छी बाक्नीम। 15 गे इ चाइमी नु मइपो। मेको इ तौ आ मीश बाक्ब। गे मेको नु इप्चा मदुम्ब। 16 गे इ भोग्यु, बोहारी नु मइपो। मोपा इ लोकब कली मुने मतोकको। लेवी २०:२१; मर्कूस ६:१८ 17 गे मीश मुर का नु आ तमी निम्फा नु मइपो। मिनु मेको आ तौ आ तमी नु आ तमी आ तमी, चच नु मइपो। मेकोपुकी नेक्था डा नाता बाक्नीम। मो पचा मरिम्शो बाक्ब। 18 गे इ मीश बाक्ना बाक्न, मेको आ लोकब मचाक्को। मेको नु मइपो।

19 गे रां ब्रोल्शा ग्रांग्रा दिशो दुम्शो मीश मुर नु मइपो। 20 गे अर्को मुर आ मीश नु इप्शा आंम कली ग्रांग्रा मसेलो। २सामुएल ११:४ 21 गे मोलेक कली आंम तमी तौपुकी चढ़ेशा, आंम परमप्रभु यावे, इन परमप्रभु आ नें ग्रांग्रा मसेलीन। गो परमप्रभु यावे नड। 22 मीश मुर नु इप्शो खोदेशो पा वोंइश मुर नु मइपो। मेको थम ग्रांग्रा बाक्ब। 23 गे बस्तु भाव नु इप्शा, आंम कली ग्रांग्रा मसेलो। मीश मुर यो बस्तु भाव नु इप्चा मदुम्ब। मेको थम मरिम्शो दूली गेय बाक्ब। प्रस्थान २२:१८; लेवी २०:१६

24 गेपुकीमी मोदेशो पाप पा आंम कली ग्रांग्रा मसेलीन। मारदे हना गो मोदेशो पाप आ पर्बम जात जात डा मुर इन डोंइती रे गुंइनुडमी। मेको नेल्लेम मोदेशो पाप पा ग्रांग्रा दिशो दुम्शो बाक्तेक्म। 25 मोपान मेको रागी ग्रांग्रा दिशो दुम्त। मिनु गो मेको आन पाप आ पर्बम सजाइ गेता। मिनु रागीम मेक डा मुर आन कली उक्बे पा ताइक्ताक्ब। 26 तन्न गे आं फुल्लुम मुशा ब्रेक्शो लोव्र नु आं पावो, दे अरेशो लोव्र टिने। मिनु गे इस्राएली नु इन दातेमी बाक्ब अर्को रागी डा मुर मोदेशो ग्रांग्रा दिशो गेय मपने। 27 मारदे हना इन डोंइती मेकेर बाक्ब मुरपुकीमी मोदेशो ग्रांग्रा नेल्ल पाम्तेक्म। मिनु रागी ग्रांग्रा दिशो दुम्त। 28 मिनु आं अरेशो मपथु, मेको रागी ग्रांग्रा दिशो सेलतीनी हना, मेको डोंइती बाक्ब मुर आन कली खोदेशो पा मेको रागीमी इन कली यो उक्बे पा ताइक्ब।

29 सुइमी मेको मरिम्शो का ला पाप्तु हना, मेको मुर आ मुर रे तिल्ला पुंइसीब। 30 मोपतीके गे डोंइती डा मुरपुकीमी पशो खोदेशो पा मेको दूली ग्रांग्रा दिशो पाप मपने। मिनु आंम कली ग्रांग्रा दिशो मसेलीन। मारदे हना गो परमप्रभु यावे, इन परमप्रभु नड' देनो" देंत।

19

अरु पतीक गेय

1 मिनु परमप्रभु यावेमी मोसा कली 2 “इस्राएली आन गुम्तीक डा मुर नेल्ल आन कली ‘गेपुकी आं कली ला ठेयब सेलीन। मारदे हना गो परमप्रभु यावे, इन परमप्रभु का ला नड। लेवी ११:४४-४५; मत्ती ५:४८; १ पत्रुस १:१५-१६ 3 गे नेल्लेमी इन आंम आफ आस कली मान पने। मिनु आं नाइक्तीक नाक्ती नांइसीन। गो परमप्रभु यावे, इन परमप्रभु नड। प्रस्थान २०:१२; प्रस्थान २०:८ 4 गे मूर्ति कली पूजा मपने। मिनु गे आंम कली मूर्ति मसेलीन। गो परमप्रभु यावे, इन परमप्रभु नड। प्रस्थान २०:३; प्रस्थान ३४:१७

5 गे दुशा बाक्चा आ पर्बम परमप्रभु यावे आ डोंइती चढ़ेनीनु, परमप्रभु यावेमी ब्रचा डा पा चढ़ेने। लेवी ७:१२-१८; 6 गे चढ़ेनीनु, मेको चढ़ेशो नाक्त नु आ दीसा सम्म नेल्ल ब्वशा नेंचा मालनीनी आ नित्थ नाक्त सम्म मारेइ लीत हना, मेको चोचा मालनीनी। 7 आ नित्थ नाक्त मेको ब्वाइताक्नी हना, थम ग्रांग्रा दुम्ब। मिनु मेको चढ़ेशो मब्राइब। 8 मेको ब्वाइब नेल्लेमी सजाइ ताइनीम। मारदे हना मेकोमी परमप्रभु यावे कली चढ़ेशो ग्रांग्रा दिशो सेल्शा, मेको कली मटीम। मिनु मोदेशो मुर आन मुर रे तिल्ला पुंइसीनीम।

9 मिनु गे इन बाली नाली रिक्नीनु, रू आ सुर सुर सम्म मरिक्कीन। सिला बाला मगुपीन। लेवी २३:२२; ब्यवस्था २४:१९; रूथ २:२, १५, १६ 10 गेपुकीमी इन अडगुर रू डा फल काइ मलीपाइक्थु, मसेक्कीन। मिनु रूम दोक्शो अडगुर यो मगुपीन। मेको प्रुडग नु अर्को रागी डा मुर आन कली बाक्ल। गो परमप्रभु यावे, इन परमप्रभु नड।

11 गे खुइ मपने। मठगेने। गे जोल मपमुने। प्रस्थान २०:१५-१६; १ थिस्सलोनिकी ४:६ 12 गेपुकीमी आं नें थिशा, जोल पा कसम मजने। मो पाइतीनी हना, गे इन परमप्रभु आ नें आइक्च सेल्नीनी। गो परमप्रभु यावे नड। प्रस्थान २०:७; मत्ती ५:३३

13 गे आंम नेक्था डा मुर आन कली श्येत गेशा, मदिपीन। मिनु मेको आन मार मार मरोइक्तीन। गाल्च ताक्शा गेय पाइब आन क्येट काब नाक्दो यो इन खिंम वोइक्चा मदुम्ब। ब्यवस्था २४:१४-१५; येरमीया २२:१३; याकूब ५:४

14 नोफा मनेब मुर कली मरिम्शो लोव्र मपने। मिक्च मताइब आ डोंइती दाइल पाइक्तीक थोव्रक मवोतीन। इन परमप्रभु क्येडा हिनीन। गो परमप्रभु यावे नड। उत्पत्ती २७:१९; ब्यवस्था २७:१८

15 गे जोल पाइब सांकछी मदुमीन। ठेयब मुर बाक्त हना यो, आइक्च मुर बाक्त हना यो, मुर आन कुल मकोव्रथु, ठीक निसाफ पने। प्रस्थान २३:३,६; ब्यवस्था १६:१९,२०

16 गेपुकी मुर आन पर्बम जोल पा लोव्र मपमुने। गे इन नेक्था डा मुर कली साइक्चा ममालीन। गो परमप्रभु यावे नड। प्रस्थान २३:७

17 गे इन लोक्ब कली काइ मदाक्ब मदुमीन। इन नेक्था डा मुर कली रिम्शो पा मोदेशो दूली गेय मपने' दे लोव्र पने। मो मपाइतीनी हना, गे पाप राइनीनी। भजन संग्रह १४१:५; मत्ती १८:१५

18 गे इन मुर आन कली क्येक्क मलेत्तीन। ईख मकुरीन। तन्न इन नेक्था डा मुर कली आंम कली खोदेशो पा दाक्तीन। गो परमप्रभु यावे नड। २राजा ६:२२; २इतिहास २९:९-१५; मत्ती ५:४३-४८; मत्ती २२:३९; लूका १०:२५-३७; यूहन्ना १३:३४; रोमी १३:९; गलाती ५:१४; याकूब २:८

19 गे आं फुल्लु मुशा ब्रेक्शो लोव्र पने। निक्शी खाल डा जन्तु, बस्तु भाव आन कली मब्वाइक्तीन। इन रूमी निक्शी खाल डा वांचेर मशोक्कीन। गेपुकीमी निक्शी खाल डा श्येले ब्वाइशशा प्रोव्रशो वा मफेक्सीन। ब्यवस्था २२:९-११

20 मिनु वोंइश मुर कामी वाइलीम दुम्शो मीश आल नु इप्त हना, मेको मीश आल चहिं अरु वोंइश मुर कली गेचा चिक्शो बाक्त हना, तन्न मग्याप्थु, मप्रोंइथु बाक्त हना, मेको वोंइश मुर कली खोदील निदील पचा मालनीम। मेको आस कली साइक्चा मदुम्ब। मारदे हना मेको मीश आल मप्रोंइशो बाक्त। प्रस्थान २१:७-११ 21 तन्न मेको वोंइश मुरुमी परमप्रभु यावे आ डोंइती गुम्तीक ताम्बु आ ओव्रतीकेम आ दोस आ पर्बम सांड का चढेचा माल्ब। 22 मिनु चढेबमी मेको आ दोस आ पर्बम सांड चढेशा परमप्रभु यावे आ डोंइती पाप क्याम्तीक गेय पचा माल्ब। मोपा मेको आ पाप क्याम्तीशा माफ ताइब दुम्ब। लेवी ५:१७-१८

23 मिनु गेपुकी मेको रागी जाक्दीशशा, तेकोइ जचा दुम्ब फल फुल रवा खुम्नीनु, बर्स सां सम्म मेको आन फल मजने। 24 मिनु ४ बर्सम चहिं फल फुल नेल्ले परमप्रभु यावे कली ग्येरशो गेचा मालनीनी। परमप्रभु यावे कली ठेयब मान पचा कली बाक्ब। 25 तन्न ५ बर्सम गेपुकीम मेको फल फुल जने चाप्नीनी। मिनु मेको रवा इन कली शुश सिप्ब दुम्नीम। गो परमप्रभु यावे, इन परमप्रभु नड।

26 गेपुकीमी तेकोइ चिक्ब, जन्तु, बी बयफ, क्यारश भडा आन श्ये हुश सुन्दा मब्बने। मिनु गेपुकी लिंक्यु मकोव्रडीन। मिनु गे टुना मुना काइ मपने। लेवी ३:१७; ब्यवस्था १८:१०

27 गेपुकीमी इन चां एर ओंथ मखोतीन। मिनु इन गाल शोक्त्रे आ सुर मखोतीन। लेवी २१:५; ब्यवस्था १४:१

28 गेपुकी बेक्शो मुर आन पर्बम आंम रां क्योरशा गार मसेलीन। मिनु इन रांमी चिनु मखोपेन। गो परमप्रभु यावे नड।

29 गेपुकीमी इन तमी आन कली तेल्लेम सेल्शा, ग्रांग्रा दिशो मसेलीन। मो पाइतीनी हना, रागी तेल्लेम बाक्तीक खोदेशो दुम्शा, ग्रांग्रा दिशोमी ब्रीब। ब्यवस्था २३:१८; २राजा २३:७

30 गे आं नाइक्तीक नाक्तीम नांइसीन। मिनु आं बाक्तीक ताम्बु कली मान पने। गो परमप्रभु यावे नड। लेवी २६:२

31 गेपुकी बेक्शो मुर रे लोव्र पाइब नु लिंक्यु कोव्रब कली 'वारच पाइक्की' दे आन बाक्तीके मलने। मेकोपुकी नु सल्ला पा, गे आंम कली ग्रांग्रा दिशो मसेल्सीन। गो परमप्रभु यावे, इन परमप्रभु नड। लेवी २०:६; ब्यवस्था १८:१०-११; १सामुएल २८:७

32 गे खूशो आ डोंइती बोक्कीन। खाल्पी खाल्पा आन कली मान पने। मिनु इन परमप्रभु कली मान पा हिनीन। गो परमप्रभु यावे नड।

33 गेपुकी नु बाक्ब अर्को रागी डा मुर आन कली मदिपीन। प्रस्थान २२:२० 34 गे मेको आन कली इन रागीम जरमेशो मुर खोदेशो मिम्तीन। मेको आन कली आंम कली खोदेशो पा दाक्तीन। मारदे हना गेपुकी यो इजीप्तमी अर्को रागी डा मुर दुम्शा बाक्शो बाक्तीनी। गो परमप्रभु यावे, इन परमप्रभु नड।

35 गेपुकीमी पुक्नीनु, नाक्तीनीनु नु थाप्तीनीनु जोल मपने। 36 इन नाक्तीकेम तुला ठीक दुम्चा माल्ब। इन ढक ठीक दुम्चा माल्नीमी। मिनु इन पुक्तीके ठीक दुम्चा माल्नीमी। गो इन कली इजीप्त रे गुंडब परमप्रभु यावे, इन परमप्रभु नड। ब्यवस्था २५:१३-१६; हितोपदेस ११:१

37 गे आं फुल्लुम मुशा ब्रेक्शो लोत्र नु आं पावो, दे अरेशो लोत्र नेल्ल थुंम वोइश्शा, पचा माल्नीनी। मारदे हना गो परमप्रभु यावे नड” दे परमप्रभु यावेमी मोसा कली देंत।

20

काइ मरिम्शो पशो कली सजाइ

1 मिनु परमप्रभु यावेमी मोसा कली 2 “गे लेंशा इस्राएली आन कली ‘इस्राएलीपुकी, मेको नु बाक्ब अर्को रागी डा मुरपुकी सुम आन आल मोलेक कली चढ़ेनीमी, मेको आन कली साइक्चा माल्नीम। गुम्तीक डा मुरपुकीम मेको कली फुल्लु आप्शा साइक्चा माल्नीम। 3 मेकोपुकीमी आन आल मोलेक कली चढ़ेमेनु, आं बाक्तीक ताम्बु नु आं ठेयब नें ग्रांग्रा दिशो सेल्लेक्म। मोपतीके गो आंमा मेको आन कली ब्रोंइचा मगेथु, आ मुर आन दाते रे क्याम्नुडमी।

4 मिनु मेको रागी डा मुरपुकीम आ आल मोलेक कली चढ़ेब मुर कली तुइश्शा यो मसाइक्तेक्म हना,

5 गो आंमा मेको नु आ खिं डा मुर आन कली ब्रोंइचा मगेथु, मेको आन मुर आन दाते रे क्याम्नुडमी। मेको नु मेको आन नोले खोइक्ब मोलेक कली चढ़ेब नेल्ल आन कली क्याम्नुडमी।

6 सु मुर बेक्शो मुर रे लोत्र पाइब नु लिंक्यु कोत्रब आन कली “वारच पयी” दे आन बाक्तीके लाइबा, गो मेको कली ब्रोंइचा मगेथु, आ मुर आन दाते रे क्याम्नुड। लेवी १९:३१

7 मोपतीके आं कली जिम्मा गेंसीशा आं के दुमीन। मारदे हना गो परमप्रभु यावे, इन परमप्रभु नड। लेवी १९:२

8 आं फुल्लुम मुशा ब्रेक्शो लोत्र इन थुंम वोइश्शा टिने। गो परमप्रभु यावे नड। गो इन कली आं खोदेंशो सेल्लुड।

9 सुमी आ आंम आफ आस कली सराप पाइक्बा, मेको मुर कली साइक्चा माल्ब। आ आंम आफ आस कली सराप पाइक्तीके साइक्चा पुंडसीब। प्रस्थान २१:१७

10 सुइ मुर अरु आन मीश नु इप्त हना, मेको पाइब निम्फा आस कली साइक्चा माल्ब। प्रस्थान २०:१४; २सामुएल ११:४; यूहन्ना ८:५

11 सु आ आफ आ मीश नु इप्बा, मेकोम आ आफ कली मुने तोक्ब। मेको निम्फा आस कली साइक्चा माल्ब। मेको साइक्चा पुंडसीनीस। लेवी १८:६-२३

12 सु आ चाइमी नु इप्बा, मेको निम्फा आस कली साइक्चा माल्ब। मेको दूली पा मेको थम मरिम्शो बाक्ब। मेको साइक्चा पुंडसीनीस।

13 सुइ मुर मीश मुर नु इप्शो खोदेंशो पा वोंइश मुर नु इप्त हना, मेको थम ग्रांग्रा दितीक बाक्ब। मेको आस कली साइक्चा माल्ब। मेको थमा पा साइक्चा पुंडसीनीस।

14 सु मुर ममा नु आ तमी निम्फा नु इप्बा, मेको काइ मरिम्शो बाक्ब। मेको सां आन कली चोचा माल्ब। इन दातेमी मोदेंशो मरिम्शो मदुम्ल।

15 सुइ वोंइश मुर बस्तु भाव नु इप्त हना, मेको कली साइक्चा माल्ब। मिनु मेको बस्तु कली यो साइक्चा माल्ब।

16 सुइ मीश मुर बस्तु भाव नु इप्त हना, मेको मीश मुर नु बस्तु निम्फा आस कली साइक्चा माल्ब। मेको साइक्चा पुंडसीनीस।

17 सु मुर आ दिदी बहिनी, आ आंम आ तमी कि आ आफ आ तमी नु इप्त हना, मेको थम मुने बाक्ब। मेको निम्फा आस कली आस मुर आन दाते रे नेल्लेम तचा डा पा साइश्शा क्याम्चा माल्ब। मेकोमी आंम आ समी नु इप्तीके सजाइ गेचा पुंडसीब।

18 सुइ मुर रां ब्रोल्लो मीश मुर नु इप्त हना, मेको निम्फा आस कली आस मुर आन दाते रे साइश्शा क्याम्चा माल्ब। मारदे हना मेको वोंइश मुरुमी मीश मुर आ हुश यितीक ताप्तु। मिनु मीश मुरुमी चहिं आ हुश यितीके कोइताक्व। लेवी १५:२४

19 इन ममा आ लोक्ब नु इन आफ आ समी नु मइपीन। मारदे हना मो पाइतीनी हना, आंम खिं डा मुर कली मुने तोक्नीनी। मेको सजाइ ताइनीस।

20 सुइ मुरुमी आ बोडो, बकान्छा कि मामा आ मीश नु इप्त हना, मेकोमी आ बोडो, बकान्छा कि मामा कली मुने तोक्ब। मेको सजाइ जचा पुंडसीनीस। मिनु आल मथिथु बेक्नीस।

21 सुमी मुरुमी आ भोग्यु कि बोहारी चाक्बा, मेको ग्रांग्रा दिशो बाक्ब। मेकोमी आंम लोकब कली मुने तोक्ब। मिनु आल मथिथु बेक्नीस।

22 गेपुकीमी आं फुल्लुम मुशा ब्रेक्शो लोव्र नु आं पाबो, दे अरेशो लोव्र नेल्ल तुइशशा पचा माल्नीनी। मो मपाइतीनी हना, गो इन कली चाक्शो रागीमी इन कली उक्बे पा ताइक्ब। 23 गे इन डोंइती खेरशो रागी रागी डा मुर आन पशो मपने। मेकोपुकीमी मोदेशो नेल्ल पाम्तेक्म। मोपतीके गो मेको आन कली तशा थम ग्रांग्रा दीती। 24 तन्न गो इन कली मेको आन रागी इन के दुम्ब। गो इन कली गेनुड, देंती। मिनु मेको रागीम दूध नु खुदो शुश बाक्ब। गो परमप्रभु यावे, इन परमप्रभु नड। मिनु गो इन कली रागी रागी डा मुर रे तिल्शा योव्रतन्नी। प्रस्थान १९:५-६

25 मोपतीके गेपुकीमी ग्रांग्रा मदिशो नु ग्रांग्रा दिशो जन्तु नु ग्रांग्रा मदिशो नु ग्रांग्रा दिशो चिक्ब तुइशशा तिल्चा माल्नीनी। गेपुकीमी ग्रांग्रा दिशो जन्तु, चिक्ब नु खपीम गेशा गाक्ब जन्तु रे आंम कली ग्रांग्रा दिशो मसेल्सीन। मारदे हना मेको ग्रांग्रा दिशो बाक्नीम, दे शेंताक्ड। लेवी ११:- 26 गेपुकी ग्रांग्रा दिशो क्येडा डोन बाक्शो दुमीन। मारदे हना गो ग्रांग्रा दिशो क्येडा डोन बाक्शो परमप्रभु यावे नड। मिनु गो इन कली आं मुर दुम्चा कली अरु मुर रे तिल्शा योव्रतन्नी।

27 सु इन दातेमी वोंइश मुर कि मीश मुर बेक्शो मुर रे लोव्र पाइबा कि लिंक्यु कोव्रनीम, मेको आन कली साइक्चा माल्ब। मेको आन कली फुल्लु आप्शा साइक्चा माल्ब। मेको साइक्चा पुंइसीनीम' दे इस्राएली आन कली शेंदो" दे परमप्रभु यावेमी मोसा कली देंत। प्रस्थान २२:१७

21

चढ़ेब आन कली अरेशो लोव्र

1 मिनु परमप्रभु यावेमी मोसा कली "हारून आ तौ, चढ़ेब आन कली 'इन मुर बेक्तेक्म हना, गेपुकी मेको बेक्शो मुर कली थिशा आंम कली ग्रांग्रा दिशो मसेलीन। इजीकीएल ४४:२५-२७ 2 तन्न इन आम आफ, तमी तौ नु लोकब, 3 कन्ने दिदी बहिनी आन पर्बम ला आंम इन कली ग्रांग्रा दिशो सेल्ने चाप्नीनी। 4 मिनु गेपुकीमी ग्युंबे पा नक नाता डा मुर आन पर्बम आंम कली ग्रांग्रा दिशो सेल्चा मदुम्ब।

5 गे चढ़ेबपुकीमी रेंका पा, इन चां प्रेक्चा, इन गाल शोक्रे आ सुर खोइक्चा नु इन रां क्योरशा गार सेल्चा मदुम्नीनी। लेवी १९:२७-२८ 6 इन परमप्रभु कली ला गेय पाइब दुमीन। इन परमप्रभु आ नें ग्रांग्रा दिशो सेल्ब मदुम्नीम। मारदे हना गेपुकीमी परमप्रभु यावे कली मीम चोशा चढ़ेतीके चढ़ेनीनी। मोपतीके गेपुकी परमप्रभु कली ला गेय पाइब बाक्नीनी।

7 गे चढ़ेबपुकीमी तेल्लेम मीश मुर, ग्रांग्रा दिशो मीश मुर नु आ वोंइशेमी प्रोंइशो मीश मुर चाक्चा मदुम्ब। मारदे हना गेपुकी परमप्रभु आ मुर बाक्नीनी। 8 मिनु गे इस्राएलीपुकीमी चढ़ेब आन कली परमप्रभु आ गेय पाइब मिम्तीन। मारदे हना मेकोपुकी इन परमप्रभु आ जचा चढ़ेनीम। मेकोपुकी इन पर्बम परमप्रभु आ गेय पाइब दुम्शो बाक्नीम, दे मिम्तीन। मारदे हना इन कली ग्रांग्रा रे डोन बाक्ब सेल्ब, गो ग्रांग्रा रे डोन बाक्ब परमप्रभु यावेमी इन कली आं खोदेशो सेल्नुड।

9 मिनु चढ़ेब आ तमीमी तेल्लेम पा आंम कली ग्रांग्रा दिशो सेल्लु हना, मेकोमी आ आफ कली ग्रांग्रा दिशो सेल्ब। मेको कली मीम चोशा साइक्चा माल्ब।

10 मिनु सु आंम लोकब आन दातेम ठेयब चढ़ेब दुम्शो बाक्मे, मिनु आ पियाम तेल लुक्शो बाक्मे नु ठेयब चढ़ेब आ वा फेक्चा कली तिल्शो बाक्मे, मेकोमी रेंका पशा, आ पिया डा चां प्रेक्चा मदुम्ब नु आ वा खाक्चा मदुम्ब। लेवी ८:१२; प्रस्थान २८:४१; प्रस्थान २९:७; लेवी १०:६; लेवी २१:२ 11 मेकोमी बेक्शो मुर बाक्तीके लशा, आंम कली ग्रांग्रा दिशो सेल्चा मदुम्ब। मेको आ आम आफ आ बेक्शो रां यो कोव्रथ लचा मदुम्ब। 12 मेको परमप्रभु यावे आ बाक्तीके ताम्बु रे गूचा मदुम्ब। मोदेशो पाप्तु हना, मेकोमी आंम परमप्रभु आ बाक्तीके ग्रांग्रा दिशो सेल्ब। मारदे हना मेको परमप्रभु आ तेल लुक्शो मुर बाक्ब। गो परमप्रभु यावे नड।

13 मेकोमी कन्ने मीश आल कली ला ग्युंबे पने चाप्ब। 14 आ वोंइश बेक्शो मीश मुर, आ वोंइश प्रोंइशो मीश मुर, ग्रांग्रा दिशो कि तेल्लेम मीश मुर चाक्ने मचाप्ब। मिनु मेकोमी आ जात डा कन्ने मीश आल ग्युंबे पचा माल्ब। 15 मगारचा डा मीश मुर नु ग्युंबे पा, आंम जात नु आंम तमी तौ आन कली ग्रांग्रा दिशो सेल्चा मदुम्ब। मारदे हना गो परमप्रभु यावे नड। गो मेको कली आंम मुर सेल्ता' दे शेंदो" दे परमप्रभु यावेमी मोसा कली देंत।

16 मिनु परमप्रभु यावेमी मोसा कली 17 "गे हारून कली 'इ तमी तौ, चच युइ आन दातेमी गुइ खोइल कुंजे नु दूली मुर आंम परमप्रभु कली चढ़ेब दुम्ने मचाप्ब। 18 मारदे हना सुइ दूली मुर, मिक्च मताइब, खोइल मदुक्ब, आ कुल कि रां बिग्रेशो कि खोइल का लाइशो मुर परमप्रभु आ डोंइती जाक्चा मदुम्ब। 19 गुइ जिक्शो, खोइल जिक्शो, 20 कुप्रे,

बामन्ने, मिक्च रोइ पशो, रक सुतीक रोइ पशो, लुतो पशो कि आ गेडा ठीक मदुम्शो मुर आं परमप्रभु आ डोंइती जाक्ने मचाण्ब। 21 चढेब हारून आ तमी तौ चच युइ सु दूली दुम्शो बाक्मे, मेको परमप्रभु यावे कली चोशो चढेतीक चढेने मचाण्ब। मारदे हना मेको दूली बाक्ब। मेकोम आम परमप्रभु कली जचा थोव्रक चढेचा मदुम्ब। 22 मेकोमी आम परमप्रभु कली चढेशो नु चोव्रखो नु थम चोव्रखो जचा थोव्रक चहिं जने ब्वने चाण्ब। 23 तन्न मेको फारशो वा नु चढेतीक आ नेक्था जाक्चा मदुम्ब। मारदे हना मेको दूली मुर जाक्शा, आं बाक्तीक ताम्बु ग्रांग्रा दिशो मसेलल। गो परमप्रभु यावे नड। गो मेको आन कली मेको आं के सेल्लुड' दे शेंदो" दे परमप्रभु यावेमी मोसा कली देंत।

24 मिनु मोसामी हारून, मेको आ तौपुकी नु इस्राएली नेल्ल आन कली एको लोव्र नेंपाइक्तीमी।

22

सुमी चढेतीक रे जने ब्वने चाण्ब

1 परमप्रभु यावेमी मोसा कली 2 "गे हारून नु आ तौ आन कली मार शेंचा माल्नेवे देंशा हना, 'इस्राएलीपुकीमी आं कली चढेशो थोव्रक आन पर्बम होस पा बाक्कीन। मिनु आं नें कली ग्रांग्रा दिशो मसेलीन। गो परमप्रभु यावे नड' दे शेंचा माल्नेवे" दे परमप्रभु यावेम मोसा कली देंत।

3 मिनु मोसा कली "गो परमप्रभु यावे नड। गो मेको आन कली 'इन तौ, चच युइ आन पाला डा तेकोइ मुर ग्रांग्रा दिशो दुम्शा, इस्राएलीपुकीमी परमप्रभु यावे कली चढेशो थोव्रक आन नेक्था जाक्तेक्म हना, मेको मुर आं डोंइती रे तिल्ला पुंइसीब। गो परमप्रभु यावे नड।

4 मिनु हारून आ तौ, चच युइ आन दातेमी सुइ कुशुल डा रोइ नु ग्रांग्रा यितीक पशो बाक्तेक्म हना, मेको ग्रांग्रा मदिशो सम्म आं कली चढेशो मारेइ थोव्रक जचा ब्वचा मदुम्ब। सुइमी बेक्शो मुर के कि बिउ यिशो मुर रे ग्रांग्रा दिशो दुम्शो मुर कली थीबा, लेवी १३:-१५:- 5 कि खपीम ग्रेशा गाक्ब जन्तु कली थिशो ग्रांग्रा दिशो दुम्शो मुर थीबा, कि मार मार आ पर्बम ग्रांग्रा दिशो बाक्त हना, 6 मेको मुर नां मरिक्म सम्म ग्रांग्रा दिशो बाक्ब। मेकोमी मचिक्से सम्म ला आं कली चढेशो जचा ब्वचा मदुम्ब। लेवी ११:- 7 मोदेशो मुर नां रिक्म नोले ला ग्रांग्रा मदिशो दुम्ब। मिनु नोले मेकोमी आं कली चढेशो थोव्रक जने ब्वने चाण्ब। मारदे हना मेको आं कली चढेशो आ जचा ब्वचा थोव्रक बाक्ब। 8 मिनु बेक्शो, ब्वाकी डा जन्तुपुकीम क्राइशशा साइशो जन्तु, बस्तु भाव कली ब्वचा मदुम्ब। मोदेशो पाप्तु हना, मेको मुर ग्रांग्रा दिशो सेल्लसीब। गो परमप्रभु यावे नड। लेवी ७:२४

9 चढेबपुकीमी आं देंशो टिचा माल्नीम। मो मपाम्तेक्म हना, मेकोपुकीमी आं देंशो मटितेक्म हना, मेकोपुकी दोस तशा आं बाक्तीक ताम्बुमी बेक्नीम। मिनु गो मेको आन कली आम आं मुर सेल्ल परमप्रभु यावे नड।

10 मिनु अर्को रागी डा मुर नु चढेब आ खिंम पौना बाक्शो कि गाल्च ताइब मुर आं कली चढेशो थोव्रक जचा ब्वचा मदुम्ब। 11 तन्न चढेबमी क्येट थाप्शा ग्याप्शो मुर नु मेको आ खिंम जरमेशो मुर चढेब आ भाग रे जचा ब्वचा दुम्ब। 12 मिनु चढेब आ तमी अर्को खिं डा मुर नु ग्युंभे पशो बाक्त हना, परमप्रभु कली चढेशो जचा ब्वचा मदुम्ब। 13 तन्न चढेब आ तमी आ वोंइश बेक्शो कि प्रोंइचा पुंइसीशो बाक्त हना, आ तमी तौ मदुम्थु, आ आफ आ खिं लेत्त हना, आ आल ना डा खोदेशो पा आन आफ आ भाग डा चढेशो रे जने ब्वने चाण्ब। तन्न अर्को खिं डा मुर मेको जचा ब्वचा मदुम्ब।

14 मिनु मरुम मतुइक्थु परमप्रभु कली चढेशो रे जाप्तु हना, मेकोमी चढेब कली मेको आ जशो क्येडा ५ भाग तेम्शा, परमप्रभु कली चढेशो खोदेशो पा चढेब कली लेत्चा माल्ब। लेवी ५:१६ 15 मोपा सुइमी इस्राएली आन परमप्रभु यावे कली चढेशो थोव्रक ग्रांग्रा सेल्ला मदुम्ब। 16 मोदेशो परमप्रभु कली चढेशो जशो मुर दोस ताइनीम। मिनु मेकोमी गारशा आ पर्बम चढेतीक चाक्चा माल्ब। मारदे हना मेकोमी परमप्रभु यावे कली चढेशो जाप्तु ब्वाप्तु। गो परमप्रभु यावे नड। मिनु गो मेको कली आम आं मुर सेल्ला' दे शेंदो" देंत।

17 मिनु परमप्रभु यावेमी मोसा कली 18 "गे हारून, आ तौपुकी नु इस्राएली नेल्ल आन कली 'इस्राएली आन दातेमी मुर का कि इस्राएलम बाक्ब अर्को रागी डा मुरुमी ग्येरशा परमप्रभु यावे कली चढेतीके चोशा चढेशो खोदेशो परमप्रभु यावे कली चढेचा दाक्ताक्व हना, 19 मिनु परमप्रभु आ डोंइती ब्रचा डा पा मेकोमी मारेइ मदुम्शो थम रिम्शो ब्यफ, सांड कि बोका चढेचा माल्ब। 20 गार पाइशो बस्तु चढेचा मदुम्ब। मारदे हना मेको मब्रचा डा बाक्नीम। ब्यवस्था १५:२१; ब्यवस्था १७:१; मलाकी १:८

21 मिनु मुर कामी दुशा बाक्चा आ पर्वम चढेतीके परमप्रभु यावे कली चढेशा, आ पशो कसम खबानु, ग्येरशा परमप्रभु यावे कली चढेतीके, खोदेशो पा, मेको ब्रचा डा दुम्पाइक्चा कली आ हुल रे मारेइ मदुम्शो थम रिम्शो बस्तु चढेचा माल्ब। 22 मिनु गेपुकीम परमप्रभु यावे कली मिक्च मताइब, गार दुम्शो, आन रां बिग्रेशो, ग्रांग्रा यितीके पाइब, कुशुल रोइ पाइब कि लुतो पाइब बस्तु भाव चढेचा मदुम्ब। मोदेशो मीम चोशा चढेचा कली परमप्रभु यावे कली चढेतीकेमी वोइक्चा मदुम्ब। 23 मिनु गेपुकीमी लाइशशा खोइल पाइशो ब्यफ कि भेडा चहिं ग्येरशा चढेतीके चढेतीनी हना दुम्ब। तन्न कसम जशोनु, इन चढेतीके मब्राइब दुम्ब। 24 तेको ब्यफ, क्यारश भेडा खसी पशो गार सेल्शो नु चेशो बाक्बा, मेको परमप्रभु यावे कली चढेचा मदुम्ब। इन रागीम मो पचा मदुम्ब। 25 गेपुकीमी मोदेशो बस्तु भाव अर्को रागी डा मुर रे ग्याप्शा ताक्शा इन परमप्रभु कली जचा थोत्रक चढेचा मदुम्ब। मेको आन रां बिग्रेशो नु गारम पतीके इन पर्वम मब्रतीक दुम्ब' दे शेंदो" दे परमप्रभु यावेमी मोसा कली देंत।

26 मिनु परमप्रभु यावेमी मोसा कली 27 "बाछा, भेडा पाठा कि क्यारश पाठा जरमेशा, मेको ७ नाक्त सम्म आ ममा नु बाक्चा माल्ब। मिनु मेको कली ८ नाक्त रे चोशा चढेशोनु, परमप्रभु यावेमी ब्राइब। प्रस्थान २७:२९ 28 तन्न गेपुकी बी नु आ चाइक्ब कि भेडा नु आ पाठा काबुमी क्योरचा मदुम्ब। ब्यवस्था २२:६-७

29 गेपुकीमी परमप्रभु यावे कली 'गे रिम्शो पाइब बाक्नीनी' दे चढेशो चढेनीनु, मेको इन पर्वम ब्रचा डा पा चढेने। लेवी ७:१५ 30 मेको चढेशो नाक्ती मेको कली बवने। आ दीसा सुनी सम्म मारेइ महेंचा। गो परमप्रभु यावे नड।

31 मिनु गेपुकीमी आं शेंतीके तुइशशा टिने। गो परमप्रभु यावे नड। 32 गे आं ग्रांग्रा रे डोन बाक्शो नें ग्रांग्रा दिशो मसेलीन। मोपतीके गो इस्राएली आन दातेमी का ला ठेयब दुम्ती। गो परमप्रभु यावे नड। मिनु गो इन कली आंम आं मुर सेल्ता। लेवी २२:९, १६ 33 मिनु इन परमप्रभु दुम्चा कली गो इन कली इजीप्त रागी रे गुंडताक्ड। गो परमप्रभु यावे नड, दे शेंदो" देंत।

23

सन्चरबार नाइक्तीक नाक्ती

1 मिनु परमप्रभु यावेमी मोसा कली 2 "गे इस्राएली आन कली 'परमप्रभु यावे आ देशो पचा माल्शो चाड परमप्रभु यावे के बाक्नीम। मिनु गे मेको पचा माल्नीनी।

3 गे ६ नाक्ती सम्म गेय पचा माल्नीनी। तन्न ७ नाक्त चहिं थमा पा नाइक्तीक नाक्ती बाक्शा, परमप्रभु यावे केन बाक्ब। गे मारेइ गेय मपने। इन बाक्तीक नेल्लेमी परमप्रभु यावे आ नाइक्तीक नाक्ती बाक्ब' " देंत। प्रस्थान २०:८-११

पास्सा चाड आ पर्वम अरेशो

4 मिनु परमप्रभु यावेमी लेंशा, मुर आन कली शेंचा, दे मोसा कली "परमप्रभु यावे आ देशो पचा माल्शो चाड आ चाड बाक्नीम। आ देशो नाक्ती मानेचा माल्नीनी। परमप्रभु यावे आ चाडपुकी मार बाक्नीम देशा हना, प्रस्थान २३:१४-१९ 5 डोंइती डा महिना डा १४ नाक्ती नाक्नाक्दो पास्सा चाड डा परमप्रभु यावे कली चढेतीक गेय पचा माल्नीम। प्रस्थान १२:- 6 मेको महिना डा १५ नाक्ती परमप्रभु यावे कली बोरब ओरुत्ती मसुप्शो शोब्ले जतीक चाड बाक्ब। गेपुकीमी ७ नाक्त सम्म बोरब ओरुत्ती मसुप्शो शोब्ले जचा माल्नीनी। 7 डोंइती डा नाक्ती आं पर्वम गुम्तीक नाक्ती दुम्चा माल्ब। मेको नाक्ती मारेइ गेय मपने। 8 मिनु ७ नाक्त सम्म गेपुकीमी परमप्रभु यावे कली मी चोशो चढेतीके चढेचा माल्नीनी। मेको आ ७ नाक्ती लेंशा परमप्रभु यावे आ पर्वम गुम्तीक दुम्चा माल्ब। मेको नाक्ती गेपुकीमी मारेइ गेय मपने" देंत। प्रस्थान १३:६

डोंइती मीशो बाली नाली

9 मिनु परमप्रभु यावेमी मोसा कली 10 "गे इस्राएली आन कली 'इन कली गेशो रागीम जाक्दीशशा, मेकेर डा बाली नाली खुप्तीनीनु, गेपुकीमी डोंइती डा रिक्शो बाली मुठा का चढेब आन कली चाक्कीन। 11 मेकोमी अन्न मुठा परमप्रभु यावे आ डोंइती क्युक्शा हिम्चा माल्ब। मो पाइतीनी हना परमप्रभु यावेमी इन कली ब्राइब। नाइक्तीक नाक्ती आ दीसा चढेबमी मेको क्युक्शा हिम्चा माल्ब। 12 मेको क्युक्शा हिम्शो नाक्ती गेपुकीमी परमप्रभु यावे कली बर्स का दुम्शो मारेइ मदुम्शो थम रिम्शो सांड चोशा चढेचा माल्नीनी। 13 मेको नु अन्न चढेतीक चढेचा माल्नीनी। मेको अन्न चढेतीक चहिं तेलम निशो एफाह के २० भाग थम रिम्शो फस दुम्चा माल्ब। मेको परमप्रभु यावे कली आ दाक्शो ब्रोवशो रिना पाइशो मीम चोशा चढेतीके बाक्ब। मेको नु तूचा थोत्रक चढेतीके हिन का डा ४ भाग सेल्शो रे भाग

का अडगुर शांबु चढ़ेचा माल्नीनी। एफाह पुक्तीके का बाक्ब। एफाह का २२ लिटर रिक्ब। मेको के २० भाग ४.४ लिटर बाक्ब। लोग आइक्च पुक्तीके का बाक्ब। मेको ०.३ लिटर रिक्ब। हिन अर्को पुक्तीक का बाक्ब। हिन का ४ लिटर खोदेशो रिक्ब। हिन का ४ भाग सेल्शो रे भाग का लिटर का खोदेशो बाक्ब। 14 मेको नेल्ल परमप्रभु कली चढ़ेशो नोले ला शोब्ले, कारशो अन्न नु गिगी बाला मारेइ जने चाप्नीनी। मेको गेपुकी ते बाक्तीनी हना यो, एको गेना हना यो नेल्ल पाला सम्म पतीक बाक्ब।

७ हप्ता नोले डा चाड

15 मिनु नाइक्तीक नाक्ती आ दीसा, गे अन्न आ मुठा क्युक्शा हिम्शा चढ़ेतीक नाक्त रे गेपुकीमी ७ हप्ता हिक्चा माल्नीनी। गन्ती २८:२६-३१; ब्यवस्था १६:९-१२ 16 मिनु गेपुकीमी ७ हप्ता आ दीसा, ५० नाक्त सम्म हिक्चा माल्नीनी। मेको नाक्ती गेपुकीम परमप्रभु यावे कली नक अन्न चढ़ेचा माल्नीनी। 17 गेपुकीमी आंम इन खिं रे शोब्ले निक्शी क्युक्शा हिम्शा चढ़ेचा कली माल्नीनी। मेको शोब्ले का एफाह का के २० भाग थम रिम्शो फस रे बोरब ओरूती सुप्थु चोशा सेल्शो दुम्चा माल्ब। मेको डोंइती मीशो अन्न के परमप्रभु यावे कली चढ़ेतीक बाक्ब। एफाह पुक्तीके का बाक्ब। एफाह का २२ लिटर रिक्ब। मेको के २० भाग ४.४ लिटर खोदेशो बाक्ब। 18 मेको शोब्ले नु बर्स का गाप्शो ७ ओटा मारेइ म्दुम्शो थम रिम्शो पाठा नु ब्यफ का नु सांड निक्शी चढ़ेचा माल्नीनी। मेको अन्न चढ़ेतीक नु तूचा थोव्रक चढ़ेतीके परमप्रभु यावे कली आ दाक्शो ब्रोव्रशो रिना पाइश्शो मीम चोशो चढ़ेतीक बाक्ब। 19 मिनु गेपुकीमी पाप आ पर्बम चढ़ेचा कली बोका का नु दुशा बाक्चा आ पर्बम चढ़ेचा कली बर्स का गाप्शो सांड निक्शी यो चढ़ेचा माल्नीनी। 20 मिनु चढ़ेबमी परमप्रभु यावे कली डोंइती नक मीशो अन्न के शोब्ले नु सांड निक्शी क्युक्शा हिम्शा चढ़ेचा माल्ब। मेको चढ़ेब आ भाग दुम्चा कली परमप्रभु यावे कली गेशो बाक्नीम। 21 मेको नाक्त इन कली ठेयब गुम्तीक नाक्त बाक्ब, दे गेपुकीमी नेल्ल आन कली नेंपाइक्चा माल्नीनी। गेपुकीमी मारेइ गेय मपने। मेको गेपुकी ते बाक्तीनी हना यो, एको गेना हना यो नेल्ल पाला सम्म पतीक बाक्ब।

22 मिनु गेपुकीमी इन बाली नाली रिक्नीनु, रू आ कुना कुना सम्म मरिक्कीन। गेपुकीमी इन रू डा सिला बाला यो मगुपीन। गेपुकीमी इन दाते डा प्रुडग नु अर्को रागी डा मुर आन पर्बम प्रोनीन। गो परमप्रभु यावे, इन परमप्रभु नड' दे शेंचा माल्नेवे" देंत। लेवी १९:९-१०

नाइक्तीक डा चाड

23 मिनु परमप्रभु यावेमी मोसा कली 24 "इस्त्राएली आन कली '७ महिना डा डोंइती डा नाक्ती गे नाइक्चा माल्नीनी। गे परमप्रभु यावे आ पर्बम ग्रुम्शा, मेको नाक्त मिम्चा कली तुराही ताप्चा माल्नीनी। गन्ती २९:१-६; गन्ती १०:१० 25 गेपुकीमी मेको नाक्त मारेइ गेय मपने। मिनु परमप्रभु यावे कली मीम चोशो चढ़ेतीके चढ़ेन' दे शेंचा माल्नेवे" देंत।

पाप क्याम्तीक नाक्ती डा चाड

26 मिनु परमप्रभु यावेमी मोसा कली 27 "मेको ७ महिना डा १० नाक्त पाप क्याम्तीक नाक्त बाक्ब। मेको नाक्ती गेपुकीमी परमप्रभु यावे आ पर्बम ग्रुम्चा माल्नीनी। गेपुकी मेको नाक्त माइजा बाक्चा माल्नीनी। मिनु गेपुकीमी परमप्रभु यावे कली मीम चोशा चढ़ेतीक चढ़ेचा माल्नीनी। लेवी १६:- 28 मेको नाक्त मारेइ गेय मपने। मारदे हना मेको पाप क्याम्तीक नाक्त बाक्ब। मेको नाक्ती परमप्रभु यावे, इन परमप्रभु आ डोंइती इन पर्बम पाप क्याम्तीक गेय पतीक नाक्ती बाक्ब। 29 मिनु सु मेको नेल्ल नाक्ती माइजा मबाक्बा, मेको आ मुर आन दाते रे साइक्चा पुंडसीब। 30 मिनु सुइमी मेको नाक्त मारेइ गेय पाम्तेक्म हना, गो मेको आन कली साइक्नुड। 31 गेपुकीमी मेको नाक्त मारेइ गेय मपने। गेपुकी ते बाक्तीनी हना यो, मेको गेना हना यो इन पतीक बाक्ब। 32 मेको नाक्त इन कली थमा पा नाइक्तीक नाक्त बाक्ब। मिनु मेको नाक्त गेपुकी माइजा बाक्चा माल्नीनी। मेको महिना डा ९ नाक्त डा नां रिक्म रे आ दीसा नां रिक्म सम्म गेपुकी माइजा बाक्शा नाइक्चा माल्नीनी, दे शेंचा माल्नेवे" देंत।

गोठ सेल्शा बाक्तीक चाड

33 मिनु परमप्रभु यावेमी मोसा कली 34 "गे इस्त्राएली आन कली '७ महिना डा १५ नाक्त रे ७ नाक्न सम्म परमप्रभु यावे आ डोंइती गोठ सेल्शा बाक्तीक चाड मानेचा माल्नीनी। 35 मेको आ डोंइती डा नाक्ती परमप्रभु यावे आ पर्बम ग्रुम्चा माल्नीनी। गेपुकी मेको नाक्त इन गेय मपने। 36 मिनु गेपुकीमी ७ नाक्त सम्म परमप्रभु यावे कली मीम चोशा चढ़ेतीक चढ़ेन। मिनु गेपुकीमी आ दीसा परमप्रभु यावे आ पर्बम ग्रुम्तीक नाक्ती मानेन। मिनु परमप्रभु यावे कली मीम चोशा चढ़ेन। मेको ठेयब ग्रुम्तीक नाक्ती बाक्ब। मिनु गेपुकीम मेको नाक्त इन गेय काइ मपने। यूहन्ना ७:३७

37 मिनु परमप्रभु यावे आ देशो ठेयब गुम्तीक डा मानेचा माल्लो चाड तेको बाक्नीम देशा हना, मेको नाक्ती गेपुकीमी परमप्रभु यावे कली मीम चोशा चढेतीके, अन्न चढेतीके, क्योरशा चढेतीके नु तूचा थोवक चढेतीके ठीक नाक्ती चढेचा माल्नीनी। 38 मेको क्येडा परमप्रभु यावे आ नाइक्तीक नाक्ती डा, इन दाक्शा गेतीक थोवक, इन कबल पशो गेतीक थोवक नु इन ग्येरशा गेशो थोवक परमप्रभु यावे कली चढेचा माल्नीनी। 39 मिनु ७ महिना डा १५ नाक्ती आम रू डा अन्न खुप्लो नोले गेपुकीमी ७ नाक्त सम्म परमप्रभु यावे आ चाड मानेचा माल्नीनी। डोंइती डा नाक्त नु ८ नाक्ती थमा पा नाइक्चा माल्नीनी। 40 डोंइती डा नाक्ती गेपुकीमी रवा आन रिम्शो फल फुल, खजूर रवा आन राशी, शुश सफा पाइशो रवा आन राशी नु अरु खोलामी बाक्शो रवा आन राशी चाक्शा, गे परमप्रभु यावे, इन परमप्रभु आ डोंइती ७ नाक्त सम्म ग्येरसीन। नेहेम्याह ८:१४-१६ 41 गेपुकीमी बर्सम ७ नाक्त सम्म एको चाड मानेशा, परमप्रभु यावे कली ठेयब सेल्चा माल्नीनी। गेपुकी ७ महिनामी एको चाड मानेचा माल्नीनी। एको इन कली गेना हना यो पतीक बाक्ब। 42 गे ७ नाक्त सम्म गोठीमी बाक्कीन। इस्राएल डा मुर नेल्ल गोठीम बाक्चा माल्नीम। 43 गो इन कली इजीप्त रे गुंडशा चाक्नीनु, गोठीम बाक्पाइशो नड, दे इन चच युइपुकीम तुइक्चा माल्नीम। गो परमप्रभु यावे, इन परमप्रभु नड' दे शेंदो" देंत।

44 मिनु मोसामी परमप्रभु यावे कली मानेचा माल्लो चाड मुर नेल्ल आन कली नेंपाइक्तीमी।

24

बत्ती नु शोब्ले

1 मिनु परमप्रभु यावेमी मोसा कली 2 "गे इस्राएली आन कली 'बत्ती गेना हना यो ब्रपाइशो वाओइक्चा कली गेपुकीमी तेल रवा आ फल रे तुप्शा सेल्शो तेल चाक्कीन। प्रस्थान २७:२

3 मिनु हारूनमी बत्ती कली गुम्तीक ताम्बु आगा, फारशो वा आ डोंइती वोइक्चा माल्ब। मेको परमप्रभु यावे आ डोंइती नाक्दो रे सुनी सम्म गेना हना यो ब्रचा माल्ब। मेको इन कली गेना हना यो पतीके बाक्ब। 4 मेकोमी परमप्रभु यावे आ डोंइती क्येख सुन के सेल्शो बत्ती दातीक तारी गेना हना यो वोइक्चा माल्ब।

5 गे रिम्शो फस चाक्शा, बार ओटा शोब्ले चोवो। शोब्ले का एफाह का के २० भाग थम रिम्शो फस के दुम्या माल्ब। एफाह पुक्तीके का बाक्ब। एफाह का २२ लिटर रिक्ब। मेको के २० भाग ४.४ लिटर खोदेशो बाक्ब। प्रस्थान २५:३० 6 मेको शोब्ले परमप्रभु यावे आ डोंइती क्येख सुन के टेबल आ तार ६, ६ ओटा खोप्शा वोइक्चा माल्ब। 7 मेको निक्शी खोप्तीकेमी का का पा रिम्शो धूप वोइक्चा माल्ब। मिनु मेको शोब्ले आ पा डा मेको धूप मीम चोशा परमप्रभु यावे कली चढेचा माल्ब। 8 मोपा हारूनमी नेल्ल नाइक्तीक नाक्ती मेको शोब्ले कली परमप्रभु यावे आ डोंइती वोइक्चा माल्ब। मेको इस्राएली आन कली मेको गेना हना यो पतीक नु लीब कबल बाक्ब। 9 मेको शोब्ले हारून नु आ तौ चच आन कली बाक्नीम। मेकोपुकीमी मेको शोब्ले चोवखो बाक्तीकेमी बाक्शा जचा माल्नीम। मारदे हना मेको शोब्ले परमप्रभु यावे कली मीम चोशा चढेशो रे नेल्ल क्येडा चोवखो हारून नु आ तौ चच आन भाग बाक्ब' दे अरेवो" देंत।

परमप्रभु कली शुक्शी पाइब

10 मिनु इजीप्ती आफ नु इस्राएली ममा पाइशो मुर का बाक्माक्त। मेको मुर इस्राएली आन दातेमी जाक्शा, इस्राएली का नु तुम्मुसा बाक्त। 11 मिनु मेको इस्राएली ममा आ तौमी परमप्रभु यावे आ नें थिशा, सराप पवा बाक्त। मिनु मुरपुकीमी मेको कली मोसा आ बाक्तीकेम चाक्गमे बाक्त। मेको आ ममा आ नें शेलोमीथ बाक्माक्त। मिनु मेको दान आ थर डा दिब्री आ तमी बाक्माक्त। 12 मिनु मेको मुर कली चाक्शा, परमप्रभु यावे आ मिम्शो मतुइक्तमे सम्म चोक्शा वोदमे बाक्त। गन्ती १५:३४

13 मिनु नोले परमप्रभु यावेमी मोसा कली 14 "मेको सराप पाइब कली मुर आन बाक्तीक रे लाडगा गुंडदीन। मिनु मेको आ नेक्था बाक्ब मुर नेल्लेमी मेको आन गुइ आ पिया तारी वोइक्चा माल्नीम। मिनु मेको नोले नेल्लेमी मेको कली फुल्लु आप्शा साइक्चा माल्नीम। गन्ती १५:३६; ब्यवस्था १५:५; प्रेरित ७:५६ 15 मिनु गे इस्राएली आन कली 'सुम आ परमप्रभु कली सराप पाइबा, मेको आ पाप राइब। 16 परमप्रभु यावे आ नें आ पर्बम मरिम्शो लोव पाइब साइक्चा पुंडसीब। इस्राएल डा मुर बाक्त हना यो, अर्को रागी डा मुर बाक्त हना यो, सुम परमप्रभु यावे आ नें आ पर्बम मरिम्शो लोव पाइबा, मेको साइक्चा पुंडसीब। प्रस्थान २०:७; मती २६:६५-६६

17 सुमी मुर का कली साइक्बा, मेको साइक्चा पुंडसीब। प्रस्थान २१:१२ 18 सुइमी बस्तु भाव कली तुप्शा साइक्त् हना, मेको आ पा डा अरु गेचा माल्ब। ब्रोंइशो बस्तु आ पा डा ब्रोंइशो बस्तु गेचा माल्ब। प्रस्थान २१:३३-३७ 19 सुइमी आ नेक्था डा मुर कली आ खोइल जिक्ताक्व हना, मेको यो आ खोइल जिक्चा पुंडसीब। 20 जिक्तीके आ पा डा जिक्तीके, मिक्च आ पा डा मिक्च, खुइ आ पा डा खुइ, सुमी सु कली मार पाइबा, मेको यो मो पाइक्चा पुंडसीब। मेको कली यो मो पाइक्चा माल्ब। प्रस्थान २१:२३-२५ 21 सुइमी बी ब्यफ, क्यारश भेडा आन कली तुप्शा साइक्त् हना, मेको आ पा डा अर्को गेचा माल्ब। तन्न मुर साइक्ब कली चहिं, साइक्चान माल्ब। 22 आंम रागी डा मुर नु अर्को रागी डा मुर आन पबर्म खाल का डा ऐन कानुन दुम्चा माल्ब। मारदे हना गो परमप्रभु यावे, इन परमप्रभु नड' दे शेंचा माल्नेवे" देंत। लेवी १९:३४; प्रस्थान १२:४९

23 मिनु मोसामी इस्राएली आन कली मेको लोत्र शेंदीमी नोले मेकोपुकीमी मेको सराप पाइब कली मुर आन बाक्तीक रे गुंडशा, फुल्लु आप्शा साइक्तेक्म। मिनु परमप्रभु यावेमी मोसा कली अरेशो खोदेंशो पा इस्राएली नेल्लेमी पाम्तेक्म।

25

नाइक्तीक बर्स

1 मिनु परमप्रभु यावेमी सीनै डांडामी मोसा कली 2 "गे इस्राएली आन कली 'गेपुकी गो इन कली गेशो रागीमी जाक्दीन्नी नोले मेको रागी यो परमप्रभु यावे आ नेमी नांडसीचा माल्ब। 3 गे ६ बर्स सम्म आंम रूम मार मार शोक्चा खुम्चा माल्नीनी। ६ बर्स सम्म इन अडगुर रू डा बोट आन मसिश्शो राशी खोइश्शा ताइक्चा माल्नीनी। मिनु मेको आ अडगुर खुप्चा माल्नीनी। प्रस्थान २३:१०-११ 4 तन्न ७ बर्सम रू नेल्ले परमप्रभु यावे आ बर्सम नाइक्चा माल्ब। गेपुकीमी ७ बर्सम इन रूम मारेइ मशोक्चा मखुम्चा। मिनु अडगुर बोट आ फल मसिप्ब राशी यो मखोतीन। 5 इन रूमी आंमा वाशो मारेइ मारेइ खुप्चा मदुम्ब। मखोइश्शो अडगुर बोट आ फल खुप्चा मदुम्ब। मेको रू कली थम नांडसीतीक बर्स दुम्चा माल्ब। 6 मेको रू नांडसे ना आंमा सिश्शो मारेइ मारेइ जने चाप्नीनी। मिनु इन वाइलीम वाइल नु गे नु बाक्ब इन थाप्शो गेय पाइबपुकीमी जने चाप्नीमी। 7 मेको रूमी वाशो, इन बस्तु भाव नु ब्वाकी डा जन्तु आन कली ब्वतीक दुम्ब।

डोंइती डा खोदेंशो सेल्टीक बर्स

8 मिनु गेपुकीमी ७ नाइक्तीक बर्स मानेनी नोले, मिनु ४९ बर्स दुम्बा, 9 मिनु ७ महिना डा १० नाक्ती पाप क्याम्तीक नाक्त् बाक्ब। मेको नाक्ती इन रागी नेल्लेमी तुराही ताप्पाइक्चा माल्नीनी। लेवी २३:२७ 10 मिनु ५० डा बर्स परमप्रभु यावे आ बर्स बाक्ब। मिनु गे रागी डा मुर नेल्ल आन कली आन डोंइती डा अधिकार लेंशा ताइनीम, दे नेंपाइक्चा माल्नीनी। मेको इन कली प्रोंइतीक बर्स बाक्ब। मिनु मुर नेल्ल आन आन खिं नु आन आन बाक्तीक लेन्ने चाप्नीम। यसैया ६१:२; लूका ४:१९ 11 मेको ५० बर्स इन कली डोंइती डा खोदेंशो पा लेंशा सेल्टीक बर्स बाक्ब। मेको बर्स गेपुकीमी मारेइ मशोक्कीन, मखुमीन। आंमा वाशो बाली नाली मरुप्चा। अडगुर बोट आन ममुंइशो राशीम सिश्शो अडगुर मखुप्चा। 12 मारदे हना मेको प्रोंइतीक बर्स बाक्ब। मेको परमप्रभु यावे आ बर्स दुम्ब। गेपुकीमी रूम आंमा वाशो, आंमा सिश्शो ला जने।

13 मेको प्रोंइतीक बर्समी मुर नेल्ल आन आन रू नु खिं लेत्चा माल्नीम।

14 मिनु आंम नेक्था डा मुर नु ग्याप्तीक लेयतीक गेय पनीनु, मठगेपामुने। १ थिस्सलोनिकी ४:६ 15 गे इन नेक्था डा मुर रे रू का ग्याप्तीवी हना, मेको प्रोंइतीक बर्स जाक्चा गिश बर्स लीनीम, दे हिक्शा ला ग्यापीन। 16 गिश बर्स लीनीमी मेको कोत्रशा गेपुकीमी आ क्येट बारपाइक्चा माल्नीनी। मिनु इक्का बर्स ला लीतेक्म हना, क्येट तोक्चा माल्नीनी। मारदे हना अन्न खुप्तीक बर्स कोत्रशा, मेको रू लेयशो बाक्ब। 17 गेपुकी आंम आंमा मठगेपामुने। तन्न परमप्रभु क्येडा हिनीन। मारदे हना गो परमप्रभु यावे, इन परमप्रभु नड।

18 गेपुकीमी आं फुल्लुम मुशा ब्रेक्शो लोत्र तुइश्शा पचा माल्नीनी। आ पावो, दे अरेशो लोत्र टिने। मोपा ला गे मेको रागीमी रिम्शो पा बाक्ने चाप्नीनी। लेवी २६:५; १राजा ५:५ 19 मिनु रागीमी अन्न ग्रेल्ब। गेपुकी जचा तूचाम श्येत मजाइनीनी। मिनु मेको रागीमी महिंथु थुं नाइश्शा बाक्चा ताइनीनी। 20 गेपुकीमी अन्न मशोक्थु मखुप्थु ७ बर्सम चहिं गो मार जाइनीकी, दे देंतीनी हना, 21 गो ६ बर्सम इन कली आं आसीक गेनन्नी। मिनु रागीम बर्स सां सम्म शुश अन्न

ग्रेलपाइक्नुड। ब्यवस्था २८:८ 22 गेपुकीमी ८ बर्सम खुम्नीनु, गे माइत अन्न रे जाइनीनी। ९ बर्सम नक बाली नाली ममीम सम्म गे माइतन जाइनीनी।

रागी रू नेल्ल परमप्रभु के बाक्ब

23 मिनु इन गे रू गेना हना यो कली लेयने मचाप्नीनी। मारदे हना मेको रागी आं के बाक्ब। गेपुकी गे आं के वाइल नु बुम्था पाइब खोदेशो बाक्नीनी। भजन संग्रह ३९:१३ 24 इन ग्याप्शो अधिकारम पिशो रू लेशा लेत्चा माल्नीनी। 25 सुइ इन मुर प्रुडग दुम्तीके आन रू लेयचा माल्तेक्म हना, मेको आ नेक्था डा मुर जाक्शा, मेको लेशशा ग्याप्पाइक्चा माल्ब। रूथ ४:३-४ 26 तन्न मो पाइब सुइ मबाक्तेक्म हना, नोले मेको आंमान क्येट थीब दुम्शा, लेशशा आंमा ग्याप्चा माल्ब। 27 मेकोमी मेको लेयशो गिश बर्स दुम्मे, मेको हिक्चा माल्ब। मिनु सु कली लेयशो बाक्मे, मेको लीशो बर्स डा खुप्तीक अन्न डा क्येट गेचा माल्ब। मिनु मेको मुर आ रू लेशा मेको केन दुम्ब। 28 तन्न आंमा लेन्ने मचाप्तु हना, मेको रू ग्याप्ब मुर नु बाक्ब। मिनु रू ग्याप्बमी प्रोइतीक बर्सम लेत्चा माल्ब।

29 मिनु सुइमी गारो हिरशो सहर आगा डा खिं लेयतु हना, लेयशो बर्स का सम्म मेकोमी मेको आ खिं लेन्ने चाप्ब। मेको कली मेको अधिकार बर्स का सम्म बाक्ब। 30 तन्न बर्स काम यो मेको लेन्ने मचाप्तु हना, ग्याप्ब नु आ खिं डा मुर आन कली मेको खिं आन शोप दुम्ब। प्रोइतीक बर्सम यो मेको लेशशा गेचा ममाल्ब। 31 तन्न गारो महिरशो बाक्तीके डा खिंपुकी चहिं रूपुकी खोदेशो पा पचा माल्ब। मेको लेन्ने चाप्नीम। मिनु प्रोइतीक बर्सम लेशशा गेचा माल्नीम।

32 मिनु लेवी आन सहरमी बाक्शो खिं चहिं मेकोपुकीमी आंम खिं गेना हना यो लेन्ने चाप्नीम। गन्ती ३५:२-५ 33 लेवी आन सहरम बाक्शो लेयशो खिं अरु लेवीम लेन्ने मचाप्तेक्म हना, प्रोइतीक बर्समी मेको खिं लेशशा, मेको कली गेचा माल्ब। मारदे हना लेवी आन सहरम बाक्शो खिं इस्राएली आन दातेमी लेवी आन शोप बाक्नीम। 34 मेको आन सहर क्येडा लाडगाम बाक्शो रूपुकी लेयचा मताइनीम। मारदे हना मेको आन गेना हना यो लीब शोप बाक्नीम।

क्येट आ चाइक्ब मताक्को

35 मिनु इन इस्राएली लोक्ब का शुश प्रुडग दुम्शा, पने जने मचाप्तु हना, गेपुकीमी मेको कली अर्को रागी डा मुर खोदेशो पा वारच पचा माल्नीनी। मिनु मेको गेपुकी नु बाक्ने चबल। 36 मिनु गे मेको कली जेर गेनीनु, आ चाइक्ब मताक्कीन। गे इन परमप्रभु क्येडा हिनीन। मिनु इन लोक्ब कली गे नु बाक्चा गेन। प्रस्थान २२:२४; ब्यवस्था २३:२० 37 गेपुकीमी मेको कली क्येट गेतीकेमी चाइक्ब मताक्कीन। मिनु मेको कली जचा थोक्क गेशा, मेको आ क्येडा शुश मलेप्पाइक्तीन। 38 गो इन परमप्रभु दुम्चा नु इन कली कनान रागी गेचा, दे इन कली इजीप्त रागी रे गुंइशा, एक चाक्ब, गो परमप्रभु यावे, इन परमप्रभु नड।

39 मिनु गे इन इस्राएली लोक्ब शुश प्रुडग दुम्शा, आंमा इन कली लेयसाक्म हना, मेको आन कली वाइल खोदेशो पा गेय मपपतीन। प्रस्थान २१:२ 40 मिनु गेपुकीमी मेको कली थाप्शो गेय पाइब कि अर्को रागी डा गेय पाइब खोदेशो पा बाक्चा गेने। मिनु मेको प्रोइतीक बर्स सम्म गेपुकी नु बाक्शा इन गेय पाइब दुम्ब। 41 मिनु नोले मेकोपुकी नु आन तमी तौ गे इन बाक्तीक रे लशा, आन खिं डा मुर नु आन बाक्तीक लेम्मल। 42 मारदे हना मेकोपुकी गो इजीप्त रे गुंइशा चाक्शो आं गेय पाइबपुकी बाक्नीम। मेको आन कली वाइलीम वाइल खोदेशो पा लेयचा मदुम्ब। 43 मिनु गेपुकीमी मेको आन कली शुश अरेशा श्येत मगेन। इन परमप्रभु कली तशा हिनीन। प्रस्थान २१:२०-२१

44 मिनु गेपुकीमी इन वाइलीम वाइल चहिं एर ओंथ डा अर्को रागी डा मुर रे ग्याप्चा माल्नीनी। 45 गेपुकी नु बाक्ब अर्को रागी डा मुरपुकी नु इन रागीम जरमेशो मेको आन खिं डा मुर रे ग्याप्शा, इन के सेल्ने चाप्नीनी। 46 गे मेको आन कली आंम तौ चच आंम वाइलीम वाइल दुम्चा कली ग्याप्शा वोइक्ने चाप्नीनी। गे मेको आन कली वाइलीम वाइल खोदेशो पा दिप्शा गेय पपाइक्ने चाप्नीनी। तन्न आंम लोक्ब इस्राएली आन कली मोपा श्येत गेशा दिप्ने मचाप्नीनी।

47 मिनु इन दातेमी बाक्ब अर्को रागी डा मुर क्येट थीब दुम्त हना नु सुइ इन लोक्ब श्येत जशा, प्रुडग दुम्शा, मेको आंम कली कि आ खिं डा मुर कली लेयसाक्व हना, 48 मेको लेयसे नोले आ लोक्बपुकीमी मेको कली लेन्ने चाप्नीम। मेको आ लोक्ब कामी मेको कली लेन्ने चाप्ब। 49 मेको आ आफ आ लोक्ब, आं लोक्ब नु सुइ आ नेक्था डा मुरुमी मेको कली लेन्ने चाप्ब। मेको नोले शुश क्येट थीब दुम्त हना, आंमा थाप्शा ग्रूने चाप्ब। 50 मेको मुरुमी आ अर्को रागी डा ठेयब मुर कली लेयसीशो बर्स रे प्रोइतीक बर्स सम्म हिक्शा, आ गेय पतीक लीशो बर्स कली जेला तशो खोदेशो पा हिक्चा माल्ब। मिनु लीशो बर्सम ततीके जेला डा क्येट हिक्शा थाप्चा माल्ब। 51 मिनु शुश बर्स लीमेनु,

आंमा लेयसीशो मुरुमी मेको गेय मपशो नेल्ल बर्स हिकशा, मेको कली गारचा डा पा थाप्चा माल्ब। 52 मिनु मेको प्रोंइतीक बर्स सम्म का निक्शी बर्स ला लीतेक्म हना, मेकोमी जेला तशो खोदेशो पा का निक्शी बर्स डा गारचा डा पा प्रोंइतीक बर्स सम्म क्येट थाप्चा माल्ब। 53 मिनु मेको अर्को रागी डा ठेयब मुरुमी आंमा लेयसीशो इस्राएली कली बर्स का कली जेला ताक्शा गेय पाइब खोदेशो पा रिम्शो पचा माल्ब। मेको कली वाइलीम वाइल कली खोदेशो पचा मदुम्ब। लेवी २५:४३

54 मोपा यो मेको मुर प्रोंइचा मपुंडसाक्व हना, रिम्शा। मेको नु आ खिं डा मुर प्रोंइतीक बर्सम ला लचा ताइनीम। 55 मारदे हना इस्राएलीपुकी आं गेय पाइब बाक्नीम। गो मेको आन कली इजीप्त रागी रे गुंडशा चाक्ताक्मी। गो परमप्रभु यावे, इन परमप्रभु नड' दे शेंदो" दे परमप्रभु यावेमी देंत।

26

लोव्र टीब आन कली आसीक

प्रस्थान २३:२०-३३; ब्यवस्था २८:-

1 मिनु लेंशा परमप्रभु यावेमी मोसा कली "गेपुकीमी इन कली मूर्तिपुकी मसेलीन। मिनु आंम कली मुशा मूर्ति नु पूजा पचा कली थाम मवोतीन। मिनु इन रागीमी मुशो फुल्लु मवोतीन। मेको कली पूजा पा आन डोंइती मबपीन। मारदे हना गो परमप्रभु यावे, इन परमप्रभु नड। प्रस्थान २०:४-५ 2 गेपुकीमी आं नाइक्तीक नाक्ती मानेन। मिनु आं बाक्तीक कली मान पने। गो परमप्रभु यावे नड। लेवी १९:३०

3 गेपुकीमी आं फुल्लुम मुशा ब्रेक्शो लोव्र टिशा पाइतीनी हना, 4 गो रेउ यिची ना रेउ यिपाइक्नुड। मिनु इन रूम शुश अन्न ग्रेल्नीम। मिनु रवाम शुश फल फुल सिल्नीम। 5 मिनु अडगुर सेक्ची ना सम्म इन अन्न तुप्नीनी। मिनु अडगुर सेक्ने मथुम्थु शोक्ची ना दुम्ब। मोपा गेपुकी नु शुश जचा तूचा बाक्ब। मिनु इन रागीम थुं नाइश्शा बाक्चा ताइनीनी। आमोस ९:१३

6 मिनु गो रागी डा मुर आन कली थुं नाइश्शा बाक्चा गेनुड। मिनु गेपुकी गोल्शा निन्द्रा पाइनीनी। सुइमी इन कली हिंच मकोइब। गो इन रागी रे हिंचा डा जन्तु आन कली खेरनुडमी। इन रागीमी लडाइ मदुम्ब। इजीकीएल ३४:२५ 7 मिनु गेपुकीमी इन जोरी सत्रु आन कली खेदा पा तरवारम साइक्नीनी। 8 इन मुर ५ जनामी सहे का मुर आन कली नु सहे का मुरुमी १० हजार मुर आन कली खेदा पाइनीम। इन जोरी सत्रु इन तरवारम शोल्मो पा बेक्नीम। ब्यवस्था ३२:३०; यहोसु २३:१०

9 मिनु गो इन कली शिशी पा कोव्रनन्नी। मिनु गो इन कली सोशा बोशा शुश दुम्पाइक्नुड। मिनु आं पशो कबल गेपुकी नु गेना हना यो लीपाइक्नुड। इजीकीएल ३६:११ 10 गेपुकीम इन खेक्शा वोइश्शो माइत अन्न जना जन, नक अन्न वोइक्चा कली माइत अन्न तिल्चा माल्नीनी। 11 गो इन कली ग्राम्रा मदित्थु, इन दातेमीन आ बाक्तीकेम बाक्नुड। येरमीया ७:२३; २कोरिन्थी ६:१६ 12 मिनु गो इन दातेमी बाक्शा, गो परमप्रभु दुम्नुड। मिनु गेपुकी आं मुर बाक्नीनी। गो परमप्रभु यावे, इन परमप्रभु बाक्नुड। 13 गो परमप्रभु यावे, इन परमप्रभु नड। गेपुकी इन कली इजीप्ती आन वाइलीम वाइल मदुम्पाइक्थु, एक चाक्तन्नी। गो इन शुर डा जवा जिक्शा, इन पिया पोक्शा गाक्ब सेलतन्नी। इजीकीएल ३४:२७-२८

लोव्र मटीब आन कली सजाइ

14 तन्न गेपुकीमी आं लोव्र मटीतीनी नु आं अरेशो मपाइतीनी, 15 नु आं फुल्लुम मुशा ब्रेक्शो लोव्र मकोव्रतीनी, आं अरेशो मपाइतीनी नु आं कबल प्रोंइतीनी हना, 16 गो इन कली मार पाइनुड देशा हना, गो इन दातेमी शुश हिंतीके सेल्लुड। मिनु इन रां सोव्रना सोव्रन बाक्नीम। मिनु जरो पा इन मिक्च ततीके जाम्ना जाम्न लाइब। मिनु गे ओंखां पा बेक्नीनी। इन शोक्शो अन्न मोशा दुम्नीम। मारदे हना इन जोरी सत्रुम नेक्नीम। 17 गो इन कली मरिम्शो पाइक्नुड। गे इन जोरी सत्रु रे बुइनीनी। इन जोरी सत्रु इन कली हुकुम पाइब दुम्नीम। मिनु सुइमी इन कली खेदा मपाम्तेक्म हना यो, गेपुकी प्रोक्नीनी।

18 मेको नेल्ल तुइश्शा यो, आं कली मटीतीनी हना, गो इन पाप ७ खेयप तेम्शा सजाइ गेनन्नी। 19 गो इन ठेयब लेशो खतम सेल्लुड। मिनु गो इन सरीड फलाम खोदेशो नु इन रू तांबा खोदेशो सेल्लुड। ब्यवस्था ११:११-१७ 20 मिनु इन सक्ति मोशा दुम्शा मारेइ पने मचाप्नीनी। इन रूम मारेइ मवाब। मिनु इन रागी डा रवापुकीम फल मसिल्लीम।

21 गेपुकी दूली लांम गाक्स डा गाक्स पा, आं कली मटीतीनी हना, गो इन पाप ७ खेयप तेम्शा इन कली श्येत गेनन्नी 22 गो इन दातेमी ब्वाकी डा जन्तुपुकी सोइक्नुडमी। मेकोमी इन आल आन कली ब्वाइनीम। मिनु इन बस्तु भाव साइक्नीम। मिनु गे का निक्शी ला दुम्तीके इन लां नेल्ल श्येतथ दुम्नीम। इजीकीएल ५:१७

23 मोपा सजाइ तशा यो, गेपुकी आं गे मलेत्तीनी हना, नु दूली लां गाक्स डा गाक्स पाइतीनी हना, २सामुएल २२:२७ 24 गो इन कली यो मरिम्शो पस डा पस पाइनुड। मिनु गो इन पाप ७ खेयप तेम्शा, इन कली श्येत गेनुड। 25 गो इन कली लडाइ तोपाइक्नुड। मिनु आं कबल प्रॉइशो आ पबर्म क्येक्क लेत्नुड। गेपुकी आंम आंमा सहरम बुक्तीनी हना, गो मेकेर यो इन दातेम बेक्पाइक्ब रोइ सोइक्नुड। मिनु इन जोरी सत्रु आन गुइम दुम्नीनी। यसैया १:२०, २४ 26 मिनु गो इन अन्न थमा पा साम्पाइक्नुड। १० ओटा खिं डा मीश मुरुमी चुप्लु कामी क्येनीम। क्येशा पुक्शा तेम्मेनु, सुइ मरूनीम। यसैया ३:१; इजीकीएल ४:१६

27 मिनु मेको मो दुम्शा यो, गे आं कली मटिथु, दूली लां गाक्स डा गाक्स पाइतीनी हना, 28 गो इन कली मरिम्शो पस डा पस गुम्नुड। मिनु इन पाप ७ खेयप तेम्शा, सजाइ गेनन्नी। ब्यवस्था २८:५३; येरमीया १९:९ 29 गेपुकीमी इन तमी तौ आन श्ये ब्वचा माल्नीनी। 30 गो इन डांडा डा पूजा पतीक थामपुकी प्रेतनुड। इन धूप चोतीक नेल्ल प्रेतनुड। मिनु इन बेक्शो रां मेको ब्रोल्लो मूर्ति आन तार ताइक्नुड। मिनु गो इन कली तशा ग्रांग्रा दिशा तिल्लनुड। इजीकीएल ६:४, ६ 31 गो इन सहर गोरशो रागी खोदेशो सेल्लनुड। मिनु इन पूजा पतीके थान श्येतथ सेल्लनुड। गो इन ब्रोल्लो धूप आन रिना मनाम्नुड। 32 मिनु गो रागी कली खतम पोक्नुड। मिनु मेकेर जाक्शा बाक्ब इन जोरी सत्रुमी मेको तशा छक लाक्नीम। 33 गो इन कली रागी रागी डा मुर आन दातेमी ब्रपाइक्नुड। मिनु लडाइ तोपाइशशा, इन कली खेदा पपाइक्नुड। मिनु इन रागी श्येतथ नु इन सहरपुकी गोरशो सेल्लनुड।

34 मिनु रागी श्येतथ दुम्मेनु, मेको आ नाइक्तीक बर्स ग्येरशा मानेब। मिनु गेपुकी इन जोरी सत्रु आन रागीम बाक्नीनु, इन रागी चहिं ग्येरशा नांइसीब। लेवी २५:२; २इतिहास २६:२१ 35 मेको रागी गिश नाक्त सम्म श्येतथ लीबा, मिश नाक्त नाइक्चा ताइब। गेपुकी मेक बाक्नीनु, नाइक्तीक बर्स नाइक्चा मतशो, नाइक्तीक बर्स मानेशो बाक्ब।

36 मिनु गो इन जोरी सत्रु आन रागीम बाक्शो लीशो मुर आन थुं लुक्च लपाइक्नुड। मिनु सफा दोक्शो रेयके नेंशा यो, आन जोरी सत्रुम खेदा पशो खोदेशो पा प्रोक्नीम। मिनु मोशा दाइल पा थित्नीम। 37 सुइमी खेदा मपथु यो, मेकोपुकी तरवार तशा प्रोक्शो खोदेशो पा, प्रोक्नीम। मिनु थोक्मुशा गोल्लीम। मोपतीके आन जोरी सत्रु आन डोंइती राप्ने मचाप्नीम। 38 गेपुकी अर्को रागी डा मुर आन दातेमी जाम्शा लाइनीनी। मिनु इन जोरी सत्रु आन रागीमी इन कली दाक्ब। 39 मिनु लीशोपुकी चहिं जोरी सत्रु आन रागीमी आन पाप नु आन किकी पिपी आन पाप पतीके बेक्ना बेक्न लाइनीम। इजीकीएल २४:२३; इजीकीएल ३३:१०

40 तन्न मेकोपुकीमी आंम पाप नु आन किकी पिपी आन पाप आ पबर्म 'मरिम्शो पाइतक नु दूली लां गाक्स डा गाक्स पाइतक' दैतेक्म हना, ब्यवस्था ४:३० 41 मिनु गो मेको आन कली मरिम्शो पस डा पस बाक्शा, आन जोरी सत्रु आन रागीम सोइक्ताक्डमी। मिनु मेको आन खकटा थुं ब्रेम्शो दुम्शा, आन पाप आ पबर्म पाप क्याम्तीक गेय पाम्तेक्म हना, ब्यवस्था १०:१६; येरमीया ९:२५ 42 गो याक्ब, इसहाक नु अब्राहाम नु पशो आं कबल नु मेको रागी कली मिम्नुड। प्रस्थान २:२४; २राजा १३:२३ 43 मारदे हना मेको रागी श्येतथ दुम्शा, आ नाइक्तीक बर्सपुकी मुर मबाक्तीके मानेना मानेन बाक्ब। मिनु मेकोपुकीमी आन मरिम्शो पशो आ पबर्म सजाइ ताइनीम। मारदे हना मेकोपुकीमी आं पावो, दे अरेतीक लोव्र नु आं फुल्लुम मुशा ब्रेक्शो लोव्र काइ मपाम। 44 मिनु मोदेशो पाम्तेक्म हना यो, गो मेको आन कली आन जोरी सत्रु आन रागीमी कोव्रशा, ग्रांग्रा दिशा खतम मसेल्लनुडमी। मिनु मेकोपुकी नु पशो आं कबल मप्रॉइनुड। मारदे हना गो परमप्रभु यावे, मेको आन परमप्रभु नड। होसे ११:९ 45 तन्न गो मेको आन कली मिम्शा, आन किकी पिपी नु पशो आं कबल मिम्नुड। गो नेल्ल रागी डा मुरपुकीम तचा डा पा मेको आन परमप्रभु दुम्तीके, मेको आन कली इजीप्त रागी रे गुंइशा चाक्ताक्मी। गो परमप्रभु यावे नड” दे परमप्रभु यावेमी दैत। उत्पत्ती १२:७

46 एको परमप्रभु यावेमी सीनै डांडाम मोसा कली गेशो आं नु इस्राएली आन दातेमी फुल्लुम मुशा ब्रेक्शो लोव्र नु “पावो” दे अरेशो लोव्र बाक्नीम।

27

मुर आ पबर्म कसम जशो

1 मिनू परमप्रभु यावेमी मोसा कली 2 “गे इस्राएली आन कली ‘सुइमी परमप्रभु यावे कली मुर आ पा डा क्येट गेनुड’ दे कसम जाप्टु हना, 3 मेकोमी २० बर्स रे ६० बर्स सम्म डा वोंइश मुर आन पर्बम आं ताम्बु डा चांदी के ५० शेकेल परमप्रभु यावे कली गेचा माल्नीम। शेकेल इस्राएली आन क्येट बाक्ब। शेकेल का ११.५ ग्राम चांदी बाक्ब। ताम्बु डा शेकेल चहिं १२ ग्राम बाक्ब। न्यायाधीस ११:३१; १सामुएल १:११ 4 मीश मुर आ पर्बम बाक्ब हना, मेकोम ३० शेकेल गेचा माल्ब। ३० शेकेल ३६० ग्राम चांदी बाक्ब। 5 मिनू ५ बर्स रे २० बर्स सम्म डा वोंइश आल आन पर्बम २० शेकेल गेचा माल्ब। मीश आल बाक्ब हना, १० शेकेल गेचा माल्ब। 6 मिनू महिना का रे ५ बर्स सम्म डा वोंइश आल आन पर्बम चांदी के ५ शेकेल नु मीश आल आन पर्बम चांदी के शेकेल सां गेचा माल्नीम। 7 मिनू ६० बर्स क्येडा ग्येत्य डा वोंइश मुर आ पर्बम १५ शेकेल नु मीश मुर आ पर्बम १० शेकेल गेचा माल्ब। ताम्बु डा शेकेल का १२ ग्राम बाक्ब। 8 मिनू मेको मुर पुडग दुम्शा, गेने मचाप्ब बाक्ब हना, मेको कली चढेब आ डोंइती चाक्चा माल्नीम। मिनू चढेबमी मेको कसम जाइब आ चाप्शो खोदेशो पा मेको आ क्येट देंचा माल्ब।

9 मिनू परमप्रभु यावे कली चढेचा डा बी ब्यफ, क्यारश भेडा बाक्तेक्म हना, मेको मारेइ मदुम्शो थम रिम्शो नु ग्रांग्रा मदिशो बाक्चा माल्नीम। 10 मेको आ पा डा अरु फाइक्चा मदुम्ब। रिम्शो बस्तु आ पा डा मरिम्शो नु मरिम्शो आ पा डा रिम्शो फाइक्चा मदुम्ब। चढेचा डा बस्तु फाइक्तेक्म हना, मेको बस्तु निम्फा मारेइ मदुम्शो थम रिम्शो ग्रांग्रा मदिशो बाक्चा माल्नीस। 11 मिनू परमप्रभु यावे आ डोंइती चढेचा मदुम्शो ग्रांग्रा दिशो बस्तु भाव बाक्तेक्म हना, मेको आन कली चढेब कली कोंइचा माल्नीम। 12 मिनू चढेबमी मेको बस्तु रिम्शो बाक्ब हना यो, मरिम्शो बाक्ब हना यो, मेको गिश क्येट लाइक्बा, दे चढेबमी देंचा माल्ब। मिनू चढेबमी दोशो देंबा मेको ठीक दुम्ब। 13 मेको मुरुम क्येट थाप्शा, मेको बस्तु कली प्रोंइचा दाक्ब हना, चढेब आ देशो क्येडा यो ५ भाग डा भाग का क्येट तेम्शा गेचा माल्ब। लेवी ५:१६

14 मिनू सुइ मुरुमी परमप्रभु यावे कली खिं का चढेप्टु हना, चढेबमी मेको खिं कोव्रशा रिम्शो बाक्म कों मरिम्शो बाक्मे ‘ओशो क्येट लाइक्ब’ देंचा माल्ब। मिनू चढेबमी दोशो देंबा मेको ठीक दुम्ब। 15 मिनू मेको मुरुमी क्येट थाप्शा लेत्चा थुं पाप्टु हना, चढेबमी देशो क्येडा यो ५ भाग डा भाग का क्येट तेम्शा गेचा माल्ब। मिनू मेको खिं मेको केन दुम्ब।

16 मिनू सुइ मुरुमी तेकोइ आंम रू परमप्रभु यावे कली चढेप्टु हना, चढेबमी मेको रूम दोशो वांचेर लाइबा कोव्रशा, मेको आ क्येट देंचा माल्ब। होमेर का क्योव्रज वांचेर लाइब रू कली ५० चांदी के शेकेल दुम्चा माल्ब। होमेर का २२० लिटर रिक्ब पुक्तीक का बाक्ब। ताम्बु डा शेकेल का १२ ग्राम चांदी बाक्ब। २सामुएल २४:२४ 17 मेको मुरुमी आ रू कली लेंशा प्रोंइतीक बर्स आ नोले डा बर्स रे चढेप्टु हना, मेको आ क्येट चढेबमी देशो खोदेशो दुम्ब। लेवी २५:८-५५ 18 तन्न मेकोमी आ रू लेंशा प्रोंइतीक बर्स इक्का बर्स नोले चढेप्टु हना, लेंशा प्रोंइतीक बर्स जाक्चा दोशो लीशो बाक्मे, चढेबमी मेको हिक्चा माल्ब। मिनू आ देशो क्येट रे तोक्चा माल्ब। 19 मेको मुरुमी मेको रू लेंशा फेत्चा दाक्ब हना, चढेबमी देशो क्येट क्येडा ५ भाग डा भाग का क्येट तेम्शा गेचा माल्ब। मिनू मेको रू मेको केन दुम्ब। 20 तन्न मेकोमी मेको रू मलेप्ब हना, मेकोमी मेको रू अर्को मुर कली लेयशो बाक्ब हना, मेकोमी मेको रू गेनायो लेत्चा मताइब। 21 मेको रू लेंशा प्रोंइतीक बर्सम प्रोंइशो बाक्ब हना, मेको परमप्रभु यावे कली जिम्मा गेशो रू दुम्शा, चढेबमी मेको रू शोक्ब।

22 मिनू सुइ मुरुमी आंम के ममाइ, तन्न आ ग्याप्शो रू परमप्रभु यावे कली चढेप्टु हना, 23 चढेबमी लेंशा प्रोंइतीक बर्स सम्म हिक्शा, मेको आ क्येट दोशो बाक्मे, मोशो गेचा माल्ब। मेको नाक्तीन परमप्रभु यावे कली गेचा माल्ब। 24 मिनू लेंशा प्रोंइतीक बर्सम मेको रू सु रे ग्याप्शो बाक्मे, मेको लेंशा ताइब। 25 मिनू गिश क्येट लाइबा, मेको नेल्ल परमप्रभु यावे आ ताम्बु डा चांदी के शेकेलम थाप्चा माल्ब। शेकेल काम २० गेरा बाक्नीम। गेरा का ०.६ ग्राम बाक्ब।

26 मिनू बी ब्यफ, क्यारश भेडा आन डोंइती जरमेशो ब्यफ बाक्ब हना यो, सांड बाक्ब हना यो, बोका बाक्ब हना यो, मेको डोंइती रे परमप्रभु यावे केन बाक्ब। सुइमी परमप्रभु यावे कली गेने मचाप्नीमी। प्रस्थान १३:२,१२,१३; गन्ती १८:१५ 27 मेको ग्रांग्रा दिशो बस्तु भाव बाक्ब हना, आ देशो क्येट क्येडा ५ भाग डा भाग का तेम्शा, लेत्चा माल्ब। तन्न मलेत्ताक्म हना, आ देशो क्येटीम लेयचा माल्ब।

28 मिनू परमप्रभु यावे कली साइक्चा कली जिम्मा गेशो मारेइ मारेइ मुर बाक्ब हना यो, बस्तु भाव बाक्ब हना यो, आंम रू बाक्ब हना यो, मेको लेयने नु लेन्ने मचाप्नीम। मेको साइक्चा कली जिम्मा गेशो मारेइ मारेइ थमा पा परमप्रभु यावे केन बाक्नीम। गन्ती १८:१४; गन्ती २१:२; यहोसु ६:१८,२६; इजीकीएल ४४:२९

29 मिनु सु मुर साइक्चा कली जिम्मा गेचा पुंइसीशो बाक्बा, मेको कली क्येट थाप्शा मलेत्थु, साइक्चा माल्ब। यहोसु ६:१७-१८; १सामुएल १५:३-९

30 मिनु रू नेल्ल डा, अन्न कि रवा आ फल फुल १० भाग परमप्रभु यावे केन बाक्ब। मेको परमप्रभु यावे केन बाक्ब। गन्ती १८:२१; ब्यवस्था १४:२२-२९; नेहेम्याह १३:१२ 31 मुरुमी आंमा आ गेशो १० भाग लेत्चा दाक्ताक्व हना, ५ भाग तेम्शा, लेन्ने चाप्ब। 32 नेल्ल गोठ डा बी ब्यफ, क्यारश भेडा, मारेइ मारेइ गोठलाम हिक्तु हना यो, १० ओटा डा का परमप्रभु यावे केन बाक्ब। २इतिहास ३१:६ 33 मेकोमी रिम्शो नु मरिम्शो तिल्शा फाइक्चा मदुम्ब। मुरुमी मेको बस्तु फाइक्चा थुं पाप्तु हना, निम्फा परमप्रभु यावे कली गेचा माल्ब। मिनु क्येट थाप्शा, लेत्चा मदुम्ब, दे अरेवो” दे परमप्रभु यावेमी मोसा कली देंत।

34 मिनु सीनै डांडामी परमप्रभु यावेमी इस्राएली आन कली मोसा रे पा शेंशो लोत्र एको बाक्नीम। लेवी ७:३८; लेवी २५:१; २६:४६

गन्ती

ब्रेक्ब मुर: एको किताब ब्रेक्ब यो मेको गोरशो रागी हिरब आन दातेमी बाक्शो बाक्त। मारदे हना दोपा मेकोमी मुर आन कली हिक्तीके नु अरु मार मार आइक्च गेय पशो नेल्ल ब्रेक्ने चाप्बा डा? मोपतीके मोसामी एको किताब ब्रेक्शो बाक्ब, दे मिन्नीम। गन्ती ३३:२

गेना ब्रेक्शो: प्रस्थान ब्रेक्शो नोले, एको किताब सीनै डांडाम मार मार दुम्शो बाक्मे, मेको आ पबर्म ब्रेक्शो बाक्त। एको किताब मोसा आ ब्रोंडची ना ब्रेक्शो बाक्ब।

मारदे ब्रेक्शो:

१. सीनै डांडा रे गाक्चा साशो गन्ती १:-१०:१०
२. सीनै डांडा रे कादेश सम्म जाक्शो गन्ती १०:११
३. मोआब रागी यर्दन खोला आ पूर्व सम्म जाक्शो गन्ती २२:- ३६:-

सीनै डांडाम मुर हिक्शो

गन्ती २६:२-५१

१ इस्राएलीपुकी इजीप्त रे जाक्मा आ बर्स निक्शी, महिना निक्शी डा डोंडती डा नाक्त परमप्रभु यावेमी सीनै डा रागीमी बाक्शो गुम्तीक ताम्बुमी मोसा कली लोत्र पाप्तु। प्रस्थान ४०:१७ २ मिनु मेकोमी “गे इस्राएली वोंडश मुर आन थर थर नु आन खिं खिं पा नेल्ल आन नें ब्रेक्चा माल्नेवे। उत्पत्ती ३५:२३-३६; प्रस्थान ३०:१२ ३ इस्राएलमी २० बर्स गाप्शो नु मेको क्येडा लाक्शो लडाइम लने चाप्ब मुर नेल्ल आन कली गे नु हारूनमी लडाइ पचा कली खुप्शा वोइक्चा माल्नीसी। ४ मेको नेल्ल आन थर रे मुर का कामी इस कली वारच पचा माल्नीम। मेको मुर आन खिं डा ठेयब मुर बाक्चा माल्नीम। ५ मिनु सु सुम इन कली वारच पचा माल्नीम देशा हना, रूबेन आ थर रे शेदेउर आ तौ एली-सुर, ६ सिमियोन आ थर रे सुरी-शदै आ तौ शेलुमीएल, ७ यहूदा आ थर रे अम्मीनादाब आ तौ नहशोन, प्रस्थान ६:२३ ८ इस्राकार आ थर रे सुआर आ तौ नेथनेल, ९ जबूलून आ थर रे हेलोन आ तौ एलीआब, १० योसेफ आ तौ एफ्राइम आ थर रे अम्मीहुद आ तौ एली-शामा, योसेफ आ तौ मनस्से आ थर रे पेदा-सुर आ तौ गमलीएल, ११ इतिहास ७:२६; उत्पत्ती ४८:५ ११ बेन्यामीन आ थर रे गिदेओनी आ तौ आबी-दान, १२ दान आ थर रे अम्मी-शदै आ तौ अही-एजेर, १३ आशेर थर रे ओक्रान आ तौ पगीएल, १४ गाद आ थर रे दूएल आ तौ एली-आसाफ, १५ नाप्ताली आ थर रे एनान आ तौ अहीरा बाक्नीम” दे परमप्रभु यावेमी मोसा कली देंत। १६ एकोपुकी इस्राएली आन दाते रे योत्रशो आन थर डा ठेयब मुर बाक्नीम।

१७ मोसा नु हारूनमी योत्रशो मुर आन कली ब्रेक्ताक्स। १८ मिनु मेको निक्शीमी महिना निक्शी डा डोंडती डा नाक्ती इस्राएली नेल्ल आन कली पुक्ताक्स। मिनु मुर नेल्लेमी आन थर नु आन खिं देशा, ब्रेक्पाइक्तेक्म। मिनु २० बर्स गाप्शो नु मेको क्येडा लाक्शो आन नें नेल्ल ब्रेक्पाइक्तेक्म। १९ मिनु परमप्रभु यावेमी अरेशो खोदेशो पा, मोसामी सीनै डा गोरशो रागीमी मेको आन कली खुप्शा वोइक्तीमी।

२० इस्राएल आ डोंडती जरमेशो तौ रूबेन आ थर डा आन खिं खिं डा २० बर्स गाप्शो नु मेको क्येडा लाक्शो लडाइम लने चाप्ब वोंडश मुर नेल्ल आन नें ब्रेक्ताक्म। २१ मिनु मेको लडाइ पचा कली खुप्शो रूबेन आ थर डा मुर ४६ हजार ५ सहे बाक्तेक्म।

२२ सिमियोन आ थर डा आन खिं खिं डा २० बर्स गाप्शो नु मेको क्येडा लाक्शो लडाइम लने चाप्ब वोंडश मुर नेल्ल आन नें ब्रेक्ताक्म। २३ मिनु मेको लडाइ पचा कली खुप्शो सिमियोन आ थर डा मुर ५९ हजार सहे सां बाक्तेक्म।

२४ गाद आ थर डा आन खिं खिं डा २० बर्स गाप्शो नु मेको क्येडा लाक्शो लडाइम लने चाप्ब वोंडश मुर नेल्ल आन नें ब्रेक्ताक्म। २५ मिनु मेको लडाइ पचा कली खुप्शो गाद आ थर डा मुर ४५ हजार ६ सहे ५० बाक्तेक्म।

२६ यहूदा आ थर डा आन खिं खिं डा २० बर्स गाप्शो नु मेको क्येडा लाक्शो लडाइम लने चाप्ब वोंडश मुर नेल्ल आन नें ब्रेक्ताक्म। २७ मिनु मेको लडाइ पचा कली खुप्शो यहूदा आ थर डा मुर ७४ हजार ६ सहे बाक्तेक्म।

२८ इस्राकार आ थर डा आन खिं खिं डा २० बर्स गाप्शो नु मेको क्येडा लाक्शो लडाइम लने चाप्ब वोंडश मुर नेल्ल आन नें ब्रेक्ताक्म। २९ मिनु मेको लडाइ पचा कली खुप्शो इस्राकार आ थर डा मुर ५४ हजार ४ सहे बाक्तेक्म।

30 जबूलून आ थर डा आन खिं खिं डा २० बर्स गाप्शो नु मेको क्येडा लाकशो लडाइम लने चापब वोंइश मुर नेल्ल आन नें ब्रेक्ताकम। 31 मिनु मेको लडाइ पचा कली खुप्शो जबूलून आ थर डा मुर ५७ हजार ४ सहे बाक्तेकम।

32 योसेफ आ तौ एफ्राइम आ थर डा आन खिं खिं डा २० बर्स गाप्शो नु मेको क्येडा लाकशो लडाइम लने चापब वोंइश मुर नेल्ल आन नें ब्रेक्ताकम। 33 मिनु मेको लडाइ पचा कली खुप्शो योसेफ आ तौ एफ्राइम आ थर डा मुर ४० हजार ५ सहे बाक्तेकम।

34 योसेफ आ तौ मनस्से आ थर डा आन खिं खिं डा २० बर्स गाप्शो नु मेको क्येडा लाकशो लडाइम लने चापब वोंइश मुर नेल्ल आन नें ब्रेक्ताकम। 35 मिनु मेको लडाइ पचा कली खुप्शो योसेफ आ तौ मनस्से आ थर डा मुर ३२ हजार सहे निक्शी बाक्तेकम।

36 बेन्यामीन आ थर डा आन खिं खिं डा २० बर्स गाप्शो नु मेको क्येडा लाकशो लडाइम लने चापब वोंइश मुर नेल्ल आन नें ब्रेक्ताकम। 37 मिनु मेको लडाइ पचा कली खुप्शो बेन्यामीन आ थर डा मुर ३५ हजार ४ सहे बाक्तेकम।

38 दान आ थर डा आन खिं खिं डा २० बर्स गाप्शो नु मेको क्येडा लाकशो लडाइम लने चापब वोंइश मुर नेल्ल आन नें ब्रेक्ताकम। 39 मिनु मेको लडाइ पचा कली खुप्शो दान आ थर डा मुर ६२ हजार ७ सहे बाक्तेकम।

40 आशेर आ थर डा आन खिं खिं डा २० बर्स गाप्शो नु मेको क्येडा लाकशो लडाइम लने चापब वोंइश मुर नेल्ल आन नें ब्रेक्ताकम। 41 मिनु मेको लडाइ पचा कली खुप्शो आशेर आ थर डा मुर ४१ हजार ५ सहे बाक्तेकम।

42 नाप्ताली आ थर डा आन खिं खिं डा २० बर्स गाप्शो नु मेको क्येडा लाकशो लडाइम लने चापब वोंइश मुर नेल्ल आन नें ब्रेक्ताकम। 43 मिनु मेको लडाइ पचा कली खुप्शो नाप्ताली आ थर डा मुर ५३ हजार ४ सहे बाक्तेकम।

44 मिनु मेको मुर नेल्ले लडाइ पचा कली खुप्ताकम। मोसा, हारून नु मेको आस कली वारच पाइब इस्राएल आ १२ थर डा ठेयब मुरपुकीमी मेको आन कली लडाइ पचा कली खुप्ताकम। उत्पत्ती १७:२०; उत्पत्ती २५:१६ 45 मिनु गिश मुर २० बर्स गाप्शो नु मेको क्येडा लाकशो लडाइम लने चापब वोंइश मुर बाकशो बाक्तेकम देंशा हना, गन्ती २:३२; प्रस्थान १२:३७ 46 मेको नेल्ल पा ६ लाख ३ हजार ५ सहे ५० जना बाक्तेकम। 47 लेवी आ खिं डा मुरपुकी चहिं अरु आन खोदेशो पा महिक्सम।

लेवी आ थर डा मुर मखुप्शो

48 मिनु डोंइती परमप्रभु यावेमी मोसा कली 49 “लेवी आ थर डा मुर आन कली चहिं लडाइ पचा कली मखुप्तीमी। मिनु इस्राएली आन कली खोदेशो पा महिक्मी। गन्ती २:२३; गन्ती ३:१५-३९ 50 तन्न गे लेवी आन कली आं कबल पशो सन्दोस वोइशो ताम्बु नु आ मारेइ मारेइ थोव्रक कोव्रचा कली वोइक्मी। मेकोपुकीमी गुम्तीक ताम्बु नु आ मारेइ मारेइ थोव्रक कुरचा मालनीम। मेकोपुकीमी मेको कोव्रचा मालनीम। मिनु आन ताम्बु गुम्तीक ताम्बु आ एर ओंथ कीचा मालनीम। 51 मिनु गुम्तीक ताम्बु याक्तेमेनु, लेवीपुकीमी मेको प्राक्चा मालनीम। मिनु गुम्तीक ताम्बु कीडमेनु, मेकोपुकीमी सेल्चा मालनीम। आन नेक्था जाक्ब अरु मुर साइक्चा पुंइसीनीम। गन्ती ३:१०, ३८; गन्ती १७:५ 52 अरु इस्राएली आन आन हुल आन दातेमी नु आन छेदर आ खुक्तीके डा बाक्तीकेम बाक्चा मालनीम। 53 लेवी आ मुर चहिं परमप्रभु यावे आ कबल पशो सन्दोस वोइशो ताम्बु आ एर ओंथ आन ताम्बु कीचा मालनीम। इस्राएलीपुकी गुम्तीके ताम्बु आ नेक्था लचा मदुम्नीम। मिनु मेको आन पबर्म परमप्रभु यावे मगाइक्ब। मिनु लेवीपुकीमी परमप्रभु यावे आ कबल पशो सन्दोस वोइशो ताम्बु खाल पचा मालनीम” दे परमप्रभु यावेमी देंत। गन्ती १७:११; गन्ती १८:५; २सामुएल २४:१; २इतिहास १९:२; यसैया ५७:१७; यसैया ६४:४-६

54 मिनु इस्राएलीपुकीमी परमप्रभु यावेमी मोसा कली अरेशो खोदेशो पा नेल्ल पाम्तेकम।

2

मुर आन बाक्तीक ताम्बु

1 मिनु परमप्रभु यावेमी मोसा नु हारून आस कली 2 “इस्राएलीपुकीमी आन थर डा छेदर बाक्तीकेम आन ताम्बु कीचा मालनीम। मेकोपुकी गुम्तीक ताम्बु क्येडा डोन एर ओंथ बाक्चा मालनीम।

3 पूर्व, नां दाप्तीक गे यहूदा आ हुल आन बाक्तीके बाक्ब। मेको आन छेदर आ नेक्था आन ताम्बु कीचा मालनीम। यहूदा आ थर डा मुर आन ठेयब मुर अम्मीनादाब आ तौ नहशोन बाक्त। 4 मेको आन कली खुप्शा हिक्शोनु ७४ हजार ६ सहे लडाइ पाइब वोंइश मुर बाक्नीम।

5 मेको आन नेक्था इस्साकार आ हुल आन बाक्तीके बाक्ब। इस्साकार आ थर डा मुर आन ठेयब मुर सुआर आ तौ नेथनेल बाक्ब। 6 मेको आन कली खुप्शा हिक्शोनु ५४ हजार लडाइ पाइब वोंइश मुर बाक्नीम।

7 मिनु नोले जबूलून आ थर डा मुर आन बाक्तीके बाक्ब। जबूलून आ थर डा मुर आन ठेयब मुर हेलोन आ तौ एलीआब बाक्ब। 8 मेको आन कली खुप्शा हिक्शोनु ५७ हजार ४ सहे लडाइ पाइब वोंइश मुर बाक्नीम।

9 यहूदा आ नेक्था खुप्शा हिक्शो मुर आन हुल नेल्ल पा लाख का ८६ हजार ४ सहे लडाइ पाइब वोंइश मुर बाक्नीम। मेको नेल्ल मुर आन डोंइती गाक्चा मालनीम।

10 मिनु दक्खिन गे रूबेन आ हुल आन बाक्तीके बाक्ब। मेको आन छेदर आ नेक्था आन ताम्बु कीचा मालनीम। रूबेन आ थर डा मुर आन ठेयब मुर शेदेउर आ तौ एली-सुर बाक्ब। 11 मेको आन कली खुप्शा हिक्शोनु ४६ हजार ५ सहे लडाइ पाइब वोंइश मुर बाक्नीम।

12 मेको आन नेक्था सिमियोन आ हुल आन बाक्तीके बाक्ब। सिमियोन आ थर डा मुर आन ठेयब मुर सुरी-शदै आ तौ शेलुमीएल बाक्ब। 13 मेको आन कली खुप्शा हिक्शोनु ५९ हजार सहे सां लडाइ पाइब वोंइश मुर बाक्नीम।

14 मिनु नोले गाद आ थर डा मुर आन बाक्तीके बाक्ब। गाद आ थर डा मुर आन ठेयब मुर रूएल आ तौ एली-आसाफ बाक्ब। 15 मेको आन कली खुप्शा हिक्शोनु ४५ हजार ६ सहे ५० जना लडाइ पाइब वोंइश मुर बाक्नीम।

16 रूबेन आ नेक्था खुप्शा हिक्शो मुर आन हुल नेल्ल पा लाख का ५२ हजार ४ सहे ५० जना लडाइ पाइब वोंइश मुर बाक्नीम। मेकोपुकी यहूदा आ हुल आन नोले गाक्चा मालनीम।

17 मिनु गुम्तीक ताम्बु नु लेवी आन बाक्तीक ताम्बु कुरशा गाक्चा मालनीम। दोदेशो पा आन ताम्बु कीशो बाक्मे, मोदेशो पा आन छेदर आ नेक्था गाक्चा मालनीम। गन्ती १०:१७,२१

18 पच्छिम गे एफ्राइम आ हुल आन बाक्तीके बाक्ब। मेको आन छेदर आ नेक्था आन ताम्बु कीचा मालनीम। एफ्राइम आ थर डा मुर आन ठेयब मुर अम्मीहुद आ तौ एली-शामा बाक्ब। 19 मेको आन कली खुप्शा हिक्शोनु ४० हजार ५ सहे लडाइ पाइब वोंइश मुर बाक्नीम।

20 मेको आन नेक्था मनस्से आ हुल आन बाक्तीके बाक्ब। मनस्से आ थर डा मुर आन ठेयब मुर पेदा-सुर आ तौ गमालीएल बाक्ब। 21 मेको आन कली खुप्शा हिक्शोनु ३२ हजार सहे निक्शी लडाइ पाइब वोंइश मुर बाक्नीम।

22 मिनु नोले बेन्यामीन आ थर डा मुर आन बाक्तीके बाक्ब। बेन्यामीन आ थर डा मुर आन ठेयब मुर गिदेओनी आ तौ आबी-दान बाक्ब। 23 मिनु मेको आन कली खुप्शा हिक्शोनु ३५ हजार ४ सहे लडाइ पाइब वोंइश मुर बाक्नीम।

24 एफ्राइम आ नेक्था खुप्शा हिक्शो मुर आन हुल नेल्ल पा लाख का ८ हजार सहे का लडाइ पाइब वोंइश मुर बाक्नीम। मेकोपुकी लेवी आन नोले गाक्चा मालनीम।

25 उत्तर गे दान आ हुल आन बाक्तीके बाक्ब। मेको आन छेदर आ नेक्था आन ताम्बु कीचा मालनीम। दान आ थर डा मुर आन ठेयब मुर अम्मी-शदै आ तौ अही-एजेर बाक्ब। 26 मेको आन कली खुप्शा हिक्शोनु ६३ हजार ७ सहे लडाइ पाइब वोंइश मुर बाक्नीम।

27 मेको आन नेक्था आशेर आ हुल आन बाक्तीके बाक्ब। आशेर आ थर डा मुर आन ठेयब मुर ओक्रान आ तौ पगीएल बाक्ब। 28 मेको आन कली खुप्शा हिक्शोनु ४१ हजार ५ सहे लडाइ पाइब वोंइश मुर बाक्नीम।

29 मिनु नोले नाप्ताली आ थर डा मुर आन बाक्तीके बाक्ब। नाप्ताली आ थर डा मुर आन ठेयब मुर एनान आ तौ अहीरा बाक्ब। 30 मेको आन कली खुप्शा हिक्शोनु ५३ हजार ४ सहे लडाइ पाइब वोंइश मुर बाक्नीम।

31 दान आ नेक्था खुप्शा हिक्शो मुर आन हुल नेल्ल पा लाख का ५७ हजार ६ सहे लडाइ पाइब वोंइश मुर बाक्नीम। मेकोपुकी मुर नेल्ल आन क्येडा नोले गाक्चा मालनीम।

32 एको इस्राएली आन थर थर डा लडाइ पने चापब खुप्शा हिक्शो मुर बाक्नीम। आन हुल हुल डा मुर नेल्ल पा ६ लाख हजार सां ५ सहे ५० जना लडाइ पाइब वोंइश मुर बाक्नीम” दंत गन्ती १:४६ 33 मिनु परमप्रभु यावेमी मोसा कली अरेशो खोदेशो पा लेवी आ थर डा मुर अरु इस्राएलीपुकी खोदेशो पा मखुप्शो महिक्शो बाक्तेक्म। गन्ती १:४८-४९

34 इस्राएलीपुकीमी परमप्रभु यावेमी मोसा कली अरेशो खोदेशो पा पाम्तेक्म। आन थर डा बाक्तीकेमी आन छेदर आ नेक्था बाक्शा, आन थर थर पा गाक्तेक्म।

3

हारून आ तौपुकी

1 परमप्रभु यावेमी मोसा नु सीनै डांडाम लोत्र पची ना मोसा नु हारून आस खिं डा मुर सु सु बाक्तेक्म देंशा हना, प्रस्थान ६:२३

2 हारून आ तौ आन नें, आ डोंइती जरमेशो तौ नादाब नु अबीहु, एलाजर नु इथामार बाक्तेक्म। 3 मेको नेल्ल तेल लुक्शो चढेब बाक्तेक्म। हारूनमी मेको आन कली चढेतीक गेय पचा, दे तेल लुक्ताक्व। प्रस्थान ४०:१५ 4 नादाब नु अबीहु सीनै डा गोरशो रागीम बेक्ताक्स। मारदे हना, मेको निक्शीमी परमप्रभु यावेमी मदुम्ब देंशो अर्को मी धूप चोतीकेम कुर पा, परमप्रभु यावे आ डोंइती चढेम्ताक्स। मिनु परमप्रभु यावे आ डोंइती बेक्ताक्स। मिनु मेको आस के आल मबाक्म। मोपतीके आ तौ एलाजर नु इथामार निक्शीमी ला आस आफ आ डोंइती चढेतीक गेय पाम्ताक्स। लेवी १०:१-२

लेवीपुकी आन गेय

5 परमप्रभु यावेमी मोसा कली 6 “लेवी आ थर डा मुर आन कली ब्रेशा, मेको आन कली चढेब हारून आ डोंइती राप्पाइक्मी। मिनु मेकोपुकीमी मेको कली वारच पचा माल्नीम। प्रस्थान ३२:२९ 7 मिनु मेकोपुकीमी हारून कली वारच पा इस्राएली नेल्ल आन पर्वम गुम्तीक ताम्बु आ डोंइती गेय पचा माल्नीम। गन्ती १८:३; गन्ती १६:९ 8 मेकोपुकीमी गुम्तीक ताम्बु डा मारेइ मारेइ कोत्रचा माल्नीम। मिनु मेकोपुकीमी गुम्तीक ताम्बु डा इस्राएली आन पचा माल्शो गेय पचा माल्नीम। गन्ती ४:- 9 गे मेको लेवी आ मुर आन कली हारून नु आ तौ आन कली गेचा माल्नेवे। मेको इस्राएली आन दाते रे योत्रशा हारून कली गेशो बाक्नीम। 10 मिनु गे हारून नु आ तौ आस कली चढेबम पचा माल्शो गेय पपाइक्मी। मेकोपुकी डा लाक्शा अर्को सुइ मुरुम मो पाम्तेक्म हना, मेको आन कली साइक्चा माल्नीम” देंत। गन्ती १:१५

11 मिनु लेंशा परमप्रभु यावेमी मोसा कली 12 “गो इस्राएली आन डोंइती जरमेशो तौ आन पा डा लेवी आ थर डा मुर आन कली इस्राएली आन दाते रे योत्रतामी। मोपतीके लेवी आ मुर आं केन बाक्नीम। गन्ती ८:१६; प्रस्थान १३:२ 13 डोंइती जरमेशो नेल्ल आं के बाक्नीम। इजीप्तमी डोंइती जरमेशो नेल्ल सदुमी नाक्ती, गो इस्राएली आन डोंइती जरमेशो आं कली वोंइसाक्यी। मिनु गो मुर नु बी ब्यफ, क्यारश भेडा नेल्ल आं कली वोंइसाक्यी। मेको आं के बाक्नीम। गो परमप्रभु यावे नड” देंत।

14 मिनु परमप्रभु यावेमी सीनै डा गोरशो रागीमी मोसा कली 15 “गे लेवी आ थर डा मुर आन कली आन खिं खिं पा हिक्मी। महिना का गाप्शो नु मेको क्येडा लाक्शो वोंइश मुर नेल्ल आन कली हिक्मी” देंत। 16 मिनु मोसामी परमप्रभु यावेमी अरेशो खोदेंशो पा मेको आन कली हिक्तीमी।

17 मिनु लेवी आ तौ सु सु बाक्तेक्म देंशा हना, गेरशोन, कोहाथ नु मेरारी बाक्तेक्म। प्रस्थान ६:१६-१९; गन्ती २६:५७-६४ 18 गेरशोन आ तौ लिब्नी नु आ खिं डा मुर नु शिमेइ नु आ खिं डा मुर बाक्तेक्म। 19 कोहाथ आ तौ अम्राम नु आ खिं डा मुर नु इच्चार नु आ खिं डा मुर, हेब्रोन नु आ खिं डा मुर नु उज्जीएल नु आ खिं डा मुर बाक्तेक्म। 20 मेरारी आ तौ माहली नु आ खिं डा मुर नु मुशी नु आ खिं डा मुर बाक्तेक्म। एको लेवी आ थर डा मुर आन खिं खिं डा मुर बाक्तेक्म।

21 गेरशोन रे पा लिब्नी नु शिमेइ आस खिं खिं डा मुर दुम्तेक्म। मेकोन गेरशोन आ खिं खिं डा मुर बाक्नीम। 22 मेकोपुकी महिना का गाप्शो नु मेको क्येडा लाक्शो वोंइश मुर हिक्शोनु ७ हजार ५ सहे बाक्तेक्म। 23 गेरशोन आ खिं डा मुर आन बाक्तीके गुम्तीक ताम्बु आ नोले, पच्छिम गे दुम्चा माल्ब। 24 गेरशोनी आन खिं डा ठेयब मुर, लाएल आ तौ एली-आसाफ बाक्त। 25 गेरशोन आ मुरपुकीमी गुम्तीक ताम्बु कली सुम्तीके, गुम्तीक ताम्बु आ आगा ओव्रतीक डा फारशो वा, 26 लाडगा डा फारशो वा, ताम्बु नु चढेतीक आ एर ओंथ डा लाडगा आ आगा ओव्रतीक डा फारशो वा नु ताम्बु डा डोरीपुकी कोत्रचा माल्बाक्तेक्म।

27 कोहाथ रे पा अम्राम आ खिं डा मुर, इच्चार आ खिं डा मुर, हेब्रोन आ खिं डा मुर नु उज्जीएल आ खिं डा मुरपुकी दुम्तेक्म। मेको कोहाथ आ खिं खिं डा मुर बाक्नीम। 28 मेकोपुकी महिना का गाप्शो नु मेको क्येडा लाक्शो वोंइश मुर हिक्शोनु ८ हजार ६ सहे बाक्तेक्म। मिनु मेकोपुकी गुम्तीक ताम्बु डा गेय पाइब आन कली वारच पाइब बाक्तेक्म। 29 कोहाथ आ खिं डा मुर आन बाक्तीके गुम्तीक ताम्बु आ दक्खिन गे दुम्चा माल्ब। 30 कोहाथी आन

खिं डा ठेयब मुर उज्जीएल आ तौ, एली-जाफान बाक्ब। लेवी १०:४ 31 कोहाथीपुकीमी कबल पशो सन्दोस, शोब्ले वोइक्तीक टेबल, बत्ती दातीके, चढेतीक निक्शी नु चढेब आन माल्शो मारेइ मारेइ नु नेल्ल क्येडा चोव्रखो कोठा डा फारशो वा कोव्रचा माल्बाक्तेक्म। गन्ती ७:९ 32 मिनु चढेब हारून आ तौ एलाजर चहिं लेवी आन थर डा ठेयब मुर आन नेल्ल क्येडा ठेयब मुर बाक्त। मिनु मेको गुम्तीक ताम्बु डा गेय पाइब नेल्ल आन कली कोव्रब मुर बाक्त।

33 मेरारी रे पा माहली आ खिं डा मुर नु मुशी आ खिं डा मुर बाक्तेक्म। एको मेरारी आ खिं खिं डा मुर बाक्नीम। 34 मेकोपुकी महिना का गाप्शो नु मेको क्येडा लाक्शो वोंइश मुर नेल्ल हिक्शोनु ६ हजार सहे निक्शी बाक्तेक्म। 35 मेरारी आ खिं डा ठेयब मुर अबीहेल आ तौ सुरीएल बाक्ब। मेरारी आ खिं डा मुर आन बाक्तीके गुम्तीक ताम्बु आ उत्तर गे दुम्चा माल्ब। 36 मेरारी आ तौपुकीमी गुम्तीक ताम्बु डा फलेकपुकी, थामपुकी नु आन राप्पाइक्तीकपुकी नु आन मारेइ मारेइ कोव्रचा माल्नीम। 37 मेकोपुकीमी लाडगा एर ओथ डा थामपुकी नु आन राप्पाइक्तीकपुकी, किलापुकी नु डोरीपुकी कोव्रचा माल्नीम।

38 मोसा, हारून नु आस तौ आन बाक्तीके गुम्तीक ताम्बु आ डोंइती पूर्व गे, नां दाप्तीके गे दुम्चा माल्बाक्त। मेकोपुकीमी गुम्तीक ताम्बुम इस्राएली आन पर्वम मार मार पचा माल्शो बाक्मे, मेको पचा माल्बाक्तेक्म। मेकोपुकी डा लाक्शा अर्को सुइ मुरुम मो पाम्तेक्म हना, मेको आन कली साइक्चा माल्नीम।

39 मोसा नु हारूनमी परमप्रभु यावे आ देशो खोदेशो पा हिक्शो लेवी आ थर डा खिं खिं डा मुर महिना का गाप्शो नु मेको क्येडा लाक्शो नेल्ल २२ हजार जना बाक्तेक्म।

40 मिनु परमप्रभु यावेमी मोसा कली “महिना का गाप्शो नु मेको क्येडा लाक्शो इस्राएली आन डोंइती जरमेशो तौ नेल्ल आन कली हिक्शा आन नें ब्रेक्तो। 41 मिनु गे इस्राएली आन डोंइती जरमेशो तौ आन पा डा लेवी आ मुर आन कली आं के सेल्मी। मोपा इस्राएली आन डोंइती जरमेशो बी ब्यफ क्यारश भेडा आन पा डा लेवी आन बी ब्यफ क्यारश भेडा आं के सेल्मी। गो परमप्रभु यावे नड” देंत। गन्ती १८:१५

42 मिनु मोसामी परमप्रभु यावेमी अरेशो खोदेशो पा इस्राएली आन डोंइती जरमेशो तौ आन कली हिक्तीमी। 43 मिनु मेकोपुकी महिना का गाप्शो नु मेको क्येडा लाक्शो डोंइती जरमेशो आन नें ब्रेक्शा, हिक्शोनु नेल्ल २२ हजार सहे निक्शी ७३ जना बाक्तेक्म।

44 मिनु लेशा परमप्रभु यावेमी मोसा कली 45 “इस्राएली आन डोंइती जरमेशो तौ आन पा डा लेवी आ मुर आं के सेल्मी। मिनु मेको आन बी ब्यफ, क्यारश भेडा आन पा डा लेवी आ मुर आन बी ब्यफ, क्यारश भेडा आं के सेल्मी। लेवी आ मुर आं के बाक्नीम। गो परमप्रभु यावे नड। 46 मिनु लेवी आन क्येडा शुश दुम्शो इस्राएली आन डोंइती जरमेशो तौ सहे निक्शी ७३ जना बाक्तेक्म। मेको आन कली प्रोंइचा माल्बाक्त। 47 मेको आन कली प्रोंइचा कली का के ५ शेकेल ताक्को। गुम्तीक ताम्बु डा शेकेल का २० गेराह डा बाक्ब। गेराह का ०.६ ग्राम बाक्ब। गुम्तीके ताम्बु डा शेकेल १२ ग्राम बाक्ब। 48 मिनु गे इस्राएली आन कली प्रोंइचा कली गेशो शेकेल हारून नु आ तौ आन कली गेचा माल्नेवे” देंत। शेकेल इस्राएली आन क्येट बाक्ब। बजार डा शेकेल ११.५ ग्राम बाक्ब। ताम्बु कली गेतीक शेकेल चहिं १२ ग्राम बाक्ब। मेको सुन के नु चांदी के शेकेल बाक्नीम।

49 मिनु मोसामी लेवी आन क्येडा शुश दुम्शो, प्रोंइचा माल्शो मुर रे प्रोंइतीक क्येट ताक्तु। 50 मिनु मेकोमी इस्राएली आन डोंइती जरमेशो तौ रे प्रोंइतीक क्येट ताक्शा, मेको हजार का सहे सां ६५ ताम्बु डा शेकेल बाक्तेक्म। 51 मिनु मोसामी परमप्रभु यावेमी अरेशो खोदेशो पा, मेको प्रोंइतीक क्येट हारून नु आ तौ आन कली गेम्तीमी।

4

कोहाथ आ मुर आन कली हिक्शो

1 परमप्रभु यावेमी मोसा नु हारून आस कली 2 “लेवी आ मुर आन दाते डा कोहाथी आन कली आन खिं खिं डा मुर पा हिक्कीस। 3 गे ३० बर्स रे ५० बर्स सम्म डा वोंइश मुर आन कली हिक्कीस। मेकोपुकी ला गुम्तीक ताम्बु डा गेय पने चाप्नीम। गन्ती ८:२४-२५; १इतिहास २३:२४ 4 मेको कोहाथी आन पचा माल्शो गेय गुम्तीक ताम्बु डा नेल्ल क्येडा चोव्रखो थोव्रक नु बाक्ब।

5 मिनु गुम्तीक ताम्बु याक्तमेनु, हारून नु आ तौ गुम्तीक ताम्बु ओव्रशा, फारशो वा शोलशा, मेको वामी कबल पशो सन्दोस सुम्चा माल्नीम। 6 मिनु नोले मेकोपुकीमी मेको आ तार रिम्शो कोक्तेमी सुम्चा माल्नीम। मेको आ तारी नीलो रड डा वामी सुम्चा माल्नीम। मिनु मेको आ कुरतीक कोक्के शुइक्चा माल्नीम।

7 मिनु मेकोपुकीमी कोंइतीक शोब्ले वोइक्तीक टेबल तार नीलो वा का ब्रशा, मेको आ तारी थालपुकी, थनौरोपुकी, बोसपुकी नु तूचा थोव्रक चढेचा कली कचौरा वोइक्चा माल्नीम। मिनु नाक्त किंत किंत डा कोंइतीक शोब्ले यो मेको तार बाक्चा माल्ब। 8 मिनु नोले मेको आ तार लल रड डा वा ब्रशा, मेको आ तार रिम्शो कोक्तेम सुम्चा माल्नीम। मिनु मेको आ कुरतीक कोक्के शुइक्चा माल्नीम।

9 मेकोपुकीमी बत्ती दातीके नीलो वाम सुम्चा माल्नीम। मेको आ बत्ती, आ थनारो, आ थाल नु तेल वोइक्तीके नेल्ल सुम्चा माल्नीम। प्रस्थान २५:३१ 10 मिनु मेको नेल्ल कली रिम्शो कोक्तेमी वोइश्शा, कुरतीक तारी वोइक्चा माल्नीम।

11 मेकोपुकीमी सुन के चढेतीक तारी नीलो वा ब्रशा, रिम्शो कोक्तेम सुम्चा माल्नीम। मिनु मेको आ कुरतीक कोक्के शुइक्चा माल्नीम। प्रस्थान ४०:२६-२७

12 मिनु गुम्तीक ताम्बुम माल्शो मारेइ मारेइ खुप्शा, नीलो वाम कुम्लो पचा माल्नीम। मिनु मेको कली रिम्शो कोक्तेम सुम्चा माल्नीम। मिनु कुरतीक तारी वोइक्चा माल्नीम।

13 मेकोपुकीमी चढेतीक रे पुलु शोल्शा, मेको आ तार प्याजी रड डा वा ब्रचा माल्नीम। 14 मिनु मेकोपुकीमी चढेतीकेम माल्शो मारेइ मारेइ थोव्रकी मेको आ तारी वोइक्चा माल्नीम। मी वोइक्तीके, श्ये गुंइतीके, बेलचापुकी, ब्वाक्कु वोइक्तीक ग्योंबपुकी नु चढेतीक डा मारेइ मारेइ वोइश्शा, मेको तार रिम्शो कोक्तेम सुम्चा माल्नीम। मेको आ कुरतीक कोक्के शुइक्चा माल्नीम।

15 मिनु हारून नु आ तौपुकीमी मेको गुम्तीक ताम्बु डा मारेइ मारेइ सुम्ने थुम्मे नोले कोहाथीपुकी मेको कुरथ जाक्चा माल्नीम। तन्न मेकोपुकीमी परमप्रभु यावे आ मार मार थोव्रक थिचा मदुम्नीम। मेकोपुकीम थिम्तेक्म हना, बेक्नीम। कोहाथीपुकीमी गुम्तीक ताम्बु डा कुरचा माल्शो थोव्रक मेकोन बाक्नीम। गन्ती ७:९; २सामुएल ६:६-७

16 चढेब हारून आ तौ एलाजर बत्ती दाशो तेल, ब्रोव्रशो रिना पाइक्ब धूप, नाक्त किंत किंत डा चढेतीक अन्न नु लुक्तीक तेल कली कोव्रब बाक्ब। मेको गुम्तीक ताम्बु नु मेकेर डा मारेइ मारेइ कोव्रब बाक्ब” देंत।

17 मिनु नोले परमप्रभु यावेमी मोसा नु हारून आस कली 18 “गे लेवी आन दाते डा कोहाथी आन खिं खिं डा मुर आन कली खतम दुम्चा मगेस। 19 गे, कोहाथी मबेक्थु, ब्रोइमल दे नेल्ल क्येडा चोव्रखो थोव्रक आ नेक्था जाक्मानु, मार पचा माल्नीनी देंशा हना, हारून नु आ तौपुकी आगा ओव्रशा, मेको आन कली आन आन गेय नु मार मार कुरचा माल्नीनी, मेको योक्शा गेचा माल्नीमी। 20 तन्न कोहाथीपुकीम मेको नेल्ल क्येडा चोव्रखो थोव्रक आन कली कोव्रचा मदुम्ब। कोव्रतेक्म हना, बेक्नीम” देंत। १सामुएल ६:१९

गेरशोन आ मुर आन कली हिक्शो

21 मिनु परमप्रभु यावेमी मोसा कली 22 “गेरशोनी आन कली यो आन खिं खिं पा हिक्मी। 23 गे ३० बर्स रे ५० बर्स सम्म डा वोंइश मुर आन कली हिक्को। मेकोपुकी ला गुम्तीक ताम्बु डा गेय पने चाप्नीम।

24 मिनु गेरशोन आ मुर आन पतीके मार बाक्त देंशा हना, गेय पचा नु मार मार कुरचा माल्नीम। 25 गुम्तीक ताम्बु डा फारशो वा, गुम्तीक ताम्बु आ सुम्तीके नु मेको तार बाक्शो रिम्शो कोक्ते नु गुम्तीक ताम्बु आ ओव्रतीक डा फारशो वा कुरचा माल्नीम। 26 मिनु लाडगा डा एर ओंथ फारशो वा, ओव्रतीक डा फारशो वा, गुम्तीक ताम्बु नु चढेतीक आ एर ओंथ डा वा नु आ डोरी नु मेको आ गेय कली माल्शो नेल्ल पचा माल्नीम। 27 गेरशोन आ मुरपुकीमी हारून नु आ तौपुकीमी अरेशो खोदेंशो पा ला आन कुरतीक नु अरु गेय पने चाप्नीम। हारून नु आ तौपुकीमी मेको आन कुरचा माल्शो नु पतीक गेय नेल्ल अरेचा माल्नीम। प्रस्थान ३८:२१ 28 मिनु गेरशोनीमी गुम्तीक ताम्बुम पचा माल्शो गेय एकोन बाक्ब। मिनु हारून आ तौ इथामार मेको आन कली अरेब बाक्ब।

मेरारी आ मुर आन कली हिक्शो

29 गे मेरारी आ मुर आन कली आन खिं खिं डा मुर पा हिक्शा, ब्रेक्तो। 30 गे ३० बर्स रे ५० बर्स सम्म डा वोंइश मुर आन कली हिक्को। मेकोपुकी ला गुम्तीक ताम्बु डा गेय पने चाप्नीम। 31 मिनु मेकोपुकीमी गुम्तीक ताम्बु डा मार कुरचा माल्नीम देंशा हना, गुम्तीक ताम्बु डा फलेकपुकी, मेको आन ग्याइक्तीक कोक्केपुकी, थामपुकी नु राप्पाइक्तीकपुकी कुरचा माल्नीम। 32 मिनु लाडगा डा थाम नेल्ले, आन राप्पाइक्तीकपुकी, किलापुकी, डोरीपुकी नु मार मार अरु बाक्मा मेको कोव्रचा नु कुरचा माल्नीम। 33 मेको मेरारी आ मुरपुकीम आन गुम्तीक ताम्बु कली पचा माल्शो गेय बाक्ब। मिनु चढेब हारून आ तौ इथामार मेको आन कली अरेब बाक्ब” देंत।

लेवी आ मुर आन कली हिक्शो

34 मोसा, हारून नु थर थर डा मुर आन ठेयब मुरपुकीमी कोहाथी आन खिं खिं डा मुर आन कली हिक्शा ब्रेक्ताक्म। 35 मिनु ३० बर्स रे ५० बर्स सम्म डा मुर ला गुम्तीक ताम्बुमी गेय पने चाप्बाक्तेक्म। 36 मिनु मेको आन खिं खिं डा मुर हिक्शोनु, हजार निक्शी ७ सहे ५० जना बाक्तेक्म। 37 मेको गुम्तीक ताम्बु डा गेय पाइब कोहाथीपुकी बाक्नीम। मिनु मोसा नु हारूनमी परमप्रभु यावेमी अरेशो खोदेंशो पा मेको आन कली हिक्शा ब्रेक्शो बाक्ताक्स।

38 मिनु गेरशोनी आन खिं खिं डा मुर आन कली हिक्शा ब्रेक्ताक्म। 39 मिनु ३० बर्स रे ५० बर्स सम्म डा मुर ला गुम्तीक ताम्बुमी गेय पने चाप्बाक्तेक्म। 40 मिनु मेको आन खिं खिं डा मुर हिक्शोनु, हजार निक्शी ६ सहे ३० जना बाक्तेक्म। 41 मेको गुम्तीक ताम्बु डा गेय पाइब गेरशोनी बाक्नीम। मिनु मोसा नु हारूनमी परमप्रभु यावेमी अरेशो खोदेंशो पा मेको आन कली हिक्शा ब्रेक्ताक्स।

42 मिनु मेरारी आ मुर आन खिं खिं डा मुर आन कली हिक्तेक्म। 43 मेको ३० बर्स रे ५० बर्स सम्म डा मुर ला गुम्तीक ताम्बुमी गेय पने चाप्बाक्तेक्म। 44 मिनु मेको आन खिं खिं डा मुर हिक्शोनु, हजार सां सहे निक्शी बाक्तेक्म। 45 मेको गुम्तीक ताम्बु डा गेय पाइब मेरारी आ मुर बाक्नीम। मिनु मोसा नु हारूनमी परमप्रभु यावेमी अरेशो खोदेंशो पा मेको आन कली हिक्शा ब्रेक्ताक्स।

46 मिनु मोसा, हारून नु इस्राएल आ थर डा मुर आन ठेयब मुरपुकीमी लेवी आ मुर नेल्ल आन खिं खिं डा मुर हिक्शा ब्रेक्ताक्म। 47 मिनु ३० बर्स रे ५० बर्स सम्म डा मुर ला गुम्तीक ताम्बुमी गेय पने नु मार मार कुरने चाप्बाक्तेक्म। 48 मिनु मेको आन खिं खिं डा मुर हिक्शोनु ८ हजार ५ सहे ८० जना बाक्तेक्म। 49 मिनु परमप्रभु यावेमी अरेशो खोदेंशो पा मोसामी मेको आन कली हिक्शा, मार गेय पचा माल्नीमी, मार कुरचा माल्नीमी, मेको अरेम्तीमी। मिनु परमप्रभु यावेमी मोसा कली अरेशो खोदेंशो पा मेको आन कली हिक्शो बाक्त।

5

मुर बाक्तीक ग्रांग्रा मसेल्चा

1 परमप्रभु यावेमी मोसा कली 2 “गे इस्राएली आन कली गेपुकीमी कोव्रर खोदेंशो रोइ पाइब, आन रां रे ग्रांग्रा दिशो यिशो नु बेक्शो मुर थिशा ग्रांग्रा दुम्शो मुर आन कली इन बाक्तीक क्येडा डोन वोइक्चा माल्नीनी। लेवी १३:४६; लेवी १५:२; गन्ती ९:६-७ 3 मोदेंशो वोइश मुर नु मीश मुर नेल्ल आन कली मुर आन बाक्तीके क्येडा डोन वोइक्चा माल्नीनी। मेकोपुकीमी मुर आन बाक्तीके ग्रांग्रा दिशो सेल्चा मदुम्नीम। मारदे हना गो इन दातेमी बाक्शो बाक्नुड” देंत। गन्ती १२:१४-१५; प्रस्थान २५:८ 4 मिनु इस्राएलीपुकीमी मो पाम्तेक्म। मोदेंशो मुर आन कली मुर आन बाक्तीके क्येडा डोन वोइक्तेक्म। परमप्रभु यावेमी मोसा कली अरेशो खोदेंशो पा इस्राएलीपुकीमी पाम्तेक्म।

खुइ पशो आ पर्बम शेंशो

5 मिनु लेंशा परमप्रभु यावेमी मोसा कली 6 “गे इस्राएली आन कली ‘मीश मुर, वोइश मुर सु बाक्त हना यो, परमप्रभु यावे आ डोंइती पाप पा अरु मुर आन कली मारेइ मरिम्शो पाप्तु हना, मेको मुर दोस ताइब दुम्ब। लेवी ५:२१-२६ 7 मिनु मेकोमी आ मरिम्शो पशो शोव्रचा माल्ब। मिनु मेको मुरुमी आ खुइ पशो नेल्ल लेशशा गेशा, मेको क्येडा यो ५ भाग तेम्शा गेचा माल्ब। 8 तन्न मेको खुइ पचा पुंइसीशो मुर बेक्शा, मेको के सुइ मबाक्तेक्म हना, मेको पाप आ पर्बम थाप्शो परमप्रभु यावे के दुम्शा, चढेब आन के दुम्ब। मिनु आ पाप क्याम्तीक गेय पचा कली सांड का गेचा माल्ब। 9 मिनु इस्राएलीपुकीमी आन परमप्रभु यावे कली गेशो क्युक्शा चढेतीक नेल्ले चढेब कली गेचा माल्नीम। मिनु मेको चढेब केन दुम्ब। गन्ती १८:८ 10 मिनु मुर नेल्ल आन परमप्रभु यावे कली गेशो, मेको केन दुम्ब। मार गेम्तेक्म हना यो, मेको चढेब केन दुम्ब’ दे अरेमी” देंत।

मीश मुर कली नाक्शो

11 मिनु परमप्रभु यावेमी मोसा कली 12 “गे इस्राएली आन कली ‘सुइ आन मीश हेंथे गाक्शा, आ वोइश कली मरिम्शो पाप्तु हना, 13 अरु वोइश मुर नु इप्त हना, मेको आ वोइश रे खुइशो बाक्त हना, मेकोमी सुइम मतुइक्थु, ग्रांग्रा दिशो सेल्सीशो बाक्त हना यो, मेको सुइम थित्चा मपुंइसीशो बाक्त हना यो, 14 मेको वोइश मुरुमी आ ग्रांग्रा दिशो सेल्सीशो मीश आ पर्बम रुश पा, आ थुंम मरिम्शो मिम्शो बाक्त हना, मेको आ मीश आंम कली ग्रांग्रा दिशो मसेल्सीशो बाक्त हना यो, 15 मेको वोइश मुरुमी आ मीश कली चढेब आ बाक्तीके चाक्चा माल्ब। मिनु मेको आ

मीश आ पर्बम एफाह का डा १० भाग डा भाग का क्योव्रज फस चाक्चा माल्ब। मेको आ तारी तेल लुक्या नु धूप वोइक्चा मदुम्ब। मारदे हना मेको रुश पशो आ पर्बम अन्न चढेतीक बाक्ब। मेको अन्न चढेतीक मरिम्शो पशो मिम्चा कली बाक्ब। एफाह का २२ लिटर डा पुक्तीक बाक्ब।

16 मिनु चढेबमी मेको मीश मुर कली आ नेक्था चाक्शा, परमप्रभु यावे आ डोंइती राप्पाइक्चा माल्ब। 17 मिनु चढेबमी खप के ग्योंबुम नक ब्वाक्कु चाक्चा माल्ब। मिनु मेकोमी गुम्तीक ताम्बु डा खप डा फुरक इक्का हुइश्शा, मेको ब्वाक्कुम कुर पचा माल्ब। 18 मिनु चढेबमी मेको मीश मुर कली परमप्रभु यावे आ डोंइती राप्पा, मेको आ चां पुइक्चा माल्ब। मिनु मेकोमी मेको मिम्चा कली अन्न चढेतीक आ गुइमी वोइक्चा माल्ब। मेको रुश पशो आ पर्बम अन्न चढेतीक बाक्ब। मिनु मेको चढेबमी मेको सराप चीले रशो कशो ब्वाक्कु आ गुइमी ग्याइक्चा माल्ब। 19 मिनु चढेबमी मेको मीश मुर कली कसम जपाइश्शा “थमा पा गे सुइ वोंइश मुर नु मइप्शो बाक्ते हना, इ वोंइश नु बाक्शा, हेंथे मगाक्थु, इ कली ग्रांग्रा दिशो मसेल्सीशो बाक्ते हना, एको कशो ब्वाक्कु तूडीनु, गे सराप चीले मराइनेवे। 20 तन्न गे इ वोंइश नु बाक्शा यो, हेंथे गाक्शा, ग्रांग्रा दिशो सेल्सीशो बाक्ते हना, गे अरु वोंइश मुर नु इप्शो बाक्ते” हना, देंशा, 21 चढेबमी मेको मीश मुर कली सराप चीले रतीक कसम जपाइक्चा माल्ब। मिनु मेकोमी मीश मुर कली “परमप्रभु यावेमी इ कोव्रज होम्पाइक्तीक नु देल्लो सोव्रपाइक्तीक रोइ पपाइश्शो तशा, गे इ मुर आन दातेमी हिंचा डा कोइतीक दुम्नेवे। 22 एको सराप चीले रतीक ब्वाक्कु इ कोव्रजम ओव्रशा इ कोव्रज होम्तीक नु इ देल्लो सोव्रतीक रोइ पपाइक्ब” देंचा माल्ब। मिनु मेको मीश मुरुमी “आमेन, मोदेंशोन दुम्ल” देंचा माल्ब।

23 मिनु नोले चढेबमी मेको सराप चीले कागजम ब्रेक्शा मेको कशो ब्वाक्कुम मेको कागज कली मुरचा माल्ब। 24 मिनु नोले मेकोमी मेको मीश मुर कली मेको सराप चीले बाक्शो कशो ब्वाक्कु तूपाइक्चा माल्ब। मिनु मेको सराप चीले बाक्शो ब्वाक्कु मेको मीश मुर आ कोव्रजम ओव्रशा मेको कली शुश खाइक्पाइक्ब। भजन संग्रह १०९:१८ 25 मिनु चढेबमी मेको रुश पतीक आ पर्बम चढेशो अन्न मेको मीश मुर आ गुइ रे लाइश्शा, परमप्रभु यावे आ डोंइती क्युक्शा, चढेतीकेम चाक्चा माल्ब। 26 मिनु चढेबमी मेको अन्न चढेतीक रे मिम्चा कली योल का हुइश्शा चढेतीकेमी चोचा माल्ब। मिनु नोले मेको कली मेको ब्वाक्कु तूपाइक्चा माल्ब। 27 मिनु मेकोमी मेको मीश मुर कली मेको ब्वाक्कु तूपदानु, मेको ग्रांग्रा दिशो दुम्शो बाक्त हना, नु आ वोंइश कली मरिम्शो पशो बाक्त हना, मेको सराप चीले बाक्शो कशो ब्वाक्कु मेको आ आगा ओव्रशा, शुश खाइक्पाइक्ब। मेको आ कोव्रज होम्ब। मिनु मेको आ देल्लो सोव्रब। मिनु मेको मीश मुर आ मुर आन दातेमी हिंचा डा कोइतीक दुम्ब। 28 तन्न मेको मीश मुरुम आम कली ग्रांग्रा दिशो मसेल्सीशो नु मरिम्शो मपशो बाक्त हना, मेको ब्वाक्कु मखाइक्थु, आल थीब दुम्ब।

29 आ वोंइश नु बाक्शा यो, हेंथे गाक्शा ग्रांग्रा दिशो सेल्सीशो मीश मुर आ पर्बम रुश पाइब वोंइश कली अरेशो लोव्र बाक्ब। 30 मिनु वोंइश मुर रुश पाइब दुम्शा, आ मीश आ पर्बम रुश पाप्तु हना, मेकोमी आ मीश परमप्रभु यावे आ डोंइती राप्पाइक्चा माल्ब। मिनु चढेबमी मेको अरेशो लोव्र नेल्ले मेको मीश मुर आ पर्बम पचा माल्ब। 31 मिनु मेको वोंइश मुर दोस मताइब दुम्ब। मिनु आ मीशेमी चहिं आ मरिम्शो पशो राइब’ दे इस्राएली आन कली शेंदो” दे परमप्रभु यावेमी मोसा कली देंत।

6

परमप्रभु कली नाजिरी दिल्लो

1 परमप्रभु यावेमी मोसा कली 2 “गे इस्राएली आन कली ‘सुइ मीश मुर, वोंइश मुरुमी परमप्रभु यावे कली दिल्ला बाक्चा, दे नाजिरी कबल पाप्तु हना, १ सामुएल १:११ 3 मेकोमी शांबु राकसी तूचा काइ मदुम्ब। मेकोम ग्युरशो अडगुर शांबु नु अडगुर आ रस तूचा मदुम्ब। क्येख नु सोव्रपाइश्शो अडगुर यो ब्वचा मदुम्ब। आमास १:११-१२; लूका १:१५ 4 गिश नाक्त सम्म मेको नाजिरी दुम्शा दिल्ला बाक्बा, मिश नाक्त सम्म मेको अडगुर आ वांचेर रे आ खोशले सम्म यो ब्वचा मदुम्ब।

5 मेको गिश नाक्त सम्म नाजिरी दुम्शा दिल्ला बाक्बा, मिश नाक्त सम्म आ पिया डा चां प्रेक्चा मदुम्ब। मेको आ नाजिरी दुम्शा दिल्लो नाक्ती मनुम्म सम्म मेकोमी परमप्रभु यावे कली ला दिल्लो बाक्ब। मेकोमी आ चां बारचा गेचा माल्ब। न्यायाधीस १३:५

6 गिश नाक्त सम्म मेको परमप्रभु यावे आ पर्बम दिल्ला बाक्बा, मिश नाक्त सम्म मेको बेक्शो मुर आन नेक्था लचा मदुम्ब। 7 मेको आ आम आफ, आ लोकबपुकी सु बेक्तेकम हना यो, मेको आन पर्बम मेकोमी आम कली ग्रांग्रा दिशो

सेल्चा मदुम्ब। मारदे हना मेको आ पियाम आ परमप्रभु आ पर्बम दिल्लो चिन्ड बाक्ब। लेवी २१:११ ८ आ दिल्ला बाक्शो नाक्त नेल्ले मेको परमप्रभु यावे कली ला दुम्शो बाक्ब।

९ मिनू दोक का का पा सुइ मुर मेको आ नेक्था बेक्शा, आ चां ग्रांग्रा सेल्लु हना, ग्रांग्रा मदिशो दुम्चा कली ७ नाक्तीम आ चां प्रेक्चा माल्ब। गन्ती १९:११, १४, १६ १० मिनू मेकोमी ८ नाक्ती परवा हना यो, दुकुर हना यो निक्शी गुम्तीक ताम्बु डा ओव्रतीक चढेब आ डोंइती चाक्चा माल्ब। लेवी ५:७ ११ मिनू चढेबमी मेको का पाप आ पर्बम चढेतीके नु का चोशा चढेतीके चढेचा माल्ब। मिनू मेको मुर आ पर्बम पाप क्याम्तीक गेय पचा माल्ब। मारदे हना मेको बेक्शो मुर आ नेक्था बाक्शा पाप दुम्शा, ग्रांग्रा दिशो दुम्शो बाक्ब। मिनू मेको नाक्त रे मेकोम आ पिया परमप्रभु यावे कली तिल्ला माल्ब। १२ मिनू मेको मुरुमी आ नाजिरी बाक्तीक नाक्ती नक गोशा परमप्रभु यावे कली दिल्ला माल्ब। मिनू मेकोमी गारचा आ पर्बम चढेचा कली बर्स का गाप्शो सांड का चाक्चा माल्ब। मेको मुर दिल्ला बाक्मेनु, ग्रांग्रा दिशो दुम्तीके आ डोंइती डा नाक्त महिक्सीब।

१३ मिनू नाजिरी आन कली अरेशो लोव्र मार बाक्ब देंशा हना, आंम दिल्ला बाक्शो नाक्त गाक्म नोले, मेको मुर आ पतीके मार बाक्ब देंशा हना, मेको कली गुम्तीक ताम्बु आ ओव्रतीक आ डोंइती चाक्चा माल्ब। १४ मिनू मेकोमी परमप्रभु यावे कली मारेइ मदुम्शो थम रिम्शो सांड का चोशा चढेतीक चढेचा माल्ब। मिनू मेकोमी बर्स का गाप्शो मारेइ मदुम्शो थम रिम्शो पाठी का पाप आ पर्बम चढेचा माल्ब। मिनू मारेइ मदुम्शो थम रिम्शो बर्स का गाप्शो सांड का दुशा बाक्चा आ पर्बम चढेचा माल्ब। १५ मिनू मेकोमी डालो का बोरब ओरुक्ती मसुप्शो शोब्ले, थम रिम्शो तेलम निशो फस के बटुकपुकी नु तेल खेक्शो बोरब ओरुक्ती मसुप्शो बाबरपुकी चढेचा माल्ब।

१६ मिनू चढेबमी मेको नेल्ल परमप्रभु यावे आ डोंइती वोइक्चा माल्ब। मिनू मेको पाप आ पर्बम चढेतीके नु चोशा चढेतीके चढेचा माल्ब। १७ मिनू मेकोमी मेको सांड दुशा बाक्चा आ पर्बम परमप्रभु यावे कली चढेचा माल्ब। मेको नु डालोम बाक्शो बोरब ओरुक्ती मसुप्शो शोब्ले चढेचा माल्ब। मिनू मेको चढेबमी मेको नु अन्न चढेतीके नु तूचा थोव्रक चढेतीक चढेचा माल्ब।

१८ मिनू नोले मेको नाजिरीमी गुम्तीक ताम्बु ओव्रतीक आ डोंइती आ तिल्लो पिया डा चां प्रेक्चा माल्ब। मिनू मेको चां दुशा बाक्चा आ पर्बम चढेतीक आ आगाम चोचा माल्ब। प्रेरित १८:१८

१९ मिनू आ पिया प्रेक्गा नोले मेको चढेबमी मेको सांड आ लोप्शो बला नु डालो डा बोरब ओरुक्ती मसुप्शो बटुक का नु बोरब ओरुक्ती मसुप्शो बाबर का मेको नाजिरी आ गुइम वोइक्चा माल्ब। २० मिनू चढेबमी मेको कली क्युक्शा परमप्रभु यावे आ डोंइती क्युक्शा चढेतीक चढेचा माल्ब। मिनू क्युक्शा चढेशो, कुथ्रु नु फिला चढेब आ भाग दुम्ब। मेको नोले मेको नाजिरीमी अडगुर शांबु तूतु हना दुम्ब। प्रस्थान २९:२३, २४, २७

२१ मिनू कसम जशो नाजिरी कली अरेशो लोव्र मार बाक्ब देंशा हना, आ परमप्रभु यावे कली चढेशो नाजिरी आ कसम जशो खोदेंशो बाक्चा माल्ब। आ चाप्शो तेम्ने चाप्ब। आ कसम जशो गारचा माल्ब। मिनू आ जिम्मा डा अरेशो लोव्र नेल्ल गारचा माल्ब' देनो" देंत।

हारूनमी गेचा माल्लो आसीक

२२ मिनू परमप्रभु यावेमी मोसा कली २३ "गे हारून नु आ तौ आन कली 'गे इस्राएली आन कली आसीक गेनीनु, मार देंचा माल्नीनी देंशा हना, लेवी ९:२२-२३; ब्यवस्था १०:८ २४ परमप्रभु यावेमी इन कली आसीक गेवल। इन कली गेना हना यो कोव्रडल। उत्पत्ती २४:१, ३५; भजन संग्रह १२१:- २५ परमप्रभु यावे इन कली तशा ग्येरसेक्ल। मिनू इन कली शिशी पवल। भजन संग्रह ८०:४; प्रस्थान ३४:६-७ २६ परमप्रभु यावेमी इन कली कोव्रशा, इन थुं नाइश्शा बाक्चा गेवल' देंचा माल्नीनी। भजन संग्रह ६९:१७-१८; भजन संग्रह ८५:९; यसैया ५७:१९ २७ मेकोपुकीमी मोदेंशो लोव्र पा, आं नें इस्राएली आन तार वोइक्चा माल्नीम। मिनू गो मेको आन कली आसीक गेनुडमी" दे मोसा कली देंत।

7

इस्राएली आन थर डा ठेयब मुर

१ मोसामी गुम्तीक ताम्बु सेल्ले थुम्शा, मेको नु आ मारेइ मारेइ आन कली तेल बुइक्ताक्मी। मिनू परमप्रभु यावे आ गेय पचा कली वोइक्तु। मिनू मेकोमी चढेतीक नु आ मारेइ मारेइ तेल बुइश्शा परमप्रभु यावे आ गेय पचा कली वोइक्तीमी। प्रस्थान ४०:९, १०, १७ २ मिनू इस्राएल डा थर थर नु खिं खिं डा खुप्शा हिक्शो मुर आन ठेयब मुरपुकीमी चढेम्तेक्म। ३ मेकोपुकीमी आन चढेतीके परमप्रभु यावे आ डोंइती चाक्तेक्म। मार चाक्तेक्म देंशा हना, ६ ओटा बग्गी,

१२ ओटा ब्यफ, निक्शी थर डा मुर आन ठेयब मुर आस कली बग्गी का बाक्त। मिनु ठेयब मुर का का पा ब्यफ का का चढ़ेचा कली चाक्तेक्म। मिनु मेकोपुकीमी गुम्तीक ताम्बु आ डोंइती वोइक्तेक्म।

4 मिनु नोले परमप्रभु यावेमी मोसा कली 5 “मेको आन चाक्शो ताक्को। मिनु मेकोमी गुम्तीक ताम्बु डा गेय पने चाप्नीम। लेवी आन कली आन आन गेय गारचा डा पा गेमी” देंत।

6 मिनु मोसामी मेको बग्गी नु ब्यफपुकी ताक्शा, लेवी आन कली गेम्तीमी। 7 मिनु मेकोमी बग्गी निक्शी नु ४ ओटा ब्यफ गेरशोन आ तौ आन गेय कोव्रशा, मेको आन कली गेम्तीमी। 8 मिनु ४ ओटा बग्गी नु ८ ओटा ब्यफ मेरारी आ मुर आन गेय कोव्रशा, मेको आन कली गेम्तीमी। चढ़ेब हारून आ तौ इथामार मेको आन कली अरेब बाक्त। गन्ती ४:२८, ३३ 9 तन्न मेकोमी कोहाथी आन कली मारेइ मगेमी। मारदे हना मेकोपुकीमी परमप्रभु यावे आ मार मार थोव्रक कोव्रचा नु आन बलाम कुरचा माल्बाक्तेक्म। गन्ती ४:१५

10 मिनु चढ़ेतीक कली तेल ब्रुइक्तीक नु परमप्रभु यावे आ गेय पचा कली वोइक्तीक नाक्त मेको इस्राएल आ थर डा मुर आन ठेयब मुरुमी यो चढ़ेचा कली मार मार चाक्शा, चढ़ेतीक आ डोंइती वोइक्तेक्म। 11 मिनु परमप्रभु यावेमी मोसा कली “मेकोपुकीमी चढ़ेचा कली मार मार चाक्चा माल्नीम। मेको चढ़ेतीके आं गेय पचा कली वोइक्तीक नाक्ती इस्राएल आ थर डा मुर आन ठेयब मुर का कामी नाक्त का कली चढ़ेतीक चाक्चा माल्नीम” देंत। गन्ती १:४-१६; गन्ती २:३-२९

12 मिनु डोंइती डा नाक्ती यहूदा आ थर डा मुर आन ठेयब मुर अम्मीनादाब आ तौ नहशोनमी आ चढ़ेतीक चाक्तु। 13 मिनु मार चाक्तु देशा हना, सहे का ३० शेकेल डा चांदी के थाल का ७० शेकेल डा चांदी के बोस का चाक्तु। मेको शेकेल गुम्तीक ताम्बु डा शेकेल खोदेशो बाक्तेक्म। मेको थाल नु बोस निम्फामी तेलम निशो रिम्शो फसीम प्रिंशो बाक्ताक्स। मेको अन्न चढ़ेतीके बाक्त। ताम्बु डा शेकेल का १२ ग्राम डा क्येट बाक्ब। बजार डा शेकेल चहिं ११.५ ग्राम बाक्ब। 14 मिनु १० शेकेल डा धूपम ब्रीशो सुन के आइक्च बोस का, 15 चोशा चढ़ेचा कली ब्यफ का, सांड का नु बर्स का गाप्शो पाठा का चाक्तु। 16 पाप आ पर्बम चढ़ेचा कली बोका का, 17 दुशा बाक्चा आ पर्बम चढ़ेचा कली ब्यफ निक्शी, ५ ओटा सांड, ५ ओटा बोका नु ५ ओटा बर्स का गाप्शो पाठा चाक्तु। मेको अम्मीनादाब आ तौ नहशोन आ चढ़ेतीक बाक्त।

18 मिनु आ दीसा इस्साकार आ थर डा मुर आन ठेयब मुर सुआर आ तौ नेथनेलम आ चढ़ेतीक चाक्तु। 19 मिनु मार चाक्तु देशा हना, सहे का ३० शेकेल डा चांदी के थाल का नु ७० शेकेल डा चांदी के बोस का चाक्तु। मेको शेकेल गुम्तीक ताम्बु डा शेकेल खोदेशो बाक्तेक्म। मेको थाल नु बोस निम्फामी तेलम निशो रिम्शो फसीम प्रिंशो बाक्ताक्स। मेको अन्न चढ़ेतीके बाक्त। 20 मिनु १० शेकेल डा धूपम ब्रीशो सुन के आइक्च बोस का, 21 चोशा चढ़ेचा कली ब्यफ का, सांड का नु बर्स का गाप्शो पाठा का चाक्तु। 22 पाप आ पर्बम चढ़ेचा कली बोका का, 23 दुशा बाक्चा आ पर्बम चढ़ेचा कली ब्यफ निक्शी, ५ ओटा सांड, ५ ओटा बोका नु ५ ओटा बर्स का गाप्शो पाठा चाक्तु। मेको सुआर आ तौ नेथनेल आ चढ़ेतीक बाक्त।

24 मिनु मेको आ नित्थ नाक्ती जबूलून आ थर डा मुर आन ठेयब मुर हेलोन आ तौ एलीआबमी आ चढ़ेतीक चाक्तु। 25 मिनु मार चाक्तु देशा हना, सहे का ३० शेकेल डा चांदी के थाल का नु ७० शेकेल डा चांदी के बोस का चाक्तु। मेको शेकेल गुम्तीक ताम्बु डा शेकेल खोदेशो बाक्तेक्म। मेको थाल नु बोस निम्फामी तेलम निशो रिम्शो फसम प्रिंशो बाक्ताक्स। मेको अन्न चढ़ेतीके बाक्त। 26 मिनु १० शेकेल डा धूपम ब्रीशो सुन के आइक्च बोस का, 27 चोशा चढ़ेचा कली ब्यफ का, सांड का नु बर्स का गाप्शो पाठा का चाक्तु। 28 पाप आ पर्बम चढ़ेचा कली बोका का, 29 दुशा बाक्चा आ पर्बम चढ़ेचा कली ब्यफ निक्शी, ५ ओटा सांड, ५ ओटा बोका नु ५ ओटा बर्स का गाप्शो पाठा चाक्तु। मेको हेलोन आ तौ एलीआब आ चढ़ेतीक बाक्त।

30 मिनु मेको आ सांबु नाक्ती रूबेन आ थर डा मुर आन ठेयब मुर शेदेउर आ तौ एली-सुरमी आ चढ़ेतीक चाक्तु। 31 मिनु मार चाक्तु देशा हना, सहे का ३० शेकेल डा चांदी के थाल का नु ७० शेकेल डा चांदी के बोस का चाक्तु। मेको शेकेल गुम्तीक ताम्बु डा शेकेल खोदेशो बाक्तेक्म। मेको थाल नु बोस निम्फामी तेलम निशो रिम्शो फसीम प्रिंशो बाक्ताक्स। मेको अन्न चढ़ेतीके बाक्त। ताम्बु डा शेकेल का १२ ग्राम चांदी बाक्ब। 32 मिनु १० शेकेल डा धूपम ब्रीशो सुन के आइक्च बोस का, 33 चोशा चढ़ेचा कली ब्यफ का, सांड का नु बर्स का गाप्शो पाठा का चाक्तु। 34 पाप आ पर्बम चढ़ेचा कली बोका का, 35 दुशा बाक्चा आ पर्बम चढ़ेचा कली ब्यफ निक्शी, ५ ओटा सांड, ५ ओटा बोका नु ५ ओटा बर्स का गाप्शो पाठा चाक्तु। मेको शेदेउर आ तौ एली-सुर आ चढ़ेतीक बाक्त।

72 मिनु मेको आ नोले डा नाक्ती आशेर आ थर डा मुर आन ठेयब मुर ओक्रान आ तौ पगीएलमी आ चढ़ेतीक चाक्तु। 73 मिनु मार चाक्तु देशा हना, सहे का ३० शेकेल डा चांदी के थाल का नु ७० शेकेल डा चांदी के बोस का चाक्तु। मेको शेकेल गुम्तीक ताम्बु डा शेकेल खोदेशो बाक्तेक्म। मेको थाल नु बोस निम्फामी तेलम निशो रिम्शो फसम प्रिंशो बाक्ताक्स। मेको अन्न चढ़ेतीके बाक्त। 74 मिनु १० शेकेल डा धूपम ब्रीशो सुन के आइक्च बोस का, 75 चोशा चढ़ेचा कली ब्यफ का, सांड का नु बर्स का गाप्शो पाठा का चाक्तु। 76 पाप आ पर्बम चढ़ेचा कली बोका का, 77 दुशा बाक्चा आ पर्बम चढ़ेचा कली ब्यफ निक्शी, ५ ओटा सांड, ५ ओटा बोका नु ५ ओटा बर्स का गाप्शो पाठा चाक्तु। मेको ओक्रान आ तौ पगीएल आ चढ़ेतीक बाक्त।

78 मिनु मेको आ नेल्ल क्येडा नोले डा नाक्ती नाप्ताली आ थर डा मुर आन ठेयब मुर एनान आ तौ अहीरामी आ चढ़ेतीक चाक्तु। 79 मिनु मार चाक्तु देशा हना, सहे का ३० शेकेल डा चांदी के थाल का नु ७० शेकेल डा चांदी के बोस का चाक्तु। मेको शेकेल गुम्तीक ताम्बु डा शेकेल खोदेशो बाक्तेक्म। मेको थाल नु बोस निम्फामी तेलम निशो रिम्शो फसम प्रिंशो बाक्ताक्स। मेको अन्न चढ़ेतीके बाक्त। 80 मिनु १० शेकेल डा धूपम ब्रीशो सुन के आइक्च बोस का, 81 चोशा चढ़ेचा कली ब्यफ का, सांड का नु बर्स का गाप्शो पाठा का चाक्तु। 82 पाप आ पर्बम चढ़ेचा कली बोका का, 83 दुशा बाक्चा आ पर्बम चढ़ेचा कली ब्यफ निक्शी, ५ ओटा सांड, ५ ओटा बोका नु ५ ओटा बर्स का गाप्शो पाठा चाक्तु। मेको एनान आ तौ अहीरा आ चढ़ेतीक बाक्त।

84 मिनु परमप्रभु यावे आ गेय पचा कली वोइश्शो चढ़ेतीक कली तेल बुइक्तीक नाक्ती इस्राएल आ थर थर डा मुर आन ठेयब मुर आन चढ़ेशो मार बाक्तेक्म देशा हना, १२ ओटा चांदी के थाल, १२ ओटा चांदी के बोस नु १२ ओटा सुन के आइक्च बोस बाक्तेक्म। 85 मेको चांदी के थाल का का पा सहे का ३० शेकेल हेल्शो बाक्तेक्म। मेको चांदी के बोस का का पा ७० शेकेल हेल्शो बाक्तेक्म। मेको चांदी के ग्योब नेल्ल नाक्शोनु, गुम्तीक ताम्बु डा शेकेल खोदेशो पा हजार निक्शी ४ सहे शेकेल हेल्शो बाक्त। 86 मिनु मेको १२ ओटा धूपमी ब्रीशो सुन के आइक्च बोस का का पा गुम्तीक ताम्बु डा शेकेल खोदेशो पा १०, १० शेकेल हेल्शो बाक्तेक्म। मेको सुन नेल्ल नाक्शोनु, सहे का २० शेकेल हेल्शो बाक्त। 87 मिनु बी ब्यफ, क्यारश भेडा रे चोशा चढ़ेचा कली १२ ओटा ब्यफ, १२ ओटा सांड, १२ ओटा बर्स का गाप्शो पाठा नु मेकोपुकी नु गारचा डा पा अन्न चढ़ेतीके बाक्तेक्म। मिनु पाप आ पर्बम चढ़ेचा कली १२ ओटा बोका बाक्तेक्म। 88 मिनु बी ब्यफ, क्यारश भेडा रे दुशा बाक्चा आ पर्बम चढ़ेचा कली २४ ओटा ब्यफ, ६० ओटा सांड, ६० ओटा बोका नु ६० ओटा बर्स का गाप्शो पाठा बाक्तेक्म। मेको परमप्रभु यावे आ गेय पचा कली ला मेको चढ़ेतीक कली तेल बुइक्तीक नाक्ती आ नोले चढ़ेशो बाक्तेक्म।

89 मिनु मोसा परमप्रभु यावे नु लोव्र पचा कली गुम्तीक ताम्बुम ओव्रमेनु, मेकोमी कबल पशो सन्दोस सुम्शो शिशी बाक्तीके, करूब निक्शी आस दाते इर रे लोव्र पशो नेंतु। मोपा मेकोमी मोसा नु लोव्र पाप्तु। प्रस्थान २५:१७-२२; प्रस्थान २९:४२; प्रस्थान ३३:७; १सामुएल ३:३-१४

8

बत्ती दातीक वोइश्शो

1 मिनु परमप्रभु यावेमी मोसा कली 2 “गे हारून कली ‘गे मेको बत्ती वोदीनु, मेको ७ ओटा बत्ती दातीक आ डोंइती गे ब्रपतो’ देनो” देत।

3 मिनु हारूनमी मो पाप्तु। परमप्रभु यावेमी मोसा कली अरेशो खोदेशो पा दातीक आ डोंइती गे ब्रपाइक्तु। प्रस्थान २५:९, ३१-४० 4 मिनु बत्ती दातीके दोपा सेल्शो बाक्त देशा हना, मेको सुन के तुप्शा सेल्शो बाक्त। मेको उइ रे इर सम्म तुप्शा सेल्शो बाक्त। मिनु परमप्रभु यावेमी मोसा कली कोंइशो खोदेशो पा, हारूनमी मेको बत्ती दातीक सेल्लु।

लेवी आ मुर परमप्रभु के दुम्शो

5 परमप्रभु यावेमी मोसा कली 6 “इस्राएली आन दाते रे लेवी आन कली चाक्शा, मेको आन कली चोव्रखो सेल्मी। 7 मेको आन कली मार पचा मालनेवे देशा हना, मेको आन तारी चोव्रखो सेल्तीक ब्वाक्कु बुइक्तीमी। मिनु मेकोपुकीमी आन रां डा चां नेल्ल प्रेक्शा, आन वा मुरशा, चिकसीशा ग्रान्ग्रा मदिशो सेल्सीचा मालनीम। गन्ती १९:९, १७; लेवी १४:८ 8 मिनु नोले मेकोपुकीमी ब्यफ का नु तेलम निशो रिम्शो फस अन्न चढ़ेतीके चाक्चा मालनीम। गे चहिं पाप आ पर्बम चढ़ेचा कली ब्यफ का चाक्को। 9 मिनु गे लेवी आन कली गुम्तीक ताम्बु आ डोंइती चाक्शा, इस्राएली नेल्ल आन कली गुम्पाइक्मी। 10 मिनु गे लेवी आन कली परमप्रभु यावे आ डोंइती चाक्गीनु, इस्राएली नेल्लेमी आन गुइ लेवी

आन तार वोइक्का माल्नीम। 11 मिनु हारूनमी लेवी आ मुर आन कली परमप्रभु यावे आ गेय पचा कली मेको आ डोंइती क्युक्का चढेशो खोदेशो पा वोइक्का माल्ब। प्रस्थान २९:२४

12 मिनु लेवी आ मुरपुकीमी आन गुइ मेको ब्यफ आस पिया तार वोइक्का माल्नीम। मिनु हारूनमी लेवी आ मुर आन पर्बम पाप क्याम्तीक गेय पचा कली ब्यफ का पाप आ पर्बम चढेतीके नु अर्को चोशा चढेतीके परमप्रभु यावे कली चढेचा माल्ब। 13 मिनु मेको नोले गे लेवी आ मुर आन कली हारून नु आ तौ आन डोंइती राप्पा, परमप्रभु यावे कली क्युक्का चढेतीक खोदेशो पा वोइक्का माल्नेवे।

14 मोपा गे लेवी आ मुर आन कली अरु इस्राएली रे तिल्चा माल्नेवे। मिनु लेवी आ मुर आं के दुम्नीम। गन्ती ३:४५

15 मिनु गे लेवी आ मुर आन कली ग्रांग्रा मदिशो सेल्शा, मेको आन कली क्युक्का चढेतीक खोदेशो पा वोइक्की नोले मेकोपुकीमी गुम्तीक ताम्बुमी गेय पने चाप्नीम। 16 मिनु मेकोपुकी इस्राएली आन दाते रे थमा पा आं कली तिल्शो बाक्नीम। गो मेको आन कली इस्राएली आन नेल्ल क्येडा डोंइती जरमेशो तौ आन पा डा आं कली वोइक्तामी। गन्ती ३:१२-१३ 17 मिनु इस्राएली आन दातेम मुर बाक्तेक्म हना यो, बी ब्यफ, क्यारश भेडा बाक्तेक्म हना यो, डोंइती जरमेशो नेल्ल आं के बाक्नीम। इजीप्ती आन नेल्ल क्येडा डोंइती जरमेशो तौ नेल्ल आन कली सदुमी नाक्त रे गो मेको आन कली आं कली तिल्शा वोंइसाक्यी। प्रस्थान १३:२ 18 मिनु इस्राएली आन डोंइती जरमेशो आन पा डा गो लेवी आ मुर तिल्शा वोंइसाक्यी। 19 मिनु गो इस्राएली आन दाते रे लेवी आ मुर आन कली हारून नु आ तौ आन कली गेतामी। मार कली गेतामी देशा हना, इस्राएली आन पर्बम गुम्तीक ताम्बुमी गेय पचा कली इस्राएली आन पर्बम पाप क्याम्तीक गेय पचा कली नु इस्राएलीपुकी गुम्तीक ताम्बु आ नेक्था मजाक्मल नु मुर बेक्तीक रोइम मबेक्म, दे गेतामी” दे परमप्रभु यावेमी मोसा कली देंत। गन्ती ३:९; गन्ती १:५३

20 मिनु मोसा, हारून नु इस्राएल डा मुर नेल्लेमी लेवी आ मुर आन पर्बम परमप्रभु यावेमी मोसा कली अरेशो खोदेशो पा पाम्तेक्म। 21 मिनु लेवी आ मुरपुकीमी आंम आन पाप रे ग्रांग्रा मदिशो सेल्सीशा आन वा मुरतेक्म। मिनु नोले हारूनमी मेको आन कली क्युक्का चढेतीक खोदेशो पा परमप्रभु यावे आ डोंइती वोइक्तीमी। मिनु हारूनमी मेको आन कली पाप क्याम्तीक गेय पा ग्रांग्रा मदिशो सेल्तीमी। 22 मिनु मेको नोले लेवी आ मुरपुकीमी हारून नु आ तौ आन कली वारच पा गुम्तीक ताम्बु डा गेय पाम्तेक्म। मिनु परमप्रभु यावेमी मोसा कली लेवी आ मुर आन पर्बम अरेशो खोदेशो पा मेकोपुकीमी पाम्तेक्म। 23 मिनु परमप्रभु यावेमी मोसा कली 24 “एको लोव २५ बर्स गाण्शो नु मेको क्येडा लाक्शो लेवी आ मुर आन पर्बम बाक्ब। मिनु मेकोपुकी गुम्तीक ताम्बुमी गेय पचा गोचा माल्नीम। गन्ती ४:३, २३, ३०, ४७; १इतिहास २३:३, २४ 25 मिनु मेकोपुकी ५० बर्स लाक्गमेनु, गेय पचा प्रोन्मेक्ल। 26 मिनु मेकोपुकी गुम्तीक ताम्बुमी गेय पाइब आन लोक्ब आन कली वारच पदमेक्ल। तन्न आंमा चहिं गेय मपामेक्ल। गे लेवी आ मुर आन कली मोदेशो पा गेय पपाइक्का माल्नेवे” देंत।

9

पास्सा चाड

प्रस्थान १२:-; लेवी २५:५-८

1 मिनु परमप्रभु यावेमी इस्राएलीपुकी इजीप्त रे जाक्मा आ बर्स निक्शी नोले डोंइती डा महिनाम सीनै डा गोरशो रागीमी मोसा कली 2 “गे इस्राएलीपुकीमी आं देशो नाक्ती पास्सा चाड मानेचा माल्नीनी। 3 मेको महिना डा १४ नाक्त डा नाक्नाक्दो मेको चाड मानेचा माल्नीनी। गेपुकीमी मेको आ पर्बम फुल्लुम मुशा ब्रेक्शो लोव नु शेंशो पतीके नेल्लेमी मानेचा माल्नीनी” देंत।

4 मिनु मोसामी इस्राएली आन कली “पास्सा चाड मानेचा माल्नीनी” दे अरेप्तु। 5 मिनु मेकोपुकीम डोंइती डा महिना डा १४ नाक्ती डा नाक्नाक्दो सीनै डा गोरशो रागीमी पास्सा चाड मानेक्म। परमप्रभु यावेमी मोसा कली अरेशो खोदेशो पा इस्राएलीपुकीमी पाम्तेक्म।

6 मिनु मेकेर मुर का निक्शी बेक्शो मुर थिशा, ग्रांग्रा दिशो दुम्शो बाक्तेक्म। मोपा मेकोपुकीमी मेको नाक्ती मेको पास्सा चाड मानेचा मतामे। मेकोपुकी मेको नाक्ती मोसा नु हारून आस डोंइती जाक्तेक्म। गन्ती १९:११ 7 मिनु मेको मुरपुकीमी “गो बेक्शो मुर थिशा ग्रांग्रा दिशो दुम्शो बाक्तक हना यो, मारदे मेको देशो नाक्ती गोपुकीमी इस्राएली आन दातेमी आंइ परमप्रभु यावे कली चढेतीके चढेचा मताइनीकी?” देंतेक्म।

8 मिनु मोसाम मेको आन कली “रिम्दीन, परमप्रभु यावेमी इन पर्बम मार देंबा, गो मेको नेंचा माल्नुड” देंत।

9 मिनू परमप्रभु यावेमी मोसा कली 10 “गे इस्राएली आन कली ‘सुइ इन दातेमी नु इन चच युइ आन दातेमी बेकशो मुर थिशा ग्रांग्रा दिशो दुम्शो बाक्त हना यो, डोन लत हना यो, मेकोमी परमप्रभु यावे कली पास्सा चाड मानेचा माल्ब। 11 मेकोपुकीमी महिना निक्शी डा १४ नाक्ती नाक्नाक्दो मेको मानेचा माल्नीम। मिनू मेकोपुकीमी मेको पाठा कली बोरब ओरुली मसुप्शो शोब्ले, कशो खाइ नु ब्वचा माल्नीम। 12 मिनू मेको आ दीसा सुनी सम्म मारेइ हेंचा मदुम्ब। मिनू मेको आ रुश का यो जिक्चा मदुम्ब। मिनू पास्सा चाड आ पर्बम फुल्लुम मुशा, मार ब्रेक्शो बाक्मे, मेको पचा माल्नीम। 13 तन्न तेको मुर ग्रांग्रा दिशो मदुम्शो बाक्बा, डोन यो मलशो बाक्बा, मेकोमी पास्सा चाड ममानेपुतु हना, मेको मुर आ मुर आन दाते रे तिल्ला पुंडसीब। मारदे हना मेकोमी आ देशो नाक्ती परमप्रभु यावे कली चढेतीक मचढेवो। मेको मुर आ पाप राइब।

14 मिनू इन दातेमी बाक्शो अर्को रागी डा मुरुमी परमप्रभु यावे कली पास्सा चाड मानेचा दाक्ताक्व हना, मेकोमी मेको आ पर्बम ब्रेक्शो नेल्ल शेंशो पतीक खोदेशो पा पचा माल्ब। मिनू अर्को रागी डा मुर नु इन मुर नेल्ल आन कली पास्सा चाड आ पर्बम ब्रेक्शो लोत्र का दुम्चा माल्ब’ देनो” देंत।

ताम्बु आ तार बाक्शो गोस्स

15 मिनू गुम्तीक ताम्बु वोइक्ने थुम्शो नाक्ती गोस्सुमी मेको कबल पशो सन्दोस वोइश्शो ताम्बु सुम्तु। मेको नाक्नाक्दो रे सुनी सम्म ताम्बु तारी बाक्त। मेको गोस्स मी खोदेशो तांडसीशो बाक्त। प्रस्थान ४०:३४-३५ 16 मेको मोदेशो गेना हना यो दुम्शो बाक्त। गोस्सुमी मेको ताम्बु कली नाक्ती सुम्बाक्त। मिनू नाक्दो मी खोदेशो दुम्बाक्त। 17 मिनू मेको गोस्स ताम्बु आ तार रे इर गे लमेनु, इस्राएलीपुकी गाक्चा गोम्तेक्म। मिनू तेकेर मेको गोस्स जुक्ता, मेकेर इस्राएलीपुकीमी आन बाक्तीक सेल्लेक्म। प्रस्थान ४०: ३६-३८ 18 मिनू इस्राएलीपुकी परमप्रभु यावे आ अरेशोमी गाक्बाक्तेक्म। मिनू परमप्रभु यावे आ अरेशोमी मेकोपुकीमी आन बाक्तीक सेल्लबाक्तेक्म। मिनू मेकोपुकी मेको गोस्स गुम्तीक ताम्बु तार बाक्म सम्म मेकेर बाक्बाक्तेक्म। 19 मेको गोस्स शुश नाक्त सम्म गुम्तीक ताम्बु तार बाक्त हना यो, इस्राएलीपुकी परमप्रभु यावे आ देशो टिशा मगाक्बाक्तेक्म। 20 कोइ नाक्ती मेको गोस्स गुम्तीक ताम्बु आ तार का निक्शी नाक्त सम्म ला बाक्बाक्त। मिनू मेकोपुकी परमप्रभु यावे आ अरेशो टिशा, बास बाक्बाक्तेक्म। मिनू परमप्रभु यावे आ अरेशो खोदेशो पा गाक्बाक्तेक्म। 21 कोइ नाक्ती मेको गोस्स नाक्दो रे सुनी सम्म ला बाक्बाक्त। मिनू सुनी गोस्स इर लमेनु, मेकोपुकी गाक्बाक्तेक्म। नाक्ती बाक्त हना यो, नाक्दो बाक्त हना यो, मेको गोस्स इर लत हना, मेकोपुकी गाक्बाक्तेक्म। 22 मिनू मेको गोस्स नाक्त निक्शी, महिना का नु मेको क्येडा शुश नाक्त सम्म यो गुम्तीक ताम्बु तार बाक्त हना, इस्राएली आन बाक्तीकेमी बाक्बाक्तेक्म। तन्न गोस्स इर गे लत हना, मेकोपुकी गाक्बाक्तेक्म। 23 मिनू मेकोपुकी परमप्रभु यावेमी अरेशो खोदेशो पा आन बाक्तीक सेल्लबाक्तेक्म। मिनू परमप्रभु यावे आ अरेशो खोदेशो पा गाक्बाक्तेक्म। मेकोपुकीमी परमप्रभु यावेमी मोसा कली अरेशो खोदेशो पा पाइबाक्तेक्म।

10

चांदी के तुराही

1 परमप्रभु यावेमी मोसा कली 2 “गे चांदी के तुराही निक्शी सेलो। मेको तुप्शा, सेल्ला माल्नेवे। मिनू गे मेको ताप्शा, इस्राएली आन कली गुम्पाइक्चा माल्नेवे। मिनू गाक्ची ना दुम्मेनु, गे मेको ताप्चा माल्नेवे। गन्ती ३१:६ 3 मेको निक्शी कालेम ताप्शोनु, इस्राएली नेल्ल इ डोंइती गुम्तीक ताम्बु आ ओत्रतीकेमी जाक्शा बुक्चा माल्नीम। 4 तन्न का ला ताप्शोनु, इस्राएली आन थर थर डा मुर आन ठेयब मुरपुकी इ डोंइती जाक्शा बुक्चा माल्नीम। 5 मिनू ठेयब सेंदामी ताप्शोनु, पूर्ब गे बाक्शो मुरपुकी गाक्चा माल्नीम। 6 मिनू निक्शी खेयप ताप्शोनु, दक्खिन गे बाक्शो मुरपुकी गाक्चा माल्नीम। गाक्ची ना दुम्मेनु, गेना हना यो तुराही ताप्चा माल्नीम। 7 गे मुर आन कली गुम्पाइक्ची ना मेको ताप्चा माल्नेवे। तन्न मेको गाक्ची ना डा खोदेशो पा ताप्चा मदुम्ब।

8 मिनू हारून आ तौ चढेब निक्शीमी मेको तुराही ताप्चा माल्नीस। मेको इन कली नु इन चच युइ आन कली गेना हना यो पतीके बाक्ब। 9 मिनू गे इन रागीमी इन कली दिप्ब जोरी सत्रुपुकी नु लडाइ पथ लनीनु, ठेयब सेंदामी तुराही ताप्चा माल्नीस। मो पाइतीनी हना, परमप्रभु यावे, इन परमप्रभुमी इन कली मिम्शा, इन जोरी सत्रु रे प्रोंइब। न्यायाधीस ६:३४ 10 मिनू गेपुकी ग्येरशा बाक्नीनु, गे इन पचा माल्शो चाड मानेनीनु, औंसी डा चाड मानेनीनु, इन चोशा चढेतीके

नु इन दुशा बाक्चा आ पबर्म चढेतीके चढेनीनु, गेपुकीमी तुराही ताप्चा माल्नीनी। मिनु मेको ताप्नीनु, इन परमप्रभुमी इन कली मिम्ब। गो परमप्रभु यावे, इन परमप्रभु नड” देंत। लेवी २३:२४; २राजा ११:१४; २इतिहास ७:६

इसाएली सीनै डांडा रे गाक्शो

11 मिनु बर्स निक्शी, महिना निक्शी डा २० नाक्ती मेको गोस्स परमप्रभु यावे आ कबल पशो सन्दोस बाक्शो ताम्बु रे इर लत। गन्ती १:१ 12 मिनु नोले इसाएलीपुकी सीनै डा गोरशो रागी रे हुल हुल पा गाक्तेक्म। मिनु मेको गोस्स पारान डा गोरशो रागीम नांडसाक्व। 13 मिनु परमप्रभु यावेमी मोसा कली अरेशो खोदेशो पा टिशा, मेकोपुकी गाक्तेक्म। गन्ती २:-

14 नेल्ल क्येडा डोंइती यहूदा आ बाक्तीक डा मुर हुल हुल पा आन छेदर कुरशा गाक्तेक्म। मेको आन ठेयब मुर अम्मीनादाब आ तौ नहशोन बाक्त। 15 मिनु इस्साकार आ बाक्तीक डा मुर आन ठेयब मुर सुआर आ तौ नेथनेल बाक्त। 16 मिनु जबूलून आ बाक्तीक डा मुर आन ठेयब मुर हेलोन आ तौ एलीआब बाक्त। 17 मिनु नोले ग्रुम्तीक ताम्बु पोक्शा, गेरशोन आ मुरपुकी नु मेरारी आ मुरपुकीमी मेको कुरशा, गाक्तेक्म।

18 मिनु मेको आन नोले रूबेन आ बाक्तीक डा मुरपुकी हुल हुल पा आन छेदर कुरशा गाक्तेक्म। मेको आन ठेयब मुर शेदेउर आ तौ एली-सुर बाक्त। 19 मिनु सिमियोन आ बाक्तीक डा मुर आन ठेयब मुर सुरी-शदै आ तौ शेलुमीएल बाक्त। 20 मिनु गाद आ बाक्तीक डा मुर आन ठेयब मुर दूएल आ तौ एली-आसाफ बाक्त।

21 मिनु कोहाथीपुकी परमप्रभु यावे आ ताम्बु डा मार मार कुरशा, गाक्तेक्म। मेको आन जाक्चा क्येडा डोंइती मेको ग्रुम्तीक ताम्बु सेलने थुम्शो बाक्चा माल्बाक्त।

22 मेको नोले एफ्राइम आ बाक्तीक डा मुरपुकी हुल हुल पा आन छेदर कुरशा गाक्तेक्म। मेको आन ठेयब मुर अम्मीहुद आ तौ एली-शामा बाक्त। 23 मिनु मनस्से आ बाक्तीक डा मुर आन ठेयब मुर पेदा-सुर आ तौ गमालीएल बाक्त। 24 मिनु बेन्यामीन आ बाक्तीक डा मुर आन ठेयब मुर गिदेओनी आ तौ आबी-दान बाक्त।

25 मिनु नेल्ल आन क्येडा नोले दान आ बाक्तीक डा मुर हुल हुल पा आन छेदर कुरशा, गाक्तेक्म। मेको आन ठेयब मुर अम्मी-शदै आ तौ अही-एजेर बाक्त। 26 मिनु आशेर आ बाक्तीक डा मुर आन ठेयब मुर ओक्रान आ तौ पगीएल बाक्त। 27 मिनु नाप्ताली आ बाक्तीक डा मुर आन ठेयब मुर एनान आ तौ अहीरा बाक्त। 28 मोपा इसाएली आन हुल हुल पा गाक्चा माल्शो बाक्तेक्म।

मोसामी आ शिउ आ तौ कली ग्रुम्शो

29 मिनु मोसामी मिदयान डा रूएल आ तौ होबाब, आ रिउ कली “परमप्रभु यावेमी आंड कली गेशो रागी लना लन बाक्नीकी। गे यो गोपुकी नु पिने। गो इन कली रिम्शो पाइक्नीकी। मारदे हना परमप्रभु यावेमी ‘इसाएली आन कली रिम्शो पाइनुड’ देंत” दे मोसामी देंत। प्रस्थान २:१८; प्रस्थान १८:१; न्यायाधीस १:१६; न्यायाधीस ४:११

30 होबाबमी “गो मलाइक्नुड। गो आं रागी नु आं मुर आन बाक्तीके लेत्नुड” देंत। 31 मिनु मोसामी “आंड कली मप्रोनीन। मारदे हना मेको गोरशो रागीमी ते ताम्बु कीचा मेको तुइक्नीनी। मिनु गे आंड कली लां कोंइब दुम्नीनी। 32 गे गोपुकी नु गाक्तीनी हना, परमप्रभु यावेमी आंड कली मार मार रिम्शो पाइबा, गो मेको खोदेशो पा इन कली पाइनीकी” देंत।

33 मिनु मेकोपुकी परमप्रभु यावे आ डांडा रे नाक्त सां सम्म गाक्तेक्म। परमप्रभु यावे आ कबल पशो सन्दोस कुरबपुकी मेको आन कली बास बाक्तीक माल्चा, दे मेको आन डोंइडोंइती गाक्तेक्म। 34 मिनु परमप्रभु यावे आ गोस्स मेको आन गाक्ची ना मेको आन तार बाक्त। प्रस्थान १३:२१; गन्ती ९:१५-२३

35 मिनु कुरबपुकीमी मेको कबल पशो सन्दोस कुरशा गाक्मानु, गेना हना यो मोसामी “परमप्रभु यावे, बोक्कीन। इन जोरी सत्रु एर ओंथ ब्रामल। मिनु इन जोरी सत्रु इन क्येडा प्रोक्मल” देंबाक्त। २इतिहास ६:४१; भजन संग्रह ३:८; भजन संग्रह ९:२०; भजन संग्रह १०:१२; भजन संग्रह १७:१३; भजन संग्रह ६८:२; भजन संग्रह १३२:८ 36 मिनु मेको कबल पशो सन्दोस नाइक्तेमेनु, मेकोमी “परमप्रभु यावे, गे हजार, हजार इसाएली आन दातेमी लेशशा, जाक्कीन” देंबाक्त।

11

इसाएलीपुकीमी गन गन पशो

1 मिनु परमप्रभु यावेमी मुर आन श्येत जशो आ पबर्म गन गन पशो नेंतु। परमप्रभु यावेमी मेको नेंशा, शुश गाइक्ताक्व। मिनु परमप्रभु यावे गाइश्शा, मुर आन बाक्तीके गे मी सोइश्शा, एर सुर मीम नेक्पाइक्तु। लेवी १०:२ 2 मिनु मुरपुकीमी मोसा कली “वारच पने” दे ग्रीतेक्म। मिनु मोसामी परमप्रभु यावे कली पुंडतु। मिनु मेको मी काप्त। 3 मिनु परमप्रभु यावेमी मेको आन दातेमी मी सोइक्तीके, मेको बाक्तीके आ नें तबेरा वोइक्तेक्म।

4 मिनु मेको आन दातेमी बाक्शो अर्को रागी डा मुरपुकीमी मार मार जचा थोत्रक जचा ब्वचा दाक्तेक्म। मिनु इस्राएली यो लेंशा डाक्शा “गोपुकीमी श्ये ब्वचा तक हना, दुम वा। प्रस्थान १२:३८; प्रस्थान १६:३; १कोरिन्थी १०:६ 5 गो इजीप्तीमी मो ब्वशो डांइ श्ये मिम्नीकी। मिनु वोबीस, खाइपुकी, प्याज नु लसुन यो मिम्नीकी। 6 तन्न गो मुल ओले पेटे दुम्शा, एको मन्ना डा लाक्शा मारेइ मथिल्लीकी” देंतेक्म।

7 मन्ना चहिं धन्या वांचेर खोदेशो बाक्त। मेको कोव्रशोनु, खोटो खोदेशो तांइसीबाक्त। प्रस्थान १६:१४-३१ 8 मिनु मुरपुकी लशा, मेको खुप्शा, कोइमी हिल्ला, कोइमी चुशा, कोइमी नेल्शा, कोइम बटुक सेल्शा जाम्तेक्म। मिनु मेको तेलम चोशो शोब्ले खोदेशो पा ब्रोत्रबाक्त। 9 मिनु नाक्दो आन बाक्तीकेमी सीत यिमेनु, मन्ना यो यीबाक्त।

10 मिनु मोसामी मुर नेल्ल आन आन ताम्बु डा ओव्रतीकेमी राप्शा डाक्शो ताप्तु। मिनु मुरपुकीमी परमप्रभु यावे कली शुश गाइक्पाइक्तीके, मोसामी मेको आन पशो काइ मदाक्शो बाक्त।

11 मिनु मोसामी परमप्रभु यावे कली “गे मारदे आं कली श्येत गेयीनी? मारदे गो इन डोंइती शिशी मतडा? मारदे आं कली इश डा मुर आन कली कोव्रब सेल्यीनी? 12 मार, एको इश डा मुर आं आल नमी डा? मार, गो मेको आन कली थिडमी डा? गे आं कली ‘दूध तूब आल कली आ आममी कुरशा लाइश्शो खोदेशो पा, आंइ किकी पिपी आन कली इन गेशो रागीमी कुरशा लावो’ देंनीनी। 13 गो इश डा मुर आन ब्वतीक श्ये ते थित्नुड डा? मिनु मेकोपुकीमी आं कली ‘श्ये ब्वचा गेकी’ दे जाक्शा डाक्तेक्म। 14 गो इश डा मुर आन कली खुल्ने मचाप्नुड। एको आं मचाप्चा डा गेय बाक्ब। 15 मिनु गे आं कली ओदेशो पाइक्तीनी। मिनु गो इन शिशी ताता हना, साइय्यीनी। मिनु गो आं खतम दुम्तीके तचा ममाल्नुड” देंत। प्रस्थान ३२:३२

16 मिनु परमप्रभु यावेमी मोसा कली “गे इस्राएली आन दाते रे ७० जना खाल्पा आन कली खुप्तीमी। मेको आन मुर आन दाते डा ठेयब मुर नु मेको आन कली सासन पाइब मुर दुम्चा माल्नीम। मिनु गे मेको आन कली तुइक्चा माल्नेवे। मिनु मेको आन कली गुम्तीक ताम्बुमी चाक्मी। मिनु मेकोपुकी गे नु बाक्चा माल्नीम। प्रस्थान १८:२१-२६; प्रस्थान २४:९-११ 17 मिनु गो यिशा, गे नु लोत्र पाइनुड। मिनु गो इ आगामी बाक्शो सोक्त रे लाइश्शा, मेको आन तारी वोइक्नुड। मिनु मेकोपुकीमी गे नु गारशा, मेको मुर आन श्येत कुरनीम। मिनु गे का ला कुरचा ममाल्नेवे।

18 मिनु गे मुर आन कली ‘गे दीसा कली ग्रांग्रा मदिशो दुम्शा, ठीक दुमीन। गेपुकीमी श्ये ब्वचा ताइनीनी। मारदे हना गेपुकीमी परमप्रभु यावे आ डोंइती श्ये ब्वचा तक हना, रिम्शो दुम वा, दे डाक्शो बाक्तीनी। आंइ कली एको रागी क्येडा इजीप्तीमी रिम्शो बाक्त’ देंतीनी। मोपतीके परमप्रभु यावेमी इन कली श्ये ब्वचा गेब। मिनु गे मेको ब्वाइनीनी। प्रस्थान १९:१० 19 मिनु नाक्त का, नाक्त निक्शी ५ नाक्ती, १० नाक्ती नु २० नाक्त ला ममाइ, 20 गेपुकीमी ब्रीचा डा पा महिना का सम्म श्ये ब्वचा ताइनीनी। मारदे हना गेपुकीम आंम इन दातेम बाक्शो परमप्रभु यावे कली मटिनी। मिनु गे मेको आ डोंइती ‘गो मारदे इजीप्ती रे गूशा गाक्का?’ दे डाक्तीनी” देंत।

21 मिनु मोसामी “गो नु लां गाक्ब मुर ६ लाख बाक्नीम। मो हना यो, गे ‘मेको आन कली महिना का सम्म श्ये ब्वचा गेनुडमी’ देंतीनी। 22 मार, बी ब्यफ, क्यारश भेडा नेल्ल क्योरशा हना यो, एको इश डा मुर आन कली गाप्बा डा? समुन्द्र डा डांइ नेल्ल रेशशा हना यो, नेल्ल आन कली गाप्बा डा?” देंत।

23 मिनु परमप्रभु यावेमी मोसा कली “मार, आं सक्ति ग्युम्शो बाक्बा डा? आं देशो लोत्र गाप्बाक्म कों मगाप्बाक्मे, तुइक्नेवे” देंत। यसैया ५०:२; यसैया ५९:१

24 मोपतीके मोसा लाडगा गूशा, मुर नेल्ल आन कली परमप्रभु यावे आ देशो लोत्र नेंपाइक्तीमी। मिनु मेको मुर आन दाते डा ७० जना खाल्पा आन कली ताम्बु आ एर ओंथ राप्पाइक्मी। 25 मिनु नोले परमप्रभु यावे गोस्सुमी उइ आगा तोइश्शा, मोसा नु लोत्र पाप्तु। मिनु मेकोमी मोसा आ आगा बाक्शो सोक्त इक्का लाइश्शा, मेको ७० जना खाल्पा आन तार वोइक्तु। मिनु मेको सोक्त मेको आन तार नांइसेनु, मेकोपुकीमी परमप्रभु यावे आ लोत्र पाम्तेक्म। तन्न नोनोले मो मपाम।

26 मिनु ७० जना खाल्पा आन दातेमी एल्दाद नु मेदाद माइश्शो मुर निक्शी बाक्ताक्स। मेको आस नें यो ब्रेक्शो बाक्त। तन्न मेको निक्शी गुम्तीक ताम्बुम मलसा बाक्त। मिनु परमप्रभु यावे आ सोक्त मेको आस तार यो नांइसे

बाक्त। मिनु मेको निक्शीमी मुर आन बाक्तीकेमी परमप्रभु यावे आ लोत्र पाम्से बाक्त। 27 मिनु वोंइश मुर का दोरशा जाक्शा, मोसा कली “एल्दाद नु मेदादमी मुर आन बाक्तीकेमी परमप्रभु यावे आ लोत्र पाम्ताक्स” देंत।

28 मिनु नून आ तौ यहोसु मोसा कली वारच पाइब बाक्त। मेको मोसा आ योत्रशो मुरुमी मोसा कली “हजुर, आं होत्रप मेको आस कली तेक्कीन” देंत। गन्ती १३:१६; प्रस्थान २४:१३

29 तन्न मोसामी मेको कली “मार, आं पर्बम गे ईख पाइब दुमे? परमप्रभु यावेमी आ सोक्त आ मुर नेल्ल आन तार वोइशशा, मेको नेल्ल परमप्रभु यावे आ लोत्र पाइब दुम हना, गिश रिम्शो दुम वा” देंत। योएल ३:१; मर्कूस ९:३८-३९

30 मिनु मोसा नु इस्राएली खाल्पा मुर आन बाक्तीके लेत्तेक्म।

इस्राएलीपुकीमी बटटाइ ब्वशो

31 मिनु नोले परमप्रभु यावेमी फश पपाइक्तु। मिनु मेको फशेमी समुन्द्र रे बटटाइपुकी चाक्तु। मिनु मुर आन बाक्तीक आ एर ओथ नेल्ल नाइक्पाइक्तु। काबु डा नाक्त डा लां सम्म कुबीत निक्निक्शी थांइशो पा नांइसाक्म। कुबीत का ०.५ मिटर खोदेशो बाक्ब। प्रस्थान १६:१३ 32 मिनु मुरपुकीमी मेको नाक्त रे, नाक्दो रे नु आ दीसा नाक्त सम्म मेको ग्याइक्ताक्म। नेल्ल क्येडा इच्का खोइ ग्याइक्बमी यो १० होमेर ग्याइक्ताक्मे। मिनु मेकोपुकीम आन बाक्तीक एर ओथ नेल्ल सोत्रपाइक्तेक्म। होमेर का २२० लिटर रिक्ब पुक्तीके का बाक्ब। 33 तन्न मेकोपुकीमी श्ये ब्वना ब्वन परमप्रभु यावे मेको आन पर्बम शुश गाइक्ताक्व। मिनु परमप्रभु यावेमी मेको आन कली थम ठेयब बेक्तीक रोइ पपाइक्तीमी। 34 मोपतीके मेको बाक्तीके आ नें किब्रोथ-हत्तावा वोइक्तेक्म। मारदे हना मेकेर शुश वाल्ब मुर आन कली थिम्तेक्म।

35 मिनु मुरपुकी किब्रोथ-हत्तावा रे पा गाक्शा, हसेरोथ गे लाम्तेक्म।

12

हारून नु मिरयाम गाइशशो

1 मिनु हसेरोथमी बाक्मानु, मोसामी कूश रागी डा मीश चाक्तीके मिरयाम नु हारूनमी मोसा कली मरिम्शो लोत्र पाम्ताक्स। मारदे हना मेकोमी कूश रागी डा मीश ग्युंबे पशो बाक्त। प्रस्थान २:२१ 2 मिनु मेको निक्शीमी “मार, परमप्रभु यावेमी मोसा नु ला लोत्र पशो बाक्बा डा? मार, मेकोमी गोपुकी नु यो लोत्र मपशो बाक्बा डा?” देंताक्स। मिनु परमप्रभु यावेमी मेको लोत्र नेंतु। 3 मोसा चहिं रागी डा मुर नेल्ले आन क्येडा ब्रेम्शो मुर बाक्त।

4 मिनु परमप्रभु यावेमी रीब पा मोसा, हारून नु मिरयाम आन कली “गे सांफा, गुम्तीक ताम्बुम रे गूडीन” देंत। मिनु मेको सांफा गूतेक्म। 5 मिनु नोले परमप्रभु यावे गोस्स के थामम यिशा गुम्तीक ताम्बु आ ओत्रतीक राष्शा, हारून नु मिरयाम आस कली ब्रेत्ताक्मसी। मिनु मेको निम्फा जाक्ताक्स। प्रस्थान १६:१० 6 मिनु मेकोमी “आं लोत्र नेनीन। गोपुकी इन दातेमी परमप्रभु यावे आ लोत्र पाइब बाक्त हना, गो मेको कली कोंइतीकेम तपांइसीनुड। गो मेको नु आ डोमुमी लोत्र पाइनुड। 7 तन्न आं गेय पाइब मोसा नु मोदेशो मपाइनुड। मेको आ गेय नेल्लेमी थमा सुइक्चा पुंइसीशो बाक्ब। हिब्रू ३:२ 8 गो मेको नु कोत्रमुशा लोत्र पाइनुड। मिनु मेको नु रुप्चा डा लोत्र पा खुइशशो लोत्र मपाइनुड। मिनु मेको आं नेक्था जाक्ने चाप्ब। मारदे गे आं गेय पाइब मोसा आ पर्बम मरिम्शो लोत्र पचा काइ महिंसी?” देंत। प्रस्थान ३३:११; ब्यवस्था ३४:१० 9 मिनु परमप्रभु यावेमी मेको आस पर्बम शुश गाइक्ताक्व। मिनु मेको गाक्त।

10 मिनु मेको गोस्स ताम्बु आ तार रे लमेनु, मिरयाम कोत्रर मुशा फु खोदेशो बुश दुम्त। मिनु हारूनमी मिरयाम कली कोत्रडानु, मेको कोत्ररी दुम्ने थुम्शो बाक्त। ब्यवस्था २४:९ 11 मिनु हारूनमी मोसा कली “आं प्रभु, गो मूर्ख दुम्शा, पाप पशो आ पर्बम आंस कली सजाइ मगेने। 12 एको कली आ आम आ कोत्रर जे रे गूमेनु, आ रां फेके का राक्शो शाम्शो आल खोदेशो दुम्चा मगेने” देंत। 13 मिनु मोसामी परमप्रभु यावे कली “परमप्रभु, एको कली सापतीन” दे पुंइतु। प्रस्थान १५:२६ 14 मिनु परमप्रभु यावेमी मोसा कली “मार, मेको आ आफोमी आ कुलुम तोक्शो हना, मेको ७ नाक्त सम्म मुने मदोक्बा डा? मेको कली ७ नाक्त सम्म मुर आन बाक्तीक क्येडा लाडगाम तिल्शा वोतो। मेको नोले ला लेशशा जाक्चा गेवो” देंत। गन्ती १३:४६ 15 मिनु मिरयाम ७ नाक्त सम्म मुर आन बाक्तीक क्येडा लाडगाम तिल्शा वोइक्चा पुंइसाक्व। मिनु मिरयाम कली लेशशा मचाक्गामे सम्म मुरपुकी यो मगाक्म। 16 मिनु मेको आ नोले मेकोपुकी हसेरोथ रे गाक्शा, पारान डा गोरशो रागीम आन बाक्तीक सेल्तेक्म।

13

कनान रागी कली क्यारी पशो
ब्यवस्था १:१९-२५

1 मिनु परमप्रभु यावेमी मोसा कली 2 “गे कनान रागी क्यारी पाइब मुरपुकी सोइक्तो। गो मेको रागी इस्राएली आन कली गेनुड। मेको आन थर थर रे पा मुर का का सोइक्तो। मेको आन मुर आन दाते डा ठेयब मुर दुम्चा मालनीम” देत।

3 मिनु परमप्रभु यावे आ देशो खोदेशो पा, मोसामी मेको क्यारी पाइब आन कली पारान डा गोरशो रागी रे सोइक्ताक्मी। मेको नेल्ले इस्राएली आन दाते डा ठेयब मुर बाक्तेक्म। 4 मिनु सु सु बाक्तेक्म देशा हना, रूबेन आ थर रे जाक्कुर आ तौ शम्मुआ, 5 सिमियोन आ थर रे होरी आ तौ शाफात, 6 यहूदा आ थर रे यपुन्ने आ तौ कालेब, यहोसु १४:७ 7 इस्साकार आ थर रे योसेफ आ तौ इगाल, 8 एफ्राइम आ थर रे नून आ तौ होशेआ, गन्ती १३:१६ 9 बेन्यामीन आ थर रे रफु आ तौ पाल्ती, 10 जबूलून आ थर रे सोदी आ तौ गददीएल, 11 योसेफ आ तौ मनस्से आ थर रे सूसी आ तौ गाददी, 12 दान आ थर रे गेमल्ली आ तौ अम्मीएल, 13 आशेर आ थर रे मिकाएल आ तौ सेथुर, 14 नाप्ताली आ थर रे वोफसी आ तौ नाहबी, 15 गाद आ थर रे मार्की आ तौ गूएल बाक्तेक्म।

16 मिनु मोसामी मेको रागी कली क्यारी पथ सोइश्शो मुर आन नें एकोन बाक्नीम। मोसामी नून आ तौ होशेआ आ नें यहोसु वोइक्तु। गन्ती ११:२८; १इतिहास ७:२७

17 मोसामी मेको आन कली कनान रागी कली क्यारी पथ सोइक्ताक्मी। मिनु मोसामी मेको आन कली “गे एक रे लशा, नेगेब माइश्शो दक्खिन डा रागी रे पहाड गे लने। 18 मेको रागी दोदेशो बाक्मे, मेकेर डा मुरपुकी बोल्यो बाक्मा कों, मबाक्मा, शुश बाक्मा कों, इच्का खोइ ला बाक्मा? मेको नेल्ल कोवडीन। 19 मिनु मेको आन रागी रिम्शो बाक्म कों, मरिम्शो बाक्म? मिनु मेको आन सहर गारो हिरशो बाक्म कों महिरशो बाक्म? 20 मिनु मेको रागी डा खप दोदेशो बाक्मे, मलिलो बाक्म कों, पाडकोक्च बाक्म? मेकेर रवापुकी बाक्मा कों, मबाक्मा? महिंब दुमीन। मिनु मेको रागी डा फल फुल चाक्कीन” दे माइक्तीमी। मेना डोंइती डा अडगुर मीची जाक्शो बाक्त।

21 मिनु मेकोपुकी ग्येत्य लशा, जीन डा गोरशो रागी रे रेहोब सम्म मेको रागी क्यारी पाम्तेक्म। रेहोब लेबो-हमाथ आ नेक्था बाक्माक्त। 22 मिनु मेकोपुकी नेगेब गे ग्येत्य लशा, हेब्रोन सहर जाक्दीम्मा बाक्त। मेकेर अनाक आ मुर अहीमान, शेशै नु तलमै बाक्बाक्तेक्म। हेब्रोन चहिं इजीप्त डा सोआन सहर क्येडा ७ बर्स डोंइती सेल्शो बाक्त। 23 मिनु नोले एश्कोल डा दिंममी जाक्दीत्तेक्म। मिनु मेकेर अडगुर सिश्शो राशी क्योरशा, मेको कोक्के कामी शुइश्शा मुर निक्शीमी कुरशा चाक्तेक्स। मेकोपुकीमी अनार नु फोव्रशी गेडा यो चाक्तेक्म। 24 मिनु मेको ठेयब अडगुर खोइक्तीके नोले मेको बेंसी आ नें एश्कोल डा बेंसी वोइक्तेक्म।

क्यारी पथ लाइब आन लोव

25 मिनु ४० नाक्ती नोले मेकोपुकीमी मेको रागी क्यारी पशा, लेत्तेक्म। 26 मिनु लेशशा, मोसा, हारून नु इस्राएली नेल्ल आन बाक्तीके, पारान डा गोरशो रागी कादेशमी जाक्तेक्म। मिनु मेको क्यारी पाइबपुकीमी मोसा, हारून नु मुर नेल्ल आन कली आन तशो शेंताक्मे। मिनु मेको रागी डा फल फुल कोंइताक्मे। गन्ती २०:१; उत्पत्ती १६:१४; उत्पत्ती २०:१; ब्यवस्था १:१९,४६; यहोसु १४:६-७ 27 मिनु मोसा कली “गोपुकी इन सोइश्शो रागीमी जाक्दीत्तक। मेको रागीम थमा पा दूध नु खुदो शुश बाक्ब। मिनु मेको रागी डा फल फुल एकोन बाक्नीम। प्रस्थान ३:८,१७ 28 तन्न मेकेर बाक्ब मुरपुकी बोल्यो बाक्नीम। मिनु मेको आन सहरपुकी गारोम हिरशो नु थम ठेयब बाक्नीम। मिनु गोपुकीमी मेकेर अनाक आ मुर आन कली यो ताइतक। 29 मिनु अमालेक आ मुर नेगेब रागीम बाक्बाक्तेक्म। मिनु हिती, यबुसी नु एमोरी पहाडम बाक्बाक्तेक्म। मिनु कनानी ठेयब समुन्द्र आ नेक्था नु यर्दन खोला आ नेक्था बाक्बाक्तेक्म” देतेक्म।

30 मिनु कालेबमी मोसा आ डोंइती बाक्शो मुर आन थुं नाइक्पाइक्चा, दे मोसा कली “गोपुकी रीब पा लशा, मेको रागी इं के सेल्य। मारदे हना गो मेको थमा पा ग्राने चाप्नय” देत। गन्ती १४:६

31 मिनु नोले मेको नु लाइब मुरपुकीमी “गोपुकी मेको मुरपुकी नु लडाइ पथ लने मचाप्नय। मारदे हना मेकोपुकी गो इं क्येडा शुश बोल्यो बाक्नीम” देतेक्म। 32 मोपा मेकोपुकीमी क्यारी पथ लतीक रागी आ पर्वम मरिम्शो लोव नेंपाइश्शा “गोपुकीमी क्यारी पथ लशो रागीमी आ मुर आन कली साइक्ब ताइतक। मिनु आंइ तशो मुरपुकी थम ठेयब बाक्नीम। 33 गोपुकीमी मेकेर नेफीलीमपुकी यो ताइतक। अनाक आ मुर नेफीलीम रे दुम्शो बाक्नीम। मिनु गो

मेको आन कली तशा, गो आंमा माले खोदेशो तांडसाक्क। मिनु गो मेको आन डोंइती यो मोदेशोन तांडसीनय” देंतेक्म। ब्यवस्था १:२८; ब्यवस्था ९:२

14

इसाएलीपुकीमी थमा मसुइश्शो

1 मिनु मेको नाकदो मेको मुर नेल्ले वाइ ब्रेशशा डाक्तेक्म। ब्यवस्था १:२६-४४ 2 मिनु इस्राएली नेल्ल मोसा नु हारून आस पर्वम गन गन पाम्तेक्म। मिनु नेल्लेमी मेको आस कली “गोपुकी इजीप्त उइ बेक्शो नकी हना, रिम्शो दुम वा। एको गोरशो रागीम बेक्शो नकी हना यो, दुम वा। गन्ती ११:१; प्रस्थान १६:२-३; प्रस्थान १७:२-३ 3 मारदे परमप्रभु यावेमी आंइ कली तरवारम साइक्पाइक्चा कली एको रागी चाक्गा? गो आंइ मीशपुकी नु आंइ आलपुकी रोइश्शा लाइक्नीम। गोपुकी इजीप्त रागी लेत्चा रिम्शो ममाइ डा?” देंतेक्म। भजन संग्रह १०६:२४-२६ 4 मिनु मेकोपुकी “मुल गो लां कोंइब मुर का योव्रशा, इजीप्त रागीम लेय्य” देंमुतेक्म।

5 मिनु मोसा नु हारून मेकेर बुक्शो इस्राएली नेल्ल आन डोंइती खुम्की पा बाप्ताक्स। गन्ती १६:४ 6 मिनु मेको रागीम क्यारी पथ लाइब नून आ तौ यहोसु नु यपुन्ने आ तौ कालेबमी सुर्ता पा आस आस वा खाक्ताक्स। गन्ती १३:६,८,१६,३० 7 मिनु मेको निक्शीमी इस्राएली नेल्ल आन कली “गोपुकी आंइ क्यारी पथ लशो रागी थम रिम्शो बाक्ब। 8 परमप्रभु यावे गोपुकी इं कली तशा ग्येरसाक्व हना, मेकोमी इं कली मेको रागीम चाक्दीप्ब। मिनु मेको रागी दूध नु खुदो शुश बाक्शो रागी बाक्ब। मेको रागी इं कली गेब। गन्ती १३:२७ 9 गोपुकी परमप्रभु यावे कली गन गन मपने। मिनु मेको रागी डा मुर आन क्येडा महिनीन। मारदे हना गो मेको आन कली शोब्ले खोदेशो पा नेक्नय। मेको आन कली प्रोंइब सुइ मबाक्नीम। परमप्रभु यावे गोपुकी नु बाक्ब। मेको आन क्येडा महिनीन” देंताक्स। गन्ती १३:३२ 10 तन्न मुर नेल्लेमी मेको आस कली “फुल्लु आप्नीकी” दे हिंच कोंइताक्म। मेना परमप्रभु यावे आ छेडछेड इस्राएली नेल्ल आन कली गुम्तीक ताम्बुम तपांडसाक्व। प्रस्थान १७:४; प्रस्थान १६:१० 11 मिनु परमप्रभु यावेमी मोसा कली “एको मुरपुकीम गेना सम्म आं कली मटीनीमी? एको आन दातेम आं कोंइशो चिन्ड तशा यो, गेना सम्म आं कली थमा मसुइक्नीमी? 12 गो मेको आन कली बेक्तीक रोइमी साइक्नुडमी। मेको आं मुर खोदेशो मबाक्नीम। मिनु गो इ रे मेको आन क्येडा शुश नु बोल्यो जात का सेल्लुडमी” देंत। प्रस्थान ३२:१०-१४

13 मिनु मोसामी परमप्रभु यावे कली “मोदेशो पाइतीनी हना, इजीप्त डा मुरपुकीमी एको लोव्र नेंनीम। मारदे हना गो मेको आन कली इन सक्तिमी मेकेर रे गुंडताक्नी। 14 एको रागी डा मुरपुकीम मेको आन कली नेंपाइक्नीम। परमप्रभु यावे, गो इन मुर आन दातेम बाक्शो बाक्नीनी, दे मेकोपुकीमी देशो लोव्र नेंने थुम्शो बाक्नीम। परमप्रभु यावे, गो मेको आन डोंइतीन तपांडसीशो बाक्नीनी। मिनु इन गोस्स मेको आन तार बाक्शो बाक्ब। मिनु गो नाक्ती गोस्स के थामम नु नाकदो मी के थामम बाक्शा, मेको आन डोंइती गाक्नीनी। प्रस्थान १३:२१-२२; गन्ती ९:१५-२३ 15 मिनु मुल गो एको मुर आन कली कालेमी साइक्तीनी हना, इन पशो नेंब रागी रागी डा मुरपुकीमी 16 ‘परमप्रभु यावेमी मेको आन कली गेनुड, दे कसम जशो रागीम चाक्दीन्ने मचब। मोपतीके मेको आन कली गोरशो रागीम साइक्तु’ देंनीम। ब्यवस्था ९:२८; यहोसु ७:८-९

17 मोपतीके, परमप्रभु, इन ठेयब सक्ति कोंइदीन। गो इन थोक्शो पशो लोव्र खाप्पीन। 18 ‘परमप्रभु यावे रीब पा मगाइक्ब नु गेना हना यो दाक्ब, प्रस्थान ३४:६-७ मेकोमी मरिम्शो पशो नु दूली पशो क्याम्ब, तन्न दोस ताइब कली दोस मताइब मदेंब। आन आंम आफ आन पशो पाप मेको आन आल, चच, युइ नु युइ आन आल सम्म रपाइक्ब’ दे थोक्शा लोव्र पशो बाक्तीनी। 19 मिनु गो मेको मुर आन मरिम्शो पशो इन ठेयब नु गेना हना यो दाक्तीकेमी क्याम्दीन। गो इन मुर आन कली इजीप्त रे एक सम्म आन मरिम्शो पशो क्याम्शो खोदेशो पने” दे पुंडतु। प्रस्थान ३४:१०

20 मिनु परमप्रभु यावेमी “गो इ पुंडशो खोदेशो पा एको मुर आन मरिम्शो पशो क्याम्नुड। 21 मो हना यो गो थमा पा, रागी नेल्ले आं सक्तिमी प्रिंनुड। प्रस्थान ९:१६ 22 मेकोपुकीमी इजीप्तमी नु गोरशो रागीमी आं ठेयब सक्ति नु छक लाक्चा डा गेय तशा यो, आं कली १० खेयप नाक्शा, मटीब दुम्शा, मेको नेल्लेमी 23 मेको आन किकी पिपी आन कली कसम जशा ‘गेनुड’ देशो रागी ओव्रचा मताइनीम। मिनु आं कली काइ मदाक्बपुकीम मेको रागी मताइनीम। भजन संग्रह ९५:११; हिब्रू ३:११,१७-१९ 24 तन्न आं गेय पाइब कालेब आ थुंमी अर्को सोक्ती बाक्ब। मिनु मेकोमी आ थुं नेल्लेमी आं कली टिशो बाक्ब। गो मेको कली आ क्यारी पथ लशो रागी चाक्दीत्नुड। मिनु मेको आ तौ चच

युइ आन रागी दुम्ब। यहोसु १४:६-९ 25 मिनु अमालेक आ मुर नु कनानीपुकी बेंसीम बाक्तीके, गेपुकी दीसा लने। मिनु लल समुन्द्र गे पा गोरशो रागी लने” देंत।

26 मिनु परमप्रभु यावेमी मोसा नु हारून आस कली 27 “गेना सम्म एको मरिम्शो मुरपुकीम आं पर्वम गन गन पाइनीमी? गो इस्राएली आन आं कली गन गन पशो नेंता। मेकोपुकीम आं कली गन गन पाइनीम। प्रस्थान ३२:३४-३५ 28 गे मेको आन कली ‘परमप्रभु यावेमी थमा पा इन देशो खोदेशो पा इन कली पाइनुड। 29 गे नेल्ल गोरशो रागीमी बेक्चा माल्नीनी। नें ब्रेक्शो नेल्ले, २० बर्स गाप्शो नु मेको क्येडा लाक्शो आं कली गन गन पाइब बेक्चा माल्नीम। १कोरिन्थी १०:१० 30 आं कसम जशा, इन कली गेनुड देशो रागीमी सुइ ओव्रचा मताइनीम। यपुन्ने आ तौ कालेब नु नून आ तौ यहोसु ला ओव्रचा ताइनीस। 31 मिनु रोइक्चा पुंइसीनीम, देशो इन आल आन कली चहिं गो मेक चाक्दीत्नुडमी। मिनु मेकोपुकीमी इन मदाक्शो रागीम बाक्शा, तुइक्नीम। 32 गेपुकी चहिं एको गोरशो रागीमी बेक्नीनी। 33 मिनु इन आल मेको गोरशो रागीमी ४० बर्स सम्म गोठला दुम्शा हिरचा माल्नीम। मोपा इन मटिशो आ पर्वम श्येत जाइनीम। गे नेल्ल इन नेल्ल क्येडा नोले डा मुर मबेक्नी सम्म मोदेशो पा हिरचा माल्नीम। प्रस्थान १६:३५; ब्यवस्था २:७; ब्यवस्था ८:४ 34 गेपुकीमी मेको रागी क्यारी पचा कली ४० नाक्त सम्म माल्शो बाक्तीनी। मोपतीके नाक्त का डा बर्स का पा ४० बर्स सम्म गेपुकीम इन मरिम्शो पशो आ पर्वम श्येत जचा माल्नीनी। मिनु गो इन पर्वम गाइक्ताक्ड, दे तुइक्नीनी’ दे येरमीया २:१९; गन्ती ३२:१३ 35 गो, परमप्रभु यावेमी, लोव्र पाता। मिनु गो एको आं कली गन गन पा बुक्शो मरिम्शो मुर आन कली थमा पा मो पाइनुड। मेको नेल्ल एको गोरशो रागीमीन बेक्शा नुप्नीम” देंत।

36 मिनु मोसाम क्यारी पथ सोइश्शो मुरपुकी लेशशा जाक्शा मेको रागी आ पर्वम मरिम्शो लोव्र पा मुर नेल्ल आन कली परमप्रभु यावे कली गन गन पपाइक्तेक्म। १कोरिन्थी १०:५,१०; यहूदा:५ 37 मेको रागी आ पर्वम मरिम्शो लोव्र चाक्ब मुर नेल्ल परमप्रभु यावे आ डोंइती बेक्चा माल्नीम। 38 मिनु मेको रागी क्यारी पथ लाइब आन दाते डा नून आ तौ यहोसु नु यपुन्ने आ तौ कालेब ला ब्रोंइनीस।

39 मिनु मोसाम मुर नेल्ल आन कली एको लोव्र नेंपदानु, मुर नेल्ल शुश रोंका पाम्तेक्म। 40 मेकोपुकीमी सुनी कना बोक्शा इर पहाड गे डोइश्शा “गेपुकी मुल एक रे परमप्रभु यावे आ कबल पशो रागी लाइनीकी। मारदे हना, गोपुकीम पाप पशो बाक्नीकी” देंतेक्म। ब्यवस्था १:४१ 41 तन्न मोसामी मेको आन कली “मारदे गेपुकीमी परमप्रभु यावे आ लोव्र लाक्नीनी? गे मग्रानीनी। 42 गे इर मडोंइसीन। मारदे हना परमप्रभु यावे गेपुकी नु मबाक्ब। मो पाइतीनी हना, इन जोरी सत्रुपुकीमी इन कली साइक्नीम। 43 मिनु अमालेक आ मुर नु कनानीपुकीमी इन कली लडाइ तोइनीम। मिनु गेपुकी तरवारम साइक्चा पुंइसीनीनी। मारदे हना गेपुकी परमप्रभु यावे कली टिचा प्रोंइतीनी। मोपतीके परमप्रभु यावे इन दातेमी मबाक्ब” देंत। 44 मो हना यो मेकोपुकीम लोव्र मनेंथु, इर पहाड गे डोंइसाक्म। तन्न परमप्रभु यावे आ कबल पशो सन्दोस गुम्तीक ताम्बुम बाक्त। मिनु मोसा मुर आन बाक्तीक उइ बाक्त। 45 मिनु मेको पहाडम बाक्ब अमालेक आ मुर नु कनानीपुकी उइ तोइश्शा, मेको आन कली साइक्ना साइक्न होरमा सम्म खेदा पाम्तेक्म। गन्ती २१:३; ब्यवस्था १:४४

15

दोपा चढ़ेचा, दे अरेशो

1 परमप्रभु यावेमी मोसा कली 2 “गे इस्राएली आन कली ‘गे इन कली गेशो बाक्तीक रागीम जाक्दीन्नीनु, 3 गे कसम जशो खाप्चा कली मीम चोशा चढ़ेतीक चढ़ेचा दाक्ताक्नी हना, यो, चोशा चढ़ेतीके चढ़ेचा दाक्तीनी हना यो, क्योरशा चढ़ेचा दाक्ताक्नी हना यो, इन कली देशो चाडमी ग्येरशा परमप्रभु यावे कली चढ़ेचा दाक्ताक्नी हना यो, गे इन गोठ नु बगाल रे परमप्रभु यावे कली आ दाक्शो ब्रोंव्रशो रिना पाइश्शो चढ़ेचा माल्नीनी। 4 मिनु सुमी परमप्रभु यावे कली चढ़ेबा, मेकोमी अन्न चढ़ेतीके यो चढ़ेचा माल्ब। मेको अन्न चढ़ेतीक एफाह का डा १० भाग डा भाग का रिम्शो फस, हिन का डा ४ भाग डा भाग का तेल ब्वाइश्शा, चढ़ेचा माल्नीनी। एफाह का २२ लिटर पुक्तीके बाक्ब। हिन का ४ लिटर खोदेशो बाक्ब। लेवी २:-; गन्ती २८:५ 5 गे चोशा चढ़ेतीक पाठा का का नु तूचा थोव्रक चढ़ेतीक हिन का डा भाग सां डा भाग का अडगुर शांबु यो चढ़ेचा माल्नीनी। गन्ती २८:७; प्रस्थान २९:४०; लेवी २३:१३ 6 सांड का चढ़ेचा दाक्तीनी हना, मेको नु अन्न चढ़ेतीक यो चढ़ेचा माल्नीनी। मेको अन्न चढ़ेतीक एफाह का डा १० भाग डा भाग निक्शी रिम्शो फस नु हिन का डा भाग सां डा भाग का तेल ब्वाइश्शा, चढ़ेचा माल्नीनी। 7 तूचा थोव्रक

चढ़ेतीक कली हिन का डा भाग सां डा भाग का अडगुर शांबु चढ़ेचा माल्नीनी। मेको परमप्रभु यावे कली आ दाक्शो ब्रोव्रशो रिना पाइशो चढ़ेतीक बाक्ब।

8 मिनु कसम जशो खाप्या कली कि दुशा बाक्चा आ पबर्म परमप्रभु यावे कली चोशा चढ़ेचा कली कि क्योरशा चढ़ेचा कली ब्यफ का चढ़ेतीनी हना, 9 मेको नु अन्न चढ़ेतीके यो चढ़ेचा माल्नीनी। गे एफाह का डा १० भाग डा भाग सां रिमशो फस नु आधा हिन तेल ब्वाइशशा, चढ़ेचा माल्नीनी। एफाह का २२ लिटर पुक्तीक बाक्ब। हिन का ४ लिटर पुक्तीके बाक्ब। 10 मिनु तूचा थोव्रक चढ़ेतीक कली आधा हिन अडगुर शांबु यो मेको चोशा चढ़ेतीक नु चढ़ेचा माल्नीनी। मेको परमप्रभु यावे कली आ दाक्शो ब्रोव्रशो रिना पाइशो मीम चोशा चढ़ेतीके बाक्ब।

11 मिनु मेको ब्यफ, सांड, बोका, पाठा नु आइक्च पाठा चढ़ेशोनु, मो पचा माल्नीनी। 12 गेपुकीम दोशो चढ़ेतीनी, मेको नेल्ल आन कली का का पा मो पचा माल्नीनी। 13 मिनु इस्राएली सु सुमी परमप्रभु यावे कली ब्रोव्रशो रिना पाइशो मीम चोशा चढ़ेतीके चढ़ेतीमी, मेकोपुकीमी मोदेशो पचा माल्नीमी। 14 मिनु अर्को रागी डा मुर, गेपुकी नु इच्का नाक्त बाक्त हना यो, गेना हना यो बाक्त हना यो, मेकोमी परमप्रभु यावे कली आ दाक्शो ब्रोव्रशो रिना पाइशो मीम चोशा चढ़ेतीक चढ़ेचा दाक्ताक्व हना, इन खोदेशो पा पचा माल्ब। 15 मिनु इन गुम्तीकेमी गेपुकी नु बाक्शो अर्को रागी डा मुर आन कली नेल्ल पाला सम्म एको पचा माल्शो कान बाक्ब। गेपुकी नु अर्को रागी डा मुर परमप्रभु यावे आ डोंइती खाल का डा बाक्नीनी। प्रस्थान १२:४८-४९ 16 गेपुकी नु गे नु बाक्शो अर्को रागी डा मुर आन कली अरेशो लोव्र नु ठीक पतीक लोव्र खाल डा बाक्चा माल्ब” देचा माल्नेवे” दे परमप्रभु यावेमी मोसा कली देत।

डोंइती डा शोब्ले

17 परमप्रभु यावेमी मोसा कली 18 “गे इस्राएली आन कली परमप्रभु यावेमी इन कली लाइशो, रागीम जाक्दीन्नीनु, 19 गेपुकीमी मेको रागी डा अन्न जनीनु, परमप्रभु यावे कली कोसेली का गेचा माल्नीनी। 20 मिनु इन डोंइती निशो फस रे सेल्शो शोब्ले का परमप्रभु यावे कली गेचा माल्नीनी। खला रे क्युक्शा चढ़ेशो खोदेशो पा चढ़ेचा माल्नीनी। नेहेम्याह १०:३८; इजीकीएल ४४:३० 21 मिनु गेपुकीमी नेल्ल इन पाला सम्म इन डोंइती डा निशो फस रे शोब्ले का परमप्रभु यावे कली क्युक्शा चढ़ेतीके कली चढ़ेचा माल्नीनी।

मतुइक्थु पशो पाप

22 मिनु गेपुकीमी मतुइक्थु परमप्रभु यावेमी मोसा कली शेंशो लोव्र नेल्लेमी का मपाइतीनी हना, लेवी ४:१३-२१ 23 परमप्रभु यावेमी मोसा रे पा इन कली नु इन नोले डा मुर आन कली शेंशो लोव्र मपाइतीनी हना, 24 गे नु गुम्तीक डा मुरुमी मतुइक्थु पशो पाप आ पबर्म मेको गुम्तीक डा मुर नेल्लेमी ब्यफ का चोशा चढ़ेचा माल्नीम। मेको परमप्रभु यावे कली आ दाक्शो ब्रोव्रशो रिना पाइशो बाक्ब। मेको आ शेंशो खोदेशो पा अन्न चढ़ेतीक नु तूचा थोव्रक चढ़ेतीक यो चढ़ेचा माल्नीम। मिनु पाप आ पबर्म बोका का यो चढ़ेचा माल्नीम। 25 मिनु चढ़ेबमी इस्राएली नेल्ल आन पबर्म पाप क्याम्तीक गेय पचा माल्ब। मिनु मेकोपुकी आन पाप क्याम्चा ताइनीम। मारदे हना मेकोम मतुइक्थु पाप पशो बाक्नीम। मिनु मेकोपुकीमी परमप्रभु यावे कली मीम चोशा चढ़ेतीक चढ़ेचा माल्नीम। मेको आन मतुइशो पाप आ पबर्म परमप्रभु यावे कली चढ़ेचा माल्नीम। 26 मिनु गुम्तीक डा इस्राएली नु मेको नु बाक्शो अर्को रागी डा मुर नेल्ल माफ ताइनीम। मारदे हना मेको मुर नेल्लेम मतुइक्थु पाप पशो बाक्नीम।

27 मिनु सुइमी मतुइक्थु पाप पाप्तु हना, मेकोमी आ पाप आ पबर्म बर्स का गाप्शो क्यारश आ पाठी का चढ़ेचा माल्ब। लेवी ४:२७-२८ 28 मिनु चढ़ेबमी मेको मुर आ पशो पाप मतुइक्तीके, परमप्रभु यावे आ डोंइती पाप क्याम्तीक गेय पचा माल्ब। मिनु नोले मेको मुरुम माफ ताइब। 29 मतुइक्थु पाप पाइब इस्राएलीपुकी नु मेको नु बाक्ब अर्को रागी डा मुर नेल्ल आन कली मतुइक्थु पाप पशो आ पबर्म पचा माल्शो गेय खाल का डा बाक्ब।

30 तन्न इस्राएली बाक्त हना यो, अर्को रागी डा मुर बाक्त हना यो, तुइशशा यो, मटिथु पाप पाप्तु हना, मेको परमप्रभु यावे कली पाप पाइब बाक्ब। मेको मुर कली गुम्तीके रे तिल्ला माल्ब। प्रेरित १३:३८; हिब्रू १०:२६-२९ 31 मिनु मेको मुरुमी परमप्रभु यावे आ लोव्र लाक्शा, आ अरेशो काइ मटितीके, मेको मुर तिल्ला पुंडसीशा, आ पाप राइब” देत।

मुरुम नाइक्तीक नाक्त गेय पशो

32 मिनु इस्राएलीपुकी गोरशो रागीम बाक्मानु, मेकोपुकीमी नाइक्तीक नाक्ती मुर का कली शी खुप्शो थित्तेक्म। प्रस्थान २०:८-१० 33 मिनु मुरपुकीमी मेको शी खुप्ब कली मोसा, हारून नु मुर नेल्ल आन डोंइतीमी चाक्तेक्म।

34 मिनु मेको कली मार पाइक्चा माल्बा मतुइक्तीके चोक्शा वोइक्तेक्म। लेवी २४:१२ 35 मिनु परमप्रभु यावेमी मोसा कली “मेको मुर कली साइक्चा माल्ब। गुम्तीक डा मुर नेल्लेमी मेको कली मुर आन बाक्तीके रे गुंडशा, फुल्लु आप्शा साइक्चा माल्नीम” देंत। प्रस्थान ३१:१४-१५; प्रस्थान ३५:२-३ 36 मिनु गुम्तीक डा मुर नेल्लेमी मेको कली मुर आन बाक्तीके रे गुंडशा, फुल्लु आप्शा साइक्तेक्म। परमप्रभु यावेमी मोसा कली दोदेशो पा अरेवा, मोदेशो पा मुरपुकीमी पाम्तेक्म।

परमप्रभु आ शेंतीके मिम्चा कली

37 मिनु लेंशा परमप्रभु यावेमी मोसा कली 38 “गे इस्राएली आन कली ‘गेपुकीमी इन फेक्तीक वा आन सुरमी नीलो श्येले के फेने सेलीन। मोदेशो नेल्ल इन पाला सम्म पचा माल्नीनी। ब्यवस्था २२:१२; मत्ती २३:५; प्रस्थान ३९:१ 39 मारदे मोदेशो पचा माल्नीनी देशा हना, गे मेको फेने तशा, परमप्रभु यावे आ शेंतीके नेल्ल मिम्शा, टिचा कली मोदेशो पचा माल्नीनी। इन थुं डा दला दाक्स मपचा कली नु इन मिक्च कली पाप मपपाइक्चा कली मोदेशो पचा माल्नीनी। 40 गे परमप्रभु यावे आ शेंतीक नेल्ल मिम्शा पचा माल्नीनी। मिनु गे इन परमप्रभु आ डोंइती ग्रांग्रा मदिशो दुम्चा माल्नीनी। 41 गो, परमप्रभु यावे, इन परमप्रभु नड। गो इन परमप्रभु दुम्चा कली इन कली इजीप्त रागी रे गुंडताक्नी। गो परमप्रभु यावे, इन परमप्रभु नड’ देंचा माल्नेवे” देंत।

16

कोराह, दाथान नु अबीराम

1 मिनु लेवी आ तौ कोहाथ, आ चच इचहार, आ युइ कोराह, नु रूबेन आ थर डा एलीआब आ तौ निक्शी दाथान नु अबीराम नु पेलेथ आ तौ ओन सल्ला पाम्तेक्म। प्रस्थान ६:१६,१८,२१; गन्ती २६:७-९; यहूदा १:११ 2 मिनु मेकोपुकीम सहे निक्शी ५० जना इस्राएली ब्रेत्ताक्म। मेकोपुकी गुम्तीकेमी योव्रचा पुंडसीशो ठेयब मुर बाक्तेक्म। मेको आन कली मुर नेल्लेमी तुइश्शो बाक्तेक्म। मेकोपुकीम मोसा कली दोस गेम्तेक्म। गन्ती १२:१-२ 3 मिनु मेकोपुकी बुक्शा, मोसा नु हारून आस कली “गे निक्शीमी थम मरिम्शो पाइतीसी। गुम्तीक डा मुर नेल्ले का का पा, ग्रांग्रा मदिशो बाक्नीम। मिनु परमप्रभु यावे मेको आन दातेमी बाक्ब। गे मारदे इस कली परमप्रभु यावे आ मुर आन क्येडा ठेयब सेल्सीनीसी?” देंतेक्म। 4 मिनु मोसा मेको लोव्र नेंशा, खुम्की पा बाप्त। गन्ती १४:५ 5 मिनु मेकोमी कोराह नु मेको आ मुर नेल्ल आन कली “दीसा सुनी परमप्रभु यावेमी सु मेको आ मुर बाक्बा, सु ग्रांग्रा मदिशो बाक्बा नु सु आ नेक्था जाक्दीत्चा गेबा, मेको तुइक्पाइक्ब। २तिमोथी २:१९ 6 कोराह, गे नु बाक्ब मुर नेल्लेमी थनौरो चाक्शा जाक्कीन। 7 मिनु गे दीसा मेकेर मी कुर पा परमप्रभु यावे आ डोंइती धूप चोने। मिनु परमप्रभु यावेमी सु कली योव्रबा, मेको ग्रांग्रा मदिशो बाक्ब। लेवीपुकी, गे थम मरिम्शो पाइतीनी” देंत। 8 मिनु मोसामी कोराह कली “गे लेवीपुकी नेनीन। 9 इस्राएली आन परमप्रभु यावेमी इन कली आ नेक्था जाक्चा गेशा, आ ताम्बु डा गेय पचा कली मुर आन दाते रे योव्रशो बाक्ब। गे गुम्तीक आ डोंइती राप्शा, मेको मुर आन गेय पचा, आइक्च मिम्नीनी? गन्ती ३:६-१३; गन्ती ४:४-२० 10 मेकोमी गे नु इ लोक्ब, लेवी नेल्ल आन कली आ नेक्था जाक्चा गेप्टु। मार, गेपुकीम चढेब आन गेय यो माल्नीनी? 11 गे नु इ मुर नेल्ले परमप्रभु यावे कली दोस गेशा बुक्तीनी। हारून सु बाक्बा डा? गे मेको कली गन गन पनी?” दे माइक्तीमी।

12 मिनु मोसामी एलीआब आ तौ दाथान नु अबीराम आस कली ब्रेत्थ सोइक्ताक्ब। तन्न मेको निक्शीमी “गो मजाक्नस्कु। 13 गे आंइ कली दूध नु खुदो शुश बाक्शो रागी रे एको गोरशो रागीम साइक्थ चाक्शा यो, मार, इन कली मजाक्दीम्मे? मिनु गे आंइ कली हुकुम यो पचा माल्नीसी? 14 गे आंइ कली दूध नु खुदो शुश बाक्शो रागीम चाक्दीन्नी? रू नु अडगुर रू गेनी? मार, गे एको मुर आन मिक्च फेत्चा दाक्नीनी? गोपुकी थमा पा मजाक्नीकी” देंताक्स। प्रस्थान ३:८

15 मिनु मोसा शुश गाइश्शा, परमप्रभु यावे कली “मेको आन चढेशो मताक्कीन। गो मेको आन गधा का यो मताक्गु। गो मेको आन कली मरिम्शो यो मपड” देंत। 16 मिनु मोसामी कोराह कली “गे नु इ मुरपुकी नु हारून यो दीसा परमप्रभु यावे आ डोंइती जाक्कीन। 17 गे नेल्लेमी आंम आंम थनौरो चाक्शा, मेकेर धूप कुर पने। मिनु गे का का पा आंम थनौरो परमप्रभु यावे आ डोंइती चाक्कीन। गे नु हारूनम यो इस थनौरो चाक्कीस। मेको सहे निक्शी ५० ओटा थनौरो बाक्नीम” देंत। 18 मिनु मेको का का पा आन थनौरोम मी कुर पा धूप वोइक्तेक्म। मिनु मेकोपुकी मोसा नु हारून गुम्तीक ताम्बु आ ओव्रतीकेमी राप्तेक्म। 19 मिनु कोराहमी गुम्तीक डा मुर नेल्ल आन कली मोसा नु हारून आस

पर्वम गन गन पचा, दे गुम्तीक ताम्बु आ ओव्रतीकेमी पुक्तीमी। मेना परमप्रभु यावे आ छेडछेड मेको नेल्ल आन डोंइती गूत। गन्ती १६:१०

20 मिनु परमप्रभु यावेमी मोसा नु हारून आस कली 21 “गे निक्शी मेको मुर आन रे दिलीस। मिनु गो याम कामी एको नेल्ल आन कली रोवल चिवल पोक्नुडमी” देत। उत्पत्ती १९:१४ 22 मिनु मोसा नु हारूनमी खुम्की पा “परमप्रभु मुर नेल्ल आन कली ब्रोंइचा गेब परमप्रभु, मुर कामी पाप पतीके गे मुर नेल्ल नु गाइक्नीनी?” देताक्स। अय्युब १०:१२; अय्युब १२:१०; २सामुएल २४:१७; गन्ती २७:१६

23 मिनु परमप्रभु यावेमी मोसा कली 24 “एको मुर आन कली ‘कोराह, दाथान नु अबीराम आन बाक्तीक रे दिलीन’ दे माइक्मी” देत। 25 मिनु मोसा बोक्शा दाथान नु अबीराम आस बाक्तीक लत। मिनु इस्राएली आन खाल्पापुकी यो लाम्तेक्म। 26 मिनु मेकोम नेल्ल मुर आन कली “मेको मरिम्शो मुर आन ताम्बु रे दिल्ला बाक्कीन। मेको आन के मारेइ मथिने। मो मपाइतीनी हना, मेको आन पापमी पतीके गेपुकी यो साइक्चा पुंइसीनीनी” दे माइक्तीमी। 27 मोपतीके मेकोपुकी कोराह, दाथान नु अबीराम आन ताम्बु रे दिल्लेक्म। मिनु दाथान नु अबीराम आस ताम्बु रे गूशा, मेको आस ताम्बु आ ओव्रतीकेम आस मीश नु आस आलपुकी नु राप्ताक्स। 28 मिनु मोसामी मेको नेल्ल आन कली “परमप्रभु यावेमी आं कली एको गेय पचा कली सोइश्शो बाक्ब, दे गे तुइक्नीनी। एको गेय नेल्ल गो आंमा पशो मनड। 29 मेको मुरपुकी अरु मुरपुकी खोदेशो पा बेक्तेक्म हना, गो परमप्रभु यावे आ सोइश्शो मनड। 30 तन्न परमप्रभु यावेमी नक गेय का पा, रागीम आ शोव्र पाक्शा, दाक्तु हना, एको आन मारेइ मारेइ सुन्दा सेसीन बेक्शो मुर आन बाक्तीके दोक्तेक्म हना, एकोपुकीमी परमप्रभु यावे आ लोव्र लाक्शो बाक्मा बाक्त, दे गेपुकीमी तुइक्नीनी” देत।

31 मिनु मेको लोव्र पने थुमा नोले मेको आन बाक्शो रागी ब्रोल्लत। ब्यवस्था ११:६ 32 मिनु रागीम आ शोव्र पाक्शा, मेको नु मेको आस खिं डा मुर नेल्ल, कोराह आ खिं डा मुर नेल्ले नु मेको आन मारेइ मारेइ नेल्ल दाक्तु। 33 मिनु मेकोपुकी नु आन मारेइ मारेइ सेसीन बेक्शो मुर आन बाक्तीके लाम्तेक्म। मिनु रागीम मेको आन तार आ शोव्र खेप्ताक्व। मिनु मेकोपुकी गुम्तीक डा मुर आन दाते रे जाम्तेक्म। 34 मिनु आन नेक्था बाक्ब इस्राएली नेल्लेमी मेको आन वाइ ब्रेश्शो नेंशा “गोपुकी इ कली यो मुल रागीम दाक्ब” देना देन प्रोक्तेक्म। 35 मिनु परमप्रभु यावे रे मी गूशा, मेको सहे निक्शी ५० जना धूप चोइब आन कली दाक्तु। लेवी १०:१-२; भजन संग्रह १०६:१७-१८ 36 मिनु परमप्रभु यावेमी मोसा कली 37 “चढेब हारून आ तौ एलाजर कली थनौरोपुकी ब्रशो मी रे गुंइचा कली नु मी आ फिलीडगो शुश डोन लाइश्शा फ्रचा कली अरेवो। गन्ती ३:४; प्रस्थान ६:२५ 38 मारदे हना मेको पाप पाइबपुकी बेक्तीके आन थनौरोपुकी ग्रांग्रा मदिशो बाक्नीम। मेको थनौरो तुप्शा, चढेतीके गिल्लीक पाता सेल्चा माल्ब। मारदे हना मेको मुर आन थनौरो परमप्रभु यावे आ डोंइती चढेतीके ग्रांग्रा मदिशो दुम्तेक्म। मिनु मेको इस्राएली आन कली मिम्तीक चिन्ड दुम्चा माल्नीम” देत। 39 मिनु चढेब एलाजरमी मेको बेक्शो मुरपुकीम धूप चोशो तांबा के थनौरो गुप्तु। मिनु मेको कली तुप्शा चढेतीक गिल्चा कली पाता सेल्लु। 40 मेको इस्राएली आन कली मिम्तीके बाक्ब। मार मिम्तीके बाक्ब देशा हना, हारून आ मुर डा लाक्शा, अरु मुरपुकी परमप्रभु यावे आ डोंइती धूप चोचा कली आ नेक्था लने मचाप्नीम। मिनु कोराह नु आ मुरपुकी खोदेशो पा साइक्चा मपुंइसीनीम, दे मिम्पाइक्तीक बाक्ब। मिनु परमप्रभु यावे मोसा रे पा एलाजर कली दोदेशो पा लोव्र पवा, मोदेशो पा पाप्तु। गन्ती ३:१०

41 मिनु आ दीसा सुनी इस्राएली नेल्लेमी मोसा नु हारून आस पर्वम गन गन पा “गे निक्शीमी परमप्रभु यावे आ मुर आन कली साइक्तीसी” देतेक्म। प्रस्थान १७:३ 42 मिनु मुरपुकीम मोसा नु हारून आस कली गन गन पा बुक्शा, गुम्तीक ताम्बु गे कोव्रडमेनु, गोस्सुमी मेको ताम्बु कली सुम्शो ताम्तेक्म। मिनु परमप्रभु यावे आ छेडछेड गूत। 43 मेना मोसा नु हारून गुम्तीक ताम्बु आ डोंइती लाम्ताक्स। 44 मिनु परमप्रभु यावेमी मोसा कली 45 “गे मेको मुर आन दाते रे दिलीस। गो मेको आन कली याम कामी रोवल चिवल पोक्नुडमी” देत। मिनु मेको खुम्की बाप्ताक्से। 46 मिनु मोसामी हारून कली “मेको थनौरो लाइश्शा, मेको चढेतीक डा मी कुर पा धूप चोवो। मिनु रीब पा मेको मुर आन दातेमी लाइश्शा, मेको आन पाप क्याम्तीक गेय पावो। मारदे हना परमप्रभु यावे गाइक्ताक्व। मिनु मुर बेक्तीक रोइ बोक्चा गोप्तु” देत। लेवी १६:१२,१३,१७; गन्ती १:५३ 47 मिनु मोसामी देशो खोदेशो पा हारून थनौरो लाइश्शा मुर आन दातेमी दोरशा लत। मेना मुर आन दातेमी मुर साइक्ब रोइ जाक्ने थुम्शो बाक्त। मिनु मेकोमी धूप चोशा मुर आन पर्वम पाप क्याम्तीक गेय पाप्तु। 48 मिनु हारून बेक्शो नु सेस मुर आन दातेमी राप्त। मिनु मेको मुर बेक्तीक रोइ देक्त। 49 कोराह बेक्तीकेम बेक्शो प्रोंइशा, मेको मुर बेक्तीक रोइम बेक्शो मुर १४ हजार ७ सहे बाक्तेक्म। 50 मिनु मेको मुर बेक्तीक रोइ देक्म नोले हारून मोसा आ बाक्तीक, गुम्तीक ताम्बु आ ओव्रतीकेम लेत्त।

17

हारून आ कोक्के

1 मिनू परमप्रभु यावेमी मोसा कली 2 “गे इस्राएली नेल्ल आन कली ‘गे इन किकी पिपी आन थर थर रे पा का का पा १२ ओटा कोक्के चाक्कीन’ दे माइक्मी। मेको मुर आन नें मेको आन आन कोक्केमी ब्रेक्टो। 3 मिनू हारून आ नें लेवी आ थर डा मुर आन कोक्केम ब्रेक्टो। मारदे हना नेल्ल थर डा ठेयब मुर आन नेंम कोक्के का का दुम्या माल्ब। 4 मिनू गे मेको कोक्के आन कली गुम्तीक ताम्बुमी सल्ला पशो सन्दोस आ डोंइती वोतो। गो मेकेर रे इन कली लोव्र पाइनुड। प्रस्थान २५:२२ 5 मिनू आं योव्रशो मुर आ कोक्केम कोच्चा दाप्ब। मोपा गो इस्राएलीपुकीम इस पशो गन गन नाइक्पाइक्नुडमी” देंत। गन्ती १६:५-७

6 मिनू मोसाम इस्राएली आन कली मेको लोव्र नेंपाइक्तीमी। मिनू मेको आन ठेयब मुर नेल्लेमी मेको कली कोक्के का का चाक्शा, गेम्तेक्म। मिनू मेको आन किकी पिपी आन थर थर पा १२ ओटा कोक्के गेम्तेक्म। मिनू हारून आ कोक्के यो मेको आन कोक्के आन दातेम बाक्त। 7 मिनू मोसामी मेको कोक्के नेल्ल परमप्रभु यावे आ सल्ला पशो सन्दोस बाक्शो ताम्बुमी परमप्रभु यावे आ डोंइती वोइक्तु।

8 मिनू मोसा आ दीसा सल्ला पशो सन्दोस बाक्शो ताम्बुम लत। मिनू लेवी आ थर डा मुर, हारून आ कोक्केम कोच्चा दाप्शा, फू बोइश्शा देसी बदाम सिश्शो मीशो ताप्तु। 9 मिनू नोले मोसामी कोक्के नेल्ल खुप्शा, परमप्रभु यावे आ डोंइती रे लाइश्शा, इस्राएली आन कली गेम्तीमी। मिनू मेकोपुकीमी कोव्रशा, आन आन कोक्के लांइसाक्म।

10 मिनू परमप्रभु यावेमी मोसा कली “मरिश्शो पाइब मुर आन कली मिम्तीके दुम्पाइक्चा कली हारून आ कोक्के लेंशा सल्ला पशो सन्दोस आ डोंइती लाइश्शा वोतो। मिनू मेकोपुकीमी आं पर्बम गन गन पचा मप्रोंइतेक्म हना, बेक्नीम” देंत। हिब्रू ९:४ 11 मिनू मोसामी परमप्रभु यावे आ देंशो खोंदेंशो पा पाप्तु।

12 मिनू इस्राएलीपुकीमी मोसा कली “कोव्रडीन, गोपुकी खतम दुम्शा जाम्शा लाइनीकी। 13 सु परमप्रभु यावे आ ताम्बु आ नेक्था लाइबा, मेको बेक्ब। मार, गो नेल्ल यो बेक्नीकी?” देंतेक्म। भजन संग्रह १३०:३-४

18

लेवी नु चढेब आन गेय

1 मिनू परमप्रभु यावेमी हारून कली “गे इ तौपुकी नु इ आफ आ खिं डा मुरुम परमप्रभु यावे आ बाक्तीक कली मरिश्शो पशो कुरचा माल्नीनी। मिनू गे नु इ तौपुकीमी चढेतीक गेय पाइब आन मरिश्शो पशो कुरचा माल्नीनी। प्रस्थान २८:३८; लेवी १६:३२-३३ 2 मोपतीके गे इ लोक्ब लेवी आ थर डा मुर आन कली यो इ कली वारच पचा कली चाक्मी। गे नु इ तौपुकीम ताम्बु आ डोंइती गेय पना पन बाक्नीनु, मेकोपुकीम इन कली वारच पामेक्ल। गन्ती ३:६-१० 3 मेकोपुकी इ कली वारच पशा, ताम्बु डा गेय पचा माल्नीम। तन्न मेकोपुकीम ताम्बु डा मार मार थिचा मदुम्नीम। मिनू चढेतीक आ नेक्था जाक्चा मदुम्नीम। मो पाम्तेक्म हना, मेकोपुकी नु गे यो बेक्नीनी। 4 मेकोपुकीम इन अरेशो टिशा, गुम्तीक ताम्बु डा मारेइ मारेइ गेय पचा माल्नीम। गे इन डा लाक्शा अरु सुइम मेको गेय पचा मताइनीम। 5 मिनू गे इस्राएली आन दातेमी लेंशा गाइक्तीक गेनायो मजाक्ल, दे परमप्रभु यावे आ बाक्तीक नु चढेतीक डा गेय आंमा पचा माल्नेवे। गन्ती १७:११ 6 मिनू गो मुल इस्राएली आन दाते रे इ लोक्ब लेवी आन कली योव्रनुड। गो मेको इ कली गेनुड। मेकोपुकी गुम्तीक ताम्बु डा गेय पचा कली आं कली जिम्मा गेशो बाक्नीम। गन्ती ३:१२,४५ 7 तन्न गे नु इ तौपुकीम चढेतीक नु फारशो वा आगा डा कोठा डा गेय थम रिश्शो पा पने। चढेतीक गेय इन कली गेतन्नी। अरु सुइ मेकेर जाक्तेक्म हना, मेको साइक्चा पुंइसीनीम” देंत। गन्ती १:५१

चढेब आन भाग

8 मिनू परमप्रभु यावेमी हारून कली “गो आं कली चढेशो इ कली गेतन। इस्राएलीपुकीमी आं कली चढेशो नेल्ल गेतन। मेको इ कली नु इ तौ आन कली चढेतीक गेय पशो डा गेना हना यो इन भाग बाक्ब। लेवी ३:२,१०; लेवी ६:९-११,१९-२२; लेवी ७:६-१० 9 मिनू मी रे पा प्रोंइशा आं कली चढेशो इन कली मार बाक्ब देंशा हना, मेको आं कली नेल्ल क्येडा चोव्रखो चढेशो अन्न चढेशो बाक्त हना यो, पाप आ पर्बम चढेशो बाक्त हना यो नु गारचा आ पर्बम चढेशो नेल्ल इ कली नु इ तौ आन कली बाक्ब। 10 मिनू मेको इन कली नेल्ल क्येडा चोव्रखो जचा थोव्रक बाक्ब। मेको इन दाते डा वोंइश मुर नेल्लेमी जने चाप्नीम। मेको इन कली चोव्रखो बाक्ब। लेवी ६:९; लेवी १०:१२,१४

11 मिनु इस्राएलीपुकीमी क्युकशा चढेतीक चढेम्तेकम हना, मेको तिल्लशो नेल्ल इ कली नु इ तमी तौ आन कली गेना हना यो इन भाग बाक्ब, दे गेतन्नी। इ खिंम ग्रांग्रा मदिशो बाक्शो सुइ सुइमी मेको जने चाप्नीम। 12 मिनु मेकोपुकीमी परमप्रभु यावे कली गेशो नेल्ल क्येडा रिम्शो तेल, नेल्ल क्येडा रिम्शो अडगुर शांबु, अन्न नु रिम्शो मारेइ मारेइ गो इ कली गेतन। 13 मेकोपुकीमी परमप्रभु यावे कली चढेथ चाक्शो आन डोंइती मीशो फल फुल नेल्ल इ केन दुम्ब। इ खिंमी ग्रांग्रा मदिशो बाक्शो मुर नेल्लेमी मेको जने चाप्नीम। प्रस्थान २३:१९; ब्यवस्था १८:३-४ 14 इस्राएलम आं कली चढेशो मारेइ मारेइ इ केन बाक्ब। लेवी २७:२८ 15 मिनु परमप्रभु यावे कली चढेशो, मुर आन डोंइती जरमेशो, बी ब्यफ क्यारश भेडा आन डोंइती जरमेशो नेल्ल इ केन बाक्नीम। मो दुम्त हना यो, गे मुर आ डोंइती जरमेशो कली प्रोंइचा माल्नेवे। ग्रांग्रा दिशो बस्तु भाव आन डोंइती जरमेशो यो प्रोंइचा माल्नेवे। प्रस्थान १३:२; प्रस्थान ३४:१९-२० 16 मेको आन कली प्रोंइतीक क्येट महिना का गाप्शो कली चांदी के ५ शेकेल ताक्चा माल्नेवे। मेको ताम्बु डा शेकेल बाक्चा माल्नीम। मेको ताम्बु डा शेकेल का २० गेराह डा बाक्ब। गेराह का ०.६ ग्राम बाक्ब। ताम्बु डा शेकेल का १२ ग्राम डा क्येट बाक्ब। लेवी २७:६, २७

17 मिनु बी, भेडा क्यारश आन डोंइती जरमेशो आन कली प्रोंइने मचाप्नीम। मेको आं केन बाक्नीम। गे मेको आन हुश चढेतीकेमी बुइक्चा माल्नेवे। मिनु मेको आन बोंसो चोचा माल्नेवे। मेको परमप्रभु यावे कली आ दाक्चा ब्रोवशो रिना पाइशो मीम चोशा चढेतीक बाक्ब। 18 तन्न आन श्ये इ केन बाक्ब। मेको क्युकशा चढेशो कुथु नु ग्युरा फिला खोदेंशो पा इ केन बाक्ब। 19 मिनु इस्राएलीपुकीमी आं कली चढेशो नेल्ल इ कली नु इ तमी तौ आन कली गेना हना यो कली गेतन्नी। मेको इ कली नु इ चच युइ आन कली परमप्रभु यावे आ डोंइती गेना हना यो लीशो हिक्सी आ कबल पशो बाक्ब” देंत। लेवी २:१३; २इतिहास १३:५ 20 मिनु नोले परमप्रभु यावेमी हारून कली “गे मेको रागीम मुर आन दातेमी रू मताइनीनी। गो इस्राएली आन दातेमी इन भाग नु इन शोप नड। गन्ती ३५:-; ब्यवस्था १०:९; ब्यवस्था १२:१२; यहोसु १३:१४, ३३; भजन संग्रह १६:५; भजन संग्रह ७३:२६; इजीकीएल ४४:२८ 21 गो लेवी आ मुर आन कली गुम्तीक ताम्बुमी गेय पचा कली इस्राएली नेल्ल आन १० भाग डा भाग का गेतामी। लेवी २७:३० 22 मुल रे इस्राएलीपुकी गुम्तीक ताम्बु आ नेक्था जाक्ने मचाप्नीम। जाक्तेकम हना, पापम पतीकेमी बेक्नीम। 23 तन्न लेवीपुकीमी गुम्तीक ताम्बु डा गेय पचा माल्नीम। मेकोपुकीमी पाप पाम्तेकम हना, मेको आंमा कुरचा माल्नीम। मेको इन कली गेना हना यो लीब शेंतीके बाक्ब। तन्न मेकोपुकीमी इस्राएली आन दातेमी रू मताइनीम। 24 मारदे हना गो लेवी आन कली इस्राएली आन परमप्रभु यावे कली चढेशो १० भाग डा भाग का गेतामी। मोपतीके गो मेको आन कली ‘गे इस्राएली आन दातेमी रू मताइनीनी’ देंती” देंत।

25 मिनु परमप्रभु यावेमी मोसा कली 26 “गे लेवी आन कली ‘परमप्रभु यावेमी इन कली मुर आन गुइ रे इन भाग दुम्चा कली गेशो, इस्राएली आ १० भाग डा भाग का ताक्नीनु, गेपुकीम मेको रे यो परमप्रभु यावे कली १० भाग डा भाग का तिल्ला, गेचा माल्नीनी। 27 मिनु मेको अन्न नु अडगुर शांबु मुर आन रे चाक्शो भाग खोदेंशो मिम्सीब। 28 मोपा गे इस्राएली आन रे ताक्शो १० भाग डा भाग का नेल्ल रे तिल्ला परमप्रभु यावे कली १० भाग डा भाग का गेचा माल्नीनी। मेको चढेब हारून कली गेचा माल्नीनी। 29 मिनु गे मार मार ताक्नी, मेको नेल्ल रे परमप्रभु यावे आ भाग तिल्ला माल्नीनी’ दे माइक्मी। 30 मिनु गे मेको आन कली ‘गेपुकीमी नेल्ल क्येडा रिम्शो भाग तिल्ली नोले, मेको लीशो इन रू रे रुप्शो अन्न नु इन अडगुर रू डा शांबु खोदेंशो बाक्ब। 31 मिनु गे नु इन खिं डा मुर नेल्ले ते ते जचा दाक्नीनी, मेक मेक जने चाप्नीनी। मारदे हना मेको इन गुम्तीक ताम्बुमी गेय पशो डा गाल्च बाक्ब। मत्ती १०:१० 32 मिनु गे मेको आन नेल्ल क्येडा रिम्शो भाग गेतीके इन कली मारेइ दोस मदुम्ब। तन्न इस्राएलीपुकीम आन परमप्रभु यावे कली गेशो थोव्रक दूली पा मचलेने। मो पाइतीनी हना गे बेक्नीनी’ दे माइक्चा माल्नेवे” दे परमप्रभु यावेमी मोसा कली देंत।

19

चोव्रखेतीक आ पर्वम चढेशो

1 परमप्रभु यावेमी मोसा नु हारून आस कली 2 “गे इस्राएली आन कली ‘परमप्रभु यावेमी ब्रेक्शा अरेशो पचा माल्लो लोव्र का एको बाक्ब। गेपुकी थम रिम्शो मारेइ मदुम्शो गेनायो जवा मलाप्शो लल बी का आंस बाक्तीक चाक्कीन’ देनीस। हिब्रू ९:१३; लेवी २२:२०; ब्यवस्था २१:३ 3 मिनु गे मेको बी कली चढेब एलाजर कली गेसे। मिनु मेकोमी मेको बी कली मुर आन बाक्तीक रे डोन लाइशा, आ डोंइती मेको कली क्योरपाइक्चा माल्ब। 4 मिनु चढेब

एलाजरमी आ ब्रेचोमी आ हुश खुम्शा, गुम्तीक ताम्बु आ डोंइती ७ खेयप ब्रुइक्चा माल्ब। लेवी ४:६, १७ ५ मिनू नोले मेको बी चढेब आ डोंइती चोचा माल्ब। आ कुशुल, आ श्ये, आ हुश नु गोबर सुन्दा चोचा माल्ब। लेवी ७:८; लेवी ४:११-१२ ६ मिनू चढेबमी लेबानोन डा लाइशो रवा आ शी, हिस्सोप के ब्राक्स, लल रड डा ऊन चाक्शा, मेको बी कली जेन्ना जेन्न पशो मीम हुम्चा माल्ब। लेवी १४:६ ७ मेको नोले चढेबमी आ वा मुरशा, चिक्सीचा माल्ब। नोले मेको मुर आन बाक्तीके लेन्ने चाप्व। तन्न मेको चढेब नां मलाक्गा सम्म ग्रांग्रा दिशो बाक्ब। लेवी १६:२८ ८ मिनू नोले मेको बी चोइबमी आ वा मुरशा, चिक्सीचा माल्ब। मेको नां मलाक्गा सम्म ग्रांग्रा दिशो बाक्ब। ९ मिनू ग्रांग्रा मदिशो मुर कामी मेको बी कली चोशो पुलु खुम्शा, मुर आन बाक्तीके रे डोन ग्रांग्रा मदिशो बाक्तीकेम वोइक्चा माल्ब। मेको इस्राएली आन कली चोव्रखेतीक ब्वाक्कु सेल्चा कली बाक्ब। मेको चोव्रखेतीचा कली चढेतीक बाक्ब। १० मिनू मेको बी चोशो पुलु हुइक्बमी यो आ वा मुरचा माल्ब। मिनू नां मलाक्गा सम्म मेको ग्रांग्रा दिशा बाक्ब। मेको इस्राएलीपुकी नु मेकोपुकी नु बाक्ब अर्को रागी डा मुर नेल्ल आन कली पचा माल्शो गेय बाक्ब।

११ मिनू सुमी बेक्शो मुर कली थीबा, मेको ७ नाक्त सम्म ग्रांग्रा दिशोन बाक्ब। १२ मिनू मेकोम मेको सां नाक्तीम ब्वाक्कु चोव्रखेतीचा माल्ब। मिनू ७ नाक्तीम लेंशा चोव्रखेतीचा माल्ब। मिनू मेको ग्रांग्रा मदिशो दुम्ब। तन्न मेकोमी सां नाक्त नु ७ नाक्त मचोव्रखेसाक्व हना, मेको ग्रांग्रा दिशा बाक्ब। १३ मिनू सुमी बेक्शो मुर थिशा, मचोव्रखेतीबा, मेकोमी परमप्रभु यावे आ ताम्बु ग्रांग्रा दिशो सेल्ब। मेको मुर इस्राएली आन दाते रे तिल्चा पुंइसीब। मारदे हना चोव्रखेतीक ब्वाक्कु मेको आ तार मब्रुइशो बाक्ब। मोपतीके मेको ग्रांग्रा दिशो बाक्ब। मिनू मेको आ ग्रांग्रा दितीके मेको नु लीब। लेवी १५:३१

१४ मिनू मुर आ ताम्बुम बेक्त हना, मेको आ पर्वम पचा माल्शो गेय मार बाक्ब देंशा हना, सु मेको ताम्बुम बाक्बा, सु मेको ताम्बुम जाक्बा, मेको ७ नाक्त सम्म ग्रांग्रा दिशो बाक्नीम। १५ मिनू मसुम्शो ग्योब नेल्ल ग्रांग्रा दिशो बाक्नीम। १६ मिनू सुमी लांम तरवारम साइक्चा पुंइसीशो मुर बाक्त हना यो, आंमा बेक्शो मुर बाक्त हना यो, मुर आ रुश बाक्त हना यो, मेको थीब मुर ७ नाक्त सम्म ग्रांग्रा दिशो दुम्ब। १७ मिनू मुरुमी मेको ग्रांग्रा दिशो मुर कली चोव्रखेचा कली चढेतीक पुलु ग्योबुम कुर पा नक ब्वाक्कु लुक्चा माल्ब। १८ मिनू नोले ग्रांग्रा मदिशो मुर कामी हिस्सोप के ब्राक्स मेको चोव्रखेतीक ब्वाक्कुम नुप्शा, मेको बेक्शो मुर आ ताम्बु, मेकेर बाक्शो मारेइ मारेइ, मेक बाक्ब मुर आन कली, रुश थीब मुर आन कली, साइक्चा पुंइसीशो मुर थीब, बेक्शो मुर नु तुरस थीब मुर आन कली मेको ब्वाक्कु ब्रुइक्चा माल्ब। १९ मिनू ग्रांग्रा मदिशो मुरुमी सां नाक्तीम नु ७ नाक्तीम ग्रांग्रा दिशो मुर आन कली मेको चोव्रखेतीक ब्वाक्कु ब्रुइक्चा माल्ब। मिनू ७ नाक्तीम मेको आन कली चोव्रखेतीके नुप्व। मिनू नोले मेकोपुकीम आन वा मुरशा, आन रां चिक्सीचा माल्नीम। मिनू मेकोपुकी नां लाक्गा नोले ग्रांग्रा मदिशो दुम्नीम। गन्ती १९:१२-१३ २० मिनू सु ग्रांग्रा दिशो दुम्शा यो, मचोव्रखेतीबा, मेकोमी परमप्रभु यावे आ ताम्बु ग्रांग्रा दिशो सेल्ब। मेको मुर इस्राएली आन दाते रे तिल्चा पुंइसीब। मारदे हना चोव्रखेतीक ब्वाक्कुम मेको कली मब्रुइशो बाक्ब। मोपतीके मेको ग्रांग्रा दिशोन बाक्ब। २१ मिनू मेको, मेको कली गेना हना यो आ पतीक दुम्ब। मिनू मेको ब्वाक्कु ब्रुइक्ब मुरुम आ वा मुरचा माल्ब। मिनू सुमी चोव्रखेतीक ब्वाक्कु थीबा, मेको नां मलाक्गा सम्म ग्रांग्रा दिशो दुम्शो बाक्ब। २२ ग्रांग्रा दिशो दुम्शो मुरुमी मार थिवा, मेको नेल्ल ग्रांग्रा दिशो दुम्नीम। मिनू सुमी मेको ग्रांग्रा दिशो थोव्रक थीबा, मेको यो नां मलाक्गा सम्म ग्रांग्रा दिशो दुम्ब” देंत।

20

सेरथे फुल्लु रे ब्वाक्कु बुक्शो

१ मिनू डोंइती डा महिनाम इस्राएली नेल्ले जीन डा गोरशो रागीम जाक्तेक्म। मिनू कादेशमी बाक्तीक सेल्शा बाक्तेक्म। मिनू मिरयाम मेक उइ बेक्त। मिनू मेक उइ थिम्तेक्म। गन्ती १३:२१; गन्ती १२:१५

२ मिनू मेकेर मुर आन कली ब्वाक्कु मबा। मिनू मुरपुकी मोसा नु हारून आस पर्वम मरिम्शो पा बुक्तेक्म। प्रस्थान १७:१-७ ३ मिनू मेकोपुकीमी मोसा कली जिचा तोशा मेको कली “गो आंइ लोक्बपुकी परमप्रभु यावे आ डोंइती बेक्मानु, गोपुकी यो बेक्शो नकी हना, रिम्शो दुम वा। ४ गे मारदे परमप्रभु यावे आ मुर, आंइ कली एको गोरशो रागीम चाक्नी? मुल गोपुकी नु आंइ बी ब्यफ, क्यारश भेडा नेल्ल एक बेक्ब दुम्तक। ५ गे मारदे आंइ कली इजीप्त रे एको मरिम्शो रागीम चाक्नी। एको रागीम अन्न, फोव्रशी, अडगुर नु अनार मारेइ मथिंसीब। एकोक्के तूचा कली ब्वाक्कु यो मबा” देंतेक्म। ६ मिनू नोले मोसा नु हारून मुर आन बाक्तीक रे लशा, गुम्तीक ताम्बु आ ओव्रतीकेमी खुम्की

पा बाप्ताक्स। मिनु परमप्रभु यावे आ छेडछेड मेको आस डोंइती गूत। 7 मिनु परमप्रभु यावेमी मोसा कली 8 “एको कोक्के लतो। मिनु गे नु इ लोक्ब हारून लशा, मुर आन कली पुक्कीस। मिनु मेको आन डोंइतीन एको फुल्लु कली हुकुम पावो। मिनु फुल्लु रे ब्वाक्कु यीब। मिनु गे मुर आन डोंइती एको सेरथे फुल्लु कली ‘ब्वाक्कु बुक्को’ दे मतो। मोपा गे मुर आन कली मेको सेरथे फुल्लु रे ब्वाक्कु यिपाइक्नेवे। गे मोपा मुर नु मेको आन बी ब्यफ क्यारश भेडा आन कली तूचा गेनेवे” दंत।

9 मिनु मोसामी मेको कोक्के परमप्रभु यावेम देशो खोदेशो पा ताक्तु। गन्ती १७:२५ 10 मिनु मोसा नु हारूनमी मुर नेल्ल आन कली सेरथे फुल्लु आ डोंइती पुक्ताक्स। मिनु मोसाम मेको आन कली “गे गन गन पाइबपुकी नेनीन। मार, गो एको सेरथे फुल्लु रे इन कली ब्वाक्कु बुक्पाइशशा गेन्नी?” दे माइक्तीमी। भजन संग्रह १०६:३२-३३ 11 मिनु मोसामी आ गुइ क्युक्शा आ कोक्केमी निक्शी खेयप मेको सेरथे फुल्लु कली तुप्तु। मिनु मेकेर शुश ब्वाक्कु बुक्शा गूत। मिनु मुरपुकी नु आन बी ब्यफ, क्यारश भेडामी तूतेक्म।

12 तन्न परमप्रभु यावेमी मोसा नु हारून आस कली “गे आं कली थमा मसुइक्तीके नु आं ठेयब सक्ति इस्राएली आन डोंइती मकोइतीके, गे एको मुर आन कली गो इन कली गेशो रागीम चाक्दीत्चा मताइनीसी” दंत। गन्ती २७:१४; ब्यवस्था १:३७; ब्यवस्था ४:२१; ब्यवस्था ५०:५१ 13 मोपतीके मेको ब्वाक्कु कली मेरीबा डा ब्वाक्कु देंसीब। मेकेर इस्राएलीपुकीमी परमप्रभु यावे कली जिचा तोम्तेक्म। मिनु मेकोमी आ सक्ति कोंइताक्व। भजन संग्रह ८१:८

इस्राएली आन कली लचा मगेशो

14 मिनु मोसामी कादेश रे एदोम डा पिप कली “इन लोक्ब इस्राएलमी इन कली ‘गो आंइ कली दुम्शो श्येत गे तुइक्नीनी। उत्पत्ती ३६:१,३१; ब्यवस्था २:१-८; ब्यवस्था २३:८ 15 आंइ किकी पिपी इजीप्त लशा, मेकेर शुश बाक्शो बाक्तेक्म। मिनु इजीप्तीपुकीमी आंइ किकी पिपी नु आंइ कली दिप्शा, मरिम्शो पाम्तेक्म। 16 मिनु गोपुकीमी परमप्रभु यावे कली पुंइतक। मिनु मेकोमी आंइ पुंइशो नेशा, आ स्वर्ग डा गेय पाइब का सोइशशा, गो आंइ कली इजीप्त रे गूंइशा एक चाक्तु। मुल गो इन रागी डा सांद कादेश देशो सहरम बाक्शो बाक्नीकी। प्रस्थान २३:२० 17 मिनु गो आंइ रागी रे पा लचा गेने। गोपुकी रू नु अडगुर रू रे पा मलाइनीकी। गोपुकीम इन तेकोइ इनार डा ब्वाक्कु मतूनीकी। गो पिप आ ठेयब लां रे पा लाइनीकी। इन रागी मलाक्का सम्म गो ग्युरा पेरा मपाइनीकी’ देशो बाक्ब, देनीन” दे मुर सोइक्ताक्मी। गन्ती २१:२२; ब्यवस्था २:१-८; न्यायाधीस ११:१७

18 तन्न एदोममी मेको कली “गेपुकी एको रागी रे पा लचा मताइनीनी। मो पाइतीनी हना, गोपुकीमी गेपुकी इन कली लडाइ तोइनीकी” दंत। 19 मिनु इस्राएलीपुकीमी मेको कली “गोपुकी ठेयब लां रे पा लाइनीकी। मिनु गो नु आंइ बी ब्यफ क्यारश भेडामी इन ब्वाक्कु तूतक हना, मेको डा क्येट थाप्नीकी। आंइ कली इन रागी रे पा ला लचा गेने” देंतेक्म। 20 तन्न मेकोपुकीमी “गेपुकी लचा मताइनीनी” देंतेक्म। मिनु एदोममी मेको आन कली लडाइ तोचा कली शुश या कुरशा, ठेयब हुल लडाइ पाइब चाक्शा जाक्त। 21 मोपा एदोममी इस्राएली आन कली आ रागी रे पा लचा मगेमी। मोपतीके इस्राएलीपुकी मेकेर रे लेत्तेक्म।

हारून बेक्शो

22 मिनु इस्राएली कादेश रे गाक्शा, होर डांडामी जाक्तेक्म। 23 मिनु नोले परमप्रभु यावेमी एदोम रागी डा सांद डा होर डांडामी मोसा नु हारून आस कली 24 “हारून आ किकी पिपी नु बाक्थ लाइब। गे निम्फा मेरीबा डा ब्वाक्कुम आं देशो मटितीके, गोम इस्राएली आन कली गेशो रागीम हारून ओत्रचा मताइब। 25 हारून नु मेको आ तौ एलाजर आस कली होर डांडा लाइशशा लावो। 26 मिनु हारून आ वा पुइशशा, मेको आ तौ एलाजर कली फेक्तो। मेको नोले हारून आ किकी पिपी नु बाक्थ लचा कली बेक्ब” दंत। प्रस्थान २९:४-७ 27 मिनु मोसामी परमप्रभु यावे आ देशो खोदेशो पा पाप्तु। मिनु मुर नेल्ल आन डोंइती रे मेकोपुकी होर डांडा लाम्तेक्म। 28 मिनु मोसामी हारून आ वा पुइशशा, आ तौ एलाजर कली फेक्ताक्व। मिनु हारून मेको डांडा तार बेक्व। मिनु मोसा नु एलाजर मेको डांडा रे ब्रुप्ताक्स। गन्ती ३३:३८-३९; ब्यवस्था १०:६ 29 मिनु इस्राएली नेल्लेमी हारून बेक्शो तुइशशा, ३० नाक्त सम्म रोंका पाम्तेक्म। ब्यवस्था ३४:८

1 मिनू नेगेबम बाक्ब कनानी आराद डा पिपम इस्राएली अथारीम डा लां रे पा पिना पिन बाक्नीम, देशो लोव नेंतु। मिनू मेकोमी इस्राएली नु लडाइ पा, इस्राएली का निक्शी आन कली ग्याइक्ताक्व। गन्ती १४:४४,४५; न्यायाधीस १:११-१५ 2 मिनू इस्राएलीपुकीमी परमप्रभु यावे कली “गे एको मुर आन कली थमा पा आंइ गुइमी गेतीनी हना, गोपुकीमी मेको आन सहर नेल्ल रोवल चिवल पोक्नीकी” दे कसम जाम्तेक्म। ब्यवस्था १३:१६; ब्यवस्था २०:१४,१६,१७; यहोसु ६:१७; न्यायाधीस १:१७; १सामुएल १५:३ 3 मिनू परमप्रभु यावेमी इस्राएली आन पुंइशो लोव नेंशा, मेको कनानी आन कली मेको आन गुइमी गेपु। मिनू इस्राएलीपुकीम मेकोपुकी नु मेको आन सहर नेल्ल खतम पोक्तेक्म। मोपतीके मेको रागी आ नें होरमा वोइक्तेक्म। होरमा हिब्रू लोवमी खतम दुम्तीके देंसीब। गन्ती १४:१४,४५; ब्यवस्था १:४४

कांसा के बुस्स

4 मिनू मेकोपुकी एदोम रागी कली हेरशा लचा, दे होर डांडा रे लल समुन्द्र गे लाम्तेक्म। तन्न मुरपुकी शुश गाक्चा माल्तीके दाम्तेक्म। गन्ती ११:४-६ 5 मिनू मेकोपुकीम परमप्रभु नु मोसा आस पर्वम गन गन पा “मारदे गे आंइ कली एको गोरशो रागीम बेक्पाइक्चा कली इजीप्त रागी रे गुंइशा एक चाक्सी? एकेर जचा थोवक मबा। ब्वाक्कु यो मबा। गो एको मब्रोवशो जचा थोवक क्येडा ब्रीताक्क” देंतेक्म।

6 मिनू नोले परमप्रभु यावेमी बीस पाइशो बुस्स मेको मुर आन दातेमी सोइक्ताक्व। मिनू बुस्सपुकीमी मुर आन कली कोक्तेक्म। मिनू शुश इस्राएली बेक्तेक्म। १कोरिन्थी १०:९ 7 मिनू मुरपुकी मोसा आ बाक्तीक जाक्शा “गोपुकीम परमप्रभु यावे नु इन पर्वम मरिम्शो लोव पा पाप पाइतक। मेको बुस्सपुकी खेरचा, दे परमप्रभु यावे कली आंइ पर्वम पुनीन” देंतेक्म। मिनू मोसामी मेको मुर आन पर्वम पुंइतु। प्रस्थान ३२:३०-३४

8 मिनू परमप्रभु यावेमी मोसा कली “गे मेको बीस पाइशो बुस्स खोदेशो पा बुस्स का सेल्शा, खांबा काम क्युक्को। मिनू सु बुस्सुम कोक्शो बाक्मे, मेकोमी मेको बुस्स कोवशा, ब्रॉइब” देंत। २राजा १८:४; यूहन्ना ३:१४ 9 मिनू मोसाम कांसा के बुस्स का सेल्लु। मिनू मेको कली खांबा काम क्युक्कु। मिनू सु सु बुस्सुमी कोक्शो बाक्मा, मेकोपुकीम कांसा के बुस्स कोवडमेनु, ब्रॉइतेक्म।

इस्राएलीपुकी मोआब रागी लशो

10 मिनू इस्राएलीपुकी गाक्शा, ओबोथम बाक्तीक सेल्लेक्म। 11 मिनू ओबोथ रे गाक्शा, मोआब आ पूर्व गे डा सांद इये-अबारीम डा गोरशो रागीम बाक्तीक सेल्लेक्म। 12 मिनू मेकोपुकी मेकेर रे गाक्शा, जेरेद डा बेसीम बाक्तीक सेल्लेक्म। 13 मिनू मेकोपुकी मेकेर रे गाक्शा, एमोरी आन सांदम गूतीक गोरशो रागीम बाक्शो अरनोन खोला आ आइक्ची हांबुम आन बाक्तीक सेल्लेक्म। मेको अरनोन खोला मोआब आ सांद बाक्ब। मेको एमोरी नु मोआबी आन दातेम बाक्ब। 14 मोपतीके परमप्रभु यावे आ लडाइ डा किताबमी दोपा ब्रेक्शो बाक्ब देशा हना “वाहेब सहर सुफाह नु अरनोन खोला आ दिंम, यहोसु १०:१३; २सामुएल १:१८ 15 नु आर माइशो बाक्तीके सम्म लाइब लुक्च लतीक लां। मेको मोआब आ सांद सम्म लशो बाक्ब” देशो बाक्ब।

16 मिनू मेकेर रे मेकोपुकी बेयर लाम्तेक्म। मिनू परमप्रभु यावेमी मोसा कली “मुर आन कली पुक्मी। मिनू गो ब्वाक्कु गेनुडमी” देशो कुवा मेकेर बाक्ब। 17 मिनू नोले इस्राएलीपुकीम एको कुम्सो पाम्तेक्म। “कुवा, ब्वाक्कु बुक्शा गूडो। मिनू मेको आ पर्वम कुम्सो पावो। 18 मेको कुवा मेको ठेयब मुरपुकीम दोशो बाक्तेक्म। मिनू मुरपुकीमी मेको कुवा पिप आ सुन के कोक्केम दोशो बाक्तेक्म” दे कुम्सो पाम्तेक्म। मिनू मेकोपुकी गोरशो रागी रे गूशा मत्ताना लाम्तेक्म। 19 मिनू नोले मत्ताना रे नाहालीएल, नाहालीएल रे बामोथ सम्म 20 बामोथ रे मोआब डा दिंम बाक्शो बेसी सम्म, गोरशो रागी रे तांइसीतीक इर पिस्गा डांडा सम्म लाम्तेक्म।

सीहोन नु ओग बुशो

21 मिनू नोले इस्राएलीपुकीमी एमोरी आन पिप सीहोन आ बाक्तीकेम मुर आन कली सोइशशा ब्यवस्था २:२६-३७ 22 “गो आंइ कली इन रागी रे पा लचा गेने। गो रू नु अडगुर रू रे पा मलाइनीकी। गोपुकीम इन तेकोइ कुवा डा ब्वाक्कु मतूनीकी। इन रागी मलाक्का सम्म गो पिप आ ठेयब लां रे पा लाइनीकी” देंपाइक्तेक्म। 23 तन्न सीहोनमी इस्राएली आन कली आ रागी लाक्शा लचा मगेवो। मेकोम आ लडाइ पाइबपुकी खुप्शा, गोरशो रागीम इस्राएली आन कली लडाइ तोपु। मेकोमी याहास सम्म जाक्शा, इस्राएली नु लडाइ पापु। 24 मिनू इस्राएलीपुकीम मेको कली तरवारम क्योरशा साइक्तेक्म। मिनू अरनोन खोला रे यब्बोक खोला सम्म मेको आ रागी आन के सेल्लेक्म। मिनू अम्मोनी

आन सांद सम्म मेकोपुकीम आन रागी सेल्लेक्म। मारदे हना, अम्मोनी आन सांद बोल्यो बाक्त। 25 इस्राएलीपुकीम मेको सहर नेल्ल आन के सेल्लेक्म। मिनु मेकोपुकीम एमोरी आन सहर नेल्ल नु हेशबोन नु मेको आ एर ओंथ डा गाउं नेल्लेम बाक्तेक्म। 26 हेशबोन सहर एमोरी आन पिप सीहोन आ सहर बाक्त। पिप सीहोनमी मोआबी आन डोंइती डा पिप नु लडाइ पा मेको आ रागी अरनोन खोला सम्म आ के सेल्लो बाक्त। 27 मोपतीके कुम्सो पाइबपुकीम “गेपुकी हेशबोन सहरम जाक्कीन। मिनु मेको लेंशा सेल्लसीन। सीहोन आ सहर लेंशा सेलीन। 28 हेशबोन रे मी गूत। सीहोन आ सहर रे ब्रशो मी गूत। मिनु मेको मीम मोआब डा आर सहर नु अरनोन डा डांडा दाक्तु। 29 आबी आबी, मोआब, केमोश आ मुरपुकी बेक्तेक्म। एमोरी आन पिप सीहोनमी मेको आ तौ आन कली प्रोक्ब सेल्लतीमी। आ तमी आन कली ग्याइक्चा पुंडसीब सेल्लतीमी। न्यायाधीस ११:३४; १राजा ११:१७

30 मोपा मेको आन थेरशो रू हेशबोन रे दीबोन सम्म खतम दुम्त। मिनु मेदेबा मीम नेक्चा क्येडा डोंइती गो मेको खतम पोक्तका” दे कुम्सो पाम्तेक्म। 31 मोपा इस्राएलीपुकी एमोरी आन रागीम आन खिं सेल्लेक्म। 32 मिनु मोसामी याजेर रागी कली क्यारी पथ मुर सोइक्ताक्व। मिनु मेकोपुकीमी मेको आन एर ओंथ डा गाउं आन के सेल्लेक्म। मेकेर डा एमोरी आन कली खेरतेक्म।

33 मेको नोले मेकोपुकी हिरशा बाशान डा लां रे पा डोइशशा लाम्तेक्म। मिनु बाशान डा पिप ओग नु आ मुरपुकी इस्राएली नु लडाइ पचा कली गूशा एद्रेइमी जाक्तेक्म। ब्यवस्था ३:१-११

34 मिनु परमप्रभु यावेमी मोसा कली “मेको नु महिनो। मारदे हना गो मेको कली आ मुर नेल्ल नु मेको आ रागी यो यो इ कली गेतन। गे हेशबोन डा एमोरी आन पिप सीहोन कली पाइशो खोदेशो पा मेको कली यो पतो” दे माइक्तु। भजन संग्रह १३६:१७-२२

35 मोपतीके मेको कली, मेको आ तौपुकी नु मेको आ मुर नेल्ल आन कली का यो मप्रोंइथु साइशशा, मेको आन रागी आन के सेल्लेक्म।

22

बालाक नु बालाम

1 मिनु इस्राएलीपुकी गाक्शा, यरीको यर्दन खोला आ आइक्ची हांबुम बाक्शो मोआब डा दिंममी बाक्तीक सेल्लेक्म। 2 मिनु सिप्पोर आ तौ बालाकमी इस्राएलीपुकीम एमोरी आन कली मार पाइशो बाक्मा, मेको नेल्ल तुइशो बाक्त। 3 मिनु मोआब डा मुर इस्राएली आन कली तशा साप्पा हितेक्म। मारदे हना मेको शुश बाक्तेक्म। मोपतीके मेको आन थुं ग्येत्थ लुक्च दुम्त। 4 मिनु मोआबीपुकीमी मिदयान डा खाल्पा आन कली “दोपा ब्यफोम घांस बाक्तीक दिंम चाइशशा घांस नेल्ल ब्वाइबा, मोपा एको हुलपुकीमी इ कली एर ओंथ नेल्ल रे ब्वाइनीम” देतेक्म। मेना सिप्पोर आ तौ बालाक मोआब डा पिप बाक्त। 5 मेकोमी आमाव रागी युफ्रेटीस माइशो ठेयब खोला आ नेक्था, पथोर सहरम बाक्शो बेओर आ तौ बालाम कली मुरपुकी ब्रथ सोइक्ताक्व। मेकोपुकीमी “इजीप्त रे जाक्शो मुरुम रागी नेल्ल ब्रीतेक्म। मेकोपुकी आं नेक्था जाक्शा बाक्शो बाक्नीम। गन्ती ३१:८; यहोसु २४:९; मीका ६:५ 6 मुल गे जाक्को। आं कली वारच पा, मेको मुर आन कली सराप चीले पाइक्मी। मारदे हना मेकोपुकी आं क्येडा शुश नु बोल्यो बाक्नीम। मो पाइतीनी हना, गो मेको आन कली ग्राशा, आं रागी रे गूंदेने चबु वा। मारदे हना गे सु कली आसीक गेनीनी, मेको आसीक राइनीम। मिनु सु कली सराप चीले पाइनीनी, मेको सराप चीले राइनीम, दे गो तुइक्नुड” दे सोइक्ताक्व। २पत्रुस २:१५

7 मिनु मोआब नु मिदयान डा खाल्पापुकीम मेको गेय पचा कली क्येट कुरशा, बालाम आ बाक्तीक जाक्शा, बालाक आ लोव्र शोव्रतेक्म। 8 मिनु बालाममी मेको आन कली “मुलाक्दो एकेन बाक्कीन। मिनु परमप्रभु यावेमी आं कली मार देंबा, गो मेकोन इन कली देंनुड” देंत। मोपतीके मेको मोआब डा ठेयब गेय पाइब मुरपुकी मेको नाक्दो बालाम आ खिं उइ बाक्तेक्म। 9 मिनु परमप्रभु बालाम आ बाक्तीक जाक्शा, मेको कली “गे नु बाक्ब मुरपुकी सु नमी?” देंत। 10 मिनु बालाममी परमप्रभु कली “मोआब डा पिप, सिप्पोर आ तौ बालाकमी आं कली 11 “इजीप्त रे गूशा जाक्शो मुरपुकीम रागी नेल्ल ब्रीशो बाक्नीम। मुल जाक्शा आं कली वारच पा मेको आन कली सराप चीले पाइक्मी। मो दुम्त हना, गो मेको आन कली लडाइ पा ग्राशा, खेरने चाप्नुड डा कों?” दे लोव्र कुर पा सोइशो मुर बाक्ब” देंत। 12 मिनु परमप्रभुमी बालाम कली “गे एकोपुकी नु मलावो। गे मेको मुर आन कली सराप चीले मपाइक्मी। मारदे हना मेकोपुकी आसीक रशो बाक्नीम” देंत। 13 मिनु बालाम सुनी कना बोक्शा, मेको बालाक आ सोइशो मुर आन कली “गेपुकी इन रागी लने। मारदे हना, परमप्रभु यावेमी आं कली गेपुकी नु लचा मगेयी” दे माइक्तीमी।

14 मिनू मोआब डा ठेयब मुरपुकी बालाक आ बाक्तीक जाक्शा “बालाम गोपुकी नु जाक्ने मबिस्से” दैतेक्म। 15 मिनू बालाकमी लेंशा, मेको आन क्येडा ठेयब नु शुश मुरपुकी सोइक्ताकमी। 16 मिनू मेकोपुकी बालाम आ बाक्तीक जाक्दीशशा “सिप्पोर आ तौ बालाकमी इन कली ‘आं बाक्तीक जाक्चा मारेइम मतेक्गल। 17 गो थमा पा इ कली मान पशा, ठेयब सेल्लुड। गे मार देंनीनी, गो मेकोन पाइनुड। मिनू जाक्शा, मेको मुर आन कली सराप चीले पाइक्मी’ दैत” दैतेक्म। 18 तन्न बालाममी बालाक आ गेय पाइब मुर आन कली “बालाकमी सुन नु चांदीम ब्रीशो आ दरवार गेती हना यो, गो परमप्रभु यावे, आं परमप्रभु आ लोव्र आइक्च बाक्त हना यो, ठेयब बाक्त हना यो, मेको लोव्र लाक्ने मचाप्नुड। १राजा १३:८ 19 मिनू अरु आन खोदेशो पा गेपुकी यो, मुलाक्दो एक उइ बाक्कीन। मिनू परमप्रभु यावेमी आं कली लेंशा मार मार देंबा गो तुइक्नुड” दैत। 20 मिनू मेको नाक्दो परमप्रभु बालाम आ बाक्तीक जाक्शा, मेको कली “एको मुरपुकी इ कली ब्रेत्थ जाक्शो बाक्तेक्म हना, बोक्को, मिनू मेकोपुकी नु लावो। तन्न गो इ कली मार देंडा, मेको ला पावो” दैत। 21 मिनू बालाम सुनी कना बोक्शा, आ गधा छादेशा मोआब डा ठेयब मुरपुकी नु लत।

बालाम आ गधा

22 मिनू मेको मोपा लतीके परमप्रभु गाइक्ताक्व। मिनू परमप्रभु यावे आ स्वर्ग डा गेय पाइब कामी मेको कली तेक्चा, दे लांम राप्शा बाक्त। मिनू बालाम आ गधाम डोइशशा लना लन बाक्त। मेको आ गेय पाइब निक्शी यो मेको नु गाक्शो बाक्ताक्स। उत्पत्ती १६:७ 23 मिनू मेको गधामी परमप्रभु यावे आ स्वर्ग डा गेय पाइब शोइशशो तरवार शेशा, लांम बाक्शो ताप्नु। मिनू मेको गधा हिंशा, लां रे रूम लत। मिनू बालाम गधा कली लां गे सोइक्चा कली तुप्नु। यहोसु ५:१३

24 मिनू परमप्रभु यावे आ स्वर्ग डा गेय पाइब आइक्च लांम राप्शा बाक्त। मेको लां निम्फा पटटी गारो प्रोव्रशो अडगुर रू आस दातेमी बाक्त। 25 मिनू मेको गधामी परमप्रभु यावे आ स्वर्ग डा गेय पाइब कली तशा, गारो गे ढेंसेसीशा गाक्त। मिनू बालाम आ खोइली मेको गारोम खोरताक्व। मिनू मेकोमी मेको कली लेंशा तुप्नु। 26 मिनू लेंशा परमप्रभु यावे आ स्वर्ग डा गेय पाइब इक्का ग्येत्थ लशा, ग्युरा पेरा तेइ रे मलाक्चा डा पा आइक्च लांमी राप्त। 27 मिनू बालाम आ गधाम परमप्रभु यावे आ स्वर्ग डा गेय पाइब कली तशा, गु ब्रेशा बाक्त। मिनू बालाम थाम्पा गाइशशा, आ गधा कली कोक्केमी तुबा बाक्त। 28 मिनू नोले परमप्रभु यावेमी मेको गधा कली ब्वाक्ब सेल्लु। मिनू मेकोमी बालाम कली “गो इन कली मार पडा? मारदे गे आं कली सां खेयप तुप्पीनी?” दैत। २ पत्रुस २:१६ 29 मिनू बालाममी मेको गधा कली “गे आं कली शाक्ती। गो आं गुइम तरवार बाक्शो हना, गो इ कली मुलन साइक्न वा” दे माइक्तु। 30 तन्न गधाम बालाम कली “गो डोंइती रे मुल सम्म इन डोइशशो गधा मनडा डा? गो डोंइती इन कली गेनायो ओदेशो मपड” दैत। मिनू मेकोमी “मपवी” दैत।

31 मिनू परमप्रभु यावेमी बालाम कली मिक्च ताइब सेल्लु। मिनू मेकोमी तरवार शोइशशो परमप्रभु यावे आ स्वर्ग डा गेय पाइब का लांम राप्शो ताप्नु। मिनू बालाम खुम्की पा बाप्त। 32 मिनू मेको परमप्रभु यावे आ स्वर्ग डा गेय पाइबमी मेको कली “मारदे इ गधा कली खेयप सां तुबी? कोव्रडो, गो इ लां तेक्चा कली जाक्शो बाक्नुड। मारदे हना गे आं डोंइती इ दला दाक्स पाप्तीवी। 33 इ गधामी आं कली तशा, खेयप सां सम्म आं बाक्तीक रे प्रोक्त। मेकोम आं कली तशा, मप्रोक्शो हना, गो इ कली मुल साइक्ने थुमु वा। तन्न मेको कली चहिं सेसीन सोइक्तु वा” दे माइक्तु। 34 मिनू बालाममी परमप्रभु यावे आ स्वर्ग डा गेय पाइब कली “गो पाप पाता। आं लां तेक्शा इन राप्शो गो मतुइक्तु। मिनू इन डोंइती एको मरिश्शो बाक्त हना, गो लेशशा लाइनुड” दैत। 35 मिनू परमप्रभु यावे आ स्वर्ग डा गेय पाइबमी बालाम कली “एको मुरपुकी नु लावो। तन्न गो इ कली मार लोव्र पाइनुडा, गे मेको ला देनो” दे माइक्तु। मोपतीके बालाम बालाक आ सोइशशो ठेयब मुरपुकी नु लत।

36 मिनू बालाकमी बालाम जाक्शो नेंशा, मेकोमी आ रागी आ सुर अरनोन खोला डा सांद डा सहर इर-मोआब सम्म मेको कली गुम्थ लत। 37 मिनू बालाकमी बालाम कली “गो इन कली ब्रेत्थ मुर सोइक्ताक्डमी। तन्न गे मारदे आं बाक्तीक मजाक्नी? गो इ कली मान पने मचाप्नुडा डा?” दैत। 38 मिनू बालाममी बालाक कली “मुल गो इन बाक्तीके जाक्ती। मार देंचा माल्लुडा, दे मतुइक्नुड। परमप्रभुम मार देंबा, गो मेको ला देनो चाप्नुड” दैत। 39 मिनू बालाम बालाक नु लत। मिनू मेको नेल्ल किरयथ-हुसोथमी जाक्तेक्म। 40 मिनू बालाकमी ब्यफ नु क्यारश भेडा क्योरशा च्छेशा, बालाम नु मेको नु बाक्ब ठेयब मुर आन कली यो थुल्लतीमी।

41 आ दीसा सुनी बालाकमी बालाम कली लाइशशा, बामोथ-बालमी डोइशशा लत। मिनू मेकेर रे बालाममी इक्का मुर आन कली ताप्नु। यहोसु १३:१७

23

बालाममी आसीक गेशो

1 मिनू बालाममी बालाक कली “आं कली ७ ओटा चढ़ेतीक सेलीन। मिनू ७ ओटा ब्यफ नु ७ ओटा सांड ठीक सेलीन” देंत। 2 मिनू बालाकमी बालाममी देंशो खोदेंशो पाप्तु। मिनू बालाक नु बालाममी ब्यफ का नु सांड का चढ़ेतीक का काम चढ़ेताकसे।

3 मिनू नोले बालाममी बालाक कली “गे इन चोशा चढ़ेतीके आ नेक्था राप्शा बाक्कीन। गो चहिं एर गे लाइनुड। परमप्रभु यावे आं कली गुम्थ जाक्बा, कों। मिनू मेकोमी आं कली मार कोइबा, मेको इन कली देंनुड” देंत। मिनू मेको गोरशो डांडा डोंइसाक्व।

4 मिनू परमप्रभुमी बालाम कली गुमानु, बालाममी मेको कली “गो ७ ओटा चढ़ेतीके सेल्पाइश्शा, मेकेर ब्यफ का का नु सांड का का चढ़ेता” देंत। 5 मिनू परमप्रभु यावेमी बालाम कली लोत्र पशा “गे बालाक आ बाक्तीके लेतो। इ कली देंशो लोत्र मेको कली मतो” देंत। 6 मिनू मेको बालाक आ बाक्तीके लेशशा जाक्त। मेना बालाक नु मोआब डा ठेयब मुरपुकी चोशा चढ़ेतीके आ नेक्था राप्शा बाक्तेक्म। 7 मिनू बालाममी परमप्रभु आ देंशो लोत्र पा बालाकमी आं कली अराम रागी रे चाक्तु। नां दाप्तीके डा पहाडम बाक्ब मोआबी आन पिपमी आं कली “जाक्कीन, मिनू आं पा डा याकूब कली सराप चीले पने। इस्राएली आन कली हिंच कोइदीमी” देंत। 8 मिनू “परमप्रभुमी सराप चीले मपाइश्शा आन कली, गो दोपा सराप चीले पाइक्नुडमी? परमप्रभु यावेमी हिंच मकोइशो आन कली, गो दोपा हिंच कोइनुडमी? 9 गो सेरथे फुल्लु तार बाक्शा, मेको आन कली ताइनुड। गो डांडाम बाक्शा, मेको आन कली कोत्रनुड। मेको आन का ला बाक्ब जात डा मुर बाक्नीम। मिनू रागी रागी डा मुर नु मखाल्सीनीम। 10 याकूब आ मुर फुरक खोदेंशो पा शुश दुम्शो बाक्नीम। इस्राएल डा मुर आन ४ भाग डा भाग का यो, सुम हिक्ने चाप्नीमी डा? उत्पती १३:१६ गे आं कली ठीक पाइब मुर आन कली खोदेंशो पा बेक्चा गेयीनी। मिनू आं बेक्तीके मेको आन केन खोदेंशो दुम्ल” देंत।

11 मिनू बालाकमी बालाम कली “गे आं कली मार पनी? गो इन कली आं जोरी सत्रु आन कली सराप चीले पाइक्चा कली ब्रेशशा चाक्तन्नी। तन्न गे दूली पा मेको आन कली आसीक कका गेतीनी” देंत। 12 मिनू मेकोमी “गो परमप्रभु यावेम आं थुंम वोइश्शो देंशो लोत्र ब्वाक्चा माल्नुड” देंत। गन्ती २२:३८

बालाममी लेंशा आसीक गेशो

13 मिनू बालाकमी मेको कली “गो नु अर्को बाक्तीके पिने। गे एकेर रे मेको आन कली ताइनीनी। मेकेर रे मेको आन कली इक्का ला ताइतीनी। नेल्ल आन कली तने मचाप्नीनी। मेको आन कली मेकेर रे सराप चीले पतीन” देंत। 14 मिनू मेकोमी मेको कली चोफीम डा रू पिस्गा डांडाम लाइक्तु। मिनू ७ ओटा चढ़ेतीक सेल्शा, मेको तारी ब्यफ का का नु सांड का का चढ़ेत्तु। 15 मिनू बालाममी बालाक कली “गो परमप्रभु यावे कली गुम्थ एर लाइनुड। गे चहिं एको इन चोशा चढ़ेशो आ नेक्था राप्शा बाक्कीन” देंत। 16 मिनू परमप्रभु यावेमी बालाम कली गुम्शा, आ थुंमी लोत्र वोइश्शा, मेको कली “गे बालाक आ बाक्तीके लेतो। इ कली देंशो लोत्र मेको कली मतो” देंत। 17 मिनू मेको बालाक आ बाक्तीके लेशशा जाक्त। मेना बालाक नु मोआब डा ठेयब मुरपुकी चोशा चढ़ेतीके आ नेक्था राप्शा बाक्तेक्म। मिनू बालाकमी मेको कली “परमप्रभु यावेम मार देंम?” दे हिल्लो पाप्तु। 18 मिनू बालाममी परमप्रभु आ देंशो लोत्र पा “बालाक बोक्शा, आं लोत्र नेनो। सिप्पोर आ तौ इ नोफा दाइक्तो। 19 परमप्रभु मुर ममाइ। मेकोमी जोल मपाइब। मेको बेक्शा लाइब मुर खोदेंशो पा आ थुं मफाइक्ब। मेकोमी लोत्र थोक्शा देंम डा मेरे पाइब। मेकोम पाइक्नुड देंम डा मेरे मेको मपाइक्बा डा? १सामुएल १५:२९ 20 नेनीन, गो मेको आन कली आसीक गेतीक लोत्र तशो बाक्नुड। मेकोमी मेको आन कली आसीक गेशो बाक्ब। मिनू गो मेको फाइक्ने चाप्नुडा डा? 21 याकूब कली मरिम्शो मदुम्ब, देंशो बाक्ब। मिनू इस्राएली आन कली श्येत मदुम्ब। मेको परमप्रभु यावे, आन परमप्रभु मेकोपुकी नु बाक्ब। मिनू मेको आन दातेमी पिप बाक्ब। 22 परमप्रभुमी मेको आन कली इजीप्त रे गुंइशा, आ सक्तिम मेको आन कली ब्वाकी डा ब्यफ खोदेंशो सेल्शो बाक्ब। 23 थमा पा, याकूब कली राइब मारेइ मन्तर तन्तर मबाक्ब। इस्राएली आन कली राइब मारेइ लिंक्नु कोत्रतीके मबाक्नीम। मुल याकूब नु इस्राएल आ पर्बम परमप्रभु आ पशो कोत्रडीन। 24 कोत्रडीन, मेको जात डा मुर गुप्सनी खोदेंशो पा बोक्नीम। प्रेक्शा ग्राम्चा चिक्शो गुप्स खोदेंशो पा मेको छुल बोक्ब। मेकोमी सिखार मब्वा सम्म नु सिखार आ हुश मतूडा सम्म मनाइक्ब” देंत। गन्ती २४:९; इजीकीएल १९:२

25 मिनू बालाकमी बालाम कली “मेको आन कली सराप चीले मगेने, आसीक यो मगेने” देंत।

26 तन्न बालाममी बालाक कली “परमप्रभु यावेमी मार देंबा, गो मेको पचा माल्नुड, दे गो इन कली ना कना मदेंडा डा?” देंत।

27 मिनु बालाकमी बालाम कली “मुल पिने, गो इन कली अर्को बाक्तीकेमी लाइक्नन्नी। मेकेर रे गे आं पा डा मेको आन कली सराप चीले पचा कली परमप्रभुमी दाक्बा को?” देंत। 28 मिनु बालाकमी बालाम कली पेओर डांडाम लाइक्नु। मेकेर रे गोरशो रागी नेल्ल तांडसाक्व। गन्ती २२:४१; गन्ती २५:३

29 मिनु बालाममी बालाक कली “एकेर आं कली ७ ओटा चढ़ेतीक सेलीन। मिनु ७ ओटा ब्यफ ७ ओटा सांड ठीक पने” देंत। 30 मिनु बालाकमी बालाममी देंशो खोदेंशो पा पाप्तु। मिनु चढ़ेतीक नेल्लेमी ब्यफ का का नु सांड का का चढ़ेप्तु।

24

बालाममी सां खेयप लोत्र पशो

1 मिनु बालाममी परमप्रभु यावेमी इस्राएली आन कली आसीक गेचा थुं पशो बाक्त, दे तुइक्ताक्व। मिनु मेको डोंइती डा खोदेंशो पा परमप्रभु कली हिल्लो पथ मला। तन्न मेकोमी आ कुल गोरशो रागी गे हिरशा कोव्रतु। 2 मिनु बालाममी कोव्रना कोव्रन, इस्राएली आन कली थर थर पा बाक्शो ताम्तीमी। मिनु परमप्रभु आ सोक्तीम मेको कली सुम्तु। 3 मिनु मेकोमी परमप्रभु आ पपाइश्शो लोत्र पा “गो बेओर आ तौ बालाम, मिक्च ताइब नड, आ देंशो लोत्र मार बाक्त देंशा हना, १ सामुएल ९:९ 4 गो, परमप्रभु आ लोत्र नेंबमी, एको लोत्र पाइनुड। गो नेल्ल क्येडा सक्ति पाइश्शो आ कोइशो ताइनुड। मिनु गो आ डोंइती बाप्शा, मेको कली ताइनुड। 5 याकूब आ मुर इन ताम्बु गिश रिम्शो बाक्नीमी। गे इस्राएली इन बाक्तीके दारशो बाक्नीम। 6 मेको खजूर रवा खुम्शो ठेयब दिंम खोदेंशो बाक्ब। मेको खोला आ नेक्था खुम्शो फू रू खोदेंशो बाक्ब। मेको परमप्रभु यावेमी खुम्शो ठेयब घ्यू कुमारी खोदेंशो बाक्ब। ब्वाक्कु आ नेक्था वाशो लेबानोन डा लाइश्शो रवा खोदेंशो बाक्ब। 7 मेको आन गरपुकीम ब्वाक्कु ब्रीशा क्युप्ब। मिनु मेको आन रू शुश ब्वाक्कु ताइनीम। मेको आन पिप अगाग क्येडा यो ठेयब बाक्ब। मिनु मेको आ राज्य ठेयब सेल्चा पुंडसीब। 8 परमप्रभुमी मेको आन कली इजीप्त रे गुंडशा चाक्शो बाक्ब। आ सक्ति इस्राएली आन कली ब्वाकी डा ब्यफ आ ग्रोत्र खोदेंशो बाक्ब। रागी रागी डा जोरी सत्रु आन कली क्याम्ब। मेको आन रुश जिकब। मेको आन लिब्रामी मेको आन कली ख्रिश्शा साइक्ब। 9 मेको गुप्स खोदेंशो पा बाप्शा बाक्ब। गुप्सनी खोदेंशो पा बाप्शा बाक्ब। सुम मेको कली पोक्बा डा? इस्राएली, सुमी इन कली आसीक गेनीमी, मेको आसीक राइनीम। सुमी इन कली सराप चीले पाइक्नीमी, मेको सराप चीले राइनीम” देंत। गन्ती २३:२४; उत्पत्ती ४९:९; उत्पत्ती १२:३; उत्पत्ती २७:२९

10 मिनु बालाक बालाम कली तशा, शुश गाइक्ताक्व। मिनु मेकोमी आ गुइ क्युक्शा, बालाम कली “गो इ कली आं जोरी सत्रु आन कली सराप चीले पाइक्चा कली कका ब्रेत्ताक्न। तन्न गे मेको आन कली सां खेयप आसीक कका गेप्तीवी। 11 मोपतीके मुल गे दोरोर पा इ खिं लेतो। गो इ कली ठेयब सेल्लुड, दे मिम्शो नड। तन्न परमप्रभु यावेमी इ कली मान ततीक रे तेक्तु” देंत।

12 मिनु बालाममी बालाक कली “गे आं कली ब्रेत्थ सोइश्शो मुर आन कली गो 13 ‘बालाकमी आं कली सुन नु चांदीम ब्रीशो आ दरवार गेती हना यो, परमप्रभु यावे आ लोत्र लाक्शा आं मिम्शोमी मारेइ रिम्शो नु मरिम्शो पने मचाप्नुड। परमप्रभु यावेमी आं कली मार देंबा, गो मेकोन देंनुड’ मदेंशो नडा डा? गन्ती २२:१८ 14 मुल गो आं मुर आन बाक्तीके लाइनुड। तन्न इस्राएलीपुकीम इन मुर आन कली नोले मार पाइक्नीमी, मेको इन कली शेंनुड” देंत।

बालाममी परमप्रभु आ लोत्र पशो

15 मिनु बालाममी परमप्रभु आ पपाइश्शो लोत्र पा “गो बेओर आ तौ बालाम, मिक्च ताइब नड, आ देंशो लोत्र मार बाक्त देंशा हना, 16 गो, परमप्रभु आ लोत्र नेंबमी, एको लोत्र पाइनुड। गो नेल्ल क्येडा ठेयब तुइश्शा, नेल्ल क्येडा सक्ति पाइश्शो आ कोइशो ताइनुड। मिनु गो आं मिक्च मसुम्शो आ डोंइती बाप्शा, 17 गो मेको कली ताइनुड, तन्न मुल ममाइ। गो मेको कली कोव्रनुड। तन्न आ नेक्था रे ममाइ। याकूब रे पा सोरुल का दाप्ब। मिनु इस्राएली रे पा पिप का गूब। मिनु मेकोमी मोआब रागी आ सांद रे पा खतम सेल्ब। मिनु शेथ आ थर डा मुर आन कली खतम पोक्ब। मत्ती २:२; लूका १:७८; उत्पत्ती ४९:१०; २सामुएल ८:२ 18 एदोम रागी आ केन सेल्ब। मिनु सेइर रागी ग्राब। मिनु इस्राएल बोल्यो दुम्ब। २सामुएल ८:१४; येरमीया ४९:७-२२ 19 याकूब रे पा हुकुम पाइब का गूब। मिनु इर सहर डा लीशो आन कली साइक्ब” देंत। मीका ५:१,७,८ 20 मिनु बालाममी अमालेक आ मुर आन कली कोव्रशा “अमालेक

आ मुरपुकी रागी रागी नेल्ल क्येडा डोंइती डा बाक्तेक्म। तन्न मेकोपुकी गेना हना यो जाम्शा लाइनीमी” देंत। प्रस्थान १७:१४; १सामुएल १५:२-३,७ 21 मिनु नोले मेकोमी केनी डा मुर आन कली कोव्रशा “इन बाक्तीक रागी बोल्यो बाक्ब। इन बाक्तीक सेरथे फुल्लुमी सेल्शो ग्योव्र खोदेशो बाक्ब। १सामुएल १५:६ 22 तन्न गे काइन सहर डा मुरपुकी मीम चोचा पुंडसीनीनी। गिश सम्म अश्शुरीमी इन कली फ्रेशा लाइक्नीम” देंत।

23 मिनु लेंशा मेकोमी लोव्र पा “आबी, परमप्रभुम मोदेशो पवानु, सु ब्रोंइने चाण्बा डा? 24 किक्तीम रे जहाजपुकी जाक्नीम। मिनु मेकोपुकीम अश्शुर नु एबेर कली श्येत गेनीम। मिनु मेकोपुकी यो खतम दुम्नीम” देंत। उत्पत्ती १०:-४; उत्पत्ती १०:२१-२२

25 मिनु बालाम बोक्शा, आ खिं लेत्त। मिनु बालाक यो आ लां लत। गन्ती ३१:८,१६

25

शिक्तीममी मूर्ति पूजा पशो

1 इस्राएलीपुकी शिक्तीममी बाक्मानु, मुरपुकी मोआबी आन तमीपुकी नु इप्शा, मरिम्शो पचा गोम्तेक्म। गन्ती ३३:४९; १कोरिन्थी १०:८ 2 मिनु मेकोपुकीम इस्राएली आन कली आन देवी देवता आन कली चढ़ेतीकेम ब्रेत्ताक्म। मिनु मेकोपुकीम मेको आन भोज जशा, मेको आन देवी देवता आन डोंइती बाप्तेक्म। 3 मोपा इस्राएलीपुकीम पेओर डांडा डा बाल देवता कली पूजा पचा गोम्तेक्म। मिनु परमप्रभु यावे इस्राएली आन पर्वम गाइक्ताक्व। ब्यवस्था ४:३; भजन संग्रह १०६:२८ 4 मिनु परमप्रभु यावेमी मोसा कली “एको मुर आन ठेयब मुर नेल्ल आन कली चाक्शा क्युक्शा साइश्शा, परमप्रभु यावे आ डोंइती नाप्शो नांम वोइक्मी। मिनु परमप्रभु यावे इस्राएली आन पर्वम आ थाम्पा गाइश्शो नांडसीब” देंत। ब्यवस्था २१:२२-२३; २सामुएल २१:६-९ 5 मिनु मोसाम इस्राएली आन निसाफ पाइब आन कली “गे नेल्लेमी पेओर डांडा डा बाल देवता कली पूजा पाइब इन मुर नेल्ल आन कली साइक्चा मालनीनी” दे माइक्तीमी। प्रस्थान ३२:२७

6 मिनु इस्राएलीपुकी ग्रुम्तीक ताम्बु आ ओव्रतीकेम डाक्शा बाक्मानु, मेना इस्राएली काम मोसा नु इस्राएली नेल्ल आन डोंइती आ खिंम मिदयानी मीश का चाक्तु। गन्ती ३१:१६ 7 मिनु चढ़ेब हारून आ चच, एलाजर आ तौ फिनेहासमी मेको तशा, मेको बोक्शा, आ गुइमी तूतीक का शेशा, प्रस्थान ६:२५ 8 मेको इस्राएली आ नोनोले लशा, आ बाक्तीक ओव्रशा, मेको इस्राएली नु मेको मीश मुर निम्फा आस कली एर ओंथ खिप्पाइश्शा थोक्तीम्सी। मिनु इस्राएली आन दाते रे मेको मुर बेक्तीक रोइ जाम्त। 9 तन्न मेको मुर बेक्तीक रोइम बेक्बपुकी २४ हजार बाक्तेक्म। भजन संग्रह १०६:२९-३१

10 मिनु परमप्रभु यावेमी मोसा कली 11 “चढ़ेब हारून आ चच, एलाजर आ तौ, फिनेहासमी इस्राएली आन पर्वमी आं गाइश्शो नाइक्पाइक्तु। फिनेहासमी आं रुश पशो तुइश्शा, आ जोंब बोक्शा, आं गाइश्शो नाइक्पाइक्तु। मिनु मेको आन कली मसदुमी। 12 मोपतीके गे मेको कली “परमप्रभुमी इ कली आं थुं नाइक्तीक कबल पाइब। १इतिहास ९:२०; यसैया ५४:१०; मलाकी २:५ 13 मिनु मेको कबल इ कली नु इ चच युइ आन कली बाक्ब। मेको गेना हना यो चढ़ेब दुम्तीक कबल बाक्ब। मारदे हना गे इ परमप्रभु आ पर्वम जोंब बोक्शा, गेय पाप्तीवी। मिनु गेमी इस्राएली आन पर्वम पाप क्याम्तीक गेय पाप्तीवी” देनो” देंत। 14 मेको मिदयानी मीश मुर नु साइक्चा पुंडसीब इस्राएली आ नें जिम्मी बाक्त। मेको सालु आ तौ सिमियोन आ थर डा खिं का डा ठेयब मुर बाक्त। 15 मेको साइक्चा पुंडसीब मिदयानी मीश मुर आ नें कोज्बी बाक्त। मेको सुर आ तमी बाक्त। मेको मिदयान डा ठेयब मुर बाक्त।

16 मिनु परमप्रभु यावेमी मोसा कली 17 “मिदयानी आन कली श्येत गेशा, साइक्मी। गन्ती ३१:२-१० 18 मारदे हना, मेकोपुकीमी इन कली यो श्येत गेचा गोम्तेक्म। मिनु इन कली बाल-पेओर कली पूजा पपाइक्तेक्म। मेना मिदयान डा ठेयब मुर आ तमी कोज्बीमी इन कली श्येत गेपाइक्तु। मेको चहिं मुर साइक्चा रोइ बोक्म नाक्त साइक्चा पुंडसाक्व। पेओर कली पूजा पतीके मो दुम्शो बाक्त” देंत।

26

इस्राएली आन कली हिक्शो

1 मेको मुर बेक्तीक रोइ दुम नोले परमप्रभु यावेमी मोसा नु चढ़ेब हारून आ तौ एलाजर आस कली 2 “इस्राएली नेल्ल आन दातेमी २० बर्स गाप्शो नु मेको क्येडा लाक्शो लडाइम लने चाण्ब आन कली थर थर पा हिक्कीस” देंत। गन्ती १:२-४७; 3 मिनु मोसा नु चढ़ेब एलाजरमी यरीको आ आइक्ची हांबु यर्दन खोला आ शुंइच मोआब डा दिंमम

इसाएली आन कली ग्रुम्पाइशशा 4 “परमप्रभु यावेमी मोसा कली अरेशो खोदेशो पा २० बर्स गाप्शो नु मेको क्येडा लाक्शो मुर आन कली हिक्कीन” दे माइक्तीमी। मिनु इजीप्त रे गूशा जाक्शो इसाएलीपुकी एकोन बाक्तेक्म।

5 इसाएल आ डोंइती जरमेशो तौ रूबेन आ थर, हनोक आ खिं खिं डा मुरपुकी, पल्लु आ खिं खिं डा मुरपुकी, उत्पत्ती ३५:२३-२६; उत्पत्ती ४६:८-२७; १इतिहास ४:-८:- 6 हेसोन आ खिं खिं डा मुरपुकी नु कारमी आ खिं खिं डा मुरपुकी बाक्तेक्म। 7 एको रूबेन आ थर डा खिं खिं डा मुरपुकी बाक्तेक्म। मेको नेल्ल आन कली हिक्शोनु, ४३ हजार ७ सहे ५० जना बाक्तेक्म।

8 पल्लु आ तौ आन दातेमी का एलीआब बाक्त। 9 एलीआब आ तौपुकी, नेमुएल, दाथान नु अबीराम बाक्तेक्म। एकोपुकी मेको दाथान नु अबीराम आन दाते डा ठेयब मुरपुकी बाक्तेक्म। मेकोपुकी कोराह आ हुलम ब्वाइसीशा मोसा नु हारून नु जिचा पोक्शा, परमप्रभु यावे आ पर्बम दूली पा बोक्शो बाक्तेक्म। गन्ती १६:१,१२ 10 मिनु रागीम आ शोव पाक्शा मेको आन कली कोराह नुन दाक्शो बाक्त। मेना सहे निक्शी ५० जना आन कली मीम खतम पोक्शो बाक्त। मेकोपुकी मरिम्शो पाइब दुम्शो बाक्तेक्म। 11 तन्न कोराह आ तौपुकी चहिं मबेक्शो बाक्तेक्म।

12 सिमियोन आ थर डा मुर आन खिं खिं डा मुरपुकी का का पा हिक्शोनु, नेमुएल आ खिं खिं डा मुरपुकी, यामीन आ खिं खिं डा मुरपुकी, याकीन आ खिं खिं डा मुरपुकी, 13 जेराह आ खिं खिं डा मुरपुकी नु शावल आ खिं खिं डा मुरपुकी बाक्तेक्म। उत्पत्ती ३६:१३ 14 एको सिमियोन आ थर डा खिं खिं डा मुरपुकी बाक्नीम। मेको नेल्ल आन कली हिक्शोनु, २२ हजार सहे निक्शी बाक्तेक्म।

15 गाद आ थर डा मुर आन खिं खिं डा मुरपुकी का का पा हिक्शोनु, सेफोन आ खिं खिं डा मुरपुकी, हाग्गी आ खिं खिं डा मुरपुकी, शुनी आ खिं खिं डा मुरपुकी, 16 ओज्नी आ खिं खिं डा मुरपुकी, एरी आ खिं खिं डा मुरपुकी, 17 अरोद आ खिं खिं डा मुरपुकी नु अरेली आ खिं खिं डा मुरपुकी बाक्तेक्म। 18 एको गाद आ थर डा खिं खिं डा मुरपुकी बाक्तेक्म। मेको नेल्ल आन कली हिक्शोनु ४० हजार ५ सहे जना बाक्तेक्म।

19 मिनु यहूदा आ तौ एर नु ओनान बाक्ताक्स। तन्न मेको कनान रागीम बेक्ताक्स। उत्पत्ती ३८:७-१० 20 यहूदा आ थर डा मुर आन खिं खिं डा मुरपुकी का का पा हिक्शोनु, शेलाह आ खिं खिं डा मुरपुकी, पेरेस आ खिं खिं डा मुरपुकी, जेराह आ खिं खिं डा मुरपुकी बाक्तेक्म। 21 मिनु पेरेस आ चच युइ डा मुर चहिं, हेसोन आ खिं खिं डा मुरपुकी नु हामुल आ खिं खिं डा मुरपुकी बाक्तेक्म। रूथ ४:१८ 22 एको यहूदा आ थर डा खिं खिं डा मुरपुकी बाक्तेक्म। मेको नेल्ल आन कली हिक्शोनु, ७६ हजार ५ सहे जना बाक्तेक्म।

23 इस्साकार आ थर डा मुर आन खिं खिं डा मुरपुकी का का पा हिक्शोनु, तोला आ खिं खिं डा मुरपुकी, पुवा आ खिं खिं डा मुरपुकी, 24 याशुब आ खिं खिं डा मुरपुकी नु शिमोन आ खिं खिं डा मुरपुकी बाक्तेक्म। 25 एको इस्साकार आ थर डा खिं खिं डा मुरपुकी बाक्तेक्म। मेको नेल्ल आन कली हिक्शोनु, ६४ हजार सहे सां बाक्तेक्म।

26 जबूलून आ थर डा मुर आन खिं खिं डा मुरपुकी का का पा हिक्शोनु, सेरेद आ खिं खिं डा मुरपुकी, एलोन आ खिं खिं डा मुरपुकी नु याहलेल आ खिं खिं डा मुरपुकी बाक्तेक्म। 27 एको जबूलून आ थर डा खिं खिं डा मुरपुकी बाक्तेक्म। मेको नेल्ल आन कली हिक्शोनु, ६० हजार ५ सहे जना बाक्तेक्म।

28 मिनु योसेफ आ तौ मनस्से नु एफ्राइम आस थर डा मुर आन खिं खिं डा मुर आन कली का का पा हिक्शोनु, 29 मनस्से आ चच युइ डा माकीर आ खिं खिं डा मुरपुकी बाक्तेक्म। माकीर गिलाद आ आफ बाक्त। यहोसु १७:१-६ 30 गिलाद आ चच युइपुकी इएजेर आ खिं खिं डा मुर रे इएजेर, हेलेक आ खिं खिं डा मुरपुकी, 31 अस्नीएल आ खिं खिं डा मुरपुकी, शेकेम आ खिं खिं डा मुरपुकी, 32 शेमीदा आ खिं खिं डा मुरपुकी नु हेफेर आ खिं खिं डा मुरपुकी बाक्तेक्म। हेफेर आ तौ सेलोफेहाद के चहिं तौ मबाक्थु, तमीपुकी ला बाक्तेक्म। 33 हेफेर आ तौ सेलोफेहाद आ तमी आन नें महलाह, नोआह, होग्ला, मिल्का नु तिरचा बाक्तेक्म। गन्ती २७:१ 34 एको मनस्से आ थर डा खिं खिं डा मुरपुकी बाक्तेक्म। मेको नेल्ल आन कली हिक्शोनु, ५२ हजार ७ सहे बाक्तेक्म।

35 एफ्राइम आ थर डा मुर आन खिं खिं डा मुरपुकी का का पा हिक्शोनु, शुथेलाह आ खिं खिं डा मुरपुकी, बेकेर आ खिं खिं डा मुरपुकी नु तहन आ खिं खिं डा मुरपुकी बाक्तेक्म। 36 मिनु शुथेलाह आ खिं खिं डा मुरपुकी चहिं एरान आ खिं खिं डा मुर बाक्तेक्म। 37 एको एफ्राइम आ थर डा खिं खिं डा मुरपुकी बाक्तेक्म। मेको नेल्ल आन कली हिक्शोनु, ३२ हजार ५ सहे बाक्तेक्म। मेको योसेफ आ चच युइ आन खिं खिं डा मुरपुकी बाक्तेक्म।

38 बेन्यामीन आ थर डा मुर आन खिं खिं डा मुरपुकी का का पा हिक्शोनु, बेला आ खिं खिं डा मुरपुकी, अशबेल आ खिं खिं डा मुरपुकी, अहीराम आ खिं खिं डा मुरपुकी, 39 शुफाम आ खिं खिं डा मुरपुकी नु हुफाम आ खिं खिं डा

मुरपुकी बाक्तेक्म। 40 मिनु बेला आ तौ आरद नु नामान बाक्ताक्स। आरद आ खिं खिं डा मुरपुकी नु नामान आ खिं खिं डा मुरपुकी बाक्तेक्म। 41 एको बेन्यामीन आ थर डा खिं खिं डा मुरपुकी बाक्तेक्म। मेको नेल्ल आन कली हिक्शोनु, ४५ हजार ६ सहे बाक्तेक्म।

42 दान आ थर डा मुर आन खिं खिं डा मुरपुकी का का पा हिक्शोनु, शुहाम आ खिं खिं डा मुरपुकी बाक्तेक्म। मेको दान आ थर डा खिं खिं डा मुरपुकी बाक्तेक्म। 43 एको शुहाम आ खिं खिं डा मुर नेल्ल आन कली हिक्शोनु, ६४ हजार ४ सहे बाक्तेक्म।

44 आशेर आ थर डा मुर आन खिं खिं डा मुरपुकी का का पा हिक्शोनु, इम्नाह आ खिं खिं डा मुरपुकी, इश्वी आ खिं खिं डा मुरपुकी, बेरीआ आ खिं खिं डा मुरपुकी, 45 हेबेर आ खिं खिं डा मुरपुकी नु माल्कीएल आ खिं खिं डा मुरपुकी बाक्तेक्म। 46 आशेर आ तमी आ नें सेराह बाक्त। 47 एको आशेर आ थर डा खिं खिं डा मुरपुकी बाक्तेक्म। मेको नेल्ल आन कली हिक्शोनु ५३ हजार ४ सहे बाक्तेक्म।

48 नाप्ताली आ थर डा मुर आन खिं खिं डा मुरपुकी का का पा हिक्शोनु, याहसेल आ खिं खिं डा मुरपुकी, गुनी आ खिं खिं डा मुरपुकी, 49 येसेर आ खिं खिं डा मुरपुकी नु शिल्लेम आ खिं खिं डा मुरपुकी बाक्तेक्म। 50 एको नाप्ताली आ थर डा खिं खिं डा मुरपुकी बाक्तेक्म। मेको नेल्ल आन कली हिक्शोनु, ४५ हजार ४ सहे बाक्तेक्म।

51 इस्राएली वोंइश मुर नेल्ल आन कली हिक्शोनु, ६ लाख हजार का ७ सहे ३० जना बाक्तेक्म।

52 मिनु परमप्रभु यावेमी मोसा कली 53 “मेको आन खिं खिं डा मुर गिश बाक्नीमी, दे मिम्शा, रागी आंम के सेल्चा कली योक्शा गेमी। 54 गे मेको आन कली ठेयब थर आन कली ठेयब रागी नु आइक्च थर आन कली आइक्च रागी पा योक्शा गेमी। थर का का आन कली मेको आ मुर आन कली कोव्रशा हुकुम पचा गेमी। 55 मो हना यो मेको रागी चिठठा आप्शा योक्चा माल्ब। मेकोपुकीमी आन किकी पिपी आन नें नें खोदेशो पा अधिकार पामेक्ल। गन्ती ३३:५४; यहोसु १४:२ 56 ठेयब नु आइक्च आन दातेमी आन अधिकार पतीके चिठठा आप्शा योक्चा माल्ब” देंत।

57 मिनु लेवी आ थर डा मुर का का पा हिक्शोनु, सु सु बाक्तेक्म देशा हना, गेरशोन आ खिं खिं डा मुर, कोहाथ आ खिं खिं डा मुर, मेरारी आ खिं खिं डा मुर बाक्तेक्म। गन्ती ३:१७-२०; प्रस्थान ६:१६-२५ 58 मिनु लेवी आ थर डा खिं खिं डा मुर अरु सु सु अरु बाक्तेक्म देशा हना, लिब्नी आ खिं खिं डा मुर, हेब्रोन आ खिं खिं डा मुर, माहली आ खिं खिं डा मुर, मुशी आ खिं डा मुर, कोराह आ खिं डा मुर बाक्तेक्म। कोहाथ चहिं अग्राम आ किकी बाक्त। गन्ती ३३:२०; गन्ती १३:२२ 59 अग्राम आ मीश आ नें योकेबेद बाक्त। मेको चहिं लेवी आ थर डा इजीप्त रागीमी थिशो तमी बाक्त। मेकोमी अग्राम रे हारून नु मोसा नु आस समी मिरयाम आन कली थिम्तीमी। 60 मिनु हारूनमी नादाब, अबीहु, एलाजर नु इथामार थिम्तीमी। 61 तन्न नादाब नु अबीहु चहिं परमप्रभु यावे आ डोंइती अरु मी रे पा चोशा चढेतीके, बेक्ताक्स। लेवी १०:१-२ 62 मेको वोंइश आल नेल्ले महिना का नु मेको क्येडा लाक्शो हिक्शोनु २३ हजार बाक्तेक्म। मेकोपुकी अरु इस्राएली आन खोदेशो पा लडाइ पचा कली महिक्शो बाक्तेक्म। मारदे हना मेकोपुकी इस्राएली आन दातेमी आंम आन रागी कली मगेशो बाक्त।

63 मिनु मोसा नु एलाजर चढेबमी मेको नेल्ल आन कली हिक्ताक्स। मेना मेकोपुकी मोआब डा दिंम यर्दन आ शुंइच, यरीको आ नेक्था बाक्तेक्म। 64 तन्न मोसा नु हारूनमी सीनै डा गोरशो रागीम हिक्शो इस्राएली का यो मबाक्म। गन्ती १:- 65 मारदे हना, परमप्रभु यावेमी मेको आन पर्बम “मेकोपुकी थमा पा गोरशो रागीमीन बेक्चा माल्नीम” देशो बाक्त। यपुन्ने आ तौ कालेब नु नून आ तौ यहोसु डा लाक्शा, मेको आन दाते डा का यो सेस मलीम। गन्ती १४:२२-३८

27

सेलोफेहाद आ तमीपुकी

गन्ती ३६:-

1 योसेफ आ तौ मनस्से, मनस्से आ तौ माकीर, माकीर आ तौ गिलाद, गिलाद आ तौ हेफेर, हेफेर आ तौ सेलोफेहाद आ तमीपुकी महलाह, नोआह, होग्ला, मिल्ला नु तिरचा बाक्तेक्म। गन्ती २६:३३; यहोसु १७:३-६ 2 मेकोपुकी मोसा, चढेब एलाजर, ठेयब मुरपुकी नु मेकेर बाक्ब मुर नेल्ले आन डोंइती ग्रुम्तीक ताम्बु आ लाप्चो आ डोंइती बाक्तेक्म। 3 मिनु सेलोफेहाद आ तमीपुकीमी “आंइ आफ गोरशो रागीम बेक्त। तन्न मेको परमप्रभु यावे आ पर्बम मरिम्शो पा बोक्ब कोराह आ हुलम मबाक्शो बाक्त। तन्न मेको आ आंम पाप पतीके बेक्त। मिनु मेको के तौ मबाक्म। गन्ती

१६:७; उत्पत्ती ३:१९ 4 मिनु तौ मबाक्तीके आंइ आफ आ नें आ थर आ मुर आन दाते रे मारदे क्याम्सीबा? आंइ आफ आ लोकबपुकी नु आंइ कली यो अडस गेने” दैतेक्म।

5 मिनु मोसामी मेको आन पोक्शो लोत्र परमप्रभु यावे आ डोंइती चाक्तु। 6 मिनु परमप्रभु यावेमी मोसा कली 7 “सेलोफेहाद आ तमीपुकीम पोक्शो लोत्र ठीक बाक्ब। गे थमा पा मेको आन कली आन आफ आ लोकब आन दातेमी अडस गेचा माल्नेवे। मिनु गे मेको आन आफ आ अडस मेको आन कली गेमी।

8 मिनु गे इस्राएली आन कली ‘सुइ मुर तौ मथिथु, बेक्त हना, मेको आ तमी आन कली आ अडस गेचा माल्नीनी। 9 मेको के तमी यो मबाक्त हना, मेको आ अडस आ लोकब आन कली गेचा माल्नीनी। 10 मेको के आ लोकब यो मबाक्त हना, मेको आ अडस आ आफ आ लोकब कली गेचा माल्नीनी। 11 मिनु मेको आ आफ आ लोकब यो मबाक्त हना, मेको आ अडस आ थर डा नेल्ल क्येडा आ नेक्था डा मुर कली गेचा माल्नीनी। मिनु मेको अडस मेको केन दुम्ब’ दे माइक्मी” दैत। मेको लोत्र परमप्रभु यावेमी मोसा कली दैशो, इस्राएली आन कली फुल्लुम मुशा ब्रेक्शो नु अरेशो लोत्र बाक्ब।

यहोसु लां कोंइब दुम्शो

12 मिनु परमप्रभु यावेमी मोसा कली “गे एको अबारीम पहाड डा डांडा डोंइसो। मिनु इस्राएली आन कली गेशो रागी कोव्रडो। गन्ती २१:११; ब्यवस्था ३२:४८-५२ 13 मिनु गे मेको रागी तवी नोले, गे इ लोकब हाखून खोदैशो पा इ किकी पिपी नु बाक्थ लाइनेवे। गन्ती २०:२४-२८ 14 मारदे हना जीन डा गोरशो रागीमी मुरपुकी गो नु जिचा पोक्मेनु, गे यो मटिसी। मेरीबाथ-कादेश डा ब्वाक्कुम मुर आन डोंइती गे आं कली ठेयब मसेल्यीसी” दैत। गन्ती २०:१२-१३

15 मिनु मोसामी परमप्रभु यावे कली 16 “परमप्रभु यावे, मुर नेल्ल आन ब्रोंइचा गेब परमप्रभु, एको मुर आन कली लां कोंइब मुर का वोतीन। गन्ती १६:२२ 17 मिनु मेको मुर आन डोंइती गाक्ल। मिनु मेको आन कली लतीक नु जाक्तीक लां कोंइदल। मोपा परमप्रभु यावे आ मुर गोठला मबाक्शो भेडा खोदैशो मदुम्मल” दैत। मीका ५:३; मत्ती ९:३६

18 मिनु परमप्रभु यावेमी मोसा कली “गे आं सोक्त पाइशो नून आ तौ यहोसु कली चाक्शा, इ गुइ मेको आ तार वोतो। प्रस्थान ३३:११; ब्यवस्था ३४:९ 19 मिनु मेको कली चढ़ेब एलाजर नु मुर नेल्ल आन डोंइती राप्पतो। मिनु मेको मुर नेल्लेम तचा डा पा मेको कली एको गेय जिम्मा गेवो। 20 मोपा गे मेको कली इ अधिकार गेवो। मिनु इस्राएली नेल्लेमी मेको आ दैशो टीमेक्ल। प्रस्थान ३४:२९-३०; २राजा २:९,१५ 21 मिनु यहोसु चढ़ेब एलाजर आ डोंइती राप्चा माल्ब। मिनु एलाजरमी ऊरीम यहोसु आ पर्वम मार दैबा, दे परमप्रभु यावे आ डोंइती हिल्लो पचा माल्ब। यहोसु आ दैशोमी इस्राएली नेल्ले मेको नु लडाइ पथ लचा नु लेत्चा माल्नीम” दैत। प्रस्थान २८:३०; ब्यवस्था ३३:८ 22 मिनु मोसामी परमप्रभु यावेमी अरेशो खोदैशो पा पाप्तु। मेकोमी यहोसु कली चाक्शा चढ़ेब एलाजर नु इस्राएली नेल्ल आन डोंइती राप्पाइक्तु। 23 मिनु मोसामी परमप्रभु यावेमी दैशो खोदैशो पा आ गुइ यहोसु आ तार वोइशशा, आ गेय पचा कली जिम्मा गेप्तु।

28

नाक्त किंत किंत डा चढ़ेतीके

1 परमप्रभु यावेमी मोसा कली 2 “गे इस्राएली आन कली मीम चोशा चढ़ेतीके आं जचा थोव्रक, आं दाक्शो ब्रोंव्रशो रिना पाइशो चढ़ेतीके गे आं दैशो नाक्त चढ़ेचा माल्नीम, दे शेंचा माल्नेवे। लेवी २१:६ 3 मिनु गे मेको आन कली ‘गे परमप्रभु यावे कली मीम चोशा चढ़ेतीके मार चढ़ेचा माल्नीनी दैशा हना, मारेइ मदुम्शो थम रिम्शो बर्स का गाप्शो पाठा निक्शी नाक्त किंत किंत चढ़ेचा माल्नीनी। प्रस्थान २९:३८-४२ 4 मिनु का सुनी नु का नाक्दो चढ़ेचा माल्नीनी। 5 मेको नु अन्न चढ़ेतीके कली एफाह का डा १० भाग डा भाग का रिम्शो फस नु हिन का डा ४ भाग डा भाग का ख्राक्शो तेल ब्वाइशशा चढ़ेचा माल्नीनी। एफाह का २२ लिटर पुक्तीक बाक्ब। हिन का ४ लिटर बाक्ब। ४ भाग डा भाग का लिटर का बाक्ब। 6 एको परमप्रभु यावे कली गेना हना यो मीम चोशा चढ़ेतीके बाक्ब। मेको आ दाक्शो ब्रोंव्रशो रिना पाइशो सीनै डांडाम दैशो खोदैशो पा चढ़ेतीके बाक्ब। 7 मेको नु तूचा थोव्रक चढ़ेतीके पाठा का कली हिन का डा ४ भाग डा भाग का अडगुर शांबु चढ़ेचा माल्नीनी। मेको परमप्रभु यावे आ बाक्तीकेम परमप्रभु यावे आ डोंइती मोइक्चा माल्नीनी। 8 मेको अर्को पाठा नां रिक्चावानु, चढ़ेचा माल्नीनी। मेको नु सुनी डा खोदैशो पा अन्न

चढ़ेतीके नु तूचा थोव्रक चढ़ेतीके चढ़ेचा माल्नीनी। एको परमप्रभु यावे कली मीम चोशा चढ़ेशो आ दाक्शो ब्रोव्रशो रिना पाइश्शो चढ़ेतीके बाक्ब।

नाइक्तीक नाक्त डा चढ़ेतीके

9 मिनु नाइक्तीक नाक्तीम मारेइ मदुम्शो थम रिम्शो बर्स का गाप्शो पाठा निक्शी चढ़ेचा माल्नीनी। मेको नु अन्न चढ़ेतीके तेल ब्वाइश्शो रिम्शो फस एफाह का डा १० भाग डा भाग निक्शी चढ़ेचा माल्नीनी। मिनु मेको नु तूचा थोव्रक चढ़ेतीके यो चढ़ेचा माल्नीनी। एफाह का २२ लिटर पुक्तीक बाक्ब। मत्ती १२:५ 10 मेको नाइक्तीक नाक्ती डा चोशा चढ़ेतीके बाक्ब। मेको नाक्त किंत किंत डा चोशा चढ़ेतीके नु तूचा थोव्रक चढ़ेतीके चढ़ेशा यो मेको चढ़ेचा माल्नीनी।

औंसी डा चढ़ेतीके

11 मिनु गे नेल्ल महिना डा डोंइती डा नाक्त परमप्रभु यावे कली चोशा चढ़ेतीके चढ़ेचा माल्नीनी। मेको ब्यफ निक्शी, सांड का नु ७ ओटा मारेइ मदुम्शो थम रिम्शो बर्स का गाप्शो पाठा चढ़ेचा माल्नीनी। गन्ती १०:१०; इजीकीएल ४६:१, ३, ६; यसैया १:१३ 12 मिनु मेको ब्यफ का का पा नु अन्न चढ़ेतीके तेलम निशो रिम्शो फस एफाह डा १० भाग डा भाग सां चढ़ेचा माल्नीनी। मेको सांड का नु अन्न चढ़ेतीके तेलम निशो रिम्शो फस एफाह का डा १० भाग डा भाग निक्शी चढ़ेचा माल्नीनी। एफाह का २२ लिटर पुक्तीके बाक्ब। गन्ती १५:२-१२ 13 मिनु मेको ७ ओटा पाठा नु का का पा एफाह डा १० भाग डा भाग का तेलम निशो रिम्शो फस चढ़ेचा माल्नीनी। एको परमप्रभु यावे कली आ दाक्शो ब्रोव्रशो रिना पाइश्शो मीम चोशा चढ़ेतीके बाक्ब। 14 मेको नु तूचा थोव्रक चढ़ेतीके ब्यफ का का नु आधा हिन अडगुर शांबु बाक्चा माल्ब। सांड नु हिन का डा भाग सां डा भाग का अडगुर शांबु बाक्चा माल्ब। मिनु पाठा नेल्ल नु हिन का डा ४ भाग डा भाग का अडगुर शांबु चढ़ेचा माल्नीनी। मेको बर्स डा महिना नेल्ल डा औंसीम चोशा चढ़ेतीके बाक्नीम। 15 मिनु पाप पशो आ पर्बम बोका का परमप्रभु यावे कली चढ़ेचा माल्नीम। मेको नाक्त किंत किंत डा चोशा चढ़ेतीक नु तूचा थोव्रक चढ़ेतीके चढ़ेशा यो मेको चढ़ेचा माल्नीनी।

पास्सा नाक्त डा चढ़ेतीक

16 मिनु डोंइती डा महिना डा १४ नाक्ती परमप्रभु यावे कली पास्सा चाड डा चढ़ेतीके चढ़ेचा माल्नीनी। लेवी २३:५-१४ 17 मिनु मेको महिना डा १५ नाक्ती ठेयब चाड का मानेचा माल्नीम। मेको चाडम ७ नाक्त सम्म बोरब ओख्ती मसुप्शो शोब्ले जचा माल्नीनी। 18 डोंइती डा नाक्तीम परमप्रभु यावे नु गुम्तीके का दुम्चा माल्ब। मेको नाक्ती गे काइ गेय मपने। 19 गे परमप्रभु यावे कली मीम चोशा चढ़ेतीके चढ़ेचा माल्नीनी। मार चढ़ेचा माल्नीनी देशा हना, ब्यफ निक्शी, सांड का नु बर्स का गाप्शो ७ ओटा पाठा चढ़ेचा माल्नीनी। मेको नेल्ल मारेइ मदुम्शो थम रिम्शो बाक्चा माल्नीम। 20 मेको नु अन्न चढ़ेतीके तेल ब्वाइश्शो रिम्शो फस दुम्चा माल्ब। मेको ब्यफ का नु एफाह का डा १० भाग डा भाग सां चढ़ेचा माल्नीनी। मेको सांड का नु एफाह का डा १० भाग डा भाग निक्शी चढ़ेचा माल्नीनी। एफाह का २२ लिटर खोदेशो बाक्ब। 21 मिनु मेको ७ ओटा पाठा नु एफाह डा १० भाग डा भाग का का पा रिम्शो फस चढ़ेचा माल्नीनी। 22 मिनु इन पाप आ पर्बम पाप क्याम्तीक गेय पचा कली बोका का चढ़ेचा माल्नीनी। 23 मिनु सुनी डा चोशा चढ़ेतीके, मेको गेना हना यो पचा माल्शो चोशा चढ़ेतीक बाक्ब, मेको चढ़ेचा माल्नीनी। 24 गे मोदेशो चढ़ेतीके ७ नाक्त सम्म नाक्त किंत किंत जचा थोव्रक कली चढ़ेचा माल्नीनी। मेको परमप्रभु यावे कली आ दाक्शो ब्रोव्रशो रिना पाइश्शो मीम चोशा चढ़ेतीक बाक्ब। मेको नाक्त किंत किंत डा चोशा चढ़ेतीके नु तूचा थोव्रक चढ़ेतीके चढ़ेशा यो मेको चढ़ेचा माल्नीनी। 25 मिनु ७ नाक्तीम परमप्रभु यावे नु गुम्तीके का दुम्चा माल्ब। मेको नाक्ती गे काइ गेय मपने।

डोंइती मीशो अन्न डा चाड

26 डोंइती मीशो अन्न नु फल फुल डा चाड नाक्त गे परमप्रभु यावे कली नक अन्न रे अन्न चढ़ेतीक चढ़ेनीनी। मेको हप्ता डा चाड बाक्ब। मेना परमप्रभु यावे नु गुम्तीके का दुम्चा माल्ब। मेको नाक्ती गे काइ गेय मपने। लेवी २३:१५-२१; ब्यवस्था १६:१० 27 गे परमप्रभु यावे कली चोशा चढ़ेतीके चढ़ेचा माल्नीनी। मेको परमप्रभु यावे कली आ दाक्शो ब्रोव्रशो रिना पाइश्शो चढ़ेतीके बाक्ब। गेपुकीमी ब्यफ निक्शी, सांड का नु बर्स का गाप्शो ७ ओटा पाठा चढ़ेचा माल्नीनी। 28 मेको नु अन्न चढ़ेतीके तेल ब्वाइश्शो रिम्शो फस दुम्चा माल्ब। मेको ब्यफ का नु एफाह का डा १० भाग डा भाग सां चढ़ेचा माल्नीनी। मेको सांड का नु एफाह का डा १० भाग डा भाग निक्शी चढ़ेचा

माल्नीनी। एफाह का २२ लिटर खोदेशो बाक्ब। 29 मिनु मेको ७ ओटा पाठा नु भाग का रिम्शो फस चढ़ेचा माल्नीनी। 30 मिनु इन पाप आ पर्बम पाप क्याम्तीक गेय पचा कली बोका का चढ़ेचा माल्नीनी। 31 मिनु नाक्त किंत किंत डा चोशा चढ़ेतीक नु मेको अन्न चढ़ेतीक गेपुकीम मेको नु आ तूचा थोत्रक चढ़ेतीक चढ़ेचा माल्नीनी। मेको ब्यफ, सांड, पाठा नेल्ल मारेइ मदुम्शो थम रिम्शो बाक्चा माल्नीम।

29

नक बर्स डा चाड

1 गेपुकी ७ महिना डा डोंइती डा नाक्ती गुम्तीके का सेल्चा माल्नीनी। मेको नाक्ती गे काइ गेय मपने। मेको नाक्ती गे तुराही ताप्चा माल्नीनी। गन्ती १०:१०; लेवी २३:२४-२५ 2 गे परमप्रभु यावे कली चोशा चढ़ेतीके चढ़ेचा माल्नीनी। मेको परमप्रभु यावे कली आ दाक्शो ब्रोत्रशो रिना पाइश्शो चढ़ेतीके बाक्ब। गेपुकीमी ब्यफ का, सांड का नु बर्स का का गाप्शो ७ ओटा पाठा चढ़ेचा माल्नीनी। मेको मारेइ मदुम्शो थम रिम्शो दुम्चा माल्नीम। 3 मिनु मेको ब्यफ नु अन्न चढ़ेतीके, तेल ब्वाइश्शो रिम्शो फस एफाह का १० भाग डा भाग सां नु सांड नु १० भाग डा भाग निक्शी चढ़ेचा माल्नीनी। एफाह का २२ लिटर पुक्तीके का बाक्ब। भाग सां ६ नु आधा लिटर खोदेशो बाक्ब। भाग निक्शी ४ नु आधा लिटर खोदेशो बाक्ब। 4 मिनु मेको ७ ओटा पाठा नु का का पा भाग का चढ़ेचा माल्नीनी। 5 मिनु इन पाप आ पर्बम पाप क्याम्तीक गेय पचा कली बोका का चढ़ेचा माल्नीनी। 6 मेको नेल्ले औंसी नाक्त डा चोशा चढ़ेतीक नु मेको नु अन्न चढ़ेतीके, नाक्त किंत किंत डा चोशा चढ़ेतीक नु मेको नु अन्न चढ़ेतीके, मेको नेल्ल नु तूचा थोत्रक चढ़ेतीके यो चढ़ेचा माल्नीनी। मेको नेल्ले परमप्रभु यावेमी देशो खोदेशो पा आ दाक्शो ब्रोत्रशो रिना पाइश्शो मीम चोशा चढ़ेतीक बाक्नीम।

पाप क्याम्तीक नाक्त डा चाड

7 मेको ७ महिना डा १० नाक्त परमप्रभु यावे नु गुम्तीके का दुम्चा माल्ब। मेको नाक्ती गे माइजा बाक्शा, काइ गेय मपने। लेवी २३:२७-३२ 8 गे परमप्रभु यावे कली चोशा चढ़ेतीके चढ़ेचा माल्नीनी। मेको आ दाक्शो ब्रोत्रशो रिना पाइश्शो चढ़ेतीके बाक्ब। मिनु गे ब्यफ का, सांड का नु बर्स का का गाप्शो ७ ओटा पाठा चढ़ेचा माल्नीनी। मेको थम रिम्शो मारेइ मदुम्शो दुम्चा माल्नीम। 9 मिनु मेको ब्यफ नु अन्न चढ़ेतीके, तेल ब्वाइश्शो रिम्शो फस एफाह का डा १० भाग डा भाग सां नु सांड नु १० भाग डा भाग निक्शी चढ़ेचा माल्नीनी। एफाह का २२ लिटर खोदेशो बाक्ब 10 मिनु मेको ७ ओटा पाठा नु का का पा भाग का का पा चढ़ेचा माल्नीनी। 11 मिनु मेको नु पाप पशो आ पर्बम बोका का चढ़ेचा माल्नीनी। मेको पाप पशो क्याम्तीक गेय पचा कली चढ़ेचा यो नाक्त किंत किंत डा चोशा चढ़ेतीके, मेको नु अन्न चढ़ेतीके नु तूचा थोत्रक चढ़ेतीके चढ़ेचा माल्नीनी। लेवी १६:११-२८

गोठ सेल्शा बाक्तीक चाड

12 गे ७ महिना डा १५ नाक्ती परमप्रभु यावे नु गुम्तीके का सेल्चा माल्नीनी। मेको नाक्ती गे काइ गेय मपने। गे परमप्रभु यावे कली ७ नाक्त सम्म चाड मानेचा माल्नीनी। लेवी २३: ३४-४३ 13 गेपुकीमी परमप्रभु यावे कली चोशा चढ़ेतीके चढ़ेचा माल्नीनी। मेको आ दाक्शो ब्रोत्रशो रिना पाइश्शो मीम चोशा चढ़ेतीके बाक्ब। मेको चोशा चढ़ेतीके मार बाक्चा माल्नीम देशा हना, १३ ओटा ब्यफ, सांड निक्शी नु बर्स का गाप्शो १४ ओटा पाठा बाक्चा माल्नीम। मेको नेल्ल थम रिम्शो मारेइ मदुम्शो बाक्चा माल्नीम। 14 मिनु मेको नु अन्न चढ़ेतीके तेल ब्वाइश्शो रिम्शो फस बाक्चा माल्ब। मेको १३ ओटा ब्यफ आन कली का का पा एफाह का डा १० भाग डा भाग सां चढ़ेचा माल्नीम। मेको सांड निक्शी नु एफाह का डा १० भाग डा भाग निक्शी रिम्शो तेल ब्वाइश्शो फस चढ़ेचा माल्नीम। एफाह का २२ लिटर खोदेशो बाक्ब। 15 मिनु मेको १४ ओटा पाठा नु का का पा भाग का का रिम्शो फस चढ़ेचा माल्नीनी। भाग ला ब्रेक्शो बाक्त हना, एफाह डा १० भाग डा भाग का मिम्सीब। मेको २ लिटर २०० सी सी बाक्ब। 16 मिनु मेको नु पाप पशो आ पर्बम बोका का चढ़ेचा माल्नीनी। मेको पाप पशो क्याम्तीक गेय पचा कली चढ़ेचा यो नाक्त किंत किंत डा चोशा चढ़ेतीके, मेको नु अन्न चढ़ेतीके नु तूचा थोत्रक चढ़ेतीके चढ़ेचा माल्नीम।

17 मिनु मेको आ दीसा गे १२ ओटा ब्यफ, सांड निक्शी १४ ओटा बर्स का गाप्शो पाठा चढ़ेचा माल्नीनी। मेको नेल्ल थम रिम्शो मारेइ मदुम्शो बाक्चा माल्नीम। 18 मेको नु अन्न चढ़ेतीके नु तूचा थोत्रक चढ़ेतीके डोंइती डा खोदेशो पा ब्यफ, सांड नु पाठा आन कली हिक्शा, चढ़ेचा माल्नीनी। 19 मिनु मेको नु पाप पशो आ पर्बम बोका का चढ़ेचा

1 मिनु मोसामी इस्राएल आ थर थर डा ठेयब मुर आन कली “परमप्रभु यावेमी अरेशो मार बाक्त देशा हना, 2 मुर कामी परमप्रभु यावे कली लोत्र पाप्तु हना यो, कसम जाप्तु हना यो, मेकोमी आ पशो लोत्र पचा नु आ कसम जशो खाप्चा माल्ब। मेको आ शोत्र रे मार लोत्र गूशो बाक्मे, मेकोमी मेको खाप्चा माल्ब।

3 मिनु मीश आलमी आ आम आफ आस खिम बाक्मेनु, परमप्रभु यावे कली लोत्र गेप्तु हना यो, कसम जाप्तु हना यो, लेवी २७:२-२५; ब्यवस्था २३:२२; न्यायाधीस ११:३५; उपदेसक ५:३,४; गन्ती ६:१-२१ 4 मिनु मेको आ आफोमी आ लोत्र नेशा यो सिक्सी पा बाक्त हना, मेको आ गेशो लोत्र बाक्त हना यो कसम बाक्त हना यो लीब। 5 तन्न आ आफोमी मेको नेना नाक्ती ‘मेको मदुम्ब’ दंत हना, मेको आ लोत्र गेशो नु आ कसम जशो मलीब। मेको आ आफोमी मदुम्ब देतीके परमप्रभु यावेमी मेको आ पाप क्याम्ब।

6 मिनु मेकोम कसम जशो बाक्त हना यो, ममिम्थु लोत्र गेवा नोले आ ग्युंवे दुम्त हना, 7 मिनु आ वोंइशेमी मेको नेशा यो सिक्सी पा बाक्त हना, मेको आ गेशो लोत्र बाक्त हना यो कसम बाक्त हना यो मेको लीब। 8 तन्न मेको आ वोंइशेमी मेको लोत्र नेना नाक्ती मेको कली ‘मदुम्ब’ दंत हना, मेको आ जशो कसम नु आ ममिम्थु गेशो लोत्र मलीब। मिनु परमप्रभु यावेमी मेको आ पाप क्याम्ब।

9 आ वोंइश बेक्शो नु आ वोंइशेमी प्रोंइशो मीश मुरुमी कसम जाप्तु हना, मेको लीब। 10 सुइ मीश मुरुमी आ वोंइश आ खिम बाक्शा, लोत्र गेप्तु हना, कसम जाप्तु हना, 11 मिनु आ वोंइशेमी मेको नेशा यो सिक्सी पा बाक्त हना, मेको आ गेशो लोत्र बाक्त हना यो, कसम बाक्त हना यो, मेको लीब। येरमीया ४४:१९, २५ 12 तन्न आ वोंइशेमी मेको नेशा ‘मदुम्ब’ दंत हना, मेको आ गेशो लोत्र डा कसम मलीब। आ वोंइशेमी मेको आ गेशो लोत्र क्याम्शो बाक्त। मिनु परमप्रभु यावेमी मेको मीश मुर आ पाप क्याम्ब। 13 आ वोंइशेमी आ मीश आ मारेइ लोत्र गेशो, आ मारेइ कसम जशो पचा गेने नु क्याम्ने चाप्ब। 14 तन्न मेको आ वोंइशेमी मेको नेशा यो नाक्ती कित कित सिक्सी पा बाक्त हना, मेकोमी आ कसम जशो नु आ गेशो लोत्र पचा गेशो बाक्ब। 15 तन्न मेकोमी नेना आ नाक्ती का निक्शी नोले ‘मेको मदुम्ब’ दंत हना, मेकोमी आ मीश आ तशो दोस कुरचा माल्ब” दंत।

16 एको वोंइश मीश नु आ आम आफ आस खिम बाक्शो मीश आल आ पर्बम फुल्लुम मुशा ब्रेक्शो लोत्र एको बाक्ब। एको लोत्र परमप्रभु यावेमी मोसा कली अरेशो बाक्ब।

31

मिदयान डा मुर आन कली ग्राशो

1 मिनु परमप्रभु यावेमी मोसा कली 2 “इस्राएली आन पर्बम गे मिदयान डा मुर आन कली क्येक्क लेत्तीमी। मेको आ नोले गे बेक्नेवे” दंत। 3 मिनु मोसामी मुर आन कली “इन लडाइ पाइब आन दाते डा मिदयान नु लडाइ पचा कली नु परमप्रभु यावेमी मेको आन कली क्येक्क लेत्चा कली इन मुर आन कली ठीक पने। 4 गे इस्राएली आन थर थर नेल्ल रे हजार का का मुर लडाइ पचा कली सोइक्तीने” दंत। 5 मोपतीके इस्राएली आन शुश मुर रे थर थर रे हजार का का पा, १२ हजार लडाइ पाइब मुर या कुरशा ठीक दुम्तेक्म। 6 मिनु मोसामी थर नेल्ल रे हजार का का मुर आन कली लडाइम सोइक्ताक्मी। मिनु मेकोपुकी नु चढेब एलाजर आ तौ फिनेहास यो सोइक्ताक्व। मेकोमी परमप्रभु यावे आ ताम्बु डा माल्शो नु लडाइ डा तुराही ताप्तीक कुरशो बाक्त। गन्ती १०:२ 7 परमप्रभु यावेमी मोसा कली अरेशो खोदेशो पा मेकोपुकीम मिदयान डा मुर नु लडाइ पाप्तेक्म। मिनु मेको आन वोंइश मुर नेल्ल आन कली साइक्तेक्म। ब्यवस्था २०:१३ 8 मेकोपुकीमी मिदयान डा ५ जना पिप एवी, रेकेम, सुर, हुर नु रेबा आन कली साइक्तेक्म। मिनु मेको नु बाक्ब अरु मुर यो साइक्तेक्म। मिनु बेओर आ तौ बालाम कली यो तरवारमी साइक्तेक्म। यहोसु १३:२१-२२; गन्ती २२:५ 9 मिनु इस्राएलीपुकीम मिदयान डा मीश मुरपुकी नु आल ब्रेप्च ग्याइक्तेक्म। मेको आन बी ब्यफ, क्यारश भेडा नु आन शोंप नेल्ल लाइक्तेक्म। 10 मिनु मेको आन बाक्शो सहर नेल्ल नु मेको आन ताम्बु नेल्ल क्रोइक्तेक्म। 11 मेको आन ग्राशो मुर, बी ब्यफ, क्यारश भेडा, नु शोंप नेल्ल लाइक्ता गाक्तेक्म। 12 मिनु यरीको आ आइक्ची हांबु यर्दन खोला आ शुंडचीम मोआब डा दिंममी बाक्शो ताम्बुम मोसा, चढेब एलाजर नु इस्राएली नेल्ल आन डोंइती चाक्तेक्म।

13 मिनु मोसा, चढेब एलाजर नु मेको आन दाते डा ठेयब मुर नेल्ल मेको आन कली ग्रुम्थ, लाङगा गूतेक्म। 14 मिनु मोसामी लडाइ रे ग्राशा, लेशशा जाक्शो हजार का नु सहे का डा कप्तान आन कली तशा गाइक्ताक्व। 15 मिनु मोसाम मेको आन कली “मार गे मीश मुर नेल्ल आन कली सेसीन प्रोंइनी? 16 एको मीश मुरपुकीमी बालाम आ देशो पशा,

इस्राएली आन कली पेओरम परमप्रभु यावे कली मरिम्शो पपाइशो बाक्तेकम। मोपतीके परमप्रभु यावे आ मुर आन दातेमी मुर साइकब रोइ गूत। गन्ती २५:१-३; प्रकाश २:१४ 17 मोपतीके वोंइश आल नेल्ल वोंइश मुर नु बाक्शो मीश मुर नेल्ल आन कली सतीन। न्यायाधीस २१:११-१२ 18 तन्न वोंइश मुर नु मबाक्शो मीश आल नेल्ल चहिं इन कली वोंइसीन।

19 गेपुकी सु सुम मुर साइशो बाक्नी नु बेक्शो मुर आन कली थिशो बाक्नी मेको नेल्ल ७ नाक्त सम्म इन बाक्तीक आ लाडगाम बाक्कीन। मिनु सां नाक्त नु ७ नाक्ती गेपुकीमी इन कली ग्रांग्रा मदिशो सेल्सीशा, इन ग्याइशो आन कली यो ग्रांग्रा मदिशो सेलीन। गन्ती १९:११-२० 20 गेपुकीम वा नेल्ले, कुशुल के मार मार, क्यारश आ चां के सेल्शो नु शी के मार मार नेल्ल ग्रांग्रा मदिशो सेलीन” देत।

21 मिनु चढेब एलाजरमी लडाइम लाइब मुर नेल्ल आन कली “परमप्रभु यावेमी मोसा कली फुल्लुम मुशा ब्रेक्शो आ अरेशो लोव्र मार बाक्त देशा हना, 22 ‘सुन, चांदी, कांसा, फलाम, टीन नु सिसा, 23 मीम मनेक्ब मारेइ मारेइ थोव्रक मीम क्रोइशशा, ग्रांग्रा मदिशो दुम्ब। मीम नेक्चा डा थोव्रक चहिं ग्रांग्रा मदिशो दुम्तीक ब्वाक्कुमी ग्रांग्रा मदिशो सेल्ने चाप्नीमी। 24 मिनु ७ नाक्ती गेपुकीमी इन वा मुरचा माल्नीनी। मिनु गेपुकी ग्रांग्रा मदिशो दुम्नीनी। मेको नोले गे इन बाक्तीके ओव्रने चाप्नीनी” देत।

लडाइम रोइशो मार मार

25 मिनु परमप्रभु यावेमी मोसा कली 26 “गे, चढेब एलाजर नु मुर आन थर डा ठेयब मुरपुकीम ‘ग्याइशो मुर नु बी ब्यफ, क्यारश भेडा आन कली हिक्शा ब्रेक्चा माल्नीनी। 27 मेको नेल्ल के भाग निक्शी सेलीन। भाग का लडाइम लाइब आन कली नु भाग का अर्को मुर नेल्ल आन कली बाक्ब। यहोसु २२:८; १सामुएल ३०:२४-२५ 28 लडाइम लाइब मुर आन भाग रे मुर, बी ब्यफ, गधा नु क्यारश भेडा ५ सहे रे का परमप्रभु यावे कली गेचा माल्नीनी। 29 मेको लडाइ पाइब आन भाग रे ताक्शा, चढेब एलाजरमी परमप्रभु यावे कली चढेचा माल्ब। 30 मिनु इस्राएली आन भाग रे मुर, बी ब्यफ, गधा नु क्यारश भेडा ५० रे का ताक्शा, परमप्रभु यावे आ ताम्बुम गेय पाइब लेवी आ थर डा मुर आन कली गेचा माल्नीनी’ देनो” देत।

31 मिनु परमप्रभु यावेमी मोसा कली अरेशो खोदेशो पा मोसा नु चढेब एलाजरमी पास्ताक्स। 32 मेको लडाइ पाइबपुकीमी रोइशो गिश बाक्तेकम देशा हना, क्यारश भेडा ६ लाख ७५ हजार 33 बी ब्यफ ७२ हजार 34 गधा ६१ हजार 35 वोंइश मुर नु मबाक्शो मीश आलपुकी ३२ हजार जना बाक्तेकम। 36 मेको लडाइम लाइब आन भाग गिश बाक्तेकम देशा हना, क्यारश भेडा ३ लाख ३७ हजार ५ सहे, 37 मेको रे पा ६ सहे ७५ ओटा परमप्रभु यावे कली गेशो बाक्तेकम। 38 बी ब्यफ ३६ हजार बाक्तेकम। मेको रे पा ७२ ओटा बी ब्यफ परमप्रभु यावे कली गेशो बाक्तेकम। 39 गधा ३० हजार ५ सहे बाक्तेकम। मेको रे पा ६१ ओटा गधा परमप्रभु यावे कली गेशो बाक्तेकम। 40 मिनु मीश आल १६ हजार जना बाक्तेकम। मेको रे पा ३२ जना परमप्रभु यावे कली गेशो बाक्तेकम। 41 परमप्रभु यावेमी मोसा कली देशो खोदेशो पा मोसामी परमप्रभु यावे कली गेशो भाग चढेब एलाजर कली गेपु।

42 मोसामी लडाइम लाइब मुर रे योक्शा अर्को इस्राएली आन कली गेशो, 43 क्यारश भेडा लाख सां ३७ हजार ५ सहे बाक्तेकम, 44 बी ब्यफ ३६ हजार बाक्तेकम, 45 गधा ३० हजार ५ सहे बाक्तेकम, 46 नु मीश आल १६ हजार जना बाक्तेकम। 47 परमप्रभु यावेमी अरेशो खोदेशो पा मोसामी इस्राएली आन भाग रे मुर नु बी ब्यफ, क्यारश भेडा हिक्शा, ५०, ५० रे का का गुंडशा परमप्रभु यावे आ बाक्तीकेमी गेय पाइब लेवी आ थर डा मुर आन कली गेपु।

48 मिनु लडाइ पाइब आन हजार का नु सहे का डा कप्तान मोसा आ बाक्तीके जाक्तेकम। 49 मिनु मेकोपुकीमी मोसा कली “इन गेय पाइब, गोपुकीमी आंइ लडाइ पाइब आन कली हिक्तक। मिनु आंइ के मुर का यो मजाम्शो बाक्नीम। 50 मिनु गो नेल्ल आंइ थिशो सुन के गहाना, बाला, छाप थोक्तीक औंठी, नचे नु साडलीपुकी परमप्रभु यावे कली चढेशा, आंइ पर्वम पाप क्याम्तीक गेय पचा, दे चाक्शा जाक्ताक्क” देतेकम। न्यायाधीस ८:२४-२६

51 मिनु मोसा नु चढेब एलाजरमी मेको आन चाक्शो सुन के गहाना नेल्ल ताक्ताक्से। 52 मिनु हजार, हजार डा कप्तान नु सहे, सहे डा कप्तान आन चाक्शो परमप्रभु यावे कली चढेशो सुन १६ हजार ७ सहे ५० शेकेल बाक्तेकम। शेकेल का ११.५ ग्राम बाक्ब। 53 लडाइम लाइब आन रोइशो मार मार आंम आंमा लांइसीशो बाक्तेकम। 54 मिनु मोसा नु चढेब एलाजरमी हजार का, हजार का, नु सहे का, सहे का मुर आन कप्तानपुकीमी चाक्शो सुन ताक्शा, परमप्रभु यावे आ गुम्तीक ताम्बुम वोइक्ताक्स। मेको परमप्रभु यावे आ डोंइती इस्राएली आन कली मिम्पाइक्चा कली वोइक्ताक्स। प्रस्थान ३०:१२-१६

32

रूबेन नु गाद आस खिं खिं डा मुर
ब्यवस्था ३:१२-२२

1 मिनू रूबेन आ थर डा मुर नु गाद आ थर डा मुर आन के शुश बी ब्यफ बाक्तेक्म। मिनू मेकोपुकीम याजेर नु गिलादमी रिम्शो योव्रतीक ताम्तेक्म। 2 मिनू गाद आ थर डा मुर नु रूबेन आ थर डा मुरुमी मोसा, चढेब एलाजर नु ग्रुम्तीक डा ठेयब मुर आन बाक्तीक जाक्शा 3 “अतारोथ, दीबोन, याजेर, निम्ना, हेसबोन, एलेआले, सेबाम, नेबो नु बेओन, 4 परमप्रभु यावेमी मेको रागी इस्राएली आन डोंइती खतम पोक्शो बाक्त। मेको रागी बी ब्यफ योव्रचा कली रिम्शो बाक्ब। मिनू इन गेय पाइब, गोपुकी नु बी ब्यफ यो बाक्नीम। 5 गे आंइ कली दाक्ताक्नी हना, एको रागी आंइ कली गेकी। आंइ कली यर्दन आइक्ची हांबु मलाइक्की” दैतेक्म।

6 मिनू मोसामी गाद आ थर डा मुर नु रूबेन आ थर डा मुर आन कली “इन लोकबपुकी एर लडाइम लमानु, गेपुकी चहिं एक बाक्नीनी? 7 मारदे गे परमप्रभु यावे आ गेशो आइक्ची हांबु डा रागीम लचा कली इस्राएली आन थुं क्याल्नीनी? 8 गो इन आफ आन कली कादेश-बारनेआ रे एको रागी क्यारी पथ सोइक्तुनु, मेकोपुकीमी यो इन खोदेशो पशो बाक्तेक्म। गन्ती १३:- 9 मिनू मेकोपुकी एश्कोल डा खोला लशा, एको रागी ताम्तेक्म। मिनू परमप्रभु यावेमी गेशो रागीम मलचा, दे इस्राएली आन थुं क्याल्शो बाक्तेक्म। 10 मिनू मेको नाक्ती परमप्रभु यावे गाइक्ताक्व। मिनू मेकोमी कसम जशा 11 ‘इजीप्त रे जाक्शो २० बर्स गाप्शो नु मेको क्येडा लाक्शो सुइ मेको अब्राहाम, इसहाक नु याकूब नु कसम जशो रागी ओव्रचा मताइनीम। मारदे हना आं कली मटीयीमी। गन्ती १४:२२-३८; गन्ती २६:६५ 12 केनीज्जी यपुन्ने आ तौ कालेब नु नून आ तौ यहोसु ला ओव्रचा ताइनीस। मारदे हना मेको निक्शीमी थमा पा आं नोले खोइक्तीस्सी’ दे कसम जाप्तु” दे मोसामी दैत। गन्ती १४:७-९; यहोसु १४:६-१५ 13 मिनू मोसामी “परमप्रभु यावे इस्राएली आन पर्बम गाइक्ताक्व। मिनू मेकोमी मेको आन कली ४० बर्स सम्म गोरशो रागीम हिरपाइक्तीमी। परमप्रभु यावे आ डोंइती मरिम्शो पाइब मबेक्म सम्म मोदेशो पाप्तु। 14 मिनू मुल गे, पाप पाइबपुकी, परमप्रभु यावेमी इस्राएल आ पर्बम गाइशो बाक्त। मिनू गेपुकीमी चिनु तेम्शो बाक्नीनी। 15 गेपुकीम मेको आ नोले खोइक्ने मबिस्साक्नी हना, मेकोमी एको मुर नेल्ल आन कली एको गोरशो रागीमीन प्रोंइब। मिनू गे मेको मुर नेल्ल आन कली खतम सेल्ब दुम्नीनी” दे माइक्तीमी।

16 मिनू मेकोपुकी मोसा आ नेक्था जाक्शा “गो आंइ भेडा आन कली गोठ नु आंइ आल आन कली सहर सेल्चा दाक्नीकी। 17 तन्न गोपुकी चहिं इस्राएली आन कली मेको आन बाक्तीकेमी मचाक्दीशो सम्म मेको आन डोंइडोंइती लडाइ पा लाइनीकी। मेना आंइ मीशपुकी नु आंइ आलपुकी चहिं एको रागी डा मुर आन रे मारेइ पाइक्चा मपुंडसीथु, मेको सहर डा गारो आगाम बाक्नीम। 18 इस्राएल डा मुर नेल्लेमी आन योव्रशो रागी मतामे सम्म गो आंइ खिं मलेत्नीकी। 19 गोपुकीमी यर्दन खोला आ आइक्ची हांबु नु मेको क्येडा एर गे रागी मताक्नीकी। मारदे हना, आंइ भाग यर्दन ओथ हांबु पूर्ब गे दुम्शो बाक्ब” दैतेक्म। यहोसु १३:८

20 मिनू मोसामी मेको आन कली “दुम्ब। गेपुकी परमप्रभु यावे आ डोंइती लडाइम लाइनीनी हना, यहोसु १:१२-१५ 21 नु परमप्रभु यावेमी आ जोरी सत्रु आन कली खेरशा मेको रागी मफुवा सम्म गेपुकी परमप्रभु यावे आ डोंइती लडाइ पा यर्दन आइक्ची हांबु लाइतीनी हना, 22 मिनू मेको रागी परमप्रभु यावे आ डोंइती ग्रानी नोले, गे लेन्ने चाप्नीनी। मिनू इन पुंइशो रागी परमप्रभु यावे आ डोंइती इन के दुम्ब।

23 तन्न गेपुकीम मो मपाइतीनी हना, परमप्रभु यावे आ डोंइती पाप पाइनीनी। मिनू इन पाप थमा पा राइनीनी। 24 गेपुकी इन मीश नु आल आन कली सहर नु इन बी ब्यफ, क्यारश भेडा आन कली गोठ सेलीन। तन्न इन गेशो लोव्र खाप्चा माल्नीनी” दैत।

25 मिनू गाद नु रूबेन आस थर डा मुरपुकीमी मोसा कली “इन गेय पाइब, गोपुकी इन अरेशो पाइनीकी। 26 आंइ आलपुकी, आंइ मीशपुकी, आंइ बी ब्यफ, क्यारश भेडा नेल्ल एको गिलाद सहरमी बाक्नीम। 27 तन्न इन गेय पाइब, गोपुकी इन अरेशो खोदेशो पा परमप्रभु यावे आ डोंइती लडाइ पचा कली या कुरशा लाइनीकी” दैतेक्म।

28 मिनू मोसामी मेको आन पर्बम चढेब एलाजर, नून आ तौ यहोसु नु इस्राएली आन थर थर डा ठेयब मुर आन कली अरेम्तीमी। 29 मिनू मोसाम मेको आन कली “गाद नु रूबेन आस थर डा मुर गेपुकी नु या कुरशा, परमप्रभु यावे आ डोंइती लडाइ पा यर्दन आइक्ची हांबु लाम्तेक्म हना, नु मेको रागी इन गुइम दुम नोले, गेपुकीमी गिलाद रागी मेको

आन कली गेचा माल्नीनी। 30 तन्न मेकोपुकी या कुरशा लडाइ पा गोपुकी नु यर्दन आइक्ची हांबु लने मबिस्साक्म हना, मेकोपुकी इन दातेमी कनान रागीमीन आन रागी तचा माल्नीम” दे माइक्तीमी।

31 मिनु गाद नु रूबेन आस थर डा मुरपुकीमी “परमप्रभु यावेमी इन गेय पाइब, आंइ कली मार देंमे मेको पाइनीकी। 32 गोपुकी या कुरशा परमप्रभु यावे आ डोंइती आइक्ची हांबु कनान रागी लाइनीकी। तन्न आंइ योवशो रागी यर्दन ओंथ हांबुमी बाक्ल” देंतेक्म।

33 मिनु मोसामी गाद आ थर, रूबेन आ थर नु योसेफ आ तौ मनस्से आ उइक्थ थर डा मुर आन कली एमोरी आन पिप सीहोन आ राज्य नु बाशान डा पिप ओग आ राज्य, मेको रागी नु आ एर ओंथ डा सहर नेल्ल गेम्तीमी। यहोसु १३:१५-३२ 34 मिनु गाद आ थर डा मुरपुकीमी दीबोन, अतारोथ, आरोएर, 35 अत्रोथ-शोफान, याजेर, योग-बेहा, 36 बेथ-निम्रा, बेथ-हारान नेल्ल गारोम हिरशो सहर सेल्लेक्म। मिनु भेडा आन कली गोठ यो सेल्लेक्म। 37 मिनु रूबेन आ थर डा मुरपुकीमी हेशबोन, एलेआले नु किरयथ-थाइम, 38 नेबो, बाल-मेओन नु सिब्मा लेंशा सेल्लेक्म। मिनु मेकोपुकीमी आन लेंशा सेल्लो सहर कली नक नें वोइक्तेक्म।

39 मनस्से आ तौ माकीर आ चच युइ गिलादम लशा, मेको आन के सेल्लशा, मेकेर बाक्ब एमोरी आन कली खेरतेक्म। 40 मोपतीके मोसामी मनस्से आ तौ माकीर आ चच युइ आन कली गिलाद गेप्तु। मिनु मेकोपुकी मेकेर बाक्तेक्म। ब्यवस्था ३:१४; न्यायाधीस १०:३-४ 41 मनस्से आ तौ याइर लशा, मेकेर डा गाउं आंम के सेल्लु। मिनु मेको नेल्ल आन नें हव्वोथ-याइर वोइक्तु। 42 मिनु नोबाह लशा केनाथ नु मेको आ गाउंपुकी आंम के सेल्लु। मिनु मेको नेल्ल आन नें आ नें रे पा नोबाह वोइक्तु।

33

इस्राएली आन गाक्शो लां

1 मिनु इस्राएली लडाइ पाइब खोदेशो पा इजीप्त रे हुल हुल पा गाक्तेक्म। मोसा नु हारून मेको आन लां कोइब बाक्ताक्स। 2 मिनु मोसामी परमप्रभु यावेमी देशो खोदेशो पा ते ते लचा माल्बा, नेल्ल ब्रेक्ताक्व। मिनु आन गाक्शो लां डा रागी नु सहर तेको तेको बाक्तेक्म देशा हना, 3 मेकोपुकी डोंइती डा महिना डा १५ नाक्ती रामेसेस रे गाक्चा गोम्तेक्म। मिनु इजीप्ती नेल्ल आन डोंइती काइ महिंथु पास्सा चाड आ दीसा नाक्ती गाक्चा गोम्तेक्म। प्रस्थान १:११; प्रस्थान १२:२,६; प्रस्थान ३:१९ 4 मेना इजीप्तीपुकीमी परमप्रभु यावेमी साइशो आन डोंइती जरमेशो तौ आन कली थिम्शो बाक्तेक्म। मिनु परमप्रभु यावेमी मेको आन देवी देवता आन कली यो निसाफ पशो बाक्त।

5 मिनु इस्राएलीपुकी रामेसेस रे गाक्शा, सुक्कोथ सहर जाक्दीशशा बाक्तीके सेल्लशा बाक्तेक्म। प्रस्थान १२:३७ 6 मिनु सुक्कोथ सहर रे गाक्शा, गोरशो रागी आ सुर डा एथाम सहरम बाक्तीके सेल्लशा बाक्तेक्म। प्रस्थान १३:२० 7 मिनु एथाम रे गाक्शा, बाल-सेफोन गे बाक्शो पी-हहीरोथ लेत्तेक्म। मिनु मिगदोल आ नेक्था बाक्तीके सेल्लशा बाक्तेक्म। प्रस्थान १४:२ 8 मिनु पी-हहीरोथ रे गाक्शा, समुन्द्र आ दाते रे पा गाक्शा, गोरशो रागीम जाक्तेक्म। मेकोपुकी नाक्त सां डा लां एथाम डा गोरशो रागीम गाक्शा, माराह माइक्तीकेमी बाक्तीके सेल्लशा बाक्तेक्म। प्रस्थान १४:२२; प्रस्थान १५:२३

9 मिनु माराह रे गाक्शा, एलीम जाक्तेक्म। एलीमम १२ ओटा ब्वाक्कु बुक्तीके नु ७० ओटा खजूर रवा बाक्तेक्म। मिनु मेकेर बाक्तीके सेल्लशा बाक्तेक्म। प्रस्थान १५:२७ 10 मिनु मेकोपुकी एलीम रे गाक्शा, लल समुन्द्र आ नेक्था बाक्तीके सेल्लशा बाक्तेक्म। 11 मिनु मेकोपुकी लल समुन्द्र रे गाक्शा, सीन माइशो गोरशो रागीम बाक्तीके सेल्लशा बाक्तेक्म। प्रस्थान १६:१ 12 मिनु सीन माइशो गोरशो रागी रे गाक्शा, दोफकामी बाक्तीके सेल्लशा बाक्तेक्म। 13 मिनु दोफका रे गाक्शा, आलुशमी बाक्तीके सेल्लशा बाक्तेक्म। 14 मिनु आलुश रे गाक्शा, रेफीदीममी बाक्तीके सेल्लशा बाक्तेक्म। मेकेर मुर आन कली तूतीक ब्वाक्कु मबा। प्रस्थान १७:१ 15 मिनु रेफीदीम रे गाक्शा, सीनै डा गोरशो रागीम बाक्तीक सेल्लशा बाक्तेक्म। 16 मिनु सीनै डा गोरशो रागी रे गाक्शा, किब्रोथ-हत्तावामी बाक्तीक सेल्लशा बाक्तेक्म। गन्ती ११:३४ 17 मिनु किब्रोथ-हत्तावा रे गाक्शा, हसेरोथमी बाक्तीक सेल्लशा बाक्तेक्म। 18 मिनु हसेरोथ रे गाक्शा, रिथ्माहमी बाक्तीके सेल्लशा बाक्तेक्म। गन्ती १२:१६ 19 मिनु रिथ्माह रे गाक्शा, रिम्मोन-पेरेसमी बाक्तीके सेल्लशा बाक्तेक्म। 20 मिनु रिम्मोन-पेरेस रे गाक्शा, लिब्नामी बाक्तीके सेल्लशा बाक्तेक्म। 21 मिनु लिब्ना रे गाक्शा, रिस्साहमी बाक्तीके सेल्लशा बाक्तेक्म। 22 मिनु रिस्साह रे गाक्शा, केहेलाथामी बाक्तीके सेल्लशा बाक्तेक्म। 23 मिनु केहेलाथा रे गाक्शा, शेफेर डांडा आ नेक्था बाक्तीके सेल्लशा बाक्तेक्म। 24 मिनु शेफेर डांडा रे गाक्शा, हरादामी बाक्तीके सेल्लशा

बाक्तेकम्। 25 मिनु हरादा रे गाक्शा, मखेलोथमी बाक्तीके सेल्शा बाक्तेकम्। 26 मिनु मखेलोथ रे गाक्शा, तहाथमी बाक्तीके सेल्शा बाक्तेकम्। 27 मिनु तहाथ रे गाक्शा, तेराहमी बाक्तीक सेल्शा बाक्तेकम्। 28 मिनु तेराह रे गाक्शा, मिथ्कामी बाक्तीक सेल्शा बाक्तेकम्। 29 मिनु मिथ्का रे गाक्शा, हश्मोनाहमी बाक्तीक सेल्शा बाक्तेकम्। 30 मिनु हश्मोनाह रे गाक्शा, मोसेरोथमी बाक्तीक सेल्शा बाक्तेकम्। 31 मिनु मोसेरोथ रे गाक्शा, बेने-याकानमी बाक्तीक सेल्शा बाक्तेकम्। ब्यवस्था १०:६-७ 32 मिनु बेने-याकान रे गाक्शा, होर-हगीद-गादमी बाक्तीक सेल्शा बाक्तेकम्। 33 मिनु होर-हगीद-गाद रे गाक्शा, योत्बाथाहमी बाक्तीक सेल्शा बाक्तेकम्। 34 मिनु योत्बाथाह रे गाक्शा, अब्रोनाहमी बाक्तीक सेल्शा बाक्तेकम्। 35 मिनु अब्रोनाह रे गाक्शा, एस्योन-गेबेरमी बाक्तीक सेल्शा बाक्तेकम्। १राजा ९:२६; १राजा २२:४९ 36 मिनु एस्योन-गेबेर रे गाक्शा, जीन डा गोरशो रागीम बाक्शा, कादेशमी बाक्तीक सेल्शा बाक्तेकम्। गन्ती २०:१ 37 मिनु कादेश रे गाक्शा, एदोम रागी आ सांदमी बाक्शो होर डांडा आ नेक्था बाक्तीक सेल्शा बाक्तेकम्। गन्ती २०:२२-२९; ब्यवस्था ३४:१-१२

38 मिनु परमप्रभु यावे आ देशो खोदेशो पा, चढेब हारून होर डांडा डोइश्शा लत। मिनु मेकेर बेक्त। मेना इस्राएली इजीप्त रागी रे गूशो ४० बर्स ५ महिना डा डोंइती डा नाक्ती बाक्त। 39 हारून होर डांडा तार बेक्मेनु, हारून सहे का २३ बर्स दुम्शो बाक्त।

40 कनान डा नेगेब देशो रागीम हुकुम पाइब पिप आरादमी इस्राएली पिन पिन पाइश्शो बाक्नीम, देशो लोत्र नेंतु। गन्ती २१:१

41 मिनु मेकोपुकी होर डांडा रे गाक्शा, सल्मोनामी बाक्तीक सेल्शा बाक्तेकम्। 42 मिनु सल्मोना रे गाक्शा, पुनोनमी बाक्तीक सेल्शा बाक्तेकम्। 43 मिनु पुनोन रे गाक्शा, ओबोथमी बाक्तीक सेल्शा बाक्तेकम्। गन्ती २१:१०-११ 44 मिनु ओबोथ रे गाक्शा, मोआब डा सांदमी बाक्शो इये-अबारीममी बाक्तीक सेल्शा बाक्तेकम्। 45 मिनु इयीम रे गाक्शा, दीबोन-गादमी बाक्तीक सेल्शा बाक्तेकम्। गन्ती ३२:३४ 46 मिनु दीबोन-गाद रे गाक्शा, अल्मोन-दिब्लाथाइममी बाक्तीक सेल्शा बाक्तेकम्। 47 मिनु अल्मोन-दिब्लाथाइम रे गाक्शा, नेबो सहर आ डोंइती अबारीम डा पहाडम बाक्तीक सेल्शा बाक्तेकम्। 48 मिनु अबारीम डा पहाड रे गाक्शा, यर्दन आ शुंइचीमी बाक्शो यरीको रे आइक्ची हांबु मोआब डा दिंममी बाक्तीक सेल्शा बाक्तेकम्। गन्ती २२:१; ब्यवस्था ३२:४९ 49 मिनु यर्दन खोला आ शुंइच डा मोआब डा दिंममी बेथ-येशीमोथ रे पा आबेल-शितीम सम्म बाक्तीक सेल्शा बाक्तेकम्। गन्ती २५:१

कनानी आन कली गुंइचा, दे अरेशो

50 मिनु यरीको आ आइक्ची हांबु यर्दन खोला आ नेक्था मोआब डा दिंममी परमप्रभु यावेमी मोसा कली 51 “गे इस्राएली आन कली ‘गे यर्दन खोला शोक्शा, कनान रागीमी जाक्दीन्नीनु, प्रस्थान २३:२३-२४; प्रस्थान ३४:१२-१४ 52 मेको रागी डा मुर नेल्ल आन कली मेको रागी रे खेरचा माल्नीनी। मिनु मेको आन मुशा सेल्शो नु कांसा के सेल्शो मूर्ति नेल्ल कली खतम पोक्कीन। मेको आन डांडा डा थानपुकी प्रेशशा खतम पोक्चा माल्नीनी। 53 गे मेको रागी इन के सेल्शा, मेक उइ बाक्कीन। मारदे हना गो मेको रागी इन कली गेता। 54 मिनु गे थर थर आन खिं खिं डा मुर आन कली हिक्शा, रागी योव्रशा, मेको रागी योक्सीन। शुश खिं पाइश्शो थर आन कली ठेयब रागी गेचा, शुश खिं मपाइश्शो थर आन कली आइक्च रागी गेचा माल्नीनी। सुका आ नें बाजीम कोंइबा, मेको मेको थर केन दुम्ब। इन किकी पिपी आन थर थर पा मेको रागी योक्कीन। गन्ती २६:५४-५५

55 तन्न गे मेको रागीम बाक्ब मुर आन कली इन डोंइती रे मखेरतीनी हना, मेको लीशो मुर इन मिक्चीम कसीडगर नु इन कोव्रखाम थोक्शो चू खोदेशो दुम्नीम। मिनु गे ते बाक्तीनी हना यो, मेकोपुकीमी इन कली श्येत गेनीम। प्रस्थान २३:३१-३३; यहोसु २३:१२-१३ 56 मिनु गो मेको आन कली मार पदुमी, दे मिम्शा बाक्डा, मेको इन कली पाइनुड’ दे माइक्मी” देंत।

34

कनान रागी डा सांद

1 मिनु परमप्रभु यावेमी मोसा कली 2 “इस्राएली आन कली ‘गे कनान रागी ओव्रनीनु, इन कली योक्शा गेशो रागी आ सांद तेको बाक्नीम देशा हना, इजीकीएल ४७:१३-२०; ब्यवस्था ३२:८ 3 इन दक्खिन डा रागी जीन डा गोरशो रागी रे एदोम सम्म बाक्ब। इन दक्खिन डा सांद हिक्सी समुन्द्र आ पूर्ब रे गोचा माल्ब। यहोसु १५:२-४ 4 मिनु अक्रब्बीम डा ग्येत्थ लतीक लां डा दक्खिन गे जीन गे लाइब। कादेश-बारनेआ आ दक्खिन सम्म जाक्दीत्चा माल्ब। मिनु नोले

हासार-अददार रे पा अज्मोन जाक्दीत्चा माल्ब। 5 मिनू नोले मेको सांद अज्मोन रे पा हिरशा, इजीप्त डा खोला सम्म जाक्दीशशा ठेयब समुन्द्र नुप्ब।

6 मिनू पच्छिम डा सांद ठेयब समुन्द्र बाक्ब। मेको ठेयब समुन्द्र आ शुंडच इन पच्छिम गे डा सांद बाक्ब।

7 मिनू इन उत्तर गे डा सांद ठेयब समुन्द्र रे होर डांडा सम्म फ्रेंचा माल्नीनी। 8 मिनू होर डांडा रे लेबो-हमाथ सम्म फ्रेंदीन। मिनू मेको सेदाद सम्म जाक्दीत्चा माल्ब। 9 मिनू नोले सिप्रोन सम्म जाक्दीत्चा माल्ब। मिनू हासार-एनानमी नुप्ब। मेको इन उत्तर गे डा सांद बाक्ब।

10 मिनू इन पूर्व डा सांद हासार-एनान रे शेफाम सम्म फ्रेंदीन। 11 मिनू शेफाम रे उइ बुष्शा ऐन डा पूर्व गे डा रिब्ला सम्म जाक्दीत्चा माल्ब। मिनू नोले मेको सांद बुष्शा, किन्नेरेथ समुन्द्र आ पूर्व डा शुंडच सम्म जाक्दीत्चा माल्ब। 12 मिनू मेको सांद यर्दन खोला रे पा हिक्सी समुन्द्र सम्म जाक्दीशशा नुप्ब। इन रागी आ एर ओंथ डा सांद एको बाक्नीम' दे माइक्मी” देंत।

13 मिनू मोसामी इस्राएली आन कली “परमप्रभु यावे आ अरेशो खोदेशो पा फेन्टे आप्शा ९ थर नु आधा थर आन कली गेशो रागी बाक्ब। 14 मारदे हना रूबेन आ थर डा खिं खिं डा मुर, गाद आ थर डा खिं खिं डा मुर नु मनस्से आ उइक्थ थर डा खिं खिं डा मुर आन भाग तने थुम्शो बाक्तेक्म। गन्ती ३२:२९-३३ 15 मेको निक्शी नु उइक्थ थर डा मुरपुकीमी यरीको ओंथ हांबु, यर्दन खोला आ पूर्व गे आन आन रागी तशो बाक्नीम” देंत।

16 मिनू परमप्रभु यावेमी मोसा कली 17 “इन कली रागी योक्शा गेब मुर आन नें मार बाक्नीस देशा हना, डोंडती मेको चढेब एलाजर नु नून आ तौ यहोसु बाक्नीस। यहोसु १४:१; ब्यवस्था १:३८ 18 मिनू गे थर थर डा मुर आन ठेयब मुर का का योव्रचा माल्नेवे। 19 मेको थर थर डा ठेयब मुर सु सु बाक्नीम देशा हना, यहूदा आ थर डा यपुन्ने आ तौ कालेब, गन्ती १३:६,३०

20 सिमियोन आ थर डा अम्मीहुद आ तौ शेमुएल, 21 बेन्यामीन आ थर डा किस्लोन आ तौ एलीदाद, 22 दान आ थर डा योग्ली आ तौ बुक्की, 23 योसेफ आ तौ मनस्से आ थर डा एफोद आ तौ हन्नीएल, 24 योसेफ आ तौ एफ्राइम आ थर डा शिफतान आ तौ केमुएल, 25 जबूलून आ थर डा पारनाक आ तौ एली-जाफान, 26 इस्साकार आ थर डा अज्जान आ तौ पाल्तीएल, 27 आशेर आ थर डा शेलोमी आ तौ अहीहुद, 28 नाप्ताली आ थर डा अम्मीहुद आ तौ पेदाहेल बाक्नीम। 29 मिनू मेको परमप्रभु यावेमी अरेशो इस्राएली आन कली कनान रागी योक्ब थर थर डा योव्रशो ठेयब मुर एको बाक्नीम” देंत।

35

लेवी थर डा मुर आन सहर

1 परमप्रभु यावेमी यरीको आ आइक्ची हांबु यर्दन खोला आ शुंडच मोआब डा दिंमम मोसा कली यहोसु २१:१-३ 2 “गे इस्राएल आन कली ‘गे इन आंम सेल्शो रागी रे लेवी आ थर डा मुर आन कली सहरपुकी गेचा माल्नीनी। मिनू मेको आन कली मेको सहर आन एर ओंथ बी ब्यफ, क्यारश भेडा योव्रतीके गेचा माल्नीनी। गन्ती १८:२०; लेवी २५:३२-३४ 3 मेको सहरपुकी मेको आन कली बाक्तीक दुम्नीम। बी ब्यफ, क्यारश भेडा योव्रतीक मेको आन बी ब्यफ, क्यारश भेडा आन कली दुम्ब।

4 मिनू गे लेवी आ थर डा मुर आन कली गेशो सहर मेर डा योव्रतीक मेको सहर आ गारो आ एर ओंथ रे हजार का कुबीत बाक्चा माल्ब। कुबीत का ०.५ मिटर बाक्ब। 5 गे सहर आ लाडगा पूर्व गे हजार निक्शी कुबीत, दक्खिन गे हजार निक्शी कुबीत, पच्छिम गे हजार निक्शी कुबीत नु उत्तर गे हजार निक्शी कुबीत पुक्चा माल्नीनी। मिनू सहर मेको आ दातेम बाक्चा माल्ब। मेको आन सहर डा योव्रतीके मेकोन बाक्नीम' देनो” देंत।

ब्रोंइशा बाक्तीक सहर

6 मिनू “गे लेवी आ थर डा मुर आन कली गेशो सहर रे ६ ओटा सहर चहिं ब्रोंइशा बाक्तीक सहर दुम्चा माल्नीम। गे मेकेर मुर साइक्ब मुर कली प्रोक्चा गेचा माल्नीनी। मेको नु तेम्शा ४२ ओटा सहर दुम्चा माल्नीम। प्रस्थान २१:१३ 7 गे लेवी थर डा मुर आन कली नेल्लेमी ४८ ओटा सहर नु मेको आन एर ओंथ डा योव्रतीक रू गेचा माल्नीनी। 8 मिनू ठेयब रागी तशो इस्राएली आन थर रे शुश सहर गेचा नु आइक्च रागी तशो इस्राएली आन थर रे का निक्शी सहर गेचा माल्नीनी। मेको थर थर डा मुरुमी आ योक्शा गेशो रागी गारचा डा पा लेवी थर डा मुर आन कली सहरपुकी गेचा माल्नीम, देंचा माल्नेवे” दे परमप्रभु यावेमी मोसा कली देंत। गन्ती २६:५४

9 मिनु परमप्रभु यावेमी लेंशा मोसा कली 10 “गे इस्राएली आन कली ‘गेपुकी यर्दन खोला शोकशा कनान रागी जाकदीन्नी नोले, 11 गे ब्रोंइशा बाक्तीक सहर योव्रचा माल्नीनी। मिनु मतुइक्थु, मुर साइक्तु हना, मेको मुर साइक्ब मुर मेकेर प्रोक्ने चाप्ब। 12 मेको सहरपुकी क्येक्क लेप्ब आन क्येडा ब्रोंइशा बाक्तीक सहर दुम्ब। मिनु मेको मुर साइक्ब मेको सहर डा मुर आन दातेमी निसाफ पचा पुंडसीचा डोंइती साइक्चा मपुंडसेक्ल।

13 मिनु इन योव्रशो ब्रोंइशा बाक्तीक सहर ६ ओटा दुम्चा माल्नीम। 14 गे यर्दन खोला आ ओंथ हांबुमी सां नु कनान रागीमी सां सहर ब्रोंइशा बाक्चा कली तिल्चा माल्नीनी। 15 मेको ६ ओटा सहर इस्राएली, आन दातेम बाक्ब अर्को रागी डा मुर नु लां गाक्ब मुर आन कली ब्रोंइशा बाक्तीक सहर दुम्ब। मोपा मतुइक्थु मुर साइक्ब मुर मेकेर प्रोक्शा लशा बाक्ने चाप्नीम।

मुर साइक्चा आ पर्बम ब्यवस्था १९:४-१३

16 सुइमी फलाम के मारेइमी आप्शा, मुर साइक्तु हना, मेको मुर साइक्ब बाक्ब। मेको मुर साइक्ब कली साइक्चान माल्ब। 17 सुइ मुरुमी मुर आन कली फुल्लु आप्शा साइक्तु हना, मेको मुर साइक्ब बाक्ब। मेको मुर साइक्ब कली साइक्चान माल्ब। 18 सुइमी मुर कली शीम तुप्शा साइक्तु हना, मेको मुर साइक्ब बाक्ब। मेको मुर साइक्ब कली साइक्चान माल्ब। 19 मेको क्येक्क लेप्बमी मेको मुर साइक्ब कली साइक्चा माल्ब। मेको कली गुमानुन, मेको कली साइक्चा माल्ब। 20 मिनु सुइमी मुर कली काइ मदाक्थु नेप्शा, मार मार आप्शा कि लांम बाप्शा साइक्तु हना, 21 गुइम तुप्शा साइक्तु हना, मेको मुर कली साइक्चा माल्ब। मेको मुर साइक्ब बाक्ब। मेको क्येक्क लेप्बमी मेको मुर साइक्ब कली गुमानु, मेको कली साइक्चा माल्ब।

22 तन्न सुइमी मुर कली मगाइक्थु, मतुइक्थु, चुशा तोक्तु हना, कि मारेइ थोव्रक आबानु मेको कली ख्रशा बेक्त हना, 23 मेको आ वारचमी ठेयब फुल्लु ग्याइक्तानु, आ गुइ रे दोक्शा ख्रशा बेक्त हना, 24 मेको सहर डा मुरपुकीम मेको मुर साइक्ब नु क्येक्क लेप्ब आस दातेमी निसाफ पचा माल्नीम। 25 मिनु मेको सहर डा मुरपुकीम मेको मुर साइक्ब कली क्येक्क लेप्ब आ गुइ रे प्रोंइचा माल्नीम। मिनु नोले सहर डा मुरपुकीमी मेको मुर साइक्ब ब्रोंइशा बाक्तीक सहर सोइक्चा माल्नीम। मिनु मेको मुर साइक्ब तेल लुक्शो ठेयब चढेब मबेक्म सम्म मेकेर बाक्चा माल्ब। लेवी २१:१० 26 तन्न मेको मुर साइक्ब मेको आ ब्रोंइशा बाक्तीक सहर रे गूत हना, 27 मिनु क्येक्क लेत्चा माल्ब मुरुमी मेको कली गुम्शा साइक्तु हना, मेको कली साइक्ब दोस मताइब। 28 मारदे हना मेको साइक्ब ठेयब चढेब मबेक्म सम्म मेको ब्रोंइशा बाक्तीक सहरम बाक्चा माल्ब। तन्न ठेयब चढेब बेक्म नोले ला मेको आ रू खिंम लेत्ने चाप्ब।

29 मिनु मेको गेना हना यो परमप्रभु यावेमी इन कली फुल्लुम मुशा ब्रेक्शो नु आ शेंशो लोव्र बाक्ब। मिनु गेपुकी ते बाक्तीनी हना यो, इन तौ चच युइ नेल्ल पाला डा मुरुमी पचा माल्नीम।

30 सुइम सुइ आन कली साइक्तु हना, मेको मुर साइक्ब कली सांक्छी आन लोव्र नेंशा ला साइक्चा माल्ब। तन्न सांक्छी का आ लोव्र नेंशा ला मेको कली मसाइक्चा। ब्यवस्था १७:६; ब्यवस्था १९:५ 31 गेपुकी साइक्चा पुंडसीब मुर प्रोंइचा कली मेको आ पा डा क्येट मताक्कीन। मेको मुर साइक्ब कली साइक्चा माल्ब। भजन संग्रह ४९:८-९ 32 ब्रोंइशा बाक्तीक सहरम प्रोक्शो मुर, ठेयब चढेब मबेक्थु, आ खिं रू लेत्चा गेचा कली गे क्येट मताक्कीन। ठेयब चढेब मबेक्म सम्म मेको आ खिं रूमी लेत्चा मताइब। 33 मिनु गेपुकीमी इन बाक्तीक रागी ग्रांग्रा दिशो मसेलीन। मारदे हना रागी हुशेम ग्रांग्रा दिशो सेल्ब। मिनु मेको ग्रांग्रा मदिशो सेल्ने मचाप्नीम। हुश खाक्श पोक्ब कली साइक्शा ला मेको रागी ग्रांग्रा मदिशो सेल्ने चाम्सीब। 34 गे इन बाक्शो रागी ग्रांग्रा दिशो मसेलीन। गो यो मेकेर बाक्नुड। मारदे हना गो परमप्रभु यावे इस्राएली आन दातेमी बाक्नुड’ दे इस्राएली आन कली देनो” देंत। लेवी १८:२४-२८; प्रस्थान २९:४५

36

सेलोफेहाद आ तमी आन थेरशो रू तशो गन्ती २७:१-११

1 योसेफ आ युइ, मनस्से आ चच माकीर आ तौ गिलाद आ खिं खिं डा योसेफ आ थर का डा ठेयब मुरपुकी, मोसा नु इस्राएली आन थर थर डा ठेयब मुर आन डोंइती जाक्तेक्म। 2 मिनु मेकोपुकीमी “परमप्रभु यावेमी आंइ होव्रप, इन कली इस्राएली आन कली रागी योक्शा गेचा, दे अरेशो बाक्त। मिनु आंइ लोक्ब सेलोफेहाद आ शोंप चहिं मेको आ

तमी आन कली गेचा माल्ब, दे परमप्रभु यावेमी अरेशो बाक्त। गन्ती २६:५५ ३ तन्न मेको मीश आलपुकीम इस्राएली आन अरु थर डा मुर नु ग्युंबे पाम्तेक्म हना, मेको आन शोंप वोंइश मुर आन शोंपोम तेम्सीब। मोपा मेको आन भाग आंइ किकी पिपी आन रागी रे जाम्शा लाइब। ४ मिनु प्रोंइतीक बर्स जाक्मेनु, मेको मीश मुर आन रू यो ग्युंबे पा लाइब मुर आन रूम तेम्सीब। मोपा गो आंइ थर रागी रे जाम्शा लाइब” देतेक्म। लेवी २५:१०-१३

५ मिनु परमप्रभु यावेमी मोसा कली अरेशो खोदेशो पा मोसामी इस्राएली आन कली “योसेफ आ तौ आन थर डा मुर आन देशो लोत्र थमा बाक्ब। ६ परमप्रभु यावेमी सेलोफेहाद आ तमी आन पर्बम अरेशो मार बाक्त देशा हना, मेकोपुकीमी आन दाक्शो वोंइश आल ग्युंबे पने चाप्नीम। तन्न आन आफ आ खिं खिं डा मुर नु ला ग्युंबे पने चाप्नीम। ७ मो दुम्मेनु इस्राएली आन रागी थर का रे अर्को थरम मयाक्सीब। मारदे हना इस्राएली नेल्ल आन किकी पिपी आन रागीम बाक्चा माल्नीम। ८ सुइ मीश आल आ आफ आ शोंप तशो बाक्त हना, मेकोमी आ आफ आ खिं खिं डा मुर का ग्युंबे पचा माल्ब। मोपा इस्राएली नेल्ले आन किकी पिपी आन थर डा रागी लीब। ९ मिनु इस्राएली आन रागी थर का रे अर्को थरम याक्चा मदुम्ब। मोपा इस्राएली नेल्ल आन आंम रागीम बाक्चा ताइनीम” देंत।

१० सेलोफेहाद आ तमीपुकीमी परमप्रभु यावेमी मोसा कली अरेशो खोदेशो पा पाम्तेक्म। ११ सेलोफेहाद आ तमीपुकी महलाह, तिरचा, होग्ला, मिल्का नु नोआहमी आन आफ आ लोक्ब आन तौपुकी नु ग्युंबे पाम्तेक्म। गन्ती २६:२९-३४ १२ मेकोपुकीमी योसेफ आ तौ मनस्से आ थर डा मुरपुकी नु ग्युंबे पाम्तेक्म। मोपा मेको आन शोंप आन थर नु आन आफ आ खिं खिं डा मुर नु लीत।

१३ एको परमप्रभु यावेमी मोसा कली शेंतीके नु ठीक पतीके लोत्र बाक्ब। मिनु मोसामी इस्राएली आन कली नेल्ल अरेशो बाक्ब। मेना मेकोपुकी यर्दन खोला आ शुंइच, मोआब डा दिंममी यरीको आ नेक्था बाक्तेक्म।

ब्यवस्था

ब्रेक्ब मुर: एको किताब यो मोसा आ ब्रेक्शो बाक्ब। मोसा परमप्रभु आ अरेशो लोव्र ब्रेक्ब नु कुम्सो सेल्ब बाक्त। ब्यवस्था ३१:९, २२, २४ मोसा बेक्म नोले अरु मुरपुकीम ब्रेक्शो बाक्तेक्म। का निक्शीम “यहोसुम ब्रेक्शो बाक्ब” देनीम। मोसामी डांडा डोइक्चा क्येडा डोंइती आंमा ब्रेक्शो बाक्ब, दे यो मिम्नीम।

गेना ब्रेक्शो: एको किताब इस्राएलीपुकी गोरशो रागीम हिरशा ४० बर्स ११ महिना डा डोंइती नाक्त रे ३० नाक्त सम्म डा ब्रेक्स बाक्ब। मोसामी आ बेक्चा क्येडा डोंइती ब्रेक्शो कि ब्रेक्पाइशो बाक्त।

मार ब्रेक्शो: एको किताब परमप्रभु आ अरेशो लोव्र लेंशा शेंतीक ला ममाइ, परमप्रभु आ देंशो नेल्ल टिचा आ पर्बम लोव्र बाक्ब। एको नेल्ल मोसा आ पशो लोव्र बाक्ब।

होरेब रे कादेश सम्म गाक्शो

1 मोसामी एको ब्रेक्शो लोव्र इस्राएली नेल्ल आन कली शेंशो बाक्ब। मिनु मेना मेकोपुकी सुफ माइशो दिंम आ ओंथ हांबुम बाक्तेक्म। मेको बाक्तीके अराबाहम, पारान, तोफेल, लाबान, हसेरोथ नु दी-साहाब आन दातेमी यर्दन खोला आइक्ची हांबु डा रागीम बाक्ब। 2 होरेब रे पा कादेश-बारनेआ सम्म, सेइर डा लां रे लचा कली ११ नाक्त माल्ब।

3 मिनु परमप्रभु यावेमी मोसा कली मार मार शेंदा, मेको मोसामी ४० बर्स नु ११ महिना डा डोंइती डा नाक्तीमी मेको इस्राएली नेल्ल आन कली शेंताक्ब। गन्ती ३३:३८ 4 डोंइती मेकोपुकीमी हेशबोन डा एमोरी आन पिप सीहोन नु अशतारोथ नु एट्रेइ सहरम बाक्ब बाशान डा पिप ओग नु लडाइ पा ग्रातेक्म। गन्ती २१:२१-३५ 5 मिनु यर्दन खोला आइक्ची हांबुम, मोआब रागीम बाक्शा, मोसामी परमप्रभु यावे आ अरेशो लोव्र शेंचा गोप्नु।

6 मिनु मोसामी “होरेब डांडाम बाक्शो परमप्रभु यावे, इं परमप्रभुमी ‘गेपुकी एको पहाडम शुश नाक्त बाक्तीनी। गन्ती १०:११-१२ 7 मुल गे गाक्चा गोने। कनानी आन रागी लने। एमोरी आन पहाड नु दिंम लने। मेको आ नेक्था डा अराबाह माइक्तीके यो लने। मेको पहाड बाक्ब। मेको शेफेलाह, नेगेब नु समुन्द्र आ नेक्था डा कनानी आन रागी बाक्ब। गे लेबानोन नु युफ्रेटीस माइशो ठेयब खोला सम्म लने’ देंत। 8 मिनु लेंशा परमप्रभु यावेमी ‘कोव्रडीन, मेको रागी इन डोंइती बाक्ब। मेकेर ओव्रशा, मेको रागी आंम के सेलीन। मारदे हना गो मेको रागी इन किकी पिपी अब्राहाम, इसहाक, याकूब नु आन चच युइ आन कली गेनुड’ दे कसम जाता” देंत। उत्पत्ती १२:७; गन्ती ११:१४

मोसामी निसाफ पाइब वोइशो

9 मिनु गो इन कली “गो आं का ला इन कली कोव्रने मचाप्नुड। प्रस्थान १८:१८ 10 मिनु परमप्रभु यावे, इन परमप्रभुमी इन कली शुश सेल्शा, गे मुल सरीड डा सोरुल खोदेंशो पा शुश दुम्शो बाक्नीनी। ब्यवस्था १०:२२; उत्पत्ती १५:५ 11 परमप्रभु यावे, इन किकी पिपी आन परमप्रभुमी इन कली का का पा हजार क्येडा शुश सेलल। आ देंशो खोदेंशो पा इन कली आसीक गेवल। 12 दोपा गो का ला इन श्येत तशा, इन जिशो खेशो नेल्ल गारपाइक्ने चाप्नुडा डा? 13 मिनु गे इन थर थर रे निप्स पाइशो, लोव्र रुब्ब नु मारेइ मारेइ तुइक्ब मुर योव्रडीन। मिनु गो मेको आन कली इन कली कोव्रब सेल्लुड। 14 मिनु गेपुकीमी आं कली ‘इन देंशो लोव्र रिम्शो बाक्ब’ देंतीनी। 15 मोपतीके गो इन थर डा निप्स पाइशो, तुइक्ब नु ठेयब मुरपुकी योव्रशा, इन कली कोव्रब सेल्ला। मिनु इन थर थर डा हजार का, सहे का, ५० नु १० जना मुर आन कली का का पा कोव्रब ठेयब मुरपुकी सेल्लाक्मी। आंम इन थर थर डा मुरपुकी यो योव्रताक्मी। प्रस्थान १८:२५ 16 मेना गो इन कली निसाफ पाइब आन कली ‘इन लोक्ब आन दातेमी जिशो खेशो रिम्शो पा नेंशा, ठीक पा निसाफ पने। इस्राएली नु रागी डा मुर जिशो यो नेल्ल आन कली ठीक पा निसाफ पने। लेवी १९:१५ 17 निसाफ पनीनु, मुर आन कुल मकोव्रडीन। गेपुकीमी आइक्च नु ठेयब मुर, नेल्ल आन लोव्र नेनीन। सुइ कली महिनीन। मारदे हना निसाफ परमप्रभु आ गुइमी बाक्ब। इन मचाप्शो निसाफ चहिं गो नेंनुड। मेको कली आं बाक्तीक चाक्कीन’ दे माइक्ताक्मी। ब्यवस्था १६:१९; २इतिहास १९:६-७; प्रस्थान २१:६ 18 मेना गो इन पचा माल्शो गेय नेल्ल अरेतन्नी।

मोसामी क्यारी पाइब सोइशो

19 मिनु नोले परमप्रभु यावे, इं परमप्रभुमी देंशो खोदेंशो पा गोपुकी होरेब डांडा रे पा एमोरी आन बाक्तीक पहाड लाइतक। गोपुकी एको हिंचा डा ठेयब गोरशो रागी लकानु, गे मेको नेल्ल तुइक्नीनी। मोपा गो कादेश-बारनेआम

जावतक। गन्ती २०:१ 20 मिनु गो इन कली 'परमप्रभु यावे, इं परमप्रभुमी इं कली गेशो एमोरी आन पहाड रागीमी जावतीनी। 21 कोव्रडीन, परमप्रभु यावे, इन परमप्रभुमी एको रागी इन कली गेशो बावत। मिनु परमप्रभु यावे, इन किकी पिपी आन परमप्रभुमी देशो खोदेशो पा मेकेर इर लशा, आंम के सेलीन। गेपुकी महिनीन। सुर्ता मपने' देंती।

22 मिनु गे नेल्लेमी आं कली 'मेको रागी डा मारेइ मारेइ तुइक्चा कली आंइ डोंइती क्यारी पाइबपुकी सोइक्तीन। मेकोपुकीम तेको लां गाक्चा नु तेको सहर जावदीत्नीकी, दे शेंने चाप्नीमी' देंतीनी। गन्ती १३:२ 23 मिनु गो मेको लोव्र ठीक लावती। गो इन थर थर डा का का पा १२ जना मुर योव्रताक्मी। 24 मिनु मेकोपुकी पहाड गे लशा, एक्कोल डा दिंमम जावदीशशा, क्यारी पथ लाम्तेक्म। 25 मिनु मेकोपुकीमी मेको रागी डा फल फुल कुरशा चाक्शा, आंइ कली 'परमप्रभु यावे, इं परमप्रभुमी गेशो रागी शुश रिम्शो बाक्ब' देंतेक्म।

इस्राएलीपुकीमी मटिशो

26 तन्न गेपुकी परमप्रभु यावे, इन परमप्रभुमी देशो मटिथु, मेको रागी लचा मबिस्सीनी। 27 मिनु गे इन बाक्तीक ताम्बुमी गन गन पा 'परमप्रभु यावेमी आंइ कली मदाक्तीके नु एमोरी आन गुइ रे पा साइक्पाइक्चा कली आंइ कली इजीप्त रे गुंइशा, एक चाक्शो बाक्ब। गन्ती १४:- 28 मारदे मेकेर लचा? मेको क्यारी पाइबपुकीमी आंइ कली मेकेर डा मुरपुकी आंइ क्येडा लाइशशो नु बोल्यो बाक्नीम। मेको आन सहर आन गारो सरीड थिचा डा पा लाइशशो बाक्नीम। मिनु मेकेर गोपुकीमी अनाकीम डा मुर यो ताइतक, दे हिंच कोंइताक्म' दे गन गन पाइतीनी। ब्यवस्था ९:१-२; गन्ती १३:३३ 29 मिनु गो इन कली हिंशा, खिंखि मपने। मेको आन कली तशा महिनीन। प्रस्थान १४:१४-२५; यहोसु १०:१४ 30 इन डोंइती गाक्ब, परमप्रभु यावे, इन परमप्रभुमी इन पा डा लडाइ पाइब। दोपा इजीप्त रागीमी इन डोंइती मार मार पवा, मोपा पाइब। 31 मिनु गोरशो रागीम गेपुकी गाक्नीनु, आफोम आ तौ कली कुरशो खोदेशो पा, परमप्रभु यावे, इन परमप्रभुमी इन कली एक जाक्ची सम्म कुरशो बाक्त। गे आंमा तुइक्नीनी। ब्यवस्था ८:५; प्रस्थान १९:४ 32 मोदेशो दुम्त हना यो गे परमप्रभु यावे, इन परमप्रभु कली थमा मसुइक्नी। 33 मेको इन डोंइती इन कली बाक्तीके कोंइथ गाक्त हना यो, गे थमा मसुइक्नी। मिनु लां कोंइचा कली नाक्दोम मी नु नाक्तीम गोस्स दुम्शा इन कली लां कोंइताक्व। प्रस्थान १३:२१

थमा मसुइक्ब सजाइ तशो

34 मिनु परमप्रभु यावेमी इन रेयके पा लोव्र पशो नेंशा गाइशशा 35 'एको मरिम्शो मुर आन दातेमी मुर का ला मेको आन किकी पिपी आन कली गेशो रिम्शो रागी लचा ताइब। गन्ती १४:२३-२४ 36 मेको यपुन्ने आ तौ कालेब बाक्ब। मेको नु आ तौ चचम मेको आ थेक्शो रागी ताइनीम। मारदे हना मेकोमी आं कली, परमप्रभु यावे कली थमा पा नोले खोइशशो बाक्त' दे कसम जशा देंत। 37 मिनु परमप्रभु यावेमी इन पशो तशा, आं पबर्म यो गाइक्ताक्व। मिनु मेकोमी आं कली 'गे यो मेको रागी ओव्रचा मताइनेवे। गन्ती २०:१२ 38 इ के गेय पाइब नून आ तौ यहोसु चहिं ओव्रचा ताइब। गे मेको आ थुं बारपाइक्चा माल्नेवे। मारदे हना यहोसुमी इस्राएली आन कली मेको रागी योक्शा गेचा माल्ब' दे परमप्रभुमी कसम जशा देंत। गन्ती ३४:१७ 39 मिनु गेपुकीमी इन आल ब्रेप्च आन पबर्म 'मेको गोरशो रागीमी बेक्नीम' देंतीनी। तन्न मेकोपुकी ओव्रचा ताइनीम। इन आइक्च तौपुकी ओव्रचा ताइनीम। मेको रागी मेको आन कली गेनुड। मिनु मेकोपुकीमी मेको रागी आंम के सेल्नीम। 40 मिनु गेपुकी चहिं लेशशा गोरशो रागी लल समुन्द्र गे लने। गन्ती १४:२५

41 मिनु गेपुकीमी आं कली 'गो परमप्रभु यावे कली पाप पाइतक। परमप्रभु यावे, इं परमप्रभुमी शेंशो खोदेशो पा गो लडाइ पथ लाइनीकी' देंतीनी। मिनु गे नेल्ले इन या पिम्साक्नी। मिनु गो ग्रानीक, दे मिम्शा, पहाडी रागी कली लडाइ तोचा, दे ग्येतथ लाइतीनी। गन्ती १४:४० 42 मिनु परमप्रभु यावेमी आं कली 'गेपुकी इन जोरी सत्रु रे बुइनीनी, गे मेको डांडा डोइशशा मलने। लडाइ मपने। मारदे हना गो इन दातेमी मबाक्शो बाक्नुड, दे मेको आन कली माइक्मी' देंत। 43 मिनु गो इन कली मेको लोव्र पाता। तन्न गेपुकीमी नेंसीन मनेंनी। ठेयब लेशशा, परमप्रभु यावे आ लोव्र मबिथु मटिथु, गे डांडा डोंइसाक्नी। 44 मिनु मेको डांडाम बाक्ब एमोरीपुकीमी गेपुकी नु लडाइ पाम्तेक्म। मिनु मेकोपुकीमी सुरब आन हुल खोदेशो पा इन कली खेदा पाम्तेक्म। मिनु सेइर नु होरमा सम्म खेदा पा इन कली फ्रुम्तेक्म। गन्ती १४:४५ 45 मिनु गेपुकी लेशशा जाक्शा, परमप्रभु यावे आ डोंइती डाक्तीनी। तन्न मेकोमी इन डाक्शो मनेन। इन पुंइशो लोव्र यो मगेवो। 46 मिनु नोले गे शुश नाक्त कादेशम बाक्तीनी। ब्यवस्था २:१४

२

इस्राएलीपुकी गाकशो

१ मिनु परमप्रभु यावेमी आं कली देशो खोदेशो पा गोपुकी गोरशो रागी लल समुन्द्र गे लाइतक। मिनु शुश नाक्त सम्म सेइर डांडा हिरना हिरन बाक्तक। गन्ती २१:४

२ मिनु परमप्रभु यावेमी आं कली ३ 'गोपुकी शुश नाक्ती एको डांडा कली हिरना हिरन बाक्तीनी। मुल उत्तर गे लने। ४ गे मुर आन कली मुल गे सेइरम बाक्ब, इन लोकबपुकी एसाव आ चच युइ आन रागी लाइनीनी। मेकोपुकी इन कली तशा हिंनीम। मिनु गोपुकी होस पचा माल्नीनी। गन्ती २०:१४ ५ मेकोपुकी नु काइ मजिने। मारदे हना गो मेको आन रागी रे इन कली खोइल थेक्तीक खोमो रू यो मगेनुड। गो सेइर पहाड एसाव कली गेशो बाक्नुड। उत्पत्ती ३६:८ ६ मिनु इन माल्शो जचा थोत्रक मेको आन के ग्याप्शा ला जने। ब्वाक्कु यो मेको आन के ग्याप्शा तूडीन।

७ मारदे हना परमप्रभु यावे, इन परमप्रभुमी इन पशो नेल्लेमी इन कली आसीक गेशो बाक्ब। गोपुकी मेको ठेयब गोरशो रागीम गाक्नीनु, इन कली कोत्रतु। मिनु परमप्रभु यावे, इन परमप्रभु ४० बर्स सम्म गोपुकी नु बाक्त। इन माल्शो नेल्ल ताइतीनी' दे परमप्रभुमी देंत। गन्ती १४:३३

८ मिनु गो, सेइरम बाक्ब एसाव आ चच युइ, आंइ लोकब आन बाक्तीक दिंम डा अराबाह डा लां रे पा एलाथ नु एस्योन-गेबेर रे मगाक्थु, गो मोआब डा गोरशो रागी गे लाइतक। ९ मिनु परमप्रभु यावेमी आं कली 'मोआब नु लडाइ मपने। मेकोपुकी नु काइ मजिने। मेको रागी इ कली मगेनन। मारदे हना गो आर सहर लोत नु आ चच युइ आन कली गेता। उत्पत्ती १९:३६-३७

१० मिनु डोंइती मेकेर एमीमपुकी बाक्तेक्म। मेको शुश नु लाइशो मुर बाक्तेक्म। अनाकीम डा मुर खोदेशो शुश लाइशो कोल्शो मुर बाक्तेक्म। ब्यवस्था १:२८ ११ मिनु अनाकीम डा मुर आन कली खोदेशो पा रेफाइम माइशो मुरपुकी शुश कोल्शो मुर देंनीम। मिनु मोआबीम मेको आन कली एमीम देंनीम। १२ डोंइती होरीपुकी यो सेइरम बाक्शो बाक्तेक्म। मिनु नोले एसाव आ मुरपुकीम मेको आन कली साइशशा, मेको आन रागीम बाक्तेक्म। परमप्रभु यावेमी इस्राएली आन कली गेशो रागी मेकोपुकीम आंम के सेल्शो खोदेशो पा, मोआब डा मुरपुकीमी मेको रागी आंम के सेल्शो बाक्तेक्म' देंत। उत्पत्ती १४:६ १३ मिनु नोले परमप्रभुमी 'गोपुकी जेरेद खोल्सा शोक्सीन' देंत। मिनु गो जेरेद खोल्सा शोक्साक्क। गन्ती २१:१२ १४ मिनु डोंइती परमप्रभु यावेमी कसम जशो खोदेशो पा कादेश-बारनेआ रे जेरेद खोल्सा आइक्ची हांबु सम्म जाक्चा नु लडाइ पाइब नेल्ल मनुम्मा सम्म आंइ कली ३८ बर्स माल्ताक्व। गन्ती १४:३४ १५ थमा पा परमप्रभु यावेमी मेको लडाइ पाइब आन कली आंमान क्याम्ताक्व। गन्ती १६:३१-३२; गन्ती २१:६; गन्ती २५:३-५

१६ मिनु मुर आन दाते डा लडाइ पाइब नेल्ल बेक्ने थुम्मे नोले १७ परमप्रभु यावेमी आं कली १८ 'गे मुलाक्त मोआब डा सांद आर सहर लाक्शा, लचा माल्नीनी। गन्ती २१:१३,१५ १९ मिनु गे अम्मोनी आन रागी जाक्दीत्नीनी। मेको नु लडाइ मपने। काइ मजिने। मारदे हना अम्मोनी आन रागी इन कली मगेनुड। मेको लोत नु आ चच युइ आन कली गेतामी। उत्पत्ती १९:३८

२० मेको रागी यो लाइशो कोल्शो मुर आन रागी बाक्त। डोंइती मेकेर रेफाइम माइशो मुर बाक्तेक्म। तन्न अम्मोनीपुकीमी मेको आन कली जाम्जुम्मीम देंनीम। २१ मेको शुश दुम्शो नु लाइशो अनाकीम डा मुर खोदेशो बाक्तेक्म। मिनु परमप्रभु यावेमी मेको आन कली अम्मोनी आन डोंइती खतम सेल्लतु। मिनु मेको नेल्ल आन कली खेरशा, अम्मोनी मेको आन बाक्तीकेम बाक्तेक्म। २२ परमप्रभुम सेइरम बाक्ब एसाव आ खिं खिं डा मुर आन पबर्म यो मोदेशोन पाप्तु। मेको आन डोंइती होरी आन कली खतम सेल्लतु। मिनु होरी नेल्ल आन कली खेरशा, मुल सम्म एसाव आ खिं खिं डा मुर मेकेर बाक्नीम। २३ मिनु मेको मोदेशो पा गाजा डा काफतोर सहर रे जाक्शो काफतोरपुकीमी आव्वीम सहर डा मुर आन कली साइक्तेक्म। मिनु मेको आन बाक्तीकेमी बाक्तेक्म' देंत। उत्पत्ती १०:१४; यहोसु १३:३

पिप सीहोन नु लडाइ पा ग्राशो

२४ मिनु परमप्रभुमी 'बोक्कीन। गाक्चा गोने। मिनु अरनोन खोल्सा शोक्सीन। मारदे हना गो हेशबोनम बाक्शो एमोरी आन पिप सीहोन नु आ रागी इन कली गेता। मेको इन के सेल्ना सेल्न लडाइ पने। २५ मुलाक्त रे गो जात जात डा मुर नेल्ल आन कली इन लोत्र नेंशा, इन क्येडा हिंशा, खिंखिं पाइब सेल्नुडमी' देंत। प्रस्थान २३:२७ २६ मिनु गो केदेमोथ माइशो गोरशो रागी रे हेशबोन डा पिप सीहोन नु दुचा गारचा आ पबर्म मुरपुकी लोत्र पथ सोइक्ताक्डमी। गन्ती

२१:२१-२६ 27 मार लोत्र सोइक्ताक्डमी देशा हना 'आंड कली इन रागी रे लचा गेकी। गो एर ओंथ मपथु, ठेयब लां खोइश्शा गाक्नीकी। 28 गे जचा थोत्रक क्येट ताक्शा आंड कली लेयडीन। ब्वाक्कु यो क्येट ताक्शा गेकी। आंड कली गाक्तीक लां ला गेकी। 29 मोपा सेडरम बाक्ब एसाव आ खिं खिं डा मुरपुकीमी नु आर सहरम बाक्ब मोआबी डा मुरपुकीमी गाक्चा गेम्तेक्म। परमप्रभु यावे, इं परमप्रभुमी गेशो यर्दन खोला आइक्ची हांबु डा रागी जाक्दीचा सम्म लां गेने' देंथ, मुरपुकी सोइक्ताक्डमी। 30 तन्न हेशबोन डा पिप सीहोनमी आंड कली गाक्तीक लां मगेव। मारदे हना परमप्रभु यावे, इन परमप्रभुमी इन पा डा लडाइ पा ग्राचा कली मेको आ थुं खकटा नु मटीब सेला बाक्त। मिनु मोदेशो दुम्त। प्रस्थान ४:२१

31 मिनु परमप्रभु यावेमी आं कली 'गो सीहोन नु आ रागी इन कली जिम्मा गेचा गोवता। मेको आ रागी लडाइ पा आम के के सेलीन' देंत। यहोसु १०:१२; येरमीया २४:८; रोमी १:२४; रोमी ४:२५; ८:३२ 32 मिनु सीहोन नु आ मुर नेल्ल गोपुकी नु लडाइ पथ याहास माइक्तीकेमी जाक्तेक्म। 33 मिनु परमप्रभु यावे, इं परमप्रभुमी मेको कली साइक्च, दे इं कली जिम्मा गेपु। मिनु गोपुकीमी मेको कली, मेको आ तौ नु मेको आ मुर नेल्ल आन कली साइक्तक। 34 मेना गो मेको आन सहर नेल्ल आंड के सेल्लतक। आन मुर नेल्ल कली साइक्तक। वोंइश मुर, मीश मुर नु आल नेल्ल साइक्तक। का कली यो मप्रोंइथु, नेल्ल आन कली साइक्तक। 35 गो आंड ग्राशो सहर डा मारेइ मारेइ आम के सेल्ला, बी ब्यफ, क्यारश भेडा यो आंड कली वोंइसाक्क। 36 अरनोन खोल्ला डा दिमम बाक्ब आरोएर सहर रे गिलाद सम्म आंड ग्राने मचाप्चा डा सहर कान मबाक्म। परमप्रभु यावे, इं परमप्रभुमी मेको नेल्ल आंड कली ग्राचा गेपु। यहोसु १३:९; २सामुएल २४:५ 37 यब्बोक खोल्ला आ नेक्था बाक्ब अम्मोनी आन रागी, पहाड डा सहरपुकी नु परमप्रभु यावे, इं परमप्रभुमी इं कली मलचा देंशो रागी ला मलक।

3

पिप ओग कली ग्राशो

1 मिनु नोले गो बाशान ग्येत्थ लाइतक। मिनु बाशान डा पिप ओग नु आ मुर नेल्ले गोपुकी नु लडाइ पथ एड्रेइम जाक्तेक्म। गन्ती २१:३३-३५ 2 मिनु परमप्रभु यावेमी आं कली 'मेको आन कली तशा महिनो। मारदे हना गो मेको नु आ मुर नेल्ल आन कली इन गुडमी गेता। मेको आ रागी नु आ मुरपुकी इन के दुम्त। मिनु गे हेशबोनम बाक्शो एमोरी आन पिप सीहोन कली खोदेशो पा मेको कली यो पने' देंत।

3 मिनु परमप्रभु यावे, इं परमप्रभुमी बाशान डा पिप ओग कली यो नु आ मुर नेल्ल आन कली इं गुडमी गेपु। मेकेर यो का कली यो मप्रोंइथु, नेल्ल आन कली साइक्तक। 4 मेना गो मेको आ सहर नेल्ल ग्रातक। का यो मली। बाशान डा ओग आ राज्यम अरगोब माइश्शो रागी नेल्ल पा ६० ओटा सहर ग्रातक। 5 मेको सहर नेल्ले लाइश्शो गारो हिरशो बाक्तेक्म। मेको गारो डा ठेयब लाप्चो आग्लो पाइश्शो बाक्तेक्म। मेको प्रोंइशा, अरु गारो महिरशो शुश गाउं यो ग्रातक। 6 मिनु हेशबोन डा पिप सीहोन कली खोदेशो पा मेको सहर डा वोंइश मुर, मीश मुर नु आल नेल्ल साइक्तक। 7 मिनु बी ब्यफ, क्यारश भेडा नु सहर डा मारेइ मारेइ आंड कली वोंइसाक्क। ब्यवस्था २०:१३-१८ 8 मोपा गो यर्दन ओंथ हांबु डा एमोरी पिप निक्शी आस रागी ग्रातक। अरनोन खोल्ला रे हेरमोन डांडा सम्म डा रागी ग्रातक। ब्यवस्था ४:४८; १इतिहास ५:२३; भजन संग्रह २९:६ 9 सीदोनीपुकीमी हेरमोन डांडा कली सिरीयोन नु एमोरीपुकीमी सेनीर देंनीम। 10 गोपुकी दिंम डा सहर नेल्ले, गिलाद रागी नेल्ल, बाशान, साल्ला नु एड्रेइ सम्म, बाशानम बाक्शो ओग आ राज्य नेल्ल ग्रातक। 11 मिनु बाशान डा पिप ओग चहिं मेको लाइश्शो मुर, रेफाइम आन दातेमी नेल्ल क्येडा नोले साइक्चा पुंइसाक्व। मिनु मेको आ फलाम के खाट मुल सम्म अम्मोनी आन सहर रब्बाहम बाक्ब। मेको खाट ९ कुबीत लाइश्शो नु ४ कुबीत ब्रेम्शो बाक्ब। कुबीत का आधा मिटर कि हात का खोदेशो बाक्ब।

यर्दन आ पूर्व डा रागी योक्शो

गन्ती ३२:-

12 मिनु मेना तेको तेको रागी आंड के सेल्लतक देशा हना, अरनोन खोल्ला आ नेक्था दिमम बाक्शो आरोएर रे गिलाद पहाड आधा नु मेकेर डा सहरपुकी सम्म गो रूबेन आ थर नु गाद आ थर डा मुर आन कली गेतामी। 13 गिलाद डा लीशो, ओग आ राज्य, बाशान रागी नेल्ल, मनस्से आ उइक्थ थर डा मुर आन कली गेतामी। बाशान नु अरगोब रागी नेल्ल रेफाइम माइश्शो, लाइश्शो मुर आन रागी देंनीम। 14 मनस्से आ युइ याइरमी अरगोब डा रागी नेल्ल, गेशुरी नु माकाथी आन सांद सम्म लाइक्तु। मेको बाशान कली आ नें हव्वोथ-याइर वोइक्तु। मेको मुल सम्म बाक्ब। 15 मिनु

गो माकीर कली गिलाद गेता। 16 मिनु गो रूबेन आ थर नु गाद आ थर डा मुर आन कली मार गेतामी देंशा हना, गिलाद रे अरनोन खोल्सा आ दाते सम्म नु आ नेक्था डा दिंम यब्बोक खोल्सा सम्म गेतामी। मेको अम्मोनी आन सांद बाक्ब। 17 मिनु मेको अराबाह दिंम, यर्दन नु आ नेक्था डा किन्नेरेथ रे अराबाह समुन्द्र, मेको हिक्सी समुन्द्र यो देंनीम, सम्म नां दाप्तीके डा पिस्गा डांडा रूबेन आ थर नु गाद आ थर डा मुर आन कली गेतामी। यहोसु ११:२; यहोसु १९:३५; मर्कूस ६:५३

रूबेन नु गाद आस कली लोत्र पशो

18 मेना गो इन कली ‘परमप्रभु यावे, इन परमप्रभुमी एको रागी इन के दुम्चा कली गेशो बाक्ब। मो हना यो इन दाते डा लडाइ पाइब वोंइश मुरपुकी इन या पिम्सीशा, इन लोकब इस्राएली आन डोंइती यर्दन खोला शोक्चा माल्नीनी। 19 मिनु इन मीश, इन आलपुकी नु इन बी ब्यफ, क्यारश भेडा गो इन कली गेशो सहरम ला बाक्चा ताइनीम। इन के बी ब्यफ, क्यारश भेडा शुश बाक्नीम, दे तुइक्नुड। 20 परमप्रभु यावेमी इन कली खोदेशो पा इन लोकब आन कली मनाइक्पदा सम्म मोदेशो दुम्चा माल्ब। मिनु परमप्रभु यावे, इन परमप्रभुमी यर्दन आइक्की हांबु मेको आन कली गेशो रागी आंम के मसेल्मे सम्म गेपुकीमी मो पचा माल्नीनी। मिनु नोले गोम इन कली गेशो रागी लेशशा, जाक्ने चाप्नीनी’ दे माइक्मी” देंत।

मोसाम यहोसु कली लोत्र पशो

21 मिनु मेना गो यहोसु कली “परमप्रभु यावे, इन परमप्रभुमी एको पिप निक्शी आस कली मार मार पवा, गे मेको नेल्ल ताप्तीवी। मुल गे आइक्की हांबु शोक्सेनु, परमप्रभु यावेमी मेकेर डा राज्य नेल्ल आन कली यो मोदेशोन पाइब। गन्ती २७:१८-२२ 22 मेको आन क्येडा महिनीन। मारदे हना परमप्रभु यावे, इन परमप्रभुमी इन पा डा लडाइ पाइब” दे माइक्ता। ब्यवस्था १:२९-३०

मोसामी परमप्रभु नु लोत्र पशो

23 मिनु मेना गो परमप्रभु यावे कली 24 “परमप्रभु, परमप्रभु यावे, गे इन गेय पाइब कली इन ठेयब पतीके नु सक्ति कोइंचा गोइतीनी। मिनु स्वर्ग नु रागीम बाक्ब तेको प्रभु इन खोदेशो पा ठेयब पतीके नु सक्ति पाइशो गेय पने चाप्बा डा? 25 मेको यर्दन आइक्की हांबु डा रिम्शो रागी, ठेयब पहाड नु लेबानोन तडल, दे आं कली यर्दन खोला आइक्की हांबु शोक्चा गेयीनी” दे पुंइता।

26 तन्न इन पतीके परमप्रभु यावे गो नु गाइशो बाक्त। मिनु मेकोमी आं पुंइशो मनेन। मिनु परमप्रभु यावेमी आं कली “मुल रे एको आ पर्वम लोत्र मपावो। गन्ती २०:१२ 27 गे पिस्गा डांडा डोइशशा, पच्छिम, उत्तर दक्खिन नु पूर्व गे कोत्रडो। मारदे हना गे यर्दन आइक्की हांबु शोक्चा मताइनेवे। 28 मिनु गे यहोसु कली अरेशा, लोत्र पा ठेयब थुं पाइशो सेलो। मारदे हना मेकोमी मुर आन डोंइती शोक्शा, इ तशो रागी मेको आन के दुम्चा कली योत्रब” दे परमप्रभुम आं कली देंत। ब्यवस्था ३१:३,७; 29 मिनु गोपुकी बेथ-पेओर आ डोंइती डा दिंमम बाक्तक।

4

लेशा परमप्रभु आ लोत्र शेंशो

1 मिनु मोसामी “मिनु गे इस्राएली नेल्ले, गो इन कली परमप्रभु यावे आ फुल्लुम मुशा ब्रेक्शो लोत्र नु आ निसाफ पतीक लोत्र शेंनुड। इन नोफा दाइक्तीन। मिनु आ शेंशो पने। मेको पाइतीनी हना, गे ब्रोंइचा ताइनीनी। मिनु गे परमप्रभु यावे, इन किकी पिपी आन परमप्रभुमी इन कली गेशो रागी ओत्रचा नु इन के सेल्चा ताइनीनी। 2 मिनु गो इन कली परमप्रभु यावे, इन परमप्रभु आ लोत्र शेंशा ‘परमप्रभु आ शेंशो पचा माल्ब’ दे अरेनुड। गेपुकीमी आं शेंशो लोत्र कली का यो मतेम्दीन। का यो मशोलीने। ब्यवस्था १३:१; हितोपदेस ३०:६; प्रकाश २२:१८-१९ 3 मिनु परमप्रभु यावेमी बाल-पेओर मूर्ति आ नोले खोइक्ब आन कली मार पवा, गे आंमा ताइतीनी। मिनु परमप्रभु यावे, इन परमप्रभुमी बाल-पेओर आ नोले खोइक्ब वोंइश मुर नेल्ल साइक्तु। गन्ती २५:३-९ 4 गे परमप्रभु यावे, इन परमप्रभु कली आ नोले खोइक्बपुकी चहिं नेल्ल ब्रोंइशो बाक्नीनी।

5 मिनु परमप्रभु यावे, आं परमप्रभुमी आं कली अरेशो खोदेशो पा, गो इन कली आ फुल्लुम मुशा ब्रेक्शो लोत्र नु आ निसाफ पतीक लोत्र शेंतान्नी। मारदे शेंतान्नी देंशा हना, गे जाक्शा इन के सेल्चा चिक्शो रागीमी मेको नेल्ल पचा, दे शेंतान्नी। 6 मोपतीके गेपुकीमी एको लोत्र होस पा, तिने। मेकोमी इन कली तुइक्ब नु रुक्ब मुर सेल्ब। मिनु जात

जात डा मुरपुकी मेको फुल्लुम मुशा ब्रेक्शो लोत्र नेल्ल नेंशा, मेकोपुकीमी 'मेको ठेयब जात डा मुर थमा पा तुइक्ब नु रुप्ब मुर बाक्नीम' देनीम। यसैया २:३ 7 मिनु परमप्रभु यावे इं परमप्रभुमी आंइ नेक्था बाक्शो नु आंइ पुंइशो लोत्र नेंब खोदेशो पा तेको अर्को ठेयब जात डा देवी देवताम मोदेशो पाइनीमी? २सामुएल ७:२३ 8 मुलाक्त गो इन कली परमप्रभु यावे आ अरेशो लोत्र नेल्ले नेंपाइक्नुड। मिनु तेको ठेयब जात डा मुर इं खोदेशो रिम्शो पचा कली फुल्लुम मुशा ब्रेक्शो लोत्र नु निसाफ पतीक लोत्र नेंचा ताइनीमी। येरमीया ८:८

परमप्रभु आ अरेशो लोत्र

9 इन आम तशो इन थुंम वोइश्शा, मप्रेंथु, होस पा बाक्कीन। गे ब्रोइनी सम्म इन थुंम वोतीन। इन आल नु चच युइ आन आन कली शेंदीन। भजन संग्रह १०३:२

10 मिनु गेपुकी काबु परमप्रभु यावे, इन परमप्रभु आ डोंइती होरेब डांडा तार राप्शो बाक्तीनी, मेको मिम्तीन। मिनु परमप्रभु यावेमी आं कली मुर आन कली आं डोंइती पुक्मी। गो मेको आन कली आं लोत्र नेंपाइक्नुडमी। मिनु मेकोपुकी रागीम मबेक्मा सम्म आं कली मान पा हिंचा शेंसामल। मिनु मेकोपुकीमी एको लोत्र आन तमी तौ आन कली शेंचा माल्नीम” देंत। प्रस्थान १९:१७; ब्यवस्था ६:७ 11 मिनु गे आ नेक्था जाक्शा, डांडा आ पुंम राप्तीनी। मेको डांडाम सरीड सम्म मी ब्रत। मिनु छिडछिड, ठेयब गोस्स नु नाकदो खोदेशो बाक्त। 12 मिनु परमप्रभु यावेमी मी आ दाते रे गेपुकी नु लोत्र पाप्तु। गे मेको आ लोत्र नेंतीनी, तन्न मारेइ मतनी। ब्यवस्था ५:४, २४ 13 मिनु मेकोमी गे नु कबल पाप्तु। आ अरेशो १० ओटा लोत्र गे टिशा पने, दे गेप्तु। मिनु मेकोमी मेको लोत्र फुल्लु निकशी तार मुशा गेप्तु। प्रस्थान ३१:१८ 14 मिनु मेना परमप्रभु यावेमी आं कली “मेको आन कली आं फुल्लुम मुशा ब्रेक्शो लोत्र नु निसाफ पतीक लोत्र शेंदो। नोले आन गाक्शो आम के सेल्शो रागीमी मेको लोत्र टिशा पचा, दे मेको लोत्र शेंदो” दे माइक्ती।

15 मिनु परमप्रभु यावेमी इन कली होरेब डांडाम मी रे लोत्र पवानु, गे मारेइ मतनी। 16 मिनु गे इन कली मूर्ति सेल्शा, खतम मसेल्सीन। गे होस पा बाक्कीन। तेकोइ वोंइश मुर, मीश मुर, प्रस्थान २०:४ 17 रागी डा बी ब्यफ, क्यारश भेडा, जन्तु सरीडम बेरब चिक्ब, 18 खपीम गाक्ब, ब्वाक्कुम बाक्ब डांड के मूर्ति काइ मसेलीन। 19 मिनु गे सरीड इर कोव्रशा, परमप्रभु यावे, इन परमप्रभुमी जात जात डा मुर नेल्ल आन कली गेशो नां, तास्ला, सोरुल नेल्ल तशा, मेको आन डोंइती सेउ पा पूजा मपने। होस पा बाक्कीन। ब्यवस्था १७:३; रोमी १:२३ 20 परमप्रभु यावेमी इन कली आम मुर सेल्चा, दे फलम चौतीके खोदेशो इजीप्त रागी रे गुंइताक्व। मोदेशो पा मुलाक्त बाक्ब, दे तुइक्नीनी। १राजा ८:५१; यसैया ४८:१०; येरमीया ११:४; प्रस्थान १९:५-६; यसैया १९:२५

21 मिनु परमप्रभु यावे इन पतीके, आं पबर्म गाइक्ताक्व। मेकोमी आं कली “गे यर्दन खोला मशोक्थु, इस्राएली आन कली गेशो रिम्शो रागी लचा मताइनेवे” दे कसम जाप्तु। ब्यवस्था ३:२६ 22 मिनु गो यर्दन खोला मशोक्थु, मुल बाक्शो रागीमी बेक्चा माल्नुड। तन्न गेपुकी यर्दन शोक्शा, मेको रिम्शो रागी इन के सेल्नीनी। 23 मिनु परमप्रभु यावे, इन परमप्रभुमी गे नु पशो कबल मप्रेक्थु, होस पा बाक्कीन। गे मप्रेंथु परमप्रभु यावे, इन परमप्रभुमी देशो टिशा मारेइ के मूर्ति मसेलीन। 24 मारदे हना परमप्रभु यावे, इन परमप्रभु ठेयब मी खोदेशो नु रुश पाइब परमप्रभु बाक्ब। ब्यवस्था ९:३; प्रस्थान २४:१७; यसैया १०:१७; हिब्रू १२:२९; प्रस्थान २०:५

दूली पाइब परमप्रभु गे लेशो

25 मिनु गेपुकी मेको रागीमी शुश बर्स बाक्शा, तमी तौ, चच युइ थिशा बाक्नीनी। तन्न परमप्रभु यावे, इन परमप्रभुमी मदाक्चा डा पा मारेइ के मूर्ति सेल्शा, परमप्रभु यावे कली गाइक्पाइक्तीनी हना, 26 गो मुलाक्ती सरीड नु रागी कली इन दूली पशो आ पबर्म सांकछी वोइक्नुड। गे यर्दन आइक्ची हांबु डा इन के सेल्चा चिक्शो रागीम रीब पा खतम दुम्नीनी। गे शुश नाक्त मेकेर बाक्चा मताइनीनी। गे क्याम्चा पुंइसीनीनी। ब्यवस्था ३०:१९; ब्यवस्था ३१:२८; ब्यवस्था ३२:१; 27 मिनु परमप्रभु यावेमी इन कली जात जात डा मुर आन दातेमी ब्रपाइक्ब। मिनु परमप्रभु यावेमी इन कली कोंइशो रागी रागी आन दातेमी इक्का ला लीनीनी। 28 मिनु गेपुकीमी मेकेर डा मुर आन सेल्शो शी के, फुल्लु के मताइब, मनेंब, मजाइब नु मनाम्ब मूर्ति आन कली पूजा पाइनीनी। ब्यवस्था २८:३६; भजन संग्रह ११५:४-७

29 तन्न गे मेकेर बाक्शा, परमप्रभु यावे, इन परमप्रभु कली माल्नीनी। मिनु गे थमा पा इन थुं नेल्लेम माल्तीनी हना, गे मेको कली थित्नीनी। भजन संग्रह २७:८; येरमीया २९:१३-१४ 30 आं देशो लोत्र मोदेशो पा दुम्शा, श्येत जनीनु, गे नोले डा नाक्तीम परमप्रभु यावे, इन परमप्रभु गे लेत्नीनी। आं देशो लोत्र टीनीनी। ब्यवस्था ३०:२ 31 मारदे हना

परमप्रभु यावे, इन परमप्रभु, शिशी पाइब परमप्रभु बाकब। इन किकी पिपी नु कसम जशा पशो कबल मप्रेंब। मेकोमी इन कली मप्रोंइथु, खतम मसेल्ब।

32 मिनु गे इन क्येडा डोंइती डा नाक्त मिम्तीन। परमप्रभुमी मुर नु रागी सेल्शो रे मुल सम्म ओदेंशो ठेयब गेय पशो आ पर्बम लोव्र नेंनी? तनी? 33 अरु सुइ मुरुम गे इन खोदेंशो पा परमप्रभुमी मी रे लोव्र पशो नेंमे?। मिनु गे नेंशा यो ब्रोंइशो बाकनीनी। प्रस्थान २०:१,१९ 34 मिनु तेको देवी देवतामी इन कली खोदेंशो पा शुश रागी आन दाते रे आंम मुर सेल्चा कली योव्रशो बाकबा? मुर आन कली नाक्शा, चिनु कोंइशा, छक लाक्चा डा गेय पा, मेको आन पर्बम लडाइ पा, शुश हिंचा डा सक्तिमी, परमप्रभु यावे, इन परमप्रभुमी इन कली इजीप्त रागी रे गुंडशो गे ताइतीनी। ब्यवस्था ७:१९; ब्यवस्था २९:२ 35 गे मारदे मेको ताइतीनी देंशा हना, परमप्रभु यावे, का ला परमप्रभु बाकब। मेको क्येडा लाक्शा अर्को परमप्रभु मबाकब, दे तुइकपाइक्चा कली इन कली कोंइताक्व। 36 मिनु मेकोमी सरीड रे इन कली शेंचा, दे आ सेंदा नेंपाइक्तु। मिनु खपीम इन कली आ ठेयब मी कोंइताक्व। गे मी आ दाते रे आ लोव्र पशो नेंतीनी। प्रस्थान २०:१,१८,२० 37 मिनु इन किकी पिपी आन कली दाक्तीके, आन चच युइ आन कली योव्रशा, मेकोमी आंमान आ ठेयब सक्तिमी इन कली इजीप्त रे गुंडताक्व। प्रस्थान ३३:१४ 38 इन कली रागी गेचा, दे इन डोंइती इन क्येडा सक्ति पाइशो नु शुश मुर आन कली आन रागी रागी रे गुंडताक्व। मिनु गे रागी इन के सेल्चा कली ठीक दुम्शो बाकनीनी। मोदेंशो मुलाक्ती बाकब, दे तुइक्नीनी। 39 मिनु गे मुलाक्ती परमप्रभु यावे, का ला सरीड नु रागी डा परमप्रभु बाकब। मेको डा लाक्शा अर्को सुइ परमप्रभु मबाकब। एको लोव्र गे मुलाक्ती थमा पा तुइक्तीन। मिनु इन थुंम लील। 40 मुलाक्ती गो इन कली माइशो परमप्रभु यावे आ फुल्लुम मुशा ब्रेक्शो लोव्र नु आ शेंशो टिने। मो पाइतीनी हना, इन आल नु चच आन कली रिम्शो दुम्ब। मिनु परमप्रभु यावे, इन परमप्रभुमी इन कली गेना हना यो बाक्चा कली गेशो रागीम गे शुश नाक्ती बाक्चा ताइतीनी।

मुर साइशशा प्रोक्तीक सहर

41 मिनु मोसामी यर्दन खोला नां दाप्तीक गे सहर सां योव्रतु। ब्यवस्था १९:२-१३; गन्ती ३५:६-२९ 42 डोंइती मगाइक्मुशो, मतुइक्थु मुर का कली साइक्ब मुर मेकेर प्रोक्शा लने चाण्ब। मोदेंशो मुर मेको सहरम प्रोक्शा, ब्रोंइचा ताइब। 43 मोसामी रूबेन आ थर डा मुर आन कली गोरशो रागी डा दिंमम बेसेर सहर योव्रतु। गाद आ थर डा मुर आन कली गिलाद डा रामोथ सहर योव्रतु। मनस्से आ थर डा मुर आन कली बाशान डा गोलान सहर योव्रतु।

परमप्रभु आ अरेशो मिम्पाइशो

44 मोसामी इस्राएली आन कली परमप्रभु यावे आ अरेशो लोव्र शेंताक्व। 45 मिनु मेको परमप्रभु यावे आ आ देशो, आ फुल्लुम मुशा ब्रेक्शो लोव्र नु आ निसाफ पतीक लोव्र बाक्नीम। मोसामी मेको नेल्ल इस्राएली आन कली इजीप्त रे गुंडची ना शेंताक्व। 46 मिनु मेना मेकोपुकी यर्दन ओंथ हांबु, बेथ-पेओर आ डोंइती बाक्शो बेंसीम बाक्तेक्म। मेको डोंइती हेश्बोनम बाक्शो सीहोन, एमोरी आन पिप आ रागी बाक्त। मेको रागी मोसा नु इस्राएलीपुकीमी इजीप्त रे गाक्मा नोले लडाइ पा ग्राशो बाक्तेक्म। गन्ती २१:२४ 47 मेको रागी आंम के सेल्शा, बाशान डा पिप ओग आ रागी यो आंम के सेल्शो बाक्तेक्म। मेको निक्शी एमोरी आन पिप बाक्ताक्स। मेको रागी यर्दन ओंथ हांबु नां दाप्तीके गे बाक्त। 48 मेको रागी अरनोन खोल्सा आ नेक्था बाक्ब आरोएर सहर रे सिरीयोन माइशो, हेरमोन पहाड, ब्यवस्था ३:८-९ 49 मिनु यर्दन आ ओंथ हांबु नां दाप्तीके गे अराबाह नेल्ल पिस्गा डांडा नु आ दिंमम अराबाह समुन्द्र माइशो, हिक्सी समुन्द्र सम्म इस्राएलीपुकीमी आंम रागी सेल्ने थुम्शो बाक्तेक्म।

5

१० ओटा अरेशो लोव्र

प्रस्थान २०:-

1 मिनु मोसामी इस्राएली नेल्ल आन कली ब्रेशशा, मेको आन कली “इस्राएली नेनीन। परमप्रभु यावे आ फुल्लुम मुशा ब्रेक्शो लोव्र नु आ निसाफ पतीक लोव्र नेनीन। मुलाक्ती गो मेको इन कली शेंनुड। गे मेको लोव्र शेंसीशा, होस पने। 2 मिनु परमप्रभु यावे, इ परमप्रभुमी होरेब डांडाम गोपुकी नु कबल का पाप्तु। प्रस्थान १९:५ 3 परमप्रभु यावेमी इं किकी पिपी नु एको कबल मपथु, मुलाक्ती एकेर बाक्शो गोपुकी नु पशो बाक्त। ब्यवस्था २९:१४ 4 परमप्रभु यावेमी गो आंइ नेक्था डांडाम बाक्शो, मी आ दाते रे लोव्र पाप्तु। ब्यवस्था ५:२४ 5 मारदे हना गे मी तशा हिंतीनी, डांडा मडोंइसीनी। गो परमप्रभु यावे आ लोव्र इन कली शेंचा, दे परमप्रभु यावे नु इन दातेम, राप्शो बाक्ती” देंत।

6 मिनु परमप्रभुमी इन कली “वाइलीम वाइल दुम्शा बाक्शो इजीप्त रे ग्रुंइशा एक चाक्ब, गो परमप्रभु यावे, इन परमप्रभु नड।

7 आं क्येडा लाक्शा सुइ देवी देवता आन कली ठेयब सेल्शा ममानेचा। ब्यवस्था ११:१६, २८ 8 सरीडमी, रागीमी, रागी आ आगामी ब्वाक्कुम बाक्ब मारेइ जन्तु के गेपुकीमी आंम कली मूर्ति मसेल्सीन। ब्यवस्था २७:१५ 9 मेको आन डोंइती मबपीन। मेको आन कली पूजा मपने। मारदे हना गो परमप्रभु यावे, इन परमप्रभु रुश पाइब परमप्रभु नड। आ कली मटीब आम आफ बाक्ताक्स हना, मेको आ आल, चच, युइ नु युइ आन युइ सम्म सजाइ ताइनीम। ब्यवस्था ४:२४ 10 मिनु सुम आं कली दाक्बा नु आं शेंशो लोव्र टीबा, मेको आन चच युइ आन हजार हजार पाला सम्म गेना हना यो दाक्नुडमी।

11 गे परमप्रभु यावे, इन परमप्रभु आ नें मो मथिने। मारदे हना सुमी परमप्रभु यावे आ नें मोशा थिप्ब, मेकोम पाप पाइब” देंत।

12 परमप्रभु यावे, इन परमप्रभुमी अरेशो खोदेंशो पा नाइक्तीक नाक्ती परमप्रभु आ नाक्ती बाक्ब, दे नाइक्सीन। 13 ६ नाक्त गे इन गेय पने। 14 मिनु मेको आ नोले डा ७ नाक्ती चहिं परमप्रभु यावे, इन परमप्रभु आ नाइक्तीक नाक्त बाक्ब। मेको नाक्ती मारेइ गेय मपने। गे इन तमी तौ, वाइलीम वाइल, ब्यफ, गधा, क्यारश भेडा नेल्ल नु इन सहरम बाक्शो अर्को रागी डा मुर नेल्ल आन कली इन खोदेंशो पा गेय मपपतीन। 15 मिनु गेपुकी इजीप्तमी वाइल दुम्तीके मप्रेंदीन। परमप्रभु यावे, इन परमप्रभुमी शुश सक्ति पाइश्शो नु आ ठेयब बोल पतीकेमी इन कली ग्रुंइशा, एक चाक्तु। मोपतीके परमप्रभु यावे, इन परमप्रभुमी इन कली नाइक्तीक नाक्ती नाइक्चा माल्ब, दे अरेशो बाक्ब। ब्यवस्था १५:१५; ब्यवस्था १६:१२; ब्यवस्था २४:१६, २२

16 परमप्रभु यावे, इन परमप्रभुमी अरेशो खोदेंशो पा इन आंम आफ कली मान पने। मो पाइतीनी हना, परमप्रभु यावे, इन परमप्रभुमी इन कली गेशो रागीम रोइ मपथु, शुश नाक्त ब्रोंइशा बाक्नीनी।

17 मुर मसाइक्चा।

18 आंम मीश क्येडा अरु नु मइप्चा।

19 खुइ मपचा।

20 आंम नेक्था डा मुर आन पर्बम जोल पा सांकछी मबाक्चा।

21 आंम नेक्था डा मुर आ खिं, आ मीश, आ रू, आ वाइलीम वाइल, आ बी ब्यफ, गधा मेको के मार बाक्त हना यो, मेको तशा मवाल्चा। मीका २:२

परमप्रभु आ लोव्र मिम्पाइश्शो

22 परमप्रभु यावेमी डांडाम नेल्ल इन कली एको लोव्र नेंपाइक्तु। मेकोमी मी, गोस्स नु हिंचा डा छिडछिड खोदेंशो पा आ दाते रे ठेयब सेंदामी इन कली लोव्र पाप्तु। मिनु मेकोमी मारेइ मतेम्द। मिनु नोले मेकोमी मेको अरेशो लोव्र फुल्लु निक्शीम ब्रेक्शा, गेती। प्रस्थान ३१:१८

23 मिनु गेपुकीमी डांडाम मी ब्रशो तशा, छिडछिड रे सेंदा नेंनीनु, गे इन थर थर डा ठेयब मुरपुकी नु खाल्पापुकी आं नेक्था जाक्तेक्म। 24 मिनु गेपुकीमी “परमप्रभु यावे, इं परमप्रभुमी इं कली आ ठेयब पतीके नु आ छेडछेड कोइताक्व। मिनु गोपुकीमी मेको आ सेंदा मी आ दाते रे नेंतक। मुलाक्त मार ताइतक देशा हना, परमप्रभुमी मुर नु लोव्र पाइब। मो हना यो मुर मबेक्म, दे ताइतक। ब्यवस्था ४:१२-१३, ३३ 25 मुल गोपुकी एको ठेयब मीमी मारदे बेक्चा? गोपुकी मुल यो परमप्रभु यावे, इं परमप्रभु आ सेंदा नेंना नेंन बाक्तय हना, बेक्नय। 26 मिनु सु मुरुम इं खोदेंशो पा ब्रोंइशा बाक्ब परमप्रभु आ सेंदा मी आ दाते रे पा नेंशा यो ब्रोंइशो बाक्बा? 27 गे आ नेक्था लने। मिनु परमप्रभु यावे, इं परमप्रभु आ देशो लोव्र नेंशा, आंइ कली नेल्ल शेंदीन। मिनु मेको नेंशा पाइनीकी” देंतीनी।

28 मिनु परमप्रभु यावेमी इन पशो लोव्र नेंतु। मिनु आं कली “मुरपुकीम इ कली देशो लोव्र नेंता। आन देशो नेल्ल रिम्शो बाक्ब। 29 आं कली मान पा हितेक्म हना, आं शेंशो गेना हना यो टिम्तेक्म हना, मेको नु आन आल आन कली गेना हना यो रिम्शो दुम्ब। ब्यवस्था २९:३ 30 मेकेर लावो। मिनु मेको आन कली ‘इन ताम्बुम लेत्तीन’ दे माइक्मी। 31 तन्न गे आं नेक्था बाक्को। मिनु गेमी आं शेंशो नेल्ल, आं फुल्लुम मुशा ब्रेक्शो लोव्र नु आं निसाफ पतीक लोव्र इ कली देंनन। मिनु मेकोपुकीमी मेको आन कली गेशो रागीम मेको पचा माल्नीम” दे परमप्रभुम देंत।

32 मोपतीके इन परमप्रभु यावेमी इन कली शेंशो होस पा टिने। गेपुकी ग्युरा पेरा गे मलथु, आ लां खोतीन। ब्यवस्था ४:२; ब्यवस्था २८:१४; यहोसु १:७; हितोपदेस ४:२७ 33 परमप्रभु यावे, इन परमप्रभुमी इन कली कोंइशो लां ठीक पा गाक्कीन। मो पाइतीनी हना, गे ब्रोंइनीनी, इन कली रिम्शो दुम्ब नु इन के सेल्चा चिक्शो रागीम शुश नाक्ती ब्रोंइनीनी।

6

नेल्ल क्येडा ठेयब अरेशो लोव

1 मिनु मोसामी “परमप्रभु यावेमी इन कली माइशो फुल्लुम मुशा ब्रेक्शो लोव नु निसाफ पतीक लोव बाक्ब। मिनु गो इन कली शेंचा माल्नुड, दे आं कली माइक्ती। गेपुकी मुल इन लशा, इन के सेल्चा चिक्शो रागीम बाक्नीनु, मेको पचा माल्नीनी। 2 गेपुकी मबेक्नी सम्म परमप्रभु यावे, इन परमप्रभु कली मान पा हिंचा माल्नीनी। गो इन कली माइशो परमप्रभु आ फुल्लुम मुशा ब्रेक्शो लोव नु आ शेंशो नेल्ले थुंम वोइक्चा माल्नीनी। गे, इन तौ नु इन चच युइ नेल्लेमी होस पा टिचा माल्नीमी। मो पाइतीनी हना, शुश नाक्त ब्रोंइनीनी। 3 मोपतीके इस्राएलीपुकी, इन नोफा दाइशशा, एको पचा कली होस पा बाक्कीन। गे शुश सोशो बोशो दुम्शा इन कली रिम्शो दुम्ब। डोंइती परमप्रभु यावे, इन किकी पिपी आन परमप्रभुमी मेको आन कली मोदेशो पा लोव पाप्तु। मेको दूध नु खुदो शुश बाक्शो रागी इन के दुम्ब। लूका ११:२८

4 इस्राएलीपुकी, नोफा दाइशशा, नेनीन। परमप्रभु यावे, का ला इं परमप्रभु बाक्ब। मर्कूस १२:२९; १कोरिन्थी ८:४-६ 5 मिनु गेपुकी परमप्रभु यावे, इन परमप्रभु कली इन थुं नेल्लेमी, इन सोक्त नेल्लेमी नु इन बोल नेल्लेमी दाक्चा माल्नीनी। ब्यवस्था १०:१२; २राजा २२:२५; मत्ती २२:३७ 6 मिनु गो इन कली मुलाक्ती अरेशो लोव इन थुंम वोइक्चा माल्नीनी। ब्यवस्था ११:१८-२० 7 मिनु गेपुकीम मेको लोव इन आल आन कली शेंचा माल्नीनी। मिनु खिम बाक्नीनु, लांम गाक्नीनु, इप्शा बाक्नीनु, बोक्नीनु, मेको अरेशो लोव आन पबर्म लोव पने। उत्पत्ती १८:१९ 8 मिनु मेको मिम्चा कली इन गुइम फ्रेंशा वोतीन। मेको इन कुप्फीम फ्रेंचा माल्नीनी। प्रस्थान १३:९; मत्ती २३:५ 9 मिनु मेको इन खिं डा थाम नु इन लाप्चोपुकीम ब्रेक्शा वोतीन।

10 मिनु डोंइती परमप्रभु यावे, इन परमप्रभुमी इन किकी पिप अब्राहाम, इसहाक नु याकूब आन कली ‘मेको रागी इन चच युइ आन कली गेनुड’ दे कसम जाप्तु। मुल मेकेर गे इन मसेल्शो ठेयब रिम्शो सहर, 11 इन मसेल्शो रिम्शो थोवकीम ब्रीशो खिं, इन मदोशो इनारपुकी, इन मखुम्शो अङ्गुर रू नु तेल रवा रू ताइनीनी। मिनु गे शुश जचा तूचा तशा, ब्यवस्था ८:३० 12 परमप्रभु यावे कली मप्रेचा, दे होस पा बाक्कीन। मेकोमी इन कली इन वाइलीम वाइल दुम्शो इजीप्त रे गुंइताक्व।

13 गेपुकी परमप्रभु यावे, इन परमप्रभु कली मान पा हिनीन। मेको कली गेय पने। मिनु मेको आ नेम ला कसम जने। ब्यवस्था १०:२०; मत्ती ४:१० 14 गे इन एर ओंथ डा रागीम बाक्शो जात जात डा मुर आन देवी देवता आन नोले मखोतीन। 15 मारदे हना परमप्रभु यावे, इन परमप्रभु, रुश पाइब परमप्रभु इन दातेमी बाक्ब। मो पाइतीनी हना, परमप्रभु यावे, इन परमप्रभु इन पबर्म शुश गाइक्ब। मिनु मेकोमी इन कली रागी रे क्याम्ब। प्रस्थान २०:५

16 गेपुकीमी मास्साहमी परमप्रभु यावे, इन परमप्रभु कली नाक्शो खोदेशो पा, मेको कली मनाक्तीन। मत्ती ४:७; प्रस्थान १७:२-७ 17 गेपुकीमी परमप्रभु यावे, इन परमप्रभुमी इन कली माइशो आ शेंशो लोव, आ देशो नेल्ल नु आ फुल्लुम मुशा ब्रेक्शो लोव शुश होस पा पने। 18 मिनु परमप्रभु यावे आ डोंइती तेको ठीक नु रिम्शो बाक्बा, मेको पने। मोपा इन कली रिम्शो दुम्ब। मिनु परमप्रभु यावेमी इन किकी पिप नु कसम जशो, रिम्शो रागी इन के सेलीन। 19 मेको नोले परमप्रभु यावेमी देशो खोदेशो पा इन जोरी सत्रु नेल्ल आन कली इन डोंइती रे खेरब। प्रस्थान २३:२७-२८

परमप्रभु आ ठेयब पतीके

20 मिनु नोले इन तौपुकीमी इन कली ‘परमप्रभु यावे, इं परमप्रभुमी आ देशो लोव, आ फुल्लुम मुशा ब्रेक्शो लोव नु आ निसाफ पतीक लोव आन अर्थ मार में?’ दे हिल्लो पाम्तेक्म हना, प्रस्थान १३:१४ 21 गे मेको आन कली ‘गो इजीप्त डा पिप फाराओ आ वाइलीम वाइल बाक्तय। मिनु शुश सक्ति पाइशो परमप्रभु यावेमी मेक रे गुंइताक्व। भजन संग्रह ४४:२ 22 मिनु परमप्रभु यावेमी गोपुकीम तचा डा पा इजीप्ती डा पिप फाराओ नु आ खिं डा मुर नेल्ल कली खतम सेल्चा, दे ठेयब नु हिंचा डा चिन्ड नु छक लाक्चा डा गेय पाप्तु। 23 मिनु आंइ किकी पिपी आन कली गेनुड देशा कसम जशो रागीम इं कली चाक्चा कली मेकेर रे गुंइताक्व। 24 मिनु परमप्रभु यावेमी एको फुल्लुम मुशा ब्रेक्शो लोव नेल्ल पचा माल्ब, दे माइशो बाक्त। गोपुकी परमप्रभु यावे, इं परमप्रभु कली मान पा हितय हना, आंइ

कली नेल्ल नाक्त रिम्शो दुम्ब। मिनु आंइ कली ब्रोंइचा गोब। मुलाक्त मोदेशो बाक्ब। 25 मिनु गोपुकी मेको आ शेंशो नेल्ल परमप्रभु यावे, इं परमप्रभु आ डोंइती पाइतय हना, मेकोमी रिम्शो दुम्ब' दे इन तौ आन कली देंचा माल्नीनी" देंत। ब्यवस्था ९:५-६; रोमी २:१३, १९-२४

7

कनानी नु मखाल्सीचा

1 मिनु मोसामी "परमप्रभु यावे, इन परमप्रभुमी इन कली गेशो रागीम चाक्दीत्ची ना, इन ओव्रचा क्येडा डोंइती हिती, गिरगाशी, एमोरी, कनानी, परिजी, हिंवी नु यबुसी आन कली खेरब। मेको नेल्ल इन क्येडा बोल्यो नु शुश मुर पाइशो ७ रागी डा मुर बाक्नीम। ब्यवस्था ३१:३ 2 मिनु परमप्रभु यावे, इन परमप्रभुमी मेको आन कली इन गुइमी जिम्मा गेपु हना, गे मेको नेल्ल आन कली साइक्चा माल्नीनी। मेकोपुकी नु कबल मपने। मिनु शिशी यो मपने। 3 मेकोपुकी नु ग्युंवे मपचा। इन तमी मेको आन तौ कली ग्युंवे पा मगेन। इन तौ कली आन तमी मचाक्चा। प्रस्थान ३४:१५-१६ 4 मारदे हना मेकोपुकीमी इन तौ आन कली आंम देवी देवता गे कीनीम। परमप्रभु यावे कली गेय मपथु, देवी देवता आन नोले खोइक्पाइक्नीम। मो दुम्मेनु, परमप्रभु यावे शुश गाइशशा, इन कली रीब पा साइक्ब। 5 मेको आन कली मार पचा माल्नीनी देंशा हना, मेको आन चढेतीक प्रेत्चा माल्नीनी। मेको आन लाइशशो मूर्ति जिक्चा माल्नीनी। मेको आन अशेराह देवी आ मूर्ति खोइक्चा माल्नीनी। मेको आन शी मुशा सेल्शो मूर्तिपुकी मीम हुम्चा माल्नीनी। ब्यवस्था १२:२-३ 6 मारदे हना गे परमप्रभु यावे, इन परमप्रभु आ आंम मुर बाक्नीनी। परमप्रभु यावेमी नेल्ल जात जात डा मुर आन दाते रे इन कली आंम मुर सेल्चा, दे योव्रतु। प्रस्थान १९:५-६

7 मिनु परमप्रभु यावेमी जात जात आन क्येडा गे शुश मुर बाक्तीके इन कली दाक्शा योव्रशो ममाइ। थमा पा, गे जात जात डा मुर आन क्येडा आइक्च जात बाक्नीनी। ब्यवस्था १०:१५ 8 तन्न परमप्रभु यावेमी इन कली दाक्ब। मिनु मेकोमी 'इन किकी पिपी नु पशो कबल खाप्नुड' देंत। मोपतीके परमप्रभु यावेमी शुश सक्ति पाइशशोमी इन कली वाइलीम वाइल सेल्शो इजीप्त डा पिप फाराओ रे प्रोंइशा, गुंइताक्व। होसे ११:१

9 परमप्रभु यावे, इन परमप्रभुमी आ कबल काइ मप्रोंइब आ देंशो पाइब परमप्रभु बाक्ब। मिनु परमप्रभु कली दाक्ब नु आ शेंशो टीब आन कली हजार पाला सम्म आ पशो कबल खाप्ब नु आ शिशी कोंइना कोंइन बाक्ब। प्रस्थान २०:६ 10 मेकोमी आ कली मदाक्ब आन कली चहिं क्येक्क लेशशा, साइक्ब। आ कली मदाक्ब आन कली शुश मफाल्थु, मेको आन कली शोल्मो पा साइक्ब। नहुम १:२ 11 मोपतीके गो मुलाक्त इन कली माइशशो आ शेंशो, आ फुल्लुम मुशा ब्रेक्शो लोव्र नु आ निसाफ पतीके लोव्र होस पा पने। 12 मिनु गेपुकीमी एको ठीक पतीके लोव्र होस पा नेशा टिशा, पाइतीनी हना, इन परमप्रभुमी इन किकी पिपी नु कसम जशा, पशो कबल खाप्शा इन कली मप्रोंइब। प्रस्थान २३:२२-३१ 13 मेकोमी इन कली दाक्शा, आसीक गेशा, शुश सेल्ब। मेकोमी इन आल आन कली आसीक गोब। इन किकी पिपी आन कली कसम जशा गेशो रागीमी इन रू डा फल फुल, इन अन्न, इन अडगुर शांबु नु तेल, इन बी ब्यफ आन बाछा नु इन क्यारश भेडा आन चाइक्ब नेल्ल आन कली आसीक गोब। होसे २:७-१२ 14 गे नेल्ल जात जात डा मुर आन क्येडा आसीक राइब दुम्नीनी। इन दातेमी सुइ वोंइश मुर नु मीश मुर आल मथीब मबाक्नीम। इन बी ब्यफ, क्यारश भेडा थारा मदुम्नीम। 15 मिनु परमप्रभु यावेमी रोइ नेल्ल इन क्येडा डोन वोइक्ब। गे इन तशो इजीप्त डा हिंचा डा रोइ इन कली मपपाइक्ब। तन्न इन कली मदाक्ब आन कली मेको रोइ कोप्ब। प्रस्थान ९:१-१२ 16 मिनु गे परमप्रभु यावे, इन परमप्रभुमी इन कली जिम्मा गेशो जात जात डा मुर नेल्ल कली रीब पा साइक्नीनी। मिनु गे मेको आन कली शिशी मपने। मेको आन देवी देवता आन कली सेउ मपने। मारदे हना मो पाइतीनी हना, गे खतम दुम्नीनी। प्रस्थान २३:३३; प्रस्थान ३४:१२; यहोसु २३:१३

17 मिनु गे इन थुंमी 'एको रागी रागी डा मुर आंइ क्येडा शुश बाक्नीम। गो मेको आन कली दोपा गुंइशा, खेरने चाप्नीकी डा?' मदेनीन। गन्ती १३:३१; गन्ती १४:१-४ 18 मेको आन क्येडा महिनीन। परमप्रभु यावे, इन परमप्रभुमी फाराओ नु इजीप्त रागी डा मुर नेल्ल कली मार मार पवा, मेको मिम्तीन। 19 गेपुकीमी परमप्रभु यावे, इन परमप्रभुमी आ ठेयब नाक्तीक, आ पशो चिन्ड नु छक लाक्चा डा गेय, आ शुश सक्ति पाइशशो नु ठेयब बोल पतीकेमी इन कली गुंइताक्व। गे आंमा तशो बाक्नीनी। मिनु परमप्रभु यावे, इन परमप्रभुमी इन हिंशो जात जात डा मुर नेल्ल आन कली इजीप्ती आन कली खोदेशो पाइब। ब्यवस्था ४:३४; ब्यवस्था २९:२ 20 मिनु परमप्रभु यावे, इन परमप्रभुमी मेको आन के लीशो नु इन कली तशा हिंशा ख्रुइशशा बाक्शो मुरपुकी यो मुर साइक्ब रोइ सोइशशा साइक्ब। 21 गेपुकी चहिं

मेको आन क्येडा महिनीन। मारदे हना परमप्रभु यावे, इन परमप्रभु इन दातेमी बाक्ब। मेको ठेयब नु मान पा हिंचा डा परमप्रभु बाक्ब। 22 मिनु परमप्रभु यावे, इन परमप्रभुमी मेको रागी रागी डा मुर आन कली इन डोंइती रे का का पा ग्रुंडब। गेपुकीमी मेकेर डा मुर आन कली कालेम साइक्चा मताइनीनी। मो पाइतीनी हना, इन एर ओंथ डा ब्वाकी डा जन्तु शुश दुम्नीम। 23 मिनु परमप्रभु यावे, इन परमप्रभुमी मेको जात जात डा मुर आन कली शुश वाम ग्याम सेल्शा, का का पा साइक्चा सम्म, इन कली जिम्मा गेब। 24 मिनु मेकोमी मेको आन पिप यो इन कली जिम्मा गेब। मिनु गे मेको आन नें रागी रे क्याम्नीनी। इन डोंइती सुइ मबाक्नीम। 25 गेपुकीमी मेको आन शी मुशा सेल्शो मूर्तिपुकी मीम हुम्चा माल्नीनी। मूर्तिम बाक्शो सुन चांदी बाक्त हना, वाल्शा आंम कली मवोंइसीन। मारदे हना मोदेशो पाइतीनी हना, इन कली मरिम्शो दुम्ब। मेको परमप्रभु यावे, इन परमप्रभु कली ग्रांग्रा बाक्ब। 26 मिनु गेपुकीमी मारेइ ग्रांग्रा दिचा डा थोव्रक इन खिंम मचाक्कीन। मो पाइतीनी हना गेपुकी यो मेको आन खोदेशो पा सराप राइब दुम्नीनी। गेपुकीमी मेको नेल्ल कली ग्रांग्रा दिशो दुम्तीके, तिल्चा माल्नीनी” देंत। यहोसु ७:११-१२

8

परमप्रभु आ अरेशो नेंशा टिचा

1 मिनु मोसामी “गो मुलाक्त इन कली परमप्रभु आ शेंशो नेल्ल माइक्तन्नी। गेपुकीमी मेको होस पा पचा माल्नीनी। मो पाइतीनी हना, गेपुकी ब्रोंइचा ताइनीनी, सोशा बोशा शुश दुम्नीनी नु परमप्रभु यावेमी इन किकी पिपी आन कली ‘मेको गेनुड’ दे कसम जशो रागी ओव्रशा इन के सेल्शा बाक्चा ताइनीनी। 2 मिनु परमप्रभु यावे, इन परमप्रभुमी इन कली ४० बर्स सम्म गोरशो रागीमी बाक्पाइक्तु। इन कली मारदे मोदेशो पाप्तु देशा हना, इन कली ब्रेम्पाइक्चा, इन थुं नाक्चा नु गे इन नेल्ल थुंमी आ शेंशो पाइनीनी देय मपाइनीनी, दे तुइक्चा कली इन कली मेको ४० बर्स सम्म मेकेर गाक्पाइक्तु। ब्यवस्था १३:४; उत्पत्ती २२:१; प्रस्थान १६:४; प्रस्थान २०:२०; न्यायाधीस २:२२ 3 मिनु मेकोमी इन कली ब्रेम्पाइक्चा, दे शोव्रलु बेक्पाइक्तु। मिनु मेकोमी इन किकी पिपी कली इन मतुइशो मन्ना जपाइक्तु। मारदे इन कली मन्ना जपाइक्तु देशा हना, मुरुम जचा थोव्रक जशा ला मब्रोंइनीम, तन्न परमप्रभु यावे आ लोव्र रे ब्रोंइनीम, दे तुइक्पाइक्चा कली मन्ना जपाइक्तु। प्रस्थान १६:१३-१५; मत्ती ४:४ 4 मेको ४० बर्स सम्म इन फेक्शो वा मजे। इन खोइल महोम्म। ब्यवस्था २९:४ 5 मिनु मुरपुकीमी दोदेशो पा आन तौ आन कली शेंचा, दे सजाइ गेनीमी, मोदेशो पा परमप्रभु यावे, इन परमप्रभुमी इन कली शेंचा, दे सजाइ गेप्तु। मेको तुइक्चा माल्नीनी। यसैया २८:२६; येरमीया ३०:११; येरमीया ४६:२८ 6 मिनु गेपुकीमी परमप्रभु यावे, इन परमप्रभु आ शेंशो पना पन बाक्कीन। परमप्रभु आ लां गाक्शा, मेको कली मान पा हिनीन। 7 परमप्रभु यावे, इन परमप्रभुमी इन कली रिम्शो रागी लाइक्ब। मेकेर खोला, दिंम नु पहाड रे बुक्शो ब्वाक्कु नु दोम्ली बाक्नीम। 8 मेको रागीम चेरब, क्योव्रज, अडगुर बोट, फोव्रशी रवा, दारीम बोट, तेल रवा नु खुदो बाक्ब। 9 मेको रागीम गे काइ श्येत मजथु, मारेइमी खांचो मदुम्नीनी। मेको रागी डा फुल्लुमी फलाम बाक्ब। मेको आ पहाड रे गे तांबा ग्रुंडनीनी। 10 मिनु गेपुकीमी मरूनी सम्म जशा तूशा, इन कली गेशो रिम्शो रागी आ पर्बम परमप्रभु यावे, इन परमप्रभु कली ठेयब सेल्चा माल्नीनी।

11 मिनु गे परमप्रभु यावे, इन परमप्रभु कली मप्रेंदीन। मिनु मुलाक्त गो इन कली देशो आ शेंशो, आ निसाफ पतीके लोव्र नु आ फुल्लुम मुशा ब्रेक्शो लोव्र यो मप्रेंचा, दे होस पा बाक्कीन। 12 मिनु गेपुकी जशा तूशा, रूशा, रिम्शो खिं सेल्शा बाक्नीनी, 13 मिनु इन बी ब्यफ नु क्यारश भेडा शुश दुम्शा, इन सुन चांदी नु इन मारेइ मारेइ शुश दुम्मेनु, 14 गेपुकी ठेयब लेशशा, वाइलीम वाइल दुम्तीक इजीप्त रे ग्रुंडब परमप्रभु यावे, इन परमप्रभु कली मप्रेंचा, दे होस पा बाक्कीन। 15 मेकोमी इन कली ठेयब हिंचा डा गोरशो रागीम बाक्पाइक्तु। मेकेर बीस पाइशो बुस्स नु बिच्छी बाक्तेक्म। मेकोमी इन कली सोव्रशो रागीम हिरताक्व। मिनु इन पर्बम ठेयब फुल्लु रे ब्वाक्कु बुक्पाइक्तु। गन्ती २१:६; प्रस्थान १७:६ 16 मिनु मेकोमी इन कली गोरशो रागीम मन्ना जचा गेप्तु। मेको इन किकी पिपी आन मतुइशो जचा थोव्रक बाक्त। मारदे मोदेशो पाप्तु देशा हना, मेको नेल्ल इन कली ब्रेम्पाइक्चा, नाक्चा नु नोले रिम्शो पचा कली पाप्तु। 17 मिनु गे नोले इन थुंमी ‘गो आंम आंइ सक्तिम एको शोंप चेम्तक’ दे मदेनीन। 18 तन्न परमप्रभु यावे, इन परमप्रभुमी आंइ कली शोंप चेम्तीक सक्ति गेप्तु, दे मिम्तीन। मेकोमी इन किकी पिपी नु कसम जशा पशो कबल गेना हना यो लीपाइक्ब। मोदेशो पा मुलाक्त बाक्ब, दे तुइक्नीनी। ब्यवस्था ४:३१ 19 मिनु गे परमप्रभु यावे, इन परमप्रभु कली प्रेंशा, देवी देवता आन नोले खोइक्तीनी, मेको आन कली पूजा पाइतीनी नु मेको आन डोंइती बाप्तीनी हना, गो इन कली ‘गेपुकी थमा पा साइक्चा पुंइसीनीनी’ दे मुलाक्ती लोव्र का पाइनुड। 20 मिनु परमप्रभु यावेमी इन डोंइती

रागी रागी डा मुर आन कली खतम सेल्शो खोदेशो पा, गेपुकीमी आ लोत्र मनेथु, मटीतीनी हना, परमप्रभु यावे, इन परमप्रभुमी इन कली यो खतम सेल्ब” देत।

9

परमप्रभुमी लडाइ पशो

1 मिनू मोसामी “गे इस्राएलीपुकी, नोफा दाइशशा, नेनीन! मुल गे मेको रागी ओत्रचा कली यर्दन खोला शोक्नीनी। इन क्येडा ठेयब नु सक्ति पाइशशो रागी रागी, सरीड थिचा चिक्शो गारो हिरशो सहरपुकी इन के सेल्नीनी। ब्यवस्था १:२८ 2 मेकेर अनाक आ चच युइ बाक्नीमी। मेकोपुकी ठेयब नु लाइशशो मुर बाक्नीम, दे तुइक्नीनी। गे डोंइती ‘अनाकीम डा मुर आन डोंइती सु राप्ने चाप्बा डा’ दे लोत्र पशो नेतीनी। 3 परमप्रभु यावे, इन परमप्रभु इन डोंइडोंइती शोक्शा लाइब, दे तुइक्चा माल्नीनी। मेको नेल्ल गु दाक्ब मी खोदेशो बाक्ब। मिनू मेको आन कली मी खोदेशो पा दाक्ब। मेकोमी इन कली जिम्मा गेब। मिनू परमप्रभु यावेमी देशो खोदेशो पा, गे मेको आन कली खेरशा रीब पा साइक्नीनी। ब्यवस्था ४२४

4 मिनू परमप्रभु यावे, इन परमप्रभुमी मेको आन कली इन डोंइती रे खेरानु, गे इन थुंमी ‘परमप्रभु यावेमी आंइ ठीक पतीके एको रागीम चाक्तु’ दे ममिम्तीन। मेको रागी रागी डा मुर आन मरिम्शो पतीके परमप्रभु यावेमी मेको आन कली इन डोंइती रे खेरब। ब्यवस्था ८:१७; उत्पत्ती १५:१६ 5 गेपुकी इन ठीक पतीक नु इन ठीक थुं दुम्तीके मेको आन रागी इन के सेल्चा तशो मननी। तन्न मेको रागी रागी डा मुर आन मरिम्शो पतीके परमप्रभु यावे, इन परमप्रभुमी मेको आन कली खेरब। मिनू इन किकी पिप अब्राहाम, इसहाक नु याकूब नु जशो कसम खाप्चा कली मो पाइब। ब्यवस्था ६:२५

6 परमप्रभु यावे, इन परमप्रभुमी इन ठीक पतीक आ पर्बम इन कली मेको रिम्शो रागी इन के सेल्चा कली मगेवो। मारदे हना गे शुश मटीब मुर बाक्नीनी। प्रस्थान ३२:९ 7 मिनू गेपुकी गोरशो रागीम परमप्रभु यावे, इन परमप्रभु कली दोपा गाइक्पाइक्नी, मेको मप्रेदीन। इजीप्त रागी रे गे एक जाक्नी सम्म गे परमप्रभु यावे आ देशो मटिशो बाक्तीनी।

8 मिनू होरेब डांडामी यो गे परमप्रभु यावे कली गाइक्पाइक्तीनी। मिनू परमप्रभु यावेमी इन कली क्याम्चा डा पा शुश गाइक्ताक्व। प्रस्थान ३२:१-२४ 9 मिनू गो परमप्रभु यावेमी गेपुकी नु पशो कबल डा लोत्र ब्रेक्शो फुल्लु ब्रथ डांडा डोंइसाक्यी। मिनू गो ४० नाक्त नु ४० नाक्दो मेकेर बाक्ती। शोब्ले मजड, ब्वाक्कु यो मतूडु। प्रस्थान ३४:२८ 10 मिनू परमप्रभु यावेमी, आंम गुइम ब्रेक्शो फुल्लु निक्शी गेती। मिनू मेको फुल्लु तार मार ब्रेक्शो बाक्त देशा हना, परमप्रभु यावेमी डांडामी इन कली पशो लोत्र नेल्ल ब्रेक्शो बाक्त। परमप्रभुमी मेको गुम्ची नाक्त डांडाम ब्रशो मी आ दाते रे इन कली लोत्र पशो बाक्त। 11 मिनू मेको ४० नाक्ती नाक्दो थुम्ची ना परमप्रभु यावेमी मेको कबल डा लोत्र ब्रेक्शो फुल्लु निक्शी आं कली गेती। 12 मिनू परमप्रभु यावेमी आं कली ‘बोक्को, रीब पा एक रे बुपो। मारदे हना इ इजीप्त रे गुंइशो मुरपुकीमी आं देशो लां रीब पा प्रोंइतेक्म। आंम आन कली खतम सेल्तेक्म। गोम मेको आन कली मपचा देशो पाम्तेक्म नु आंम कली सुन के मूर्ति सेल्तेक्म’ देत। 13 मिनू परमप्रभु यावेमी आं कली ‘गो एको मुर आन कली कोत्रता। मिनू एकोपुकी काइ मटीब बाक्नीम। 14 मुल आं कली पुंइचा प्रोंइयी। मिनू गो मेको आन कली खतम सेल्नुड। मिनू मेको आन नें रागी रे क्याम्नुड। मिनू गे रे पा मेको आन क्येडा ठेयब नु सक्ति पाइशशो जात का सेल्नुड’ देत।

15 मिनू गो डांडा रे ब्रुप्ती। मेको डांडाम मी ब्रस डा ब्रस बाक्त। मिनू गो मेको कबल डा लोत्र ब्रेक्शो फुल्लु निक्शी कुरता। 16 मिनू गेपुकीमी परमप्रभु यावे, इन परमप्रभु कली पाप पा, आंम कली बाछा आ मूर्ति सेल्सीशो बाक्तीनी। परमप्रभु यावेमी इन कली अरेशो लां रीब पा प्रोंइशा दूली लां खोइक्नी बाक्त। 17 मिनू गो मेको फुल्लु निम्फा ताइशशा, इन डोंइती प्रोल्ता।

18 मिनू डोंइती खोदेशो पा, गो परमप्रभु यावे आ डोंइती बाप्शा, ४० नाक्ती ४० नाक्दो शोब्ले मजड, ब्वाक्कु यो मतूडु। इन पशो पाप आ पर्बम मोदेशो पा बाक्ती। गे परमप्रभु यावे कली काइ मरिम्शो पा गाइक्पाइक्तीनी। 19 मारदे हना गो परमप्रभु यावेमी इन पर्बम गाइशशा, चुरशा पशो तशा, साप्पा हिंती। मेकोमी इन कली थमा पा साइक्च, दे मिम्शो बाक्त। मिनू परमप्रभु यावेमी मेना यो आं पुंइशो लोत्र नेतु। हिब्रू १२:२१ 20 परमप्रभु यावे हारून आ पर्बम यो शुश गाइशशा ‘मेको कली साइक्नुड’ दे मिम्शो बाक्त। गो हारून आ पर्बमी यो पुंइता। 21 मिनू इन पशो पाप, मेको बाछा लाइशशा, मीम हुम्ताक्ड। मेको कली तुप्शा, फस सेल्ता। मिनू मेको फस पहाड रे यिशो खोलाम ताइक्ताक्ड।

22 मिनु गेपुकीमी तबेरा, मास्साह नु किब्रोथ-हत्तावामी यो परमप्रभु यावे कली गाइक्पाइक्तीनी। गन्ती ११:३; प्रस्थान १७:७; गन्ती ११:३४ 23 मिनु परमप्रभु यावेमी गे कादेश-बारनेआ रे लशा, इन कली 'मेकेर लने। मिनु इन कली गेशो रागी इन के सेलीन' दे सोइक्ताक्व। मिनु गेपुकीमी परमप्रभु यावे, इन परमप्रभु आ अरेशो मबित्थु, गन गन पा मेको कली थमा मसुइक्नी। मेको आ लोव्र यो मटिनी। गन्ती १३:२, ३१; गन्ती १४:१-४ 24 गो इन कली तुइक्त्तु रेन गे परमप्रभु यावे आ लोव्र मटिथु गन गन पाइतीनी।

मोसामी इस्राएली आन पर्वम पुंइशो

25 मोपतीके परमप्रभु यावे आ डोंइती गो ४० नाक्ती ४० नाक्दो सम्म बाप्शा बाक्ती। मारदे हना परमप्रभु यावेमी 'गे इन कली क्याम्नुड' देशो बाक्त। ब्यवस्था ९:१८ 26 मिनु गो परमप्रभु यावे कली 'परमप्रभु, इन मुर आन कली मक्याम्दीन। गे मेको आन कली प्रोंइशा इन शुश सक्ति पाइशामी इजीप्त रागी रे गुंइताक्नी। 27 इन वाइल अब्राहाम, इसहाक नु याकूब आन कली मिम्तीन। एको मुर आन खकटा थुं, इन अरेशो मटितीके नु आन मरिम्शो पतीके मकोव्रडीन। 28 गे मेको आन कली क्याम्ताक्नी हना, आंइ कली गुंइशो रागी डा मुरपुकीमी "परमप्रभु यावेमी मेको आन कली देशो रागी चाक्दीन्ने मचाप्तीके, मेको आन कली मदाक्तीके गोरशो रागीम साइक्चा कली एक रे गुंइशा लाइक्त्तु" देनीम। गन्ती १४:१६ 29 मेको इन मुर बाक्नीम। मिनु गे शुश सक्ति नु ठेयब बोलमी गुंइशा चाक्तीनी' दे परमप्रभु कली पुंइशा, लोव्र पाता" देत।

10

लेंशा फुल्लुम मुशा ब्रेक्शो लोव्र

1 मेना परमप्रभु यावेमी आं कली "डोंइती डा खोदेशो पा फुल्लु निक्शी चेतो। मिनु आं कली गुम्थ, डांडा डोंइसो। मिनु शी के सन्दोस का यो सेलो। प्रस्थान ३४:१; प्रस्थान २५:१० 2 मिनु गो डोंइती डा इ प्रोल्शो फुल्लुम ब्रेक्शो लोव्र खोदेशो पा, नक फुल्लुम लेंशा ब्रेक्नुड। मिनु गे मेको कली सन्दोसम कुर पा वोतो" माइक्ती। प्रस्थान ३२:१९ 3 मिनु गो बोल्यो शी के सन्दोस का सेल्ला। मिनु डोंइती डा खोदेशो पा फुल्लु निक्शी चेतता। मिनु मेको चेशो फुल्लु निक्शी कुरशा, डांडा डोंइसाक्यी। 4 मिनु परमप्रभु यावेमी डोंइती डांडाम लोव्र पशो खोदेशो पा मेको १० ओटा लोव्र लेंशा ब्रेक्ताक्व। मेको लोव्र, गेपुकीम डांडा डा मी आ दाते रे नेंशो ननी। मिनु परमप्रभु यावेमी मेको ब्रेक्स पाइशो चेशो फुल्लु निक्शी गेती। 5 मिनु मेको कुरशा गो डांडा रे बुप्ती। मिनु गो मेको चेशो फुल्लु निक्शी कली आं सेल्शो सन्दोस आगाम कुर पा वोइक्ता। मिनु परमप्रभु यावेमी आं कली अरेशो खोदेशो पा मेको फुल्लु सन्दोस आगाम बाक्नीस। प्रस्थान २५:२१

हारून बेक्शो

6 मिनु इस्राएलीपुकी बेयरोथ-बेने-याकान रे गाक्शा, मोसेराह माइक्तीके जाक्तेक्म। मेकेर हारून बेक्त। मिनु मेको कली मेकेर थिम्तेक्म। मिनु आ तौ एलाजरमी आ पा डा चढेतीक गेय पचा गोप्तु। गन्ती ३३:३१-३३; गन्ती २०:२८; गन्ती ३३:३७-३९ 7 मिनु इस्राएलीपुकी मेकेर रे गाक्शा, गुदगोदा गे लाम्तेक्म। मिनु गुदगोदा रे गाक्शा, शुश ब्वाक्कु बाक्तीके योल्बाथाह जाक्तेक्म।

8 मेना परमप्रभु यावेमी लेवी आ थर डा मुर आन कली योव्रतीमी। मार कली योव्रतीमी देशा हना, परमप्रभु यावे आ कबल डा लोव्र कुरपाइशो सन्दोस कुरचा, परमप्रभु यावे कली गेय पचा कली आ डोंइती राप्चा नु आ नेम मुर आन कली आसीक गेचा कली योव्रतीमी। मुल सम्म मोदेशो बाक्ब। ब्यवस्था १८:५; गन्ती ६:२३-२७ 9 मोपतीके लेवीपुकीम आन लोक्ब खोदेशो पा रागी डा रू मतामे। परमप्रभु यावे मेको आन शोंप बाक्ब। परमप्रभु यावे, इन परमप्रभुमी दोदेशो देमे, मोदेशो दुम्त। गन्ती १८:२०

परमप्रभुमी मोसा आ पुंइशो गेशो

10 मिनु गो डोंइती डा खोदेशो पा ४० नाक्ती ४० नाक्दो डांडाम बाप्शा बाक्ती। मेना यो परमप्रभु यावेमी आं लोव्र नेंतु। मिनु इन कली मसद। 11 मिनु परमप्रभु यावेमी आं कली "मुल बोक्शा लावो। मुर आन डोंइती गाक्चा कली लावो। मिनु गो मेको आन किकी पिपी आन कली कसम जशा गेशो रागी मेकोपुकी ओव्रशा, आंम के सेल्चा मालनीम" दे माइक्ती।

परमप्रभु आ दाक्शो

12 मिनु गे इस्राएलीपुकी, परमप्रभु यावे, इन परमप्रभुमी इन कली मार पशो दाक्ब देंशा हना, गेपुकी परमप्रभु यावे, इन परमप्रभु कली मान पा हिंचा माल्नीनी। गेपुकी मेको आ लां गाक्शा, मेको कली दाक्चा नु इन थुं नु सोक्त नेल्लेमी परमप्रभु यावे, इन परमप्रभु कली गेय पचा माल्नीनी। मीका ६:८ 13 दोपा दाक्चा नु गेय पचा देंशा हना, गो मुलाक्ती इन कली देंशो परमप्रभु यावे आ शेंशो नु आ फुल्लुम मुशा ब्रेक्शो लोव्र पचा माल्नीनी। मेको इन कली थम रिम्शो दुम्ब। 14 मिनु नेनीन, स्वर्ग नु सरीड नु रागी नु मेकेर बाक्ब मारेइ मारेइ नेल्ल परमप्रभु यावे, इन परमप्रभु केन बाक्ब। 15 मो हना यो परमप्रभु यावेमी इन किकी पिपी आन कली तशा, दाक्ताक्ब। मिनु मेको आन चच युइ, इन कली जात जात डा मुर नेल्ल आन दाते रे योव्रतु। मोदेंशो पा मुलाक्ती बाक्ब, दे तुइक्नीनी। ब्यवस्था ७६ 16 मोपतीके इन थुं कली खोइक्तीक चिनु खोतीन। मिनु मटीब मदुमीन। 17 मारदे हना परमप्रभु यावे, इन परमप्रभु देवी देवता आन परमप्रभु बाक्ब। मेको प्रभु आन प्रभु बाक्ब। मेको नेल्ल क्येडा ठेयब, सक्ति पाइश्शो नु हिंचा डा परमप्रभु बाक्ब। मेकोमी सुइ आन कुल मकोव्रब। मेकोमी घूस मताक्ब। 18 मेकोमी रोम रोइक्च नु वोंइश बेक्शो मीश मुर आन कली ठीक निसाफ पाइब। मेकोमी अर्को रागी डा मुर आन कली दाक्ब। मिनु मेको आन कली जचा फेक्चा गेब। 19 मिनु गेपुकी यो अर्को रागी डा मुर आन कली दाक्तीन। मारदे हना गे यो इजीप्तमी अर्को रागी डा मुर बाक्तीनी। प्रस्थान २२:२०-२३ 20 गेपुकीमी परमप्रभु यावे, इन परमप्रभु कली मान पा हिंचा माल्नीनी। मेको आ गेय पचा माल्नीनी। मेको आ नोले खोइश्शा, आ नेमी कसम जचा माल्नीनी। 21 मेकोन इन कली ठेयब सेल्लेके बाक्ब। मिनु इन परमप्रभु दुम्शा, इन पर्बम हिंचा डा ठेयब गेय पाइब मेकोन बाक्ब। गे मेको नेल्ल आंमा तशो बाक्नीनी। 22 इन किकी पिपी इजीप्त रागी लमानु, ७० जना मुर ला लशो बाक्तेक्म। मिनु मुल परमप्रभु यावे, इन परमप्रभुमी इन कली सरीड डा सोरुल खोदेंशो पा शुश सेल्लु। उत्पत्ती ४६:२७; ब्यवस्था १:१०

11

परमप्रभु यावे आ ठेयब गेय

1 मिनु मोसामी “गे परमप्रभु यावे, इन परमप्रभु कली दाक्चा माल्नीनी। गे नाक्त किंत किंत मेको आ ब्रेक्शा अरेशो लोव्र, आ फुल्लुम मुशा ब्रेक्शो लोव्र, आ निसाफ पतीक लोव्र नु आ शेंशो नेल्ल टिने। 2 मिनु परमप्रभु यावे, इन परमप्रभुमी इन आल आन डोंइती मारेइ यो छक लाक्चा डा गेय नु सजाइ मकोइद। तन्न मेकोमी दोपा आ ठेयब पतीकेमी शुश सक्ति पाइश्शो नु ठेयब बोल पतीकेमी इन कली इजीप्त रागी रे गुंइशो, गे नेल्लेम तशा तुइश्शा मिम्चा माल्नीनी। ब्यवस्था ४:३६ 3 मिनु इजीप्त रागी नु आ पिप फाराओ नु मेको आ मुर नेल्ल आन कली कोंइशो चिन्ड नु आ पशो गे नेल्ले तशो तुइश्शो बाक्नीनी। 4 मिनु मेकोमी इजीप्त डा लडाइ पाइक्ब, शारा नु बग्गी आन कली पशो नेल्ल तुइक्नीनी। इन कली खेदा पामेनु, मेकोमी मेको आन कली लल समुन्द्र डा ब्वाक्कुम साइक्चा कली खुम्तु, मेको यो तशो बाक्नीनी। मुल सम्म मेको लडाइ पाइब आन हुल खतम दुम्शो बाक्नीम। प्रस्थान १४:२५, २७ 5 मिनु एको रागी मजाक्शो सम्म गोरशो रागीम मेकोमी इन कली मार मार पवा, मेको गे तुइश्शो बाक्नीनी। 6 मिनु मेकोमी रूबेन आ चच निक्शी, एलीआब आ तौ दाथान नु अबीराम आस कली पशो तुइक्नीनी। दोपा खपीम आ शोव्र पाक्शा इस्राएली आन दातेमी मेको आस कली दाक्गा। मिनु आस खिं डा मुर नु आस ताम्बु नु मेको आस मारेइ मारेइ दाक्शो गेपुकीम तुइश्शो बाक्नीनी। गन्ती १६:२५-३४ 7 गेपुकी परमप्रभु यावेमी पशो ठेयब गेय नेल्ले तशो बाक्नीनी।

8 मोपतीके गो मुलाक्ती इन कली देंशो परमप्रभु यावे आ शेंशो नेल्ल टिशा पने। मेको पाइतीनी हना, गेपुकी बोल्यो दुम्नीनी। मिनु खोला शोक्शा इन के सेल्ल्या चिक्शो रागीम ओव्रशा, थमा पा इन के सेल्ले चाप्नीनी। 9 मोपा गे परमप्रभु यावेमी इन किकी पिपी नु आन चच युइ, इन कली, गेशो रागीम शुश ब्रोंइशा बाक्चा ताइनीनी। मेको रागीम शुश दूध नु खुदो बाक्ब। प्रस्थान ३:१७ 10 मारदे हना मेको इन के सेल्ल्या चिक्शो रागी, इन गूशा पिशो इजीप्त रागी खोदेंशो ममाइ, मेकेर वांचेर शोक्शा, गिग खाइ रू कली ब्वाक्कु कुर पचा माल्ताक्नी। 11 मेको गे शोक्चा, इन के सेल्ल्या चिक्शो रागी, डांडा नु बेंसी डा रागी बाक्ब। मेकेर रेउ यिशा, रागी जिप्पाइक्ब। 12 परमप्रभु यावे, इन परमप्रभुमी मेको रागी कली कोव्रब। मेकोमी बर्स डा डोंइती डा नाक्त रे नोले डा नाक्त सम्म, गेना हना यो कोव्रब।

13 मिनु मुलाक्ती गो इन कली देंशो आं शेंशो नेतीनी, गे परमप्रभु यावे, इन परमप्रभु कली इन थुं सोक्त नेल्लेमी दाक्शा नु मेको कली गेय पाइतीनी हना, लेवी २६:३-५; येरमीया ५:२४ 14 मेना परमप्रभु यावेमी इन कली ‘गो इन रू कली गारचा डा रेउ गेनुड। डोंइती नु नोले डा रेउ ठीक पा गेनुड। मोपा इन अन्न, इन अडगुर नु तेल रवा आन फल खुप्ने चाप्नीनी। 15 मिनु गो इन बी ब्यफ, क्यारश भेडा आन कली योव्रतीकेम घांस वापाइक्नुड। मिनु गे जशा

तूशा रूनीनी' दे परमप्रभुमी इन कली देंत। 16 मोपतीके सुइम इन कली हेंथे गाक्पाइक्चा मगेने, होस पा बाक्कीन। गेपुकी परमप्रभु क्येडा डोन लाइतीनी नु देवी देवता आन कली सेउ पाइतीनी हना, 17 परमप्रभु यावेमी गाइशशा रागीम रेउ मयिपाइक्ब। मिनु मारेइ खुप्चा मताइनीनी। मिनु परमप्रभु यावेमी इन कली गेशो रिम्शो रागी रे क्याम्ब। ब्यवस्था २८:२३-२४; लेवी २६:१९-२०

आसीक नु सराप

18 मिनु गेपुकीमी आं देशो लोव्र इन थुंम वोतीन। मेको मिम्चा कली इन गुइमी चिन्ड फ्रेंदीन। मिनु कुप्फीम फ्रेंतीके खोदेशो पा फ्रेंचा माल्नीम। ब्यवस्था ६:६-९ 19 आंम खिंम बाक्नीनु, लां गाक्नीनु, इप्थ लनीनु नु बोक्नीनु इन तमी तौ आन कली मेको अरेशो आ पबर्म लोव्र पा शेंदीन। 20 इन खिं डा थाम तारी नु लाप्चो तारी ब्रेक्तीन। 21 मिनु गे नु इन आलपुकी परमप्रभु यावेमी इन किकी पिपी आन कली 'गेनुड' दे कसम जशो रागीमी शुश ब्रॉइनीनी। रागी तार सरीड बाक्म सम्म शुश ब्रॉइनीनी।

22 गेपुकीमी गो इन कली देशो अरेशो लोव्र नेल्ल होस पा पाइतीनी नु परमप्रभु यावे, इन परमप्रभु कली दाक्ताक्नी हना, मेको आ लां नेल्ल गाक्शा, मेको कली मप्रोंइतीनी हना, 23 परमप्रभु यावेमी मेकेर डा रागी रागी डा मुर नेल्ल कली इन डोंइती रे खेरब। मिनु गे इन क्येडा शुश नु सक्ति पाइशशो रागी रागी डा मुर आन रागी इन के सेल्नीनी। ब्यवस्था ७:१-२ 24 गे इन खोइलीम थेक्शो रागी नेल्ल गे इन के दुम्ब। गोरशो रागी रे लेबानोन सम्म नु ठेयब खोला युफ्रेटीस रे पच्छिम डा समुन्द्र सम्म इन के सांद दुम्ब। 25 गे नु लडाइ पा सुइ मग्रानीम। परमप्रभु यावे, इन परमप्रभुमी आ देशो खोदेशो पा तेको रागी थेक्नीनी, मेकेर डा मुर आन कली इन कली तशा हिंतीक थुं गेब। प्रस्थान २३:२७

26 नेनीन, मुलाक्त गो आसीक नु सराप इन डोंइती वोइक्नुड। ब्यवस्था ३०:१,१५,१९ 27 गे परमप्रभु यावे, इन परमप्रभु आ शेंशो टीतीनी हना, आसीक राइनीनी। ब्यवस्था २८:२,१५ 28 परमप्रभु यावे, इन परमप्रभु आ शेंशो मटिथु, गो मुलाक्ती इन कली देशो लचा माल्शो लां रे हेंथे गाक्तीनी नु इन मतुइशशो देवी देवता आन नोले खोइक्तीनी हना, सराप राइनीनी।

29 मिनु परमप्रभु यावे, इन परमप्रभुमी इन कली इन के सेल्चा चिक्शो रागीम ओंइचानीनु, गेरीजीम डांडा रे आसीक गेचा नु एबाल डांडा रे सराप पचा माल्नीनी। ब्यवस्था २७:१२-१३; यहोसु ८:३३-३४ 30 मेको डांडापुकी यर्दन आइक्ची हांबु, नां रिक्तीक गे यर्दन बेसी डा लां आ नोले, अराबाहमी बाक्शो कनानी आन रागीम बाक्नीस। मेको गिल्गाल आ डोंइती मोरेह माइशशो ब्वाकी आ नेक्था बाक्नीस। उत्पत्ती १२:६

31 मिनु गेपुकी यर्दन शोक्शा, परमप्रभु यावे, इन परमप्रभुमी इन कली गेशो रागी ओव्रनीनी। मिनु गे मेको इन के सेल्शा, मेकेर बाक्नीनी। 32 मुलाक्त गो इन कली शेंशो फुल्लुम मुशा ब्रेक्शो लोव्र नु ठीक पतीक लोव्र नेल्ल पशा, होस पा बाक्कीन" देंत।

12

परमप्रभु यावे आ बाक्तीके

1 मिनु मोसामी "मेको परमप्रभु यावे आ फुल्लुम मुशा ब्रेक्शो लोव्र नु आ ठीक पतीक लोव्र बाक्नीम। गे मेको नेल्ल परमप्रभु यावे, इन किकी पिपी आन परमप्रभुमी इन के सेल्चा कली गेशो रागीम मबेक्नी सम्म टिचा माल्नीनी।

2 मिनु गे तेको रागी डा मुर आन कली खेरनीनी, मेको आन देवी देवता आन थान नेल्ल प्रेत्या माल्नीनी। मेको लाइशशा डांडाम, पहाडीम नु नेल्ल रवा आन पुंम बाक्शो बाक्नीम। ब्यवस्था ७५,२५; प्रस्थान ३४:१३ 3 गे मेको आन चढ़ेतीक प्रेत्या माल्नीनी। मेको आन लाइशशा मूर्तिपुकी जिक्चा माल्नीनी नु मेको आन मूर्ति मीम हुम्चा माल्नीनी। मिनु मेको शी के सेल्शो मूर्तिपुकी खोल्शा बिग्रेचा माल्नीनी। मिनु आन नें क्याम्चा माल्नीनी। 4 मिनु गेपुकीमी मेको आन देवी देवता आन कली ठेयब सेल्शो खोदेशो पा परमप्रभु यावे, इन परमप्रभु कली ठेयब मसेलीन। 5 परमप्रभु यावे, इन परमप्रभुमी इन थर थर आन बाक्तीक रागीमी ते बाक्चा दाक्बा, मेको माल्शा मेकेर लचा माल्नीनी। 6 मिनु इन चोशा चढ़ेशो, क्योरशा चढ़ेशो, इन १० भाग डा भाग का, इन गेचा डा चढ़ेशो, इन देशो चढ़ेशो नु इन आंम दाक्शो चढ़ेशो, इन बी ब्यफ आन डोंइती जरमेशो नु इन क्यारश भेडा आन डोंइती जरमेशो मेकेर लाइक्चा माल्नीनी। 7 मिनु गे नु इन खिं डा मुर नेल्लेमी परमप्रभु यावे, इन परमप्रभुमी इन कली आसीक गेशो गेय मिम्चा, दे मेकेर परमप्रभु यावे, इन परमप्रभु आ डोंइती जशा तूशा, ग्येरसीचा माल्नीनी।

8 गोपुकीम मुल सम्म 'आंम पशो ठीक बाक्ब' दे पशो खोदेशो पा मुल मपने। 9 मारदे हना गोपुकी मुल सम्म परमप्रभु यावे, इन परमप्रभुमी गेशो नाइक्तीके नु रागी मजाक्दीशो बाक्नीनी। 10 तन्न यर्दन शोक्शा, परमप्रभु यावे, इन परमप्रभुमी इन कली गेशो रागीमी बाक्नीनी, मिनु इन एर ओंथ बाक्शो इन जोरी सत्रु रे ब्रोंडशा, श्येत मजथु बाक्नीनी। यहोसु १:१३; यहोसु २१:४४; १राजा ५:५; भजन संग्रह ९५:११; होसे २:२०; हिब्रू ४:११ 11 मेना परमप्रभु यावे, इन परमप्रभुम आ बाक्तीके का योत्रब। गो इन कली अरेशो इन चोशा चढेशो, इन क्योरशा चढेशो, इन १० भाग डा भाग का, इन गेचा डा चढेशो नु इन मार मार परमप्रभु यावे कली देशो चढेशो मेकेर चाक्चा माल्नीनी। 12 मिनु गोपुकी, इन तमी तौ, वाइलीम वाइल, इन सहरम बाक्शो आंम कली शोप मतशो लेवी नेल्ल परमप्रभु यावे, इन परमप्रभु आ डोंइती ग्येरसीचा माल्नीनी। ब्यवस्था १०:९

13 इन चोशा चढेतीक ते ते थिन्नी मेक मेक मचढेन, गो होस पा बाक्कीन। 14 तन्न परमप्रभु यावेमी इन थर थर आन दातेमी योत्रशो आ बाक्तीकेम ला चढेने चाप्नीनी। मेकेर ला इन चोशा चढेतीके चाक्चा माल्नीनी। गो आं अरेशो गेय नेल्ल मेकेर पचा माल्नीनी।

15 तन्न गोपुकी श्ये ब्वचा दाक्तीनी हना, परमप्रभु यावे, इन परमप्रभुमी इन कली आसीक गेशो खोदेशो पा इन सहर सहरमी क्योरशा, ब्वने चाप्नीनी। ग्रांग्रा दिशो नु ग्रांग्रा मदिशो मुर नेल्लेमी ब्वने चाप्नीम। गोपुकीम किशश नु रोकोश खोदेशो पा ब्वने चाप्नीनी। ब्यवस्था १२:२२; ब्यवस्था १४:५ 16 तन्न हुश चहिं मब्वने। मेको ब्वाक्कु खोदेशो पा खपीम ताइक्तीन। लेवी ३:१७; लेवी १७:११ 17 इन अन्न, अडगुर शांबु नु तेल आन १० भाग डा भाग का चढेशो, बी ब्यफ नु क्यारश भेडा आन डोंइती जरमेशो, इन देशो चढेशो, इन आंम दाक्शा गेशो नु इन गेचा माल्शो चढेशो चहिं आंम सहरम मजने मब्वने। 18 तन्न परमप्रभु यावे, इन परमप्रभु आ डोंइती, आ योत्रशो बाक्तीकेमी मेको गोपुकी नु इन तमी तौ, वाइलीम वाइल नु इन सहरम बाक्शो लेवीपुकी नु जने ब्वने। गोपुकी इन पशो नेल्लेमी परमप्रभु यावे, इन परमप्रभु आ डोंइती ग्येरसीने। ब्यवस्था १४:२३ 19 इन रागीम गेना सम्म बाक्नीनी, मेना सम्म लेवी आ थर डा मुर आन कली रिम्लो कोत्रडीन। ब्यवस्था १२:१२; ब्यवस्था १४:२७

20 मिनु परमप्रभु यावे, इन परमप्रभुम आ कबल पशो खोदेशो पा इन रागी बारपाइक्ब। गोपुकी श्ये ब्वचा दाक्तीनी हना, रूचा डा पा ब्वने। 21 परमप्रभु यावे, इन परमप्रभु आ योत्रशो बाक्तीके इन क्येडा डोन बाक्त हना, परमप्रभु यावेमी इन कली गेशो बी ब्यफ नु क्यारश भेडा आ अरेशो खोदेशो पा इन सहरम क्योरशा ब्वने चाप्नीनी। 22 मिनु किशश नु रोकोश ब्वशो खोदेशो पा परमप्रभु आ डोंइती ग्रांग्रा दिशो नु ग्रांग्रा मदिशो नेल्लेमी ब्वने चाप्नीम। ब्यवस्था १२:१५ 23 होस पा हुश गेनायो ब्वचा मदुम्ब। मारदे हना हुशेमी ब्रोंडतीक सोक्त बाक्ब। श्ये नु ब्रोंडतीक सोक्त ब्वचा मदुम्ब। ब्यवस्था १२:१६ 24 मेको ब्वचा मदुम्ब। मेको कली ब्वाक्कु खोदेशो पा खपीम ताइक्चा माल्नीनी। 25 गोपुकीम मेको मब्वचा। मिनु गे परमप्रभु यावे आ डोंइती मार ठीक बाक्मे, मेको पतीके, गोपुकी नु इन नोले डा इन आल आन कली रिम्लो दुम्ब। 26 तन्न गोपुकी इन परमप्रभु कली गेशो थोत्रकपुकी नु इन गेचा माल्शो, इन दाक्शा गेशो कुरशा परमप्रभु यावे आ योत्रशो बाक्तीकेम लचा माल्नीनी। 27 मिनु इन चोशा चढेशो श्ये नु मेको आ हुश परमप्रभु यावे, इन परमप्रभु कली चढेतीकेम चढेचा माल्नीनी। इन क्योरशा चढेशो आ हुश परमप्रभु यावे, इन परमप्रभु कली चढेतीके आ पुंम जारचा माल्नीनी। मेको आ श्ये गे ब्वने चाप्नीनी। ब्यवस्था १२:६ 28 गोपुकीमी होस पा आं अरेशो लोत्र नेल्ल नेनीन। मिनु टिशा पाइतीनी हना, इन कली नु इन नोले डा इन तमी तौ आन कली गेना हना यो रिम्लो दुम्ब। परमप्रभु यावे, इन परमप्रभु आ डोंइती रिम्लो नु ठीक पाइबपुकी रिम्लो दुम्नीम।

29 परमप्रभु यावे, इन परमप्रभुमी मेको रागी रागी डा मुर आन कली इन डोंइती क्याम्ब। गे मेको आन कली खेरचा कली जाक्नीनी। मिनु थमा पा खेरशा, मेको आन बाक्तीकेम बाक्नीनी। 30 इन डोंइती क्याम्लो मुर आन देवी देवता आन पर्वम मेको रागी रागी डा मुरपुकीमी आन देवी देवता कली दोपा ठेयब सेल्मे? गो यो मोदेशो पाइनीकी, दे हिल्लो पा लोत्र मपने। होस पा बाक्कीन। गे यो मेको आन खोदेशो पा हेंथे गाक्तीनी हना, मेको आन खोदेशो पा साइक्चा पुंइसीनीनी। प्रस्थान २३:२४; इजीकीएल २०:३२ 31 गोपुकीमी परमप्रभु यावे, इन परमप्रभु कली मोदेशो मपने। मारदे हना मार मार परमप्रभु यावे आ डोंइती ग्रांग्रा दित्चा डा बाक्मे, मेकोपुकीमी आन देवी देवता आन कली नेल्ल पाम्तेक्म। मेकोपुकीमी आंम तमी तौ आन कली मेको आन देवी देवता आन पर्वम मीम चोशा चढेम्तेक्म। 32 गो इन कली दोशो अरेडा, मेको नेल्ल होस पा पने। गोपुकीमी मारेइ मतेम्दीन, मारेइ मशोलीने" देंत।

13

मूर्ति पूजा मपने

1 मिनु मोसामी “इन दातेमी परमप्रभु यावे आ लोव्र पाइब, डोमु शेंब ‘चिन्ड नु छक लाक्चा डा गेय दुम्ब’ देंब। 2 मिनु आन देंशो खोदेंशो पा दुम्शा मेकोपुकीमी ‘गोपुकी आंइ डोंइती मतुइश्शो देवी देवता आन नोले खोइय्या। मेको आन कली ठेयब सेल्य’ दे लोव्र पाम्तेक्म हना, 3 गोपुकीमी मेको परमप्रभु यावे आ लोव्र पाइब, डोमु शेंब, आन लोव्र काइ मनेनीन, मटिने। मारदे हना परमप्रभु यावे, इन परमप्रभुमी गे इन थुं नु सोक्त नेल्लेमी परमप्रभु यावे, इन परमप्रभु कली दाक्नीनी देय मदाक्नीनी, दे इन थुं नाक्शो बाक्ब। 4 गोपुकी परमप्रभु यावे, इन परमप्रभु कली ला खोतीन। मिनु मेको कली ला मान पा हिनीन। मिनु मेको आ शेंशो पचा माल्नीनी। मेको आ देंशो टिशा, मेको कली गेय पशा, मप्रोंइथु बाक्कीन। ब्यवस्था ८:२ 5 मिनु गोपुकीमी परमप्रभु यावे आ लोव्र पाइब मेको डोमु डा लोव्र शेंब कली साइक्चा माल्नीनी। मारदे हना मेकोमी परमप्रभु यावे, इन परमप्रभु कली प्रोंइपाइक्चा, दे इन कली दूली शेंताक्व। मिनु इन कली वाइलीम वाइल दुम्तीके रे इजीप्त रे गुंइशा एक चाक्ब परमप्रभु यावे, इन परमप्रभु बाक्ब। मोदेंशो मुरपुकीमी इन कली परमप्रभु यावे आ कोंइशो लां रे हेंथे गाक्पाइक्चा दाक्नीम। 6 मिनु सुइमी इ कली खुइश्शोमी हेंथे गाक्चा कली लेम्ब, मेको इ लोक्ब बाक्त हना, इ आफ आ तौ बाक्त हना, इ आंम आ तौ बाक्त हना, इ आंम आ तमी बाक्त हना, इ दाक्शो मीश बाक्त हना, इ शुश दाक्शो वारच बाक्त हना, नु मेकोमी ‘गे नु इ किकी पिपीमी मतुइश्शो देवी देवता आन कली सेउ पय’ देंतेक्म हना, ब्यवस्था १८:२०; १कोरिन्थी ५:९, १३ 7 इन एर ओंथ बाक्शो जात जात डा इन नेक्था रागी डा बाक्ल कि डोन रागी डा बाक्ल आन देवी देवता बाक्तेक्म हना यो, 8 मेको लेम्ब आ लोव्र मनेंचा, आ देंशो मटिचा। गे मेको कली शिशी मपथु, मेको कली मखुइक्थु, 9 मेको कली थमा पा साइक्चा माल्नीनी। मिनु गे नेल्ल क्येडा डोंइती मेको कली साइक्च, दे आप्चा माल्नेवे। नोले ला इ मुर नेल्लेम आप्शा साइक्चा माल्नीनी। 10 मिनु नेल्लेमी मेको कली मबेक्म सम्म फुल्लु आप्चा माल्नीम। मारदे हना इन वाइलीम वाइल दुम्तीके इजीप्त रे गुंइब परमप्रभु यावे, इन परमप्रभु रे हेंथे गाक्ब सेल्चा माल्शो बाक्त। ब्यवस्था १७:७ 11 मिनु इस्राएली नेल्ल मेको नेंशा, हिंचा माल्नीम। मिनु इन दातेमी मोदेंशो मरिम्शो गेनायो मपमेक्ल।

12 मिनु परमप्रभु यावे, परमप्रभुमी इन कली बाक्चा कली गेशो सहर काम 13 इन दाते रे मरिम्शो वोंइश मुरपुकी बोक्शा, सहर डा मुर आन कली दूली पपाइश्शा, मेकोपुकीमी ‘लय, देवी देवता आन कली पूजा पय’ देंतेक्म हना, गोपुकी मेको देवी देवता गेनायो मतुइश्शो बाक्तीनी हना, 14 गोपुकीम रिम्शो पा खोदील निदील पा हिल्लो पचा माल्नीनी। मिनु मेको मरिम्शो थमा पा इन दातेमी पशो बाक्त हना, 15 गोपुकीमी मेको सहर डा मुर आन कली थमा पा क्योरशा साइक्चा माल्नीनी। मेको सहर नेल्ल कली खतम सेल्चा माल्नीनी। मिनु मेकेर बाक्शो बी ब्यफ, क्यारश भेडा नेल्ल यो साइक्चा माल्नीनी। 16 मेकेर बाक्शो मारेइ मारेइ, मेको सहर आ दातेम खुप्चा माल्नीनी। मिनु मेको खुप्शो नु सहरम मी सुइक्तीन। मेको परमप्रभु यावे, इन परमप्रभु कली चोशा चढेशो खोदेंशो दुम्ल। मेको सहर गेना हना यो फोहोर ताइक्तीके दुम्ल। मिनु मेको सहर कली लेंशा मसेलीन। ब्यवस्था २०:१६-१८ 17 मिनु गोपुकीमी मथिचा देंशो थोव्रक मारेइ मलतीन। मिनु परमप्रभु यावे आ गाइश्शो नाइक्ब कों, इन कली शिशी पा दाक्ब। इन किकी पिपी नु कसम जशो खोदेंशो पा इन कली शुश सेल्ब। 18 गोपुकी परमप्रभु यावे, इन परमप्रभु आ देंशो टीतीनी, मुलाक्ती गो इन कली देंशो आं शेंशो नेल्ल पाइतीनी हना, गोपुकी परमप्रभु यावे, इन परमप्रभु आ डोंइती ठीक पाइब दुम्नीनी” देंत। यहोसु ७:-

14

ब्वचा नु मब्वचा डा श्ये

लेवी ११:-

1 मिनु मोसामी “गोपुकी परमप्रभु यावे, इन परमप्रभु आ तमी तौ ननी। बेक्शो मुर आ पर्बम इन कुशुल प्रेक्चा मदुम्ब। इन चां प्रेक्चा मदुम्ब। लेवी १९:२७-२८; येरमीया ४७:५; इजीकीएल ७:१८ 2 मारदे हना गोपुकी परमप्रभु यावे, इन परमप्रभु आ आंम मुर बाक्नीनी। मिनु परमप्रभु यावेमी जात जात डा मुर नेल्ल आन दाते रे इन कली आ मुर सेल्चा कली योव्रतु।

3 गोपुकीमी मारेइ गांग्रा दिचा डा थोव्रक मजने मब्वने। 4 गोपुकीमी ब्वचा दुम्ब जन्तु तेको बाक्नीम देंशा हना, ब्यफ, क्यारश, भेडा, 5 रोकोश, किश्श, बरांट, कौरो किश्श, साबर, चितल नु थार बाक्नीम। 6 मिनु गोपुकीमी जन्तु आन

दातेमी तेको नेल्ल गेंच चेशशो नु शोकोल हेक्ब बाक्नीमी, मेको आन कली ब्वचा दुम्ब। 7 तन्न शोकोल हेक्ब नु गेंच जेशशो आन दातेमी तेको मब्वचा देंशा हना, दलओंठ, खरायो, रोंगु डा खरायो मब्वचा। मारदे हना मेकोपुकी शोकोल हेक्नीम हना यो, आन गेंच मजेशशो बाक्नीम। मेको इन कली ग्रांग्रा बाक्ब। 8 मिनु पोत्र आन गेंच जेशशो बाक्नीम हना यो, शोकोल महेक्नीम। मेको इन कली ग्रांग्रा बाक्ब। मेको आन श्ये मब्वचा, आन सिनु यो थिचा मदुम्ब।

9 ब्वाक्कुम बाक्बपुकीमी फ्रां नु कत्ला पाइशशो ब्वचा दुम्ब। 10 तन्न फ्रां नु कत्ला मपाइशशो मब्वने। मेको इन कली ग्रांग्रा बाक्ब। 11 गेपुकीमी ग्रांग्रा मदिचा डा चिक्ब नेल्ल ब्वने चाप्नीनी। 12 तन्न गेपुकीमी ब्वचा मदुम्शोपुकी चहिं ककाकुली, ब्वारदे, गिद, कुही, 13 नेल्ल खाल डा ब्वारदे, 14 खद, 15 सुतुमुर्ग, हुहुचील, हांस, नेल्ल खाल डा बेसारा, 16 हुहुचील, कोइरालो नु बुक्स, 17 धनेस, सिनु ब्वाइब गिद हांडगील, 18 सारस, नेल्ल खाल डा बोकुला, फाप्ते चिक्बी नु पकातिकती चहिं मब्वने। 19 फ्रां पाइशशो माले फटेडग्रा नेल्ल इन कली ग्रांग्रा बाक्ब। मेकोपुकी मब्वचा। 20 तन्न ग्रांग्रा मदिचा डा फ्रां पाइशशो नेल्ल ब्वने चाप्नीनी।

21 गेपुकीमी परमप्रभु यावे, इन परमप्रभुम आ कली योत्रशो मुर बाक्नीनी। मोपतीके आंमा बेक्शो जन्तुपुकी ब्वचा मदुम्नीनी। गे नु बाक्शो अर्को रागी डा मुर आन कली मेको गेने चाप्नीनी। मेकोपुकीमी मेको ब्वाम्तेक्म हना यो, लेयतेक्म हना यो, ठीक दुम्ब। क्यारश आ पाठा आ ममा आ दूधम मक्वेने। प्रस्थान २२:३०; प्रस्थान २३:१९

१० भाग डा भाग का चढेचा

22 गेपुकीमी गेनायो मप्रोंइचा डा पा बर्स बर्स डा इन रूम नु खेतम वाशा सिशशो नेल्ल रे १० भागम भाग का तिल्शा वोइशशा, गेचा माल्नीनी। लेवी २७:३० 23 मिनु परमप्रभु यावे, इन परमप्रभु आ योत्रशो बाक्तीकेमी मेको आ डोंइती जचा माल्नीनी। मार जचा ब्वचा माल्नीनी देंशा हना, इन १० भाग डा भाग का अन्न, इन अडगुर शांबु, इन तेल, इन कली डोंइती जरमेशो ब्यफ नु क्यारश भेडा जचा ब्वचा तूचा माल्नीनी। मो पाइतीनी हना, गे मबेक्नी सम्म परमप्रभु यावे, इन परमप्रभु कली मान पा हिंचा शेंसीनीनी। ब्यवस्था १२:१७-१८; ब्यवस्था १९:२३ 24 मिनु परमप्रभु यावे, इन परमप्रभु आ योत्रशो बाक्तीक इन बाक्तीके रे शुश डोन बाक्त हना, नु परमप्रभु यावे, इन परमप्रभुमी इन कली आसीक गेप्तु नु इन १० भागम भाग का मेकेर लाइक्ने मचाप्तीनी हना, 25 मेको इन तिल्शा वोइशशा १० भागम भाग का लेयडीन। मेको रे ताक्शो क्येट लाइशशा, परमप्रभु यावे, इन परमप्रभु आ योत्रशो बाक्तीके लने। 26 मिनु इन दाक्शो खोदेंशो पा बी ब्यफ, क्यारश भेडा, अडगुर शांबु, रकसी मेको क्येटीमी ग्यापीन। मिनु गे नु इन खिं डा मुर परमप्रभु यावे, इन परमप्रभु आ डोंइती जशा ब्वशा ग्येरसीने। 27 इन सहरम बाक्ब लेवी आ थर डा मुर आन कली रिम्शो पा कोवडीन। मारदे हना मेकोपुकी इन खोदेंशो पा शोंप मतामे। ब्यवस्था १२:१२, १९;

28 मिनु बर्स सां नोले गे इन रुप्शो डा १० भागमी भाग का इन सहर डा वोइक्तीकेम वोइक्चा माल्नीनी। ब्यवस्था २६:१२-१५; लेवी २७:३२-३३ 29 मिनु इन खोदेंशो पा शोंप मताइब लेवी आ थर डा मुरपुकी, अर्को रागी डा मुर, रोम रोइक्च नु वोंइश बेक्शो मीश मुरपुकी मेकेर जाक्शा, रूथी जचा ब्वचा तामेक्ल। मो पाइतीनी हना, परमप्रभु यावे, इन परमप्रभुमी इन कली इन पतीक नेल्लेमी आसीक गेब” देंत।

15

७ बर्स नु जेर

1 मिनु मोसामी “गे इन कली ७ बर्स नोले जेर क्याम्तीक बर्स बाक्ब। प्रस्थान २३:१०-११ 2 मेको मथाप्तीक माफ गेतीक बर्स दोपा पचा माल्नीनी देंशा हना, सु सुमी आ वारच, दे लोक्ब आन कली जेर गेम्तेक्म हना, मेको गेबपुकीमी जेर ताक्ब आन कली गेशो जेर मथाप्पाइक्थु प्रोन्मेक्ल। मेकोमी आ वारच नु आ लोक्ब आन कली जेर आ पबर्म गेन कि गेन, दे पुंइचा मदुम्ब। मारदे हना परमप्रभु यावे रे पा जेर क्याम्तीक डा बर्स बाक्ब। नेहेम्याह ५:१०; नेहेम्याह १०:३२ 3 अर्को रागी डा मुर आन कली चहिं गेन कि गेन, दे पुंइने चाप्नीनी। तन्न इन लोक्ब आन कली चहिं दोशो जेर बाक्मे मेको प्रोंइचा माल्नीनी। 4 इन दातेमी सुइ पुडग मबाक्म कों? मारदे हना परमप्रभु यावेमी योत्रशा गेशो इन के सेल्शो रागीम इन कली शुश आसीक गेब। 5 गेपुकीमी परमप्रभु यावे, इन परमप्रभु आ देंशो होस पा टीतीनी हना, इन कली अरेशो नेल्ल पाइतीनी हना, सुइ पुडग मदुम्नीनी। 6 मारदे हना परमप्रभु यावे, इन परमप्रभुमी इन कली देंशो खोदेंशो पा इन कली आसीक गेब। मिनु गे शुश रागी रागी डा मुर आन कली जेर गेब दुम्नीनी। गेपुकीम चहिं

जेर पुंडचा ममाल्नीनी। मिनु गेपुकीमी शुश रागी रागी डा मुर आन कली हुकुम पाइनीनी। तन्न मेकोपुकीमी इन कली हुकुम मपाइनीम। ब्यवस्था २८:१२

7 मिनु परमप्रभु यावे, इन परमप्रभुमी इन कली गेशो रागीम, सहर कामी बाक्शो इन लोकब का पुडग बाक्त हना, इन थुं खकटा पा मबाक्कीन। ‘काइ मगेनुड’ दे मदेनीन। १यूहन्ना ३:१७ 8 तन्न गे शिशी पा मेको कली आ माल्शो नेल्ल जेर गेने। लूका ६:३४-३५ 9 मिनु इन थुंमी ‘जेर क्याम्तीक बर्स जाक्चा चिक्ताक्व’ दे इन पुडग लोकब आ पर्बम गन गन पा, मेको कली वारच पा जेर गेचा मदाक्नीनी हना, होस पने। मेको पुडगुमी इन पर्बम परमप्रभु यावे कली पुंडब। मिनु गे पापी दुम्नीनी। 10 गेपुकीमी मेको कली हाइशो थुं पा गन गन मपथु गेने। मारदे हना ओं पतीकेन परमप्रभु यावे, इन परमप्रभुमी इन कली इन पशो नेल्लेमी आसीक गेब। २कोरिन्थी ९:६-७ 11 मारदे हना रागीम श्येत जशो पुडगपुकी गेना हना यो बाक्नीम। मोपतीके गो इन कली इन रागीम बाक्शो श्येत जाइब इन लोकब नु पुडग आन कली तशा, हाइशो मुर दुम्शा गेन। मत्ती २६:११; यसैया ५८:७; याकूब २:१५-१६

७ बर्स डा वाइलीम वाइल
प्रस्थान २१:१-६

12 मिनु इन हिब्रू आन दाते डा लोकब, मीश मुर वोंडश मुर, आंम कली इन गुडमी लेयसीनीम हना, मेकोमी इन कली ६ बर्स गेय पचा माल्नीम। मेको ७ बर्समी मेको आन कली प्रोंडशा लचा गेचा माल्नीनी। येरमीया ३४:१४ 13 मिनु गे मेको प्रोंडनीनु, श्येतथ गुड मसोइक्तीन। 14 परमप्रभु यावे, इन परमप्रभुमी इन कली आसीक गेशो रे इन क्यारश भेडा इन अन्न नु अडगुर शांबु रे मेको कली शुश गेशा सोइक्तीन। 15 गेपुकी इजीप्त रागीमी वाइलीम वाइल दुम्शा बाक्तीनी। मिनु परमप्रभु यावे, इन परमप्रभुमी इन कली प्रोंडतु, मेको मिम्तीन। मोपतीके गो मुलाक्ती दोपा पचा, दे गो इन कली शेंनुड। ब्यवस्था ५:१५ 16 मिनु मेकोमी इन कली नु इन मुर आन कली दाक्शा, मेकोमी ‘गो इन कली मप्रोंडथु, एकेन गेय पाइनुड’ देत हना, 17 गे मेको मुर कली लाप्चोमी राप्पाइशशा लूजे का लाइशशा, मेको आ नोफा लाप्चो डा शी तारी ख्रित्चा माल्नीनी। मिनु मेको मबेक्म सम्म इन वाइल दुम्ब। वाइलीम कली यो मोदेशो पचा माल्नीनी। 18 गेपुकीमी मेको आन कली प्रोंडशा सोइक्चा श्येत मलाक्कीन। मारदे हना गाल्च ताक्शा गेय पाइब आन क्येडा निक्शी खेयप हिक्शो खोदेशो पा मेकोमी ६ बर्सम गेय पने थुम्शो बाक्ब। गेपुकीमी इन प्रोंडशो वाइलीम वाइल कली रिम्शो पा गेतीनी हना, परमप्रभु यावे, इन परमप्रभुमी इन कली इन पशो नेल्लेमी आसीक गेब।

डोंडती जरमेशो ब्यफ नु सांड

19 इन बी ब्यफ आ डोंडती जरमेशो बाछा नु इन क्यारश भेडा आ डोंडती जरमेशो पाठा परमप्रभु यावे, इन परमप्रभु कली गेचा माल्नीनी। इन डोंडती जरमेशो ब्यफ लाइशशा गेय मपचा। डोंडती जरमेशो सांड आन कली ऊन मप्रेक्चा। प्रस्थान १३:२, १३-१६ 20 मिनु बर्स बर्सम गेपुकी नु इन खिं डा मुर नेल्लेमी परमप्रभु यावे आ बाक्तीकेमी परमप्रभु यावे, इन परमप्रभु आ डोंडती ब्वचा माल्नीनी। ब्यवस्था १४:२३ 21 तन्न मेको ब्यफ, सांड कली मारेइ दुम्शो बाक्त हना, कोडटे बोडटे बाक्त हना, नु मिक्च मताइब मारेइ दुम्शो बाक्त हना, गेपुकीमी मेको कली परमप्रभु यावे, इन परमप्रभु कली चढेचा मदुम्ब। लेवी २२:२० 22 गेपुकीमी इन सहरमी किशश नु रोकोश ब्वशो खोदेशो पा परमप्रभु आ डोंडती ग्रांग्रा दिशो नु मदिशो नेल्लेमी ब्वने चाप्नीम। ब्यवस्था १२:१५, २२ 23 मेको आ हुश ला मब्वचा। मेको ब्वाक्कु खोदेशो पा खपीम ताइक्चा माल्नीनी” देत। ब्यवस्था १२:१६

16

पास्सा चाड मानेतीके

प्रस्थान २३:१४-१७; प्रस्थान ३४:१८-२४

1 मिनु मोसामी “गेपुकीमी आबीब महिनाम परमप्रभु यावे, इन परमप्रभु आ पास्सा चाड मानेचा माल्नीनी। मारदे हना परमप्रभु यावे, इन परमप्रभुमी आबीब महिना डा नाक्दो इन कली इजीप्त रे गुंडताक्व। प्रस्थान १२:- 2 मिनु गेपुकीमी परमप्रभु यावे आ नें चोइक्चा कली आ योत्रशो बाक्तीकेमी परमप्रभु यावे, इन परमप्रभु कली बोका नु ब्यफपुकी क्योरशा पास्सा चाड मानेचा माल्नीनी। 3 गेपुकीमी ग्युरशो बोरब ओरुक्ती सुप्शो शोब्ले मेको श्ये नु मजने। गेपुकी ७ नाक्त सम्म ग्युरशो बोरब ओरुक्ती मसुप्शो शोब्ले जचा माल्नीनी। मेको इन श्येत डा शोब्ले बाक्ब। मारदे हना गे इजीप्त रे चुइशशा गूतीनी। मिनु गेपुकीमी मबेक्नी सम्म इजीप्त रे गूशो नाक्ती मिम्चा कली मेको पास्सा चाड मानेचा माल्नीनी। प्रस्थान १२:११ 4 मिनु ७ नाक्त सम्म इन रागी नेल्लेमी ग्युरशो बोरब ओरुक्ती बाक्चा मदुम्ब। मिनु

गेपुकी डोंइती डा नाकदो क्योरशो श्ये सुनी सम्म मारेइ हेंचा मदुम्ब। 5 परमप्रभु यावे, इन परमप्रभुमी इन कली गेशो सहरमी मेको पास्सा चाड डा मार मार क्योरने मचाप्नीनी। 6 परमप्रभु यावे, इन परमप्रभुमी आ नें वोइक्चा कली नोले योव्रशो बाक्तीकेमी मेको पास्सा चाड डा मार मार क्योरचा माल्नीनी। गे मेको इजीप्त रे ग्रुंडशा, नां रिक्ची ना पचा माल्नीनी। 7 मिनु गे मेको श्ये कली वालशा, परमप्रभु यावे, इन परमप्रभुमी नोले योव्रशो बाक्तीकेम चोचा माल्नीनी। मिनु सुनी लेशशा, आंम आंम ताम्बु लने। 8 गे ६ नाक्त सम्म ग्युरशो बोरब ओरुत्ती मसुप्शो शोब्ले जचा माल्नीनी। मिनु ७ नाक्तीम परमप्रभु यावे, इन परमप्रभु आ पर्वम बुक्तीक नाक्त बाक्ब। मेको नाक्ती मारेइ गेय मपने।

पास्सा आ ७ हप्ता नोले डा चाड

9 मिनु मीशो बाली रिक्चा गोशो नाक्त रे गेपुकीमी ७ हप्ता हिक्चा माल्नीनी। 10 मिनु गेपुकी हप्तापुकी डा चाड परमप्रभु यावे, इन परमप्रभु कली मानेचा माल्नीनी। परमप्रभु यावे, इन परमप्रभुमी इन कली आसीक गेशो खोदेशो पा इन ग्येरसीशो थुंमी चढेशा चाड मानेचा माल्नीनी। प्रस्थान ३४:२२ 11 मिनु गेपुकी, इन तमी तौपुकी, वाइलीम वाइल, इन सहरम बाक्शो लेवी आ थर डा मुरपुकी, इन दातेमी बाक्शो अर्को रागी डा मुरपुकी, रोम रोइक्च नु आन वोंइश बेक्शो मीश मुर नेल्ल परमप्रभु यावे, इन परमप्रभु आ नें वोइक्चा कली नोले योव्रशो बाक्तीकेमी मेको आ डोंइती ग्येरसीचा माल्नीनी। 12 गेपुकी इजीप्त रागीम वाइलीम वाइल दुम्शो मिम्चा माल्नीनी। गे मेको फुल्लुम मुशा ब्रेक्शो लोव्र होस पा टिचा माल्नीनी। ब्यवस्था ५:१५

बाली नाली ओंइतीक चाड

13 मिनु इन रू डा अन्न अडगुर मारेइ मारेइ खुम्ने थुम्शा, गेपुकीमी बाली नाली ओंइतीक चाड ७ नाक्त सम्म मानेचा माल्नीनी। 14 मिनु गेपुकी, इन तमी तौ, इन वाइलीम वाइल, इन सहरम बाक्शो लेवीपुकी, अर्को रागी डा मुरपुकी, रोम रोइक्च नु आन वोंइश बेक्शो मीश मुरपुकी, नेल्लेमी ग्येरसीशा मेको चाड मानेचा माल्नीम। ब्यवस्था २६:११; यसैया ३०:२९ 15 मिनु गेपुकीमी परमप्रभु यावे, इन परमप्रभु आ योव्रशो बाक्तीकेमी ७ नाक्त सम्म मेको चाड मानेचा माल्नीनी। मारदे हना परमप्रभु यावे, इन परमप्रभुमी इन कली बाली नाली शुश गेब नु इन मारेइ मारेइ पशोमी इन कली आसीक गेब। मोपतीके गेपुकी शुश ग्येरसीचा माल्नीनी।

16 मिनु परमप्रभु यावे, इन परमप्रभुमी आ नोले योव्रशो बाक्तीकेमी इन दाते डा वोंइश मुर नेल्ले सां खेयप परमप्रभु यावे आ डोंइती जाक्दीत्चा माल्नीम। ग्युरशो बोरब ओरुत्ती मसुप्शो शोब्ले डा पास्सा माइशो चाड, ७ हप्ता नोले डा हप्ता डा चाड नु बाली नाली ओंइतीक गोठ सेल्टीक चाडम जाक्दीत्चा माल्नीम। मिनु परमप्रभु यावे आ डोंइती श्येत्थ गुइ जाक्चा मदुम्ब। 17 परमप्रभु यावे, इन परमप्रभुमी आसीक गेशो खोदेशो पा नेल्लेमी आन चाप्शो गेचा माल्नीम।

निसाफ पतीके

18 मिनु मुर आन कली ठीक निसाफ पचा कली गेपुकीमी इन थर थर डा नु परमप्रभु यावे, इन परमप्रभुमी इन कली गेशो सहर सहरम निसाफ पाइब नु ठेयब मुर योव्रशा वोइक्चा माल्नीनी। ब्यवस्था १:१६-१८; गन्ती ११:१६ 19 निसाफ हेंथे मपने। कुल मकोव्रडीन। घूस मजने। मारदे हना घूसमी जोक्ब तुइक्ब मुर आन मिक्च सिल्लब। मिनु ठीक पाइबमी घूस जशा दूली लोव्र पाइब। १सामुएल ८:३ 20 मिनु परमप्रभु यावे, इन परमप्रभुमी गेशो रागीम ब्रोंइचा नु इन के सेल्चा, दे ठीक पतीक लां खोतीन।

चढेतीके परमप्रभु कली ला बाक्ब

21 गेपुकीमी अशेराह देवी आ लाइशो मूर्ति परमप्रभु यावे, इन परमप्रभु कली चढेतीक आ नेक्था खुक्चा मदुम्ब। ब्यवस्था ७:५; २राजा २३:४ 22 गेपुकीमी तेकोइ अर्को मूर्ति वोइक्चा मदुम्ब। मारदे हना मेको नेल्ल परमप्रभु यावे, इन परमप्रभुमी कली ग्रांरा दीब” देत। लेवी २६:१; येरमीया २:२७

17

1 मोसामी “गेपुकीमी परमप्रभु यावे, इन परमप्रभु कली कोडटे बोडटे गाक्ब मिक्च मताइब, मारेइ दुम्शो ब्यफ भेडा चढेचा मदुम्ब। मोदेशो परमप्रभु यावे, इन परमप्रभु कली ग्रांरा बाक्ब। लेवी २२:२०; मलाकी १:६-९

मूर्ति पूजा आ पर्वम

2 मिनू परमप्रभु यावे, इन परमप्रभुमी इन कली गेशो सहरमी सुइ वोंइश मुर मीश मुरुमी परमप्रभु यावे, इन परमप्रभु आ डोंइती मरिम्शो पा आ कबल कली प्रोंइशा, ब्यवस्था १३:७-१२ 3 मेकोपुकीमी देवी देवता खोइशशा, मेको आन कली ठेयब सेल्शा, नां, तास्ला, सोरुल आन डोंइती बाप्शा गोम 'मपन देंशो' पाम्तेक्म हना, ब्यवस्था ४:१९ 4 मिनू मुरपुकीम मेको आन पर्बम इन कली शेंताक्म हना, गेपुकीम रिम्शो पा खोदील निदील पा हिल्लो पचा माल्नीनी। मिनू मेको थमा पा इन इस्राएलमी मोदेशो ग्रांग्रा दिचा डा गेय पशो बाक्त हना, 5 मेको मोदेशो ग्रांग्रा पाइब वोंइश मुर हना यो, मीश मुर हना यो इन सहर रे गुंइशा, फुल्लु आप्शा साइक्चा माल्नीनी। लेवी २४:१४ 6 साइक्चा पुंइसीब आन पर्बम मुर निक्शी नु सांमी 'गो ताता, सांकछी दुम्ती' देंतेक्म हना, ला साइक्चा दुम्ब। का ला सांकछी बाक्त हना साइक्चा मदुम्ब। ब्यवस्था १९:१५; १राजा २१:१०; हिब्रू १०:२८ 7 मेको आन पशो ताइब सांकछीपुकीमी नेल्ल क्येडा डोंइती मेको आन कली साइक्चा, दे फुल्लु आप्चा माल्ब। मेको नोले ला नेल्ल अरुम पचा माल्नीम। मिनू मोपा गेपुकीमी मरिम्शो नेल्ल इन दाते रे गुंइचा माल्नीनी।

नेल्ल क्येडा ठेयब निसाफ

8 मिनू इन सहरम मुर साइक्तीके, रू योक्तीके, तुम्मुतीके नु मारेइ मारेइ मचाप्चा डा निसाफ बाक्त हना, इन सहर रे परमप्रभु यावे, इन परमप्रभु आ योव्रशो बाक्तीकेम लचा माल्नीनी। 9 मिनू गेपुकी चढेब, लेवी आ थर डा मुर नु मेना गेय पाइब निसाफ पाइब कली 'मार पचा' दे हिल्लो पचा कली गुम्थ लचा माल्नीनी। मेकोमी इन कली दोपा निसाफ पचा शेंनीम। २इतिहास १९:८,११ 10 मिनू परमप्रभु यावे आ योव्रशो बाक्तीकेमी मेकोपुकीमी इन कली मार देंनीम, मेको मोदेशो पा ठीक पा निसाफ पचा माल्नीनी। मिनू इन कली दोपा शेंदमे, मोपा होस पा पचा माल्नीनी। 11 मेको इन कली शेंशा अरेशो लोव्र नु निसाफ पतीके गे पचा माल्नीनी। मेको लोव्र नेंशा, ग्युरा नु पेरा गे मलने। 12 सुइम ठेयब लेशशा, परमप्रभु यावे, इन परमप्रभु आ गेय पचा कली वोइशो चढेब, निसाफ पाइब आन लोव्र मटिप्टु हना, मेको साइक्चा पुंइसीब। मिनू मोपा गेपुकीमी इस्राएली, इन दाते रे मरिम्शो नेल्ल गुंइचा माल्नीनी। 13 मिनू मुर नेल्लेमी मेको नेंशा हिंशा मोदेशो मपाइक्नीम।

पिप योव्रतीके आ पर्बम

14 मिनू गेपुकी परमप्रभु यावे, इन परमप्रभुमी इन कली गेशो रागी जाक्दीशशा, इन के सेल्शा बाक्नीनु, गेपुकीमी 'एर ओथ डा रागी रागी खोदेशो पा आंइ कली यो पिप का वोइक्चा माल्नीक' देंतीनी हना, १सामुएल ८:५-९ 15 परमप्रभु यावे, इन परमप्रभुमी योव्रशो मुर कली ला वोइक्चा दुम्ब। इन लोकब आन दाते रे योव्रशा पिप वोइक्चा माल्नीनी। अर्को जात डा मुर पिप सेल्चा मदुम्ब, इन लोकब कली ला सेल्चा माल्ब। 16 मेकोमी शुश शारा आंम कली मवोदल। मिनू मेकोमी शारा ग्याप्चा कली मुर आन कली इजीप्त मसोइक्तल। मारदे हना परमप्रभु यावेमी 'मेको लां गेनायो लेशशा मलने' देंत। १राजा १०:२६-२९ 17 मिनू परमप्रभु यावे रे डोन मलल, दे मीश मुर शुश चाक्चा मदुम्ब। मिनू मेकोम आंम कली शुश सुन चांदी मखुप्तल। १राजा ११:१-८; १राजा १०:१४ 18 मिनू मेको पिपमी सासन पवानु, चढेब, लेवी आ थर डा मुर आन किताब रे परमप्रभु यावे आ अरेशा लोव्र किताब काम ब्रेक्चा माल्ब। 19 मेको लोव्र मेको नु बाक्चा माल्ब। मिनू मेकोमी परमप्रभु यावे, आ परमप्रभु कली मान पा हिंचा कली शेंसीचा कली मबेक्म सम्म नाक्त किंत किंत पढेचा माल्ब। मेको अरेशो लोव्र नेल्ल नु फुल्लुम मुशा ब्रेक्शो लोव्र होस पा पचा माल्ब। 20 मेकोमी आंम लोकब आन दातेमी आंम कली ठेयब मसुदल। परमप्रभु यावे आ शेंशो लोव्र रे डोन मलल। ग्युरा पेरा गे मलल। मिनू आं तौ चचपुकीमी इस्राएल डा राज्य कली शुश नाक्ती सम्म सासन पामेक्ल" देंत। ब्यवस्था ५:२९

18

लेवी आ थर डा चढेब आन गेय

1 मोसामी "लेवी आ थर डा चढेब, नु लेवी आ थर डा मुर नेल्लेमी रू मथेरनीम। परमप्रभु यावे कली चोशा चढेशो नु मेको कली गेशो मेकोपुकीम जामेक्ल। ब्यवस्था १०:९; गन्ती १८:८-२०; १सामुएल २:२८; १कोरिन्थी ९:१३ 2 मेको आन लोकब आन दातेमी मारेइ शोंप मताइनीम। आं देंशो खोदेशो पा परमप्रभु यावे मेको आन शोंप बाक्ब।

3 मिनू मुरपुकीमी ब्यफ, भेडा, क्यारश क्योरशा चढेमेनु, चढेब कली मार गेचा माल्नीम देशा हना, आ बला रे खोइल सम्म, शांपे निक्शी नु कोव्रज गेचा माल्नीम। 4 मिनू इन डोंइती रिक्शो अन्न, डोंइती डा अडगुर शांबु, डोंइती डा खाक्शो तेल नु भेडा आन डोंइती प्रेक्शो ऊन गेचा माल्नीम। प्रस्थान २३:१९ 5 मारदे हना परमप्रभु यावे, इन

परमप्रभुमी नेल्ल इन थर रे लेवी आ थर योव्रशो बाक्त। मारदे योव्रशो बाक्त देशा हना, मेको नु आ तौपुकी गेना हना यो परमप्रभु यावे आ डोंइती राप्शा, आ गेय पचा कली योव्रशो बाक्त।

6 मिनु इस्राएलम बाक्ब लेवी आ थर डा मुर तेको तेको सहर रे परमप्रभु यावे आ योव्रशो बाक्तीके जाक्शा, न्यायाधीस १७:७; न्यायाधीस १९:१ 7 परमप्रभु यावे आ डोंइती राप्ब आ लोकब नेल्ल खोदेशो पा परमप्रभु यावे, आ परमप्रभु कली गेय पने चाक्ब। 8 मेको नु आ मार मार लेयशो क्येट बाक्त हना यो, अरु चढेब खोदेशो पा उइक्थ उइक्थ जचा ताइब।

मपचा डा ग्रांग्रा दिशो गेय

9 परमप्रभु यावे, इन परमप्रभुमी इन कली गेशो रागी जाक्दीन्नी नोले मेकेर डा रागी रागी डा मुर आन पशो ग्रांग्रा दिशो गेय शेंसीशा काइ मपने। 10 मेको ग्रांग्रा दिशो गेय मार बाक्ब देशा हना, आंम तमी तौ आन कली मीम चोशा चढेशा, लिंक्कु कोव्रचा, टुना मुना पचा, मन्तर तन्तर पचा, लेवी १८:२१; लेवी १९:२६, ३१ 11 ठेयब मिक्च पचा, बेक्शो मुर रे लोव्र पचा नु बेक्शो मुर आ अर्ती नेंथ माल्चा मेको नेल्ल ग्रांग्रा दिचा डा गेय बाक्ब। मोदेशो पाइब इन दातेमी काइ मदुम्ब। लेवी २०:२७; १सामुएल २८:३-२० 12 मोदेशो पाइब मुर परमप्रभु यावे आ डोंइती ग्रांग्रा दिचा डा बाक्नीम। मेको ग्रांग्रा दिचा डा गेय आ पबर्म परमप्रभु यावे, इन परमप्रभुमी मेको मुर आन कली इन डोंइती रे गुंडब। 13 परमप्रभु यावे, इन परमप्रभु आ डोंइती गेपुकी थमा सुइक्चा पुंडसीब रिम्शो पाइब दुमीन। उत्पत्ती ६:९; उत्पत्ती १७:१ 14 मारदे हना गे खेरचा चिक्शो रागी रागी डा मुरुम टुना मुना पाइनीम नु लिंक्कु कोव्रनीम। परमप्रभु यावे, इन परमप्रभुमी इन कली मोदेशो पचा मगेब।

परमप्रभु आ लोव्र पाइब

15 परमप्रभु यावे, इन परमप्रभुमी इन दाते रे आं खोदेशो पा आ लोव्र पाइब का योव्रब। गेपुकीमी मेको आ लोव्र नेंचा माल्नीनी। गन्ती १२:६-८; यूहन्ना १:४५; यूहन्ना ६:१४; यूहन्ना ७:४०; प्रेरित ३:२२; प्रेरित ७:३७ 16 मिनु होरेब डांडाम ग्रुम्या नाक्त परमप्रभु यावे, इन परमप्रभु कली मार पुंडतीनी देशा हना 'गो परमप्रभु यावे, आंइ परमप्रभु आ सेंदा लेंशा नेंचा मदाक्नीक। मिनु मेको ठेयब मी लेंशा तचा मदाक्नीकी। लेंशा, ताइताक हना, बेक्नीकी, कों' दे हिंशा पुंडतीनी। प्रस्थान २०:१९; हिब्रू १२:१९ 17 मिनु परमप्रभु यावेम आं कली 'मेकोपुकीमी रिम्शो लोव्र पाम्तेक्म' देंत। ब्यवस्था ५:२५ 18 मिनु परमप्रभु यावेमी आं कली 'इ खोदेशो पा आं लोव्र पाइब, आन लोकब आन दाते रे का योव्रनुड। आं देंचा माल्शो लोव्र गो मेको कली देंपाइक्नुड। मिनु आं अरेशो लोव्र मेकोमी नेल्ले मुर आन कली देंब। प्रस्थान ४:१२; यसैया ६:८; येरमीया १:९; मत्ती १०:१९ 19 मिनु सुमी मेको आं नेंम, देशो लोव्र मटीबा, मेको कली गो सजाइ गेनुडमी। 20 तन्न तेको आं लोव्र पाइबमी आं मदेंशो लोव्र देशा नु अरु देवी देवता आन देशो लोव्र पाप्तु हना, मेको आं लोव्र पाइब कली साइक्चा माल्नीनी। ब्यवस्था १३:२-६; येरमीया १४:१३-१५ 21 मिनु गे इन थुंमी "परमप्रभु यावे आ लोव्र बाक्बा देय मबाक्बा मेको दोपा तुइक्नय?" दे मिम्ताक्नी हना, 22 मेको परमप्रभु यावे आ लोव्र पाइबमी परमप्रभु यावे आ नेंमी लोव्र पाइब, तन्न मेको लोव्र मगाप्त नु मदुम्त हना, मेको आं देशो ममाइ। मेको आं लोव्र पाइबमी आंमा थुं डा लोव्र पाप्तु। गेपुकी मेको कली तशा महिनीन' दे परमप्रभुमी देंत" दे मोसामी इस्राएली आन कली लोव्र पाप्तु। येरमीया २३:१४; येरमीया २८:-; इजीकीएल १३:३-१६

19

मुर साइशशा प्रोक्तीक सहर

1 मिनु परमप्रभु यावे, इन परमप्रभुमी रागी रागी डा मुर आन कली खेरशा इन कली गेशो रागीमी आन सहर नु खिंपुकी इन के दुम्मेनु, 2 मेना परमप्रभु यावे, इन परमप्रभुमी इन कली गेशो रागीम गे सहर सां तिल्ला माल्नीनी। ब्यवस्था ४:४१-४३ 3 मिनु परमप्रभु यावे, इन परमप्रभुम इन कली गेशो रागी कली का का पा प्रोक्तीक सहर योव्रचा, दे भाग सां सेल्चा माल्नीनी। मेको का का पा सहर सांम मुर साइक्ब मुर प्रोक्शा, लशा बाक्तीक सहर सेल्चा माल्नीनी।

4 मिनु सुइमी गेहे मपथु, साइक्चा ममिम्थु मुर का कली साइक्तु हना, मेकेर प्रोक्शा लशा ब्रोंडल। 5 दोदेशो दुम्ने चाप्ब देशा हना, आन वारच नु शी खोइक्थ ब्वाकी लमानु, रवा तिम्मेनु, मेको खा डा फलम बुइशशा, लशा, ख्रशा आ वारच बेक्त हना, मोदेशो पा मुर साइक्ब मुर मेको सहरम प्रोक्शा लने चाप्नीम। 6 मेको सहर डोन बाक्त हना बेक्ब मुर आ मुरपुकीम मेको कली क्येक्क लेत्चा कली लांमी खेदा पा साइक्ब। तन्न मेको मुर साइक्चा मपुंडसीब बाक्ब। मारदे हना मेको आ वारच बाक्त। 7 मोपतीके गो इन कली "सहर सां तिल्ला माल्नीनी" दे माइक्तन्नी।

8 मिनु परमप्रभु यावे, इन परमप्रभुमी इन किकी पिपी नु कसम जशो खोदेशो पा इन रागी बारपाइवतु हना, 9 मिनु गे मुलाकती शेंशो परमप्रभु यावे आ अरेशो नेल्ल होस पा पाइतीनी हना, मिनु गे परमप्रभु यावे, इन परमप्रभु कली दाक्ताकनी हना, गे नेल्ल नाकती मेको आ लांम गाकतीनी हना, मेको सहर सां कली अर्को सहर सां तेम्चा माल्नीनी। 10 मोपा परमप्रभु यावे, इन परमप्रभुमी इन कली गेशो रागीम दोस मताइब कली मसदमेक्ल। दोस मताइब कली साइक्नीम हना, इन दातेमी साइक्चा डा पाप राइब।

11 तन्न मुरुम डोंइती रे ईख कुरशा, गेहे पशा, बाप्शा मुर कली तुप्शा साइवतु हना, प्रोक्तीक सहर काम प्रोक्त हना, 12 मेको मुर आ सहर डा खाल्पापुकीमी मेको कली चाक्पाइशशा, क्येक्क लेप्ब आन गुइमी साइक्पाइक्चा कली जिम्मा गेमेक्ल। 13 मेको कली शिशी मपन। मिनु इस्राएलम सुम मारेइ दोस मतशो मुर कली हुश ख्राक्श पोक्शो पाप मोदेशो पा क्याम्चा माल्ब। ब्यवस्था २१:८-९

सांद याक्चा मदुम्ब

14 मिनु गे परमप्रभु यावे, इन परमप्रभुमी इन कली इन के सेल्चा कली गेशो रागीम बाक्तीनी हना, इन किकी पिपीमी वोइशो इन नेक्था डा मुर आन सांद याक्चा मदुम्ब। ब्यवस्था २७:१७

सांकछी आन लोव्र गारचा माल्ब

15 मुर कामी दोस ताइब दुम्शो बाक्त देतेक्म हना, सांकछी का आ लोव्र ला नेंशा मदुम्ब। सांकछी निक्शी, सां आन लोव्र गारत हना ला मेको कली दोस गेचा। ब्यवस्था १७:६; गन्ती ३५:३०; यूहन्ना ८:१७; २कोरिन्थी १३:१; हिब्रू १०:२८ 16 मिनु जोल पा सांकछी बाक्शा, मुर का कली दोस गेचा कली बोक्त हना, 17 दोस गेब नु दोस ताइब निम्फा, परमप्रभु यावे आ डोंइती, चढेब नु निसाफ पाइब आ नेक्था जाक्चा माल्नीस। 18 मेको निसाफ पाइबमी मेको निक्शी आस कली खोदील निदील पा हिल्लो पचा माल्ब। दोस गेब आ लोव्र जोल बाक्त हना, दूली पा आ लोक्ब कली दोस गेशो बाक्त हना, 19 मेकोम आम लोक्ब कली मार पचा मिम्शो बाक्मे, मेको कली मोन पचा माल्ब। मोपा गे इन दाते रे मरिम्शो पतीके क्याम्चा माल्नीनी। 20 मिनु अरु मुरपुकीमी मेको नेंशा हिंचा माल्नीम। मिनु नोले इन दातेमी मोदेशो मरिम्शो मपाइनीम। 21 मिनु गेपुकीमी शिशी मपने। साइक्ब कली साइक्चा माल्ब। मिक्च पुक्ब कली आ मिक्च पुक्चा माल्ब। खुइ जिकब कली आ खुइ जिकचा माल्ब। गुइ खोइल जिकब कली आ गुइ खोइल जिकचा प्रस्थान २१:२३-२५

20

लडाइ आ पर्बम लोव्र

1 मिनु मोसामी “गेपुकी लडाइ पथ लनीनु, शारा नु बग्गीपुकी तशा, इन जोरी सत्रु इन क्येडा शुश बाक्तेक्म हना, महिनीन। मारदे हना परमप्रभु यावे, इन कली इजीप्त रे ग्रुंडब इन परमप्रभु गेपुकी नु बाक्ब। 2 मिनु लडाइम लचा क्येडा डोंइती चढेबमी लडाइ पथ लाइब आन डोंइती लशा 3 ‘इस्राएलीपुकी नेनीन, गेपुकी मुल लडाइ पथ लचा चिक्शो बाक्नीनी। मोपतीके आइक्च थुं मपने। महिनीन। मेको आन कली तशा, ग्रीचोक पा इन थुं ग्येत्थ लुक्च मदुमीने। 4 मारदे हना परमप्रभु यावे, इन परमप्रभु इन जोरी सत्रु नु लडाइ पा इन कली ग्रापाइक्चा कली गेपुकी नु लाइब’ देंचा माल्ब। 5 मिनु आन ठेयब मुरपुकीमी मुर आन कली ‘सु इन दातेमी नक खिं का सेल्शा, ओव्रतीक चाड ममानेशो बाक्त हना, मेको आ खिं लेशशा, लचा माल्ब। मेको लडाइम बेक्त हना, आ खिंम अर्को मुर चाड सेल्शा ओव्रब, मेको मदुम्ब। ब्यवस्था १:१५; ब्यवस्था १६:१८ 6 सुइ इन दातेमी अडगुर रू खुम्शा, जचा मतशो बाक्तीनी हना, इन खिं लेशशा लने। मेको लडाइम बेक्त हना, आ अडगुर रू अर्कोम जाइब, मेको मदुम्ब। ब्यवस्था २८:३०; लेवी १९:२४-२५ 7 सुइ इन दातेमी मीश आल का पुंइशा ग्युबे पचा चिक्शो बाक्तीनी हना, मेको खिं लेशशा लचा माल्ब। मेको लडाइम बेक्त हना, मेको मीश आल अर्कोम लाइक्ब। मेको मदुम्ब’ देंचा माल्नीम। ब्यवस्था २४:५ 8 मिनु मेको ठेयब मुरपुकीमी लेंशा मुर आन कली ‘इन दातेमी सुइम हिंन नु आ थुं लुक्च लाइब बाक्त हना, मेको आ खिं लेशशा लचा माल्ब। मेकेर बाक्त हना, आ लोक्ब आन थुं यो ग्येत्थ लुक्च लपाइक्ब’ देंचा माल्नीम। न्यायाधीस ७:३ 9 मिनु ठेयब मुरपुकीमी मो देंने थुम्मे नोले, मेकोपुकीमी लडाइ पाइब आन डोंइती गाक्चा कली, ठेयब मुरपुकी योव्रचा माल्नीमी।

लडाइ दोपा पचा, दे शेंशो

10 मिनु गेपुकी सहर का कली लडाइ पथ, आ नेक्था जाक्दीन्नी नोले मेको आन कली 'लडाइ मपय, गुइ पोक्कीन' देंचा माल्नीनी। 11 मिनु मेकोपुकीमी 'दुम्ब' दे गुइ पोक्तेक्म हना, मेकेर डा मुर नेल्ले आन कली वाइलीम वाइल खोदेशो पा गेय पाइब सेल्चा माल्नीनी। 12 तन्न मेको सहर डा मुरपुकीमी इन देशो मबित्थु लडाइ पचा दाक्ताक्म हना, मेको सहर कली पुम्दीन। 13 मिनु परमप्रभु यावे, इन परमप्रभुमी मेको सहर इन कली गेपु हना, गेपुकीमी मेकेर डा वोंइश मुर नेल्ल आन कली तरवारम साइक्चा माल्नीनी। ब्यवस्था ३:६-७; गन्ती ३१:७, १४-१८ 14 तन्न मीश मुर, आलपुकी, बी ब्यफ, क्यारश भेडा नु सहरम बाक्शो मारेइ मारेइ इन के दुम्ब। मोपा परमप्रभु यावे, इन परमप्रभुमी गेशो ग्राशो थोव्रक तशा ग्येरसीन। 15 आंम नेक्था डा रागी रागी कली ममाइ, तन्न डोन डा सहर कली मोदेशो पचा माल्नीनी। 16 तन्न परमप्रभु यावे, इन परमप्रभुमी मेको जात जात डा मुर आन सहर इन कली गेशो सहरम मार मार सेस बाक्मे, मेको साइक्चा माल्नीनी। गन्ती २१:१-३; यहोसु १०:४० 17 परमप्रभु यावे, इन परमप्रभुमी अरेशो खोदेशो पा, हिती, एमोरी, कनानी, परिज्जी, हिब्वी नु यबुसी नेल्ल आन कली साइशशा क्याम्चा माल्नीनी। 18 मो मपाइतीनी हना, मेको आन देवी देवता आन कली ग्रांग्रा दिचा डा पतीके शेंसीनीनी। मोपा परमप्रभु यावे, इन परमप्रभु कली मरिम्शो पा पाप पाइनीनी।

19 मिनु गेपुकीमी सहर का कली लडाइ पा शुश नाक्त सम्म पुम्शा बाक्नीनु, मेको सहर डा रवापुकी मतिम्चा। मारदे हना गेपुकीमी नोले मेको आन फल जने चाप्नीनी। मार, मेको एर ओंथ डा रवापुकी मुर खोदेशो बाक्नीमी डा? 20 तन्न इन तुइशो जचा फल मसिप्ब रवा तिम्ने चाप्नीनी। मिनु मग्रानी सम्म मेको रे सहर डा गारो डोइक्तीके सेल्ने चाप्नीनी” देंत।

21

मतुइक्थु साइशशो

1 मिनु परमप्रभु यावे, इन परमप्रभुमी इन कली गेशो इन के सेल्चा चिक्शो रागी डा दिंम मेर बेक्शो मुर का थित्तीनी नु मेको साइक्ब मुर मतुइसाक्व हना, 2 इन खाल्पा नु निसाफ पाइबपुकी लशा, मेको साइशशो मुर तेको एर ओंथ डा सहर क्येडा नेक्था बाक्बा, पुक्चा माल्नीम। 3 मिनु मेको आ नेल्ल क्येडा नेक्था डा सहर आ खाल्पापुकीमी गेय मपपाइशशो नु हलो मवाक्शो बी बाछा का चाक्चा माल्नीम। 4 मिनु मेको खाल्पापुकीमी मवाक्शो नु वांचेर मशोक्शो रू नु गेना हना यो ब्वाक्कु बाक्शो खोला आ नेक्था लाइशशा, मेको बाछा आ शुर रोप्चा माल्नीम। 5 मिनु चढेब, लेवी आ तौपुकी मेको आ नेक्था जाक्चा माल्नीम। मारदे हना परमप्रभु यावे, इन परमप्रभु आ गेय पचा नु आ नेमी आसीक गेचा कली योव्रतु। मिनु जिशो खेशो बाक्त हना, मेको आन देशो पचा माल्नीम। ब्यवस्था १७:८-९ 6 मिनु मेको साइशशो मुर आ सहर नेक्था डा खाल्पापुकी मेको शुर रोप्शा साइशशो खोला डा बी तार आन गुइ चिक्सीमल। मती २७:२४ 7 मिनु मेकोपुकीमी “गेपुकी आंइ गुइमी हुश ख्राक्श मपोक्शो। सुम पवा मेको यो मतुइशशो। 8 मोपतीके परमप्रभु यावे इन श्येत रे प्रोंइशो इन मुर इस्राएली आंइ पाप क्याम्दीन। इन मुर इस्राएली आन दातेमी एको दोस मतशो मुर कली पोक्शो हुश ख्राक्श आ पाप गो आंइ दातेमी मलील” दे पुंइचा माल्नीम। मिनु मेको हुश ख्राक्श पोक्तीके पाप क्याम्सीब। 9 मोपा गेपुकीमी दोस मतशो मुर कली साइक्चा पुंइसीतीके इन दाते रे गुंइचा माल्नीनी। मारदे हना गेपुकीमी परमप्रभु यावे आ डोंइती ठीक पचा माल्नीनी। गन्ती ३५:३३

लडाइम तशो मीश आल

10 मिनु गेपुकीमी लडाइम लनीनु, परमप्रभु यावे, इन परमप्रभुमी इन जोरी सत्रु आन कली इन गुइमी गेवानु, 11 मिनु फ्रेंशा लाइशशो आन दातेमी दारशो मीश आल का ताइतीनी नु मेको नु ग्युंबे पचा दाक्ताक्नी हना, 12 मेको कली इन खिंम लतीन। मिनु मेको मीश आलम आ चां फ्रेंचा नु आ ग्ये खोइक्चा माल्ब। 13 मिनु नोले मेकोमी आ माइत वा पुइशशा नक वा फेक्चा माल्ब। मेको इन खिंम बाक्शा, महिना का सम्म आ आंम आफ आन पर्बम रोंका पचा माल्ब। मिनु नोले मेको कली ग्युंबे पा मेको निक्शी मीश वोंइश दुम्ने चाप्नीम। 14 मिनु गे मेको कली तशा ब्रीताक्नी हना, मेको कली तिल्चा दाक्ताक्नी हना, मेको कली प्रोंइशा लचा गेन। गे मेको कली लेयचा मताइनीनी। मिनु वाइलीम कली खोदेशो पचा मताइनीनी। मारदे हना मेको इन मीश बाक्त।

डोंइती जरमेशो तौ

15 मिनु वोंइश मुर का के मीश निक्शी बाक्शा, का आ दाक्शो नु का आ मदाक्शो मीश बाक्त हना, मेको निक्शीमी तौ का थिशा, आ मदाक्शो मीशेम चहिं डोंइती तौ थिशो बाक्त हना, उत्पत्ती २९:३०-३२ 16 अडस पशोनु, आ दाक्शो

मीश आ तौ, मदाक्शो आ तौ प्रोंइशा, डोंइती जरमेशो तौ सेल्ले मचाप्व। 17 मेकोमी आ मदाक्शो मीश आ तौ “डोंइती जरमेशो तौ बाक्ब” दे आ शोंप डा भाग निक्शी गेचा माल्ब। मारदे हना मेको आ डोंइती डा सक्तिम थिशो बाक्ब। डोंइती जरमेशो तौ आ अधिकार मेको केन बाक्ब। उत्पत्ती ४९:३

हेंथे गाक्ब तौ कली सजाइ

18 मिनु मुर का हेंथे गाक्ब मटीब तौ का बाक्त हना, मेको आ आम आफ आस देंशो काइ मटीब बाक्त हना, तुप्शा, शेंशा यो मेको आस देंशो मटिप्टु हना, ब्यवस्था २७:१६; प्रस्थान २०:१२ 19 मेको आ आम आफोम मेको कली ग्याइश्शा, सहर डा खाल्पा आन डोंइती सहर डा लाप्यो आ नेक्था चाक्चा माल्नीम। 20 मिनु नोले मेको निक्शीमी सहर डा खाल्पा आन कली “एको आंस तौ हेंथे गाक्ब नु मटीब बाक्ब। एकोमी आंस अरेशो मटीब। एको शुश जाइब नु रकसी शांबु तूब बाक्ब” देंसल। 21 मिनु मेको सहर डा मुर नेल्लेमी मेको कली फुल्लु आप्शा साइक्चा माल्नीम। मिनु गेपुकीमी इन दाते डा मरिम्शो क्याम्चा माल्नीनी। मिनु इस्राएली नेल्लेमी मेको नेंशा, हिंचा माल्नीम।

मरिम्शो पाइब कली सजाइ

22 मिनु मुर कामी बेक्चा माल्शो सजाइ तशा, गेपुकीमी मेको कली खाम क्युक्तीनी हना, गन्ती २५:४; यहोसु ८:२९; यहोसु १०:२६-२७; १सामुएल ३१:१०; २सामुएल ४:१२; २सामुएल २१:६,९ 23 मेको आ लास आ दीसा सुनी सम्म खाम क्युक्शा, वोइक्चा मदुम्ब। मेको नाक्तीन मेको कली थिम्चा माल्नीनी। मारदे हना क्युक्शा साइश्शो मुर परमप्रभुम पशो सराप चीले बाक्ब। परमप्रभु यावे, इन परमप्रभुमी गेशो रागी कली ग्रांग्रा दिशो मसेलीन। यहोसु ८:१९; यहोसु १०:२७; यूहन्ना १९:३१; गलाती ३:१३

22

वारच पतीके आ पर्वम अरेशो

1 गे इन लोकब आन ब्यफ, भेडा हेंथे गाक्शो ताइक्तीनी हना, गे मेको कली इन लोकब आ बाक्तीकेम चाक्दीतीन। प्रस्थान २३:४ 2 इन लोकब इन नेक्था मबाक्त हना, मेको आ होत्रप मतुइक्ताक्नी हना, गे मेको आन कली इन खिं चाक्शा वोतीन। मिनु ममाल्मे सम्म इन खिंम थुलीन। मिनु मेको मुर ब्रथ जाक्त हना, लेत्नीन। 3 मिनु जाम्शो गधा, वासी नु मारेइ मारेइ जाम्शो थित्तीनी हना, मेको मोदेंशो पचा माल्नीनी। वारच पचा मप्रोनीन।

4 मिनु इन नेक्था डा मुर आ गधा, ब्यफ लांम थिश्शो ताइतीनी हना, मतशो खोदेंशो मपने। मेको कली पोक्चा कली वारच पतीन।

5 मीश मुरुमी वोंइश मुर आन फेक्तीक वा मफेक्सीन। वोंइश मुरुमी मीश मुर आन फेक्तीक वा मफेक्सीन। सु सुमी मेको पाइबा, मेको परमप्रभु यावे, इन परमप्रभु कली ग्रांग्रा बाक्ब।

6 मिनु गे, खाम खपीम चिक्ब आ ग्योत्र का थित्तीनी हना, मेको ग्योत्रम ब्वोफु कि चाइक्ब बाक्तेक्म हना, गे मेको चिक्बी नु आ चाइक्ब आन कली लाइक्चा मदुम्ब। 7 मेको चिक्ब कली बेरचा गेचा माल्नीनी। आ चाइक्ब आन कली लाइक्ने चाप्नीनी। मो पाइतीनी हना, गे रिम्शो पा बाक्चा ताइनीनी। मिनु इन ब्रोंइतीक नाक्त शुश दुम्नीम।

8 गे नक खिं सेल्लतीनी हना, खिं तार एर ओंथ नेल्ल थरपु हिरचा माल्नीनी। मारदे हना मुर का दोक्त हना, गे इन खिं तार दोस मतशो मुर कली साइक्तीक पाप राइब।

9 गेपुकीमी इन अडगुर रूमी अरु वांचेर तेम्शा मशोक्कीन। मो पाइतीनी हना, इन शोक्शो निम्फा परमप्रभु कली मगारचा डा दुम्ब। लेवी १९:१९ 10 गे ब्यफ नु गधा कालेम वाक्चा मदुम्ब। 11 गे ऊन नु सुती ब्वाइश्शा प्रोत्रशो फेक्चा मदुम्ब।

12 गे इन फेक्तीक वा आ कुनामी झुम्का क्युक्शा सेलीन। गन्ती १५:३८

मीश मुर आन पर्वम अरेशो

13 मिनु मुर कामी ग्युंवे पा आ मीश नु बाक्शा, नोले मदाक्ताक्व हना, 14 आ मीश प्रोंइचा कली आ मीश आ पर्वम “आं ग्युंवे पशो मीश आल नु बाक्डानु, कन्ने मबा” देंत हना, 15 मेना मेको मीश आल आ आम आफोम आस तमी कन्ने दुम्तीक चिनु लाइश्शा, सहर डा ठेयब लाप्योम बाक्ब खाल्पा आन बाक्तीके लचा माल्नीस। 16 मिनु मीश मुर आ आफोम मेको खाल्पा आन कली “गो आं तमी मेको मुर कली ग्युंवे पा गेता। मिनु मेकोमी मुल आं तमी कली मदाक्ब। 17 मिनु मेकोमी आं तमी नु ब्राचा कली ‘इ तमी कन्ने मबाक्शो बाक्त’ देंत” देंशा, मेको इप्शो वा मेको खाल्पा आन डोंइती ब्राचा माल्ब। 18 मिनु सहर डा खाल्पापुकीमी मेको वोंइश मुर कली सजाइ गेचा माल्नीम। 19 मिनु

मेको वोंइश मुरुम मेको मीश मुर आ आफ कली सहे का चांदी के शेकेल थाप्चा माल्ब। मारदे हना इस्राएल डा कन्ने मीश आल आ नें मरिम्शो सेल्चा माल्शो बाक्त। मिनु मेको आ मीश कली मबेक्म सम्म प्रॉइने मचाप्ब। शेकेल का ११.५ ग्राम चांदी के क्येट बाक्ब। ब्यवस्था २२:२९

20 तन्न मेको वोंइश मुर आ देशो थमा बाक्त हना, मिनु कन्ने आ चिनु मेको मीश आल नु मबाक्शो बाक्त हना, 21 मेको मीश मुर कली आ आफ आ खिं डा लाप्चोम चाक्चा माल्नीम। मिनु मेको आ सहर डा वोंइश मुर नेल्लेमी मेको कली फुल्लु आप्शा साइक्चा माल्नीम। मारदे हना मेकोमी आ आफ आ खिंम तेल्लेम पा इस्राएलम काइ मरिम्शो पाप्तु। मिनु मोपा गेपुकीमी इन दातेमी पशो मरिम्शो क्याम्चा माल्नीनी। उत्पत्ती ३४:७

वोंइश मुर आ पर्वम अरेशो

22 मिनु वोंइश मुर का अरु आन मीश नु इप्शो थितेक्म हना, मेको निम्फा आस कली साइक्चा माल्नीम। मेको मीश मुर नु बाक्शो वोंइश मुर यो साइक्चा माल्नीम। मिनु मोपा गेपुकीमी इन इस्राएलम पशो मरिम्शो क्याम्चा माल्नीनी। लेवी २०:१०; २सामुएल ११:४

23 मिनु ग्युंभे पचा कली पुंइशो मीश आल का कली सहरम अरु वोंइश मुर काम गुम्तु हना, मेको नु इप्त हना, 24 मेको निम्फा आस कली सहर डा ठेयब लाप्चो रे गुंइशा, फुल्लु आप्शा साइक्चा माल्नीम। मेको मीश आल वारच पन, दे मग्रीतीके नु मेको वोंइश मुर आ इस्राएली लोक्ब आ मीश आल नु बाक्तीके, निम्फा आस कली साइक्चा माल्नीम। मिनु मोपा गेपुकीमी इन दातेमी पशो मरिम्शो क्याम्चा माल्नीनी।

25 तन्न मेको वोंइश मुरुम मेको ग्युंभे पचा कली पुंइशो मीश आल कली रूम थित्तु हना, मेको कली ग्याइश्शा बिथोलो पाप्तु हना, मेको वोंइश मुर कली ला साइक्चा माल्ब। 26 मेको मीश आल कली मारेइ मपचा। मारदे हना मेकोमी साइक्चा पुंइसीचा डा पाप मपशो बाक्ब। मेको पाप कली साइश्शो खोदेशो बाक्ब। 27 मेको पुंइशो मीश आल रूमी वाइ ब्रेश्शा ग्रीम माइ, तन्न सुइमी वारच मपामे माइ।

28 मिनु वोंइश मुर काम ग्युंभे पचा कली मपुंइशो कन्ने मीश आल कली ग्याइश्शा, मेको नु बाक्शो, थित्तेक्म हना, प्रस्थान २२:१५ 29 मेको नु बाक्शो वोंइश मुरुम मेको मीश आल आ आफ कली ५० शेकेल चांदी थाप्चा माल्ब। मिनु मेको वोंइश मुरुम मेको मीश आल नु बाक्तीके, आ मीश दुम्चा माल्ब। मेकोमी मेको कली मबेक्म सम्म प्रॉइने मचाप्ब। मारदे हना मेको मेको नु इप्त।

30 मुरुमी आ आफ आ मीश कली चाक्ने मचाप्ब। आ आफ नु इप्शो मीश मुर नु आ तौ इप्चा मदुम्ब। लेवी १८:८; २सामुएल १६:२२

23

परमप्रभु आ अरेशो लीशो लोव्र

1 मिनु वोंइश मुर कली आल मथीब सेल्चा कली आ चारतीक खोइश्शो बाक्त हना, परमप्रभु यावे आ गुम्तीकेमी ओव्रने मचाप्ब। यसैया ५६:३-४; प्रेरित ८:२७ 2 तेल्लेम पा थिश्शो आल परमप्रभु यावे आ गुम्तीकेमी ओव्रने मचाप्ब। मेको आ १० पाला सम्म परमप्रभु यावे आ गुम्तीकेमी ओव्रचा मताइनीम। एज्रा ९:-; एज्रा १०:- 3 अम्मोनी नु मोआबी परमप्रभु यावे आ गुम्तीकेमी ओव्रने मचाप्नीम। मेको आ १० पाला सम्म परमप्रभु यावे आ गुम्तीकेमी ओव्रचा मताइनीम। उत्पत्ती १९:३७-३८ 4 मारदे हना गे इजीप्त रे ग्रीनीनु, मेकोपुकीमी जचा थोव्रक नु ब्वाक्कु कुरशा इन कली गुम्थ मपीम। मिनु मेकोपुकीमी यो इन कली सराप पचा, दे बेओर आ तौ बालाम मेसोपोटामीया आ नेक्था डा अराम-नाहाराइम डा पेशोर सहर रे क्येट गेशा ब्रेत्ताक्म। गन्ती २२:५-६ 5 मो हना यो परमप्रभु यावे, इन परमप्रभुमी बालाम आ लोव्र मनेन। मेकोमी मेको सराप के आसीक सेल्लु। मारदे हना परमप्रभु यावे, इन परमप्रभुमी इन कली दाक्ताक्व। 6 मोपतीके गेपुकीमी गेनायो मोआबी नु अम्मोनी नु मगरीन, वारच मदुमीन। एज्रा ९:१२

7 मिनु गेपुकीमी एदोमी आन कली ग्रांग्रा मदित्चा। मारदे हना मेकोपुकी इन लोक्ब बाक्नीम। गेपुकीमी इजीप्ती आन कली ग्रांग्रा मदित्चा। मारदे हना गेपुकी मेको आन रागीम बाक्शो बाक्तीनी। 8 मेको आन युइ आन पाला रे परमप्रभु यावे आ गुम्तीकेमी ओव्रचा गेने चाप्नीनी।

लडाइ पाइब आन बाक्तीके

9 मिनु गेपुकी लडाइ पथ लनीनु, इन ताम्बुम नेल्ल मरिम्शो रे डोन बाक्कीन। 10 मिनु इन दाते डा वोंइश मुर का नाक्दोम ग्रांरा दितीके दुम्त हना, मेको बाक्तीके रे डोन लचा माल्ब। मिनु लडाइ पाइब आन बाक्तीके मओव्रचा। लेवी १५:१६-१८ 11 मिनु मेको मुर नाक्नाक्दो चिक्सीशा, नां रिक्ची ना लेंशा आ बाक्तीके ओव्रचा ताइब।

12 मिनु गेपुकी लडाइ पाइब आन बाक्तीक मेर डाइक्तीके का सेल्चा माल्ब। 13 गेपुकी इन थोव्रक नु दोतीक का यो बाक्चा माल्ब। डाइक्चा कली लनीनु, पोव्रला दोशा, आगा डाइश्शा नोले ख्री सुम्शा वोतीन। 14 मारदे हना इन कली प्रोंइचा नु इन जोरी सत्रु आन कली इन कली जिम्मा गेचा कली परमप्रभु यावे, इन परमप्रभु इन लडाइ पाइब आन बाक्तीकेम बाक्ब। मेकोमी इन कली इन जोरी सत्रु रे प्रोंइचा नु मेको आन कली इन गुडिम गेब। मोपतीके इन बाक्तीके रिम्शो, आ खोदेशो दुम्चा माल्ब। मिनु इन दातेमी ग्रांरा दित्चा डा ताप्तु हना, इन बाक्तीक रे गाक्ब। लेवी २६:१२

प्रोक्शो मुर आन पर्बम शेंशो

15 मिनु वाइल का आ होव्रप रे प्रोक्शा, इन बाक्तीकेम जाक्त हना, गेपुकीमी मेको कली लेंशा आ होव्रप कली गेचा मदुम्ब। 16 मेको इन दातेमी आ दाक्शो सहरमी बाक्चा गेने। गेपुकीमी मेको कली श्येत मगेने। फिलेमोन १२-१६

17 मिनु इस्राएली आन तमी कि तौ मन्दीर डा तेल्लेम पाइब दुम्चा मदुम्ब। होसे ४:१४; १राजा १४:२४; २राजा २३:७ 18 वोंइश मुर, मीश मुर तेल्लेम पशो क्येट परमप्रभु यावे, इन परमप्रभु आ खिंम कबल खाप्चा कली चाक्चा मदुम्ब। मारदे हना मेको परमप्रभु यावे, इन परमप्रभु कली ग्रांरा बाक्ब। प्रकाश २२:१५

19 मिनु गेपुकीमी क्येट, जचा थोव्रक नु मारेइ मारेइ जेर गेशो इन आंम लोकब रे मेको आ चाइक्ब मताक्चा। प्रस्थान २२:२४; लेवी २५:३६ 20 अर्को रागी डा मुर आन कली चाइक्ब गेपाइक्ने चाप्नीनी। तन्न इन लोकब आन कली जेर गेशा आ चाइक्ब मथाप्पाइक्चा। मिनु मेको टीतीनी हना, परमप्रभु यावे, इन परमप्रभुमी गे लचा चिक्शो इन के सेल्चा चिक्शो रागीमी इन कली आसीक गेब।

21 मिनु गेपुकीमी परमप्रभु यावे, इन परमप्रभु नु कसम जनीनु, मेको खाप्शा, थाप्चा कली मरिम्दीन। मारदे हना परमप्रभु यावे, इन परमप्रभुमी कसम खाप्शो कोव्रचा दाक्ब। मो मपाइतीनी हना, गे पाप राइनीनी। गन्ती ३०:३ 22 तन्न गेपुकी कसम मजाइतीनी हना, गे पाप मराइतीनी। 23 गेपुकीमी मार देंनी, मेको खाप्शा, पचा माल्नीनी। मारदे हना गे परमप्रभु यावे, इन परमप्रभु नु आंमान कसम जाइतीनी। 24 मिनु गेपुकी इन लोकब आ अडगुर रूमी ओव्रतीनी हना, मरूनी सम्म सेक्शा ब्वने चाप्नीनी। तन्न कुरशा लाइक्चा मताइतीनी। मत्ती १२:१ 25 मिनु गेपुकी इन लोकब आ बाली मीशो रूमी ओव्रतीनी हना, जचा कली बाली सेक्चा ताइतीनी। तन्न रिक्चा चहिं मताइतीनी।

24

ग्युंभे पा प्रोंइतीक आ पर्बम

1 मिनु मुर कामी ग्युंभे पा आ मीश नु बाक्शा, नोले ला मेको मरिम्शो बाक्त, दे तुइश्शा, मेको कली प्रोंइचा कली ब्राचा आ पर्बम ब्रेक्स गेशा, आ खिं रे सोइक्ताक्व हना, 2 मेको लशा, अर्को आ मीश दुम्मेनु, 3 मिनु मेको अर्को वोंइशेम यो मरिम्शो बाक्त, दे तुइश्शा, मेको कली मदाक्थु प्रोंइचा कली ब्राचा आ पर्बम ब्रेक्स गेशा, आ खिं रे सोइक्ताक्व हना, कि मेको मुर आंमा बेक्त हना, 4 मेको आ डोंइती प्रोंइशो वोंइशेम मेको मीश मुर अरु वोंइश नु बाक्शा ग्रांरा दुम्शो नोले लेंशा चाक्ने मचाप्ब। मारदे हना मोदेशो पशो परमप्रभु यावे आ डोंइती ग्रांरा बाक्ब। परमप्रभु यावे, इन परमप्रभुमी इन कली गेशो रागीमी पाप मचाक्कीन।

रिम्शो दुम्चा कली अरेशो

5 वोंइश मुर कामी नक ग्युंभे पशो बाक्त हना, मेको लडाइम लचा मदुम्ब। अरु गेय यो “मेको कली पावो” दे अरेचा मदुम्ब। बर्स का सम्म मेको आ खिंम बाक्शा आ नक चाक्शो मीश नु ग्येरसीचा माल्ब। ब्यवस्था २०:७

6 सुइमी सुइ आन यात जाकटी मवोइक्चा। मारदे हना मेको मबाक्त हना दोपा शोब्ले सेल्ने चाप्नीमी?

7 सुइ मुरुमी इस्राएली लोकब कली ग्याइश्शा खुइ पा आ वाइल सेल्तु हना, लेयतु हना, मेको खुइ कली साइक्चा माल्नीम। मोपा गेपुकीमी इन दाते रे मरिम्शो नेल्ले गुंइचा माल्नीनी। प्रस्थान २१:१६

8 कोत्रर मुतीक तशा होस पा बाक्कीन। चढेब, लेवीपुकीमी मेको आ पबर्म इन कली शेंशो खोदेशो पा नेल्ल पचा माल्नीनी। गो मेको आन कली अरेशो खोदेशो पा होस पा बाक्कीन। 9 गेपुकी इजीप्त रे गूशा पिनीनु, परमप्रभु यावे, इन परमप्रभुमी लांम मिरयाम कली पशो गेय मप्रेंदीन। गन्ती १२:१०-१५

10 मिनु गेपुकीमी इन वारच कली जेर गेनीनु, मेको के मार मार जाकटी पुंडथ आ खिं मओवडीन। 11 लाडगामीन रिम्दीन। मिनु जेर लाडबमी मेको जाकटी लाडगा गुंडशा गेब। 12 मेको मुर पुडग बाक्त हना, मेको आ जाकटी इन खिंम वोइशशा ब्रशा मइपीन। 13 नां रिक्ची ना मेको जाकटी लेशशा गेने। मिनु मेकोमी मेको आ फेक्तीक फेक्शा इण्थ लने चापब। मिनु मेकोम इन कली आसीक गेब। मेको परमप्रभु यावे, इन परमप्रभु आ डोंइती ठीक पतीक बाक्ब। प्रस्थान २२:२५; अय्युब २२:६; आमोस २:८; ब्यवस्था ६:२५

14 गेपुकीमी इस्राएल डा कि इन सहरम बाक्शो अर्को रागी डा पुडग नु श्येत जाडब खेतलाम इन कली गेय पाप्तु हना, आ ततीक ठीक पा गेने। 15 गेय पची नाक्ती नां मरिक्थु, आ तचा डा गाल्च गेचा माल्नीनी। मेको पुडग मुर आ गाल्च माल्ब बाक्ब। ठीक पा मगेतीनी हना, मेकोमी इन मरिम्शो पशो आ पबर्म परमप्रभु यावे नु लोत्र पाडब। मिनु गे पाप राइनीनी।

16 मुर आ तमी तौम साइक्चा डा पाप पाप्तु हना, आफ कली मसाइक्चा। मिनु आफोमी साइक्चा डा पाप पाप्तु हना, आ तमी तौ आन कली मसाइक्चा। सुमी पाप पाडबा, मेको ला साइक्चा पुंडसीब। २राजा १४:६

17 मिनु अर्को रागी डा मुर नु रोम रोइक्च आन कली निसाफ दूली मपने। मिनु वोंइश बेक्शो मीश मुर आन फेक्तीक वा जाकटी मवोतीन। 18 गेपुकी इजीप्त रागीम वाइलीम वाइल दुम्शो मिम्तीन। मिनु परमप्रभु यावे, इन परमप्रभुमी इन कली मेक रे प्रोंइशो मप्रेंदीन। मोपतीके गो इन कली मोदेशो पचा, दे अरेता। ब्यवस्था ५:१५

19 गेपुकीमी खेतम बाली नाली रिक्शा, मुठा का खेतम प्रेंताक्नी हना, लेशशा ब्रथ मलने। मेको मुठा अर्को रागी डा मुर, रोम रोइक्च नु वोंइश बेक्शो मीश मुर आन कली बाक्ब। मो पाइतीनी हना, परमप्रभु यावे, इन परमप्रभुमी इन गेय नेल्लेमी इन कली आसीक गेब। लेवी १९:९-१० 20 गेपुकीमी तेल रवा आ फल थेप्तीनी हना, लेंशा लीशो फल मथेपीन। मेको लीशो फल अर्को रागी डा मुर, रोम रोइक्च नु वोंइश बेक्शो मीश मुर आन कली बाक्नीम। 21 गेपुकीमी इन अडगुर रू डा अडगुर सेक्तीनी हना, लेंशा लीशो फल मसेक्कीन। मेको लीशो फल अर्को रागी डा मुर, रोम रोइक्च नु वोंइश बेक्शो मीश मुर आन कली बाक्नीम। 22 गेपुकी इजीप्त रागीम वाइलीम वाइल दुम्शो, मिम्तीन। मोपतीके गो इन कली मोदेशो पचा, दे अरेता।

25

तुप्तीक सजाइ

1 मिनु मोसामी “वोंइश मुर निक्शी जिम्ताक्स हना, मुददा कोम्मुइनीस। मिनु निसाफ पाडबमी का कली रिम्शो नु का कली मरिम्शो देंब। प्रस्थान २३:७ 2 मिनु मरिम्शो पाडब का तुप्चा सजाइ पुंडसाक्व हना, मेको निसाफ पाडब आ डोंइतीन मेको कली खोल्शा, मेको आ पाप गिश खेयप तुप्चा डा बाक्मे, मिश खेयप मेको कली तुप्चा माल्नीम। 3 मेकोमी ४० खेयप सम्म तुप्चा दुम्ब। मेको क्येडा शुश तुप्पाइक्तु हना, इन लोकब इन डोंइती मुने दोक्ब। २कोरिन्थी ११:२४

बी ब्यफ आ पबर्म अरेशो

4 दांइ पशो ब्यफ कली फुडला पाइक्चा मदुम्ब। १कोरिन्थी ९:९; १तिमोथी ५:१८

खिं डा शोंप आ पबर्म अरेशो

5 मिनु लोकब निक्शी काथा बाक्ताक्स हना, का तौ मथिथु, बेक्त हना, मेको आ मीशेम अर्को खिं डा मुर नु ग्युंबे पचा मदुम्ब। बेक्शो मुर आ लोकबमी मेको मीश मुर कली ग्युंबे पचा माल्ब। 6 मिनु मेको आ डोंइती जरमेशो तौ कली मेको बेक्शो आ नें वोइक्चा माल्नीम। मिनु मोपा आ नें इस्राएल रे मक्याम्सीब। 7 तन्न आ रिउम आ भोग्यु वोइक्चा मबिस्साक्व हना, मेको मीश मुरुमी सहर डा ठेयब लाप्चोम बाक्ब खाल्पा आन नेक्था लशा ‘आं रिउम आ लोकब आ नें इस्राएलम वोइक्ने मबिस्से। मेकोमी आ पचा माल्शो गेय मपावो’ देंचा माल्ब। 8 मिनु मेको सहर डा खाल्पापुकीमी मेको कली ब्रेशा, मेको नु लोत्र पचा माल्नीम। मिनु मेकोमी ‘गो एको कली मचाक्नुड’ दे आ थुं मलेत्ताक्व हना, 9 आ भोग्युम सहर डा खाल्पा आन डोंइती मेको आ जुत्ता पुइशशा आ कुलम तोक्चा माल्ब। मिनु

मेको मीश मुरुम 'सुम आ लोकब आ खिं डा मुर सेल्चा मदाक्बा, मेको कली ओं पाइक्चा माल्ब' दे लोव पचा माल्ब। 10 मिनु इस्राएलमी मेको आ खिं डा मुर आन कली 'जुत्ता पुंडसीशो मुर' दे नें वोइक्चा माल्नीम।

जीब आस कली हेंथे वारच पशो

11 मिनु वोंइश मुर निक्शी राम्शी पाम्सेनु, का आ मीश जाक्शा, आ वोंइश कली प्रोंइचा, दे अर्को आ खुइश्शो थोव्रक ग्याइक्ताक्व हना, 12 गेपुकीमी मेको कली शिशी मपाइक्थु, आ गुइ खोइक्चा माल्ब।

पुक्तीक नु नाक्तीकेम जोल मपने

13 मिनु इन पुक्तीक नाक्तीक ठेयब नु आइक्च बाक्चा मदुम्ब। लेवी १९:३५-३६; इजीकीएल ४५:१०; आमोस ८:५; मीका ६:११ 14 इन खिंमी यो निक्शी खाल डा पुक्तीके एफाह मदुम्ब। एफाह का २२ लिटर रिक्ब पुक्तीके बाक्ब। 15 तन्न इन खिंमी ठीक नाक्तीक नु ठीक पुक्तीक बाक्चा माल्नीम। मो पाइतीनी हना, परमप्रभु यावे, इन परमप्रभुमी गेशो रागीम शुश नाक्त ब्रोंइनीनी। 16 मारदे हना मरिम्शो पुक्बपुकी, परमप्रभु यावे, इन परमप्रभु आ डोंइती ग्रांग्रा दित्चा डा बाक्नीम।

अमालेकी आन नें क्याम्दीन

17 मिनु गेपुकी इजीप्त रे पिनीनु, अमालेक डा मुरपुकीमी इन कली लांम मार पामे मेको मप्रेंदीन। प्रस्थान १७:८-१६ 18 मेकोपुकीमी इन कली लडाइ तोशा, गेपुकी लांम गाक्शो रे दनीनु नोले गाक्ब नेल्ल आन कली साइश्शो बाक्तेक्म। मेकोपुकी परमप्रभु क्येडा महिंम। 19 मोपतीके परमप्रभु यावे, इन परमप्रभुमी इन कली योव्रशा गेशो इन के सेल्चा चिक्शो रागीम इन जोरी सत्रु नु लडाइ पशा, नाइक्साक्नी हना, अमालेकी आन नें रागी रे क्याम्चा माल्नीनी। मेको मप्रेंदीन” देंत। १सामुएल १५:२-३

26

डोंइती मीशो अन्न चढेतीक

1 मिनु मोसामी “परमप्रभु यावे, इन परमप्रभुमी इन कली गेशो रागी जाक्दीश्शा, इन के सेल्शा, मेक बाक्नीनु, 2 परमप्रभु यावे, इन परमप्रभुमी इन कली गेशो रागी डा डोंइती मीशो मारेइ मारेइ डालो काम कुर पा परमप्रभु यावे, इन परमप्रभु आ योव्रशो बाक्तीकेम लतीन। प्रस्थान २३:१९; लेवी २:१४ 3 मिनु गे मेना गेय पाइब चढेब आन बाक्तीक लचा माल्नीनी। मिनु मेको कली गो परमप्रभु यावे, इन परमप्रभु आ डोंइती 'परमप्रभु यावेमी आंइ किकी पिपी नु कसम जशा गेनुड, देंशो रागीम गो मुलाक्ती जाक्ती' देंचा माल्नीनी। 4 मिनु मेको चढेबमी मेको डालो इन गुइ रे ताक्शा, परमप्रभु यावे, इन परमप्रभु कली चढेतीक आ डोंइती वोइक्चा माल्ब। 5 मिनु गेपुकीमी परमप्रभु यावे, इन परमप्रभु आ डोंइती 'आं किकी पिपी हिरब अरामी बाक्तेक्म। मेको इजीप्त रागीम अर्को रागी डा मुर दुम्शा बाक्शो बाक्त। डोंइती मेको शुश मुर मबाक्म। नोले शोशा बोशा शुश नु बोल्यो ठेयब रागी डा मुर दुम्तेक्म। ब्यवस्था ६:२०-२५; यहोसु २४:२-१३; भजन संग्रह ७८:-; भजन संग्रह १०५:-; भजन संग्रह १३६:- 6 मिनु इजीप्तीपुकीम आंइ कली मरिम्शो पा दिप्शा, आंइ कली शुश गेय पपाइक्तेक्म। 7 मिनु गोपुकीमी परमप्रभु यावे, इं किकी पिप आन परमप्रभु कली पुंडतक। मिनु मेकोमी आंइ पुंडशो नेंशा, आंइ श्येत तशा नु दोपा आंइ कली दिप्शो बाक्मा, मेको ताप्तु। 8 मिनु परमप्रभु यावेमी शुश सक्ति पाइश्शो ठेयब बोल पतीकेमी हिंचा डा चिन्ड नु छक लाक्चा डा गेय कोंइशा, आंइ कली इजीप्त रे गुंडशा एक चाक्तु। 9 मेकोमी एकेर चाक्शा, एको रागी आंइ कली गेप्तु। मिनु एको रागीम दूध नु खुदो शुश बाक्त। 10 मिनु परमप्रभु यावे, आं कली गेशो रागी डा डोंइती डा मीशो मारेइ मारेइ इन बाक्तीक चाक्ता' देंचा माल्तीनी। मिनु मेको नेल्ल परमप्रभु यावे, इन परमप्रभु आ डोंइती वोइश्शा, मेको परमप्रभु यावे, इन परमप्रभु आ डोंइती बाप्शा ठेयब सेल्चा माल्नीनी। 11 मिनु गे परमप्रभु यावे, इन परमप्रभुमी इन कली नु इन खिं डा मुर आन कली शुश गेशो तशा, लेवीपुकी नु गेपुकी नु बाक्ब अर्को रागी डा मुरपुकी ग्येरसीचा माल्नीमी। ब्यवस्था १६:११-१४

पुडंग आन कली गेतीक

12 मिनु गेपुकीमी बर्स सां सांमी इन बाली नाली डा मारेइ मारेइ रे इन सहरम १० भाग डा भाग का तिल्शा वोइक्चा माल्नीनी। मेको इन सहर डा लेवी आ थर डा मुर, अर्को रागी डा मुर, रोम रोइक्च नु वोंइश बेक्शो मीश मुर आन कली गारचा डा जचा थोव्रक बाक्ब। ब्यवस्था १४:२७-२९ 13 मिनु गेपुकीमी परमप्रभु यावे, इन परमप्रभु आ डोंइती 'गो इन भाग आं खिं रे तिल्शा, इन शेंशो खोदेंशो पा लेवी आ थर डा मुर, अर्को रागी डा मुर, रोम रोइक्च नु वोंइश

बेक्शो मीश मुर आन कली गेता। गो इन शेंशो नेल्ल पाता। गो मेको काइ मप्रेंदु' देंचा माल्नीनी। 14 रोंका पडानु, मेको रे मारेइ मजड। गो ग्रांशा दिशो बाक्डानु, मेको रे मारेइ मगुंडु। मिनु बेक्शो मुर आन कली यो मेकेर रे मारेइ मगेशो बाक्ती। गो परमप्रभु यावे, आं परमप्रभु आ देंशो टिशा, इन अरेशो नेल्ल खाप्शो बाक्ती। गन्ती १९:१४-१५; इजीकीएल २४:१७, २२; होसे ९:४ 15 इन स्वर्ग डा बाक्तीके रे कोव्रशा, इन मुर, इस्राएली, आंइ कली आसीक गेने। मिनु आंइ किकी पिपी नु कसम जशा गेशो शुश दूध नु खुदो बाक्शो रागी कली यो आसीक गेने” दे परमप्रभु कली लोव्र पचा माल्ब।

परमप्रभु आ कबल डा लोव्र

16 मिनु मोसामी “मुलाक्त परमप्रभु यावे, इन परमप्रभुमी इन कली मेको फुल्लुम मुशा ब्रेक्शो लोव्र नु निसाफ पतीक लोव्र पचा माल्नीनी। गेपुकीमी मेको कली इन थुंम वोइश्शा, इन थुं नु सोक्त नेल्लेमी टिने। 17 गेपुकीमी मुलाक्ती परमप्रभु यावे कली ‘गे आंइ परमप्रभु बाक्नीनी। गो इन लां खोइक्नीकी। मिनु इन फुल्लुम मुशा ब्रेक्शो लोव्र, इन शेंशो नु इन निसाफ पतीके लोव्र पाइनीकी नु इन देंशो टीनीकी’ दे परमप्रभु कली लोव्र पाइतीनी। 18 मिनु मुलाक्ती परमप्रभु यावेमी इन कली ‘गो इन कली आं दाक्शो मुर सेल्ला। आं शेंशो नेल्ल टिचा माल्नीनी। 19 गो आं सेल्लशो रागी रागी आन दातेमी इन कली नेल्ल क्येडा ठेयब सेल्लुड। मान पाइक्चा पुंइसीशा, इन नें ठेयब सेल्ला नु शुश दारशो सेल्लुड। मिनु परमप्रभु यावे, इन परमप्रभु आ मुरपुकी दुम्चा माल्नीनी’ दे परमप्रभु यावेमी इन कली देंशो बाक्त” देंत। ब्यवस्था १८:१

27

मिम्तीक फुल्लु थारशो

1 मिनु मोसा नु इस्राएल डा खाल्पापुकीमी मुर आन कली “मुलाक्ती इन कली देंशो शेंशो लोव्र नेल्ल टिशा पने। 2 परमप्रभु यावे, इन परमप्रभुमी इन कली गेशो यर्दन आइक्ची हांबु डा रागीमी शोक्सीनी नोले डा नाक्तीमी ठेयब फुल्लु थारशा, बुलु ब्रुइक्तीन। 3 मिनु शोक्सीनी नोले गेपुकीमी मेको अरेशो लोव्र नेल्ले मेको फुल्लु तार ब्रेक्चा माल्नीनी। मो पाइतीनी हना, परमप्रभु यावे, इन परमप्रभुमी इन कली गेशो रागी ओव्रचा ताइनीनी। परमप्रभु यावे, इन किकी पिपी आन परमप्रभुमी इन कली देंशो खोदेंशो पा इन कली दूध नु खुदो शुश बाक्शो रागी गेब। 4 यर्दन आइक्ची हांबु जाक्दीन्नी नोले गो इन कली अरेशो, मेको फुल्लुपुकी एबाल डांडाम थारशा बुलु ब्रुइक्तीन। 5 मिनु मेकेर रे गेपुकीम परमप्रभु यावे, इन परमप्रभु कली फुल्लु के चढेतीक का सेलीन। मेको सेल्लुनी, मेको फुल्लु आन कली फलम के यामी काइ मथिचा। प्रस्थान २०:२५ 6 गेपुकीमी परमप्रभु यावे, इन परमप्रभु कली चढेतीक सेल्लुनी, मप्रोल्लशो फुल्लु के सेलीन। मिनु मेको तारी परमप्रभु यावे, इन परमप्रभु कली चोशा चढेतीक मेकेर चढेचा माल्नीनी। 7 मिनु गेपुकीमी दुशा बाक्चा आ पर्बम चढेतीक चढेचा माल्नीनी। मिनु गेपुकीमी परमप्रभु यावे, इन परमप्रभु आ डोंइती मेको जशा ब्वशा ग्येरसीने। ब्यवस्था १२:७ 8 मिनु मेको फुल्लु आन तारी एको अरेशो लोव्र नेल्ल मुशा, रिम्शो पा ब्रेक्चा माल्नीनी” देंत।

परमप्रभुम मुर नु पशो कबल

9 मिनु मोसा नु चढेब, लेवीपुकीमी इस्राएली नेल्ल आन कली “इस्राएलीपुकी ब्वालेइ पा, नेनीने। मुलाक्ती गेपुकी परमप्रभु यावे, इन परमप्रभु आ मुर दुम्तीनी। ब्यवस्था २६:१८-१९ 10 मोपतीके परमप्रभु यावे, इन परमप्रभु आ देंशो टिने। मुलाक्ती गो इन कली माइश्शो आ शेंशो लोव्र नु आ फुल्लुम मुशा ब्रेक्शो लोव्र नेल्ल टिने” देंतेक्म।

सराप नु आसीक राइब

11 मिनु मेको नाक्तीम मोसामी मुर आन कली 12 “गेपुकी यर्दन आइक्ची हांबु शोक्सीने थुम्नी नोले, सु सुमी मुर आन कली आसीक गेचा कली गेरीजीम माइश्शो डांडाम राप्शा बाक्चा माल्नीम देंशा हना, सिमियोन, लेवी, यहूदा, इस्साकार, योसेफ नु बेन्यामीन राप्शा बाक्चा माल्नीम। ब्यवस्था ११:२९ 13 मिनु सु सुमी मुर आन कली सराप पचा कली एबाल माइश्शो डांडाम राप्शा बाक्चा माल्नीम देंशा हना, रूबेन, गाद, आशेर, जबूलून, दान नु नाप्ताली राप्शा बाक्चा माल्नीम। 14 मिनु लेवीपुकीमी नेल्ल इस्राएल डा मुर आन कली ठेयब सेंदामी लोव्र पचा माल्नीम” देंत।

सराप रचा आ पर्बम शेंशो

15 मिनु मेकोपुकीमी “सु मुरुमी मुशा, यपाइशशा मूर्ति सेल्ब, मेको परमप्रभु यावे कली ग्रांग्रा दित्चा डा बाक्ब। मिनु मेको जोक्ब मुरुमी आ सेल्शो मूर्ति कली खुइशशोमी वोइक्ब, मेको मुर सराप राइब” दैतेक्म। मिनु मुर नेल्लेमी “आमेन, मोदेशो दुम्ल” दैचा माल्नीम। प्रस्थान २०:४,२३ 16 मिनु “सु मुरुमी आंम आम आफ कली मान मपाइब, मेको मुर सराप राइब” दैतेक्म। मिनु मुर नेल्लेमी “आमेन, मोदेशो दुम्ल” दैचा माल्नीम। प्रस्थान २१:१७ 17 मिनु “सु मुरुमी आ नेक्था डा मुर आ रू डा सांद याक्ब, मेको मुर सराप राइब” दैतेक्म। मिनु मुर नेल्लेमी “आमेन, मोदेशो दुम्ल” दैचा माल्नीम। ब्यवस्था १९:१४ 18 मिनु “सु मुरुमी मिक्च मताइब कली हेंथे लां कोइब, मेको मुर सराप राइब” दैतेक्म। मिनु मुर नेल्लेमी “आमेन, मोदेशो दुम्ल” दैचा माल्नीम। लेवी १९:१४ 19 मिनु “सु मुरुमी अर्को रागी डा मुर, रोम रोइक्च नु चोइश बेक्शो मीश मुर आन कली ठीक निसाफ मपाइबा, मेको मुर सराप राइब” दैतेक्म। मिनु मुर नेल्लेमी “आमेन, मोदेशो दुम्ल” दैचा माल्नीम। प्रस्थान २२:२०-२१ 20 मिनु “सु मुर आ आफ आ मीश नु इप्बा, मेको मुर सराप राइब। मारदे हना मेकोमी आ आफ कली मुने तोक्ब” दैतेक्म। मिनु मुर नेल्लेमी “आमेन, मोदेशो दुम्ल” दैचा माल्नीम। लेवी १८:८ 21 मिनु “सु मुरुमी बी ब्यफ, क्यारश भेडा नु इप्ब, मेको मुर सराप राइब” दैतेक्म। मिनु मुर नेल्लेमी “आमेन, मोदेशो दुम्ल” दैचा माल्नीम। लेवी २२:१८ 22 मिनु “सु मुर आ समी नु इप्ब, मेको आ आफ आ तमी बाक्त हना यो आ आम आ तमी बाक्त हना यो, सराप राइब” दैतेक्म। मिनु मुर नेल्लेमी “आमेन, मोदेशो दुम्ल” दैचा माल्नीम। लेवी १८:९,११ 23 मिनु “सु मुर आ शिमी नु इप्ब, मेको मुर सराप राइब” दैतेक्म। मिनु मुर नेल्लेमी “आमेन, मोदेशो दुम्ल” दैचा माल्नीम। लेवी १८:१७ 24 मिनु “सु मुरुमी बाप्शा, मुर कली साइक्ब, मेको मुर सराप राइब” दैतेक्म। मिनु मुर नेल्लेमी “आमेन, मोदेशो दुम्ल” दैचा माल्नीम। प्रस्थान २१:१२; गन्ती ३५:२० 25 मिनु “सु मुरुमी क्येट ताक्शा, दोस मतशो मुर कली साइक्ब, मेको मुर सराप राइब” दैतेक्म। मिनु मुर नेल्लेमी “आमेन, मोदेशो दुम्ल” दैचा माल्नीम। प्रस्थान २३:८ 26 मिनु “सु मुरुमी एको अरेशो लोत्र नेल्ल खाप्शा मपाइब, मेको मुर सराप राइब” दैतेक्म। मिनु मुर नेल्लेमी “आमेन, मोदेशो दुम्ल” दैचा माल्नीम। गलाती ३:१०

28

टीबपुकी आसीक राइनीम

1 मिनु मोसामी “मुलाक्त गो इन कली माइशशो परमप्रभु यावे, इन परमप्रभु आ देशो नेल्ल होस पा टिशा, आ शेंशो पाइतीनी हना, परमप्रभु यावे, इन परमप्रभुमी इन कली नेल्ल रागी रागी डा मुर आन क्येडा ठेयब सेल्ब। ब्यवस्था २६:१९ 2 गे परमप्रभु यावे, इन परमप्रभु आ देशो टिशा पाइतीनी हना, गेपुकी एको आसीक नेल्ल राइनीनी। 3 गेपुकी सहरम बाक्शा, आसीक राइनीनी। मिनु रूम बाक्शा, आसीक राइनीनी। उत्पत्ती ४९:२५-२६

4 इन आलपुकी, इन बाली नाली, इन बी ब्यफ नु इन क्यारश भेडा नु गोठ नेल्ल आसीक रशा सोशा बोशा लाइनीमी। 5 इन फस वोइक्तीक डालो नु फस नित्तीक बोस आसीक राइनीम। 6 गेपुकी खिंडगा ओव्रनीनु, आसीक राइनीनी। मिनु लाडगा ग्रीनीनु, आसीक राइनीनी। भजन संग्रह १२१:८ 7 मिनु परमप्रभु यावेमी इन कली लडाइ पाइब इन जोरी सत्रु आन कली इन डोंडती बुपाइक्ब। मेको लां कामी इन कली लडाइ पथ जाक्नीम। मिनु बुशा, शाउ शिउ ब्रशा ७ ओटा लां रे प्रोक्नीम। 8 मिनु परमप्रभु यावेमी इन भकारीमी आसीक गेब। मिनु गे मार मार पाइनीनी रिम्शो दुम्चा कली आसीक गेब। मिनु परमप्रभु यावे, इन परमप्रभुमी इन कली गेशो रागीमी इन कली आसीक गेब। लेवी २५:२१ 9 मिनु गेपुकीमी परमप्रभु यावे, इन परमप्रभु आ शेंशो लोत्र टिशा पाइतीनी हना नु आ लांमी गाक्तीनी हना, आ कसम जशो खोदेशो पा इन कली आंम मुर सेल्शा वोइक्ब। प्रस्थान १९:५-६ 10 मिनु ‘गेपुकी परमप्रभु यावे आ नें पाइशशो मुर बाक्नीनी’ दे जात जात डा मुर नेल्लेम तुइशशा, इन कली तशा, शुश हिंनीम। 11 मिनु परमप्रभु यावेमी इन किकी पिपी आन कली गेनुडमी देशो रागीमी गेपुकी शुश आल थीब दुम्नीनी। इन बी ब्यफ, क्यारश भेडा आन चाइक्ब शुश दुम्नीम, इन बाली नाली नेल्ल सोशा बोशा लाइनीनी। इन रागी रिम्शो दुम्ब।

12 मिनु परमप्रभु यावेमी नेल्ल सरीड डा शोप वोइक्तीक रोक्शा, इन रू कली माल्ची ना रेउ यिपाइक्ब। मिनु गे मार मार पाइनीनी, मेको कली आसीक गेब। मिनु गेपुकीमी शुश रागी रागी डा मुर आन कली जेर गेनीनी, गे चहिं सुइ आन जेर मताक्नीनी। ब्यवस्था १५:६ 13 मिनु मुलाक्ती इन कली माइशशो परमप्रभु यावे, इन परमप्रभु आ शेंशो होस पा टिशा पाइतीनी हना, परमप्रभु यावेमी इन कली पिया खोदेशो पा, मुर आन कली अरेब सेल्ब। मीलु खोदेशो पा अरु आन कली खोइक्ब ममाइ। मिनु गे शुश ठेयब दुम्शा लाइक्नीनी। 14 मिनु आं देशो लोत्र नेल्ल पाइतीनी हना, आइदी आइक्था पा अरु देवी देवता आन हेंथे लां मलाइतीनी हना, मोदेशो आसीक राइब दुम्नीनी। ब्यवस्था ५:२९-३२

मटीबपुकी सराप राइनीम

15 मिनु गे परमप्रभु यावे, इन परमप्रभु आ देशो मटीब दुम्तीनी हना, मुलाक्ती गो इन कली माइशशो आ शेंशो नु आ फुल्लुम मुशा ब्रेक्शो लोव्र नेल्ल होस पा मपाइतीनी हना, एको सराप चीले नेल्ल राइनीनी। मिनु गेपुकी सराप रशो मुर दुम्नीनी। दानीएल ९:११ 16 गेपुकी सहरम बाक्शा, सराप राइनीनी। मिनु रूम बाक्शा, सराप राइनीनी। 17 इन फस वोइक्तीस डालो नु इन फस नित्तीक बोस सराप राइनीम। 18 इन आल, इन बाली नाली, इन बी ब्यफ, इन क्यारश भेडा गोठ सराप राइनीम। 19 गेपुकी खिंडगा ओव्रनीनु, सराप राइनीनी, मिनु लाडगा ग्रीनीनु, सराप राइनीनी।

20 मिनु परमप्रभु यावे कली टिचा प्रोइशा बाक्तीनी हना, इन मार मार पतीकेमी इन थुं ग्यशा सराप राइनीनी। इन मरिम्शो पतीके गे रीब पा क्याम्चा पुंडसीनीनी। 21 मिनु परमप्रभु यावेमी इन कली गेशो नु इन के सेल्शो रागी रे ग्रुंडचा सम्म इन कली मुर बेक्तीक रोइ पपाइक्ब। 22 मिनु परमप्रभु यावेमी इन कली रां सोक्तीक रोइ, जोरो, शुश गार मुइक्तीके, रेउ मयितीके, नेल्ल बाली नाली सोव्रतीके बुंखी डाइक्तीके रोइ सोइक्ब। 23 मिनु इन तारी बाक्शो सरीड कांसा खोदेशो दुम्ब। मिनु इन रू डा खप फलम खोदेशो दुम्ब। ब्यवस्था ११:१७ 24 मिनु परमप्रभु यावेमी इन रागीम रेउ कली फुरक सेल्ब। मिनु गेपुकी खतम मदुम्नी सम्म सरीड रे मोदेशो पा फुरक इन तारी यिना यिन बाक्ब। 25 मिनु परमप्रभु यावेमी इन कली इन जोरी सत्रु आन डोंइती ब्रुपाइक्ब। गेपुकी मेकोपुकी नु लडाइ पथ लां कामी लाइनीनी, मिनु ब्रुशा शाउ शिउ ब्रशा ७ ओटा लां रे प्रोक्चा माल्नीनी। मिनु राज्य राज्य डा मुर नेल्ल आन डोंइती ग्रांग्रा दिशो दुम्नीनी। 26 मिनु गेपुकी बेक्नीनु, चिक्बपुकी नु ब्वाकी डा जन्तुपुकीमी इन श्ये ब्वाइनीम। मिनु मेको आन कली खेरब 'हा हाइ' दे ग्रीब सुइ मबाक्नीम। 27 मिनु परमप्रभु यावेमी इन कली इजीप्त रागी डा कान मुपाइक्ब, साने मचाप्चा डा पा गार नु लुतो पपाइक्ब। प्रस्थान ९:९

28 मिनु परमप्रभु यावेमी इन थुं ग्यपाइक्ब, मिक्च मतपाइक्ब नु निप्स ग्यशो दुम्पाइक्ब। 29 मिनु मिक्च मताइबमी एर ओंथ सुल्ना सुल्न गाक्शो खोदेशो पा गेपुकी नाक्तीन सुल्शा गाक्नीनी। मिनु गेपुकीमी मार पाइतीनी हना यो, रिम्शो मदुम्नीनी। मिनु गेपुकी नाक्त किंत किंत तुप्चा नु रोइक्चा पुंडसीशा बाक्नीनी। सुइमी इन कली वारच मपाइब। यसैया ५९:१० 30 गेपुकी मीश आल का कली पुंडनीनी, तन्न अरु वोंइश मुरुम मेको नु इप्ब। मिनु खिं का सेल्नीनी, तन्न आंमान बाक्चा मताइनीनी। मिनु गेपुकीम अडगुर रू का खुम्नीनी, तन्न आंमान ब्वचा मताइनीनी। 31 मिनु इन डोंइती इन बी ब्यफ क्योरनीम, तन्न आ श्ये ब्वचा मताइनीनी। इन गधा इन कली तचा डा पा रोइक्नीम, मलेत्नीम। इन क्यारश भेडा इन जोरी सत्रु आन कली गेनीम। मिनु इन कली वारच पाइब सुइ मबाक्नीम।

32 इन तमी तौपुकी अर्को रागी डा मुर आन कली गेनीम। मिनु गे मेको तशा, नाक्त किंत किंत मेको आन लां कोव्रशा बाक्नीनी, तन्न मारेइ पने मचाप्नीनी। 33 इन मतुइशशो मुरपुकीमी इन रू डा खुम्शो जाइनीम। मिनु गेपुकी गेना हना यो श्येत जचा नु दिप्चा पुंडसीनीनी। न्यायाधीस ६:३ 34 मिनु इन मिक्चीम तशोपुकीम इन निप्स ग्यपाइक्ब। 35 मिनु परमप्रभु यावेमी इन पोक्च नु खोइलीम गेनायो मसाब गार मुपाइक्ब। मिनु मोदेशो गारम इन पिया रे दिम्ला सम्म रां नेल्ल सुम्पाइक्ब। मिनु सुइम इन कली सापाइक्ने मचाप्ब।

36 मिनु परमप्रभु यावेमी इन कली नु इन योव्रशो पिप कली, गेपुकी नु इन किकी पिपी यो मतुइशशो जात डा मुर आन रागी कोइब। मिनु गेपुकीमी मेकेर रे शी नु फुल्लु के देवी देवता आन कली गेय पाइनीनी। ब्यवस्था ४:२८ 37 मिनु परमप्रभु यावेमी इन कली खेरशा जात जात डा मुर आन दातेमी इन पर्बम शुक्शी पा, देंतीके सेल्शा, शुक्शी पचा पुंडसीनीनी। १राजा ९:७; येरमीया २४:९

38 गेपुकीमी शुश वांचेर शोक्नीनी, तन्न इक्का ला रुप्नीनी। मारदे हना मालेपुकीमी मेको नेल्ल नेक्नीम। मीका ६:१५ 39 गेपुकीमी अडगुर रू खुम्नीनी, तन्न बुस्स जोल्शा अडगुर खुप्चा नु अडगुर शांबु तूचा मताइनीनी। 40 गे इन बाक्तीक तेइ तेइ तेल रवा बाक्नीम, तन्न खेक्चा कली तेल मताइनीनी। मारदे हना मेको फल हेम्शा दोक्नीम। 41 गे तमी तौ थीनीनी, तन्न मेकोपुकी इन के मदुम्नीम। मेकोपुकी ग्याइशशा अर्को रागी लाइक्चा पुंडसीनीम। 42 इन रवा नु बाली नाली नेल्ले मालेपुकीमी खतम सेल्नीम। 43 मिनु गेपुकी नु बाक्ब अर्को रागी डा मुर क्येट थीब दुम्शा, डोंइती क्येडा ठेयब दुम्नीम, तन्न गेपुकी दोक्ना दोक्न लाइनीनी। 44 मेकोपुकीमी इन कली जेर गेनीम। तन्न गेपुकीमी मेको आन कली जेर गेने मचाप्नीनी। मेकोपुकी पिया खोदेशो दुम्नीम, गेपुकी चहिं मीलु खोदेशो दुम्नीनी। ब्यवस्था २८:१२-१३

45 मिनु मेको सराप चीले नेल्ल गे मबेक्नी सम्म राइनीनी। मारदे हना गेपुकीमी परमप्रभु यावे, इन परमप्रभु आ शेंशो लोत्र नु आ फुल्लुम मुशा ब्रेक्शो लोत्र नेल्ल होस पा मटिनी। 46 मिनु मेको सराप इन कली नु इन चच युइ आन कली छक लाक्चा डा नु हिंचा डा बाक्नीमी।

47 मारदे हना गेपुकी मारेइ मारेइमी गाप्शो बाक्नीनु, गे परमप्रभु यावे, इन परमप्रभु कली ग्येरसीशा नेल्ल थुंम टिशा गेय मपनी। 48 मोपतीके परमप्रभु यावेमी इन कली जोरी सत्रु सोइक्ब। गेपुकी शोत्रलु बेक्शा नु तूतू दाक्ना दाक्न, फेक्चा मतथु नु मारेइ मगाप्शो दुम्शा, मेको आन गेय पचा माल्नीनी। मिनु मेकोमी इन कली मक्याम्दमे सम्म फलम के हलो इन तारी वोइक्नीम। येरमीया २८:१३-१४ 49 मिनु परमप्रभु यावेमी नेल्ल क्येडा डोन बाक्शो रागी रे मरुप्शो लोत्र पाइब मुरपुकी बेरशो ककाकुली खोदेशो पा इन तारी जुक्पाइक्ब। हबकुक् १:८; यसैया ३३:१९; येरमीया ५:१५ 50 मेको मुरपुकी काइ शिशी मपाइशो बाक्नीम। मेकोपुकीमी खाल्पा आन कली मान मपाइनीम। मिनु आल आन कली यो काइ शिशी मकोइनीम। 51 मिनु गेपुकी खतम मदुम्नी सम्म मेकोपुकीमी इन थुल्शो बी ब्यफ, क्यारश भेडा नु बाली नाली जाइनीम। मिनु मेकोपुकीमी इन अन्न, अडगुर शांबु, तेल, बी ब्यफ आन चाइक्ब, क्यारश भेडा आन पाठा का यो मगेनीम। 52 मिनु मेकोपुकीमी इन सहर नेल्ल आन कली पुम्नीम। मिनु गेपुकीमी 'सुइम आंइ कली मफुइब' दे इन बोल्यो नु ग्येत्थ लाइशो ठेयब गारो कली थमा सुइक्तीनी, तन्न मेकोपुकीमी परमप्रभु यावे, इन परमप्रभुमी इन कली गेशो रागी डा सहर नेल्ल पुम्शा, गारो प्रेत्नीम। 53 मिनु मोदेशो पा इन जोरी सत्रुपुकीमी इन कली पुम्दमेनु, गे श्येत जशा, परमप्रभु यावे, इन परमप्रभुमी इन कली गेशो तमी तौ आन श्ये ब्वाइनीनी। लेवी २६:२९; २राजा ६:२८-२९; येरमीया १९:९; बिलाप २:२०; बिलाप ४:१०; इजीकीएल ५:१० 54 मिनु गेपुकी इन दाते डा नेल्ल क्येडा रिम्शो थुं पाइशो नु ठीक पाइब वोंइश मुरुमी यो आ लोक्ब, आ दाक्शो मीश नु आ लीशो आ तमी तौ आन कली शिशी मपथु, जचा थोत्रक रोइक्ब। 55 मिनु मेकोमी मेको आन कली आ ब्वचा माल्शो आ आल आ श्ये सुइ आन कली मगेब। मारदे हना जोरी सत्रुपुकीमी सहर पुम्शा जचा थोत्रक मारेइ मबाक्ब। 56 मिनु इन दाते डा नेल्ल आन क्येडा शकल मकल पाइशो नु नेल्ल क्येडा सुख जशो, आ खोइलीमी खप यो थेक्ने मबिण्ब मीश मुरुम आ दाक्शो वोंइश नु आ तमी तौ कली गेहे पा कोत्रब। 57 मारदे गेहे पा कोत्रब देंशा हना, आ नक थिशो आल नु आल आ उम्नो आ पबर्म गेहे पा कोत्रब। मिनु जोरी सत्रुम सहर पुम्तीके श्येत जशा, मेको मीश मुरुम खुइशोमी आ उम्नो 'आंमा ब्वाइनुड' दे मिम्ब।

58 मिनु गेपुकीमी एको किताबमी ब्रेक्शो अरेशो लोत्र नेल्ले टिशा मपाइतीनी हना, मेको ठेयब नु हिंचा डा परमप्रभु यावे, इन परमप्रभु आ नें कली मान पा महिंतीनी हना, 59 परमप्रभु यावेमी इन कली नु इन चच युइ आन कली गेचा डा श्येत डोंइती मतशो खोदेशो पा ठेयब फाल्ने मचाप्चा श्येत गेब। मेको ठेयब श्येत नु ठेयब नु मसाचा डा रोइ पपाइक्ब। 60 मिनु परमप्रभु यावेमी हिंचा डा इजीप्त रागी डा मुर बेक्तीक रोइ इन कली पपाइक्ब। मिनु मेको बेक्तीक डा रोइ इन दातेमी याक्सीब। ब्यवस्था २८:२७ 61 मिनु मेको अरेशो लोत्र डा किताबम मब्रेक्शो रोइ नु बेक्तीक रोइ यो इन कली पपाइक्ब। परमप्रभु यावेमी गेपुकी खतम मदुम्नी सम्म मोदेशो पपाइक्ब।

62 मिनु गेपुकी डोंइती सरीड डा सोरुल खोदेशो पा शुश बाक्तीनी। मिनु नोले इक्का ला लीनीनी। मारदे हना गेपुकीमी परमप्रभु यावे, इन परमप्रभु आ देशो मटिनी। 63 मिनु परमप्रभु यावेमी दोपा इन कली रिम्शो पचा नु शुश सेल्चा कली ग्येरसीशो बाक्मे, मोपा परमप्रभु यावेमी इन कली खतम सेल्चा नु क्याम्चा कली ग्येरसीशो बाक्ब। मिनु मेकोमी गे ओत्रचा नु इन के सेल्चा चिक्शो रागी रे इन कली तुल्ब। हितोपदेस १:२६ 64 मिनु परमप्रभु यावेमी इन कली जात जात डा मुर आन दातेमी फ्राइब। मिनु गेपुकीमी मेकेर डा इन किकी पिपी नु इन मतुइशो शी नु फुल्लु के देवी देवता आन कली गेय पाइनीनी। 65 मेको रागी रागी डा मुर आन दातेमी गे नाइक्चा मताइनीनी। इन कली गेना हना यो खेरनीमी। मिनु परमप्रभु यावेमी मेकेर इन कली हिंब थुं गेब। मिनु फाल्ने मचाण्ब नु थुं लुक्च लाइब मुर दुम्नीनी। 66 मिनु गेपुकी दीसा मार दुम्बा 'ब्रोंइनुडा, मब्रोंइनुडा' दे मारेइ मतुइक्थु, नाक्दो नाक्ती हिंशा बाक्चा माल्नीनी। 67 मिनु सुनी कना गेपुकीमी 'नां रिक्शो हना, रिम्शो दुम वा' देंनीनी। मिनु नां रिक्ची ना 'नां सोत्रशो हना, गिश रिम्शो दुम वा' देंनीनी। मारदे हना मार मार ताइनीनी, गे शुश हिंनीनी। 68 परमप्रभु यावेमी इन कली जहाजम इजीप्त रागीम लेशशा सोइक्ब। गो मेको लां आ पबर्ममी 'गेपुकीमी एको लां गेनायो लेंशा लचा मदुम्ब' दे गो इन कली देंती। मेकेर जाक्शा इन कली इन जोरी सत्रु आन कली वाइलीम वाइल सेल्चा कली लेयचा दाक्नीम, तन्न सुइम इन कली मग्याप्नीम" देंत। ब्यवस्था १७:१६; होसे ८:१३

29

अर्ती गेशो नु हिंच कोइशो

1 मिनु होरेब डांडामी परमप्रभु यावेमी इस्राएली नु पशो कबल नु तेम्शा, मोआब रागीम मोसा कली इस्राएली आन कली तेम्चा डा लोत्र मार बाक्नीम देशा हना, ब्यवस्था ५:२

2 मोसामी इस्राएली नेल्ल आन कली ब्रेशशा “परमप्रभु यावेमी इजीप्तमी फाराओ नु मेको आ गेय पाइब नेल्ल नु आ रागी कली पशो गेपुकीमी नेल्ल तशो बाक्नीनी। प्रस्थान १९:४ 3 गेपुकी मेको ठेयब नाक्तीके ताइतीनी। मिनु मेको ठेयब चिन्ड नु छक लाक्चा डा गेय यो ताइतीनी। ब्यवस्था ४:३४; ब्यवस्था ७:१९ 4 तन्न मुल सम्म परमप्रभु यावेमी इन कली रुप्तीक थुं, कोत्रतीक मिक्च नु नेंतीक नोफा मगेशो बाक्ब। ब्यवस्था ५:२६ 5 मिनु गो इन कली ४० बर्स सम्म गोरशो रागीम लां कोइताक्नीनी। इन फेक्तीक मजे, जुत्ता यो मजे। ब्यवस्था ८:४ 6 गेपुकीमी शोब्ले मजनी, अडगुर शांबु नु रकसी यो तूचा मतनी, तन्न ब्रोंइतीनी। मिनु गो परमप्रभु यावे, इन परमप्रभु नड, दे गेपुकीमी रुप्तीनी। 7 मिनु गेपुकी एको रागीम जाक्नीनु, हेशबोन डा पिप सीहोन नु बाशान डा पिप ओग गोपुकी नु लडाइ पचा कली गुम्शा जाक्ताक्स। मिनु गो मेको आन कली फ्रुइतय। गन्ती २१:२१-३५ 8 मिनु गोपुकीमी मेको आन रागी ग्राशा, रूबेन आ थर, गाद आ थर नु मनस्से आ थर डा आधा मुर आन कली आन के सेल्चा कली रू गेशो। गन्ती ३२:- 9 मोपतीके एको कबल पशो लोत्र होस पा पने। मिनु मो पाइतीनी हना, गे मार मार पनी, मेको रिम्शो दुम्ब।

10 मिनु गे नेल्ल परमप्रभु यावे, इन परमप्रभु आ डोंइती राप्शो बाक्नीनी। इन थर थर डा ठेयब मुरपुकी, इन खाल्पापुकी, ससान पाइबपुकी नु इस्राएली नेल्ल, 11 इन आलपुकी नु इन मीशपुकी, अर्को रागी डा इन दातेमी बाक्शो मुरपुकी, शी चाक्ब नु ब्वाक्कु कुरब नेल्ल बाक्नीम। यहोसु ९:२७ 12 मारदे नेल्ल बाक्शो बाक्तीनी देशा हना, परमप्रभु यावे, इन परमप्रभुमी गे नु कसम जशो कबल मुलाक्त परमप्रभु यावे, इन परमप्रभुमी गे नु पाइब। 13 दोपा परमप्रभु यावेमी इन किकी पिपी अब्राहाम, इसहाक नु याकूब नु कसम जशो बाक्मे, मोपान मुलाक्ती इन परमप्रभुमी इन कली आंम के मुर सेल्चा कली कबल पाप्तु। 14 मिनु गो मेको कसम जशो कबल परमप्रभु यावे, इं परमप्रभु आ डोंइती राप्शा बाक्ब इन कली ला ममाइ, ब्यवस्था ५:३; उत्पत्ती १७:७ 15 तन्न सु सु मुलाक्त मबाक्तेक्म हना, यो मेको कबल पाइनुड। 16 गो दोपा इजीप्त रागीम बाक्या, तुइक्नीनी। गोपुकी रागी रागीम गाक्शा, दोपा जाक्या, दे यो तुइक्नीनी। 17 मिनु गे आन ग्रांग्रा दित्चा डा शी, फुल्लु, सुन नु चांदी के देवी देवता आन कली यो तशो बाक्नीनी। 18 मिनु इन दाते रे सुइ वोंइश मुर, मीश मुर, खिं डा मुर नु थर डा सुइ आन थुं परमप्रभु यावे, इं परमप्रभु रे नोले शोंइसीशा, मेको रागी रागी डा देवी देवता आन कली पूजा पचा दाक्ब बाक्नीम कों? इन दातेमी मोदेशो ओश्येर पाइशो शाक्श का बाक्बा कों? ब्यवस्था ३२:३२; होसे १०:४; आमोस ६:१२; हिबू १२:१५ 19 मिनु मोदेशो पाइब मुर मेको कसम डा लोत्र नेंशा, आ थुंमी ‘गो आंम मिम्तीके पशा बाक्ती हना यो, गो सराप मराइनुड। गो आसीक ताइब बाक्ती’ दे मिम्ब। मोदेशो मिम्तीके नेल्ल आन कली खतम सेल्ब। 20 मिनु परमप्रभु यावेमी मोदेशो मुर आ पाप मक्याम्ब। परमप्रभु यावे मेको कली तशा, आ गाइक्चा नु आ गेहे पतीके मी खोदेशो पा ब्राइब। मिनु मेको अरेशो लोत्र डा किताबम ब्रेक्शो सराप नेल्ल मेको मुर कली राइब। मिनु परमप्रभु यावेमी मेको आ नें रागी रे क्याम्ब। ब्यवस्था २८:१५-६८ 21 मिनु परमप्रभु यावेमी मेको कली इस्राएली आन थर रे तिल्शा, मेको अरेशो किताबम ब्रेक्शो कबल डा सराप नेल्ल रपाइक्ब। 22 इन नोले जरमेशो पाला, इन नोले जाक्शो तमी तौ नु डोन रागी डा मुरपुकीमी मेको रागी डा श्येत नु परमप्रभु यावेमी मेको आन कली गेशो बेक्तीक डा रोइ तशा 23 मेको रागी नेल्लेम मी ब्रशा गन्धक नु हिक्सी बाक्ब। मारेइ मशोक्शो, काइ गिग मग्रूशो मारेइ मवाशो बाक्ब। मेको परमप्रभु यावेमी चुरशा गाइशो सोदोम नु गोमोररा, अदमाह नु सेबोयीम खतम सेल्शो रागी खोदेशो बाक्ब। उत्पत्ती १९:२४ 24 मिनु रागी रागी डा मुर नेल्लेमी ‘परमप्रभु यावेमी एको रागी कली मारदे ओदेशो सेला? एको आ पबर्म मारदे मोदेशो शुश चुरशा गाइक्ता?’ दे हिल्लो पाइनीम। 25 मिनु मेकोपुकीमी ‘मेको परमप्रभु यावे, आन किकी पिपी आन परमप्रभुमी मेको कली इजीप्त रे गुंइची ना पशो कबल प्रॉइने थुम्शो बाक्तेक्म। 26 मिनु मेकोपुकीमी आन मतुइशो नु परमप्रभुम मपचा देशो देवी देवता आन डोंइती बाप्शो बाक्तेक्म। 27 मोपतीके परमप्रभु यावे एको रागी आ पबर्म शुश गाइक्ताक्व। मिनु मेकोमी एको किताबम ब्रेक्शो सराप नेल्ल मेको रागी कली रपाइक्तु। 28 मिनु परमप्रभु यावेमी चुरशा, गाइशशा, आ ठेयब गाइशशोम मेको आन कली आन रागी रे खेरशा, अर्को रागीम ताइक्ताक्व। मेको मोदेशो मुलाक्त दुम्शो बाक्ब’ देंनीम। 29 मिनु

मारेइ मारेइ खुइश्शो परमप्रभु यावे, इं परमप्रभु के बाक्ब। तन्न मेको अरेशो लोव्र नेल्ल टिचा नु मेको तुइक्तीके आंइ के नु आंइ तमी तौ के बाक्ब” देंत। ब्यवस्था ३२:३४

30

परमप्रभु यावे गे लेत्चा

1 मिनु गो इन कली देंशो लोव्र, दोपा आसीक राइनीनी नु दोपा सराप राइनीनी, गे मेको नोले आंमा तशो, परमप्रभु यावे, इन परमप्रभुमी इन कली रागी रागी डा मुर आन दाते रे खेरा नु ला तुइक्तीनी। ब्यवस्था २८:- 2 मिनु गो मुलाक्ती इन कली अरेशो खोदेंशो पा गे नु इन तमी तौ इन थुं नु सोक्त नेल्लेमी परमप्रभु यावे, इन परमप्रभु गे लेशशा टिचा दाक्तीनी हना, ब्यवस्था ४:३०; लेवी २६:४० 3 मेना परमप्रभु यावे, इन परमप्रभुमी इन रिम्शो नाक्ती लेप्पाइक्ब। मिनु परमप्रभु यावे, इन परमप्रभुमी इन कली शिशी पाइश्शा, जात जात डा मुर आन दातेमी ब्रपाइक्तीके रे खुप्शा चाक्ब। इजीकीएल १६:५३; येरमीया २९:१४; आमोस ९:१४; येरमीया ३२:३७ 4 मिनु गे शुश डोन रागी सम्म खेरचा पुंइसाक्नी हना यो परमप्रभु यावे, इन परमप्रभुमी इन कली खुप्शा एक चाक्ब। ब्यवस्था २८:६४; नेहेम्याह १:९ 5 मिनु परमप्रभु यावे, इन परमप्रभुमी इन कली इन किकी पिपी आन रागीमी चाक्ब। मेको रागी इन के बाक्ब। मिनु मेकोमी इन कली इन किकी पिपी क्येडा शुश नु रिम्शो सेल्ब।

6 मिनु परमप्रभु यावे, इन परमप्रभुमी इन थुं नु इन तमी तौ आन थुं खोइक्तीक चिनु खोदेंशो पा खोइक्ब। मोपा ला गे परमप्रभु यावे, इन परमप्रभु कली इन थुं नु सोक्त नेल्लेमी दाक्शा, ब्रोंइने चाप्नीनी। ब्यवस्था १०:१६; येरमीया ४:४; इजीकीएल ११:१९; रोमी २:२९ 7 मिनु परमप्रभु यावे, इन परमप्रभुमी मेको सराप नेल्ल इन कली खेदा पाइब, इन कली गेहे पाइब जोरी सत्रु आन कली रपाइक्ब। 8 मुलाक्ती गो इन कली माइश्शो गे लेशशा परमप्रभु यावे आ शेंशो नेल्ल टीनीनी। 9 मिनु परमप्रभु यावे, इन परमप्रभुमी इन पतीके नेल्लेमी इन कली आसीक गेब। मेकोमी इन कली शुश तमी तौ, बी ब्यफ, क्यारश भेडा नु इन रू डा अन्न शुश सेल्ब। मारदे हना परमप्रभु यावेमी इन किकी पिपी आन कली रिम्शो पशो खोदेंशो पा इन कली यो रिम्शो पचा दाक्ब। 10 गेपुकीम परमप्रभु यावे, इन परमप्रभु आ देंशो टीतीनी हना, आ शेंशो, आ फुल्लुम मुशा ब्रेक्शो लोव्र नु मेको अरेशो लोव्र डा किताबम ब्रेक्शो लोव्र पाइतीनी हना, गे इन थुं नु सोक्त नेल्लेमी परमप्रभु यावे, इन परमप्रभु गे लेत्तीनी हना, गे लेंशा आसीक राइनीनी।

परमप्रभु आ लोव्र इन नेक्था बाक्शो

11 मिनु गो मुलाक्त इन कली माइश्शो परमप्रभु यावे आ शेंशो मरुप्चा डा नु इन पने मचाप्चा डा मबाक्ब। मेको इन नेक्था बाक्ब। 12 मेको लोव्र इर सरीडमी मबाक्ब। मिनु गेपुकीमी “सु सरीड लशा मेको लोव्र आंइ कली चाक्बा? मिनु मेको नेंशा, पाइनीकी” देंचा ममालनीनी। रोमी १०:६-८ 13 मिनु मेको समुन्द्र आ आइक्ची हांबु यो मबाक्ब। गेपुकीमी “सुम आंइ कली समुन्द्र आइक्ची हांबु मेको ब्रथ लाइबा? मिनु मेको नेंशा, पाइनीकी” देंचा ममालनीनी। 14 मेको अरेशो लोव्र इन नेक्था बाक्ब। गे मेको आ पबर्म लोव्र पाइनीनी। मिनु मेको पचा कली इन थुंमी बाक्ब।

ब्रोंइचा नु बेक्चा

15 मिनु मुलाक्ती गो ब्रोंइतीक नु रिम्शो दुम्तीक, बेक्तीक नु मरिम्शो दुम्तीक इन कली कोइशो बाक्नुड। ब्यवस्था ११:२६ 16 मिनु गोम मुलाक्त इन कली माइश्शो परमप्रभु यावे आ शेंशो, आ फुल्लुम मुशा ब्रेक्शो लोव्र नु आ निसाफ पतीक लोव्र टीतीनी हना, परमप्रभु यावे, इन परमप्रभु कली दाक्ताक्नी हना, मेको आ लां गाक्तीनी हना, गे ब्रोंइशा, सोशा बोशा, शुश दुम्शा बाक्नीनी। मिनु परमप्रभु यावे, इन परमप्रभुमी इन ओव्रचा चिक्शो रागीमी आसीक गेब। 17 तन्न गे इन थुं हिरशा मटीब दुम्तीनी हना, नु देवी देवता आन डोंइती बाप्शा, गेय पाइतीनी हना, 18 गो इन कली मुलाक्ती “गेपुकी थमा पा बेक्नीनी। मिनु यर्दन आइक्ची हांबु इन के सेल्शो रागीमी गे शुश नाक्ती मब्रोंइनीनी” देंनुड। ब्यवस्था ८:१९ 19 गो मुलाक्ती सरीड नु रागी कली इन डोंइती सांकछी चोइक्नुड। गो इन कली ब्रोंइचा नु बेक्चा, आसीक नु सराप इन कली कोइताक्ड। गे नु इन चच युइ ब्रोंइतीक योव्रडीन। ब्यवस्था ४:२६ 20 परमप्रभु यावे, इन परमप्रभु कली दाक्तीन। आ देंशो टिने। मेको कली मप्रोंइथु बाक्कीन। मारदे हना मेकोम इन कली ब्रोंइचा नु शुश नाक्ती बाक्चा गेब। मिनु गेपुकी परमप्रभु यावेमी इन किकी पिपी अब्राहाम, इसहाक नु याकूब आन कली कसम जशा गेशो रागीम बाक्ने चाप्नीनी।

31

मोसामी यहोसु कली अरेशो

1 मिनु मोसामी इस्राएली नेल्ल आन कली एको लोत्र नेंपाइव्कु। 2 मिनु मेकोमी “मुलाक्ती गो सहे का २१ बर्स गाप्ती। गो मुल रे इन कली लां कोंइने मचाप्नुड। मिनु परमप्रभु यावेमी आं कली ‘गे मेको यर्दन मशोक्नेवे’ दे माइक्ती। प्रस्थान ७:७; गन्ती २०:१२ 3 परमप्रभु यावे, इन परमप्रभु इन डोंइती यर्दन शोक्शा, आइक्ची हांबु लाइब। मेकोमी इन डोंइती मेको रागी रागी डा मुर आन कली क्याम्ब। मिनु गेपुकीमी मेको आन कली खेरने चाप्नीनी। मिनु परमप्रभु यावेमी देशो खोदेशो पा यहोसु इन डोंइती शोक्ब। ब्यवस्था ३:२२ 4 मिनु परमप्रभु यावेमी मेको एमोरी आन पिप सीहोन नु ओग नु आन रागी खतम पोक्शो खोदेशो पा, मेको आन कली यो खतम पोक्ब। गन्ती २१:२१-३५ 5 मिनु परमप्रभु यावेमी मेको आन कली इन जिम्मा गेब। गो इन कली माइशो परमप्रभु यावे आ शेंशो खोदेशो पा नेल्ल गेपुकीमी मेको आन कली पचा माल्नीनी। प्रस्थान २३:३२-३३ 6 बोल्यो नु महिंब दुमीन। मेको आन कली तशा महिनीन मारदे हना परमप्रभु यावे, इन परमप्रभु गेपुकी नु लाइब। मेकोम इन कली कोत्रशा, मप्रोंइब” दे मोसामी देंत। ब्यवस्था १:२९-३०

7 मिनु मोसामी यहोसु कली ब्रेशा, इस्राएली नेल्ल आन डोंइती “बोल्यो नु महिंब दुमो। मारदे हना परमप्रभु यावेमी मेको इन किकी पिपी आन कली कसम जशा ‘मेको रागी इन कली गेनुड’ देशो बाक्त। मिनु गे मेको रागी मेको आन कली योक्शा गेनीनी। ब्यवस्था ३:२८; यहोसु १:६ 8 मिनु परमप्रभु यावे इ डोंइती लाइब। मेको गे नु बाक्ब। मेकोम इन कली कोत्रशा, मप्रोंइब। महिनीन नु मेको आन कली तशा इन थुं लुक्च मलने” दे मोसामी यहोसु कली देंत।

चढेब आन कली अरेशो लोत्र गेशो

9 मिनु मोसामी परमप्रभु आ अरेशो लोत्र ब्रेक्शा, चढेब, लेवी आ थर डा मुर नु इस्राएली आन खाल्पा आन कली गेम्तीमी। मिनु लेवी आ थर डा मुरपुकीमी चहिं परमप्रभु यावे आ सल्ला पतीक सन्दोस कुरशो बाक्तेक्म। 10 मिनु मोसाम मेको आन कली “७ बर्स डा प्रोंइतीक बर्समी गोठ सेल्टीक चाडमी ब्यवस्था १५:१; ब्यवस्था १६:१३ 11 नेल्ल इस्राएली परमप्रभु यावे, इन परमप्रभु आ योत्रशो बाक्तीकेमी मेको अरेशो लोत्र इस्राएली नेल्ल आन डोंइती पढेचा माल्नीनी। 12 गेपुकीमी वोंइश मुर, मीश मुर, आलपुकी नु इन सहरम बाक्शो अर्को रागी डा मुर नेल्ल आन कली खुप्चा माल्नीनी। मिनु मेकोपुकीमी मेको अरेशो लोत्र नेंशा, शेंशा, परमप्रभु यावे, इन परमप्रभु कली मान पा हिंब दुम्चा माल्नीम। मिनु एको अरेशो लोत्र नेल्ल तुइशशा पचा माल्नीम। 13 मिनु एको अरेशो लोत्र मतुइक्ब, आन आलपुकीमी यो नेंशा रुप्शा, परमप्रभु यावे, इन परमप्रभु कली मान पा हिंचा शेंचा माल्नीम। गेपुकीमी यर्दन खोला आ आइक्ची हांबु इन के सेल्शो रागीम बाक्ची ना मोदेशो पचा माल्नीनी” दे माइक्तीमी।

यहोसु नु मोसा कली शेंशो लोत्र

14 मिनु परमप्रभु यावेमी मोसा कली “मुल इ बेक्ची नाक्ती जाक्शो बाक्ब। मोपतीके यहोसु कली ब्रेशा, मेको कली इ गेय जिम्मा गेनुड। मोपतीके गुम्तीक ताम्बुम जाक्शा, राप्शा बाक्कीस” देंत। मिनु मोसा नु यहोसु लशा गुम्तीक ताम्बुम राप्शा बाक्ताक्स। 15 मिनु परमप्रभु यावे गुम्तीक ताम्बुम गोस्स के थामम व्रूत। मिनु गोस्स के थाम ताम्बु आ ओव्रतीकेमी बाक्त। प्रस्थान ३२:९

16 मिनु परमप्रभु यावेमी मोसा कली “गे इ किकी पिपी नु बाक्चा चिक्शो बाक्नेवे। गे बेक्डे नोले मेको मुर आन लशो रागीम जाक्दीशशा, मेको रागी डा आन मतुइशशो देवी देवता आन कली खोइक्नीम। आं कली प्रोंइशा, गो नु पशो कबल क्याम्नीम। 17 मिनु गो मेको नाक्त मेको आन पर्बम शुश गाइक्नुड। मिनु गो मेको आन कली प्रोंइशा, मेको आन कली वारच मपाइनुड। मेकोपुकी रोइक्चा पुंइसीनीम। मिनु मेकोपुकीमी शुश मरिम्शो दुम्शा, ठेयब श्येत जाइनीम। मिनु मेको नाक्त मेकोपुकीमी ‘इं परमप्रभु गोपुकी नु मबाक्तीके इं कली मोदेशो दुम्शो बाक्ब’ देंनीम। 18 मिनु मेकोपुकी शुश मरिम्शो पा, देवी देवता आन नोले खोइक्ब दुम्नीम। मोपतीके गो मेको आन कली वारच मपाइनुड।

मोसा कली ब्रेक्पाइशो कुम्सो

19 एको कुम्सो ब्रेक्तो। मिनु इस्राएली आन कली शेंदो। मेको रिम्शो तुइक्पतो। मारदे हना मेको कुम्सो इस्राएली आन पर्बम आं सांकली दुम्चा माल्ब। ब्यवस्था ३२:१-४३ 20 गो मेको आन किकी पिपी आन कली गेनुड, दे कसम जशो दूध नु खुदो शुश बाक्शो रागी मेको आन कली गेनुड। मिनु मेकोपुकी जशा ब्वशा, रूशा दोम्नीम। मिनु मेकोपुकीमी देवी देवता खोइशशा, मेको आन गेय पाइनीम। आं कली चहिं आइक्च सेल्नीम गो नु आं कबल क्याम्नीम। 21 मिनु

मेको मरिम्शो दुम्शा, शुश श्येत जाम्तेक्म हना, मेको कुम्सो मेको आन पशो आ पबर्म आं सांकछी दुम्ब। मारदे हना आन चच युइ मेको कुम्सो शेंसीशा, तुइशो बाक्नीम। ‘मेको आन कली गेनुड’ दे कसम जशो रागीम चाक्चा क्येडा डोंइती आन मिम्तीके दूली बाक्ब, दे तुइक्नुड” दे परमप्रभु यावेमी मोसा कली देंत। भजन संग्रह १३९:२

22 मिनु मेको नाक्ती मोसामी एको कुम्सो ब्रेक्शा, इस्राएली आन कली शेंताक्मी। 23 मिनु परमप्रभु यावेमी नून आ तौ यहोसु कली अरेशा “बोल्यो नु महिब दुमो। मारदे हना ‘मेको आन कली गेनुड’ देशो रागीम गे इस्राएली आन कली चाक्दीत्चा माल्नेवे। मिनु गो गे नु बाक्नुड” देंत।

अरेशो किताब नु कुम्सो

24 मिनु मोसामी मेको अरेशो लोव्र किताबम ब्रेक्ने थुम्शा नोले 25 मेकोमी परमप्रभु यावे आ सल्ला पतीक सन्दोस कुरब लेवी आ थर डा मुर आन कली 26 “एको अरेशो लोव्र डा किताब लाइशशा, परमप्रभु यावे, इन परमप्रभु आ सल्ला पतीक सन्दोस आ नेक्था वोतीन। मोदेशो पा मेको आन पबर्म सांकछी दुम्शा बाक्ब। यूहन्ना ५:४५ 27 मारदे हना गो इन मरिम्शो पतीक नु इन मटितीके तुइक्नुड। गो मुल सम्म गेपुकी नु बाक्शा यो, गेपुकी परमप्रभु यावे कली गन गन पा मटीब बाक्तीनी। गो बेक्डा नोले दोशो मरिम्शो पाइनीनी? 28 मिनु गे इन थर थर डा खाल्पा नु ठेयब मुर नेल्ल आं बाक्तीकेम ब्रेशशा खुम्सीन। मिनु गो मेको आन कली एको लोव्र नेंपाइक्नुडमी। मिनु मेको गो सरीड नु रागी आन पबर्म सांकछी वोइक्नुड। ब्यवस्था ३२:१ 29 मारदे हना गो बेक्डा नोले गेपुकी थमा पा दूली पाइब दुम्नीनी। मेको गो तुइक्नुड। मिनु गेपुकी आं अरेशो लां रे डोन लाइनीनी। मिनु गेपुकीमी परमप्रभु यावे आ डोंइती मरिम्शो पाइनीनी। मिनु मेको इन पतीकेमी मेको कली गाइक्पाइक्नीनी। नोले डा नाक्तीमी इन कली शुश श्येत दुम्ब” देंत। 30 मिनु मोसामी इस्राएली नेल्ल आन डोंइती एको कुम्सो थुम्चा सम्म नेंपाइक्तीमी।

32

मोसा आ ब्रेक्पाइशो कुम्सो

मिनु मोसामी 1 “सरीड, गो मार देंनुडा, नोफा दाइशशा नेनो। रागीम, आं लोव्र नेनल। यसैया १:२ 2 आं अरेशो लोव्र रेउ खोदेशो पा यीब। आं अरेशो लोव्र सीत खोदेशो पा दोक्ब। कल्लो घांस तार भूस भुसे रेउ खोदेशो पा नु सुवा आन तार ठेयब रेउ खोदेशो पा यीब। यसैया ५५:१०-११ 3 मारदे हना गो परमप्रभु यावे आ नें ठेयब सेल्लुड। इं परमप्रभु ठेयब बाक्ब।

4 मेको सेरथे फुल्लु बाक्ब। मेको आ गेय नेल्ल क्येडा रिम्शो बाक्ब। आ लां नेल्ले ठीक बाक्नीम। मारदे हना मेको आ देशो पाइब परमप्रभु बाक्ब। जोल मपाइब, कुल मकोव्रब नु ठीक पाइब बाक्ब। 5 तन्न मेको पाला डा मरिम्शो दुम्शो मुरपुकीमी मेको कली मरिम्शो पाम्तेक्म। मेको दूली पाइब नु हेंथे गाक्ब ला डा बाक्नीम। यसैया १:२-४; मत्ती १७:१७ 6 मूर्ख नु निप्स मपाइशो मुरपुकी, मार, गे परमप्रभु यावे कली क्येक्क लेत्नीनी? मार, इन कली सेल्ब इन आफ मेको ममाइ डा? मेको इन कली सेल्ब नु वोइक्ब बाक्ब। 7 साइ डोंइती डा नाक्त मिम्तीन। साइ डा बर्स कली मिम्तीन। इन आफ कली हिल्लो पने। मिनु मेकोमी इन कली शेंनीम। इन खाल्पा आन कली हिल्लो पने। मेकोमी इन कली देंनीम। 8 नेल्ल क्येडा ठेयबमी रागी रागी डा मुर आन कली आन रागी गेपु। मेकोमी मुर नेल्ल आन कली शुश खाल डा सेल्लु। मेना इस्राएली आन थर डा खिं खिं डा मुर कोव्रशा, आन सांद योक्शा गेपु। उत्पत्ती ११:८; प्रेरित १७:२६ 9 मिनु परमप्रभु यावे आ भाग आ मुरपुकी बाक्तेक्म। याकूब आ मुर आन भाग आ योव्रशो रागी बाक्त।

10 मेकोमी याकूब कली सुइ मबाक्शो रागीम थुल्लु। गोरशो रागीमी कोव्रशा थुल्लु। मिनु मेकोमी मेको कली आ एर ओंथ नेल्ल रे कोव्रतु। मिनु मेको कली आ मिक्च कली खोदेशो पा होस पा कोव्रतु। भजन संग्रह १७:८; इजीकीएल १६:१०-१४; जकरिया २:१२ 11 आंम चाइक्ब कली रिम्शो कोव्रशा जचा गेब, फ्रां प्राक्शा चाइक्ब कली पुण्व नु आ फ्रांम इर कुरब ककाकुली खोदेशो पा, प्रस्थान १९:४ 12 परमप्रभु यावेमी मेको कली लां कोंइताक्व। मेको नु अर्को तेकोइ देवता मबाक्म। 13 मेकोमी मेको कली नेल्ल क्येडा रिम्शो रागीम वोइक्तु। मेकोमी रूम शोक्शो थोव्रकीम थुल्लु। मिनु मेको कली रोंगु डा खुदो नु फुल्लु रे तेल जचा गेपु। भजन संग्रह ८१:१७ 14 मिनु बी आन दूध के दहि, भेडा आन दूध नु पाठा नु सांड आन बोसो ब्वचा गेपु। बाशान डा ब्यफ नु क्यारश आन श्ये ब्वचा गेपु। नेल्ल क्येडा रिम्शो चेरब फस जशा, अडगुर शांबु तूशा बाक्ते। 15 मिनु येशुरुनमी दोम्शा ताइक्तु। गे दोम्ते। गे दोम्शा, ठेयब लेशो दुम्ते। मेकोमी आ कली सेल्ब परमप्रभु कली प्रोंइतु। मिनु आ श्येत रे प्रोंइब सेरथे फुल्लु, कली प्रोंइतु।

येशुरुन याकूब-इसाएल कली मान पतीक नें बाकब। ब्यवस्था ३३:५, २६; यसैया ४४:२; ब्यवस्था ३१:२०; नेहेम्याह ९:२५ 16 मिनु मेकोपुकीमी अर्को देवी देवता आन कली ठेयब सेल्शा, मेको कली गेहे पपाइक्तेकम। मेकोपुकीमी ग्रांग्रा दिचा डा थोवकीम पतीके मेको कली गाइक्पाइक्तेकम। 17 मेकोपुकीमी परमप्रभु कली ममाइ, वोल आन कली चढेम्तेकम। आन डोंइती मतुइश्शो देवी देवता आन कली चढेम्तेकम। आन किकी पिपीमी महिंशो नक सेल्शो देवी देवता आन कली चढेम्तेकम। 18 मिनु गे इन कली सेल्ब सेरथे फुल्लु कली ममिम्तीनी। इन कली थीब परमप्रभु यावे कली प्रेंताकनी। उत्पत्ती ४९:२४; भजन संग्रह १८:३२; भजन संग्रह ७८:१५-१६

19 मिनु परमप्रभु यावे मेको तशा रुश पाप्नु। मारदे हना आ तमी तौपुकीम मेको कली आइक्च सेल्तेकम। 20 मिनु मेकोमी 'गो मेको आन कली वारच मपाइनुड। मेको दोपा बेकनीमी, मेको कोव्रनुड। मारदे हना मेको दूली पाइब पाला डा मुर बाकनीम। मेको थमा मसुइक्चा डा बाकनीम। 21 देवी देवता आन पबर्मी आं कली रुश पपाइक्नीम। मूर्ति पूजा पा आं कली गाइक्ब सेल्तीमी। मोपतीके गो डोन डा मुर आन कली आंम के सेल्शा, एको आन कली रुश पपाइक्नुड। रागी डा मतुइक्ब मुर आन कली गुप्शा, मेको आन कली गाइक्पाइक्नुड। भजन संग्रह ७८:५८; येरमीया २:११; रोमी १०:१९ 22 मारदे हना आं गाइक्चा मी खोदेशो पा ब्रशो बाकब। रागी आगा सम्म ब्राइब। रागी नु मेकेर बाकशो नेल्ले नेक्ब। मेकोमी डांडा आन जग नेल्ल नेक्ब। 23 गो मेको आन कली शुश श्येत गेनुड। गो मेको आन कली ब्रा आप्नुड। दोपा आप्नुड देशा हना, 24 बेक्चा डा शोव्रलु, शुश नाप्शो जोरो, मुर कली साइक्ब रोइ नु मेको आन कली बुप्शा ब्वाइब जन्तुपुकी नु खपीम ग्रेशा गाक्ब बीस पाइश्शो बुस्सपुकी सोइक्नुड। 25 लां लांमी तरवारम मेको आन कली रोम रोइक्च सेल्नुड। खिं खिंम राम्शी पोक्नुड। ठिटा ठिटी, दूध तूब आल, चां बोइश्शो नेल्ल आन कली खाल का डा पाइनुड। इजीकीएल ५:१७; इजीकीएल १४:२१ 26 गो मेको आन कली डोन डोन सम्म ब्रापाइक्नुड। गो मेको आन कली मुर आन दातेम ममिम्पाइक्नुड। 27 तन्न आन जोरी सत्रुपुकीमी दूली मिम्शा "गोपुकीमी इं सक्तिम ग्रातय। एको परमप्रभु यावे आ पशो ममाइ" देंनीम। मिनु आं कली गाइक्पाइक्नीम।

28 मारदे हना मेकोपुकी रागी डा निप्स मपाइश्शो मुर नम। मेकोपुकी नु मारेइ रुप्तीक थुं मबाक्ब। यसैया २७:११; येरमीया ४:२२ 29 मेकोपुकी निप्स पाइश्शो नम हना, एको लोव्र रुबेम वा। मेको आन बेक्तीक तुइक्तेम वा। 30 मेको आन सेरथे फुल्लुम मेको आन कली लेयने थुम्शो बाक्ब। परमप्रभु यावेमी मेको आन कली प्रोंइने थुम्शो बाक्ब। मोपतीके मुर कामी हजार का आन कली खेदा पाप्नु। मुर निक्शीमी १० हजार आन कली खेदा पने चाप्नीसी। लेवी २६:३६-३७; यसैया ३०:१७ 31 इं जोरी सत्रुमी "मेको आन सेरथे फुल्लु आंइ सेरथे फुल्लु खोदेशो ममाइ" दे लोव्र पाप्तेकम। ब्यवस्था ३२:४, ३७ 32 मारदे हना मेको आन अडगुर सोदोम डा अडगुर बाकनीम। मेको गोमोररा डा अडगुर रू रे दुम्शो बाकनीम। मेको आन अडगुर बीखम ब्रीशो बाकनीम। मेको आ गेडा कशो बाकनीम। 33 मेको आन अडगुर बुस्स आ बीस नु साइक्चा डा बीख बाक्ब।

34 गो एको मिम्शा वोइश्शो बाक्नुड। आं वोइक्तीकेमी छाप थोक्शा वोइश्शो बाक्नुड। ब्यवस्था २९:२८ 35 सजाइ नु क्येक्क लेत्तीक आं के बाक्ब। मिनु ग्रेक्शा थित्तीक नाक्त नु आन बेक्तीक नाक्त जाक्चा चिक्शो बाक्ब। मेको आन खतम दुम्तीक नाक्त जाक्चा चिक्शो बाक्ब। भजन संग्रह ९४:१; रोमी १२:१९; हिब्रू १०:३०

36 परमप्रभु यावेमी आ मुर आन कली थमा पा वारच पाइब। आ मुर आन कली शिशी पाइब। मेको आन सक्ति लत हना, मुर नु वाइलीम वाइल यो खतम दुम्नीम। 37 मेको आन देवी देवता ते बाकनीमी? मेको आन खुइक्तीक सेरथे फुल्लु ते बाक्बा डा? ब्यवस्था ३२:३१ 38 आन क्योरशा चढेतीके डा बोंसो सुमी ब्ववा? मिनु तूचा थोव्रक चढेतीके रे सुम तूडा? मेकोपुकी बोक्शा इन कली वारच पामेक्ल। मिनु इन कली प्रॉन्मेक्ल। न्यायाधीस १०:१४; येरमीया २:२८

39 मुल कोव्रडीन, गो ला परमप्रभु नड। आं क्येडा लाक्शा सुइ परमप्रभु मबाक्ब। गो साइक्ब नु ब्रोंइपाइक्ब नड। गो गार सेल्ब नु सापाइक्ब नड। आं गुइ रे ब्रोंइब सुइ मबाक्ब। ब्यवस्था ४:३५; यसैया ४५:५; १सामुएल २:६; प्रस्थान १५:२६; अय्युब ५:१८; होसे ६:१-२ 40 मिनु गो आं गुइ सरीड गे पोक्शा, गो गेना हना यो ब्रोंइशा बाक्शो खोदेशो पा कसम जाइनुड। 41 गो आं टल्केशो या शेप्ता हना, आं गुइमी निसाफ पचा कली ग्याइक्ताकड हना, आं जोरी सत्रु आन कली क्येक्क लेत्नुड। आं कली काइ मदाक्ब आन कली क्येक्क लेत्नुड। येरमीया ४६:१० 42 आं ब्रा आन कली ग्याइश्शा साइश्शो मुर आन हुशेमी गिल्नुड। आं या लाइश्शो चां पाइश्शो आं जोरी सत्रु आन श्ये ब्वाइब खोदेशो सेल्नुड' दे परमप्रभुमी देंत।

43 गे रागी रागी डा मुरपुकी, ग्येरसीशो मेको आ मुर बाक्नीनी। मिनु नेल्लेमी परमप्रभु कली मान पने। मारदे हना मेकोमी आ गेय पाइब आन हुश आ क्येक्क लेप्ब। आ मुर आन कली मरिम्शो पाइब आन कली क्येक्क लेप्ब। मिनु मेको आन कली काइ मदाक्ब आन कली क्येक्क लेप्ब। मिनु मेकोमी आ मुर आन रागी कली लेंशा रिम्शो सेल्ब” दे मोसामी कुम्सो पाप्तु। रोमी १५:१०; ब्यवस्था २१:८; गन्ती ३५:३३-३४

मोसा आ नोले डा अरेशो लोत्र

44 मिनु मोसा नु नून आ तौ यहोसु मुर आन डोंइती एको कुम्सो डा लोत्र नेंपाइक्ताक्स। 45 मिनु मोसामी इस्राएली नेल्ल आन कली एको लोत्र नेंपाइक्ने थुम्शा, 46 मेको आन कली “मुलाक्त गे इन कली आं देशो लोत्र नेल्ल इन थुंम वोतीन। इन तमी तौ आन कली देनीन। गे मेको आन कली ‘मेको अरेशो लोत्र नेल्ल होस पा पचा माल्नीनी’ दे मतीन। ब्यवस्था ६:७ 47 मारदे हना एको इन कली आइक्च लोत्र ममाइ। एको इन ब्रोंइतीक बाक्ब। एको पशा, गेपुकी यर्दन शोक्शा इन के सेल्शो रागीम शुश नाक्त ब्रोंइनीनी” दे माइक्तीमी। लेवी १८:५

परमप्रभुमी मोसा कली लोत्र पशो

48 मिनु मेको नाक्ती परमप्रभु यावेमी मोसा कली 49 “गे अबारीम डांडा डोंइसो। यरीको आ नेक्था मोआब रागीम बाक्शो नेबो डांडा डोंइसो। मिनु गो इस्राएली आन कली गेशो कनान रागी नेल्ल कोत्रडो। गन्ती २७:१२; गन्ती ३३:४८ 50 मिनु दोपा इ लोक्ब हारून होर डांडाम बेक्मे नु आ किकी पिपी आ मुर आन बाक्तीक लमे, मोपा गे मेको इ डोइशो डांडाम बेक्नेवे। मिनु बेक्शा इ किकी पिपी आन बाक्तीक लाइनेवे। गन्ती २०:२३-२९ 51 मारदे हना गे निक्शीमी जीन डा गोरशो रागी मेरीबाथ-कादेशमी आं ब्वाक्कु आ नेक्था इस्राएली आन दातेमी आं कली थमा मसुइक्कीसी। आं कली टिचा माल्नीम, दे इस्राएली आन डोंइती मकोंइथु, आं कली ठेयब मसेल्सी। गन्ती २०:१२-१३ 52 गे आं इस्राएली आन कली गेशो रागी डोन रे ताप्तीवी हना यो, गे मेकेर लचा मताइनेवे” दे परमप्रभु यावेमी मोसा कली देंत।

33

मोसामी आसीक गेशो उत्पत्ती ४९:-

1 परमप्रभु आ मुर, मोसामी आ बेक्चा क्येडा डोंइती इस्राएली आन कली मार आसीक गेपुतु देशा हना 2 “परमप्रभु यावे सीनै रे जाक्शो बाक्ब। मेको सेइर रे पा आंइ डोंइती गूत। मेको पारान डांडा रे पा टल्केसाक्व। मेको नु लाख लाख आ मुर बाक्तेक्म। आ ग्युरा गे आंम मुर डा ठेयब हुल बाक्तेक्म। न्यायाधीस ५:४ 3 थमा पा, मुर आन दातेमी आ मुर शुश दाक्शो मुर बाक्नीम। गे इन मुर नेल्ल आन कली कोत्रब बाक्तीनी। मेकोपुकी इन खोइल आ नेक्था गाक्शो बाक्तेक्म। इन देशो नेल्ल पाक्तेक्म। 4 मोसामी आंइ कली इन अरेशो लोत्र ‘पचा माल्नीनी’ दे माइक्तु। मेको अरेशो लोत्र याक्ब आ जात डा मुर नेल्ल आन के दुम्त। 5 मिनु येशुरुन पिप का दुम्त। मुर आन ठेयब मुरपुकी बुक्तेक्म। मिनु इस्राएल आन थर थर नेल्ल गुम्तेक्म। येशुरुन याक्ब-इस्राएल कली मान पतीक नें बाक्ब। प्रस्थान १५:१८; ब्यवस्था ३२:१५; प्रस्थान १९:७

6 रूबेन आ मुर शुश मदुम्तेक्म हना यो, ब्रोंइशा बाक्ल, मबेक्ल” देंत।

7 मिनु यहूदा आ पर्बम मार देशो बाक्त, देशा हना “परमप्रभु यावे, यहूदा आ लोत्र नेनीन। मेको कली आ मुर आन बाक्तीक चाक्कीन। मेको कली सक्ति गेने। मेको आ जोरी सत्रु आन पर्बम मेको कली वारच पतीन” देंत। 8 मिनु लेवी आ पर्बम मार देशो बाक्त, देशा हना “गे लेवी कली इन थुम्मीम गेने। इन ऊरीम इन थमा सुइक्चा डा गेय पाइब कली गेने। गे मेको कली मास्साहम नाक्ताक्नी। गे मेरीबा डा ब्वाक्कुम मेको नु जीतीनी” देंत। प्रस्थान २८:३०; १सामुएल १४:४१; प्रस्थान १७:२,७; भजन संग्रह ९५:८ 9 मेकोमी आ आम आफ आस पर्बम “गो मेको आस कली ममिम्नुड। मेकोमी आं खिं डा मुर आन कली प्रोंइतु। आ तौ आन कली मतुइक्त। मारदे हना मेकोमी इन लोत्र टिपुतु। मिनु गे नु कबल पशो बाक्त। प्रस्थान ३२:२७-२९; मती १०:३७ 10 मेकोपुकीमी याक्ब कली इन पतीके लोत्र नु इस्राएली आन कली इन अरेशो लोत्र शेंनीम। मेकोपुकीमी इन डोंइती धूप चोइनीम। इन कली इन चढ़ेतीके तार नेल्ल चोशा चढ़ेतीके चढ़ेनीम। 11 परमप्रभु यावे, गे मेको कली आसीक गेने। मेको आन गेय ताक्कीन। मेको कली काइ मदाक्ब आन कली नु आ जोरी सत्रु आन कली लेंशा मबोक्चा डा पा खतम सेलीन” देंत।

12 मिनु बेन्यामीन आ पबर्म मार देशो बाक्त, देशा हना “परमप्रभु यावे आ दाक्शो महिचा डा पा नाइक्ब। नेल्ल क्येडा ठेयबमी मेको कली नाक्त रे कोव्रब। मेको आ दाक्शो मुर आ बला आस दातेम नाइक्ब” दंत। 13 मिनु योसेफ आ पबर्म मार देशो बाक्त, देशा हना “परमप्रभु यावे आ रू आन कली आसीक गेवल। मेकोमी इर सरीड नु उइ रागी डा नेल्ल क्येडा रिम्शो तवल। उत्पत्ती ४९:२५ 14 नांम सिशो फल फुल तवल। महिना महिना डा रिम्शो फल फुल तवल। 15 माइत पहाड डा नेल्ल क्येडा रिम्शो अन्न नु गेना हना यो लीब डांडा डा शुश बाली नाली तवल। 16 मेको रू डा नेल्ल क्येडा रिम्शो सिशो शुश तवल। मिनु सीनै डांडाम बाक्ब आ दाक्शो तवल। मिनु मेको आसीक योसेफ आ पिया तार दुम्ल। प्रस्थान ३:२-४; उत्पत्ती ४९:२६ 17 मेको आ लोक्ब आन दाते डा नेल्ल क्येडा ठेयब मुर, योसेफ आ पिया तार दुम्ल। मेको डोंइती जरमेशो बाछा खोदेशो बाक्ब। मेको ताइब बाक्ब। मेको आ ग्रोत्र ब्वाकी डा ब्यफ आ ग्रोत्र खोदेशो बाक्ब। मेकोमी जात जात डा मुर आन कली खेरशा, रागी आ सुर सम्म नेप्ब। मेकोपुकी एफ्राइम आ लाख लाख डा मुर नु मनस्से आ हजार हजार डा मुर बाक्नीम” दंत। उत्पत्ती ४६:२०

18 मिनु जबूलून आ पबर्म मार देशो बाक्त, देशा हना “जबूलून, लाडगा लशा ग्येरसो। मिनु इस्साकार इ ताम्बुम बाक्शा ग्येरसो। 19 मेकोपुकीमी जात जात डा मुर आन कली डांडाम ब्रेत्नीम। मेकेर ठीक दुम्शो चढेतीक चढेनीम। मारदे हना मेकोपुकीमी समुन्द्र डा शोंप नु बाल्वाम खुइशो शोंप जाइनीम” दंत।

20 मिनु गाद आ पबर्म मार देशो बाक्त, देशा हना “गाद कली सोशो बोशो दुम्शा ग्येरसो। गाद गुप्स खोदेशो पा बाप्शा बाक्ब। मेकोमी गुइ नु पिया रेप्ब। 21 मेकोमी आंम कली नेल्ल क्येडा रिम्शो रागी योव्रतु। मारदे हना मेको कली कप्तान आ भाग वोइशो बाक्त। मेको नेल्ल इस्राएली आन डोंइती गाक्त। परमप्रभु यावेमी देशो ठीक पतीके पाप्तु” दंत। गन्ती ३२:२९-३२

22 दान आ पबर्म मार देशो बाक्त, देशा हना “दान बाशान रे प्रेक्शा, जाक्ब, गुप्स आ चाइक्ब बाक्ब” दंत।

23 मिनु नाप्ताली आ पबर्म मार देशो बाक्त, देशा हना “नाप्ताली, गे परमप्रभु यावे आ दाक्शो, आसीक ताइब बाक्नेवे। गे पच्छिम नु दक्खिन इ के सेलो” दंत।

24 मिनु आशेर आ पबर्म मार देशो बाक्त, देशा हना “मुर आन दातेमी नेल्ल क्येडा आसीक राइब आशेर बाक्ब। मेको आ लोक्बपुकीमी मेको कली दाक्तमेक्ल। मेको आ खोइल तेलम चिक्सेक्ल। 25 इ आग्लोपुकी फलाम नु कांसा के बाक्नीम। इ नाक्त दोदेशो बाक्मे इ सक्ति यो मोदेशोन बाक्ल” दंत।

26 मिनु “येशुरुन आ परमप्रभु खोदेशो सुइ मबाक्ब। मेको इ कली वारच पाइक्चा कली स्वर्ग रे पीब। मेको सरीड मेर रे मान पचा पुंडसीशा पीब। येशुरुन याकूब-इस्राएल कली मान पतीक नें बाक्ब। आ अर्थ ठीक पाइब बाक्ब। ब्यवस्था ३२:१५ 27 साइ नेसी डा परमप्रभु खुइशो बाक्तीक बाक्ब। इन डोंइती इन जोरी सत्रु आन हुल कली खेरतु। मिनु मेको आन पबर्म खतम सेलीन, दंत। 28 मोपतीके इस्राएली मारेइ मदुम्थु, रिम्शो पा बाक्ब। याकूब आ बाक्तीकेमी श्येत मजाइनीम। मेको अन्न नु अडगुर आ रागीमी सीत यीब। लेवी २५:१८; १राजा ५:५; भजन संग्रह ६८:२७-२८; यसैया ५१:१-२; उत्पत्ती २७:२८ 29 गे इस्राएली, ग्येरसीने। परमप्रभु यावेमी प्रोंइचा पुंडसीशो इन खोदेशो जात सु बाक्बा? परमप्रभु यावे इन कली वारच पाइब नु तेक्तीक बाक्ब। मेको इन ग्रातीक तरवार बाक्ब। इन जोरी सत्रु इन डोंइती बाप्नीम। मिनु गे मेको आन चीमी थेक्शा गाक्नीनी” दे आसीक गेशा, दंत। ब्यवस्था ४:७-८; भजन संग्रह ३३:१२; भजन संग्रह १४४:१५

34

मोसा बेक्शो

1 मिनु नोले मोसा मोआब रे यरीको आ नेक्था बाक्शो नेबो डांडा रे पिस्गा डांडा डोंइसाक्व। मेको यरीको एर बाक्ब। परमप्रभु यावेमी मेको कली गिलाद रागी नेल्ल दान सम्म कोंइताक्व। ब्यवस्था ३:२७ 2 नाप्ताली आ रागी नेल्ल, एफ्राइम नु मनस्से, यहूदा आ रागी नेल्ल पच्छिम गे डा समुन्द्र सम्म, 3 नेगेब नु दिंम, मेको यरीको डा दिंम बाक्ब। खजूर रवा आ सहर यरीको रे सोआर सम्म कोंइताक्व। इतिहास २८:१५ 4 मिनु परमप्रभु यावेमी मेको कली “इन चच युइ आन कली गेनुड, दे अब्राहाम इसहाक नु याकूब नु कसम जशो रागी एकोन बाक्ब। गो एको इ कली कोंइतन। तन्न गे मेकेर लचा मताइनेवे” दंत। उत्पत्ती १२:७ 5 मिनु परमप्रभु यावेमी आ देशो खोदेशो पा परमप्रभु यावे आ गेय पाइब मोसा मोआब रागीम बेक्त। ब्यवस्था ३२:५० 6 मिनु परमप्रभुमी मोसा कली मोआब रागी बेथ-पेओर आ डोंइती दिंम कामी थिम्तु। तन्न मुल सम्म मोसा आ तुरस सुइमी मतुइक्नीम। 7 मोसा बेक्मेनु, मेको सहे का २१

बर्स दुम्शो बाक्त। मेको आ मिक्च ब्राब्रा मदुम्शो बाक्त। आ बोल यो मग्युम्शो बाक्त। ब्यवस्था ३१:२ ८ मोआब डा दिंमम इस्राएलीपुकीमी ३० नाक्त सम्म मोसा आ पर्बम रोंका पाम्तेक्म। नोले मोसा आ पर्बम रोंका पतीक नाक्त नुप्त।

९ मिनु नून आ तौ यहोसु रुप्तीक तुइक्तीक सोक्तीम ब्रीशो बाक्त। मारदे हना मोसामी आ गुइ मेको आ तार वोइश्शो बाक्त। मिनु परमप्रभु यावेमी मोसा कली माइश्शो खोदेशो पा इस्राएलीपुकीमी यहोसु कली टिम्तेक्म। गन्ती २७:१८-२३; १तिमोथी ४:१४; २तिमोथी १:६

१० मेना रे मुल सम्म इस्राएली आन दातेमी मोसा खोदेशो परमप्रभु यावे आ लोत्र पाइब सुइ मगूम। परमप्रभु यावेमी मेको कली थमा पा तुइक्बाक्त। प्रस्थान ३३:११; गन्ती १२६-८; १कोरिन्थी १३:१२ ११ मिनु परमप्रभु यावेमी मेको कली इजीप्त रागीमी चिन्ड नु छक लाक्चा डा गेय पथ सोइक्ताक्व। मोदेशो मुल सम्म सुइम मपावो मोसामी फाराओ, आ गेय पाइब नु रागी डा मुर नेल्ल आन डोंइती कोंइताक्व। १२ मिनु मेकोमी इस्राएली आन दातेमी सक्तिम पाइश्शो गेय नु हिंचा डा गेय कोंइशो बाक्त।

यहोसु

ब्रेक्ब मुर: एको किताब ब्रेक्ब मुर आ नें तेइ मब्रेक्शो बाक्ब। तन्न “यहोसुमी मेको नेल्ल परमप्रभु आ अरेशो लोव्र ब्रेक्तीक किताबमी ब्रेक्ताक्ब” दे ब्रेक्शो बाक्ब। टाल्मुत माइशो यहूदी आन माइत किताबमी “ब्रेक्ब मुर यहोसु बाक्ब। मिनु यहोसु बेक्म नोले डा लोव्र फिनेहासम तेम्शो बाक्त” दे ब्रेक्शो बाक्ब। यहोसु २४:२९-३३

गेना ब्रेक्शो: एको किताब ब्रेक्ची ना यबुसीपुकी रागीम बाक्शो बाक्तेक्म। यहोसु १५:६३ पिप दाऊदमी आ सासन पची ना मेको आन कली खेरशो बाक्त। एको किताब ब्यवस्था आ नोले डा दुम्बा, मोसा आ बेक्शो रे यहोसु आ बेक्शो सम्म इस्राएली आन इतिहासम बाक्ब।

मार ब्रेक्शो: एको किताबम इस्राएली आन १२ थर का का पा आन थेरशो रू योक्तीके ला ममाइ, मेको रागी कली ग्राशा, आंम के सेल्चा कली परमप्रभु यावे आ देशो टितीकेम ला दुम्ब, दे शेंशो बाक्ब। मेको आ कोइतीके आकान आ मटितीके बाक्त।

१. कनान रागी आंम के सेल्चा कली ठीक दुम्तीके यहोसु १:- ५:-

२. कनान रागी कली ग्राशो यहोसु ६:-१२:-

३. इस्राएली आन थेरशो रू योक्शो यहोसु १३:-२४:-

इस्राएली रागी ओव्रचा सासीशो

१ परमप्रभु यावे आ गेय पाइब मोसा बेक्म नोले परमप्रभु यावेमी मोसा आ गेय पाइब नून आ तौ, यहोसु कली लोव्र पाप्तु। २ परमप्रभु यावेमी मार लोव्र पाप्तु देशा हना “आं गेय पाइब मोसा बेक्त। मोपतीके गे मुर नेल्ल आन कली लाइक्चा सासो। मिनु गो इस्राएली आन कली गेचा चिक्शो रागी यर्दन खोला आ आइक्ची हांबु लावो। ब्यवस्था ३४:५ ३ गोमी मोसा कली देशो खोदेशो पा, इन खोइलीम थेक्शो रागी नेल्ल इन कली गेता। ब्यवस्था ११:२४ ४ गोरशो रागी नु लेबानोन रे ठेयब युफ्रेटीस खोला सम्म, हिती आन रागी नेल्ल, पच्छिम गे डा ठेयब समुन्द्र सम्म इन रागी दुम्ब। ५ गे मबेक्डे सम्म इ कली सुइमी यो फ्रुने मचाप्नीम। गो दोपा मोसा नु बाक्डा, मोपा गे नु यो बाक्नुड। गो इ कली गेना हना यो कोव्रनुड। मिनु गेनायो मप्रॉइनुड। ब्यवस्था ३१:७,८; हिब्रू १३:५

६ गे बोल्यो नु महिंब दुमो। मिनु गो डोंइती ‘इ किकी पिपी आन कली गेनुड’ दे कसम जशो रागी, गे इस्राएली आन कली आंम के सेल्पाइक्चा माल्नेवे। ब्यवस्था ३:२८; ७ गे थम बोल्यो नु महिंब दुमो। आं गेय पाइब मोसामी इ कली अरेशो लोव्र नेल्ल होस पा टिवो। मेको रे ग्युरा पेरा गे मलावो। मिनु गे ते लते हना यो ग्रानेवे। ब्यवस्था ५:२९; ब्यवस्था २९:८; १राजा २:३ ८ एको आं अरेशो लोव्र डा किताब इ थुं रे डोन मवोतो। मेको कली नाक्दो नाक्ती मिम्तो। मेकेर ब्रेक्सीशो नेल्ल होस पा टिवो। मो पाप्तीवी हना, गे ग्राना ग्रान गाक्नेवे। मिनु इ पतीक नेल्ल थम रिम्शो दुम्ब। भजन संग्रह १:२-३ ९ गो इ कली ‘बोल्यो नु महिंब दुमो’ देंती। इ थुं लुक्च मलल। गे गेनायो हिंशा खिंखि मपावो। मारदे हना गे ते लते हना यो, गो, परमप्रभु यावे, इ परमप्रभु, गे नु बाक्नुड” दे परमप्रभु यावेमी यहोसु कली देंत।

यर्दन खोला शोक्सीचा गोशो

१० मिनु यहोसुमी मेकेर डा ठेयब मुर आन कली “गे नेल्ल मुर आन बाक्तीकेमी लने। मिनु मेको आन कली ११ ‘बुत लाम्ज कुरशा सासीन। मारदे हना सांबु नाक्ती परमप्रभु यावे, इन परमप्रभुमी गेशो रागी आंम के सेल्चा कली यर्दन खोला शोक्सीचा माल्नय’ देनीन” दे अरेप्तु। १२ मिनु यहोसुमी रूबेन आ थर, गाद आ थर नु मनस्से आ उइक्थ थर कली ब्यवस्था ३:१२-२०; गन्ती ३२:२०-२९ १३ “परमप्रभु यावे आ गेय पाइब मोसामी इन कली अरेशो लोव्र मिम्तीन। मिनु मेकोमी इन कली ‘परमप्रभु यावे, इन परमप्रभुमी इन कली नाइक्पाइक्तीक गेशा, मेको रागी गेनुड’ देशो लोव्र मप्रेंदीन। १४ इन मीश नु आलपुकी, बी ब्यफ, क्यारश भेडा नेल्ल मोसामी इन कली गेशो रागी यर्दन ओंथ हांबुम बाक्चा माल्नीम। तन्न गे लडाइ पाइब वोंइश मुरपुकी या कुरशा इन लोक्ब आन कली वारच पचा कली मेको आन क्येडा डोंइती आइक्ची हांबु लचा माल्नीनी। १५ मिनु परमप्रभु यावेमी इन लोक्ब आन कली, इन कली खोदेशो पा नाइक्चा मगेवा सम्म, मेको रागी आंम के मसेल्मे सम्म नु परमप्रभु यावे, इन परमप्रभुमी मेको आन कली गेचा चिक्शो

रागी मग्रामा सम्म मेको आन कली वारच पचा माल्नीनी। मिनु नोले परमप्रभु यावे आ गेय पाइब मोसामी यर्दन आ पूर्व गे इन कली गेशो रागीमी लेशशा, बाक्ने चाप्नीनी” देंत।

16 मिनु मेकोपुकीमी यहोसु कली “गे आंइ कली मार मार अरेनी, गो मेको नेल्ल पाइनीकी। मिनु गे आंइ कली ते ते सोइक्नीनी, गो मेक मेक लाइनीकी। 17 दोपा मोसा आ लोत्र नेल्ल टिशो नया, मोपान इन लोत्र यो टीनीकी। दोपा परमप्रभु यावे, इन परमप्रभु मोसा नु बाक्मे, मोपान गे नु यो बाक्ल। 18 सुमी इन अरेशो लोत्र ‘मपाइनुड’ दे इन लोत्र मनेंबा, मेको साइक्चा पुंडसीब। मोपतीके गे बोल्यो नु महिंब दुमीन” देंतेक्म। यहोसु १:६

2

यरीकोम क्यारी पथ सोइश्शो

1 मिनु नून आ तौ यहोसुमी, सुइम मतुइक्चा डा पा, शित्तीम रे मुर निक्शी क्यारी पथ सोइक्ताक्व। मिनु यहोसुमी मेको आस कली “मेको रागी नु यरीको नेल्ल क्यारी पथ लस” देंत। मिनु मेको निक्शी मेकेर जाक्दीश्शा, राहाब माइश्शो तेल्लेम आ खिंमी बास बाक्सा बाक्त। मत्ती १:५; हिबू ११:३१; याकूब २:२५ 2 मिनु मेकेर डा मुर कामी यरीको डा पिप कली “हजुर, मुलाक्त नाक्दो इस्त्राएल डा मुर निक्शी एको रागी कली क्यारी पथ, जाक्ताक्स” दे मदा बाक्त। 3 मिनु यरीको डा पिपमी राहाब आ बाक्तीकेमी मुर सोइक्ता नाक्त। मेकोपुकीमी राहाब कली “इ खिंमी जाक्शो मेको मुर निक्शी आस कली गुंडशा, एक चाक्को। मारदे हना मेको निक्शी इ रागी नेल्ल कली क्यारी पथ जाक्शो नसी” दे लोत्र सोइक्ता बाक्त। 4 तन्न मेको मीश मुरुमी मेको निक्शी आस कली लाइश्शा, खुइक्तीम्सी बाक्त। मिनु मेकोमी लोत्र चाक्ब आन कली “मेको निक्शी थमा पा आं बाक्तीकेमी जाक्ताक्स। तन्न ते रे जाक्शो नसी गो मतुइक्तु। 5 मिनु नां रिक्शा, सहर डा ठेयब लाप्चो चोक्ची ना, मेको निक्शी गूशा गाक्ताक्स। मेको ते लसा गो मतुइक्नुड। रीब पा माल्तीनी हना, थित्नीनी को” दे लोत्र लेत्ता बाक्त। 6 तन्न मेकोमी मेको निक्शी आस कली तला तारी वोइश्शा, पले आ डाठमी सुम्शा, खुइश्शा वोइश्शो बाक्माक्त। 7 मिनु मेको निक्शी आस कली खेदा पाइबपुकी यर्दन डा लां लशा, खोला सम्म जाक्दीम्मा बाक्त। मेको खेदा पाइबपुकी सहर रे गूमा नोले ठेयब लाप्चो चोक्गमे बाक्त।

8 मेको मीश मुर इप्चा क्येडा डोंइती मेको निक्शी आस बाक्तीक डोइश्शा, गुम्थ लमाक्त। 9 मिनु मेको मीश मुरुमी मेको आस कली “परमप्रभु यावेमी आंइ रागी इन कली गेशो बाक्ब, दे गो तुइक्नुड। मारदे हना एको रागीम बाक्ब मुर नेल्ल इन कली तशा, शुश हिंनीम। प्रस्थान २३:२७ 10 गे इजीप्त रागी रे गूशा पिनीनु, परमप्रभु यावेमी इन डोंइती लल समुन्द्र सोत्रपाइक्तु। मिनु यर्दन आइक्ची हांबु डा एमोरी आन पिप सीहोन नु ओग आस कली साइश्शा खतम सेल्शो लोत्र गोपुकीमी नेंतक। प्रस्थान १४:२१; गन्ती २१:२१-२६ 11 मोदेशो लोत्र नेंशो नोले, गोपुकी साप्पा हितक। इन पतीक तशा, गो नेल्ल शुश हितक। मारदे हना परमप्रभु यावे, इन परमप्रभु इर स्वर्ग डा नु उइ रागी डा परमप्रभु बाक्ब। यहोसु ५:१; प्रस्थान १५:१४-१५; ब्यवस्था ४:३९ 12 मोपतीके गो इस कली वारच पाता। गे परमप्रभु यावे आ नें थिशा, कसम जसे। मार कसम जस देशा हना, गो इस कली वारच पशो खोदेशो पा, गे लडाइ पनीनु, आं खिं डा मुर नेल्ल आन कली यो वारच पसे। आं कली वारच पतीके चिन्ड का गेयीसी। यहोसु ६:२३,२५ 13 मिनु आं आम आफ, आं लोकबपुकी नु मेको आन खिं डा मुर नेल्ल आन कली ब्रोंइचा गेन। बेक्चा रे प्रोनीन” दे मेकोमी देंमाक्त। 14 मिनु मेको निक्शीमी “गे आंइ पचशो गेय सुइ आन कली मदेते हना, नु परमप्रभु यावेमी एको रागी आंइ कली गेवा नोले गो इ कली थमा पा वारच पा रिम्शो पाइनस्कु। इ कली साइक्चा क्येडा डोंइती आंस कली साइक्चा माल्नीम” देंसा बाक्त।

15 मिनु मेको मीश मुरुमी मेको निक्शी आस कली झेल रे डोरी तोक्शा, उइ तोइक्चा गेम्सी बाक्त। मारदे हना मेको आ खिं मेको सहर डा गारोम बाक्माक्त। 16 मिनु मेको मीश मुरुमी मेको निक्शी आस कली “गे डांडा गे लसे। मेक लाइतीसी हना, खेदा पाइबपुकीमी इस कली मथित्नीम। मेको खेदा पाइब एक्य मलेम्मा सम्म, गे सां नाक्ती मेकेर खुंडसीस। मिनु नोले इस लां लसे” देंमाक्त। 17 मिनु मेको निक्शीमी “गे आस देशो मपाप्तीवी हना, गो कसम मजशो खोदेशो दुम्नस्कु। 18 गो लेंशा एक जाक्कानु, गे आंस कली तोइक्तीक झेलम मेको लल डोरी फ्रेंशा चोतो। इ आम आफ, इ लोकब नु इ खिं डा मुर नेल्ल यो इ खिं बाक्चा माल्नीम। 19 मेना सु इन खिं रे लांम गूबा, मेको साइक्चा पुंडसीब। मिनु आंइ कली मारेइ यो दोस मदुम्ब। सु चहिं इ खिं बाक्शा यो, साइक्चा पुंडसीबा, मेको आ दोस आंइ तारी दुम्ल। 20 तन्न एको लोत्र गे सुइ कली देंते हना, आंस कली जपाइश्शो कसम मराइनीक” देंसा बाक्त। 21 मिनु

मेको मीश मुरुमी “इस देशो खोदेशो दुम्ल” देंमाक्त। मिनु मेको निक्शी लसा बाक्त। मिनु नोले मेको मीश मुरुमी आ झेलम मेको लल डोरी फ्रेंशा वोदा बाक्त।

22 मेको निक्शी लशा, डांडामी जाक्दीशशा, खेदा पाइब मलेम्मा सम्म नाक्ती सां मेकेर बाक्सा बाक्त। खेदा पाइबपुकीमी मेको निक्शी आस कली साप्पा माल्मे बाक्त हना यो, मथिदमे बाक्त। 23 मिनु मेको निक्शी डांडा रे ब्रुप्शा, लेशशा, खोला आइक्ची हांबु नून आ तौ यहोसु आ बाक्तीक जाक्दीशशा, मेको कली मार मार दुम्मे, मेको नेल्ल शोव्रताक्स। 24 मेको निक्शीमी यहोसु कली “थमा पा, परमप्रभु यावेमी मेको रागी नेल्ल इं कली गेशो बाक्ब। मेको रागी डा मुर इं कली तशा, शुश हिंशा, खिंखि पशो बाक्तेक्म” देंताक्स। यहोसु २:९

3

यर्दन खोला शोक्सीशो

1 मिनु यहोसु सुनी कना बोक्शा, इस्राएलीपुकी नु शित्तीम प्रोइशा, यर्दन खोलामी जाक्तेक्म। मिनु आइक्ची हांबु शोक्सीचा क्येडा डोंइती मेकेर बास बाक्तेक्म। गन्ती २५:१ 2 मिनु सां नाक्त नोले ठेयब मुरपुकी मुर आन बाक्तीकेमी लाम्तेक्म। 3 मिनु मेकोपुकीमी मुर आन कली “गेपुकी गेना परमप्रभु यावे, इन परमप्रभु आ कबल पशो सन्दोस चढेब लेवीपुकीम कुरशो ताइनीनी, मेना छुल छाल बोक्शा, इन मारेइ मारेइ कुरशा, मेको आन नोले खोतीन। 4 मो पाइतीनी हना, इन लतीक लां तुइक्नीनी। मारदे हना गे मेको लां डोंइती मगाक्शो बाक्तीनी। गे मेको आन क्येडा हजार निक्शी हात नोले ला गाक्कीन। मेको आन नेक्था मलन” देंतेक्म। कुबीत का, ०.५ मिटर खोदेशो बाक्ब। 5 मिनु यहोसुमी मुर आन कली “गेपुकी आंम कली परमप्रभु यावे आ डोंइती बाक्चा कली ठीक सेल्सीन। मारदे हना दीसा परमप्रभु यावेमी इं दातेमी छक लाक्चा डा गेय पाइब” देंत। प्रस्थान १९:१० 6 यहोसुमी चढेब आन कली “परमप्रभु आ कबल पशो सन्दोस कुरशा, मुर आन डोंइती गाक्कीन” देंत। मिनु मेकोपुकी सन्दोस कुरशा, मुर आन डोंइती गाक्तेक्म। यहोसु ६:६

7 मिनु परमप्रभु यावेमी यहोसु कली “मुलाक्त रे गो इ कली इस्राएली नेल्ल आन डोंइती ठेयब सेल्सन। दोपा गो मोसा नु बाक्डा, मोपा गे नु यो बाक्नुड, दे नेल्ल आन कली तुइक्पाइक्नुड। यहोसु ४:१४; यहोसु १:५, १७ 8 गे कबल पशो सन्दोस कुरब चढेब आन कली ‘गेपुकी यर्दन खोला आ सुर डा ब्वाक्कुम जाक्दीशशा, मेक उइ राप्शा, बाक्चा माल्नीनी’ दे अरेचा माल्नेवे” देंत। 9 मिनु यहोसुमी इस्राएली आन कली “ओथ पिन। मिनु परमप्रभु यावे, इन परमप्रभु आ लोव्र नेनीन” देंत। 10 मिनु यहोसुमी “ब्रोंइशा बाक्ब परमप्रभु इन दातेमी बाक्ब, गे तुइक्ब दुम्नीनी। मिनु मेकोमी कनानी, हिती, हिव्वी, परिज्जी, गिरगाशी, एमोरी नु यबुसी आन कली इन डोंइती रे थमा पा खेरब। 11 कोव्रडीन, रागी नेल्ल आन कली सासन पाइब परमप्रभु आ कबल पशो सन्दोस इन डोंइडोंइती यर्दन शोक्चा कली लाइब। 12 मिनु मुल इस्राएल डा थरपुकी रे १२ जना वोंइश मुर थर का रे का का पा योव्रडीन। 13 गेना परमप्रभु यावे, रागी नेल्ल आन कली सासन पाइब परमप्रभु आ कबल पशो सन्दोस कुरब चढेब आन खोइली यर्दन डा ब्वाक्कुमी खुम्नीमी, मेना इर रे यिशो यर्दन डा ब्वाक्कु नांइसीब। मिनु गारो खोदेशो पा राप्शा बाक्ब” देंत। भजन संग्रह ९७:५; मीका ४:१३; जकरिया ४:१४

14 मिनु मुर नेल्ल यर्दन शोक्सीचा कली ठीक पा बाक्मानु, चढेबपुकीमी मुर आन डोंइती परमप्रभु यावे आ कबल पशो सन्दोस कुरशा गाक्तेक्म। 15 मिनु बाली नाली रुप्ची ना, खोला गेना हना यो शुश बारशो बाक्ब। मिनु चढेबपुकीमी आन खोइली यर्दन खोला आ सुर डा ब्वाक्कुम खुम्मेनु, 16 इर रे यिशो ब्वाक्कु तेक्साक्व। मेको गारो खोदेशो दुम्शा, मुर आन लतीके लां रे डोन बाक्त। मेको ते तेक्सीशो बाक्त देंशा हना, चारेथन आ नेक्था डा आदम सहर माइशोमी तेक्सीशो बाक्त। मिनु इर रे यिशो दिंम डा अराबाह समुन्द्र, मेको कली हिकसी समुन्द्र यो देंनीम, यीब ब्वाक्कु तेक्सीशो बाक्त। प्रस्थान १४:२१-२२; भजन संग्रह ११४:३ 17 मिनु मुरपुकी गाक्शा, सोव्रशो खपीम यर्दन शोक्सीचा गोम्तेक्म। मिनु परमप्रभु यावे आ कबल पशो सन्दोस कुरब चढेबपुकी यर्दन आ दातेमी सोव्रशो खपीम राप्शा, रिम्शा बाक्तेक्म। मिनु इस्राएली नेल्ल सोव्रशो खपीम गाक्शा, यर्दन आइक्ची हांबु जाक्दीत्तेक्म।

4

१२ ओटा फुल्लु वोइशो

1 मिनु मुर नेल्ल यर्दन आइक्की हांबु शोक्ने थुम्मे नोले परमप्रभु यावेमी यहोसु कली 2 “मेको मुर आन दाते रे १२ जना वोइश मुर योव्रडो। थर का रे का का पा योव्रशा लावो। 3 मेको आन कली ‘यर्दन आ दातेमी चढेब आन राप्तीके रे १२ ओटा फुल्लु गुप्शा, कुरशा चाक्कीन। मिनु नाक्दो ते बास बाक्नीनी, मेको फुल्लु यो मेक उइ वोतीन’ दे मतो” देंत।

4 मिनु यहोसुमी आ योव्रशो इस्राएली थर नेल्ल डा का का पा १२ जना वोइश मुर आन कली ब्रेत्ताक्व। 5 मिनु यहोसुमी मेको आन कली “गे यर्दन आ दातेमी परमप्रभु यावे, इन परमप्रभु आ कबल पशो सन्दोस आ डोंइती लने। मिनु मेकेर इस्राएल आ १२ थर खोदेशो पा १२ ओटा फुल्लु बलाम लाप्शा पितीन। 6 मिनु मेको इन कली मिम्तीके दुम्ल। दीसा नित्थी इन तमी तौपुकीमी ‘एको फुल्लु आ अर्थ मार बाक्म?’ दे हिल्लो पाम्तेक्म हना, प्रस्थान १२:२६; 7 गेपुकीमी मेको आन कली ‘परमप्रभु यावेमी आ कबल पशो सन्दोस यर्दन शोक्की ना, मेको आ डोंइती यर्दन डा ब्वाक्कु तेक्पाइक्तु। मेको यर्दन शोक्की ना, यर्दन डा ब्वाक्कु नाइक्पाइक्तु। एको फुल्लु इस्राएली आन कली गेना हना यो मिम्तीक दुम्ल’ देंचा माल्नीनी” देंत।

8 मिनु परमप्रभु यावेमी यहोसु कली माइशो खोदेशो पा यहोसुमी दोपा अरेवा, मोपा इस्राएल डा १२ थर डा १२ जना वोइश मुरुमी १२ ओटा फुल्लु यर्दन आ दाते रे पिशशा, मेको आन बाक्शो दिंममी वोइक्तेक्म।

१२ ओटा फुल्लु यर्दनमी वोइशो

9 मिनु यहोसुमी कबल डा सन्दोस कुरशा चढेबपुकी राप्तीकेमी यो यर्दन खोला आ दातेमी १२ ओटा फुल्लु वोइक्तु। मिनु मेको फुल्लुपुकी मुलाक्त सम्म बाक्नीम।

10 मिनु सन्दोस कुरब चढेबपुकी यर्दन आ दातेमी परमप्रभु यावेमी यहोसु कली देशो लोव्र नेल्ल मपामे सम्म राप्शा बाक्तेक्म। डोंइती मोसामी अरेशो खोदेशो पा यहोसुमी मुर आन कली मअरेवा सम्म राप्शा बाक्तेक्म। मिनु मुरपुकी रीब पा शोक्साक्म। 11 मिनु मुरपुकी शोक्ने थुम्मे नोले, परमप्रभु यावे आ कबल पशो सन्दोस कुरब आन डोंइती चढेबपुकी यो शोक्साक्म।

12 मोसामी मेको आन कली देशो खोदेशो पा, रूबेन आ थर, गाद आ थर नु मनस्से आ उइक्थ थर डा वोइश मुर या कुरशा, इस्राएली आन डोंइती गाक्तेक्म। यहोसु १:१२-१६ 13 मिनु परमप्रभु यावे आ डोंइती हेररा ४० हजार लडाइ पाइब, या कुरशो वोइश मुरपुकी शोक्शा, लडाइ पचा कली यरीको डा दिंम गे लाम्तेक्म।

14 मेको नाक्त परमप्रभु यावेमी यहोसु कली इस्राएली आन डोंइती ठेयब सेल्लु। मिनु मेकोपुकीम मोसा कली हिक्शो खोदेशो पा यहोसु कली यो मबेक्म सम्म हिक्तेक्म। यहोसु ३:७

15 मिनु परमप्रभु यावेमी यहोसु कली 16 “कबल पशो सन्दोस कुरब चढेब आन कली ‘मुल यर्दन रे इर कुन’ देशा ब्रेत्तो” दे माइक्तु। 17 मोपतीके यहोसुमी मेको आन कली “यर्दन रे इर कुन” दे ब्रेत्ताक्व। 18 परमप्रभु यावे आ कबल पशो सन्दोस कुरब चढेबपुकी यर्दन आ दाते रे गाक्शा, खोला आ सुर डा सोव्रशो खपीम थेक्त्मे नोले यर्दन डा ब्वाक्कु लेंशा डोंइती डा खोदेशो पा एर ओंथ सुम्शा शांइसाक्व।

गिल्गालमी वोइशो फुल्लु

19 मिनु इस्राएलीपुकी डोंइती डा महिना डा १० नाक्तीमी यर्दन रे गूतेक्म। मिनु यरीको आ पूबर्ब गे गिल्गाल माइक्तीकेमी बास बाक्तीक सेल्साक्म। यहोसु ५:९-१० 20 मिनु यहोसुमी मुरपुकीम यर्दन रे गुंइशा पिशशो १२ ओटा फुल्लु गिल्गालमी पुक्पाइक्तु। 21 मिनु इस्राएली आन कली “इन तमी तौपुकीमी आन आफ आन कली ‘एको फुल्लु आ अर्थ मार बाक्बा?’ दे हिल्लो पाम्तेक्म हना, यहोसु ४:६ 22 गेपुकीमी इन तमी तौ आन कली ‘गो इस्राएलीपुकी सोव्रशो खपीम गाक्शा, यर्दन खोला शोक्सीशो नकी’ देंचा माल्नीनी। 23 दोपा परमप्रभु यावे, इन परमप्रभुमी लल समुन्द्र मशोक्सीशो सम्म सोव्रपदा, मोपान आंइ डोंइती यर्दन मशोक्सीशो सम्म मेकेर डा ब्वाक्कु यो सोव्रपाइक्तु। यहोसु ३:९-१७; प्रस्थान १४:२१-२२ 24 मिनु रागी डा मुर नेल्लेमी परमप्रभु यावे, इन परमप्रभु ठेयब सक्ति पाइशशो बाक्ब, दे तुइक्तमेक्ल। मिनु गे परमप्रभु यावे, इन परमप्रभु कली तुइशशा, गेना हना यो मान पा हिनीन, दे मोदेशो पाप्तु” देंत।

1 मिनु यर्दन आइक्की हांबु पच्छिम गे डा एमोरी आन पिप नेल्ल नु ठेयब समुन्द्र आ नेक्था डा कनानी आन पिप नेल्लेमी “परमप्रभु यावेमी इस्राएली आन डोंइती यर्दन खोला मशोक्सीमा सम्म सोव्रपाइक्तु” दे नेंशा, मेकोपुकी इस्राएली आन कली तशा, साप्पा हिंशा आन थुं लुकच लत। यहोसु ३:१६; यहोसु २:२४

2 मेना परमप्रभु यावेमी यहोसु कली “फुल्लु के खोइक्तीक सेल्शा, चिनु मखोइश्शो इस्राएली आन कली खोइक्तीक चिनु खोतो” दे अरेप्तु। प्रस्थान ४:२५; उत्पत्ती १७:१२-१४ 3 मिनु यहोसुमी फुल्लु के खोइक्तीक सेल्शा, गिबेआथ-हारालोथमी इस्राएली आन कली खोइक्तीक चिनु खोइक्तु। 4 यहोसुमी मारदे इस्राएली आन कली खोइक्तीक चिनु खोइक्तु देशा हना, इजीप्त रागी रे पिशो वोंइश मुर नु लडाइ पाइब नेल्ल गोरशो रागीमी बेक्ने थुम्शो बाक्तेक्म। 5 इजीप्त रागी रे पिशो वोंइश मुर नेल्ल आन के खोइक्तीक चिनु खोइक्ने थुम्शो बाक्तेक्म। तन्न गोरशो रागीमी जरमेशो आन कली चहिं खोइक्तीक चिनु मखोइश्शो बाक्तेक्म। 6 मिनु डोंइती परमप्रभु यावेमी आंइ किकी पिपी आन कली “दूध नु खुदो शुश बाक्शो रागी इन चच युइ आन कली गेनुड” दे कसम जाप्तु। तन्न आ लोव्र मटितीके इजीप्त रे पिशो लडाइ पाइब नेल्ल ४० बर्स गोरशो रागीमी मबेक्मा सम्म हिरचा माल्तेक्म। परमप्रभु यावेमी मेको आन मटितीके मेको आन कली “गे इन कली मेको दूध नु खुदो शुश बाक्शो रागी ओव्रचा मगेनुड” दे कसम जशो बाक्त। गन्ती १४:२२-२३ 7 मेकोमी आन आफ आन पा डा आन तौ आन कली मेको रागी तचा कली कोल्पाइक्तु। मिनु यहोसुमी मेको आन तौ आन कली खोइक्तीक चिनु खोइक्पाइक्तु। मारदे हना लांमी गाक्तीके मेको आन कली खोइक्तीक चिनु मखोइश्शो बाक्तेक्म।

8 मिनु नेल्ल मुर आन कली खोइक्तीक चिनु खोइक्ने थुम्मे नोले, मेकोपुकी खोइश्शो गार मसाम सम्म आन बाक्तीकेमी बाक्शो बाक्तेक्म। 9 मिनु परमप्रभु यावेमी यहोसु कली “मुलाक्त डा नाक्ती इजीप्त डा इन मुने नेल्ल क्याम्ताक्ड” देंत। मोपतीके मुलाक्त सम्म मेको आन बाक्शो बाक्तीके कली गिल्गाल देशो बाक्नीम। यहोसु ४:१९

पास्सा चाड मानेशो

10 इस्राएलीपुकी गिल्गाल सहरम बाक्शो बाक्तेक्म। मिनु मेकोपुकीमी महिना डा १४ नाक्ती पास्सा चाड मानेक्मेक्म। मेको यरीको डा दिंमम बाक्शो बाक्तेक्म। प्रस्थान १२:६, ३९; लेवी २३:१०, १४; २राजा २३:२१:२२; होसे ९:१५ 11 पास्सा चाड आ दीसा नाक्ती मेकोपुकीमी मेको रागी डा सिश्शो अन्न रे पा बोरब ओख्ती मसुप्शो शोब्ले नु कारशो अन्न जाम्तेक्म। 12 मेको रागी डा अन्न जामे नोले, आ दीसा नाक्त रे मन्ना शोब्ले यिचा नांइसाक्व। मेकोपुकीमी मेको नाक्त रे कनान रागी डा अन्न जाम्तेक्म। प्रस्थान १६:३५

स्वर्ग डा गेय पाइब नु यहोसु

13 यहोसु यरीको आ नेक्था बाक्मेनु, मेको आ डोंइती गुइमी तरवार शेशा मुर का दोक राप्शो ताप्तु। मिनु यहोसु मेको आ नेक्था लशा “गे आंइ मुर ननी देय आंइ जोरी सत्रु आ मुर ननी?” दे हिल्लो पाप्तु। गन्ती २२:२३, ३१ 14 मिनु मेकोमी “ममाइ, गो परमप्रभु यावे आ फौज आन कली चलेब नड। मोपतीके जाक्ती” देंत। मिनु यहोसुमी गु बाप्शा सेउ पशा “आं प्रभु, गो इन गेय पाइब नड। आं कली मार लोव्र पाइनीनी?” दे हिल्लो पाप्तु। 15 मिनु परमप्रभु यावे आ फौज आन कली चलेबमी यहोसु कली “इ लिक्शो जुत्ता प्रुतो। मारदे हना इ बाक्शो परमप्रभु यावे आ बाक्तीक बाक्ब” देंत। मिनु यहोसुमी मेको आ देशो खोदेशो पा आ जुत्ता पुइक्तु। प्रस्थान ३:५

6

यरीको सहर कली ग्राचशो

1 मिनु यरीको डा मुरपुकीमी इस्राएली आन कली तशा, आन गारो डा ठेयब लाप्चो चोक्तेक्म। मिनु सुइ मुर सहर रे खिंडगा लाडगा मपाम।

2 मिनु परमप्रभु यावेमी यहोसु कली “गो यरीको, मेकेर डा पिप नु मेकेर डा लडाइ पाइब नेल्ल इ कली गेता। 3 मोपतीके ६ नाक्त सम्म, नाक्तीमी खेयप का इ लडाइ पाइब वोंइश मुर नेल्ल आन कली मेको यरीको सहर एर ओंथ हिरपतो। 4 मिनु ७ जना चढेब ७ ओटा ताप्तीक ग्रोव्र कुरशा, परमप्रभु यावे आ सल्ला पतीक सन्दोस कुरशो चढेब आन डोंइडोंइती गाक्चा माल्नीम। मिनु ७ नाक्तीमी गे ७ खेयप मेको सहर एर ओंथ हिरचा माल्नीनी। मेना मेको ७ जना चढेबपुकीमी आन ग्रोव्र ताम्ना ताम्न गाक्चा माल्नीम। 5 मिनु मेकोपुकीमी शुश रेयके पा ग्रोव्र ताम्ना ताम्न बाक्मानु, इन मुर नेल्लेमी मेको रेयके नेन्मे नोले, ठेयब सेंदा पा ग्रीचा माल्नीम। मोपा ग्रीमानु, मेको सहर डा गारो नेल्ल ब्रेप्ब। मिनु मुर नेल्ल आंम आंम डोंइती बारशा, ब्रेश्शो गारो डोइक्चा माल्नीम” दे परमप्रभुम माइक्तु।

6 मिनू नून आ तौ यहोसुमी चढेब आन कली ब्रेशशा, मेको आन कली “परमप्रभु यावे आ कबल पशो सन्दोस कुरीन। मेको ७ जना अरु चढेबपुकी चहिं ७ ओटा ताप्तीक ग्रोव कुरशा, परमप्रभु यावे आ कबल पशो सन्दोस कुरब आन डोंइती गाकपतीन” देंत। 7 मिनू मेकोमी मुर आन कली “गे यो सहर एर ओंथ हिरसीन। मिनू या कुरशो मुरपुकी परमप्रभु यावे आ कबल पशो सन्दोस आ डोंइडोंइती गाक्चा माल्नीम” देंत।

8 मिनू यहोसुमी देशो खोदेशो पा मेको ७ जना चढेब परमप्रभु यावे आ डोंइती ताप्तीक ग्रोव कुरशा, ताम्ना ताम्न गाक्तेकम। मिनू परमप्रभु यावे आ कबल पशो सन्दोस कुरबपुकी मेको आन नोले खोइक्तेकम। 9 मिनू या कुरब चहिं ग्रोव ताप्ब चढेब आन डोंइडोंइती गाक्तेकम। मिनू मुर नेल्ल सन्दोस आ नोनोले गाक्तेकम। चढेबपुकी ताप्तीक ग्रोव ताम्ना ताम्न गाक्तेकम।

10 मिनू यहोसुमी नोनोले गाक्ब मुर आन कली “गे काइ मग्रीडीन। इन सेंदा काइ मनेंसेकल। सिक्सी पा गाक्कीन। तेको नाक्त गो इन कली ‘ग्रीडीन’ देंनुडा, मेको नाक्त ला वाइ ब्रेशशा ग्रीचा माल्नीनी” दे माइक्तु। 11 मोपा मेकोपुकी परमप्रभु यावे आ कबल पशो सन्दोस नाक्त कामी खेयप का सहर आ एर ओंथ हिरताकम। मिनू मुर नेल्ल आन बाक्तीकेमी लशा, बास बाक्तेकम।

12 मिनू यहोसु सुनी कना बोक्त। मिनू चढेबपुकीमी परमप्रभु यावे आ कबल पशो सन्दोस कुरतेकम। 13 मिनू परमप्रभु यावे आ कबल पशो सन्दोस आ डोंइती गाक्ब ताप्तीक ग्रोव कुरब ७ जना चढेबपुकीमी ग्रोव ताम्ना ताम्न गाक्तेकम। या कुरब मेको आन डोंइडोंइती गाक्तेकम। अर्को नेल्ल परमप्रभु यावे आ कबल पशो सन्दोस आ नोले मेको ताप्शो नेंना नेंन खोइक्तेकम। 14 मोपा आ दीसा नाक्त यो खेयप का सहर आ एर ओंथ हिरताकम। मिनू आन बाक्तीकेमी लेत्तेकम। मोपा ६ नाक्त सम्म मोदेशो पाम्तेकम।

यरीको सहर डा गारो ब्रेशशो

15 मिनू मेको आ ७ नाक्ती नां सोव्रचा क्येडा डोंइती बोक्शा, डोंइती डा खोदेशो पा मेको सहर एर ओंथ हिरसाकम। तन्न मेको नाक्ती मेकोपुकीमी मेको सहर ७ खेयप हिरसाकम। 16 मिनू ७ खेयप हिरसीमा नोले चढेबपुकीमी ताप्तीक ग्रोव ताप्ची ना, यहोसुमी मुर आन कली “वाइ ब्रेशशा ग्रीडीन। मारदे हना परमप्रभु यावेमी एको सहर इन कली गेप्टु। 17 एको सहर नु एको आगा बाक्शो मारेइ मारेइ खतम सेल्लतीक परमप्रभु यावे केन बाक्ब। राहाब तेल्लेम नु आ खिंमी बाक्ब मुर ला ब्रोंइचा ताइनीम। मारदे हना मेकोमी आंइ सोइशशो क्यारी पाइब मुर आस कली खुइशशा प्रोंइशो बाक्त। ब्यवस्था २०:१६-१७; यहोसु २:१२-१३; हिबू ११:३१ 18 मिनू परमप्रभुमी खतम सेल्चा, देशो थोव्रक लाइक्चा मदुम्ब। होस पा बाक्कीन। गे परमप्रभु आ देशो मटिथु, मारेइ लाइक्तीनी हना, गे आंमा खतम दुम्नीनी। सुइमी मारेइ खुइ पा, इस्राएली आन बाक्तीकेम वोइक्तीनी हना, मेको खतम दुम्ब। मिनू मुर नेल्ल आन कली श्येत जपाइक्ब। लेवी २७:२८; ब्यवस्था १३:१८ 19 सुन चांदी, कांसा नु फलाम के सेल्लशो थोव्रक नेल्ल परमप्रभु यावे केन बाक्नीम। मेको परमप्रभु यावे आ शोंप वोइक्तीकेमी वोइक्चा माल्नीम” देंत। 20 मिनू मुरपुकी वाइ ब्रेशशा ग्रीतेकम। मिनू चढेबपुकीमी ग्रोव ताम्ना ताम्न बाक्तेकम। मुरपुकीमी ग्रोव ताप्शो नेंशा, शुश ग्रीतेकम। मिनू मेको गारो ब्रेत्त। मिनू मुरपुकी ग्येतथ बारशा, मेको सहर आंम के सेल्लेकम। हिबू ११:३० 21 मिनू सहर डा मीश मुर वोंइश मुर, आल, खाल्पी खाल्पा बी ब्यफ, क्यारश भेडा, गधा नेल्ल आन कली तरवारम साइक्तेकम। 22 मिनू यहोसुमी मेको क्यारी पाइब निक्शी आस कली “गे मेको तेल्लेम आ खिं लस। मिनू इस कसम जशो खोदेशो पा मेको मीश मुर नु आ खिं डा मुर नेल्ल आन कली गुंडदीस” देंत। यहोसु २:१२-१४ 23 मिनू मेको डोंइती क्यारी पाइब ठिटा निक्शी मेको आ खिं ओव्रशा, राहाब कली गुंडताकस। मेको नु आ आम आफ आ लोकब नु आ खिं डा मुर नेल्ल आन कली यो गुंडताकस। मिनू मेको आन कली इस्राएली आन बाक्तीके आ लाडगाम बाक्चा गेम्ताकस। गन्ती ३१:१९ 24 मिनू मी सुइशशा, मेको सहर नु आगा डा थोव्रक नेल्ल क्रोइक्तेकम। सुन चांदी, कांसा नु फलाम के सेल्लशो थोव्रकपुकी ला परमप्रभु यावे आ खिं डा शोंप वोइक्तीकेमी वोइक्तेकम। 25 तन्न यहोसुमी राहाब तेल्लेम नु आ खिं डा मुर आन कली प्रोंइतु। मारदे हना मेकोमी यहोसु आ यरीको सोइशशो क्यारी पाइब निक्शी आस कली खुइशशा प्रोंइशो बाक्त। मेको नाक्त रे राहाब आ खिं डा मुरपुकी इस्राएली आन दातेमी बाक्तेकम। मत्ती १:५; न्यायाधीस १:२५

26 मेना यहोसुमी “सुमी यरीको सहर लेंशा सेल्बा, मेको परमप्रभु यावे आ डोंइती सराप राइब। मेकोमी जग फुल्लु वोदानु, आ डोंइती जरमेशो तौ बेक्ब। मिनू आ गारो डा ठेयब लाप्चो वोदानु, आ कान्छा तौ बेक्ब” दे कसम जाप्टु। १राजा १६:३४ 27 मिनू परमप्रभु यावेमी यहोसु कली वारच पाप्टु। मेको रागी डा मुर नेल्ल मेको तुइशशा, यहोसु तशा हिंतेकम।

7

आकानमी मार मार खुइ पशो

1 मिनु इस्राएलीपुकीमी मटिथु, खतम सेल्चा माल्शो परमप्रभु यावे आ थोत्रक रे खुइ पाम्तेक्म। यहूदा आ थर डा जेराह आ युइ, जब्दी आ चच, कारमी आ तौ आकानमी मलाइक्चा थोत्रक रे पा मार मार खुइ पा लदा बाक्त। मोपतीके परमप्रभु यावे इस्राएली नेल्ल आन कली तशा चुरमाक्त। यहोसु ६:१८ 2 मिनु यहोसुमी यरीको रे बेथेल आ पूर्व बेथ-आवेन आ नेक्था ऐ सहरमी मुर आन कली सोइक्ताक्व। मिनु मेको आन कली “गेपुकी मेक लशा, मेको रागी कली क्यारी पन” दे माइक्तु। मिनु मेको मुरपुकी लशा, मेको ऐ सहर कली क्यारी पाम्तेक्म। 3 मिनु मेकोपुकीमी यहोसु बाक्तीक लेशशा जाक्शा “मुर नेल्ल ऐ सहरम लचा ममाल्नीम। निक्शी सां हजार मुर ला लशा, लडाइ पाम्तेक्म हना, ग्रानीम। नेल्ल कली श्येत मगेन। मारदे हना मेकेर शुश मुर मबाक्म” देतेक्म। 4 मोपतीके हजार सां खोइ मुर ला लाम्तेक्म। तन्न मेकोपुकी ऐ सहर डा मुरपुकी नु लडाइ बुशा, प्रोक्शा लेत्तेक्म। 5 मिनु ऐ डा मुरपुकीमी ३६ जना इस्राएली आन कली साइक्तेक्म। मेकोपुकीमी सहर डा ठेयब लाप्चो रे शेबारीम डा लुक्च लतीक लां सम्म खेदा पा, मेको आन कली साइक्तेक्म। मिनु इस्राएली आन थुं लुक्च लशा, शुश हिंतेक्म।

6 मिनु यहोसु नु इस्राएल डा खाल्पापुकीम सुर्ता पा आंम वा खाक्शा, पियामी फुरक फुइशशा, परमप्रभु यावे आ कबल पशो सन्दोस आ नेक्था पोक्च थेक्शा, मेकेर नाक्दो सम्म बाक्तेक्म। 7 मिनु यहोसुमी “परमप्रभु, परमप्रभु यावे, मारदे गे मेको मुर आन कली यर्दन खोला शोक्चा गेनी? मारदे गे आंइ कली एमोरी आन गुइमी साइक्चा कली गेनी? गो यर्दन आइक्ची हांबु ठीक पा बाक्शो नकी। 8 परमप्रभु, इस्राएली आन जोरी सत्रु रे प्रोक्चा माल्तेक्म। गो मुल मार पाइनुडा डा? 9 मारदे हना कनानीपुकी नु एको रागी डा मुर नेल्लेमी एको लोत्र नेंशा, आंइ कली पुम्नीम। मिनु आंइ नें रागी रे पा क्याम्नीम। मिनु गे इन ठेयब नें आ पर्बम मार पाइनीनी?” दे परमप्रभु यावे कली लोत्र पाप्तु। प्रस्थान ३२:१२

10 मिनु परमप्रभु यावेमी यहोसु कली “बोक्को। गे मारदे इ कुल खुक्शा, बाप्शा बाक्नेवे? 11 इस्राएलीपुकीमी पाप पाम्तेक्म। मेकोपुकीमी आं माइशो ‘पचा माल्ब’ दे पशो कबल प्रोइतेक्म। खतम सेल्चा माल्शो थोत्रक खुइ पा लाइशशा, आंम थोत्रक नु ब्वाइशशा, खुइशशा चोइक्तेक्म। 12 मोपतीके इस्राएली आन जोरी सत्रु आन कली तशा, प्रोक्नीम। मारदे हना मेकोपुकी यो खतम सेल्चा माल्शो दुम्शो बाक्नीम। मेको आन खतम सेल्चा माल्शो खुइशशा थोत्रक इन दाते रे मगुंइताक्नी हना, गो गे नु मबाक्नुड। 13 बोक्को। मुर आन कली आं डोंइती ठीक सेल्पतो। मिनु मेको आन कली गे दीसा कली परमप्रभु यावे आ डोंइती ठीक सेल्सीन। मारदे हना परमप्रभु यावे, इस्राएली आन परमप्रभुमी इन दातेमी खतम सेल्चा माल्शो थोत्रक बाक्नीम। मेको मगुंइताक्वी हना, इन जोरी सत्रु क्येडा ग्राने मचाप्नीनी। यहोसु ३:५ 14 मिनु गे सुनी कना थर थर डा मुरपुकी बुक्शा, जाक्चा माल्नीनी। मिनु परमप्रभु यावेमी तेको थर कली कोंइबा, मेको थर डा नेल्ल खिं खिं डा मुरपुकी जाक्चा माल्नीम। मिनु परमप्रभु यावेमी तेको खिं डा मुर कली कोंइबा, मेको आ खिं खिं डा मुर आन डोंइती जाक्चा माल्नीम। मिनु परमप्रभु यावेमी तेको खिं कली कोंइबा, मेको खिं रे का का पा वोंइश मुरपुकी मुर आन डोंइती जाक्चा माल्नीम। 15 मिनु तेको मुर नु खुइ पशो थोत्रक बाक्बा तुंडसीब, मेको नु आ मारेइ मारेइ मीम हुम्चा पुंडसीब। मारदे हना मेकोमी परमप्रभु यावे आ देशो मटिथु, इस्राएली आन दातेमी काइ मरिम्शो ग्रांरा दिशो गेय पाप्तु” दे माइक्तु।

16 मिनु यहोसुमी सुनी कना बोक्शा, इस्राएली नेल्ल आन कली थर थर पा बुक्पाइक्तु। मो पशोनु यहूदा आ थर कोंइचा पुंडसाक्व। १सामुएल १०:२०-२१; १सामुएल १४:४१-४२ 17 मिनु यहूदा आ खिं खिं डा मुर आन डोंइती जाक्चा माल्तेक्म। मिनु जेराह आ खिं खिं डा मुर कोंइचा पुंडसाक्म। मिनु यहोसुमी जेराह आ खिं खिं डा मुर आन कली आ डोंइती जाक्पाइक्तु। मेको रे जब्दी आ खिं डा मुर कोंइचा पुंडसाक्व। गन्ती २६:२० 18 मिनु यहोसुमी मेको आ खिं डा वोंइश मुर का का पा मुर आन डोंइती जाक्पाइक्तु। मोपा जाक्मानु, यहूदा आ थर डा जेराह आ युइ, जब्दी आ चच, कारमी आ तौ आकान कोंइचा पुंडसाक्व।

19 मिनु यहोसुमी आकान कली “आं तौ, परमप्रभु यावे, इस्राएली आन परमप्रभु कली ठेयब सेलो। मार मार पवी, मेको कली देनो। इ पशो आं कली देनो। लोत्र का यो मखुइक्तो” देत। 20 मिनु आकानमी यहोसु कली “थमा, गो परमप्रभु यावे, इस्राएली आन परमप्रभु आ डोंइती पाप पाता। गो मार पाता देशा हना, गन्ती २१:७; न्यायाधीस १०:१०; १सामुएल ७:६; भजन संग्रह ५१:५-६ 21 गो खतम सेल्चा माल्शो थोत्रक रे पा शिनार रागी डा रिम्शो फेक्तीक वा, सहे निक्शी शेकेल चांदी नु ५० शेकेल हेल्लो सुन के कोक्के का ताता। गो मेको साप्पा दाक्ताक्ड डा मिन लांइसाक्यी।

मिनु मेको आं ताम्बु आगाम थिम्शा वोइक्ता। मेको चांदी नेल्ल क्येडा आगाम बाक्ब” देंत। शेकेल का ११.५ ग्राम बाक्ब।

22 मिनु यहोसुमी गेय पाइब आन कली आकान आ ताम्बुम सोइक्ताक्व। मेकोपुकी दोरशा लशा, मेको आ ताम्बुमी दोशा, फेक्तीक वा नु खुइश्शो थोत्रक नेल्ल गुंडताक्म। मिनु मेको चांदी नेल्ल क्येडा आगाम बाक्त। 23 मिनु मेकोपुकीमी मेको थोत्रक गुंडशा, यहोसु नु इस्राएली नेल्ल आन बाक्तीकेम चाक्तेक्म। मिनु परमप्रभु यावे आ डोंइती वोइक्तेक्म। 24 मिनु यहोसु नु इस्राएली नेल्ल गारशा, जेराह आ खिं डा आकान नु आ खुइ पशो चांदी, फेक्तीक वा नु सुन के कोक्के, मेको आ तमी तौ मेको आ बी ब्यफ, आ गधापुकी, आ भेडापुकी, मेको आ ताम्बु नु मेको नु बाक्शो मारेइ मारेइ आकोर आ बेंसीमी लाइक्तेक्म। लेवी २४:१४-१५ 25 मिनु यहोसुमी आकान कली “गे गो आंइ कली शुश श्येत गेप्तीवी। मुलाक्ती परमप्रभु यावेमी इ कली श्येत गेब” देंत। मिनु इस्राएली नेल्लेमी मेको आन कली फुल्लुमी आप्शा साइक्तेक्म। मिनु मेको आन कली साइश्शा, मीम हुम्ताक्म। ब्यवस्था १३:१६-१७ 26 मिनु मेको आन तारी शुश फुल्लु तेल्लेक्म। मेको फुल्लु तेल्लेक्के मुलाक्त सम्म बाक्ब। मिनु नोले परमप्रभु यावे आ गाइक्चा नांइसाक्व। मिनु मेको बेंसी आ नें आकोर बेंसी वोइक्तेक्म। मेको मुल सम्म बाक्ब। यसैया ६५:१०; होसे २:१७

8

ऐ सहर कली खतम सेल्शो

1 मिनु परमप्रभु यावेमी यहोसु कली “महिनो। इ थुं लुक्च मलल। मुल लडाइ पाइब नेल्ल लाइश्शा, ऐ सहर कली लडाइ तोवो। मारदे हना गो ऐ सहर डा पिप, मेकेर डा मुरपुकी, सहर नु रागी इ कली गेता। 2 गे यरीको नु मेकेर डा पिप कली मार मार पवी, ऐ सहर नु मेकेर डा पिप कली यो मोदेशो पावो। मेक डा मारेइ मारेइ, बी ब्यफ क्यारश भेडा नेल्ल गे इन कली लांइसीन। मिनु सहर आ नोले गे हुल का मुर बाप्पाइश्शा, वोतीन” देंत। यहोसु ६:२१; ब्यवस्था २०:१०-१८ 3 मिनु यहोसु नु लडाइ पाइब नेल्ल ऐ सहर कली लडाइ तोथ, लाम्तेक्म। यहोसुमी ३० हजार लडाइ पाइब मुर आन कली योत्रशा, नाक्दो सोइक्ताक्व। 4 मिनु मेकोमी “गे मेको सहर आ नोले बाप्शा बाक्चा माल्नीनी। मेको सहर क्येडा डोन मलने। लडाइ पचा कली ठीक दुम्शा, होस पा बाक्कीन। 5 गो नु आं मुर नेल्ल सहर गे बारनीकी। मिनु मेको डोंइती खोदेशो पा आंइ कली खेदा पा गूतेक्म हना, गो प्रोक्खु पाइनीकी। 6 मेकोपुकीमी आंइ कली खेदा पा खोइक्नीम। आंइ कली खेदा पा खोदमेनु, गोपुकी मेको आन कली सहर रे शुश डोन लपाइक्चा कली आंइ कली खेदा पपाइक्नीकी। मारदे हना मेकोपुकीमी ‘इस्राएलीपुकी डोंइती डा बुदी गो आंइ कली तशा, प्रोक्ना प्रोक्न बाक्नीम’ दे मिन्नीम। मोपा गो प्रोक्कानु, यहोसु ७:५ 7 गेपुकी इन बाप्तीके रे बोक्शा गूशा, सहर आंम के सेलीन। मिनु परमप्रभु यावे, इन परमप्रभुमी मेको सहर इन कली गेब। 8 परमप्रभु यावेमी आ देशो खोदेशो पा, सहर इन गुइमी गेवा नोले, मेको कली मी सुइक्तीन” दे मेको आन कली देंत।

9 मिनु यहोसुमी मेको आन कली सोइक्ताक्व। मिनु मेकोपुकी ऐ क्येडा पच्छिम बेथेल नु ऐ आस दातेम बाप्शा बाक्तेक्म। मिनु यहोसु मेको नाक्दो आ मुर आन दातेमी बाक्त।

10 मिनु यहोसु सुनी कना बोक्शा, आ मुर आन कली खुप्ताक्व। इस्राएल डा खाल्पा नु ऐ सहर गे लाम्तेक्म। 11 यहोसु नु बाक्शो लडाइ पाइब नेल्ल यो मेकेर लाम्तेक्म। मिनु ऐ सहर आ डोंइती जाक्तेक्म। सहर आ उत्तर गे जाक्शा बाक्तेक्म। मेको ऐ सहर नु आन दातेमी बेंसी का बाक्त। 12 मिनु डोंइती यहोसुमी ५ हजार लडाइ पाइब आन कली लाइश्शा, ऐ क्येडा पच्छिम गे बेथेल नु ऐ आस दातेम बाप्शा कली वोइक्तु। 13 मोपा ऐ सहर आ उत्तर गे शुश लडाइ पाइब आन बाक्तीकेमी बाक्मानु, पच्छिम गे मेको बाप्शो ५ हजार लडाइ पाइब बाक्तेक्म। मेको नाक्दो यहोसु नु आ मुरपुकी बेंसीम बाक्तेक्म।

14 मिनु सुनी कना ऐ डा पिपमी मेको आन कली तशा, ऐ डा लडाइ पाइब नु सहर डा वोंइश मुर नेल्ल इस्राएली नु लडाइ पथ लाम्तेक्म। पिप नु आ मुर नेल्ल अराबाह माइक्तीकेमी दिंम आ डोंइती जाक्तेक्म। तन्न सहर आ नोले मेकोपुकी बाप्शा बाक्शो बाक्नीम मतुइक्तेम। 15 मिनु यहोसु नु इस्राएली नेल्ल ब्रुशो खोदेशो पा, गोरशो रागी गे प्रोक्खु पाम्तेक्म। 16 मेको पिपमी ऐ सहर डा मुर नेल्ल आन कली ब्रेश्शा, इस्राएली आन कली खेदा पपाइक्तु। मोपा यहोसु कली खेदा पा, मेकोपुकी ऐ सहर क्येडा डोन सम्म लाम्तेक्म। 17 ऐ नु बेथेल डा वोंइश मुर नेल्लेमी इस्राएली आन कली खेदा पाम्तेक्म। खेदा मपाइब का सम्म यो मलीम। मेकोपुकी आंम सहर डा गारो आ ठेयब लाप्चो रोक्शा वोइश्शा, इस्राएली आन कली खेदा पाम्तेक्म।

18 मिनु परमप्रभु यावेमी यहोसु कली “इ गुइमी बाक्शो तरवार ऐ सहर गे कोंइशा दिंदो। मारदे हना गो मेको सहर इ कली गेनन” देत। मिनु यहोसुमी आ गुइमी बाक्शो तरवार ऐ सहर गे कोंइशा दिंताक्व। 19 मिनु यहोसुम आ तरवार दिंदानु, मेको बाप्शा बाक्ब लडाइ पाइब नेल्ल बोक्शा बारशा, ऐ सहर आगा ओव्रतेक्म। मेकोपुकी ओव्रशा, सहर कली आंम के सेल्शा, मी सुइक्ताक्म। 20 मिनु ऐ सहर डा खेदा पाइबपुकीमी बिर हिरशा, कोव्रडमेनु, आंम सहरमी कुन जुइश्शो ताम्तेक्म। मोपा कुन जुइश्शो तशा, मेकोपुकीमी एर ओंथ प्रोक्ने मचबेम। मारदे हना गोरशो रागी गे प्रोक्खु पाइब इस्राएलीपुकी लेशशा, मेकोपुकी नु लडाइ पचा गोम्तेक्म। 21 यहोसु नु इस्राएली नेल्लेमी मेको ऐ सहर बाप्शा बाक्बपुकीमी सहर आंम के सेल्शो ताम्तेक्म। सहर रे कुन जुइश्शो तामे चोटीन, मेकोपुकी बिर हिरशा, ऐ सहर डा वोंइश मुर आन कली साइक्चा गोम्तेक्म। 22 मिनु डोंइती बाप्शा बाक्बपुकी सहर रे मूतेक्म। मोपा इस्राएलीपुकीमी ऐ सहर डा मुर आन कली आन दाते पा आन एर ओंथ बाक्शा, का कली यो प्रोक्चा मगेम। नेल्ल आन कली साइक्तेक्म। 23 मिनु मेकेर डा पिप कली चहिं सेसीन ग्याइश्शा, यहोसु आ बाक्तीक चाक्तेक्म।

24 मिनु इस्राएलीपुकीमी ऐ डा मुर नेल्ल आन कली, गोरशो रागी डा दिंममी साइक्ने थुम्शा, ऐ सहर लेशशा, ओव्रशा, मेकेर बाक्शो आन कली यो तरवारमी क्योरशा साइक्तेक्म। 25 मेको नाक्ती साइक्चा पुंइसीशो मुर वोंइश मुर नु मीश मुर नेल्ल पा १२ हजार बाक्तेक्म। ऐ डा मुर नेल्ल मोशोन बाक्तेक्म।

26 मिनु यहोसुमी ऐ डा मुर नेल्ल साइक्ने मथुम्मे सम्म आ तरवार शेशा दिंशो गुइ मतोकग।

27 मिनु परमप्रभु यावेमी यहोसु कली देशो खोदेशो पा बी ब्यफ, क्यारश भेडा नु रोइश्शो मारेइ मारेइ इस्राएलीपुकीमी वोंइसाक्म। 28 मिनु यहोसुमी ऐ सहर कली चोशा, गेनायो मसेल्चा डा पा खतम सेल्लु। मोदेशो मुल सम्म बाक्ब। 29 मिनु मेकोमी ऐ डा पिप कली नां मरिक्म सम्म रवामी क्युक्शा वोइक्पाइक्तु। मिनु नां रिक्म नोले यहोसुमी पिप आ रां रवा रे शोल्शा, सहर ओव्रतीक लाप्चोम लाइश्शा ताइक्पाइक्तु। मेको आ तारी शुश फुल्लु तेल्लेक्म। मेको मुल सम्म बाक्ब। ब्यवस्था २१:२२-२३

एबाल डांडाम अरेशो लोव्र पदेशो

30 मिनु यहोसुमी परमप्रभु यावे, इस्राएली आन परमप्रभु कली एबाल डांडामी चढेतीक का सेल्लु। ब्यवस्था २७:२-८ 31 परमप्रभु यावे आ गेय पाइब मोसामी इस्राएली आन कली देशो खोदेशो पा नु मोसामी अरेशो लोव्र ब्रेक्शा किताबम ब्रेक्शो खोदेशो, मक्योरशो, फलामम मथिपाइश्शो फुल्लु खुप्शा, चढेतीक का सेल्लेक्म। मेकेर परमप्रभु यावे कली चोशा चढेतीके नु दुशा बाक्चा आ पर्वम चढेतीके चढेम्तेक्म। प्रस्थान २०:२५; प्रस्थान २४:१-८ 32 मिनु मेकेर इस्राएली नेल्ल आन डोंइती यहोसुमी परमप्रभु यावे आ अरेशो लोव्र मोसामी मुशा ब्रेक्शो खोदेशो पा, फुल्लुम मुशा ब्रेक्ताक्व। 33 मिनु इस्राएली नेल्ल, मेको नु बाक्ब अर्को रागी डा मुरपुकी, खाल्पापुकी, ठेयब मुर नु मेको आन ठेयब मुरपुकी परमप्रभु यावे आ कबल पशो सन्दोस आ नेक्था राप्शो बाक्तेक्म। मेकोपुकी परमप्रभु यावे आ सन्दोस कुरब लेवी आ थर डा चढेब गे कोव्रशा, राप्शो बाक्तेक्म। इस्राएली नु मेको नु बाक्ब अर्को रागी डा मुर नेल्ल आधी गेरीजीम डांडा गे कोव्रशा, अरु आधी एबाल डांडा गे कोव्रशा राप्शो बाक्तेक्म। मिनु परमप्रभु यावे आ गेय पाइब मोसामी अरेशो खोदेशो पा यहोसुमी इस्राएली नेल्ल आन कली आसीक गेप्तु। ब्यवस्था ११:२९; ब्यवस्था २७:१२-२६; ब्यवस्था २८:- 34 मिनु नोले यहोसुमी परमप्रभु यावे आ अरेशो लोव्र नेल्ल, आसीक नु सराप आ पर्वम ब्रेक्शो यो पढेप्तु। दोदेशो पा ब्रेक्शो बाक्मे, मोदेशो पा पढेप्तु। 35 मोसामी मार मार लोव्र अरेशा, ब्रेक्शो बाक्मे, मेको नेल्ल यहोसुमी इस्राएली नेल्ल कली पदेशा नेंपाइक्तु। मेक बाक्शो वोंइश मुर, मीश मुर, आलपुकी नु मेकोपुकी नु बाक्ब अर्को रागी डा मुर आन डोंइती नेल्ल पदेशा नेंपाइक्तु।

9

गिबोन डा मुरपुकीम जोल पशो

1 मिनु यर्दन आइक्ची हांबु पहाड नु दिंममी, ठेयब समुन्द्र आ नेक्था नु लेबानोन गे बाक्ब हित्ती, एमोरी, कनानी, परिज्जी, हिव्वी नु यबुसी आन पिपपुकीमी एको लोव्र नेंशा, 2 मेकोपुकी थुं का दुम्शा, यहोसु नु इस्राएलीपुकी नु लडाइ पचा कली बुक्तेक्म।

3 मिनु गिबोन डा मुरपुकीमी यहोसुमी यरीको नु ऐ सहर कली मार मार पवा, मेको लोव्र नेंशा, यहोसु ६:२०-२१; यहोसु ६:२६-२८ 4 मेकोपुकीमी डोन रागी रे जाक्शो खोदेशो पा बुत सेल्शा, आन गधा तारी माइत धोक्रो वोइश्शा, गाक्शो फेरशो कुशुल के अडगुर शांबु वोइक्तीक कुर पाइक्तेक्म। 5 मिनु गाक्शो माइत जुत्ता नु जेक्शो वासी फेक्साक्म।

मेको आन कुरशो बुत सोव्रशो नु बुंखी डाइशो बाक्त। 6 मिनु मेकोपुकीमी गिलगाल यहोसु आ बाक्तीकेमी जाक्शा, यहोसु नु इस्राएली नेल्ल वोंइश मुर नेल्ल आन कली “गोपुकी डोन रागी रे जाक्शो नकी। मोपतीके गोपुकी नु गारशा, कबल पने” दैतेक्म। 7 मिनु इस्राएलीपुकीमी मेको हिच्ची आन कली “गोपुकी आंइ दातेमी बाक्ब मुर बाक्नीनी, कों? गोपुकी गोपुकी नु दोपा गारने चाप्नीकी डा?” दैतेक्म। यहोसु ११:१९; प्रस्थान २३:३२

8 मिनु मेकोपुकीमी यहोसु कली “गो इन गेय पाइब नकी” दे लोत्र लेत्ताक्म। मिनु यहोसुमी मेको आन कली “गे सु ननी? ते रे जाक्शो ननी” दे हिल्लो पाप्तु। 9 मिनु मेकोपुकीमी “गो इन गेय पाइबपुकी शुश डोन रागी रे जाक्शो नकी। गोपुकी परमप्रभु यावे, इन परमप्रभु आ पर्वम शुश नैतक। मिनु इजीप्त रागीमी मार पवा मेको नेल्ल नैतक। 10 यर्दन आइक्की हांबु डा एमोरी आन पिप निक्शी, हेशबोन डा पिप सीहोन कली नु अशतारोथम बाक्ब बाशान डा पिप ओग कली मार मार पनी मेको नेल्ल नैतक। गन्ती २१:२१-३५ 11 मोपतीके आंइ ठेयब मुरपुकी नु आंइ रागी डा मुर नेल्लेमी ‘गोपुकीमी लांम जतीक बुत कुरशा, मेको आन कली गुमथ लने’ दैतेक्म। मेको आन कली ‘गो इन गेय पाइब नकी। गे गो नु कबल पा आंइ कली ब्रने, दे देनीन’ दैतेक्म। 12 इन कली गुमथ गाक्शो नाक्ती गोपुकीमी आंइ खिं रे एको शोब्ले होश कुरशो नकी। मुल सोव्रशा बुंखी डाइशो बाक्ब। 13 मिनु आंइ गाक्की ना एको अडगुर शांबुम प्रिंशो कुशुल के थैलो नक बाक्तेक्म। मुल कोव्रडीन, एको यो गाक्ने थुम्तेक्म। मेको लाइशो लां दुम्तीके आंइ फेक्शो वासी नु जुत्ता यो माइत दुम्शा जेक्तेक्म” दैतेक्म। 14 मिनु इस्राएलीपुकीमी आन चाक्शो कोसेली ताक्तेक्म, तन्न परमप्रभु यावे कली हिल्लो मपथु, जाम्तेक्म। गन्ती २७:२१ 15 मिनु यहोसुमी मेको आन कली “इन थुं नांइसीन। ब्रोंइचा ताइनीनी” दे कबल पाप्तु। मिनु मेकेर डा ठेयब मुरपुकीमी यो कसम जाम्तेक्म।

16 मिनु कबल पशो सां नाक्त नोले मेको मुर आन नेक्था डा मुर आंम दातेमी बाक्ब मुर बाक्तेक्म, दे इस्राएलीपुकीमी नैतेक्म। 17 मिनु इस्राएली गाक्शा, सां नाक्तीमी मेको आन सहर जाक्दीत्तेक्म। मेको आन सहर गिबोन, केफीरा, बेयरोथ नु किरयथ-यारीम बाक्तेक्म। 18 मिनु इस्राएलीपुकीमी मेको आन सहर कली लडाइ मतोम। मारदे हना इस्राएल डा ठेयब मुरपुकीमी मेको नु परमप्रभु यावे, इस्राएली आन परमप्रभु आ डोंइती कसम जशो बाक्तेक्म। मोपतीके मुरपुकीमी इस्राएली आन ठेयब मुर आन पर्वम गन गन पाम्तेक्म। 19 मिनु ठेयब मुरपुकीमी इस्राएली नेल्ल आन कली “गोपुकीमी परमप्रभु यावे, इस्राएली आन परमप्रभु आ नैमी कसम जाइतक। मोपतीके गो मेको आन कली ब्रोंइचा गेचा माल्नीकी। 20 मुल मेको आन कली ब्रोंइचा गेचा माल्नीकी। मोदेशो मपाइतक हना, आंइ जशो कसममी पतीके, गो सराप राइनीक” दे इस्राएली आन कली दैतेक्म। गन्ती १:५३; २सामुएल २४:१ 21 मिनु ठेयब मुरपुकीमी “मेको आन कली ब्रोंइचा गेन” दैतेक्म। मिनु मेकोपुकी इस्राएली आन शी चेप्ब नु ब्वाक्कु क्याक्ब वाइल दुम्तेक्म। ठेयब मुरुमी दोदेशो देंमे मोदेशो दुम्त।

22 मिनु यहोसुमी मेको गिबोन डा मुर आन कली ब्रेशशा “गोपुकी आंइ नेक्था गोपुकी नु बाक्ब बाक्नीनी। तन्न ‘गो डोन रागी डा नकी’ दे मारदे जोल पनी? 23 मोपा जोल पतीके मुल गोपुकी सराप रशो दुम्तीनी। गोपुकी गेना हना यो वाइल दुम्चा माल्नीनी। गोपुकी आं परमप्रभु यावे आ खिं डा शी चेप्ब नु ब्वाक्कु क्याक्ब दुम्तीनी” दैत। 24 मिनु मेकोपुकीमी यहोसु कली “परमप्रभु यावे, इ परमप्रभुमी आ गेय पाइब मोसा कली ‘रागी नेल्ल इन के दुम्ब। एको रागी डा मुर नेल्ल सतीन’ दे अरेशो तुइशो नकी। मोपतीके गो इन कली तशा शुश हिंतीके, आंइ कली प्रोंइचा कली जोल पाइतक। 25 मुल गो इन गुइमी बाक्नीकी। आंइ कली मार पशो नु रिम्शो लाक्नीनी, मोदेशोन पन” दैतेक्म। 26 मोपा यहोसुमी मेको आन कली इस्राएली आन गुइ रे पा प्रोंइतु। मिनु इस्राएलीपुकीमी मेको आन कली साइक्चा मतामे। 27 मिनु मेको नाक्त रे यहोसुमी मेको आन कली इस्राएली नेल्ल नु परमप्रभु यावे आ चढेतीक कली शी चेप्ब नु ब्वाक्कु क्याक्ब सेल्लु। मेकोपुकीम मुल सम्म मोदेशो पाइनीमी। ब्यवस्था २९:१०; १इतिहास २१:२९; २इतिहास १:३

10

नां नाइशशा बाक्शो

1 मिनु यरूसलेम डा पिप अदोनी-सेदेकमी “यहोसुमी ऐ सहर ग्राशा, खतम सेल्लु। मिनु यरीको नु मेकेर डा पिप कली पाइशो खोदेशो पा मेको ऐ सहर नु मेकेर डा पिप कली यो पाइक्तु। मिनु गिबोन डा मुरपुकी इस्राएली नु गारशा, मुल आन दातेमी बाक्शो बाक्तेक्म” दे नैतु। यहोसु ६:-; यहोसु ८:-; यहोसु ९:- 2 मिनु मेको नु आ मुर नेल्ल शुश हिंतेक्म। मारदे हना गिबोन थम ठेयब सहर, पिप आ बाक्तीक सहर खोदेशो, बाक्त। मिनु मेको ऐ सहर क्येडा ठेयब

बाक्त। मिनु मेकेर डा वोंइश मुर नेल्ल बोल्यो लडाइ पाइब बाक्तेक्म। 3 मिनु यरूसलेम डा पिप अदोनी-सेदेकमी हेब्रोन डा पिप होहाम, यरमुथ डा पिप पिराम, लाकीश डा पिप याफीया नु एग्लोन डा पिप देबीर बाक्तीकेमी लोव्र सोइक्ताक्व। 4 मिनु मेको आन कली “आं कली वारच पथ पिन। गो नेल्ल गारशा, गिबोन नु लडाइ पय। मारदे हना मेकोपुकी यहोसु नु इस्राएलीपुकी नु गारमा बाक्त” दे लोव्र सोइक्ताक्व।

5 मोपा एमोरी आन ५ जना पिप, यरूसलेम, हेब्रोन, यरमुथ, लाकीश नु एग्लोन डा पिप खुम्सीशा, आन लडाइ पाइब नेल्ल नु जाक्शा, गिबोन नु लडाइ पाम्तेक्म।

6 मिनु गिबोन डा मुरपुकीमी गिलगाल सहरम बाक्शो यहोसु कली “मुल, गे इन गेय पाइब, गो आंइ कली मप्रेदीन। गे रीब पा जाक्कीन। आंइ कली वारच पा प्रोनीन। मारदे हना पहाड रागीम बाक्ब एमोरी आन पिप नेल्ल गो नु लडाइ पचा कली खुम्सीशो बाक्नीम” दे लोव्र सोइक्ताक्म। 7 मिनु यहोसुमी आ लडाइ पाइब नेल्ल आन कली लाइशशा, गिलगाल रे लत। मिनु आ नेल्ल क्येडा बोल्यो लडाइ पाइबपुकी यो मेको नु लाम्तेक्म।

8 मोपा लमानु, परमप्रभु यावेमी यहोसु कली “मेको आन कली तशा, महिनो। मारदे हना गो मेको आन कली इन गुइमी गेता। मेको आन मुर का सम्म यो इन डोंइती राप्ने मचाप्नीम” देंत।

9 मिनु नेल्ल नाक्दो यहोसु नु इस्राएली गिलगाल रे गाक्शा, मेक जाक्दीशशा, छक लाक्चा डा पा मेको आन कली लडाइ तोम्तेक्म। 10 मिनु परमप्रभु यावेमी एमोरी डा मुर आन कली इस्राएली आन डोंइती वाम ग्याम सेल्शा, मेको आन कली गिबोन सहरम ब्रुपाइक्तु। इस्राएलीपुकीमी मेको आन कली गिबोन रे बेथ-होरोन डा ग्येत्थ लां रे पा खेदा पाम्तेक्म। आजेका नु माकेदा सम्म खेदा पा साइक्तेक्म। 11 मिनु मोपा इस्राएली आन डोंइती बेथ-होरोन रे आजेका सम्म ब्रुप्शा प्रोक्मानु, परमप्रभु यावेमी सरीड रे ठेयब मुप्स यिपाइक्तु। इस्राएलीपुकीमी तरवारमी क्योरशा बेक्शो क्येडा ठेयब मुप्सीम ख्रशा बेक्शो मुर शुश बाक्तेक्म। प्रस्थान ९:२२-२५; अय्युब ३८:२२-२३; हबकुक ३:११; २सामुएल १:१८

12 मिनु परमप्रभु यावेमी एमोरी आन कली इस्राएली आन गुइमी गेशो नाक्ती यहोसुमी परमप्रभु यावे कली इस्राएली नेल्ल आन डोंइती “नां, गे गिबोन तारी नांइसो। तास्ला, आइयालोन बेंसी तारी नाइशशा बाक्को” देंत। 13 मिनु यहोसुमी मेको आन कली क्येक्क मलेत्ता सम्म नां नु तास्ला नांइसाक्स। मेको लोव्र याशार डा किताबमी यो ब्रेक्सीशो बाक्ब। मिनु नां सरीड आ दातेमी नांइसाक्व। मिनु नां मेको नाक्त का मपेरस। 14 मोदेशो डोंइती नु नोले गेनायो मडुम्शो बाक्त। मारदे हना परमप्रभु यावेमी मुर आ लोव्र नेंशा, इस्राएली आन पर्वम लडाइ पाप्तु। 15 मिनु नोले यहोसु नु इस्राएली नेल्ल आंम बाक्तीके गिलगाल लेत्तेक्म।

एमोरी आन पिप साइशशो

16 मिनु मेको ५ जना पिपपुकी चहिं प्रोक्शा, माकेदा डा पुक्खीमी खुंइसाक्म। 17 मिनु मुरपुकीमी यहोसु कली “मेको ५ जना पिपपुकी माकेदा डा पुक्खीमी खुइशशो बाक्नीम” दे नेंपाइक्तेक्म। ब्यवस्था २१:२२-२३ 18 मिनु यहोसुमी “ठेयब ठेयब फुल्लु लोक्शा लाइशशा, मेको पुक्खी आ ओव्रतीके सुने। मिनु आ डोंइतीमी खाल पाइबपुकी वोतीन। 19 तन्न गेपुकी मो मबाक्कीन। इन जोरी सत्रु आन कली खेदा पना पन डोंइती बारीन। नेल्ल क्येडा नोले डा सम्म यो सतीन। मेको आन कली लेंशा, आन सहर ओव्रचा मगेन। मारदे हना परमप्रभु यावे, इन परमप्रभुमी मेको इन गुइमी गेशो बाक्ब” देंत। 20 मिनु यहोसु नु इस्राएलीपुकीमी मेको आन कली खतम सेल्तेक्म। का निक्शी चहिं प्रोक्शा, गारो पाइशशो सहर आगा ओव्रतेक्म। 21 मिनु मुर नेल्ल माकेदा, यहोसु आ बाक्तीकेमी, रिम्शो पा लेत्तेक्म। मेको इस्राएली आन पर्वम सुइ मुरुमी यो शुक्शी लोव्र पने मचबेम। 22 मिनु यहोसुमी “पुक्खी रोक्शा, मेको ५ जना पिप आन कली आं बाक्तीक चाक्कीन” देंत। 23 मिनु मेकोपुकीमी मेको ५ जना पिप आन कली चाक्तेक्म। यरूसलेम डा पिप, हेब्रोन डा पिप, यरमुथ डा पिप, लाकीश डा पिप नु एग्लोन डा पिप कली पुक्खी रे गुंइशा, यहोसु आ बाक्तीकेम चाक्तेक्म। 24 मिनु मेको आन कली यहोसु आ बाक्तीक चाक्मे नोले, यहोसुमी इस्राएली नेल्ल आन कली खुप्शा, लडाइ पाइब आन ठेयब मुर आन कली “एको पिप आन शुरमी इन खोइलीमी दिम्दीन” देंत। मिनु मेकोपुकीमी जाक्शा, आन खोइलीमी मेको पिप आन शुर दिम्ताक्म।

25 मिनु यहोसुमी मेको आन कली “बोल्यो नु महिंब दुमीन। मारदे हना इं परमप्रभु यावेमी गे सु नु लडाइ पाइनीनी, मेको आन कली मोदेशो पाइब” देंत। 26 मेको नोले यहोसुमी मेको ५ जना पिप आन कली तुप्शा साइशशा, ५ ओटा रवामी क्युक्पाइक्तु। मिनु नाक्दो सम्म क्युक्शा, वोइक्तेक्म। 27 मिनु नां रिक्की ना, यहोसुमी “मेको आन कली

लाइशशा, डोंइती आन खुइशशो पुक्खीमी वोतीन। मिनु मेको पुक्खी आ ओवतीकेमी ठेयब फुल्लुपुकी लाइशशा सुने” दे अरेप्टु। मिनु मेको फुल्लु मुल सम्म बाक्नीम। ब्यवस्था २१:२२-२३

कनान रागी कली ग्राशो

28 मिनु मेको नाक्ती यहोसुमी माकेदा आंम के सेल्लु। मेको सहर डा मुर नेल्ल आन कली नु मेकेर डा पिप कली तरवारमी साइवक्तु। मेकोमी मेकेर डा मुर नेल्ल आन कली खतम पोवक्तु। सुइ कली यो मप्रोन। मेकोमी यरीको डा पिप कली पशो बुदी माकेदा डा पिप कली यो पाइवक्तु।

29 मिनु यहोसु नु इस्राएली नेल्ल माकेदा रे गाक्शा, लिब्ना लाम्तेक्म। मिनु लडाइ पाम्तेक्म। 30 मिनु परमप्रभु यावेमी मेक डा मुर नु पिप कली यो यहोसु नु इस्राएली आन गुइमी गेप्टु। मेकोपुकीमी लिब्ना डा मुर नेल्ल आन कली तरवारमी साइवक्तेक्म। सुइ कली यो मप्रोनेम। यरीको डा पिप कली पशो खोदेशो मेकेर डा पिप कली यो पाम्तेक्म।

31 मिनु यहोसु नु इस्राएली नेल्ल लिब्ना रे गाक्शा, लाकीश लाम्तेक्म। मिनु लाकीश कली पुम्शा, लडाइ पाम्तेक्म। 32 परमप्रभु यावेमी लाकीश कली यो इस्राएली आन गुइमी गेप्टु। मिनु मेको आ दीसा नाक्ती यहोसुमी लाकीश आंम के सेल्लु। मिनु मेकेर डा मुर नेल्ल आन कली लिब्ना कली पशो खोदेशो पाप्टु। नेल्ल आन कली तरवारमी साइवक्तु। 33 मेना गेजेर डा पिप होराम लाकीश कली वारच पथ जावक्त। मिनु यहोसुमी मेको नु आ लडाइ पाइब नेल्ल आन कली फ्रुशा, का कली यो मप्रोइथु, ग्याइशशा साइवक्तु।

34 मिनु यहोसु नु इस्राएली नेल्ल लाकीश रे गाक्शा, एग्लोन लाम्तेक्म। मिनु मेकेर यो पुम्शा, लडाइ पाम्तेक्म। 35 मेको नाक्ती मेकोपुकीमी एग्लोन कली ग्रातेक्म। मिनु मेकेर डा मुर नेल्ल आन कली तरवारमी साइवक्तेक्म। लाकीश कली दोदेशो पामे, एग्लोन कली यो मोदेशो पाम्तेक्म।

36 मिनु यहोसु नु इस्राएली नेल्ल एग्लोन रे ग्येत्थ डोइशशा हेब्रोन लाम्तेक्म। मेकेर यो लडाइ पाम्तेक्म। 37 मिनु मेकोपुकीमी हेब्रोन सहर कली ग्राशा, मेको सहर डा पिप नु आ एर ओथ गाउं डा मुर नेल्ल आन कली तरवारमी साइवक्तेक्म। सुइ कली यो मप्रोनेम। मेकोपुकीमी एग्लोन कली पशो खोदेशो पा, नेल्ल मुर आन कली खतम पोक्तेक्म।

38 मिनु यहोसु नु इस्राएली नेल्ल देबीर गे लेशशा, मेको नु लडाइ पाम्तेक्म। 39 मेकोमी मेकेर डा सहर नेल्ल, आन पिप नु एर ओथ डा गाउं आन कली ग्रातेक्म। मुर नेल्ल आन कली खतम पोक्तेक्म। सुइ कली यो मप्रोनेम। मेकोपुकीमी हेब्रोन नु मेकेर डा पिप नु लिब्ना कली दोदेशो पामे, मोदेशो पा देबीर नु मेकेर डा पिप कली यो पाम्तेक्म।

40 मोपा यहोसुमी पहाड नेल्ल, नेगेब रागी, पच्छिम नेल्ल डा आइक्च पहाड नु आइक्च डांडा डा देम्सीलो ग्रात। पिप नेल्ल आन कली साइवक्तु। का कली यो मप्रोन। मेको ब्रोंइशो नेल्ल आन कली खतम सेल्लु। परमप्रभु यावे, इस्राएली आन परमप्रभुमी दोदेशो अरेवा, मोदेशो पाप्टु। ब्यवस्था २०:१६-१८ 41 मिनु यहोसुमी कादेश-बारनेआ, गाजा नु गोशेन रे लाइशशा गिबोन सम्म नेल्ल ग्रात। यहोसु ११:१६ 42 मिनु यहोसुमी मेको आन पिप आन कली नु आन रागी नेल्ल कली कालेम ग्रात। मारदे हना परमप्रभु यावे, इस्राएली आन परमप्रभुमी इस्राएली आन पा डा लडाइ पाप्टु। 43 मिनु नोले यहोसु नु इस्राएली नेल्ल आन बाक्तीके गिलगालमी लेत्तेक्म। यहोसु १०:१५

11

याबीन नु अरु पिपपुकी बुशो

1 मिनु हासोर डा पिप याबीनमी यहोसुमी पशो नेल्ल नेशा, मादोन डा पिप योबाब, शिम्रोन डा पिप आकशाफ, 2 उत्तर डा पहाडम बाक्ब पिपपुकी नु किन्नेरोथ डा दक्खिन डा पिप, अराबाह डा पहाडम बाक्ब आन पिप नु पच्छिमम नाफथ-डोर डांडा गे बाक्ब आन पिप, किन्नेरोथ किन्नेरेथ यो बाक्ब। 3 पूर्व नु पच्छिम डा कनानी आन पिप नु एमोरी आन पिप, हिती आन पिप, परिज्जी आन पिप, पहाड रागीम बाक्ब यबुसी आन पिप नु रागी डा हेरमोन डांडा आइदी मिस्पा रागी गे बाक्ब हिठ्ठी आन पिप, नेल्ल आन कली ब्रेशशा सोइक्ताक्व। 4 मिनु मेको पिपपुकी नु आन लडाइ पाइब मुर नेल्ल जाक्तेक्म। मेकोपुकी ठेयब समुन्द्र डा बाल्वा खोदेशो पा शुश बाक्तेक्म। मिनु मेको आन के शारापुकी नु बग्गीपुकी यो शुश बाक्तेक्म। 5 मिनु मेको पिप नेल्ल खुम्सीशा, इस्राएली नु लडाइ पचा कली मेरोम माइशशो ब्वाक्कु आ बुक्तीके आ नेक्था बाक्तेक्म।

6 मिनु परमप्रभु यावेमी यहोसु कली “मेको आन कली तशा महिनीन। मारदे हना दीसा गो मेको आन कली साइशशा, गे इस्राएली इन गुइमी गेनुड। गे मेको आन शारा आन ठेयब नारी खोइशशा, आन बग्गी आन कली मीम क्रोतो” दंत।

7 मिनु यहोसु नु आ लडाइ पाइब नेल्लेमी मेरोम माइशशो ब्वाक्कु बुक्तीके आ नेक्था जाक्दीशशा, मेकोपुकी नु लडाइ

पाम्तेक्म। 8 मिनु परमप्रभु यावेमी मेको आन कली इस्राएली आन गुडमी गेप्टु। मिनु इस्राएलीपुकीमी मेको आन कली ठेयब सहर सीदोन नु मिस्रेपोत-माइम सम्म नु पूर्ब डा मिस्पा दिंम सम्म खेदा पा साइक्तेक्म। सुइ कली यो मप्रोनेम। यहोसु १३:६ 9 मिनु यहोसुमी परमप्रभु यावेमी देंशो खोदेंशो पा, मेको आन शारा आन ठेयब नारी खोइश्शा, मेको आन बग्गीपुकी मीम क्रोइक्तु।

10 मिनु यहोसु नु इस्राएलीपुकी मेकेर रे लेशशा, हासोर ग्रातेक्म। मेकेर डा पिप कली तरवारमी साइक्तेक्म। हासोर चहिं मेको रागी डा नेल्ल क्येडा ठेयब सहर बाक्माक्त। 11 मिनु इस्राएलीपुकीमी मेकेर बाक्ब मुर नेल्ल आन कली तरवारमी साइक्तेक्म। मेकोपुकीमी नेल्ल आन कली खतम सेल्लेक्म। ब्रोंइशो का कली यो मप्रोनेम। मिनु मेकोपुकीमी हासोर सहरम मी सुइक्ताक्म। यहोसु १०:४०

12 मिनु यहोसुमी मेकेर डा पिप नेल्ल आन सहर ग्राशा, पिप नेल्ल आन कली साइक्तु। मिनु परमप्रभु यावे आ गेय पाइब मोसामी देंशो खोदेंशो पा नेल्ल आन कली खतम पोक्तु। 13 मिनु इस्राएलीपुकीमी अरु डांडाम बाक्शो सहर आन कली मक्रोदेम। यहोसुमी हासोर सहर कली ला क्रोइक्तु। 14 मिनु इस्राएलीपुकीमी मेको सहर डा मार मार थोव्रक नु बी ब्यफ, क्यारश भेडा आंम कली वोंइसाक्म। तन्न मुर नेल्ल आन कली साइक्तेक्म। नेल्ल आन कली खतम सेल्शा, का कली यो मप्रोनेम। ब्यवस्था २०:१०-१५ 15 दोपा परमप्रभु यावेमी आ गेय पाइब मोसा कली अरेशो बाक्मे, मोपा मोसामी यहोसु कली अरेशो बाक्माक्त। मिनु यहोसुमी मोदेंशोन पाप्तु। परमप्रभु यावेमी मोसा कली अरेशो लोव्र यहोसुमी का सम्म यो मप्रोन। नेल्ल रिम्शो पा टिप्तु।

16 मोपा यहोसुमी मेको रागी नेल्ल आंम के सेल्लु। तेको तेको रागी आंम के सेल्लु देंशा हना, पहाड, नेगेब नेल्ल, गोशेन नेल्ल नु दिंम डा रागी, अराबाह रागी नु इस्राएल डा ठेयब डांडा नु आ दिंम, यहोसु १०:४१ 17 सेइर ग्येत्थ लाइब हालाक माइश्शो डांडा रे पा लेबानोन डा बेसी हेरमोन डांडा आंइदी बाल-गाद सम्म ग्राशा, आंम के सेल्लु। मिनु मेकेर डा पिप नेल्ल आन कली ग्याइश्शा साइक्तु।

18 मिनु शुश नाक्त सम्म यहोसुमी मेको पिपपुकी नु लडाइ पाप्तु। 19 मिनु गिबोन डा मुर हिव्वीपुकी ला इस्राएलीपुकी नु गारशा सल्ला पाम्तेक्म। अरु सहर डा मुरपुकी मेकोपुकी नु गारथ मजाक्म। मोपतीके इस्राएलीपुकीमी सहर नेल्ल नु लडाइ पा ग्राशा, आंम के सेल्लेक्म। यहोसु ९:१५ 20 मारदे हना नेल्ल आन कली खतम सेल्चा, दे परमप्रभु यावेमी मेको नेल्ल आन थुं खकटा सेल्शा, नेल्ल खतम दुम्चा कली इस्राएलीपुकी नु लडाइ पतीक थुं गेप्टु। मिनु शिशी मपथु, नेल्ल आन कली खतम सेल्पाइक्तु। परमप्रभु यावेमी मोसा कली अरेशो खोदेंशो दुम्त। प्रस्थान ४:२१; ब्यवस्था ७:२

21 मिनु मेना यहोसुमी हेब्रोन, देबीर, आनाब नु यहूदा आन पहाड नु इस्राएली आन पहाड रागीमी बाक्ब अनाकीम डा मुर आन कली खतम सेल्लु। यहोसुमी मेको आन कली नु आन सहर नेल्ल खतम सेल्लु। यहोसु १४:६-१५; ब्यवस्था ९:२ 22 इस्राएली आन रागीमी अनाकीम डा मुर का सम्म यो मलीम। गाजा, गाथ नु अशदोदमी का निक्शी ला लीतेक्म। १सामुएल १७:४; २सामुएल २१:२२

23 परमप्रभु यावेमी मोसा कली देंशो खोदेंशो पा यहोसुमी रागी नेल्ल ग्राशा, आंम के सेल्लु। मिनु यहोसुमी इस्राएली आन थर थर डा मुर आन कली कोव्रशा, रागी रागी योक्शा गेप्टु। मिनु नोले रागी लडाइ रे नांइसाक्म। यहोसु १४:१५

12

बुशो पिप आन नें नु आन रागी

1 मिनु इस्राएलीपुकीमी यर्दन डा पूर्ब, अरनोन खोला रे हेरमोन डांडा सम्म नु पूर्ब डा अराबाह दिंम नेल्ल आंम के सेल्लेक्म। मेको बुशो पिप सु सु बाक्तेक्म देंशा हना, 2 एमोरी आन पिप सीहोन, मेको हेश्बोनमी बाक्शो बाक्माक्त। मेकोमी ते ते हुकुम पाइब बाक्माक्त देंशा हना, अरनोन खोला आ नेक्था बाक्शो आरोएर रे अरनोन खोला आ दाते रे यब्बोक खोला सम्म सासन पाइब बाक्माक्त। मेको अम्मोनी आन सांद बाक्त। मिनु मेकोमी आधा गिलाद कली यो सासन पशो बाक्माक्त। गन्ती २१:२४ 3 मिनु पूर्ब गे किन्नेरोथ माइश्शो समुन्द्र रे अराबाह दिंम नु अराबाह हिक्सी समुन्द्र, बेथ-येशीमोथ नु दक्खिन गे पिस्गा डांडा आधी रागी सम्म यो सासन पशो बाक्माक्त। 4 मेको बाशान डा पिप, ओग आ रागी बाक्त। मिनु मेको रेफाइम आन नोले डा पिप का बाक्माक्त। मेको ते ते सासन पाइबाक्माक्त देंशा हना, अशतारोथ नु एद्रेइमी सासन पाइबाक्माक्त। गन्ती २१:३३; ब्यवस्था ३:१०-११ 5 हेरमोन डांडा, साल्का, बाशान नेल्ल, गेशुरी आन सांद नु माकाथ आ मुर आन सांद सम्म नु आधा गिलाद रे लाइश्शा, हेश्बोन डा पिप सीहोन आ सांद सम्म सासन पाइबाक्माक्त।

6 परमप्रभु यावे आ गेय पाइब मोसा नु इस्राएलीपुकीमी मेको आन कली ग्राशा साइक्तेकम। मिनु परमप्रभु यावे आ गेय पाइब मोसामी रूबेन आ थर, गाद आ थर नु मनस्से आ उइक्थ थर डा मुर आन कली “मेको रागी इन के दुम्त” दे गेप्टु। गन्ती ३२:३३

7 मिनु यहोसु नु इस्राएलीपुकीमी यर्दन खोला आ पच्छिम डा पिप आन रागी तेको तेको ग्रातेकम देशा हना, लेबानोन बेंसी डा बाल-गाद, सेइर डा ग्येत्थ लां डा हालाक डांडा सम्म ग्रातेकम। मिनु डोंइती देशो खोदेशो पा यहोसुमी इस्राएली आन थर थर डा मुर गिश बाकनीम, दे कोव्रशा, मेको आन कली “मेको रागी इन के दुम्त” दे गेप्टु। मेको रागी तेको तेको बाक्तेकम देशा हना, 8 पहाड रागी, पच्छिम डा आइक्च डांडापुकी, अराबाह रागी, पहाड डा देम्सीलो, गोरशो रागी नु नेगेब बाक्तेकम। मेकेर तेको जात डा मुर बाक्तेकम देशा हना, हिती, एमोरी, कनानी, परिज्जी, हिन्वी नु यबुसीपुकी बाक्तेकम। मिनु ब्रुइब पिप तेको तेको सहर डा बाक्तेकम देशा हना, यहोसु ११:३ 9 यरीको डा पिप, ऐ डा पिप, मेको बेथेल आ नेक्था बाक्ब, यहोसु ६:२; यहोसु ८:२९ 10 यरूसलेम डा पिप, हेब्रोन डा पिप, यहोसु १०:- 11 यरमुथ डा पिप, लाकीश डा पिप, 12 एग्लोन डा पिप, गेजेर डा पिप, 13 देबीर डा पिप, गेदेर डा पिप यहोसु १३:३८; न्यायाधीस १:११ 14 होरमा डा पिप, आराद डा पिप, न्यायाधीस १:१७; गन्ती २१:१ 15 लिब्ना डा पिप, अदुल्लाम डा पिप, यहोसु १०:२९-३० 16 माकेदा डा पिप, बेथेल डा पिप, यहोसु १०:२८ 17 ताप्पुआह डा पिप, हेफेर डा पिप, यहोसु १५:५३; १सामुएल ४:१; १इतिहास ५:१६ 18 अफेक डा पिप, लशारोन डा पिप, 19 मादोन डा पिप, हासोर डा पिप, यहोसु ११:१, १० 20 शिमोन-मेरोन डा पिप, आकशाफ डा पिप, 21 तानाक डा पिप, मेगीददो डा पिप, यहोसु १७:११ 22 केदेश डा पिप, कारमेलम बाक्शो योकनाम डा पिप, यहोसु १९:३७; यहोसु १९:११ 23 नाफाथ-डोरम बाक्शो डोर डांडा डा पिप, गिल्गालम बाक्शो गोयीम डा पिप, ग्रीक लोव्रम गिल्गाल कली गालील यो देंब।उत्पत्ती १४:१९ 24 नु तिरचा डा पिप बाक्तेकम। मेको नेल्ल पा ३१ जना पिप बाक्तेकम। १राजा १४:१७

13

ग्राचा लीशो रागीपुकी

1 मिनु यहोसु शुश खाल्पा दुम्त। मिनु परमप्रभु यावेमी मेको कली “गे मुल शुश खाल्पा दुम्ते। रागी शुश इन के सेल्चा माल्शो लीशो बाक्नीम। 2 मिनु तेको तेको रागी लीशो बाक्तेकम देशा हना, पलिस्ती नु गेशुरी आन रागी नेल्ल, १सामुएल २७:८ 3 इजीप्त रागी डा पूर्व डा शीहोर खोला रे लाइश्शा इजीप्त आ उत्तर डा एक्रोन सम्म लीशो बाक्तेकम। मेको नेल्ल कनानी आन रागी बाक्ब। मिनु पलिस्ती आन ५ जना सासन पाइब आन सहर गाजा, अशदोद, अशकलोन, गाथ नु एक्रोन लीशो बाक्नीम। मिनु दक्खिन डा आव्वीम डा मुर आन रागी यो लीशो बाक्त। 4 मिनु दक्खिन गे कनानी आन रागी नेल्ल नु सीदोनी आन मेआरा रागी रे लाइश्शा, अफेक सहर एमोरी आन सांद सम्म लीशो बाक्नीम। 5 गेबाली आन रागी, लेबानोन नेल्ल नु पूर्व गे डा हेरमोन डांडा दी डा बाल-गाद रे लाइश्शा, लेबो-हमाथ सम्म लीशो बाक्नीम। 6 मिनु लेबानोन रे मिस्रेपोत-माइम सम्म पहाड डा मुर नेल्ल नु सीदोनी आन रागी लीशो बाक्नीम। गो मेको मुर नेल्ल आन कली इस्राएली आन डोंइती रे गुंडनुडमी। गोम इ कली अरेशो खोदेशो पा मेको रागी इस्राएली आन कली योक्शा गेवो। मेको रागी आंम के सेल्चा कली योक्शा गेमी। 7 मिनु एको रागी ९ थर नु मनस्से आ उइक्थ थर कली योक्शा गेवो” दे परमप्रभु यावेमी यहोसु कली देंत।

रूबेन, गाद नु मनस्से आ उइक्थ थर

8 मिनु डोंइती परमप्रभु यावे आ गेय पाइब मोसामी मनस्से आ उइक्थ थर, रूबेन आ थर नु गाद आ थर आन कली यर्दन आइक्ची हांबु पूर्वमी आन रागी गेने थुम्शो बाक्त। यहोसु १३:१५-३२ 9 तेको रागी गेशो बाक्त देशा हना, अरनोन खोला आ नेक्था बाक्शो आरोएर सहर नु दिंम आ दातेमी बाक्शो मेदेबा सहर डा दिंम दीबोन सहर सम्म डा रागी नेल्ल गेशो बाक्त। 10 मिनु हेशबोन सहरम हुकुम पाइब एमोरी आन पिप सीहोन आ सहर नेल्ल अम्मोनी आन सांद सम्म गेशो बाक्त। 11 गिलाद रागी नु गेशुरी नु माकाथी आन रागी नु हेरमोन नेल्ल नु बाशान नेल्ल रे लाइश्शा साल्का सम्म गेशो बाक्त। ब्यवस्था ३:१४; २सामुएल ३:३; २सामुएल १५:८ 12 मिनु अशतारोथ नु एट्रेइमी सासन पाइब बाशान सहरम बाक्ब ओग माइश्शो पिप आ रागी नेल्ल गेशो बाक्त। मेको पिप ओग ला रेफाइम आन दातेमी ब्रोंइशा लीशो बाक्माक्त। मोसामी मेको आन कली ग्राशा, खेरशो बाक्त। 13 तन्न इस्राएलीपुकीमी गेशुरी नु माकाथ आ मुर आन कली मखेरेम। मोपतीके मुल सम्म मेको गेशुरी नु माकाथी इस्राएली आन दातेमी बाक्शो बाक्नीम।

14 मोसामी लेवी आ थर कली ला रागी मगेवो। मारदे हना परमप्रभु यावे आ देशो खोदेशो पा परमप्रभु यावे, इस्राएली आन परमप्रभु कली चोशा चदेशो मेको आन भाग बाक्ब। यहोसु १३:३३; उत्पत्ती ४९:५; गन्ती १८:२०-२१

रूबेन आ थर डा मुर आन रागी

15 मिनु मोसामी रूबेन आ थर डा खिं खिं डा मुर गिश बाक्नीमी, दे कोव्रशा, रागी गेशो बाक्त। 16 मेको आन रागी अरनोन खोला आ नेक्था बाक्शो आरोएर सहर नु मेको दिंम आ दातेम बाक्शो सहर नु मेदेबा दिंम आ नेक्था डा रागी नेल्ल, 17 हेशबोन नु दिंम डा सहर नेल्ल, दीबोन, बामोथ-बाल नु बेथ-बाल-मेओन, 18 याहास, केदेमोथ नु मेफा-आथ, 19 किरयथ-थाइम, सिब्मा नु बेसी डा डांडामी बाक्शो सेरेथ-शाहार, 20 बेथ-पेओर, पिस्गा डा देम्सीलो, बेथ-येशीमोथ, 21 दिंम डा सहर नेल्ल नु एमोरी आन पिप सीहोन आ रागी नेल्ल गेशो बाक्त। सीहोन हेशबोनमी सासन पाइब बाक्त। मिनु मोसामी मेको कली नु मिदयान डा सासन पाइब आन कली ग्राशा साइशो बाक्त। मेको सासन पाइब सु सु बाक्तेक्म देशा हना, मिदयानमी बाक्शो एवी, रेकेम, सुर, हुर नु रेबा, सीहोनमी वोइशो सासन पाइब बाक्तेक्म। 22 मिनु इस्राएलीपुकीमी मेकोपुकी नु बेओर आ तौ बालाम, लिंक्यु कोव्रब कली यो तरवारमी साइक्तेक्म। गन्ती २२:५; गन्ती ३१:८ 23 मिनु रूबेन आ थर डा मुर आन सांद यर्दन नु आ सुर सम्म बाक्त। मेको रूबेन आ थर आन खिं खिं डा मुर आन कली गेशो सहर नु गाउंपुकी एकोन बाक्तेक्म।

गाद आ थर डा मुर आन रागी

24 मिनु मोसामी गाद आ थर डा खिं खिं डा मुर आन कली कोव्रशा, रागी गेशो बाक्त। उत्पत्ती ४९:१९ 25 मेको आन कली याजेर नु गिलाद डा सहर नेल्ल नु अम्मोनी आन आधा रागी, रब्बाह आ पूर्ब डा आरोएर सम्म गेशो बाक्त। 26 मिनु हेशबोन रे रामाथ-मिस्पे नु बेतोनीम सम्म नु महा-नाइम रे देबीर सहर सम्म गेशो बाक्त। 27 मिनु हेशबोन डा पिप सीहोन आ लीशो राज्य नेल्ल, दिंम बेथ-हाराम, बेथ-निम्रा, सुक्कोथ, साफोन, यर्दन नु आ सुर मेको आ सांद बाक्त। मेको आन कली यर्दन डा पूर्ब गे किन्नेरेथ समुन्द्र आ दक्खिन उइ सम्म गेशो बाक्त। 28 मेको गाद आ थर आन खिं खिं डा मुर आन कली कोव्रशा गेशो रागी डा सहर नु गाउंपुकी एकोन बाक्नीम।

मनस्से आ थर डा मुर आन रागी

29 मिनु मोसामी मनस्से आ उइक्थ थर कली रागी गेशो बाक्त। मेको आ खिं खिं डा मुर आन कली गिश बाक्नीम, दे कोव्रशा, रागी योक्शा गेशो बाक्त। 30 मेको आन रागी महा-नाइम रे लाइशशा, बाशान नेल्ल गेशो बाक्त। बाशान डा पिप ओग आ राज्य नेल्ल नु बाशान डा याइर आ सहर नेल्ल पा ६० ओटा सहर गेशो बाक्त। यहोसु १७:१; न्यायाधीस १०:३-४ 31 मिनु आधा गिलाद, अशतारोथ नु एद्रेइ बाशान डा पिप ओग आ राज्य डा सहरपुकी मनस्से आ तौ माकीर आ खिं खिं डा आधा मुर आन कली आन खिं खिं कोव्रशा गिश बाक्नीमी योक्शा गेशो बाक्त।

32 मिनु डोंइती मोसामी मेको रागी नेल्ल मोआब डा दिंमम बाक्शा योक्शा गेशो बाक्त। मेको दिंम ते बाक्शो बाक्त देशा हना, यरीको नु यर्दन आ पूर्ब गे बाक्त। 33 तन्न लेवी आ थर डा मुर आन कली तेकोइ रागी मगेम। मारदे हना परमप्रभु यावे, इस्राएली आन परमप्रभु मेको आन भाग बाक्ब। यहोसु १३:१४

14

मनस्से नु ९ थर आन रागी

1 मिनु इस्राएलीपुकीमी कनान रागी डा तेको तेको रागी आंम कली ताम्तेक्म देशा हना, चढ़ेब एलाजर, नून आ तौ यहोसु नु इस्राएल डा थर नेल्ल आन ठेयब मुरपुकीमी इस्राएली आन थर थर आन कली रागी योक्तेक्म। गन्ती ३४:१७ 2 मिनु परमप्रभु यावेमी मोसा कली दोपा अरेवा, मोपा मेको ९ थर नु उइक्थ थर आन कली रागी योक्शा गेशो बाक्त। गन्ती २६:५५ 3 मारदे हना मोसामी थर निक्शी नु उइक्थ थर आन कली यर्दन खोला आ पूर्बम रागी गेने थुम्शो बाक्त। तन्न लेवी आन कली मेको आन दातेमी तेकोइ रागी मगेशो बाक्त। यहोसु १३:१४, ३३; ब्यवस्था १०:९ 4 मिनु योसेफ आ तौ मनस्से नु एफ्राइम निक्शी थर बाक्ताक्स। तन्न लेवी आन कली रागी काइ मगेमे बाक्त। मेकोपुकी बाक्चा कली सहरपुकी नु मेको आन बी ब्यफ, क्यारश भेडा योव्रचा कली इक्का रू ला तामे बाक्त। यहोसु २१:- 5 परमप्रभु यावेमी मोसा कली दोदेशो पा अरेवा, मोदेशो पा इस्राएलीपुकीमी थर थर आन कली रागी योक्शा गेम्तेक्म।

हेब्रोन सहर कालेब कली गेशो

6 मिनु यहूदा आ थर डा वोंइश मुरपुकी यहोसु बाक्तीक गिलगालमी जाक्तेक्म। मिनु केनीज्जी यपुन्ने आ तौ कालेबमी मेको कली “परमप्रभु यावेमी कादेश-बारनेआमी आं नु इन पर्वमी परमप्रभु आ मुर मोसा कली देंशो लोव्र तुइक्नीनी। गन्ती १४:२४; ब्यवस्था १:३६ 7 गो ४० बर्स डा बाक्डानु, परमप्रभु यावे आ गेय पाइब मोसामी कादेश-बारनेआ रे एको रागी कली क्यारी पथ सोइक्ताक्व। मिनु गो क्यारी पा आं तुइशो लोव्र शोव्रशो नड। गन्ती १३:६, ३० 8 गो नु लशो लोक्बपुकीमी चहिं मरिम्शो लोव्र पा, मुर नेल्ल आन कली हिंपाइक्तेक्म। तन्न गो परमप्रभु यावे, आं परमप्रभु कली आं थुं नेल्लेमी आ नोले खोइक्ता। 9 मिनु मेको नाक्ती मोसामी आं कली कसम जशा गे ते गाक्डे, मेको रागी इ कली नु इ तौ, चच युइ आन कली गेना हना यो कली दुम्ल। मारदे हना इ थुं नेल्लेमी परमप्रभु यावे, आं परमप्रभु नोले खोइक्तीवी। 10 मिनु नेनीन, परमप्रभु यावेमी आं कली ब्रोंइचा गेप्टु। इस्राएलीपुकी गोरशो रागीमी हिरसामानु, परमप्रभु यावेमी मोसा कली एको लोव्र देंशो ४५ बर्स दुम्त। मिनु मुलाक्ती गो ८५ बर्स दुम्ती। 11 मिनु मोसामी आं कली सोइक्ची ना दोशो बोल्यो बाक्डा, मोशोन मुलाक्ती यो बोल्यो बाक्नुड। लडाइ पचा नु खिंडगा लाडगा पचा मेना दोदेंशो नडा, मुलाक्ती यो मे मोदेंशोन बाक्नुड। 12 मोपतीके एको डांडा डा रागी आं कली गेने। परमप्रभु यावेमी एको आ पर्वम मेनान देंने थुम्तु। मिनु ‘मेकेर अनाकीम डा मुर बाक्नीम। मिनु मेकेर गारो पाइशो ठेयब सहर बाक्नीम’ देंशो गे नेतीनी। मिनु परमप्रभु यावे गो नु बाक्त हना, परमप्रभु यावे आ देंशो खोदेंशो पा गो मेको आन कली खेरने चाप्नुड” देंत। यहोसु ११:२१

13 मिनु यहोसुमी मेको कली आसीक गेशा, यपुन्ने आ तौ कालेब कली हेब्रोन सहर गेप्टु। यहोसु १५:१३-१९; यहोसु २१:११-१२ 14 मोपतीके मुल सम्म केनीज्जी यपुन्ने आ तौ कालेब आ रागी हेब्रोन बाक्ब। मारदे हना मेकोमी परमप्रभु यावे, इस्राएली आन परमप्रभु कली आ थुं नेल्लेमी आ नोले खोइशो बाक्त। गन्ती ३२:१२ 15 डोंइती हेब्रोन कली किरयथ-अरबा देंशो बाक्तेक्म। मेको अरबा माइशो मुर अनाकीम डा मुर आन दातेमी नेल्ल क्येडा लाइशो मुर बाक्तेक्म। मिनु मेको रागी लडाइ रे नांइसाक्व। गन्ती १३:२२; यहोसु ११:२३

15

यहूदा आ थर डा मुर आन रागी

1 मिनु योक्शा गेशो यहूदा आ खिं खिं डा मुर आन रागी एदोम रागी रे दक्खिन जीन माइशो गोरशो रागी सम्म बाक्त। उत्पत्ती ४९:८-९; गन्ती ३४:३-५ 2 मेको आन रागी डा दक्खिन डा सांद हिक्सी समुन्द्र आ दक्खिन रे दक्खिन गे 3 अक्रब्बीम रे ग्येत्थ लाइशो जीन लाक्शा कादेश-बारनेआ आ दक्खिन रे ग्येत्थ लशा, हेस्रोन लाक्शा, अदार सम्म जाक्दीशशा, कारका सहर सम्म बाक्त। 4 मेकेर रे अचमोन लाक्शा इजीप्त डा खोला रे समुन्द्र जाक्दीशशा नुपुशो बाक्त। मेको रागी मेको आन के दक्खिन गे डा सांद बाक्त।

5 मिनु पूर्ब डा सांद चहिं हिक्सी समुन्द्र यर्दन आ ओव्रतीक सम्म बाक्त। उत्तर डा सांद यर्दन आ ओव्रतीक रे लाइशो 6 बेथ-होगला रे बेथ-अराबाह आ उत्तर लाक्शो बाक्त। मिनु मेको सांद रूबेन आ तौ बोहान आ फुल्लु सम्म ग्येत्थ लशो यहोसु १८:१७ 7 नु आकोर नें पाइशो दिंम रे देबीर नु उत्तर गे गिलगाल सम्म बाक्त। गिलगाल अदुम्मीम डा ग्येत्थ लतीक लां रे आइक्ची गे सम्म बाक्त। मेको अदुम्मीम दिंम डा दक्खिन गे बाक्ब। मेको सांद एन-शेमेश नें पाइशो खोला रे लशा, एन-रोगेल सम्म लशो बाक्त। २सामुएल १७:१७ 8 मेको सांद हिन्नोम आ तौ आ दिंम रे यबुसी आन सहर आ दक्खिन रे ग्येत्थ खोइशो बाक्त। यबुसी आन सहर यरूसलेम बाक्ब। मिनु मेकेर रे हिन्नोम दिंम डा पच्छिमम बाक्शो डांडा ग्येत्थ रे रेफाइम आन दिंम डा उत्तर सम्म लशो बाक्त। २इतिहास २८:३ 9 मेको सांद डांडा आ थेपील रे नेप्टोआह नें पाइशो ब्वाक्कु बुक्तीके जाक्दीशशा, एफ्रोन पहाड डा सहर सम्म जाक्दीशशा बाक्त। लेंशा मेको सांद मेको किरयथ-यारीम, मेको कली बालाह यो देंनीम, सम्म जाक्दीशशा बाक्त। यहोसु १५:६०; यहोसु ९:१७; यहोसु १८:१५ 10 मिनु मेको सांद बालाह रे पा सेइर पहाड सम्म पच्छिम गे हिरब। येआरीम डांडा आ उत्तर गे डा देम्सीलो रे पा बेथ-शेमेश रे लुक्च लशा, तिम्नाह सम्म बाक्त। मेको येआरीम डांडा कली केसालोन यो देंनीम। यहोसु १९:४३; न्यायाधीस १४:१ 11 मेको सांद लेंशा एक्रोन आ उत्तर गे जाक्दीशशा बाक्त। मिनु शिक्केरोन सहरमी जाक्दीशशा, बालाह डांडा लाक्शा, यब्नेलमी जाक्दीशशा बाक्त। मेको सांद समुन्द्र सम्म बाक्त। 12 पच्छिम डा सांद चहिं ठेयब समुन्द्र सम्म बाक्त। यहूदा आ थर आन खिं खिं डा मुर आन रागी एर ओंथ डा सांद एकोन बाक्नीम। यहोसु १४:६-१५; न्यायाधीस १:१०-१५

13 मिनु परमप्रभु यावेमी यहोसु कली अरेशो खोदेशो पा यहूदा आ थर डा रागी आ दातेमी यपुन्ने आ तौ कालेब कली किरयथ-अरबा गेपु। मेको कली हेब्रोन यो देंनीम। मेको अरबा अनाक आ आफ बाक्त। 14 मिनु कालेबमी हेब्रोन रे अनाक आ चच युड सां शेशै, अहीमान नु तल्लै आन कली खेरतीमी। 15 मिनु मेकेर रे देबीरमी बाक्ब मुरपुकी नु लडाइ पथ लत। डोंइती देबीर कली किरयथ-सेफेर देशो बाक्तेक्म। 16 मिनु कालेबमी “सुमी चहिं किरयथ-सेफेर लडाइ पा ग्राशा, खतम पाइबा, मेको कली आं तमी अकसा ग्युंवे पा गेनुड” देंत। न्यायाधीस १:१२ 17 मिनु कालेब आ लोकब केनाज आ तौ ओथनीएलमी मेको सहर ग्रात। मिनु कालेबमी ओथनीएल कली आ तमी अकसा ग्युंवे पा गेपु। न्यायाधीस ३:९

18 अकसा ओथनीएल नु लम नोले, अकसामी ओथनीएल कली “आं आफ नु रू का पुन” देंत। मिनु अकसा आ गधा रे तोंइसाक्व। मिनु आ आफ कालेबमी अकसा कली “मार माल्दे” दे हिल्लो पापु। 19 मिनु अकसामी “आं कली रिम्शो थोव्रक का गेन। मारदे हना गे आं कली नेगेब डा रू गेतीनी। मुल आं कली ब्वाक्कु बुक्तीके यो गेन” देंत। मिनु कालेबमी अकसा कली आइदी नु आइक्था डा ब्वाक्कु बुक्तीके गेपु।

20 मिनु यहूदा आ थर डा मुर आन खिं खिं डा मुर आन कली गेशो रागी तेको तेको बाक्नीम देशा हना, 21 यहूदा आ खिं डा मुर आन दक्खिनम बाक्शो एदोम आ सांद गे डा सहरपुकी कब्सेल, एदेर नु यागुर, 22 कीनाह, दिमोना नु अदादाह, 23 केदेश, हासोर नु इथनान, 24 जीफ, तेयलेम नु बेआलोथ, 25 हासोर-हादत्ता, केरयोथ-हेसोन, मेको कली हासोर यो देंनीम, 26 अमाम, शेमा नु मोलादा 27 हासार-गददा, हेशमोन नु बेथ-पेलेत, 28 हासार-शुआल, बेयर-शेबा नु बिज्योत्या, 29 बालाह, यीम नु एसेम, 30 एल्लोलद, केसील नु होरमा, 31 सिकलाग, मदमन्ना नु सन्सन्ना, 32 लेबाओत, शिल्हीम, ऐन नु रिम्मोन सहर बाक्नीम। मेको नेल्ल पा २९ ओटा सहर नु आन नेक्था डा गाउं नेल्ल यो बाक्नीम।

33 मिनु दिंम गे चहिं एशताओल, सोराह नु अश्ना, न्यायाधीस १३:२५; न्यायाधीस १६:३१ 34 जानोह, एन-गन्नीम ताप्पुआह नु एनाम, 35 यरमुथ, अदुल्लाम, सोकोह नु आजेका, 36 शा-आराइम, अदीथैम, गेदेराह नु गेदे-रोथैम बाक्नीम। मेको नेल्ल पा १४ ओटा सहर नु आन नेक्था डा गाउं नेल्ल यो बाक्नीम।

37 मिनु सेनान, हदाशा नु मिग्दल-गाद, 38 दिलेआन, मिस्पा नु योकतेल, 39 लाकीश, बोस्कत नु एग्लोन, 40 कब्बोन, लहमाम नु कित्लीश, 41 गेदे-रोथ, बेथ-दागोन, नामा नु माकेदा बाक्नीम। मेको नेल्ल पा १६ ओटा सहर नु आन नेक्था डा गाउं नेल्ल यो बाक्नीम।

42 लिब्ना, एथेर नु आशान, 43 इफताह, अश्ना नु नेजीब, 44 कैलाह, अकजीब नु मारेशा बाक्नीम। मेको आन बाक्तीक नेल्ल पा ९ ओटा सहर बाक्नीम। यहोसु १९:२९

45 मेको एक्रोन सहर नु आ नेक्था डा खिंपुकी नु गाउं नेल्ल, १सामुएल ५:१०; यहोसु १९:४१-४६ 46 एक्रोन आ पच्छिम गे डा समुन्द्र सम्म अश्दोद आ नेक्था डा सहर नेल्ल नु मेकेर डा गाउं नेल्ल 47 अश्दोद नु मेको आ नेक्था डा खिंपुकी नु गाउं नेल्ल, गाजा नु मेको आ नेक्था डा खिंपुकी नु गाउं नेल्ल नु इजीप्त डा खोला नु ठेयब समुन्द्र आ सुर सम्म बाक्नीम। १सामुएल ५:१; न्यायाधीस १:१८

48 मिनु पहाड डा शामीर, यत्तीर नु सोकोह, 49 दन्ना, किरयथ-सन्ना, मेको कली देबीर यो देंनीम, 50 आनाब, एश्तेमोह नु अनीम, 51 गोशेन, होलोन नु गिलोह। मेको नेल्ल पा ११ ओटा सहर नु आन नेक्था डा गाउं नेल्ल यो बाक्नीम।

52 अराब, दुमा नु एशान, 53 यानीम, बेथ-ताप्पुआह नु अफेकाह, 54 हुम्ता, किरयथ-अरबा, मेको कली हेब्रोन यो देंनीम, नु सीओर बाक्नीम। मेको नेल्ल पा ९ ओटा सहर नु आन नेक्था डा गाउं नेल्ल यो बाक्नीम।

55 माओन, कारमेल, जीफ नु युत्ता, 56 येज्जेल, योकदाम नु जानोह, 57 काइन, गिबा नु तिम्नाह बाक्नीम। मेको नेल्ल पा १० ओटा सहर नु आन नेक्था डा गाउं नेल्ल यो बाक्नीम।

58 हल्लहुल, बेथ-सुर नु गेदोर, 59 माराथ, बेथ-अनोत नु एल्लेकोन। मिनु मेको नेल्ल पा ६ ओटा सहर नु आन नेक्था डा गाउं नेल्ल यो बाक्नीम।

60 किरयथ-बाल, मेको कली किरयथ-यारीम यो देंनीम नु रब्बाह बाक्नीम। मेको नेल्ल पा सहर निक्शी नु आस नेक्था डा गाउं नेल्ल यो बाक्नीम। यहोसु ९:१७; यहोसु १८:१४

61 मिनु गोरशो रागीमी बेथ-अराबाह, मिदीन नु सेकाका 62 निब्शान, शुश हिक्सी सेल्ब आन सहर नु एन-गेदी बाक्नीम। मेको नेल्ल पा ६ ओटा सहर नु आन नेक्था डा गाउं नेल्ल यो बाक्नीम।

63 तन्न यहूदा आ खिं डा मुरपुकीमी यरूसलेम सहरमी बाक्ब यबुसी आन कली खेरने मचबेम। मोपतीके एको यबुसीपुकी मुलाक्त सम्म यरूसलेममी यहूदा आ खिं डा मुरपुकी नु काथा बाक्नीम। यहोसु १८:२८; २सामुएल ५:६-७

16

योसेफ आ तौ एफ्राइम आ रागी

1 मिनु योक्शा गेशो योसेफ आ खिं खिं डा मुर आन रागी तेको तेको बाक्तेक्म देशा हना, यरीको आ नेक्था डा यर्दन रे यरीको खोला आ पूर्व रे ग्येत्थ लाइब गोरशो रागी लाक्शा, बेथेल डा पहाड रागी सम्म बाक्त। उत्पत्ती ४९:२२
2 बेथेल कली लूज यो देनीम। मेकेर रे अरकी आ मुर आन रागी लाक्शा, अतारोथ सम्म जाक्दीशो बाक्त। 3 मिनु पच्छिम गे तोइशशा याफ्लेत आ मुर आन रागी रे पा आइदी डा बेथ-होरोन नु गेजेर सम्म डा समुन्द्र जाक्दीशशा नुष्शो बाक्त। 4 मिनु योसेफ आ तौ निक्शी, मनस्से नु एफ्राइम आस खिं खिं डा मुरपुकीमी आंम कली रागी ताम्तेक्म।

5 मिनु एफ्राइम आ खिं खिं डा मुर आन रागी तेको तेको बाक्तेक्म देशा हना, मेको आन के सांद पूर्व गे अतारोथ-अदार रे पा आइक्था डा बेथ-होरोन सम्म बाक्त। 6 मिनु मेको सांद ठेयब समुन्द्र सम्म लत। उत्तर गे डा मिकमेथाथ रे लाइशशा, पूर्व गे तानत-शिलो लाक्शा, पूर्व डा यानोह सम्म जाक्दीशशा बाक्त। 7 मिनु नोले यानोह रे पा अतारोथ नु नाराह सम्म तोइशशा यरीको जाक्दीशशा, यर्दन सम्म बाक्त। 8 मेको सांद ताप्पुआह रे पा लाइशशा पच्छिम गे कानाह खोल्सा सम्म लशा समुन्द्रमी जाक्दीशशा नुष्शो बाक्त। मेको एफ्राइम आ खिं खिं डा मुर आन रागी बाक्ब। 9 एको क्येडा लाक्शा मनस्से आ खिं डा मुर आन दातेमी एफ्राइम आ खिं डा मुर आन कली यो सहर नु गाउंपुकी गेशो बाक्त। यहोसु १७:९ 10 तन्न मेकोपुकीमी गेजेर सहरमी बाक्ब कनानी आन कली मखेरेम। मोपतीके कनानीपुकी मुल सम्म एफ्राइम आ मुर आन दातेमी बाक्नीम। मेकोपुकी वाइलीम वाइल दुम्शा बाक्शो बाक्नीम। न्यायाधीस १:२९; १राजा ९:१६

17

मनस्से आ थर डा मुर आन रागी

1 मिनु योसेफ आ ठेयब तौ मनस्से नु मनस्से आ ठेयब तौ माकीर कली योक्शो रागी गिलाद नु बाशान बाक्माक्त। गिलाद आ किकी पिपी बाक्माक्त। मेकोपुकी बोल्यो लडाइ पाइब बाक्तेक्म। यहोसु १३:३१; गन्ती २६:२९ 2 मिनु मेको योव्रशो रागी मनस्से आ लीशो मुर आन कली बाक्त। मिनु मेको लीशो मुर सु सु बाक्तेक्म देशा हना, अबीएजेर आ खिं डा मुर, हेलेक आ खिं डा मुर, अस्त्रीएल आ खिं डा मुर, शेकेम आ खिं डा मुर, हेफेर आ खिं डा मुर नु शेमीदा आ खिं डा मुर बाक्तेक्म। मेकोपुकी योसेफ आ चच युइ आन खिं खिं डा मुर बाक्तेक्म। न्यायाधीस ६:११,२४; न्यायाधीस ८:३२

3 तन्न मनस्से आ तौ माकीर, मेको आ तौ गिलाद, मेको आ तौ हेफेर नु मेको आ तौ सेलोफेहाद के तमीपुकी ला बाक्तेक्म, तौ मबाक्म। मेको आ तमीपुकी महलाह, नोआह, होग्ला, मिल्का नु तिरचा बाक्तेक्म। गन्ती २६:३३; गन्ती २७:१-८; गन्ती ३६ 4 मेकोपुकीमी चढ़ेब एलाजर, नून आ तौ यहोसु नु ठेयब मुर आन डोंइती जाक्शा “आंइ कली आंइ लोक्ब आन दातेमीन रागी गेचा, दे परमप्रभु यावेमी मोसा कली अरेशो बाक्ब” देतेक्म। मिनु यहोसुमी मेको आन कली, परमप्रभु यावे आ देशो खोदेशो पा, आन बोडो बकान्छा आन दातेमी रागी गेप्तु। 5 मिनु मनस्से कली १० ओटा रागी गेम्तेक्म। मिनु मेको कली यर्दन आ पूर्व डा गिलाद नु बाशान रागी यो तेम्शा गेम्तेक्म। 6 मारदे हना मनस्से आ थर डा तमीपुकीमी यो मेको आन तौ आन दातेमीन रागी ताम्तेक्म। गिलाद रागी चहिं मनस्से आ अरु तौ आन रागी दुम्त।

7 मनस्से आ रागी आशेर रे लाइशशा शेकेम आ पूर्व डा मिकमेथाथ सम्म बाक्शो बाक्त। मेको सांद दक्खिन गे लशा एन-ताप्पुआह सहरमी बाक्ब आन रागी सम्म जाक्दीशशा बाक्त। 8 मिनु ताप्पुआह आ एर ओंथ डा रागी मनस्से के बाक्त। तन्न मनस्से आ सांदमी बाक्शो ताप्पुआह सहर चहिं एफ्राइम आ खिं डा मुर आन के बाक्त। 9 मेको सांद दक्खिन गे कानाह खोला सम्म जाक्दीशशा बाक्त। एफ्राइम आ सहर आन दातेमी मनस्से आ सहरपुकी यो बाक्तेक्म। तन्न मनस्से आ सांद चहिं खोला आ उत्तर गे डा समुन्द्र जाक्दीशशा नुष्शो बाक्त। 10 दक्खिन गे एफ्राइम आ रागी बाक्त। मिनु उत्तर गे मनस्से आ रागी बाक्त। मनस्से थर आ रागी समुन्द्र रे लशा, उत्तर गे आशेर आ रागी नु पूर्व गे इस्साकार आ रागी सम्म जाक्दीशशा बाक्त।

11 इस्साकार नु आशेर आस रागी आस दातेमी मनस्से आ सहर नु गाउं का निक्शी यो बाक्तेक्म। मेको तेको तेको बाक्तेक्म देशा हना, बेथ-शेआन, इब्लाम नु आ एर ओंथ, एन-डोर, तानाक, मेगीददो नु एर ओंथ डा गाउंपुकी बाक्तेक्म। मेको कली डांडा सां यो देंनीम। न्यायाधीस १:२७-२८

12 मिनु मनस्से आ थर डा मुरपुकीमी मेको सहर आंम के सेल्ने मचाप्शो बाक्तेक्म। मिनु कनानीपुकी मेकेर बाक्शो बाक्तेक्म। 13 मिनु नोले इस्राएलीपुकी बोल्यो दुम्शा, मेको कनानी आन कली वाइलीम वाइल सेल्तेक्म। तन्न नेल्ल आन कली मखेरेम। यहोसु १६:१०

14 मिनु योसेफ आ खिं डा मुरपुकीमी यहोसु कली “गे मारदे आंइ कली रागी का ला गेनी? गो शुश मुर बाक्नीकी। मिनु परमप्रभु यावेमी आंइ कली शुश आसीक गेप्टु” देतेक्म।

15 मिनु यहोसुमी मेको आन कली “गेपुकी मोदेशो शुश बाक्नीनी नु एफ्राइम आ पहाड रागी इन कली आइक्च दुम्त हना, परिज्जी नु रेफाइम आन रागी डा ब्वाकी कोव्रथ लने” देत।

16 मिनु योसेफ आ खिं डा मुरपुकीमी “पहाड रागी आंइ कली मजाक्दीप्ब। मिनु दिंमम बाक्ब कनानीपुकी नु फलाम के बग्गी बाक्नीम। मिनु बेथ-शेआन, एर ओंथ डा मुरपुकी नु येजेल आ दिंममी बाक्बपुकी नु यो फलाम के बग्गी बाक्नीम” देतेक्म।

17 मिनु यहोसुमी योसेफ आ खिं डा मुर, एफ्राइम नु मनस्से आस मुर आन कली “गे शुश मुर नु बोल्यो यो बाक्नीनी। गे रागी का ला मताइनीनी। 18 गे पहाड ब्वाकी डा रागी यो ताइनीनी। मिनु लशा, मेको कली शुश लाइशो सम्म क्योव्रडीन। मिनु मेको इन के दुम्ब। मेको कनानीपुकी नु फलाम के बग्गी बाक्त हना नु बोल्यो बाक्तेक्म हना यो, गेपुकीमी मेको आन कली खेरने चाप्नीनी” देत।

18

लीशो रागीपुकी योक्शो

1 मिनु इस्राएल डा मुर नेल्ल शिलोमी बुक्तेक्म। मेकेर ग्रुम्तीक ताम्बु कीतेक्म। मेना मेको रागी मेको आन रागी दुम्शो बाक्त। न्यायाधीस २१:१९; १सामुएल १:३; येरमीया ७:१२-१५ 2 तन्न इस्राएली ७ थरपुकीमी आंम कली रागी मतशो बाक्तेक्म।

3 मिनु यहोसुमी इस्राएली आन कली “गे परमप्रभु यावे, इन किकी पिपी आन परमप्रभुमी इन कली गेशो रागी आंम के सेल्चा कली मार रिम्नीनी। 4 मुल गेपुकीमी थर थर रे सां सां मुरपुकी योव्रडीन। गो मेको आन कली रागी कोव्रथ सोइक्नुड। मिनु मेकोपुकी लशा, आंम आंम रागी दोदेशो बाक्मे, मेको ब्रेक्चा माल्नीम। मिनु नोले आं बाक्तीक लेत्चा माल्नीम। 5 मिनु गे मेको रागी कली ७ भाग पा योक्चा माल्नीनी। यहूदा दक्खिन गे आंम रागीमी बाक्ब। योसेफ आ खिं डा मुर चहिं उत्तर गे मेको आन रागीम बाक्नीम। 6 गेपुकीमी मेको रागी कली ७ भाग पा ब्रेक्स ब्रेक्ने थुम्शा नोले, आं बाक्तीक चाक्कीन। मिनु गो परमप्रभु यावे, इं परमप्रभु आ डोंइती मेको रागी इन कली योक्शा गेनन्नी। 7 तन्न लेवी आ थर डा मुरपुकीमी इन दातेमी रागी मताइनीम। मारदे हना परमप्रभु यावे आ चढेब दुम्तीकेन मेको आन भाग बाक्ब। मिनु गाद, रूबेन नु मनस्से आ उइक्थ थरमी यर्दन आ पूर्व गे आन रागी तशो बाक्तेक्म। मारदे हना परमप्रभु यावे आ गेय पाइब मोसामी मेको आन कली आन रागी गेने थुम्शो बाक्त” देत। यहोसु १३:१४, ३३

8 मिनु मेको मुरपुकी बोक्शा लशा, मेको रागी आ ब्रेक्स ब्रेक्चा गोम्तेक्म। यहोसुमी मेको आन कली दोदेशो देंमे, मोदेशो पाम्तेक्म। मिनु डोंइती यहोसुमी “लने, मेको रागी नेल्ल हिरसीन। मिनु मेको रागी आ ब्रेक्स ब्रेक्शा, आ बाक्तीक चाक्कीन। मिनु गो एक शिलोमी गे इन कली परमप्रभु यावे आ डोंइती योक्शा गेनन्नी” देत।

9 मिनु मेकोपुकी लशा, रागी नेल्ल हिरसाक्म। मिनु सहर सहर कोव्रशा, मेको रागी ७ भाग सेल्शा ब्रेक्ताक्म। मिनु यहोसु आ बाक्तीके शिलोम लेत्तेक्म। 10 मिनु यहोसुमी शिलोमी परमप्रभु यावे आ डोंइती इस्राएली थर डा खिं खिं डा मुर आन कली मेको रागी योक्शा गेप्टु।

बेन्यामीन आ मुर आन रागी

11 मिनु योव्रडमेनु, बेन्यामीन आ खिं खिं डा मुरपुकीमी आन रागी ताम्तेक्म। मेको आन रागी यहूदा थर नु योसेफ आस थर निक्शी आन दातेमी बाक्त। उत्पत्ती ४९:२७

12 मेको सांद उत्तर गे यर्दन रे पा लाइशशा यरीको आ उत्तर डा देम्सीलो लाक्शा, पच्छिम गे डा पहाड लाक्शा गोरशो रागी बेथ-आवेन सम्म जाक्दीशशो बाक्त। यहोसु ७:२ 13 मेकेर रे मेको सांद दक्खिन डा लूज डा देम्सीलो

लाकशा, अतारोथ-अदार आ आइदी जाकदीशशो बाक्त। लूज कली बेथेल यो देंनीम। मेको आ दक्खिन गे जाकदीशशा, आइदी बेथ-होरोन आ दक्खिन गे डा पहाड रे पा लुकच लशो बाक्त। उत्पत्ती १२:८; उत्पत्ती २८:१९

14 मिनु मेको सांद मेकेर डा पहाड आ डोंइती बाक्शो बेथ-होरोन आ दक्खिन पच्छिम रे पा दक्खिन गे हिरशो बाक्त। मिनु किरयथ-बाल सम्म जाकदीशशो बाक्त। किरयथ-बाल कली किरयथ-यारीम यो देंनीम। मेको यहूदा आ थर डा मुर आन सहर बाक्त। मेको पच्छिम गे बाक्ब। यहोसु १५:६-९, ६० 15 दक्खिन गे डा सांद चहिं किरयथ-यारीम आ एर ओंथ डा पच्छिम गे बाक्त। मिनु मेको सांद एफ्रोन रे नेप्तोआह आ ब्वाक्कु बुक्तीकेमी जाकदीशशो बाक्त। यहोसु १५:९ 16 नोले मेको सांद बेन-हिन्नोम दिंम आ डोंइती डा डांडा आ पुं रे लाइब। मेको रेफाइम आन दिंम डा उत्तर गे बाक्ब। मेको सांद हिन्नोम दिंम गे लशा, यबुसी आन सहर आ दक्खिन डा देम्सीलो रे पा लुकच लशा एन-रोगेलमी तोइशशो बाक्त। 17 मिनु उत्तर गे लशा, एन-शेमेश लाकशा, अदुम्मीम आ डोंइती बाक्शो गेलीलोत रे रूबेन आ तौ बोहान आ फुल्लु सम्म जाकदीशशो बाक्त। 18 मेकेर रे पा लाकशा बेथ-अराबाह आ उत्तर डा देम्सीलो रे अराबाह रागीम जाकदीशशा नुशो बाक्त। यहोसु १५:६३; न्यायाधीस १:२१ 19 मेको सांद बेथ-होग्ला आ उत्तर डा देम्सीलो लाकशा यर्दन आ दक्खिन गे बाक्शो हिक्सी समुन्द्र आ उत्तर डा ओवतीक सम्म लशो बाक्त। मेको दक्खिन गे डा सांद बाक्ब। 20 मिनु यर्दन खोला मेको आ पूर्व डा सांद बाक्ब। बेन्यामीन आ खिं खिं डा मुर आन रागी डा सांद नेल्ल एकोन बाक्नीम।

21 बेन्यामीन आ खिं खिं डा मुरपुकीमी तेको तेको सहर ताम्तेक्म देंशा हना, यरीको, बेथ-होग्ला, एमेक-केसीस, 22 बेथ-अराबाह, सेमाराइम, बेथेल, 23 आव्वीम, पारा, ओफ्रा, 24 केफार-अम्मोनी, ओप्नी, गेबा मेको आन के बाक्तीक नेल्ल पा १२ ओटा सहर नु मेको आन गाउंपुकी बाक्तेक्म।

25 गिबोन, रामाह, बेयरोथ, 26 मिस्पा, केफीरा, मोचाह, 27 रेकेम, इरपेल, तरालाह, 28 जेला, हा-एलेफ, यबुसी आन सहर, मेको कली यरूसलेम यो देंनीम, गिबा नु किरयथ-यारीम बाक्नीम। मेको आन के बाक्तीक नेल्ल पा १४ ओटा सहर नु आन गाउंपुकी बाक्तेक्म। मेको बेन्यामीन आन खिं खिं डा मुर आन रागी बाक्ब।

19

सिमियोन आ मुर आन रागी

1 मिनु नोले योव्रडमेनु, सिमियोन आ खिं खिं डा मुरपुकीमी आन रागी ताम्तेक्म। मेको आन रागी यहूदा आ खिं खिं डा मुर आन रागी आ दातेमी बाक्त। उत्पत्ती ४९:५ 2 मेको आन रागी तेको तेको बाक्त देंशा हना, बेयर-शेबा, मेको कली शेबा यो देंनीम, मोलादा, उत्पत्ती २१:१४, ३१, ३३ 3 हासार-शुआल, बलाह, एसेम, 4 एल्लोलद, बेथुल, होरमा, 5 सिकलाग, बेथ-मारकाबोथ, हासार-सूसाह, 6 बेथ-लेबाओथ नु शारूहेन मेको आन के बाक्तीक नेल्ल पा १३ ओटा सहर नु गाउंपुकी बाक्तेक्म।

7 ऐन, रिम्मोन, एथेर नु आशान। मेको आन के बाक्तीक नेल्ल पा ४ ओटा सहर नु मेकेर डा गाउंपुकी बाक्तेक्म। मेको आन एर ओंथ डा गाउं नेल्ल बालाथ-बेर, दक्खिन गे डा रामाह सम्म बाक्तेक्म। 8 मेको सिमियोन आ थर डा खिं खिं डा मुर कोव्रशा, मेको सहर नेल्ल आन एर ओंथ डा गाउं बालाथ-बेएर नु नेगेब डा रामाह सम्म बाक्ब। 9 मेको सिमियोन आ खिं खिं डा मुर आन रागी बाक्त। मिनु मेको आन रागी यहूदा आ खिं खिं डा मुर आन रे पा तशो बाक्तेक्म। मारदे हना यहूदा थर आन रागी मालशो क्येडा यो शुश बाक्माक्त। मोपतीके सिमियोन आ खिं खिं डा मुरपुकीमी मेको आन रागी यहूदा आन रागीमी ताम्तेक्म।

जबूलून आ मुर आन रागी

10 मिनु नोले योव्रडमेनु, जबूलून आ खिं खिं डा मुरपुकीमी आन रागी ताम्तेक्म। मेको आन सांद सारीद सम्म बाक्त। उत्पत्ती ४९:१३ 11 मिनु पच्छिम गे मरलाह सम्म लशा, दब्बेशेत लाकशा, योकनाम आ नेक्था डा खोला सम्म जाकदीत्त। 12 सारीद रे पा लशा, पूर्व नां दाप्तीक गे किस्लोथ-ताबोर रागी रे दाबेराथमी गूशा याफीया सम्म डोइशशा लशो बाक्त। 13 मेकेर रे मेको पूर्व गे लशा, गाथ-हेफेर नु एथ-कासीन सम्म जाकदीशशा, यो रिम्मोन सम्म गूशो बाक्त। मेको सांद नेआह सम्म जाकदीशशो बाक्त। 14 मिनु मेको सांद हन्नातोन उत्तर गे लशा, हिरशा इफताह-एल डा दिंममी जाकदीशशा नुशो बाक्त। 15 मेको सांद आगाम कात्ताथ, नहालाल, शिम्रोन, इदलाह नु बेथलेहेम यो बाक्तेक्म। मेको

आन के बाक्तीक नेल्ल पा १२ ओटा सहर नु मेकेर डा गाउंपुकी बाक्तेकम। न्यायाधीस १:३० 16 जबूलून आ खिं खिं डा मुर आन सहर नु गाउंपुकी एकोन बाक्तेकम।

इस्साकार आ मुर आन रागी

17 मिनु नोले योव्रडमेनु, इस्साकार आ खिं खिं डा मुरपुकीमी आन रागी ताम्तेकम। 18 मेको आन सहर तेको तेको बाक्तेकम देशा हना, येजेल, केसुल्लोथ नु शुनेम, २राजा ४:८ 19 हाफ्राइम, शीओन नु अनाहारथ, 20 रब्बीत, किशयोन नु एबेस, 21 रेमेथ, एन-गन्नीम, एन-हददाह नु बेथ-पस्सेस बाक्तेकम। 22 मेको सांद ताबोर, शहसूमा नु बेथ-शेमेश सम्म जाक्दीशशा, यर्दनमी नुप्शो बाक्त। मेको आन के बाक्तीक सहर नेल्ल पा १४ ओटा सहर नु मेकेर डा गाउंपुकी बाक्तेकम। 23 इस्साकार आ खिं खिं डा मुर आन सहर नु गाउंपुकी एकोन बाक्तेकम।

आशेर आ मुर आन रागी

24 मिनु नोले योव्रडमेनु, आशेर आ खिं खिं डा मुरपुकीमी आन रागी ताम्तेकम। मेको आन रागी तेको तेको बाक्तेकम देशा हना, उत्पत्ती ४९:२० 25 हेल्काथ, हाली, बेतेन नु आकशाफ, 26 अल्लाम्मेलेक, अमाद नु मिशाल बाक्तेकम। मिनु मेको सांद पच्छिममी कारमेल नु शीहोर-लिब्नाथ सम्म जाक्दीशशो बाक्त। 27 मिनु नोले पूर्व गे बेथ-दागोन गे लशा, जबूलून नु इफताह-एल डा दिम सम्म जाक्दीशशो बाक्त। मेको उत्तर गे डा बेथ-एमेक नु नेइल लशा, पेरा गे काबुल रागीमी गूशो बाक्त। 28 मिनु एब्रोन, रेहोब, हम्मोन नु कानाह सहर रे पा ठेयब सीदोन सम्म जाक्दीशशो बाक्त। 29 मिनु मेको सांद रामाह नु गारो पाइशशो टायर सहर गे हिरशो बाक्त। मेको सांद लशा, होसाह गे समुन्द्र आ नेक्था डा अकजीब सहरमी नुप्शो बाक्त। यहोसु १५:४४; न्यायाधीस १:३१ 30 उम्मा, अफेकाह नु रेहोब, नेल्ल पा मेको आन के २२ ओटा सहर नु मेकेर डा गाउंपुकी बाक्तेकम। 31 आशेर आ खिं खिं डा मुर आन सहर नु गाउंपुकी एकोन बाक्तेकम।

नाप्ताली आ मुर आन रागी

32 मिनु नोले योव्रडमेनु, नाप्ताली आ खिं खिं डा मुरपुकीमी आन रागी ताम्तेकम। उत्पत्ती ४९:२१ 33 मेको आन सांद हेलेफ, सा-अनानीममी बाक्शो ठेयब रवा, अदामी-नेकेब लाक्शा, यब्नेल रे लक्कुम सम्म लशा, यर्दनमी नुप्शो बाक्त। 34 मेको सांद पच्छिममी अच्चोथ-ताबोर रे लाइशशा, हुक्कोकमी गूशो बाक्त। मिनु मेको दक्खिन गे जबूलून सम्म, पच्छिम गे आशेर सम्म, नु पूर्व गे यहूदा आ यर्दन सम्म जाक्दीशशो बाक्त। 35 मिनु गारो पाइशशो सहरपुकी चहिं सिददीम, सेर, हम्मथ, रक्कत, किन्नेरेथ, 36 आदामाह, रामाह, हासोर, 37 केदेश, एद्रेइ, एन-हासोर 38 इरोन, मिगदल-एल, होरेम, बेथ-अनात नु बेथ-शेमेश बाक्तेकम। मेको नेल्ल पा मेको आन के १९ ओटा सहर नु मेकेर डा गाउंपुकी बाक्तेकम। न्यायाधीस १:३३ 39 मिनु मेको नाप्ताली आ खिं खिं डा मुर आन सहर नु गाउंपुकी एकोन बाक्तेकम।

दान आ मुर आन रागी

40 मिनु नोले योव्रडमेनु, दान आ खिं खिं डा मुरपुकीमी आन रागी ताम्तेकम। मेको आन रागी तेको तेको बाक्तेकम देशा हना, उत्पत्ती ४९:१६ 41 सोराह, एशताओल नु इर-शेमेश, 42 शा-आलब्बीन, आइयालोन नु इथलाह, 43 एलोन, तिम्नाह नु एक्रोन, यहोसु १५:१० 44 एल-तेके, गिब्बेथोन नु बालाथ, 45 येहुद, बेने-बेराक नु गाथ-रिम्मोन, 46 मे-यारकोन, रक्कोन नु योप्पा आ डोंइती डा रागी बाक्तेकम। योना १:३ 47 मिनु दान आ खिं खिं डा मुर मेको रागी ग्राचा कली श्येत जाम्तेकम। मिनु मेकोपुकीमी लेशेम सहरमी लशा, लडाइ पा तरवारमी मुर नेल्ल आन कली साइशशा ग्रातेकम। मेकोपुकी मेको सहरमी बाक्शा, मेको कली आंम किर्की आ नें दान वोइक्तेकम। न्यायाधीस १८:२७-२९ 48 मिनु मेको दान आ खिं खिं डा मुर आन सहर नु गाउंपुकी एकोन बाक्तेकम।

यहोसु आ रागी

49 मिनु मेकोपुकीमी रागी नेल्ल योव्रशा, योक्ने थुम्मे नोले इस्राएलीपुकीमी नून आ तौ यहोसु कली मेको आन दातेम रागी गेम्तेकम। 50 परमप्रभु यावेमी देशो खोदेशो पा यहोसुमी पुंइशो एफ्राइम डा पहाड रागी डा तिम्नाथ-सेराह सहर मेको कली गेम्तेकम। मिनु यहोसुमी सहर सेल्शा मेकेन बाक्त। यहोसु २४:३०; न्यायाधीस २:९

51 मिनु चढेब एलाजर, नून आ तौ यहोसु नु इस्राएली आन थर थर डा ठेयब मुर नेल्ल परमप्रभु यावे आ डोंइती शिलोम गुम्तीक ताम्बु आ लाप्चोमी रागी नेल्ल योक्ने थुम्तेक्म। मोपा मेकोपुकीमी रागी योक्तीके गेय यो थुम्तेक्म। यहोसु १४:१; यहोसु १८:१

20

साइक्ब प्रोक्शा बाक्तीक सहर

1 मिनु नोले परमप्रभु यावेमी यहोसु कली 2 “गेम इस्राएली आन कली ‘प्रोक्शा बाक्तीक सहरपुकी वोइक्चा माल्नीनी’ दे देंचा माल्नेवे। गो मोसा रे पा इ कली देशो खोदेशो पा पावो। गन्ती ३५:९-२९ 3 मजोक्थु, मतुइक्थु सुइमी सुइ कली साइक्बु हना, मेको साइक्ब मुर प्रोक्शा, मेको सहर लल। मेको सहर क्येक्क लेप्ब रे पा ब्रोंइतीक सहर दुम्ब।

4 मिनु मेको मोदेशो सहरमी मुर साइक्ब मुर प्रोक्त्त हना, मेको सहर डा ठेयब लाप्चोमी राप्शा बाक्चा माल्ब। मिनु सहर डा ठेयब मुर आन डोंइती आं लोत्र नेंपदल। मिनु नोले मेकोपुकीमी मेको मुर कली सहर ओत्रचा नु बाक्तीक खिं गेचा माल्नीम। मिनु मेको मुर मेकोपुकी नु बाक्चा माल्ब। 5 मिनु क्येक्क लेप्ब मुरुमी मेको मुर साइक्ब कली खेदा पाप्तु हना, मेको सहर डा मुरुमी मेको मुर साइक्ब मुर कली जिम्मा गेचा मदुम्ब। मारदे हना मेकोमी मजोक्थु मतुइक्थु साइक्बु। 6 मिनु निसाफ दुम नोले नु मेकेर डा नेल्ल क्येडा ठेयब चढेब मबेक्म सम्म मेको मुर मेको सहरमीन बाक्चा माल्ब। नोले मेको मुर आंम सहर आंम खिंमी, ते रे प्रोक्शा जाक्मे, मेकेन लेन्ने चाप्ब।

7 मिनु मेकोपुकीमी नाप्ताली आ पहाड रागी गालील डा केदेश सहर वोइक्तेक्म। एफ्राइम पहाड रागी डा शेकेम नु यहूदा आ पहाड रागी डा किरयथ-अरबा सहर वोइक्तेक्म। मेको कली हेब्रोन यो देंनीम। ग्रीक लोत्रम गिल्गाल कली गालील देंब। यहोसु १९:३७; यहोसु १५:१३ 8 यर्दन नु यरीको आ पूर्व गे रूबेन आ थर आन गोरशो रागीमी बाक्शो दिंम डा बेसेर सहर वोइक्तेक्म। गाद आ थर डा गिलाद रागीमी रामोथ सहर वोइक्तेक्म। मनस्से थर आन बाशानमी गोलान सहर वोइक्तेक्म। मेकोपुकी मोपा मुर बाक्तीक सेल्लेक्म। ब्यवस्था ४:४१-४३ 9 सुइ इस्राएली नु मेको आन दातेमी बाक्शो अर्को रागी डा मुरुमी मतुइक्थु मुर साइक्बु हना, मेको मोदेशो वोइक्शो सहरमी प्रोक्ने चाप्ब। निसाफ दुम्चा क्येडा डोंइती क्येक्क लेप्ब मुर आन गुइ रे मेको मुर साइक्चा मपुंडसेक्ल” देंत।

21

लेवी आन बाक्तीक सहरपुकी

1 मिनु लेवी थर डा ठेयब मुरपुकी, चढेब एलाजर, नून आ तौ यहोसु नु इस्राएल थर थर डा ठेयब मुर आन डोंइती बुक्तेक्म। यहोसु १४:१; गन्ती ३५:२-८ 2 मेको कनान रागी डा शिलोम बुक्शा, मेको आन कली “परमप्रभु यावेमी मोसा कली अरेशो खोदेशो पा, गे आंइ कली बाक्चा कली सहरपुकी नु आंइ बी ब्यफ आन कली योत्रतीक रूपुकी गेचा माल्नीनी” देंतेक्म। 3 मिनु परमप्रभु यावेमी अरेशो खोदेशो पा इस्राएलीपुकीमी लेवी आन कली आंम आंम रागी रे पा सहर नु बी ब्यफ, क्यारश भेडा योत्रतीक रूपुकी गेम्तेक्म।

4 मिनु योत्रडमेनु, कोहाथ आ मुर आन खिं खिं डा ग्रूतेक्म। मेकोपुकी लेवी आ थर चढेब हारून आ चच युइ बाक्तेक्म। मेकोपुकीमी यहूदा आ थर, सिमियोन आ थर नु बेन्यामीन आ थर रे पा १३ ओटा सहर ताम्तेक्म। गन्ती ३:१७-३९ 5 लीशो खिं खिं डा कोहाथ आ चच युइमी एफ्राइम आ थर, दान आ थर नु मनस्से आ उइक्थ थर रे पा १० ओटा सहर ताम्तेक्म।

6 मिनु गेरशोन आ खिं खिं डा मुर आन चच युइमी इस्साकार आ थर, आशेर आ थर, नाप्ताली आ थर नु बाशानमी बाक्ब मनस्से आ उइक्थ थर रे पा १३ सहर ताम्तेक्म।

7 मिनु मेरारी आ चच युइ आन खिं खिं डा मुरुमी रूबेन आ थर, गाद आ थर नु जबूलून आ थर रे पा १२ ओटा सहर ताम्तेक्म।

8 मिनु परमप्रभु यावेमी मोसा कली अरेशो खोदेशो पा इस्राएलीपुकीमी लेवी थर डा मुर आन कली मेको सहरपुकी नु बी ब्यफ, क्यारश भेडा योत्रतीक रू गेम्तेक्म।

9 मेकोपुकीमी यहूदा आ थर डा खिं खिं डा मुर नु सिमियोन आ थर डा खिं खिं डा मुरपुकीमी तेको तेको सहर ताम्तेक्म देशा हना, 10 लेवी आ थर डा हारून आ चच युइ, कोहाथ आ खिं खिं डा मुरपुकीमी ताम्तेक्म। मारदे हना नेल्ल क्येडा डोंइती योत्रडमेनु, मेको आन नें ग्रूत। 11 मिनु मेकोपुकीमी मेको आन कली यहूदा आ पहाड रागीमी

किरयथ-अरबा नु आ नेक्था डा योव्रतीक रूपुकी गेम्तेक्म। किरयथ-अरबा कली हेब्रोन यो देंनीम। मेको अरबा अनाक आ आफ बाक्त। यहोसु २०:७ 12 तन्न मेकोपुकीमी मेको सहर डा रूपुकी नु मेकेर डा गाउंपुकी चहिं यपुन्ने आ तौ कालेब कली गेशो बाक्तेक्म। यहोसु १४:३४; यहोसु १५:१३

13 मिनु चढेब हारून आ चच युइ आन खिं खिं डा मुरपुकीमी मुर साइक्ब मुर प्रोक्शा लशा बाक्तीक सहर हेब्रोन, लिब्ना, 14 यत्तीर, एश्तेमोआ, 15 होलोन, देबीर, 16 ऐन, युत्ता नु बेथ-शेमेश नु आन बी ब्यफ, क्यारश भेडा योव्रतीक रू नेल्ल पा मेको निक्शी थर रे ९ ओटा सहर ताम्तेक्म। १ सामुएल ६:१२, १५ 17 मिनु बेन्यामीन आ थर रे पा गिबोन नु गेवा, 18 अनाथोथ, अल्मोन नु आन बी ब्यफ, क्यारश भेडा योव्रतीक रू नेल्ल पा ४ सहर ताम्तेक्म। येरमीया १:१ 19 चढेब हारून आ चच युइ आन खिं खिं डा मुर आन के नेल्ल पा १३ ओटा सहर नु आन बी ब्यफ, क्यारश भेडा योव्रतीके दुम्त।

20 लेवी आ थर डा कोहाथ आ खिं खिं डा लीशो मुर आन कली योव्रडमेनु, एफ्राइम आ थर आ रागी रे पा तेको तेको सहरपुकी ताम्तेक्म देंशा हना, यहोसु २०:७ 21 एफ्राइम आ पहाड रागीमी मुर साइक्ब मुर बाक्तीक सहर शेकेम नु गेजेर, 22 किब्साइम नु बेथ-होरोन, नेल्ल पा ४ ओटा सहर नु आन बी ब्यफ, क्यारश भेडा योव्रतीक रू ताम्तेक्म।

23 दान आ थर रे एल-तेके, गिब्बेथोन, 24 आइयालोन, गाथ-रिम्मोन, नेल्ल पा ४ ओटा सहर नु आन बी ब्यफ, क्यारश भेडा योव्रतीक रू ताम्तेक्म।

25 मनस्से आ उइक्थ थर रे पा तानाक नु गाथ-रिम्मोन सहर निक्शी नु आन बी ब्यफ, क्यारश भेडा योव्रतीक रू ताम्तेक्म। 26 कोहाथ आ खिं खिं डा लीशो मुर आन कली १० ओटा सहर नु आन बी ब्यफ, क्यारश भेडा योव्रतीक रू गेम्तेक्म।

27 मेकोपुकीमी लेवी थर डा गेरशोन आ खिं खिं डा मुर आन कली मनस्से आ उइक्थ थर रे पा बाशानमी मुर साइक्ब मुर प्रोक्शा लशा बाक्तीक सेल्शो गोलान नु बेयश्तेराह, सहर निक्शी नु आन बी ब्यफ, क्यारश भेडा योव्रतीक रू गेम्तेक्म। यहोसु २०:८ 28 मिनु इस्साकार आ थर रे पा किश्योन, दावेराथ, 29 यरमुथ नु एन-गन्नीम, नेल्ल पा ४ ओटा सहर नु आन बी ब्यफ, क्यारश भेडा योव्रतीक रू गेम्तेक्म। 30 मिनु आशेर आ थर रे पा मिशाल नु अब्दोन, 31 हेलकाथ नु रेहोब, नेल्ल पा ४ ओटा सहर नु आन बी ब्यफ, क्यारश भेडा योव्रतीक रू गेम्तेक्म। 32 मिनु नाप्ताली आ थर रे पा गालील रागीमी मुर साइक्ब मुर प्रोक्शा लशा बाक्तीक सहर केदेश, हम्मोथ-डोर नु कारतान, नेल्ल पा सहर सां नु आन बी ब्यफ, क्यारश भेडा योव्रतीक रू गेम्तेक्म। यहोसु २०:७ 33 मेको गेरशोनी आ सहर नेल्ल पा १३ ओटा सहर नु आन बी ब्यफ, क्यारश भेडा योव्रतीक रू गेम्तेक्म।

34 मिनु लेवी आ थर डा लीशो मेरारी आ खिं खिं डा मुर आन कली जबूलून आ थर रे पा योकनाम, कारताह, 35 दीम्नाह नु नहालाल, नेल्ल पा ४ ओटा सहर नु आन बी ब्यफ, क्यारश भेडा योव्रतीक रू गेम्तेक्म। 36 मिनु रूबेन आ थर डा बेसेर नु याहास, यहोसु २०:८ 37 केदेमोथ नु मेफा-आथ, नेल्ल पा ४ ओटा सहर नु आन बी ब्यफ, क्यारश भेडा योव्रतीक रू गेम्तेक्म। 38 मिनु गाद आ थर डा मुर साइक्ब मुर प्रोक्शा लशा बाक्तीक गिलाद रागी डा रामोथ, महा-नाइम, यहोसु २०:८ 39 हेशबोन नु याजेर, नेल्ल पा ४ ओटा सहर नु आन बी ब्यफ, क्यारश भेडा योव्रतीक रू गेम्तेक्म।

40 मिनु लेवी आ लीशो मेरारी आ खिं खिं डा मुर आन कली योव्रशा १२ ओटा सहर गेम्तेक्म।

41 मिनु इस्राएली आन रागी आन दातेमी लेवी आन के ४८ ओटा सहर नु आन बी ब्यफ, क्यारश भेडा योव्रतीक रू दुम्तेक्म। 42 एको सहर नेल्ल आन एर ओंथ बी ब्यफ, क्यारश भेडा योव्रतीक रू बाक्तेक्म।

43 मोपा परमप्रभु यावेमी इस्राएली आन कली “गेनुड” दे मेको आन किकी पिपी आन कली जशो कसम खाप्तु। मिनु इस्राएलीपुकीमी मेको रागी कली आंम के सेल्शा बाक्तेक्म। उत्पत्ती १२:७ 44 मिनु परमप्रभु यावेमी इस्राएली आन किकी पिपी आन कली कसम जशो खोदेंशो पा नेल्ल रे पा नाइक्चा गेप्तु। मेको आन जोरी सत्रु नेल्ल मेको नु ब्रुम्तेक्म। परमप्रभु यावेमी मेको आन जोरी सत्रु इस्राएली नेल्ल आन गुइमी गेप्तु। ब्यवस्था १२:९-१० 45 मिनु परमप्रभु यावेमी पशो रिम्शो लोव्र का सम्म यो मली, नेल्ल खाप्तु। यहोसु २३:१४; १राजा ८:५६

22

पूर्ब डा वोंइश मुरपुकी खिं लेशो

1 मिनु यहोसुमी रूबेन आ थर, गाद आ थर नु मनस्से आ उइक्थ थर डा वोंइश मुर आन कली ब्रेत्ताक्व। 2 मिनु मेको आन कली “परमप्रभु यावे आ गेय पाइब मोसामी इन कली अरेशो नेल्ल पाइतीनी। आं अरेशो लोव्र यो नेल्ल

टीतीनी। गन्ती ३२:२०-२२; ब्यवस्था ३:१८-२० ३ गेपुकीमी शुश नाक्ती सम्म इन लोकब आन कली यो वारच पा मप्रोंइनी। मिनु परमप्रभु यावे, इन परमप्रभु कली अरेशो नेल्ल टीतीनी। ४ मुल परमप्रभु यावे, इन परमप्रभुमी आ देशो खोदेशो पा इन लोकब आन कली नाइक्चा गेशो बाक्त। मुल गेपुकी परमप्रभु यावे आ गेय पाइब मोसामी इन कली यर्दन आइक्ची हांबु गेशो इन खिं खिं लेतीन। हिब्रू ४:८ ५ मुल गे परमप्रभु यावे आ गेय पाइब मोसामी अरेशो लोव्र होस पा पने। परमप्रभु यावे, इन परमप्रभु कली दाक्तीन। मेको आ लां गाक्कीन। आ अरेशो लोव्र टिने। मेको कली मप्रोनीन। गे इन थुं नेल्लेमी परमप्रभु यावे आ गेय पने” देंत। ब्यवस्था १०:१२

६ मिनु यहोसुमी मेको आन कली आसीक गेशा, सोइक्ताक्व। मिनु मेकोपुकी आंम आंम खिं लाम्तेक्म। ७ मनस्से आ उइक्थ थर कली मोसामी बाशानमी आंम रागी गेपु। तन्न अर्को उइक्थ थर कली यहोसुमी यर्दन आ पच्छिम गे मेको आन लोकब नु गेपु। मिनु यहोसुमी मेको आन कली आंम आंम खिंम सोइक्ची ना मेको आन कली आसीक गेपु। ८ मिनु मेको आन कली “इन जोरी सत्रु रे रोइश्शो शुश शोंप नु शुश बी ब्यफ, क्यारश भेडा, शुश सुन चांदी, कांसा फलाम नु शुश वासी लाइश्शा, इन लोकब आन कली यो योक्शा गेचा माल्नीनी” देंत। गन्ती ३१:२७

९ मोपा रूबेन आ थर, गाद आ थर नु मनस्से आ उइक्थ थर डा वोंइश मुर कनान रागी डा शिलो रे इस्राएलीपुकी नु ब्राशा, गिलाद रागी लेत्तेक्म। मेको रागी परमप्रभु यावे आ देशो नु मोसा आ पतीकेमी डोंइती रे ग्राशा, आंम के सेल्शा बाक्ने थुंशो बाक्तेक्म। १० मिनु मेकोपुकी कनान रागी डा यर्दन खोला आ नेक्था गेलीलोत सहर जाक्दीत्तेक्म। मिनु मेको रूबेन आ थर, गाद आ थर नु मनस्से आ उइक्थ थरमी यर्दन खोला नेक्था थम ठेयब चढ़ेतीक का सेल्तेक्म।

११ मिनु इस्राएलीपुकीमी “रूबेन आ थर, गाद आ थर नु मनस्से आ उइक्थ थरमी कनान रागी आ सांदमी यर्दन आ नेक्था इस्राएली आन रागीमी ठेयब चढ़ेतीक का सेल्तेक्म” देशो नेतेक्म। १२ मिनु इस्राएलीपुकीमी मेको नेन्मे नोले, मेकोपुकी नु लडाइ पचा कली शिलोमी खुम्साक्म।

१३ मिनु इस्राएलीपुकीमी चढ़ेब एलाजर आ तौ फिनेहास कली गिलाद रागीमी रूबेन आ थर, गाद आ थर नु मनस्से आ उइक्थ थर आन बाक्तीकेमी सोइक्ताक्म। गन्ती २५:७ १४ मेको नु काथा इस्राएल डा नेल्ल थर रे पा १० जना ठेयब मुर आन कली यो सोइक्ताक्म। १५ मिनु मेकोपुकी रूबेन आ थर, गाद आ थर नु मनस्से आ उइक्थ थर बाक्तीक गिलाद रागी जाक्दीश्शा, मेको आन कली १६ “परमप्रभु यावे आ मुर नेल्लेमी ‘मारदे गेपुकीमी परमप्रभु यावे, इस्राएली आन परमप्रभु रे नोले शोंइसीनी? गे दोपा परमप्रभु यावे रे पा डोन लशा, मेको कली मटिथु, आंम कली चढ़ेतीक सेल्नी? लेवी १७:८-९; ब्यवस्था १२:१३-१४ १७ मार, पेओर नु पशो पापम आंइ कली मजाक्दीम्मे? मेना परमप्रभु यावे आ मुर शुश बेक्तेक्म हना यो, मेको आ पाप रे गो मुल सम्म आंम कली ठीक सेल्ने मचाप्शो बाक्नीक। गन्ती २५:१-९ १८ मुलाक्त गेपुकी परमप्रभु यावे रे नोले शोंइसीनी? गे मुलाक्ती परमप्रभु यावे कली टिचा प्रोंइतीनी हना, मेको आ दीसा इस्राएली नेल्ल आन कली तशा, गाइक्ब, दे मतुइक्तीनी? १९ मिनु आंम इन रागी ग्रांग्रा दिशो बाक्त हना, ओंथ हांबु परमप्रभु यावे आ रागी नु आ बाक्तीक पिशा, गोपुकी नु रागी योक्कीन। तन्न गे परमप्रभु यावे नु आंइ कली मटिथु, परमप्रभु यावे, इं परमप्रभु आ चढ़ेतीक क्येडा लाक्शा, आंम के चढ़ेतीक मसेलीन। २० मिनु जेराह आ तौ आकानमी मटिथु, खुइ पवानु, परमप्रभु यावे आ गाइश्शोमी नेल्ल आन कली मार दुम्मे? आकान ला मबे, इस्राएली नेल्लेमी श्येत जाम्तेक्म’ ” देंतेक्म। यहोसु ७:६-१३

२१ मिनु रूबेन आ थर, गाद आ थर नु मनस्से आ उइक्थ थरमी इस्राएल आ थर थर डा ठेयब मुर आन कली गन्ती १:१६; गन्ती १०:४ २२ “परमप्रभु यावे, नेल्ल क्येडा सक्ति पाइश्शो परमप्रभु यावेमी नेल्ल तुइक्ब। गो परमप्रभु यावे कली मटिशो बाक्तय हना, इस्राएलीपुकीमी यो मेको तुइक्तमेक्ल। मुलाक्त आंइ कली सतीन। २३ गोपुकीमी परमप्रभु यावे आ नोले खोइक्चा प्रोंइशा, आंम कली चढ़ेतीक सेल्शा, मेको चढ़ेतीकेमी चोशा चढ़ेशो, अन्न चढ़ेशो, दुशा बाक्तीक चढ़ेशो चढ़ेतय हना, परमप्रभु यावेमी आंइ कली सजाइ गेवल।

२४ तन्न ममाइ, गोपुकीमी मारदे एको चढ़ेतीक सेल्लतक देशा हना, इन चच युइमी आंइ चच युइ आन कली ‘गे परमप्रभु यावे, इस्राएली आन परमप्रभु नु मार पाइक्मुनी डा? २५ परमप्रभु यावेमी यर्दन कली गो आंइ सांद सेल्शा गेपु। गे रूबेन आ थर नु गाद आ थर परमप्रभु यावे के मबाक्नीनी। मिनु इन चच युइमी आंइ चच युइ आन कली परमप्रभु यावे कली मान पा हिंचा तेक्नीमी’ देंनीमी कों।

२६ मोपतीके गोपुकीमी ‘चढ़ेतीक का सेल्य। चोशा चढ़ेतीक नु अरु चढ़ेतीक चढ़ेचा कली ममाइ। २७ तन्न मेको चढ़ेतीक गे नु गो आंइ दातेमी नु आंइ चच युइ आन दातेमी एको चढ़ेतीक सांकछी दुम्ल। मिनु गोपुकीमी परमप्रभु यावे कली आ बाक्तीकेमी ठेयब सेल्य। मिनु मेकेर गो आंइ चोशा चढ़ेशो नु दुशा बाक्तीक चढ़ेशो चाक्शा चढ़ेनय।

मिनु इन चच युइमी गो आंइ चच युइ आन कली “गे परमप्रभु यावे आ मुर मबाक्नीनी” दे देने मचाप्नीम, दे एको चढेतीक सेल्लक। यहोसु २४:२७ 28 मिनु गोपुकीमी मेकोपुकीमी खेयप का आंइ कली कि आंइ चच युइ आन कली मोदेशो देतेक्म हना, गोपुकीमी मेको आन कली मेको आंइ किकी पिपीमी परमप्रभु यावे कली चढेतीक सेल्लो थोव्रक कोव्रडीन। चोशा चढेतीक नु अरु चढेतीक चढेचा कली ममाइ, तन्न गे नु गो इं दातेमी सांकछी दुम्ल’ दे सेल्लक।

29 मिनु गोपुकीमी थमा पा मुलाक्ती परमप्रभु यावे कली मटिथु, मेको आ नोले खोइक्चा प्रोंइशा एको चढेतीक मसेल्लक। मेको चढेतीकेमी चोशा चढेतीक, अन्न चढेतीक नु अरु चढेतीक चढेचा कली यो मसेल्लक। परमप्रभु यावे, आंइ परमप्रभु आ बाक्तीक आ डोंइती बाक्शो चढेतीके क्येडा लाक्शा अरु मसेल्लनीकी” देतेक्म।

30 मिनु चढेब फिनेहास, मेको नु बाक्ब इस्राएली आन ठेयब मुरपुकी नु थर थर डा ठेयब मुरपुकीमी रूबेन आ थर, गाद आ थर नु मनस्से आ उइक्थ थर आन लोव्र नेंशा ग्येरसाक्म। 31 मिनु चढेब एलाजर आ तौ फिनेहासमी रूबेन, गाद नु मनस्से आ थर डा मुर आन कली “परमप्रभु यावे गो आंइ दातेमी बाक्ब, दे मुलाक्ती गोपुकीमी तुइक्ताक्क। मारदे हना एको चढेतीक सेल्ल्या कली परमप्रभु यावे रे पा नोले मशोंइसीनी। मुल चहिं गेपुकीमी इस्राएली आन कली परमप्रभु यावे आ गुइ रे प्रोंइतीनी” देत। 32 मिनु चढेब एलाजर आ तौ फिनेहास नु ठेयब मुर नेल्ल गिलाद रागी रे रूबेन नु गाद आ थर डा मुर ग्रुम्तीके रे कनान रागी गे लेत्तेक्म। मिनु इस्राएली आन कली मेको लोव्र नेल्ल शेंताक्म। 33 मेको लोव्र नेंशा नेल्ल ग्येरसाक्म। मिनु परमप्रभु कली “गे रिम्शो पाइब बाक्नीनी” दे ठेयब सेल्लेक्म। मिनु मेकोपुकीमी लेंशा रूबेन नु गाद आस थर बाक्शो रागी कली खतम सेल्लतीक नु लडाइ पतीक लोव्र गेनायो मपाम।

34 मिनु रूबेन नु गाद आस थर डा मुरुमी मेको चढेतीक आ नें “सांकछी” वोइक्तेक्म। मिनु मेको आ अर्थ मार बाक्त देशा हना “गे नु गो इं दातेमी परमप्रभु यावे थमा पा परमप्रभु बाक्ब, दे मेको चढेतीक सांकछी बाक्ब” देतेक्म।

23

यहोसु आ नोले डा लोव्र

1 मिनु शुश नाक्त नोले परमप्रभु यावेमी इस्राएली आन कली आन जोरी सत्रु रे पा प्रोंइशा, नाइश्शा बाक्चा गेपु। मेना यहोसु खाल्पा दुम्शा, शुश बर्स दुम्शो बाक्त। यहोसु २१:४४ 2 मिनु यहोसुमी इस्राएली नेल्ल आन खाल्पा, आन ठेयब मुर, आन निसाफ पाइब नु मेको आन सासन पाइब आन कली ब्रेत्ताक्व। मिनु मेकोमी मेको आन कली “गो मुल खाल्पा दुम्ती। शुश बर्स यो दुम्ती। 3 परमप्रभु यावे, इन परमप्रभुमी मेको रागी रागी डा मुर आन कली गे इन पर्वम मार मार पवा, गेपुकीमी मेको नेल्ल ताइतीनी। परमप्रभु यावे, इन परमप्रभुमी इन पचा डा लडाइ आंमान पापु। 4 गोम योक्शा, लीशो रागी इन थर थर डा मुर आन कली गेता। मिनु गो यर्दन रे पच्छिम गे डा ठेयब समुन्द्र सम्म रागी नेल्ल ग्राती। 5 परमप्रभु यावे, इन परमप्रभुमी मेको लीशो मुर आन कली इन डोंइती रे ग्रुंइब। मिनु मेकोमी मेको आन कली इन डोंइती रे खेरब। मिनु परमप्रभु यावे, इन परमप्रभुमी देशो खोदेशो पा, मेको आन रागी इन के सेल्लनीनी।

6 गे थम बोल्यो दुमीन। मिनु मोसा आ ब्रेक्शो अरेशो लोव्र होस पा टिने। गे ग्युरा पेरा गे गेनायो मलने। ब्यवस्था ५:२९ 7 गे इन दातेमी बाक्शो अर्को रागी डा मुरपुकी नु मब्वंइसीन। मेको आन देवता आन नें मथिने। मेको आन नेंमी कसम मजने। मेको आन कली पूजा मपने। मिनु मेको आन डोंइती बाप्शा सेउ मपने। प्रस्थान २३:१३-२४ 8 तन्न गेपुकी मुलाक्त डा नाक्त सम्म पशो खोदेशो पा परमप्रभु यावे, इन परमप्रभु नु ला बाक्कीन।

9 परमप्रभु यावेमी इन डोंइती रे ठेयब सक्ति पाइश्शो रागी डा मुर आन कली खेरशो बाक्ब। मिनु मुलाक्त सम्म मेको रागी डा मुर सुइमी यो गे इन कली ग्राने मचाप्शो बाक्तेक्म। लेवी २६:७-८; ब्यवस्था २८:७ 10 इन मुर कामी मेको आन के हजार का मुर आन कली खेरने चाप्ब। मारदे हना आ देशो खोदेशो पा इन लडाइ पचा डा परमप्रभु यावे, इन परमप्रभुमी पाइब। 11 मोपतीके गे परमप्रभु यावे, इन परमप्रभु कली दाक्तीन। मिनु होस पने।

12 तन्न गे नोले शोंइसाक्नी हना नु मेको रागी डा इन दातेमी लीशो मुरपुकी नु गारपाइक्तीनी हना, गे इन तमी मेको आन तौ कली गेतीनी हना, इन तौ कली मेको आन तमी चाक्तीनी हना नु मेको मुरपुकी नु गारशा गेय पाइतीनी हना, 13 परमप्रभु यावे, इन परमप्रभुमी मेको रागी डा मुर आन कली इन डोंइती रे मखेरब, दे तुइक्तीन। तन्न मेकोपुकी इन कली ग्याइल नु ब्वारद दुम्नीम। मेकोपुकी इन ची कली युक्तीक नु इन मिक्च कली चू दुम्नीम। परमप्रभु यावे, इन परमप्रभुमी इन कली गेशो रिम्शो रागी रे गे मबेक्नी सम्म मोदेशो दुम्ब। गन्ती ३३:५५; ब्यवस्था ७:१६; न्यायाधीस २:३

14 नेनीन, गो मुल मुर नेल्ल खोदेंशो पा बेक्चा चिक्ताक्ड। मिनु परमप्रभु यावे, इन परमप्रभुमी इन कली देंशो रिम्शो लोव्र मारेइ मली। मेकोमी नेल्ल इन कली खाप्शो बाक्ब। मिनु का सम्म यो मखाइक्थु पाप्तु, दे गो इन थुं डा मिम्तीकेमी तुइक्नीनी। यहोसु २१:४५ 15 दोपा परमप्रभु यावे, इन परमप्रभुमी इन कली देंशो रिम्शो लोव्र नेल्ल खाप्बा, मोपा परमप्रभु यावेमी गे आ अरेशो लोव्र मटीतीनी हना, इन कली देंशो हिंच कोइतीक लोव्र यो खाप्ब। मिनु परमप्रभु यावे, इन परमप्रभुमी इन कली एको रिम्शो रागी रे खेरशा, खतम सेल्ब। ब्यवस्था २८:१५-४७ 16 गेपुकी परमप्रभु यावे, इन परमप्रभु आ कबल कली प्रोइशा, अरु देवी देवता आन कली ठेयब सेल्थ लाइतीनी हना नु मेको आन कली बाप्शा सेउ पाइतीनी हना, परमप्रभु यावे शुश चुरशा, मेकोमी इन कली एको रिम्शो रागी रे रीब पा खेरशा खतम सेल्ब” देंत।

24

शेकेम सहरम पशो कबल

1 मिनु यहोसुमी इस्राएली आन थर नेल्ल कली शेकेममी इस्राएली आन खाल्पा, आन ठेयब मुर, आन निसाफ पाइब नु मेको आन सासन पाइब आन कली ब्रेत्ताक्व। मिनु मेको नेल्ल परमप्रभु आ डोंइती जाक्शा बाक्तेक्म।

2 मिनु यहोसुमी मुर नेल्ल आन कली “परमप्रभु यावे, इस्राएली आन परमप्रभुमी ‘साइ नेसी इन किकी पिपी, अब्राहाम नु नाहोर आ आफ तेराह युफ्रेटीस खोला आ आइक्ची हांबुम बाक्शो बाक्तेक्म। मिनु मेकोपुकीमी अरु देवी देवता आन कली ठेयब सेल्तेक्म। उत्पत्ती ११:२६; उत्पत्ती ३१:१९; उत्पत्ती ३५:२ 3 तन्न गो इन किकी पिपी अब्राहाम कली खोला आइक्ची हांबु रे पा पित्ता। मिनु मेको कली कनान रागी नेल्ल हिरताक्ड। मिनु सोशा बोशा, इसहाक माइशो तौ का गेता। 4 मिनु इसहाक कली याकूब नु एसाव माइशो तौ निक्शी गेता। मिनु एसाव कली सेइर पहाडम बाक्चा कली गेता। मिनु याकूब नु आ तौपुकी चहिं इजीप्त रागी लाम्तेक्म। उत्पत्ती ३२:४; उत्पत्ती ४६:६

5 मिनु नोले गो मोसा नु हारून कली सोइक्ताक्डसी। मिनु गो इजीप्त डा मुर आन कली श्येत गेता। मिनु गो इन कली मेकेर रे ग्रुइताक्नी। प्रस्थान ३:१० 6 मिनु गो इन किकी पिपी आन कली इजीप्त रागी रे पा ग्रुइशा पित्ता। मिनु मेकोपुकी लल समुन्द्र सम्म जाक्तेक्म। इजीप्त डा मुरपुकीमी इन किकी पिपी आन कली शारा नु बग्गीमी लल समुन्द्र सम्म खेदा पाम्तेक्म। प्रस्थान १२:३३,५१ 7 मिनु खेदा पाइब आन कली तशा मेकोपुकीमी परमप्रभु यावे, आं कली “वारच पाइय्यीकी” दे आं कली थोम्तेक्म। मिनु गो मेकोपुकी नु खेदा पाइब आन दातेमी छिडछिड सेल्ता। मिनु मेको खेदा पाइब नेल्ल आन कली ब्वाक्कुमी खुम्शा साइक्तामी। गो इजीप्त रागी डा मुर आन कली मार मार पडा, गे आंमा ताइतीनी। मिनु नोले गेपुकी शुश नाक्ती सम्म गोरशो रागीमी बाक्तीनी। प्रस्थान १४:--

8 मिनु गो इन कली यर्दन आ पूर्व एमोरी आन रागीमी चाक्ता। मिनु मेकोपुकीमी गेपुकी नु लडाइ पाम्तेक्म। मिनु गो मेको आन कली इन गुइमी गेता। गो मेको आन कली इन डोंइती खतम सेल्ता। मिनु गेपुकीमी मेको आन रागी आंम के सेल्तीनी। गन्ती २१:२५,३१ 9 मिनु मोआब डा पिप सिप्पोर आ तौ बालाकमी इस्राएलीपुकी नु लडाइ पचा मिम्शा, इन कली सराप पचा कली बेओर आ तौ बालाम कली ब्रेत्थ सोइक्ताक्व। गन्ती २२:- 10 तन्न गो बालाम आ लोव्र मनेनु। मोपतीके मेकोमी इन कली आसीक गेस डा गेस पाप्तु। मिनु गो इन कली बालाम आ गुइ रे पा प्रोइता। गन्ती २३:११,२०

11 मिनु नोले गेपुकी यर्दन शोक्सीशा यरीकोमी जाक्तीनी। मिनु यरीको डा मुरपुकी एमोरी, परिज्जी, कनानी, हिती, गिरगाशी, हिव्वी नु यबुसीपुकीमी गेपुकी नु लडाइ पाम्तेक्म। तन्न गो मेको आन कली इन गुइमी गेता। यहोसु ३:१०; यहोसु ६:१-२१ 12 गो इन डोंइडोंइती हिकवा सोइक्ताक्ड। मेकोमी एमोरी आन पिप निक्शी आस कली खेदा पाम्तेक्म। गे इन तरवार नु लिब्रामी खेदा पचा ममालनी। प्रस्थान २३:२८; यहोसु १०:१-२ 13 गो इन कली इन मशोक्शो रू, रागी नु इन मसेल्शो सहर गेता। मिनु गेपुकी मेकेर बाक्नीनी। गेपुकीमी मखुम्शो अडगुर रू नु तेल रवा डा फल जना जन बाक्नीनी’ दे परमप्रभुमी देंत” दे यहोसुमी मुर नेल्ल आन कली देंत। ब्यवस्था ६:१०-११

14 मिनु यहोसुमी “मोपतीके मुल परमप्रभु यावे कली मान पा हिंशा, मेको कली थमा पा मप्रोंइथु, गेय पने। इन किकी पिपीमी खोला आइक्ची हांबु नु इजीप्त रागीमी पूजा पशो देवी देवता आन कली ताइक्तीन। परमप्रभु यावे कली ठेयब सेलीन। यहोसु २४:२; प्रस्थान ३२:- 15 तन्न परमप्रभु यावे आ नें ठेयब सेल्चा मदाक्नीनी हना, सु कली ठेयब सेल्नीनी? मुलाक्ती योव्रडीन। गे इन किकी पिपीमी खोला आइक्ची हांबुम पूजा पशो देवी देवता आन कली ठेयब सेल्नीनी देय मुल बाक्शो एमोरी आन रागी डा देवी देवता आन कली ठेयब सेल्नीनी? योव्रडीन। तन्न गो नु आ सिं डा मुरुमी परमप्रभु यावे कली ला ठेयब सेल्नीकी” देंत। ब्यवस्था ६:१३-१४

16 मिनु मुरपुकीमी “गो गेनायो परमप्रभु यावे कली मप्रोंइनीकी। मिनु अरु देवी देवता आन कली पूजा मपाइनीकी। 17 मारदे हना परमप्रभु यावे, आंइ परमप्रभुमी आंइ कली नु आंइ किकी पिपी आन कली इजीप्त रागीम वाइल दुम्शो खिं रे गुंडशा पिश्शो बाक्त। मिनु मेकोमी आंइ डोंइती दुम्तीक ठेयब ठेयब छक लाक्चा डा गेय पाप्तु। गो ते लाइतक हना यो, परमप्रभु यावेमी आंइ कली कोवना कोवन बाक्त। 18 मिनु परमप्रभु यावेमी आंइ डोंइती रे एको रागीम बाक्ब एमोरी आन कली खेरतु। मोपतीके गोपुकीमी यो परमप्रभु यावे कली ठेयब सेल्नीक। मारदे हना मेको आंइ परमप्रभु बाक्ब” देंतेक्म।

19 मिनु यहोसुमी मुर आन कली “गेपुकीमी परमप्रभु यावे कली ठेयब सेल्ने मचाप्नीनी। मारदे हना मेको का ला परमप्रभु नु रुश पाइब परमप्रभु बाक्ब। मिनु मेकोमी इन मरिम्शो पशो नु इन पाप मक्याम्ब। ब्यवस्था २९:३; प्रस्थान २०:५ 20 गेपुकीमी परमप्रभु यावे कली प्रोंइशा, अरु देवी देवता आन कली पूजा पाइतीनी हना, इन कली डोंइती रिम्शो पा, नोले मरिम्शो पचा गोइब। मिनु इन कली खतम पोक्ब” देंत। 21 मिनु मुरपुकीमी यहोसु कली “ममाइ, गोपुकीम परमप्रभु यावे कली ठेयब सेल्नीकी” देंतेक्म। 22 मिनु यहोसुमी “गेपुकीमी परमप्रभु यावे कली ‘ठेयब सेल्नीक’ देंशा, गे आंमा सांकछी दुम्तीनी” देंत। मिनु मेकोपुकीमी “गो थमा पा सांकछी दुम्तक” देंतेक्म।

23 यहोसुमी “मुल गेपुकी नु बाक्शो देवी देवता ताइक्तीन। इन थुं परमप्रभु यावे, इस्राएली आन परमप्रभु गे हिरदीन” देंत। उत्पत्ती ३५:२; 24 मिनु मुरपुकीमी यहोसु कली “गो परमप्रभु यावे, आंइ परमप्रभु कली ठेयब सेल्नीकी। मेको आ लोव्र टीनीक” देंतेक्म।

25 मेको नाक्ती यहोसुमी मुर आन कली कबल पाप्तु। शेकेममी मेको आन कली पतीक नु मपतीक नेल्ल ब्रेक्ताक्व। २राजा २५:३ 26 मिनु यहोसुमी मेको ब्रेक्स नेल्ल परमप्रभु आ अरेशो लोव्र ब्रेक्तीक किताबमी ब्रेक्ताक्व। मिनु मेकोमी ठेयब फुल्लु का लाइशा, परमप्रभु यावे आ बाक्तीक आ नेक्था डा ठेयब रवा आ पुंम खुक्तु। उत्पत्ती ३५:४; न्यायाधीस ९:६

27 मिनु यहोसुमी मुर नेल्ल आन कली “कोवडीन, एको फुल्लु आंइ सांकछी बाक्ब। परमप्रभु यावेमी आंइ कली देंशो लोव्र नेल्ल एको फुल्लुमी यो तुइश्शो बाक्ब। मोपतीके गेपुकीमी इन परमप्रभु कली प्रोंइतीनी हना, गे जोल पाइब बाक्नीनी, दे एको फुल्लु सांकछी बाक्ब” देंत। यहोसु २२:२७; उत्पत्ती ३१:४८ 28 मिनु यहोसुमी मेको आन कली मेको आन आंम आंम थेरशो रूमी सोइक्ताक्व।

यहोसु कली थिम्शो

29 मेको नेल्ल दुम नोले नून आ तौ, परमप्रभु यावे आ गेय पाइब यहोसु सहे का १० बर्समी बेक्त। गन्ती २७:१८-२३ 30 मिनु मेकोपुकीमी यहोसु कली गाश डांडा आ उत्तर गे एफ्राइम आ पहाड तिम्नाथ-सेराह माइक्तीक, आंम आ रूमी थिम्तेक्म। यहोसु १९:५०

31 इस्राएलीपुकीमी यहोसु आ ब्रोंइतीक नाक्त सम्म परमप्रभु यावे कली ठेयब सेल्लेक्म। मिनु परमप्रभु यावेमी पशो नेल्ल तशा तुइक्ब खाल्पापुकी बाक्मा सम्म मेकोपुकीमी परमप्रभु यावे कली ठेयब सेल्लेक्म। न्यायाधीस २:७

32 इस्राएलीपुकीमी योसेफ आ रुश कली इजीप्त रागी रे लाइशा, शेकेम सहरम थिम्तेक्म। याकूबमी मेको रू कली हमोर आ तौपुकी रे सहे का चांदी के शेकेलमी ग्याप्शो बाक्त। हमोर चहिं शेकेम सेल्ब बाक्त। शेकेम योसेफ आ चच युइ आन थेरशो रू दुम्त। शेकेल का ११.५ ग्राम खोदेंशो बाक्ब। उत्पत्ती ५०:२५; उत्पत्ती ३३:१९ 33 मिनु हारून आ तौ एलाजर यो बेक्त। मेको कली गिबा सहरमी थिम्तेक्म। मेको एफ्राइम डा पहाड रागीमी बाक्शो सहर, मेको आ तौ फिनेहास कली गेम्तेक्म। ब्यवस्था १०:६

न्यायाधीस

ब्रेक्ब मुर: साइ डोंइती डा मुरपुकीमी “सामुएलमी एको किताब ब्रेक्शो बाक्ब” देशो बाक्तेक्म। तन्न सामुएल आ ब्रोंइची ना अर्को परमप्रभु यावे आ लोत्र पाइब यो बाक्तेक्म। मेकोपुकीमी यो एको किताब ब्रेक्शो बाक्म माइ, दे यो मिम्नीम।

गेना ब्रेक्शो: एको किताब ब्रेक्ब सामुएल बाक्त हना, मेको खाल्पा दुम्मेनु, ब्रेक्शो बाक्त। मारदे हना “मेना इस्राएलमी पिप मबाक्म” दे शुश खेयप एको किताबम ब्रेक्शो बाक्ब। न्यायाधीस १७:७; न्यायाधीस १८:१; न्यायाधीस १९:१; न्यायाधीस २१:२५

मार ब्रेक्शो: परमप्रभु यावे आ गेना हना यो दाक्तीके नु शिशी कोंइचा कली लोत्र ब्रेक्शो बाक्ब। दोपा कोंइब देशा हना:

१. इस्राएल डा मुरुम परमप्रभु आ डोंइती मरिम्शो पशो बाक्तेक्म। न्यायाधीस ३:७; न्यायाधीस ५:-
२. परमप्रभुमी मेको आन कली सजाइ गेब।
३. इस्राएलीपुकीमी परमप्रभु कली पुंइनीम।
४. परमप्रभुमी मेको आन कली श्येत रे प्रोंइब का सोइक्ब।
५. परमप्रभु गे लेशो मुर आन कली गेना हना यो माफ गेब, दे शेंशो बाक्ब।

अदोनी-बेसेक कली ग्याइशो

१ यहोसु बेक्म नोले इस्राएलीपुकीमी परमप्रभु यावे कली “डोंइती आंइ दाते डा तेको थरमी कुशा, कनानी आन कली लडाइ तोचा?” दे हिल्लो पामे बाक्त। उत्पत्ती ४९:८; न्यायाधीस १८:५; न्यायाधीस २०:१८; प्रस्थान २८:३०; गन्ती २७:२१ २ मिनु परमप्रभु यावेमी “यहूदा आ थर डा मुर कुचा मालनीम। नेनीन, गो मेको रागी मेको आन कली गेनुड” देंमाक्त। ३ मिनु यहूदा आ लोकब सिमियोन कली “गे आं कली गेशो रागी ग्राचा कली वारच पथ पिबो। मोपा गो कनानी नु लडाइ पाइनस। नोले गो गे नु इ कली गेशो रागी ग्राचा कली वारच पथ लाइनुड” देंमाक्त। मिनु सिमियोन आ थर डा मुर यहूदा आ थर डा मुर नु लमा बाक्त। ४ मिनु यहूदा आ थर डा मुरपुकीमी लडाइ पा परमप्रभु यावेमी कनानी नु परिज्जी आन कली मेको आन गुइम गेवा बाक्त। मेकोपुकीमी मेको आन कली खेदा पामे बाक्त। बेसेक सहरमी १० हजार मुर आन कली साइशशा ग्रामा बाक्त। ५ मेकेर मेकोपुकीमी अदोनी-बेसेक माइशो पिप नु लडाइ पामे बाक्त। मेकोपुकीमी कनानी नु परिज्जी आन कली ग्रामा बाक्त। ६ मिनु अदोनी-बेसेक प्रोक्माक्त। तन्न यहूदा आ थर डा मुरपुकीमी मेको कली खेदा पा थिश्शा, आ गुइ खोइल डा बोंग्ये खोइशशा गेमे बाक्त। ७ मिनु अदोनी-बेसेकमी “गुइ खोइल डा बोंग्ये खोइशशा ७० जना पिपमी आं निश्शा जतीक रे दोक्शो जचा थोव्रक जाम्तेक्म। डोंइती गो दोदेशो पडा, मुल परमप्रभुमी आं कली यो मोदेशोन पाप्तु” देंमाक्त। मिनु यहूदा डा मुरपुकीमी मेको पिप कली यरूसलेम चाक्गमे बाक्त। मिनु मेको मेकेर बेक्माक्त।

यरूसलेम नु हेब्रोन कली ग्राशो

८ यहूदा आ थर डा मुरपुकीमी यरूसलेम कली लडाइ पा ग्राशा, आंम के सेलमे बाक्त। मेकोपुकीमी मेकेर डा मुर आन कली तरवारमी क्योरशा सदमे बाक्त। मिनु सहर कली मी सुइक्त्मे बाक्त। न्यायाधीस १:२१ ९ मिनु नोले यहूदा डा मुरपुकी पहाडी रागीमी, नेगेब नु दिंममी बाक्शो कनानी नु लडाइ पथ लमा बाक्त। यहोसु १०:४०; यहोसु ११:१६-२० १० मिनु मेकोपुकीमी हेब्रोन डा कनानी नु लडाइ पामे बाक्त। मिनु शेशै, अहीमान नु तल्लै कली ग्रामा बाक्त। हेब्रोन आ डोंइती डा नें किरयथ-अरबा बाक्त। यहोसु १५:१३-१९

ओथनीएलमी देबीर कली ग्राशो

११ मिनु नोले देबीर डा मुरपुकी नु लडाइ पचा ठीक दुम्मा बाक्त। देबीर कली डोंइती किरयथ-सेफेर देंबाक्तेक्म। १२ मिनु कालेबमी “सुम किरयथ-सेफेर कली लडाइ पा ग्राबा, मेको कली आं तमी अकसा ग्युंवे पा गेनुड” देंमाक्त। यहोसु १५:१६ १३ मिनु कालेब आ लोकब केनाज आ तौ ओथनीएलमी किरयथ-सेफेर कली ग्रामाक्त। मिनु कालेबमी आ तमी अकसा कली मेको नु ग्युंवे पा गेवा बाक्त। यहोसु १५:१६-१९ १४ मिनु काबु ओथनीएलमी अकसा कली “आं आफ ‘रू का गेयी’ दे पुन” दे मदा बाक्त। मिनु अकसा आ गधा रे तोंइसे बाक्त। मोपा तोइशो तशा कालेबमी

“गे मार माल्दे?” दे हिल्लो पवा बाक्त। 15 मिनु अकसामी “आं कली मारेइ गेनीनी को? गे आं कली नेगेबमी रू गेतीनी। मोपतीके मुल आं कली ब्वाक्कु बुक्तीक पाइश्शो रू यो गेने” देंमाक्त। मिनु कालेबमी मेको कली आइदी नु आइक्था डा ब्वाक्क बुक्तीके निक्शी गेवा बाक्त।

यहूदा नु बेन्यामीनम ग्राशो

16 मोसा आ शिउ आ खिं डा होबाब आ चच युइ, केनीपुकी नु यहूदा डा मुरपुकी खजूर रवा आ सहर रे पा आराद सहर आ नेक्था डा नेगेबमी बाक्शो यहूदा डा गोरशो रागीमी लमा बाक्त। मिनु मेकेर बाक्ब अमालेक डा मुरपुकी नु बाक्चा गोत्रमे बाक्त। न्यायाधीस ४:११; गन्ती १०:२९; यहोसु १२:१४ 17 मिनु यहूदा डा मुरपुकी आंम लोकब सिमियोन आ थर डा मुरपुकी नु लशा, सेफतमी बाक्ब कनानी आन कली लडाइ पा मेको आन सहर खतम पोक्गमे बाक्त। मोपतीके मेको सहर आ नें होरमा वोदमे बाक्त। ब्यवस्था २०:१२-१८ 18 यहूदा आ थर डा मुरपुकीमी गाजा, अश्कलोन, एक्रोन सहर नु मेको आ नेक्था बाक्शो रू नेल्ल आंम के सेल्मे बाक्त। 19 मिनु परमप्रभु यावेमी यहूदा आ थर डा मुर आन कली वारच पतीके मेकेर डा पहाडी रागी नेल्ल आंम के सेल्मे बाक्त। तन्न मेकोपुकीमी दिंम डा मुर आन कली खेरने मचाप्बमे बाक्त। मारदे हना मेकोपुकी नु फलाम के बग्गी बाक्मा बाक्त। 20 मिनु मोसामी देंशो खोदेशो पा कालेब कली हेब्रोन सहर गेमे बाक्त। मिनु मेकोमी अनाक आ तौ सां आन कली मेकेर रे खेरा बाक्त। यहोसु १४:६-१५ 21 तन्न बेन्यामीन आ थर डा मुरपुकीमी यरूसलेम डा यबुसी आन कली मखेरमे बाक्त। मोपतीके यबुसीपुकी मुलाक्त सम्म यरूसलेममी बेन्यामीन आ थर डा मुरपुकी नु बाक्नीम। न्यायाधीस १:८; यहोसु १५:६३; यहोसु १८:२८

बेथेल सहर ग्राशो

22 योसेफ आ थर डा मुरपुकीमी बेथेल नु लडाइ पचा कली लमा बाक्त। परमप्रभु यावे योसेफ आ थर डा मुरपुकी नु बाक्माक्त। 23 मेकोपुकीमी बेथेलमी क्यारी पाइब मुर सोइक्तमे बाक्त। डोंइती बेथेल आ नें लूज बाक्माक्त। उत्पत्ती २८:१९; यहोसु १२:१६ 24 मेको क्यारी पाइबपुकीमी मुर का कली बेथेल सहर रे गूशो तशा, मेको कली “सहर दोपा ओव्रचा? आंइ कली शेंदीन। गो इन कली मारेइ यो मरिश्शो मपाइनीकी” देंमा बाक्त। 25 मिनु मेको मुरुमी सहर दोपा ओव्रचा, मेको नेल्ल कोंइदा बाक्त। मिनु योसेफ आ थर डा मुरपुकीमी मेको सहर ओव्रशा, मेकेर डा मुर नेल्ल आन कली तरवारमी क्योरशा सदमे बाक्त। तन्न मेको लां शोव्रब नु आ खिं डा मुर आन कली मारेइ यो मपामे बाक्त। यहोसु ६:२५ 26 मिनु मेको लां कोंइब मुर हिती आन रागी लमाक्त। मिनु मेकेर सहर का सेल्शा, मेको सहर आ नें लूज वोदा बाक्त। मेको सहर कली मुलाक्त सम्म लूज देंनीम।

मनस्से नु एफ्राइमम लडाइ ग्राशो

27 मनस्से आ थर डा मुरपुकीमी बेथ-शेआन, तानाक, डोर, इब्लाम नु मेगीददो डा मुर आन कली नु मेकेर डा गाउं डा मुर आन कली मखेरमे बाक्त। मारदे हना कनानीपुकीमी मेकेर बाक्चा थुं पामे बाक्त। यहोसु १७:११-१३ 28 नोले इस्राएलीपुकी बोल्यो दुश्शा, मेको आन कली वाइलीम वाइल सेल्ना सेल्न बाक्मा बाक्त। तन्न मेको आन कली गेनायो मखेरमे बाक्त।

अर्को थरपुकीमी ग्राना ग्रान लशो

29 एफ्राइम आ थर डा मुरपुकीमी यो गेजेर सहरमी बाक्ब कनानी आन कली मखेरमे बाक्त। मेकोपुकी गेना हना यो गेजेरमी बाक्मा बाक्त। यहोसु १६:१० 30 जबूलून आ थर डा मुरपुकीमी कित्रोन नु नहलोल सहरमी बाक्ब कनानी आन कली मखेरमे बाक्त। मिनु कनानी जबूलून डा मुर आन दातेमी बाक्शा, आन वाइलीम वाइल दुम्मा बाक्त। यहोसु १९:१५ 31 आशेर आ थर डा मुरपुकीमी अक्को, सीदोन, अहलाब, अकजीब, हेल्बा, अफीक नु रेहोब सहरमी बाक्ब आन कली मखेरमे बाक्त। 32 मोपा आशेर आ थर डा मुरपुकी कनानी नु बाक्मा बाक्त। मारदे हना सुइ कली मखेरमे बाक्त। 33 नाप्ताली आ थर डा मुरपुकीमी बेथ-शेमेश नु बेथ-अनात सहरमी बाक्ब आन कली मखेरमे बाक्त। मिनु मेकेर डा कनानी नु बाक्मा बाक्त। तन्न बेथ-शेमेश नु बेथ-अनातमी बाक्ब आन कली वाइलीम वाइल सेल्मे बाक्त। यहोसु १९:३८

34 मिनु एमोरीपुकीमी दान आ थर डा मुर आन कली पहाडी रागी मेर सोइक्तमे बाक्त। दिंममी यिचा मगेमे बाक्त। 35 एमोरीपुकीमी हार-हेरेस, आइयालोन नु शा-आल्बीम सहरम बाक्चा थुं पामे बाक्त। तन्न योसेफ आ थर

डा मुरपुकीमी मेको आन कली लडाइ पा ग्राशा, वाइलीम वाइल सेल्मे बाक्त। यहोसु १९:४२ 36 एमोरी आन सांद दक्खिन अक्रब्बीम आइक्था, सेला सहर रे लाइशा, मेको क्येडा आइक्था सम्म लशो बाक्माक्त।

2

स्वर्ग डा गेय पाइबमी लोत्र पशो

1 मिनु परमप्रभु यावे आ स्वर्ग डा गेय पाइब गिल्गाल रे बोकीम सहरमी कुमाक्त। मेकोमी “गो इन कली इजीप्त रे गुंडताक्न्नी। इन किकी पिपी आन कली ‘इन कली गेनुड’ देशो रागीमी चाक्तन्नी। गो गे नु पशो कबल गेना हना यो खाप्नुड। यहोसु २४:२९-३१ 2 मिनु गे एको रागी डा मुरपुकी नु काइ कबल मपने। गे मेको आन चढेतीक प्रेत्या माल्नीनी। तन्न गे आं देशो मटिनी। लो कोवडीन, गे मार पनी? 3 मोपतीके ‘इन डोंइती रे मेको आन कली मखेरनुड। मेकोपुकी इन कली चू खोदेशो दुम्नीम। मिनु मेको आन देवी देवता इन कली ग्याइल खोदेशो दुम्नीम’ देनुड” देमाक्त। 4 मोपा परमप्रभु यावे आ स्वर्ग डा गेय पाइबमी देने थुमा नोले, मेकेर डा मुर नेल्ले डाक्शा रोंका पामे बाक्त। 5 मोपतीके मेको आन बाक्तीक कली बोकीम नें वोदमे बाक्त। मिनु मेकोपुकीमी मेकेर परमप्रभु यावे कली मार मार चढेमे बाक्त। बोकीम आ अर्थ डाक्चा बाक्ब।

यहोसु बेक्शो

6 मिनु यहोसुमी नेल्ल आन कली लचा गेवा नोले, मेकोपुकी आंम आंम थेरशो रागी आंम के सेलथ लमा बाक्त। 7 मिनु इस्राएलीपुकीमी यहोसु मबेक्म सम्म परमप्रभु यावे कली ठेयब सेल्मे बाक्त। मिनु परमप्रभु यावेम इस्राएली आन पर्बम पशो ठेयब गेय ताइब खाल्पापुकी बाक्मा सम्म यो परमप्रभु यावे कली ठेयब सेल्मे बाक्त। 8 मिनु नून आ तौ यहोसु, परमप्रभु यावे आ वाइल सहे का १० बर्समी बेक्माक्त। 9 मिनु आ थेरशो रूम थिम्मे बाक्माक्त। आ रू ते बाक्त देशा हना, गाश डांडा आ उत्तर, एफ्राइम डा पहाडी रागीमी बाक्शो तिम्नाथ-हेरेसमी बाक्माक्त। 10 मेको पाला डा मुर नेल्ल बेक्मा बाक्त। मिनु मेको आन आल ठेयब दुम्मा बाक्त। मेकोपुकी परमप्रभु यावे कली मतुइक्ब बाक्मा बाक्त। मिनु इस्राएल डा मुर आन कली ठेयब गेय पा वारच पशो यो मतुइशो बाक्मा बाक्त।

इस्राएलीपुकीमी हेंथे पशो

11 मिनु इस्राएलीपुकीमी परमप्रभु यावे आ डोंइती मार मरिम्शो बाक्मे, मेको पामे बाक्त। मेकोपुकीमी बाल देवी देवता आन कली ठेयब सेल्मे बाक्त। 12 मिनु मेको आन कली इजीप्त रागी रे गुंडब, परमप्रभु यावे, आंम किकी पिपी आन परमप्रभु कली प्रोन्मे बाक्त। मेको आन दातेमी बाक्ब जात जात डा मुर आन देवी देवता आन डोंइती बाम्मा बाक्त। मोपा परमप्रभु यावे कली चुरपदमे बाक्त। 13 मेकोपुकीमी परमप्रभु यावे कली प्रोंइशा, बाल नु अशतारोथ देवता कली ठेयब सेल्मे बाक्त। 14 मिनु परमप्रभु यावेमी इस्राएली आन पर्बम गाइशा, मेको आन कली रोइक्ब आन गुइमी गेमी बाक्त। मिनु मेकोपुकीमी मेको आन मारेइ मारेइ रोइक्तमे बाक्त। मिनु मेकोमी मेको आन कली आन नेक्था बाक्ब जोरी सत्रु आन हुकुममी बाक्चा गेमे बाक्त। मोपा इस्राएलीपुकीमी आन जोरी सत्रु आन कली ग्राने मचाप्बमे बाक्त। 15 गेना मेकोपुकी लडाइ पथ गूमा, मेना परमप्रभु यावेमी मेको आन कली श्येत गेमी बाक्त। मोपा परमप्रभु यावेमी मेको आन कली डोंइती देशो नु आ कबल पशो खबा बाक्त। मोपतीके मेकोपुकीमी शुश श्येत जामे बाक्त। लेवी २६:१७; ब्यवस्था २:१५; ब्यवस्था २८:२०; १सामुएल १२:१५

16 मिनु नोले परमप्रभु यावेमी मेको आन कली रोइक्ब आन गुइ रे प्रोंइचा कली निसाफ पाइब सोइक्ता बाक्त। मिनु मेको आन कली प्रोंइना प्रोंइन बाक्मा बाक्त। प्रेरित १३:२० 17 तन्न मेकोपुकीमी निसाफ पाइब आन देशो लोत्र मनेन्मे बाक्त। मेकोपुकीमी तेल्लेम पशो खोदेशो पा अरु देवी देवता आन नोले खोदमे बाक्त। मेको आन डोंइती बाम्मा बाक्त। मेकोपुकी परमप्रभु यावे आ शेंशो लोत्र टीब आन किकी पिपी आन गाक्शो लां प्रोंइशा, मटीब दुम्मा बाक्त। 18 गेना परमप्रभु यावेमी मेको आन कली निसाफ पाइब सोइक्ता, मेना परमप्रभु यावे मेको नु बाक्माक्त। मेको निसाफ पाइब मबेक्म सम्म आन जोरी सत्रु रे प्रोंइशा वोदा बाक्त। मारदे हना परमप्रभु यावेमी आन जोरी सत्रु रे श्येत जशो तशा शिशी पवा बाक्त। 19 तन्न निसाफ पाइब बेक्म चोटीन आन किकी पिपी क्येडा लाक्शा मरिम्शो पामे बाक्त। देवी देवता आन कली ठेयब सेल्शा, मेको आन डोंइती बाप्शा, मेको आन नोले खोदमे बाक्त। आन मरिम्शो पशो प्रोंइने मबिस्समा बाक्त। प्रस्थान ३२:९ 20 मोपतीके परमप्रभु यावे इस्राएलीपुकी नु गाइक्ता बाक्त। मिनु “गो मेको आन किकी पिपी आन कली देशो नु कबल पशो एकोपुकीमी खतम सेल्लेक्म। आं देशो लोत्र मटितीके 21 मुल यहोसुमी आ बेक्ची ना मखेरशो रागी रागी डा मुर कली यो इस्राएली आन डोंइती रे मखेरनुड” दे परमप्रभु

यावेमी देमाक्त। 22 इस्राएली आन किकी पिपी परमप्रभु यावे आ लांम गाक्शो खोदेशो पा मेकोपुकी गाक्नीमी कों मगाक्नीमी, दे इस्राएली आन कली नाक्चा कली मेको अर्को जात डा मुर मखेरशो बाक्माक्त। न्यायाधीस ३:१,४; ब्यवस्था ८:२ 23 मोपा परमप्रभु यावेमी डोंइती यहोसु आ गुइमी मगेशो रागी रागी डा मुर आन कली मोशीन प्रोंइशा वोइशो बाक्माक्त। न्यायाधीस १:२८; भजन संग्रह १०६:३४

3

इस्राएली आन कली नाक्शो

1 मिनु परमप्रभु यावेमी इस्राएली आन कली नाक्चा, दे रागी रागी डा मुर इस्राएली आन डोंइती रे मखेरशो बाक्माक्त। मेना इस्राएली आन नक पाला डा मुरपुकीम कनान रागीम लडाइ पचा आ पबर्म मारेइ मतुइशो बाक्मा बाक्त। न्यायाधीस २:२२ 2 मोदेशो मारेइ मतुइक्व इस्राएली आन कली दोपा लडाइ पचा, दे शेंचा कली परमप्रभुमी अर्को जात डा मुर आन कली वोइशो बाक्माक्त। 3 मेको तेको तेको जात बाक्मा बाक्त देशा हना, ५ जना हुकुम पाइब पलिस्ती, कनानी नेल्ले, सीदोन डा मुर नेल्ले नु बाल-हेरमोन डांडा रे लाइशशा, लेबानोन डा पहाडम लेबो-हमाथ सम्म बाक्ब हिव्वीपुकी बाक्मा बाक्त। यहोसु १३:३ 4 मिनु परमप्रभु यावेमी इस्राएली आन किकी पिपीम मोसा कली गेशो शेंतीके मेकोपुकीमी पाइनीमी कों मपाइनीमी, दे नाक्चा कली मेको अर्को जात डा मुर आन कली बाक्चा गेवा बाक्त।

5 मोपा इस्राएलीपुकी कनानी, हिती, एमोरी, परिज्जी, हिव्वी नु यबुसी आन दातेमी बाक्शो बाक्मा बाक्त। 6 मिनु मेकोपुकीमी मेको आन तमीपुकी ग्युबे पा चाक्गमे बाक्त। मिनु आंम तमीपुकी यो मेको आन तौ आन कली ग्युबे पा गेमे बाक्त। मिनु मेकोपुकीमी मेको आन देवी देवता आन कली यो मार मार चदेशा ठेयब सेल्मे बाक्त। ब्यवस्था ७:३

ओथनीएल

7 इस्राएलीपुकीमी परमप्रभु यावे आ डोंइती मार मरिम्शो बाक्मे, मेको पामे बाक्त। मेकोपुकीमी परमप्रभु यावे, आन परमप्रभु कली प्रेंदमे बाक्त। मिनु बाल नु अशेराह देवी आस कली ठेयब सेल्मे बाक्त। 8 मिनु परमप्रभु यावेमी इस्राएली आन कली तशा गाइक्ता बाक्त। मिनु मेसोपोटामीया डा अराम-नहाराइम डा पिप कुशन-रिशतैम आ गुइमी लेयडा बाक्त। मेकोम इस्राएली आन कली ८ बर्स सम्म सासन पवा बाक्त। 9 मिनु इस्राएलीपुकीमी “वारच पाइय्यीकी” दे परमप्रभु यावे कली थोव्रमेनु, इस्राएली आन कली प्रोंइचा, दे केनाज आ तौ ओथनीएल कली सोइक्ता बाक्त। मेको कालेब आ लोक्ब बाक्त। मिनु मेकोमी मेको आन कली प्रोना बाक्त। न्यायाधीस १:१३; यहोसु १५:१७-१८ 10 परमप्रभु यावे आ सोक्त मेको तार जाक्माक्त। मिनु मेकोमी इस्राएली आन कली निसाफ पवा बाक्त। मिनु मेकोमी लडाइ पचा गोवा बाक्त। मिनु परमप्रभु यावेमी मेसोपोटामीया डा पिप कुशन-रिशतैम कली ओथनीएल आ गुइम गेवा बाक्त। मोपा ओथनीएलमी मेको पिप कली ग्रामाक्त। न्यायाधीस ६:३४ 11 केनाज आ तौ ओथनीएल मबेक्म सम्म मेको रागी ४० बर्स सम्म लडाइ रे नांइसे बाक्त।

एहूद

12 मिनु इस्राएलीपुकीमी लेंशा परमप्रभु यावे आ डोंइती मार मरिम्शो बाक्मे, मेको पामे बाक्त। मिनु मेको आन मरिम्शो पशो आ पबर्म परमप्रभु यावेमी मोआब डा पिप एग्लोन कली इस्राएली क्येडा बोल्यो सेला बाक्त। 13 मिनु एग्लोनमी अम्मोनी नु अमालेक डा मुर आन कली लडाइ पचा कली खुप्तीमी बाक्त। मिनु इस्राएली नु लडाइ पचा गोव्रमे बाक्त। मिनु खजूर रवा बाक्शो सहर आंम के सेल्मे बाक्त। न्यायाधीस १:३६ 14 इस्राएलीपुकी १८ बर्स सम्म मोआब डा पिप एग्लोन आ सासनमी बाक्मा बाक्त।

15 मिनु इस्राएलीपुकीमी लेंशा “वारच पाइक्की” दे परमप्रभु यावे कली थोव्रमेनु, परमप्रभु यावेमी इस्राएली आन कली श्येत रे प्रोंइचा कली बेन्यामीन आ थर डा गेरा आ तौ एहूद कली सोइक्ता बाक्त। मेको पेरा गुइम गेय पाइब बाक्त। मिनु इस्राएलीपुकीमी मेको कली मोआब डा पिप एग्लोन आ बाक्तीकेम तिरो थाप्य सोइक्तमे बाक्त। 16 मिनु एहूदमी आंम कली कुबीत का लाइशशो निक्शी गे हेरशो क्योरतीक पाइशशो तरवार का सेल्शा, आ वा आगामी ग्युरा गे खुइशशा पिप्शा कुरा बाक्त। कुबीत का ०,५ मिटर कि ठेयब हात का खोदेशो बाक्ब। 17 मिनु नोले मेकोमी तिरो कुरब लाइशशा, मोआब डा पिप एग्लोन आ बाक्तीके लमाक्त। एग्लोन साप्पा दोम्शो मुर का बाक्माक्त। 18 मिनु मेकोमी तिरो नेल्ल पोक्शा, कुरब मुर नु गाक्माक्त। 19 एहूद चहिं गिलगाल आ नेक्था बाक्शो फुल्लु के मूर्ति आन

बाक्तीक रे लेशशा, पिप कली “पिप, गो इन कली खुइशशा लोत्र का पचा माल्नुड” देंमाक्त। मिनु पिप एग्लोनम “सिक्सी पने” दे आ नेक्था बाक्ब नेल्ल आन कली लाडगा सोइक्तीमी बाक्त।

20 मिनु मेको पिप आ दरवार डा तला तारी सितल कोठामी बाक्शो बाक्माक्त। मिनु एहूद मेको आ डोंइती जाक्शा “परमप्रभु रे पा गो इन कली लोत्र का देंचा माल्नुड” देंमाक्त। 21 मिनु एग्लोन आ नित्तीके रे बोक्शा राम्माक्त। मिनु एहूदमी आ पेरा गुइमी आ ग्युरा गे बाक्शो तरवार गुंइशा, मेको पिप आ कोत्रजमी तूदा बाक्त। 22 समुएल २०:९-१० 22 मेको तरवार आ ग्याइक्तीक सम्म ओत्रमाक्त। मिनु कोत्रज डा बोंसोम मेको तरवार नेल्ल सुमा बाक्त। मिनु पिप आ कोत्रज रे ख्री गूमाक्त। मिनु एहूदमी तरवार मगुंइथु, प्रोंइशा वोदा बाक्त। 23 मिनु तला तारी डा कोठा डा लाप्चो चोक्शा, एग्लोन कली आगाम चोक्शा, सांचो पाइशशा वोइशशा, लाडगा गूमाक्त।

24 मिनु गूने थुमा नोले, एग्लोन आ गेय पाइब जाक्मा बाक्त। मिनु लाप्चो चोक्शो तशा “पिप डाइशशा बाक्म कों” दे मिम्तमे बाक्त। 25 मेकोपुकी शुश सम्म रिम्स डा रिम्स बाक्शा, मुने यो पामे बाक्त। तन्न पिपमी तला तारी डा कोठा डा लाप्चो यो मरोक्गा बाक्त। मोपतीके मेकोपुकीमी सांचो चाक्शा, लाप्चो रोकगमे बाक्त। मिनु आन पिप कली खपीम गोल्ला बेक्शो तामे बाक्त।

26 मोपा मेकोपुकीमी शुश रिम्शा बाक्मानु, एहूद प्रोक्ने थुम्शो बाक्माक्त। मेको फुल्लु के मूर्ति आन बाक्तीक लाक्शा सेइरा माइक्तीकेमी जाक्दीम्माक्त। 27 मिनु एफ्राइम डा पहाड रागीम जाक्दीम नोले, मेकेर रे मेकोमी तुराही तबा बाक्त। मिनु इस्राएली मेको नु पहाड रे तोइशशा, आ नोले खोदमे बाक्त।

28 एहूदमी “आं नोले खोतीन। मारदे हना परमप्रभु यावेमी इन जोरी सत्रु मोआबी आन कली इन गुइमी गेशो बाक्ब” दे माइक्मी बाक्त। मोपतीके आ नोनोले तोइशशा यिमा बाक्त। मिनु मोआबी मप्रोक्मल, दे मेको आ नेक्था डा यर्दन खोला शोक्तीके आन के सेल्मे बाक्त। मिनु सुइ आन कली मेक रे शोक्चा मगेमे बाक्त। 29 मेको नाक्ती १० हजार खोदेंशो मोआबी आन कली सदमे बाक्त। मेको नेल्ल बोल्यो लडाइ पाइब बाक्मा बाक्त। मेको का यो प्रोक्चा मतामे बाक्त। 30 मोपा मेको नाक्ती रे इस्राएलीम मोआबी आन कली हुकुम पामे बाक्त। मिनु मेको रागी ८० बर्स सम्म लडाइ रे नांइसे बाक्त।

31 एहूद आ नोले अनाथ आ तौ शाम्गार इस्राएली आन निसाफ पाइब दुम्माक्त। मेकोमी ब्यफ वाक्तीक हरीसमी ६ सहे पलिस्ती आन कली तुप्शा साइक्मी बाक्त। मेकोमी यो इस्राएली आन कली आन जोरी सत्रु रे प्रोंइमी बाक्त। न्यायाधीस ५:६

4

देबोरा नु बाराक

1 एहूद बेक्म नोले इस्राएलीपुकीमी लेंशा परमप्रभु यावे आ डोंइती मार मरिम्शो बाक्मे, मेको पामे बाक्त। 2 मोपतीके परमप्रभु यावेमी मेको आन कली हासोरमी सासन पाइब कनानी आन पिप याबीन आ गुइमी गेवा बाक्त। मेको आ लडाइ पाइब आन ठेयब मुर सीसेरा माइशशा बाक्माक्त। मेको हरोशेश-हा-गोयीममी बाक्माक्त। यहोसु ११:२ 3 मिनु लेंशा इस्राएलीपुकीमी परमप्रभु यावे कली “वारच पाइय्यीकी” दे थोत्रमे बाक्त। मारदे हना सीसेरा के ९ सहे फलाम के बग्गी बाक्तेक्म। मिनु इस्राएली आन कली २० बर्स सम्म शुश श्येत गेशा, दिप्शा वोइशशा बाक्माक्त।

4 मेना लप्पीदोथ आ मीश, देबोरा इस्राएली आन कली निसाफ पाइब दुम्शो बाक्माक्त। मेको परमप्रभु यावे आ लोत्र पाइब यो बाक्माक्त। 5 मेको एफ्राइम डा पहाडी रागी, रामाह नु बेथेल आ दातेमी बाक्शो देबोरा आ खजूर रवा आ पुंमी बाक्शो बाक्माक्त। मिनु इस्राएलीपुकी निसाफ पुंइथ मेक जाक्मा बाक्त। उत्पत्ती ३५:८ 6 मेकोमी अबीनोअम आ तौ बाराक कली नाप्ताली डा केदेश सहर रे ब्रेत्थ सोइक्ता बाक्त। मिनु मेको कली परमप्रभु यावे, इस्राएली आन परमप्रभुम इ कली “गे लशा, नाप्ताली नु जबूलून आस थर डा १० हजार मुर आन कली योत्रशा, मेको आन कली ताबोर डांडामी पिशशा पिवो। यहोसु २१:३२ 7 गो चहिं याबीन आ लडाइ पाइब आन कप्तान सीसेरा आ मुर नु आ बग्गीपुकी गुंइशा, किशोन खोला आ नेक्था चाक्नुड। मिनु इन गुइमी गेनुड” दे मदा बाक्त। 8 मिनु बाराकमी देबोरा कली “गे गो नु लाइतीनी हना, गो लाइनुड। गे गो नु मलाइतीनी हना, गो मलाइनुड” दे लोत्र लेत्ता बाक्त। 9 मिनु देबोरामी “थमा पा, गो गे नु लाइनुड। तन्न एको ठेयब गेय आ ततीक मान गे मताइनेवे। मारदे हना परमप्रभु यावेमी सीसेरा कली मीश मुर का आ गुइमी गेशो बाक्ब” देंमाक्त। मिनु देबोरा बोक्शा डा मिन बाराक नु केदेश सहरमी

लमाक्त। 10 बाराकमी जबूलून नु नाप्टाली आस थर डा मुर आन कली केदेश सहरमी ब्रेत्ता बाक्त। मोपा १० हजार लडाइ पाइबपुकीमी मेको आ नोले खोदमे बाक्त। मिनु देबोरा मेको नु लमाक्त।

11 मिनु केनी डा मुर, मोसा आ शिउ होबाब आ चच युइ बाक्मा बाक्त। केनी हेबेर चहिं केनी आन दाते रे ब्राशो बाक्माक्त। मोपा ब्राशा, केदेश सहर आ नेक्था एलोन-बे-सा-अनानीममी बाक्शो ठेयब रवा आ नेक्था जाक्दीशशा, आ ताम्बु कीशा बाक्शो बाक्माक्त। न्यायाधीस १:१६; गन्ती १०:२९

12 मिनु सीसेरामी अबीनोअम आ तौ बाराक ताबोर डांडामी लशो बाक्ब देशो नेना बाक्त। 13 मिनु सीसेरामी आ ९ सहे फलाम के बग्गी नु आ लडाइ पाइब आन कली हरोशेथ-हा-गोयीम रे किशोन खोलाम खुप्ता बाक्त।

14 मिनु देबोरामी बाराक कली “बोक्को, मुलाक्त परमप्रभु यावेमी सीसेरा कली इ गुइमी गेशो बाक्ब। परमप्रभु यावे इ डोंइती मगाक्बा डा?” देंमाक्त। मोपतीके बाराक नु आ १० हजार लडाइ पाइब ताबोर डांडा रे बुम्मा बाक्त।

15 मिनु परमप्रभु यावेमी सीसेरा नु आ बग्गी नेल्ले, आ लडाइ पाइब नेल्ल बाराक नु बुपदा बाक्त। सीसेरा चहिं आ बग्गी रे तोइशशा प्रोक्माक्त। न्यायाधीस ५:२०; उत्पत्ती ३५:५; प्रस्थान २३:२७; ब्यवस्था २:२५; यहोसु २:९-११

16 मिनु बाराकमी बग्गीपुकी नु लडाइ पाइब आन कली हरोशेथ-हा-गोयीम सम्म खेदा पा, सीसेरा आ लडाइ पाइब नेल्ल आन कली तरवारमी क्योरशा सदा बाक्त। का यो ब्रोंइचा मतामे बाक्त। 17 सीसेरा चहिं खोइलीमी प्रोक्ना प्रोक्न, केनी हेबेर आ मीश याएल आ ताम्बुमी जाक्माक्त। मारदे हना हासोर डा पिप याबीन नु केनी हेबेर डा मुरपुकी लडाइ मपथु, वारच दुम्शो बाक्मा बाक्त।

18 मिनु याएल सीसेरा कली गुम्चा, दे लाडगा गूमाक्त। मिनु मेकोमी “हजुर ओव्रडीन। महिनीन” देंमाक्त। मिनु सीसेरा ताम्बु आगा ओव्रमाक्त। मिनु याएलमी मेको कली खुइशशा, वाम सुमा बाक्त।

19 सीसेरामी याएल कली “आं कली ब्वाक्क तूचा गेन। गो साप्पा तूतू दाक्ती” देंमाक्त। मिनु मेकोमी दूध वोइशशा बोस का गुंइशा, मेको कली तूचा गेवा बाक्त। मिनु मेको कली वा फेक्ता बाक्त।

20 मिनु सीसेरामी मेको कली “ताम्बु आ लाप्चोमी राप्शा बाक्को, सुइ जाक्शा ‘एकेर सुइ मुर जाक्मा?’ दे हिल्लो पाम्तेक्म हना, मजाक्म देनो” देंमाक्त।

21 तन्न हेबेर आ मीश याएलमी थात्ला का नु ताम्बु डा किला का लाइशशा, निन्द्रा पशो सीसेरा आ नेक्था लमाक्त। मिनु याएलमी सीसेरा आ पियामी खप सम्म गुक्चा डा पा किला थोक्ता बाक्त। मिनु शुश दशा, निन्द्रा पा बाक्शो, सीसेरा बेक्माक्त।

22 मिनु बाराक सीसेरा कली खेदा पा मेक जाक्माक्त। मिनु याएलमी मेको कली गुम्शा “ओव्रडीन, गो इन माल्शो मुर इन कली कोंइनुड” देंमाक्त। मिनु बाराक मेको नु ताम्बु आगा ओव्रमाक्त। मिनु सीसेरा आ पियामी किला गुक्शा बेक्शो तवा बाक्त।

23 मेको नाक्ती परमप्रभुमी कनान डा पिप याबीन कली इस्राएलीपुकी नु बुपदा बाक्त। 24 मिनु इस्राएलीपुकीमी कनानी पिप याबीन कली शुश श्येत गेशा, मसदमे सम्म श्येत गेमे बाक्त।

5

देबोरा नु बाराक आस कुम्सो

1 मेको नाक्त देबोरा नु अबीनोअम आ तौ बाराकमी कुम्सो पाम्से बाक्त। मेको निक्शीमी मार कुम्सो पाम्से बाक्त, देशा हना 2 “इस्राएल डा ठेयब मुरुमी लडाइ पाइब आन कली खुल्मेनु, मेकोपुकीमी आन ठेयब मुर आन कली टिम्तेक्म। मोपतीके परमप्रभु यावे कली ठेयब सेलीन।

3 पिपपुकी, नेनीन। सासन पाइबपुकी, इन नोफा दाइक्तीन। नेनीन। गो परमप्रभु यावे कली कुम्सो पाइनुड। गो परमप्रभु यावे, इस्राएली आन परमप्रभु कली ताप्तीक का ताप्शा, कुम्सो का पाइनुड। 4 परमप्रभु यावे, सेइर रे पा गाक्नी ना, एदोम रागी रे लाइतीनी, मेना रागी नेल्ल खिंखि पाप्तु। रेउ यित। गोस्सुमी रेउ यिपाइक्तु। ब्यवस्था ३३:२; हबकुक ३:३-६ 5 मिनु सीनै डांडा डा परमप्रभु यावे आ डोंइती पहाडमी खिनु कुत। परमप्रभु यावे, इस्राएली आन परमप्रभु आ डोंइती डांडा खिंखि पाप्तु। भजन संग्रह ६८:९

6 अनाथ आ तौ शाम्गार आ पालामी, याएल बाक्म सम्म ग्याप्ब लेयब आन हुल ठेयब लां मगाक्ब दुम्तेक्म। मुरपुकी खुइशशा लांमी गाक्चा गोम्तेक्म। न्यायाधीस ३:३१ 7 मिनु इस्राएलीपुकीमी आन रूमी शोक्ने खुप्ने मचबेम। देबोरा, गे मेको आन दातेमी मजाक्डे सम्म मारेइ पने मचबेम। गे इस्राएली आन ममा खोदेशो पा जाक्ते। 8 इस्राएलीपुकीमी नक देवी देवता आन कली ठेयब सेल्चा कली योव्रची ना सहर डा लाप्चोमी लडाइ दुम्त। मिनु ४० हजार इस्राएली आन के तेक्तीक नु तरवार मबा।

9 इस्राएली लडाइ पाइब आन ठेयब मुर दाक्नुड। मारदे हना मेकोपुकी महिंथु, लडाइ पचा कली, दे आंम कली जिम्मा गोम्तेक्म। परमप्रभु यावे ठेयब बाक्ब। 10 बुश गधा डोइशशा गाक्बपुकी, राडी तारी निप्बपुकी, खोइलीम गाक्ब

नेल्लेमी यो परमप्रभु यावेम मेको लडाइ 'दोपा पवा' मेको शेंदीन। 11 मिनु ब्वाक्कु बुक्तीकेमी बाजा ताप्शा 'परमप्रभु यावे आ ग्रातीक ठेयब बाक्ब' दे लेंशा कुम्सो पाइनीम। 'मिनु इस्राएल डा बोल्यो मुर आन ग्राशो आ पर्बम कुम्सो पाइनीम। मिनु परमप्रभु यावेमी रूम शोक्ब आन कली ग्रापाइक्तु' दे कुम्सो पाइनीम। मिनु परमप्रभु यावे आ मुरपुकी उइ सहर डा ठेयब लाप्चोमी लाम्तेक्म।

12 बोक्को, देबोरा, बोक्को, बोक्शा डा मीन, कुम्सो पावो। अबीनोअम आ तौ बाराक, बोक्को, इ ग्याइशो मुर आन कली एक रे योल्दो। 13 मिनु ठेयब मुरपुकी उइ गाक्तेक्म। परमप्रभु यावे आ मुरपुकी डोंइती बारशा, बोल्यो मुर नु लडाइ पचा चिक्ताक्म। 14 एफ्राइम आ थर डा मुर दिंम जाक्तेक्म। बेन्यामीन आ थर डा मुरपुकीमी मेको आन नोले खोइक्तेक्म। माकीर रे आन ठेयब मुर यिम्तेक्म। जबूलून आ थर डा मुर आन रागी रे पिशा, आन थर डा कप्तानपुकी जाक्तेक्म। यहोसु १७:१ 15 इस्साकार आ थर डा हुकुम पाइबपुकी देबोरा नु जाक्तेक्म। मिनु इस्साकार आ थर डा मुर बाराक कली मप्रोंइथु आ नोले खोइक्तेक्म। मेकोपुकी उइ दिंममी मेको आ नोले दोरशा लाम्तेक्म। मिनु रूबेन आ थर डा मुर चहिं आन दातेमी 'लचा देय मलचा' दे शुश लोत्र पा मिम्ना मिम्न थुं नाक्मुम्तेक्म। 16 मारदे गोठम बाक्नीनी? मेको योत्रब आन ताप्शो नेंचा दाक्नीनी? मिनु रूबेन आ थर डा मुर आन दातेमी शुश मिम्ना मिम्न बाक्तेक्म। 17 गिलाद डा मुरपुकी यर्दन आइक्की हांबुमी बाक्तेक्म। दान आ थर डा मुरपुकी, मारदे डोंगा आन नेक्था रिम्शा बाक्नीनी? मिनु आशेर आ थर डा मुरपुकी समुन्द्र आ नेक्था देश पा बाक्तेक्म। मेकोपुकी डोंगा आन नाइक्तीकेमी मेक उइ बाक्शो बाक्तेक्म। 18 मिनु जबूलून आ थर डा मुरपुकीमी महिंथु लडाइ पाम्तेक्म। मिनु नाप्ताली आ थर डा मुरपुकीमी यो लडाइ पाम्तेक्म।

19 कनान डा पिपपुकी लडाइ पा जाक्तेक्म। मेगीददो आ नेक्था तानाक सहरमी लडाइ पाम्तेक्म। तन्न चांदी नु अरु रोइशो मारेइ यो लाइक्का मताम। 20 मिनु सोरुलपुकीमी सरीड रे लडाइ पाम्तेक्म। मेको आन लतीक लां रे सीसेरा नु लडाइ पाम्तेक्म। प्रस्थान १४:२५; यहोसु १०:१४ 21 मिनु किशोन खोलामी सीसेरा आ लडाइ पाइब आन कली योल्ताक्व। मेको बारशो किशोन खोलाम मोदेशो पाप्तु। आं थुं महिंथु, बारशा, लडाइ पावो।

22 मिनु शारा आन खोइल रेयके पपाइशशा मेको साप्पा दोरतेक्म। आन खोइल ताप्शा, मेको साप्पा दोरतेक्म। 23 परमप्रभु यावे आ स्वर्ग डा गेय पाइबमी 'मेरोज कली सराप पावो। मिनु मेकेर बाक्ब मुर आन कली सराप पावो। मारदे हना मेकोपुकीमी परमप्रभु यावे कली मारेइ यो वारच मपाम' देंत।

24 केनी हेबेर आ मीश याएल मीश मुर नेल्ल आन क्येडा आसीक ताइब दुम्ब। ताम्बुमी बाक्ब मीश मुर नेल्ल आन क्येडा आसीक ताइब बाक्ब। 25 सीसेरामी ब्वाक्कु पुंड्तु। तन्न मेकोमी दूध गेप्तु। मेको कली दारशो डप्कामी दहि खेत्ताक्व। न्यायाधीस ४:१९ 26 मिनु मेकोमी ताम्बु आ किला तुल्शा, थात्ला का गुप्तु। मिनु सीसेरा आ पियाम थोक्ताक्व। मेको कली आ रेक्चे ख्रिशशा साइक्तु। 27 सीसेरा याएल आ खोइलीम बेक्त। मेको आ खोइलीमी गोलशा बेक्त।

28 मिनु सीसेरा आ ममामी झेल रे चिवा पा कोव्रतु। मोपा चिवा पा कोव्रशा 'मेको आ बग्गी मारदे मजाक्मे? आ बग्गी आ रेयके मारदे मनेंसे?' दे वाइ ब्रेत्त। 29 मिनु मेकेर बाक्ब नेल्ल क्येडा अरेब मीश मुरुमी आ देशो लोत्र आंमान लेन्ना लेन्न 30 मेको आन रोइशो नेल्ल योक्गमे कों? मुर नेल्ल कली मीश आल का कि निक्शी ताइनीम कों? मिनु सीसेरामी रिम्शो रड पाइशो वा ताइबा कों? आं कली बुटा आप्शो दारशो कुप्नी निक्शी चाक्बा कों? दे आंमा नु लोत्र पशो बाक्त।

31 मिनु परमप्रभु यावे, इन जोरी सत्रु नेल्ल मोपान खतम दुम्मल। इन कली दाक्बपुकी चहिं सुनी दाप्शो नां खोदेशो पा ब्रशा सक्ति पाइशो दुम्शा, बाक्मल" दे कुम्सो पाम्से बाक्त। मिनु ४० बर्स सम्म मेको रागीमी लडाइ मदुम्माक्त। ब्यवस्था ६:५

6

मिदयानीपुकीम श्येत गेशो

1 मिनु इस्राएलीपुकीमी लेंशा परमप्रभु यावे आ डोंइती मार मरिम्शो बाक्मे, मेको पामे बाक्त। मोपतीके परमप्रभु यावेमी मेको आन कली ७ बर्स कली मिदयान डा मुर आन गुइमी गेवा बाक्त। 2 मिनु मिदयान डा मुरपुकीमी इस्राएली आन कली शुश दिप्शा, सक्ति पाइशो दुम्मा बाक्त। मोपतीके इस्राएलीपुकी पहाड डा पुक्खी, रोंगु इर लशा, आन खुइशशा बाक्तीक सेल्मे बाक्त। 3 इस्राएलीपुकीमी वांचेर शोक्गमे चोटीन मिदयान डा मुरपुकी, अमालेक डा मुरपुकी नु पूर्ब डा मुरपुकी जाक्शा, इस्राएलीपुकी नु लडाइ पाइबाक्मा बाक्त। ब्यवस्था २८:३३ 4 मेको आन ताम्बु कीशा

बाक्शा, गाजा सम्म डा बाली नाली कली खतम पोक्गमे बाक्त। मेकोपुकीमी इस्राएल डा मुर आन कली जचा थोवक काइ महेंदमे बाक्त। आन भेडा, ब्यफ नु गधा नेल्ल रोइशशा लदमे बाक्त। 5 मेकोपुकी आम के बी ब्यफ नु ताम्बुपुकी चाक्शा, सल्हा माले खोदेशो पा जाक्मा बाक्त। मुर नु मेको आन दलओंठ हिकने मचाप्चा डा पा शुश बाक्तीके, मोपा मेको रागी कली खतम पोक्गमे बाक्त। 6 मिनु मिदयान डा मुरपुकीमी इस्राएली आन कली शुश प्रुडग सेल्मे बाक्त। मिनु इस्राएलीपुकीमी “वारच पाइय्यीकी” दे परमप्रभु यावे कली थोवमे बाक्त।

7 मोपा इस्राएलीपुकीमी परमप्रभु यावे कली मिदयान डा मुर आन पर्वम थोवमे नोले 8 परमप्रभु यावेमी मेको आन कली आ लोव पाइब का सोइक्ता बाक्त। मिनु मेकोमी “परमप्रभु यावे, इस्राएली आन परमप्रभुम इन कली ‘गो इन कली इजीप्त रागी वाइलीम वाइल दुम्तीक रे प्रोइशा गुंडशा पित्ता। 9 गो इन कली इजीप्त डा मुर आन गुइ रे नु इन कली श्येत गेब मुर आन गुइ रे प्रोइशा चाक्ता। मेको इन कली दिण्व नेल्ल आन कली इन डोंइती रे खेरताक्मी। मिनु मेको आन रागी इन कली गेता। 10 मिनु गो इन कली गो परमप्रभु यावे, इन परमप्रभु नड। गेपुकी एमोरी आन रागीमी बाक्तीनी हना यो, मेको आन देवी देवता आन कली ठेयब मसेलीन’। तन्न गे आं लोव मनेनी” दे मेको परमप्रभु यावे आ लोव पाइबमी माइक्मी बाक्त।

गिदोन कली ब्रेशो

11 मिनु परमप्रभु यावे आ स्वर्ग डा गेय पाइब जाक्शा, ओफ्रा सहर आ नेक्था बाक्शो ठेयब रवा आ पुंम निस्से बाक्त। मेको रू अबीएजेर आ मुर योआश आ रू बाक्माक्त। योआश आ तौ गिदोन चहिं मिदयान डा मुरपुकी रे खुइक्चा कली अडगुर खाक्तीकेमी चेरब तुम्ना तुम्न बाक्मा बाक्त। यहोसु १७:२ 12 मिनु परमप्रभु यावे आ स्वर्ग डा गेय पाइब मेको आ डोंइती गूशा मेको कली “गे महिंथु लडाइ पाइब मुर, परमप्रभु यावे गे नु बाक्ब” देंमाक्त। 13 मिनु गिदोनमी मेको कली “हजुर, परमप्रभु यावे गोपुकी नु बाक्त हना, आंइ कली मारदे ओदेशो दुम्मे? मिनु मेको आ छक लाक्चा डा गेय नेल्ले ते बाक्नीमी? आंइ किकी पिपीपुकीमी ‘परमप्रभु यावेमी आंइ कली इजीप्त रागी रे गुंडशा पिशशो’ दे मदेंमा डा? तन्न मुल परमप्रभु यावेमी आंइ कली प्रोइतु। मिनु आंइ कली मिदयान डा मुर आन गुइमी गेपु” देंमाक्त।

14 मिनु परमप्रभु यावे मेको गे लेशशा “गे महिंब नु बोल्यो बाक्नेवे। मोपतीके लावो। इस्राएली आन कली मिदयान डा मुर आन गुइ रे प्रोनो। गो इ कली सोइक्नुड” देंमाक्त। न्यायाधीस ६:३२; १सामुएल १२:११; हिब्रू ११:३२ 15 मिनु गिदोनमी “हजुर, गो दोपा इस्राएली आन कली प्रोइने चाप्नुडा? आं खिं मनस्से आ थरमी नेल्ल क्येडा आइक्च बाक्ब। मिनु गो आं आफ आ खिंमी यो नेल्ल क्येडा आइक्च मुर बाक्नुड” देंमाक्त। 16 मिनु परमप्रभु यावेमी मेको कली “गो गे नु बाक्नुड। मिनु गे मिदयानी नेल्ल आन कली साइक्नेवे” देंमाक्त। प्रस्थान ३:१२ 17 मिनु मेकोमी “गो इन डोंइती शिशी ताता हना, नु गे थमा पा गो नु लोव पाइब बाक्तीनी हना, आं कली चिन्ड का कोइदीनी। 18 गो इन कली जचा मखेतु सम्म, गे एक रे मलन” देंमाक्त। मिनु मेकोमी “गे मजाक्डे सम्म गो एकेन बाक्नुड” देंमाक्त। न्यायाधीस १३:१५-१६ 19 मिनु गिदोन खिं ओवशा, क्यारश पाठा का ठीक पवा बाक्त। एफाह का फस के बोरब ओख्ती मसुप्शो शोब्ले चोवा बाक्त। मिनु श्ये डालोम कुर पा आ शेक्क चहिं बोस काम लुक्शा, ठेयब रवा आ पुंमी लाइशशा, मेको कली खेतता बाक्त। एफाह का २२ लिटर पुक्तीक बाक्ब। एफाह का ५ पाथी खोदेशो बाक्ब। लेवी ४:२८ 20 मिनु परमप्रभु आ स्वर्ग डा गेय पाइबमी “मेको श्ये नु बोरब ओख्ती मसुप्शो शोब्ले एको फुल्लु तारी वोतो। आ शेक्क चहिं आ तार मोतो” देंमाक्त। मिनु मोदेशोन पवा बाक्त। 21 मिनु नोले परमप्रभु यावे आ स्वर्ग डा गेय पाइबमी मेको श्ये नु शोब्ले कली आ गुइम बाक्शो कोक्केमी थिवा बाक्त। मिनु मेको फुल्लु रे पा मी गूशा, मेको श्ये नु बोरब ओख्ती मसुप्शो शोब्ले नेल्ल नेक्गा बाक्त। मिनु परमप्रभु यावे आ स्वर्ग डा गेय पाइब यो लमाक्त। लेवी ९:१४ 22 मिनु गिदोनमी “थमा पा परमप्रभु यावे आ स्वर्ग डा गेय पाइब बाक्माक्त” दे तुइक्ता बाक्त। मिनु “परमप्रभु, परमप्रभु यावे, आं कली वारच पाइय्यीनी। मुलाक्त परमप्रभु यावे आ स्वर्ग डा गेय पाइब कली आं नेक्थान ताता” देंमाक्त। न्यायाधीस १३:२२; प्रस्थान ३३:२०

23 मिनु परमप्रभु यावेमी “इ थुं नाइक्तो। महिनो। मारदे हना मबेक्नेवे” देंमाक्त। 24 मिनु गिदोनमी परमप्रभु यावे कली चढ़ेतीक का सेला बाक्त। मिनु आ नें “परमप्रभु यावे थुं नाइक्चा गेब बाक्ब” दे नें वोदा बाक्त। मेको चढ़ेतीक मुलाक्त सम्म अबीएजेर आ मुर आन ओफ्रा सहरम बाक्ब।

25 मेको नाक्दो परमप्रभु यावेमी गिदोन कली “इ आफ आ गोठ रे ७ बर्स दुम्शो ब्यफ चाक्को। इ आफ आ बाल देवता नु आ नेक्था बाक्शो अशेराह देवी आ शी के थाम प्रेशशा गेवो” देंमाक्त। २राजा ११:१८; २राजा २३:१२-१५

26 मिनु “मेकेर परमप्रभु यावे, इ परमप्रभु कली आं देशो खोदेशो पा चढ़ेतीक का सेलो। मिनु नोले आं कली मेको ब्यफ कली इ प्रेशो अशेराह देवी आ शी के खोलशो थाम तारी चोशा चढ़ेतीक का चढ़ेवो” देमाक्त। 27 मिनु गिदोनमी आंम के १० जना गेय पाइब कली लाइशशा, परमप्रभु यावे आ देशो खोदेशो पवा बाक्त। मिनु नाक्त मेको गेय पचा कली आं आफ आ खिं डा मुर नु मेको सहर डा मुर आन कली तशा शुश हिंमाक्त। मोपतीके मेकोमी गेय नेल्ले नाक्टोमी पवा बाक्त।

28 मिनु मेको सहर डा मुरपुकी सुनी कना बोक्शा, बाल देवता आ चढ़ेतीके प्रेशो, मेको आ नेक्था बाक्शो अशेराह देवी आ मूर्ति यो प्रेशो नु गिदोनमी सेल्शो चढ़ेतीकेम नोले डा ब्यफ चढ़ेशो तामे बाक्त। 29 मिनु मेकोपुकीमी “एको सुम पवा, माइ?” दे हिल्लो पमुमा बाक्त। शुश हिल्लो पामे नोले योआश आ तौ गिदोनमी पाप्तु, दे तुइक्त्मे बाक्त। 30 मिनु सहर डा मुरपुकीमी योआश कली “इ तौ कली लाडगा गुंडदो। मेको बेक्चा माल्ब। मेकोमी बाल देवता आ चढ़ेतीक प्रेदा बाक्त। मिनु आ नेक्था बाक्शो अशेराह देवी आ मूर्ति पाइशो थाम यो खोला बाक्त। मोपतीके मेको कली साइक्चा माल्नीक” देमा बाक्त। 31 मिनु योआशमी मेको आ नेक्था बाक्शो ग्रीब मुर नेल्ल आन कली “गेपुकी बाल देवता आ पबर्म ग्रीशो ननी? बाल देवता कली वारच पचा दाक्नीनी? सुम मेको कली वारच पाइबा, मेको दीसा सुनी सम्म साइक्चा पुंडसीब। आ चढ़ेतीक प्रेत्चा पुंडसीशो बाल देवता थमा पा देवता बाक्त हना, मेकोमी आंमान आ सक्ति कोइदल” देमाक्त। १रजा १८:२१-३९ 32 मेको नाक्त रे मेकोपुकीमी गिदोन आ नें येरूब-बाल, दे वोदमे बाक्त। मेको आ अर्थ “बाल देवता आंमान गिदोन कली आ सक्ति कोइदल। मारदे हना गिदोनमी आ चढ़ेतीक प्रेशो बाक्ब” देमा बाक्त। न्यायाधीस ७:१ 33 मिनु मिदयानी, अमालेकी नु पूर्ब डा मुरपुकी खुम्सीशा, हुल का दुम्मा बाक्त। मेकोपुकी यर्दन खोला शोक्शा, येजेल आ दिंमम ताम्बु कीडमे बाक्त। 34 मिनु परमप्रभु यावे आ सोक्तीम गिदोन कली सुमा बाक्त। मिनु तुराही ताप्शा, अबीएजेर आ मुर नेल्ल आन कली “आं नोले खोतीन” दे ब्रेत्ता बाक्त। न्यायाधीस ३:१०; न्यायाधीस ११:२९; न्यायाधीस १३:२५ 35 मिनु मनस्से आ थर आन बाक्तीकेमी लोव्र कुरब मुर सोइक्ता बाक्त। मिनु मेको आन कली “आं नोले खोतीन” दे ब्रेत्ता बाक्त। मिनु मोपा आशेर, जबूलून नु नाप्ताली आन बाक्तीकेम यो लोव्र कुरब मुर सोइक्ता बाक्त। मिनु मेको नेल्ल गिदोन कली ग्रुम्थ जाक्मा बाक्त।

36 मिनु गिदोनमी परमप्रभु कली “गे देंनी बुदी आं कली इस्राएली आन कली प्रोंइब सेल्लतीनी हना, 37 गो भेडा आ ऊन कली खलामी वोइक्नुड। मेको खला डा ऊन कली ला सीतमी जिशो नु एर ओंथ डा खप चहिं मजिशो बाक्त हना, इन देशो लोव्र, गे इस्राएली आन कली प्रोंइचा, दे आं कली ब्रेत्तीनी, देशो लोव्र थमा बाक्ब, दे तुइक्नुड” देमाक्त। 38 मिनु मेको आ देशो खोदेशोन दुम्माक्त। मेको आ सुनी बोक्शा मेको ऊन रे चिरशा, बोस का ब्वाक्कु गुंडदा बाक्त। एर ओंथ डा खप चहिं मजिशो बाक्माक्त। 39 मिनु लेंशा गिदोनमी परमप्रभु कली “गो नु मगाइक्तीन। मिनु आं कली चिनु लोव्र का देंचा गेन। गो इन कली लेंशा पुंडनुड। आं कली खेयप का मेको ऊन सोव्रशो नु एर ओंथ डा खप चहिं जिप्पाइशशा कोइदीन” देमाक्त। उत्पत्ती १८:३० 40 मिनु परमप्रभुमी मेको नाक्टो यो गिदोन आ देशो खोदेशो पवा बाक्त। खप ला जिम्माक्त, मेको ऊन चहिं सोव्रशो बाक्माक्त।

7

गिदोन आ मुरपुकीमी ग्राशो।

1 गिदोन कली येरूब-बाल यो देंबाक्तेक्म। मिनु गिदोन नु आ मुर नेल्ले सुनी कना बोक्शा डा मिन हारोद सहर डा ब्वाक्कु बुक्तीके आ नेक्था ताम्बु कीडमे बाक्त। मिदयान डा मुरपुकीमी चहिं मेको आन उत्तर गे डा मोरेह डांडा आ नेक्था डा दिंममी ताम्बु कीडमे बाक्त। न्यायाधीस ६:३२ 2 मिनु परमप्रभु यावेमी गिदोन कली “गे नु बाक्शो मुरपुकी माल्शो क्येडा शुश बाक्नीम। गो मिदयान डा मुर आन कली मोदेशो शुश मुर आन गुइमी गेता हना, इस्राएलीपुकीमी आं कली प्रेंशा ‘गो आंमा आंइ सक्तिमी मिदयान डा मुर आन कली ग्राशो नकी’ दे ठेयब लेत्नीम। 3 मोपतीके मुल गे मेको नेल्ल आन कली ‘सुइ मुर हिंशा खिंखि पाइब बाक्तेक्म हना, मेको मुर आन खिं लेत्चा माल्नीम’ दे नेंपतो” देमाक्त। मिनु २२ हजार आन खिं लेशशा, १० हजार इस्राएली ला लीमा बाक्त। ब्यवस्था २०:८ 4 मिनु परमप्रभु यावेमी गिदोन कली “मुल यो शुश मुर बाक्नीम। मोपतीके मेको आन कली उइ खोलामी लतो। मेकेर गो मुर योव्रशा गेनुड। गो इ कली ‘एको मुर लाइब’ देंती हना, ‘मेको मुर गे नु लचा माल्ब। एको मुर गे नु मलाइब’ देंती हना, मेको गे नु लचा मलाइब” देमाक्त। 5 मिनु गिदोनमी मुर आन कली उइ खोलामी लाइक्मी बाक्त। मिनु परमप्रभु यावेमी गिदोन कली “सु सुमी बाप्शा, खोला डा ब्वाक्कु कुचुममी तुक्शो खोदेशो पा लेंमी तुक्शा तूनीमी, मेको आन कली एर वोतो।

सु सुम चहिं खोला डा ब्वाक्कु पोक्च थेक्शा गुडम तूनीमी, मेको आन कली ओंथ वोतो” देंमाक्त। 6 मिनू कुचुम खोदेशो पा ब्वाक्कु तुक्शा तूबपुकी सहे सां दुम्मा बाक्त। मिनू अरु नेल्लेमी पोक्च थेक्शा आन गुडमी तूडमे बाक्त। 7 मिनू परमप्रभु यावेमी गिदोन कली “एको सहे सां ब्वाक्कु तुक्शा तूब मुर रे पा मिदयानी आन गुड रे प्रोडनुड। लीशो आन कली आम आम खिमी लचा गेमी” देंमाक्त। १सामुएल १४:६ 8 मिनू मुरपुकीमी मेको आन बुत लाम्ज नु तुराही वोडशा, मेको आन खिं गाक्मा बाक्त। गिदोनमी मेको सहे सां कली वोडक्मी बाक्त। मिदयानी आन बाक्तीक चहिं मेको आन क्येडा उड दिंममी बाक्माक्त।

9 मिनू मेको नाक्दो परमप्रभु यावेमी गिदोन कली “बोक्को, मिदयानी आन बाक्तीके बुपो। मारदे हना गो मेको आन कली इ गुडमी गेता। 10 तन्न हिंनेवे हना, इ गेय पाइब पुराह कली लाडशा बुपो। 11 मिनू लशा, मेको आन लोव पशो नेनो। मेको आन लोव नेनी नोले, मेको आन कली लडाइ तोचा महिंनेवे” देंमाक्त। मिनू मेको आ गेय पाइब पुराह नु मिदयानी आन डोइती डा ताम्बु आ नेक्था लमाक्त। मेकेर लडाइ पाइबपुकी बाक्शो बाक्मा बाक्त। 12 मेको मिदयानी, अमालेकी नु पूब डा थर डा मुर नेल्ल शुश सल्हा माले खोदेशो पा दिंममी बाक्शो बाक्मा बाक्त। मेको आन दलओंठ ठेयब समुन्द्र डा बाल्वा खोदेशो हिक्ने मचाप्चा डा पा शुश बाक्मा बाक्त। 13 मिनू गिदोन मेको आन ताम्बु आ नेक्था जाक्दीम्मेनु, मेकेर डा मुर कामी आ वारच कली आ डोमु शोवडा बाक्त। मेकोमी “गो आ डोमुमी क्योवज शोब्ले का गुलुल पा लोक्सीशा, मिदयानी आन बाक्तीकेमी जाक्शा, मेको आन ताम्बु चिप्शो ताता” देंमाक्त। 14 मिनू आ वारचमी “थमा पा, मेको इस्राएली योआश आ तौ गिदोन आ तरवार बाक्ब। परमप्रभुमी मिदयान नु मुर नेल्ले आन कली मेको आ गुडमी गेपु” देंमाक्त।

15 मिनू गिदोनमी डोमु नु मेको आ अर्थ नेंशा डा मिन परमप्रभु यावे कली ठेयब सेला बाक्त। मिनू इस्राएली आन बाक्तीकेम लेशशा “बोक्कीन, परमप्रभु यावेमी मिदयानी नेल्ल आन कली इन गुडमी गेपु” देंमाक्त। 16 मिनू मेको सहे सां मुर आन कली, हुल सांमी योक्मा बाक्त। मिनू नेल्ल आन कली का का पा तुराही नु आगा रांको वोडशा शेतथ गर का का गेमी बाक्त। 17 मिनू “आं कली कोवडीन। आं खोदेशो पने। गो मेको आन ताम्बु आ नेक्था जाक्दीशा, मार मार पाइनुडा, गे यो मोदेशो पने। 18 मिनू गो नु बाक्ब हुलमी गेना तुराही ताप्नीमी, मेना गे यो आन बाक्तीक एर ओंथ इन तुराही ताप्शा ‘परमप्रभु यावे कली नु गिदोन कली’ दे ठेयब सेदा पा ग्रीडीन” देंमाक्त। 19 गिदोन नु मेको नु बाक्ब सहे का मुरपुकी क्येर नाक्दोमी मिदयान डा मुर आन बाक्तीक आ नेक्था जाक्दीम्मा बाक्त। मेको आन खाल पाइब नक फांडसीशो बाक्मा बाक्त। मिनू गिदोन आ मुरपुकीमी तुराही ताप्शा, आन गुडमी कुरशो शेतथ गर प्रोल्मे बाक्त। 20 मोपा मेको हुल सांमीन तुराही ताप्शा, आन कुरशो गर प्रोल्मे बाक्त। आन पेरा गुडमी रांको नु ग्युरा गुडमी तुराही कुरशा “परमप्रभु यावे कली तरवार का नु गिदोन कली तरवार का” दे ग्रीमा बाक्त। 21 मिनू गिदोन आ मुर नेल्ल मेको आन बाक्तीक एर ओंथ राप्शा बाक्मा बाक्त। मिदयान डा लडाइ पाइबपुकी चहिं नेल्ल वाइ ब्रेशशा प्रोक्मा बाक्त। 22 मिनू मेको सहे सां मुरुमी तुराही ताप्मेनु, परमप्रभु यावेमी मेको मिदयान डा मुर आन दातेमी साइक्मुपाइक्मी बाक्त। मिनू मिदयान डा लडाइ पाइबपुकी सेरेराह गे बेथ-शित्ता सम्म प्रोक्मा बाक्त। मेको आबेल-मेहोलाह आ सांद तब्बाथ सहर आ नेक्था सम्म प्रोक्मा बाक्त। भजन संग्रह ८३:१०; यसैया ९:३; यसैया १०:२६ 23 मिनू गिदोनमी नाप्ताली आ थर, आशेर आ थर नु मनस्से आ थर डा मुर आन कली ब्रेशशा, मिदयान डा मुर आन कली खेदा पपदा बाक्त।

24 मिनू गिदोनमी एफ्राइम डा पहाडी रागीम बाक्ब मुर आन कली लोव सोइक्ता बाक्त। मार लोव सोइक्ता बाक्त, देशा हना “उड बुप्शा, मिदयानी आन कली सतीन। बेथ-बाराह सम्म यर्दन डा लांमी प्रोक्चा मगेन” दे लोव सोइक्ता बाक्त। मिनू मेको ब्रेशशा एफ्राइम आ थर डा मुरपुकीमी बेथ-बरा डा ब्वाक्कु रे यर्दन डा शोक्तीक सम्म डा लां तेक्गमे बाक्त।

25 मेकोपुकीमी मेको मिदयानी आन कली खेदा पस डा पस पा आन कप्तान निक्शी ओरेब नु जेयब कली ग्याइक्तमे बाक्त। मिनू मेकोपुकीमी ओरेब कली ओरेब आ फुल्लु तारी नु जेयब कली आ अडगुर खाक्तीक कोलमी सदमे बाक्त। मिनू नोले मेकोपुकीमी ओरेब नु जेयब आस पिया क्योरशा, यर्दन आइक्ची हांम गिदोन आ बाक्तीकेम चाक्गमे बाक्त।

8

गिदोन नु एफ्राइम आस मुर

1 मिनू एफ्राइम आ थर डा मुरपुकीमी गिदोन कली “मारदे आंइ कली ओदेशो पाइनीनी? मिदयान डा मुरपुकी नु लडाइ पथ लनीनु, मारदे आंइ कली मब्रेन्नी?” देंमा बाक्त। मिनू गिदोन कली शुश दोस गेशा जिचा तोवमे बाक्त।

2 मिनु गिदोनमी “गो मार पडा डा? गे आं क्येडा ठेयब गेय पाइतीनी। मार, अबीएजेर आ मुरपुकीम मिदयान डा मुर नेल्ल आन कली प्रोकपाइक्चा क्येडा एफ्राइम आ थर डा मुरपुकीमी मेको आन कली साइक्चा ठेयब मबाक्बा डा? 3 परमप्रभुमी मिदयान डा कप्तान ओरेब नु जेयब आस कली इन गुइमी गेशो बाक्ब। गेपुकीमी पशो खोदेशो गो पडा डा?” देंमाक्त। मिनु आ लोव्र नेंशा आन गाइश्शो नांडसे बाक्त।

पिप आस कली ग्याइश्शो

4 मिनु गिदोन यर्दन खोला जाक्शा, शोक्से बाक्त। मिनु गिदोन नु मेको नु बाक्शो सहे सां मुरपुकी मिदयान डा मुर आन कली खेदा पा दशा योलक योलुक दुम्शा शोव्रलु बेक्शो बाक्मा बाक्त। 5 मिनु गिदोनमी सुक्कोथ डा मुर आन कली “आं मुर आन कली इक्का शोब्ले गेन। मारदे हना एकोपुकी दशा, शोव्रलु बेक्शो बाक्नीम। मिनु गो मिदयान डा पिप जेबाह नु साल्मुन्ना आस कली खेदा पना पन बाक्नुड” दे पुना बाक्त। उत्पत्ती ३३:१७ 6 तन्न सुक्कोथ डा ठेयब मुरपुकीमी “मार, जेबाह नु साल्मुन्ना आस कली गे ग्याइक्ने थुमी डा? इ लडाइ पाइब आन कली मारदे शोब्ले गेनीकी?” दे लोव्र लेत्मे बाक्त। 7 मिनु गिदोनमी “परमप्रभु यावेमी जेबाह नु साल्मुन्ना आस कली आं गुइमी गेपु हना, गो गोरशो रागी डा चोंक चूमी युक्नन्नी” देंमाक्त। 8 मिनु पेनुएल सहरमी लमाक्त। मिनु मेकेर डा मुर आन कली खाल का डा लोव्र पवा बाक्त। मिनु मेकेर डा मुरपुकीमी यो सुक्कोथ डा मुरपुकीमी खोदेशो पा लोव्र लेत्मे बाक्त। 9 मिनु पेनुएल डा मुर आन कली “गो रिम्शो पा लेडडा नोले, गो मेको इन लाइश्शो खिं प्रेशशा गेनन्नी” देंमाक्त।

10 मिनु जेबाह नु साल्मुन्ना १५ हजार लडाइ पाइब नु कारकोर सहरमी बाक्सा बाक्त। पूर्ब डा लडाइ पाइब आन लीशो में मोशोन बाक्मा बाक्त। लाख का २० हजार लडाइ पाइब चहिं साइक्चा पुंडसमा बाक्त। 11 मिनु गिदोन नोबाह नु योग-बेहा आ पूर्बम बाक्शो ग्याप्ब लेयब आन गाक्तीक लां लशा, जेबाह नु साल्मुन्ना आस लडाइ पाइबपुकीमी लडाइ आ पर्बम मारेइ ममिथु बाक्मानु, गिदोनमी लडाइ तोवा बाक्त। 12 मिनु जेबाह नु साल्मुन्ना चहिं मेक रे प्रोकसा बाक्त। गिदोनमी मेको मिदयानी पिप आस कली खेदा पा ग्याइक्ता बाक्त। मोपतीके मेको आन लडाइ पाइब नेल्ले वाम ग्याम दुम्मा बाक्त।

13 मिनु योआश आ तौ गिदोन लडाइ रे हेरेस इर गे लतीक लां रे लेम्माक्त। 14 मिनु सुक्कोथ डा ठिटा का कली ग्याइश्शा, मेको कली “सुक्कोथ डा ठेयब मुर नु खाल्पापुकी, सु सु बाक्नीमी?” दे हिल्लो पवा बाक्त। मिनु मेको ठिटामी सुक्कोथ डा ७० जना ठेयब मुर नु खाल्पा आन नें ब्रेक्शा गेवा बाक्त। 15 मिनु नोले गिदोन सुक्कोथ सहरम जाक्शा, मेकेर डा मुर आन कली “जेबाह नु साल्मुन्ना एकेर बाक्नीस। मेको आस पर्बम गेपुकीमी आं कली ‘मार, जेबाह नु साल्मुन्ना आस कली ग्याइक्ने थुमी डा? इ लडाइ पाइब आन कली गो मारदे शोब्ले गेनीकी डा?’ दे शुक्शी पाइतीनी” देंमाक्त। 16 मिनु सुक्कोथ सहर डा ठेयब मुर नु खाल्पा आन कली लाइश्शा, गोरशो रागी डा चोंक चूम युक्मी बाक्त। 17 पेनुएल सहरम बाक्शो लाइश्शो खिं कली प्रेशशा, मेकेर डा वोंइश मुर आन कली साइक्मी बाक्त।

18 मिनु गिदोनमी जेबाह नु साल्मुन्ना आस कली “गे निक्शीमी ताबोरमी साइश्शो मुर दोदेशो बाक्मा?” दे हिल्लो पाम्सी बाक्त। मिनु “इन खोदेशो बाक्तेक्म। पिप आ तौ खोदेशो बाक्मा बाक्त” दे लोव्र लेत्मे बाक्त। 19 मिनु गिदोनमी “मेकोपुकी आं लोकबपुकी बाक्तेक्म। आं आम आ तौपुकी बाक्तेक्म। मिनु मेको आन कली मसाइक्नी हना, परमप्रभु यावे ब्रोंइशा, बाक्शो खोदेशो पा, गो थमा पा, इस कली ब्रोंइचा गेड वा” दे माइक्सी बाक्त। गन्ती ३५:३१ 20 मिनु आ जेठा तौ, येथेर कली “बोक्शा, एको आस कली सांडसी” देंमाक्त। तन्न आ तौ आल बाक्तीके हिंशा, आ तरवार मशोदा बाक्त। 21 मिनु जेबाह नु साल्मुन्नामी “आंमान बोक्शा, आंस कली सतीन। मारदे हना गे नु वोंइश मुर आ बोल बाक्ब” देंसा बाक्त। मिनु गिदोन बोक्शा, मेको निक्शी आस कली सांडसी बाक्त। मिनु मेको आस दलओंठ आ शुरमी बाक्शो शुश क्येट लाइब गहनापुकी पुइश्शा लदा बाक्त।

गिदोन आ गेय नेल्ल

22 मिनु इस्राएलीपुकीमी गिदोन कली “गो आंड कली मिदयानी रे पा प्रोंइतीनी। मुल आंड कली हुकुम पाइब दुमीन। मिनु इन तौ नु इन चच नेल्ल आंड सासन पाइब दुम्मल” देंमा बाक्त। 23 मिनु गिदोनमी “गो नु आं तौ ममाइ, तन्न परमप्रभु यावेमी इन कली हुकुम पाइब” देंमाक्त। 24 मेकोमी “गो इन कली थोव्रक का पुंडनुड, मार पुंडनुड देंशा हना, गेपुकीमी का का पा इन रोइश्शो रे पा नोफाम पांडतीक का का आं कली गेने” देंमाक्त। मारदे हना मेको आन जोरी सत्रु इश्माएली बाक्मा बाक्त। मेकोपुकीमी सुन के नोफाम पांडतीक पाइबाक्मा बाक्त। 25 मिनु मेकोपुकीमी “दुम्ब, गो मेको इन कली गेनीकी” देंमा बाक्त। मिनु वा का ब्रामे बाक्त। मिनु नेल्लेमी आम के रोइश्शो सुन मेकेर वोदमे

बाक्त। 26 मिनु अरु शुश क्येट लाइक्ब माला नु आन दलओंठ आ शुरम रेल्लो सुन के माला, पिप आन फेक्तीक वा मनाव्थु, मेकोमी पुंइशो सुन हजार का ७ सहे शेकेल दुम्माक्त। शेकेल का ११.५ ग्राम खोदेशो बाक्ब। गन्ती ३१:५० 27 मिनु गिदोनमी मेको सुन रे पा निसाफ पतीक ऊरीम नु थुम्मीम बाक्शो झोला का सेल्शा, मेको कली आ सहर ओफ्रामी वोदा बाक्त। मिनु इस्राएली नेल्लेमी मेको कली ठेयब सेल्शा, आंम कली दूली पाइब सेल्मे बाक्त। मेको गिदोन नु आ खिं डा मुर आन कली यो हेंथे पपाइक्चा कली बाक्माक्त। न्यायाधीस १७:५; 28 मोपा मिदयान डा मुरपुकी इस्राएली आन गुइमी दुम्शा, मेकोपुकीमी लेंशा लडाइ मपामे बाक्त। मिनु गिदोन बाक्म सम्म इस्राएल रागी ४० बर्स सम्म लडाइ रे नांइसे बाक्त। न्यायाधीस ३:११; न्यायाधीस ५:३१

गिदोन बेक्शो

29 मिनु नोले योआश आ तौ येरूब-बाल आ खिं लशा, बाक्शो बाक्माक्त। 30 गिदोन आ तौ ७० जना बाक्मा बाक्त। मारदे हना मेको आ मीश शुश बाक्मा बाक्त। 31 मेको आ कान्छी मीश शेकेम सहरमी बाक्माक्त। मेकोमी यो तौ का थिमाक्त। गिदोनमी आ तौ आ नें अबीमेलेक वोदा बाक्त। 32 मिनु योआश आ तौ गिदोन शुश खूशो दुम्शा बेक्माक्त। मेको कली आ आफ अबीएजेर आ तुरस ओफ्रा सहरमी थिम्मे बाक्त। न्यायाधीस ६:११ 33 गिदोन बेक्म नोले इस्राएलीपुकीमी लेंशा बाल देवता कली ठेयब सेल्मे बाक्त। मेकोपुकीमी बाल-बेरीत कली आंम देवता सेल्मे बाक्त। न्यायाधीस २:११; न्यायाधीस ९:४ 34 मिनु मेको आन कली एर ओंथ डा जोरी सत्रु रे प्रॉइब परमप्रभु यावे, आन परमप्रभु कली प्रेंदमे बाक्त। 35 येरूब-बाल माइश्शो गिदोन आ पशो रिम्शो गेय प्रेंशा, मेको आन खिं डा मुर आन कली ममिम्थु, आइक्च सेल्मे बाक्त। न्यायाधीस ९:५,९,२४

9

अबीमेलेक पिप दुम्शो

1 येरूब-बाल आ तौ अबीमेलेक आ ममा आ खिं डा मुर आन बाक्तीक शेकेम सहरमी लमाक्त। मेकोमी आ मामा आन खिं डा मुर मौली नेल्ल आन कली न्यायाधीस ८:३१ 2 “शेकेम सहर डा मुर नेल्ल कली लोत्र का हिल्लो पन। मार लोत्र हिल्लो पन देशा हना ‘येरूब-बाल आ ७० जना तौ नेल्लेमी इन कली सासन पशो रिम्शो दय गोम इन कली सासन पशो रिम्शो?’ गो इन हुश बाक्नुड, दे मिम्तीन” देमाक्त। न्यायाधीस ९:१८ 3 मिनु आ मामापुकीमी मेको शेकेम डा मुर आन कली मेको लोत्र शोत्रडमे बाक्त। मिनु मुर नेल्लेमी “मेको आंइ लोक्ब बाक्ब” दे अबीमेलेक आ नोले खोइक्चा थुं पामे बाक्त। 4 मिनु मेकोपुकीमी अबीमेलेक कली बाल-बेरीत आ मन्दीर रे पा ७० शेकेल चांदी के क्येट गेमे बाक्त। मिनु मेकोमी मेको क्येट लाइश्शा, मरिम्शो पाइब मुर आन कली गेवा बाक्त। मिनु मेकोपुकी मेको आ नोले खोदमे बाक्त। न्यायाधीस ८:३३ 5 मिनु मेको नेल्ल आ आफ आ खिं ओफ्रामी लमा बाक्त। मेकेर येरूब-बाल आ तौ नेल्ल आन कली फुल्लु का तारी क्योरशा सदमे बाक्त। तन्न येरूब-बाल आ कान्छा तौ योथाम खुइश्शा ब्रोंइमाक्त। 6 मिनु शेकेम नु बेथ-मिल्लो डा ठेयब मुर नेल्ल खुम्सीशा, शेकेममी बाक्शो ठेयब थाम आ नेक्था बाक्शो ठेयब रवा आ पुंमी अबीमेलेक कली पिप सेल्मे बाक्त। उत्पती ३५:४; यहोसु २४:२६

योथाम आ कथा

7 मिनु ठेयब मुरपुकीमी मेको लोत्र योथाम कली नेंपदमे बाक्त। मेको लशा गेरीजीम डांडामी राम्माक्त। मिनु ठेयब सेंदामी “शेकेम सहरम बाक्ब ठेयब मुर नेल्ल, गे आं लोत्र नेंतीनी हना, परमप्रभुमी इन लोत्र नेंब। 8 काबु रवा नेल्ल खुम्सीशा, आंम कली पिप सेल्चा, दे लोत्र पमुमा बाक्त। मिनु मेकोपुकीमी तेल रवा कली ‘आंइ पिप दुमीन’ देमा बाक्त। 9 तन्न तेल रवामी ‘मार, देवी देवता नु मुर आन कली ठेयब सेल्पाइक्ब आंम के रिम्शो तेल सेल्चा प्रॉइशा, गो रवा आन कली सासन पाइनुडा?’ देमाक्त। 10 मिनु रवापुकीमी फोत्रशी रवा कली ‘गे आंइ पिप दुमीन’ देमा बाक्त। 11 मिनु फोत्रशी रवामी ‘मार, आंम के रिम्शो जिज नु ब्रोत्रशो फल सेल्चा प्रॉइशा, गो रवा आन कली सासन पाइनुडा?’ देमाक्त। 12 मिनु रवापुकीमी अडगुर बोट कली ‘गे आंइ पिप दुमीन’ देमा बाक्त। 13 मिनु अडगुर बोटमी ‘मार, देवी देवता नु मुर आन कली ग्येरपाइक्ब आं के अडगुर शांबु सेल्चा प्रॉइशा, गो रवा आन कली सासन पाइनुडा?’ देमाक्त। 14 मिनु नोले रवापुकीमी चू रवा कली ‘गे आंइ पिप दुमीन’ देमा बाक्त। २राजा १४:९ 15 मिनु चू रवामी ‘गेपुकीमी थमा पा, आं कली इन पिप सेल्चा दाक्नीनी हना, आं नेक्था जाक्शा, आं पुंम बाक्कीन। मबाक्तीनी हना, चू रवा रे पा मी गूशा लेबानोन डा ठेयब रवा नेल्ल आन कली खतम सेल्ब’ देमाक्त” दे कथा सेल्शा ठेयब सेंदा पा

देंमाक्त। 16 मिनु योथाममी “मुल नेनीन, गे अबीमेलेक कली थमा सुइशशा नु रिम्शो थुंमी पिप सेल्टीनी हना, दुम्ब। मिनु येरूब-बाल नु आ खिं डा मुरुम इन कली रिम्शो पशो खोदेशो पा, गेमी यो मेको आन कली रिम्शो पाइतीनी हना, दुम्ब। 17 आं आफोमी बेक्नुड, दे महिंथु, लडाइ पा इं कली मिदयानी रे पा प्रोइतु। 18 तन्न मुलाक्त आं आफ आ खिं डा मुर आन कली थम मरिम्शो पाइतीनी। मेको आ ७० जना तौ आन कली फुल्लु तारी क्योरशा साइक्तीनी। मेको आ वाइलीम आ तौ अबीमेलेक कली शेकेम डा पिप सेल्टीनी। मारदे हना मेको इन लोकब बाक्ब। 19 मिनु मुलाक्त गेपुकीमी येरूब-बाल नु आ खिं डा मुर आन कली रिम्शो पा मान पशो बाक्तीनी हना, गे अबीमेलेक नु ग्येरसीन। मिनु अबीमेलेक यो गेपुकी नु ग्येरसेक्ल। 20 तन्न मोदेशो मदुम्त हना, अबीमेलेक रे मी गूशा, शेकेम नु बेथ-मिल्लो डा मुर आन कली खतम पोक्गल। मिनु शेकेम नु बेथ-मिल्लो डा मुर रे मी गूशा अबीमेलेक कली खतम पोक्गल” देंमाक्त। न्यायाधीस ९:५७ 21 मिनु योथाम मेकेर रे प्रोक्शा, बेयर माइशो सहरमी जाक्दीम्माक्त। मिनु मेको आ लोकब अबीमेलेक तशा हिंशा, मेकेरेन बाक्माक्त।

अबीमेलेक नु शेकेम डा मुरपुकी

22 अबीमेलेकमी इस्राएली आन कली बर्स सां सासन पवा बाक्त। 23 मेना परमप्रभुमी अबीमेलेक नु शेकेम डा ठेयब मुर आन दातेमी जिपाइक्चा कली मरिम्शो जिपाइक्ब वोल का सोइक्ता बाक्त। मिनु शेकेम डा ठेयब मुरपुकीमी मेको कली जोल पा मरिम्शो पामे बाक्त। १सामुएल १६:१४; १सामुएल १८:१०; १सामुएल १९:९ 24 मिनु परमप्रभुमी येरूब-बाल आ ७० जना तौ आन कली हुश खाक्श पोक्तीके, अबीमेलेक नु मेको कली वारच पाइब शेकेम डा ठेयब मुर आन कली क्येक्क लेत्चा कली मोदेशो जिप्पाइक्ब वोल का सोइशशा बाक्माक्त। उत्पत्ती ९:६ 25 मिनु शेकेम डा ठेयब मुरपुकीमी अबीमेलेक कली काइ मदाक्थु, साइक्चा, दे डांडाम बाप्चा कली मुर सोइक्तमे बाक्त। मेकोपुकीमी लांम गाक्ब आन मारेइ मारेइ रोइक्तमे बाक्त। मिनु लांम बाप्शो बाक्नीम, दे अबीमेलेक कली तुइक्पदमे बाक्त।

26 मिनु एबेद आ तौ गाल नु आ खिं खिं डा मुर शेकेममी बाक्चा कली जाक्मा बाक्त। मिनु शेकेम डा ठेयब मुरपुकीमी गाल कली थमा सुइशशा, दाक्चा गोत्रमे बाक्त। 27 शेकेम डा मुर आन अडगुर रूमी लशा, अडगुर सेक्शा कोलमी खाक्गामे बाक्त। मिनु आन देवता आ मन्दीरमी चाड मानेचा कली लमा बाक्त। मिनु मेकेर जशा तूशा अबीमेलेक आ पर्वम शुक्शी लोत्र पामे बाक्त। 28 मिनु एबेद आ तौ गालमी “अबीमेलेक सु बाक्बा डा? मार, मेको येरूब-बाल आ तौ ममाइ डा? मेको नु आ लडाइ पाइब आन कप्तान जेबुलमी शेकेम आ आफ हमोर आ मुर आन कली गेय मपामे? गो शेकेम डा मुर, मारदे मेको कली गेय पाइनीकी? उत्पत्ती ३४:२ 29 गो शेकेम डा मुर आन कली सासन पाइब बाक्शो नड हना, गो अबीमेलेक कली क्याम्दु वा। गो मेको कली ‘लडाइ पाइब शुश सेल्शा, लडाइ पय’ देड वा” देंमाक्त।

30 मिनु सहर डा सासन पाइब जेबुलमी एबेद आ तौ गाल आ देशो नेंशा, शुश गाइक्ता बाक्त। 31 मिनु मेकोमी खुइशशोमी अबीमेलेक कली लोत्र सोइक्ता बाक्त। मार लोत्र सोइक्ता बाक्त देशा हना “एबेद आ तौ गाल नु आ खिं खिं डा मुर शेकेममी जाक्शा बाक्शा, सहर डा मुर आन कली इन पर्वम मरिम्शो लोत्र पना पन बाक्नीम। 32 मोपतीके गे इन लडाइ पाइब नु नाक्दोन बोक्शा, सहर डा लाडगा डा रूमी रिम्दीन। 33 मिनु सुनी कना नां दाप्ची ना सहर कली लडाइ तोन। मिनु गाल नु आ मुरपुकी लाडगा गूमानु, मेको आन कली मार पचा माल्नीनी, मेको पन” देंमाक्त।

34 मिनु अबीमेलेक नु आ लडाइ पाइब नाक्दोन बोक्शा, ४ हुल दुम्शा, शेकेम आ लाडगाम लडाइ तोचा कली बाप्शा बाक्मा बाक्त। 35 मिनु एबेद आ तौ गाल सहर डा लाडगा लशा, सहर डा ओव्रतीक लाप्चोमी राप्शा बाक्माक्त। मिनु अबीमेलेक नु आ लडाइ पाइब आन बाप्तीक रे गूमा बाक्त। 36 मिनु गालमी मेको आन कली तशा, जेबुल कली “मुरपुकी डांडा रे बुम्ना बुम्न बाक्नीम” देंमाक्त। मिनु जेबुलमी “मेको मुर ममाइ, डांडा आ वांकु बाक्ब। मेको मुर खोदेशो तांइसीनीम” दे लोत्र लेत्ता बाक्त। 37 मिनु लेंशा गालमी “कोव्रडीन, मुरपुकी रागी आ दाते रे बुम्ना बुम्न बाक्नीम। मुर आ हुल का चहिं चिडगा कोइतीक रवा रे यिना यिन बाक्नीम” देंमाक्त। इजीकीएल ३८:१२ 38 मिनु जेबुलमी “इ डांडी डा ठेयब लेशो लोत्र, ते लाक्गा? गे ‘अबीमेलेक सु बाक्बा? गो मारदे मेको कली गेय पाइनीकी?’ देशो नवे। इ मदाक्शो मुर मेको मनमी डा? मुल लावो। मेकोपुकी नु लडाइ पावो” देंमाक्त। 39 मोपतीके गालमी शेकेम डा ठेयब मुर आन डांडी लशा, अबीमेलेक नु लडाइ पवा बाक्त। 40 तन्न अबीमेलेकमी मेको लडाइ ग्रामाक्त। गाल चहिं प्रोक्माक्त। मिनु शुश मुर साइक्चा पुंइसमा बाक्त। सहर डा ठेयब लाप्चो सम्म शुश मुर शोल्मो

पा बेक्शो बाक्मा बाक्त। 41 मिनु अबीमेलेक लशा, अरुमाह माइक्तीक सहरम बाक्माक्त। जेबुलमी चहिं गाल नु आ खिं खिं डा मुर आन कली शेकेम रे खेरमी बाक्त।

42 आ दीसा शेकेम डा मुरपुकी लाडगा रूमी लमा बाक्त। मिनु मुरपुकीमी मेको लोत्र अबीमेलेक कली नेपदमे बाक्त। 43 मोपतीके आ लडाइ पाइब आन कली हुल सां पा योक्शा, सहर मेर डा रूमी बाप्शा, बाक्पदा बाक्त। मिनु मुरपुकी सहर रे गूशा पिशो तशा, मेको आन कली साइक्मी बाक्त। 44 अबीमेलेक नु आ हुल रीब पा डोंइती बारमा बाक्त। मिनु सहर ओत्रतीक ठेयब लाप्चोमी लडाइ पचा सासमा बाक्त। अरु हुल निक्शी चहिं पिशा, रूमी बाक्शोपुकी नु लडाइ पा मेको आन कली सदमे बाक्त। 45 अबीमेलेकमी सुनी रे नाक्दो सम्म लडाइ पा, मेको सहर कली आंम के सेला बाक्त। मेकेर डा मुर नेल्ल आन कली साइक्मी बाक्त। मिनु सहर खतम पोक्शा, हिक्सी फ्रवा बाक्त।

46 मिनु शेकेम डा बोल्यो दरवार डा ठेयब मुरपुकीमी सहर खतम दुम्शो नेंशा, मेकोपुकी एल-बेरीत देवता आ बोल्यो खिं आगा लमा बाक्त। न्यायाधीस ८:३३ 47 मिनु मुरपुकीमी “शेकेम डा बोल्यो दरवार डा मुर नेल्ल बुक्शा बाक्नीम” दे अबीमेलेक कली नेपदमे बाक्त। 48 मिनु अबीमेलेक नु आ लडाइ पाइब सल्मोन डांडामी लमा बाक्त। मेकोमी खा लाइशशा, शाक्श क्योरशा, बालाम लाप्शा कुरा बाक्त। आ लडाइ पाइब आन कली “गे आं कली मार पशो तनी, रीब पा मोदेंशो पन” देंमाक्त। 49 मोपा लडाइ पाइब नेल्लेमी मोदेंशो पा शाक्श क्योरशा, यित्मे बाक्त। मिनु अबीमेलेक आ नोले खोदमे बाक्त। मेको शाक्श लाइशशा, एल-बेरीत आ बोल्यो खिंम तेल्ला, मी सुइक्तमे बाक्त। मिनु शेकेम डा बोल्यो दरवारम बाक्ब नेल्ल बेक्मा बाक्त। मेकेर हजार का खोदेंशो वोंइश मुर नु मीश मुर बाक्शो बाक्मा बाक्त।

अबीमेलेक बेक्शो

50 मिनु मेकेर रे अबीमेलेक थेबेस गे लमाक्त। मिनु मेको थेबेस सहर कली लडाइ पा आंम के सेला बाक्त। 51 मेको सहर आ दातेमी बोल्यो दरवार का बाक्माक्त। मिनु सहर डा मुर नेल्ले, वोंइश मुर नु मीश मुरपुकी मेकेर खुइशशा, आन नोले लाप्चो चोक्शा, नेल्ल क्येडा तला तारी कौसीमी डोइशशा बाक्मा बाक्त। 52 मिनु अबीमेलेक मेको बोल्यो दरवार आ नेक्था जाक्शा, लडाइ तोवा बाक्त। मिनु बोल्यो दरवार कली मी सुइक्चा, दे दरवार डा लाप्चो आ नेक्था जाक्दीम्माक्त। 53 मेना मीश मुर कामी तला डा यात तोक्शा, मेको आ पिया प्रोल्ला गेवा बाक्त। 54 मिनु अबीमेलेकमी रीब पा आ या कुरब कली ब्रेशशा “मुरपुकीमी ‘मीश मुर कामी मेको कली साइक्तु’ दे मदेंमल, दे रीब पा इ तरवार शोइशशा, साइय्यी” दे मदा बाक्त। मिनु आ या कुरबमी तूदानु, अबीमेलेक बेक्माक्त। १सामुएल ३१:४; २सामुएल ११:२१ 55 मिनु इस्राएल डा मुरपुकीमी अबीमेलेक बेक्शो तशा, नेल्ल आंम आंम खिं गे लेम्मा बाक्त। 56 मोपा परमप्रभुमी अबीमेलेक आ आफ कली पशो पाप, आ ७० जना लोकब आन कली साइशशा आ क्येक्क लेत्ता बाक्त। 57 मिनु परमप्रभुमी शेकेम डा मुर आन मरिम्शो पशो आ पर्बम क्येक्क लेत्ता बाक्त। मेकोपुकीमी येरूब-बाल आ तौ योथाम आ सराप रमा बाक्त। न्यायाधीस ९:२०

10

तोला नु याइर निसाफ पाइब दुम्शो

1 अबीमेलेक आ नोले इस्साकार आ थर डा, पुआ आ तौ दोदो आ चच तोला माइशशा मुर इस्राएली आन कली प्रोंइचा कली जाक्माक्त। मेको एफ्राइम डा पहाडी रागी शामीरमी बाक्शो बाक्माक्त। उत्पत्ती ४६:१३; गन्ती २६:२३ 2 तोलाम २३ बर्स सम्म इस्राएली आन कली निसाफ पशो बाक्माक्त मिनु नोले बेक्माक्त। मिनु मुरपुकीमी मेको कली शामीरमी थिम्मे बाक्त।

3 तोला आ नोले गिलाद डा मुर याइरम २२ बर्स सम्म इस्राएली आन कली निसाफ पशो बाक्माक्त। गन्ती ३२:४१ 4 मेको आ तौ ३० जना बाक्मा बाक्त। मेकोपुकी ३० ओटा गधाम डोइक्बाक्मा बाक्त। मिनु गिलाद डा ३० ओटा सहर मेको आन के बाक्माक्त। मुल सम्म मेको सहर आन नें हव्वोथ-याइर देंनीम। मेको गिलाद रागीम बाक्नीम। ब्यवस्था ३:१४ 5 मिनु नोले याइर बेक्माक्त। मिनु मुरपुकीमी मेको कली कामोनमी थिम्मे बाक्त।

अम्मोनीपुकीमी श्येत गेशो

6 मिनु इस्राएलीपुकीमी लेंशा परमप्रभु यावे आ डोंइती मार मरिम्शो बाक्मे, मेको पामे बाक्त। मेकोपुकीमी बाल, अशतारोथ नु देवी देवता आन कली ठेयब सेल्मे बाक्त। मिनु अराम, सीदोन, मोआब नु अम्मोनी नु पलिस्ती आन देवी

देवता कली यो ठेयब सेल्मे बाक्त। मोपा परमप्रभु यावे कली प्रोंइशा, मेको कली ठेयब मसेल्मे बाक्त। 7 मोपतीके परमप्रभु यावे मेकोपुकी नु गाइशशा मेको आन कली पलिस्ती नु अम्मोनी आन गुइमी गेवा बाक्त। 8 मेको बर्समी मेकोपुकीमी इस्राएली आन कली थाम्पा श्येत गेशा, साप्पा दिप्मे बाक्त। मिनु यर्दन खोला आ आइक्ची हांबु, पूर्ब गे गिलाद माइशशो एमोरी आन रागीमी बाक्ब इस्राएली आन कली १८ बर्स सम्म थाम्पा श्येत गेशा दिप्मे बाक्त। 9 अम्मोनीपुकीमी ओंथ हाम ला ममाइ, यर्दन आइक्ची हांबु यो शोक्शा, यहूदा आ थर, बेन्यामीन आ थर नु एफ्राइम आ थर डा मुर आन कली लडाइ तोवमे बाक्त। मिनु इस्राएलीपुकीमी शुश श्येत जामे बाक्त।

10 मिनु इस्राएलीपुकीमी परमप्रभु यावे कली “वारच पाइय्यीकी। पाप पाइतक। आंइ परमप्रभु, इन कली प्रोंइशा, बाल देवी देवता आन कली पूजा पाइतक” देंमा बाक्त। १सामुएल १२:१० 11 मिनु परमप्रभु यावेमी इस्राएली आन कली “डोंइती इन कली इजीप्त डा मुर, एमोरी, अम्मोनी नु पलिस्ती आन गुइ रे प्रोंइतन्नी। 12 मिनु सीदोन डा मुर, अमालेक आ मुर नु मोआबीपुकीमी इन कली दिप्मेनु ‘वारच पाइय्यीकी’ दे ब्रेत्तीनी। मेना इन कली मेको आन गुइ रे प्रोंइता। 13 तन्न गेपुकीमी आं कली प्रोंइशा, अरु देवी देवता आन कली पूजा पा ठेयब सेल्तीनी। मोपतीके मुल रे गो इन कली मप्रोंइनुड। 14 लने, इन योव्रशो देवी देवता आन कली थोन। मेकोपुकीमी इन कली इन श्येत रे प्रोन्मेक्ल” दे परमप्रभु यावेमी देंमाक्त। ब्यवस्था ३२:३७-३८; येरमीया २:२८ 15 तन्न इस्राएलीपुकीमी परमप्रभु यावे कली “गोपुकीमी पाप पाइतक। मोपतीके गे आंइ कली मार पचा दाक्नीनी, मेको पन। तन्न मुल आंइ कली प्रोनीन” दे पुन्मे बाक्त। 16 मिनु अरु देवी देवता आन कली ताइशशा, परमप्रभु यावे कली ठेयब सेल्मे बाक्त। मिनु परमप्रभु यावेमी इस्राएली आन कली मेको क्येडा श्येत गेचा मगेमी बाक्त। यहोसु २४:२३; न्यायाधीस २:१८

17 मिनु अम्मोनी लडाइ पचा कली खुम्सीशा, गिलादमी ताम्बु कीशा बाक्शो बाक्मा बाक्त। मिनु इस्राएली यो खुम्सीशा, मिस्पामी बाक्शो बाक्मा बाक्त। न्यायाधीस ११:२९ 18 मिनु गिलाद सहरम बाक्ब इस्राएली लडाइ पाइब आन कप्तान ग्रुमुशा “सुम अम्मोनी आन कली लडाइ तोचा गोइबा, मेकोमी गिलादम बाक्ब आन कली हुकुम पाइब” दे लोव्र पमुमा बाक्त। न्यायाधीस ११:६-१०

11

येफता निसाफ पाइब दुम्शो

1 गिलाद सहर डा येफता ठेयब नु बोल्यो लडाइ पाइब मुर बाक्माक्त। मेको गिलाद आ तौ तेल्लेम रे पा थिशो बाक्माक्त। 2 मिनु गिलाद आ मीशेमी यो मेको के शुश तौ थिशो बाक्माक्त। मिनु मेकोपुकी कोल्शो दुम्शा, येफता कली खेरमे बाक्त। मेकोपुकीमी येफता कली “आंइ आफ आ खिंमी इ के मारेइ यो अडस मबाक्ब। गे अर्को मीश आ तौ नवे” देंमा बाक्त। उत्पत्ती २१:१० 3 मोपतीके येफता मेको आ लोकबपुकी रे पा ब्रोंइचा कली प्रोक्शा, तोब रागीमी लशा बाक्शो बाक्माक्त। मिनु मरिम्शो पाइब मुरपुकी मेको नु गारशा, रोइक्थ, लमा बाक्त। न्यायाधीस ९:४; १सामुएल २२:२

4 मिनु इच्का नोले अम्मोनीपुकीमी इस्राएली नु लडाइ पामे बाक्त। 5 मिनु लडाइ दुम्मेनु, गिलाद डा खाल्पापुकीमी तोब रागीमी बाक्शो येफता कली ब्रथ लमा बाक्त। 6 मेकोपुकीमी येफता कली “पिन, आंइ लडाइ पाइब आन ठेयब मुर दुमीन। मिनु गो अम्मोनी नु लडाइ पने चाप्नीकी” देंमा बाक्त। 7 मिनु येफतामी मेको गिलाद डा खाल्पा आन कली “गेपुकीमी आं कली मदाक्थु, आं आफ आ खिं रे खेरतीनी। मुल श्येत जनी ना मारदे आं कली ब्रेत्तीनी?” देंमाक्त। 8 मिनु मेको खाल्पापुकीमी येफता कली “मोपतीके गो इन कली ग्रुम्थ जाक्तक। मुल गोपुकी नु गाक्कीन। मिनु अम्मोनी नु लडाइ पा ग्राशा, गिलादमी बाक्ब नेल्ल आंइ ठेयब मुर दुमीन” देंमा बाक्त। न्यायाधीस १०:१८ 9 येफतामी मेको आन कली “गेपुकीमी आं कली अम्मोनी नु लडाइ पथ लेम्शा लाइक्तीनी नु परमप्रभु यावेमी मेको आन कली आं गुइमी गेपु हना, इन ठेयब मुर दुम्नुडा?” दे माइक्मी बाक्त। 10 मिनु गिलाद डा खाल्पापुकीमी येफता कली “परमप्रभु यावे गो आंइ दातेमी सांकछी बाक्ब। गो इन देशो खोदेशो पाइनीकी” देंमा बाक्त। 11 मिनु येफता गिलाद डा खाल्पापुकी नु लमाक्त। मेकेर डा मुरपुकीमी मेको कली ठेयब मुर नु लडाइ पाइब आन ठेयब मुर सेल्मे बाक्त। मिनु येफतामी मिस्पामी परमप्रभु यावे आ डोंइती मेको लोव्र नेल्ल शोव्रडा बाक्त। न्यायाधीस ११:२९; न्यायाधीस १०:१७ 12 मिनु येफतामी अम्मोनी आन पिप कली “गे मारदे आंइ रागी कली लडाइ तोथ पीनीनी? गे नु आंइ दातेमी मार मरिम्शो बाक्बा?” दे हिल्लो पचा कली मुर सोइक्ता बाक्त। 13 मिनु अम्मोनी आन पिपमी येफता आ मुर आन कली “इस्राएलीपुकी इजीप्त रे जाक्शा, अरनोन खोला रे यब्बोक नु यर्दन खोला सम्म आंइ रागी लाइक्तेक्म।

मेको रागी सिक्सी पा लेत्तीन” दे लोत्र सोइक्ता बाक्त। 14 मिनु येफतामी लेंशा मुर सोइशशा अम्मोनी आन पिप कली 15 “येफता आ लोत्र मार बाक्त देशा हना, इस्राएलीपुकीमी गेनायो मोआबी आन रागी नु अम्मोनी आन रागी मलदेम। ब्यवस्था २:९,१९ 16 इस्राएलीपुकी इजीप्त रे कुशा, गोरशो रागी रे लल समुन्द्र गे कादेश सहरम जाक्दीम्मा बाक्त। 17 मिनु एदोम डा पिप कली ‘इन रागी डा लां लचा गेकी’ दे लोत्र सोइक्ते बाक्त। तन्न एदोम डा पिपमी मेको लोत्र नेंसीन मनेना बाक्त। मिनु मोआबी आन पिप कली यो लोत्र सोइक्ते बाक्त। तन्न मेको यो मबिस्से बाक्त। मोपतीके इस्राएलीपुकी कादेशमी बाक्ता बाक्त। गन्ती २०:१४-२१

18 मेकेर रे एदोम नु मोआब रागी हिरशा, गोरशो रागी रे मोआब आ नां दाप्तीक गे लमा बाक्त। मिनु अरनोन खोला आ नेक्था ताम्बु कीडमे बाक्त। मोआबी आन रागी मओवम। मारदे हना अरनोन मोआब आ सांद बाक्ता बाक्त। गन्ती २१:१३ 19 मिनु नोले हेशबोनम बाक्शो एमोरी आन पिप सीहोन कली ‘इन रागी डा लां रे पा आंइ रागी सम्म लचा गेकी’ दे लोत्र सोइक्ते बाक्त। गन्ती २१:२१-३१ 20 तन्न सीहोनमी इस्राएली आन कली मेकेर रे लाइनीम, दे थमा मसुदा बाक्त। मिनु मुर नेल्ल कली खुप्शा, याहासमी आन ताम्बु कीशा, इस्राएली नु लडाइ पामे बाक्त। 21 मिनु परमप्रभु यावे, इस्राएली आन परमप्रभुमी सीहोन नु आ मुर आन कली इस्राएली आन गुइमी गेमी बाक्त। मिनु मेकोपुकीमी मेको आन कली ग्राशा, आन रागीमी बाक्शो एमोरी आन रागी आंम के सेल्मे बाक्त। 22 मेकोपुकीमी अरनोन खोला रे पा यब्बोक खोला सम्म नु गोरशो रागी रे पा यर्दन खोला सम्म एमोरी आन रागी आंम के सेल्मे बाक्त। 23 मोपा परमप्रभु यावे, इस्राएली आन परमप्रभुमी आंम मुर आन कली रिम्शो पचा, दे एमोरी आन कली खेरा बाक्त। मुल एको रागी लेंशा ताक्चा मगारनीनी। 24 इन देवता केमोशमी इन कली गेशो ताइनीनी ममाइ डा? परमप्रभु यावे, आंइ परमप्रभुमी मार गेबा, गो यो मेको ताइनीकी। गन्ती २१:२९ 25 मुल मार, गे मोआबी आन पिप सिप्पोर आ तौ बालाक क्येडा रिम्शो बाक्नीनी? मार, मेकोमी इस्राएली नु जिशा, मेको नु लडाइ पवा डा? गन्ती २२:२; यहोसु २४:९ 26 इस्राएलीपुकी सहे सां बर्स सम्म हेशबोन नु आ एर ओंथ डा गाउंपुकी, आरोएर नु मेको आ एर ओंथ डा गाउंपुकी नु अरनोन आ नेक्था डा सहर नेल्लेम बाक्ता बाक्त। मारदे मेको क्येडा डोंइती इन के मसेल्नी? 27 गोपुकीमी इन कली मारेइ यो मरिम्शो मपशो। तन्न गोपुकीमी आं कली लडाइ तोशा, मरिम्शो पाइनीनी। मुलाक्ती परमप्रभु यावेमी इस्राएली नु अम्मोनी आन दातेमी निसाफ पाइब” दे येफतामी अम्मोनी आन पिप कली लोत्र सोइक्ता बाक्त। 28 तन्न अम्मोनी आन पिपमी येफतामी सोइशशो लोत्र मारेइ खोदेशो मलाक्ता बाक्त।

येफतामी कसम पशो

29 मिनु परमप्रभु यावे आ सोक्तीम येफता कली सुमा बाक्त। मिनु गिलाद नु मनस्से आन रागी लाक्शा, गिलाद डा मिस्पा जाक्दीम्मा बाक्त। मिनु मेकेर रे अम्मोनी आन रागी लमाक्ता। न्यायाधीस ६:३४ 30 येफतामी परमप्रभु यावे कली कबल का पवा बाक्त। मेकोमी मार कबल पवा बाक्त देशा हना “परमप्रभु यावे, गे अम्मोनी आन कली आं गुइमी गेतीनी हना, २सामुएल १५:८ 31 गो अम्मोनी रे रिम्शो पा आं खिं लेत्ती हना, सु आं खिंमी नेल्ल क्येडा डोंइती गो नु गुम्थ जाक्बा, मेको इन के दुम्ब। गो मेको कली चोशा चढ़ेनुड” दे कसम जवा बाक्त। २राजा ३:२७

32 मिनु येफता अम्मोनी नु लडाइ पथ आइक्की हांम शोक्शा लमाक्ता। मिनु परमप्रभु यावेमी अम्मोनी आन कली येफता आ गुइमी गेवा बाक्त। 33 मेकोमी आरोएर रे मिन्नीथ नु आबेल-केरामीम सम्म २० ओटा सहर खतम सेला बाक्त। मोपा इस्राएलीमी अम्मोनी आन कली ग्रामा बाक्त।

34 मिनु येफता आ खिं मिस्पामी लेम्माक्ता। मिनु आ तमी खैजडी ताप्शा, सिल पना पन मेको कली गुम्थ जाक्ता बाक्त। मेको आ तमी का ला बाक्ता बाक्त। अरु आल मबाक्ता बाक्त। 35 मिनु येफतामी आ तमी तवा चोटीन आ वा खाक्शा “आं तमी, आं थुं जिक्तीवी। शुश श्येत गेप्तीवी। गो परमप्रभु यावे कली कसम जाता। मिनु मेको कसम मखाप्थु मदुम्नुड” देंमाक्ता। गन्ती ३०:३ 36 मिनु आ तमीमी “आं आफ, परमप्रभु यावे कली कसम जाइतीनी हना, कबल पशो खोदेशो पा आं कली पने। मारदे हना परमप्रभु यावेमी इन जोरी सत्रु अम्मोनी नु क्येक्क लेशो बाक्ब। 37 तन्न आं कली शिशी पन। महिना निक्शी सम्म आं कली प्रोनीन। आं वारचपुकी नु एको डांडाम हिरनुड। गो कन्नेमी बेक्चा माल्ताक्थी, दे रोंका पचा तडल” देंमाक्ता। 38 मिनु येफतामी “लावो” देशा, आ तमी कली महिना निक्शी सम्म प्रोना बाक्त। मिनु मेको आ वारचपुकी नु डांडा लशा डा मीन आ कन्नेमीन बाक्शा बेक्चा माल्शो आ पर्बम डाक्ता बाक्त। 39 मिनु महिना निक्शी नोले मेको लेशशा जाक्ता बाक्त। मिनु येफतामी परमप्रभु कली आ पशो कसम खबा बाक्त। मिनु मेको मीश आल कन्नेन बेक्ता बाक्त। न्यायाधीस ११:३१; ब्यवस्था १२:२९-३१ 40 मेना रे इस्राएल डा तमी नेल्लेमी बर्स बर्समी ४ नाक्त सम्म गिलाद सहर डा येफता आ तमी कली मिम्शा, रोंका पाइनीम।

12

येफता नु एफ्राइम

1 एफ्राइम आ थर डा मुरुमी आ लडाइ पाइब आन कली खुप्ता बाक्त। मिनु मेकोपुकी यर्दन आइक्की हांबु साफोन गे शोक्शा, येफता कली “अम्मोनी नु लडाइ पथ लनीनु, आंइ कली मारदे मब्रेन्नी? मुल इन कली नु इन खिं कली मी सुइक्नीकी” देमा बाक्त। न्यायाधीस ८:१

2 मिनु येफतामी “गो नु आं मुर अम्मोनी नु ठेयब लडाइ दुम्मेनु, गे इन कली ‘वारच पन’ दे ब्रेशशो नड। तन्न गेपुकीमी आंइ कली मेको आन गुइ रे मप्रॉइनी। 3 मिनु गेपुकीमी आंइ कली वारच मपाइनीनी, दे तुइक्तु नोले, महिंथु, खोला शोक्शा, अम्मोनी नु लडाइ पथ गाक्तक। मिनु परमप्रभु यावेमी मेको आन कली आंइ गुइमी गेपु। मिनु मारदे मुलाक्ती गेपुकी गो नु जिथ जाक्नीनी?” देमाक्त। न्यायाधीस ५:१८; न्यायाधीस ९:१७

4 मिनु येफतामी गिलाद डा मुर नेल्ल कली खुप्शा, एफ्राइम आ थर डा मुर नु लडाइ पवा बाक्त। मिनु गिलाद डा मुरपुकीमी मेको आन कली ग्रामा बाक्त। मेको जिचा मारदे बोक्शो बाक्त देंशा हना, एफ्राइम आ थर डा मुरपुकीमी “गे गिलादी एफ्राइम नु मनस्से आन दातेमी बाक्शो ला ननी” दे देंशो बाक्मा बाक्त। 5 मिनु गिलादीपुकीमी यर्दन डा शोक्तीक लां एफ्राइम रे रोइशशा, आंम के सेलमे बाक्त। मिनु गिलाद डा मुरपुकीमी खोला शोक्ब मुर आन कली “गे एफ्राइम आ थर डा मुर बाक्नीनी?” दे हिल्लो पामे बाक्त। “गो मनड” देमा बाक्त हना, 6 गिलाद डा मुरपुकीमी “मो हना, शिब्बोलेथ देनो” देबाक्मा बाक्त। मिनु मेकोमी ठीक पा देने मचाप्यु “शिब्बोलेथ” देतेक्म हना, मेकेर ग्याइशशा यर्दन आ नेक्था साइक्बाक्मा बाक्त। मेना एफ्राइम आ थर डा मुर ४२ हजार साइक्चा पुंइसमा बाक्त। 7 येफता ६ बर्स सम्म इस्राएली आन निसाफ पाइब दुश्शा बेक्माक्त। मिनु मेको कली आ सहर गिलादमी थिम्मे बाक्त।

इब्सान, एलोन नु अब्दोन

8 येफता आ नोले बेथलेहेम डा इब्सान इस्राएली आन निसाफ पाइब दुम्माक्त। 9 मेको के ३० जना तौ नु ३० जना तमी बाक्मा बाक्त। मेकोमी आ तमी आन कली अरु थर डा मुर नु ग्युंवे पा गेवा बाक्त। मिनु आ तौ आन कली अरु थर डा ३० जना मीश आल ग्युंवे पा चाक्गा बाक्त। मेको ७ बर्स सम्म इस्राएली आन निसाफ पाइब दुम्माक्त।

10 मिनु इब्सान बेक्माक्त। मिनु मेको कली बेथलेहेममी थिम्मे बाक्त। 11 मेको बेक्म नोले जबूलून आ थर डा एलोन १० बर्स सम्म इस्राएली आन निसाफ पाइब दुम्माक्त। गन्ती २६:२६ 12 मिनु जबूलून आ थर डा एलोन बेक्माक्त। मिनु मेको कली जबूलून आ रागी डा आइयालोन सहरमी थिम्मे बाक्त। 13 मेको आ नोले पिराथोन सहर डा हिल्लेल आ तौ अब्दोन इस्राएली आन निसाफ पाइब दुम्माक्त। 14 मेको के ४० जना तौ नु ३० जना चच बाक्मा बाक्त। मेको आन के ७० ओटा गधा बाक्माक्त। मिनु मेकोपुकी आंम आंम गधामी डोइक्बाक्मा बाक्त। मिनु अब्दोनमी ८ बर्स सम्म इस्राएली आन कली निसाफ पशो बाक्माक्त। 15 मिनु नोले पिराथोन सहर डा हिल्लेल आ तौ अब्दोन बेक्माक्त। मिनु अमालेकी आन पहाडी रागी डा एफ्राइम डा पिराथोन सहरमी थिम्मे बाक्त।

13

सिम्सोन जरमेशो

1 मिनु इस्राएलीपुकीमी लेंशा परमप्रभु यावे आ डोंइती मार मरिम्शो बाक्मे, मेको पामे बाक्त। मोपतीके परमप्रभु यावेमी मेको आन कली ४० बर्स सम्म पलिस्ती आन गुइमी गेमी बाक्त।

2 मिनु दान आ थर डा मुर का बाक्माक्त। मेको सोराह सहरमी बाक्शो बाक्माक्त। मेको मुर आ नें मानोआह बाक्माक्त। मिनु मेको आ मीश आल मथीब बाक्माक्त। 3 मिनु परमप्रभु यावे आ स्वर्ग डा गेय पाइब मेको मीश मुर आ डोंइती गूशा, मेको कली “गे आल मथीब बाक्नेवे। तन्न मुल गे कोव्रज कुरशा तौ थीनेवे। उत्पत्ती १५:२; उत्पत्ती २५:२१; उत्पत्ती २९:३१ 4 मोपतीके होस पा बाक्को, अडगुर शांबु नु अरु दुक्तीक काइ मतूडो, मगारचा डा जचा थोव्रक मजावो। गन्ती ६:२-२१; लेवी ११:-; १सामुएल १:११ 5 मारदे हना गे कोव्रज कुरशा, तौ थीनेवे। मेको आ चां गेनायो खोइक्चा मदुम्ब। मारदे हना मेको वोंइश आल जरमसे चोटीन परमप्रभु कली योव्रशो नाजिरी का दुम्ब। मिनु मेकोमी इस्राएली आन कली पलिस्ती आन गुइ रे प्रोंइचा गोइब” देमाक्त। 6 मिनु मेको मीश मुरुमी आ वोंइश कली “परमप्रभु आ गेय पाइब मुर का आं बाक्तीक जाक्त। मेको आ कुल हिंचा डा परमप्रभु आ स्वर्ग डा गेय पाइब खोदेंशो बाक्त। मिनु ‘सु बाक्नीनी?’ दे हिल्लो मपड। मिनु मेकोमी यो आ नें मदे। 7 तन्न मेकोमी आं कली ‘गे कोव्रज

कुरशा तौ थीनेवे। मिनु अडगुर शांबु नु अरु दुक्तीक मतूडो, मगारचा डा जचा थोव्रक मजावो। मारदे हना मेको आल जरमेसे रे मबेकम सम्म परमप्रभु आ योव्रशो नाजिरी का दुम्ब' दे माइक्ती” देंमाक्त। 8 मिनु मानोआहमी परमप्रभु यावे कली “परमप्रभु, इन सोइशशो मुर लेंशा आंस नेक्था सोइक्तीन। मेकोमी आंस कली मेको नोले जरमेसीब वोंइश आल कली दोपा कोल्पाइक्चा, गो निक्शीमी मार पचा माल्बा, आंस कली शेंदल” दे पुना बाक्त।

9 मिनु परमप्रभुमी मानोआह आ पुंइशो लोव्र नेना बाक्त। मिनु आ मीश रूमी बाक्मेनु, परमप्रभु आ स्वर्ग डा गेय पाइब लेंशा जाक्माक्त। मेना आ वोंइश मेको नु मबाक्शो बाक्माक्त। 10 मिनु आ मीश दौरशा लशा, आ वोंइश कली “मेको डोंइती जाक्शो मुर लेंशा आं बाक्तीक जाक्त” देंमाक्त।

11 मिनु मानोआह बोक्शा, आ मीश नु लशा, मेकेर जाक्दीशा, मेको कली “आं मीश नु लोव्र पाइब गे ननी?” दे हिल्लो पवा बाक्त। मिनु मेकोमी “गो नड” देंमाक्त। 12 मिनु मानोआहमी “इन देंशो लोव्र दुम डा मेरे मेको वोंइश आलमी मार मार पचा दुम्बा, मार मार पचा मदुम्बा” दे हिल्लो पवा बाक्त। 13 मिनु परमप्रभु यावे आ स्वर्ग डा गेय पाइबमी “गो मार मार देंडा, इ मीशेमी रिम्शो पा टिचा माल्ब। 14 अडगुर बोट रे सिशशो मारेइ यो जचा मदुम्ब। मेकोमी अडगुर शांबु नु अरु दुक्तीक तूचा मदुम्ब। मगारचा डा मारेइ यो जचा मदुम्ब। गो मार मार देंडा, मेकोमी नेल्ल टिचा माल्ब” देंमाक्त। न्यायाधीस १३:४

15 मिनु मानोआहमी परमप्रभु यावे आ स्वर्ग डा गेय पाइब कली “गो इन कली पाठा का क्योरशा क्येनीकी। मोपतीके रिम्दीन” देंमाक्त। न्यायाधीस ६:१८ 16 मिनु परमप्रभु यावे आ स्वर्ग डा गेय पाइबमी “आं कली तेक्तीसी हना यो, गो इन क्येशो मजाइनुड। तन्न गेमी चोशा चढेतीक ठीक सेल्लतीनी हना, परमप्रभु यावे कली चढेवो” देंमाक्त। मानोआहमी मेको परमप्रभु यावे आ स्वर्ग डा गेय पाइब बाक्ब, दे मतुइक्ता बाक्त।

17 मिनु मानोआहमी परमप्रभु यावे आ स्वर्ग डा गेय पाइब कली “इन नें मार बाक्बा? मारदे हना इन लोव्र थमा दुम्त हना, गो इन कली ठेयब सेल्चा दाक्नीकी” देंमाक्त। उत्पत्ती ३२:३० 18 मिनु परमप्रभु यावे आ स्वर्ग डा गेय पाइबमी मेको कली “गे मारदे आं नें हिल्लो पाइनेवे? मेको मतुइक्चा डा बाक्ब” देंमाक्त। 19 मिनु मानोआहमी अन्न नु पाठा लाइशशा, फुल्लु तारी छक लाक्चा डा गेय पाइब परमप्रभु यावे कली चढेवा बाक्त। न्यायाधीस ६:२१ 20 मिनु मेको चढेतीक रे मी गूशा, सरीड गे लमेनु, परमप्रभु यावे आ स्वर्ग डा गेय पाइब मेको मी नु सरीड गे लमाक्त। मानोआह नु आ मीश कोव्रस डा कोव्रस बाक्शा, सेउ पाम्से बाक्त।

21 मिनु मेको नोले परमप्रभु यावे आ स्वर्ग डा गेय पाइब मानोआह नु आ मीश आ डोंइती गेनायो मगूमाक्त। मिनु मानोआहमी मेको परमप्रभु यावे आ स्वर्ग डा गेय पाइब बाक्माक्त, दे तुइक्ता बाक्त। 22 मिनु मेकोमी आ मीश कली “गो थमा पा बेक्नस। मारदे हना गो परमप्रभु कली ताइतस” देंमाक्त। प्रस्थान ३३:२० 23 तन्न आ मीशेमी “परमप्रभु यावेमी इस कली साइक्चा दाक्शो हना, इस चढेशो चोशा चढेतीक नु अन्न चढेतीक मब्रव वा। इस कली मोदेंशो लोव्र मदे वा, मकोंइद वा” देंमाक्त। 24 मिनु मानोआह आ मीशेमी तौ का थिवा बाक्त। मेको कली सिम्सोन नें वोदा बाक्त। मेको आल कोल्ना कोल्न लमाक्त। मिनु परमप्रभु यावेमी मेको कली आसीक गेवा बाक्त। उत्पत्ती २४:१; उत्पत्ती ३५:९; गन्ती २२:६ 25 मिनु सोराह नु एशताओल सहर आस दातेमी बाक्शो माहानेह-दान सहरमी बाक्मेनु, परमप्रभु यावे आ सोक्तीमी मेको कली गेय पपाइक्चा गोवा बाक्त। न्यायाधीस ३:९-१०; न्यायाधीस ६:३४; न्यायाधीस १४:६,९; न्यायाधीस १५:१४; गन्ती २४:२-४; १सामुएल १०:६,१०; १सामुएल १६:१३; इजीकीएल ११:५

14

सिम्सोनमी मीश आल दाक्शो

1 काबु सिम्सोन तिम्नाह सहर बुम्माक्त। मिनु मेकेर पलिस्ती मीश आल का तवा बाक्त। यहोसु १९:४३ 2 मिनु आ खिं लेशशा, आ आम आफ आस कली “तिम्नाहमी पलिस्ती मीश आल का ताता। मेको नु ग्युंवे पा गेयीनी” दे माइक्सी बाक्त।

3 मिनु आ आम आफोमी “मार, आंइ मुर नु इं थर डा मीश आल मबाक्बा? मिनु गे खोइक्तीक चिनु मखोइशशो, मेको पलिस्ती आ तमी का चाक्चा दाक्नेवे?” देंसा बाक्त। तन्न सिम्सोनमी “मेको मीश आल आं कली चाक्कीन। मारदे हना गो मेको कली दाक्नुड” देंमाक्त। उत्पत्ती ३४:१४; प्रस्थान ३४:१६

4 परमप्रभु यावेम सिम्सोन कली मेको मीश आल कली दाक्पाइशो बाक्त, दे आ आम आफोमी मतुइशो बाक्ताक्स। परमप्रभुमी पलिस्ती आन कली खतम पचा कली मोदेशो पशो बाक्माक्त। मेना पलिस्तीपुकीमी इस्राएली आन कली सासन पशो बाक्मा बाक्त।

5 मिनु नोले सिम्सोन आ आम आफ नु तिम्नाहमी ब्रुम्माक्त। मिनु मेकेर डा अडगुर रूमी जाक्दीम्माक्त। मिनु मेकेर ठिटा गुप्स का गूशा, मेको कली ग्राम्दा बाक्त। 6 मिनु परमप्रभु यावे आ सोक्तीम सिम्सोन कली ठेयब सक्तिम सुमा बाक्त। मिनु आ गुइमी मारेइ यो या मबाक्त हना यो, मेको गुप्स कली पाठा खोदेशो पा सदा बाक्त। मिनु गुप्स साइशो लोत्र आ आम आफ कली मशोत्रडा बाक्त। न्यायाधीस १३:२५ 7 मिनु सिम्सोन मेकेर जाक्दीशशा, मेको मीश आल नु लोत्र पवा बाक्त। मिनु मेको मीश आल कली दाक्शा लेम्माक्त। 8 मिनु इच्का नोले सिम्सोन मेको मीश आल कली ग्युंभे पचा कली लेंशा तिम्ना ब्रुम्माक्त। मिनु लां प्रोंइशा, साइशो गुप्स कोत्रथ लमाक्त। मिनु राक्शो गुप्स आ आगाम हुल का सुरब नु खुदो बाक्माक्त। 9 मिनु खुदो गुंइशा, जना जन लमाक्त। मेकोमी आ आम आफ आस कली यो जचा गेम्सी बाक्त। मिनु जाम्से बाक्त। तन्न मेको खुदो राक्शो गुप्स आ आगा रे गुंइशो, दे आ आम आफ कली मशोत्रडा बाक्त।

10 मिनु सिम्सोन आ आफ मेको मीश आल कोत्रथ लमाक्त। मिनु सिम्सोनमी अरुम ग्युम्लेम पशो खोदेशो पा भोज का गेवा बाक्त। 11 मिनु मेकेर डा मुरपुकीमी सिम्सोन कली गुम्शा, ३० जना वोंइश मुर मेको कली वारच पचा कली चाक्गमे बाक्त। 12 मिनु सिम्सोनमी मेको आन कली “इन कली लोत्र का हिल्लो पाइनन्नी। एको ७ नाक्त डा भोजमी मेको लोत्र लेन्ने चाप्तीनी हना, गो इन कली ३० ओटा बुश फेक्तीक वा नु ३० ओटा शुश क्येट लाइब फेक्तीक वा गेनन्नी। 13 तन्न आं हिल्लो पशो लोत्र लेन्ने मचाप्तीनी हना, गो आं कली ३० ओटा बुश फेक्तीक वा नु शुश क्येट लाइब फेक्तीक वा गेचा माल्नीनी” देमाक्त। मिनु मेकोपुकीमी “लो दुम्ब, हिल्लो पन” देमा बाक्त। 14 मिनु सिम्सोनमी मेको आन कली “शुश ब्वाइब रे जचा थोत्रक गूत। बोल्यो रे जिज थोत्रक गूत। मेको मार बाक्बा?” दे हिल्लो पामी बाक्त। मिनु मेकोपुकीमी नाक्त सां सम्म मिम्ना मिम्न बाक्शा, मेको लोत्र मार बाक्बा, दे लेन्ने मचाप्बमे बाक्त।

15 मिनु ४ नाक्तीम मेकोपुकीमी सिम्सोन आ मीश कली “इ वोंइश कली लेम्शा, हिल्लो पावो। मिनु आंइ कली शोत्रडो। मोदेशो मपाप्तीवी हना, गो इ कली नु इ आफ आ खिं कली मी सुइक्नीकी। आंइ कली पुडग सेल्चा कली निम्तो पवी?” देमा बाक्त। 16 मिनु सिम्सोन आ मीश आ वोंइश आ डोंइती डाक्शा “गे आं कली काइ मदाक्नीनी। गे थमा पा आं कली मदाक्नीनी। गे आं मुर आन कली लोत्र का हिल्लो पाइतीनी। मिनु मेको लोत्र आ अर्थ चहिं आं कली मदेनी” देमाक्त। मिनु सिम्सोनमी “मेको लोत्र आ अर्थ आं आम आफ कली लाइयो मदेड। मिनु इ कली मारदे देनुडा?” देमाक्त। 17 मिनु भोज के ७ नाक्ती मनुम्म सम्म आ मीश सिम्सोन आ डोंइती डाक्स डा डाक्स बाक्माक्त। मोपतीके ७ नाक्त सम्म शुश हिल्लो पा पुंइतीके सिम्सोनमी मेको लोत्र आ मीश कली शोत्रडा बाक्त। मिनु मेकोमी लशा, आ मुर आन कली देमाक्त। न्यायाधीस १६:१६-१७ 18 मिनु मेको ७ नाक्ती नां सोत्रचा क्येडा डोंइती सहर डा मुरपुकीमी सिम्सोन कली “खुदो क्येडा जिज, मार बाक्बा डा? गुप्स क्येडा बोल्यो सु बाक्बा डा?” देमा बाक्त। मिनु सिम्सोनमी “आं मीशेमी इन कली मेको लोत्र मशोत्रड हना, गेपुकीमी लेन्ने मचाप्नी वा” देमाक्त। 19 मिनु परमप्रभु यावे आ सोक्तीम सिम्सोन कली ठेयब सक्तिम सुमा बाक्त। मिनु मेको अश्कलोन सहरमी लशा, मेकेर ३० जना मुर साइक्मी बाक्त। मिनु मेको आन के मार मार थोत्रक नु वा पिशशा, मेको लोत्र लेप्ब आन कली शुश क्येट लाइब फेक्तीक वा गेवा बाक्त। मिनु सिम्सोन गाइशशा, आ आफ आ खिं लेम्माक्त। 20 मिनु सिम्सोन आ मीश चहिं सिम्सोन कली वारच पाइब का कली गेमे बाक्त। न्यायाधीस १५:२

15

सिम्सोन आ मीश गुम्थ लशो

1 मिनु इच्का नोले चेरब रिक्ची ना सिम्सोन पाठा का कुरशा, आ मीश कली गुम्थ लमाक्त। मिनु “गो आं मीश आ कोठामी ओत्रचा दाक्नुड” देमाक्त। तन्न आ शिउमी ओत्रचा मगेवा बाक्त। 2 मिनु आ शिउमी “आं तमी काइ मदाक्नीनी, दे मिम्ताक्ड। मोपतीके इन कली वारच पाइब कली गेता। मेको आ लोकब मेको क्येडा दारशो मबाक्बा डा? मुल इ मीश आ पा डा मेको कली लतो” देमाक्त। न्यायाधीस १४:२० 3 मिनु सिम्सोनमी “गो मुल पलिस्ती आन कली थम मरिम्शो पाता हना यो, दोस मताइब दुम्ती” देमाक्त। 4 मिनु सिम्सोनमी लशा, सहे सां सिवार ग्याइशशा, निक्निक्शी पा आस मीलु फ्रेंशा, आस दातेमी रांको का यो फ्रेंदा बाक्त। 5 मिनु रांको जेशशा, पलिस्ती आन रिक्शा

वोइशशो चेरब, मीशो चेरब रू, अडगुर रू नु तेल रवा रू आगा सोइक्ता बाक्त। 6 मिनु पलिस्तीपुकीमी “एको सुम पवा?” दे हिल्लो पामे बाक्त। मिनु का निक्शीमी “तिम्ना डा मुर आ चांइवा सिम्सोनमी पाप्तु। मारदे हना आ शिउमी आ तमी, सिम्सोन आ मीश दुम्शा यो आ वारच कली गेप्तु” देमा बाक्त। मिनु पलिस्तीपुकी लशा, सिम्सोन आ मीश नु आ आफ कली मीम क्रोइशशा सदमे बाक्त। 7 मिनु सिम्सोनमी मेको आन कली “क्येक्क मलेत्थु मप्रोंडनुड” दे कसम जवा बाक्त। 8 मिनु सिम्सोनमी मेको आन कली शुश श्येत गेशा, शुश मुर आन कली साइक्मी बाक्त। मिनु मेकेर रे लशा, एताम डा रोंगु डा पुक्खीमी बाक्माक्त।

पलिस्ती आन कली साइशशो

9 मिनु पलिस्तीपुकी कुशा यहूदामी ताम्बु कीशा, लेही सहर आ नेक्था बाक्मा बाक्त। 10 मिनु यहूदा आ थर डा मुरपुकीमी मेको आन कली “गे मारदे आंइ कली लडाइ तोइनीनी?” दे हिल्लो पामे बाक्त। मिनु मेकोपुकीमी “गो सिम्सोन कली ग्याइशशा, फ्रेंचा कली पीतक। मेकोमी आंइ कली मार पवा, गो यो मेको कली मोदेशोन पाइनीक” देमा बाक्त। 11 मिनु यहूदा डा हजार सां मुर एताम डा रोंगु डा पुक्खीमी यिमा बाक्त। मिनु मेकोपुकीमी सिम्सोन कली “पलिस्तीपुकी आंइ सासन पाइब बाक्नीम, दे गे तुइक्नीनी। गे मारदे आंइ कली मोदेशो पा मरिम्शो पनी?” देमा बाक्त। मिनु सिम्सोनमी “मेकोपुकीमी आं कली दोदेशो पामे, गो यो में मोदेशो ला पाता” देमाक्त। 12 मिनु मेकोपुकीमी “गो दा इ कली फ्रेंशा पलिस्ती आन गुइमी गेचा कली जाक्तक” देमा बाक्त। मिनु सिम्सोनमी “मो हना आं कली मसाइक्नीक, देशा, कसम जने” देमाक्त। 13 मिनु मेकोपुकीमी “इन कली फ्रेंशा ला पलिस्ती आन गुइमी गेनीक। गो इन कली मसाइक्नीक” देमा बाक्त। मिनु मेकोपुकीमी सिम्सोन कली नक डोरी निक्शीमी फ्रेंशा, पुक्खी क्येडा आइक्था कुत्मे बाक्त।

14 मिनु मेकोपुकी लेहीमी जाक्दीत्चामेनु, पलिस्तीपुकीमी मेको कली तशा ग्रीना ग्रीन पिमा बाक्त। मेना परमप्रभु यावे आ सोक्तीमी सिम्सोन कली सुमा बाक्त। मिनु सिम्सोनमी आ कली फ्रेंशो डोरी निक्शी मीम दुम्शो पले खोदेशो पा प्रोदा बाक्त। न्यायाधीस १३:२५ 15 मिनु गधा आ पिया डा रुश खप रे गुप्शा, मेकोमी हजार का मुर आन कली तुप्शा सदा बाक्त। 16 मिनु मेकोमी “गो गधा आ पिया डा रुशेमी तुम्ना तुम्न शुश मुर साइक्ता। तेन्ना तेन्न हजार का मुर साइक्ता” देमाक्त। 17 मेकोमी मो देने थुम्शा, मेको रुश ताइक्ता बाक्त। मोपतीके मेको ठाउं कली रामाथ-लेही ने वोदमे बाक्त।

18 मिनु सिम्सोनमी ब्वाक्कु तूतू दाक्शा, परमप्रभु यावे कली पुंइशा, “गे इन वाइल कली ठेयब लडाइ ग्रापाइक्तीनी। मुल गो तूतू दाक्शा बेक्नुडा? एको खोइक्तीक चिनु मखोइशशो आन गुइमी बेक्नुडा?” देमाक्त। 19 मिनु परमप्रभुमी लेही डा खाल्टा कली प्रोल्शा, मेक रे ब्वाक्कु गुंइदा बाक्त। मिनु सिम्सोनमी ब्वाक्कु तूडा बाक्त। मिनु लेशा, बोल्यो दुम्माक्त। मोपतीके लेही डा ब्वाक्कु बुक्तीक कली मुलाक्त सम्म एन-हाकोरे देनीम। 20 मिनु पलिस्तीपुकीमी इस्राएली आन कली दिप्शा सासन पामेनु, सिम्सोनमी २० बर्स सम्म इस्राएली आन निसाफ पशो बाक्माक्त।

16

सिम्सोनमी लाप्चो कुरशो

1 काबु सिम्सोन गाजा सहरमी लमाक्त। मिनु मेकेर तेल्लेम का तशा, मेको नाक्दो मेको नु इप्थ लमाक्त। 2 मिनु गाजेज सहर डा मुरपुकीमी “सिम्सोन मेकेर जाक्शो बाक्ब” दे गाजा डा मुर आन कली तुइक्पदमे बाक्त। मिनु मेकोपुकीमी सिम्सोन आ बाक्तीक पुम्तमे बाक्त। मिनु मुरपुकी नाक्दो सहर डा ठेयब लाप्चोमी बाप्शा बाक्मा बाक्त। नाक्दो मेकोपुकी सिक्सी पा बाक्मा बाक्त। मेकोपुकीमी “नां सोवचीना साइक्चा” दे सल्ला पशो बाक्मा बाक्त। 3 तन्न सिम्सोन क्येर नाक्दो सम्म ला आ ब्राख्येमी गोल्शा बाक्माक्त। मिनु बोक्शा लशा, सहर डा ठेयब लाप्चो नु आ थाम निक्शी आ दलीन नेल्ल तुल्शा बालाम लाप्शा, हेब्रोन आ नेक्था डा डांडाम लदा बाक्त।

सिम्सोन नु देलीलाह

4 मिनु नोले सिम्सोनम सोरेक डा दिंममी बाक्ब देलीलाह माइशशो मीश मुर का दाक्ता बाक्त। 5 मिनु पलिस्ती आन ठेयब मुरपुकी मेको मीश मुर कली गुम्थ लमा बाक्त। मिनु मेको कली “सिम्सोन कली लेम्शा ‘इ कली सुमी बोल गेबा? दोपा इ कली फ्रेंने चाप्नीकी’ दे हिल्लो पावो। मिनु गो आंइ कली शेंदो। मारदे हना गो ग्याइक्चा दाक्नीकी। मिनु ग्याइशशा गो का का पा इ कली ११, ११ सहे चांदी के शेकेल गेनीकी” देमा बाक्त। 6 मिनु देलीलाहमी सिम्सोन

कली “सुमी इन कली शुश बोल गेवा? दोपा इन कली फ्रेंने चाम्सीबा? मुरपुकीम दोपा इन कली ग्याइक्ने चाप्नीमी? आं कली शेंदीन” दे हिल्लो पवा बाक्त। 7 मिनु सिम्सोनमी “आं कली लिब्रा आ ७ ओटा क्येख डोरीमी फ्रेंताक्यीमी हना, अरु मुर खोदेशो बोल मपाइशो दुम्नुड” देंमाक्त। 8 मिनु पलिस्ती आन ठेयब मुरपुकीमी ७ ओटा लिब्रा आ क्येख डोरी चाक्शा, देलीलाह कली गेमे बाक्त। मिनु मेकोमी सिम्सोन कली फ्रेंदा बाक्त। 9 मेकोमी आगा डा कोठामी मुरपुकी खुइशशा वोइशशा बाक्माक्त। मिनु मेकोमी “सिम्सोन इन कली साइक्चा, दे पलिस्ती जाक्तेक्म” दे ग्रीमाक्त। मिनु सिम्सोनमी मेको डोरी कली मीम किक्शो पले खोदेशो पा प्रोइशशा प्रोक्माक्त। मिनु आ बोल चहिं मारम बाक्बा, दे मतुइक्तमे बाक्त।

10 मिनु देलीलाहमी सिम्सोन कली “गे आं कली शुक्शी पा जोल पाइतीनी। तन्न मुल डा मेरे दोपा इन कली पाइक्ने चाम्सीबा, लो, देनीन” देंमाक्त। 11 मिनु सिम्सोनमी “आं कली नक मारेइ यो मफ्रेंशो डोरीमी फ्रेंताक्यीमी हना, अरु मुर खोदेशो दुम्नुड” देंमाक्त। 12 मोपतीके देलीलाहमी नक डोरी चाक्शा, मेको कली फ्रेंदा बाक्त। मेना यो मुरपुकी आ कोठामी खुइशशा बाक्शो बाक्मा बाक्त। मिनु मेकोमी “सिम्सोन इन कली साइक्चा, दे पलिस्ती जाक्तेक्म” दे ग्रीमाक्त। मिनु सिम्सोनमी मेको डोरी कली श्येले प्रोइशशा खोदेशो पा प्रोदा बाक्त।

13 मिनु देलीलाहमी लेंशा सिम्सोन कली “गे मुल सम्म आं कली शुक्शी पा जोल पाइतीनी। इन कली दोपा फ्रेंने चाम्सीबा?” दे हिल्लो पवा बाक्त। मिनु सिम्सोनमी “गे आं चां डा ७ ओटा लामा कली तोव्र ओल्तीकेम पाइक्ताक्यी नु मेको तोव्र आ प्रोव्रशो हिरतीक ठीक पा वोइक्तीवी हना, अरु मुर खोदेशो पा बोल मपाइशो दुम्नुड” देंमाक्त। 14 मोपतीके मेकोमी सिम्सोन इम्मेनु, मेको आ चां डा ७ ओटा लामा कली तोव्र आ प्रोव्रशो हिरतीकेमी हिरशा फ्रेंशा वोदा बाक्त। मिनु मेकोमी “सिम्सोन इन कली साइक्चा, दे पलिस्ती जाक्तेक्म” दे ग्रीमाक्त। मिनु सिम्सोन निन्द्रा रे सेंशा, तोव्र ओल्तीके, तोव्र नेल्ल नु प्रोव्रशो वा यो उइशशा बोक्माक्त।

15 मिनु देलीलाहमी “आं कली दाक्नुड, दे दोपा देने चाप्नीनी डा? इन थुंमी आं कली मदाक्शो बाक्नीनी। गे आं कली खेयप सां शुक्शी पा, इन ठेयब बोल मारम बाक्बा, मुल सम्म मशेंदीनी” देंमाक्त। 16 मिनु मेकोमी सिम्सोन कली नाक्त किंत किंत हिल्लो पा श्येत गेवा बाक्त। न्यायाधीस १४:१७ 17 मोपतीके सिम्सोनमी आ खुइशशा थमा लोव्र मेको कली शेंदा बाक्त। मेकोमी “मुल सम्म आं चां मप्रेक्शो बाक्ब। मारदे हना गो जरमेसी डा रे परमप्रभु आ योव्रशो नाजिरी का नड। आं चां प्रेक्तेक्म हना, आं बोल लाइब। मिनु गो अरु मुर खोदेशो पा बोल मपाइशो दुम्नुड” देंमाक्त। न्यायाधीस १३:५

18 मिनु सिम्सोनमी देलीलाह कली आ थुं डा लोव्र नेल्ल शोव्रशा, नोले देलीलाहमी पलिस्ती आन ठेयब मुर आन कली “रीब पा जाक्कीन। मारदे हना मेकोमी आ थुं डा लोव्र नेल्ल शेंताक्यी” दे ब्रेत्थ सोइक्ता बाक्त। मिनु पलिस्ती आन ठेयब मुरपुकी चांदी कुरशा जाक्मा बाक्त। 19 मिनु देलीलाहमी सिम्सोन कली आ थुकुमी इप्पदा बाक्त। मिनु मुर का ब्रेशशा, आ ७ ओटा लामा प्रेक्पदा बाक्त। मोपा देलीलाहमी सिम्सोन आ बोल जाम्पाइशशा सक्ति मपाइशशा सेला बाक्त। 20 मिनु मेकोमी “सिम्सोन बोक्कीन, इन कली साइक्चा, दे पलिस्ती जाक्तेक्म” दे ग्रीमाक्त। मिनु मेको निन्द्रा रे बोक्माक्त। मिनु गो आंम कली गेना हना यो प्रोइनुड, दे मिम्ता बाक्त। तन्न “परमप्रभु यावेमी आं कली प्रोइने थुम्तु” दे मेकोमी मतुइक्ता बाक्त। १ सामुएल १६:१४ 21 मिनु पलिस्तीपुकीमी मेको कली ग्याइशशा, आ मिक्च पुक्तमे बाक्त। मिनु गाजा सहरम चाक्गमे बाक्त। मिनु कांसा के साडलोमी पाइशशा जेल्खानमी यात हिल्पदमे बाक्त। 22 मिनु नोले आ प्रेक्शो चां लेंशा लाइशशा दुम्माक्त।

सिम्सोन बेक्शो

23 मिनु पलिस्ती आन ठेयब मुरपुकीमी “इं देवतामी इं सत्रु सिम्सोन कली इं गुइमी गेप्टु” देंशा, आन देवता दागोन कली ठेयब चढेतीक चढेचा कली नु ग्येरसीचा कली खुम्समा बाक्त। 24 मिनु खुम्सीशो मुरपुकीमी सिम्सोन आ पर्बम “इं देवतामी इं सत्रु, इं रागी डा सत्रु, इं रागी डा मुर साइक्ब मुर कली इं गुइमी गेशो बाक्ब” दे ग्रीशा, आन देवता कली ठेयब सेल्मे बाक्त। 25 मिनु शुश ग्येरसीशा “सिम्सोन कली गुंइदीन। मिनु मेकोमी आंइ कली सिल पा कोंइदल” दे पुन्मे बाक्त। मिनु सिम्सोन कली जेल्खान रे गुंइदमे बाक्त। मिनु मेकोमी मेको आन कली सिल पा कोंइदा बाक्त। मिनु मेकोपुकीमी सिम्सोन कली ठेयब थाम आस दातेमी राप्पदमे बाक्त। 26 मिनु सिम्सोनमी आ गुइ ग्याइशशा खुल्ब ठिटा कली “एको खिं कली तिक्ब नेल्ल क्येडा ठेयब थाम कली ग्याइक्चा गेयी। मिनु गो मेकेर रक एशशा बाक्नुड” देंमाक्त। 27 मेको खिंम शुश वोंइश मुर नु मीश मुर बाक्मा बाक्त। पलिस्ती आन ठेयब मुरपुकी यो नेल्ल मेकेर बाक्मा

बाक्त। हजार सां खोइ वोंइश मुर नु मीश मुर चहिं खिं डा नेल्ल क्येडा तला तार बाक्शा, सिम्सोन आ सिल कोव्रडमे बाक्त।

28 मिनु सिम्सोनमी परमप्रभु यावे कली “परमप्रभु, परमप्रभु यावे, आं कली मिम्तीन। आं कली लेंशा खेयप का सक्ति गेयीनी। परमप्रभु, गो काले आं मिक्च निक्शी आ पर्बम मेको आन कली क्येक्क लेत्ने चबुल” दे पुना बाक्त। 29 मिनु सिम्सोनमी मेको खिं कली तिकशा वोइक्ब खिं आ दातेमी वोइश्शो थाम निक्शी कली पेरा गुइमी का नु ग्युरा गुइमी अर्को कली ग्याइक्ता बाक्त। 30 मिनु सिम्सोनमी “आं कली पलिस्तीपुकी नु बेक्चा गेन” देंशा, आ सक्ति नेल्लेमी बोल पा मेको थाम निक्शी कली नेप्ता बाक्त। मिनु मेको खिं ब्रेम्माक्त। मोपा बाक्शा नेल्ल ठेयब मुर नु अरु मुर नेल्ले चिप्शा बेक्मा बाक्त। मोपा सिम्सोनमी आ ब्रोंइशो क्येडा यो आ बेक्ची ना शुश मुर सदा बाक्त। हिब्रू ११:३२-३४ 31 मिनु सिम्सोन आ आफ आ खिं डा मुर नु आ लोकबपुकी मेकेर जाक्शा, आ रां आ आफ मानोआह आ तुरस सोराह नु एश्ताओल सहर आ दातेमी थिम्मे बाक्त। सिम्सोन २० बर्स सम्म इस्राएली आन निसाफ पाइब दुम्शो बाक्माक्त। न्यायाधीस १३:२५; न्यायाधीस १५:२०

17

मीकाहमी मूर्ति सेल्पाइश्शो

1 एफ्राइम डा पहाडम मीकाह नें पाइश्शो मुर का बाक्माक्त। 2 मिनु मेकोमी आ आम कली “इन जाम्शो ११ सहे चांदी के शेकेल आ पर्बम सराप पशो, गो नेता। मेको चांदी के शेकेल गो नु बाक्नीम। गो लाइश्शो नड। मुल गो लेत्नन्नी” देंमाक्त। मिनु मेको आ ममामी “आं तौ, परमप्रभु यावेमी इ कली आसीक गोवल” देंमाक्त। लेवी ५:१; हितोपदेस २९:२४

3 मिनु मेको ११ सहे चांदी के शेकेल आ ममा कली लेशशा गेवानु, आ ममामी “एको चांदी आं तौ कली रिम्शो दुम्ल, दे मुशो, चांदीम गिल्शो मूर्ति सेल्पाइश्शा परमप्रभु यावे कली गेनुड। मोपतीके गो मेको चांदी के शेकेल लेंशा इ कली गेनन” देंमाक्त। शेकेल का ११.५ ग्राम बाक्ब। 4 आ तौमी मेको चांदी आ ममा कली गेवानु, आ ममामी सहे निक्शी चांदी के शेकेल लाइश्शा, चेम्ब कली गोवा बाक्त। मिनु मेकोमी मुशो मूर्ति का सेल्शा मेको कली चांदीम गिला बाक्त। मिनु मेको मीकाह आ खिंमी वोदमे बाक्त।

5 मेको मीकाह के देवता थान का यो बाक्माक्त। मेकोमी चढ़ेब आ डोंइती फेक्तीके निसाफ पतीक ऊरीम नु थुम्मीम बाक्शा झोला सेल्पाइश्शा, खिं डा देवतापुकी यो सेल्पदा बाक्त। मिनु आ तौ का कली योव्रशा, चढ़ेब सेला बाक्त। न्यायाधीस ८:२७; उत्पत्ती ३१:१९; प्रस्थान २८:४१ 6 मेना इस्राएल रागीमी पिप मबाक्मा बाक्त। मोपतीके सुम मार पचा दाक्मा, मेको पाइक्बाक्मा बाक्त। न्यायाधीस १८:१; न्यायाधीस १९:१; न्यायाधीस २१:२५

7 मिनु यहूदा डा बेथलेहेम रे पा जाक्शो यहूदा आ थर डा रागीम बाक्ब लेवी ठिटा का बाक्माक्त। न्यायाधीस १८:३; ब्यवस्था १८:६-८ 8 मेको यहूदा डा बेथलेहेम सहर प्रोंइशा, अर्को सहरम बाक्चा कली बाक्तीक मालना मालन गाक्माक्त। मोपा गाक्मेनु, मेको एफ्राइम रागी डा पहाड मीकाह आ खिंमी जाक्दीम्माक्त।

9 मिनु मीकाहमी “ते रे जाक्शो नवे?” दे हिल्लो पवा बाक्त। मिनु मेकोमी “गो यहूदा डा बेथलेहेम रे पा जाक्शो लेवी का नड। मिनु बाक्चा कली बाक्तीक का मालना मालन गाक्ती” देंमाक्त। 10 मिनु मीकाहमी “गो नु बाक्को। मिनु आं आफ नु आं चढ़ेब दुमो। गो इ कली बर्स बर्समी १० ओटा चांदी के शेकेल गेनन। मिनु जचा फेक्चा यो गेनन” देंमाक्त। 11 मोपतीके मेको लेवी मीकाह नु बाक्चा बिस्से बाक्त। मिनु मीकाहमी मेको कली आ तौ आन दाते डा का खोदेंशो पा वोदा बाक्त। 12 मिनु मीकाहमी मेको लेवी ठिटा कली आ गेय गोवा बाक्त। मिनु मेको ठिटा आ चढ़ेब दुम्शा, मेको आ खिंम बाक्माक्त। प्रस्थान २८:४१ 13 मिनु मीकाहमी “मुल परमप्रभु यावेमी आं कली सोशो बोशो सेल्लती, दे तुइक्ताक्ड। मारदे हना लेवी का आं चढ़ेब दुम्शो बाक्ब” देंमाक्त।

18

दान आ मुरपुकीम रागी माल्शो

1 मेना इस्राएल रागीम पिप मबाक्मा बाक्त। मिनु मेना दान आ थर डा मुरपुकीमी बाक्चा कली रू मालना मालन बाक्मा बाक्त। मारदे हना इस्राएली आन दातेमी योक्शो रागी मथेरशो बाक्मा बाक्त। न्यायाधीस १:३४; यहोसु १९:४०-४८ 2 मोपतीके दान आ थर डा मुरपुकीमी सोराह नु एश्ताओल रे ५ जना मुर आन कली क्यारी पथ सोइक्त्मे

बाक्त। मिनु मेको आन कली “लन, मिनु मेको रागी कली क्यारी पन” देमा बाक्त। मिनु मेकोपुकी एफ्राइम आ पहाडी रागी, मीकाह आ खिंमी जाक्शा, बास बाक्मा बाक्त। न्यायाधीस १३:२५ ३ मिनु मेकोपुकी मीकाह आ खिंम बाक्मानु, मेको लेवी ठिटा आ लोव्र पशो नेंशा तुइक्तमे बाक्त। मिनु मेको लेवी कली “सुम इ कली एकेर चाक्गा? एकेर मार पाइनेवे? मार गेय पाइनेवे?” दे हिल्लो पामे बाक्त। न्यायाधीस १७:७ ४ मिनु मेकोमी “मीकाहमी गेय गेती। मेको आ चढेब दुम्ती” देमाक्त। ५ मिनु मेकोपुकीमी मेको लेवी कली “मो हना आंइ गेय रिम्शो दुम्बा देय मदुम्बा, परमप्रभु कली हिल्लो पावो” देमा बाक्त। ६ मिनु लेवीमी “थुं नाइशशा लने, परमप्रभु यावेमी इन गेय दाक्शो बाक्ब” देमाक्त।

७ मिनु मेको ५ जना मुर लशा, लाइश सहरमी जाक्दीम्मा बाक्त। मेकोपुकीमी मेकेर डा मुर आन कली सीदोन डा मुरपुकी खोदेशो पा लडाइ मपथु, रिम्शो नु क्येट थीब दुम्शा, बाक्शो तामे बाक्त। मेकोपुकी नु मारेइ मारेइ बाक्माक्त। मेको आन रागी सीदोनी आन रागी क्येडा डोन बाक्माक्त। मिनु मेकोपुकी आंमा ला बाक्शो बाक्मा बाक्त। ८ मिनु मेको ५ जना मुर सोराह नु एशताओल सहरमी लेशशा जाक्मा नोले आन लोकबपुकीमी “मार लोव्र चाक्नी?” दे हिल्लो पामे बाक्त। ९ मिनु क्यारी पाइबपुकीमी “लो, लय। मिनु मेकोपुकी नु लडाइ पय। मारदे हना मेको रागी थम रिम्शो बाक्ब। मुल मार सिक्सी पा बाक्नीनी? मुल लचा कली देश मपने। मिनु मेको रागी कली आंम के सेल्य। १० गे मेकेर जाक्दीशशा, कोव्रनीनु, ठेयब रागीमी थम रिम्शो पा बाक्शो जात का डा मुर आन कली ताइनीनी। मेको मुरपुकीमी लडाइ आ पबंम मारेइ ममिम्शो बाक्नीम। मेको रागी परमप्रभुमी इन गुइमी गेशो बाक्ब। मेको रागीमी बाक्शो मारेइ मारेइ थीसीब” देमा बाक्त।

मीकाह आ मूर्ति रोइशशो

११ मिनु दान आ थर डा ६ सहे या कुरशो मुरपुकी सोराह नु एशताओल सहर रे पा गाक्मा बाक्त। न्यायाधीस १३:२, २५ १२ मेकोपुकी कुशा, यहूदा डा किरयथ-यारीम आ नेक्था ताम्बु कीशा बाक्मा बाक्त। मोपतीके मुल सम्म मेको कली माहानेह-दान देनीम। मेको किरयथ-यारीम आ पच्छिममी बाक्ब। १३ मिनु मेक रे गाक्शा, एफ्राइम डा पहाडी रागीम बाक्शो मीकाह आ खिंमी जाक्दीम्मा बाक्त।

१४ मिनु डोंइती रागी क्यारी पथ पिशो ५ जना मुरुमी आन लोकब आन कली “एको खिं कामी चढेब आ निसाफ पतीक ऊरीम नु थुम्मीम बाक्शो झोला नु खिं डा देवता, मुशा चांदीमी गिल्शो मूर्ति बाक्नीम। गेपुकीमी तुइक्चा माल्नीनी। मिनु मुल मार पचा माल्बा, मिम्चा माल्नीनी” देमा बाक्त। १५ मिनु मेकोपुकी मीकाह आ खिं आ नेक्था जाक्शा, लेवी ठिटा आ बाक्तीक जाक्मा बाक्त। मिनु “दोदेशो बाक्नेवे?” दे हिल्लो पामे बाक्त। १६ या कुरशो ६ सहे दान आ थर डा मुरपुकी चहिं लाप्चोमी बाक्मा बाक्त। १७ मिनु डोंइती क्यारी पथ जाक्शो ५ जना मुर खिं आगा ओव्रमा बाक्त। मिनु मेकोपुकीमी मेको मुशा चांदीम गिल्शो मूर्ति, निसाफ पतीके ऊरीम नु थुम्मीम बाक्शो झोला नु खिं डा देवता नेल्ल लदमे बाक्त। मेना चढेब यो मेको ६ सहे मुर नु लाप्चोम राप्शा बाक्शो बाक्माक्त। न्यायाधीस १७:५ १८ मिनु मोपा मेको ५ जना मुरुमी मीकाह आ खिंमी ओव्रशा, मेको मुशा चांदीम गिल्शो मूर्ति, चढेब आ डोंइती फेक्शो निसाफ पतीके ऊरीम नु थुम्मीम बाक्शो झोला नु खिं डा देवतापुकी लदमेनु, चढेबमी “मार पनी?” दे हिल्लो पामी बाक्त। १९ मिनु मेकोपुकीमी “ब्वालेइ पावो। लोव्र का यो मपावो। गो नु गाक्शा आंइ आफ नु चढेब दुमो। मार, मुर का आ चढेब दुम्चा रिम्शो देय इस्राएल डा थर का नु आन मुर आन चढेब दुम्चा रिम्शो दुम्बा? लो, मिम्तो” देमा बाक्त। २० मिनु मेको चढेब बिशशा, मेको निसाफ पतीके ऊरीम नु थुम्मीम बाक्शो झोला खिं डा देवतापुकी नु मेको मुशा चांदीम गिल्शो मूर्ति कुरशा, मेकोपुकी नु गाक्माक्त।

२१ मिनु मेकोपुकी मेकेर रे लेशशा, आन लां खोदमे बाक्त। मेकोपुकीमी आलपुकी, बस्तु भाव नु आन मारेइ मारेइ लाइशशा, आन डोंइती खुल्शा गाक्मा बाक्त। २२ मिनु दान आ थर मा मुरपुकी मीकाह आ खिं रे इक्का डोन जाक्दीम्मानु, मीकाहमी आ नेक्था डा मुर आन कली ब्रेशशा खुप्शा, खेदा पा थिम्मी बाक्त। २३ मिनु हुइक्तीमी बाक्त। मिनु दान आ थर डा मुरपुकीमी मीकाह कली “इ कली मार दुम्मे? मारदे मोदेशो पा शुश मुर खुप्तीमी?” देमा बाक्त। २४ मिनु मीकाहमी “आं कली सेल्सीशो देवी देवता नु आं चढेब मुर मारदे लाइक्नी? आं कली मारेइ महेंदीनी। मिनु आं कली ‘इ कली मार दुम्मे?’ दे हिल्लो पाइनीनी?” देमाक्त। २५ मिनु दान आ थर डा मुरपुकीमी “ब्वाले पावो। मारदे हना आंइ दाते डा चुरब मुरपुकीमी चुरशा, इ कली नु इ खिं डा मुर आन कली साइक्नीमी” देमा बाक्त। २६ मिनु मेको दान आ थर डा मुरपुकी मेकेर रे गाक्मा बाक्त। मीकाह यो आ क्येडा बोल्यो मुर तशा, मारेइ मपथु, आ खिं लेम्माक्त।

27 मोपा मेको चढ़ेब नु मीकाह आ सेल्सीशो मूर्ति लाइशशा, मेकोपुकी गाक्मा बाक्त। मिनु मेकोपुकी लाइश सहर नु लडाइ पामे बाक्त। मेकेर डा मुरपुकी थुं नाइशशा, लडाइ ममिथु बाक्शो बाक्मा बाक्त। मिनु दान आ थर डा मुरपुकीमी मेको आन कली तरवारमी साइशशा, मेको आन सहरम मी सुइक्तमे बाक्त। 28 मेको आन कली प्रोंइब सुइ मबाक्मा बाक्त। मारदे हना मेको सहर सीदोन रे शुश डोन बाक्माक्त। मेको सहर बेथ-रेहोब आ नेक्था डा दिंममी बाक्माक्त। मिनु दान आ थर डा मुरपुकीमी मेको सहर सेल्शा बाक्चा गोत्रमे बाक्त। 29 मिनु मेको सहर कली इस्राएल आ तौ, मेको आन किकी पिपी आ नें दान वोदमे बाक्त। मेको सहर आ नें डोंइती लाइश बाक्माक्त। यहोसु १९:४७ 30 मिनु दान आ थर डा मुरपुकीमी मेको मूर्ति पूजा पचा कली वोदमे बाक्त। इस्राएली नेल्ल ग्याइशशा लाइक्चा मपुंडसीमा सम्म मोसा आ तौ गेरशोम, आ तौ योनाथन नु मेको आ चच युइ दान आ थर डा चढ़ेब दुम्मा बाक्त। १राजा १२:२९; आमोस ८:१४; प्रस्थान १८:३; २राजा १५:२९ 31 परमप्रभु आ खिं शिलोमी बाक्म सम्म मेकोपुकीमी मीकाहमी सेल्सीशो मूर्ति कली पूजा पामे बाक्त। यहोसु १८:३; येरमीया ७:१२

19

गिबा सहरम मरिम्शो दुम्शो

1 मेना इस्राएल रागीम पिप मबाक्माक्त। मिनु लेवी का बाक्माक्त। मेको एफ्राइम डा नेल्ल क्येडा नोले डा पहाडी रागीम बाक्शो बाक्माक्त। मेकोमी यहूदा डा बेथलेहेम रे मीश का चाक्शो बाक्माक्त। न्यायाधीस १७:६ 2 मिनु आ वोंइश नु गाइशशा, मेको कली प्रोंइशा आ माइत यहूदा डा बेथलेहेममी लशो बाक्माक्त। मिनु मेको मीश मुर मेकेर बाक्शो ४ महिना दुम्शो बाक्माक्त। 3 मिनु आ वोंइश आ कान्छी मीश कली लेम्शा बिप्पाइशशा, मेको कली पित्चा कली लमाक्त। मेकोमी वाइल का नु गधा निक्शी यो लदा बाक्त। मिनु मेको आ शिउ आ खिंमी जाक्दीम्माक्त। मिनु आ शिउमी मेको कली तशा ग्येरसीशा गुमा बाक्त। 4 मिनु आ शिउमी “बाक्कीन” दे नमो सिमो पवा बाक्त। मोपतीके नाक्त सां सम्म बाक्माक्त। मेकोपुकी जशा तूशा बाक्मा बाक्त। 5 मिनु ४ नाक्त नोले मेको लेवी सुनी कना बोक्शा, गाक्चा कली सासे बाक्त। तन्न आ शिउमी “लचा क्येडा डोंइती मारेइ जने” देंमाक्त। 6 मोपतीके जशा तूशा बाक्सा बाक्त। मिनु आ शिउमी “मुलाक्त नाक्दो का बाक्शा, चिनु ग्येरसीशा लने” देंमाक्त। 7 मिनु मेको निक्शी जशा तूशा बाक्सा बाक्त। मिनु आ शिउमी “चिनु काब नाक्दो बाक्कीन” दे नमो सिमो पवा बाक्त। 8 मिनु ५ नाक्त मेको लचा कली सुनी कना बोक्माक्त। तन्न आ शिउमी “डोंइती जने, नां इच्का चोक्तल। मिनु नोले लने” देंमाक्त। मोपतीके मेको निक्शी नां चोक्चा सम्म बाक्शा, जशा तूशा, बाक्सा बाक्त। 9 मिनु मेको मुर, आ मीश नु आ वाइल नु लचा, दे बोक्मेनु, आ शिउमी “लो, कोव्रडीन, नां रिक्चाप्तु। मोपतीके मुलाक्त नाक्दो बाक्शा, इन थुं ग्येरपतीन। मिनु दीसा सुनी कना बोक्शा इन खिं लेतीन” देंमाक्त। लूका २४:२९

10 तन्न मेको नाक्दो बाक्चा मबिस्से बाक्त। मेक रे बोक्शा, आ मीश, आ वाइल नु गधा निक्शी खुल्शा, मेकोपुकी यबुस आ आइदी जाक्दीम्मा बाक्त। यबुस सहर कली यरूसलेम यो देंबाक्मा बाक्त। न्यायाधीस १:२१; १इतिहास ११:४ 11 मिनु यबुस आ नेक्था जाक्दीम्मानु, नां रिक्चशो बाक्माक्त। मिनु वाइलमी “मुलाक्त नाक्दो लशा, यबुसी आन सहरमी बाक्च” देंमाक्त। 12 तन्न लेवीमी “गो इस्राएली अरु मुर आन सहरम मलाइनीक। गिबा सहरमी लय। 13 लो, गाक्च, गिबा हना यो रामाह सहर हना यो का सम्म जाक्दीशा, बास बाक्च” देंमाक्त। 14 मिनु गाक्मा बाक्त। मोपा गाक्मा गाक्मा बेन्यामीन आन गिबा सहर जाक्चामेनु, नां रिक्माक्त। यहोसु १८:२८ 15 मिनु मेकेर बास माल्शा लामा बाक्त। मिनु सहर डा चोकमी बाक्मा बाक्त। मारदे हना सुइमी मेको आन कली बास बाक्चा कली आन खिंमी मलदमे बाक्त।

16 मिनु खाल्पा का आ रूमी गेय पा नाक्दो खिं लेशो बाक्माक्त। मेको खाल्पा एफ्राइम डा पहाडी रागी डा बाक्माक्त। तन्न गिबामी बेन्यामीन आ थर डा सहरम बाक्बाक्माक्त। 17 मिनु मेको खाल्पामी इर कोव्रशा सहर डा चोकमी बाक्शो लां गाक्ब मुर आन कली तवा बाक्त। मिनु लशा मेको आन कली “ते रे पिनी? ते लाइनीनी?” दे हिल्लो पवा बाक्त। 18 मिनु मेकोमी “गोपुकी यहूदा डा बेथलेहेम रे एफ्राइम डा नेल्ल क्येडा नोले डा पहाडी रागीम लाइनीकी। गो मेकेर डा नड। गो यहूदा डा यबुस बेथलेहेममी लती। मुल मेक रे लेशशा, आं खिं लना लन बाक्नुड। मिनु सुइमी आंइ कली बास बाक्चा मगेम। 19 गोपुकी नु आंइ गधा कली नल नु जचा थोव्रक बाक्ब। गो, आं मीश नु आं वाइल नेल्ल कली जचा तूचा थोव्रक यो बाक्ब। गो आंइ कली माल्शो मारेइ मारेइ गोपुकी नु बाक्ब” दे लोव्र लेत्ता बाक्त। 20 मिनु खाल्पामी “थुं नाइक्तीन। आं खिंम बाक्कीन। इन माल्शो नेल्ल गेनन्नी। गोपुकीमी चोकमी

बाक्शा, नां सोंइचा काइ मदुम्ब” देंमाक्त। 21 मिनु खाल्पामी आ खिंमी लाइक्मी बाक्त। गधा आस कली जचा गोवा बाक्त। मिनु आन खोइल चिक्शा, जशा तूशा बास बाक्मा बाक्त।

22 मेकोपुकी ग्येरसीशा बाक्शो बाक्मानु, सहर डा मरिम्शो मुरपुकीमी मेको खिं कली दि दा रे पा पुम्दमे बाक्त। मिनु खिं डा लाप्चो कली खोकोल पना पन “इ खिंमी ओव्रब मुर कली लाडगा गुंइदो। गोपुकी मेको नु इप्नीकी” दे ग्रीमा बाक्त। उत्पत्ती १९:५-८ 23 मिनु खाल्पा लाडगा गूशा, मेको आन कली “आं लोकबपुकी, एको मुर आं वारच बाक्ब। मोदेशो मरिम्शो मपन। एको मुर आं पौना बाक्ब। मेको कली मारेइ यो मपन। 24 एकेर आं कन्ने तमी नु एको पौना आ कान्छी मीश बाक्ब। मेको आस कली लतीन। मिनु इन दाक्शो पन। तन्न एको मुर कली मारेइ यो मपन” देंमाक्त। 25 तन्न मेको मुरपुकीमी खाल्पा आ लोव्र काइ मबिस्समा बाक्त। मोपतीके मेको पौनामी आ कान्छी मीश मेको आन बाक्तीक सोइक्ता बाक्त। मिनु मेकोपुकी मेको नाक्दो नेल्ल मेको मीश मुर नु इम्मा बाक्त। मेको कली का का पा बिग्रेमे बाक्त। मिनु सुनी सोइक्तामे बाक्त। 26 मिनु सुनी कना आ वोंइश बाक्शो खिं डा लाप्चोमी जाक्शा गोल्माक्त। मिनु नां मसोक्म सम्म मेकेरेन गोलशा बाक्माक्त।

27 मिनु आ वोंइश बोक्शा, मुल गाक्चा, दे लाप्चो रोकगानु, आ मीश कली लाप्चो आ पुंम गोल्लो तवा बाक्त। 28 मिनु “बोक्को, गाक्च” देंमेनु, मारेइ लोव्र मलेत्ता बाक्त। मिनु आ मीश कली गधा तारी वोंइशशा खिं लदा बाक्त। 29 मिनु खिं जाक्दीशशा, आ छूरी गुंइशा आ मीश कली क्योरशा, १२ टुक्रा पा इस्राएल आ थर नेल्ल आन कली सोइक्ता बाक्त। १सामुएल ११:७ 30 मेको ताइब नेल्लेमी “गो इस्राएलीपुकीम इजीप्त रागी रे पिशो रे मुलाक्त सम्म ओदेशो मदुम्शो नु मतशो बाक्तय। मोपतीके मुल मार पचा मिम्तीन। मिनु सल्ला पने” देंमा बाक्त। होसे १०:९

20

बेन्यामीनी आन कली क्येक्क लेशशो

1 मिनु इस्राएली नेल्ले दान रे पा बेयर-शेबा सम्म गिलाद रागी परमप्रभु यावे आ डोंइती मिस्पामी गुम्मा बाक्त। यहोसु १८:२६; १सामुएल ७:५ 2 इस्राएली आन थर थर डा ठेयब मुरपुकी नु तरवार कुरब ४ लाख लडाइ पाइबपुकी परमप्रभु आ मुर आन गुम्तीकेमी जाक्मा बाक्त। 3 मिनु बेन्यामीन आ थर डा मुरपुकीमी इस्राएली नेल्ले मिस्पामी बुक्तेक्म, दे तुइक्तामे बाक्त। मिनु इस्राएलीपुकीमी मेको लेवी कली “एको मरिम्शो गेय दोपा दुम्मे?” दे हिल्लो पामे बाक्त।

4 मिनु मेको साइक्चा पुंइसीशो मीश मुर आ वोंइश लेवीमी “गो नु आं मीश बास बाक्चा कली बेन्यामीन आ थर डा गिबा सहरमी लशो नस्कु। न्यायाधीस १९:१४; यहोसु १८:२८ 5 मिनु मेको नाक्दो गिबा सहरम बाक्ब मुरपुकीम आं कली मरिम्शो पचा कली आं बाक्शो खिं पुम्ताक्म। मिनु मेकोपुकीमी आं कली साइक्चा माल्तेक्म। मिनु आं मीश कली कीशा लाइशशा, मेको नु मबेक्म सम्म का का पा इप्तेक्म। 6 मिनु गो आं बेक्शो मीश कली टुक्रा टुक्रा पा चेक्ता। मिनु इस्राएल आ थर नेल्ल आन रागीम सोइक्ताक्ड। मेकोपुकीमी इस्राएलमी मोदेशो ग्रांग्रा दिशो नु मरिम्शो पामे बाक्त, दे तुइक्पाइक्चा कली गो मो पाता। उत्पत्ती ३४:७ 7 मुल गे इस्राएली नेल्ल लोव्र पने। मार पचा माल्बा, इन मिम्शो शोव्रडीन” देंमाक्त।

8 मिनु मुर का दुम्शो खोदेशो पा मुर नेल्ले बोक्मा बाक्त। मिनु मेकोपुकीमी “गोपुकी सुइ यो आंम खिं लेशशा मलय। का सम्म यो लेशशा मलय। 9 मुल गोपुकीमी गिबा सहर डा मुर आन कली मार पचा देंशा हना, गो फेन्टे आप्शा, गिबा सहर लशा, लडाइ तोय। 10 इस्राएल आ थर नेल्ल डा सहे का रे १० जना, हजार का रे सहे का जना, १० हजार रे हजार का जना मुर लाइशशा, लडाइ पाइब आन कली जचा थोव्रक क्यापब नु कुरब सेल्य। मिनु मोपा गो गिबा सहरम बाक्ब बेन्यामीन आ थर डा मुरपुकीम इस्राएलम पशो ग्रांग्रा दिशो गेय आ पबंम क्येक्क लेत्तय” देंमा बाक्त। 11 मोपा इस्राएली नेल्ले थुं का दुम्शा, मेको सहर नु लडाइ पचा कली खुम्साक्मा बाक्त।

12 मिनु इस्राएल आ थर डा मुरपुकीमी बेन्यामीन आ थर डा मुर नेल्ल आन कली “इन दातेमी पशो ग्रांग्रा दिशो गेय, मार बाक्बा? 13 मोदेशो मरिम्शो पाइब आन कली आंइ गुइमी गेन। मिनु गो मेको आन कली साइशशा, इस्राएल रागी कली मोदेशो ग्रांग्रा दिशो रे रिम्शो सेल्नीकी” दे लोव्र पथ, मुर सोइक्तामे बाक्त। तन्न बेन्यामीन आ थर डा मुरपुकीम आंम लोकब इस्राएली आन लोव्र मनेन्मे बाक्त। प्रस्थान २१:१२; गन्ती ३५:३३-३४ 14 मिनु बेन्यामीन आ थर डा मुरपुकी इस्राएलीपुकी नु लडाइ पचा कली गिबामी खुम्समा बाक्त। 15 बेन्यामीन आ थर डा मुरपुकीमी रीब पा २६ हजार तरवार कुरशो लडाइ पाइब मेको सहर रे खुप्तमे बाक्त। मेको आन क्येडा लाक्शा गिबा सहर डा मुर यो बाक्मा बाक्त। 16 मेको आन दातेमी ७ सहे पेरा गुइ चलेब, हुरद आप्चा शुश जोक्ब मुर यो बाक्मा बाक्त। आन

सहर नु गिबा रे यो जाकमा बाक्त। 17 मिनु इस्राएलीपुकीमी चहिं बेन्यामीन आ थर डा मुरपुकी नु लडाइ पचा कली तरवार कुरशो ४ लाख लडाइ पाइब ठीक पामे बाक्त।

18 मिनु इस्राएलीपुकी रीब पा बेथेल लशा, परमप्रभु कली “आंइ इस्राएली आन दातेमी तेको थरमी नेल्ल क्येडा डोंइती बेन्यामीन आ थर डा मुर नु लडाइ पचा?” दे हिल्लो पामे बाक्त। मिनु परमप्रभु यावेमी “यहूदा आ थर डा मुरपुकीमी डोंइती लडाइ पचा माल्नीम” देंमाक्त। न्यायाधीस १:१-२; गन्ती २७:२१

19 मिनु इस्राएलीपुकी सुनी कना बोक्शा लशा, गिबा आ नेक्था ताम्बु कीशा बाक्मा बाक्त। 20 मेकोपुकीमी बेन्यामीन आ थर डा मुरपुकी नु लडाइ पचा कली गिबा सहर आ नेक्था ठीक पा बाक्मा बाक्त। 21 मेको नाक्ती बेन्यामीन आ थर डा मुरपुकी गिबा सहर रे लशा, लडाइ पा २२ हजार इस्राएली आन कली सदमे बाक्त। 22 तन्न इस्राएल डा मुरपुकी थुं बारपाइशशा, डोंइती नाक्ती खोदेंशो पा लेंशा लडाइ पचा कली ठीक पा बाक्मा बाक्त।

23 मिनु इस्राएलीपुकी लशा, नाक्दो सम्म परमप्रभु यावे आ डोंइती डाक्मा बाक्त। मिनु मेकोपुकीमी परमप्रभु यावे कली “आंम लोकब बेन्यामीन आ थर डा मुर नु लेंशा लडाइ तोचा देय मतोचा” दे हिल्लो पामे बाक्त। मिनु परमप्रभु यावेमी “मेकोपुकी नु लडाइ पचा कली लन” देंमाक्त। 24 आ दीसा नाक्त यो मेकोपुकीमी बेन्यामीन आ थर डा मुरपुकी नु लडाइ पचा गोवमे बाक्त। 25 मिनु बेन्यामीन आ थर डा मुरपुकी मेकोपुकी नु लडाइ पचा कली गिबा रे गूमा बाक्त। मिनु मेकोपुकीमी लेंशा १८ हजार इस्राएली आन कली सदमे बाक्त। उत्पत्ती ४९:२७ 26 मिनु इस्राएली नेल्ले बेथेल सहर लमा बाक्त। मिनु मेकोपुकीमी नाक्दो सम्म परमप्रभु यावे आ डोंइती डाक्शा माइजा बाक्मा बाक्त। मेकोपुकीमी परमप्रभु यावे कली चोशा चढेतीक नु दुशा बाक्चा आ पर्बम चढेतीक चढेमे बाक्त। न्यायाधीस २०:१८; यहोसु १८:२१-२२ 27 मिनु इस्राएलीपुकीमी परमप्रभु यावे कली “मार पचा” दे हिल्लो पामे बाक्त। मारदे हना मेना परमप्रभु आ कबल पशो सन्दोस मेकेर बाक्माक्त। 28 मिनु हारून आ तौ एलाजर आ तौ फिनेहासमी मेको कली कोव्रब बाक्माक्त। मिनु इस्राएलीपुकीमी परमप्रभु यावे कली “मुल गो आंइ लोकब बेन्यामीन आ थर डा मुरपुकी नु लडाइ पथ लेंशा लचा देय मलचा” दे हिल्लो पामे बाक्त। मिनु परमप्रभु यावेमी “लन, गो दीसा मेको आन कली इन गुइमी गेनन्नी” देंमाक्त। गन्ती २५:७; यहोसु २४:३३

29 मोपतीके इस्राएल डा मुरपुकीमी लडाइ पाइब आन कली गिबा आ एर ओंथ बाप्पदमे बाक्त। यहोसु ८:१२, १४ 30 मेको सां नाक्ती इस्राएलीपुकी बेन्यामीन आ थर डा मुरपुकी नु लडाइ पथ लमा बाक्त। डोंइती पशो खोदेंशो पा लडाइ पचा कली गिबा सहर आ डोंइती ठीक पा बाक्मा बाक्त। 31 मिनु बेन्यामीन आ थर डा मुरपुकी चहिं इस्राएली आन लडाइ पाइब नु लडाइ पचा कली लाडगा गूमा बाक्त। इस्राएलीपुकी सहर रे प्रोक्खु पा मेको आन कली गिबा सहर रे डोन लदमे बाक्त। मिनु बेन्यामीन आ थर डा मुर डोंइती खोदेंशो पा इस्राएली सदमे बाक्त। मेकोपुकी ठेयब लांमी बाक्मा बाक्त। लां का बेथेल गे लाइब नु अरु चहिं गिबा नु अर्को रू गे लाइब लां बाक्माक्त। मेकेर ३० जना इस्राएली कली सदमे बाक्त। 32 मिनु बेन्यामीन आ थर डा मुरपुकीमी “गो डोंइती खोदेंशो पा ग्राना ग्रान बाक्नय” दे मिम्तमे बाक्त। तन्न इस्राएलीपुकीमी “गो प्रोक्खु पा मेको आन कली सहर रे डोन ठेयब लां सम्म ग्रुंडचा माल्नीक” देंमा बाक्त। 33 मोपा इस्राएली आन लडाइ पाइब आन ठेयब हुल आंम आन लडाइ पतीके प्रोंइशा बाल-तामार गे प्रोक्खु पामे बाक्त। मिनु बाप्शा बाक्बपुकी चहिं गेबा आ पच्छिम रे रीब पा गूमा बाक्त। गेबा गिबा सहर दुम्ने चाप्ब। 34 मिनु इस्राएल डा १० हजार योव्रसीशो लडाइ पाइबपुकीमी गिबा गे बारशा ठेयब लडाइ तोमे बाक्त। तन्न बेन्यामीन आ थर डा मुरपुकीमी “ठेयब श्येत जाक्चा चिक्शो बाक्त” दे मतुइक्तमे बाक्त।

35 मिनु परमप्रभु यावेमी बेन्यामीन आ थर डा मुर आन कली इस्राएली आन गुइ रे खतम सेला बाक्त। मेको नाक्ती इस्राएलीपुकीमी २५ हजार सहे का बेन्यामीन आ थर डा मुर आन कली सदमे बाक्त। 36 मिनु बेन्यामीन आ थर डा मुरपुकीमी “मुल गो ब्रुइतक” दे तुइक्तमे बाक्त। मारदे हना इस्राएलीपुकीमी ब्रुशो देंखु पा गिबा आ नेक्था बाप्शा बाक्ब आन कली थमा सुइशशा, प्रोक्खु पामे बाक्त। 37 मिनु मेको बाप्शा बाक्बपुकीमी रीब पा लडाइ पा गिबा सहर ओव्रमा बाक्त। मिनु मेकोपुकीमी मोपा ओव्रशा, गिबा डा मुर नेल्ल कली तरवारमी क्योरशा सदमे बाक्त। 38 इस्राएली नु मेको बाप्शा बाक्ब मुर आन सल्ला मार बाक्त देंशा हना, मेकोपुकीमी सहर ओव्रशा, ग्राशा, मी मुइशशा सरीड गे कुन सोइक्चा माल्बाक्मा बाक्त। 39 मिनु प्रोक्खु पशो इस्राएल डा ठेयब हुल मेको तशा लेत्चा, दे सल्ला पशो बाक्मा बाक्त। मिनु डोंइती बेन्यामीन आ थर डा मुरपुकीमी इस्राएली आन कली ३० जना साइशशा “गो थमा पा ग्रानीक” दे मिम्शो बाक्मा बाक्त। 40 मिनु सहर आ दाते रे कुन गूशो तशा, बेन्यामीन आ थर डा मुरपुकीमी नोले हिरशा कोव्रडमे बाक्त। मिनु सहर नेल्लेमी मी ब्रुशो तामे बाक्त। 41 मिनु प्रोक्खु पाइब इस्राएलीपुकी फ्रा लेशशा, बेन्यामीन आ थर

डा मुर आन कली लडाइ तोव्रमे बाक्त। मिनु बेन्यामीन आ थर डा मुरपुकी “ला, मुल बेकसाक्व” दे हिंमा बाक्त। 42 मोपतीके बेन्यामीन आ थर डा मुर मेक रे गोरशो रागी गे प्रोक्मा बाक्त। तन्न सहर रे जाक्शो इस्राएलीपुकीमी मेको आन कली दाते पा क्योरशा साइक्चा गोव्रमे बाक्त। 43 मेकोपुकीमी बेन्यामीन आ थर डा मुर नेल्ल कली मनाइक्थु, खेदा पामे बाक्त। मिनु नोहा रे गिबा आ नां दाप्तीके सम्म मेको आन कली खेदा पा साइशशा ग्रामा बाक्त। 44 मिनु १८ हजार बेन्यामीन आ थर डा मुरपुकी साइक्चा पुंडसमा बाक्त। मेको नेल्ल बोल्यो लडाइ पाइब बाक्मा बाक्त। 45 मिनु लेशशा गोरशो रागी रिम्मोन माइशशो ठेयब फुल्लु गे प्रोक्मानु, इस्राएलीपुकीमी ठेयब लांमी ५ हजार खोइ बेन्यामीन आ थर डा मुर आन कली सदमे बाक्त। मेकोपुकीमी अरु आन कली गिदोम सहर सम्म खेदा पा हजार निक्शी आन कली सदमे बाक्त। 46 मेको नाक्ती २५ हजार या कुरशो बेन्यामीन आ थर डा मुरपुकी लडाइमी साइक्चा पुंडसमा बाक्त। 47 तन्न ब्रोंइशा लीशो ६ सहे जना बेन्यामीन आ थर डा मुरपुकी गोरशो रागी डा रिम्मोन फुल्लु मेर प्रोक्शा, ४ महिना मेकेर बाक्मा बाक्त। न्यायाधीस २१:१३ 48 मिनु इस्राएलीपुकीमी बेन्यामीन आ थर डा मुर नेल्ल आन कली लडाइ पा सदमे बाक्त। सहर कली क्रोइशशा, मुर नु बस्तु भाव मारेइ मारेइ सदमे बाक्त। मेकोपुकीमी लीशो सहर नेल्ल आन कली यो मी सुइक्तमे बाक्त। उत्पती ३४:२५-२९; गन्ती ३५:३०-३४; ब्यवस्था १३:१३-१९

21

लीशो बेन्यामीनी

1 मिनु डोंइती मिस्पामी जाक्शो इस्राएलीपुकीमी मार कसम जशो बाक्मा बाक्त देशा हना “गोपुकीमी इं तमी आन कली बेन्यामीन आ थर डा मुर आन कली ग्युंवे पा मगेय” दे कसम जशो बाक्मा बाक्त। न्यायाधीस २०:१ 2 मिनु मुरपुकी बेथेल लशा, नाक्दो सम्म परमप्रभु आ डोंइती बाक्शा, शुश डाक्मा बाक्त। न्यायाधीस २०:१८, २३, २६ 3 मेकोपुकीमी “परमप्रभु यावे, इस्राएली आन परमप्रभु, मारदे ओदेशो दुम्मे? मुलाक्त मारदे इस्राएली आन थर का जाम्मे?” देमा बाक्त। 4 मिनु आ दीसा मुरपुकी सुनी कना बोक्शा, मेकेर चढेतीके का सेल्शा, चोशा चढेतीक नु दुशा बाक्चा आ पबर्म चढेतीक चढेमे बाक्त। 5 मिनु नोले इस्राएलीपुकीमी “तेको थर परमप्रभु यावे आ डोंइती मजाक्मा?” दे हिल्लो पमुमा बाक्त। मारदे हना मिस्पामी मेकोपुकीमी “परमप्रभु यावे आ डोंइती सु मजाक्बा, मेको कली साइक्चा माल्ब” दे कसम जशो बाक्मा बाक्त। 6 मिनु आंम लोकब बेन्यामीन आ थर डा मुर आन पबर्म डाक्शा “मुलाक्ती इस्राएल डा थर का क्याम्साक्व। 7 लीशो वोंइश मुर आन कली मीश आल चाक्चा कली मार पय? गोपुकीमी परमप्रभु यावे आ डोंइती मेको आन कली आंइ तमी ग्युंवे पा मगेनीक, दे कसम जशो बाक्नीकी” देमा बाक्त।

8 मिनु मेकोपुकीमी “परमप्रभु यावे आ डोंइती इस्राएली आन थर डा मिस्पामी मजाक्ब, सु बाक्मे?” दे हिल्लो पशा, याबेश-गिलाद रे सुइ यो गुम्तीक ताम्बुमी मजाक्मा बाक्त, दे तुइक्तमे बाक्त। 9 मारदे हना मेकोपुकीमी मुर हिकगमेनु, याबेश-गिलाद डा सुइ मुर मजाक्शो तुइक्तमे बाक्त। 10 मोपतीके मेको गुम्शो मुरपुकीमी १२ हजार लडाइ पाइब आन कली याबेश-गिलाद डा वोंइश मुर, मीश मुर, आल ब्रेच नेल्ल कली तरवारमी क्योरशा सतीन, दे हुकुम पा सोइक्तमे बाक्त। 11 मिनु “वोंइश मुर नु मेको नु इण्शो मीश मुर नेल्ल आन कली सतीन। तन्न कन्ने आन कली प्रोनीन” दे हुकुम पामे बाक्त। गन्ती ३१:१७-१८ 12 मिनु सोइशशोपुकीमी याबेश-गिलादमी ४ सहे सुइ नु मइण्शो कन्ने मीश आल थिश्शा, मेको आन कली कनान डा शिलोम बाक्शो ताम्बुमी चाक्गमे बाक्त।

13 मिनु गुम्शो इस्राएली नेल्लेमी रिम्मोनमी खुइशशा बाक्शो बेन्यामीन आ थर डा मुर आन कली “गारचा” दे ब्रेत्थ सोइक्मे बाक्त। न्यायाधीस २०:४७ 14 मिनु बेन्यामीन आ थर डा मुरपुकी लेशशा जाक्मा बाक्त। मिनु मेकोपुकीमी मेको आन कली याबेश-गिलादम सेस प्रोंइशो मीश आल गेमे बाक्त। तन्न बेन्यामीन आ थर डा वोंइश मुर आन कली मेको मीश आल मजाक्दीम्माक्त। 15 मिनु इस्राएलीपुकीमी बेन्यामीन आ थर आ पबर्म सुर्ता पस डा पस बाक्मा बाक्त। मारदे हना परमप्रभु यावेमी इस्राएल डा बेन्यामीन आ थर हेररा क्याम्शो बाक्माक्त। 16 मोपतीके मेको गुम्तीक डा खाल्पापुकीमी “मुल लीशो वोंइश मुर आन कली मीश गेचा कली मार पय? मारदे हना बेन्यामीन आ थर डा मीश मुर नेल्ल बेक्तेक्म” देमा बाक्त। 17 मिनु मुरपुकीमी “प्रोक्शा ब्रोंइशो बेन्यामीन आ थर डा मुर आन कली चच युइ दुम्चा माल्नीम। मोदेशो मदुम्त हना, इस्राएल रे थर का ग्याम्शा लाइब। 18 तन्न गो मेको आन कली इं तमी गेने मचाप्नय” देमा बाक्त। मारदे हना इस्राएलीपुकीमी “सुम बेन्यामीन आ थर डा मुर कली आ तमी गेबा, मेको सराप राइब” दे कसम जशो बाक्मा बाक्त। 19 मोपतीके “नेनीन, परमप्रभु यावे आ पबर्म बर्सम काले दुम्ब चाड शिलोमी पाइनीम। शिलो बेथेल आ उत्तर गे बाक्ब। मिनु मेको बेथेल रे शेकेम लतीक ठेयब लां आ पूर्व नु लेबोना सहर आ

दक्खिनम बाक्शो बाक्ब” देंमा बाक्त। यहोसु १८:१ 20 मिनु बेन्यामीन आ थर डा मुर आन कली “गे लशा अडगुर रूमी खुइशशा बाक्कीन। 21 मिनु शिलो डा मीश आलपुकी सिल पथ जाक्मानु, अडगुर रू रे फो फु गूशा, आंम मीश सेल्चा कली का का पा मीश आल कीडीन। मिनु बेन्यामीन आ थर डा रागी लन। प्रस्थान २१:१६; ब्यवस्था २४:७ 22 मिनु मेको मीश आल आन आफ नु लोक्बपुकी जाक्शा, आंइ कली लोत्र पाम्तेक्म हना, गो मेको आन कली ‘बेन्यामीन आ थर डा मुर आन कली शिशी पन। मेको आन कली ग्युंबे पचा गेन। मारदे हना गो लडाइमी मेको मिश डा वोंइश मुर आन कली मीश आल गयाइक्ने मचाप्क। मिनु गे इन तमी गेशा यो दोस मताइनीनी। मारदे हना गे मेको आन कली इन तमी आंमन मगेनी’ देंनीकी” देंमा बाक्त।

23 मिनु बेन्यामीन आ थर डा मुरपुकीमी मोदेशो पामे बाक्त। मेको सिल पाइब मीश आल का का आंम मीश सेल्चा कली कीडमे बाक्त। मेको आन रागी लेशशा आंम सहर कली लेंशा सेल्शा, मेकेर बाक्मा बाक्त। 24 मेना इस्राएली नेल्ल मेकेर रे लशा ब्राशा, आंम आंम थर नु आंम आंम खिं लमा बाक्त। 25 मेना इस्राएल रागीम पिप मबाक्माक्त। मोपतीके सु सुमी मार मार पचा दाक्मा मेको पाइक्बाक्मा बाक्त। न्यायाधीस १७:६

रूथ

ब्रेक्ब मुर: साइ डा टाल्मुत माइशशो किताबमी “एको किताब ब्रेक्ब सामुएल बाक्ब” दे ब्रेक्शो बाक्ब।

गेना ब्रेक्शो: दाऊद आ सासन पची ना ब्रेक्शो बाक्ब। मेको आ सासन ११०४-९६५ बि. सी.म बाक्शो बाक्त।

मार ब्रेक्शो: एको किताब डा लोत्र परमप्रभु यावेमी आ वोंइश बेक्शो मीश मुर नु रोम रोइक्च आन कली शिशी पशो सांकछी बाक्ब। रूथ मोआबी दुम्शा यो परमप्रभु यावे कली थमा सुइक्ब दुम्त। मेकोमी बोआज नु ग्युबे पा येसु आ किकी पिपी दुम्त। मत्ती १:५

नाओमी नु आ खिं डा मुर

1 निसाफ पाइबपुकीमी इस्राएली आन कली हुकुम पची ना, अन्काल दुम्माक्त। मोपतीके यहूदा रागी डा बेथलेहेम रे मुर का, आ मीश नु आ तौ निक्शी लाइशशा, मोआबी आन रागीम बाक्थ लमाक्त। गन्ती २५:१-५; १सामुएल २२:३-४ 2 मेको मुर आ नें एलीमेलक बाक्माक्त। आ मीश आ नें नाओमी नु आ तौ निक्शी आस नें का के माहलोन, का के किल्योन बाक्माक्त। मेकोपुकी यहूदा रागी डा बेथलेहेम एफ्राथाह सहरम बाक्शो बाक्मा बाक्त। मिनु मोआबी आन रागी जाक्दीशशा, मेक उइ बाक्मा बाक्त। उत्पत्ती ४८:७; मीका ५:१ 3 मिनु नाओमी आ वोंइश एलीमेलक बेक्शा, नाओमी नु आ तौ निक्शी प्रोंइचा पुंडसमा बाक्त। ब्यवस्था ७:३; ब्यवस्था २३:४; नेहेम्याह १३:२३ 4 मिनु मेको आ तौ निक्शीमी मोआबी मीश आल चाक्से बाक्त। का आ नें ओरपा, का आ नें रूथ बाक्माक्त। मेकोपुकी मेकेर १० बर्स बाक्मा बाक्त। 5 मिनु माहलोन नु किल्योन निम्फा बेक्सा बाक्त। मोपा आ वोंइश नु आ तौ निम्फा बेक्शा, नाओमी ला लीमाक्त।

रूथ नु आ शिमी

6 मिनु नोले नाओमी आ चाइमी निक्शी नु मोआब रे आ रागी लेत्चा चिक्ता बाक्त। मारदे हना मोआब रागीम बाक्मेनु, नाओमीमी “परमप्रभु यावेम आ मुर आन कली मिम्शा, मेको आन कली जचा गेप्टु” देशो लोत्र नेना बाक्त। २राजा ८:३ 7 मिनु मेको आ चाइमी निक्शी नु आ बाक्तीके रे गाक्शा, यहूदा रागी लमा बाक्त। 8 मिनु नाओमीमी आ चाइमी निक्शी आस कली “इस इस माइत लेतीसे। गे दोपा बेक्शो आन कली नु आं कली रिम्शो पसी, मोपा परमप्रभु यावेमी इस कली रिम्शो पवल। 9 परमप्रभु यावेमी इस कली अर्को वोंइश गेशा, इस थुं नाइशशा बाक्चा गोवल” देंमाक्त। मिनु आ चाइमी आस कली पुक्पु पाइशशा, नेल्ल डाक्मा बाक्त। रूथ ३:१ 10 मिनु आ चाइमी निक्शीमी “गो थमा पा इन मुर आन बाक्तीके लाइनस्कु” देंसा बाक्त। 11 मिनु नाओमीमी “आं चाइमी निक्शी लेतीसे। मारदे गो नु लचा दाक्नीसी? मार, गो इस वोंइश दुम्पाइक्चा कली तौ थीने चाप्नुडा डा? 12 आं चाइमी निक्शी लेतीस। गो खाल्पी दुम्शा, ग्युबे पने मचाप्नुड। गो आल मिम्शा, मुलाक्दोन वोंइश नु बाक्शा, तौ थिती हना यो, मेको मकोल्म सम्म 13 रिम्शा बाक्ने चाप्नीसी? मेको आस कली रिम्शा, अर्को ग्युबे मपथु बाक्नीसी? मदुम्ब, आं चाइमी निक्शी। मारदे हना इस क्येडा गो परमप्रभु यावे आ गुइ रे श्येत जाइब बाक्ती” देंमाक्त। 14 मिनु मेकोपुकी लेंशा डाक्मा बाक्त। मेको नोले ओरपामी आ शिमी कली पुक्पु पाइशशा वोंइशशा, आ मुर आन बाक्तीके लेम्माक्त। रूथ चहिं आ शिमी नुन बाक्माक्त।

15 मिनु नाओमीमी “नेनो, इ देउरानी आ मुर आन बाक्तीके नु आ देवी देवताम लेत्त। गे इ देउरानी आ पशो खोदेशो पावो” देंमाक्त। 16 मिनु रूथमी “इन कली प्रोंइपाइशशा, आं कली लेशशा, सोइक्चा कली ढिपी मपाइय्यीनी। गे ते लाइनीनी, गो यो मेकेन लाइनुड। गे ते बाक्नीनी, गो यो मेकेन बाक्नुड। इन मुरपुकी आं मुर दुम्नीम। इन परमप्रभु आं परमप्रभु दुम्ब। 17 गे ते बेक्नीनी, गो यो मेकेन बेक्नुड। मिनु मेकेन थिम्चा पुंडसीनुड। गो मबेक्थु इन कली प्रोंइतन्नी हना, परमप्रभु यावेमी सजाइ गेयील” देंमाक्त। 18 मिनु नाओमीमी रूथमी आ कली प्रोंइसीन मप्रोंइब, दे तुइशशा, अरु मारेइ मदेंमाक्त। 19 मिनु मेको निम्फा गाक्शा, बेथलेहेम जाक्सा बाक्त। मिनु बेथलेहेम जाक्सानु, सहर डा मुर नेल्लेमी मेको आस पबर्म लोत्र पामे बाक्त। मिनु मीश मुरपुकीमी “मार, एको नाओमीन बाक्बा?” देंमा बाक्त। 20 मिनु नाओमीमी “आं कली नाओमी मदेनीन। मारा देनीन। मारदे हना नेल्ल क्येडा सक्ति पाइशशा परमप्रभु यावेमी आं कली मरिम्शो पाइशशा, श्येत जपाइक्ती। नाओमी देशो दारशो रुम्सीब, मारा चहिं कशो रुम्सीब। 21 गो मारेइ

मारेइमी गाप्शा लशो नड। मुल परमप्रभु यावेमी श्येतथ लेशशा चाक्ती। गे मारदे आं कली नाओमी देंनीनी? नेल्ल सक्ति पाइशो परमप्रभु यावेमी आं कली दोस गेशा, मरिम्शो पाइक्ती” देंमाक्त।

22 मोपा नाओमी नु आ चाइमी मोआबी रूथ मोआब रागी रे बेथलेहेम जाक्सा बाक्त। मेको बेथलेहेमम जाक्सानु, क्योव्रज मीशो बाक्माक्त।

2

रूथ सिला माल्दीशो

1 मिनु नाओमी आ वोंइश एलीमेलेक आ खिं डा शुश शोंप पाइशो नु ठेयब मुर का बाक्माक्त। मेको आ नें बोआज बाक्माक्त। 2 मिनु मोआबी रूथमी नाओमी कली “गो रूम लशा, सु सुम आं कली शिशी पाइनीमी, मेको आन नोनोले सिला बाला गुप्दी डा?” देंमाक्त। मिनु आ शिमीमी “दुम्ब, आं चाइमी लावो” देंमाक्त। 3 मिनु रूथ लशा, रिक्ब आन नोनोले सिला बाला गुबा बाक्त। आ जाक्दीशो रू चहिं एलीमेलेक आ खिं डा मुर बोआज आ रू बाक्माक्त। 4 मेना बोआज बेथलेहेम रे जाक्माक्त। मिनु मेकोमी रिक्ब आन कली “परमप्रभु यावे गेपुकी नु बाक्ल” देंमाक्त। मिनु रिक्बपुकीमी यो “परमप्रभु यावेमी इन कली आसीक गेवल” देंमा बाक्त। रूथ १:२ 5 मिनु बोआजमी आ गेय पाइब आन कली कोव्रब कली “एको मीश आल सुम?” दे हिल्लो पवा बाक्त। 6 मिनु मेको गेय पाइब आन कली कोव्रब मुरुमी “एको मोआब रागी रे नाओमी नु जाक्शो मोआबी मीश आल बाक्ब। 7 एकोमी आं कली ‘रिक्ब आन नोनोले मुठा आन नेक्था यो सिला गुप्चा गेयीनी’ दे पुंइतु। मिनु एको सुनी रे इच्छका ला नाइशशा, सिला गुप्स डा गुप्स बाक्त” देंमाक्त। 8 मिनु बोआजमी रूथ कली “नेनी, गे अरु आन रू सिला गुप्थ मलावो। आं गेय पाइब मीश मुर आन नेक्थान बाक्को। 9 मुरपुकीम ते ते रिक्नीमी, मेके मेके लावो। आं गेय पाइब वोंइश मुर आन कली ‘इ कली मथिचा’ दे माइक्तामी। तूतू दाक्ते हना, वोंइश मुर आन चाक्शो गर डा ब्वाक्कु तूडो” देंमाक्त। 10 मिनु रूथ मेको आ डोंइती बाप्शा, मेको कली “गो अर्को रागी डा मुर नड, दे तुइशशा यो मारदे आं कली इश डा शिशी पाइय्यीनी?” देंमाक्त। ब्यवस्था २३:४-६ 11 मिनु बोआजमी “इ वोंइश बेक्म नोले इ शिमी कली दोदेशो रिम्शो पवी, मेको नेल्ल मुरपुकीम आं कली माइक्तीमी। गे इ आम आफ, इ जरमेशो रागी प्रोंइशा, मतुइशो मुर आंइ बाक्तीके जाक्ते। रूथ १:१६, १७ 12 परमप्रभु यावेमी इ कली रिम्शो पवल। परमप्रभु यावे, इस्राएली आन परमप्रभुम इ कली वारच पवल, दे मेको आ नेक्था जाक्ते। मेकोमी इ माल्शो नेल्ल गेवल” देंमाक्त। भजन संग्रह ३६:८ 13 मिनु रूथमी “प्रभु, इन डोंइती शिशी ताता। गे आं थुं नाइक्पाइक्तीनी। गो इन गेय पाइब मबाक्ती हना यो, गे आं कली रिम्शो लोव्र पाइतीनी” देंमाक्त। 14 मिनु लाम्ज जची ना, बोआजमी मेको कली “एक पिवो। शोब्ले जावो। इ शोब्ले अडगुर शांबुम तेप्तो” देंमाक्त। मिनु रूथ रिक्ब मुर नु निस्से बाक्त। मिनु बोआजमी मेको कली कारशो क्योव्रज गेवा बाक्त। रूथमी रूथी सम्म जशा, हेंशा वोदा बाक्त। 15 मिनु मेको बोक्शा, सिला गुप्थ लमाक्त। बोआजमी आ गेय पाइब वोंइश मुर आन कली “मेको कली मुठा आन नेक्नेक्था यो सिला गुप्चा गेने, महुइक्तीन। 16 इच्छा बाला तोक्शा गेने। मिनु गुबानु, महुइक्तीन” दे माइक्मी बाक्त। लेवी १०:९-१० 17 मोपा रूथ नां रिक्चावा सम्म सिला गुम्ना गुम्न बाक्माक्त। मिनु तुबानु, एफाह का क्योव्रज दुम्माक्त। एफाह का २२ लिटर पुक्तीके खोदेशो बाक्ब।

18 मिनु मेको कुरशा, सहर जाक्माक्त। आ शिमीमी मिश डा क्योव्रज गुप्शा, चाक्शो तवा बाक्त। मिनु रूथमी आ हेंशो जचा थोव्रक यो गुंइशा, आ शिमी कली गेवा बाक्त। 19 मिनु आ शिमीमी “मुलाक्ती सिला गुप्थ ते लवे? इ कली शिशी पाइब मुर आसीक तवल” देंमाक्त। मिनु रूथमी ते सिला गुबा आ शिमी कली शेंदा बाक्त। “मुलाक्ती आं सिला गुप्शो रू डा होव्रप आ नें बोआज बाक्त” देंमाक्त। 20 मिनु नाओमीमी आ चाइमी कली “परमप्रभु यावेमी मेको कली आसीक गेवल। मिनु बेक्शो नु ब्रोंइशो मुर आन कली शिशी पचा मप्रोन। मेको मुर इस खाल डा बाक्ब” देंमाक्त। रूथ ४:४ 21 मिनु मोआबी रूथमी “मेकोमी आं कली ‘क्योव्रज नेल्ल ओंइने मथुमु सम्म आं मुरपुकी नु सिला गुप्थ जाक्को’ देंत” देंमाक्त। 22 मिनु नाओमीमी “आं चाइमी, मेको आ गेय पाइब मीश मुर नु गाक्चा रिम्शो बाक्ब। इ कली सुइमी अर्को आन रूमी श्येत मगेमेक्ल” देंमाक्त। 23 मोपतीके क्योव्रज नु चेरब रिक्ने मनुम्म सम्म, रूथ बोआज आ गेय पाइब मीश मुरपुकी नु सिला गुबा बाक्त। मिनु आ शिमी नु बाक्बाक्माक्त।

3

रूथमी नाओमी आ लोव्र टिशो

1 मिनू रूथ आ शिमी नाओमीमी “आं चाइमी, इ कली रिम्शो दुम्चा कली इ खिं पशा बाक्शो तचा दाक्नुड। 2 बोआज इं खाल डा मुर बाक्ब। गे मेको आ गेय पाइब मीश मुरपुकी नु बाक्ते। मुलाक्दो मेकोमी आ क्योव्रज तुप्तीकेम गेय पाइब। 3 मोपतीके गे चिक्शा, तेल खेक्शा, रिम्शो वा फेक्शा, क्योव्रज तुप्तीकेम लावो। बोआजम मजवा मतूडा सम्म मतपांडसो। 4 मिनू मेको इप्दीमेनु, आ इप्तीके कोव्रशा वोतो। मिनू नोले लशा, आ खोइल गे डा फेक्शो वा हुक्शा गोलो। मिनू गे मार पचा माल्नेवे, मेकोमी इ कली देंब” देंमाक्त। 5 मिनू रूथमी “इन देंशो, नेल्ल पाइनुड” देंमाक्त। 6 मिनू रूथ क्योव्रज तुप्तीके लशा, आ शिमी आ देशो खोदेशो पवा बाक्त।

7 बोआज जशा, तूशा ग्येरसे बाक्त। मिनू क्योव्रज पुक्तीके आ नोले इप्थ लमाक्त। मिनू रूथ बोआज आ मतुइक्चा डा पा जाक्शा, आ खोइली गे डा वा हुक्शा, गोलमाक्त। 8 मिनू नाक्दो उइक्थ दुम्मेनु, बोआज सेंसे बाक्त। मिनू आ खोइल गे मीश मुर का गोलशो तवा बाक्त। 9 मिनू बोआजमी “गे सु नवे?” दे हिल्लो पवा बाक्त। मिनू मेकोमी “गो इन वाइलीम रूथ नड। गे आंइ खाल डा मुर बाक्नीनी, इन वा फेक्तीनी” देंमाक्त। इजीकीएल १६:८ 10 मिनू बोआजमी “परमप्रभु यावेमी इ कली आसीक गेवल। डोंइती पशो क्येडा मुल डा इ पशो रिम्शो बाक्ब। गे क्येट थीब नु मथीब सुइ ठिटा वोंइश मुर आन नोले मखोदी। रूथ २:११ 11 गे महिंथु बाक्को। इ माल्शो गो नेल्ल पाइनुड। गे रिम्शो मीश मुर बाक्नेवे। सहर डा मुर नेल्लेमी तुइश्शो बाक्नीम। 12 गो थमा पा इ खाल डा मुर बाक्नुड। तन्न आं क्येडा यो आं नेक्था डा अर्को मुर का बाक्ब। 13 मुलाक्दो एके बाक्को। दीसा सुनी मेको मुरुमी इ नेक्था डा मुर आ पचा माल्शो गेय पाइब, मपाप्तु हना, परमप्रभु यावे ब्रांइशा बाक्शो खोदेशो पा, गो एको गेय पाइनुड। नां मसोव्रम सम्म इपो” देंमाक्त। 14 मिनू रूथ नां मसोव्रम सम्म इम्माक्त। मिनू रिम्शो पा नां मसोव्रथु बोक्माक्त। मिनू बोआजमी “क्योव्रज तुप्तीकेमी मीश मुर का बाक्त, दे सुइम मतुइक्तमेक्ल। 15 इ कुप्नी दाइक्तो” देंमाक्त। मिनू रूथमी दाइक्तानु, ६ सेआह क्योव्रज गेशा कुरपदा बाक्त। मिनू रूथ सहर लेम्माक्त। सेआह का ७ लिटर खोदेशो बाक्ब। मिनू ६ पुक्तीके ४२ लिटर कि १० पाथी खोदेशो बाक्ब। 16 मिनू आ शिमी आ बाक्तीके जाक्दीम्मेनु, आ शिमीमी “आं चाइमी, मार दुम्मे?” दे हिल्लो पवा बाक्त। 17 मिनू रूथमी बोआजमी पशो नेल्ल शेंशा “मेकोमी आं कली ‘इ शिमी आ बाक्तीके श्येत्थ मलेतो’ दे आं कली ६ सेआह क्योव्रज गेती” देंमाक्त। सेआह का ७ लिटर खोदेशो बाक्ब। 18 मिनू नाओमीमी “आं चाइमी, एको दोदेशो दुम्बा, मतुइक्ती सम्म इ थुं नाइश्शा बाक्को। मारदे हना मेकोमी मेको गेय मुलाक्तीन मथुमा सम्म आ थुं यो नाइक्चा मताइब” देंमाक्त।

4

बोआजम आ नेक्था डा मुर गुम्शो

1 मिनू बोआज सहर डा गारो डा ठेयब लाप्चोम लशा, मेकेर निश्शा बाक्माक्त। मिनू याम का नोले रूथ आ नेक्था डा मुर जाक्शो तशा, बोआजमी आ नें थिशा “एके पिशा, निस्सो” दे ब्रेत्ता बाक्त। मिनू मेको निस्से बाक्त। 2 मिनू बोआजमी १० जना सहर डा खाल्पा आन कली यो तेक्शा “निस्सीने” देंमाक्त। मिनू मेकोपुकी निस्समा बाक्त। 3 मिनू बोआजमी रूथ आ नेक्था डा मुर कली “मोआब रागी रे जाक्शो नाओमीमी इं लोकब एलीमेलेक आ रू लेयचा चिक्शो बाक्ब। 4 गो इ कली मो देंड, देंशो नड। एको सहर डा मुरपुकी नु खाल्पा आन डोंइती गे ग्याप्चा दाक्नेवे हना, ग्यापो। ग्याप्चा मदाक्नेवे हना, आं कली तुइक्पाइय्यी। मारदे हना इ नेक्था डा मुर गो नड” देंमाक्त। मिनू मेको मुरुमी “गो ग्याप्नुड” देंमाक्त। लेवी २५:२५; येरमीया ३२ 5 मिनू बोआजमी “नाओमी रे मेको रू ग्यबी नाक्ती, गे बेक्शो मुर आ मीश मोआबी रूथ यो ताइनेवे। मेको बेक्शो मुर आ नें आ थेरशो रू नु लील, दे मो दुम्चा माल्ब” देंमाक्त। ब्यवस्था २५:५-६ 6 मिनू रूथ आ नेक्था डा मुरुमी “गो ग्याप्ता हना, आं आंम थेरशो रू मरिम्शो दुम्ब। आं पचा माल्शो गेय गेन पावो। गो ग्याप्ने मचाप्नुड” देंमाक्त। 7 इस्राएल रागीमी डोंइती रू ग्याप्मेनु, लेयडमेनु, रू डा होव्रप फांडसीमानु, रू लेयबमी ग्याप्ब कली आ जुत्ता पुइश्शा गेचा माल्बाक्माक्त। इस्राएलमी लोव्र फाइक्चा मततीके आ पर्बम मोदेशो पचा माल्बाक्माक्त। ब्यवस्था २५:७-१० 8 मिनू रूथ आ नेक्था डा मुरुमी बोआज कली “गे ग्याम्सो” दे आ जुत्ता पुइश्शा गेवा बाक्त। 9 मिनू बोआजमी खाल्पापुकी नु मेकेर बाक्ब मुर आन कली “गो एलीमेलेक, माहलोन नु किल्योन आन थेरशो रू नेल्ले नाओमी रे ग्याप्ता। गे मुलाक्ती सांकछी दुम्तीनी। 10 माहलोन आ मीश, मोआबी रूथ यो बेक्शो मुर आ नें, आ थेरशो रू नु लील, दे चाक्ता। मोपा आ लोकब आन दातेमी नु आ जरमेशो बाक्तीकेम आ नें लील, दे मो पाता। गेपुकी मुलाक्ती सांकछी दुम्तीनी” देंमाक्त। 11 मिनू ठेयब लाप्चोम बाक्ब नु खाल्पा नेल्लेमी “गो सांकछी दुम्तक। परमप्रभु यावेम एको इ खिंम जाक्शो मीश मुर कली राहेल नु लेआ खोदेशो सेलल। मेको निक्शीमी इस्राएल

आ खिं सेल्शो बाक्ताक्से। बेथलेहेम एफ्राथाहम इ नें ठेयब दुम्ल। 12 तामारम यहूदा रे थिशो पेरेस आ खिं खोदेशो पा, परमप्रभु यावेमी एको ठिटी मीश मुर रे थिशो आलम इ खिं सेलल” देंमा बाक्त। उत्पत्ती ३८:२९

बोआजम रूथ कली ग्युंवे पशो

13 मिनु बोआजमी रूथ चाक्शा, मेको नु बाक्माक्त। मिनु परमप्रभु यावे आ आसीकमी रूथ कोव्रज कुरशा, तौ का थिमाक्त। 14 मिनु मीश मुरपुकीमी नाओमी कली “परमप्रभु यावे ठेयब बाक्ब। मेकोमी इ कली मुल इ खाल डा मुर नु वोइक्ते। परमप्रभुम इ कली चच का गेते। एको आ नें इस्राएलम ठेयब दुम्ल। 15 एकोमी इ कली मुल नक ब्रोंइतीक गेशा, खाल्पी दुमेनु, इ कली थुल्ब। मारदे हना ७ जना तौ आन क्येडा इ कली दाक्ब चाइमीमी रिम्शो पशो बाक्ब” देंमा बाक्त। 16 मिनु नाओमीमी मेको आल ताक्शा, आ थुकुम वोइश्शा, मेको कली कोव्रब दुम्माक्त। 17 मिनु आ नेक्था डा मीश मुरपुकीमी “नाओमी के चच का दुम्त। गो मेको आ नें ओबेद वोइय्य” देंमुमा बाक्त। मेकोन येस्से आ आफ, दाऊद आ बाजे बाक्माक्त। मत्ती १:५-६; लूका २:३२

दाऊद आ किकी पिपी

18 पेरेसम हेस्रोन थिमाक्त। 19 हेस्रोनम राम थिमाक्त। राममी अम्मीनादाब थिमाक्त। १इतिहास २:९-१५ 20 अम्मीनादाबमी नहशोन थिमाक्त। नहशोनमी साल्मोन थिमाक्त। गन्ती १:७ 21 साल्मोनमी बोआज थिमाक्त। बोआजमी ओबेद थिमाक्त। 22 ओबेदमी येस्से थिमाक्त। येस्सेमी दाऊद थिमाक्त। १सामुएल १६:१, ११-१३

१ सामुएल

ब्रेक्ब मुर: नेल्ल क्येडा डोंइती एको सामुएल किताब निक्शी, राजा किताब निक्शी नु इतिहास के किताब निक्शी नेल्ल ठेयब किताब का बाक्शो बाक्त। नोले ला सेप्तुआगीन्त माइशशोमी एको किताब कली ६ ओटा किताब सेल्शो बाक्त। सामुएल नु राजा आन पालाम इतिहास ब्रेक्ब मुर बाक्शो बाक्तेक्म। मेना सामुएल आ ब्रेक्शो तामेनु, परमप्रभु यावे आ लोव्र पाइब नाथान, गाद, येरमीया कि एज्राम एको किताब ब्रेक्शो दुम्ने चाप्ब। १इतिहास २९:२९ पिप दाऊद आ पशो मार मार बाक्मे, मेको डोंइती रे नोले सम्म नेल्ल परमप्रभु यावे आ लोव्र पाइब सामुएल, नाथान नु गाद आन ब्रेक्शो किताबम ब्रेक्शो बाक्ब।

गेना ब्रेक्शो: सामुएल किताब निक्शी ९७५ बि. सी. नेबुकदनेसरम यरूसलेम खतम सेला नोले डा लोव्र तेम्शा ब्रेक्शो बाक्ब, दे तुंडसीब।

मारदे ब्रेक्शो: परमप्रभु यावेमी आ देंशो पाइब। चढ़ेब एली, पिप सावल नु इस्राएल डा मुरपुकीम परमप्रभु यावे आ लोव्र मटिशो बाक्तेक्म। परमप्रभुमी चढ़ेब एली आ पा डा सामुएल चढ़ेब नु पिप सावल आ पा डा दाऊद कली पिप सेला बाक्त। परमप्रभु यावेमी आ देंशो गेनायो मप्रोंडब।

डोंइती डा लोव्र

1 रामाथाइम-सोफीम रे जाक्शो मुर का बाक्माक्त। मेको एफ्राइम डा पहाड डा सुफ आ खिं डा बाक्माक्त। मेको आ नें एल्काना बाक्माक्त। एल्काना येरोहाम आ तौ, एलीहु आ चच बाक्माक्त। मेको आ शेर बाजे तोहु नु आ किकी बाजे जूफ माइशशो एफ्राइम थर डा बाक्माक्त। १इतिहास ६:१; १इतिहास १२:१९-२० 2 एल्काना के मीश निक्शी बाक्सा बाक्त। का आ नें हान्नाह नु अर्को आ नें पेनीनाह बाक्माक्त। पेनीनाह के आल बाक्मा बाक्त, तन्न हान्नाह के आल मबाक्माक्त। उत्पत्ती २९:३१ 3 एल्काना बर्स बर्सम आ सहर रे शिलो लाइबाक्माक्त। मेकेर मुर नेल्ल आन परमप्रभु यावे कली ठेयब सेल्शा, चढ़ेतीक चढ़ेचा कली लाइबाक्माक्त। मिनु मेकेर चढ़ेब एली आ तौ निक्शी होफनी नु फिनेहास बाक्सा बाक्त। मेको परमप्रभु यावे कली चढ़ेब बाक्सा बाक्त। यहोसु १८:१ 4 मिनु एल्कानाम चढ़ेशो नाक्ती आ मीश पेनीनाह आ तमी तौ नेल्ल आन कली चढ़ेशो थोव्रक गेबाक्माक्त। 5 मिनु हान्नाह कली निक्शी भाग खोइ गेबाक्माक्त। मारदे हना एल्कानाम हान्नाह कली शुश दाक्बाक्माक्त। तन्न परमप्रभु यावेमी हान्नाह कली आल मथीब सेल्शो बाक्माक्त। 6 हान्नाह के आल मबाक्तीके आ सौतामी मेको कली आ थुं शुश खाइक्पाइशशा, तोक्शा लोव्र पाइक्बाक्माक्त। मारदे हना परमप्रभु यावेमी हान्नाह कली आल मथीब सेल्शो बाक्माक्त। 7 मोपा एल्कानामी बर्स बर्सम परमप्रभु यावे कली चढ़ेथ लमेनु, आ सौतामी हान्नाह कली श्येत गेस डा गेस पतीके हान्नाह डाक्शा, मारेइ मजवा मब्बवा बाक्त। 8 मिनु आ वोंइश एल्कानामी मेको कली “हान्नाह, गे मारदे डाक्स डा डाक्स बाक्डे? मारदे मजवी मब्बवी? गे मारदे इ थुं खाइक्पाइक्नेवे? मार, गो इ कली १० जना तौ आन क्येडा यो शुश दाक्ब मनडा डा?” देंमाक्त।

हान्नाह आ प्रार्थना

9 मिनु काले शिलोमी जने तूने थुम्मे नोले हान्नाह बोक्माक्त। मिनु परमप्रभु यावे आ डोंइती लशा राम्माक्त। मेना चढ़ेब एली परमप्रभु यावे आ ताम्बु आ ओव्रतीक नेक्था आ नित्तीकेम निशशो बाक्माक्त। 10 मिनु हान्नाह आ थुं शुश खाइशशा, डाक्शा, परमप्रभु यावे कली पुना बाक्त। 11 मिनु मेकोमी कबल पा “मुर नेल्ल आन परमप्रभु यावे, गे इन वाइलीम, आं श्येत तशा, आं कली मिम्शा, मप्रेंताक्नी हना, आं कली तौ का गोयीनी। गो मेको कली मबेक्म सम्म परमप्रभु यावे, इन कली जिम्मा गेनुड। मेको आ चां गेनायो मप्रेक्सीब मेकोम गेनायो अडगुर शांबु मतूब” दे कबल पवा बाक्त। आमोस २:११; न्यायाधीस १३:५ 12 मिनु मेकोमी परमप्रभु यावे आ डोंइती पुंडस डा पुंडस बाक्मेनु, एलीम मेको आ शोव्र हिक्शो कोव्रशा बाक्माक्त। 13 हान्नाहमी आ थुंम ला पुंडशो बाक्माक्त। मिनु आ शोव्र हिक्साक्व हना यो, आ सेंदा मग्रूमाक्त। मिनु एलीम मेको कली दुक्शो मीश मुर का बाक्त, दे मिम्ता बाक्त। 14 मिनु एलीमी मेको कली “गे गेना सम्म मोपा दुक्शा बाक्नेवे? अडगुर शांबु तूचा प्रोनो” दे मदा बाक्त। 15 मिनु हान्नाहमी “आं प्रभु, गो थुं खाइशशा मीश मुर का बाक्नुड। गो मारेइ अडगुर शांबु मतूडु। गो परमप्रभु यावे आ डोंइती आं थुं डा श्येत नेल्ल शोव्रता। 16 आं कली मरिम्शो मीश मुर मसुइय्यीनी। आं थुं खाइक्तीके नु शुश श्येत जतीके गो मुल सम्म पुंडस

डा पुंइसन बाक्ती” देंमाक्त। 17 मिनु एलीम “इ थुं नाइशशा लावो। इस्राएली आन परमप्रभुम इ पुंइशो लोत्र गेवल” देंमाक्त।

18 मिनु हान्नाहमी “गो इन शिशी ताइब दुम्डल” देंमाक्त। मिनु नोले मेको लशा, आ वोंइश नु जवा तूडा बाक्त। मिनु नोले लेंशा आ थुं मखाइक्माक्त।

सामुएल जरमेशो

19 मिनु मेकोपुकी आ दीसा सुनी कना बोक्शा, परमप्रभु यावे कली ठेयब सेल्शा, आन खिं रामाह लेम्मा बाक्त। मिनु एल्काना आ मीश हान्नाह नु इम्माक्त। मिनु परमप्रभु यावेमी हान्नाह कली मिम्ता बाक्त। उत्पत्ती ३०:२२ 20 मिनु नोले हान्नाहम कोत्रज कुरशा, तौ का थिमाक्त। मेकोमी आ नें सामुएल वोदा बाक्त। मारदे हना मेकोम “गो मेको परमप्रभु यावे नु पुंइशो नड” देंमाक्त।

हान्नाहमी आ कबल खाप्शो

21 परमप्रभु यावे कली बर्स बर्स डा चढेतीक चढेशा, आंम कबल खाप्चा कली एल्काना आ खिं डा मुर नु इर शिलो लमाक्त। 22 तन्न हान्नाह चहिं मेकोपुकी नु मलमाक्त। मेकोमी आ वोंइश कली “आलम दूध प्रोना नोले गो एको कली परमप्रभु यावे आ बाक्तीक चोत्रदीनुड। मिनु एको गेना हना यो परमप्रभु यावे आ डोंइती मेक उइ बाक्ब” देंमाक्त। 23 मिनु मेको आ वोंइश एल्कानामी “गो मार दाक्ती, मेकोन पावो। मेकोम दूध मप्रोना सम्म खिं उइ बाक्को। परमप्रभु यावेम आ पशो लोत्र कबल” देंमाक्त। मिनु हान्नाह आलम दूध मप्रोना सम्म खिं उइ बाक्शा, थुल्शा, मेको कली कोल्पदा बाक्त। 24 मिनु दूध प्रोना नोले मेको आल लाइशशा, शिलो लमाक्त। मिनु मेकोमी आ नु बर्स सां डा ब्यफ का, एफाह का फस नु गर का अडगुर शांबु यो इर परमप्रभु यावे आ ताम्बुम लदा बाक्त। मेना मेको आल आइक्चन बाक्माक्त। एफाह का २२ लिटर बाक्ब। मेको ५ पाथी खोदेशो बाक्ब। गन्ती १५:३,८-११ 25 मिनु मेकोपुकीम मेको ब्यफ साइशशा, चढेमे बाक्त। मिनु मेको आल कली एली आ बाक्तीक चाक्दीत्मे बाक्त। 26 मिनु हान्नाहमी मेको कली “आं प्रभु, गे ब्रोंइशा बाक्शो खोदेशो पा, गो थमा लोत्र पाइनुड। गो परमप्रभु यावे कली पुंइशा, इन डोंइती राप्शा, बाक्ब मीश मुर नड। 27 गो एको वोंइश आल आ पर्वम पुंइशो नड। मिनु परमप्रभु यावेमी आं पुंइशो गेती। 28 मोपतीके गो एको कली परमप्रभु यावे कली जिम्मा गेनुड। एको ब्रोंइशा बाक्म सम्म परमप्रभु यावे कली जिम्मा गेंसीशो बाक्ब” देंमाक्त। मिनु मेकोपुकी यो परमप्रभु यावे आ डोंइती बाप्शा, मेको कली ठेयब सेल्मे बाक्त। १सामुएल १:११

2

हान्नाहम आ प्रार्थना

1 हान्नाहमी “आं थुं परमप्रभु यावे नु ग्येरसीब। गो परमप्रभु यावे आ पर्वम आं पिया पोक्नुड। गो आं जोरी सत्रु आन कली ग्राती। गेम आं कली प्रोंइतीके गो ग्येरसाक्यी। लूका १:४६-५५

2 परमप्रभु यावे खोदेशो अरु सुइ मबाक्नीम। इन क्येडा लाक्शो अर्को सुइ मबाक्नीम। आंइ परमप्रभु, सेरथे फुल्लु खोदेशो अरु सुइ मबाक्नीम। ब्यवस्था ४:३५; उत्पत्ती ४९:२४; ब्यवस्था ३२:१८; भजन संग्रह १८:२२ 3 ठेयब लेशशो लोत्र नु मरिम्शो लोत्र पचा प्रोनीन। मारदे हना परमप्रभु यावे नेल्ल जोक्ब तुइक्ब बाक्ब। मेकोमी मुर आन पतीके नु लोत्र नेल्ले नाक्ब। 4 सक्ति पाइशशो मुर आन लिब्रा जिक्शो बाक्ब। तन्न सक्ति मपाइशशो बोल्यो दुम्शो बाक्नीम। 5 डोंइती मारेइ मारेइम गाप्शो मुर यो मुल जचा आ पर्वम गेय पाइनीम। तन्न शोत्रलु बेक्शोपुकी रूशो बाक्नीम। आल मथीब मीश मुरुमी ७ जना आल थिप्तु। तन्न शुश आल थीब ममा आ थुं बेक्ब। 6 परमप्रभु यावे बेक्पाइक्ब नु सेंपाइक्ब बाक्ब। मेकोमी मुर आन कली बेक्शो मुर आन बाक्तीके सोइक्ब। मिनु मेकोमी सेंपाइक्ने यो चाप्ब। ब्यवस्था ३२:३९; भजन संग्रह ७१:२० 7 परमप्रभु यावे प्रुडग नु शोंप पाइशशो सेल्ब बाक्ब। मेकोमी आइक्च नु ठेयब यो सेल्ब। भजन संग्रह ७५:८ 8 मेकोमी मारेइ मथीब आन कली फुरक रे पोक्ब। प्रुडग आन कली घुरेन रे पोक्ब। मिनु मेको आन कली पिप आन तौ नु निप्पाइक्ब। मेको ठेयब मुर आन दातेम बाक्चा नु मान पाइक्तीक ताइनीम। मारदे हना रागी आ थाम परमप्रभु यावे केन बाक्नीम। मेकोम मेको तार रागी वोइक्तु। भजन संग्रह ११३:७-८ 9 मेकोमी थमा सुइक्चा पुंइसीब मुर आन कली कोत्रब। तन्न आ अरेशो लोत्र मटीब आन कली छिडछिडमी खतम पोक्पाइक्ब। मारदे हना मुरपुकीम आन सक्तिमी मग्रानीम। भजन संग्रह ३३:१६ 10 परमप्रभु यावे आ पर्वम जोरी सत्रु साइक्चा

पुंडसीनीम। नेल्ल क्येडा ठेयबमी मेको आन पर्बम सरीड रे बुंबु पपाइक्ब। मिनु परमप्रभु यावेमी रागी नेल्ल आन कली निसाफ पाइब। मेकोम आ पिप कली सक्ति गेब। मिनु आ तेल लुकशो आ पिया पोक्ब” देंमाक्त।

11 मिनु नोले एल्काना आ खिं डा मुरपुकी नु रामाह लेम्माक्त। मेको वोंइश आल चहिं परमप्रभु यावे कली चढ़ेब एली आ डोंइती बाक्शा, परमप्रभु यावे आ गेय पवा बाक्त।

एली आ तौ निक्शीम मरिम्शो पशो

12 एली आ तौ निम्फा हिंचा डा मरिम्शो पाइब बाक्सा बाक्त। मेको निक्शी परमप्रभु यावे कली मान पा महिंब बाक्सा बाक्त। 13 मेको चढ़ेब निक्शीमी चढ़ेथ जाक्ब मुर आन कली मार पाइक्बाक्ताक्स देशा हना, मुर आन चाक्शो चढ़ेशो श्ये क्येशा बुइक्तानु, मेको आस गेय पाइब कली ठेयब तूतीक सां पाइशो काटा कुरपाइशशा, लेवी ३:२-५; लेवी ७:११-१७, २८-३४ 14 कराइ, ताप्के, दिउरे कि ठेयब बोसुम लोप्शो श्ये तूपाइशशा, दोशो गूमे मोशो आंम के सेल्बाक्सा बाक्त। मोपा शिलोम चढ़ेथ जाक्शो इस्राएली नेल्ल आन कली मो पाइक्बाक्सा बाक्त। 15 मेको निक्शीमी नेल्ल क्येडा मरिम्शो मार पाइक्बाक्सा बाक्त देशा हना, मेको बोंसो चोशा चढ़ेचा क्येडा डोंइती आस गेय पाइबपुकी सोइशशा “चढ़ेब कली वाल्चा कली श्ये गेवो। लोप्शो श्ये मताक्ब। क्येख ला ताक्ब” देंपाइक्बाक्सा बाक्त। 16 मिनु मेको मुरुमी “ममाइ, डोंइती बोंसो चोचा गेयी। मिनु नोले इ दाक्शो लाइक्ने चाप्नेवे” देंमेनु, मेको आस गेय पाइबमी “ममाइ, मुलन गेयी। मगेप्तीवी हना, गो रोइशशा लाइक्नुड” देंबाक्माक्त। 17 मिनु मेको ठिटा आस मरिम्शो पशो परमप्रभु यावे आ डोंइती ठेयब पाप दुम्माक्त। मारदे हना मुरपुकीमी परमप्रभु यावे कली चढ़ेशो आइक्च मिन्तसे बाक्त।

सामुएल नु आ आम आफ

18 मिनु सामुएल परमप्रभु यावे आ डोंइती गेय पाइक्बाक्माक्त। मेको वोंइश आल सुती वा के कुचु तार चढ़ेब आ फेक्तीके फेक्शा, गेय पाइक्बाक्माक्त। १सामुएल २२:१८; प्रस्थान २८:४-६हिब्रू लोवमी एफोद देशो कुचु आ फेक्तीक बाक्त। 19 मिनु आ ममाम मेको कली बर्स बर्सम आइक्च फेक्तीक वा फेरबाक्माक्त। मिनु आ वोंइश नु बर्स बर्स डा क्योरशा चढ़ेदीमेनु, मेको वा लाइशशा गेबाक्माक्त। 20 मिनु एलीमी एल्काना नु आ मीश आस कली आसीक गेशा “एको आल आ पा डा परमप्रभु यावेमी एको मीश रे इन कली आलपुकी गेवल। मारदे हना एको परमप्रभु यावे कली गेप्तीवी” देंबाक्माक्त। मिनु नोले मेको आन खिं लेप्बाक्मा बाक्त। 21 मिनु परमप्रभु यावेमी हान्नाह कली आसीक गेवानु, मेको आल थीब दुम्शा, तौ सां नु तमी निक्शी थिमाक्त। मिनु सामुएल चहिं परमप्रभु यावे आ डोंइती कोल्ना कोल्न लमाक्त। लूका १:८०

एली आ तौ निक्शीम मटिशो

22 मिनु एली थम खूशो दुम्माक्त। आ तौ निक्शीमी इस्राएली आन कली दोदेशो पाम्से, मेको नेल्ल नेना बाक्त। मेकोमी आ तौ गुम्तीक ताम्बु आ डोंइती गेय पाइब मीश मुरपुकी नु इप्शो, यो नेना बाक्त। प्रस्थान ३८:८ 23 मोपतीके मेकोमी मेको आस कली “गे निक्शीमी मारदे ओदेशो गेय पसी? गेमी ओदेशो मरिम्शो गेय पाइतीसी देशो लोव गो मुर नेल्ल आन शोव रे नेंता। 24 आं तौ निक्शी ओदेशो गेय पचा प्रोनीस। मारदे हना, परमप्रभु यावे आ मुर आन दातेमी एको लोव ब्रशो नेंता। एको थम मरिम्शो बाक्ब। गे परमप्रभु यावे आ मुर आन कली पाप पपाइक्नीसी। 25 मुरुमी मुर आन कली पाप पाप्तु हना, परमप्रभुम निसाफ पाइब। तन्न मुरुमी परमप्रभु यावे कली पाप पाप्तु हना, सुम गारपाइक्ने चाप्बा डा” देंमाक्त। मेको लोव नेल्ल नेंताक्स हना यो, मेको निक्शीमी आस आफ आ लोव मटिम्से बाक्त। मारदे हना परमप्रभु यावेम मेको निक्शी आस कली साइक्चा माल्शो बाक्माक्त। अय्युब १६:२०-२१

परमप्रभुम एली आ पर्बम लोव पशो

26 मिनु सामुएल कोल्ना कोल्न लमेनु, परमप्रभु यावे नु मुर आन डोंइती दाक्शो दुम्माक्त। लूका २:५२ 27 मिनु परमप्रभु आ लोव पाइब का जाक्शा, एली कली “परमप्रभु यावेमी इन कली लोव का पाइब। मेको मार बाक्ब देशा हना, गो इन आफ नु आ खिं डा मुर इजीप्त फाराओ आ रागीमी बाक्मानु, गो मतपांडसीडा डा? 28 गो इस्राएल डा थर नेल्ल रे मेको कली आं कली चढ़ेब दुम्पाइक्चा कली योवता। आं कली चढ़ेतीकेम चढ़ेचा, आं कली धूप चोचा, नु आं डोंइती निसाफ पतीक ऊरीम नु थुम्मीम बाक्शो झोला फेक्चा कली योवता। इस्राएल डा मीम चढ़ेशो नेल्ल इ आफ आ खिं डा मुर आन कली गेता। ब्यवस्था १८:१; गन्ती १८:८-२० 29 मारदे गे आं देशो चढ़ेशो नु जचा थोवक चढ़ेशो नेल्ल आइक्च मिन्ती? मिनु आं क्येडा गे इ तौ आस कली ठेयब सेल्नेवे। आं मुर, इस्राएली आन चढ़ेशो रे

गे नेल्ल क्येडा रिम्शो मारदे आंम कली वोंइसीशा, इ तौ आस कली ठेयब सेल्लेवे?” देंमाक्त। 30 मोपतीके परमप्रभु यावे, इस्राएली आन परमप्रभुमी “इ किकी पिपी आन खिं डा मुर नेल्ल गेना हना यो आं डोंइती चढेब दुम्नीम, गो कसम जशो नड” देंशो बाक्त। तन्न परमप्रभु यावेमी “मुल ओदेंशो मदुम्ब। मारदे हना आं कली ठेयब सेल्ल आन कली गो ठेयब सेल्लुड। आं कली आइक्च सेल्ल नेल्ल आइक्च सेल्ला पुंइसीनीम। प्रस्थान २८:१; मलाकी ३:१६-१८ 31 मुल गे नु इ किकी पिपी आन खिं डा मुर आन सक्ति नेल्ल साम्नुड। इ खिं डा मुर सुइ खूशो दुम्चा मताइनीम। १राजा २:२७ 32 गे आं मुर इस्राएली आन कली गेशो रिम्शो थोव्रक तशा गेहे पाइनीनी। मिनु इ खिंमी सुइ खूशो सम्म मलीनीम। 33 तन्न गो इ तौ चच युइ आन दाते डा आं कली चढेतीकेम गेय पाइब, का कली मसाइक्नुड। मेको शुश डाक्शा, आ थुं लुक्च लाइक्ब। मारदे हना मेकोमी आ वोंइश मुर नेल्ल बेक्ची मजाक्थु बेक्शो ताइब। 34 मिनु इ तौ निक्शी होफनी नु फिनेहास काबुमीन बेक्नीस। मेको आं देशो लोव्र थमा बाक्ब, देशो चिन्ड का बाक्ब। १सामुएल ४:११ 35 गो आं कली थमा सुइक्ब चढेब का पोक्नुड। मेकोम आं कली टिशा, आं थुंम मिम्शो पाइब। गो मेको कली गेना हना यो लीब खिं का सेल्लुड। मिनु मेकोमी आं तेल लुक्शो आ डोंइती गेना हना यो गेय पाइब। १राजा २:३५; हिब्रू ५:४-६ 36 मिनु इ खिं डा ब्रोंइशा लीशोपुकी मेको आ डोंइती बाप्शा ‘टुक्रा का चांदी, शोब्ले का तचा कली, आं कली चढेतीक गेय गेयीनी। मिनु गो नु जचा थोव्रक बाक्ल’ देंनीम” दे परमप्रभु यावेमी देंत।

3

परमप्रभुम सामुएल कली ब्रेशो

1 मिनु सामुएल एली आ देशो टिशा, परमप्रभु यावे आ गेय पना पन बाक्माक्त। मेना परमप्रभु यावे आ लोव्र शुश मनेसीबाक्माक्त। मिनु ततीक यो शुश मतांइसीबाक्माक्त। आमोस ८:११ 2 मिनु काबु नाक्दो एली आ इप्तीकेमी गोल्शा बाक्माक्त। आ मिक्च ब्राब्रा दुम्शा, रिम्शो पा तने मचाप्ब दुम्शो बाक्माक्त। 3 मिनु सामुएल परमप्रभु यावे आ ताम्बु डा कबल पशो सन्दोस आ नेक्था इप्शो बाक्माक्त। मेना परमप्रभु आ बत्ती मकाप्शो बाक्माक्त। गन्ती ७:८९ 4 मिनु परमप्रभु यावेमी “सामुएल, सामुएल” दे ब्रेत्ता बाक्त। मिनु सामुएलम “गो एक बाक्ती” देंमाक्त। 5 मिनु एली आ बाक्तीकेम दोरशा लशा “गे आं कली ब्रेत्ताक्यीनी। गो एक बाक्ती” देंमाक्त। मिनु एलीमी “गो इ कली मब्रेत्तन, लावो। इपो” दे मदा बाक्त। मिनु मेको लशा इम्माक्त। 6 मिनु परमप्रभु यावेम लेंशा “सामुएल” दे ब्रेम्माक्त। मिनु मेको बोक्शा एली आ बाक्तीक लमाक्त। मिनु मेकोमी “गो एक बाक्ती। गे आं कली ब्रेत्ताक्यीनी” देंमाक्त। मिनु एलीमी “आं तौ, गो इ कली मब्रेत्तन। लावो। इपो” दे मदा बाक्त। 7 मेना सम्म सामुएलम परमप्रभु यावे कली मतुइश्शो बाक्माक्त। परमप्रभु यावे आ लोव्र मेको कली मतुइक्पाइश्शो बाक्माक्त। 8 मिनु परमप्रभु यावेमी मेको कली सां खेयप ब्रेम्माक्त। मिनु मेको लेंशा एली आ बाक्तीक लशा “गो एक बाक्ती। गे आं कली ब्रेत्ताक्यीनी” देंमाक्त। मेना एलीमी “परमप्रभु यावेम एको आल कली ब्रेत्ता बाक्त” दे तुइक्ता बाक्त। 9 मिनु मेकोमी सामुएल कली “लशा, गोल्शा, बाक्को। मेकोम लेंशा ब्रेत्ताक्व हना ‘परमप्रभु यावे, लोव्र पने। इन गेय पाइबम नेंशो बाक्नुड’ देनो” दे मदा बाक्त। मिनु सामुएल लशा, आ इप्तीकेम गोल्शा, बाक्माक्त।

10 मिनु परमप्रभु यावे मेकेर जाक्शा, राप्शा, डोंइती डा खोदेंशो पा “सामुएल, सामुएल” दे ब्रेम्माक्त। मिनु सामुएलमी “देनीन, इन गेय पाइबम नेंशो बाक्नुड” देंमाक्त। 11 मिनु परमप्रभु यावेम सामुएल कली “गो इस्राएलमी रीब पा गेय का पाइनुड। मेको आ पब्रम नेंबपुकी शुश हिंनीम। 12 मेको नाक्ती गो एली नु आ खिं डा मुर आन कली आं देशो नेल्ल पाइनुड। 13 मारदे हना गो मेको कली ‘गो इ खिं डा मुर आन कली गेना हना यो सजाइ गेनुड। मारदे हना एलीमी आ तौ निक्शीमी मरिम्शो पशो तुइश्शा यो, मेको आस कली मतेक्ग। १सामुएल २:२७-३६ 14 मोपतीके गो एली आ खिं डा मुर आन पब्रम कसम जशा, एली आ खिं डा मुर आन मरिम्शो पशो मक्याम्सीब। मेको मारेइ मारेइ चढेशोमी मक्याम्सीब’ देंशो बाक्नुड” देंमाक्त।

15 मिनु सामुएल नां सोव्रम सम्म इम्माक्त। मिनु बोक्शा परमप्रभु यावे आ खिं डा लाप्चो रोकगा बाक्त। मिनु मेकोम परमप्रभु यावे आ देशो नु कोइशो लोव्र एली कली शेंचा हिंमाक्त। 16 मिनु एलीम सामुएल कली ब्रेशा “ए आं तौ, सामुएल” देंमाक्त। मिनु मेकोमी “गो एक बाक्ती” देंमाक्त। 17 मिनु एलीमी “मेकोमी इ कली मार देंमे? आं कली मेको नेल्ल मखुइक्थु, देनो। मेकोम इ कली देशो लोव्र का सम्म यो खुइक्ताक्वी हना, परमप्रभुम इ कली थम ठेयब सजाइ गोवल” देंमाक्त। 18 मिनु सामुएलम परमप्रभु यावे आ देशो लोव्र नेल्ल शेंदा बाक्त। तेकोइ लोव्र मखुइक्ता बाक्त। मिनु एलीमी “मेको परमप्रभु यावे बाक्ब। मेकोम आ दाक्शो पवल” देंमाक्त। २सामुएल १५:२६

19 मिनु सामुएल कोलना कोलन लमाक्त। परमप्रभु यावे मेको नु बाक्माक्त। मिनु मेकोम आ लोत्र नेल्ल खबा बाक्त। 20 मिनु दान रे बेयर-शेबा सम्म डा इस्राएली नेल्लेमी सामुएल परमप्रभु यावे आ लोत्र पाइब दुम्माक्त, दे तुइक्तमे बाक्त। 21 मिनु परमप्रभु यावेमी शिलोम आंम कली तुइक्पांडसीन सीन बाक्माक्त। मारदे हना परमप्रभु यावेमी सामुएल कली आ लोत्र नेंपदा बाक्त।

4

पलिस्तीपुकीमी लडाइ पशो

1 मिनु सामुएल आ लोत्र नेल्ल इस्राएलम ब्रमाक्त। मेना पलिस्ती इस्राएली नु लडाइ पचा कली लशो बाक्मा बाक्त। इस्राएलीपुकीम एबेन-एजेरमी आन बाक्तीक सेल्मे बाक्त। मिनु पलिस्तीपुकीम अफेकमी आन बाक्तीक सेल्मे बाक्त। यहोसु १५:५३ 2 मिनु पलिस्तीपुकी इस्राएली आन डोंइती लडाइ पचा कली गारशा, बाक्मा बाक्त। मिनु लडाइ ठेयब दुम्शा, इस्राएलीपुकी ब्रुमा बाक्त। पलिस्तीपुकीम मेकेर ४ हजार खोइ इस्राएली सदमे बाक्त। 3 मिनु लडाइ पाइब आन बाक्तीके लेशशा जाक्मानु, इस्राएली आन खाल्पापुकीमी “मुलाक्ती मारदे परमप्रभु यावेमी आंइ कली पलिस्ती नु ब्रुपदा? गो शिलो रे परमप्रभु यावे आ कबल पशो सन्दोस एक चाक्य। मो पाइतय हना परमप्रभु यावे गोपुकी नु बाक्शा, इं जोरी सत्रु रे प्रॉइब” देमा बाक्त। प्रस्थान २५:१०; यहोसु ३:६,११ 4 मोपतीके मुरपुकीमी शिलोम मुर सोइक्तमे बाक्त। मिनु करूब आस दातेम बाक्ब मुर नेल्ल आन परमप्रभु यावे आ कबल पशो सन्दोस चाक्गमे बाक्त। मिनु एली आ तौ होफनी नु फिनेहास परमप्रभु आ कबल पशो सन्दोस नु बाक्सा बाक्त। प्रस्थान २५:२२; २सामुएल ६:२ 5 मिनु परमप्रभु यावे आ कबल पशो सन्दोस लडाइ पाइब आन बाक्तीकेम चाक्गमेनु, इस्राएली नेल्ल ठेयब सेंदा पा ग्येरशा रेयके पामे बाक्त। मिनु मेको आन रेयके पशो सेंदामी रागी नेल्ल मुरदा बाक्त। 6 मिनु पलिस्तीपुकीम मेको ग्येरशो सेंदा नेंशा “हिब्रू आन बाक्तीकेम मार दुम्मे? मार रेयके नेंसे?” दे हिल्लो पमुमा बाक्त। मिनु परमप्रभु यावे आ कबल पशो सन्दोस आन बाक्तीकेमी चाक्तेक्म, दे तुइक्तमे बाक्त। 7 मिनु पलिस्तीपुकी हिंशा “परमप्रभु मेको आन बाक्तीकेम जाक्त। 8 आबी, मुल गो बेक्नय। मो देंशो डोंइती गेनायो मदुम्शो बाक्त” देमा बाक्त। “आबी, सुम आंइ कली मेको शुश सक्ति पाइशो परमप्रभु रे प्रॉइबा? मेकोम इजीप्ती आन कली श्येत गेशा गोरशो रागीम बेक्तीक रोइ पपाइशो साइशो बाक्त। 9 गे पलिस्तीपुकी महिनीन। बोल्यो दुमीन। मेकोपुकी दोपा इं वाइल दुम्मा, मोपा गोपुकी यो हिब्रू आन वाइल मदुम्चा डा पा, इन थुं लुकच मलपाइक्थु, लडाइ पने। बोल्यो दुम्शा, लडाइ पने” देमा बाक्त। न्यायाधीस १३:१ 10 मिनु पलिस्तीपुकीम लडाइ पामे बाक्त। मिनु इस्राएलीपुकी ब्रुशा, आन आन ताम्बुम प्रोक्मा बाक्त। मेको लडाइम शुश मुर साइक्चा पुंडसमा बाक्त। खोइलीम गाक्ब ३० हजार लडाइ पाइबपुकी बेक्मा बाक्त। 11 मिनु परमप्रभु आ कबल पशो सन्दोस रोइशो, एली आ तौ होफनी नु फिनेहास आस कली यो सदमे बाक्त। १सामुएल २:३४

एली बेक्शो

12 मिनु मेको नाक्ती बेन्यामीन आ थर डा मुर का लडाइ पतीक रे प्रोक्शा, खाक्शो वा फेक्सीशा, आ पियाम फुरक फुंडसीशा, दोरशा शिलोम जाक्माक्त। 13 मेको जाक्मेनु, एली आ नित्तीकेम निशशा, लां कोत्रशा बाक्शो बाक्माक्त। मारदे हना परमप्रभु आ कबल पशो सन्दोस आ पब्रम थाम्पा सुर्ता पवा बाक्त। मिनु मेको मुर दोरशा, जाक्शा सहर डा मुर नेल्ल आन कली मार दुम्मे, मेको नेल्ल शेंदा बाक्त। मिनु सहर डा मुर नेल्ल ग्रीशा वाइ ब्रेम्मा बाक्त।

14 मिनु एलीम आन वाइ ब्रेशो नेंशा “एको मार रेयके बाक्मे” देमाक्त। मेको मुर दोरोर पा दोरशा, एली आ बाक्तीक जाक्शा, लोत्र नेल्ल शेंदा बाक्त। 15 मेना एली ९८ बर्स दुम्शो बाक्माक्त। मिनु मिक्च मताइब दुम्शो बाक्माक्त। १सामुएल ३:२ 16 मिनु मेको मुरुम मेको कली “गो लडाइ रे नक जाक्ती। गो लडाइ रे प्रोक्शा जाक्ती” देमाक्त। मिनु एलीम “ए, आं तौ, मार दुम्मे” दे हिल्लो पवा बाक्त। 17 मिनु मेको दोरशा जाक्बमी “इस्राएली पलिस्ती आन क्येडा प्रोक्तेक्म। लडाइ पाइब शुश साइक्चा पुंडसाक्म। इन तौ होफनी नु फिनेहास निम्फा साइक्चा पुंडसाक्स। मिनु परमप्रभु आ कबल पशो सन्दोस यो रोइक्ताक्म” देमाक्त। 18 मिनु मेकोमी परमप्रभु आ कबल पशो सन्दोस आ पब्रम लोत्र पवानु, एली ठेयब लाप्चो आ नेक्था बाक्शो आ नित्तीक रे नोले गे गोल्माक्त। मिनु आ शुर जिक्शा, मेको बेक्माक्त। मारदे हना मेको खूशो नु ठेयब रां पाइशो मुर बाक्माक्त। मेकोम ४० बर्स सम्म इस्राएली आन कली निसाफ पशो बाक्माक्त।

19 मेको आ चाइमी, फिनेहास आ मीशेमी कोव्रज कुरशो बाक्माक्त। मिनु आ आल थिची ना दुम्शो बाक्माक्त। मिनु मेकोमी परमप्रभु आ कबल पशो सन्दोस रोइशशा योल्शो नु आ शिउ नु आ वोइश बेक्शो नेशा, आ आल थितीक रोइम जेत्ता बाक्त। मिनु गोल्शा आल थिवा बाक्त। 20 मिनु मेको बेक्चा चिक्तानु, आ वारच पाइब मीश मुरुम “इ थुं ग्येत्थ लुक्च मदुमो। गे तौ का थिप्तीवी” दे मदा बाक्त। तन्न मेकोम लोव्र मलेत्ता बाक्त। मेकोम आ नोफा मदाइक्ता बाक्त। उत्पत्ती ३५:१७ 21 मिनु मेकोमी आल आ नें इकाबोद वोदा बाक्त। मेको आ अर्थ “परमप्रभु आ छेडछेड इस्राएल रे जाम्त” देशो बाक्माक्त। मारदे हना परमप्रभु आ कबल पशो सन्दोस रोइशशो नु आ शिउ नु आ वोइश बेक्शो मिम्शा इकाबोद आ अर्थ “इस्राएल डा छेडछेड जाम्त” देशो बाक्त। सामुएल १४:३; भजन संग्रह ७८:६१ 22 “इस्राएल डा छेडछेड जाम्त। मारदे हना परमप्रभु आ कबल पशो सन्दोस रोइसाक्व” देंमाक्त।

5

पलिस्तीपुकीमी श्येत जशो

1 पलिस्तीपुकीम परमप्रभु आ कबल पशो सन्दोस रोइशशा लाइशशा, एबेन-एजेर रे अशदोद सहरम चाक्गमे बाक्त। यहोसु १५:४७ 2 मिनु मेकोपुकीम मेको कली लाइशशा दागोन मूर्ति आ थानम चाक्दीत्मे बाक्त। मिनु दागोन आ नेक्था वोदमे बाक्त। न्यायाधीस १६:२३ 3 मिनु आ दीसा अशदोद डा मुरपुकी सुनी कना बोक्शा कोव्रडमेनु, दागोन आ मूर्ति गोल्शा, परमप्रभु यावे आ कबल पशो सन्दोस आ डोंइती बाप्शो तामे बाक्त। मिनु मेकोपुकीम दागोन कली पोक्शा, आ बाक्तीकेम वोदमे बाक्त। 4 मिनु मेकोपुकी लेंशा आ दीसा सुनी कना बोक्शा कोव्रडमेनु, दागोन परमप्रभु यावे आ कबल पशो सन्दोस आ डोंइती गोल्शो तामे बाक्त। मिनु मेको मूर्ति आ पिया नु गुइ निक्शी जिक्शा, लाप्चो डा शीम बाक्शो तामे बाक्त। दागोन आ रां ला लीशो बाक्माक्त। 5 मोपतीके मेको नाक्त रे अशदोद सहरमी दागोन कली चढेबपुकी नु सु सु दागोन आ थानम ओव्रबाक्मा, मेकोपुकीम दागोन आ थान डा लाप्चो डा शी मदिम्थु, ख्राक्शा ओव्रबाक्मा बाक्त। सेफन्याह १:९

6 मिनु परमप्रभु यावेमी अशदोद डा मुर आन कली शुश श्येत गेमी बाक्त। मेकोमी मेको अशदोद डा नु मेको आ एर ओंथ डा मुर आन कली गार मुतीक रोइमी श्येत गेमी बाक्त। मिनु मेको आन रागीम शुश यिच ग्रूमा बाक्त। मिनु मेको आन सहर नेल्लेम मारेइ मारेइ खतम दुम्तीक नु बेक्तीकेम सुमा बाक्त। भजन संग्रह ७८:६६ 7 मिनु अशदोद डा मुरपुकीम मोदेशो दुम्शो तशा “इस्राएली आन परमप्रभु आ कबल पशो सन्दोस एक वोइक्चा मदुम्ब। मारदे हना मेको आ गाइशशोमी इं कली नु इं देवता दागोन कली श्येत दुम्शो बाक्ब” देंमा बाक्त। 8 मोपतीके मेकोपुकीम पलिस्ती आन ठेयब मुर आन कली ब्रेशशा खुप्शा “गो इस्राएली आन परमप्रभु आ कबल पशो सन्दोस मार पय?” दे हिल्लो पामे बाक्त। मिनु मेकोपुकीमी “परमप्रभु आ कबल पशो सन्दोस गाथ सहरम लतीन” देंमा बाक्त। मिनु मेकोपुकीम इस्राएली आन परमप्रभु आ सन्दोस गाथम चाक्गमे बाक्त। यहोसु ११:२२ 9 मिनु गाथम लदमे नोले परमप्रभु यावेम मेको सहर डा मुर आन कली शुश हिंचा डा श्येत गेमी बाक्त। मेकेर डा ठेयब रे आइक्च मुर नेल्ल आन कली गार मुतीक रोइ पपाइक्मी बाक्त। 10 मिनु मेकोपुकीमी परमप्रभु आ कबल पशो सन्दोस एक्रोनम सोइक्तमे बाक्त। मिनु इस्राएली आन परमप्रभु आ कबल पशो सन्दोस एक्रोनमी चाक्दीत्मेनु, मेकेर डा मुरपुकीम “मारदे मेकोपुकीम इं कली नु इं खिं डा मुर आन कली साइक्चा कली इस्राएली आन परमप्रभु आ कबल पशो सन्दोस एक चाक्मे?” दे ग्रीशा रेयके पामे बाक्त। यहोसु १५:४५ 11 मोपतीके मेकोपुकीम पलिस्ती आन ठेयब मुर नेल्ल आन कली ग्रुम्शा लोव्र पचा कली ब्रेत्थ सोइक्तमे बाक्त। मिनु मेको आन कली “इस्राएली आन परमप्रभु आ कबल पशो सन्दोस आ बाक्तीकेम लेशशा सोइक्तीन। मेको कली आ बाक्तीकेम चाक्दीतीन। मो मपाइतीनी हना, गो नेल्ल बेक्नय” देंमा बाक्त। सहर डा मुर नेल्ल शुश हिंशो बाक्मा बाक्त। मारदे हना परमप्रभु शुश गाइशशो बाक्माक्त। 12 मिनु मबेक्शो आन कली गार मुतीक रोइम श्येत जपाइशशो बाक्माक्त। मेको सहर डा मुर आन डाक्शो सरीड सम्म जाक्दीमाक्त।

6

परमप्रभु आ सन्दोस लेशशो

1 परमप्रभु यावे आ कबल पशो सन्दोस पलिस्ती आन रागीम बाक्शो ७ महिना दुम्शो बाक्माक्त। 2 मिनु पलिस्तीपुकीम दागोन कली चढेब नु लिंक्यु कोव्रब आन कली ब्रेशशा, मेको आन कली “गो परमप्रभु यावे आ कबल पशो सन्दोस कली मार पय? गो मेको आ बाक्तीकेम दोपा सोइक्तय? आंइ कली शेंदीकी” दे हिल्लो

पामे बाक्त। 3 मिनु मेकोपुकीम “गेपुकीम इस्राएली आन परमप्रभु आ कबल पशो सन्दोस लेशशा सोइक्नीनी हना, मोशा मसोइक्तीन। परमप्रभु कली दोस आ पर्बम चढेतीक नु सोइक्तीन। मिनु नोले गे सानीनी। मिनु मेकोमी लेशा इन कली श्येत मगेब” देमा बाक्त।

4 मिनु मेकोपुकीम “गो दोस आ पर्बम मार चढेतीक सोइक्नीकी?” दे हिल्लो पामे बाक्त। मिनु मेकोपुकीम “५ ओटा सुन के कान नु ५ ओटा सुन के यिच, इन ५ जना ठेयब मुर खोदेशो पा नु इन कली श्येत गेब कान खोदेशो पा सोइक्तीन। यहोसु १३:३ 5 गे इन कान खोदेशो सुन के कान नु रागी कली खतम पोक्ब यिच खोदेशो पा सुन के यिच सेलीन। मिनु इस्राएली आन परमप्रभु कली मान पने। मिनु मेकोमी इन कली, इन देवी देवता आन कली नु इन रागी कली श्येत गेचा प्रोइबा को? 6 गे मारदे इजीप्त डा मुर नु फाराओ खोदेशो पा इन थुं खकटा सेल्नीनी? मेकोम आ सक्ति कोइदा नोले मेकोपुकी मूर्ख दुम्शा इस्राएली आन कली लचा मगेमे डा?” देमा बाक्त। प्रस्थान ४:२१; प्रस्थान १२:३१ 7 मिनु “मुल गे नक बग्गी का सेलीन। मिनु गिक्शो नु गेनायो जुवा मलाप्शो बी निक्शी लतीन। मिनु मेको बी आस कली नारेशा, बग्गी कीपाइक्चा कली ठीक पने। मेको आस बाछा कली चहिं फ्राशा गोठम लतीन। 8 मिनु परमप्रभु यावे आ कबल पशो सन्दोस लाइश्शा, बग्गी तारी वोतीन। मिनु मेको इन दोस आ पर्बम चढेशो सुन के थोव्रकी आइक्च सन्दोस काम कुर पा, मेको आ नेक्था वोतीन। मिनु मेको सोइक्तीन। 9 मिनु मेको बग्गी कली कोव्रशा बाक्कीन। मेको सन्दोस कुरशो बग्गी आ रागी, बेथ-शेमेश ग्येत्थ गे लत हना, परमप्रभुमी एको ठेयब श्येत दुम्पाइश्शो बाक्माक्त, दे तुंडसीब। मो मदुम्त हना, एको श्येत मेकोमी मदुम्पाइश्शो बाक्माक्त। आंमा दुम्शो बाक्तेक्म, दे तुंडसीब” देमा बाक्त।

10 मिनु मेको मुरपुकीमी मो पामे बाक्त। मिनु गिक्शो बी निक्शी चाक्शा, बग्गीम नारेमे बाक्त। मेको आस बाछा चहिं गोठ उइ पाइश्शा, वोदमे बाक्त। 11 मिनु परमप्रभु यावे आ कबल पशो सन्दोस नु सुन के यिच नु सुन के कान बाक्शो आइक्च सन्दोस बग्गी तार वोदमे बाक्त। 12 मिनु मेको बी एर ओंथ मपथु, गाक्ची ना ग्रीना ग्रीन इर बेथ-शेमेश ठेयब लां गे लसा बाक्त। मिनु पलिस्ती आन ठेयब मुरपुकी मेको बी आस नोले बेथ-शेमेश डा सांद सम्म लमा बाक्त। यहोसु १५:१० 13 मेना बेथ-शेमेश डा मुरपुकी दिंमम चेरब रिक्ना रिक्न बाक्मा बाक्त। मिनु मेकोपुकीम इर गे कोव्रडमेनु, सन्दोस तशा ग्येरशा मेको आ नेक्था लमा बाक्त। 14 मेको बग्गी बेथ-शेमेश डा यहोसु आ रूम जाक्शा, नांइसे बाक्त। मेको आ नेक्था ठेयब फुल्लु का बाक्माक्त। मिनु मेकोपुकीम मेको बग्गी खोइश्शा, मेको बी साइश्शा, परमप्रभु यावे कली चोशा चढेमे बाक्त। 15 मिनु लेवीपुकीम परमप्रभु यावे आ कबल पशो सन्दोस नु मेको आ नेक्था बाक्शो सुन के थोव्रक बाक्शो आइक्च सन्दोस शोल्शा, मेको ठेयब फुल्लु तारी वोदमे बाक्त। मिनु मेको नाक्त बेथ-शेमेश डा मुरपुकीम परमप्रभु यावे कली चोशा चढेतीक नु अरु चढेतीक चढेमे बाक्त। 16 मिनु पलिस्ती आन ५ जना ठेयब मुरुमी मेको नेल्ल तशा, मेको नाक्तीन एक्रोन लेम्मा बाक्त।

17 मिनु मेको पलिस्तीपुकीम मेको आन दोस आ पर्बम परमप्रभु यावे कली सोइश्शो सुन के कान मार कली बाक्मा बाक्त देंशा हना, अशदोद कली का, गाजा कली का, अशकलोन कली का, गाथ कली का नु एक्रोन कली का बाक्मा बाक्त। 18 मिनु सुन के यिच चहिं गारो हिरशो सहर आन कली नु आन हुकुम पाइब नु आन एर ओंथ डा सहर आन कली का का बाक्माक्त। मिनु मेकोपुकीमी परमप्रभु यावे आ कबल पशो सन्दोस कली लाइश्शा, ठेयब फुल्लु तारी वोदमे बाक्त। मेको फुल्लु मुल सम्म बेथ-शेमेश डा यहोसु आ रूम सांकछी बाक्ब।

कबल पशो सन्दोस लांम बाक्शो

19 मिनु परमप्रभु यावेमी बेथ-शेमेश डा मुर आन दाते डा ७० जना आन कली सदा बाक्त। मारदे हना मेकोपुकीम परमप्रभु यावे आ कबल पशो सन्दोस आगा कोव्रडमे बाक्त। मिनु परमप्रभु यावेमी मोदेशो पशो आ पर्बम मुरपुकी रोंका पामे बाक्त। गन्ती ४:२०; २सामुएल ६:६-७ 20 मिनु बेथ-शेमेश डा मुरपुकीम “मेको परमप्रभु यावे, का ला परमप्रभु आ डोंइती सु राप्ने चाप्बा डा? मिनु आंइ बाक्तीके रे मुल मेको सु आ बाक्तीके लाइक्चा माल्बा?” देमा बाक्त। 21 मिनु मेकोपुकीम किरयथ-यारीम डा मुर आन कली लोव्र कुरब सोइश्शा, मेको आन कली “पलिस्तीपुकीम परमप्रभु यावे आ कबल पशो सन्दोस लेत्ताक्म। उइ यिशा, मेको इन बाक्तीकेम कुतीन” देमा बाक्त। १इतिहास १३:६; भजन संग्रह ३२:३-६

1 मिनु किरयथ-यारीम डा मुर जाक्शा, परमप्रभु यावे आ कबल पशो सन्दोस लाइशशा, डांडाम बाक्ब अबीनादाब आ खिंम चाक्दीत्मे बाक्त। मिनु मेको आ तौ एलाजर कली परमप्रभु यावे आ कबल पशो सन्दोस कोव्रचा कली ठीक सेल्मे बाक्त। लेवी ८:-

मुरपुकी परमप्रभु यावे गे लेशशो

2 मिनु मेको सन्दोस किरयथ-यारीमम वोइशशो, शुश नाक्त दुम्शा, २० बर्स मेकेर बाक्माक्त। मिनु इस्राएली नेल्लेमी “परमप्रभु यावेम इं कली प्रोइतु” दे सुर्ता पामे बाक्त। १सामुएल ६:२१; १सामुएल ४:२२; १इतिहास १३:६

3 मिनु सामुएलमी इस्राएली नेल्ल आन कली “गे इन थुं नेल्लेमी परमप्रभु यावे गे लेत्चा दाक्ताक्नी हना, इन दाते रे अर्को रागी डा देवी देवता नु अशतारोथ माइशशो मूर्ति पाइशशो थाम नेल्ल गुंडदीन। मिनु इन थुं नेल्लेमी परमप्रभु यावे कली ला ठेयब सेलीने। मिनु मेकोम इन कली पलिस्ती आन गुइ रे प्रोइब” देंमाक्त। उत्पत्ती ३५:२; यहोसु २४:२३ 4 मिनु इस्राएलीपुकीमी बाल देवता नु मूर्ति पाइशशो थाम नेल्ल गुंडदमे बाक्त। मिनु परमप्रभु यावे कली ला ठेयब सेल्मे बाक्त। न्यायाधीस १०:१६ 5 मिनु सामुएलमी इस्राएली नेल्ल आन कली “मिस्पाम बुक्कीने। मिनु गो परमप्रभु यावे कली इन पबर्म पुंडनुड” देंमाक्त। १सामुएल १०:१७; यहोसु १८:२६; न्यायाधीस २०:१ 6 मिनु मेकोपुकी मिस्पाम बुक्मा बाक्त। मिनु ब्वाक्कु चाक्शा, परमप्रभु यावे आ डोइती मोदमे बाक्त। मिनु मेको नाक्ती माइजा बाक्शा, मेकोपुकीमी “गो परमप्रभु यावे आ डोइती पाप पाइतक” देंमा बाक्त। मिनु सामुएलम इस्राएली आन कली मिस्पा सहरम ब्रेशशा निसाफ पवा बाक्त। २सामुएल २३:१६

7 मिनु पलिस्तीपुकीमी इस्राएली मिस्पाम बुक्तेक्म देंशो लोव्र नेन्मे बाक्त। मिनु मेको आन ठेयब मुरपुकी इस्राएली नु लडाइ पचा कली लमा बाक्त। मिनु इस्राएलीपुकी मेको नेंशा, पलिस्ती आन कली तशा शुश हिंमा बाक्त। 8 मिनु इस्राएलीपुकीमी सामुएल कली “आइ कली पलिस्ती आन गुइ रे प्रोइचा कली परमप्रभु यावे, आइ परमप्रभु कली पुंडचा मप्रोनीन। मिनु मेकोम पलिस्ती आन गुइ रे प्रोइबा कों, दे पुनीन” दे सामुएल कली देंमा बाक्त। १सामुएल १२:२३; उत्पत्ती २२:१७; १राजा १३:६; येरमीया ३७:३; येरमीया ७:१६ 9 मिनु सामुएलमी परमप्रभु यावे कली दूध तूब पाठा का चोशा चढ़ेवा बाक्त। मिनु इस्राएली आन पबर्म ठेयब सेंदा पा परमप्रभु यावे कली पुना बाक्त। मिनु परमप्रभु यावेम मेको आ पुंडशो लोव्र नेना बाक्त। 10 सामुएलम चोशा चढ़ेना ढेन बाक्मेनु, पलिस्तीपुकी इस्राएली नु लडाइ पचा कली आन नेक्था जाक्मा बाक्त। मिनु मेको नाक्ती परमप्रभु यावेमी पलिस्ती आन तारी ठेयब बुंबु पपदा बाक्त। मिनु पलिस्तीपुकी वाम ग्याम दुम्शा, इस्राएली आन डोइती रे प्रोक्मा बाक्त। उत्पत्ती ३५:५; प्रस्थान १४:२४; प्रस्थान २३:२७; यहोसु १०:१०; न्यायाधीस ४:१५ 11 मिनु इस्राएलीपुकीमी मेको आन कली मिस्पा रे खेदा पना पन, बेथ-कर आ दी सम्म साइक्ना साइक्न खेदा पामे बाक्त। 12 मिनु सामुएलमी फुल्लु का लाइशशा, मिस्पा नु येशाना आस दातेमी खुक्गा बाक्त। मेको कली एबेन-एजेर नें वोइशशा “परमप्रभु यावेम आइ कली एक सम्म वारच पाप्तु” देंमाक्त। 13 मोपा पलिस्ती ब्रुशा, इस्राएली आन रागी लेंशा मओव्रमा बाक्त। मिनु परमप्रभु यावेम सामुएल बाक्म सम्म पलिस्तीपुकी रे इस्राएली आन कली श्येत मगेपदा बाक्त। 14 मिनु पलिस्ती आन डोइती ग्राशो सहर एक्रोन रे गाथ सम्म नु आन एर ओथ डा गाउं नेल्ल इस्राएलीपुकीमी पलिस्ती आन गुइ रे ताक्गमे बाक्त। मिनु इस्राएली नु एमोरीपुकी गारमा बाक्त।

15 मिनु सामुएल बाक्म सम्म इस्राएली आन कली निसाफ पवा बाक्त। न्यायाधीस १०:१-५; न्यायाधीस १२:७-१४ 16 मेकोमी बर्स बर्सम बेथेल, गिलगाल नु मिस्पाम हिरशा, इस्राएली आन कली निसाफ पाइक्बाक्माक्त। 17 मिनु मेको रामाह लेप्बाक्माक्त। मारदे हना मेको आ खिं मेकेर बाक्माक्त। मिनु मेकोमी मुर आन कली निसाफ पा, परमप्रभु यावे कली चढ़ेतीक का सेला बाक्त। यहोसु १८:२५

8

इस्राएलीपुकीमी पिप पुंडशो

1 सामुएल खूशो दुम्तीके, आ तौ आन कली इस्राएली आन कली निसाफ पाइब सेल्मी बाक्त। 2 मेको आ डोइती जरमेशो तौ आ नें योएल नु आ माइला तौ आ नें अबीयाह बाक्माक्त। मेको बेयर-शेबाम निसाफ पाइब बाक्सा बाक्त। १इतिहास ६:१३; आमोस ८:१४ 3 तन्न मेको निक्शीमी आस आफोम पशो खोदेंशो मपाम्से बाक्त। क्येट पाइशशो दुम्चा कली घूस जाम्से बाक्त। दूली निसाफ पाम्से बाक्त। ब्यवस्था १६:१९ 4 मोपतीके इस्राएल डा खाल्पा नेल्ल गुम्शा, रामाहम सामुएल आ बाक्तीक जाक्मा बाक्त। १सामुएल ७:१७ 5 मिनु मेकोपुकीमी “गे मुल खूशो दुम्तीनी।

इन तौ निक्शी इन देशो लांम मगाक्स। मोपतीके अर्को रागी रागी डा मुर आन खोदेशो पा आंइ कली सासन पचा कली पिप का सेल्शा, गेकी” देमा बाक्त। ब्यवस्था १७:१४-२०; होसे १३:१०; प्रेरित १३:२१ 6 तन्न सामुएलम सासन पचा कली पिप पुंइशो लोत्र नेंशा, काइ मदाक्ता बाक्त। मिनु सामुएलमी परमप्रभु यावे नु लोत्र पवा बाक्त। 7 मिनु परमप्रभु यावेमी सामुएल कली “मुरुम मार मार देमा, मेको नेल्ल नेनो। मारदे हना मेकोपुकीम इ कली प्रोंइशो ममाइ, आं कली प्रोंइशो नम। मेकोपुकीम आं कली आन पिप दुमशो मदाक्शो नम। प्रस्थान १५:१८; गन्ती २३:२१; ब्यवस्था ३३:५; भजन संग्रह २४:७-१०; भजन संग्रह ७४:१२; यसैया ६:५ 8 इजीप्त रे गुंइशो नाक्त रे आं कली मार मार पाइय्यीमी, मुल मेकोपुकीम इ कली यो मो पाइनीम। मेकोपुकीम अरु देवी देवता आन नोले खोइश्शा, आं कली प्रोंइशो बाक्नीम। मिनु मुल इ कली यो प्रोंइनीम। 9 मिनु मुल मार देना देन बाक्मा, मेको नेनो। मुल मेको आन कली हिंपाइश्शा शेंदीमी। आन सासन पाइब पिपम दोदेशो पाइनीमी, मेको आन कली माइक्मी” देमाक्त।

10 मिनु सामुएलमी पिप पुंइब मुर आन कली परमप्रभु यावेम देशो लोत्र नेल्ल नेंपाइक्मी बाक्त। 11 मिनु सामुएलमी “इन कली सासन पाइब पिपमी मार पाइब देशा हना, इन तौ आन कली लाइश्शा, आ बग्गी, शारा नु गेय पाइब सेल्ब। मेकोमी मेको आन कली आ बग्गी आ डोंइडोंइती दोरपाइक्ब। 12 मिनु का निक्शी आन कली हजार का जना आन ठेयब मुर सेल्ब। का निक्शी आन कली ५० जना आन ठेयब मुर सेल्ब। मेको आ रू वाक्शा, आ बाली नाली रूपब सेल्ब। मिनु मेको आन लडाइ पतीक या नु बग्गी सेल्पाइक्ब। 13 मेकोमी इन तमी आन कली रांम खेक्तीक तेल सेल्पाइक्ब। जचा थोत्रक क्येब नु शोब्ले चोइब सेल्चा कली लाइक्ब। 14 मेकोमी इन नेल्ल क्येडा रिमशो रू, अडगुर रू नु तेल रवा बाक्शो रू रोइश्शा, आ गेय पाइब आन कली गेब। 15 मेकोमी इन अन्न १० भागमी भाग का लाइक्ब। इन अडगुर यो मोपान लाइक्ब। मिनु आ कप्तान नु आ खिं डा गेय पाइब आन कली गेब। 16 मेकोमी इन वाइलीम वाइल, इन नेल्ल क्येडा रिमशो बी ब्यफ नु गधापुकी लाइश्शा आ गेय पपाइक्ब। 17 मेकोमी इन क्यारश भेडा रे १० भाग डा भाग का लाइक्ब। मिनु गेपुकी यो मेको आ गेय पाइब दुम्नीनी। 18 मो दुम्मेनु, इन योत्रशो पिप आ पबर्म ठेयब सेंदा पा पुंइनीनी। तन्न मेना परमप्रभु यावेम इन पुंइशो लोत्र मनंभ” देमाक्त।

19 तन्न मुरपुकीम सामुएल आ लोत्र नेने मबिस्समा बाक्त। मिनु मेकोपुकीम “ममाइ, आंइ कली पिप का माल्नीकी। 20 गो यो अर्को रागी डा मुर खोदेशो दुमचा दाक्नीकी। आंइ कली सासन पाइब नु लडाइम आंइ डोंइती गाक्ब पिप का माल्नीकी” देमा बाक्त।

21 मिनु सामुएलम मेको मुर आन देशो लोत्र नेल्ल नेंशा, परमप्रभु यावे कली नेंपदा बाक्त। 22 मिनु परमप्रभु यावेम “मेको आन देशो खोदेशो पावो। मेको आन कली पिप का गेमी” देमाक्त। मिनु सामुएलमी इस्राएल डा मुर नेल्ल आन कली आन खिं खिं सोइक्तीमी बाक्त।

9

सावलमी जाम्शो गधा माल्शो

1 बेन्यामीन आ थर डा मुर का बाक्माक्त। मेको आ नें कीश बाक्माक्त। मेको आ आफ अबीएल, मेको आ बाजे जरोर, आ शेर बाजे बेकोराथ नु आ किकी बाजे आफीयाह बेन्यामीन थर डा बाक्माक्त। कीश शोंप पाइश्शो मुर का बाक्माक्त। 2 मिनु मेको आ तौ का बाक्माक्त। मेको आ नें सावल बाक्माक्त। मेको ठिटा दारशो बाक्माक्त। मेना इस्राएल रागीमी मेको क्येडा दारशो अर्को सुइ मबाक्मा बाक्त। मुर नेल्ले मेको आ बला डा लुकच ला बाक्मा बाक्त।

3 मिनु काबु सावल आ आफ कीश आ गधापुकी जाम्मा बाक्त। मिनु मेकोमी आ तौ सावल कली “गेय पाइब ठिटा का लाइश्शा, गधापुकी माल्थ लावो” दे मदा बाक्त। 4 मिनु मेको निक्शी एफ्राइम डा पहाड लाक्शा, शालीशाह रागी रे पा लसा बाक्त। तन्न गधा मथित्से बाक्त। मेको निक्शी शालीम रागी लसा, बेन्यामीन आ रागी रे पा हिरशा, लसा बाक्त। मेकेर यो मथिदसे बाक्त। 5 मिनु मेको निक्शी जूफ रागी ओत्रसा बाक्त। मिनु सावलम आ गेय पाइब कली “मुल गो लेस्स। मुल मलेत्तस हना, आं आफोम गधा आन पबर्म सुर्ता पचा प्रोंइशा, इस पबर्म सुर्ता पाइब” देमाक्त। १ सामुएल १०:२ 6 मिनु मेको गेय पाइबम “एको सहरम परमप्रभु आ लोत्र पाइब का बाक्ब। मेको आ देशो नेल्ल गाप्तीके, मेको आ नें थाम्पा चलेशो बाक्ब। गो मेक लांइसाक्व हना, मेकोमी तेको लां लचा माल्बा, मेको शेंबा को?” देमाक्त। 7 मिनु सावलमी “गो मेक लशा हना, मेको कली मार गेचा? गो इस नु मारेइ जचा थोत्रक मबाक्ब। परमप्रभु आ मुर कली मारेइ कोसेली यो मबाक्ब” दे आ गेय पाइब कली देमाक्त। 8 मिनु मेको गेय पाइबमी “गो नु ४ भाग डा भाग का शेकेल चांदी बाक्ब। इस कली लां कोइचा, दे गो मेको मुर कली एको चांदी गेनुड” देमाक्त। शेकेल का ११.५ ग्राम बाक्ब। मेको आ गेशो २.६ ग्राम चांदी के क्येट बाक्त। 9 डोंइती इस्राएल रागीम सुइम परमप्रभु

आ लोव्र तुइक्चा माल्ताक्व हना, मार देंबाक्मा बाक्त देशा हना “परमप्रभु यावे आ ततीक ताइब आ बाक्तीक लय” देंबाक्मा बाक्त। तन्न सिनाक्त मुलाक्त परमप्रभु यावे आ ततीके ताइब कली परमप्रभु यावे आ लोव्र पाइब देंनीम। गन्ती २४:३-४; २राजा १७:१३; १इतिहास ९:२२ 10 मिनु सावलमी आ गेय पाइब कली “इ देशो रिम्शो बाक्ब। गो मेको आ बाक्तीक लस” देंमाक्त। मिनु मेको निक्शी मेको परमप्रभु आ मुर बाक्तीक सहर लसा बाक्त। 11 मिनु मेको निक्शी इर सहर गे लना लन बाक्सानु, ब्वाक्कु दिथ यीब मीश आल आन कली ग्रुम्से बाक्त। मिनु मेको आन कली “परमप्रभु यावे आ ततीक ताइब खिंम बाक्मे?” दे हिल्लो पाम्से बाक्त। 12 मिनु मेकोपुकीमी “ओ, इस डोंइती लना लन बाक्ब। रीब पा लने। मेको मुलाक्त सहर रे जाक्त। मारदे हना मुलाक्त डांडाम क्योरशा चढ़ेतीक नाक्त बाक्ब। 13 मिनु गे सहरम ओव्रतीसी हना, गे मेको कली जचा कली इर लना लन पशो थित्नीसी। मेको मजाक्म सम्म मुरपुकीम भोज मजाइनीम। मारदे हना, मुरुम जचा क्येडा डोंइती मेकोमी क्योरशा चढ़ेतीकेम आसीक गेब। मिनु नोले ला ब्रेशशो मुरपुकीम जाइनीम। मिनु इर लसे, गे मुलाक्ती मेको कली ग्रुम्नीसी” देंमा बाक्त। 14 मिनु इर सहर लसा बाक्त। मिनु सहर ओव्रसानु, सामुएल कली थित्से बाक्त।

सावलमी सामुएल कली ग्रुम्शो

15 मिनु परमप्रभु यावेमी सावल आ जाक्चा क्येडा नाक्त का डोंइती सामुएल कली आ मिम्शो लोव्र तुइक्पाइश्शो बाक्माक्त। 16 मेकोमी “दीसा गो बेन्यामीन रागी डा मुर का इ कली ग्रुम्थ सोइक्नुड। मिनु गे मेको कली आं मुर, इस्राएली, आन पिप सेल्शा, तेल लुक्तो। मेकोमी आं मुर आन कली पलिस्ती आन गुइ रे प्रोंइब। मारदे हना गो आं मुर आन श्येत ताता। मेको आन पुंइशो नेता” देंमाक्त। 17 मिनु सामुएलम सावल कली जाक्शो तवा बाक्त। मेना परमप्रभु यावेम मेको कली “आं देशो मुर एकोन बाक्ब। एको आं मुर आन कली सासन पाइब दुम्ब” देंमाक्त। 18 मिनु सावलमी ठेयब लाप्चोम जाक्शा, सामुएल कली “परमप्रभु यावे आ ततीके ताइब आ खिं ते बाक्म, आं कली कोंइदीनी” देंमाक्त। 19 मिनु सामुएलमी सावल कली “परमप्रभु यावे आ ततीके ताइब गो नड। आं डोंइडोंइती इर गाक्कीस। मारदे हना मुलाक्ती गे गो नु जचा माल्नीसी। मिनु दीसा सुनी इ कली लचा गेनुड। इ थुंम मार मार बाक्मे, गो मेको इ कली शेंनन। प्रस्थान २४:११ 20 मिनु नाक्त सां डोंइती जाम्शो गधा आन पर्बम सुर्ता मपावो। मेको थिन्ने थुम्तेक्म। नेल्ल क्येडा ठेयब लोव्र मार बाक्ब देशा हना, इस्राएली नेल्लेमी इ कली नु इ किकी पिपी आन खिं डा मुर कली मिम्शो बाक्नीम” देंमाक्त। 21 मिनु सावलमी “गो इस्राएली आन नेल्ल क्येडा आइक्च बेन्यामीन आ थर डा मुर का नड। मिनु आं खिं बेन्यामीन आ थर डा नेल्ल क्येडा आइक्च बाक्ब। मिनु गे मारदे आं कली एको लोव्र देंनी?” दे हिल्लो पवा बाक्त। १सामुएल १५:१७ 22 मिनु सामुएलमी सावल नु आ गेय पाइब आस कली जतीक कोठाम ओंइदीम्सी बाक्त। मिनु ब्रेशशो मुर आन दातेमी नेल्ल क्येडा ठेयब नित्तीकेम निप्पदा बाक्त। मेकेर मेको नेल्ल पा ३० जना मुर बाक्मा बाक्त। 23 मिनु सामुएलमी क्येब कली “डोंइती गो इ कली तिल्शा वोइक्चा देशो भाग एक पितो” दे मदा बाक्त। 24 मिनु मेको क्येबमी फिला चाक्शा, सावल आ डोंइती वोदा बाक्त। मिनु सामुएलमी “इ कली वोइश्शो भाग एकोन बाक्ब। ब्वावो। मुर आन कली ब्रेशशो भोजम एको इ कली वोइश्शो भाग बाक्ब” दे सावल कली देंमाक्त। मिनु मेको नाक्ती सावल पौनापुकी नु भोज जवा बाक्त। 25 मिनु नोले मेकोपुकी डांडा रे सहर ब्रुम्मा बाक्त। मिनु सामुएलमी सावल कली खिं तला तारी लाइश्शा लोव्र पवा बाक्त। 26 मिनु नां सोव्रची ना सामुएलम सावल कली “बोक्को। मुल गो इ कली चोव्रदीनन” देंमाक्त। मिनु सावल नु आ गेय पाइब बोक्सा नोले सामुएल नु काथ काथा गाक्मा बाक्त। 27 मिनु मेकोपुकी सहर लाग्मे नोले सामुएलम सावल कली “इ गेय पाइब कली डोंइती सोइक्तो” देंमाक्त। मिनु मेकोमी मो पवा बाक्त। मिनु सामुएलमी “गे एकेर रिम्दो। गो इ कली परमप्रभु आ लोव्र नेंपाइक्नन” देंमाक्त।

10

सामुएलम सावल कली पिप सेल्शो

1 मिनु सामुएलमी तेल कुरतीक रे तेल गुंइशा, सावल आ पिया तार लुक्ता बाक्त। मिनु मेको कली पुक्पु पा “परमप्रभु यावेमी इ कली आ मुर इस्राएली आन पिप सेल्लु। गे आ मुर आन कली सासन पाइक्नेवे। मिनु गे मेको आन एर ओंथ डा जोरी सत्रु आन गुइ रे प्रोंइनेवे। परमप्रभु यावेम थमा पा इन कली आ मुर आन कली सासन पाइब सेल्शो आ चिन्ड मार बाक्ब देशा हना, 2 गे मुलाक्ती एक रे लाइनीसी। मिनु बेन्यामीन आ सांद सेल्साह सहर आ नेक्था राहेल कली थिम्तीकेमी मुर निक्शी ग्रुम्नीसी। मेको निक्शीमी इस कली ‘इन माल्शो गधा थित्तेक्म। इन आफोमी मेको आन

पर्वम सुर्ता पचा प्रोइशा, इस पर्वम सुर्ता पा “मुल आं तौ आ पर्वम गो मार पाइनुडा?” दंत’ देंनीस। उत्पत्ती ३५:१९ 3 मिनु मेकेर रे लाक्शा, ताबोर डा ठेयब रवा आ नेक्था सम्म लाइनीसी। मेकेर परमप्रभु कली चढेथ बेथेल गे लाइब मुर सां गुम्नीसी। मेको डोंइती डा मुरुम पाठा सां, दाते डा मुरुम शोब्ले सां नु नोले डा मुरुम गर का अडगुर शांबु कुरशा गाक्शो बाक्नीम। 4 मिनु मेकोपुकीमी इस कली ‘रिम्शो बाक्नी?’ दे हिल्लो पाइनीम। मिनु इस कली शोब्ले निक्शी गेनीम। मिनु गे मेको ताक्चा माल्नीसी। 5 मिनु नोले गे परमप्रभु आ डांडा गिबेआथ-एलोहीम जाक्नीसी। मेकेर लडाइ पचा कली बाक्शो पलिस्ती बाक्नीमी। मिनु गे मेको सहर ओव्रतीसी हना, डांडा रे यिन यिन पशो परमप्रभु यावे आ लोव्र पाइब आन हुल का गुम्नीसी। मेको आन डोंइती मार मार ताप्तीके ताप्बपुकी गाक्शो बाक्नीम। मिनु मेकोमी परमप्रभु यावे आ लोव्र पाइनीम। 6 मिनु परमप्रभु यावे आ सोक्त इन तार जुक्ब। मिनु गे यो परमप्रभु यावे आ लोव्र पाइनीनी। मिनु गे अर्को मुर दुम्नीनी। न्यायाधीस १३:२५ 7 मिनु मोदेशो चिन्ड नेल्ल दुम नोले इ डोंइती मार गेय बाक्बा, मेको पावो। मारदे हना परमप्रभु गे नु बाक्ब। 8 मिनु गे आं डोंइती गिल्लाल यिवो। मिनु गो चोशा चढेचा नु दुशा बाक्चा आ पर्वम चढेचा कली इ बाक्तीक जाक्नुड। गो इ बाक्तीक मजाक्डा सम्म, ७ नाक्त सम्म आं कली रिम्शा बाक्को। मिनु गो जाक्शा गे मार पचा माल्नेवे, इन कली शेंनुड” दे सामुएलम सावल कली देंमाक्त। १ सामुएल १३:८

सावल आ थुं नक सेल्शो

9 मिनु सावल गाक्चा कली सामुएल नु ब्रामेनु, परमप्रभुम सावल आ थुं नक सेला बाक्त। मिनु मेको नोले मेको चिन्ड नेल्ल दुम्माक्त। 10 मिनु मेको गिबा जाक्दीस्सानु, परमप्रभु यावे आ लोव्र पाइब हुल मेको कली गुम्थ, यिशो बाक्मा बाक्त। मिनु परमप्रभु आ सोक्तीम मेको कली सुमा बाक्त। मिनु सावल यो मेको आन दातेमी परमप्रभु यावे आ लोव्र पाइब दुम्माक्त। १ सामुएल १९:२०-२४ 11 मिनु मेको कली डोंइती रे तुइक्ब मुरपुकीम, परमप्रभु यावे आ लोव्र पाइब आन दातेमी लोव्र पाइब दुम्शो तशा “कीश आ तौ कली मार दुम्मे? मार, सावल यो परमप्रभु यावे आ लोव्र पाइब आन दाते डा का बाक्मे” देंमुमा बाक्त। 12 मिनु मेकेर डा मुर कामी “मेरे आन आफ सु बाक्मे?” दे हिल्लो पवा बाक्त। मेना रे मुरपुकीमी “सावल यो परमप्रभु यावे आ लोव्र पाइब आन दाते डा बाक्मे?” दे देंतीक लोव्र लीमाक्त। 13 मिनु मेकोमी परमप्रभु यावे आ लोव्र पने थुम्शा, आ खिं लमाक्त।

14 मिनु सावल आ बकान्छाम, सावल नु आ गेय पाइब आस कली “गे निक्शी ते लसी?” दे हिल्लो पवा बाक्त। मिनु सावलमी “जाम्शो गधा माल्दीशो नस्कु। गो थिन्ने मचाप्स्कु। मिनु गो सामुएल आ बाक्तीक यो लाइतस्कु” देंमाक्त। 15 मिनु सावल आ बकान्छाम “सामुएलम इ कली मार देंमे? आं कली शेंदीसी” देंमाक्त। 16 मिनु सावलमी “गधा थित्तेक्म” दंत” देंमाक्त। तन्न पिप दुम्तीके आ पर्वम देंशो लोव्र मशेंदा बाक्त।

सावल इस्राएली आन पिप दुम्शो

17 मेना सामुएलमी मुर आन कली परमप्रभु यावे आ बाक्तीके मिस्पामी गुम्चा, दे ब्रेत्तीमी बाक्त। १ सामुएल ७:५ 18 मिनु मेकोमी इस्राएली आन कली “परमप्रभु यावे, इस्राएली आन परमप्रभुमी मार दंत देंशा हना ‘गो इस्राएली इन कली इजीप्त रागी रे गुंइशा, एक चाक्तन्नी। इन कली श्येत गेब इजीप्ती आन गुइ रे प्रोइतन्नी। मिनु नोले इन कली दिप्ब अर्को रागी डा मुर आन गुइ रे यो प्रोइतन्नी’ दंत। 19 तन्न मुलाक्ती गे इन कली हिंचा डा श्येत नु मरिम्शो रे प्रोइब इन परमप्रभु कली प्रोइतीनी। मिनु गेपुकीमी ‘आंइ कली पिप का योव्रशा गेने’ देंतीनी। मोपतीके मुल परमप्रभु यावे आ डोंइती इन थर थर नु खिं खिं डा मुर पा रपीन” दे माइक्मी बाक्त। १ सामुएल ८:७ 20 मिनु सामुएलमी इस्राएली नेल्ल आन थर आन कली राप्पाइक्मी बाक्त। मिनु बेन्यामीन आ थर योव्रचा पुंइसे बाक्त। १ सामुएल १४:४१-४२; यहोसु ७:१६ 21 मिनु मेकोमी बेन्यामीन आ थर डा खिं खिं डा मुर आन कली राप्पदा बाक्त। मिनु मात्री आ खिं डा मुर योव्रचा पुंइसमा बाक्त। मिनु मेको नोले कीश आ तौ सावल योव्रचा पुंइसे बाक्त। मिनु मेको कली माल्शा, मथित्मे बाक्त। 22 मिनु मेकोपुकीम परमप्रभु यावे कली “मार, मेको मुर एक बाक्बा?” दे हिल्लो पामे बाक्त। मिनु परमप्रभु यावेमी “मेको मार मार आन दातेमी खुइश्शा बाक्शो बाक्ब” देंमाक्त। 23 मिनु मुरपुकी दोरशा लशा, मेको कली चाक्गमे बाक्त। मिनु मेको मुर आन दातेमी राम्मेनु, नेल्ल आन क्येडा लाइश्शा बाक्माक्त। मुर नेल्ले मेको आ बला डा लुक्च ला बाक्मा बाक्त। 24 मिनु सामुएलम मुर नेल्ल आन कली “परमप्रभु यावेमी योव्रशो मुर कली कोव्रडीन। मुर नेल्ल आन दातेमी एको खोदेशो सुइ मबाक्म” देंमाक्त। मिनु मुर नेल्ल ग्येरशा “पिप शुश ब्रोंइल” दे ग्रीमा बाक्त। मती २१:९ 25 मिनु सामुएलमी मुर आन कली पिप आ अधिकार आ पर्वम शेंदीमी बाक्त। मिनु मेको नेल्ल कागजम

ब्रेक्शा, परमप्रभु यावे आ डोंइती चोदा बाक्त। मिनु नोले मेकोमी मुर आन कली आन खिं खिं सोइक्तीमी बाक्त। 26 मिनु सावल यो आ खिं गिबा लमाक्त। मिनु परमप्रभुम आन थुं थिशो रिम्शो लडाइ पाइबपुकी मेको नु लमा बाक्त। 27 मेकेर मरिम्शो मुर यो बाक्मा बाक्त। मेकोपुकीमी “एको मुरुम आंइ कली आंइ जोरी सत्रु रे दोपा प्रॉइने चाप्बा डा” देंमा बाक्त। मिनु मेकोपुकीमी सावल कली शुक्शी पा मेको कली मान पतीके यो मारेइ मचाक्मे बाक्त। तन्न सावल सिक्सी पा बाक्माक्त। १सामुएल ११:१२

11

सावलम अम्मोनी नु लडाइ पशो

1 मिनु महिना का नोले अम्मोन डा नाहाशमी याबेश-गिलादम लडाइ पा पुम्दमे बाक्त। याबेश डा वोंइश मुरपुकीम नाहाश कली “गोपुकी नु गरीन। मिनु गो इन गेय पाइब दुम्नीकी” देंमा बाक्त। १सामुएल ३१:११ 2 मिनु अम्मोन डा नाहाशमी मेको आन कली “गो गोपुकी नु गारचा कली नेल्ल इन ग्युरा मिक्च पुक्शा ला गोपुकी नु गारनुड। मोपा इस्राएली नेल्ल इन कली मुने तोक्नुड” देंमाक्त। 3 मिनु याबेश सहर डा खाल्पापुकीमी “इस्राएली नेल्ल आन कली नेंपाइक्चा कली आंइ कली ७ नाक्त सम्म रिम्दीन। मिनु नोले आंइ कली सुइमी प्रॉइने मचाप्तेक्म हना, गो इन जिम्मा गेंसीनीकी” देंमा बाक्त। 4 मिनु लोव कुरबपुकी सावल आ बाक्तीक गिबा जाक्मा बाक्त। मिनु मुर आन डोंइती मेको लोव शेंदमे बाक्त। मिनु मुर नेल्ले ठेयब सेंदा पा डाक्मा बाक्त।

5 मेना सावल रू रे पा ब्यफ खुल्शा जाक्ना जाक्न बाक्माक्त। मिनु मेकोमी “मुरपुकी मारदे ठेयब सेंदा पा डाक्मा” दे हिल्लो पामी बाक्त। मिनु याबेश-गिलाद डा मुरपुकीमी देशो लोव मेको कली शेंदमे बाक्त। 6 मिनु सावलम मेको लोव नेनानु, परमप्रभु आ सोक्तीम मेको कली सुमा बाक्त। मिनु सावल थाम्पा गाइक्ता बाक्त। न्यायाधीस १३:२५ 7 मिनु मोपा गाइशा, हाल का ब्यफ टुक्रा टुक्रा पा चेक्गा बाक्त। मिनु मुर आन कली मेको टुक्रा कुरपाइशा इस्राएल रागी नेल्लेमी “सु मुर लडाइ पथ सावल नु सामुएल आस नोले मखोइक्नीमी, मेको आन ब्यफ यो ओदेशो टुक्रा टुक्रान दुम्नीम देनीन” दे सोइक्तीमी बाक्त। परमप्रभु यावेमी मुर आन कली शुश हिंपाइशो बाक्माक्त। मोपतीके मेकोपुकी थुं का दुम्शा, सावल नु सामुएल आस नोले खोदमे बाक्त। न्यायाधीस १९:२९ 8 मिनु सावलम मेको आन कली बेसेकम लडाइ पचा कली ठीक पामी बाक्त। मेकेर इस्राएल डा लाख सां नु यहूदा डा ३० हजार मुर दुम्मा बाक्त। 9 मिनु मेको डोंइती लोव चाक्ब मुर आन कली “याबेश-गिलाद डा मुर आन कली ‘गे दीसा नाक्त उइक्थ दुम्मेनु, ब्रोंइचा ताइनीनी’ दे मतीन” देंमाक्त। मिनु मेकोपुकीमी याबेश डा मुर आन कली मेको लोव शेंदमे बाक्त। मिनु मेको नेंशा, शुश ग्येरसमा बाक्त। 10 मिनु याबेश डा मुरपुकीमी अम्मोनी आन कली “गो दीसा इन बाक्तीक जाक्नीकी। मिनु गे मार पचा दाक्नीनी, मेको पने” देंमा बाक्त। 11 मिनु आ दीसा सावलमी आ मुर आन कली हुल सां सेल्मी बाक्त। सुनी कना रिम्शो पा हाम्सो मदुम्थु, मेको आन जोरी सत्रु आन बाक्तीके ओव्रशा, नाक्ती उइक्थ दुम सम्म लडाइ पा अम्मोनी आन कली फूमे बाक्त। मोपा मुरपुकी निक्शी सम्म काथा मदुम्चा डा पा ब्राशा प्रोक्मा बाक्त।

12 मिनु मुरपुकीम सामुएल कली “सावलम आंइ कली सासन पने चाप्बा डा?” देंब सु बाक्मा? मेको आन कली साइक्चा कली आंइ गुइम गेने” देंमा बाक्त। १सामुएल १०:२७ 13 तन्न सावलमी “ममाइ, मुलाक्ती परमप्रभु यावेमी इस्राएली इं कली ग्रापदा नाक्त सुइ साइक्चा मदुम्ब” देंमाक्त। १सामुएल १४:४५

14 मिनु सामुएलम मुर आन कली “गो गिल्गालम लशा, एको राज्य कली लेंशा सेल्य” देंमाक्त। १सामुएल १०:८ 15 मोपतीके मेको नेल्ल गिल्गालम लशा, परमप्रभु यावे आ डोंइती सावल कली पिप सेल्मे बाक्त। मिनु परमप्रभु यावे आ डोंइती दुशा बाक्चा आ पर्बम चढ़ेतीक चढ़ेमे बाक्त। मिनु सावल नु इस्राएली नेल्ले शुश ग्येरसमा बाक्त।

12

सामुएलम निसाफ पचा प्रॉइशो

1 मिनु सामुएलमी गुम्शा बाक्शो इस्राएली नेल्ल आन कली “गो इन पुंइशो नेंता। मिनु गो इन कली सासन पपाइक्चा कली पिप का योव्रशा गेतन्नी। १सामुएल ८:७,२२; १सामुएल ११:१५ 2 मुल एको पिप इन ठेयब मुर दुम्शो बाक्ब। मुल गो खूशो दुम्ती। आं चां बोइशो बाक्ब। आं तौ गोपुकी नु बाक्शो बाक्नीस। गो आं ठिटा रेन इन कली लां कोइब दुम्शो नड। 3 गो एक बाक्ती। आं पर्बम मारेइ मरिम्शो लोव पचा बाक्त हना, परमप्रभु यावे नु आ तेल लुक्शो आ डोंइती देनीन। गो सुका आ ब्यफ, गधा रोइशो बाक्डा? गो सु सु कली श्येत गोडा? गो सु सु आन कली दिबुमी?

मिनु सु सु आन निसाफ पची ना घूस जडा? आं कली देंनीन। मिनु गो मेको थाप्नुड” दे माइक्मी बाक्त। गन्ती १६:१५
 4 मिनु मेकोपुकीमी “आंइ कली श्येत मगेनी। गे आंइ कली मदिप्नी। गे सुइ रे मारेइ मलाइक्नी” देंमा बाक्त। 5 मिनु सामुएलम मेको आन कली “गे आं कली दोसी सेल्ले मचाप्नी। मेको आ पबर्म परमप्रभु यावे नु आ तेल लुक्शो सांकछी बाक्नीस” देंमाक्त। मिनु मेकोपुकीमी “मेको सांकछी बाक्नीस” देंमा बाक्त।

6 मिनु लेंशा सामुएलम मुर आन कली “परमप्रभु यावे सांकछी बाक्ब। मेकोमी मोसा नु हारून आस कली योव्रतु। मिनु इन किकी पिपी आन कली इजीप्त रागी रे गुंडशा, एक चाक्तु। 7 मिनु गे आं डोंइती बाक्कीन। गो परमप्रभु यावे आ डोंइती गेपुकी नु लोव्र पाइनुड। परमप्रभु यावेमी इन कली नु इन किकी पिपी आन कली दोपा प्रोना, मेको इन कली देंनुड। 8 याकूब इजीप्त रागी ब्रुमेनु, इजीप्त डा मुरपुकीमी मेको आन कली दिप्मे बाक्त। मिनु इन किकी पिपीपुकीमी परमप्रभु यावे कली ‘वारच पाइक्की’ दे पुन्मे बाक्त। मिनु परमप्रभु यावेमी मोसा नु हारून आस कली सोइक्ता बाक्त। मेको निक्शीमी इन किकी पिपी आन कली इजीप्त रे गुंडशा एक चाक्शा बाक्पदसे बाक्त। प्रस्थान ३:७
 9 तन्न मेकोपुकीमी परमप्रभु यावे, आन परमप्रभु कली प्रेंताक्म। मेकोमी मेको आन कली प्रोंइशा, सीसेरा आ गुइमी गेवा बाक्त। सीसेरा हासोर डा पिप याबीन आ नेल्ल क्येडा सक्ति पाइश्शो लडाइ पाइब आन कप्तान बाक्माक्त। परमप्रभुमी मेको आन कली पलिस्ती आन गुइमी गेवा बाक्त। मिनु मोआब डा पिप आन गुइमी यो गेवा बाक्त। मिनु मेकोपुकी मेको नु लडाइ पना पन बाक्मा बाक्त। न्यायाधीस ४:२; न्यायाधीस १०:७; न्यायाधीस १३:१; न्यायाधीस ३:१२ 10 मिनु नोले मेकोपुकीम परमप्रभु यावे कली ‘गो पाप पाइतक। गो परमप्रभु यावे कली प्रोंइतक। गो बाल देवता नु अशतारोथ माइश्शो मूर्ति पाइश्शो थाम कली पूजा पाइतक। मिनु मुल आंइ जोरी सत्रु आन गुइ रे प्रोनीन। मिनु गो इन कली ला ठेयब सेल्लनीकी’ देंमा बाक्त। गन्ती २१:७; यहोसु ७:२०; न्यायाधीस १०:१०; दानीएल ९:९-१९
 11 मिनु परमप्रभु यावेमी येरूब-बाल, बाराक, येफता नु सामुएल आन कली सोइक्ता बाक्त। मिनु मेकोपुकीमी इन एर ओंथ बाक्शो जोरी सत्रु रे प्रोन्मे बाक्त। मिनु गेपुकी थुं नाइश्शा, मारेइ मदुम्थु बाक्चा तशो बाक्तीनी। न्यायाधीस ६:१४, ३२; न्यायाधीस ४:६; न्यायाधीस ११:२९; १सामुएल ७:३ 12 तन्न गे अम्मोनी आन पिप नाहाश कली लडाइ पथ पिशो ताइतीनी। मिनु गेपुकीमी ‘परमप्रभु यावे, इन परमप्रभु इन पिप बाक्त हना यो, आंइ कली सासन पपाइक्चा कली पिप का गेने’ देंतीनी। १सामुएल ११:१-२; १सामुएल ८:१९ 13 मुल इन पुंडशो पिप एक बाक्ब। गेपुकीम एको कली माल्शा, योव्रतीनी। मिनु परमप्रभु यावेमी इन कली पिप का गेपु। 14 गेपुकीम परमप्रभु यावे कली मान पा हिंशा ठेयब सेल्लतीनी हना, मेको आ देंशो टीतीनी हना, इन कली सासन पाइब पिपमी यो परमप्रभु यावे, इन परमप्रभु आ नोले खोइक्तु हना, परमप्रभु यावे गेपुकी नु बाक्ब। 15 तन्न गेपुकीम परमप्रभु यावे आ देंशो ममिम्ताक्नी नु आ देंशो मटीतीनी हना, परमप्रभु यावेमी इन कली नु इन पिप कली यो प्रोंइब। न्यायाधीस २:१५

16 मोपतीके गे बाक्कीन। मिनु परमप्रभु यावेमी इन डोंइती मार ठेयब गेय पाइबा, मेको कोव्रडीन। 17 मुल चेरब रिक्की जाक्शो बाक्ब। मिनु गो परमप्रभु यावे कली रेउ नु बुंबु पुंडनुड। मिनु मेकोम बुंबु पपाइश्शा, रेउ यिपाइक्ब। मिनु गे परमप्रभु यावे आ डोंइती पिप पुंडशा, इन परमप्रभु यावे आ अरेशो लोव्र मटिशो ठेयब पाप बाक्ब, दे तुइक्नीनी” देंमाक्त। 18 मिनु सामुएलमी परमप्रभु यावे कली पुना बाक्त। मिनु मेकोमी मेको नाक्ती बुंबु पपाइश्शा रेउ यिपदा बाक्त। मिनु मुर नेल्ल परमप्रभु यावे नु सामुएल तशा, शुश हिंमा बाक्त।

19 मिनु मुर नेल्लेमी सामुएल कली “परमप्रभु यावे, इन परमप्रभु कली आंइ पबर्म ‘गो मबेक्कल’ दे पुनीन। मारदे हना आंइ मरिश्शो पशो ला ममाइ, आंइ कली पिप का माल्नीकी, दे आंइ मरिश्शो पतीक तेम्ताक्क” देंमा बाक्त। 20 मिनु सामुएलम मुर आन कली “महिनीन। गेपुकी मेको मरिश्शो नेल्ल पाइतीनी हना यो, परमप्रभु यावे आ नोले खोइक्चा मप्रोनीन। मिनु इन थुं नेल्लेम परमप्रभु यावे कली ठेयब सेलीन। 21 मो मपाइतीनी हना, गे शोर गाक्शो दुम्नीनी। मेकोम इन कली वारच मपाइब। श्येत रे यो मप्रोंइब। ब्यवस्था ३२:३७-३८; यसैया ४१:२९ 22 मारदे हना परमप्रभु यावेमी आ ठेयब नें आ पबर्म आ मुर आन कली कोव्रशा मप्रोंइब। परमप्रभु यावेमी इन कली आम आ मुर सेल्चा कली ग्येरसाक्व। प्रस्थान १९:६ 23 मिनु गो इन पबर्म पुंडचा प्रोंइचा यो परमप्रभु यावे आ डोंइती पाप बाक्ब। पुंडचा मप्रोंइनुड। गो इन कली रिश्शो नु ठीक लां शेंनुड। १सामुएल ७:८-९; उत्पत्ती १८:२३-३२; प्रस्थान ३२:११-१४, ३२ 24 मिनु परमप्रभु यावे कली मान पा हिनीन। इन थुं नेल्लेम थमा पा मेको कली ठेयब सेलीन। मेकोमी इन कली गिश ठेयब गेय पशो बाक्मे, मेको मिम्तीन। ब्यवस्था ६:१२-१५ 25 तन्न गे मेको तुइश्शा यो, मरिश्शो पाइतीनी हना, गेपुकी नु इन पिप मलीनीनी” देंमाक्त।

13

सावल पलिस्ती नु लडाइ पशो

1 सावल पिप दुम्मेनु, ३० बर्स खोदेशो दुम्शो बाक्माक्त। मेकोमी इस्राएल कली ४२ बर्स क्येडा शुश सासन पवा बाक्त। एको लोत्र मतुंडसीब। मारदे हना माइत हिब्रू किताबमी क्याम्सीशो बाक्माक्त। 2 सावलमी इस्राएल डा हजार सां मुर आन कली योत्रमी बाक्त। मिनु हजार निक्शी आं नु मिकमाशम नु बेथेल डा पहाडीम बाक्मा बाक्त। मिनु हजार का मुर योनाथन नु बेन्यामीन डा गिबाम बाक्मा बाक्त। लीशो मुर आन कली चहिं आन खिं सोइक्तीमी बाक्त। 3 मिनु योनाथनम गेबा डा पलिस्ती आन ठेयब मुर कली सदा बाक्त। मिनु मेको लोत्र पलिस्ती आन दातेमी ब्रमाक्त। मिनु सावलमी “हिब्रू नेल्लेम नेंन्मेक्ल” दे रागी नेल्लेमी तुराही ताप्पदा बाक्त। १सामुएल १४:४९ 4 मिनु सावलम पलिस्ती आन ठेयब मुर साइक्तीके, पलिस्तीपुकीम इस्राएली आन नें थिचा ग्रांग्रा दीनीम देशो नेंन्मे बाक्त। मिनु सावल कली वारच पा लडाइ पचा कली मुर नेल्ल गिल्गालमी ब्रेत्मे बाक्त।

5 मिनु पलिस्तीपुकी इस्राएली नु लडाइ पचा कली बुक्मा बाक्त। मेकोपुकी नु ३० हजार बग्गी, ६ हजार शारा डोइक्बपुकी नु समुन्द्र डा बाल्वा खोदेशो पा हिक्ने मचाप्चा डा पा खोइलीम गाक्ब लडाइ पाइब मुर बाक्मा बाक्त। मेकोपुकी इर गूशा, बेथ-आवेन आ पूर्व गे मिकमाशम आन बाक्तीके सेल्मे बाक्त। 6 मिनु इस्राएलीपुकीमी थम श्येत जामे बाक्त। मारदे हना लडाइ पाइबपुकी थाम्पा आइक्च सेल्चा पुंडसमा बाक्त। मोपतीके मेकोपुकी पुक्खी, काक्पे, सेरथे फुल्लु आन दातेम, बेक्शो मुर वोइक्तीके नु इनार आगाम खुंडसमा बाक्त। 7 का निक्शी हिब्रू यर्दन खोला शोक्शा, गाद आन रागी गिलाद जाक्दीम्मा बाक्त। तन्न सावल चहिं गिल्गाल उइ बाक्माक्त। मेको आ नोले खोइक्ब नेल्ले थाम्पा हिंशा खिंखि पामे बाक्त।

8 मिनु सावलमी सामुएल कली ७ नाक्त सम्म रिम्दा बाक्त। तन्न सामुएल गिल्गालमी मजाक्माक्त। मोपतीके मुरपुकी सावल आ बाक्तीक रे नोले शोंइसीमा बाक्त। १सामुएल १०:८ 9 मिनु सावलमी “चोशा चढेतीक नु दुशा बाक्चा आ पर्बम चढेतीक एक आं बाक्तीक चाक्कीन” देंमाक्त। मिनु आंमान चोशा चढेतीक चढेवा बाक्त। 10 सावलम चोशा चढेतीक चढेने थुमा नोले सामुएल जाक्माक्त। मिनु सावल मेको कली गुम्थ लमाक्त। 11 मिनु सामुएलमी “एको मार पवी” देंमाक्त। मिनु सावलमी “मुरपुकीम आं कली प्रोंइशा, लशो तातामी। इन जाक्नुड देशो ना मजाक्नी। पलिस्तीपुकी मिकमाशम बुक्तेक्म। 12 पलिस्तीपुकी गो नु लडाइ पथ गिल्गालम जाक्नीम, दे मिम्ताक्ड। गो परमप्रभु यावेम शिशी पवल, दे मपुनु। मोपतीके गो आंमान एको चोशा चढेतीक चढेचा माल्ताक्यी” देंमाक्त। 13 मिनु सामुएलमी सावल कली “गे मूर्ख गेय पाप्तीवी। परमप्रभु यावे, इ परमप्रभुमी शेंशो लोत्र मटिवी। गे टिशो नवे हना, परमप्रभु यावेमी इ राज्य इस्राएलमी गेना हना यो लीपद वा। 14 तन्न मुल इ राज्य मली। परमप्रभु यावेम आ दाक्शो मुर का योत्रतु। परमप्रभु यावेमी मेको कली आ मुर आन पिप सेल्ब। मारदे हना, गे परमप्रभु यावे आ लोत्र मटिवी” देंमाक्त। १सामुएल १६:१; प्रेरित १३:२२

15 मिनु सामुएल बोक्शा, गिल्गाल प्रोंइशा, बेन्यामीन आ गिबा गे खोदा बाक्त। लीशो मुरपुकी चहिं सावल आ नोले लडाइ पाइब दुम्चा कली खोदमे बाक्त। मिनु सावलमी मेको मुर आन कली हिक्गानु, मेको नेल्ल पा ६ सहे मुर बाक्मा बाक्त। 16 सावल, मेको आ तौ योनाथन नु मेको नु बाक्शो मुरपुकी नु बेन्यामीन आ रागी गेबाम लीमा बाक्त। पलिस्तीपुकी चहिं मिकमाशम आन बाक्तीक सेल्शा बाक्मा बाक्त। 17 मिनु पलिस्ती आन बाक्तीक रे रोइक्बपुकी हुल सां गूमा बाक्त। हुल का शुआल आ रागीम बाक्शो ओफ्रा गे लमा बाक्त। 18 अर्को हुल बेथ-होरोन गे लमा बाक्त। मिनु लीशो हुल चहिं डांडा गे लमा बाक्त। मेको डांडा रे सेबोयीम डा बेंसी गोरशो रागी तांडसीबाक्माक्त।

19 मेना इस्राएल रागीमी तुप्तील का यो मथिंसीबाक्माक्त। मारदे हना पलिस्तीपुकीम हिब्रू आन कली तरवार नु तूतीक सेल्चा मगेशो बाक्मा बाक्त। न्यायाधीस ५:८ 20 इस्राएलीपुकी आंम फाली, कोदाली, खा नु गुये शेप्थी यो पलिस्ती आन खिं लचा माल्बाक्मा बाक्त। 21 फाली का नु कोदाली का शेप्चा कली शेकेल का के भाग सांमी भाग निक्शी थाप्चा माल्बाक्मा बाक्त। खा नु ब्यफ खुल्तीक कोक्के शेप्चा कली शेकेल का के भाग सांमी भाग का थाप्चा माल्बाक्मा बाक्त। शेकेल का ११.५ ग्राम बाक्ब। मेको शेप्तीक गेय कली का का कली ३.५ ग्राम चांदी थाप्शो बाक्तेक्म। 22 मोपतीके लडाइ दुम्मेनु, सावल नु योनाथन नु बाक्शो लडाइ पाइब आन के तरवार नु तूतीक का यो मबाक्माक्त। तन्न सावल नु योनाथन आस के ला बाक्माक्त।

23 पलिस्तीपुकी मिकमाश डा लां मेर लमा बाक्त।

14

योनाथन पलिस्ती बाक्तीके लशो

1 काबु सावल आ तौ योनाथनमी, आ या कुरब कली “पिवो, गो लां खोइशशा, पलिस्ती आन बाक्तीक लस” देंमाक्त। तन्न मेकोमी मेको लोव आ आफ कली मशेंदा बाक्त। 2 मेना सावल गिबा सहर क्येडा लाडगा मिग्रोनम बाक्शो अनार रवा आ पुंमी बाक्शो बाक्माक्त। मेको नु ६ सहे मुर ला बाक्मा बाक्त। 3 मिनु परमप्रभु यावे कली चढेब एली आ तौ फिनेहास, फिनेहास आ तौ अहीतुब नु आ लोकब इकाबोद मेकेर बाक्मा बाक्त। अहीतुब आ तौ अहीयाह शिलोमी चढेब बाक्शा, निसाफ पतीक ऊरीम नु थुम्मीम बाक्शो झोला यो फेक्शो बाक्माक्त। मेको मुरपुकीमी योनाथन पलिस्ती आन बाक्तीके लशो, मतुइक्तमे बाक्त। २सामुएल ८:१७; १सामुएल ४:१९-२१ प्रस्थान २८:६-३० 4 मिनु योनाथन पलिस्ती आन बाक्तीक लतीक लांमी ठेयब सेरथे फुल्लु निक्शी बाक्सा बाक्त। का एर गे नु अर्को ओंथ गे बाक्सा बाक्त। का आ नें बोसेस नु अर्को आ नें सेनेह बाक्माक्त। 5 मेको का उत्तर मिकमाश गे नु का दक्खिन गेबा गे बोक्शो बाक्सा बाक्त। 6 योनाथनमी आ या कुरब कली “पिवो, गो मेको खोइक्तीक चिनु मखोइशशा आन बाक्तीक लस। परमप्रभु यावेमी वारच पाइबा, कों? परमप्रभु यावेमी शुश मुर बाक्तेक्म हना यो, इच्का ला बाक्तेक्म हना यो, इं कली प्रोंइने चाप्ब” दे मदा बाक्त। न्यायाधीस ७:७; २इतिहास १४:१० 7 मेको आ या कुरबमी “गे मार पचा दाक्नीनी, पने। गे मार पाइनीनी गो मेको वारच पाइनुड” देंमाक्त। 8 मिनु योनाथनमी “दुम्ब, गो आइक्ची गे लस। मिनु पलिस्ती आन कली तपांडसस। 9 मिनु मेकोपुकीमी इस कली ‘गो मजाक्का सम्म रिम्दीस’ देंतेक्म हना, गो मेकेर राप्शा बाक्स। गो मेको आन बाक्तीके मलस। 10 तन्न मेकोपुकीमी ‘आंइ बाक्तीक कुस जाक्कीन’ देंतेक्म हना, गो इर डोइशशा लस। मारदे हना परमप्रभु यावेम मेको आन कली इस गुइमी गेशो बाक्माक्त, दे तुइक्नस। मेको गो इस कली चिन्ड बाक्ब” देंमाक्त। 11 मोपतीके मेको निक्शी पलिस्ती आन कली तपांडससा बाक्त। मिनु पलिस्तीपुकीम “कोवडीन। हिबू आन खुइक्तीक पोवला रे गूमा बाक्त” देंमुमा बाक्त। 12 मिनु पलिस्तीपुकीमी योनाथन नु आ या कुरब आस कली “गो आंइ बाक्तीक गे डोइशशा कुस। गो इस कली मारेइ कोंइनीकी” देंमा बाक्त। मिनु योनाथनमी आ या कुरब कली “आं नोले कुवो। परमप्रभु यावेम मेको आन कली इस्राएली आन गुइमी जिम्मा गेशो बाक्त” दे मदा बाक्त। 13 मिनु योनाथन गुइ खोइल थेक्शा डोंइसे बाक्त। मिनु मेको या कुरब आ नोले कुमाक्त। मिनु मेको पलिस्ती योनाथन आ डोंइती गोल्ला बाक्त। मिनु मेको आ नोले जाक्ब आ या कुरबमी मेको आन कली सदा बाक्त। 14 मेको डोंइती डा लडाइमी योनाथन नु आ या कुरबम २० जना खोइ सदसे बाक्त। मेको साइक्तीके रू ४ रोपानी खोदेशो पा दिंम का बाक्माक्त। 15 मिनु नोले पलिस्तीपुकी शुश हिंमा बाक्त। मिनु लाडगा मेर बाक्ब मुर नु अरु मुर नेल्ल खिखि पा हिंमा बाक्त। आन ठेयब मुर नु रोइक्ब नेल्ल शुश हिंमा बाक्त। मिनु खिनु कुशा ठेयब खल्बल दुम्माक्त। १सामुएल ७:१०

16 मिनु बेन्यामीन आ गिबाम खाल पाइब सावल आ मुरपुकीम पलिस्ती आन हुल खल्बल पा एर ओंथ दोरशो तामे बाक्त। 17 मिनु सावलमी सु सु मबाक्मा, दे हिक्पाइक्मी बाक्त। मिनु मेकोपुकीमी योनाथन नु आ या कुरब मबाक्शो तुइक्तमे बाक्त। 18 मिनु सावलमी अहीयाह कली “परमप्रभु आ कबल पशो सन्दोस एक चाक्को” देंमाक्त। मेना परमप्रभु आ कबल पशो सन्दोस इस्राएलीपुकी नु बाक्माक्त। १सामुएल २१:१० 19 मिनु सावलम लोव पन पना पलिस्ती आन बाक्तीक डा खल्बल ठेयब दुम्ना दुम्न लमाक्त। मिनु मेकोमी चढेब कली “याम का रिम्दो” देंमाक्त। 20 मिनु सावल नु आ मुरपुकी रेयके पना पन लडाइ पतीक गे लमा बाक्त। मेना आन जोरी सत्रु ब्रशा आंम आंमा साइक्मुशो तामे बाक्त। न्यायाधीस ७:२२; २इतिहास २०:२३ 21 मेना सम्म हिबूपुकी पलिस्ती नु बाक्मा बाक्त। मेकोपुकीमी यो पलिस्ती आन बाक्तीकेम बाक्शा यो, इस्राएली आन गे लशा सावल नु योनाथन आस कली वारच पदमे बाक्त। 22 एफ्राइम आ पहाडीम बाक्शो प्रोक्शो इस्राएलीपुकीमी पलिस्ती प्रोक्शो लोव नेंमे बाक्त। मिनु मेकोपुकी यो गारशा पलिस्ती आन कली खेदा पामे बाक्त। 23 मेको नाक्ती परमप्रभु यावेमी इस्राएली आन कली ग्रापदा बाक्त। मिनु मेको लडाइ बेथ-आवेन आ आइक्ची सम्म दुम्माक्त। सावल आ लडाइ पाइब १० हजार खोइ दुम्मा बाक्त। मेको लडाइ एफ्राइम डा पहाड नेल्लेम दुम्माक्त।

24 मेको नाक्ती सावलमी ममिम्थु, गेय पवा बाक्त। मेकोमी मुर आन कली “गो आं जोरी सत्रु आन कली क्येक्क लेन्ने मथुमु सम्म, सुम नाक्दो दुम्चा क्येडा डोंइती जाइबा, मेको सराप रल” देशा कसम जपाइक्मी बाक्त। मोपा मेको नाक्ती इस्राएली थाम्पा दशो बाक्मा बाक्त। सुइमी मारेइ मजामे बाक्त। 25 मिनु मेकोपुकी ब्वाकीम जाक्मानु, सुरब खुदो चाका तामे बाक्त। 26 तन्न मेकोपुकीम मेकेर खुदो याप्शो तशा यो, कसम जतीके सुइमी खुदो थिसीन मथीमे

बाक्त। 27 तन्न आ आफोम मुर आन कली कसम जपाइशो नु मजचा देशो योनाथनमी मनेशो बाक्माक्त। मेकोमी आ गुइमी बाक्शो कोक्के दिशा, मेको आ डरीमी थोक्शा तुक्गा बाक्त। मिनु आ सक्ति बारमाक्त। 28 तन्न लडाइ पाइब कामी मेको कली “इन आफोमी मो पचा मदुम्ब देशो बाक्ब” देंमाक्त। मेकोमी “मुलाक्त जचा थोव्रक जाइब सराप रल देशो बाक्ब” देंमाक्त। मुरपुकी चहिं शोव्रलुम बेक्चशो बाक्मा बाक्त। 29 मिनु योनाथनमी “आं आफोमी मुर आन कली श्येत गेतीक गेय डा लाक्शा अरु मपशो बाक्ब। कोव्रडीन गो एको खुदो थाम्शा दोशो सक्ति पाइशो दुम्डा। 30 मुरपुकीम जोरी सत्रु रे रोइशो मार मार जचा तशो नम हना, गिश रिम्शो दुम वा। पलिस्ती आन कली यो शुश साइक्ने चबेम वा” देंमाक्त।

31 मेको नाक्ती मेकोपुकीम पलिस्ती आन कली ग्रामा बाक्त। मिनु मेको आन कली मिकमाश रे आइयालोन सम्म खेदा पामे बाक्त। मिनु मोपा लडाइ पाइबपुकी शुश दमा बाक्त। 32 तन्न मुरपुकी शोव्रलुम बेक्चा चिक्शा, मार मार रोइक्चा गोव्रमे बाक्त। मोपा भेडा बी ब्यफ नु बाछा ग्याइक्तमे बाक्त। मिनु खपीमीन साइशशा हुश सुन्दा ब्वामे बाक्त। लेवी ३:१७ 33 मुरपुकीम हुश सुन्दा श्ये ब्वशा “परमप्रभु यावे कली पाप पाम्तेक्म” दे मुरुमी सावल कली शेंदमे बाक्त। मिनु सावलमी “एको दा थम मरिम्शो दुम्त। ठेयब फुल्लु का लोक्शा एक चाक्कीन” देंमाक्त। 34 मिनु सावलमी मेको मुर कली “मुर आन दातेमी लशा ‘ग्याइशो ब्यफ नु भेडापुकी एक चाक्शा ब्वामेक्ल। मिनु हुश सुन्दा ब्वशा परमप्रभु यावे कली पाप मपामेक्ल’ देनो” देंमाक्त। मिनु मेको नाक्दो आन ग्याइशो ब्यफ खुल्शा जाक्शा मेकेर सदमे बाक्त। 35 मोपा सावलमी परमप्रभु यावे कली चढेतीक का सेला बाक्त। मेको सावलम परमप्रभु यावे कली सेल्शो नेल्ल क्येडा डोंइती डा चढेतीक बाक्माक्त।

36 मिनु सावलमी “मुल गो उइ लशा पलिस्ती आन कली नाक्दो लडाइ तोय। मिनु नां सोव्रम सम्म मेको आन मारेइ मारेइ रोइक्तय। मेको आन कली का यो महेंदय” देंमाक्त। मिनु मुरपुकीम “गे मार पचा दाक्नीनी मेको पने” देंमा बाक्त। मिनु चढेबमी “गो डोंइती परमप्रभु नु सल्ला पय” देंमाक्त। 37 मिनु सावलमी परमप्रभु कली “मार गो पलिस्ती आन कली खेदा पका? गे मेको आन कली इस्राएली आन गुइमी गेनीनी?” दे हिल्लो पवा बाक्त। तन्न परमप्रभुमी मेको कली मारेइ लोव्र मलेत्ता बाक्त। १सामुएल १४:१८; १सामुएल २३:९-१२ 38 मिनु सावलम “इस्राएल डा ठेयब मुर नेल्ल आं डोंइती जाक्कीन। मिनु मुलाक्त मार पाप दुम्मे तुइक्चा माल्ताक्व। 39 परमप्रभु यावे ब्रोंइशा बाक्शो खोदेशो पा नु इस्राएल श्येत रे प्रोंइब, गो मेको आ नेम कसम जशा देंनुड, आं तौ योनाथनम मेको पाप पशो बाक्त हना यो, मेको कली साइक्चा माल्ब” देंमाक्त। मिनु सुइमी मेको कली लोव्र मलेत्ते बाक्त। 40 मिनु मेकोम इस्राएली नेल्ल आन कली “गे नेल्ल का पटटी बाक्कीन। गो नु आं तौ योनाथन का पटटी बाक्नुस्कु” देंमाक्त। मिनु मुरपुकीम “गे मार पचा दाक्नीनी मेकोन पने” देंमा बाक्त। 41 मिनु सावलमी परमप्रभु यावे, इस्राएली आन परमप्रभु कली “मुलाक्ती गे इन गेय पाइब कली मारदे लोव्र मलेत्तीनी? मेको दोस गो नु आं तौ योनाथन नु बाक्त हना यो, तुइक्पतीन” देंमाक्त। परमप्रभु यावे, इस्राएली आन परमप्रभु गे ऊरीम कोइदीन। तन्न इन मुर दोस ताइब बाक्नीम हना, थुम्मीम कोइदीन। मिनु मेको मो पामे नोले योनाथन नु सावल आस नेम ग्रूमाक्त। मुरपुकी चहिं ब्रोंइमा बाक्त। १सामुएल २८:६; प्रस्थान २८:३०; गन्ती २७:२१; ब्यवस्था ३३:८ 42 मिनु सावलमी “गो नु आं तौ योनाथन आंस दातेमी ऊरीम आपीन” देंमाक्त। मिनु योनाथन आ नेम ग्रूमाक्त।

43 मिनु सावलमी योनाथन कली “गे मार पवी आं कली देनो” दे हिल्लो पवा बाक्त। मिनु योनाथनमी “थमा पा गो आं कोक्के आ डरीमी इक्का खोइ खुदो थाम्ता। गो एक बाक्ती, गो बेक्चा कली ठीक बाक्नुड” देंमाक्त। यहोसु ७:१९ 44 मिनु सावलमी योनाथन बेक्चान माल्ब, दे कसम जवा बाक्त। 45 तन्न मुरपुकीम सावल कली “मार, योनाथन सांइसीबा? मेको योनाथनमी ओमो ठेयब गेय पा इस्राएल कली मग्रापदा? मोदेशो मदुम्ल। गेना हना यो ब्रोंइशा बाक्ब परमप्रभु यावे आ नेमी गो कसम जशा देंनीकी, मेको के चां का यो महेम्ल। मारदे हना मेकोम मुलाक्ती परमप्रभु नु गेय पशो बाक्ब” देंमा बाक्त। मोपा मुरपुकीम योनाथन कली प्रोन्मे बाक्त। मिनु मेको मसांइसे बाक्त। 46 मिनु सावलमी पलिस्ती आन कली खेदा पचा प्रोना बाक्त। मिनु पलिस्ती आन खिं लेम्मा बाक्त।

सावल आ राज्य डा लोव्र

47 मिनु सावलमी इस्राएलमी आ सासन पतीके बोल्यो सेल्ले थुमा बाक्त। मिनु मेकोमी मोआबी, अम्मोनी, एदोमी, सोबाह डा पिपपुकी नु पलिस्ती आंम एर ओंथ डा जोरी सत्रु नु लडाइ पवा बाक्त। मेकोपुकी ते ते लमा मेक मेक ग्रामा बाक्त। 48 मेकोमी अमालेकी आन कली ग्रामा बाक्त। मिनु इस्राएली आन कली रोइक्ब हुल आन रे प्रोना बाक्त।

49 सावल आ तौपुकी योनाथन, इश्वी नु माल्कीशुआ बाक्मा बाक्त। मेको आ डोंइती जरमेशो तमी आ नें मेराब नु अर्को के मिकाल बाक्माक्त। १इतिहास ९:३९ 50 मेको आ मीश चहिं अहीमाज आ तमी अहीनोआम बाक्माक्त। मेको आ लडाइ पाइब आन कप्तान मेको आ बकान्छा नेर आ तौ आब्नेर बाक्माक्त। १सामुएल १७:५५ 51 सावल आ आफ कीश नु आब्नेर आ आफ नेर अबीएल आ तौ बाक्सा बाक्त। १इतिहास ९:३६, ३९

52 सावल आ पालाम पलिस्तीपुकी नु लडाइ दुम्स डा दुम्स दुम्माक्त। मेकोमी आ थिश्शो बोल्यो नु सक्ति पाइश्शो मुर आ गेय पचा कली लाइक्बाक्माक्त।

15

सावलम अमालेकी आन कली ग्राशो

1 मिनु सामुएलम सावल कली “परमप्रभु यावेम इ कली आ मुर इस्राएली आन पिप सेल्शा तेल लुक्चा, दे आं कली सोइक्ताकयी। मोपतीके परमप्रभु यावे आ लोत्र नोफा दाइश्शा नेनो। १सामुएल १०:१ 2 मुर नेल्ल आन परमप्रभु यावेमी मार देंत, देंशा हना ‘इस्राएली इजीप्त रे गूशा पिमानु, अमालेकीपुकीम मेको आन कली लडाइ तोम्तेक्म। मोपतीके अमालेकी आन कली थमा पा सजाइ गेनुडमी’ देंत। प्रस्थान १७:८-१६; ब्यवस्था २५:१७-१९ 3 अमालेकी आन कली लडाइ तोशा, मेको आन कली सतीन। मेको आन शोंप नेल्ल खतम पोक्कीन। मारेइ मप्रोनीन। नेल्ल आन कली खतम पोक्कीन। मेको आन मीश मुर, वोंइश मुर, मीश आल, वोंइश आल, दूध तूब आल, बी ब्यफ, क्यारश भेडा, दलओंठ नु गधा नेल्ल आन कली खतम पोक्कीन” देंमाक्त।

4 मिनु सावलमी मुर नेल्ल आन कली तेलाम बाक्तीकेम जाक्चा कली ब्रेश्शो बाक्त। मेकेर लाख निक्शी खोइलीम गाक्ब लडाइ पाइब नु यहूदा डा १० हजार लडाइ पाइब बाक्मा बाक्त। 5 मिनु सावल अमालेक आ सहरमी जाक्माक्त। मिनु मेकेर बेंसीम बाप्शा, इच्का नाक्त बाक्मा बाक्त। 6 मेना सावलम केनी डा मुर आन कली “अमालेकी आन कली प्रोंइशा उइ यिने, दे लोत्र सोइक्ता बाक्त। मो मपाइतीनी हना, गो इन कली नु मेको आन कली खतम पोक्नुड। मारदे हना इस्राएली इजीप्त रे गूशा पिमानु, गेपुकीमी वारच पाइश्शो ननी” देंमाक्त। मोपतीके केनी डा मुरपुकी अमालेकी आन कली प्रोंइशा, उइ ब्रुम्मा बाक्त। न्यायाधीस १:१६ 7 मिनु सावलमी हवीलाह रे इजीप्त डा पूर्ब डा सांद शुर सम्म डा अमालेकी आन कली साइक्मी बाक्त। 8 तन्न मेकोमी अमालेकी आन पिप अगाग कली सेसीन ग्याइक्ता बाक्त। अरु नेल्ल आन कली तरवारम सदमे बाक्त। 9 सावल नु मेको आ लडाइ पाइबपुकीमी पिप अगाग आ रिम्शो भेडापुकी, बी ब्यफ, दोम्शो बस्तु भाव, पाठापुकी नु वोइक्चा डा मारेइ मारेइ प्रोंइशा वोदमे बाक्त। मेकोपुकीम मेको आन कली खतम पोक्चा मदाक्तमे बाक्त।

परमप्रभुमी देंशो सावलम मटिशो

10 परमप्रभु यावेमी सामुएल कली 11 “गो बिच्चीम ला सावल कली पिप सेलु बाक्त। मारदे हना मेकोमी आं नोले खोइक्चा प्रोंइतु। मिनु आं देंशो मटीव” देंमाक्त। मिनु सामुएल गाइश्शा नाक्दो रे परमप्रभु यावे कली पुंइना पुंइन बाक्माक्त। उत्पत्ती ६:६ 12 मिनु सामुएल सुनी कना बोक्शा सावल कली गुम्थ लमाक्त। तन्न मुरुमी “सावल कारमेल लत” दे मेको कली नेंपदमे बाक्त। सावलम आंम कली मिम्तमेक्ल, दे आंम के मूर्ति का सेल्शा, गिल्गालम ब्रुम्ने थुम्शो बाक्माक्त। यहोसु १५:५५ 13 मिनु मेकोमी सावल कली गुमा बाक्त। मिनु सावलम मेको कली “परमप्रभु यावे आ आसीक इन नु बाक्ल। गो परमप्रभु यावे आ देंशो टीता” देंमाक्त। 14 तन्न सामुएलम मेको कली “आं नोफाम नेंशो भेडा नु बी ब्यफ आन ग्रीशो चहिं मारम” दे हिल्लो पवा बाक्त। 15 मिनु सावलमी “मुरपुकीम मेको अमालेकी रे चाक्शो नम। मुरपुकीम भेडा नु बी ब्यफ रे रिम्शो चहिं परमप्रभु यावे, इन परमप्रभु कली चोशा चढ़ेचा कली प्रोंइशा वोइक्तेक्म। लीशो आन कली गो नेल्ल साइक्तक” देंमाक्त। 16 मिनु सामुएलम सावल कली “मोक्ल दुम्त। सिनाक्दो परमप्रभु यावेम मार देंमे, मेको गो इ कली शेंनन” देंमाक्त। मिनु सावलमी “देनीन” देंमाक्त। 17 मिनु सामुएलमी “डोंइती गे आंमा कली आंमान शोर गाक्शो मुर मिम्शो ननी। तन्न मुल गे इस्राएली आन पिप बाक्नीनी। परमप्रभु यावेमी इन कली तेल लुक्शा इस्राएल डा पिप सेलु। १सामुएल ९:२१ 18 परमप्रभु यावेम इन कली मेको पाप पाइब अमालेकी आन कली खतम पोक्चा, दे थमा पा देंशा सोइश्शो बाक्त। मेको आन कली काइ मवोइक्थु मसाइक्नी सम्म गे लडाइ पस डा पस बाक्चा माल्शो ननी। 19 गे मारदे परमप्रभु यावे आ देंशो मटिनी? गे मारदे रोइश्शो मार मार ताक्नी? मिनु परमप्रभु यावे आ डोंइती मार मरिम्शो बाक्मे, मेको पनी” देंमाक्त। 20 तन्न सावलमी सामुएल कली “गो परमप्रभु यावे आ देंशो टीता। गो परमप्रभु यावेम सोइश्शो रागी लती। मिनु अमालेकी आन पिप

अगाग कली ग्याइशशा चाक्ता। गो आ मुर नेल्ल आन कली खतम पोक्तामी। 21 मुरपुकीम रोइशशो मार मार भेडा नु बी ब्यफ नु रिम्शो थोव्रक गिल्गालम परमप्रभु यावे, इन परमप्रभु कली चढेचा कली वोइशशो बाक्नीम” देंमाक्त।

22 मिनु सामुएलमी “परमप्रभु यावेमी चोशा चढेशो नु अरु चढेशो क्येडा आ देशो टिशो दाक्ब। थमा पा, चढेशो क्येडा आ देशो टिचा रिम्शो बाक्ब। मिनु सांड आ बोसो चढेचा क्येडा आ देशो टिचा रिम्शो बाक्ब। यसैया १:११-१७; येरमीया ७:२२; होसे ६:६; आमोस ५:२१-२२; मीका ६:६-८; जकरिया ७:५-७; मत्ती ९:१३; मत्ती १२:७ 23 मेको आ देशो मटिचा लिंक्यु कोव्रचा खोदेशो पाप बाक्ब। मटिचा हेथे पतीके मूर्ति पूजा पशो खोदेशो बाक्ब। मारदे हना गे परमप्रभु यावे आ देशो टिचा प्रोंइतीनी। मेकोम इन कली यो पिप सेल्टीक रे प्रोंइशो बाक्ब” देंमाक्त। १सामुएल १६:१ 24 मिनु सावलम सामुएल कली “गो पाप पाता। परमप्रभु यावे आ देशो नु इन लोव्र ममिम्तु। मारदे हना गो मुर आन क्येडा हिंती। मिनु मुर आन देशो टीता। 25 तन्न गो मुल आं पाप माफ तडल, दे पुंडनुड। गो नु जाक्कीन। मिनु गो परमप्रभु यावे कली ठेयब सेल्लुड” देंमाक्त। 26 मिनु सामुएलमी “गो गे नु मलेत्नुड। गे परमप्रभु यावे आ देशो प्रोंइतीनी। मिनु परमप्रभु यावेमी यो इन कली इस्राएल डा पिप दुम्तीक रे प्रोंइतु” देंमाक्त। 27 मिनु सामुएल गाक्चवानु, सावलम आ वा आ सुर ग्याइक्ता बाक्त। मिनु मेको गाक्माक्त। 28 मिनु सामुएलम मेको कली “मुलाक्त रे परमप्रभु यावेम इस्राएल डा राज्य खाक्शा अर्को कली गेप्टु। इन नेक्था डा, इन क्येडा रिम्शो मुर का कली गेप्टु। १सामुएल २८:१७ 29 परमप्रभु यावे इस्राएल डा मान ताइब बाक्ब। मेकोमी आ लोव्र मफाइक्ब। आ थुं यो मफाइक्ब। मेको थुं फाइक्ब बेक्शा लाइब मुर खोदेशो ममाइ” देंमाक्त। गन्ती २३:१९ 30 मिनु सावलमी “गो पाप पाता। मो हना यो खूशो नु इस्राएली आन डोंइती आं मान ततीक गेने। गो नु लेतीन। मिनु गो परमप्रभु यावे, इन परमप्रभु कली ठेयब सेल्लुड” देंमाक्त। 31 मोपतीके सामुएल सावल नु लेशशा लमाक्त। मिनु सावलमी परमप्रभु यावे कली ठेयब सेला बाक्त।

32 मिनु सामुएलमी “अमालेकी आन पिप अगाग कली एक चाक्कीन” देंमाक्त। मिनु अगाग ओंखां पा गाक्शा, मेक जाक्माक्त। मिनु अगागमी “थमा पा, एको बेक्चा डा श्येत बाक्ब” देंमाक्त। 33 मिनु सामुएलमी “दोपा इ तरवारम मीश मुर आन कली आल मपाइशशो सेला, मोपा इ ममा यो मीश मुर आन दातेमी आल मपाइशशो दुम्ब” देंमाक्त। मिनु सामुएलमी अगाग कली परमप्रभु यावे आ डोंइती गिल्गालम क्योरशा सदा बाक्त। 34 मिनु सामुएल रामाहम लमाक्त। सावल चहिं आ खिं गिबा लमाक्त। 35 मिनु सामुएल मबेक्म सम्म गेनायो सावल कली गुम्थ मलमाक्त। तन्न परमप्रभु यावेम “सावल कली बित्चीम ला इस्राएल डा पिप सेलु बाक्त” देशो, मिम्शा सुर्ता पस डा पस बाक्माक्त।

16

सामुएलम दाऊद कली पिप सेल्लो

1 परमप्रभु यावेमी सामुएल कली “गे सावल आ पर्बम गेना सम्म सुर्ता पा बाक्नेवे? गो मेको कली पिप दुम्तीक रे गुंडताक्ड। मुल गे नु बाक्शो ग्रोव्रमी तेल कुर पा लतो। गो इ कली बेथलेहेम डा येस्से आ बाक्तीक सोइक्नन। मारदे हना, गो मेको आ तौ का कली पिप सेल्ला कली योव्रता” देंमाक्त। १सामुएल १५:२३, ३५ 2 मिनु सामुएलमी “गो दोपा लने चाप्नुडा? एको लोव्र सावलम नेंशा, आं कली साइक्ब” देंमाक्त। मिनु परमप्रभु यावेम “गे मगिक्शो बी का लतो। मिनु परमप्रभु यावे कली क्योरशा चढेथ जाक्त, देनो। 3 येस्से कली यो मेको चढेतीक चाडम ब्रेत्तो। मिनु गे मार पचा माल्नेवे गो शेंनन। गो सु कली कोंइनुडा मेको कली गे तेल लुक्तो” देंमाक्त। 4 मिनु सामुएलमी परमप्रभु यावे आ देशो खोदेशो पवा बाक्त। मेको बेथलेहेम लमाक्त। मिनु सहर डा खूशोपुकी खिंखि पा गुम्थ जाक्शा, मेकोपुकीमी “गे मारदे जाक्नी? मार, नेल्ल रिम्शोन बाक्बा” देंमा बाक्त। 5 मिनु सामुएलमी “नेल्ल रिम्शोन बाक्ब। गो परमप्रभु यावे कली चढेथ जाक्ती। गेपुकी आंम कली ठीक सेल्लसीशा, चढेतीकेम जाक्कीन” देंमाक्त। मिनु मेकोम चहिं येस्से नु आ तौ आन कली परमप्रभु यावे आ डोंइती ठीक सेल्ला चढेतीकेम ब्रेत्तीमी बाक्त।

6 मिनु मेको नेल्ल जाक्मा नोले सामुएलमी एलीआब कली तशा “परमप्रभु यावेम तेल लुक्चा देशो मुर एकोन बाक्ब” दे मिम्ता बाक्त। 7 तन्न परमप्रभु यावेम मेको कली “मेको दारशो नु लाइशशो बाक्त हना यो, मेको कली ममिम्तो। गो मेको कली पिप मसेल्लुड। गो, परमप्रभु यावेम मुरुम खोदेशो पा मकोव्रनुड। मुरुम रां दारशो कोव्रशा मिम्नीम। गो मुर आ थुं कोव्रनुड” देंमाक्त। येरमीया १७:१०; प्रकाश २:२३; प्रेरित १०:३४ 8 मिनु येस्सेमी अबीनादाब कली ब्रेत्ता बाक्त। मिनु सामुएल आ डोंइती गाक्पदा बाक्त। तन्न मेकोमी “ममाइ, परमप्रभु यावेम योव्रशो एको ममाइ” देंमाक्त। 9 मिनु येस्सेमी शम्माह कली चाक्गा बाक्त। तन्न सामुएलमी “परमप्रभु यावेम एको कली यो मयोव्रड” देंमाक्त। 10 मोपा येस्सेमी आ ७ जना तौ आन कली सामुएल आ डोंइती चाक्मी बाक्त। तन्न सामुएलमी “एको

तेकोइ आन कली परमप्रभु यावेम मयोव्रमी” देंमाक्त। १इतिहास २:१३-१५; १सामुएल १७:१२ 11 मिनु सामुएलमी “मार इ तौ नेल्ल ओशोन नमी” देंमाक्त। मिनु येस्सेमी “मुल यो कान्छा का नु बाक्ब। तन्न मेको दा भेडा गोठला बाक्ब” देंमाक्त। मिनु सामुएलम येस्से कली “मेको कली ब्रेथ सोइक्तो। मेको मजाक्म सम्म गो मनित्थु बाक्नय” देंमाक्त। १सामुएल १७:१४ 12 मोपतीके मेकोमी मेको कली ब्रथ मुर सोइक्ता बाक्त। मेको लल चोव्रचो पाइश्शो, दारशो मिक्च पाइश्शो नु दारशो ठिटा का बाक्माक्त। मिनु परमप्रभु यावेम सामुएल कली “बोक्शा, मेको कली तेल लुक्तो। एकोन बाक्ब” देंमाक्त। 13 मिनु सामुएलमी तेल बाक्शो ग्रोव्र गुंइशा, आ लोकब आन डोंइती तेल लुक्ता बाक्त। मिनु परमप्रभु यावे आ सोक्त दाऊद तार जुक्ता बाक्त। मिनु मेना रे मेको नुन बाक्माक्त। मिनु सामुएल रामाह डा लां खोदा बाक्त। २सामुएल २:४; २सामुएल ५:३; भजन संग्रह ८९:२१

दाऊद सावल आ या कुरब दुम्शो

14 मिनु परमप्रभु यावे आ सोक्तीम सावल कली प्रोना बाक्त। परमप्रभु यावे रे मरिम्शो पाइब सोक्तीम मेको कली श्येत गेवा बाक्त। 15 मेको आ गेय पाइबपुकीम सावल कली “कोव्रडीन हजुर, परमप्रभुमी इन कली श्येत गेब सोक्त गेशो बाक्ब। 16 इन डोंइती बाक्शो इन गेय पाइब आन कली इन पबर्म बीना ताप्ब का माल्शा चाक्कीन, दे मारदे मदेनी? परमप्रभु रे मेको मरिम्शो पाइब सोक्तीम इन कली सुम्ब। मेना मेको मुरुम बीना ताप्ब। मिनु गे सानीनी” देंमा बाक्त। 17 मिनु सावलमी आ गेय पाइब आन कली “रिम्शो बीना ताप्ब मुर का मालीन। मिनु मेको कली आं बाक्तीक चाक्कीन” देंमाक्त। 18 मिनु मेको आ गेय पाइब आन दाते डा काम “बेथलेहेम डा येस्से आ तौ आन दातेमी, काम ताप्शो गो नेंशो बाक्नुड। मेको बोल्यो मुर बाक्ब। मिनु रिम्शो लडाइ पाइब, निप्स खाप्शा ब्वाक्ब नु दारशो यो बाक्ब। परमप्रभु यावे मेको नु बाक्शो बाक्ब” देंमाक्त। 19 मोपतीके सावलमी लोव्र कुरब मुर कली येस्से आ बाक्तीक सोइक्ता बाक्त। मिनु मेकोम आ भेडा योव्रब तौ दाऊद कली सावल आ बाक्तीक सोइक्तीक हुकुम पवा बाक्त। 20 मिनु येस्सेमी कुशुल के थैलो का शांबु, पाठा का इच्का खोइ शोब्ले कुर पा नु आ तौ दाऊद कली सावल आ बाक्तीक सोइक्ता बाक्त। 21 मिनु दाऊद सावल आ बाक्तीक जाक्माक्त। मिनु मेको आ गेय पतीकेमी योव्रसे बाक्त। सावलम मेको कली थाम्पा दाक्चा गोवा बाक्त। मिनु मेको सावल आ या कुरब दुम्माक्त। 22 मोपतीके सावलम येस्से कली “दाऊद आं गेयमीन बाक्ल। मारदे हना गो मेको तशा ग्येरसाक्यी” दे लोव्र कुरब सोइक्ता बाक्त। 23 मिनु परमप्रभु रे मरिम्शो श्येत गेब सोक्त सावल तार जुक्तानु, दाऊदमी बीना ताप्बाक्माक्त। मिनु मरिम्शो पाइब सोक्तीम प्रोंइशा लमेनु, सावल साबाक्माक्त।

17

दाऊद नु गोल्याथ

1 पलिस्तीपुकीम लडाइ पचा कली आन लडाइ पाइब आन कली खुप्तमे बाक्त। मिनु यहूदा डा सोकोहम बुक्मा बाक्त। मेकोपुकीमी सोकोह नु आजेका आस दाते एफेस-दाम्मीम आन बाक्तीके सेल्मे बाक्त। यहोसु १५:३५ 2 सावल नु इस्राएलीपुकी यो गुम्शा एलाह डा दिंम आन बाक्तीके सेल्मे बाक्त। मेकोपुकी पलिस्ती आन डोंइती लहर पा राम्मा बाक्त। 3 पलिस्तीपुकी डांडा का नु इस्राएलीपुकी अर्को डांडा पा बाक्मा बाक्त। मेको आन दातेमी दिंम का बाक्माक्त। 4 मिनु पलिस्ती आन बाक्तीक रे गाथ डा गोल्याथ नें पाइश्शो बोल्यो लडाइ पाइब का गूशा, पिमाक्त। मेको ६ कुबीत ३ इन्च लाइश्शो बाक्माक्त। कुबीत का ०.५ मिटर बाक्ब। यहोसु ११:२२ 5 मेको आ पियामी कांसा के टोपी बाक्माक्त। ५ हजार शेकेल डा कांसा के फेक्तीक फेक्शो बाक्माक्त। शेकेल का ११.५ ग्राम, तोला का खोदेशो बाक्ब। 6 मेको आ खोइलीम कांसा के मुइक्तीक मुइश्शो बाक्माक्त। मेको आ बलाम ठेयब कांसा के या कुरशो बाक्माक्त। 7 मेको आ तूतीक आ ग्याइक्तीके वा प्रोव्रब आन शी खोमो बाक्माक्त। मेको आ तूतीके फलाम के बाक्माक्त। मेको ६० शेकेल डा बाक्माक्त। मेको आ या कुरब मेको आ डोंइडोंइती गाक्बाक्माक्त। शेकेल का ११.५ ग्राम बाक्ब। मेको या ६९० ग्राम बाक्त। १इतिहास ११:२३ 8 मेको मुर राप्शा, इस्राएल डा मुर नेल्ल आन कली ठेयब सेंदा पा “ए सावल आ गेय पाइबपुकी, गेपुकी मारदे लडाइ पथ जाक्नीनी? गो पलिस्ती नड। गो नु लडाइ पचा कली इन मुर योव्रडीन। मिनु लडाइ पथ पिन। गे सावल आ गेय पाइब मननी डा? 9 आ कान लडाइ पा मेकोम आं कली साइक्ने चाप्ती हना, गो इन वाइल दुम्नीकी। तन्न गो मेको कली ग्राती हना, गेपुकी आंइ वाइल दुम्शा, आंइ गेय पचा माल्नीनी” देंमाक्त। 10 मिनु लेंशा “गो मुलाक्ती इस्राएल डा लडाइ पाइब आन कली आइक्च मिम्नुड। मुर

का सोइक्तीन। मिनु गो लडाइ पाइक्नस्कु” देमाक्त। २राजा १९:१६; भजन संग्रह ७४:१८; सेफन्याह २:८ 11 मिनु सावल नु इस्राएलीपुकी मेको पलिस्ती आ देशो नेशा, थाम्पा हिंमा बाक्त।

12 दाऊद बेथलेहेम, एफ्राथाह सहर डा यहूदा डा येस्से माइशो आ तौ बाक्माक्त। मेको येस्से के ८ जना तौ बाक्मा बाक्त। सावल आ पालाम मेको खाल्पा बाक्माक्त। १सामुएल १६:१-११ 13 येस्से आ तौ, जेठा, माइला नु साइला लडाइ पचा कली सावल आ नोले खोइशो बाक्मा बाक्त। मेको जेठा एलीआब, आ माइला अबीनादाब नु आ साइला शम्माह बाक्मा बाक्त। 14 दाऊद चहिं कान्छा बाक्माक्त। मेको ठिटा सां चहिं सावल आ नोले खोइशो बाक्मा बाक्त। 15 मेना दाऊद सावल आ बाक्तीके नु बेथलेहेम आ आफ आ क्यारश भेडापुकी कोव्रचा कली एर ओंथ पाइक्बाक्माक्त।

16 मेको पलिस्ती ४० नाक्त सम्म नाक्दो सुनी आन डोंइती जाक्शा आ राप्तीकेम राप्बाक्माक्त।

17 काबु नाक्ती येस्सेमी आ तौ दाऊद कली “इ लोकब आन कली एको ४ पाथी तांब्रा नु १० ओटा शोब्ले लाइशशा रीब पा चोव्रथ लावो। 18 एको १० ओटा दूध के सेल्शो जचा थोव्रक चहिं आन हजार का मुर आन कप्तान कली लतो। इ लोकबपुकी दोदेशो पा बाक्मा कोव्रडो। मिनु मेको आन रे मारेइ चिनु कुरशा जाक्को” दे मदा बाक्त।

19 मेना सावल, दाऊद आ लोकब सां नु इस्राएली नेल्ले एलाह डा दिंमम पलिस्ती नु लडाइ पना पन बाक्मा बाक्त। 20 मिनु आ दीसा सुनी कना दाऊद आ भेडापुकी मुर आन कली “कोव्रडीन” दे येस्से आ देशो खोदेशो पा, मेको चोव्रथ गाक्माक्त। लडाइ पाइब नेल्ल आन आन राप्तीकेम राप्शा लडाइ के बाजा ताप्मे ना, मेको आन बाक्तीकेम जाक्दीम्माक्त। 21 इस्राएली पलिस्ती आन डोंइतीमी, पलिस्ती इस्राएली आन डोंइतीमी लहर पा राम्मा बाक्त। 22 मार मार वोइक्ब आन कली, मार मार गेशा, दाऊद आ लोकब आन राप्तीकेम मेको आन कली ग्रुमथ दोरशा लमाक्त। 23 मिनु मेको आ लोकबपुकी नु लोव्र पना पन बाक्मेनु, मेको गाथ डा पलिस्ती गोल्याथ आ हुल रे गूशा, डोंइती डा खोदेशो पा ग्रीमाक्त। मेको लोव्र दाऊदम नेना बाक्त।

24 इस्राएलीपुकी मेको मुर कली तामे चोटीन प्रोक्बाक्मा बाक्त। 25 मेकोपुकीमी “कोव्रडीन, मेरे मुर नाक्त किंत किंत गूशा इस्राएली आन कली ग्रीशा हिंपाइक्ब। मेरे मुर कली साइक्ब कली पिपम शुश इनाम गेब। आ तमी यो मेको मुर कली गेशा ग्युबे पाइब। मेको आ खिं डा मुर आन कली इस्राएलीमी पिप आ गेय पतीक रे थमा पा प्रोंइब” देमा बाक्त। 26 मिनु दाऊदमी आ नेक्था बाक्ब आन कली “मेरे पलिस्ती कली साइक्ब नु इस्राएली आन कली मुने दोक्तीक रे प्रोंइबमी मार ताइबा? गेना हना यो ब्रोंइशा बाक्ब परमप्रभु आ लडाइ पाइब आन कली शुक्शी पाइब मेरे खोइक्तीक चिनु मखोइशो पलिस्तीम मार मिम्बा?” देमाक्त। 27 मिनु मेको आ परबम मार दुम्बा? मेको कली साइक्ब मुर कली मार पांइसीबा, दे मुरपुकीमी दाऊद कली शेंदमे बाक्त।

28 मेको कली मुरपुकी नु लोव्र पा बाक्शो आ लोकब एलीआबम नेना बाक्त। मिनु मेको गाइक्ता बाक्त। मेकोम दाऊद कली “गे मारदे एक बाक्डे? गोरशो रागीम बाक्शो मेको इक्का खोइ भेडापुकी यो सु कली कोव्रपाइक्मी? गो इ कली तुइक्नुड। गे मटीब नु हेंथे पाइब बाक्नेवे। गे एक लडाइ कोव्रथ ला जाक्शो नवे” दे मदा बाक्त। 29 मिनु दाऊदमी “मुल गो मार पडा डा? गो हिल्लो पचा यो मताइनुडा?” देमाक्त। 30 मिनु मेको ब्राशा अर्को मुर आन बाक्तीक लशा, मेको लोव्र हिल्लो पामी बाक्त। तन्न नेल्लेमी मेको कली मोदेशो लोव्र मदमे बाक्त।

31 मिनु दाऊदम देशो लोव्र मुरपुकीम सावल कली शेंदमे बाक्त। मिनु मेकोमी दाऊद कली ब्रेथ सोइक्ता बाक्त। १सामुएल १७:३१ 32 मिनु दाऊदम मेको कली “गे ग्येथ लुक्च मदुमीन। गो इन गेय पाइब लशा मेको पलिस्ती नु लडाइ पाइक्नुड” देमाक्त। 33 मिनु सावलमी “गे लशा, मेको पलिस्ती नु लडाइ पने मचाप्नेवे। गे नक डा आलन बाक्नेवे। मेको साइ रेन लडाइ पाइब मुर बाक्ब” दे मदा बाक्त। 34 मिनु दाऊदमी सावल कली “गो आं आफ आ भेडा गोठला नड। जोइ वां जाक्शा। भेडा बगाल रे योल्नीम। 35 मेना गो मेको आन कली खेदा पा लशा, आन शोव्र रे मेको रोइशशा चाक्नुड। आं कली क्राइक्चा कली मेको लेत्तेक्म हना, मेको आन कली आन शांपेम ग्याइशशा तुप्शा साइक्नुडमी 36 गो जोइ वांपुकी साइशो बाक्नुड। मेको खोइक्तीक चिनु मखोइशो पलिस्ती यो मेको आन खोदेशो दुम्ब। मेकोमी गेना हना यो ब्रोंइशा बाक्ब परमप्रभु आ लडाइ पाइब आन कली शुक्शी पशो बाक्ब। 37 आं कली जोइ नु वां आन शोव्र रे प्रोंइब परमप्रभु यावेमी मेको पलिस्ती आ गुइ रे यो प्रोंइब” देमाक्त। मिनु सावलमी “लावो, परमप्रभु यावे गे नु बाक्ल” देमाक्त।

38 मिनु सावलमी दाऊद कली आ लडाइम फेक्तीक फेक्पदा बाक्त। कांसा के टोपी आ पियाम गुप्ता बाक्त। मिनु आ कांसा के फेक्तीक यो फेक्ता बाक्त। 39 मेको नोले मेको आ तरवार पिप्ता बाक्त। मिनु दाऊद गाक्चा थुं

पवा बाक्त। तन्न मचबा बाक्त। मारदे हना मेकोमी मेको गेना यो मफेक्शो, मपांइशो बाक्माक्त। मोपतीके मेकोम सावल कली “गो एको पांइशा, फेक्शा लने मचाप्नुड। मारदे हना गो एको गेनायो मपांइशो मफेक्शो नड” देंमाक्त। मिनु मेकोमी मेको नेल्ल पुइक्मी बाक्त। 40 मेको नोले मेकोमी आ कोक्के कुरा बाक्त। मिनु खोला रे ५ ओटा सिल सिल देंशो फुल्लु गुबा बाक्त। मिनु आ झोलाम कुर पवा बाक्त। मिनु आ हुरद शेशा, मेको पलिस्ती नु लडाइ पथ लमाक्त।

41 मेको पलिस्ती आ या कुरब कली डोंइती गाक्पाइशशा, दाऊद आ बाक्तीक गे पिमाक्त। मेको आ तेक्तीक कुरबमी मेको कली वारच पशो बाक्माक्त। 42 मिनु मेकोमी दाऊद कली तशा, रिस्से बाक्त। मिनु लल चोव्रचो, पाइशशो दारशो ठिटा कली तशा, शुक्शी पचा गोवा बाक्त। १सामुएल १६:१२ 43 मिनु मेको पलिस्तीम दाऊद कली “मार, गो कुचुम नडा? मिनु कोक्के शेशा, गो नु लडाइ पथ जाक्डे” मदा बाक्त। मिनु मेकोमी आ देवता आ नें थिशा दाऊद कली सराप पवा बाक्त। 44 मेकोमी “पिवो, गो इ श्ये चिक्ब नु ब्वाकी डा जन्तु आन कली ब्वचा गेनुड” दे मदा बाक्त। 45 मिनु दाऊदमी पलिस्ती कली “गे, गो नु लडाइ पचा कली तूतीक तरवार कुरशा, पिशो बाक्नेवे। तन्न गो गे नु लडाइ पचा कली मुर नेल्ल आन परमप्रभु यावे, इस्राएल डा लडाइ पाइब आन परमप्रभु आ नेंमी पिशो बाक्नुड। 46 मुलाक्ती परमप्रभु यावेम इ कली आं गुइम गेब। गो इ कली साइक्नन। मिनु इ पिया खोइशशा। इ रां नु पलिस्ती आन रां चिक्ब नु ब्वाकी डा जन्तु आन कली ब्वचा गेनुड। मिनु इस्राएलम परमप्रभु का बाक्ब, दे रागी नेल्ल डा मुरुम तुइक्नीम। 47 मिनु एक बाक्शो मुर नेल्लेम परमप्रभु यावेम तूतीक नु तरवारम मप्रोंइब, दे तुइक्नीम। मारदे हना एको लडाइ परमप्रभु यावे केन बाक्ब। मेकोमी गे नेल्ल इन कली आंइ गुइमी गेब” दे मदा बाक्त। प्रस्थान १५:३; भजन संग्रह २०:८; जकरिया ४:६

48 मिनु मेको पलिस्ती दाऊद गे पिमाक्त। मिनु दाऊदम मेको नु लडाइ पचा कली, आ डोंइती गे दोरशा लमाक्त। 49 मेकोमी आ गुइ झोलाम कुर पा फुल्लु का गुंइदा बाक्त। मिनु हुरदम वोदा बाक्त। मिनु हिरशा, मेको पलिस्ती आ कुप्फीम आबा बाक्त। मिनु मेको फुल्लुम कुप्फ होदा बाक्त। मिनु मेको खपीम गोल्माक्त। 50 मोपा दाऊद आ हुरद नु फुल्लुम ग्रामाक्त। मेको नु तरवार मबाक्त हना यो, पलिस्ती गोल्याथ कली सदा बाक्त। 51 मेको दोरशा मेको पलिस्ती गोल्याथ गे लमाक्त। मिनु आ नेक्था राम्माक्त। मेको आ तरवार खोत रे शोइशशा, मेको कली साइशशा आ पिया खोदा बाक्त। पलिस्तीपुकीमी आंम बोल्यो लडाइ पाइब साइशशो तामे बाक्त। मिनु मेकोपुकी हिंशा प्रोक्मा बाक्त।

52 मिनु इस्राएली नु यहूदीपुकीमी लडाइ डा ग्रीतीक ग्रीमा बाक्त। गाथ नु एक्रोन डा ठेयब लाप्चो सम्म मेको आन कली थाम्पा खेदा पामे बाक्त। शा-आराइम, गाथ नु एक्रोन लतीक लां सम्म आन बेक्शो रां नेल्ल थाम्पा ब्रमाक्त। 53 पलिस्ती आन कली खेदा पा लेम्मानु, मेकोपुकीमी मेको आन बाक्तीक डा मारेइ मारेइ खुप्तमे बाक्त। 54 दाऊदमी गोल्याथ आ या मेको आ ताम्बुमीन प्रोंइशा, मेको आ पिया चहिं कुरशा यरूसलेम चाक्गा बाक्त।

55 मिनु सावलमी दाऊद कली पलिस्तीपुकी नु लडाइ पथ लशो तशा, मेकोम आ लडाइ पाइब आन कप्तान आबनेर कली “मेको ठिटा सु का आ तौ बाक्मे?” दे हिल्लो पवा बाक्त। मिनु आबनेरमी “गो इन नेंमी कसम जशा देंनुड, गो मेको कली मतुइक्नुड” देंमाक्त। 56 पिपम आबनेर कली “मेको सुका आ तौ बाक्मे रुपो” देंमाक्त। 57 मिनु दाऊद मेको पलिस्ती कली साइशशा, लेम नोले आबनेरमी दाऊद कली सावल आ डोंइती चाक्दीदा बाक्त। दाऊदमी मेको पलिस्ती आ पिया गुइम ग्याइशशो बाक्माक्त। 58 मिनु सावलम मेको कली “ए ठिटा, गे सुका आ तौ नवे” दे हिल्लो पवा बाक्त। मिनु दाऊदमी “गो इन गेय पाइब बेथलेहेम डा येस्से आ तौ नड” देंमाक्त।

18

दाऊद नु योनाथन वारचु दुम्शो

1 मोपा दाऊदम सावल नु लोव्र पने थुमा बाक्त। नोले योनाथनमी, दाऊद कली आंम कली खोदेंशो पा आ थुं रेन दाक्चा गोवा बाक्त। मेको सावलम तुइक्ता बाक्त। 2 मिनु सावलमी दाऊद कली लदा बाक्त। आ आफ आ खिं लेशशा लचा मगेवा बाक्त। १सामुएल १६:२२; १सामुएल १७:१५ 3 मिनु योनाथन नु दाऊद आस थुं रेन थमा पा वारच बु दुम्सा बाक्त। मारदे हना मेको निक्शी काम अर्को कली आंम कली खोदेंशो पा दाक्मुसा बाक्त। मिनु कबल का पाम्से बाक्त। १सामुएल २३:१८; २सामुएल २१:७; १सामुएल १९:१; १सामुएल २०:१७; २सामुएल १:२६ 4 मिनु योनाथनमी आ फेक्शो वा पुइशशा दाऊद कली गोवा बाक्त। आ तरवार, लिब्रा नु पेटी सुन्दा पुइशशा गोवा बाक्त। 5 दाऊदम सावल आ पथ सोइशशो हिंचा डा गेय यो रिम्शो पा पवा बाक्त। मिनु सावलमी दाऊद कली नेल्ल क्येडा

सक्ति पाइशशो कप्तान सेला बाक्त। मोपा मेको कली मान बारपाइशशोमी सावल नु आ ठेयब मुरपुकी यो ग्येरसमा बाक्त।

दाऊद कली साइक्चा माल्शो

6 दाऊदम पलिस्ती आन कली साइशशा लेम्मेनु, इस्राएल डा सहर नेल्ल डा मीश मुर नेल्ल कोव्रथ गूमा बाक्त। सिल पाइब मीश मुरपुकी खैजडी ताप्शा, कुम्सो पना पन, सिल पना पन पिप सावल कली गुम्थ जाक्मा बाक्त। न्यायाधीस ११:३४ 7 मिनु मीश मुरपुकीम ग्येरसीशा “सावलम हजार हजार आन कली साइक्तीमी। तन्न दाऊदमी १० हजार, हजार आन कली साइक्तीमी” दे कुम्सो पामे बाक्त। १सामुएल २१:१२; १सामुएल २९:५ 8 मिनु सावल थाम्पा गाइक्ता बाक्त। मेको लोव्र नेंशा थाम्पा आ थुं खुरसे बाक्त। मेकोमी दाऊद कली चहिं “१० हजार, हजार तन्न आं कली चहिं हजार हजार ला देतेक्म। मुल मेको कली पिप सेल्चा का ला लीत” दे मिम्ता बाक्त। 9 मेको नाक्त रे सावलमी दाऊद कली गेहे पचा गोवा बाक्त।

10 आ दीसा परमप्रभु रे मरिम्शो पाइब सोक्त काम सावल कली सुमा बाक्त। मिनु सावलमी आ खिंमी हेंथे पवा बाक्त। मिनु दाऊदमी डोंइती डा खोदेशो पा सावल आ पर्बम बीना तबा बाक्त। सावल आ गुइमी तूतीक का बाक्माक्त। १सामुएल १६:१४, २३ 11 मेकोम “गो दाऊद कली गारोम क्येप्नुड” दे मिम्शा, आ तूतीक आबा बाक्त। तन्न दाऊद निक्शी खेयप दिल्शा मख्रपांडसे बाक्त। १सामुएल १९:१०; १सामुएल २०:३३ 12 मिनु सावल दाऊद कली तशा हिंमाक्त। मारदे हना परमप्रभु यावेम आ कली प्रोंइशा दाऊद नु बाक्शो बाक्ब, दे तुइक्ता बाक्त। 13 मोपतीके सावलम दाऊद कली आ दरवार रे गुंइशा, हजार का मुर आन कप्तान सेला बाक्त। मिनु दाऊदमी आ मुर आन कली लडाइम लाइक्मी बाक्त। 14 मिनु परमप्रभु यावे मेको नु बाक्तीके आ पशो गेय नेल्लेमी मेको रिम्शो दुम्माक्त। १सामुएल १८:५ 15 सावलमी दाऊद आ गेय नेल्ल रिम्शो दुम्शो तशा, डोंइती क्येडा हिंमाक्त। 16 इस्राएल नु यहूदा डा मुर नेल्लेमी दाऊद कली दाक्तमे बाक्त। मारदे हना मेको लडाइ पतीकेम लां कोंइशा डोंइती गाक्बाक्माक्त।

17 मिनु सावलम दाऊद कली “गो आं ठेयब तमी मेराब इ कली गेशा ग्युंभे पपाइक्नुड। तन्न गे मेको आ पर्बम बोल्यो पा आं गेय पचा माल्नेवे। मिनु परमप्रभु यावे आ पर्बम लडाइ पावो” दे मदा बाक्त। मारदे हना सावलम दाऊद कली आंम आ गुइम ममाइ पलिस्ती आन गुइ रे साइक्पाइक्चा माल्शो बाक्माक्त। 18 मिनु दाऊदमी “गो सु नडा डा? आं आफ आ खिं डा मुर इस्राएली सु नमी डा? गो पिप आ चांइवा दुम्नुडा?” देंमाक्त। २सामुएल ७:१८ 19 मो हना यो सावल आ तमी मेराब नु दाऊद आस ग्युंभे दुम्तीक नाक्त जाक्चा क्येडा डोंइती, मेराब कली मेहोला आ मुर अद्रीएल नु ग्युंभे पा सोइक्ता बाक्त। 20 तन्न सावल आ अर्को तमी मिकाल दाऊद नु दाक्मुसा बाक्त। मेको लोव्र सावलम नेनानु “आं मिम्शो गाप्ब दुम्त” दे मिम्ता बाक्त। 21 मेको आ थुंमी “गो मेको कली दाऊद नु ग्युंभे पपाइक्नुड। पलिस्ती आन गुइम बेक्पाइक्चा कली मेको वाल्पाइक्तीक गेय बाक्ब” देंमाक्त। मोपतीके सावलमी आ चांइवा सेल्चा कली लोव्र पवा बाक्त। 22 मेकोमी आ गेय पाइब आन कली “एको लोव्र सुइम मतुइक्चा डा पा दाऊद कली मतीन” देंमाक्त। मिनु मेकोपुकीम दाऊद कली “पिप इन क्येडा थाम्पा ग्येरशो बाक्ब। मिनु आ गेय पाइब नेल्ल आन दाक्शो यो गे बाक्नीनी। पिप आ खिं डा मुर नु ग्युंभे पतीक नाक्ती यो मुलन बाक्ब” देंमा बाक्त। १सामुएल २२:१४ 23 सावल आ मुरपुकीम दाऊद कली मोदेशो लोव्र पामेनु, दाऊदम मेको आन कली “गेपुकीम पिप आ तमी नु ग्युंभे पचा आइक्च लोव्र मिम्तीनी? आं खोदेशो मारेइ मथीब मुरुम ओदेशो पने चाप्नुडा?” दे माइक्मी बाक्त। 24 मिनु दाऊद आ देशो लोव्र आ गेय पाइबपुकीम सावल कली शेंदमे बाक्त। 25 मिनु मेकोमी दाऊद कली “जोरी सत्रु आन क्येक्क लेत्चा कली पिपम ग्युम्ली आ पर्बम सहे का पलिस्ती आन खोइक्तीक चिनु खोइक्तीक डा कुशुल ला पुंइब मतीन” देंमाक्त। मारदे हना पलिस्ती आन गुइ रे दाऊद बेक्ल देशो बाक्माक्त। 26 मिनु सावल आ देशो लोव्र आ गेय पाइब मुरपुकीम दाऊद कली नेंपदमे बाक्त। मिनु मेको लोव्रमी मेको पिप आ तमी नु ग्युंभे पचा बिस्से बाक्त। 27 मिनु देशो नाक्त आ डोंइती, नाक्त दाऊद आ मुरपुकी नु लशा सहे निक्शी पलिस्ती आन कली सदमे बाक्त। मिनु मेकोम मेको आन खोइक्तीक चिनु खोइक्तीक डा कुशुल लाइशशा, चांइवा सेल्यीनी, दे पिप आ डोंइती हिक्शा, गेवा बाक्त। मिनु सावलमी आ तमी मिकाल दाऊद कली गेशा ग्युंभे पाइक्ता बाक्त। 28 मिनु सावलमी परमप्रभु यावे दाऊद नु बाक्ब, दे तुइक्ता बाक्त। आ तमी मिकालम मेको कली दाक्ब, दे यो तुइक्ता बाक्त। 29 मिनु सावल दाऊद क्येडा शुश हिंचा गोवा बाक्त। मिनु आ लीशो ब्रोंइतीक नाक्त सम्मन मेको दाऊद आ जोरी सत्रु दुम्माक्त। १सामुएल १८:१२

30 पलिस्ती आन कप्तान का का पा लडाइ पथ जाक्बाक्मा बाक्त। मेकोपुकी मोपा जाक्मानु, सावल आ अरु गेय पाइब आन क्येडा दाऊदमी रिम्शो गेय पवा बाक्त। मोपा मेको आ नें ठेयब दुम्माक्त।

19

योनाथनम दाऊद कली प्रोंइशो

1 सावलमी दाऊद कली साइक्चा, दे आ तौ योनाथन नु आ गेय पाइब नेल्ल आन कली लोत्र पवा बाक्त। तन्न सावल आ तौ योनाथन दाऊद आ वारच बाक्माक्त। १सामुएल १८:३ 2 योनाथनमी आ आफ सावलमी दाऊद कली साइक्चा माल्शो बाक्ब, दे दाऊद कली शेंदा बाक्त। मेकोमी दाऊद कली “होस पा, दीसा सुनी सुइमी मतुइक्तीकेमी खुइश्शा बाक्कीन। 3 सुनी गो गूशा पीनुड। मिनु इन खुइश्शा बाक्तीके आ नेक्था आं आफ नु ग्रुमुनुड। मिनु मेको नु इन पर्वम लोत्र पाइनुड। मारेइ तुइक्ताक्ड हना, गो इन कली शेंनुड” देंमाक्त। 4 मिनु योनाथनम आ आफ कली दाऊद आ पर्वम रिम्शो लोत्र पा “इन गेय पाइब दाऊद कली मारेइ पाप मपने। मारदे हना मेकोमी इन कली मारेइ पाप मपावो। थमा पा, आ पशो गेय नेल्ल इन कली रिम्शो दुम्ब। 5 मेकोमी पलिस्ती कली सदानु, आंमा चहिं बेक्नुड देय ब्रोंइनुड, दे मतुइश्शो बाक्त। मिनु परमप्रभु यावेम इस्राएल कली ठेयब सेल्शा ग्रापाइक्तु। गे मेको नेल्ल तशा शुश ग्येरशो बाक्तीनी। गे मारदे मेको दोस मताइब दाऊद कली मरिम्शो पचा माल्नीनी? बिट्चीम मेको कली मारदे साइक्चा दाक्नीनी?” देंमाक्त। १सामुएल १७:५० 6 मिनु सावलमी योनाथन आ लोत्र नेंशा “परमप्रभु यावे ब्रोंइशा बाक्शो खोदेंशो पा, दाऊद मसाइक्नुड” दे कसम जवा बाक्त। 7 मिनु योनाथनमी दाऊद कली ब्रेश्शा, मेको लोत्र नेल्ल नेंपदा बाक्त। मिनु योनाथनमी दाऊद कली सावल आ बाक्तीके चाक्दीदा बाक्त। मिनु मेकोम डोंइती डा खोदेंशो पा सावल आ गेय पवा बाक्त।

8 मिनु लेंशा पलिस्तीपुकी नु लडाइ दुम्माक्त। दाऊदम मेकोपुकी नु लडाइ पवा बाक्त। मिनु मेकोमी हिंचा डा पा लडाइ पतीके मेको पलिस्ती प्रोक्मा बाक्त।

9 मिनु काबु परमप्रभु यावे रे मरिम्शो पाइब सोक्तीम सावल कली सुमा बाक्त। मेना सावल आ खिंमी तूतीक शेशा बाक्शो बाक्माक्त। दाऊद चहिं बीना ताप्ना ताप्न बाक्माक्त। १सामुएल १८:१०-११ 10 मिनु सावलम दाऊद कली गारोम क्येप्चा डा पा तूतीकेम आबा बाक्त। तन्न दाऊद दिल्माक्त। मिनु मेको तूतीक गारोम ग्रुकसे बाक्त। दाऊद चहिं ब्रोंइशा प्रोक्माक्त। 11 सावलमी मेको कली सुनी साइक्चा कली दाऊद आ खिंम क्यारी पाइब मुर वोदा बाक्त। तन्न दाऊद आ मीश मिकालमी मेको कली हिंचाइश्शा “गे मुल नाक्दोन प्रोक्शा मगाक्तीनी हना, दीसा इन कली साइक्नीम” दे मदा बाक्त। भजन संग्रह ५९:१ 12 मिकालमी दाऊद कली झेल रे उइ तोइक्पदा बाक्त। मिनु मेको सुइमी मतुइक्थु प्रोक्माक्त। 13 मिकालमी मूर्ति चाक्शा, दाऊद आ ब्राख्येम वोदा बाक्त। मिनु आ पिया थांडसीतीकेम चहिं क्यारश आ चां वोदा बाक्त। उत्पत्ती ३१:१९ 14 मिनु सावलमी दाऊद कली कोव्रथ मुर सोइक्तानु, मेकोम “रोइ पशो बाक्ब” देंमाक्त। 15 मिनु सावलमी मेको आन कली “गे आमा दाऊद कली कोव्रडीन” दे सोइक्तीमी बाक्त। मेकोमी “मेको कली आ खाट सुन्दा क्युक्शा एक चाक्कीन। मिनु गो साइक्नुड” दे सोइक्तीमी बाक्त। 16 मिनु मेकोपुकी जाक्मानु, ब्राख्येम मूर्ति नु पिया थांडतीकेमी क्यारश आ चां ला थित्मे बाक्त। 17 मिनु सावलमी मिकाल कली “गे मारदे आं कली जोल पाइय्यी? आं जोरी सत्रु कली मारदे रिम्शो पा प्रोक्पदी?” देंमाक्त। मिनु मिकालमी “मेकोम ‘आं कली रिम्शो पा मप्रोक्पाइक्ती हना, गो इ कली साइक्नन’ दे माइक्ती” देंमाक्त।

18 मिनु दाऊद प्रोक्शा लशा, रामाह सामुएल आ बाक्तीकेम जाक्दीम्माक्त। मिनु सावलमी मार मार पवा, मेको नेल्ल शेंदा बाक्त। मिनु मेको नु सामुएल लशा नायोथमी बाक्सा बाक्त। 19 मिनु मुर कामी सावल कली “दाऊद रामाह डा नायोथम बाक्ब” दे शेंदा बाक्त। 20 सावलमी दाऊद कली ग्याइक्चा, दे मुर आन कली सोइक्ता बाक्त। मेकोपुकीमी परमप्रभु यावे आ लोत्र पाइब आन हुल परमप्रभु यावे आ सोक्तीम लोत्र पा बाक्शो तामे बाक्त। मिनु सामुएल मेको आन ठेयब मुर बाक्माक्त। मिनु परमप्रभु आ सोक्तीम मेको आन कली सुमा बाक्त। मिनु मेकोपुकी यो परमप्रभु यावे आ सोक्तीम लोत्र पामे बाक्त। १सामुएल १०:१०-१२ 21 मिनु सावलम मेको नेंशा, अर्को हुल का सोइक्ता बाक्त। मेकोपुकीम यो परमप्रभु यावे आ सोक्तीम लोत्र पामे बाक्त। मिनु सावलमी लेंशा अर्को हुल का सोइक्तीमी बाक्त। मिनु मेकोपुकी यो मोदेंशो दुम्मा बाक्त। 22 मिनु नोले सावल आंमान रामाहम पिशा, सेकुम बाक्शो ठेयब कुवाम जाक्माक्त। मिनु मेकोमी “सामुएल नु दाऊद ते बाक्सा?” दे हिल्लो पवा बाक्त। मिनु “मेको निक्शी रामाह डा नायोथम बाक्नीसी” दे शेंदमे बाक्त। 23 मेको रामाह डा नायोथ लना लन पवानु, परमप्रभु आ सोक्तीम मेको कली यो सुमा बाक्त। मिनु रामाह डा नायोथ सम्मन, परमप्रभु यावे आ लोत्र पना पन जाक्दीम्माक्त। 24 मेकोमी यो आ वा पुइश्शा, सामुएल आ डोंइती परमप्रभु यावे आ सोक्तीम लोत्र पना पन नाक्त रे नु नाक्दो रे शिश्रा बाक्माक्त। मोपतीके मुरपुकीम “मार, सावल यो परमप्रभु यावे आ लोत्र पाइब आन दातेमी बाक्मे?” देंबाक्मा बाक्त।

20

योनाथनम दाऊद कली वारच पशो

1 मिनू दाऊद रामाह डा नायोथ रे प्रोक्शा, योनाथन आ बाक्तीक जाक्दीम्माक्त। मिनू मेकोमी योनाथन कली “गो मार पडा? आं दोस मार बाक्बा? मारदे इन आफोम आं कली साइक्चा माल्बा?” दे हिल्लो पवा बाक्त। 2 मिनू योनाथनमी “मोदेशो मदुम्ल। गे मबेक्नीनी। आं आफोम आं कली मदेंथु, आइक्च नु ठेयब गेय मारेइ मपाइब। ओदेशो लोव्र आं आफोम आं रे दोपा खुइक्बा डा? मोदेशो मपाइब” देंमाक्त। 3 मिनू दाऊदमी “गे आं कली दाक्नीनी, दे इन आफोम तुइक्ब। मेकोमी ‘योनाथनम मतुइक्तल। तुइक्ताक्व हना, आ थुं खाइक्ब’ दे मिम्शो बाक्ब। थमा पा, परमप्रभु यावे ब्रोंइशा बाक्शो खोदेशो पा बेक्तीक आं नेक्था बाक्त” दे कसम जवा बाक्त। 4 मिनू योनाथनमी दाऊद कली “गे मार देंनीनी, गो मेको पाइनुड” देंमाक्त। 5 मिनू दाऊदमी योनाथन कली “दीसा औसी बाक्ब। गो पिप नु बाक्शा, जचा माल्नुड। गो नाक्त सां सम्म रू मेर लशा खुइश्शा बाक्नुड। 6 इन आफोम आं मजाक्शो आ पब्रम लोव्र गुंडताक्व हना, मेको कली ‘दाऊदमी बेथलेहेम आ खिंम रीब पा लचा माल्तीके, आं कली हिल्लो पती। मारदे हना मेकेर खिं डा मुर नेल्लेमी बर्सम चढेतीक चढेचा माल्बाक्माक्त’ देनीन। 7 मिनू मेकोम ‘ठीक बाक्ब’ देंत हना, मेको रिम्शो बाक्ब। तन्न मेको गाइश्शा चुरशा पाप्तु हना, मेकोमी आं पब्रम मरिम्शो मिम्शो बाक्ब, दे गे तुइक्नीनी। 8 मोपतीके गे इन गेय पाइब, गो नु थमा सुइक्चा डा गेय पने। मारदे हना गे नु गो परमप्रभु यावे आ डोंइती कबल का पशो बाक्नस। गो दोस ताइब बाक्ती हना, गे आं कली साइय्यीनी। इन आफ बाक्तीकेमी मलाइय्यीनी” देंमाक्त। १ सामुएल १८:३ 9 मिनू योनाथनम “मोदेशो लोव्र मपन। आं आफोम इन कली साइक्चा मिम्शो गो तुइक्ताक्ड हना, इन कली शेनुड” देंमाक्त। 10 मिनू दाऊदम योनाथन कली “इन आफोम मरिम्शो लोव्र पाप्तु हना, मेको सुम आं कली तुइक्पाइक्बा?” देंमाक्त। 11 मिनू योनाथनमी “गो नु पिने” देंमाक्त। मिनू मेको निम्फा हिरथ लसा बाक्त।

12 मिनू योनाथनम दाऊद कली “गो इन कली, परमप्रभु यावे, इस्त्राएली आन परमप्रभु आ डोंइती एको लोव्र पाइनुड। दीसा कि नित्थ नाक्त आं आफ आ थुं थामु नोले मेकोम इन पब्रम रिम्शो मिम्शो बाक्त हना, गो इन कली तुइक्पाइक्नुड। 13 तन्न आं आफोम मरिम्शो मिम्शो बाक्त हना यो, गो इन कली तुइक्पाइक्नुड। गो इन कली मतुइक्पाइक्ता हना नु इन कली मप्रोंइता हना, परमप्रभु यावेमी आं कली सजाइ गेवल। परमप्रभु यावे आं आफ नु बाक्शो खोदेशो पा गे नु यो बाक्ल। 14 गो ब्रोंइडा सम्म परमप्रभु यावेम आ गेना हना यो दाक्शा मप्रोंइशो खोदेशो पा इन दाक्तीक आं कली कोइदीन। 15 परमप्रभु यावेम रागी रे दाऊद आ जोरी सत्रु नेल्ल क्याम्ताक्व हना यो, गे इन गेना हना यो दाक्तीक आं खिं डा मुर आन रे मक्याम्दीन” दे योनाथनमी दाऊद कली देंमाक्त। 16 मेना योनाथनमी दाऊद आ खिं डा मुर नु कबल पा “परमप्रभु यावेम दाऊद आ जोरी सत्रु आन कली माल्शा गुंडदल” देंमाक्त। 17 मेको नु दाक्मुशो आ पब्रम योनाथनमी दाऊद नु कसम जवा बाक्त। मारदे हना, मेकोम मेको कली आं कली खोदेशो पा दाक्बाक्माक्त।

18 मिनू योनाथनम दाऊद कली “दीसा औसी बाक्ब। इन नित्तीक श्येत्थ बाक्शो तशा, गे मबाक्नीनी, दे तुंडसीब। 19 मोपतीके नित्थ नाक्त इन खुइक्तीके उइ मेर लने। इन डोंइती खुइक्तीकेम लशा, फुल्लु आ नेक्था बाक्कीन। 20 मिनू गो मेको फुल्लु आ नेक्था ब्रा सां आप्नुड। 21 मिनू गो मेको वोंइश आल कली ब्रा इ डोंइती बाक्नीम, दे माल्थ सोइक्ताक्ड हना, गे गूशा पिन। परमप्रभु यावे ब्रोंइशा बाक्शो खोदेशो पा गे ठीक बाक्नीनी। 22 तन्न गो मेको वोंइश आल कली ‘कोव्रडो, ब्रा इ नोले गे बाक्नीम। मेको खुप्शा चाक्को’ देंती हना, गे प्रोक्कीन। मारदे हना परमप्रभु यावेम इन कली सोइश्शो बाक्ब। 23 गो निक्शी इस दातेम पशो लोव्र गेना हना यो लील, दे परमप्रभु यावे सांकछी बाक्ब” देंमाक्त।

24 मोपतीके दाऊद रू मेर खुइश्शा बाक्माक्त। मिनू औसीमी भोज ठीक दुम नोले पिप जचा कली निस्से बाक्त। 25 सावल डोंइती खोदेशो पा आ नित्तीकेम निस्से बाक्त। आ नित्तीके गारो आ नेक्था बाक्शो बाक्त। आबनेर मेको आ नेक्था निस्से बाक्त। योनाथन चहिं राप्शा बाक्शो बाक्माक्त। तन्न दाऊद आ नित्तीक श्येत्थ बाक्माक्त। 26 मेको नाक्त सावलम मारेइ मदेंमाक्त। मेको ग्रान्ग्रा दिशो दुम माइ। मोपतीके मजाक्म माइ, दे मिम्ता बाक्त। लेवी १५:१६ 27 औसी आ दीसा दाऊद आ नित्तीक श्येत्थ बाक्माक्त। मिनू सावलम आ तौ योनाथन कली “सिनाक्त मुलाक्त येस्से आ तौ भोजम मारदे मजाक्म” दे हिल्लो पवा बाक्त। 28 मिनू योनाथनम सावल कली “दाऊदमी ‘गो बेथलेहेम लाइनुड’ दे लोव्र पाप्तु। 29 मेकोमी ‘आं खिं डा मुरपुकी चढेचा कली सहर लशो बाक्नीम। आं लोक्बम आं कली मेक जाक्चा, दे ब्रेत्ताक्यी। मिनू गे आ कली शिशी पाइनीनी हना, आं लोक्ब आन कली गुम्थ लचा गेयीनी’ देंत। मोपतीके मेको पिप नु जथ जाक्ने मचब” देंमाक्त।

30 मिनु सावल योनाथन नु गाइशशा मेको कली “गे दूली पाइब नु मटीब मीश आ तौ, गे येस्से आ तौ कली वारच सेल्शा, मुने दोक्शो बाक्नेवे। मिनु इ ममा इ कली जरमेशो आ पर्वम मुने दोक्त। 31 येस्से आ तौ रागीम ब्रोंइशा बाक्म सम्म गे मलीनेवे। इ राज्य यो मलीब। मेको कली रीब पा एक चाक्चा कली ब्रेथ सोइक्तीमी। थमा पा मेको साइक्चा पुंइसीब बाक्ब” देमाक्त। 32 मिनु योनाथनमी आ आफ कली “मेको मारदे साइक्चा पुंइसीबा? मेकोम मार पवा डा?” देमाक्त। 33 मेको लोत्रम पतीके सावलमी आ तूतीक क्युक्शा, आ तौ कली साइक्चा मला बाक्त। मिनु योनाथनमी आ आफोम दाऊद कली साइक्चान माल्शो बाक्माक्त, दे तुइक्ता बाक्त। १सामुएल १८:११ 34 मिनु योनाथन गाइशशा चुरशा आ नित्तीक रे बोक्शा, मारेइ मजवा बाक्त। मारदे हना दाऊद कली साइक्चा माल्शो आ पर्वम सुर्ता पवा बाक्त। आ आफोम दाऊद कली मरिम्शो पचा मिम्शो बाक्माक्त।

35 मिनु आ दीसा सुनी देशो खोदेशो पा, योनाथन दाऊद कली ग्रुम्थ लमाक्त। मेको नु वोंइश आल का यो बाक्माक्त। 36 मेकोमी मेको वोंइश आल कली “गो आं आप्शो ब्रा माल्थ लावो” दे मदा बाक्त। मेको वोंइश आल दोरमेनु, योनाथनम आ नोले गे ब्रा आबा बाक्त। 37 मिनु मेको वोंइश आल योनाथनम ब्रा आप्तीकेम जाक्दीम्मेनु, योनाथनम “ब्रा इ नोले गे बाक्ब” दे ब्रेत्ता बाक्त। 38 मिनु योनाथनमी मेको वोंइश आल कली “रीब पा लावो। देश मपावो” दे ब्रेत्ता बाक्त। मिनु मेको वोंइश आल ब्रा गुप्शा आ ठेयब मुर आ बाक्तीक चाक्गा बाक्त। 39 मेको वोंइश आलम मारेइ मतुइशो बाक्माक्त। योनाथन नु दाऊदम ला आस डोंइती देशो लोत्र तुइक्तसे बाक्त। 40 मिनु योनाथनम आ या मेको वोंइश आल कली गेशा “सहरम लतो” दे सोइक्ता बाक्त। 41 मिनु मेको वोंइश आल लम नोले, दाऊद आ खुइक्तीक फुल्लु आ नोले रे गूशा, खेयप सां बाप्शा मान पवा बाक्त। मिनु मेको निक्शी पुक्पु पाइक्मुसा बाक्त। मिनु निम्फा डाक्सा बाक्त। दाऊद योनाथन क्येडा शुश डाक्माक्त। 42 मिनु योनाथनम दाऊद कली “रिम्शो पा लावो। गे नु गो परमप्रभु यावे आ नेमी कसम जशा, परमप्रभु यावे गे नु गो इस दातेमी बाक्ल। मेको इ चच युइ नु आं चच युइ आन दातेमी गेना हना यो बाक्ल” देमाक्त। मिनु दाऊद बोक्शा लमाक्त। योनाथन चहिं सहर लेम्माक्त।

21

दाऊद प्रोक्शा नोब नु गाथ लशो

1 मिनु दाऊद नोब डा चढेब अहीमेलेक आ बाक्तीक जाक्माक्त। मिनु अहीमेलेक खिंखि पा दाऊद कली ग्रुम्शा “मारदे इन का ला जाक्नी? गे नु सुइ मबाक्मा” देमाक्त। १सामुएल २२:९,१९ 2 मिनु दाऊदम चढेब अहीमेलेक कली “गो पिप आ हुकुममी जाक्ती। मेको गो सुइ आन कली शेंचा मदुम्नुड। गो आं मुर आन कली सुइ मबाक्तीकेम ग्रुम्चा नड, दे माइक्तामी। 3 मुल इन नु मार बाक्बा आं कली ५ ओटा शोब्ले कि दोशो बाक्मे, मोशो गेयीनी” देमाक्त। 4 मिनु चढेबम दाऊद कली “गो नु शोब्ले मबाक्ब। कोंइतीक शोब्ले ला बाक्नीम। तन्न मार, मेरे वोंइश मुरपुकी मीश मुर रे डोन बाक्शो बाक्नीमी?” दे हिल्लो पवा बाक्त। लेवी २४:५-९; प्रस्थान १९:१५ 5 मिनु दाऊदमी “गो इन कली थमा लोत्र पाइनुड, गेना हना यो गो लां गाक्ची ना मीश मुर रे डोन बाक्नीकी। एको वोंइश मुर ग्रान्ग्रा मदिशो बाक्नीम। मुल मेको क्येडा ग्रान्ग्रा मदिशो बाक्नीकी” देमाक्त। 6 मोपतीके मेकेर अरु शोब्ले मबाक्तीके चढेबमी मेको परमप्रभु यावे आ डोंइती वोंइशो कोंइतीक शोब्ले गेवा बाक्त। तेको नाक्ती कोंइतीक शोब्ले परमप्रभु यावे आ डोंइती रे लदमे, मेको नाक्ती अर्को होश शोब्ले वोइक्चा माल्बाक्माक्त। मत्ती १२:३-४ 7 सावल आ गेय पाइब आन दाते डा गेय पाइब का यो मेको नाक्ती मेकेर परमप्रभु यावे आ डोंइती दिक्शा, बाक्शो बाक्माक्त। मेको एदोम डा दोएग बाक्माक्त। मेको सावल आ गोठला आन नेल्ल क्येडा ठेयब मुर बाक्माक्त। प्रस्थान २१:१३; लेवी १३:४,३१; १सामुएल २२:९,१८ 8 दाऊदम अहीमेलेक कली “गे नु तूतीक तरवारपुकी बाक्नीमी? मारदे हना पिप आ गेय रीब पा पचा माल्तीके गो तरवार नु अरु या कुरचा मतड” देमाक्त।

9 मिनु चढेबमी “एलाह डा दिंमम इन साइशो पलिस्ती गोल्याथ आ तरवार एक बाक्ब। मेको निसाफ पतीक ऊरीम नु थुम्मीम बाक्शो झोला आ नोले वाम गिल्शा वोइशो बाक्ब। मेको लाइक्नीनी हना, लतीन। मेको डा लाक्शा एक अर्को या मबाक्ब” देमाक्त। मिनु दाऊदमी “मेको खोदेशो रिम्शो अर्को तरवार मबाक्ब। आं कली मेकोन गेयीनी” देमाक्त। १सामुएल १७:५०-५१; न्यायाधीस ८:२७

10 मेको नाक्ती दाऊद बोक्शा सावल रे प्रोक्माक्त। मिनु गाथ डा पिप अकीश आ बाक्तीके जाक्माक्त। भजन संग्रह ५६:१ 11 अकीश आ गेय पाइबपुकीम मेको कली “थमा पा रागी डा पिप दाऊद एकोन बाक्ब। एको आ पर्वम सावलम हजार हजार आन कली साइक्तु। दाऊदम १० हजार हजार आन कली साइक्तीमी” दे कुम्सो मपामे डा?

१सामुएल १८:७ 12 दाऊदम मेको लोव आ थुंम वोइशो बाक्माक्त। मिनु मेको गाथ डा पिप अकीश तशा थाम्पा हिंमाक्त। 13 मोपतीके मेकोमी मेको आन डोंइती आ निप्स ग्राइशो खोदेशो दुम्खु पवा बाक्त। मेकोम ठेयब लाप्चोमी रेन्ना रेन्नु नु आ राल आ गल शोक्रेम तोक्ना तोक्न बाक्माक्त। भजन संग्रह ३४:१ 14 मिनु अकीशमी आ गेय पाइब आन कली “एको मुर आ निप्स ग्राइशो बाक्त। एको कली मारदे आं बाक्तीक चाक्नी? 15 गो अरु निप्स ग्राइशो मुर माल्नुडा? गे मारदे एको कली आं डोंइती हेंथे पपाइक्चा कली चाक्नी। मेको आं खिंमी बाक्ल, दे मिन्नीनी?” दे माइक्मी बाक्त।

22

दाऊद अदुल्लाम पुक्खीम बाक्शो

1 दाऊद मेकेर रे प्रोक्शा, अदुल्लाम डा पुक्खीम लमाक्त। मिनु मेको आ लोक्ब नु आ खिं डा मुर नेल्लेम मेको लोव नेंमे बाक्त। मिनु मेकोपुकी आ बाक्तीक जाक्दीम्मा बाक्त। भजन संग्रह ५७:१; यहोसु १५:३६ 2 श्येत जशो, जेर दुम्शो नु आन थुं मनुशो मुरपुकी मेको आ बाक्तीकेम जाक्मा बाक्त। मिनु दाऊद मेको आन कप्तान दुम्माक्त। मेकोपुकी ४ सहे खोइ बाक्मा बाक्त। न्यायाधीस ११:३

3 मेकेर रे मेकोपुकी मोआब डा मिस्पे लमा बाक्त। मिनु मोआब डा पिप कली “परमप्रभुम आं पबर्म मार पाइबा, मेको मतुइक्त्तु सम्म आं आंम आफ आस कली इन बाक्तीकेम बाक्चा गेने” देंमाक्त। २सामुएल ८:२; रूथ १:३ 4 दाऊदमी आ आम आफ आस कली मोआब डा पिप नु वोदा बाक्त। मेको आ बोल्यो खुइशशा बाक्तीकेम बाक्ची ना सम्म आ आम आफ मोआब डा पिप नु बाक्सा बाक्त। 5 मिनु परमप्रभु यावे आ लोव पाइब गादमी दाऊद कली “गे मेको बोल्यो खुइशशा बाक्तीकेम मबाक्कीन। रीब पा यहूदा रागी लने” देंमाक्त। मोपतीके दाऊद हेरेथ डा ब्वाकीम लमाक्त। भजन संग्रह ६३:१

सावल नु नोब डा चढेब

6 मिनु सावलमी दाऊद नु आ मुरपुकी ते बाक्शो बाक्मा मेको नेना बाक्त। सावल गिबा डा डांडाम बाक्शो, ठेयब रवा आ पुंम, गुइम तूतीक शेशा बाक्शो बाक्माक्त। मेको आ गेय पाइब नेल्ल आ एर ओंथ राप्शा बाक्शो बाक्मा बाक्त। 7 मिनु सावलमी आ एर ओंथ बाक्शो मुर आन कली “गे बेन्यामीन आ थर डा मुर, आं लोव नेनीन। मार, येस्से आ तौमी नेल्ल इन कली रू नु अडगुर रू गेबा कों? नेल्ल इन कली सहे का डा नु हजार का लडाइ पाइब मुर आन कप्तान सेल्बा कों, दे आस पाइनीनी? 8 मोपतीके गे नेल्लेम आं कली मरिम्शो पशो बाक्तीनी। इन दातेमी सुइम आं कली आं तौ नु येस्से आ तौ कबल पमुशो मशेंदीनी। सुइम आं कली आं तौमीन आं गेय पाइब कली जोंब पोक्शा, आं कली बाप्पाइशो लोव मशेंदीनी” देंमाक्त। १सामुएल १८:३ 9 मिनु सावल आ गेय पाइब नु राप्शा बाक्शो एदोम डा दोएगमी “गे येस्से आ तौ कली नोब डा अहीतुब आ तौ अहीमेलेक आ बाक्तीकेम जाक्शो ताता। भजन संग्रह ५२:२; १सामुएल २१:१-१० 10 अहीमेलेकम दाऊद आ पबर्म परमप्रभु यावे कली पुंइतु। मेको नोले जचा थोवक नु पलिस्ती गोल्याथ आ तरवार यो मेको कली गेप्तु” देंमाक्त।

11 मिनु सावलमी नोब डा चढेब अहीतुब आ तौ अहीमेलेक नु नोबम बाक्ब आ खिं डा चढेब नेल्ल आन कली ब्रथ सोइक्तीमी बाक्त। मिनु मेको नेल्ल पिप आ डोंइती जाक्मा बाक्त। 12 मिनु सावलम “ए अहीतुब आ तौ नेनो” देंमाक्त। मिनु मेकोमी “दुम्ब, आं प्रभु” देंमाक्त। 13 मिनु सावलम मेको कली “गे नु येस्से आ तौमी आं पबर्म मारदे मरिम्शो पसी? गे मेको कली शोब्ले नु तरवार गेप्तीवी। मेको आ पबर्म परमप्रभु नु पुंइतीवी। मेको आं पबर्म मरिम्शो पचा कली ठीक दुम्शो बाक्ब। मुल आं कली बाप्शा बाक्चा कली मोदेशो पाइतीनी” देंमाक्त। 14 मिनु अहीमेलेकमी “इन गेय पाइब नेल्लेमी थमा सुइक्चा पुंइसीशो इन चांइवा, इन गेय पाइब दुम्शो, इन खिंमान पाइक्चा पुंइसीब दाऊद बाक्ब। १सामुएल १८:२२, २७ 15 मोदेशो मुर आ पबर्म परमप्रभु नु डोंइती डा खेयप सल्ला पुंइशा, मार मरिम्शो पडा डा? मोदेशो लोव आं रे डोन बाक्ल। गो नु आं खिं डा मुर आन कली दोस मगेकी। मारदे हना, गो एको आ पबर्म मारेइ मतुइशो बाक्नीकी” देंमाक्त। 16 मिनु पिपम “अहीमेलेक गे थमा पा साइक्चा पुंइसीनेवे। गे नु इ खिं डा मुर नेल्ल साइक्चा पुंइसीनीम” देंमाक्त। 17 मिनु सावलम आ नेक्था उइ राप्शा बाक्शो आ कली खाल पाइब कली “लशा परमप्रभु यावे कली चढेब आन कली सतो। मारदे हना, मेकोपुकी दाऊद नु गारशो बाक्नीम। मेकोपुकीमी दाऊद प्रोक्शो बाक्ब, दे तुइशशा यो, आं कली मशेंदीमी” देंमाक्त। तन्न पिप कली खाल पाइबपुकीमी परमप्रभु यावे कली

चढेब आन कली साइक्चा थुं मपामे बाक्त। 18 मोपतीके पिपम एदोम डा दोएग कली “ए दोएग लशा चढेब आन कली सतो” देंमाक्त। मिनु दोएग लशा, चढेब आन कली सदा बाक्त। मिनु मेकोमी मेको नाक्ती ८५ जना निसाफ पतीक ऊरीम नु थुम्मीम बाक्शो झोला फेक्शो मुर आन कली साइक्मी बाक्त। 19 सावलमी चढेब आन सहर नोब डा वोंइश मुर, मीश मुर, आलपुकी, ब्यफ गधा नु भेडा नेल्ल आन कली तरवारमी क्योरशा साइक्मी बाक्त। १सामुएल २१:२

20 अहीतुब आ तौ अहीमेलेक आ तौ का अबीयाथार चहिं प्रोक्शा दाऊद आ बाक्तीक जाक्दीम्माक्त। १सामुएल २३:६; मर्कूस २:२६ 21 मिनु अबीयाथारमी सावलम दोपा परमप्रभु यावे कली चढेब आन कली सदा, मेको नेल्ल दाऊद कली शेंदा बाक्त। 22 मिनु दाऊदमी अबीयाथार कली “मेको नाक्ती एदोम डा दोएग मेकेर बाक्त। मेकोम सावल कली शेंब, दे गो तुइश्शो नड। इ आफ नु आ खिं डा मुर नेल्ल आन कली साइक्पाइक्ब दोस ताइब गो दुम्नी। १सामुएल २२:९ 23 गे एक गो नु बाक्को। महिनो। इ कली साइक्चा माल्बम आं कली साइक्चा माल्शो बाक्ब। गे गो नु मारेइ मदुम्यु बाक्नेवे” दे मदा बाक्त। १राजा २:२६-२७

23

दाऊद सावल रे पा प्रोक्शो

1 मुरपुकीम दाऊद कली “पलिस्तीपुकीम कैलाह नु लडाइ पा अन्न वोइक्तीक रोइक्ना रोइक्न बाक्नीम” देंमा बाक्त। यहोसु १५:४४ 2 मिनु दाऊदम परमप्रभु यावे कली “गो लशा पलिस्तीपुकी नु लडाइ पड देय मपड” दे हिल्लो पवा बाक्त। मिनु परमप्रभु यावेम “लशा, मेको आन कली लडाइ तोव्रमी कैलाह कली प्रोनो” देंमाक्त। 3 तन्न दाऊद आ मुरपुकीम मेको कली “गो यहूदा रागीम बाक्शा ला यो हिंनीकी। कैलाह डा पलिस्तीपुकी नु लडाइ पाइतय हना, मेको क्येडा शुश हिंनीकी” देंमा बाक्त। 4 मिनु लेंशा दाऊदमी परमप्रभु यावे कली हिल्लो पवा बाक्त। मिनु परमप्रभु यावेमी “कैलाहम लावो। गो पलिस्ती आन कली इन गुइमी गेनुड” देंमाक्त। 5 मोपतीके दाऊद नु आ मुरपुकी कैलाहम लमा बाक्त। मिनु पलिस्तीपुकी नु लडाइ पामे बाक्त। मेकोपुकीम मेको आन बी ब्यफ रोइक्तमे बाक्त। मेको आन कली मरिम्शो पा फ्रूमे बाक्त। मिनु कैलाह डा मुर आन कली प्रोन्मे बाक्त। १सामुएल २२:२०; न्यायाधीस ८:२७

6 अहीमेलेक आ तौ अबीयाथार दाऊद आ बाक्तीक, कैलाह सहर प्रोक्मेनु, निसाफ पतीक ऊरीम नु थुम्मीम बाक्शो झोला यो लाइश्शा लशो बाक्माक्त। 7 दाऊद कैलाह ओव्रशो बाक्ब, दे का निक्शी मुरुमी सावल कली शेंदमे बाक्त। मिनु सावलमी “परमप्रभुम मेको कली आं गुइमी गेशो बाक्ब। मारदे हना मेको गारो हिरशो, आग्लो पाइश्शो, सहरम ओव्रशो बाक्ब” दे मिम्ता बाक्त। 8 सावलम आ लडाइ पाइब नेल्ल आन कली कैलाहम लडाइ पा दाऊद नु आ मुर आन कली एर ओथ रे पुम्चा नम, दे हुकुम पवा बाक्त। 9 मिनु दाऊदमी आंम पर्बम मरिम्शो पचा चिक्शो तुइक्ता बाक्त। मिनु मेकोमी अबीयाथार चढेब कली “निसाफ पतीक ऊरीम नु थुम्मीम बाक्शो झोला चाक्को” दे मदा बाक्त। १सामुएल ३०:७-८ 10 मिनु नोले मेकोमी “परमप्रभु यावे, इस्राएली आन परमप्रभु सावल कैलाहम जाक्शा, आं पर्बम एको सहर खतम पोक्चशो बाक्ब, देंशो लोव्र इन गेय पाइबम नेंशो बाक्नुड। 11 मार, कैलाह सहरम बाक्ब मुरपुकीमी आं कली मेको आ गुइम गेनीमी? मार आं नेंशो खोदेंशो पा सावल एक जाक्बा? परमप्रभु यावे, इस्राएली आन परमप्रभु, इन गेय पाइब कली शेंदीन” देंमाक्त। मिनु परमप्रभु यावेम “थमा पा मेको एक जाक्ब” देंमाक्त। 12 मिनु दाऊदमी “मार कैलाह डा मुरपुकीमी गो नु आं मुर आन कली सावल आ गुइम गेनीमी?” देंमाक्त। मिनु परमप्रभु यावेम “मो पाइनीम” देंमाक्त। 13 मिनु दाऊदमी आ ६ सहे खोइ मुर लाइश्शा, कैलाह रे गाक्माक्त। मिनु तेइ तेइ हिरना हिरन बाक्मा बाक्त। दाऊद कैलाह रे प्रोक्त, देंशो लोव्र नेंशा, सावल लेम्माक्त। 14 दाऊद जीफ डा पहाड डा गोरशो रागीमी बोल्यो खुइश्शा बाक्तीकेमी खुइश्शा बाक्माक्त। सावल मेको कली नाक्त किंत किंत माल्शा गाक्बाक्माक्त। तन्न परमप्रभुम दाऊद कली मेको आ गुइमी मगेवा बाक्त।

15 दाऊद जीफ डा गोरशो रागी डा होरेशम बाक्मेनु, सावलम थमा पा आ कली साइक्चा कली गूशा पिशो बाक्ब, दे तुइक्ता बाक्त। 16 मिनु सावल आ तौ योनाथन दाऊद आ बाक्तीक होरेश जाक्दीम्माक्त। मिनु मेको कली परमप्रभु आ नेंमी आ थुं बारपदा बाक्त। 17 मेकोमी “गे महिनीन। गे आं आफ आ गुइ रे मबेक्नीनी। मेकोम इन कली मथिप्ब। गे इस्राएल डा पिप दुम्नीनी। गो इन दी डा दुम्नुड। मेको लोव्र आं आफोम तुइश्शो बाक्ब” देंमाक्त। १सामुएल २०:३०-३१; १सामुएल २४:२१ 18 मिनु नोले मेको निक्शीमी परमप्रभु यावे आ डोंइती कबल पाम्से बाक्त। मिनु दाऊद होरेशम बाक्माक्त। योनाथन चहिं आ खिं लेम्माक्त। १सामुएल १८:३

19 मिनु जीफ डा मुरपुकीम सावल गिबाम बाक्मेनु “दाऊद आंइ दाते डा बोल्यो खुइश्शा बाक्तीक होरेशम बाक्ब। मेको हाकीलाह डांडा रे येशीमोन आ दक्खिन गे बाक्ब। १सामुएल २६:१; भजन संग्रह ५४:२ 20 मुल गे गेना बुप्चा दाक्नीनी, मेना ब्रुपीन। मिनु गो मेको कली इन गुइम गेनीकी” दे लोत्र पामे बाक्त। 21 मिनु सावलमी “थमा पा परमप्रभु यावेम इन कली आसीक गेवल। मारदे हना गो आं कली शिशी पाइतीनी। 22 मुल लशा, चिनु रूपीन। मिनु मेको ते बाक्मे? मेको कली सुम तवा तुइक्तीन। मेको मुर आन मिक्च सिल्ल बाक्ब। 23 मेको तेको खुइक्तीकेम बाक्मे, रिम्शो पा रूपीन। मिनु आं बाक्तीक जाक्शा शेंदीनी। मिनु गो गेपुकी नु लाइनुड। मेको एको रागीम बाक्त हना, गो यहूदा आ खिं खिं डा मुर आन दाते रे माल्शा गुंइनुड” देंमाक्त।

24 मिनु मेकोपुकी रीब पा सावल क्येडा डोंइती जीफ गे लमा बाक्त। दाऊद नु आ मुर चहिं अराबाह डा माओनम बाक्मा बाक्त। मेको येशीमोन आ दक्खिन गे डा गोरशो रागीम बाक्ब। यहोसु १५:५५ 25 सावल आ मुरपुकी नु मेको आन कली माल्थ गाक्माक्त। दाऊदम मेको लोत्र नेंशा, रोंगु लुक्च लशा, माओन डा गोरशो रागीम बाक्मा बाक्त। 26 सावल मेको डांडामी लमाक्त। दाऊद नु आ मुर मेको डांडा आ अर्को पटटी बाक्मा बाक्त। दाऊद नु आ मुरपुकी प्रोक्चा माल्ना माल्न बाक्मा बाक्त। सावल नु मेको आ नोले खोइक्बपुकीम चहिं मेको आन कली ग्याइक्चा कली आन नेक्था जाक्दीम्मा बाक्त। 27 मिनु लोत्र कुरब मुर का सावल आ बाक्तीक जाक्शा “रीब पा जाक्कीन। मारदे हना पलिस्तीपुकीम इन रागीम मारेइ मारेइ रोइक्ना रोइक्न श्येत गेशो बाक्नीम” देंमाक्त। 28 मोपतीके सावल, दाऊद कली खेदा पचा प्रोंइशा, पलिस्तीपुकी नु लडाइ पथ लेम्माक्त। मोपतीके मेको कली “प्रोक्पाइक्ब रोंगु” देंनीम। 29 मेको नोले दाऊद डांडा डोइश्शा एन-गेदी डा बोल्यो खुइश्शा बाक्तीक मेर बाक्माक्त।

24

दाऊद एन-गेदी डा पुक्खीम बाक्शो

1 मिनु सावल पलिस्ती आन कली खेदा पा लेम्मेनु, मुरपुकीमी मेको कली “दाऊद एन-गेदी डा गोरशो रागीम बाक्ब” दे लोत्र पामे बाक्त। यहोसु १५:६२ 2 मिनु सावलमी इस्राएल रे योत्रशो हजार सां मुर लाइश्शा, दाऊद कली रोकोश आन रोंग गे मला बाक्त। 3 मेको लांमी भेडा योत्रबपुकी बाक्मा बाक्त। मेको आ नेक्था पुक्खी का यो बाक्माक्त। मिनु सावल मेको आगा डाइक्चा कली ओत्रमाक्त। मेको पुक्खी आ नेल्ल क्येडा आगाम दाऊद नु आ मुरपुकी खुइश्शा बाक्शो बाक्मा बाक्त। 4 मिनु दाऊद आ मुरपुकीम “परमप्रभु यावेम देंशो खोदेंशो पा इन जोरी सत्रु कली इन गुइमी गेतीक नाक्त मुलाक्त बाक्ब। एको कली मार पचा दाक्नीनी मेको पने चाप्नीनी” देंमा बाक्त। मिनु दाऊद सिक्सी पा लशा, सावल आ वा आ सुर का रिक्गा बाक्त। भजन संग्रह १४२:१ 5 मोपा रिक्गा नोले “ला गो पिप आ वा रिक्ता” दे इक्का हिंमाक्त। 6 मिनु दाऊदम आ मुर आन कली “गो आं ठेयब मुर, परमप्रभु यावेम तेल लुक्शो मुर कली मारेइ मपाइनुड। गो मेको कली मसाइक्नुड। मारदे हना मेको परमप्रभु यावे आ तेल लुक्शो मुर बाक्ब” देंमाक्त। 7 मोपा दाऊदम आ मुर आन कली हुइश्शा, सावल कली मारेइ पाइक्चा मगेमी बाक्त। मिनु सावल बोक्शा, पुक्खी रे आ लां खोदा बाक्त। १सामुएल १:३४

8 मेको नोले दाऊद यो पुक्खी रे लाडगा गूमाक्त। मिनु सावल कली “आं प्रभु, आं पिप” दे ब्रेत्ता बाक्त। मिनु सावल आ नोले लेशशा कोत्रडा बाक्त। मिनु दाऊद बाप्शा खुम्की पा सेउ पवा बाक्त। 9 मिनु दाऊदमी “गे मारदे आं पर्बम मुर आन लोत्र नेंनीनी? गो इन कली मरिम्शो पाइब, दे थमा सुइक्नीनी? 10 मुलाक्त गेन तुइक्ताक्नी। मुलाक्त पुक्खी आगाम परमप्रभु यावेमी इन कली आं गुइम गेशो बाक्त। का निक्शीम ‘इन कली साइक्चा’ थुं पाम्तेक्म। तन्न गो इन कली प्रोंइशा सोइक्ताक्ड। मिनु गो ‘आं प्रभु, इन कली मसाइक्नुड। मारदे हना मेको परमप्रभु यावे आ तेल लुक्शो मुर बाक्ब’ देंती। 11 कोत्रडीन, आं आफ एको आं गुइम बाक्शो वा कोत्रडीन। गो एको रिक्ता, तन्न इन कली मसदु। मोपतीके गे रूपीन। गो इन कली श्येत गेचा नु साइक्चा ममिम्तु। गो इन कली मारेइ पाप मपड। मो हना यो गे आं कली साइक्चा दाक्नीनी। 12 परमप्रभु यावेम इस दातेम निसाफ पवल। मेकोमी आं पर्बम इन कली क्येक्क लेत्ताक्व हना यो, गो इन कली मारेइ मपाइनुड। 13 साइ डोंइती डा लोत्रमी ‘मरिम्शोमी मरिम्शोन जाक्ब’ देंशो बाक्ब। मो हना यो गो आं गुइ इन पर्बम मक्युक्नुड। रोमी १२:१९; १ पत्रुस २:२३ 14 इस्राएल डा पिप सु का आ पर्बम बोक्शो बाक्बा? गे सु कली खेदा पना पन बाक्नीनी? बेक्शो कुचुम, चुक्बे का कली खेदा पाइनीनी? 15 परमप्रभु यावे निसाफ पाइब बाक्ब। मिनु मेकोमी इस दातेम निसाफ पवल। परमप्रभु यावेम कोत्रडल। आं परमप्रभु यावेम आं कली इन गुइ रे प्रोंइब” देंमाक्त।

16 मिनु दाऊद ब्वाक्ने थुमा नोले, सावलम “मार, मेको इ सेंदा बाक्ब, आं तौ दाऊद?” देशा, डाक्माक्त। 17 मिनु मेकोमी दाऊद कली “गे आं क्येडा ठीक पाइब मुर बाक्नेवे। गे आं कली रिम्शो पाप्तीवी। गो चहिं इ कली मरिम्शो पाता। 18 मुलाक्त गे आं कली रिम्शो पाप्तीवी। परमप्रभु यावेमी मुलाक्त आं कली इ गुइम गेपु। तन्न गे आं कली मसाइय्यी। 19 सुइमी आंम जोरी सत्रु आन कली थिश्शा, रिम्शो पा लचा मगेब। मोपतीके मुलाक्त इ पशो गेय आ पबर्म परमप्रभु यावेम इ कली इनाम गेवल। 20 मुल गो थमा पा तुइक्ताक्ड गे पिप दुम्नेवे। इ पालाम इस्राएलम थम रिम्शो दुम्ब। 21 मोपतीके परमप्रभु यावे आ नेम आं खिं डा मुर आन कली, आं चच युइ आन कली खतम मपाइनुड। आं नें आं आफ आ खिं रे मक्याम्नुड, दे कसम जावो” देंमाक्त। १सामुएल २३:१७ 22 मिनु दाऊदमी सावल नु कसम जवा बाक्त। मिनु सावल आ खिं लेम्माक्त। दाऊद नु आ मुरपुकी चहिं आन बोल्यो खुइश्शा बाक्तीक पुक्खीम लेम्मा बाक्त।

25

सामुएल बेक्शो

1 मिनु सामुएल बेक्माक्त। मिनु इस्राएली नेल्ल बुक्शा, मेको आ पबर्म रोंका पामे बाक्त। मेको कली आ खिं रामाह उइ थिम्मे बाक्त। मेको नोले दाऊद पारान डा गोरशो रागीम ब्रुम्माक्त। १सामुएल २८:३

दाऊद, नाबाल नु अबीगेल

2 माओनमी कारमेल डा मुर का बाक्माक्त। मेको शुश शोंप पाइश्शो मुर बाक्माक्त। मेको के हजार सां भेडा नु हजार का क्यारश बाक्मा बाक्त। मेको कारमेलम आ भेडा आन ऊन प्रेक्शो बाक्माक्त। यहोसु १५:५५ 3 मेको आ नें नाबाल बाक्माक्त। आ मीश आ नें अबीगेल बाक्माक्त। अबीगेल दारशो नु निप्स पाइश्शो मीश मुर बाक्माक्त। मेको आ वोंइश, कालेब आ चच युइ, खकटा थुं पाइश्शो मरिम्शो पाइब बाक्माक्त। 4 दाऊदमी गोरशो रागीम “नाबालमी आ भेडा आन ऊन प्रेक्शो बाक्ब” देंशो लोव्र नेना बाक्त। 5 मिनु दाऊदमी आ १० ठिटा मुर आन कली “कारमेल लने। मिनु नाबाल कली ग्रुमीन। मिनु मेको कली आं नेमी ‘रिम्शो बाक्कीन’ मतीन। 6 मिनु मार देनीन देशा हना ‘इन थुं नाइसेक्ल। इन खिं डा मुर थुं नाइश्शा बाक्चा तामेक्ल। गे नु बाक्ब नेल्ले थुं नाइश्शा बाक्मल। 7 गे नु भेडा आ ऊन प्रेक्ब मुर बाक्नीम, देंशो लोव्र नेता। इन भेडा योव्रबपुकी गो नु बाक्शो बाक्तेक्म। मिनु गो मेको आन कली मारेइ मरिम्शो मपक। मेकोपुकी कारमेलम बाक्मानु, मेको आन के मारेइ मजाम। 8 इन ठिटा आन कली हिल्लो पने। मिनु मेकोपुकीम इन कली शेनीम। मोपतीके आं मुर आन कली रिम्शो पा शिशी पा ब्रने। मारदे हना मुलाक्त चाड का बाक्ब। इन गेय पाइब नु इन तौ दाऊद कली मार गेने चाप्नीनी मेको गेने’ देंत, दे मतीन” देंमाक्त। 9 मिनु दाऊद आ ठिटा मुरपुकी लशा, नाबाल कली दाऊद आ नेमी मेको लोव्र नेल्ल मदमे बाक्त। मिनु रिम्तमे बाक्त। 10 तन्न नाबालमी दाऊद आ मुर आन कली “दाऊद माइश्शो सु बाक्बा? येस्से आ तौ बाक्बा? सिनाक्त मुलाक्ती आन होव्रप रे प्रोक्शो वाइल शुश बाक्नीम। 11 आं शोब्ले, आं ब्वाक्कु नु ऊन प्रेक्ब आन कली सेल्शो श्ये लाइश्शा, मतुइश्शो मुर आन कली गेनुडा?” दे माइक्मी बाक्त। 12 मिनु दाऊद आ ठिटा मुरपुकी लेशशा, जाक्दीश्शा, दाऊद कली मेको लोव्र नेल्ल शेंदमे बाक्त। 13 मिनु दाऊदम आ मुर आन कली “नेल्लेमी आंम आंम तरवार पिम्सीन” देंमाक्त। दाऊदमी यो आ तरवार पिम्से बाक्त। मिनु ४ सहे जना खोइ मुर दाऊद आ नोले खोदमे बाक्त। सहे निक्शी मुर चहिं मार मार खाल पचा कली मेक उइ बाक्मा बाक्त।

14 मिनु नाबाल आ ठिटा मुर कामी नाबाल आ मीश अबीगेल कली “दाऊदम गोरशो रागी रे आ मुर आन कली आंइ होव्रप कली मान पा, मार मार पुंइथ सोइश्शो बाक्त। तन्न आंइ होव्रपमी मेको आन कली हुइक्ताक्व। 15 मेको मुरपुकीम आंइ कली रिम्शो पशो नम। आंइ कली मारेइ श्येत मगेम। गोपुकी मेकोपुकी नु ब्वाक्कीम नाक्दो नाक्ती एर ओंथ पकानु, आंइ के मारेइ मजाम। 16 गो आंइ भेडा योव्रदीकानु, मेकोपुकी नाक्दो नाक्ती आंइ एर ओंथ गारो खोदेंशो पा बाक्तेक्म। 17 गे मार पचा माल्नीनी मेको रिम्शो पा मिम्तीन। मारदे हना, आंइ होव्रप नु आ खिं थमा पा खतम दुम्ब। आंइ होव्रप थम मरिम्शो बाक्ब। मेको नु लोव्र पने सुइ मचाप्ब” देंमाक्त।

18 मोपतीके अबीगेलम रीब पा सहे निक्शी शोब्ले, थैलो निक्शी अडगुर शांबु, क्योरशा ठीक सेल्शो ५ ओटा भेडा, ५ एफाह तांब्रा, सहे का सोव्रपाइश्शो अडगुर के शोब्ले नु सहे निक्शी सोव्रपाइश्शो फोव्रशी गेडा के शोब्ले ठीक पा गधा आन कली कुरपदा बाक्त। एफाह का ७ लिटर खोदेंशो पा रीब। 19 मिनु मेकोमी आ ठिटा गेय पाइब आन कली “गे आं डोंइती लने। गो इन नोले पीनुड” माइक्मी बाक्त। तन्न आ वोंइश नाबाल कली मेको मशेंदा बाक्त। 20 मिनु

मेको डांडाम फारतीक रे गधा लना लन बाक्मानु, दाऊद नु आ मुरपुकी मेको आन गे लुक्च ब्रुम्ना ब्रुम्न बाक्मा बाक्त। मिनु अबीगेलमी मेको आन कली गुमा बाक्त। 21 मिनु दाऊदमी “गोरशो रागीम मारेइ मजाम्चा डा पा, मेको मुर आ मार मार खाल पशो मोशा दुम्त। मेकोम आ कली रिम्शो पाइश्शो आ पा डा, आं कली मरिम्शो पाइक्ती” देंमाक्त। 22 मिनु दाऊदमी “दीसा सुनी सम्म गो मेको आ खिं डा वोंइश मुर नेल्ल मसाइक्ताक्मी हना, परमप्रभुम आं कली मोन पवल” दे कसम जवा बाक्त।

23 मिनु अबीगेलमी दाऊद कली तशा, आ गधा रे फु तोइश्शा, दाऊद आ डोंइती बाम्माक्त। 24 मेको आ खोइलीम बाप्शा “आ प्रभु, दोस ताइब गो नड। इन वाइलीम कली ब्वाक्चा गेने। आं लोत्र नेनीन। 25 आ प्रभु, मेको शोर गाक्शो मुर आ पर्बम मगाइक्तीन। मेको आ नें दोपा नाबाल बाक्मे, मेको मो देंशोन बाक्ब। आ नें नाबाल बाक्ब। मिनु मेको मूर्ख बाक्ब। तन्न गो, इन गेय पाइबम, इन सोइश्शो ठिटा आन कली मतडमी।

26 आ प्रभु, परमप्रभु यावे ब्रोंइशा बाक्शो खोदेशो पा नु इन ब्रोंइशा बाक्शो खोदेशो पा, परमप्रभु यावेमी इन कली हुश खाक्श पोक्तीक नु क्येक्क लेत्तीक रे तेक्शो बाक्ब। इन जोरी सत्रु नु इन कली मरिम्शो पाइब नाबाल खोदेशो दुम्मल। 27 मिनु इन गेय पाइबम, आ प्रभु, इन कली चाक्शो कोसेली इन नोले खोइक्ब ठिटा आन कली गेन। 28 इन गेय पाइब आ मरिम्शो पशो डा आं कली माफ गेयीनी। परमप्रभु यावेमी आं प्रभु, इन खिं डा मुर आन कली गेना हना यो रिम्शो पवल। मारदे हना गे परमप्रभु यावे आ पर्बम लडाइ पशो बाक्नीनी। गे बाक्नी सम्म इन कली मारेइ मरिम्शो मदुम्ब। २सामुएल ७:१६ 29 सुइ मुरुम इन कली खेदा पा साइक्चा माल्तु हना, परमप्रभु यावे, इन परमप्रभुमी इन कली कोत्रब। तन्न इन जोरी सत्रु आन कली चहिं हुरदम वोइश्शा ताइश्शो फुल्लु खोदेशो पा ताइक्ब। भजन संग्रह ६९:२९ 30 परमप्रभु यावेम आं प्रभु, इन कली, आ देंशो खोदेशो पा रिम्शो पाप्तु हना नु इन कली इस्राएल डा सासन पाइब सेल्लु हना, २सामुएल ५:२ 31 गे मो हुश खाक्श पोक्तीक नु इन गाइश्शोमी मरिम्शो पशो आ पर्बम सुर्ता पचा ममाल्नीनी। इन थुं खाइक्पाइक्चा ममाल्नीनी। मिनु परमप्रभु यावेमी इन कली रिम्शो पाप्तु हना, इन गेय पाइब, आं कली यो मिम्तीन” देंमाक्त।

32 मिनु दाऊदमी अबीगेल कली “मुलाक्ती आं कली गुम्पाइक्चा कली इन कली सोइक्ब परमप्रभु यावे, इस्राएली आन परमप्रभु ठेयब बाक्ल। 33 इन मिम्तीक रिम्शो बाक्ब। गे मुलाक्ती आं कली हुश खाक्श पोक्तीक नु क्येक्क लेत्तीक रे तेक्तीके आसीक राइनीनी। 34 मिनु परमप्रभु यावेम आं कली इ कली श्येत गेतीके रे तेक्शो बाक्ब। मारदे हना गे रीब पा आं कली गुम्थ जाक्तीनी। मो मपशो ननी हना परमप्रभु यावे, इस्राएली आन परमप्रभु ब्रोंइशा बाक्शो खोदेशो पा, सुनी सम्म नाबाल आ खिं डा वोंइश मुर का सम्म यो मलीम वा” देंमाक्त। 35 मिनु दाऊदमी अबीगेलमी आ कली चाक्शो कोसेली ब्रवा बाक्त। मिनु “इन थुं नाइश्शा खिं लेतीन। गो इन लोत्र नेंशा बिस्साक्यी” देंमाक्त।

36 मिनु अबीगेल लेशशा जाक्मेनु, नाबालमी आ खिंमी, पिपम खोदेशो पा ठेयब भोज सेल्ला भोज पशो तवा बाक्त। नाबाल ग्येरसीशा शांबुम दुक्शा बाक्शो बाक्माक्त। मेको थाम्पा दुक्शा बाक्तीके आ मीशेमी सुनी सम्म रिम्शो मरिम्शो मारेइ शेंने मचबा बाक्त। 37 सुनी शांबुम प्रोना नोले आ मीशेमी लोत्र नेल्ल शेंदा बाक्त। मिनु मेको आ लुडगीर खाइश्शा, फुल्लु खोदेशो दुम्माक्त। 38 मिनु १० नाक्त नोले परमप्रभु यावेमी मेको कली बेक्पदा बाक्त।

39 मिनु दाऊदम नाबाल बेक्शो लोत्र नेंशा मेकोमी “परमप्रभु यावे ठेयब बाक्ब। मारदे हना मेकोमी आं कली मरिम्शो पशो आ पर्बम नाबाल कली सजाइ गेप्तु। मिनु आ गेय पाइब, आं कली मरिम्शो पतीक रे तेक्ती। नाबाल आ मरिम्शो पशो आ पियामीन मोइक्तु” देंमाक्त। मिनु दाऊदमी अबीगेल कली आ मीश सेल्ला कली लोत्र पथ मुर सोइक्ता बाक्त। 40 मिनु दाऊद आ गेय पाइबपुकी अबीगेल आ बाक्तीक कारमेल लशा, मेको कली “दाऊदमी गे नु ग्युंभे पचा कली आंइ कली ब्रथ सोइक्ताक्व” देंमा बाक्त। 41 मिनु अबीगेल बोक्शा बाप्शा सेउ पा “गो इन गेय पाइब आन खोइल चिक्ब वाइलीम नड” देंमाक्त। 42 मिनु अबीगेल रीब पा सासे बाक्त। गधा डोइश्शा आ ५ जना गेय पाइब लाइश्शा लोत्र चाक्ब दाऊद आ मुरपुकी नु लमाक्त। मिनु मेको आ मीश दुम्माक्त। १सामुएल २७:३; १सामुएल ३०:५; २सामुएल ३:३

43 दाऊदम मेको क्येडा डोंइती येज्जेल डा अहीनोआम कली यो ग्युंभे पशो बाक्माक्त। मिनु मेको निम्फा मेको आ मीश दुम्सा बाक्त। 44 मेना सावलमी आ तमी, दाऊद आ मीश मिकाल कली गाल्लीम डा लाइश आ तौ पाल्ती कली गेवा बाक्त। २सामुएल ३:१४-१५

26

दाऊदम सावल कली मसाइशो

1 मिनू जीफ डा मुरपुकी सावल आ बाक्तीक गिबाम जाक्शा “दाऊद येशीमोन आ आइक्ची हाम हाकीलाह डांडाम खुइशशा बाक्शो बाक्ब” दे शेंदमे बाक्त। १सामुएल २३:१९-२४:२३; भजन संग्रह ५४:२ 2 मिनू सावलमी दाऊद कली माल्चा, दे हजार सां इस्राएल डा योव्रशो मुरपुकी लाइशशा, रीब पा जीफ डा गोरशो रागी गे लमाक्त। 3 येशीमोन आइक्ची हाम डा हाकीलाह डांडा डा लां आ नेक्था आन बाक्तीक सेल्मे बाक्त। मेना दाऊद चहिं गोरशो रागीमी बाक्माक्त। मिनू सावलम आ कली खेदा पचा कली गोरशो रागीम जाक्शो बाक्ब देंशो लोव्र नेना चोटीन 4 दाऊदमी क्यारी पाइबपुकी सोइक्ता बाक्त। मिनू सावल आ बाक्तीके तुइशशा लेम्मा बाक्त। 5 मिनू दाऊद सावल आ बाक्तीक गे लमाक्त। मिनू सावल नु आ लडाइ पाइब आन नेल्ल क्येडा ठेयब मुर, नेर आ तौ आबनेर इप्शा बाक्शो थिदा बाक्त। आ मुर नेल्लेम एर ओंथ रे हिरतीकेमी सावल इप्शो बाक्माक्त। १सामुएल १४:५० 6 दाऊदमी हित्ती अहीमेलेक नु सेरूयाह आ तौ योआब आ लोकब अबीशै गे लेशशा कोव्रशा “सावल आ बाक्तीकेम गो नु सु लने चाप्बा” देंमाक्त। मिनू अबीशैमी “गो लाइनुड” देंमाक्त। 7 मिनू नाक्दो दाऊद नु अबीशै सावल आ बाक्तीकेम ओव्रसा बाक्त। मिनू सावल आ मुर आन दातेमी आ तूतीक आ पिया गे खुक्शा, इप्शो थित्से बाक्त। आबनेर नु आ मुरपुकी चहिं सावल आ एर ओंथ हिरशा इप्शो बाक्मा बाक्त। 8 मिनू अबीशैमी दाऊद कली “परमप्रभुम मुलाक्ती इन जोरी सत्रु आन कली इन गुइमी गेशो बाक्माक्त। तूतीकेम कालेमीन खप सम्म ग्रुकसीचा डा पा आप्चा कली हुकुम गेयीनी। गो खेयप निक्शी आप्चा ममाल्डल” देंमाक्त। २सामुएल १६:९ 9 तन्न दाऊदमी अबीशै कली “पिप कली साइक्चा ममिम्तो। परमप्रभु यावे आ तेल लुक्शो कली साइक्बपुकी सु चहिं सजाइ मतशो बाक्बा डा?” देंमाक्त। 10 मिनू दाऊदमी लेंशा “परमप्रभु यावे ब्रोंइशा बाक्शो खोदेंशो पा, मेकोमीन मेको कली काबु साइक्ब कि आ बेक्ची नाक्त जाक्शा बेक्ब कि लडाइम लशा साइक्चा पुंइसीब। १सामुएल २४:१३ 11 गो परमप्रभु यावे आ तेल लुक्शो पिप कली गेनायो मरिम्शो मपाइनुड। तन्न मुल मेको आ पिया गे खुक्शो तूतीक नु आ ब्वाक्कु तूतीक ग्योब कुरशा गाक्स” देंमाक्त। 12 मिनू दाऊदम मेको आ पिया आ नेक्था बाक्शो तूतीक नु आ ब्वाक्क तूतीक कुरशा गाक्सा बाक्त। सुइमी मेको आस कली मतामे बाक्त। मिनू सुइ मसेंसीमा बाक्त। मारदे हना परमप्रभु यावेम मेको आन कली मारेइ मतुइक्चा डा पा निन्द्रा पपदा बाक्त। उत्पत्ती १५:१२

13 मिनू दाऊद आइक्ची हाम लशा, डांडा डोइशशा मेको आन क्येडा डोन राम्माक्त। 14 मिनू दाऊदम नेर आ तौ आबनेर आ नें थिशा “ए आबनेर, गे आं लोव्र लेत्ती” देंमाक्त। मिनू आबनेरमी “गे पिप कली हुइशशा लोव्र पाइब सु नवे” देंमाक्त। 15 मिनू दाऊदमी आबनेर कली “मार गे मुर मनवे। मार इस्राएलमी अरु यो इ खोदेंशो मुर बाक्नीमी? गे मारदे इ प्रभु, पिप कली रिम्शो पा खाल मपवी? मारदे हना आं मुर का इ प्रभु, इ पिप कली साइक्चा कली मेकेर जाक्त। 16 इन पशो मरिम्शो बाक्ब। परमप्रभु यावे ब्रोंइशा बाक्शो खोदेंशो पा गे साइक्चा पुंइसीचा डा बाक्नीनी। मारदे हना गे इन प्रभु कली खाल मपनी। परमप्रभु यावे आ तेल लुक्शो कली खाल मपनी। लो कोव्रडीन, मेको इन पिप आ पिया गे बाक्शो आ तूतीक नु ब्वाक्कु तूतीक ग्योब ते बाक्म?” देंमाक्त। 17 मेना सावलमी दाऊद आ सेंदा नेंशा “आं तौ दाऊद, मेको इ सेंदा बाक्बा?” देंमाक्त। मिनू दाऊदमी “आं प्रभु, आं पिप, आं सेंदा बाक्ब” दे लोव्र लेत्ता बाक्त 18 मिनू दाऊदम “आं प्रभु, मारदे गे इन गेय पाइब, आं कली, खेदा पाइनीनी? गो मार पडा डा? आं दोस मार बाक्बा? 19 मोपतीके आं प्रभु नु आं पिप, इन गेय पाइब, आं लोव्र नेनीन। परमप्रभु यावेमी इन कली आं कली खेदा पपाइक्चा कली पोक्शो बाक्त हना, मेकोमी चढेतीक का ब्राइबा कों। तन्न बेक्शा लाइब मुरुम इन कली आं कली खेदा पचा कली पोक्शो बाक्त हना, मेको परमप्रभु यावे आ डोंइती सराप रल। मारदे हना मेकोपुकीम मुलाक्त आं कली परमप्रभु यावे आ गेशो रू रे खेरशा ‘लावो, अरु देवी देवता आन कली सेउ पावो’ दे लोव्र पाप्तेक्म। उत्पत्ती ८:२१; ब्यवस्था ३२:९; २राजा ५:१७ 20 मोपतीके परमप्रभु यावे क्येडा डोन आं हुश मशाइक्पतीन। मारदे हना इस्राएल डा पिप चुक्बे का कली माल्थ ग्रूशो बाक्ब। मेको पहाडम थेलमी सिखार ग्यारशो खोदेंशो दुम्त” दे सावल कली देंमाक्त।

21 मिनू सावलमी “गो मरिम्शो पाता। आं तौ दाऊद, लेशशा जाक्को। मुलाक्ती गे आं कली ब्रोंइचा गेती मुल रे गो इ कली गेनायो श्येत मगेनुड। गो मूर्ख दुम्ती। गो थमा पा मरिम्शो पाता” देंमाक्त। 22 मिनू दाऊदमी “पिप आ तूतीक एक बाक्ब। इन ठिटा मुर का कुशा लदल। 23 परमप्रभु यावेम ठीक पाइब नु थमा सुइक्चा पुंइसीब मुर आन कली इनाम गेब। मिनू मुलाक्ती परमप्रभु यावेमी इन कली आं गुइमी गेपुतु। तन्न गो परमप्रभु यावे आ तेल लुक्शो कली साइक्ने मबिस्सीड। 24 दोपा मुलाक्त गो इन ब्रोंइतीक ठेयब मिम्तु, मोपा परमप्रभु यावेम आं ब्रोंइतीक कली ठेयब

मिम्तल। मिनु आं कली हिंचा डा श्येत नेल्ल रे प्रोंइयील” देमाक्त। 25 मिनु सावलमी दाऊद कली “आं तौ दाऊद, गे आसीक र्वेल। गे शुश गेय पशा, नेल्ल रिम्शो पाइनेवे। मिनु गे ग्रानेवे” देमाक्त। मिनु दाऊद आ लां खोदा बाक्त। सावल चहिं आ बाक्तीक मेर लेम्माक्त।

27

दाऊदमी बाक्तीक पुंइशो

1 दाऊदमी “काबु सावलम आं कली साइक्ब। मोपतीके पलिस्ती आन रागीम आं कली प्रोक्शा लचा रिम्शो दुम्ब। मिनु सावलमी इस्राएल आगामी आं कली माल्चा प्रोंइब। मिनु गो मेको आ गुइ रे ब्रोंइनुड” दे मिम्ता बाक्त। १सामुएल २३:२३ 2 मोपतीके दाऊद नु आ ६ सहे मुर रीब पा सांद लाक्शा, गाथ डा पिप माओक आ तौ अकीश आ बाक्तीकेम लमा बाक्त। १सामुएल २१:११-१६ 3 दाऊद आ लडाइ पाइब मुर, मेको आन खिं डा मुर नु दाऊद नु आ मीश निक्शी, येज्जेल डा अहीनोआम नु कारमेल डा बेक्शो नाबाल आ मीश अबीगेल गाथम अकीश नु बाक्मा बाक्त। १सामुएल २५:४०-४३ 4 दाऊद गाथम प्रोक्शा लत देंशो लोत्र मुरुमी सावल कली नेंपदमे बाक्त। मिनु मेकोम दाऊद कली माल्चा प्रोना बाक्त।

5 दाऊदम अकीश कली “गे आं कली शिशी पाइतीनी हना, आं कली इन रागी डा तेकोइ सहरम बाक्चा गेयीनी। गो दोपा पिप नु पिप आ सहरम बाक्नुडा?” देमाक्त। 6 मिनु मेको नाक्ती अकीशम मेको कली सिकलाग गेवा बाक्त। मोपतीके मुल सम्म सिकलाग यहूदा डा पिप आन के बाक्ब। यहोसु १५:३१ 7 दाऊद पलिस्ती आन रागीम बर्स का ४ महिना सम्म बाक्माक्त।

8 दाऊद नु मेको आ मुरपुकी लडाइ पथ गूमानु, गेशुरी, गिरजी अमालेकी आन मारेइ मारेइ रोइक्बाक्मा बाक्त। मारदे हना मेकोपुकी तेलाम रे शुर सम्म नु इजीप्त सम्म बाक्बाक्मा बाक्त। 9 दाऊदमी मेको आन रागीम मार मार रोइक्तानु, मेकेर डा वोंइश मुर मीश मुर सुइ आन कली का यो मवोइक्थु साइक्बाक्माक्त। क्यारश भेडा, बी ब्यफ, गधा, दलओंठ वासी नेल्ल लाइशशा अकीश आन बाक्तीक लेप्बाक्मा बाक्त। 10 मिनु अकीशमी मेको कली “मुलाक्त गे ते रोइक्तीनी” दे हिल्लो पाइक्बाक्माक्त। मिनु मेकोमी “यहूदा रागी डा नेगेब, येराहमेल आ मुर आन नेगेब नु केनी आन नेगेबम रोइक्ताक्क” देबाक्माक्त। 11 दाऊदमी सेस मीश मुर वोंइश मुर आन कली गाथम मचाक्बाक्माक्त। मारदे हना मेको आन पशो गेय आ पर्बम दाऊद नु आ मुर आन कली मरिम्शो सेल्नीम, दे दाऊद हिंबाक्माक्त। पलिस्ती नु बाक्म सम्म मेकोम मोदेशो पवा बाक्त। 12 अकीशम “दाऊदम आंम रागी इस्राएलमी मरिम्शो पतीके मेक बाक्चा मताइब। मोपतीके गेना हना यो आं मुर दुम्शा गो नु बाक्ब” दे मिम्शो बाक्माक्त।

28

लडाइ दुम्चशो

1 मेना पलिस्तीपुकीम इस्राएल नु लडाइ पचा, दे आन लडाइ पाइब मुर आन कली खुप्तमे बाक्त। मिनु अकीशम दाऊद कली “गे नु इ मुरपुकी लडाइ पचा कली गो नु लडाइ पतीकेम लचा माल्नीनी। देंशो लोत्र तुइशशो बाक्डे माइ” देमाक्त। 2 मिनु दाऊदमी अकीश कली “दुम्ब इन गेय पाइबम मार पने चाप्बा, मेको गे तुइक्नीनी” देमाक्त। मिनु अकीशमी दाऊद कली “गो इ कली बाक्डे सम्म आं कली खाल पाइब सेल्नन” देमाक्त।

सावल नु एन-डोर डा मीश मुर

3 सामुएल बेक्ने थुम्शो बाक्माक्त। मिनु इस्राएली नेल्लेमी मेको आ पर्बम रोंका पा मेको कली मेको आ सहर रामाहम थिम्शो बाक्मा बाक्त। सावलमी बेक्शो मुर रे लोत्र पाइब नु लिंक्यु कोत्रब आन कली मेको रागी रे गुंइने थुम्शो बाक्माक्त। १सामुएल २५:१; प्रस्थान २२:१७ 4 पलिस्तीपुकीमी नेल्ल क्येडा सक्ति पाइशशा आन लडाइ पाइब आन कली गुम्पाइशशा, शुनेम सहरम आन बाक्तीक सेल्मे बाक्त। सावलम इस्राएली नेल्ल आन कली गुम्पाइशशा गिल्बोआम आन बाक्तीक सेल्शा बाक्मा बाक्त। यहोसु १९:१८ 5 मिनु सावल पलिस्ती आन नेल्ल क्येडा सक्ति पाइशशा लडाइ पाइब कली तशा, थाम्पा हिंशा खिंखि पवा बाक्त। 6 मिनु सावलम परमप्रभु यावे कली हिल्लो पवा बाक्त। तन्न परमप्रभु यावेम डोमुम, ऊरीम नु परमप्रभु यावे आ लोत्र पाइब आन रे लोत्र मलेत्ता बाक्त। १सामुएल १४:४१; प्रस्थान २८:३० 7 मोपतीके मेकोमी आ गेय पाइब आन कली “आं कली बेक्शो मुर नु लोत्र पाइब मीश मुर का मालीन। गो मेकेर लशा, मेको कली हिल्लो पाइनुड” देमाक्त। मिनु “एन-डोरम मोदेशो मीश मुर का बाक्ब” दे आ

गेय पाइबपुकीमी देंमा बाक्त। लेवी १९:३१ ८ मिनु सावल अर्को वा फेक्शा, आ मुर निक्शी नु मेकेर लमाक्त। मिनु नाक्दो मेको मीश मुर आ बाक्तीक जाक्दीशा, मेको कली “आं कली मार दुम्बा बेक्शो मुर कली हिल्लो पा शेंदीनी। मिनु गो तेको बेक्शो मुर कली ब्रेत्चा देंनुडा, मेको कली ब्रेत्तीन” देंमाक्त। ९ मेको मीश मुरुम मेको कली “सावलम मार पवा मेको गे तुइक्नीनी। मेकोमी बेक्शो मुर नु लोव्र पाइब नु लिंक्नु कोव्रब नेल्ल कली रागी रे गुंइशा खेरतु। मिनु गे मारदे आं कली साइक्पाइक्चा कली ओदेशो गेय पपाइक्चा माल्नीनी?” देंमाक्त। १० मिनु सावलमी परमप्रभु यावे आ नेम कसम जशा, मेको कली “परमप्रभु यावे ब्रोइशा बाक्शो खोदेशो पा, गे एको गेय आ पर्बम मारेइ सजाइ मताइनीनी” देंमाक्त। ११ मिनु मेको मीश मुरुम “सु कली ब्रेत्चा” दे हिल्लो पवा बाक्त। मिनु सावलमी “सामुएल कली ब्रेत्चा” देंमाक्त। १२ मिनु मेको मीश मुरुमी सामुएल कली तशा ठेयब सेंदा पा ग्रीशा सावल कली “गे आं कली मारदे मरिम्शो पवी? गे सावल बाक्डे बाक्त” देंमाक्त। १३ मिनु पिपम मेको कली “महिनी। गे मार तवी” देंमाक्त। मिनु मेको मीश मुरुम “गो स्वर्ग डा गेय पाइब खोदेशो खप रे गूशो ताता” देंमाक्त। १४ मिनु सावलमी “मेको दोदेशो बाक्मे” दे हिल्लो पवा बाक्त। मिनु मेकोमी “खूशो मुर का गूशा कुत। मेकोमी दारशो वा फेक्शो बाक्त” देंमाक्त। मिनु सावलमी मेको सामुएल बाक्ब, दे तुइश्शा खुम्की पा बाप्शा सेउ पवा बाक्त।

१५ मिनु सामुएलमी सावल कली “गे मारदे आं कली श्येत गेशा, गुंइदीनी?” देंमाक्त। मिनु सावलमी “गो थम ठेयब श्येतम बाक्नुड। पलिस्तीपुकीम आं कली लडाइ तोशो बाक्नीम। परमप्रभुम आं कली प्रोइती। मेकोम आं कली आ लोव्र पाइब नु डोमु रे लोव्र मलेत्ती। मोपतीके गो इन कली ‘मुल मार पचा माल्नुडा’ दे हिल्लो पचा कली ब्रेत्ताक्नीनी” देंमाक्त। १६ मिनु सामुएलमी “परमप्रभु यावेम इ कली प्रोइशा, इ जोरी सत्रु दुम्शो बाक्ब, दे तुइश्शा यो, गे आं कली मारदे हिल्लो पयी। १७ परमप्रभु यावेम डोंइती आं कली देशो खोदेशो पा पाप्तु। परमप्रभु यावेमी मेको राज्य इ गुइ रे लाइश्शा, इ नेक्था डा मुर दाऊद कली गेशो बाक्ब। १सामुएल १५:२८ १८ मारदे हना गे परमप्रभु यावे आ देशो मटिवी। अमालेकी आन पर्बम परमप्रभु यावे आ गाइश्शो गे मखबी। मोपतीके मेकोम मोदेशो पाप्तु। १सामुएल १५:१८-१९; प्रस्थान १७:१४, १६ १९ मुल चिनु तेम्शा, परमप्रभु यावेमी इस्राएली नु इ कली पलिस्ती आन गुइमी गेब। दीसा गे नु इ तौपुकी गो नु बाक्नीनी। परमप्रभु यावेमी इस्राएल डा लडाइ पाइब नेल्ल आन कली पलिस्ती आन गुइमी गेब” देंमाक्त। १सामुएल ३१:६

२० मिनु सावल सामुएल आ लोव्र नेंशा हिंशा, आ थुं ग्येत्थ लुक्च दुम्शा, खपीम गोल्माक्त। मिनु नाक्त रे नाक्दो रे मारेइ मजतीके मेको आ बोल नेल्ल जाम्माक्त। २१ मिनु मेको मीश मुर सावल आ नेक्था लशा, सावल शुश हिंशो तशा, सावल कली “गो बेक्चा आ पर्बम महिंथु, इन देशो टीता। २२ मोपतीके मुल गे आं लोव्र नेनीन। गो इन कली जचा थोव्रक गेनुड। बोल्यो दुम्शा इन लां गाक्चा कली मेको जने” देंमाक्त। २३ मिनु सावलमी “गो मजाइनुड” देंमाक्त। तन्न आ गेय पाइबमी यो मेको मीश मुर आ देशो लोव्रमी लोव्र तेम्दा बाक्त। मिनु मेको आन देशो लोव्र बिश्शा, खप रे बोक्शा, खाटम निस्से बाक्त। २४ मेको मीश मुर आ खिंमी दोम्शो बाछा का बाक्माक्त। मेको मीश मुरुम मेको बाछा क्योरशा क्येशा, फस निवा बाक्त। मिनु बोरब ओख्ती मसुप्शो शोब्ले चोवा बाक्त। प्रस्थान १२:३९ २५ मिनु मेकोमी, सावल नु आ गेय पाइब आन कली खेत्तीमी बाक्त। मिनु मेकोपुकीम मेको जशा ब्वशा मेको नाक्दोन गाक्मा बाक्त।

29

दाऊद पलिस्ती नु ब्राशो

१ पलिस्तीपुकीमी लडाइ पाइब आन कली अफेकम पुक्गमे बाक्त। इस्राएलीपुकीम चहिं येज्जेल डा ब्वाक्कु बुक्तीकेम आन बाक्तीक सेल्मे बाक्त। १सामुएल ४:१; यहोसु १५:५३ २ पलिस्ती आन ठेयब मुरुम आन नेल्ल क्येडा सक्ति पाइश्शो लडाइ पाइब आन कली सहे सहे नु हजार हजार डा हुल पा कप्तान दुम्मा बाक्त। दाऊद नु आ मुरपुकी नोले डा हुलमी अकीश नु गाक्शो बाक्मा बाक्त। यहोसु १३:३ ३ मिनु पलिस्ती आन ठेयब मुरपुकीम “एको हिब्रूपुकी मारदे पिमा?” देंमा बाक्त। मिनु अकीशमी “एको इस्राएल डा सावल आ गेय पाइब दाऊद बाक्ब। एको गो नु बर्स का क्येडा यो शुश बाक्त। एको गो नु बाक्म रे मारेइ मरिम्शो मतड” देंमाक्त। १सामुएल २७:७ ४ तन्न पलिस्ती आन ठेयब मुरपुकी गाइश्शा, अकीश कली “मेको मुर कली इन गेशो आ बाक्तीकेम सोइक्तीन। मेकोम आंइ कली वारच पा लडाइ मपवल। मो पाप्तु हना, मेकोम आंइ कली वारच पखु पा मरिम्शो पाइब। आंइ कली साइश्शा आ प्रभु आ शिशी तचा मेको कली नेल्ल क्येडा रिम्शो बाक्ब। ५ एको दाऊद बाक्ब। एको आ पर्बम डोंइती मुरपुकीम ‘सावलम हजार हजार आन कली साइक्तीमी। तन्न दाऊदमी १० हजार हजार आन कली साइक्तीमी’ दे कुम्सो पना

पन, सिल पाम्तेक्म” देंमा बाक्त। १ सामुएल १८:७ 6 मिनु अकीशमी दाऊद कली ब्रेशा “परमप्रभु यावे ब्रोंइशा बाक्शो खोदेशो पा, गे थमा सुइक्चा पुंडसीब मुर बाक्नेवे। मिनु गे गो नु लडाइ पचा कली आं कली ठीक बाक्ब। मारदे हना इ जाक्शो रे मुल सम्म गेम मारेइ मरिम्शो पशो मतड। तन्न मेको कप्तानपुकीमी इ कली थमा मसुइक्नीम। 7 मोपतीके गे रिम्शो पा लेशशा खिं लावो। मेको पलिस्ती आन ठेयब मुर आन मिम्शो खोदेशो पा मरिम्शो मपावो” देंमाक्त। 8 मिनु दाऊदमी अकीश कली “गो मार पडा डा? गो इन गेय पचा गोडा रे गे आं कली मार मरिम्शो पशो तनी? गो आं प्रभु, आं पिप, आ जोरी सत्रु नु लडाइ पचा मताइक्नुडा?” देंमाक्त। 9 मिनु अकीशम दाऊद कली “गे आं पबर्म दोस मताइब नु परमप्रभु आ स्वर्ग डा गेय पाइब खोदेशो बाक्नेवे। तन्न पलिस्ती आन कप्तानम ‘गे मेकोपुकी नु लडाइ पथ लचा मदुम्नेवे’ देंतेक्म। २ सामुएल १४:१७ 10 मोपतीके दीसा सुनी कना बोक्शा, गे नु इ नोले खोइक्ब मुरपुकी आं गेशो सहरम लेतीन। दीसा सुनी कना बोक्कीन। मिनु नां सोव्रम चोटीन लने” देंमाक्त। 11 मोपतीके दाऊद नु आ मुरपुकी पलिस्ती आन रागी लेत्चा कली सुनी कना बोक्मा बाक्त। पलिस्तीपुकी चहिं येजेल डा लां खोदमे बाक्त।

30

दाऊदम सिकलाग डा मुर प्रोंइशो

1 मिनु लेम्मा आ नित्थ नाक्ती सिकलाग जाक्दीम्मा बाक्त। मेना अमालेकीपुकीमी नेगेब रोइक्ने थुम्शा, सिकलागम लडाइ तोशा मी सुइश्शो बाक्मा बाक्त। १ सामुएल २७:६ 2 मेकोपुकीम मीश मुर, आइक्च नु ठेयब मुर नेल्ल आन कली मसाइक्थु सेसीन लाइश्शो बाक्मा बाक्त। मेकोपुकीमी मेको आन कली डोंइडोंइती गाक्पाइश्शा लाइक्ना लाइक्न बाक्मा बाक्त। 3 दाऊद नु आ मुरपुकी मेकेर जाक्दीम्मानु, सहर कली मीम क्रोइश्शो नु मेको आन मीश नु तमी तौ नेल्ल आन कली योल्शो तुइक्तमे बाक्त। 4 मिनु दाऊद नु मेको नु बाक्शो मुरपुकी डाक्ने मचाप्थ्री डाक्मा बाक्त। 5 दाऊद आ मीश निम्फा येजेल डा अहीनोआम नु कारमेल डा बेक्शो नाबाल आ मीश अबीगेल निम्फा ग्याइश्शा लाइक्चा पुंडसीसा बाक्त। १ सामुएल २५:४२-४३ 6 दाऊद कली हिंचा डा दुम्शो बाक्त। मारदे हना मुरपुकीम मेको आन तमी तौ नेल्ल योल्ने थुम्तीके, दाऊद कली फुल्लु आप्शा साइक्नीकी देशो बाक्मा बाक्त। तन्न दाऊदमी परमप्रभु यावे, आ परमप्रभु कली सक्ति पुना बाक्त।

7 मिनु दाऊदमी अहीमेलेक आ तौ चढेब अबीयाथार कली “निसाफ पतीक ऊरीम नु थुम्मीम बाक्शो एफोद चाक्को” दे मदा बाक्त। मिनु चाक्गा बाक्त। १ सामुएल २३:९ 8 मिनु दाऊदमी परमप्रभु यावे कली “मार, गो मेको रोइक्ब आन कली खेदा पडा? गो मेको आन कली थिन्ने चाप्नुडा?” देंमाक्त। मिनु “मेको आन कली खेदा पावो। थमा पा, गे मेको आन कली थिश्शा, नेल्ल आन कली प्रोंइने चाप्नेवे” देशो नेना बाक्त। 9 मिनु दाऊद नु मेको आ ६ सहे मुर गाक्मा बाक्त। मिनु बेसोर डा खोल्सा सम्म जाक्दीम्मा बाक्त। मेकेर दशा गाक्ने मचाप्बपुकी बाक्मा बाक्त। 10 मिनु मेको आन दाते डा सहे निक्शी मुर थाम्पा दशा, बेसोर खोल्सा शोक्ने मचाप्शो बाक्मा बाक्त। मिनु मेकोपुकी मेकेर बाक्मा बाक्त। दाऊद चहिं ४ सहे मुर लाइश्शा खेदा पचा कली लमाक्त।

11 मोपा गाक्ना गाक्न लमानु, मेकोपुकीमी इजीप्त डा मुर का थित्मे बाक्त। मिनु मेको कली दाऊद आ बाक्तीक चाक्गमे बाक्त। मिनु मेको कली जचा तूचा गेमे बाक्त। मिनु मेकोमी जवा तूडा बाक्त। 12 मेको कली डल्ला का फोव्रशी गेडा नु डल्ला निक्शी सोक्शो अडगुर यो गेमे बाक्त। मिनु मेको नेक्गा नोले मेको आ सोक्त पिमाक्त। मारदे हना मेकोम नाक्त सां नु नाक्दो सां सम्म मारेइ मजशो बाक्माक्त। 13 मिनु दाऊदम मेको कली “गे ते रे जाक्शो नवे। सु आ मुर नवे?” दे हिल्लो पवा बाक्त। मिनु मेकोमी “गो इजीप्त डा ठिटा का नड। अमालेकी का आ वाइल नड। तन्न गो नाक्त सां डोंइती रे रोइ पतीके आं होव्रपम आं कली प्रोंइशा गाक्त। 14 गो यहूदा रागी डा केरेथी आन नेगेब डा मारेइ मारेइ नु कालेब आ नेगेब तेइ तेइ रोइक्ताक्क। मिनु सिकलाग सहरम मी सुइक्ताक्क” देंमाक्त। २ सामुएल ८:१८; यहोसु १४:१३ 15 मिनु दाऊदमी “गे आंइ कली लां कोंइशा मेको आन बाक्तीके चाक्दीन्ने चाप्नेवे?” देंमाक्त। मिनु मेकोमी “गे परमप्रभु आ डोंइती ‘आं कली मसाइक्नीकी नु आं होव्रप आ गुइम जिम्मा मगेनीकी’ दे कसम जने। मिनु गो लां कोंइशा मेको आन बाक्तीक चाक्दीत्नुड” देंमाक्त।

16 मिनु मेकोम लां कोंइना कोंइन मेको आन कली उइ चाक्दीदा बाक्त। मेकेर अमालेकी एर ओंथ ब्रशा जशा तूशा सिल पा, आन रोइश्शो मार मार पुक्शा ग्येरशा बाक्शो बाक्मा बाक्त। मारदे हना मेकोपुकीम पलिस्ती नु यहूदा रे शुश मार मार रोइश्शो बाक्मा बाक्त। 17 मिनु दाऊदम मेको आन कली सुनी रे आ दीसा नाक्दो सम्म नेल्ल साइक्मी बाक्त। ४ सहे ठिटा मुर ला दलओंठ डोइश्शा प्रोक्मा बाक्त। 18 दाऊदमी अमालेकी आन रोइश्शो नेल्ल लेंशा थिदा बाक्त।

मेको आ मीश निम्फा आस कली यो थिदा बाक्त। 19 मेको आन के मारेइ यो मजाम्माक्त। आन खिं डा आइक्ची ठेयब, तमी तौ रोइशशा लाइशशो नेल्ल थोत्रक थित्मे बाक्त। मोपा दाऊदमी मारेइ मारेइ प्रोना बाक्त। 20 दाऊद नु आ मुरपुकीम मेकोपुकीम डोंइती रोइशशो क्यारश भेडा, बी ब्यफ नेल्ल आन कली लदमे बाक्त। मिनु “एको नेल्ल दाऊद के बाक्ब” देंमा बाक्त।

21 नोले दाऊदम बेसोर डा खोल्साम नाइशशा बाक्शो सहे निक्शी मुर आन बाक्तीक जाक्माक्त। मेकोपुकी दाऊद कली नु मेको आ मुर आन कली ग्रुथ जाक्मा बाक्त। मिनु दाऊदम मेको नेल्ल आन कली “मार दुम्मे? दोपा बाक्नी” दे हिल्लो पवा बाक्त। 22 तन्न दाऊद नु लाइब का निक्शी शोर गाक्शो मुरपुकीम मेको आ लोत्र खोइशशा दाऊद कली “एको मुरपुकी गो नु मलम। गोपुकीम लशा रोइशशा चाक्शो मार मार गो मेको आन कली योक्शा मगेनीकी। मेकोपुकीम आन मीश नु आन आलपुकी ला लदमेक्ल” देंमा बाक्त। 23 मिनु दाऊदमी मेको आन कली “परमप्रभु यावेम इं कली प्रोंइतु। एको नेल्ल गेपुतु। इं जोरी सत्रु आन कली इं गुइमी गेपुतु। 24 सुम इन देंशो लोत्र बिप्बा? खाल पाइब नु लडाइम लाइब नेल्लेम उइक्थ उइक्थ ताइनीम” देंमाक्त। गन्ती ३१:२४ 25 मिनु दाऊदमी इस्राएलम मेको फुल्लुम मुशा ब्रेक्शो खोदेंशो पा नु निसाफ पतीक लोत्र पवा बाक्त। मेको मेना रे मुल सम्म लीशो बाक्ब।

26 मिनु दाऊद सिकलागम जाक्शा, रोइशशो मार मार रे यहूदा डा आ वारच खाल्पा आन कली “परमप्रभु यावे आ जोरी सत्रु रे रोइशशो मार मार एको इन कली कोसेली बाक्ब” देंशा, सोइक्ता बाक्त। 27 मेकोमी सु सु आन कली कोसेली सोइक्ता बाक्त देंशा हना, बेथेल सहर, नेगेब डा रामोथ सहर, यतीर, सहर 28 आरोएर सहर, सिफ्मोथ सहर, एशतेमोआ सहर, 29 राकाल सहर, येराहमेला आ मुर आन सहरम बाक्ब आन कली, केनी आन सहरम बाक्ब आन कली, †सामुएल २७:१० 30 होरमा सहर, बोर-अशान सहर, अथाक सहर 31 हेब्रोन सहरम बाक्ब नेल्ल आन कली नु दाऊद नु आ मुर गाक्शो सहर गांउ नेल्ल आन कली कोसेली सोइक्तीमी बाक्त। डोंइती मेकेर दाऊद नु आ मुरपुकीम मार मार पामे बाक्त।

31

सावल नु योनाथन बेक्शो

‡इतिहास १०:१-१२

1 पलिस्ती नु इस्राएली लडाइ पामे बाक्त। मिनु इस्राएली पलिस्ती आन क्येडा बुशा प्रोक्मा बाक्त। शुश इस्राएली गिल्बोआ डांडाम साइक्चा पुंडसमा बाक्त। 2 पलिस्तीपुकीम सावल नु आ तौ आन कली साप्पा खेदा पामे बाक्त। मिनु सावल आ तौ सां योनाथन, अबीनादाब नु माल्कीशुआ आन कली सदमे बाक्त। 3 लडाइम सावलमी थाम्पा श्येत जवा बाक्त। मारदे हना लिब्रा आप्बम मेको कली ख्रपाइशशा गार सेल्मे बाक्त। 4 मिनु मेकोम आ या कुरब कली “इ तरवार शोइशशा आं कली साइय्यी। मिनु मेको खोइक्तीक चिनु मखोइशशोपुकीम आं कली शुक्शी पचा मतामेक्ल” देंमाक्त। तन्न मेको या कुरब हिंशा, मबिस्से बाक्त। मेको नोले सावलमी आ तरवार शोइशशा आंमा थोक्सीशा बेक्माक्त। न्यायाधीस ९:५४ 5 मिनु मेको या कुरबमी सावल बेक्शो तशा, मेको यो आ तरवारम थोक्सीशा मेको नु बेक्माक्त। 6 मोपा सावल, आ तौ सांफा, आ या कुरब नु लडाइ पाइब नेल्ल काबुमीन बेक्मा बाक्त। 7 बेसी नु यर्दन आइक्ची हांबुम बाक्ब इस्राएलीपुकीम लडाइ पाइब इस्राएली प्रोक्शो नु सावल नु आ तौ नेल्ल बेक्शो नेंन्मे बाक्त। मोपतीके मेकोपुकी आंम आंम सहर प्रोंइशा प्रोक्मा बाक्त। मिनु पलिस्ती जाक्शा मेको सहर आन के सेल्मे बाक्त।

8 आ दीसा पलिस्तीपुकी बेक्शो आन मार मार रोइक्चा कली जाक्मा बाक्त। मिनु मेकोपुकीम गिल्बोआ डांडाम सावल नु आ तौपुकी बेक्शो थित्मे बाक्त। 9 मिनु मेकोपुकीम सावल आ पिया खोदमे बाक्त। मिनु आ यापुकी लदमे बाक्त। मेको नोले मेकोपुकीम मेको रिम्शो लोत्र रागी डा तेइ तेइ नु देवी देवता नेल्ल आन कली नेंपाइक्चा, दे मुर सोइक्तमे बाक्त। 10 मेकोपुकीम सावल आ यापुकी अशतारोथ माइशशो मूर्ति पाइशशो थाम आ खिंमी वोदमे बाक्त। मिनु मेको आ बेक्शो रां बेथ-शान डा गारोम किला थोक्शा क्युक्शा वोदमे बाक्त। ब्यवस्था २१:२२-२३ 11 पलिस्तीपुकीम सावल आ बेक्शो रां कली मार पामे, मेको याबेश-गिलाद डा मुरपुकीम नेंन्मे बाक्त। †सामुएल ११:१-११ 12 मिनु मेको आन बोल्यो मुरपुकी नेल्ल नाक्दो रे गाक्शा, सावल नु आ तौ आन बेक्शो रां बेथ-शान डा गारो रे शोलशा, याबेशम चाक्गमे बाक्त। मिनु मेको आन कली थिम्मे बाक्त। 13 मिनु नोले आन रुश याबेश डा ठेयब रवा आ पुंमी थिम्मे बाक्त। मिनु मेकोपुकी ७ नाक्त सम्म माइजा बाक्मा बाक्त। २सामुएल १:१२

२ सामुएल

ब्रेक्ब मुर: डोंइती १सामुएल नु २सामुएल किताब कान बाक्ताक्स। १इतिहास २९:२९ पिप दाऊद आ पशो मार मार बाक्मे, मेको डोंइती रे नोले सम्म नेल्ल परमप्रभु यावे आ लोव्र पाइब सामुएल, नाथान नु गाद आन ब्रेक्शो किताबम ब्रेक्शो बाक्मा बाक्त।

गेना ब्रेक्शो: ९७५ बि. सी. क्येडा नोले परमप्रभु यावे आ लोव्र पाइब रे ब्रेक्शा एको किताब थुम्शो बाक्त।

मार ब्रेक्शो: परमप्रभुम इस्राएली आन कली दाक्चा मप्रोंइब आ सांकछी बाक्ब।

दाऊदम सावल बेक्शो लोव्र नेंशो

1 सावल बेक्म नोले दाऊदम अमालेकी आन कली खेदा पशा, लेशशा नाक्त निक्शी सिकलाग सहरम बाक्शो बाक्माक्त। १सामुएल ३०:२६ 2 मिनु आ नित्थ नाक्ती, आ वा खाक्शो नु पियाम खप फुइसीशो मुर का सावल आ बाक्तीक रे जाक्माक्त। मिनु मेको दाऊद आ बाक्तीक जाक्शा, मेको आ डोंइती खुम्की पा बाक्माक्त। 3 दाऊदम मेको कली “गे ते रे जाक्डे?” दे हिल्लो पवा बाक्त। मिनु मेकोमी “गो इस्राएल डा लडाइ पाइब आन बाक्तीके रे प्रोक्शा जाक्ती” देंमाक्त। 4 मिनु दाऊदमी मेको कली “मार दुम्मे? आं कली देंनो” देंमाक्त। मिनु मेकोमी “लडाइ पाइबपुकी लडाइ रे प्रोक्तेक्म। शुश मुर साइक्चा पुंइसाक्म। मिनु सावल नु आ तौ योनाथन यो साइक्चा पुंइसाक्स” देंमाक्त। 5 मिनु दाऊदम मेको लोव्र चाक्ब ठिटा कली “सावल नु आ तौ योनाथन साइक्चा पुंइसाक्स, दे दोपा तुइक्ती?” देंमाक्त। 6 मिनु मेको ठिटामी “गो गिल्लबोआ डांडाम बाक्शो नड। मेकेर सावल कली आ तूतीक तिकशा राप्शा बाक्शो ताता। बग्गी डोइक्ब नु शारा डोइक्बपुकीम मेको कली थित्चा चिक्ताक्म। १सामुएल ३१:१-३ 7 मिनु मेकोमी नोले लेशशा कोव्रडानु, आं कली तती। मिनु ब्रेत्ताक्यी। मिनु गो ‘मार देंनी’ देंती। 8 मिनु मेकोमी ‘गे सु नवे’ दे हिल्लो पती। मिनु ‘गो अमालेकी का नड’ देंती। 9 मिनु मेकोमी ‘आं नेक्था जाक्को। आं कली साइय्यी। मारदे हना गो बेक्चा चिक्शो बाक्ती। आं सोक्त ला बाक्ब’ देंत। 10 मोपतीके गो आ नेक्था लशा, मेको कली साइक्ता। मारदे हना मेको मप्रोंइब, दे गो तुइक्ताक्ड। मिनु गो मेको आ पिया रे सिरपेच नु आ गुइ डा पांइतीके, आं प्रभु, इन बाक्तीकेम चाक्ता” देंमाक्त। 11 मेको लोव्र नेंशा, दाऊदम आ वा खाक्गा बाक्त। मेको नु बाक्ब मुर नेल्लेमी यो मो पामे बाक्त। १सामुएल ४:१२ 12 मेकोपुकी नां मरिक्म सम्म सावल नु आ तौ योनाथन आस परबम डाक्शा रोंका पा माइजा बाक्मा बाक्त। मारदे हना परमप्रभु यावे आ लडाइ पाइबपुकी नु इस्राएल आ खिं डा मुरपुकी तरवारम साइक्चा पुंइसमा बाक्त। १सामुएल ३१:१३ 13 मिनु दाऊदम मेको लोव्र चाक्ब ठिटा कली “गे ते रे जाक्शो नवे?” दे हिल्लो पवा बाक्त। मिनु मेकोमी “गो अर्को रागी डा अमालेकी का आ तौ नड” देंमाक्त। 14 मिनु दाऊदमी “परमप्रभु यावे आ तेल लुक्शो मुर कली साइक्चा महिने?” देंमाक्त। १सामुएल २४:७; १सामुएल २६:९ 15 मिनु दाऊदमी आ ठिटा मुर का कली ब्रेशशा “मेको कली सतो” दे अरेवा बाक्त। मिनु मेकोमी मेको कली तुप्शा सदा बाक्त। २सामुएल ४:१०-१२ 16 दाऊदमी मेको कली “इ हुश इ पिया तार मोंइसेक्ल। मारदे हना गे ‘गो परमप्रभु यावे आ तेल लुक्शो कली साइक्ता’ देंते। इ शोव्रमीन आंम इ कली दोसी सेल्साक्वे” देंमाक्त।

दाऊदम रोंका पतीक कुम्सो सेल्शो

17 मिनु दाऊदमी सावल नु आ तौ योनाथन आस परबम रोंका पतीक कुम्सो पवा बाक्त। 18 मिनु मेको रोंका पतीक कुम्सो यहूदा डा मुर आन कली शेंचा माल्ब, दे हुकुम पवा बाक्त। मेको कुम्सो याशार आ किताबम ब्रेक्शो बाक्ब। २सामुएल १:२२; यहोसु १०:१३

19 “इस्राएल, इ छेडछेड डांडाम साइक्चा पुंइसाक्म। सक्ति पाइशो मुरपुकी दोपा बेक्मा? 20 गाथम एको लोव्र मपने। अश्कलोन डा लांम एको लोव्र मपने। मो पाइतीनी हना, पलिस्ती आन तमी ग्येरसीनीम। खोइक्तीक चिनु मख्रोइशो आन तमी ग्येरसीनीम।

21 गिल्लबोआ नें पाइशो डांडा, इ तार सीत नु रेउ मयिल। अन्न ग्रेल्ब रू मबाक्ल। मारदे हना सक्ति पाइशो आ तेक्तीक ग्रांग्रा दिशो सेल्तेक्म। सावल आ तेक्तीक कली मुल रे तेल मखेक्नीम।

22 योनाथन आ लिब्रा साइक्चा पुंइसीशो जोरी सत्रु आन हुश नु बोल्यो मुर आन बोंसो मलुम्सीथु, गेनायो मले। सावल आ तरवार यो मोशा मले।

23 सावल नु योनाथन दाक्मुबाक्ताक्स। अरुम यो दाक्चा पुंडसाक्स। ब्रोंइसा नु बेक्सा नु यो काथा दुम्ताक्स। मेको निक्शी ककाकुली क्येडा यो रीब पा पाइब बाक्ताक्स। गुप्स क्येडा यो बोल्यो बाक्ताक्स।

24 इस्राएल डा तमीपुकी सावल आ पबर्म डाक्कीन। मेकोमी इन कली लल दारदारशो शुश क्येट लाइब वा फेक्पाइशो बाक्त। मेकोमी इन कली सुन के गहना पांइपाइशो बाक्त।

25 सक्ति पाइशो दोपा बेक्मा! मेको लडाइम बेक्तेक्म। योनाथन साइक्चा पुंडसीशा, डांडाम गोल्लशो बाक्ब। 26 आं लोकब योनाथन, गो इ पबर्म रोंका पाइनुड। गो इ कली थाम्पा दाक्ताक्न। इ आं कली दाक्शो ठेयब बाक्त। मीश मुर आन कली दाक्तीक क्येडा यो लाक्शो बाक्त। 27 सक्ति पाइशो दोपा बेक्मा! मेको लडाइम आन या खतम दुम्तेक्म” दे कुम्सो पशो बाक्त।

2

दाऊद यहूदा डा पिप दुम्शो

1 मेको नोले दाऊदमी परमप्रभु यावे कली “मार गो यहूदा डा सहर काम लडा?” दे हिल्लो पवा बाक्त। मिनु परमप्रभु यावेमी “लावो” देंमाक्त। मिनु दाऊदमी “तेको सहरम लड” दे हिल्लो पवा बाक्त। मिनु “हेब्रोन सहरम लावो” देंमाक्त। १सामुएल २३:६,९; १सामुएल ३०:७-८ 2 मोपतीके दाऊद आ मीश निक्शी येजेल डा अहीनोआम नु कारमेल डा बेक्शो नाबाल आ मीश अबीगेल नु मेकेर लमाक्त। १सामुएल २५:४२-४३ 3 मिनु दाऊदमी आ नु गाक्ब मुर आन खिं डा मुर नेल्ल यो लाइक्मी बाक्त। मिनु मेकोपुकी हेब्रोन सहरमी बाक्मा बाक्त। 4 मिनु यहूदा डा मुरपुकी जाक्शा, दाऊद कली तेल लुक्शा, आन पिप सेल्मे बाक्त। मिनु मुरपुकीमी दाऊद कली “याबेश-गिलाद डा मुरपुकीम सावल कली थिम्तेक्म” दे नैपदमे बाक्त। २सामुएल ५:३; १सामुएल १६:१३; १सामुएल ३१:११-१३ 5 मिनु दाऊदम याबेश-गिलाद डा मुर आन कली लोत्र कुरब मुर सोइशशा “परमप्रभु यावेम इन कली आसीक गेवल। मारदे हना गे इन प्रभु सावल कली रिम्शो पा थिम्तीनी। 6 मिनु परमप्रभु यावेमी इन कली गेना हना यो दाक्शा मप्रोनल। मिनु गो यो इन पशो गेय आ पबर्म इन कली इनाम गेनुड। 7 मोपतीके बोल्यो नु महिंब दुमीन। मारदे हना इन प्रभु सावल बेक्शा लत। मिनु यहूदा डा मुरपुकीम आं कली आन पिप सेल्टीमी” दे लोत्र कुरब मुर सोइक्ता बाक्त।

इश-बोशेथ पिप दुम्शो

8 मेना सावल आ लडाइ पाइब मुर आन ठेयब मुर नेर आ तौ आब्नेरमी सावल आ तौ इश-बोशेथ कली यर्दन ओथ हांबु महा-नाइमम चाक्गा बाक्त। १सामुएल १४:५०; उत्पत्ती ३२:२-३ 9 मिनु गिलाद, अशशुर, येजेल, एफ्राइम, बेन्यामीन आ थर डा मुर नु इस्राएली नेल्ल आन पिप सेला बाक्त। 10 सावल आ तौ इश-बोशेथ इस्राएल डा पिप दुम्मेनु ४० बर्स दुम्शो बाक्माक्त। मेकोमी बर्स निक्शी सम्म सासन पवा बाक्त। तन्न यहूदा डा मुर दाऊद आ नोले खोदमे बाक्त। 11 दाऊदमी हेब्रोन सहरम यहूदा डा मुर आन कली ७ बर्स ६ महिना सम्म सासन पवा बाक्त।

आसाहेल बेक्शो

12 नेर आ तौ आब्नेर, सावल आ तौ इश-बोशेथ नु आ गेय पाइबपुकी महा-नाइम रे गिबोन लमा बाक्त। 13 सेरूयाह आ तौ योआबमी दाऊद आ गेय पाइब आन कली लाइशशा गिबोन डा दोम्लीम लडाइ पवा बाक्त। मेको निक्शी गिबोन डा दोम्लीम ग्रुम्सा बाक्त। मिनु काम दोम्ली आ आइक्ची हांबुम, काम दोम्ली आ ओथ हांबुम आस लडाइ पाइब आन कली राप्पदसे बाक्त। १सामुएल २६:६; यहोसु ९:३,१७ 14 मिनु आब्नेरम योआब कली “इ लडाइ पाइब मुर नु आं लडाइ पाइब का का पा ग्रुम्शा इस डोंइती लडाइ पामेक्ल” देंमाक्त। मिनु योआबमी “दुम्ब, मो पामेक्ल” देंमाक्त। 15 मोपतीके मेकोपुकी ग्रूशा लशा, बेन्यामीन नु सावल आ तौ इश-बोशेथ आन मुर १२ जना नु दाऊद आ मुर १२ जना का का पा राम्मा बाक्त। 16 मिनु मेको नेल्लेमी आंम आंम जोरी सत्रु आन पियाम ग्याइशशा कोखाम तरवारम आप्मे बाक्त। मोपा नेल्ल कालेम बेक्मा बाक्त। मोपतीके गिबोन आ नेक्था डा रू कली हेल्काथ-हच्चुरीम देंनीम। मेको नें आ अर्थ तरवार आ क्योरतीक देंसीब। 17 मेको नाक्त थम ठेयब लडाइ दुम्माक्त। मिनु आब्नेर नु इस्राएल डा मुर दाऊद आ मुर आन क्येडा बुमा बाक्त।

18 सेरूयाह आ तौ सांफा योआब, अबीशै नु आसाहेल मेकेर बाक्शो बाक्मा बाक्त। आसाहेल ब्वाकी डा दोरब किशश खोदेशो रीब पा गेय पाइब बाक्माक्त। १इतिहास २:१६ 19 मेकोम ग्युरा पेरा एर ओथ मारेइ मकोव्रथु दोरशा आब्नेर कली खेदा पवा बाक्त। 20 मिनु आब्नेरम नोले लेशशा कोव्रशा “मार गे आसाहेल नवे?” दे हिल्लो पवा

बाक्त। मिनु आसाहेलमी “गो नड” देंमाक्त। 21 मिनु आब्नेरमी “ग्युरा गे कि पेरा गे लशा, लडाइ पाइब का कली आ मार मार रोइक्तो” देंमाक्त। तन्न आसाहेलमी मेको कली खेदा पचा मप्रोना बाक्त। 22 मिनु आब्नेरमी लेंशा “आं कली खेदा पचा प्रोंइयी। गो इ कली मारदे साइक्नुडा? इ लोकब योआब आ डोंइती दोपा आं कुल कोंइनुडा?” देंमाक्त। 23 तन्न आसाहेल एर ओथ लने मबिस्से बाक्त। मिनु आब्नेरमी आ तूतीक नोले गे आप्शा मेको आ कोव्रज खिदा बाक्त। मिनु मेकेर गोलशा बेक्माक्त। मिनु आसाहेल बेक्शो बाक्तीके जाक्शा मुर नेल्ल दिक्मा बाक्त। २सामुएल ३:२७ 24 मिनु योआब नु अबीशैमी आब्नेर कली खेदा पस डा पस पाम्से बाक्त। मिनु नां मलाक्थु, मेकोपुकी अम्माह डांडा जाक्मा बाक्त। अम्माह डांडा गिअह आ डोंइती, गिबोन रे गोरशो रागी डा लाम बाक्ब।

25 बेन्यामीन आ थर डा मुर आब्नेर गे बुक्मा बाक्त। मिनु हुल का दुम्शा, अम्माह डांडा तार लडाइ पचा कली ठीक दुम्मा बाक्त। 26 मिनु आब्नेरमी ठेयब सेंदा पा योआब कली “मार, गेना हना यो क्योरमुस डा मुस, साइक्मुस डा साइक्मुस बाक्चा? मेको नोले मरिम्शो दुम्ब, दे गे मतुइक्नेवे? आंम लोकब आन कली खेदा पचा प्रोंइचा, दे इ मुर आन कली ममाइक्नेवे?” देंमाक्त। 27 मिनु योआबमी “परमप्रभु ब्रोंइशा बाक्शो खोदेशो पा, गे मो मदेंशो नवे हना, मुरपुकीम दीसा सुनी सम्म यो आन लोकब आन कली खेदा पचा मप्रोनेम वा” देंमाक्त। 28 मिनु योआबम तुराही तबा बाक्त। मिनु मुर नेल्लेमी इस्राएली आन कली खेदा पचा प्रोन्मे बाक्त। मिनु लडाइ नांइसे बाक्त। 29 आब्नेर नु आ मुरपुकी नाक्दो रे अराबाह रे गाक्शा यर्दन खोला शोक्समा बाक्त। मिनु सुनी रे गाक्शा महा-नाइमम जाक्दीम्मा बाक्त। 30 मिनु योआबमी आब्नेर कली खेदा पचा प्रोंइशा, लडाइ पाइब आन कली पुक्मी बाक्त। मिनु आसाहेल प्रोंइशा, दाऊद आ मुर १९ जना मबाक्मा बाक्त। 31 तन्न दाऊद आ लडाइ पाइबपुकीमी बेन्यामीन आ थर डा मुर नु आब्नेर आ नोले खोइक्ब ३ सहे ६० जना आन कली सदमे बाक्त। 32 मेकोपुकीम आसाहेल कली कुरशा लाइशशा, आ आफ आ तुरस बेथलेहेम सहरम थिम्मे बाक्त। मेको नोले योआब नु आ मुरपुकी नाक्दो रे गाक्शा नां सोव्र सोव्र हेब्रोन सहरमी जाक्दीम्मा बाक्त।

3

दाऊद आ खिं डा मुर

1 सावल नु दाऊद आस खिं डा मुर शुश नाक्त सम्म लडाइ पस डा पस बाक्मा बाक्त। मिनु दाऊद बोल्यो दुम्ना दुम्न लमाक्त। सावल आ खिं डा मुर चहिं मचाप्ब दुम्ना दुम्न लमा बाक्त। २सामुएल ५:१०

2 हेब्रोनमी दाऊद आ तौपुकी जरमेसीमा बाक्त। मेको आ डोंइती जरमेशो तौ अम्नोन बाक्माक्त। मेको आ ममा येजेल डा अहीनोआम बाक्माक्त। १इतिहास ३:१-४; २सामुएल १३:१ 3 मेको आ माइला तौ किलेआब बाक्माक्त। मेको आ ममा कारमेल डा बेक्शो नाबाल आ मीश अबीगेल बाक्माक्त। मेको आ साइला तौ अब्सालोम बाक्माक्त। मेको आ ममा गेशुर डा पिप तल्मै आ तमी माकाह बाक्माक्त। २सामुएल १५:१ 4 काइला अदोनीयाह बाक्माक्त। मेको आ ममा हग्गीथ बाक्माक्त। ठाइला शेफत्याह बाक्माक्त। मेको आ ममा अबीतल बाक्माक्त। १राजा १:५ 5 आ कान्छा इश्रैआम बाक्माक्त। मेको आ ममा दाऊद आ मीश एगलाह बाक्माक्त। मेको नेल्ल हेब्रोनम जरमेशो दाऊद आ तौ बाक्मा बाक्त।

आब्नेरमी दाऊद नु कसम जशो

6 सावल नु दाऊद आस खिं डा मुर आन दातेमी लडाइ दुम्ना दुम्न लमेनु, आब्नेर सावल आ खिंमी बोल्यो दुम्ना दुम्न लमाक्त। 7 मिनु सावल आ कान्छी मीश का बाक्माक्त। मेको आइयाह आ तमी बाक्माक्त। मेको आ नें रिस्पाह बाक्माक्त। मिनु इश-बोशेथम आब्नेर कली “गे आं आफ आ कान्छी मीश नु मारदे इमे?” दे मदा बाक्त। 8 आब्नेरमी इश-बोशेथ आ लोव्र नेंशा गाइशशा “मार, गो यहूदा आ गेय पाइब कुचुम नडा? मुल सम्म गो इ आफ सावल आ खिं डा मुर, आ लोकब नु आ वारच आन कली मानेब मुर बाक्ती। गो इन कली दाऊद आ गुइम मगेड। मो हना यो गे एको मीश मुर आ पर्बम आं कली दोस गेनीनी। 9 गो परमप्रभुमी दाऊद कली देंशो मपाता हना, आं कली सजाइ गेयील। परमप्रभु यावेमी दाऊद कली दोदेशो कसम जवा, गो मोदेशो पाइनुड। 10 ‘सावल आ खिं डा मुर आन राज्य रोइक्चा नु दाऊद कली इस्राएल यहूदा नु दान रे बेयर-शेबा सम्म सासन पपाइक्नुड’ दे परमप्रभु यावेमी देंशो बाक्ब” दे आब्नेरम इश-बोशेथ कली देंमाक्त। 11 मिनु इश-बोशेथ आब्नेर क्येडा हिंतीके मारेइ लोव्र मलेत्ता बाक्त।

12 मेको नोले आब्नेरम हेब्रोनम बाक्ब दाऊद कली “एको रागी सु के बाक्बा? गे गो नु कबल का पने। मिनु गो इस्राएल नेल्ल इन के सेल्चा कली वारच पाइनुड” दे लोव्र कुरब मुर सोइक्ता बाक्त। 13 मिनु दाऊदमी मेको

आन कली “दुम्ब। गो गे नु कबल पाइनुड। तन्न गो इ कली लोव्र का पाइनुड। गे सावल आ तमी मिकाल कली मचाक्तीवी हना, आं डोंइती मजाक्को, दे मतीन” दे माइक्मी बाक्त। 14 मिनु दाऊदमी सावल आ तौ इश-बोशेथ कली यो “आं मीश मिकाल गेयी। गो मेको आ पर्वम सहे का जना पलिस्ती आन खोइक्तीक चिनु खोइशो कुशुल थाप्ताक्ड” देपाइक्थ मुर सोइक्ता बाक्त। १सामुएल १८:२५-२७ 15 मोपतीके इश-बोशेथम मुर सोइशशा मिकाल आ वोंइश लाइश आ तौ, पाल्तीएल आ बाक्तीक रे चाक्पदा बाक्त। १सामुएल २५:४४ 16 मेको डाक्ना डाक्न बाहुरीम सहर सम्म मिकल आ नोले खोइशशा पिमाक्त। मिनु आबनेरमी “लेशशा खिं लावो” दे मदा नोले लेम्माक्त।

17 मिनु नोले आबनेरम इस्राएल डा खाल्पा आन कली “शुश डोंइती रे गेपुकीम दाऊद कली पिप सेल्चा माल्शो ननी। 18 मुल मेको पची जाक्त। मारदे हना परमप्रभु यावेमी दाऊद कली ‘गो आं गेय पाइब दाऊद आ गुइ रे आं मुर इस्राएली आन कली पलिस्ती नु आन जोरी सत्रु नेल्ल आन गुइ रे प्रोंइनुड’ दे लोव्र थोक्शो बाक्ब” देमाक्त। 19 आबनेरमी बेन्यामीन आ थर डा मुर नु यो लोव्र पवा बाक्त। नोले आबनेर दाऊद आ बाक्तीक हेब्रोन लमाक्त। मिनु इस्राएली नु बेन्यामीन आ थर डा मुर आन पचा देंशो लोव्र नेल्ल देमाक्त।

20 मिनु आबनेर २० जना मुर नु दाऊद आ बाक्तीक हेब्रोन जाक्दीम्माक्त। दाऊदम आबनेर नु मेको नेल्ल आन कली भोज गेमी बाक्त। 21 मिनु आबनेरमी दाऊद कली “मुल आं कली इस्राएली नेल्ल आन कली आं प्रभु, पिप इन डोंइती चाक्चा गेयीनी। मिनु मेकोपुकीम गे नु कबल का पाइनीम। गे इन दाक्शो राज्य कामी रागी नेल्ल डा पिप दुम्नीनी” देमाक्त। नोले दाऊदमी आबनेर नु गारशा सोइक्ता बाक्त।

योआबम आबनेर कली साइशो

22 मेना योआब दाऊद आ मुरपुकी नु गारशा, लडाइ पा मार मार रोइशशा जाक्मा बाक्त। आबनेर चहिं गाक्ने थुम्तीके दाऊद नु हेब्रोन सहरम मबाक्माक्त। मारदे हना दाऊदम मेको नु गारशा, सोइक्ने थुम्शो बाक्माक्त। 23 मिनु योआब नु लडाइ पाइब हुल जाक्मानु, मुरुमी “नेर आ तौ आबनेर दाऊद आ बाक्तीक जाक्मेनु, दाऊदमी मेको नु गारशा सोइक्ताक्व” दे नेपदमे बाक्त। 24 मिनु योआबम पिप आ बाक्तीक लशा “गे एको मार पनी? आबनेर इन बाक्तीक जाक्माक्त। गे मारदे मेको कली मो लेशशा सोइक्तीनी? 25 गे नेर आ तौ आबनेर कली तुइक्नीनी। मेकोम इन कली जोल पा इन पर्वम रुप्चा कली नु गे मार पा बाक्नी, मेको तुइक्चा कली जाक्शो बाक्ब” देमाक्त। 26 मिनु योआब दाऊद आ बाक्तीक रे गूशा, लोव्र कुरब मुर कली आबनेर आ नोले सोइक्ता बाक्त। मिनु मेकोम आबनेर कली सिराह डा कुवा रे लेशशा चाक्दीत्मे बाक्त। तन्न दाऊदम मेको नेल्ल मतुइक्ता बाक्त। 27 मोपा आबनेर हेब्रोनम लेशशा जाक्मेनु, योआबमी लोव्र पचा, दे सुइ मबाक्तीकेम लदा बाक्त। मिनु आ कोव्रजम थोक्गा बाक्त। मोपा मेको आसाहेल साइशो आ पर्वम बेक्माक्त। १राजा २:५; २सामुएल २:२३ 28 मिनु नोले दाऊदम मेको लोव्र नेंशा “गो नु आं राज्य परमप्रभु यावे आ डोंइती गेनायो नेर आ तौ आबनेर साइशो आ पर्वम दोस मताइब दुम्नीकी। 29 मेको दोस योआब नु आ आफ आ खिं डा मुर आन पियाम दुम्ल। योआब आ खिंम ग्रान्रा यितीके रोइ पाइब कि कोव्रर मुशो रोइ पाइब कि कोक्के तिकशा गाक्ब कि तरवारम साइक्चा पुंइसीब कि जचा मताइब मुर का गेना हना यो बाक्ल” देमाक्त। 30 मोपा योआब नु आ लोक्ब अबीशैमी आबनेर कली सदसे बाक्त। मारदे हना आबनेरमी मेको आस लोक्ब आसाहेल कली गिबोन डा लडाइम साइशो बाक्माक्त। न्यायाधीस ८:१८-२१; २राजा १४:५

31 मिनु दाऊदमी योआब नु आ नु बाक्ब नेल्ल आन कली “इन वा खाक्कीन। मिनु भाडग्रा फेक्सीन। मिनु आबनेर आ पर्वम रोंका पने” देमाक्त। मिनु पिप दाऊद बेक्शो आबनेर कुरब आन नोले गाक्माक्त। 32 मिनु आबनेर कली हेब्रोनम थिम्मे बाक्त। मिनु पिप आबनेर आ तुरसुम ठेयब सेंदा पा डाक्माक्त। मिनु मुर नेल्ल यो डाक्मा बाक्त। 33 मिनु पिपमी आबनेर आ पर्वम रोंका पशो कुम्सो सेला बाक्त। मेकोमी “मार, आबनेर परमप्रभु यावे आ अरेशो मटीब खोदेंशो दुम्शा, बेक्चा माल्दा? 34 इ गुइ मफ्रेशो बाक्त। इ खोइलीम साडलो मपाइशो बाक्त। गे परमप्रभु यावे आ अरेशो मटीब आन डोंइती मेकोपुकी खोदेंशो पा गोल्ले” देमाक्त। मिनु मुर नेल्ल मेको आ पर्वम लेंशा डाक्मा बाक्त। 35 मिनु मुरपुकीमी दाऊद कली “नां लाक्चा डोंइती जने” देमा बाक्त। तन्न दाऊदमी कसम जशा “नां मलाक्गा सम्म गो मारेइ जचा थोव्रक मथीनुड। थीता हना, परमप्रभुमी सजाइ गेयील” देमाक्त। 36 मुर नेल्लेम मेको लोव्र रुप्शा बिस्समा बाक्त। मिनु ग्येरसमा बाक्त। पिप आ पशो नेल्ल दाक्तमे बाक्त। 37 मेको नाक्ती इस्राएल डा मुर नेल्लेमी नेर आ तौ आबनेर साइशोमी पिप आ दोस मबा, दे तुइक्तमे बाक्त। 38 मिनु पिपमी आ गेय पाइब आन कली “मुलाक्ती इस्राएलमी लडाइ पाइब नु ठेयब मुर का बेक्त, दे तुइक्चा माल्नीनी। १सामुएल २६:१५ 39 गो तेल लुक्शो पिप दुम्ती

हना यो, मुलाक्ती सक्ति मपाइशो दुम्शो बाक्नुड। एको हुश खाक्श पोक्ब सेरूयाह आ तौ गो नु मगारनीम। परमप्रभु यावेमी मरिम्शो पाइब आन कली आन पशो क्येक्क लेप्ब” देंमाक्त। २सामुएल २:१८

4

इश-बोशेथ साइक्चा पुंडसीशो

1 सावल आ तौ इश-बोशेथम हेब्रोनम आब्नेर साइशो लोव्र नेंशा आ थुं लुक्च लमाक्त। मिनु इस्राएली नेल्ल हिंशा ग्येत्थ लुक्च दुम्मा बाक्त। २सामुएल ३:२७ 2 सावल आ तौ के मार मार रोइक्ब आन हुल डा कप्तान निक्शी बाक्सा बाक्त। मेको का आ नें बानाह नु अर्को आ नें रेकाब बाक्माक्त। मेको बेयरोथ सहर डा बेन्यामीन आ थर डा रिम्मोन आ तौ बाक्सा बाक्त। मारदे हना बेयरोथ यो बेन्यामीन आ रागीम बाक्माक्त। यहोसु ९:१७ 3 मिनु बेयरोथ सहर डा मुर गित्ताइम सहर प्रोक्शा लशो बाक्मा बाक्त। मिनु मेना रे मेकेर अर्को रागी डा मुर दुम्शा बाक्मा बाक्त। नेहेम्याह ११:१३

4 मिनु सावल आ तौ योनाथन के यो तौ का बाक्माक्त। मेको खोइल निम्फा मदुक्ब बाक्माक्त। मेको ५ बर्स दुम्मेनु, सावल नु योनाथन बेक्ताक्स देशो लोव्र येजेल रे नेंसे बाक्त। मेको लोव्र नेंशा आ खाल पाइब मीश मुरुमी मेको कली कुरशा प्रोक्मेनु, थिश्शा मेको आल आ खोइल मदुक्ब दुम्शो बाक्माक्त। मेको आ नें मेफी-बोशेथ बाक्माक्त। मेफी-बोशेथ आ नें मेरीब-बाल नु इश-बोशेथ देंनीम। २सामुएल ९:३; १इतिहास ८:३४; १इतिहास ९:४०

5 बेयरोथ सहर डा मुर रिम्मोन आ तौ निक्शी रेकाब नु बानाह नाक्ती उइक्थ दुम्मेनु, इश-बोशेथ आ खिंम जाक्सा बाक्त। मेना इश-बोशेथ इप्शो बाक्माक्त। २सामुएल २:८ 6 मेको निक्शी चेरब लाइक्चशो खोदेशो पखु पा, खिं ओव्रसा बाक्त। मिनु मेको कली कोव्रजम तूशा सदसे बाक्त। मिनु रेकाब नु आ लोक्ब बानाह सुइम मतुइक्थु प्रोक्सा बाक्त। 7 मेको निक्शीमी इश-बोशेथ कली दोपा सदसे बाक्त देशा हना, इश-बोशेथ इप्शा बाक्शो कोठा ओव्रशा, मेको कली तूशा साइशशा आ पिया खोइशशा लदसे बाक्त। मिनु नाक्दो रे अराबाह रे गाक्शा, हेब्रोन जाक्सा बाक्त। 8 मिनु मेको निक्शीमी मेको पिया दाऊद आ बाक्तीक हेब्रोनमी चाक्गसे बाक्त। मिनु पिप कली “सावल आ तौ इश-बोशेथ आ पिया एको बाक्ब। इन कली साइक्चा माल्ब इन सत्रु बाक्त। मुलाक्ती परमप्रभु यावेमी सावल नु आ चच युइ आन कली क्येक्क लेत्ताक्व” देंसा बाक्त।

9 मिनु दाऊदमी बेयरोथ सहर डा रिम्मोन आ तौ रेकाब नु बानाह आस कली “परमप्रभु यावे ब्रोंइशा बाक्शो खोदेशो पा, मेकोमी आं कली आं श्येत नेल्ल रे प्रोंइती। 10 ‘सावल बेक्शो रिम्शो लोव्र बाक्ब’ दे मिम्शा आं कली देंब मुर कली गो ग्याइशशा सिकलागमी साइक्ता। मेको आ लोव्र आ इनाम बाक्त। २सामुएल १:१५ 11 मिनु परमप्रभु यावे आ अरेशो मटीब मुरुमी ठीक पाइब मुर कली आ आंम खिंम बाक्शा, इप्तीकेम इप्शो मुर कली साइक्ब आस कली मेको क्येडा यो क्येक्क लेत्चा ममाल्नुडा डा? मार, मुल गो मेको आ हुश आ क्येक्क लेशशा इस कली साइशशा, रागी रे मक्याम्नुडा?” देंमाक्त। २सामुएल ३:३२ 12 मिनु दाऊदम ठिटा मुर आन कली “मेको आस कली सतीन” दे अरेवा बाक्त। मिनु मेको आस कली सदमे बाक्त। आस गुइ खोइल खोइशशा, हेब्रोन डा दोम्ली आ नेक्था क्युक्गमे बाक्त। मिनु मुरपुकीमी इश-बोशेथ आ पिया लाइशशा, आब्नेर आ तुरस हेब्रोनमी थिम्मे बाक्त। ब्यवस्था २१:२२-२३

5

दाऊद पिप दुम्शो

१इतिहास ११:१-३

1 मिनु नोले इस्राएल आ थर डा मुर नेल्ल दाऊद आ बाक्तीक हेब्रोनम जाक्शा, मेको कली “गो इन हुश नकी। 2 डोंइती सावल आंइ पिप बाक्मेनु, गे लडाइ पाइब आन कली लाइक्तीक नु चाक्तीक पशो ननी। परमप्रभु यावेमी इन कली ‘गे आं मुर इस्राएली आन गोठला दुम्चा माल्नेवे। गे इस्राएली आन पिप दुम्नेवे’ देशो बाक्ब” देंमा बाक्त। १सामुएल १८:१३,१६; १सामुएल १३:१४; १सामुएल २५:३० 3 मिनु इस्राएल डा खाल्पा नेल्ल पिप आ बाक्तीक हेब्रोनम जाक्मा बाक्त। मेकेर पिप दाऊदमी मेकोपुकी नु परमप्रभु यावे आ डोंइती कबल का पवा बाक्त। मिनु मेकोपुकीम दाऊद कली तेल लुक्शा, इस्राएल डा पिप सेल्मे बाक्त। २सामुएल २:४; १सामुएल १६:१३ 4 दाऊद ३० बर्स दुम्मेनु, पिप दुम्माक्त। मिनु मेकोमी ४० बर्स सासन पवा बाक्त। १राजा २:११; १इतिहास ३:४; १इतिहास

२९:२७ 5 मेकोम हेब्रोनम बाक्शा, यहूदा कली ७ बर्स ६ महिना सासन पवा बाक्त। मिनु यरूसलेम सहरमी बाक्शा ३३ बर्स इस्राएल नेल्ल नु यहूदा कली सासन पवा बाक्त।

दाऊदमी यरूसलेम ग्राशो

१इतिहास ११:४-९; १इतिहास १४:१-७

6 नोले पिप दाऊद नु आ मुरपुकी, यरूसलेम सहरम बाक्ब यबुसी नु लडाइ पचा कली यरूसलेम लमा बाक्त। मिनु यबुसीपुकीम दाऊद कली “गे एक जाक्ने मचाप्नीनी। मिक्च मताइब नु खोइल मदुक्बम यो इन कली प्रोक्पाइक्नीम” देंमा बाक्त। मोपा दाऊद जाक्ने मचाप्ब, दे मिम्तमे बाक्त। यहोसु १५:६३; न्यायाधीस १:२१; न्यायाधीस १९:१०-१२ 7 मो हना यो दाऊदमी गारो हिरशो सियोन ग्रामाक्त। मिनु मेको दाऊद आ सहर दुम्माक्त। 8 मेको नाक्त दाऊदमी “सुम यबुसी आन कली साइक्बा, मेकोम ब्वाक्कु यितीक रे जाक्शा, दाऊद कली ग्रांग्रा दीब मिक्च मताइब नु खोइल मदुक्ब आन कली सदमेक्ल” देंमाक्त। मोपतीके “मिक्च मताइब नु खोइल मदुक्ब पिप आ खिं ओव्रचा मताइनीम” देंशो बाक्मा बाक्त। 9 मिनु दाऊद मेको गारो हिरशो सहरम बाक्शा, मेको आ नें दाऊद आ सहर वोदा बाक्त। मिनु दाऊदमी मिल्लो रे पा आगा एर ओंथ नेल्ल सहर सेला बाक्त। 10 मिनु दाऊद शुश ठेयब दुम्ना दुम्न लमाक्त। मारदे हना परमप्रभु यावे मुर नेल्ल आन परमप्रभु मेको नु बाक्माक्त। २सामुएल ३:३

11 टायर डा पिप हीराममी आ लोव्र कुरब आन कली दाऊद आ बाक्तीके सोइक्ता बाक्त। हीरामम लेबानोन डा लाइशो रवा आ शी नु शी सेल्ब नु गारो प्रोव्रब यो सोइक्ता बाक्त। मिनु मेकोपुकीम दाऊद कली खिं का सेल्मे बाक्त। 12 मिनु दाऊदमी “परमप्रभु यावेम आं कली इस्राएल डा सक्ति पाइशो पिप सेल्यी बाक्त। मिनु आ मुर इस्राएली आन पर्बम मेको आन राज्य ठेयब सेला बाक्त” दे तुइक्ता बाक्त।

13 दाऊद हेब्रोन रे यरूसलेम याक्से नोले मेकोमी मेकेर शुश मीश चाक्गा बाक्त। मेको के अर्को तमी तौ यो जरमेसमा बाक्त। २सामुएल ३:२-५; १इतिहास ३:५-९ 14 यरूसलेम सहरम जरमेशो दाऊद आ तौपुकी शम्मुआ, शोबाब, नाथान, सोलोमन, लूका ३:३१; मत्ती १:६ 15 इभार, एली-शुआ, नेफेग, याफीया 16 एली-शामा, एली-आदा नु एली-फेलेत बाक्मा बाक्त।

दाऊदम पलिस्ती आन कली फुशो

१इतिहास १४:८-१७

17 पलिस्तीपुकीम दाऊद इस्राएल डा पिप दुम्त देंशो लोव्र नेन्मे बाक्त। मिनु पलिस्ती नेल्ल लडाइ पाइब लाइशशा, दाऊद कली माल्थ लमा बाक्त। तन्न दाऊदम मेको लोव्र नेंशा उइ डा बोल्यो दरवार लशा बाक्माक्त। १सामुएल २२:१; २सामुएल २३:१४ 18 मिनु पलिस्तीपुकी जाक्शा, रेफाइम डा बेंसीम ब्रशा बाक्मा बाक्त। यहोसु १५:८; यहोसु १८:१६ 19 मिनु दाऊदमी परमप्रभु यावे कली “गो पलिस्ती आन कली लडाइ तोतामी हना, गे मेको आन कली आं गुइमी गेनीनी?” दे हिल्लो पवा बाक्त। मिनु परमप्रभु यावेमी “लावो, गो थमा पा मेको आन कली इ गुइम गेनुड” देंमाक्त। १सामुएल ३०:८ 20 मिनु दाऊद लशा, बाल-पेराजीमम लडाइ तोमी बाक्त। मिनु मेको आन कली ग्रामाक्त। मिनु दाऊदमी “बारशो ब्वाक्कुम आ एर ओंथ प्रेशो खोदेंशो पा, परमप्रभु यावेम आं जोरी सत्रु आन कली फुप्तु” देंमाक्त। मोपतीके मेकेर बाल-पेराजीम नें लीमाक्त। यसैया २१:२८ 21 पलिस्तीपुकीम आन मूर्ति मेक उइ प्रोन्मे बाक्त। मिनु दाऊद नु आ मुरपुकीमी मेको लदमे बाक्त।

22 मिनु लेंशा पलिस्तीपुकी जाक्शा रेफाइम डा बेंसीम ब्रशा बाक्मा बाक्त। 23 मिनु दाऊदम लेंशा परमप्रभु यावे कली हिल्लो पवा बाक्त। मिनु परमप्रभु यावेमी “मुल सोजो लडाइ मपावो। हिरशा, ठेयब रवा आ आइक्ची हांबु नोले रे लडाइ पावो। 24 रवा आन डरम लडाइ पाइब आन दोरशो नेंनी चोटी होस पावो। मारदे हना परमप्रभु यावे पलिस्ती आन कली फुचा कली इ डोंइती गाक्ब” देंमाक्त। 25 मिनु दाऊदमी परमप्रभु यावेम आ कली देंशो खोदेंशो पा पवा बाक्त। मिनु पलिस्ती आन कली गेबा रे गेजेर सहर डा लां सम्म शोल्मो पा सदमे बाक्त। न्यायाधीस १:२९

6

परमप्रभु आ सन्दोस चाक्शा

१इतिहास १३:-; १इतिहास १५:१६

1 मिनु दाऊदमी इस्राएल डा ३० हजार योव्रशो मुर आन कली खुप्तीमी बाक्त। 2 मिनु दाऊद नु मेको मुर नेल्ल परमप्रभु आ सन्दोस चाक्चा कली यहूदा डा बाले सहर रे लमा बाक्त। मेको सन्दोस तार आ नें बाक्त। मुर नेल्ल

आन परमप्रभु यावे आ नें मेकेर बाक्ब। मेको करूब आस दातेम बाक्ब। बाले सहर आ अर्को नें किरयथ-यारीम बाक्त। यहोसु १५:९ प्रस्थान २५:२२ ³ मेकोपुकीम परमप्रभु आ सन्दोस डांडाम बाक्शो अबीनादाब आ खिं रे गुंडशा, नक बग्गी काम वोदमे बाक्त। अबीनादाब आ तौ निक्शी उज्जाह नु अहीयोमी मेको नक बग्गी खुलना खुलन लदसे बाक्त। १सामुएल ७:१ ⁴ मेकोपुकीम परमप्रभु आ सन्दोस डांडाम बाक्शो अबीनादाब आ खिं रे लदमे बाक्त। अहीयो चहिं मेको बग्गी आ डोंइती गाक्माक्त। ⁵ मिनु दाऊद नु इस्राएली नेल्ल आन जोब बोक्शा परमप्रभु यावे आ डोंइती कुम्सो पना पन बीना, तार पाइशो ठेयब ताप्तीक, खैजडी, मार मार ताप्तीक नु बुप्केल ताप्शा सिल पना पन गाक्मा बाक्त।

⁶ मेकोपुकी नाकोन आ खलाम जाक्मानु, ब्यफ दाइल पांडससा बाक्त। मिनु उज्जाहम आ गुड दिंशा, परमप्रभु आ सन्दोस तिक्गा बाक्त। ⁷ मिनु परमप्रभु यावे उज्जाह कली तशा, गाइक्ता बाक्त। मिनु परमप्रभुमी मेको आ गुड दिंशा, सन्दोस थिशो तशा, आ सन्दोस आ नेक्था उइ सदा बाक्त। १सामुएल ६:१९; गन्ती ४:१५ ⁸ मिनु दाऊद गाइक्ता बाक्त। मारदे हना परमप्रभु यावेम उज्जाह आ पर्बम गाइशशा, मेको कली सदा बाक्त। मोपतीके मेकेर पेरेस-उज्जा नें वोदा बाक्त। मेको आ नें मुल सम्म मेकोन बाक्ब। ⁹ मेको नाक्ती दाऊद परमप्रभु यावे क्येडा हिंमाक्त। मिनु “मुल गो परमप्रभु यावे आ सन्दोस दोपा लाइक्नुडा?” देंमाक्त। ¹⁰ मिनु दाऊदमी परमप्रभु यावे आ सन्दोस आ बाक्तीके, दाऊद आ सहर, लाइक्ने मचबा बाक्त। मिनु आ खिं लाइक्चा आ पा डा मेको गित्त आ खिं डा मुर, ओबेद-एदोम आ खिंमी चाक्दीदा बाक्त। ¹¹ मोपा परमप्रभु यावे आ सन्दोस ओबेद-एदोम आ खिंमी महिना सां सम्म बाक्माक्त। मिनु परमप्रभु यावेमी गित्त आ खिं डा ओबेद-एदोम नु आ खिं डा मुर नेल्ल आन कली आसीक गेमी बाक्त।

सन्दोस यरूसलेमम चाक्शो

¹² मिनु मुरपुकीमी दाऊद कली “परमप्रभु यावेमी, परमप्रभु आ सन्दोस वोइशो आ पर्बम ओबेद-एदोम आ खिं डा मुर नु आ मारेइ मारेइ आन कली आसीक गेप्तु” दे मदमे बाक्त। मिनु दाऊद लशा, ओबेद-एदोम आ खिं रे थाम्पा ग्येरसीशा, मेको परमप्रभु आ सन्दोस आ सहरमी चाक्गा बाक्त। ¹³ परमप्रभु यावे आ सन्दोस कुरब मुर ६ पैला गाक्शा नोले, मेकोपुकीम ब्यफ का नु दोम्शो बाछा का क्योरशा चढेमे बाक्त। १राजा ८:५ ¹⁴ दाऊदम सुती के ऊरीम नु थुम्मीम कुरतीके पांडशा, परमप्रभु यावे आ डोंइती आ जोब बोक्शा सिल पवा बाक्त। प्रस्थान २८:६; १सामुएल २:१८; १सामुएल २२:१८ ¹⁵ मिनु दाऊद नु इस्राएल आ खिं डा मुर नेल्ल रेयके पना पन तुराही ताम्ना ताम्न परमप्रभु यावे आ सन्दोस चाक्गमे बाक्त।

¹⁶ मिनु परमप्रभु यावे आ सन्दोस दाऊद आ सहरमी चाक्गमेनु, सावल आ तमी मिकालमी झेल रे कोवडा बाक्त। मिनु पिप दाऊद कली परमप्रभु यावे आ डोंइती प्रेक्ना प्रेक्न, सिल पशो तशा, आ थुंमी ग्रान्गा दिमाक्त। ¹⁷ मिनु मेकोपुकीम परमप्रभु यावे आ सन्दोस वोइक्चा कली दाऊदम कीशो ताम्बुम ओइदमे बाक्त। मिनु दाऊदमी परमप्रभु यावे आ डोंइती चोशा चढेतीक नु दुशा बाक्चा आ पर्बम चढेतीक चढेवा बाक्त। ¹⁸ दाऊदमी मेको चोशा चढेतीक नु दुशा बाक्चा आ पर्बम चढेतीके चढेने थुम्शा, मुर नेल्ल आन परमप्रभु यावे आ नेमी आ मुर नेल्ल आन कली आसीक गेमी बाक्त। १राजा ८:५५ ¹⁹ मिनु दाऊदमी इस्राएली नेल्ल आन कली नु मेकेर देल्लो मीश मुर, वोंइश मुर नेल्ल आन कली शोब्ले का का, चोकटा का का श्ये, सोव्रशो अडगुर शोब्ले गेमी बाक्त। मिनु मुर नेल्ल आन खिं खिं लेम्मा बाक्त।

²⁰ मिनु दाऊद आ खिं डा मुर आन कली आसीक गेथ लेम्मेनु, सावल आ तमी मिकाल मेको कली गुम्थ लाडगा गूशा पिमाक्त। मिनु मेकोम “मुलाक्ती इस्राएल डा पिप थम ठेयब मिम्सीशो बाक्त। मेको मुलाक्त आ गेय पाइब वाइलीम आन डोंइती शिश्रा दुम्शा, मुने मपाइशो आइक्च मुर खोदेशो दुम्त” देंमाक्त। ²¹ मिनु दाऊदम मिकाल कली “इ आफ नु आ खिं डा मुर आन पा डा आं कली इस्राएल डा आ मुर आन पिप सेल्ब परमप्रभु यावे आ डोंइती मो पाता। गो परमप्रभु यावे आ डोंइती ग्येरशा सिल पाइनुड। २सामुएल ५:२ ²² गो थमा पा मुल यो मेको क्येडा यो आइक्च दुम्नुड। तन्न मेको आं वाइलीम आन पर्बम गे मार देंने, मेकोपुकीमी आं कली मो पशो आ पर्बम मान पाइनीम” देंमाक्त। ²³ मोपतीके मेको सावल आ तमी मिकाल के आ बेक्ची नाक्त सम्म तमी तौ मदुम्मा बाक्त।

7

परमप्रभुमी दाऊद नु लोव्र पशो
१इतिहास १७:-

1 मिनु पिप आंम खिंम बाक्म नोले, परमप्रभु यावेम मेको कली आ एर ओंथ डा जोरी सत्रु नेल्ल आन रे नाइक्चा गेवा बाक्त। 2 मिनु पिपमी परमप्रभु यावे आ लोव्र पाइब नाथान कली “कोव्रडीन। गो लेबानोन डा लाइशो रवा आ शी के सेल्लो खिंम बाक्शो बाक्नुड। तन्न परमप्रभु आ सन्दोस चहिं ताम्बुम बाक्ब” देंमाक्त। भजन संग्रह १३२:३-५ 3 मिनु नाथानमी पिप कली “दुम्ब, इन थुंम मार बाक्मे, मेको पने। मारदे हना परमप्रभु यावे गे नु बाक्ब” देंमाक्त।

4 तन्न मेको नाक्दोन परमप्रभु यावेम नाथान कली लोव्र पवा बाक्त। 5 मार लोव्र पवा बाक्त देंशा हना “गे लशा, आं गेय पाइब दाऊद कली ‘गे आं कली बाक्चा कली खिं सेल्लेवे डा? १इतिहास २२:८; १राजा ५:१७ 6 गो इस्राएली आन कली इजीप्त रे चाक्गुमी रे मुल सम्म गेनायो खिंम मबाक्ड। ताम्बु नु अरु बाक्तीकेम बाक्ती। १राजा ८:१६, २७; यसैया ६६:१ 7 गो इस्राएल डा आं मुरपुकी नु ते ते गाक्डा, मेक मेक मार आं मुर इस्राएली आन कली कोव्रब, आन थर डा ठेयब मुर आन कली आं कली लेबानोन डा लाइशो रवा आ शी के खिं मारदे मसेल्लनी’ देंडा डा? 8 मोपतीके गे आं गेय पाइब दाऊद कली मुर नेल्ल आन परमप्रभु यावेमी मार देंत देंशा हना ‘इ कली, आं मुर इस्राएली आन कली कोव्रब दुम्पाइक्चा कली भेडा योव्रतीक रे चाक्तन। १सामुएल १६:११-१३; २सामुएल ५:२ 9 गे ते ते गाक्डे, मेक मेक गो गे नु बाक्ती। गो इ जोरी सत्रु नेल्ल आन कली इ डोंइती रे खेरतामी। गो इ नें रागी डा ठेयब मुर आन नें खोदेंशो पा ठेयब सेल्लनुड। 10 गो आं मुर इस्राएली आन कली बाक्तीक का योव्रनुड। मिनु मेकोपुकी आंम आंम रागीम बाक्नीम। मुल रे मेको आन कली सुइम श्येत मगेनीम। डोंइती डा खोदेंशो पा मुल रे मेको आन कली सुइम मरिम्शो मपाइनीम, श्येत मगेनीम। 11 आं मुर इस्राएली आन कली निसाफ पाइब योव्रशो रे गो इ कली इ जोरी सत्रु नेल्ल रे नाइक्पाइक्चन। मिनु परमप्रभु यावेमी इ कली चच युइ गेब’ दे मतो” देंमाक्त।

दाऊदम आसीक तशो

12 परमप्रभु यावेम दाऊद कली “इ नाक्त नुप्त हना नु इ किकी पिपी नु बाक्थ लचा नोले गो इ खिं डा मुर आन दाते रे का कली इ पा डा पिप सेल्लनुड। मिनु मेको आ राज्य बोल्यो सेल्लनुड। १राजा ८:२० 13 मिनु मेकोमी आं नेमी खिं का सेल्लब। गो मेको आ राज्य गेना हना यो बाक्ब सेल्लनुड। १राजा ५:१९; १राजा ६:१२; भजन संग्रह ८९:४-५; यसैया ९:६ 14 गो मेको आ आफ दुम्नुड। मिनु मेको आं तौ दुम्ब। मेकोम मरिम्शो पाप्तु हना, गो मेको कली मुर खोदेंशो पा कोक्केम तुप्नुड। भजन संग्रह २:७; भजन संग्रह ८९:२७; लूका १:३२; हिब्रू १:५ 15 तन्न गो गेना हना यो आं दाक्तीकेम मप्रोंइनुड। मेको इ डोंइती सावल कली प्रोंइशो खोदेंशो पा मेको कली मप्रोंइनुड। १सामुएल १५:२३-२६ 16 इ खिं नु इ राज्य गेना हना यो आं डोंइती लीब। इ सासन पतीक गेना हना यो लीब” देंमाक्त। भजन संग्रह ७२:-; यसैया ५५:३ 17 मिनु नाथानम मेको देंशो लोव्र नु कोंइशो नेल्ल दाऊद कली देंमाक्त।

दाऊदम परमप्रभु कली ठेयब सेल्लो

18 मिनु पिप दाऊद परमप्रभु यावे आ बाक्तीक ओव्रशा, मेको कली “परमप्रभु यावे, गो सु नडा? आं खिं डा मुर सु बाक्नीमी? मिनु गे आं कली एक सम्म चाक्यीनी? 19 आं कली पशो इन डोंइती आइक्च बाक्ब। गे इन गेय पाइब आ खिं आ पबर्म नोले दुम्ब लोव्र यो पाइतीनी। परमप्रभु यावे, मेको इन मुर आन कली अरेशो लोव्र बाक्ब। 20 परमप्रभु यावे, मुल गो एको क्येडा शुश मार देंने चाप्नुडा डा? मारदे हना गे इन गेय पाइब कली रिम्शो पा तुइक्नीनी। 21 गे इन थुंम मिम्शा, थोक्शा पशो लोव्र इन गेय पाइब, आं कली तुइक्पाइक्चा कली मोदेंशो ठेयब गेय पाइतीनी। 22 मोपतीके परमप्रभु यावे, परमप्रभु गे ठेयब बाक्नीनी। इन खोदेंशो अरु सुइ मबाक्नीम। अर्को परमप्रभु यो मबाक्नीम। 23 इन मुर खोदेंशो अर्को सु बाक्नीमी? इस्राएली खोदेंशो सु बाक्नीमी? रागी नेल्लेमी परमप्रभुम प्रोंइशो इस्राएली खोदेंशो अर्को जात यो बाक्मा कों? गे इन नें ठेयब सेल्लचा कली गे इन मुर आन कली ठेयब नु छक लाक्चा डा गेय पाइतीनी। गे इन मुर आन डोंइती रे रागी रागी डा मुर नु आन देवी देवता आन कली खेरतीनी। ब्यवस्था ४:७ 24 गे इन मुर इस्राएली आन कली गेना हना यो इन मुर दुम्पाइक्चा कली बोल्यो सेल्लतीनी। मिनु परमप्रभु यावे, गे मेको आन परमप्रभु दुम्तीनी। 25 परमप्रभु यावे, मुल परमप्रभु, इन गेय पाइब नु मेको आ खिं डा मुर आन पबर्म देंशो गेना हना यो खपीन। इन थोक्शा पशो लोव्र खोदेंशो पा पने। 26 मुर नेल्ल आन परमप्रभु यावे इस्राएली आन परमप्रभु बाक्ब। मिनु इन गेय पाइब दाऊद आ खिं गेना हना यो इन डोंइती लीब, दे इन नें गेना हना यो ठेयब सेल्लनीम। 27 मारदे हना गे, मुर नेल्ल आन परमप्रभु यावे, इस्राएल आ परमप्रभु, इन गेय पाइब कली ‘गो इ खिं सेल्लनुड’ देंतीनी। गो महिंथु, एको लोव्र पाता। यसैया ५०:५ 28 परमप्रभु यावे, गे परमप्रभु बाक्नीनी। इन लोव्र थमा बाक्ब। गे इन गेय पाइब कली रिम्शो थोक्शा पशो लोव्र पाइतीनी। १राजा ८:२६ 29 मोपतीके मुल इन गेय पाइब आ खिं कली आसीक गेने। मिनु मेको इन डोंइती

गेना हना यो लील। परमप्रभु यावे मेको गे पाइतीनी। मिनु इन आसीकमी इन गेय पाइब आ खिं गेना हना यो आसीक राइब” दे परमप्रभु कली पुना बाक्त।

8

दाऊद आ पशो नु ग्राशो लडाइ

१इतिहास १८:१-१३

1 मिनु इच्छा नोले दाऊदमी पलिस्ती आन कली लडाइ तोशा ग्रामाक्त। दाऊदमी मेथेग-आम्माह सहर आंम के सेला बाक्त। 2 दाऊदम मोआबी आन कली यो फुवा बाक्त। मिनु मेको आन कली खपीम इप्पाइकमी बाक्त। मिनु डोरी कामी थाप्शा भाग सां सेल्मी बाक्त। भाग निक्शी डा मुर आन कली साइकमी बाक्त। मिनु भाग का डा मुर आन कली प्रोंइमी बाक्त। मिनु मोआबीपुकी मेको आ वाइल दुम्मा बाक्त। मिनु मेकोपुकीम दाऊद कली तिरो थाप्चा माल्मा बाक्त। १सामुएल २२:३

3 मिनु दाऊद युफ्रेटीस खोला आ नेक्थाम आ अधिकार वोइक्चा कली लमेनु, सोबाह सहर डा रेहोब आ तौ पिप हादादेजेर कली यो लडाइ पा ग्रामाक्त। 4 दाऊदम मेको रे हजार का ७ सहे शारा डोइक्बपुकी नु २० हजार जना खोइलीम गाक्ब लडाइ पाइब आन कली ग्याइक्तीमी बाक्त। मिनु दाऊदम बग्गी कीब शारा आन नारी खोदा बाक्त। मिनु आंम कली सहे का शारा बग्गी कीचा कली वोदा बाक्त। यहोसु ११:९ 5 मेना दमस्कस डा अराम डा मुर सोबाह सहर डा पिप हादादेजेर कली वारच पाइक्चा कली जाक्मा बाक्त। मिनु दाऊदम मेको आन दाते डा २२ हजार अरामी आन कली साइकमी बाक्त। 6 मिनु दाऊदम मेको अराम डा मुर आन रागी दमस्कसम कोव्रब मुर वोइक्मी बाक्त। मिनु मेकोपुकी दाऊद आ वाइल दुम्मा, तिरो थाप्चा माल्मा बाक्त। मोपा परमप्रभु यावेम दाऊद ते ते गाक्मे, मेक मेक ग्रापदा बाक्त। 7 हादादेजेर आ गेय पाइब आन कुरशो सुन के तेक्तीके दाऊदम आइक्के सेला बाक्त। मिनु मेको यरूसलेम सहरम चाक्गा बाक्त। 8 मेकोमी हादादेजेर आ सहर, बेताह नु बेरोथाइ सहर रे शुश कांसा चाक्गा बाक्त।

9 मिनु हमाथ डा पिप तोइमी “दाऊदम हादादेजेर आ लडाइ पाइब नेल्ल आन कली फुप्तु” देंशो नेना बाक्त। 10 मिनु पिप तोइमी आ तौ योराम कली दाऊद कली गुम्थ सोइक्ता बाक्त। मिनु मेकोमी दाऊद कली “गे लडाइम हादादेजेर कली फुशा रिम्शो पाइतीनी” देंथ नु मान पा ठेयब सेल्तीक लोव्र पथ सोइक्ता बाक्त। मारदे हना हादादेजेर नु तोइ आस दातेमी लडाइ दुम्ना दुम्न बाक्शो बाक्माक्त। योराममी सुन चांदी नु कांसा के ग्योंब यो चाक्गा बाक्त। 11 पिप दाऊदमी मेको यो परमप्रभु यावे कली गेवा बाक्त। आ फुशो रागी नेल्ल डा सुन चांदी मोपा गेबाक्माक्त। 12 एदोम, मोआब, अम्मोन पलिस्ती नु अमालेक रे चाक्शो सुन चांदी, सोबाह सहर डा रेहोब आ तौ पिप हादादेजेर रे रोइश्शो मारेइ मारेइ परमप्रभु यावे कली गेवा बाक्त।

13 दाऊद लडाइ ग्राशा, आ नें चेम्शा लेम्मेनु, हिक्सी बाक्शो बेंसीम १८ हजार एदोम डा मुर आन कली साइकमी बाक्त। भजन संग्रह ६०:२ 14 मेकोमी एदोम रागी नेल्लेम कोव्रब मुर वोइक्मी बाक्त। मिनु एदोम डा मुर नेल्ल दाऊद आ वाइल दुम्मा बाक्त। मोपा परमप्रभु यावेम दाऊद ते ते लमे, मेक मेक ग्रापदा बाक्त। उत्पत्ती २७:४०; गन्ती २४:१८

दाऊद आ गेय पाइबपुकी

१इतिहास १८:१४-१७

15 मिनु दाऊदमी इस्राएल रागी नेल्लेम सासन पवा बाक्त। मिनु आ मुर नेल्ल आन कली ठीक निसाफ पवा बाक्त। 16 सेरूयाह आ तौ योआब लडाइ पाइब आन ठेयब मुर बाक्माक्त। अहीलुद आ तौ येहो-शाफात मेको आ ब्रेक्ब बाक्माक्त। २सामुएल २:२३-२६ 17 अहीतुब आ तौ सादोक नु अबीयाथार आ तौ अहीमेलोक चढ़ेब बाक्सा बाक्त। सेरायाह ब्रेक्ब बाक्माक्त। 18 येहो-यादा आ तौ बेनायाह, केरेथी नु पेलेथी, पिप कली कोव्रब आन ठेयब मुर बाक्माक्त। दाऊद आ तौपुकी चहिं चढ़ेब बाक्मा बाक्त। २सामुएल १५:१८

9

दाऊदमी शिशी पशो

1 मिनु दाऊदमी “मार, सावल आ खिं डा मुर सुइ ब्रोंइशो बाक्नीमी? मेको आन कली गो योनाथन आ पर्बम शिशी पाइक्के चाप्नुडा?” दे हिल्लो पवा बाक्त। 2 सावल आ खिं डा सीबा नें पाइश्शो गेय पाइब मुर का बाक्माक्त। दाऊदम मेको कली ब्रेत्थ सोइक्ता बाक्त। मिनु पिपमी मेको कली “मार, गे सीबा नवे” देंमाक्त। मिनु मेकोम “ओं, गो

इन गेय पाइब सीबा नड” देंमाक्त। २सामुएल १६:१ ३ मिनु पिपमी “सावल आ खिं डा सुइ ब्रोंइशा लीशो बाक्नीमी? गो मेको कली परमप्रभु आ दाक्तीक कोंइचा दाक्नुड?” देंमाक्त। मिनु सीबाम पिप कली “योनाथन आ तौ का ब्रोंइशा लीशो बाक्ब। मेको आ खोइल निम्फा मदुक्ब बाक्ब” देंमाक्त। ४ मिनु पिपमी मेको कली “मेको ते बाक्म?” दे हिल्लो पवा बाक्त। मिनु सीबामी “मेको लो-देबार सहर डा अम्मीएल आ तौ माकीर आ खिंम बाक्ब” देंमाक्त। २सामुएल १७:२७

५ मिनु पिप दाऊदमी लो-देबार डा अम्मीएल आ तौ माकीर आ खिंम मुर सोइशशा मेको कली चाक्पदा बाक्त। ६ मिनु योनाथन आ तौ सावल आ चच मेफी-बोशेथ दाऊद आ बाक्तीके जाक्माक्त। मिनु मेकोमी खुम्की पा बाप्शा पिप कली सेउ पवा बाक्त। मिनु दाऊदम मेको कली “मेफी-बोशेथ” देंमाक्त। मिनु मेफी-बोशेथमी “गो इन गेय पाइब एक बाक्ती” देंमाक्त। ७ मिनु दाऊदम मेको कली “महिंनो, गो इ कली इ आफ योनाथन आ पर्बम शिशी पाइक्नुड। गो इ कली इ बाजे सावल आ रू नेल्ल लेशशा गेनन। मिनु गे गेना हना यो गो नु बाक्शा जाइनेवे” देंमाक्त। ८ मिनु मेफी-बोशेथम खुम्की पा बाप्शा “गो सु नडा डा? पिपमी गो बेक्शो कुचुम खोदेंशो मुर, आं कली शिशी पाइय्यीनी?” देंमाक्त। ९ मिनु दाऊदमी सावल आ गेय पाइब सीबा कली ब्रेशशा “सावल नु आं खिं डा शोंप नेल्ल गो इ होव्रप आ चच कली गेता। २सामुएल १९:२९-३० १० गे, इ तौपुकी नु इ गेय पाइब नेल्लेमी मेको आ रूम गेय पचा माल्नीनी। मिनु गे इ होव्रप आ चच आ खिं डा मुर आन कली गेचा माल्नेवे। तन्न इ होव्रप आ चच मेफी-बोशेथ गेना हना यो गो नु काथा बाक्शा जाइब” दे मदा बाक्त। सीबा के १५ जना तौ नु २० जना गेय पाइब बाक्मा बाक्त। ११ मिनु सीबाम पिप कली “आं प्रभु पिप, गो इन गेय पाइबमी इन देशो खोदेंशो पा नेल्ल पाइक्नुड” देंमाक्त। मेफी-बोशेथ पिप आ तौ का खोदेंशो पा पिप दाऊद आ खिंम बाक्शा, जवा बाक्त। १२ मेफी-बोशेथ आ तौ का बाक्माक्त। मेको आ नें मीका बाक्माक्त। मिनु सीबा आ खिं डा मुर नेल्ल मेफी-बोशेथ आ गेय पाइब दुम्मा बाक्त। १३ तन्न मेफी-बोशेथ यरूसलेमम बाक्माक्त। मारदे हना मेकोमी गेना हना यो पिप नु जवा बाक्त। मेको आ खोइल निम्फा मदुक्ब बाक्माक्त। २सामुएल ९:३

10

दाऊदमी लडाइ पशो १इतिहास १९:१-१९

१ मिनु नोले अम्मोनी आन पिप बेक्माक्त। मिनु मेको आ पा डा आ तौ हानुन पिप दुम्माक्त। २ दाऊदम “नाहाशमी आं कली रिम्शो पशो खोदेंशो पा गो नाहाश आं तौ हानुन कली रिम्शो पाइनुड” दे मिम्ता बाक्त। मिनु मेकोमी आ आफ बेक्शो आ पर्बम लेम्शो लोव्र नेंपाइक्थ लोव्र कुरब मुर आन कली सोइक्ता बाक्त। मिनु दाऊद आ मुरपुकी अम्मोनी आन रागीम ओव्रमानु, १सामुएल ११:१ ३ अम्मोनी आन कली सासन पाइबम आन प्रभु हानुन कली “दाऊदमी इन आफ कली ठेयब सेल्चा आ पर्बम इन कली लेम्शो लोव्र नेंपाइक्थ सोइशशा बाक्ब, दे थमा सुइक्नीनी? एको मुरपुकी क्यारी पाइब नम। दाऊदमी एको आन कली इन सहर दोपा ओव्रचा, दे क्यारी पथ सोइशशा बाक्ब” देंमा बाक्त। ४ मोपतीके हानुनमी दाऊद आ सोइशशा मुर आन कली ग्याइशशा, आन गल शोक्रे उइक्थ उइक्थ खोइशशा नु आन फेक्शो वा क्रातो सम्म खोइशशा सोइक्तीमी बाक्त। ५ मेको आन कली मो पशो दाऊदम नेना बाक्त। मिनु दाऊदमी मेको आन कली गुम्थ मुर सोइक्ता बाक्त। मारदे हना मेकोपुकी थम मुने तोक्चा पुंइसमा बाक्त। मिनु दाऊदमी “मेको आन गल शोक्रे डोंइती डा खोदेंशो मदुम सम्म यरीको सहरमी बाक्मल” देंमाक्त।

६ मिनु अम्मोन डा मुरपुकीमी दाऊद कली गाइक्पाइशशा तुइक्तमे बाक्त। मिनु अम्मोन डा मुरपुकीम बेथ-रेहोब, सोबाह डा २० हजार मुर नु अराम डा खोइलीम गाक्ब लडाइ पाइब आन कली गाल्च थाप्शा चाक्गमे बाक्त। मेकोपुकीम माकाह डा पिप नु हजार का मुर नु तोब रागी रे १२ हजार मुरपुकी गाल्च थाप्शा चाक्गमे बाक्त। ७ दाऊदम मेको लोव्र नेंशा, योआब नु लडाइ पाइब नेल्ल आन कली सोइक्तीमी बाक्त। ८ अम्मोन डा मुर जाक्शा सहर ओव्रतीक ठेयब लाप्चोमी ठीक दुम्मा बाक्त। तन्न सोबाह, रेहोब सहर डा, अराम डा मुरपुकी नु तोब नु माकाह रागी डा मुरपुकी चहिं दिंमम लडाइ पचा कली ठीक दुम्मा बाक्त।

९ योआबम आ डोंइती नु नोले निम्फा पटटी रे लडाइ तोचशो तवा बाक्त। मिनु मेकोमी इस्राएल डा योव्रशो मुर आन कली अरामी आन डोंइती वोइक्मी बाक्त। १० लीशो मुर चहिं आ लोक्ब अबीशै आ हुकुममी गेमी बाक्त। मेकोपुकी अम्मोनी आन डोंइती लडाइ तोचा कली ठीक दुम्मा बाक्त। ११ योआबम “अराम डा मुरपुकीम आंइ कली ग्राना ग्रान

पिम्तेकम हना, आंइ कली वारच पने। अम्मोन डा मुरपुकीम इन कली ग्राना ग्रान पिम्तेकम हना, गो इन कली वारच पाइनीकी। 12 सक्ति पाइशो बोल्यो दुमीन। गो आंम मुरपुकी नु आंम परमप्रभु आ सहर आ पबर्म महिंथु, लडाइ पय। मिनु परमप्रभु यावेमी आ दाकशो पवल” देंमाकत। 13 मिनु योआब नु आ मुरपुकी अरामी नु लडाइ पामे बाकत। मिनु अरामी मेको आन डोंइती रे प्रोक्शा बाकत। 14 मिनु अम्मोनीपुकीम अराम डा मुर आन कली प्रोक्शो तशा, आं यो अबीशै आ डोंइती रे प्रोक्शा, आन सहर ओव्रमा बाकत। मिनु योआब अम्मोनी नु लडाइ पचा प्रोंइशा, लेशशा यरूसलेम जाकमाकत।

15 तन्न अरामी इस्राएली नु ब्रुशो तशा, लेंशा बुक्मा बाकत। 16 हादादेजेरमी युफ्रेटीस खोला आ आइक्की हांबु रे अरामी आन कली ब्रेथ सोइक्तीमी बाकत। मिनु मेकोपुकी हादादेजेर आ लडाइ पाइब आन ठेयब मुर शोबाक आ हुकुममी हेलाम सहरम जाकमा बाकत। 17 मिनु दाऊदमी मेकोपुकी लडाइ पथ पिशो लोव्र नेना बाकत। मिनु मेकोम रीब पा इस्राएल डा लडाइ पाइब नेल्ल आन कली खुप्शा यर्दन आइक्की हांबु शोक्से बाकत। मिनु हेलाम सहरम जाकमा बाकत। मेकेर अरामीपुकी दाऊद नु लडाइ पचा कली ठीक दुम्मा बाकत। मिनु लडाइ पामे बाकत। 18 तन्न इस्राएलीपुकीम मेको आन कली प्रोक्पदमे बाकत। मेकेर दाऊदमी ७ सहे बग्गी डोइक्ब नु ४० हजार शारा डोइक्ब अरामी आन कली सदा बाकत। लडाइ पाइब आन ठेयब मुर शोबाक कली बेक्चा डा पा गार सेला बाकत। मिनु मेको लडाइ पतीकेमीन बेक्माकत। 19 मिनु हादादेजेर कली वारच पाइब पिप नेल्लेमी इस्राएली नु ब्रुशो, दे तुइशशा, इस्राएली नु गारचा गोव्रमे बाकत। मिनु इस्राएली आन हुकुममी बाक्ने बिस्समा बाकत। मेना रे अराम डा मुरपुकीम अम्मोनी आन कली लेंशा गेनायो वारच मपदमे बाकत।

11

दाऊदमी पाप पशो

1 नक बर्स जाकमेनु, पिपपुकी लडाइ पथ गूमा बाकत। दाऊदमी योआब, लडाइ पाइब आन ठेयब मुर नु इस्राएल डा लडाइ पाइब नेल्ल आन कली सोइक्तीमी बाकत। मिनु मेकोपुकीम अम्मोन खतम पोक्गमे बाकत। रब्बाह सहर कली पुम्दमे बाकत। तन्न दाऊद चहिं यरूसलेम सहरमी बाक्माकत। १इतिहास २०:१ 2 काबु नाक्ती नाक्नाक्दो दाऊद आ इप्तीक रे बोक्शा, खिं तार हिरसेनु, मेकोमी मीश मुर का चिक्शो तवा बाकत। मेको थम दारशो बाक्माकत। मत्ती ५:२८-२९ 3 मेको सु बाक्म, दे हिल्लो पथ, मुर का सोइक्ता बाकत। मिनु मेकोमी “मेको एलीआम आ तमी, हिती उरीयाह आ मीश बाथशेबा बाकत” देंमाकत। २सामुएल २३:३९ 4 मिनु दाऊदम मेको कली ब्रथ सोइक्ता बाकत। मिनु मेको जाक्माकत। मिनु दाऊद मेको नु इम्माकत। मेको मीश मुर मेना आ रां ब्रोलशा चिक्शो बाक्माकत। मिनु नोले बाथशेबा आ खिं लेम्माकत। प्रस्थान २०:१४; लेवी २०:१०; ब्यवस्था २२:२२; लेवी १५:१९ 5 मिनु मेकोमी कोव्रज कुरा बाकत “गो कोव्रज कुरशो दुम्ती” दे दाऊद कली लोव्र सोइक्ता बाकत।

6 मिनु दाऊदमी योआब कली “मेको आ वोंइश हिती उरीयाह कली आं बाक्तीक सोइक्तो” दे लोव्र कुरब सोइक्ता बाकत। मिनु योआबमी मेको कली दाऊद आ बाक्तीक सोइक्ता बाकत। 7 मिनु उरीयाह जाक्मेनु, दाऊदमी “लडाइ दोदेशो दुम्मे, योआब नु अरु लडाइ पाइबपुकी मार पामे?” दे हिल्लो पवा बाकत। 8 मेको नोले दाऊदमी हिती उरीयाह कली “उइ इ खिं लशा नांइसो, इ खोइल चिक्सो” दे मदा बाकत। मिनु मेको पिप आ खिं रे गूशा गाक्मेनु, पिपमी मेको आ नोले कोसेली सोइक्ता बाकत। 9 तन्न उरीयाह उइ आ खिं मलथु, पिप आ ओव्रतीक लाप्चो आ नेक्था इम्माकत। मेकेर आ प्रभु आ गेय पाइबपुकी यो इप्शो बाक्मा बाकत। 10 मिनु दाऊदम उरीयाह उइ आ खिं मला देशो लोव्र नेना बाकत। मिनु मेको कली “गे लाइशो लां गाक्शा जाक्शो बाक्नेवे। मारदे गे उइ इ खिं मलवे?” दे मदा बाकत। 11 मिनु उरीयाहमी “परमप्रभु आ सन्दोस, इस्राएल नु यहूदा डा मुर नेल्ल, आं प्रभु योआब नु इन गेय पाइब नेल्ल दिंम डा बाक्तीकेम बाक्शो बाक्नीम। मिनु गो दोपा जचा तूचा नु आं मीश नु इप्चा कली खिं लाइक्नुडा? गे इन ब्रोंइशा बाक्शो खोदेशो पा, गो मो पने मचाप्नुड” देंमाकत। 12 मिनु दाऊदमी उरीयाह कली “मो हना मुलाकत का एक बाक्को। मिनु दीसा लेशशा सोइक्नन” देंमाकत। मोपतीके उरीयाह मेको नाक्ती यरूसलेम उइ बाक्माकत। 13 मिनु आ दीसा दाऊदमी मेको कली आ बाक्तीकेम जथ ब्रेत्ता बाकत। मिनु मेको कली दुक्पदा बाकत। तन्न नाक्दो मेको लाडगा गूशा आ प्रभु आ गेय पाइबपुकी नु आ ब्राख्येम इम्माकत। तन्न मेको उइ आ खिं मलमाकत।

14 आ दीसा दाऊदमी योआब कली चिठी का ब्रेक्शा, उरीयाह आ गुइमी सोइक्ता बाकत। 15 मेको चिठीम “तेकेर ठेयब लडाइ दुम्मे मेकेर उरीयाह कली सोइशशा, गेपुकी चहिं नोले शोंइसीन। मिनु मेको बेक्ल” दे ब्रेक्ता बाकत।

प्रस्थान २०:१३ 16 योआब नु लडाइ पाइबपुकीमी सहर कली पुम्दमे बाक्त। मिनु मेकोमी उरीयाह कली थम ठेयब लडाइ दुम्तीकेम सोइक्ता बाक्त। 17 मिनु सहर डा मुरपुकी फो फु गूशा योआब नु लडाइ पामे बाक्त। दाऊद आ मुरपुकी का निक्शी बेक्मा बाक्त। हिती उरीयाह यो साइक्चा पुंडसे बाक्त। 18 मिनु योआबमी लडाइ डा लोत्र नेल्ल देंशा, मुर का दाऊद आ बाक्तीकेम सोइक्ता बाक्त। 19 योआबमी लोत्र कुरब मुर कली “गे लडाइम मार मार दुम्मे, मेको लोत्र नेल्ल पिप कली शेने थुमी नोले, 20 पिप गाइश्शा ‘लडाइ पनीनु सहर आ नेक्था मारदे लनी? गारो तार रे आप्नीम, दे मतुइक्नीनी? 21 येरूब-बाल आ तौ अबीमेलोक कली सुम सदा? मीश मुर कामी थेबेस डा गारो रे यात तोक्शा साइश्शा बाक्ब। मारदे गे गारो आ नेक्था लनी?’ दंत हना, गे मेको कली ‘इन गेय पाइब हिती उरीयाह यो बेक्त’ मतो” दे मदा बाक्त। न्यायाधीस ९:५३-५४

22 मिनु मेको लोत्र कुरब मुर दाऊद आ बाक्तीक जाक्माक्त। मिनु योआब आ देंशो खोदेंशो पा लोत्र नेल्ल शोवडा बाक्त। 23 मिनु मेको लोत्र चाक्ब मुरुमी दाऊद कली “मुरपुकी आंइ कली लडाइ तोचा कली बुक्तेक्म। मिनु फो फु गूशा दिंमम आंइ कली लडाइ तोम्तेक्म। गोपुकीम मेको आन कली सहर आ लाप्चो सम्म खेदा पा लाइतक। 24 मिनु ब्रा आप्बपुकीम इन गेय पाइब आंइ कली गारो तार रे ब्रा आप्तेक्म। मिनु इन मुर का निक्शी बेक्तेक्म। इन वाइल हिती उरीयाह यो बेक्त” देंमाक्त। 25 मिनु दाऊदम मेको कली “गे योआब कली ‘गे मेको साइश्शा मुर आन पर्वम सुर्ता मपावो। मारदे हना तरवारम गेना हना यो मुर साइक्ब। गे सहर कली लडाइ तोस डा तोस बाक्शा, ग्रानीनी’ दे आ थुं बारपतीन” देंमाक्त।

26 मिनु उरीयाह आ मीशेम आ वोंइश बेक्शो लोत्र नेंशा, मेको आ पर्वम रोंका पवा बाक्त। 27 मिनु रोंका पतीक नाक्त नुम नोले दाऊदम मुर सोइश्शा आ खिं चाक्गा बाक्त। मिनु मेको दाऊद आ मीश दुम्शा, तौ का थिमाक्त। तन्न दाऊद आ पशो परमप्रभु यावे आ डोंइती थम मरिम्शो बाक्माक्त।

12

नाथान आ कथा

1 परमप्रभु यावेमी आ लोत्र पाइब नाथान कली दाऊद आ बाक्तीक सोइक्ता बाक्त। मिनु मेको दाऊद आ बाक्तीक जाक्शा, मेको कली “सहर कामी मुर निक्शी बाक्सा बाक्त। मुर का शोंप पाइश्शा नु का पुडग बाक्माक्त। प्रस्थान २०:१७ 2 शोंप पाइश्शा मुर के शुश क्यारश भेडा नु बी ब्यफ बाक्मा बाक्त। 3 मेको पुडग मुर के पाठी का ला बाक्माक्त। मेको कली ग्याप्शो बाक्माक्त। मेको पाठी कली थुल्शा, आ आलपुकी नु कोल्पदा बाक्त। मिनु मेकोमी मेको आ भाग जशा तूशा बाक्बाक्माक्त। मेको आ थुकुमीन इप्बाक्माक्त। मिनु मेको मुरुमी मेको पाठी कली आ तमी खोदेंशोन पाइक्बाक्माक्त। 4 काबु नाक्ती मेको शोंप पाइश्शा मुर आ खिंम पौना का जाक्माक्त। मेको शोंप पाइश्शा मुरुम आ पौना कली थुल्चा कली आ क्यारश भेडा रे मारेइ गेचा थुं मपवा बाक्त। तन्न मेको पुडग मुर आ पाठी चाक्शा आ पौना कली जचा ब्वचा थोवक सेला बाक्त” दे मदा बाक्त। 5 मिनु दाऊदम मेको लोत्र नेंशा, मो पाइब मुर आ पर्वम थाम्पा गाइक्ता बाक्त। मिनु मेकोमी नाथान कली “परमप्रभु यावे ब्रोंइशा बाक्शो खोदेंशो पा मेको मुर साइक्चा पुंडसीब। 6 मेकोम मोपा शिशी मकोंइतीके मेको पाठी का के ४ ओटा पाठी गेचा माल्ब” देंमाक्त। प्रस्थान २१:३७

7 मिनु नाथानम दाऊद कली “मेको मुर गेन ननी। इस्राएली आन परमप्रभु यावेमी मार दंत देंशा हना ‘गो इ कली तेल लुक्शा, इस्राएल डा पिप सेलतन। सावल आ गुइ रे प्रोंइतन। १राजा २०:४० 8 गो इ कली इ होवप आ खिं नु आ मीशपुकी गेतेन। गो इस्राएल नु यहूदा डा मुर इ कली गेतेन। मोशोम मगाप्ते हना यो, गो अरु शुश गेन वा। 9 गे मारदे आं लोत्र मटिवी? मारदे आं डोंइती मरिम्शो पवी? गे हिती उरीयाह कली तरवारम क्योरतीवी। मिनु मेको आ मीश लाइश्शा, आ वोंइश कली अम्मोनी आन गुइम साइक्पाइक्तीवी। २सामुएल ११:-; १राजा १५:५ 10 मोपतीके इ खिं गेना हना यो तरवार रे नाइक्चा मताइब। मारदे हना गे आं लोत्र मटिथु, हिती उरीयाह आ मीश चाक्तीवी’ दंत। २सामुएल १३:२८-२९; २सामुएल १८:१४; १राजा २:२४-२५; २राजा २५:७ 11 परमप्रभु यावेमी ‘गो इ कली इ खिं रे श्येत दुम्पाइक्नुड। गो इ मीश आन कली इ डोंइती इ नेक्था डा मुर कली गेनुड। मिनु मेकोमी नाक्तीन मुर नेल्लेम तचा डा पा मेकोपुकी नु इप्ब। २सामुएल १६:२२; अय्युब ३१:९-१० 12 मारदे हना गे मेको खुइश्शा पाप्तीवी। तन्न गो इस्राएली नेल्ल आन तचा डा पा नाक्तीन पाइनुड’ देंशो बाक्ब” दे नाथानमी देंमाक्त। 13 मिनु दाऊदमी नाथान कली “गो परमप्रभु यावे आ डोंइती पाप पाता” देंमाक्त। मिनु नाथानम मेको कली “परमप्रभु यावेमी इ पाप क्याम्ताक्व।

गे मबेकनेवे। २सामुएल २४:१०; भजन संग्रह ५१:३; इजीकीएल १८:२१-२३ 14 तन्न गे एको पाप पा परमप्रभु यावे कली गाइकपाइक्तीवी। मोपतीके इ थिशो आल चहिं बेक्ब” देंमाक्त। २सामुएल ११:२७

15 मिनु नाथान आ खिं लमाक्त। परमप्रभु यावेम उरीयाह आ मीश रे पा जरमेशो दाऊद आ आल कली रोइ पपदा बाक्त। 16 मोपतीके दाऊदम मेको आल आ पर्वम परमप्रभु कली पुना बाक्त। मेको मारेइ मजथु खिंडगा लशा खपीम गोल्शा नां सोइदा बाक्त। 17 खिं डा खाल्पापुकीमी मेको कली “गे बोक्कीन” देंमा बाक्त। तन्न मेको मबिस्से बाक्त। मिनु मेकोपुकी नु जने यो मबिस्से बाक्त। 18 मिनु ७ नाक्त नोले आल बेक्माक्त। मिनु दाऊद आ गेय पाइबपुकीम “आल बेक्त” दे दाऊद कली देंचा हिंमा बाक्त। मारदे हना मेकोपुकीमी “आल सेस बाक्मेनु ला यो इं लोव्र मनंन। मुल मेको कली ‘आल बेक्त’ दे दोपा देंचा? मेकोमी आंम आ कली मारेइ मरिम्शो पाइक्बा को?” देंमा बाक्त। 19 तन्न दाऊदम आ गेय पाइबपुकीम शिप शिप पा देंशो लोव्र नेंशा, आल बेक्माक्त, दे तुइक्ता बाक्त। मिनु दाऊदमी आ गेय पाइब आन कली “आल बेक्मे” दे हिल्लो पामी बाक्त। मिनु मेकोपुकीम “बेक्त” देंमा बाक्त।

20 मिनु दाऊद खप रे बोक्शा, चिक्सीशा, तेल खेक्सीशा, अर्को वा फेक्से बाक्त। मिनु परमप्रभु यावे आ बाक्तीक लशा, परमप्रभु यावे कली ठेयब सेला बाक्त। मिनु नोले खिं जाक्शा, जचा थोव्रक पुंइशा, जवा बाक्त। 21 मिनु मेको आ गेय पाइबपुकीम मेको कली “गे मार पनी? आल सेस बाक्म सम्म गे मेको आ पर्वम मारेइ मजथु डाक्शा बाक्तीनी। तन्न आल बेक्म नोले बोक्शा जाइतीनी” देंमा बाक्त। 22 मिनु दाऊदमी “आल सेस बाक्म सम्म गो मारेइ मजथु डाक्शा बाक्ती। परमप्रभु यावेमी आं कली शिशी पा, आल ब्रोंइबा, को? दे मिम्ताक्ड। 23 तन्न मुल मेको बेक्त। मारदे गो मारेइ मजथु बाक्नुडा? मार गो मेको कली लेशशा चाक्ने चाप्नुडा डा? गो मेको आ बाक्तीक लाइनुड। तन्न मेको आं बाक्तीक लेशशा मजाक्ब” देंमाक्त।

24 मिनु दाऊदमी आ मीश बाथ्शेबा कली लेम्दा बाक्त। मिनु मेको नु इम्माक्त। मिनु अर्को तौ का थिमाक्त। मेको आ नें सोलोमन वोदमे बाक्त। मिनु परमप्रभु यावेमी मेको कली दाक्ता बाक्त। 25 मिनु मेको आ नें येदीदीयाह वोइक्चा माल्ब, दे आ लोव्र पाइब नाथान रे पा दाऊद कली लोव्र सोइक्ता बाक्त। येदीदीयाह आ अर्थ चहिं “परमप्रभु यावे आ दाक्शो मुर” बाक्ब।

दाऊदम रब्बाह सहर ग्राशो
१इतिहास २०:१-३

26 मेको नोले योआबमी लडाइ पा अम्मोनी आन पिप आ रब्बाह सहर, ग्रामाक्त। 27 मेकोमी “गो रब्बाहम लडाइ पा मेको शुश ब्वाक्कु बाक्शो सहर ग्राती। 28 गेमी लीशो मुर आन कली खुप्शा, मेको सहर कली लडाइ तोशा ग्राडीन। मो मपाइतीनी हना, गो आं के सेल्लुड। मिनु मेको सहर आं के दुम्ब” दे दाऊद कली लोव्र सोइक्ता बाक्त। 29 मोपतीके दाऊदम मुर नेल्ल आन कली खुप्तीमी बाक्त। मिनु रब्बाह सहर लमाक्त। मिनु लडाइ तोशा मेको आइक्के सेला बाक्त। 30 मेकोमी मिल्लोम आ पिपा रे सिरपेच प्रुदा बाक्त। मेको टलेन्ट का सुन के बाक्माक्त। मेको तारी हीरा का यो क्येप्शो बाक्माक्त। मेको दाऊद कली गुक्त्मे बाक्त। मेकोम सहर रे शुश मार मार यो रोइश्शा चाक्गा बाक्त। टलेन्ट का ३४ किलो खोइ बाक्ब। 31 मेकोमी मेकेर डा मुर आन कली लाइश्शा आरा, खन्ती नु खामी गेय पपदा बाक्त। मिनु इंटा सेल्लीकेम गेय पपदा बाक्त। मेको अम्मोनी आन सहर नेल्लेम मोदेंशो पवा बाक्त। मिनु नोले दाऊद नु आ मुर नेल्ल यरूसलेम लेम्मा बाक्त।

13

अम्नोनमी मरिम्शो पशो

1 मेको मो दुम्शो इच्का बर्स दुम्माक्त। मिनु दाऊद आ तौ अब्सालोम के थम दारशो समी का बाक्माक्त। मेको आ नें तामार बाक्माक्त। दाऊद आ अर्को तौ अम्नोनम मेको कली दाक्ता बाक्त। २सामुएल ३:२-३ 2 अम्नोन आ सान्मा आ तमी तामार नु दाक्मुतीके, आ थुंम थम मरिम्शो दुम्माक्त। मिनु मेकोमी दाक्तीके मेको रोइ पवा बाक्त। मारदे हना मेको कन्ने मीश आल बाक्तीके, मेकोम मारेइ मरिम्शो पने मचबा बाक्त। 3 तन्न अम्नोन आ वारच का बाक्माक्त। मेको आ नें योनादाब बाक्माक्त। मेको दाऊद आ लोक्ब शिमेआह आ तौ बाक्माक्त। मेको मिक्च सिल्ल मुर का बाक्माक्त। १सामुएल १७:१३ 4 मेकोम अम्नोन कली “ए पिप आ तौ, मारदे गे नाक्त किंत किंत मरिम्शो दुम्ना दुम्न लवे? मार दुमे आं कली देनो” दे मदा बाक्त। मिनु अम्नोनमी “गो आं लोक्ब अब्सालोम आ समी तामार कली दाक्नुड” देंमाक्त। 5 मिनु योनादाबमी “रोइ पाता, देंखु पा इप्शा बाक्को। मिनु इ आफ इ कली कोव्रथ जाक्त हना, गे मेको कली ‘आं समी तामारम आं कली जचा थोव्रक सेल्ला गेयील। मेकोम जचा थोव्रक आं डोंइती सेलल। मिनु

गो मेको आ सेल्शो कोव्रनुड। मिनु मेको आ गुइ रे जाइनुड' देंनो" देंमाक्त। 6 मोपतीके अम्नोन "रोइ पाता" देंखु पा इप्शा बाक्माक्त। मिनु पिप मेको कली कोव्रथ जाक्माक्त। मिनु अम्नोनमी पिप कली "आं समी तामारम आं डोंइती शोब्ले निक्शी चोशा गेयील। मिनु गो मेको आ गुइ रे जाइनुड" देंमाक्त।

7 मिनु दाऊदमी ख्विम लोव्र कुरब मुर का तामार आ बाक्तीक सोइक्ता बाक्त। मेकोमी "इ लोकब अम्नोन आ बाक्तीक लशा, मेको कली जचा थोव्रक सेल्शा गेवो" दे लोव्र पथ सोइक्ता बाक्त। 8 मिनु तामार आ लोकब अम्नोन आ ख्विम लमाक्त। मिनु मेको कली इप्शा बाक्शो थिदा बाक्त। मिनु तामारमी फस निशा, आ डोंइती शोब्ले चोशा गेवा बाक्त। 9 मिनु मेकोम तांइ शेशा अम्नोन आ बाक्तीक लशा, शोब्ले कुर पवा बाक्त। तन्न अम्नोन जने मबिस्से बाक्त। मिनु अम्नोनमी "नेल्ल आन कली लाडगा सोइक्तो" देंमाक्त। मिनु मुर नेल्ल लमा बाक्त। 10 मिनु अम्नोनमी तामार कली "मेको जचा थोव्रक आं कोठाम पितो। मिनु गो इ गुइ रे जाइनुड" दे मदा बाक्त। मिनु तामारमी आ चोशो शोब्ले आ लोकब अम्नोन आ कोठाम लदा बाक्त। 11 मिनु मेकोम शोब्ले गेवानु, अम्नोनम मेको कली ग्याइश्शा "आं समी पिवो। गो नु इपो" देंमाक्त। लेवी १८:९ 12 तन्न तामारमी "ममाइ, आं लोकब, आं कली ओदेंशो मपने। इस्राएलम ओदेंशो गेय पचा मदुम्ब। ओदेंशो मरिम्शो गेय मपने। 13 गो आं मुनेम आं कुल गुंइने मचाप्नुड। गे यो इस्राएलम काइ मरिम्शो मुर दुम्नीनी। आं पबर्म पिप नु लोव्र पने। गो नु ग्युबे पचा कली पिप बिप्ब" देंमाक्त। 14 तन्न मेकोम तामार आ लोव्र का यो मनेना बाक्त। मिनु मेको कली बोल पा ग्याइश्शा, मेको नु इम्माक्त।

15 मिनु नोले अम्नोनम मेको कली मदाक्ता बाक्त। अम्नोन आ डोंइती डा दाक्शो क्येडा नोले डा ग्रांग्रा दिशो शुश बाक्माक्त। मिनु अम्नोनम मेको कली "बोकशा लावो" दे मदा बाक्त। 16 मिनु तामारमी "ममाइ, आं लोकब, इ पशो गेय क्येडा यो आं कली गुंइशा सोइक्चा थम मरिम्शो बाक्ब" देंमाक्त। तन्न अम्नोनम मेको आ लोव्र मनेना बाक्त। 17 मिनु अम्नोनम आ गेय पाइब वोंइश आल कली ब्रेश्शा "एको मीश मुर कली आं डोंइती रे गुंइदो। एको कली गुंइशा आग्लो पतो" देंमाक्त। 18 तामारमी कन्ने मीश आल पिप आ तमीमी फेक्तीक लाइश्शा वा फेक्शो बाक्माक्त। मिनु अम्नोन आ गेय पाइब वोंइश आलम तामार कली गुंइशा, आ नोले लाप्चोम आग्लो पदा बाक्त। 19 मिनु तामारमी आ पियाम पुलु फुंइसीशा, आ लाइश्शा वा खाक्गा बाक्त। मिनु आ पियाम गुइ वोइश्शा ठेयब सेंदा पा डाक्ना डाक्न लमाक्त।

20 मेको आ लोकब अब्सालोमम "मार, इ लोकब अम्नोन गे नु इम्मे? मुल आं समी सिक्सी पा बाक्को। मेको इ लोकब बाक्ब। सुर्ता मपावो" देंमाक्त। मोपतीके तामार आ लोकब अब्सालोम आ ख्विमी प्रोंइचा पुंइसीशो मीश मुर खोदेंशो पा बाक्माक्त। 21 मिनु पिप दाऊदम मेको लोव्र नेशा थाम्पा गाइक्ता बाक्त। तन्न अम्नोन कली सजाइ मगेवा बाक्त। मारदे हना आ दाक्शो डोंइती डा तौ बाक्माक्त। 22 अब्सालोमम अम्नोन कली रिम्शो मरिम्शो मारेइ लोव्र मपवा बाक्त। आ समी तामार कली बिथोलो सेल्तीके अब्सालोमम अम्नोन कली काइ मदाक्ता बाक्त।

अब्सालोममी क्येक्क लेशो

23 बर्स निक्शी नोले अब्सालोमम आ भेडा आन ऊन प्रेक्चा कली मुर आन कली ब्रेत्ता बाक्त। मेको एफ्राइम आ नेक्था बाल-हजोरम बाक्माक्त। मिनु मेको भोजमी पिप आ तौ नेल्ल आन कली ब्रेत्तीमी बाक्त। 24 अब्सालोमम पिप आ बाक्तीक जाक्शा "गो, इन गेय पाइबम, ऊन प्रेक्तीक चाड मानेशो बाक्नुड। पिप नु इन गेय पाइबपुकी यो गो नु गाक्कीन" देंमाक्त। 25 तन्न पिपमी "ममाइ, आं तौ, गो नेल्ल जाक्शा इ कली श्येत मगेनीकी" देंमाक्त। अब्सालोमम "जाक्कीन कि जाक्कीन" देंमाक्त। मिनु पिप मबिस्से बाक्त। तन्न आसीक गेशा सोइक्ता बाक्त। 26 मिनु अब्सालोमम "गे जाक्ने मचाप्नीनी हना यो, आं लोकब अम्नोन कली गो नु लचा गेनीनी को?" देंमाक्त। मिनु पिपमी "मारदे मेको गे नु लाइबा?" दे हिल्लो पवा बाक्त। 27 तन्न दाऊदम अम्नोन नु अरु आ तौ मसोइक्ता सम्म अब्सालोमम देंस डा देंस पवा बाक्त। मिनु अब्सालोमम पिप आन कली गारचा डा ठेयब भोज सेला बाक्त। 28 मेकोम आ गेय पाइब आन कली "रिम्शा बाक्कीन। अम्नोन अडगुर शांबुम दुक्त हना, गो 'मेको कली सतीन' देंनुड। मिनु गे मेको कली सतीन। मारेइ हिंचा ममाल्नीनी। एको आं हुकुम बाक्ब। महिंथु बाक्कीन" दे माइक्मी बाक्त। लेवी २०:१७ 29 मिनु अब्सालोम आ गेय पाइबपुकीम आ देंशो खोदेंशो पा अम्नोन कली पामे बाक्त। मिनु पिप आ तौ नेल्ल आन आन खच्चर डोइश्शा डांडा रे ख्विम प्रोक्मा बाक्त।

अब्सालोम प्रोक्शो

30 मेकोपुकी लाम बाक्न बाक्ना पिप कली "अब्सालोमम पिप आ तौ नेल्ल आन कली साइक्तु। सुइ मब्रोंइम" देंशो लोव्र चाक्दीत्मे बाक्त। 31 मिनु पिप बोकशा आ वा खाक्गा बाक्त। मिनु खपीम निस्से बाक्त। मेको आ एर ओंथ

बाकब आ गेय पाइब नेल्लेमी यो आन वा खाकगमे बाकत। 32 मिनु दाऊद आ लोकब शिमेआह आ तौ योनादाबम “आं प्रभु, मेकोमी पिप आ तौ नेल्ल साइव्तु, दे ममिम्तीन। अम्नोन कली ला साइशो बाकब। अम्नोनम तामार कली बिथोलो सेला नाकत रे अब्सालोम आ कुल राव किकशो तांडसीशो बाकब। 33 आं प्रभु, पिप आ तौ नेल्ल आन कली साइव्तु देशो जोल लोव्र मनेनीन। अम्नोन ला साइवचा पुंडसाकव” देमाकत।

34 मिनु अब्सालोम प्रोक्शा गाकमाकत। मेना कोव्रब मुरुमी इर गे कोव्रडानु, होरोनाइम डांडा रे पा मुर आन हुल यिशो तवा बाकत। 35 मिनु योनादाबम पिप कली “गो इन गेय पाइब, आं देशो खोदेशो पा पिप आ तौपुकी यिना यिन बाकनीम” देमाकत। 36 मेकोम लोव्र पने थुमानु, पिप आ तौपुकी खिंडगा ओव्रशा ठेयब सेंदा पा डाकमा बाकत। पिप नु आ गेय पाइब मुरपुकी यो हुइ हुइ पा डाकमा बाकत।

37 तन्न अब्सालोम प्रोक्शा गेशुर डा पिप अम्मीहुद आ तौ तल्मै आ बाकतीक लशा बाकमाकत। दाऊद आ तौ आ पर्बम शुश नाकत सम्म रोंका पवा बाकत। 38 अब्सालोम गेशुरम प्रोक्म रे बर्स सां सम्म मेक उइ बाकमाकत। 39 अम्नोन बेक्शो शुश दुम नोले, पिपमी आ थुं अब्सालोम गे हिरदा बाकत। २सामुएल ३:३; २सामुएल १४:२३; यहोसु १३:११

14

अब्सालोम कली लेशशा चाकशो

1 मिनु सेरूयाह आ तौ योआबम पिप आ थुंम अब्सालोम कली दाकचा गोप्तु, दे तुइक्ता बाकत। 2 मिनु योआबम मुर का कली तेकोहा सहरम सोइशशा जोक्ब तुइक्ब मीश मुर का कली चाकपाइकमी बाकत। योआबम मेको मीश मुर कली “रोंका पशो मीश मुर खोदेशो पखु पावो। रोंका पतीक वा फेक्सो। पियाम तेल मखेक्सो। शुश नाकत रे बेक्शो मुर आ पर्बम रोंका पशो मीश मुर खोदेशो पखु पावो। 3 मिनु पिप आ बाकतीक लशा, आं शेंशो लोव्र देंनो” दे मदा बाकत। मिनु मार देंचा माल्बा, योआबम मेको कली शेंदा बाकत।

4 मिनु तेकोहा सहर डा मीश मुर पिप आ बाकतीक जाकशा, खप सम्म बाप्शा सेउ पवा बाकत। मिनु डाकना डाकन “पिप वारच पाइय्यीनी” देमाकत। 5 मिनु पिपमी मेको कली “इ कली मार श्येत दुम्मे?” दे मदा बाकत। मिनु मेकोमी “गो वोंइश बेक्शो मीश मुर का नड। आं वोंइश बेकत। 6 मेको इन वाइल आ तौ निक्शी बाकताकस। मेको निक्शी दिंमम राम्शी पाम्से बाकत। मेको आस कली फ्राब सुइ मबाकमा बाकत। मिनु काम आ लोकब कली तुप्शा सदा बाकत। 7 मुल आ थर डा मुर नेल्लेमी, इन वाइलीम कली ‘आ लोकब साइक्ब कली आंइ गुइम गेने। मिनु गो मेको कली साइक्नीकी। मारदे हना आ लोकब कली साइव्तु। गो इ अडस ताइब सुइ मबाकत हना यो, गो मेको कली साइक्नीक’ देंतेकम। मेकोपुकीम मो पाम्तेकम हना, आं लीशो मी यो काप्नीम। मिनु आं वोंइश आ नें नु चच युइ यो रागी रे क्याम्सीनीम” देमाकत। ब्यवस्था १९:११-१३ 8 मिनु पिपमी मेको मीश मुर कली “इ खिं लावो। इ निसाफ गो कोव्रनुड” देमाकत। 9 मिनु मेको तेकोहा सहर डा मीश मुरुमी पिप कली “आं प्रभु पिप, मेको दोस गो नु आं आफ आ खिं कली दुम्ल। पिप नु इन राज्य दोस मतवल” देमाकत। 10 मिनु पिपमी “मुल यो सुइम इ कली मारेइ देंतेकम हना, मेको आन कली आं बाकतीक चाकको। मिनु मेकोपुकीम इ कली लेंशा श्येत मगेनीम” दे मदा बाकत। 11 मिनु मेको मीश मुरुमी “पिप, गे परमप्रभु यावे, इन परमप्रभु कली मिम्शा गेय पने। मिनु हुश खाक्श पोक्चा नांइसेक्ल। मिनु आं तौ साइवचा मपुंडसीब” देमाकत। मिनु पिपमी “परमप्रभु यावे ब्रोंइशो खोदेशो पा इ तौ के चां का यो महेम्ब” देमाकत। गन्ती ३५:१९-२१

12 मिनु मेको मीश मुरुमी “आं प्रभु पिप, गो इन वाइलीममी मुल यो लोव्र का देंचा ताइक्नुडा कों?” देमाकत। मिनु पिपमी “देंनो” देमाकत। 13 मिनु मेको मीश मुरुमी “गे परमप्रभु आ मुर आन कली मारदे ओदेशो पचा मिम्तीनी? गे मोदेशो पाइतीनी हना, गे दोसी खोदेशो दुम्नीनी। गे रागी रे गुंडशा सोइशशो मुर कली लेंशा जाकचा गेने मबिस्सीनी। 14 गो नेल्ल बेक्चा माल्नय। गो खपीम क्युप्शा हुइक्ने मचाप्चा डा ब्वाक्कु खोदेशो बाकनय। तन्न परमप्रभुमी मुर कली मखेरब। मेकोमी आ डोंइती चाकचा कली मिम्ना मिम्न बाकब। इजीकीएल १८:२३ 15 गो, इन वाइलीम, एको लोव्र आं प्रभु पिप, इन कली देंथ जाक्ती। मारदे हना मुरपुकीम आं कली हिंच कोंइताक्यीमी। मिनु गो पिप नु लोव्र पाइनुड। मेकोमी आ वाइलीम कली आ पुंडशो गेबा कों? 16 मिनु पिपमी आ गेय पाइब, आं लोव्र नेंशा, गो नु आं तौ आंस कली श्येत गेब मुर रे प्रोंइबा कों, देंती। मारदे हना मेको मुरपुकीमी आंस कली परमप्रभु आ गेशो रू रे क्याम्चा माल्तेकम। 17 मिनु इन वाइलीम, आं प्रभु, आं पिप, आ लोव्रम आं थुं नाइक्चा गेब। मारदे हना गे, आं प्रभु पिप, परमप्रभु आ स्वर्ग डा गेय पाइब खोदेशो बाकनीनी। रिम्शो नु मरिम्शो तिल्ल बाकनीनी। परमप्रभु यावे, इन परमप्रभु गे

नु बाक्ब” देंमाक्त। २सामुएल १९:२८; १सामुएल २९:९ 18 मिनु पिपमी मेको मीश मुर कली “आं डोंइती मारेइ लोव्र मखुइक्तो, इ कली लोव्र का हिल्लो पाइक्नुड” देंमाक्त। मिनु मीश मुरुमी “आं प्रभु पिप, देंनीन” देंमाक्त। 19 मिनु पिपमी “मार, एको नेल्ल योआब आ देंशो बाक्मे?” देंमाक्त। मिनु मेको मीश मुरुमी “इन ब्रोंइशा बाक्शो खोदेंशो पा, आं प्रभु पिप, गे मारेइ लोव्र हिल्लो पनीनु, लोव्र लेप्ब के ग्युरा पेरा लतीक मबाक्ब। मारदे हना इन गेय पाइब योआबम आं कली मोदेंशो लोव्र पचा शेंशा सोइक्ताक्यी। 20 योआबमी इन थुं डा मिम्शो गेय फाइक्चा कली मोदेंशो पपाइक्ती। तन्न गे, आं प्रभु, परमप्रभु आ स्वर्ग डा गेय पाइब खोदेंशो पा रुप्तीक थुं पाइइशो बाक्नीनी। रागीम मार दुम्शो बाक्बा, मेको नेल्ल तुइक्नीनी” देंमाक्त। २सामुएल १४:१७

21 मिनु पिपमी योआब कली “दुम्ब, गो एको लोव्र बिस्साक्यी। लशा, मेको ठिटा अब्सालोम कली लेशशा चाक्कीन” देंमाक्त। 22 मिनु योआबमी आ कुल खप सम्म बाप्शा, सेउ पवा बाक्त। मेकोमी पिप कली “परमप्रभु यावेमी इन कली आसीक गेवल। मुलाक्ती गो आं प्रभु, पिप इन डोंइती शिशी ताता, दे तुइक्ताकड। मारदे हना गे आं पुंइशो गेतीनी” देंमाक्त। 23 मिनु योआब रीब पा गेशुर लशा, अब्सालोम कली यरूसलेमम चाक्गा बाक्त। २सामुएल १३:३७ 24 तन्न पिपमी “मेको आ खिंमीन बाक्ल। आं डोंइती जाक्चा मदुम्ब” देंमाक्त। मोपतीके अब्सालोम आ खिंमीन बाक्शा, पिप आ डोंइती मजाक्माक्त।

25 इस्राएल नेल्लेमी अब्सालोम खोदेंशो दारशो सुइ मबाक्मा बाक्त। आ पिया रे खोइल सम्म मेको के मारेइ मरिम्शो मदुम्शो मबाक्माक्त। 26 मेकोम बर्स बर्सम आ चां खोइक्बाक्माक्त। मारदे हना हेल्बाक्माक्त। मिनु मेको आ चां पिप आ नाक्तीकेम नाक्शोनु, सहे निक्शी शेकेल डा दुम्बाक्त। २०० शेकेल २ किलो ३०० ग्राम खोदेंशो बाक्ब। 27 अब्सालोम के तौ सां नु तमी का बाक्मा बाक्त। आ तमी आ नें तामार बाक्माक्त। मेको थाम्पा दारशो मीश मुर बाक्माक्त।

28 मिनु अब्सालोम बर्स निक्शी सम्म यरूसलेमम बाक्माक्त। मेको पिप आ डोंइती मजाक्थु बाक्माक्त। 29 मिनु अब्सालोममी पिप कली गुम्चा कली योआब कली लोव्र सोइक्ता बाक्त। तन्न योआब जाक्ने मबिस्से बाक्त। लेंशा ब्रथ सोइक्तानु यो, जाक्ने मबिस्से बाक्त। 30 मिनु अब्सालोमम आ गेय पाइब आन कली “योआब आ रू का आं रू आ नेक्था बाक्ब। मेको के क्योव्रज वाशो बाक्ब, दे गे तुइक्नीनी। मेकेर मी सुइक्तीन” दे माइक्मी बाक्त। मोपतीके अब्सालोम आ गेय पाइबपुकीम मेकेर मी सुइक्तमे बाक्त। 31 मिनु योआब रीब पा अब्सालोम आ खिं लशा, मेको कली “मारदे इन गेय पाइबपुकीम आं रूम मी सुइक्तमे?” दे हिल्लो पवा बाक्त। 32 मिनु अब्सालोममी योआब कली “गो इन कली ब्रथ सोइक्ताकड। गे आं पबर्म पिप कली लोव्र लाइक्नीनी कों, दे मिम्ताकड। गे पिप कली ‘गो मारदे गेशुर रे जाक्चा माल्डा? गो मेक उइ बाक्शो नड हना, रिम्शो दुम वा’ देंचा कली ब्रेत्थ सोइक्ताकड। गो पिप आ डोंइती लचा तडल। गो मारेइ मरिम्शो पशो बाक्ती हना, दोस ताइब बाक्ती हना, साइय्यील” देंमाक्त। 33 मिनु नोले योआब पिप आ बाक्तीक लशा, अब्सालोम आ लोव्र नेंपदा बाक्त। मिनु पिपमी अब्सालोम कली ब्रेत्थ सोइक्ता बाक्त। मिनु मेको पिप आ डोंइती जाक्शा खप सम्म बाप्शा, सेउ पवा बाक्त। मिनु पिपमी अब्सालोम कली पुक्पु पदा बाक्त।

15

अब्सालोम पिप दुम्चा माल्शो

1 मिनु नोले अब्सालोमम बग्गी का, शारा नु आ डोंइडोंइती दोरचा कली ५० जना मुर आंम कली वोदा बाक्त। १राजा १:५ 2 अब्सालोम सुनी कना बोक्शा, सहर ओव्रतीक ठेयब लाप्चोमी बाक्बाक्माक्त। मिनु मुरपुकी पिप कली निसाफ पुंइथ जाक्बाक्तेक्म। अब्सालोममी मेको आन कली का का पा “तेको सहर रे जाक्शो नवे” देंबाक्माक्त। मिनु मेकोमी “इन गेय पाइब इस्राएल डा एको थर रे जाक्शो नड” देंबाक्मा बाक्त। 3 मिनु अब्सालोमम मेको कली “इ लोव्र ठीक बाक्ब। तन्न पिपमी इ कली ठीक निसाफ पा मनंपाइक्ब” देंबाक्माक्त। 4 मिनु नोले अब्सालोममी “गो एको रागी डा निसाफ पाइब दुम्शो नड हना, सु सु कली निसाफ माल्दा, गो मेको नेल्ल आन कली निसाफ गेड वा” देंबाक्माक्त। 5 सुइ मुर मेको कली सेउ पथ जाक्मेनु, मेको कली आ गुइ हाम्शा मुप्शा, पुक्पु पाइक्बाक्माक्त। 6 अब्सालोममी पिप आ निसाफ पतीकेम इस्राएली सु सु जाक्बाक्मा, मेको आन कली मोपा आन थुं खुइ पाइबाक्माक्त।

7 मिनु ४ बर्स नोले अब्सालोमम पिप कली “गे आं कली हेब्रोन लचा गेयीनी। गो परमप्रभु यावे कली पशो कबल खाप्चा दाक्नुड। 8 मारदे हना गो, इन गेय पाइबम अराम डा गेशुरम बाक्डानु, कबल का पाता। गो मार कबल पाता देंशा हना, ‘परमप्रभु यावे, गे आं कली थमा पा यरूसलेमम लेशशा चाक्ती हना, गो हेब्रोनम परमप्रभु यावे, इन कली

ठेयब सेल्लुड' दे कबल पाता" देंमाक्त। उत्पत्ती २८:२०-२१; २सामुएल १३:३७-३८ 9 मिनु पिपमी "गे इ थुं नाइशशा लावो" देंमाक्त। मिनु मेको बोक्शा, हेब्रोन लमाक्त। 10 मिनु अब्सालोमम इस्राएल डा थर नेल्ल आन कली सुइम मतुइक्चा डा पा, लोत्र कुरब सोइशशा "तुराही ग्रीशो नेंनी चोटी, गोपुकीम 'अब्सालोम हेब्रोनम पिप दुम्त' देंनीन" देंपाइक्मी बाक्त। 11 यरूसलेम डा सहे निक्शी जना मुर अब्सालोम आ नोले खोइक्ब दुम्मा बाक्त। मेको आन कली अब्सालोमम ब्रेशो बाक्माक्त। तन्न मेकोपुकी मारेइ मतुइक्थु, लशो बाक्मा बाक्त। 12 अब्सालोमम आ क्योरशा चढ़ेतीकेम चढ़ेवानु, गिलोह सहर डा अहीथोफेल कली ब्रेथ सोइक्ता बाक्त। मेको अहीथोफेल चहिं गिलोह सहर डा दाऊद कली अर्ती गेब मुर बाक्माक्त। मोपा पिप कली मरिम्शो गेय पना पन लशा अब्सालोम आ मुर शुश दुम्ना दुम्न लमा बाक्त। २सामुएल २३:३४; यहोसु १५:५१

दाऊद प्रोक्शो

13 मिनु लोत्र कुरब मुर का दाऊद आ बाक्तीकेम जाक्शा "इस्राएल डा मुरपुकी अब्सालोम आ नोले खोइक्तेक्म" देंमाक्त। 14 मिनु दाऊदम यरूसलेमम आं नु बाक्ब आ ठेयब गेय पाइब आन कली "बोक्कीन, गोपुकी रीब पा प्रोक्चा मालनय। मो मपाइतय हना, गो सुइ अब्सालोम आ गुइ रे ब्रोंइचा मताइनय। रीब पा पने, मो मदुम्त हना, मेकोमी इं क्येडा लाक्शा, इं कली शुश श्येत गेशा, सहर कली लडाइ तोइब" देंमाक्त। 15 मिनु पिप आ ठेयब गेय पाइबपुकीमी "गे आंइ प्रभु पिपमी, मार देंनी, गो इन गेय पाइबम मेको पाइनीकी" देंमा बाक्त। 16 मिनु पिपमी आ खिं डा सुइ सुइ आन कली लाइशशा गाक्माक्त। मेकोमी १० जना नोले चाक्शो मीश आन कली खिं कोत्रचा कली प्रोंइशा वोइक्मी बाक्त। 17 मिनु पिप गाक्माक्त। मिनु मुर नेल्ल आ नोले खोदमे बाक्त। मिनु नोले डा खिंम चहिं दिक्मा बाक्त। 18 मिनु पिप आ ठेयब गेय पाइब, केरेथी नु पेलेथी नेल्ल, गाथ सहर रे जाक्शो ६ सहे गित्त आ खिं डा नु मुर नेल्ल पिप आ डोंइती लाक्गमे बाक्त। २सामुएल ८:१८; १सामुएल २७:२

19 मिनु पिपमी गित्त आ खिं डा इत्ताइ कली "मारदे गे यो गो नु पिवे? लेशशा लशा, पिप नु बाक्को। मारदे हना गे अर्को रागी डा मुर नवे। गे इ रागी रे गुंडचा पुंडसीशो मुर नवे। 20 गे सिनाक्त साबेर नाक्त ला जाक्शो मुर नवे। गो मुलाक्त इ कली दोपा गो नु गाक्को देंनुडा? गो ते लाइक्नुडा आंमान मतुइक्नुड। गे खिं लावो। मिनु इ मुर आन कली यो लाइक्मी। परमप्रभु यावेमी इ कली आ गेना हना यो दाक्शा मप्रोंइतीके कोंइदल" देंमाक्त। 21 तन्न इत्ताइमी पिप कली "परमप्रभु यावे ब्रोंइशा बाक्शो खोदेंशो पा नु आं प्रभु पिप इन ब्रोंइशा बाक्शो खोदेंशो पा, गे ते लाइतीनी हना यो, गो मेक लाइक्नुड। ब्रोंइतीनी हना यो, बेक्तीनी हना यो, गो इन गेय पाइब, इन नु बाक्नुड" दे मदा बाक्त। 22 मिनु दाऊदमी इत्ताइ कली "लो, दुम्ब गाक्को" दे मदा बाक्त। मोपा गित्त आ खिं डा इत्ताइ, आ मुर नेल्ल नु आ आल नेल्ल नु गाक्मा बाक्त। 23 पिप मोपा गाक्मेनु लांम बाक्ब मुर नेल्ल डाक्मा बाक्त। पिप किद्रोन खोला शोक्शा गोरशो रागी गे लमा बाक्त।

24 मिनु अबीयाथार, सादोक नु लेवी नेल्ल परमप्रभु आ कबल पशो सन्दोस कुरशा, जाक्मा बाक्त। मेकोपुकी चहिं सहर डा मुर नेल्ल गूशा मगाक्मा सम्म सन्दोस नाइशशा रिम्शा बाक्मा बाक्त। 25 मिनु पिपमी सादोक कली "परमप्रभु आ सन्दोस सहर लेशशा लतीन। परमप्रभु यावेमी आं कली शिशी पाइक्ती हना, आं कली लेशशा जाक्चा गेब। मिनु सन्दोस नु मेको वोइक्तीके लेंशा कोत्रचा गेब। 26 तन्न परमप्रभु यावेमी 'गे इ कली शिशी मपाइनुड' देंत हना, गो एक उइ बाक्नुड। मेकोम आं कली आ दाक्शो पवल। 27 कोत्रडीन, गे नु इ तौ अहीमाज नु अबीयाथार नु आ तौ योनाथन एको ठिटा निक्शी आस कली लाइशशा, सहर लेतीन। १राजा १:४२ 28 गो गोरशो रागी आ सुरमी इन लोत्र मनेनु सम्म रिम्शा बाक्नुड। एको लोत्र मप्रेंदीन" देंमाक्त। 29 मिनु सादोक नु अबीयाथारम परमप्रभु आ सन्दोस यरूसलेम लेशशा लदसे बाक्त। मिनु मेको मेक उइ बाक्सा बाक्त।

30 तन्न दाऊद जैतून डांडा डा ग्येथ लांमी डाक्ना डाक्न लमाक्त। मेकोम आ पिया सुम्शो बाक्माक्त। श्येथ खोइल गाक्शो बाक्माक्त। मेको नु गाक्ब नेल्ल यो आन पिया सुम्शा डाक्ना डाक्न गाक्मा बाक्त। 31 मिनु दाऊद कली अहीथोफेल मरिम्शो पाइब आन दातेम अब्सालोम नु बाक्त देंशो लोत्र नेंपदमे बाक्त। मिनु दाऊदम "परमप्रभु यावे अहीथोफेल आ अर्ती शोर गाक्शो सेलीन" दे पुंन बाक्त। २सामुएल १७:१४ 32 मिनु दाऊद परमप्रभु कली ठेयब सेल्लिक डांडा तार जाक्माक्त। मेना अरकी आ खिं डा हुशाइ आ वा खाक्शा, आ पियाम खप फुंडसीशा दाऊद कली गुम्थ जाक्माक्त। १राजा ३:२; यहोसु १६:२ 33 दाऊदम मेको कली "गे गो नु गाक्ते हना, आं कली श्येत ला दुम्ब। 34 तन्न गे सहर लेशशा लशा अब्सालोम कली 'गे इन आफ आ गेय पशो खोदेंशो पा इन गेय पाइब दुम्नुड' देंते हना, मिनु मेक बाक्ते हना, अहीथोफेल आ अर्ती खतम सेल्चा कली आं कली वारच पाइनेवे। २सामुएल १७:७ 35 चढ़ेब

सादोक नु अबीयाथार गे नु मेक बाक्नीस। पिप आ खिंम मार मार लोत्र नेंनी, मेको नेल्ल मेको आस कली शेंदीम्सी। 36 मेको निक्शी नु आस तौ मेको नु बाक्नीस। सादोक आ तौ अहीमाज नु अबीयाथार आ तौ योनाथन रे इन नेंशो लोत्र नेल्ल आं कली नेंपाइक्ने चाप्नीनी” देंमाक्त। २सामुएल १७:१५-२१ 37 मिनु दाऊद आ वारच हुशाइ, अब्सालोम यरूसलेमम ओव्रन ओव्रना, सहर जाक्दीम्माक्त। १इतिहास २७:३३

16

सीबामी दाऊद कली गुम्शो

1 दाऊद डांडा तार रे इच्का आइक्ची जाक्दीम्मेनु, मेफी-बोशेथ आ गेय पाइब सीबामी दाऊद कली गुमा बाक्त। मेकोम लगम पाइशो गधा निक्शीम सहे निक्शी शोब्ले, सहे का मुठा सोव्रशो अडगुर, सहे का फल फुल नु मसक का अडगुर शांबु कुरपाइशशा, चाक्गा बाक्त। २सामुएल ७:२ 2 पिपमी सीबा कली “गे एको नेल्ल मारदे चाक्गी?” दे हिल्लो पवा बाक्त। मिनु सीबाम “एको गधा पिप आ खिं डा मुर डोइक्चा कली बाक्नीस। शोब्ले नु फल फुल चहिं ठिटा आन कली जचा कली बाक्ब। अडगुर शांबु गोरशो रागीम दशा थशो आन कली तूचा कली बाक्ब” देंमाक्त। 3 मिनु पिपमी “इ होव्रप आ तौ ते बाक्म” दे हिल्लो पवा बाक्त। मिनु सीबाम “मेको यरूसलेममीन बाक्शो बाक्ब। मेकोमी ‘मुलाक्ती इस्राएलीपुकीम आ बाजे आ राज्य लेशशा गेनीम’ दे रिम्शा बाक्शो बाक्ब” देंमाक्त। २सामुएल १९:२५-३१ 4 मिनु पिपमी सीबा कली “मुल मेफी-बोशेथ आ मारेइ मारेइ इ के दुम्ब” दे मदा बाक्त। मिनु सीबामी “आं प्रभु पिप, गो इन वाइल का नड। इन डोंइती शिशी तडल” देंमाक्त। १राजा २:८-९; प्रस्थान २२:२७

शिमेइम दाऊद कली सराप पशो

5 मिनु पिप दाऊद बाहुरीम सहरम जाक्माक्त। मिनु मेकेर सावल आ खिं डा मुर का, गेरा आ तौ शिमेइ गूशा दाऊद कली सराप चीले पना पन पिमाक्त। 6 मेकोम पिप दाऊद नु आ गेय पाइब नेल्ल, लडाइ पाइब नेल्ल नु अरु मुर नेल्ल आन कली एर ओंथ नेल्ल फुल्लु क्रोम्दीमी बाक्त। दाऊद आ ग्युरा नु पेरा आ लडाइ पाइब नु आ मुर बाक्मा बाक्त। 7 शिमेइमी “लावो, लावो, ए मुर साइक्ब नु मरिम्शो पाइब” दे ग्रीशा, सराप पवा बाक्त। 8 मिनु “परमप्रभु यावेम सावल आ खिं डा मुर आन हुश आ क्येक्क लेत्ताक्वे। गे मेको आ पा डा सासन पाप्तीवी। मिनु परमप्रभु यावेमी एको राज्य इ तौ अब्सालोम कली गेप्टु। मुल गे खतम दुम्ते श्येत जाइनेवे। मारदे हना गे हुश खाक्श पोक्ब बाक्नेवे” देंमाक्त।

9 मिनु सेरूयाह आ तौ अबीशैमी पिप कली “मारदे मेरे बेक्शो कुचुममी आं प्रभु, पिप इन कली सराप पवा? गो आइक्ची हांबु लशा मेरे आ पिया खोइक्नुड” देंमाक्त। १सामुएल २६:८ 10 तन्न पिपमी “ए सेरूयाह आ तौ, गे गो नु मगारचा डा बाक्नीसी। परमप्रभु यावेमी मेको कली ‘दाऊद कली सराप पावो’ दे सोइशो बाक्त हना, सुम तेक्ने चाप्बा डा?” देंमाक्त। २सामुएल १९:१७-२४ 11 मिनु दाऊदम अबीशै नु आ गेय पाइब नेल्ल आन कली “आं तौमी आं कली साइक्चा माल्ब हना, मेरे बेन्यामीन आ थर डा मुर के मार लोत्र पचा डा? मेरे कली प्रोनीन। मेरेमी सराप पवल। मारदे हना परमप्रभु यावेमीन मेरे कली सराप पचा गेशो बाक्म माइ। 12 परमप्रभु यावेम मेरे मुलाक्त डा सराप आ पा डा आं श्येत तशा आं कली रिम्शो पाइबा को” देंमाक्त। 13 मिनु दाऊद नु आ मुर आन लां खोदमे बाक्त। शिमेइ चहिं दाऊद आ लां गे आइक्ची हांबुइ आइक्ची हांबु लमाक्त। लमेनु दाऊद कली सराप पना पन फुल्लु आप्ना आप्ना, खप ब्वारना ब्वारन लमाक्त। 14 मिनु पिप नु मेको नु गाक्ब मुर नेल्ल यर्दन खोला आ नेक्था जाक्दीम्मा बाक्त। मिनु मेको थाम्पा दशा नांसमा बाक्त।

अब्सालोम यरूसलेम जाक्शो

15 अब्सालोम नु मेको नु बाक्ब इस्राएली नेल्ल यरूसलेम जाक्मा बाक्त। अहीथोफेल यो मेको नु बाक्माक्त। 16 मिनु अरकी आ खिं डा हुशाइ दाऊद आ वारचमी अब्सालोम कली गुमा बाक्त। मिनु मेकोमी अब्सालोम कली “पिप गेना हना यो ब्रोंइशा बाक्ल। पिप गेना हना यो ब्रोंइशा बाक्ल” देंमाक्त। २सामुएल १५:३७ 17 तन्न अब्सालोममी हुशाइ कली “इ वारच कली मप्रोंइतीके, मोदेशो बाक्बा डा? मारदे गे इ वारच नु मलवे” दे मदा बाक्त। 18 मिनु हुशाइमी अब्सालोम कली “ममाइ, परमप्रभु यावे मेकेर बाक्ब मुर नु इस्राएली नेल्लेमी योव्रशो मुर आ गेय पचा मिम्ताक्ड। गो एक बाक्नुड। 19 मुल गो सुका आ गेय पाइनुड डा? पिप आ तौ कली गेय पचा मदुम्बा डा? गो दोपा इन आफ आ गेय पडा, मोपा इन गेय यो पाइनुड” देंमाक्त।

अहीथोफेलमी अर्ती गेशो

20 मिनु अब्सालोममी अहीथोफेल कली “आंइ कली इन अर्ती गेने। गो दोपा गेय पचा माल्नीकी?” दे हिल्लो पवा बाक्त। 21 मिनु अहीथोफेलमी अब्सालोम कली “इन आफोमी आ खिं कोव्रचा कली प्रोइशा वोइशो आ नोले चाक्शो मीशपुकी नु इपो। मोपा इन आफ कली मरिम्शो पशो इस्राएल नेल्लेम नेंनीम। मिनु इन नोले खोइक्ब आन थुं बारब” देंमाक्त। २सामुएल १५:१६ 22 मोपतीके मेकोपुकीम अब्सालोम कली खिं तार ताम्बु का कीडमे बाक्त। मिनु अब्सालोममी इस्राएली नेल्लेम तचा डा पा, आ आफ आ नोले चाक्शो मीशपुकी नु इम्माक्त। 23 मेना मुरपुकीम अहीथोफेल आ अर्ती परमप्रभु आ लोव्र खोदेशो मिम्बाक्सा बाक्त। मोपतीके दाऊद नु अब्सालोमम अहीथोफेल आ अर्ती ठेयब मिम्बाक्सा बाक्त।

17

अहीथोफेल आ अर्ती क्याम्शो

1 अहीथोफेलम अब्सालोम कली “आं कली १२ हजार योव्रशो मुर गेयीनी। मिनु गो मुलाक्दो दाऊद कली खेदा पाइनुड। 2 मेको दशा, आ थुं लुकच लशा बाक्मेनु, मेको कली थित्नुड। मिनु मेको नु बाक्ब मुर नेल्ल ब्रशा प्रोक्नीम। मिनु गो पिप कली ला साइक्नुड, अरु सुइ मसाइक्नुड। 3 मिनु गो इस्राएली नेल्ल आन कली ग्युम्ली आ ग्युम्ले बाक्तीक जाक्शो खोदेशो पा इन बाक्तीक चाक्नुडमी। गे मुर का आ सोक्त मालना मालन बाक्नीनी। लीशो मुर मारेइ मदुम्नीम” देंमाक्त। 4 मिनु अब्सालोम नु इस्राएल डा खाल्पा नेल्लेम अहीथोफेल आ अर्ती दाक्तमे बाक्त।

5 तन्न अब्सालोमम “अरकी आ हुशाइ कली ब्रेत्तीन। मेकोमी मार देंबा, मेको नेंय” देंमाक्त। २सामुएल १६:१६ 6 मिनु हुशाइ अब्सालोम आ डोंइती जाक्मेनु, अब्सालोममी “अहीथोफेल आ देशो नेल्ल शेंदा बाक्त। मेको आ देशो पचा, दे मपचा? मपचा हना, गे मार मिम्नेवे देंनो” देंमाक्त।

7 मिनु हुशाइमी अब्सालोम कली “एको मुल डा अहीथोफेल आ देशो ठीक मदुम्ब” देंमाक्त। 8 मिनु हुशाइमी लेंशा “गे इन आफ नु मेको नु बाक्ब मुरपुकी थम जोक्ब लडाइ पाइबपुकी बाक्नीम, दे तुइक्नीनी। मेकोपुकी चाइक्ब रोइक्चा पुंइसीशो वां खोदेशो दुम्शो बाक्नीम। इन आफ लडाइ पतीकेम जोक्ब तुइक्ब बाक्ब। मेको नाक्दो आ लडाइ पाइब नु काथा मबाक्ब। 9 मुल यो मेको तेकोइ ढोडोडगा नु अरु बाक्तीकेमी खुइशशा बाक्म माइ? मिनु इं लडाइ पाइबपुकी डोंइती साइक्चा पुंइसाक्म हना, मेको नेंबपुकीमी ‘अब्सालोम आ नोले खोइक्बपुकी बेक्ना बेक्न बाक्नीम’ देशो नेंनीम। 10 मोदेशो दुम्मेनु, महिंब गुप्स खोदेशो थुं पाइशो लडाइ पाइब मुर यो हिंनीम। मारदे हना इस्राएली नेल्लेमी इन आफ बोल्यो लडाइ पाइब मुर बाक्ब, दे तुइक्नीम। मेको नु बाक्ब थम बोल्यो बाक्नीम, दे तुइक्नीम। 11 आं अर्ती चहिं मार बाक्ब देशा हना, दान रे बेयर-शेबा सम्म डा इस्राएली नेल्ल आन कली खुप्चा माल्नीम। मेको समुन्द्र डा बाल्वा खोदेशो पा शुश बाक्नीम। मिनु गे मोदेशो पा लडाइ पथ लने। 12 मिनु मेको ते बाक्त हना यो, गो मेको कली थिश्शा लडाइ तोइनय। गो सीत यिशो खोदेशो पा मेको तार जुक्नय। मिनु मेको नु मेको कली खोइक्ब का यो ब्रोंइचा मताइनीम। 13 मेको प्रोक्शा सहर लशा, बाक्तीक पुंइशा बाक्त हना यो गो इस्राएली नेल्ल मेकेर लशा मेको सहर कली डोरीम कीशा फुल्लु का यो ख्रोप्शा मलीपाइक्थु, दिंमम चाक्नय” दे हुशाइमी देंमाक्त। 14 मिनु अब्सालोम नु इस्राएली नेल्लेमी “अहीथोफेल आ अर्ती क्येडा अरकी आ हुशाइमी गेशो अर्ती रिम्शो बाक्ब” देंमा बाक्त। मारदे हना परमप्रभु यावेमी अहीथोफेल आ अर्ती क्याम्शा, अब्सालोम कली खतम पोक्चा कली मो पवा बाक्त। २सामुएल १५:३१-३४ 15 मिनु नोले हुशाइमी चढेब सादोक नु अबीयाथार आस कली अहीथोफेलम अब्सालोम नु इस्राएल डा खाल्पा आन कली गेशो अर्ती नु आ गेशो अर्ती नेल्ल शेंदीम्सी बाक्त। 16 मिनु गे दाऊद कली “गोरशो रागी आ सुरम बास मबाक्थु, गोरशा रागी लाक्शा गाक्कीन। मो मपाइतीनी हना, पिप नु आ नु बाक्ब नेल्ल साइक्चा पुंइसीनीम” देंमाक्त।

17 मेना योनाथन नु अहीमाज एन-रोगेलमी रिम्शा बाक्शो बाक्सा बाक्त। मिनु वाइलीम का लशा, मेको आस कली शेंबाक्माक्त। मिनु मेको निक्शीमी पिप दाऊद कली शेंबाक्सा बाक्त। मारदे हना सहर डा मुरुम मतामेक्ल, दे मो पाइक्बाक्सा बाक्त। २सामुएल १५:३६; यहोसु १५:७-८ 18 तन्न मेना वोंइश आल काम मेको आस कली तशा, अब्सालोम कली शेंदा बाक्त। मोपतीके मेको निक्शी रीब पा बाहुरीम डा मुर का आ खिं जाक्दीम्सा बाक्त। मेको आ लाडगाम इनार का बाक्माक्त। मिनु मेको निक्शी मेको आगा ओव्रसा बाक्त। 19 मेको खिं डा मुर आ मीशेमी सुम्तीक का चाक्शा, मेको तार बिस्कुन हामा बाक्त। सुइम मारेइ मतुइक्तमे बाक्त। 20 मिनु अब्सालोम आ गेय पाइब

मुरपुकी जाकशा, मेको मीश मुर कली “अहीमाज नु योनाथन ते बाकसा” दे हिल्लो पामे बाक्त। मिनु मेकोमी “मेको निक्शी आइक्ची हांबु लाक्ताक्स” देंमाक्त। मेको मुरपुकीम एर ओंथ माल्मे बाक्त, तन्न मथिदमे बाक्त। मोपतीके मेकोपुकी यरूसलेम लेम्मा बाक्त। 21 मिनु मेकोपुकी लमा नोले मेको निक्शी इनार रे गूसा बाक्त। मिनु मेको लशा पिप दाऊद कली नेल्ल शोव्रडसे बाक्त। मेको निक्शीमी दाऊद कली “बोक्कीन, रीब पा खोला शोक्सीन” देंसा बाक्त। अहीथोफेल आ देंशो अर्ती डा लोव्र यो शेंदसे बाक्त। 22 मोपतीके दाऊद नु आ मुरपुकी रीब पा यर्दन खोला शोक्सीमा बाक्त। बुरुु पा हाम्सो दुम्मेनु, आइक्ची हांबु मजाक्दीप्ब, सुइ मलीमा बाक्त।

23 मिनु अहीथोफेलमी आ अर्ती डा लोव्र मबिश्शो तुइश्शा, आ गधा ठीक पा आ सहर डा खिं लमाक्त। मिनु आ खिं डा मुर आन कली देंचा माल्शो लोव्र देंशा, आं चहिं ग्युक्शा बेक्माक्त। मेको मोपा बेक्शा आ आफ आ तुरसुम थिम्चा पुंइसे बाक्त। १सामुएल ३१:४; १राजा १६:१८; मत्ती २७:५

24 मिनु दाऊद महा-नाइमम जाक्दीम्माक्त। मेना अब्सालोम नु मेको नु बाक्शो इस्राएली यर्दन खोला शोक्सीने थुम्मे बाक्त। २सामुएल २:८ 25 अब्सालोमम योआब आ पा डा इश्माएली इश्शा आ तौ आमासा कली कप्तान सेला बाक्त। इश्शामी अबीगेल कली ग्युंवे पवा बाक्त। अबीगेल, नाहाश नु सेरूयाह आस समी आ तमी बाक्माक्त। सेरूयाह योआब आ ममा बाक्माक्त। 26 इस्राएलीपुकी नु अब्सालोमम गिलादमी आन बाक्तीक सेलमे बाक्त। 27 मिनु दाऊद महा-नाइमम जाक्मेनु, रब्बाहम बाक्ब अम्मोनी नाहाश आ तौ शोबी, लो-देबारम बाक्ब अम्मीएल आ तौ माकीर नु रोगेलीम बाक्ब गिलाद आ मुर बारजील्लाइम, १इतिहास १९:१; २सामुएल ९:४; १राजा २:७ 28 ब्रतीक फेक्तीक, ग्योंबपुकी, खप के ग्योंबपुकी, क्योव्रज नु चेरब, फस, सिबी, दाल, 29 खुदो, दहि, भेडा नु दूध के सेल्शो जचा थोव्रक दाऊद नु मेको नु बाक्ब मुर आन कली चाक्शा, गेमे बाक्त। मारदे हना मेकोपुकीम दाऊद नु आ मुरपुकी गोरशो रागीम शोव्रलु बेक्शो, तूतू दाक्शो नु थाम्पा दशो बाक्नीम, दे तुइक्त्मे बाक्त।

18

अब्सालोम साइक्चा पुंइसीशो

1 दाऊदमी आं नु बाक्शो मुर आन कली लडाइ पचा कली पुक्मी बाक्त। मिनु हजार का नु सहे का डा मुर आन कप्तान योव्रमी बाक्त। 2 मिनु नोले दाऊदमी आ लडाइ पाइब आन कली भाग सां सेल्मी बाक्त। भाग का योआब आ हुकुममी, भाग का सेरूयाह आ तौ अबीशै योआब आ लोक्ब आ हुकुममी नु भाग का गित्त आ खिं डा मुर इत्ताइ आ हुकुममी गेमी बाक्त। मिनु पिपमी “गो यो गेपुकी नु लडाइम लाइनुड” देंमाक्त। २सामुएल १५:१९ 3 तन्न मेकोपुकीमी “ममाइ, गे चहिं मलने। ब्रुशा प्रोक्चा माल्ताक्क हना, आंइ कली सुइम मतुइक्नीम। गो उइक्थ बेक्त्क हना यो, मेकोपुकीम आंइ कली मकोव्रनीम। तन्न गे आंइ १० हजार खोदेंशो बाक्नीनी। मोपतीके गे सहरम बाक्शा, आंइ कली वारच पाइतीनी हना, रिम्शो दुम्ब” देंमा बाक्त। 4 मिनु पिपमी “मो हना गो, गे मार देंनी, मेको पाइनुड” देंमाक्त। मिनु मेको ठेयब लाप्चोम राप्शा बाक्माक्त। मिनु लडाइ पाइबपुकी हजार का, सहे का डा हुल पा आ डोइती रे लमा बाक्त। 5 पिपमी योआब, अबीशै नु इत्ताइ आन कली “गो आं पर्वम मेको ठिटा अब्सालोम नु मरिम्शो मपने” दे अब्सालोम आ पर्वम लडाइ पाइब आन कली अरेशो मुर नेल्लेम नेन्मे बाक्त। २सामुएल १८:१२

6 मिनु लडाइ पाइबपुकी इस्राएली नु लडाइ पथ जाक्दीम्मा बाक्त। मेको लडाइ एफ्राइम डा ब्वाकीम दुम्माक्त। 7 मेकेर दाऊद आ मुरपुकीम इस्राएली आन कली फ्रूमे बाक्त। मेको नाक्ती थम ठेयब लडाइ दुम्शा २० हजार मुर बेक्मा बाक्त। 8 लडाइ राज्य आ एर ओंथ नेल्ल ब्रमाक्त। तरवारम साइश्शो क्येडा ब्वाकीम साइश्शो मुर शुश दुम्मा बाक्त।

9 अब्सालोममी दाऊद आ मुर कली तवा बाक्त। अब्सालोम आ खच्चर डोइश्शो बाक्माक्त। मेको खच्चर शुश राशी पाइश्शो ठेयब बोल्यो रवा का आगा रे ग्रीशा लमाक्त। मिनु अब्सालोम आ चां मेको बोल्यो रवा आ राशीम बवेक्ता बाक्त। मिनु मेको ग्युक्शा लीमाक्त। आ खच्चर चहिं ग्रीशा लाक्गा बाक्त। 10 मुर कामी मेको तशा योआब कली “गो अब्सालोम कली बोल्यो ठेयब रवा काम ग्युक्शा लीशो ताता” मदा बाक्त। 11 योआबमी मेको मुर कली “गे मेको कली मोपा तशा, मारदे मसदी? गो इ कली १० टुक्रा चांदी नु काम्बरी का गेन वा” देंमाक्त। 12 मेको मुरुम योआब कली “गे आं कली हजार का टुक्रा चांदी गेतीनी हना यो, गो पिप आ तौ आ पर्वम आं गुइ मक्कुनुड। मारदे हना पिपमी ‘मेको ठिटा अब्सालोम कली सुम थिप्बा, मेकोमी रिम्शो पने’ दे अबीशै, इत्ताइ नु इन कली देंशो गो नेल्लेम नेंतक। २सामुएल १८:५ 13 मिनु गो मेको कली मरिम्शो पा साइक्ता हना, मेको लोव्र पिपमी रीब पा नेंब। मिनु

गे दोस मताइब दुम्नीनी” देंमाक्त। 14 मिनु योआबमी “गो गे नु लोव्र पा मग्योलनुड” देंमाक्त। मिनु मेकोमी तूतीक सां शेशा, अब्सालोम मो पा रवाम ग्युकशा बाक्मेनु, आ कुचुमी थोक्गा बाक्त। मेना सम्म अब्सालोम सेस बाक्शो बाक्माक्त। 15 मिनु योआब आ या कुरब १० जना मुरुम अब्सालोम कली आ एर ओंथ बाक्शा, मेको कली आप्शा सदमे बाक्त।

16 मिनु योआबम तुराही तबा बाक्त। मिनु लडाइ पाइबपुकी इस्राएली आन कली खेदा पचा प्रोंइशा, लेम्मा बाक्त। मारदे हना योआबम लडाइ पाइब आन कली तेक्मी बाक्त। 17 मेकोपुकीम अब्सालोम आ बेक्शो रां लाइश्शा, ब्वाकी डा ठेयब ढोडोडगा काम ताइक्तमे बाक्त। मिनु मेको तार शुश फुल्लु पुक्गमे बाक्त। मिनु इस्राएली नेल्ल आन आन खिं प्रोक्मा बाक्त। यहोसु ८:२९

18 डोंइती अब्सालोममी पिप आ बेंसीम थाम का खुक्शो बाक्माक्त। मारदे हना मेकोमी “आं नें वोइक्चा कली आं तौ मबाक्ब” देशो बाक्माक्त। मेकोमी मेको थाम कली आ नें वोइश्शो बाक्माक्त। मुल सम्म मेको थाम कली अब्सालोम आ थाम देंसीब। २सामुएल १४:२७

19 मिनु सादोक आ तौ अहीमाजम “परमप्रभु यावेम क्येक्क लेत्ताक्व। मिनु पिप कली आ जोरी सत्रु आन गुइ रे प्रोंइतु, देंचा कली आं कली दोरपा सोइक्तीनी” देंमाक्त। २सामुएल १५:३६; २सामुएल १७:१७ 20 तन्न योआबमी मेको कली “मुलाक्ती इ लोव्र लाइक्तीक नाक्त ममाइ। अर्को नाक्ती गे लोव्र लाइक्चा माल्नेवे। मारदे हना मुलाक्ती पिप आ तौ बेक्शो बाक्ब” देंमाक्त। 21 मिनु योआबमी कूश आ खिं डा मुर का कली “लशा, इ तशो नेल्ल पिप कली नेंपतो” दे मदा बाक्त। मिनु मेको कूश आ मुर योआब कली बाप्शा सेउ पा दोरशा लमाक्त। 22 मिनु सादोक आ तौ अहीमाजम लेंशा, योआब कली “मार दुम्त हना यो आं कली कूश डा मुर आ नोनोले दोरशा लचा गेयीनी” देंमाक्त। मिनु योआबमी “आं तौ गे मारदे लाइनेवे? इ लोव्र आ पर्बम गे मारेइ इनाम मताइनेवे” दे मदा बाक्त। 23 मिनु मेकोमी “मार दुम्त हना यो, गो दोरशा लाइनुड” देंमाक्त। मिनु योआबमी “मो हना लावो” देंमाक्त। मिनु अहीमाज यर्दन डा बेंसी रे पा दोरमाक्त। मिनु मेकोम कूश आ खिं डा मुर कली ग्रामाक्त।

24 मेना दाऊद लाप्चो निक्शी आस दातेमी बाक्शो बाक्माक्त। खाल पाइबमी गारो आ तार लशा कोव्रडा बाक्त। मिनु मुर का दोरशा पिशो तवा बाक्त। 25 मिनु मेको खाल पाइबम पिप कली ठेयब सेंदा पा देंमाक्त। मिनु पिपमी “मेको आ का ला बाक्त हना, मारेइ लोव्र चाक्तु” देंमाक्त। मेको मुर आन नेक्था जाक्माक्त। 26 मिनु मेको खाल पाइबमी अर्को मुर का यो दोरशा पिशो तवा बाक्त। मिनु लाप्चो खाल पाइब कली “कोव्रडीन, दे अर्को मुर का यो आ कान दोरशा पिन पिन बाक्ब” देंमाक्त। मिनु पिपमी “मेकोम यो लोव्र चाक्गा माइ” देंमाक्त। 27 मिनु मेको खाल पाइबमी “मेरे डोंइती दोरब सादोक आ तौ अहीमाज खोदेशो पा दोरत” देंमाक्त। मिनु पिपमी “मेको रिम्शो मुर बाक्ब, मेकोम रिम्शो लोव्र चाक्गा माइ” देंमाक्त।

28 मिनु अहीमाजम पिप कली ठेयब सेंदा पा “नेल्ल रिम्शो बाक्ब” देंमाक्त। मिनु पिप आ डोंइती खुम्की पा बाप्शा, पिप कली “परमप्रभु यावे, इन परमप्रभु ठेयब बाक्ब। मेकोम आं प्रभु, पिप इन कली मरिम्शो पाइब आन कली इन गुइमी गेशो बाक्ब” देंमाक्त। 29 मिनु पिपमी “मार मेको ठिटा अब्सालोम रिम्शोन बाक्मे?” देंमाक्त। मिनु अहीमाजम “इन गेय पाइब योआबम आं कली सोइक्तानु, गो ठेयब ग्रांग्ये माग्ये दुम्शो ताता। तन्न मार दुम्शो बाक्मे मतुइक्नुड” देंमाक्त। 30 मिनु पिपमी मेको कली “गे मेकेर राप्शा बाक्को” दे मदा बाक्त। मिनु मेको मेकेर राप्शा बाक्माक्त।

31 मिनु मेको कूश आ मुर जाक्शा मेकोमी “आं प्रभु, आ पिप, इन कली नेल्ल रिम्शो बाक्ब। मारदे हना मुलाक्ती परमप्रभु यावेमी इन कली मरिम्शो पाइब आन गुइ रे प्रोंइशो बाक्ब” देंमाक्त। 32 मिनु पिपमी मेको कूश आ मुर कली “मेको ठिटा अब्सालोम रिम्शोन बाक्मे” दे हिल्लो पवा बाक्त। मिनु मेको कूश आ मुरुमी “आं प्रभु, पिप आ जोरी सत्रु नु मरिम्शो पाइब नेल्ल मेको ठिटा खोदेशो दुम्मल” देंमाक्त। 33 मिनु पिप आ थुं ग्येतथ लुक्च दुम्शा, मेको ठेयब लाप्चो आ तार डा कोठाम लशा डाक्माक्त। मिनु गाक्ना गाक्न लमेनु “आं तौ अब्सालोम, आं तौ अब्सालोम, इ पा डा गो बेक्शो नड हना, दुम वा। अब्सालोम! आं तौ, आं तौ” दे डाक्माक्त।

19

अब्सालोम आ पर्बम रोंका पशो

1 मिनु योआबम “पिप दाऊद अब्सालोम आ पर्बम डाक्ना डाक्न रोंका पा बाक्शो बाक्ब” देशो लोव्र नेना बाक्त।
2 मेको नाक्त डा ग्राशो नेल्ल लडाइ पाइब आन कली रोंका पतीक दुम्माक्त। मारदे हना लडाइ पाइबपुकीमी पिप

आ तौ आ पर्बम रोंका पशो बाक्ब, दे नेंन्मे बाक्त। 3 मेको नाक्ती लडाइ पाइबपुकी लडाइम ब्रुशा आन कुल कोंइने मचाप्यु, मुने दोक्शा प्रोक्शो मुर खोदेशो पा सिक्सी पा सहर ओव्रमा बाक्त। 4 पिप आ कुल सुम्शा ठेयब सेंदा पा डाक्ना डाक्ना “आं तौ अब्सालोम, अब्सालोम, आं तौ, आं तौ” देंमाक्त। 5 मिनु योआब पिप आ खिंम ओव्रशा मेको कली “गे मुलाक्ती इन कप्तान नेल्ल आन कली मुने तोक्तीनी। मारदे हना मुलाक्ती मेकोपुकीमी इन कली प्रोंइतेक्म। इन तमी तौ, इन मीशपुकी नु इन नोले चाक्शो मीश आन कली यो प्रोंइतेक्म। 6 इन कली काइ मदाक्ब कली गे दाक्नीनी। इन कली दाक्ब आन कली गे काइ मदाक्नीनी। मुलाक्ती गो लडाइ पाइब आन कप्तान नु ठेयब मुर इन डोंइती मारेइ मनकी, दे रुप्पाइक्तीनी। मुलाक्ती अब्सालोम ब्रोंइशा, गो नेल्ल बेक्शो नकी हना, गे ग्येरसीनी वा। 7 मुल रीब पा लशा, इन गेय पाइब आन थुं बारपतीन। गे मो मपाइतीनी हना, गो परमप्रभु यावे आ नेंमी कसम जशा ‘मुलाक्दो गे नु सुइ मबाक्नीम’ देंनुड। मिनु डोंइती इन तशो श्येत क्येडा मुलाक्त डा श्येत ठेयब दुम्ब” देंमाक्त। 8 मिनु पिप बोक्शा, ठेयब लाप्योम बाक्माक्त। मिनु पिप ठेयब लाप्योम बाक्शो बाक्ब, दे लडाइ पाइब आन कली नेंपदमे बाक्त। मिनु लडाइ पाइब नेल्ल पिप आ डोंइती जाक्मा बाक्त। मेना सम्म इस्राएली नेल्ल आन आन खिं प्रोक्ने थुम्शो बाक्मा बाक्त।

दाऊद यरूसलेम लेशशो

9 इस्राएल डा थर नेल्ल डा मुरुम आंम आंम लोव्र पा “पिपमी आंइ कली आंइ जोरी सत्रु रे प्रोंइतु। पलिस्ती आन गुइ रे यो प्रोंइतु। मुल अब्सालोमम पतीके आंम रागी रे प्रोक्शा गाक्शो बाक्ब। 10 मुल गो इं पिप सेल्शो अब्सालोम लडाइम बेक्त। मोपतीके गो मुल मारदे पिप कली लेशशा मचाक्नया?” देंमुमा बाक्त।

11 मिनु पिप दाऊदमी सादोक नु अबीयाथार कली “यहूदा डा खाल्पा आन कली ‘मारदे गे पिप कली आ खिंमी लेशशा चाक्चा कली नेल्ल क्येडा नोले दुम्चा दाक्नीनी? इस्राएली नेल्लेम देंशो लोव्र पिपमी नेंने थुम्शो बाक्ब। 12 गेपुकी आं मुर ननी। आं हुश ननी। पिप कली लाइक्चा कली गे मारदे नोले दुम्नी’ मतीस। २सामुएल ५:१ 13 मिनु आमासा कली ‘गे आं मुर नु आं हुश मनवे? गे योआब आ पा डा गो बाक्डा सम्म कप्तान दुम्नेवे। मो मपाता हना, परमप्रभुमी सजाइ गेवल’ देंत मतीस” देंमाक्त। २सामुएल १:२५ 14 मिनु आमासामी यहूदा डा मुर नेल्लेमी “दाऊद कली ब्रेत्चा माल्ब” दे थुं का सेला बाक्त। मिनु मेकोपुकीम पिप कली “गे नु इन गेय पाइब नेल्ल नु लेशशा जाक्कीन” दे लोव्र सोइक्तमे बाक्त। 15 मोपतीके पिप लेशशा यर्दन जाक्माक्त। डोंइती यहूदा डा मुरपुकी गिल्गालम पिप ग्रुम्चा कली जाक्मा बाक्त। मेकोपुकीमी पिप कली यर्दन खोला शोक्पाइक्थ जाक्मा बाक्त।

16 बेन्यामीन आ थर डा मुर बाहरीम डा गेरा आ तौ शिमेइ यो यहूदा डा मुर नु रीब पा पिप दाऊद कली ग्रुम्थ जाक्माक्त। 17 मेको नु हजार का जना बेन्यामीन आ थर डा मुर यो बाक्मा बाक्त। सावल आ गेय पाइब सीबा यो आ १५ जना तौ नु आ २० जना गेय पाइब नु मेकेर बाक्शो बाक्माक्त। मेकोपुकी पिप आ डोंइती यर्दन खोलाम जाक्दीम्मा बाक्त। २सामुएल ९:२,१०; २सामुएल १६:१-४ 18 मिनु मेको आइक्ची हांबुम लचा कली पिप आ खिं डा मुर आन कली शोक्चा कली नु पिप आ माल्शो पचा कली मेकेर जाक्मा बाक्त। मिनु गेरा आ तौ शिमेइ पिप खोला शोक्ची ना पिप आ डोंइती बाम्माक्त। 19 मिनु शिमेइमी पिप कली “आं प्रभु, पिप, गे यरूसलेम प्रोंइची ना आं मरिम्शो पशो आ पर्बम दोस मगेथु ममिम्तीन। 20 मारदे हना गो, इन गेय पाइबम पाप पाता, दे तुइक्नुड। मोपतीके गो योसेफ आ खिं डा मुर नेल्ल आन क्येडा डोंइती आं प्रभु पिप इन कली ग्रुम्थ जाक्ती” देंमाक्त। 21 मिनु सेरूयाह आ तौ अबीशैमी “परमप्रभु यावे आ तेल लुक्शो कली सराप पतीके शिमेइ साइक्चा मपुंडसीबा डा?” देंमाक्त। 22 तन्न दाऊदमी “सेरूयाह आ तौ, गे आं कली काइ मगारब मुर बाक्नीसी। गे मुलाक्ती आं जोरी सत्रु दुम्तीसी? मुलाक्ती इस्राएलमी तेकोइ मुर साइक्चा मदुम्ब। मुलाक्ती गो इस्राएल डा पिप दुम्ती, दे गो मतुइक्नुडा डा?” देंमाक्त। २सामुएल १६:१० 23 मिनु पिपमी शिमेइ कली “गे साइक्चा मपुंडसीनेवे” देंमाक्त। मिनु पिपमी मेको लोव्र थमा सेल्चा कली कसम जवा बाक्त। १राजा २:८-९

24 सावल आ चच मेफी-बोशेथ यो दाऊद पिप कली ग्रुम्थ उइ यिमाक्त। मेकोम पिप गाक्म रे ग्राशा मलेम्म सम्म आ खोइल डा ग्ये यो मखोदा बाक्त। आ गल शोक्रे यो मप्रेक्गा बाक्त। आ वा यो ममुरशो बाक्माक्त। २सामुएल ९:६ 25 मेको पिप कली ग्रुम्थ यरूसलेम रे जाक्मेनु, पिपमी मेको कली “मेफी-बोशेथ गे मारदे गो नु मगाक्डे?” दे मदा बाक्त। 26 मिनु मेकोमी “आं प्रभु पिप, आं गेय पाइबम आं कली मरिम्शो पाप्तु। गो आं गधाम लगम पाइश्शा पिप नु गाक्चा ठीक दुम्शो नड। मारदे हना गो इन गेय पाइब खोइल थेक्ने मचाप्व मुर नड। 27 मेको आ लोव्रमी आं प्रभु पिप

इन कली आं पबर्म मरिम्शो दुम्पाइक्तु। गे आं प्रभु पिप परमप्रभु आ स्वर्ग डा गेय पाइब खोदेशो बाक्नीनी। गे मार पचा दाक्नीनी मेको पने। २सामुएल १६:३; २सामुएल १४:१७ 28 आं आफ आ खिं डा मुर नेल्ल इन गुइमी बेक्चा डा नकी। तन्न गो इन गेय पाइब आं कली इन नु जचा बाक्चा गेतीनी। मेको क्येडा लाक्शा, गो मार शिशी ताइक्नुडा डा?” देंमाक्त। २सामुएल ९:७ 29 मिनु पिपमी “मुल दुम्त। सीबा नु गे रू योक्सीस, देंती” देंमाक्त। २सामुएल ९:९-१०; २सामुएल १६:३-४ 30 मिनु मेफी-बोशेथमी पिप कली “नेल्ल मेकोम पांइसेक्ल। मारदे हना गे आं प्रभु पिप मारेइ मदुम्थु खिं लेशशा जाक्तीनी” देंमाक्त।

31 मिनु गिलाद आ मुर बारजील्लाइ यो रोगेलीम रे उइ यिमाक्त। मिनु पिप कली यर्दन शोक्चा कली पिप आ नेक्था जाक्माक्त। २सामुएल १७:२७; १राजा २:७ 32 बारजील्लाइ ८० बर्स दुम्शो थम खूशो बाक्माक्त। मेकोमी पिप महा-नाइमम बाक्मेनु, पिप कली जचा थोव्रक गेशो बाक्माक्त। मारदे हना मेको थम शोंप पाइशो मुर बाक्माक्त। 33 पिपमी बारजील्लाइ कली “गो नुन खोला शोक्शा लय। गो इन कली यरूसलेममी कोव्रशा थुल्शा वोइक्नुड” देंमाक्त। 34 मिनु बारजील्लाइमी पिप कली “गो शुश बर्स मब्रोंइनुड। दोपा गो पिप नु यरूसलेम लाइनुड। 35 मुल गो ८० बर्स दुम्ती। मुल गो रिम्शो नु मरिम्शो दोपा तुइक्नुडा? आं जशो तूशो ब्रोंव्रशो नु मब्रोंव्रशो मारेइ मतुइक्नुड। वोंइश मुर मीश मरुम कुम्सो पशो, गो नेंने मचाप्नुड। मोपतीके गो आं प्रभु पिप इन कली मारदे श्येत तेम्नुडा? 36 गो इन गेय पाइब यर्दन आइक्ची हांबु इक्का सम्म पिप इन नु लाइनुड। पिपमी आं कली मारदे ओदेशो रिम्शो इनाम गेयीनी? 37 आं कली लचा गेयीनी। मिनु आं आंम सहरम आं आम आफ आस तुरस आ नेक्था आं लीशो नाक्त थुम्चा गेयीनी। तन्न इन वाइल किम्हाम एक बाक्ब। मेको कली आं प्रभु पिप इन नु आइक्ची हांबु लतीन। गे मार रिम्शो लाक्नीनी, मेकोन पने” देंमाक्त। येरमीया ४१:१७ 38 मिनु पिपमी “मो हना किम्हाम गो नु आइक्ची हांबु गाक्ल। मिनु गे मार पचा दाक्नीनी, मेको इन देशो खोदेशो पाइनुड। गे मार दाक्नीनी गो मेको पाइनुड” देंमाक्त। 39 मिनु मुर नेल्ल यर्दन आइक्ची हांबु शोक्समा बाक्त। पिप यो शोक्से बाक्त। मिनु पिपमी बारजील्लाइ कली पुक्पु पा आसीक गेवा बाक्त। मिनु बारजील्लाइ आंम आ खिं लेम्माक्त। 40 पिप खोला शोक्शा गिल्गाल जाक्माक्त। किम्हाम मेको नु गाक्शो बाक्माक्त। यहूदा डा मुर नेल्ल नु इस्राएल डा उइक्थ मुरुम पिप कली इक्का आइक्ची सम्म चाक्दीत्मे बाक्त।

41 मिनु इस्राएल डा मुर नेल्ल काथा दुम्शा, पिप आ बाक्तीक जाक्मा बाक्त। मिनु मेकोपुकीमी “मारदे आंइ लोकब यहूदा डा मुरपुकीम इन कली खुइ पा लदमे? पिप, आ खिं डा मुर नु इन मुर नेल्ल लाइशशा यर्दन आइक्ची हांबु चाक्दीत्मे?” देंमा बाक्त। 42 मिनु यहूदा डा मुर नेल्लेमी इस्राएल डा मुर आन कली “पिप आंइ नेक्था डा मुर बाक्ब। गे मारदे आंइ पबर्म गाइक्नीनी? मार, गो पिप आ शोंप जका? मार पिपमी गो आंइ कली मारेइ गेवा?” देंमा बाक्त। २सामुएल १९:१२-१३ 43 मिनु इस्राएल डा मुरपुकीम यहूदा डा मुर आन कली “पिप इन क्येडा १० खेयप शुश आंइ पिप बाक्ब। गे मारदे आइक्च सेल्नीनी? पिप दाऊद कली लेशशा चाक्ता, दे गोपुकीम डोंइती देशो बाक्नीकी, मेको मप्रेंदीन” देंमा बाक्त। तन्न इस्राएल डा मुर क्येडा यहूदा डा मुरपुकीमी ठेयब लोव्र पामे बाक्त। २सामुएल १९:१०-११

20

शेबा आ मरिम्शो पशो

1 शेबा नें पाइशो मरिम्शो पाइब मुर का बाक्माक्त। मेको बेन्यामीन आ थर डा बिक्री आ तौ बाक्माक्त। मेकोम तुराही ताप्शा ग्रीशा “दाऊद नु आंइ के मार बाक्बा डा? येस्से आ तौ नु आंइ के मारेइ मबाक्ब। ए इस्राएली, गे इन ताम्बु ताम्बुम लने” देंमाक्त। १राजा १२:१६ 2 मोपतीके इस्राएली नेल्लेमी दाऊद कली प्रोंइशा, बिक्री आ तौ शेबा आ नोले खोदमे बाक्त। तन्न यहूदा डा मुरपुकी चहिं दाऊद कली मप्रोंइथु, यर्दन रे यरूसलेम सम्म आ नोले खोइक्स डा खोइक्स पामे बाक्त।

3 मिनु दाऊद आ खिं यरूसलेमम जाक्माक्त। मिनु मेकोम आ खिं कोव्रचा कली वोइशो मेको १० जना नोले चाक्शो मीश आन कली खिं कामी कोव्रब मुर का वोइशशा वोइक्मी बाक्त। मेकोमी आन माल्शो नेल्ल गेमी बाक्त। तन्न मेको नु गेनायो मइम्माक्त। मोपा मेको आन बेक्ची नाक्त सम्म यो मप्रोंइथु वोइक्मी बाक्त। मोपा मेकोपुकी वोंइश बेक्शो मीश मुर खोदेशो पा बाक्मा बाक्त। २सामुएल १६:२१ 4 पिपमी आमासा कली “यहूदा डा वोंइश मुर आन कली खुप्तीमी। मिनु नाक्त सांमी आं बाक्तीकेमी जाक्पाइक्मी। मिनु गे यो जाक्को” दे मदा बाक्त। 5 मोपतीके आमासा यहूदा डा मुर आन कली खुप्चा कली गाक्माक्त। तन्न पिपमी देशो क्येडा मेको कली शुश नाक्त माल्दा

बाक्त। 6 मिनू दाऊदमी अबीशै कली “अब्सालोम क्येडा बिक्री आ तौ शेबामी इं कली शुश श्येत गेब। पिप आ गेय पाइब आन कली लाइशा, मेको कली खेदा पावो। मेको गारो हिरशो सहरम ओव्रत हना, इं गुइ रे ब्रोंडब” दे मदा बाक्त। 7 मिनू योआबम केरेथी, पेलेथी नु लडाइ पाइब नेल्ल यरूसलेम रे लाइशा, बिक्री आ तौ शेबा कली खेदा पवा बाक्त। २सामुएल ८:१८ 8 मिनू मेकोपुकी गिबोन डा ठेयब फुल्लु बाक्तीक जाक्मानु, आमासा, मेको आन कली गुमथ जाक्माक्त। मिनू योआबम लडाइ पतीक वा फेक्शो बाक्माक्त। मेको तार किप्शुर किप्शो बाक्माक्त। मिनू खोतम शुइशा तरवार किप्शुरम पिप्शो बाक्माक्त। मिनू मेको डोंइती गे लमेनु, मेको तरवार खोत रे दोक्माक्त। मत्ती २६:४८-५० 9 योआबम आमासा कली “आं लोकब आमासा गे रिमशोन बाक्डे?” दे हिल्लो पवा बाक्त। मिनू मेकोमी आमासा कली पुक्पु पाइक्चा कली आ ग्युरा गुइमी मेको आ गल शोक्रे ग्याइक्ता बाक्त। 10 आमासामी योआब आ गुइमी तरवार बाक्शो मतुइक्ता बाक्त। मिनू योआबमी मेको आ कोव्रजम तूदा बाक्त। मिनू मेको आ गा क्यी खपीम दोक्शा बेक्माक्त। मेकोमी खेयप निक्शी तूचा ममाल्दा बाक्त। मिनू योआब नु आ लोकब अबीशै बिक्री आ तौ शेबा कली खेदा पना पन लसा बाक्त। १राजा २:५ 11 मिनू योआब आ ठिटा मुर काम आमासा आ बेक्शो रां आ नेक्था राप्शा “योआब नु दाऊद आस नोले खोइक्बपुकीम योआब आ नोले खोदमेक्ल” देंमाक्त। 12 आमासा आ बेक्शो रां हुशेम गिल्शा ठेयब लांमी गोल्शा बाक्माक्त। मिनू मुर नेल्ल लांमी दिक्शा बाक्शो बाक्मा बाक्त। मिनू मेकोम आमासा आ बेक्शो रां कली लां रे लाइशा आइक्ची खेतम ताइक्ता बाक्त। मिनू मेको कली वा काम सुमा बाक्त। 13 मेको कली ठेयब लां रे लदमे नोले, मुर नेल्लेम बिक्री आ तौ शेबा कली खेदा पचा कली योआब आ नोले खोदमे बाक्त।

14 शेबा इस्राएल डा थर नेल्ल लाक्शा, आबेल डा बेथ-माकाहम जाक्मा सम्म बिक्री आ खिं डा मुर नेल्ल तेइ तेइ रे गुम्मा बाक्त। मिनू मेको आ नोले सहर ओव्रमा बाक्त। 15 योआब आ लडाइ पाइब मुर नेल्ल जाक्शा, आबेल डा बेथ-माकाह कली पुमदमे बाक्त। मिनू सहर डा गारो गे मार मार तेल्ला, गारो डोइक्तीक ठीक पामे बाक्त। मिनू योआब आ लडाइ पाइबपुकीमी गारो प्रेत्चा गोव्रमे बाक्त। 16 मिनू जोक्ब तुइक्ब मीश मुर काम सहर रे ब्रेशशा “नेनीन, नेनीन, योआब कली ब्रेशशा सोइक्तीन। मिनू गो मेको नु लोव्र पाइनुड” देंमाक्त। 17 मिनू योआब आ डोंइती जाक्माक्त। मिनू मेको मीश मुरुमी “मार, गे योआब ननी?” देंमाक्त। मिनू योआबम “ओं, गो नड” देंमाक्त। मिनू मेको मीश मुरुमी “इन गेय पाइब आं लोव्र रिमशो पा नेनीन” देंमाक्त। मिनू मेकोमी “नेंता” देंमाक्त। 18 मिनू मेकोमी “साइ रे मुरपुकीमी लोव्र नेंचा कली ‘आबेल सहर लचा मालनीम’ देशो बाक्ब। मिनू मोपा निसाफ दुम्बाक्त। 19 आं सहर इस्राएल डा सहरपुकीम लडाइ मपाइब, पिप कली दाक्शा मान पाइब सहरम हिक्सीब। मिनू गे एको सहर, इस्राएली आन कली कोव्रब ममा खोदेशो सहर कली खतम सेल्चा मालनीनी? मारदे गे परमप्रभु यावे आ शोंप कली खतम पोक्चा मालनीनी?” देंमाक्त। ब्यवस्था ३२:९ 20 मिनू योआबमी “गो खतम मपोक्नुड, मक्याम्नुड। 21 गो मो पचा माल्शो मनकी। तन्न एफ्राइम पहाड डा बिक्री आ तौ शेबामी पिप दाऊद कली मरिमशो पचा माल्शो बाक्ब। मेको मुर कली आंइ कली गेने। मिनू गो सहर प्रोंइशा गाक्नीक” देंमाक्त। मिनू मेको मीश मुरुम योआब कली “मेको आ पिया सहर रे लाडगा ब्वारनीकी” देंमाक्त। 22 मिनू मेको मीश मुरुम आ लोव्र मुर नेल्ल आन कली नेंपाइक्मी बाक्त। मिनू मेकोपुकीम बिक्री आ तौ शेबा आ पिया खोइशा, योआब कली ब्वारदमे बाक्त। मिनू योआबम तुराही तबा बाक्त। मिनू लडाइ पाइब नेल्ल सहर प्रोंइशा आन खिं खिं लेम्मा बाक्त। योआब चहिं पिप आ बाक्तीके यरूसलेम लेशशा लमाक्त।

ठेयब मुर आन नें

23 योआब इस्राएल डा लडाइ पाइब आन नेल्ल क्येडा ठेयब मुर बाक्माक्त। येहो-यादा आ तौ बेनायाह केरेथी नु पेलेथी पिप कली खाल पाइब आन ठेयब मुर बाक्माक्त। २सामुएल ८:१६-१८; १राजा ४:४-६ 24 अदोराम वाइलीम वाइल आन ठेयब मुर बाक्माक्त। अहीलुद आ तौ येहो-शाफात ब्रेक्ब बाक्माक्त। 25 शेवा चहिं लडाइ पाइब आन ब्रेक्ब बाक्माक्त। सादोक नु अबीयाथार चहिं चढेब बाक्सा बाक्त। 26 याइर आ मुर इरा चहिं दाऊद आ चढेब बाक्माक्त।

21

अन्काल नु रिस्पाह आ कथा

1 पिप दाऊद आ पालाम बर्स सां सम्म अन्काल दुम्स डा दुम्स पवा बाक्त। मिनू दाऊदमी परमप्रभु यावे कली हिल्लो पवा बाक्त। मिनू परमप्रभु यावेमी “सावल नु आ खिं डा मुर आन तार हुश आ दोस बाक्शो बाक्ब। मारदे हना

मेकोम गिबोनी आन कली साइवकु” देमाक्त। 2 मिनु पिपमी गिबोनी आन कली ब्रेशा, मेकोपुकी नु लोव पवा बाक्त। गिबोनी इस्राएली आन थर डा मुर मबाक्मा बाक्त। मेकोपुकी एमोरी रे ब्रोंइशा लीशो बाक्मा बाक्त। इस्राएलीपुकीम मेको आन कली प्रोंइतीक कसम जशो बाक्मा बाक्त। मो हना यो सावलमी इस्राएल नु यहूदा आ पबर्म मेको आन कली क्याम्चा माल्शो बाक्माक्त। यहोसु ९:३, १५, १९ 3 दाऊदमी गिबोनी आन कली “गो इन कली मार पड? परमप्रभु यावे आ मुर आन कली आसीक गेचा कली गो दोपा गारपाइक्नुडा?” दे हिल्लो पवा बाक्त। ब्यवस्था ३२:९ 4 मिनु गिबोनीपुकीमी “सावल आ खिं नु आंइ खिं डा मुर आन दातेम सुन नु चांदीम गार पाइक्ने मचाम्सीब। इस्राएली का यो साइक्चा मगारनीकी” देमा बाक्त। मिनु दाऊदम “मिनु मुल गोम इन कली मार पवल, दे मिन्नीनी?” देमाक्त। 5 मिनु मेकोपुकीम पिप कली “सुम आंइ कली खतम पोक्गा, आंइ कली रागी रे क्याम्दा, मेको कली खतम पोक्चा कली आंइ गुइम गेने। 6 मेको आ ७ जना तौ चच आंइ कली गेने। मिनु गो मेको आन कली परमप्रभु यावे आ डोंइती आ डांडा गिबोन सहरमी साइक्नीकी” देमा बाक्त। मिनु पिपमी “गो मेको इन कली गेनुड” देमाक्त। ब्यवस्था २१:२२-२३

7 तन्न पिपमी परमप्रभु यावे आ नेम नु सावल आ तौ योनाथन नु कसम जतीके सावल आ चच योनाथन आ तौ मेफी-बोशेथ कली प्रोंइशा वोदा बाक्त। १सामुएल २०:१५-१७; 8 पिपमी आइयाह आ तमी रिस्पाहम सावल रे जरमेशो तौ निक्शी आरमोनी नु मेफी-बोशेथ चाक्गा बाक्त। मिनु सावल आ तमी मेराबम मेहोला आ मुर बारजील्लाड आ तौ अद्रीएल रे जरमेशो ५ जना तौ यो चाक्गा बाक्त। २सामुएल ३:७; १सामुएल १८:१९ 9 मिनु मेको आन कली गिबोनी आन गुइमी गेमी बाक्त। मेकोपुकीम मेको आन कली परमप्रभु यावे आ डोंइती सदमे बाक्त। मिनु मेको ७ जना कालेम बेक्मा बाक्त। मेकोपुकी क्योव्रज रिक्तीक आ डोंइती डा नाक्त साइक्चा पुंइसीमा बाक्त।

10 आइयाह आ तमी रिस्पाहम रोंगु तारी आंम कली बाक्तीक सेल्चा कली भाडग्रा ब्रवा बाक्त। मिनु क्योव्रज ओंइतीक आ डोंइती डा नाक्त रे रेड यिचा सम्म मेकोमी आ तौ आन बेक्शो रां आन कली खाल पवा बाक्त। नाक्ती आन तार चिक्ब जुक्चा मगेथु, नाक्दो ब्वाकी डा जन्तुम ब्वचा मगेमी बाक्त। 11 मिनु दाऊदमी सावल आ नोले चाक्शो मीश आइयाह आ तमी रिस्पाह आ पशो नेंशा, 12 मेकोमी सावल नु आ तौ योनाथन आस रुश याबेश-गिलाद डा मुर आन गुइ रे चाक्गा बाक्त। मेकोपुकीम सावल नु योनाथन आस बेक्शो रां बेथ-शान सहर डा चोक रे लदमे बाक्त। पलिस्तीपुकीमी मेको आस कली गिल्बोआम साइशशा, नोले मेकेर क्युक्शो बाक्मा बाक्त। १सामुएल ३१:१२ 13 मेकोम मेकेर रे सावल नु योनाथन आस रुश चाक्गा बाक्त। मिनु मेको रिस्पाह आ तौ आन रुश यो खुप्तमे बाक्त। 14 मेकोपुकीम सावल नु आ तौ योनाथन आस रुश बेन्यामीन आ थर आन रागी डा जेला सहर सावल आ आफ कीश आ तुरसुम थिम्मे बाक्त। पिपमी मेको आन कली मार मार देंमे, मेको पामे बाक्त। मेको नोले परमप्रभुम रागी आ पबर्म पुंइशो लोव्र नेना बाक्त। २सामुएल २४:२५

दाऊदम लडाइ ग्राशो १इतिहास २०:४-८

15 पलिस्ती नु इस्राएली लडाइ पामे बाक्त। दाऊद आ मुर नु लडाइ पथ यिमाक्त। मिनु पलिस्ती नु लडाइ पामे बाक्त। मिनु दाऊद थाम्पा दमाक्त। 16 इशबी-बेनोब रेफाइम आ बोल्यो लाइशो मुर का बाक्माक्त। मेको आ तूतीके सहे सां शेकेल कांसा के बाक्माक्त। मिनु नक या का यो पिम्सीशो बाक्माक्त। मेकोमी “दाऊद कली साइक्नुड” देमाक्त। शेकेल का ११.५ ग्राम बाक्ब। ३०० शेकेल ३ किलो आधा बाक्ब। 17 मेना सेरूयाह आ तौ अबीशै दाऊद कली वारच पाइक्थ जाक्शा, मेको पलिस्ती कली सदा बाक्त। मेना दाऊद आ लडाइ पाइबपुकीमी “मुल रे गे गो नु लडाइमी मगाक्कीन। मारदे हना गे इस्राएल डा छेडछेडन ननी। मेको मकाप्ल” दे कसम जामे बाक्त। २सामुएल २३:१८; २सामुएल २२:२९

18 मिनु नोले लेंशा, गोब सहरम पलिस्तीपुकी नु लडाइ दुम्माक्त। मेना हुशा डा मुर सिब्बेकैम साफ माइशो रेफाइ आ मुर कली सदा बाक्त। रेफा थम लाइशो रेफाइ माइशो मुर आन किकी पिपी बाक्शो बाक्त। 19 मिनु लेंशा गोब सहरम पलिस्तीपुकी नु अर्को लडाइ का दुम्माक्त। बेथलेहेम डा यारे-ओरेगीम आ तौ एल्हानानम गाथ सहर डा गित्त आ खिं डा मुर गोल्याथ कली सदा बाक्त। मेको आ तूतीक आ बिड तोव्र प्रोव्रब आन प्रोव्रतीक शी खोमो बाक्माक्त। १सामुएल १७:७ 20 मिनु नोले लेंशा गाथ सहरम लडाइ दुम्माक्त। मेकेर यो ठेयब लाइशो मुर का बाक्माक्त। मेको आ गुइ नु खोइलीम ६, ६ ओटा अम्ला, नेल्ल पा २४ ओटा अम्ला पाइशो रेफाइ आन मुर बाक्माक्त। 21 मिनु मेकोम इस्राएली आन कली हिंच कोंइदा बाक्त। मिनु दाऊद आ लोकब शिमेइ आ तौ योनाथनमी मेको कली सदा बाक्त।

१ सामुएल १७:१० 22 मेको ४ जना मुर गाथम बाक्ब रेफाइ आन दाते डा बाक्मा बाक्त। मेको नेल्ल दाऊद नु आ मुर आन गुइ रे बेक्मा बाक्त।

22

दाऊदम परमप्रभु कली ठेयब सेल्शो
भजन संग्रह १८:-

1 परमप्रभु यावेमी दाऊद कली आ जोरी सत्रु नेल्ल नु सावल रे प्रोना नोले दाऊदमी परमप्रभु यावे कली कुम्सो पवा बाक्त। 2 मेकोमी “परमप्रभु यावे आं सेरथे फुल्लु, आं बोल्यो दरवार नु आं कली श्येत रे प्रोंइब बाक्ब। 3 आं परमप्रभु आं सेरथे फुल्लु आं खुइक्तीके बाक्ब। मेको आं तेक्तीक नु आं ब्रोंइतीक बाक्ब। मेको आं बोल्यो दरवार नु आं फाम्सीतीक बाक्ब। मेको आं कली हुश खाक्श पोक्तीके रे प्रोंइब बाक्ब। 4 गो परमप्रभु यावे कली थोइनुड। मेको ठेयब सेल्चा पुंइसीब बाक्ब। मिनु मेकोम आं कली आं जोरी सत्रु रे प्रोंइब।

5 बेक्पाइक्बम आं कली ब्वाक्कु आ छालम खोदेशो पा गिल्ली। खतम पोक्ब बारशो ब्वाक्कुम आं कली सुम्ती। 6 बेक्शो मुर आन बाक्तीकेम आं एर ओथ नेल्ल रे गिल्ली। बेक्पाइक्ब आ ब्वारद आं डोंइती बाक्ब।

7 मिनु गो आं श्येत आ पर्बम परमप्रभु यावे कली थोव्रता। गो आं परमप्रभु कली ‘वारच पने’ दे पुंइता। मिनु मेकोमी आ बाक्तीके रे आं सेंदा नेंतु। आं पुंइशो नेंतु।

8 मिनु रागीमी खिनु कुत। सरीड डा जग हिम्साक्म। मारदे हना, परमप्रभु यावे गाइशो बाक्त। 9 मेको आ नें रे कुन गूत। मेको आ शोव्र रे ग्राव गू दाक्ब मी गूत। मेकेर रे ब्रशो कोइला गूतेक्म। 10 मेको सरीड रे तोंइसाक्व। मेको आ खोइली आगा क्येर गोस्स बाक्त। 11 मेको करूब डोइशशा बेरत। फश के फ्राम बेरशो तांइसाक्व। 12 मेको छिडछिडम सुम्साक्व। शुश ब्वाक्कु बाक्शो क्येर गोस्स आ एर ओथ बाक्तेक्म। 13 मेको आ डोंइती डा छेडछेड रे ब्रशो कोइला गूतेक्म। 14 परमप्रभु यावेमी सरीड रे बुंबु पाप्तु। नेल्ल क्येडा ठेयबम आ सेंदा नेंपाइक्तु। 15 मेकोम ब्रा आप्शा, एर ओथ ब्रपाइक्तु। चिला आप्शा, सोइक्ताक्व। 16 समुन्द्र आ पुं तांइसाक्व। रागी आ जग हुक्साक्व। मेको परमप्रभु यावे आ हुइशो नु आ सास रे मोदेशो दुम्त। 17 मेकोमी इर रे आ गुइ दिंशा ग्याइक्ताक्यी। आं कली ठेयब समुन्द्र रे कीशा गुंइताक्यी। 18 मेकोमी आं कली आं बोल्यो जोरी सत्रु नु आं कली काइ मदाक्ब, रे प्रोंइती। मेको आं क्येडा शुश बोल्यो बाक्तेक्म। 19 मेकोपुकीमी गो हिंचा डा श्येत जडा ना आं कली लडाइ तोम्तेक्म। तन्न परमप्रभु यावेमी आं कली तिक्ती। 20 मेकोमी आं कली लाडगा डा ठेयब बाक्तीकेम गुंइशा, श्येत रे प्रोंइती। मारदे हना मेको आं कली तशा ग्येरशो बाक्त।

21 परमप्रभु यावेमी आं कली आं ठीक पशो डा इनाम गेती। आं गुइम हुश मशाइक्पाइक्तीके आं रिम्शो पशो डा गेती। 22 मारदे हना गो परमप्रभु यावे आ लांम गाक्शो बाक्ती। गो आ अरेशो लोव्र मटीब खोदेशो पा आं परमप्रभु रे डोन मलड। 23 मारदे हना आ ठीक पतीक लोव्र आं डोंइती बाक्तेक्म। गो मेको आ फुल्लुम मुशा ब्रेक्शो लोव्र नेल्ल टिशा पाता। 24 मेको आ डोंइती गो दोस मताइब बाक्ती। गो मरिम्शो पतीक रे डोन बाक्ती। 25 मोपतीके परमप्रभु यावेमी आं कली आं ठीक नु रिम्शो पशो आ पा डा गेती।

26 मे प्रोंइब आन कली मप्रोंइब बाक्नीनी। दोस मताइब आन कली दोस मताइब बाक्नीनी। 27 मे रिम्शो पाइब आन कली रिम्शो पाइब बाक्नीनी। दूली पाइब आन कली दूली पाइब बाक्नीनी। 28 मे ब्रेम्शो मुर आन कली प्रोंइनीनी। तन्न ठेयब लेशो आन कली आइक्च सेल्नीनी। 29 परमप्रभु यावे मे थमा पा आं बत्ती खोदेशो बाक्नीनी। परमप्रभु यावेमी आं कली छिडछिडमी छेडछेड दुम्पाइक्ब। 30 इन पतीकेमी गो लडाइ पाइब आन कली ग्रानुड। आं परमप्रभु गो गारो खाक्शा लाक्ने चाप्नुड। 31 परमप्रभु आ लां ठीक बाक्ब। परमप्रभु यावे आ थोशा पशो लोव्र थमा बाक्ब। मेको आ बाक्तीकेम खुंइसीब आन कली तेक्तीक बाक्ब।

32 परमप्रभु यावे क्येडा अर्को तेकोइ परमप्रभु मबाक्ब। आंइ परमप्रभु क्येडा लाक्शा अर्को तेकोइ सेरथे फुल्लु मबाक्ब। 33 परमप्रभुमी आं कली सक्ति गेती। आं गाक्तीक लां ब्रेम्शो सेल्लु। 34 मेकोम आं कली किशश खोदेशो पा दोरब सेल्लती। मेकोमी आं कली इर वोइशशा कोव्रब। 35 मेकोम आं गुइ कली लडाइ पचा शेंब। मोपा आं गुइमी कांसा के लिब्रा खुक्ने चाप्ब। 36 मे आं कली इन तेक्शा ब्रोंइतीक गेतीनी। इन वारच पतीकेम आं कली ठेयब सेल्लती। 37 मे आं कली ठीक पा गाक्चा गेतीनी। मोपतीके आं खोइल गेनायो मग्रेक्ब। 38 गो आं जोरी सत्रु आन कली खेदा पा खतम पोक्तामी। गो मेको नेल्ल आन कली खतम मपोक्गुमी सम्म मलेडड। 39 गो मेको आन कली खतम पोक्शा

साइक्नुडमी। मिनु मेकोपुकी गेनायो बोक्ने मचाप्नीम। मेकोपुकी आं खोइली आगाम गोल्लेक्म। 40 गे आं कली लडाइ पचा कली सक्ति गेनीनी। आं जोरी सत्रु आन कली आं डोंइती आइक्च सेल्लतीनी। 41 गे आं जोरी सत्रु आन कली आं डोंइती रे प्रोक्पाइक्नीनी। गो आं कली काइ मदाक्ब आन कली खतम पोक्तामी। 42 मेकोपुकीम कोव्रना कोव्रन बाक्तेक्म। तन्न मेको आन कली प्रोंइब सुइ मबाक्ब। मेकोपुकीम परमप्रभु यावे कली पुंइतेक्म। तन्न मेकोमी मेको आन कली लोव्र मलेत्त। 43 गो मेको नेल्ल आन कली रागी डा फुरक खोदेंशो पा फस पोक्तामी। गो मेको आन कली लां डा हिलो खोदेंशो पा दिम्ताक्डमी।

44 गे आं कली मुर आन जिचा पोक्तीक रे प्रोंइतीनी। गे आं कली रागी रागी डा मुर आन ठेयब मुर सेल्शा वोइक्तीनी। आं मतुइश्शो मुरपुकीम आं कली गेय पाम्तेक्म। 45 अर्को रागी डा मुर जाक्शा आं कली मान पाम्तेक्म। आं लोव्र नेंशा, मेकोपुकी आं देंशो टिम्तेक्म। 46 अर्को रागी डा मुर हिंशा खिंखि पा आन बोल्यो दरवार रे जाक्तेक्म।

47 परमप्रभु यावे ब्रोंइशा बाक्ब। आं सेरथे फुल्लु ठेयब बाक्ब। आं परमप्रभु मान ताइब बाक्ब। मेको आं कली प्रोंइब, सेरथे फुल्लु बाक्ब। 48 परमप्रभुम आं पबंम क्येक्क लेत्ताक्व। मिनु मुर आन कली आं सासनम वोइक्तीमी। 49 मेकोम आं कली आं जोरी सत्रु रे प्रोंइती। गे आं कली आं जोरी सत्रु आन क्येडा ठेयब सेल्लतीनी। गे आं कली हुश खाक्श पोक्ब रे प्रोंइतीनी। 50 मोपतीके परमप्रभु यावे, गो रागी रागी डा मुर आन दातेमी इन कली ठेयब सेल्लुड। मिनु इन कली ठेयब सेल्लतीक कुम्सो पाइनुड। 51 परमप्रभु यावे पिप, आं ब्रोंइशा बाक्तीक बाक्ब। मेकोम आ तेल लुक्शो दाऊद कली नु आ चच युइ आन कली गेना हना यो दाक्तीक कोइब” दे दाऊदमी परमप्रभु यावे कली ठेयब सेला बाक्त।

23

दाऊद आ नोले डा लोव्र

1 एको दाऊद आ नोले डा लोव्र बाक्ब। येस्से आ तौ दाऊद आ नोले देंशो लोव्र एको बाक्ब। परमप्रभुमी ठेयब सेल्शो मुर आ पशो लोव्र एको बाक्ब। याकूब आ परमप्रभुमी मेको कली तेल लुक्शा, पिप सेल्शो बाक्त। इस्राएली आन सक्ति पाइश्शो आन दातेमी दाऊद कली नेल्ल क्येडा दाक्ब बाक्ब। १सामुएल १६:१३ 2 “परमप्रभु यावे आ सोक्त आं रे पा ब्वाक्शो बाक्ब। मेको आ देंशो लोव्र आं शोव्रम बाक्ब। 3 इस्राएली आन परमप्रभुम लोव्र पाप्तु। इस्राएली आन सेरथे फुल्लुमी आं कली ‘सुमी मुर आन कली ठीक निसाफ पाइबा, सुम परमप्रभु कली मान पा हिंशा हुकुम पाइबा, 4 मेको सुनी डा नां खोदेंशो बाक्ब। मेको गोस्स मबाक्शो सुनी दाप्शो नां खोदेंशो बाक्ब। मिनु मेको रेउ यिम नोले वाशो घांस खोदेंशो बाक्ब’ देंत। न्यायाधीस ५:३१ 5 मोपा आं खिं परमप्रभु नु बाक्ब। मारदे हना मेकोमी गो नु गेना हना यो लीब कबल का पशो बाक्ब। मेको नेल्ल रिम्शो नु लीब। मिनु मेकोमी आं रिम्शो दुम्शो नु आं दाक्शो बारना बारना लपाइक्ब। 6 तन्न परमप्रभु यावे आ अरेशो मटीब फशेम बेरशो चू खोदेंशो बाक्नीम। सुइम मेको कली गुइम थीने मचाप्नीम। 7 सुम मेको कली ताइक्चा दाक्बा, मेकोमी फलाम नु कोक्के लाइश्शा गुप्नीम। मेको मीम हुम्शा, रीब पा दाक्चा पुंइसीनीम” देंत।

दाऊद आ बोल्यो लडाइ पाइब

१इतिहास ११:१०-४७

8 दाऊद आ बोल्यो लडाइ पाइब मुर आन नें मार बाक्तेक्म देंशा हना, डोंइती ताह-केमोन आ खिं डा मुर योशेब-बाशेबेथ बाक्माक्त। मेको बोल्यो सां आन दाते डा कप्तान बाक्माक्त। मेकोमी ८ सहे मुर आन कली आ तूतीकेम कालेमी साइक्मी बाक्त। 9 मेको आ नोले डा बोल्यो सां लडाइ पाइब आन दाते डा अहोही आ चच दोदो आ तौ एलाजर बाक्माक्त। मेको दाऊद नु बाक्शो बाक्माक्त। मेकेर पलिस्तीपुकी लडाइ पचा कली बुक्शो बाक्मा बाक्त। मिनु इस्राएलीपुकी प्रोक्मानु, मेको कामीन लडाइ पतीकेम राप्शा, 10 मदम सम्म पलिस्ती आन कली तरवारम क्योरस डा क्योरस पामी बाक्त। मेको आ गुइमी तरवार खोक्शो बाक्माक्त। मोपा परमप्रभु यावेम मेको नाक्ती थाम्पा ग्रापदा बाक्त। मेको नोले मुरपुकी बेक्शो मुर आन मार मार रोइक्थ ला जाक्मा बाक्त। 11 मेको आ नोले डा हरारी आगी आ तौ शम्माह बाक्माक्त। पलिस्तीपुकी लेहीम बुक्शो बाक्मा बाक्त। मेकेर मस शोक्शो थम रिम्शो रू का बाक्माक्त। मिनु अरामीपुकी पलिस्ती आन डोंइती रे ब्रुशा प्रोक्मा बाक्त। 12 मिनु पलिस्तीपुकीमी मुर आन कली खेदा पा लदमेनु, मेको शम्मा मस शोक्शो रू आ दातेमी राप्शा, खाल पा बाक्शो बाक्माक्त। मिनु मेकोमी पलिस्ती आन कली साइक्मी बाक्त। मोपा परमप्रभु यावेमी मेको आन कली थाम्पा ग्रापदा बाक्त।

13 अन्न रिक्तीक डोंइती डा नाक्ती, मेको ३० जना कप्तान आन दाते डा मेको सां अदुल्लाम डा पुक्खी दाऊद आ बाक्तीकेम जाक्शो बाक्मा बाक्त। पलिस्ती आन हुल का चहिं रेफाइम डा बेसीम बाक्तीक सेल्शा बाक्शो बाक्मा बाक्त। १सामुएल २२:१ 14 मेना दाऊद डांडा डा गारो हिरशो बोल्यो बाक्तीकेम बाक्शो बाक्माक्त। पलिस्ती आन लडाइ पाइब हुल बेथलेहेमम बाक्मा बाक्त। 15 मिनु काबु नाक्त दाऊद थाम्पा ब्वाक्कु तूतू दाक्शो बाक्माक्त। मिनु मेकोमी तूतू दाक्शा “सुइमी आं कली बेथलेहेम डा ठेयब लाप्चो आ नेक्था बाक्शो इनार डा ब्वाक्कु तूचा गेयीमी हना, रिम्शो दुम वा” देंमाक्त। 16 मिनु मेको बोल्यो लडाइ पाइब सां पलिस्ती आन दाते रे ग्रीशा लशा बेथलेहेम डा ठेयब लाप्चो आ नेक्था बाक्शो इनार डा ब्वाक्कु चाक्शा दाऊद कली गेमे बाक्त। तन्न दाऊदम मेको तूने मबिस्से बाक्त। मेकोमी मेको ब्वाक्कु परमप्रभु यावे आ डोंइती मोदा बाक्त। 17 मेकोमी “परमप्रभु यावे आ नेंमी गो एको ब्वाक्कु मतूनुड। मार, गो एको मुर आन हुश तूनुडा? एकोपुकीम एको ब्वाक्कु हेररा आन गिम सोइक्चा डा पा लशा चाक्तेक्म” देंमाक्त। मोपतीके दाऊदमी मेको ब्वाक्कु मतूडा बाक्त। मेको बोल्यो लडाइ पाइब सां आन ठेयब गेय मेकोन बाक्त।

अरु बोल्यो लडाइ पाइब

18 मिनु सेरूयाह आ तौ योआब आ लोकब अबीशै मेको ३० जना आन दाते डा ठेयब बाक्माक्त। मेकोमी सहे सां जना मुर आन कली आ तूतीकेम लडाइ पा साइक्मी बाक्त। मेको सांमी “मेको बोल्यो मुर बाक्ब” देंमा बाक्त। २सामुएल २१:१७ 19 मेको, मेको ३० जना आन दाते डा नेल्ल क्येडा हिक्सीशो मुर बाक्शो बाक्त। मिनु मेको आन कप्तान दुम्माक्त। तन्न मेको बोल्यो मुर सां खोदेशो दुम्ने मचबा बाक्त।

20 कब्सेल सहर डा येहो-यादा आ तौ बेनायाह यो बोल्यो लडाइ पाइब का बाक्माक्त। मेकोमी ठेयब गेय पशो बाक्माक्त। मेकोम मोआब डा अरीएल आ तौ निक्शी साइशो बाक्माक्त। फुं यिम ना मेकोमी खाल्टाम लशा मेकेर गुप्स का साइशो बाक्माक्त। २सामुएल ८:१८; यहोसु १५:२१ 21 मेकोमी दारशो बोल्यो इजीप्त डा मुर का कली साइशो बाक्माक्त। मेको इजीप्त डा मुर तूतीक का शेशो बाक्माक्त। तन्न बेनायाह कोक्के का शेशा लशा, मेको इजीप्त डा मुर आ तूतीक आ गुइ रे रोइशो, मेको कली सदा बाक्त। 22 येहो-यादा आ तौ बेनायाह आ पशो मेकोन बाक्ब। मेको सांमी “मेको बोल्यो लडाइ पाइब का बाक्ब” देंमा बाक्त। 23 मेको, मेको ३० जना मुर आन दाते डा हिक्सीशो मुर का बाक्शो बाक्त। तन्न मेको बोल्यो सां खोदेशो दुम्ने मचबा बाक्त। मिनु दाऊदमी मेको कली आं कली खाल पाइब आन ठेयब मुर सेला बाक्त।

24 मिनु मेको ३० जना आन दातेमी सु सु बाक्मा बाक्त देंशा हना, योआब आ लोकब आसाहेल, बेथलेहेम डा दोदो आ तौ एल्हानान, २सामुएल २:१८ 25 हारोद सहर डा शम्माह, हारोद सहर डा एलीका, 26 पाल्ती आ खिं डा हेलेस, तेकोहा सहर डा इक्केश आ तौ इरा, 27 अनाथोथ सहर डा अबीएजेर, हुशा डा मुर मेबुन्नाइ, 28 अहोही आ खिं डा मुर सल्मोन, नेतोफाह आ खिं डा माहाराइ, 29 नेतोफाह आ खिं डा बानाह आ तौ हेलेब, गिबा सहर डा बेन्यामीन आ थर डा रिबाइ आ तौ इत्ताइ, 30 पिराथोन सहर डा बेनायाह, गाश खोला डा हिददाइ, 31 अरबा आ खिं डा मुर अबी-अल्बोन, बाहुरीम सहर डा अज्मावेथ, 32 शा-आल्बोन सहर डा एली-अहबा, याशेन आ तौ योनाथन, 33 हरारी सहर डा शम्माह, हरारी सहर डा शरार आ तौ अहीयाम, २सामुएल १५:१२ 34 माकाह सहर डा अहास्बाइ आ तौ एली-फेलेत, गिलो डा अहीथोफेल आ तौ एलीआम, 35 कारमेल पहड डा हेस्रो, यहूदा डा अरब सहर डा पाराइ, 36 सोबाह सहर डा नाथान आ तौ इगाल, गाद आ थर डा बानी, 37 अम्मोनी जेलेक, बेयरोथ सहर डा नहाराइ, मेको सेरूयाह आ तौ योआब आ या कुरब बाक्माक्त। 38 इथ्री आ खिं डा इरा, इथ्री आ खिं डा गारेब नु २सामुएल ११:३ 39 हित्ती आ मुर उरीयाह, मेको नेल्ल पा ३७ जना बाक्मा बाक्त।

24

मुर आन कली हिक्शो

१इतिहास २१:-

1 मिनु परमप्रभु यावे इस्राएली आन पर्बम लेंशा गाइक्ता बाक्त। मिनु मेकोमी दाऊद कली मेको आन पर्बम मरिम्शो पपाइक्चा कली क्युक्गा बाक्त। मिनु दाऊदमी “इस्राएल नु यहूदा डा मुर आन कली हिक्कीन” देंमाक्त। 2 मिनु पिपमी योआब नु मेको नु बाक्ब लडाइ पाइब आन ठेयब मुर नेल्ल आन कली “दान रे बेयर-शेबा सम्म डा इस्राएल आ खिं खिं डा मुर आन बाक्तीक तेइ तेइ लशा, नेल्ल आन कली हिक्शा, मेको दोशो बाक्मा, आं बाक्तीकेम ब्रेक्शा

चाक्कीन” देंमाक्त। प्रस्थान ३०:१२ ३ तन्न योआबम पिप कली “परमप्रभु यावे, इन परमप्रभुम मुर आन कली सहे का खेयप हिक्शो क्येडा यो शुश सेलल। मेको तचा डा पा इन ब्रोंइची ना दुम्ल। तन्न मारदे आं प्रभु पिप मोदेशो पचा माल्नी?” दे हिल्लो पवा बाक्त। ४ तन्न पिप आ अरेशो योआब नु लडाइ पाइब आन ठेयब मुरपुकीम पचा माल्मा बाक्त। मोपतीके योआब नु लडाइ पाइब आन ठेयब मुर पिप आ डोंइती रे इस्राएल डा मुर आन कली हिक्चा कली लमा बाक्त। ५ मिनु मेकोपुकी यर्दन खोला शोक्शा, आरोएर सहर नु दिंम आ दाते डा सहर रे गाद नु याजेर गे लमा बाक्त। ब्यवस्था २:३६ ६ मिनु मेकोपुकी हिक्ती आन रागी गिलाद नु कादेश जाक्मा बाक्त। नोले दान लशा, सीदोन जाक्दीम्मा बाक्त। ७ मिनु नोले गारो हिरशो सहर टायर, हिक्वी नु कनानी आन सहर नेल्ल लमा बाक्त। नोले यहूदा डा नेगेब डा बेयर-शेबा सहर सम्म लमा बाक्त। ८ मिनु ९ महिना नु २० नाक्त नोले मेकोपुकी रागी नेल्ल हिरशा, लेशशा यरूसलेम जाक्मा बाक्त। ९ मिनु योआबम पिप कली “या चलेने चापब लडाइ पाइब इस्राएलम ८ लाख नु यहूदाम ५ लाख बाक्तेक्म” दे शेंदा बाक्त।

१० मिनु नोले दाऊद मुर आन कली हिक्शो आ पर्बम आ थुं मनुमाक्त। मिनु दाऊदमी परमप्रभु यावे कली “गो मुर आन कली हिक्शा ठेयब पाप पाता। मुल परमप्रभु यावे, इन वाइल आ मरिम्शो पशो क्याम्दीन। मारदे हना गो थम मूर्ख गेय पाता” देंमाक्त। २सामुएल १२:१३ ११ मिनु दाऊद सुनी कना बोक्माक्त। मिनु परमप्रभु यावेमी आ लोत्र पाइब गाद कली लोत्र पवा बाक्त। १२ मार लोत्र पवा बाक्त देंशा हना “गे दाऊद कली परमप्रभु यावेम इ कली मार देंब देंशा हना ‘गो इ कली लोत्र सां गेनन। मेको आन दाते डा का योत्रचा माल्नेवे। मिनु गो मेको इ कली पाइनुड’ देंत” देंमाक्त। १३ मिनु गाद दाऊद आ बाक्तीक जाक्शा “इन कली नु रागी कली बर्स सां सम्म अन्काल दुम्तीके, महिना सां सम्म इन जोरी सत्रुम खेदा पचा पुंडसीतीके नु इन रागीम नाक्त सां सम्म मुर बेक्तीक रोइ जाक्तीके, तेको योत्रनीनी मिम्शा देंनीन। मिनु आं कली सोइक्ब कली मार देंचा माल्नुडा देंनीन” देंमाक्त। येरमीया २४:१०; इजीकीएल ६:११-१२ १४ मिनु दाऊदम गाद कली “गो शुश श्येत जशो बाक्नुड। आंइ कली परमप्रभु यावे आ गुइम दुम्चान रिम्शो बाक्ब। मारदे हना आ शिशी ठेयब बाक्ब। गो मुर आन गुइम मडुडल” देंमाक्त।

१५ मोपतीके परमप्रभु यावेमी आ देंशो नाक्त रे इस्राएल नेल्लेम मुर बेक्तीक रोइ जाक्पदा बाक्त। मिनु दान रे बेयर-शेबा सम्म ७० हजार मुर बेक्मा बाक्त। १६ मिनु परमप्रभु यावे आ स्वर्ग डा गेय पाइबमी यरूसलेम खतम पोक्चा कली आ गुइ मेक गे दिंदा बाक्त। मिनु परमप्रभु यावेमी मुर आन कली खतम सेल्ब आ स्वर्ग डा गेय पाइब कली तेक्शा “मोक्ल, मुल दुम्त” देंमाक्त। मेना मेको परमप्रभु यावे आ स्वर्ग डा गेय पाइब यबुसी अरौनाह आ खलाम राप्शो बाक्माक्त। उत्पत्ती १९:१३; प्रस्थान १२:२३; यसैया ५४:१६ १७ मिनु दाऊदमी मेको मुर आन कली साइक्ब परमप्रभु आ आ स्वर्ग डा गेय पाइब कली तवा बाक्त। मिनु मेकोमी परमप्रभु यावे कली “पाप पाइब, गो आं का ला नड। इन अरेशो लोत्र मटीब यो गो नड। तन्न एको मुर मार पामे डा? गे आं कली नु आं खिं डा मुर आन कली श्येत गेने” देंमाक्त। गन्ती १६:२२ १८ मेको नाक्ती गाद दाऊद आ बाक्तीकेम जाक्शा, मेको कली “गे लशा, यबुसी अरौनाह आ खलाम परमप्रभु यावे कली चढ़ेतीक का सेलो” देंमाक्त। १९ मिनु परमप्रभु यावेमी अरेशो गादमी देंशो खोदेशो पा दाऊद इर डोइशशा लमाक्त। २० मिनु अरौनाहम पिप नु आ मुर आन कली आ बाक्तीक गे पिशो तशा, पिप आ डोंइती खुम्की पा बाप्शा सेउ पवा बाक्त। २१ मिनु अरौनाहमी “मारदे आं प्रभु पिप इन वाइल कली गुम्थ जाक्नी” दे हिल्लो पवा बाक्त। मिनु दाऊदमी “गो परमप्रभु यावे कली चढ़ेतीक का सेल्चा, दे इ खला ग्यापथ जाक्ती। मो पाता हना, एको मुर बेक्तीक रोइ दिक्बा कों?” देंमाक्त। २२ मिनु अरौनाहमी दाऊद कली “आं प्रभु पिप मेको इन के दुम्त। मिनु दोदेशो दाक्नीनी मोदेशो पा चढ़ेन। चोशा चढ़ेचा कली गो नु ब्यफ बाक्नीम। शी कली जुवा नु दांइ पतीक शी बाक्नीम। २३ पिप, गो इन कली मेको नेल्ल गेनुड। परमप्रभु यावे, इन परमप्रभुम इन चढ़ेशो ब्रवल” देंमाक्त। २४ तन्न पिपमी अरौनाह कली “ममाइ, गो मेको ग्याप्नुड। गो क्येट मथाप्शो थोत्रक परमप्रभु यावे, आं परमप्रभु कली मचढ़ेनुड” देंमाक्त। मोपतीके दाऊदम मेको खला नु ब्यफ डा ५० शेकेल चांदी थाप्शा ग्यबा बाक्त। शेकेल का ११.५ ग्राम बाक्ब। २५ मिनु दाऊदम मेकेर परमप्रभु यावे कली चढ़ेतीक का सेला बाक्त। मिनु चोशा चढ़ेतीक नु दुशा बाक्चा आ पर्बम चढ़ेतीके चढ़ेवा बाक्त। मिनु परमप्रभु यावेमी रागी आ पर्बम पुंडशो लोत्र नेना बाक्त। मिनु इस्राएलम मुर बेक्तीक रोइ दिक्माक्त। २सामुएल २१:१४

१ राजा

ब्रेक्ब मुर: नेल्ल क्येडा नोले ब्रेक्ब मुर मतुइक्नीम। एको ब्रेक्ब मुरुमी यहूदा डा पिप आन इतिहास नु इस्राएल डा पिप आन इतिहास डा किताब तुइश्शो बाक्त।

गेना ब्रेक्शो: एको किताब ५६१ बि. सी. मेर ब्रेक्शो दुम्चा माल्ब। मारदे हना मेना पिप योयाकीन जेल्खान रे गूशो बाक्त।

मार ब्रेक्शो: डोंइती १राजा नु २राजा हिब्रू लोव्रमी ब्रेक्शो किताब का बाक्त। नेल्ल ग्रीक लोव्रमी सेप्तुआगीन्त माइश्शो किताबम निक्शी सेल्मे बाक्त। डोंइती राजा किताब निक्शी, सामुएल किताब निक्शी, यहोसु नु न्यायाधीस किताब कली “परमप्रभु यावे आ लोव्र पाइब आन किताब” देशो बाक्मा बाक्त। मेको किताबपुकीमी मोसा रे इस्राएली ग्याइश्शा लाइक्चा पुंडसीमा सम्म डा लोव्र नेल्ल ब्रेक्शो बाक्त। १राजा किताबमी दाऊद खाल्पा दुम्शो रे आ तौ सोलोमन नोले डा यहूदा नु इस्राएल डा पिप आहाब नु आ तौ अहज्याह सम्म डा लोव्र ब्रेक्शो बाक्ब।

अबीशागम पिप कली काल्गी पशो

1 मिनु दाऊद पिप शुश बर्स दुम्शा, थम खूशो दुम्माक्त। मिनु वा फेक्सेनु, यो महोमाक्त। 2 मोपतीके मेको आ गेय पाइबपुकीम मेको कली “आंइ प्रभु पिप इन कली कोव्रचा कली नु इन काल्गी पचा कली, गो कन्ने मीश आल का माल्नीकी। मिनु मेको आंइ प्रभु पिप, इन कली होपाइक्चा कली इन नु इप्ल” देंमा बाक्त। 3 मिनु मेकोपुकीम इस्राएल रागी नेल्लेम दारशो मीश आल का माल्मेनु, शुनेम सहर डा अबीशाग, कन्ने मीश आल कली थित्मे बाक्त। मिनु मेको कली पिप आ बाक्तीक चाक्मे बाक्त। 4 मेको थम दारशो मीश आल बाक्माक्त। मिनु मेकोमी पिप कली कोव्रचा नु आ काल्गी पचा गोवा बाक्त। तन्न पिप मेको नु मबाक्माक्त।

अदोनीयाह पिप दुम्चा माल्शो

5 मिनु हग्गीथ आ तौ अदोनीयाहम आंम कली ठेयब सेल्शा “गोन पिप दुम्नुड” देंचा गोवा बाक्त। मोपतीके मेकोम बग्गीपुकी, शारा डोइक्बपुकी नु आ डोंइडोंइती दोरपाइक्चा कली ५० जना मुर ठीक पवा बाक्त। २सामुएल ३:४; २सामुएल १५:१ 6 मिनु मेको आ आफोम मेको कली “गे मारदे मोदेशो पवी?” दे गेनायो महुइक्ता बाक्त। अदोनीयाह यो थम दारशो मुर का बाक्माक्त। मेको अब्सालोम क्येडा नोले जरमेशो बाक्माक्त। 7 मिनु मेकोमी सेरूयाह आ तौ योआब नु चढ़ेब अबीयाथार नु लोव्र गारपदा बाक्त। मिनु मेको निक्शीमी अदोनीयाह कली वारच पदसे बाक्त। १राजा २:२७ 8 तन्न चढ़ेब सादोक, येहो-यादा आ तौ बेनायाह, परमप्रभु यावे आ लोव्र पाइब नाथान, शिमेइ, रेइ नु दाऊद आ लडाइ पाइबपुकी चहिं अदोनीयाह नु मगारमा बाक्त।

9 मिनु अदोनीयाहमी एन-रोगेल आ नेक्था डा सोहेलेथ देशो फुल्लुम भेडा, ब्यफ नु दोम्शो बस्तु भाव चढ़ेवा बाक्त। मिनु मेकोमी आ लोक्ब नेल्ले, पिप आ तौ नेल्ले नु पिप आ ठेयब गेय पाइब यहूदा डा मुर नेल्ल आन कली ब्रेत्तीमी बाक्त। यहोसु १५:७-८ 10 तन्न मेकोमी परमप्रभु यावे आ लोव्र पाइब नाथान, बेनायाह, लडाइ पाइबपुकी नु आ लोक्ब सोलोमन आन कली चहिं मब्रेत्ता बाक्त।

11 मिनु नाथानमी सोलोमन आ ममा बाथ्शेबा कली “मार गे हग्गीथ आ तौ अदोनीयाह आंइ प्रभु दाऊद आ मतुइक्थु पिप दुम्त देशो लोव्र मनैनी? 12 मोपतीके मुल नेनीन। आंम इन कली नु इन तौ सोलोमन कली दोपा प्रोंइने चाम्सीबा, मेको आ पर्बम गो इन कली सल्ला गेनुड। 13 मुल रीब पा लशा, पिप दाऊद कली गुमीन। मिनु मेको कली ‘आं प्रभु, मार, गे इन वाइलीम नु थमा पा इ तौ सोलोमन आं नोले पिप दुम्ब। मिनु मेको आं नित्तीकेम निप्ब देशो मननी डा? मिनु मुल मारदे अदोनीयाह कका पिप दुम्मे?’ देनीन। १इतिहास २८:५-१० 14 मिनु मोपा गे पिप नु लोव्र पना पन बाक्नीनु, गो जाक्नुड। मिनु गो इन देशो लोव्रम लोव्र तेम्नुड” देंमाक्त।

15 मिनु बाथ्शेबा पिप आ बाक्तीक कोठाम ओव्रमाक्त। पिप थम खूशो दुम्शो बाक्माक्त। मेना शुनेम सहर डा अबीशागमी मेको आ काल्गी पना पन बाक्माक्त। 16 मिनु बाथ्शेबाम पिप आ डोंइती बाप्शा आ पोक्च थेक्शा सेउ पवा बाक्त। मिनु पिपम “गे मार पुनी” दे मदा बाक्त। 17 मिनु मेकोमी पिप कली “आं प्रभु, गे इन वाइलीम, आं कली परमप्रभु यावे, इन परमप्रभु आ डोंइती कसम जशा ‘इ तौ सोलोमन आं नोले पिप दुम्ब। मिनु आं नित्तीकेम निप्ब’ देशो ननी। 18 तन्न मुल अदोनीयाह कका पिप दुम्त। एको लोव्र आं प्रभु पिपम मतुइश्शो बाक्नीनी। 19 मेकोमी शुश

ब्यफ नु दोम्शो बस्तु भाव नु भेडा क्योरशा चढ़ेशो बाक्ब। मिनु पिप आ आल नेल्ले, चढ़ेब अबीयाथार नु लडाइ पाइब आन नेल्ल क्येडा ठेयब मुर योआब नेल्ल आन कली ब्रेशो बाक्ब। तन्न इन गेय पाइब सोलोमन कली चहिं मब्रेशो बाक्ब। 20 मिनु मुल आं प्रभु पिप, इन नोले सु पिप दुम्बा? मिनु इन नित्तीकेम सु निप्बा, दे तुइक्चा कली इस्राएल डा मुर नेल्लेम इन लां कोव्रशो बाक्नीम। 21 मो मदुम्त हना, नोले गे आं प्रभु पिप इन किकी पिपी नु इप्नीनी। मिनु गो नु आं तौ सोलोमन आंस कली मरिम्शो पाइब खोदेंशो सेल्नीम” दे बाथशेबाम देंमाक्त।

22 मिनु मेको पिप नु लोव्र पना पन बाक्मेनु, परमप्रभु यावे आ लोव्र पाइब नाथान जाक्माक्त। 23 मिनु पिप कली “परमप्रभु यावे आ लोव्र पाइब नाथान जाक्शो बाक्ब” देंशो लोव्र नेंपदमे बाक्त। मिनु नाथान जाक्शा, खप सम्मन बाप्शा, पिप कली सेउ पवा बाक्त। 24 मिनु नाथानम “आं प्रभु पिपमी ‘अदोनीयाह आं नोले पिप दुम्ब। मिनु आं नित्तीकेमी निप्ब’ देंशो ननी देय मननी? 25 मेको मुलाक्ती उइ ब्रुप्शा शुश ब्यफ, दोम्शो बस्तु भाव नु भेडा क्योरशा चढ़ेशो बाक्ब। मिनु मेकोम पिप इन आल नेल्ले, लडाइ पाइब आन ठेयब मुर योआब नु चढ़ेब अबीयाथार नेल्ल आन कली ब्रेशो बाक्ब। मिनु मुल मेको नेल्ल मेको आ डोंइती जना जन, तूना तून ‘पिप अदोनीयाह गेना हना यो ब्रोंइशा बाक्ल’ देंना देंन बाक्नीम। 26 तन्न मेकोम इन गेय पाइब आं कली, चढ़ेब सादोक, येहो-यादा आ तौ बेनायाह नु इन गेय पाइब सोलोमन आंइ कली मब्रेत्तीकी। 27 मार, आं प्रभु पिप इन देंतीके मो पशो नमी? मिनु गो इन गेय पाइब आंइ कली चहिं इन नोले सु पिप दुम्ब, दे मशेंदीनी” देंमाक्त।

दाऊदम सोलोमन कली पिप सेल्शो

28 मिनु पिप दाऊदमी “बाथशेबा कली आं नेक्था ब्रेत्तीन” देंमाक्त। मिनु मेको पिप आ डोंइती जाक्शा राम्माक्त। 29 मिनु पिपमी “गो आं कली आं श्येत नेल्ल रे प्रोंइब नु गेना हना यो बाक्ब परमप्रभु यावे ब्रोंइशा बाक्शो खोदेंशो पा गो कसम जाइनुड। 30 डोंइती गो परमप्रभु यावे, इस्राएली आन परमप्रभु आ नेमी इ कली ‘इ तौ सोलोमन आं नोले पिप दुम्ब। मिनु आं नित्तीकेम निश्शा, आं पा डा पिप दुम्ब’ देंती। मुलाक्त गो मेको कसम जशो खाप्नुड” देंमाक्त। 31 मिनु बाथशेबा पिप आ डोंइती आ पोकच थेक्शा बाप्शा “आं प्रभु पिप दाऊद गेना हना यो ब्रोंइशा बाक्ल” देंमाक्त। 32 मिनु पिप दाऊदम “चढ़ेब सादोक, परमप्रभु यावे आ लोव्र पाइब नाथान नु येहो-यादा आ तौ बेनायाह आन कली ब्रेत्तीने” देंमाक्त। मिनु मेको पिप आ डोंइती जाक्मा बाक्त। 33 मिनु पिपम मेको आन कली “गे इन प्रभु, आं ठेयब गेय पाइब आन कली लतीन। मिनु आं तौ सोलोमन कली आं खच्चरम डोइक्पाइश्शा गिहोन सम्म लतीन। 34 मिनु मेकेर चढ़ेब सादोक नु परमप्रभु यावे आ लोव्र पाइब नाथानमी मेको कली तेल लुक्शा इस्राएल डा पिप सेल्सेक्ल। मिनु तुराही ताप्शा ‘पिप सोलोमन गेना हना यो ब्रोंइशा बाक्ल’ देंमल। 35 मिनु मेको आ नोले खोतीन। मेको जाक्शा आं नित्तीकेम नित्चा माल्ब। मिनु मेकोम आं पा डा सासन पचा माल्ब। मारदे हना गो मेको कली इस्राएल नु यहूदाम सासन पचा कली योव्रता” देंमाक्त। 36 मिनु येहो-यादा आ तौ बेनायाहम पिप कली “आमेन। परमप्रभु यावे, आं प्रभु पिप आ परमप्रभुमी मोदेंशोन पवल। 37 दोपा परमप्रभु यावे आं प्रभु पिप इन नु बाक्मे, मोपान सोलोमन नु यो बाक्ल। मिनु मेको आ राज्य आं प्रभु पिप दाऊद आ राज्य क्येडा यो सक्ति पाइश्शो सेलल” देंमाक्त।

सोलोमन कली पिप सेल्शो

38 मिनु चढ़ेब सादोक, परमप्रभु यावे आ लोव्र पाइब नाथान, येहो-यादा आ तौ बेनायाह नु केरेथी नु पेलेथी उइ ब्रुप्शा सोलोमन कली दाऊद पिप आ खच्चरम डोइक्पाइश्शा गिहोन सम्म लदमे बाक्त। २सामुएल ८:१८ 39 मिनु चढ़ेब सादोकमी परमप्रभु यावे आ ताम्बु रे तेल चोइश्शो ग्रोव्र गुंइशा सोलोमन कली लुक्शा पिप सेला बाक्त। मिनु मेकोपुकीम तुराही ताप्मे बाक्त। मिनु मुर नेल्लेम ठेयब सेंदा पा “पिप सोलोमन गेना हना यो ब्रोंइशा बाक्ल” देंमा बाक्त। १इतिहास २३:१; २सामुएल २९:२२ 40 मिनु मुर नेल्ल ठेयब सेंदा पा ग्येरशा बांसुरी ताप्शा, मेको आन नोनोले इर डोइश्शा लमा बाक्त। मिनु मेको आन ग्येरशा रेयके पशोम रागी नेल्ल मुरदा बाक्त।

41 मिनु अदोनीयाह नु आ मुरपुकीम मेको रेयके नेन्मे बाक्त। मेना मेकोपुकीमी नक भोज जने ला थुम्शो बाक्मा बाक्त। मिनु योआबमी तुराही ग्रीशो नेंशा “सहरम मार रेयके पामे?” देंमाक्त। 42 मिनु मेकोमी मो देंन देंना चढ़ेब अबीयाथार आ तौ योनाथन जाक्माक्त। मिनु अदोनीयाहमी मेको कली “खिंडगा पिवो। गे रिम्शो मुर बाक्नेवे। मिनु गे थमा पा रिम्शो लोव्र चाक्की माइ” देंमाक्त। २सामुएल १५:२७,३६ 43 मिनु योनाथनमी अदोनीयाह कली “ममाइ, इं प्रभु पिप दाऊदमी सोलोमन कली पिप सेल्लु। 44 पिपमी चढ़ेब सादोक, परमप्रभु यावे आ लोव्र पाइब नाथान, येहो-यादा आ तौ बेनायाह नु केरेथी नु पेलेथी आन कली मेको नु सोइक्ताक्व। मिनु मेकोपुकीम मेको कली पिप आ

खच्चरम डोइकपाइशशा लाइक्तेकम। 45 मिनु चढेब सादोक नु परमप्रभु यावे आ लोत्र पाइब नाथानमी मेको कली गिहोनमी तेल लुक्शा, पिप सेल्लाकस। मिनु मुल मेकोपुकीम मेको कली ग्येरशा इर खिं लाइक्तेकम। मोपतीके सहरम रेयके दुम्शो बाक्ब। गेपुकीम मेको रेयके नेशो बाक्नीनी। 46 मुल सोलोमन पिप आ नित्तीकेम निप्ब। 47 मिनु पिप आ खिं डा ठेयब गेय पाइब मुरपुकीमी इं प्रभु पिप दाऊद कली ‘इन परमप्रभुम इन तौ सोलोमन आ नें इन क्येडा यो सक्ति पाइशशा सेलल। मिनु मेको आ नित्तीक इन नित्तीक क्येडा यो सक्ति पाइशशा सेलल’ देंथ लशो बाक्नीम। मिनु पिपमी आ खाटमी बाप्शा 48 ‘परमप्रभु यावे, इस्राएली आन परमप्रभु ठेयब बाक्ब। मुलाक्ती मेकोमी आं सेस बाक्ना बाक्न, आं कली तपाइक्चा कली आं नित्तीकेम पिप का निप्पाइक्त्’ देंत” देंमाक्त।

49 मोपतीके अदोनीयाह आ मुरपुकी हिंशा छुल छाल बोक्शा आन लां खोदमे बाक्त। 50 मिनु अदोनीयाह आंमा यो सोलोमन क्येडा हिंशा लशा, चढेतीक डा ग्रोत्र ग्याइक्ता बाक्त। 51 मेको नोले सोलोमन कली “अदोनीयाह पिप क्येडा हिंशा, चढेतीक डा ग्रोत्र ग्याइशशा ‘पिप सोलोमनम आ गेय पाइब आं कली मक्योरनुड, दे कसम जवल’ देंशो बाक्ब” देंशो लोत्र नेंपदमे बाक्त। १राजा २:२८ 52 मिनु सोलोमनमी “मेकोमी गो ओदेंब पाइब मुर नड, देंने चाप्टु हना, मेको के आ चां का यो महेम्ब। तन्न मेकोम मरिम्शो पशो थिंसाक्व हना, मेको थमा पा साइक्चा पुंइसीब” देंमाक्त। २सामुएल १४:११ 53 मिनु पिप सोलोमनम मुर आन कली सोइशशा, मेको कली चढेतीक रे उइ तोइक्पदा बाक्त। मिनु अदोनीयाह जाक्शा, पिप सोलोमन कली सेउ पवा बाक्त। मिनु सोलोमनम मेको कली “इ खिं लावो” दे मदा बाक्त।

2

दाऊदमी सोलोमन कली अरेशो

1 मिनु दाऊद आ बेक्ची ना जाक्माक्त। मिनु मेकोमी आ तौ सोलोमन कली आ बाक्शो मारेइ मारेइ जिम्मा गेवा बाक्त। 2 मिनु मेकोमी “गो रागी डा मुर नेल्ल आन खोदेंशो पा बेक्नुड। मोपतीके गे बोल्यो नु महिंब दुमो। 3 मिनु गे परमप्रभु यावे, इ परमप्रभु आ देंशो टिवो। मेको आ लांम गाक्को। मिनु मोसा आ अरेशो लोत्रम गेशो खोदेंशो पा परमप्रभु यावे आ फुल्लुम मुशा ब्रेक्शो लोत्र, आ शेंशो, आ देंशो पतीक लोत्र नु आ गेशो अर्ती नेल्ल पावो। मिनु गे मार मार पाइनेवे, ते ते लाइनेवे, मेको नेल्ल रिम्शो दुम्ल। ब्यवस्था १७:१४-२०; यहोसु १:७ 4 परमप्रभु यावेमी आं कली ‘इ तौ चच नेल्लेम आंमा दोपा बाक्चा माल्बा, दे मिम्ताकम हना नु आन थुं नु आन सोक्त नेल्लेम आं कली मप्रोंइथु आं डोंइती गाक्तेकम हना, गेना हना यो इस्राएलम हुकुम पचा कली इ तौ चच का लीब’ दे लोत्र गेशा कबल पशो बाक्ब।

5 सेरूयाह आ तौ योआबम आं कली मार पवा? गे मेको तुइक्नेवे। मेकोमी इस्राएल डा लडाइ पाइब आन ठेयब मुर नेर आ तौ आब्नेर नु येथेर आ तौ आमासा आस कली साइक्तीम्सी। मेको लोत्र गे आंमा तुइशशा बाक्नेवे। मेकोमी मेको निम्फा आस कली लडाइ मदुम्थु, थुं नाइशशा बाक्तीक ना साइक्तीम्सी। मिनु मेको हुशेमीन आ किप्शुर नु आ जुत्ता दोस ताइब सेल्लु। २सामुएल ३:२७; २सामुएल २०:१० 6 मोपतीके इ जोक्ब तुइक्ब थुंम मार पचा देंबा, मेको पावो। तन्न मेको आ बोइशशा चां थुं मनाइक्थु बेक्शो मुर आन बाक्तीकेम लल। 7 गिलाद डा बारजील्लाइ आ तौ आन कली चहिं मप्रोंइथु रिम्शो पावो। मेको गे नु काथा जाइब आन दातेमी बाक्मल। गो इ लोक्ब अब्सालोम क्येडा प्रोक्शा गाक्डानु, मेकोपुकीम रिम्शो पाम्तेकम। २सामुएल १७:२७; २सामुएल १९:३२-४१; २सामुएल १५:- 8 मिनु गे बाहुरीम डा बेन्यामीन आ थर डा गेरा आ तौ शिमेइ कली योत्रकी पावो। मेकोमी गो महा-नाइम लडा नाक्त आं कली थाम्पा सराप पाइक्ती। नोले मेको यर्दन खोलाम आं कली ग्रुम्थ जाक्त। मिनु मेना गो मेको कली ‘मसाइक्नन’ दे परमप्रभु यावे आ नें थिशा कसम जाता। २सामुएल १६:५; २सामुएल १९:१७-२४ 9 तन्न मुल गे मेको कली दोस मताइब ममिम्तो। गे जोक्ब तुइक्ब मुर बाक्नेवे। मोपतीके मेको कली मार पचा माल्बा, मेको तुइक्नेवे। मेको आ बोइशशा चां हुश सुन्दा बेक्शो मुर आन बाक्तीकेम सोइक्तो” देंमाक्त।

10 मिनु दाऊद बेक्माक्त। मिनु दाऊद आ सहरम थिम्चा पुंइसे बाक्त। 11 दाऊदम इस्राएलम ४० बर्स सम्म सासन पवा बाक्त। मेकोम ७ बर्स हेब्रोनमी नु ३३ बर्स यरूसलेमम सासन पवा बाक्त। २सामुएल ५:४-५; १इतिहास २९:२७ 12 मिनु सोलोमन आ आफ दाऊद आ पा डा पिप दुम्माक्त। मिनु मेको आ राज्य बोल्यो दुम्माक्त।

सोलोमनमी अदोनीयाह साइशशा

13 मिनु हग्गीथ आ तौ अदोनीयाह, सोलोमन आ ममा बाथ्शेबा बाक्तीक जाक्माक्त। मिनु बाथ्शेबाम मेको कली “मार गे रिम्शो मिम्शा जाक्डे” दे हिल्लो पवा बाक्त। मिनु मेकोमी “ओं रिम्शो पान जाक्ती” देंमाक्त। 14 मिनु मेकोम

लेंशा “गो इन कली लोत्र का देंनुड” देंमाक्त। मिनु मेकोम “दुम्ब देंनो” देंमाक्त। 15 मिनु अदोनीयाहम “राज्य आं के बाक्त। गे मेको तुइक्नीनी। मिनु इस्राएली नेल्लेम आं कली पिप दुम्ब, दे मिम्शो बाक्तेक्म। तन्न मारेइ मारेइ दूली दुम्त। मुल राज्य आं लोकब के दुम्त। मारदे हना परमप्रभु यावे आ दाक्शो मेकोन बाक्त। 16 मुल गो इन कली लोत्र का पाइनुड। आं पशो लोत्र मदुम्ब मदेनीन” देंमाक्त। मिनु मेकोमी “मेको मार बाक्बा? देंनो” देंमाक्त। 17 मिनु अदोनीयाहम “गो शुनेम सहर डा अबीशाग कली ग्युंवे पचा तडल, दे पिप सोलोमन कली पुनीन। मेकोमी इन कली मदुम्ब मदेब” देंमाक्त। १राजा १:३; २सामुएल ३:७ 18 मिनु बाथशेबाम “मेको रिम्शो बाक्ब। गो इ पर्बम पिप नु लोत्र पाइनुड” देंमाक्त।

19 मोपतीके बाथशेबा अदोनीयाह आ पर्बम लोत्र पथ पिप सोलोमन आ बाक्तीक लमाक्त। मिनु पिप मेको कली मान पथ बोक्माक्त। मिनु आ ममा आ डोंइती बाप्शा मान पा, आ नित्तीकेम निस्से बाक्त। पिप सोलोमनम आ ममा कली नित्चा कली नित्तीक का चाक्पदा बाक्त। मिनु मेको पिप आ ग्युरा गे निस्से बाक्त। 20 मिनु मेकोमी “गो गे नु आइक्च लोत्र का पचा माल्नुड। मेको आं लोत्र मदुम्ब मदेनो” देंमाक्त। मिनु पिपमी आ ममा कली “मार देंनीनी? आं ममा गो इन लोत्र मदुम्ब मदेनुड” देंमाक्त। 21 मिनु मेकोमी “इ लोकब अदोनीयाह नु शुनेम सहर डा अबीशाग आस कली ग्युंवे पाइक्सी” देंमाक्त। 22 मिनु पिप सोलोमनम आ ममा कली “गे मारदे शुनेम सहर डा अबीशाग नु अदोनीयाह आस कली ग्युंवे पाइक्चा कली पुंइनी? गे मेको कली राज्य पुंइतीनी हना यो दुम्ब। मारदे हना मेको आं ठेयब लोकब बाक्ब। चढ़ेब अबीयाथार नु सेरूयाह आ तौ योआब आस पर्बम यो पुनीन” देंमाक्त। १राजा १:६-७ 23 मिनु पिप सोलोमनम परमप्रभु यावे आ नें थिशा “एको आ पर्बम अदोनीयाह साइक्चा मपुंइसाक्व हना, परमप्रभुम आं कली थम मरिम्शो सजाइ गेयील” दे कसम जवा बाक्त। 24 मनु “मुल आं कली आं आफ दाऊद आ राज्यम वोइक्ब नु आ पाइनुड देशो लोत्र खाप्शा, आं थर आन कली सेल्ब परमप्रभु यावे ब्रोंइशा बाक्शो खोदेशो पा, गो कसम जशा देंनुड, अदोनीयाह मुलाक्तीन साइक्चा पुंइसीब” देंमाक्त। 25 मेको नोले पिप सोलोमनम येहो-यादा आ तौ बेनायाह कली “अदोनीयाह कली तुप्शा सतो” दे हुकुम गेवा बाक्त। मिनु मेकोम अदोनीयाह कली तुप्शा सदा बाक्त।

26 मिनु पिपम चढ़ेब अबीयाथार कली “अनाथोथम बाक्शो इ खिंम लावो। गे साइक्चा पुंइसीब बाक्नेवे। मो हना यो मुल गो इ कली मसाइक्नन। मारदे हना गे आं आफ दाऊद आ डोंइती परमप्रभु यावे आ सन्दोस कुरब बाक्ते। मिनु गे मेको आ श्येत नेल्लेम बाक्शो बाक्ते” देंमाक्त। १राजा १:७; १सामुएल २२:२०-२३; १सामुएल ३०:७; २सामुएल १५:२४ 27 मोपतीके सोलोमनम अबीयाथार कली परमप्रभु यावे कली चढ़ेतीक गेय रे गुंइदा बाक्त। मोपा परमप्रभु यावेमी शिलोम एली आ खिं आ पर्बम देशो लोत्र गाम्माक्त। १सामुएल २:३१-३२

28 मिनु मेको लोत्र नेल्ल योआबम नेना बाक्त। मेको अब्सालोम गे ममाइ, तन्न अदोनीयाह गे बाक्शो बाक्माक्त। मिनु योआब प्रोक्शा परमप्रभु यावे आ ताम्बुम लमाक्त। मिनु चढ़ेतीक आ ग्रोत्र ग्याइश्शा बाक्माक्त। १राजा १:५१ 29 मिनु पिप सोलोमनम “योआब प्रोक्शा लशा, परमप्रभु यावे आ ताम्बुम चढ़ेतीक आ नेक्था जाक्दीश्शा बाक्शो बाक्ब” देशो लोत्र नेना बाक्त। मिनु मेकोम येहो-यादा आ तौ बेनायाह कली “योआब कली तुप्शा सतो” दे अरेशा सोइक्ता बाक्त। प्रस्थान २१:१२-१४ 30 मोपतीके बेनायाह परमप्रभु यावे आ ताम्बुम ओव्रशा, योआब कली “पिपम लाङगा गूडो देशो बाक्ब” दे मदा बाक्त। तन्न मेकोम “गो एक उइ बेक्नुड” देंमाक्त। मिनु बेनायाहमी लशा पिप कली योआब आ लोत्र नेंपदा बाक्त। 31 मिनु पिपमी बेनायाह कली “मेको आ देशो खोदेशो पावो। मेको कली साइश्शा थिमीन। मोपा योआब आ मोशा हुश ख्राक्श पोक्शो दोस गो नु आं आफ आ खिं रे क्याम्दीन। 32 मिनु परमप्रभु यावेमी मेको आ हुश ख्राक्श पोक्शो मेको आ पियामीन मोइक्ब। मारदे हना मेकोमी आं आफ दाऊद आ मतुइक्थु आ क्येडा ठीक पाइब इस्राएल डा लडाइ पाइब आन ठेयब मुर निक्शी नेर आ तौ आबनेर नु येथेर आ तौ यहूदा डा ठेयब मुर आमासा आस कली साइश्शो बाक्त। १राजा २:५ 33 मेको आस हुश आ दोस गेना हना यो योआब नु मेको आ तौ चच आन पिया तार लील। तन्न दाऊद नु मेको आ तौ चच आन तार, मेको आन खिंम नु आन राज्यम परमप्रभु यावे आ डोंइती गेना हना यो थुं नाइश्शा बाक्तीक दुम्ल” देंमाक्त। 34 मोपतीके येहो-यादा आ तौ बेनायाह इर लमाक्त। मिनु योआब कली तुप्शा सदा बाक्त। मिनु मेको कली गोरशो रागी, आ खिं आ नेक्था आ रूम थिम्मे बाक्त। 35 मिनु पिपमी येहो-यादा आ तौ बेनायाह कली योआब आ पा डा लडाइ पाइब आन ठेयब मुर सेला बाक्त। मिनु चढ़ेब अबीयाथार आ पा डा सादोक कली चढ़ेब सेला बाक्त। १राजा ४:४

36 मेको नोले पिपमी शिमेइ कली ब्रथ सोइशशा, मेको कली “यरूसलेममी खिं का सेल्शा, मेक उइ बाक्को। मिनु सहर प्रॉइशा तेइ मलावो। 37 सहर प्रॉइशा, किद्रोन खोल्सा शोकसाक्वे हना, गे थमा पा साइक्चा पुंडसीनेवे। मो पाप्तीवी हना, इ हुश आ दोस इ पियामीन मोंइसीब” दे मदा बाक्त। 38 मिनु शिमेइम पिप कली “गे मार देनी मेको रिम्शो बाक्ब। आं प्रभु पिपम आ वाइल कली देशो खोदेशो पा गो पाइनुड” देमाक्त। मोपतीके शुश नाक्त सम्म शिमेइ यरूसलेममीन बाक्माक्त।

39 तन्न बर्स सां नोले मेको आ वाइल निक्शी प्रोक्शा, गाथ डा पिप माकाह आ तौ अकीश आ बाक्तीक लसा बाक्त। मिनु शिमेइम “इ वाइल निक्शी गाथ सहरम बाक्ताक्स” देशो लोव्र नेना बाक्त। 40 मिनु शिमेइ रीब पा आ गधाम लगम पाइशशा, आ वाइल आस कली माल्थ गाथ डा अकीश आ बाक्तीक लमाक्त। मोपा शिमेइमी गाथ रे आ वाइल निक्शी आस कली चाक्सी बाक्त। 41 मिनु पिप सोलोमन कली शिमेइ यरूसलेम रे गाथ जाक्दीशशा लेशशा जाक्शो लोव्र नेपदमे बाक्त। 42 मिनु पिपमी शिमेइ कली ब्रथ सोइक्ता बाक्त। मिनु मेको कली “मार, गो इ कली परमप्रभु यावे आ नें थिशा कसम जपाइशशो मनडा डा? गे अर्को रागी लचा कली एको सहर रे गाक्ते हना, साइक्चा पुंडसीनेवे, देशो मनडा? मिनु मेना गे आं कली ‘इन देशो लोव्र रिम्शो बाक्ब देशो मनवे?’ मेना गे ‘इन देशो टीनुड’ देशो नवे। 43 मिनु मारदे गे परमप्रभु यावे आ नें थिशा कसम जशो नु आं देशो लोव्र मटिवी?” दे हिल्लो पवा बाक्त। 44 मिनु पिपम शिमेइ कली “आं आफ दाऊद आ पबर्म पशो मरिम्शो नेल्ल गे तुइशशो बाक्नेवे। मुल परमप्रभु यावेमी मेको मरिम्शो पशो आ क्येक्क इ पियामीन मोइक्ब। १राजा २:८ 45 तन्न पिप सोलोमन आसीक ताइब। मिनु परमप्रभु यावे आ डोंइती दाऊद आ राज्य गेना हना यो लीब” देमाक्त। 46 मिनु पिपमी येहो-यादा आ तौ बेनायाह कली हुकुम गेवा बाक्त। मिनु मेको लशा, शिमेइ कली तुप्शा सदा बाक्त। मिनु मेको बेक्माक्त। मोपा पिप सोलोमन आ राज्य बोल्यो दुम्माक्त।

3

सोलोमनम तुइक्तीक थुं पुंडशो

२इतिहास १:१-१२

1 सोलोमन आ ग्युबेम पतीके इजीप्त डा पिप फाराओ आ खिं डा मुर दुम्माक्त। मिनु सोलोमनम फाराओ आ तमी नु ग्युबे पवा बाक्त। मिनु मेको कली पिप आ खिं, परमप्रभु यावे आ खिं नु यरूसलेम डा गारो सेल्ने मथुमा सम्म दाऊद आ सहरम चाक्शा वोदा बाक्त। ब्यवस्था २३:८; १राजा ११:१-२ 2 मेना सम्म मुरपुकीम डांडा मेर चढ़ेबाक्मा बाक्त। मारदे हना परमप्रभु यावे आ नें कली मान पा तेकोइ खिं मसेल्शो बाक्माक्त।

3 सोलोमनम चहिं परमप्रभु यावे कली दाक्शा, मेको आ लांम गाक्शा आ आफ दाऊद आ पशो खोदेशो पवा बाक्त। तन्न मेकोमी डांडा डा थानम चढ़ेशा, धूप चोइबाक्माक्त। 4 काले पिप सोलोमन गिबोन सहरम मार मार चढ़ेथ लमाक्त। मारदे हना मेको डांडा नेल्ल क्येडा ठेयब चढ़ेतीक बाक्माक्त। मिनु मेको चढ़ेतीकेम सोलोमनम हजार का मार मार चोशा चढ़ेतीक चढ़ेवा बाक्त। १इतिहास २१:२९; १राजा ९:२ 5 मिनु मेको नाक्दो परमप्रभु यावे गिबोनम सोलोमन आ डोमुम जाक्शा “गे मार पुंडनेवे, मेको गेनन” देमाक्त। 6 मिनु सोलोमनम “गे इन गेय पाइब, आं आफ दाऊद कली इन ठेयब गेना हना यो दाक्तीक कोंइताक्नी। मारदे हना मेको इन कली मप्रॉइथु, ठीक पाइब नु रिम्शो थुं पाइशशो इन नोले खोइक्ब मुर बाक्त। मिनु गे मेको कली इन ठेयब नु गेना हना यो दाक्तीके कोंइशो बाक्तीनी। मिनु मुलाक्ती मेको आ नोले आ नित्तीकेम चोइक्चा कली मेको कली तौ का गेतीनी। १राजा १:४८ 7 मिनु मुल परमप्रभु यावे, आं परमप्रभु गे इन गेय पाइब, आं कली, आं आफ दाऊद आ पा डा पिप सेल्तीनी। मो हना यो गो आइक्च आल का ला बाक्नुड। मिनु गो दोपा लाडगा लचा माल्नुडा, दोपा जाक्चा माल्नुडा, मेको मतुइक्नुड। 8 मुल गो इन गेय पाइब इन योव्रशो मुर इस्राएली आन दातेम बाक्शो बाक्नुड। मेको शुश नु हिक्ने मचाप्चा डा बाक्नीम। १राजा ४:२० 9 मोपतीके इन गेय पाइब, आं कली इन मुर आन कली ठीक पा सासन पचा कली रुप्तीक थुं गेयीनी। मिनु गो रिम्शो नु मरिम्शो तिल्स जोक्नुड। मो मदुम्त हना, एको इश्का इन मुर आन कली सुम सासन पने चाप्नीमी डा” देमाक्त।

10 मिनु परमप्रभु यावे सोलोमनम मेको लोव्र पुंडशो तशा, ग्येरसे बाक्त। 11 मोपतीके परमप्रभुमी मेको कली “गेमी एको लोव्र पुंडतीके, तन्न आंम इ पबर्म शुश ब्रोंइतीक, शोंप चेम्तीके नु इ जोरी सत्रु आन कली साइक्तीक मपुंडतीके, मार ठीक बाक्म, दे रुप्तीक थुं पुंडतीके, 12 मुल गो इ पुंडशो गेनुड। गो थमा पा इ कली जोक्तीक तुइक्तीक थुं नु रुप्तीक थुं गेनन। डोंइती इ खोदेशो अर्को सुइ मबाक्म। मिनु नोले यो इ खोदेशो सुइ मदुम्नीम। ब्यवस्था २६:१४

१३ मेको प्रोइशा यो, गो अर्को इ मपुंइशो यो गेनन। गे मबेकडे सम्म इ कली शोप नु मान ततीके यो गेनन। तेकोइ पिपपुकी गे नु उइक्थ मदुम्नीम। मती ६:३३ १४ मिनु गे इ आफ दाऊदम खोदेशो पा, आं लांम गाक्ते हना, आं फुल्लुम मुशा ब्रेक्शो लोत्र नु आं शेंतीके टिप्तीवी हना, गो इ कली शुश ब्रोंइचा गेनन” देंमाक्त।

१५ मिनु नोले सोलोमन सेसे बाक्त। मिनु एको दा डोमु कका बाक्त, दे तुइक्ता बाक्त। मिनु मेको नोले यरूसलेम लेम्माक्त। मिनु परमप्रभु यावे आ कबल पशो सन्दोस आ नेक्था रम्माक्त। मिनु मेकेर चोशा चढ़ेतीक नु दुशा बाक्तीक आ पबर्म चढ़ेतीके चढ़ेवा बाक्त। मिनु मेकोमी आ गेय पाइब नेल्ल आन कली भोज का गेमी बाक्त।

सोलोमन आ निसाफ

१६ मिनु नोले तेल्लेम मीश मुर निक्शी पिप आ डोंइती जाक्शा, राप्सा बाक्त। १७ मिनु मेको आस दाते डा काम “आं प्रभु, एको मीश मुर नु गो खिं कामीन बाक्नस्कु। मिनु गो एको नु बाक्डानु, आल का थीता। १८ मिनु गो आल थिडा आ नाक्त सां नोले एकोमी यो आल का थिप्तु। मेकेर गो निक्शी ला बाक्शो नस्कु। मेको खिंम आंस निक्शी डा लाक्शा, अर्को सुइ मबाक्म। १९ मिनु नाक्दो एको मीश मुरुम आ तौ कली चिप्शा सदा बाक्त। २० मिनु नाक्दो उइक्थ दुम्मेनु, गो, इन वाइलीम निन्द्रा पडा ना एको बोक्शा जाक्शा, आं तौ लदा बाक्त। मिनु आ बेक्शो तौ चहिं आं थुकुम वोदा बाक्त। २१ मिनु आ दीसा सुनी गो बोक्शा ‘आल दूध तुंइदु’ देंडानु दा, आल बेक्शो बाक्त। तन्न गो मेको कली सुनी रिम्शो पा शिरशा कोत्रडुनु, मेको आं थिशो तौ ममाइ बाक्त” देंमाक्त। २२ मिनु मेको अर्को मीश मुरुम “ममाइ सेस आल आं तौ बाक्ब। बेक्शो इ के बाक्ब” देंमाक्त। तन्न डोंइती डा मीश मुरुम “ममाइ बेक्शो तौ इ के बाक्ब। सेस चहिं आं तौ बाक्ब” देंमाक्त। मोपा मेको निक्शी पिप आ डोंइती जिम्से बाक्त।

२३ मिनु पिपम “कामी ‘सेस तौ आं के बाक्ब। बेक्शो चहिं इ के बाक्ब’ देंत। मिनु अर्कोम ‘ममाइ बेक्शो तौ इ के बाक्ब। सेस चहिं आं तौ बाक्ब’ देंत” देंमाक्त। २४ मिनु पिपम “आं कली तरवार का चाक्शा गेयीनी” देंमाक्त। मिनु मेकोपुकीम पिप कली तरवार का चाक्शा गेमे बाक्त। २५ मिनु पिपम “मेको सेस आल कली उइक्थ पा क्योरीन। मिनु उइक्थ भाग का, का कली नु अर्को उइक्थ भाग का अर्को कली गेने” देंमाक्त। २६ मिनु मेको सेस आल आ ममाम आ तौ कली शिशी पा पिप कली “ए प्रभु, एको सेस आल एकोमीन लदल। एको आल कली मसतीन” देंमाक्त। मिनु अर्कोम चहिं “एको आल गे यो लाइक्चा मताइनेवे, गो यो लाइक्चा मताइनुड। एको कली उइक्थ पा क्योरीन” देंमाक्त। यसैया ४९:१५ २७ मिनु पिपम आ निसाफ डा लोत्र नेंपाइशशा “एको सेस आल डोंइती डा मीश मुर कली गेने। एको आल कली मसतीन। आल आ ममा एकोन बाक्ब” देंमाक्त। २८ मिनु पिप आ निसाफ नेंशा, इस्राएली नेल्ल आन थुंमी रिम्शो पशो तुइशशा, हिंमा बाक्त। मारदे हना मेकोपुकीम ठीक पा निसाफ पचा कली मेको आ थुंम परमप्रभु आ रुप्पाइक्तीक थुं बाक्त, दे तुइक्तमे बाक्त।

४

सोलोमन आ गेय पाइबपुकी

१ मोपा पिप सोलोमनम इस्राएल नेल्लेम सासन पवा बाक्त। २ मेको आ ठेयब गेय पाइब सु सु बाक्मा बाक्त देंशा हना, सादोक आ तौ अजारयाह चढ़ेब बाक्माक्त। ३ शीशा आ तौ एली-होरेफ नु अहीयाह ब्रेक्ब बाक्सा बाक्त। अहीलुद आ तौ येहो-शाफात हिक्शा ब्रेक्शा वोइक्ब मुर बाक्माक्त। ४ येहो-यादा आ तौ बेनायाह लडाइ पाइब आन ठेयब मुर बाक्माक्त। सादोक नु अबीयाथार चढ़ेब बाक्सा बाक्त। १ राजा २:३४-३५; २ सामुएल २३:२० ५ नाथान आ तौ अजारयाह सासन पाइब आन ठेयब मुर बाक्माक्त। नाथान आ तौ जाबुद चढ़ेब नु पिप आ वारच बाक्माक्त। ६ अहीशार पिप आ खिं डा मारेइ मारेइ कोत्रब मुर बाक्माक्त। अब्दा आ तौ अदोनीराम गेय पाइब आन कली कोत्रब बाक्माक्त। १ राजा ५:२८

७ सोलोमनम इस्राएल नेल्लेम १२ जना सासन पाइब वोइशशा बाक्माक्त। मेकोपुकीम पिप कली नु पिप आ खिं डा मुर आन कली जचा थोत्रक गारपाइक्बाक्मा बाक्त। मेको नेल्लेमी बर्सम महिना का का कली जचा थोत्रक चाक्तीक गेय पाइक्बाक्मा बाक्त। १ सामुएल ८:११-१८ ८ मेको आन नें मार मार बाक्मा बाक्त देंशा हना, बेन-हुर, एफ्राइम पहाड डा ठेयब मुर बाक्माक्त। बेन-हुर देंशो हुर आ तौ बाक्ब। ९ बेन-देकेर, माकाज, शा-आल्बीम, बेथ-शेमेश नु एलोन-बेथ-हानान सहर डा ठेयब मुर बाक्माक्त। १० बेन-हेसेद, अरुब्बोथ डा ठेयब मुर बाक्माक्त। मेको आ जिम्माम सोकोह नु हेफेर डा रागी नेल्ल बाक्मा बाक्त। ११ बेन-अबीनादाब नाफाथ-डोर डा ठेयब मुर बाक्माक्त। बेन-अबीनादाबम सोलोमन आ तमी थाफाथ कली गुंवे पशो बाक्माक्त। १ सामुएल १६:८ १२ अहीलुद आ तौ बाना

तानाक सहर, मेगीददो नु बेथ-शेआन डा ठेयब मुर बाक्माक्त। बेथ-शेआन चारेथन आ नेक्था नु येज्जेल आ दी बाक्ब। मेको बेथ-शेआन रे आबेल-मेहोलाह योकमाम सहर आ अर्को पटटी सम्म डा ठेयब मुर बाक्माक्त। 13 बेन-गेबेर रामोथ-गिलाद डा ठेयब मुर बाक्माक्त। मेको आ जिम्माम मनस्से आ तौ याइर आ गिलादम बाक्शो गाउंपुकी बाक्मा बाक्त। मेको के बाशान रागी डा अरगोब गारो हिरशो ६० ओटा ठेयब सहर यो बाक्मा बाक्त। मेको गारो डा लाप्चोम कांसा के आग्लो बाक्मा बाक्त। गन्ती ३२:४१ 14 इददो आ तौ अहीनादाब महा-नाइम डा ठेयब मुर बाक्माक्त। 15 अहीमाज नाप्ताली डा ठेयब मुर बाक्माक्त। मेकोम सोलोमन आ तमी बासेमाथ नु ग्युंबे पशो बाक्माक्त। 16 हुशाइ आ तौ बाना आशेर नु बेआलोथ डा मुर आन ठेयब मुर बाक्माक्त। 17 पारुआह आ तौ येहो-शाफात इस्साकार डा ठेयब मुर बाक्माक्त। 18 एला आ तौ शिमेइ बेन्यामीन रागी डा ठेयब मुर बाक्माक्त। 19 ऊरी आ तौ गेबेर गिलाद डा ठेयब मुर बाक्माक्त। मेको एमोरी आन पिप सीहोन नु बाशान रागी डा पिप ओग आस रागी डा यो ठेयब मुर बाक्माक्त। मिनु यहूदा रागी कली कोत्रब अर्को मुर मबाक्मा बाक्त।

सोलोमन आ राज्य

20 यहूदा नु इस्राएल डा मुरपुकी समुन्द्र डा बाल्वा खोदेशो पा शुश बाक्मा बाक्त। मेकोपुकी जशा तूशा ग्येरशा बाक्बाक्मा बाक्त। १राजा ३:८; उत्पत्ती १३:१६ 21 सोलोमनम युफ्रेटीस खोला रे पलिस्ती आन रागी इजीप्त डा सांद सम्म डा राज्यम सासन पशो बाक्माक्त। मिनु मेको रागीम सोलोमन कली तिरो थाप्बाक्मा बाक्त। मिनु मेकोपुकी सोलोमन ब्रोंइम सम्म मेको आ गेय पाइब दुम्शा बाक्मा बाक्त। उत्पत्ती १५:१८

22 सोलोमन आ खिंमी काबु डा जचा थोत्रक ३० कोर रिम्शो फस नु ६० कोर अरु फस बाक्मा बाक्त। कोर का २२० लिटर डा ठेयब पुक्तीके बाक्ब। 23 मिनु १० ओटा दोम्शो ब्यफ, २० ओटा खर्कम योत्रशो ब्यफ नु सहे का क्यारश भेडा बाक्मा बाक्त। मेको प्रोंइशा किश्श, रोकेश नु दोम्शो हांसपुकी यो बाक्मा बाक्त। 24 मारदे हना मेकोम युफ्रेटीस खोला आ पच्छिम गे डा रागी तिफसाह रे गाजा सम्म युफ्रेटीस खोला आ पच्छिम गे बाक्ब पिप नेल्ल आन कली सासन पशो बाक्माक्त। मेको आ राज्य नेल्ल लडाइ मदुम्थु थुं नाइश्शा बाक्शो बाक्मा बाक्त। 25 सोलोमन बाक्म सम्म दान रे बेयर-शेबा सम्म यहूदा नु इस्राएल रिम्शो दुम्शा बाक्सा बाक्त। मुर नेल्ल आंम आंम अडगुर नु फोत्रशी जशा बाक्मा बाक्त। लेवी २५:१८ 26 सोलोमन के ४ हजार बग्गी कीब शारा आन कली वोइक्तीक खिं बाक्माक्त। मेको के १२ हजार शारा डोइक्ब बाक्मा बाक्त। २इतिहास ९:२५ 27 मिनु मेको १२ जना सासन पाइबपुकीमी महिना महिनाम पाल्पालो पा सोलोमन नु मेको नु बाक्शा जाइब आन कली जचा थोत्रक चाक्बाक्मा बाक्त। मोपा चाक्मेनु, मेकोपुकीम तेकोइ थोत्रक मखाइक्थु चाक्बाक्मा बाक्त। 28 मेकोपुकीमी शारा नु बग्गी कीब शारा आन कली यो क्योत्रज नु नल चाक्बाक्मा बाक्त। नेल्लेम आन पचा डा गेय पाइबाक्मा बाक्त।

सोलोमन आ जोक्तीक तुइक्तीक

29 परमप्रभुमी सोलोमन कली शुश जोक्तीक तुइक्तीक थुं गेवा बाक्त। मेको आ रुप्तीके समुन्द्र डा बाल्वा खोदेशो पा शुश बाक्माक्त। 30 पूर्व डा मुर नेल्ल नु इजीप्त डा मुर नेल्ले आन दातेमी सोलोमन के खोदेशो जोक्तीक तुइक्तीक थुं सुइ के मबाक्मा बाक्त। 31 मिनु मेको अरु नेल्ल आन क्येडा जोक्ब तुइक्ब दुम्माक्त। मेको एजाह आ खिं डा एथान नु माहोल आ तौ हेमान, कल्कोल नु दारदा आन क्येडा यो शुश जोक्ब तुइक्ब बाक्माक्त। मिनु मोपा आ जोक्तीके तुइक्तीके रागी रागी डा मुर नेल्ल आन दातेमी ब्रमाक्त। 32 मेकोमी हजार सां अर्ती ब्रेक्ता बाक्त। मिनु हजार का ५ ओटा कुम्सो सेला बाक्त। उपदेसक १२:९ 33 मेकोमी रवा आन पर्वम लेबानोन डा लाइश्शो रवा रे लाइश्शा, गारोम वाब हिस्सोप माइश्शो सुप्तीक बोट सम्म आन पर्वम ब्रेक्ता बाक्त। मिनु मेकोमी चिक्ब, जन्तु, खपीम गेशा गाक्ब जन्तु नु डांइ नेल्ल आन पर्वम यो ब्रेक्ता बाक्त। 34 रागी डा शुश मुर सोलोमन आ जोक्तीक तुइक्ती नेंचा तुइक्चा कली जाक्बाक्मा बाक्त। रागी डा पिपपुकीम सोलोमन आ पर्वम नेंशा, मेको आ लोत्र नेंचा कली मुर आन कली सोइक्बाक्मा बाक्त।

5

परमप्रभु आ खिं सेल्चा चिक्शो
२इतिहास २:-

1 टायर डा पिप हीराममी सोलोमन आ आफ आ पा डा पिप दुम्शो बाक्ब देशो लोत्र नेना बाक्त। मिनु मेकोमी आ गेय पाइब आन कली सोलोमन आ बाक्तीक सोइक्ता बाक्त। मारदे हना मेको गेना हना यो दाऊद आ वारच दुम्शा बाक्शो बाक्माक्त। २सामुएल ५:११ 2 मिनु सोलोमनम हीराम कली लोत्र सोइक्ता बाक्त। 3 मार लोत्र सोइक्ता बाक्त देशा हना “परमप्रभु यावे, आं आफ दाऊदम आ परमप्रभु आ नें कली मान पा खिं का सेल्चा थुं पशा यो सेल्ने मचब। मारदे हना मेको आ एर ओंथ नेल्ल डा जोरी सत्रु नु लडाइ दुम्तीके नु परमप्रभु यावेमी मग्रापदा सम्म मोदेशो दुम्शो बाक्त। गे मेको लोत्र नेल्ल तुइक्नीनी। 4 तन्न मुल परमप्रभु यावे, आं परमप्रभुमी आं कली सुइ नु लडाइ मपपाइक्थु, थुं नाइश्शा बाक्चा गेती। आं कली लडाइ तोशा श्येत गेब सुइ मबाक्नीम। 5 मोपतीके मुल परमप्रभु यावेमी आं आफ दाऊद कली देशो खोदेशो पा, गो परमप्रभु यावे, आं परमप्रभु आ नें कली मान पा, खिं का सेलु देंती। परमप्रभु यावेमी आं आफ दाऊद कली ‘गे इ पा डा पिप दुम्ब इ तौमी आं कली मान पा खिं का सेल्ब’ देशो बाक्त। २सामुएल ७:१३ 6 मोपतीके गे आं कली लेबानोन रे लाइश्शो रवा क्योरशा चाक्चा हुकुम गेयीनी। आं गेय पाइबपुकी, इन गेय पाइबपुकी नु गारशा गेय पाइनीम। मिनु गे इन गेय पाइब आन कली दोशो गाल्च गेचा देंनीनी, गो मेको गेनुडमी। सीदोनी खोदेशो पा शी क्योरस जोक्ब एक आंइ दातेमी सुइ मबाक्नीम” दे लोत्र कुरब मुर सोइक्ता बाक्त।

7 मिनु हीरामम सोलोमन आ लोत्र नेंशा थाम्पा ग्येरसीशा “परमप्रभु यावे ठेयब बाक्ब। मारदे हना मेकोम दाऊद कली इश्का मुर आन कली सासन पाइब जोक्ब तुइक्ब तौ का गेप्टु” देंमाक्त। १राजा १०:९ 8 मिनु हीरामम सोलोमन कली “गो इन सोइश्शो लोत्र नेंता। इन माल्शो नेल्ल गेनुड। लेबानोन डा लाइश्शो रवा नु अरु रवा आन शी खाप्शा गेनुड। 9 आं गेय पाइबपुकीम मेको रवा लेबानोन रे समुन्द्र सम्म चाक्नीम। मिनु गो मेको शी फ्रेंपाइश्शा, इन देंतीक सम्म समुन्द्रम योल्पाइश्शा सोइक्पाइक्नुडमी। गो मेको आन कली इन देंतीकेम प्राक्पाइक्नुडमी। मिनु गे मेको लाइक्ने चाप्नीनी। मिनु गे आं खिं कली जचा थोत्रक सोइश्शा आं मिम्शो खपीन” दे लोत्र कुरब मुर सोइक्ता बाक्त। 10 मोपा हीरामम सोलोमन कली माल्शो लेबानोन डा लाइश्शो रवा आ शी नु अरु शी नेल्ले सोइक्ता बाक्त। 11 मिनु सोलोमनम चहिं मेको आ पा डा हीराम आ खिं कली २० हजार कोर चेरब नु २० कोर रिम्शो तेल सोइक्ता बाक्त। मोपा सोलोमनम बर्स बर्सम मेको सोइक्ता बाक्त। कोर का २२० लिटर बाक्ब। १राजा ५:२ 12 मिनु परमप्रभु यावेमी कबल पा देशो खोदेशो पा सोलोमन कली जोक्तीक तुइक्तीक थुं गेवा बाक्त। मिनु हीराम नु सोलोमन आस दातेमी दुशा बाक्तीक दुम्माक्त। मिनु मेको निम्फा गारशा बाक्स, दे सल्ला पमुसा बाक्त।

13 मिनु पिप सोलोमनम इस्राएल नेल्ल रे मोशा गेय पाइब ३० हजार मुर आन कली खुप्तीमी बाक्त। 14 मिनु मेकोमी मेको आन कली महिना महिनाम १०, १० हजार पा लेबानोनम सोइक्तीमी बाक्त। मोपा मुरपुकी महिना का लेबानोनम नु महिना निक्शी आन खिंम बाक्मा बाक्त। मेको गेय पाइब आन कली कोत्रब अदोनीराम बाक्माक्त। १राजा ४:६ 15 सोलोमन के ७० हजार कुरब नु ८० हजार फुल्लु खोइक्ब मुर पहाडम बाक्मा बाक्त। 16 सोलोमन आ गेय पाइब आन कली कोत्रब ३३ सहे ठेयब मुर बाक्मा बाक्त। 17 मिनु पिप आ अरेशो खोदेशो पा, परमप्रभु यावे आ खिंम जग वोइक्चा कली रिम्शो पा फुल्लु खोइश्शा गुंइदमे बाक्त। 18 मोपा सोलोमन नु हीराम आस मुरपुकी नु गेबाल डा मुरपुकीम खिं सेल्चा कली फुल्लु खोइश्शा शी ठीक सेल्मे बाक्त। यहोसु १३:५; इजीकीएल २७:९

6

सोलोमनम परमप्रभु आ खिं सेल्शो २इतिहास ३:१-१४

1 इस्राएली इजीप्त रे गूशा जाक्शो ४ सहे ८० बर्स दुम्शो बाक्माक्त। मिनु सोलोमनम इस्राएली आन कली हुकुम पशो ४ बर्स नु महिना निक्शी डा जिव महिनाम परमप्रभु यावे आ खिं सेल्चा गोवा बाक्त। मती १:१७ 2 सोलोमनमी परमप्रभु यावे कली सेल्शो खिं ६० कुबीत लाइश्शो, २० कुबीत ब्रेम्शो नु ३० कुबीत ग्येत्थ लाइश्शो बाक्माक्त। कुबीत का ०.५ मिटर खोदेशो बाक्ब। 3 मेको परमप्रभु यावे आ खिं आ डोंइती डा पिंडी आ ब्रेम्शो नु आ लाइश्शो २० कुबीत बाक्माक्त। मेको खिं आ डोंइती गे १० कुबीत लाइश्शो गूशो बाक्माक्त। कुबीत का ०.५ मिटर खोदेशो बाक्ब। १राजा ७:१५-२१ 4 मेकोमी खिं आ दी गे गारोम रोक्तीक पाइश्शो झेलपुकी सेल्पदा बाक्त। 5 नोले मेकेर चोत्रखो नु नेल्ल क्येडा चोत्रखो बाक्शो खिं आ एर ओंथ डा गारो नेल्लेम बोइश्शो कोठापुकी सेल्पदा बाक्त। 6 मिनु नेल्ल क्येडा आगा डा तला ५ कुबीत ब्रेम्शो बाक्माक्त। मिनु दाते डा तला ६ कुबीत ब्रेम्शो नु नेल्ल क्येडा आ तार

डा तला ७ कुबीत ब्रेमशो बाक्माक्त। मेकोमी ठेयब गारो आ एर ओंथ नेल्ले लाडगा गे पाइद्रा वोइक्चा कली गारो प्रोव्रपदा बाक्त। मोपा पाइद्रा खिं डा गारो मओव्रचा डा पा सेल्पदा बाक्त।

7 खिं सेल्मेनु, फुल्लु खांनीमीन खोदमे बाक्त। मेको खिं सेल्मेनु घन, खा नु मारेइ फलाम के या आन रेयके मनेसे बाक्त। 8 नेल्ल क्येडा आगा डा तला डा ओव्रतीक दक्खिन गे बाक्माक्त। मिनु मेकेर रे दाते डा नु आ तार डा तला लचा कली हिरशो थेंकापुकी बाक्मा बाक्त। 9 मोपा मेकोम लेबानोन डा लाइशशो रवा के पाइद्रा नु फलेक साप्शा खिं सेल्ने थुम्पदा बाक्त। 10 मेकोम खिं आ एर ओंथ नेल्ल आइक्च आइक्च कोठा सेल्पदा बाक्त। मेको कोठा नेल्ल ५, ५ कुबीत लाइशशो बाक्मा बाक्त। मिनु मेको कोठा नेल्ल लेबानोन डा लाइशशो रवा आ शीम खिं नु बोइशशो बाक्मा बाक्त।

11 मिनु परमप्रभु यावेम सोलोमन कली लोव्र पवा बाक्त। 12 मार लोव्र पवा बाक्त देशा हना “एको इ सेल्शो खिं आ पबर्म लोव्र पाइनुड। गे आं फुल्लुम मुशा ब्रेक्शो लोव्र पाप्तीवी हना, आं देशो पतीक लोव्र नु आं शेंशो नेल्ल पशा, आं लांम गाक्ते हना, इ आफ दाऊद नु थोक्शा पशो कबल गे नु पाइनुड। २सामुएल ७:१३ 13 मिनु गो इस्राएल डा आं आल आन दातेम बाक्नुड। मिनु गो आं मुर इस्राएली आन कली गेनायो मप्रौइनुडमी” देमाक्त। प्रस्थान २९:४५

14 मोपा सोलोमनम परमप्रभु यावे आ खिं सेल्ने थुमा बाक्त। प्रेरित ७:४७ 15 मेकोमी खिं आगा गे डा गारोम लेबानोन डा लाइशशो रवा आ शी के फलेक गारपाइशशा क्येप्पदा बाक्त। खप रे इर डा शी सम्मन शी के फलेक गारपाइशशा क्येप्पदा बाक्त। मिनु खपीम चहिं अरु रवा डा फलेक ब्रपदा बाक्त। 16 सोलोमनमी मेको खिं आगा आ नोले गे २० कुबीत लाइशशो नेल्ल क्येडा चोव्रखो कोठा सेल्पदा बाक्त। मेको कोठा नेल्ले लेबानोन डा लाइशशो रवा आन फलेक गारपाइशशा क्येप्पदा बाक्त। कुबीत का ०.५ मिटर बाक्ब। 17 मेको नेल्ल क्येडा चोव्रखो कोठा आ डोंइती ४० कुबीत लाइशशो बाक्माक्त। १ कुबीत ०,५ खोदेशो बाक्ब। 18 मेको खिं आ आगा गे लेबानोन डा लाइशशो रवा आ शी के फलेकम चहिं लौका नु बोइशशो फू आ बुटा मुशा आप्शो बाक्मा बाक्त। मेको शी नेल्ल मोदेशो बाक्मा बाक्त। मेकेर फुल्लु का यो मताइसीशो बाक्माक्त। 19 मेको आ खिं आ नेल्ल क्येडा आगाम चहिं परमप्रभु यावे आ कबल पशो सन्दोस वोइक्चा कली नेल्ल क्येडा चोव्रखो कोठा सेल्पदा बाक्त। 20 मेको नेल्ल क्येडा चोव्रखो कोठा पुक्शो नु २० कुबीत लाइशशो, २० कुबीत ब्रेमशो नु २० कुबीत ग्येत्थ लाइशशो बाक्माक्त। मिनु मेकोमी मेकेर नेल्ल क्येख सुन क्येप्पदा बाक्त। मिनु मोदेशो पा मेकोमी लेबानोन डा लाइशशो रवा आ शी के सेल्शो चढेतीक कली यो सुनम गिल्पदा बाक्त। कुबीत का ०,५ खोदेशो बाक्ब। १राजा ७:४८ 21 सोलोमनम मेको खिं आगा गे नेल्ल क्येख सुन क्येप्पदा बाक्त। मिनु आगा डा नेल्ल क्येडा चोव्रखो कोठा नेल्ल सुन क्येप्पाइशशा, आ डोंइती सुन के साडलीपुकी क्याइक्पदा बाक्त। 22 मोपा मेकोम खिं आगा नेल्ल सुन क्येप्पदा बाक्त। आगा बाक्तीक डा चढेतीक कली यो सुनम गिल्पदा बाक्त।

23 मेकोमी परमप्रभु यावे आ खिं आगा डा चोव्रखो बाक्तीकेम तेल रवा आ शी के करूब निक्शी सेल्पदा बाक्त। मेको निम्फा १०, १० कुबीत ग्येत्थ लाइशशो बाक्सा बाक्त। कुबीत का ०,५ खोदेशो बाक्ब। प्रस्थान ३७:७-९ 24 करूब आ फ्रां का ५ कुबीत लाइशशो बाक्माक्त। मिनु अर्को यो ५ कुबीत लाइशशो बाक्माक्त। मिनु फ्रां का आ डर रे अर्को फ्रां आ डर सम्म १० कुबीत लाइशशो बाक्माक्त। 25 मोपान अर्को करूब आ फ्रां यो १० कुबीत लाइशशो बाक्माक्त। मारदे हना मेको करूब निम्फा उइक्थ उइक्थ पा खाल का डा बाक्सा बाक्त। 26 मेको करूब निम्फा खाल का डा पा १०, १० कुबीत लाइशशो बाक्सा बाक्त। 27 मिनु मेकोमी मेको करूब आस कली परमप्रभु यावे आ खिं डा नेल्ल क्येडा चोव्रखो कोठाम वोदा बाक्त। मेको करूब आस फ्रां प्राक्पाइशशा सेल्शो बाक्माक्त। मोपा करूब का आ फ्रां कामी गारो का कली नु अर्को करूब आ फ्रां कामी अर्को गारो कली थिशो बाक्माक्त। मिनु मेको आस अर्को फ्रां चहिं दातेम थिमुशो बाक्सा बाक्त। 28 मिनु मेकोमी मेको करूब आस कली यो सुनम गिल्पदा बाक्त।

29 मेकोमी परमप्रभु यावे आ खिं डा नेल्ल क्येडा चोव्रखो कोठा आ एर ओंथ नेल्ल, गारो नेल्ल करूब, खजूर रवा नु बोइशशो फु आन बुटा मुशा आप्पदा बाक्त। मेको चोव्रखो कोठा आगा नु लाडगा नेल्ल मोदेशो पा मुशा बुटा आप्पदा बाक्त। 30 मिनु मेकोमी परमप्रभु यावे आ खिं डा नेल्ल क्येडा चोव्रखो कोठा डा खप नेल्ल सुन ब्रपदा बाक्त।

31 मेकोमी नेल्ल क्येडा चोव्रखो कोठा ओव्रचा कली तेल रवा आ शी के लाप्चो निक्शी सेल्पदा बाक्त। मेको लाप्चो डा शी ५ सुर पाइशशो पा सेल्पदा बाक्त। 32 मिनु मेकोम तेल रवा आ शी के लाप्चो निक्शीम करूब, खजूर रवा नु बोइशशो फु आन बुटा मुशा आप्पदा बाक्त। मिनु सुनम गिल्पदा बाक्त।

33 मेको खिं डा लाप्चो डा शी यो तेल रवा आ शी के ४ पाटे पा सेल्पदा बाक्त। 34 मिनु मेकोमी अरु शी के लाप्चो निक्शी सेल्पदा बाक्त। मेको आगा नु लाडगा डा लाप्चो हिरब लाप्चो बाक्सा बाक्त। 35 मिनु मेकोमी मेकेर नेल्ल

करूब, खजूर रवा नु बोइश्शो फु आन बुटा मुशा आप्पदा बाक्त। मिनु सुनम गिल्पदा बाक्त। 36 मिनु मेकोमी खिं आगा डा गारो यो खोइश्शो फुल्लु सां खेयप खोप्शा क्येप्शा, मेको आ तारी लेबानोन डा लाइश्शो रवा के फलेकम सुम्पदा बाक्त।

37 सोलोमनमी सासन पवा आ ४ बर्स जिव माइश्शो महिनामी परमप्रभु यावे आ खिं आ जग वोदमे बाक्त। १ राजा ६:१ 38 मिनु ११ बर्स डा बुल माइश्शो महिनामी मेको खिं नेल्ले सेल्ले थुम्मे बाक्त। मेको सेल्चा कली ७ बर्स माल्दा बाक्त।

7

सोलोमनम आ खिं सेल्शो

1 सोलोमन आ खिं सेल्चा कली १३ बर्स माल्दा बाक्त। मिनु मेकोमी आ खिं नु मारेइ मारेइ सेल्ले थुमा बाक्त। १ राजा ९:१० 2 मेकोमी लेबानोन डा ब्वाकी माइश्शो खिं सेला बाक्त। मेको खिं सहे का कुबीत लाइश्शो, ५० कुबीत ब्रेम्शो नु ३० कुबीत ग्येत्थ लाइश्शो बाक्माक्त। मेको खिं ४ लहर लेबानोन डा लाइश्शो रवा आ शी के थाम पाइश्शो बाक्माक्त। मिनु मेको आ तार लेबानोन डा लाइश्शो रवा आ पाइद्रा वोदा बाक्त। कुबीत का ०.५ मिटर खोदेशो बाक्ब। यसैया २२:८ 3 मेको नेल्ल लेबानोन डा लाइश्शो रवा आ शी के फलेकम साप्शो बाक्माक्त। मेको थाम लहर कामी १५ ओटा पा, लहर सांमी ४५ ओटा बाक्मा बाक्त। 4 मेकेर लहर सां पा झेलपुकी वोइश्शो बाक्मा बाक्त। मेकोपुकी एर ओथ पा कोव्रमुशो बाक्मा बाक्त। 5 लाप्चो डा शी नेल्ल ४ पाटे बाक्मा बाक्त। मेको यो नेल्ल लहर सां पा कोव्रमुशो बाक्मा बाक्त।

6 मेकोमी ५० कुबीत लाइश्शो नु ३० कुबीत ब्रेम्शो थाम पाइश्शो ठेयब पिंडी सेल्पदा बाक्त। मिनु मेको आ डोंइती थाम पाइश्शो ओव्रतीक बाक्माक्त। मेको आ डोंइती इप्तीक का यो बाक्माक्त।

7 मेकोमी निसाफ पचा कली ठेयब नित्तीके बाक्शो कोठा का सेल्पदा बाक्त। मेको कली निसाफ पतीक कोठा, दे नें वोदा बाक्त। मिनु मेकोमी मेको कोठा नेल्ले इर रे उइ सम्म लेबानोन डा लाइश्शो रवा आ शी के फलेक क्येप्पदा बाक्त।

8 मेकोम मेको निसाफ पतीक खिं आ नोले आ बाक्तीक खिं सेल्पदा बाक्त। मेको खिं डोंइती डा खिं खोदेशो पा सेल्पदा बाक्त। मिनु सोलोमनमी आ ग्युंवे पा चाक्शो फाराओ आ तमी कली यो मोदेशोन खिं सेल्पदा बाक्त। १ राजा ३:१

9 मेको खिं नेल्ल शुश क्येट लाइब फुल्लु रे पा सेल्शो बाक्मा बाक्त। मेको फुल्लु नेल्ले गारपा अराम खोइश्शो बाक्माक्त। मेको खिं इर रे उइ सम्म नु खिंडगा रे लाडगा सम्म मोदेशो फुल्लु के सेल्शो बाक्मा बाक्त। 10 मेको आ जग फुल्लु ठेयब नु शुश क्येट लाइब बाक्मा बाक्त। मेको पुक्शोन कोइ १० कुबीत लाइश्शो, कोइ ८ कुबीत लाइश्शो बाक्मा बाक्त। 11 मेको आ तार शुश क्येट लाइब, थम गारपा खोइश्शो फुल्लु ब्रपदा बाक्त। मिनु मेको तार लेबानोन डा लाइश्शो रवा आ शी के फलेक गारपा ब्रपदा बाक्त। 12 मिनु ठेयब लाडगाम एर ओथ नेल्ल खोइश्शा गारपाइश्शो फुल्लु सां खेयप ब्रशा, फुल्लु तार लेबानोन डा लाइश्शो रवा आ शी के फलेक ब्रशो बाक्माक्त। मिनु परमप्रभु यावे आ खिं आगा डा लाडगा नु आ पिंडी यो मोदेशोन बाक्माक्त। १ राजा ६:३६

हुराम आ गेय

२इतिहास ३:१५-५:१

13 पिप सोलोमनम हुराम कली टायर रे ब्रेत्थ सोइक्ता बाक्त। २इतिहास २:१३-१४ 14 मेको आ ममा नाप्ताली आ खिं डा आ वोंइश बेक्शो मीश मुर का बाक्माक्त। मेको आ आफ टायर डा थाम्पा कांसा के गेय पस जोक्ब मुर बाक्माक्त। मोपतीके हुराम यो थाम्पा कांसा के गेय पस जोक्ब बाक्माक्त। मिनु मेको पिप सोलोमन आ बाक्तीक जाक्माक्त। मिनु आ कली गेशो गेय नेल्ल पवा बाक्त।

कांसा के थाम निक्शी

15 मेकोम यपाइश्शा कांसा के थाम निक्शी सेला बाक्त। मेको थाम का १८ कुबीत लाइश्शो बाक्माक्त। मेको आ एर ओथ नेल्ल १२ कुबीत बाक्माक्त। मिनु अर्को यो मोदेशोन बाक्माक्त। कुबीत का ०.५ मिटर खोदेशो बाक्त। २ राजा २५:१७ 16 मिनु मेकोमी मेको थाम आस डरम पिया वोइक्चा कली यपाइश्शो कांसा के पिया निक्शी सेला बाक्त। मेको निम्फा ५, ५ कुबीत लाइश्शो बाक्सा बाक्त। 17 मेकोमी थाम आ पिया कली बुटा आप्शो जाली के ७ ओटा झुम्का सेला बाक्त। मिनु अर्को थाम कली यो मोदेशोन सेला बाक्त। 18 मिनु मेको थाम आ पिया ग्योम्चा कली

कांसा के जाली नेल्ल आन एर ओंथ लहर निक्शी बुटा आप्शो दारीमपुकी सेला बाक्त। मिनु मेकोम अर्को कली यो मोदेशो पान सेला बाक्त। 19 मिनु मेको पिंडी डा थाम आन पिया ४, ४ कुबीत लाइशो लिली फू खोदेशो पा सेला बाक्त। 20 मिनु मेको थाम आ पियामी कचौरा खोदेशो बाक्तीकेम जाली थाम आ पिया आ एर ओंथ नेल्ल लहर लहर पा सहे निक्शी दारीम क्याइक्चा कली सेला बाक्त। मिनु अर्को थाम कली यो मोदेशोन सेला बाक्त। 21 मिनु मेकोमी परमप्रभु यावे आ खिं आ पिंडीम मेको थाम निक्शी राप्पदा बाक्त। मिनु दक्खिन गे डा थाम आ नें याकीन वोदा बाक्त। मिनु उत्तर गे डा थाम आ नें बोआज वोदा बाक्त। 22 मेको थाम आस पिया लिली फू खोदेशो बाक्मा बाक्त। मोपा मेको थाम आस गेय नुम्माक्त।

कांसा के ठेयब बोस

23 मिनु मेकोमी कांसा के यपाइशशा ब्वाक्कु वोइक्तीक ठेयब बोस का सेला बाक्त। मेको आ सुर का रे अर्को सुर सम्म १० कुबीत बाक्माक्त। मेको ५ कुबीत ग्येत्थ लाइशो बाक्माक्त। मेको आ एर ओंथ पुक्शोन ३० कुबीत बाक्बाक्त। 24 मेको ठेयब बोस आ एर ओंथ नेल्ल डा सुरमी कुबीत काम १०, १० ओटा लौका आ बुटा आप्शा गुंइशो बाक्माक्त। मोपा मेको ठेयब बोसुम लहर निक्शी लौका सेला बाक्त। 25 मेको ठेयब बोस १२ ओटा ब्यफ आन तार वोइशो बाक्माक्त। मेको ब्यफ सां उत्तर गे, सां पच्छिम गे, सां दक्खिन गे नु सां पूर्व गे कोत्रशो बाक्मा बाक्त। मेको ब्यफ नेल्ल लाडगा गे हिरशो बाक्मा बाक्त। 26 मेको बोस ४ आंइची थांइशो बाक्माक्त। मिनु मेको आ शोत्र चहिं कचौरा नु बोइक्चशो लिली फू खोदेशो बाक्माक्त। मेकेर हजार निक्शी बाथ ब्वाक्कु रिक्बाक्माक्त। बाथ का २२ लिटर खोदेशो बाक्ब।

कांसा के १० ओटा चिक्तीक

27 मिनु मेकोमी कांसा के १० ओटा अरु निप्पाइक्तीक सेला बाक्त। मेको नेल्ल ४, ४ कुबीत लाइशो ४, ४ कुबीत ब्रेम्शो नु ३, ३ कुबीत ग्येत्थ लाइशो बाक्मा बाक्त। कुबीत का ०.५ मिटर खोदेशो बाक्त। 28 मेको निप्पाइक्तीक आन खोइली आन दातेमी बोइक्तीके बाक्मा बाक्त। 29 मेको वोइक्तीकेमी ब्यफ, गुप्स नु करूब आन बुटा आप्शो बाक्मा बाक्त। मेको आन दी गे यो झुम्का क्याइशो बाक्मा बाक्त। 30 मेको निप्पाइक्तीक नेल्लेम कांसा के ४, ४ ओटा गुगील बाक्मा बाक्त। मेको बोस आन पुंमी तिक्तीक क्येपशो बाक्मा बाक्त। मेको झुम्का आन नेक्था बाक्मा बाक्त। 31 मेको आन रोक्तीक कुबीत का ग्येत्थ लाइशो बाक्मा बाक्त। मेको कुल कुल देशो बाक्मा बाक्त। मेको कुबीत का नु आधा ब्रेम्शो बाक्मा बाक्त। मिनु मेको आन रोक्तीकेमी बुटा आप्शो बाक्मा बाक्त। मिनु मेको निप्पाइक्तीक चहिं कुल कुल देशो ममाइ ४ पाटे बाक्मा बाक्त। 32 मेको ४ ओटा गुगील आगा गे बाक्मा बाक्त। मिनु मेको गुगील आन बोइक्तीक नु बोइशो बाक्मा बाक्त। मेको गुगील नेल्ल कुबीत का नु आधा डा बाक्मा बाक्त। 33 मेको गुगील बग्गी आन गुगील खोदेशो पा सेल्शो बाक्मा बाक्त। मेको आन गुगील नु आन मारेइ मारेइ यपाइशशा सेल्शो बाक्मा बाक्त। 34 मेको निप्पाइक्तीक आन तिक्तीक ४ पाटे बाक्मा बाक्त। मेको नेल्ल टुक्रा का के सेल्शो बाक्मा बाक्त। 35 मेको निप्पाइक्तीक आन तार आधा आधा कुबीत ग्येत्थ लाइशो कुल कुल देशो सुर बाक्मा बाक्त। मेको निप्पाइक्तीक आन तार बाक्शा, मेको नु टुक्रा का के बाक्मा बाक्त। 36 मिनु मेकोमी मेकेर तेक तेक श्येत्थ बाक्मा, मेक मेक गुप्स, करूब नु खजूर रवा आन बुटा आबा बाक्त। मेको आन एर ओंथ नेल्ल मुशा सेल्शो कांसा के मालापुकी सेला बाक्त। 37 मोपा मेकोमी मेको १० ओटा निप्पाइक्तीक सेला बाक्त। मेको नेल्ल खाल का डा पा सेला बाक्त।

38 मेको नोले मेकोम कांसा के १० ओटा चिक्तीक बोस सेला बाक्त। मेको नेल्लेमी ४०, ४० बाथ ब्वाक्कु रिक्बाक्मा बाक्त। मेको पुक्शोन ४, ४ कुबीत डा बाक्मा बाक्त। मेको निप्पाइक्तीक नेल्ल आन कली का का बाक्मा बाक्त। बाथ का २२ लिटर खोदेशो बाक्ब। 39 मिनु मेकोमी ५ ओटा निप्पाइक्तीके खिं आ दक्खिन गे नु ५ ओटा खिं आ उत्तर गे वोदा बाक्त। मिनु ठेयब बोस चहिं परमप्रभु यावे आ खिं आ दक्खिन पूर्व गे वोदा बाक्त।

परमप्रभु आ खिं डा मार मार

40 हुराममी बोसपुकी, पुलु ताप्तीक नु ग्योबपुकी सेला बाक्त। मोपा हुराममी पिप सोलोमन आ देशो खोदेशो पा परमप्रभु यावे आ खिं डा मारेइ मारेइ सेल्ने थुमा बाक्त। 41 थाम निक्शी, मेको आस डर सुम्चा कली कचौरा खोदेशो पिया निक्शी, मेको थाम आस पिया ग्योम्तीक बुटा आप्शो जाली निक्शी, 42 मेको जाली निक्शी आस कली ४ सहे दारीम, मेको कचौरा खोदेशो पिया पाइशो थाम निक्शी आस कली सुम्तीक जाली आस कली लहर निक्शी दारीम,

४३ मेको १० ओटा निप्पाइक्तीक आन कली १० ओटा बोस, ४४ ठेयब बोस का मेको आगा डा १२ ओटा ब्यफ सेल्ले थुमा बाक्त।

४५ हुराममी बोसपुकी, पुलु ताप्तीक नु ग्योबपुकी सेला बाक्त। मोपा हुराममी पिप सोलोमन आ देशो खोदेशो पा परमप्रभु यावे आ खिं डा मारेइ मारेइ सेल्ले थुमा बाक्त। मेको नेल्ल टल्केशो कांसा के बाक्मा बाक्त। ४६ मेको नेल्ल पिपम यर्दन खोला डा दिंम सुक्कोथ नु चारेथन आस दातेमी मार मार यपाइक्तीकेम यपाइश्शा, सेल्पाइश्शो बाक्माक्त। ४७ सोलोमनम मेको मिश का थोत्रक सेल्लेके, मेको नेल्ल मनाक्थुन वोदमे बाक्त। मेको सेल्चा कली दोशो कांसा माल्दा, मेको यो मनाक्तमे बाक्त।

४८ मिनु सोलोमनम परमप्रभु यावे आ खिं दारपाइक्चा कली मारेइ मारेइ थोत्रक नेल्ल सेल्पदा बाक्त। मेकोमी सुन के चढेतीके नु कोइतीक शोब्ले वोइक्तीक सुन के टेबल यो सेल्पदा बाक्त। ४९ क्येख सुन के बत्ती दातीक सेल्पाइश्शा, नेल्ल क्येडा चोत्रखो बाक्तीक कोठाम दक्खिन गे ५ ओटा नु उत्तर गे ५ ओटा पा वोइक्पदा बाक्त। सुन के फू खोदेशो बुटा, सुन के बत्ती दातीक, सुन के थनारो, ५० क्येख सुन के ग्योब, सल्दो खोइक्तीक कांइची, बोसपुकी थनारो, कोइला कुरतीके, ब्वाक्कु बुइक्तीक डाडु, कचौरा, थनारो, नेल्ल क्येडा चोत्रखो कोठा डा लाप्चो नु अरु लाप्चो डा हेक्तीक नेल्ल क्येख सुन के सेल्पदा बाक्त।

५१ मिनु पिप सोलोमनम परमप्रभु यावे आ खिं डा गेय नेल्ल थुम्पदा बाक्त। मिनु मेकोमी आ आफ दाऊदमी जिम्मा गेशो थोत्रकपुकी, सुन, चांदी नु दारपाइक्तीक चाक्पाइश्शा, परमप्रभु यावे आ खिं डा शोप वोइक्तीकेमी वोइक्पाइक्मी बाक्त।

८

कबल पशो सन्दोस चाक्शो २इतिहास ५:७-७,१०

१ मिनु नोले सोलोमनम इस्राएल डा खाल्पा, इस्राएल डा थर थर डा ठेयब मुर नु इस्राएली आन खिं खिं डा मुर आन कली दाऊद आ सहर, सियोन रे परमप्रभु यावे आ कबल पशो सन्दोस चाक्चा कली यरूसलेम सहरम बुक्चा कली ब्रेप्पाइक्मी बाक्त। २ मिनु एथानीम माइश्शो ७ महिना डा चाड नाक्ती, इस्राएल डा मुर नेल्ल पिप सोलोमन आ डोंइती बुक्मा बाक्त। ३ मिनु इस्राएल डा खाल्पा नेल्ल जाक्ने थुम्मे नोले, चढेबपुकीमी परमप्रभु यावे आ सन्दोस कुरमे बाक्त। ४ मिनु चढेब नु लेवीपुकीमी परमप्रभु यावे आ सन्दोस नु ग्रुम्तीक ताम्बुम बाक्शो परमप्रभु आ मारेइ मारेइ कुरशा, इर लदमे बाक्त। ५ मिनु पिप सोलोमन इस्राएल डा मुर नेल्ले नु मेको आ डोंइती बुक्ब नेल्लेम, सन्दोस आ डोंइती हिक्ने मचाप्चा डा पा भेडा नु ब्यफ क्योरशा चढेमे बाक्त। २सामुएल ६:१३ ६ मिनु नोले चढेबपुकीम परमप्रभु यावे आ कबल पशो सन्दोस खिं डा नेल्ल क्येडा चोत्रखो बाक्तीकेम चाक्शा करूब आस फ्रां आगाम वोदमे बाक्त। २सामुएल ६:१७; १राजा ६:२७ ७ मारदे हना मेको करूब आस फ्रांम सन्दोस नु कुरतीक कोक्के कली सुम्शो बाक्सा बाक्त। ८ मेको कुरतीक कोक्के थम लाइश्शो बाक्तीके, मेको आन सुर नेल्ल क्येडा चोत्रखो बाक्तीक आ डोंइती रे तांइसीबाक्मा बाक्त। तन्न नेल्ल क्येडा चोत्रखो बाक्तीक आ लाडगा रे मतांइसी बाक्मा बाक्त। मेको मुल सम्म मेकेर बाक्नीम। प्रस्थान २५:१३-१५ ९ मिनु होरेब डांडाम परमप्रभु यावेमी इस्राएली आन कली इजीप्त रे गुंइची ना कबल पशो बाक्त। मेना मोसामी मेको कबल पशो लोत्र मुशा ब्रेक्शो फुल्लु निक्शी सन्दोसम कुर पा वोदा बाक्त। मेको सन्दोसम फुल्लु निक्शी डा लाक्शा अर्को मारेइ मबाक्माक्त। प्रस्थान २५:२१; ब्यवस्था १०:५ १० मिनु चढेब नेल्ल क्येडा चोत्रखो बाक्तीक रे ग्रूमानु, परमप्रभु यावे आ खिं गोस्सुम ब्रीमाक्त। ११ मिनु मेकेर गोस्सुम सुम्तीके चढेबपुकीम गेय पने मचाप्मे बाक्त। मारदे हना परमप्रभु यावे आ छेडछेडम आ खिं ब्रीशो बाक्माक्त। प्रस्थान ४०:३४-३५

१२ मिनु सोलोमनमी “परमप्रभु यावे क्येर गोस्सुम बाक्ब देशो बाक्ब। प्रस्थान २०:२१ १३ गो इन कली गेना हना यो बाक्चा कली गारचा डा खिं का सेल्ला” देंमाक्त।

१४ मिनु पिपमी लेशशा कोत्रशा, इस्राएल डा बुक्शो मुर नेल्ल आन कली आसीक गेमी बाक्त। मेना मेकोपुकी चहिं राप्शो बाक्मा बाक्त। १५ मिनु मेकोमी “परमप्रभु यावे, इस्राएली आन परमप्रभु ठेयब बाक्ल। मेकोमी आं आफ दाऊद नु कबल पा, मुल मेको खाप्नु। १६ मारदे हना मेकोमी ‘गो आं मुर आन कली इजीप्त रे गुंइशा चाक्गु रे मुल सम्म इस्राएल डा तेकोइ थर डा मुर आन सहरम आं नें बाक्ल, दे आं खिं सेल्चा कली मयोत्रडु। तन्न गो आं मुर इस्राएली आन कली सासन पचा कली दाऊद कली योत्रता’ देंत। १७ आं आफ दाऊदमी परमप्रभु यावे, इस्राएली आन परमप्रभु आ नें कली मान पा खिं का सेल्चा मिम्शो बाक्त। २सामुएल ७:- १८ तन्न परमप्रभु यावेमी आं आफ दाऊद कली

‘गे आं नें कली मान पा खिं का सेल्चा मिम्ताक्वी, मेको रिम्शो बाक्त। 19 मो हना यो गे मेको खिं मसेल्नेवे। तन्न इ तौमी आं नें कली मान पा खिं का सेल्ब’ देशो बाक्तीनी। 20 मुल परमप्रभु यावेमी ‘गो पाइनुड’ देशो लोव्र खाप्तु। गो आं आफ दाऊद आ पा डा पिप दुम्शो बाक्नुड। मिनु परमप्रभु यावेमी ‘पाइनुड’ देशो खोदेशो पा गो इस्राएल डा पिप दुम्ती। मिनु परमप्रभु यावे, इस्राएली आन परमप्रभु आ नें कली मान पा एको खिं सेल्ता। 21 गो मेकेर परमप्रभु यावे आ कबल पशो सन्दोस बाक्तीके का सेल्ता। परमप्रभु यावेमी इं किकी पिपी आन कली इजीप्त रागी रे ग्रुंइशा चाक्गानु, मेकोपुकी नु कबल पशो बाक्माक्त” देंमाक्त।

सोलोमन आ प्रार्थना

22 मिनु सोलोमनम इस्राएल डा बुक्शो मुर नेल्ल आन दातेम परमप्रभु यावे कली चढेतीक आ डोंइती राप्शा, आ गुइ सरीड गे क्युकगा बाक्त। 23 मिनु मेकोमी “परमप्रभु यावे, इस्राएली आन परमप्रभु इर स्वर्गम नु रागीम इन खोदेशो अर्को तेकोइ परमप्रभु मबाक्नीम। इन कली आन थुं नेल्लेमी नोले खोइक्ब, इन गेय पाइब आन कली पशो कबल खाप्शा, मेको आन कली गेना हना यो दाक्नीनी। 24 गे इन गेय पाइब, आं आफ दाऊद नु पशो कबल खाप्तीनी। मुलाक्ती ‘गो पाइनुड’ देशो कबल थमा पा खाप्तीनी। 25 मोपतीके परमप्रभु यावे, इस्राएली आन परमप्रभु इन गेय पाइब आं आफ दाऊद नु पशो कबल खाप्पीन। गे मेको नु कबल पा ‘गेना हना यो इ तौ चच रे इस्राएलम पिप दुम्नीम। तन्न मेकोपुकी इ खोदेशो पा आं डोंइती होस पा गाक्तेक्म हना, ला मोदेशो दुम्ब’ देशो बाक्तीनी। 26 मोपतीके इस्राएली आन परमप्रभु, इन गेय पाइब आं आफ दाऊद कली ‘गो पाइनुड’ देशो लोव्र खाप्पीन” देंमाक्त।

27 मेकोमी “मार, थमा पा परमप्रभु रागीम बाक्बा डा? कोव्रडीन, इर डा ठेयब सरीडम ला यो गे मरिक्नीनी हना, एको आं सेल्शो खिंम दोपा रिक्नीनी डा? यसैया ६६:१; प्रेरित १७:२४ 28 मो हना यो परमप्रभु यावे, आं परमप्रभु इन गेय पाइब आं प्रार्थना नु आं पुंइशो लोव्र नेनीन। मुलाक्ती इन गेय पाइबमी इन डोंइती ठेयब सेंदा पा पुंइशो लोव्र नेनीन। 29 मिनु नाक्दो नाक्ती एको खिं कली कोव्रडीन। गे ‘गो एको खिंम बाक्नुड’ देशो बाक्तीनी। मोपतीके इन गेय पाइब आं लोव्र नेनीन। जकरिया १२:४; प्रस्थान २:२४ 30 इन गेय पाइब नु इन मुर इस्राएलीम एको खिं गे कोव्रशा पुंइतेक्म हना, मेको आन पुंइशो गेन। मेको आन लोव्र इर इन बाक्तीक रे नेनीन। मिनु गे मेको आन पुंइशो गेशा, माफ गेने।

31 सुइ मुरुमी आ नेक्था डा मुर आन पर्वम मरिम्शो पा कसम जपाइक्तु हना, मेकोम मेको कसम एको इन खिं डा चढेतीक आ डोंइती जाप्तु हना, 32 गे इर स्वर्गम मेको आन लोव्र नेंशा, निसाफ पने। मिनु दोस ताइब आ मरिम्शो पशो आ पियामी मोइक्तीन। मिनु ठीक पाइब कली दोस मताइब बाक्ब देंनीन। मोपा ठीक पाइब कली रिम्शो पाइब दुमीन।

33 मिनु इन मुर, इस्राएलीपुकीमी पाप पशा आन जोरी सत्रु नु बुशा, इन गे लेशशा ‘गे आंइ परमप्रभु यावे बाक्नीनी’ दे एको इन खिं गे कोव्रशा पुंइतेक्म हना, 34 इर स्वर्ग रे मेको आन पुंइशो नेनीन। मिनु इन मुर इस्राएली आन पाप माफ गेन। मिनु मेको आन किकी पिपी आन कली गेशो रागीम लेशशा चाक्कीन।

35 मिनु इन मुरपुकीमी पाप पतीके सरीड चोक्सीशा रेउ मयित हना, इन गेशो सजाइ तुइशशा, ‘गे आंइ परमप्रभु यावे बाक्नीनी’ दे आन पशो पाप प्रोइतेक्म हना, १ राजा १७:१ 36 इर स्वर्ग रे मेको आन पुंइशो लोव्र नेंशा, इन गेय पाइब, इन मुर इस्राएली आन पाप माफ गेने। मेको आन पचा माल्शो शेंदीन। मिनु मेको आन कली गेशो रागीमी रेउ यिपतीन।

37 मेको रागीम अन्काल दुम्त हना, मुर बेक्तीक रोइ जाक्त हना, बाली नाली सोव्रतीक नु बुक्खी डाइक्तीक रोइ जाक्त हना, सल्हा माले नु बुस्स जाक्तेक्म हना, मेको आन तेकोइ सहरम जोरी सत्रुम पुम्ताक्म हना, मारेइ श्येत नु मारेइ रोइ जाक्त हना, 38 इन मुर इस्राएली सुइम आन थुंम श्येत जशा, एको इन खिं गे कोव्रशा आन गुइ क्युकशा पुन्मेनु, इन बाक्तीक इर स्वर्ग रे मेको आन पुंइशो नेनीन। 39 गे मुर नेल्ल आन थुं तुइक्तीके, इन बाक्तीक स्वर्ग रे मेको आन लोव्र नेंशा, आन पशो कोव्रशा माफ गेने। मारदे हना गे ला मुर नेल्ल आन थुं तुइक्ब बाक्नीनी। भजन संग्रह १३९:१-२ 40 मिनु मेकोपुकी इन कली मान पा हिंशा, आंइ किकी पिपी आन कली इन गेशो रागीम बाक्नीम।

41 मिनु इन मुर इस्राएली ममाइ, तन्न अर्को रागी डा मुर सुइमी इन कली तुइशशा डोन डोन रागी रे जाक्तेक्म हना, गन्ती १५:१४-१६ 42 मेकोपुकीम इन ठेयब नें, इन ठेयब सक्ति नु इन वारच पतीके नेंशा बाक्तेक्म। मोदेशो मुर जाक्शा, एको खिं गे कोव्रशा पुंइतेक्म हना, 43 गे मेको आन लोव्र इन बाक्तीक स्वर्ग रे नेंशा, मेको अर्को रागी डा मुर

आन पुंइशो नेल्ल गेने। मिनु इन मुर इस्राएली खोदेशो पा रागी डा मुर नेल्लेम इन नें तुइक्तमेक्ल। मिनु इन कली मान पा हिंमल। गे एको आं सेल्शो खिंम बाक्नीनी, दे तुइक्तमेक्ल।

44 मिनु इन मुर आन जोरी सत्रु नु लडाइ पथ लाम्तेक्म हना, गे मेको आन कली तेइ सोइक्ताक्नी हना, मेकोपुकीम एको इन योव्रशो सहर नु गोम इन कली सेल्शो एको खिं गे कोव्रशा, पुंइतेक्म हना, 45 गे स्वर्ग रे मेको आन पुंइशो नेनीन। मिनु मेको आन कली वारच पतीन।

46 मेकोपुकीम पाप पाम्तेक्म हना, मारदे हना पाप मपाइब सुइ मबाक्नीम। मिनु गे इन गाइशोमी आन जोरी सत्रु आन गुइम गेतीनी। मिनु मेकोपुकीम मेको आन कली आन रागीम ग्याइशशा लाइक्तेक्म हना, भजन संग्रह १४:३-४; रोमी ३:२३ 47 मिनु मेकोपुकीम आन कली ग्याइशशा लाइशशो रागीम श्येत जशा 'गो पाप पाइतक। दूली पा काइ मरिम्शो पाइतक' देंतेक्म हना, नेहेम्याह ९:३३; दानीएल ९:५ 48 मिनु मेको आन ग्याइशशा लाइशशो जोरी सत्रु आन रागीमी आन थुं नेल्लेम इन गे लेत्तेक्म हना, मेको आन किकी पिपी आन कली इन गेशो रागी नु इन योव्रशो एको सहर नु इन नें कली मान पा आं सेल्शो खिं गे कोव्रशा, इन कली पुंइतेक्म हना, दानीएल ६:११ 49 इन बाक्तीक इर स्वर्ग रे मेको आन पुंइशो लोव्र नेंशा, आन माल्शो गेन। मिनु मेको आन कली वारच पतीन। 50 मिनु मेको इन मुर आन पाप नु हेंथे पशो नेल्ल माफ गेने। मिनु मेको आन जोरी सत्रुम शिशी पपतीन। 51 मारदे हना मेकोपुकी इन खिं डा मुर बाक्नीम। गे मेको आन कली शुश श्येत गेतीके इजीप्त रागी रे गुंइशा चाक्तीनी। 52 मिनु गे इन गेय पाइब नु इन मुर इस्राएली आन कली कोव्रडीन। मेको आन पुंइशो लोव्र गेना हना यो नेनीन। मिनु मेकोपुकीम इन कली ब्रेम्मानु, मेको आन ब्रेशो नेनीन। 53 मारदे हना गे मेको आन कली इन मुर सेल्चा कली, रागी नेल्ल डा मुर आन दाते रे योव्रशा तिल्लीनी। मोपा आंइ किकी पिपी आन कली इजीप्त रे गुंइशा चाक्तीनु, इन गेय पाइब मोसा कली मोदेशो लोव्र पशो बाक्तीनी” देंमाक्त। प्रस्थान १९:५-६

54 मोपा सोलोमनम परमप्रभु यावे कली प्रार्थना पा पुंइने थुमा बाक्त। मिनु मेको परमप्रभु यावे कली चढ़ेतीक आ डोंइती रे बोक्माक्त। मेकेर सरीड गे कोव्रशा आ गुइ क्युक्शा आ पोक्च थेक्शा प्रार्थना पशो बाक्माक्त। 55 मिनु मेको राप्शा, ठेयब सेंदा पा बुक्शा बाक्शो इस्राएली नेल्ल आन कली आसीक गेमी बाक्त।

56 मेकोमी “आ मुर इस्राएली आन कली आ देशो खोदेशो पा नाइक्चा गेब परमप्रभु यावे ठेयब बाक्ल। मेकोम आ गेय पाइब मोसा रे पा पाइनुड देशो रिम्शो गेय नेल्ले का सम्म यो मख्राइक्थु, पाप्तु। यहोसु २१:४५ 57 परमप्रभु यावे इं परमप्रभु इं किकी पिपी नु बाक्शो खोदेशो पा गोपुकी नु यो बाक्ल। मेकोमी इं कली गेनायो मप्रोनल। 58 मेकोमी इं किकी पिपी आन कली शेंशो लोव्र, आ फुल्लुम मुशा ब्रेक्शो लोव्र नु आ ठीक पतीक लोव्र पना पन, इन थुं नेल्लेमी मेको आ लांम गाक्कीन। 59 गो इं परमप्रभु यावे आ डोंइती पुंइशो लोव्र नाक्दो नाक्ती परमप्रभु यावे, इं परमप्रभु आ डोंइती बाक्ल। मिनु मेकोमी नाक्त किंत किंत आ गेय पाइब नु आ मुर इस्राएली इं माल्शो गेशा, वारच पवल। 60 मिनु रागी डा मुर नेल्लेमी परमप्रभु यावे ला परमप्रभु बाक्ब, दे तुइक्नीम। मिनु मेको डा लाक्शा अर्को सुइ परमप्रभु मबाक्ब, दे यो तुइक्नीम। 61 मोपतीके इं थुं नेल्लेमी परमप्रभु यावे, इं परमप्रभु कली जिम्मा गेसय। मुलाक्त खोदेशो पा गोपुकीमी आ फुल्लुम मुशा ब्रेक्शो लोव्र टिना टिन, आ शेंशो पना पन बाक्थ” देंमाक्त।

परमप्रभु आ खिं जिम्मा गेशो

62 मिनु नोले पिप नु इस्राएली नेल्लेमी परमप्रभु यावे आ डोंइती चढ़ेतीक चढ़ेमे बाक्त। 63 सोलोमनमी दुशा बाक्चा आ पर्बम २२ हजार ब्यफ नु लाख का २० हजार भेडा चढ़ेवा बाक्त। मोपा पिप नु इस्राएल डा मुर नेल्लेमी परमप्रभु यावे आ खिं कली जिम्मा गेमे बाक्त। 64 मेको नाक्त पिपमी परमप्रभु यावे आ खिं आ डोंइती बाक्शो लाडगा आ दाते डा लाडगा कली यो तिला बाक्त। मारदे हना मेकोमी मेकेर चोशा चढ़ेतीके, अन्न चढ़ेतीके नु दुशा बाक्चा आ पर्बम चढ़ेतीके आन बोंसो चढ़ेवा बाक्त। अन्न चढ़ेतीके, दुशा बाक्चा आ पर्बम चढ़ेतीके नु चोशा चढ़ेतीक आन बोंसो वोइक्चा कली मेको परमप्रभु यावे आ डोंइती बाक्शो कांसा के चढ़ेतीके आइक्च दुम्माक्त।

65 मिनु सोलोमन नु मेको नु बुक्शा बाक्शो इस्राएली लेबो-हमाथ रे इजीप्त डा खोला सम्म डा ठेयब हुल नेल्लेमी परमप्रभु यावे, इं परमप्रभु आ डोंइती मेको नाक्त रे ७ नाक्त सम्म नु अर्को ७ नाक्त तेम्शा, नेल्ल पा १४ नाक्त सम्म चाड मानेमे बाक्त। 66 मिनु आ दीसा मेकोमी मुर आन कली आन खिं सोइक्तीमी बाक्त। मिनु मेकोपुकीम पिप कली ठेयब सेल्मे बाक्त। मिनु परमप्रभु यावेमी आ गेय पाइब दाऊद नु आ मुर इस्राएली आन कली रिम्शो पशो तशा, ग्येरना ग्येरन आन आन खिं लमा बाक्त।

9

परमप्रभुमी लोत्र पशो

२इतिहास ७:११-२२

1 मिनु सोलोमनम परमप्रभु यावे आ खिं, पिप आ खिं नु आ सेल्चा दाक्शो मारेइ मारेइ नेल्ल सेल्ने थुमा बाक्त। 2 मेना परमप्रभु यावेम सोलोमन कली गिबोनम लोत्र पशो खोदेशो पा लेशा लोत्र पवा बाक्त। १राजा ३:५ 3 मिनु परमप्रभु यावेमी मेको कली “गो इ आं डोंइती पशो प्रार्थना नु इ पुंइशो लोत्र नेंता। गो एको इ सेल्शो खिं कली आं के सेल्ता। मिनु गो गेना हना यो एकेर बाक्नुड। आं थुं एकेर बाक्शा, गो एको खिं कली गेना हना यो कोव्रनुड। १राजा ८:२९ 4 मिनु गे चहिं ब्रेमशो दुमशा, इ आफ दाऊद खोदेशो पा आं डोंइती गेना हना यो रिमशो पाइब नु रिमशो थुं पाइशो दुमते हना, आं इ कली शेंशो नेल्ल पना पन, आं फुल्लुम मुशा ब्रेक्शो लोत्र नु आं निसाफ पतीक लोत्र नेल्ल पाप्तीवी हना, 5 गो इ राज्य इस्राएल कली गेना हना यो बोल्यो दुम्पाइक्नुड। मिनु गो इ आफ दाऊद कली ‘इ तौ चच रे गेना हना यो इस्राएलम पिप दुम्नीम’ दे कबल पशो खोदेशो पा गे नु यो कबल पाइनुड। २सामुएल ७:१२; येरमीया ३३:१७

6 तन्न गे नु इ आलपुकी आं नोले खोइक्चा प्रोंइशा, गो इन डोंइती वोइशो आं शेंशो नु आं फुल्लुम मुशा ब्रेक्शो लोत्र मपाइतीनी हना नु देवी देवता आन कली पूजा पाइतीनी हना, 7 गो इस्राएली आन कली आं गेशो रागी रे खेरनुडमी। मिनु एको आं कली सेल्शो खिं कली प्रोंइशा मकोव्रनुड। मिनु इस्राएली चहिं मुर नेल्ल आन दातेमी मुने दोक्शा, ग्रॉग्रा दित्तीक दुम्नीम। ब्यवस्था ४:२६; ब्यवस्था ८:१९-२०; मत्ती २३:३८ 8 एको खिं ब्रेक्शा, फुल्लु देल्शो दुम्ब। मिनु नोले एकेर गाक्ब मुर नेल्ल छक लाक्नीम। मिनु मुरपुकीमी मेको तशा ‘मारदे परमप्रभु यावेमी एको खिं नु एको रागी कली ओं पवा, माइ?’ दे शुक्शी पाइनीम। 9 मिनु मुरपुकीमी ‘मेकोपुकीमी परमप्रभु यावे, आन परमप्रभुम मेको आन किकी पिपी आन कली इजीप्त रागी रे ग्रुंइशा चाक्तु हना यो, मेको कली प्रोंइशा, देवी देवता आन कली मानेशा, पूजा पाप्तेक्म। मोपतीके परमप्रभु यावेमी मेको आन कली मोदेशो श्येत गेप्तु’ देंनीम” देंमाक्त।

सोलोमन नु हीराम

२इतिहास ८:७-११

10 सोलोमन कली परमप्रभु यावे आ खिं नु आ बाक्तीक खिं सेल्चा कली २० बर्स माल्दा बाक्त। १राजा ६:३८; १राजा ७:१ 11 टायर डा पिप हीराममी सोलोमन कली माल्शो लेबानोन डा लाइशो रवा आ शी, अरु शी, सुन नु आ माल्शो नेल्ल गेशो बाक्माक्त। मोपतीके पिप सोलोमनमी हीराम कली गालील रागी डा २० ओटा सहर गेवा बाक्त। २इतिहास ८:२ 12 मिनु हीरामम टायर रे मेको सोलोमन आ गेशो सहरपुकी कोव्रथ लमाक्त। मिनु मेकोम मेको सहर मदाक्ता बाक्त। 13 मिनु मेकोमी सोलोमन कली “आं लोक्ब, मेको इ गेशो सहरपुकी दा दोकका देशो बाक्तेक्मे” देंमाक्त। मिनु मेकोम मेको सहर आन कली “काबुल रागी” देंशो नें वोदा बाक्त। मेको सहर आन नें मुल सम्म मेकोन बाक्नीम। 14 मिनु हीराममी पिप सोलोमन कली सहे का २० टलेन्ट सुन सोइक्ता बाक्त। टलेन्ट का ३४ किलो बाक्ब।

सोलोमन आ गेय पाइब

15 पिप सोलोमनम पपाइशो गेय मार मार बाक्त देंशा हना, परमप्रभु यावे आ खिं, आ बाक्तीक खिं, मिल्लो माइशो बोल्यो दरवार, यरूसलेम डा गारो, हासोर, मेगीददो नु गेजेर सहर सेल्पदा बाक्त। 16 इजीप्त डा पिप फाराओम गेजेर सहर कली लडाइ तोशा ग्राशा, मेकेर मी सुइशो बाक्माक्त। मेकोम मेकेर बाक्ब कनानी आन कली साइशो, मेको सहर आ तमी, सोलोमन आ मीश कली दाइजो गेशो बाक्माक्त। यहोसु १६:१०; १राजा ३:१ 17 मिनु सोलोमनम गेजेर सहर, बेथ-होरोन, 18 बालाथ नु मेको गोरशो रागी डा तामार नु आ एर ओथ डा रागी, 19 सोलोमन आ मार मार वोइक्तीक सहरपुकी, आ बग्गी नु शारा वोइक्तीके नु शारा डोइक्ब आन कली बाक्चा कली सहरपुकी यो सेल्पदा बाक्त। सोलोमनमी यरूसलेम, लेबानोन नु आ सासन पशो राज्य नेल्लेमी मार सेल्चा दाक्शो बाक्मे, मेको सेल्ने थुमा बाक्त। १राजा १०:२६ 20 मिनु लीशो एमोरी, हिती, परिज्जी, हिब्वी नु यबुसी चहिं इस्राएली आन थर डा मुर मबाक्मा बाक्त। 21 इस्राएलीपुकीमी मेको रागीम लीशो मेको आन चच युइ आन कली काइ मवोइक्थु साइक्ने मचाप्शो बाक्मा बाक्त। सोलोमनमी मेको आन कली गेय पाइब वाइल सेल्शा वोइक्मी बाक्त। मेको मुल सम्म मोपान बाक्शो बाक्नीम। यहोसु १६:१० 22 तन्न सोलोमनम इस्राएली सुइ आन कली वाइलीम वाइल मसेल्मी बाक्त। मेकोपुकी चहिं लडाइ पाइब, लडाइ पाइब आन ठेयब मुर, कप्तान, बग्गी चलेब आन ठेयब मुर नु शारा डोइक्ब सेल्मी बाक्त।

23 मिनु सोलोमन आ ठेयब गेय पाइब ५ सहे ५० जना बाक्मा बाक्त। मेकोपुकी गेय पाइब आन कली कोत्रब बाक्मा बाक्त।

24 मिनु फाराओ आ तमी दाऊद आ सहर रे पिप सोलोमनम सेल्शा गेशो आंम खिंम लमाक्त। सोलोमनमी मिल्लो माइशो बोल्यो दरवार यो सेल्पदा बाक्त।

25 मिनु सोलोमनमी परमप्रभु यावे कली सेल्शो चढ़ेतीकेमी बर्सम खेयप सां परमप्रभु यावे आ डोंइती चोशा चढ़ेतीक नु दुशा बाक्चा आ पबर्म चढ़ेतीक चढ़ेशा धूप यो चोशा चढ़ेवा बाक्त। मोपा मेकोम परमप्रभु यावे आ खिं डा गेय नेल्ल पवा बाक्त।

सोलोमनम जहाज सेल्पाइशो

26 मिनु पिप सोलोमनम लल समुन्द्र आ शुंइच एदोम रागी एलोथ आ नेक्था एस्योन-गेबेर सहरम जहाजपुकी यो सेल्पदा बाक्त। गन्ती ३३:३५; २इतिहास ८:१७-१८ 27 हीराममी समुन्द्र आ पबर्म तुइक्ब नु जहाजम गेय पाइब मुर सोलोमन आ गेय पाइबपुकी नु गेय पपाइक्चा कली सोइक्तीमी बाक्त। १राजा १०:११ 28 मिनु मेकोपुकी जहाजम ओफीर लमा बाक्त। मिनु मेकेर रे ४ सहे २० टलेन्ट सुन चाक्मे बाक्त। मिनु मेको पिप सोलोमन कली गेमे बाक्त। उत्पत्ती १०:२९

10

शेबा डा पिपीम जाक्शो

२इतिहास ९:१-१२

1 शेबा डा पिपीममी सोलोमन आ रिमिशो पशो नेल्ल, परमप्रभु यावे आ ठेयब नें नु आ पशो नेल्ल नेना बाक्त। मिनु लोत्र लेन्ने मचाप्चा डा लोत्र कुरशा सोलोमन कली नाक्चा कली जाक्माक्त। मत्ती १२:४२; १राजा ५:१४ 2 मेको शुश मुर नु शुश मस्ला, सुन नु शुश क्येट लाइब हीरा दलओंठम कुरपाइशशा यरूसलेम जाक्माक्त। मिनु आ थुंम बाक्शो लोत्र नेल्ल सोलोमन कली देंमाक्त। 3 मिनु सोलोमनम मेको आ हिल्लो पशो लोत्र नेल्ल लेत्ता बाक्त। मेको हिल्लो पशो लोत्र लेत्चा कली पिप कली मारेइ श्येत मदुम्माक्त। 4 मिनु शेबा डा पिपीममी सोलोमन आ जोक्तीक तुइक्तीक नेल्ले, मेको आ सेल्शो पिप आ खिं, 5 मेको आ जचा थोत्रक, मेको आ एर ओंथ बाक्ब आ ठेयब गेय पाइब आन बाक्तीके, आ गेय पाइब आन गेय पशो, मेको आन फेक्शो वा, आ ग्योबपुकी, परमप्रभु यावे आ खिंम चोशा चढ़ेतीकपुकी तशा, शुश छक लाक्माक्त।

6 मिनु मेकोमी पिप कली “गो आं रागीमी इन गेय नु जोक्तीक तुइक्तीक आ पबर्म लोत्र नेता। 7 तन्न गो आंमा जाक्शा, मतडा सम्म थमा मसुदु। मेको आं कली नेंशो दा उइक्थ लाइ यो मनेंशो बाक्ती। इन जोक्तीक तुइक्तीक, इन पशो गेय नु इन शोंप आ पबर्म आं नेंशो क्येडा यो शुश बाक्त। 8 इन मीशपुकी नु इन गेय पाइबपुकीमी गेना हना यो इन जोक्शो तुइशो लोत्र नेंशा ग्येरसीशो बाक्नीमी। 9 मिनु परमप्रभु यावे, इन परमप्रभु ठेयब बाक्ब। मेकोमी इन कली दाक्शा इस्राएल कली सासन पचा कली पिप सेल्लु। परमप्रभु यावेमी इस्राएली आन कली गेना हना यो दाक्ताक्व। मोपतीके मेकोमी इन कली ठीक निसाफ पचा नु ठीक पचा कली मेको आन पिप सेल्शो बाक्त” देंमाक्त। १राजा ५:२१ 10 मिनु नोले मेकोमी पिप कली सहे का २० टलेन्ट सुन, शुश मस्लापुकी नु शुश क्येट लाइब हीरापुकी गेवा बाक्त। शेबा डा पिपीममी सोलोमन कली गेशो खोदेंशो पा शुश मस्ला डोंइती सुइम मचाक्मे बाक्त। टलेन्ट का ३४ किलो बाक्ब।

11 मेको नेल्ल प्रोंइशा यो हीराम आ जहाजपुकीम ओफीर रे सुन चाक्बाक्मा बाक्त। मेकोपुकीमी जहाजम सिरी खन्ड के शुश क्येट लाइब शी नु हीरापुकी चाक्बाक्मा बाक्त। १राजा ९:२७-२८ 12 मिनु पिपमी मेको सिरी खन्ड के शी रे परमप्रभु यावे आ खिं नु आ बाक्तीके खिं कली क्रेसी डा ग्याइक्तीक सेल्पदा बाक्त। मिनु कुम्सो पाइब आन कली बीना नु तार पाइशो ताप्तीक यो मेको शी के सेल्पदा बाक्त। मेको मोदेंशो पा सिरी खन्ड के शी गेना यो मचाक्शो बाक्मा बाक्त। मिनु मेना रे मुल सम्म यो गेनायो मतांइसीशो बाक्ब।

13 मिनु पिप सोलोमनम शेबा डा पिपीम कली आ गेशो प्रोंइशा यो आ दाक्शा पुंइशो थोत्रक नेल्ल गेवा बाक्त। मेको नोले मेको आ गेय पाइब नेल्ल लाइशशा आ रागी लेम्माक्त।

सोलोमन आ शोंप

२इतिहास ९:१३-२८

14 सोलोमन आ बाक्तीकेम बर्स बर्सम जाक्शो सुन सहे सां ६६ टलेन्ट दुम्बाक्माक्त। टलेन्ट का ३४ किलो बाक्ब। 15 मेको प्रोइशा, ग्याप्ब लेयब आन चाक्शो, अराब रागी डा पिपपुकी नु अर्को रागी डा सासन पाइबपुकी रे यो सुन जाक्बाक्माक्त। 16 मिनु पिप सोलोमनम तुप्शा सेल्शो सुन के सहे निक्शी ठेयब तेक्तीक सेल्पदा बाक्त। मेको का सेल्चा कली ६ सहे शेकेल सुन माल्दा बाक्त। शेकेल का ११.५ ग्राम खोदेशो बाक्ब। १राजा १४:२६ 17 मेकोमी तुप्शो सुन के सहे सां आइक्च आइक्च तेक्तीक यो सेल्पदा बाक्त। मेको का सेल्चा कली सहे सां शेकेल सुन माल्दा बाक्त। मिनु पिपमी मेको नेल्ल लेबानोन डा ब्वाकी माइश्शो खिंम वोइक्पाइक्मी बाक्त। १राजा ७:२ 18 मिनु पिपम हात्ती आ दारा के ठेयब नित्तीक का सेल्शा, मेको कली क्येख सुनमी गिल्पदा बाक्त। 19 मेको नित्तीक तार डोइक्तीक ६ ओटा थेंका बाक्मा बाक्त। मेको नित्तीक आ नोले गे कुल कुल पा सेल्शो बाक्माक्त। मेको नित्तीक आ निम्फा गे गुइ वोइक्तीक पाइश्शो बाक्माक्त। मेको गुइ वोइक्तीक आस नेक्था गुप्स निक्शी सेल्शो बाक्माक्त। 20 मेको ६ ओटा थेंका नेल्लेम एर गे का, ओंथ गे का पा १२ ओटा गुप्स बाक्मा बाक्त। मेको मोदेशो नित्तीके तेकोइ राज्य डा पिप आन पर्वम मसेल्शो बाक्माक्त। 21 पिप सोलोमन आ तूतीक कचौरा नेल्ल सुन के बाक्मा बाक्त। मिनु लेबानोन डा ब्वाकी माइश्शो पिप आ खिंम बाक्शो ग्योब नेल्ले क्येख सुन के बाक्मा बाक्त। चांदी के मारेइ मबाक्मा बाक्त। मारदे हना सोलोमन आ पालाम चांदी मारेइ खोदेशो मबाक्माक्त। 22 मिनु पिप नु हीराम आस जहाजपुकी टारसीस गे लाइबाक्मा बाक्त। मिनु बर्स सां सांमी मेको जहाजम काले टारसीस रे सुन, चांदी, हात्ती आन खुइ, बुदी नु मजुर चाक्शा, जाक्बाक्मा बाक्त।

23 मोपा सोलोमन आ शोंप नु आ जोक्तीक तुइक्तीकेमी पिप नेल्ल आन क्येडा ठेयब दुम्माक्त। 24 रागी नेल्ल डा मुरपुकी परमप्रभुम सोलोमन कली गेशो जोक्शो तुइश्शो लोव्र नेंचा कली जाक्बाक्मा बाक्त। 25 मेको मोपा जाक्ब नेल्लेमी बर्स बर्सम कोसेली सुन चांदी के मार मार, फेक्तीक वा, यापुकी, मस्ला, शारा नु खचचर चाक्बाक्मा बाक्त।

26 सोलोमनम शुश बग्गी नु शारा तेलमी बाक्त। मेको के १४ सहे बग्गी नु १२ हजार शारा बाक्मा बाक्त। मेकोमी बग्गी आन कली बग्गी वोइक्तीक सहरम वोदा बाक्त। का निक्शी आन कली चहिं आं नुन यरूसलेमम वोइक्मी बाक्त। १राजा ५:६ 27 पिपमी यरूसलेमम चांदी फुल्लु खोदेशो पा तेलमी बाक्त। मिनु लेबानोन डा लाइश्शो रवा आ शी चहिं शेफेलाह डा फोव्रशी रवा खोदेशो पा शुश तेलमी बाक्त। 28 सोलोमन आ शारा इजीप्त नु क्युए रे ग्याप्शा चाक्शो बाक्मा बाक्त। 29 मेकोपुकीम इजीप्त रे ६ सहे शेकेल चांदीम बग्गी नु सहे का ५० शेकेल चांदीम शारा ग्याप्बाक्मा बाक्त। मिनु पिप आ ग्याप्ब लेयबपुकीम हित्ती आन पिप नु अराम डा पिप नेल्ल आन कली लेयबाक्मा बाक्त। शेकेल का ११.५ ग्राम, तोला का खोदेशो बाक्ब।

11

सोलोमन आ मीशपुकी

1 पिप सोलोमनम फाराओ आ तमी ग्युंभे पा यो, मेकोमी शुश अर्को रागी डा मीश मुर, मोआबी, अम्मोनी, एदोमी, सीदोनी नु हित्ती आन कली दाक्तीमी बाक्त। ब्यवस्था १७:१७ 2 परमप्रभु यावेमी इस्राएली आन कली मेको रागी डा मुर आन पर्वम “गेपुकीम मेको आन कली ग्युंभे पचा मदुम्नीनी। मारदे हना मेकोपुकीम थमा पा इन थुं आन देवी देवता आन नोले खोइक्पाइक्नीम” देशो बाक्माक्त। तन्न सोलोमनम मेको आन कली दाक्तीमी बाक्त। प्रस्थान ३४:१६ 3 मेको के ७ सहे ग्युंभे पशो मीश नु सहे सां अरु नोले चाक्शो मीश बाक्मा बाक्त। मिनु मेकोपुकीम आ थुं क्याल्पदमे बाक्त। 4 मिनु सोलोमन खूशो दुम्मेनु, मेको आ मीशपुकीम आ थुं अरु देवी देवता आन गे हिरपदमे बाक्त। मिनु मेको आ आफ दाऊद आ थुंम खोदेशो पा आ थुं नेल्लेम परमप्रभु यावे, आ परमप्रभु आ नोले मखोदा बाक्त। 5 मोपा सोलोमन सीदोनी आन अश्तोरैथ देवी नु अम्मोनी आन ग्रांग्रा दिशो मूर्ति मोलोक आस नोले खोदा बाक्त। मोलोक नु मोलेक नें वोइश्शो देवता मिल्लोम यो बाक्त। 6 मोपा सोलोमनम परमप्रभु यावे आ डोंइती मार मरिम्शो बाक्मे, मेको पवा बाक्त। मेको आ आफ दाऊद खोदेशो पा आ थुं नेल्लेमी परमप्रभु यावे आ नोले मखोदा बाक्त। 7 मिनु सोलोमनम मोआब डा ग्रांग्रा दिशो मूर्ति केमोश नु अम्मोनी आन ग्रांग्रा दिशो मूर्ति मोलेक आस कली यरूसलेम आ पूर्व गे डा डांडा काम पूजा पतीक थान सेला बाक्त। गन्ती २१:२९; २राजा २३:१३ 8 मेकोमी अर्को रागी डा आ मीश नेल्ल आन कली मोदेशो पवा बाक्त। मेकोपुकीमी आन देवी देवता आन कली धूप चोशा चढेमे बाक्त।

9 मिनु परमप्रभु यावे सोलोमन क्येडा गाइक्ता बाक्त। मारदे हना परमप्रभुमी मेको नु खेयप निक्शी लोव्र पशो बाक्त हना यो, मेको परमप्रभु यावे, इस्राएली आन परमप्रभु रे डोन लशो बाक्माक्त। १राजा ३:५; १राजा ९:२ 10 परमप्रभु

यावेमी सोलोमन कली “अरु देवी देवता आन नोले मखोतो” देशो बाक्माक्त। मो हना यो सोलोमनम परमप्रभु यावे आ शेंशो मपवा बाक्त। 11 मोपतीके परमप्रभु यावेम इस्राएली आन पिप सोलोमन कली “इ मो पशो, आं कबल प्रोइशो नु इ कली पावो, दे आं फुल्लुम मुशा ब्रेक्शो लोव्र मटितीके गो थमा पा एको इ राज्य रोइशशा इ गेय पाइब कली गेनुड। १सामुएल १५:२८ 12 मो हना यो इ आफ दाऊद आ पर्वम इ पालामी मो मपाइनुड। गो एको राज्य इ तौ आ पालाम रोइक्नुड। १राजा १२:१९ 13 तन्न गो राज्य नेल्ल मरोइक्नुड। आं गेय पाइब दाऊद नु आं योव्रशो सहर यरूसलेम आस पर्वम इस्राएल डा थर का इ तौ कली गेनुड” देंमाक्त।

सोलोमन आ जोरी सत्रु

14 मिनु परमप्रभु यावेमी इस्राएली आन मुर एदोम डा पिप आ खिं डा मुर हादाद कली सोलोमन आ जोरी सत्रु सेल्शा पोक्गा बाक्त। 15 डोंइती दाऊदम एदोमी नु लडाइ पवानु, मेको आ लडाइ पाइब आन ठेयब मुर योआबमी मेकेर बेक्शो मुर आन कली थिम्थ लमेनु, मेको रागी डा वोंइश मुर नेल्ल आन कली साइशो बाक्माक्त। २सामुएल ८:१४ 16 मेना योआब नु इस्राएली नेल्लेम एदोम डा वोंइश मुर नेल्ल आन कली साइक्ने मथुम्मे सम्म मेकेर ६ महिना बाक्मा बाक्त। 17 मेना हादाद आलन बाक्माक्त। मिनु आ आफ आ गेय पाइब का निक्शी एदोमी नु प्रोक्शा इजीप्त लशो बाक्माक्त। 18 मिनु मेकोपुकी मिदयान रे पारानम जाक्मा बाक्त। मिनु पारान रे सुइ मुर आन कली लाइशशा इजीप्त डा पिप फाराओ आ बाक्तीके लशो बाक्मा बाक्त। मिनु फाराओमी हादाद कली आ रागीम खिं का रू नु जचा तूचा थोव्रक गार पा गेशा वोइशो बाक्माक्त। 19 फाराओमी हादाद कली शुश दाक्ता बाक्त। मिनु मेकोम आ मीश पिपीम तहपेनेस आ लोक्ब का गेशा ग्युंवे पदा बाक्त। 20 मिनु तहपेनेस आ लोक्बमी हादाद रे गेनुबाथ नें पाइशो तौ का थिवा बाक्त। मिनु तहपेनेसमी मेको आल कली दूध प्रोइपाइशशा फाराओ आ खिंम थुला बाक्त। मिनु गेनुबाथ फाराओ आ आलपुकी नुन कोल्माक्त। 21 मिनु हादाद इजीप्तम बाक्मेनु, मेकोम दाऊद बेक्शो नु मेको आ लडाइ पाइब आन ठेयब मुर योआब यो बेक्ने थुम्शो लोव्र नेना बाक्त। मिनु हादादम फाराओ कली “आं कली आं रागी लेत्चा गेयीनी” देंमाक्त। 22 तन्न फाराओम मेको कली “आं रागीम इन कली मार मजाक्दीम्मे? मिनु ‘आं रागी लेशशा लाइनुड’ देंनी” दे हिल्लो पवा बाक्त। मिनु मेकोमी “मारेइ माल्शो मबाक्ब। तन्न आं कली लचा गेयीनी” देंमाक्त।

23 मिनु परमप्रभुम सोलोमन आ पर्वम अर्को जोरी सत्रु का यो पोक्गा बाक्त। मेको एल-आदा आ तौ रेसोन बाक्माक्त। मेको आ होव्रप सोबाह डा पिप हादादेजेर रे प्रोक्शा लशो बाक्माक्त। २सामुएल ८:३ 24 मिनु दाऊदम सोबाह डा लडाइ पाइब आन कली सदानु, मेको रेसोनमी आ मुर आन कली खुप्ता बाक्त। मिनु मेको मरिम्शो पाइब आन हुल डा ठेयब मुर दुम्माक्त। मिनु मेको मरिम्शो पाइब आन हुल दमस्कस लमा बाक्त। मिनु मेकोपुकीम मेकेर ग्राशा दमस्कस आन के सेल्मे बाक्त। मिनु मेको मेकेर डा पिप दुम्माक्त। २सामुएल १०:१८ 25 रेसोन सोलोमन बाक्म सम्मन इस्राएल आ जोरी सत्रु दुम्माक्त। मिनु हादाद आ मरिम्शो पशोम, मेकोम मरिम्शो तेम्दा बाक्त। मिनु अरामम हुकुम पवा बाक्त। मिनु मेको इस्राएल आ जोरी सत्रु दुम्माक्त।

येरोबाम जोरी सत्रु दुम्शो

26 एफ्राइम आ थर, सेरैदाह सहर डा नेबात आ तौ येरोबाम सोलोमन आ गेय पाइब बाक्माक्त। मेको आ ममा आ नें सेरूआह बाक्माक्त। मेको आ वोंइश बेक्शो मीश मुर बाक्माक्त। मेको येरोबाममी यो सोलोमन कली श्येत गेचा गोवा बाक्त। 27 मेकोमी पिप कली मार पवा बाक्त देशा हना, सोलोमनम मेको कली मिल्लो बोल्यो दरवार सेल्पाइशो नु आ आफ दाऊद आ सहर डा ब्रेशो गारो सुपाइशो बाक्माक्त। १राजा ९:१५, २४ 28 येरोबाम थाम्पा गेय पाइब मुर का बाक्माक्त। मेको ठिटा मुर आ गेय पशो तशा, सोलोमनमी मेको कली योसेफ आ खिं डा गेय पाइब आन कली कोव्रब मुर सेला बाक्त। 29 मिनु येरोबाम यरूसलेम रे अर्को रागी लना लन बाक्माक्त। मेना परमप्रभु यावे आ लोव्र पाइब शिलो सहर डा अहीयाहमी मेको कली लांम गुमा बाक्त। अहीयाहम नक वा फेक्शो बाक्माक्त। लांम ग्रुम्सानु मेको निक्शी ला बाक्सा बाक्त। 30 मिनु अहीयाहमी मेको आ फेक्शो नक वा खाक्शा १२ टुक्रा सेला बाक्त। 31 मिनु मेकोमी येरोबाम कली “१० टुक्रा गुम्सो। मारदे हना परमप्रभु यावे, इस्राएली आन परमप्रभुमी ‘गो एको राज्य सोलोमन आ गुइ रे रोइक्नुड। मिनु इ कली १० थर गेनन। १राजा १२:१५; १राजा १४:२ 32 थर का मेको केन लीब। आं गेय पाइब दाऊद नु यरूसलेम आ पर्वम मोदेशो दुम्ब। मारदे हना गो यरूसलेम सहर इस्राएली आन थर नेल्ल आन दाते रे आं के दुम्पाइशशा योव्रता। भजन संग्रह १३२:१३ 33 मेकोमी आं कली प्रोइतीके, गो मो पाइनुड। मेकोमी सीदोनी आन देवी अशतोरैथ, मोआब डा देवता केमोश नु अम्मोनी आन देवता मोलेक कली पूजा पाप्तु।

मेको आं लांम मगा। मेकोमी आं डोंइती मार ठीक बाक्मे, मेको मपावो। मेकोम आ आफ दाऊदम पशो खोदेशो पा, आं फुल्लुम मुशा ब्रेक्शो लोव्र नु आं निसाफ पतीक लोव्र मपावो। मोलेक देवता कली मिल्लकोम यो देशो बाक्त। 34 मो हना यो गो मेको आ राज्य नेल्ल मरोइक्नुड। गो मेको कली मबेक्म सम्म सासन पाइब सेल्लुड। मेको आं योव्रशो गेय पाइब नु आं शेंशो नु आं फुल्लुम मुशा ब्रेक्शो लोव्र टीब दाऊद आ पर्वम मोदेशो पाइनुड। २सामुएल ७:१२ 35 तन्न गो मेको आ राज्य आ तौ रे १० थर रोइशशा इ कली गेनन। 36 थर का चहिं गो मेको आ तौ कली गेनुड। मोपा आं योव्रशा बाक्शो सहर यरूसलेमम आं गेय पाइब दाऊद आ मुर का लीमल। १राजा १५:४; २राजा ८:१९ 37 गो इ कली सासन पपाइक्नुड। गे इ दाक्शो नेल्ल आन कली सासन पाइनेवे। गे इस्राएल डा पिप दुम्नेवे। 38 मिनु गे आं गेय पाइब दाऊद खोदेशो पा आं शेंशो नेल्ल पाप्तीवी नु आं लांम गाक्ते हना, आं डोंइती मार ठीक बाक्मे, मेको नेल्ल पाप्तीवी हना, आं फुल्लुम मुशा ब्रेक्शो लोव्र नु आं शेंशो नेल्ल आं गेय पाइब दाऊदम खोदेशो पा टिप्तीवी हना, गो गे नु बाक्नुड। गो इ खिं कली गेना हना यो लीपाइक्नुड। मिनु इस्राएल इ कली गेनन। १राजा ९:४ 39 मिनु गो दाऊद आ चच युइ आन कली सजाइ गेनुडमी। तन्न गेना हना यो कली ममाइ' दे परमप्रभुम देशो बाक्ब" देंमाक्त। 40 मोपतीके सोलोमनमी येरोबाम कली साइक्चा मला बाक्त। तन्न येरोबाम इजीप्त डा पिप शीशक आ बाक्तीक प्रोक्शा लमाक्त। मिनु सोलोमन मबेक्म सम्म मेकेर बाक्माक्त। १राजा १४:२५

सोलोमन बेक्शो

41 मिनु सोलोमनम पशो अरु गेय, आ जोक्तीक तुइक्तीक, मार, मेको सोलोमन आ इतिहासम ब्रेक्शो मबाक्बा डा? २इतिहास ९:२९-३१ 42 सोलोमनमी यरूसलेमम बाक्शा, इस्राएली नेल्ल आन कली ४० बर्स सम्म सासन पवा बाक्त। 43 मिनु नोले मेको बेक्माक्त। मिनु आ आफ दाऊद आ सहरमी थिम्चा पुंइसे बाक्त। मिनु मेको आ पा डा आ तौ रेहोबाम पिप दुम्माक्त।

12

रेहोबामम इस्राएल कली मरिम्शो पशो

२इतिहास १०:-

1 रेहोबाम शेकेम सहर लमाक्त। मारदे हना इस्राएली नेल्ले मेको कली पिप सेल्चा कली मेकेर लशो बाक्मा बाक्त। 2 मिनु नेबात आ तौ येरोबामम मेको लोव्र नेना बाक्त। मेको मेना सम्म इजीप्त रागीमी बाक्शो बाक्माक्त। मेको सोलोमन पिप क्येडा प्रोक्शा, लशो बाक्माक्त। मिनु येरोबाम इजीप्त रे लेम्माक्त। १राजा ११:४० 3 मोपतीके मुरपुकीम येरोबाम कली ब्रेत्थ सोइक्तमे बाक्त। मिनु मेको नु इस्राएली नेल्ल जाक्शा रेहोबाम कली 4 “इन आफोमी आंइ कली शुश श्येत गेप्टु। मिनु मुल गे इन आफ खोदेशो मपथु, आंइ कली मोदेशो श्येत रे प्रोनीन। मिनु गो इन गेय पाइब दुम्नीकी” देंमा बाक्त। 5 मिनु रेहोबामम मेको आन कली “आं कली नाक्त सां सम्म मिम्चा गेयीनी। मिनु लेंशा जाक्कीन” देंमाक्त। मोपतीके मुरपुकी खिं लमा बाक्त।

6 मिनु पिप रेहोबाममी आ आफ सोलोमन आ पाला डा सल्ला गेब खाल्पापुकी नु सल्ला पुंइशा “एको मुर आन कली गो मार देंड, गे मार सल्ला गेनीनी?” दे हिल्लो पामी बाक्त। 7 मिनु मेकोपुकीमी “मुलाक्त गे मेको मुर आन कली रिम्शो पाइतीनी हना, गे मेको आन गेय पाइब खोदेशो दुमीन। मिनु मेको आन कली रिम्शो लोव्र पने। मिनु नोले मेकोपुकी गेना हना यो इन गेय पाइब दुम्नीम” देंमा बाक्त। 8 तन्न मेकोमी मेको खाल्पा आन सल्ला मबिस्से बाक्त। मिनु मेकोमी आ खोदेशो आ नु कोल्शो सल्ला गेब ठिटा आन कली सल्ला पुना बाक्त। 9 मिनु मेकोमी मेको आन कली “गे मार देंनीनी? मुरपुकीमी ‘इन आफोम शुश श्येत गेप्टु’ देंतेक्म। मुल गो मेको आन कली मार देंचा माल्लुडा?” दे हिल्लो पामी बाक्त। 10 मिनु मेको नु कोल्शो ठिटापुकीम मेको कली “इन कली ‘इन आफोम शुश श्येत गेप्टु, मुल गे आंइ कली मेको श्येत रे प्रोनीन’ देंब आन कली गे मार देंचा माल्लनीनी देशा हना ‘आं आइक्च ब्रेच्यो आं आफ आ क्रातो क्येडा यो ठेयब बाक्ब। 11 आं आफोम इन कली श्येत गेप्टु। मुल गो इन कली मेको क्येडा यो शुश श्येत गेनुड। आं आफोम इन कली कोक्केम तुप्पाइशो बाक्त। तन्न मुल गो इन कली बिच्छीम क्राइक्पाइक्नन्नी’ दे मतीन” देंमा बाक्त।

12 मिनु पिपमी नाक्त सां नोले जाक्कीन, दे सोइशशो येरोबाम नु मुर नेल्ले पिप रेहोबाम आ बाक्तीक जाक्मा बाक्त। 13 मिनु पिपमी मेको खाल्पा आन गेशो सल्ला मनेंथु, मेको आन कली मरिम्शो लोव्र पाइक्मी बाक्त। हितोपदेस १५:१ 14 मेको ठिटा आन गेशो सल्ला बिशशा, मुर आन कली “आं आफोम इन कली श्येत गेप्टु। मुल गो इन कली मेको क्येडा यो शुश श्येत गेनुड। आं आफोमी इन कली कोक्केम तुप्पाइशो बाक्त। तन्न मुल गो इन कली बिच्छीम

क्राइक्पाइक्नन्नी” दे माइक्मी बाक्त। 15 मोपा पिपम मेको मुर आन लोव्र मनेना बाक्त। मारदे हना, शिलो सहर डा अहीयाह रे पा नेबात आ तौ येरोबाम कली देंशो लोव्र गाप्चा कली परमप्रभु यावेमी मोदेंशो पशो बाक्माक्त। १राजा ११:२९-३१

येरोबाम कली पिप सेल्चशो

16 मिनु इस्राएली नेल्लेमी पिपम मेको आन लोव्र मनेशो तुइश्शा, मेकोपुकीम पिप कली “दाऊद नु आंइ के ततीक मार बाक्बा डा? येस्से आ तौ नु आंइ के ततीक मारेइ मबाक्ब। इस्राएली, आंम आंम खिं लेतीन। दाऊद गे आंम थुती थाती पांइसो” देंमा बाक्त। मोपतीके इस्राएली आन आन खिं लेम्मा बाक्त। २सामुएल २०:१ 17 तन्न पिप रेहोबामम यहूदा डा सहरम बाक्ब इस्राएली आन कली सासन पना पन बाक्माक्त। 18 मिनु पिप रेहोबामम वाइल आन गेय कोव्रब अदोराम कली सोइक्ता बाक्त। तन्न इस्राएली नेल्लेम मेको कली फुल्लु आप्शा सदमे बाक्त। मोपतीके पिप रेहोबाम रीब पा आ बग्गी डोइश्शा यरूसलेम प्रोकमाक्त। 19 मोपतीके मेको नाक्त रे मुल सम्म इस्राएलीपुकी दाऊद आ खिं डा मुर नु जोरी सत्रु दुम्शो बाक्नीम।

येरोबाम इस्राएल डा पिप दुम्शो

२इतिहास ११:१-४

20 मिनु इस्राएली नेल्लेमी “येरोबाम लेशशा जाक्शो बाक्ब” देंशो लोव्र नेंशा, मेको कली ब्रेत्थ सोइक्तमे बाक्त। मिनु मेको कली इस्राएल डा पिप सेल्मे बाक्त। यहूदा आ थर डा मुर ला दाऊद आ खिं डा मुर आ नोले खोदमे बाक्त।

21 मिनु सोलोमन आ तौ रेहोबाम यरूसलेमम जाक्शा, इस्राएली नु लडाइ पा आ राज्य लेत्चा कली यहूदा नु बेन्यामीन आस थर डा लाख का ८० हजार लडाइ पाइब आन कली खुप्तीमी बाक्त। 22 तन्न परमप्रभुमी आ मुर शेमायाह कली लोव्र पवा बाक्त। 23 मार लोव्र पवा बाक्त देंशा हना “सोलोमन आ तौ यहूदा डा पिप रेहोबाम, यहूदा नु बेन्यामीन आस थर डा मुर नेल्ल नु लीशो मुर आन कली, 24 परमप्रभु यावेमी ‘गेपुकी आंम लोकब इस्राएली नु लडाइ पचा कली इर मलने। गे नेल्ल इन खिं खिं लेशशा लने। मारदे हना एको आं मिम्शा पशो बाक्ब’ देंनो” देंमाक्त। मोपतीके मेकोपुकी परमप्रभु यावे आ देंशो खोदेंशो पा लडाइ पथ मलथु, आन खिं खिं लेशशा लमा बाक्त।

येरोबाम आ पाप

25 मेको नोले येरोबाममी एफ्राइम डा पहाडम बाक्शो शेकेम सहर सेला बाक्त। मिनु आ रागी बोल्यो सेल्शा, मेकेर बाक्माक्त। मेकेर रे लशा मेकोम पेनुएल सहर सेला बाक्त। 26 मिनु येरोबामम आ थुंमी “एको राज्य दाऊद आ खिं गेन लेशशा लाइब। 27 एको मुरपुकी गेना हना यो परमप्रभु यावे आ खिं यरूसलेमम चढेथ लाम्तेक्म हना, मेको आन थुं आन ठेयब मुर यहूदा आ खिं डा पिप रेहोबाम गे लेप्ब। मेकोपुकीम आं कली साइश्शा यहूदा डा पिप रेहोबाम गे लेत्नीम” दे मिम्शो बाक्माक्त। 28 मिनु पिपम सल्ला पा सुन के बाछा निक्शी सेल्पदा बाक्त। मिनु मेकोम मुर आन कली “गे मुल यरूसलेम लशा शुश श्येत जाइनीनी। इस्राएली, इन कली, इजीप्त रे गुंइशा चाक्ब देवता एकेन बाक्नीम” दे माइक्मी बाक्त। प्रस्थान ३२:४,८ 29 मिनु मेकोमी मेको बाछा का बेथेल सहरम नु का चहिं दानम वोदा बाक्त। न्यायाधीस १८:३० 30 मिनु मेको मो पशो इस्राएलमी पाप दुम्माक्त। मुरपुकी मेको देवता आस कली पूजा पचा कली बेथेल नु दान सम्म लाइबाक्मा बाक्त। १राजा १४:१६ 31 मिनु येरोबामम डांडा तार यो पूजा पतीक थानपुकी सेला बाक्त। मिनु मेकेर लेवी आन मुर मबाक्तेक्म हना यो अर्को थर डा मुर रे चढेबपुकी योव्रशा वोइक्मी बाक्त। 32 मिनु येरोबामम ८ महिना डा १५ नाक्त यहूदा डा चाड खोदेंशो पा चाड का मानेतीक नाक्त सेला बाक्त। मिनु थानपुकीम क्योरशा चढेपपाइक्मी बाक्त। मेकोमी आ सेल्शो बाछा आस कली यो मार मार क्योरशा चढेपपाइक्मी बाक्त। मेकोमी बेथेलम आ सेल्शो डांडा डा थानपुकीमी यो चढेब आन कली योव्रशा वोइक्मी बाक्त। 33 मेकोम ८ महिना डा १५ नाक्त आ देंशो ना बेथेल डा आ सेल्शो चढेतीकेम मार मार चढेवा बाक्त। मोपा मेकोम इस्राएली आन कली चाड का मानेतीक नाक्त सेला बाक्त। मिनु मेकोमी धूप चोवा बाक्त।

13

यहूदा रे जाक्शो परमप्रभु आ मुर

1 मिनु येरोबाम धूप चोचा कली चढेतीक आ नेक्था राम्मेनु, परमप्रभु आ मुर का परमप्रभु यावे आ लोव्र कुरशा यहूदा रे बेथेलम जाक्माक्त। 2 मिनु मेकोमी मेको चढेतीक आ पर्बम परमप्रभु यावे आ लोव्र पा “ए चढेतीके! ए चढेतीके!

परमप्रभु यावेमी 'दाऊद आ खिं रे योसीयाह नें पाइशो आल का जरमेब। मिनु मेकोमी इर थान डा धूप चोइब चढेब आन कली क्योरशा इ तार चढेब। मेको आन रुश इ तार चोइब' देशो बाक्ब" देंमाक्त। २ राजा २३:१६, २० ३ मेको नाक्त मेको मुरुमी चिन्ड का कोंइदा बाक्त। मेकोमी "परमप्रभु यावे आ लोत्र आ चिन्ड मार बाक्ब देशा हना, मेको चढेतीक ब्रेण्ब। मिनु मेकेर बाक्शो पुलु चहिं लाडगाम ब्राइब" देंमाक्त। ४ मिनु येरोबामम परमप्रभु आ मुरुम बेथेल डा चढेतीक आ पर्वम ठेयब सेंदा पा देशो लोत्र नेना बाक्त। मिनु मेकोम चढेतीक रे आ गुइ दिंशा "मेरे कली ग्याइक्तीन" देंमाक्त। तन्न येरोबाम आ गुइ मुक्ने मचबा बाक्त। ५ परमप्रभु यावे आ लोत्रमी आ मुर रे देशो लोत्र गाप्शा, चढेतीक ब्रेम्माक्त। पुलु यो लाडगाम ब्रमाक्त। ६ मिनु पिपमी परमप्रभु आ मुर कली "आं गुइ डोंइती डा खोदेशो दुम्ल, दे परमप्रभु यावे, इन परमप्रभु कली आं पर्वम पुनीन" देंमाक्त। मिनु पिप आ देशो खोदेशो पा मेको परमप्रभु आ मुरुम परमप्रभु यावे कली पुना बाक्त। मिनु पिप आ गुइ डोंइती डा खोदेशो दुम्माक्त। प्रस्थान ८:४ ७ मिनु पिपम परमप्रभु आ मुर कली "गो नु आं खिं गाक्कीन। मिनु मारेइ जचा थोत्रक जने। मिनु गो इन कली कोसेली गेनन्नी" देंमाक्त। ८ तन्न मेको परमप्रभु आ मुरुमी पिप कली "गे आं कली इन राज्य उइक्थ पा योक्शा गेतीनी हना यो, गो इन खिं मलाइनुड। गो जचा थोत्रक यो मजाइनुड, ब्वाक्कु यो मतूनुड। ९ मारदे हना परमप्रभु यावेमी आं कली 'गे मेकेर जचा थोत्रक मजावो। ब्वाक्कु यो मतूडो। मिनु इ लशो लां रे लेशशा मपिवो' देशो बाक्ब" देंमाक्त। १० मोपतीके मेको अर्को लां रे पा लेम्माक्त। डोंइती बेथेल जाक्शो लां रे मलेम्माक्त।

११ मेना बेथेलमी खूशो परमप्रभु यावे आ लोत्र पाइब मुर का बाक्माक्त। मिनु मेको आ तौपुकी जाक्शा, मेको नाक्त परमप्रभु आ मुरुम बेथेलम पशो गेय नेल्ल शेंदमे बाक्त। मेकोपुकीम मेकोमी पिप कली देशो लोत्र यो आन आफ कली शेंदमे बाक्त। १२ मिनु मेको आन आफोमी मेको आन कली "मेको तेको लां रे लम?" दे हिल्लो पामी बाक्त। मिनु आ तौपुकीम यहूदा रे जाक्शो मेको परमप्रभु आ मुर लशो लां कोंइदमे बाक्त। १३ मिनु मेकोमी आ तौ आन कली "आं कली गधा काम लगम पाइशशा गेयीनी" दे माइक्मी बाक्त। मिनु मेकोपुकीम मेको कली गधा काम लगम पाइशशा गेमे बाक्त। मिनु मेको गधाम डोइशशा, मेको मुर आ नोले खोदा बाक्त। १४ मिनु मेकोमी परमप्रभु आ मुर माल्शा, मेको कली रवा आ पुंमी नाइशशा बाक्शो थिदा बाक्त। मिनु मेकोमी मेको कली "यहूदा रे जाक्शो परमप्रभु आ मुर गेन ननी?" दे हिल्लो पवा बाक्त। मिनु मेकोम "ओं, गोन नड" देंमाक्त। १५ मिनु मेकोमी मेको कली "गो नु आं खिं लशा, मारेइ जचा थोत्रक जने" देंमाक्त। १६ तन्न मेकोमी "गो गे नु लेशशा लने मचाप्नुड। इन खिंम ओत्रने मचाप्नुड। गो एको रागीम मारेइ जने तूने मचाप्नुड। १७ मारदे हना परमप्रभु यावेमी 'गे मेको रागीम जचा थोत्रक मजावो। ब्वाक्कु यो मतूडो। इ लशो लां रे मलेतो' देशो बाक्ब" देंमाक्त। १८ मिनु मेको परमप्रभु यावे आ लोत्र पाइब खूशोमी मेको कली "गो यो इन खोदेशो परमप्रभु यावे आ लोत्र पाइब नड। मिनु परमप्रभु यावे आ स्वर्ग डा गेय पाइब काम गो नु जचा तूचा कली इन कली आं खिंम चाक्चा माल्नेवे देंत" देंमाक्त। तन्न मेकोमी मेको कली जोल पाइशशा बाक्माक्त। १९ नोले मेको परमप्रभु आ मुर लेशशा, मेको नु लमाक्त। मिनु मेको आ खिंम जवा तूडा बाक्त।

२० मिनु मेकोपुकी जना जन बाक्मानु, परमप्रभु यावेमी मेको लेशशा चाक्ब, आ लोत्र पाइब खूशो कली लोत्र पपदा बाक्त। २१ मिनु मेकोमी यहूदा रे जाक्शो, परमप्रभु आ मुर कली ठेयब सेंदा पा "परमप्रभु यावेमी 'गे परमप्रभु यावे आ लोत्र मटिवी। मिनु गे परमप्रभु यावे, इ परमप्रभु आ अरेशो मटिवी। २२ मेको आ मजावो, मतूडो देशो रागीम लेशशा, जथ तूथ जाक्ते। मोपतीके मुल इ बेक्शो रां इ किकी पिपी आन तुरसुम मथिम्सीब' देशो बाक्ब" देंमाक्त। २३ मिनु मेको परमप्रभु आ मुरुम जने तूने थुमा नोले, मेको कली लेशशा चाक्ब परमप्रभु यावे आ लोत्र पाइब खूशोमी मेको कली आ लगम पाइशशा गधा गेवा बाक्त। २४ मिनु मेको लना लन बाक्मेनु लांम गुप्स का गूशा मेको कली सदा बाक्त। मिनु मेको आ बेक्शो रां लांम गोल्शा लीमाक्त। गधा मेको आ नेक्थान राप्शा बाक्शो बाक्माक्त। मिनु गुप्स यो मेको आ नेक्था राप्शा बाक्शो बाक्माक्त। १ राजा २०:३६ २५ मिनु मेको लां रे पा गाक्ब मुरपुकीम मेको आ बेक्शो रां लांम गोल्शा बाक्शो नु गुप्स मेको आ नेक्थान बाक्शो तामे बाक्त। मिनु मेकोपुकीम मेको खूशो परमप्रभु यावे आ लोत्र पाइब आ सहर लशा, मेको लोत्र शोत्रडमे बाक्त।

२६ मिनु मेको कली लां रे लेशशा चाक्ब मेको खूशो परमप्रभु यावे आ लोत्र पाइबमी मेको लोत्र नेना बाक्त। मिनु मेकोम "मेको परमप्रभु आ मुर बाक्ब। मेकोम परमप्रभु यावे आ लोत्र मटिशो बाक्त। मोपतीके परमप्रभु यावेम मेको कली गुप्स कली गेवा बाक्त। मिनु परमप्रभु यावेम मेको आ पर्वम पशो लोत्र गाप्शा कली गुप्सम मेको कली सदा बाक्त" देंमाक्त २७ मिनु मेको परमप्रभु यावे आ लोत्र पाइब खूशोमी आ तौ आन कली "आं कली गधा काम लगम पाइशशा गेयीनी" दे माइक्मी बाक्त। मिनु गधाम लगम पाइशशा गेमे बाक्त। २८ मिनु मेको लमेनु, मेको मुर बेक्शा

लांम गोल्शा बाक्शो नु गधा नु गुप्स मेको आ नेक्था राप्शा बाक्शो थिदा बाक्त। मेको गुप्सम मेको बेक्शो मुर कली मब्बशो बाक्माक्त। गधा कली यो मसाइशो बाक्माक्त। 29 मिनु मेको परमप्रभु यावे आ लोत्र पाइब खूशोमी मेको परमप्रभु आ मुर आ बेक्शो रां गुप्शा गधाम वोदा बाक्त। मिनु मेको आ पर्बम रोंका पा थिम्चा कली आ सहरमी चाक्गा बाक्त। 30 मिनु मेकोम मेको बेक्शो मुर कली आ तुरसुमीन थिमा बाक्त। मिनु मेकोपुकीम “ए आंइ लोकब, ए आंइ लोकब” दे रोंका पामे बाक्त। येरमीया २२:१८ 31 मिनु मेको कली थिम्ने थुम्शा, मेको परमप्रभु यावे आ लोत्र पाइब खूशोमी आ तौ आन कली “गो बेक्डा नोले आं कली यो मेकेर वोतीन। आं रुश मेको परमप्रभु आ मुर आ नेक्था लीमल। 32 मारदे हना मेको मुर आ देशो, बेथेलम बाक्शो परमप्रभु यावे कली चढ़ेतीक नु सामरीया सहर डा डांडा डा थान आन पर्बम देशो नेल्ल थमा पा गाप्ब” देंमाक्त।

33 मिनु मेको नोले यो येरोबामम आ मरिम्शो पतीक मप्रोना बाक्त। मेकोम डांडाम बाक्शो थानम थर नेल्ल डा मुर रे चढ़ेब योत्रशा वोइक्ना वोइक्न बाक्माक्त। सुइ मुर चढ़ेब दुम्चा दाक्ताक्व हना, मेको कली तेकोइ डांडा का डा चढ़ेब सेल्शा वोदा बाक्त। १राजा १२:३१; प्रस्थान २८:४१ 34 मेको येरोबाम आ खिं डा पाप बाक्त। मोपतीके मेको आ खिं मलीथु, रागी रे क्याम्चा पुंइसे बाक्त।

14

येरोबाम आ तौ बेक्शो

1 मिनु येरोबाम आ तौ अबीयाह रोइ पवा बाक्त। 2 मिनु येरोबाममी आ मीश कली “गे येरोबाम आ मीश नवे, दे मुरुम मतुइक्पाइक्चा डा पा वा फेक्सो। मिनु शिलो सहरम लावो। मेकेर परमप्रभु यावे आ लोत्र पाइब अहीयाह बाक्ब। मेकोम आं कली एको मुर आन पिप दुम्नेवे देशो बाक्त। १राजा ११:२९-३१ 3 मिनु गे १० ओटा शोब्ले, आइक्च बटुक नु गर का खुदो लाइशशा, मेको आ बाक्तीक लावो। मिनु मेकोमी आल कली मार दुम्बा, मेको इ कली शेंब” दे मदा बाक्त।

4 मोपतीके येरोबाम आ मीशेम मेकोम देशो खोदेशो पवा बाक्त। मिनु मेको रीब पा शिलो अहीयाह आ खिं लमाक्त। मेना अहीयाह मिक्च मताइब दुम्शो बाक्माक्त। मारदे हना मेको खूशो दुम्शो बाक्माक्त। 5 तन्न परमप्रभु यावेमी अहीयाह कली “येरोबाम आ मीश आ रोइ पशो तौ आ पर्बम इ कली हिल्लो पथ जाक्ब। मिनु गे मेको कली आं देशो लोत्र मतो” देंमाक्त। मिनु मेको अर्को मीश मुर दुम्खु पा जाक्माक्त। 6 मिनु अहीयाहमी आ लाप्चोम खोइल थेक्शो नेंशा, मेको कली “ए येरोबाम आ मीश खिंङगा पिबो। गे मारदे अर्को मीश मुर खोदेशो दुम्खु पवी? गो इ कली मरिम्शो लोत्र देंचा माल्नुड। 7 गे येरोबाम कली परमप्रभु यावे, इस्राएली आन परमप्रभुमी ‘गो इ कली मुर आन दाते डा ठेयब मुर सेल्ता। मिनु आं मुर इस्राएली, आन कली सासन पाइब सेल्तन। १राजा ११:३७ 8 गो दाऊद आ खिं डा मुर रे राज्य खोइशशा, इ कली गेतन। तन्न गे आं गेय पाइब दाऊद खोदेशो मदुमे। मेकोमी आं डोंइती मार ठीक बाक्मे, मेको पना पन आं देशो टिप्तु। मिनु आ थुं नेल्लेम आं नोले खोइक्ती। 9 तन्न गे इ क्येडा डोंइती डा मुर नेल्ल आन क्येडा यो शुश मरिम्शो पाप्तीवी। गे इ कली यपाइशशा देवी देवता आन मूर्ति सेल्शा, आं कली गाइक्पाइक्ती। मिनु गे नोले शोंइसाक्वे। 10 मोपतीके गो येरोबाम आ खिंम श्येत चाक्शा, मरिम्शो पाइनुड। गो इस्राएलम बाक्शो येरोबाम आ खिं डा वोइश मुर, वाइल बाक्तेक्म हना यो, अरु मुर बाक्तेक्म हना यो, नेल्ल आन कली साइक्नुडमी। गो मेको आन कली मनुम्मा सम्म येरोबाम आ खिं कली गोबर चोशो खोदेशो पा चोइनुड। १राजा १५:२९; १राजा २१:२१ 11 सहरम बेक्शो येरोबाम आ खिं डा मुर आन कली कुचुमम ब्वाइनीम। मिनु रू मेर बेक्शो आन कली चिक्बीम ब्वाइनीम’ दे परमप्रभु यावेमी देशो बाक्ब। १राजा १६:४; १राजा २१:२४ 12 मुल गे लेशशा इ खिं लावो। गे सहरम ओव्रडे चोटी इ आल बेक्ब। 13 मिनु इस्राएली नेल्लेमी मेको आ पर्बम रोंका पा, मेको कली थिम्नीम। मारदे हना मेको का ला रिम्शो पा थिम्चा पुंइसीब बाक्त। परमप्रभु यावे, इस्राएली आन परमप्रभुमी मेको आल कली दाक्ताक्व। 14 मिनु परमप्रभु यावेमी इस्राएलमी पिप का सेल्ब। मेकोमी येरोबाम आ खिं कली क्याम्ब। मेको मुलाक्तीन बाक्ब। १राजा १५:२९

15 परमप्रभु यावेम इस्राएल कली ब्वाक्कुम एर ओथ पा हिम्शो बुदी मीलु घांस खोदेशो सेल्ब। मेकोमी इस्राएली आन किकी पिपी आन कली गेशो, एको रिम्शो रागी रे खेरब। मिनु मेको आन कली युफ्रेटीस खोला आ आइक्ची हांबुम एर ओथ ब्रपाइक्ब। मारदे हना मेकोपुकीम देवी आ मूर्ति पाइशशा थाम सेल्शा, परमप्रभु यावे कली गाइक्पाइक्तेक्म। २राजा १७:२३ 16 मिनु मेकोमी येरोबामम मरिम्शो पतीके नु इस्राएली आन कली मरिम्शो पपाइशशा आ पर्बम इस्राएल कली प्रोंइब” देंमाक्त। १राजा १२:२८-३०; १राजा १३:३४

17 मिनु येरोबाम आ मीश बोक्शा, आ खिं तिरचा सहर लेम्माक्त। मिनु मेको आ खिं डा लाप्चो जाक्मेनु, आल बेक्माक्त। 18 मिनु परमप्रभु यावेम आ गेय पाइब, अहीयाह रे पा देशो खोदेशो पा इस्राएली नेल्लेमी मेको आ पर्बम रोंका पा थिम्मे बाक्त।

19 येरोबाम आ पशो अरु गेय, मेको आ पशो लडाइपुकी, मेकोम दोदेशो पा सासन पवा, मेको नेल्ल इस्राएल डा पिप आन इतिहासम ब्रेक्शो बाक्ब। 20 येरोबाममी २२ बर्स सासन पवा बाक्त। मिनु मेको बेक्माक्त। मिनु मेको आ पा डा आ तौ नादाब पिप दुम्माक्त। १राजा १५:२५

यहूदा डा पिप रेहोबाम

२इतिहास १२:-

21 मिनु सोलोमन आ तौ रेहोबाम यहूदा डा पिप दुम्माक्त। मेको ४१ बर्स दुम्शो बाक्माक्त। मेकोम यरूसलेम सहरम १७ बर्स सासन पवा बाक्त। परमप्रभु यावेमी इस्राएली आन थर नेल्ल आन दातेम बाक्चा कली मेको सहर योत्रशो बाक्माक्त। रेहोबाम आ ममा आ नें नामा बाक्माक्त। मेको अम्मोनी का बाक्माक्त। १राजा १२:१७ 22 यहूदा डा मुरपुकीम परमप्रभु यावे आ डोंइती मार मरिम्शो बाक्मे, मेको पामे बाक्त। मेकोपुकीमी आन किकी पिपीम मरिम्शो पशो क्येडा यो शुश मरिम्शो पामे बाक्त। परमप्रभु यावे कली थाम्पा रुश पपदमे बाक्त। 23 मेकोपुकीम इर डांडा डांडा डा थानम, देवी आ मूर्ति पाइशो थाम नु लाइशो डांडा डा शुश सफा पाइशो रवा आन आगाम थान सेल्समा बाक्त। २राजा १६:१-४ 24 मेको रागी डा थानम तेल्लेम वोइश मुरपुकी यो बाक्मा बाक्त। मेकोपुकीमी परमप्रभु यावेमी आन डोंइती रे खेरशो रागी रागी डा मुर आन ग्रंग्रा दिशो नेल्ल पामे बाक्त।

25 मिनु रेहोबामम सासन पवा आ ५ बर्सम इजीप्त डा पिप शीशकमी यरूसलेम कली लडाइ तोवा बाक्त। १राजा ११:४० 26 मिनु मेकोमी परमप्रभु यावे आ खिं नु पिप आ खिं डा शुश क्येट लाइब मारेइ मारेइ रोइशशा लदा बाक्त। मेकोम सोलोमन आ सेल्शो सुन के तेक्तीक नेल्ल योल्दा बाक्त। १राजा १०:१६ 27 मिनु पिप रेहोबामम मेको आ पा डा कांसा के तेक्तीक सेल्शा, पिप आ खिं डा लाप्चो खाल पाइब आन ठेयब मुर आन कली जिम्मा गेमी बाक्त। 28 मिनु पिप परमप्रभु यावे आ खिंम ओत्रमेनु, मेको खाल पाइबपुकीम मेको तेक्तीके कुरबाक्मा बाक्त। मिनु नोले लेशशा चाक्शा खाल पाइब आन कोठाम वोइक्बाक्मा बाक्त।

29 रेहोबाम आ पशो अरु गेय, मेको आ पशो नेल्ले मार, मेको यहूदा डा पिप आन इतिहासम ब्रेक्शो मबाक्बा डा? 30 रेहोबाम नु येरोबाम आस दातेम गेना हना यो लडाइ दुम्स डा दुम्स बाक्माक्त। 31 मिनु रेहोबाम बेक्माक्त। मिनु मेको आ किकी पिपी नु दाऊद आ सहरम थिम्चा पुंइसे बाक्त। मेको आ ममा आ नें नामा बाक्माक्त। मेको अम्मोनी बाक्माक्त। मिनु रेहोबाम आ पा डा आ तौ अबीयाम पिप दुम्माक्त।

15

यहूदा डा पिप अबीयाम

1 मिनु अबीयाम यहूदा डा पिप दुम्माक्त। मेना नेबात आ तौ येरोबाम पिप दुम्शो १८ बर्स दुम्शो बाक्माक्त। २इतिहास १३:- 2 मेकोमी यरूसलेमम बर्स सां सासन पवा बाक्त। मेको आ ममा आ नें माकाह बाक्माक्त। मेको अबीशालोम आ तमी बाक्माक्त। 3 मेकोमी आ आफ खोदेशो पा मरिम्शो पवा बाक्त। मेको आ किकी दाऊद खोदेशो पा, आ थुं नेल्लेमी परमप्रभु यावे, आ परमप्रभु आ नोले मखोदा बाक्त। 4 मो हना यो परमप्रभु यावे, मेको आ परमप्रभुमी दाऊद आ पर्बम अबीयाम आ पा डा पिप दुम्पाइक्चा कली तौ का गेवा बाक्त। मोपा यरूसलेम बोल्यो सेला बाक्त। १राजा ११:३६ 5 मारदे हना दाऊदमी परमप्रभु यावे आ डोंइती ठीक पशो बाक्माक्त। मेको परमप्रभु यावे आ देशो रे एर ओंथ मपवा बाक्त। मेकोमी हिती उरीयाह कली मरिम्शो पशो डा लाक्शा अरु मारेइ मरिम्शो मपवा बाक्त। २सामुएल ११:५; २सामुएल १२:९ 6 रेहोबाम नु येरोबाम आस दातेमी लडाइ दुम्स डा दुम्स बाक्माक्त। अबीयाम ब्रोंइम सम्म मोदेशो दुम्माक्त। 7 अबीयाम आ पशो अरु गेय, मेको आ पशो नेल्ले, मार, मेको यहूदा डा पिप आन इतिहासम ब्रेक्शो मबाक्बा डा? अबीयाम नु येरोबाम आस दातेम गेना हना यो लडाइ दुम्स डा दुम्स बाक्माक्त। 8 मिनु अबीयाम बेक्माक्त। मिनु मेको दाऊद आ सहरमी थिम्चा पुंइसे बाक्त। मिनु मेको आ पा डा आ तौ आसा पिप दुम्माक्त।

यहूदा डा पिप आसा

9 आसा यहूदा डा पिप दुम्माक्त। मेना इस्राएल डा पिप येरोबाम पिप दुम्शो २० बर्स दुम्शो बाक्माक्त। 10 मिनु आसामी यरूसलेममी ४१ बर्स सासन पवा बाक्त। मेको आ बगे अबीशालोम आ तमी माकाह बाक्माक्त। 11 आसामी आ किकी दाऊद खोदेशो पा, परमप्रभु यावे आ डोंइती मार ठीक बाक्मे, मेको पवा बाक्त। 12 मेकोमी थानम बाक्ब तेल्लेम वोंइश मुर आन कली रागी रे गुंडदीमी बाक्त। मिनु मेकोमी आ किकी पिपपुकीम सेल्शो मूर्ति नेल्ल ताइक्तीमी बाक्त। २राजा २३:७; २इतिहास १४:१-४ 13 मिनु आ बगे माकाह कली राज्य डा ममा रे गुंडदा बाक्त। मारदे हना मेकोमी अशेराह देवी आ ग्रंग्रा दिशो थाम पाइशो मूर्ति का सेल्सीशो बाक्माक्त। आसामी मेको मूर्ति पाइशो थाम क्योरशा खोल्शा किद्रोन खोल्साम चोपाइक्मी बाक्त। 14 मेकोमी इर डांडा डा थान चहिं मप्रेत्तीके लीमा बाक्त। तन्न आसा ब्रोंइम सम्म आ थुं नेल्लेमी परमप्रभु यावे आ नोले खोदा बाक्त। १राजा २२:४४ 15 मेकोमी आं नु आ आफोम चदेशो सुन, चांदी नु अरु मार मार परमप्रभु यावे आ खिंम चाक्पाइक्मी बाक्त।

16 मेको पिप आसा नु इस्राएल डा पिप बाशा आस दातेम गेना हना यो लडाइ दुम्स डा दुम्स बाक्माक्त। २इतिहास १६:१-६ 17 इस्राएल डा पिप बाशामी यहूदा कली लडाइ तोवा बाक्त। मिनु सुइ आन कली यहूदा डा पिप आसा आ रागी लचा मगेथु, रामाह सहरम गारो प्रोवशा तेक्गा बाक्त। 18 मोपतीके आसामी परमप्रभु यावे आ खिं नु दरवार डा लीशो सुन नु चांदी नेल्ल लाइशशा, आ गेय पाइब आन कली गेमी बाक्त। पिप आसामी मेको नेल्ल आ गेय पाइब आन कली गेशा, पिप ताब्रीमोन आ तौ, अराम डा हेज्योन आ चच, पिप बेन-हादाद आ बाक्तीक सोइक्तीमी बाक्त। मेको दमस्कस सहरम बाक्शो बाक्माक्त। २राजा १२:१९ 19 मिनु पिप आसामी पिप बेन-हादाद कली “इस आफ गारशो खोदेशो पा, गो यो गारस। गो एको सुन नु चांदी कोसेली सोइक्ताक्ड। मुल इस्राएल डा पिप बाशा नु पशो कबल प्रोनीन। मिनु मेकोमी आं रागी प्रोनल” दे सल्ला पचा कली मुर सोइक्ता बाक्त। 20 मिनु बेन-हादादमी पिप आसा आ देशो बिस्से बाक्त। मिनु मेकोमी आ लडाइ पाइब आन ठेयब मुर आन कली इस्राएल डा सहर नु लडाइ पथ सोइक्ता बाक्त। मिनु मेकोपुकीम इयोन, दान, आबेल-बेथ-माकाह किन्नेरोथ नेल्ल नु नाप्ताली आ रागी नेल्ल ग्रामा बाक्त। २राजा १५:२९ 21 मिनु बाशामी मेको लोव्र नेंशा, रामाह सहर कली बोल्यो सेल्चा प्रोना बाक्त। मिनु तिरचा लेशशा लमाक्त। 22 मिनु पिप आसामी यहूदा डा मुर नेल्ल आन कली “बाशामी रामाह कली बोल्यो सेल्चा कली तेल्लो शी फुल्लु चाक्कीन” दे अरेमी बाक्त। मिनु पिप आसामी मेको शी फुल्लुमी बेन्यामीन डा गेबा नु मिस्पा सहर सेला बाक्त। 23 आसा आ पशो अरु गेय, मेको आ सक्ति, मेको आ पतीके, मेको आ सेल्शो सहर, मार, मेको यहूदा डा पिप आन इतिहासम ब्रेक्शो मबाक्बा डा? मिनु मेको खूशो दुम्मेनु, आ खोइल रोइ पवा बाक्त। २इतिहास १६:११-१४ 24 मिनु आसा बेक्माक्त। मिनु मेको आ किकी पिपी नु दाऊद आ सहरम थिम्चा पुंडसे बाक्त। मिनु मेको आ पा डा तौ येहो-शाफात पिप दुम्माक्त। १राजा २२:४१

इस्राएल डा पिप नादाब

25 येरोबाम आ तौ नादाब इस्राएल डा पिप दुम्माक्त। मेना आसा यहूदा डा पिप दुम्शो बर्स निक्शी दुम्शो बाक्माक्त। मिनु पिप नादाबमी इस्राएलम बर्स निक्शी सासन पवा बाक्त। 26 मेकोम परमप्रभु यावे आ डोंइती मार मरिम्शो बाक्मे, मेको पवा बाक्त। मेको आ आफोम खोदेशो पा पाप पा मेको आ लांम गाक्माक्त। मिनु आ आफोमी इस्राएली आन कली पपाइशो पाप यो पवा बाक्त। १राजा १२:२८-३०

27 मिनु इस्साकार आ खिं डा मुर अहीयाह आ तौ बाशाम मेको कली मरिम्शो पचा गोवा बाक्त। मिनु बाशामी मेको कली गिब्बेथोन सहरम तुष्शा सदा बाक्त। मेको गिब्बेथोन सहर नादाब नु इस्राएली नेल्लेम पुम्शा वोइशो, पलिस्ती आन सहर बाक्माक्त। यहोसु १९:४४ 28 मिनु यहूदा डा पिप आसा पिप दुम्शो बर्स सां दुम्मेनु, बाशामी नादाब कली सदा बाक्त। मिनु मेको आ पा डा पिप दुम्माक्त। 29 मिनु मेको पिप दुम चोटीन येरोबाम आ खिं डा मुर नेल्ल आन कली साइक्मी बाक्त। मेकोम येरोबाम आ खिं डा सेस बाक्शो नेल्ल आन कली साइक्मी बाक्त। मोपा परमप्रभु यावेमी आ गेय पाइब शिलो डा अहीयाह रे पा देशो लोव्र नेल्ल खबा बाक्त। १राजा १४:१०-११ 30 येरोबाम आ पशो पाप, मेकोमी इस्राएली आन कली पपाइशो पापम पतीके नु मेकोमी परमप्रभु यावे, इस्राएली आन परमप्रभु कली गाइक्पाइक्तीके मो दुम्शो बाक्माक्त। 31 नादाबमी पशो अरु गेय, मेको आ पशो नेल्ल, मार, मेको इस्राएल डा पिप आन इतिहासम ब्रेक्शो मबाक्बा डा? 32 पिप आसा नु इस्राएल डा पिप बाशा आस दातेमी गेना हना यो लडाइ दुम्स डा दुम्स बाक्माक्त।

इस्राएल डा पिप बाशा

33 मिनु अहीयाह आ तौ बाशामी इस्राएलम सासन पवा बाक्त। मेना आसा यहूदा डा पिप दुम्शो बर्स सां दुम्शो बाक्माक्त। मिनु बाशा तिरचा सहरम बाक्शा २४ बर्स इस्राएल कली सासन पवा बाक्त। 34 मिनु मेको येरोबाम आ लांम गाक्शा, मेकोमी इस्राएली आन कली पपाइश्शो पाप पशा, परमप्रभु यावे आ डोंइती मार मरिम्शो बाक्मे, मेको नेल्ल पवा बाक्त।

16

1 मेको नोले परमप्रभु यावेम बाशा आ पर्बम हानानी आ तौ येहू कली लोत्र पवा बाक्त। 2 मार लोत्र पवा बाक्त देशा हना “गो इ कली फुरक रे पोक्शा आं मुर इस्राएली आन ठेयब मुर सेल्लतन। तन्न गे येरोबाम आ लांम गाक्शा, आं मुर इस्राएली आन कली पाप पपाइक्तीवी। मिनु मेको आन पापम पतीके आं कली गाइक्पाइक्तीमी। १ राजा १४:७ 3 मोपतीके गो बाशा नु आ खिं कली खतम पोक्चा चिक्शो बाक्नुड। मिनु गो इ खिं कली नेबात आ तौ येरोबाम आ खिं खोदेशो सेल्लनुड। १ राजा १५:२९ 4 बाशा, इ खिं डा सहरम बेक्शो मुर आन कली कुचुमम ब्वाइनीम। मिनु रूम बेक्शो मुर आन कली चिक्बपुकीम ब्वाइनीम” देंमाक्त। १ राजा १४:११

5 बाशा आ पशो नु अरु गेय, मेको आ सक्ति, मार, मेको इस्राएल डा पिप आन इतिहासम ब्रेक्शो मबाक्बा डा? 6 मिनु बाशा बेक्माक्त। मिनु तिरचा सहरम आ किकी पिपी आ नेक्था थिम्चा पुंडसे बाक्त। मिनु मेको आ पा डा आ तौ एलाह पिप दुम्माक्त। 7 डोंइती परमप्रभु यावेमी हानानी आ तौ, आ लोत्र पाइब येहू कली बाशा नु आ खिं डा मुर आन पर्बम लोत्र पशो बाक्माक्त। मेकोमी परमप्रभु यावे आ डोंइती मरिम्शो पा गाइक्पाइक्तीके, येरोबाम आ खिं डा मुर खोदेशो दुम्तीके नु येरोबाम नु आ खिं डा मुर आन कली खतम पोक्तीके हानानी आ तौ, आ लोत्र पाइब येहू कली मोदेशो लोत्र पशो बाक्माक्त।

इस्राएल डा पिप एलाह

8 बाशा आ तौ एलाह इस्राएल डा पिप दुम्माक्त। मेना आसा यहूदा डा पिप दुम्शो २६ बर्स दुम्शो बाक्माक्त। मिनु एलाहम तिरचा सहरम बाक्शा, बर्स निक्शी इस्राएल कली सासन पवा बाक्त। 9 मिनु मेको आ लडाइ पाइब बग्गी चलेब, आन भाग निक्शीमी भाग का डा ठेयब मुर जिम्नीमी मेको कली मरिम्शो पचा गोवा बाक्त। मेना पिप एलाह तिरचा सहरम आ खिं डा मारेइ मारेइ कोत्रब अरचा आ खिं तिरचा सहरम बाक्शा, तूशा दुक्शो बाक्माक्त। 10 मिनु जिम्नी आगा ओत्रशा, मेको कली तुप्शा सदा बाक्त। मिनु मेको आ पा डा पिप दुम्माक्त। मेना आसा यहूदामी पिप दुम्शो २७ बर्स दुम्शो बाक्माक्त। २ राजा ९:३१

11 मिनु जिम्नी पिप दुम चोटीन बाशा आ खिं डा मुर नेल्ल आन कली साइक्मी बाक्त। मेकोम बाशा आ खिं डा मुर, मेको आ वारचपुकी नु आ नाता गोत्रता वोंइश मुर नेल्ल आन कली का यो मप्रोंइथु साइक्मी बाक्त। 12 परमप्रभु यावेमी बाशा आ पर्बम आ लोत्र पाइब येहू रे देशो खोदेशो पा, जिम्नीमी बाशा आ मुर नेल्ल आन कली साइक्मी बाक्त। 13 बाशा नु मेको आ तौ एलाहमी पशो पाप नु इस्राएली आन कली पपाइश्शो पाप आ पतीके, आन शोर गाक्शो मूर्ति सेल्लतीके नु परमप्रभु यावे, इस्राएली आन परमप्रभु कली गाइक्पाइक्तीके मोदेशो दुम्शो बाक्माक्त। 14 एलाह आ पशो नु अरु गेय नेल्ले, मार, इस्राएल डा पिप आन इतिहासम ब्रेक्शो मबाक्बा डा?

इस्राएल डा पिप जिम्नी

15 मिनु जिम्नीम तिरचा सहरम ७ नाक्त सासन पवा बाक्त। मेना आसा यहूदा डा पिप दुम्शो २७ बर्स दुम्शो बाक्माक्त। लडाइ पाइबपुकी चहिं पलिस्ती आन सहर गिब्बेथोन आ नेक्था बाक्तीक सेल्लशा बाक्शो बाक्मा बाक्त। १ राजा १५:२७ 16 मिनु बाक्तीक सेल्लशा बाक्ब इस्राएलीपुकीमी जिम्नी आ पशो नु पिप कली साइश्शो लोत्र नेंशा, मेको नाक्तीन मेकोपुकीमी आन बाक्तीक उइ लडाइ पाइब आन ठेयब मुर ओम्नी कली इस्राएल डा पिप सेल्ले बाक्त। 17 मिनु ओम्नी नु इस्राएल डा लडाइ पाइब नेल्लेम गिब्बेथोन प्रोंइशा तिरचा कली पुम्दमे बाक्त। 18 मिनु जिम्नीमी सहर ग्राशो तवा चोटी पिप आ खिं ओत्रशा मी सुइश्शा, आंमा यो दुप्शा बेक्माक्त। २ सामुएल १७:२३ 19 मेकोम परमप्रभु यावे आ डोंइती मार मरिम्शो बाक्मे, मेको पशा, येरोबाम आ लांम गाक्शो बाक्माक्त। मिनु येरोबाम आ पशो पाप नु इस्राएली आन कली पपाइश्शो पाप पतीकेम मेको मोदेशो दुम्शो बाक्माक्त। 20 जिम्नी आ पशो नु अरु गेय, एलाह कली मरिम्शो पशो, मार, मेको इस्राएल डा पिप आन इतिहासम ब्रेक्शो मबाक्बा डा?

इस्राएल डा पिप ओम्नी

21 मेको नोले इस्राएल डा मुरपुकी हुल निक्शी दुम्मा बाक्त। हुल काम गिनाथ आ तौ तिब्नी कली पिप सेल्चा कली वारच पदमे बाक्त। मिनु हुल का चहिं ओम्नी आ नोले खोदमे बाक्त। 22 तन्न ओम्नी आ नोले खोइक्बपुकी गिनाथ आ तौ तिब्नी आ नोले खोइक्ब आन क्येडा बोल्यो बाक्मा बाक्त। मोपतीके तिब्नी कली साइशशा, ओम्नी पिप दुम्माक्त। 23 मोपा ओम्नी इस्राएल डा पिप दुम्माक्त। मेना आसा यहूदाम पिप दुम्शो ३१ बर्स दुम्शो बाक्माक्त। ओम्नीमी नेल्ल पा १२ बर्स सासन पवा बाक्त। मेकोम ६ बर्स तिरचा सहरम बाक्शा, सासन पवा बाक्त।

24 मेकोम टलेन्ट निक्शी चांदीम शेमेर आ गुइ रे सामरीया डा डांडा ग्याप्शा, मेकेर गारो हिरशो सहर का सेला बाक्त। मिनु मेको सहर डा होत्रप शेमेर आ ने रे पा मेको आ ने सामरीया वोदा बाक्त। टलेन्ट का ३४ किलो बाक्ब।

25 तन्न ओम्नीमी परमप्रभु यावे आ डोंइती मार मरिम्शो बाक्मे, मेको पवा बाक्त। मेकोम आ डोंइती डा पिप नेल्ल आन क्येडा शुश मरिम्शो पवा बाक्त। मीका ६:१६ 26 मेको नेबात आ तौ येरोबाम आ पाप डा लांम गाक्माक्त। मेकोमी मेको पाप इस्राएली आन कली पपाइशो बाक्माक्त। मिनु मेकोपुकीम मेको पाप पा आन ग्रांग्रा दिशो मूर्ति आन पर्बम परमप्रभु यावे, इस्राएली आन परमप्रभु कली गाइक्पाइशो बाक्मा बाक्त। 27 ओम्नी आ पशो नु अरु गेय, मेको आ सक्ति कोंइतीके नेल्ल, मार, मेको इस्राएल डा पिप आन इतिहासम ब्रेक्शो मबाक्बा डा? 28 मिनु ओम्नी बेक्माक्त। मिनु सामरीया सहरम थिम्चा पुंडसे बाक्त। मिनु मेको आ पा डा आ तौ आहाब पिप दुम्माक्त।

आहाब इस्राएल डा पिप दुम्शो

29 ओम्नी आ तौ आहाब इस्राएल डा पिप दुम्माक्त। मेना आसा यहूदा डा पिप दुम्शो ३८ बर्स दुम्शो बाक्माक्त। ओम्नी आ तौ आहाब सामरीया सहरम बाक्शा, इस्राएल कली २२ बर्स सासन पवा बाक्त। 30 मिनु ओम्नी आ तौ आहाबमी परमप्रभु यावे आ डोंइती पिप नेल्ल आन क्येडा मरिम्शो पवा बाक्त। 31 नेबात आ तौ येरोबाम आ पाप डा लांम गाक्चा, मेको कली मारेइ खोदेशो मदुम्माक्त। मेकोम सीदोन डा पिप एथ-बाल आ तमी इजेबेल कली ग्युंवे पवा बाक्त। मिनु बाल देवता कली पूजा पा ठेयब सेला बाक्त। 32 मेकोम सामरीयाम बाल आ खिंम बाल कली चढ़ेतीक का सेला बाक्त। २राजा ३:२; २राजा १०:२७-२८; २राजा ११:१८ 33 आहाबम अशेराह देवी आ मूर्ति पाइशो थाम का यो सेल्पदा बाक्त। मिनु मेकोम आ क्येडा डोंइती डा इस्राएल डा पिप आन क्येडा परमप्रभु यावे, इस्राएली आन परमप्रभु कली शुश गाइक्पाइक्तीक गेय पवा बाक्त। 34 आहाबम सासन पवा ना बेथेल डा हीएलमी यरीको सहर लेंशा सेला बाक्त। मेको आ जग वोदमेनु, मेको आ डोंइती जरमेशो तौ अबीराम बेक्माक्त। मिनु मेको आ ठेयब लाप्चो वोदमेनु, मेको आ कान्छा तौ सेगुब बेक्माक्त। मोपा परमप्रभु यावेमी नून आ तौ यहोसु रे पा देशो लोत्र खबा बाक्त। यहोसु ६:२६

17

खदपुकीम एलीया कली थुल्शो

1 मिनु गिलाद डा तिश्बे सहर डा एलीयाम आहाब कली “परमप्रभु यावे, इस्राएली आन परमप्रभु ब्रोंइशा बाक्शो खोदेशो पा, गो मेको आ डोंइती राप्शा गेय पाइनुड। इस्राएलम रेउ नु सीत मारेइ मयीब” देंमाक्त। १राजा ८:३५; लूका ४:२५; याकूब ५:१७; प्रकाश ११:६ 2 मिनु परमप्रभु यावेमी एलीया कली लोत्र पवा बाक्त। 3 मार लोत्र पवा बाक्त देशा हना “एको रागी प्रोंइशा, पूर्ब गे लावो। मिनु यर्दन आ पूर्ब गे बाक्शो केरीथ खोलाम लशा खुइशशा बाक्को। 4 गे मेको खोला डा ब्वाक्कु तूडो। मिनु गो इ कली थुल्चा कली मेकेर डा खद आन कली अरेता” देंमाक्त। 5 मिनु मेकोमी परमप्रभु यावे आ देशो खोदेशो पवा बाक्त। मिनु मेको यर्दन आ पूर्बम बाक्शो केरीथ खोला लशा, खुइशशा बाक्माक्त। 6 मिनु खदपुकीम मेको कली नाक्दो सुनी शोब्ले नु श्ये चाक्शा, गेमे बाक्त। मिनु एलीया मेको खोला डा ब्वाक्कु तूशा बाक्माक्त। 7 इच्का नाक्त नोले रेउ मयितीके मेको खोला डा ब्वाक्कु सोत्रमाक्त।

चारेफाथ डा मीश मुर

8 मिनु परमप्रभु यावेमी मेको कली लोत्र पवा बाक्त। 9 मार लोत्र पवा बाक्त देशा हना “मुल गे सीदोन डा चारेफाथ सहर लावो। गो मेकेर इ कली थुल्चा कली आ वोंइश बेक्शो मीश मुर का कली अरेता” देंमाक्त। लूका ४:२५-२६ 10 मोपतीके मेको चारेफाथ सहरम लमाक्त। मिनु मेको चारेफाथ सहर डा ठेयब लाप्चोम जाक्दीम्मेनु, आ वोंइश बेक्शो मीश मुर का शी खुम्ना खुम्न बाक्शो तवा बाक्त। मिनु मेको कली ब्रेशशा “आं कली शिशी पा लोटा का ब्वाक्कु तूचा गेयी। मिनु गो तूनुड” देंमाक्त। 11 मिनु मेको मीश मुर ब्वाक्कु ब्रथ लन लना, लेंशा ब्रेशशा “आं कली शिशी पा

टुक्रा का शोब्ले यो पिशशा गेयी” देंमाक्त। 12 तन्न मेकोमी “परमप्रभु यावे, इन परमप्रभु ब्रोंडशा बाक्शो खोदेशो पा बोसुम मुठी का फस नु दुडग्रोम इच्का खोइ तेल डा लाक्शा, आं खिंम मारेइ मबाक्ब। गो इच्का खोइ शी खुप्शा, खिं लशा, गो नु आ तौ आंस कली शोब्ले सेलनुड। मिनु गो मेको जशा, बेक्नस्कु” देंमाक्त। 13 मिनु एलीयाम मेको कली “महिनी, खिं लशा इ देशो खोदेशो पावो। तन्न मेको क्येडा डोंइती बटुक का सेल्शा, एक आं बाक्तीक चाक्को। मिनु मेको नोले इस कली जचा थोव्रक सेलो। 14 मारदे हना परमप्रभु यावे, इस्राएली आन परमप्रभुमी ‘गो रागीम रेउ मयिपदु सम्म फस मनुप्ब। मिनु दुडग्रो डा तेल यो मनुप्ब’ देशो बाक्ब” देंमाक्त। २राजा ४:२-४ 15 मिनु मेको मीश मुर लशा एलीयाम देशो खोदेशो पवा बाक्त। मिनु मेको नेल्ल आन कली शुश नाक्त सम्म जचा थोव्रक गाम्माक्त। 16 मारदे हना एलीया रे पा परमप्रभु यावेम देशो खोदेशो पा बोस डा फस मनुम्माक्त। मिनु दुडग्रो डा तेल यो मनुम्माक्त।

17 इच्का नाक्त नोले मेको मीश मुर, मेको खिं डा होव्रपोक्म आ तौ रोइ पवा बाक्त। मिनु मेको नाक्त किंत किंत मरिम्शो दुम्ना दुम्न लमाक्त। मिनु नोले बेक्माक्त। 18 मिनु मेको मीश मुरुम एलीया कली “परमप्रभु आ मुर, गे नु गो इस दातेम मार मरिम्शो दुम्शो बाक्बा? मार, गे आं पाप कोइशा, आं तौ कली साइक्थ जाक्नी?” देंमाक्त। 19 मिनु एलीयाम “इ तौ आं कली गेयी” देंमाक्त। मिनु मेकोमी मेको आ तौ आ गुइ रे ताक्शा आ बाक्तीक तला तार लदा बाक्त। मिनु मेको कली आ ब्राख्येम वोदा बाक्त। 20 मेको नोले मेकोमी ठेयब सेंदा पा परमप्रभु यावे कली “परमप्रभु यावे, आं परमप्रभु, गो सुका आ खिंम बाक्डा, मेको आ तौ बेक्पा मेको वोइश बेक्शो मीश मुर कली मारदे श्येत गेनी” देंमाक्त। 21 मिनु मेको सां खेयप मेको बेक्शो आल तार गोलमाक्त। मिनु ठेयब सेंदा पा, परमप्रभु यावे कली “परमप्रभु यावे, आं परमप्रभु, एको आल कली लेशा ब्रोंडपतीन” देंमाक्त। २राजा ४:३४; प्रेरित २०:१० 22 मिनु परमप्रभु यावेमी एलीया आ पुंडशो लोव्र नेना बाक्त। मिनु मेको आल ब्रोंडमाक्त। 23 मिनु एलीयाम मेको कली पोक्शा तला तार रे आगा यिदा बाक्त। मिनु मेको आ ममा कली गेशा “कोव्रडो, इ तौ ब्रोंडत” दे मदा बाक्त। लूका ७:१५; हिब्रू ११:३५ 24 मिनु मेको मीश मुरुमी एलीया कली “गे परमप्रभु आ मुर बाक्नीनी, दे मुल गो थमा पा तुइक्ताक्ड। मिनु इन देशो परमप्रभु यावे आ लोव्र थमा बाक्त” देंमाक्त।

18

एलीया नु ओबदिया गुम्शो

1 मिनु परमप्रभु यावेम रागी सोव्रशो शुश नाक्त नोले बर्स सांमी एलीया कली लोव्र पवा बाक्त। मार लोव्र पवा बाक्त देशा हना “गे लशा, आहाब कली गुमो। मिनु गो रागीम रेउ यिपाइक्नुड” देंमाक्त। 2 मोपतीके एलीया आहाब कली गुम्थ लमाक्त। मेना सामरीया सहरम ठेयब अन्काल दुम्शो बाक्माक्त। 3 मिनु आहाबमी आ खिं कोव्रब ओबदिया कली ब्रेत्थ सोइक्ता बाक्त। मेको ओबदिया परमप्रभु यावे कली शुश मान पा हिंशा, थमा सुइक्ब मुर का बाक्माक्त। 4 इजेबेलम परमप्रभु यावे आ लोव्र पाइब आन कली साइक्ना साइक्न बाक्मेनु, ओबदियामी मेको आन दाते डा सहे का जना आन कली लाइशशा, मेको आन कली प्रोंइचा कली जचा तूचा थोव्रक गेशा ५०, ५० जना डा हुल पा पुक्खी निक्शीम खुइशशा वोइशो बाक्माक्त। 5 मिनु आहाबम ओबदिया कली “रागी डा ब्वाक्कु बुक्तीके, खोल्सा मेर लावो। गो शारा नु खच्चर आन कली प्रोंइचा कली घांस थित्नासा को? मोपा इं बस्तु भाव आन कली साइक्चा ममाल्नया को?” देंमाक्त। 6 मिनु मेको निक्शीमी कोव्रचा कली रागी योक्ससा बाक्त। मिनु आहाब का गे नु ओबदिया अर्को गे लसा बाक्त।

7 मिनु ओबदिया लांम गाक्ना गाक्न बाक्मेनु, एलीयाम मेको कली गुमा बाक्त। मिनु ओबदियामी मेको कली तुइशशा खप सम्मन बाप्शा सेउ पा “आं प्रभु, गे थमा पा एलीयान ननी?” देंमाक्त। 8 मिनु एलीयाम “ओं, गो नड। गे लशा इ होव्रप कली ‘एलीया एक बाक्त’ मतो” देंमाक्त। 9 मिनु ओबदियामी “गो मार मरिम्शो पडा डा? गे इन गेय पाइब, आं कली साइक्पाइक्चा कली आहाब आ गुइम गेनीनी? 10 परमप्रभु यावे, इन परमप्रभु गेना हना यो ब्रोंडशा बाक्शो खोदेशो पा, आं होव्रपम इन कली रागी रागी नु राज्य नेल्लेम माल्थ सोइक्ताक्व। तेकोइ रागी नु राज्य मलीशो बाक्ब। मिनु मेकोपुकीमी ‘एलीया एक मबाक्ब। गो थमा पा मेको कली थिन्ने मचाप्का’ देंमानु, मेको कसम जचा माल्लेक्म। 11 तन्न मुल गे आं कली लावो, इ होव्रप कली ‘एलीया एक बाक्त, देंनो’ देंतीनी। 12 गो इन कली प्रोनु चोटी परमप्रभु यावे आ सोक्तीम इन कली लाइक्ब। मिनु गो लशा आहाब कली मो देंडानु, मेकोमी इन कली मथित्तु हना, आं कली साइक्ब। मो हना यो, गो, इन गेय पाइब, आं आल रेन परमप्रभु यावे कली मान पा हिंशा, थमा सुइक्ब बाक्नुड। 13 आं प्रभु, इजेबेलम परमप्रभु यावे आ लोव्र पाइब आन कली साइक्ना साइक्न बाक्मेनु, गो मार पडा,

मेको गे मनेनी डा? गो मेको आन दाते डा सहे का जना आन कली ५०, ५० जना पा पुक्खीम खुइशशा वोइक्तामी। मिनु मेको आन कली जचा तूचा गेतामी। 14 मिनु मुल गे आं कली लावो, इ होवप कली 'एलीया एक बाक्त' देंनो, देंतीनी। मेकोमी आं कली थमा पा साइक्ब" देंमाक्त। 15 मिनु एलीयामी "गो मेको आ डोंइती बाक्शो मुर नेल्ल आन परमप्रभु यावे ब्रोंइशा बाक्शो खोदेशो पा, मुलाक्ती थमा पा आहाब कली गुम्नुड" देंमाक्त। 16 मिनु ओबदिया आहाब कली गुम्थ लमाक्त। मिनु मेको कली मेको लोव्र शेंदा बाक्त। मिनु आहाब एलीया कली गुम्थ जाक्माक्त।

एलीया कारमेल डांडाम बाक्शो

17 मिनु आहाबमी एलीया कली तशा, मेको कली "इस्त्राएल कली श्येत गेब गेन नवे?" दे मदा बाक्त। येरमीया ३८:४ 18 मिनु एलीयाम "इस्त्राएल कली श्येत गेब गो मनड। तन्न गे नु इन आफ आ खिं डा मुर इस्त्राएल कली श्येत गेब ननी। मारदे हना गे परमप्रभु यावे आ शेंतीक प्रोंइशा, बाल देवता आ नोले खोइशशो बाक्तीनी। १ राजा १६:३१-३३ 19 मोपतीके मुल कारमेल डांडाम इस्त्राएल डा मुर नेल्ल आं कली गुम्पाइक्चा कली ब्रेत्तीन। मिनु इजेबेलम थुल्शा वोइशशो बाल देवता आ नोले दुम्ब लोव्र पाइब ४ सहे ५० जना मुर नु अशेराह देवी आ नोले दुम्ब लोव्र पाइब ४ सहे जना मुर नेल्ल आन कली यो ब्रेत्तीन" देंमाक्त।

20 मोपतीके आहाबमी इस्त्राएली नेल्ल आन कली लोव्र सोइक्तीमी बाक्त। मिनु बाल नु अशेराह देवी आस नोले दुम्ब लोव्र पाइब नेल्ल आन कली कारमेल डांडाम पुक्की बाक्त। 21 मिनु एलीया मुर नेल्ल आन डोंइती राप्शा "गे गेना सम्म थुं निक्शी पा बाक्नीनी? परमप्रभु यावे, थमा परमप्रभु बाक्ब देंनीनी हना, मेको आ नोले खोतीन। बालन परमप्रभु बाक्ब देंनीनी हना, मेको आ नोले खोतीन" देंमाक्त। तन्न मुरपुक्कीम लोव्र का यो मलेत्थु, सिक्सी पा बाक्मा बाक्त। यहोसु २४:१४; मत्ती ६:२४ 22 मिनु एलीयाम मेको आन कली "परमप्रभु यावे आ लोव्र पाइब गो आं का ला लीती। तन्न बाल आ नोले दुम्ब लोव्र पाइब ४ सहे ५० जना बाक्नीम। 23 मुल आंइ कली ब्यफ निक्शी चाक्शा गेने। मिनु मेकोपुक्कीम का योव्रसीशा मेको कली क्योरशा चेक्शा, शी तार वोइशशा, मी मसुइक्थु वोइक्चा माल्नीम। गो यो मेको अर्को कली क्योरशा मो पान शी तार वोइशशा मी मसुइक्थु वोइक्नुड। 24 मिनु गे इन देवता आ नें थिशा, मेको कली पुनीन। गो परमप्रभु यावे आ नें थिशा, मेको कली पुंइनुड। मिनु पुंइशो नेंशा, मी सोइक्ब, परमप्रभु बाक्ब" देंमाक्त। मिनु मुर नेल्लेमी "दुम्ब इन देशो लोव्र ठीक बाक्ब" देंमा बाक्त। उत्पत्ती १५:१७ 25 मिनु एलीयाम बाल आ लोव्र पाइब नेल्ल आन कली "गे डोंइती ब्यफ का योव्रशा, मेको कली क्योरीन। मारदे हना गे शुश बाक्नीनी। मिनु इन देवता आ नें थिशा पुनीन। तन्न मी मसुइक्तीन" दे माइक्मी बाक्त। 26 मोपतीके मेको आन योव्रशो ब्यफ लांडसीशा, क्योरशा चढेशा, बाल आ नें थिशा सुनी रे नाक्त सम्म "ए बाल! आंइ कली लोव्र लेत्तीकी" दे ग्रीमा बाक्त। तन्न मेकेर मारेइ मदुम्माक्त। मारेइ सेंदा यो मनेसे बाक्त। मिनु मेकोपुक्की मेको आन सेल्शो चढेतीक आ एर ओंथ प्रेक्ना प्रेक्न सिल पामे बाक्त। 27 मिनु नाक्त उइक्थ दुम्मेनु, एलीयाम मेको आन कली "मुल यो ठेयब सेंदा पा ग्रीडीन। मेको थमा पा देवता बाक्ब। मेको मिम्ना मिम्न बाक्म माइ, ना हिरथ गाक्म कों? ना डोन लम कों? ना इप्शा बाक्म कों? मेको कली पोक्चा माल्ब" दे शुक्शी पा लोव्र पवा बाक्त। 28 मोपतीके मेको चिनु ठेयब सेंदा पा ग्रीमा बाक्त। मिनु मेकोपुक्कीम आन रिती थिती पा आंम आन रां तरवार नु भालाम चेस्सीशा, हुश चुंइसमा बाक्त। 29 मोपा नाक्त रे नाक्दो चढेची ना सम्म ग्रीना ग्रीन बाक्मा बाक्त। तन्न मेकेर मारेइ मदुम्माक्त। मारेइ सेंदा यो मनेसे बाक्त। मी यो मयिमाक्त।

30 मिनु एलीयाम मुर नेल्ल आन कली "आं नेक्था जाक्कीन" देंमाक्त। मिनु मेको नेल्ल मेको आ नेक्था जाक्मा बाक्त। मिनु मेकोम डोंइती ब्रेशशो परमप्रभु यावे कली चढेतीके लेंशा सेला बाक्त। 31 मिनु एलीयाम १२ ओटा फुल्लु चाक्मी बाक्त। मेको याक्ब आ १२ जना तौ आन थर का का पा १२ ओटा फुल्लु गुबा बाक्त। डोंइती परमप्रभु यावेमी याक्ब कली "इ नें इस्त्राएल दुम्ब" देशो बाक्माक्त। प्रस्थान २४:४; उत्पत्ती ३२:२९ 32 मिनु मेकोमी मेको फुल्लु रे परमप्रभु यावे आ नेम चढेतीक का सेला बाक्त। मिनु मेको चढेतीक कली एर ओंथ हिरशा, कुला दोवा बाक्त। मेकेर सेआह अन्न पुक्तीक बोस निक्शी रिक्ब बाक्माक्त। सेआह का ७.३ लिटर बाक्ब। 33 मिनु नोले शी गार पाइशशा, मेको ब्यफ क्योरशा चेक्शा, मेको शी तार वोदा बाक्त। मिनु मेकोमी मुर आन कली "गे ४ गाग्री ब्वाक्कु चाक्शा, एको चोशा चढेतीक नु शी तार लुक्तीन" दे माइक्मी बाक्त। मिनु मेकोपुक्कीम मो पामे बाक्त। 34 मिनु नोले मेकोमी "मेको लेंशा पने" देंमाक्त। मिनु मेकोपुक्कीम मो पामे बाक्त। मिनु मेकोम लेंशा "चीनु खेयप सां मो पने" देंमाक्त। मिनु मेकोपुक्कीम खेयप सां यो मो पामे बाक्त। 35 मिनु चढेतीक आ एर ओंथ डा कुला नेल्ल ब्वाक्कु ब्रीशा क्युम्माक्त।

36 मिनु नाक्त किंत किंत डा नाक्टो डा चढेची ना परमप्रभु यावे आ लोत्र पाइब एलीयामी मेको आ चढेतीक आ डोंइती लशा “परमप्रभु यावे, अब्राहाम, इसहाक नु इस्राएल आ परमप्रभु, गे का ला इस्राएल रागीम परमप्रभु बाक्नीनी, दे मुलाक्ती एको आन कली तुइक्पतीन। मिनु गो इन गेय पाइब बाक्नुड। मिनु गो एको नेल्ल इन देंतीके पशो बाक्नुड, दे यो एको आन कली तुइक्पतीन। 37 आं लोत्र लेत्तीनी। परमप्रभु यावे, आं लोत्र लेत्तीनी। मिनु एको मुरपुकीम गेन परमप्रभु यावे, थमा परमप्रभु बाक्नीनी, दे तुइक्तमेक्ल। एको आन थुं लेप्पाइक्ब गेन बाक्नीनी” देंमाक्त। 38 मिनु इर रे परमप्रभु यावे आ मी यिशा चोशा चढेतीके, चोशा चढेतीक डा शी, फुल्लु नु खप नेल्ल नेक्गा बाक्त। मिनु मेको कुला डा ब्वाक्कु यो सोत्रमाक्त। लेवी ९:२४ 39 मिनु मुर नेल्ल मेको तशा, खुम्की पा बाप्शा “परमप्रभु यावे, थमा पा परमप्रभु बाक्माक्त। परमप्रभु यावे, थमा पा परमप्रभु बाक्माक्त” देंमा बाक्त। 40 मिनु एलीयामी मेको आन कली “बाल आ लोत्र पाइब आन कली ग्याइक्तीन। का यो प्रोक्चा मतामेक्ल” दे माइक्मी बाक्त। मिनु मेकोपुकीम मेको आन कली ग्याइक्तमे बाक्त। मिनु एलीयाम मेको आन कली किशोन खोल्लसाम लाइशशा साइक्मी बाक्त। प्रस्थान २२:१९; ब्यवस्था १३:६-९

41 मिनु एलीयाम आहाब कली “लशा जने तूडीन। मारदे हना गो ठेयब रेउ आ रेयके नेंता” देंमाक्त। याकूब ५:१८ 42 मिनु आहाब जचा तूचा कली लमाक्त। तन्न एलीया चहिं कारमेल डांडा डोइशशा, मेकेर आ पिया पोक्चीम खेप्शा बाक्माक्त। 43 मिनु मेकोमी आ गेय पाइब कली “लशा, समुन्द्र गे कोव्रडो” दे मदा बाक्त। मिनु मेको लशा कोव्रडा बाक्त। मिनु मेकोमी “मेकेर मारेइ मबा” देंमाक्त। मिनु एलीयामी मेको कली “७ खेयप मेकेर लशा, कोव्रडो” दे सोइक्ता बाक्त। 44 मिनु ७ खेयप डा पाली मेकोमी “मुर आ गुइ खोमो गोस्स का समुन्द्र रे बोक्शो ताता” देंमाक्त। मिनु एलीयाम मेको कली “मुल लशा आहाब कली ‘इन बग्गी ठीक पा, उइ खिं लने। मो मपाइतीनी हना, इन कली रेउम तेक्ब’ दे मतो” देंमाक्त। 45 मिनु क्येर गोस्सुम सरीड सुम्शा, फश गिवार पा ठेयब रेउ यिचा गोवा बाक्त। मिनु आहाब आ बग्गी डोइशशा येजेल सहर लमाक्त। 46 मिनु परमप्रभु यावेमी एलीया कली थिवा बाक्त। मिनु मेको आ फेक्शो वा खाइशशा आहाब आ डोंइडोंइती येजेल डा ठेयब लाप्चो सम्म दौरशा लमाक्त।

19

एलीया प्रोक्शा, होरेब डांडा लशो

1 मिनु आहाबमी इजेबेल कली एलीया आ पशो गेय नेल्ल नु मेकोमी दोपा देवी देवता आन लोत्र पाइब नेल्ल आन कली तरवारम सदा, मेको नेल्ल शेंदा बाक्त। 2 मिनु इजेबेलम एलीया आ बाक्तीकेम “गे दोपा मेको आन कली सदी, मोपा गो दीसा एं ना सम्म इ कली मसाइक्तन हना, देवतापुकीम आं कली यो मोदेशोन पाइय्यीमील। मेको क्येडा यो शुश पाइय्यीमील” देंथ लोत्र कुरब मुर सोइक्ता बाक्त। 3 मिनु एलीया हिंशा, प्रोक्माक्त। मिनु मेको प्रोक्शा यहूदा डा बेयर-शेबा जाक्माक्त। मिनु मेकोमी आ गेय पाइब कली मेक उइ प्रोना बाक्त।

4 मिनु आं चहिं काबु डा लां डोन गोरशो रागीम ओव्रमाक्त। मिनु मेको बुटा आगाम निशशा, परमप्रभु यावे कली “मुल नुप्त। आ सोक्त ब्रने। मारदे हना गो आं किकी पिपी आन क्येडा रिम्शो मनड” देंमाक्त। अय्युब ७:१५; योना ४:३ 5 मिनु नोले बुटा आ आगामीन गोल्शा निन्द्रा पवा बाक्त। मेना परमप्रभु यावे आ स्वर्ग डा गेय पाइब कामी मेको कली ब्रा थिशा “बोक्शा जावो” देंमाक्त। 6 मिनु मेकोमी बोक्शा, एर ओंथ कोव्रडानु, आ पिया गे चोशो होश शोब्ले का नु ढुडगो का ब्वाक्कु तवा बाक्त। मिनु मेकोम मेको जशा तूशा लेंशा इम्माक्त। 7 मिनु परमप्रभु यावे आ स्वर्ग डा गेय पाइब लेंशा जाक्शा, मेको कली थिशा “बोक्शा जावो। इ लां थम लाइशशो बाक्ब” देंमाक्त। 8 मोपतीके मेको बोक्शा, जवा तूडा बाक्त। मिनु मेको आ बोलम मेको ४० नाक्त नु ४० नाक्टो सम्म गाक्शा, परमप्रभु आ डांडा होरेब जाक्दीम्माक्त। प्रस्थान २४:१८ 9 मिनु मेकेर डा पुक्खी काम ओव्रशा, मेक उइ नां सोइदा बाक्त। मेकेर बाक्मेनु, परमप्रभु यावेम मेको कली “एलीया, गे एक मार पा बाक्डे?” दे हिल्लो पवा बाक्त। 10 मिनु मेकोमी “परमप्रभु यावे, मुर नेल्ल आन परमप्रभु, गो इन पर्बम शुश गेय पाता। इस्राएलीमी इन कबल प्रोंइतेक्म। इन कली चढेतीक प्रेत्तेक्म। मिनु इन लोत्र पाइब आन कली तरवारम क्योरशा साइक्तेक्म। गो आं का ला लीशो बाक्नुड। मिनु मुल मेकोपुकीमी आं कली यो साइक्चा माल्लो बाक्नीम” देंमाक्त। भजन संग्रह ६९:१०; यसेया ४९:४; १राजा १८:२२; रोमी ११:३

11 मिनु परमप्रभु यावेमी “गूडो, आं डोंइती डांडाम रपो” देंमाक्त। मारदे हना परमप्रभु यावे मेकेर रे लन लन बाक्माक्त। मिनु परमप्रभु यावे आ डोंइडोंइती ठेयब फश गिवार डांडा आन कली प्रोल्ला प्रोल्लन नु फुल्लु आन कली खिन्ना खिन्न जाक्माक्त। तन्न परमप्रभु यावे मेको फशेम मबाक्माक्त। मेको आ नोले ठेयब खिनु कुमाक्त। तन्न परमप्रभु यावे मेको खिनुमी यो मबाक्माक्त। प्रस्थान ३३:२२ 12 मिनु मेको खिनु आ नोले मी का जाक्माक्त। तन्न

मेको मीमी यो परमप्रभु यावे मबाक्माक्त। मिनु मी आ नोले इम्चीली सेंदा का जाक्माक्त। 13 मिनु एलीयामी मेको सेंदा नेंशा, आ वामी आ कुल सुम्से बाक्त। मिनु लाडगा गूशा पुक्खी आ डोंइती राम्माक्त। मिनु मेको आइक्च सेंदाम “एलीया गे एक मार पन पन बाक्डे?” देंमाक्त। 14 मिनु मेकोमी “परमप्रभु यावे, मुर नेल्ल आन परमप्रभु गो इन पबर्म शुश गेय पाता। इस्राएलीमी इन कबल प्रोंइतेक्म। इन कली चढेतीक प्रेत्तेक्म। मिनु इन लोव्र पाइब आन कली तरवारम क्योरशा साइक्तेक्म। गो आं का ला लीशो बाक्नुड। मिनु मुल मेकोपुकीमी आं कली यो साइक्चा माल्शो बाक्नीम” देंमाक्त। 15 मिनु परमप्रभु यावेम मेको कली “गे तेको लां रे जाक्शो बाक्डे, मेको लां रे पा लेशशा दमस्कस डा गोरशो रागीम लावो। मिनु गे मेको सहर जाक्दीशशा, हजाएल कली अराम डा पिप सेलो। २राजा ८:१३, १५ 16 मिनु निम्शी आ तौ येहू कली यो इस्राएल डा पिप सेलो। आबेल-मेहोलाह डा शाफात आ तौ एलीशा कली इ पा डा आं लोव्र पाइब सेलो। २राजा ९:२-३ 17 मिनु हजाएल आ तरवार रे ब्रोंइशो आन कली येहूमी साइक्ब। मिनु येहू आ तरवार रे ब्रोंइशो आन कली एलीशामी साइक्ब। 18 मो हना यो, गो ७ हजार जना आन कली इस्राएलम प्रोंइशा वोइक्नुडमी। मेकोपुकीमी बाल आ डोंइती आन पोक्च मथेक्शो बाक्नीम। मिनु मेकोपुकीम बाल कली पुक्पु मपाइशो बाक्नीम” देंमाक्त। रोमी ११:४

एलीयामी एलीशा कली ब्रेशो

19 मिनु एलीया मेकेर रे लमाक्त। मिनु शाफात आ तौ एलीशा कली गुमा बाक्त। मेको १२ हाल ब्यफ वाक्ना वाक्न बाक्माक्त। मेको चहिं मेको नेल्ल क्येडा नोले डा हाल वाक्ना वाक्न बाक्माक्त। मिनु एलीया लशा, आ फेक्शो वा मेको आ तार कोप्ता बाक्त। 20 मिनु एलीशामी आ ब्यफ प्रोंइशा, एलीया आ नोनोले दोरमाक्त। मिनु मेकोम “आं कली आं आंम आफ आस कली पुक्पु पाइक्चा गेयीनी। मिनु इन नोले खोइक्नुड” देंमाक्त। मिनु एलीयाम “लावो, गो इ कली मार पडा मेको मिम्तो” दे मदा बाक्त। लूका ९:६१-६२ 21 मिनु एलीशाम एलीया कली प्रोंइशा लमाक्त। मिनु मेकोमी आ हाल ब्यफ लाइशशा क्योरा बाक्त। मिनु मेकोम हलो चोशा श्ये क्येवा बाक्त। मिनु मुर आन कली ब्वचा गेमी बाक्त। मिनु मुरपुकीम ब्वामे बाक्त। मिनु मेको नोले एलीया आ नोले खोदा बाक्त। मिनु मेको आ गेय पाइब दुम्माक्त।

20

बेन-हादादम लडाइ तोशो

1 अराम डा पिप बेन-हादादम आ लडाइ पाइब नेल्ल आन कली खुप्तीमी बाक्त। मिनु मेकोमी ३२ जना पिप, मेको आन शारा नु बग्गीपुकी लाइशशा, सामरीया सहर कली पुम्शा लडाइ तोवा बाक्त। 2 मेकोमी लोव्र कुरब आन कली सहरम सोइशशा, इस्राएल डा पिप आहाब कली “बेन-हादाद आ लोव्र नेनीन, 3 ‘इन सुन चांदी आं के नम। इन नेल्ल क्येडा दारशो मीश नु इन तमी तौ यो आं केन नम’ देंत” देनीन, दे सोइक्तीमी बाक्त। 4 मिनु इस्राएल डा पिपमी मेको आन कली “आं प्रभु, पिप इन देंशो खोदेंशो पा ‘गो नु बाक्शो मारेइ मारेइ इन केन नम, देंत’ मतीन” दे सोइक्तीमी बाक्त। 5 मिनु लेंशा बेन-हादादमी लोव्र कुरब सोइशशा “इन सुन चांदी, इन मीश नु इन तमी तौ नेल्ल आं कली गेन। 6 गो दीसा एं ना आं गेय पाइब आन कली, इन खिं नु इन ठेयब गेय पाइब आन खिंमी इन शुश क्येट लाइब थोव्रक ब्रथ सोइक्नुडमी। मेकोपुकीमी आन दाक्शो मारेइ मारेइ लाइक्नीम” दे लोव्र कुरब सोइक्ता बाक्त।

7 मिनु इस्राएल डा पिपम आ रागी डा खाल्पा नेल्ल आन कली ब्रेशशा, मेको आन कली “गे तुइशो बाक्नीनी। मेको मुरुम लडाइ पचा कली खुज्जी माल्ना माल्न बाक्ब। मेकोम आं मीश, आं आलपुकी नु आं सुन चांदी आ केन नम देंमेनु यो, गो मारेइ मदेड” देंमाक्त। 8 मिनु खाल्पा नु मुर नेल्लेमी मेको कली “मेको आ लोव्र मनेनीन। गे मेको आ देंशो मबिस्सीन” देंमा बाक्त। 9 मोपतीके मेकोमी बेन-हादाद आ लोव्र कुरब आन कली “आं प्रभु पिप कली ‘आं ठेयब पिप आ डोंइती पुंइशो नेल्ल गेनुड। तन्न मुल इन पुंइशो लोव्र गो गेने मचाप्नुड’ मुल लशा गेपुकीम बेन-हादाद कली एको लोव्र मतीन” दे माइशशा सोइक्तीमी बाक्त। मिनु मेको लोव्र कुरबपुकी लशा, आन होव्रप बेन-हादाद कली शोव्रडमे बाक्त। 10 मिनु बेन-हादादम आहाब कली “गो नु शुश लडाइ पाइब बाक्नीम। आं लडाइ पा ग्राशो सामरीया डा फुरक, आं लडाइ पाइब आन कली योल का का गेचा कली यो मगाप्ब। मेको गाप्त हना, देवतापुकीम आं कली खतम पोय्यीमील” देंथ मुर सोइक्ता बाक्त। 11 मिनु मेको आन कली इस्राएल डा पिपमी “मेको कली ‘लडाइ ग्राचा गेना गेना, मुल कना मार ठेयब लेशशो लोव्र पाइनेवे’ देंत, मतीन” दे सोइक्तीमी बाक्त। 12 मेना बेन-हादाद नु अरु पिप आन बाक्तीकेम शांबु दुक्शा बाक्मानु, मेको लोव्र नेना बाक्त। मिनु मेकोमी रीब पा आ लडाइ पाइब आन कली

“लडाइ पचा ठीक दुमीन” दे हुकुम गेमी बाक्त। मिनु मेकोपुकी मेको सहर कली लडाइ तोचा कली ठीक दुम्मा बाक्त।

आहाबमी बेन-हादाद कली फुशो

13 मेना परमप्रभु यावे आ लोत्र पाइब का इस्राएल डा पिप आहाब आ बाक्तीक जाक्शा, मेको कली “परमप्रभु यावेमी ‘मार, गे एको ठेयब हुल लडाइ पाइब आन कली तवी? कोत्रडो, गो मुलाक्तीन मेको आन कली इ गुइमी गेनुड। मिनु गोन परमप्रभु यावे नड, दे तुइक्नेवे’ दंत” देंमाक्त। 14 मिनु आहाबमी “तन्न मेको सुम पाइब?” दे हिल्लो पवा बाक्त। मिनु परमप्रभु यावे आ लोत्र पाइबमी “परमप्रभु यावेम ‘हुकुम पाइब ठेयब मुर आन गेय पाइब ठिटापुकीम लडाइ पाइनीम’ ” देंमाक्त। मिनु पिपमी “लडाइ सुम गोचा माल्बा?” दे हिल्लो पवा बाक्त। मिनु मेको परमप्रभु यावे आ लोत्र पाइबम “गे गोचा माल्नीनी” देंमाक्त। 15 मिनु आहाबमी मेको हुकुम पाइब ठेयब मुर आन गेय पाइब सहे निक्शी ३२ जना ठिटा आन कली खुपथ सोइक्तीमी बाक्त। मिनु नोले इस्राएली नेल्ल आन कली पुक्मी बाक्त। मेको नेल्ले ७ हजार बाक्मा बाक्त।

16 मिनु नाक्त उइक्थ दुम्मेनु, बेन-हादाद नु मेको आ वारच ३२ जना पिप आन बाक्तीकेमी दुक्शो बाक्मा ना मेकोपुकी गूमा बाक्त। 17 मिनु मेको हुकुम पाइब आन गेय पाइब ठिटापुकी डोंइती बारमा बाक्त। मेना बेन-हादादमी क्यारी पाइबपुकी सोइश्शो बाक्माक्त। मिनु मेकोपुकी जाक्शा “सामरीया रे मुरपुकी पिशो बाक्नीम” देंमा बाक्त। 18 मिनु बेन-हादादम “मेकोपुकी गारचा कली जाक्शो बाक्तेक्म हना, मेको आन कली सेसीन ग्याइक्तीन। लडाइ पथ जाक्शो बाक्तेक्म हना यो, सेसीन ग्याइक्तीन” दे माइक्मी बाक्त।

19 मिनु मेको हुकुम पाइब ठेयब मुर आन गेय पाइब ठिटापुकी सहर रे लाडगा गूमानु, आहाब आ अरु लडाइ पाइबपुकी मेको आन नोले खोइश्शा गूमा बाक्त। 20 मिनु नेल्लेमी आन जोरी सत्रु आन कली सदमे बाक्त। मिनु मो दुम्मेनु अरामी प्रोक्मा बाक्त। मिनु इस्राएलीपुकीम मेको आन कली खेदा पामे बाक्त। तन्न अराम डा पिप बेन-हादाद आ शारा डोइश्शा, अरु शारा डोइक्बपुकी नु प्रोक्माक्त। 21 मिनु इस्राएल डा पिप डोंइती बारशा, शारा नु बग्गी आन कली ग्रामाक्त। मिनु अरामी शुश आन कली साइक्मी बाक्त।

22 मिनु नोले मेको परमप्रभु यावे आ लोत्र पाइब इस्राएल डा पिप आ बाक्तीक जाक्शा, मेको कली “इन लडाइ पाइब आन कली ठीक पा वीतीन। मार पचा माल्बा, मेको रिम्शो पा मिम्तीन। मारदे हना मुल जाक्शो बर्सम अराम डा पिपम लेंशा गेपुकी नु लडाइ पाइब” देंमाक्त।

23 मिनु अराम डा पिप आ गेय पाइबपुकीम आन पिप कली “मेको आन देवता पहाड डा देवता बाक्नीम। मोपतीके मेकोपुकी इं क्येडा शुश बोल्यो बाक्नीम। मुल गोपुकीम मेको आन कली दिंमम लडाइ पाइतय हना, थमा पा गो मेको आन क्येडा बोल्यो दुम्नय। 24 मुल गे मार पचा माल्नीनी देंशा हना, एको पिप आन कली लडाइ पाइब आन ठेयब मुर रे गुंइदीन। मिनु मेको आन पा डा अर्को मुर योत्रडीन। 25 डोंइती बेक्शो लडाइ पाइब आन खोदेंशो पा, अर्को लडाइ पाइब आन हुल का सेलीन। शारा डोइक्ब आन कली शारा नु बग्गी डोइक्ब आन कली बग्गी ठीक पने। मिनु नोले गो इस्राएली नु दिंमम लडाइ पथ लय। मिनु गो थमा पा मेको आन क्येडा बोल्यो दुम्नय” देंमा बाक्त। मिनु बेन-हादादमी मेको आन सल्ला बिश्शा, मेको आन देंशो खोदेंशो पवा बाक्त।

26 मिनु मेको जाक्शो बर्सम बेन-हादादम लडाइ पचा कली अरामी आन कली पुक्मी बाक्त। मिनु इस्राएली नु लडाइ पचा कली अफेक सहर गे लमा बाक्त। 27 मिनु इस्राएली यो खुम्सीशा, जशा तूशा, मेको नु लडाइ पचा कली हुल हुल पा गूमा बाक्त। इस्राएलीम अरामी आन डोंइती गे आन बाक्तीक सेल्मे बाक्त। मेकोपुकी क्यारश आन आइक्च हुल निक्शी खोदेंशो बाक्मा बाक्त। तन्न अरामी चहिं मेको रागी डा दिंम एर ओंथ नेल्ल ब्रीशा बाक्मा बाक्त। 28 मिनु परमप्रभु आ मुर का इस्राएल डा पिप आ बाक्तीकेम जाक्शा, मेको कली “परमप्रभु यावेम ‘अरामीपुकीम परमप्रभु यावे, इस्राएली आन परमप्रभु पहाड डा देवता ला बाक्ब। बेसी डा देवता ममाइ, दे मिम्शो बाक्नीम। मोपतीके गो एको ठेयब हुल लडाइ पाइब आन कली इ गुइमी गेनुड। मिनु गे गोन परमप्रभु यावे नड, दे तुइक्नेवे’ दंत” देंमाक्त। प्रस्थान ७:५ 29 मिनु मेको आन डोंइती आन बाक्तीकेम कोत्रमुशा ७ नाक्त सम्म बाक्मा बाक्त। मिनु नोले ७ नाक्तीम लडाइ पामे बाक्त। मिनु इस्राएलीपुकीम काबुम अरामी आन खोइलीम गाक्ब लडाइ पाइब लाख का आन कली सदमे बाक्त। 30 मिनु मेको आन दाते डा लीशोपुकी अफेक डा सहरम प्रोक्मा बाक्त। मिनु मेकेर डा गारो ब्रेश्शा १७ हजार आन कली चिप्ता बाक्त। बेन-हादाद चहिं सहर ओत्रशा, खुइश्शा बाक्माक्त। 31 मिनु मेको आ गेय पाइबपुकीम मेको कली “गोपुकीमी इस्राएल आ खिं डा पिपपुकी दा शिशी पाइब बाक्नीम देंशो लोत्र नेंशो बाक्नीकी। मोपतीके क्रातोम

अरन्डी फेक्सीय। मिनु पियाम डोरी फ्रेंसीशा इस्राएल डा पिप आ बाक्तीक लय। मिनु मेकोम इन कली ब्रोंइचा गेबा को?" देमा बाक्त। 32 मोपतीके मेकोपुकीमी आन क्रातोम अरन्डी फेक्शा, आन पियाम डोरी फ्रेंसीशा इस्राएल डा पिप आ बाक्तीक लशा मेको कली "इन वाइल बेन-हादादम 'गो आं कली ब्रोंइचा गेयीमी' देशो बाक्ब" देमा बाक्त। मिनु पिपमी "मार, मेको मुल यो सेसीन बाक्मे? मेको आं लोकब बाक्ब" देमाक्त। 33 मिनु मेको मुरपुकीम पिप आ लोत्र रिम्शो बाक्माक्त दाप्शा "ओं, इन लोकब बेन-हादाद मुल यो सेसीन बाक्ब" देमा बाक्त। मिनु पिपमी मेको आन कली "लशा, मेको कली एक चाक्कीन" देमाक्त। मिनु बेन-हादाद गूशा जाक्मेनु, आहाबम मेको कली आ बग्गीम डोइक्पदा बाक्त। 34 मिनु बेन-हादादमी मेको कली "आं आफोम इन आफ रे ग्राशो सहर नेल्ल गो लेशशा गेनन्नी। मिनु आं आफोम सामरीयाम पशो खोदेशो पा, गे यो दमस्कसम ग्याप्तीक लेयतीक सेल्ले चाप्नीनी" देमाक्त। मिनु इस्राएल डा पिप आहाबमी "मेको सल्लाम पतीके गो इ कली प्रोंइनन" देमाक्त। मोपा आहाबमी दुचा आ पर्बम लोत्र पा, मेको कली प्रोना बाक्त।

आहाब कली दोस गेशो

35 मिनु परमप्रभु यावे आ लोत्र पा, मेको आ लोत्र पाइब आन दाते डा काम आ वारच का कली "आं कली तुब्यी" देमाक्त। तन्न मेकोमी तुप्ने मबिस्से बाक्त। 36 मिनु मेको परमप्रभु यावे आ लोत्र पाइबमी "गे परमप्रभु यावे आ अरेशो लोत्र मटितीके आं कली प्रोंइशा लवे चोटीन इ कली गुप्स काम साइक्ब" देमाक्त। मिनु मेको लम नोले गुप्स काम थिश्शा, मेको कली सदा बाक्त। १राजा १३:२४ 37 मिनु मेको परमप्रभु यावे आ लोत्र पाइबमी अर्को मुर का कली ग्रुम्शा, मेको कली "आं कली तुब्यी" देमाक्त। मोपतीके मेकोमी मेको कली तुप्शा, गार सेला बाक्त। 38 मिनु मेको परमप्रभु यावे आ लोत्र पाइब लशा, मतुइक्पाइसीचा डा पा आ मिक्चीम वा फ्रेंशा पिप कली लांम रिम्दा बाक्त। 39 मिनु पिप मेको आ नेक्था रे लमेनु, मेकोमी पिप कली ब्रेशशा "गो इन वाइल लडाइ पतीकेम जाक्दीश्शो नड। मिनु मेकेर लडाइ पाइब मुर काम फ्रेंशो मुर का चाक्शा आं बाक्तीक जाक्त। मिनु मेकोमी आं कली 'एको मुर जिम्मा ब्रावो। एको मुर दोकका पा प्रोक्त हना, एको आ पा डा गे बेक्चा माल्लेवे कि टलेन्ट का चांदी थाप्चा माल्लेवे' देंत। टलेन्ट का ३४ किलो बाक्ब। २राजा १०:२४ 40 मिनु गो, इन वाइल, गेय पा बाक्डा सम्म, मेको ग्याइश्शो मुर प्रोक्माक्त" देमाक्त। मिनु इस्राएल डा पिपमी मेको कली "गे इ निसाफ आंमान पाप्तीवी। मेकोन इ कली पतीक निसाफ बाक्ब" देमाक्त। 41 मिनु मेको परमप्रभु यावे आ लोत्र पाइबमी रीब पा आ मिक्चीम फ्रेंशो वा पुदा बाक्त। मिनु इस्राएल डा पिपम मेको कली परमप्रभु यावे आ लोत्र पाइब का बाक्त, दे तुइक्ता बाक्त। 42 मिनु मेकोमी पिप कली "परमप्रभु यावेमी 'गो साइक्चा कली ठीक पशो मुर कली गे प्रोंइतीवी। मोपतीके मेको आ पा डा गे बेक्चा माल्लेवे। मिनु मेको आ मुर आन पा डा इ मुर बेक्चा माल्लीम' देंत" देमाक्त। 43 मिनु इस्राएल डा पिपमी "मार लोत्र पवा?" दे गाइश्शा, आ खिं सामरीयाम जाक्माक्त।

21

नाबोथ आ अडगुर रू

1 इक्का नाक्त नोले मार दुम्माक्त देशा हना, येजेल सहर डा नाबोथ माइश्शो मुर का बाक्माक्त। मेको के अडगुर रू का बाक्माक्त। मेको अडगुर रू येजेल सहर सामरीया डा पिप आहाब आ दरवार आ नेक्था बाक्माक्त। 2 काबु नाक्ती आहाबमी नाबोथ कली "इ अडगुर रू आं कली गिग खाइ खुम्चा कली गेयी। मारदे हना मेको आं खिं आ नेक्था बाक्ब। मेको आ पा डा गो इ कली अर्को मेको क्येडा रिम्शो अडगुर रू का गेनन। क्येट देंनेवे हना यो, क्येट गेनन" देमाक्त। 3 तन्न नाबोथमी आहाब कली "परमप्रभु यावे आ डोंइती मोदेशो पने मचाप्नुड। गो आं किकी पिपी आन गेशो रू इन कली गेने मचाप्नुड" देमाक्त। 4 मोपतीके आहाब आ थुं खुरसीशा गाइश्शा आ खिं लमाक्त। मारदे हना येजेली नाबोथमी "आं किकी पिपी आन गेशो रू इन कली मगेनुड" देशो बाक्माक्त। मिनु मेको आ कुल किरशा आ ब्राख्येम इप्शा बाक्माक्त। जने यो मबिस्से बाक्त।

5 मिनु मेको आ मीश इजेबेल जाक्शा, मेको कली "गे मारदे इन थुं खुरसीनी? मारदे मारेइ जने मबिस्सीनी?" दे हिल्लो पवा बाक्त। 6 मिनु मेकोम इजेबेल कली "गो येजेली नाबोथ कली 'इ अडगुर रू ग्याप्चा गेयी कि इ दाक्शो रू नु फाइक्स' माइक्ता। तन्न मेकोम 'गो आं अडगुर रू इन कली मगेनन्नी' देंत" देमाक्त। 7 मिनु मेको आ मीश इजेबेलम मेको कली "गे इस्राएल डा पिप बाक्नीनी। मिनु गे मोदेशो पाइनीनी? बोक्शा, जने तूडीन। मिनु ग्येरसीने। गो येजेली नाबोथ आ अडगुर रू इन कली गेनन्नी" देमाक्त।

8 मिनु इजेबेलम आहाब आ नेंमी चिठी का ब्रेक्ता बाक्त। मिनु मेकेर पिप आ छाप थोक्ता बाक्त। मिनु मेको नाबोथ आ सहर डा खाल्पा नु ठेयब मुर आन कली सोइक्ता बाक्त। 9 मेकोम मेको चिठीमी “माइजा बाक्तीक नाक्त का बाक्ब’ देंनीन। मिनु नाबोथ कली मरिम्शो पाइब आन नित्तीकेम निप्पतीन। 10 मिनु मरिम्शो पाइब मुर निक्शी आस कली मेको आ डोंइती निप्पाइश्शा, एकोम ‘परमप्रभु नु पिप कली सराप पशो बाक्ब’ दे दोस गोपतीन। मिनु मेको नोले मेको कली लाडगा गुंडशा फुल्लु आप्शा सतीन” दे ब्रेक्ता बाक्त। ब्यवस्था १७:६; मत्ती २६:५९-६१; प्रस्थान २२:२७ 11 मिनु इजेबेलम मेको आन कली चिठीम ब्रेक्शो खोदेशो पा, मेको सहर डा मुर, खाल्पा नु मेकेर डा ठेयब मुरपुकीम पामे बाक्त। 12 मिनु मेकोपुकीम माइजा बाक्तीक नाक्त का सेल्मे बाक्त। मिनु नाबोथ कली मरिम्शो पाइब आन कली निप्पाइक्तीकेम निप्पदमे बाक्त। 13 मिनु मेको नोले मेको मरिम्शो पाइब मुर निक्शी जाक्शा, मेको आ डोंइती निस्ससा बाक्त। मिनु मेको निक्शीमी “नाबोथम परमप्रभु नु पिप कली सराप पशो बाक्ब” दे नेल्लेम नेंचा डा पा दोस गेम्से बाक्त। मिनु मेकोपुकीम मेको कली लाडगा गुंडशा फुल्लु आप्शा सदमे बाक्त। 14 मेको नोले मेकोपुकीमी इजेबेल कली “नाबोथ कली फुल्लु आप्शा साइक्तक” दे लोत्र कुरब मुर सोइक्तमे बाक्त।

15 मिनु इजेबेलम नाबोथ कली फुल्लु आप्शा साइक्तेकम देंशो लोत्र नेंना चोटीन आहाब कली “मुल बोक्शा येजेल सहर डा नाबोथम इन कली लेयने मबिश्शो रू इन के सेलीन। मारदे हना मेको बेक्त” देंमाक्त। 16 मिनु नाबोथ बेक्माक्त देंशो लोत्र नेंशा, आहाब बोक्शा येजेल सहर डा नाबोथ आ अडगुर रू हिरशा आंम के सेल्थ लमाक्त।

17 मिनु परमप्रभु यावेमी तिश्बे सहर डा एलीया कली लोत्र पवा बाक्त। 18 मार लोत्र पवा बाक्त देंशा हना “इस्त्राएल डा पिप आहाब कली गुम्थ उइ लावो। मेको सामरीयाम बाक्शो नाबोथ आ अडगुर रू आंम के सेल्थ लशो बाक्ब। 19 गे मेको कली परमप्रभु यावेमी ‘मार, गे मुर का कली साइश्शा, मेको आ रू इ के मसेली डा?’ देंत, मतो। मिनु मेको कली परमप्रभु यावेमी ‘नाबोथ आ हुश कुचुमम तुक्तीकेमीन इ हुश यो कुचुमम तुक्नीम’ देंत, मतो” देंमाक्त। १राजा २२:३८

20 मिनु आहाबमी एलीया कली “आं सत्रु, गे आं कली थिय्यी?” दे मदा बाक्त। मिनु मेकोम “ओं, गो इ कली थित्तन। मारदे हना गे परमप्रभु यावे आ डोंइती मार मरिम्शो बाक्मे, मेको ला पना पन बाक्ते। 21 मोपतीके परमप्रभु यावेमी ‘मुल गो इ तार शुश श्येत कोप्नुड। गो इस्त्राएल रागीम बाक्ब, गे नु इ खिं डा वोंइश मुर नेल्ल आन कली साइक्नुडमी। वाइल बाक्मल कि प्रोंइचा पुंडसीशो बाक्मल, नेल्ल आन कली साइक्नुडमी। २राजा ९:७-८ 22 मिनु गो इ खिं कली नेबात आ तौ येरोबाम नु अहीयाह आ तौ बाशा आस खिं कली पाइश्शो खोदेशो पाइनुड। मारदे हना गे आं कली गाइक्पाइक्तीके नु इस्त्राएल कली पाप पपाइक्तीके, मो पाइनुड’ देंत। १राजा १५:२९; १राजा १६:११-१२ 23 मिनु परमप्रभु यावेम इजेबेल आ पर्बम ‘कुचुमपुकीम इजेबेल कली येजेल सहरम ब्वाइनीम। २राजा ९:३३-३६ 24 सहरम बेक्शो आहाब आ खिं डा मुर आन कली कुचुमम ब्वाइनीम। मिनु रूम बेक्शो आन कली चिक्बपुकीम ब्वाइनीम’ देंत” देंमाक्त। १राजा १४:११; १राजा १६:४; १राजा २१:२४

25 आहाबम आ मीश इजेबेल आ लोत्र नेंशा, परमप्रभु यावे आ डोंइती काइ मरिम्शो पवा बाक्त। मोदेशो मुर अर्को सुइ मबाक्मा बाक्त। 26 मेको परमप्रभु यावेमी इस्त्राएली आन डोंइती रे खेरशो एमोरी खोदेशो पा मेको आन ग्रॉग्रा दिशो मूर्ति आन नोले खोदा बाक्त।

27 मिनु आहाबम मेको लोत्र नेंशा, आ वा खाक्गा बाक्त। मिनु अरन्डी फेक्शा माइजा बाक्माक्त। मेको अरन्डी फेक्शा आ थुं लुक्च लशा इम्माक्त। 28 मिनु परमप्रभु यावेम तिश्बे सहर डा एलीया कली लोत्र पवा बाक्त। 29 मार लोत्र पवा बाक्त देंशा हना “आहाब आं डोंइती ब्रेम्शो दुम्शो तवी? मारदे हना मेको ब्रेम्शो दुम्तीके गो मेको आ पालाम ठेयब श्येत मदुम्पाइक्नुड। तन्न मेको आ तौ आ पालाम मेको आ खिंम ठेयब श्येत चाक्नुड” देंमाक्त। २राजा ९:२६

22

मीकायामी लोत्र पशो
२इतिहास १८:-

1 मिनु बर्स सां सम्म अरामी नु इस्त्राएली आन दातेमी लडाइ मदुम्माक्त। 2 तन्न बर्स सां नोले यहूदा डा पिप येहो-शाफात इस्त्राएल डा पिप कली गुम्थ ब्रुम्माक्त। १राजा २२:४१ 3 मिनु इस्त्राएल डा पिपमी आ गेय पाइब आन कली “गे नेल्लेम रामोथ-गिलाद इं के बाक्ब, दे तुइक्नीनी। मो हना यो गो मेको अराम डा पिप रे लेशशा ताक्चा कली मारेइ मपशो बाक्नय” देंमाक्त। यहोसु २१:३८ 4 मोपतीके मेकोम येहो-शाफात कली “रामोथ-गिलाद कली लडाइ तोचा

कली गे आं कली वारच पाइक्नीनी?” दे हिल्लो पवा बाक्त। मिनु येहो-शाफातमी इस्राएल डा पिप कली “गो इन खोदेशो नड। आं मुरपुकी इन मुर नम। आं शारा नेल्ल इन केन नम” देमाक्त। २राजा ३:७

५ तन्न येहो-शाफातम इस्राएल डा पिप कली “डोंइती परमप्रभु यावे कली हिल्लो पने” देमाक्त। ६ मोपतीके इस्राएल डा पिपम ४ सहे जना खोइ परमप्रभु यावे आ लोव्र पाइब आन कली पुक्शा, मेको आन कली “गो रामोथ-गिलाद कली लडाइ तोड देय मतोड” दे हिल्लो पामी बाक्त। मिनु मेकोपुकीमी “तोन, परमप्रभु यावेम मेको इन गुडमी गेब” देमा बाक्त। ७ मिनु येहो-शाफातम “हिल्लो पचा कली परमप्रभु यावे आ लोव्र पाइब अर्को सुइ मबाक्नीमी” देमाक्त। २राजा ३:११ ८ मिनु इस्राएल डा पिपम येहो-शाफात कली “परमप्रभु यावे कली हिल्लो पचा कली अर्को का बाक्ब। मेको इम्लाह आ तौ मीकाया बाक्ब। तन्न गो मेको मुर कली काइ मदाक्नुड। मारदे हना मेकोम आं पर्वम गेनायो रिमशो लोव्र मपाइब। गेना हना यो मरिमशो लोव्र ला पाइब” देमाक्त। मिनु येहो-शाफातमी पिप कली “पिपम मोदेशो लोव्र मपवल” देमाक्त। २इतिहास १८:७-२७ ९ मिनु इस्राएल डा पिपम आ मुर आन दाते डा का कली ब्रेशा “इम्लाह आ तौ मीकाया कली रीब पा चाक्को” दे मदा बाक्त। १० मिनु इस्राएल डा पिप नु यहूदा डा पिप येहो-शाफात पिपम फेक्तीक वा फेक्शा सामरीया डा ठेयब लापचो आ डोंइती आस आस नित्तीकेम निशशा बाक्शो बाक्सा बाक्त। मिनु परमप्रभु यावे आ लोव्र पाइब नेल्ले मेको आस डोंइती बाक्शा नोले दुम्ब लोव्र पना पन बाक्शो बाक्मा बाक्त। ११ मेको आन दाते डा का केनानाह आ तौ सिदकीयाहमी चहिं फलाम के ग्रोव्र सेल्सीशो बाक्माक्त। मिनु मेकोमी “परमप्रभु यावेमी ‘गे एको ग्रोव्रमी अरामी आन कली नेल्ल मबेक्मा सम्म खुडक्नीनी’ देत” देमाक्त। १२ मिनु परमप्रभु यावे आ लोव्र पाइब नेल्लेमी मेको मोदेशोन लोव्र पशो बाक्मा बाक्त। मेकोपुकीमी “रामोथ-गिलाद कली लडाइ तोशा रीब पा ग्राडीन। मारदे हना परमप्रभु यावेम मेको पिप इन गुडमी गेब” देशो बाक्मा बाक्त।

१३ मिनु मीकाया कली ब्रेशा चाक्ब मुरुम मेको कली “परमप्रभु यावे आ लोव्र पाइब नेल्लेमी लोव्र का पा पिप कली ग्येरपाइशो बाक्नीम। गे यो मेको आन खोदेशो पा रिमशो लोव्र पने” देमाक्त। १४ तन्न मीकायाम चहिं “गो परमप्रभु यावे गेना हना यो ब्रोंइशा बाक्शो खोदेशो पा परमप्रभु यावेमी आं कली मार देबा, मेको ला देनुड” देमाक्त।

१५ मिनु मीकाया पिप आ डोंइती जाक्मेनु, पिपमी मेको कली “मीकाया, गो रामोथ-गिलाद कली लडाइ तोड देय मतोड?” दे हिल्लो पवा बाक्त। मिनु मेकोमी “लडाइ तोने। मिनु ग्राडीन। मारदे हना परमप्रभु यावेमी मेको इन गुडमी गेब” देमाक्त। १६ मिनु पिपमी मेको कली “परमप्रभु यावे आ नेमी थमा लोव्र ला पचा, दे गिश खेयप कसम जपाइक्नना?” देमाक्त। १७ मिनु मीकायामी “गो इस्राएली नेल्ल आन कली गोठला मबाक्शो भेडा खोदेशो पा, डांडा मेर ब्रशो तातामी। मिनु परमप्रभु यावेमी ‘मेको मुर आन ठेयब मुर मबाक्ब। मेको नेल्ल आन थुं नाइशशा आन खिं लमल’ देशो बाक्ब” देमाक्त। गन्ती २७:१७; मत्ती ९:३६ १८ मिनु इस्राएल डा पिपम येहो-शाफात कली “मार एकोम आं पर्वम मरिमशो लोव्र डा लाक्शा अर्को मारेइ मदेब, देडा ममाइ डा?” देमाक्त।

१९ मिनु मीकायामी लोव्र तेमशा “एको परमप्रभु यावे आ लोव्र नेनीन। गो परमप्रभु यावे आ स्वर्ग डा गेय पाइब नेल्ल आन कली आ ग्युरा गे नु आ पेरा गे राप्पाइशशा, परमप्रभु यावे आ नित्तीकेम बाक्शो ताता। २इतिहास १८:१८; अय्युब १:६; यसैया ६:१ २० मिनु परमप्रभु यावेमी ‘आहाब कली रामोथ-गिलाद नु लडाइ पपाइशशा, मेको कली साइक्पाइक्चा कली सुम क्युक्बा?’ देत। मिनु काम लोव्र का पाप्तु, अर्कोम अर्को लोव्र पाप्तु। २१ मिनु नोले का जाक्शा, परमप्रभु यावे आ डोंइती राष्शा ‘गो मेको आ थुं क्याक्नुड’ देत। यसैया १९:१४ २२ मिनु परमप्रभु यावेमी मेको कली ‘दोपा?’ दे हिल्लो पाप्तु। मिनु मेकोमी ‘गो लशा मेको आ नोले दुम्ब लोव्र पाइब नेल्ल आन शोव्रमी जोल पाइब सोक्त का दुम्नुड’ देत। मिनु परमप्रभु यावेम मेको कली ‘गे थमा पा मेको कली क्युक्ने चाप्नेवे। गे लावो। मिनु इ देशो पावो’ देत। १यूहन्ना ४:६ २३ मोपतीके परमप्रभु यावेम इन नोले दुम्ब लोव्र पाइब नेल्ल आन शोव्रमी जोल पाइब सोक्त कुर पशो बाक्ब। परमप्रभु यावेम इन कली खतम दुम्तीक नाक्त चाक्शो आ पर्वम नेपाइक्ने थुमशो बाक्ब” देमाक्त।

२४ मिनु केनानाह आ तौ सिदकीयाह, इर डोइशशा मीकाया आ चोवचो रबा बाक्त। मिनु मेको कली “दोपा परमप्रभु यावे आ सोक्त आं रे पा इ थुंम ब्वाक्थ जाक्मे?” देमाक्त। २५ मिनु मीकायाम “गे आंमा आगा डा कोठाम खुडक्थ लवे नाक्त, तुडक्नेवे” दे मदा बाक्त। २६ मिनु इस्राएल डा पिपम “मीकाया कली ग्याइक्तीन। मिनु सहर डा ठेयब मुर आमोन नु पिप आ तौ योआश आस जिम्माम गेने। २७ मिनु एको मुर कली चोक्शा वोतीन। गो रिमशो पा लेशशा मजाक्डा सम्म एको कली शोब्ले नु ब्वाक्कु डा लाक्शा अरु मारेइ मगेने” देमाक्त। २८ मिनु मीकायाम मेको कली

“गे रिम्शो पा लेशशा जाक्तीनी हना, परमप्रभु यावे गो नु मब्वाक्शो बाक्माक्त, देनुड” देमाक्त। मिनु मेकोम चिनु लोव्र तेम्शा “गे नेल्लेम एको लोव्र नेंशा, इन थुंम वोतीन” देमाक्त।

आहाब साइक्चा पुंडसीशो

29 मिनु इस्राएल डा पिप नु यहूदा डा पिप येहो-शाफात रामोथ-गिलाद लसा बाक्त। 30 मिनु इस्राएल डा पिपम येहो-शाफात कली “गो मतुइक्चा डा वा फेक्शा लडाइ पथ लाइनुड। तन्न गे इन फेक्तीक वा फेक्शा बाक्कीन” देमाक्त। मिनु इस्राएल डा पिप मतुइक्पांडसीचा डा वा फेक्शा लडाइ पथ लमाक्त। 31 मिनु अराम डा पिपम आ ३२ जना बग्गी डोइश्शा लडाइ पाइब आन ठेयब मुर आन कली “इस्राएल डा पिप डा लाक्शा अरु आइक्च ठेयब सुइ नु लडाइ मपने” दे हुकुम गेशो बाक्माक्त। 32 मिनु बग्गी डोइश्शा, लडाइ पाइब आन ठेयब मुरपुकीम येहो-शाफात कली तशा “थमा पा इस्राएल डा पिप मेकोन बाक्ब” देंशा, मेको नु लडाइ पचा कली लमा बाक्त। तन्न येहो-शाफात ठेयब सेंदा पा वाइ ब्रेम्माक्त। 33 मिनु मेको बग्गी डोइश्शा, लडाइ पाइब आन ठेयब मुरपुकीम “एको दा इस्राएल डा पिप ममाइ बाक्माक्त” दे तुइक्तमे बाक्त। मिनु मेको कली खेदा पचा प्रोंइशा लेम्मा बाक्त। 34 तन्न मुर कामी आ लिब्रा खुक्शा, हेंथे पा ब्रा आप्शा सोइक्ता बाक्त। मिनु मेको ब्रामी इस्राएल डा पिप आ कुचु तेक्तीक पाता आ बोंइसेम खवा बाक्त। मिनु पिपम आ बग्गी खुल्ब कली “बग्गी हिरशा लडाइ रे गुंडी। गो ठेयब गार दुम्शो बाक्नुड” देमाक्त। 35 मिनु नाक्त रे ठेयब लडाइ दुम्माक्त। पिप चहिं आ बग्गीम अरामी आन डोंइती राप्शा बाक्शो बाक्माक्त। मेको आ गार रे गूशो हुश बग्गी आगामीन शाइश्शो बाक्माक्त। मिनु मेको पिप मेको नाक्दोन बेक्माक्त। 36 मिनु नां लाक्गा नोले लडाइ पाइब आन हुलम “मुर नेल्ल इन सहर सहर नु इन बाक्तीक लने” देंशो लोव्र नेन्मे बाक्त।

37 मोपा पिप बेक्माक्त। मिनु मुरपुकीम मेको कली सामरीयाम चाक्शा थिम्मे बाक्त। 38 मिनु मेकोपुकीम मेको बग्गी सामरीया डा दोम्ली काम मुरमे बाक्त। मेकेर कुचुमपुकीम आ हुश तुक्गमे बाक्त। तेल्लेमपुकी मेकेर जाक्शा, चिक्सीमा बाक्त। मोपा परमप्रभु यावे आ देंशो खोदेशो दुम्माक्त। १राजा २१:१९; २राजा ९:२५-२६ 39 आहाब आ पशो अरु गेय, मेको आ पशो नेल्ले, मेको आ सेल्शो हात्ती आन खुइ के खिं नु मेको आ सेल्शो सहरपुकी, मार, मेको इस्राएल डा पिप आन इतिहासम ब्रेक्शो मबाक्बा डा? 40 मोपा आहाब बेक्माक्त। मिनु मेको आ पा डा आ तौ अहाज्याह पिप दुम्माक्त।

यहूदा डा पिप येहो-शाफात

२इतिहास २०:३१-२१:१

41 आसा आ तौ येहो-शाफात यहूदा डा पिप दुम्माक्त। मेना इस्राएल डा पिप आहाबम सासन पशो ४ बर्स दुम्शो बाक्माक्त। १राजा १५:२४ 42 येहो-शाफात पिप दुम्मेनु ३५ बर्स दुम्शो बाक्माक्त। मिनु मेकोम यरूसलेमम २५ बर्स सासन पवा बाक्त। मेको आ ममा आ नें अजुबाह बाक्माक्त। मेको शिल्ही आ तमी बाक्माक्त। 43 मेको गेना हना यो आ आफ आसा आ लांम गाक्माक्त। मिनु मेको रे गेनायो मलेम्माक्त। मेकोमी परमप्रभु यावे आ डोंइती मार रिम्शो बाक्मे, मेको पवा बाक्त। मो हना यो मेकोम डांडा मेर सेल्शो थानपुकी मप्रेदा बाक्त। मिनु मेना सम्म मुरपुकीम मेकेर पूजा पना पन धूप चोना चोन बाक्मा बाक्त। 44 येहो-शाफात इस्राएल डा पिप नु यो गारशा बाक्माक्त। १राजा १५:१४; २राजा १२:४

45 येहो-शाफात आ पशो अरु गेय, आ सक्ति कोंइशो, मेको आ लडाइ पशो, मार, मेको यहूदा डा पिप आन इतिहासम ब्रेक्शो मबाक्बा डा? 46 मेकोमी आ आफ आसा आ पालाम लीशो थान डा तेल्लेम वोंइश मुर आन कली क्याम्दा बाक्त। २इतिहास १७:-२०:-

47 मेना एदोमम सुइ पिप मबाक्मा बाक्त। मिनु मेकेर सोइश्शो मुर कामी मेको रागीम सासन पवा बाक्त। १राजा १५:१२ 48 येहो-शाफातम ओफीर रे सुन चाक्चा कली टारसीस डा खोदेशो पा जहाजपुकी सेल्पदा बाक्त। तन्न मेकोपुकी एस्पोन-गेबेरम बिग्रेतीके समुन्द्रम लने मचाप्मे बाक्त। 49 मेना आहाब आ तौ अहाज्याहम येहो-शाफात कली “इन गेय पाइबपुकी आं गेय पाइब नु जहाजम लचा गेने” देमाक्त। तन्न येहो-शाफात मबिस्से बाक्त। १राजा ९:२८ 50 मिनु नोले येहो-शाफात बेक्माक्त। मिनु मेको आ आफ दाऊद आ सहरम थिम्चा पुंडसे बाक्त। मिनु मेको आ पा डा आ तौ येहोराम पिप दुम्माक्त।

इस्राएल डा पिप अहाज्याह

51 आहाब आ तौ अहाज्याह सामरीयाम इस्राएल डा पिप दुम्माक्त। मिनु मेकोम बर्स निक्शी इस्राएलम सासन पवा बाक्त। मेना यहूदा डा पिप येहो-शाफात पिप दुम्शो १७ बर्स दुम्शो बाक्माक्त। २राजा ८:१६ 52 पिप अहाज्याहमी परमप्रभु यावे आ डोंइती मार मरिम्शो बाक्मे, मेको पवा बाक्त। मेको आ आंम आफ नु इस्राएली आन कली पाप पपाइक्ब नेबात आ तौ येरोबाम आ लांम गाक्माक्त। १राजा २२:४० 53 मेकोम बाल देवता कली पूजा पवा बाक्त। मेकोमी आ आफोम परमप्रभु यावे, इस्राएली आन परमप्रभु कली गाइक्पाइश्शो खोदेशो पा, मेकोमी यो परमप्रभु कली गाइक्पदा बाक्त। १राजा १२:२८-३०

२ राजा

ब्रेक्ब मुर: नेल्ल क्येडा नोले ब्रेक्ब, सुइम मतुइक्नीम। एको ब्रेक्ब मुरुमी यहूदा डा पिप आन इतिहास डा किताब नु इस्राएल डा पिप आन इतिहास डा किताब तुइश्शो बाक्त।

गेना ब्रेक्शो: ५६१ बि. सी. पिप योयाकीन जेल्खान रे प्रोंइचा पुंडसीशो बर्सम बाक्त।

मार ब्रेक्शो: डोंइती १राजा नु २राजा हिबू लोव्र रे ब्रेक्शो किताब का बाक्त। मेको ब्रेक्ब मुरुमी ग्रीक लोव्र डा सेप्तुआगीन्त माइश्शो किताब निक्शी सेल्मे बाक्त। राजा किताब निक्शी, सामुएल निक्शी, यहोसु नु न्यायाधीस कली डोंइती डा परमप्रभु यावे आ लोव्र पाइब आन किताब देंनीम। मेको किताबपुकीमी मोसामी इस्राएली आन कली इजीप्त रे प्रोंइशा बेबीलोन डा मुर आन कली ग्याइश्शा लाइश्शो सम्म डा लोव्र नेल्ल ब्रेक्शो बाक्ब।

एलीयाम पिप कली लोव्र पशो

1 मिनु आहाब बेक्म नोले मोआबमी इस्राएली आन कली मटिवा बाक्त। २सामुएल ८:२; २राजा ३:४-२७ 2 अहाज्याह सामरीया सहर डा आ खिं डा तला तार रे दोक्शा, गार दुम्माक्त। मोपतीके मेकोमी मुर आन कली “लशा, एक्रोन डा देवता बाल-जेबुब नु पुनीन। गो एको आं गार रे सानुडा देय मसानुडा?” दे हिल्लो पचा कली सोइक्तीमी बाक्त। १राजा २२:५२-५४ 3 तन्न परमप्रभु यावे आ स्वर्ग डा गेय पाइबमी तिश्बे सहर डा एलीया कली “बोक्शा लशा, सामरीया डा पिप आ लोव्र कुरब आन कली ग्रुम्शा, मेको आन कली ‘मार, इस्राएलम परमप्रभु मबाक्बा डा? मिनु गेपुकी एक्रोन डा देवता बाल-जेबुब आ बाक्तीके हिल्लो पथ लनी?’ यसैया ८:१९ 4 मोपतीके परमप्रभु यावेमी अहाज्याह कली ‘गे इ रोइ पा गोल्टीक रे मबोक्नेवे। गे थमा पा बेक्नेवे’ देंशो बाक्ब, देनीन” देंमाक्त। मिनु एलीया गाक्माक्त।

5 मिनु मेको लोव्र कुरब मुरपुकी पिप आ बाक्तीक लेशशा जाक्मा बाक्त। मिनु पिपमी “गे मारदे लेशशा जाक्नी?” दे हिल्लो पामी बाक्त। 6 मिनु मेकोपुकीमी “गो आंइ कली ग्रुम्थ मुर का जाक्त। मिनु मेकोमी ‘लेशशा लशा इन कली सोइक्ब पिप आ बाक्तीक लने। मिनु मेको कली परमप्रभु यावेमी मार, इस्राएलम परमप्रभु मबाक्बा डा? गे एक्रोन डा देवता बाल-जेबुब कली हिल्लो पथ मुर सोइक्तीके, मसानीनी, बेक्नीनी’ देंत माइक्चा” देंमा बाक्त। 7 मिनु पिपमी मेको आन कली “इन कली ग्रुम्शा, मेको लोव्र पाइब मुर दोदेंशो बाक्म” दे हिल्लो पामी बाक्त। 8 मिनु मेकोपुकीमी “दलओंठ आ चां के प्रोव्रशो वा फेक्सीशो नु कुशुल के पेट्टी किम्सीशो बाक्त” देंमा बाक्त। मिनु मेकोमी “मेको तिश्बे सहर डा एलीया बाक्ब” देंमाक्त। इतिहास १६:१७; मत्ती ३:४

9 मिनु पिपमी ५० जना लडाइ पाइब नु आन कप्तान आन कली एलीया आ बाक्तीक सोइक्तीमी बाक्त। मिनु मेको ठेयब मुर डांडा डोइश्शा एलीया आ बाक्तीक लमाक्त। मेना एलीया डांडाम बाक्शो बाक्माक्त। मिनु मेको कप्तानमी “परमप्रभु आ मुर, पिपमी इन कली ‘यिन’ देंशो बाक्ब” देंमाक्त। 10 मिनु एलीयामी मेको ५० जना डा लडाइ पाइब आन कप्तान कली “गो परमप्रभु आ मुर बाक्ती हना, सरीड रे मी दोक्शा, गे नु इ लडाइ पाइब ५० जना इन कली दाक्गल” देंमाक्त। मिनु सरीड रे मी दोक्शा, मेको कप्तान नु आ लडाइ पाइब ५० जना आन कली दाक्गा बाक्त। लूका ९:५४; प्रकाश ११:५

11 मिनु मेको नोले पिपमी अर्को ५० जना लडाइ पाइब नु आन कप्तान कली एलीया आ बाक्तीक सोइक्तीमी बाक्त। मिनु मेको लडाइ पाइब आन कप्तान डांडा डोइश्शा लशा “परमप्रभु आ मुर, पिपमी इन कली ‘रीब पा यिन’ देंत” देंमाक्त। 12 मिनु एलीयाम “गो परमप्रभु आ मुर बाक्ती हना, सरीड रे मी दोक्शा, गे नु इ ५० जना लडाइ पाइब इन कली दाक्गल” देंमाक्त। मिनु परमप्रभु आ मी सरीड रे दोक्शा, मेको नु मेको आ लडाइ पाइब ५० जना आन कली दाक्गा बाक्त।

13 मिनु पिपमी लेंशा ५० जना लडाइ पाइब नु आन कप्तान कली सोइक्तीमी बाक्त। मिनु मेको सोइश्शो लडाइ पाइब आन कप्तान डांडा डोइश्शा एलीया आ बाक्तीक लमाक्त। मिनु मेकोमी एलीया आ डोंइती पोक्च थेक्शा सेउ पा “परमप्रभु आ मुर, गो नु एको इन गेय पाइब ५० जना आंइ कली शिशी पा ब्रोंइचा गेने। 14 डोंइती डा ५०, ५० जना लडाइ पाइब नु आन कप्तान निक्शी आस कली सरीड रे मी दोक्शा, दाक्तु। तन्न मुल आंइ कली शिशी पा ब्रोंइचा गेने” देंमाक्त। 15 मिनु परमप्रभु यावे आ स्वर्ग डा गेय पाइबमी एलीया कली “मेको नु उइ बुपो। मेको क्येडा महिनो” देंमाक्त। मोपतीके एलीया मेको लडाइ पाइब आन कप्तान नु पिप आ बाक्तीक लमाक्त। 16 मिनु मेकोमी

पिप कली “परमप्रभु यावेमी इन कली ‘मार, इस्राएलम परमप्रभु मबाकबा डा? मिनु गे मुर आन कली एक्रोन डा देवता बाल-जेबुब आ बाक्तीके हिल्लो पथ सोइक्तीनी? मोपतीके गे इन गोल्तीके रे मबोक्नीनी। गे थमा पा बेक्नीनी’ देशो बाकब” देंमाकत।

17 मिनु एलीयामी देंशो खोदेंशो पा, परमप्रभु यावे आ लोत्र गाप्शा अहाज्याह बेक्माकत। मिनु मेको आ पा डा आ लोकब येहोराम पिप दुम्माकत। मारदे हना अहाज्याह के तौ मबाक्मा बाकत। मेना यहूदा डा पिप येहो-शाफात आ तौ येहोराम यहूदा डा पिप दुम्शो बर्स निकशी दुम्शो बाक्माकत। येहोराम कली ब्रेत्तीक नें योराम यो बाकत। २राजा ३:१ 18 अहाज्याह आ पशो अरु गेय, मार, इस्राएल डा पिप आन इतिहासम ब्रेक्शो मबाकबा डा?

2

परमप्रभुम एलीया कली लाइशो

1 परमप्रभु यावेमी एलीया कली फश गिवारम क्युकशा स्वर्ग लाइक्चा चिकशो बाक्माकत। मेना एलीया नु एलीशा गिल्गाल प्रॉइशा गाक्ना गाक्न बाक्सा बाकत। 2 मिनु एलीयामी एलीशा कली “गे एक उइ बाक्को। मारदे हना परमप्रभु यावेमी आं कली बेथेल सोइशो बाकब” देंमाकत। तन्न एलीशामी “परमप्रभु यावे ब्रॉइशा बाक्शो खोदेंशो पा नु इन ब्रॉइशा बाक्शो खोदेंशो पा, गो इन कली मप्रॉइनुड” देंमाकत। मोपतीके मेको निकशी बेथेल ब्रुप्सा बाकत। 3 मिनु मेकेर परमप्रभु यावे आ लोत्र पाइब आन हुल का जाक्शा, एलीशा कली “परमप्रभु यावेमी मुलाक्ती इन होत्रप कली लाइक्ब, दे तुइक्नीनी?” दे हिल्लो पामे बाकत। मिनु एलीशामी “गो तुइक्नुड। गे सिक्सी पने” देंमाकत।

4 मिनु एलीयामी मेको कली “एलीशा गे एक बाक्को। मारदे हना परमप्रभु यावेमी आं कली यरीको सोइशो बाकब” देंमाकत। तन्न मेकोमी “परमप्रभु यावे ब्रॉइशा बाक्शो खोदेंशो पा नु इन ब्रॉइशा बाक्शो खोदेंशो पा, गो इन कली मप्रॉइनुड” देंमाकत। मोपतीके मेको निकशी यरीको सम्म ब्रुप्सा बाकत। 5 मिनु यरीकोम परमप्रभु यावे आ लोत्र पाइब आन हुल का जाक्शा, एलीशा कली “परमप्रभु यावेमी मुलाक्ती इन होत्रप कली लाइक्ब, दे तुइक्नीनी?” दे हिल्लो पामे बाकत। मिनु मेकोमी “गो तुइक्नुड। गे सिक्सी पने” देंमाकत।

6 मिनु एलीयामी मेको कली “गे एक उइ बाक्को। मारदे हना परमप्रभु यावेमी आं कली ‘यर्दन खोला लावो’ दे सोइक्ताक्यी” देंमाकत। तन्न एलीशामी “परमप्रभु यावे ब्रॉइशा बाक्शो खोदेंशो पा नु इन ब्रॉइशा बाक्शो खोदेंशो पा, गो इन कली मप्रॉइनुड” देंमाकत। मोपतीके मेको निम्फा गाक्सा बाकत। 7 मिनु ५० जना परमप्रभु यावे आ लोत्र पाइबपुकीम एलीया नु एलीशा आस नोले खोदमे बाकत। मिनु मेको निकशी यर्दन खोला आ नेक्था राप्शा बाक्सानु, मेकोपुकी डोन रे कोत्रशो बाक्मा बाकत। 8 मिनु एलीयामी आ फेक्शो वा प्रुइशो ओल्शा यर्दन खोला डा ब्वाक्कु तुबा बाकत। मिनु ब्वाक्कु ग्युरा गे नु पेरा गे ब्राशा, सोत्रशो लां दुम्माकत। मेको निकशी आइक्ची हांबु मजाक्दीस्सा सम्म मोपा ब्राशा बाक्माकत। प्रस्थान १४:२१-२२; यहोसु ३:१६

9 मिनु खोला शोक्ससा नोले एलीयाम एलीशा कली “आं कली इ रे पा लाइक्चा पुंडसीचा क्येडा डोंइती गो इ पर्बम मार पड?” देंमाकत। मिनु एलीशामी “इन सोक्त क्येडा भाग निकशी आं कली गेयीनी” देंमाकत। ब्यवस्था २१:१७ 10 मिनु एलीयामी “गे दा ठेयब लोत्र कका पुंडतीवी। तन्न आं कली एक रे क्युकशा लाइशो ताप्तीवी हना, मेको इ पुंडशो गाप्ब। तन्न मताप्तीवी हना, मेको इ पुंडशो मगाप्ब” देंमाकत। 11 मिनु मेको निकशी लोत्र पना पन गाक्सा बाकत। मिनु रीब पा मी ब्रशो बग्गी नु शारापुकी गूमा बाकत। मिनु मेकोपुकीमी मेको निकशी आस कली फ्रादमे बाकत। मिनु एलीया फश गिवारम क्युकशा इर सरीड लाइक्चा पुंडसे बाकत। उत्पत्ती ५:२४ 12 मिनु एलीशाम मेको तशा, वाइ ब्रेशो “ए आं आफ! ए आं आफ! इस्राएल डा बग्गी नु शारा डोइक्बपुकी” देंमाकत। मिनु मेना रे एलीशाम एलीया कली लेंशा मतवा बाकत। मिनु नोले मेकोमी आ वा जेर खाक्गा बाकत। २राजा ६:२१; २राजा १३:१४

13 मिनु एलीशाम एलीया आ दोक्शो फेक्शो वा गुबा बाकत। मिनु लेशो यर्दन खोला आ नेक्था राम्माकत। 14 मिनु मेकोमी एलीया आ फेक्शो वामी ब्वाक्कु तुप्शा “परमप्रभु यावे, एलीया आ परमप्रभु ते बाक्म?” देंमाकत। मिनु ब्वाक्कु तुबा बाकत। मिनु ब्वाक्कु ग्युरा गे नु पेरा गे ब्रामेनु, मेको ओंथ हांबु शोक्से बाकत।

15 मिनु मेको कोत्रशा बाकब यरीको डा परमप्रभु यावे आ लोत्र पाइब हुलमी “एलीया आ सोक्त एलीशा तार जाक्माकत” देंमा बाकत। मिनु मेकोपुकी एलीशा कली ग्रुथ जाक्मा बाकत। मिनु मेको आ डोंइती खप सम्मन बाम्मा बाकत। 16 मिनु मेकोपुकीम एलीशा कली “कोत्रडीन, गो इन गेय पाइबपुकी नु बोल्यो ५० जना मुर बाक्नीम। मेकोपुकी लशा, इन होत्रप कली माल्चा गेने। परमप्रभु यावे आ सोक्तीम क्युकशा लाइशो, मेको कली तेकोइ पहाड, बेसीम

वोइशशो बाक्म माइ” देमा बाक्त। तन्न एलीशाम “ममाइ, मेको आन कली मसोइक्तीन” देमाक्त। 17 तन्न मेकोपुकीम एलीशा कली सोइक्तीन कि सोइक्तीन देमा बाक्त। मिनु एलीशाम मेको आन कली “लो, मो हना सोइक्तीन” देमाक्त। मिनु मेकोपुकीम मेको ५० जना मुर आन कली सोइक्तमे बाक्त। मिनु मेकोपुकीम नाक्त सां सम्म मालशा मथिदमे बाक्त। 18 मिनु एलीशा यरीकोम बाक्मेनु, मेकोपुकी लेशशा, मेको आ बाक्तीक जाक्मा बाक्त। मिनु एलीशाम मेको आन कली “मार, गो इन कली मलन मदेंडा डा?” दे माइक्मी बाक्त।

एलीशाम ब्वाक्कु रिम्शो सेल्शो

19 मिनु मेको सहर डा मुरपुकीम एलीशा कली “एको आंड सहर रिम्शो बाक्ब। तन्न एकेर डा ब्वाक्कु मरिम्शो बाक्ब। मिनु एको ब्वाक्कुमी आल शाम्पाइक्ब” देमा बाक्त। 20 मिनु मेकोमी “आं कली नक बोस का गेयीनी। मिनु मेकेर हिक्सी कुर पने” देमाक्त। मिनु मेकोपुकीम मोपा चाक्गमे बाक्त। 21 मिनु एलीशा मेको ब्वाक्कु बुक्तीकेम लशा, मेको हिक्सी ब्रुइशशा, मेकोमी “परमप्रभु यावेमी मार देंत देशा हना ‘गो एको ब्वाक्कु कली रिम्शो सेल्ता। मुल एकोमी मबेक्पाइक्ब, मशाम्पाइक्ब’ देंत” देमाक्त। 22 मिनु एलीशा आ देशो खोदेशो पा मेको ब्वाक्कु मुल सम्म रिम्शो बाक्ब।

एलीशा कली शाक्शो

23 मेको नोले एलीशा इर बेथेल लमाक्त। मिनु लना लन बाक्मेनु, सहर डा हुल का वोंइश आल जाक्शा, मेको कली शाक्शा “ए तालु खुइले, इर लावो। ए तालु खुइले, इर लावो” दे ग्रीमा बाक्त। 24 मिनु मेकोम लेशशा कोव्रशा, मेको आन कली परमप्रभु यावे आ नेमी सराप पाइक्मी बाक्त। मिनु ब्वाकी रे छाउरी वां निक्शी गूशा, मेको आन दाते डा ४२ जना आन कली क्राइशशा साइक्मी बाक्त। 25 मिनु मेको मेकेर रे कारमेल डांडा लमाक्त। मिनु नोले सामरीया लेम्माक्त।

3

येहोराम इस्राएल डा पिप दुम्शो

1 आहाब आ तौ येहोराम सामरीयाम इस्राएल डा पिप दुम्माक्त। मिनु मेकोमी १२ बर्स सासन पवा बाक्त। मेना यहूदा डा पिप येहो-शाफात पिप दुम्शो १८ बर्स दुम्शो बाक्माक्त। २राजा १:१७ 2 मिनु येहोराममी परमप्रभु यावे आ डोंइती मार मरिम्शो बाक्मे, मेको पवा बाक्त। तन्न मेको आ आंम आफोम पशो खोदेशो चहिं ममाइ। मेकोमी आ आफ आ सेल्शो बाल आ थामपुकी प्रेदा बाक्त। १राजा १६:३२ 3 मो हना यो मेकोमी नेबात आ तौ येरोबामम इस्राएली आन कली पपाइशो पाप मप्रोंइथु, पवा बाक्त।

4 मोआब डा पिप मेशामी भेडा थुल्बाक्माक्त। मिनु मेकोमी गेना हना यो इस्राएल डा पिप कली लाख का पाठा नु लाख का सांड आन ऊन गेबाक्माक्त। 5 तन्न आहाब बेक्म नोले मोआब डा पिपमी इस्राएल डा पिप कली मटिवा बाक्त। 6 मोपतीके पिप येहोराम सामरीया रे जाक्शा, इस्राएली नेल्ल आन कली खुप्तीमी बाक्त। 7 मिनु मेकोमी यहूदा डा पिप येहो-शाफात कली “मोआब डा पिपम आं कली मटीयी। गे आं कली मोआब डा पिप नु लडाइ पचा कली वारच पाइक्नीनी” दे लोव्र कुरब मुर सोइक्तीमी बाक्त। मिनु मेकोमी “गो वारच पाइनुड। गो गे नु बाक्नुड। आं मुर इन मुर नम। आं शारा नेल्ल इन के नम” देमाक्त। १राजा २२:४ 8 मिनु येहो-शाफातमी “गो ते रे लडाइ तोय?” दे हिल्लो पवा बाक्त। मिनु येहोराममी “एदोम डा गोरशो रागी रे” देमाक्त।

9 मोपतीके इस्राएल डा पिप, यहूदा डा पिप नु एदोम डा पिप गारशा, लडाइ पथ लमा बाक्त। मिनु मेकोपुकी ७ नाक्त सम्म गाक्मानु, लडाइ पाइब नु आन लाइशो बी ब्यफ आन कली तूतीक ब्वाक्कु मबाक्माक्त। 10 मिनु इस्राएल डा पिपमी “आबी, परमप्रभु यावेमी गो पिप सां इं कली मोआबी आन गुइमी जिम्मा गेचा कली एक चाक्शो बाक्त” देमाक्त। 11 तन्न येहो-शाफातमी “मार एकेर परमप्रभु यावे आ लोव्र पाइब सुइ मबाक्नीमी? मेको रे पा गो परमप्रभु यावे कली हिल्लो पने चाप्नीक” देमाक्त। मिनु इस्राएल डा पिप आ गेय पाइब आन दाते डा काम “एलीया आ गुइम ब्वाक्कु लुक्ब शाफात आ तौ एलीशा एक बाक्ब” देमाक्त। १राजा २२:५,७; १राजा १९:१९-२१

12 मिनु येहो-शाफातमी “परमप्रभु यावे आ लोव्र मेको नु बाक्ब” देमाक्त। मोपतीके इस्राएल डा पिप, येहो-शाफात नु एदोम डा पिप एलीशा आ बाक्तीक ब्रुम्मा बाक्त।

13 मिनु एलीशाम इस्राएल डा पिप कली “गे नु गो इस के मार बाक्बा डा? इन आम आफ आस नोले दुम्ब लोव्र पाइब आन बाक्तीक लने” देमाक्त। तन्न इस्राएल डा पिपमी मेको कली “ममाइ, परमप्रभु यावेमी गो पिप सांफा

आंइ कली मोआबी आन गुडमी जिम्मा गेचा कली एक चाक्शो बाक्ब” देंमाक्त। 14 मिनु एलीशामी “गो आं गेय पशो, मुर नेल्ल आन परमप्रभु यावे ब्रोंइशा बाक्शो खोदेशो पा यहूदा डा पिप येहो-शाफात कली मान मपशो नड हना, गो इन कली मसेत्तु वा, मारेइ मसुदु वा” देंमाक्त। १राजा १८:१५ 15 मिनु मेकोमी “तन्न मुल आं कली तार पाइशो ताप्तीके ताप्ब का चाक्कीन” देंमाक्त। मिनु मेकोमी तार पाइशो ताप्तीक ताप्बमी तबानु, परमप्रभु यावे आ सक्तिम एलीशा कली सुमा बाक्त। १सामुएल १६:१६ 16 मिनु मेकोमी “परमप्रभु यावेमी ‘गे एको खोल्सा डा दिंमम दोम्ली नु शुशु खाल्टा दोन’ ” देंमाक्त। 17 मारदे हना परमप्रभु यावेमी “गे फश गिवार नु रेउ यिशो मताइनीनी। मो हना यो एको दिंम ब्वाक्कुम ब्रीब। मिनु गे, इन बी ब्यफ नु इन शाराम ब्वाक्कु तूनीनी। 18 एको परमप्रभु यावे आ डोंइती आइक्च गेय का ला बाक्ब। मेकोमी मोआबी आन कली यो इन गुडम गेब। 19 गेपुकीम गारो हिरशो सहर नेल्ल नु ठेयब दारशो सहर नेल्ल ग्रानीनी। गेपुकीम रिम्शो रवा नेल्ल तिम्नीनी। मिनु ब्वाक्कु यितीक नेल्ल तेक्नीनी। मिनु रू नेल्लेम फुल्लु तेल्नीनी, देशो बाक्ब” देंमाक्त। 20 मिनु आ दीसा सुनी चढ़ेची ना छक लाक्चा डा पा एदोम रे ब्वाक्कु शाइशो यिचा गोवा बाक्त। मिनु रागी नेल्ल ब्वाक्कुम ब्रीमाक्त। गन्ती २८:४-५

21 मेना मोआबीपुकीम पिप नेल्ल गोपुकी नु लडाइ पथ जाक्शो बाक्नीम देशो लोत्र नेन्मे बाक्त। मोपतीके या चलेने चाप्ब वोंइश मुर, ठिटा नु खाल्पा नेल्ल आन कली ब्रेत्मे बाक्त। मिनु मेको आन कली लडाइ पचा कली ठीक पामे बाक्त। 22 मिनु मेकोपुकी आ दीसा सुनी कना बोक्मा बाक्त। मिनु मेना ब्वाक्कुम नां टल्केशो तांइसीशो बाक्माक्त। मिनु मोआबीपुकीम मेको आन डोंइती डा ब्वाक्कु नांम हुश खोदेशो लल तामे बाक्त। 23 मिनु मेकोपुकीम “एको दा हुश बाक्त। मेको पिपपुकी आंम आंमा लडाइ पा साइक्मुमा बाक्त, थांका। मुल ए मोआबी, मार मार रोइक्थ लय” देंमुमा बाक्त।

24 मिनु मोआबी इस्राएली आन बाक्तीकेम जाक्मानु, इस्राएली गूशा मेको आन कली मप्रोक्पदमे सम्म लडाइ तोत्रमे बाक्त। मिनु इस्राएलीम मोआबी आन कली लडाइ तोस डा तोस पामे बाक्त। 25 मिनु मेकोपुकीम मेको आन सहर प्रेशा श्येत्थ पोक्गमे बाक्त। मिनु मुर नेल्लेमी मेको आन रूम फुल्लु का का ताइशो, तेइ तेइ फुल्लुम प्रिंदमे बाक्त। मेकोपुकीम ब्वाक्कु यितीक नेल्ल तेक्गमे बाक्त। मिनु रिम्शो रवा नेल्ल तिम्मे बाक्त। मेकोपुकीम किर-हारेसेथ सहर डा गारो ला हेंदमे बाक्त। तन्न मेको सहर कली हुरद आप्बपुकीम तेक्शा लडाइ तोत्रमे बाक्त।

26 मिनु मोआब डा पिपमी लडाइ ब्रुइनुड, दे तुइशो, तरवार शेब लडाइ पाइब ७ सहे जना आन कली लाइशो, एदोम डा पिप आ बाक्तीक ओत्रचा कली लमाक्त। तन्न मेकोमी मो पने मचबा बाक्त। 27 मिनु मेकोमी आ पा डा पिप दुम्ब आ डोंइती जरमेशो तौ कली गारोम क्योरशा चोशा चढ़ेवा बाक्त। मिनु इस्राएली छक लाक्शा लेशो आन रागी लमा बाक्त।

4

एलीशामी वारच पशो

1 मिनु परमप्रभु यावे आ लोत्र पाइब का आ मीश जाक्शा ठेयब सेंदा पा एलीशा कली “इन गेय पाइब आं वोंइश बेक्त। मेको परमप्रभु यावे कली मान पा हिंभ बाक्त, दे तुइक्नीनी। तन्न मुल मेको आ जेर जशो मुर जाक्शा आं आल निक्शी आस कली वाइल सेल्चा कली लाइक्चो बाक्ब” देंमाक्त। 2 मिनु एलीशामी मेको कली “गो इ कली मार पाइनुडा? इ खिंम मार बाक्बा? आं कली देनो” देंमाक्त। मिनु मेकोमी “गो, इन वाइलीम आं खिंम गर का तेल डा लाक्शा अर्को मारेइ मबाक्ब” देंमाक्त। १राजा १७:१२ 3 मिनु एलीशामी “इ नेक्था डा मुर आन खिं लशा, श्येत्थ गर का निक्शी ला ममाइ, शुशु गर पुंइशा चाक्को। 4 मिनु गे खिं ओत्रशा, इ आल आस कली यो आगा ओंइशा, लाप्चो चोक्को। मिनु मेको गर डा तेल अर्को गर नेल्लेम कुर पावो। मिनु ब्रीशो गार याक्शा वोतो” देंमाक्त। 5 मिनु मेको मीश मुर एलीशा आ बाक्तीक रे गाक्माक्त। मिनु आ खिं जाक्दीशो, आ आल आस कली खिंङगा ओंइशा लाप्चो चोक्गा बाक्त। मिनु आ चाक्शो श्येत्थ गर शुशेमी तेल प्रिंदा बाक्त। 6 मिनु मेको गर तेलम ब्रीमा बाक्त। मिनु मेकोमी आ तौ कली “अर्को गर चाक्को” देंमाक्त। मिनु मेकोमी “मुल श्येत्थ गर का यो मबा” देंमाक्त। मिनु तेल यिचा यो देक्माक्त। 7 मिनु मेको लशा, मेको परमप्रभु आ मुर कली शेंदा बाक्त। मिनु मेकोमी “लशा मेको तेल लेयडो। मिनु इ जेर थाप्तो। मिनु लीशो क्येट चहिं इन खिं डा मुर आन कली थुल्चा कली दुम्ल” दे मदा बाक्त।

एलीशा नु शुनेम डा मीश मुर

8 काबु नाक्ती एलीशा शुनेम सहर लमाक्त। मेकेर शुश शोप पाइशशो मीश मुर का बाक्माक्त। मिनु मेकोम एलीशा कली जथ तूथ ब्रेत्ता बाक्त। मिनु एलीशा मेको मेर गाक्मेनु, जथ तूथ ओव्रबाक्माक्त। यहोसु १९:१८ 9 मिनु काबु नाक्त मेको मीश मुरुमी आ वोंइश कली “एको गेना हना यो इं लां रे गाक्ब मुर थमा पा परमप्रभु आ मुर बाक्ब, दे गो तुइक्नुड। 10 गो तला तार थरपु हिरशा मेको कली आइक्च कोठा का सेल्शा गेय। मिनु मेको कोठाम मेको कली खाट का, टेबल का, नित्तीक का नु बत्ती का वोइशशा गेचा। मिनु मेको एक जाक्मेनु, मेकेर बाक्तीक पवल” देंमाक्त।

11 मिनु काबु नाक्त एलीशा जाक्शा, नाइक्चा कली मेको कोठाम लशा गोल्माक्त। 12 मिनु मेकोम आ गेय पाइब गेहाजी कली “मेको शुनेम सहर डा मीश मुर कली ब्रेशशा कुतो” दे मदा बाक्त। मिनु मेकोम, मेको कली ब्रेत्ता बाक्त। मिनु मेको एलीशा आ डोंइती जाक्माक्त। 13 मिनु एलीशाम आ गेय पाइब कली “मेको कली ‘गे आं पर्वम इशका श्येत पाप्तीवी। मुल गो इ कली मार पने चाप्नुडा? मार, गो इ पर्वम पिप नु लडाइ पाइब आन ठेयब मुर नु मारेइ लोव्र पशा गेना?’ दे मेको कली हिल्लो पावो” दे मदा बाक्त। मिनु मेको मीश मुरुमी “गो एक आं मुर आन दातेमीन बाक्नुड” देंमाक्त। 14 मिनु एलीशाम गेहाजी कली “मो हना मुल गो मेको कली मार पने चाप्नुडा?” देंमाक्त। मिनु गेहाजीम “मेको के तौ मबाक्ब। आ वोंइश खूशो दुम्शो बाक्ब” देंमाक्त। 15 मिनु एलीशामी “मेको कली ब्रेत्तो” देंमाक्त। मिनु गेहाजीम मेको कली ब्रेत्तानु, मेको लाप्चोम राम्माक्त। २राजा २:२५ 16 मिनु एलीशामी “अर्को बर्स इ थुकुम तौ का बाक्ब” देंमाक्त। मिनु मेकोमी “ममाइ, आं प्रभु, गे परमप्रभु आ मुर बाक्नीनी। मोपा इन वाइलीम आं कली जोल मपने” देंमाक्त। उत्पती १८:१०,१४

17 मिनु मेको कोव्रज कुरशो दुम्शा, एलीशाम देंम ना तौ का थिमाक्त।

18 मिनु मेको आल कोल्शा, काबु आ आफ नु खेत्ला आन अन्न खुप्तीकेम लमाक्त। २राजा ४:१६ 19 मिनु मेकोमी आ आफ कली ठेयब सेंदा पा “आं पिया ब्वती, आं पिया ब्वती” देंमाक्त। मिनु आ आफोम आ गेय पाइब का कली “एको कली आ ममा आ बाक्तीक लतो” दे मदा बाक्त। लूका १०:४ 20 मिनु मेको गेय पाइब मुरुम मेको आल कली आ ममा आ बाक्तीक चाक्दीदा बाक्त। मिनु मेको आल आ ममा आ थुकुम नाक्ती उइक्थ दुम सम्म बाक्शा बेक्माक्त। 21 मिनु मेको मीश मुरुमी मेको आल कली इर परमप्रभु आ मुर आ ब्राख्येम लाइशशा खोल्शा वोइशशा लाप्चो चोक्शा गूशा गाक्माक्त। 22 मिनु मेकोमी आ वोंइश कली ब्रेशशा “आं कली गेय पाइब का नु गधा का सोइक्तीनी। मिनु गो रीब पा परमप्रभु आ मुर बाक्तीक लशा लेत्नुड” देंमाक्त। 23 मिनु आ वोंइशेमी “मुलाक्त मारदे लचा मालदे? औंसी यो ममाइ, नाइक्तीक नाक्त यो ममाइ” दे मदा बाक्त। मिनु मेकोमी “लचा माल्नुड” देंमाक्त। 24 मिनु मेकोमी गधाम लगम पाइशशा, आ गेय पाइब कली “गो नाइक्तो मदेंडा सम्म खुलो देश मपावो” दे मदा बाक्त। 25 मोपा मेको गाक्शा, परमप्रभु आ मुर बाक्तीके कारमेल डांडाम जाक्माक्त। मिनु परमप्रभु आ मुरुम मेको कली डोन रेन तशा आ गेय पाइब गेहाजी कली “कोव्रड, दे मेरे जाक्ब शुनेम सहर डा मीश मुर बाक्ब। 26 गे दोरशा लशा मेरे कली ‘मार नेल्ल रिम्शोन बाक्बा? मार, इ वोंइश रिम्शोन बाक्मे? इ आल रिम्शोन बाक्मे?’ दे हिल्लो पावो” दे मदा बाक्त। मिनु मेकोम हिल्लो पवानु “नेल्ल रिम्शोन बाक्नीम” देंमाक्त। 27 मिनु मेको परमप्रभु आ मुर बाक्तीक डांडाम जाक्शा, एलीशा आ खोइल मुबा बाक्त। मिनु गेहाजी मेको कली फ्राचा कली जाक्मेनु, परमप्रभु आ मुरुम एको कली “मपावो, एको कली ठेयब श्येत दुम्शो बाक्ब। तन्न परमप्रभु यावेमी मेको लोव्र खुइशशा, आं कली मशेंदी” देंमाक्त। 28 मिनु मेको मीश मुरुमी “ए आं प्रभु, मार गो तौ पुंइशो नडा डा? आं कली आस कोंइशा मोशा मसेल्यीनी देंशा पुंइशो मनडा डा?” देंमाक्त। 29 मिनु एलीशाम गेहाजी कली “इ किप्शुर किम्सो। एको आं कोक्के कुरशा दोरशा लावो। लांम सुइ गुम्तीवी हना, मेकोपुकी नु लोव्र पचा कली मदिक्को। सुइमी इ कली लोव्र पाम्तेक्म हना, मेको आन कली लोव्र मलेत्तो। एको आं कोक्के लाइशशा, मेको आल आ कुलुम वोतो” दे मदा बाक्त। 30 तन्न मेको आल आ ममामी “परमप्रभु यावे ब्रोंइशा बाक्शो खोदेंशो पा नु इन ब्रोंइशा बाक्शो खोदेंशो पा गो इन कली मप्रोंइनुड” देंमाक्त। मोपतीके एलीशा बोक्शा, मेको मीश मुर आ नोले खोदा बाक्त। 31 गेहाजी चहिं डोंइती लशा मेको कोक्के मेको आल आ कुलुम वोदा बाक्त। तन्न मेको मारेइ मडुम्माक्त। मोपतीके एलीशा कली गुम्चा कली गेहाजी लेम्माक्त। मिनु मेको कली “मेको आल मसेस” देंमाक्त।

32 मिनु एलीशा खिं जाक्मेनु, मेको आल कली आ ब्राख्येम बेक्शो थिदा बाक्त। 33 मिनु एलीशा आगा ओव्रशा लाप्चो चोक्शा, परमप्रभु यावे कली पुना बाक्त। प्रेरित ९:४० 34 मेको नोले मेको ब्राख्येम डोइशशा, मेको आल आ शोव्रम आ शोव्र, मेको आ मिक्चम आ मिक्ची नु मेको आ गुइम आ गुइ वोइशशा, मेको आल तार गोल्माक्त। मिनु मेको आल होना होन लमाक्त। १राजा १७:२१ 35 मिनु एलीशा बोक्शा कोठाम एर ओंथ पवा बाक्त। मिनु मेको

लेंशा खाट डोइशशा मेको आल कली कोव्रडानु, मेको आलम ७ खेयप हाक्च पा, आ मिक्च पाक्गा बाक्त। 36 मिनु एलीशाम गेहाजी कली “मेको शुनेम सहर डा मीश मुर कली ब्रेशशा, एक चाक्को” दे मदा बाक्त। मिनु मेकोमी मेको कली ब्रेत्ता बाक्त। मिनु मेको मीश मुर जाक्मेनु, एलीशामी मेको कली “इ तौ लतो” दे मदा बाक्त। 37 मिनु मेको आगा ओव्रशा एलीशा आ खोइलीम खप सम्मन बाक्माक्त। मिनु मेको नोले आ तौ लाइशशा गूशा लमाक्त।

बोसुम ओश्येर बाक्शो

38 मिनु एलीशा लेशशा गिल्गाल लमाक्त। मेना मेको रागीम ठेयब अन्काल दुम्शो बाक्माक्त। परमप्रभु यावे आ लोव्र पाइब आन हुल का मेको आ डोंइती बाक्मा बाक्त। मिनु मेकोम आ गेय पाइब कली “चुप्लुम ठेयब बोस का काशा एको परमप्रभु यावे आ लोव्र पाइब आन हुल आन कली खोले क्येवो” दे मदा बाक्त। 39 मेको आन दाते डा का चहिं गिग खाइ माल्थ रू मेर लमाक्त। मिनु ब्वाकी डा वोबीस थिदा बाक्त। मिनु मेकोम मेको सेक्शा पोल्टो का पा चाक्गा बाक्त। मेकोमी मेको मार बाक्मे, दे मतुइक्थु प्रेक्शा खोलेम सुप्ता बाक्त। 40 मिनु मुरपुकीम जामेक्ल, दे मेको तेम्शा ख्रेत्तीमी बाक्त। मिनु मेकोपुकीम जशा, ठेयब सेंदा पा “ए परमप्रभु आ मुर, एको बोसुम दा ओश्येर कका बाक्त” देंमा बाक्त। मिनु मेकोपुकीम मेको जने मचाप्मे बाक्त। 41 मिनु एलीशाम “इच्का खोइ फस चाक्कीन” देंमाक्त। मिनु मेकोम मेको फस बोसुम कुर पवा बाक्त। मिनु मेकोमी “मुल मेको आन कली एको जचा गेने” देंमाक्त। मेको नोले मेको बोसुम ओश्येर मबाक्माक्त।

सहे का मुर आन कली थुल्शो

42 मिनु बाल-शालीशा डा मुर काम परमप्रभु आ मुर कली आ डोंइती मीशो क्योव्रज के २० ओटा शोब्ले नु नक मीशो अन्न चाक्शा जाक्माक्त। मिनु एलीशाम “एको मुर आन कली जचा गेने” देंमाक्त। मत्ती १५:३३, ३७; मत्ती १६:९-१०; यूहन्ना ६:९ 43 मिनु मेको आ गेय पाइबमी “गो एको सहे का मुर आन कली जचा थोव्रक दोपा जचा गेनुडमी” देंमाक्त। मिनु मेकोमी लेंशा “एको मुर आन कली जचा गेमी। मारदे हना परमप्रभु यावेम ‘मेको नेल्लेम जशा यो, इच्का हेंब’ देशो बाक्ब” देंमाक्त। 44 मिनु मेकोमी मुर आन डोंइती ख्रेत्तीमी बाक्त। मिनु परमप्रभु यावे आ देशो खोदेशो पा, मेको मुरपुकीम जशा यो हेंमाक्त।

5

नामान कोव्रर पशो रे साशो

1 नामान अराम डा पिप आ लडाइ पाइब आन ठेयब मुर बाक्माक्त। मेको आ होव्रपम मेको कली शुश दाक्बाक्माक्त। मेको शुश हिक्सीशो मुर का बाक्माक्त। मारदे हना मेकोम पतीकेन परमप्रभु यावेम अराम कली ग्रापाइशो बाक्माक्त। मिनु मेको थम सक्ति पाइशो लडाइ पाइब मुर यो बाक्माक्त। तन्न मेको कोव्रर पशो बाक्माक्त। 2 मिनु अराम रे लडाइ पाइबपुकी लशा इस्राएल डा मीश आल का कली ग्याइशशा चाक्शो बाक्मा बाक्त। मिनु मेको नामान आ मीश आ गेय पाइब दुम्शो बाक्माक्त। 3 मिनु मेकोमी आ होव्रपोक्म कली “आं होव्रप, आं प्रभुमी सामरीयाम बाक्ब परमप्रभु यावे आ लोव्र पाइब कली गुम्शो हना, मेकोमी आ कोव्रर सापद वा” देंमाक्त। 4 मिनु नामान आ प्रभु पिप बाक्तीक लशा, मेको इस्राएल रे चाक्शो मीश आल आ देशो लोव्र नेल्ल नेंपदा बाक्त। 5 मिनु अराम डा पिपमी “दुम्ब, गे लावो। गो इस्राएल डा पिप कली चिठी का ब्रेक्नुड” देंमाक्त। मोपतीके नामान १० टलेन्ट चांदी, ६ हजार शेकेल सुन नु १० जोर फेक्तीक वा कुरशा लमाक्त। टलेन्ट का ३४ किलो बाक्ब। शेकेल का ११.५ ग्राम बाक्ब। 6 मिनु मेकोमी मेको चिठी इस्राएल डा पिप आ बाक्तीक चाक्गा बाक्त। मेको चिठीम इस्राएल डा पिप कली “गो एको चिठी नु आं गेय पाइब ठेयब मुर नामान कली इन बाक्तीक सोइक्ताक्ड। गे मेको आ कोव्रर सापतीन” दे ब्रेक्शो बाक्माक्त। 7 मिनु इस्राएल डा पिपम मेको चिठी पढेवा चोटीन आ वा खाक्शा “मार, गो परमप्रभु नडा डा? मिनु बेक्पाइक्ने नु सेंपाइक्ने चाप्नुडा? मेको मुरुम मारदे एको मुर कली आ कोव्रर सापाइक्चा कली आं बाक्तीक सोइक्ता? मेकोम गो नु खुज्जी माल्तु” देंमाक्त।

8 मिनु इस्राएल डा पिपमी आ वा खाक्शो लोव्र परमप्रभु आ मुर एलीशाम नेना बाक्त। मिनु मेकोमी पिप कली “गे मारदे इन वा खाक्नी? मेको मुर कली एक आं बाक्तीक सोइक्तीन। मिनु मेकोमी इस्राएलमी परमप्रभु यावे आ लोव्र पाइब मुर का बाक्ब, दे तुइक्ब” दे लोव्र कुरब मुर सोइक्ता बाक्त। 9 मोपतीके नामान आ बग्गी नु शारापुकी चाक्शा जाक्माक्त। मिनु एलीशा आ खिं आ लाप्चोमी राम्माक्त। 10 मिनु एलीशाम मेको कली “गे लशा, यर्दन खोलाम ७

खेयप चिकसीचा माल्नेवे। मिनु इन श्ये डोंइती डा खोदेशो दुम्ब। मिनु गे ग्रांग्रा मदिशो दुम्नीनी” दंथ मुर का कली सोइक्ता बाक्त। 11 तन्न नामान गाइशशा “गो मेको गूशा राप्शा, थमा पा, परमप्रभु यावे, आ परमप्रभु आ नें थिशा पुंइशा, आं गार तार आ गुइ वोइशशा, आं कोव्र सापाइक्ब, दे मिम्शो नड। 12 मार, आबाना, फारपार नु दमस्कस डा खोला मेर डा ब्वाक्कु इस्राएल डा ब्वाक्कु नेल्ल क्येडा रिम्शो ममाइ डा? मार, गो मेकेर डा ब्वाक्कुम चिकशा साने मचाप्नुडा डा?” दे गाइशशा गाक्माक्त। 13 तन्न नामान आ गेय पाइबपुकी जाक्शा मेको कली “ए, आंइ आफ, मार परमप्रभु यावे आ लोव्र पाइबमी इन कली ‘श्येत डा गेय का पने’ देशो हना, गे मेको मपाइनीनी डा? मेकोमी इन कली ‘ब्वाक्कुम चिकशा ग्रांग्रा मदिशो दुमीन’ देंमेनु, मेको मारदे मपाइनीनी?” देंमा बाक्त। 14 मोपतीके मेको उइ ब्रुम्माक्त। मिनु परमप्रभु आ मुरुम देशो खोदेशो पा, यर्दन खोलाम ७ खेयप चिकसे बाक्त। मिनु मेको आ श्ये नु कुशुल डोंइती डा खोदेशो पा ठिटा आन के खोदेशो दुम्माक्त। मिनु मेको ग्रांग्रा मदिशो दुम्माक्त। लेवी १४:७-९; लूका ४:२७

15 मिनु मेको नु आ मुर नेल्ल लेशशा परमप्रभु आ मुर बाक्तीके जाक्मा बाक्त। मिनु मेको एलीशा आ डोंइती राप्शा “इस्राएलम डा लाक्शा, अर्को तेकोइ रागीम परमप्रभु मबाक्माक्त। मुल गो तुइक्ताक्ड। इन गेय पाइब आं गुइ रे कोसेली का ताक्कीन” देंमाक्त। २राजा ५:५ 16 मिनु परमप्रभु यावे आ लोव्र पाइबमी “गो आ गेय पशो, परमप्रभु यावे ब्रोंइशा बाक्शो खोदेशो पा, गो मारेइ मब्राइनुड” देंमाक्त। नामानम मेको कली ताक्कीन कि ताक्कीन देंमाक्त। मो हना यो मेको मबिस्से बाक्त। 17 मिनु नामानमी “गे एको मताक्नीनी हना, इन गेय पाइब, आं कली भारी निक्शी गधाम कुरतीक खप लाइक्चा गेयीनी। मारदे हना मुल गो इन गेय पाइबम, परमप्रभु यावे कली डा लाक्शा अरु तेकोइ देवी देवता आन कली चोशा चढेतीक नु अरु चढेतीक मचढेनुड। 18 तन्न एको गेय काम ला परमप्रभु यावेम इन गेय पाइब कली माफ गेवल। मेको आं होव्रप रिम्मोन कली पूजा पथ लमेनु, आं गुइमी ग्याइक्पाइशशा आगा ओव्रब। मिनु मेकोमी मेकेर पूजा पवानु, गो यो बाप्चा माल्नुड। मोपतीके मेको आ पर्बम परमप्रभु यावेमी आ गेय पाइब, आं कली माफ गेयील” देंमाक्त। 19 मेको नोले एलीशाम मेको कली “इ थुं नाइशशा लावो” दे मदा बाक्त। मिनु नामान गाक्शा इक्का आइक्वी जाक्दीम्मेनु, 20 परमप्रभु आ मुर एलीशा आ गेय पाइब गेहाजी आ थुंमी “एको आं होव्रपमी दा एको अरामी नामान आ चाक्शो मारेइ मब्रथु लेशशा कका सोइक्ताक्व। मुल गो परमप्रभु यावे ब्रोंइशा बाक्शो खोदेशो पा, गो मेको आ नोले लशा मारेइ थोव्रक ताक्नुड” दे मिम्ता बाक्त। 21 मोपतीके गेहाजी नामान आ नोले दोरशा लमाक्त। मिनु नामानम मेको कली आ नोनोले दोरशा पिशो तवा बाक्त। मिनु मेको कली गुम्चा कली नामान आ बग्गी रे तोइशशा “मार नेल्ल ठीक बाक्बा?” दे हिल्लो पवा बाक्त। 22 मिनु गेहाजीम “मारेइ मदुम। तन्न आं होव्रपमी आं कली एफ्राइम पहाड डा परमप्रभु यावे आ लोव्र पाइब आन हुल रे ठिटा निक्शी जाक्ताक्स। मिनु शिशी पा मेको आस कली ‘टलेन्ट का चांदी नु जोर निक्शी वा गेने’ दंथ सोइक्ताक्यी” देंमाक्त। टलेन्ट का ३४ किलो बाक्ब। 23 मिनु नामानमी मेको कली “थमा पा गे टलेन्ट निक्शी लतीन” देंमाक्त। मिनु नामानमी गेहाजी कली “लतीन कि लतीन” दे मदा बाक्त। मिनु मेको कली टलेन्ट निक्शी चांदी नु जोर निक्शी वा थैलो निक्शीम कुर पा, फ्रेंशा गेवा बाक्त। मेकोमी मेको आ गेय पाइब निक्शी आस कली मेको कुरपाइशशा गेहाजी कली चोव्रथ सोइक्ता बाक्त। टलेन्ट का ३४ किलो बाक्ब। 24 मिनु मेको गेहाजी डांडाम जाक्शा, मेको गेय पाइब आस गुइ रे ताक्शो थोव्रक आ खिंम वोदा बाक्त। मिनु मेको आस कली चहिं सोइक्तीम्सी बाक्त। मिनु मेको गाक्सा बाक्त।

25 मिनु मेको आगा लशा, आ होव्रप एलीशा आ डोंइती राम्माक्त। मिनु एलीशामी “गेहाजी गे ते लवे” दे हिल्लो पवा बाक्त। मिनु गेहाजीम “इन गेय पाइब, गो तेइ मलशो बाक्नुड” देंमाक्त। 26 तन्न एलीशाम मेको कली “मार, मेको मुर आ बग्गी रे तोइशशा इ कली गुम्थ पिमेनु, आं सोक्त गे नु मबाक्म डा? मुल क्येट, वा, तेल रवा, अडगुर रू, भेडा, ब्यफ नु वाइलीम वाइलपुकी आंम के सेल्लतीक ना बाक्बा डा? 27 मुल नामान आ कोव्र पतीक रोइ गे नु इ चच युइ इन खिंम गेना हना यो खोक्शा लीब” दे मदा बाक्त। मिनु गेहाजी मेको आ डोंइती रे लमाक्त। मिनु मेको फुं खोदेशो पा बुश पा कोव्रर मुमाक्त।

6

खा ब्वाक्कु तार गूशा

1 परमप्रभु यावे आ लोव्र पाइब आन हुल काम एलीशा कली “एको इ बाक्शो खिं इ कली थम आइक्च बाक्ब। 2 मुल गो यर्दन खोला आ नेक्था लय। मिनु मेकेर नेल्लेम शी चाक्शा खिं का सेल्सय” देंमा बाक्त। मिनु एलीशाम “दुम्ब लने” देंमाक्त। 3 मिनु मेको आन दाते डा काम “गे यो इन गेय पाइबपुकी नु लाइनीनी?” देंमाक्त। मिनु एलीशाम

“दुम्ब गो यो लाइनड” देंमाक्त। 4 मिनु एलीशा मेकोपुकी नु लमाक्त। मिनु मेकोपुकी यर्दन खोला जाकदीशशा रवा तिम्चा गोत्रमे बाक्त। 5 मिनु मुर काम रवा तिम्ना तिम्न पवानु, आ खा बुइशशा ब्वाक्कुम ओत्रमाक्त। मिनु मेको ठेयब सेंदा पा “आबी, आं प्रभु, मेको दा पुंइशा चाक्शो खा कका बाक्ब” देंमाक्त। 6 मिनु मेको परमप्रभु आ मुरुम “मेको ते दोक्म” दे हिल्लो पवा बाक्त। मिनु मेकोम एकेर दोक्त, दे कोंइदा बाक्त। मिनु एलीशाम मेकेर शी का खोइशशा ब्वारदा बाक्त। मिनु मेको खा ब्वाक्कु तार गूमाक्त। 7 मिनु एलीशाम “शोलशा लतो” देंमाक्त। मिनु मेको मुरुम आ गुइ दिंशा शोलशा लदा बाक्त।

एलीशाम मिक्च मताइब सेल्शो

8 काले अराम डा पिप इस्राएल नु लडाइ पना पन बाक्माक्त। मिनु मेकोम आ गेय पाइब लडाइ पाइब आन ठेयब मुरपुकी नु सल्ला पा “गो आं बाक्तीक मेकेर सेल्नुड” देंमाक्त। 9 मिनु परमप्रभु आ मुरुम इस्राएल डा पिप कली “मेकेर रे गाक्ची ना होस पा गाक्कीन। मारदे हना अरामी मेकेर लशो बाक्नीम” देंमाक्त। 10 मोपतीके इस्राएल डा पिपमी आ मुर आन कली मेकेर गाक्नीनु “होस पा गाक्कीन” दे का निक्शी खेयप हिंच कोंइदा बाक्त। मिनु मेकोपुकी होस पा बाक्मा बाक्त।

11 मोपतीके अराम डा पिपमी “इस्राएल डा पिपम इं बाक्तीक दोपा तुइक्ता” दे थाम्पा गाइक्ता बाक्त। मिनु मेकोम आ लडाइ पाइब आन ठेयब मुर आन कली ब्रेशशा “गे इन दाते डा सुमी चहिं इस्राएल डा पिप कली लोव्र शेंदीनी? लो, देनीन” देंमाक्त। 12 मिनु मेको लडाइ पाइब आन ठेयब मुर आन दाते डा काम “आं प्रभु पिप, आं प्रभु, गो सुइम मो मपक। तन्न इस्राएल डा परमप्रभु यावे आ लोव्र पाइब एलीशाम गे इन इप्तीक कोठाम ब्वाक्शो यो शेंब” देंमाक्त। 13 मिनु पिपमी “मेको ते बाक्मे माल्शा तुइशशा जाक्कीन। मिनु गो मुर आन कली सोइशशा, मेको कली ग्याइक्पाइक्नुड” देंमाक्त। मिनु मेकोम “मेको दोथान सहरम बाक्ब” देंमाक्त। 14 मिनु पिपम शारा नु बग्गी पाइशशो ठेयब सक्ति पाइशशो लडाइ पाइब आन हुल का मेक सोइक्ता बाक्त। मिनु मेकोपुकी नाक्दो लशा, मेको सहर पुम्दमे बाक्त।

15 मिनु परमप्रभु आ मुर आ गेय पाइब सुनी कना बोक्शा लाडगा गूमाक्त। मिनु मेना शारा नु बग्गी पाइशशो लडाइ पाइब आन हुलमी सहर पुम्शो तवा बाक्त। मिनु मेको गेय पाइब लशा आ होव्रप कली “आबी, आं प्रभु, मुल मार पय” देंमाक्त। 16 मिनु मेको परमप्रभु यावे आ लोव्र पाइबमी “महिनो। मेकोपुकी नु बाक्शो आन क्येडा गो नु बाक्शो शुश बाक्नीम” देंमाक्त। 17 मिनु एलीशामी “परमप्रभु यावे, एको आ मिक्च ताइब सेलीन। मिनु एकोम तवल” दे पुना बाक्त। मिनु परमप्रभु यावेम मेको गेय पाइब आ मिक्च ताइब सेला बाक्त। मिनु मेकोमी एलीशा आ एर ओंथ डा डांडा नेल्लेम मी ब्रशो शारा नु बग्गीम ब्रीशो तवा बाक्त। यहोसु ५:१३ 18 मिनु अरामीपुकी तोइशशा मेको आ बाक्तीक पिमानु, एलीशाम परमप्रभु यावे कली “एको मुर आन कली मिक्च मताइब सेलीन” दे पुना बाक्त। मिनु एलीशाम पुंइशो खोदेशो पा, परमप्रभु यावेम मेको आन कली मिक्च मताइब सेल्मी बाक्त। उत्पत्ती १९:११ 19 मिनु एलीशाम मेको आन कली “एको लां ममाइ। एको सहर यो ममाइ। गे आं नोले खोइय्यीनी। मिनु गो इन माल्शो मुर आ बाक्तीक चाक्दीत्नन्नी” दे माइक्मी बाक्त। मिनु एलीशाम मेको आन कली सामरीयाम चाक्दीम्मी बाक्त।

20 मिनु मेकोपुकी सामरीया सहरम जाक्दीम्मा नोले एलीशाम “ए परमप्रभु यावे, एको मुर आन कली मिक्च ताइब सेलीन। मिनु एकोपुकीम लेंशा तने चाप्मेक्ल” दे पुना बाक्त। मिनु परमप्रभु यावेमी मेको आन कली मिक्च ताइब सेल्मी बाक्त। मिनु मेकोपुकीम कोव्रडमेनु, सामरीया सहरम बाक्शो तामे बाक्त। 21 मिनु इस्राएल डा पिपमी मेको आन कली तशा, एलीशा कली “आं आफ, मार गो एको आन कली सदुमी। एको आन कली सदुमी?” दे हिल्लो पवा बाक्त। 22 मिनु एलीशाम “मेको आन कली मसतीन। मार, गे आंमा इन लिब्रा नु तरवारम ग्याइशशा आन कली साइक्ने चाप्नीनी डा? गे एको मुर आन कली जचा तूचा गेने। मिनु एकोपुकी जशा तूशा आन होव्रप बाक्तीक लमल” देंमाक्त। लेवी १९:१८; २इतिहास २८:९-१५; हितोपदेस २५:२१-२२ 23 मिनु पिपमी मेको आन कली ठेयब भोज का सेल्शा थुल्मी बाक्त। मिनु मेकोपुकी जशा तूशा पामे नोले मेको आन कली आन होव्रप बाक्तीक सोइक्तीमी बाक्त। मिनु मेको आन होव्रप बाक्तीक लेम्मा बाक्त। मेना रे अरामीपुकीमी इस्राएली आन कली लडाइ तोतीक नु मार मार रोइक्तीक मपामे बाक्त।

सामरीयाम अन्काल दुम्शो

24 तन्न इच्का नाक्त नोले अराम डा पिप बेन-हादादमी आ लडाइ पाइब आन कली खुप्शा सामरीयाम सोइशशा, मेको कली एर ओंथ नेल्ल रे पुम्पदा बाक्त। 25 मिनु मोपा पुम्दमे नोले मेको सहरम थम ठेयब अन्काल दुम्माक्त।

मेकेर गधा आ पिया का कली ८० शेकेल चांदी नु काब का डा ४ भाग, डा भाग का दुकुर आन ख्री कली ५ शेकेल चांदी थाप्चा माल्दा बाक्त। शेकेल का ११.५ ग्राम बाक्ब। काब का १.२ लिटर खोदेशो पुक्तीके बाक्ब। काब डा ४ भाग डा भाग का, १/४ लिटर खोदेशो बाक्ब। 26 काबु नाक्त इस्राएल डा पिप सहर डा गारो तार हिरसे बाक्त। मिनु मीश मुर काम पिप कली “आं प्रभु पिप, आं प्रभु आं कली वारच पाइय्यीनी” देंमाक्त। 27 मिनु पिपमी “परमप्रभु यावेमी इ कली वारच पवल। गो ते रे वारच पाइक्नना? अन्न तुप्तीक रे देय अडगुर खाक्तीक रे?” देंमाक्त। 28 मिनु पिपम मेको कली “इ कली मार दुम?” दे मदा बाक्त। मिनु मेको मीश मुरुम “एको मीश मुरुम आं कली ‘मुलाक्ती इ तौ ब्वचा योक्को। मिनु दीसा चहिं आं तौ ब्वय’ देंत। ब्यवस्था २८:५३ 29 मिनु गो आं तौ कली ब्वाइतक। मिनु गो एको कली ‘मुलाक्त ब्वचा कली इ तौ चाक्को’ दे माइक्ता। तन्न एकोम आ तौ खुइश्शा मगुंइद” देंमाक्त। 30 मिनु पिपमी मेको मीश मुर आ लोव्र नेशा, आ वा खाक्गा बाक्त। मुरपुकीम मेको कली आगाम अरन्डी फेक्शो तामे बाक्त। मारदे हना मेको सहर डा गारो तार गाक्शो बाक्माक्त। 31 मिनु मेकोम “मुलाक्त गो शाफात आ तौ एलीशा आ पिया मखोइक्ता हना, परमप्रभुम सजाइ ला ममाइ, मेको क्येडा यो शुश पाइय्यील” देंमाक्त। 32 मिनु पिपम आ लोव्र कुरब मुर का कली एलीशा आ बाक्तीक सोइक्ता बाक्त। मेना एलीशा खाल्पापुकी नु आ ख्विम बाक्शो बाक्माक्त। तन्न मेको लोव्र कुरब मुर जाक्चा क्येडा डोंइती एलीशाम मेको खाल्पा आन कली “मेको मुर साइक्बम आं पिया खोइक्पाइक्चा कली मुर सोइश्शो गे मतनी? कोव्रडीन, मेको आ लोव्र कुरब जाक्मेनु, लाप्चो चोक्कीन। मिनु थम बोल्यो पा नेप्शा बाक्कीन। मार मेको आ होव्रप मेको आ नोनोले मपिशो बाक्बा डा?” देंमाक्त। 33 मिनु एलीशाम मेकोपुकी नु लोव्र पना पन बाक्मेनु मेको लोव्र कुरब मुर जाक्माक्त। मिनु पिपमी “एको खतम दुम्तीक परमप्रभु यावे रे जाक्शो बाक्ब। मुल गो मारदे परमप्रभु यावे कली आस पा बाक्नुडा?” देंमाक्त। आमोस ३:६

7

जचा थोव्रक तांडसीब देशो

1 एलीशाम “परमप्रभु यावे आ लोव्र नेनीन। परमप्रभु यावेमी ‘दीसा सामरीया डा ठेयब लाप्चो आ डोंइती शेकेल का चांदीमी सेआह माइश्शो पुक्तीक का रिम्शो फस नु शेकेल का चांदीम पुक्तीक निक्शी क्योव्रज लेयसीब’ देशो बाक्ब” देंमाक्त। शेकेल का ११.५ ग्राम खोदेशो बाक्ब। सेआह का आगा ७,३ लिटर रिक्शो ठेयब पाथी खोदेशो पुक्तीके बाक्ब। २राजा ७:१६-१९ 2 मिनु पिप कली कुक्ब लडाइ पाइब आन ठेयब मुरुम परमप्रभु आ मुर कली “परमप्रभु यावेमी आ सरीड डा झेल नेल्ल रोक्तु हना यो, मोदेशो गेनायो दुम्ने मचाप्ब” देंमाक्त। मिनु एलीशाम “गे मेको इ मिक्चीमीन ताइनेवे। तन्न जचा चहिं मताइक्नेवे” देंमाक्त।

सहर पुम्चा प्रोंइशो

3 मिनु मेको सहर डा लाप्चो आ डोंइती ४ जना कोव्र पशो मुर बाक्मा बाक्त। मिनु मेकोपुकीम “गो मबेक्या सम्म मारदे एकेर बाक्नया? लेवी १३:४६ 4 गो सहर ओव्रतय हना, मेकेर डा अन्कालम बेक्नय। एक उइ बाक्तय हना यो, शोव्रलुम बेक्नय। मोपतीके गो अरामी आन लडाइ पाइब आन बाक्तीकेम लशा, जिम्मा गेसय। मिनु मेकोपुकीम इ कली प्रोंइतेक्म हना, गो ब्रोंइनय। साइक्तेक्म हना, यो बेक्य” देंमुमा बाक्त। 5 मिनु मेकोपुकी नाक्नाक्दो बोक्शा अरामी आन बाक्तीक गे लमा बाक्त। मिनु मेकोपुकी अरामी आन बाक्तीक आ नेक्था जाक्मानु, सुइ आन कली मतामे बाक्त। 6 मारदे हना परमप्रभुमी अरामी आन कली शारा बग्गी नु ठेयब लडाइ पाइब हुल आन रेयके नेंपाइश्शो बाक्माक्त। मिनु मेकोपुकीम आंम आंमा “इस्राएल डा पिपम गोपुकी नु लडाइ पचा कली हिती नु इजीप्त डा पिप कली क्येट थाप्शा ब्रेत्तीमी बाक्त, थांका” देंमुमा बाक्त। २राजा १९:७ 7 मोपतीक मेकोपुकीम आन बाक्तीक ताम्बु यो मो हेंथे पा प्रोंइशा, शारा नु गधा यो प्रोंइशा, आन गिम पोंइचा कली प्रोक्मा बाक्त। 8 मिनु मेको कोव्र पशो मुर अरामी आन बाक्तीक जाक्दीम्मा बाक्त। मिनु मेकोपुकी ताम्बु काम ओव्रशा जशा तूशा बाक्मा बाक्त। मिनु सुन चांदी वापुकी एर ओंथ लाइश्शा खुइश्शा वोदमे बाक्त। मेको नोले मेकोपुकी लेंशा अर्को बाक्तीकेम ओव्रमा बाक्त। मिनु मार मार लाइश्शा खुइश्शा वोदमे बाक्त।

9 मिनु मेकोपुकी आंम आंमा “गो मरिम्शो गेय पाइतय। मुलाक्ती रिम्शो लोव्र नेंपाइक्तीक नाक्त बाक्ब। गोपुकी चहिं सिक्सी पा बाक्शो बाक्नय। दीसा सम्म गो ओं पा बाक्तय हना, दोस ताइनय। मुल गो रीब पा लशा, पिप आ दरवारम एको लोव्र नेंपाइय्य” देंमुमा बाक्त। 10 मिनु मेकोपुकी लशा, सहर डा ठेयब लाप्चो खाल पाइब आन कली ब्रेश्शा “गोपुकी अरामी आन बाक्तीक लाइतक। मिनु मेकेर मुर का यो मतक। मारेइ चाल चुल मबा। शारा नु

गधापुकी पाइक्स डा पाइक्स बाक्तेक्म। मिनु मुर आन ताम्बु यो मो प्रोंइशो बाक्तेक्म” देंमा बाक्त। 11 मिनु लाप्चो खाल पाइबपुकीम ठेयब सेंदा पा मेको लोत्र पिप आ खिंम नैपदमे बाक्त। 12 मिनु पिप नाक्दो कना बोक्शा, आ गेय पाइब मुर आन कली “गो इन कली लोत्र का पाइनुड। अरामीपुकीम गो इं कली मार पामे? गो मेको इन कली देंनुड। गोपुकी शोत्रलु बाक्शो बाक्नय, दे मेकोपुकीम तुइश्शो बाक्नीम। मोदेशो मिम्शा आन बाक्तीक प्रोंइशा, एर ओंथ लशा खुइश्शा बाक्शो बाक्नीम। मेकोपुकीम ‘गोपुकी थमा पा गूनीम। मिनु गो मेको आन कली सेसीन ग्याइश्शा, सहर ओव्रनय’ देशो बाक्नीम” दे माइक्मी बाक्त। 13 मिनु मेको आ गेय पाइब काम “इं सहर डा ५ ओटा शारा आन कली कोत्रथ सोइक्तीन। मेकोपुकी एको बेक्शो इस्राएली खोदेशोन दुम्नीम। थमा पा मेकोपुकी एक बेक्ब इस्राएली खोदेशोन दुम्नीम। मार दुम्शो बाक्मे, मेको तुइक्चा कली सोइक्तय” देंमाक्त। 14 मिनु मेकोपुकीम बग्गी निक्शी निक्निक्शी शारा गुइदमे बाक्त। मिनु पिपम मेको आन कली “अरामी लडाइ पाइब आन कली मार दुम्मे, मेको रुपीन” दे सोइक्तीमी बाक्त। 15 मिनु मेको यर्दन खोला सम्मन कोत्रन कोत्रन लमा बाक्त। मिनु अरामी नेल्लेम रीब पा प्रोक्मानु, लां नेल्ल मेको आन प्रोंइशो वासी नु यापुकी तामे बाक्त। मिनु क्यारी पथ लाइब मुरपुकी लेशशा जाक्शा, मेको लोत्र पिप कली शेंदमे बाक्त।

16 मिनु मुरपुकी गूशा, अरामी आन बाक्तीक डा मार मार नेल्ल लदमे बाक्त। मिनु परमप्रभु यावे आ देशो खोदेशो पा सेआह पुक्तीक का रिम्शो फस शेकेल का चांदीम नु पुक्तीक निक्शी क्योत्रज शेकेल का चांदीम लेयडमे बाक्त। शेकेल का ११.५ ग्राम चांदी के क्येट बाक्ब। 17 मिनु पिप कली कुक्शा गाक्ब लडाइ पाइब आन ठेयब मुर कली लाप्चोम कोत्रब सेल्ला वोदमे बाक्त। मिनु मेको कली मुरपुकीम दिम्शा सदमे बाक्त। मिनु पिप मेको कली ग्रुम्थ आ खिंम लमेनु, परमप्रभु आ मुरुम देशो खोदेशो पा मेको कली मुरपुकीम ठेयब लाप्चोम दिम्शा साइश्शो बाक्मा बाक्त। 18 परमप्रभु आ मुरुम पिप कली “दीसा सेआह पुक्तीक का रिम्शो फस शेकेल का चांदीम नु पुक्तीक निक्शी क्योत्रज शेकेल का चांदीम सामरीया डा ठेयब लाप्चो आ डोंइती लेयसीब” देशो बाक्माक्त। 19 मिनु मेको लडाइ पाइब आन ठेयब मुरुम परमप्रभु आ मुर कली “परमप्रभु यावेम आ सरीड डा झेल रोक्तु हना यो, मोदेशो दुम्ने मचाप्ब” देशो बाक्माक्त। मिनु परमप्रभु आ मुरुम “गे मेको मो पशो ताइनेवे, तन्न जचा चहिं मताइक्नेवे” देशो बाक्माक्त। 20 मिनु मेको कली मोदेशोन दुम्माक्त। मारदे हना मेको कली मुरपुकीम लाप्चोम दिम्शा सदमे बाक्त। मिनु मेको बेक्माक्त।

8

शुनेम डा मीशेम आ रू तशो

1 तेको मीश मुर आ तौ कली एलीशाम बेक्शो रे सेंशो बाक्मे, मेको मीश मुर कली एलीशाम “इ खिं डा मुर नेल्ल मेकेर रे गाक्कीन। मिनु इक्का नाक्ती कली ते दुम्बा, मेक लशा बाक्कीन। मारदे हना परमप्रभु यावेम एको रागीम ७ बर्स सम्म अन्काल दुम्पाइक्ब” दे माइश्शो बाक्माक्त। २ राजा ४:३५ 2 मिनु मेको परमप्रभु आ मुरुम देशो खोदेशो पा, मेको मीश मुरुम पवा बाक्त। मिनु मेको आ खिं डा मुर नेल्ल लाइश्शा लमाक्त। मिनु लशा पलिस्ती आन रागीम ७ बर्स सम्म बाक्मा बाक्त। 3 मिनु ७ बर्स नोले मेको पलिस्ती आन रागी रे लेशशा जाक्माक्त। मिनु मेको आ रू नु खिं लेशशा तचा कली पिप आ बाक्तीक लमाक्त। 4 मेना पिप चहिं परमप्रभु आ मुर आ गेय पाइब गेहाजी कली “एलीशाम पशो ठेयब ठेयब गेय नेल्ल आं कली शेंदी” दे मेको नु लोत्र पना पन बाक्शो बाक्माक्त। 5 मिनु गेहाजीम एलीशाम बेक्शो मुर आन कली दोपा सेंपदा, मेको नेल्ल पिप कली शेंना शेंन बाक्शो बाक्माक्त। मेना मेको आ तौ बेक्शो रे सेंपाइश्शो मीश मुर आ रू नु खिं लेशशा तडल, दे पिप आ बाक्तीकेम कागज ब्रेक्शा गेथ जाक्माक्त। मिनु गेहाजीम “ए आं प्रभु पिप, एलीशाम बेक्शो रे सेंपाइश्शो। एको मीश मुर आ तौ बाक्ब। मिनु बेक्शो रे सेंसीशो आ तौ एकोन बाक्ब” देंमाक्त। 6 मिनु पिपमी मेको मीश मुर कली मेको आ पर्बम हिल्लो पवा बाक्त। मिनु मेकोमी यो शोत्रडा बाक्त। मिनु पिपम आ गेय पाइब ठेयब मुर का कली “एकोम आ रागी प्रोंइशा गाक्म नाक्त रे मुल सम्म डा मेको रू डा मारेइ मारेइ एको कली लेशशा गेने” देंमाक्त।

हजाएलम बेन-हादाद साइश्शो

7 मिनु एलीशा दमस्कस लमाक्त। मेना अराम डा पिप बेन-हादाद रोइ पशो बाक्माक्त। मिनु मुरपुकीम पिप कली “परमप्रभु आ मुर एक जाक्शो बाक्ब” दे नैपदमे बाक्त। 8 मिनु पिपमी हजाएल कली “कोसेली लाइश्शा, परमप्रभु आ मुर कली ग्रुम्थ लावो। मेको रे पा परमप्रभु यावे कली ‘गो एको रोइ रे सानुडा देय मसानुडा’ दे हिल्लो पपतो” दे अरेवा बाक्त। 9 मिनु हजाएलम दमस्कसम बाक्शो रिम्शो रिम्शो मारेइ मारेइ कोसेली ४० ओटा दलओंठम कुरपाइश्शा

लमाक्त। मिनु मेको आगा ओव्रशा परमप्रभु यावे आ लोव्र पाइब आ डोंइती राम्माक्त। मिनु मेकोम “इन तौ, अराम डा पिप बेन-हादादमी आं कली ‘गो आं रोइ रे सानुडा देय मसानुडा’ दे हिल्लो पथ सोइक्ताक्यी” देंमाक्त। 10 मिनु एलीशाम मेको कली “लशा, पिप कली ‘गे थमा पा सानीनी’ दे मतो” देंमाक्त। तन्न एलीशाहमी “परमप्रभु यावेम आं कली ‘मेको थमा पा बेक्ब’ देंशो बाक्ब” देंमाक्त। 11 मिनु मेकोमी पर डोशा, हजाएल कली कोव्रस डा कोव्रस बाक्माक्त। मिनु हजाएल मुने पवा बाक्त। मिनु मेको परमप्रभु आ मुर डाक्माक्त। लूका १९:४१-४४ 12 मिनु हजाएलम “ए आं प्रभु, गे मारदे डाकनी?” दे हिल्लो पवा बाक्त। मिनु मेकोमी हजाएल कली “गेम इस्राएल डा मुर आन कली काइ मरिम्शो पशो तुइक्नुड। गे मेको आन दरवारम मी सुइक्नेवे। मिनु मेको आन ठिटा मुर आन कली तरवारम क्योरनेवे। मेको आन आइक्च आल आन कली खपीम राप्शा साइक्नेवे। मेको आन कोव्रज कुरशो मीश मुर आन कोव्रज पाक्नेवे” दे मदा बाक्त। २राजा १०:३२ 13 मिनु हजाएलमी “गो महिक्शो, कुचुम खोदेंशो मुरुम ओदेंशो ठेयब गेय दोपा पने चाप्नुड डा?” देंमाक्त। मिनु एलीशाम “परमप्रभु यावेम गे अराम डा पिप दुम्नेवे, दे आं कली कोइशो बाक्ब” देंमाक्त। १राजा १९:१५ 14 मेको नोले हजाएल एलीशा आ डोंइती रे गाक्माक्त। मिनु आ होव्रप बेन-हादाद आ बाक्तीक लेशशा जाक्माक्त। मिनु बेन-हादाद “एलीशाम इ कली मार देंमे?” दे हिल्लो पवा बाक्त। मिनु मेकोमी “गे थमा पा सानीनी नें” दे मदा बाक्त। 15 तन्न आ दीसा हजाएलमी सुम्तीक वा का ब्वाक्कुम नुप्शा, पिप आ कुलुमी सुमा बाक्त। मिनु मोपा मेको पिप बेक्माक्त। मिनु बेन-हादाद आ पा डा हजाएल पिप दुम्माक्त।

यहूदा डा पिप येहोराम

२इतिहास २१:१, ५-१०; २इतिहास २२:१-६

16 येहो-शाफात आ तौ येहोराम यहूदा डा पिप दुम्शा, सासन पचा गोवा बाक्त। मेना इस्राएल डा पिप आहाब आ तौ येहोराम पिप दुम्शो ५ बर्स दुम्शो बाक्माक्त। मेको निक्शी आस नें येहोराम बाक्त। मेको आस कली योराम यो देंमा बाक्त। १राजा २२:५१ 17 येहोराम पिप दुम्मेनु, मेको ३२ बर्स दुम्शो बाक्माक्त। मिनु मेकोम यरूसलेममी ८ बर्स सासन पवा बाक्त। 18 मेको इस्राएल डा पिप, आहाब आ खिं डा मुर आन लांम गाक्माक्त। मारदे हना मेकोम आहाब आ तमी ग्युंवे पशो बाक्माक्त। मिनु मेकोम परमप्रभु यावे आ डोंइती मार मरिम्शो बाक्मे, मेको पवा बाक्त। 19 मो हना यो परमप्रभु यावेमी आ गेय पाइब दाऊद आ पबर्म यहूदा कली मक्याम्दा बाक्त। मेकोमी दाऊद कली इ तौ चच का गेना हना यो पिप दुम्शा बाक्ब, दे कबल पशो बाक्माक्त। २सामुएल ७:११-१६; १राजा ११:३६

20 येहोरामम पिप पवा ना एदोम डा मुरुमी यहूदा आ देंशो मटिथु, आंम आन पिप का सेल्मे बाक्त। 21 मोपतीके यहूदा डा पिप येहोराम आ बग्गी नेल्ल लाइश्शा, आइक्ची हांबु जाइर सहरमी लमाक्त। मिनु एदोमीपुकीम येहोराम आ बग्गी नेल्ल नु आ लडाइ पाइब आन ठेयब मुर नेल्ल आन कली पुम्दमे बाक्त। मिनु मेको आ लडाइ पाइबपुकी चहिं प्रोक्शा, आन आन खिं लेम्मा बाक्त। 22 मोपतीके एदोम मुल सम्म यहूदा रे ब्राशो बाक्ब। मेना लिब्ना यो यहूदा आ देंशो मटिथु ब्राशो बाक्माक्त। 23 मिनु यहूदा डा पिप येहोराम आ पशो अरु गेय, मेको आ पशो नेल्ल, मार, मेको यहूदा डा पिप आन इतिहासम ब्रेक्शो मबाक्बा डा? 24 यहूदा डा पिप येहोराम बेक्माक्त। मिनु मेको आ किकी पिपी नु दाऊद आ सहरमी थिम्चा पुंइसे बाक्त। मिनु मेको आ पा डा आ तौ अहाज्याह पिप दुम्माक्त।

यहूदा डा पिप अहाज्याह

25 मिनु यहूदा डा पिप येहोराम आ तौ अहाज्याह यहूदाम पिप दुम्माक्त। मेना इस्राएल डा पिप आहाब आ तौ येहोराम पिप दुम्शो १२ बर्स दुम्शो बाक्माक्त। 26 अहाज्याह पिप दुम्मेनु २२ बर्स दुम्शो बाक्माक्त। मिनु मेकोम यरूसलेममी बर्स का सासन पवा बाक्त। मेको आ ममा आ नें अथाल्याह बाक्माक्त। मेको इस्राएल डा पिप ओम्नी आ चच बाक्माक्त। २राजा ११:१ 27 अहाज्याह आहाब आ खिं डा मुर आन लांम गाक्माक्त। मिनु आहाब आ खिं डा मुरपुकीम खोदेंशो पा परमप्रभु यावे आ डोंइती मार मरिम्शो बाक्मे, मेको पवा बाक्त। मारदे हना मेको आहाब आ चांइवा दुम्शो बाक्माक्त।

28 यहूदा डा पिप अहाज्याह नु आहाब आ तौ इस्राएल डा पिप येहोराम नु गारशा, अराम डा पिप हजाएल नु लडाइ पचा कली रामोथ-गिलादम लमाक्त। तन्न अरामीपुकीम येहोराम कली गार सेल्मे बाक्त। 29 मिनु अराम डा पिप हजाएल नु लडाइ पथ लमेनु, रामाहम गार दुम्शो रे साचा कली येहोराम येजेल सहरम लमाक्त। मिनु यहूदा डा पिप

येहोराम आ तौ अहाज्याह इस्राएल डा पिप आहाब आ तौ येहोराम कली कोव्रथ येजेल सहर लमाक्त। मारदे हना मेको कली गार दुम्शो बाक्माक्त। २राजा ९:१४-१६

9

येहू इस्राएल डा पिप दुम्शो

1 परमप्रभु यावे आ लोव्र पाइब एलीशामी परमप्रभु यावे आ लोव्र पाइब आन हुल डा का कली ब्रेशा “इ किप्शुर किप्शा, एको तेल कुरशा रामोथ-गिलादम लावो। 2 मिनु मेक जाक्दीशशा, निम्शी आ चच, येहो-शाफात आ तौ येहू कली मालो। मिनु मेको कली आ वारचपुकी रे फ्राशा, आगा डा कोठाम लतो। 3 मिनु नोले मेको तेल मेको आ पियाम लुकशा ‘परमप्रभु यावेम इ कली इस्राएल डा पिप सेल्ला’ देंशो बाक्ब, दे मतो। मिनु लाप्चो गुरु रोक्शा प्रोक्को। देश मपावो” दे मदा बाक्त। १राजा १९:१६

4 मोपतीके परमप्रभु यावे आ लोव्र पाइब, ठिटा रामोथ-गिलादमी लमाक्त। 5 मिनु मेको मेक जाक्दीम्मेनु, येहू लडाइ पाइब आन ठेयब मुरपुकी नु गुम्शा काथा बाक्शो थिम्मी बाक्त। मिनु मेकोम येहू कली “लडाइ पाइब आन ठेयब मुरपुकी, गो इन नु लोव्र का पचा माल्नुड” देंमाक्त। मिनु येहूम “गो आंइ दाते डा सु नु लोव्र पचा माल्नेवे?” देंमाक्त। मिनु मेकोम “इन नु” देंमाक्त। 6 मिनु येहू बोक्शा, आगा डा कोठाम ओव्रमाक्त। मिनु मेको ठिटा येहू आ पियाम तेल लुकशा “परमप्रभु यावे, इस्राएली आन परमप्रभुमी ‘गो इ कली आं मुर इस्राएली आन पिप सेल्लन। 7 गे इ होव्रप आहाब आ खिं डा मुर आन कली साइक्चा माल्नेवे। मिनु इजेबेलमी आं गेय पा आं लोव्र पाइबपुकी नु आं गेय पाइब मुर आन कली साइशो आ क्येक्क लेत्नुड। 8 आहाब आ खिं डा मुर नेल्ल बेक्चा माल्नीम। इस्राएलम मेको आ खिं डा वोंइश मुर वाइल बाक्मल कि मबाक्मल, गो नेल्ल आन कली साइक्नुडमी। १राजा १४:१० 9 गो आहाब आ खिं कली नेबात आ तौ येरोबाम नु अहीयाह आ तौ बाशा आस खिं खोदेशो सेल्लुड। १राजा १५:२९; १राजा १६:३, ११ 10 इजेबेल कली चहिं येजेल डा रू काम कुचुमम ब्वाइनीम। मेको कली सुइम मथिम्नीम’ देंशो बाक्ब” देंशा, मेको लाप्चो गुरु रोक्शा दोरशा प्रोक्माक्त। १राजा २१:२३

11 मिनु येहू मेको नोले लडाइ पाइब आन ठेयब मुर आन बाक्तीक जाक्माक्त। मिनु मेकोपुकीम मेको कली “मार नेल्ल रिम्शोन बाक्बा? मेको आ निप्स ग्यशो मुर इ बाक्तीक मारदे जाक्म?” दे हिल्लो पामे बाक्त। मिनु येहूमी मेको आन कली “गे मेको मुर कली तुइक्नीनी। मिनु मेकोम मार देंबा, मेको यो तुइक्नीनी” दे माइक्मी बाक्त। 12 मिनु मेकोपुकीम “गे जोल पाइनीनी। आंइ कली थमा लोव्र पने” देंमा बाक्त। मिनु येहूम “मेकोमी आं कली मार देंत देंशा हना, परमप्रभु यावेमी ‘गो इ कली इस्राएल डा पिप सेल्लुड’ देंशो बाक्ब” दे माइक्मी बाक्त। 13 मिनु मेकोपुकीम रीब पा आन आ तार फेक्शो वा पुइशशा, तला डोइक्तीक थेंका डा फुल्लु तार ब्रामे बाक्त। मिनु मेकोपुकीम तुराही ताप्शा, ठेयब सेंदा पा “येहू पिप दुम्त” देंमा बाक्त। मत्ती २१:७

येहूमी येहोराम कली साइशो

14 मोपतीके निम्शी आ चच येहो-शाफात आ तौ येहूम येहोराम कली मरिम्शो पचा गोवा बाक्त। मिनु येहोराम नु इस्राएली नेल्ले अराम डा पिप हजाएल आ जोरी सत्रु दुम्शा रामोथ-गिलाद कली खाल पामे बाक्त। 15 तन्न पिप येहोराम चहिं आ गार सापाइक्चा कली येजेल लशो बाक्माक्त। मेको गार अराम डा पिप हजाएल नु लडाइ पवानु, अरामीपुकीम सेल्लो बाक्मा बाक्त। मिनु येहूमी मेको लडाइ पाइब आन ठेयब मुर आन कली “गे गो नु बाक्तीनी हना, सुइ मुर रामोथ-गिलाद सहर रे एको लोव्र शोव्रचा कली येजेल रे गूचा मतामेक्ल” देंमाक्त। २राजा ८:२८-२९ 16 मिनु येहू आ बग्गीम डोइशशा येजेल लमाक्त। मारदे हना येहोराम मेकेर नाइशशा बाक्माक्त। मिनु यहूदा डा पिप अहाज्याह यो येहोराम कली कोव्रथ मेक उइ बाक्शो बाक्माक्त।

17 मिनु येजेल सहर कली कोव्रशा खाल पाइबमी येहू नु आ मुर आन कली जाक्शो तवा बाक्त। मिनु मेकोमी ठेयब सेंदा पा “गो हुल का लडाइ पाइब मुर पिशो तातामी” देंमाक्त। मिनु येहोराममी “शारा डोइक्ब का मेको आन कली गुम्थ सोइशशा ‘मार, गे रिम्शो पथ जाक्शो बाक्नीनी?’ दे हिल्लो पपतो” देंमाक्त। 18 मिनु मेको शारा डोइक्ब मुर येहू कली गुम्थ लशा “पिपमी इन कली ‘मार, गे रिम्शो पथ जाक्नी?’ दे हिल्लो पाप्तु” देंमाक्त। मिनु येहूम “रिम्शो पथ जाक्डल कि मरिम्शो पथ जाक्डल, गे मारदे माल्दे? आं नोले खोइय्यी” दे मदा बाक्त। मिनु मेको कोव्रशा खाल पाइबमी पिप कली “मेको लोव्र कुरबम मेको आन कली गुम्चा दा गुम्तु, तन्न मेको लेशशा मजा” देंमाक्त। 19 मिनु

पिपमी अर्को शारा डोइक्व सोइक्ता बाक्त। मिनु मेको, मेको आन नेक्था जाक्दीशशा “पिपमी ‘गे रिम्शो पथ जाक्नी’ दे हिल्लो पाप्तु” देंमाक्त। मिनु येहूम “रिम्शो पथ जाक्डल कि मरिम्शो पथ जाक्डल इ कली मारदे माल्दे, आं नोले खोइय्यी” दे मदा बाक्त। 20 मिनु मेको कोव्रशा खाल पाइबमी “मेको लोव्र कुरबमी मेको आन कली गुम्चा दा गुम्तु, तन्न मेको यो लेशशा मजा। मेरे बग्गी दोरपाइक्व दा निम्शी आ चच येहू बाक्त। मारदे हना मेकोम निप्स ग्यशो मुरुमी दोरपाइशो खोदेंशो पा दोरपाइक्व” देंमाक्त।

21 मिनु येहोराममी “आं बग्गी ठीक पने” देंमाक्त। मिनु मेकोपुकीम मेको ठीक पामे बाक्त। मिनु इस्राएल डा पिप येहोराम नु यहूदा डा पिप अहाज्याह आस बग्गी डोइशशा येहू कली गुम्थ लसा बाक्त। मिनु मेको निक्शीम येहू कली “येजेल सहर नाबोथ आ रूम गुम्से बाक्त। १राजा २१:१ 22 मिनु येहोरामम येहू कली तशा, मेको कली ‘येहू, गे मार रिम्शो मिम्शा गुम्थ जाक्डे?’ दे हिल्लो पवा बाक्त। तन्न येहूम इ ममा इजेबेलम आ ग्रांग्रा दिशो मूर्ति पूजा पाइब, टुना मुना पाइब। मिनु मार रिम्शो पा गुम्थ जाक्नुडा?” देंमाक्त। 23 मिनु येहोराममी आ बग्गी लेशशा अहाज्याह कली “अहाज्याह मरिम्शो दुम्त” देंना देंन प्रोक्माक्त। 24 मिनु येहूम आ लिब्रा कीशा येहोराम आ बला आ दातेमी आबा बाक्त। मिनु मेको ब्राम मेको आ लुङगीर खिदा बाक्त। मिनु मेको आ बग्गीमी गोल्माक्त। 25 मिनु येहूम आ लडाइ पाइब आन ठेयब मुर बिदकार कली “मेरे कली पोक्शा येजेली नाबोथ आ रूम ताइक्तो। गे नु गो मेको आ आफ आहाब नु शाराम काथ काथा लसानु, मेको आ पर्बम परमप्रभु यावेम लोव्र पशो गे तुइशो बाक्नेवे। १राजा २१:१९; यसैया १३:१; येरमीया २३:३३-४० 26 परमप्रभु यावेमी ‘गो सिनाक्ती नाबोथ नु मेको आ आल आन हुश ताता। मिनु गो थमा पा इ कली एको रूमी क्येक्क लेत्नुड’ देंशो बाक्त। मोपतीके मेरे कली पोक्शा परमप्रभु यावे आ देंशो खोदेंशो पा मेको रूमीन ताइक्तो” दे मदा बाक्त।

येहूमी अहाज्याह कली साइशो

27 मिनु यहूदा डा पिप अहाज्याह मेको तशा, बेथ-हाग्गान लतीक लां गे प्रोक्माक्त। मिनु येहू मेको आ नोनोले खेदा पना पन लशा “मेरे कली यो सतीन” देंमाक्त। मिनु मेको कली इब्लाम डा गुर डा ग्येतथ लतीक लांम आप्शा गार सेल्मे बाक्त। तन्न मेको प्रोक्शा मेगीदोम जाक्दीम्माक्त। मिनु मेक उइ बेक्माक्त। २इतिहास २२:७-९ 28 मिनु मेको आ गेय पाइब ठेयब मुरपुकीम मेको आ बेक्शो रां यरूसलेमम लाइशशा दाऊद आ सहरम मेको आ किकी पिप नु आ तुरसुम थिम्मे बाक्त। 29 आहाब आ तौ येहोरामम सासन पवा आ ११ बर्सम अहाज्याह यहूदा डा पिप दुम्शो बाक्माक्त।

येहूमी इजेबेल कली साइशो

30 मिनु येहू येजेल सहरमी जाक्माक्त। मार मार दुम्मे, मेको नेल्ल इजेबेलम नेंशो बाक्माक्त। मिनु मेकोम आ मिक्चीम गाजल खेक्से बाक्त। मिनु चां मिंसीशा झेल रे उइ लां गे कोव्रडा बाक्त। 31 मिनु येहू ठेयब लाप्चो रे ओव्रमाक्त। मिनु इजेबेलम “ए आंम होव्रप कली साइक्व जिम्मी, मार, गे रिम्शो पथ जाक्डे” दे मदा बाक्त। १राजा १६:९-१० 32 मिनु मेकोमी इर झेल गे कोव्रशा ठेयब सेंदा पा “आं गे सु बाक्नी? सु बाक्नी?” देंमाक्त। मिनु का निक्शी दरवार डा गेय पाइब मेको गे कोव्रडमे बाक्त। 33 मिनु येहूमी “मेको कली झेल रे ताइक्तीन” देंमाक्त। मिनु मेकोपुकीम इजेबेल कली उइ ताइक्तमे बाक्त। मिनु मेको आ हुश प्रेक्शा कोइ गारोमी नु कोइ शारा आन कली जुक्तमे बाक्त। 34 मेको नोले येहू आगा ओव्रशा जचा तूचा थोव्रक जवा तूडा बाक्त। मिनु मेकोमी “मेको सराप रशो मीश मुर कली लाइशशा थिमीन। मारदे हना मेको पिप आ तमी बाक्व” देंमाक्त। 35 मिनु मुरपुकी मेको कली थिम्चा कली उइ ब्रुम्मा बाक्त। तन्न मेकेर आ पिया, गुइ नु खोइल डा लाक्शा अरु मारेइ मथिदमे बाक्त। 36 मिनु मेकोपुकी लेशशा जाक्शा येहू कली शेंदमे बाक्त। मिनु मेकोमी “परमप्रभु यावेम आ गेय पाइब तिश्बे सहर डा एलीया रे पा ‘इजेबेल कली येजेल सहरम कुचुमम व्वाइनीम। १राजा २१:२३ 37 इजेबेल आ बेक्शो रां येजेल सहरम मोव्रल खोदेंशो पा राक्व। मिनु मेको कली एको इजेबेल बाक्व, दे सुइम मतुइक्नीम’ देंशो बाक्व” देंमाक्त।

10

आहाब आ तौपुकी साइशो

1 आहाब आ ७० जना तौ सामरीया सहरम बाक्शो बाक्मा बाक्त। मोपतीके येहूमी चिठी का ब्रेक्शा सामरीयाम, येजेल डा हुकुम पाइब, खाल्पा नु आहाब आ तौ आन कली कोव्रब मुर आन कली सोइक्ता बाक्त। 2 मेको चिठीम

“गे इन होत्रप आ तौ मेकेर बाक्तीके, इन बग्गी, शारा, गारो हिरशो सहर नु यापुकी बाक्तीके, 3 गेपुकीमी इन होत्रप आ तौ आन दातेमी नेल्ल क्येडा रिम्शो नु नेल्ल क्येडा निप्स पाइशो, का कली आ आफ आ पा डा पिप सेलीन। मिनु मेको नोले इन होत्रप आ खिं आ पबंम लडाइ पने” दे ब्रेक्शा सोइक्तीमी बाक्त। 4 तन्न मेकोपुकी थाम्पा हिंशा सुर्ता पा “पिप निक्शी ला यो मेको आ डोंइती राप्ने मचबेस हना, गो मार पने चाप्नया डा?” देंमुमा बाक्त। 5 मोपतीके पिप आ खिं डा खाल पाइबपुकी, सहर डा हुकुम पाइबपुकी, खाल्पापुकी नु आहाब आ तौ आन कली कोत्रब नेल्ल गारशा येहू कली “गोपुकी इन गेय पाइब नकी। गे आंइ कली मार देंनीनी, गो मेको पाइनीकी। गो सुइ कली पिप मसेलीनीकी। गे मार पचा दाक्नीनी, मेको पने” दे लोत्र कुरब मुर सोइक्तमे बाक्त। 6 मिनु येहूमी मेको आन कली अर्को चिठी का ब्रेक्शा “गेपुकी आं गे बाक्तीनी हना नु आं अरेशो बिन्नीनी हना, दीसा एं खोइ ना इन होत्रप आ तौ आन पिया कुरशा येजेल सहरमी जाक्कीन” दे ब्रेक्शा सोइक्ता बाक्त। मेना मेको पिप आ ७० जना तौ चहिं आन कली कोत्रब मुर आन खिंमी बाक्शो बाक्मा बाक्त। 7 मिनु मेको चिठी मेक जाक्दीम्मेनु, मेकोपुकीम मेको ७० जना पिप आ तौ आन कली लाइशशा सदमे बाक्त। मिनु मेकोपुकीम मेको आन खोइशशो पिया थुन्सेपुकीम कुर पा येजेल सहरम सोइक्तमे बाक्त। 8 मिनु लोत्र कुरब मुर जाक्शा, येहू कली “मेकोपुकीम पिप आ तौ आन पिया चाक्तेक्म” देंमाक्त। मिनु येहूमी मेको कली “मेको आन कली पुक्थी निक्शी पा पुक्शा, सहर डा ठेयब लाप्चो आ डोंइती दीसा सुनी सम्म वोतीन” देंमाक्त। 9 मिनु आ दीसा सुनी येहू लाडगा गूमाक्त। मिनु मेकोम मेकेर राप्शा बाक्ब नेल्ल आन कली “गे दोस ताइब मननी। आंम होत्रप कली मरिम्शो पा साइक्ब मुर दा गो नड। तन्न एको नेल्ल आन कली चहिं सुम सदा? 10 आहाब आ खिं डा मुर आन कली परमप्रभु यावेम देंशो लोत्र का यो मोशा मदुम्ब। परमप्रभु यावेम आ गेय पाइब एलीया रे पा देंशो लोत्र नेल्ल गाप्त” देंमाक्त। १राजा २१:२१ 11 मोपा येहूमी येजेलम लीशो आहाब आ खिं डा मुर नेल्ल, मेको आ ठेयब गेय पाइब मुरपुकी, मेको आ वारच नु मेको आ चढेब, नेल्ल आन कली का यो मप्रोंइथु साइक्मी बाक्त। होसे १:४

12 मेको नोले येहू सामरीया गे लमाक्त। मिनु गोठला आन बाक्तीक बेथ-एकेद सहरम जाक्दीम्माक्त। 13 मिनु मेकेर येहूम यहूदा डा पिप अहाज्याह आ मुर आन कली गुमा बाक्त। मिनु येहूमी मेको आन कली “गे सु ननी?” दे हिल्लो पामी बाक्त। मिनु मेकोपुकीम “गो पिप अहाज्याह आ मुर नकी। मिनु गो पिप तौ आन कली नु ठेयब पिपीमी आ तौ आन कली गुम्थ लाइतक” देंमा बाक्त। २इतिहास २२:८ 14 मिनु येहूम “एको आन कली सेसीन ग्याइक्तीन” देंमाक्त। मिनु मेकोपुकीम मेको आन कली सेसीन ग्याइशशा बेथ-एकेद सहरम सदमे बाक्त। मेकोपुकीम मेकेर ४२ जना वोंइश मुर आन कली का यो सेस मप्रोन्मे बाक्त।

15 मिनु मेकोम मेकेर रेकाब आ तौ येहो-नादाब आ कली गुम्थ पिशो तवा बाक्त। मिनु येहूम मेको कली रिम्शो पा “मार गो आं थुं इ गे बाक्शो खोदेंशो पा, गे यो इ थुं नेल्लेम आं गे बाक्नेवे?” दे मदा बाक्त। मिनु येहो-नादाबम “बाक्नुड” देंमाक्त। मिनु येहूमी “मो हना इ गुइ आं कली गेयी” दे मदा बाक्त। मिनु मेकोम आ गुइ गेवा बाक्त। मिनु येहूम मेको कली लाइशशा आ बग्गीम निप्पदा बाक्त। येरमीया ३५:६ 16 मिनु येहूम मेको कली “गे गो नु पिने। मिनु परमप्रभु यावे कली आं जोंब बोक्शा गेय पशो कोत्रडीन” दे मदा बाक्त। मिनु मेकोम मेको कली आ बग्गीम लदा बाक्त। 17 मिनु येहू सामरीयाम जाक्दीशशा, परमप्रभु यावेमी एलीया कली देंशो खोदेंशो पा, आहाब आ खिं डा लीशो मुर नेल्ल आन कली का यो मप्रोंइथु, साइक्मी बाक्त। १राजा २१:२१

बाल कली चढेब आन कली साइशशो

18 मिनु येहूमी मुर नेल्ल आन कली ब्रेशशा, मेको आन कली “आहाबम दा इच्का ला बाल आ पूजा पाप्तु। तन्न येहूमी मेको क्येडा यो थम ठेयब पा पूजा पाइब। १राजा १६:३१-३३ 19 मुल बाल आ लोत्र पाइब नेल्ले, मेको आ नोले खोइक्ब नेल्ल नु मेको कली चढेब नेल्ल आन कली ब्रेत्तीन। मेकोपुकी का यो मग्राइक्मल। मारदे हना गो बाल कली ठेयब पूजा का पाइनुड। मेको पूजाम मजाक्ब सुइ ब्रोंइचा मताइनीम” देंमाक्त। तन्न येहूम बाल आ नोले खोइक्ब नेल्ल आन कली साइक्चा कली मोपा जोल पशो बाक्माक्त। 20 मिनु येहूम “बाल आ पबंम चाड का मानेचा माल्ब” देंमाक्त। मोपतीके मेकोपुकीम मेको लोत्र नेल्ल आन कली नेंपदमे बाक्त। 21 मिनु येहूम मेको लोत्र इसाएल नेल्लेम नेंपाइक्चा कली लोत्र कुरब मुर सोइक्तीमी बाक्त। मिनु बाल आ नोले खोइक्ब नेल्ल जाक्मा बाक्त। का यो मलीमा बाक्त। मेकोपुकी बाल आ खिंम जाक्शा क्राक्थी चोक्थी दुम्शा एर डा गारो रे ओंथ डा गारो सम्म दुम्मा बाक्त।

22 मिनु मेकोमी वा वोइक्ब आन कली “बाल आ नोले खोइक्ब नेल्ल आन कली वा गुंडदीन” दे माइक्मी बाक्त। मिनु मेकोम मेको आन कली वा गुंडदमे बाक्त। 23 मिनु येहू, रेकाब आ तौ येहो-नादाब नु बाल आ खिं ओव्रमाक्त। मिनु येहूम बाल आ नोले खोइक्ब आन कली “होस पा एर ओंथ नेल्ल कोव्रडीन। मिनु थमा पा एकेर गे इन दातेम परमप्रभु यावे आ गेय पाइब सुइ मबाक्मल। बाल आ नोले खोइक्ब ला बाक्मल” देंमाक्त। 24 मिनु मेको क्योरशा चढेचा नु चोशा चढेचा कली आगा ओव्रसा बाक्त। येहूमी लाडगाम ८० जना मुर आन कली योव्रशा, मेको आन कली “गो एको मुर आन कली इन जिम्मा गेशो बाक्नुड। सुइम का कली यो प्रोक्चा गेपु हना, मेको आ पा डा मेको प्रोक्पाइक्ब मुर साइक्चा पुंडसीब” देंशो बाक्माक्त। 25 मिनु येहूम मार मार चढेने थुमा चोटी खाल पाइब नु आ दी डा योव्रशो मुर आन ठेयब मुर आन कली “ओव्रशा, मेको नेल्ल आन कली का यो मप्रोंडथु, क्योरशा सतीन” दे हुकुम गेमी बाक्त। मोपतीके मेको खाल पाइबपुकी नु योव्रशो आन ठेयब मुरपुकीम सुइ आन कली प्रोक्चा मगेथु तरवारम क्योरशा सदमे बाक्त। मिनु मेको आन बेक्शो रां लाडगा गुंडशा बाल आ खिं आ लाडगाम ताइक्तमे बाक्त। १राजा १८:४० 26 मिनु मेकोपुकीम बाल आ खिं डा थाम लाडगा गुंडशा चोव्रमे बाक्त। 27 मिनु नोले मेकोपुकीम बाल आ थाम प्रेत्मे बाक्त। मिनु आ खिं यो प्रेत्मे बाक्त। मिनु मेको डाइक्तीक खिं सेल्मे बाक्त। मेको मुल सम्म बाक्ब।

28 मोपा येहूमी इस्राएलमी बाल आ नोले खोइक्ब नेल्ल आन कली क्याम्दा बाक्त। १राजा १२:२६-३३ 29 मो हना यो येहूम इस्राएली आन कली पाप पपाइक्ब नेबात आ तौ येरोबाम आ पतीक मप्रोना बाक्त। बेथेल नु दान डा सुन के बाछा आस कली पूजा पतीक गेय में डा में वोदा बाक्त। 30 मिनु परमप्रभु यावेम येहू कली “गे आं डोंइती मार रिम्शो बाक्मे, मेको पाप्तीवी। मिनु आं मिम्शो लोव्र आहाब आ खिं डा मुर नेल्ल आन कली पाप्तीवी। मोपतीके इ तौ चच ४ पाला सम्म इस्राएल डा पिप दुम्नीम” देंमाक्त। 31 मो हना यो येहूम आ थुं नेल्लेम होस पा परमप्रभु यावे, इस्राएली आन परमप्रभु आ अरेशो मटिवा बाक्त। मेकोमी इस्राएली आन कली पाप पपाइक्ब येरोबाम आ पाप पतीक मप्रोना बाक्त।

32 मेना परमप्रभु यावेमी इस्राएल कली आइक्च सेल्चा गोवा बाक्त। मिनु हजाएलमी इस्राएल कली लडाइ पा ग्रामाक्त। २राजा ८:१२ 33 मिनु यर्दन खोला आ पूर्व गे गिलाद डा रागी नेल्ल, गाद, रूबेन नु मनस्से आन रागी, अरनोन खोला आ नेक्था आरोएर, गिलाद डा लां रे पा बाशान सम्म इस्राएली आन कली फ्रूमी बाक्त। 34 येहू आ पशो अरु गेय, मेको आ पशो नेल्ल नु आ सक्ति मार, मेको इस्राएल डा पिप आन इतिहासम ब्रेक्शो मबाक्बा डा? 35 मिनु येहू बेक्माक्त। मिनु मेको सामरीयाम थिम्चा पुंडसे बाक्त। मिनु मेको आ पा डा आ तौ येहो-अहाज पिप दुम्माक्त। २राजा १३:१ 36 येहू सामरीया सहरम बाक्शा २८ बर्स इस्राएल कली सासन पवा बाक्त।

11

अथाल्याह नु योआश

1 अहाज्याह आ ममा अथाल्याहम आ तौ कली साइशो तशा, पिप आ खिं डा मुर नेल्ल आन कली साइक्चा गोवा बाक्त। २राजा ८:२६; २राजा ९:२७ 2 तन्न पिप येहोराम आ तमी, अहाज्याह आ समी येहो-शेबा बाक्माक्त। मेकोमी अहाज्याह आ तौ योआश कली मेको साइक्चा पुंडसीब पिप आ आल आन दाते रे लाइशा, मेको आ खाल पाइब मीश मुर नु इप्तीके कोठा काम खुइक्ता बाक्त। मोपा अथाल्याहमी मेको आल कली साइक्चा मतवा बाक्त। 3 मिनु मेको आल ६ बर्स सम्म मेको नु परमप्रभु यावे आ खिंम खुइशा बाक्माक्त। मेना अथाल्याहमी सासन पशो बाक्माक्त।

4 मिनु ७ बर्सम येहो-यादामी सहे, सहे जना पिप कली कोव्रब केरेती नु खाल पाइब आन ठेयब मुर आन कली परमप्रभु यावे आ खिंम ब्रेशशा चाक्मी बाक्त। मिनु येहो-यादाम मेको आन कली कबल का पपाइशा, परमप्रभु यावे आ खिंम कसम जपाइक्मी बाक्त। मिनु मेको आन कली पिप आ तौ कोंइदीमी बाक्त। केरेती परमप्रभु यावे आ खिं कोव्रब बाक्नीम। 5 मिनु येहो-यादामी मेको आन कली “गे मार पचा माल्नीनी देंशा हना, सु सु नाइक्तीक नाक्ती गेय पथ जाक्नीनी, मेकोपुकीम भाग सां डा भाग का पिप आ खिं खाल पने। 6 मिनु अर्को भाग का सुर माइशो लाप्चोम बाक्कीन। नोले डा भाग लाप्चो खाल पाइब आन नोले गे बाक्शा, दरवार कोव्रचा माल्नीम। 7 मिनु गे नाइक्तीक नाक्ती गेय मपाइब हुल निक्शी चहिं परमप्रभु यावे आ खिं खाल पा बाक्कीन। 8 गे नेल्ल आंम आंम गुइम या शेशा, पिप कली खाल पा आ एर ओंथ बाक्चा माल्नीनी। इन नेक्था जाक्ब नेल्ल आन कली सतीन। पिप ते लत हना यो, गे मेको आ नेक्था बाक्चा माल्नीनी” दे अरेमी बाक्त।

9 मिनु पिप कली कोव्रब आन ठेयब मुरपुकीमी चढ़ेब येहो-यादा आ अरेशो नेल्ल पामे बाक्त। मेको नेल्लेमी आन आन मुर आन कली खुप्तमे बाक्त। नाइक्तीक नाक्ती गेय पचा माल्शो नु ममाल्शो नेल्ल चढ़ेब येहो-यादा आ बाक्तीक जाक्मा बाक्त। 10 मिनु मेको चढ़ेबम मेको आन कली परमप्रभु यावे आ खिंम बाक्शो दाऊद आ तूतीक नु तेक्तीक गेमी बाक्त। २सामुएल ८:७ 11 मिनु मेको खाल पाइबपुकी आंम आंम या शेशा परमप्रभु यावे आ खिं आ दक्खिन रे उत्तर सम्म, खिं नु चढ़ेतीक आ एर ओंथ पिप कली खाल पा बाक्मा बाक्त।

12 मिनु येहो-यादाम पिप आ तौ कली गुंडा बाक्त। मिनु मेको आ पियाम सिरपेच गुक्ता बाक्त। मिनु येहो-यादामी मेको कली कबल डा कागज का गेवा बाक्त। मिनु मेको कली तेल लुक्शा पिप सेला बाक्त। मिनु मुरपुकीम गुड फ़ोकशा “पिप गेना हना यो ब्रोंइशा बाक्ल” देंमा बाक्त। ब्यवस्था १७:१८-१९; १राजा १:३९

13 मिनु अथाल्याहमी खाल पाइब नु मुरपुकी ठेयब सेंदा पा रेयके पशो नेना बाक्त। मिनु मेको परमप्रभु यावे आ खिंम बाक्शो मुर आन नेक्था लमाक्त। 14 मिनु मेकोम कोव्रडानु, पिप थाम आ नेक्था राप्पाइशो तवा बाक्त। मेको आन पतीक पशा ठेयब मुरपुकी नु तुराही ताप्बपुकी पिप आ नेक्था बाक्मा बाक्त। मिनु रागी डा मुर नेल्ल तुराही ताप्ना ताप्न ग्येरसीशो बाक्मा बाक्त। मिनु अथाल्याहम आ वा खाक्गा बाक्त। मिनु ठेयब सेंदा पा “गो नु रागी नेल्ल खतम! गो नु रागी नेल्ल खतम!” दे वाइ ब्रेम्माक्त। 15 मिनु चढ़ेब येहो-यादामी लडाइ पाइब आन ठेयब मुर आन कली “मेको कली खिं रे गुंडदीन। मेको आ नोले खोइक्ब नेल्ल आन कली तरवारम सतीन। मारदे हना ‘मेको परमप्रभु यावे आ खिंम साइक्चा मपुंडसेक्ल’ ” देंमाक्त। 16 मिनु मेको कली ग्याइशशा, शारा वोइक्तीक लाइशशा, सदमे बाक्त।

17 मेको नोले येहो-यादामी परमप्रभु यावे, पिप नु आ मुर कली कबल का पवा बाक्त। मेकोपुकी परमप्रभु यावे आ मुर दुम्नीम, दे कबल पवा बाक्त। मिनु मेकोम पिप नु मुर आन दातेम यो कबल का पवा बाक्त। 18 मिनु मेको रागी डा मुर नेल्ल बाल आ खिं लशा, मेको प्रेत्मे बाक्त। मेकोपुकीम मेको आ चढ़ेतीक नु आ मूर्ति जिक्शा ताइक्तमे बाक्त। मिनु बाल कली चढ़ेब मत्तान कली चढ़ेतीक आ डोंइती सदमे बाक्त। मिनु चढ़ेब येहो-यादाम परमप्रभु यावे आ खिं कली खाल पाइब मुर योव्रमी बाक्त। २राजा १०:२६-२७; न्यायाधीस ६:२५ 19 मिनु येहो-यादामी सहे का जना लडाइ पाइब आन कप्तानपुकी, केरेती, खाल पाइबपुकी नु रागी डा मुर नेल्ल आन कली लाइक्मी बाक्त। मिनु मेकोपुकीमी पिप कली परमप्रभु यावे आ खिं रे खाल पाइब आन लाप्चो लां पा पिप आ खिंम चाक्गमे बाक्त। मिनु पिप आ नित्तीकेम निप्पदमे बाक्त। करेती परमप्रभु यावे आ खिं कोव्रब बाक्तेक्म। 20 मिनु रागी डा मुर नेल्ल ग्येरसमा बाक्त। मिनु सहरम थुं नाइशशा बाक्तीक दुम्माक्त। मारदे हना अथाल्याह तरवारमी साइक्चा पुंडसे बाक्त। 21 योआश पिप दुम्मेनु, मेको ७ बर्स दुम्शो बाक्माक्त। योआश नु येहो-आश नें का बाक्ब, येहो-आश कली योआश यो बाक्ब।

12

योआश यहूदा डा पिप दुम्शो

२इतिहास २४:-

1 योआश यहूदा डा पिप दुम्माक्त। मेना यहू इस्राएल डा पिप दुम्शो ७ बर्स दुम्शो बाक्माक्त। मिनु योआशमी यरूसलेमम ४० बर्स सासन पवा बाक्त। मेको आ ममा आ नें सिबीयाह बाक्माक्त। मेको बेयर-शेबा डा बाक्माक्त। 2 योआशमी चढ़ेब येहो-यादाम शेंशो खोदेशो पा, ब्रोंइम सम्म परमप्रभु यावे आ डोंइती मार रिम्शो बाक्मे, मेको पवा बाक्त। 3 मो हना यो मेकोमी डांडाम बाक्शो थानपुकी मताइक्ता बाक्त। मेना सम्म मुरपुकीम मेकेर क्योरशा चढ़ेतीक चढ़ेशा, धूप चोव्रमे बाक्त।

4 मिनु योआशमी चढ़ेब आन कली “परमप्रभु यावे आ खिंमी मुरपुकीमी आन दाक्शा गेशो क्येट, मुर आन कली हिक्शो नु बोक्शो क्येट नु मुरपुकीम ग्येरशा गेशो क्येट नेल्ले परमप्रभु यावे आ खिंम वोतीन। २राजा १४:४; १राजा २२:४४ 5 चढ़ेबपुकीमी मेको क्येट मुर रे ताक्चा माल्नीम। मिनु परमप्रभु यावे आ खिं डा बिगेशो मार मार बाक्मा, मेको सेल्पाइक्चा माल्नीम” देंमाक्त। 6 तन्न योआशमी सासन पवा आ २३ बर्स सम्म यो चढ़ेबपुकीम मेको बिगेशो मारेड मसेल्पदमे बाक्त। 7 मोपतीके पिप योआशमी चढ़ेब येहो-यादा नु अरु चढ़ेब आन कली ब्रेशशा “मारदे गे परमप्रभु यावे आ खिं डा ब्रेशो मसेल्नी? मुल रे गेपुकीम इन कली गेशो क्येट मताक्कीन। तन्न मेको अरु परमप्रभु यावे आ खिं डा ब्रेशो सेल्ब आन कली कोव्रब आ गुडमी गेचा माल्नीनी” देंमाक्त। 8 मोपतीके चढ़ेबपुकीमी “मुल गो क्येट यो मताक्क्य नु बिगेशो यो मसेल्य” दे सल्ला पामे बाक्त।

9 मिनु चढ़ेब येहो-यादामी सन्दोस का सेल्शा, मेको आ सुम्तीकेम पोवला का सेला बाक्त। मिनु येहो-यादामी मेको सन्दोस परमप्रभु यावे आ खिं आगा ओवतीकेम चढ़ेतीक आ नेक्था ग्युरा गे वोदा बाक्त। मिनु परमप्रभु यावे आ खिं डा लाप्चो कोवब चढ़ेबपुकीम परमप्रभु यावे आ खिंम चाक्शो क्येट नेल्ल मेकेर कुर पामे बाक्त। 10 मिनु मेकोपुकीमी मेको सन्दोस “शुश क्येट बाक्ब” दे तुइक्तमेनु, पिप आ ब्रेक्ब नु नेल्ल क्येडा ठेयब चढ़ेब जाक्शा, मेको परमप्रभु यावे आ खिं डा क्येट हिक्शा थैलोम कुर पा फ्रेंशा वोइक्बाक्मा बाक्त। 11 मिनु मेकोपुकीम मेको हिक्गमे नोले, मेको परमप्रभु यावे आ खिंम गेय पाइब आन कली कोवब मुर कली गेबाक्मा बाक्त। मिनु मेकोपुकीम मेको रे परमप्रभु यावे आ खिं सेल्ब आन कली गेबाक्मा बाक्त। मेकोपुकीम मेको क्येट शी के गेय पाइब नु सेल्ब आन कली गेबाक्मा बाक्त। 12 मेकोपुकीमी मेको क्येट गारो प्रोवब, फुल्लु खोइक्ब नु शी नु खोइश्शो फुल्लु ग्याप्चा कली गेबाक्मा बाक्त। मिनु मेको क्येट परमप्रभु यावे आ खिं डा बिग्रेशो सेल्चा कली नु परमप्रभु यावे आ खिं डा अरु मार मार लेंशा सेल्चा कली चलेबाक्मा बाक्त। 13 मेकोपुकीम चांदी के बोस, सल्दो क्राम्तीक थनारो, ग्योब, तुराही नु अरु सुन चांदी के मारेइ मारेइ सेल्चा कली परमप्रभु यावे आ खिंम चाक्शो क्येट रे मसेल्पदमे बाक्त। 14 मारदे हना मेको क्येट परमप्रभु यावे आ खिं डा बिग्रेशो लेंशा सेल्ब मुर आन कली गेमे बाक्त। 15 मिनु मेको गेय पाइब आन कली गेचा कली, मेको आन कोवब मुर आन कली गेशो क्येट सु सु कली गेनी, मार मार पनी, दे हिल्लो मपाइक्बाक्मा बाक्त। मारदे हना मेकोपुकी थमा सुइक्चा पुंडसीशो मुर बाक्मा बाक्त। २राजा २२:७ 16 मिनु दोस आ पर्बम नु पाप आ पर्बम चढ़ेशो क्येट चहिं परमप्रभु यावे आ खिं डा क्येट नु मब्वाइक्तमे बाक्त। मेको चहिं चढ़ेब आन के दुम्बाक्माक्त।

17 मेना अराम डा पिप हजाएल इर कुशा, गाथ कली लडाइ तोशा मेको आ के सेला बाक्त। मेको नोले हजाएल यरूसलेम नु लडाइ पचा कली मेक गे लमाक्त। 18 तन्न यहूदा डा पिप योआशमी मेको आ किकी पिपी, यहूदा डा पिप येहो-शाफात, येहोराम नु अहाज्याहम चढ़ेशो परमप्रभु यावे आ खिं डा क्येट नु आंम आ चढ़ेशो थोवक, परमप्रभु यावे आ खिंम बाक्शो थोवक नु आ दरवारम बाक्शो सुन नेल्ल अराम डा पिप हजाएल कली सोइक्ता बाक्त। मिनु हजाएल यरूसलेम रे लेम्माक्त। २राजा १०:३२

19 योआश आ पशो अरु गेय नु आ पशो नेल्ल, मार, मेको यहूदा डा पिप आन इतिहासम ब्रेक्शो मबाक्बा डा? १राजा १५:१८ 20 मिनु नोले मेको आ गेय पाइब मुरपुकीम मेको कली साइक्चा माल्मे बाक्त। मिनु योआश कली सिल्ला सहर डा लुकच लतीक लां मिल्लो माइश्शो दरवारम सदमे बाक्त। २राजा १४:५ 21 मेको कली साइक्ब, योआश आ गेय पाइब शिमेआथ आ तौ योजाकार नु शोमेर आ तौ येहो-जाबाद बाक्सा बाक्त। मिनु योआश बेक्शा आ किकी पिप नु दाऊद आ सहरम थिन्चा पुंडसे बाक्त। मिनु मेको आ पा डा आ तौ अमस्याह पिप दुम्माक्त। २राजा १४:१

13

इस्त्राएल डा पिप येहो-अहाज

1 यहू आ तौ येहो-अहाज सामरीयाम इस्त्राएल डा पिप दुम्माक्त। मेना यहूदा डा पिप अहाज्याह आ तौ योआशम सासन पशो २३ बर्स दुश्शो बाक्माक्त। मिनु येहो-अहाजम १७ बर्स सासन पवा बाक्त। २राजा १०:३५ 2 मेकोमी परमप्रभु यावे आ डोंइती मार मरिश्शो बाक्मे, मेको पवा बाक्त। मिनु इस्त्राएली आन कली पाप पपाइक्ब नेबात आ तौ येरोबाम आ लांम गाक्माक्त। मिनु मेकोमी येरोबाम आ लां मप्रोना बाक्त। १राजा १२:२८-३० 3 मोपतीके परमप्रभु यावेमी इस्त्राएली आन कली तशा गाइक्ता बाक्त। मिनु मेकोमी मेको आन कली शुश खेयप अराम डा पिप हजाएल नु मेको आ तौ बेन-हादाद आस गुइमी गेमी बाक्त। २राजा १०:३२ 4 तन्न येहो-अहाजमी परमप्रभु यावे कली पुना बाक्त। मिनु परमप्रभु यावेम मेको आ पुंडशो नेना बाक्त। मारदे हना अराम डा पिपमी इस्त्राएली आन कली दिष्शा श्येत गेशो तवा बाक्त। उत्पत्ती १६:१३ 5 मिनु परमप्रभु यावेमी इस्त्राएली आन कली प्रोंइब का योवडा बाक्त। मिनु मेकोपुकी अरामी आन गुइ रे ब्रोंइमा बाक्त। मिनु इस्त्राएली डोंइती डा खोदेशो पा आन आन खिंम बाक्चा तामे बाक्त। २राजा १४:२७ 6 तन्न मेकोपुकीमी इस्त्राएली आन कली पाप पपाइक्ब येरोबाम आ पाप पतीके मप्रोंइथु, पना पन बाक्मा बाक्त। मिनु मूर्ति पाइश्शो थाम यो सामरीयाम बाक्स डा बाक्स दुम्माक्त। १राजा १६:३३ 7 येहो-अहाज के ५० जना शारा डोइक्ब, १० ओटा बग्गी नु १० हजार खोइलीम गाक्ब लडाइ पाइब डा लाक्शा अर्को मारेइ मलीशो बाक्माक्त। मारदे हना अरु आन कली अराम डा पिपम साइश्शा, खप डा फुरक खोदेशो सेल्शो बाक्माक्त। 8 येहो-अहाज आ पशो अरु गेय, मेको आ पशो नेल्ल नु आ सक्ति दोदेशो बाक्मे, मार, मेको इस्त्राएल डा पिप आन इतिहासम ब्रेक्शो

मबाक्बा डा? 9 मिनु येहो-अहाज बेक्माक्त। मिनु मुरपुकीम मेको कली आ किकी पिपी नु सामरीयाम थिम्मे बाक्त। मिनु मेको आ पा डा आ तौ योआश पिप दुम्माक्त।

इस्त्राएल डा पिप योआश

10 मिनु येहो-अहाज आ तौ योआश सामरीयाम इस्त्राएल डा पिप दुम्माक्त। मेना योआश यहूदा डा पिप दुम्शो ३७ बर्स दुम्शो बाक्माक्त। मिनु इस्त्राएल डा पिप योआशमी १६ बर्स सासन पवा बाक्त। यहूदा डा पिप नु इस्त्राएल डा पिप आस नें खाल का डा बाक्त। योआश नु येहो-आश नें का बाक्ब, येहो-आश कली योआश यो देशो बाक्त। 11 मेकोमी परमप्रभु यावे आ डोंइती मार मरिम्शो बाक्मे, मेको पवा बाक्त। मिनु इस्त्राएली आन कली पाप पपाइक्ब नेबात आ तौ येरोबाम आ लांम गाक्माक्त। मिनु मेकोमी येरोबाम आ लां मप्रोना बाक्त। 12 योआश आ पशो अरु गेय, मेको आ पशो नेल्ल, यहूदा डा पिप अमस्याह नु लडाइ पा सक्ति कोंइशो, मार, मेको इस्त्राएल डा पिप आन इतिहासम ब्रेक्शो मबाक्बा डा? २ राजा १४:८-१६ 13 मिनु योआश बेक्माक्त। मेको आ पा डा येरोबाम पिप दुम्माक्त। योआश इस्त्राएल डा पिपपुकी नु सामरीयाम थिम्चा पुंइसे बाक्त। २ राजा १४:२३

एलीशा बेक्शो

14 एलीशा रोइ पवा बाक्त। मिनु नोले मेको रोइ रे बेक्माक्त। मिनु इस्त्राएल डा पिप योआश मेको कली कोव्रथ लमाक्त। मिनु मेको आ डोंइती डाक्शा “ए, आं आफ! ए, आं आफ! इस्त्राएल डा बग्गी नु शारा डोइक्बपुकी” देंमाक्त। २ राजा २:१२ 15 मिनु एलीशामी मेको कली “लिब्रा का नु ब्रा गुपो” देंमाक्त। मिनु मेकोम लिब्रा नु ब्रा गुबा बाक्त। 16 मिनु मेकोमी इस्त्राएल डा पिप कली “लिब्रा खुक्को” देंमाक्त। मिनु मेकोम खुक्का बाक्त। मिनु एलीशामी आ गुइ पिप आ गुइ तार वोदा बाक्त। 17 मिनु एलीशामी “पूर्ब गे डा झेल रोक्को” दे मदा बाक्त। मिनु रोक्का बाक्त। मिनु एलीशाम मेको कली “ब्रा आपो” दे मदा बाक्त। मिनु मेकोमी आबा बाक्त। मिनु एलीशाम “परमप्रभु यावे आ अराम रागी कली ग्रातीक ब्रा बाक्त। गे अफेक सहरमी अरामी आन कली लडाइ पा ग्रानीनी” दे मदा बाक्त। 18 मिनु लेंशा मेकोम “ब्रापुकी गुपो” देंमाक्त। मिनु मेकोमी गुबा बाक्त। मिनु मेकोमी इस्त्राएल डा पिप कली “खप तुपो” देंमाक्त। मिनु पिपम खेयप सां तुप्शा नांइसे बाक्त। 19 मिनु परमप्रभु आ मुरुमी गाइश्शा मेको कली “गे खपीम ५, ६ खेयप तुप्चा माल्शो नवे। मिनु गे अराम कली गेना हना यो कली ग्राडे वा। तन्न मुल गे अराम कली खेयप सां ला ग्रानेवे” दे मदा बाक्त।

20 मेको नोले एलीशा बेक्माक्त। मुरपुकीम मेको कली थिम्मे बाक्त। मोआब डा रोइक्बपुकी बर्स बर्समी मेको रागी ओव्रबाक्मा बाक्त। 21 काले इस्त्राएलीपुकीम बेक्शो मुर का थिम्मेनु मोदेशो रोइक्ब मोआबी आन कली तामे बाक्त। मोपतीके मेकोपुकीम मेको बेक्शो मुर एलीशा वोइक्तीकेमी ताइश्शा, प्रोक्मा बाक्त। मिनु मेको बेक्शो मुरुम एलीशा आ रुश थिवा चोटी सेस दुम्शा बोक्माक्त।

22 मिनु अराम डा पिप हजाएलमी इस्त्राएल कली श्येत गेस डा गेस बाक्माक्त। मेना येहो-अहाजम इस्त्राएलम सासन पशो बाक्माक्त। 23 तन्न परमप्रभु यावेमी अब्राहाम, इसहाक नु याकूब नु पशो कबलम पतीके, मेको आन कली शिशी पाइक्मी बाक्त। मेकोम मेको आन कली मिम्तीमी बाक्त। मिनु परमप्रभु यावेमी मेको आन कली साइक्वा नु आ डोंइती रे तिल्चा थुं मपवा बाक्त। लेवी २६:४२

24 मिनु अराम डा पिप हजाएल बेक्माक्त। मिनु मेको आ पा डा आ तौ बेन-हादाद पिप दुम्माक्त। 25 मिनु येहो-अहाज आ तौ योआशमी आ आफ रे हजाएल आ तौ बेन-हादादम लडाइ पा ग्राशो सहरपुकी लेंशा ताक्का बाक्त। योआशमी खेयप सां मेको कली ग्रामाक्त। मिनु मोपा मेकोमी इस्त्राएल डा सहरपुकी लेंशा आं के सेला बाक्त। २ राजा १३:१९

14

यहूदा डा पिप अमस्याह

२इतिहास २५:-

1 योआश आ तौ अमस्याह यहूदा डा पिप दुम्माक्त। मेना यो-आहाज आ तौ योआश इस्त्राएल डा पिप दुम्शो बर्स निक्शी दुम्शो बाक्माक्त। योआश नु येहो-आश नें का बाक्ब, येहो-आश कली योआश यो देशो बाक्त। २ राजा १२:२२ 2 यहूदा डा पिप अमस्याह पिप दुम्मेनु २५ बर्स दुम्शो बाक्माक्त। मिनु मेकोमी यरूसलेमम २९ बर्स सासन पवा बाक्त। मेको आ ममा आ नें येहो-अददीन बाक्माक्त। मेको यरूसलेम डा बाक्माक्त। 3 अमस्याहमी परमप्रभु यावे आ डोंइती

मार रिम्शो बाक्मे, मेको पवा बाक्त। तन्न मेको आ किकी दाऊदमी पशो खोदेशो चहिं मपवा बाक्त। मेकोमी आ आफ योआशमी पशो खोदेशो पवा बाक्त। २राजा १२:३-४ 4 मो हना यो मेकोमी डांडाम बाक्शो थानपुकी मताइक्ता बाक्त। मेना सम्म मुरपुकीम मेकेर क्योरशा चढेतीक चढेशा, धूप चोत्रमे बाक्त। 5 मेकोमी आ राज्य डा गेय बोल्यो सेला नोले, आ आफ कली साइक्ब, आ गेय पाइब आन कली साइक्मी बाक्त। २राजा १२:२१:२२; २सामुएल ३:३० 6 तन्न मेकोमी मोसा आ अरेशो किताबम ब्रेक्शो खोदेशो पा “तमी तौ आन पाप आ पर्बम आन आम आफ आस कली मसतीन। मिनु आम आफ आस पाप आ पर्बम यो आन तमी तौ आन कली मसतीन। सुम पाप पाइनीमी मेको ला साइक्चा पुंडसमल” देशो, मेकोमी परमप्रभु यावे आ लोत्र टिशा, नेल्ल आंम आन पशो पापम ला साइक्चा पुंडसीनीम। ब्यवस्था २४:१६

7 मेकोम हिकसी के बेंसीम १० हजार एदोमी आन कली साइक्मी बाक्त। मिनु लडाइम सेला सहर ग्राशा, मेको आ नें योकतेल वोदा बाक्त। मेको सहर आ नें मुल सम्म मेकोन बाक्ब। 8 मेको नोले अमस्याहम इस्राएल डा पिप येहू आ चच येहो-अहाज आ तौ योआश कली लडाइ पतीक लोत्र पा “जाक्को, गो नु आं डोंइती राप्शा लडाइ पावो” दे लडाइ पचा कली लोत्र कुरब मुर सोइक्ता बाक्त। 9 तन्न इस्राएल डा पिप योआशम यहूदा डा पिप अमस्याह कली “लेबानोन डा चू बुटा काम लेबानोन डा लाइशो रवा का कली ‘इ तमी आं तौ नु ग्युबे पचा गेवो’ देंमाक्त। तन्न लेबानोन डा ब्वाकीमी बाक्ब जन्तु का मेको मेर पा पिमाक्त। मिनु मेकोम चू बुटा कली दिम्शा ताइशशा पवा बाक्त। न्यायाधीस ९:१४ 10 गे एदोम कली ग्राशा, ठेयब लेशो दुम्तीनी। इन ग्राशोम ग्येरसीने। तन्न इन खिंमी सिक्सी पा बाक्कीन। आंम इन कली नु यहूदा कली मारदे खतम सेल्चा दाक्नीनी?” देंपाइक्थ लोत्र कुरब मुर का सोइक्ता बाक्त।

11 मो हना यो अमस्याहमी मेको लोत्र मनेना बाक्त। मोपतीके इस्राएल डा पिप योआशमी लडाइ तोवा बाक्त। मिनु मेको नु यहूदा डा पिप अमस्याह यहूदा डा बेथ-शेमेशम लडाइ पाम्से बाक्त। यहोसु १५:१० 12 मिनु यहूदा डा पिप इस्राएली आन क्येडा बुमाक्त। मिनु मुर नेल्ल प्रोक्मा बाक्त। 13 मिनु इस्राएल डा पिप योआशमी यहूदा डा पिप अहाज्याह आ चच, योआश आ तौ अमस्याह कली बेथ-शेमेशमी ग्याइक्ता बाक्त। मिनु मेको नोले योआश यरूसलेम लेशशा जाक्माक्त। मिनु इस्राएल डा पिपमी यरूसलेम डा गारो एफ्राइम डा ठेयब लाप्चो रे कुना डा ठेयब लाप्चो सम्म ४ सहे कुबीत प्रेप्पदा बाक्त। कुबीत का आधा मिटर खोदेशो बाक्ब। 14 मेकोमी परमप्रभु यावे आ खिंम बाक्शो नु पिप आ खिंम थिश्शो सुन चांदी नु ग्योंब नेल्ल नु मुर यो ग्याइशशा लदा बाक्त। मिनु नोले सामरीया लेम्माक्त।

15 मेको योआश आ पशो अरु गेय, आ पशो नेल्ल, आ सक्ति नु यहूदा डा पिप अमस्याह नु पशो लडाइ, मार, मेको नेल्ल इस्राएल डा पिप आन इतिहासम ब्रेक्शो मबाक्बा डा? 16 मिनु योआश बेक्माक्त। मिनु इस्राएल डा पिपपुकी नु सामरीयाम थिम्चा पुंडसे बाक्त। मिनु मेको आ पा डा आ तौ येरोबाम पिप दुम्माक्त। २राजा १३:१३

17 यहूदा डा पिप योआश आ तौ अमस्याह, इस्राएल डा पिप येहो-अहाज आ तौ योआश क्येडा १५ बर्स शुश ब्रोंइमाक्त। 18 अमस्याह आ पशो अरु गेय, मार, मेको यहूदा डा पिप आन इतिहासम ब्रेक्शो मबाक्बा डा? 19 मिनु यरूसलेम सहरम मुरपुकीमी मेको कली साइक्चा माल्मे बाक्त। मोपतीके मेको लाकीश सहरम प्रोक्माक्त। तन्न मेको कली खेदा पाइब मुर सोइशशा मेक उइ साइक्पदमे बाक्त। २राजा १२:२१ 20 मिनु मेको आ बेक्शो रां शाराम कुर पा यरूसलेम चाक्गमे बाक्त। मिनु मेको कली आ किकी पिपी नु दाऊद आ सहरम थिम्मे बाक्त। 21 मिनु यहूदा डा मुर नेल्लेम १६ बर्स दुम्शो अमस्याह आ तौ अजारयाह कली मेको आ पा डा पिप सेल्मे बाक्त। २राजा १५:१-२ 22 मेकोमी अमस्याह बेक्ने थुमा नोले एलाथ सहर लेंशा सेल्शा लेशशा ताक्गा बाक्त। २राजा १६:६

येरोबाम इस्राएल डा पिप दुम्शो

23 मिनु योआश आ तौ येरोबाम सामरीया सहरम इस्राएल डा पिप दुम्माक्त। मेना योआश आ तौ अमस्याह यहूदा डा पिप दुम्शो १५ बर्स दुम्शो बाक्माक्त। मिनु येरोबाम ४१ बर्स सासन पवा बाक्त। होसे १:१; आमोस १:१ 24 मेकोमी परमप्रभु यावे आ डोंइती मार मरिम्शो बाक्मे, मेको पवा बाक्त। मिनु इस्राएली आन कली पाप पपाइक्ब नेबात आ तौ येरोबाम आ लांम गाक्माक्त। मिनु मेकोमी येरोबाम आ लां मप्रोना बाक्त। १राजा १२:२८-३० 25 मिनु परमप्रभु यावे आ गेय पाइब नु आ लोत्र पाइब इस्राएल डा गाथ-हफेर सहर डा अमीत्तै आ तौ योना आ पशो परमप्रभु यावे, इस्राएली आन परमप्रभु आ लोत्र गाम्माक्त। लेबो-हमाथ रे अराबाह डा समुन्द्र सम्म इस्राएल डा सांद लेंशा सेल्ब येरोबाम बाक्माक्त। योना १:१ 26 मारदे हना परमप्रभु यावेमी इस्राएली आन कली शुश श्येत जशो तवा बाक्त। वाइल दुम्शो नु मदुम्शो सुइ मलीमा बाक्त। इस्राएली आन कली वारच पाइब सुइ मबाक्मा बाक्त। 27 परमप्रभु यावेमी

इस्राएल कली रागी रे क्याम्चा मदेंतीके, मेकोमी योआश आ तौ येरोबाममी मेको आन कली प्रोंडमी बाक्त। २राजा १३:५

२८ येरोबाम आ पशो अरु गेय, मेको आ पशो नेल्ल, आ सक्ति, मेको आ लडाइ पशो नु दोपा यहूदा डा दमस्कस नु हमाथ सहर लेंशा इस्राएल के सेला, मार, मेको इस्राएल डा पिप आन इतिहासम ब्रेक्शो मबाक्बा डा? २९ मिनू येरोबाम बेक्माक्त। मिनू इस्राएल डा पिप नु थिम्चा पुंडसे बाक्त। मिनू मेको आ पा डा आ तौ जकरिया पिप दुम्माक्त। २राजा १५:८

15

यहूदा डा पिप अजारयाह

१ मिनू अमस्याह आ तौ अजारयाह यहूदा डा पिप दुम्माक्त। मेना येरोबाम इस्राएल डा पिप दुम्शो २७ बर्स दुम्शो बाक्माक्त। २इतिहास २६:-; २राजा १४:२१ २ मिनू अजारयाह पिप दुम्मेनु १६ बर्स दुम्शो बाक्माक्त। मिनू मेकोम यरूसलेममी ५२ बर्स सासन पवा बाक्त। मेको आ ममा आ नें येकोल्याह बाक्माक्त। मेको यरूसलेम डा बाक्माक्त। ३ मेकोम आ आफ अमस्याह खोदेशो पा, परमप्रभु यावे आ डोंडती मार रिम्शो बाक्मे, मेको पवा बाक्त। ४ मो हना यो मेकोमी डांडाम बाक्शो थानपुकी मताइक्ता बाक्त। मेना सम्म मुरपुकीम मेकेर चढेतीक चढेशा धूप चोव्रमे बाक्त। २राजा १४:३-४ ५ मिनू परमप्रभु यावेमी पिप कली कोव्रर मुपदा बाक्त। मिनू मेको मबेक्म सम्म आ कान खिं काम बाक्चा माल्दा बाक्त। मिनू पिप आ तौ योथाममी पिप आ दरवार डा मारेइ मारेइ गेय पशा, राज्य डा मुर आन कली सासन पवा बाक्त। लेवी १३:४६ ६ अजारयाह आ पशो अरु गेय, मेको आ पशो नेल्ल, मार, मेको यहूदा डा पिप आन इतिहासम ब्रेक्शो मबाक्बा डा? ७ मिनू अजारयाह बेक्माक्त। मिनू आ किकी पिपी नु दाऊद आ सहरम थिम्चा पुंडसे बाक्त। मिनू मेको आ पा डा आ तौ योथाम पिप दुम्माक्त। २राजा १५:३२

इस्राएल डा पिप जकरिया

८ मिनू येरोबाम आ तौ जकरिया सामरीयाम इस्राएल डा पिप दुम्माक्त। मेना अजारयाह यहूदा डा पिप दुम्शो ३८ बर्स दुम्शो बाक्माक्त। मिनू जकरियामी ६ महिना सासन पवा बाक्त। २राजा १४:२९ ९ मेकोमी आ किकी पिपी खोदेशो पा, परमप्रभु यावे आ डोंडती मार रिम्शो बाक्मे, मेको पवा बाक्त। मिनू इस्राएली आन कली पाप पपाइक्ब नेबात आ तौ येरोबाम आ लांम गाक्माक्त। १राजा १२:२८-३०; आमोस ७:९ १० याबेश आ तौ शाल्लुममी जकरिया कली साइक्चा मला बाक्त। मिनू शाल्लुममी मेको कली मुर आन दातेमीन तुप्शा सदा बाक्त। मिनू मेको आ पा डा शाल्लुम पिप दुम्माक्त। ११ जकरिया आ पशो अरु गेय, मेको आ पशो नेल्ल, इस्राएल डा पिप आन इतिहासम ब्रेक्शो बाक्ब। १२ मोपा परमप्रभु यावेम येहू कली “इ मुर ४ पाला सम्म पिप दुम्नीम” देशो लोव्र गाम्माक्त। मिनू मोदेशोन दुम्माक्त। २राजा १०:३०

इस्राएल डा पिप शाल्लुम

१३ मिनू याबेश आ तौ शाल्लुम सामरीयाम पिप दुम्माक्त। मेना उज्जीयाह यहूदा डा पिप दुम्शो ३९ बर्स दुम्शो बाक्माक्त। मिनू शाल्लुममी सामरीया सहरम महिना का सासन पवा बाक्त। १४ मेको नोले गादी आ तौ मेनाहेम तिरचा सहर रे सामरीयाम कुमाक्त। मिनू मेकोमी याबेश आ तौ शाल्लुम कली तुप्शा सदा बाक्त। मिनू मेको कली साइशशा, आ पा डा पिप दुम्माक्त। १५ शाल्लुम आ पशो अरु गेय, मेको आ पशो नेल्ल नु जकरिया कली साइशशा मेको इस्राएल डा पिप आन इतिहासम ब्रेक्शो बाक्ब। १६ मेना मेनाहेममी तिरचा सहर रे लाइशशा, तिफसाह नु मेको आ एर ओंथ बाक्शो रागी नेल्ल आन कली लडाइ तोव्रमी बाक्त। मारदे हना मेकोपुकीम मेको कली ठेयब लाप्चो रोकशा मगेमे बाक्त। मेकोम तिफसाह कली खतम सेला बाक्त। मिनू आल कुरशो मीश मुर नेल्ल आन कोव्रज पाक्मी बाक्त। तिफसाह ताप्पुआह सहर आ हिब्रू नें बाक्ब। यहोसु १२:२४; २राजा ८:१२

इस्राएल डा पिप मेनाहेम

१७ गादी आ तौ मेनाहेम इस्राएल डा पिप दुम्माक्त। मेना अजारयाह यहूदा डा पिप दुम्शो ३९ बर्स दुम्शो बाक्माक्त। मिनू मेनाहेम सामरीयाम १० बर्स सासन पवा बाक्त। १८ मेकोमी परमप्रभु यावे आ डोंडती मार रिम्शो बाक्मे, मेको पवा बाक्त। मिनू मेकोमी ब्रोंडम सम्म इस्राएली आन कली पाप पपाइक्ब नेबात आ तौ येरोबाम आ लां मप्रोना बाक्त। १९ मिनू अस्सुर डा पिप पुलमी मेको रागी कली लडाइ तोवा बाक्त। मिनू मेनाहेममी आ राज्य बोल्यो सेल्चा कली,

पुल कली हजार का टलेन्ट, चांदी गेवा बाक्त। टलेन्ट का ३४ किलो बाक्ब। २राजा १५:२९ 20 मेनाहेममी मेको क्येट इस्राएल डा शॉप पाइशो मुर रे पोक्गा बाक्त। मिनु मेकेर डा मुरपुकीमी अस्सुर डा पिप कली ५० शेकेल चांदी गेचा माल्बाक्मा बाक्त। मोपतीके अस्सुर डा पिप मेको रागीम मबाक्थु, आ रागी लेशशा लमाक्त। शेकेल का ११.५ ग्राम खोदेशो बाक्ब। २राजा २३:३५ 21 मेनाहेम आ पशो अरु गेय, मेको आ पशो नेल्ल, मार, मेको इस्राएल डा पिप आन इतिहासम ब्रेक्शो मबाक्बा डा? 22 मिनु मेनाहेम बेक्माक्त। मिनु मेको आ पा डा आ तौ पेकाहीयाह पिप दुम्माक्त।

इस्राएल डा पिप पेकाहीयाह

23 मिनु मेनाहेम आ तौ पेकाहीयाहम सामरीयाम इस्राएल डा पिप दुम्माक्त। मेना अजारयाह यहूदा डा पिप दुम्शो ५० बर्स दुम्शो बाक्माक्त। मिनु पेकाहीयाह बर्स निक्शी सासन पवा बाक्त। 24 मेकोमी परमप्रभु यावे आ डोंइती मार मरिम्शो बाक्मे, मेको पवा बाक्त। मिनु इस्राएली आन कली पाप पपाइक्ब नेबात आ तौ येरोबाम आ लांम गाक्माक्त। 25 मिनु मेको आ लडाइ पाइब आन कप्तान रेमाल्याह आ तौ पेकाहमी मेको पिप कली साइक्चा मला बाक्त। मिनु मेकोम गिलाद डा ५० जना मुर आन कली लाइशशा सामरीया डा पिप पेकाहीयाह आ दरवारम ओव्रशा, मेको कली सदा बाक्त। मिनु अरगोब नु अरीएह आस कली यो सांडसी बाक्त। मोपा पेकाह आ पा डा पिप दुम्माक्त। २राजा १५:१०, १५, ३० 26 पेकाहीयाह आ पशो अरु गेय, मेको आ पशो नेल्ल, इस्राएल डा पिप आन इतिहासम ब्रेक्शो बाक्ब।

इस्राएल डा पिप पेकाह

27 रेमाल्याह आ तौ पेकाह सामरीयाम इस्राएल डा पिप दुम्माक्त। मेना अजारयाह यहूदा डा पिप दुम्शो ५२ बर्स दुम्शो बाक्माक्त। मिनु पेकाहमी २० बर्स सासन पवा बाक्त। 28 मेकोमी परमप्रभु यावे आ डोंइती मार मरिम्शो बाक्मे, मेको पवा बाक्त। मिनु इस्राएली आन कली पाप पपाइक्ब नेबात आ तौ येरोबाम आ लांम गाक्माक्त। मिनु मेकोमी येरोबाम आ लां मप्रोना बाक्त।

29 इस्राएल डा पिप पेकाहमी सासन पवा ना अस्सुर डा पिप तिगलात-पिलेसेरमी लडाइ तोशा, इयोन, आबेल-बेथ-माकाह, यानोह, केदेश, हासोर, गिलाद, गालील रागी नु नाप्ताली आ रागी नेल्ल आ के सेल्शा, मेकेर डा मुर आन कली ग्याइशशा अस्सुर लाइक्मी बाक्त। १इतिहास ५:२६ 30 मिनु एलाह आ तौ होशेआमी रेमाल्याह आ तौ पेकाह कली साइक्चा मला बाक्त। मिनु पेकाह कली तुप्शा सदा बाक्त। मिनु मेको आ पा डा पिप दुम्माक्त। मेना यहूदामी उज्जीयाह आ तौ योथामम सासन पशो २० बर्स दुम्शो बाक्माक्त। २राजा १७:१; २राजा १५:२५ 31 पेकाह आ पशो अरु गेय, मेको आ पशो नेल्ल इस्राएल डा पिप आन इतिहासम ब्रेक्शो बाक्ब।

यहूदा डा पिप योथाम

32 मिनु उज्जीयाह आ तौ योथाम यहूदा डा पिप दुम्माक्त। मेना रेमाल्याह आ तौ पेकाह इस्राएल डा पिप दुम्शो बर्स निक्शी दुम्शो बाक्माक्त। २इतिहास २७:१-७ 33 योथाम पिप दुम्मेनु २५ बर्स दुम्शो बाक्माक्त। मिनु मेकोम यरूसलेमम १६ बर्स सासन पवा बाक्त। मेको आ ममा आ नें येरुशा बाक्माक्त। मेको सादोक आ तमी बाक्माक्त। 34 मेकोम आ आफ उज्जीयाह खोदेशो पा, परमप्रभु यावे आ डोंइती मार रिम्शो बाक्मे, मेको पवा बाक्त। २राजा १५:३, ४ 35 मो हना यो मेकोमी डांडा डा थानपुकी मताइक्ता बाक्त। मेना सम्म मुरपुकीम मेकेर चढेतीक चढेशा, धूप चोव्रमे बाक्त। मेकोमी परमप्रभु यावे आ खिं डा उत्तर गे डा ठेयब लाप्चो यो सेल्पदा बाक्त। 36 योथाम आ पशो अरु गेय, मेको आ पशो नेल्ल, मार, मेको यहूदा डा पिप आन इतिहासम ब्रेक्शो मबाक्बा डा? 37 मेना परमप्रभु यावेमी अराम डा पिप रेसीन नु रेमाल्याह आ तौ पेकाह आस कली यहूदा नु लडाइ पचा कली क्युक्सी बाक्त। २राजा १६:५ 38 मिनु योथाम बेक्माक्त। मिनु मेको दाऊद आ सहरम आ किकी पिपी नु थिम्चा पुंडसे बाक्त। मिनु मेको आ पा डा आ तौ आहाज पिप दुम्माक्त।

16

यहूदा डा पिप आहाज

1 मिनु योथाम आ तौ आहाज यहूदा डा पिप दुम्माक्त। मेना रेमाल्याह आ तौ पेकाह इस्राएल डा पिप दुम्शो १७ बर्स दुम्शो बाक्माक्त। २इतिहास २८:१-६ 2 आहाज पिप दुम्मेनु २० बर्स दुम्शो बाक्माक्त। मिनु मेकोमी यरूसलेमम १६ बर्स सासन पवा बाक्त। मेकोमी आ किकी दाऊदम खोदेशो पा परमप्रभु यावे, आ परमप्रभु आ डोंइती मार

रिम्शो बाक्मे, मेको मपवा बाक्त। 3 मेको इस्राएल डा पिप आन लांम गाक्माक्त। मेकोमी आ तौ कली चोशा चढ़ेवा बाक्त। मोदेंशो ग्रांग्रा दिशो गेय पशो आ पर्बम परमप्रभु यावेमी डोंइती रागी रागी डा मुर आन कली इस्राएल रे गुंडशो बाक्माक्त। लेवी १८:२१ 4 मेकोमी डांडा डा थानम, पहाड मेर नु गिग रवा आन पुं नेल्लेमी चढ़ेतीक चढ़ेशा धूप चोवा बाक्त।

5 मिनु अराम डा पिप रेसीन नु इस्राएल डा पिप रेमाल्याह आ तौ पेकाहमी यरूसलेम कली लडाइ तोशा पुम्दमे बाक्त। तन्न मेकोम आहाज कली ग्राने मचाप्से बाक्त। यसैया ७:१-९ 6 मेना अराम डा पिपमी रेसीन एलाथ डा यहूदी आन कली खेरशा, एलाथ सहर एदोमी आन कली गेवा बाक्त। मिनु एदोम डा मुर मुल सम्म मेकेर बाक्शो बाक्नीम। २राजा १४:२२ 7 मिनु आहाजम अस्सुर डा पिप तिगलात-पिलेसेर कली “गो इन गेय पाइब नु इन तौ नड। आं कली लडाइ तोइब अराम नु इस्राएल डा पिप रे प्रोंइचा नड। मेकोपुकीम आं कली लडाइ तोशो बाक्नीम” देंशा लोत्र कुरब मुर सोइक्ता बाक्त। २इतिहास २८:१६-२७ 8 मिनु आहाजमी परमप्रभु यावे आ खिंम बाक्शो नु पिप आ खिंम बाक्शो सुन नु चांदी नेल्ल अस्सुर डा पिप कली कोसेली सोइक्ता बाक्त। १राजा १५:१८ 9 मिनु अस्सुर डा पिपमी मेको आ लोत्र नेना बाक्त। मिनु दमस्कस कली लडाइ तोशा मेको आ के सेला बाक्त। मेकोमी मेकेर डा मुर आन कली ग्याइशशा कीर सहर लाइक्मी बाक्त। मिनु नोले रेसीन कली सदा बाक्त।

10 मिनु पिप आहाज, अस्सुर डा पिप तिगलात-पिलेसेर कली ग्रुथ दमस्कस लमाक्त। मिनु मेकोमी दमस्कसम चढ़ेतीक का तवा बाक्त। मिनु मेको दोदेंशो बाक्मे, मेको नेल्ल ब्रेक्शा चढ़ेब उरीयाह आ बाक्तीक सोइक्ता बाक्त। 11 मिनु चढ़ेब उरीयाहम दमस्कस रे पिप आहाजम सोइशशो ब्रेक्स खोदेंशो पा, चढ़ेतीक का सेला बाक्त। मिनु मेकोमी मेको चढ़ेतीक पिप आहाज दमस्कस रे जाक्चा क्येडा डोंइतीन सेल्ले थुमा बाक्त। 12 मिनु पिप दमस्कस रे लेशशा जाक्शा, मेको चढ़ेतीक कोत्रडा बाक्त। मिनु पिपम चढ़ेतीक आ नेक्था लशा डोंइसे बाक्त। 13 मेकोम मेकेर चोशा चढ़ेतीके नु अन्न चढ़ेतीके चढ़ेवा बाक्त। मिनु तूचा थोत्रक चढ़ेतीक लुक्शा दुशा बाक्चा आ पर्बम चढ़ेशो आ हुश मेको तार ब्रुइक्ता बाक्त। 14 मेकोमी परमप्रभु यावे आ खिं आ डोंइती बाक्शो कांसा के चढ़ेतीक परमप्रभु यावे आ खिं नु चढ़ेतीक आस दातेम मबाक्ल, दे याक्ता बाक्त। नक चढ़ेतीक लाइशशा, मेकेर वोदा बाक्त। मेको माइत चढ़ेतीक चहिं उत्तर गे वोदा बाक्त। 15 मेको नोले पिप आहाजमी चढ़ेब उरीयाह कली “एको ठेयब नक चढ़ेतीकम सुनी चोशा चढ़ेतीके नु नाक्दो डा अन्न चढ़ेतीके, पिप आ चोशा चढ़ेतीके, मेको आ अन्न चढ़ेतीके, रागी डा मुर नेल्ल आन चोशा चढ़ेतीके नु मेको आन अन्न चढ़ेतीके नु तूचा थोत्रक चढ़ेतीके चढ़ेवो। चढ़ेतीकेम चोशा चढ़ेतीक नु चढ़ेशो नेल्ल आन हुश ब्रुइक्चा माल्ब। तन्न मेको कांसा के चढ़ेतीके चहिं परमप्रभु यावे कली मारेइ लोत्र हिल्लो पची ना गो मेकेर चढ़ेशा हिल्लो पाइनुड” दे मदा बाक्त। 16 मिनु चढ़ेब उरीयाहम पिप आहाज आ देंशो नेल्ल पवा बाक्त।

17 मेको नोले पिप आहाजमी चिक्तीक बोस आन नित्तीकपुकी मेको आन एर ओंथ डा चिक्तीक बोस गुंडपदा बाक्त। मिनु मेको आ नेक्था बाक्शो ब्वाक्कु कुर पतीक ठेयब बोस कली ब्यफ आन तार रे गुंडपदा बाक्त। मिनु मेको ठेयब बोस कली फुल्लुम तिव्शा वोइक्पदा बाक्त। १राजा ७:२३-३९ 18 मेकोमी परमप्रभु यावे आ खिंम सेल्लो नाइक्तीक नाक्त कली सेल्लो ठेयब कोठा नु परमप्रभु यावे आ खिं डा लाडगा पिप आ खिं रे ओवतीक अस्सुर डा पिप आ पर्बम अर्को सेला बाक्त। 19 आहाज आ पशो अरु गेय नु मेको आ पशो नेल्ल, मार, मेको यहूदा डा पिप आन इतिहासम ब्रेक्शो मबाक्बा डा? 20 मिनु आहाज बेक्माक्त। मिनु दाऊद आ सहरमी आ किकी पिपी नु थिम्चा पुंडसे बाक्त। मिनु मेको आ पा डा आ तौ हिज्कीयाह पिप दुम्माक्त। २राजा १८:१

17

इस्राएल डा पिप होशेआ

1 एलाह आ तौ होशेआ सामरीयाम इस्राएल डा पिप दुम्माक्त। मेना यहूदा डा पिप आहाज पिप दुम्शो १२ बर्स दुम्शो बाक्माक्त। मिनु होशेआम ९ बर्स सासन पवा बाक्त। २राजा १८:९-१२; २राजा १५:३० 2 मेकोम परमप्रभु यावे आ डोंइती मार मरिम्शो बाक्मे, मेको पवा बाक्त। तन्न आ डोंइती डा इस्राएल डा पिप आन पशो खोदेंशो चहिं मपवा बाक्त। 3 मिनु अस्सुर डा पिप शाल्मानेसेर होशेआ कली लडाइ तोथ जाक्माक्त। मिनु होशेआमी मेको कली तिरो थाप्चा माल्दा बाक्त। 4 तन्न अस्सुर डा पिपमी होशेआम आ कली मटिशो तवा बाक्त। मारदे हना मेकोमी इजीप्त डा पिप सो कली लोत्र कुरब मुर सोइशशो तुइक्ता बाक्त। मिनु बर्स बर्सम गेतीक तिरो यो अस्सुर डा पिप कली मथाप्ता बाक्त। मोपतीके अस्सुर डा पिपमी मेको कली ग्याइशशा जेल्खानम चोक्गा बाक्त। होसे १२:२

5 मिनु अस्सुर डा पिपम रागी नेल्ल आन कली लडाइ तोशा, सामरीया जाक्माक्त। मिनु मेको कली लडाइ तोशा, बर्स सां सम्म पुम्दा बाक्त। यसैया २८:२ 6 अस्सुर डा पिपमी होशेआम सासन पशो ९ बर्स दुम्मेनु, सामरीया कली ग्रामाक्त। मेकोमी इस्राएल डा मुर आन कली ग्याइश्शा अस्सुर लाइक्मी बाक्त। मिनु मेको आन कली हालाह सहर नु गोजान डा खोला हाबोर आ नेक्था नु मादी आन सहरम वोइक्मी बाक्त।

इस्राएली ग्याइक्चा पुंडसीशो

7 मारदे मोदेशो दुम्शो बाक्त देशा हना, परमप्रभु यावे, आन परमप्रभुम मेको आन कली इजीप्त रागी डा पिप फाराओ आ गुइ रे गुंडशा चाक्गा रे इस्राएलीपुकीम देवी देवता आन कली पूजा पशो बाक्मा बाक्त। 8 मेकोपुकीम परमप्रभु यावेमी आन डोंइती गुंडशो रागी रागी डा मुर आन पतीके पशो बाक्मा बाक्त। इस्राएल डा पिप आन पशो मरिम्शो गेय नेल्ल पशो बाक्मा बाक्त। मेकोपुकीमी परमप्रभु यावे कली मटिशो बाक्मा बाक्त। २राजा १६:३ 9 इस्राएल डा मुरपुकीम परमप्रभु यावे, आन परमप्रभु आ डोंइती खुइश्शा मरिम्शो पशो बाक्मा बाक्त। खाल पतीक लाइश्शा खिं रे सहर नेल्लेम आंम कली थान सेल्मे बाक्त। 10 मेकोपुकीम डांडा नेल्ल नु शुश गिग रवा आन पुंमी खुक्शो फुल्लु नु मूर्ति पाइश्शा थामपुकी सेल्मे बाक्त। २राजा १६:४; १राजा १४:२३ 11 मेकोपुकीम परमप्रभु यावेमी मेको आन डोंइती रे गुंडशो रागी रागी डा मुर खोदेशो पा डांडा डा थानम धूप चोत्रमे बाक्त। मेकोपुकीम परमप्रभु यावे आ अरेशो काइ मटिथु, गाइक्पदमे बाक्त। 12 मेकोपुकीमी मूर्ति पूजा पामे बाक्त। डोंइती परमप्रभु यावेमी “मोदेशो पचा मदुम्ब” देशो बाक्माक्त। 13 मो हना यो परमप्रभु यावेमी आ लोत्र पाइब नु आ कोइतीक ताइब नेल्ल रे पा इस्राएल नु यहूदा डा मुर आन कली “गे इन मरिम्शो लां रे लेतीन। आं शेंशो, आं फुल्लुम मुशा ब्रेक्शो लोत्र नु इन किकी पिपी आन कली गेशा आं अरेशो नेल्ल पने” दे आ गेय पाइबपुकीमी मेको आन कली थाम्पा हिंच कोइपदा बाक्त। 14 तन्न मेकोपुकीम आन थमा मसुइक्ब किकी पिपी खोदेशो पा परमप्रभु यावे आ लोत्र मनेंथु, काइ मटीमे बाक्त। 15 मेकोपुकीम मेको आ फुल्लुम मुशा ब्रेक्शो लोत्र, मेको आन किकी पिपी नु पशो कबल नु हिंच कोइशो ममिन्तमे बाक्त। मेकोपुकी शोर गाक्शो मूर्ति आन नोले खोइश्शा, आंमा यो शोर गाक्शो दुम्शो बाक्मा बाक्त। मेको आन एर ओंथ बाक्ब रागी रागी डा मुर आन नोले खोदमे बाक्त। परमप्रभु यावेमी मेको आन कली “गे मेको आन पशो खोदेशो मपने” देशा, अरेशो बाक्माक्त। प्रस्थान २३:२४ 16 मेकोपुकीम परमप्रभु यावे, आन परमप्रभु आ शेंशो मटिथु, आंम कली यपाइश्शा बाछा निक्शी नु मूर्ति पाइश्शा थाम का सेल्समा बाक्त। मेकोपुकी नां, तास्ला नु सोरुल आन डोंइती बाम्मा बाक्त। मिनु बाल देवता कली पूजा पामे बाक्त। १राजा १२:२८; १राजा १६:३३ 17 मेकोपुकीम आंम तमी तौ आन कली क्योरशा चोशा चढेमे बाक्त। मिनु लिंक्यु कोत्रशा, मन्तर तन्तर पामे बाक्त। मिनु परमप्रभु यावे आ डोंइती मार मरिम्शो बाक्मे, मेको पना पन बाक्मा बाक्त। मिनु मेको कली गाइक्पदमे बाक्त। लेवी १८:२१ 18 मोपतीके परमप्रभु यावे इस्राएल आ पबर्म थाम्पा गाइक्ता बाक्त। मिनु मेको आन कली आ डोंइती रे खेरमी बाक्त। यहूदा आ थर डा मुर ला प्रोंइशा वोइक्चा पुंडसमा बाक्त।

19 मिनु यहूदा आ मुरपुकीम यो परमप्रभु यावे, आन परमप्रभु आ शेंशो लोत्र मटीमे बाक्त। मेकोपुकीम इस्राएली आन पशो पामे बाक्त। 20 मोपतीके परमप्रभु यावेम इस्राएल आ चच युइ नेल्ल आन कली प्रोंइमी बाक्त। मिनु मेको आन कली सजाइ गेशा, रोइक्ब आन गुइमी गेमी बाक्त। आ डोंइती रे मखेरा सम्म मो पवा बाक्त।

21 मेकोमी “इस्राएली आन कली दाऊद आ खिं रे तिल्लुड” दे नेबात आ तौ येरोबाम कली पिप सेल्पदा बाक्त। मिनु येरोबामम इस्राएली आन कली परमप्रभु यावे कली प्रोंइपाइश्शा, ठेयब पाप पपाइक्मी बाक्त। १राजा १२:२० 22 मिनु इस्राएलीपुकीम येरोबाम आ पपाइश्शा पाप नेल्ल पामे बाक्त। मिनु मेको मप्रोन्मे बाक्त। 23 परमप्रभु यावेमी आ गेय पा, आ लोत्र पाइबपुकी रे डोंइती देशो खोदेशो पा इस्राएली आन कली आ डोंइती रे खेरमी बाक्त। मोपतीके इस्राएलीपुकी आंम आन रागी रे अस्सुर रागीम ग्याइश्शा लाइक्चा पुंडसमा बाक्त। मिनु मुल सम्म मेक उइ बाक्शो बाक्नीमी। ब्यवस्था २८:६३-६४

सामरीयाम अर्को रागी डा मुर वोइश्शो

24 मेको नोले अस्सुर डा पिपमी बेबीलोन, कूथाह, अक्वा, हमाथ नु सेफारवाइम रे मुरपुकी चाक्मी बाक्त। मिनु मेको आन कली इस्राएली आन पा डा सामरीया डा सहरपुकीम बाक्पाइक्मी बाक्त। मेकोपुकी सामरीया आंम के सेल्शा मेकेर बाक्मा बाक्त। 25 मिनु डोंइती मेकोपुकी मेकेर बाक्मानु, परमप्रभु यावे कली ममानेमे बाक्त। मोपतीके परमप्रभु यावेमी मेको आन दातेमी गुप्स सोइक्तीमी बाक्त। मिनु मेको गुप्सपुकीम कोइ कोइ आन कली सदमे बाक्त।

होसे १३:८ 26 मिनु मेकोपुकीमी अस्सुर डा पिप कली “गे इन सोइशशो रागी रागी डा मुर सामरीया डा सहरम बाक्नीम। मेकोपुकीमी मेको रागी डा परमप्रभु आ अरेशो मतुइक्नीम। मोपतीके परमप्रभुम मेको आन दातेमी गुप्स सोइक्ताक्व। मारदे हना मेकोपुकी मेको रागी डा परमप्रभु कली मतुइक्तीके ठेयब सेल्स मजोक्तीके, मेको गुप्समी मुर आन कली साइक्तेक्म” दे लोव कुरब मुर सोइक्तेमे बाक्त। 27 मिनु अस्सुर डा पिपमी “सामरीया रे ग्याइशशा लाइशशो अस्सुर रागीम चाक्शो तेकोइ चढेब का मेक बाक्चा कली लेशशा सोइक्तेमेक्ल। मिनु मेकोमी मेको रागी डा परमप्रभु आ अरेशो लोव मुर आन कली शेंचा माल्ब” दे अरेवा बाक्त। 28 मोपतीके डोंइती सामरीया रे ग्याइशशा लाइशशो चढेब का बेथेलम लेशशा जाक्शा, मेकेर बाक्माक्त। मिनु मेकोमी मुर आन कली परमप्रभु यावे कली दोपा ठेयब सेल्चा माल्नीमी मेको शेंदीमी बाक्त।

29 मो हना यो रागी रागी डा मुरपुकीम आंम आन बाक्तीके सहर सहरम आन देवी देवता सेल्शा, मेको डांडा डा थानम वोदमे बाक्त। मोपा आन बाक्शो सहर नेल्लेमी सामरीया डा मुर आन सेल्शो डांडा डा थान यो बाक्मा बाक्त। 30 बेबीलोन डा मुरपुकीम आन देवता सुक्कोथ-बेनोथ सेल्मे बाक्त। कूथ डा मुरपुकीम नेरगल सेल्मे बाक्त। हमाथ डा मुरपुकीम अशीमा सेल्मे बाक्त। 31 अच्वा सहर डा मुरपुकीम निभाज नु तारतक सेल्मे बाक्त। मिनु सेफारवाइम डा मुरपुकीमी आन आल आन कली आन देवता अद्राम्मेलेक नु अनाम्मेलेक आस कली चोशा चढेमे बाक्त। २राजा १७:३१ 32 मेकोपुकीम परमप्रभु यावे कली यो ठेयब सेल्मे बाक्त। मिनु डांडा डा थानमी अरु मुर आन कली चढेब सेल्मे बाक्त। मेकोपुकीमी डांडा डा थानपुकीम मुर आन पर्बम चढेमे बाक्त। १राजा १२:३१ 33 मिनु मोपा मेकोपुकीम परमप्रभु यावे कली ठेयब सेल्शा, आंम आन देवी देवता आन कली यो पूजा पामे बाक्त। तेको रागी रे चाक्शो बाक्मा, मेको आन देवी देवता आन पतीक पशा, पूजा पामे बाक्त। 34 मेकोपुकीमी मुलाक्त सम्म मोदेशो पना पन बाक्नीम। मिनु मेकोपुकीमी परमप्रभु यावे कली मान पा महिनीम। मेको आ फुल्लुम मुशा ब्रेक्शो लोव, आ निसाफ पतीक लोव, आ अरेशो नु आ शेंशो मपामे बाक्त। परमप्रभु यावेमी मोदेशो पचा माल्नीनी, दे इस्राएल माइशशो याकूब आ आल आन कली अरेशो बाक्माक्त। उत्पत्ती ३२:२९ 35 परमप्रभु यावेमी इस्राएली नु कबल का पवा बाक्त। मिनु मेकोमी इस्राएली आन कली “गेपुकीम देवी देवता आन कली ममानेन। मेको आन डोंइती मबपीन। मेको आन गेय मपने। मेको आन कली मारेइ मचढेन। प्रस्थान २३:२४ 36 मिनु आ सक्ति नु आ क्युक्शो गुडम इन कली इजीप्त रे गुंडशा एक चाक्ब परमप्रभु यावे कली ला ठेयब सेलीन। मेको आ डोंइती ला बाप्पीन। मेको कली ला चढेचा माल्नीनी” देमाक्त। 37 मेकोमी इन कली “आं फुल्लुम मुशा ब्रेक्शो लोव नु आं पतीके लोव, आं अरेशो नु आं शेंशो लोव नेल्ल शुश होस पा गेना हना यो पचा माल्नीनी। गेपुकीमी देवी देवता आन कली मानेचा मदुम्नीनी। 38 गेपुकीम गो नु पशो कबल मप्रेंदीन। मिनु देवी देवता आन कली मानेचा मदुम्नीनी। 39 तन्न गेपुकीम परमप्रभु यावे, इन परमप्रभु कली ला ठेयब सेलीन। मेकोमी इन कली इन जोरी सत्रु आन गुड रे प्रोंइब” दे अरेशो बाक्माक्त। ब्यवस्था ६:१२-१९ 40 मो हना यो मेकोपुकीम मेको लोव मनेन्मे बाक्त। मिनु मेको आन डोंइती डा पशो खोदेशो पामे बाक्त।

41 मेको रागी रागी डा मुरपुकीमी परमप्रभु यावे कली ठेयब सेल्शा यो आन मुशा सेल्शो मूर्ति आन कली पूजा पामे बाक्त। मुल सम्म आन चच युइमी आन किकी पिपीम पशो खोदेशो पना पन बाक्नीम।

18

यहूदा डा पिप हिज्कीयाह

२इतिहास २९:-३१:-

1 आहाज आ तौ हिज्कीयाह यहूदा डा पिप दुम्माक्त। मेना एलाह आ तौ होशेआ इस्राएल डा पिप दुम्शो बर्स सां दुम्शो बाक्माक्त। २राजा १६:२० 2 मिनु हिज्कीयाह पिप दुम्मेनु, २५ बर्स दुम्शो बाक्माक्त। मेकोमी यरूसलेमम २९ बर्स सासन पवा बाक्त। मेको आ ममा आ नें आबी बाक्माक्त। मेको जकरिया आ तमी बाक्माक्त। 3 मेकोम आ किकी दाऊदम खोदेशो पा, परमप्रभु यावे आ डोंइती मार रिम्शो बाक्मे, मेको पवा बाक्त। २राजा २०:३ 4 मेकोम डांडा डा थानपुकी प्रेशशा, ताइक्तीमी बाक्त। खुक्शो फुल्लु जिक्शा, मूर्ति पाइशशो थाम क्योरशा ताइक्तीमी बाक्त। मेकोमी मोसा आ सेल्शो कांसा के बुस्स कली टुक्रा टुक्रा पवा बाक्त। मारदे हना मेना सम्म इस्राएलीपुकीम मेको कली धूप चोइबाक्मा बाक्त। मेकोपुकीम मेको कली नहुशतन देंबाक्मा बाक्त। २राजा १५:३५; गन्ती २१:८-९ 5 हिज्कीयाहम परमप्रभु यावे, इस्राएली आन परमप्रभु कली थमा सुदा बाक्त। मेको आ क्येडा डोंइती डा नु आ क्येडा नोले डा यहूदा डा पिप नेल्ले मेको खोदेशो मदुम्मा बाक्त। २राजा २३:२५ 6 मेकोमी परमप्रभु यावे आ नोले खोइक्चा गेनायो मप्रोना

बाक्त। मिनु परमप्रभु यावेमी मोसा कली शेंशो लोव्र नेल्ल टिवा बाक्त। 7 मिनु परमप्रभु यावे मेको नु बाक्माक्त। मेको आ पशो गेय नेल्लेमी रिम्शो दुम्माक्त। मेको अस्सुर डा पिप कली मटीब दुम्माक्त। मिनु मेको आ देशो मपवा बाक्त। 8 मेकोमी पलिस्ती आन रागी गाजा रे खाल पाइब आन लाइशो खिं नु गारो हिरशो सहर नेल्ल ग्रामाक्त।

सामरीया खतम दुम्शो

9 हिज्कीयाहमी सासन पशो ४ बर्स दुम्माक्त। इस्राएल डा पिप एलाह आ तौ होशेआम सासन पशो ७ बर्स दुम्मेनु, अस्सुर डा पिप शाल्मानेसेरमी सामरीया कली लडाइ तोशा पुम्दा बाक्त। २राजा १७:३-६ 10 मिनु अस्सुरीपुकीमी मेको सहर कली बर्स सां सम्म पुम्शा, आन के सेल्मे बाक्त। मेना हिज्कीयाह पिप दुम्शो ६ बर्स नु इस्राएल डा पिप होशेआ पिप दुम्शो ९ बर्स दुम्शो बाक्माक्त। मिनु अस्सुर डा पिपमी सामरीया ग्रामाक्त। 11 मिनु मेकोमी इस्राएली आन कली ग्याइशशा अस्सुर लाइक्मी बाक्त। मिनु मेको आन कली हालाह, गोजान डा खोला हाबोर आ नेक्था नु मादी आन सहरम बाक्पाइक्मी बाक्त। 12 मारदे हना मेकोपुकीमी परमप्रभु यावे, आन परमप्रभु आ देशो मटिथु, आ कबल पशो हेंथे पशो बाक्मा बाक्त। परमप्रभु यावे आ गेय पाइब मोसामी शेंशो लोव्र मनेंशो नु मटिशो बाक्मा बाक्त।

यरूसलेम कली लडाइ तोशो

२इतिहास ३२:१-१९; यसैया ३६:-

13 पिप हिज्कीयाहमी सासन पशो १४ बर्स दुम्मेनु, अस्सुर डा पिप सन्हेरीबमी यहूदा डा गारो हिरशो सहर नेल्ल कली लडाइ तोशा ग्रामाक्त। 14 मोपतीके यहूदा डा पिप हिज्कीयाहमी लाकीश सहरम बाक्ब अस्सुर डा पिप कली “गो मरिम्शो पाता। आं रागी रे लेतीन। मिनु गे आं कली मार देंनीनी, मेको पाइनुड” दे लोव्र कुरब मुर सोइक्ता बाक्त। मिनु अस्सुर डा पिपम हिज्कीयाह कली सहे सां टलेन्ट चांदी नु ३० टलेन्ट सुन थाप्पदा बाक्त। टलेन्ट का ३४ किलो बाक्ब। 15 मिनु हिज्कीयाहमी परमप्रभु यावे आ खिं नु पिप आ खिंम थिश्शो चांदी नेल्ल मेको कली गेवा बाक्त। २राजा १६:८ 16 मेना हिज्कीयाहमी परमप्रभु यावे आ खिं डा लाप्चो नु लाप्चो डा शीम आंम आ गिल्शो सुन नेल्ल शोल्शा, अस्सुर डा पिप कली गेवा बाक्त।

सन्हेरीबम हिच कोइशो

17 मिनु अस्सुर डा पिपम लडाइ पाइब आन नेल्ल क्येडा ठेयब मुर तारतान, दरवार डा ठेयब मुर राब्सारीस, पिप आ ठेयब गेय पाइब राब्शाके नु ठेयब हुल का लडाइ पाइब आन कली लाकीश रे पिप हिज्कीयाह आ बाक्तीक यरूसलेम सहरम सोइक्तीमी बाक्त। मिनु मेकोपुकी यरूसलेम जाक्मा बाक्त। मिनु आइक्था दोम्ली डा ब्वाक्कु शाइक्तीक वा मुरब आन लांमी जाक्शा राम्मा बाक्त। यसैया ७:३ 18 मिनु मेकोपुकीम पिप कली ब्रेत्मे बाक्त। मिनु पिप आ खिं डा ठेयब मुर हिल्कीयाह आ तौ दरवार कोव्रब एल्याकीम, ब्रेक्ब शेब्ना नु आसाफ आ तौ पिप आ लोव्र कुरब योआह मेको आन कली ग्रुम्थ जाक्मा बाक्त।

19 मिनु राब्शाकेमी मेको आन कली “हिज्कीयाह कली, ठेयब पिप, अस्सुर डा पिपमी, मार देब देशा हना, गे सु कली तशा, महिंब बाक्नीनी? 20 गे लोव्र पा ला लडाइ ग्रानीनी डा? सुम इन कली वारच पा आं क्येडा महिंथु, आं कली मटिपदा? 21 गे इजीप्त रागीम इन कली वारच पाइब, दे मिम्नीनी। मेको जिक्शो किन्दा खोदेशो बाक्ब। मेकोमी ‘वारच पाइब’ देब आन गुइ थोक्ब। ‘मेकोमी वारच पाइब’ देब नेल्ल आन कली इजीप्त डा पिप फाराओ मोदेशोन बाक्ब। 22 तन्न गे आं कली ‘गो परमप्रभु यावे, आंइ परमप्रभु आ मुर नकी। मेकोम आंइ कली वारच पाइब’ देंतीनी हना, मार, हिज्कीयाहम मेको डांडा डा थान नु चढ़ेतीक प्रेशशा यहूदा नु यरूसलेम सहर डा मुर आन कली ‘गेपुकीम यरूसलेमम बाक्शो चढ़ेतीकेम ला चढ़ेचा माल्नीनी’ मदेम डा? ब्यवस्था १२:१४ 23 मुल आं होव्रप अस्सुर डा पिप नु गारीन। इन के मिश डा शारा डोइक्ब बाक्तेक्म हना, गो इन कली हजार निक्शी शारा गेनन्नी। 24 आं होव्रप आ नेल्ल क्येडा आइक्च लडाइ पाइब आन ठेयब मुर का कली ला यो दोपा नोले शोइक्पाइक्ने चाप्नीनी डा? गे बग्गी नु शारा डोइक्ब आन पर्बम इजीप्त कली थमा सुइश्शो बाक्नीनी। 25 मिनु अर्को लोव्र, मार गो एको रागीम परमप्रभु यावे नु सल्ला मपथु खतम पोक्थ जाक्डा डा? परमप्रभु यावेमी आं कली ‘एको रागीम लडाइ पा खतम पोक्को’ देशो बाक्ब” देमाक्त।

26 मिनु हिल्कीयाह आ तौ एल्याकीम, शेब्ना नु योआहमी मेको लडाइ पाइब आन ठेयब मुर राब्शाके कली “शिशी पा, इन वाइल गोपुकी नु अरामी लोव्रम ब्वाक्कीन। मारदे हना गो मेको लोव्र रुप्नीकी। गारोम बाक्ब मुर नेल्लेम नेंचा डा पा यहूदी लोव्रम म्बवाक्कीन” देमा बाक्त। 27 तन्न राब्शाकेम मेको आन कली “मार, आं होव्रपमी एको लोव्र

इन कली नु इन होवप कली ला नेंपाइक्चा कली सोइश्शो बाक्बा डा? मार, गारोम बाक्ब मुर नेल्ल आन कली यो ममाइ डा? गेपुकीम खोदेशो पा, मेकोपुकीम यो आन ख्री चारनाक जचा तूचा माल्नीम” देंमाक्त।

28 मिनु मेको लडाइ पाइब आन ठेयब मुर राब्शाके राप्शा यहूदी लोवमी ठेयब सेंदा पा “ठेयब पिप, अस्सुर डा पिप आ लोव्र नेनीन। 29 मेकोमी मार देंत देशा हना ‘हिज्कीयाहमी इन कली जोल पशो थमा मसुतीन। मारदे हना मेकोमी इन कली आं गुइ रे प्रॉइने मचाप्ब’ देंत। 30 हिज्कीयाहमी ‘परमप्रभु यावेम थमा पा इं कली श्येत रे प्रॉइब। मिनु एको सहर अस्सुर डा पिप आ गुइम मदुम्ब’ दे इन कली परमप्रभु यावे कली थमा मसुइक्पदल। 31 हिज्कीयाह आ लोव्र मनेनीन। अस्सुर डा पिपम ‘गो नु गारीन। मिनु गूशा आं बाक्तीक जाक्कीन। मिनु गेपुकीमी इन अडगुर रू डा अडगुर नु इन रवा डा फोव्रशी जचा ताइनीनी। इन इनार डा ब्वाक्कु तूचा ताइनीनी। १राजा ५:५ 32 गो जाक्शा इन कली आंम इन रागी खोदेशो रागीम लाइक्नन्नी। मेको रागी अन्न नु अडगुर शांबु, शोब्ले नु अडगुर रू, तेल रवा नु खुदो बाक्शो रागी बाक्ब। गेपुकी बेक्तीक आ पा डा ब्रॉइतीक योव्रडीन। हिज्कीयाह आ लोव्र मनेनीन, मेकोम इन कली “परमप्रभु यावेमी इं कली प्रॉइब” दे जोल पाइब। 33 मार रागी रागी डा तेकोइ देवी देवताम आन रागी कली अस्सुर डा पिप आ गुइ रे प्रॉइने चाप्शो बाक्नीमी डा? यसैया १०:१०-११ 34 हमाथ नु अरपाद डा देवी देवता ते लाक्गमे? सेफारवाइम, हेना नु इव्वाह डा देवी देवता ते बाक्मा? मार, मेकोपुकीम सामरीया कली आं गुइ रे प्रॉइने चाप्मे डा? 35 मार, मेको रागी डा देवी देवता आन दाते डा तेकोइमी आ रागी कली आं गुइ रे प्रॉइने चबा डा? मिनु परमप्रभु यावेमी यरूसलेम कली आं गुइ रे दोपा प्रॉइने चाप्बा डा?” दे इस्राएली आन कली देंमाक्त। दानीएल ३:१५

36 तन्न मुर नेल्ल सिक्सी पा बाक्शा, लोव्र का यो मलेत्मे बाक्त। मारदे हना पिपमी मेको आन कली “सुइम लोव्र मलेत्चा” दे अरेशो बाक्माक्त। 37 मिनु पिप, हिल्कीयाह आ तौ दरवार कोव्रब एल्याकीम, ब्रेक्ब शेब्ना नु आसाफ आ तौ पिप आ लोव्र कुरब योआहम आन वा खाक्गमे बाक्त। मिनु हिज्कीयाह आ बाक्तीक जाक्शा, राब्शाके आ लोव्र नेंपदमे बाक्त।

19

हिज्कीयाहम परमप्रभु नु लोव्र पशो

२इतिहास ३२:२०-२३; यसैया ३७:१-७

1 मिनु पिप हिज्कीयाहम मेको लोव्र नेंशा, आ वा खाक्गा बाक्त। मिनु अरन्डी फेक्शा, परमप्रभु यावे आ खिं लमाक्त। 2 मेकोमी दरवार कोव्रब एल्याकीम, ब्रेक्ब शेब्ना नु ठेयब चढेब आन कली अरन्डी फेक्पाइश्शा, परमप्रभु यावे आ लोव्र पाइब आमोज आ तौ यसैया आ बाक्तीकेम सोइक्तीमी बाक्त। 3 मिनु मेकोपुकीमी यसैया कली “हिज्कीयाहमी ‘मुलाक्ती श्येत जतीक, हुइक्चा पुंइसीतीक नु मुने दोक्तीक नाक्त बाक्ब। दोपा आल थिचा चिक्शो मीश मुर कली आल थिचा कली बोल मबाक्बा, मोदेशो दुम्शो बाक्ब। 4 परमप्रभु यावे, इन परमप्रभुमी अस्सुर डा पिपमी सोइश्शो मेको राब्शाके आ लोव्र नेल्ल नेंना माइ। आ होवप, अस्सुर डा पिपमी ब्रॉइशा बाक्शो परमप्रभु कली शुक्शी पथ सोइश्शो बाक्ब। मिनु परमप्रभु यावे, इन परमप्रभुमी आ नेंशो लोव्र आ पर्बम मेको कली हुइक्बा कों। मोपतीके मुल लीशो मुर आन पर्बम प्रार्थना पने’ देंत” देंमा बाक्त। १सामुएल १७:१०; २राजा १८:३५ 5 मिनु पिप हिज्कीयाह आ सोइश्शो गेय पाइबपुकी यसैया आ बाक्तीकेम बाक्मानु, 6 यसैयामी मेको आन कली “परमप्रभु यावेमी इन होवप कली ‘इ नेंशो लोव्रम महिनो। अस्सुर डा पिप आ गेय पाइबपुकीमी आं कली शुक्शी पशो लोव्र नेंता। 7 गो मेको आ थुंम सोक्त का कुर पाइनुड। मिनु मेकोमी लोव्र का नेंब। मिनु मेको आ रागी लेश्शा लाइब। मेकेर गो मेको कली तरवारम साइक्पाइक्नुड’ देंत, दे मतीन” दे माइक्मी बाक्त। २राजा १९:९; २राजा १९:३५-३७

8 मिनु राब्शाकेमी “अस्सुर डा पिपमी लाकीश प्रॉइतु” देशो लोव्र नेना बाक्त। मिनु मेको लेम्माक्त। मिनु मेकोमी पिप कली लिब्ना नु लडाइ पना पन बाक्शो थिदा बाक्त। 9 मिनु मेको पिपमी “एथीयोपीया डा पिप तिरहाकाह गे नु लडाइ पचा कली पिना पिन बाक्ब” देशो लोव्र नेना बाक्त। मोपतीके मेकोमी यहूदा डा पिप हिज्कीयाह आ बाक्तीकेम लोव्र कुरब मुर सोइश्शा, 10 यहूदा डा पिप हिज्कीयाह कली “यरूसलेम अस्सुर डा पिप आ गुइम मदुम्ब, दे थोक्शा लोव्र पाइब इ थमा सुइश्शो परमप्रभुमी इ कली जोल मपवल। 11 अस्सुर डा पिपमी रागी नेल्ल आन कली मार पवा, मेको आन कली दोपा खतम पोक्गा, मेको थमा पा नेंतीनी। मिनु मार, ‘गो ब्रॉइनुड’ दे आस पाइनीनी? 12 मार, आं किकी पिपी आन क्याम्शो रागी रागी डा देवी देवताम मेको आन कली प्रॉइने चाप्ने डा? गोजान, हारान,

रेचेफ नु तेलास्सार सहरम बाकब एदेन डा मुर आन देवी देवता ते लाकगमे? 13 हमाथ, अरपाद सेफारवाइम सहर, हेना नु इव्वाह डा पिप ते लाकगमे?” देंपाइक्चा कली मुर सोइक्ता बाकत।

हिज्कीयाह आ पुंडशो लोव

14 मिनु हिज्कीयाह मेको चिठी चाकब मुर आन गुइ रे ताकशा पढेवा बाकत। मिनु परमप्रभु यावे आ खिं लमाकत। मिनु मेको परमप्रभु यावे आ डोंइती प्राकशा वोदा बाकत। 15 मिनु हिज्कीयाहम मेको परमप्रभु यावे आ डोंइती प्राकशा वोइश्शा “परमप्रभु यावे, इस्राएली आन परमप्रभु गे करूब आन तार बाकनीनी। रागी डा राज्य नेल्लेम गे का ला परमप्रभु बाकनीनी। गे रागी नु सरीड सेल्ब बाकनीनी। प्रस्थान २५:२२; भजन संग्रह ८०:२ 16 परमप्रभु यावे आं लोव नेनीन। परमप्रभु यावे कोवडीन, सन्हेरीबम ब्रोंइशा बाकशो परमप्रभु, इन कली शुक्शी पा सोइश्शो लोव नेनीन। 17 परमप्रभु यावे, अस्सुर डा पिपपुकीम रागी रागी डा मुर नु आन रागी कली खतम पोक्तेक्म। एको थमा बाकब। 18 मेकोपुकीमी मेको आन देवी देवता आन कली मीम हुम्शा नेकपाइक्तेक्म। मारदे हना मेको परमप्रभु मनम। मेको मुरुमी सेल्शो शी नु फुल्लु के ला बाक्तेक्म। मोपतीके मेको खतम दुम्तेक्म। 19 मुल परमप्रभु यावे, आंइ परमप्रभु आंइ कली मेको आ गुइ रे प्रोनीन, दे पुंडनुड। मिनु रागी नेल्ल डा मुरपुकीम परमप्रभु यावे, गे का ला परमप्रभु बाकनीनी, दे तुइक्तेक्म” दे पुना बाकत।

यसैयामी सन्हेरीब खतम दुम्ब देशो

20 मिनु आमोज आ तौ यसैयाम हिज्कीयाह कली “परमप्रभु यावे, इस्राएली आन परमप्रभुमी मार देत देशा हना ‘गो अस्सुर डा पिप सन्हेरीब आ पबर्म इ पुंडशो लोव नेता’ देत। 21 सन्हेरीब आ पबर्म परमप्रभु यावे आ देशो लोव मार बाकब देशा हना ‘सियोन डा तमीमी इ कली शुक्शी पाइब। मिनु गे प्रोक्शा लवेनु, यरूसलेम डा तमीमी आ पिया हिक्ब।

22 गे सु कली शाकशा शुक्शी पवी? गे सुका आ पबर्म ठेयब लेशशा लोव पवी? मेको इस्राएली आन का ला बाकशो परमप्रभु यावे आ पबर्म बाकब। 23 गे इ लोव कुरबपुकी सोइश्शा, परमप्रभु यावे कली शुक्शी पाप्तीवी’। मिनु गे ‘गो आं शुश बगीम ठेयब पहाड डोंइसाक्यी। गो लेबानोन डा नेल्ल क्येडा डोन डोंइसाक्यी। गो मेकेर डा नेल्ल क्येडा लाइश्शो रवा नु मेकेर डा नेल्ल क्येडा रिम्शो अरु रवा तिम्तामी। गो मेको आ सुर सम्म डा नेल्ल क्येडा ठेयब ब्वाकीम जाकदीत्ती। 24 गो इनार दोशा, अर्को रागी डा ब्वाक्कु तूता। गो आं खोइलीम दिम्शा इजीप्त रागी डा खोला नेल्ल सोवपाइक्तामी’ देशो बाक्नेवे।

25 गे ‘गो साइ डोंइती रे मेको नेल्ल देशो नड। गो मेको साइ रे मो पाइनुड देशो नड। मुल गो मेको थुम्ता। मार, मेको मनेशो बाकनीनी? गे गारो हिरशो सहर आन कली प्रेशशा, फुल्लु तेल्लो खोदेशो सेल्शो बाक्नेवे। 26 मिनु मेको सहर डा मुर आन सोक्त जाम्शा आन थुं लुक्च लत। मेकोपुकी रू डा कल्लो घांस खोदेशो दुम्तेक्म। मेकोपुकी खिं तार वाशो घांस खोदेशो दुम्शा, वामा चोटीन सोवशो बाकनीम।

27 गो इ बाकशो बोक्शो नेल्ल तुइक्नुड। गो इ लाडगा खिंडगा पशो नेल्ल तुइक्नुड। मिनु आं पबर्म इ गाइश्शो तुइक्नुड। 28 मारदे हना गेम आं पबर्म गाइश्शा, इ ठेयब लेशशो लोव पशो नेता। मोपतीके गो इ नेमी आं बोल्सी ब्वेक्नुड। इ शोवमी लगम पाइक्नुड। मिनु गो इ जाकशो लां रेन लेप्पाइक्नन’ दे परमप्रभु यावेमी सन्हेरीब आ पबर्म देत” देमाकत।

29 मिनु लेंशा “मेको नेल्ल थमा दुम्ब, दे मार चिन्ड दुम्ब देशा हना, गेपुकी एको बर्स आंमा वाशो जाइनीनी। मिनु नोले डा बर्स मेको रे वाशो जाइनीनी। मिनु बर्स सांमी गेपुकीम शोक्शा खुप्शा जने, अडगुर खुम्शा जने। 30 मिनु यहूदा आ खिं डा ब्रोंइशा लीशोपुकीम रागीम शाकश थोक्नीम। मिनु रागी तार फल सित्नीम। 31 मारदे हना यरूसलेम रे लीशो मुरपुकी लाइनीम। सियोन डांडा रे हुल का ब्रोंइशो मुर गूशा जाक्नीम। मुर नेल्ल आन परमप्रभु यावेमी आ जोब बोक्शा मेको पाइब” देमाकत। यसैया ९:६

32 मिनु परमप्रभु यावेमी अस्सुर डा पिप आ पबर्म “सन्हेरीब एको सहरम मओवब। एको सहरम ब्रा का यो मआप्ब। मेको आ तेक्तीक कुरशा एको सहर आ डोंइती मजाकब। सहर ओवचा कली गारो डोइक्तीक मसेल्ब। 33 मेको आ जाकशो लां रेन लेशशा लाइब। मेको सहरम मओवब। 34 मारदे हना गो आंम आं पबर्म नु आं गेय पाइब दाऊद आ पबर्म मेको सहर कली वारच पा प्रोंइनुड” देमाकत। २राजा २०:६

35 मिनु मेको नाक्टो परमप्रभु यावे आ स्वर्ग डा गेय पाइब का जाक्माक्त। मिनु मेकोमी अस्सुर डा पिप आ लडाइ पाइब आन बाक्तीकेम ओव्रशा, लाख का ८५ हजार मुर आन कली साइक्मी बाक्त। मिनु आ दीसा सुनी मुरपुकी बोक्मानु मेकेर बेक्शो मुर ला तामे बाक्त। यसैया ३७:३६-३८ 36 मोपतीके अस्सुर डा पिप सन्हेरीब ताम्बु पोक्शा लेशशा आ खिं निनवे लमाक्त। 37 मिनु मेको काबु आ देवता निस्रोक आ खिंमी पूजा पना पन बाक्मेनु, मेको आ तौ अद्राम्मेलेक नु शरेसेरमी मेको कली तरवारम क्योरशा सदसे बाक्त। मिनु प्रोक्शा आरारात रागी लसा बाक्त। मिनु मेको आ पा डा आ तौ एसर-हददोन पिप दुम्माक्त। २राजा १९:७

20

हिज्कीयाह रोइ पशो

२इतिहास ३२:२४-२६; यसैया ३८:१-८

1 मेना हिज्कीयाह रोइ पा बेक्चा चिक्ता बाक्त। मिनु आमोज आ तौ परमप्रभु यावे आ लोव्र पाइब यसैया हिज्कीयाह आ बाक्तीक जाक्शा, “परमप्रभु यावेमी इन कली मार देंत देशा हना ‘इन खिं डा मुर आन कली इन अरेचा माल्लो लोव्र अरेने। मारदे हना गे बेक्नीनी। मसानीनी’ देंत” देंमाक्त। 2 मिनु हिज्कीयाह गारो गे हिरशा, परमप्रभु यावे कली पुना बाक्त। 3 मेकोमी “परमप्रभु यावे, गो इन डोंइती रिम्शो पा बाक्ती। गो इन कली गेनायो मप्रोंइथु आं थुं नेल्लेमी इन नोले खोइक्ता। इन डोंइती मार रिम्शो बाक्मे, मेको पाता, मेको मिम्तीन” दे आ थुं खाइश्शा डाक्माक्त। 4 मिनु यसैया दाते डा लाडगा रे गूचा क्येडा डोंइती परमप्रभु यावेम मेको कली लोव्र पवा बाक्त। 5 मार लोव्र पवा बाक्त देशा हना “लेशशा लशा, परमप्रभु यावे इ किकी दाऊद आ परमप्रभुमी ‘आं मुर आन कली सासन पाइब हिज्कीयाह कली “गो इ पुंइशो लोव्र नेंता। मिनु इ प्रेक्कु ताता। गो इ कली सापाइक्नुड। मिनु नाक्त सां नोले गे परमप्रभु यावे आ खिं लाइनेवे। 6 गो इ ब्रोंइतीक नाक्त १५ बर्स तेम्नुड। मिनु इ कली नु एको सहर कली अस्सुर डा पिप आ गुइ रे प्रोंइनुड। गो आं पबर्म नु आं गेय पाइब दाऊद आ पबर्म एको सहर कली वारच पा प्रोंइनुड” देंत’ देनो” देंमाक्त। २राजा १९:३४ 7 मिनु यसैयामी “मेको कली सापाइक्चा कली आ कानम फोव्रशी गेडा शेप्शा खेक्तीन” देंमाक्त। मिनु मुरपुकीम मेको आ कानम फोव्रशी गेडा शेप्शा खेक्तमे बाक्त।

8 मिनु हिज्कीयाहमी यसैया कली “गो सानुड, मिनु नाक्त सां नोले परमप्रभु यावे आ खिं लाइनुड, दे परमप्रभु यावेमी आं कली दोपा तुइक्पाइक्बा?” दे हिल्लो पवा बाक्त। 9 मिनु यसैयामी “परमप्रभु यावेमी आ देशो थमा पा पाइब, दे इन कली मार कोंइब देशा हना, नां आ वांकु १० खेयप डोंइती गे ग्रेल देय नोले गे लेल्ल?” दे हिल्लो पवा बाक्त। 10 मिनु हिज्कीयाहम “नां आ वांकु १० खेयप डोंइती ग्रेचा दा आ गेयन बाक्ब। मेको १० खेयप नोले गे लेत्चा माल्ब” देंमाक्त। 11 मिनु परमप्रभु यावे आ लोव्र पाइब यसैयाम, परमप्रभु यावे कली पुना बाक्त। मिनु परमप्रभु यावेमी आहाज आ नां आ वांकु कोंइतीके १० खेयप नोले गे लेप्पदा बाक्त।

बेबीलोन डा पिप आ लोव्र

२इतिहास ३२:३१; यसैया ३९:-

12 मेना बेबीलोन डा पिप बालादन आ तौ मेरोदाक-बालादानमी हिज्कीयाह आ बाक्तीकेम कोसेली नु चिठी कुर पा मुर सोइक्ता बाक्त। मारदे हना मेकोम हिज्कीयाह रोइ पा साशो बाक्ब देशो नेना बाक्त। 13 मिनु हिज्कीयाहम मेको चिठी चाक्ब मुर आन कली मान पाइक्मी बाक्त। मिनु मेको आन कली आ शोंप वोइक्तीकेम नेल्ल कोंइदा बाक्त। सुन चांदी, मस्ला, ब्रोंव्रशो रिना पाइश्शो खेक्तीक तेल, आ यापुकी नु आ मार मार वोइक्तीकेम बाक्शो मारेइ मारेइ थोव्रक कोंइदीमी बाक्त। हिज्कीयाह आ खिंम नु आ नेक्थाम बाक्शो मेको आन कली मकोंइशो मारेइ मलीमाक्त। 14 मिनु नोले परमप्रभु यावे आ लोव्र पाइब यसैया जाक्शा, पिप हिज्कीयाह कली “मेको मुरपुकीम मार देंमा? मेकोपुकी ते रे जाक्शो नमी?” दे हिल्लो पवा बाक्त। मिनु हिज्कीयाहमी “एकोपुकी डोन रागी बेबीलोन रे जाक्शो नम” देंमाक्त। 15 मिनु मेकोमी “मेकोपुकीम इन खिंम मार मार तामे?” दे हिल्लो पवा बाक्त। मिनु हिज्कीयाहम “एकोपुकीम आं खिंम बाक्शो नेल्ल ताम्तेक्म। आं मार मार वोइक्तीक खिंम बाक्शो मतशो मारेइ मली” देंमाक्त।

16 मिनु यसैयाम हिज्कीयाह कली “परमप्रभु यावे आ लोव्र नेनीन। 17 परमप्रभु यावेमी ‘काबु नाक्त इ खिंम बाक्शो मारेइ मारेइ थोव्रक नु इ किकी पिपी नु इन आंम तेल्लो थोव्रक नेल्ल बेबीलोनम चाक्दीत्नीम। मारेइ मप्रोंइनीम। २राजा २४:१३-१४ 18 मेकोपुकीम इन तौ का निक्शी यो लाइक्नीम। मिनु मेकोपुकी बेबीलोन डा पिप आ दरवारमी गेय पाइब दुम्नीम’ दे परमप्रभु यावे देंत” देंमाक्त। दानीएल १:३-४ 19 मिनु हिज्कीयाहम यसैया कली “इन देशो परमप्रभु यावे

आ लोव रिम्शोन बाक्ब” देमाक्त। मारदे हना मेकोमी “आं पाला सम्म थुं नाइशशा बाक्तीक दुम्ब” दे मिम्ता बाक्त। २राजा २२:२०

हिज्कीयाह बेक्शो

20 हिज्कीयाह आ पशो अरु गेय, मेको आ सक्ति, मेको आ दोम्ली नु ब्वाक्कु लतीके सेल्शो, सहर कली ब्वाक्कु चाक्शो, मार, मेको नेल्ल यहूदा डा पिप आन इतिहासम ब्रेक्शो मबाक्बा डा? 21 मिनु हिज्कीयाह बेक्माक्त। मिनु मेको आ पा डा आ तौ मनस्से पिप दुम्माक्त।

21

यहूदा डा पिप मनस्से

२इतिहास ३३:-

1 मनस्से पिप दुम्मेनु, १२ बर्स दुम्शो बाक्माक्त। मिनु मेकोम यरूसलेमम ५५ बर्स सासन पवा बाक्त। मेको आ ममा आ नें हेफसीबाह बाक्माक्त। 2 मेकोम परमप्रभु यावे आ डोंइती मार मरिम्शो बाक्मे, मेको पवा बाक्त। परमप्रभु यावेमी इस्राएली आन डोंइती रे खेरशो रागी रागी डा मुर आन ग्रांग्रा दिशो गेय पवा बाक्त। 3 मेकोमी आ आफ हिज्कीयाहमी खतम पोक्शो डांडा डा थानपुकी लेंशा सेला बाक्त। मेकोम इस्राएल डा पिप आहाब खोदेशो पा बाल कली चढेतीक नु मूर्ति पाइशो थाम सेला बाक्त। इस्राएल डा पिप आहाब खोदेशो पा मेकोमी नां तास्ला नु सोरुल आन कली खुम्की पा बाप्शा पूजा पवा बाक्त। १राजा १६:३३ 4 मेकोमी परमप्रभु यावे आ खिंमी मेको देवी देवता आन कली चढेतीकपुकी सेला बाक्त। परमप्रभु यावेमी मेको खिं आ पर्वम “यरूसलेमम गो आं नें वोइक्नुड” देशो बाक्माक्त। 5 मिनु मेकोमी परमप्रभु यावे आ खिं आ लाडगा निम्फामी नां तास्ला नु सोरुल आन कली चढेतीक सेला बाक्त। २राजा २३:१२ 6 मेकोमी आ तौ कली चोशा चढेवा बाक्त। मिनु मन्तर तन्तर, टुना मुना पा, बेक्शो मुर रे लोव पचा गेशा, लिंक्नु कोवडा बाक्त। मेकोम परमप्रभु यावे आ डोंइती शुश मरिम्शो पवा बाक्त। मिनु मेको कली थाम्पा गाइक्पदा बाक्त। २राजा १६:३; लेवी १८:२१ 7 मेकोम आ मुशा सेल्शो अशेराह देवी आ मूर्ति परमप्रभु यावे आ खिंम वोदा बाक्त। परमप्रभु यावेमी मेको खिं आ पर्वम दाऊद नु आ तौ सोलोमन आस कली “गो एको इस्राएल आ थर नेल्ल आन रे आं योव्रशो यरूसलेम सहर डा एको खिंम आं नें गेना हना यो वोइक्नुड। १राजा ८:२९; १राजा ९:३ 8 मिनु इस्राएलीम आं शेंशो होस पना पन बाक्तेक्म हना, मोसा रे पा, मेको आन कली आं अरेशो पना पन बाक्तेक्म हना, मेको आन किंकी पिपी आन कली आ गेशो रागी प्रोंइशा गाक्चा ममाल्नीम। 9 तन्न मुरपुकीम मेको नेंसीन मनेन्मे बाक्त। मनस्सेम मेको आन कली हेंथे लां खोइक्पाइशो बाक्माक्त। मिनु मेकोपुकीम परमप्रभु यावेम इस्राएली आन डोंइती रे खतम पोक्शो रागी रागी डा मुर आन क्येडा यो शुश मरिम्शो पामे बाक्त” देमाक्त।

10 मिनु परमप्रभु यावेम आ गेय पा आ लोव पाइब आन रे पा 11 “यहूदा डा पिप मनस्सेम एको ग्रांग्रा दिशो गेय पशो बाक्ब। मेकोम डोंइती बाक्शो एमोरी आन क्येडा यो शुश ग्रांग्रा दिशो गेय पशो बाक्ब। मिनु मेकोमी यहूदा डा मुर आन कली मूर्ति पूजामी पाप पपाइशो बाक्ब” देमाक्त। 12 मोपतीके परमप्रभु यावे, इस्राएली आन परमप्रभुमी “गो यरूसलेम नु यहूदाम शुश खतम दुम्तीक चाक्नुड। मेको नेंब आन नोफामी ग्रीब। यसैया १९:३ 13 गो सामरीया कली पुक्तीकेमी यरूसलेम कली पुक्नुड। गो आहाब आ खिं कली थाप्शो डोरीम यरूसलेम कली थाप्नुड। मुरपुकीम दोपा थाल शेक्शा गुक्शा वोइक्नीमी, मोपा गो यरूसलेम कली शेक्शा गुक्शा वोइक्नुड। 14 गो आं लीशो मुर आन कली प्रोंइशा सोइक्नुडमी। मिनु मेको आन कली आन जोरी सत्रु आन गुडमी गेनुडमी। मेको आन जोरी सत्रुम ग्याइशशा लाइक्चा पुंइसीनीम। 15 मारदे हना मेकोपुकीम आं डोंइती मार मरिम्शो बाक्मे, मेको पाम्तेक्म। मेको आन किंकी पिपी आन कली इजीप्त रे गुंइशा चाक्गु रे मुल सम्म आं कली गाइक्पाइक्स डा गाइक्पाइक्स बाक्शो बाक्नीम” देमाक्त।

16 मेको क्येडा लाक्शा यो मनस्सेम दोस मताइब शुश मुर आन हुश शाइक्पाइशशा, यरूसलेम आ सुर का रे अर्को सुर सम्म प्रिंदा बाक्त। मिनु मेकोम यहूदा कली पाप पपदा बाक्त। मिनु मेकोपुकीम परमप्रभु यावे आ डोंइती मार मरिम्शो बाक्मे, मेको पामे बाक्त। २राजा २४:४; भजन संग्रह १०६:३८

17 मनस्से आ पशो अरु गेय, मेको आ पशो नेल्ल, मेको आ पशो पाप, मार, मेको यहूदा डा पिप आन इतिहासम ब्रेक्शो मबाक्बा डा? 18 मिनु मनस्से बेक्माक्त। मिनु मेको उज्जा आ खिं डा रूम थिम्चा पुंइसे बाक्त। मिनु मेको आ पा डा आ तौ आमोन पिप दुम्माक्त।

यहूदा डा पिप आमोन

19 आमोन पिप दुम्मेनु २२ बर्स दुम्शो बाक्माक्त। मेकोम यरूसलेमम बर्स निक्शी सासन पवा बाक्त। मेको आ ममा आ नें मेशुल्लेमेथ बाक्माक्त। मेको योत्बाह डा हारुच आ तमी बाक्माक्त। 20 मेकोम आ आफ मनस्से खोदेशो पा, परमप्रभु यावे आ डोंइती मार मरिम्शो बाक्मे, मेको पवा बाक्त। 21 मेको आ आफ आ लांम गाक्माक्त। मिनु आ आफोम पूजा पशो मूर्ति आन डोंइती खुम्की पा बाम्माक्त। मिनु मेको आन कली पूजा पवा बाक्त। 22 मेकोम परमप्रभु यावे, आ किकी पिपी आन परमप्रभु कली प्रोना बाक्त। मेको परमप्रभु यावे आ लांम मगाक्माक्त। 23 आमोन आ गेय पाइबपुकीम मेको कली साइक्चा माल्मे बाक्त। मिनु मेको कली पिप आ खिंमीन सदमे बाक्त। 24 मिनु मेको रागी डा मुरपुकीम मेको पिप आमोन कली साइक्ब मुर नेल्ल आन कली सदमे बाक्त। मिनु मेको आ तौ योसीयाह कली आ पा डा पिप सेल्मे बाक्त। 25 आमोन आ पशो अरु गेय, मेको आ पशो नेल्ल, मार, मेको यहूदा डा पिप आन इतिहासम ब्रेक्शो मबाक्बा डा? 26 मिनु मेको बेक्शा उज्जा आ तुरसुम थिम्चा पुंइसे बाक्त। मिनु मेको आ पा डा आ तौ योसीयाह पिप दुम्माक्त।

22

परमप्रभु आ अरेशो लोत्र थिश्शो

२इतिहास ३४:१-२८

1 योसीयाह पिप दुम्मेनु ८ बर्स दुम्शो बाक्माक्त। मिनु मेकोमी यरूसलेमम ३१ बर्स सासन पवा बाक्त। मेको आ ममा आ नें येदीदाह बाक्माक्त। मेको बोस्कत डा अदायाह आ तमी बाक्माक्त। 2 योसीयाहमी परमप्रभु यावे आ डोंइती मार रिम्शो बाक्मे, मेको पवा बाक्त। मेको ग्युरा पेरा मपथु, आ किकी दाऊद आ लांम गाक्माक्त। २राजा १८:३

3 योसीयाह पिप दुम्मे आ १८ बर्सम मेकोमी मेशुल्लाम आ चच असाल्याह आ तौ ब्रेक्ब शाफान कली परमप्रभु यावे आ खिंम सोइक्ता बाक्त। 4 योसीयाहमी मेको कली “ठेयब चढेब हिल्कीयाह आ बाक्तीक लावो। मिनु लाप्चो खाल पाइबपुकीम ताक्शो, मुरपुकीम परमप्रभु यावे आ खिंम चाक्शो क्येट ठीक पा वोइक्चा माल्नीम, दे मतो। २राजा १२:११ 5 मिनु मेको परमप्रभु यावे आ खिंम बाक्ब ठेयब गेय पाइब आन कली गेचा नम। मिनु मेकोपुकीम परमप्रभु यावे आ खिंम बिग्रेशो मार मार सेल्ब आन कली गेमेक्ल। 6 मेकोपुकीम परमप्रभु यावे आ खिं डा बिग्रेशो लेंशा सेल्चा कली शी सेल्ब, गारो प्रोत्रब नु मार मार सेल्ब आन कली गेमेक्ल। मिनु शी नु खोइश्शो फुल्लुपुकी ग्याप्मेक्ल। 7 मेको आन कली गेशो क्येट ब्रेक्शा वोइक्चा ममाल्नीम। मारदे हना मेकोपुकी थमा सुइश्शो गेय पाइब बाक्नीम” दे मदा बाक्त। २राजा १७:१६

8 मिनु ठेयब चढेब हिल्कीयाहमी ब्रेक्ब शाफान कली “गो परमप्रभु यावे आ खिंम अरेशो लोत्र ब्रेक्शो कागज थित्ता” देंमाक्त। मिनु हिल्कीयाहमी मेको कागज शाफान कली गेवा बाक्त। मिनु शाफानमी मेको पढेवा बाक्त। 9 मिनु मेको ब्रेक्ब शाफान पिप आ बाक्तीक लशा मेको कली “इन गेय पाइबपुकी परमप्रभु यावे आ खिंम लशा, मेकेर डा क्येट परमप्रभु यावे आ खिं डा गेय कोत्रब आन कली गेम्तेक्म” देंमाक्त। 10 मिनु नोले मेको ब्रेक्ब शाफानमी पिप कली “चढेब हिल्कीयाहमी आं कली कागज का गेती” दे शेंदा बाक्त। मिनु नोले शाफानमी मेको ठेयब सेंदा पा पदेशा पिप कली नेंपदा बाक्त।

11 मिनु पिपमी मेको कागज डा लोत्र नेंशा, आ वा खाक्गा बाक्त। 12 मिनु नोले पिपमी चढेब हिल्कीयाह, शाफान आ तौ अहीकाम, मीकाया आ तौ आकबोर, ब्रेक्ब शाफान नु पिप आ गेय पाइब आसायाह आन कली येरमीया २६:२४ 13 “गे आं पर्वम, आं मुर आन पर्वम नु यहूदा आ पर्वम मेको थिश्शो कागजमी मार ब्रेक्शो बाक्मे, दे परमप्रभु यावे कली हिल्लो पथ लने। मारदे हना परमप्रभु यावे थाम्पा गाइश्शो बाक्ब। इं किकी पिपीम एको कागजम ब्रेक्शो लोत्र मटीमे। मेकोपुकीम इं पर्वम मेकेर ब्रेक्शो लोत्र नेल्ल मपाम” देंमाक्त।

14 मोपतीके चढेब हिल्कीयाह, अहीकाम, आकबोर, शाफान नु आसायाह पिप आ खिंम वासी कोत्रब हारहास आ चच, तिकवाह आ तौ शाल्लुम आ मीश परमप्रभु यावे आ लोत्र पाइब हुल्दा आ बाक्तीके यरूसलेमम हिल्लो पथ लमा बाक्त। मेको आ खिं यरूसलेम डा नक सहरम बाक्बाक्माक्त। 15 मिनु हुल्दामी मेको आन कली “परमप्रभु यावे, इस्राएली आन परमप्रभुम इन कली आं बाक्तीके सोइक्ब कली मार देंत देंशा हना 16 मेकोमी ‘यहूदा डा पिपमी मेको कागजम पदेशो श्येत डा लोत्र, गो मेको श्येत यहूदा नु मेकेर बाक्ब मुर आन कली थमा पा गेनुड। 17 मारदे

हना मेकोपुकीम आं कली प्रोइशा, देवी देवता आन कली धूप चोम्तेकम। मिनु आन गुइम सेल्शो मूर्ति रे पा आं कली गाइक्पाइक्तीमी। मोपतीके गो एको रागी आ पर्वम गाइक्ताक्यी। मिनु मेको गाइशो मनाइक्ब' देंत। ब्यवस्था ३१:२९; ब्यवस्था ३२:२१-२३ 18 परमप्रभु यावे कली हिल्लो पथ सोइक्ब यहूदा डा पिप कली परमप्रभु यावे, इस्राएली आन परमप्रभुमी मार देंत देंशा हना 'गे आं लोव्र नेंतीवी। 19 गे आं कली टिचा दाक्शा, इ थुं आं डोंइती ब्रेमशो दुम्शा, गे सुर्ता पा इ वा खाक्शो ताता। मारदे हना गो यहूदा रागी नु मेकेर डा मुर आन पर्वम सराप रशा, मुर मबाक्तीक दुम्ब, देंती। गे मेको आ पर्वम आं डोंइती डाक्शो नेंता। 20 मिनु गे इ थुं नाइशशा बेक्नेवे। मिनु गो यहूदा कली गेशो ठेयब श्येत गे तचा ममाल्नेवे' दे मतो" दे परमप्रभुमी देंमाक्त। मिनु मेकोपुकीम मेको लोव्र पिप आ बाक्तीकेम चाक्गमे बाक्त। २राजा २०:१९; यसैया ५७:१-२

23

योसीयाहम परमप्रभु आ लोव्र टिशो

२इतिहास ३४:२९-३५:२५

1 मिनु नोले पिपम यहूदा नु यरूसलेम डा खाल्पा नेल्ल आन कली आ डोंइती बुक्चा, दे ब्रेत्थ सोइक्तीमी बाक्त। 2 मिनु पिप परमप्रभु यावे आ खिं लमाक्त। मिनु मेको नु यहूदा डा मुर नेल्ल, यरूसलेम डा मुर, चढेबपुकी, परमप्रभु यावे आ लोव्र पाइबपुकी नु आइक्च नु ठेयब मुर नेल्ल पिप नु परमप्रभु यावे आ खिं लमा बाक्त। मिनु पिपमी नेल्ल नेंशा, परमप्रभु यावे आ खिंम थिश्शो कबल डा लोव्र ब्रेक्शो कागज पढेवा बाक्त। 3 मिनु पिप थाम आ पुंम राप्शा, परमप्रभु यावे आ डोंइती कबल का पवा बाक्त। मेको कबल मार बाक्त देंशा हना, "गो परमप्रभु यावे आ शेंशो, आ देंशो लोव्र, आ फुल्लुम मुशा ब्रेक्शो लोव्र आं थुं नु रां नेल्लेमी टिशा पाइनुड। मोपा एको कागजम ब्रेक्शो कबल डा लोव्र नेल्ल खाप्नुड" देंमाक्त। मिनु मेको नोले मुर नेल्लेमी "गोपुकीम यो मेको कबल खाप्नीकी" देंमा बाक्त। प्रस्थान २४:३-८; यहोसु २४:२५

4 मेको नोले पिपमी नेल्ल क्येडा ठेयब चढेब हिल्लीयाह, मेको आ नोले डा अरु चढेबपुकी नु लाप्चो खाल पाइब आन कली "परमप्रभु यावे आ खिं रे बाल देवता, अशेराह देवी, नां तास्ला नु सोरुल आन कली सेल्शो मारेइ मारेइ बोसपुकी गुंइदीन" दे अरेवा बाक्त। मिनु मेकोपुकीमी मेको नेल्ल यरूसलेम डा किद्रोन खोल्साम चोव्रमे बाक्त। मिनु पुलु चहिं बेथेलम लदमे बाक्त। २राजा २१:३ 5 डोंइती यहूदा डा पिपपुकीम यहूदा डा सहर नु यरूसलेम डा डांडा डा थानम बाक्शो देवी देवता आन कली चढेब आन कली वोइशो बाक्मा बाक्त। मेकोपुकीमी बाल, नां, तास्ला, सोरुल आन कली धूप चोइबाक्मा बाक्त। मिनु पिपम मेको आन कली गुंइपदा बाक्त। 6 मेकोमी अशेराह देवी आ मूर्ति पाइशो थाम परमप्रभु यावे आ खिं यरूसलेम रे गुंइशा, किद्रोन खोल्साम लाइशशा चोपाइक्मी बाक्त। मिनु मुरपुकीम मेको कली फुरक सेल्मे बाक्त। मिनु मेको आइक्च मुर आन तुरसुम फ्रामे बाक्त। २राजा २१:७ 7 मेकोमी तेल्लेम वोंइश मुर आन बाक्तीक प्रेल्मे बाक्त। मेको खिं, अशेराह देवी आ मूर्ति कली नु मीश मुर आन तोव्र प्रोव्रतीके परमप्रभु यावे आ खिं आ नेक्था बाक्शो बाक्माक्त। १राजा १४:२४ 8 योसीयाहमी यहूदा डा सहर रे चढेब नेल्ल आन कली गुंइदीमी बाक्त। मिनु गेबा सहर रे बेयर-शेबा सम्म डा डांडा डा थान आन कली ग्रान्ग्रा दिशो सेल्पदा बाक्त। मेकोमी सहर डा लाप्चो डा देवता थानपुकी प्रेप्पदा बाक्त। मेको सहर डा सासन पाइब यहोसु आ लाप्चो आ डोंइती गे बाक्माक्त। मेको सहर डा ठेयब लाप्चो आ पेरा गे बाक्माक्त। 9 मेको डांडा डा थान डा गेय पाइब चढेबपुकीम यरूसलेम डा परमप्रभु यावे आ खिं डा चढेतीकेम जाक्ने मचाप्बमे बाक्त। तन्न मेकोपुकीम आन वारच चढेबपुकी नु बोरब ओरुती मसुप्शो शोब्ले जाइबाक्मा बाक्त। 10 मिनु पिप योसीयाहम मोलेक कली आन तमी तौ क्योरशा चढेथ मजाक्मल, दे बेन-हिन्नोम बेंसीम बाक्शो तोफेथ थान कली ग्रान्ग्रा दिशो सेल्पदा बाक्त। २राजा १७:१७; लेवी १८:२१ 11 मेकोम यहूदा डा पिपपुकीम परमप्रभु यावे आ खिं ओव्रतीक लाप्चो आ डोंइती नां कली मान पचा कली सेल्शो शारा प्रेशशा ताइक्पाइक्मी बाक्त। मेको चहिं नाथान-मेलेक नें पाइशो मुर आ कोठा आ नेक्था बाक्माक्त। मिनु योसीयाहम नां कली मान पचा कली सेल्शो बग्गीपुकी क्रोइक्पाइक्मी बाक्त। 12 आहाज आ तार डा कोठा डा कौसीम यहूदा डा पिपपुकीम सेल्शो चढेतीकपुकी नु परमप्रभु यावे आ खिं डा लाङगा निम्फा गे डा मनस्सेम सेल्शो चढेतीकपुकी प्रेशशा, फस पोक्शा, मेको नेल्ल किद्रोन खोल्साम ताइक्पदा बाक्त। २इतिहास २८:२४; २राजा २१:४-५ 13 मिनु पिपमी यरूसलेम आ पूर्ब गे बाक्शो डांडा डा थान ग्रान्ग्रा दिशो सेल्पदा बाक्त। मेको खतम सेल्ब डांडा आ दक्खिन गे बाक्माक्त। मिनु मेकेर पिप सोलोमनमी सीदोनी आन ग्रान्ग्रा दिशो अशतोरैथ देवी आ मूर्ति, मोआब

डा ग्रांग्रा दिशो देवता केमोश आ मूर्ति नु अम्मोनी आन ग्रांग्रा दिशो देवता मोलेक आ मूर्ति आन थान सेल्पाइशो बाक्माक्त। मिनु योसीयाहमी मेको आ सेल्शो पूजा पतीक थान प्रेशा ग्रांग्रा दिशो सेल्पदा बाक्त। मेको मोलेक देवता कली मिल्लकोम यो देशो बाक्त। १राजा ११:७ १४ मिनु योसीयाहमी थान डा खुक्शो फुल्लु जिक्शा फस पोक्पाइक्मी बाक्त। मिनु मूर्ति पाइशो थाम एशशा मेको आ बाक्तीकेम मुर आन रुशेम प्रिपाइक्मी बाक्त।

१५ मिनु मेकोम इस्राएली आन कली पाप पपाइक्ब नेबात आ तौ येरोबामम बेथेल डा डांडाम सेल्शो थान यो प्रेप्पदा बाक्त। मेकोम चढेतीक नु थाम यो खतम सेल्पदा बाक्त। मेको थान क्रोइशशा, पुलु सेल्पदा बाक्त। मेकोमी मेको मूर्ति पाइशो थाम यो चोपदा बाक्त। मिनु मेको कली फस पोक्पदा बाक्त। मेकोम अशेराह आ थाम यो चोपदा बाक्त। १राजा १२:३२ १६ मेको नोले योसीयाहम एर ओंथ कोव्रडा बाक्त। मिनु मेकोमी डांडाम बाक्शो तुरसपुकी तवा बाक्त। मिनु मेकोमी तुरस रे रुश गुंडपदा बाक्त। मिनु मेकोम चढेतीक ग्रांग्रा दिशो सेल्चा कली मेको चढेतीकेम चोपाइक्मी बाक्त। परमप्रभु आ मुरुमी, येरोबाम चढेतीकेम बाक्मेनु, देशो परमप्रभु यावे आ लोव्र गाप्चा कली योसीयाहमी मो पवा बाक्त। मिनु पिपमी एर ओंथ कोव्रशा, मोदेशो नोले दुम्ब लोव्र पाइब परमप्रभु आ मुर आ तुरस तवा बाक्त। १राजा १३:२ १७ मिनु पिपमी “मेरे आं तशो तुरस सु के बाक्मे?” दे हिल्लो पामी बाक्त। मिनु मेको सहर डा मुरपुकीमी “मेरे परमप्रभु आ मुर आ तुरस बाक्ब। मेको यहूदा रे जाक्शा, बेथेल डा चढेतीकमी येरोबाम आ डोंइती मुल इन पशो गेय आ पर्बम नोले दुम्ब लोव्र पाइब, परमप्रभु आ मुर आ तुरस बाक्ब” देमा बाक्त। १राजा १३:३०-३२ १८ मिनु मेकोमी “मो हना बाक्चा गेन। सुडम मेको आ रुश मथिने” देमाक्त। मोपतीके मुरपुकीमी मेको सामरीया रे जाक्शो परमप्रभु यावे आ लोव्र पाइब आ रुश नु यहूदा रे जाक्शो परमप्रभु आ मुर आ रुश चहिं मशोल्मे बाक्त। १९ मिनु मेको प्रोंइशा पिप योसीयाहम इस्राएल डा पिपपुकीम सामरीया डा सहरपुकीम सेल्पाइशो डांडा डा थान प्रेप्पदा बाक्त। मुरपुकीमी मेको थान सेल्शा पूजा पा परमप्रभु यावे कली गाइक्पाइशो बाक्मा बाक्त। मिनु योसीयाहमी मेको आन कली बेथेलम पशो खोदेशो ग्रांग्रा दिशो सेल्पाइक्मी बाक्त। २० पिप योसीयाहमी मेको डांडा डा थानपुकीम बाक्शो चढेतीक तार आन चढेब नेल्ल साइक्पाइक्मी बाक्त। मिनु मेको चढेतीक आन तार मुर आन रुश चोपाइक्मी बाक्त। मिनु मेको नोले यरूसलेम लेम्माक्त।

पास्सा नाक्त डा चाड लेंशा मानेशो

२१ मिनु पिपमी मुर नेल्ल आन कली “परमप्रभु यावे, इन परमप्रभु आ कबल डा लोव्र ब्रेक्शो खोदेशो पा पास्सा नाक्त डा चाड मानेचा मालनीनी” दे माइक्मी बाक्त। ब्यवस्था १६:१-८; यहोसु ५:१०-११ २२ इस्राएली आन कली निसाफ पाइबपुकीम हुकुम पामे रे नु इस्राएल नु यहूदा डा पिपपुकीम सासन पामे ना रे मुल सम्म मोदेशो पा पास्सा चाड ममानेशो बाक्मा बाक्त। न्यायाधीस २:१०, १६, १७ २३ तन्न पिप योसीयाहम सासन पवा आ १८ बर्सम यरूसलेमम मेको परमप्रभु यावे आ पास्सा नाक्त डा चाड मानेमे बाक्त।

२४ परमप्रभु यावे आ खिंमी चढेब हिल्लीयाहमी थिश्शो ब्रेक्शो लोव्र खाप्चा कली योसीयाहम बेक्शो मुर नु लोव्र पाइब, लिंक्यु कोव्रब नु खिं डा मूर्ति नेल्ल, यहूदा नु यरूसलेमम बाक्शो ग्रांग्रा दिशो मारेइ मारेइ नेल्ल ताइक्पाइक्मी बाक्त। लेवी २०:२७; ब्यवस्था २९:१६-१७ २५ मोपा योसीयाह खोदेशो पा आ थुं नेल्ले आ रां नेल्ले नु आ सक्ति नेल्लेमी मोसा आ ब्रेक्शो लोव्र टिशा गाक्शा परमप्रभु यावे गे लेप्ब मेको आ डोंइती नु नोले तेकोइ पिप मदुम्मा बाक्त। २राजा १८:५; ब्यवस्था ६:५

२६ मो हना यो परमप्रभु यावेम आ ठेयब पा गाइशो चुरशो मलेत्ता बाक्त। यहूदा आ पर्बम मेको आ गाइशो मनाइसे बाक्त। मिनु मनस्सेमी यो मेको कली थाम्पा गाइक्पाइशो बाक्माक्त। २राजा २१:११-१६ २७ मिनु परमप्रभु यावेमी “गो दोपा इस्राएल कली गुंडु, मोपा यहूदा कली यो आं डोंइती रे गुंडनुड। मिनु गो आं योव्रशो यरूसलेम सहर नु आं नें बाक्ब देशो आं खिं प्रोंइनुड” देशो बाक्माक्त। २राजा १७:१८; १राजा ८:२९

योसीयाह बेक्शो

२इतिहास ३६:१-८

२८ योसीयाह आ पशो अरु गेय, मेको आ पशो नेल्ल, मार, मेको यहूदा डा पिप आन इतिहासम ब्रेक्शो मबाक्बा डा? २९ पिप योसीयाहम सासन पवा ना इजीप्त डा पिप फाराओ नेको अस्सुर डा पिप नु लडाइ पचा कली युफ्रेटीस खोला गे लमाक्त। मिनु पिप योसीयाह फाराओ नेको नु लडाइ पचा कली मेकेर लमाक्त। तन्न नेकोम योसीयाह नु लडाइ पा मेको कली मेगीददोम सदा बाक्त। ३० मिनु मेको आ गेय पाइबपुकीम मेको आ बेक्शो रां बग्गीम कुर पा

मेगीददो रे यरूसलेमम चाक्गमे बाक्त। मिनु मेको कली आ तुरसुमीन वोदमे बाक्त। मिनु मेको रागी डा मुरपुकीम मेको आ तौ येहो-अहाज कली तेल लुक्शा, मेको आ पा डा पिप सेल्मे बाक्त।

यहूदा डा पिप येहो-अहाज

31 येहो-अहाज पिप दुम्मेनु २३ बर्स दुम्शो बाक्माक्त। मेकोम यरूसलेममी महिना सां सासन पवा बाक्त। मेको आ ममा आ नें हामुतल बाक्माक्त। मेको लिब्ना डा येरमीया आ तमी बाक्माक्त। 32 मेकोमी आ किकी पिपी खोदेशो पा, परमप्रभु यावे आ डोंइती मार मरिम्शो बाक्मे, मेको पवा बाक्त। 33 मिनु फाराओ नेकोमी मेकोम यरूसलेमम सासन मपवल, दे साडलोम फ्रेंशा हमाथ रागी डा रिब्लामी चोक्शा वोदा बाक्त। मिनु मेकोमी यहूदा कली सहे का टलेन्ट चांदी नु टलेन्ट का सुन तिरो थाप्पदा बाक्त। टलेन्ट का ३४ किलो बाक्ब। इजीकीएल १९:४ 34 मिनु फाराओ नेकोमी योसीयाह आ तौ एल्याकीम कली मेको आ आफ योसीयाह आ पा डा पिप सेल्शा वोदा बाक्त। मिनु फाराओ नेकोमी मेको आ नें एल्याकीम रे येहो-याकीम वोदा बाक्त। तन्न मेकोमी येहो-अहाज कली इजीप्त रागी लदा बाक्त। मिनु मेको इजीप्त उइ बेक्माक्त। १इतिहास ३:१५ 35 मिनु फाराओ नेको आ पुंइशो सुन नु चांदी थाप्चा कली येहो-याकीमम आ रागी डा मुर आन कली तिरो थाप्पाइक्मी बाक्त। मिनु देशो खोइ तिरो थाप्चा कली मेकोमी आ रागी डा मुरपुकी रे सुन नु चांदी पोक्गा बाक्त। २राजा १५:२०

यहूदा डा पिप येहो-याकीम

36 येहो-याकीम पिप दुम्मेनु मेको २५ बर्स दुम्शो बाक्माक्त। मेकोम यरूसलेममी ११ बर्स सासन पवा बाक्त। मेको आ ममा आ नें जेबीदाह बाक्माक्त। मेको रूमाह सहर डा पेदायाह आ तमी बाक्माक्त। 37 मिनु मेकोमी आ किकी पिपी खोदेशो पा, परमप्रभु यावे आ डोंइती मार मरिम्शो बाक्मे, मेको पवा बाक्त।

24

नेबुकदनेसरमी लडाइ तोशो

1 येहो-याकीममी सासन पवा ना बेबीलोन डा पिप नेबुकदनेसर मेको रागी नु लडाइ पथ जाक्माक्त। मिनु बर्स सां सम्म येहो-याकीम मेको आ सासनम बाक्माक्त। तन्न बर्स सां नोले मेकोमी आ थुं फाइश्शा, नेबुकदनेसर कली मटिवा बाक्त। येरमीया २२:१३-१९ 2 मिनु परमप्रभु यावेमी यहूदा नु लडाइ पचा कली कल्दी, अरामी, मोआबी नु अम्मोनी आन कली सोइक्तीमी बाक्त। परमप्रभु यावेमी आ गेय पा आ लोव पाइब आन देशो खोदेशो दुम्पाइश्शा यहूदा कली खतम पोक्पाइक्चा कली मेको आन कली सोइक्तीमी बाक्त। 3 परमप्रभु यावेमी आ मिम्शो खाप्शा, मनस्से आ पशो मरिम्शो नु आ पाप आ पर्बम मेको आन कली आ डोंइती रे गुंइचा कली मो पशो बाक्माक्त। २राजा २१:१०-१६; २राजा २३:२६-२७ 4 मारदे हना मनस्सेम दोस मताइब मुर आन कली साइश्शा, यरूसलेम कली हुशेम प्रिंशो बाक्माक्त। मिनु परमप्रभु यावेमी मेको कली माफ गेने मबिश्शो बाक्माक्त। 5 मिनु येहो-याकीम आ पशो अरु गेय, मेको आ पशो नेल्ल, मार, मेको यहूदा डा पिप आन इतिहासम ब्रेक्शो मबाक्बा डा? 6 मिनु येहो-याकीन बेक्माक्त। मिनु मेको आ पा डा आ तौ येहो-याकीन पिप दुम्माक्त। 7 इजीप्त डा पिप आ रागी प्रोना नोले लेंशा मजाक्माक्त। मारदे हना बेबीलोन डा पिपम इजीप्त डा खोला रे युफ्रेटीस खोला सम्म डा रागी नेल्ल आ के सेल्शो बाक्माक्त।

यहूदा डा पिप येहो-याकीन

२इतिहास ३६:९-१०

8 येहो-याकीन पिप दुम्मेनु १८ बर्स दुम्शो बाक्माक्त। मेकोमी यरूसलेमम महिना सां सासन पवा बाक्त। मेको आ ममा आ नें नहुश्ता बाक्माक्त। मेको यरूसलेम डा एल्नाथान आ तमी बाक्माक्त। येरमीया २२:२४-३० 9 येहो-याकीनमी आ आफ खोदेशो पा, परमप्रभु यावे आ डोंइती मार मरिम्शो बाक्मे, मेको पवा बाक्त।

10 मेना बेबीलोन डा पिप नेबुकदनेसर आ लडाइ पाइबपुकी यरूसलेमम लडाइ पथ जाक्शा, मेको सहर कली पुम्शो बाक्मा बाक्त। 11 मिनु आ लडाइ पाइबपुकीम मेको सहर पुम्दमेनु, बेबीलोन डा पिप नेबुकदनेसर जाक्माक्त। 12 मिनु यहूदा डा पिप येहो-याकीन, नेबुकदनेसर कली जिम्मा गेसे बाक्त। मिनु मेको नु मेको आ ममा, आ गेय पाइबपुकी, आ ठेयब मुरपुकी नु आ लडाइ पाइब आन ठेयब मुर नेल्ल बेबीलोन डा पिप कली जिम्मा गेसमा बाक्त। मिनु बेबीलोन डा पिपम सासन पवा आ ८ बर्सम येहो-याकीन कली ग्याइश्शा चोक्गा बाक्त।

13 मेकोमी परमप्रभु यावे आ खिं डा शोंप नु पिप आ खिं डा शोंप नेल्ल लदा बाक्त। मेकोमी सोलोमनम सेल्शो परमप्रभु यावे आ खिं डा सुन के बोस खोइशशा लदा बाक्त। मोपा परमप्रभु यावे आ देशो लोत्र गाम्माक्त। २राजा २०:१७ 14 मेकोपुकीम यरूसलेम डा ठेयब मुर, लडाइ पाइब आन ठेयब मुर नेल्ल, लडाइ पाइब नेल्ल १० हजार मार मार सेल्स जोक्ब नु तुप्तील नेल्ल ग्याइशशा लदा बाक्त। थम पुडग आन कली ला प्रोंइशा वोदा बाक्त। येरमीया २४:१ 15 नेबुकदनेसरमी येहो-याकीन कली ग्याइशशा बेबीलोनम लदा बाक्त। पिप आ ममा, पिप आ मीशपुकी, मेको आ ठेयब गेय पाइबपुकी नु नेल्ल क्येडा जोक्ब तुइक्ब आन कली यरूसलेम रे ग्याइशशा बेबीलोन लदा बाक्त। येरमीया २२:२६ 16 बेबीलोन डा पिपमी ७ हजार बोल्यो लडाइ पाइब नु हजार का मार मार सेल्स जोक्ब नु तुप्तील आन कली ग्याइशशा बेबीलोन लाइक्मी बाक्त। मेको नेल्ल लडाइ पचा कली बोल्यो मुर बाक्मा बाक्त। 17 बेबीलोन डा पिपमी येहो-याकीन आ बकान्छा मत्तन्याह कली मेको आ पा डा पिप सेला बाक्त। मिनु मेको आ नें सिदकीयाह वोदा बाक्त।

यहूदा डा पिप सिदकीयाह

२इतिहास ३६:११-२१; येरमीया ५२:१-३०

18 सिदकीयाह पिप दुम्मेनु, मेको २१ बर्स दुम्शो बाक्माक्त। मिनु मेकोमी यरूसलेमम ११ बर्स सासन पवा बाक्त। मेको आ ममा आ नें हामुतल बाक्माक्त। मेको लिब्ना सहर डा येरमीया आ तमी बाक्माक्त। 19 मेकोम येहो-याकीमम पशो खोदेशो पा परमप्रभु यावे आ डोंइती मार मरिम्शो बाक्मे, मेको पवा बाक्त। २राजा २३:३७ 20 मिनु परमप्रभु यावे आ गाइशशोम पतीके यरूसलेम नु यहूदा डा मुर नेल्ल आन कली आ डोंइती रे ग्रुंडीमी बाक्त। मिनु नोले सिदकीयाहमी बेबीलोन डा पिप कली मटिवा बाक्त। २राजा २३:२७

25

यरूसलेम खतम दुम्शो

1 सिदकीयाहम सासन पशो ९ बर्स १० महिना डा १० नाक्त बेबीलोन डा पिप नेबुकदनेसर आ लडाइ पाइब नेल्ल चाक्शा यरूसलेम नु लडाइ पथ जाक्माक्त। मिनु यरूसलेम कली पुम्शा एर ओंथ गारो डोइक्तीक सेल्मे बाक्त। येरमीया ३४:१ 2 पिप सिदकीयाहमी सासन पशो ११ बर्स दुम्मेनु, सहर पुम्दमे बाक्त। 3 मिनु मेको ४ महिना डा ९ नाक्त सहरम थम ठेयब अन्काल दुम्माक्त। मिनु मेको रागीम मुर आन कली जचा थोत्रक मारेइ मबाक्माक्त। 4 मेना पिप नु लडाइ पाइब नेल्ल गारो होइशशा, नाक्दो प्रोकमा बाक्त। मेको पिप आ रू रे गारो निक्शी आस दाते डा लाप्चो रे कल्दीपुकी सहर आ एर ओंथ बाक्तेक्म हना यो, प्रोकमा बाक्त। मोपा मेकोपुकी अराबाह गे प्रोकमा बाक्त। 5 तन्न कल्दी डा लडाइ पाइबपुकीम पिप कली खेदा पामे बाक्त। मिनु मेको कली यरीको डा दिंममी थित्मे बाक्त। आ लडाइ पाइब नेल्ल मेको कली प्रोंइशा एर ओंथ ब्रमा बाक्त। 6 मिनु मेको कली ग्याइशशा बेबीलोन डा पिप आ डोंइती रिब्ला सहरम चाक्गमे बाक्त। मिनु मेकोमी मेको आन कली निसाफ पवा बाक्त। 7 मेकोपुकीम सिदकीयाह आ तौ आन कली मेको आ डोंइतीन सदमे बाक्त। मिनु नोले सिदकीयाह आ मिक्च पुक्तमे बाक्त। मिनु मेको कली कांसा के साडलोम पाइशशा बेबीलोन लदमे बाक्त। २सामुएल १२:१०

यहूदा डा मुर आन कली लाइशशो

8 बेबीलोन डा पिप नेबुकदनेसरमी सासन पशो १९ बर्स ५ महिना डा ७ नाक्त, नेबुकदनेसर कली खाल पाइब आन ठेयब मुर नेबुजरादान यरूसलेम जाक्माक्त। 9 मिनु मेकोमी परमप्रभु यावे आ खिं, पिप आ दरवार, यरूसलेम सहर डा खिं नेल्ल नु ठेयब खिं नेल्ल मी सुइक्ता बाक्त। 10 मेको पिप कली खाल पाइब आन ठेयब मुर आ हुकुमम बाक्शो कल्दी लडाइ पाइबपुकीम यरूसलेम आ एर ओंथ डा गारो नेल्ल प्रेत्मे बाक्त। 11 मेको पिप कली खाल पाइब आन ठेयब मुर नेबुजरादानमी सहरम प्रोंइचा पुंडसीशो मुर नु अरु बेबीलोन डा पिप कली जिम्मा गेंसीशो मुर आन कली ग्याइशशा बेबीलोन लाइक्मी बाक्त। 12 तन्न मेको पिप कली खाल पाइब आन ठेयब मुरुम अडगुर रू रोकचा नु रू दोचा कली थम पुडग आन कली चहिं प्रोंइशा वोइक्मी बाक्त।

13 मिनु कल्दीपुकीमी परमप्रभु यावे आ खिंम बाक्शो कांसा के थामपुकी, निप्पाइक्तीकपुकी नु कांसा के ठेयब बोस प्रोल्शा आइक्च सेल्शा बेबीलोन लदमे बाक्त। येरमीया २७:१९-२२ 14 मेकोपुकीम ग्योंबपुकी, बेल्लापुकी, सल्दो थेप्तीके थनारोपुकी, कचौरापुकी, थनौरोपुकी नु चढ़ेतीकेम चलेतीक कांसा के मारेइ मारेइ ग्योंब नेल्ल लदमे

बाक्त। 15 मेकोपुकीमी मी कुरतीके नु बस नेल्ले लदमे बाक्त। मिनु पिप कली खाल पाइब आन ठेयब मुरुमी सुन नु चांदीम सेल्शो मारेइ मारेइ लदा बाक्त। 16 सोलोमनमी परमप्रभु यावे आ खिं कली सेल्शो थाम निक्शी, ठेयब बस नु निप्पाइक्तीक सेल्शो कांसा नाक्ने मचाप्चा डा बाक्मा बाक्त। १राजा ७:१५; १राजा ७:२३; १राजा ७:२७ 17 मेको थाम का १८ कुबीत लाइशो बाक्माक्त। मिनु मेको थाम का आ पिया कुबीत सां लाइशो बाक्माक्त। मिनु मेको कांसा के जालीम आ एर ओंथ क्युकशा हिरशो दारीम बाक्माक्त। अर्को थाम यो जालीम हिरशा मेको खोदेशो पा सेल्शो बाक्माक्त। कुबीत का आधा मिटर खोदेशो बाक्ब।

18 मिनु पिप कली खाल पाइब आन ठेयब मुरुम ठेयब चढेब सेरायाह नु मेको आ दी डा सेफन्याह नु लाप्चो कोव्रब सां आन कली यो ग्याइशशा लाइक्मी बाक्त। 19 मेकोमी सहरम मुल यो लीशो आन दाते डा लडाइ पाइब आन ठेयब मुर नु ५ जना पिप कली सल्ला गेब आन कली यो लाइक्मी बाक्त। मेकोम रागी डा मुर आन कली लडाइ पाइब मुर सेल्चा कली योव्रब ब्रेक्ब ठेयब मुर नु सहरम थिश्शो ६० जना मुर आन कली यो लाइक्मी बाक्त। 20 मेको पिप कली खाल पाइब आन ठेयब मुर नेबुजरादानमी मेको आन कली बेबीलोन डा पिप आ बाक्तीक रिब्ला सहरम चाक्मी बाक्त। 21 मिनु बेबीलोन डा पिपम मेको आन कली हमाथ आ रागीम रिब्लाम साइक्पाइक्मी बाक्त। मोपा यहूदा डा मुर आन रागी रे ग्याइशशा लाइक्चा पुंडसमा बाक्त। २राजा २३:३३

गेदाल्याहमी सासन पशो

येरमीया ४०:५; येरमीया ४१:३

22 बेबीलोन डा पिप नेबुकदनेसरमी शाफान आ चच अहीकाम आ तौ गेदाल्याह कली यहूदाम प्रोइशा वोइशो इच्का खोइ मुर आन कली सासन पाइब सेल्शा वोदा बाक्त। 23 मिनु लडाइ पाइब आन ठेयब मुर नेल्ल नु मेको आन मुरपुकीम बेबीलोन डा पिपम गेदाल्याह कली सासन पाइब सेल्शो लोव्र नेन्मे बाक्त। मिनु मेको नेल्ल गेदाल्याह आ बाक्तीके मिस्पा सहरम जाक्मा बाक्त। मेको नेथन्याह आ तौ इश्माएल, कारेआह आ तौ योहानान, नेतोफाह सहर डा तन्हुमेथ आ तौ सेरायाह, माकाथी आ तौ याजन्याह नु मेको आन मुरपुकी जाक्मा बाक्त। 24 मिनु गेदाल्याहमी मेकोपुकी नु आन मुर आन कली कसम जशा रिम्शो लोव्र पाइक्मी बाक्त। मिनु मेकोम “कल्दी डा ठेयब मुर आन कली तशा महिनीन। रागीम बाक्कीन। मिनु बेबीलोन डा पिप आ गेय पने। मिनु इन कली रिम्शो दुम्ब” दे माइक्मी बाक्त। 25 तन्न ७ महिनाम पिप आ खिं डा मुर एली-शामा आ चच, नेथन्याह आ तौ इश्माएलम १० जना मुर आन कली चाक्शा जाक्माक्त। मिनु मेकोमी गेदाल्याह नु मेको नु मिस्पा सहरम बाक्ब यहूदा नु कल्दी डा मुर आन कली तुप्शा साइक्मी बाक्त। 26 मोपतीके कल्दी आन क्येडा हिंशा आइक्च रे ठेयब मुर नु लडाइ पाइब आन ठेयब मुर नेल्ल प्रोक्शा इजीप्त रागी जाक्दीम्मा बाक्त। ब्यवस्था २८:६८

येहो-याकीन कली प्रोइशो

येरमीया ५२:३१-३४

27 यहूदा डा पिप येहो-याकीन ग्याइशशा लाइशो ३७ बर्स, १२ महिना डा २७ नाक्त दुम्मेनु, प्रोइचा पुंडसे बाक्त। मिनु एवील-मेरोदक बेबीलोन डा पिप दुम्शा सासन पशो आ डोंइती डा बर्सम मेको कली प्रोना बाक्त। २राजा २४:१५ 28 मेकोमी येहो-याकीन कली रिम्शो लोव्र पवा बाक्त। मिनु मेको कली बेबीलोनम बाक्शो पिप आन दातेमी नेल्ल क्येडा ठेयब सेला बाक्त। 29 मोपा येहो-याकीनमी आ चोक्सीशो वा प्रुदा बाक्त। मिनु आ लीशो नाक्त नेल्ल पिप नु बाक्शा जवा बाक्त। 30 बेबीलोन डा पिपमी मेको कली ब्रोंइम सम्म नाक्त किंत किंत आ माल्शो मारेइ मारेइ गेवा बाक्त।

१ इतिहास

ब्रेक्ब मुर: एको इतिहास किताब निक्शी हिब्रू बाइबलम किताब का बाक्त। मेकेर राजा किताब निक्शी नु सामुएल किताब निक्शीम मब्रेक्शो लीशो लोत्र ब्रेक्शो बाक्ब। एको किताब आ ब्रेक्स एज्रा आ ब्रेक्शो खोदेशो तांडसीब। मिनु एज्रा किताब इतिहास किताब नु थम गारचा डा बाक्त। २इतिहास ३६:२२-२३ नु एज्रा १:१-३ तन्न एज्रा ब्रेक्ब मुर बाक्त हना यो, अर्को मुरुम यो लोत्र तेम्शो बाक्तेक्म। १इतिहास ३:१९-२४

गेना दुम्शो: एको किताब रागी सेल्चा रे पिप कोरेस आ सासन पशो ५३६ बि. सी. सम्म डा बाक्ब। तन्न पिप दाऊद आ पर्बम शुश लोत्र बाक्ब।

मार ब्रेक्शो: एको किताब इस्राएली आन इतिहासम तेम्शो लोत्र बाक्ब।

१. आदम रे इस्राएल आ १२ थर १इतिहास १:- १इतिहास ९:-

२. पिप दाऊद आ सासनम इस्राएली आन इतिहास १इतिहास १०:- १इतिहास २९:-

आदम रे अब्राहाम सम्म डा मुर

1 आदम आ तौ सेथ बाक्माक्त। सेथ आ तौ एनोश बाक्माक्त। उत्पत्ती ५:- 2 एनोश आ तौ केनान बाक्माक्त। केनान आ तौ मा-हालालेल बाक्माक्त। मा-हालालेल आ तौ यरेद बाक्माक्त। 3 यरेद आ तौ हनोक बाक्माक्त। एनोक आ तौ मेथुसेलाह बाक्माक्त। मेथुसेलाह आ तौ लमेक बाक्माक्त। 4 लमेक आ तौ नोआह बाक्माक्त। नोआह आ तौ शेम, हाम नु यफेथ बाक्मा बाक्त।

यफेथ आ तौ चच

5 यफेथ आ तौ गोमेर, मागोग, मादै, यावान, तूबाल, मेशेक नु तिरास बाक्मा बाक्त। उत्पत्ती १०:२-५ 6 गोमेर आ तौ अश्केनज, दिफाथ नु तोगारमाह बाक्मा बाक्त। 7 यावान आ तौ एलीशाह, टारशीश, कितीम नु रोदानीम बाक्मा बाक्त।

हाम आ तौ चच युइ

8 हाम आ तौ कूश, इजीप्त, पूत नु कनान बाक्मा बाक्त। उत्पत्ती १०:६-२० 9 कूश आ तौ शेबा, हवीलाह, साब्ताह, रामाह नु साब्तेका बाक्मा बाक्त। रामाह आ तौ शेबा नु देदान बाक्सा बाक्त। 10 कूश निम्रोद आ आफ बाक्माक्त। निम्रोद रागी आ डोंइती सक्ति पाइशो मुर का बाक्माक्त।

11 इजीप्त माइशो मुर लूदीम अनामीम, लेहाबीम नु नफ्तुहीम, 12 पथुसीम, कस्लुहीम, काफतोरीम आन आफ बाक्माक्त। मेको रे पलिस्ती दुम्शो बाक्मा बाक्त।

13 कनान माइशो मुर आ डोंइती थिशो तौ सीदोन नु हेथ आस आफ बाक्माक्त। 14 मेको निक्शी रे यबुसी, एमोरी, गिरगाशी, 15 हिब्वी, अरकी, सिनी, 16 अरवादी, सेमारी नु हमार्थी दुम्शो बाक्मा बाक्त।

शेम आ तौ चच युइ

17 शेम आ तौ एलाम, अश्शुर, अरपक्शाद, लूद, अराम, ऊज, हुल, गेथेर नु मेशेक बाक्मा बाक्त। उत्पत्ती १०:२१-३० 18 अरपक्शाद शेलाह आ आफ बाक्माक्त। मिनु शेलाह एबेर आ आफ बाक्माक्त। 19 मिनु एबेरमी तौ निक्शी थिवा बाक्त। का आ नें पेलोग बाक्माक्त। मेको थिशो ना रागी योक्शो बाक्माक्त। मेको आ लोक्ब आ नें योक्तन बाक्माक्त। उत्पत्ती ११:१-९ 20 मिनु योक्तन आ चच युइ अल्मोदाद, शेलेफ, हासार-मावेथ, येराह, 21 हदोराम, उजाल, दिकलाह, 22 एबाल, अबीमा-एल, शेबा, 23 ओफीर, हवीलाह नु योबाब बाक्मा बाक्त। मेको नेल्ल योक्तन आ चच युइ बाक्मा बाक्त। उत्पत्ती ११:१०-२६

24 शेम रे अब्राम सम्म सु सु बाक्मा बाक्त देंशा हना, अरपक्शाद, शेलाह, 25 एबेर, पेलोग रेऊ, उत्पत्ती ११:१०-२६ 26 सेरूग, नाहोर, तेराह, 27 नु अब्राम बाक्मा बाक्त। अब्राम कली अब्राहाम यो देंबाक्मा बाक्त।

अब्राहाम आ तौ चच युइ

28 अब्राहाम आ तौ निकशी इसहाक नु इश्माएल बाक्सा बाक्त। उत्पत्ती २१:३; उत्पत्ती १६:१५ 29 इश्माएल आ डोंइती थिशो तौ नेबायोथ बाक्माक्त। मेको आ नोले डा तौ केदार, अदबेल, मिब्साम, उत्पत्ती २५:१३-१६ 30 मिशमा, दुमा, मस्सा, हादाद, तेमा, 31 येतुर, नाफीश नु केदमा बाक्सा बाक्त। मेको नेल्ल इश्माएल आ तौ बाक्सा बाक्त।

32 अब्राहाम आ नोले चाक्शो मीश केतुराहमी जिम्नान, योकशान, मेदान, मिदयान, इश्बाक नु शुआह थीमी बाक्त। मिनु योकशान आ तौ शेबा नु देदान बाक्सा बाक्त। उत्पत्ती २५:१-४ 33 मिदयान आ तौ एफाह, एफेर, हनोक, अबीदा नु एल्दाह बाक्सा बाक्त। मेको नेल्ल केतुराह आ तौ चच बाक्सा बाक्त।

34 अब्राहाम आ तौ इसहाक बाक्सा बाक्त। मिनु इसहाक आ तौ निकशी एसाव नु इस्राएल बाक्सा बाक्त। उत्पत्ती २५:१९-२६ 35 एसाव आ तौ एलीफाज, रूएल, येऊश, यालाम नु कोराह बाक्सा बाक्त। उत्पत्ती ३६:१०-१४, २०-२८ 36 एलीफाज आ तौ तेमान, ओमार, सेफी, गाताम, केनाज, तिम्ना नु अमालेक बाक्सा बाक्त। 37 रूएल आ तौ नाहाथ, जेराह, शम्माह नु मिज्जा बाक्सा बाक्त।

एदोम आ डोंइती डा मुर

38 सेइर आ तौ लोतान, शोबाल, सिबोन, अनाह, दीशोन, एजेर नु दीशान बाक्सा बाक्त। 39 लोतान होरी नु होमाम आ किकी पिपी बाक्सा बाक्त। मिनु लोतान आ समी तिम्ना बाक्सा बाक्त। 40 शोबाल अल्यान, मानाहाथ, एबाल, शेफी नु ओनाम आ थर डा किकी पिपी बाक्सा बाक्त। सिबोन आ तौ आइयाह नु अनाह बाक्सा बाक्स। 41 अनाह आ तौ दीशोन बाक्सा बाक्त। दीशोन आ तौ हाम्नान, एशबान, इथान नु केरान बाक्सा बाक्त। 42 एजेर आ तौ बिल्हान, जावान नु याकान बाक्सा बाक्त। दीशान आ तौ ऊज नु अरान बाक्सा बाक्त।

एदोम डा पिपपुकी

43 इस्राएल रागीम पिप दुम्चा क्येडा डोंइती एदोम रागीमी बेओर आ तौ बेला पिप दुम्शा बाक्शो बाक्सा बाक्त। मेको आ सहर दिनहाबा बाक्सा बाक्त। उत्पत्ती ३६:३१-४३ 44 मिनु बेला बेकम नोले बोज्रा सहर डा जेराह आ तौ योबाब पिप दुम्माक्त। 45 मिनु योबाब बेकम नोले तेमान डा मुर आन रागी डा हुशाम पिप दुम्माक्त। 46 मिनु हुशाम बेकम नोले बेदाद आ तौ हादाद पिप दुम्माक्त। मेकोम मोआब रागीम मिदयानी आन कली लडाइ पा फूमी बाक्त। मेको आ सहर आ नें अवीथ बाक्सा बाक्त। 47 मिनु हादाद बेकम नोले मास्केकाह सहर डा सम्ला पिप दुम्माक्त। 48 मिनु सम्ला बेकम नोले युफ्रेटीस खोला आ नेक्था डा रेहोबोथ डा शावल पिप दुम्माक्त। 49 मिनु शावल बेकम नोले आकबोर आ तौ बाल-हनान पिप दुम्माक्त। 50 मिनु बाल-हनान बेकम नोले हादाद पिप दुम्माक्त। मेको आ सहर आ नें पाही बाक्सा बाक्त। मेको आ मीश आ नें मेहेताबेल बाक्सा बाक्त। मेको मात्रेद आ तमी, मे-जाहाब आ चच बाक्सा बाक्त। 51 मिनु हादाद बेकसा बाक्त। एदोम रे दुम्शो थरपुकी तिम्ना, अल्याह, येथेथ, 52 ओहोली-बामा, एलाह, पिनोन, 53 केनाज, तेमान, मिब्सार, 54 मग्दीएल नु यिराम बाक्सा बाक्त। मेको नेल्ल एदोम रे दुम्शो थर बाक्सा बाक्त।

2

इस्राएल माइशो याकूब आ तौ

1 इस्राएल आ तौ रूबेन, सिमियोन, लेवी, यहूदा, इस्साकार, जबूलून, 2 दान, योसेफ, बेन्यामीन, नाप्ताली, गाद नु आशेर बाक्सा बाक्त। उत्पत्ती ३५:२२-२६

यहूदा आ तौ चच

इतिहास ४:-

3 यहूदा आ तौ एर, ओनान नु शेलाह बाक्सा बाक्त। मेको आन ममा कनानी मीश बाथ-शुआ बाक्सा बाक्त। मिनु यहूदा आ डोंइती थिशो तौ एरमी परमप्रभु यावे आ डोंइती मरिम्शो पवा बाक्त। मोपतीके परमप्रभु यावेमी मेको कली सदा बाक्त। उत्पत्ती ३८:१-७ 4 मिनु यहूदा आ चाइमी तामारमी यहूदा रे पा पेरेस नु जेराह थिम्सी बाक्त। मिनु यहूदा आ तौ नेल्ल पा ५ जना दुम्मा बाक्त। उत्पत्ती ३८:२७-३०

5 पेरेस आ तौ हेसोन नु हामुल बाक्सा बाक्त। उत्पत्ती ४६:१२ 6 जेराह आ तौ जिप्ती, एथान, हेमान कल्कोल नु दारा बाक्सा बाक्त। मेको नेल्ल ५ जना बाक्सा बाक्त। 7 कारमी आ तौ आकान बाक्सा बाक्त। मेकोमी इस्राएली आन कली शुश श्येत गोवा बाक्त। परमप्रभु आ थोवक लदा बाक्त। यहोसु ७:- 8 मिनु एथान आ तौ अजारयाह बाक्सा बाक्त।

राम आ तौ चच

9 हेस्रोन आ तौ येराहमेल, राम नु कलूबै बाक्मा बाक्त। रूथ ४:१९-२२; मत्ती १:३ 10 राम अम्मीनादाब आ आफ बाक्माक्त। अम्मीनादाब नहशोन आ आफ बाक्माक्त। मेको यहूदा आ तौ आन दाते डा नेल्ल क्येडा ठेयब बाक्माक्त। गन्ती १:७; गन्ती २:३; गन्ती ७:११-१२ 11 नहशोन साल्मा आ आफ बाक्माक्त। साल्मा बोआज आ आफ बाक्माक्त। 12 बोआज ओबेद आ आफ बाक्माक्त। ओबेद येस्से आ आफ बाक्माक्त। 13 येस्से एलीआब आ आफ बाक्माक्त। मेको आ डोंइती थिशो तौ बाक्माक्त। मेको आ माइला अबीनादाब, साइला शिमेआ, १सामुएल १६:५-१० 14 काइला नेथनेल, अन्तरे रदाइ, 15 जन्तरे ओसेम नु कान्छा दाऊद बाक्मा बाक्त। १सामुएल १७:१२ 16 मेको आन समी सेरूयाह नु अबीगेल बाक्सा बाक्त। सेरूयाह आ तौ अबीशै, योआब नु आसाहेल सां बाक्मा बाक्त। २सामुएल २:१८ 17 अबीगेलम आमासा थिवा बाक्त। मेको आ आफ इश्माएली येथेर बाक्माक्त। २सामुएल १७:२५

कालेब आ तौ चच

18 हेस्रोन आ तौ कालेबमी आ मीश अजुबाह नु येरीओथ रे पा तमी तौ थिवा बाक्त। मेको आ तौ येशेर, शोबाब नु अरदोन बाक्मा बाक्त। १इतिहास २:९,४२ 19 मिनु अजुबाह बेक्म नोले कालेबमी एफ्राथ कली ग्युंवे पवा बाक्त। मिनु मेकोमी हुर थिवा बाक्त। १इतिहास २:५० 20 मिनु हुर आ तौ ऊरी बाक्माक्त। ऊरी आ तौ बेजालेल बाक्माक्त। प्रस्थान ३१:२ 21 मिनु हेस्रोन ६० बर्स दुम्मेनु, माकीर आ तमी नु ग्युंवे पवा बाक्त। मेको गिलाद आ समी बाक्माक्त। मिनु हेस्रोन मेको नु बाक्शा सेगुब थिवा बाक्त। 22 मिनु सेगुब याइर आ आफ बाक्माक्त। याइरम गिलाद डा २३ सहर सासन पवा बाक्त। न्यायाधीस १०:३-६; १राजा ४:१३ 23 तन्न गेशुर नु अराम आस राज्य निक्शीमी मेको रे हव्वोथ-याइर, केनाथ नु आ नेक्था डा सहर ६० ओटा सहर लडाइ पा ग्राशा आस के सेल्से बाक्त। मेको नेल्ल माकीर आ तौ बाक्मा बाक्त। माकीर चहिं गिलाद आ आफ बाक्माक्त। 24 हेस्रोन कालेब-एफ्राथाह सहरम बेक्म नोले हेस्रोन आ मीश अबीयाहम मेको के अश्हुर थिवा बाक्त। मेको तेकोहा आ आफ बाक्माक्त। १इतिहास ४:५

येराहमेल आ तौ चच

25 हेस्रोन आ डोंइती थिशो तौ येराहमेल बाक्माक्त। येराहमेल आ डोंइती थिशो तौ राम बाक्माक्त। मिनु नोले डा तौ बुनाह, ओरेन, ओसेम नु अहीयाह बाक्मा बाक्त। इतिहास २:९ 26 येराहमेल के अर्को मीश का यो बाक्माक्त। मेको आ नें अतारा बाक्माक्त। मेकोमी ओनाम थिवा बाक्त। 27 येराहमेल आ डोंइती थिशो तौ राम आ तौ मास, यामीन नु एकेर बाक्मा बाक्त। 28 ओनाम आ तौ शम्माइ नु यादा बाक्सा बाक्त। मिनु शम्माइ आ तौ नादाब नु अबीशुर बाक्सा बाक्त। 29 अबीशुर आ मीश आ नें अबीहेल बाक्माक्त। मेकोमी अहबान नु मोलीद थिवा बाक्त। 30 नादाब आ तौ सेलेद नु अप्पाइम बाक्सा बाक्त। मिनु सेलेद आल मथिथु बेक्माक्त। 31 अप्पाइम आ तौ इशी बाक्माक्त। मिनु इशी आ तौ शेशान बाक्माक्त। शेशान आ तौ अहलै बाक्माक्त। 32 शम्माइ आ लोकब यादा आ तौ येथेर नु योनाथन बाक्सा बाक्त। मिनु येथेर आल मथिथु बेक्माक्त। 33 योनाथन आ तौ पेलेथ नु जाजा बाक्सा बाक्त। मेको नेल्ल येराहमेल आ तौ चच बाक्मा बाक्त। 34 मिनु शेशान के तौ मबाक्म। तमी ला बाक्मा बाक्त। शेशान के इजीप्त डा यारहा माइश्शो वाइल का बाक्माक्त। १इतिहास २:३१; गन्ती२७:७ 35 मिनु शेशानमी आ तमी का कली आ वाइल यारहा नु ग्युंवे पदा बाक्त। मिनु आ तमीमी अत्तै थिवा बाक्त। 36 अत्तै नाथान आ आफ बाक्माक्त। नाथान जाबाद आ आफ बाक्माक्त। 37 जाबाद एफलाल आ आफ बाक्माक्त। एफलाल ओबेद आ आफ बाक्माक्त। 38 ओबेद येहू आ आफ बाक्माक्त। येहू अजारयाह आ आफ बाक्माक्त। 39 अजारयाह हेलेस आ आफ बाक्माक्त। हेलेस एलेआसाह आ आफ बाक्माक्त। 40 एलेआसाह सिस्माइ आ आफ बाक्माक्त। सिस्माइ शाल्लुम आ आफ बाक्माक्त। 41 शाल्लुम येकाम्याह आ आफ बाक्माक्त। येकाम्याह एली-शामा आ आफ बाक्माक्त।

कालेब आ तौ चच युइ

42 येराहमेल आ लोकब कालेब आ डोंइती थिशो तौ मेशाह बाक्माक्त। मेको कली हिब्रू लोव्रमी मारेशा यो देंसीब, मेको आ तौ जीफ बाक्माक्त। मारेशा आ तौपुकी हेब्रोन आ मुर बाक्मा बाक्त। १इतिहास २:१८ 43 हेब्रोन आ तौ कोराह, ताप्पुआह, रेकेम नु शेमा बाक्मा बाक्त। 44 शेमा राहाम आ आफ बाक्माक्त। मिनु रहम योरकेआम आ आफ बाक्माक्त। रेकेम शम्माइ आ आफ बाक्माक्त। 45 शम्माइ आ तौ माओन बाक्माक्त। माओन आ तौ बेथ-सुर बाक्माक्त। 46 कालेब आ अर्को मीश एफाहमी हारान, मोचा नु गाजेज थिवा बाक्त। मिनु हारान गाजेज आ आफ

बाक्माक्त। 47 याहदै आ तौ रेगेम, योथाम, गेशान, पेलेत, एफाह नु शाफ बाक्मा बाक्त। 48 कालेब आ अर्को मीश माकाहमी शेबेर नु तिरहानाह थिवा बाक्त। 49 मेकोमी मदमन्ना आ आफ शाफ, मकबेनाह आ आफ शेवा नु गिबा आ आफ थिवा बाक्त। कालेब आ तमी अकसा बाक्माक्त। यहोसु १५:१६; न्यायाधीस १:१२ 50 मेको कालेब आ तौ चच युइ बाक्मा बाक्त। कालेब आ मीश एफ्राथाह आ डोंइती थिशो तौ हुर बाक्माक्त। हुर आ तौ शोबाल किरयथ-यारीम डा मुर आन आफ बाक्माक्त। १इतिहास २:१९ 51 साल्मा बेथलेहेम आ आफ बाक्माक्त। हारेफ बेथ-गादेर आ आफ बाक्माक्त। 52 किरयथ-यारीम आ किकी पिपी शोबाल के अर्को तौ यो बाक्मा बाक्त। मेको हारोए नु मेनुहोथ सहर डा आधा मुर बाक्मा बाक्त।

53 मिनु किरयथ-यारीम सहरम बाक्शो खिं खिं डा मुर इथ्री, पूथी, शुमाथी नु मिश्री बाक्मा बाक्त। मेकोपुकी रे सोराथी नु एशताओली दुम्मा बाक्त। १इतिहास ४:२

54 साल्मा आ तौ बेथलेहेम, नेतोफाह अत्रोथ-बेथ-योआब नु मानाहाथ सहर डा आधा मुर नु सोराह सहर डा मुर बाक्मा बाक्त। १इतिहास ९:१६ 55 याबेस सहरम बाक्ब मेको आन खिं खिं डा मुर तिराथी, शिमेआथ आ खिं डा मुरपुकी नु सुकाथी बाक्मा बाक्त। मेको हम्माथ सहर रे जाक्शो केनी बाक्मा बाक्त। मेको आन किकी पिपी रेकाब बाक्माक्त। येरमीया ३५:-

3

दाऊद आ तौपुकी

1 हेब्रोन सहरम थिशो दाऊद आ तौ सु सु बाक्मा बाक्त देशा हना, आ डोंइती थिशो तौ अम्नोन, दाऊद आ मीश येज्जेल डा अहीनोआम के बाक्माक्त। नोले डा तौ दानीएल, दाऊद आ मीश कारमेल डा अबीगेल के बाक्माक्त। 2 नोले डा तौ अब्सालोम, दाऊद आ मीश गेशुर डा पिप तल्मै आ तमी माकाह के बाक्माक्त। नोले डा तौ अदोनीयाह, दाऊद आ मीश हग्गीथ के बाक्माक्त। २सामुएल ३:२-५ 3 नोले डा तौ शेफत्याह, दाऊद आ मीश अबीतल के बाक्माक्त। नोले डा तौ इथ्रेआम, दाऊद आ मीश एग्लाह के बाक्माक्त। 4 मेको नेल्ल हेब्रोन सहरम थिशो दाऊद आ तौ बाक्मा बाक्त। दाऊदमी हेब्रोन सहरम ७ बर्स ६ महिना सासन पवा बाक्त। मिनु यरूसलेम ३३ बर्स सासन पवा बाक्त। 5 यरूसलेम सहरम थिशो दाऊद आ तौ सु सु बाक्मा बाक्त देशा हना, शिमेआ, शोबाब, नाथान नु सोलोमन बाक्मा बाक्त। मेको ४ जना अम्मीएल आ तमी बाथ-शुआम थिवा बाक्त। १इतिहास १४:५-७; २सामुएल ५:१४-१६ 6 अरु यरूसलेम सहरम दाऊद आ थिशो तौ इभार, एली-शामा, एली-फेलेत, 7 नोगाह, नेफेग, याफीया, 8 एली-शामा, एली-आदा नु एली-फेलेत ९ जना तौ बाक्मा बाक्त। 9 अरु चाक्शो मीश आन तौपुकी प्रोंइशा, मेको दाऊद आ तौ बाक्मा बाक्त। मिनु मेको आन समी तामार बाक्माक्त। २सामुएल १३:१

सोलोमन आ तौ चच युइ

10 सोलोमन आ तौ चच युइ सु सु बाक्मा बाक्त देशा हना, रेहोबाम आ तौ बाक्माक्त। रेहोबाम आ तौ अबीयाह बाक्माक्त। अबीयाह आ तौ आसा बाक्माक्त। आसा आ तौ येहो-शाफात बाक्माक्त। मत्ती १:७-१२ 11 येहो-शाफात आ तौ योराम बाक्माक्त। योराम आ तौ अहाज्याह बाक्माक्त। अहाज्याह आ तौ योआश बाक्माक्त। 12 योआश आ तौ अमस्याह बाक्माक्त। अमास्याह आ तौ अजारयाह बाक्माक्त। अजारयाह आ तौ योथाम बाक्माक्त। 13 योथम आ तौ आहाज बाक्माक्त। आहाज आ तौ हिज्कीयाह बाक्माक्त। हिज्कीयाह आ तौ मनस्से बाक्माक्त। 14 मनस्से आ तौ आमोन बाक्माक्त। अम्मोन आ तौ योसीयाह बाक्माक्त। 15 योसीयाह आ डोंइती थिशो तौ योहानान बाक्माक्त। योसीयाह आ माइला येहो-याकीम, आ साइला सिदकीयाह नु आ कान्छा शाल्लुम बाक्माक्त। 16 येहो-याकीम आ तौ चच युइ सु सु बाक्मा बाक्त देशा हना, आ तौ येकोन्याह बाक्माक्त। येकोन्याह आ तौ सिदकीयाह बाक्माक्त। २इतिहास ३६:९-१०

17 मिनु ग्याइशशा लाइक्चा पुंइसीशो येकोन्याह आ तौ शाल्तीएल बाक्माक्त। 18 अरु ग्याइशशा लाइक्चा पुंइसीशो माल्कीराम, पेदायाह, शेनास्सार, येकाम्याह, होशामा नु नेदाब्याह बाक्मा बाक्त। 19 पेदायाह आ तौ जेरूब-बाबेल नु शिमेइ बाक्सा बाक्त। जेरूब-बाबेल आ तौ मेशुल्लाम नु हनान्याह बाक्सा बाक्त। मेको आस समी शेलोमीथ बाक्माक्त। एज्रा ३:२, ८ 20 अर्को हशुबाह, ओहेल, बेरेक्याह, हासादीयाह नु युशब-हेसेद ५ जना तौ बाक्मा बाक्त। 21 हनान्याह आ तौ पेलात्याह नु येशायाह बाक्सा बाक्त। येशायाह आ तौ रेफायाह बाक्माक्त। रेफायाह आ तौ अरनान बाक्माक्त। अरनान आ तौ ओबदिया बाक्माक्त। ओबदिया आ तौ शेकन्याह बाक्माक्त। 22 शेकन्याह आ तौ शेमायाह बाक्माक्त। शेमायाह आ तौ हत्तुश, इगाल, बारयाह, नेआरयाह नु शाफात नेल्ल पा ६ जना तौ बाक्मा

बाक्त। 23 नेआरयाह आ तौ एली-ओ-एनाइ, हिज्कीयाह नु अज्रीकाम सां बाक्मा बाक्त। 24 एली-ओ-एनाइ आ तौ होदावीयाह, एल्याशीब, पेलायाह, अक्कुब, योहानान, देलायाह नु अनानी नेल्ल ७ जना बाक्मा बाक्त।

4

यहूदा आ तौ चच युइ

1 यहूदा आ तौ पेरेस, हेसोन, कारमी, हर नु शोबाल बाक्मा बाक्त। १इतिहास २:४-५; १इतिहास ७:१९, ५०
2 शोबाल आ तौ रेआयाह, याहाथ आ आफ बाक्माक्त। याहाथ अहुमै नु लाहाद आस आफ बाक्माक्त। मेको सोराथी आन चच युइ बाक्मा बाक्त। १इतिहास २:५३

3 एताम आ तौ येजेल, इश्मा नु इदबाश बाक्मा बाक्त। मेको आन समी आ नें हास्सल-एल-पोनी बाक्माक्त।
4 पेनुएल गेदोर आ आफ बाक्माक्त। एजेर हुशाह आ आफ बाक्माक्त। मिनु कालेब आ मीश एफ्राथाह आ डोंइती थिशो तौ हर बाक्माक्त। मेको आ तौ चच युइ बेथलेहेम डा मुर बाक्मा बाक्त। १इतिहास २:१९, ५० 5 तेकोहा आ आफ अश्हुर के मीश निक्शी बाक्सा बाक्त। मेको का आ नें हेलाह नु अर्को आ नें नाराह बाक्माक्त। 6 नाराहमी अहुज्जाम, हेफेर, तेमेनी नु हाहाशतारी थिवा बाक्त। एको नाराह आ तौ बाक्मा बाक्त। 7 हेलाह आ तौ सेरेथ, इच्हार नु एथनान बाक्मा बाक्त। 8 कोस आनुब नु जोबेबा आस आफ बाक्माक्त। मिनु कोस हारुम आ तौ अहारहेल आ चच युइ आन किकी पिपी बाक्माक्त।

9 मिनु याबेस माइश्शो मुर का बाक्माक्त। मेको आ लोकब आन क्येडा शुश मान ताइब बाक्माक्त। मेको आ ममामी मेको कली श्येत पा थितीके मेको आ नें याबेस वोइश्शो बाक्माक्त। 10 मिनु याबेसमी इस्राएली आन परमप्रभु कली “आं कली आसीक गेने। आं कली रू तेम्शा गेयीनी। गे गो नु बाक्कीन। आं कली श्येत रे डोन वोइय्यीनी” दे पुना बाक्त। मिनु परमप्रभुमी मेको आ पुंइशो गेवा बाक्त।

11 शुहाह आ लोकब केलुब मेहीर आ आफ बाक्माक्त। मेहीर एश्तोन आ आफ बाक्माक्त। 12 एश्तोन बेथ-राफा, पासओह नु तेहीन्नाह आन आफ बाक्माक्त। तेहीन्नाह इर-नाहाश आ आफ बाक्माक्त। मेको रेकाह आ मुर बाक्मा बाक्त। 13 केनाज आ तौ ओथनीएल नु सेरायाह बाक्सा बाक्त। ओथनीएल आ तौ हथाथ नु मेओनोथाइ बाक्सा बाक्त। यहोसु १५:१७; १न्यायाधीस १:१३

14 मेओनोथाइ ओफ्रा आ आफ बाक्माक्त। सेरायाह योआब आ आफ बाक्माक्त। योआब गे-हाराशीम आ आफ बाक्माक्त। मेको मुरपुकी मार मार सेल्स जोक्ब बाक्तीके मेको आन नें मेकोन बाक्माक्त।

15 यपुन्ने आ तौ कालेब आ तौ इरू, एलाह नु नाआम बाक्मा बाक्त। एलाह आ तौ केनाज बाक्माक्त। गन्ती १३:६; गन्ती १४:६ 16 येहल्लेल आ तौ जीफ, जीफाह, तिरया नु असारेल बाक्मा बाक्त। 17 एज्राह आ तौ येथेर, मेरेद, एफेर नु यालोन बाक्मा बाक्त। मेरेदमी फाराओ आ तमी बिथीयाह ग्युंभे पवा बाक्त। मेकोमी मिरयाम, शम्माइ नु इश्बा थिवा बाक्त। इश्बा एश्तेमोआ आ आफ बाक्माक्त। 18 मेरेद आ यहूदी मीशेमी येरेद, हेबेर नु येकुथीएल थिवा बाक्त। येरेद गेदोर आ आफ बाक्माक्त। हेबेर सोको आ आफ बाक्माक्त। येकुथीएल जानोह आ आफ बाक्माक्त। 19 होदीयाहम नाहाम आ समी ग्युंभे पवा बाक्त। मेको आ तौपुकी गारम डा कैलाह आ थर नु माकाथी एश्तेमोआ आ थर डा किकी पिपी बाक्मा बाक्त।

20 शिमोन आ तौ अम्मोन, रिन्नाह, बेन-हानान नु तिलोन बाक्मा बाक्त। इशी आ तौ जोहेथ नु बेन-जोहेथ बाक्सा बाक्त।

शेलाह आ तौ चच युइ

21 यहूदा आ तौ का शेलाह बाक्माक्त। शेलाह आ तौ एर नु लेकाह सहरम बाक्बपुकी बाक्मा बाक्त। आ तौ लादाह नु मारेशा सहरम बाक्बपुकी बाक्मा बाक्त। बेथ-अशबेया सहरम बाक्ब रिम्शो सुती श्येले के वा प्रोव्रब नु गेय पाइब आ चच युइ बाक्मा बाक्त। १इतिहास २:३ 22 आ तौ योकीम नु कोजेबा सहरम बाक्ब मुर नु आ तौ योआश नु सारब बाक्मा बाक्त। योआश नु सारबमी मोआबी मीश आल ग्युंभे पाम्से बाक्त। तन्न लेहेम सहर लेशशा जाक्शो बाक्सा बाक्त। (एको लोत्र थम माइत बाक्त।) बेथलेहेम बाक्म कां, लाशुबी-लाहेम सहर बाक्म, मेको मतुंइसीब। 23 मेकोपुकी खप के ग्योव्रब सेल्ब बाक्मा बाक्त। मिनु नेताइम नु गेदेराह सहरम बाक्शा, पिप आ गेय पाइब बाक्मा बाक्त।

सिमियोन आ तौ चच युइ

24 सिमियोन आ तौपुकी नेमुएल, यामीन, यारीब, जेराह नु शावल बाक्मा बाक्त। उत्पत्ती ४६:१० 25 शावल आ तौ शाल्लुम बाक्माक्त। शाल्लुम आ तौ मिब्साम बाक्माक्त। मिब्साम आ तौ मिश्मा बाक्माक्त। 26 मिश्मा आ तौ हाम्मुएल बाक्माक्त। हाम्मुएल आ तौ जाक्कुर बाक्माक्त। जाक्कुर आ तौ शिमेइ बाक्माक्त। 27 शिमेइ के १६ जना तौ नु ६ जना तमी बाक्मा बाक्त। तन्न मेको आ लोकब के शुश आल मबाक्मा बाक्त। मोपतीके मेको आन खिं डा मुर यहूदा डा मुर खोदेशो पा शुश मदुम्मा बाक्त। 28 मेकोपुकी बेयर-शेबा, मोलादा, हासार-शुआल, यहोसु १९:२-८ 29 बिल्हाह, एसेम नु तोलाद, 30 बेथुएल, होरमा नु सिकलाग, 31 बेथ-मारकाबोथ, हासार-सुसीम, बेथ-बीरी नु शा-आराइम सहरमी बाक्बाक्मा बाक्त। दाऊदम सासन मपवा सम्म सिमियोन आ थर डा मुर मेको सहरम बाक्शो बाक्मा बाक्त। 32 मेकोपुकी अर्को बाक्तीके एताम, ऐन, रिम्मोन, तोकेन नु आशान नेल्ल पा ५ सहर बाक्मा बाक्त। 33 मेको सहर आन एर ओंथ डा गाउंपुकीम बाल सहर सम्म आन बाक्तीके बाक्मा बाक्त। मिनु मेकोपुकीमी आन नें तौ चच युइ आन नें ब्रेक्ना ब्रेक्न बाक्शो बाक्मा बाक्त।

34 मेको आन खिं खिं डा ठेयब मुर सु सु बाक्मा बाक्त देशा हना, मेशोबाब, याम्लेक, अमस्याह आ तौ योशाह, 35 योएल, येहू योशीबीयाह आ तौ बाक्मा बाक्त। योशीबीयाह सेरायाह आ तौ बाक्माक्त। सेरायाह असीएल आ तौ बाक्माक्त। 36 एली-ओ-एनाइ, याकोबाह, येशोहायाह, आसायाह, अदीएल, येसीमीएल बेनायाह, 37 जीजा शिफी आ तौ बाक्मा बाक्त। शिफी अल्लोन आ तौ बाक्माक्त। अल्लोन येदायाह आ तौ बाक्माक्त। येदायाह शिम्री आ तौ बाक्माक्त। शिम्री शेमायाह आ तौ बाक्माक्त। 38 मोदेशो आन नें ब्रेक्शो मुर आन खिं खिं डा ठेयब मुर बाक्मा बाक्त। मिनु आन खिं डा मुर सोशा बोशा शुश दुम्मा बाक्त। 39 मेको आन बस्तु भाव योव्रतीके मालना मालन दिंम नेल्ल आ पूर्व गेदोर सहर सम्म लमा बाक्त। 40 मेकेर शुश नु रिम्शो बस्तु भाव योव्रतीके थित्मे बाक्त। मेकेर मारेइ रेयके मनेंसीब रिम्शो ठेयब दिंम बाक्माक्त। मेको क्येडा डोंइती हाम आ मुर बाक्शो बाक्मा बाक्त। इतिहास १:८-१६ 41 यहूदा डा पिप हिज्कीयाहम सासन पवा ना मेको नें ब्रेक्शो मुरपुकीम गेदोर सहरम बाक्ब हाम नु मेउनीम आस मुर आन ताम्बु नु खिं खतम सेलमे बाक्त। मुर आन कली सदमे बाक्त। मेकेर रिम्शो बस्तु भाव योव्रतीके बाक्शा, मेक उइ आंमान बाक्शो बाक्मा बाक्त। २रजा १८:३ 42 मिनु मेको सिमियोन आ थर डा ५ सहे खोइ मुरुमी सेइर पहाड कली लडाइ तोमे बाक्त। मेको आन ठेयब मुर इशी आ तौ पेलात्याह, नेआरयाह, रेफायाह नु उज्जीएल बाक्मा बाक्त। 43 मेकोपुकीम प्रोक्शा लीशो अमालेकी नेल्ल आन कली साइशो बाक्मा बाक्त। मिनु सिमियोन आ थर डा मुर मुल सम्म मेक उइ बाक्शो बाक्नीम। १सामुएल १५:३-८

5

रूबेन आ तौ चच युइ

1 इस्राएल आ तौ आन दाते डा नेल्ल क्येडा डोंइती थिशो रूबेन बाक्माक्त। नेल्ल क्येडा डोंइती थिशो बाक्त हना यो, आ आफ आ मीश नु इप्तीके, आ डोंइती थिशो तौ आ तचा डा अधिकार इस्राएल आ तौ योसेफ आ तौ आस कली गेशो बाक्माक्त। मिनु रूबेन आ नें, डोंइती डा तौ आ नें ब्रेक्तीकेम मब्रेक्शो बाक्माक्त। उत्पत्ती ३५:२२; उत्पत्ती ४९:३-४ 2 मिनु यहूदा आ लोकब आन दातेमी नेल्ल क्येडा ठेयब दुम्त हना यो, मेको रे पा सासन पाइब का गूत हना यो, डोंइती थिशो तौ आ अधिकार योसेफ केन दुम्शो बाक्माक्त। उत्पत्ती ४९:८,१०; ब्यवस्था ३३:७; उत्पत्ती ४९:२२; ब्यवस्था ३३:१३-१७ 3 इस्राएल आ डोंइती थिशो तौ रूबेन बाक्त। रूबेन आ तौ हनोक, पल्लु, हेस्रोन नु कारमी बाक्मा बाक्त। प्रस्थान ६:१४ 4 योएल आ तौ शेमायाह बाक्माक्त। शेमायाह आ तौ गोग बाक्माक्त। गोग आ तौ शिमेइ बाक्माक्त। 5 शिमेइ आ तौ मीकाह बाक्माक्त। मीकाह आ तौ रेआयाह बाक्माक्त। रेआयाह आ तौ बाल बाक्माक्त। 6 बाल आ तौ बेयराह बाक्माक्त। मिनु मेको अस्सुर डा पिप तिलगथ-पिलेसेरमी ग्याइशशा लाइक्चा पुंडसे बाक्त। मेको रूबेन आ मुर आन दाते डा ठेयब मुर का बाक्माक्त। इतिहास ५:२६ 7 रूबेन आ थर डा खिं खिं डा मुर आन नें ब्रेक्तीकेमी ब्रेक्शो बाक्मा बाक्त। मेको आन ठेयब मुर यिएल, जकरिया नु 8 आजाज आ तौ बेला बाक्मा बाक्त। बेला आ तौ शेमा बाक्माक्त। मेको योएल आ खिं डा मुर बाक्मा बाक्त। मेकोपुकी आरोएर सहरम बाक्शो बाक्मा बाक्त। आन रागी नेबो रे बाल-मेओन सम्म बाक्माक्त। 9 मेकोपुकीम पूर्व गे गोरशो रागी आ डोंइती युफ्रेटीस खोला आ ओंथ हांबु सम्म आन के सेल्शो बाक्मा बाक्त। मारदे हना गिलादम बाक्मानु, आन बस्तु भाव शुश दुम्शो बाक्मा बाक्त। 10 मेकोपुकी सावल आ पालाम हाग्री नु लडाइ पा ग्राशो बाक्मा बाक्त। मिनु मेकोपुकीम गिलाद आ पूर्व नेल्लेमी आन ताम्बुमी बाक्शो बाक्मा बाक्त।

गाद आ तौ चच युइ

11 गाद आ मुरपुकी रूबेन आ मुर आन नेक्था बाशान रागीम साल्का सम्म बाक्शो बाक्मा बाक्त। 12 मेको आन ठेयब मुर योएल बाक्माक्त। मेको आ नोले डा शाफाम बाक्माक्त। मेको आस नोले बाशान रागीम यानाइ नु शाफात बाक्सा बाक्त। 13 मिनु आन मुर, आन खिं खिं डा मुर सु सु बाक्मा बाक्त देशा हना, मिकाएल, मेशुल्लाम, शेबा, योराइ, याकान, जिआ नु एबेर नेल्ल पा ७ जना बाक्मा बाक्त। 14 मेकोपुकी अबीहेल आ तौ हुरी, हुरी आ तौ यारोआह, यारोआह आ तौ गिलाद, गिलाद आ तौ मिकाएल, मिकाएल आ तौ येशीशाइ, येशीशाइ आ तौ याहदो, याहदो आ तौ बूज, 15 अब्दीएल आ तौ आही, आही आ तौ गुनी मेको आ खिं खिं डा आन ठेयब मुर बाक्मा बाक्त। 16 गाद आ मुरपुकी गिलाद, बाशान नु मेको आ नेक्था डा सहर नेल्लेमी नु शारोन डा बस्तु भाव योव्रतीके सम्म बाक्मा बाक्त। 17 यहूदा डा पिप योथाम नु इस्राएल डा पिप येरोबामम सासन पाम्से ना मेको आन नें नेल्ल नें ब्रेक्तीकेम ब्रेक्शो बाक्मा बाक्त। २राजा १५:३२; २राजा १४:२३

18 रूबेन, गाद नु मनस्से आ उइक्थ थर डा मुर बोल्यो लडाइ पाइब बाक्मा बाक्त। मेको तेक्तीक नु या कुरमे बाक्त। मेको लिब्रा आप्ब नु लडाइ पाइब जोक्ब बाक्मा बाक्त। मेको ४४ हजार ७ सहे ६० जना बाक्मा बाक्त। लडाइ पचा कली ठीक दुम्शो बाक्मा बाक्त। 19 मिनु हाग्री, येतुरी, नाफीशी नु नोदाब आ मुर नु लडाइ पामे बाक्त। 20 मेकोपुकीमी लडाइम परमप्रभु कली “वारच पाइक्की” दे पुंडतीके, मेको आन जोरी सत्रु हाग्री नु अरु सु बाक्तेक्म हना यो, आन गुइमी गेवा बाक्त। मारदे हना मेकोपुकीमी थमा सुदमे बाक्त। 21 मेकोपुकीमी बस्तु भाव गिश लदमे बाक्त देशा हना, ५० हजार दलओंठ, लाख निक्शी ५० हजार भेडा, हजार निक्शी गधा नु लाख का मुर आन कली ग्याइश्शा लदमे बाक्त। 22 मेको लडाइम शुश मुर बेक्मा बाक्त। मारदे हना मेको लडाइ परमप्रभु रे पा दुम्शो बाक्माक्त। मिनु मेकोपुकी ग्याइश्शा लाइक्चा मपुंडिसामा सम्म मेको आन बाक्तीकेम बाक्मा बाक्त।

मनस्से आ उइक्थ तौ चच युइ

23 मनस्से आ उइक्थ थर डा मुर शुश दुम्शो बाक्मा बाक्त। मेको बाशान रागी रे बाल-हेरमोन, सेनीर हेरमोन डांडा सम्म बाक्शो बाक्मा बाक्त। ब्यवस्था ३:८-९ 24 मेको आन खिं खिं डा मुर आन ठेयब मुर सु सु बाक्मा बाक्त देशा हना, एफेर, इशी, एलीएल, अज्जीएल, येरमीया, होदावीयाह नु याहदीएल बाक्मा बाक्त। मेको नेल्ल बोल्यो लडाइ पाइब मुर बाक्मा बाक्त। मेको आन खिं डा ठेयब मुर बाक्मा बाक्त। 25 तन्न मेकोपुकीम आन किकी पिपी आन परमप्रभु आ पर्बम मरिम्शो पामे बाक्त। मिनु परमप्रभुम मेको आन डोंइती खतम पोक्शो जात डा मुर आन देवता आन कली पूजा पा आन नोले खोदमे बाक्त। 26 मोपतीके इस्राएली आन परमप्रभुमी अस्सुर डा पिप पुल, तिल्लगथ-पिलेसेरमी कली क्युक्गा बाक्त। मिनु मेकोपुकीम रूबेन, गाद नु मनस्से आ उइक्थ थर डा मुर आन कली ग्याइश्शा लदमे बाक्त। मेको आन कली हालाह, हाबोर, हारा नु गोजान खोला सम्म लदमे बाक्त। मेको मुल सम्म मेकेर बाक्शो बाक्नीम। २राजा १५:१९; २राजा १५:२९

6

लेवी आ तौ चच युइ

1 लेवी आ तौ गेरशोम, कोहाथ नु मेरारी बाक्मा बाक्त। 2 कोहाथ आ तौ अग्राम, इच्हार, हेब्रोन नु उज्जीएल बाक्मा बाक्त। प्रस्थान ६:२०; गन्ती २६:५९; मीका ६:४; प्रस्थान ६:२३; गन्ती २६:६० 3 अग्राम आ आल हारून, मोसा नु मिरयाम बाक्मा बाक्त। हारून आ तौ नादाब, अबीहु, एलाजर नु इथामार बाक्मा बाक्त। १इतिहास ६:३५-३८ 4 एलाजर फिनेहास आ आफ बाक्माक्त। फिनेहास अबीशुआ आ आफ बाक्माक्त। 5 अबीशुआ बुक्की आ आफ बाक्माक्त। बुक्की उज्जी आ आफ बाक्माक्त। 6 उज्जी जेराहीयाह आ आफ बाक्माक्त। जेराहीयाह मेरायोथ आ आफ बाक्माक्त। 7 मेरायोथ अमारयाह आ आफ बाक्माक्त। अमारयाह अहीतुब आ आफ बाक्माक्त। 8 अहीतुब सादोक आ आफ बाक्माक्त। सादोक अहीमाज आ आफ बाक्माक्त। २सामुएल ८:१७; २सामुएल १५:२७, ३६ 9 अहीमाज अजारयाह आ आफ बाक्माक्त। अजारयाह योहानान आ आफ बाक्माक्त। 10 योहानान अजारयाह आ आफ बाक्माक्त। मेको अजारयाहम सोलोमनमी यरूसलेमम सेल्शो परमप्रभु यावे आ खिंम चढ़ेतीक गेय पाइबाक्माक्त। 11 अजारयाह अमारयाह आ आफ बाक्माक्त। अमारयाह अहीतुब आ आफ बाक्माक्त। 12 अहीतुब सादोक आ आफ बाक्माक्त। सादोक शाल्लुम आ आफ बाक्माक्त। 13 शाल्लुम हिल्कीयाह आ आफ बाक्माक्त। हिल्कीयाह अजारयाह आ आफ बाक्माक्त। 14 अजारयाह सेरायाह आ आफ बाक्माक्त। सेरायाह

यहो-सादाक आ आफ बाक्माक्त। २राजा २५:१८; एजा ७:१; नहेम्याह १२:२६ 15 मेना परमप्रभु यावेमी यहूदा नु यरूसलेम कली नेबुकदनेसर आ गुडम गेशो बाक्माक्त। मिनु यहो-सादाक यो ग्याइशशा लाइक्चा पुंडसीशो बाक्माक्त। २राजा २५:२१

लेवी आ खिं खिं डा मुर

16 लेवी आ तौ गेरशोम, कोहाथ नु मेरारी बाक्मा बाक्त। प्रस्थान ६:१६-१९ 17 गेरशोम आ तौ आस नें लिब्नी नु शिमेइ बाक्सा बाक्त। 18 कोहाथ आ तौ अम्राम, इच्छार, हेब्रोन नु उज्जीएल बाक्मा बाक्त। 19 मेरारी आ तौ माहली नु मुशी बाक्सा बाक्त। चढेब लेवी आ खिं खिं डा मुर मेको बाक्मा बाक्त।

20 गेरशोम आ तौ चच युइ सु सु बाक्मा बाक्त देशा हना, लिब्नी, लिब्नी आ तौ याहाथ, याहाथ आ तौ जिम्माह, 21 जिम्माह आ तौ योआह, योआह आ तौ इददो, इददो आ तौ जेराह नु जेरह आ तौ येआथेराइ बाक्मा बाक्त। 22 कोहाथ आ तौ चच युइ सु सु बाक्मा बाक्त देशा हना, अम्मीनादाब, अम्मीनादाब आ तौ कोराह, कोराह आ तौ अस्सीर, १इतिहास ९:१९; प्रस्थान ६:२४ 23 अस्सीर आ तौ एल्काना, एल्काना आ तौ एब्यासाफ, एब्यासाफ आ तौ अस्सीर, 24 अस्सीर आ तौ तहाथ, नाहाथ आ तौ उरीएल, उरीएल आ तौ उज्जीयाह, उज्जीयाह आ तौ शावल बाक्मा बाक्त। 25 एल्काना आ तौ सु बाक्सा बाक्त देशा हना, अमासै नु अहीमोथ बाक्सा बाक्त। 26 अहीमोथ आ तौ एल्काना, एल्काना आ तौ जोफाइ, जोफाइ आ तौ नाहाथ, 27 नाहाथ आ तौ एलीआब, एलीआब आ तौ येरोहाम, येरोहाम आ तौ एल्काना नु एल्काना आ तौ सामुएल बाक्मा बाक्त। १सामुएल १:१ 28 सामुएल आ डोंइती थिशो तौ योएल नु कान्छा अबीयाह बाक्सा बाक्त। 29 मेरारी आ तौ सु सु बाक्मा बाक्त देशा हना, माहली, माहली आ तौ लिब्नी, लिब्नी आ तौ शिमेइ, शिमेइ आ तौ उज्जाह, 30 उज्जाह आ तौ शिमेआ, शिमेआ आ तौ हग्गीयाह नु हग्गीयाह आ तौ आसायाह बाक्मा बाक्त।

परमप्रभु कली कुम्सो पाइबपुकी

31 दाऊदमी परमप्रभु यावे आ बाक्तीकेम सन्दोस वोदा नोले कुम्सो पाइब आन कली योवडा बाक्त। २सामुएल ६:१७ 32 सोलोमनम यरूसलेमम परमप्रभु यावे आ खिं मसेला सम्म मेकोपुकीमी गुम्तीक ताम्बु आ डोंइती कुम्सो पना पन बाक्मा बाक्त। आन पालो पालोम कुम्सो पना पन बाक्मा बाक्त। 33 मेको कुम्सो पाइब नु आन तौ सु सु बाक्मा बाक्त देशा हना, कोहाथ आ खिं डा कुम्सो पाइब हेमान बाक्माक्त। हेमान योएल आ तौ बाक्माक्त। योएल सामुएल आ तौ बाक्माक्त। १इतिहास १५:१७,१९ 34 सामुएल एल्काना आ तौ बाक्माक्त। एल्काना येरोहाम आ तौ बाक्माक्त। येहोराम एलीएल आ तौ बाक्माक्त। एलीएल तोआह आ तौ बाक्माक्त। तोआह जूफ आ तौ बाक्माक्त। 35 जूफ एल्काना आ तौ बाक्माक्त। एल्काना माहाथ आ तौ बाक्माक्त। माहाथ अमासै आ तौ बाक्माक्त। अमासै एल्काना आ तौ बाक्माक्त। 36 एल्काना योएल आ तौ बाक्माक्त। योएल अजारयाह आ तौ बाक्माक्त। अजारयाह सेफन्याह आ तौ बाक्माक्त। 37 सेफन्याह तहाथ आ तौ बाक्माक्त। तहाथ अस्सीर आ तौ बाक्माक्त। अस्सीर एब्यासाफ आ तौ बाक्माक्त। एब्यासाफ कोराह आ तौ बाक्माक्त। कोराह इच्छार आ तौ बाक्माक्त। 38 इच्छार कोहाथ आ तौ बाक्माक्त। कोहाथ लेवी आ तौ बाक्माक्त। लेवी इस्राएल आ तौ बाक्माक्त। 39 हेमान आ लोकब आसाफ आ ग्युरा गे बाक्शो बाक्माक्त। आसाफ बेरेक्याह आ तौ बाक्माक्त। बेरेक्याह शिमेआ आ तौ बाक्माक्त। १इतिहास १५:१७,१९ 40 शिमेआ मिकाएल आ तौ बाक्माक्त। मिकाएल बासैयाह आ तौ बाक्माक्त। बासैयाह माल्कीयाह आ तौ बाक्माक्त। 41 माल्कीयाह एथनी आ तौ बाक्माक्त। एथनी जेराह आ तौ बाक्माक्त। जेरह अदायाह आ तौ बाक्माक्त। 42 अदायाह एथान आ तौ बाक्माक्त। एथान जिम्माह आ तौ बाक्माक्त। जिम्माह शिमेइ आ तौ बाक्माक्त। 43 शिमेइ याहाथ आ तौ बाक्माक्त। याहात गेरशोम आ तौ बाक्माक्त। गेरशोम लेवी आ तौ बाक्माक्त।

44 हेमान आ लोकब मेरारी आ तौ आ पेरा गे बाक्शो बाक्मा बाक्त। अरु सु सु बाक्मा बाक्त देशा हना, एथान किशी आ तौ बाक्माक्त। किशी अब्दी आ तौ बाक्माक्त। अब्दी माल्लुक आ तौ बाक्माक्त। १इतिहास १५:१९ 45 माल्लुक हशाब्याह आ तौ बाक्माक्त। हशाब्याह अमास्याह आ तौ बाक्माक्त। अमस्याह हिल्कीयाह आ तौ बाक्माक्त। 46 हिल्कीयाह अम्जी आ तौ बाक्माक्त। अम्जी बानी आ तौ बाक्माक्त। बानी शेमेर आ तौ बाक्माक्त। 47 शेमेर माहली आ तौ बाक्माक्त। माहली मुशी आ तौ बाक्माक्त। मुशी मेरारी आ तौ बाक्माक्त। मेरारी लेवी आ तौ बाक्माक्त। 48 मेको आन लोकब लेवी आ मुर नेल्ल परमप्रभु आ बाक्तीक ताम्बु डा मार मार पचा कली योवशो बाक्मा बाक्त।

हारून आ चच युइ

49 मिनु हारून नु आ तौपुकीमी ला चढ़ेतीकेम चोशा चढ़ेतीक नु धूप चोशा चढ़ेतीकेम चढ़ेमे बाक्त। मेकोम नेल्ल क्येडा चोव्रखो कोठा डा गेय यो पामे बाक्त। इस्राएली आन पर्बम पाप क्याम्तीक गेय पामे बाक्त। परमप्रभु आ गेय पाइब मोसामी दोदेशो पा अरेवा मोदेशो पा पामे बाक्त। प्रस्थान २८:१; लेवी १६:- 50 हारून आ तौपुकी सु सु बाक्मा बाक्त देशा हना, एलाजर, एलाजर आ तौ फिनेहास, फिनेहास आ तौ अबीशुआ, १ इतिहास ५:१०-३४ 51 अबीशुआ आ तौ बुक्की, बुक्की आ तौ उज्जी, उज्जी आ तौ जेराहीयाह, 52 जेरह आ तौ मेरायोथ, मेरायोथ आ तौ अमारयाह, अमारयाह आ तौ अहीतुब, 53 अहीतुब आ तौ सादोक, सादोक आ तौ अहीमाज बाक्मा बाक्त।

लेवी आन सहरपुकी

यहोसु २१:-

54 हारून आ तौ कोहाथ आ खिं खिं डा मुर नेल्ल आन क्येडा डोंइती योव्रशा गेशो बाक्तीके तेको बाक्मा बाक्त देशा हना, 55 मेको आन कली यहूदा आ थेरशो रू रे हेब्रोन सहर नु आ एर ओंथ डा बस्तु भाव योव्रतीके गेमे बाक्त। 56 तन्न मेको सहर डा रू नु आ एर ओंथ डा गाउंपुकी यपुन्ने आ तौ कालेब कली गेमे बाक्त। 57 हारून आ तौ आन कली प्रोक्शा लशा ब्रोंइशा बाक्तीक सहर हेब्रोन, लिब्ना नु आ एर ओंथ डा बस्तु भाव योव्रतीके, यत्तीर, एश्तेमोआ, नु आ एर ओंथ डा बस्तु भाव योव्रतीके, 58 हीलेन नु आ एर ओंथ डा बस्तु भाव योव्रतीके, देबीर नु आ एर ओंथ डा बस्तु भाव योव्रतीके, 59 आशान नु आ एर ओंथ डा बस्तु भाव योव्रतीके, बेथ-शेमेश नु आ एर ओंथ डा बस्तु भाव योव्रतीके नेल्ल गेमे बाक्त। 60 मिनु बेन्यामीन आ थर डा मुर आन थेरशो रू रे मार गेमे बाक्त देशा हना, गेबा नु आ एर ओंथ डा बस्तु भाव योव्रतीके, आलेमेथ नु आ एर ओंथ डा बस्तु भाव योव्रतीके, अनाथोथ नु आ एर ओंथ डा बस्तु भाव योव्रतीके गेमे बाक्त। मिनु कोहाथ आ खिं खिं डा मुर आन कली योक्सीशो सहर नेल्ल १३ ओटा बाक्मा बाक्त।

61 मिनु कोहाथ आ लीशो मुर आन कली मनस्से आ आधा थर डा मुर आन रे बाजी आप्शा १० ओटा सहर गेमे बाक्त। 62 गेरशोम आ खिं खिं डा मुर आन कली बाजी आप्शा इस्साकार आ थर, आशेर आ थर, नाप्ताली आ थर नु बाशान रागीम बाक्ब मनस्से आ आधा थर डा मुर आन थेरशो रू रे १३ ओटा सहर गेमे बाक्त। 63 मेरारी आ खिं खिं डा मुर आन कली बाजी आप्शा रूबेन आ थर, गाद आ थर नु जबूलून आ थर आन थेरशो रू रे १२ ओटा सहर गेमे बाक्त। 64 मोपा इस्राएलीपुकीमी लेवी आन कली सहर नु आन एर ओंथ डा बस्तु भाव योव्रतीके गेमे बाक्त। 65 मेकोपुकीमी यो बाजी आप्शा, यहूदा आ थर, सिमियोन आ थर नु बेन्यामीन आ थर आन थेरशो रू रे मेको नें ब्रेक्शो सहरपुकी गेमे बाक्त।

66 कोहाथ आ तौ आन खिं डा का निक्शी मुर एफ्राइम आ थर डा मुर आन थेरशो रू रे सहरपुकी तामे बाक्त। 67 मेकोपुकीमी मेको आन कली पहाड रागी डा शेकेम सहर नु आ एर ओंथ डा बस्तु भाव योव्रतीके एफ्राइम पहाड नु गेजेर सहर नु आ बस्तु भाव योव्रतीक, 68 योकमाम सहर नु आ एर ओंथ डा बस्तु भाव योव्रतीके, बेथ-होरोन सहर नु आ एर ओंथ डा बस्तु भाव योव्रतीके, 69 आइयालोन सहर नु आ एर ओंथ डा बस्तु भाव योव्रतीके, गाथ-रिम्मोन सहर नु आ एर ओंथ डा बस्तु भाव योव्रतीके तामे बाक्त। 70 मनस्से आ उइक्थ थर डा मुर आन थेरशो रू रे आनेर सहर नु आ एर ओंथ डा बस्तु भाव योव्रतीके, बिलाम सहर नु आ एर ओंथ डा बस्तु भाव योव्रतीके मेको नेल्ल कोहाथ आ लीशो मुरपुकीमी तामे बाक्त।

71 मनस्से आ उइक्थ थर डा मुर आन थेरशो रू रे गेरशोम आ मुर आन कली मार गेमे बाक्त देशा हना, बाशानम बाक्ब गोलान सहर नु आ एर ओंथ डा बस्तु भाव योव्रतीके, अश्तारोथ सहर नु आ एर ओंथ डा बस्तु भाव योव्रतीके गेमे बाक्त। 72 मिनु इस्साकार आ थर डा मुर आन थेरशो रू रे केदेश सहर नु आ एर ओंथ डा बस्तु भाव योव्रतीके, दाबेराथ सहर नु आ एर ओंथ डा बस्तु भाव योव्रतीके, 73 रामोथ सहर नु आ एर ओंथ डा बस्तु भाव योव्रतीके नु आनेम सहर नु आ एर ओंथ डा बस्तु भाव योव्रतीके गेमे बाक्त। 74 आशेर आ थर डा मुरपुकीमी आन थेरशो रू रे माशाल सहर नु आ एर ओंथ डा बस्तु भाव योव्रतीके नु अब्दोन सहर नु आ एर ओंथ डा बस्तु भाव योव्रतीके, 75 हुकोक सहर नु आ एर ओंथ डा बस्तु भाव योव्रतीके, रेहोब सहर नु आ एर ओंथ डा बस्तु भाव योव्रतीके गेमे बाक्त। 76 नाप्ताली आ थर डा मुर आन थेरशो रू रे गालील डा केदेश सहर नु आ एर ओंथ डा बस्तु भाव योव्रतीके, हम्मोन सहर नु आ एर ओंथ डा बस्तु भाव योव्रतीके नु किरयथ-थाइम सहर नु आ एर ओंथ डा बस्तु भाव योव्रतीके गेमे बाक्त। 77 जबूलून आ थर डा मुरपुकीमी आन थेरशो रू रे मेरारी आ लीशो मुर आन कली रिम्मोनो सहर नु आ एर ओंथ डा बस्तु भाव योव्रतीके, ताबोर सहर नु आ एर ओंथ डा बस्तु भाव योव्रतीके गेमे बाक्त। 78 रूबेन आ थर डा

मुरपुकीमी आन थेरशो रू रे यर्दन आ आइक्की हांबु यरीको आ पूर्व गे गोरशो रागीम बाक्शो बेसेर सहर नु एर ओंथ डा बस्तु भाव योव्रतीके, याहसाह सहर नु आ एर ओंथ डा बस्तु भाव योव्रतीके, 79 केदेमोथ सहर नु आ एर ओंथ डा बस्तु भाव योव्रतीके नु मेफा-आथ सहर नु आ एर ओंथ डा बस्तु भाव योव्रतीके गेमे बाक्त। 80 मिनु गाद आ थर डा मुरपुकीमी आन थेरशो रू रे गिलाद डा रामोथ नु सहर नु आ एर ओंथ डा बस्तु भाव योव्रतीके, महा-नाइम सहर आ एर ओंथ डा बस्तु भाव योव्रतीके, 81 हेसबोन सहर नु आ एर ओंथ डा बस्तु भाव योव्रतीके नु याजेर सहर नु आ एर ओंथ डा बस्तु भाव योव्रतीके गेमे बाक्त।

7

इस्साकार आ तौ चच युइ

1 इस्साकार आ तौ तोला, पुआ, याशुब नु शिप्रोन ४ जना बाक्मा बाक्त। उत्पत्ती ४६:१३; गन्ती २६:२३-२४ 2 तोला आ तौ उज्जी, रेफायाह, येरीएल, याहमाइ, इब्साम नु शेमुएल बाक्मा बाक्त। मेको नेल्ले आन खिं खिं डा ठेयब मुर बाक्मा बाक्त। दाऊदम सासन पवा ना तोला आ खिं खिं डा मुर २२ हजार ६ सहे बोल्यो लडाइ पाइब बाक्मा बाक्त। 3 उज्जी आ तौ इज्रायाह बाक्मा बाक्त। इज्रायाह आ तौ मिकाएल, ओबदिया, योएल नु इस्शीयाह बाक्मा बाक्त। मेको ५ जना नेल्ल ठेयब मुर बाक्मा बाक्त। 4 मेको प्रोइशा यो अरु मुर आन पाला पाला डा खिं खिं डा मुर आन कली हिकशोनु ३६ हजार लडाइ पाइब मुर बाक्मा बाक्त। मारदे हना मेको आन के शुश मीश नु तौ बाक्मा बाक्त। 5 मेको आन खिं खिं डा मुर नेल्ल इस्साकार आ थर डा मुर बाक्मा बाक्त। मेको नेल्ल ८७ हजार बोल्यो लडाइ पाइब बाक्मा बाक्त।

बेन्यामीन आ तौ चच युइ

6 बेन्यामीन आ तौ बेला, बेकेर नु येदीएल सां बाक्मा बाक्त। १इतिहास ८:१-२; उत्पत्ती ४६:२१ 7 बेला आ तौ एस्बोन, उज्जी, उज्जीएल, येरीमोथ नु इरी ५ जना आन खिं खिं डा ठेयब मुर बाक्मा बाक्त। आन नें ब्रेक्शो २२ हजार ३४ जना बोल्यो लडाइ पाइब बाक्मा बाक्त। 8 बेकेर आ तौ जेमीरा, योआश, एलीएजर, एली-ओ-एनाइ, ओम्री, येरेमोथ, अबीयाह, अनाथोथ नु आलेमेथ बाक्मा बाक्त। मेको नेल्ल बेकेर आ तौ बाक्मा बाक्त। 9 मेको आन नें पाला पालामी ब्रेक्शो बाक्मा बाक्त। आन खिं खिं डा मुर आन ठेयब मुर बाक्मा बाक्त। मिनु आन दाते डा २० हजार सहे निकशी बोल्यो लडाइ पाइब बाक्मा बाक्त। 10 येदीएल आ तौ बिल्हान बाक्मा बाक्त। बिल्हान आ तौ येऊश बेन्यामीन, एहूद, केनानाह, जेथान, टारशीश नु अहीशाहार बाक्मा बाक्त। 11 मेको नेल्ल येदीएल आ तौ नु मेको आन खिं खिं डा ठेयब मुर बाक्मा बाक्त। मेको १७ हजार सहे निकशी बोल्यो लडाइ पाइब बाक्मा बाक्त। मेको लडाइ पचा कली ठीक दुम्शो बाक्मा बाक्त। 12 इर आ तौ शुप्पीम नु हुप्पीम बाक्सा बाक्त। आहेर आ तौ हुशीम बाक्मा बाक्त।

नाप्ताली आ तौ चच युइ

13 नाप्ताली आ तौ याहसीएल, गुनी, येसेर नु शाल्लुम बाक्मा बाक्त। मेको बिल्हाह आ चच युइ बाक्मा बाक्त। उत्पत्ती ४६:२४

मनस्से आ तौ चच युइ

14 मनस्से आ तौ अस्मीएल बाक्मा बाक्त। मेको आ नोले चाक्शो अरामी मीश रे थिशो तौ बाक्मा बाक्त। मेकोमी गिलाद आ आफ माकीर कली यो थिवा बाक्त। 15 मिनु माकीरमी हुप्पीम नु शुप्पीम आस कली मीश आल का का माल्शा, ग्युंभे पदा बाक्त। माकीर आ समी आ नें माकाह बाक्मा बाक्त। मेको आ माइला तौ आ नें सेलेफेहाद बाक्मा बाक्त। सेलोफेहाद के तमी ला बाक्मा बाक्त। गन्ती २७:१ 16 माकीर आ मीश माकाहमी तौ निकशी थिवा बाक्त। मेको आस नें पेरेश नु शेरेश वोदा बाक्त। पेरेशम तौ निकशी थिम्सी बाक्त। आस नें ऊलाम नु रेकेम वोदा बाक्त। 17 ऊलाम आ तौ बेदान बाक्मा बाक्त। मेको नेल्ले गिलाद आ तौ चच युइ बाक्मा बाक्त। गिलाद माकीर आ तौ नु मनस्से आ चच बाक्मा बाक्त। 18 गिलाद आ समी हाम्मोलेकेथमी तौ सां थीमी बाक्त। मेको इश्होद, अबीएजेर नु महलाह बाक्मा बाक्त। 19 शेमीदा आ तौ अहीयान, शेकेम, लिखी नु अन्याम बाक्मा बाक्त।

एफ्राइम आ तौ चच युइ

20 एफ्राइम आ तौ शुथेलाह बाक्मा बाक्त। शुथेलाह आ तौ बेरेद बाक्मा बाक्त। बेरेद आ तौ तहाथ बाक्मा बाक्त। तहाथ आ तौ एलेआदाह बाक्मा बाक्त। एलेआदाह आ तौ तहथ बाक्मा बाक्त। गन्ती २६:३५ 21 तहथ आ तौ जाबाद बाक्मा बाक्त।

जाबाद आ तौ शुथेलाह बाक्माक्त। शुथेलाह आ अरु तौ एजेर नु एलेआद बाक्सा बाक्त। मेको निक्शी गाथ डा मुर आन बस्तु भाव रोइक्थ लसानु, गाथ डा मुरपुकीमी मेको आस कली सदमे बाक्त। 22 मेको आस आफ एफ्राइममी मेको आस पबर्म शुश नाक्त सम्म रोंका पवा बाक्त। आ लोकबपुकी मेको कली लेम्थ जाक्मा बाक्त। 23 मेको नोले एफ्राइम आ मीश नु बाक्माक्त। मिनु मेकोमी कोव्रज कुरशा तौ का थिवा बाक्त। मेको आ नें बेरीआ वोदा बाक्त। मारदे हना मेना मेको खिंम श्येत दुम्शो बाक्माक्त। 24 एफ्राइम के शेराह माइश्शो तमी का यो बाक्माक्त। मेकोमी आइदी नु आइक्था बेथ-होरोन सहर नु उज्जेन-शेराह सहर सेल्शो बाक्माक्त।

25 एफ्राइम के रेफाह माइश्शो तौ यो बाक्माक्त। रेफाह आ तौ रेशेफ बाक्माक्त। रेशेफ आ तौ तेलाह बाक्माक्त। तेलाह आ तौ तहन बाक्माक्त। 26 तहन आ तौ लादान बाक्माक्त। लादान आ तौ अम्मीहुद बाक्माक्त। अम्मीहुद आ तौ एली-शामा बाक्माक्त। गन्ती १:१० 27 एली-शामा आ तौ नून बाक्माक्त। नून आ तौ यहोसु बाक्माक्त। गन्ती १३:८,१६ 28 मेको मुर आन थेरशो रू नु आन बाक्तीके बेथेल सहर नु मेको आ एर ओंथ डा सहर, पूर्ब गे नारान सहर नु आ एर ओंथ डा सहर, पच्छिम गे गेजेर सहर नु आ एर ओंथ डा सहर नेल्ले, शेकेम सहर नु आ एर ओंथ डा सहर, अय्याह नु आ एर ओंथ डा सहर बाक्मा बाक्त। यहोसु १६:१; यहोसु १६:१० 29 मनस्से आ मुर आन सांद बेथ-शेआन नु आ एर ओंथ डा सहर, तानाक नु आ एर ओंथ डा सहर, मेगीददो नु आ एर ओंथ डा सहर नु डोर नु आ एर ओंथ डा सहर बाक्मा बाक्त। मेको सहर नेल्लेम इस्राएल आ तौ योसेफ आ चच युइ बाक्शो बाक्मा बाक्त। यहोसु १७:११

आशेर आ तौ चच युइ

30 आशेर आ तौ इम्नाह, इश्वाह, इश्वी नु बेरीआ बाक्मा बाक्त। मेको आन समी सेराह बाक्माक्त। 31 बेरीआ आ तौ हेबेर नु माल्कीएल बाक्सा बाक्त। माल्कीएल बिरजाइथ आ आफ बाक्माक्त। उत्पत्ती ४६:१७ 32 हेबेर याफलेत, शोमेर, होथाम नु मेको आन समी शुआ आन आफ बाक्माक्त। 33 याफलेत आ तौ पासाक, बिम्हाल नु अश्वाथ बाक्मा बाक्त। मेकोपुकी याफलेत आ तौ बाक्मा बाक्त। 34 शेमेर आ तौ आही, रोहगाह, हूब्बाह नु अराम बाक्मा बाक्त। 35 आन लोकब हेलेम आ तौ सोफाह, इम्ना, शेलेश नु आमाल बाक्मा बाक्त। 36 सोफाह आ तौ सुआह, हारनेफेर, शुआल, बेरी, इम्नाह, 37 बेसेर, होद, शाम्मा, शिल्शाह, इथ्रान नु बेयरा बाक्मा बाक्त। 38 येथेर आ तौ यपुन्ने, पिस्पा नु आराह बाक्मा बाक्त। 39 उल्ला आ तौ आराह, हन्नीएल नु रिसीया बाक्मा बाक्त। 40 मेको नेल्ल आशेर आ खिं डा मुर नु मेको आन खिं खिं डा ठेयब मुर, बोल्यो लडाइ पाइब नु योव्रशो जोक्ब तुइक्ब लां कौंडब हिक्चा पुंडसीशो मुर बाक्मा बाक्त। मेको आन खिं खिं पा हिक्शा, नें ब्रेक्तीकेमी नें ब्रेक्शो लडाइ पाइब २६ हजार मुर बाक्मा बाक्त।

8

बेन्यामीन आ तौ चच युइ

1 बेन्यामीन आ डोंइती थिशो तौ बेला, माइला अशबेल, साइला अहाराह, उत्पत्ती ४६:२१ 2 काइला नोहा नु कान्छा रेफा आन आफ बाक्माक्त। 3 बेला आ तौ अददार, गेरा, अबीहुद, 4 अबीशुआ, नामान, अहोयाह, 5 गेरा, शेफुफान नु हुराम बाक्मा बाक्त। 6 एहूद आ तौ आन खिं खिं डा ठेयब मुर बाक्मा बाक्त। मेको गेबा सहरम बाक्शो बाक्मा बाक्त। ग्याइक्ब मुरपुकीमी मेको आन कली मानाहाथ सहरम बाक्चा गेमी बाक्त। एहूद आ तौ सु सु बाक्मा बाक्त देशा हना, 7 नामान, अहीयाह नु गेरा बाक्मा बाक्त। हेग्लाम माइश्शो गेरा उज्जा नु अहीहुद आस आफ बाक्माक्त। मेकोपुकी ग्याइश्शा लाइक्चा पुंडसीमा बाक्त। 8 मिनु शाहारैममी आ मीश हुशीम नु बारा आस कली प्रोना नोले मोआब रागीम तौपुकी थिवा बाक्त। 9 आ मीश होदेशमी योबाब, सिबीया, मेशा, माल्काम, 10 येऊस, साकीया नु मिरमाह थीमी बाक्त। मेको शाहारैम आ तौ आन खिं खिं डा ठेयब मुर बाक्मा बाक्त। 11 शाहारैम आ मीश हुशीममी यो अहीतुब नु एल्पाल थिम्सी बाक्त। 12 एल्पाल आ तौ एबेर, मिशाम नु शेमेद बाक्मा बाक्त। मेकोपुकीम ओनो नु लोद सहर नु आस एर ओंथ डा सहर सेल्मे बाक्त। 13 मिनु बेरीआ नु शेमा आइयालोन सहरम बाक्ब आन खिं खिं डा मुर आन ठेयब मुर बाक्सा बाक्त। मेको निक्शीमी गाथ सहरम बाक्ब मुर आन कली प्रोक्पदसे बाक्त। 14 मिनु बेरीआ आ तौ अहीयो, शाशाक, येरेमोथ, 15 जेबदीयाह, आराद, एदेर, 16 मिनु बेरीआ तौ मिकाएल, इश्पाह नु योहा बाक्मा बाक्त। 17 एल्पाल आ तौ जेबदीयाह, मेशुल्लाम, हिज्की, हेबेर, 18 इश्मेराइ, इज्लीयाह नु योबाब बाक्मा बाक्त। 19 शिमेइ आ तौ याकीम, जिक्री, जबदी, 20 एली-एनाइ, सिल्लेथाइ, एलीएल, 21 अदायाह, बेरायाह नु शिम्राथ बाक्मा बाक्त।

22 शाशाक आ तौ इशपान, एबेर, एलीएल, 23 अब्दोन, जिक्री, हानान, 24 हनान्याह, एलाम, अन्थोथीयाह, 25 इफदैयाह नु पेनुएल, बाक्मा बाक्त। 26 येरोहाम आ तौ शाम्शेराइ, शेहारयाह, अथाल्याह, 27 यारेश्याह, एलीया नु जिक्री बाक्मा बाक्त। 28 मेको आन पाला डा खिं खिं डा मुर आन ठेयब मुर बाक्मा बाक्त। मिनु यरूसलेम सहरम बाक्मो बाक्मा बाक्त।

सावल आ खिं डा मुर

29 गिबोन आ आफ यिएल गिबोन सहरम बाक्माक्त। मेको आ मीश आ नें माकाह बाक्माक्त। १ इतिहास ९:३५-४४ 30 मेको आ डोंइती थिशो तौ अब्दोन बाक्माक्त। मेको आ नोले डा तौ सुर, कीश, बाल, नादाब, 31 गेदोर, अहीयो, जेकेर नु मीक्लोथ बाक्मा बाक्त। 32 मीक्लोथ शिमेआह आ आफ बाक्माक्त। मेको नेल्ल यरूसलेम सहरम आन खिं खिं डा मुर आन नेक्था बाक्मो बाक्मा बाक्त।

33 नेर कीश आ आफ बाक्माक्त। कीश सावल आ आफ बाक्माक्त। सावल योनाथन, माल्कीशुआ, अबीनादाब नु एश-बाल आन आफ बाक्माक्त। १सामुएल १४:५१; २सामुएल २:८ 34 योनाथन आ तौ मेरीब-बाल बाक्माक्त। मेरीब-बाल मीकाह आ आफ बाक्माक्त। 35 मीकाह आ तौ पिथोन, मेलेक, ताहरेआ नु आहाज बाक्मा बाक्त। 36 आहाज येहो-अदाह आ आफ बाक्माक्त। येहो-अदाह आलेमेथ, अज्मावेथ नु जिम्नी आन आफ बाक्माक्त। जिम्नी मोचा आ आफ बाक्माक्त। 37 मोचा बिनैआ आ आफ बाक्माक्त। बिनैआ आ तौ रेफा बाक्माक्त। रेफा आ तौ एलेआसाह बाक्माक्त। एलेआसाह आ तौ आसेल बाक्माक्त। 38 आसेल के ६ जना तौ बाक्मा बाक्त। मेको आन नें अज्जीकाम, बोकेरु, इश्माएल, शेआरयाह, ओबदिया नु हानान बाक्मा बाक्त। मेको नेल्ल आसेल आ तौ बाक्मा बाक्त। 39 मेको आ लोकब एशेक आ डोंइती थिशो तौ ऊलाम, माइला येऊश नु कान्छा एली-फेलेत बाक्मा बाक्त। 40 ऊलाम आ तौ रिम्शो पा लिब्रा आप्ब नु बोल्यो लडाइ पाइब बाक्मा बाक्त। मेको आन के शुश आल नु चच बाक्मा बाक्त। मेको नेल्ल सहे का ५० जना बाक्मा बाक्त। मेको नेल्ल बेन्यामीन आ थर डा मुर बाक्मा बाक्त।

9

बाबेल रे लेशशा, यरूसलेममी बाक्ब मुर

1 मोपा इस्राएली नेल्ल आन खिं खिं डा मुर आन नें ब्रेक्शो बाक्मा बाक्त। मेको आन नें इस्राएल डा पिप आन किताबमी ब्रेक्शो बाक्मा बाक्त। मिनु यहूदा डा मुर आन परमप्रभु आ देशो मटितीके बेबीलोनम ग्याइशशा लाइक्चा पुंइसीमा बाक्त। २राजा २४:१५-१६ 2 मिनु नेल्ल क्येडा डोंइती लेंशा आंम थेरशो रू नु आंम आन सहरपुकीम बाक्ब सु सु बाक्मा बाक्त देशा हना, इस्राएल डा मुर, चढ़ेब, लेवी नु परमप्रभु यावे आ खिंम गेय पाइबपुकी बाक्मा बाक्त। यहोसु ९:२३, २७; एज्रा ८:२०

3 मिनु यहूदा आ थर डा, बेन्यामीन आ थर डा, एफ्राइम आ थर डा नु मनस्से आ थर डा मुर का निक्शी यरूसलेम सहरम बाक्मा बाक्त। नहेम्याह ११:३-१९ 4 मेको सु सु बाक्मा बाक्त देशा हना, उथाइ आ आफ अम्मीहुद, अम्मीहुद आ आफ ओम्री ओम्री आ आफ इम्री, इम्री आ आफ बानी बानी आ आफ पेरेस नु पेरेस आ आफ यहूदा बाक्मा बाक्त। 5 मिनु शिलो डा मुर रे डोंइती थिशो तौ आसायाह नु आ तौपुकी बाक्मा बाक्त। 6 जेराह आ डोंइती डा तौ येहुएल नु आ खिं खिं डा मुर बाक्मा बाक्त। मेको नेल्ल पा ६ सहे ९० जना बाक्मा बाक्त। 7 बेन्यामीन आ थर डा मुर रे सल्लु आ आफ मेशुल्लाम, मेशुल्लाम आ आफ होदावीयाह, होदावीयाह आ आफ हास्सेनुआ, 8 हास्सेनुआ आ आफ इब्नैआ, इब्नैआ आ आफ येरोहाम येरोहाम आ आफ एलाह, आ आफ उज्जी, उज्जी आ आफ मिक्री, मिक्री आ आफ मेशुल्लाम, मेशुल्लाम आ आफ शेफत्याह, शेफत्याह आ आफ रूएल, रूएल आ आफ इब्नीयाह बाक्मा बाक्त। 9 मिनु आन पाला डा खिं खिं डा ९ सहे ५६ जना मुर बाक्मा बाक्त। मेको नेल्ले आन खिं खिं डा ठेयब मुर बाक्मा बाक्त।

10 चढ़ेब आन दाते डा सु सु बाक्मा बाक्त देशा हना, येदायाह, येहो-यारीब, याकीन, 11 अजारयाह आ आफ हिल्कीयाह, हिल्कीयाह आ आफ मेशुल्लाम, मेशुल्लाम आ आफ सादोक, सादोक आ आफ मेरायोथ, मेरायोथ आ आफ अहीतुब बाक्मा बाक्त। अहीतुब परमप्रभु आ खिं डा नेल्ल क्येडा ठेयब मुर बाक्माक्त। १ इतिहास ५:३८-३९ 12 मिनु अदायाह आ आफ येरोहाम, येरोहाम आ आफ पशहुर, पशहुर आ आफ माल्कीयाह, माल्कीयाह आ आफ मासाइ, मासाइ आ आफ अदीएल, अदीएल आ आफ याहजेराह, याहजेराह आ आफ मेशुल्लाम, मेशुल्लाम आ आफ मेशील्लेमीथ, मेशील्लेमीथ आ आफ इम्मेर बाक्मा बाक्त। 13 मेको आन खिं खिं डा ठेयब मुर बाक्मा बाक्त। मिनु नेल्ले परमप्रभु आ खिंम गेय पचा जोक्ब तुइक्ब हजार का ७ सहे ६० जना बाक्मा बाक्त।

14 मिनु लेवी आ थर डा मुर सु सु बाक्मा बाक्त देशा हना, शेमायाह आ आफ हाशुब, हाशुब आ आफ अजीकाम, अजीकाम आ आफ हशाब्याह, हशाब्याह आ आफ मेरारी बाक्मा बाक्त। 15 मिनु बाकबाकार, हेरेश, गालाल नु मत्तन्याह आन आफ मीका, मीका आ आफ जिक्री, आ आफ जिक्री आ आफ आसाफ बाक्मा बाक्त। 16 मिनु ओबदिया आ आफ शेमायाह, शेमायाह आ आफ गालाल, गालाल आ आफ येदुथून, येदुथून आ आफ बेरेक्याह, बेरेक्याह आ आफ आसा नु आसा आ आफ एल्काना बाक्मा बाक्त। मेकोपुकी नेतोफाह डा मुर आन गाउंमी बाक्शो बाक्मा बाक्त। १इतिहास २:५४

17 लाप्चो खाल पाइबपुकी शाल्लुम, अक्कुब, ताल्मोन नु अहीमान बाक्मा बाक्त। मिनु आन लोकब शाल्लुम आन ठेयब मुर बाक्माक्त। 18 मेको डोंइती पूर्व गे पिप आ लाप्चो खाल पाइब बाक्माक्त। मिनु अरु लेवीपुकी लेवी आन बाक्तीक डा लाप्चो खाल पाइब बाक्मा बाक्त। 19 शाल्लुम आ आफ कोरे, कोरे आ आफ एब्यासाफ, एब्यासाफ आ आफ कोराह बाक्मा बाक्त। कोराह आ खिं खिं डा मुर गेय आन ठेयब मुर बाक्तेक्म। मिनु परमप्रभु यावे आ ताम्बु आ ओव्रतीक खाल पाइब आन किकी पिपी खोदेंशो पाइब बाक्मा बाक्त। २इतिहास ३४:९ 20 मेको क्येडा डोंइती एलाजर आ तौ फिनेहास मेको आन कली कोव्रब ठेयब मुर बाक्माक्त। मिनु परमप्रभु यावे मेको नु बाक्माक्त। गन्ती २५:७-१३ 21 जकरिया मेशेलेम्याह आ तौ गुम्तीक ताम्बु डा ओव्रतीक खाल पाइब बाक्माक्त। 22 मेको नेल्ल लाप्चो खाल पाइब योव्रशो सहे निक्शी १२ जना मुर बाक्मा बाक्त। मेको आन नें आन गाउं गाउंमी ब्रेक्तीकेम ब्रेक्शो बाक्मा बाक्त। दाऊद नु परमप्रभु यावे आ लोव्र पाइब सामुएलम थमा सुइक्चा पुंडसीशो मुर आन कली मेको गेय गेम्से बाक्त। १सामुएल ९:८-११ 23 मेको नु आन तौ चच परमप्रभु यावे आ बाक्तीक डा ओव्रतीक खाल पाइब बाक्मा बाक्त। मेको बाक्तीक ताम्बु बाक्माक्त। 24 मेकोपुकी परमप्रभु यावे आ बाक्तीके खाल पाइब पूर्व, पच्छिम, उत्तर नु दक्खिन एर ओंथ गे बाक्मा बाक्त। 25 मेको आन खिं खिं डा मुर आन गाउंम बाक्मा बाक्त। मेकोपुकी ७, ७ नाक्त पा मेको नु बाक्थ जाक्चा माल्मा बाक्त। 26 मिनु मेको लाप्चो खाल पाइब आन कली कोव्रब ठेयब मुर लेवी आ मुर ४ जना बाक्मा बाक्त। मेकोपुकी परमप्रभु आ खिं डा कोठा नु शोप वोइक्तीक कोठा खाल पाइब बाक्मा बाक्त। 27 मेकोपुकी नाक्दो परमप्रभु आ बाक्तीके आ नेक्था बाक्बाक्मा बाक्त। मारदे हना मेको आन गेय नाक्दो कोव्रतीक बाक्माक्त। मिनु सुनी कुस कुस परमप्रभु आ बाक्तीक रोक्चा माल्बाक्मा बाक्त।

28 मेको आन दाते डा का निक्शीमी परमप्रभु आ बाक्तीके डा गेय पतीक मार मार खाल पाइब बाक्मा बाक्त। मेकोपुकीमी मार मार आगा लदमेनु नु गुंडदमेनु, हिक्शा वोइक्चा माल्बाक्मा बाक्त। 29 मेको आन दाते डा अरुमी परमप्रभु यावे आ ग्योब नेल्ल, फस, अडगुर शांबु, तेल, धूप नु मस्ला खाल पाइब बाक्मा बाक्त। 30 चढेब आन तौ डा का निक्शीम मस्ला ब्वाइक्तीक गेय पाइबाक्मा बाक्त। प्रस्थान ३०:२३-२५ 31 मिनु लेवी आ थर डा कोराह आ खिं डा मुर शाल्लुम आ डोंइती थिशो तौ मत्तीथ्याहमी शोब्ले सेल्टीक गेय पाइब बाक्माक्त। 32 मेको आन खिं खिं डा मुर कोहाथ आ मुर का निक्शीमी नाइक्तीक नाक्ती कोंइतीक शोब्ले ठीक पा वोइक्तीके गेय पाइबाक्मा बाक्त। लेवी २४:५-८

33 मिनु कुम्सो पाइब नु लेवी आन खिं खिं डा ठेयब मुर परमप्रभु यावे आ खिं डा कोठापुकीम बाक्बाक्मा बाक्त। मिनु अरु गेय पचा ममाल्बाक्मा बाक्त। मारदे हना मेको आन गेय नाक्दो नु नाक्ती बाक्माक्त। 34 मेको नेल्ल आन पालामी लेवी आ थर डा खिं खिं डा ठेयब मुर बाक्मा बाक्त। मिनु यरूसलेम सहरम बाक्बाक्मा बाक्त।

सावल आ किक नु चच युइ

१इतिहास ८:२८-३८

35 गिबोन आ आफ यिएल गिबोन सहरम बाक्शो बाक्माक्त। मेको आ मीश आ नें माकाह बाक्माक्त। 36 मेको आ डोंइती थिशो तौ अब्दोन बाक्माक्त। मिनु नोले डा तौ सुर, कीश, बाल, नेर, नादाब, 37 गेदोर, अहीयो, जकरिया नु मीक्लोथ बाक्मा बाक्त। 38 मीक्लोथ शिमे-आम आ आफ बाक्माक्त। मेकोपुकी यो यरूसलेमम आन खिं खिं डा मुर आन नेक्था बाक्बाक्मा बाक्त। 39 नेर कीश आ आफ बाक्माक्त। कीश सावल आ आफ बाक्माक्त। सावल योनाथन, माल्कीशुआ, अबीनादाब नु एश-बाल आन आफ बाक्माक्त। 40 योनाथन आ तौ मेरीब-बाल बाक्माक्त। मिनु मेरीब-बाल मीकाह आ आफ बाक्माक्त। 41 मीकाह आ तौ पिथोन, मेलेक, ताहरेआ नु आहाज बाक्मा बाक्त। 42 आहाज याराह आ आफ बाक्माक्त। मिनु याराह आलेमेथ अज्मावेथ नु जिम्नी आन आफ बाक्माक्त। जिम्नी मोचा आ आफ बाक्माक्त। 43 मिनु मोचा बिनेआ आ आफ बाक्माक्त। बिनेआ आ तौ रेफायाह बाक्माक्त। रेफायाह आ तौ एलेआसाह बाक्माक्त। एलेआसाह आ तौ आसेल बाक्माक्त। 44 आसेल के ६ जना तौ बाक्मा बाक्त। मिनु मेको

आन नें अज्रीकाम, बोकेरु, इश्माएल, शेआरयाह, ओबदिया नु हानान बाक्मा बाक्त। मेको नेल्ल आसेल आ तौ बाक्मा बाक्त।

10

सावल नु आ तौपुकी बेक्शो
१सामुएल ३१:-

1 पलिस्तीपुकीम इस्राएल नु लडाइ पामे बाक्त। मिनु इस्राएल डा मुर पलिस्ती आन डोंइती रे प्रोकमा बाक्त। मिनु गिल्बोआ डांडाम साइक्चा पुंडिसामा बाक्त। 2 मिनु पलिस्तीपुकीम सावल नु आ तौ आन कली खेदा पामे बाक्त। मिनु सावल आ तौ सांफा योनाथन, अबीनादाब नु माल्कीशुआ सदमे बाक्त। 3 मेको लडाइम सावल कली थम श्येत दुम्माक्त। मारदे हना का निक्शी ब्रा आप्बपुकीम मेको कली आप्मे बाक्त। मिनु सावल मेको रे गार दुम्माक्त।

4 मोपतीके सावलमी आ या कुरब कली “इ तरवार शोइश्शा साइय्यी। खोइक्तीक चिनु मख्रोइश्शोपुकीम आं कली ग्याइश्शा मरिम्शो मपाइय्यीमील” दे मदा बाक्त। तन्न आ या कुरब हिंशा, मबिस्से बाक्त। मिनु सावल आ या शोइश्शा, तूसे बाक्त। 5 मिनु मेको या कुरबम सावल कली बेक्शो तशा, आं यो आ या शोइश्शा आंम कली सांडसे बाक्त। 6 मोपा सावल नु आ तौ सांफा आ खिं डा मुर नेल्ल कालेम बेक्मा बाक्त। 7 मिनु बेंसीम बाक्शो इस्राएली नेल्लेमी लडाइ पाइब प्रोक्शो नु सावल नु आ तौ बेक्शो तशा, मेको आन सहर प्रोंइशा प्रोकमा बाक्त। मिनु पलिस्ती मेकेर जाक्दीश्शा, मेको सहर आन के सेल्मे बाक्त।

8 मिनु आ दीसा पलिस्तीपुकी बेक्शो मुर आन मार मार गुप्थ जाक्शा, सावल नु आ तौ आन कली गिल्बोआ डांडाम बेक्शो थित्मे बाक्त। 9 मिनु मेकोपुकीम मेको आ फेक्तीक फ्रुइश्शा, आ पिया खोइश्शा लाइश्शा, आन रागी डा देवता नु मुर नेल्ल आन कली मेको लोव्र नेंपाइक्चा कली कुरब मुर आन कली सोइक्तमे बाक्त। 10 मेकोपुकीम सावल आ या आन देवी देवता आन थानम वोदमे बाक्त। आ पिया दागोन आ थानम क्युकगमे बाक्त।

11 मिनु याबेश-गिलाद सहर डा मुरपुकीमी पलिस्तीमी सावल कली मार मार पदमे, मेको नेंशा, 12 बोल्यो लडाइ पाइब नेल्ले बोक्शा, सावल नु आ तौ आन रां ब्रथ लमा बाक्त। मिनु मेकोपुकीम मेको आन रां याबेश सहर चाक्गमे बाक्त। मिनु याबेश डा मुरपुकीमी मेको आन कली यावेश डा ठेयब रवा आ पुंम थिम्मे बाक्त। मिनु ७ नाक्त सम्म माइजा बाक्मा बाक्त। २सामुएल २:४-५

13 मोपा सावल आ परमप्रभु यावे प्रोंइतीके आ पर्बम बेक्चा माल्दा बाक्त। मेकोमी परमप्रभु यावे आ शेंशो मटिथु, बेक्शो मुर नु लोव्र पाइब आ लोव्र नेना बाक्त। १सामुएल १५:२३; १सामुएल २८:८ 14 मिनु परमप्रभु यावे आ अर्ती ममाल्थु, मनेना बाक्त। मोपतीके परमप्रभु यावेमी मेको कली सदा बाक्त। मिनु आ राज्य येस्से आ तौ दाऊद कली गेवा बाक्त।

11

दाऊद इस्राएली आन पिप दुम्शो
२सामुएल ५:१-१०

1 मिनु मेको नोले इस्राएल डा मुर नेल्ल गुम्शा दाऊद आ बाक्तीक हेब्रोन सहरम बुक्मा बाक्त। मिनु मेकोपुकीम “गोपुकी इन मुर नकी। उत्पत्ती २९:१४ 2 डोंइती सावल पिप बाक्मेनु, गे इस्राएल डा लडाइ पाइब आन ठेयब कप्तान बाक्तीनी। मिनु परमप्रभु यावे, इन परमप्रभुमी इन कली ‘गे आं मुर, इस्राएली आन गोठला नु आन पिप दुम्नेवे’ देशो बाक्त” देंमा बाक्त।

3 मिनु इस्राएल डा खाल्पा नेल्ल पिप आ बाक्तीक हेब्रोन सहरम जाक्मा बाक्त। मिनु दाऊदमी हेब्रोन सहरमी परमप्रभु यावे आ डोंइती मेकोपुकी नु कबल पवा बाक्त। दाऊद कली तेल लुकशा इस्राएल डा पिप सेल्मे बाक्त। दोपा परमप्रभु यावेम सामुएल कली दोदेशो देंमे, मोदेशो पामे बाक्त। १सामुएल १६:१, ३, ११, १२

दाऊदम यरूसलेम सहर ग्राशो

4 मिनु दाऊद नु इस्राएल डा लडाइ पाइब नेल्ले यरूसलेम लमा बाक्त। मेको यबुस सहर बाक्माक्त। मेकेर यबुसी बाक्शो बाक्मा बाक्त। 5 मिनु यबुसम बाक्ब मुरपुकीमी दाऊद कली “गे एक गेनायो जाक्ने मचाप्नेवे” देंमा बाक्त। मो हना यो दाऊदम सियोन डा बोल्यो सहर ग्रामाक्त। मेको कली मुल सम्म दाऊद आ सहर देंनीम।

6 दाऊदमी “सु यबुसी आन कली डोंइती लडाइ तोइबा, मेको नेल्ल क्येडा ठेयब कप्तान दुम्ब” देशो बाक्माक्त। मिनु मेकेर डोंइती सेरूयाह आ तौ योआब डोंइसे बाक्त। मोपतीके मेको ठेयब कप्तान दुम्माक्त।

7 मिनु दाऊद मेको बोल्यो सहरम बाक्शो बाक्माक्त। मोपतीके मुरुमी मेको सहर कली दाऊद आ सहर देंमा बाक्त। 8 मिनु दाऊदमी मेको सहर आ एर ओंथ डा गारो तिकतीक रे सहर नेल्ल आ एर ओंथ गारो हिरशा सेला बाक्त। मिनु योआबम लीशो ब्रेशो खिं लेंशा सेला बाक्त। 9 मोपा दाऊद शुश बोल्यो दुम्ना दुम्न लमाक्त। मारदे हना मुर नेल्ल आन परमप्रभु यावे मेको नु बाक्माक्त।

दाऊद आ बोल्यो लडाइ पाइब
२सामुएल २३:८-३९

10 मिनु दाऊद आ राज्य बोल्यो सेल्ल नु आ लडाइ पाइब आन ठेयब कप्तान आन पर्वम ब्रेक्शो लोव्र एको बाक्माक्त। मेकोपुकी नु इस्राएली नेल्लेमी दाऊद कली आन पिप सेल्ले बाक्त। परमप्रभु यावेमी इस्राएली आन पर्वम दोदेशो लोव्र पवा, मोदेशो पामे बाक्त।

11 दाऊद आ बोल्यो लडाइ पाइब सु सु बाक्मा बाक्त देशा हना, हाकमोनी आ तौ याशोबाम कप्तान सां आन ठेयब कप्तान बाक्माक्त। मेकोमी आ तूतीकेमी कालेमी सहे सां मुर आन कली सदा बाक्त।

12 मेको आ नोले अहोही डा मुर दोदो आ तौ एलाजर बाक्माक्त। मेको बोल्यो मुर सां आन दाते डा का बाक्माक्त। १इतिहास २७:४ 13 मेको दाऊद नु पलिस्ती नु लडाइ पचा कली पास-दम्मीम बाक्शो बाक्माक्त। मेकेर क्योव्रज रू का बाक्माक्त। मिनु मुर नेल्ल पलिस्ती आन डोंइती रे प्रोक्मा बाक्त। 14 तन्न एलाजर नु दाऊद ला रू आ दातेमी राप्शा बाक्सा बाक्त। मिनु मेको निक्शीमी पलिस्ती आन कली ग्राशा क्योव्रज रू कली मारेइ दुम्चा मगेम्से बाक्त। मोपा परमप्रभु यावेमी ठेयब पा ग्रापाइशशा प्रोक्पदा बाक्त।

15 मेको ३० जना कप्तान आन दाते डा सां दाऊद आ बाक्तीके अदुल्लाम डा पुक्खी आ नेक्था बाक्शो सेरथे फुल्लुम लमा बाक्त। मेना पलिस्ती आन लडाइ पाइब रेफाइम डा बेसीम ताम्बु कीशा बाक्शो बाक्मा बाक्त। १सामुएल २२:१ 16 दाऊद बोल्यो बाक्तीकेमी बाक्शो बाक्माक्त। मिनु पलिस्ती आन लडाइ पाइब बेथलेहेम सहरम बाक्शो बाक्मा बाक्त। 17 मिनु दाऊदमी थाम्पा तूतू दाक्शा “सुइम आं कली बेथलेहेम डा ठेयब लाप्चो आ डोंइती बाक्शो इनार डा ब्वाक्कु तूचा गेयीमी हना, दुम वा” देंमाक्त। 18 मेना मेको मुर सां पलिस्ती आन दाते रे ग्रीशा लशा बेथलेहेम डा ठेयब लाप्चो आ डोंइती डा इनार डा ब्वाक्कु ताप्शा, दाऊद आ बाक्तीकेम चाक्गमे बाक्त। तन्न दाऊदम मेको तूने मबिस्से बाक्त। मिनु ब्वाक्कु परमप्रभु यावे आ डोंइती मोदा बाक्त। 19 मेकोमी “आं परमप्रभुम आं कली ओदेशो पचा मगेयील। गो एको मुर आन हुश तूनुडा? मारदे हना एको आन गिंम खतम दुम्चा डा पा लशा ब्वाक्कु चाक्तेक्म” देंमाक्त। मोपतीके मेकोमी मेको ब्वाक्कु मतूडा बाक्त। मेको बोल्यो लडाइ पाइब सां आन पशो गेय मेकोन बाक्माक्त।

20 योआब आ लोकब अबीशै मेको ३० जना आन कप्तान बाक्माक्त। मेकोमी आ तूतीकेमी कालेम सहे सां मुर आन कली लडाइ पा साइक्मी बाक्त। मिनु मोपा मेको सां आन दातेमी हिक्चा पुंइसे बाक्त। 21 मेको ३० जना आन दातेम ठेयब दुम्माक्त। मेको सां आन दातेमी मान तवा बाक्त। मिनु आन कप्तान दुम्माक्त। तन्न मेको डोंइती डा सां आन खोदेशो पा मान मतवा बाक्त।

22 येहो-यादा आ तौ बेनायाह कब्सेल सहर डा शुश बोल्यो लडाइ पाइब का बाक्माक्त। मेकोमी मोआब डा अरीएल आ तौ निक्शी आस कली सदा बाक्त। फुं यिम नाक्त ढोडोडगाम बाक्ब गुप्स का सदा बाक्त। 23 मेकोमी ५ कुबीत लाइशो इजीप्त डा मुर का यो सदा बाक्त। मेको आ तूतीक वा प्रोव्रतीक शी खोमो बाक्माक्त। मेको बेनायाहमी कोक्के का कुरशा, मेको तूतीक इजीप्त डा मुर आ गुइ रे रोइशशा, आंम आ तूतीकेमी सदा बाक्त। कुबीत का ०.५ मिटर बाक्ब। १सामुएल १७:७ 24 मेको येहो-यादा आ तौ बेनायाह आ पशो बाक्माक्त। मिनु मोपा बेनायाह मेको मुर सां आन दातेम हिक्से बाक्त। १इतिहास २७:५-६ 25 मिनु ३० जना आन क्येडा मेकोमी शुश मान तवा बाक्त। तन्न मेको सां आन दातेम महिक्से बाक्त। दाऊदमी मेको कली आ कली खाल पाइब आन ठेयब मुर सेला बाक्त।

26 मिनु अरु मान तशो लडाइ पाइब सु सु बाक्मा बाक्त देशा हना, योआब आ लोकब आसाहेल, बेथलेहेम डा दोदो आ तौ एल्हानान, 27 हारोद सहर डा शाम्माथ, पेलोन डा मुर हेलेस, १इतिहास २७:१० 28 तेकोहा सहर डा इक्केश आ तौ इरा, अनाथोथ डा अबीएजेर, 29 हुशा डा मुर सिब्बेकै, अहोही आ मुर इलाइ, 30 नेतोफाह डा माहाराइ,

नेतोफाह डा बानाह आ तौ हेलेद, 31 बेन्यामीन आ थर डा गिबा डा रिबाइ आ तौ इथाइ, पिराथोन डा बेनायाह, 32 गाश डा खोल्सा आ नेक्था बाक्ब हूरै, अरबा आ मुर अबीएल, 33 बाहारुम सहर डा अज्मावेथ, शा-आल्बोन सहर डा एली-अहबा, 34 गिजोन डा मुर हाशेम, हरारी शागे आ तौ योनाथन, 35 हरारी साकार आ तौ अहीयाम, ऊर आ तौ एलीफाल, 36 मेकारा सहर डा मुर हेफेर, पेलोन डा मुर अहीयाह, 37 कारमेल डा हेस्रो, एज्बाइ आ तौ नाराइ, 38 नाथान आ लोकब योएल, हाग्री आ तौ मिभार, 39 अम्मोनी जेलेक, बेयरोथ सहर डा नहाराइ, मेको नहाराइ डा सेरूयाह आ तौ योआब आ या कुरब बाक्माक्त। 40 इथ्री आ मुर इरा, इथ्री आ मुर गरिब, २सामुएल ११:३ 41 हिती उरीयाह, अहलै आ तौ जाबाद, 42 रूबेन आ थर डा शीजा आ तौ अदीना मेको रूबेन आ थर डा मुर आन ठेयब मुर का बाक्माक्त। मेको नु आ मुर नु ३० जना बाक्मा बाक्त। 43 माकाह आ तौ हानान, मिथनी आ मुर योशाफात, 44 अशतारोथ सहर डा मुर उज्जीया, आरोएर आ मुर होथाम आ तौ शामा नु यिएल, 45 शिग्री आ तौ येदीएल नु आ लोकब तिजी आ मुर योहा, 46 महाब आ मुर एलीएल, एलनाम आ तौ येरीबाइ नु योशावीयाह नु मोआबी इथ्माह, 47 एलीएल, ओबेद नु मेजोबी यासीएल बाक्मा बाक्त।

12

दाऊद आ लडाइ पाइबपुकी

1 दाऊद सिकलाग सहरम बाक्मेनु, आ बाक्तीक जाक्ब बोल्यो लडाइ पाइब नु लडाइम वारच पाइब बाक्मा बाक्त। मेना दाऊद कीश आ तौ सावल आ डोंइती रे प्रोकशो बाक्माक्त। १सामुएल २७:६ 2 मेकोपुकी लिब्रा कुरब बाक्मा बाक्त। मिनु ग्युरा नु पेरा गुइ निम्फामी ब्रा नु हुरद आप्ने चाप्ब बाक्मा बाक्त। मेकोपुकी बेन्यामीन आ थर डा सावल आ खिं खिं डा मुर बाक्मा बाक्त।

3 मिनु सु सु बाक्मा बाक्त देशा हना, मेको आन दाते डा ठेयब मुर अही-एजेर नु योआश निम्फा गिबा डा शेमाह आ तौ बाक्सा बाक्त। मिनु अरु अज्मावेथ आ तौ येजीएल नु पेलेत बाक्सा बाक्त। बेराकाह नु अनाथोथ डा येहू बाक्सा बाक्त। 4 गिबोन डा इश्मायाह मेको ३० जना आन दाते डा बोल्यो लडाइ पाइब नु मेको आन ठेयब मुर बाक्माक्त। अरु येरमीया, याहासीएल, योहानान नु गेदेराह सहर डा योजाबाद, 5 एलुजाइ, येरीमोथ, बेअल्याह, शेमारयाह, हारुफ आ मुर शेफत्याह बाक्मा बाक्त। 6 कोराह आ खिं डा एल्काना, इस्शीयाह, अजारेल, योएजेर नु याशोबाम बाक्मा बाक्त। 7 मिनु गेदोर डा येरोहाम आ तौ योएलाह नु जेबदीयाह बाक्सा बाक्त।

8 मिनु गाद आ थर डा मुर यो गोरशो रागीम दाऊद आ बोल्यो बाक्तीकेम जाक्शो बाक्मा बाक्त। मेको तेक्तीक नु तूतीक कुरशो जोक्ब तुइक्ब लडाइ पाइब बाक्मा बाक्त। मेको आन कुल गुप्स खोदेशो हिंचा डा बाक्मा बाक्त। रोकौश खोदेशो पा दोरने चाप्ब बाक्मा बाक्त। 9 मेको आन ठेयब मुर एजेर बाक्माक्त। एजेर आ नोले डा ओबदिया बाक्माक्त। ओबदिया आ नोले डा एलीआब बाक्माक्त। 10 एलीआब आ नोले डा मिश्मन्नाह बाक्माक्त। मिश्मन्नाह आ नोले डा येरमीया बाक्माक्त। 11 येरमीया आ नोले डा अत्तै बाक्माक्त। अत्तै आ नोले डा एलीएल बाक्माक्त। 12 एलीएल आ नोले डा योहानान बाक्माक्त। योहानान आ नोले डा एल्जाबाद बाक्माक्त। 13 एल्जाबाद आ नोले डा येरमीया बाक्माक्त। येरमीया आ नोले डा माकबन्नाइ बाक्माक्त। 14 मेको मुरपुकी गाद आ थर डा लडाइ पाइब आन कप्तान बाक्मा बाक्त। मेको आन दाते डा नेल्ल क्येडा आइक्च सहे का नु लडाइ पने चाप्ब नु नेल्ल क्येडा ठेयब हजार का नु लडाइ पने चाप्ब बाक्मा बाक्त। 15 मेको नेल्ले डोंइती डा महिनाम यर्दन खोला शोकसामा बाक्त। मेना खोला बारशा लशो बाक्माक्त। मिनु यर्दन खोला शोकशा, मेको आ पूर्ब नु पच्छिम डा बेसीम बाक्ब मुर नेल्ल आन कली खेदा पा खेरशो बाक्मा बाक्त।

16 मिनु बेन्यामीन आ थर नु यहूदा आ थर डा का निकशी मुर गोरशो रागीम दाऊद आ बोल्यो बाक्तीकेम जाक्मा बाक्त। 17 मिनु दाऊद मेको आन कली गुमथ लशा, मेको आन कली “गे गो नु वारचु दुमशा, आं कली वारच पाइक्थ जाक्शो ननी हना, गो इन कली दाक्नुड। तन्न गेपुकीम आं कली क्यारी पथ नु आं जोरी सत्रु आन कली शेंथ जाक्तीनी हना, इं किकी पिपी आन परमप्रभुम एको तशा, इन कली निसाफ पवल” देंमाक्त। 18 मेना परमप्रभु आ सोक्तीम मेको ३० जना आन दाते डा कप्तान अमासै कली सुमा बाक्त।

मिनु मेकोम “दाऊद, गो इन मुर नकी। येस्से आ तौ दाऊद गो गे नु बाक्नीकी। इन थुं नाइक्सेक्ल। मिनु इन कली वारच पाइब आ थुं नाइक्सेक्ल। इन परमप्रभु इन कली वारच पाइब बाक्ब” देंमाक्त।

मिनु दाऊद म मेको आन कली ब्रावा बाक्त। मिनु मेको आन कली आ हुल डा कप्तान सेल्मी बाक्त।

19 मिनु दाऊद पलिस्ती नु गारशा, सावल नु लडाइ पथ लमाक्त। मेना मनस्से आ थर डा मुर का निक्शी सावल कली प्रोइशा, दाऊद आ बाक्तीके जाक्मा बाक्त। तन्न पलिस्ती नु गारशा लडाइ चहिं मपामे बाक्त। मारदे हना पलिस्ती आन सासन पाइबपुकीमी आंम आंमा सल्ला पा दाऊद कली आ नु लडाइ मपपदमे बाक्त। मेकोपुकीम “मेकोमी आ होव्रप सावल कली वारच पा, गो इं कली प्रोइब। मिनु मो दुम्मेनु, गो लडाइ बुइनय। गो बेक्नय” देमुमा बाक्त। १सामुएल २९:३-४ 20 मिनु दाऊद सिकलाग सहरम लामेनु, मेको आ बाक्तीक जाक्ब मनस्से आ थर डा मुर आदनाह, योजाबाद, येदीएल, मिकाएल, योजाबाद, एलीहु नु सिल्लेथाइ बाक्मा बाक्त। मेकोपुकी मनस्से आ खिं डा हजार का का डा लडाइ पाइब आन कप्तान बाक्मा बाक्त। 21 मिनु मेकोपुकीमी दाऊद कली मार मार रोइक्ब आन पर्बम लडाइ पचा कली वारच पाइशो बाक्मा बाक्त। मारदे हना, मेको नेल्ल लडाइ पाइब नु कप्तान बाक्मा बाक्त। 22 थमा पा नाक्त किंत किंत दाऊद आ बाक्तीके अर्को लडाइ पाइब वारच पथ जाक्मा बाक्त। नोले परमप्रभु आ फौज खोदेशो शुश दुम्मा बाक्त।

दाऊद कली वारच पाइब मुर

23 दाऊद हेब्रोन सहरम बाक्मेनु, या कुरशा, वारच पाइब लडाइ पाइब शुश जाक्मा बाक्त। परमप्रभु यावेम देशो खोदेशो पा सावल आ राज्य रोइशशा दाऊद कली गेचा, दे मो पामे बाक्त। 24 मेको सु सु बाक्मा बाक्त देशा हना, यहूदा आ थर डा ६ हजार ८ सहे तेक्तीक नु तूतीक कुरशो लडाइ पाइब बाक्मा बाक्त। 25 सिमियोन आ थर डा ७ हजार सहे का बोल्यो लडाइ पाइब बाक्मा बाक्त। 26 लेवी आ थर डा ४ हजार ६ सहे मुर बाक्मा बाक्त। 27 मेको हारून आ खिं डा ठेयब मुर येहो-यादा नु हजार सां ७ सहे मुर बाक्मा बाक्त। 28 मिनु ठिटा लडाइ पाइब सादोक नु मेको आ खिं खिं डा मुर २२ जना कप्तान बाक्मा बाक्त। १इतिहास ५:३४; २सामुएल १५:२४ 29 सावल आ खिं डा मुर बेन्यामीन आ थर डा हजार सां मुर बाक्त। तन्न सावल आ खिं डा शुश मुर सावल कली मप्रोइथु बाक्मा बाक्त। 30 एफ्राइम आ थर डा २० हजार ८ सहे बोल्यो लडाइ पाइब नु आन खिं डा ठेयब मुर बाक्मा बाक्त। 31 मनस्से आ उइक्थ थर डा १८ हजार मुर बाक्मा बाक्त। मेको दाऊद कली पिप सेल्चा कली योव्रशो मुर बाक्मा बाक्त। 32 इस्साकार आ थर डा इस्राएल डा मुर तेको लां गाक्पाइक्चा माल्बा, मार मार पचा माल्नीम मारेइ मारेइ तुइक्ब सहे निक्शी कप्तान बाक्मा बाक्त। मेको आन खिं खिं डा लडाइ पाइब मुर आन कप्तान बाक्मा बाक्त। 33 जबूलून आ थर डा ५० हजार लडाइ पस जोक्ब मारेइ मारेइ या कुरब बाक्मा बाक्त। मेको आन थुं नेल्लेमी दाऊद कली वारच पाइब बाक्मा बाक्त। 34 नाप्ताली आ थर डा हजार का कप्तान नु ३७ हजार तेक्तीक नु तूतीक कुरब लडाइ पाइब मुर बाक्मा बाक्त। 35 दान आ थर डा २८ हजार ६ सहे या कुरब लडाइ पाइब बाक्मा बाक्त। 36 आशेर आ थर डा ४० हजार लडाइ पचा कली ठीक दुम्शो लडाइ पाइब बाक्मा बाक्त। 37 यर्दन खोला आइक्ची हांबु, पूर्ब डा रूबेन आ थर, गाद आ थर नु मनस्से आ उइक्थ थर डा लाख का २० हजार मारेइ मारेइ या कुरब लडाइ पाइब बाक्मा बाक्त।

38 मेको लडाइ पाइब नेल्ले दाऊद कली इस्राएल डा पिप सेल्चा कली दाऊद आ बाक्तीक हेब्रोन सहरमी ठेयब फौज जाक्मा बाक्त। मिनु अरु इस्राएली नेल्लेमी यो दाऊद कली पिप सेल्चा, दे मिम्शो बाक्मा बाक्त। 39 मिनु मेको नेल्ले मेकेर जना जन, तूना तून नाक्त सां सम्म दाऊद नु बाक्मा बाक्त। मारदे हना मेको आन मुरपुकीम मेको आन कली जचा तूचा थोव्रक ठीक पशो बाक्मा बाक्त। 40 मिनु आन नेक्था डा मुर, इस्साकार आ थर, जबूलून आ थर नु नाप्ताली आ थर डा मुर डोन रे गधा, दलओंठ, खच्चर नु ब्यफपुकीम जचा थोव्रक चाक्शो बाक्मा बाक्त। मेकोपुकीम शुश फस, सोव्रपाइशो फोव्रशी गेडा, सोव्रपाइशो अडगुर, अडगुर शांबु, तेल, बी ब्यफ, भेडा शुश चाक्शो बाक्मा बाक्त। मारदे हना, इस्राएली नेल्ल ग्येरशो बाक्मा बाक्त।

13

दाऊदम सन्दोस चाक्चा माल्शो २सामुएल ६:१-११

1 दाऊदम मार पचा माल्ताक्व हना यो, आ हजार हजार डा लडाइ पाइब आन कप्तान नु सहे सहे डा लडाइ पाइब आन कप्तान आन कली लोव्र पा सल्ला पाइबाक्माक्त। 2 मिनु दाऊदम इस्राएल डा ग्रुशो मुर नेल्ल आन कली “गेपुकी रिम्शो मिम्नीनी हना, नु परमप्रभु यावे इं परमप्रभु आ दाक्शो बाक्त हना, गो इस्राएल रागी नेल्लेमी लीशो इं मुरपुकी ‘मुर नेल्ल जाक्कीन’ दे लोव्र कुरब सोइक्तय। मेको आन दातेमी सहर आ एर ओंथ डा बी ब्यफ योव्रतीकेम

बाकब चढेब नु लेवीपुकी बाक्नीम। नेल्ल आन कली 'जाक्कीन' दे लोत्र कुरब मुर सोइक्तय। 3 गो इं परमप्रभु आ सन्दोस एक चाक्य। मारदे हना सावल बाक्म सम्म, गो मेको कली ममिम्तय" देंमाक्त। 4 मिनु मेको गुम्शो मुर नेल्लेमी मेको लोत्र बिस्समा बाक्त। मारदे हना मुर नेल्लेमी मोदेशो पचा दाक्तमे बाक्त।

5 मोपतीके दाऊद इजीप्त डा खोला शीहोर रे लेबो-हमाथ सम्म इस्राएली नेल्ल पुक्मी बाक्त। मेको नेल्लेमी परमप्रभु आ सन्दोस किरयथ-यारीम रे चाक्चा माल्मे बाक्त। 6 मिनु दाऊद नु इस्राएली नेल्ल बालाह डोइशशा लमा बाक्त। बालाह सहर यहूदा डा किरयथ-यारीमम बाक्माक्त। मेकेर रे परमप्रभु, परमप्रभु यावे आ सन्दोस ब्रथ लमा बाक्त। परमप्रभु यावे सन्दोस तारी बाक्शो करूब आस दातेम बाक्शो बाक्माक्त। मेको परमप्रभु, परमप्रभु यावे आ सन्दोस बाक्माक्त। यहोसु १५:९ 7 मिनु मेकोपुकीम परमप्रभु आ सन्दोस अबीनादाब आ खिं रे गुंइशा नक बग्गी कामी कुर पामे बाक्त। मिनु उज्जाह नु अहीयोमी मेको बग्गी खुल्ना खुल्न लसा बाक्त। 8 मिनु दाऊद नु इस्राएली नेल्ले परमप्रभु आ डोंइती ग्येरशा कुम्सो पना पन आइक्च नु ठेयब तार पाइशशो ताप्तीके, खैजडी, बुप्केल नु तुराही ताप्शा, जोंब बोक्शा, सिल पामे बाक्त।

9 मिनु मेकोपुकी किदोन आ चेरब तुप्तीकेम जाक्मानु, ब्यफोमी सन्दोस हिकपदसे बाक्त। मिनु उज्जाहमी सन्दोस तिक्चा कली आ गुइ दिंदा बाक्त। 10 मिनु परमप्रभु यावे उज्जाह क्येडा गाइशशा, मेको कली सदा बाक्त। मारदे हना मेकोमी सन्दोस ग्याइक्चा कली आ गुइ दिंदा बाक्त। मोपतीके मेको परमप्रभु आ डोंइती बेक्माक्त। 11 दाऊदमी परमप्रभु यावे उज्जाह आ पर्बम गाइशशो तशा, चुरमाक्त। मिनु मेको बाक्तीके आ नें पेरेस-उज्जाह वोदा बाक्त। मेको आ नें मुल सम्म मेकोन बाक्ब। 12 मेको नाक्ती दाऊद परमप्रभु क्येडा हिंमाक्त। मेकोमी "मुल ओं दुम्मेनु, गो परमप्रभु आ सन्दोस दोपा कोव्रशा वोइक्नुडा?" देंमाक्त। 13 मोपतीके दाऊदम मेको सन्दोस कोव्रशा वोइक्चा कली आ सहर मलदा बाक्त। आ कोव्रशा वोइक्चा आ पा डा गित्त आ खिं डा ओबेद-एदोम आ खिं लदमे बाक्त। 14 मोपा मेको परमप्रभु आ सन्दोस ओबेद-एदोम आ खिंम महिना सां सम्म लीमाक्त। मिनु परमप्रभु यावेमी ओबेद-एदोम आ खिं डा मुर नु आ मारेइ मारेइ कली आसीक गोवा बाक्त।

14

दाऊद नु आ खिं डा मुरपुकी
२सामुएल ५:११-२५

1 टायर डा पिप हीराममी आ लोत्र कुरबपुकी दाऊद आ बाक्तीकेम सोइक्ता बाक्त। मेको कुरब मुर नु दाऊद आ खिं सेल्चा कली लेबानोन डा लाइशशो रवा आ शी, गारो प्रोत्रब नु शी के गेय पाइब सोइक्तीमी बाक्त। 2 मिनु दाऊदमी "मुल परमप्रभु यावेम आं कली इस्राएली आन पिप सेलती। मिनु आ मुर इस्राएली आन पर्बम आ राज्य ठेयब नु मान ताइब सेल्शो बाक्ब" दे तुइक्ता बाक्त।

3 दाऊदमी यरूसलेमम बाक्मेनु, अर्को मीश चाक्मी बाक्त। मिनु शुश तमी तौ आन आफ दुम्माक्त। 4 यरूसलेमम थिशो आ आल आन नें मार मार बाक्मा बाक्त देशा हना, शम्मुआ शोबाब, नाथान, सोलोमन, 5 इभार, एली-शुआ नु एली-फेलेत, 6 नोगाह, नेफेग, याफीया, 7 एली-शामा, बेलीआदा नु एली-फेलेत बाक्मा बाक्त।

दाऊद नु पलिस्ती लडाइ पशो

8 मिनु पलिस्तीमी दाऊद इस्राएल नेल्ल डा पिप दुम्त देशो लोत्र नेंशा, मेको नेल्ले दाऊद कली माल्थ लमा बाक्त। मिनु दाऊदम मेको लोत्र नेंशा पलिस्ती नु लडाइ पथ लमाक्त। 9 मिनु पलिस्ती जाक्शा, रेफाइम डा बेंसीम मार मार रोइक्तमे बाक्त। 10 मोपतीके दाऊदमी परमप्रभु कली "गो लशा, पलिस्ती आन कली लडाइ तोडमी? गो मेको आन कली आं गुइमी गेनीनी?" दे हिल्लो पवा बाक्त। मिनु परमप्रभु यावेमी "इर डोइशशा लावो, गो मेको आन कली इ गुइमी गेनन" देंमाक्त।

11 मोपतीके दाऊद नु आ मुरपुकी इर डोइशशा लशा, बाल-पेराजीमम मेको आन कली लडाइ तोशा ग्रामा बाक्त। मिनु दाऊदमी "परमप्रभुमी खोला आ नेक्था डा रू प्रेशशो खोदेशो पा, आं जोरी सत्रु आन कली साइक्मी बाक्त" देंत। मोपतीके मेको बाक्तीक आ नें बाल-पेराजीम वोदमे बाक्त। 12 मेकेर पलिस्तीपुकीम आन देवी देवता प्रोंइशा वोदमे बाक्त। मिनु दाऊदमी "मेको चोने" दे अरेवा बाक्त। ब्यवस्था ७:५-२५

13 मिनु पलिस्तीपुकीम लेंशा बेंसीम मार मार रोइक्चा गोव्रमे बाक्त। 14 मिनु दाऊदमी लेंशा परमप्रभु कली हिल्लो पवा बाक्त। मिनु परमप्रभुम मेको कली "मुल गो इर डोइशशा मलने। गो नोले रे हिरशा, लचा माल्नेवे। शुश रवा

बाक्तीके रे मेको आन नेक्था लशा लडाइ तोवमी। 15 गे रवा आन डर डरमी लडाइ पाइब आन गाक्शो नेनी चोटी मेको आन कली लडाइ तोवमी। मारदे हना परमप्रभु इन डोंइती पलिस्ती आन लडाइ पाइब नु लडाइ पथ लाइब” देंमाक्त। 16 मिनु दाऊदमी परमप्रभुम देशो खोदेशो पा लडाइ पवा बाक्त। मिनु मेकोम पलिस्ती आन लडाइ पाइब आन कली गिबोन रे गेजेर सम्म खेदा पा सदमे बाक्त। 17 मोपा दाऊद आ ठेयब दुम्तीके रागी नेल्ल ब्रमाक्त। मिनु परमप्रभु यावेमी रागी रागी डा मुर नेल्ल आन थुमी दाऊद क्येडा हिंतीक थुं वोदा बाक्त।

15

दाऊदमी सन्दोस चाक्शो
२सामुएल ६:१२-१६

1 दाऊदमी आ सहरमी आंम कली खिंपुकी सेला बाक्त। मिनु परमप्रभु आ कबल पशो सन्दोस वोइक्चा कली बाक्तीक का सेल्शा, ताम्बु का कीडा बाक्त। 2 मिनु नोले दाऊदम “लेवी आ थर डा मरुमी ला परमप्रभु आ सन्दोस कुरचा माल्नीम” दे हुकुम पवा बाक्त। मारदे हना परमप्रभु यावेमी लेवी आन कली आ सन्दोस कुरचा नु गेना हना यो परमप्रभु आ गेय पचा कली योव्रशो बाक्मा बाक्त।

3 मिनु दाऊदम परमप्रभु यावे आ कबल पशो सन्दोस आ ठीक पशो बाक्तीकेम चाक्चा कली इस्राएली नेल्ल आन कली यरूसलेम सहरम पुक्मी बाक्त। 4 नोले दाऊदम हारून आ चच युइ नु लेवी नेल्ल आन कली खुप्तीमी बाक्त। 5 मेको सु सु बाक्मा बाक्त देशा हना, कोहाथ आ तौ आन ठेयब मुर उरीएल नु सहे का २० जना आन खिं खिं डा मुर बाक्मा बाक्त। 6 मेरारी आ तौ आन ठेयब मुर आसायाह नु सहे निक्शी २० जना आन खिं खिं डा मुर बाक्मा बाक्त। 7 गेरशोम आ तौ आन ठेयब मुर योएल नु सहे का ३० जना आन खिं खिं डा मुर बाक्मा बाक्त। 8 एली-जाफान आ तौ आन ठेयब मुर शेमायाह नु सहे निक्शी आन खिं खिं डा मुर बाक्मा बाक्त। 9 हेब्रोन आ तौ आन ठेयब मुर एलीएल नु ८० जना आन खिं खिं डा मुर बाक्मा बाक्त। 10 उज्जीएल आ तौ आन ठेयब मुर अम्मीनादाब नु सहे का १२ जना आन खिं खिं डा मुर बाक्मा बाक्त।

11 मिनु दाऊदमी चढेब सादोक नु अबीयाथार नु लेवी उरीएल, आसायाह, योएल, शेमायाह, एलीएल नु अम्मीनादाब आन कली ब्रेत्तीमी बाक्त। २सामुएल १५:२९ 12 मिनु मेको आन कली “गे लेवी आन खिं डा ठेयब मुर ननी। परमप्रभु यावे, इस्राएली आन परमप्रभु आ सन्दोस आं ठीक पशो बाक्तीके कुइक्चा, दे इन कली नु इन खिं खिं डा मुर आन कली ठीक सेलीन। 13 डोंइती गे मेको कली मकुरतीके परमप्रभु यावे, इं परमप्रभु गोपुकी नु गाइक्ताक्व। मारदे हना गो मेको सन्दोस कली ठीक पा मचाक्क” देंमाक्त। १इतिहास १३:९-११ 14 मोपतीके परमप्रभु यावे, इस्राएली आन परमप्रभु आ सन्दोस चाक्चा कली चढेब नु लेवी आंम आंम कली ठीक सेल्समा बाक्त। 15 मिनु लेवीपुकीम परमप्रभु आ सन्दोस शुइश्शो कोक्केमी आन बलामी कुरमे बाक्त। परमप्रभु यावेम मोसा कली दोपा देंमे, मोपा मोसा आ शेंशो पामे बाक्त। प्रस्थान २५:१४; गन्ती ४:१५

16 मिनु दाऊदम लेवी आन ठेयब मुर आन कली “इन खिं खिं डा मुर कुम्सो पाइब योव्रशा, वोइक्चा माल्नीनी। मेकोपुकी तार पाइश्शो ताप्तीके, बीना नु बुप्केल ताप्शा, ग्येरशा ठेयब सेंदा पा कुम्सो पचा माल्नीम” दे अरेमी बाक्त। 17 मोपतीके लेवीपुकीम योएल आ तौ हेमान नु आ खिं खिं डा मुर बेरेक्याह आ तौ आसाफ, नु मेरारी आ तौ आन खिं खिं डा मुर रे कुशायाह आ तौ एथान आन कली योव्रडमे बाक्त। 18 मिनु मेको आन नोले जकरिया, याजीएल, शेमीरामोथ, येहीएल, उन्नी, एलीआब, बेनायाह, मासेयाह, मत्तीथ्याह, एली-फेलेहु, मीक्नैयाह नु लाप्चो खाल पाइब ओबेद-एदोम नु यिएल आन कली योव्रेडमे बाक्त। 19 मिनु कुम्सो पाइब हेमान, आसाफ नु एथान कांसा के बुप्केल ताप्चा कली योव्रचा पुंडसमा बाक्त। १इतिहास ६:१८; १इतिहास ६:२४; १इतिहास ६:२९; १इतिहास २५:१ 20 मिनु जकरिया, अजीएल, शेमीरामोथ, येहीएल, उन्नी, एलीआब, मासेयाह नु बेनायाह अलामोथ देशो आइक्च सेंदा पाइश्शो तार पाइश्शो ताप्तीके ताप्चा कली योव्रचा पुंडसमा बाक्त। 21 मिनु मत्तीथ्याह, एली-फेलेहु, मीक्नैयाह, ओबेद-एदोम, यिएल नु अजजीयाह शेमीनीथ देशो ठेयब सेंदा पाइश्शो बीना ताप्तीके ताप्चा कली योव्रचा पुंडसमा बाक्त। 22 लेवी आन ठेयब मुर केनानीयाह कुम्सो पचा नु ताप्चा जोक्ब तुइक्ब बाक्तीके मेको आन कली चलेब दुम्माक्त। 23 बेरेक्याह नु एल्काना सन्दोस बाक्तीके डा लाप्चो कोव्रब बाक्सा बाक्त। 24 मिनु चढेब शेबान्याह, योशाफात, नेथनेल, अमासै, जकरिया, बेनायाह नु एलीएजर परमप्रभु आ कबल पशो सन्दोस आ डोंइती तुराही ताप्चा माल्बाक्मा बाक्त। ओबेद-एदोम नु येहीयाह यो सन्दोस बाक्तीके डा लाप्चो कोव्रब बाक्सा बाक्त।

25 मिनू दाऊद नु इस्राएल डा खाल्पा नु हजार हजार डा लडाइ पाइब आन कप्तानपुकी ओबेद-एदोम आ खिं लशा, ग्येरशा परमप्रभु यावे आ कबल पशो सन्दोस चाक्गमे बाक्त। 26 मिनू परमप्रभु यावेमी आ कबल पशो सन्दोस कुरब लेवी आन कली चारच पाइक्तीके मेकोपुकीम ७ ओटा ब्यफ नु ७ ओटा सांड चढेमे बाक्त। 27 मिनू दाऊद नु सन्दोस कुरब लेवी, कुम्सो पाइब नु केनानीयाह ताप्ब नु कुम्सो पाइब आन कली चलेब नेल्ल रिम्शो सुती के वा फेक्शो बाक्मा बाक्त। दाऊदम रिम्शो सुती वा के कुचु तार फेक्तीके यो फेक्शो बाक्माक्त। प्रस्थान २५:७ 28 मोपा इस्राएली नेल्लेमी ठेयब रेयके पा नु ग्रोव, तुराही, बुप्केल, तार पाइश्शो ताप्तीके नु बीना ताप्शा परमप्रभु यावे आ कबल पशो सन्दोस कुइश्शा कुमा बाक्त।

29 मिनू परमप्रभु यावे आ कबल पशो सन्दोस दाऊद आ सहरम ओइदमेनु, सावल आ तमी, दाऊद आ मीश मिकालमी झेल रे कोव्रडा बाक्त। मिनू पिप दाऊद कली ग्येरशा सिल पशो तशा, आ थुंमी पिप कली आइक्च मिम्ता बाक्त।

16

दाऊदम मुर आन कली आसीक गेशो
२सामुएल ६:१७-१९

1 मिनू मेकोपुकीमी परमप्रभु आ कबल पशो सन्दोस चाक्शा, दाऊदमी कीशो ताम्बु आगाम वोदमे बाक्त। मिनू मेकोपुकीमी परमप्रभु आ डोंइती चोशा चढेतीक नु दुशा बाक्चा आ पर्बम चढेतीक चढेमे बाक्त। 2 मिनू दाऊदमी मेको चोशा चढेतीके नु दुशा बाक्चा आ पर्बम चढेतीके चढेने थुम्शा, मुर आन कली परमप्रभु यावे आ नेंमी आसीक गोवा बाक्त। 3 मिनू मेकोमी इस्राएली नेल्ल आन कली, मीश मुर नु वोंइश मुर आन कली शोब्ले का का, श्ये नु अडगुर शोब्ले का का जचा ब्वचा गेमी बाक्त।

4 मिनू दाऊदमी परमप्रभु यावे आ सन्दोस आ डोंइती गेय पचा, दे लेवी आन कली योव्रशा वोइक्मी बाक्त। मेकोपुकीमी परमप्रभु कली पुंडतीक लोव्र “गे रिम्शो पाइब बाक्नीनी” दे नु परमप्रभु यावे, इस्राएली आन परमप्रभु कली ठेयब सेल्चा माल्बाक्मा बाक्त। 5 मेको आन ठेयब मुर आसाफ बाक्माक्त। मेको आ नोले डा जकरिया, यिएल, शेमीरामोथ, येहीएल, मत्तीथ्याह, एलीआब, बेनायाह, ओबेद-एदोम नु यिएल ठेयब नु आइक्च तार पाइश्शो ताप्तीके नु सितार ताप्ब बाक्मा बाक्त। आसाफ बुप्केल ताप्ब बाक्माक्त। 6 मिनू चढेब बेनायाह नु याहासीएलमी नाक्त किंत किंत परमप्रभु आ कबल पशो सन्दोस आ डोंइती तुराही तप्चा माल्बाक्सा बाक्त।

दाऊदमी कुम्सो पशो

भजन संग्रह १०५:१-१५; भजन संग्रह ९६; भजन संग्रह १०६:१,४६,४८

7 मेको नाक्ती दाऊदमी नेल्ल क्येडा डोंइती आसाफ नु आ खिं खिं डा मुर आन कली परमप्रभु यावे कली ठेयब सेल्टीक कुम्सो पपाइक्मी बाक्त।

8 “परमप्रभु यावे, गे रिम्शो पाइब बाक्नीनी, आ नें थिशा मेको कली पुंनीन। मेको आ पशो जात जात डा मुर आन कली तुइक्पतीन। 9 मेको कली कुम्सो पने। मेको कली ठेयब सेल्टीक कुम्सो पने। मुर आन कली मेको आ छक लाक्चा डा गेय नेल्ल आन पर्बम लोव्र पने। 10 मेको आ ठेयब नें आ पर्बम ग्येरसीन। परमप्रभु यावे कली माल्बपुकीमी ग्येरसीन। 11 परमप्रभु यावे नु मेको आ सक्ति मालीन। मेको नु बाक्चा कली माल्ना माल्न बाक्कीन। 12 मेको आ रिम्शो गेय मप्रेंदीन। आ पशो छक लाक्चा डा गेय नु आ निसाफ पतीके मप्रेंदीन। 13 आ गेय पाइब इस्राएल आ चच युइ, याकूब आ आल, आ योव्रशोपुकी परमप्रभु आ पशो गेय मप्रेंदीन। 14 मेको परमप्रभु यावे, इं परमप्रभु बाक्ब। मेकोमी रागी नेल्ल आन कली निसाफ पाइब। 15 आ पशो कबल गेना हना यो मप्रेंदीन। मेको कबल हजार हजार पाला डा मुर आन कली पशो बाक्त। 16 मेकोमी अब्राहाम नु कबल पशो बाक्त। मेकोमी इसहाक नु कसम जशा, थोक्शो लोव्र पशो बाक्त। 17 मेको कबल याकूब कली फुल्लुम मुशा ब्रेक्शा गेशो बाक्त। इस्राएल कली गेना हना यो लीब कबल पशो बाक्त। 18 मेको कबल मार बाक्त देशा हना ‘गो इ कली कनान रागी गेनन। इ रागी नु इ थेरशो रू बाक्ब’ दे मेको कबल बाक्त।

19 मेकोपुकी शुश मुर मबाक्तीके, मान मताइब नु अर्को रागी डा मुर बाक्शा, 20 रागी रागी डा मुर आन दातेम हिरशा, राज्य का रे अर्को जात डा मुर सम्म हिरना हिरन गाक्बाक्तेक्म। 21 परमप्रभु यावेमी सुइमी मेको आन कली दिप्चा मगेमी। मेको आन पर्बम पिप आन कली यो हुइश्शा उत्पत्ती १२:१७; उत्पत्ती २०:३,७; उत्पत्ती २६:९ 22 ‘आं तेल लुक्शो आन कली मथिने। आं नोले दुम्ब लोव्र पाइब आन कली श्येत मगेने’ देशो बाक्त। 23 रागी डा मुर नेल्लेमी

परमप्रभु यावे कली कुम्सो पने। नाक्त किंत किंत आ श्येत रे प्रोंइशो आ पर्बम लोत्र पने। 24 रागी रागी डा मुर आन दातेमी मेको आ सक्ति आ पर्बम लोत्र पने। जात जात डा मुर आन दातेमी मेको आ पशो छक लाक्चा डा गेय आ पर्बम लोत्र पने। 25 मारदे हना परमप्रभु यावे ठेयब बाक्ब। ठेयब मान पाइक्चा पुंडसीब बाक्ब। देवी देवता नेल्ल आन क्येडा मान पाइक्चा पुंडसीब बाक्ब। 26 मारदे हना जात जात डा मुर आन देवी देवता नेल्ल मूर्ति बाक्नीम। तन्न परमप्रभु यावेमी सरीड सेल्शो बाक्ब। 27 ठेयब दुम्तीक नु मान ततीक मेको नु बाक्नीस। सक्ति नु ग्येरतीक मेको आ बाक्तीकेम बाक्नीस।

28 जात जात डा खिं खिं डा मुरपुकीमी परमप्रभु यावे कली ‘छेडछेड नु सक्ति इन के बाक्ब’ दे ठेयब सेलीन। भजन संग्रह २९:१२ 29 परमप्रभु यावे कली आ नें शिरचा डा पा मान पने। चढेतीक चाक्शा, आ डोंइती जाक्कीन। आंम आन कली परमप्रभु यावे आ डोंइती ठीक सेल्शा मेको कली ठेयब सेलीन। 30 रागी नेल्ल मेको आ डोंइती थिर थिर पा खिंखिं पने। रागी नेल्ल कली गेना हना यो मदुक्चा डा पा वोइशो बाक्ब। 31 सरीड ग्येरसेक्ल। रागी थाम्पा ग्येरसेक्ल। मिनु रागी रागी डा मुर आन दातेमी ‘परमप्रभु यावे पिप बाक्ब’ देंमल। 32 समुन्द्र नु मेकेर बाक्ब मारेइ मारेइ नेल्ल ग्येरशा रेयके पामेक्ल। रू नु मेकेर बाक्ब मारेइ मारेइ ग्येरसीमल। 33 मेना ब्वाकी डा रवा परमप्रभु यावे आ डोंइती ग्येरशा कुम्सो पाइनीम। मारदे हना मेको रागी कली निसाफ पथ जाक्ब। 34 परमप्रभु यावे कली ‘गे रिम्शो पाइब बाक्नीनी’ देंनीन। मारदे हना आ दाक्तीक गेना हना यो लीब। २इतिहास २०:२१

35 मिनु गेपुकीमी ‘आंइ कली श्येत रे प्रोनीन। गे आंइ कली प्रोंइब परमप्रभु बाक्नीनी। आंइ कली रागी रागी रे खुप्शा, प्रोंइकी’ दे यो देनीनी। गोपुकीमी इन कली ‘गे रिम्शो पाइब बाक्नीनी’ देशा इन नें ठेयब सेल्शा, ग्येरशा बाक्नीकी। 36 परमप्रभु यावे, इस्राएली आन परमप्रभु गेना हना यो ठेयब बाक्ब। गेना हना यो मोदेशो बाक्ब” दे कुम्सो पवा बाक्त।

मिनु नोले मुर नेल्लेमी “आमेन” देशा, परमप्रभु यावे कली ठेयब सेल्मे बाक्त। भजन संग्रह ४१:१४

नाक्त किंत किंत पचा माल्शो

37 मिनु दाऊदम आसाफ नु आ खिं खिं डा मुर आन कली परमप्रभु यावे आ कबल पशो सन्दोस आ डोंइती नाक्त किंत किंत पचा माल्शो गेय पचा, दे वोदा बाक्त। 38 ओबेद-एदोम नु आ खिं डा मुर मेको आन कली वारच पाइब बाक्मा बाक्त। येदुथून आ तौ ओबेद-एदोम नु होसाह लाप्चो कोत्रब आन ठेयब मुर बाक्सा बाक्त। 39 दाऊदम चढेब सादोक नु मेको आ खिं खिं डा चढेब आन कली गिबोनम बाक्शो डांडा डा परमप्रभु यावे आ बाक्तीकेम वोइशो बाक्माक्त। १इतिहास २१:२९ 40 मेकोपुकीमी नाक्त किंत किंत नाक्दो नु सुनी चढेतीकेमी चोशा चढेतीक चढेचा माल्शो बाक्मा बाक्त। परमप्रभु यावेमी इस्राएली आन कली ब्रेक्शा आ अरेशो लोत्रम खोदेशो पा नेल्ल पचा माल्मे बाक्त। २प्रस्थान २९:३८-३९ 41 हेमान, येदुथून नु आन नें ब्रेक्शो योत्रशो मुर मेको नु बाक्मा बाक्त। मेको परमप्रभु कली “गे रिम्शो पाइब बाक्नीनी। मारदे हना इन दाक्तीक गेना यो लीब” देंचा कली वोइशो बाक्मा बाक्त। 42 हेमान नु येदुथून आस ताप्तीक तुराही नु बुप्केल यो बाक्मा बाक्त। परमप्रभु कली कुम्सो पचा कली अरु ताप्तीके यो बाक्मा बाक्त। येदुथून आ तौपुकी लाप्चो खाल पाइब बाक्मा बाक्त।

43 मिनु नोले मुर नेल्ल आन खिं खिं लेम्मा बाक्त। मिनु दाऊद आ खिं डा मुर आन कली आसीक गेथ लमाक्त।

17

परमप्रभुमी दाऊद नु कबल पशो २सामुएल ७:१-१६

1 मिनु दाऊद आ खिंम बाक्म नोले परमप्रभु यावे आ लोत्र पाइब नाथान कली “गो लेबानोन डा लाइशो रवा आ शी के खिंम बाक्शो बाक्नुड। तन्न परमप्रभु यावे आ कबल पशो सन्दोस ताम्बुम वोइशो बाक्ब” दे मदा बाक्त।

2 मिनु नाथानम दाऊद कली “गे इन थुंम मार बाक्मे, मेको पने। मारदे हना परमप्रभु गे नु बाक्ब” दे मदा बाक्त।

3 तन्न मेको नाक्दो परमप्रभु यावेमी नाथान कली लोत्र पवा बाक्त। 4 मेकोमी “आं गेय पाइब दाऊद कली ‘परमप्रभु यावेमी इ कली मार देंब देशा हना, गे आं कली बाक्तीक खिं मसेलो। 5 इस्राएली आन कली इजीप्त रे गुंडशा एक चाक्शो नाक्त रे मुल सम्म गो गेनायो खिंम मबाक्ड। गो ताम्बुम, आं बाक्तीकेम बाक्शो बाक्ती। 6 मिनु गो इस्राएली आन दातेम नु ते ते गाक्डा, गो मेको आं मुर आन कली लां कोइब इन निसाफ पाइब आन कली आं कली लेबानोन डा लाइशो रवा आ शी डा खिं सेलो, दे गेनायो मदेडा’। 7 मोपतीके आं गेय पाइब दाऊद कली मुर नेल्ल आन परमप्रभु यावेमी इ कली मार देंब देशा हना ‘गो क्यारश भेडा योत्रतीके रे आं मुर इस्राएली आन पिप दुम्चा कली योत्रतन।

8 गे ते ते लवे, गो यो मेक मेक बाक्शो बाक्ती। मिनु इ लांम बाक्शो इ जोरी सत्रु आन कली खतम पोक्तामी। मुल गो इ कली रागी डा थम ठेयब मुर खोदेशो पा ठेयब सेलनन। 9 गो आं मुर इस्राएली आन कली रागी का योव्रनुड। मिनु गो मेको आन कली मेकेर बाक्पाइक्नुडमी। मिनु मेको आन रागीम बाक्नीम। मुल रे मेको आन कली श्येत गेबपुकी सुइम श्येत मगेनीम। 10 गोमी डोंइडोंइती आं मुर इस्राएली आन कली सासन पाइब निसाफ पाइबपुकी योव्रडुमी रे मेको आन कली मरिम्शो मुरपुकीम श्येत गेशो खोदेशो पा मुल गेनायो श्येत मगेनीम। गो इ जोरी सत्रु नेल्ल आन कली इ सासनम सेलनुडमी। गो इ परमप्रभु यावेम इ राज्य नु इ खिं बोल्यो सेलनुड। 11 मिनु इ नाक्त नुप्शा, गे बेक्शा इ किकी पिपपुकी नु लाइनेवे। मिनु नोले गो इ तौ का कली इ पा डा पिप सेलनुड। मिनु गो मेको आ राज्य महिम्सीब सेलनुड। 12 मिनु मेकोमीन आं कली खिं का सेल्चा माल्ब। गो मेको आ राज्य गेना हना यो लीपाइक्नुड। १इतिहास २२:१०-२८ 13 गो मेको आ आफ दुम्नुड। मिनु मेको आं तौ दुम्ब। गो मेको आ डोंइती डा सासन पाइब रे आं गेना हना यो दाक्तीके प्रोंइशो खोदेशो पा दाऊद रे मप्रोंइनुड। 14 गो मेको कली आं खिं नु आं राज्यम गेना हना यो कली वोइक्नुड। मिनु मेको आ सासन पतीक गेना हना यो महिम्सीथु बाक्ब' देशो लोव्र" नाथान कली तुइक्पदा बाक्त। 15 मिनु नाथानमी मेको कली देशो लोव्र नु कोंइशो नेल्ल दाऊद कली शेंदा बाक्त।

“गे रिम्शो पाइब बाक्नीनी” देशो

२सामुएल ७:१७-२९

16 मिनु पिप दाऊद परमप्रभु यावे आ बाक्तीक लशा “परमप्रभु यावे, परमप्रभु, गो सु नडा? मिनु आं खिं मार बाक्बा? मिनु गे आं कली एक सम्म चाक्यीनी। उत्पत्ती ३२:११ 17 मो हना यो परमप्रभु एको इन डोंइती शुश ममाइ। परमप्रभु यावे, परमप्रभु, गेमी इन कबल इन गेय पाइब आ खिं कली शुश नोले सम्म कली बारपाइशो बाक्नीनी। 18 इन गेय पाइब कली इन गेशो मान आ पर्बम दाऊदम अरु मार देने चाप्बा डा? गे इन गेय पाइब कली रिम्शो पा तुइशो बाक्नीनी। 19 परमप्रभु यावे, गे इन गेय पाइब आ पर्बम नु इन पत दाक्शो गेय खोदेशो पा गे थम ठेयब गेय पशो बाक्नीनी। मिनु एको इन पशो ठेयब कबल तुइक्पाइशो बाक्नीनी।

20 इन खोदेशो अर्को सुइ मबाक्नीम। परमप्रभु यावे, इन डा लाक्शा अर्को तेकोइ परमप्रभु मबाक्नीम। डोंइती इन देशो नेशो नेल्ल मुल आंइ मिक्चीम ताइतक। यसेया ४४:६ 21 मिनु इन मुर इस्राएली आन कली सु नु थाप्ने चाम्सीबा डा? मेको आन वाइल दुम्तीक रागी रे आंम मुर सेल्चा कली आंमान रागीम चाक्ब अर्को तेको जात डा मुर आन परमप्रभु बाक्नीमी डा? गेमी ठेयब नु हिंचा डा गेय पा इजीप्त रे प्रोंइशो इन मुर आन डोंइडोंइती अर्को जात डा मुर आन कली खेरशा इन मुर आन कली बाक्पाइशो बाक्नीनी। 22 गेम इन मुर इस्राएली आन कली गेना हना यो कली इन के सेल्शो बाक्नीनी। परमप्रभु यावे गे मेको आन परमप्रभु दुम्शो बाक्नीनी।

23 मुल ए परमप्रभु यावे, गे इन गेय पाइब नु मेको आ खिं आ पर्बम मार मिम्शा पशो बाक्नी, मेको गेना हना यो लील। गे मार कबल पशो बाक्नी, मेको गाप्ल। 24 मिनु इन पशो गेय ठेयब दुम्चा कली मेको गेना हना यो लील। मिनु मुर नेल्ल आन परमप्रभु यावे, इस्राएली आन परमप्रभु बाक्ब। मिनु इन गेय पाइब दाऊद आ खिं इन डोंइती बोल्यो दुम्शा लीब।

25 गे आं परमप्रभुम इन गेय पाइब आं खिं सेल्चा कली इन मिम्शो शेंशो बाक्नीनी। मोपतीके गो इन गेय पाइबम इन डोंइती एको प्रार्थना पचा चिक्शो बाक्नुड। 26 ए परमप्रभु यावे, गेन परमप्रभु बाक्नीनी। गे इन गेय पाइब नु एको रिम्शो कबल पशो बाक्नीनी। 27 मेको गेना हना यो इन डोंइती बाक्ल, दे इन गेय पाइब आ खिं कली आसीक गेचा इन मिम्शो बाक्ब। मारदे हना गेन मेको कली आसीक गेशो बाक्नीनी। मिनु मेको गेना हना यो आसीक रशो बाक्ब” दे दाऊदम परमप्रभु कली लोव्र पवा बाक्त। उत्पत्ती १२:३

18

दाऊद आ राज्य बारशो

२सामुएल ८:१-१४

1 मेको आ इच्का नोले दाऊदमी पलिस्ती नु लडाइ पा ग्राशा फ्रूमी बाक्त। मिनु पलिस्ती आन गाथ सहर नु मेको आ एर ओंथ डा गाउं नेल्ल आइक्के सेला बाक्त।

2 मेकोमी मोआबी आन कली यो फ्रूमी बाक्त। मिनु मेकोपुकी दाऊद आ सासनम दुम्शा, मेको कली तिरो थाप्चा माल्मा बाक्त।

3 मिनु दाऊदमी युफ्रेटीस खोला सम्म आ ग्राशो अधिकार ठीक वोइक्थ लमेनु, सोबाह डा पिप हादादेजेर नु हमाथ सम्म लडाइ पवा बाक्त। 4 मिनु दाऊदम मेको रे पा हजार का बग्गी, ७ हजार शारा डोइक्ब नु २० हजार खोइलीम गाक्ब लडाइ पाइब आन कली ग्याइक्तीमी बाक्त। मिनु मेकोम सहे का शारा प्रॉइशा अरु बग्गी डा शारा नेल्ल आन कली खोइल डा नारी खोदमे बाक्त।

5 मिनु सोबाह डा पिप हादादेजेर कली वारच पाइक्चा कली दमस्कस डा अरामीपुकी जाक्मे बाक्त। मिनु दाऊदमी मेको आन दाते डा २२ हजार आन कली साइक्मी बाक्त। 6 मिनु दाऊदम दमस्कस डा अराम सहरम आ ताम्बु कीडा बाक्त। मिनु अरामीपुकी मेको आ सासनम दुम्शा मेको कली तिरो थाप्तमे बाक्त। मोपा दाऊद ते लत हना यो परमप्रभु यावेम मेको कली ग्रापदा बाक्त। 7 दाऊदम हादादेजेर आ लडाइ पाइब आन ठेयब मुरपुकीम कुरशो सुन के ब्रा, तेक्तीकपुकी रोइशशा यरूसलेमम चाक्गमे बाक्त। 8 दाऊदम हादादेजेर आ तिब्हाथ नु कुन सहर रे शुश कांसा चाक्गमे बाक्त। मेको रे पा सोलोमनम ठेयब चिक्तीक बोस, थामपुकी नु ग्योबपुकी सेला बाक्त। १राजा ७:२३; १राजा ७:१५

9 मिनु हमाथ डा पिप तोऊमी दाऊदमी सोबाह डा पिप हादादेजेर आ लडाइ पाइब नेल्ल आन कली फ्रुशो लोव्र नेना बाक्त। 10 मिनु दाऊदमी हादादेजेर कली लडाइ फ्रुशो आ पर्बम मेको कली रिम्शो पाइतीनी देंथ तोऊम आ तौ हदोराम कली दाऊद आ बाक्तीक सोइक्ता बाक्त। मारदे हना हादादेजेर नु तोऊ आस दातेमी लडाइ दुम्शो बाक्माक्त। मिनु हदोराममी आं नु बाक्शो सुन चांदी नु कांसा के ग्योबपुकी चाक्गा बाक्त।

11 मिनु दाऊद पिपम मेको आ चाक्शो सुन नु चांदी के ग्योब नेल्ल परमप्रभु यावे कली चढ़ेवा बाक्त। मेकोमी अर्को जात नेल्ल एदोम, मोआब, अम्मोनी, पलिस्ती नु अमालेकी रे चाक्शो सुन चांदी यो चढ़ेवा बाक्त।

12 सेरूयाह आ तौ अबीशैमी हिकसी आ बेंसीम १८ हजार एदोमी लडाइ पा सदा बाक्त। 13 मिनु मेको आन रागीम ताम्बु कीडा बाक्त। मिनु एदोमी नेल्ल दाऊद आ सासनम दुम्मा बाक्त। मोपा दाऊद ते ते लमे, मेक मेक परमप्रभु यावेमी मेको कली ग्रापदा बाक्त।

दाऊद आ कप्तानपुकी
२सामुएल ८:१५-१८

14 मिनु दाऊदम इस्राएल नेल्लेमी सासन पवा बाक्त। मिनु आ मुर नेल्ल आन कली ठीक निसाफ पवा बाक्त। 15 सेरूयाह आ तौ योआब कप्तान बाक्माक्त। अहीलुद आ तौ येहो-शाफात ठेयब ब्रेक्ब बाक्माक्त। 16 अहीतुब आ तौ सादोक नु अबीयाथार आ तौ अहीमेलेक चढ़ेब बाक्सा बाक्त। शावशा लडाइ पाइब आन ठेयब ब्रेक्ब बाक्माक्त। १इतिहास २४:६ 17 येहो-यादा आ तौ बेनायाह केरेथी नु पेलेथी पिप कली खाल पाइब आन कप्तान बाक्माक्त। दाऊद आ तौपुकी चहिं पिप आ गेय पाइब आन ठेयब मुर बाक्मा बाक्त।

19

दाऊद आ मुर आन कली मुने तोक्शो
२सामुएल १०:-; २सामुएल ११:१; २सामुएल १२:२६-३१

1 मिनु इक्का नाक्त नोले अम्मोनी आन पिप नाहाश बेक्माक्त। मिनु मेको आ पा डा आ तौ पिप दुम्माक्त। १सामुएल ११:१ 2 मिनु दाऊदमी “आ आफोम आं कली रिम्शो पशो खोदेशो पा, गो नाहाश आ तौ हानुन नु थमा पा वारचबु दुम्चा माल्नस्कु” देंमाक्त। मिनु मेको आ आफ बेक्शो आ पर्बम सुर्ता पशो लोव्र पथ लोव्र कुरब मुर सोइक्ता बाक्त। मिनु दाऊद आ लोव्र कुरबपुकी हानुन कली रिम्शो लोव्र पथ अम्मोनी आन रागीम जाक्दीम्मा बाक्त। 3 मिनु अम्मोनी आन ठेयब मुरपुकीम हानुन कली “दाऊदमी इन कली रिम्शो लोव्र पथ मुर सोइक्तानु, गे दाऊदमी इन आफ कली मान पा मुर सोइशो बाक्ब, दे मिम्नीनी? इन रागीम तेरे ओव्रशा खतम पोक्चा, दे कोव्रथ कका सोइशो बाक्ब। आ मुरपुकी क्यारी पथ जाक्शो मनमी डा?” दे मदमे बाक्त। 4 मिनु हानुनमी दाऊद आ सोइशो मुर आन कली ग्याइशशा आन चां प्रेक्तमे बाक्त। आन वा इर रे आन देल्लो सम्म रिक्शा सोइक्तमे बाक्त। 5 मिनु दाऊदमी आ मुर आन कली मो पशो लोव्र नेना बाक्त। मिनु मेको आन कली गुम्चा, दे मुर सोइक्तमे बाक्त। मारदे हना मेकोपुकी थाम्पा मुने तोक्चा पुंइसीशो बाक्मा बाक्त। मिनु मेको आन गल शोक्त्रे डोंइती डा खोदेशो पा मबारम सम्म मेको आन कली “यरीको सहरम बाक्मल” दे अरेवा बाक्त।

अम्मोनी लडाइ पचा ठीक दुम्शो

6 मिनु अम्मोनीपुकीमी “दाऊद आ डोंइती मरिम्शो पाइतक” दे तुइक्तमे बाक्त। मिनु हानुन नु अम्मोनीपुकीम मेसोपोटामीया डा अराम-नाहाराइम, अराम-माकाह नु सोबाह रे बग्गीपुकी नु शारा डोइक्ब चाक्चा कली हजार का टलेन्ट चांदी सोइक्तमे बाक्त। टलेन्ट का ३४ किलो बाक्ब। 7 मिनु मेकोपुकीमी ३२ हजार बग्गी नु माकाह डा पिप नु आ लडाइ पाइब आन कली थाप्शा चाक्गमे बाक्त। मेकोपुकी जाक्शा मेदेबा सहर आ नेक्था ताम्बु कीडमे बाक्त। अम्मोनीपुकी आन सहर सहर रे गूशा लडाइ पचा कली ठीक पामे बाक्त। 8 मिनु दाऊदम मेको लोव नेंशा, योआब नु लडाइ पाइब नेल्ल आन कली सोइक्ता बाक्त। 9 अम्मोनीपुकी जाक्शा, सहर ओव्रतीकेमी लडाइ पचा कली ठीक दुम्मा बाक्त। मेको नु जाक्शो पिपपुकी सहर ओव्रतीकेम मबाक्थु, इच्का डोन राप्शा लडाइ पचा ठीक दुम्मा बाक्त।

10 मिनु योआबम आ नोले नु डोंइती निम्फा पटटी रे लडाइ तोचशो तवा बाक्त। मिनु मेकोमी कोइ कोइ योव्रशो हिक्सीशो लडाइ पाइब इस्त्राएली आन कली अरामी नु लडाइ पथ सोइक्ता बाक्त। 11 मिनु लीशो लडाइ पाइब आन कली आ लोक्ब अबीशै आ हुकुममी गेवा बाक्त। मिनु मेको अम्मोनी नु लडाइ पचा कली ठीक दुम्माक्त। 12 मिनु योआबमी “अरामीपुकी आं क्येडा ग्राचा चिक्ताक्म हना, गे आं कली वारच पथ पिवो। अम्मोनी इं क्येडा ग्राचा चिक्ताक्म हना, गो इ कली वारच पथ पीनुड। 13 सक्ति पाइश्शो दुमीन। गोपुकी आंम जात नु इं परमप्रभु आ सहर आ पर्बम महिंथु, लडाइ पय। परमप्रभु यावेम मार मिम्शो बाक्बा, मेको पाइब” देंमाक्त। 14 मिनु योआब नु मेको आ मुरपुकी अरामी आन नेक्था लशा, मेको आन कली खेदा पामे बाक्त। मिनु मेकोपुकी मेको आन क्येडा प्रोक्मा बाक्त। 15 मिनु अम्मोनीपुकी यो अरामी प्रोक्शो तशा, योआब आ लोक्ब अबीशै आ डोंइती रे प्रोक्शा सहर ओव्रमा बाक्त। मोपतीके योआब यरूसलेम लेम्माक्त।

16 मिनु अरामी इस्त्राएली आन क्येडा बुका बाक्त, दे तुइश्शा, युफ्रेटीस खोला आ आइक्ची हांबु डा हादादेजेर आ कप्तान शोफाक आ हुकुमम बाक्शो अरु अरामी आन कली ब्रेथ सोइक्तमे बाक्त। 17 मेको आन मो पशो लोव दाऊद कली नेंपदमे बाक्त। मिनु मेकोमी रीब पा इस्त्राएली लडाइ पाइब नेल्ल आन कली खुप्शा यर्दन खोला शोक्शा लडाइ पचा कली सोइक्तीमी बाक्त। मिनु मेकोपुकी लशा लडाइ पचा कली ठीक दुम्मा बाक्त। अरामी यो मोपान दाऊद नु लडाइ पचा कली ठीक दुम्मा बाक्त। मिनु लडाइ पामे बाक्त। 18 तन्न इस्त्राएलीपुकीम मेको आन कली फ्रुशा खेदा पामे बाक्त। दाऊदमी ७ हजार अरामी आन बग्गी खुल्ब नु ४० हजार लडाइ पाइब नु मेको आन कप्तान शोफाक आन कली सदमे बाक्त।

19 मिनु हादादेजेरम आ मुरपुकी इस्त्राएली आन क्येडा बुशो तशा गारचा कली सल्ला पथ मुर सोइक्ता बाक्त। मिनु दाऊद कली जिम्मा गेसमा बाक्त। मोपतीके मेको नोले गेनायो अरामीपुकीम अम्मोनी आन कली वारच मपामे बाक्त।

20

दाऊदम रब्बाह सहर ग्राशो

1 मिनु बर्खा जाक्मेनु, पिपपुकी लडाइ पथ गूमा बाक्त। मिनु योआबमी लडाइ पाइबपुकी लाइश्शा अम्मोनी आन रागी कली गोरशो सेला बाक्त। मिनु मेको रब्बाह सहर पुम्शा, आ एर ओथ नेल्ल हिरदा बाक्त। दाऊद चहिं यरूसलेम उइ बाक्माक्त। मिनु योआबमी रब्बाह सहर कली लडाइ पा खतम सेल्शा ग्रामाक्त। 2 मिनु दाऊदमी मेको आन पिप आ पिया रे सिरपेच लदा बाक्त। मेको सुन नाक्शोनु, टलेन्ट का बाक्माक्त। मेको सिरपेचम शुश क्येट लाइब हीरा यो क्येप्शो बाक्माक्त। मेको सिरपेच दाऊद कली गुक्त्मे बाक्त। दाऊदमी मेको सहर रे शुश मार मार रोइश्शा लदा बाक्त। टलेन्ट का ३४ किलो बाक्ब 3 मेको रागी डा मुर आन कली गुंइशा, मेको आन कली आरा, कोदाली नु खामी गेय पपदमे बाक्त। मोदेशो दाऊदमी अम्मोनी आन सहर नेल्लेमी पवा बाक्त। नोले दाऊद नु आ मुर नेल्ले यरूसलेम लेम्मा बाक्त।

पलिस्ती नु लडाइ पशो

२सामुएल २१: १८-२१

4 मेको आ नोले पलिस्तीपुकी नु गेजेर सहरमी लडाइ दुम्माक्त। मेना हुशा डा मुर सिब्बेकै माइश्शा सिप्पाइ कली सदा बाक्त। सिप्पाइ चहिं रेफाइ आ चच युइ का बाक्शो बाक्माक्त। पलिस्ती बुम्मा बाक्त। १इतिहास २७:११ 5 नोले लेंशा पलिस्ती नु लडाइ दुम्माक्त। याइर आ तौ एल्हानानमी गित्त आ खिं डा मुर गोल्याथ आ लोक्ब लाहमी कली सदा बाक्त। मेको आ तूतीक आ ग्याइक्तीक वा प्रोक्ब आन शी खोमो ठेयब बाक्माक्त। 6 मिनु नोले लेंशा गाथ सहरमी लडाइ दुम्माक्त। मेकेर लाइश्शा मुर का बाक्माक्त। आ गुइ नु खोइली नेल्लेम ६,६ ओटा ब्रेप्चो पाइश्शो

नेल्ल पा २४ ओटा ब्रेचो पाइशो मुर का बाक्माक्त। मेको रेफाइ आ चच युइ का बाक्माक्त। 7 मेकोमी इस्राएली आन कली शुक्शी पवा बाक्त। मिनु दाऊद आ लोकब शिमेआ आ तौ योनाथनमी मेको कली सदा बाक्त। 8 मेको गाथ डा लाइशो मुर आन चच युइ, रेफाइ आ मुर बाक्मा बाक्त। मिनु दाऊद नु आ मुरपुकीमी मेको आन कली सदमे बाक्त।

21

दाऊदम मुर आन कली हिक्शो
२सामुएल २४:-

1 मिनु सैतानमी इस्राएली आन कली मरिम्शो पचा कली दाऊद कली आ मुर इस्राएली आन कली हिक्पाइक्मी बाक्त। 2 मोपतीके दाऊदम योआब नु आ कप्तान आन कली “बेयर-शेबा रे दान सम्म डा इस्राएली आन कली हिक्शा, आं कली शेंचा नड। मिनु मेकोपुकी दोशो बाक्मा, गो तुइक्चा माल्नुड” दे अरेमी बाक्त। 3 तन्न योआबमी “परमप्रभु यावेमी आ मुर आन कली एको क्येडा यो सहे खेयप हिक्शो खोइ सोशा बोशा शुश सेलल। मेकोपुकी आं पिप इन गेय पाइब मुर मदुम्नीमी डा? गे मारदे मो पचा माल्नीनी? गे मारदे इस्राएली आन कली दोस चाक्नीनी?” देंमाक्त। प्रस्थान ३०:१२ 4 तन्न पिपमी योआब आ लोव्र मनेना बाक्त। मिनु योआब लशा, इस्राएल नेल्ल हिरशा, यरूसलेमम लेशशा जाक्माक्त। 5 मिनु योआब यरूसलेम जाक्शा, दाऊद कली आ हिक्शो मुरपुकी ओशो बाक्तेक्म, दे शेंदा बाक्त। मेकोमी “इस्राएलम या चलेने चाप्ब, लडाइ पाइब ११ लाख नु यहूदाम ४ लाख ७० हजार बाक्नीम” देंमाक्त। 6 तन्न योआबमी लेवी आ थर डा मुर नु बेन्यामीन आ थर डा मुर आन कली महिक्मी बाक्त। मारदे हना योआबमी पिप आ हुकुम पशो कली काइ मदाक्ता बाक्त।

दाऊदम सजाइ तशो

7 मिनु परमप्रभु दाऊद आ पशो तशा, गाइक्ता बाक्त। मिनु इस्राएली आन कली सजाइ गेवा बाक्त १इतिहास २७:२४ 8 मिनु दाऊदम परमप्रभु कली “गो मोदेशो पा ठेयब पाप पाता। मुल इन गेय पाइब आं दोस क्याम्दीन। मारदे हना गो थम मरिम्शो पाइब दुम्ती” देंमाक्त। 9 मिनु परमप्रभु यावेमी आ लोव्र पाइब गाद कली “गे लशा दाऊद कली 10 परमप्रभु यावेमी इन कली मार लोव्र पाइब देंशा हना ‘गो इ डोंइती लोव्र सां वोइक्नुड। मेको रे का योव्रसो। मिनु मेको इ कली पाइनुड’ देंत, मतो” देंमाक्त। 11 मिनु गाद दाऊद आ बाक्तीके जाक्शा, मेकोमी “परमप्रभु यावेमी इन कली लोव्र पाइब। मिनु गे लोव्र का योव्रसो। 12 ‘गो इ डोंइती लोव्र सां वोइक्नुड। मेको रे का योव्रसो’ देंशो बाक्ब। मेको लोव्र सां तेको बाक्नीम देंशा हना, डोंइती डा बर्स सां सम्म अन्काल दुम्तीके, नोले डा महिना सां सम्म इन जोरी सत्रुमी खेदा पचा पुंइसीतीके, आन तरवारम इन कली ग्रातीके नु नेल्ल क्येडा नोले डा परमप्रभु यावेमी आ तरवार रे नाक्त सां सम्म रागी नेल्लेम बेक्चा डा रोइ पपाइशशा मुर साइक्तीक। मेको लोव्र सांमी का योव्रसो। परमप्रभु यावे आ स्वर्ग डा गेय पाइबमी नाक्त सां सम्म इस्राएल रागीम शुश मुर आन कली साइक्तीक। मेको लोव्र सां बाक्तेक्म। का योव्रसो। गो आं कली सोइक्ब कली मार देंचा माल्नुड, देंनीन” देंमाक्त। 13 मिनु दाऊदम गाद कली “गो थम श्येत जाइब दुम्ती। परमप्रभु यावे आ गुइमी दुम्चा गेयीनी। मारदे हना मेको आ शिशी थम ठेयब बाक्ब। तन्न मुर आन गुइमी दुम्चा मगेयीनी” दे मदा बाक्त। 14 मोपतीके परमप्रभु यावेमी इस्राएल रागीम बेक्चा डा रोइ पपाइक्मी बाक्त। मिनु ७० हजार बेक्मा बाक्त। 15 मिनु परमप्रभुमी आ स्वर्ग डा गेय पाइब का यरूसलेम सहर खतम पोक्चा कली सोइक्ता बाक्त। तन्न मेकोमी खतम पोक्चा चिक्तानु, परमप्रभु यावेमी मेको खतम पोक्तीक तशा, शिशी पा तेक्गा बाक्त। मेकोमी खतम पोक्ब आ स्वर्ग डा गेय पाइब कली “मुल दुम्त। इ गुइ तेक्को” दे मदा बाक्त। मेना परमप्रभु यावे आ स्वर्ग डा गेय पाइब यबुसी ओरनान आ खला आ नेक्था राप्शा, बाक्शो बाक्माक्त। 16 मिनु दाऊदमी इर गे कोव्रडानु, परमप्रभु यावे आ स्वर्ग डा गेय पाइब का सरीड नु रागी आस दातेमी राप्शा, आ गुइमी शोइशो तरवार का यरूसलेम गे दिंशो तवा बाक्त। मिनु दाऊद नु मेको नु बाक्शो खूशोपुकी भाडग्रा फेक्शा खुम्की पा बाम्मा बाक्त। 17 मिनु दाऊदम परमप्रभु कली “मुर आन कली हिक्चा कली गो कका अरेतामी। गो कका पाप पा काइ मरिम्शो पाता। तन्न एको भेडापुकीम मार पामे डा? परमप्रभु यावे, आं परमप्रभु, इन गेचा डा श्येत आं कली नु आं आफ आ खिं कली दुम्ल। तन्न इन मुर आन कली मोदेशो श्येत मगेन” देंमाक्त।

दाऊदम चढ़ेतीक सेल्शो

18 मिनु परमप्रभु यावे आ स्वर्ग डा गेय पाइबमी गाद कली “गे दाऊद कली ‘यबुसी ओरनान आ खलामी परमप्रभु यावे कली चढ़ेतीक का सेलो’ दे मतो” देंमाक्त। 19 मोपतीके दाऊदमी गादम परमप्रभु यावे आ नेमी अरेशो लोव्र खोदेशो पवा बाक्त। 20 मेना ओरनान आ चेरब दांड पा लेशशा कोव्रडानु, परमप्रभु यावे आ स्वर्ग डा गेय पाइब कली तवा बाक्त। आ नु बाक्शो आ ४ जना तौ चहिं खुंडिसमा बाक्त। ओरनान चहिं चेरब तुप्स डा तुप्स बाक्माक्त। 21 दाऊद मेको आ बाक्तीक जाक्दीम्मेनु, ओरनानम पिप कली तशा, आ डोंइती खुम्की पा बाम्माक्त। 22 मिनु दाऊदम ओरनान कली “एको खला डा रू परमप्रभु यावे कली चढ़ेतीक का सेल्चा कली गेयी। मेको गिश बाक्मे, मेको डा क्येट गेनुड। मुर आन कली गेशो बेक्तीक रोइ नाइक्सेक्ल” देंमाक्त। 23 मिनु ओरनानमी दाऊद कली “मेको ताक्कीन। हजुर, पिपम मार पचा दाक्नीनी, मेको पने। चोशा चढ़ेचा कली ब्यफपुकी गेनुड। शी कली दांड पशो शी बाक्ब। अन्न चढ़ेचा कली चेरब बाक्ब। गो मो गेता” देंमाक्त। 24 तन्न पिप दाऊदमी ओरनान कली “ममाइ, गो नेल्ल गिश बाक्मे मिश क्येट थाप्नुड। गो मोशा इ मार मार ताक्शा परमप्रभु यावे कली मचढ़ेनुड” देंमाक्त। 25 मोपतीके दाऊदमी ओरनान कली मेको रू डा ६ सहे सुन के शेकेल नाक्शा गेवा बाक्त। सेकेल का ११.५ ग्राम डा चांदी के क्येट बाक्ब। 26 मिनु दाऊदम मेकेर परमप्रभु यावे कली चढ़ेतीक का सेला बाक्त। मिनु चोशा चढ़ेतीक नु दुशा बाक्चा आ पर्बम चढ़ेतीक चढ़ेवा बाक्त। मिनु परमप्रभु यावे आ नें थिशा पुना बाक्त। परमप्रभु यावेमी सरीड रे चोशा चढ़ेतीके तारी मी तोक्शा लोव्र लेत्ता बाक्त। १राजा १८:२४ 27 मिनु परमप्रभु यावेमी आ स्वर्ग डा गेय पाइब कली “इ तरवार खोतम पिप्तो” दे मदा बाक्त।

28 मेना दाऊदम परमप्रभु यावेम यबुसी ओरनान आ खलाम आ लोव्र लेत्ताक्यी, दे तुइश्शा मेकेर चढ़ेवा बाक्त। 29 मोसाम गोरशो रागीम सेल्शो परमप्रभु यावे आ बाक्तीक नु चढ़ेतीके मेना सम्म गिबोन इर डा पूजा पतीकेम बाक्शो बाक्माक्त। १राजा ३:४; २इतिहास १:३,६ 30 तन्न दाऊद परमप्रभु कली पुंड्या मेकेर लने मचाप्शो बाक्माक्त। मारदे हना परमप्रभु यावे आ स्वर्ग डा गेय पाइब आ तरवार क्येडा हिंमाक्त।

22

परमप्रभु यावे आ खिं सेल्चा चिक्शो

1 मिनु दाऊदमी “एकेर परमप्रभु आ खिं नु इस्राएलीपुकीमी परमप्रभु यावे कली चोशा चढ़ेतीक सेल्चा माल्ब” देंमाक्त।

2 मिनु दाऊदमी “इस्राएलम बाक्ब अर्को रागी डा मुर आन कली बुक्कीन” दे अरेवा बाक्त। मिनु मेको आन कली परमप्रभु आ खिं सेल्चा कली फुल्लु खोइक्तीक गेय गेमी बाक्त। 3 दाऊदमी शुश फलाम नु कांसा गेवा बाक्त। मेको लाप्चो नु लाप्चो डा शी आन कली कांटी नु ग्याइक्पाइक्तीके सेल्चा कली वोइश्शो बाक्त। मेको नाक्ने मचाप्चा डा पा शुश बाक्शो बाक्त। 4 मिनु हिक्ने मचाप्चा डा पा लेबानोन डा लाइश्शो रवा आन शी तेलपाइमी बाक्त। मारदे हना सीदोन नु टायर डा मुरपुकीमी दाऊद कली लेबानोन डा रवा आन शी शुश चाक्गमे बाक्त। 5 मिनु दाऊदमी “आं तौ सोलोमन मुल सम्म आइक्च नु मतुइक्ब बाक्ब। परमप्रभु यावे कली सेल्शो खिं थम दारशो, रागी नेल्लेमी मिम्चा डा पा नु ठेयब दुम्चा माल्ब। मोपतीके गो मेको सेल्चा कली मारेइ मारेइ ठीक पचा माल्नुड” देंमाक्त। मिनु दाऊदम आ बेक्चा क्येडा डोंइती मार मार शुश तेलमी बाक्त। १इतिहास २९:१

6 मिनु नोले दाऊदमी आ तौ सोलोमन कली ब्रेत्थ सोइक्ता बाक्त। मेको कली “परमप्रभु यावे इस्राएली आन परमप्रभु कली खिं का सेलो” दे अरेवा बाक्त। 7 मिनु सोलोमन कली “आं तौ, गो परमप्रभु यावे, आं परमप्रभु कली खिं का सेल्चा थुं पशो बाक्ती। 8 तन्न परमप्रभु यावेमी आं कली लोव्र पाप्नु। मेकोमी ‘गे शुश हुश खाक्श पोक्तीवी। गे ठेयब ठेयब लडाइ पाप्तीवी। मोपतीके आं कली खिं सेल्चा मदुम्ब। मारदे गे आं डोंइती रागीम शुश हुश खाक्श पोक्शो बाक्नेवे। 9 गे तौ का थीनेवे। मेको लडाइ मपाइब मुर दुम्ब। गो मेको आ एर ओंथ डा जोरी सत्रु नेल्ल आन कली लडाइ मपपाइक्नुड। मिनु मेको आ नें सोलोमन दुम्चा माल्ब। आ सासन पची ना, गो इस्राएलम लडाइ मदुम्पाइक्थु रिम्शो पा बाक्चा गेनुड। 10 मेकोमी आं नें ठेयब सेल्चा कली खिं का सेल्चा माल्ब। मिनु मेको आं तौ दुम्ब। मिनु गो मेको आ आफ दुम्नुड। गो इस्राएलम मेको आ सासन पतीके गेना हना यो बोल्यो सेल्नुड’ दे परमप्रभुम आं कली देंत। 11 आं तौ, परमप्रभु यावे गे नु बाक्ल। मिनु परमप्रभु यावे, इ परमप्रभुमी इ पर्बम देशो खोदेशो पा गे मेको कली खिं सेल्चा माल्नेवे। मेको गेय नेल्ल रिम्शो दुम्ल। 12 परमप्रभु यावेमी इ कली रुप्तीक नु जोक्ब तुइक्ब थुं गेवल। मेकोमी इ कली इस्राएल कली सासन पचा गेवानु, गे परमप्रभु यावे, इ परमप्रभु आ अरेशो लोव्र टिशा पाइब

दुम्नेवे। 13 परमप्रभु यावेमी मोसा कली आ फुल्लुम मुशा ब्रेक्शो लोत्र नु निसाफ पतीक लोत्र इस्राएली आन कली टिशा पचा कली गेशो बाक्त। गे मेको नेल्ल पाप्तीवी हना, इ गेय रिम्शो दुम्ब। गे बोल्यो नु महिंब दुमो। हिंशा इ थुं लुकच लचा मगेवो। १ राजा २:२-३ 14 गो शुश श्येत पा परमप्रभु यावे आ खिं सेल्चा कली मार वोइक्ता देंशा हना, लाख का टलेन्ट सुन, १० लाख टलेन्ट चांदी नु नाक्ने मचाप्चा डा पा कांसा नु फलाम खेक्शा वोइक्तामी। मारदे हना मेकेर शुश बाक्शो बाक्त। शी नु फुल्लुपुकी यो ठीक पा वोइक्तामी। गे अर्को यो तेम्चा माल्नेवे। टलेन्ट का ३४ किलो बाक्ब। १ इतिहास २९:२ 15 गे नु शुश गेय पाइब बाक्शो बाक्नीम। मार गेय पाइब बाक्शो बाक्नीम देंशा हना, फुल्लु ख्रोइक्ब, गारो प्रोत्रब, शी के गेय पाइब, शुश दारशो गेय जोक्शा पाइब यो बाक्नीम। 16 मेकोपुकीमी सुन, चांदी, कांसा नु फलाम के मारेइ मारेइ गेय पाइब बाक्नीम। मुल गेय पचा गोवो। परमप्रभु यावे गे नु बाक्ल” दे दाऊदमी सोलोमन कली मदा बाक्त।

17 मिनु दाऊदमी इस्राएली आन ठेयब मुर नेल्ल आन कली “आं तौ सोलोमन कली वारच पने। 18 परमप्रभु यावे, इन परमप्रभु गेपुकी नु बाक्ब। मेकोमी इन रागी नेल्लेमी काइ लडाइ मदुपद। इन थुं नाइक्पाइश्शा वोइक्तु। मेकोमी एको रागी डा मुर आन कली आं गुइमी गेशो बाक्त। मारदे हना परमप्रभु यावेमी एको रागी डा मुर आं गुइम गेती। मेको रागीपुकी परमप्रभु यावे नु आ मुर आन सासनमी वोइक्तु। १ इतिहास २३:२५ 19 मुल इन थुं नेल्लेमी परमप्रभु यावे, इन परमप्रभु कली मालीन। मिनु परमप्रभु यावे, परमप्रभु आ बाक्तीक सेल्चा गोने। मिनु नोले परमप्रभु यावे आ कबल पशो सन्दोस नु परमप्रभु आ ग्योबपुकी परमप्रभु यावे कली सेल्शो खिंमी वोइक्चा माल्नीनी” दे माइक्मी बाक्त।

23

लेवी नु चढेब आन गेय

1 मिनु दाऊद खूशो नु शुश बर्स दुम्शा, आ तौ सोलोमन कली इस्राएल डा पिप सेला बाक्त। १ राजा १:२८-४० 2 मिनु मेकोमी इस्राएली आन ठेयब मुर नेल्ले नु चढेबपुकी नु लेवी आन कली गुम्पाइक्मी बाक्त। 3 मिनु ३० बर्स गाप्शो नु मेको क्येडा लाक्शो लेवी आन कली हिक्शोनु, मेको नेल्ल ३८ हजार बाक्मा बाक्त। 4 मिनु दाऊदमी लेवी आन परबम “मेको आन दाते डा २४ हजार परमप्रभु यावे आ खिं डा गेय कोत्रचा माल्नीम। ६ हजार मेको आन ठेयब मुर नु निसाफ पाइब दुम्चा माल्नीम। 5 मिनु ४ हजार लाप्चो खाल पाइब दुम्चा माल्नीम। मिनु नोले डा ४ हजार आं गेशो बाजापुकी ताप्शा, परमप्रभु यावे कली ठेयब सेल्तीक कुम्सो पचा माल्नीम” देंमाक्त। 6 मिनु दाऊदम मेको आन कली लेवी आ तौ गेरशोम, कोहाथ नु मेरारी का का पा हुल पा योक्शा गेमी बाक्त। १ इतिहास ६:१ 7 गेरशोम आ तौ लादान नु शिमेइ बाक्सा बाक्त। 8 लादान आ डोंइती थिशो तौ येहीएल ठेयब मुर बाक्माक्त। आ नोले डा जेथाम नु योएल नेल्ल पा सां बाक्मा बाक्त। १ इतिहास २६:२१ 9 शिमेइ आ तौ शेलोमोथ, हजीएल नु हारान सां बाक्मा बाक्त। मेकोपुकी लादान आ खिं डा ठेयब मुर बाक्मा बाक्त। 10 मिनु शिमेइ आ तौ याहाथ, जीना, येऊश नु बेरीआ, ४ जना बाक्मा बाक्त। 11 याहाथ मेको आन ठेयब मुर बाक्माक्त। मेको आ नोले डा जीजाह बाक्माक्त। तन्न येऊश नु बेरीआ आस के शुश तौ मबाक्तीके मेको आस कली खिं का डा मुर हुल का सेल्शा हिक्चा पुंडसमा बाक्त।

12 कोहाथ आ तौ अग्राम, इच्छार, हेब्रोन नु उज्जीएल ४ जना बाक्मा बाक्त। 13 अग्राम आ तौ हारून नु मोसा बाक्सा बाक्त। हारून नेल्ल क्येडा चोत्रखो चढेतीक गेय पाइब सेल्चा कली योत्रचा पुंडसे बाक्त। मेको नु आ तौपुकी गेना हना यो परमप्रभु यावे आ डोंइती चढेचा माल्दमे बाक्त। परमप्रभु आ डोंइती गेय पचा कली नु आ नेमी गेना हना यो आसीक गेचा कली योत्रशो बाक्मा बाक्त। १ इतिहास ५:२९; १ इतिहास ६:३४; ब्यवस्था १०:८; गन्ती ६:२४-२७ 14 मोसा परमप्रभु आ मुर बाक्शो बाक्माक्त। मेको नु आ तौपुकी अरु लेवी आ थर डा मुर खोदेंशो पा हिक्शो बाक्मा बाक्त। 15 मोसा आ तौ गेरशोम नु एलीएजर बाक्सा बाक्त। प्रस्थान १८:३-४ 16 गेरशोम आ तौ शेबुएल ठेयब मुर का बाक्माक्त। मेको डोंइती डा बाक्माक्त। १ इतिहास २६:२४ 17 एलीएजर आ तौ रेहब्याह ठेयब मुर बाक्माक्त। मेको एलीएजर आ तौ का ला बाक्माक्त। तन्न रेहब्याह के तौ शुश बाक्मा बाक्त। १ इतिहास २४:२१-३० 18 इच्छार आ तौ शेलोमीथ ठेयब मुर बाक्माक्त। 19 हेब्रोन आ तौ येरीयाह ठेयब मुर बाक्माक्त। मेको आ माइला अमारयाह, आ साइला याहासीएल, नु आ कान्छा येकामेआम बाक्मा बाक्त। 20 उज्जीएल आ तौ मीकाह ठेयब मुर बाक्माक्त। मेको आ नोले डा तौ इस्शीयाह बाक्माक्त।

21 मेरारी आ तौ माहली नु मुशी बाक्सा बाक्त। माहली आ तौ एलाजर नु कीश बाक्सा बाक्त। ?इतिहास ६:४
22 एलाजर तौ मथिथु बेक्माक्त। मेको के तमीपुकी ला बाक्सा बाक्त। मेको आ लोकब कीश आ तौपुकीमी मेको
आन कली ग्युंवे पामे बाक्त। 23 मुशी आ तौपुकी माहली, एदेर नु येरेमोथ सां बाक्सा बाक्त।

24 मेको लेवी आ थर डा खिं खिं डा मुर बाक्सा बाक्त। मेको खिं खिं डा २० बर्स गाप्शो नु मेको क्येडा लाक्शो
बाक्सा बाक्त। मेको आन कली हिक्शा, आन नें ब्रेक्शो बाक्सा बाक्त। मारदे हना मेकोपुकी परमप्रभु यावे आ
खिंम गेय पचा माल्बाक्सा बाक्त। 25 मिनु दाऊदमी “परमप्रभु यावे, इस्राएली आन परमप्रभुमी आ मुर आन कली
थुं नाइक्चा गेशो बाक्ब। मिनु परमप्रभु यरूसलेम सहरम गेना हना यो बाक्ब। 26 मोपतीके मुल रे लेवी आ थर डा
मुरपुकी परमप्रभु यावे आ बाक्तीके नु मेको आ मार मार ग्योबपुकी गेनायो कुरचा ममालनीम” देंमाक्त। योएल ४:२१
27 दाऊद आ नोले देंशो लोव रे पा मेको २० बर्स गाप्शो नु मेको क्येडा लाक्शो लेवी आ थर डा मुर हिक्चा बाक्सा
बाक्त। 28 मेकोपुकीमी हारून आ तौ परमप्रभु यावे आ खिं डा गेय पतीकेम वारच पचा माल्मा बाक्त। लाडगा नु
कोठापुकी कोव्रचा, चोव्रखो थोव्रकपुकी सफा पचा, परमप्रभु आ खिं डा अरु गेय नेल्ल पचा माल्बाक्सा बाक्त।
29 मिनु मेकोपुकीमी चढ़ेशो शोब्ले वोइक्चा कली, अन्न चढ़ेतीक डा रिम्शो फसी, बोरब ओरुक्ती मसुप्शो शोब्ले, तेल
बवाइश्शो चढ़ेतीक, नेल्ल नाक्तीक गेयम वारच पचा माल्बाक्सा बाक्त। 30 मिनु मेकोपुकी सुनी कुस कुस नु नाक्दो
कुस कुस परमप्रभु यावे आ डोंइती “गे रिम्शो पाइब बाक्नीनी” दे ठेयब सेल्चा माल्बाक्सा बाक्त। 31 नाइक्तीक
नाक्त परमप्रभु यावे कली चोशो चढ़ेतीक चढ़ेचा कली, औंसी नाक्त नु नेल्ल पचा डा चाड डा चढ़ेतीके गेय परमप्रभु
यावे आ डोंइती वारच पचा माल्बाक्सा बाक्त।

32 मोपा मेकोपुकीमी गुम्तीक ताम्बु नु चोव्रखो बाक्तीक नेल्ल कोव्रचा माल्मा बाक्त। मिनु मेकोपुकीमी हारून
आ तौ चच आन दी बाक्शा परमप्रभु यावे आ खिं डा गेय पचा माल्बाक्सा बाक्त।

24

चढ़ेब आन गेय पाइब योव्रशो

1 मिनु योव्रसीशो हारून आ तौ चच सु सु बाक्सा बाक्त देंशा हना, आ तौ नादाब, अबीहु एलाजर नु इथामार बाक्सा
बाक्त। ?इतिहास २३:६; ?इतिहास ५:२९ 2 नादाब नु अबीहु चहिं आस आफ बेक्चा क्येडा डोंइती तौ मथिथु, बेक्सा
बाक्त। मोपतीके एलाजर नु इथामार चढ़ेब दुम्शो बाक्सा बाक्त। 3 मिनु दाऊदमी एलाजर नु आ तौ सादोक नु इथामार
नु आ तौ अहीमेलेक नु मेको आन गेय पचा कली हुल सेल्शा गेमी बाक्त। 4 मिनु इथामार आ खिं खिं डा ठेयब मुर
आन क्येडा एलाजर आ खिं खिं डा मुर शुश बाक्शो बाक्सा बाक्त। मोपतीके एलाजर आ तौ आन खिं खिं डा ठेयब
मुर १६ जना आन कली हुल हुल सेल्मे बाक्त। इथामार आ तौ आन खिं खिं डा ठेयब मुर ८ जना आन कली हुल
हुल सेल्मे बाक्त। 5 मिनु आन दातेम बाजी आप्शा, आन हुल हुल सेल्मे बाक्त। मारदे हना एलाजर नु इथामार आस
तौ आस खिं खिं डा मुर नेल्ल खाल का डा ठेयब मुर बाक्सा बाक्त। मेको नेल्ले परमप्रभु नु आ बाक्तीक डा ठेयब
मुर बाक्सा बाक्त। 6 नेथनेल आ तौ शेमायाह, लेवी आ थर डा ब्रेक्ब का बाक्सा बाक्त। मेकोमी पिप नु ठेयब मुरपुकी,
चढ़ेब सादोक, अबीयाथार आ तौ अहीमेलेक, चढ़ेब लेवी आन खिं खिं डा ठेयब मुर आन डोंइती चढ़ेब आन नें
ब्रेक्ता बाक्त। एलाजर आ खिं खिं डा नु इथामार आ खिं खिं डा गेय पतीक हुल सेल्मे बाक्त। ?इतिहास १८:१६

7 मिनु डोंइती डा बाजी आप्शो येहो-यारीब आ नेमी, मेको आ नोले डा बाजी येदायाह आ नेमी, 8 मेको आ नोले
डा बाजी हारीम आ नेमी, मेको आ नोले डा बाजी सेओरीम आ नेमी, 9 मेको आ नोले डा बाजी माल्कीयाह आ नेमी,
मेको आ नोले डा बाजी मियामीन आ नेमी, 10 मेको आ नोले डा बाजी हककोस आ नेमी, मेको आ नोले डा बाजी
अबीयाह आ नेमी, लूका १:५ 11 मेको आ नोले डा बाजी येशुआ आ नेमी, मेको आ नोले डा बाजी शेकन्याह आ
नेमी, 12 मेको आ नोले डा बाजी एल्याशीब आ नेमी, मेको आ नोले डा बाजी याकीम आ नेमी, 13 मेको आ नोले डा
बाजी हुप्पाह आ नेमी, मेको आ नोले डा बाजी येशेबे-आब आ नेमी, 14 मेको आ नोले डा बाजी बिल्गाह आ नेमी,
मेको आ नोले डा बाजी इम्मेर आ नेमी, 15 मेको आ नोले डा बाजी हेजीर आ नेमी, मेको आ नोले डा बाजी हप्पीसेस
आ नेमी, 16 मेको आ नोले डा बाजी पेथायाह आ नेमी, मेको आ नोले डा बाजी येहेजकेल आ नेमी, 17 मेको आ नोले
डा बाजी याकीन आ नेमी, मेको आ नोले डा बाजी गामुल आ नेमी, 18 मेको आ नोले डा बाजी देलायाह आ नेमी नु
मेको आ नेल्ल क्येडा नोले डा बाजी माजीयाह आ नेमी दुम्माक्त। नेल्ल पा २४ हुल बाक्सा बाक्त। 19 मेको आन
किकी हारूनमी गेशो पतीक लोव गेय बाक्सा बाक्त। दोपा परमप्रभु यावे आ खिं लचा ब्रेक्शो बाक्त। परमप्रभु यावे,

इसाएली आन परमप्रभुमी हारून कली गेशा शेंशो लोव खोदेंशो बाक्शो बाक्त। हारून आ खिं खिं डा लेवी आन गेय पचा माल्मा बाक्त।

लेवी आ थर डा अरु मुरपुकी

20 मिनु लीशो लेवी आ थर डा मुर सु सु बाक्मा बाक्त देशा हना, अग्राम आ तौ आन दाते डा शुबाएल बाक्माक्त। शुबाएल आ तौ आ दाते डा येहदयाह बाक्माक्त। 21 रेहब्याह आ तौ आन दाते डा मेको आन ठेयब मुर इस्शीयाह बाक्माक्त। 22 इच्चार आ तौ आन दाते डा शेलोमोथ बाक्माक्त। शेलोमोथ आ तौ आन दाते डा याहाथ बाक्माक्त। 23 हेब्रोन आ तौ आन दाते डा येरीयाह मेको आन ठेयब मुर बाक्माक्त। मेको आ माइला अमारयाह बाक्माक्त। आ साइला याहासीएल बाक्माक्त। आ कान्छा येकामेआम बाक्माक्त। 24 उज्जीएल आ तौ आन दाते डा मीकाह बाक्माक्त। मीकाह आ तौ आन दाते डा शामीर बाक्माक्त। 25 मिनु मीकाह आ लोकब इस्शीयाह आ तौ आन दाते डा जकरिया बाक्माक्त। 26 मेरारी आ तौ आन दाते डा माहली नु मुशी बाक्माक्त। याजीयाह आ तौ बेनो बाक्माक्त। 27 मेरारी आ तौ चच आन दाते डा याजीयाह, बेनो, शोहाम, जाक्कुर नु इब्री बाक्मा बाक्त। 28 माहली आ तौ आन दाते डा एलाजर बाक्माक्त। मेको के तौ मबाक्म। 29 कीश आ तौ आन दाते डा येराहमेल बाक्माक्त। 30 मिनु मुशी आ तौ आन दाते डा माहली, एदेर नु येरीमोथ बाक्मा बाक्त। मेको लेवी आ थर डा खिं खिं डा मुर बाक्मा बाक्त। 31 मेकोपुकीमी पिप दाऊद, सादोक अहीमेलोक नु चढ़ेब आन खिं खिं डा ठेयब मुरपुकी नु लेवी आ थर डा मुर आन डोंइती बाजी आप्मे बाक्त। खिं खिं डा ठेयब मुर नु नेल्ल क्येडा आइक्च नेल्लेम खाल का डा पामे बाक्त। मिनु गेना गेय पचा, दे यो बाजी आप्मे बाक्त। १इतिहास २५:८

25

कुम्सो पाइब नु ताप्ब योव्रशो

1 दाऊद नु आ कप्तानपुकीमी आसाफ आ तौपुकी, हेमान आ तौपुकी नु येदुथून आ तौ आन कली परमप्रभु यावे आ सोक्तीम ब्रीशा आइक्च नु ठेयब तार पाइशो ताप्तीके नु बुप्केल ताप्चा कली योव्रडमे बाक्त। मेको गेय पाइब आन नें ब्रेक्तमे बाक्त। १इतिहास १५:१९ 2 मिनु सु बाक्मा बाक्त देशा हना, आसाफ आ तौ आन दाते डा जाक्कुर, योसेफ, नेथन्याह नु अशारेलाह बाक्मा बाक्त। आसाफ मेको आन कली अरेब बाक्माक्त। आसाफमी पिप आ देशो परमप्रभु यावे आ सोक्तीम ब्रीशो कुम्सो सेला बाक्त। 3 येदुथून आ तौ नु गेदाल्याह, सेरी, येशायाह, शिमेइ, हशाब्याह नु मत्तीथ्याह ६ जना बाक्मा बाक्त। आन आफ येदुथून मेको आन कली अरेब बाक्माक्त। मेकोमी बीना ताप्शा परमप्रभु यावे आ सोक्तीम ब्रीशा “गे रिम्शो पाइब बाक्नीनी” दे ठेयब सेल्लिक कुम्सो पवा बाक्त। 4 हेमान आ तौपुकी बुक्कीयाह, मत्तन्याह, उज्जीएल, शेबुएल, येरीमोथ, हनान्याह, हानानी, एली-आथा, गिदाल्ती, रोमाम्ती-एजेर, योशबे-काशाह, माल्लोथी, होथीर नु माहाजी-ओथ बाक्मा बाक्त। 5 मेको नेल्ल पिप कली परमप्रभु आ लोव्र पाइब हेमान आ तौ बाक्मा बाक्त। मेकोपुकीमी परमप्रभु आ देशो खोदेंशो पा परमप्रभु कली ठेयब सेल्लि माल्मा बाक्त। मारदे हना परमप्रभुमी हेमान कली १४ जना तौ नु तमी सां गेशो बाक्माक्त। २इतिहास ३५:१५ 6 मिनु आन आफोमी परमप्रभु यावे आ खिंम मेको नेल्ल आन कली बीना ताप्चा, तार पाइशो ताप्तीके ताप्चा नु बुप्केल ताप्चा कली शेंशो बाक्माक्त। पिपमी आसाफ, येदुथून नु हेमान आन कली दोपा अरेवा, मोपा पामे बाक्त। 7 मेको नु आन खिं खिं डा मुरपुकी परमप्रभु यावे कली कुम्सो पचा शेंसीशो बाक्मा बाक्त। नेल्ल तुइक्ब जोक्ब बाक्शो बाक्मा बाक्त। कुम्सो पाइब नेल्ल सहे निक्शी ८८ जना बाक्मा बाक्त। 8 मिनु मेकोपुकीमी गेना गेय पचा, दे बाजी आप्मे बाक्त। आइक्च नु ठेयब, शेंसीब नु शेंब खाल का डा बाक्मा बाक्त। १इतिहास २४:३१

9 मिनु डोंइती डा बाजी आप्शो आसाफ आ तौ योसेफ आ नेंम गूम्माक्त। मिनु मेको आ नोले डा गेदाल्याह, आ लोकबपुकी नु आ तौ आन नेंम दुम्माक्त। मेको नेल्ल १२ जना बाक्मा बाक्त। 10 मेको आ नोले डा बाजी जाक्कुर, आ तौपुकी नु आ लोकब आन नेंमी दुम्माक्त। मेको नेल्ल १२ जना बाक्मा बाक्त। 11 मेको आ नोले डा बाजी इज्री, आ तौपुकी नु आ लोकब आन नेंमी दुम्माक्त। मेको नेल्ल १२ जना बाक्मा बाक्त। 12 मेको आ नोले डा बाजी नेथन्याह, आ तौपुकी नु आ लोकब आन नेंमी दुम्माक्त। मेको नेल्ल १२ जना बाक्मा बाक्त। 13 मेको आ नोले डा बाजी बुक्कीयाह, आ तौपुकी नु आ लोकब आन नेंमी दुम्माक्त। मेको नेल्ल १२ जना बाक्मा बाक्त। 14 मेको आ नोले डा बाजी येसारेला, आ तौपुकी नु आ लोकब आन नेंमी दुम्माक्त। मेको नेल्ल १२ जना बाक्मा बाक्त। 15 मेको आ नोले

डा बाजी येशायाह, आ तौपुकी नु आ लोकब आन नेंमी दुम्माक्त। मेको नेल्ल १२ जना बाक्मा बाक्त। 16 मेको आ नोले डा बाजी मत्तन्याह, आ तौपुकी नु आ लोकब आन नेंमी दुम्माक्त। मेको नेल्ल १२ जना बाक्मा बाक्त। 17 मेको आ नोले डा बाजी शिमेइ, आ तौपुकी नु आ लोकब आन नेंमी दुम्माक्त। मेको नेल्ल १२ जना बाक्मा बाक्त। 18 मेको आ नोले डा बाजी अजारेल, आ तौपुकी नु आ लोकब आन नेंमी दुम्माक्त। मेको नेल्ल १२ जना बाक्मा बाक्त। १इतिहास १२:७ 19 मेको आ नोले डा बाजी हशाब्याह, आ तौपुकी नु आ लोकब आन नेंमी दुम्माक्त। मेको नेल्ल १२ जना बाक्मा बाक्त। 20 मेको आ नोले डा बाजी शुबाएल, आ तौपुकी नु आ लोकब आन नेंमी दुम्माक्त। मेको नेल्ल १२ जना बाक्मा बाक्त। 21 मेको आ नोले डा बाजी मत्तीथ्याह, आ तौपुकी नु आ लोकब आन नेंमी दुम्माक्त। मेको नेल्ल १२ जना बाक्मा बाक्त। 22 मेको आ नोले डा बाजी येरेमोथ, आ तौपुकी नु आ लोकब आन नेंमी दुम्माक्त। मेको नेल्ल १२ जना बाक्मा बाक्त। 23 मेको आ नोले डा बाजी हनान्याह, आ तौपुकी नु आ लोकब आन नेंमी दुम्माक्त। मेको नेल्ल १२ जना बाक्मा बाक्त। 24 मेको आ नोले डा बाजी योशबे-काशाह, आ तौपुकी नु आ लोकब आन नेंमी दुम्माक्त। मेको नेल्ल १२ जना बाक्मा बाक्त। 25 मेको आ नोले डा बाजी हानानी, आ तौपुकी नु आ लोकब आन नेंमी दुम्माक्त। मेको नेल्ल १२ जना बाक्मा बाक्त। 26 मेको आ नोले डा बाजी माल्लोथी, आ तौपुकी नु आ लोकब आन नेंमी दुम्माक्त। मेको नेल्ल १२ जना बाक्मा बाक्त। 27 मेको आ नोले डा बाजी एली-आथा, आ तौपुकी नु आ लोकब आन नेंमी दुम्माक्त। मेको नेल्ल १२ जना बाक्मा बाक्त। 28 मेको आ नोले डा बाजी होथीर, आ तौपुकी नु आ लोकब आन नेंमी दुम्माक्त। मेको नेल्ल १२ जना बाक्मा बाक्त। 29 मेको आ नोले डा बाजी गिदाल्ती, आ तौपुकी नु आ लोकब आन नेंमी दुम्माक्त। मेको नेल्ल १२ जना बाक्मा बाक्त। 30 मेको आ नोले डा बाजी डा माहाजी-ओथ, आ तौपुकी नु आ लोकब आन नेंमी दुम्माक्त। मेको नेल्ल १२ जना बाक्मा बाक्त। 31 मेको आ नेल्ल क्येडा नोले डा बाजी रोमाम्ती-एजेर, आ तौपुकी नु आ लोकब आन नेंमी दुम्माक्त। मेको नेल्ल १२ जना बाक्मा बाक्त।

26

लाप्चो खाल पाइब योत्रशो

1 मिनु लाप्चो खाल पतीक गेय पाइब सु सु बाक्मा बाक्त देंशा हना, कोराह आ खिं खिं डा मुर आसाफ आ तौ रे कोराह आ तौ मेशेलेम्याह बाक्माक्त। २इतिहास ८:१४; २इतिहास ३५:१५ 2 मेशेलेम्याह आ डोंइती थिशो तौ जकरिया, आ माइला येदीएल, आ साइला जेबदीयाह, आ काइला याथनीएल, 3 आ अन्तरे एलाम, आ जन्तरे येहो-हानान नु आ कान्छा एली-ए-होएनाइ बाक्मा बाक्त। 4 ओबेद-एदोम आ डोंइती थिशो तौ शेमायाह, आ माइला येहो-जाबाद, आ साइला योआह, आ काइला साकार, आ अन्तरे नेथनेल, २सामुएल ६:११ 5 आ जन्तरे अम्मीएल, आ खन्तरे इस्साकार नु आ कान्छा पेउल्लेथाइ ८ जना बाक्मा बाक्त। मारदे हना परमप्रभुमी ओबेद-एदोम कली आसीक गेशो बाक्माक्त। 6 मेको आ तौ शेमायाह के यो तौपुकी बाक्मा बाक्त। मेको आन खिं खिं डा ठेयब मुर बाक्मा बाक्त। मारदे हना मेकोपुकी शुश जोक्ब तुइक्ब मुर बाक्मा बाक्त। 7 शेमायाह आ तौपुकी ओथनी, रेफाएल, ओबेद नु एल्जाबाद बाक्मा बाक्त। मेको आन लोकब एलीहु नु सेमक्याह यो जोक्ब तुइक्ब मुर बाक्सा बाक्त। 8 मेको ओबेद-एदोम आ तौपुकी, मेको आन तौ नु आन लोकब नेल्ले मेको गेय पचा कली जोक्ब तुइक्ब बाक्मा बाक्त। ओबेद-एदोम आ मुर नेल्ले पा ६२ जना बाक्मा बाक्त। 9 मेशेलेम्याह आ तौपुकी नु आ लोकबपुकी नेल्ल जोक्ब तुइक्ब मुर बाक्मा बाक्त। मेको नेल्ल १८ जना बाक्मा बाक्त। 10 मेरारी आ तौ होसाह आ तौपुकी सु सु बाक्मा बाक्त देंशा हना, शिग्री आ डोंइती थिशो तौ मबाक्त हना यो, मेको आन ठेयब मुर बाक्माक्त। आ आफोमी मेको कली ठेयब मुर सेला बाक्त। 11 मिनु होसाह आ तौ माइला हिल्कीयाह, आ साइला तेबल्याह नु आ कान्छा जकरिया बाक्मा बाक्त। होसाह आ तौपुकी नु आ लोकबपुकी नेल्ल १३ जना बाक्मा बाक्त।

12 परमप्रभु यावे आ खिं डा लाप्चो खाल पाइब आन हुल नु आन ठेयब मुर आन खिं खिं डा मुरपुकी खोदेंशो पा परमप्रभु यावे आ खिं गेय पचा कली योत्रशो बाक्मा बाक्त। 13 मिनु मेकोपुकीमी आन खिं खिं डा मुर कली तेको लाप्चो खाल पचा, दे बाजी आप्मे बाक्त। खूशो नु ठिटा नेल्ल कली खाल का डा पा बाजी आप्मे बाक्त।

14 मिनु पूर्ब डा लाप्चो खाल पचा कली शेलेम्याह आ नेंम दुम्माक्त। मेकोपुकीमी आ तौ जकरिया आ पर्बम यो बाजी आप्मे बाक्त। मिनु उत्तर डा लाप्चो खाल पचा कली दुम्माक्त। जकरिया रिम्शो अर्ती गेब बाक्माक्त। 15 ओबेद-एदोम दक्खिन डा ठेयब लाप्चो खाल पाइब दुम्माक्त। आ तौ आन गेय मार मार वोइक्तीक खिं कोव्रतीक बाक्माक्त।

16 मिनु शुप्पीम नु होसाह पच्छिम डा लाप्चो नु शल्लेकेथ माइशो लाप्चो खाल पाइब दुम्सा बाक्त। मेको लाप्चो ग्येत्थ लतीक लाम नेक्नेक्था बाक्माक्त। 17 मिनु पूर्ब गे नाक्त किंत किंत ६ जना लेवी, उत्तर गे नाक्त किंत किंत ४ जना, दक्खिन गे नाक्त किंत किंत ४ जना खाल पाइब बाक्मा बाक्त। मार मार वोइक्तीक खिं खाल पचा कली नाक्त किंत किंत निक्निक्शी मुर बाक्सा बाक्त। 18 परमप्रभु यावे आ खिं डा पच्छिम गे डा लाम ४ जना खाल पाइब बाक्मा बाक्त। आ खिं आ नेक्था चहिं खाल पाइब निक्शी बाक्सा बाक्त। 19 मेको नेल्ल कोराह नु मेरारी आस खिं खिं डा लाप्चो खाल पाइब आन हुल बाक्मा बाक्त।

परमप्रभु आ मार मार कोव्रब मुर

20 मिनु अरु लेवी आ थर डा मुर आन गेय मार बाक्त देशा हना, परमप्रभु आ खिं डा मार मार शोप वोइक्तीके नु मार मार परमप्रभु कली गेशो वोइक्तीके कोव्रब अहीयाह बाक्माक्त। 21 लादान आ तौपुकी, लादान आ खिं डा गेरशोनी नेल्ले, गेरशोनी आ खिं डा ठेयब मुर येहीएली बाक्मा बाक्त। १इतिहास २३:८ 22 येहीएली आ तौ जेथाम नु आ लोकब योएल परमप्रभु यावे आ खिं डा मार मार शोप वोइक्तीके कोव्रब बाक्मा बाक्त। 23 मिनु अग्राम आ खिं डा मुरपुकी, इच्चार आ खिं डा मुरपुकी, हेब्रोन आ खिं डा मुरपुकी नु उज्जीएल आ खिं डा मुरपुकी 24 मार मार वोइक्तीके कोव्रब आन ठेयब मुर शेबुएल बाक्माक्त। मेको मोसा आ चच, गेरशोम आ तौ बाक्माक्त। १इतिहास २३:१६ 25 गेरशोम आ लोकब एलीएजर आ तौ रेहब्याह बाक्माक्त। मेको आ तौ येशायाह, येशायाह आ तौ योराम योराम आ तौ जिक्री नु जिक्री आ तौ शेलोमोथ बाक्मा बाक्त। १इतिहास २३:१७ 26 शेलोमोथ नु आ लोकबपुकी पिप दाऊदमी गेशो, खिं खिं डा ठेयब मुरपुकीमी गेशो, हजार हजार लडाइ पाइब आन कप्तानपुकीमी गेशो नु सहे सहे डा लडाइ पाइब आन कप्तानपुकीमी गेशो शोप वोइक्तीके कोव्रब बाक्मा बाक्त। 27 मेकोपुकीमी लडाइम रोइशशा चाक्शो मार मार परमप्रभु यावे आ खिंम चालेचा कली गेशो बाक्मा बाक्त। 28 परमप्रभु यावे आ लोव्र पाइब सामुएल, कीश आ तौ सावल, नेर आ तौ आब्नेर नु सेरूयाह आ तौ योआबमी गेशो मारेइ मारेइ शेलोमोथ नु आ लोकबपुकी कोव्रब बाक्मा बाक्त।

लेवी आन गेय

29 इच्चार आ थर डा मुर आन दाते रे केनानीयाह नु आ तौ आन कली इस्राएली आन कली कोव्रब नु निसाफ पाइब बाक्मा बाक्त। 30 हेब्रोन आ खिं डा मुर आन दाते रे हशाब्याह नु आ लोकबपुकी हजार का ७ सहे जोक्ब तुइक्ब मुर यर्दन खोला आ पच्छिम गे डा इस्राएल रागी डा परमप्रभु यावे आ खिं डा गेय नु पिप आ गेय आ पर्बम कोव्रब बाक्मा बाक्त। 31 दाऊद ४० बर्सम पिप दुम्तीके हेब्रोन आ मुर रे तेको तेको खिं डा ठेयब जोक्ब तुइक्ब मुर माल्मे बाक्त। मिनु गिलाद डा याजेर सहरमी मेको आन कली शुश थित्मे बाक्त। मिनु येरीयाह मेको आन ठेयब मुर बाक्माक्त। 32 पिप दाऊदमी येरीयाह नु आ लोकबपुकी, हजार निक्शी ७ सहे जोक्ब तुइक्ब नु आंम आन खिं डा ठेयब मुर दुम्शो आन कली गेय पपाइक्मी बाक्त। मार गेय पपाइक्मी बाक्त देशा हना, मेकोपुकी रूबेन आ थर डा मुर, गाद आ थर डा मुर नु मनस्से आ आधा थर डा मुर आन कली परमप्रभु आ पर्बम मार गेय पचा नु पिप आ पर्बम मार गेय पचा मेको कोव्रब सेल्मी बाक्त।

27

लडाइ पाइब आन हुल

1 मिनु इस्राएली आन खिं खिं डा ठेयब मुरपुकी, हजार हजार लडाइ पाइब आन कप्तानपुकी, सहे सहे डा लडाइ पाइब आन कप्तानपुकी नु मेको आन ठेयब मुरपुकी बाक्मा बाक्त। मेकोपुकीमी लडाइ पाइब आन हुल हुल आन कली बर्सम महिना महिनामी पालो पा पिप आ गेय पपाइक्बाक्मा बाक्त। लडाइ पाइब आन हुल का का पालो पा बर्स डा महिना का गेय पपदमे बाक्त। हुल काम १४ हजार मुर बाक्मा बाक्त। पिप आ नेल्ल क्येडा ठेयब कप्तान सु बाक्मा बाक्त देशा हना,

2 बर्स आ डोंइती डा महिना डा डोंइती डा हुल आन कप्तान जब्दीएल आ तौ याशोबाम बाक्माक्त। मेको आ हुलम १४ हजार मुर बाक्मा बाक्त। 3 मेको पेरेस आ खिं खिं डा मुर बाक्मा बाक्त। मेको डोंइती डा महिना डा लडाइ पाइब नेल्ल आन कप्तान, क्येडा ठेयब मुर बाक्माक्त।

4 मेको आ नोले डा महिना डा हुल आन कप्तान अहोही आ मुर दोदाइ बाक्माक्त। मेको हुल नेल्ल आन कप्तान क्येडा ठेयब मुर मीक्लोथ बाक्माक्त। मेको आ हुलम १४ हजार मुर बाक्मा बाक्त।

5 मेको आ नोले डा महिना डा हुल आन नेल्ल क्येडा ठेयब कप्तान चढेब येहो-यादा आ तौ बेनायाह बाक्माक्त। मेको आ हुलम १४ हजार मुर बाक्मा बाक्त। १इतिहास ११:२२-२५ 6 मेको बेनायाह शुश सक्ति पाइशो ३० जना मुर आन दाते डा का बाक्माक्त। मिनु मेको ३० जना सक्ति पाइशो मुर आन ठेयब मुर बाक्माक्त। मेको आ तौ अम्मीजाबाद बेनायाह आ लडाइ पाइब आ हुल डा मुर आन कप्तान बाक्माक्त।

7 मेको आ नोले डा महिना डा हुल आन कप्तान योआब आ लोक्ब आसाहेल बाक्माक्त। मेको आ नोले आ तौ जेबदीयाह कप्तान दुम्माक्त। मेको आ हुलम १४ हजार मुर बाक्मा बाक्त। १इतिहास ११:२६

8 मेको आ नोले डा महिना डा हुल आन कप्तान इज्जायाह आ मुर शाम्हुथ बाक्माक्त। मेको आ हुलम १४ हजार मुर बाक्मा बाक्त।

9 मेको आ नोले डा महिना डा हुल आन कप्तान तेकोहा आ मुर इक्केस आ तौ इरा बाक्माक्त। मेको आ हुलम १४ हजार मुर बाक्मा बाक्त। १इतिहास ११:२८

10 मेको आ नोले डा महिना डा हुल आन कप्तान एफ्राइम आ थर डा, पेलोन आ खिं डा मुर हेलेस बाक्माक्त। मेको आ हुलम १४ हजार मुर बाक्मा बाक्त। १इतिहास ११:२७

11 मेको आ नोले डा महिना डा हुल आन कप्तान जेराह डा हुशा डा मुर सिब्बेकै बाक्माक्त। मेको आ हुलम १४ हजार मुर बाक्मा बाक्त। १इतिहास ११:२९; १इतिहास २०:४

12 मेको आ नोले डा महिना डा हुल आन कप्तान बेन्यामीन आ थर डा अनाथोथ सहर डा अबीएजेर बाक्माक्त। मेको आ हुलम १४ हजार मुर बाक्मा बाक्त। १इतिहास ११:२८

13 मेको आ नोले डा महिना डा हुल आन कप्तान जेरह आ खिं डा नेतोफाह सहर डा मुर माहाराइ बाक्माक्त। मेको आ हुलम १४ हजार मुर बाक्मा बाक्त। १इतिहास ११:३०

14 मेको आ नोले डा महिना डा हुल आन कप्तान एफ्राइम आ थर डा पिराथोन सहर डा बेनायाहम बाक्माक्त। मेको आ हुलम १४ हजार मुर बाक्मा बाक्त। १इतिहास ११:३१

15 मिनु बर्स आ नेल्ल क्येडा नोले डा महिना डा हुल आन कप्तान ओथनीएल आ खिं डा नेतोफाह सहर डा हेल्दाइ बाक्माक्त। मेको आ हुलम १४ हजार मुर बाक्मा बाक्त।

थर थर डा ठेयब मुरपुकी

16 इस्राएली आन थर थर डा ठेयब मुरपुकी सु सु बाक्मा बाक्त देशा हना, रूबेन आ थर डा जिक्री आ तौ एलीएजर ठेयब मुर बाक्माक्त। सिमियोन आ थर डा माकाह आ तौ शेफत्याह बाक्माक्त। 17 लेवी आ थर डा केमुएल आ तौ हशाब्याह बाक्माक्त। हारून आ खिं डा सादोक बाक्माक्त। 18 यहूदा आ थर डा दाऊद आ लोक्ब एलीहु बाक्माक्त। इस्साकार आ थर डा मिकाएल आ तौ ओम्री बाक्माक्त। 19 जबूलून आ थर डा ओबदिया आ तौ इश्मायाह बाक्माक्त। नाप्ताली आ थर डा अज्जीएल आ तौ येरेमोथ बाक्माक्त। 20 एफ्राइम आ थर डा अज्जीयाह आ तौ होशेआ बाक्माक्त। मनस्से आ उइक्थ थर डा पेदायाह आ तौ योएल बाक्माक्त। 21 मिनु गिलादम बाक्शो मनस्से आ उइक्थ थर डा जकरिया आ तौ इददो बाक्माक्त। बेन्यामीन आ थर डा आब्नेर आ तौ यासीएल बाक्माक्त। 22 दान आ थर डा येरोहाम आ तौ अजारेल बाक्माक्त। मेको नेल्ल इस्राएली आन थर थर डा ठेयब मुर बाक्मा बाक्त। 23 मिनु दाऊदमी २० बर्स मगाप्शो आन कली महिकमी बाक्त। मारदे हना परमप्रभु यावेमी “इस्राएली आन कली सरीड डा सोरुल खोदेशो पा शुश सेल्लुडमी” दे कबल पशो बाक्माक्त। उत्पत्ती २२:१७ 24 सेरूयाह आ तौ योआबमी मुर आन कली हिक्चा गोवा बाक्त। आ गेय मथुम्थु, परमप्रभु यावेमी इस्राएली आन पबर्म गाइक्ता बाक्त। मोपतीके मेना पिप दाऊद आ सासन पची ना मार मार दुम्शो बाक्मा ब्रेक्तीकेम गिश मुर हिक्शो बाक्मा मेको मब्रेक्शो बाक्माक्त। १इतिहास २१:७,१४

पिप आ मार मार कोव्रबपुकी

25 मिनु अदीएल आ तौ अज्मावेथ पिप आ मार मार वोइक्तीके कोव्रब आन ठेयब मुर बाक्माक्त। उज्जीयाह आ तौ योनाथन चहिं रूमी, सहरपुकीमी, गाउंपुकीमी नु वोइक्तीके लाइशो खिंमी बाक्शो पिप आ मार मार कोव्रब आन ठेयब मुर बाक्माक्त। 26 केलुब आ तौ एज्जी रूम गेय पा दोइब आन कली कोव्रब आन ठेयब मुर बाक्माक्त। 27 रामाह

सहर डा शिमेइ अडगुर रूपुकी कोव्रब आन ठेयब मुर बाक्माक्त। शिफमी आ मुर जब्दी चहिं अडगुर शांबु वोइक्तीके कोव्रब आन ठेयब मुर बाक्माक्त। 28 गेदेराह सहर डा बाल-हनान शेफेलाह डा दिंममी बाक्शो तेल रवा नु फल सिप्ब फोव्रशी रवापुकी कोव्रब आन ठेयब मुर बाक्माक्त। योआश चहिं तेल वोइक्तीक कली कोव्रब आन ठेयब मुर बाक्माक्त। 29 शारोन दिंम डा शित्राइ मेकेर डा दिंममी जोइब बी ब्यफ आन कली कोव्रब आन ठेयब मुर बाक्माक्त। अदलाइ आ तौ शाफात चहिं अरु दिंमम जोइब बस्तु भाव आन कली कोव्रब आन ठेयब मुर बाक्माक्त। 30 इश्माएली ओबील दलओठ आन कली कोव्रब आन ठेयब मुर बाक्माक्त। मेरोनोथ डा येहदयाह गधा आन कली कोव्रब आन ठेयब मुर बाक्माक्त। मिनु हाग्री आ मुर याजीज क्यारश भेडा आन कली कोव्रब आन ठेयब मुर बाक्माक्त। 31 मेको नेल्ले पिप दाऊद आ शोंप कोव्रब आन ठेयब मुर बाक्मा बाक्त।

पिप दाऊद आ नेक्था डा मुरपुकी

32 दाऊद आ बकान्छा योनाथन दाऊद कली अर्ती गेब बाक्माक्त। मेको शुश जोक्ब तुइक्ब नु ब्रेक्स तुइक्ब मुर बाक्माक्त। हाकमोनी आ तौ येहीएल पिप आ तौ आन कली कोव्रब बाक्माक्त। 33 मिनु अहीथोफेल यो पिप कली अर्ती गेब बाक्माक्त। अरकी आ मुर हुशाइ पिप आ वारच बाक्माक्त। 34 अहीथोफेल आ नोले बेनायाह आ तौ येहो-यादा नु अबीयाथार पिप कली अर्ती गेब बाक्सा बाक्त। मिनु योआब पिप आ लडाइ पाइब आन ठेयब मुर बाक्माक्त। २सामुएल ८:१६

28

परमप्रभु आ खिं सेल्चा मिम्शो

1 मिनु दाऊदमी यरूसलेम सहरम इस्राएली आन ठेयब मुर नेल्ले आन कली गुम्पदा बाक्त। सु सु गुम्पदा बाक्त देंशा हना, थर थर डा ठेयब मुर, पिप आ गेय पाइब हुल हुल आन ठेयब मुर, हजार हजार लडाइ पाइब आन कप्तानपुकी, सहे सहे लडाइ पाइब आन कप्तानपुकी, पिप नु आ तौ आन मार मार नु बी ब्यफ कोव्रब आन ठेयब मुरपुकी, दरवारमी गेय पाइब आन ठेयब मुरपुकी, शुश सक्ति पाइशो लडाइ पाइबपुकी नु अरु महिं ब लडाइ पाइब आन कली गुम्पदा बाक्त। 2 मिनु पिप दाऊद बोक्शा मेको आन कली “आं लोकब नु आं मुर आं लोव्र नेनीन। गो परमप्रभु यावे आ कबल पशो सन्दोस कली नाइक्चा कली बाक्तीक का सेल्चा मिम्शो बाक्ती। परमप्रभु यावे, इं परमप्रभु आ खोइल थेक्तीक खोदेंशो दुम्चा माल्ब। गो मेको सेल्चा कली ठीक पाता। ?इतिहास २२:६-१०; भजन संग्रह ९९:५; भजन संग्रह १३२:७ 3 तन्न परमप्रभुमी आं कली ‘गे आं नें ठेयब सेल्चा कली खिं सेल्चा मदुम्ब। मारदे हना गे लडाइ पा हुश ख्राक्श पोक्शो बाक्ते’ देंत। 4 मो हना यो परमप्रभु यावे, इस्राएली आन परमप्रभुमी आं आफ आ खिं खिं रे आं कली गेना हना यो इस्राएलम पिप दुम्चा कली योव्रती। मारदे हना मेकोमी लां कोंइचा कली यहूदा कली योव्रतु। मिनु यहूदा आ थर डा खिं खिं रे आं आफ आ खिं कली योव्रतु। मिनु आ आफ आ तौ आन दातेमी आं कली दाक्शा, इस्राएल डा पिप सेलती। उत्पत्ती ४९:१०; १सामुएल १६:१, १२ 5 परमप्रभु यावेमी आं कली शुश तौ गेती। परमप्रभु यावेमी आ राज्य इस्राएलम पिप दुम्चा कली आं तौ सोलोमन कली योव्रतु। 6 मिनु आं कली ‘इ तौ सोलोमनमी आं खिं नु आं लाडगा सेल्चा माल्ब। मारदे हना गो आं तौ दुम्चा, दे मेको कली योव्रता। गो आ आफ दुम्नुड। ?इतिहास १७:११-१४ 7 मेकोमी आं शेंशो नु निसाफ पतीक लोव्र टिना टिन बाक्ब। मुल खोदेंशो पा रिम्शो टिप्तु हना, गो मेको आ राज्य गेना हना यो बोल्यो सेल्लुड’ देंमाक्त। 8 मोपतीके गे परमप्रभु यावे आ नेंम गुम्शो इस्राएली नेल्ल आन डोंइती नु इं परमप्रभु आ डोंइती परमप्रभु यावे, इन परमप्रभु आ शेंतीके टिशा बिस्सीन। मिनु नोले मेको रिम्शो रागी इन के दुम्ब नु इन नोले इन आल आन कली गेना हना यो थेरशो रू दुम्ब।

9 आं तौ सोलोमन, इ आफ आ परमप्रभु कली तुइश्शा मालो। इ थुं नेल्लेमी ग्येरशा मेको आ नोले खोतो। मारदे हना परमप्रभु यावेमी इ थुं कोव्रना कोव्रन, इन मिम्शो नु पशो नेल्ल तुइक्ब। गे मेको कली माल्तीवी हना, गे थित्नेवे। तन्न गे मेको कली प्रोंइतीवी हना, इ कली गेना हना यो कली प्रोंइब। येरमीया २९:१३-१४; १राजा ११:३१, ३३ 10 मुल होस पावो। मारदे हना परमप्रभु यावेमी आंम आ बाक्तीक खिं सेल्चा कली इ कलीन योव्रतु। इ थुं ग्येत्थ लुकच मपथु, गेय पावो” दे पिप दाऊदमी आ तौ कली मदा बाक्त।

11 मिनु नोले दाऊदम आ तौ सोलोमन कली परमप्रभु यावे आ खिं सेल्लेकी ब्रेक्स गेवा बाक्त। मेको खिं डा ब्रेक्समी परमप्रभु आ बाक्तीक, आ पिंडी, अरु खिं, मार मार वोइक्तीक, खिं आ तार डा कोठापुकी, आगा डा कोठापुकी नु

सन्दोस नु आ सुम्तीके आ कोठा बाक्शो बाक्माक्त। प्रस्थान २५:९ 12 दाऊद आ मिम्शो नेल्ल मेको ब्रेक्सम बाक्शो बाक्त। मेकोमी परमप्रभु यावे आ खिं डा लाडगा, आ एर ओंथ नेल्ल डा कोठापुकी, परमप्रभु आ खिं डा मार मार वोइक्तीक कोठा नु नेल्ल गेशो थोव्रक कली वोइक्तीक कोठा आ तौ कली गोवा बाक्त। 13 मिनु लेवी नु चढेब आन हुल हुल, परमप्रभु यावे आ खिंमी मार मार गेय पचा नु मेकेर मार मार ग्योंबपुकी परमप्रभु यावे आ खिं डा गेय कली सेल्चा नेल्ल मेको ब्रेक्सम ब्रेक्शो बाक्माक्त। 14 मार मार गेय पचा कली सुन के ग्योंब सेल्चा कली गिश सुन माल्बा, चांदी के ग्योंब सेल्चा कली गिश चांदी माल्बा, मेको ब्रेक्शो बाक्माक्त। 15 मिनु सुन के बत्ती दातीक नु आ दियारी आन कली गिश सुन माल्बा, चांदी के बत्ती दातीक नु आ दियारी आन कली गिश चांदी माल्बा नु मार मार गेय कली मार माल्बा नेल्ल ब्रेक्शो बाक्माक्त। 16 लहर पा वोइश्शो कोंइतीक शोब्ले कली सुन के टेबल गिश सुन नु चांदी के टेबल आन कली गिश चांदी माल्बा मेको ब्रेक्शो बाक्माक्त। 17 मिनु कांटा, बुइक्तीक बोस, लोटा नु सुन के बोस आन कली गिश क्येख सुन माल्बा, मेको ब्रेक्शो बाक्माक्त। मिनु चांदी के बोस गिश चांदी माल्ब, मेको ब्रेक्शो बाक्माक्त। 18 क्येख सुन के धूप चोतीक कली गिश क्येख सुन माल्बा, मेको ब्रेक्शो बाक्माक्त। सुन के फ्रां प्राक्शा परमप्रभु यावे आ सन्दोस सुम्ब करूब आस कली कुरब बग्गी के यो ब्रेक्स यो सेल्शो बाक्माक्त। मिनु गिश सुन माल्बा, मेको ब्रेक्शो बाक्माक्त।

19 मिनु दाऊदमी “एको नेल्ल परमप्रभु यावेमी मार पचा, दोपा सेल्चा आं कली शेंताक्यी। मोपा गो मेको नेल्ल गेय डा ब्रेक्स ब्रेक्ताकड” दे दाऊदमी देंमाक्त।

20 मिनु दाऊदमी आ तौ सोलोमन कली “बोल्यो नु महिंब दुम्शा, एको गेय पावो। महिनो, इ थुं ग्येत्थ लुकच मपावो। मारदे हना परमप्रभु यावे, आं परमप्रभु गे नु बाक्ब। परमप्रभु यावेमी आ खिंमी गेय पचा कली मारेइ मारेइ सेल्ने मथुमा सम्म इ कली मप्रोंइथु वारच पाइब। १इतिहास २२:१३; ब्यवस्था ३१:६ 21 परमप्रभु आ खिंमी गेय पचा कली चढेब नु लेवी आन हुल हुल ठीक दुम्शो बाक्नीम। मिनु मेको गेय पचा कली शुश जोक्ब तुइक्ब नु ग्येरशो गेय पाइब गे नु बाक्नीम। मिनु ठेयब मुरपुकी नु मुर नेल्लेमी इ देशो नेल्ल टीनीम” दे दाऊदम आ तौ सोलोमन कली देंमाक्त।

29

परमप्रभु कली मार मार गेशो

1 मिनु पिप दाऊदमी बुक्शा बाक्शो मुर नेल्ल आन कली “परमप्रभुमी आं तौ सोलोमन का ला योव्रतु। मेको मुल सम्म ठिटा बाक्ब। एको खिं सेल्चा चहिं थम ठेयब गेय बाक्ब। मारदे हना एको खिं मुर आन कली ममाइ, परमप्रभु, परमप्रभु यावे आ खिं बाक्ब। १इतिहास २२:५ 2 गो आं परमप्रभु आ खिं सेल्चा कली मार मार वोइक्ता देशा हना, सुन के थोव्रक कली सुन, चांदी के थोव्रक कली चांदी, कांसा के थोव्रक कली कांसा, फलाम के थोव्रक कली फलाम, शी के थोव्रक कली शी, हीरा नु सुनम ग्याइश्शो हीरा, दारपाइक्चा कली मार मार रड पाइश्शो फुल्लु, मार मार हीरा नु अरु दारशो फुल्लु शुश तेलशा वोइक्ता। 3 मेको आं परमप्रभु आ बाक्तीके सेल्चा कली खुप्शा वोइश्शो मार मार प्रोंइशा यो आं परमप्रभु आ खिं सेल्चा थाम्पा दाक्तीके गो आंम आं सुन नु चांदी परमप्रभु आ खिं सेल्चा कली गेता। 4 परमप्रभु यावे आ खिं डा आगा डा गारो गिल्चा कली ४३ हजार टलेन्ट ओफीर डा सुन नु ७ हजार टलेन्ट याप्पाइश्शो चांदी वोइश्शो बाक्ब। टलेन्ट का ३४ किलो बाक्ब। १इतिहास २२:१४; प्रस्थान ३५:४-९ 5 मिनु रिम्शो जोक्ब तुइक्ब गेय पाइब आन कली एको सुन के थोव्रक कली सुन नु चांदी के थोव्रक सेल्चा कली चांदी वोइश्शो बाक्ब। मुल परमप्रभु यावे कली आं खोदेशो पा सु सुम मार मार गेचा दाक्नीनी?” दे हिलो पवा बाक्त।

6 मिनु खिं खिं डा ठेयब मुरपुकी, इस्त्राएली आ थर थर डा ठेयब मुरपुकी, हजार हजार डा लडाइ पाइब आन कप्तानपुकी नु सहे सहे डा लडाइ पाइब आन कप्तानपुकी नु पिप आ गेय पाइब आन कली कोव्रब मुरपुकी हाइश्शो दुम्शा मार मार गेमी बाक्त। 7 मेकोपुकीमी ग्येरशा परमप्रभु आ खिं सेल्चा कली मार मार गेमे बाक्त देशा हना, ५ हजार टलेन्ट सुन, नु सुन के क्येट १० हजार दारीके, १० हजार टलेन्ट चांदी, १८ हजार टलेन्ट कांसा लाख का टलेन्ट फलाम गेमे बाक्त। दारीके का ८.४ ग्राम सुन के क्येट बाक्ब। 8 मिनु सु सु नु हीरा बाक्मा, मेकोमी परमप्रभु यावे आ शोप वोइक्तीक कली गेरशोन आ खिं डा मुर येहीएल आ गुइमी गेमे बाक्त। प्रस्थान ३५:२७ 9 मिनु मुरपुकीमी हाइश्शो थुंमी गेशा ग्येरसीशो बाक्मा बाक्त। मारदे हना मेकोपुकीमी ग्येरसीशा परमप्रभु यावे कली शुश गेशो बाक्मा बाक्त। पिप दाऊद यो थाम्पा ग्येरशो बाक्माक्त।

परमप्रभु कली ठेयब सेल्शो

10 मिनु दाऊदमी मुर नेल्ल आन डोंइती परमप्रभु यावे कली “परमप्रभु यावे, आंइ किकी पिपी इस्राएल आ परमप्रभु, गे गेना हना यो ठेयब बाक्नीनी। 11 परमप्रभु यावे, नेल्ल क्येडा ठेयब दुम्तीके, सक्ति, छेडछेड, ग्रातीके नु मान तचा पुंइसीतीके नेल्ल इन के बाक्नीम। मारदे हना रागी नु सरीडम बाक्शो मारेइ मारेइ इन के नम। परमप्रभु यावे, मेको राज्य इन के बाक्ब। गे नेल्ल क्येडा ठेयब बाक्नीनी। प्रकाश ४:११;५:१३ 12 गे शोप नु मान ततीक गेब बाक्नीनी। गे नेल्ल आन कली सासन पाइनीनी। बोल नु सक्ति इन गुइमी बाक्ब। गे इन गुइमी ठेयब सेल्शा, सक्ति गेनीनी। २इतिहास २०:६ 13 मुल आंइ परमप्रभु, गो इन कली ‘गे रिम्शो पाइब बाक्नीनी’ दे इन नें ठेयब सेल्नीकी।

14 मिनु गो आंइ थुंम ग्येरशा सोम्शा ओपा शुश गेने चाप्नीकी? गो सु नडा? आं मुरपुकी सु बाक्नीमी? मारदे हना नेल्ल थोव्रक इन गुइ रे जाक्नीम। गोपुकीमी इन गेशो रे इन कली गेतक। 15 गोपुकी इन डोंइती शुश नाक्त मबाक्ब अर्को रागी डा मुर दुम्शो बाक्नीकी। आंइ किकी पिपी यो मोदेशो बाक्मा बाक्त। आंइ रागीम बाक्तीके नाक्ती वांकु खोदेशो बाक्नीम। शुश बाक्तीक आस मबाक्ब। भजन संग्रह ३९:१३; हिब्रू ११:१३; अय्युब १४:२ 16 परमप्रभु यावे, आंइ परमप्रभु खिं सेल्शा, इन नें ठेयब सेल्चा कली आंइ तेल्लो शोप नेल्ल इन गुइ रे जाक्शो बाक्ब। 17 आं परमप्रभु, गे मुर आन थुं नाक्शा कोव्रनीनी, दे तुइक्नुड। गे ब्रेम्शो थुं पाइशो मुर तशा ग्येरनीनी। गो आं ब्रेम्शो थुं दुम्तीकेमी ग्येरशा एको नेल्ल इन कली चढेता। मुल गो एक बाक्शो इन मुर आन कली ताता। ग्येरशो थुंमी एको नेल्ल चढेम्तेक्म। भजन संग्रह ७:१० 18 परमप्रभु यावे, आंइ किकी पिपी अब्राहाम, इसहाक नु याकूब आन परमप्रभु, इन मुर आन थुंमी मोदेशो मिम्चा नु पचा गेना हना यो लीपतीन। मिनु मेको आन थुं इन गे कीडीन। 19 आं तौ सोलोमन कली इन शेंतीके, इन देशो नु फुल्लुम मुशा ब्रेक्शो लोव्र आ थुं नेल्लेमी पपतीन। मेकोमी नेल्ल पने चबल। मिनु आं ठीक पा वोइशो थोव्रकमी इन खिं सेल्ने चबल” दे दाऊदमी परमप्रभु कली देंमाक्त।

सोलोमन पिप दुम्शो

20 मिनु नोले दाऊदमी मुर नेल्ल आन कली “परमप्रभु यावे, इन परमप्रभु कली ठेयब सेलीन” देंमाक्त। मिनु मुर नेल्लेमी परमप्रभु यावे, आन किकी पिप आन परमप्रभु कली ठेयब सेल्शा बाम्मा बाक्त। मिनु परमप्रभु यावे नु पिप आ डोंइती बाप्शा, सेउ पामे बाक्त। 21 मिनु आ दीसा नाक्ती मेकोपुकीमी परमप्रभु यावे कली मार मार चढेतीके नु चोशा चढेतीक चढेमे बाक्त। मेकोपुकीमी हजार का ब्यफ, हजार का सांड, हजार का पाठा, तूचा थोव्रक चढेमे बाक्त। इस्राएली नेल्ल आन पर्बम शुश चढेमे बाक्त। 22 मेको नाक्त शुश ग्येरसीशा परमप्रभु यावे आ डोंइती जशा, तूडमे बाक्त। मिनु नोले मेकोपुकीमी दाऊद आ तौ सोलोमन कली लेंशा पिप सेल्मे बाक्त। मिनु सोलोमन कली तेल लुक्शा पिप सेल्मे बाक्त। मिनु सादोक कली चढेब सेल्मे बाक्त। १इतिहास २३:१ 23 नोले सोलोमन आ आफ दाऊद आ पा डा परमप्रभु यावे आ नित्तीकेमी निश्शा, पिप दुम्शा, ठेयब दुम्माक्त। इस्राएली नेल्लेमी मेको आ देशो बिस्समा बाक्त। १इतिहास २८:५; १राजा १:३४, ३५, ३९ 24 ठेयब मुर नेल्ले, सक्ति पाइशो लडाइ पाइब नेल्ले नु पिप दाऊद आ तौ नेल्लेमी यो पिप सोलोमन कली आन पिप बाक्ब, दे कसम जामे बाक्त। 25 मिनु परमप्रभु यावेमी सोलोमन कली इस्राएली नेल्ल आन डोंइती ठेयब सेला बाक्त। मिनु मेको कली राज्य नु मान ततीके शुश गेवा बाक्त। इस्राएलम मेको क्येडा डोंइती डा तेकोइ पिप आन कली मोदेशो मान ततीके मगेशो बाक्माक्त।

दाऊद बेक्शो

26 मोपा येस्से आ तौ दाऊदमी इस्राएल नेल्लेमी सासन पवा बाक्त। 27 मेकोमी इस्राएल कली ४० बर्स सासन पवा बाक्त। हेब्रोनम ७ बर्स नु यरूसलेममी ३३ बर्स सासन पवा बाक्त। १राजा २:११ 28 मिनु शुश खूशो दुम्शा बेक्माक्त। मेको के शोप नु मान ततीके शुश बाक्माक्त। मिनु आ तौ सोलोमन आ नोले पिप दुम्माक्त। उत्पत्ती २५:८; उत्पत्ती ३५:२९; २इतिहास २४:१५; अय्युब ४२:१७ 29 पिप दाऊद आ पशो मार मार बाक्मे, मेको डोंइती रे नोले सम्म नेल्ल परमप्रभु यावे आ लोव्र पाइब सामुएल, नाथान नु गाद आन ब्रेक्शो किताबम ब्रेक्शो बाक्ब। १इतिहास २१:९ 30 दोपा सासन पवा, आ सक्ति नु आ पशो नेल्ल, इस्राएली आन तशो नु रागी रागी डा राज्यम मार मार दुम्मे, मेको लोव्र नेल्ल मेकेर ब्रेक्शो बाक्ब।

२ इतिहास

ब्रेक्ब मुर: एजा ब्रेक्ब मुर बाक्त हना यो, अर्को मुरपुकीम यो लोत्र तेम्शो बाक्तेक्म।

गेना दुम्शो: १इतिहास खोदेशो पा ५३६ बि. सी. सम्म डा इस्राएली आन इतिहास बाक्ब।

मार ब्रेक्शो:

१. सोलोमन आ सासन पची ना डा इस्राएली आन इतिहास। २इतिहास १:- २इतिहास ९:-

२. यहूदा रागी डा पिप आन सासन पची ना डा इस्राएली आन इतिहास। २इतिहास १०:-२इतिहास ३६:-

सोलोमनम तुइक्तीक थुं पुंइशो

१राजा ३:१-१५

१ दाऊद आ तौ सोलोमन पिप दुम्शा, आ राज्य बोल्यो दुम्माक्त। मारदे हना परमप्रभु यावे, आ परमप्रभु मेको नु बाक्शा, मेको कली थाम्पा ठेयब मान ताइब सेला बाक्त। १राजा २:१२,४६

२ मिनु सोलोमनम इस्राएली नेल्ल, हजार हजार नु सहे सहे डा लडाइ पाइब आन कप्तान, निसाफ पाइबपुकी, इस्राएली आन ठेयब मुरपुकी नु आन खिं खिं डा ठेयब मुर नेल्ल खुप्शा लोत्र पवा बाक्त। ३ मिनु सोलोमन नु मेको मुर नेल्ल गिबोन सहर आ नेक्था बाक्शो लाइशो डांडाम लमा बाक्त। मारदे हना परमप्रभु यावे आ गेय पाइब मोसाम गोरशो रागीम सेल्शो परमप्रभु आ गुम्तीक ताम्बु मेकेर बाक्माक्त। १इतिहास १६:३९ ४ मिनु दाऊदम डोंइती परमप्रभु आ कबल पशो सन्दोस कली किरयथ-यारीम रे आ ठीक पशो बाक्तीके यरूसलेमम चाक्शो बाक्माक्त। मारदे हना मेको कली मेकेर ताम्बु का कीशो बाक्माक्त। १इतिहास १३:६; १इतिहास १५:३,२; १इतिहास १६:१ ५ मिनु हुर आ चच ऊरी आ तौ बेजालेलमी सेल्शो कांसा के चोशा चढ़ेतीके परमप्रभु यावे आ बाक्तीके आ डोंइती गिबोनम बाक्शो बाक्माक्त। प्रस्थान ३८:३-८ ६ मिनु सोलोमन नु आ खुप्शो मुर नेल्ल इर परमप्रभु यावे आ डोंइती जाक्मा बाक्त। मिनु सोलोमन मेको कांसा के चढ़ेतीक सम्म डोंइशो लमाक्त। मेको गुम्तीक ताम्बु आ डोंइती बाक्शो बाक्माक्त। मेको आ तारी हजार का चोशा चढ़ेतीक चढ़ेवा बाक्त। ७ मेको नाक्दो परमप्रभुम सोलोमन कली तपांडसे बाक्त। मिनु सोलोमन कली “गो इ कली मार गेन? लो पुनो” देंमाक्त। ८ मिनु सोलोमनम परमप्रभु कली “गे आं आफ दाऊद कली ठेयब नु गेना हना यो दाक्तीक कोंइताक्नी। मिनु आं कली मेको आ पा डा पिप सेल्शो बाक्नीनी। ९ मुल आं परमप्रभु यावे, गे आं आफ दाऊद कली गेशो इन लोत्र खाप्पीन। मारदे हना गे आं कली एको रागी डा फुरक खोदेशो पा हिकने मचाप्चा डा शुश मुर आन पिप सेल्तीनी। १० आं कली एको मुर आन कली सासन पाइब सेल्तीनी। मोपतीके आं कली रुप्तीक नु तुइक्तीक थुं गेयीनी। मिनु आं कली एको मुर नु रिम्शो पा बाक्चा गेयीनी। मारदे हना एको इश्का इन मुर आन कली सुम सासन पने चाप्बा डा?” देंमाक्त। ११ मिनु परमप्रभुम सोलोमन कली “गे आं मुर आन पिप दुम्चा कली रुप्तीक नु तुइक्तीक थुं पुंइतीवी। तन्न गे शुश क्येट नु शोंप, मान ततीके, आंम जोरी सत्रु आन कली साइक्तीके नु आंम कली शुश ब्रोंइडल, दे मपुनी। १२ मोपतीके गो इ कली रुप्तीक नु तुइक्तीक थुं गेनन। मिनु गो इ कली शुश क्येट, शोंप नु मान ततीके यो गेनन। मेको इ क्येडा डोंइती नु इ क्येडा नोले डा तेकोइ पिपपुकीम मतशो बाक्नीम” दे मदा बाक्त। १३ मिनु सोलोमन गिबोन सहर आ नेक्था डा डांडा गुम्तीक ताम्बु आ बाक्तीक रे यरूसलेमम जाक्शा, इस्राएली आन कली सासन पवा बाक्त।

सोलोमन आ शोंप

१राजा १०:२६-२९

१४ मिनु सोलोमनम शुश बग्गी नु शारापुकी खुप्तीमी बाक्त। मेको के हजार का ४ सहे बग्गी नु हजार का सहे निक्शी शारा बाक्मा बाक्त। मिनु मेकोमी आ बग्गी आन कली बग्गी वोइक्तीक सहरम वोइक्पदा बाक्त। तन्न का निक्शी चहिं आं सहर यरूसलेमम वोइक्पदा बाक्त। १५ सोलोमनम सुन नु चांदी यरूसलेमम बाक्शो फुल्लु खोदेशो पा शुश तेला बाक्त। मिनु लेबानोन डा लाइशो रवा आ शी, शेफेलाह डा फोत्रशी रवा खोदेशो पा शुश तेला बाक्त। १६ सोलोमनम शारापुकी इजीप्त नु क्युए रे ग्याप्शा, चाक्पाइक्बाक्माक्त। मिनु मेको आ ग्याप्ब लेयबपुकीम क्युएम क्येट थाप्शा ग्याप्शा चाक्बाक्मा बाक्त। १७ मेकोपुकीम इजीप्त रे ग्याप्शा अर्को रागी कली लेयबाक्मा बाक्त। बग्गी का कली ६ सहे चांदी के शेकेल नु शारा का कली सहे का ५० चांदी के शेकेलम लेयबाक्मा बाक्त। मिनु सोलोमन आ ग्याप्ब लेयबपुकीमी मेको हिती नु अरामी पिप आन कली लेयबाक्मा बाक्त।

2

परमप्रभु आ खिं सेल्चशो
१राजा ५:१-१८

1 मिनु सोलोमनम परमप्रभु यावे कली मान पचा, दे खिं का नु आंम कली दरवार का सेल्चा थुं पवा बाक्त। 2 मिनु सोलोमनमी ७० हजार कुरब मुर, ८० हजार पहाडम फुल्लु खोइक्चा कली नु मेको गेय पाइब आन कली कोव्रब हजार सां ६ सहे मुर आन कली योव्रमी बाक्त।

3 मिनु सोलोमनम टायर डा पिप हुराम कली “गे आं आफ दाऊद कली आ खिं सेल्चा कली लेबानोन डा लाइशशो रवा आ शी सोइशशो बाक्तीनी। १इतिहास १४:१ 4 मिनु मुल गो परमप्रभु यावे, आं परमप्रभु कली मान पचा, दे मेको कली खिं का सेल्चा दाक्नुड। मिनु मेको खिं परमप्रभु यावे आ डोंइती ब्रोव्रशो रिना पाइशशो धूप चोचा कली, मेकेर नाक्त किंत किंत डा कोइतीक शोब्ले हार हार पा चढेचा कली, नाक्दो सुनी चोशा चढेचा कली, नाइक्तीक नाक्ती, औंसी नाक्ती नु परमप्रभु यावेम, आंइ परमप्रभु गेना हना यो ‘मानेन’ दे इस्राएली आन कली गेशो चाड मानेचा कली जिम्मा गेचा दाक्नुड। 5 गो आं सेल्चा चिक्शो खिं थम ठेयब नु रिम्शो खिं दुम्चा माल्ब। मारदे हना आंइ परमप्रभु देवी देवता नेल्ल आन क्येडा ठेयब बाक्ब। 6 तन्न सरीड नु स्वर्गम मेको मरिक्ब हना, सुम मेको कली खिं सेल्ने चाण्बा डा? मेको कली मार मार चढेचा क्येडा लाक्शा, आ खिं सेल्ब गो सु नडा डा? २इतिहास ६:१८; १राजा ८:२७ 7 मोपतीके गे आं कली सेल्स जोक्ब तुइक्ब मुर का सोइक्तीन। मेको मुरुम सुन, चांदी, कांसा नु फलाम चेम्शा, मार मार सेल्स जोक्चा माल्ब। मेकोमी प्याजी, लल नु नीलो श्येले रे मार मार प्रोव्रस जोक्चा माल्ब। मिनु मार मार मुशा, बुटा आप्चा शेंसीशो मुर दुम्चा माल्ब। मिनु मेकोमी आं आफ दाऊदम योव्रशो मारेइ मारेइ पस जोक्ब यहूदा नु यरूसलेमम गो नु बाक्ब मुरपुकी नु गेय पचा माल्ब। 8 गे आं कली यो लेबानोन डा लाइशशो रवा आ शी नु लेबानोन डा अरु रवा आ शी सोइक्तीनी। मारदे हना इन लेबानोन डा मुरपुकीम रिम्शो पा शी खोइक्स जोक्ब बाक्तीम, दे गो तुइक्नुड। आं गेय पाइब इन गेय पाइब नु गेय पाइनीम। 9 आं कली शुश शी तिम्शा सोइक्तीन। मारदे हना गो ठेयब नु दारशो खिं सेल्चा दाक्नुड। 10 गो इन गेय पाइब रवा तिम्ब आन कली २० हजार कोर हिल्शो चेरब, २० हजार कोर क्योव्रज, २० हजार बाथ अडगुर शांबु नु २० हजार बाथ तेल गेनुडमी” दे लोव्र कुरब मुर सोइक्ता बाक्त। कोर का २२० लिटर पुक्तीके बाक्ब। बाथ का २२ लिटर बाक्ब।

11 मिनु टायर डा पिप हुराममी चिठी का ब्रेक्शा, सोलोमन कली सोइक्ता बाक्त। मिनु मेकोमी “परमप्रभु यावेमी आ मुर आन कली दाक्तीके, इन कली मेको आन पिप सेल्लु। 12 सरीड नु रागी सेल्ब परमप्रभु यावे, इस्राएली आन परमप्रभु ठेयब बाक्ब। मेकोमी पिप दाऊद कली रुप्तीक नु तुइक्तीक थुं पाइशशो तौ का गेप्तु। मेकोमी परमप्रभु यावे कली खिं का नु आंम कली दरवार का सेल्ब। 13 गो इन कली वारच पाइक्चा कली मार मार सेल्स शुश जोक्ब नु तुइक्ब हुराम-अबी कली सोइक्नुड। १राजा ७:१३ 14 मेको दान आ थर डा मीश मुर आ तौ बाक्ब। मेको आ आफ चहिं टायर डा बाक्ब। मेको सुन, चांदी, कांसा, फलाम, हीरा, शी नु प्याजी, लल, नीलो श्येले नु रिम्शो पा किरशो सुती श्येले रे प्रोव्रशो वा रे मार मार सेल्ने चाण्ब। मुशा मार मार सेल्चा यो जोक्ब बाक्ब। इन कली मार मार ब्रेक्स माल्नीनी, मेकोमी पने चाण्ब। मेको मारेइ मारेइ जोक्ब मुरपुकी नु ठेयब पिप, इन आफ दाऊद आ मारेइ मारेइ सेल्बपुकी नु गेय पने चाण्ब। प्रस्थान ३१:२-६ 15 इन ब्रेक्शो खोदेशो पाइन गेय पाइब आन कली चेरब, क्योव्रज, तेल नु अडगुर शांबु सोइक्तीन। 16 गो इन माल्शो शी नेल्ल लेबानोनम तिम्नीकी। मिनु फ्रेंशा योप्पा सहर सम्म ठेयब समुन्द्र रे पा सोइक्तीकी। मिनु गे मेकेर रे यरूसलेम सम्म लतीन” दे चिठी ब्रेक्शा सोइक्ता बाक्त।

17 मिनु सोलोमनम इस्राएलम बाक्शो अर्को रागी डा मुर आन कली हिक्पाइक्मी बाक्त। डोंइती आ आफ दाऊदमी मुर आन कली हिक्पाइशशो बाक्माक्त। मुल मेकोपुकी लाख का ५३ हजार ६ सहे वोंइश मुर बाक्मा बाक्त। १इतिहास २२:२ 18 मेको रे ७० हजार आन कली कुरब, ८० हजार आन कली पहाडम फुल्लु खोइक्ब नु हजार सां ६ सहे आन कली मेको गेय पाइब आन कली कोव्रब सेल्मी बाक्त।

3

परमप्रभु यावे कली खिं सेल्शो
१राजा ६:-

1 मिनु सोलोमनमी यरूसलेम डा मोरीयाह डांडाम परमप्रभु यावे आ खिं सेल्चा गोवा बाक्त। डोंइती परमप्रभु यावेमी आ आफ दाऊद कली मेको मोरीयाह डांडाम कोंइशो बाक्माक्त। मिनु दाऊदमी “परमप्रभु आ खिं यबुसी ओरनान आ चेरब तुप्तीकेम सेल्चा माल्ब” दे माइशो बाक्माक्त। १इतिहास २१:१८-२६ 2 मिनु सोलोमन पिप दुम्शो आ ४ बर्स डा महिना निक्शी डा नाक्त निक्शीमी मेको खिं सेल्चा गोवा बाक्त। 3 सोलोमनम परमप्रभु आ खिं दोमो सेल्चा थुं पशो बाक्माक्त देशा हना, माइत पुक्तीके रे आ लाइशो ६० कुबीत नु आ ब्रेम्शो २० कुबीत बाक्माक्त। कुबीत का ०.५ मिटर बाक्ब। 4 खिं आ डोंइती २० कुबीत लाइशो, २० कुबीत ब्रेम्शो नु सहे का २० कुबीत ग्येत्थ लाइशो पिंडी बाक्माक्त। मेको आगा डा गारोमी क्येख सुनम गिल्पदा बाक्त। 5 मेको खिं आ आगा नेल्ल सला के फलेक क्येप्पदा बाक्त। मिनु नेल्ल कली क्येख सुनम गिल्पदा बाक्त। मेको दारपाइक्चा कली मेको आ तार खजूर रवा नु सिक्कीपुकी बुटा आप्शा सेल्पदा बाक्त। 6 मेको खिं कली दारपाइक्चा कली हीरापुकी क्येप्पदा बाक्त। मेको आन माल्शो सुन पारवाइम माइक्तीके रे चाक्शो बाक्मा बाक्त। 7 मिनु मेको खिं आगा नेल्ले सुनम गिल्पदा बाक्त। मेको आ थाम, लाप्चो आ पुं डा शी, गारो नु लाप्चो नेल्ल गिल्पदा बाक्त। आन गारोम करूबपुकी मुशा सेल्पदा बाक्त।

8 मिनु मेकोमी नेल्ल क्येडा चोव्रखो कोठा सेल्पदा बाक्त। खिं आ ब्रेम्शो आ लाइशो यो खाल का डा पा २० कुबीत लाइशो नु २० कुबीत ब्रेम्शो सेल्पदा बाक्त। मिनु मेकोमी आ आगा नेल्ल ६ सहे टलेन्ट क्येख सुनम गिल्पदा बाक्त। टलेन्ट का ३४ किलो बाक्ब। 9 मेको कांटी डा सुन नाक्शोनु, ५० शेकेल बाक्मा बाक्त। मेकोमी आ इर गे डा कोठा यो सुनम गिल्पदा बाक्त। शेकेल का ११.५ ग्राम बाक्ब

10 मिनु मेकोमी नेल्ल क्येडा चोव्रखो कोठा कली करूब निक्शी मुशा, सुनम गिल्पदा बाक्त। 11 मेको करूब आस फ्रां नेल्ल प्राक्शा पुक्शोनु, २० कुबीत लाइशो बाक्मा बाक्त। मेको करूब आ फ्रां का ५ कुबीत लाइशो बाक्माक्त। मिनु मेको वोइशशा, आ फ्रां काम परमप्रभु यावे आ खिं डा गारो थिशो बाक्माक्त। मिनु मेको आ अर्को ५ कुबीत लाइशो फ्रांम चहिं अर्को करूब आ फ्रां थिशो बाक्माक्त। 12 मोपान अर्को करूब आ फ्रां खिं आ अर्को गे डा गारो थिशा ५ कुबीत लाइशो बाक्माक्त। मिनु मेको आ अर्को फ्रांम अर्को डोंइती डा करूब आ फ्रांम थिशो बाक्माक्त, मेको यो ५ कुबीत लाइशो बाक्माक्त। 13 मेको करूब आस फ्रां नेल्ल पा २० कुबीत प्राक्शो बाक्मा बाक्त। मेको निक्शी राप्शो बाक्सा बाक्त। मिनु मेको निक्शीमी मेको खिं गे कोव्रशो बाक्सा बाक्त। 14 मिनु सोलोमनम फारतीक वा नीलो, प्याजी नु लल श्येले नु रिम्शो पा किरशो सुती श्येले रे प्रोव्रशो वा के सेल्पदा बाक्त। मिनु करूब आ बुटा आप्शा प्रोव्रपदा बाक्त। प्रस्थान २६:३१

परमप्रभु आ खिं डा थाम निक्शी

१राजा ७:१५-२२

15 मिनु खिं आ डोंइती ३५ कुबीत लाइशो कांसा के थाम निक्शी सेल्पदा बाक्त। मेको आस कली ५ कुबीत लाइशो गुप्तीके गुप्पदा बाक्त। 16 मेको थाम निक्शी आस गुप्तीके एर ओंथ हिरचा कली जाली खोदेशो साडली निक्शी सेल्पाइशशा, सहे का दारीम सेल्शा, मेको दारीम साडलीम क्युकपदा बाक्त। 17 मेको थाम निक्शी परमप्रभु यावे आ खिं आ डोंइती का ग्युरा गे, का पेरा गे राप्पदा बाक्त। मिनु ग्युरा गे डा थाम आ नें याकीन वोदा बाक्त। पेरा गे डा थाम आ नें बोआज वोदा बाक्त। याकीन आ अर्थ “थुं बारपाइक्ब” बाक्ब। बोआज आ अर्थ “मेकोमी सक्ति गेब” बाक्ब।

4

खिं कली मार मार सेल्शो

१राजा ७:२३-५१

1 मिनु सोलोमनमी हराम-अबी कली २० कुबीत लाइशो २० कुबीत ब्रेम्शो नु १० कुबीत ग्येत्थ लाइशो कांसा के चढेतीक का सेल्पदा बाक्त। कुबीत का ०.५ मिटर बाक्ब। १इतिहास ७:७

2 मिनु नोले यपाइशशा कांसा के थम ठेयब बोस का सेल्पदा बाक्त। मेको कली दोम्ली देमा बाक्त। मेको सुर का रे अर्को सुर सम्म १० कुबीत बाक्माक्त। मिनु मेको आ ग्येत्थ लाइशो ५ कुबीत बाक्माक्त। मेको आ एर ओंथ पुक्शोनु ३० कुबीत बाक्माक्त। 3 मेको दोम्ली आ लाङगा गे हार निक्शी ब्यफ दारपाइक्चा कली बाक्माक्त। कुबीत काम १० ओटा ब्यफ बाक्शो बाक्मा बाक्त। मेको बोस नु दारपाइक्तीक ब्यफ कांसा यपाइक्तीक गेय रे कालेमीन सेल्शो बाक्मा बाक्त। 4 मेको दोम्ली १२ ओटा ब्यफ आन तार वोइशशा बाक्माक्त। ब्यफ सां उत्तर गे कोव्रशो, सां पच्छिम गे कोव्रशो, सां दक्खिन गे कोव्रशो नु सां पूर्व गे कोव्रशो बाक्मा बाक्त। मिनु मेको दोम्ली मेको ब्यफ आन

तार वोइश्शो बाक्माक्त। मेको ब्यफ आन मीलु आगा गे बाक्शो बाक्मा बाक्त। 5 मेको दोम्ली आ सुर लिली फू आ सफा खोदेशो पा रोम्सीशो बाक्माक्त। मेको आ सुर लोटा के खोदेशो बाक्माक्त। मेको बोस इन्ची सां थांइशो बाक्माक्त। मेको आ आगाम हजार सां बाथ ब्वाक्कु रिक्बाक्माक्त। बाथ का २२ लिटर बाक्ब।

6 मिनु सोलोमनम चिनु तेम्शा १० ओटा आइक्च कांसा के चिक्तीक बोस सेल्पदा बाक्त। मिनु मेको के ५ ओटा दोम्ली आ ग्युरा गे नु ५ ओटा आ पेरा गे वोइक्पाइक्मी बाक्त। मिनु चोशा चढ़ेचा कली मार मार मुरचा माल्तेक्म हना, मेकेर मुरबाक्मा बाक्त। मेको दोम्ली चहिं चढ़ेब आन चिक्तीक बाक्माक्त।

7 मिनु मोसामी डोंइती बत्ती दातीक सेल्चा शेंशो खोदेशो पा, १० ओटा सुन के बत्ती दातीक सेल्पदा बाक्त। मिनु मेको परमप्रभु यावे आ खिंम ५ ओटा दक्खिन गे नु ५ ओटा उत्तर गे पा वोइक्पदा बाक्त। 8 मेकोमी १० ओटा टेबल यो सेल्शा, परमप्रभु यावे आ खिंम ५ ओटा ग्युरा गे नु ५ ओटा पेरा गे पा वोइक्पदा बाक्त। मिनु सहे का सुन के ब्रुइक्तीक बोस यो सेल्पदा बाक्त।

9 मेकोमी चढ़ेब आन बाक्तीक लाङगा, ठेयब लाङगा नु लाङगा डा लाप्चोपुकी सेल्पदा बाक्त। मिनु लाप्चो आन कली कांसाम गिल्पदा बाक्त। 10 मिनु मेको दोम्ली माइश्शो ठेयब ब्वाक्कु वोइक्तीके परमप्रभु यावे आ खिं आ दक्खिन पूर्व गे डा कुनाम वोइक्पदा बाक्त।

हुराममी मार मार सेल्शो

11 मिनु hurammi ग्योंब, बेल्ला नु बोसपुकी सेला बाक्त। मोपा hurammi पिप सोलोमन आ गेशो परमप्रभु आ खिं डा गेय नेल्ल थुमा बाक्त। 12 hurammi थाम निक्शी, बोस खोदेशो गुप्तीके, मेको आस एर ओंथ क्युकुशो दारपाइक्तीक जाली खोदेशो साडली सेल्शा थुमा बाक्त। 13 मेको साडलीम क्युकुचा कली ४ सहे दारीम सेला बाक्त। मेको थाम आस डरम बाक्शो गुप्तीक बोस आस कली सुम्चा कली सेल्शो जाली खोदेशो साडली नु मेको साडलीम हार निक्शी पा वोइक्चा कली दारीमपुकी, 14 बोसपुकी राप्पाइश्शा वोइक्तीके नु बोसपुकी, 15 मेको दोम्ली माइश्शो ठेयब चिक्तीके नु मेको आ राप्पाइक्तीके डा १२ ओटा ब्यफपुकी, 16 ग्योंबपुकी, बेल्लापुकी, श्ये गुंइतीक कांटापुकी नु मेकेर माल्शो मारेइ मारेइ सोलोमनम अरेशो खोदेशो पा hurammi परमप्रभु यावे आ खिं कली सेल्शो नेल्ल टल्केपपाइश्शो कांसा के बाक्मा बाक्त। 17 मिनु पिपमी मेको नेल्ल यर्दन डा दिंम डा खपीम, सुक्कोथ नु सेरेदाह सहर आस दातेम यपाइश्शा सेल्पाइश्शो बाक्माक्त। 18 मोपा सोलोमनमी मेकेर शुश कांसा के सेल्तीके सेल्पदा बाक्त। मेको कली दोशो कांसा माल्दमे, मेको मतुइश्शो बाक्मा बाक्त।

19 मिनु सोलोमनम परमप्रभु आ खिं कली माल्तीक मारेइ मारेइ सुन के चढ़ेतीके, कोंइतीक शोब्ले वोइक्तीके टेबलपुकी सेल्पदा बाक्त। 20 मिनु मोसाम देशो खोदेशो पा नेल्ल क्येडा चोव्रखो कोठा आ डोंइती दाचा कली क्येख सुन के बत्ती दातीक नु आन तेल वोइक्तीके सेल्पदा बाक्त। 21 मेकोमी क्येख सुन के फू, तेल वोइक्तीके नु थनारोपुकी, 22 क्येख सुन के सल्दो क्योरतीके, बोसपुकी नु डाडुपुकी नु मी कुरतीके सेल्पदा बाक्त। मिनु परमप्रभु यावे आ खिं डा लाप्चो, आगा डा नेल्ल क्येडा चोव्रखो कोठा डा लाप्चो नु ठेयब बाक्तीक डा लाप्चो नेल्ल सुन के सेल्पदा बाक्त।

5

कबल पशो सन्दोस चाक्शो

1 मिनु सोलोमनम परमप्रभु यावे आ खिं कली पशो गेय नेल्ल थुमा नोले, आ आफ दाऊदमी परमप्रभु यावे कली गेशो नेल्ल चाक्गा बाक्त। मेको सुन चांदी नु ग्योंब नेल्ल मारेइ मारेइ परमप्रभु आ खिं डा शोंप वोइक्तीकेमी वोइक्पदा बाक्त। १ इतिहास १८:११; १ इतिहास २९:२-४

2 मिनु नोले सोलोमनम परमप्रभु यावे आ कबल पशो सन्दोस दाऊद आ सहर सियोन रे चाक्चा कली इस्राएल डा खाल्पापुकी, इस्राएली आन थर थर डा ठेयब मुर नेल्ले नु इस्राएली आन खिं खिं डा ठेयब मुर आन कली यरूसलेममी बुक्चा, दे ब्रेत्तीमी बाक्त। 3 मिनु इस्राएल डा खुम्सीशो मुर नेल्ल ७ महिना डा चाड नाक्ती पिप आ डोंइती जाक्मा बाक्त। लेवी २३:३४ 4 मिनु इस्राएल डा खाल्पा नेल्ल जाक्मानु, लेवीपुकीम कबल पशो सन्दोस कुरमे बाक्त। 5 मिनु चढ़ेबपुकी नु लेवीपुकीम सन्दोस, ग्रुम्तीक ताम्बु नु ताम्बुम बाक्शो ग्योंब परमप्रभु आ मारेइ मारेइ थोव्रक कुरशा, इर लदमे बाक्त। 6 मिनु पिप सोलोमन आ डोंइती बुक्शो इस्राएल डा मुर नेल्ले मेको कबल पशो सन्दोस आ डोंइती बाक्शो बाक्मा बाक्त। मिनु मेकोपुकीम हिक्ने मचाप्चा डा पा शुश ब्यफ नु भेडा चढ़ेमे बाक्त। 7 मिनु नोले

चढेबपुकीम परमप्रभु यावे आ कबल पशो सन्दोस आ बाक्तीक परमप्रभु यावे आ खिं आ आगा डा नेल्ल क्येडा चोव्रखो कोठाम चाक्शा करूब आस फ्रां आगाम वोदमे बाक्त। 8 मेको करूब आस फ्रां मेको कबल पशो सन्दोस बाक्तीक आ तारी प्राक्शो बाक्सा बाक्त। मोपा मेको करूब निक्शीमी आस प्राक्शो फ्रांम कबल पशो सन्दोस नु आ कोक्के सुम्शो बाक्सा बाक्त। 9 मेको कोक्के चहिं थम लाइशो बाक्तीके नेल्ल क्येडा चोव्रखो कोठा रे ठेयब बाक्तीकेम तांडसीशो बाक्माक्त। तन्न मेको लाडगा रे मतांडसीबाक्माक्त। मेको मुल सम्म यो बाक्नीम। 10 मोसामी होरेब डांडाम मेको कबल पशो सन्दोस आगा वोइशो फुल्लु निक्शी क्येडा लाक्शा, अरु मारेइ मबाक्माक्त। मेना परमप्रभु यावेमी इस्राएली इजीप्त प्रोइशा गाक्मानु, कबल पशो बाक्माक्त। ब्यवस्था १०:५; हिब्रू ९:४

11 मिनु चढेबपुकी नेल्ल क्येडा चोव्रखो कोठा रे गूमा बाक्त। मेकेर बाक्शो चढेब नेल्ले आन पालो मरिम्थुन परमप्रभु यावे आ डोंइती जाक्चा कली ठीक सेल्सीशो बाक्मा बाक्त। १इतिहास ८:१४; लूका १:८-९ 12 मिनु कुम्सो पाइब लेवी नेल्ल, आसाफ, हेमान, येदुथून नु मेको आन तौपुकी, मेको आन खिं खिं डा वोंइश मुर नेल्ल रिम्शो पा किरशो श्येले रे प्रोव्रशो सुती वा फेक्सीशा बुप्केल, ठेयब नु आइक्च तार पाइशो ताप्तीके कुरशा चढेतीक आ पूर्व गे राम्मा बाक्त। मिनु मेकोपुकी नु सहे का २० जना चढेब यो बाक्मा बाक्त। मिनु मेकोपुकी चहिं तुराही ताप्ब बाक्मा बाक्त। १इतिहास १५:१९; १इतिहास १६:३७; १इतिहास १६:४१-४२ 13 मिनु तुराही ताप्बपुकी नु कुम्सो पाइबपुकीम खाल का डा सेंदा पा “परमप्रभु यावे, गे ठेयब बाक्नीनी। गे रिम्शो पाइब बाक्नीनी” दे कुम्सो पतीक मेको आन गेय बाक्माक्त। मिनु मेकोपुकीम तुराही, बुप्केल नु अरु ताप्तीक ताप्शा, परमप्रभु यावे कली “गे रिम्शो पाइब बाक्नीनी। इन दाक्तीके गेना हना यो लीब” दे कुम्सो पामे बाक्त। मिनु परमप्रभु यावे आ खिं गोस्सुम ब्रीमाक्त। १इतिहास १६:३४; भजन संग्रह १०६:१ 14 मिनु मेको गोस्सुम खिं ब्रीतीके चढेबपुकीम गेय पने मचाप्मे बाक्त। मारदे हना परमप्रभु यावे आ खिं आ छेडछेडम ब्रीशो बाक्माक्त। १इतिहास ७:१-३; प्रस्थान ४०:३५

6

सोलोमनम परमप्रभु नु लोव्र पशो

१राजा ८:१२-५३

1 मिनु सोलोमनम “परमप्रभु यावे, गे ‘गो थम क्येर गोस्सुम बाक्नुड’ देशो बाक्तीनी। 2 गो इन कली गेना हना यो बाक्चा कली थम दारशो खिं का सेल्ता” देंमाक्त।

3 मिनु नोले पिप खुम्सीशो इस्राएली गे हिरशा, नेल्ल आन कली आसीक गेमी बाक्त। मेना मुर नेल्ले राप्शो बाक्मा बाक्त। 4 मिनु मेकोमी “परमप्रभु यावे, इस्राएली आन परमप्रभु, गे ठेयब बाक्नीनी। गे आं आफ दाऊद नु देशो लोव्र मुल खाप्शो बाक्नीनी। 5 गे आं आफ दाऊद कली ‘गो आं मुर आन कली इजीप्त रागी रे गुंइशा चाक्गुमी रे मुल सम्म आं नें वोइक्चा नु आं खिं सेल्चा कली इस्राएल डा तेकोइ थर आन सहर मयोव्रडु। मिनु गो आं मुर इस्राएली आन कली सासन पपाइक्चा कली पिप मयोव्रडु। 6 तन्न गो आं नें कली मान पचा, दे यरूसलेम कली योव्रता। मिनु दाऊद कली आं मुर इस्राएली आन पिप दुम्चा कली योव्रता’ देशो बाक्तीनी। 7 आं आफ दाऊदम परमप्रभु यावे, इस्राएली आन परमप्रभु आ नें कली मान पा खिं का सेल्चा कली थुं पशो बाक्माक्त। २सामुएल ७:२-१३ 8 तन्न परमप्रभु यावे, गे आं आफ दाऊद कली ‘गे आं नें कली मान पा खिं का सेल्चा थुं पाप्तीवी। मेको रिम्शो बाक्ब। 9 मो हना यो गे मेको सेल्चा मदुम्नेवे। तन्न इ तौम आं नें कली मान पा खिं का सेल्चा माल्ब’ दे माइशो बाक्तीनी। 10 मुल परमप्रभु यावे, गे इन देशो लोव्र खाप्तीनी। परमप्रभु यावे, गे इन लोव्र खोदेशो पा गो आं आफ दाऊद आ पा डा पिप दुम्ती। मिनु गो इस्राएल डा पिप आ ठेयब नित्तीकेम निशो बाक्नुड। मिनु गो परमप्रभु यावे, इस्राएली आन परमप्रभु, इन नें कली मान पा एको खिं सेल्ता। जकरिया ४:९ 11 मिनु गो इन कबल पशो सन्दोस मेको आगाम वोइक्ता। परमप्रभु यावे, इन इस्राएली नु पशो कबल आगाम बाक्ब” देंमाक्त। ब्यवस्था ९:९; ब्यवस्था १०:५

परमप्रभु आ खिं जिम्मा गेशो

12 मिनु सोलोमन परमप्रभु यावे कली चढेतीक आ डोंइती नु इस्राएल डा खुम्सीशो मुर नेल्ल आन डोंइती राप्शा, आ गुइ निम्फा पोक्गा बाक्त। 13 सोलोमनम ५ कुबीत लाइशो, ५ कुबीत ब्रेम्शो नु कुबीत सां ग्येत्थ लाइशो कांसा के राप्तीक का सेल्पाइशो, लाडगा आ दातेम वोइशो बाक्माक्त। मिनु मेको तार राम्माक्त। मिनु नोले खुम्सीशो इस्राएली नेल्ल आन डोंइती आ पोक्च थेक्शा, आ गुइ सरीड गे पोक्गा बाक्त। कुबीत का ०.५ मिटर बाक्ब। 14 मिनु मेकोमी “परमप्रभु यावे, इस्राएली आन परमप्रभु, सरीड नु रागीम इन खोदेशो सुइ मबाक्नीम। गे कबल खाप्ब बाक्नीनी

नु इन कली नेल्ल थुंम खोइक्ब इन वाइल आन कली गे गेना हना यो दाक्नीनी। 15 गे इन वाइल, आं आफ दाऊद कली देशो लोव्र खाप्तीनी। इन देशो लोव्र मुलाक्त पाइतीनी। 16 मोपतीके परमप्रभु यावे, इस्राएली आन परमप्रभु इन गेय पाइब, आं आफ दाऊद कली देशो लोव्र खपीन। मार देशो लोव्र खपीन देशा हना, 'इस्राएली आन कली सासन पचा कली गेना हना यो इ मुर बाक्ब। गे आं डोंइती गाक्शो खोदेशो पा इ आलपुकीम आं अरेशो लोव्र पाम्तेक्म हना, इस्राएल डा ठेयब नित्तीकेम पिप दुम्चा कली गेना हना यो इ मुर का बाक्ब' देशो बाक्तीनी। २सामुएल ७:१६ 17 मिनु मुल परमप्रभु यावे, इस्राएली आन परमप्रभु, इन गेय पाइब दाऊद कली देशो लोव्र थमा दुम्पतीन।

18 मिनु मार, परमप्रभु थमा पा मुर नु रागीम बाक्बा डा? सरीड नु स्वर्गम इन कली मरिक्ब हना, इन कली सेल्शो खिंम इन कली दोपा रिक्बा डा? १इतिहास २:५ 19 इन गेय पाइब, आं पुंइशो, आं पशो लोव्र नेनीन। परमप्रभु यावे, आं परमप्रभु, आं ब्रेशो नु आं प्रार्थना नेनीन। 20 मिनु इन देशो लोव्र खोदेशो पा इन नें कली मान पचा कली सेल्शो बाक्तीक, एको खिं कली नाक्दो नाक्ती कोव्रडीन। मिनु इन खिं गे कोव्रशा पुनुनु, आं लोव्र नेनीन। 21 मिनु इन गेय पाइब नु इस्राएली, इन मुरुम एको खिं गे कोव्रशा पुन्मेनु, इन स्वर्ग डा बाक्तीक रे नेनीन। मिनु नेंशा मेको आन पाप क्याम्दीन।

22 सुइम अरु मुर कली पाप पशो बाक्त हना, कसम जचा माल्ताक्व हना, मेको मुर कली इन कली चढेतीक नु इन खिं आ डोंइती कसम जपाइक्तेक्म हना, ब्यवस्था २७:२६; प्रस्थान २२:१० 23 गे स्वर्ग रे मेको नेंशा, मार पचा माल्बा, मेको पने। मिनु इन गेय पाइब आस दातेम निसाफ पने। दोस ताइब कली सजाइ गेने। मिनु दोस मताइब कली प्रोनीन। दोपा ठीक पवा, मेको आ पशो खोदेशो पा, मेको कली गेने।

24 मिनु इस्राएली, इन मुरपुकीमी इन कली पाप पशा, आन जोरी सत्रु नु लडाइ पा ब्रुम्तेक्म हना, तन्न एको इन खिं जाक्शा, इन नें थिशा, इन कली पुंइशा, इन गे लेत्तेक्म हना, ब्यवस्था २८:२५ 25 गे स्वर्ग रे मेको आन पुंइशो नेनीन। मिनु इस्राएल डा मुर आन पाप क्याम्दीन। मिनु गे मेको आन कली नु आन किकी पिपी आन कली गेशो रागीम लेशशा चाक्कीन।

26 मिनु मेकोपुकीम इन कली पाप पतीके, रेउ मयित हना, मेकोपुकीम इन बाक्तीक गे कोव्रशा, इन कली पुंइनीम। मिनु गे मेको आन कली सजाइ गेब परमप्रभु बाक्नीनी, दे तुइक्नीम। मिनु आन पाप रे लेशशा, इन कली पुंइतेक्म हना, ब्यवस्था २८:२३-२४ 27 गे, स्वर्ग डा बाक्तीक रे मेको आन पुंइशो लोव्र नेनीन। मिनु इन गेय पाइब, इस्राएली आन पाप क्याम्दीन। गे मेको आन गाक्चा माल्शो रिम्शो लां कोइदीन। मिनु गे इन इस्राएल डा मुर आन कली गेशा आन थेरशो रागीम रेउ यिपतीन।

28 मिनु रागीम अन्काल दुम्त हना, मुरपुकी बेक्तीक रोइ पाम्तेक्म हना, चेरब सोव्रतीक रोइ जाक्त हना, बुंखी डाइक्ताक्व हना, सल्हा सोंपु जोम्तेक्म हना, आन जोरी सत्रुम आन बाक्तीक पुम्ताक्म हना, दोदेब हिंचा डा श्येत नु रोइ बोक्त हना यो, 29 इन इस्राएल डा मुर नु अरु सुइम आन श्येत इन कली शोव्रशा, एको खिं गे कोव्रशा, आन गुइ पोक्शा, इन कली पुंइतेक्म हना, 30 गे, इन मुर आन पुंइशो इन स्वर्ग डा बाक्तीक रे नेनीन। मिनु मेको आन पाप क्याम्दीन। गे इन मुर आन थुं तुइशो खोदेशो पा रिम्शो कली रिम्शो नु मरिम्शो कली मरिम्शो पने। मारदे हना गे ला मुर आन थुं तुइक्ब बाक्नीनी। भजन संग्रह १३९:१-४, २३ 31 मोपा इन कली मान पा हिंशा, मबेक्मा सम्म इन लां गाक्शा नु इन गेशो आन किकी पिपीम थेरशो रागीम रिम्शो पा बाक्नीम।

32 मिनु इन मुर, इस्राएली मबाक्थु, अर्को रागी डा मुरपुकीम डोन रागी रे जाक्शा, इन ठेयब नें, इन सक्ति नु इन वारच पतीके नेंशा, एको खिं गे कोव्रशा, पुंइतेक्म हना, 33 गे, इन स्वर्ग डा बाक्तीक रे मेको आन पुंइशो नेंशा, मेको अर्को रागी डा मुर आन पुंइशो गेने। मोपा इस्राएली खोदेशो पा रागी डा मुर नेल्लेमी इन कली तुइशशा, इन कली मान पा हिंनीम। मिनु मेकोपुकीम आं सेल्शो खिंम गे थमा पा बाक्नीनी, दे तुइक्नीम।

34 मिनु इन मुरपुकीम आन जोरी सत्रु नु लडाइ पचा कली तेको लां रे सोइक्ताक्नी हना यो, इन योव्रशो सहर नु गोम इन कली मान पा सेल्शो खिं गे कोव्रशा, पुंइतेक्म हना, दानीएल ६:११ 35 गे मेको आन पुंइशो लोव्र इन स्वर्ग डा बाक्तीक रे नेंशा आन माल्शो गेशा वारच पने।

36 मिनु मेकोपुकीमी इन कली पाप पाम्तेक्म हना, मारदे हना पाप मपाइब सुइ मबाक्नीम। गे मेको आन कली तशा गाइशशा, मेको आन कली आन जोरी सत्रु आन गुइमी गेतीनी हना, मेकोमी मेको आन कली ग्याइशशा, डोन रागी हना यो, आन नेक्था डा रागी हना यो लाइशशा, चोक्तेक्म हना, 37 मिनु मेको रागीमी मेको आन थुं इन गे लेशशा, मेकोपुकीम 'गो पाप पाइतक, गो दूली पाइतक, गो काइ मरिम्शो पाइतक' देशा, दानीएल ९:५ 38 मिनु मेको रागीम आन थुं नेल्लेमी इन गे लेशशा, आन किकी पिपीम थेरशो रागी, इन योव्रशो सहर नु गो इन कली मान पचा कली

सेल्शो खिं गे कोव्रशा, इन कली पुंइतेक्म हना, 39 इन स्वर्ग डा बाक्तीक रे मेको आन पुंइशो लोव्र नेनीन। मिनु मेको आन माल्शो गेन। आन पशो पाप नेल्ल क्याम्दीन। 40 मुल आं परमप्रभु, मेको खिं रे इन मुर आन लोव्र नेंशा कोव्रडीन। मिनु आन पुंइशो नेनीन।

41 परमप्रभु यावे, परमप्रभु, मुल बोक्कीन। गे नु इन सक्ति डा कबल पशो सन्दोस इन नाइशशा बाक्तीकेम जाक्कीन। परमप्रभु यावे, परमप्रभु, इन कली चढेबपुकीम इन मुर आन कली पाप क्याम्तीक गेय पपतीन। मिनु इन कली थमा सुइक्ब इन रिम्शो पशो तशा ग्येरसमल। भजन संग्रह १३२:८ 42 परमप्रभु यावे, परमप्रभु, गे इन तेल लुकशो मुर, आं कली मप्रोंइयीनी। इन गेय पाइब दाऊद कली पशो इन गेना हना यो दाक्तीक मिम्तीन” दे सोलोमनम परमप्रभु कली देमाक्त। भजन संग्रह ८९:४-५

7

परमप्रभु आ खिंमी चाड मानेशो

१ राजा ८:५४-६६

1 मिनु सोलोमनम मेको पुंइने थुमा नोले सरीड रे मी यिमाक्त। मिनु मेको मीम चोशा चढेशो नु अरु चढेशो नेल्ल नेक्गा बाक्त। मिनु परमप्रभु यावे आ छेडछेडम आ खिं कली ब्रीमाक्त। लेवी ९:२४; १ राजा १८:३८; प्रस्थान ४०:३४ 2 मिनु परमप्रभु यावे आ खिं आ छेडछेडम ब्रीतीके, चढेबपुकी परमप्रभु यावे आ खिं ओव्रने मचबमे बाक्त। 3 इस्राएली नेल्लेमी मेको मी यिशा नु परमप्रभु यावे आ खिं आ तार छेडछेड बाक्शो तामे बाक्त। मेकोपुकीमी खप सम्मन बाप्शा “परमप्रभु यावे, गे रिम्शो पाइब बाक्नीनी। इन दाक्तीके गेना हना यो लीब” देंशा, ठेयब सेल्मे बाक्त। २इतिहास ५:१३-१४; भजन संग्रह १०६:१

4 मिनु नोले पिप नु मुर नेल्लेमी परमप्रभु यावे आ डोंइती चढेमे बाक्त। 5 मिनु पिप सोलोमनम २२ हजार ब्यफ नु लाख का, २० हजार भेडा चढेवा बाक्त। मोपा पिप नु मुर नेल्लेमी मेको खिं परमप्रभु कली जिम्मा गेमे बाक्त। 6 चढेब आन पालो खोदेशो पा बाक्मा बाक्त। लेवीपुकी परमप्रभु यावे कली ताप्तीक ताप्चा कली आन ताप्तीके शेशा बाक्मा बाक्त। पिप दाऊदम मेको ताप्तीकपुकी परमप्रभु यावे कली ठेयब सेल्चा कली “आ दाक्चा गेना हना यो लीब” दे कुम्सो पचा कली, परमप्रभु यावे कली ठेयब सेल्ची ना कली सेल्शो बाक्माक्त। मिनु लेवीपुकीमी कुम्सो पामे बाक्त। चढेबपुकी कोव्रमुशा तुराही ताप्मे बाक्त। मेना इस्राएली नेल्ल राप्शा बाक्मा बाक्त। २इतिहास ४:१

7 मिनु नोले सोलोमनम परमप्रभु यावे आ खिं आ डोंइती डा लाडगा परमप्रभु कली जिम्मा गेवा बाक्त। मिनु मेकेर चोशा चढेतीक चढेवा बाक्त। दुशा बाक्चा आ पर्बम चढेशो आन बोंसो यो चढेवा बाक्त। मारदे हना मेको आ सेल्शो कांसा के चढेतीकेम चोशा चढेशो, अन्न चढेशो नु बोंसो चढेचा कली मरिक्ता बाक्त। २इतिहास ४:१

8 मेना सोलोमनम ७ नाक्ती सम्म चाड सेला बाक्त। मिनु इस्राएली नेल्ले मेको नु बाक्मा बाक्त। लेबो-हमाथ रे इजीप्त डा खोला सम्म शुश मुरुमी ७ नाक्त सम्म चाड मानेमे बाक्त। 9 मिनु मेकोपुकीमी ८ नाक्तीम परमप्रभु यावे कली ठेयब ग्रुम्तीक का सेल्मे बाक्त। मारदे हना मेकोपुकीम चढेतीक डा जिम्मा गेतीके ७ नाक्त सम्म मानेमे बाक्त। मिनु नोले ७ नाक्त डा चाड यो मानेमे बाक्त। गन्ती ७:१० 10 मिनु ७ महिना डा २३ नाक्तीम सोलोमनम मुर आन कली आन खिं खिं सोइक्तीमी बाक्त। मेकोपुकी थुं नाइशशा, थम ग्येरसीशा लमा बाक्त। मारदे हना परमप्रभु यावेमी दाऊद, सोलोमन नु आ मुर आन कली थम रिम्शो पवा बाक्त। 11 मो पा सोलोमनम परमप्रभु यावे आ खिं नु आ दरवार सेल्ने थुमा बाक्त। मिनु परमप्रभु यावे आ खिं नु आ खिं सेल्चा थुं पा रिम्शो पा थुमा बाक्त।

परमप्रभुमी लोव्र पशो

१ राजा ९:१-९

12 मिनु नोले परमप्रभु यावे नाक्दो सोलोमन आ डोंइती तपांइसीशा, मेको कली “गो इ पुंइशो लोव्र नेंता। मिनु गो मेको खिं मुरपुकीमी आं कली मेकेर चढेचा कली योव्रता। ब्यवस्था १२:५-६; यसैया ५६:७; मर्कूस ११:१७; यूहन्ना २:१६ 13 गो सरीड कली चोक्शो खोदेशो पा रेउ मयिपाइक्ता हना, गो रागी कली खतम पोक्चा कली सल्हा सोइक्ताक्ड हना, आं मुर आन दातेम बेक्तीक रोइ पपाइक्ता हना, 14 मिनु आं मुरपुकी ब्रेम्शो दुम्शा, आं कली पुंइशा, आं कली माल्तेक्म हना, आन मरिम्शो लां रे लेत्तेक्म हना, गो स्वर्ग रे मेको आन पुंइशो नेंनुड। मिनु मेको आन पाप क्याम्नुड। मिनु गो मेको आन रागी कली डोंइती डा खोदेशो पा रिम्शो सेल्नुड। 15 मिनु मेको बाक्तीकेमी मुरपुकीम आं कली पुंइशो लोव्र गो कोव्रशा नोफा दाइक्नुड। २इतिहास ६:४० 16 मारदे हना गो आं नें गेना हना यो बाक्चा कली एको खिं कली योव्रता। एको आं के ला बाक्ब। गो मेको कली कोव्रनुड। आं थुं गेना हना यो मेकेर बाक्ब। 17 मिनु

गे चहिं इ आफ दाऊद आं डोंइती गाकशो खोदेशो पा गाक्तेवे नु आं इन कली शेंशो फुल्लुम मुशा ब्रेकशो लोत्र नु आ निसाफ पतीक लोत्र नेल्ल पाप्तीवी हना, 18 गो इ राज्य बोल्यो नु ठेयब सेल्लुड। गो इ आफ दाऊद कली कबल पशो खोदेशो पा इ कली यो 'गेना हना यो इस्राएली आन कली सासन पचा कली इ खिं डा मुर का बाक्ब' दे कबल पाइनुड। २इतिहास ६:१६

19 तन्न गे नोले शोंइसीशा, गो इ डोंइती वोइशो आं फुल्लुम मुशा ब्रेकशो लोत्र नु आं शेंतीके मटिप्तीवी हना, नु लशा अर्को देवी देवता आन कली सेउ पा पूजा पाप्तीवी हना, 20 गो इन कली गेशो रागी रे गुंडनुड। मिनु गो आं नें बाक्शो खिं प्रॉइनुड, काइ मकोव्रनुड। मिनु गो एको कली जात जात डा मुर आन दातेमी खिसी नु शुक्शी पाइक्तीक सेल्लुड। ब्यवस्था २८:६३; १राजा १४:१५ 21 मिनु एको खिं आ पबर्म मार देंनीमी? मुल ठेयब दारशो बाक्ब। तन्न नोले एको लां रे गाक्ब मुर नेल्ल छक लाक्शा 'मारदे परमप्रभु यावेम एको रागी नु एको खिं ओदेशो सेला?' दे हिल्लो पाइनीम। ब्यवस्था २९:२३-२८; येरमीया २२:८-९ 22 मिनु लेंशा मुरपुकीम 'मारदे हना मेकोपुकीमी परमप्रभु यावे, आन किकी पिपी आन परमप्रभुमी मेको आन कली इजीप्त रे गुंडशा चाक्ब परमप्रभु यावे कली प्रॉइतेक्म। मिनु अर्को देवी देवता आंम के सेल्ला, पूजा पा गेय पाम्तेक्म। मोपतीके परमप्रभु यावेमी मेको आन कली मोदेशो श्येत गेप्तु' दे लोत्र लेत्नीम" देंमा बाक्त।

8

सोलोमन आ अरु पतीके

१राजा ९:१०-२८

1 मिनु सोलोमनम परमप्रभु यावे आ खिं नु आ दरवार सेल्चा कली २० बर्स माल्दा बाक्त। 2 मिनु पिप हुरामम सोलोमन कली सहरपुकी गेवा बाक्त। मिनु सोलोमन मेको सहर आन कली लेंशा सेला बाक्त। मेकेर इस्राएल डा मुर आन कली बाक्पाइक्मी बाक्त।

3 मिनु सोलोमन हमाथ-सोबा लशा, लडाइ पा मेको आ के सेला बाक्त। 4 मिनु गोरशो रागीमी तदमोर माइशशो सहर सेला बाक्त। मिनु हमाथम यो मार मार वोइक्तीक सहरपुकी सेला बाक्त। 5 मेकोमी आइक्था डा बेथ-होरोन नु आइदी डा बेथ-होरोन यो सेला बाक्त। मिनु गारो हिरशो, ठेयब लाप्चो वोइशो नु आग्लो पाइशो बोल्यो सहर दुम्मा बाक्त। 6 मेकोमी बालाथ सहर नु सोलोमन आ मार मार वोइक्तीक सहरपुकी सेला बाक्त। मिनु बग्गी वोइक्तीक सहर नु शारा आन कली वोइक्तीक सहरपुकी सेला बाक्त। मेकोमी यरूसलेम, लेबानोनम नु आ राज्य नेल्लेमी आ दाक्शो खोदेशो पा सहरपुकी सेला बाक्त। 7 हिती, एमोरी, परिज्जी, हिच्वी नु यबुसी इस्राएली मबाक्शो मुर, 8 आन चच युड इस्राएल रागीम लीशो बाक्मा बाक्त। मारदे हना मेको आन कली मसाइक्थु, ब्रोंइचा गेशो बाक्मा बाक्त। मिनु सोलोमनम मेको आन कली वाइल सेल्ला, गेय पपदा बाक्त। मेको मुल सम्म मोदेशोन बाक्नीम। यहोसु १६:१० 9 तन्न सोलोमनम इस्राएल डा मुर रे मोदेशो वाइल गेय पचा कली सुड मलदा बाक्त। मेको आन कली लडाइ पाइब, आन ठेयब मुर, आ बग्गी चलेब नु शारा डोइक्ब आन कप्तान सेल्मी बाक्त। 10 पिप सोलोमन के सहे निक्शी ५० जना अधिकार पाइशो मुर बाक्मा बाक्त। मेकोपुकी मुर आन कली कोत्रब बाक्मा बाक्त।

11 मिनु सोलोमनम फाराओ आ तमी कली दाऊद आ सहर रे मेको कली सेल्लो खिंम चाक्गा बाक्त। मारदे हना मेकोमी "आं मीश इस्राएल डा पिप दाऊद आ खिंमी बाक्चा मदुम्ब। मारदे हना मेको परमप्रभु यावे आ कबल पशो सन्दोस बाक्शो, परमप्रभु आ बाक्तीक ला बाक्ब" देंमाक्त। १राजा ३:३

12 मिनु नोले सोलोमनम परमप्रभु यावे आ खिं डा पिंडी आ डोंइती वोइशो आ सेल्लो चढेतीकेम परमप्रभु यावे कली चोशा चढेतीके चढेवा बाक्त। २इतिहास ४:१ 13 मोसा आ अरेशो खोदेशो पा नाइक्तीक नाक्ती, औंसी नाक्ती, बर्स डा चाड सां बोरब ओरुक्ती मसुप्शो जिज शोब्ले जतीक चाड, ७ नाक्त डा चाड नु गोठ सेल्ला बाक्तीक चाड मानेतीक नु नाक्त किंत किंत चढेचा माल्लो चढेतीक चढेवा बाक्त। लेवी २३:-; गन्ती २८:२,४,११,१७,२६; गन्ती २९:१२ 14 सोलोमन आ आफ दाऊदम ब्रेकशो अरेशो लोत्र खोदेशो पा, तेको चढेबम गेना चढेचा माल्बा, आन पालोम पतीक गेय नेल्ल देशो बाक्माक्त। मिनु लेवीपुकीमी परमप्रभु यावे कली ठेयब सेल्लो कुम्सो पचा कली नु चढेब आन कली वारच पचा कली बाक्मा बाक्त। मिनु लाप्चो खाल पाइब आन कली आन हुल हुल पा योत्रशा, तेको तेको लाप्चोम बाक्चा माल्दा मोपा वोइक्पाइशो बाक्माक्त। मारदे हना परमप्रभु आ मुर दाऊद मोदेशो अरेशो बाक्त। १इतिहास २३:- १इतिहास २६:- 15 मिनु चढेबपुकी नु लेवीपुकीम पिप आ अरेशो नेल्ल ठीक पा पामे बाक्त। मोपा मेकोपुकीमी शोप वोइक्तीक कोठा यो कोत्रडमे बाक्त।

16 सोलोमनम परमप्रभु यावे आ खिं डा जग दोवा रे नेल्ल मथुमा सम्म मोदेशो दुम्माक्त।

17 मेको नोले सोलोमन ठेयब समुन्द्र आ नेक्था एदोम रागी डा एस्योन-गेबेर नु एलोथ लमाक्त। 18 मिनु पिप हुराममी आ गेय पाइबपुकी, आ जहाजपुकी नु जहाज चलेब आन कली सोलोमन कली वारच पचा कली ठेयब समुन्द्रम सोइक्ता बाक्त। मेकोपुकी सोलोमन आ गेय पाइबपुकी नु ओफीर लशा, ४ सहे ५० टलेन्ट सुन ग्याप्शा चाक्शा, पिप सोलोमन कली गेमे बाक्त। टलेन्ट का ३४ किलो बाक्ब।

9

शेबा डा पिपीम जाक्शो

१राजा १०:१-१३

1 शेबा डा पिपीममी सोलोमन आ शुश नें चलेशो नेना बाक्त। मिनु मेकोमी सोलोमन कली नाक्चा कली लेन्ने मचाप्चा डा लोत्र हिल्लो पथ यरूसलेमम जाक्माक्त। मेको शुश मुर नु जाक्शा, शुश दलओंठम मस्लापुकी, शुश सुन नु हीरापुकी कुर पा जाक्माक्त। मिनु मेकोमी सोलोमन कली गुम्शा, आ थुंम बाक्शो लोत्र नेल्ल हिल्लो पवा बाक्त। मत्ती १२:४२ 2 मिनु सोलोमनमी आ हिल्लो पशो लोत्र नेल्ल लेत्ता बाक्त। मेकोमी तेको लोत्र हिल्लो पवा, मेको लोत्र सोलोमनम मारेइ श्येत मलाक्थु, लेत्ता बाक्त। 3 मिनु शेबा डा पिपीममी सोलोमन आ रुप्तीक थुं नेल्ल तशा, मेको आ सेल्शो खिं, 4 मेको आ टेबल डा जचा थोत्रक, मेको आ एर ओंथ निश्शो आ सरकार डा ठेयब मुरपुकी, मेको आ गेय पाइब आन दारशो वा, अरु आन फेक्तीके नु पिप कली तूचा गेब आन वा कोवस डा कोवस दुम्माक्त। मिनु परमप्रभु यावे आ खिं लशा, मेको आ चोशा चदेशो तशा, शुश छक लाक्माक्त।

5 मिनु मेकोमी पिप कली “आं रागीम इन पतीके नु शुश रुप्तीक थुं आ पर्बम नेंशो लोत्र नेल्ल थमा बाक्त। 6 तन्न गो जाक्शा, आंमा मतडा सम्म मेको आन देशो लोत्र थमा मसुदु। मेकोपुकीमी आं कली इन रुप्तीक थुं आ पर्बम नेल्ल लोत्र मशोत्रडमे बाक्त। इच्का ला शोत्रडमे बाक्त। तन्न गे शुश रुप्तीक थुं पाइश्शो बाक्तीनी। 7 इन मुर ग्येरशो मुर बाक्नीमी। नाक्त किंत किंत इन डोंइती गेय पाइबपुकीम इन रुप्तीक थुं डा लोत्र नेंशा, ग्येरसीशो बाक्नीमी। 8 परमप्रभु यावे, इन परमप्रभु ठेयब बाक्ब। इन कली तशा ग्येरसीशा आ ठेयब नित्तीकेमी इन कली निप्पाइश्शा, आ पा डा पिप सेल्लु। मारदे हना परमप्रभु यावे, इन परमप्रभुम इस्राएली आन कली दाक्शा, गेना हना यो बाक्पाइक्चा थुं पाप्तु। मोपतीके इन कली मेकेर ठीक निसाफ पचा नु ठीक पतीके शेंचा, दे आन पिप सेल्लु” देंमाक्त। १इतिहास २९:२३ 9 मिनु नोले मेकोमी पिप कली सहे का २० टलेन्ट सुन शुश मस्ला नु शुश हीरा गेवा बाक्त। शेबा डा पिपीममी सोलोमन कली गेशो मस्लापुकी, थम रिम्शो बाक्शा तेइ मथिंसीब बाक्माक्त। टलेन्ट का ३४ किलो बाक्ब।

10 मिनु मेको नेल्ल प्रॉइशा, पिप हुराम नु सोलोमन आस गेय पाइबपुकीम ओफीर रे सुन चाक्गमे बाक्त। मिनु मेकोपुकीमी शुश क्येट लाइब शी नु हीरापुकी यो चाक्गमे बाक्त। 11 मिनु पिपमी मेको शी रे परमप्रभु यावे आ खिं नु दरवार कली थेंका सेला बाक्त। कुम्सो पाइब आन कली ठेयब नु आइक्च तार पाइश्शो ताप्तीकपुकी सेला बाक्त। डोंइती मोदेशो रिम्शो शी यहूदा रागीम गेनायो मबाक्शो बाक्माक्त।

12 मिनु पिप सोलोमनम शेबा डा पिपीम कली आ चाक्शा गेशो कोसेली क्येडा यो शुश आ माल्शो मारेइ मारेइ गेवा बाक्त। मिनु नोले मेको आ गेय पाइबपुकी नु आ रागी लेम्माक्त।

सोलोमन आ शोंप नु आ मान तशो

१राजा १०:१४-२९

13 सोलोमन आ बाक्तीकेम बर्स काम ६ सहे ६६ टलेन्ट सुन ताक्बाक्माक्त। टलेन्ट का ३४ किलो बाक्ब। 14 मेको प्रॉइशा, आ ग्याप्ब लेयबपुकीमी यो चाक्बाक्मा बाक्त। अराब रागी डा पिपपुकी नु रागी रागी डा सासन पाइबपुकीमी यो सोलोमन कली सुन नु चांदी चाक्बाक्मा बाक्त। 15 मिनु पिप सोलोमनमी तुप्शो सुन के सहे निक्शी लडाइ पाइब आन कली ठेयब तेक्तीक सेला बाक्त। मेको तेक्तीक का सेल्चा कली ६ सहे शेकेल सुन माल्मा बाक्त। शेकेल का ११.५ ग्राम डा चांदी के क्येट बाक्ब। 16 मेकोमी लेंशा तुप्शो सुन के सहे सां आइक्च तेक्तीक सेला बाक्त। मेको तेक्तीक का सेल्चा कली सहे सां शेकेल सुन माल्मा बाक्त। मिनु पिपमी मेको नेल्ल लेबानोन ब्वाकी डा खिंम वोइक्पदा बाक्त। १राजा ७:२ 17 मिनु पिपम हात्ती आ दारा के ठेयब नित्तीक का सेल्शा, मेको कली क्येख सुनम गिल्पदा बाक्त। 18 मेको ठेयब नित्तीके आ डोंइती ६ ओटा थेंका नु सुन के खोइल वोइक्तीक बोइसीशो बाक्माक्त। मेको ठेयब नित्तीक आ निम्फा पटटी गुइ वोइक्तीक बाक्माक्त। मेको गुइ वोइक्तीक निम्फा पटटी गे राप्शो गुप्स

का का सेल्शो बाक्माक्त। 19 मेको ६ ओटा थेंकामी थेंका कामी एर गे गुप्स का, ओंथ गे गुप्स का पा १२ ओटा गुप्स सेल्शो बाक्माक्त। तेकोइ राज्यम मोदेशो ठेयब नित्तीके गेनायो मसेल्शो बाक्माक्त। 20 सोलोमन आ तूतीक बोस नेल्ल सुन के बाक्माक्त। मिनु लेबानोन ब्वाकी डा खिं डा बोस नेल्ले क्येख सुन के बाक्मा बाक्त। चांदी के मारेइ मसेल्शो बाक्मा बाक्त। मारदे हना सोलोमन आ पालाम चांदी मारेइ खोदेशो मबाक्माक्त। 21 हुराम आ गेय पाइबपुकी पिप सोलोमन आ जहाजपुकी नु टारसीस डा बाक्त। मिनु बर्स सां सांमी मेको पिप आ जहाजपुकीम सुन, चांदी, हात्ती आ दारा, मोरपुकी नु मजुरपुकी चाक्बाक्मा बाक्त।

22 मोपा पिप सोलोमन शोप पाइशो नु रुप्तीक थुंम रागी डा पिप नेल्ल आन क्येडा ठेयब दुम्माक्त। 23 मिनु परमप्रभुम सोलोमन कली गेशो रुप्तीक थुं डा लोव्र नेंचा कली रागी रागी डा पिप नेल्ले मेको कली गुमथ जाक्बाक्मा बाक्त। 24 मिनु मेको कली गुमथ जाक्ब नेल्लेमी सुन नु चांदी के मार मार, फेक्तीक वापुकी, यापुकी, मस्लापुकी, शारापुकी नु खच्चरपुकी बर्स बर्सम कोसेली चाक्बाक्मा बाक्त।

25 सोलोमन के ४ हजार शारा नु बग्गीपुकी वोइक्तीक खिं बाक्मा बाक्त। मिनु मेको के १२ हजार शारा बाक्मा बाक्त। मेकोमी शारा नु बग्गी आन कली बग्गी वोइक्तीक सहरम नु का निक्शी चहिं आं नु यरूसलेममी वोइक्पाइक्बाक्माक्त। २इतिहास १:१४-१७; १राजा ५:६ 26 मेकोमी युफ्रेटीस खोला रे पलिस्ती आन रागी नु इजीप्त आ सांद सम्म सासन पवा बाक्त। 27 पिपमी फुल्लु खोदेशो पा यरूसलेम सहरम चांदी तेला बाक्त। लेबानोन डा ठेयब रवा आ शी शेफेलाहम बाक्शो फोव्रशी रवा खोदेशो पा शुश तेला बाक्त। 28 सोलोमन आ शारापुकी चहिं इजीप्त नु अरु नेल्ल रागी रे ग्याप्शा चाक्बाक्मा बाक्त।

सोलोमन बेक्शो
१राजा ११:४१-४३

29 मिनु पिप सोलोमन आ डोंइती रे डा नोले सम्म पशो नेल्ल परमप्रभु यावे आ लोव्र पाइब नाथान आ इतिहासम मब्रेक्शो बाक्बा डा? मिनु शिलो डा नोले दुम्ब लोव्र पाइब अहीयाहम मब्रेक्शो बाक्बा डा? इददोमी नेबात आ तौ येरोबाम आ पर्बम तशो मब्रेक्शो बाक्बा डा? 30 सोलोमनम यरूसलेमम बाक्शा, इस्राएल नेल्ल कली ४० बर्स सासन पवा बाक्त। 31 मिनु सोलोमन बेक्माक्त। मिनु मुरपुकीम मेको कली आ आफ दाऊद आ सहरमी थिम्मे बाक्त। मिनु मेको आ पा डा आ तौ रेहोबाम पिप दुम्माक्त। १राजा १४:२१

10

पिप रेहोबामम अर्ती मनेंशो
१राजा १२:१-२४

1 रेहोबाम शेकेमम लमाक्त। मारदे हना इस्राएली नेल्ल मेको कली पिप सेल्चा कली शेकेमम जाक्शो बाक्मा बाक्त। 2 मिनु नेबात आ तौ येरोबामम मेको लोव्र नेनानु, इजीप्त उइ बाक्शो बाक्माक्त। मेको सोलोमन पिप क्येडा प्रोक्शा इजीप्त लशो बाक्माक्त। मिनु येरोबाम इजीप्त रागी रे लेम्माक्त। 3 मिनु मुरपुकीम मेको कली ब्रेत्थ सोइक्तमे बाक्त। मिनु मेको नु इस्राएली नेल्ल रेहोबाम आ बाक्तीक जाक्शा, मेको कली 4 “इन आफोम आंइ कली हेल्शो गेय पपाइशो बाक्त। मुल गे इन आफोम गेशो हेल्शो गेय इच्का सोपी पाइतीनी हना, गो इन कली गेय पाइनीकी” देंमा बाक्त। 5 मिनु रेहोबामम “आं कली नाक्त सां सम्म मिन्चा गेयीनी। मिनु लेंशा जाक्कीन” दे सोइक्तीमी बाक्त। मोपतीके मुरपुकी लेशशा लमा बाक्त।

6 मिनु नोले पिप रेहोबामम आ आफ सोलोमन ब्रोंइशा बाक्मेनु, अर्ती गेब खाल्पापुकी नु अर्ती पुंइशा “एको मुर आन कली मार लोव्र लेत्तुमी? गे मार अर्ती गेनीनी?” दे हिल्लो पवा बाक्त। 7 मिनु मेकोपुकीम “गे एको मुर आन कली शिशी पा रिम्शो लोव्र पाइतीनी हना, मेकोपुकी गेना हना यो इन गेय पाइब दुम्नीम” दे अर्ती गेमे बाक्त। 8 तन्न मेकोमी मेको खाल्पा आन अर्ती मनेना बाक्त। मिनु आ नु कोल्शो ठिटा आन अर्ती पुंइशा 9 “मेकोपुकीम आं आफोम आन कली गेशो हेल्शो गेय सोपी सेल्चा कली पुंइतेकम। मिनु गो मेको आन कली मार लोव्र लेत्तुमी? गे मार अर्ती गेनीनी?” दे हिल्लो पवा बाक्त। 10 मिनु मेको नु काथा कोल्शो ठिटापुकीम “इन आफोम आंइ कली हेल्शो गेय गेशो बाक्त। मुल मेको सोपी सेल्शा गेकी, दे पुंइब मुर आन कली ‘आं आइक्च ब्रेच्यो आं आफ आ क्रातो क्येडा ठेयब बाक्ब। 11 आं आफोम इन कली हेल्शो गेय पपाइशो बाक्माक्त। तन्न मुल गो मेको क्येडा हेल्शो गेय पपाइक्नुड।

आं आफोम इन कली कोक्केम तुप्पाइश्शो बाक्माक्त। तन्न मुल गो इन कली बिच्छीम क्राइक्पाइक्नन्नी' मतीन" दे अर्ती गेमे बाक्त।

12 मिनु येरोबाम नु मेको मुर नेल्ल पिप रेहोबामम देशो खोदेशो पा नाक्त सां नोले रेहोबाम आ बाक्तीकेम जाक्मा बाक्त। 13 मिनु पिपम मेको मुर आन कली मरिम्शो लोत्र पाइमी बाक्त। मारदे हना मेकोमी खाल्पा आन गेशो अर्ती मनेना बाक्त। 14 मिनु मेको ठिटापुकीम गेशो अर्ती बिश्शा, मेको आन कली "आं आफोम इन कली हेल्शो गेय गेशो बाक्माक्त। तन्न मुल गो मेको क्येडा हेल्शो गेय गेनुड। आं आफोम इन कली तुप्पाइश्शो बाक्माक्त। तन्न मुल गो इन कली बिच्छीम क्राइक्पाइक्नन्नी" दे माइक्मी बाक्त। 15 मिनु पिपम मेको मुर आन लोत्र मनेना बाक्त। मारदे हना परमप्रभुमी शिलो डा अहीयाह रे पा नेबात आ तौ येरोबाम आ पर्बम देशो लोत्र खाप्चा कली परमप्रभु यावेम मोदेशो पपाइश्शो बाक्माक्त। १राजा ११:२९-३१

यहूदा थर नु उत्तर डा इस्राएली ब्राशो

16 मिनु उत्तरम बाक्ब इस्राएलीपुकी नेल्लेमी "पिपम आंइ देशो मबिप्ब" दे तुइक्तमे बाक्त। मिनु मेकोपुकीमी पिप कली "दाऊद नु आंइ के मार भाग बाक्बा डा? येरुसे आ तौ नु आंइ के मार बाक्बा डा? गे इस्राएलीपुकी, आंम ताम्बुम लने। मुल दाऊद आ खिं डा मुर, गे आंमा इन खिं कली कोत्रडीन" देंमा बाक्त। मोपतीके इस्राएली नेल्ल आन ताम्बुम लमा बाक्त। 17 तन्न रेहोबामम यहूदा डा सहरम बाक्ब इस्राएली आन कली सासन पा बाक्माक्त। 18 मिनु पिप रेहोबाममी आ गेय पाइब आन कली कोत्रब हदोराम कली मुर आन बाक्तीकेम सोइक्ता बाक्त। तन्न इस्राएलीपुकीम मेको कली फुल्लु आप्शा सदमे बाक्त। मिनु पिप रीब पा द्यु प्रेक्शा आ बग्गी डोइश्शा, यरूसलेम लमाक्त। 19 मिनु मेको नाक्ती रे मुल सम्म उत्तरम बाक्ब इस्राएलीपुकीम दाऊद आ खिं डा मुरपुकी नु मदुथु, सासन पचा मगेशो बाक्नीम।

11

रेहोबाम यरूसलेम लेशशो

1 मिनु रेहोबाम यरूसलेमम लेशशा, आंम राज्य लेंशा ताक्चा कली यहूदा नु बेन्यामीन थर डा लाख का ८० हजार बोल्यो लडाइ पाइब मुरपुकी इस्राएली नु लडाइ पचा कली खुप्ता बाक्त। १राजा १२:२१-२४ 2 तन्न परमप्रभु यावे आ लोत्र परमप्रभु आ मुर शेमायाह कली जाक्माक्त। 3 मिनु परमप्रभुमी शेमायाह कली "सोलोमन आ तौ यहूदा डा पिप रेहोबाम, इस्राएलम बाक्ब यहूदा डा मुर नु बेन्यामीन डा मुर नेल्ल आन कली, 4 परमप्रभु यावेमी मार देब देशा हना 'गे इन लोक्बपुकी नु लडाइ पथ इर डोइश्शा मलने। गे नेल्ल इन खिं लेशशा लने। मारदे हना एको नेल्ल आं रे पा पिशो बाक्ब' दे माइक्मी" देंमाक्त। मोपतीके मेकोपुकीम परमप्रभु यावे आ लोत्र टिशा, येरोबाम नु लडाइ पचा थुं मपामे बाक्त।

रेहोबामम यहूदा कली बोल्यो सेल्शो

5 मिनु रेहोबाम यरूसलेमम बाक्शा, यहूदा डा सहरपुकी बोल्यो सेला बाक्त। 6 मेकोमी बेथलेहेम, एताम, तेकोहा, 7 बेथ-सुर, सोको, अदुल्लाम, 8 गाथ, मारिशा, जीफ, 9 अदोरैम, लाकीश, आजेका, 10 सोराह, आइयालोन नु हेब्रोन बोल्यो सेला बाक्त। मेको सहरपुकी यहूदा नु बेन्यामीनम बाक्मा बाक्त। 11 मिनु मेकोमी मेको सहरपुकी थम बोल्यो सेला बाक्त। मिनु मेकेर कप्तानपुकी योत्रशा वोदा बाक्त। मिनु जचा थोत्रक, तेल, अडगुर शांबु खेक्शा वोइक्पदा बाक्त। 12 मिनु मेकोमी सहर नेल्लेम ठेयब तेक्तीक नु तूतीकपुकी, तेलशा वोइक्पदा बाक्त। मिनु मेको सहर नेल्ल थम बोल्यो सेला बाक्त। मोपा मेकोमी यहूदा नु बेन्यामीन आ राज्य बोल्यो सेल्शा सासन पवा बाक्त।

13 इस्राएल रागीम ब्राशा बाक्शो चढेब नु लेवीपुकी नेल्ल आन बाक्तीक रे रेहोबाम आ बाक्तीक जाक्मा बाक्त। 14 लेवीपुकीम आन बाक्तीक नेल्ले प्रोइशा, यहूदा नु यरूसलेमम बाक्थ जाक्मा बाक्त। मारदे हना येरोबाम नु आ तौपुकीमी मेको आन कली परमप्रभु यावे कली चढेतीक गेय पचा मगेमे बाक्त। २इतिहास १३:९ 15 मिनु येरोबाममी डांडा डा थानम आ सेल्शो क्यारश आ मूर्ति नु बाछा आन मूर्ति पूजा पचा कली आ चढेब वोइक्पदा बाक्त। 16 मिनु सु सुमी परमप्रभु यावे, इस्राएली आन परमप्रभु कली खोइक्चा थुं पशो बाक्मा, मेको इस्राएली नेल्ल परमप्रभु यावे, आन किकी पिपी आन परमप्रभु कली चढेथ यरूसलेम सहरम लमा बाक्त। मिनु लेवीपुकी मेको आन नोले खोदमे

बाक्त। १ राजा १२:२६-२७ 17 मेकोपुकीम यहूदा डा राज्य बोल्यो सेल्शा, बर्स सां सम्म सोलोमन आ तौ रेहोबाम कली वारच पदमे बाक्त। मारदे हना मेकोपुकी बर्स सां सम्म दाऊद नु सोलोमन आस रिम्शो लांम गाक्मा बाक्त।

18 मिनु रेहोबामम महलाथ कली ग्युंवे पा चाक्गा बाक्त। मेको आ आफ दाऊद आ तौ येरीमोथ नु मेको आ ममा चहिं येस्से आ तौ एलीआब आ तमी अबीहेल बाक्माक्त। १ सामुएल १६:६ 19 मेकोमी रेहोबाम कली येऊशा, शेमारयाह नु चाहम तौ थिवा बाक्त। 20 मेको आ नोले रेहोबाममी अब्सालोम आ तमी माकाह कली ग्युंवे पवा बाक्त। मेकोमी अबीयाह, अत्तै, जीजा नु शेलोमीथ थीमी बाक्त। 21 मिनु रेहोबाममी आ ग्युंवे पशो मीशपुकी नु अरु मीश आन क्येडा अब्सालोम आ तमी माकाह कली शुश दाक्बाक्माक्त। मेको के १८ जना ग्युंवे पशो मीश नु ६० जना अरु मीश बाक्मा बाक्त। मेको के २८ जना तौ नु ६० जना तमी बाक्मा बाक्त। 22 रेहोबामम आ तौ नेल्ल आन दाते डा माकाह आ तौ अबीयाह कली आ नोले, आ पा डा पिप सेल्चा कली मिम्ता बाक्त। 23 मिनु मेकोमी रुप्तीक थुं पा अर्को तौ आन कली यहूदा नु बेन्यामीन डा रागी डा बोल्यो सहरम सासन पाइब सेला बाक्त। मेको आन कली मार मार माल्मा, शुश गेशा, मेको आन कली शुश मीश आल, मीश सेल्चा कली चाक्शा गेवा बाक्त। २इतिहास २१:३

12

यहूदा कली लडाइ तोशो

१ राजा १४:२५-३१

1 रेहोबाम आ राज्य बोल्यो दुम नोले मेको सक्ति पाइश्शो दुम्माक्त। मिनु मेकोमी परमप्रभु यावे आ अरेशो लोव्र प्रोना बाक्त। मिनु मेको नु इस्राएली नेल्लेमी यो परमप्रभु यावे आ अरेशो लोव्र प्रोन्मे बाक्त। 2 मिनु रेहोबामम पिप पशो ५ बर्स दुम्मेनु, इजीप्त डा पिप शीशक यरूसलेम कली लडाइ तोचा कली जाक्माक्त। मारदे हना इस्राएलीपुकीमी परमप्रभु यावे कली प्रोइशो बाक्मा बाक्त। 3 पिप शीशक हजार का सहे निक्शी बग्गी नु ६० हजार शारा डोइक्ब लडाइ पाइबपुकी चाक्शा जाक्माक्त। शीशक नु इजीप्त रे हिकने मचाप्चा डा पा लिबीया, सुक्कीम नु एथीयोपीया डा लडाइ पाइब मेको नु जाक्मा बाक्त। 4 मिनु मेकोमी यहूदा डा बोल्यो सहरपुकी ग्राना ग्रान यरूसलेम सम्म जाक्माक्त। २इतिहास ११:५-१० 5 मिनु परमप्रभु यावे आ लोव्र पाइब शेमायाह नु रेहोबाम यहूदा डा ठेयब मुर आन बाक्तीक जाक्सा बाक्त। मेकोपुकी शीशक आ लडाइ तोशो रे ब्रोंइचा कली प्रोक्शा, यरूसलेमम बुक्शो बाक्मा बाक्त। मिनु शेमायाहम मेको आन कली “परमप्रभु यावेमी मार देंत देशा हना ‘गेपुकीम आं कली प्रोइतीनी। मोपतीके गो इन कली प्रोइशा, शीशक आ गुडमी गेतन्नी’ देशो बाक्ब” दे माइक्मी बाक्त। 6 मिनु इस्राएल डा ठेयब मुरपुकी नु पिप आन थुं ब्रेम्शो दुम्शा “परमप्रभु यावेम थमा लोव्र पवा बाक्त” देंमा बाक्त। 7 मिनु परमप्रभु यावेमी मेको आन थुं ब्रेम्शो दुम्शो तशा, मेको शेमायाह कली “मेकोपुकी ब्रेम्शो दुम्तीके, गो मेको आन कली खतम मसेल्लुडमी। तन्न गो मेको आन कली ब्रोंइचा गेनुडमी। आं गाइश्शो शीशक आ पतीके रे पा यरूसलेमम ममोइक्नुड। 8 मो हना यो मेकोपुकी मेको शीशक आ गेय पाइब दुम्नीम। मोपा मेकोपुकीमी आं कली गेय पचा नु अर्को राज्य डा मुर आन कली गेय पचा गिश फरक दुम्बाक्मे, मेको तुइक्नीम” देशो बाक्माक्त।

9 मिनु इजीप्त डा पिप शीशकम यरूसलेम कली लडाइ तोशा ग्राशा, परमप्रभु यावे आ खिं डा शोप नु पिप आ दरवार डा शोप लदा बाक्त। मिनु सोलोमन आ सेल्शो सुन के तेक्तीकपुकी यो योल्दा बाक्त। 10 मिनु पिप रेहोबामम मेको सुन के तेक्तीक आन पा डा कांसा के तेक्तीक सेल्शा, पिप आ दरवार डा लाप्चो खाल पाइब आन ठेयब मुर आन कली जिम्मा गेशा वोइक्पदा बाक्त। 11 मिनु पिप परमप्रभु यावे आ खिं ओव्रमेनु, मेको खाल पाइबपुकीम मेको तेक्तीक कुरशा, मेको नु आगा ओव्रबाक्मा बाक्त। मिनु नोले मेकोपुकीम मेको तेक्तीक खाल पाइब आन बाक्तीकेम वोइक्बाक्मा बाक्त। 12 मारदे हना परमप्रभु यावेमी रेहोबाम ब्रेम्शो दुम्शो तशा, मेको आ पबर्म गाइक्तीके प्रोना बाक्त। मिनु नेल्ल खतम मसेला बाक्त। मिनु यहूदामी रिम्शो दुम्शो यो बारना बारन लमाक्त। २इतिहास ३२:२६

13 मोपा पिप रेहोबाममी यरूसलेममी आ राज्य बोल्यो सेल्शा, सासन पवा बाक्त। रेहोबाम पिप दुम्मेनु, ४१ बर्स दुम्शो बाक्माक्त। मिनु मेकोमी यरूसलेम सहरम १७ बर्स सासन पवा बाक्त। परमप्रभु यावेम इस्राएल डा थर नेल्ल आन दाते रे आ नें कली मान पा बाक्चा, दे यरूसलेम सहर योव्रशो बाक्माक्त। रेहोबाम आ ममा आ नें नामा बाक्माक्त। मेको अम्मोनी बाक्माक्त। २इतिहास ६:२० 14 रेहोबामम मरिम्शो पवा बाक्त। मारदे हना मेकोमी आ थुं नेल्लेमी परमप्रभु यावे आ नोले मखोदा बाक्त।

15 मिनु रेहोबाम आ डोंइती रे डा नोले सम्म पशो नेल्ल परमप्रभु यावे आ लोव्र पाइब शेमायाह नु इददोम इतिहासम मब्रेक्शो बाक्बा डा? मेकोपुकीम मुर आन किकी पिपी ब्रेक्तसे बाक्त। रेहोबाम नु येरोबाम आस दातेमी गेना हना यो लडाइ दुम्ना दुम्न बाक्माक्त। २इतिहास १३:२२ 16 मिनु रेहोबाम बेक्माक्त। मिनु मुरपुकीम मेको कली दाऊद आ सहर, यरूसलेममी थिम्मे बाक्त। मिनु आ तौ अबीयाह पिप दुम्माक्त।

13

अबीयाह यहूदा डा पिप दुम्शो

१राजा १५:३-८

1 येरोबाम पिप पशो १८ बर्स दुम्मेनु, अबीयाह यहूदा डा पिप दुम्माक्त। 2 मेकोमी बर्स सां यरूसलेमम सासन पवा बाक्त। आ ममा गिबा सहर डा उरीएल आ तमी मीकाया बाक्माक्त। मिनु अबीयाह नु येरोबाम आस दातेम लडाइ दुम्ना दुम्न बाक्माक्त। 3 अबीयाहमी लडाइ पचा कली थम बोल्यो ४ लाख लडाइ पाइबपुकी ठीक पवा बाक्त। येरोबामम चहिं ८ लाख बोल्यो लडाइ पाइबपुकी खुप्ता बाक्त। 4 मिनु अबीयाह एफ्राइम डा पहाड रागी डा सेमाराइम डांडाम राप्शा, ठेयब सेंदा पा “येरोबाम नु इस्राएल डा मुर नेल्ल, आं लोव्र नेनीन। 5 मार, गे परमप्रभु यावे, इस्राएली आन परमप्रभु दाऊद नु गेना हना यो लीब हिकसी कबल पशो मतुइक्नीनी? मेको कबल मार बाक्ब देशा हना, मेको इस्राएली आन राज्य नेल्ल दाऊद नु आ तौ आन कली गेना हना यो कली गेशो बाक्ब, दे मतुइक्नीनी? लेवी २:१३; गन्ती १८:१९ 6 मो हना यो दाऊद आ तौ सोलोमन आ गेय पाइब नेबात आ तौ येरोबामम आ होव्रप कली मटिथु, मेको आ पबर्म मरिम्शो पाप्तु। 7 मिनु शोर गाक्शो मुरपुकी मेको नु बाक्शा, सोलोमन आ तौ रेहोबाम कली शुक्शी पाप्तेक्म। मेना रेहोबाम आइक्च बाक्माक्त। मोपतीके मारेइ पने मचाप्बा बाक्त।

8 मुल गे दाऊद आ तौम सासन पशो, परमप्रभु यावे आ राज्य नु लडाइ पचा कली मिम्शो बाक्नीनी? गेपुकी थमा पा ठेयब हुल का बाक्नीनी। मार, गेपुकी नु येरोबामम सेल्शो सुन के बाछापुकी इन देवता दुम्चा कली गे नु बाक्नीनी? गे ग्रासीब, दे मिम्नीनी? १राजा २२:२८ 9 मार, गेपुकीम हारून आ चच युइ परमप्रभु यावे कली चढेब लेवी आन कली खेरशा, आंम मुर आन कली योव्रशा, अर्को रागी खोदेशो पा चढेबपुकी मसेल्नी डा? सुइ मुरुम चढेब दुम्चा कली बाछा का नु ७ ओटा सांड चाक्शा जाक्त हना, गे मेको कली चढेब सेल्नीनी। मिनु मेको मारेइ पने मचाप्ब मूर्ति कली चढेब दुम्ब। प्रस्थान २१:४८; २इतिहास ११:१५ 10 तन्न परमप्रभु यावे आंइ परमप्रभु बाक्ब। मिनु गोपुकीम मेको कली मप्रोंइक। मिनु परमप्रभु यावे कली चढेब हारून आ चच युइ बाक्नीम। मिनु लेवीपुकीमी मेको आन कली वारच पाइनीम। 11 मेकोपुकीम नाक्दो नु सुनी परमप्रभु यावे कली चोशा चढेतीक चढेनीम। मेकोपुकीम ब्रोव्रशो रिना पाइशो धूप चोइनीम। मेकोपुकीम कोंइतीक शोब्ले लहर पा क्येख सुन के टेबलम वोइक्नीम। मेकोपुकी नाक्दो कुस कुस सुन के बत्ती दातीकेम बत्ती दानीम। मोपा गोपुकीम आंइ परमप्रभु यावेम देशो नेल्ल थमा पा पाइनीकी। तन्न गेपुकीम मेको कली प्रोंइतीनी। गन्ती २८:३-८ 12 परमप्रभु गोपुकी नु बाक्शा, आंइ डोंइती गाक्ब। मेको आ चढेब आन तुराही गे नु लडाइ पचा कली ताप्चा चिक्शो बाक्नीम। गे इस्राएली मुरपुकी, गे परमप्रभु यावे, इन किकी पिपी आन परमप्रभु नु लडाइ मपने। गे मग्रानीनी” देमाक्त। गन्ती १०:९

13 येरोबामम नोले रे जाक्शा लडाइ पचा कली हुल का बाप्पाइशो वोइशो बाक्माक्त। मिनु मेको आन लडाइ पाइब आन ठेयब हुलम चहिं यहूदा नु लडाइ पामे बाक्त। येरोबाम आ बाप्पाइशो हुल चहिं नोले रे जाक्मा बाक्त। 14 मिनु यहूदा डा मुरपुकीम लेशशा कोव्रडमेनु, लडाइ आन डोंइती नु नोले यो बाक्माक्त, दे तुइक्तमे बाक्त। मिनु मेकोपुकीम “वारच पाइक्की” दे परमप्रभु यावे कली वाइ ब्रेशशा थोव्रमे बाक्त। मिनु चढेबपुकीम आन तुराही ताप्मे बाक्त। 15 मिनु यहूदा डा मुरपुकी लडाइ पचा कली वाइ ब्रेशशा, ग्रीमा बाक्त। मोपा ग्रीमानु, परमप्रभुमी येरोबाम नु इस्राएली नेल्ल आन कली अबीयाह नु यहूदा डा मुर आन डोंइती ब्रुपदा बाक्त। 16 मिनु इस्राएलीपुकी यहूदा डा मुर आन डोंइती रे प्रोक्मा बाक्त। मिनु परमप्रभुमी मेको आन कली यहूदा डा मुर आन गुइमी गेवा बाक्त। 17 मोपा अबीयाह नु आ लडाइ पाइबपुकीम इस्राएली आन कली खतम पोक्शा, ग्रामा बाक्त। मिनु इस्राएल डा योव्रशो बोल्यो लडाइ पाइब ५ लाख मुर साइक्चा पुंइसमा बाक्त। 18 मेना इस्राएलीपुकी ब्रुशा, दिप्चा पुंइसमा बाक्त। मिनु यहूदा डा मुरपुकी ग्रामा बाक्त। मारदे हना मेकोपुकीमी परमप्रभु यावे, आन किकी पिपी आन परमप्रभु कली थमा सुइशो बाक्मा बाक्त। 19 अबीयाहमी येरोबाम कली खेदा पवा बाक्त। मिनु मेकोमी बेथेल सहर नु आ एर ओंथ डा गाउंपुकी, येशाना सहर नु आ एर ओंथ डा गाउंपुकी नु एफ्रोन सहर नु आ एर ओंथ डा गाउंपुकी आंम के सेला बाक्त। 20 मिनु

अबीयाह आ पालाम येरोबामम लेंशा लडाइ तोने मचबा बाक्त। मिनु परमप्रभु यावेमी येरोबाम कली रोइ पपाइशशा, बेकपदा बाक्त। 21 मिनु अबीयाह बोल्यो दुम्माक्त। मेकोमी १४ जना मीश चाक्का बाक्त। मिनु मेको २२ जना तौ नु १६ जना तमी आन आफ दुम्माक्त। 22 अबीयाह आ पशो नेल्ले, दोपा बाक्मे मार मार पवा, परमप्रभु यावे आ लोव्र पाइब इददो आ किताबम ब्रेक्शो बाक्ब। २इतिहास १२:१५

14

आसा यहूदा डा पिप दुम्शो
१राजा १५:९-१२

1 मिनु अबीयाह बेक्माक्त। मिनु मुरपुकीम मेको कली दाऊद आ सहरमी थिम्मे बाक्त। मिनु मेको आ पा डा आ तौ आसा पिप दुम्माक्त। मेकोमी सासन पवानु, आ रागीमी १० बर्स सम्म लडाइ मदुम्माक्त। 2 मिनु आसामी परमप्रभु यावे, आ परमप्रभु आ डोंइती मार रिम्शो नु ठीक बाक्मे, मेकोन पवा बाक्त। 3 मेकोमी यहूदामी अर्को रागी डा चढ़ेतीकपुकी नु डांडा डा थानपुकी प्रेशशा, खुक्शो फुल्लु नु मूर्ति पाइशशा थाम खोल्पाइशशा ताइक्तीमी बाक्त।

4 मिनु मेकोमी यहूदा डा मुर आन कली परमप्रभु यावे, आन किकी पिपी आन परमप्रभु आ माल्शा, आ अरेशो नु आ शेंशो लोव्र नेल्ल पचा, दे सासन पवा बाक्त। 5 मेकोमी यहूदा डा नेल्ल सहरम बाक्शो डांडा डा थान नु धूप चोतीके यो प्रेशशा गेवा बाक्त। मेको आ सासनमी आ राज्य नाइक्चा तवा बाक्त। २इतिहास १५:१५ 6 मेकोमी रागीम लडाइ मदुम्तीके यहूदा डा सहर कली बोल्यो सेला बाक्त। मेना मेको नु सुइम लडाइ मपामे बाक्त। मारदे हना परमप्रभु यावेम मेको कली नाइक्चा गेशो बाक्माक्त। २इतिहास १५:१५

7 मिनु आसामी यहूदा डा मुर आन कली “एको सहरपुकी सेल्य। एको आन एर ओंथ नेल्ल गारो हिरशा लाइशशा खिं नु ठेयब आग्लो पाइशशा लाप्चोपुकी सेलशा बोल्यो सेल्य। मारदे हना गोपुकीम परमप्रभु यावे, इं परमप्रभु कली माल्शा, मेको रागी इं के बाक्ब। मिनु मेकोमी इं कली थुं नाइक्चा गेप्तु” देंमाक्त। मोपतीके मेकोपुकीम सेल्ल्तीक गेय पा सोशो बोशो दुम्मा बाक्त। 8 आसा के ठेयब तेक्तीक नु तूतीक बाक्मा बाक्त। यहूदा रे जाक्शो लाख सां लडाइ पाइब बाक्मा बाक्त। मिनु बेन्यामीन रे जाक्शो लाख निक्शी ८० हजार आइक्च तेक्तीक नु लिब्रा आप्व लडाइ पाइबपुकी बाक्मा बाक्त। मेको नेल्ल बोल्यो सक्ति पाइशशा लडाइ पाइबपुकी बाक्मा बाक्त। 9 एथीयोपीया डा जेराहमी मेकोपुकी नु लडाइ पचा कली हजार हजार लडाइ पाइबपुकी नु सहे सां बग्गी चाक्शा, मारेशा सम्म जाक्मा बाक्त।

10 मिनु मेकोपुकी जाक्मानु, आसा मेको कली गुम्थ लमाक्त। मिनु मेकोपुकी मारेशा आ नेक्था सेफाथाह डा दिंमम लडाइ पामे बाक्त।

11 मिनु आसामी परमप्रभु यावे, आ परमप्रभु कली “परमप्रभु यावे, गे सक्ति पाइशशा नु सक्ति मपाइशशा मुर आन कली वारच पने चाप्नीनी। सु कली वारच पचा दाक्नीनी, मेकोन चाप्नीनी। परमप्रभु यावे, आंइ परमप्रभु, आंइ कली वारच पाइय्यीकी। मारदे हना गो इन कली थमा सुइक्नीकी। मिनु गोपुकी इन नेंमी एको इश्का लडाइ पाइब नु लडाइ पथ जाक्तक। परमप्रभु यावे, आंइ परमप्रभु, इन कली सुइ मुरुम ग्राने मचाप्नीम” दे पुना बाक्त। १सामुएल १४:६

12 मिनु परमप्रभु यावेम आसा नु यहूदा डा मुर आन डोंइती एथीयोपीया डा मुर नु लडाइ पा ग्रापदा बाक्त। मिनु एथीयोपीया डा मुर प्रोकमा बाक्त। 13 मिनु आसा नु मेको आ लडाइ पाइबपुकीम मेको आन कली गेरार सम्म खेदा पामे बाक्त। एथीयोपीया डा मुर नेल्ल साइक्चा पुंइसमा बाक्त। मारदे हना परमप्रभु यावे आ लडाइ पाइबपुकीमी मेकोपुकी नु लडाइ पामे बाक्त। मिनु यहूदा डा मुरपुकीम मारेइ मारेइ रोइशशा शुश लदमे बाक्त। 14 मोपा लशा, मेकोपुकीम गेरार आ एर ओंथ डा सहर नेल्ल खतम पोक्गामे बाक्त। मारदे हना मेक डा मुरपुकी परमप्रभु यावे आ पशो तशा शुश हिंमा बाक्त। मिनु यहूदा डा मुरपुकीमी मेको सहर डा मारेइ मारेइ रोइक्तमे बाक्त। मारदे हना मेकेर शुश रोइक्चा डा मार मार बाक्मा बाक्त। 15 मेकोपुकीमी ताम्बुम बाक्शो बस्तु भाव थुल्ब आन कली यो खेदा पा मेको आन शुश क्यारश भेडा दलओंठ रोइशशा, यरूसलेम लेम्मा बाक्त।

15

आसा आ रिम्शो गेय

1 मिनु परमप्रभु आ सोक्तीम ओदेद आ तौ अजारयाह कली सुमा बाक्त। 2 मिनु मेको आसा कली गुम्थ लशा, मेको कली “आसा, यहूदा डा मुर नु बेन्यामीन डा मुर नेल्ले, आं लोव्र नेनीन। परमप्रभु यावे गे नु बाक्ब। मेको गे नु

बाक्ब। गेपुकीम मेको कली माल्तीनी हना, गे थित्नीनी। तन्न गेपुकीमी मेको कली प्रोंइतीनी हना, मेकोमी यो इन कली प्रोंइब। 3 इस्राएली शुश बर्स सम्म थमा डा परमप्रभु नु मबाक्शो बाक्तेक्म। मेको आन कली शेंब चढेब का यो मबाक्शो बाक्माक्त। मिनु परमप्रभु आ अरेशो लोत्र यो मतुइक्तेम। होसे ३:४ 4 तन्न मेकोपुकीम श्येत जामेनु, परमप्रभु यावे, इस्राएली आन परमप्रभु गे लेशशा, माल्शा, मेको कली थित्तेक्म। मिनु मेको आन कली वारच पाप्तु। येरमीया २९:१३-१४ 5 मेना सुइ लाडगा लशा, रिम्शो पा जाक्ने मचाप्शो बाक्तेक्म। मारदे हना मेकेर शोर गाक्शो शुश मुर बाक्मा बाक्त। मिनु रागीम बाक्ब नेल्लेमी श्येत जाम्तेक्म। 6 मेको नेल्ल ठेयब श्येतम बाक्तेक्म। रागी नु रागी लडाइ पाम्तेक्म। सहर नु सहर यो लडाइ पाम्तेक्म। मारदे हना परमप्रभुमी मेको आन कली मार मार श्येत गेना गेन बाक्त। लूका २१:१० 7 तन्न गे इन थुं बारपाइशशा बोल्यो दुम्शा, गेय पने। मारदे हना गे इन पशो गेय डा इनाम ताइनीनी” देमाक्त। १कोरिन्थी १५:५८

8 मिनु आसाम परमप्रभु यावे आ लोत्र पाइब ओदेद आ तौ अजारयाह आ लोत्र नेंशा, आ थुं बारपदा बाक्त। मिनु यहूदा, बेन्यामीन नु सहर नेल्लेमी नु आ ग्राशो एफ्राइम डा पहाड रागी डा सहरपुकीम बाक्शो ग्रांग्रा दिचा डा मूर्ति नेल्ल लाइशशा, खतम पोक्गा बाक्त। मिनु परमप्रभु यावे आ खिं डा पिंडी आ डोंइती बाक्शो परमप्रभु यावे कली चढेतीक यो लेशा सेल्पदा बाक्त। 9 मिनु आसामी यहूदा डा मुर, बेन्यामीन डा मुर नु मेको नु बाक्ब एफ्राइम, मनस्से नु सिमियोन रे प्रोक्शो मुर नेल्ल खुप्ता बाक्त। मेकेर बाक्ब एफ्राइम, मनस्से नु सिमियोन डा मुरपुकी परमप्रभु यावे पिप आसा नु बाक्ब, दे तुइशशा, इस्राएल रे प्रोक्शा, यहूदामी जाक्शो बाक्मा बाक्त। मारदे हना परमप्रभु यावे, आ परमप्रभु यावे मेको नु बाक्शो तुइशशा, इस्राएल डा शुश मुरपुकी यहूदाम बाक्थ जाक्शो बाक्मा बाक्त। २इतिहास ११:१६; येरमीया ४१:५ 10 आसा पिप दुम्शो १५ बर्स डा महिना सांम मेको नेल्ले यरूसलेममी बुक्मा बाक्त। 11 मिनु मेको नाक्ती मेकोपुकीमी लडाइम रोइशशा चाक्शो ७ सहे ब्यफ नु ७ हजार क्यारश भेडा चढेमे बाक्त। 12 मिनु मेकोपुकीम आन थुं नेल्लेमी परमप्रभु यावे, आन किकी पिपी आन परमप्रभु आ नोले खोइक्चा, दे कबल पामे बाक्त। यहोसु २४:२५ 13 मिनु सु सुमी परमप्रभु यावे, इस्राएली आन परमप्रभु आ नोले खोइक्चा मबिस्से, मेको साइक्चा पुंइसे बाक्त। खाल्पा बाक्त हना यो, ठिटा बाक्त हना यो, मीश मुर बाक्त हना यो, वोंइश मुर बाक्त हना यो साइक्चा पुंइसे बाक्त। 14 मिनु मेको मुर नेल्लेमी “परमप्रभु यावे आ नोले खोइक्चनय” दे कसम जशा, ग्येरसीशा ठेयब सेंदा पा, तुराही नु ग्रोत्र ताप्मे बाक्त। 15 यहूदा डा मुर नेल्लेमी मेको कसम जतीके ग्येरसमा बाक्त। मारदे हना मेकोपुकीमी आन थुं नेल्लेमी परमप्रभु यावे कली खोइक्चा थमा पा दाक्तमे बाक्त। मिनु परमप्रभु कली थिशो बाक्मा बाक्त। मोपतीके परमप्रभु यावेमी मेको नेल्ल आन रागीमी लडाइ मदुम्पाइक्थु, आन थुं नाइक्चा गेवा बाक्त। २इतिहास १४:५-६; २इतिहास २०:३०

16 पिप आसामी आ बगे माकाह कली यो पिप आ ममा आ गेय रे गुंइदा बाक्त। मारदे हना मेकोमी अशेराह देवी आ ग्रांग्रा दिचा डा मूर्ति सेल्पदा बाक्त। आसामी मेको मूर्ति क्योरशा जिकशा फस सेल्शा किद्रोन डा खोलाम चोवा बाक्त। १राजा १५:१३-१५ 17 तन्न मेकोमी डांडा डा थान नेल्ल इस्राएल रे मगुंइदा बाक्त। मो हना यो आसा मबेक्म सम्म आ थुं नेल्लेमी परमप्रभु यावे आ मुर दुम्शा बाक्माक्त। 18 मेकोमी आ आफोम परमप्रभु कली गेशो थोव्रक नु आ गेशो थोव्रक सुन चांदी नु ग्योबपुकी परमप्रभु आ खिंम चाक्गा बाक्त। 19 आसा पिप दुम्मेनु, ३५ बर्स सम्म लडाइ का यो मदुम्माक्त।

16

पिप आसा आ नोले डा बर्सपुकी

१राजा १५:१६-२४

1 पिप आसाम सासन पशो ३६ बर्सम इस्राएल डा पिप बाशामी यहूदा कली लडाइ तोवा बाक्त। मिनु पिप बाशामी यहूदा डा पिप आसा आ रागी ओव्रतीक नु ग्रीतीक लां नेल्ल तेक्चा कली रामाह सहर कली बोल्यो सेला बाक्त। 2 मिनु आसामी परमप्रभु यावे आ खिं नु पिप आ दरवार डा शोंप चोइक्तीक रे सुन नु चांदी गुंइशा, दमस्कस सहरम बाक्शो अराम डा पिप बेन-हादाद कली सोइशशा, मेको कली 3 “इन आफ नु आं आफ आस दातेम गारशो खोदेशो पा, गे नु गो यो गारस। मुल गो इन कली सुन नु चांदी सोइक्ताक्ड। मोपतीके इस्राएल डा पिप बाशा नु गारशो लोत्र प्रोनीन। मिनु मेकोमी आं कली पचशो लडाइ मपवल” दे लोत्र सोइक्ता बाक्त। 4 मिनु बेन-हादादम पिप आसा आ लोत्र बिस्से बाक्त। मिनु मेकोमी आ लडाइ पाइब आन कप्तान आन कली “इस्राएल डा सहर आन कली लडाइ

तोन” दे हुकुम पवा बाक्त। मिनु मेकोपुकीम इयोन सहर, दान सहर, आबेल-मैम सहर नु नाप्ताली आन मार मार वोइक्तीक सहर आन के सेल्मे बाक्त। 5 मिनु बाशामी मेको लोत्र नेंशा, रामाह कली बोल्यो सेल्चा प्रोंइशा, आ गेय नेल्ल तेक्गा बाक्त। 6 मिनु नोले पिप आसामी यहूदा डा मुर नेल्ल आन कली खुप्शा, रामाह लाइशशा, रामाह सहर डा सेल्तीक फुल्लु नु शी नेल्ल कुरपाइशशा लदा बाक्त। बाशाम मेको फुल्लु नु शी रामाह सहर बोल्यो सेल्चा कली मेकेर वोइशशा बाक्माक्त। मिनु पिप आसाम मेको चाक्शो फुल्लु नु शीम गेबा नु मिस्पा सहर आस कली बोल्यो सेला बाक्त।

परमप्रभु आ लोत्र पाइब हानानी

7 मेना परमप्रभु यावे आ लोत्र पाइब हानानी यहूदा डा पिप आसा आ बाक्तीकेम जाक्शा, मेको कली “गे अराम डा पिप कली थमा सुइक्तीनी नु परमप्रभु यावे, इन परमप्रभु कली थमा मसुइक्नी। मोपतीके इस्राएल डा पिप आ लडाइ पाइब इन डोंइती रे प्रोक्चा ताम्तेक्म। 8 मार, डोंइती एथीयेपीया लिबीया डा लडाइ पाइबपुकी शुश मबाक्मा? बग्गी नु शारा डोइक्ब हिक्ने मचाप्चा डा शुश मबाक्मा? मेना गे परमप्रभु यावे कली थमा सुइक्तीनी। मिनु मेकोमी नेल्ल आन कली इन गुइमी गेप्तु। २इतिहास १४:८-१२ 9 परमप्रभु यावेमी सु आन थुंम थमा पा मेको नु बाक्बा, मेकोमी रागी नेल्लेम माल्ना माल्न मेको कली कोत्रशा, मेको आन कली बोल्यो सेल्ब। गे अराम डा पिप नु गारशा मरिम्शो पाइतीनी। मुल रे गे लडाइ पस डा पस बाक्चा माल्नीनी” देंमाक्त। हितोपदेस १५:३ 10 मिनु परमप्रभु यावे आ लोत्र पाइबम मोदेशो लोत्र पा, आसा कली शुश गाइक्पदा बाक्त। मिनु मेको कली फ्रेंशा चोक्शा वोइक्पदा बाक्त। मेना पिप आसामी का निक्शी अरु मुर आन कली यो काइ मरिम्शो पवा बाक्त। २इतिहास १८:२६; मत्ती १४:३

11 पिप आसा आ पशो, डोंइती नु नोले डा नेल्ल, मेको यहूदा नु इस्राएल डा पिप आन इतिहास डा किताबम ब्रेक्शो बाक्नीम। 12 आसाम सासन पशो ३९ बर्स दुम्मेनु, आ खोइली राक्तीक रोइ पवा बाक्त। मिनु मेको रोइ शुश ठेयब दुम्माक्त। शुश रोइ पवा बाक्त हना यो परमप्रभु यावे आ वारच पशो कली ममाल्थु, ओरुक्ती खेक्ब आन कली मला बाक्त। 13 मिनु आसा आ सासन पशो ४१ बर्स दुम्मेनु मेको बेक्माक्त। 14 मिनु मुरपुकीमी दाऊद आ सहरम आसामी सेल्पांडसीशो बेक्शो मुर कली वोइक्तीक कोठामी वोदमे बाक्त। मेकेर जोक्ब मुरुमी थम ब्रोत्रशो मार मार ब्वाइशशा ब्रोत्रशो रिना पाइब घांस सेल्शा, मेको आ तारी वोदमे बाक्त। मिनु मुरपुकीम मेको पिप कली मान पचा, दे थम ठेयब मी मुइक्तमे बाक्त। २इतिहास २१:१९; येरमीया ३४:५

17

यहूदा डा पिप येहो-शाफात

1 मिनु पिप आसा बेक्म नोले आ तौ येहो-शाफात पिप दुम्माक्त। मिनु मेकोमी “इस्राएल कली तेक्नुड” दे आ लडाइ पाइब बोल्यो सेला बाक्त। 2 मेकोमी यहूदा डा बोल्यो सेल्शो सहर नेल्लेमी लडाइ पाइबपुकी वोदा बाक्त। मिनु यहूदा नेल्ल नु आ आफ आसाम ग्राशो एफ्राइम डा सहरपुकी यो खाल पचा कली लडाइ पाइब वोदा बाक्त। 3 मिनु परमप्रभु यावे येहो-शाफात नु बाक्माक्त। मारदे हना मेको आ किकी पिपी दाऊद आ डोंइती डा नाक्ती रिम्शो पा गाक्शो खोदेशो पा गाक्माक्त। मेकोमी वारच पचा कली बाल देवता आन कली ममला बाक्त। 4 तन्न मेको परमप्रभु यावे, आ आफ आ परमप्रभु आ नोले खोदा बाक्त। मिनु मेको आ शेंशो पवा बाक्त। मेको इस्राएल डा पिप आन लांम मगाक्माक्त। 5 मोपतीके परमप्रभु यावेम मेको आ राज्य बोल्यो सेला बाक्त। मिनु यहूदा डा मुर नेल्लेमी येहो-शाफात कली मार मार चाक्गमे बाक्त। मिनु मेको शुश शोंप पाइशशा नु मान ताइब दुम्माक्त। २इतिहास १८:१ 6 मेकोमी परमप्रभु यावे आ लांम गाक्चा कली काइ महिंथु आ थुं बारपदा बाक्त। मेकोम यहूदाम बाक्शो डांडा डा थान नु मूर्ति पाइशशा थाम प्रेशशा ताइक्ता बाक्त।

7 मेकोमी सासन पशो आ बर्स सांमी आ राज्य डा ठेयब गेय पाइब बेन-हेल, ओबदिया, जकरिया, नेथनेल नु मीकाया आन कली यहूदा डा सहरपुकीम मुर आन कली शेंचा कली सोइक्तीमी बाक्त। 8 मेकोपुकी नु लेवीपुकी बाक्मा बाक्त। मेको लेवीपुकी सु सु बाक्मा बाक्त देंशा हना, शेमायाह, नेथन्याह, जेबदीयाह, आसाहेल, शेमीरामोथ, येहो-नाथान, अदोनीयाह, तोबीयाह, तोबा-दोनीयाह बाक्मा बाक्त। मिनु मेको नु चढेब एली-शामा नु येहोराम यो बाक्सा बाक्त। 9 मेकोपुकीम परमप्रभु यावे आ अरेतीक लोत्र डा किताब मेको नु बाक्शो बाक्त। यहूदा डा सहर नेल्ल डा मुर आन कली शेंदमे बाक्त।

येहो-शाफात आ सक्ति

10 मिनु यहूदा आ एर ओंथ बाक्शो राज्य डा मुर नेल्ल परमप्रभु यावे क्येडा हिंमा बाक्त। मोपतीके मेकोपुकीम येहो-शाफात नु लडाइ मपामे बाक्त। 11 पलिस्ती आन दातेमी का निक्शीमी येहो-शाफात कली आन गेचा मालशो चांदी चाक्गमे बाक्त। मिनु अराबीपुकीमी यो मेको कली ७ हजार ७ सहे सांड नु ७ हजार ७ सहे बोका चाक्गमे बाक्त। १ राजा ५:१ 12 मिनु येहो-शाफात शुश सक्ति पाइशो दुम्माक्त। मेकोमी यहूदामी गारो हिरशा, बोल्यो दरवार नु मार मार वोइक्तीक सहरपुकी सेला बाक्त। 13 मेकोमी यहूदा डा सहरपुकीम शुश सेल्लिक गेय यो पवा बाक्त। यरूसलेम सहरम लडाइ पाइब नु थम बोल्यो लडाइ पस जोक्ब मुर बाक्मा बाक्त। 14 मेको यहूदा डा मुर आन खिं खिं डा हजार हजार लडाइ पाइब आन कप्तान आदनाह बाक्माक्त। मेको नु लाख सां सक्ति पाइशो लडाइ पाइब बाक्मा बाक्त। 15 मेको आ नोले डा येहो-हानान बाक्माक्त। मेको लाख निक्शी ८० हजार लडाइ पाइब आन कप्तान बाक्माक्त। 16 मेको आ नोले डा जिक्री आ तौ अमासीयाह बाक्माक्त। मेको परमप्रभु यावे आ गेय पाइब कली कोव्रब यो बाक्माक्त। मेको लाख निक्शी सक्ति पाइशो लडाइ पाइब आन कप्तान बाक्माक्त। 17 बेन्यामीन आ थर डा एली-आदा बोल्यो लडाइ पाइब बाक्माक्त। मेको नु लाख निक्शी लिब्रा आप्व नु तेतीक कुरब बाक्मा बाक्त। 18 मिनु मेको आ नोले डा येहो-जाबाद बाक्माक्त। मेको नु लाख का ८० हजार या कुरशो लडाइ पाइब बाक्मा बाक्त। 19 मिनु मेको नेल्ल पिप आ लडाइ पाइब बाक्मा बाक्त। मेको प्रोंइशा अरु लडाइ पाइबपुकी यो यहूदा डा गारो हिरशो सहरम बाक्मा बाक्त।

18

मीकायाम आहाब कली लोव्र पशो

१ राजा २२:-

1 मिनु पिप येहो-शाफात शुश शोंप पाइशो, मान ताइब नु थाम्पा ठेयब मुर दुम्माक्त। मिनु मेकोमी आहाब आ खिं डा मुर नु ग्युंवे पा नाता सेला बाक्त। 2 मिनु इच्का बर्स नोले मेको आहाब कली गुम्थ सामरीया लमाक्त। मिनु आहाबम मेको नु आ मुर आन कली थुल्चा, दे शुश भेडा नु ब्यफ क्योरा बाक्त। मिनु आहाबमी येहो-शाफात कली रामोथ-गिलाद नु लडाइ पचा कली क्युक्गा बाक्त। 3 मिनु इस्राएल डा पिप आहाबमी यहूदा डा पिप येहो-शाफात कली “रामोथ-गिलाद नु लडाइ पचा कली गे आं कली वारच पाइक्नीनी?” देंमाक्त। मिनु मेकोमी “गो गे नु बाक्नुड। आं मुर इन मुर यो बाक्नीम। एको लडाइम गो इन कली वारच पाइक्नीकी” देंमाक्त।

4 तन्न येहो-शाफातमी इस्राएल डा पिप कली “गे डोंइती परमप्रभु यावेम मेको लडाइ आ पर्बम मार देंबा? पुनीन” देंमाक्त। २ राजा ३:११ 5 मिनु इस्राएल डा पिपमी ४ सहे आ नोले दुम्ब लोव्र पाइब आन कली पुक्शा, मेको आन कली “गो रामोथ-गिलाद कली लडाइ तोड देय मतोड?” दे हिल्लो पामी बाक्त। मिनु मेकोपुकीम “लडाइ तोने। मारदे हना परमप्रभुम मेको आन कली इन गुडम गेब” देंमा बाक्त। 6 तन्न येहो-शाफातमी “परमप्रभु यावे कली हिल्लो पचा कली थमा पा परमप्रभु यावे आ लोव्र पाइब एकेर सुइ मबाक्नीमी?” दे हिल्लो पवा बाक्त। 7 मिनु इस्राएल डा पिपमी येहो-शाफात कली “परमप्रभु यावे कली हिल्लो पचा कली मुर का बाक्ब। मेको इम्लाह आ तौ मीकाया बाक्ब। तन्न गो मेको कली काइ मदाक्नुड। मारदे हना आं पर्बम गेनायो रिम्शो लोव्र मपाइब। मेकोमी मरिम्शो लोव्र डा लाक्शा अरु मारेइ मदेब” देंमाक्त। मिनु येहो-शाफातमी “पिपम मोदेशो लोव्र पचा मदुम्ब” देंमाक्त। 8 मिनु इस्राएल डा पिपम आ गेय पाइब का कली ब्रेशशा “इम्लाह आ तौ मीकाया कली रीब पा चाक्को” दे ब्रथ सोइक्ता बाक्त। 9 मेना इस्राएल डा पिप नु यहूदा डा पिप येहो-शाफात आस आस पिपम फेक्तीक वा फेक्शा, सामरीया डा ठेयब लाप्चो ओव्रतीक डा चेरब तुप्तीक दिंमम आस आस ठेयब नित्तीकेमी बाक्शो बाक्सा बाक्त। मिनु मेको नोले दुम्ब लोव्र पाइब नेल्ल मेको आस डोंइती नोले दुम्ब लोव्र पन पन बाक्शो बाक्मा बाक्त। 10 मेको आन दाते डा केनानाह आ तौ सिदकीयाहमी फलाम के ग्रोव्र सेल्सीशो बाक्माक्त। मिनु मेकोमी “परमप्रभु यावेम मार देंत देंशा हना ‘एको ग्रोव्रम गेम अराम डा मुर आन कली खुशा खतम पोक्नीनी’ देशो बाक्ब” देंमाक्त। 11 मिनु अरु नोले दुम्ब लोव्र पाइब नेल्लेम यो मोदेशो लोव्र पशो बाक्मा बाक्त। मेकोपुकीम “रामोथ-गिलाद कली लडाइ तोशा ग्राडीन। मारदे हना मेको परमप्रभु यावेम पिप आ गुडमी गेब” देंमा बाक्त।

12 मिनु मीकाया कली ब्रेशशा चाक्ब मुरुम मीकाया कली “नेनीन, अरु नोले दुम्ब लोव्र पाइबपुकी नेल्ल थुं का दुम्शा, पिप कली रिम्शो लोव्र पशो बाक्नीम। मिनु इन लोव्र यो मेको आन देशो नु गारचा डा रिम्शो लोव्र पने” देंमाक्त। 13 तन्न मीकायाम “परमप्रभु यावे ब्रोंइशा बाक्शो खोदेशो पा, आं परमप्रभुम मार देंबा, मेको लोव्र ला पाइनुड” देंमाक्त।

14 मिनु पिप आ बाक्तीक जाक्मेनु, पिप आहाबमी मेको कली “मीकाया, गो रामोथ-गिलाद कली लडाइ तोक देय मतोक” दे मदा बाक्त। मिनु मेकोमी “लडाइ तोने। मिनु ग्राडीन। मारदे हना परमप्रभु यावेमी मेको इन गुडम गेब” देंमाक्त। 15 तन्न पिपम मेको कली “परमप्रभु यावे आ नेम थमा लोत्र ला पचा, दे गिश खेयप इ कली कसम जपाइक्नना?” दे मदा बाक्त। 16 मिनु नोले मीकायाम “गो इस्राएली नेल्ल आन कली गोठला मबाक्शो भेडा खोदेशो पा पहाडम ब्रशो ताता। मिनु परमप्रभु यावेमी ‘मेको मुर आन के होत्रप मबा। मेको नेल्ल थुं नाइश्शा आन खिं लेम्मल’ देशो नेता” देंमाक्त। मत्ती ९:३६ 17 मिनु इस्राएल डा पिपम येहो-शाफात कली “मार, एकोम आं पबर्म मरिम्शो लोत्र डा लाक्शा अरु मारेइ मदेब, खतम लोत्र ला देब, दे गो इन कली मदेडा डा?” देंमाक्त।

18 मिनु मीकायाम “मुल परमप्रभु यावे आ लोत्र नेनीन। गो परमप्रभु यावे कली आ ठेयब नित्तीकेम निश्शो ताता। मिनु आ स्वर्ग डा गेय पाइब नेल्ले आ ग्युरा गे नु आ पेरा गे राप्शो बाक्तेकम। यसैया ६:१ 19 मिनु परमप्रभु यावेमी ‘इस्राएल डा पिप आहाब कली रामोथ-गिलाद नु लडाइ पा साइक्चा पुंडसीचा कली सुमी मेको कली जोल पाइबा?’ देशो नेता। मिनु काम लोत्र का पाप्तु, अर्कोमी अर्को लोत्र पाप्तु। 20 नोले सोक्त का परमप्रभु यावे आ डोंइती जाक्शा ‘गो मेको कली जोल पाइनुड’ देंत। अय्युब १:६ 21 मिनु परमप्रभु यावेमी ‘दोपा?’ दे हिल्लो पाप्तु। मिनु मेकोमी ‘गो लशा आहाब आ नोले दुम्ब लोत्र पाइब नेल्ल आन शोत्रम जोल पाइब सोक्त दुम्नुड’ देंत। मिनु परमप्रभु यावेमी ‘गे मेको कली जोल पावो। गे मेको पने चाप्नेवे। लावो’ देंत। 22 लो कोत्रडीन, परमप्रभु यावेमी इन नोले दुम्ब लोत्र पाइब आन शोत्रम जोल पाइब सोक्त का वोइश्शो बाक्त। परमप्रभु यावेम इन कली खतम सेल्चा थुं पने थुम्शो बाक्ब” देंमाक्त।

23 मिनु केनानाह आ तौ सिदकीयाह इर डोइश्शा लशा, मीकाया आ चोत्रचो राप्शा “दोपा परमप्रभु यावे आ सोक्त आं रे पा गे नु लोत्र पथ लम” देंमाक्त। 24 मिनु मीकायाम “मेको गे हिंशा, आगा डा कोठामी खुंडसे नाक्ती कका तुइक्नेवे” देंमाक्त। 25 मिनु नोले इस्राएल डा पिपम “मीकाया कली लाइश्शा, सहर कली हुकुम पाइब आमोन नु पिप आ तौ योआश आस कली गेन। मिनु मेको आस कली 26 ‘पिप आ देंशो मार बाक्ब देंशा हना, मेको मुर कली जेल्खानम चोक्शा वोतीन। रिम्शो पा लेशशा मजाक्डा सम्म, एको कली इक्का शोब्ले नु ब्वाक्कु ला गेने’ दे पिपम हुकुम पशो बाक्ब देनीन” देंमाक्त। २इतिहास १६:१० 27 मिनु मीकायामी “गे रिम्शो पा लेशशा जाक्तीनी हना, परमप्रभु यावे आं रे मब्वाक्शो बाक्माक्त, देंनुड” देंमाक्त। मिनु मेकोमी चिनु लोत्र तेम्शा “मुर नेल्लेमी आं लोत्र नोफा दाइश्शा नेनीन” देंमाक्त।

आहाब साइक्चा पुंडसीशो

28 मिनु इस्राएल डा पिप नु यहूदा डा पिप येहो-शाफात रामोथ-गिलाद ग्येत्थ लसा बाक्त। 29 मिनु इस्राएल डा पिपम येहो-शाफात कली “गो मतुइक्चा डा पा अर्को वा फेक्शा, लडाइम लाइनुड। तन्न गे इन पिपम फेक्तीक वा फेक्शा बाक्कीन” देंमाक्त। मोपा इस्राएल डा पिप अर्को वा फेक्शा, लडाइम लमाक्त। 30 मिनु अराम डा पिपम आ बग्गी चलेब आन कप्तान आन कली “इस्राएल डा पिप कली डा लाक्शा, अरु आइक्च ठेयब सुइ नु लडाइ मपने” दे माइश्शो बाक्माक्त। 31 मिनु बग्गी चलेब आन कप्तानमी येहो-शाफात कली तशा “मेकोन इस्राएल डा पिप बाक्ब” देंमाक्त। मिनु मेको कली लडाइ तोथ लमा बाक्त। तन्न येहो-शाफात ठेयब सेंदा पा वाइ ब्रेम्माक्त। मिनु परमप्रभु यावेमी मेको कली वारच पशा, मेको बग्गी चलेब आन कली मेकेर रे लेप्पदा बाक्त। 32 मारदे हना बग्गी चलेब लडाइ पाइब आन कप्तानपुकीमी “एको इस्राएल डा पिप मबाक्माक्त” दे तुइश्शा, मेको कली खेदा पचा प्रोन्मे बाक्त। 33 तन्न मुर काम आ लिब्रा खुक्शा, हेंथे पा ब्रा आप्शा सोइक्ता बाक्त। मिनु मेको ब्रामी इस्राएल डा पिप आ कुचु सुम्तीके नु कुचु तेक्तीक आस दातेम ख्रवा बाक्त। मिनु पिपम आ बग्गी चलेब कली “बग्गी हिरशा लडाइ रे ग्रुंडदी। आं कली ब्राम ख्रशा गार सेलती” दे मदा बाक्त। 34 मेको लडाइ नाक्त रेन दुम्ना दुम्न लमाक्त। मिनु इस्राएल डा पिप आ बग्गीम राप्शा, अरामी नु लडाइ पशो कोत्रडा बाक्त। मेको नाक्त रे मोपान बाक्माक्त। मिनु नां लाक्गानु, मेको बेक्माक्त।

19

येहूमी येहो-शाफात कली लोत्र पशो

1 मिनु यहूदा डा पिप येहो-शाफात मारेइ मदुम्थु आ दरवार यरूसलेम लेशशा जाक्माक्त। 2 मिनु परमप्रभु यावे आ नोले दुम्ब लोत्र पाइब हानानी आ तौ येहू मेको कली ग्रुम्थ जाक्माक्त। मिनु मेकोमी येहो-शाफात कली “मार, मरिम्शो

पाइब कली वारच पाइशशा, परमप्रभु यावे आ जोरी सत्रु कली दाक्का ठीक बाक्का? इन पशो तशा परमप्रभु यावे इन परबम गाइक्ताक्क। 3 मो हना यो गे का निक्शी रिम्शो गेय यो पशो बाक्नीनी। गे रागी रे मूर्ति थाम आन कली पुंइताक्नी। मिनु परमप्रभु आ नोले खोइक्का थुं पाइतीनी” देंमाक्त। २इतिहास १७:३,६

निसाफ पाइबपुकी वोइशशो

4 येहो-शाफात आ दरवार यरूसलेमम बाक्माक्त। मिनु मेको लेंशा बेयर-शेबा रे एफ्राइम डा पहाड डा मुर आन बाक्तीक लशा, मेको आन कली लेंशा परमप्रभु यावे, आन किकी पिपी आन परमप्रभु गे लेशशा चाक्मी बाक्त। 5 मेकोमी यहूदा डा बोल्यो सहर नेल्लेमी निसाफ पाइबपुकी वोदा बाक्त। 6 मिनु मेकोमी मेको निसाफ पाइब आन कली “गेपुकीम मार पाइनीनी, मेको मिम्तीन। गेपुकीम निसाफ नेंपाइक्नीनु, मुर आन कली ममाइ तन्न परमप्रभु यावे आ डोंइती निसाफ पाइनीनी। गे निसाफ पची ना मेको गे नु बाक्ब। ब्यवस्था १:१७ 7 परमप्रभु यावे कली मान पा हिनीन। होस पा निसाफ पने। मारदे हना परमप्रभु यावे, इं परमप्रभुमी दूली निसाफ मपाइब। मेको कुल मकोवब नु घूस मताक्ब निसाफ पाइब बाक्ब” देंमाक्त। प्रस्थान १८:२१; ब्यवस्था १०:१७; रोमी २:३१

8 येहो-शाफातम यरूसलेममी लेवीपुकी, चढ़ेबपुकी नु इस्राएल डा खिं खिं आन ठेयब मुर आन कली परमप्रभु यावे आ डोंइती निसाफ पचा कली नु जीब आन दातेमी गारपाइक्का कली वोइशशो बाक्माक्त। मिनु मेकोपुकी यरूसलेमम बाक्बाक्का बाक्त। ब्यवस्था १७:८-९; ब्यवस्था १९:१७ 9 मिनु मेकोमी मेको आन कली “इन गेय दोपा पचा देंशा हना, इन पशो नेल्लेमी परमप्रभु यावे कली मान पा हिंशा, थमा सुइक्का डा दुम्शा, इन थुं नेल्लेमी पचा मालनीनी। 10 मिनु अरु सहर डा आइक्च निसाफ पाइब इन लोक्ब, इन बाक्तीक सहरम इन कली हिल्लो पचा कली जाक्नीमी। मार बाक्त हना यो, मुर साइशशो आ परबम बाक्त हना यो, परमप्रभु यावे आ अरेशो लोव्र आ परबम बाक्त हना यो, शेंतीक लोव्र आ परबम बाक्त हना यो, फुल्लुम मुशा ब्रेक्शो लोव्र नु निसाफ पतीक लोव्र बाक्त हना यो, गे मेको आन कली शेंचा मालनीनी। मोपा मेकोपुकीमी दूली मपथु, परमप्रभु यावे आ डोंइती पाप मपाइनीम। मेकोपुकीम मरिम्शो पाम्तेक्म हना, परमप्रभु इन परबम नु इन लोक्ब, आइक्च निसाफ पाइब आन परबम गाइक्क। पाप मपथु, रिम्शो शेंदीने। 11 परमप्रभु यावे आ परबम तुइक्ब नु इन कली वारच पाइब ठेयब चढ़ेब अमारयाह बाक्ब। मिनु पिप नु राज्य आ परबम तुइक्ब यहूदा आ थर डा मुर आन ठेयब मुर इश्माएल आ तौ जेबदीयाह इन कली वारच पाइब बाक्ब। लेवीपुकीम चहिं इन निसाफ पची ना ब्रेक्ब नु मार मार वारच पाइब बाक्नीम। महिंथु इन गेय पने। परमप्रभु यावे रिम्शो पाइबपुकी नु बाक्कल” दे अर्ती गेमी बाक्त।

20

येहो-शाफातम ग्राशो

1 मिनु नोले मोआबी अम्मोनी नु का निक्शी सेइर डांडा रे अर्को जात डा मेउनी माइशशो मुरपुकी येहो-शाफात नु लडाइ पथ जाक्का बाक्त। 2 मिनु मुरपुकीमी येहो-शाफात कली “थम ठेयब हुल का लडाइ पाइब एदोम रे इन कली लडाइ तोचा कली जाक्शो बाक्नीम। मेकोपुकी हिक्सी समुन्द्र आ आइक्की हांबु रे पिना पिन बाक्नीम। मेको हासासोन-तामार जाक्दीत्तेक्म” दे लोव्र नेंपदमे बाक्त। मेको रागी कली एन-गेदी यो देंनीम। 3 मिनु येहो-शाफातम हिंशा, परमप्रभु यावे कली पुंइचा, दे थुं पवा बाक्त। यहूदा रागी डा मुर नेल्ल कली “माइजा बाक्कीन” दे हुकुम पवा बाक्त। 4 मिनु यहूदा डा मुरपुकी परमप्रभु यावे कली “वारच पाइक्की” दे पुंइचा कली बुक्का बाक्त। यहूदा रागी डा सहर नेल्ल डा मुरपुकी परमप्रभु यावे कली पुंइथ जाक्का बाक्त। २इतिहास १५:९-१५

5 मिनु येहो-शाफात परमप्रभु यावे आ खिं डा नक लाडगामी यहूदा नु यरूसलेम डा खुम्सीशो मुर आन डोंइती राप्शा 6 “आंइ परमप्रभु यावे, आंइ किकी पिपी आन परमप्रभु गे स्वर्गम बाक्ब परमप्रभु मननी डा? गे रागी रागी डा राज्य सासन पाइब मननी डा? सक्ति नु अधिकार नेल्ल इन के बाक्ब। गे इन क्येडा ग्राब सुइ मबाक्नीम। उत्पत्ती १८:२५; १इतिहास २९:१२ 7 आंइ परमप्रभु, मार, गे इन मुर इस्राएली जाक्मानु, एको रागी डा मुर आन कली मखेरनी डा? इन वारच अब्राहाम नु आ चच युइ आन कली मेको रागी गेना हना यो कली गेशो मननी डा? 8 मेकोपुकी मेकेर बाक्शो बाक्तेक्म। मिनु इन नें कली मान पचा, दे इन कली बाक्तीक खिं का सेल्शो बाक्तेक्म। 9 मेकोपुकीम ‘आंइ कली ठेयब श्येत दुम्त हना, लडाइ दुम्त हना, निसाफ पतीके, मुर बेक्तीक रोइ, अन्काल दुम्त हना, इन खिं इन डोंइती राप्नीकी। मारदे हना इन नें कली मान पशो खिं रे आंइ श्येत जशा पुंइशो लोव्र नेंशा, आंइ कली प्रोंइनीनी’ दे पुंइतेक्म।

२इतिहास ६:२८-३० 10 आंइ किकी पिपी इजीप्त रे जाक्मानु, गे इस्राएली आन कली 'अम्मोनी, मोआबी नु सेइर डांडा डा मुर आन रागी मओव्रडीन' देशो बाक्तीनी। मोपतीके मेकोपुकी एर ओंथ रे हिरशा, मेको आन कली खतम मसेल्थु लमा बाक्त। ब्यवस्था २:४,५,९,१९ 11 तन्न मुल कोव्रडीन, एको मुरपुकीम आंइ कली दोदेशो पा क्येक्क लेत्नीमी। गे आंइ कली गेशो आंइ थेरशो रागी रे आंइ कली खेरचा कली जाक्शो बाक्तीनी। 12 आंइ परमप्रभु, गे मेको आन कली निसाफ मपाइनीनी डा? मारदे हना गोपुकी एको शुश मुर आन डोंइती मारेइ पने मचाप्ब बाक्तीनी। मुल गो मार पचा माल्नीकी मारेइ मतुइक्कीनी। तन्न गो इन गे कोव्रनीकी” दे पुना बाक्त।

13 मिनु यहूदा डा मुर नेल्ले, मेको आन मीशपुकी, आन आल ब्रेच नेल्ल परमप्रभु यावे आ डोंइती राम्मा बाक्त। 14 मिनु परमप्रभु यावे आ सोक्तीम खुम्सीशो मुर नेल्ल आन दातेमी आसाफ आ खिं डा लेवी याहासीएल कली सुमा बाक्त। मेको जकरिया आ तौ, बेनायाह आ चच बाक्माक्त। आ अरु किकी पिपी यिएल नु मत्तन्याह बाक्सा बाक्त। 15 मिनु मेकोमी “यहूदा नु यरूसलेमम बाक्ब मुर नेल्ले नु पिप येहो-शाफात नेनीन। परमप्रभु यावेमी इन कली मार देंब देशा हना 'गे एको लडाइ पाइब आन ठेयब हुल तशा महिनीन। इन थुं लुक्च मलल। मारदे हना एको लडाइ परमप्रभु के बाक्ब। इन के ममाइ। प्रस्थान १४:१३-१४ 16 दीसा मेकोपुकी नु लडाइ पथ बुपीन। मेकोपुकी जीज डा ग्येत्थ लतीक लां रे पा कुइनीम। मिनु गोपुकीम मेको आन कली येरूएल डा गोरशो रागी डा बरखे खोला क्येडा आइदी गुम्नीनी।

17 यहूदा नु यरूसलेम डा मुर, गोपुकीम एको लडाइ पचा ममाल्नीनी। आं देंतीकेम लने। मिनु रिम्शा बाक्कीन। इन पा डा गो परमप्रभु यावेम लडाइ पा ग्राशो, कोव्रडीन। महिनीन। इन थुं लुक्च मलल। गे गूशा, मेकोपुकी नु लडाइ पथ लने। मारदे हना परमप्रभु यावे गोपुकी नु बाक्ब' ” देंमाक्त।

18 मिनु येहो-शाफातम खपीम बाप्शा सेउ पवा बाक्त। मिनु यहूदा नु यरूसलेमम बाक्ब मुर नेल्ल परमप्रभु यावे आ डोंइती बाप्शा, परमप्रभु यावे कली ठेयब सेल्मे बाक्त। 19 मिनु लेवी, कोहाथ नु कोराह आन मुर बोक्शा परमप्रभु यावे, इस्राएली आन परमप्रभु कली ठेयब सेंदा पा ठेयब सेल्तीक कुम्सो पामे बाक्त।

20 मिनु मेकोपुकी सुनी कना बोक्शा, तेकोहा सहर डा गोरशो रागीम लमा बाक्त। मिनु मेकोपुकी गूशा लमानु, येहो-शाफातम “यहूदा नु यरूसलेमम बाक्ब मुर नेल्लेम आं लोव्र नेनीन। गे परमप्रभु यावे, इन परमप्रभु कली थमा सुतीन। मिनु गे ग्रानीनी। परमप्रभु यावे आ लोव्र पाइब आन लोव्र थमा सुइश्शा बाक्कीन” देंमाक्त। यसैया ७:९; यसैया १८:१६ 21 मिनु मेकोमी मुरपुकी नु सल्ला पशा, लडाइ पाइब आन डोंइती रिम्शो वा फेक्शा, परमप्रभु यावे कली ठेयब सेल्तीक कुम्सो पाइब योव्रमी बाक्त। मिनु मेकोपुकीम “परमप्रभु यावे कली 'गे रिम्शो पाइब बाक्तीनी। मारदे हना इन दाक्तीक गेना हना यो लीब' ” दे कुम्सो पामे बाक्त। भजन संग्रह १०६:१ 22 मिनु मेकोपुकीम कुम्सो पा परमप्रभु यावे कली ठेयब सेल्मे चोटीन परमप्रभु यावेमी बाप्ब हुल का वोदा बाक्त। मिनु यहूदा नु लडाइ पथ जाक्ब अम्मोनी, मोआबी नु सेइर डांडा डा मुर आन कली क्याम्दा बाक्त। 23 मिनु मार दुम्माक्त देशा हना, अम्मोनी नु मोआबी गारशा सेइर डांडा डा मुर आन कली लडाइ पा सदमे बाक्त। मेको आन कली साइक्ने थुम्मे नोले, लीशो मुरपुकी आंम आंमा साइक्मुमा बाक्त।

24 मिनु यहूदा डा मुरपुकी गोरशो रागी डा कोव्रतीक लाइश्शो खिं जाक्शा, लडाइ पाइब आन कली कोव्रडमेनु, मेको आन कली शोल्मो पा खपीम गोल्ला बेक्शो तामे बाक्त। मेको आन दाते डा का सम्म यो प्रोक्ने मचाप्शो बाक्मा बाक्त। 25 मिनु येहो-शाफात नु आ मुरपुकी मार मार रोइक्थ जाक्मा बाक्त देशा हना, मार मार वासी, सुन चांदी के शोंप मार मार थोव्रक थित्मे आंम कली कुरने मचाप्चा डा पा रोइक्तमे बाक्त। मिनु मेको आन बस्तु भाव यो लदमे बाक्त। मेकोपुकीम नाक्त सां सम्म मेको रोइश्शो मार मार खुप्तमे बाक्त। मारदे हना मेको थम शुश बाक्माक्त। 26 मिनु ४ नाक्ती मेकोपुकी बेराकाह डा दिंमम ग्रुम्मा बाक्त। मिनु मेकेर परमप्रभु यावे कली ठेयब सेल्मे बाक्त। मुल सम्म मेको आ नें बेराकाह डा दिंम लीशो बाक्ब। बेराकाह आ अर्थ आसीक बाक्ब। 27 मेको नोले यहूदा नु यरूसलेम डा मुर नेल्लेमी येहो-शाफात कली डोंइती गाक्पाइश्शा, ग्येरसीशा यरूसलेम लेम्मा बाक्त। मारदे हना परमप्रभु यावेमी मेको आन कली आन जोरी सत्रु रे ग्रापाइश्शा, थम ग्येरसीशो बाक्मा बाक्त। 28 मिनु मेकोपुकीम ठेयब नु आइक्च तार पाइश्शो ताप्तीके नु तुराही ताम्ना ताम्न यरूसलेमम परमप्रभु यावे आ खिं जाक्मा बाक्त। 29 परमप्रभु यावेमी इस्राएल आ जोरी सत्रु नु लडाइ पा ग्रामाक्त देशो लोव्र नेंशा, रागी रागी डा राज्य डा मुर नेल्ल परमप्रभु क्येडा हिंमा बाक्त। 30 मिनु येहो-शाफात आ राज्यम लडाइ मडुम्थु, नांइसे बाक्त। मारदे हना आ परमप्रभुमी मेको रागी कली एर ओंथ नेल्ल रे नाइक्पदा बाक्त। २इतिहास १५:१५

येहो-शाफात आ सासन
१राजा २२:४१-५०

31 मोपा येहो-शाफातम यहूदाम सासन पवा बाक्त। मेको पिप दुम्मेनु, ३५ बर्स दुम्शो बाक्माक्त। मेकोमी यरूसलेम मी २५ बर्स सासन पवा बाक्त। मेको आ ममा आ नें अजुबाह बाक्माक्त। मेको शिल्ही आ तमी बाक्माक्त। 32 येहो-शाफात आ आफ आसा आ लांम गाक्माक्त। मिनु मेको लां रे ग्युरा पेरा मपवा बाक्त। मेकोमी परमप्रभु यावे आ डोंइती मार ठीक बाक्मे, मेको पवा बाक्त। 33 मो हना यो मेकोमी डांडा डा थानपुकी नेल्ल मप्रेदा बाक्त। मिनु मुरपुकीम आन थुं आन किकी पिपी आन परमप्रभु गे मलेत्मे बाक्त।

34 मिनु हानानी आ तौ येहूम येहो-शाफात आ पशो डोंइती रे नोले सम्म नेल्ल इस्राएल डा पिप आन इतिहासम ब्रेक्शा, वोइशो बाक्ब।

35 मिनु नोले यहूदा डा पिप येहो-शाफात, इस्राएल डा काइ मरिम्शो पाइब पिप अहाज्याह नु वारचबु दुम्माक्त। मेको काइ मरिम्शो पाइब बाक्माक्त। १राजा २२:५२-५४ 36 मेकोमी टारशीश लशा ग्याप्तीक लेयतीक गेय पचा कली जहाजपुकी सेल्चा कली अहाज्याह नु गारमाक्त। मिनु मेको ठेयब जहाजपुकी एस्योन-गेबेरम सेल्मे बाक्त। 37 मारेशा डा दोदा-वाहु आ तौ एलीएजेरमी येहो-शाफात आ पर्बम परमप्रभु आ लोत्र पवा बाक्त। मेकोमी “गे अहाज्याह नु वारचबु दुम्तीके, परमप्रभु यावेम इन गेय खतम सेल्ब” देंमाक्त। मिनु मेको ठेयब जहाजपुकी खतम दुम्मा बाक्त। टारशीश लचा मतामे बाक्त।

21

यहूदा डा पिप येहोराम

१राजा २२:५१; २राजा ८:१६-२२

1 मिनु येहो-शाफात बेक्माक्त। मिनु मुरपुकीमी मेको आ किकी पिपी आन कली थिम्तीके दाऊद आ सहरम थिम्मे बाक्त। मिनु आ तौ येहोराम पिप दुम्माक्त। 2 येहो-शाफात आ तौपुकी, येहोराम नु आ लोकबपुकी अजारयाह, येहीएल जकरिया, अजारयाह, मिकाएल नु शेफत्याह बाक्मा बाक्त। मेको नेल्ल यहूदा डा पिप येहो-शाफात आ तौ बाक्मा बाक्त। 3 मेको आन आफोम मेको आन कली सुन, चांदी, शुश क्येट लाइब शोप नु यहूदा डा बोल्यो सहरपुकी यो गेशो बाक्माक्त। तन्न मेको राज्य येहोराम कली गेवा बाक्त। मारदे हना मेको आ डोंइती थिशो तौ बाक्माक्त।

पिप येहोराम आ मरिम्शो पशो

4 मिनु येहोराम आ आफ आ पा डा सासन पा बोल्यो दुम्शा, मेकोमी आ लोकब नेल्ल नु इस्राएल डा का निक्शी ठेयब मुर आन कली तरवारम क्योरशा साइक्मी बाक्त। 5 येहोराम पिप दुम्मेनु, ३२ बर्स दुम्शो बाक्माक्त। मेकोमी यरूसलेम ८ बर्स सासन पवा बाक्त। 6 मेकोमी आहाब आ खिं डा मुर खोदेशो पा इस्राएल डा पिप आन लांम गाक्माक्त। मारदे हना मेको आ मीश पिप आहाब आ तमी बाक्माक्त। मेकोमी परमप्रभु यावे आ डोंइती मार मरिम्शो बाक्मे, मेको पवा बाक्त। 7 मो हना यो परमप्रभु यावेमी दाऊद नु पशो कबल आ पतीके दाऊद आ खिं डा मुर आन कली साइक्चा मदाक्ता बाक्त। मारदे हना मेकोमी दाऊद नु आ तौ चच युइ आन कली “इ खिं रे गेना हना यो इस्राएली आन कली सासन पाइब का बाक्ब” देंशो बाक्माक्त। २सामुएल ७:१२; १राजा ११:३६; भजन संग्रह १३२:१७

8 मिनु येहोराममी सासन पवानु, एदोम डा मुर यहूदा नु मदुथु, आंम आ राज्य सेल्शा, आंम पिप सेल्मे बाक्त। 9 मोपतीके येहोराम आ लडाइ पाइबपुकी, कप्तान नु आ बग्गी नेल्ल लाइशशा, एदोम गे लमाक्त। मेकोपुकी नाक्दो बोक्शा, आंम कली, आ कप्तान नु आ बग्गी कली पुम्ब एदोमी नु लडाइ पा खेरमे बाक्त। 10 एदोम मुल सम्म यहूदा डा सासन पाइब नु मदुशो बाक्ब। मेना लिब्ना यो येहोराम आ मरिम्शो सासन आ पर्बम बोक्माक्त। मारदे हना येहोरामम परमप्रभु यावे, आ किकी पिपी आन परमप्रभु कली प्रोंइशो बाक्माक्त।

11 मेकोमी यहूदा डा पहाडमी डांडा डा थानपुकी सेला बाक्त। मिनु मेकोमी यरूसलेमम बाक्ब मुर आन कली मूर्ति पूजा पा परमप्रभु कली प्रोंइपाइक्मी बाक्त। मिनु यहूदा कली दूली लांम गाक्पदा बाक्त। 12 मिनु येहोराममी परमप्रभु यावे आ लोत्र पाइब एलीया रे चिठी का तवा बाक्त। मिनु मेको चिठीमी “परमप्रभु यावेमी मार देंत देंशा हना, परमप्रभु यावे, इन किकी पिपी दाऊद आ परमप्रभुम ‘गे इ आफ येहो-शाफात नु यहूदा डा पिप आसा खोदेशो पा मेको आन लांम मगाक्डे। 13 तन्न गे आहाब आ खिं डा मुर खोदेशो पा इस्राएल डा पिप आ लांम गाक्शा, आहाबमी इस्राएली आन कली परमप्रभु प्रोंइपाइशो हेंथे गाक्शो खोदेशो पा, गे यहूदा नु यरूसलेम डा मुर आन कली मूर्ति पूजा

पपाइश्शा, परमप्रभु कली प्रॉइपाइक्तीवी। मिनु इ आफ आ तौपुकी, इ लोकब आन कली यो साइक्तीवी। मेकोपुकी इं क्येडा रिम्शो मुर बाक्तेक्म। 14 मेको इ पतीके परमप्रभु यावेमी इ खिं डा मुर, इ तौपुकी, इ मीशपुकी नु इ मुर नेल्ल आन कली मुर बेक्तीक रोइ पपाइक्नुड। 15 मिनु गे मसाब कोव्रज डा रोइ पाइनेवे। मिनु मेको रोइम पतीके इ कोव्रज राक्शा इ गा क्यी नाक्त किंत किंत गूनीम' देशो बाक्ब" दे ब्रेक्शो बाक्माक्त।

16 मिनु मेको नोले परमप्रभु यावेमी येहोराम नु लडाइ पपाइक्चा कली पलिस्ती नु एथीयोपीया आ नेक्था बाक्ब अराबी आन कली क्युक्मी बाक्त। 17 मिनु मेकोपुकीम यहूदा कली लडाइ तोशा, आ आगा ओव्रमा बाक्त। मिनु मेकोपुकीम पिप आ दरवारम थिश्शो शोंप नेल्ल, मेको आ तौपुकी नु मेको आ मीशपुकी नेल्ल लदमे बाक्त। मेको आ कान्छा तौ येहो-अहाज डा लाक्शा अर्को तौ मलीमा बाक्त। येहो-अहाज कली अहाज्याह यो देंनीम।

18 मेको नेल्ल दुम नोले परमप्रभु यावेमी येहोराम कली मसाक्ब कोव्रज राक्तीक रोइ पपदा बाक्त। 19 मिनु मेको रोइ पा बर्स निक्शी नोले आ कोव्रज राक्शा, आ गा क्यी गूशा, शुश श्येत जशा बेक्माक्त। मिनु मेको आ मुरपुकीम मेको आ किकी पिपी आन पर्बम पशो खोदेशो पा मेको कली मान पचा कली ठेयब मी ममुइक्तमे बाक्त। २इतिहास १६:१४ 20 मेको पिप दुम्मेनु, ३२ बर्स दुम्शो बाक्माक्त। मेकोमी यरूसलेमम ८ बर्स सासन पवा बाक्त। मेको बेक्मेनु सुइम रोंका मपामे बाक्त। मिनु मुरपुकीमी मेको कली दाऊद आ सहरमी थिम्मे बाक्त। तन्न पिप आन कली थिम्तीकेम मथिम्मे बाक्त। २इतिहास २४:२५

22

यहूदा डा पिप अहाज्याह

२राजा ८:२५-२९

1 मेको नोले यरूसलेम डा मुरपुकीम मेको आ पा डा मेको आ कान्छा तौ अहाज्याह कली पिप सेल्मे बाक्त। मारदे हना अराबी नु जाक्शोपुकीम मेको अरु तौ आन कली साइश्शो बाक्मा बाक्त। मोपतीके येहोराम आ कान्छा तौ अहाज्याह यहूदा डा पिप दुम्माक्त। 2 अहाज्याह पिप दुम्मेनु, २२ बर्स दुम्शो बाक्माक्त। मेकोमी यरूसलेमम बर्स का सासन पवा बाक्त। मेको आ ममा आ नें अथाल्याह बाक्माक्त। मेको ओम्री आ चच बाक्माक्त। 3 मेको यो आहाब आ खिं डा मुर खोदेशो पा मेको आन लांम गाक्माक्त। मारदे हना आ ममामी मेको कली परमप्रभु यावे आ अरेशो मटिचा कली अर्ती गेवा बाक्त। 4 मेकोमी यो आहाब आ खिं डा मुर खोदेशो पा परमप्रभु यावे आ डोंइती मार मरिम्शो बाक्मे, मेको पवा बाक्त। मारदे हना आ आफ बेक्म नोले मेको मुरपुकीमी अर्ती गेशा, मेको कली खतम सेल्मे बाक्त। 5 मेकोमी आन गेशो अर्ती रामोथ-गिलादम अराम डा पिप हजाएल नु लडाइ पचा कली इस्राएल डा पिप आहाब आ तौ येहोराम नु वारचबु दुम्चा बिस्से बाक्त। मिनु अरामीपुकीम मेको कली गार सेल्मे बाक्त। 6 मिनु योराम रामाह सहरम अराम डा पिप हजाएल नु लडाइम दुम्शो गार साचा कली येजेलम लेशशा लमाक्त। मिनु यहूदा डा पिप येहोराम आ तौ अहाज्याह, आहाब आ तौ, योराम कली ग्रुथ येजेलम लमाक्त। मारदे हना मेको रोइ पशो बाक्माक्त। येहोराम योराम यो देंनीम।

7 तन्न परमप्रभु आ मिम्शो खोदेशो पा योराम नु अहाज्याह ग्रुम्सानु, अहाज्याह आ बेक्तीक दुम्माक्त। मेको ग्रुम्शा, अहाज्याह नु येहोराम निम्शी आ तौ येहू कली ग्रुम्थ लसा बाक्त। परमप्रभु यावेमी आहाब आ खिं डा मुर आन कली थुम्पाइक्चा कली येहू कली योव्रशो बाक्माक्त। १राजा १९:१६; २राजा ९:६-७ 8 मिनु येहूम आहाब आ खिं डा मुर आन कली सदानु, अहाज्याह आ गेय पाइब यहूदा डा ठेयब मुरपुकी नु मेको नु पिशो आ लोकब आन तौ आन कली यो थिश्शा साइक्मी बाक्त। २राजा १०:१२-१४ 9 मेको नोले मेकोमी अहाज्याह कली मला बाक्त। मिनु येहू आ मुरपुकीम मेको कली सामरीयाम थित्मे बाक्त। मिनु मेकोपुकीम अहाज्याह कली येहू आ बाक्तीक चाक्शा सदमे बाक्त। मिनु मुरपुकीम मेको आ पर्बम "आ थुं नेल्लेमी परमप्रभु यावे आ नोले खोइक्ब येहो-शाफात आ चच एकोन बाक्ब" दे थिम्मे बाक्त। मेको नोले अहाज्याह आ खिं डा मुर सासन पाइब सुइ मलीमा बाक्त। २राजा ९:२७-२९

अथाल्याह नु योआश

२राजा ११:-

10 मिनु अहाज्याह आ ममा अथाल्याहम आ तौ साइश्शो तुइश्शा, मेकोमी यहूदा डा पिप आ खिं डा मुर नेल्ल आन कली साइक्चा कली बोक्माक्त। 11 तन्न पिप येहोराम आ तमी येहो-शबेआथम अहाज्याह आ तौ योआश कली साइक्चा चिक्शो पिप आ तौ आन दाते रे प्रेंइशा लदा बाक्त। मिनु मेको कली कोव्रब नु मेको आल आस कली इप्तीक

कोठा कामी खुइश्शा, वोइक्सी बाक्त। पिप येहोराम आ तमी येहो-शेबा चढेब येहो-यादा आ मीश बाक्माक्त। मारदे हना अहाज्याह आ दिदी बाक्तीके, मेकोमी योआश कली अथाल्याह आ गुइ रे प्रॉइशा खुइश्शा वोइक्पदा बाक्त। मिनु अथाल्याहम मेको कली साइक्चा मतवा बाक्त। 12 मेको रागीम अथाल्याहम सासन पवानु, योआश मेकोपुकी नु ६ बर्स सम्म परमप्रभु आ खिंम खुइश्शा बाक्माक्त।

23

योआश यहूदा डा पिप दुम्शो

1 मिनु ७ बर्सम येहो-यादा महिंम दुम्शा, सक्ति कोंइदा बाक्त। मेकोमी सहे सहे डा लडाइ पाइब आन कप्तानपुकी, येरोहाम आ तौ अजारयाह, येहो-हानान आ तौ इश्माएल, ओबेद आ तौ अजारयाह, अदायाह आ तौ मासेयाह नु जिक्की आ तौ एली-शाफात नु सल्ला पवा बाक्त। 2 मिनु यहूदा डा सहरपुकी रे लेवीपुकी नु इस्राएल डा खिं खिं डा ठेयब मुर आन कली यरूसलेमम ग्रुम्पाइक्चा कली यहूदा नेल्लेमी लोत्र सोइश्शा, मेकोपुकी जाक्मा बाक्त। 3 मिनु मेकेर जाक्ब खुम्सीशो नेल्लेमी परमप्रभु आ खिंम पिप आ तौ योआश नु कबल पामे बाक्त। मिनु येहो-यादाम मेको आन कली “परमप्रभु यावेमी दाऊद आ तौ चच आन पर्बम देशो लोत्र खोदेशो पा पिप आ तौ पिप दुम्चा माल्ब। 4 मुल गेपुकीम मार पचा माल्नीनी देशा हना, नाइक्तीक नाक्ती गेय पाइब चढेबपुकी नु लेवीपुकी भाग सांमी भाग का ठेयब लाप्चोमी बाक्कीन। 5 मिनु अर्को भाग का पिप आ दरवारम बाक्चा माल्नीम। अर्को भाग काम दरवार आ लाडगा डा ठेयब लाप्चो खाल पने। मिनु अरु मुर नेल्ल परमप्रभु यावे आ लाडगाम बाक्चा माल्नीम। 6 चढेबपुकी नु गेय पाइब लेवीपुकी डा लाक्शा, अरु सुइ आन कली परमप्रभु यावे आ खिं ओत्रचा मगेचा नम। मेकोपुकी ला ओत्रने चाप्नीम। मारदे हना मेकोपुकी परमप्रभु यावे आ डोंइती ठीक सेल्शो बाक्नीम। मिनु अरु मुर नेल्लेम परमप्रभु यावे आ ब्रेक्शो अरेशो लोत्र टिशा पचा माल्नीम। 7 लेवीपुकी नेल्ले आन आन या शेशा, पिप आ एर ओंथ बाक्चा माल्नीम। सुइ परमप्रभु यावे आ खिं ओत्रतेक्म हना, मेको कली साइक्चा माल्नीम। पिप ते लत हना यो, मेकोपुकी मेको नुन लचा माल्नीनी” दे माइक्मी बाक्त।

8 मिनु चढेब येहो-यादाम देशो खोदेशो पा लेवीपुकी नु यहूदा डा मुरपुकी नेल्लेमी पामे बाक्त। मेको नेल्लेम नाइक्तीक नाक्ती गेय पाइब आंम मुर आन कली नु गेय थुम्शा नाइश्शो आन कली चाक्गमे बाक्त। मारदे हना चढेब यहोयादाम सुइ आन कली मप्रॉइशो बाक्माक्त। 9 मिनु चढेब येहो-यादाम लडाइ पाइब आन कप्तान आन कली परमप्रभु आ खिंम बाक्शो दाऊद आ सेल्शो तूतीक नु आइक्च नु ठेयब तेक्तीकपुकी गेमी बाक्त। 10 मिनु मेकोमी मुर नेल्ल आन कली आन गुइ गुइमी या शेशा पिप कली खाल पचा कली वोइक्मी बाक्त। मेको आन कली दक्खिन रे उत्तर सम्म नु चढेतीक आ एर ओंथ हिरशा खिं नेल्ल कली खाल पपाइश्शा वोइक्मी बाक्त। 11 मेको नोले येहो-यादाम पिप आ तौ कली लाडगा गुंइदा बाक्त। मिनु मेको आ पियाम सिरपेच गुप्शा, पिप दुम्तीक कागज गेशा, यहोयादा नु आ तौपुकीम मेको कली पिप सेल्शा, तेल लुक्तमे बाक्त। मिनु मेकोपुकीम ठेयब सेंदा पा “पिप शुश ब्रॉइशा बाक्ल” दे ग्रीमा बाक्त।

12 मिनु अथाल्याहमी मुरपुकीमी आन पिप कली ठेयब सेल्शा शुश रेयके पशो नेना बाक्त। मिनु मेको परमप्रभु यावे आ खिं मुर आन बाक्तीकेम जाक्माक्त। 13 मिनु कोत्रडानु, पिप कली थाम आ नेक्था लाप्चोम राप्शा बाक्शो तवा बाक्त। मिनु कप्तानपुकी नु तुराही ताप्बपुकी पिप आ एर ओंथ बाक्शो बाक्मा बाक्त। मिनु मेको रागी डा मुर नेल्ल पिप आ डोंइती ग्येरशा, तुराही ताप्ना ताप्न बाक्शो बाक्मा बाक्त। मिनु कुम्सो पाइबपुकी ताप्तीक ताप्शा, मुर नेल्ल आन डोंइती कुम्सो पना पन बाक्मा बाक्त। मिनु अथाल्याहमी आ वा खाक्शा, ठेयब सेंदा पा “गो नु रागी नेल्ल खतम! गो नु रागी नेल्ल खतम!” दे शुश गाइश्शा ग्रीमाक्त। 14 मिनु चढेब येहो-यादाम लडाइ पाइब आन कप्तान आन कली “मेको कली मुर आन दाते रे गुंइदीन। मेको आ नोले खोइक्ब नेल्ल आन कली तरवारम क्योरशा सतीन। मेको आन कली परमप्रभु यावे आ खिं आगाम मसतीन” दे अरेमी बाक्त। 15 मिनु मेकोपुकीम मेको कली ग्याइक्तमे बाक्त। मिनु पिप आ दरवार डा शारा लाप्चोम लाइश्शा, सदमे बाक्त।

16 मेको नोले येहो-यादामी, मुर नेल्ल नु पिप कली परमप्रभु यावे आ मुर दुम्चा माल्ब, दे कबल पवा बाक्त। २इतिहास १५:१२ 17 मिनु मुरपुकी नेल्ल बाल देवता आ खिं ओत्रशा, प्रेत्मे बाक्त। मेको कली चढेतीक नु आ मूर्ति नेल्ल फस पोक्गमे बाक्त। मिनु बाल कली चढेब मत्तान कली चढेतीक आन डोंइती सदमे बाक्त। 18 मिनु येहो-यादामी “दाऊदमी देशो खोदेशो पा परमप्रभु यावे आ खिं कोत्रचा कली लेवी आ थर डा चढेब आन कली जिम्मा गेमी बाक्त।

डोंइती दाऊदम मोसामी ब्रेक्शो परमप्रभु यावे आ अरेशो लोव खोदेशो पा कुम्सो पन पन ग्येरना ग्येरन परमप्रभु यावे कली चोशा चढेतीक चढेचा माल्नीम” दे अरेशो बाक्माक्त। २इतिहास ७:६; २इतिहास २९:१५-३० 19 येहो-यादाम मारेइ पा ग्रांघ्रा दिशो दुम्शो मुर आन कली ओव्रचा मगेचा कली परमप्रभु यावे आ खिं डा लाप्चोम खाल पाइबपुकी वोइक्पदा बाक्त। 20 मिनु मेकोमी कप्तानपुकी, ठेयब मुरपुकी, मुर आन कली हुकुम पाइबपुकी नु रागी डा मुर नेल्ल आन कली लाइशशा, पिप कली परमप्रभु यावे आ खिं रे पा आइक्था डा लाप्चो रे ओव्रशा, पिप आ दरवारम चाक्गा बाक्त। मिनु पिप कली पिप आ ठेयब नित्तीकेम निप्पदा बाक्त। 21 मिनु रागी डा मुर नेल्ल ग्येरसमा बाक्त। मिनु अथाल्याह तरवारम क्योरशा साइक्चा पुंडसे नोले सहरमी थुं नाइशशा बाक्तीक दुम्माक्त।

24

परमप्रभु आ खिं लेंशा सेल्शो

२राजा १२:१-१७

1 योआश पिप दुम्मेनु, ७ बर्स दुम्शो बाक्माक्त। मेकोमी यरूसलेमम ४० बर्स सासन पवा बाक्त। मेको आ ममा आ नें बेयर-शेबा डा सिबीयाह बाक्माक्त। 2 मिनु योआशम चढेब येहो-यादा ब्रोंइम सम्म परमप्रभु यावे आ डोंइती मार ठीक बाक्मे, मेको पवा बाक्त। 3 येहो-यादामी मेको कली मीश निकशी योव्रडा बाक्त। मिनु मेको तमी तौ आन आफ दुम्माक्त।

4 मेको आ इक्का नोले योआशम परमप्रभु यावे आ खिं लेंशा ठीक सेल्चा थुं पवा बाक्त। 5 मिनु मेकोमी चढेब नु लेवी आन कली ब्रेशशा “यहूदा डा सहरपुकीम लशा, इस्राएली नेल्ल आन रे परमप्रभु आ खिं लेंशा ठीक सेल्चा कली मेको आन बर्स बर्सम गेतीक क्येट पोक्कीन। एको गेय रीब पा पने” देंमाक्त। तन्न लेवीपुकीम मेको गेय रीब पा मपामे बाक्त। 6 मोपतीके पिपम ठेयब चढेब येहो-यादा कली ब्रेशशा “परमप्रभु यावे आ गेय पाइब मोसामी गोरशो रागीमी मुर आन कली ‘परमप्रभु यावेमी लोव्र पतीक ताम्बु कली क्येट गेचा माल्नीम’ देंशो बाक्ब। मारदे गे लेवीपुकी, यहूदा नु यरूसलेम डा मुर रे पोक्चा माल्शो क्येट रीब पा मचाक्नीनी?” दे हिल्लो पवा बाक्त। 7 डोंइती मेको काइ परमप्रभु कली मटीब मीश मुर अथाल्याह नु आ नोले खोइबपुकीम परमप्रभु आ खिं ओव्रशा, मेकेर डा परमप्रभु यावे आ थोव्रक नेल्ल बाल देवता आ पूजा पतीकेम चलेशो बाक्मा बाक्त। २इतिहास २२:३-४

8 मिनु पिपम मेको आन कली सन्दोस का सेल्पाइशशा “परमप्रभु यावे आ खिं डा ठेयब लाप्चो आ लाडगाम वोतीन” दे अरेमी बाक्त। 9 मिनु मेकोपुकीम यहूदा नु यरूसलेम डा मुर नेल्ल आन कली “परमप्रभु आ गेय पाइब मोसाम गोरशो रागीम इस्राएली आन कली देंशो थाप्चा माल्शो क्येट मुरपुकीम परमप्रभु यावे आ खिंम चाक्चा माल्नीम” देंशा नेंपदमे बाक्त। 10 मिनु ठेयब मुरपुकी नु मुर नेल्लेमी ग्येरशा, आन गेचा माल्शो क्येट चाक्शा, मेको सन्दोस मब्रीम सम्म मेकेर कुर पामे बाक्त। 11 मिनु लेवीपुकीम पिप आ सरकार डा गेय पाइब आन बाक्तीकेम सन्दोस चाक्गामेनु, मेकोपुकीम दोशो क्येट बाक्मे, मेको कोव्रबाक्मा बाक्त। मिनु पिप आ ब्रेक्ब मुरुम मेको ब्रेक्शा, ठेयब चढेब आ गेय पाइबपुकीम मेको सन्दोस श्येत्य सेल्शा, लेंशा आ बाक्तीकेम लाइशशा वोइक्बाक्मा बाक्त। मेकोपुकीम नाक्त किंत किंत मो पा शुश क्येट खुप्तमे बाक्त। 12 मिनु पिप नु येहो-यादाम मेको क्येट परमप्रभु यावे आ खिं डा गेय पाइब आन कली कोव्रब मुर कली गेमी बाक्त। मेकोपुकीम चहिं गारो प्रोक्ब मुर, शी के गेय पाइब नु फलाम नु कांसा के गेय पाइब आन कली ब्रेशशा, गाल्च गेशा, लेंशा परमप्रभु यावे आ खिं सेल्पदमे बाक्त। 13 मिनु मेको गेय पाइबपुकीमी शुश गेय पा लेंशा ठीक पतीके गेय रिम्शो दुम्ना दुम्न लमाक्त। मेकोपुकीम परमप्रभु आ खिं डोंइती डा खोदेशो पा ठीक नु बोल्यो सेल्मे बाक्त। 14 मिनु मेकोपुकीम गेय थुम्मे नोले मेको लीशो क्येट पिप नु येहो-यादा आस कली लेशशा गेमे बाक्त। मिनु मेको क्येटीम परमप्रभु यावे आ खिं कली ग्योबपुकी सेल्मे बाक्त। गेय पचा कली, चोशा चढेचा कली माल्तीक थोव्रकपुकी नु सुन नु चांदी के डाडुपुकी नु ग्योबपुकी सेल्मे बाक्त। यहोयादा बाक्म सम्म परमप्रभु यावे आ खिंम नाक्त किंत किंत चोशा चढेतीक चढेमे बाक्त।

15 मिनु येहो-यादा शुश ब्रोंइशा खूशो दुम्शा, सहे का ३० बर्स दुम्मेनु, बेक्माक्त। १इतिहास २९:२८ 16 मिनु मुरपुकीम मेको कली दाऊद आ सहरम पिप आन कली थिम्तीकेमी थिम्मे बाक्त। मारदे हना मेकोमी इस्राएलमी रिम्शो पवा बाक्त। परमप्रभु नु आ खिं कली यो थम रिम्शो पवा बाक्त।

पिप योआश आ मरिम्शो पशो

17 मिनु येहो-यादा बेक्म नोले यहूदा डा सरकार आ गेय पाइब पिप योआश कली ग्रुथ जाक्शा, मेको कली सेउ पामे बाक्त। मिनु पिपम मेको आन लोत्र नेना बाक्त। 18 मिनु मेकोपुकीम परमप्रभु यावे, आन किकी पिपी आन परमप्रभु आ खिं प्रोइशा, अशेराह आ मूर्ति पाइशशो थाम नु अरु मूर्ति आन कली पूजा पामे बाक्त। मोपतीके परमप्रभु यावे यहूदा नु यरूसलेम डा मुर आन पाप आ पबर्म गाइक्ता बाक्त। 19 मो हना यो परमप्रभु यावेम मेको आन कली आ गे लेप्पाइक्चा कली आ लोत्र पाइबपुकी सोइक्तीमी बाक्त। मिनु मेकोपुकीम मेको आन मरिम्शो पशो कोंइदमे बाक्त। तन्न मुरपुकीम मेको आन लोत्र मनेन्मे बाक्त।

20 मिनु परमप्रभु आ सोक्तीम चढेब येहो-यादा आ तौ जकरिया कली सुमा बाक्त। मिनु मेको मुर आन डोंइती राप्शा मेको आन कली “परमप्रभुमी मार देशो बाक्त, देशा हना, ‘गे मारदे परमप्रभु यावे आ शेंशो मपाइनीनी? मोपतीके गे गेना हना यो श्येत जशा, रिम्शो मदुम्नीनी। गेपुकीम परमप्रभु यावे कली प्रोंइतीके, मेकोमी यो इन कली प्रोंइशो बाक्ब’ देशो बाक्ब” देंमाक्त। मत्ती २३:३५; हिब्रू ११:३७ 21 तन्न मेकोपुकीम जकरिया आ पबर्म गारशा, पिप आ हुकुम पतीकेमी जकरिया कली परमप्रभु यावे आ खिं डा लाडगाम फुल्लु आप्शा सदमे बाक्त। 22 पिप योआशम जकरिया आ आफ येहो-यादाम आ कली रिम्शो पशो नेल्ल प्रेंदा बाक्त। मिनु मेको आ तौ कली सदा बाक्त। मिनु आ बेक्ची ना जकरियामी “परमप्रभु यावेम एको तशा, क्येक्क लेत्तल” देंमाक्त। २इतिहास २३:-

23 मिनु मेको बर्स नुप्ची ना अराम रागी डा लडाइ पाइबपुकी योआश नु लडाइ पथ जाक्मा बाक्त। मिनु मेकोपुकीम यहूदा नु यरूसलेम जाक्शा, मेकेर डा मुर आन दाते डा सरकार डा गेय पाइब नु ठेयब मुर नेल्ले आन कली सदमे बाक्त। मिनु आन रोइशो मारेइ मारेइ दमस्कस डा पिप कली सोइक्तमे बाक्त। २राजा १२:१८-२२ 24 अराम डा लडाइ पाइब इक्का ला बाक्तेक्म हना यो, परमप्रभु यावेमी इस्राएल डा शुश लडाइ पाइब आन कली मेको आन गुइमी गेमी बाक्त। मारदे हना यहूदा डा मुरपुकीम परमप्रभु यावे, आन किकी पिपी आन परमप्रभु कली प्रोंइशो बाक्मा बाक्त। मोदेशो पा योआशमी निसाफ नु सजाइ तवा बाक्त।

25 मिनु अराम रागी डा लडाइ पाइबपुकीमी पिप कली शुश गार सेल्शा, गाक्मा नोले, पिप आ ठेयब गेय पाइबपुकीमी गारशा, चढेब येहो-यादा आ तौ कली साइशो आ क्येक्क लेत्चा कली पिप आ ब्राख्येम बाक्मेनु, सदमे बाक्त। मोपा मेको बेक्माक्त। मिनु मुरपुकीम मेको कली दाऊद आ सहरमी थिम्मे बाक्त। तन्न पिप आन कली थिम्तीकेम मथिम्मे बाक्त। २इतिहास २१:२० 26 मेको कली साइक्ब अम्मोनी मीश मुर शिमेआथ आ तौ जाबाद नु मोआबी मीश मुर शिमीथ आ तौ येहो-जाबाद बाक्सा बाक्त। 27 योआश आ चच युइ आन पबर्म ब्रेक्शो लोत्र, मेको आ थाप्चा माल्शो क्येट आ पबर्म लोत्र नु दोपा मेकोमी लेंशा परमप्रभु आ खिं सेला, मेको नेल्ल पिप आन किताबम ब्रेक्शो बाक्ब। मिनु मेको आ पा डा आ तौ अमस्याह पिप दुम्माक्त।

25

यहूदा डा पिप अमस्याह

२राजा १४:१-२०

1 अमस्याह पिप दुम्मेनु, २५ बर्स दुम्शो बाक्माक्त। मेकोमी यरूसलेममी २९ बर्स सासन पवा बाक्त। मेको आ ममा आ नें येहो-अदान बाक्माक्त। मेको यरूसलेम डा बाक्माक्त। 2 मेकोमी परमप्रभु यावे आ डोंइती मार ठीक बाक्मे, मेको पवा बाक्त। तन्न आ थुं नेल्लेम ममाइ। 3 मेकोमी आ राज्य डा सासन बोल्यो दुम नोले, आ आफ कली साइक्ब, आ गेय पाइब आस कली साइसी बाक्त। २इतिहास २४:२५ 4 तन्न मेको आस आल आन कली मसदा बाक्त। मारदे हना मोसा आ किताबम ब्रेक्शो परमप्रभु यावे आ अरेशो “आम आफ आन तमी तौ आन पबर्म नु तमी तौ आन आम आफ आन पबर्म साइक्चा मदुम्ब। सुम पाप पाइबा, मेको साइक्चा पुंइसीब” देशो परमप्रभु यावे आ लोत्र टिवा बाक्त। ब्यवस्था २४:१६

5 मिनु अमस्याहम यहूदा नु बेन्यामीन डा मुर नेल्ल आन कली ग्रुम्पाइशशा, आन खिं खिं डा मुर हजार हजार आन कली कप्तान का का नु सहे सहे डा आन कली कप्तान का का चोइक्पदा बाक्त। मेकोमी २० बर्स गाप्शो नु मेको क्येडा लाक्शो मुर नेल्ल आन कली पुक्मी बाक्त। मेको आन कली हिक्शोनु, लाख सां बाक्मा बाक्त। मेको नेल्ल लडाइ पने चाप्ब बाक्मा बाक्त। तूतीक नु तेक्तीक चलेने चाप्ब बाक्मा बाक्त। 6 मेकोमी इस्राएल रें लाख का बोल्यो लडाइ पाइब आन कली ब्रेशशा, सहे का टलेन्ट चांदी गोवा बाक्त। टलेन्ट का ३४ किलो बाक्ब। 7 तन्न परमप्रभु आ मुर का मेको आन बाक्तीक जाक्शा “आं पिप, इस्राएल डा लडाइ पाइब आन कली गे नु मलाइक्मी। मारदे हना

परमप्रभु यावे इस्राएलीपुकी नु एफ्राइम आ थर डा मुर नेल्ल नु मबाक्ब। 8 गे मोपा बोल्यो दुम्शा बाक्शो मिम्तीनी नु इस्राएल डा लडाइ पाइब लाइक्तीनी हना, परमप्रभुम इन कली इन जोरी सत्रु आन डोंइती ब्रुपाइक्ब। मारदे हना ग्रापाइक्तीक नु ब्रुपाइक्तीक सक्ति परमप्रभु आ गुइम बाक्ब” देंमाक्त। 9 मिनु अमस्याहम परमप्रभु आ मुर कली “इस्राएली लडाइ पाइब आन पर्बम गेशो मेको सहे का टलेन्ट चांदी आ पर्बम गो मार पाइनुडा?” दे हिल्लो पवा बाक्त। मिनु परमप्रभु आ मुरुम “परमप्रभु यावेम इन कली मेको क्येडा यो शुश गेने चाप्ब” देंमाक्त। 10 मोपतीके पिप अमस्याहम एफ्राइम रे जाक्शो लडाइ पाइब आन कली आन खिं लेशशा सोइक्तीमी बाक्त। मिनु मेकोपुकी यहूदा नु शुश गाइक्तमे बाक्त। मिनु थाम्पा चुरशा, आन खिं लेशशा लमा बाक्मा बाक्त।

11 मिनु अमस्याहम बोल पा महिथु थुं बारपाइश्शा, आ लडाइ पाइब आन कली हिक्सी दिंमम लाइक्मी बाक्त। मिनु मेकेर सेइर डा १० हजार मुर आन कली साइक्मी बाक्त। 12 मिनु यहूदा डा लडाइ पाइबपुकीम अर्को १० हजार मुर आन कली सेसीन ग्याइश्शा, मेको आन कली ठेयब सेरथे फुल्लु तार लाइश्शा, नेप्शा ख्रीडमे बाक्त। ख्रीशो नेल्ले चोकटा लाम्टा दुम्शा बेक्मा बाक्त। 13 मेना अमस्याहम लडाइम मलाइक्थु, खिं लेशशा सोइश्शा लडाइ पाइबपुकीम यहूदा डा सहरपुकी सामरीया रे बेथ-होरोन सम्म मारेइ मारेइ रोइक्तमे बाक्त। मेकोपुकीम मेकेर हजार सां मुर आन कली सदमे बाक्त। मिनु शुश मार मार रोइश्शा लदमे बाक्त।

14 मिनु अमस्याहम एदोमी आन कली ग्राशा लेम्मेनु, सेइर डा मुर आन देवतापुकी चाक्शा आ देवता सेला बाक्त। मिनु मेकोमी मेको देवता आन कली पूजा पा मेको आन कली चढ़ेवा बाक्त। 15 मोपतीके परमप्रभु यावे अमस्याह नु गाइश्शा, आ लोव्र पाइब का सोइक्ता बाक्त। मिनु मेकोमी “गे मारदे आ मुर आन कली लायो इ गुइ रे प्रोंइने मचाप्ब देवता आन नोले खोदी?” दे हिल्लो पवा बाक्त। 16 मिनु मेकोमी लोव्र पना पन, पिपमी “मार गोपुकीम इन कली पिप कली अर्ती गेब सेल्शो नकी डा? ब्वाले पावो। मारदे साइक्चा पुंइसीनेवे?” दे मदा बाक्त। मिनु मेको परमप्रभु यावे आ लोव्र पाइबम सिक्सी पचा क्येडा डोंइती “गेम ओं पाइतीनी, आं लोव्र मनेंतीके परमप्रभुमी इन कली थमा पा खतम पोक्चा थुं पवा बाक्त। गो तुइक्नुड” देंमाक्त।

17 मेको नोले यहूदा डा पिप अमस्याहम आ अर्ती गेबपुकी नु सल्ला पा इस्राएल डा पिप येहू आ चच येहो-अहाज आ तौ योआश कली “जाक्को। गे नु गो लडाइ पस” दे मदा बाक्त। 18 तन्न इस्राएल डा पिप योआशमी यहूदा डा पिप अमस्याह कली कथा का देंमाक्त। मार कथा देंमाक्त देंशा हना “लेबानोन डा चू बुटा कामी लेबानोन डा लाइश्शा रवा का कली ‘इ तमी आं तौ नु ग्युंवे पचा गेवो’ देंमाक्त। तन्न लेबानोन डा ब्वाकी डा जन्तु का मेको रे पा पिमेनु, मेको चू बुटा कली दिम्शा लाक्गा बाक्त। न्यायाधीस ९:१४ 19 गे एदोम कली ग्राती, दे बोरशा ठेयब मलेतो। गे इ खिं उइ बाक्को। गे मारदे आंम कली नु यहूदा कली खतम पोक्चा माल्नेवे?” दे लोव्र लेत्ता बाक्त।

20 तन्न अमस्याहम मेको लोव्र मनेना बाक्त। मोपतीके परमप्रभुमी मेको कली मुर आन गुइमी गेवा बाक्त। मारदे हना मेकोपुकीम एदोम डा देवता आन कली खोइश्शा बाक्मा बाक्त। 21 मिनु इस्राएल डा पिप योआश डोंइती लमाक्त। मिनु मेको नु यहूदा डा पिप अमस्याह यहूदा डा बेथ-शेमेशम लडाइ पाम्से बाक्त। 22 मिनु यहूदा डा मुरपुकी इस्राएली आन क्येडा ब्रुमा बाक्त। मिनु मेको नेल्ल आन खिं प्रोकमा बाक्त। 23 मिनु इस्राएल डा पिप योआशमी योआश आ तौ, अहाज्याह आ चच, यहूदा डा पिप अमस्याह कली बेथ-शेमेशम ग्याइश्शा यरूसलेमम चाक्गा बाक्त। मिनु मेकोमी एफ्राइम डा ठेयब लाप्चो रे सुर डा ठेयब लाप्चो सम्म डा ४ सहे कुबीत लाइश्शा गारो प्रेदा बाक्त। कुबीत का ०.५ मिटर बाक्ब। 24 मेकोमी ओबेद-एदोम आ खाल पशो परमप्रभु आ खिंम बाक्शो सुन चांदी, ग्योबपुकी नु पिप आ खिंम बाक्शो सुन चांदी शुश क्येट लाइब थोव्रकपुकी नु मुर आन कली ग्याइश्शा लाइश्शा, सामरीया लेम्माक्त। पिप आ मुर आन कली यो ग्याइश्शा लाइश्शा, सामरीया लेम्माक्त। इतिहास २६:१३,१५

25 इस्राएल डा पिप येहो-अहाज आ तौ योआश क्येडा यहूदा डा पिप योआश आ तौ अमस्याह १५ बर्स शुश ब्रोंइमाक्त। 26 अमस्याह आ पशो, आ डोंइती रे नोले सम्म नेल्ल यहूदा नु इस्राएल डा पिप आन इतिहासम ब्रेक्शो बाक्ब। 27 मेको अमस्याह परमप्रभु यावे रे डोन दुम नाक्त रे यरूसलेमम मेको कली साइक्चा, दे सल्ला पा गारशो बाक्मा बाक्त। मेको प्रोक्शा ब्रोंइचा कली लाकीशम लमाक्त। तन्न मेकोपुकीम लाकीशम आ नोनोले खेदा पाइब मुर सोइश्शा, मेको कली मेक उइ साइक्पदमे बाक्त। २इतिहास २४:२५ 28 मेको नोले मेको आ बेक्शो रां शाराम कुर पा, यरूसलेम चाक्गामे बाक्त। मिनु मुरपुकीमी मेको कली आ किकी पिपी आन कली थिम्तीके दाऊद आ सहरम थिम्मे बाक्त।

26

यहूदा डा पिप उज्जीयाह

२राजा १४:२१-२२; २राजा १५:१-७

1 मिनू यहूदा डा मुरपुकी नेल्लेम १६ बर्स दुम्शो अमस्याह आ तौ उज्जीयाह कली मेको आ आफ आ पा डा पिप सेलमे बाक्त। 2 मिनू अमस्याह बेक्म नोले उज्जीयाहमी एलोथ सहर लेंशा ताक्शा, यहूदा कली लेशशा गेशा, रिम्शो सेला बाक्त। 3 उज्जीयाह पिप दुम्मेनु, मेको १६ बर्स दुम्शो बाक्माक्त। मेकोमी यरूसलेमम ५२ बर्स सासन पवा बाक्त। मेको आ ममा आ नें येकोल्याह बाक्माक्त। मेको यरूसलेम डा बाक्माक्त। 4 मेकोमी आ आफ अमस्याह खोदेंशो पा परमप्रभु यावे आ डोंइती मार ठीक बाक्मे, मेको पवा बाक्त। २इतिहास २५:२ 5 मेना जकरिया पिप कली परमप्रभु यावे कली मान पा हिंचा आ पर्बम शेंब बाक्माक्त। मिनू पिपमी जकरिया आ पालाम परमप्रभु यावे आ नोले खोइक्ना खोइक्न बाक्माक्त। मोपा खोदा सम्म परमप्रभुम अमस्याह आ पशो नेल्ल रिम्शो दुम्पदा बाक्त।

6 मिनू मेको पलिस्ती नु लडाइ पचा कली लडाइ पतीकेम लमाक्त। मिनू मेकोमी गाथ, याब्नेह नु अशदोद कली ग्राशा, गारो प्रेशशा गेवा बाक्त। मिनू मेकोमी अशदोद नु आ नेक्था पलिस्ती रागी आन दातेम अरु सहरपुकी सेला बाक्त। 7 परमप्रभुमी मेको कली पलिस्ती, गुर-बालम बाक्ब अराबीपुकी नु मेउनीपुकी नु लडाइ दुम्तीकेम वारच पदा बाक्त। 8 मिनू अम्मोनीपुकीमी उज्जीयाह कली आन गेचा माल्शो मार मार गेमे बाक्त। मिनू मेको आ सोशो बोशो लोव्र इजीप्त आ नेक्था सम्म जाक्दीम्माक्त। मारदे हना मेको शुश सक्ति पाइशो दुम्शो बाक्माक्त। 9 मेकोमी यरूसलेमम गारो डा सुर डा ठेयब लाप्चो, बेसी डा ठेयब लाप्चो नु गारो आ सुर हिरतीकेमी यो लाइशो खिंपुकी सेला बाक्त। मिनू मेको कली बोल्यो सेला बाक्त। 10 मेकोमी गोरशो रागीम अरु लाइशो खिंपुकी सेला बाक्त। मिनू मेकोमी शुश इनारपुकी दोपाइक्मी बाक्त। मारदे हना मेको के शेफेलाह नु दिंममी शुश बी ब्यफ बाक्मा बाक्त। मिनू मेको के पहाडम नु रिम्शो खप डा दिंमम रू दोइब नु अडगुर रू कोव्रब मुरपुकी बाक्मा बाक्त। मारदे हना मेको खेतीपाती पचा दाक्ब मुर बाक्माक्त। 11 मेको प्रोंइशा, उज्जीयाह के बोल्यो लडाइ पाइब शुश बाक्मा बाक्त। मेकोपुकी गेना हना यो लडाइ पचा कली ठीक दुम्शा बाक्बाक्मा बाक्त। मिनू मेको लडाइ पाइब आन ब्रेक्ब यिएल नु पुक्ब मासेयाहम मेको आन कली हुल हुल सेल्शा, पिप आ कप्तान हनान्याहम देशो खोदेंशो पा पाम्से बाक्त। 12 खिं खिं डा बोल्यो सक्ति पाइशो लडाइ पाइब हजार निक्शी ६ सहे बाक्मा बाक्त। 13 मेको ठेयब मुर आन हुकुममी पिप कली आ जोरी सत्रु रे वारच पाइक्चा कली लाख सां ७ हजार ५ सहे बोल्यो लडाइ पाइब आन हुल का यो बाक्माक्त। 14 मिनू उज्जीयाहमी लडाइ पाइब नेल्ल आन कली तेक्तीके, तूतीक, फलाम के टोपी, कुचुम पांइतीके, लिब्रा नु हुरद आप्तीक फुल्लु ठीक पा गेवा बाक्त। 15 मेकोमी यरूसलेम डा गारो डा लाइशो खिं तारी नु सुरपुकीम जोक्ब मुर आन सेल्शो ब्रा आप्तीक नु ठेयब फुल्लु आप्तीक वोइक्पदा बाक्त। आ ठेयब दुम्तीके तेइ तेइ ब्रशो बाक्माक्त। मेको सक्ति पाइशो दुम्माक्त। मारदे हना परमप्रभुमी मेको कली छक लाक्चा डा पा वारच पवा बाक्त। मेको आ पर्बम शुश लोव्र ब्रशो बाक्माक्त।

16 मोपा मेको सक्ति पाइशो दुम्तीके ठेयब लेशशा, खतम दुम्माक्त। मेकोमी परमप्रभु यावे, आ परमप्रभु कली मटिथु, धूप चोतीकेम धूप चोचा कली परमप्रभु यावे आ खिं ओव्रमाक्त। २इतिहास २५:१९ 17 तन्न चढ़ेब अजारयाह नु अरु परमप्रभु यावे कली चढ़ेब बोल्यो नु महिब ८० जना मुरुमी मेको आ नोले खोदमे बाक्त। 18 मिनू पिप उज्जीयाह कली तेक्चा, दे “पिप उज्जीयाह परमप्रभु यावे कली धूप चोतीक गेय इन के ममाइ। एको गेय पचा कली जिम्मा गेशो हारून आ चच युइ चढ़ेब आन के बाक्ब। परमप्रभु यावे आ बाक्तीक रे गूडीन। मारदे हना गे दूली पाइतीनी। मिनू मुल परमप्रभु यावेमी इन कली मारेइ मान मगेपाइक्ब” दे मदमे बाक्त। गन्ती १८:७; प्रस्थान ३०:७ 19 मिनू गुइम थनौरो शेशा धूप चोचा कली ठीक दुम्शो पिप गाइक्ता बाक्त। मिनू मेको चढ़ेबपुकी नु गाइक्ना गाइक्नन आ कुप्फीम कोव्र गूमाक्त। मेको नेल्ल चढ़ेब आन डोंइती, परमप्रभु यावे आ खिं आगाम नु धूप चढ़ेतीक आ डोंइती दुम्माक्त। 20 मिनू ठेयब चढ़ेब अजारयाह नु अरु चढ़ेबपुकीम मेको कली कोव्रना कोव्रन मेको आ कुप्फीम कोर गूशो तशा, मेको कली रीब पा परमप्रभु यावे आ खिं रे लाडगा गुंइदमे बाक्त। मेको आंमा यो रीब पा लाडगा गूचा माल्शो बाक्माक्त। मारदे हना परमप्रभु यावेम मेको कली मेको रोइमी आप्शो बाक्माक्त। 21 मिनू पिप उज्जीयाह आ बेक्ची नाक्त सम्मन कोव्ररी दुम्शा बाक्माक्त। मेको कोव्ररी दुम्शा खिं काम आ कान बाक्चा माल्दा बाक्त। मेको परमप्रभु यावे आ खिं रे तिल्चा पुंइसे बाक्त। मिनू मेको आ तौ योथाममी दरवार कली कोव्रशा, मुर आन कली सासन पचा गोवा बाक्त। गन्ती ५:२ 22 उज्जीयाह आ पशो नेल्ल डोंइती रे नोले सम्म डा गेय नेल्ल आमोज आ तौ परमप्रभु यावे

आ लोत्र पाइब यसैयाम ब्रेक्शो बाक्ब। यसैया ६:१; यसैया १:१ 23 मिनु उज्जीयाह बेक्माक्त। मिनु मेकोपुकीमी आ किकी पिपी आन कली थिम्तीके आ नेक्था डा रू काम थिम्मे बाक्त। मारदे हना मुरपुकीम “कोत्ररी का बाक्ब” देमा बाक्त। मिनु मेको आ पा डा आ तौ योथाम पिप दुम्माक्त।

27

यहूदा डा पिप योथाम
२राजा १५:३२-३८

1 योथाम पिप दुम्मेनु, २५ बर्स दुम्शो बाक्माक्त। मेकोमी यरूसलेमम १६ बर्स सासन पवा बाक्त। मेको आ ममा आ नें येरुशाह बाक्माक्त। मेको सादोक आ तमी बाक्माक्त। 2 मेकोमी आ आफ उज्जीयाह खोदेशो पा परमप्रभु यावे आ डोंइती मार ठीक बाक्मे, मेको पवा बाक्त। तन्न मेको आ आफ खोदेशो पा परमप्रभु यावे आ खिं मओत्रमाक्त। मो हना यो मुर आन मरिम्शो गेय पस डा पस बाक्मा बाक्त। २इतिहास २६:२६ 3 मेकोमी परमप्रभु यावे आ खिं डा आइक्था डा लाप्चो लेंशा सेला बाक्त। मिनु मेकोमी ओफेल डा गारोम शुश गेय पा बोल्यो पा सेला बाक्त। 4 मेकोमी यहूदा डा पहाडमी यो सहरपुकी सेला बाक्त। मिनु ब्वाकी डा डांडापुकीम बोल्यो दरवार नु लाइशो खिंपुकी सेला बाक्त। २इतिहास २६:१० 5 मिनु योथाममी अम्मोनी आन पिप नु लडाइ पा मेको आन कली ग्रामाक्त। मिनु मेको बर्स अम्मोनीपुकीम मेको कली सहे का टलेन्ट चांदी, १० हजार कोर चेरब नु १० हजार कोर क्योत्रज गेमे बाक्त। मिनु मेकोपुकीम आ नोले डा बर्स नु मेको क्येडा नोले डा बर्सम यो मोपान तिरो थाप्तमे बाक्त। टलेन्ट का ३४ किलो बाक्ब। कोर का २२० लिटर खोदेशो बाक्ब। 6 मिनु योथामम परमप्रभु यावे, आ परमप्रभु आ डोंइती रिम्शो गेय पतीके मेको थम सक्ति पाइशो दुम्माक्त। 7 योथामम मार मार पवा, मेको आ पशो लडाइ नेल्ले नु आ गाक्शो लां इस्राएल नु यहूदा डा पिप आन इतिहासम ब्रेक्शो बाक्ब। 8 मेको पिप दुम्मेनु, २५ बर्स दुम्शो बाक्माक्त। मिनु मेकोमी यरूसलेमम १६ बर्स सासन पवा बाक्त। 9 मिनु योथाम बेक्माक्त। मिनु मुरपुकीमी मेको कली दाऊद आ सहरम थिम्मे बाक्त। मिनु आ नोले मेको आ तौ आहाज पिप दुम्माक्त।

28

यहूदा डा पिप आहाज

1 आहाज पिप दुम्मेनु, २० बर्स दुम्शो बाक्माक्त। मेकोमी यरूसलेमम १६ बर्स सासन पवा बाक्त। मेकोमी आ किकी पिपी दाऊद खोदेशो पा परमप्रभु यावे आ डोंइती मार ठीक बाक्मे, मेको मपवा बाक्त। 2 मेको इस्राएल डा पिप आन लांम गाक्माक्त। मिनु चेम्शा बाल देवता आ मूर्तिपुकी सेला बाक्त। 3 मिनु पिप आहाजम बेन-हिन्नोम आ बेंसीम धूप चढ़ेवा बाक्त। आहाजमी रागी रागी डा मुर आन ग्रान्रा दिशो गेय खोदेशो पा, आ तौ आन कली मीम चोशा चढ़ेवा बाक्त। मोपतीके परमप्रभु यावेमी रागी रागी डा मुर आन कली इस्राएली आन डोंइती रे खेरशो बाक्माक्त। ब्यवस्था १८:९-१२ 4 मेकोमी डांडा डा थानपुकीम चढ़ेवा बाक्त। मिनु नेल्ल डांडाम नु ठेयब रवा आ पुंम चढ़ेतीक चढ़ेवा धूप चोवा बाक्त। १राजा १४:२२-२३

5 मोपतीके परमप्रभु यावे, आ परमप्रभुमी मेको कली अराम डा पिप नु ब्रुपाइश, मेको आ गुइमी गेवा बाक्त। मिनु मेकोमी पिप आहाज आ शुश मुर आन कली ग्याइश, दमस्कसम लदा बाक्त। मेको इस्राएल डा पिप नु यो ब्रुमाक्त। मिनु मेको पिपम शुश मुर आन कली सदा बाक्त। 6 रेमाल्याह आ तौ पेकाहमी काबुमीन यहूदा डा लाख का २० हजार मुर आन कली साइक्मी बाक्त। मेको नेल्ल बोल्यो लडाइ पाइब बाक्मा बाक्त। मारदे हना यहूदा डा मुरपुकीम परमप्रभु यावे, आन किकी पिपी आन परमप्रभु कली प्रोंइशो बाक्मा बाक्त। 7 एफ्राइम डा जिक्री माइशो बोल्यो लडाइ पाइब मुर काम पिप आ तौ मासेयाह, पिप आ दरवार कोत्रब कप्तान अज्जीकाम नु पिप आ ठेयब ब्रेक्ब एल्काना आन कली साइक्मी बाक्त।

8 इस्राएलीपुकीमी लाख निक्शी आन थर थर डा मुर ग्याइश लदमे बाक्त। मेको मीश मुर, तमी नु तौ बाक्मा बाक्त। मिनु मेकोपुकीम शुश मार मार यो रोइश, नेल्ल सामरीया लदमे बाक्त। 9 तन्न मेकेर ओदेद नें पाइशो परमप्रभु यावे आ लोत्र पाइब का बाक्माक्त। मिनु लडाइ पाइबपुकी सामरीया लेम्मानु, मेको आन कली ग्रुथ जाक्माक्त। मिनु मेकोमी मेको लडाइ पाइब आन कली “परमप्रभु यावे, इन किकी पिपी आन परमप्रभु यहूदा डा मुरपुकी नु गाइक्तीके, मेकोमी मेको आन कली इन गुइमी गेप्टु। तन्न गेपुकीम इन गाइक्तीकेम मेको आन कली साइक्तीनी। मेको मो पशो

इर स्वर्ग सम्म जाकदीशशो बाकब। लेवी १९:१८ 10 मुल गे यहूदा नु यरूसलेम डा मीश मुर, वोंइश मुर नेल्ल आन कली इन वाइलीम वाइल सेल्चा थुं पाइनीनी। गेपुकीम परमप्रभु यावे, इन परमप्रभु आ डोंइती पाप ला पाइनीनी। अरु मार पाइनीनी? 11 मुल आं लोव्र नेनीन। इन ग्याइशशो आंम मुर आन कली प्रोंइशा लेल्चा गेने। मारदे हना परमप्रभु यावे इन कली तशा शुश चुरशो बाकब” देंमाक्त। 12 मिनु लेंशा का निक्शी एफ्राइम डा ठेयब मुर योहानान आ तौ अजारयाह, मेशील्लेमोथ आ तौ बेरेक्याह, शाल्लुम आ तौ येहीज्क्याह नु हादले आ तौ आमासाम लडाइ रे लेशशा जाकशो आन कली ग्रुम्शा, 13 मेको आन कली “गेपुकीम एको ग्याइशशो आन कली एक चाक्चा मदुम्ब। गेपुकीम मार मिम्शो बाकनी? मेको आ पर्बम गोपुकीम परमप्रभु यावे आ डोंइती दोस ताइनीकी। मार, गेपुकीम इं मरिम्शो पशो नु इं पाप तेम्चा दाकनीनी? मार, इं पाप ठेयब मबाकबा डा? परमप्रभु यावे इस्राएल आ पर्बम डोंइती रे गाइकना गाइकन बाकब” दे मदमे बाक्त। 14 मोपतीके लडाइ पाइबपुकीम ग्याइशशोपुकी नु आन रोइशशो मारेइ मारेइ मेको आन ठेयब मुर नु मेको देल्शा बाकशो मुर आन डोंइती प्रोन्मे बाक्त। 15 मिनु ठेयब मुरपुकीमी नें थिशा का निक्शी मुर आन कली ब्रेत्मे बाक्त। मेको ब्रेशशो मुरपुकीम ग्याइशशा चाकशो शिश्रा मुर आन कली रोइशशो वा फेक्पदमे बाक्त। जुत्ता मुइक्पदमे बाक्त। जचा नु तूचा गेशा, तेल खेक्तमे बाक्त। मिनु थाम्पा दशो नु गाक्ने मचाप्ब मुर आन कली गधा डोइक्पा, खजूर रवा आ सहर, यरीको आन खिं खिं सम्म चोक्डमे बाक्त। मिनु मेकोपुकी सामरीया लेम्मा बाक्त। २राजा ६:२२; हितोपदेस २५:२१-२२

16 मेना पिप आहाजम अस्सुर डा पिप कली “वारच पाइक्की” दे पुंइथ मुर सोइक्ता बाक्त। 17 मारदे हना एदोमीपुकीम लेंशा लडाइ पा यहूदा कली ग्राशा, मेकेर डा मुर आन कली ग्याइशशा लाइशशो बाक्मा बाक्त। 18 पलिस्तीपुकीमी यो यहूदा डा शेफेलाह नु नेगेब डा सहरपुकी रोइक्तमे बाक्त। मिनु मेकोपुकीम बेथ-शेमेश, आइयालोन, गेदे-रोथ, सोको नु मेको आ गाउंपुकी, तिम्नाह नु मेको आ गाउंपुकी, गिम्जो नु मेको आ गाउंपुकी आंम के सेल्शा बाक्मा बाक्त। यहोसु १५:१० 19 यहूदा डा पिप आहाजम पतीकेन परमप्रभु यावेम यहूदा कली थम आइक्च सेल्शो बाक्माक्त। मारदे हना पिप आहाजम थम मरिम्शो पा परमप्रभु यावे कली प्रोंइशो बाक्माक्त। 20 मिनु अस्सुर डा पिप तिल्गथ-पिलेसेर मेको कली वारच पाइक्थ जाक्माक्त। तन्न मेकोमी मेको कली वारच पाइक्चा आ पा डा श्येत कका गेवा बाक्त। 21 मिनु आहाजम परमप्रभु यावे आ खिं, पिप आ दरवार नु आ ठेयब मुर आन खिं रे मार मार लाइशशा, अस्सुर डा पिप कली “वारच पाइय्यीकी” दे गेवा बाक्त। तन्न मेको नेल्ल मोशा दुम्माक्त।

22 मोपा पिप आहाज दोशो श्येत जवा, मोशोन परमप्रभु यावे क्येडा डोन दुम्माक्त। 23 मेकोमी आंम कली ब्रुपाइक्ब दमस्कस डा देवता आन कली चढेवा बाक्त। मारदे हना मेकोमी “अराम डा पिप आ देवतापुकीम मेको आन कली वारच पाइक्तेक्म। गो यो मेको आन कली मार मार चढेनुड। मिनु आं कली यो वारच पाइय्यीमील” दे मिम्ता बाक्त। तन्न मेको देवतापुकी मेको कली नु इस्राएली नेल्ल आन कली खतम पोक्तीक दुम्माक्त। 24 मेको नोले आहाजमी परमप्रभु आ खिं डा ग्योबपुकी खुप्शा, खोइशशा बिग्रेवा बाक्त। मिनु परमप्रभु यावे आ खिं डा लाप्चो चोक्गा बाक्त। मिनु मेकोमी यरूसलेमम तेइ तेइ थानपुकी सेला बाक्त। 25 मिनु यहूदा डा सहर सहरमी डांडा डा थानपुकी सेला बाक्त। अरु देवता आन कली मार मार चढेवा बाक्त। मोपा मेकोमी परमप्रभु यावे, आंम किकी पिपी आन परमप्रभु कली थाम्पा गाइक्पदा बाक्त। 26 मिनु मेकोमी नोले सम्म मार मार पवा नु आ डोंइती नु नोले डा गाक्शो लां नेल्ल, यहूदा नु इस्राएल डा पिप आन किताबम ब्रेक्शो बाकब। 27 मिनु आहाज बेक्माक्त। मिनु मुरपुकीम मेको कली यरूसलेम सहरम थिम्मे बाक्त। तन्न मेकोपुकीम मेको कली इस्राएल डा पिप आन कली थिम्तीकेम मथिम्मे बाक्त। मिनु मेको आ पा डा आ तौ हिज्कीयाह पिप दुम्माक्त। २इतिहास २१:२०

29

यहूदा डा पिप हिज्कीयाह

1 हिज्कीयाह पिप दुम्मेनु २५ बर्स दुम्शो बाक्माक्त। मेकोमी यरूसलेमम २९ बर्स सासन पवा बाक्त। मेको आ ममा आ नें अबीयाह बाक्माक्त। मेको जकरिया आ तमी बाक्माक्त। 2 मेकोमी आ किकी पिपी दाऊदम पशो खोदेशो पा परमप्रभु यावे आ डोंइती मार ठीक बाक्मे, मेको पवा बाक्त।

परमप्रभु आ खिं डा गेय

३ मिनु मेको पिप दुमशो डोंइती डा बर्स डा डोंइती डा महिनाम मेकोमी परमप्रभु यावे आ खिं डा लाप्चोपुकी रोकशा, मेको आन कली सेल्पदा बाक्त। २इतिहास २८:२४ ४ मेकोमी चढेब नु लेवी आन कली पुक्शा पूर्व डा लाडगाम गुम्पाइक्मी बाक्त। ५ मिनु मेकोमी मेको आन कली “लेवीपुकी, आं लोत्र नेनीन। मुल गेपुकी आंम कली परमप्रभु यावे आ डोंइती ठीक सेल्सीन। मिनु परमप्रभु यावे, इन किकी पिपी आन परमप्रभु आ खिं ठीक सेलीन। मिनु परमप्रभु यावे आ बाक्तीक रे ग्रांरा दिशो नेल्ल गुंडशा ताइक्तीन। ६ मारदे हना इं किकी पिपीम परमप्रभु यावे कली प्रॉइशा, परमप्रभु यावे, इं परमप्रभु आ डोंइती मार मरिम्शो बाक्मे, मेको पाम्तेक्म। मेकोपुकीम मेको कली प्रॉइशा, मेको आ बाक्तीक आ पर्वम मारेइ ममिम्तेम। मेकोपुकीम परमप्रभु यावे आ खिं कली हिरशान मकोव्रडेम। ७ मेकोपुकीम पिंडी डा लाप्चोपुकी यो चोक्तेक्म। बत्ती काप्ताक्म। मेकोपुकीम इस्राएली आन परमप्रभु आ खिंम धूप चोचा नु चोशा चढेचा प्रॉइतेक्म। ८ मोपतीके परमप्रभु यावे यहूदा नु यरूसलेम आस पर्वम गाइक्ताक्व। मिनु मेकोमी मेको आन कली आन रागी आ नेक्था डा मुर आन डोंइती ग्रांरा दित्चा डा शुक्शी पचा डा नु तोक्चा पुंडसीब सेल्लु। मेको गे आंमा तशो बाक्नीनी। ९ मोपतीके इं आफ तरवारम क्योरशा साइक्चा पुंडसाक्म। मिनु इं तमी तौ नु इं मीश ग्याइश्शा लाइक्चा पुंडसाक्म। २इतिहास २८:५-८ १० मिनु मुल गो परमप्रभु यावे, इस्राएली आन परमप्रभु नु कबल पचा थुं पशो बाक्नुड। मोपा इं पर्वम गाइश्शो बेक्बा कों? ११ मोपतीके आं तौपुकी, मुल देश मपने। मारदे हना गे परमप्रभु यावे आ डोंइती राप्शा आ गेय पचा कली नु मेको कली चढेचा कली योत्रसीशो बाक्नीनी” देंमाक्त।

१२ मिनु लेवीपुकी गेय पचा कली बोक्मा बाक्त। मेको सु सु बाक्मा बाक्त देंशा हना, कोहाथी रे अमासै आ तौ माहाथ, अजारयाह आ तौ योएल, मेरारी रे अब्दी आ तौ कीश नु येहल्लेल आ तौ अजारयाह, गेरशोनी रे जिम्माह आ तौ योआह नु योआह आ तौ एदेन, १३ एली-जाफान रे शिम्री नु येहुएल, आसाफ रे जकरिया नु मत्तन्याह, १४ हेमान रे येहुएल नु शिमेइ, येदुथून रे शेमायाह नु उज्जीएल, मेको लेवीपुकी बाक्मा बाक्त। १५ मिनु मेकोपुकीम आन आन लोक्ब आन कली खुप्तमे बाक्त। मिनु मेकोपुकीम आंम कली परमप्रभु यावे आ डोंइती ठीक सेल्सीमा बाक्त। मिनु पिपम परमप्रभु यावेमी देंशो खोदेंशो पा हुकुम पवा बाक्त। मिनु मेकोपुकीम परमप्रभु यावे आ खिं ओव्रशा, ग्रांरा दिशो मार मार गुंडमे बाक्त। १६ मिनु चढेबपुकी परमप्रभु यावे आ खिं ओव्रमा बाक्त। मोपा ओव्रशा, मेकेर बाक्शो ग्रांरा दिशो थोव्रक नेल्ल गुंडशा लाडगाम तेल्ले बाक्त। मिनु लेवीपुकीम मेको गुप्शा, किद्रोन खोल्लसाम लाइश्शा ताइक्तमे बाक्त। १७ मेकोपुकीम डोंइती डा महिना डा डोंइती डा नाक्ती ठीक सेल्तीक गेय पचा गोव्रमे बाक्त। मिनु ८ नाक्तीम मेकोपुकी पिंडी सम्म जाक्दीम्मा बाक्त। मिनु अर्को ८ नाक्ती नोले मेकोपुकीम परमप्रभु यावे आ खिं नेल्ले ठीक सेल्शो बाक्मा बाक्त। मिनु मेकोपुकीम डोंइती डा महिना डा १६ नाक्तीम मेको गेय थुम्मे बाक्त।

१८ मेको नोले मेकोपुकी पिप हिज्कीयाह आ बाक्तीक लशा “गोपुकीम परमप्रभु यावे शोब्ले लहर पा वोइक्तीक टेबल नु मेको आ मारेइ मारेइ ठीक सेल्ने थुम्तक। १९ मिनु पिप आहाजम पिप पवा ना, परमप्रभु यावे कली प्रॉइशा, तिल्ला वोइश्शो थोव्रकपुकी नेल्ल ठीक सेल्शा, आन आन बाक्तीकेम वोइक्तक। मुल मेको परमप्रभु यावे कली चढेतीक आ डोंइती वोइश्शो बाक्नीम” देंमा बाक्त।

२० मिनु पिप हिज्कीयाह सुनी कना बोक्शा, सहर डा ठेयब मुर आन कली पुक्पाइश्शा, परमप्रभु यावे आ खिं ग्येत्थ लमा बाक्त। २१ मेकोपुकीम ७ ओटा ब्यफ, ७ ओटा सांड, ७ ओटा पाठा नु ७ ओटा बोका चाक्गमे बाक्त। मेको नेल्ले राज्य, परमप्रभु यावे आ बाक्तीक नु यहूदा आ पाप आ पर्वम चढेचा कली बाक्मा बाक्त। मिनु पिपम मेको नेल्ल हारून आ चच युड, चढेब आन कली परमप्रभु यावे आ चढेतीकेम चढेचा, दे हुकुम पवा बाक्त।

२२ मेकोपुकीम मेको ब्यफ आन कली क्योरमे बाक्त। मिनु चढेबपुकीम मेको आन हुश ताक्शा चढेतीकेम ब्रुइक्तमे बाक्त। मिनु मेकोपुकीम सांड आन कली क्योरमे बाक्त। मिनु मेको आन हुश ताक्शा चढेतीकेम ब्रुइक्तमे बाक्त। मिनु पाठा आन कली क्योरशा, मेको आन हुश ताक्शा चढेतीकेम ब्रुइक्तमे बाक्त। २३ मिनु मेको नोले मेकोपुकीम पाप आ पर्वम चढेतीक बोका आन कली पिप नु मुर आन डोंइती चाक्गमे बाक्त। मिनु पिप नु मुरपुकीम मेको आन तार आन आन गुइ वोदमे बाक्त। लेवी १६:१५-२२ २४ मिनु चढेबपुकीम मेको बोका क्योरशा, आन हुश पाप आ पर्वम चढेतीकेम चढेमे बाक्त। इस्राएली नेल्ल आन पर्वम पाप क्याम्तीक गेय पामे बाक्त। मारदे हना पिपम चोशा चढेतीक नु पाप आ पर्वम चढेतीक इस्राएली नेल्ल आन पर्वम चढेचा माल्ल, दे अरेशो बाक्माक्त।

२५ मिनु पिपम लेवी आन कली परमप्रभु यावे आ खिंम बुप्केल नु ठेयब नु आइक्च तार पाइश्शो ताप्तीके ताप्चा कली ठीक दुम्पाइक्मी बाक्त। मारदे हना डोंइती दाऊदम, परमप्रभु यावे आ लोत्र ताइब, गाद नु नाथान रे पा

मोदेशो शेंशो बाक्माक्त। १इतिहास २५:१ 26 मिनु लेवीपुकीम दाऊद आ सेल्शो ताप्तीकपुकी नु चढेबपुकीम तुराही शेशा राम्मा बाक्त। 27 मिनु हिज्कीयाहम चोशा चढेशो चढेतीकेम चढेचा माल्नीम, दे हुकुम पवा बाक्त। मिनु चोशा चढेतीकेम चढेचा गोत्रमेनु, परमप्रभु यावे कली कुम्सो पामे बाक्त। तुराही नु इस्राएल डा पिप दाऊदमी सेल्शो ताप्तीक मेको कुम्सो नु ताप्मे बाक्त। १इतिहास २३:५ 28 मिनु खुम्सीशो मुर नेल्ले बाप्शा, परमप्रभु यावे कली ठेयब सेल्मे बाक्त। कुम्सो पाइबपुकीम कुम्सो पामे बाक्त। मिनु तुराही ताप्बपुकीम तुराही ताप्मे बाक्त। चोशा चढेतीक मनुम्म सम्म मोदेशो पामे बाक्त। 29 मिनु चढेशो नुम नोले पिप नु मेकेर बाक्ब नेल्लेमी बाप्शा ठेयब सेल्मे बाक्त। 30 मिनु पिप हिज्कीयाह नु मेको आ सरकार डा ठेयब मुरपुकीम लेवी आन कली दाऊद नु परमप्रभु यावे आ लोत्र पाइब आसाफ आ ब्रेक्शो कुम्सो पा परमप्रभु यावे कली ठेयब सेल्पदमे बाक्त। मोपा मेकोपुकीम थाम्पा ग्येरसीशा परमप्रभु यावे आ डोंइती बाप्शा ठेयब सेल्मे बाक्त। २इतिहास २३:१८

31 मिनु हिज्कीयाहम “मुल गे आंमा परमप्रभु यावे कली जिम्मा गेसाक्नी। गेपुकीम चढेतीक नु ‘गे रिम्शो पाइब बाक्नीनी’ दे चढेतीके चाक्शा परमप्रभु यावे आ खिंम जाक्कीन” देंमाक्त। मोपतीके खुम्सीशो मुरपुकीम चढेतीक नु “गे रिम्शो पाइब बाक्नीनी” दे चढेतीक कुरशा जाक्मा बाक्त। मिनु सुइमी ग्येरसीशा चोशा चढेतीके चाक्चा दाक्ताक्म हना, मेको पामे बाक्त। 32 मिनु मेको खुम्सीशो मुरपुकीम चाक्शो चोशा चढेतीक हिक्शोनु, ७० ओटा ब्यफ, सहे का सांड नु सहे निक्शी पाठा बाक्मा बाक्त। मिनु मेको नेल्ल परमप्रभु यावे कली चोशा चढेचा कली बाक्मा बाक्त। 33 मिनु परमप्रभु यावे कली चढेचा कली गेशो ६ सहे ब्यफ नु हजार सां भेडा बाक्मा बाक्त। 34 तन्न चढेबपुकी इच्का ला बाक्तीके मेको चोशा चढेशो नेल्ल आन कुशुल उक्ने मचाप्मे बाक्त। मोपतीके मेको आन लोकब लेवीपुकीम मेको गेय नेल्ल मनुम्म सम्म नु अरु चढेबपुकीम आंम कली परमप्रभु यावे आ डोंइती ठीक मसेल्मे सम्म वारच पामे बाक्त। मारदे हना आंम कली परमप्रभु यावे आ डोंइती ठीक सेल्चामी चढेब आन क्येडा लेवीपुकी थम होस पाइबबाक्मा बाक्त। २इतिहास ३:३, १६, १७ 35 चोशा चढेतीक नेल्ल नु दुशा बाक्चा आ पर्बम चढेशो आ बोंसो नु चोशा चढेशो कली तूचा थोत्रक चढेतीक शुश बाक्मा बाक्त। मोपा परमप्रभु यावे आ खिं डा पतीक गेय डोंइती डा खोदेशो पा रिम्शो दुम्माक्त। लेवी ३:१६; गन्ती १५:४-१० 36 मिनु हिज्कीयाह नु मुर नेल्ल थाम्पा ग्येरसमा बाक्त। मारदे हना परमप्रभुम आ मुर आन कली पशो रीब पा छक लाक्चा डा पा दुम्माक्त।

30

पास्सा चाड मानेशो

1 मिनु हिज्कीयाहम इस्राएली नु यहूदा डा मुर आन कली “यरूसलेमम बाक्शो परमप्रभु यावे आ खिंम परमप्रभु यावे, इस्राएली आन परमप्रभु कली पास्सा चाड मानेथ जाक्कीन” दे ब्रेत्ता बाक्त। मिनु मेकोमी एफ्राइम नु मनस्से डा मुर आन कली यो चिठी ब्रेक्शा ब्रेत्ता बाक्त। २इतिहास ३५:१ 2 मिनु पिप, आ सरकार डा ठेयब मुर नु यरूसलेमम खुम्सीशो मुर नेल्लेम निक्शी महिनाम पास्सा चाड मानेचा कली लोत्र गारपदमे बाक्त। 3 मेकोपुकीम डोंइती परमप्रभुम देशो खोदेशो पा मानेने मचाप्शो बाक्मा बाक्त। मारदे हना शुश चढेबपुकीम आंम कली परमप्रभु यावे आ डोंइती ठीक मसेल्सीशो बाक्मा बाक्त। मिनु मुरपुकी यो यरूसलेमम मदेल्शो बाक्मा बाक्त। 4 मिनु पिप नु खुम्सीशो मुर नेल्लेमी मेको चाड मानेतीक लोत्र आ पर्बम “ठीक बाक्ब” देंमा बाक्त। 5 मिनु मेकोपुकीम दक्खिन डा बेयर-शेबा रे उत्तर डा दान सम्म डा इस्राएली नेल्ल आन कली परमप्रभु यावे, इस्राएली आन परमप्रभु आ पर्बम पास्सा चाड मानेचा कली यरूसलेमम जाक्चा माल्मा बाक्त। एको क्येडा डोंइती इश्का मुर दुम्शा, एको चाड ममानेशो बाक्मा बाक्त। 6 मिनु पिप नु आ सरकार डा ठेयब मुरुम ब्रेक्शो चिठी चोक्ब मुरपुकी पिप आ देशो खोदेशो पा यहूदा नु इस्राएलम लमा बाक्त। मिनु मेको चिठीम मार ब्रेक्शो बाक्माक्त देशा हना “इस्राएली परमप्रभु यावे, इन किकी पिपी अब्राहाम, इसहाक नु इस्राएल आन परमप्रभु गे लेत्तीन। मेना मेकोमी अस्सुर डा पिपम मलाइश्शो लीशो मुर आन कली लेंशा कोत्रब। इस्राएल याक्ब आ नें बाक्ब। 7 गेपुकी इन किकी पिपी नु आंम मुर खोदेशो मदुमीन। मेकोपुकीम परमप्रभु यावे, इन किकी पिपी आन परमप्रभु कली प्रॉइतेक्म। मोपतीके परमप्रभु यावेमी मेको आन कली खतम सेला बाक्त। मेको आंमा तशो बाक्नीनी। 8 गेपुकी इन किकी पिपी खोदेशो पा काइ मटीब मदुमीन। तन्न परमप्रभु यावे कली आ अरेशो टिशा, आ बाक्तीकेम जाक्कीन। मिनु ‘मेको गेना हना यो आं बाक्तीकेम बाक्ब’ देशो बाक्ब। गे परमप्रभु यावे कली गेय पने। मोपा इन पर्बम आ गाइश्शो बेक्बा, को? 9 गे परमप्रभु यावे गे लेत्तीनी हना, ग्याइश्शा लाइक्चा पुंइसीशो इन खिं खिं डा मुर नु इन आलपुकीम ग्याइक्ब मुर रे शिशी तशा, मेकोपुकी एको रागीम लेश्शा जाक्नीम।

मारदे हना परमप्रभु यावे, इन परमप्रभु दाक्ब नु शिशी पाइब बाक्ब। गेपुकी मेको गे लेत्तीनी हना, मेको यो इन गे लेप्ब” दे ब्रेक्शो बाक्माक्त।

10 मिनु मेको चिठी चोक्बपुकी एफ्राइम नु मनस्से आस सहर सहर नेल्ल हिरशा जबूलून सम्म जाक्दीम्मा बाक्त। तन्न मुरपुकीम मेको आन कली रिश्शा शुक्शी पामे बाक्त। 11 मो हना यो आशेर, मनस्से नु जबूलून डा मुर का निक्शी ब्रेम्शो दुम्शा यरूसलेम लमा बाक्त। २इतिहास ११:१६ 12 परमप्रभु यावेमी यहूदा डा मुर यो थुं का दुम्पदा बाक्त। मिनु मेकोपुकीमी पिप नु सरकार डा ठेयब मुर आन कली देशो, परमप्रभु यावे आ लोत्र खोदेशो पा पामे बाक्त।

13 मिनु शुश मुर महिना निक्शीम बोरब ओरुत्ती मसुप्शो शोब्ले डा चाड मानेचा कली यरूसलेमम जाक्मा बाक्त। मेकेर शुश मुर खुम्सीशो बाक्मा बाक्त। 14 मिनु मेकोपुकीम यरूसलेम आ एर ओथ बाक्शो चढेतीकपुकी नु धूप चोतीक प्रेशशा, किद्रोन खोल्लसाम लाइश्शा ताइक्तमे बाक्त। 15 मिनु मेकोपुकीम महिना निक्शी डा १४ नाक्ती पास्सा चाड मानेतीक पाठा क्योरमे बाक्त। मिनु चढेब नु लेवी परमप्रभु यावे आ डोंइती आंम कली ठीक मसेल्लतीके मुने दोक्शो बाक्मा बाक्त। मिनु मुल आंम कली ठीक सेल्लशा, परमप्रभु यावे आ ख्विम चोशा चढेतीक चढेमे बाक्त। गन्ती ९:१०-१३ 16 परमप्रभु आ मुर मोसा आ ब्रेक्शो अरेशो लोत्र खोदेशो पा मेको आन गेय पतीकेम बाक्मा बाक्त। मिनु लेवीपुकीम चाक्शो हुश चढेबपुकीम ताक्शा बुइक्तमे बाक्त। 17 तन्न मेको शुश खुम्सीशो मुर परमप्रभु यावे आ डोंइती आंम कली ठीक सेल्ले मचाप्शो बाक्मा बाक्त। मोपतीके लेवीपुकीमी मेको मुर आन पर्बम आन पास्सा चाड डा पाठा क्योरचा माल्मा बाक्त। 18 मिनु एफ्राइम, मनस्से, इस्साकार नु जबूलून रागी रे जाक्शो शुश मुरपुकी परमप्रभु यावे आ डोंइती आंम कली ठीक मसेल्लसीशो बाक्मा बाक्त। मो हना यो मेकोपुकीम परमप्रभु यावे अरेशो मपथु, पास्सा चाड मानेमे बाक्त। प्रस्थान १२:- 19 तन्न हिज्कीयाहम मेको आन पर्बम “परमप्रभु यावे गे शिशी पाइब बाक्नीनी। सु सुमी आन थुं नेल्लेमी इन कली, परमप्रभु यावे, आन किकी पिपी आन परमप्रभु खोइक्चा दाक्बा नु इन देशो खोदेशो पा आंम कली ठीक सेल्ले मचाप्शो बाक्मा, मेको आन कली मारेइ मपन” दे पुना बाक्त। 20 मिनु परमप्रभु यावेम हिज्कीयाह आ पुंइशो लोत्र नेना बाक्त। मिनु मुर आन कली सापाइक्मी बाक्त। २इतिहास ७:१४ 21 मिनु यरूसलेमम जाक्ब इस्राएली नेल्लेमी ७ नाक्त सम्म थाम्पा ग्येरसीशा बोरब ओरुत्ती मसुप्शो शोब्ले डा चाड मानेमे बाक्त। मिनु लेवी नु चढेबपुकीम ठेयब सेंदाम कुम्सो पा, ताप्तीक ताप्शा, नाक्त कित कित परमप्रभु यावे कली ठेयब सेल्ले बाक्त। 22 मिनु हिज्कीयाहम परमप्रभु यावे आ गेय रिम्शो पस जोक्ब लेवी आन कली लोत्र पा आन थुं बारपाइक्मी बाक्त। मिनु मुरपुकीम मेको चाड डा जचा थोत्रक ७ नाक्ती सम्म जना जन बाक्मा बाक्त। मेकोपुकीम दुशा बाक्चा आ पर्बम चढेतीक चढेशा, परमप्रभु यावे, आन किकी पिपी आन परमप्रभु कली “गे रिम्शो पाइब बाक्नीनी” दे ग्येरसीशा बाक्मा बाक्त।

23 मिनु खुम्सीशो मुर नेल्लेमी अर्को ७ नाक्त सम्म चाड मानेचा कली लोत्र गारपदमे बाक्त। मोपतीके मेकोपुकीम अर्को ७ नाक्ती सम्म यो ग्येरशा मेको चाड मानेमे बाक्त। 24 यहूदा डा पिप हिज्कीयाहम मेको खुम्सीशो मुर आन कली हजार का ब्यफ नु ७ हजार भेडा चढेचा कली गेमी बाक्त। मिनु सरकार डा ठेयब मुरपुकीम मेको खुम्सीशो मुर आन कली हजार का ब्यफ नु १० हजार भेडा गेमी बाक्त। शुश चढेबपुकीम यो आंम कली परमप्रभु यावे आ डोंइती ठीक सेल्लसीमा बाक्त। 25 मिनु यहूदा डा खुम्सीशो मुर नेल्ले, चढेब नु लेवीपुकी नेल्ल, इस्राएल रे जाक्शो मुरपुकी नु इस्राएल रे प्रोक्शो यहूदाम बाक्ब मुर नेल्ले ग्येरसीशो बाक्मा बाक्त। 26 मोपा यरूसलेमम थम ठेयब ग्येरसीतीक दुम्माक्त। मेको मोदेशो इस्राएल डा पिप दाऊद आ तौ सोलोमन आ पाला रे गेनायो म्दुम्शो बाक्माक्त। 27 मिनु चढेबपुकी नु लेवीपुकी बोक्शा मुर आन कली आसीक गेमे बाक्त। मेको आन पुंइशो लोत्र परमप्रभु यावे आ बाक्तीक स्वर्ग सम्म नेसे बाक्त।

31

मुरपुकीम थान प्रेशशो

1 मिनु मेको नेल्ल नुप्शा नोले यरूसलेम जाक्शो इस्राएली नेल्ल यहूदा डा सहरपुकीम लशा, पूजा पतीक खुक्शो फुल्लु प्रेत्मे बाक्त। मूर्ति पाइश्शो थाम खोल्ले बाक्त। यहूदा, बेन्यामीन, एफ्राइम नु मनस्से रागी नेल्ल डा डांडा डा थान बुल बाल उइश्शा ताइक्तमे बाक्त। मिनु नोले इस्राएली आन आन सहर नु आन आन बाक्तीकेम लेम्मा बाक्त। २इतिहास २९:५; ब्यवस्था ७:५; २राजा १८:४

चढेब आन भाग

2 पिप हिज्कीयाहमी चढेब नु लेवी आन कली आन गेय गेना पचा दे पालो पालो पा वोइक्पदा बाक्त। मिनु चढेब नु लेवी आन कली परमप्रभु यावे कली चोशा चढेतीक चढेचा नु दुशा बाक्चा आ पबर्म चढेचा, परमप्रभु यावे कली “गे रिम्शो पाइब बाक्नीनी” दे कुम्सो पा, ठेयब सेल्टीक कुम्सो नु परमप्रभु यावे आ बाक्तीक डा लाप्चो आ डोंइती गेय पचा कली आन पालो योक्शा गेशो बाक्त। 3 मिनु पिपम आ गोठ रे चोशा चढेचा कली मार गेशो बाक्माक्त देंशा हना, नाक्दो डा चोशा चढेतीके, सुनी डा चोशा चढेतीके, नाइक्तीक नाक्त डा चोशा चढेतीके, औंसी डा चोशा चढेतीके नु देंशो चाड नेल्ल कली चोशा चढेतीक गेशो बाक्माक्त। परमप्रभु यावे आ अरेशो लोव्र दोपा ब्रेक्शो बाक्मे, मोपा पवा बाक्त। गन्ती २८:- 4 मिनु चढेब नु लेवीपुकीम परमप्रभु यावे आ अरेशो लोव्र डा गेय पस डा पस बाक्मल, दे पिपम यरूसलेमम बाक्ब मुर आन कली मेको आन गेचा माल्लशो भाग चढेब नु लेवी आन कली गेचा माल्लीम, दे हुकुम पवा बाक्त। 5 मिनु मुरपुकीम पिप आ हुकुम नेन्मे चोटीन आन नेल्ल क्येडा डोंइती डा मीशो नु सिशशो अन्न, नक अडगुर शांबु, तेल, खुदो नु आन रूम सिशशो मार मार शुश चाक्शा गेमे बाक्त। मेकोपुकीम आन मारेइ मारेइ के १० भागम भाग का चाक्गमे बाक्त। प्रस्थान २३:१९; ब्यवस्था १४:२२-२३ 6 मिनु इस्राएल नु यहूदा डा सहरपुकीम बाक्ब मुरपुकीम यो आन १० भाग डा भाग का बी ब्यफ नु क्यारश भेडा चाक्गमे बाक्त। परमप्रभु यावे, आन परमप्रभु कली गेशो थोव्रक रे १० भाग डा भाग का चाक्शा तेल्ले बाक्त। लेवी २७:३२ 7 मेकोपुकीम बर्स डा महिना सांमी चाक्शा तेल्ला गोव्रमे बाक्त। मिनु ७ महिनाम चाक्ने थुम्मे बाक्त। 8 मिनु हिज्कीयाह नु मेको आ सरकार डा ठेयब मुर जाक्शा, मेको तेल्लो थोव्रक तशा, परमप्रभु यावे नु आ मुर इस्राएली आन कली “गे रिम्शो पाइब बाक्नीनी” देंमा बाक्त। 9 मिनु हिज्कीयाहमी मेको तेल्लो थोव्रक आन पबर्म चढेब नु लेवी आन कली हिल्लो हिक्सी पामी बाक्त। 10 मिनु सादोक आ खिं डा मुर, ठेयब चढेब अजारयाहम “मुरपुकीम परमप्रभु यावे आ खिं कली आन भाग चाक्गमे रे आंइ कली जचा गाप्त। मिनु शुश मार मार हेंशो यो बाक्ब। मारदे हना परमप्रभु यावेम आ मुर आन कली शुश आसीक गेशो बाक्ब। मिनु एको इशका मार मार हेंशो यो बाक्ब” देंमाक्त।

11 मिनु नोले हिज्कीयाहमी “परमप्रभु यावे आ खिंमी मार मार वोइक्तीक कोठापुकी सेलीन” दे हुकुम पवा बाक्त। मिनु मेको सेल्ले बाक्त। 12 मिनु मुर नेल्लेमी जोल मपथु, आन १० भाग डा भाग का नु परमप्रभु कली गेशो नेल्ल चाक्गमे बाक्त। मेको १० भाग डा भाग का ताक्शो कोव्रब ठेयब लेवी कोनन्याह बाक्माक्त। मिनु मेको आ लोक्ब शिमेइ चहिं मेको आ दी डा ठेयब मुर बाक्माक्त। 13 मिनु पिप हिज्कीयाह नु परमप्रभु आ खिं डा ठेयब मुर अजारयाहमी कोनन्याह नु आ लोक्ब शिमेइ आस कली वारच पाइब येहीएल, अजजीयाह, नाहाथ, आसाहेल, येरीमोथ, योजाबाद, एलीएल, इस्माक्याह, माहाथ नु बेनायाह आन कली योव्रशा वोइक्पदसे बाक्त। 14 मिनु इम्नाह आ तौ कोरे पूर्व डा लाप्चो खाल पाइब लेवी बाक्माक्त। मेकोमी मुर आन परमप्रभु कली ग्येरशा चढेतीक गेशो मारेइ मारेइ कोव्रब बाक्माक्त। मिनु चढेशो, चाक्शो मारेइ मारेइ परमप्रभु यावे कली नु सु सु कली योक्चा माल्बा, मेको नेल्ल कोव्रब बाक्माक्त। 15 मिनु कोरे कली चढेब आन सहरम वारच पाइब एदेन, मीन्यामीन, येशुआ, शेमायाह, अमारयाह नु शेकन्याह बाक्मा बाक्त। मेकोपुकीम पालो पालो पा गेय पाइब चढेब खाल्पा नु ठिटा नेल्ल आन कली खाल का डा पा थमा पा जोल मपथु, योक्तीक गेय पामे बाक्त। 16 मोपतीके सु सु आन भाग गेचा पुंडसीब बाक्मा, परमप्रभु यावे आ खिं डा गेय पाइब परमप्रभु यावे आ लोव्र खोदेंशो पालो पालो पा आन नें ब्रेक्तीक कागजम ब्रेक्शो बाक्मा बाक्त। बर्स सां लाक्शो वोंइश आल आन नें ब्रेक्शो बाक्माक्त। 17 मेको चढेब आन खिं खिं कोव्रशा, ब्रेक्सीशो बाक्मा बाक्त। लेवीपुकी २० बर्स लाक्शो, आन पचा डा गेय नु पालो कोव्रशा ब्रेक्शो बाक्मा बाक्त। 18 चढेब, आन आइक्च आल, आन मीश, आन तमी तौ नेल्ल आन नें ब्रेक्शो बाक्माक्त। मारदे हना मेकोपुकीम “परमप्रभु यावे आ गेय ला पाइनीकी” दे थुं पशो बाक्मा बाक्त। 19 मिनु हारून आ तौ डा चढेब वोंइश मुरपुकी सहर आन नेक्था डा योक्तीकेम बाक्शो, चढेब आन दातेमी सु सु वोंइश मुर आन नें ब्रेक्शो बाक्मा, मेको आन भाग गेचा पुंडसमा बाक्त। मिनु चढेब नु लेवी आन दातेमी सु सु आन नें ब्रेक्शो बाक्मा, मेको गेचा पुंडसमा बाक्त।

20 मिनु हिज्कीयाहम यहूदा नेल्लेमी मोदेंशो पवा बाक्त। मेकोमी परमप्रभु यावे, आ परमप्रभु आ डोंइती मार रिम्शो, मार ठीक नु थमा सुइक्चा पुंडसीशो बाक्मे, मेको पवा बाक्त। 21 मेकोमी परमप्रभु यावे आ खिं डा गेय पतीके, परमप्रभु यावे आ अरेशो लोव्र नु आ शेंशो तुइक्तीकेमी आ परमप्रभु कली आ थुं नेल्लेमी मला बाक्त। मिनु आ पशो नेल्लेमी रिम्शो दुम्माक्त। भजन संग्रह १:३

32

सन्हेरीबम लडाइ पशो

२राजा १८:१३-१९, ३७; यसैया ३६:-; यसैया ३७:-

1 मिनु हिज्कीयाहम मेको रिम्शो गेय नेल्ले पने थुमा नोले, अस्सुर डा पिप सन्हेरीब यहूदा ओव्रशा “यहूदा डा बोल्यो सहरपुकी आंम के सेल्लुड” दे मिम्शा, मेको सहरपुकी आ नेक्था ताम्बु कीडा बाक्त। 2 मिनु हिज्कीयाहमी सन्हेरीब जाक्शा, यरूसलेम कली लडाइ तोचा चिक्शो तवा चोटीन 3 मेकोमी सहर डा लाडगा डा ब्वाक्कु बुक्तीके तेक्चा, दे सरकार डा ठेयब मुर नु कप्तानपुकी नु सल्ला पवा बाक्त। मिनु मेकोपुकीमी पिप कली वारच पामे बाक्त। 4 मेकोपुकीम शुश मुर खुष्शा, आन रागी रे ब्वाक्कु बुक्तीक नु खोल्सा नेल्ल तेक्गमे बाक्त। मिनु मेकोपुकीम “अस्सुर डा पिपपुकी एक जाक्शा, शुश ब्वाक्कु तूचा मतामेक्ल” देंमा बाक्त। 5 मिनु हिज्कीयाहम शुश बोल पा सहर डा ब्रेशो गारो नेल्ल सेल्पदा बाक्त। मिनु आ तार लाइशो खिंपुकी सेल्पदा बाक्त। मिनु मेकोमी गारो डा लाडगा गे अर्को गारो सेल्पदा बाक्त। मिनु दाऊद आ सहर डा गारो तिक्चा कली खप तेल्पदा बाक्त। मिनु मेकोमी शुश या नु तेक्तीक यो सेल्पदा बाक्त। २इतिहास २५:२३; 6 मेकोमी लडाइ पाइब आन कप्तान योव्रशा, मेको आन कली सहर डा ठेयब लाप्चो आ डोंइती डा दिंममी पुक्शा, मेको आन कली आन थुं बारपाइशशा 7 “बोल्यो नु महिंब दुमीन। अस्सुर डा पिप नु मेको आ चाक्शो शुश मुर तशा, महिनीन। मारदे हना मेकोपुकी नु बाक्शो क्येडा गोपुकी नु बाक्शो का थम ठेयब बाक्ब। 8 मेको नु शुश मुर ला बाक्नीम। तन्न गोपुकी नु परमप्रभु यावे, इं परमप्रभु बाक्ब। मेकोमी इं कली वारच पा इं पा डा लडाइ पाइब” दे यहूदा डा पिप हिज्कीयाहमी मुर आन थुं बारपदा बाक्त। येरमीया १७:५-६

9 मेको नोले अस्सुर डा पिप सन्हेरीबम आ लडाइ पाइब लाकीशम बाक्मानु, यहूदा डा पिप हिज्कीयाह नु यरूसलेम डा मुर नेल्ल आन कली लोव्र नेंपाइक्चा कली मुरपुकी सोइक्ता बाक्त। 10 मिनु मेकोपुकीम “अस्सुर डा पिप सन्हेरीबम मार लोव्र पाइब देंशा हना, गे एर ओंथ रे पुम्शो यरूसलेम सहरम दोपा ब्रोंइने चाप्नीनी, दे सु कली थमा सुइक्नीनी? 11 पिप हिज्कीयाहमी ‘परमप्रभु यावे, इं परमप्रभु कली अस्सुर डा पिप आ गुइ रे प्रोंइब, दे जोल मपवा? तन्न मेकोमी इन बाक्तीकेमीन अन्काल नु ब्वाक्कु तूतू दाक्पाइशशा, इन कली बेक्पाइक्चा कली मोदेंशो लोव्र पशो बाक्ब। 12 मार, मेको हिज्कीयाहमी डांडा डा थान नु आ चढेतीक बुल बाल एशशा खतम मपोक्पदा? मिनु यहूदा नु यरूसलेम डा मुर नेल्ल आन कली, चढेतीक काम पूजा पा नु मेकेर ला चढेचा’ मदेम डा? 13 गो नु आं किकी पिपीम अर्को रागी जात जात डा मुर आन कली मार पाइक्का, मेको गोपुकीम मतुइशो बाक्नीनी डा? मार, मेको रागी रागी डा मुर आन देवताम मेको रागी आन कली आं गुइ रे प्रोंइने चाप्मे डा? 14 आं किकी पिपीम खतम पोक्शो रागी रागी डा मुर आन देवता आन दाते डा तेको देवताम आं गुइ रे आ मुर आन कली प्रोंइने चबा डा? मिनु दोपा इन परमप्रभुमी इन कली आं गुइ रे प्रोंइने चाप्बा? 15 मोपतीके हिज्कीयाहम इन कली जोल पा दूली लां खोइक्पाइक्चा मगेन। मेको कली थमा मसुतीन। मिनु तेकोइ देवतापुकीम आन रागी नु राज्य डा मुर आन कली आं किकी पिपी नु आं गुइ रे प्रोंइने मचाप्शो बाक्तेक्म हना, इन परमप्रभुमी इन कली आं गुइ रे दोपा प्रोंइने चाप्बा डा? देंशो बाक्ब मतीन” देंमाक्त।

16 मिनु सन्हेरीब आ गेय पाइबपुकीमी परमप्रभु यावे नु मेको आ गेय पाइब हिज्कीयाह आ पर्बम चिनु मरिम्शो लोव्र तेम्शा, लोव्र पामे बाक्त। 17 पिप सन्हेरीबम परमप्रभु यावे, इस्राएली आन परमप्रभु कली यो तोक्शा लोव्र पा चिठी ब्रेक्शो बाक्माक्त। मिनु मेको चिठीम मार ब्रेक्शो बाक्माक्त देंशा हना “दोपा अर्को रागी रागी डा मुर आन देवतापुकीम आन मुर आन कली आं गुइ रे प्रोंइने मचाप्मे, मोपा हिज्कीयाह आ परमप्रभुमी यो आ मुर आन कली आं गुइ रे प्रोंइने मचाप्ब” दे ब्रेक्शो बाक्माक्त। 18 मिनु मेकोपुकीम सहर आन के सेल्चा कली यरूसलेम डा गारो तार राप्ब मुर आन कली हिंच कोंइचा कली ठेयब सेंदा पा यहूदी आन लोव्रमी मेको चिठीम ब्रेक्शो लोव्र पा ग्रीमा बाक्त। 19 मेकोपुकीम मुर आन गुइम सेल्शो रागी डा देवता आन कली खोदेंशो पा यरूसलेम डा परमप्रभु कली तोक्शा लोव्र पामे बाक्त।

सन्हेरीब कली मुने दोक्पाइशशो

20 मेना पिप हिज्कीयाह नु आमोज आ तौ परमप्रभु यावे आ लोव्र पाइब यसैयाम परमप्रभु कली ठेयब सेंदा पा पुन्से बाक्त। 21 मिनु परमप्रभु यावेम आ स्वर्ग डा गेय पाइब का अस्सुर डा पिप आ बाक्तीकेम सोइशशा, आ बोल्यो लडाइ पाइबपुकी, आ कप्तानपुकी नु आ ठेयब मुरपुकी नेल्ल साइक्पदा बाक्त। मिनु सन्हेरीब मुने दोक्शा आ रागी लेम्माक्त। मिनु मेको आ देवता थान ओव्रमेनु, आ तौ का निकशीमी तरवारम क्योरशा सदमे बाक्त। 22 मोपा परमप्रभु

यावेम हिज्कीयाह नु यरूसलेमम बाक्ब मुर आन कली अस्सुर डा पिप सन्हेरीब नु मेको आन जोरी सत्रु नेल्ल आन गुइ रे प्रोना बाक्त। परमप्रभु यावेमी मेको रागी कली नाइक्चा गेवा बाक्त। 23 मिनु शुश मुरपुकीम यरूसलेमम परमप्रभु यावे कली मार मार चाक्गमे बाक्त। मिनु यहूदा डा पिप हिज्कीयाह कली शुश शोंप चाक्गमे बाक्त। मोपा रागी रागी डा मुर नेल्लेमी मेको कली मान पामे बाक्त।

हिज्कीयाह रोइ पशो

२राजा २०:-; यसैया ३८:-; यसैया ३९:-

24 मिनु नोले हिज्कीयाह शुश रोइ पा बेक्चा चिकता बाक्त। मिनु मेकोमी परमप्रभु यावे कली पुना बाक्त। मिनु परमप्रभु यावेमी मेको कली लोत्र लेशशा, चिन्ड का गेवा बाक्त। 25 तन्न हिज्कीयाहमी परमप्रभु यावेमी मेको कली रिम्शो पशोमी “गे रिम्शो पाइब बाक्नीनी” मदेंथु ठेयब लेशशो दुम्माक्त। मोपतीके परमप्रभु यहूदा नु यरूसलेम आ पर्बम गाइक्ता बाक्त। 26 मिनु हिज्कीयाह नु यरूसलेम डा मुर नेल्लेम ब्रेम्शो सेल्सीमे बाक्त। मोपतीके परमप्रभु यावे हिज्कीयाह आ पालाम मेकोपुकी नु मगाइक्ता बाक्त।

हिज्कीयाह आ नोले डा नाक्ती

27 हिज्कीयाह शुश शोंप पाइशशो नु मान ताइब मुर दुम्शो बाक्माक्त। मेकोमी आ सुन चांदी, हीरापुकी, मस्लापुकी तेक्तीकपुकी नु अरु मार मार शुश क्येट लाइब वोइक्तीक खिंपुकी सेला बाक्त। 28 शुश अन्न, नक अडगुर शांबु नु तेल वोइक्तीक खिंपुकी सेला बाक्त। मिनु शुश बी ब्यफ नु क्यारश भेडा आन कली ठेयब गोठपुकी सेला बाक्त। 29 मेकोमी आंम कली सहरपुकी सेला बाक्त। मेको के बी ब्यफ नु क्यारश भेडा शुश बाक्मा बाक्त। मारदे हना परमप्रभुम मेको कली थमा पा शुश शोंप गेशो बाक्माक्त। 30 मेको हिज्कीयाहमी गिहोन आ आइक्था डा बुक्शो ब्वाक्कु तेक्शा उइ दाऊद आ सहर आ पच्छिम गे शाइक्पाइशशो बाक्माक्त। मेको आ पशो गेय नेल्ले रिम्शो दुम्शा, सोशो बोशो दुम्माक्त। 31 मिनु बेबीलोन डा सरकार डा ठेयब मुर आन सोइशशो मुर मेको रागीम तांइसीशो छक लाक्चा चिन्ड आ पर्बम हिल्लो पथ जाक्मा बाक्त। तन्न परमप्रभुम हिज्कीयाह कली नाक्शा कोत्रचा कली नु मेको आ थुंम बाक्शो मार बाक्बा, दे तुइक्चा कली वारच मपवा बाक्त।।

हिज्कीयाह बेक्शो

32 हिज्कीयाह आ नोले डा गेय नु आ रिम्शो पशो आमोज आ तौ परमप्रभु यावे आ लोत्र ताइब यसैया आ यहूदा डा पिप आन किताबम ब्रेक्शो बाक्ब। 33 मिनु हिज्कीयाह बेक्माक्त। मिनु मुरपुकीम मेको कली दाऊद आ चच युइ आन कली थिम्तीक देम्सीलो मेर थिम्मे बाक्त। मिनु मेको बेक्मेनु, यहूदा नु यरूसलेम डा मुर नेल्लेमी मान पामे बाक्त। मिनु मेको आ नोले आ तौ मनस्से पिप दुम्माक्त। २इतिहास १६:१४

33

यहूदा डा पिप मनस्से

२राजा २१:१-१८

1 मनस्से पिप दुम्मेनु, १२ बर्स दुम्शो बाक्माक्त। मेकोमी यरूसलेमम ५५ बर्स सासन पवा बाक्त। 2 मेको परमप्रभु यावेम इस्राएली आन डोंइती रे खेरशो रागी रागी डा मुर आन ग्रांघा दिशो लांम गाक्माक्त। मिनु परमप्रभु यावे आ डोंइती मार मरिम्शो बाक्मे, मेको पवा बाक्त। ब्यवस्था १८:९ 3 मेकोमी आ आफ हिज्कीयाहम खतम पोक्शो डांडा डा थान लेशा सेला बाक्त। मिनु मेकोमी बाल देवता आन कली चढ़ेतीक सेला बाक्त। मेकोमी मूर्ति पाइशशो थाम यो सेला बाक्त। मेकोमी सरीड डा सोरुल आन कली पूजा पा बाप्शा, सेउ पवा बाक्त। २राजा १८:४ 4 मेकोमी परमप्रभु यावे आ खिंम चढ़ेतीकपुकी सेला बाक्त। मेको खिं आ पर्बम परमप्रभु यावेम “यरूसलेमम आं नें गेना हना यो लीब” देंशो बाक्माक्त। ब्यवस्था १२:५,११; १राजा ९:३ 5 मेकोमी सरीड डा सोरुल आन कली परमप्रभु यावे आ खिं डा लाडगा निम्फाम चढ़ेतीक सेला बाक्त। 6 मेकोमी आ तौ कली बेन-हिन्नोम आ बेसीम चोशा चढ़ेवा बाक्त। मन्तर तन्तर, टुना मुना पा नु लिंक्यु कोत्रडा बाक्त। मेकोमी टुना मुना पा नु बेक्शो मुर नु लोत्र पवा बाक्त। मिनु जादू कली गेय पपदा बाक्त। मोपा परमप्रभु यावे आ डोंइती थम मरिम्शो पवा बाक्त। मिनु मेको कली गाइक्पदा बाक्त। २इतिहास २८:३; लेवी २०:६ 7 मेकोमी मुपाइशशो मूर्ति परमप्रभु आ खिंम वोइक्पदा बाक्त। मेको खिं आ पर्बम परमप्रभुम दाऊद नु आ तौ सोलोमन आस कली “गो इस्राएल डा थर नेल्ल आन दाते रे यरूसलेम कली योत्रता। मिनु

यरूसलेमम बाक्शो एको खिंम गेना हना यो आं नें वोइक्नुड। 8 मेकोपुकीम मोसामी गेशो आं शेंशो अरेशो लोव्र नेल्ल पशा, फुल्लुम मुशा ब्रेक्शो लोव्र नु निसाफ पतीक लोव्र होस पा रिम्शो पा पाम्तेक्म हना, गो आन किकी पिपी आन कली गेशो इस्राएल रागी रे इस्राएली आन कली मगुंडुडमी” देंशो बाक्माक्त। 9 मनस्सेम यहूदा नु यरूसलेम डा मुर आन कली थम दूली लां खोइक्पाइशो बाक्माक्त। परमप्रभु यावेमी इस्राएली आन डोंइती खतम पोक्शो रागी रागी डा मुर आन क्येडा यो शुश मरिम्शो पपाइशो बाक्माक्त।

10 परमप्रभु यावेम मनस्से नु आ मुर आन कली लोव्र पवा बाक्त। तन्न मेकोपुकी मबिस्समा बाक्त। 11 मोपतीके परमप्रभु यावेम मेकोपुकी नु लडाइ पपाइक्चा कली अस्सुर डा पिप आ लडाइ पाइब आन कप्तान आन कली चाक्मी बाक्त। मिनु मेकोपुकीम मनस्से कली ग्याइशशा मेको आ शोव्रम बोल्सी ब्वेक्तमे बाक्त। मिनु मेको कली कांसा के साडलोम पाइशशा बेबीलोन लदमे बाक्त। 12 मिनु मेको मोपा श्येत जवानु, परमप्रभु यावे, आ परमप्रभु आ शिशी मला बाक्त। मिनु आ किकी पिपी आन परमप्रभु आ डोंइती आ थुं ब्रेम्पदा बाक्त। 13 मिनु मेकोमी परमप्रभु कली पुना बाक्त। मिनु परमप्रभुम मेको आ पुंइशो नेंशा, लेंशा यरूसलेमम चाक्गा बाक्त। मिनु लेंशा मेकेर डा पिप सेला बाक्त। मिनु मोपा मनस्सेम परमप्रभु यावे, थमा परमप्रभु बाक्ब, दे तुइक्ता बाक्त। १राजा १८:३९

14 मिनु मेको लेशशा नोले दाऊद आ सहर डा लाडगाम अर्को गारो गिहोन आ पच्छिम गे सेला बाक्त। मेको ओफेल हिरशा, डांइ लाप्चो सम्म सेला बाक्त। मेकोमी मेको गारो शुश दुइशो सेला बाक्त। मिनु मेकोमी यहूदा डा बोल्यो सहर नेल्लेमी कप्तानपुकी वोइक्पदा बाक्त। २इतिहास २७:३ 15 मेकोमी अर्को रागी डा देवतापुकी नु मुशा सेल्शो मूर्ति परमप्रभु यावे आ खिं रे गुंइदा बाक्त। मिनु आ परमप्रभु यावे आ खिं बाक्शो डांडाम नु यरूसलेमम सेल्शो चढेतीक नेल्ल ताइक्ता बाक्त। मिनु मेको नेल्ल आन कली सहर रे गुंइशा ताइक्ता बाक्त। 16 मिनु नोले मेकोमी परमप्रभु यावे कली चढेतीके लेंशा सेल्शा, मेकेर दुशा बाक्चा आ पर्बम चढेतीक नु “गे रिम्शो पाइब बाक्नीनी” दे चढेतीक चढेवा बाक्त। मिनु यहूदा डा मुर आन कली परमप्रभु यावे, इस्राएली आन परमप्रभु कली ला गेय पचा, दे हुकुम पवा बाक्त। 17 मेना सम्म मुरपुकीम डांडा डा थानम चढेमे बाक्त। तन्न परमप्रभु यावे, आन परमप्रभु कली चढेमे बाक्त।

18 मिनु मनस्सेम अरु मार मार पवा, आ परमप्रभु कली पशो पुंइतीक लोव्र, नु परमप्रभु यावे, इस्राएली आन परमप्रभु आ नेंमी आ लोव्र पाइब आन लोव्र नेल्ल इस्राएल डा पिप आन इतिहासम ब्रेक्शो बाक्ब। 19 मेको आ पुंइतीक लोव्र नु परमप्रभुम आ पुंइशो दोपा नेना, आ ब्रेम्शो दुम्चा क्येडा डोंइती पशो पाप नेल्ल नु आ परमप्रभु कली थमा मसुइक्थु, डांडा डा थान ते ते सेला, मूर्ति पाइशशा थाम नु मूर्ति वोइशो नेल्ल परमप्रभु यावे आ लोव्र पाइब आन इतिहासम ब्रेक्शो बाक्ब। 20 मिनु मनस्से बेक्माक्त। मिनु मुरपुकीम आ दरवार डा बाक्तीकेम थिम्मे बाक्त। मेको आ नोले आ तौ आमोन पिप दुम्माक्त।

यहूदा डा पिप आमोन

२राजा २१:१९-२६

21 आमोन पिप दुम्मेनु, २२ बर्स दुम्शो बाक्माक्त। मेकोमी बर्स निक्शी यरूसलेमम सासन पवा बाक्त। 22 मेकोमी आ आफ मनस्से खोदेंशो पा परमप्रभु यावे आ डोंइती मार मरिम्शो बाक्मे, मेको पवा बाक्त। आमोनमी आ आफ मनस्सेम सेल्शो मूर्ति नेल्ले आन कली चढेशा, पूजा पवा बाक्त। 23 तन्न मेकोमी आ आफ मनस्से खोदेंशो पा परमप्रभु यावे आ डोंइती आंम कली ब्रेम्शो मसेला बाक्त। आमोन आ पशो मरिम्शो शुश बारना बारन लमाक्त। 24 मिनु आमोन आ दरवारम गेय पाइबपुकीम लोव्र गारपाइशशा, मेको कली सदमे बाक्त। 25 तन्न मेको रागी डा मुरपुकीम पिप आमोन कली साइक्ब आन कली यो सदमे बाक्त। मिनु आ तौ योसीयाह कली मेको आ आफ आ पा डा पिप सेल्मे बाक्त।

34

यहूदा डा पिप योसीयाह

२राजा २२:१-२; २राजा २३:४-१४

1 योसीयाह पिप दुम्मेनु, ८ बर्स दुम्शो बाक्माक्त। मेकोमी यरूसलेमम ३१ बर्स सासन पवा बाक्त। 2 मेकोमी परमप्रभु यावे आ डोंइती मार ठीक बाक्मे, मेको पवा बाक्त। मेको ग्युरा पेरा मपथु, आ किकी पिपी दाऊद आ लांम गाक्माक्त। २इतिहास २९:२

मूर्ति पूजा थुम्पाइशो

3 मेकोमी सासन पशो ८ बर्स दुम्मेनु, ठिटा बाक्ना बाक्ना आ किकी पिपी दाऊद आ परमप्रभु कली माल्चा गोवा बाक्त। मिनु सासन पशो १२ बर्समी यहूदा नु यरूसलेम डांडा डा थानपुकी, मूर्ति पाइशो थामपुकी नु मुशा नु चेम्शा सेल्शो मूर्तिपुकी ताइक्चा गोवा बाक्त। लेवी २६:३० 4 मिनु पिप आ डोंइती बाल देवता आन चढेतीकपुकी प्रेप्पदा बाक्त। मिनु मेको इक्का इर बाक्शो धूप चोतीकपुकी नु चढेतीक प्रोल्शा खतम पोक्गा बाक्त। मिनु मेकोमी मूर्ति पाइशो थाम, चेम्शा सेल्शो मूर्तिपुकी फस पोक्मी बाक्त। मिनु मेको कली चढेब आन तुरस तारी फ्रवा बाक्त। 5 मिनु मेकोमी चढेब आन रुश यो आन चढेतीकेम चोवा बाक्त। मोपा मेकोमी यहूदा नु यरूसलेम कली ग्रान्ग्रा मदिशो सेला बाक्त। १राजा १३:२ 6 मेकोमी मनस्से, एफ्राइम, सिमियोन नु नाप्ताली आन सहर सम्म नु मेको आन एर ओंथ ब्रेशो खिंम बाक्शो २इतिहास ३१:१ 7 अशेराह आ चढेतीकपुकी प्रेशशा नु मूर्ति पाइशो थामपुकी नु मूर्ति नेल्ल फस पोक्गा बाक्त। मिनु मेकोमी इस्राएल रागी नेल्ल डा धूप चोतीक खतम पोक्गा बाक्त। मिनु नोले मेको यरूसलेम लेम्माक्त।

परमप्रभु आ खिं ठीक सेल्शो

२राजा २२:३-२०; २३:१-३

8 मेकोमी आ सासन पशो १८ बर्सम रागी नु परमप्रभु यावे आ खिं ग्रान्ग्रा मदिशो सेल्ने थुमा नोले, असाल्याह आ तौ शाफान, सहर डा हुकुम पाइब मासेयाह नु राज्य डा ब्रेक्ब यो-आहाज आ तौ योआह आन कली परमप्रभु यावे, आ परमप्रभु आ खिं बिग्रेशो सेल्थ सोइक्तीमी बाक्त। 9 मिनु मेकोपुकी ठेयब चढेब हिल्कीयाह आ बाक्तीक जाक्शा, परमप्रभु आ खिंम चाक्शो क्येट मेको कली गेमे बाक्त। मेको क्येट लाप्चो खाल पाइब लेवीपुकीम मनस्से, एफ्राइम नु इस्राएल डा लीशो मुर नेल्ल रे, यहूदा, बेन्यामीन नु यरूसलेमम बाक्ब मुर नेल्ल रे खुप्शो बाक्मा बाक्त। 10 मिनु मेकोपुकीमी मेको क्येट परमप्रभु यावे आ खिंम गेय पाइब आन कली कोव्रब आन कली गेमे बाक्त। मिनु मेको कोव्रबपुकीमी गेय पाइब आन कली गेमे बाक्त। मेको क्येट बिग्रेशो सेल्तीक गेय नु मेको कली डोंइती डा खोदेंशो सेल्तीक गेय पचा कली माल्मा बाक्त। 11 मेकोपुकीम मेको यहूदा डा पिपपुकीम प्रोंइशो खिं लेंशा रिम्शो सेल्चा कली माल्मा बाक्त। मेको क्येट शी सेल्ब आन कली शी, दालीन, ग्रोव्रलो ग्याप्चा कली गेमे बाक्त। मिनु गारो प्रोव्रब आन कली खोइशो फुल्लु ग्याप्चा कली गेमे बाक्त। 12 मिनु मुरपुकीम रिम्शो गेय पामे बाक्त। मिनु लेवीपुकी मेरारी आ तौ याहाथ नु ओबदिया, कोहाथ आ तौ जकरिया नु मेशुल्लाम गेय पाइब आन कली कोव्रब वोइशो बाक्मा बाक्त। अरु लेवीपुकी ताप्तीक ताप्स शुश जोक्ब बाक्मा बाक्त। 13 मेकोपुकी कुरब मुर कोव्रचा कली नु गेय चलेचा कली वोइशो बाक्मा बाक्त। का निक्शी लेवीपुकी ब्रेक्ब, का निक्शी मार माल्बा, मार बाक्बा, तुइक्चा कली नु का निक्शी लाप्चो खाल पाइब बाक्मा बाक्त।

अरेशो लोव्र डा किताब थिश्शो

14 मेकोपुकीम परमप्रभु यावे आ खिंम चाक्शो क्येट ग्रुंडमेनु, चढेब हिल्कीयाहम मोसा रे पा गेशो परमप्रभु यावे आ अरेशो लोव्र ब्रेक्शो किताब थिदा बाक्त। 15 मिनु हिल्कीयाहम ब्रेक्ब शाफान कली “गो परमप्रभु यावे आ खिंम आ अरेशो लोव्र ब्रेक्शो किताब थिश्शो बाक्नुड” दे मदा बाक्त। मिनु हिल्कीयाहम मेको किताब शाफान कली गेवा बाक्त। 16 मिनु शाफानम मेको किताब पिप आ बाक्तीक चाक्शा “इन गेशो गेय नेल्ल इन गेय पाइबपुकीम पशो बाक्नीम। 17 मेकोपुकीम परमप्रभु यावे आ खिंम बाक्शो क्येट मेकेर डा कोव्रब मुर नु गेय पाइब आन कली गेशो बाक्नीम” देंमाक्त। 18 मिनु ब्रेक्ब शाफानम पिप कली “चढेब हिल्कीयाहम आं कली किताब का गेशो बाक्ब” दे शेंदा बाक्त। मिनु शाफानम मेको किताब पिप आ डोंइती पदेशा नेंपदा बाक्त।

19 मिनु पिपम मेको अरेशो लोव्र ब्रेक्शो किताबम ब्रेक्शो लोव्र नेना नोले थुं खाइशशा, आ वा खाक्गा बाक्त। 20 मिनु पिपमी हिल्कीयाह, शाफान आ तौ अहीकाम, मीकाह आ तौ अब्दोन, ब्रेक्ब शाफान नु पिप कली गेय पाइब आसायाह आन कली, 21 “गो नु इस्राएल नु यहूदाम लीशो मुर आन पर्बम परमप्रभु यावे कली हिल्लो पने। मेको थिश्शो किताबम ब्रेक्शो लोव्र गो नु आंइ किकी पिपीम मटितीके परमप्रभु यावे गोपुकी नु शुश गाइशो बाक्माक्त। मेको ब्रेक्शो लोव्र गो मपक” देंमाक्त।

22 मोपतीके हिल्कीयाह नु पिपम सोइशो मुरपुकी परमप्रभु यावे आ लोव्र पाइब हुल्दा आ बाक्तीकेम हिल्लो पथ लमा बाक्त। मेको पिप आ दरवार डा वासी कोव्रब हासा आ चच तोखाथ आ तौ शाल्लुम आ मीशे बाक्माक्त। मेको यरूसलेम डा नक सहरम बाक्बाक्माक्त। मिनु मेको कली नेल्ल लोव्र देंमा बाक्त। 23 मिनु हुल्दाम मेको आन

कली “परमप्रभु यावे, इस्राएली आन परमप्रभु मार देंत देंशा हना, गे आं बाक्तीकेम सोइक्ब मुर कली 24 परमप्रभु यावेम ‘यहूदा डा पिप आ डोंइती पढेशो किताबम ब्रेक्शो सराप नेल्ल खाप्चा कली, गो एको रागी नु एकेर बाक्ब मुर नेल्ल आन कली खतम पोक्नुडमी। ब्यवस्था २८:१५-६८ 25 मारदे हना मेकोपुकीम आं कली प्रोंइशा, अर्को देवी देवता आन कली चढेशो बाक्नीम। मिनु मेकोपुकीम आंम आन गुडम सेल्शो मूर्तिम आं कली गाइक्पाइशो बाक्नीम। मोपतीके गो मेको रागी तशा गाइक्ताक्ड। मिनु आं गाइशो मबेक्ब’ देंत। 26 तन्न परमप्रभु यावे कली हिल्लो पथ इन कली सोइक्ब यहूदा डा पिप कली परमप्रभु यावे, इस्राएली आन परमप्रभु मार देंत देंशा हना 27 ‘गे परमप्रभु यावेमी मेको रागी नु आ मुर आ पर्वम ब्रेक्शो लोव्र नेंशा, इ थुंम परमप्रभु आ डोंइती ब्रेम्शो सेल्शा, इ वा खाक्शा, डाक्शा, इ पशो लोव्र नेंता। २इतिहास ३३:१२-१३ 28 मोपतीके गे एको खतम दुम्तीके मताइनेवे। गे थुं नाइशशा बेक्नेवे। मिनु इ किकी पिपी आन कली थिम्तीकेम थिम्चा पुंइसीनेवे’ दे मतीने” देंमाक्त। मिनु सोइशशोपुकीमी हुल्दा आ देंशो पिप कली मदमे बाक्त।

29 मेको नोले पिपम यहूदा नु यरूसलेम डा खाल्पा नेल्ल आन कली गुम्चा, दे ब्रेत्थ सोइक्ता बाक्त। 30 मिनु पिप परमप्रभु यावे आ खिं लमाक्त। मिनु यहूदा डा मुर नेल्ल, यरूसलेमम बाक्ब मुरपुकी, चढेब नु लेवीपुकी, आइक्च नु ठेयब मुर नेल्लेम मेको आ नोले खोदमे बाक्त। मिनु पिपम परमप्रभु यावे आ खिंम थिश्शो आ कबल डा किताब पढेशा नेंपाइक्मी बाक्त। 31 मिनु पिप आ बाक्तीकेम राप्शा, परमप्रभु यावे नु कबल का पवा बाक्त। मार कबल पवा बाक्त देंशा हना, परमप्रभु यावे आ नोले खोइक्चा, मेको आ शेंतीके, आ देंशो नु आ फुल्लुम मुशा ब्रेक्शो लोव्र थुं नेल्लेमी पचा नु मेको किताबम ब्रेक्शो कबल डा लोव्र नेल्ल पचा कली कबल पवा बाक्त। २इतिहास १५:१२ 32 मेको नोले यरूसलेम नु बेन्यामीन रे जाक्शो मुर नेल्ल आन कली मेको ब्रेक्शो लोव्र खाप्नीकी, दे कसम जपाइक्मी बाक्त। मिनु यरूसलेमम बाक्ब मुरपुकीम आन किकी पिपी आन परमप्रभु आ कबल खाप्मे बाक्त। 33 मिनु योसीयाहम इस्राएली आन रागी नेल्ल रे ग्रान्रा दिशो मूर्ति नेल्ल गुंइशा ताइक्ता बाक्त। मिनु इस्राएलम बाक्ब मुर नेल्ल आन कली परमप्रभु यावे, आंम परमप्रभु आ नोले ठेयब सेल्पदा बाक्त। मेको पिप ब्रोंइम सम्म मुरपुकीम परमप्रभु यावे, आन किकी पिपी आन परमप्रभु कली खोदमे बाक्त।

35

योसीयाहम पास्सा चाड मानेशो
२राजा २३:२१-२३

1 योसीयाहमी यरूसलेममी परमप्रभु यावे कली पास्सा चाड मानेवा बाक्त। मिनु मुरपुकीमी डोंइती डा महिना डा १४ नाक्ती पास्सा चाड डा पाठा क्योरमे बाक्त। प्रस्थान १२:६ 2 मिनु पिपमी चढेब आन कली आन आन गेय गेमी बाक्त। मिनु मेकोमी परमप्रभु यावे आ खिंम गेय पचा, दे आन थुं बारपाइक्मी बाक्त। 3 मिनु लेवीपुकी इस्राएली आन कली शेंब बाक्मा बाक्त। मेकोपुकी परमप्रभु यावे आ गेय ला पाइब बाक्मा बाक्त। मिनु पिपमी मेको आन कली “इस्राएल डा पिप दाऊद आ तौ सोलोमनम सेल्शो परमप्रभु यावे आ कबल पशो सन्दोस परमप्रभु यावे आ खिंम वोतीन। मुल रे गेपुकीमी मेको कली इन बालाम कुरचा ममाल्नीनी। मुल परमप्रभु यावे, इन परमप्रभु नु आ मुर इस्राएली आन गेय पने। २इतिहास ५:४-५; १इतिहास २३:२६, २८; प्रस्थान २५:१३-१५ 4 इस्राएल डा पिप दाऊद नु आ तौ सोलोमनम ब्रेक्शा गेशो लोव्र टिने। १इतिहास २३:- 5 गे परमप्रभु यावे आ खिंम इन पालोम इन किकी पिपी आन खिं खिं डा मुर गारशा गेय पने। मिनु गेना हना यो खिं खिंमी परमप्रभु यावे कली गेय पाइब लेवी चढेब आन कली चारच पचा कली बाक्चा माल्नीनी। 6 मिनु गे परमप्रभु यावे आ डोंइती ठीक सेल्सीन। पास्सा डा पाठा क्योरीन। दोशो मुरुम मेको पाठा ब्वने चाप्नीम, मोशो ला ब्रेत्तीन। मोसा रे पा परमप्रभु यावे आ देंशो लोव्र टिशा, गेय पने” देंमाक्त।

7 मिनु योसीयाहम मेकेर बुक्ब मुर नेल्ल आन कली पास्सा चाड मानेचा, दे ३० हजार क्यारश भेडा पाठा नु हजार सां ब्यफ गेमी बाक्त। पिपमी मेको नेल्ल आंम आ गोठ रे पा गेवा बाक्त। 8 मिनु मेको आ सरकार डा गेय पाइबपुकीमी थुं रे ग्येरशा मुर आन कली चढेब नु लेवी आन कली मार मार गेमे बाक्त। परमप्रभु यावे आ खिं डा ठेयब गेय पाइब हिल्लीयाह, जकरियामी नु येहीएलम, चढेब आन कली पास्सा चाड कली हजार निक्शी ६ सहे क्यारश भेडा पाठा नु सहे सां ब्यफ गेमे बाक्त। 9 मिनु लेवी आन ठेयब मुर कोनन्याह नु मेको आ लोक्बपुकी, शेमायाह नु नेथनेल, हशाब्याह, यिएल नु योजाबादमी ५ हजार क्यारश भेडा पाठा नु ५ सहे ब्यफ गेमे बाक्त।

10 मिनु चढेतीक गेय ठीक सेल्ले थुम्मे नोले चढेब आन बाक्तीकेम बाक्मा बाक्त। मिनु लेवी आन आन हुल पिपम देशो खोदेशो पा राम्मा बाक्त। 11 मिनु मेकोपुकीम पास्सा चाड डा पाठा क्योरमे बाक्त। मिनु लेवीपुकीम गेशो हुश चढेबपुकीम ताक्शा, चढेतीकेम ब्रुइक्तमे बाक्त। मिनु लेवीपुकीम चहिं मेको आ कुशुल उक्मे बाक्त। 12 मिनु मेकोपुकीम मोसा आ किताबम ब्रेक्शो खोदेशो पा मुर आन खिं खिं डा हुल आन कली योक्चा, दे परमप्रभु यावे कली चोशा चढेतीक श्ये तिल्शा वोदमे बाक्त। मिनु ब्यफ आन कली यो मो देशो पामे बाक्त। नोले चढेबपुकीमी मेको चढेचा माल्मा बाक्त। 13 मिनु पतीके लोत्रम ब्रेक्शो खोदेशो पा पास्सा चाड डा श्ये मीम चोत्रमे बाक्त। मिनु परमप्रभु यावे कली गेशो श्ये खरकुंडा, कराइ नु तस्लाम लोप्मे बाक्त। मिनु मेको मुर नेल्ले आन कली रीब पा योक्शा गेमे बाक्त। प्रस्थान १२:३-१० 14 मेको नोले आंम कली नु चढेब आन कली जचा थोत्रक ठीक पामे बाक्त। हारून आ खिं डा चढेबपुकी नाक्दो सम्मन चोशा चढेतीक नु बोसो चढेतीक गेय पचा माल्मा बाक्त। 15 दाऊद आ देशो खोदेशो पा आसाफ आ चच युइ कुम्सो पाइबपुकी आसाफ, हेमान नु पिप कली परमप्रभु यावे आ लोत्र पाइब येदुथून आन बाक्तीकेम बाक्मा बाक्त। पिप दाऊदम देशो खोदेशो पा मेकोपुकीम पामे बाक्त। लाप्चो खाल पाइबपुकीमी आन गेय प्रॉइचा ममाल्मा बाक्त। मारदे हना आन लोक्ब लेवीपुकीम मेको आन कली जचा थोत्रक चाक्शा गेमे बाक्त। १इतिहास २५:-; १इतिहास २६:१-९

16 मोपा पिप योसीयाह आ देशो खोदेशो पा परमप्रभु यावे कली पचा माल्शो गेय ठीक पशो बाक्माक्त। पास्सा चाड मानेचा नु परमप्रभु यावे आ चढेतीकेम चोशा चढेतीक चढेशो बाक्मा बाक्त। 17 मेना मेकेर बाक्ब इस्राएली नेल्लेमी पास्सा चाड मानेमे बाक्त। मिनु ७ नाक्त सम्म बोर्ब ओख्ती मसुप्शो शोब्ले डा चाड मानेमे बाक्त। 18 परमप्रभु यावे आ लोत्र पाइब सामुएल आ पाला रे मेना सम्म मोदेशो पा पास्सा चाड इस्राएलम गेनायो ममानेशो बाक्मा बाक्त। पिप योसीयाहम खोदेशो पा तेकोइ पिपम मोदेशो ठेयब पास्सा चाड ममानेशो बाक्मा बाक्त। चढेबपुकी, लेवीपुकी नु यहूदा नु यरूसलेमम बाक्ब मुरपुकी नु मेकेर जाक्शो इस्राएल डा मुरपुकीम मानेमे बाक्त। २इतिहास ३०:२६ 19 योसीयाहम सासन पशो १८ बर्स दुम्मेनु, मेको पास्सा चाड मानेशो बाक्मा बाक्त।

योसीयाह बेक्शो
२राजा २३:२८-३०

20 मिनु योसीयाहम परमप्रभु यावे आ खिं डा गेय नेल्ल गारपदा नोले इजीप्त रागी डा पिप नेको, युफ्रेटीस खोला आ शुंइच डा कारकेमीश सहर कली लडाइ तोचा कली गूमाक्त। मिनु योसीयाह मेकोपुकी नु लडाइ पथ लमाक्त। 21 तन्न नेकोमी “यहूदा डा पिप, गे नु गो इस दातेम मार जितीक खेतीक दुम्शो बाक्बा डा? मुलाक्ती गो गे नु लडाइ पचा कली जाक्शो मनड। तन्न गो आं लडाइ तोशो मुरपुकी नु ला गाइशो बाक्नुड। परमप्रभुम आं कली ‘रीब पा लशा लडाइ पावो’ देशो बाक्ब। मोपतीके परमप्रभु आ पर्बम मरिम्शो पा मबोक्कीन। मेको गो नु बाक्शो बाक्ब। बोक्तीनी हना, मेकोमी इन कली खतम पोक्ब” दे आ लोत्र पाइब आन कली सोइक्ता बाक्त। 22 मो हना यो योसीयाहम मेको आ देशो लोत्र मनेना बाक्त। तन्न मेको नेको नु लडाइ पचा कली अर्को वा फेक्से बाक्त। मेकोमी नेको आ देशो परमप्रभु आ लोत्र मनेना बाक्त। मिनु मेको मेगीददो डा दिंमम मेको नु लडाइ पचा कली रीब पा लमाक्त। 23 मिनु लिब्रा आप्बपुकीम पिप योसीयाह कली आप्मे बाक्त। मिनु पिपम आ गेय पाइब मुर कली “आं कली लडाइ पतीक रे गुंइदो। मारदे हना गो ठेयब गार दुम्शो बाक्नुड” दे मदा बाक्त। 24 मोपतीके आ गेय पाइबपुकीम मेको कली आ बग्गी रे गुंइशा, अर्को बग्गीम कुर पा यरूसलेम सहरम चाक्गमे बाक्त। मिनु मेको मेकेर बेक्माक्त। मिनु मुरपुकीमी मेको कली आ किकी पिपी आन कली थिम्तीकेम थिम्मे बाक्त। मिनु यहूदा नु यरूसलेम डा मुरपुकीम योसीयाह आ पर्बम रोंका पामे बाक्त। 25 मिनु येरमीयाम यो योसीयाह आ पर्बम रोंका पशो कुम्सो सेला बाक्त। मिनु कुम्सो पाइब मीश मुर वोंइश मुर नेल्लेमी मुल सम्म मेको रोंका पतीक कुम्सो पा योसीयाह कली मिम्नीम। मिनु मेको रोंका पतीक कुम्सो इस्राएली आन पतीके दुम्शो बाक्ब। मेको कुम्सो बिलाप किताबपुकी बाक्नीम। 26 मिनु योसीयाह आ पतीके, परमप्रभु यावे आ अरेशो टिशो, 27 मेको आ पशो डोंइती रे नोले सम्म इस्राएल नु यहूदा डा पिपी आन ब्रेक्शो बाक्ब।

36

यहूदा डा पिप येहो-अहाज
२राजा २३:३०-२४:१७

1 मिनु मेको रागी डा मुरपुकीम योसीयाह आ तौ येहो-अहाज कली चाक्शा, यरूसलेमम मेको आ आफ आ पा डा पिप सेल्मे बाक्त। 2 येहो-अहाज पिप दुम्मेनु २३ बर्स दुम्शो बाक्माक्त। मेकोमी यरूसलेमम महिना सां सासन पवा बाक्त। 3 मिनु इजीप्त डा पिपम मेको कली पिप रे गुंडदा बाक्त। मिनु यरूसलेम कली सहे का टलेन्ट चांदी नु टलेन्ट का सुन तिरो थाप्पदा बाक्त। टलेन्ट का ३४ किलो बाक्ब। 4 मिनु इजीप्त डा पिपम येहो-अहाज आ लोकब एल्याकीम कली यहूदा नु यरूसलेम डा पिप सेला बाक्त। मिनु मेकोमी मेको आ नें फाइशशा येहो-याकीम वोदा बाक्त। मिनु नेकोम आ लोकब येहो-अहाज कली इजीप्त रागी लदा बाक्त। येरमीया २२:४-१२

यहूदा डा पिप येहो-याकीम

5 मिनु येहो-याकीम पिप दुम्मेनु, २५ बर्स दुम्शो बाक्माक्त। मेकोमी यरूसलेमम ११ बर्स सासन पवा बाक्त। 6 मेकोमी आ परमप्रभु यावे आ डोंइती मार मरिम्शो बाक्मे, मेको पवा बाक्त। मिनु बेबीलोन डा पिप नेबुकदनेसरम मेको आ रागी कली लडाइ तोशा, मेको कली कांसा के साडलोम फ्रेंशा बेबीलोन लदा बाक्त। येरमीया २२:१८ 7 नेबुकदनेसरम परमप्रभु यावे आ खिं डा ग्योंबपुकी का निक्शी लाइशशा, बेबीलोनम आ दरवारम वोदा बाक्त। एज्रा १:७ 8 मिनु येहो-याकीम आ पशो, आ पशो ग्रांग्रा दिशो नु आ दोस तशो गेय नेल्ल इस्राएल नु यहूदा डा पिप आन इतिहासम ब्रेक्शो बाक्ब। मिनु मेको आ नोले मेको आ तौ येहो-याकीन पिप दुम्माक्त।

यहूदा डा पिप येहो-याकीन

9 येहो-याकीन पिप दुम्मेनु, ८ बर्स दुम्शो बाक्माक्त। मिनु मेकोमी यरूसलेमम महिना सां नु १० नाक्ती सासन पवा बाक्त। मिनु मेकोमी परमप्रभु यावे आ डोंइती मार मरिम्शो बाक्मे, मेको पवा बाक्त। येहो-याकीन पिप दुम्मेनु, २राजामी १८ बर्स देंब। २राजा २४:८ 10 मिनु बर्खा जाक्चावानु, पिप नेबुकदनेसरम मुर सोइशशा परमप्रभु यावे आ खिं डा रिम्शो रिम्शो ग्योंबपुकी नु मेको पिप कली बेबीलोनम चाक्पदा बाक्त। मिनु मेकोमी मेको पिप आ खिं डा मुर का सिदकीयाह कली यहूदा नु यरूसलेम डा पिप सेला बाक्त। येरमीया २२:२४-३०

यहूदा डा पिप सिदकीयाह

२राजा १४:१८-२५; येरमीया ५२:१-३०

11 सिदकीयाह पिप दुम्मेनु २१ बर्स दुम्शो बाक्माक्त। मेकोमी यरूसलेमम ११ बर्स सासन पवा बाक्त। 12 मेकोमी आ परमप्रभु यावे आ डोंइती मार मरिम्शो बाक्मे, मेको पवा बाक्त। परमप्रभु यावे आ लोव्र पाइब येरमीयाम मेको कली परमप्रभु यावे आ लोव्र पशो बाक्माक्त। तन्न पिपमी मेको आ डोंइती आ थुं कली ब्रेम्शो मसेला बाक्त। येरमीया ३७:-; ३८:- 13 मिनु पिप नेबुकदनेसरमी मेको कली परमप्रभु आ नेंम कसम जपदा बाक्त। तन्न मेको पिप कली यो मरिम्शो पवा बाक्त। मेको मरिम्शो पाइब नु काइ मटीब दुम्शा, परमप्रभु यावे, इस्राएली आन परमप्रभु गे लेन्ने मबिस्से बाक्त। 14 मेको प्रोंइशा, चढेब नु मुरपुकीम थाम्पा मरिम्शो पा, रागी रागी डा मुर आन ग्रांग्रा दिशो गेयपुकी नेल्ल पामे बाक्त। मोपा यरूसलेम डा परमप्रभु यावे आ खिं ग्रांग्रा दिशो सेल्मे बाक्त। ब्यवस्था १८:९

यरूसलेम खतम दुम्शो

15 मिनु परमप्रभु यावे, आन किकी पिपी आन परमप्रभुमी आ लोव्र पाइबपुकी मेको आन दातेम सोइक्ना सोइक्न बाक्शो बाक्माक्त। मारदे हना आ मुर नु आ बाक्तीक कली शिशी पाइबबाक्माक्त। 16 तन्न परमप्रभु आ लोव्र पाइब आन कली शुक्शी पामे बाक्त। आ लोव्र मटिथु, आ लोव्र पाइब आन कली तोक्शा लोव्र पामे बाक्त। मोपतीके परमप्रभु यावे आ गाइशशा मबेक्माक्त। लूका २०:१०-१२; प्रेरित ७:५२

यहूदा ग्याइक्चा पुंडसीशो

17 मिनु परमप्रभुम मेको आन कली लडाइ तोपाइक्चा कली कल्दी आन पिप कली चाक्गा बाक्त। मिनु मेकोपुकीमी मेको आन आल आन कली परमप्रभु यावे आ बाक्तीक खिंम तरवारम क्योरशा सदमे बाक्त। मेकोपुकीमी वोंइश आल नु मीश आल आन कली, खाल्पा नु खूशो आन कली काइ शिशी मपामे बाक्त। परमप्रभुम मेको नेल्ल आन कली पिप नेबुकदनेसर आ गुडमी गेमी बाक्त। 18 मिनु मेकोमी परमप्रभु आ खिं डा आइक्च ठेयब ग्योंब नेल्ल, मेकेर डा शोंप नु दरवार नु सरकार डा गेय पाइब आन खिं डा शोंप नेल्ल बेबीलोन लदमे बाक्त। 19 मेकोपुकीम परमप्रभु आ खिंम मी सुइक्तमे बाक्त। यरूसलेम सहर डा गारो प्रेत्मे बाक्त। मिनु मेकोपुकीम सहर डा दरवार नेल्लेम मी सुइशशा, आगा बाक्शो शोंप खतम सेल्मे बाक्त। येरमीया २६:६ 20 मिनु मेकोमी तरवार रे ब्रोंइशो नेल्ल आन कली

फ्रेंशा बेबीलोन लदमे बाक्त। मिनु पारसी आ राज्य मजाकम सम्म मेकोपुकीम, मेको ग्याइक्चा पुंडसीब आन तमी तौ आन कली वाइलीम वाइल सेल्मे बाक्त। 21 मिनु परमप्रभु यावे आ लोव्र पाइब येरमीया रे पा देशो परमप्रभु यावे आ लोव्र गाप्चा कली ७० बर्स मगाम सम्म इस्राएल रागीम आ नाइक्तीक नाक्ती मानेवा बाक्त। मेको रागीम ७० बर्स सम्म श्येत्य दुम्मेनु, आ नाइक्तीक नाक्ती मानेवा बाक्त। येरमीया २५:११; लेवी २६:३४; बिलाप २:६

कोरेस आ देशो लोव्र
एज्रा १:१-३

22 मिनु पारसी डा पिप कोरेसमी पिप पवा आ डोंइती डा बर्सम येरमीया आ देशो परमप्रभु यावे आ लोव्र गाप्चा कली परमप्रभु यावेम पारसी डा पिप आ थुंमी लोव्र पवा बाक्त। मिनु मेकोमी आ ठेयब राज्य नेल्लेम लोव्र पा ब्रेक्शा, उरदी पपदा बाक्त। येरमीया २९:१०; यसैया ४४:२८ 23 फारसी डा पिप कोरेसम मार उरदी पपदा बाक्त। देशा हना “परमप्रभु यावे, स्वर्ग डा परमप्रभुम रागी डा राज्य नेल्ल आं कली गेशो बाक्ब। मिनु मेकोमी आं कली यहूदा डा यरूसलेमम आ कली खिं का सेल्चा कली अरेशो बाक्ब। इन दातेम बाक्शो मेको आ मुर बाक्तेक्म हना ‘परमप्रभु यावे, आ परमप्रभु मेको नु बाक्ल। मिनु मेको यरूसलेम लमल’ देंनुड” देंमाक्त।

एजा

ब्रेक्व मुर: एको किताब एजा आंमान इच्का ब्रेक्वो बाक्त। तन्न नोले मेको नेल्ल सुम ब्रेक्ता, मतुइक्नीम। डोंइती एजा नु नेहेम्याह किताब का बाक्त। मुरुमी ग्रीक लोत्रमी सेल्ची ना किताब का रे निक्शी सेल्शो बाक्तेक्म।

गेना दुम्शो: एको किताब १०० बर्स डा इतिहास बाक्ब। जेरूब-बाबेल नु ५० हजार ग्याइश्शा लाइक्चा पुंइसीशो इस्राएली यरूसलेम लेशशो रे नेहेम्याह यरूसलेम जाक्वो सम्म डा लोत्र बाक्ब।

५३६ बि. सी. पिप कोरेसमी इस्राएली आन कली लेत्चा गेवा बाक्त।

५३६ बि. सी. चढेतीक लेंशा सेल्शा, गोठ सेल्तीक चाड मानेमे बाक्त।

५३५ बि. सी. परमप्रभु यावे आ खिं लेंशा सेल्चा गोत्रमे बाक्त।

५२० बि. सी. परमप्रभु आ लोत्र पाइब हागै नु जकरियाम आस गेय पचा गोम्से बाक्त।

५१६ बि. सी. परमप्रभु यावे आ खिं जिम्मा गेशो बाक्त।

५१५ बि. सी. पारसा चाड मानेशो बाक्तेक्म।

४५८ बि. सी. एजा नु १८ हजार इस्राएली लेंशा यरूसलेम लेशशो बाक्तेक्म।

४४६ बि. सी. नेहेम्याह यरूसलेम जाक्वो बाक्त।

मारदे ब्रेक्वो: एको १ इतिहास नु २ इतिहास किताबमी ब्रेक्वो नेल्ल दुम्शो नोले डा इस्राएली आन इतिहास बाक्ब। परमप्रभु यावे आ खिं लेंशा सेल्शो आ पर्बम ब्रेक्वो बाक्ब।

यहूदीपुकी यरूसलेम लेशशो

२इतिहास ३६:२२-२३

1 पारसी रागीमी पिप कोरेस आ डोंइती डा बर्समी परमप्रभु यावेमी येरमीया रे पा देशो लोत्र खाप्चा कली पिप कोरेस आ थुं क्युकगा बाक्त। मिनु मेको पिपमी आ राज्य नेल्लेमी मेको लोत्र नेंपाइक्चा कली ब्रेक्पदा बाक्त। यसैया ४५:१; यसैया ४४:२८

2 मिनु पारसी डा पिप कोरेसमी मार लोत्र ब्रेक्पदा बाक्त देशा हना “परमप्रभु यावे, स्वर्ग डा परमप्रभुमी, रागी डा राज्य नेल्ल आं कली गेशो बाक्ब। मिनु मेकोमी आं कली ‘यहूदा रागी डा यरूसलेममी आं खिं सेलो’ दे माइक्ती।

3 मिनु इन दातेमी सु सु परमप्रभु आ मुर बाक्नीमी, मेको नु परमप्रभु बाक्ल। मिनु मेको मुरपुकी इर लशा, यहूदा रागी डा यरूसलेममी बाक्ब परमप्रभु यावे, इस्राएली आन परमप्रभु आ खिं सेलीन। 4 मिनु लीशो यहूदी ते ते बाक्मा, मेकोपुकीमी यरूसलेमम परमप्रभु आ खिं सेल्चा कली सुन चांदी, अरु शोंप नु बी ब्यफ चाक्शा, आन आम दाक्वो गेचा मालनीम” दे पिप कोरेसमी ब्रेक्वो बाक्त।

5 मिनु नोले यरूसलेम सहरमी परमप्रभु यावे आ खिं लेंशा सेल्चा कली परमप्रभुमी मुर आन थुं पोक्चा पुंइसीशो यहूदा नु बेन्यामीन आस खिं खिं डा ठेयब मुरपुकी, चढेबपुकी नु लेवी नेल्ल मेकेर लचा कली सासमा बाक्त। 6 मिनु मेको आन नेक्था बाक्ब नेल्लेमी आन डोंइती गेशो प्रोंइशा, चांदी के बोस, सुन के थोत्रक, अरु थोत्रक, बी ब्यफ नु शुश क्येट लाइब मार मार थोत्रक शुश तेम्शा गेशा, मेको आन कली वारच पाम्तेक्म। 7 डोंइती नेबुकदनेसरमी यरूसलेममी परमप्रभु यावे आ खिं डा बोसपुकी रोइश्शा चाक्शा, आ देवता आ खिंमी वोइश्शो बाक्माक्त। मिनु पारसी डा पिप कोरेसमी मेको बोस नेल्ल मेकेर रे गुंइपाइक्तु। २इतिहास ३६:७,१८ 8 मिनु पारसी डा पिप कोरेसमी मेको बोसपुकी आ शोंप कोत्रब मिथ्रेदाथ आ गुइ रे पा यहूदा आ खिं डा नेल्ल क्येडा ठेयब मुर शेश-बस्सार कली हिक्पाइश्शा, ब्रेक्शा गेप्तु। एजा ५:१४ 9 मिनु मेको बोस मार मार बाक्तेक्म देशा हना, सुन के बोस ३० ओटा, चांदी के बोस हजार का ओटा, क्योरतीके २९ ओटा, 10 सुन के आइक्च बोस ३० ओटा, अरु चांदी के आइक्च बोस ४ सहे १० ओटा अरु बोस हजार का ओटा गेशो बाक्त। 11 सुन नु चांदी के बोस नेल्ल पा ५ हजार ४ सहे ओटा बाक्तेक्म। मिनु ग्याइश्शा लाइक्चा पुंइसीशो मुरपुकी बेबीलोन रे यरूसलेम लेशशा जाक्मानु, शेश-बस्सारमी मेको बोस नेल्ल यरूसलेममी लेशशा चाक्तु।

2

लेशशो इस्राएल डा मुर

नेहेम्याह ७:५-७२

1 बेबीलोन डा पिप नेबुकदनेसरमी यहूदा नु यरूसलेम डा मुर आन कली ग्याइशशा बेबीलोन लाइशशो बाक्त। मेको ग्याइशशा लाइक्चा पुंडसीशो आन दाते डा यहूदा नु यरूसलेम आंम आंम सहरम लेशशा जाक्शो मुर आन नें मार बाक्तेक्म देशा हना, 2 जेरूब-बाबेल नु बेबीलोन रे यरूसलेम जाक्ब येशुआ, नेहेम्याह सेरायाह, रेलायाह, मोरदेकै, बिल्शान, मिस्पार, बिग्वाइ, रेहुम नु बानाह जाक्शो बाक्तेक्म। मेको इस्राएली सु सु नु गिश मुर बाक्तेक्म देशा हना, 3 पारोश आ चच युइ २,१७२ 4 शेफत्याह आ चच युइ ३७२ 5 आराह आ चच युइ ७७५ 6 पहाथ-मोआब आ चच युइ आ तौ येशुआ नु योआब आस चच युइ २,८१२ 7 एलाम आ चच युइ १,२५४ 8 जत्तु आ चच युइ ९४५ 9 जक्काइ आ चच युइ ७६० 10 बानी आ चच युइ ६४२ 11 बेबाइ आ चच युइ ६२३ 12 अज्गाद आ चच युइ १,२२२ 13 अदोनीकाम आ चच युइ ६६६ 14 बिग्वाइ आ चच युइ २,०५६ 15 आदीन आ चच युइ ४५४ 16 आतेर आ मुर हिज्कीयाह आ चच युइ ९८ 17 बेजाइ आ चच युइ ३२३ 18 योराह आ चच युइ ११२ 19 हाशुम आ चच युइ २२३ 20 गिब्बार आ चच युइ ९५ 21 बेथलेहेम डा १२३ 22 नेतोफाह डा ५६ 23 अनाथोथ डा १२८ 24 अज्मावेथ डा ४२ 25 किरयथ-यारीम कैफीरा नु बेयरोथ डा ७४३ 26 रामाह नु गेबा डा ६२१ 27 मिक्मास डा १२२ 28 बेथेल नु ऐ डा २२३ 29 नेबो डा ५२ 30 मग्बीश आ चच युइ १५६ 31 अर्को एलाम आ चच युइ १,२५४ 32 हारीम आ चच युइ ३२० 33 लोद, हादीद नु ओनो सहर डा ७२५ 34 यरीको सहर डा ३४५ 35 नु सेनाह आ चच युइ ३,६३० जना बाक्तेक्म।

लेशशो चढेब

36 लेशशो चढेब सु सु बाक्तेक्म देशा हना, येदायाह आ चच युइ, येशुआ आ खिं डा मुर ९७३ 37 इम्मेर आ चच युइ १,०५२ 38 पश्हुर आ चच युइ १,२४७ 39 नु हारीम आ चच युइ १,०१७ जना बाक्तेक्म।

लेशशो लेवी नु कुम्सो पाइब

40 लेशशा जाक्शो लेवी आ मुर सु सु बाक्तेक्म देशा हना, येशुआ नु कदमीएल आस चच युइ, नु होदावीयाह आ चच युइ ७४ जना बाक्तेक्म। नेहेम्याह १२:८ 41 कुम्सो पाइबपुकीमी आसाफ आ चच युइ १२८ जना बाक्तेक्म।

लेशशो लाप्चो खाल पाइब

42 लाप्चो खाल पाइब सु सु बाक्तेक्म देशा हना, शाल्लुम, आतेर, ताल्मोन, अक्कुब, हतीता नु शोबाइ आन चच युइ नेल्ल पा १३९ जना मुर बाक्तेक्म।

लेशशो परमप्रभु आ खिं डा वाइल

43 परमप्रभु यावे आ खिंमी गेय पाइब वाइल आन चच युइ सु सु बाक्तेक्म देशा हना, एजा ८:२० सीहा, हासुफा, तब्बाओथ, 44 केरोस, सीआहा, पादोन, 45 लेबानाह, हगावाह, अक्कुब, 46 हागाब, शाम्लाइ, हानान, 47 गिददेल, गहार, रेआयाह, 48 रेसीन, नेकोदा, गज्जाम, 49 उज्जा, पासेआह, बेसाइ, 50 अस्नाह, मेउनीम, नेफीसीम, 51 बाकबुक, हकुफा, हारहुर, 52 बस्लुथ, मेहीदा, हारशा, 53 बारकोस, सीसेरा, तेमाह, 54 नेसीयाह नु हतीफा आन चच युइ बाक्तेक्म।

55 सोलोमन आ गेय पाइब आन चच युइ सु सु बाक्तेक्म देशा हना, सोताइ, हास्सोफेरेथ, पेरुदा, १राजा ९:२१ 56 यालाह, दारकोन, गिददेल, 57 शेफत्याह, हत्तील, पोकेरेथ-हस्सेबाइम नु आमी आन चच युइ बाक्तेक्म। 58 परमप्रभु यावे आ खिं डा गेय पाइब नु सोलोमन आ गेय पाइब नेल्ल पा ३९२ मुर बाक्तेक्म। यहोसु ९:२३

59 मिनु तेल-मलाह, तेल-हारशा करूब, अददान नु इम्मेर रे लेशशा जाक्ब यो बाक्तेक्म। तन्न मेकोपुकीमी आन किकी पिपी नु आन खिं डा मुर इस्राएल डा सु रे जाक्शो बाक्मा, मेको देने मचबेम। 60 मेकोपुकी देलायाह आ चच युइ, तोबीयाह आ चच युइ नु नेकोदा आ चच युइ नेल्ल पा ६५२ जना बाक्तेक्म। 61 परमप्रभु कली चढेब हबायाह आ चच युइ, हककोस आ चच युइ नु बारजील्लाइ आ चच युइ यो आन किकी पिपी नु आन खिं डा मुर इस्राएली सु रे बोशो बाक्मा देने मचबेम। बारजील्लाइ नें वोइशशो मुर गिलाद डा बारजील्लाइ आ तमी कली ग्युबे पवा बाक्त। मिनु आ शिउ आ नें वोदा बाक्त। २सामुएल १७:२७; २सामुएल १९:३२ 62 मेकोपुकीमी मुर आन नें ब्रेक्तीकेमी आन नें

माल्तेक्म, तन्न मथिदेम। मोपतीके मेकोपुकीम चढेचा मताम। मिनु चढेतीक गेय रे तिल्चा पुंइसाक्म। 63 मिनु ऊरीम नु थुम्मीममी गेय पने चाण्ब चढेब का मग्रूम सम्म मेकोपुकीमी नेल्ल क्येडा चोव्रखो चढेतीक थोव्रक रे जचा मताम।

64 मिनु मेकेर जाक्ब मुर नेल्ल पा ४२,३६० बाक्तेक्म। 65 मिनु मेको आन वाइलीम वाइल ७,३३७ मुर बाक्तेक्म। मेको आन दातेमी २०० कुम्सो पाइब मीश मुर नु वोंइश मुर यो बाक्तेक्म। 66 मिनु मेको नु ७३६ शारा नु २४५ खच्चर बाक्तेक्म। 67 मिनु मेको नु ४३५ दलओंठ नु ६,७२० गधा यो बाक्तेक्म। गन्ती १८:९; प्रस्थान २८:३०; १सामुएल १४:४१

68 मिनु मेकोपुकी यरूसलेममी बाक्शो परमप्रभु यावे आ खिं जाक्मा नोले का निक्शी खिं डा ठेयब मुरपुकीमी परमप्रभु आ खिं डोंइती डा आ बाक्तीके उइ लेंशा सेल्चा कली ग्येरशा आन दाक्स पा क्येट गेम्तेक्म। 69 मेकोपुकीमी आन चाप्स पा सेल्टीक गेय कली ६१ हजार सुन के आदारकोन नु ५ हजार चांदी के मीना नु चढेब आन कली सहे का फेक्तीक वा गेम्तेक्म। आदारकोन का ८.४ ग्राम सुन के क्येट बाक्ब। चांदी के मीना का ६०० ग्राम खोदेंशो बाक्ब।

70 मिनु चढेबपुकी, लेवीपुकी नु का निक्शी अरु मुर यरूसलेम नु आ एर ओंथ डा गाउंपुकीमी बाक्तेक्म। मिनु कुम्सो पाइबपुकी, लाप्यो खाल पाइबपुकी, परमप्रभु यावे आ खिंमी गेय पाइबपुकी नु लीशो इस्राएली नेल्ल आंम आन सहरम बाक्तेक्म।

3

चोशा चढेशो

1 मिनु इस्राएली आंम आन गाउं गाउंमी नेल्ल गारपा बाक्ने थुम्शो बाक्तेक्म। आन बाक्शो ७ महिना दुम नोले मुर नेल्ल थुं का डा दुम्शा, यरूसलेममी बुक्तेक्म। 2 मेना योसादाक आ तौ येशुआ नु मेको आ वारच चढेब, शाल्तीएल आ तौ जेरूब-बाबेल नु मेको आ खिं डा मुर नेल्लेमी इस्राएली आन परमप्रभु कली चढेतीके सेल्लेक्म। परमप्रभु आ मुर मोसामी आ अरेशो लोव्रम दोपा ब्रेक्शो बाक्मे, मोपा चोशा चढेचा कली मेको चढेतीक सेल्लेक्म। एजा २:२; प्रस्थान २७:१; लेवी ६:२ 3 मेकोपुकीमी चढेतीक डोंइती ते बाक्मे मेकेर लेंशा चढेतीक सेल्लेक्म। मारदे हना मेको आन एर ओंथ डा अर्को जात डा मुर आन कली तशा हिंशा, सुनी नु नाक्नाक्दो परमप्रभु यावे कली चढेतीकेम चोशा चढेतीक चढेम्तेक्म।

4 मिनु मेकोपुकीमी गोठ सेल्शा बाक्तीक चाड मानेम्तेक्म। मिनु दोपा पतीके ब्रेक्शो बाक्मे, मोपा नाक्त किंत किंत डा पचा माल्शो चोशा चढेतीके दोशो चढेचा माल्मा, मोशो चढेम्तेक्म। लेवी २३:३४-४३ 5 मिनु नाक्त किंत किंत डा चोशा चढेतीके, औंसी नाक्त डा चढेतीके नु परमप्रभु यावेमी देंशो चाड डा चढेतीके चढेम्तेक्म। सु सुमी आन ग्येरशो थुं रे परमप्रभु यावे कली चढेचा दाक्तमे, मेको चढेम्तेक्म। 6 मिनु परमप्रभु यावे आ खिं डा जग मवोइशो बाक्त हना यो, ७ महिना डा डोंइती डा नाक्त रे परमप्रभु यावे कली चोशा चढेतीक चढेचा गोम्तेक्म।

7 मिनु मेकोपुकीमी गारो प्रोव्रब नु शी के गेय पाइब आन कली क्येट गेम्तेक्म। मिनु पारसी डा पिप कोरेसमी देंशो खोदेंशो पा सीदोन नु टायर डा मुर आन कली लेबानोन डा लाइशो रवा आ शी समुन्द्र रे पा योप्पा सम्म चाक्चा कली जचा तूचा थोव्रक नु तेल गेम्तीमी। १राजा ५:१६-२५

परमप्रभु आ खिं लेंशा सेल्शो

8 मिनु मुरपुकी यरूसलेममी बाक्शो परमप्रभु आ खिं जाक्शो बर्स निक्शी नु महिना निक्शी दुम्माक्त। मिनु शाल्तीएल आ तौ जेरूब-बाबेल, योसादाक आ तौ येशुआ नु मेको आस लीशो लोक्ब, चढेबपुकी, लेवीपुकी नु बेबीलोन रे लेशशा यरूसलेम जाक्ब नेल्लेमी परमप्रभु आ खिं लेंशा सेल्चा गोम्तेक्म। मिनु परमप्रभु यावे आ खिं सेल्टीक गेय कोव्रचा कली २० बर्स जाक्दीशो नु मेको क्येडा लाक्शो लेवी आन कली योव्रशा वोइक्तीमी। 9 मिनु परमप्रभु आ खिं सेल्टीक गेय पाइब आन कली कोव्रब येशुआ नु आ तौपुकी नु आ लोक्ब, कदमीएल नु आ तौपुकी, बिन्नुइ नु होदावीयाह नु हेनादाद आ तौपुकी नु लेवी आन तौ नु खिं डा मुर नेल्ल गेय पाइब आन कली कोव्रब दुम्तेक्म।

परमप्रभु आ खिं डा जग

10 मिनु परमप्रभु यावे आ खिं सेल्बपुकीमी जग वोइक्तेक्म। चढेबमी आन वा फेक्शा तुराही ताप्तेक्म। आसाफ आ तौ लेवीपुकीम बुक्केल ताप्तेक्म। इस्राएल डा पिप दाऊदमी अरेशो खोदेंशो पा परमप्रभु यावे कली ठेयब सेल्चा कली आन आन बाक्तीकेमी राप्तेक्म। 11 मिनु मेकोपुकीमी पालो पालो पा कुम्सो पाप्तेक्म। परमप्रभु यावे कली ठेयब सेल्ना सेल्न “गे रिम्शो पाइब बाक्नीनी” दे मान पा कुम्सो पाप्तेक्म। मेकोपुकीमी “परमप्रभु यावे रिम्शो पाइब

बाक्ब, नु आ गेना हना यो दाक्तीक इस्राएली नु लीब” दे कुम्सो पाम्तेक्म। परमप्रभु यावे आ खिं डा जग वोइशशो बाक्तीके मुर नेल्लेमी ठेयब सेंदा पा परमप्रभु यावे कली ठेयब सेल्लेक्म। २इतिहास ५:१३; भजन संग्रह ११८:१

12 परमप्रभु यावे आ डोंइती डा खिं तशो चढेबपुकी, लेवीपुकी नु आन खिं खिं डा ठेयब मुर नु अरु खाल्पापुकी परमप्रभु यावे आ खिं डा जग वोइशशो तशा, ठेयब सेंदा पा डाक्तेक्म। मिनु अरु मुर चहिं ग्येरशा ठेयब सेंदामी रेयके पाम्तेक्म। हाग्वै २:३ 13 मिनु नेंब मुरपुकीमी ग्येरशा ग्रीशो नु डाक्शो मार बाक्मे मारेइ मरुबेम। मारदे हना मुर आन रेयके पशो सेंदा थम ठेयब बाक्त। मेको रेयके पशो डोन डोन सम्म नेंसे बाक्त।

4

जोरी सत्रुमी श्येत गेशो

1 लेशशा जाक्शो ग्याइशशा लाइक्चा पुंडसीशो यहूदा नु बेन्यामीन आस थर डा मुरपुकीमी परमप्रभु यावे, इस्राएली आन परमप्रभु आ खिं सेल्ला सेल्ल बाक्नीम देंशो लोव्र आन जोरी सत्रुमी नेंतेक्म। 2 मिनु मेकोपुकीमी जेरूब-बाबेल, येशुआ नु खिं खिं डा ठेयब मुर आन बाक्तीकेमी जाक्शा “गो आंइ कली यो गे नु गारशा, मेको खिं सेल्चा गेकी। गो यो गे इन खोदेंशो पा इन परमप्रभु कली ठेयब सेल्ला सेल्ल बाक्नीकी। मिनु गो आंइ कली एक चाक्ब अस्सुर डा पिप एसर-हददोन आ पाला रे गो यो इन परमप्रभु कली चढेन चढेन बाक्तक” देंतेक्म। येरमीया ४१:५; २राजा १७:२४-३३; २राजा १९:३७ 3 तन्न जेरूब-बाबेल, येशुआ नु इस्राएली आन लीशो खिं खिं डा ठेयब मुरपुकीमी मेको आन कली “एको खिं गो इस्राएली आंइ परमप्रभु कली सेल्लनीकी। एकेर गे इन पचा माल्शो मारेइ मबाक्ब। पारसी डा पिप कोरेसमी आंइ कली अरेशो खोदेंशो पा, गो आंइ परमप्रभु यावे, इस्राएली आन परमप्रभु आ खिं आंमान सेल्लनीकी” दे माइक्तेक्म। 4 मिनु नोले मेको रागी डा मुरपुकीमी यहूदी आन कली आन थुं तोक्शा गेम्तेक्म। मिनु मेको खिं मसेल्पाइक्चा कली हिंच कोंइताक्म।

सेल्लतीक गेय क्याम्चा माल्शो

5 मिनु यहूदी आन गेय नेल्ल क्याम्पाइक्चा कली, मेकोपुकीमी दरवार डा ठेयब मुर आन कली घूस गेम्तेक्म। मिनु मेकोपुकीमी पिप कोरेस आ सासन पची ना रे पारसी डा पिप दारा आ सासन पची ना सम्म मोदेंशो गेय पना पन बाक्तेक्म। एजा ४:२४

6 मिनु अहासूरसमी सासन पचा गोवा आ डोंइती डा बर्स, मेको रागी डा मुरपुकीमी यहूदा नु यरूसलेम डा मुर आन कली दोस गेशो ब्रेक्स का ब्रेक्शा सोइक्ताक्मी।

7 मिनु बिश्लाम, मिश्रेदाथ, ताबेल नु मेको आ वारच नेल्ल गारशा पारसी डा पिप आरता-सास्त कली ब्रेक्स का ब्रेक्ताक्म। मेको ब्रेक्स अरामी आन लोव्रमी ब्रेक्शो बाक्त। मिनु मेको आ अर्थ यो ब्रेक्शो बाक्त।

8 पिप आ सोइशशो रेहुम नु ब्रेक्तीक गेय पाइब शिम्शाइमी, पिप आरता-सास्त कली यरूसलेम आ पर्बम ब्रेक्स का ब्रेक्ताक्स। 9 पिप आ सोइशशो रेहुम, ब्रेक्तीक गेय पाइब शिम्शाइ नु मेको निक्शी नु गेय पाइबपुकी, निसाफ पाइबपुकी, पिप आ सोइशशोपुकी, पारसी डा ठेयब मुरपुकी, एरेक नु बेबीलोनमी बाक्ब सुसा एलाम डा मुरपुकी 10 नु नेल्ल क्येडा ठेयब मान पचा पुंडसीशो ओस्नापरमी ग्याइशशा लाइशो मुर आन रागी रे गुंइशा सामरीया सहर नु आ एर ओंथ नु युफ्रेटीस खोला आ आइक्ची हांबुमी वोइशशो मुरपुकीमी ब्रेक्ताक्म। 11 मेको सोइशशो ब्रेक्स डा लोव्र मार बाक्त देंशा हना “पिप आरता-सास्त कली युफ्रेटीस आइक्ची हांबुमी बाक्ब गेय पाइबपुकीमी इन कली ‘रिम्शो बाक्कीन’ देंनीम। 12 पिप इन कली मार लोव्र तुइक्पाइक्चा दाक्नीकी देंशा हना, इन कली प्रोइशा एको रागीमी जाक्ब यहूदीपुकी यरूसलेममी जाक्तेक्म। मिनु मेकोपुकीमी काइ मटीब नु मरिम्शो पाइब आन सहर कली लेंशा सेल्ला सेल्ल बाक्नीम। मेकोपुकीमी मेको आ जग लेंशा सेल्शा, आ गारो यो प्रोव्रने थुम्चशो बाक्नीम।

13 पिप इन कली मार लोव्र तुइक्पाइक्चा दाक्नीकी देंशा हना, मेको सहर कली लेंशा सेल्लेक्म नु मेको आ गारो प्रोव्रने थुम्तेक्म हना, मेकोपुकीमी पिप कली थाप्तीके, आन चेम्शो रे थाप्तीक नु आन रू डा थाप्तीके मारेइ मथाप्नीम। मिनु मो पामेनु, पिप इन कली मरिम्शो दुम्ब। 14 गो पिप इन गेशो जाइनीकी। मोपतीके सुइम इन कली मान मपशो कोव्रचा मदाक्नीकी। मोपतीके पिप इन कली एको लोव्र तुइक्पाइक्चा कली लोव्र कुरब मुर सोइक्ताक्क। 15 इन किकी पिपीमी ब्रेक्शा वोइशशो ब्रेक्स माल्शा, कोव्रडीन। मेकेर मार ब्रेक्शो बाक्मे थिन्नीनी। मेको सहरम काइ मटीब मुर बाक्नीम। मेकोपुकी पिप नु रागी कली मरिम्शो पाइब बाक्नीम। मोपतीके एको सहर कली खतम पोक्शो बाक्त।

16 मिनु गो पिप इन कली मार लोत्र तुइक्पाइक्चा दाक्नीकी देशा हना, एको सहर लेंशा सेल्लेक्म हना, नु मेको आ एर ओंथ डा गारो प्रोवने थुम्तेक्म हना, युफ्रेटीस आइक्ची हांबुम इन के मारेइ अधिकार मलीब” दे ब्रेक्शो बाक्त।

पिपमी लोत्र लेशो

17 मिनु पिपमी “आं सोइश्शो रेहुम, ब्रेक्तीक गेय पाइब शिम्शाइ नु सामरीया सहर नु आ एर ओंथ नु ठेयब खोला आइक्ची हांबु बाक्ब इन गेय पाइब आन कली ‘रिम्शो बाक्कीन’ दे ब्रेक्नुड। 18 इन सोइश्शो ब्रेक्स आं कली रिम्शो पा पदेशा मेको आ अर्थ नेंपाइक्तीमी। 19 मिनु गो इन देशो खोदेशो पा ब्रेक्शा वोइश्शो लोत्रपुकी माल्पाइक्तामी। मिनु मार थिंसाक्व देशा हना, मेको सहर डा मुरुमी पिप आ सासन पतीकेमी मटिशो आ पर्बम शुश लोत्रपुकी ब्रेक्शा वोइश्शो थिंसाक्व। मिनु साइ रे मोदेशो मटितीके, पना पन पिशो बाक्तेक्म। 20 यरूसलेममी सासन पाइब सक्ति पाइश्शो पिपपुकी बाक्तेक्म। मेकोपुकीमी युफ्रेटीस आइक्ची हांबु डा रागी नेल्ल अधिकारम वोइश्शो बाक्तेक्म। मिनु मुरपुकीमी पिप कली थाप्तीके, आन चेम्शो रे थाप्तीके नु आन रू डा थाप्तीके नेल्ल थाप्शो बाक्तेक्म।

21 मोपतीके मेको मुर आन गेय तेक्चा माल्ब, दे मतीन। मिनु गो हुकुम मगेडा सम्म मेको सहर लेंशा मसेल्मेक्ल। 22 गोपुकीमी मेको आ पर्बम इन पचा माल्शो गेय हेंथे मपने। पिप आ गेय रिम्शो दुम्पाइक्चा कली मेको मरिम्शो गेय तेक्चा माल्ब” दे लोत्र कुरब मुर सोइक्ताक्व।

परमप्रभु आ खिं सेल्चा नाइश्शो

23 मिनु रेहुम, ब्रेक्तीक गेय पाइब शिम्शाइ नु मेको नु गेय पाइब आन डोंइती पिप आरता-सास्त आ ब्रेक्स पढेमे चोटीन रेहुम नु मेको नु बाक्ब छुल छाल बोक्शा दोरोर पा यरूसलेम लशा, मेकेर डा यहूदी आन आन सेल्लेक् गेय नेल्ल ग्रा गु तेक्तेक्म। 24 मे नोले यरूसलेममी परमप्रभु आ खिं सेल्लेक् गेय देक्त। मिनु मोदेशो पा पारसी डा पिप दारा आ सासन पशो बर्स निकशी जाक्दीम सम्म मेको सेल्लेक् गेय देक्शा लीत।

5

परमप्रभु आ खिं लेंशा सेल्शो

1 मिनु परमप्रभु यावे आ लोत्र पाइब हागै नु इददो आ तौ जकरियामी यहूदा नु यरूसलेममी बाक्ब यहूदी आन कली इस्राएली आन परमप्रभु आ देशो लोत्र पाम्ताक्स। हागै १:१; जकरिया १:१ 2 मिनु शाल्तीएल आ तौ जेरूब-बाबेल नु योसादाक आ तौ येशुआमी यरूसलेममी परमप्रभु आ खिं लेंशा सेल्चा गोम्सेनु, परमप्रभु यावे आ लोत्र पाइबपुकीमी यो मेको आन कली वारच पाम्तेक्म।

यहूदी आन गेय तेक्चा माल्शो

3 मिनु युफ्रेटीस आइक्ची हांबु डा रागीम सासन पाइब तत्तेनाइ, शेतार-बोजेनाइ नु मेको नु बाक्बपुकी रीब पा यहूदी आन बाक्तीकेम जाक्शा “एको खिं लेंशा सेल्चा नु थुम्चा कली इन कली सुम अधिकार गोवा?” देंतेक्म। 4 मिनु मेकोपुकीमी मेको खिं सेल्ब आन नें यो पुंइतेक्म। 5 तन्न परमप्रभुमी यहूदी आन खाल्पा आन कली वारच पाप्तु। मिनु मेकोपुकी पिप दारा आ बाक्तीकेम आन ब्रेक्स जाक्दीश्शा, पिपमी मार देंबा, मेको लोत्र मनेन्मे सम्म, मेको गेय तेक्ने मचबेम। ब्यवस्था ११:१२; १राजा ८:२९

तत्तेनाइमी पिप दारा कली ब्रेक्शो

6 युफ्रेटीस आइक्ची हांबु डा रागी कली हुकुम पाइब, तत्तेनाइ, शेतार-बोजेनाइ नु मेको नु बाक्ब सोइश्शोपुकीमी पिप दारा कली ब्रेक्स का ब्रेक्शा सोइश्शो बाक्तेक्म। मेको ब्रेक्स एको बाक्ब। 7 मेको आन सोइश्शो ब्रेक्समी मार ब्रेक्शो बाक्त देशा हना “पिप दारा इन थुं नाइश्शा रिम्शो बाक्कीन। 8 पिप, इन कली लोत्र का तुइक्पाइक्चा दाक्नीकी। मार लोत्र तुइक्पाइक्चा दाक्नीकी देशा हना, गो यहूदा रागीमी ठेयब परमप्रभु आ खिं बाक्तीक लाइतक। मेको ठेयब खोइश्शो फुल्लुमी सेल्नीम। आ गारो तार शी वोइक्ने थुम्तेक्म। शुश गेय पा, रीब पा सेल्ना सेल्न बाक्नीम” दे ब्रेक्शो बाक्त। 9 मिनु मेको खाल्पा आन कली “इन कली एको खिं लेंशा सेल्चा नु थुम्चा कली सुम अधिकार गोवा? दे हिल्लो पाइतक। 10 मिनु इन कली ब्रेक्चा नु तुइक्पाइक्चा कली मेको आन ठेयब मुर आन नें यो हिल्लो पाइतक। 11 तन्न मेकोपुकीमी ‘गो सरीड नु रागी डा परमप्रभु आ गेय पाइब नकी। मिनु शुश बर्स डोंइती सेल्शो खिं लेंशा सेल्ना सेल्न बाक्नीकी। मेको डोंइती डा खिं इस्राएल डा ठेयब पिप कामी सेल्शो बाक्त। 12 तन्न आंइ किकी पिपीमी स्वर्ग डा परमप्रभु कली चुरपाइश्शो बाक्तेक्म। मिनु मेकोमी मेको आन कली बेबीलोन डा कल्दी आन पिप नेबुकदनेसर

आ गुडमी गेशो बाक्त। मिनु मेको पिपमी एको खिं कली प्रेशो बाक्त। मुर आन कली ग्याइशशा बेबीलोन रागीमी लाइशो बाक्त। २राजा २४:१०-१४; २राजा २५:९ 13 तन्न बेबीलोन डा पिप कोरेसमी आ सासन पशो डोंइती डा बर्समी एको परमप्रभु आ खिं लेंशा सेल्चा कली हुकुम गेशो लोत्र ब्रेक्शा गुंडशो बाक्त। एजा १:१-२ 14 नेबुकदनेसरमी यरूसलेम डा सुन नु चांदी के बोसपुकी परमप्रभु आ खिं रे लाइशशा बेबीलोन डा मन्दीरम वोइशो बाक्त। मिनु पिप कोरेसमी मेको बोसपुकी बेबीलोन डा मन्दीर रे गुंडशा शेश-बस्सार कली गेपु। पिप कोरेसमी शेश-बस्सार कली सासन पचा कली योत्रशो बाक्त'। एजा १:७-८ 15 मिनु मेको कली 'एको बोसपुकी लाइशशा यरूसलेम डा परमप्रभु आ खिंमी वोतो' देंत। मिनु परमप्रभु आ खिं डोंइती आ बाक्तीक उइ लेंशा सेल्चा माल्नीम" दे माइक्तु। 16 मिनु मेको शेश-बस्सार जाक्शा, यरूसलेममी परमप्रभु आ खिं आ जग वोइक्तु। मेना रे मुल सम्म एको लेंशा सेल्ना सेल्न बाक्नीम। मिनु मेको मुल सम्म सेल्ने मथुमशो बाक्ब। 17 मोपतीके मुल पिप, गे दाक्नीनी हना, बेबीलोन डा पिप आन पालामी मार मार दुमशो बाक्मे, मेको ब्रेक्स वोइक्तीकेमी माल्पतीन। मिनु पिप कोरेसमी यरूसलेममी परमप्रभु आ खिं लेंशा सेल्चा कली हुकुम पशो लोत्र ब्रेक्शा गुंडशो बाक्म कों मबाक्म? मिनु मेको आ पर्बम इन दाक्शो मार बाक्बा, मेको आंइ कली तुइक्पतीन, दे ब्रेक्शो बाक्त। एजा ८:३६

6

पिप कोरेस आ ब्रेक्स थिश्शो

1 मिनु बेबीलोन रागीमी पिप दारामी सासन पा मार मार ब्रेक्स वोइक्तीकेमी पिप आन ब्रेक्स माल्तेक्म। 2 मिनु मादी रागी डा ठेयब सहर एक-बतानामी तोल्शा वोइशो ब्रेक्स का थित्तेक्म। मिनु मेको ब्रेक्समी मार ब्रेक्शो बाक्त देंशा हना

3 पिप कोरेसमी सासन पशो डोंइती डा बर्समी यरूसलेममी परमप्रभु आ खिं आ पर्बम हुकुम पशो ब्रेक्स का गुंडशो बाक्ब। मार लोत्र गुंडशो बाक्ब देंशा हना "मेको खिं लेंशा सेलीन। मेको चढेचा कली नु चोशा चढेतीक चढेचा कली बाक्ब। आ ग्येत्थ लाइशशा ६० कुबीत नु आ पित्थ ब्रेमशो ६० कुबीत दुमचा माल्ब। कुबीत का आधा मिटर खोदेंशो बाक्ब। 4 मेको खोइशो फुल्लु के लहर सां नु शी के लहर का पा सेल्चा। मिनु मेको सेल्चा कली आ माल्शो नेल्ल पिप आ क्येट वोइक्तीक रे गेचा।

5 पिप नेबुकदनेसरमी यरूसलेम डा परमप्रभु आ खिं रे गुंडशा बेबीलोन सहरम चाक्शो सुन नु चांदी के बोसपुकी यो लेंशा डोंइती डा आन बाक्तीक उइ वोइक्चा। मेको नेल्ल यरूसलेममी परमप्रभु आ खिंमी लाइशशा वोइक्चा नम" दे ब्रेक्शो बाक्त।

पिप दारामी वारच पशो

6 मिनु पिप दारामी "युफ्रेटीस आइक्ची हांबु डा रागीमी हुकुम पाइब तत्तेनाइ, शेशार-बोजेनाइ नु इन गेय पाइबपुकी नु युफ्रेटीस आइक्ची हांबुम बाक्ब सोइशो नेल्ल इन कली 7 परमप्रभु आ खिं सेल्तीक गेय मतेक्कीन। यहूदी आन कली सासन पाइब नु मेको आन खाल्पा आन कली परमप्रभु आ खिं डोंइती डा आ बाक्तीक उइ सेल्चा गेने। 8 मिनु गो हुकुम का पाइनुड। गे यहूदी आन खाल्पा आन कली परमप्रभु आ खिं सेल्चा कली मार पचा माल्नीनी मेको यो इन कली हुकुम गेनन्नी। मेको सेल्तीक गेय पचा कली युफ्रेटीस आइक्ची हांबु डा रागी रे पोक्शो तिरो रे पिप आ क्येट वोइक्तीक रे मेको आन कली माल्शो नेल्ल गेने।

9 मिनु मेको आन कली माल्शो, बाछा, सांड, पाठा स्वर्गम बाक्ब परमप्रभु कली चोशा चढेतीक चढेचा कली गेचा माल्नीनी। यरूसलेममी बाक्ब चढेब आन माल्शो चेरब, हिक्सी, अडगुर शांबु नु तेल मप्रेंथु, नाक्त किंत किंत रीब पा गेचा माल्नीनी। 10 मिनु मेकोपुकीमी स्वर्ग डा परमप्रभु आ दाक्चा डा पा चढेने चाप्नीम। मिनु पिप नु आ तौपुकी शुश ब्रोंइशा बाक्ने चाप्मेक्ल, दे परमप्रभु कली पुंडनीम। 11 मेको प्रोंइशा यो गो एको हुकुम गेनन्नी सुमी एको आं अरेशो लोत्र फाइक्बा, मेको आ खिं डा थाम का गुंडशा, मेको थाममी क्युक्चा पुंडसीब। मिनु मोशो ला ममाइ, आ खिं यो प्रेशशा गेचा पुंडसीब। 12 परमप्रभुमी आ नें तुइक्पाइक्चा कली यरूसलेममी आ बाक्तीक सेल्पाइशो बाक्त। परमप्रभुमी आ हुकुम फाइक्ब नु यरूसलेम आ खिं प्रेण्ब पिप नेल्ल नु अरु मुर, सु बाक्तेक्म हना यो, मेको आन कली खतम पोक्गल। गो पिप दाराम हुकुम पाता। मेको रीब पा पचा माल्नीम" दे हुकुम पापु।

परमप्रभु आ लोत्र गाप्शो

13 मिनु पिप दारामी अरेशो लोत्र युफ्रेटीस आइक्की हांबु डा रागीम हुकुम पाइब ततेनाइ, शेथार-बोजेनाइ नु मेको नु बाक्ब नेल्लेमी का यो मखाइक्थु पाम्तेक्म। 14 मिनु यहूदी आन खाल्पापुकीमी सेल्ना सेल्न बाक्तेक्म। परमप्रभु यावे आ लोत्र पाइब हांगै नु इददो आ तौ जकरिया आस देशो खोदेशो पा रीब पा दुम्ना दुम्न लत। इस्राएली आन परमप्रभु आ देशो खोदेशो पा, पारसी रागी डा पिप कोरेस आ हुकुम गेशो खोदेशो पा, पिप दारा आ वारच पतीकेमी नु पिप आरता-सास्त आन ब्रेक्शा गुंडशो हुकुम खोदेशो पा मेकोपुकीमी मेको खिं लेंशा सेल्ने थुम्तेक्म। 15 पिप दारा आ सासन पशो ६ बर्स दुम्मेनु, अदार माइशो महिना डा सां नाक्तीम मेको खिं सेल्ने थुम्तेक्म।

परमप्रभु आ खिं जिम्मा गेशो

16 मिनु नोले इस्राएल डा मुरपुकी, चढेबपुकी, लेवीपुकी नु लेशशा जाक्शो ग्याइशशा लाइक्चा पुंडसीब नेल्लेमी परमप्रभु आ खिं परमप्रभु कली “इन के बाक्ब” दे ग्येरसीशा जिम्मा गेम्तेक्म। 17 मोपा मेकोपुकीमी मेको खिं परमप्रभु कली जिम्मा गेमेनु, सहे का ब्यफ, सहे निक्शी सांड नु ४ सहे पाठा चढेम्तेक्म। मिनु इस्राएली आन पाप आ पर्बम १२ थर आन कली, बोका का का पा, १२ ओटा बोका चढेम्तेक्म। गन्ती ७:१० 18 मिनु मेकोपुकीमी मोसा आ किताबमी ब्रेक्शो खोदेशो पा चढेब आन पालो पालो पा नु लेवी आन पालो पालो पा यरूसलेममी परमप्रभु आ गेय पचा कली लेंशा वोइक्तेक्म। गन्ती ३:६

पास्सा चाड मानेशो

19 मिनु लेशशा जाक्शो ग्याइशशा लाइक्चा पुंडसीबपुकीमी डोंइती डा महिना डा १४ नाक्तीमी पास्सा चाड मानेम्तेक्म। 20 चढेब नु लेवी नेल्लेमी आंम आन कली ठीक सेल्सीशो बाक्तेक्म। मेको नेल्ल परमप्रभु कली गेय पचा कली ठीक दुम्शो बाक्तेक्म। मेकोपुकीमी लेशशा जाक्शो ग्याइशशा लाइक्चा पुंडसीब, चढेब आन लोकब आन कली नु आंम आन कली पास्सा चाड डा पाठा क्योरतेक्म। 21 लेशशा जाक्शो ग्याइशशा लाइक्चा पुंडसीब इस्राएलीपुकीम मेको ब्वाम्तेक्म। मिनु रागी डा मरिम्शो दुम्तीके रे दिल्लो परमप्रभु यावे, इस्राएली आन परमप्रभु कली ठेयब सेल्ब मुरपुकी मेको नु गारशा ब्वाम्तेक्म। ब्यवस्था १६:१-८ 22 मिनु मेकोपुकीमी ग्येरशा ७ नाक्त सम्म बोरब ओरुती मसुप्शो शोब्ले डा चाड मानेम्तेक्म। मारदे हना परमप्रभु यावेमी मेको आन कली ग्येरपाइशशो बाक्त। मेकोमी अस्सुर डा पिप आ थुं हिरशा, मेको आन कली दाक्पाइशशो बाक्त। मोपतीके मेको पिपमी इस्राएल डा परमप्रभु आ खिं सेल्चा कली मेको आन कली वारच पाइक्तीमी।

7

एजा यरूसलेममी जाक्शो

1 मिनु मेको नोले, पारसी रागी डा पिप आरता-सास्तमी सासन पची ना, सेरायाह आ तौ एजा बेबीलोन रे कुत। मेको सेरायाह आ आफ अजारयाह बाक्त। अजारयाह आ आफ हिल्कीयाह बाक्त। १इतिहास ५:३९-४० 2 हिल्कीयाह आ आफ शाल्लुम बाक्त। शाल्लुम आ आफ सादोक बाक्त। सादोक आ आफ अहीतुब बाक्त। 3 अहीतुब आ आफ अमारयाह बाक्त। अमारयाह आ आफ अजारयाह बाक्त। अजारयाह आ आफ मेरायोथ बाक्त। 4 मेरायोथ आ आफ जेराह बाक्त। जेराहीयाह आ आफ उज्जी बाक्त। उज्जी आ आफ बुक्की बाक्त। 5 बुक्की आ आफ अबीशुआ बाक्त। अबीशुआ आ आफ फिनेहास बाक्त। फिनेहास आ आफ एलाजर बाक्त। एलाजर आ आफ नेल्ल क्येडा ठेयब चढेब हारून बाक्त। 6 मेको एजा बेबीलोन रागी रे जाक्त। मोसा रे पा गेशो, परमप्रभु यावे, इस्राएली आन परमप्रभु आ अरेशो लोत्र जोक्ब तुइक्ब बाक्त। मिनु पिपमी आ पुंडशो नेल्ल गेप्तु। मारदे हना आ परमप्रभु यावे आ गुड मेको आ तारी बाक्त। एजा ८:१८-२२; नेहेम्याह २:८

7 आरता-सास्त पिप दुम्शो ७ बर्स जाक्दीम्मेनु, का निक्शी इस्राएली, का निक्शी चढेब, लेवी, कुम्सो पाइब, लाप्चोम खाल पाइब नु परमप्रभु आ खिंमी गेय पाइब मेको नु यरूसलेम लाम्तेक्म। 8 मिनु पिपमी सासन पशो ७ बर्स डा ५ महिना दुम्मेनु, मेकोपुकी यरूसलेममी जाक्दीत्तेक्म। 9 मिनु डोंइती डा महिना डा डोंइती डा नाक्तीमी बेबीलोन रागी रे यरूसलेम लचा गोम्तेक्म। मिनु मेकोपुकी ५ महिना डा डोंइती डा नाक्तीमी यरूसलेम जाक्तेक्म। मारदे हना परमप्रभु यावे, आ परमप्रभु आ शिशी पतीक गुड मेको आन तारी बाक्त। 10 एजामी परमप्रभु यावे आ अरेशो लोत्र रुप्चा नु पचा कली आ थुं फ्रेंशो बाक्त। मिनु परमप्रभु आ फुल्लुम मुशा ब्रेक्शो नु आ ठीक पतीक लोत्र इस्राएलम शेंचा कली मिम्शो बाक्त।

पिपम एजा कली ब्रेक्स गेशो

11 मेको पिप आरता-सास्तमी चढेब एजा कली गेशो ब्रेक्स डा लोव्र एको बाक्ब “मेको एजा नेल्ल ब्रेक्स तुइक्ब, परमप्रभु यावेमी इस्राएली आन कली शेंशो नु फुल्लुम मुशा ब्रेक्शो लोव्र रुप्शा जोक्ब बाक्त। 12 ‘पिप आन पिप आरता-सास्तमी स्वर्ग डा परमप्रभु आ अरेशो लोव्र जोक्ब तुइक्ब चढेब एजा कली थुं नाइशशा बाक्को!’ 13 गो हुकुम का गेनन। मार हुकुम गेनन देंशा हना, आं रागीम बाक्शो इस्राएल डा मुर, चढेबपुकी नु लेवीपुकी यरूसलेममी सु सु लचा दाक्नीमी, मेको गे नु लने चाप्नीम। 14 गो, पिप नु आं ७ जना अर्ती गेबपुकीमी इन कली यहूदा नु यरूसलेममी मार दुम्ना दुम्न बाक्मे, मेको कोव्रचा कली सोइशशा बाक्नीकी। गे नु बाक्ब इन परमप्रभु आ अरेशो लोव्र पशो बाक्मा कों, मपशो बाक्मा, मेको कोव्रडो। 15 गो, पिप नु आं ७ जना अर्ती गेबपुकीमी ग्येरशा गेशो सुन चांदी यरूसलेममी बाक्ब इस्राएली आन परमप्रभु कली लतीन। 16 मिनु गे बेबीलोन रागी नेल्लेमी इ कली गेशो सुन चांदी लाइशशा लने। मुर नु चढेबपुकीमी यरूसलेम सहरम बाक्ब आन परमप्रभु आ खिं कली ग्येरशा गेशो मार मार यो लतीन। 17 मिनु मेको क्येटीमी यरूसलेममी इन परमप्रभु कली चढेतीकेमी चढेचा कली ब्यफ, सांड नु पाठापुकी ग्यापीन। मेको नु चढेचा कली अन्न नु तूचा थोव्रक यो ग्याप्चा मालनीनी। 18 मेको मोपा ग्याप्शा यो सुन चांदी हेंत हना, इन परमप्रभु आ दाक्स पा, गे नु इन लोक्बपुकीमी मार पशो नु रिम्शो लाक्नीनी, मेको पने चाप्नीनी। 19 इन परमप्रभु आ खिंमी गेय पचा कली गेशो बोसपुकी, गे मेको यरूसलेममी परमप्रभु आ डोंइती वोइक्चा मालनीनी। 20 मिनु इन परमप्रभु आ खिं कली मारेइ माल्ताक्ब हना, मेको पिप आ क्येट वोइक्तीक रे शोल्ला, गेय पने चाप्नीनी।

21 गो, पिप आरता-सास्तमी, युफ्रेटीस आइक्ची हांबु डा रागी डा क्येट कोव्रशा वोइक्ब आन कली हुकुम गेतामी। नेल्ल आन कली ‘स्वर्ग डा परमप्रभु आ अरेशो लोव्र जोक्ब तुइक्ब चढेब एजामी इन कली मार पुंडतु हना यो, रीब पा गेने। 22 सहे का टलेन्ट चांदी, सहे का कोर चेरब, सहे का बाथ अडगुर शांबु, सहे का बाथ तेल नु हिक्सी दोशो मालनीमी मोशो गेन। टलेन्ट का ३४ किलो बाक्ब। कोर का २२० लिटर, ठेयब पुक्तीके बाक्ब। बाथ का २२ लिटर बाक्ब। 23 स्वर्ग डा परमप्रभुमी मार अरेशो बाक्मे आ खिं कली मार माल्दा मेको रीब पा स्वर्ग डा परमप्रभु कली गेने। मो मदुम्त हना, आ गाइशशा पिप आ राज्य नु आ तौ चच आन तार मोंइसीब। 24 मिनु गो इन कली मार तुइक्पाइक्चा दाक्नीकी देंशा हना, चढेब, लेवी, कुम्सो पाइब, लाप्चो खाल पाइब, परमप्रभु आ खिंमी गेय पाइब नु अरु गेय पाइब आन कली पिप कली गेतीक क्येट नु तिरो पोक्चा मताइनीम’ दे हुकुम गेनन्नी।

25 मिनु गे, एजा इ परमप्रभुमी इ कली तुइक्ब थुं गेशो बाक्त। मोपतीके युफ्रेटीस आइक्ची हांबु डा रागी कली हुकुम पाइब नु निसाफ पाइब योव्रशा वोइक्चा मालनेवे। मेकोपुकीमी युफ्रेटीस आइक्ची हांबु डा मुर नेल्ल आन कली निसाफ पचा मालनीम। मेको परमप्रभु आ अरेशो लोव्र तुइक्ब दुम्चा मालनीम। गे मतुइक्ब आन कली शेंचा मालनेवे। 26 इ परमप्रभु आ लोव्र मटीब नु पिप आ अरेशो मटीब, नेल्ल आन कली सजाइ गेचा मालनीम। मेको आन कली साइक्चा पुंडसीचा डा, रागी रे तिल्ला पुंडसीतीके, मेको आन शोंप नेल्ल रोइक्चा पुंडसीतीके नु चोक्चा पुंडसीतीके, मार सजाइ हना यो गेचा मालनीम” दे ब्रेक्शो बाक्त।

27 मिनु एजामी “परमप्रभु यावे, आंइ किकी पिपी आन परमप्रभु, गे ठेयब बाक्नीनी। यरूसलेममी बाक्शो परमप्रभु यावे, इन खिं आ मान नु छेडछेड बारपाइक्चा कली पिप आ थुंमी मोदेंशो रिम्शो पतीके कुर पाइतीनी। 28 मिनु पिप, आ अर्ती गेबपुकी नु गेय पाइब आन ठेयब मुरपुकीमी आं कली दाक्ब सेलतीनी” देंत। मारदे हना परमप्रभु यावे, आं परमप्रभु आ गुइ आं तारी बाक्ब, दे तुइशशा, आं थुं ठेयब सेल्ला। मिनु गो नु यरूसलेम लचा कली बेबीलोनम बाक्शो इस्राएली आन ठेयब मुर आन कली पुक्ताक्मी।

8

बेबीलोन रे लेशशा जाक्ब आन नें

1 पिप आरता-सास्तमी सासन पवा ना बेबीलोन रे गो नु लाइब खिं खिं डा ठेयब मुर आन नें ब्रेक्तीकेम ब्रेक्शो सु सु बाक्तेक्म देंशा हना, एजा ७:१,७ 2 फिनेहास आ चच युइ रे गेरशोम, इथामार आ चच युइ रे दानीएल, दाऊद आ चच युइ रे हत्तुश, ३ इतिहास ३:२२ 3 शेकन्याह आ चच युइ, पारोश आ चच युइ, जकरिया नु नें ब्रेक्तीकेम नें ब्रेक्शो १५० जना वोंइश मुर, 4 पहाथ-मोआब आ चच युइ रे, जेराहीयाह आ तौ एली-ए-होएनाइ नु मेको नु २०० जना वोंइश मुर, एजा २:६ 5 जत्तु आ चच युइ रे याहासीएल आ तौ शेकन्याह नु ३०० जना वोंइश मुर, 6 आदीन आ चच युइ रे योनाथन आ तौ एबेद नु ५० जना वोंइश मुर, 7 एलाम आ चच युइ रे अथाल्याह आ तौ येशायाह नु ७० जना वोंइश

मुर, 8 शेफत्याह आ चच युइ रे मिकाएल आ तौ जेबदीयाह नु ८० जना वोंइश मुर, 9 योआब आ चच युइ रे येहीएल आ तौ ओबदिया नु २१८ जना वोंइश मुर, 10 बानी आ चच युइ रे योसीफीया आ तौ शेलोमीथ नु १६० जना वोंइश मुर, एजा २:१० 11 बेबाइ आ चच युइ रे आ तौ जकरिया नु २८ जना वोंइश मुर, 12 अज्गाद आ चच युइ रे हककातान आ तौ योहानान नु ११० जना वोंइश मुर, 13 नोले जाक्शो अदोनीकाम आ चच युइ रे एली-फेलेत, येहुएल नु शेमायाह नु ६० जना वोंइश मुर, 14 मिनु बिग्वाइ आ चच युइ रे उथाइ, जाक्कुर नु ७० जना वोंइश मुर बाक्तेकम।

चढ़ेब लेवी आन कली माल्शो

15 गो मेको मुर नेल्ल आन कली अहावा गे लाइब खोला आ नेक्थाम पुक्ताकमी। मिनु गो मेकेर नाक्त सां सम्म बाक्तीक सेल्शा बाक्तक। मिनु गो मुर नु चढ़ेब आन कली कोव्रडुमीनु, लेवी आ चच युइ काइ मबाकम। 16 मिनु गो मुर आन कली एलीएजर, अरीएल, शेमायाह, एलनाथान, यारीब, एलनाथान, नाथान, जकरिया नु मेशुल्लाम आन कली ब्रेत्थ सोइक्ताकड। मेको लेवी आन दातेमी ठेयब मुर बाक्तेकम। जोक्ब तुइक्ब योयारीब नु एलनाथान आस कली यो ब्रेत्थ सोइक्ताकड। 17 मिनु गो कासीपीया डा ठेयब मुर इददो आ बाक्तीकेमी “लन” दे सोइक्ताकडमी। मिनु मेको आन कली कासीपीयाम लशा, इददो मेको आ मुरपुकी नु मेकेर डा परमप्रभु आ खिंम गेय पाइब आन कली “आंइ परमप्रभु आ खिंमी गेय पचा कली गेय पाइबपुकी सोइक्तीन” दे माइक्थ सोइक्ताकडमी। 18 आंइ परमप्रभु आ शिशी पतीके गुइ आंइ तारी बाक्त। मारदे हना मेकोपुकीमी जोक्ब तुइक्ब मुर का चाक्तेकम। मेको इस्राएल आ तौ लेवी आ तौ माहली आ चच युइ शेरेब्याह माइशो मुर बाक्त। मेको आ तौपुकी नु आ लोकब नेल्ल पा १८ जना वोंइश मुर चाक्तेकम। एजा ७:६ 19 मिनु मेकोपुकीम यो हशाब्याह, मेरारी आ चच युइ येशायाह नु मेको आ लोकब नु मेको आन तौ २० जना यो चाक्तेकम। 20 मिनु मेको आन कली प्रोंइशा २२० जना परमप्रभु आ खिंमी गेय पाइब यो चाक्तेकम। डोंइती दाऊद नु आ गेय पाइब ठेयब मुरपुकीमी लेवी आन कली वारच पचा कली योव्रशा वोइशो बाक्त। मेको नेल्ल आन नें नें ब्रेक्तीकेम ब्रेक्शो बाक्तेकम। १इतिहास ९:२

माइजा बाक्शा, पुंइशो लोव्र

21 मिनु गो अहावा खोलाम बाक्कानु, गो मुर आन कली “परमप्रभु कली पुंइचा कली गो माइजा बाक्चा मालनय” देंती। “परमप्रभु आ डोंइती आंइ दाक्शो मपथु, आंइ कली, आंइ आल आन कली नु आंइ शोंप कली लांम रिम्शो दुम्ल” दे परमप्रभु कली पुंइतक। 22 गो आंइ कली लांम आंइ जोरी सत्रु रे प्रोंइचा कली लडाइ पाइब नु शारा डोइक्बपुकी सोइक्तीकी, दे पिप कली पुंइचा मुने पाता। मारदे हना गोपुकीमी पिप कली “आंइ परमप्रभुमी आ नोले खोइक्ब नेल्ल आन कली कोव्रब। तन्न मेको कली प्रोंइब आन कली आ गाइशो कोइब” देंशो नड। 23 मिनु गो आंइ रिम्शो पा गाक्तीक आ पर्बम माइजा बाक्शा, आंइ परमप्रभु कली पुंइतक। मिनु परमप्रभुमी आंइ पुंइशो नेंतु।

परमप्रभु आ शोंप जिम्मा गेशो

24 मिनु गो ठेयब चढ़ेब आन दाते रे १२ जना आन कली योव्रतामी। मेको सु सु बाक्तेकम देंशा हना, शेरेब्याह नु हशाब्याह नु मेको आस लोकब १० जना बाक्तेकम। 25 मिनु पिप आ अर्ती गेब, मेको आ गेय पाइब ठेयब मुरपुकी नु मेकेर बाक्ब इस्राएली नेल्लेमी परमप्रभु आ खिं कली गेशो सुन चांदी नु अरु बोसपुकी नाक्शा, मेको आन कली गेतामी। 26 गो मेको आन कली ६ सहे ५० टलेन्ट चांदी, अरु सहे का टलेन्ट डा चांदी के बोस नु सुन सहे का टलेन्ट, टलेन्ट का ३४ किलो बाक्ब। 27 सुन के बोस २० ओटा, मेको नेल्ल हजार का आदारकोन डा बाक्नीम। नु सुन खोदेंशो रिम्शो कांसा के बोस निक्शी यो गेतामी। आदारकोन सुन के क्येट बाक्ब। टुक्रा का ८.४ ग्राम बाक्ब।

28 मिनु गो मेको आन कली “गे परमप्रभु यावे आ मुर बाक्नीनी। एको बोस यो परमप्रभु यावे आ बोस बाक्नीम। मुरपुकीमी एको सुन नु चांदी इन किकी पिपी आन परमप्रभु कली ग्येरशा गेशो बाक्नीम। 29 गो मेको नेल्ल कली रिम्शो कोव्रडीन। यरूसलेम परमप्रभु यावे आ खिंमी ठेयब चढ़ेबपुकी, लेवी नु इस्राएली आन खिं खिं डा ठेयब मुर आन डोंइती नाक्शा मगेशो सम्म होस पा कोव्रडीन” दे माइक्तामी।

30 मिनु मेको चढ़ेब नु लेवीपुकीमी यरूसलेमम बाक्शो आंइ परमप्रभु आ खिंमी लाइक्चा कली मेको नाक्शो सुन चांदी नु बोसपुकी ताक्तेकम।

इस्राएलीपुकी यरूसलेम जाक्शो

31 मिनु गो डोंइती डा महिना डा १२ नाक्तीमी यरूसलेम लचा कली अहावा खोला रे गाक्तक। मिनु आंइ परमप्रभु आ गुइ आंइ तार बाक्त। मेकोमी पतीके जोरी सत्रु नु लांम बाप्शा बाक्ब रे ब्रोंइतक। 32 मिनु गो यरूसलेम जाक्शा नाक्त सां सम्म नांइसाक्क।

परमप्रभु आ खिं डा शोंप चाक्शो

33 मिनु आ दीसा मेको सुन चांदी नु बोसपुकी, आंइ परमप्रभु आ खिंमी लाइशशा, चढ़ेब उरीयाह आ तौ मेरेमोथ कली नाक्शा गेतक। मेको नु फिनेहास आ तौ एलाजर यो बाक्त। मिनु मेको निक्शी नु लेवी आन दाते डा येशुआ आ तौ योजाबाद नु बिन्नुइ आ तौ नोआदीयाह यो बाक्ताक्स। 34 मेको नेल्ल हिक्शा नाक्शा ब्रेक्शा वोइक्तेक्म।

जाक्बपुकीमी चोशा चढ़ेशो

35 लेशशा जाक्शो ग्याइशशा लाइक्चा पुंइसीब इस्राएलीपुकीम आन परमप्रभु कली चोशा चढ़ेक्तेक्म। इस्राएली नेल्ल आन पबर्म १२ ओटा ब्यफ, १६ ओटा सांड, ७७ ओटा पाठा नु पाप आ पबर्म चढ़ेतीके चढ़ेचा कली १२ ओटा बोका चढ़ेक्तेक्म। मेको नेल्ल परमप्रभु यावे कली चोशा चढ़ेतीके बाक्तेक्म। एजा ६:१७ 36 मेकोपुकीमी पिपमी ब्रेक्शा अरेशो लोत्र युफ्रेटीस आइक्ची हांबु डा रागी डा पिप आ गेय पाइब नु हुकुम पाइब आन कली गेक्तेक्म। मिनु मेकोपुकीमी मुर आन कली नु परमप्रभु आ खिं कली ठेयब वारच पाइक्तेक्म।

9

इस्राएली आन मरिम्शो पशो

1 मिनु मेको नेल्ल पने थुम्शो नोले का निक्शी योत्रचा पुंइसीशो मुरपुकी आं बाक्तीकेम जाक्शा “इस्राएल डा मुरपुकी, चढ़ेब नु लेवीपुकीमी, कनानी हिती, परिज्जी, यबुसी, अम्मोनी, मोआबी, इजीप्ती नु एमोरी आन ग्रान्ग्रा दिशो गेय रे डोन मदुम्शो बाक्नीम। 2 मेकोपुकीमी मेको आन तमी आंम कली नु आन तौ आन कली मीश चाक्शो बाक्तेक्म। मोदेशो पा परमप्रभु आ आंम मुरपुकी अर्को रागी डा मुरपुकी नु खाल्साक्म। मिनु योत्रचा पुंइसीशो ठेयब मुर नु सासन पाइब आन परमप्रभु आ देशो मपथु, शुश दोस ताइब बाक्नीम” देंतेक्म। ब्यवस्था ७:३; ब्यवस्था २३:३; गन्ती ११:१७-२५; नेहेम्याह १३:२३ 3 मिनु गो मेको लोत्र नेंशा आं फेक्शो वा खाक्ता। आं चां नु गल शोक्रे तुल्ला। मारेइ लोत्र पने मचाप्थु, सिक्सी पा बाक्ती। 4 मेको ग्याइशशा लाइक्चा पुंइसीब आन मरिम्शो पतीके आ पबर्म इस्राएली आन परमप्रभु आ लोत्र कली मान पा हिंबपुकी आं बाक्तीकेम एर ओंथ बुक्तेक्म। मेकेर रे गो नाक्दो डा चढ़ेतीक सम्म मारेइ लोत्र पने मचाप्थु, सिक्सी पा बाक्ती।

एजामी परमप्रभु कली पुंइशो

5 मिनु नाक्दो डा चढ़ेतीक दुम्मेनु, आं खाक्शो वा फेक्शा, गो पोक्च थेक्शा, आं गुइ परमप्रभु यावे, आं परमप्रभु गे दिंशा 6 “आं परमप्रभु, गो इन कली आं कुल कोंइचा थाम्पा मुने पाता। मारदे हना आंइ मरिम्शो पतीके आंइ पिया क्येडा यो लाक्शो बाक्ब। मिनु आंइ दोस सरीड सम्म जाक्दीशो बाक्ब। दानीएल १:७-८ 7 गो आंइ किकी पिपी रे मुलाक्त डा नाक्त सम्म आंइ दोस थम ठेयब बाक्ब। आंइ काइ मरिम्शो पतीके आंइ पिप नु चढ़ेबपुकी अर्को रागी डा पिप आन गुइमी साइक्चा, चोक्चा, मारेइ मारेइ रोइक्चा पुंइसीचा नु शुश मुने तोक्चा पुंइसाक्म। मिनु गोपुकी यो सिनाक्त मुलाक्त मोदेशो दुम्शो बाक्नीकी। 8 तन्न मुल परमप्रभु यावे, आंइ परमप्रभुमी आंइ कली का निक्शी लीशो मुर गेतीनी। आंइ वाइल दुम्तीक रे इक्का नाक्त कली नाइक्चा गेतीके आंइ परमप्रभु आ बाक्तीकेमी बाक्चा ताइतक। याम का कली आंइ कली शिशी पा ग्येरपाइक्तीनी। 9 गो वाइलीम वाइल बाक्तक हना यो, आंइ परमप्रभुमी आंइ कली मप्रोंइशो बाक्ब। पारसी रागी डा पिप आ डोंइती इन गेना हना यो दाक्तीके कोंइशो बाक्तीनी। आंइ कली नक ब्रोंइचा गेशा, आंइ परमप्रभु आ खिं लेंशा सेल्चा कली नु ब्रेशो नेल्ल लेंशा सेल्चा कली नु यहूदा नु यरूसलेम एर ओंथ गारो प्रोत्रचा गेतीनी।

10 मोदेशो बाक्त हना यो, आंइ परमप्रभु, मुल गो मार देंने चाप्नीकी? गोपुकीमी इन शेंशो मटिथु, प्रोंइतक। 11 गो इन लोत्र पाइब रे मार लोत्र पपाइक्तीनी देशा हना ‘इन के सेल्चा कली ओव्रशो रागी ग्रान्ग्रा दिशो बाक्त। मारदे हना मेको रागी डा मुर आन ग्रान्ग्रा दिक्चा डा गेयमी मेको रागी डा कुना कुना नेल्ल ब्रीशो बाक्त। लेवी १८:२४-२५ 12 मोपतीके गोपुकीमी इन तमी मेको आन तौ आन कली ग्युबे पा मगेन। इन तौ आन कली मेको आन तमी नु ग्युबे पा मचाक्कीन। मिनु गोपुकीमी मेको आन कली रिम्शो दुम्चा नु दारचा कली वारच मपने। मोपा गोपुकी शुश बोल्यो

दुम्शा, मेको रागी डा रिम्शो थोत्रक जचा ताइनीनी। मिनु गे मेको रागी इन चच युइ आन कली गेना हना यो आन के दुम्पाइश्शा वोइक्नीनी' दे लोत्र पपाइक्तीनी। 13 गोपुकीमी आंइ मरिम्शो पतीके नु आंइ ठेयब दोस आ पबर्म श्येत जशो बाक्तक। मो हना यो आंइ परमप्रभुमी आंइ तचा माल्शो क्येडा इच्का ला सजाइ गेतीनी। मिनु आंइ कली ब्रोंइचा गेतीनी। 14 गो लेंशा इन शेंशो लोत्र मटिथु, मेको ग्रॉग्रा दिशो गेय पाइब नु ग्युंभे पाइनीकी डा? गे गोपुकी नु चुरशा, आंइ कली मसाइक्नीनी डा? मिनु ब्रोंइशा बाक्ब सुइ मलीब। 15 परमप्रभु यावे, इस्राएली आन परमप्रभु गे ठीक पाइब बाक्नीनी। मुल गो इच्का खोइ लीशो बाक्नीक। गो आंइ मरिम्शो पतीकेमी इन डोंइती बाक्नीकी। मो हना यो गो इन डोंइती पिया पोक्ने मचाप्नीकी” देती।

10

आन थुं परमप्रभु गे लेशो

1 एजा परमप्रभु आ खिं आ डोंइती गु बाप्शा, आन मरिम्शो पशो नेल्ल शोत्रशा, डाक्ना डाक्न बाक्शो बाक्त। मिनु ठेयब हुल का इस्राएली वोइश मुर, मीश मुर नु आलपुकी एजा आ एर ओथ बुक्तेक्म। मिनु मेको यो शुश डाक्तेक्म। 2 मिनु एलाम आ चच युइ डा येहीएल आ तौ शेकन्याहमी एजा कली “गो आंइ परमप्रभु कली मटिथु, एको रागी डा अर्को जात डा मीश आल ग्युंभे पा चाक्तक। मोदेशो पाइतक हना यो, इस्राएली आन कली आस पतीके बाक्ब। 3 मोपतीके मुल आंइ परमप्रभु नु कबल का पय। आ प्रभु नु परमप्रभु आ शेंतीक मान पा हिंशा टीब आन देशो खोदेशो पा एको मीश मुर नु आन आल नेल्ल आन कली प्रोंइशा सोइक्चा कली लोत्र थोक्तय। मिनु परमप्रभु आ अरेशो लोत्रम देशो खोदेशो पय। 4 मिनु मुल बोक्कीन। एको गेय नेल्ल इन के बाक्ब। गो इन कली वारच पाइनीकी। मोपतीके थुं बारपाइश्शा गेय पने” देत।

कसम जपाइश्शा

5 मोपतीके एजा बोक्शा, ठेयब चढेबपुकी, लेवीपुकी नु नेल्ल इस्राएली आन कली “डोंइती देशो लोत्र पाइनीक” दे कसम जपाइक्तीमी। मिनु मेकोपुकीमी कसम जाम्तेक्म। 6 मिनु नोले एजा परमप्रभु आ खिं आ डोंइती रे बोक्शा, एल्याशीब आ तौ येहो-हानान आ कोठाम लत। मिनु मेकोमी शोब्ले मजव ब्वाक्कु यो मतूड। मारदे हना ग्याइश्शा लाइक्चा पुंइसीब आन मटितीके आ पबर्म सुर्ता पना पन बाक्त।

7 मिनु यहूदा नु यरूसलेमम बाक्ब लेशशा जाक्शो ग्याइश्शा लाइक्चा पुंइसीब नेल्ल यरूसलेमम बुक्मल, दे नेंपाइक्तेक्म। 8 मिनु हुकुम पाइब नु खाल्पापुकीमी “सुइ मुर नाक्त सां सम्ममी मजाक्त हना, मेको आ शोप नेल्ल रोइक्चा पुंइसीब। मिनु लेशशा जाक्शो ग्याइश्शा लाइक्चा पुंइसीब आन दाते रे तिल्चा पुंइसीब” दे यहूदा नु यरूसलेम डा तेइ तेइ लोत्र सोइक्ताक्म।

9 मिनु यहूदा नु बेन्यामीन डा मुर नेल्ल नाक्त सां यरूसलेममी बुक्तेक्म। मेको ९ महिना डा २० नाक्तीम बाक्त। मुर नेल्ल परमप्रभु आ खिं डा लाडगाम निस्साक्म। मेको नेल्ल लोत्र नु ठेयब ठेयब रेउ आ पबर्म खिंखिं पाम्तेक्म। 10 मिनु चढेब एजा बोक्शा मेको आन कली “गेपुकीमी अर्को जात डा मीश आल ग्युंभे पा चाक्तीनी। इस्राएली आन दोस तेम्ताक्नी। 11 मुल गे परमप्रभु यावे, इन किकी पिपी आन परमप्रभु आ डोंइती इन मरिम्शो पशो शोत्रडीन। मिनु आ दाक्शो पने। गे मेको रागी डा मुर नु अर्को जात डा मीश रे ब्राडीन” दे मेको आन कली माइक्तीमी। 12 मिनु मेकेर बुक्शो मुर नेल्लेमी ठेयब सेंदामी “इन देशो थमा बाक्ब। गोपुकीमी इन देशो खोदेशो पचा माल्नीकी। 13 तन्न गो एकेर शुश मुर बाक्नीकी। रेउ यिना यिन बाक्ब। मिनु गो हाक्सीतीकेमी राप्शा बाक्ने मचाप्नीकी। एको गेय काबु निक्बुम मथुम्सीब। मारदे हना आंइ दातेमी शुश मुरुम मोदेशो मरिम्शो पाम्तेक्म। 14 गे आंइ ठेयब मुरपुकीमी यरूसलेमम मेको लोत्र नेंपतीन। मिनु सु सुमी आंइ सहरम अर्को जात डा मीश चाक्गमे, मेको सहर डा खाल्पा नु निसाफ पाइब आन डोंइती देशो ना जाक्चा माल्नीम। आंइ परमप्रभु आ थाम्पा गाइश्शा मनांइसे सम्म मोदेशो पने” दे ठेयब सेंदामी लोत्र लेत्ताक्म। 15 मिनु आसाहेल आ तौ योनाथन नु तिकवाह आ तौ याहजैयाह मबिस्सस। मेशुल्लाम नु शब्बेथाइ लेवी निक्शीमी मेको आस कली वारच पाइक्ताक्स।

16 मिनु नोले लेशशा जाक्शो ग्याइश्शा लाइक्चा पुंइसीबपुकीमी मार पाम्तेक्म देशा हना, चढेब एजा कली खिं खिं डा ठेयब मुर आन कली मेको गेय पपाइक्चा कली नें ब्रेक्शा योत्रपाइक्तेक्म। मिनु मेकोपुकीमी १० महिना डा डोंइती डा नाक्त रे मेको गेय पचा गोम्तेक्म। 17 मिनु डोंइती डा महिना डा डोंइती डा नाक्ती अर्को जात डा मीश नु ग्युंभे पाइब नेल्ल सु सु बाक्मा तुइक्ने थुम्तेक्म।

अर्को जात डा मीश चाक्ब आन नें

18 मिनु अर्को जात डा मीश ग्युंवे पाइबपुकीमी, चढेबपुकीमी योसादाक आ तौ येशुआ आ चच युइ रे नु आ लोक्ब रे मासेयाह एलीएजर, यारीब नु गेदाल्याह बाक्तेक्म। एजा ३:२ 19 मेकोपुकी आन मीश रे ब्रातेक्म। मिनु आन दोस क्याम्चा कली आन बगाल रे सांड का का चढेचा कली चाक्तेक्म। 20 इमेर आ चच युइ रे हनानी नु जेबदीयाह, 21 हारीम आ चच युइ रे मासेयाह, एलीया, शेमायाह, येहीएल, नु उज्जीयाह बाक्तेक्म 22 पशहुर आ चच युइ रे एली-ओ-एनाइ, मासेयाह, इश्माएल, नेथनेल, योजाबाद नु एलासाह बाक्तेक्म। 23 लेवीपुकी रे योजाबाद, शिमेइ, केलीता माइश्शो केलायाह, पेथायाह, यहूदा नु एलीएजर बाक्तेक्म। नेहेम्याह ८:७; नेहेम्याह १०:११

24 कुम्सो पाइबपुकी रे एल्याशीब, लाप्चो खाल पाइबपुकीमी शाल्लुम, तेयलेम नु ऊरी बाक्तेक्म। 25 मिनु इस्राएल डा पारोश आ चच युइ रे राम्याह, इज्जीयाह, माल्कीयाह मियामीन, एलाजर, हशाब्याह नु बेनायाह बाक्तेक्म। 26 एलाम आ चच युइ रे मत्तन्याह, जकरिया, येहीएल, अब्दी, येरेमोथ, नु एलीया बाक्तेक्म। 27 जत्तु आ चच युइ रे एली-ओ-एनाइ, एल्याशीब, मत्तन्याह, येरेमोथ, जाबाद नु अजीजा बाक्तेक्म। 28 बेबाइ आ चच युइ रे येहो-हानान, हनान्याह, जब्बै नु आथलै बाक्तेक्म। 29 बानी आ चच युइ रे मेशुल्लाम, माल्लुक, अदायाह, याशुब, शेआल नु येरेमोथ बाक्तेक्म। 30 पहाथ-मोआब आ चच युइ रे अदना, केलाल, बेनायाह, मासेयाह, मत्तन्याह, बेचालेल, बिन्नुइ नु मनस्से बाक्तेक्म। 31 हारीम आ चच युइ रे एलीएजर, इस्शीयाह, माल्कीयाह, शेमायाह, शिमेओन, 32 बेन्यामीन, माल्लुक नु शेमारयाह बाक्तेक्म। 33 हाशुम आ चच युइ रे मत्तताह मतेनाइ, जाबाद, एली-फेलेत, येरेमाइ, मनस्से नु शिमेइ बाक्तेक्म। 34 बानी आ चच युइ रे मा-अदाइ, अग्राम नु ऊएल, 35 बेनायाह, बेदैयाह, केलुही, 36 वान्याह, मेरेमोथ, एल्याशीब, 37 मत्तन्याह, मतेनाइ नु यासु बाक्तेक्म। 38 बिन्नुइ आ चच युइ रे 39 शिमेइ, शेलेम्याह, नाथान नु अदायाह, 40 माक-नादेबाइ, शाशाइ, शाराइ, 41 अजारेल, शेलेम्याह, शेमारयाह, 42 शाल्लुम, अमारयाह नु योसेफ बाक्तेक्म। 43 नेबो आ चच युइ रे यिएल, मत्तीथ्याह, जाबाद, जेबीना, यददाइ, योएल नु बेनायाह बाक्तेक्म। 44 मेको नेल्लेमी अर्को जात डा मीश ग्युंवे पशो बाक्तेक्म। मिनु मेकोपुकीमी आन मीश नु आन आल प्रोइशा सोइक्ताक्म।

नेहेम्याह

ब्रेक्ब मुर: एको किताब नेहेम्याह आंमान इच्का ब्रेक्शो बाक्त। तन्न नोले सुमी मेको आ ब्रेक्शो नु एज्रा आ ब्रेक्शो किताब का सेला मतुंडसीब। डोंइती एज्रा नु नेहेम्याह किताब का बाक्शो बाक्त। मेको कली ग्रीक लोवमी सेल्शा, मेको किताब का रे निक्शी सेल्शो बाक्तेक्म।

गेना दुम्शो: ४४६ बि. सी.म नेहेम्याहमी यरूसलेम आ पर्बम लोव नेंशो। ४४५ बि. सी.म नेहेम्याह यरूसलेम लशो। ४४५-४३३ बि. सी.म सुसा सहर लेशो। ४३३ बि. सी.म नेहेम्याह लेंशा यरूसलेम लशो।

मारदे ब्रेक्शो: एको किताबमी १इतिहास नु २इतिहासम ब्रेक्शो नेल्ल दुम्शो नोले डा रागी डा इतिहास बाक्ब। यरूसलेम सहर डा ब्रेक्शो गारो ५२ नाक्तीमी लेंशा प्रोवशो आ पर्बम ब्रेक्शो बाक्ब।

नेहेम्याह आ पुंडशो लोव

1 एको हाकाल्याह आ तौ नेहेम्याह आ लोव बाक्ब। २० बर्स डा किस्लेव महिनामी गो सुसा डा दरवारम बाक्ती।
2 मेना आं लोक्ब हानानी, का निक्शी मुर नु यहूदा रागी रे जाक्त। मिनु गो मेको आन कली “प्रोक्शा, गाक्शो नु ग्याइश्शा, लाइक्चा मपुंडसीशो रे लीशो यहूदीपुकी दोदेशो बाक्नीमी? यरूसलेम दोदेशो तांडसीबा?” दे हिल्लो पातामी। 3 मिनु मेकोपुकीमी आं कली “ग्याइक्चा मपुंडसीशो मेक उइ लीशोपुकीम शुश श्येत जशा, खेदा पचा पुंडसीना सीन बाक्नीम। यरूसलेम डा गारो ब्रेक्शो बाक्ब। मेकेर डा ठेयब लाप्चोपुकी मीम दुप्शो बाक्नीम” देंतेक्म। २इतिहास ३६:१९ 4 मिनु गो मेको लोव नेंशा निश्शा, सुर्ता पा, शुश नाक्त सम्म डाक्ना डाक्न बाक्ती। मजथु स्वर्ग डा परमप्रभु कली एज्रा ९:३ 5 “परमप्रभु यावे, स्वर्गम बाक्ब परमप्रभु, गो नेल्ल क्येडा ठेयब नु मान पा हिंचा माल्लशो परमप्रभु बाक्नीनी। इन कली दाक्शा, इन अरेशो लोव टीब आन कली शिशी पाइब नु कबल खाप्ब बाक्नीनी। दानीएल ९:४ 6 गो, इन वाइल, इस्राएली आन पर्बम नाक्दो नाक्त पुंडनुड। आं पुंडशो लोव नेंचा कली गो इन नोफा दाइक्तीन। मिनु आं गो कोवडीन। गो, इस्राएली नु आं आफ आ खिं डा मुर नेल्लेमी इन डोंइती मरिम्शो पाइतक। मिनु गो यो पाप पाता। 7 गो इन वाइल मोसा कली शेंतीक गेतीनी। गोपुकीमी चहिं मेको इन गेशो फुल्लुम मुशा ब्रेक्शो लोव नु इन ठीक पतीक लोव मटिथु, इन डोंइती मरिम्शो पाइतक। 8 मिनु गो इन वाइल मोसा कली ‘गे आं देंशो मटीतीनी हना, गो इन कली रागी रागी डा मुर आन दातेमी फ्राइनन्नी’ देंतीनी। ब्यवस्था ४:२७ 9 तन्न ‘आं गे लेत्तीनी, आं शेंतीक लोव नेंशा टीतीनी हना, गो इन कली डोन डोन रागी मेर फ्राइतन्नी हना यो, खुप्नन्नी। इन कली खुप्शा, आं नें ठेयब सेल्चा कली आं योवशो रागीमी चाक्नन्नी’ दे इन डोंइती पशो लोव मिम्तीन। ब्यवस्था ३०:४-९ 10 मिनु मेकोपुकी इन वाइली नु इन रागी डा मुर बाक्नीमी। डोंइती गे मेको आन कली इन ठेयब सक्ति नु इन बोल्यो गुइमी प्रोइशो बाक्तीनी। 11 परमप्रभु, इन नोफा दाइक्तीन। मिनु इन नें कली मान पचा दाक्ब इन वाइल आन पुंडशो लोव यो नेनीन। मुलाक्ती आं पुंडशो खपीन। पिप आ डोंइती गो शिशी तडल” दे पुंडता। मेना गो पिप कली तूचा गेब आन ठेयब मुर बाक्ती।

2

नेहेम्याह आ पुंडशो तशो

1 आरता-सास्त पिप दुम्शो २० बर्स जाक्दीश्शो बाक्त। मिनु काबु निसान महिनामी पिप आ अडगुर शांबु ठीक पा लाइश्शा, पिप कली खेत्ताक्ड। गो सुर्ता पशो नड। पिपमी मेको क्येडा डोंइती आं कली सुर्ता पशो गेनायो मतशो बाक्त। 2 मिनु पिपमी “मारदे इ कुल राव किक्पदी? गे रोइ पशो मबाक्नेवे, इ थुं दोक्शो तांडसीब” देंत। मो देंमेनु, गो शुश हिंती। 3 मिनु “हजुर, गेना हना यो ब्रोंइशा बाक्कीन। आं किकी पिपी आन कली थिम्शो सहर, खतम दुम्शो बाक्ब। मिनु गारो डा ठेयब लाप्चो मीम दुप्शो बाक्नीम। मिनु गो दोपा सुर्ता मपाइनुडा डा?” देंती। 4 मिनु पिपमी “गे मार माल्नेवे?” दे हिल्लो पती। मिनु गो आं थुंमी स्वर्गम बाक्ब परमप्रभु कली लोव पाता। 5 मिनु गो पिप कली “गे दाक्नीनी नु इन शिशी ताता हना, आं किकी पिपी थिम्शो, यहूदा रागी डा सहर कली लेंशा सेल्थ सोइक्तीनी” देंती। 6 मेना पिपीम पिप नु निश्शो बाक्त। मिनु पिपमी “मो पचा कली गिश नाक्त माल्नेवे? मिनु गेना लेशशा जाक्नेवे?” दे हिल्लो पती। मिनु गो आं माल्लशो नाक्त देंती। मिनु पिपम आं देंशो बिश्शा लचा गेती। 7 मिनु गोमी पिप कली “गे

रिम्शो लाकनीनी हना, युफ्रेटीस ठेयब खोला आ आइक्ची हांबुमी सासन पाइब मुर आन कली, आं कली यहूदा रागी सम्म ग्रीशा लचा गेचा कली ब्रेक्स का ब्रेक्शा गेयीनी। 8 मिनू परमप्रभु यावे आ खिं आ नेक्था डा बोल्यो खिं कली लापचो कली, सहर डा गारो डा ठेयब लापचो आन कली, नु आं बाक्तीक खिं कली शी मालनुड। इन ब्वाकी कोव्रब आसाफ कली आं माल्शो शी गेचा, दे यो ब्रेक्स का ब्रेक्शा गेयीनी” दे पुंडता। मिनू पिपमी आं पुंडशो नेल्ल गेती। मारदे हना आं परमप्रभु आ शिशी आं तारी बाक्त। एज्रा ७:६

9 पिपमी आं कली वारच पाइक्चा कली सिपाइ आन ठेयब मुरपुकी नु शारा डोइक्बपुकी यो गो नु काथा सोइक्ताक्व। मिनू युफ्रेटीस, ठेयब खोला आ आइक्ची हांबु डा ठेयब मुर आन बाक्तीक जाक्दीश्शा, पिप आ ब्रेक्सपुकी गेतामी। 10 मिनू होरोनी सान्बल्लत नु आ गेय पाइब अम्मोनी तोबीयाह, निम्फा “इस्त्राएली आन कली रिम्शो पाइब का जाक्शो बाक्ब” देंशो नेंशा, थाम्पा चुरताक्स।

नेहेम्याह यरूसलेम जाक्शो

11 मिनू गो यरूसलेम जाक्शा, नाक्त सां सम्म मेकेर बाक्ती। 12 मिनू नोले गो नाक्दो बोक्शा, का निक्शी मुर नु गारो कोव्रथ लती। तन्न आं परमप्रभुमी आं थुंमी यरूसलेम आ पर्वम वोइश्शो लोव्र सुइ आन कली मशेंदुमी। मिनू गो आं डोइश्शो शारा डा लाक्शा, अरु शारा मलदु। 13 मेको नाक्दो गो बेंसी लापचो रे ठेयब बुस्स माइश्शो ब्वाक्कु बुक्तीके नु मोव्रल लापचो गे लती। मिनू यरूसलेम डा ब्रेश्शो गारो नु मीम दुप्शो ठेयब लापचोपुकी कोव्रतामी। 14 मेकेर रे पा ब्वाक्कु बुक्तीक लापचो नु पिप दोम्ली गे लती। तन्न आं शारा कली गाक्तीक लां मबा। नेहेम्याह ३:१५ 15 मिनू गो मेको नाक्दो बेंसी रे ग्येत्थ डोइश्शा, गारो कोव्रतामी। मिनू लेशशा, लेंशा बेंसी लापचो रे सहर जाक्ती। 16 मिनू सहर डा ठेयब मुरपुकीम गो ते लडा नु मार पडा, मारेइ मतुइक्तेम। मारदे हना गो मेना सम्म यहूदी, चढेब, मान ताइब, ठेयब मुर नु अरु आन कली मारेइ मशेंदुमी।

नेहेम्याहमी मुर आन थुं बारपाइश्शो

17 मिनू मेको नोले गो सहर डा मुर नेल्ल आन कली “गे गो आंइ खतम दुम्शो नेल्ल तुइक्नीनी। यरूसलेम यो खतम दुम्शो बाक्ब। मिनू गारो डा ठेयब लापचोपुकी मीम दुप्शो बाक्नीम। लो, गो नेल्ल गारशा, यरूसलेम डा गारो सेल्शा, आंइ मुने साम्य” दे माइक्तामी। 18 मिनू आं परमप्रभु आ शिशी आं तारी बाक्तीके नु पिपमी आं कली देंशो लोव्र यो मेको आन कली शेंताक्डमी। मिनू मेकोपुकीमी “लो, गो एको गेय पय” दे ग्येरशा, आन थुं बारपाइक्तेक्म।

19 मिनू होरोनी सान्बल्लत, आ गेय पाइब अम्मोनी तोबीयाह नु अराबी गेशेममी चहिं एको लोव्र नेंशा, आंइ कली शुक्शी पा ठेयब लेशशा “गे मार पाइनीनी, हां? पिप आ सासन प्रोंइचा माल्नी?” दे हुइक्ताक्की। 20 मिनू गो मेको आन कली “स्वर्गम बाक्ब परमप्रभुमी आंइ कली गारो सेल्चा गेब। मिनू गो परमप्रभु आ वाइलपुकीमी गारो प्रोव्रनीकी। यरूसलेममी इन खिं मबाक्ब, एकेर मारेइ यो पशो मबाक्नीनी। मिनू इन कली ते खाइक्नी?” दे मेको आन कली माइक्तामी।

3

यरूसलेम डा गारो प्रोव्रचा गोशो

1 नेल्ल क्येडा ठेयब चढेब एल्याशीब नु चढेबपुकीमी भेडा लापचो सेल्लेक्म। मिनू ठेयब लापचो सेल्ले थुम्शा “परमप्रभु के बाक्ब” दे थारतेक्म। मिनू मेकोपुकीमी मेआ माइश्शो लाइश्शो खिं नु हानानेल माइश्शो लाइश्शो खिं सम्म गारो प्रोव्रना प्रोव्रन “परमप्रभु के बाक्ब” दे वोइक्तेक्म। नेहेम्याह १२:१; येरमीया ३१:३८ 2 मिनू मेकेर रे बोइश्शा, यरीको डा मुरपुकीमी प्रोव्रतेक्म। मिनू मेकेर रे बोइश्शा, इम्री आ तौ जाक्कुरमी प्रोव्रतु।

3 मिनू हास्सेनाह आ तौपुकीमी डांइ लापचो सेल्लेक्म। मेकोपुकीमी ठेयब लापचो डा शी वोइश्शा, ठेयब लापचो थारशा, लापचो नु चोक्तीके आग्लो वोइक्तेक्म। 4 मिनू मेकेर रे बोइश्शा, हककोस आ तौ उरीयाह आ तौ मेरेमोथमी गारो प्रोव्रतु। मिनू मेकेर रे बोइश्शा, मेशेजाबेल आ तौ बेरेक्याह आ तौ मेशुल्लाममी सेल्लु। मेकेर रे बोइश्शा, बाना आ तौ सादोकमी प्रोव्रतु। 5 मेकेर रे बोइश्शा, तेकोहा आ मुरपुकीमी प्रोव्रतेक्म। मेको आन ठेयब मुरपुकीम चहिं “गो गारो प्रोव्रतीक गेय पचा आंइ कली मशिरब” दे गारो मप्रोव्रडेम।

6 माइत गारो डा ठेयब लापचो पासेआह आ तौ यो-यादा नु बेसोदैयाह आ तौ मेशुल्लाममी सेल्लताक्स। मेकोमी ठेयब लापचो डा शी वोइश्शा, लापचो थारशा, पाइक्तीक नु चोक्तीके आग्लो वोइक्तेक्म। 7 मेकेर रे बोइश्शा, गिबोन

डा मेलत्याह नु मेरोनोथ डा मुर यादोन, गिबोन नु मिस्पा डा मुरपुकीमी प्रोव्रतेकम। मेकोपुकी युफ्रेटीस ओंथ हांबु डा जिल्ला डा सासन पाइब आ हुकुममी बाक्तेकम। 8 मेकेर रे बोइश्शा, हारहायाह आ तौ सुन चेम्ब उज्जीएलमी प्रोव्रतु। मेकेर रे बोइश्शा, ब्रोव्रशो रिना पाइब खेक्तीक सेल्ब हनान्याहमी गारो प्रोव्रतु। मेकोपुकीमी ब्रेम्शो गारो सम्म गारो सेल्शा प्रोव्रतेकम। 9 मेकेर रे बोइश्शा, हुर आ तौ रेफायाहमी प्रोव्रतु। मेको रेफायाह चहिं आधा यरूसलेम कली हुकुम पाइब बाक्त। 10 मेकेर रे बोइश्शा, हरुमाफ आ तौ येदायाहमी आ खिं आ डोंइती डा गारो प्रोव्रतु। मिनु मेकेर रे बोइश्शा, हशाब्नैयाह आ तौ हत्तुशमी प्रोव्रतु। 11 मेकेर रे बोइश्शा, हारीम आ तौ माल्कीयाह नु पहाथ-मोआब आ तौ हाश्शुबमी प्रोव्रताकस। मेको निक्शीमी गारो नु मी मुइक्तीक लाइश्शो खिं यो सेल्ताकस। 12 मेकेर रे बोइश्शा, हल्लोहेश आ तौ, यरूसलेम डा अर्को आधा हुकुम पाइब शाल्लुम नु आ तमीपुकीमी प्रोव्रतेकम।

13 मिनु मेकेर रे बोइश्शा, हानुन नु जानोह डा मुरपुकीमी बेसी लाप्चो सेल्तेकम। मेकोपुकीमी ठेयब लाप्चो सेल्शा, थारशा, लाप्चो चोक्तीक आग्लो वोइक्तेकम। मिनु मेकोपुकीमी मोव्रल लाप्चो माइश्शो ठेयब लाप्चो सम्म, हजार का कुबीत गारो प्रोव्रतेकम। कुबीत का आधा मिटर खोदेंशो बाक्ब।

14 मिनु मेको मोव्रल लाप्चो रेकाब आ तौ माल्कीयाहमी सेल्लु। मेको बेथ-हक्केरेम जिल्ला डा सासन पाइब बाक्त। मेकोमी ठेयब लाप्चो सेल्शा, थारशा, लाप्चो चोक्तीक आग्लो वोइक्तु।

15 मिनु कोल-होजे आ तौ, मिस्पा सहर डा ठेयब हुकुम पाइब शाल्लुममी ब्वाक्कु बुक्तीक लाप्चो प्रोव्रतु। मेकोमी साप्शा ठेयब लाप्चो सेल्शा, थारशा, लाप्चो पाइक्तीके नु चोक्तीके आग्लो वोइक्तु। मेकोमी पिप आ फल फुल रू आ नेक्था डा शेलाह माइश्शो दोम्ली डा गारो प्रोव्रशा, दाऊद आ सहर रे बुप्तीके सम्म डा गारो प्रोव्रतु। नेहेम्याह २:१४; २राजा २०:२०; यूहन्ना ९:७

16 मेकेर रे पा बोइश्शा, अच्चुक आ तौ, उइक्थ बेथ-सुर सहर डा हुकुम पाइब, नेहेम्याहमी प्रोव्रतु। मेकोमी दाऊद नु आ किकी पिपी आन कली थिम्तीके आ आइक्ची रे मुर आन सेल्शो दोम्ली नु सिपाइ आन खिं सम्म गारो प्रोव्रतु। 17 मेकेर रे बोइश्शा, लेवीपुकीमी प्रोव्रतेकम। बानी आ तौ रेहुम मेको आन कली कोव्रब बाक्त। मिनु मेकेर रे बोइश्शा, कैलाह सहर डा उइक्थ जिल्लामी हुकुम पाइब, हशाब्नैयाहमी प्रोव्रतु। 18 मेकेर रे बोइश्शा, आन लोकबपुकीमी प्रोव्रतेकम। मेको कैलाह डा लीशो भाग डा हुकुम पाइब, हेनादाद आ तौ बिन्नुइ बाक्त। 19 मेकेर रे बोइश्शा, मेको येशुआ आ तौ, मिस्पा डा हुकुम पाइब, एजेरमी प्रोव्रतु। मिनु कुना डा लडाइ पाइब आन या वोइक्तीक खिं रे ग्येत्थ लतीके आ डोंइती सम्म यो प्रोव्रतु। 20 मेकेर रे बोइश्शा, जब्बे आ तौ बारुकमी प्रोव्रतु। मेकोमी कुना रे नेल्ल क्येडा ठेयब चढेब एल्याशीब आ खिं डा ओव्रतीक सम्म प्रोव्रतु। नेहेम्याह ३:१ 21 मेकेर रे बोइश्शा, हककोस आ तौ उरीयाह, आ तौ मेरेमोथमी एल्याशीब आ खिं डा ओव्रतीक रे खिं ची सम्म प्रोव्रतु। एज्रा ८:३३ 22 मेकेर रे बोइश्शा, आ नेक्था बाक्शो चढेबपुकीमी प्रोव्रतेकम। 23 मेकेर रे बोइश्शा, बेन्यामीन नु हाश्शुबमी आस खिं खिं आस डोंइती डा गारो प्रोव्रताकस। मेकेर रे बोइश्शा, अनान्याह आ चच, मासेयाह आ तौ, अजारयाहमी आ खिं आ नेक्था डा गारो प्रोव्रतु। 24 मेकेर रे बोइश्शा, हेनादाद आ तौ बिन्नुइमी अजारयाह आ खिं रे कुना सम्म प्रोव्रतु। 25 मेकेर रे बोइश्शा, उजाइ आ तौ पालालमी कुना नु पिप आ खिं आ नेक्था डा लाइश्शो खिं आइक्ची एरे सम्म डा गारो प्रोव्रतु। येरमीया ३२:२ 26 मेकेर रे बोइश्शा, पारोश आ तौ पेदायाह नु ओफेलम बाक्शो परमप्रभु यावे आ खिं डा गेय पाइबपुकीमी नां दाप्तीक गे, ब्वाक्कु लाप्चो आइक्ची नु गारो डा लाइश्शो खिं सम्म प्रोव्रतेकम। 27 मेकेर रे बोइश्शा, तेकोहा आ मुरपुकीमी ठेयब लाइश्शो खिं आ डोंइती रे ओफेल डा गारो सम्म प्रोव्रतेकम। 28 शारा लाप्चो आ ग्येत्थ गे चढेबपुकीमी आन खिं डोंइडोंइती डा गारो प्रोव्रतेकम। २राजा ११:३६ 29 मेकेर रे बोइश्शा, इम्मेर आ तौ सादोकमी आ खिं डोंइती डा गारो प्रोव्रतु। मेकेर रे बोइश्शा, शेकन्याह आ तौ शेमायाहमी गारो प्रोव्रतु। शेकन्याह चहिं नां दाप्तीक लाप्चो डा खाल पाइब बाक्त। 30 मेकेर रे बोइश्शा, शेलेम्याह आ तौ हनान्याह नु सालाफ आ जन्तरे तौ हानुनमी गारो प्रोव्रताकस। मेकेर रे बोइश्शा, बेरेक्याह आ तौ मेशुल्लाममी आ खिं आ डोंइती डा गारो प्रोव्रतु। 31 मेकेर रे बोइश्शा, सुन चेम्ब माल्कीयाहमी कुना डा खिं डा इर डा कोठा सम्म ग्याप्ब लेयब आन खिं रे गारो प्रोव्रशा, खाल पाइब लाप्चो आ डोंइती, कौसी पाइश्शो कुना डा तला तारी डा कोठा सम्म गारो प्रोव्रतु। 32 मेको गारो आ कुनाम बाक्शो तला तारी डा कोठा नु भेडा लाप्चो आ दातेमी सुन चेम्ब नु ग्याप्ब लेयबपुकीमी गारो प्रोव्रतेकम।

जोरी सत्रुमी गेय तेक्चा माल्शो

1 “गो गारो प्रोव्रना प्रोव्रन बाक्नीकी” देशो लोव्र सान्बल्लतमी नेंशा, उरशा, शुश गाइश्शा, यहूदी आन पर्बम शुक्शी पाप्तु। नेहेम्याह २:१०,१९ 2 मिनु मेकोमी यहूदी आन पर्बम शुक्शी पा, आ लोकबपुकी नु सामरीया डा लडाइ पाइब आन डोंइती “एको मारेइ सोक्त मपाइश्शो यहूदीपुकीमी मार पना पन बाक्नीमी? मार, मेकोपुकीमी आन गारो लेंशा प्रोव्रने चाप्नीमी? मार, मेकोपुकीमी चढेनीमी? मार, मेकोपुकीमी काबुमी थुम्नीमी? मेको मीम दुप्शो फुल्लुम गारो प्रोव्रने चाप्नीमी डा?” दे लोव्र पाप्तु। 3 मिनु अम्मोनी डा तोबीयाह सान्बल्लत आ नेक्था बाक्शा “मेकोपुकीमी मेको प्रोव्रतेक्म हना यो, सिवार का मेको तारी डोंइसाक्व हना, नेल्ल ब्रेप्ब” देंत। 4 मिनु गो चहिं “आंइ परमप्रभु, इन नोफा दाइश्शा, नेनीन। गो शुश शुक्शी पाइक्चा पुंइसाक्क। मेको आन पशो शुक्शी लेशशा, मेको आन तार कोप्तीन। मेको आन कली ग्याइश्शा, अरु आन रागी लाइक्पतीन। 5 मेको आन मरिम्शो पतीके नेल्ल क्याम्शा मगेने। मारदे हना मेकोपुकीमी गारो प्रोव्रब आन कली शुक्शी पा, आन थुं तोक्शा गेम्तेक्म” दे परमप्रभु कली पुंइता। 6 मिनु गोपुकीमी आधा लाइश्शो सम्म गारो प्रोव्रशा, एर ओंथ नेल्ल हिरने थुम्शो। मारदे हना प्रोव्रब मुरपुकीमी आन थुं नुशा, ग्येरशा, गारो प्रोव्रतेक्म।

जोरी सत्रु आन कली तेक्शो

7 मिनु सान्बल्लत, तोबीयाह, अराबीपुकी, अम्मोनीपुकी नु अशदोदीपुकीमी “यरूसलेम डा गारो रिम्शो पा सेलना सेलन बाक्नीमी। आ पोव्रला यो सुना सुन बाक्नीमी” दे तुइश्शा, शुश गाइक्ताक्म। 8 मिनु मेकोपुकी गारशा, यरूसलेम कली लडाइ पा, खतम सेल्चा, दे खुम्साक्म। 9 गोपुकी चहिं आंइ परमप्रभु कली पुंइना पुंइन बाक्तक। मिनु गोपुकीमी “मारेइ पाइनीमी, कों” दे मेको आन कली कोव्रशा, नाक्दो नाक्त खाल पाइबपुकी वोइक्तक।

10 मिनु यहूदा डा मुरपुकीमी “फुल्लु कुरब आन बोल जाम्ना जाम्न लत। मारदे हना शोर गाक्शो शी, फुल्लु नु खप शुश दुम्तीके, गोपुकी गारो प्रोव्रने मचाप्नीकी” दे गन गन पाम्तेक्म। 11 मिनु आंइ जोरी सत्रुपुकीमी “मेको आन मतुइक्थु, मतथु, मेको आन दातेमी जाक्दीश्शा, मेको आन कली साइश्शा, आन गेय थुम्पाइय्य” देंमुमा बाक्त। 12 तन्न मेको आन नेक्था बाक्ब गाउं गाउं डा यहूदीपुकी आंइ बाक्तीक जाक्शा “आंइ जोरी सत्रु गोपुकी नु लडाइ पचा कली बुक्शा बाक्नीमी” दे शुश खेयप देंतेक्म। 13 मोपतीके गो गारो आ नेल्ल क्येडा आइक्च दुम्तीके, आंइ जोरी सत्रु आन शुश श्येत मजथु, ओव्रने चाप्तीकेम, मुर आन कली खुप्ताक्डमी। मेको आन कली तरवार, तूतीक नु लिब्रा कुरपाइश्शा मेकेर वोइक्तामी। 14 मिनु गो मेको आन कली हिंशो तशा “महिनीन। नेल्ल क्येडा ठेयब नु मान पा हिंचा माल्शो परमप्रभु कली मिम्तीन। मिनु आंम लोकब, तमी तौ, मीश नु आंम खिं आ पर्बम लडाइ पने” दे ठेयब मुरपुकी, सासन पाइबपुकी नु मुर नेल्ल आन कली माइक्तामी। नेहेम्याह १:५

15 आन मिम्शो गोपुकीमी तुइक्ताक्क नु परमप्रभुमी आन मिम्शो नेल्ल क्याम्शा गोवा बाक्त, दे आंइ जोरी सत्रुपुकीमी तुइक्तमे बाक्त। मोपतीके गो नेल्ल आंम आंम गेय पा गारो प्रोव्रथ लेत्तक। 16 मेको नाक्त डा मेरे गो आंइ उइक्थ मुरपुकीमी गारो प्रोव्रशा बाक्शो। मिनु लीशो उइक्थ मुरपुकीमी तूतीक, तेक्तीक नु लिब्रा कुरशा, फलाम के फेक्तीक फेक्शा बाक्तेक्म। मिनु ठेयब मुरपुकीमी गारो प्रोव्रब यहूदा डा मुर नु गारशा, आन थुं बारपाइक्तेक्म। 17 कुरब मुरपुकीमी आन गुइ कामी कुरतीक नु अर्को गुइमी या कुरतेक्म। 18 गारो प्रोव्रब मुरपुकीमी आन किप्शुरमी चुक्ब पिप्शा प्रोव्रतेक्म। तुराही ताप्ब आं नेक्था बाक्शो बाक्त। 19 मिनु गोमी ठेयब मुर, हुकुम पाइब नु मुर नेल्ल आन कली “गेय थम ठेयब नु शुश ब्रशा बाक्शो बाक्ब। गोपुकी गारो आ नेक्था, तन्न डोन डोन बाक्नीकी। 20 तेकेर रे तुराही ग्रीशो नेंनीनी, मेकेर रीब पा बुक्कीन। आंइ परमप्रभुमी आंइ पर्बम लडाइ पाइब” दे माइक्तामी। प्रस्थान १४:१४ 21 मोपा गो उइक्थ मुरपुकीमी गेय पस डा पस बाक्तक। मिनु उइक्थ मुरपुकी सुनी रे नाक्दो सम्म या शेशा बाक्तेक्म। 22 मेना गो मुर आन कली “नाक्दो खाल पाइब, नाक्त गेय पाइब नु मेको आन कली वारच पाइब नेल्ल यरूसलेममीन नां सोंइचा माल्नीम” दे यो माइक्तामी। 23 मोदेशो पा गो, आं लोकबपुकी, आं गेय पाइबपुकी नु आं नेक्था बाक्ब खाल पाइबपुकी वा मप्रुइक्थु, आंइ या शेशान इत्तक।

5

प्रुडग आन कली वारच पशो

1 मिनु नोले मार दुम्त देशा हना, मुरपुकी नु आन मीशपुकीमी आंम आन यहूदी लोकब आन पर्बम लोव्र का ब्रपाइक्तेक्म। 2 का निक्शीमी “गो, आंइ तमी तौ शुश बाक्नीमी। गो शुश बाक्तीके ब्रोंइचा कली अन्न माल्नीकी” देंतेक्म। 3 मिनु का निक्शीमी “अन्कालमी अन्न ग्याप्चा कली आंइ रूपुकी, आंइ अडगुर रूपुकी नु आंइ खिंपुकी जाकट वोइक्चा माल्ताक्क” देंतेक्म। 4 मिनु का निक्शीमी “पिप कली तिरो थाप्चा कली आंइ रू नु अडगुर रूपुकी गेशा, जेर ताक्तक। 5 गो यो आंइ लोकब खोदेशो बाक्नीकी। आंइ तमी तौ मेको आन तमी तौ खोदेशो बाक्नीमी। मिनु गो आंइ तमी तौ आन कली वाइलीम वाइल दुम्चा कली लेयचा माल्नीकी। आंइ तमी का निक्शी डोंइतीन लेयचा पुंइसाक्म। गोपुकीमी मेको आन कली प्रोंइने मचाप्नीकी। मारदे हना आंइ रू नु अडगुर रू नेल्ल मुर आन के दुम्ने थुम्तु” देंतेक्म। लेवी २५:३९; २राजा ४:१; यसैया ५०:१; मत्ती १८:२५

6 मोपा मेको आन लोव्र नेंशा, आन डाक्शो तशा, शुश गाइक्ताक्यी। 7 तन्न गो आं थुंमी लोव्र पाता। मिनु गो मान ताइब नु ठेयब मुर आन कली हुइशशा “क्येट आ चाइक्ब ताक्चा, दे आंम लोकब आन कली जेर गेनीनी” दे माइक्ताक्मी। मिनु मेको आन पर्बम मुर नेल्ल खुप्ताक्डमी। प्रस्थान २२:२४ 8 मिनु गो मेको आन कली “गोपुकीमी अर्को रागीम लेयशो वाइलीम वाइल दुम्शो आंइ लोकब यहूदी आन कली आंइ चाप्शो थाप्शा, मुर आन गुइ रे प्रोंइतक। गेपुकी चहिं आंम इन लोकब रागी रागी डा मुर आन कली लेयनीनी? मिनु मेकोपुकीम गो आंमान लेंशा ग्याप्चा माल्नीकी?” दे शुश हुइक्ताक्ड। मिनु मेकोपुकी सिक्सी पा मारेइ मदेंम। लेवी २५:४७-४९ 9 मिनु लेंशा “इन पशो मरिम्शो बाक्ब। आंइ जोरी सत्रुपुकीमी आंइ कली शुक्शी मपपाइक्थु, आंइ परमप्रभु कली मान पा हिंशा, गेय पचा ममाल्नीनी डा? 10 गो आंमान, आं लोकबपुकी नु आं गेय पाइबपुकीमी यो मेको आन कली क्येट नु अन्न जेर गेतक। मुल गो चाइक्ब पुंइचा प्रोंइय। ब्यवस्था १५:१-११ 11 गो मुलाक्तीन मेको आन रू, अडगुर रू, आन तेल रवा रू नु आन खिं लेशशा गेने। मिनु क्येट, अन्न, नक अडगुर रस नु तेल, मार मार जेर पुन्मे, मेको नेल्ल मो गेने” दे माइक्तामी। 12 मिनु मेकोपुकीमी “गो नेल्ल लेशशा गेनीकी। मेकोपुकी रे मारेइ मताक्नीकी। इन देशो खोदेशो पा नेल्ल पाइनीकी” देंतेक्म। मिनु गो चढेब आन कली ब्रेशशा “आंइ देशो खोदेशो पा पाइनीकी” दे कसम जपाइक्तामी। 13 मिनु नोले गो आं फेक्शो वा रे थुर थुर पा फुरक हेम्शा “आन देशो मखाप्ब कली परमप्रभुमी आन खिं नु आन थेरशो रू रे ओं पान थुर थुर पा हेमल। मोपा थुर थुर पा श्येत्थ दुम्मल” देंती। मिनु मेकेर बुक्शा बाक्ब नेल्लेमी “आमेन” देंतेक्म। मिनु मेकोपुकीमी परमप्रभु यावे कली ठेयब सेल्शा, आन देशो खोदेशो पाम्तेक्म। आमेन देंबमी “गो यो मोदेशो मिम्नुड” देंब।

नेहेम्याहमी रिम्शो पशो

14 मिनु आरता-सास्त पिप दुम्शो २० बर्स दुम्मेनु, गो यहूदा रागीमी हुकुम पचा कली योव्रचा पुंइसाक्यी। मेना रे मुल १२ बर्स दुम्त। मेको आरता-सास्त पिप दुम्शो ३२ बर्स दुम्त। मेको १२ बर्स सम्म गो नु आं लोकबपुकीमी हुकुम पाइब आन ततीक जचा थोव्रक मजक। 15 आं क्येडा डोंइती डा आं खोदेशो पा हुकुम पाइबपुकीमी मुर आन कली ठेयब श्येत गेशो बाक्तेक्म। मेकोपुकीमी नाक्त किंत किंत डा जचा थोव्रक, शोब्ले, अडगुर शांबु नु ४० चांदी के शेकेल यो लाइशो बाक्तेक्म। मिनु मेको आन गेय पाइबपुकीमी यो मुर आन कली साप्पा दिप्शो बाक्तेक्म। तन्न गो परमप्रभु कली मान पा हिंशा मोदेशो मपड। चांदी के शेकेल का ११.५ ग्राम डा क्येट बाक्ब। 16 मिनु गो आंमा गारो प्रोव्रतीक गेय यो पाता। गोपुकीमी रू का यो मग्याप्क। आं गेय पाइब नेल्ल गारो प्रोव्रथ जाक्तेक्म। 17 मिनु गो नु सहे का ५० जना यहूदी आन ठेयब मुरपुकी काथा बाक्शा जाम्तेक्म। मिनु एर ओंथ रागी रे आंइ कली गुम्थ जाक्बपुकी यो गो नु बाक्शा जाम्तेक्म। 18 नाक्त का कली मार जचा थोव्रक ठीक सेल्शो बाक्त, देशा हना, ब्यफ का, ६ ओटा रिम्शो दोम्शो भेडा नु ब्वापुकी ठीक सेल्शो बाक्तेक्म। मिनु १०, १० नाक्त कली मारेइ मारेइ अडगुर शांबु यो चाक्शो बाक्त। मोदेशो शुश माल्ती हना यो, गो गेनायो हुकुम पाइब आ तचा माल्शो जचा थोव्रक ममलु। मारदे हना मुरपुकी शुश श्येत जशो बाक्तेक्म। 19 गो परमप्रभु यावे कली “आं परमप्रभु, गो एको मुर आन कली मार मार रिम्शो पडा, मेको मप्रेंदीन” देंती। नेहेम्याह १३:१४, २२, ३१

6

जोरी सत्रुमी हिंच कोंइशो

1 मिनु नोले सान्बल्लत, तोबीयाह, अराबी गेशेम नु आंइ जोरी सत्रुपुकीमी “गोपुकीमी गारो प्रोव्रशा, पोव्रला नेल्ल यो सुने थुम्तक” देशो नेंतेकम। गो ठेयब लाप्चो थारने मथुम्शो बाक्ती। 2 मेना सान्बल्लत नु गेशेममी आं कली “ओनो दिंम डा गाउं काम ग्रुम्य” दे लोव्र सोइक्ताक्यीमी। तन्न मेकोपुकीमी आं कली मरिम्शो पचा माल्शो बाक्तेकम। 3 मिनु गो मेको आन कली “मुल आं के ठेयब गेय का बाक्ब। मोपतीके यिने मचाप्नुड। मेक यिशा, आं गेय क्योल्चा मदाक्नुड” दे लोव्र सोइक्ताकड। 4 मिनु मेकोपुकीमी आं कली ४ खेयप सम्म “यिने” दे लोव्र सोइक्ताक्यीमी। मिनु गो यो डोंइती डा खोदेशो पा लोव्र लेशशा सोइक्ताकडमी। 5 मिनु सान्बल्लतमी लेंशा, ५ खेयपमी आं गेय पाइब मुर, नेल्ल आन कली पढेचा डा पा, ब्रेक्स का सोइक्ताकव। 6 मिनु मेको ब्रेक्समी “अर्को जात डा मुरपुकीमी ‘गे नु यहूदीपुकी गारशा सरकार कली तुल्चशो बाक्नीनी’ देंतेकम। गेशेममी यो मोन देंत। मोपतीके गे गारो सेल्ला सेल्ल बाक्नीनी। गे चहिं मेको आन पिप दुम्चा माल्शो बाक्नेवे, देशो यो नेंसाकव। नेहेम्याह २:१९; एज्रा ४:१२ 7 मिनु ‘यहूदामी पिप का बाक्ब’ देंपाइक्चा कली परमप्रभु यावे आ लोव्र पाइब आन कली यो योव्रशा, यरूसलेमम लोव्र पथ, वोइश्शो बाक्ते। मिनु पिपमी एको लोव्र थमा पा नेंब। मोपतीके एको आ पर्बम लोव्रसी पचा कली रीब पा यिने” दे ब्रेक्शो बाक्त। 8 मिनु गो “इ देशो लोव्र नेल्ल जोल बाक्ब। आंम इ मिम्शो बाक्ब” दे लोव्र लेशशा, सोइक्ताकड। 9 मिनु मेको नेल्लेमी आंइ कली हिंच कोइचा माल्तेकम। मेकोपुकीमी “एको गारो प्रोव्रचा प्रोंइनीम। मथुम्नीम” दे मिम्मे बाक्त। मिनु गो “परमप्रभु, आं थुं बारपतीन” दे पुंइता।

शेमायाहम रिम्शो लोव्र पखु पशो

10 मिनु काबु गो देलायाह आ तौ, मेहेताबेल आ चच शेमायाह आ खिंमी लती। मेको आ खिंमी चोक्सीशा बाक्शो बाक्त। मेकोमी आं कली “गो निक्शी परमप्रभु यावे आ खिं नेल्ल क्येडा आगा ओव्रशा, लाप्चोपुकी चोक्शा, बाक्स। मारदे हना मेकोपुकी इन कली साइक्थ पिना पिन बाक्नीम। नाकदो इन कली साइक्थ जाक्नीम” दे माइक्ती। 11 तन्न गो मेको कली “मार, आं खोदेशो मुर प्रोक्बा डा? गो परमप्रभु यावे आ खिंम ओव्रशा, ब्रोंइनुडा डा? गो मलाइनुड” दे माइक्ता। 12 मिनु गो “परमप्रभु आ सोइश्शो ममाइ, आं कली मरिम्शो पचा, दे सान्बल्लत नु तोबीयाहमी मेको कली नोले दुम्ब लोव्र पपाइक्खु पशो बाक्ताकस। 13 आं कली हिंच कोइचा नु पाप पपाइक्चा माल्ताकसे। मोपा मेकोमी आं पर्बम मरिम्शो लोव्र ब्रपाइक्चा कली क्येट ताक्शो बाक्त” दे तुइक्ताकड। 14 मिनु गो “आं परमप्रभु, तोबीयाह नु सान्बल्लत आस पशो मिम्तीन। आं कली हिंच कोइचा दाक्ब नोले दुम्ब लोव्र पाइब नोआदीयाह माइश्शो मीश मुर नु अरु नोले दुम्ब लोव्र पाइब, नेल्ल आन पतीके यो मिम्तीन” दे परमप्रभु कली पुंइता। नेहेम्याह ३:३३-३७

यरूसलेम डा गारो सेल्ले थुम्शो

15 एलुल महिना डा २५ नाक्त गोपुकीमी गारो सेल्ले थुम्तक। सेल्ले थुम्चा कली ५२ नाक्त माल्ताकक। 16 मिनु आंइ जोरी सत्रुपुकीमी एको लोव्र नेंतेकम, देशो नेंशा, आंइ एर ओंथ बाक्शो अर्को जात डा मुर नेल्ल शुश हिंतेकम। मिनु मेकोपुकीमी “इ परमप्रभुम पशो बाक्त” दे तुइक्ताकम।

17 मेना यहूदा डा ठेयब मुरपुकीमी तोबीयाह कली शुश ब्रेक्स ब्रेक्शा, सोइक्ना सोइक्न बाक्तेकम। मिनु तोबीयाहमी यो मेको आन कली ब्रेक्स सोइक्ना सोइक्न बाक्त। 18 मिनु यहूदा डा शुश मुरुमी तोबीयाह आ लोव्र बिश्शा “इन मुर दुम्नीकी” दे कसम जशो बाक्तेकम। मारदे हना तोबीयाह आ चांइवा आराह आ तौ शेकन्याह बाक्त। मिनु आ तौ येहो-हानानमी बेरेक्याह आ तौ मेशुल्लाम आ तमी चाक्शो बाक्त। 19 मेको मुरपुकीमी आं डोंइती तोबीयाहमी मार मार रिम्शो गेय पाप्तु, दे आं कली लोव्र पाप्तेकम। मिनु आं देशो लोव्र यो तोबीयाह कली शोव्रतेकम। मिनु तोबीयाहमी आं कली हिंच कोइशा चिठीपुकी सोइक्ताक्यी।

7

नेहेम्याहम हुकुम पाइब सेल्शो

1 मिनु गारो प्रोव्रने थुम्शा, लाप्चोपुकी थारशा गारपाइश्शा वोइक्ताकमी। लाप्चो खाल पाइबपुकी, कुम्सो पाइबपुकी नु लेवी नेल्ल योव्रशा वोइक्तामी। 2 मिनु गो आं लोक्ब हानानी नु लडाइ पाइब आन नेल्ल क्येडा ठेयब मुर हनान्याह आस कली यरूसलेममी हुकुम पाइब सेल्लासी। मारदे हना शुश मुर आन क्येडा हनान्याह दीगो नु रिम्शो पाइब परमप्रभु कली मान पा हिंब बाक्त। 3 मिनु गो मेको आस कली “यरूसलेम डा ठेयब लाप्चोपुकी नां चोक्ता नोले ला रोक्पतीन। मिनु नोले खाल पाइबपुकी ठेयब लाप्चोम गेय पची ना लाप्चोपुकी चोक्शा, आग्लो शुइक्चा माल्नीम।

यरूसलेम डा मुरपुकी का का पा खाल पाइब सेल्चा माल्नीम। का निक्शी गारो कोव्रब सेल्चा, का निक्शी आंम आन खिं आ डोंइती खाल पचा माल्नीम” दे माइक्तामी। 4 सहर ठेयब बाक्ब। मिनु मुर शुश मबाक्तीके, ब्रशा बाक्शो बाक्तेक्म। मिनु सुइमी आन खिं लेंशा सेल्शो मबाक्म।

यरूसलेम लेशशा जाक्ब आन नें

एजा २:१-६

5 मिनु आं परमप्रभुमी आं कली “ठेयब मुर, सरकार डा अधिकार ताइब नु अरु मुर नेल्ल आन कली बुक्पाइशशा, मेको नु आन खिं डा मुर आन नें ब्रेक्चा माल्नुड” दे मिम्पाइक्ती। मिनु गो ग्याइशशा लाइक्चा पुंइसीशो रे, यरूसलेम लेशशा जाक्ब आन नें ब्रेक्शो किताब थित्ता। मिनु मेको किताबम सु सु आन नें ब्रेक्शो बाक्तेक्म देंशा हना, 6 डोंइती बेबीलोन डा पिप नेबुकदनेसरमी यरूसलेम नु यहूदा डा मुर आन कली ग्याइशशा लाइशो बाक्त। मिनु सु सु नोले यरूसलेम नु यहूदा डा आंम आन सहर लेत्चा तशो बाक्तेक्म देंशा हना, 7 जेरूब-बाबेल, येशुआ, नेहेम्याह, अजारयाह, राम्याह, नाहामानी, मोरदेकै, बिल्शान, मिस्पेरेथ बिगवाइ, नेहुम नु बानाह लेत्चा तशो बाक्तेक्म।

8 लेत्चा ताइब इस्राएली सु सु बाक्तेक्म देंशा हना, पारोश नु आ खिं डा मुर २,१७२ 9 शेफत्याह नु आ खिं डा मुर ३७२ 10 आराह नु आ खिं डा मुर ६५२ 11 पहाथ-मोआब नु आ खिं डा मुर नु येशुआ नु योआब आस खिं डा मुर नेल्ल २,८१८ 12 एलाम नु आ खिं डा मुर १,२५४ 13 जत्तु नु आ खिं डा मुर ८४५ 14 जक्काइ नु आ खिं डा मुर ७६० 15 बिन्नुइ नु आ खिं डा मुर ६४८ 16 बेबाइ नु आ खिं डा मुर ६२८ 17 अज्गाद नु आ खिं डा मुर २,३२२ 18 अदोनीकाम नु आ खिं डा मुर ६६७ 19 बिगवाइ नु आ खिं डा मुर २,०६७ 20 आदीन नु आ खिं डा मुर ६५५ 21 आतेर नु हिज्कीयाह नु आस खिं डा मुर ९८ 22 हाशुम नु आ खिं डा मुर ३२८ 23 बेजाइ नु आ खिं डा मुर ३२४ 24 हारीफ नु आ खिं डा मुर ११२ 25 गिबोन नु आ खिं डा मुर ९५ 26 बेथलेहेम नु नेतोफाह सहर डा मुर १८८ 27 अनाथोथ सहर डा मुर १२८ 28 बेथ-अज्मावेथ सहर डा मुर ४२ 29 किरयथ-यारीम, केफीरा नु बेयरोथ सहर डा मुर ७४३ 30 रामाह नु गोबा सहर डा मुर ६२१ 31 मिक्मास सहर डा मुर १२२ 32 बेथेल नु ऐ सहर डा मुर १२३ 33 अर्को नेबो सहर डा मुर ५२ 34 अर्को एलाम आ तौ १,२५४ 35 हारीम आ तौ ३२० 36 यरीको सहर डा वोंइश मुर ३४५ 37 लोद, हादीद नु ओनो सहर डा वोंइश मुर ७२१ 38 सेनाह सहर डा वोंइश मुर ३,९३० जना लेत्चा ताइब बाक्तेक्म।

चढ़ेबपुकी

39 येशुआ आ खिं डा येदायाह आ चच युइ ९७३ 40 इम्मर आ चच युइ १,०५२ 41 पशहर आ चच युइ १,२४७ 42 हारीम आ चच युइ १,०१७ जना बाक्तेक्म।

लेवीपुकी

43 होदेवाह आ खिं डा येशुआ नु कदमीएल आस चच युइ ७४ जना लेत्चा तशो बाक्तेक्म।

कुम्सो पाइबपुकी

44 आसाफ आ चच युइ १४८ जना लेत्चा तशो बाक्तेक्म।

लाप्चो खाल पाइबपुकी

45 शाल्लुम, आतेर, ताल्मोन, अक्कुब, हतीता नु शोबाइ आन चच युइ १३८ जना लेत्चा तशो बाक्तेक्म।

परमप्रभु आ खिंम गेय पाइबपुकी

46 सीहा आ तौपुकी, हासुफा आ तौपुकी, तब्बाओथ आ तौपुकी, 47 केरोस आ तौपुकी, सीआ आ तौपुकी, पादोन आ तौपुकी, 48 लेबाना आ तौपुकी, हगाबा आ तौपुकी, शाल्माइ आ तौपुकी 49 हानान आ तौपुकी, गिददेल आ तौपुकी, गहार आ तौपुकी, 50 रेआयाह आ तौपुकी, रेसीन आ तौपुकी, नेकोदा आ तौपुकी, 51 गज्जाम आ तौपुकी, उज्जा आ तौपुकी, पासेआह आ तौपुकी, 52 बेसाइ आ तौपुकी, मेउनीम आ तौपुकी, नेफुशेसीम आ तौपुकी, 53 बाकबुक आ तौपुकी, हकुफा आ तौपुकी, हारहर आ तौपुकी, 54 बास्लुथ आ तौपुकी, मेहीदा आ तौपुकी, हारशा आ तौपुकी, 55 बारकोस आ तौपुकी, सीसेरा आ तौपुकी, तेमाह आ तौपुकी, 56 नु नेसीयाह नु हतीफा आस तौपुकी परमप्रभु यावे आ खिं डा गेय पाइब लेत्चा तशो बाक्तेक्म।

सोलोमन आ गेय पाइबपुकी

57 सोताइ आ तौपुकी, सोफेरेथ आ तौपुकी, परीदा आ तौपुकी, 58 याला आ तौपुकी, दारकोन आ तौपुकी, गिददेल आ तौपुकी, 59 शेफत्याह आ तौपुकी, हत्तील आ तौपुकी, पोकेरेथ-हस्सेबाइम आ तौपुकी नु आमोन आ तौपुकी, 60 परमप्रभु यावे आ खिं डा गेय पाइब नु सोलोमन आ खिं डा गेय पाइब आन तौ नेल्ल पा ३९२ जना लेत्चा तशो बाक्तेकम।

का निक्शी अर्को सहर डा मुर

61 तेल-मेलाह, तेल-हारशा, करूब, अददोन नु इम्मेर सहर रे कुइब मुर आन किकी पिपी इस्राएली बाक्नीम, दे ब्रेक्तीकेमी कोंइने मचबेम। 62 देलायाह, तोबीयाह नु नेकोदा आन तौ नेल्ल पा ६४२ जना बाक्तेकम। 63 चढेब आन दाते रे होबायाह, हककोस आस चच युइ नु बारजील्लाइ बाक्नीम। बारजील्लाइमी चहिं गिलादी बारजील्लाइ आ तमी का ग्युंवे पा आ शिउ आ नें बारजील्लाइ माइक्चा पुंडसीशो बाक्त। 64 मेको आन नें ब्रेक्शो मथित्तीके, चढेतीक गेय पचा मशिरनीम, दे तिल्चा पुंडसीशो बाक्तेकम। 65 हुकुम पाइबमी ऊरीम नु थुम्मीम रे गेय पाइब चढेब मग्रूम सम्म मेको आन कली चढेशो थोव्रकी जचा मगेमे बाक्त। प्रस्थान २८:३०; गन्ती १८:९; १सामुएल १४:४१

66 यरूसलेम लेशशा जाक्ब नेल्ल ४२,३६० जना बाक्तेकम। 67 मेको आन वाइलीम वाइल ७,३३७ जना बाक्तेकम। मिनु कुम्सो पाइबपुकी २४५ जना मुर बाक्तेकम। 68 मिनु ७३६ ओटा शारा, २४५ ओटा खच्चर, 69 दलओंठ ४३५ नु ६,७२० ओटा गधा बाक्तेकम।

परमप्रभु कली ग्येरशा गेशो

एज्रा २:६८-६९

70 मिनु का निक्शी खिं डा ठेयब मुरपुकीमी गारो प्रोव्रचा कली मार मार गेम्तेकम। हुकुम पाइबमी सुन के आदारकोन माइश्शो क्येट हजार का टुक्रा, ५० ओटा बोस नु ५ सहे ३० ओटा चढेब आन कली फेक्तीके वा गेप्टु। आदारकोन का ८.४ ग्राम सुन के क्येट बाक्ब। 71 मिनु का निक्शी खिं डा ठेयब मुरपुकीमी गेय कली सुन के आदारकोन २० हजार टुक्रा नु चांदी के मीना माइश्शो क्येट हजार निक्शी सहे निक्शी टुक्रा गेम्तेकम। मीना का ६०० ग्राम खोदेशो बाक्ब। 72 लीशो मुरपुकीमी सुन के आदारकोन २० हजार टुक्रा नु चांदी के मीना हजार निक्शी टुक्रा नु ६७ ओटा चढेब आन कली फेक्तीके वा गेम्तेकम। 73 मिनु चढेबपुकी, लेवीपुकी, लाप्यो खाल पाइबपुकी, कुम्सो पाइबपुकी, परमप्रभु यावे आ खिंमी गेय पाइबपुकी नु अरु नेल्ल इस्राएली आन आंम आंम सहरमी लशा बाक्शो बाक्तेकम।

8

एज्रामी परमप्रभु आ लोव्र पढेशो

1 मिनु ७ महिना थेक्चावानु, इस्राएली आंम आन आन सहरमी बाक्मानु, मुर नेल्ल थुं का दुम्शा, ब्वाक्कु लाप्यो आ नेक्था डा ठेयब बाक्तीकेम बुक्तेकम। मिनु मेकोपुकीमी परमप्रभु यावे आ लोव्र जोक्ब तुइक्ब चढेब एज्रा कली “परमप्रभु यावेमी मोसा कली गेशो इस्राएली आन कली अरेशो लोव्र डा किताब चाक्को” दैतेकम। एज्रा ७:६ 2 मिनु ७ महिना डा डोंइती डा नाक्तीमी चढेब एज्रामी मेको किताब मुर आन डोंइती चाक्तु। मेकेर वोंइश मुर, मीश मुरपुकी नु सु सु रुप्ने चापब बाक्मा, मेको नेल्ल बुक्शो बाक्तेकम। ब्यवस्था ३१:१०-१३ 3 मोपा एज्रामी ब्वाक्कु लाप्यो आ नेक्था डा बाक्तीकेमी सुनी रे नाक्त सम्म वोंइश मुर, मीश मुर नु लोव्र रुप्ने चापब नेल्ल आन डोंइती मेको किताब पढेप्टु। मिनु परमप्रभु यावे आ अरेशो लोव्र डा किताब पढेवानु, नेल्लेमी नोफा दाइश्शा नेतेकम। 4 मिनु परमप्रभु यावे आ लोव्र जोक्ब तुइक्ब एज्रा मुर नेल्ल आन कली रिम्शो नेंपाइक्चा कली शी के सेल्शो लाइश्शो राप्तीकेमी राप्शो बाक्त। मेको आ ग्युरा गे मत्तीथ्याह, शेमा, आनायाह, उरीयाह, हिल्कीयाह नु मासेयाह राप्शो बाक्तेकम। मिनु आ पेरा गे पेदायाह, मीशाएल, माल्कीयाह, हाशुम, हशबादानाह, जकरिया नु मेशुल्लाम राप्शो बाक्तेकम। 5 मिनु एज्रामी आ लाइश्शो बाक्तीकेमी राप्शा, नेल्लेम तचा डा पा मुर आन डोंइती मेको किताब प्राक्तु। मेको किताब प्राक्गानु, मुर नेल्ल बोक्तेकम। 6 मिनु एज्रामी नेल्ल क्येडा ठेयब परमप्रभु यावे कली “गे ठेयब ननी” दे मान पवानु, मुर नेल्लेमी आन गुइ पोक्शा “आमेन, आमेन” दैतेकम। मिनु नेल्लेमी आन पिया खुक्शा, परमप्रभु यावे आ डोंइती खप सम्म बाप्शा ठेयब सेल्लेकम। 7 मिनु येशुआ, बानी, शेरैब्याह, यामीन, अक्कुब, शब्बेथाइ, होदीयाह, मासेयाह, केलीता, अजारयाह, योजाबाद, हानान, पेलायाह नु लेवीपुकीमी मुर आन कली परमप्रभु आ अरेशो लोव्र रुप्पाइक्तेकम। मिनु मुर आन बाक्तीकेम राप्शा बाक्तेकम। 8 मेकोपुकीमी परमप्रभु आ अरेशो लोव्र रुप्चा डा पा पढेम्तेकम। आन पढेशो रुप्मेक्ल, दे मुर आन कली आ अर्थ यो शेंताकम।

9 मिनु परमप्रभु यावे आ अरेशो लोव्र नेंशा, मुर नेल्ल शुश डाक्तेकम। मोपतीके पिप आ वोइशो हुकुम पाइब, नेहेम्याह, परमप्रभु यावे आ लोव्र जोक्ब तुइक्ब चढेब एज्रा नु मुर आन कली शेंब लेवीपुकीमी “मुलाक्ती परमप्रभु यावे, इन परमप्रभु आ ठेयब नाक्त बाक्ब। हिशेक मपने। मडाक्कीन” दे मुर आन कली माइक्तेकम। 10 मिनु मेकोपुकीमी मुर आन कली “मुल गे नेल्ल लने। ब्रोव्रशो ब्रोव्रशो जने ब्वने, तूडीन। मिनु मथीब आन कली यो मार मार सोइक्तीने। मारदे हना मुलाक्ती आंइ परमप्रभु आ ठेयब नाक्त बाक्ब। हिशेक मपने। मारदे हना परमप्रभु यावे आ गेशो ग्येरतीकेमी इन थुं बारपाइक्ब” देंतेकम। 11 मिनु लेवीपुकीमी मुर नेल्ल आन कली “सिक्सी पा बाक्कीन। मुलाक्ती परमप्रभु आ ठेयब नाक्त बाक्ब। हिशेक मपने। मडाक्कीन” देंतेकम। मारदे हना मुर नेल्ल परमप्रभु यावे आ लोव्र नेंशा डाक्तेकम। नेहेम्याह ५:१४ 12 मिनु मुर नेल्लेमी आन देंशो लोव्र रुप्शा, ठेयब ग्येरतीक चाड मानेचा कली जचा ब्वचा तूचा नु मथीब आन कली मार मार सोइक्चा कली लाम्तेकम।

गोठ सेल्शा बाक्तीक चाड

13 मिनु आ दीसा खिं नेल्ल डा ठेयब मुर, चढेब नु लेवी नेल्ल परमप्रभु यावे लोव्र जोक्ब तुइक्ब एज्रा आ डोंइती परमप्रभु यावे आ अरेशो लोव्र शेंसीचा कली बुक्तेकम। 14 मिनु परमप्रभु यावेमी मोसा कली “इसाएलीपुकीमी ७ महिना डा ७ नाक्त कली गोठ सेल्शा बाक्तीक चाड मानेचा माल्नीम” दे शेंशा, परमप्रभु यावे आ अरेशो लोव्रम ब्रेक्शो थित्तेकम। लेवी २३:३४-३६; लेवी २३:४० 15 मिनु मेकोपुकीमी आंम बाक्तीक सहर नेल्लेमी नु यरूसलेम डा मुर आन कली “गे इर ब्वाकी ग्येत्थ लशा, मार मार तेल रवा, मूरे रवा, खजूर रवा नु शुश सफा पाइशो रवा आन राशी गोठ सेल्शा कली चाक्कीन। मिनु दोदेंशो ब्रेक्शो बाक्मे, मोदेंशो पने” दे नेंपतीन देंतेकम। लेवी २३:४० 16 मिनु मुरपुकी लशा, सेउला चाक्तेकम। मिनु आन खिं तारी, आन लाडगामी, परमप्रभु आ खिं डा लाडगामी, ब्वाक्कु लाप्चो आ नेक्थामी नु एफ्राइम लाप्चो आ नेक्थामी गोठ सेल्शा बाक्तेकम। नेहेम्याह ८:१ 17 मिनु मुर नेल्ल, सु सु ग्याइशशा लेत्चा पुंइसीशो बाक्मा, मेको नेल्ल, गोठ सेल्शा, आगाम बाक्तेकम। मिनु नून आ तौ यहोसु आ पाला रे मेको नाक्त सम्म इसाएलीपुकीमी मोदेंशो मपशो बाक्तेकम। मेको चाडमी मुर नेल्ल शुश ग्येरसाकम। 18 मिनु डोंइती डा नाक्त रे नोले डा नाक्त सम्म एज्रा मी नाक्त किंत किंत परमप्रभु आ अरेशो लोव्र डा किताब पढेप्टु। मेकोपुकीमी मेको चाड ७ नाक्त सम्म मानेम्तेकम। मिनु दोदेंशो पा ब्रेक्शो बाक्मे, मोदेंशो पा आ दीसा ८ नाक्तीमी चाड थुम्तीक नाक्त नेल्ल क्येडा ठेयब पा मानेम्तेकम।

9

मुरपुकीमी मरिम्शो पशो

1 मिनु मेको महिना डा २४ नाक्त नोले इसाएलीपुकी माइजा बाक्शा, अरन्डी फेक्शा नु आन पियामी फुरक देप्शा खुम्साकम। 2 इसाएलीपुकीमी अर्को जात डा मुरपुकी रे आंम कली तिल्साकम। मिनु आन बाक्तीकेम राप्शा, आन मरिम्शो पशो नु आन किकी पिपी आन मरिम्शो पशो शोव्रतेकम। 3 मिनु नेल्ल आन बाक्तीकेमी राप्शा, घन्टा सां सम्म परमप्रभु यावे, आन परमप्रभु आ अरेशो लोव्र डा किताब पढेशो नेंतेकम। मिनु अर्को घन्टा सां सम्म चहिं आंम आंम आन मरिम्शो पशो शोव्रना शोव्रन, परमप्रभु यावे आ डोंइती बाप्शा, परमप्रभु यावे, आन परमप्रभु कली ठेयब सेल्ना सेल्न बाक्तेकम।

4 येशुआ, बानी, कदमीएल, शेबान्याह, बुन्नी, शेरब्याह, बानी नु केनानी लेवी आन शी के सेल्शो राप्तीके डा क्रेसीमी बाक्शा, ठेयब सेंदामी परमप्रभु यावे, आन परमप्रभु कली लोव्र पाम्तेकम। 5 मिनु लेवी येशुआ, कदमीएल, बानी, हशाब्नेयाह, शेरब्याह, होदीयाह, शेबान्याह नु पेथायाहमी मुर आन कली “बोक्कीन, गेना हना यो बाक्ब परमप्रभु यावे, इन परमप्रभु कली ठेयब सेलीन। ‘इन नें ठेयब बाक्ब। नेल्ल आन ठेयब सेल्तीके आन क्येडा इन नें ठेयब सेल्चा पुंइसीशो बाक्ब’ देंचा माल्नीनी” देंतेकम।

6 मिनु एज्रामी “गे का ला परमप्रभु यावे बाक्नीनी। गे सरीड सेल्तीनी। स्वर्ग नु मेकेर बाक्ब नेल्ल सेल्तीनी। गे रागी नु मेकेर डा मारेइ मारेइ, समुन्द्र नु मेकेर डा मारेइ मारेइ आन कली सेल्तीनी। मिनु मेको नेल्ल कली ब्रोइचा गेतीनी। मिनु स्वर्ग डा गेय पाइबपुकीमी इन कली ठेयब सेल्नीम। 7 परमप्रभु यावे, गे परमप्रभुमी अब्राम कली योव्रशा, कल्दी आन रागी ऊर सहर रे ग्रुंइशा, अब्राहाम नें वोइक्तीनी। उत्पत्ती ११:३१; उत्पत्ती १७:५ 8 मिनु मेको आ थुं इन कली मप्रोंइब, ठीक पाइब बाक्ब, दे तुइशशा, मेको नु कबल का पाइतीनी। मार कबल पाइतीनी देंशा हना, मेको कली कनानी, हिती, एमोरी, परिज्जी, यबुसी नु गिरगाशी आन रागी आ चच युइ आन कली गेनुड, दे कबल पाइतीनी। मिनु

गे इन कबल खाप्तीनी। मारदे हना गे ठीक पाइब बाक्नीनी। उत्पत्ती १५:१८-२१ 9 मिनु आंइ किकी पिपी इजीप्त रागीम बाक्मानु, मेको आन श्येत जशो ताइतीनी। लल समुन्द्रम बाक्शा आन डाक्शो नेतीनी। प्रस्थान ३:७ 10 मिनु गेमी पिप फाराओ आ गेय पाइब नु आ रागी डा मुर नेल्ल आन डोंइती चिन्ड नु छक लाक्चा डा गेय पाइतीनी। मारदे हना मेकोपुकीमी आंइ किकी पिपी आन कली ठेयब लेशशा, श्येत गेशो बाक्तेक्म, दे तुइक्ताक्नी। मोदेशो पा इन नें ठेयब सेल्साक्नी। मुल सम्म मेको मोदेशो बाक्ब। प्रस्थान १८:११ 11 मेको आन डोंइती समुन्द्र कली चेशशा लां का सेल्तीनी। मेकोपुकी सोव्रशो खपीम गाक्शा, समुन्द्र शोक्साक्म। मेको खेदा पाइब आन कली चहिं ब्वाक्कुम खुम्तीनी। फुल्लु ब्वारशा, ब्वाक्कुम ताइशो खोदेशो पा खुम्तीनी। प्रस्थान १४:२१; प्रस्थान १५:५,१० 12 आंइ किकी पिपी आन कली नाक्त गोस्स के थामम लां कोइताक्नी। मिनु नाक्दो आन लां तपाइक्चा कली मी के थाम दुम्शा लां कोइताक्नी। 13 गे सीनै डांडामी यितीनी। मिनु स्वर्ग रे मेकोपुकी नु लोव्र पाइतीनी। गे मेको आन कली इन ठीक पतीक लोव्र, थमा शेंतीके, इन रिम्शो फुल्लुमु मुशा ब्रेक्शो लोव्र नु इन शेंतीके गेतीनी। प्रस्थान १९:१८; प्रस्थान २०:१-१७ 14 इन नाइक्तीक नाक्त नाइक्चा, दे मेको आन कली तुइक्पाइक्तीनी। मेको आन कली मोसा रे पा इन शेंतीके, इन फुल्लुमु मुशा ब्रेक्शो लोव्र नु इन अरेशो लोव्र गेतीनी। 15 मेको आन कली शोव्रलु बेक्मानु, सरीड रे शोब्ले गेतीनी। मेको आन कली तूतू मदाक्चा डा पा, रूचा डा पा सेरथे फुल्लु रे ब्वाक्कु गुंइशा गेतीनी। मिनु मेको आन कली 'गेपुकी मेको रागी ओव्रशा, नेल्ल आंम के सेलीन' दे माइक्तीनी। मिनु मेको आन कली 'गो मेको नेल्ल गेनुड' दे कसम जाइतीनी। प्रस्थान १६:४,१४,१५; प्रस्थान १७:६

16 मिनु आंइ किकी पिपीमी ठेयब लेशशा, आन मिम्शो ला पशा, इन शेंशो मटीब दुम्शो बाक्तेक्म। प्रस्थान ३२:१,९ 17 इन कली टिने मबिस्सम। आन दातेमी पशो इन चिन्ड नु छक लाक्चा डा गेय ममिम्शो बाक्तेक्म। मेकोपुकी इन देशो मटीब दुम्शो बाक्तेक्म। मिनु आन काइ मटितीकेमी इजीप्त रागी लेशशा लशा, लेंशा वाइलीम वाइल दुम्चा कली थुंम वोइशो बाक्तेक्म। गे चहिं आंइ मरिम्शो पशो क्याम्शा गेब परमप्रभु बाक्नीनी। शिशी पाइब नु गेना हना यो दाक्ब बाक्नीनी। गे ओंखां पा चुरब बाक्शा, गेना हना यो दाक्तीके पाइशो बाक्नीनी। मोपतीके गे इन मुर आन कली दाक्शा मप्रोंइनी। प्रस्थान ३४:६ 18 मेकोपुकीमी सुन के बाछा सेल्शा 'इजीप्त रागी रे प्रोंइशा कुइब, आंइ परमप्रभु एकोन बाक्ब' देंमानु यो, इन कली ठेयब शुक्शी लोव्र पशो बाक्तेक्म हना यो, प्रस्थान ३२:४ 19 गे मेको आन कली शुश शिशी पशा, गोरशो रागीमी प्रोंइशा मसोइक्तीनी। आन लतीक लां तपाइक्चा कली नाक्त गोस्स के थाम नु नाक्दो मी के थाम दुम्शा गेनायो मप्रोंइनी। 20 मिनु मेको आन कली शेंचा, दे इन रिम्शो पाइब सोक्त गेतीनी। मेको आन कली मन्ना शोब्ले गेचा मप्रोंइनी। मिनु मेको आन कली रूथ्री पा ब्वाक्कु तूचा गेतीनी। प्रस्थान १६:३५; प्रस्थान १७:६; गन्ती ११:१७-२५; भजन संग्रह ७८:१५-१६; भजन संग्रह ७८:२३-२४ 21 गे मेको आन कली ४० बर्स सम्म गोरशो रागीमी मारेइ ममाल्चा डा पा थुल्तीनी। मेको आन वा मजेक्म, आन खोइल यो गेनायो महोम्म। ब्यवस्था ८:४ 22 मेको आन कली राज्य नु जात जात डा मुरपुकी नु ग्रापाइक्तीनी। मेको आन बाक्तीके का का पा योव्रशा गेतीनी। मिनु सीहोन माइशो, हेशबोन रागी डा पिप नु ओग माइशो, बाशान रागी डा पिप आस रागी यो मेको आन कली गेतीनी। गन्ती २१:२३-२४; गन्ती २१:३३,३५ 23 गे मेको आन तौ सरीड डा सोरुल खोदेशो पा हिक्ने मचाप्चा डा पा शुश सेल्तीनी। मिनु आन किकी पिपी आन कली 'गे मेको रागी आंम के सेलीन' देशो रागीमी चाक्दीत्तीनी। 24 मिनु मेको आन तौ चच युइमी मेको रागी ओव्रशा, आंम के सेल्साक्म। मिनु गे मेको रागीम बाक्ब कनानी नु आन पिपपुकी यो मेको आन गुइम गेतीनी। यहोसु १२:- 25 मेकोपुकीमी एर ओंथ नेल्ल ठेयब गारो हिरशो सहरपुकी ग्राशो बाक्तेक्म। शुश ग्रेल्ब रू आंम के सेल्शो बाक्तेक्म। रिम्शो थोव्रकीम ब्रीशो खिंपुकी आंम के सेल्शो बाक्तेक्म। फुल्लु मुशा सेल्शो इनार, अडगुर रू, तेल रवा रू नु मार मार फल फुल रू शुश तशो बाक्तेक्म। मिनु मेकोपुकीमी जशा ब्वशा, रूशा, दोम्शा इन ठेयब शिशी तशा, ग्येरसीशो बाक्तेक्म। ब्यवस्था ६:१०-११; ब्यवस्था ३२:१५

26 मेको नेल्ल तशा यो इन देशो मटिथु, ठेयब लेशशा, इन अरेशो लोव्र मटीमे बाक्त। इन लोव्र पाइबपुकीमी आन कली 'गे मरिम्शो पाइब बाक्नीनी। आं गे लेतीन' देंमानु, मेको आन कली सदमे बाक्त। मिनु मेकोपुकीमी शुश शुक्शी पामे बाक्त। 27 मोपतीके गे मेको आन कली आन जोरी सत्रु आन गुइमी गेनी बाक्त। मेकोपुकीमी मेको आन कली शुश श्येत गेमे बाक्त। मिनु श्येत जामेनु 'वारच पाइक्की' दे इन कली पुन्मेनु, गे स्वर्ग रे आन पुंइशो नेंनी बाक्त। गे इन ठेयब शिशीमी मेको आन कली आन जोरी सत्रु रे प्रोंइचा कली मुर सोइक्तीनी बाक्त। मिनु मेकोपुकीमी मेको आन कली प्रोन्मे बाक्त। न्यायाधीस ३:९,१५; न्यायाधीस २:१४-२२ 28 एर ओंथ डा आन जोरी सत्रु रे प्रोंइपांइसीशा, नाइशशा बाक्मा नोले, लेंशा इन मदाक्शो पामे बाक्त। मिनु गे मेको आन कली आन जोरी सत्रु आन गुइमी गेनी बाक्त।

आन जोरी सत्रुपुकीमी मेको आन कली हुकुम पामे बाक्त। मिनु लेंशा मेकोपुकीमी इन कली 'वारच पाइक्की' दे ग्रीमानु, गे स्वर्ग रे मेको आन पुंइशो नेंशा, मेको आन कली इन ठेयब शिशीमी शुश खेयप प्रॉइनी बाक्त। 29 मिनु मेको आन कली इन अरेशो लोव्र गे लेत्चा कली, मेको आन कली टिचा शेंदीनी बाक्त। तन्न मेकोपुकी ठेयब लेशशा, इन शेंतीके काइ मटिथु, इन पतीक लोव्र मपामे बाक्त। मुरपुकीमी इन पतीक लोव्र पशो नम हना, ब्रॉइचा ताम वा। तन्न मेकोपुकीम इन लोव्र मनेंथु, मटिथु, इन गे आन ची हिरदमे बाक्त। लेवी १८:५ 30 गे शुश बर्स सम्म मेको आन कली फालनी बाक्त। इन लोव्र पाइबपुकीमी मेको आन कली इन सोक्त रे पा शेंपाइक्की बाक्त। तन्न मेकोपुकीमी नेंचा मबिस्समा बाक्त। मोपतीके गे मेको आन कली अर्को जात जात डा मुर आन गुइमी गेनी बाक्त। येरमीया ७:२५-२६; येरमीया ४४:४-६ 31 मो पाम्तेक्म हना यो, इन ठेयब शिशीमी मेको आन कली मसाइक्थु, आन श्येत रे प्रॉइनी बाक्त। मारदे हना गे शिशी पाइब नु शुश दाक्ब परमप्रभु बाक्नीनी।

32 मिनु आंइ परमप्रभु, गे नेल्ल क्येडा ठेयब सक्ति पाइशो नु मान पा हिंचा माल्शो परमप्रभु बाक्नीनी। इन पशो कबल इन गेना हना यो दाक्तीक खाप्ब बाक्नीनी। अस्सुर डा पिप आन पाला रे मुलाक्त सम्म आंइ कली गेशो श्येत, आंइ पिप आन कली, आंइ ठेयब मुर आन कली, इन कली चढेब आन कली, इन लोव्र पाइब आन कली, आंइ किकी पिपी आन कली नु इन मुर नेल्ल आन कली गेशो श्येत कली आइक्च ममिम्तीन। ब्यवस्था ७:९, १२; १राजा ८:२३; नेहेम्याह १:५ 33 आंइ कली दुम्तीके, गे ठीक पशो बाक्नीनी। मारदे हना गे आंइ कली रिम्शो पाइतीनी। गोपुकीमी चहिं इन कली थम मरिम्शो पाइतक। दानीएल ९:५, ७ 34 आंइ पिप, आंइ ठेयब मुरपुकी, इन कली चढेबपुकी नु आंइ किकी पिपीमी इन अरेशो लोव्र मपथु, इन शेंतीके नु इन गेशो होस पतीक लोव्र मनेंथु, हिक्सीन महिक्मे बाक्त। 35 मिनु आन आंम राज्यमी, इन रिम्शो पतीकेमी नु आन बाली नाली शुश ग्रेल्ब ठेयब रागीमी इन कली मान मपामे बाक्त। आन काइ मरिम्शो गेय मप्रोन्मे बाक्त। 36 मुलाक्ती गो वाइलीम वाइल दुम्शो बाक्नीकी। आंइ किकी पिपी आन कली मेको रागी डा फल फुल जचा नु मेकेर डा रिम्शो रिम्शो थोव्रक तचा कली गेशो बाक्तीनी। इन गेशो रागीमी गो वाइलीम वाइल दुम्शो बाक्नीकी। 37 मेको रागी डा मारेइ मारेइ रिम्शो थोव्रकी गे आंइ कली हुकुम पपाइक्ब पिप आन कली ताइब सेलतीनी। मेको आंइ मरिम्शो पतीके आ पर्वम बाक्ब। मेकोपुकीमी आंइ कली नु आंइ बी ब्यफ नु क्यारश भेडा आन कली आन दाक्स पा पाइनीमी। मोदेंशो पा गो शुश श्येत जशो बाक्नीकी” दे एज्जामी परमप्रभु कली लोव्र पाप्नु।

38 मिनु मेको आन पशो नेल्ल मिम्शा, गोपुकीमी परमप्रभु नु कबल का पाइतक। मिनु मेको कबल डा लोव्र नेल्ल ब्रेक्ताक्क। मेको छाप थोक्शो ब्रेक्सम आंइ ठेयब मुरपुकी, लेवीपुकी नु चढेब आन नें ब्रेक्शो बाक्तेक्म।

10

छाप थोक्शो ब्रेक्सम मुर आन ब्रेक्शो नें

1 मेको छाप थोक्शो ब्रेक्स आगाम सु सु आन नें ब्रेक्शो बाक्त देशा हना: हाकाल्याह आ तौ हुकुम पाइब नेहेम्याह नु सिदकीयाह आस नें ब्रेक्शो बाक्त।

2 मिनु चढेबपुकी: सेरायाह, अजारयाह, येरमीया, 3 पशहुर, अमारयाह, माल्कीयाह, 4 हत्तुश, शेबान्याह, माल्लुक 5 हारीम, मेरेमोथ, ओबदिया, 6 दानीएल, गिन्नेथोन, बारुक, 7 मेशुल्लाम, अबीयाह, मियामीन, 8 माजीयाह, बिल्गाइ नु शेमायाह आन नें ब्रेक्शो बाक्त।

9 मिनु लेवीपुकी अजन्याह आ तौ येशुआ, हेनादाद आ खिं डा बिन्नुइ, कदमीएल 10 नु मेको आन लोक्बपुकी शेबान्याह, होदीयाह, केलीता, पेलायाह, हानान, 11 मीका, रेहोब, हशाब्याह, 12 जाक्कुर, शेरब्याह, शेबान्याह, 13 होदीयाह, बानी नु बेनीनु आन नें ब्रेक्शो बाक्त।

14 ठेयब मुरपुकी पारोश, पहाथ-मोआब, एलाम, जत्तु, बानी, 15 बुन्नी, अज्गाद, बेबाइ, 16 अदोनीयाह, बिग्वाइ, आदीन, 17 आतेर, हिज्कीयाह, अज्जुर, 18 होदीयाह, हाशुम, बेजाइ, 19 हारीफ, अनाथोथ, नेबाइ, 20 माग्पीअश, मेशुल्लाम, हेजीर 21 मेशेजाबेल, सादोक, यादुअ, 22 पेलात्याह, हानान, आनायाह, 23 होशेआ हनान्याह, हाशुब 24 हल्लोहेश, पिल्हा, शोबेक, 25 रेहुम, हशाब्नाह, मासेयाह, 26 अहीयाह, हानान, आनान, 27 माल्लुक, हारीम नु बानाह आन नें ब्रेक्शो बाक्त।

इसाएली आन पशो कबल

28 मिनु लीशो मुरपुकी: चढेबपुकी, लेवीपुकी, लाप्चो खाल पाइबपुकी, कुम्सो पाइबपुकी, परमप्रभु यावे आ खिंमी गेय पाइबपुकी नु परमप्रभु आ अरेशो पचा कली अर्को रागी डा मुरपुकी रे तिल्लीशो वोंइश मुर, मीश मुर, आन तमी तौपुकी सु सु रुप्ने चापब बाक्मा, मेको नेल्ल बाक्तेक्म। 29 मेको आन लोक्ब नु आन ठेयब मुरपुकी नु गारशा, परमप्रभु यावे आ वाइल मोसामी गेशो परमप्रभु आ अरेशो लोत्र टिचा कली थुं का पाम्तेक्म। आंइ परमप्रभु यावे आ शेंशो, आ पतीक लोत्र नु आ फुल्लुम मुशा ब्रेक्शो लोत्र तुइशशा पचा कली कसम जाम्तेक्म। 30 मिनु गोपुकीमी आंइ तमी आन कली मेको रागी डा अर्को जात डा मुर आन कली मगेनीक। आंइ तौ आन कली यो मेको आन तमीपुकी मचाक्नीकी। प्रस्थान ३४:१६; ब्यवस्था ७:३; एज्रा ९:२ 31 मिनु मेको रागी डा मुरपुकीमी नाइक्तीक नाक्त मार मार लेयतीक थोत्रक नु अन्न लेयथ चाक्तेक्म हना, गोपुकीमी नाइक्तीक नाक्त नु परमप्रभु आ ठेयब नाक्तीम मेको आन के मारेइ मग्याप्नीकी। मिनु गोपुकी ६ बर्स आ नोले डा बर्सम मारेइ मखुम्नीकी। जेर गेशो बाक्तक हना यो, मेको बर्समी जेर नु आ चाइक्ब काइ मपोक्थु, प्रोंइनीकी। ब्यवस्था १५:१-११; नेहेम्याह ५:१०; नेहेम्याह १३:१५-१८; येरमीया १७:२१-२७ 32 मिनु गोपुकीमी बर्स बर्स कली शेकेल का के भाग सां डा भाग का परमप्रभु यावे आ खिं डा गेय कली गेनीकी, दे आंइ थुं फ्रेंताक्क। शेकेल का ११.५ ग्राम डा क्येट बाक्ब। २इतिहास २४:६; मत्ती १७:२४ 33 मार पचा कली गेनीकी देंशा हना, परमप्रभु आ डोंइती वोइशशो कोंइतीक शोब्ले कली अन्न चढेतीक नु चोशा चढेतीक कली, नाइक्तीक नाक्तीम चढेतीक, औसीम चढेतीक, अरु चाड डा चढेतीक, नेल्ल इं परमप्रभु आ खिं कली माल्लशो थोत्रकी, पाप क्याम्पाइक्चा कली चढेतीक, मोदेशो पा इस्त्राएली आन मरिम्शो पशो क्याम्चा कली नु इं परमप्रभु आ खिंमी पतीक गेय नेल्ल कली गेनीकी। 34 मिनु गो, चढेबपुकी, लेवीपुकी नु मुर नेल्लेमी इं परमप्रभु आ खिं कली कचेत सु सुम क्यक्चा, दे फेन्टे आप्तक। खिं खिं डा मुरपुकी बर्स बर्समी परमप्रभु यावे आ अरेशो लोत्रम ब्रेक्शो खोदेशो पा परमप्रभु यावे, इं परमप्रभु आ खिंम चढेचा कली शी चाक्चा माल्लीम। प्रस्थान २५:३० 35 मिनु बर्स बर्सम नेल्ल क्येडा डोंइती डा आंइ रूम सिशशो, मार मार रवा आन फल फुल परमप्रभु यावे आ खिंम चाक्नय। लेवी ६:५ 36 आंइ नेल्ल क्येडा डोंइती जरमेशो तौ नु बस्तु भाव आन डोंइती जरमेशो परमप्रभु आ अरेशो खोदेशो पा परमप्रभु आ खिंमी चाक्चा कली आंइ थुं फ्रेंताक्क। आंइ नेल्ल क्येडा डोंइती जरमेशो बी ब्यफ, क्यारश, भेडा आंइ परमप्रभु आ खिंमी गेय पाइब चढेब आन कली चाक्नीक, दे थुं फ्रेंताक्क। प्रस्थान १३:२ 37 मिनु आंइ निशो फस डा नेल्ल क्येडा डोंइती डा भाग, अन्न चढेतीके, मार मार रवा आन फल, अडगुर शांबु नु तेल चढेब आन कली गेचा, दे परमप्रभु आ खिं डा वोइक्तीक कोठाम चाक्नीकी। मोदेशो पा लेवी नेल्लेम रागी डा १० भाग डा भाग का ताइनीम। मेको लेवीपुकीमी आंइ गेय पतीक सहर जाक्शा, १० भाग डा भाग का पोक्चा माल्लीम। गन्ती १५:२०-२१; गन्ती १८:२१ 38 मोदेशो पा लेवीपुकी पोक्थ गाक्मानु, चढेब हारून आ चच युइ यो लेवीपुकी नु गाक्चा माल्लीम। मिनु लेवीपुकी मेको आन पोक्शो रे पा १० भाग डा भाग का परमप्रभु आ खिं डा वोइक्तीक कोठामी वोइक्चा माल्लीम। गन्ती १८:२६,२८ 39 मिनु इस्त्राएली नु लेवीपुकीमी मेको चाक्शो अन्न, अडगुर शांबु नु तेल मार मार वोइक्तीक कोठाम चाक्चा माल्लीम। मारदे हना मेको परमप्रभु आ खिं डा बोसपुकी वोइक्तीके बाक्त। मिनु मेकेर गेय पाइब चढेबपुकी, लाप्चोम खाल पाइबपुकी नु कुम्सो पाइबपुकी यो मेकेर बाक्नीम। मिनु गोपुकीमी “परमप्रभु आ खिं श्येतथ मवोइय्य” दे आंइ थुं फ्रेंताक्क।

11

यरूसलेम सहरम बाक्ब मुर

१इतिहास ९:२-१७

1 मिनु इस्त्राएली आन ठेयब मुरपुकी यरूसलेममी बाक्शो बाक्तेक्म। लीशो मुर आन दाते रे सु परमप्रभु यावे आ सहर यरूसलेममी बाक्चा ताइबा, दे १० जना मुर आन दाते रे का योत्रचा कली फेन्टे आप्तेक्म। अरु ९ जना मुर चहिं अरु बाक्तीकेमी बाक्तेक्म। 2 मुरपुकीमी यरूसलेममी ग्येरशा लाइब नेल्ल आन कली आसीक गेम्तेक्म।

3 गाउं गाउं डा ठेयब मुर यरूसलेम सहरम बाक्शो बाक्तेक्म। अरु मुरपुकी, चढेबपुकी, लेवीपुकी, परमप्रभु यावे आ खिंमी गेय पाइबपुकी नु सोलोमन आ खिं डा गेय पाइब आन चच युइ नेल्ल यहूदा डा सहर सहर, गाउं गाउंम आंम आंम बाक्तीक उइ बाक्चा माल्बाक्तेक्म।

यरूसलेमम बाक्ब यहूदी

4 यरूसलेममी यहूदा नु बेन्यामीन आस थर डा मुर का निक्शी बाक्शो बाक्तेक्म। यहूदा आ थर डा मुर सु सु बाक्तेक्म देशा हना, उज्जीयाह आ तौ अथायाह, मेको उज्जीयाह आ आफ जकरिया बाक्त। जकरिया आ आफ अमारयाह बाक्त। अमारयाह आ आफ शेफत्याह बाक्त। मिनु शेफत्याह आ आफ मा-हालालेल बाक्त। मिनु मेको पेरेस आ चच युइ बाक्तेक्म। 5 मिनु बारुक आ तौ मासेयाह बाक्त। बारुक आ आफ कोल-होजे बाक्त। कोल-होजे आ आफ हाजायाह बाक्त। हाजायाह आ आफ अदायाह बाक्त। अदायाह आ आफ योयारीब बाक्त। योयारीब आ आफ जकरिया बाक्त। मेको शिलो डा मुर आ खिं डा मुर बाक्तेक्म। 6 यरूसलेमम बाक्ब पेरेस आ चच युइ नेल्ल पा ४ सहे ६८ जना बोल्यो नु महिब वोंइश मुर बाक्तेक्म।

यरूसलेमम बाक्ब बेन्यामीनी

7 मिनु बेन्यामीन आ थर डा मुर सु सु बाक्तेक्म देशा हना, मेशुल्लाम आ तौ सल्लु बाक्त। मेशुल्लाम आ आफ योएद बाक्त। योएद आ आफ पेदायाह बाक्त। पेदायाह आ आफ कोलायाह बाक्त। कोलायाह आ आफ मासेयाह बाक्त। मासेयाह आ आफ इथीएल बाक्त। इथीएल आ आफ येशायाह बाक्त। 8 मिनु मेको सल्लु आ नोले गब्बाइ नु सल्लाइ बाक्ताक्से। मेको नेल्ल पा ९ सहे २८ जना बाक्तेक्म। 9 जिक्री आ तौ योएल मेको आन कली कोव्रब, ठेयब मुर बाक्त। हास्सेनुआ आ तौ यहूदा योएल नोले सहर डा ठेयब मुर दुम्शो बाक्त।

यरूसलेमम बाक्ब चढेबपुकी

10 मिनु चढेब सु सु बाक्तेक्म देशा हना, योयारीब आ तौ येदायाह, याकीन, 11 हिल्कीयाह आ तौ सेरायाह, हिल्कीयाह आ आफ मेशुल्लाम, मेशुल्लाम आ आफ सादोक, सादोक आ आफ मेरायोथ, मेरायोथ आ आफ अहीतुब चढेब बाक्तेक्म। मिनु अहीतुब परमप्रभु आ खिं डा ठेयब मुर बाक्त। २राजा २५:१८; एज्रा २:२ 12 मिनु मेको नु परमप्रभु आ खिंम गेय पाइब लोकबपुकी ८ सहे २२ जना बाक्तेक्म। मिनु येरोहाम आ तौ अदायाह, येरोहाम आ आफ पेलायाह, पेलायाह आ आफ अम्जी, अम्जी आ आफ जकरिया, जकरिया आ आफ पशहुर, पशहुर आ आफ माल्कीयाह बाक्त। 13 मिनु मेको आ लोकब आन खिं डा ठेयब मुरपुकी बाक्तेक्म। मेको नेल्ल पा २४२ जना बाक्तेक्म। मिनु अजारेल आ तौ अमाशै बाक्त। मेको असारेल आ आफ अहजाइ, अहजाइ, आ आफ मेशील्लेमोथ, मेशील्लेमोथ, आ आफ इम्मेर बाक्त। 14 मिनु मेको आन लोकबपुकी महिब ठेयब थुं पाइशो लडाइ पाइब वोंइश मुर बाक्तेक्म। मेको नेल्ल पा १२८ जना बाक्तेक्म। मेको आन ठेयब मुर हग्गेदोलीम आ तौ जब्दीएल बाक्त।

यरूसलेमम बाक्ब लेवीपुकी

15 लेवीपुकी सु सु बाक्तेक्म देशा हना, हश्शुब आ तौ शेमायाह, हाश्शुब आ आफ अज्जीकाम, अज्जीकाम आ आफ हशाब्याह, हशाब्याह आ आफ बुन्नी बाक्त। 16 मिनु लेवी आन ठेयब मुरपुकी शब्बेथाइ नु योजाबाद बाक्ताक्स। मेको निक्शी परमप्रभु आ खिं डा लाडगा माल्शो मारेइ मारेइ गेय पचा कली कोव्रब वोंइशो बाक्ताक्स। 17 मिनु मीका आ तौ मत्तन्याह बाक्त। मीका आ आफ जब्दी बाक्त। जब्दी आ आफ आसाफ बाक्त। आसाफमी परमप्रभु कली पुंइची ना “गे रिम्शो पाइब ननी” दे ठेयब सेल्शा, कुम्सो पपाइक्ब बाक्त। मेको आसाफ आ नोले डा शेंब आ लोकब बाक्बुकीयाह बाक्त। मिनु शम्मुआ आ तौ अब्दा, शम्मुआ आ आफ गालाल, गालाल आ आफ येदुथून बाक्त। 18 मेको सहरम बाक्ब लेवी नेल्ल पा २८४ जना बाक्तेक्म।

लाप्चो खाल पाइबपुकी

19 लाप्चो खाल पाइब सु सु बाक्तेक्म देशा हना, अक्कुब ताल्मोन नु आन लोकब नेल्ल पा सहे का ७२ जना बाक्तेक्म। 20 मिनु लीशो इस्राएली, चढेबपुकी नु लेवीपुकी यहूदा डा सहरपुकीमी आंम आंम आन बाक्तीकेमी बाक्शो बाक्तेक्म। 21 मिनु परमप्रभु यावे आ खिं डा गेय पाइबपुकी यरूसलेम सहर ओफेल माइक्तीकेमी बाक्शो बाक्तेक्म। सीहा नु गिश्पा परमप्रभु यावे आ खिं डा गेय पाइब आन कली कोव्रब बाक्ताक्से।

22 यरूसलेममी बाक्ब लेवी आन कली कोव्रब सु सु बाक्तेक्म देशा हना, बानी आ तौ उज्जी बाक्त। उज्जी आ आफ हशाब्याह बाक्त। हशाब्याह आ आफ मत्तन्याह बाक्त। मत्तन्याह आ आफ मीका बाक्त। मेको नेल्ले परमप्रभु आ खिंम कुम्सो पाइब शेंब आसाफ आ चच युइ बाक्तेक्म। 23 मिनु पिपमी मेको कुम्सो पाइब आन पर्बम आन नाक्त किंत किंत डा पतीके आंमान ब्रेक्शा, अरेवा बाक्त। मेको आन कली मार मार गेचा, दे यो ब्रेक्शो बाक्त। 24 मिनु जेराह आ चच युइ रे मेशेजाबेल आ तौ पेथायाह बाक्त। मेको मेशेजाबेल आ आफ बाक्त। मिनु जेराह आ आफ यहूदा बाक्त। मेको पेथायाह चहिं मुरपुकीम मार मार माल्नीमी, दे कोव्रब, पिप आ खिंम गेय पाइब बाक्त।

यरूसलेम एर ओंथ डा गाउं

25 मिनु यहूदा आ थर डा मुरपुकी का निक्शी आंम आंम आन खिंम नु रूम बाक्शो बाक्तेकम। मेकोपुकी किरयथ-अरबा नु मेको मेर डा गाउंपुकी, दीबोन नु मेको मेर डा गाउंपुकीम, येकाब्सेल सहर नु मेको मेर डा गाउंपुकीम, यहोसु २०:७ 26 येशुआ, मोलादा नु बेथ-पेलेत सहरम, 27 हासार-शुआल, बेयर-शेबा सहर नु मेको मेर डा गाउंपुकीम, 28 सिकलाग, मेकोनाह सहर नु मेको मेर डा गाउंपुकीम, यहोसु १५:३१ 29 एन-रिम्मोन, सोराह, यरमुथ, 30 जानोह, अदुल्लाम सहर नु मेको मेर डा गाउंपुकीम, लाकीश नु मेको मेर डा रूपुकीम नु आजैका नु मेको मेर डा गाउंपुकीमी बाक्तेकम। मोपा बेयर-शेबा रे हिन्नोम बेंसी सम्म बाक्शो बाक्तेकम। 31 बेन्यामीन आ चच युइ गेबा सहर रे मिकमाश, अय्या, बेथेल नु मेको मेर डा गाउंपुकीम, यहोसु १८:२२ 32 अनाथोथ, नोब, अनान्याह, 33 हासोर, रामाह, गित्ताइम, 34 हादीद, सेबोयीम, नेबल्लात 35 लोद नु ओनो सहरमी गेय पाइब आन बाक्तीक सम्म बाक्तेकम। 36 यहूदामी बाक्ब का निक्शी लेवीपुकी बेन्यामीन थर नु बाक्थ लशो बाक्तेकम।

12

चढ़ेब नु लेवीपुकी

1 शाल्तीएल आ तौ जेरूब-बाबेल नु येशुआ नु काथा लेशशा जाक्ब चढ़ेब नु लेवीपुकी सु सु बाक्तेकम देशा हना, सेरायाह, येरमीया, एज्रा एज्रा २:२ 2 अमारयाह, माल्लुक, हत्तुश, 3 शेकन्याह, रेहुम, मेरेमोथ, 4 इददो, गिन्नेथोइ, अबीयाह, लूका १:५ 5 मियामीन, मा-अदीयाह, बिल्गाह, 6 शेमायाह, योयारीब येदायाह, 7 सल्लु, अमोक, हिल्लीयाह नु येदायाह बाक्तेकम। मेकोपुकी येशुआ आ पाला डा चढ़ेब नु आन लोकब आन ठेयब मुर बाक्तेकम।

8 मिनु लेवीपुकी सु सु बाक्तेकम देशा हना, येशुआ, बिन्नुइ, कदमीएल, शेरेब्याह, यहूदा नु मत्तन्याह बाक्तेकम। मेको नु आन लोकबपुकी परमप्रभु यावे कली ठेयब सेल्टीक कुम्सो पपाइक्ब बाक्तेकम। 9 मेको आन लोकब बाकबुकीयाह नु उन्नो कुम्सो पची ना आन नेक्था बाक्बाक्ताक्स।

10 येशुआ योयाकीम आ आफ बाक्त। योयाकीम एल्याशीब आ आफ बाक्त। एल्याशीब यो-यादा आ आफ बाक्त। नेहेम्याह ३:१ 11 यो-यादा योनाथन आ आफ बाक्त। मिनु योनाथन यादुअ आ आफ बाक्त।

चढ़ेब आन ठेयब मुरपुकी

12 योयाकीम आ पालामी चढ़ेब आन खिं खिं डा ठेयब मुर सु सु बाक्तेकम देशा हना, सेरायाह आ खिं डा ठेयब मुर मेरायाह, येरमीया आ खिं डा ठेयब मुर हनान्याह, 13 एज्रा आ खिं डा ठेयब मुर मेशुल्लाम, अमारयाह आ खिं डा ठेयब मुर येहो-हानान, 14 माल्लुक आ खिं डा ठेयब मुर योनाथन, शेबान्याह आ खिं डा ठेयब मुर योसेफ, 15 हारीम आ खिं डा ठेयब मुर अदना, मेरायोथ आ खिं डा ठेयब मुर हेल्काइ, 16 इददो आ खिं डा ठेयब मुर जकरिया, गिन्नेथोन आ खिं डा ठेयब मुर मेशुल्लाम, 17 अबीयाह आ खिं डा ठेयब मुर जिक्री, मीन्यामीन आ खिं डा ठेयब मुर का, मोअदयाह आ खिं डा ठेयब मुर पिल्लाइ, 18 बिल्गाह आ खिं डा ठेयब मुर शम्मुआ, शेमायाह आ खिं डा ठेयब मुर येहो-नाथान, 19 योयारीब आ खिं डा ठेयब मुर मतेनाइ, येदायाह आ खिं डा ठेयब मुर उज्जी, 20 सल्लाइ आ खिं डा ठेयब मुर कल्लाइ, अमोक आ खिं डा ठेयब मुर एबेर, 21 हिल्लीयाह आ खिं डा ठेयब मुर हशाब्याह नु येदायाह आ खिं डा ठेयब मुर नेथनेल बाक्तेकम।

22 पारसी डा पिप दारा आ पालामी चढ़ेब नु लेवी आन खिं डा ठेयब मुर आन नें ब्रेक्शा वोइश्शो बाक्त। चढ़ेब आन नेल्ल क्येडा ठेयब चढ़ेब एल्याशीब, यो-यादा, योहानान नु यादुअ आन पाला सम्म आन खिं डा ठेयब मुर आन नें ब्रेक्शो बाक्तेकम।

23 मिनु लेवी आन खिं डा ठेयब मुर आन नें एल्याशीब आ तौ योहानान आ पाला सम्म इतिहास डा किताबमी ब्रेक्शो बाक्तेकम।

परमप्रभु कली ठेयब सेल्शो

24 मिनु लेवी आन ठेयब मुरपुकी हशाब्याह, शेरेब्याह नु कदमीएल आ तौ येशुआम परमप्रभु यावे कली ठेयब सेल्लेकम। आन लोकबपुकी परमप्रभु आ मुर दाऊदम देशो खोदेशो पा मेको आन आइक्की गे राष्शा, पालो पा परमप्रभु यावे कली कुम्सो पा ठेयब सेल्लेकम। मोपा कुम्सो पाइब आन हुल का एर गे नु हुल का ओंथ गे बाक्तेकम। १ इतिहास २५:-; २ इतिहास २९:२५ 25 मत्तन्याह, बाकबुकीयाह, ओबदिया, मेशुल्लाम, ताल्मोन नु अक्कुब चहिं ठेयब लाप्चो

आ नेक्था डा मार मार वोइक्तीक कोठा डा लाप्चो खाल पाइब बाक्तेक्म। २इतिहास ८:१४ 26 मेको नेल्लेमी योसादाक आ चच, येशुआ आ तौ योयाकीम नु हुकुम पाइब नेहेम्याह नु परमप्रभु यावे आ लोव्र जोक्ब तुइक्ब चढेब एजा आ पालामी मोदेशो गेय पाइब बाक्तेक्म। १इतिहास ५:४०-४१

गारो सेल्ने थुम्शो

27 मिनु यरूसलेम डा गारो प्रोवने थुम्तीक चाड कली लेवी आन कली आन आन बाक्तीक तेइ तेइ रे माल्शा, यरूसलेममी चाक्तेक्म। मारदे चाक्तेक्म देशा हना, गारो थुम्तीके परमप्रभु यावे आ डोंइती ग्येरसीशा “गे रिम्शो पाइब ननी” दे ठेयब सेल्टीक कुम्सो पचा नु खैजडी, तार पाइश्शो ठेयब ताप्तीके नु बीना ताप्चा कली चाक्तेक्म। 28 मिनु कुम्सो पाइबपुकी यरूसलेम नु आ एर ओंथ नु नेतोफाह आ मुर आन बाक्तीक रे यरूसलेममी खुम्साक्म। 29 बेथ-गिल्गाल नु गेबा सहर नु अज्मावेथ रे यो जाक्तेक्म। मारदे हना कुम्सो पाइबपुकीमी यरूसलेम आ एर ओंथम आंम आंम कली बाक्तीके सेल्शा बाक्शो बाक्तेक्म। 30 चढेब नु लेवीपुकीमी आंम आंम कली चोव्रखो सेल्सीशा, नोले मुर आन कली नु ठेयब लाप्चोपुकी नु गारो आन कली चोव्रखो सेल्लेक्म।

गारो थुम्शा चाड मानेशो

31 मिनु गो यहूदा रागी डा ठेयब मुर आन कली गारो तार डोइक्पाइक्तामी। परमप्रभु यावे कली ठेयब सेल्ब कुम्सो पाइब आन कली ठेयब हुल निक्शी पा वोइक्ता। हुल का गारो तारी ग्युरा गे पा, मोव्रल लाप्चो गे लाम्तेक्म। 32 मिनु मेको कुम्सो पाइब आन नोले होशयाह नु यहूदा डा ठेयब मुर आन हुल का लाम्तेक्म। 33 मिनु मेको आन नोले अजारयाह, एजा, मेशुल्लाम, 34 यहूदा, बेन्यामीन, शेमायाह नु येरमीया लाम्तेक्म। 35 मिनु चढेब आन तौ का निक्शी तुराही ताप्बपुकी यो मेको आन नोले खोइक्तेक्म। योनाथन आ तौ जकरिया, योनाथन आ आफ शेमायाह, शेमायाह आ आफ मत्तन्याह, मत्तन्याह आ आफ मीकाया नु जाक्कुर आ आफ आसाफ बाक्त। 36 मिनु मेको आ लोक्बपुकी शेमायाह, अजारेल, मिलालाइ, गिलालाइ, माइ, नेथनेल, यहूदा नु हानानी बाक्तेक्म। मेकोपुकीमी परमप्रभु आ मुर दाऊद आ ताप्तीकपुकी ताप्शा गाक्तेक्म। मिनु परमप्रभु यावे आ लोव्र जोक्ब तुइक्ब एजा मेको आन डोंइती गाक्ब बाक्त। 37 मिनु मेकोपुकी ब्वाक्कु बुक्तीक लाप्चो गे लाम्तेक्म। मिनु क्रेसी डोइश्शा, ग्येत्थ लशा, दाऊद आ सहर डा गारो डोइश्शा, दाऊद आ खिं लाक्शा, पूर्व गे बाक्शो ब्वाक्कु लाप्चो गे लाम्तेक्म।

38 मिनु परमप्रभु यावे कली “गे रिम्शो पाइब बाक्नीनी” दे कुम्सो पाइब आन अर्को हुल चहिं गारो तारी पेरा गे लाम्तेक्म। मिनु गो नु ठेयब मुर आन अर्को हुल मेको आन नोले खोइश्शा, मी मुइक्तीक माइश्शो लाइश्शो खिं लाक्शा, ब्रेम्शो गारो गे लाइतक। 39 मिनु नोले एफ्राइम लाप्चो, माइत गारो डा ठेयब लाप्चो, डांइ लाप्चो, हानानेल माइश्शो लाइश्शो खिं, मेआ माइश्शो लाइश्शो खिं लाक्शा, भेडा लाप्चो गे लाइतक। मिनु मेकोपुकी जेल्खान लाप्चोम जाक्दीशा नांइसाक्म।

40 मेकेर जाक्शा, परमप्रभु कली “गे रिम्शो पाइब बाक्नीनी” दे कुम्सो पाइब आन हुल निक्शी परमप्रभु आ खिं आ डोंइती राप्तेक्म। मिनु गो नु ठेयब मुर आन हुल का यो मेकेर बाक्तक। 41 मिनु चढेब एल्याकीम, मासेयाह, मीन्यामीन, मीकाया, एली-ओ-एनाइ, जकरिया नु हनान्याहमी तुराही ताप्तेक्म। 42 मिनु मासेयाह, शेमायाह, एलाजर, उज्जी, येहो-हानान, माल्कीयाह, एलाम नु एजेर यो मेको नु बाक्तेक्म। मिनु कुम्सो पाइबपुकीमी येजरायाह कुम्सो पाइब आन कली शेंब नु कुम्सो पाम्तेक्म। 43 मेको नाक्त ठेयब चढेतीक चढेशा, शुश ग्येरशो बाक्तेक्म। मारदे हना परमप्रभुमी मेको आन थुं थाम्पा ग्येरपाइक्तु। मीश मुरपुकी नु आलपुकी यो शुश ग्येरसाक्म। मिनु यरूसलेम डा मुर आन ग्येरसीशो सेंदा डोन डोन सम्म नेंसाक्व।

खाल पाइब आन गेय

44 मिनु मेको नाक्त मार मार वोइक्तीक कोठा खाल पाइब मुर आन कली वोइक्तेक्म। मेकोपुकी मुर आन गेशो चढेशो, डोंइती सिश्शो मार मार नु १० भाग डा भाग का चाक्शो ताक्शा साम्चा कली वोइश्शो बाक्तेक्म। मेकोपुकीमी सहर मेर डा रू रे चढेब नु लेवी आन भाग खुप्शा वोइक्तेक्म। मारदे हना यहूदा डा मुरपुकीम चढेब नु लेवी आन पशो तशा, दाक्शा, नेल्ल शुश ग्येरसीशो बाक्तेक्म। 45 चढेब नु लेवीपुकीमी परमप्रभु आ देशो खोदेशो पा चोव्रखेतीक गेय पाम्तेक्म। मिनु कुम्सो पाइब नु लाप्चो खाल पाइबपुकी यो दाऊद नु आ तौ सोलोमनमी देशो खोदेशो पा चोव्रखेतीके गेय पाइब बाक्तेक्म। 46 मारदे हना दाऊद नु आसाफ आस पालामी कुम्सो पाइब आन कली शेंब का बाक्शो बाक्त। मेना यो परमप्रभु कली ठेयब सेल्टीक नु “गे रिम्शो पाइब बाक्नीनी” दे कुम्सो पाइब बाक्शो बाक्तेक्म। १इतिहास

२५:- 47 मिनु इस्राएल डा मुर नेल्लेमी जेरूब-बाबेल नु नेहेम्याह आस पालामी कुम्सो पाइब नु लापचो खाल पाइब आन कली नाक्त किंत किंत डा माल्लो गेम्तेकम। लेवी आन भाग वोइक्तेकम। मिनु लेवीपुकीमी आन ताक्शो रे हारून आ चच युइ आन भाग वोइक्तेकम। गन्ती १८:२६; नेहेम्याह १०:३९

13

अर्को रागी डा मुर तिल्लो

1 मेको नाक्ती मुर आन डोंइती मोसा आ ब्रेक्शो किताब पढेशो बाक्त। मिनु मेकेर मार ब्रेक्शो बाक्त देशा हना “अम्मोन नु मोआब डा मुरपुकी रे सुइ परमप्रभु आ मुर आन गुम्तीकेमी गेनायो जाक्चा मताइनीम। ब्यवस्था २३:४-६ 2 मारदे हना मेकोपुकी इस्राएली आन कली शोब्ले नु ब्वाक्कु गेचा कली गुम्थ मजाक्शो बाक्तेकम। तन्न इस्राएली आन कली सराप पाइक्चा कली बालाम कली क्येट गेशा, ब्रेक्शो बाक्तेकम। मो पाम्तेकम हना यो, आंइ परमप्रभुमी मेको सराप रे आसीक सेल्लो बाक्त” दे ब्रेक्शो बाक्त। गन्ती २२:५-६ 3 मिनु मेको अरेशो लोव्र पढेशो नेशा, अर्को रागी डा मुर नेल्ल आन कली तिल्लेकम।

चढेब एल्याशीब कली हुइशो

4 मिनु मेको क्येडा डोंइती चढेब एल्याशीब आंइ परमप्रभु आ खिं डा ठेयब कोव्रब बाक्त। मेको तोबीयाह एल्याशीब आ नेक्था डा मुर बाक्त। नेहेम्याह २:१९ 5 मिनु चढेब एल्याशीबमी आंम खिं डा मुर, तोबीयाह कली परमप्रभु यावे आ खिं डा वोइक्तीक ठेयब कोठा का गेशो बाक्त। डोंइती मेको कोठामी मार मार शेंशो खोदेशो पा चढेशो १० भाग डा अन्न, धूप, परमप्रभु यावे आ खिं डा बोसपुकी, मुर आन गेशो १० भाग डा भाग का अन्न, अडगुर शांबु नु तेल वोइशो बाक्त। मेको परमप्रभुमी शेंशो खोदेशो पा लेवी, कुम्सो पाइब, लापचो खाल पाइब नु चढेब आन तचा डा भाग वोइशो बाक्त।

6 मेको नेल्ल दुम्ची ना गो यरूसलेममी मबाक्शो बाक्ती। मारदे हना गो बेबीलोन डा पिप आरता-सास्त ३२ बर्स जाक्दीम्मेनु, पिप आ बाक्तीकेमी लेत्ती। मिनु इक्का नोले “यरूसलेम लेशा, लचा गेयीनी” दे पिप कली पुंडता। 7 मिनु गो यरूसलेम जाक्डानु, एल्याशीबमी तोबीयाह कली परमप्रभु आ खिं डा कोठा गेशा, मरिम्शो पशो तुइक्ताक्ड। 8 मेको तुइशशा, शुश गाइक्ताक्ड। मिनु गो तोबीयाह आ मार मार नेल्ल मेको कोठा रे गुंडशा ताइक्ताक्ड। 9 मिनु “मेको कोठा नेल्ल कली रिम्शो सेल्चा माल्नीम” दे अरेता। मिनु गो परमप्रभु आ खिं डा बोसपुकी, चढेशो अन्न नु ब्रोव्रशो रिना पाइब थोव्रक लेंशा वोइक्तामी।

10 मिनु लेवीपुकीमी आन तचा माल्लो भाग मतशो बाक्तेकम, दे आं कली तुइक्पाइक्तेकम। मोपा मेको लेवीपुकी नु ठेयब सेल्लिक कुम्सो पाइब आन गेय प्रोंइशा, आंम आंम रूमी लशा, गेय पाइबाक्तेकम। नेहेम्याह १२:४७ 11 मोपतीके गो ठेयब मुर आन कली “परमप्रभु यावे आ खिं मारदे प्रोंइनी?” दे हुइक्ताक्डमी। मिनु गो लेवी नु कुम्सो पाइब आन कली ब्रेक्शा, आन गेय पपाइक्तामी। 12 मिनु यहूदा रागीम बाक्ब नेल्लेमी १० भाग डा भाग का अन्न, नक अडगुर शांबु नु तेल परमप्रभु यावे आ खिं डा मार मार वोइक्तीक कोठामी चाक्तेकम। गन्ती १८:२१ 13 मिनु गो चढेब शेलेम्याह, ब्रेक्ब सादोक नु लेवी आ थर डा पेदायाह मेको सांफा कली मार मार वोइक्तीक कोठा कोव्रब मुर सेल्लामी। मिनु मत्तन्याह, आ चच नु जाक्कुर आ तौ हानान कली मेको आन कली वारच पाइब सेल्लता। मेकोपुकी थमा सुइक्चा पुंडसीशो मुर बाक्तेकम। मिनु मेको आन लोक्ब आन तचा डा थोव्रक गेचा माल्लेकम। 14 गो परमप्रभु यावे कली “आं परमप्रभु, इन खिं कोव्रशा नु मेकेर डा पशो रिम्शो पतीक मप्रेंदीन। आं कली मिम्तीन” देंती। नेहेम्याह ५:१९

नाइक्तीक नाक्त

15 मेना गो का निक्शी यहूदाम बाक्बपुकीमी नाइक्तीक नाक्ती कोल ख्राक्शो, चेरब खुप्शो गधा आन कली मार मार कुरपा नाइक्तीक नाक्त यरूसलेममी चाक्शो तातामी। मेकोपुकीमी नाइक्तीक नाक्त अडगुर शांबु, अडगुर नु फोव्रशी यो यरूसलेमम लेयचा कली चाक्तेकम। मिनु गो मेको आन कली “गे नाइक्तीक नाक्ती मेको मलेयडीन” दे हुइक्ताक्डमी। नेहेम्याह १०:३२ 16 यरूसलेममी बाक्ब टायर डा मुरपुकीमी यो डांइ नु लेयतीक मार मार थोव्रक नाइक्तीक नाक्त चाक्शा, यरूसलेममी बाक्ब यहूदी आन कली लेयतेकम। 17 मिनु यहूदा डा ठेयब मुर आन कली हुइशशा “नाइक्तीक नाक्त गे मार मरिम्शो गेय पनी? गे नाइक्तीक नाक्त अरु नाक्त खोदेशो सेल्लिनी। गे मतुइक्तीनी? 18 मार, इन किकी पिपीमी यो मोदेशोन मपामे डा? मो दुम्तीके, इं परमप्रभुमी एको सहर नु इं कली एको श्येत गेशो

ममाइ डा? मिनु मुलु गे नाइक्तीक नाक्त, गेय पतीक नाक्त खोदेशो सेल्शा, परमप्रभु आ गाइक्तीक तेम्नीनी?” दे हुइक्ताक्डमी। इजीकीएल २०:१२-१३

19 मिनु “यरूसलेम डा गारो डा ठेयब लाप्चोपुकी नाइक्तीक नाक्त नां रिक्चा क्येडा डोंइती चोक्चा माल्नीम। मिनु नाइक्तीक नाक्त मनुम्म सम्म रोक्चा मदुम्ब” दे माइक्तामी। मिनु नाइक्तीक नाक्ती मार मार थोव्रक यरूसलेममी मचाक्गमेक्ल, दे आंम आंम गेय पाइब का निक्शी आन कली लाप्चोपुकी खाल पचा कली चोइक्तामी। 20 मिनु नाक्दो मेको मार मार ग्याप्ब लेयबपुकीमी यरूसलेम मेर नां सोइताक्म। का निक्शी खेयप मोदेशो पाम्तेक्म। 21 मिनु गो मेको आन कली “मारदे नाइक्तीक नाक्त गारो आ डोंइती उइ नां सोइदीनी? गे लेंशा मो पाइतीनी हना, इन कली मो मप्रोंइनन्नी” दे हुइक्ताक्डमी। मेको नोले सुइ मुर नाइक्तीक नाक्ती मेकेर मजाक्म। 22 मिनु गो लेवी आन कली ब्रेशशा “आंम कली ठीक सेल्सीने। नाइक्तीक नाक्त परमप्रभु यावे के बाक्ब, दे मानेचा कली ठेयब लाप्चोपुकी खाल पथ बाक्कीन” दे माइक्तामी। मिनु गो “आं परमप्रभु, आं ओदेशो पशो यो मिम्तीन। मिनु इन ठेयब नु गेना हना यो दाक्तीके कोंइदीनी” देंती।

अर्को रागी डा मीश चाक्शो

23 मिनु मेना यो गो अशदोदी, अम्मोनी नु मोआबी मीश आन कली चाक्ब यहूदी आन कली गुम्तामी। 24 मेको आन आलपुकीमी का निक्शी अशदोदी लोव्र पाइबाक्तेक्म। यहूदी आन लोव्र मजोक्थु, अर्को रागी डा मुर आन लोव्र पाइबाक्तेक्म। 25 मिनु गो मेकोपुकी नु जिशा, सराप पाइशशा, का निक्शी आन कली तुप्शा, आन चां रोक्ताक्डमी। मिनु मेको आन कली परमप्रभु आ नेंमी लोव्र पाइक्तामी। “गे इन तमीपुकी मेको आन तौ कली गेतीनी नु आन तमी इन तौ आन कली चाक्तीनी हना, आंइ कली खतम दुम्पाइक्नीनी” देंती। ब्यवस्था ७:३ 26 मिनु “इस्त्राएल डा पिप सोलोमनमी मोदेशो मीश चाक्शा पाप पवा, ममाइ? शुश रागी आन दातेमी मेको खोदेशो पिप सुइ मबाक्म। मिनु परमप्रभुमी मेको कली दाक्शा, इस्त्राएली नेल्ल आन पिप सेल्शो बाक्त। मोदेशो बाक्त हना यो, अर्को रागी डा मीश मुरपुकीमी मेको कली पाप पपाइशशा बाक्तेक्म। १राजा ११:३-८ 27 मिनु मार, गोपुकीमी इन लोव्र नेंशा, इन खोदेशो पा इं परमप्रभु कली शुश मरिम्शो पा, अर्को रागी डा मीश चाक्नीनी?” दे हुइक्ताक्डमी।

28 मिनु नेल्ल क्येडा ठेयब चढेब एल्याशीब आ चच, येहो-यादा आ तौमी होरोनी सान्बल्लत आ तमी का चाक्शो बाक्त। मोपतीके गो मेको कली आं डोंइती रे ग्रुइशा खेरता। नेहेम्याह २:१०,१९; नेहेम्याह १२:१० 29 “आं परमप्रभु, मेकोपुकीमी इन कली चढेतीक गेय नेल्ल मरिम्शो सेल्तेक्म। मोदेशो पा मेकोपुकीमी चढेब नु लेवी आन पशो कबल प्रोंइतेक्म। मेको मिम्तीन” देंती। 30 मिनु गो मेको आन कली अर्को रागी डा मारेइ मारेइ रे ठीक सेल्तामी। मिनु गो चढेब नु लेवी आन पचा माल्शो गेय लेंशा पपाइक्तामी। गन्ती २५:१२-१३; मलाकी २:८ 31 मिनु परमप्रभु आ खिं कली शी नु नेल्ल क्येडा डोंइती सिशशो फल चाक्चा आ पबर्म लोव्रसी गारपाइक्ता। मिनु गो “आं परमप्रभु, आं पशो मिम्शा, आं कली रिम्शो पाइय्यीनी” देंती।

एस्तर

ब्रेक्ब मुर: ब्रेक्ब मुर सु बाक्मे, मेको मतुंडसीब देनीम। तन्न मोरदेकैमी एस्तर आ पर्वम नेल्ल ब्रेक्शो बाक्ब, देनीम। एस्तर ९:२० का निक्शी मुरुम “एज्राम ब्रेक्शो बाक्ब” देनीम।

गेना डा लोव्र: इस्राएलीपुकी ग्याइशशा बेबीलोन लाइक्चा पुंडसीशो नोले जेरूब-बाबेल नु इस्राएली यरूसलेम लेशशो बाक्तेक्म। मेको आन दातेमी एज्रा यो बाक्त। एको ५३६-४५८ बि. सी. डा लोव्र बाक्ब। मेना एज्रा नु नेहेम्याह यरूसलेम सहरमी गेय पशो बाक्ताक्स। हागै नु जकरिया यो बाक्सा बाक्त। मेना एस्तर आ किताब ब्रेक्शो बाक्त।

मारदे ब्रेक्शो: एको किताब परमप्रभुमी आ मुर आन कली दाक्शा, श्येत रे प्रोंइशो आ पर्वम कोंइशा ब्रेक्शो बाक्ब। मेना रे यहूदीपुकीमी पुरीम चाड मानेनीम। मेको पुरीम चाड एस्तरमी यहूदी आन कली श्येत रे प्रोंइशो आ पर्वम मिम्तीक चाड का बाक्ब।

पिप अहासूरस आ ठेयब दुम्तीके

1 एको लोव्र नेल्ल अहासूरस माइशो पिप आ पालाम दुम्शो लोव्र बाक्ब। अहासूरसमी भारत रे एथीयोपीया माइशो कूश रागी सम्म पा १२७ ओटा रागी आन कली सासन पाइब बाक्त। 2 मेना मेको पिप अहासूरसमी आ राज्य डा सुसा दरवारमी आ ठेयब नित्तीकेमी निशशा सासन पाप्तु। 3 मिनु मेको पिप दुम्शो ३ बर्स जाक्दीम्मेनु, आ हुकुम पाइब मुर नु सरकार डा गेय पाइब नेल्ल आन कली भोज का गेप्तु। मेको भोजमी मादी नु पारसी आन ठेयब मुर नु मेको रागी डा हुकुम पाइब नेल्ल जाक्शो बाक्तेक्म। 4 मिनु मेको पिपमी १८० नाक्त सम्म आ राज्य डा शुश शोंप, आ दारस नु आ ठेयब दुम्तीके मेको आन कली कोंइताक्मी। 5 मेको कोंइतीक नाक्त नुम्मेनु, मेको पिपमी आ दरवार डा ठेयब नु आइक्च मुर नेल्ल आन कली ठेयब भोज गेप्तु। मिनु मेको भोज सुसा दरवार डा लाडगाम ७ नाक्त सम्म दुम्त। 6 मिनु पिप आ दरवार नेल्ल दारपाइक्चा कली बुश नु नीलो वा क्याइशो बाक्तेक्म। मेको वापुकी नीलो झुम्का पाइशो दारशो मलमल के बाक्तेक्म। मिनु मेको वा आन कली बुश नु नीलो डोरी पाइशो, चांदी के ग्याइक्तीकेमी शुश क्येट लाइब बुश फुल्लु के थामम क्युक्शो बाक्तेक्म। मेकेर सुन नु चांदी के सेल्शो नित्तीके बाक्तेक्मे। मेको बुटा आप्शो शुश क्येट लाइब बुश, गिगी नु क्येर फुल्लुम साप्शो खप तारी वोइशो बाक्तेक्म। 7 मिनु मेको मुर आन कली सुन के कचौरामी अडगुर शांबु तूचा गेशो बाक्तेक्म। मेको कचौरा का का पा अर्को अर्को खाल डा बुटा आप्शो बाक्तेक्म। मिनु पिपमी मेको आन कली शुश अडगुर शांबु तूचा गेप्तु। 8 मेको नेल्लेमी आंम आंम दाक्शो पा तूचा ताम्तेक्म। मारदे हना पिपम “नेल्ल आन कली आंम दाक्शो तूचा गेन” दे आ शांबु खेप्ब आन कली माइशो बाक्त।

पिपीम वास्तीमी पिप कली मटिशो

9 मिनु वास्ती पिपीममी यो दरवार डा मीश मुर आन कली पिप अहासूरस आ दरवारमीन ठेयब भोज का गेप्तु। 10 मेको भोज दुम्शो ७ नाक्तीमी पिप अहासूरस अडगुर शांबुम रांइशा, पिपम आ दरवार डा ७ जना शुश अधिकार पाइशो गेय पाइब मेहूमान, बिस्था, हारबोना, बिगथान, आबागथा, जेथार नु कारकस आन कली 11 “पिपीम वास्ती कली आ सिरपेच गुम्सीशा, मुर नेल्ल नु हुकुम पाइब आन डोंइती आ दारस कोंइचा कली चाक्कीन” दे अरेशा सोइक्ताक्व। मारदे हना मेको पिपीम शुश दारशो बाक्त। 12 तन्न पिपीममी पिप आ सोइशो मुर आन देंशो मबिस्से। मोपा वास्तीम मबिश्शो तशा, मेको पिप हिंचा डा पा गाइक्ताक्व।

पिपमी वास्ती कली सजाइ गेशो

13 मिनु पिपमी “मुल मार पचा” दे जोक्ब तुइक्ब नु लोव्र पाप्तु। मेको जोक्ब तुइक्बमी डोंइती रे पिप कली अर्ती गेबाक्मा बाक्त। मिनु ऐन कानुन जोक्ब तुइक्ब नेल्लेमी “मुल मार पचा” दे सल्ला पाम्तेक्म। 14 मेको पिप कली सल्ला गेब सु बाक्मा बाक्त, देंशा हना, पारसी नु मादी डा ७ जना हुकुम पाइब कारशेना, शेतार, अदमाथा, टारशीश, मेरेस, मारसेना नु मेमुकान बाक्मा बाक्त। मेकोपुकी पिप आ डोंइती बाक्शा, नेल्ल क्येडा ठेयब अधिकार पा गेय पाइब बाक्तेक्म। 15 मिनु पिप अहासूरसमी मेको आन कली “आं गेय पाइब रे पा आं सोइशो लोव्र पिपीम वास्तीमी मटीव। मोपतीके मेको कली ऐन कानुन कोव्रशा मार पचा?” दे हिल्लो पाप्तु। 16 मिनु मेमुकानमी पिप नु आ सरकार डा हुकुम पाइब नेल्ल आन डोंइती “पिपीम वास्तीमी पिप कली ला ममाइ, तन्न हुकुम पाइब नेल्ल आन कली नु

पिप अहासूरस आ रागी डा मुर नेल्ल आन कली मरिम्शो पाप्तु। 17 मुल पिपीम आ मरिम्शो पशो मीश मुर नेल्लेमी तुइक्नीम। मोपतीके मेकोपुकीमी यो आन वोंइश कली आइक्च सेल्शा मटीनीम। मेकोपुकीमी ‘पिप अहासूरसमी पिपीम वास्ती कली आ बाक्तीकेमी ब्रेत्ताक्व, तन्न पिपीममी मटीव’ दे लोव्र पाइनीम। 18 मिनु पिपीम आ पशो आ पबर्म नेंब मादी नु पारसी डा सासन पाइब आन मीश मुरपुकीमी, पिप आ सासन पाइब नेल्ल आन कली मुलाक्त डा लोव्र पाइनीम। मिनु मीश मुरुमी आन वोंइश आन कली मटिथु, शुश जिचा पोक्नीम। 19 मोपतीके गे दाक्नीनी हना, पिपीम वास्ती गे इन डोंइती गेनायो जाक्ने मचबल। मिनु आ पिपीम दुम्तीके क्याम्शा, अर्को मेको क्येडा दारशो मीश आल कली पिपीम सेलीन। मेको इन सेल्शो कानुन पारसी नु मादी आन कानुनमी यो गेनायो मक्याम्सीचा डा पा ब्रेक्पतीन। दानीएल ६:९ 20 मिनु एको पिप आ ब्रेक्पाइशो लोव्र एको राज्य नेल्लेमी नेंतेक्म हना, ठेयब नु आइक्च मीश मुर नेल्लेमी आन वोंइश कली मान पाइनीम” देंत।

21 मिनु मेमुकान आ लोव्र पिप नु सासन पाइबपुकीमी “रिम्शो बाक्ब” दे दाक्ताक्म। मिनु पिपीमी मेमुकान आ देशो खोदेशो पाप्तु। 22 मिनु मेकोमी आ रागी नेल्ले डा मुर आन आंम आंम ब्रेक्स नु आंम आंम लोव्रमी “खिं डा ठेयब वोंइश मुरुमी आंम खिं डा मुर आन कली अधिकार पचा माल्नीम” दे मुर नेल्ल आन जात जात डा ब्रेक्स नु आंम आंम लोव्रमी ब्रेक्पाइशो सोइक्ताक्व। एस्तर ३:१२; एस्तर ८:९

2

मीश आल खुप्शो

1 मिनु पिप अहासूरस आ गाइक्चा बेक्म नोले मेकोमी वास्ती आ पशो आ पबर्म नु मेको आ पबर्म ब्रेक्शो ब्रेक्स कली मिम्ताक्व। 2 मिनु पिप आ गेय पाइबपुकीमी पिप कली “इन कली दारशो नु कन्ने मीश आल माल्पतीन। 3 इन राज्य डा, रागी नेल्ल डा दारशो नु कन्ने मीश आल चाक्चा, दे मेकेर डा ठेयब मुर आन कली लोव्र सोइक्तीन। मिनु मेको मीश आल आन कली सुसा दरवार डा मीश मुर आन बाक्तीकेमी चाक्चा माल्नीम। मिनु मेको मीश मुर आन कली कोव्रब, इन गेय पाइब हेगे आ जिम्मामी वोइक्चा माल्नीम। मिनु मेको मीश आल आन कली खेक्तीक नु ब्रोव्रशो रिना पाइक्तीक मार मार यो गेचा माल्नीम। 4 मिनु गे तेको मीश आल कली दाक्नीनी, मेको कली वास्ती आ पा डा पिपीम सेलीन” देंतेक्म। मिनु पिपीमी मेको लोव्र दाक्ताक्व। मिनु मोदेशो पाप्तु।

सुसा दरवारमी

5 मिनु सुसा दरवारमी मोरदेकै माइशो यहूदी मुर का बाक्माक्त। मेको बेन्यामीन थर डा याइर आ तौ, शिमेइ आ चच, कीश आ युइ बाक्माक्त। १सामुएल ९:१ 6 बेबीलोन डा पिप नेबुकदनेसरमी यरूसलेम रे यहूदा रागी डा पिप येकोन्याह नु ग्याइशो लाइक्चा पुंइसीशो आन दातेमी मोरदेकै आ किकी पिपी कीश यो बाक्माक्त। २राजा २४:१५ 7 मिनु मोरदेकैमी आ बकान्छा आ तमी हदस्सा कली आ तमी खोदेशो सेल्शा, थुल्शा वोइशो बाक्माक्त। मेको के आ आम आफ निम्फा बेक्शो बाक्ताक्स। मेकोमी हदस्सा कली एस्तर नें यो वोइशो बाक्माक्त। एस्तर रिम्शो नु दारशो मीश आल बाक्माक्त। मेको आ आम आफ बेक्सा नोले मोरदेकैमी मेको कली आंम तमी खोदेशो पा दाक्शा, थुल्शो बाक्माक्त। एस्तर ८:१

एस्तर दरवारम लाइक्चा पुंइसीशो

8 मिनु पिप आ ग्रुंइशो ब्रेक्स नेंन्मे नोले, शुश मीश आल आन कली सुसा दरवारमी चाक्तेक्म। मिनु एस्तर कली यो अरु मीश आल नु काथा मीश मुर कोव्रब हेगे कली जिम्मा गेम्तेक्म। 9 मिनु एस्तर कली तशा, मेको हेगे थाम्पान ग्येरसाक्व। मिनु मेकोमी एस्तर कली दारपाइक्चा कली ग्योम्तीक, किप्तीक, खेक्तीक नु रिम्शो जचा थोव्रक नेल्ल गेप्तु। मिनु पिप आ दरवार डा ७ जना नेल्ल क्येडा रिम्शो गेय पाइब मीश आल यो एस्तर कली गेप्तु। मिनु मीश मुर आन कली वोइक्तीक खिंमी एस्तर नु आ कली वारच पाइब आन कली नेल्ल आन क्येडा रिम्शो नु गारशो बाक्तीक गेप्तु। 10 मिनु डोंइती मोरदेकैमी एस्तर कली “इ जात नु इ किकी पिपी सु बाक्नीमी, मेको मशोव्रडो” देशो बाक्तीके, एस्तरमी सुइ आन कली मेको लोव्र मशोव्रशो बाक्त। 11 एस्तर कली दोदेशो बाक्मे? मार पवा, दे तुइक्चा कली मोरदेकै नाक्त किंत किंत मेको मीश आल बाक्तीक खिं आ लाडगा रे एर ओंथ गाक्तीक पाइबाक्त।

12 पिप अहासूरस आ बाक्तीकेम लचा क्येडा डोंइती मीश आलपुकीमी ६ महिना सम्म मूरे तेल खेक्सीशा, अर्को ६ महिना ब्रोव्रशो रिना पाइशो तेल नु दारपाइक्तीक मार मार खेक्सीशा, १२ महिना आंम कली दारपाइक्तीक

गेय पचा माल्बाक्तेक्म। मोपा १२ महिना जाक्दीम नोले पिप अहासूरस आ बाक्तीकेमी मीश आल का का पा लचा माल्बाक्तेक्म। 13 मिनू मीश आलपुकी पिप आ दरवारम लमानु, मेको आन बाक्तीके रे मार मार लाइक्चा दाक्ते मेको लाइक्चा टाइबाक्तेक्म। 14 मोपा मेकोपुकी नाक्दो का का पा पिप आ बाक्तीकेम लशा, सुनी मेको अरु मीश आल बाक्तीक खिं डा कोव्रब शा-आशगज माइशो पिप आ गेय पाइब आ जिम्मामी बाक्चा कली लेत्चा माल्बाक्तेक्म। मिनू पिपमी मेको कली दाक्शा आ नें थिशा मब्रेत्ता सम्म लेंशा पिप आ बाक्तीकेम लचा मताइबाक्तेक्म।

एस्तर पिपीम दुम्शो

15 मिनू मोरदेकै आ बकान्छा अबीहेल आ तमी एस्तर पिप आ बाक्तीकेम लतीक पालो जाक्त। एस्तर पिप आ बाक्तीकेम लमेनु, मीश आल आन कली कोव्रब ठेयब मुर हेगेम मार मार गेवा, मेको ला लाइशशा लमाक्त। अरु मारेइ मपुंडदा बाक्त। सु सुमी एस्तर कली तामे, मेको नेल्लेमी एस्तर कली दाक्ते बाक्त। 16 मिनू एस्तर कली पिप अहासूरस आ बाक्तीकेम लदमेनु, अहासूरस पिप दुम्शो ७ बर्स १० महिना जाक्दीशो बाक्माक्त। मेको महिना कली तेबेथ महिना देंबाक्तेक्म।

17 मिनू पिपमी मीश आल नेल्ल आन क्येडा एस्तर कली दाक्ताक्व। मिनू अरु आन क्येडा मेको कली योव्रतु। मिनू एस्तर कली पिपीम आ सिरपेच गुप्शा, वास्ती आ पा डा आ पिपीम सेल्लु। 18 मिनू नोले पिपमी एस्तर कली मान पचा कली हुकुम पाइब नेल्ल नु गेय पाइब आन कली ठेयब भोज का गेप्टु। मिनू रागी नेल्ल डा मुर आन कली गेय मपथु बाक्चा गेशा, पिपम गेचा माल्लो मुर आन कली शुश इनाम गेम्तीमी।

मोरदेकैमी पिप कली प्रोंइशो

19 मेको कन्ने मीश आल आन कली लेंशा पिप आ दरवारमी चाक्गमेनु, मोरदेकै यो दरवार डा ठेयब लाप्चोम बाक्शो बाक्त। 20 मोरदेकै आ देंशो खोदेंशो पा एस्तरमी आ किकी पिपी मार जात डा बाक्मा, सु बाक्मा सुइ आन कली मशोव्रशो बाक्त। मेकोमी आल बाक्म ना मोरदेकै कली टिशो खोदेंशो पा, ठेयब दुम्शा यो टिप्टु। 21 मेना मोरदेकै पिप आ दरवार डा ठेयब लाप्चोमी बाक्शो बाक्त। मिनू सु जाक्म, दे कोव्रब, पिप आ ठेयब गेय पाइब बिग्थान नु तेरेश माइशो मुर चुरशा गारशा, पिप अहासूरस कली साइक्चा लोव्र पाम्से बाक्त। एस्तर ६:१-२ 22 मिनू मेको आस लोव्र मोरदेकैमी नेंशा तुइशशा, एस्तर कली शेंदा बाक्त। मिनू एस्तरमी मोरदेकै आ नेंमी पिप कली लोव्र नेल्ल शोव्रतु। 23 मिनू मेको लोव्र हिल्लो हिक्सी पामेनु, थमा बाक्त, दे पिपमी तुइक्ताक्व। मिनू मेको ठेयब गेय पाइब आस कली थामम क्युकशा साइक्तेक्म। मिनू नोले पिप आ डोंइती मेको लोव्र नेल्ल इतिहास ब्रेक्तीक किताबमी ब्रेक्ताक्म।

3

हामान मोरदेकै नु गाइशो

1 मिनू नोले पिप अहासूरसमी अगाग आ मुर हम्मदाता आ तौ हामान कली आ मान बारपाइक्तु। मिनू मेको कली हुकुम पाइब नेल्ल आन क्येडा ठेयब सेल्लशा, ठेयब मान गेशा वोइक्तु। १सामुएल १५:३२; प्रस्थान १७:१४-१६ 2 मिनू पिप आ लोव्र टिशो, दरवार डा गेय पाइब नेल्लेमी दरवार डा ठेयब लाप्चोमी हामान आ डोंइती बाप्शा पोक्च थेक्शा, सेउ पाम्तेक्म। तन्न मोरदेकैमी मोदेंशो पा पोक्च थेक्शा, सेउ मपावो। मत्ती ४:९-१० 3 मिनू पिप आ दरवार डा ठेयब लाप्चोम गेय पाइबपुकीमी मोरदेकै कली “गे मारदे पिप आ देंशो मटीनीनी?” दे हिल्लो पाम्तेक्म। 4 मिनू नाक्त किंत किंत मेकोपुकीमी मेको कली मो पा लोव्र पाम्तेक्म। तन्न मोरदेकैमी मेको आन लोव्र का यो मनेन। मोदेंशो पशो हामानम फाल्ने चाप्बाक्म कों मचाप्बाक्म, दे कोव्रचा कली, मेकोपुकीमी मेको लोव्र हामान कली शोव्रतेक्म। मारदे हना मोरदेकैमी मेको आन कली “गो यहूदी नड” देंशो बाक्त। 5 मिनू मोरदेकैमी आ डोंइती बाप्शा, सेउ पा मान मपशो तशा, हामान साप्पा चुरमाक्त।

यहूदी नेल्ल साइक्चशो

6 मिनू हामानमी मोरदेकै आ जात, आ लोक्ब सु बाक्मा, दे तुइक्ता नोले, मेको कली ला ममाइ, तन्न पिप अहासूरस आ राज्य डा यहूदी, मोरदेकै आ जात डा मुर नेल्ल आन कली खतम सेल्लतीक लां माल्लु। 7 मिनू अहासूरस पिप दुम्शो १२ बर्स दुम्शा, आ डोंइती डा निसान माइशो महिनामी हामान आ अर्ती गेब मेको नु गारशा, यहूदी आन कली गेना साइक्चा, दे हामान आ डोंइती जोक्ब तुइक्ब आन कली साहीत कोव्रपाइक्तु। मेको साहीत कोव्रतीके कली पुर देंतेक्म। मिनू मेको साहीत १२ महिना नोले अदार महिनामी गूत। प्रस्थान १३:४; प्रस्थान १२:२; एस्तर ९:२४ 8 मिनू

हामानमी पिप अहासूरस कली “इन राज्य डा रागी नेल्लेमी मुर आन दातेमी जात का डा मुर ब्रशा बाक्शो बाक्नीम। मेकोपुकी अरु मुर रे ब्राशा बाक्नीम। मिनु मेको आन पतीके गो नु मगारचा डा बाक्ब। मेकोपुकीमी इन ऐन कानुन मटीनीम। मिनु गेमी मेको आन कली मोदेशो पचा गेचा मदुम्ब। ब्यवस्था ४:५-८ 9 मोपतीके गे दाक्नीनी हना, मेको आन कली खतम सेल्चा, दे ब्रेक्स का ब्रेक्पतीन। मिनु गो नोले मेको पिप आ क्येट वोइक्तीके डा गेय पाइब आन कली १० हजार टलेन्ट चांदी पिप आ क्येट वोइक्तीकेमी वोइक्चा कली गेनुड” देंत। टलेन्ट का चांदी ३४ किलो बाक्ब। एस्तर ४:७ 10 मिनु पिपमी आ छाप पाइशो औंठी प्रुइशशा, यहूदी आन जोरी सत्रु अगाग आ मुर हम्मदाता आ तौ हामान कली गेप्टु। 11 मिनु पिपमी हामान कली “मेको चांदी नु मेको मुरपुकी इन केन बाक्नीम। गे मार दाक्नीनी मेको पने चाप्नीनी” देंत।

12 मिनु डोंइती डा महिना डा १३ नाक्तीमी पिप आ ब्रेक्स पाइब आन कली ब्रेत्ताक्मी। मिनु हामानमी देशो खोदेशो पा रागी नेल्ल इन सरकार डा गेय पाइब नु जात जात डा मुर आन ठेयब मुर नु रागी रागी डा हुकुम पाइब आन कली मेको मुर नेल्ल आन जात जात डा ब्रेक्स नु आंम आंम लोव्रम ब्रेक्पदा बाक्त। मेको ब्रेक्सम पिप अहासूरस आ छाप थोक्शा, मेको आ नेंमी ब्रेक्शो बाक्त। 13 मिनु मेको सोइशशो मुरपुकीमी मेको ब्रेक्स रीब रीब पा पिप आ रागी डा मुर नेल्ल आन कली सोइक्तमे बाक्त। मेको ब्रेक्समी मार ब्रेक्शो बाक्त देशा हना, अदार माइशशो महिना डा १३ नाक्त, काबुमीन यहूदी नेल्ल आन कली साइक्चा माल्नीम। वोंइश आल रे खाल्पा सम्म नु मीश मुर नु आल ब्रेप्च नेल्ल आन कली यो साइक्चा माल्नीम। मिनु यहूदी आन शोंप नेल्ल रोइक्चा माल्नीम, दे ब्रेक्शो बाक्त। 14 मिनु मेको नाक्त कली सासीशा बाक्चा, दे जात नेल्ल डा मुर आन कली तुइक्पाइक्चा, दे लेंशा ब्रेक्स का ब्रेक्शा, रागी डा मुर नेल्ल आन कली का का पा गेशा, उरदी पचा कली सोइक्ताक्म। 15 पिपम मेको लोव्र चोव्रथ लाइक्ब आन कली रीब रीब पा सोइक्ताक्व। मिनु सुसा दरवारमी यो मेको लोव्र ब्रपाइक्तेक्म। मो पामे नोले पिप नु हामान तूचा कली निस्साक्स। तन्न सुसा सहरम चहिं खाल बाल बोक्त।

4

यहूदी आन कली प्रोंइचा माल्शो

1 मिनु मोरदेकैमी मेको लोव्र नेल्ल तुइशशा, आ वा खाक्तु। मिनु अरन्डी फेक्शा, पुलु मोइसीशा, ठेयब सेंदामी रेंका पना पन सहरम हिरसाक्व। 2 मिनु मोपा दरवार डा ठेयब लाप्चो आ डोंइती जाक्त। तन्न अरन्डी फेक्शो सुइ मुर दरवार डा ठेयब लाप्चो रे ओव्रचा मताइबाक्तेक्म। 3 पिप आ सोइशशो मेको लोव्र नेंशा, रागी नेल्ल डा यहूदी माइजा बाक्शा, डाक्शा, रेंका पाम्तेक्म। मिनु मेको आन दाते डा शुश मुर अरन्डी फेक्शा, पुलु तारी निस्साक्म। 4 मिनु पिपीम एस्तर आ गेय पाइबपुकी जाक्शा, एस्तर कली मेको लोव्र शोव्रतेक्म। पिपीममी मेको नेंशा, शुश सुर्ता पाप्टु। मिनु “अरन्डी प्रुइशशा वा फेक्सीन” दे मोरदेकै कली वा सोइक्ताक्व। तन्न मोरदेकैमी मेको वा ताक्ने मबिस्से। 5 मोपतीके एस्तरमी पिप आ वोइशशो आ गेय पाइब हथाक कली ब्रेशशा “मोरदेकै कली मार श्येत दुम्मे? मिनु मेको श्येत दोपा दुम्मे?” दे हिल्लो पथ सोइक्ताक्व। 6 मिनु हथाक पिप आ दरवार डा ठेयब लाप्चो आ डोंइती ठेयब लाडगामी मोरदेकै कली गुमथ लत। 7 मिनु मोरदेकैमी आंम कली मार दुम्मे, मेको नेल्ल हथाक कली देंत। मिनु हामानमी यहूदी नेल्ल आन कली साइक्चा, दे पिप आ क्येट वोइक्तीकेमी दोशो क्येट वोइक्चा, दे लोव्र पवा, मेको यो हथाक कली शेंताक्व। एस्तर ३:९ 8 मिनु मोरदेकैमी सुसामी यहूदी आन कली साइक्चा, दे पिप आ लोव्र ब्रेक्शो ब्रेक्स यो एस्तर कली कोंइशा, तुइक्पाइक्चा, दे हथाक कली गेप्टु। मिनु मेकोमी हथाक कली “आंम मुरुम शिशी तामेक्ल, दे पिप कली नमो सिमो पचा कली एस्तर पिप आ बाक्तीकेमी लचा माल्ब देनीन” देंत।

9 मिनु हथाक एस्तर आ बाक्तीकेम लशा, मोरदेकै आ देशो नेल्ल देंत। 10 मिनु एस्तरमी हथाक कली मोरदेकै आ बाक्तीकेमी सोइशशा, 11 “पिप आ गेय पाइब नु रागी डा मुर नेल्ल पिपमी मब्रेत्थु, वोंइश मुर नु मीश मुर सुइ पिप आ डोंइती लाम्तेक्म हना, साइक्चा पुंइसीनीम। मेको ऐन कानुनम ब्रेक्शो बाक्ब। तन्न पिपमी आ राज दन्ड मेको मुर गे दिंशा कोंइताक्व हना ला, मेको मुर ब्रोंइचा ताइब। मिनु गो ३० नाक्त सम्म मब्रेस्सीशो बाक्नुड” दे देंचा कली सोइक्ताक्व। एस्तर ५:२; एस्तर ८:४

12 मिनु मोपा हथाकमी मोरदेकै कली एस्तर आ सोइशशो लोव्र नेल्ल शोव्रतु। 13 मिनु मोरदेकैमी हथाक कली पिपीम कली “गे पिप आ दरवारम बाक्ते हना यो, यहूदी नेल्ल आन दातेमी गे ला ‘साइक्चा मपुंइसीनुड’ दे ममिम्तो। 14 मो देशो दुम्मेनु, गे सिक्सी पा बाक्तीनी हना, यहूदी आन कली वारच पा प्रोंइचा कली अर्को मुर रे यो जाक्ब। तन्न

गे नु इं आफ आ खिं डा मुरपुकी चहिं खतम दुमचा मालनीम। गे यहूदी आन कली प्रोंइचा कली पिपीम दुमशो बाक्नेवे, को?” दे एस्तर कली माइक्चा, दे हथाक कली सोइक्ताक्व। उत्पत्ती ४५:७

यहूदीपुकी माइजा बाक्शो

15 मिनु एस्तरमी मोरदेकै कली 16 “सुसा सहरमी लशा, यहूदी नेल्ल आन कली आं पबर्म माइजा बाक्चा कली पुक्कीन। नाक्त सां नु नाक्दो सां सम्म मारेइ मजने, मारेइ मतूडीन। मिनु गो नु आं गेय पाइबपुकी यो गे खोदेशो पा माइजा बाक्नीकी। मिनु में नोले ऐन कानुनमी मगेशो बाक्त हना यो, गो पिप आ बाक्तीकेम लाइनुड। गो खतम दुमती हना, यो दुमडल” दे लोत्र सोइक्ताक्व। 17 मिनु मोरदेकै लशा, एस्तर आ देशो खोदेशो पाप्तु।

5

एस्तर पिप आ डोंइती जाक्शो

1 मिनु नाक्त सां नोले एस्तरमी पिपीम आ फेक्तीके फेक्साक्व। मोपा लशा, पिप आ दरवार आ लाडगाम बाक्शा, खिं गे कोव्रशा, राप्त। मेना पिप आ खिंमी आ ठेयब नित्तीकेमी निशशा, लाप्चो गे कोव्रशा, बाक्शो बाक्त। 2 मिनु पिपीम पिपीम एस्तर कली दरवार डा लाडगामी राप्शा बाक्शो तशा, मेको कली शिशी पा, आ शेशा बाक्शो राज दन्ड एस्तर गे दिताक्व। मिनु एस्तर पिशा, मेको कोक्के आ डर थिप्तु। एस्तर ४:११ 3 मिनु पिपीम मेको कली “पिपीम एस्तर, मारदे जाक्नी? गे मार मालनीनी? आं रागी उइक्थ इन कली गेचा माल्ताक्यी हना यो, मेको इन कली गेनन्नी” देंत। मर्कूस ६:२३ 4 मिनु एस्तरमी “हजुर, गे दाक्नीनी हना, मुल नाक्दो गो इन कली सेल्शो भोजमी गे हामान नु काथा जाक्कीने” देंत। 5 मिनु पिपीम एस्तर आ देशो पचा कली हामान कली ब्रेत्चा कली मुर सोइक्ताक्व। मिनु पिप नु हामान एस्तरमी सेल्शो भोज जथ लाम्ताक्स। 6 मिनु पिपीम अडगुर शांबु तूशा, एस्तर कली “गे मार दाक्नीनी? गो इन कली गेनन्नी। आं रागी उइक्थ पुंइतीनी हना यो, गो मेको इन कली गेनन्नी” देंत। 7 मिनु एस्तरमी सेउ पा “गो लोत्र का पुंइचा दाक्नुड। 8 मिनु गो इन शिशी ताता हना, गे आं पुंइशो गेचा दाक्ताक्नी हना, हजुर, दीसा यो गे निक्शी मुलाक्त डा खोदेशो पा, आं सेल्शो भोजम जाक्कीन। मेना गो इन हिल्लो पशो लोत्र लेत्नुड” देंत। एस्तर ६:१४

हामानम आंम कली ठेयब सेल्सीशो

9 मिनु मेको नाक्त हामान शुश ग्येरसीशा, आ थुं जाव बोरपा लत। तन्न हामानमी मोरदेकै कली दरवार डा ठेयब लाप्चोमी बाक्शो नु आ डोंइती बाप्शा मान मपशो तशा, चुरशा लां मताव। 10 मो दुम्त हना यो, हामानमी आ चुरशो मकोंइथु, आ खिं लत। मिनु आ खिं जाक्दीशशा, आ वारच आन कली नु आ मीश जेरेश कली ब्रेत्थ सोइक्ताक्व। 11 मिनु मेको आन कली “आं शोंप, आं थेरशो रू नु शुश तौ बाक्नीम। मिनु पिपीम सासन पाइब नु गेय पाइब नेल्ल आन क्येडा आं कली शुश मान गेशो बाक्ब” दे आ नें बोरपाइशशा लोत्र पाप्तु। 12 मिनु हामानमी “मोशो ला ममाइ, पिपीम एस्तरमी सेल्शो भोजमी आं कली ला ब्रेत्ताक्यी। मिनु दीसा यो पिप नु लचा कली आं कली ब्रेशो बाक्ब। 13 तन्न मेको यहूदी मोरदेकै कली दरवार डा लाप्चोम बाक्शो तडानु, आंम कली मारेइ खोइ मलाक्ड” देंत। 14 मिनु आ मीश जेरेश नु आ वारच नेल्लेमी “५० कुबीत लाइशो थाम का ग्रुक्तीने। मिनु सुनी कना मोरदेकै कली मेकेर क्युक्शा साइक्चा कली पिप नु लोत्र पने। मिनु ग्येरशा, पिप नु भोज जथ लने” देंतेक्म। मिनु हामानमी मेको लोत्र दाक्ताक्व। मिनु मेकोमी मुर कली क्युक्शा साइक्तीक थाम का ग्रुक्पाइक्तु। कुबीत का आधा मिटर खोदेशो बाक्ब।

6

मोरदेकैमी ठेयब मान तशो

1 मिनु मेको नाक्दो पिप इप्ने मचब। मिनु पिपीम इतिहास ब्रेक्शो किताब चाक्पाइक्तु। मिनु मेको पढेपपाइशशा नेंतु। एस्तर २:२१-२२ 2 मिनु मेको किताबमी पिप आ लाप्चोम बाक्ब बिगथान नु तेरेश माइशो ठेयब लाप्चोम गेय पाइब निक्शीमी चुरशा पिप अहासूरस कली साइक्चा माल्शो लोत्र नु मोरदेकैमी पिप कली तुइक्पाइशो आ पबर्म ब्रेक्शो बाक्त। 3 मिनु पिपीम “एको ओं पशो आ पबर्म मोरदेकै कली मारेइ मान नु दर्जा गेशो बाक्मे?” दे हिल्लो पाप्तु। मिनु मेकेर बाक्ब पिप आ गेय पाइबपुकीमी “मोरदेकै आ पबर्म मारेइ मपशो बाक्ब” देंतेक्म। 4 मिनु पिपीम “लाडगाम सु बाक्मे?” दे हिल्लो पाप्तु। मेना हामानमी आ ग्रुक्शो, मुर कली क्युक्शा साइक्तीक थाममी “मोरदेकै कली साइक्चा गेयीनी” दे पिप कली पुंइथ लाडगामी नक जाक्शो बाक्त। एस्तर ५:१४ 5 मिनु पिप आ गेय पाइबपुकीमी “हामान

लाडगामी राप्शा बाक्त” देतेकम। मिनु पिपमी “मेको कली खिं गा ब्रेत्तीन” देंत। 6 मिनु हामान खिं गा ओवमेनु, पिपमी मेको कली “पिप आंमान मान गेचा दाक्शो मुर कली मार पचा माल्बा?” दे हिल्लो पाप्तु। मिनु हामानमी आ थुं थुमी “आं डा लाक्शा, तेको मुर कली पिपमी मान गेचा दाक्बा डा?” दे मिम्ताक्व। 7 मिनु मेकोमी पिप कली “पिप सु कली मान गेचा दाक्नीनी, 8 मेको कली पिप आ डोंइती फेक्शो वा नु पिया ग्योम्सीशो पिप आ शारा चाक्पतीने। दानीएल ५:२९ 9 मिनु मेको पिप आ डोंइती फेक्शो वा नु आ शारा नेल्ल आन क्येडा मान तशो मुर कली गेचा माल्ब। मिनु नेल्ल क्येडा अधिकार पाइशो मुरुमी पिपम मान गेचा दाक्शो मुर कली फेक्तल। मिनु मेको कली शारा डोइक्पाइशो, सहर डा लांमी गाक्पाइक्चा माल्ब। मिनु नेल्लेमी ‘पिपमी मान गेचा दाक्शो मुर कली मार पचा, मेको कोवडीन’ देना देंन हिरदमेक्ल” देंत। उत्पती ४१:४२-४३ 10 मिनु पिपमी हामान कली “गे इ देशो खोदेशो पा फेक्तीक नु शारा मुल कना चाक्शा, लाप्चोम बाक्ब यहूदी मोरदेकै कली मोदेशो पावो। इ देशो का यो मखाइक्थु, पावो” दे माइक्तु।

11 मिनु हामानमी फेक्तीक वा नु शारा चाक्शा, मोरदेकै कली मेको वा फेक्शा, शाराम डोइक्पाइशो, सहर डा लां मेर लाइशो, आ डोंइती “पिपमी मान गेचा दाक्शो मुर कली मार पचा, मेको कोवडीन” देना देंन मोरदेकै कली हिरताक्व। 12 मिनु नोले मोरदेकै पिप आ दरवार डा ठेयब लाप्चोम लेत्त। मिनु हामान चहिं मुने पा कुल सुम्शा दोरोर पा दोरशा, आ खिं लत। 13 मिनु मेकोमी आ मीश जेरेश नु आ वारच नेल्ल आन कली मार दुम्मे, मेको नेल्ल का का पा शोवतु। मिनु मेको आ वारचपुकी नु आ मीशेमी मेको कली “इन जोरी सत्रु मोरदेकै, यहूदी बाक्त हना, गे मेको कली मारेइ पने मचाप्नीनी। मुल गे मेको आ डोंइती खतम दुम्नीनी” देतेकम।

14 मोपा लोव पना पन बाक्मेनु, पिप आ गेय पाइबपुकी जाक्शा, हामान कली पिपीम एस्तरमी सेल्शो भोज जचा कली लाइक्तेकम। एस्तर ५:८

7

एस्तरमी पिप कली पुंइशो लोव

1 मिनु पिप नु हामान, निम्फा पिपीम एस्तरमी सेल्शो भोज जथ लाम्ताक्स। 2 मिनु मेको नाक्त यो पिप अडगुर शांबु तूशा, एस्तर कली “गे मार दाक्नीनी? मेको इन कली गेनन्नी। आं रागी उइक्थ पा पुंइतीनी हना यो, गो मेको इन कली गेनन्नी” देंत। 3 मिनु पिपीम एस्तरमी “गोमी इन शिशी तशो बाक्ती नु गे दाक्ताक्नी हना, गो नु आं जात डा मुर आन कली साइक्चा रे प्रोनीन। 4 मारदे हना गो नु आं जात डा मुर नेल्ल क्याम्चा, साइक्चा नु खतम दुम्चा कली लेयसीशो बाक्नीकी। गो वाइलीम वाइल सेल्चा कली ला लेयसीशो बाक्तक हना, गो सिक्सी पा बाक्ड वा। मारदे हना मेको आइक्च लोवमी पिप कली मारेइ श्येत मदुम वा” देंत। 5 मिनु पिप अहासूरसमी पिपीम एस्तर कली “मोदेशो पचा माल्ब मुर सु बाक्बा? मिनु मेको मुर ते बाक्बा?” दे हिल्लो पाप्तु। 6 मिनु एस्तरमी “मेको श्येत गेब, मरिम्शो मुर एको हामान बाक्ब” देंत। मिनु हामान पिप नु पिपीम आ डोंइती हिंशा, सेंदा का यो गुंइने मचब।

हामानम साइक्चा पुंइसीशो

7 मिनु पिप चुरशा, भोज रे छुल बोक्शा, दरवार डा फू रूमी लत। हामानमी चहिं “पिपमी आ थुंमी आं कली खतम पचा मिम्ताक्व” दे तुइशो, पिपीम एस्तर नु माफ पुंइचा कली आ बाक्तीक उइ बाक्त। 8 मिनु पिप फू रू रे लेशो, भोज जतीक कोठाम जाक्मेनु, हामान चहिं एस्तर आ इप्तीकेम बाप्शा, आ नेक्था गुर व्वेशा बाक्शो ताप्तु। मिनु पिपमी ठेयब सेंदामी “मार, मेकोमी पिपीम कली आं डोंइती थिचा मिम्बा?” देंत। मिनु पिपम मोदेशो देंम नोले, पिप आ गेय पाइबपुकीमी हामान आ कुल सुम्तेकम। 9 मिनु पिप नु बाक्शा, गेय पाइब आन दाते डा हारबोना माइशो कामी “हामान आ खिं आ नेक्था इन कली रिम्शो पाइब नु प्रोंइब मोरदेकै कली क्युक्शा साइक्चा कली ५० कुबीत लाइशो मुर साइक्तीक थाम गुक्शा वोइशो बाक्ब” देंत। मिनु पिपमी “मुल हामान कली मेको थाममी क्युक्शा सतीन” देंत। कुबीत का आधा मिटर खोदेशो बाक्ब। 10 मिनु मेकोपुकीमी मोरदेकै कली साइक्चा, दे गुक्शो थाममी, हामान कली लाइशो क्युक्तेकम। मिनु पिप आ थुं नांइसाक्व।

8

यहूदीपुकीम अधिकार तशो

1 मिनु मेको नाक्त पिप अहासूरसमी यहूदी आन जोरी सत्रु हामान आ खिं पिपीम एस्तर कली गेप्टु। मारदे हना एस्तरमी पिप कली “गो मोरदेकै आ खिं डा मुर का नड” दे शेंतीके, मोरदेकै पिप आ बाक्तीकेम जाक्चा माल्ताक्व। एस्तर २:७ 2 मिनु पिपमी हामान रे रोइश्शो अधिकार डा छाप थोक्तीक औंठी पुइश्शा, मोरदेकै कली गेप्टु। मिनु एस्तरमी मोरदेकै कली हामान आ खिं कली अधिकार पाइब सेल्लु। एस्तर ३:१०

पिपीम एस्तरमी लेंशा पुंइशो

3 मिनु एस्तरमी लेंशा पिप आ खोइलीम बाप्शा, डाक्शा नमो सिमो पा “अगाग आ मुर हामानमी यहूदी आन पर्बम ब्रेक्सो मरिम्शो ब्रेक्स क्याम्शा गेन” दे पुंइतु। 4 मिनु पिपमी आ राज दन्ड एस्तर गे शुक्तु। मिनु एस्तर बोक्शा, पिप आ डोंइती राप्त। एस्तर ४:११; एस्तर ५:२ 5 मिनु एस्तरमी “पिपम दाक्नीनी नु गो इन शिशी ताता नु आं देशो लोव्र गे दाक्नीनी नु आं देशो नेंनीनी हना, अगाग आ मुर हम्मदाता आ तौ हामानमी इन राज्य डा हुकुम पाइब नेल्ल आन कली ‘यहूदी नेल्ल आन कली साइक्चा’ दे ब्रेक्शा सोइश्शो ब्रेक्स नेल्ल क्याम्चा, दे ब्रेक्स का ब्रेक्शा सोइक्तीन। 6 मारदे हना आं जात नु आं खिं डा मुरपुकी खतम दुम्शो गो दोपा फाल्ने चाप्नुडा डा?” देंत। 7 मिनु पिप अहासूरसमी पिपीम एस्तर नु यहूदी मोरदेकै कली “हामानमी यहूदी आन कली खतम सेल्चा माल्तीके, मेको आ खिं पिपीम एस्तर कली गेता। मारदे हना हामान क्युक्शा साइक्चा पुंइसाक्व। 8 मुल आं नेंमी इन दाक्स पा यहूदी आन कली रिम्शो दुम्चा आ पर्बम नक ब्रेक्स का ब्रेक्तीन। मिनु मेकोमी आं छाप थोक्तीन। मारदे हना पिप आ नेंमी ब्रेक्शा, आं छाप थोक्शो हुकुम गेनायो क्याम्ने मचाम्सीब” देंत।

मोरदेकै आ सोइश्शो ब्रेक्स

9 मिनु सिवान माइश्शो ३ महिना डा २३ नाक्तीम पिपम आ ब्रेक्स पाइब मुर आन कली ब्रेक्ताक्मी। मेकोपुकीमी मोरदेकै आ देशो खोदेशो पा यहूदी, सरकार डा गेय पाइब, मान ताइब नु रागी रागी आन कली हुकुम पाइब भारत रे कूश माइश्शो एथीयोपीया सम्म डा १२७ ओटा रागी नेल्लेमी मुर नेल्ल आन ब्रेक्स नु आंम आंम लोव्रम नु यहूदी आन कली आंम आंम आन ब्रेक्स नु आंम आंम आन लोव्रम पिप आ अरेशो लोव्र ब्रेक्ताक्म। 10 मोपा मेको ब्रेक्स कली पिप अहासूरस आ नेंमी ब्रेक्शा, पिप आ छाप थोक्ताक्व। मिनु मेको ब्रेक्स कली शारा दोरपाइक्ब आन कली गेशा, थाम्पान दोरपा चोव्रथ सोइक्ताक्म। मेको आन डोइश्शो शारा पिप आ नेल्ल क्येडा रिम्शो शारा बाक्तेक्म। 11 मेको ब्रेक्समी मार ब्रेक्शो बाक्त देशा हना “सहर नेल्ल डा यहूदी बुक्शा, आंम कली खतम पाइबपुकी रे प्रोइसीमल। मिनु मेकोपुकीमी तेको तेको जात डा नु तेको तेको रागी डा बुक्शो मुर, सु सुम आन मीश नु आन आल आन कली श्येत गेमे, मेको आन कली काबुमीन क्याम्चा, साइक्चा नु खतम सेल्चा कली बुक्चा माल्नीम। मिनु मेकोपुकीमी श्येत गेब मुर आन मारेइ मारेइ रोइक्ने चाप्नीम। एस्तर ३:१३; एस्तर ९:७-१०, १५, १६ 12 पिप अहासूरसमी आ रागी नेल्लेमी मेको श्येत गेब आन कली अदार माइश्शो १२ महिना डा १३ नाक्तीम खतम सेल्चा माल्ब” दे ब्रेक्शो बाक्त। 13 मिनु मेको ब्रेक्स नेल्ल रागी डा मुर आन कली तुइक्पाइक्चा कली लेंशा मोदेशोन ब्रेक्स ब्रेक्शा, उरदी पपाइक्चा, दे लोव्र सोइक्ताक्म। मिनु यहूदी चहिं मेको नाक्त आन जोरी सत्रु आन कली क्येक्क लेत्चा कली सासीशा बाक्मल, दे यहूदी आन कली अरेशा ब्रेक्शा सोइक्ताक्म। 14 मिनु पिपमी मेको शारा डोइक्ब आन कली आ देशो लोव्र चोव्रथ शारा डोइक्पा थाम्पान दोरपाइश्शा सोइक्ताक्व। मिनु मेको लोव्र सुसा दरवार रे योक्चा गोम्तेक्म।

यहूदी आन ग्येरतीक नाक्त

15 मिनु मोरदेकै पिप आ बाक्तीक रे दरवार डा ठेयब नीलो नु बुश फेक्तीक वा फेक्शा, पियाजी रड डा बरखी रुक्शा, पियामी सुन के ठेयब सिरपेच गुप्शा, सहर लत। मिनु मोरदेकै कली तशा, सुसा सहर डा मुरपुकी थाम्पान ग्येरसाक्म। 16 मिनु यहूदी आन कली मेको नाक्त आन थुं बारपाइक्तीके, शुश ग्येरतीके नु मान ततीके नाक्त दुम्त। 17 मिनु पिप आ ब्रेक्स नु आ हुकुम जाक्दीशो नेल्ल रागी नु सहर नेल्लेमी यहूदी साप्पा ग्येरसाक्म। मिनु मेको नाक्त चाड सेल्शा, भोज जाम्तेक्म। मिनु मेको रागी डा शुश मुर यहूदी दुम्तेक्म। मारदे हना मुर नेल्ल यहूदी आन कली तशा हिंतेक्म।

1 मिनु अदार माइशो १२ महिना डा १३ नाक्त पिप आ ब्रेक्शो लोत्र खाप्तीक नाक्त जाक्त। मेको नाक्त यहूदी आन जोरी सत्रुमी यहूदी आन कली साइक्चा मिम्शो बाक्तेक्म। तन्न मुल यहूदीपुकीम कका आन जोरी सत्रु आन कली साइक्तीक नाक्त जाक्त। 2 मेको नाक्त पिप अहासूरस आ रागी नु सहर डा यहूदी नेल्ल आन जोरी सत्रु आन कली साइक्चा, दे बुक्तेक्म। मिनु मेको यहूदी आन कली सुइमी तेक्ने मचबेम। मारदे हना यहूदी आन कली तशा, मुर नेल्ल शुश हिंतेक्म। 3 मिनु मोरदेकै कली तशा, हिंतीके रागी नेल्ल डा हुकुम पाइबपुकी, सरकार डा गेय पाइबपुकी नु ठेयब मुर नेल्लेमी यहूदी आन कली वारच पाम्तेक्म। 4 मोरदेकै पिप आ दरवारमी ठेयब मुर दुम्त। मिनु रागी नेल्लेमी आ नें तुइक्ताक्म। मोपा मेको आ सक्ति बारना बारन लत। 5 मिनु यहूदीपुकीम आन जोरी सत्रु आन कली तरवारम तूशा, क्योरशा साइशशा थुम्तेक्म। यहूदीपुकीमी आन कली खेदा पाइब मुर आन कली मार पचा दाक्तमे, मेको पाम्तेक्म। 6 यहूदीपुकीमी सुसा दरवारमी ५ सहे मुर आन कली साइक्तेक्म। 7 मिनु मेको हम्मदाता आ तौ हामान आ १० जना तौ पारशान-दाता, दाल्फोन, अस्पाता, 8 पोराता, अदाल्या, अरीदाता, 9 पारमशता, अरीसाइ, अरीदाइ नु वाइजाता बाक्तेक्म। उत्पत्ती १४:२१-२४ 10 मिनु मेको यहूदी आन जोरी सत्रु हम्मदाता आ तौ हामान आ १० जना तौ कली यो साइक्तेक्म। मेको आन शोप नु आन थेरशो रू चहिं मरोइक्तेम।

11 मिनु मेको नाक्त सुसा दरवारमी गिश मुर आन कली सदमे, मेको पिप कली शोत्रतेक्म। 12 मिनु पिपमी पिपीम एस्तर कली “सुसा दरवारमी यहूदीपुकीमी ५ सहे मुर नु हामान आ १० जना तौ नेल्ल आन कली साइक्तेक्म। मिनु अरु आं रागीपुकीमी मार मार पामे माइ? गे मार पुंइतीनी हना यो, मेको गेनन्नी। चिनु मार पुंइनीनी? मेको दुम्ब” देंत। 13 मिनु एस्तरमी “हजुर, गे दाक्नीनी हना, दीसा यो सुसा सहरमी यहूदीपुकीम मुलाक्त डा खोदेशो पचा तामेक्ल, दे हुकुम पने। मिनु हामान आ साइशशो १० जना तौ आन कली क्युक्तीक थाममी क्युक्पतीन” देंत। 14 मिनु पिपमी “मोदेशोन पामेक्ल” दे हुकुम पाप्तु। मिनु सुसा सहरमी पिप आ हुकुम खोदेशो पा, हामान आ साइशशो तौ नेल्ल आन कली थामम क्युक्तेक्म। 15 मिनु सुसा सहरम बाक्शो यहूदीपुकी अदार महिना डा १४ नाक्तीमी लेंशा बुक्तेक्म। मिनु सुसा सहरमी ३ सहे मुर साइक्तेक्म। तन्न मेको आन शोप नु आन थेरशो रू मारेइ मरोइक्तेम। 16 मिनु पिप आ रागी डा यहूदीपुकी आंम कली आन जोरी सत्रु रे प्रोंइचा कली बुक्तेक्म। मिनु मेकोपुकीमी आंम कली काइ मदाक्ब ७५ हजार जना मुर आन कली साइक्तेक्म। मोपा मेकोपुकीमी आन जोरी सत्रु रे थुं नाइक्चा ताम्तेक्म। तन्न मेको आन शोप नु आन थेरशो रू चहिं मारेइ मरोइक्तेम।

पुरीम चाड सेल्शो

17 मिनु मेको नेल्ल अदार माइशो महिना डा १३ नाक्तीम पाम्तेक्म। मिनु मेकोपुकी आ दीसा १४ नाक्तीम नांइसाक्म। मिनु मेको नाक्त चाड का सेल्शा, ग्येरतीक नाक्त सेल्तेक्म। 18 सुसा सहरम बाक्ब यहूदीपुकी चहिं अदार महिना डा १३ नु १४ नाक्त बुक्तेक्म। मिनु १५ नाक्त नांइसाक्म। मिनु मेको नाक्त चाड का सेल्शा, ग्येरतीक नाक्त सेल्तेक्म। 19 मोपतीके डोन डोन गाउं डा नु अर्को सहरम बाक्ब यहूदीपुकीमी अदार माइशो महिना डा १४ नाक्त, नाइक्तीक नाक्त, चाड नु ग्येरतीक नाक्त सेल्नीम। मेको नाक्त मेकोपुकीमी कोसेली गेमुइनीम।

20 मिनु मोरदेकैमी मार मार दुम्मे, मेको नेल्ल ब्रेक्ताक्व। मिनु पिप अहासूरस आ नेक्था नु डोन डा रागीम बाक्ब यहूदी नेल्ल आन कली सोइक्ताक्व। 21 मिनु मेकोमी मार ब्रेक्ताक्व देंशा हना “अदार महिना डा १४ नु १५ नाक्त यहूदी नेल्लेमी बर्स बर्समी चाड नु ग्येरतीक नाक्त सेल्चा माल्नीम। 22 मारदे हना मेको नाक्त यहूदी आन जोरी सत्रु रे नाइक्चा ताम्तेक्म। मिनु मेको महिनामी आन थुं लुक्च लतीक रे ग्येरशो थुं दुम्तेक्म। मिनु आन रोंका पतीके रे ठेयब ग्येरतीक नाक्त फांइसाक्व। मेकोपुकीमी मेको नाक्त चाड का सेल्शा, ग्येरतीक नाक्त सेल्चा माल्नीम। मिनु कोसेली सोइक्मुशा, प्रुडग आन कली मार मार गेचा माल्नीम” दे ब्रेक्शो बाक्त। 23 मोपतीके यहूदीपुकीमी मोरदेकै आ ब्रेक्शो खोदेशो पचा गोम्तेक्म। मिनु मेको मोदेशो पा गेना हना यो पचा कली आन लोत्र थोक्ताक्म। 24 डोंइती यहूदी आन जोरी सत्रु अगाग आ मुर हम्मदाता आ तौ हामानमी यहूदी आन कली खतम सेल्चा नु साइक्चा कली मेको पुर माइशो साहीत कोत्रपाइशो बाक्त। एस्तर ३:७ 25 मिनु मेको लोत्र पिप कली तुइक्पदमे नोले पिपमी, ब्रेक्स पा यहूदी आन कली मरिम्शो नु श्येत गेचा मिम्शो नेल्ल हामान आंम आ पियामी कोप्ताक्व। मिनु मेको नु आ तौ थामम क्युक्शा साइक्चा पुंइसाक्म, दे छाप आप्शो ब्रेक्तीक का ब्रेक्शा गुंइताक्व। एस्तर ७:१० 26 मेको पुर माइशो साहीत कोत्रशा थोक्शो बाक्त। मिनु मेको नाक्त निक्शी कली पुरीम नें वोइक्तेक्म। मिनु मोरदेकै आ ब्रेक्शो, यहूदी आंमा आन तशो

नु अरु आन देशो लोव्र नेंशा, 27 यहूदीपुकीमी आंम आन कली नु आन चच युइ आन कली नु सु सु यहूदी दुमचा दाक्नीमी, मेको नेल्ल आन कली गेना हना यो बर्स बर्समी मेको नाक्त निक्शी “पुरीम माइशो चाड मानेचा माल्ब” दे रिती थिती वोइक्तेक्म। दोदेशो ब्रेक्शो बाक्मे, मोदेशो पचा माल्तेक्म। 28 मिनु नेल्ल आन पालामी, नेल्ल आन खिं डा मुरपुकीमी, रागी नेल्लेमी नु सहर नेल्लेमी मेको नाक्त निक्शी कली मिम्शा, चाड सेल्चा माल्नीम। मिनु यहूदी आन दातेमी मेको पुरीम चाड कली गेनायो मप्रेंदमेक्ल। गेना हना यो मिम्तमेक्ल।

29 मिनु अबीहेल आ तमी एस्तर पिपीम नु मेको यहूदी मोरदेकैमी दोपा नु गेना मेको पुरीम माइशो चाड सेल्चा, मेको आ पर्बम शुश ब्रेक्ताक्स। 30 मिनु मोरदेकैमी पिप अहासूरस आ राज्य डा १२७ ओटा रागीम बाक्शो यहूदी आन कली चिठी ब्रेक्शा सोइक्ताक्व। मार ब्रेक्शो बाक्त देशा हना “इन थुं नाइशशा, आं डोंइती ब्रेक्शो पुरीम चाड मानेचा मप्रोनीन” दे ब्रेक्शो बाक्त। 31 मिनु मेको यहूदी मोरदेकै नु पिपीम एस्तरमी दोदेशो देंसा, मोदेशो पा पुरीम चाड ठीक नाक्तीमी पचा कली ब्रेक्शो बाक्त। मिनु यहूदीपुकीमी आंम कली नु आन चच युइ आन कली “मेको पुरीम चाड पचा माल्ब” दे आन थुंमी मिम्चा माल्नीम। मेको माइजा बाक्तीक नाक्त आन रोंका पशो नेल्ल मिम्चा माल्नीम। 32 मिनु एस्तर आ हुकुममी मेको पुरीम डा लोव्र नुप्त। मिनु मेको लोव्र किताबम ब्रेक्शा वोइक्तेक्म।

10

मोरदेकै आ पाला डा यहूदीपुकी

1 मिनु पिप अहासूरसमी आ रागी डा मुर आन कली नु समुन्द्र डा टापुपुकीम बाक्ब मुर आन कली तिरो थाप्पाइक्तु।
 2 पिप अहासूरस आ अधिकार नु सक्ति आन पर्बम नु दोपा मेकोमी मोरदेकै कली ठेयब गेय पपदा, मेको आ पर्बम मादी नु पारसी पिप आन इतिहास डा किताबमी ब्रेक्शो बाक्ब। एस्तर २:८,१५ 3 मेको यहूदी मोरदेकै पिप अहासूरस आ नोले, मेको आ रागी डा नेल्ल क्येडा ठेयब मुर दुम्त। मेको यहूदी आन दातेमी यो नेल्ल क्येडा ठेयब मान तशो मुर बाक्त। मिनु आ लोक्बपुकीमी मेको कली शुश दाक्ताक्म। मारदे हना मेकोमी आ मुर आन कली रिम्शो नु आन थुं नुचा डा गेय पाप्तु। मिनु मेकोमी नेल्ल रिम्शो दुम्ल, दे आ जात डा मुर आन पर्बम पिप कली लोव्र पाप्तु।

अय्युब

ब्रेक्ब मुर: साइ डा टाल्मुत माइश्शो किताबम मोसा एको किताब ब्रेक्ब मुर बाक्ब, दे ब्रेक्शो बाक्ब। तन्न अर्को जोक्ब तुइक्ब मोसा आ बाक्ची ना क्येडा नोले डा मुर ब्रेक्ब बाक्नीम देंनीम।

गेना बाक्शो: अय्युब ठेयब मुर दुम्शा, मोसा आ क्येडा डोंइती, अब्राहाम, इसहाक नु याकूब आन बाक्ची ना ब्रोंइशो बाक्त। एको काथा ला ममाइ, थमा पा अय्युब मुर का बाक्त, दे उत्पत्ती रे यो तुंडसीब। अय्युब किताबम ब्रेक्शो नें उत्पत्तीमी यो बाक्नीम।

ऊज	अय्युब १:१	उत्पत्ती १०:२३
साबा	अय्युब १:१५	उत्पत्ती १०:२८
कल्दी रागी	अय्युब १:१७	उत्पत्ती ११:३१
एलीफाज	अय्युब २:११	उत्पत्ती ३६:१५
शुआह	अय्युब २:११	उत्पत्ती २५:२ नु अर्को।

मार ब्रेक्शो:

१. अय्युब शुश शोंप पाइश्शो नु श्येत जाइब दुम्शो अय्युब १:-३:-
२. अय्युब आ वारच नु लोत्र पशो अय्युब ४:-३७:-
३. अय्युब परमप्रभु नु लोत्र पशो अय्युब ३८:-४२:६
४. अय्युब श्येत जवा नोले अय्युब ४२:७-१७

अय्युब कली नाक्शो

1 साइ नेसी ऊज रागीमी अय्युब नें पाइश्शो मुर का बाक्माक्त। मेको ब्रोंइम सम्म दोस मतथु नु रिम्शो थुं पाइश्शो दुम्शा बाक्चा माल्ब मुर बाक्माक्त। मेको परमप्रभु कली मान पा हिंशा मरिम्शो पतीक रे डोन बाक्ब मुर बाक्माक्त। येरमीया २५:२०; बिलाप ४:२१; इजीकीएल १४:२४,२०; याकूब ५:११ 2 मेको के ७ जना तौ नु तमी सां बाक्मा बाक्त। 3 मेको के ७ हजार भेडा, हजार सां दलओंठ, ५ सहे हाल ब्यफ नु ५ सहे गधा बाक्मा बाक्त। मिनु शुश वाइलीम वाइल यो बाक्मा बाक्त। मोपा अय्युब पूर्ब डा नेल्ल क्येडा शोंप पाइश्शो नु ठेयब मुर बाक्माक्त। 4 मेको आ तौपुकीम पाल्पालो पा आन आन खिंमी भोज पतीक पाइबाक्मा बाक्त। मिनु मेकोपुकीम जचा तूचा कली आन समी सांफा आन कली यो ब्रेण्बाक्मा बाक्त। 5 मिनु अय्युबम मेको आन भोज पतीक नाक्त नेल्ल नुम नोले, आ तमी तौ आन कली “परमप्रभु आ डोंइती ठीक सेल्सीन” देंथ, मुर सोइक्बाक्माक्त। मिनु अय्युबमी सुनी कना बोक्शा, मेको आन पर्बम चोशा चढ़ेतीक का का चढ़ेशा, मेको आन पाप क्याम्तीक गेय पाइबाक्माक्त। मारदे हना मेकोमी “आं आलपुकीम मारेइ पा परमप्रभु आ पर्बम पाप पामे कों” दे मिम्शा, गेना हना यो मो पाइबाक्माक्त।

डोंइती डा खेयप नाक्शो

6 मिनु काबु स्वर्गम बाक्ब परमप्रभु आ मुरपुकी परमप्रभु यावे आ डोंइती जाक्मानु, सैतान यो मेकोपुकी नु जाक्माक्त। अय्युब २:१; उत्पत्ती ६:२; १इतिहास २१:१ 7 मिनु परमप्रभु यावेमी सैतान कली “गे ते रे जाक्डे?” दे हिल्लो पवा बाक्त। मिनु सैतानमी परमप्रभु यावे कली “रागी डा एर ओंथ नेल्ल हिरशा जाक्ती” देंमाक्त। 8 मिनु परमप्रभु यावेमी सैतान कली “गे आं गेय पाइब अय्युब कली तवी? परमप्रभु कली मान पा हिंब, मरिम्शो पतीक रे डोन बाक्ब, रागीम मेको खोदेशो पा पाप मपाइब नु ब्रेम्शो मुर अरु सुइ मबाक्नीम” दे मदा बाक्त। 9 मिनु सैतानमी परमप्रभु यावे कली “मार, अय्युब परमप्रभु कली मो मान पा हिंशो बाक्बा डा? भजन संग्रह ७३:१३ 10 गे मेको कली मेको आ खिं, आ शोंप नु आ मारेइ मारेइ नेल्ल एर ओंथ तेइ तेइ रे थरपु हिरशा, मवोइश्शो बाक्नीनी डा? मेको आ गेय नेल्लेम गे आसीक गेशा वोइश्शो बाक्नीनी। मेको आ क्यारश भेडा नु बी ब्यफ शुश दुम्शो बाक्नीम। 11 तन्न गे इन गुइ दिंशा, मेको आ मारेइ मारेइ थिने। मिनु मेकोमी इन कली इन डोंइतीन सराप चीले पाइब” देंमाक्त। 12 मिनु परमप्रभु यावेम

सैतान कली “दुम्ब मोदेशोन दुम्ब। मेको के मार मार बाक्मे, मेको नेल्ल इ मिम्शो पावो। तन्न अय्युब कली चहिं मारेइ मपतो” दे मदा बाक्त। मिनु सैतान परमप्रभु यावे आ डोंइती रे गाक्माक्त। ब्यवस्था ८:२

अय्युब आ मारेइ मारेइ खतम दुम्शो

13 मिनु काबु अय्युब आ तमी तौ आन ठेयब लोकब आ खिंम, जन जन, तून तून बाक्मा बाक्त। 14 मेको नाक्ती लोव्र कुरब मुर का दोरशा जाक्शा अय्युब कली “ब्यफपुकी वाक्ना वाक्न बाक्मानु नु गधापुकी मेको आन नेक्था जोना जोन बाक्मानु, 15 साबा रागी डा मुरपुकी जाक्शा, गोठला आन कली लडाइ तोशा साइक्तेक्म। मिनु मेको मारेइ मारेइ योल्ताक्म। इन कली एको लोव्र शोव्रचा कली गो का ला ब्रोंइती” देंमाक्त। 16 मेकोमी मेको लोव्र पन पना अर्को लोव्र कुरब मुर का जाक्शा, मेकोमी “परमप्रभु आ मी सरीड रे दोक्शा, भेडा नु गोठला नेल्ल आन कली नेक्तु। इन कली एको लोव्र शोव्रचा कली गो का ला ब्रोंइती” देंमाक्त। भजन संग्रह ७८:४८ 17 मिनु मेकोम लोव्र पन पना, अर्को लोव्र कुरब मुर का जाक्शा “हुल सां कल्दी रागी डा मुर जाक्शा, गोठला आन कली तरवारम क्योरशा दलओंठ नेल्ल योल्ताक्म। इन कली एको लोव्र शोव्रचा कली गो का ला ब्रोंइती” देंमाक्त। येरमीया ५१:२४ 18 मेकोम लोव्र पन पना अर्को यो दोरशा जाक्शा “इन तमी तौ आन ठेयब लोकब आ खिंम जना जन तूना तून बाक्तेक्म। 19 मेना गोरशो रागी रे फश गिवार जाक्शा, खिं आ एर ओंथ नेल्ल रे थोक्ताक्व। मिनु मेको खिं मेको आन तार ब्रेशशा, मेको नेल्ल आन कली चिप्शा साइक्तु। इन कली एको लोव्र शोव्रचा कली गो का ला ब्रोंइती” देंमाक्त।

20 मिनु अय्युब बोक्शा आ वा खाक्गा बाक्त। आ चां प्रेक्गा बाक्त। मिनु खुम्की पा बाप्शा, 21 “गो आं ममा आ कोव्रज रे शिन्ना यिती। शिन्ना लेशशा लाइनुड। गो ते रे श्येत्थी जाक्डा, मेकेन श्येत्थी लेशशा, लाइनुड। मेको नेल्ल परमप्रभु यावेमी गेती। मिनु मेकोमी नेल्ल लेशशा लाइक्तु। परमप्रभु यावे आ नें ठेयब बाक्ल” देंमाक्त। उपदेसक ५:१४; १तिमोथी ६:७; याकूब ५:११

22 मेको नेल्लेमी अय्युबमी पाप मपवा बाक्त। परमप्रभु कली दोस मगेवा बाक्त।

2

निक्शी खेयप नाक्शो

1 मिनु काबु स्वर्गम बाक्ब परमप्रभु आ मुरपुकी परमप्रभु यावे आ डोंइती जाक्मानु, सैतान यो मेकोपुकी नु परमप्रभु यावे आ डोंइती जाक्माक्त। अय्युब १:६ 2 मिनु परमप्रभु यावेम सैतान कली “गे ते रे जाक्डे?” दे हिल्लो पवा बाक्त। मिनु मेकोमी परमप्रभु यावे कली “रागी डा एर ओंथ नेल्ल हिरशा जाक्ती” देंमाक्त। 3 मिनु परमप्रभु यावेम सैतान कली “गे आं गेय पाइब अय्युब कली तवी? रागीमी मेको खोदेशो अरु सुइ मबाक्नीम। मेको दोस मताइब, गेना हना यो ठीक पाइब नु आं कली मान पा हिंम बाक्ब। मेकोम मरिम्शो मपाइब। गे मेको कली श्येत गेचा कली आं कली क्युक्ती, हना यो मुल सम्म मेको आ थमा सुइक्तीके ग्येत्थ लुकच मदुम्शो बाक्ब” दे मदा बाक्त। 4 मिनु सैतानम परमप्रभु यावे कली “कुशुल आ पा डा कुशुल। मुरुम ब्रोंइचा कली आ मारेइ मारेइ मगेबा डा? 5 इन गुइ दिंशा, मेको आ रुश नु श्ये थिने। मिनु मेकोम इन डोंइतीन इन कली सराप चीले पाइब” दे लोव्र लेत्ता बाक्त। 6 मिनु परमप्रभु यावेम सैतान कली “लो मो हना, मेको कली इ मिम्शो पावो। तन्न मेको कली मसतो” देंमाक्त।

7 मिनु सैतान परमप्रभु यावे आ डोंइती रे गाक्माक्त। मेकोमी अय्युब आ पिया रे खोइल सम्म गार मुपदा बाक्त। ब्यवस्था २८:२७ 8 मिनु अय्युबम ब्वाम्सीचा कली गर आ गम्टे का शेशा पुलु तार निस्से बाक्त।

9 मिनु मेको आ मीशेमी मेको कली “मार, गे मुल सम्म थमा सुइक्चा मप्रोंइनीनी? परमप्रभु कली सराप चीले पा बेक्कीन” दे मदा बाक्त। 10 तन्न अय्युबमी “गे मूर्ख मीश मुर खोदेशो पा लोव्र पाप्तीवी। परमप्रभु आ गेशो रिम्शो चहिं ताक्शा, मरिम्शो चहिं मताक्चा डा?” दे मदा बाक्त। मेको लोव्र नेल्लेम अय्युबमी मारेइ पाप मपवा बाक्त। अय्युब १:२२

अय्युब आ वारच सां जाक्शो

11 मिनु अय्युब आ वारच सांम मेको कली मोदेशो श्येत दुम्शो लोव्र नेन्मे बाक्त। मेको आन नें तेमान डा एलीफाज, शुआह डा बिल्दाद नु नामा डा सोफार बाक्मा बाक्त। मिनु मेकोपुकीम मेको कली लेम्चा कली नु मेको आ थुं नाइक्पाइक्चा कली गारशा आन खिं प्रोंइशा अय्युब आ खिंम जाक्मा बाक्त। उत्पत्ती ३६:१५; येरमीया ४९:७; उत्पत्ती २५:२; यहोसु १५:४१ 12 मिनु मेकोपुकीम अय्युब कली डोन रे तशा, अय्युब कली मतुइक्तमे बाक्त। मिनु

मेकोपुकीम अय्युब कली तुइक्तमे नोले वाइ ब्रेशशा डाक्शा, श्येत लाक्शा आन वा खाक्शा, आन पियाम फुरक फुंडसमा बाक्त। 13 मिनु मेकोपुकी ७ नाक्ती नु ७ नाक्दो मारेइ लोव्र मपथु, मेको आ नेक्था खपीम निस्समा बाक्त। मारदे हना मेकोपुकीम अय्युब कली शुश श्येत दुम्शो तामे बाक्त।

3

अय्युबम लोव्र पशो

1 मिनु नोले अय्युबम आ जरमेशो नाक्ती कली सराप चीले पवा बाक्त। येरमीया २०:१४-१८ 2 मिनु अय्युबम 3 “आं जरमेशो नाक्त खतम दुम्ल। ‘वोंइश आल का जोल्शो बाक्ब’ देशो नाक्दो खतम दुम्ल। 4 मेको नाक्त छिडछिड दुम्ल। परमप्रभुम मेको कली ममिम्तल। मेको नाक्ती हाम्सो मदुम्ल। 5 मेको नाक्ती कली क्येर छिडछिडम सुमल। मेको गोस्सुम सुमल। मेको आ छिडछिड हिंचा डा दुम्ल। 6 मेको नाक्दो कली थम छिडछिडम सुमल। बर्स डा नाक्त आन दातेम मेको ग्येरचा मतवल। महिना डा हिकतीकेम मेको नाक्ती हिकचा मपुंडसेक्ल। 7 मेको नाक्दो आल मथीब दुम्ल। मेको नाक्दोमी ग्येरशो सेंदा मनेसेक्ल। 8 नाक्त कली सराप चीले पाइब मुरुम, मेको नाक्ती कली सराप चीले पवल। मेकोम लेव्याथन कली पोक्चा कली ठीक दुम्शो बाक्ब। 9 मेको आ सुनी डा सोरुल आ हाम्सो मतांडसेल। मेकोम नां सोव्रचा कली रिम्शो मोशा दुम्ल। नां दाप्शो गेनायो तचा मतवल। 10 मारदे हना मेकोम आं कली जरमेब ममा कली मतेक्गा। मिनु आं कली श्येत मजचा डा पा मखुइक्ती।

11 गो मारदे जरमेसी डा चोटीन मबेक्डा? गो मारदे कोव्रज रे गूडानु मबेक्डा? 12 मारदे आं कली वोइक्चा कली थुकु बाक्मे? मारदे आं कली तुंडचा कली दूध बाक्मे? 13 मो दुम्शो हना, गो सिक्सी पा गोल्लो बाक्ड वा। गो इप्शा नाइश्शा बाक्ड वा। २सामुएल १८:१८ 14 गो रागी डा पिपपुकी नु मेको आन कली अर्ती गेबपुकी नु बाक्ड वा। मेकोपुकीम आंम आन कली ब्रेशशो दरवारपुकी लेंशा सेल्नीम। 15 शुश सुन पाइश्शो तौ नु बाक्ड वा। मेकोपुकीम आन खिं चांदीम प्रिनीम। 16 मारदे गो शाम्शो आल खोदेशो पा थिम्चा मपुंडसीडा? मो दुम्शो हना गो हाम्सो गेनायो मतशो आल खोदेशो पा बाक्ड वा। 17 मेकेर परमप्रभु यावे आ अरेशो मटीबपुकीम ग्रांग्ये माग्ये पने मचाप्नीम। मेकेर दशो मुरपुकी नाइक्चा ताइनीम। 18 मेकेर चोक्शा वोइश्शोपुकी नाइक्चा ताइनीम। गेय पपाइक्ब आ सेंदा मनेसीब। 19 मेकेर ठेयब नु आइक्च नेल्ल बाक्नीम। वाइलीम वाइल यो आन होव्रप रे ब्रोंइशो बाक्नीम।

20 श्येत जाइब कली मारदे हाम्सो तचा गेशो बाक्बा? आन थुं लुकच लशो कली मारदे ब्रोंइचा गेशो बाक्बा? 21 मेकोमी बेक्चा कली रिम्शो बाक्ब। तन्न मेको मबेक्ब। मेकोमी थिम्शा वोइश्शो शोंप दोशा माल्लो क्येडा यो शुश माल्लब। प्रकाश ९:६ 22 मेकोपुकी तुरसुम जाक्दीम्मानु आन थुं नाइश्शा, शुश ग्येरसीनीम। 23 परमप्रभुम लां मताइब आन कली मारदे हाम्सो गेशो बाक्बा? मेको आन एर ओंथ नेल्ल रे थरपु हिरशो बाक्ब। अय्युब १९:८ 24 आं जचा थोव्रक आ पा डा हुकयी पतीके दुम्शो बाक्ब। आं हुकयी पशो ब्वाक्कु खोदेशो पा यीब। 25 गो मार मिम्शा हिंडा, मेकोमीन थित्ती। गो मार तशा शुश हिंडा, मेको आं तार जाक्त। 26 आं थुं मनाइसीब। गो सिक्सी पा मबाक्नुड। नाइक्चा मताइनुड। श्येत ला जाक्ब” देंमाक्त।

4

एलीफाजम लोव्र पशो

1 मिनु तेमान डा एलीफाजमी अय्युब कली 2 “मार, सुइमी गे नु लोव्र पचा माल्तु हना, इन थुं खाइक्पाइक्नीनी? तन्न सु मब्वाक्थु बाक्ने चाप्नीमी डा? 3 गे शुश मुर आन कली शेंताक्नी। गे मचाप्ब मुर आन कली बोल्यो सेल्तीनी। 4 दाइल पा गोल्लो आन कली इन लोव्रमी आन थुं बारपाइक्तीनी। मिनु गे खोइल मथेक्ब आन कली खोइल थेक्ब सेल्तीनी। 5 तन्न मुल इन तार मोदेशो श्येत जाक्मेनु, गे फाल्ने मचाप्ब दुम्शो बाक्नीनी। मेको श्येतमी इन कली थिवानु, इन थुं लुकच लशो बाक्ब। 6 मार इन परमप्रभु कली मान पा हिंतीकेम थमा मसुइक्नीनी? इन ठीक पतीकेमी आस मगेबा? 7 मारेइ दोस मताइब मुर खतम दुम्शो बाक्नीमी? मेको मिम्तीन। गेना हना यो रिम्शो पाइब मुर साइक्चा पुंडसीनीमी? 8 मरिम्शो पाइब नु ग्रांग्ये माग्ये पोक्ब आंम आन पशो ताइनीम। हितोपदेस २२:८ 9 परमप्रभु आ मुइश्शोम मेकोपुकी खतम दुम्नीम। मिनु मेको आ गाइश्शो आ मीम नेक्चा पुंडसीनीम। 10 गुप्स ग्रीमल, बोल्यो गुप्स डरर डरर पामेक्ल। मो हना यो ठिटा गुप्स आन खुइ जिक्चा पुंडसाक्म। 11 बोल्यो गुप्सपुकी सिखार ब्वचा मतथु नुप्नीम। मिनु छाउरी गुप्स आन चाइक्ब एर ओंथ ब्राइनीम।

12 आइक्च लोत्र का आं नोफाम नेंता। मिनु गो शिप शिप पा लोत्र पशो नेंता। 13 नाक्दो डोमु ततीके बाक्ब। मुर ठेयब निन्द्रा पशो बाक्नीम। अय्युब ३३:१५; उत्पत्ती १५:१२ 14 मोदुम्तीके गो शुश हिंशा खिंखि पाता। मिनु मेकोम आं पोक्च कली शुश खिंखि पपाइक्तु। 15 फश का आं डोंइती रे पा लत। मिनु आं रां डा चां बोक्तेक्म। 16 मेको दिक्शा बाक्त। तन्न मेको मार बाक्मे, गो मारेइ मतुइक्तु। आं डोंइती मार कका राप्त। नोले सिक्सी दुम्शा, सेंदा का गूत। 17 मेको सेंदामी 'मार बेक्शा लाइब मुर परमप्रभु आ डोंइती नेल्लेम ठीक पाइब दुम्ने चाप्बा डा? मुर आ कली सेल्ब क्येडा रिम्शो दुम्ने चाप्बा डा?' देंत। १राजा ८:४६; भजन संग्रह १४:३; हितोपदेस २०:९ 18 परमप्रभुम आ गेय पाइब आन कली थमा मसुइक्ब। मिनु आ स्वर्ग डा गेय पाइब आन कली दोस गेब। अय्युब १५:१५ 19 मिनु खप के खिंम बाक्ब मुर मेको आन क्येडा शुश दोस मताइनीमी डा? मुर आन जग फुरक बाक्ब। मेको तुम्ब खोदेशो पा दिप्शा साइक्चा पुंइसीनीम। 20 मेकोपुकी नाक्त काम साइक्चा पुंइसीनीम। सुइम मतुइक्थु बेक्नीम। 21 मेको आन ताम्बु डा डोरी गुंइशो बाक्ब। मेकोपुकी जोक्ब तुइक्ब मदुम्थु बेक्नीमी" देंमाक्त।

5

एलीफाज आ लोत्र

1 मिनु एलीफाजमी "मुल ब्रेशा कोत्रडीन। इन कली सुम लोत्र लेप्बाक्मा? गे सु कली 'वारच पाइय्यीनी' दे ब्रेत्नीनी? 2 गाइक्तीकेम मूर्ख आन कली साइक्ब। मिनु गेहे पतीकेम मारेइ मजोक्ब आन कली साइक्ब। 3 गो मूर्ख आन शाक्श थोक्शो तशो बाक्नुड। तन्न गो कालेमीन मेको आन खिं कली सराप चीले पाइक्ता। भजन संग्रह ३७:३५-३६ 4 मेको आन आल कोत्रब मुर मबाक्नीम। मेकोपुकी ठेयब लाप्चोम साइक्चा पुंइसीनीम। मेको आन कली प्रोंइब सुइ मबाक्ब। 5 शोत्रलु बेक्शोपुकीम मेको आन खुप्शो मारेइ मारेइ नेक्नीम। आन जचा थोत्रक चू आन दाते रे यो खुप्शा योल्नीम। तूतू दाक्शोपुकी मेको आन शोंप तशा वाल्नीम। 6 मारदे हना श्येत जतीके फुरक रे मजाक्ब। खप रे श्येत मग्रूब। 7 मुरपुकी श्येत जचा कली जरमेसीनीम। मेकोपुकी मी आ फिलीडगो खोदेशो पा जाम्नीम। 8 गो मेको नड हना, गो परमप्रभु कली मलु वा। आं पुंइशो लोत्र परमप्रभु कली देंड वा। 9 मेकोमी ठेयब, रुप्ने मचाप्चा डा नु छक लाक्चा डा गेय हिक्ने मचाप्चा डा पा पाइब। अय्युब ९:१० 10 मेकोम खप कली रेड यिपाइक्ब। मिनु रू कली ब्वाक्कु सोइक्ब। 11 मेकोम महिक्सीशो मुर आन कली ठेयब सेल्ब। मिनु रोंका पाइब आन कली लेंशा ग्येरपाइक्ब। भजन संग्रह ७५:८; लूका १:५२ 12 मेकोम मरिम्शो मिम्शा पाइब आन कली आन मिम्शो मदुम्पाइक्ब। मिनु मेकोपुकीम आन मिम्शो पने मचाप्नीम। 13 मेकोमी आंम कली जोक्ब तुइक्ब मिम्शा गेय पाइब कली आंम गेयमी मेको कली ग्याइक्पाइक्ब। मिनु आन मरिम्शो मिम्शो रीब पा खतम दुम्ब। १कोरिन्थी ३:१९ 14 मेको आन कली नाक्तीन छिडछिड दुम्ब। मिनु नाक्ती उइक्थ दुम्मेनु, मेकोपुकी नाक्दो खोदेशो पा सुल्शा गाक्नीम। यसैया ५९:९-१० 15 तन्न मेकोम मारेइ मथीब आन कली आन मरिम्शो लोत्र रे प्रोंइब। मिनु सक्ति पाइश्शो आन गुइ रे प्रोंइब। 16 मोपतीके प्रुडग आन आस बाक्ब। मिनु ठीक मपाइबपुकीमी आन शोत्र खेप्चा माल्नीम। 17 परमप्रभुमी ठीक सेल्चा पुंइसीशो मुर ग्येरसीशो बाक्नीम। मोपतीके नेल्ल क्येडा ठेयब सक्ति पाइश्शो आ शेंशो आइक्च ममिम्तीन। भजन संग्रह ९४:१२; हितोपदेस ३:११ 18 मारदे हना मेकोमी गार सेल्ब। मिनु मेकोमीन फ्रेंब। मेकोमी तुप्ब। मिनु मेकोमीन सापाइक्ब। ब्यवस्था ३२:३९; होसे ६:१ 19 मेकोमी इन कली ६ खेयप श्येत दुम्त हना यो, प्रोंइब। ७ खेयप डा श्येतमी इन कली मथीब। भजन संग्रह ३७:२४; हितोपदेस २४:१६ 20 मेकोमी अन्काल दुम्मेनु, इन कली बेक्चा रे प्रोंइब। मिनु लडाइ दुम्मेनु, तरवार रे प्रोंइब। 21 मेकोम इन कली शुक्शी पाइब रे प्रोंइब। मिनु खतम दुम्तीक नाक्त जाक्मेनु गे हिंचा ममाल्नीनी। 22 खतम दुम्तीके नु अन्काल जाक्मेनु, गे रिश्शा बाक्नीनी। मिनु गे ब्वाकी डा जन्तु आन क्येडा हिंचा ममाल्नीनी। 23 इन रूमी फुल्लु मबाक्नीम। मिनु ब्वाकी डा जन्तुपुकीम इन कली श्येत मगेनीम। यसैया ११:६-९; होसे २:२० 24 गे इन ताम्बु मारेइ मदुम्शो बाक्ब दे तुइश्शो बाक्नीनी। मिनु गे इन क्यारश भेडा कली हिक्शा कोत्रनीनु, का यो मजाम्शो बाक्नीम। 25 इन चच युइ शुश दुम्शो बाक्नीम। इन आल घांस खोदेशो पा शुश दुम्शो बाक्नीम। 26 गे खूशो दुम्शा बेक्नीनी। बाली नाली ओंइची ना खोदेशो पा, इन नाक्त जाक्ब। 27 गोपुकीम एको आन पर्बम हिल्लो हिक्सी पाइतक। मिनु नेल्ल थमा बाक्ब। मोपतीके एको नेनीन। मिनु तुइक्तीन" दे एलीफाजमी अय्युब कली मदा बाक्त।

6

अय्युबमी लोव्र लेशो

1 मिनु अय्युबमी 2 “आं सुर्ता नाक्ने चाप्शो हना नु आ शुश हिंचा डा श्येत नाक्शो हना, 3 मेको समुन्द्र डा बाल्वा आन क्येडा यो शुश हेल्शो दुम वा। मोपतीके आं लोव्र रिम्शो मबाक्म कों। 4 नेल्ल क्येडा ठेयब सक्ति पाइश्शो आ ब्राम आं कली ग्रुकशो बाक्नीम। आं सोक्तीम मेको आन बीख तूचा माल्ब। परमप्रभुमी आं कली हिंपाइश्शो बाक्ब। भजन संग्रह ३८:३ 5 ब्वाकी डा गधा घांस ब्ववानु, ग्रीबा डा? ब्यफ आ खोले जवानु, ग्रीबा डा? 6 मब्रोव्रशो जचा थोव्रक हिक्सी मसुप्थु जने चाम्सीबा? मार ब्वोफु आ बुश ब्रोव्रशो बाक्बा डा? 7 गो मेको जचा मदाक्नुड। आं कली काइ मब्रोव्रब।

8 गो आं पुंड्रशो तड हना, परमप्रभुम आं माल्शो गेशो हना, 9 आं कली खतम सेल वा। परमप्रभुमी आं कली साइय्यी वा। 10 मेको मोदेशो दुम्शो हना, आं थुं नाइस वा। मिनु शुश खाइश्शा यो ग्येरसीड वा। मारदे हना गो का ला परमप्रभु आ लोव्र मलाक्शो बाक्नुड। 11 गो आं रिम्शा बाक्तीक सक्ति बाक्बा डा? गो दोपा बेक्नुड। गो रिम्शा बाक्ने चाप्नुडा डा? 12 आं सक्ति फुल्लु खोदेशो बाक्बा डा? आं श्ये कांसा के बाक्बा डा? 13 थमा पा, गो आंम कली तिकशा वोइक्ने मचाप्नुड। आं सक्ति नेल्ल लत।

14 सुमी आन वारच कली शिशी मपाइनीमी, मेकोम नेल्ल क्येडा सक्ति पाइश्शो कली मान पा हिंचा थुम्शो बाक्नीम। 15 आं लोकबपुकी बारशा यीब खोला खोदेशो बाक्नीम। सोव्रशो खोला खोदेशो बाक्नीम। भजन संग्रह ३८:१२ 16 आन ब्वाक्कु मरिम्शो दुम्शा, फुं यशो खोदेशो पा जाम्ब। 17 मिनु नाप्शोमी मेको आ शाइक्तीक रे जाम्ब। 18 मिनु लां गाक्ब आन लां रे हिरना हिरन गाक्नीम। मिनु मेकोपुकी मुर मबाक्तीकेम गाक्शा, बेक्नीम। 19 तेमा डा लां गाक्बपुकीम तूचा कली मेको खोला डा ब्वाक्कु माल्तेक्म। साबा डा ग्याप्ब लेयबपुकीम मेको ब्वाक्कु तूचा कली आस पाप्तेक्म। अय्युब १:१५ 20 मेको आन आस सोव्रशो खोला तशा बेक्त। मेकेर जाक्दीश्शा आन थुं बेक्त। 21 मुल गे आं कली मोदेशो दुम्तीनी। गे आं खतम दुम्तीके तशा हिनीनी। 22 गो इन कली ‘आं कली कोसेली चाक्कीन’ देंडा डा? गो इन कली ‘इन शोप गेयीनी’ देंडा डा? 23 मिनु ‘आं कली आं जोरी सत्रु आन गुइ रे प्रोइयीनी’ देंडा डा? ‘आं कली दिप्ब आन गुइ रे प्रोइयीनी’ दे गो इन कली गेनायो मदेंड।

24 आं कली शेदीनी। मिनु गो सिक्सी पा नेंनुड। गो मार दूली पडा, आं कली रूप्पतीन। 25 थमा लोव्र बोल्यो बाक्नीमी। तन्न इन देशो लोव्र मार रिम्शो बाक्बा डा? 26 गे आं लोव्र रिम्शो सेल्चा माल्नीनी? गे थुं लुकच लशो मुर आ लोव्र फश बाक्ब, दे मिम्नीनी? 27 गेपुकीमी रोम रोइक्च आन पबर्म फेन्टे आप्नीनी। मिनु इन वारच आन पबर्म मार मार फाइक्नीनी।

28 मुल आं कली कोव्रडीन। गो इन कली जोल मपाइनुड। 29 गे खिं लेतीन। मिनु आं पबर्म अरु मरिम्शो मपने। लेतीन। मारदे हना गो ठीक पाइब बाक्नुड। 30 मार, आं लोव्रम मारेइ जोल बाक्बा? मार, आं लोव्रम रिम्शो नु मरिम्शो तिल्ले मचाप्बा डा?” दे अय्युबमी आ वारच कली लोव्र लेत्ता बाक्त।

7

अय्युबमी परमप्रभु नु लोव्र पशो

1 मिनु अय्युबमी “मुर रागीम बाक्मानु, शुश गेय पचा माल्नीम। मेको आन नाक्ती गेय पाइब आन नाक्त खोदेशो बाक्नीम। अय्युब १४:६ 2 मेको नाक्दो डा वांकु रिम्शो वाइलीम वाइल खोदेशो पा बाक्नीम। आ गेय पशो डा गाल्च ताक्चा कली रिम्शा बाक्शो खोदेशो बाक्नीम। 3 गो महिना नेल्ल मोशीन सोइक्ताक्डमी। नाक्दो कुस कुस श्येत जतीके आं भाग बाक्ब। 4 गो नाक्दो इप्चा कली गोल्लडानु, गेना नां सोव्रबा, दे मिम्नुड। तन्न नाक्दो शुश लाइश्शो दुम्ब। मिनु गो नां मसोव्रम सम्म एर ओंथ लोकसीशा बाक्नुड। 5 आं रां लुस्पुम ब्रीशा, फुरक लुम्सीशो बाक्ब। मिनु आं कुशुल जेशशा नेंने ग्रूशो बाक्ब। 6 आं नाक्त वा प्रोव्रब आन थूरी क्येडा यो रीब पा लाइनीम। मेको नेल्ल आस मपाइश्शो दुम्नीम। यसैया ३८:१२

7 आं ब्रोंइतीक नाक्ती का ले कीशो सोक्त खोदेशो बाक्नीम, दे मिम्तीन। गो लेंशा रिम्शो नाक्त तचा मताइनुड। 8 आं कली ताइबमी लेंशा गेनायो मताइब। गे आं कली कोव्रनीनु, गो लने थुम्शो बाक्नुड। 9 गोस्स ब्रशा जाम्शो खोदेशो पा बेक्शो मुर आन बाक्तीक उइ लाइबपुकी गेनायो लेशशा मजाक्नीम। 10 मेको आन खिंम लेशशा मजाक्नीम। मिनु मेको आन बाक्तीकेमी मेको आन कली मतुइक्नीम। अय्युब १०:२१; अय्युब १४:१२; भजन संग्रह १०३:१६

11 मोपतीके गो सिक्सी पा मबाक्नुड। गो आं थुं डा श्येतम लोव्र पाइनुड। गो आं लुकच लशो थुंम लोव्र पाइनुड। 12 मार, गो समुन्द्र नडा? गो समुन्द्र डा ठेयब जन्तु नडा? गे मारदे आं कली खाल पाइब वोइक्नीनी? 13 गो आं ब्राख्येम गोलशा, आं थुं नाइक्ब, दे मिम्नुड। इण्डानु आं श्येत प्रेनुड, दे मिम्नुड। 14 तन्न मेना गे आं कली आं डोमुम हिंपाइक्नीनी। मिनु कौंइतीक कौंइशा आं कली हिंच कौंइनीनी। 15 मोपतीके गो मेको रांम ब्रौंइचा क्येडा सोक्त मकीथु बेक्चा दाक्नुड। 16 गो ब्रौंइशा बाक्चा मदाक्नुड। गो गेना हना यो ब्रौंइशा बाक्चा मदाक्नुड। गे आं कली प्रौंइयीनी। मारदे हना आं ब्रौंइशो का ले कीशो सोक्त खोदेशो बाक्ब। 17 मार मार नमी डा? गे मेको आन पर्वम शुश मिम्नीनी? मारदे गे मेको आन कली शुश दाक्नीनी। भजन संग्रह ८:४; भजन संग्रह १४४:३ 18 गे मेको आन कली सुनी कुस कुस कोव्रनीनी। गे मेको आन कली गेना हना यो नाक्शा कोव्रनीनी 19 गिश सम्म आं रे इन मिक्च हिरनीनी? शेप्चुक मदाक्गु सम्म आं कली प्रौंइयीनी। 20 गो पाप पाता हना यो, इन कली मार दुम्बा डा, गे मार आ थुं नाक्शा कोव्रनीनी? गे मारदे आं कली खेदा पस डा पस बाक्नीनी। गे मारदे आं कली तशा ब्रीनीनी? 21 गे मारदे आं हेंथे पशो माफ मगेयीनी? मारदे आं मरिम्शो पशो मक्याम्नीनी? मुल गो बेक्नुड। मिनु गे आं कली माल्तीनी हना यो, मथित्नीनी” दे अय्युबमी परमप्रभु यावे कली देंमाक्त।

8

बिल्दाद आ डौंइती डा लोव्र

1 मिनु शुआह डा बिल्दादमी लोव्र लेशशा 2 “गे गेना सम्म ओदेशो लोव्र पस डा पस बाक्नीनी। इन लोव्र ठेयब फश ला बाक्नीम। 3 मार, परमप्रभुम दूली निसाफ पाइबा डा? मार, नेल्ल क्येडा सक्ति पाइशो परमप्रभुम मार ठीक बाक्बा, मेको मतुइक्बा डा? अय्युब ३४:१० 4 इन तमी तौपुकीम मेको आ पर्वम पाप पाम्तेक्म। मोपतीके मेकोम मेको आन कली आन हेंथे पशो मोइक्ताक्व। अय्युब १:४-५ 5 गे नेल्ल क्येडा सक्ति पाइशो परमप्रभु कली माल्तीनी नु मेको कली पुंइतीनी हना, 6 गे ग्रांग्रा मदिचा डा नु गेना हना यो रिम्शो पाइब बाक्तीनी हना, मेको थमा पा इन पोन बोक्ब। मिनु मेकोम इन खिं लेशा, डौंइती डा खोदेशो पा गेब। भजन संग्रह ३५:२३ 7 मिनु इन डौंइती डा बाक्शो क्येडा, इन नोले डा बाक्शो शौंप शुश दुम्ब। अय्युब ४२:१०

8 डौंइती डा पाला डा मार आन कली हिल्लो पने। मिनु मेको आन किकी पिपी आन मिम्शा पशो, मिम्तीन। 9 मारदे हना गोपुकी सिनाक्त ला जरमेशो बाक्नीकी। मिनु गो मारेइ मतुइक्ब बाक्नीकी। रागीम आंइ नाक्ती वांकु खोदेशो ला बाक्ब। 10 मेको किकी पिपीम इन कली मशेंनीमी? इन कली लोव्र मपाइनीमी? इन कली आन रुपशो लोव्र मशेंनीमी? 11 ब्वाक्कु मबाक्तीकेम कागज सेल्टीक बोट मवानीम। ब्वाक्कु मबाक्तीकेम बुदी मीलु लाइशो मदुम्नीम। 12 मेको कोल्ना कोल्न बाक्मानु, रिक्ची मजाक्थु, घांस क्येडा यो रीब पा सोल सुल बेक्नीमी। 13 परमप्रभु कली प्रेंबपुकी यो मोदेशोन दुम्नीम। परमप्रभु कली मटीब मार आन आस यो मोपा जाम्शा लाइब। अय्युब ११:२०; हितोपदेस १०:२८ 14 मेको आन आंमा कली थमा सुइक्तीक थम आइक्च श्येले खोदेशो बाक्ब। मेको आन आस माखा आ जाल खोदेशो बाक्ब। 15 मेको आ जालम रक एशशा बाक्त हना, मेको कली मतिकब। मेको कली ग्याइक्ताक्व हना यो, मेको ब्रेप्ब। 16 परमप्रभु यावे आ अरेशो मटीबपुकी नां तशो घांस सुवा खोदेशो पा वानीम। मिनु मेको आन शाक्श तेइ तेइ ब्रशा लाइनीम। 17 मेको आन शाक्शम फुल्लु आन कली रुक्नीम। मिनु मेको फुल्लु आन दातेम बाक्नीम। 18 मेको आन बाक्तीक रे खतम दुम्मानु, आन बाक्तीकेम मेको आन कली ‘गो इन कली गेनायो मतशो नड’ देंब। 19 मेको आन ग्येरशा ब्रौंइतीक नाक्ती मोदेशो बाक्नीम। मिनु अर्को तेइ तेइ खप रे वाशा ग्रीनीम।

20 नेनीन, परमप्रभुमी दोस मताइब मार कली मतिल्ब। मेकोम मरिम्शो गेय पाइब मार आन कली वारच मपाइब। 21 मो हना यो, मेकोमी इन कली रिप्पाइक्ब। ग्येरशा ठेयब सेंदाम लोव्र पपाइक्ब। 22 मिनु परमप्रभुमी इन कली काइ मदाक्ब आन मुने दोक्पाइक्ब। मिनु परमप्रभु यावे आ अरेशो मटीब आन ताम्बु जाम्शा लाइनीम” दे बिल्दादमी अय्युब कली देंमाक्त।

9

अय्युबमी लोव्र लेशशा

1 मिनु अय्युबमी लोव्र लेशशा 2 “गो एको थमा बाक्ब, दे तुइक्नुड। तन्न परमप्रभु आ डौंइती बेक्शा लाइब मार दोपा ठीक बाक्ने चाप्बा डा? अय्युब ४०:३-५; भजन संग्रह १४३:२ 3 सुइमी मेको नु लोव्र जिपाइक्चा मिम्ताक्व हना, मेकोम हजार का लोव्रम लोव्र का यो लेन्ने मचाप्ब। भजन संग्रह १९:१३ 4 मेको जोक्ब तुइक्ब नु सक्ति पाइशो बाक्ब।

मेको कली मटिथु, सु ग्येत्थ लने चाप्बा डा? 5 मेकोम डांडा आन कली आन मतुइक्थुन याक्ब। मिनु गाइश्शा, मेको आन कली लोक्ब। 6 मेकोम रागी कली आ बाक्तीक रे हिक्ब। मिनु मेको आ थाम नेल्ल खिंखि पाइनीम। 7 मेकोम नां कली 'मदपो' दे अरेब। मिनु सोरुल आन छेडछेड साम्ब। 8 मेको आ कामीन सरीड प्राक्शो बाक्ब। मेको समुन्द्र आ छाल तार गाक्ब। 9 मेकोमी सप्तबर्सी, मिर्गसीरा नु किरकिटी सोरुल नु दक्खिन डा सोरुल आन हुल सेल्लु। अय्युब ३८:३१; आमोस ५:८ 10 मेकोम ठेयब नु मरुप्पा डा गेय पाइब। मिनु हिक्ने मचाप्पा डा छक लाक्का डा गेय पाइब। अय्युब ५:९ 11 मेको आं बाक्तीक रे पा लाइब। गो मेको कली मताइनुड। मेको आ लां खोइश्शा गाक्मेनु, गो मतुइक्नुड। 12 मेकोम रोइक्ताक्व हना, मेको कली सुम तेक्ने चाप्बा डा? सुमी मेको कली 'गे मार पनी' दे हिल्लो पने चाप्बा डा?

13 परमप्रभुम आ गाइक्का मलेप्ब। राहाब माइश्शो समुन्द्र डा ठेयब जन्तु कली वारच पाइबपुकी मेको आ खोइलीम बाप्नीम। अय्युब २६:१२; भजन संग्रह ८९:११ 14 मोदेशो बाक्त हना, गो मेको कली दोपा लोव लेन्ने चाप्नुडा डा? गो मार लोव देनुडा डा? 15 गो दोस मतशो बाक्ती हना यो, मेको कली लोव लेन्ने मचाप्नुड। आं कली दोस गेब कली गो 'शिशो पाइय्यीनी' दे पुंइने ला चाप्नुड। 16 गो मेको कली ब्रेत्तुनु, लोव लेत्ताक्यी हना यो, मेकोम आं लोव नेंतु, दे थमा मसुइक्नुड। 17 मारदे हना मेकोमी आं कली फश गिवारम खतम सेल्ब। मोशान आं गार शुश सेल्ब। 18 मेकोम आं कली लेंशा सोक्त कीचा यो मगेब। श्येत जपाइश्शा आं थुं लुक्च लपाइक्ब। 19 एको सक्ति पाइश्शो लोव बाक्त हना, मेको आं क्येडा बोल्यो बाक्ब। एको ठीक पतीके लोव बाक्त हना, मेको कली सुम सेन्ने चाप्बा डा? अय्युब ९:३३ 20 गो दोस मताइब बाक्ती हना यो, आं लोवमीन आं कली दोस ताइब सेल्ब। गो दोस मपाइश्शो बाक्ती हना यो, मेकोमी 'गे दोस ताइब बाक्नेवे' दे चिन्ड कोंइब। 21 गो दोस मताइब बाक्नुड। मो हना यो गो आं पर्बम मारेइ मतुइक्नुड। गो ब्रोंइचा मदाक्नुड। 22 लोव नेल्ल कान बाक्ब। मोपतीके गो मेकोम दोस मताइब नु आ अरेशो मटीब निम्फा आस कली खतम सेल्ब, देनुड। अय्युब ८:२०; उपदेसक ९:२-३ 23 हिंचा डा श्येतमी कालेमीन मुर कली साइक्ब। मेकोम दोस मताइब आन हिंचा डा श्येत जशो आ पर्बम शुक्शी पाइब। 24 रागी परमप्रभु यावे आ अरेशो मटीब आन गुइमी गेशो बाक्ब। मेकोम निसाफ पाइब आन मिक्च सिल्ब। मेकोम मो मपाप्तु हना, सुम पाइबा डा? 25 आं ब्रोंइतीक नाक्त दोरब आन क्येडा यो शुश दोरशो बाक्ब। मारेइ ग्येरतीक मतथु, मेको नुम्ना नुम्न लाइनीम। 26 मेको बुदी मीलु के सेल्शो डोंगा खोदेशो पा, रीब पा शाइश्शा लाइनीम। ब्वारदे आन सिखार तार जुक्शो खोदेशो पा लाइनीम। 27 गो आं श्येत प्रेंनुड। गो ग्येरशो कुल कोंइशा रिन्नुड, देंती हना यो, 28 गो आं श्येत जचा माल्शो तशा हिंनुड। मारदे हना गे आं कली दोस मताइब मदेनीनी, दे तुइक्नुड। 29 गो दोस ताइब दुम्ने थुम्शो बाक्ती हना, मोशान मारदे श्येत पाइनुडा? 30 गो साबुनम चिक्साक्यी हना यो, आं गुइ थम सफा पा चिक्साक्यी हना यो, येरमीया २:२२ 31 गे आं कली हिलोमीन ब्वारनीनी। मिनु आं वाम यो आं कली ग्रान्रा दिप्ब। 32 मेको आं खोदेशो बेक्शा लाइब मुर ममाइ। मिनु गो मेको कली लोव लेन्ने मचाप्नुड। मोदेशो दुम हना, निसाफ पाइब आन डोंइती लोव पने चबु वा। उपदेसक ६:१० 33 आंस दातेम गारपाइक्ब सुइ मबाक्म। आंस दातेम गुइ वोइक्ब सुइ मबाक्म। 34 परमप्रभुम आ कोक्के आं ची रे याक्त हना, आं कली महिंपद हना, 35 गो मेको नु महिंथु लोव पड वा। तन्न आ मिम्शो दुम्मेनु, गो तुइक्नुड" दे अय्युबमी शुआह डा बिल्दाद कली देमाक्त।

10

अय्युब आ थुं लुक्च लशो

1 मिनु अय्युबम "गो ब्रोंइचा मदाक्नुड। गो आं श्येत आ पर्बम लोव पस डा पस बाक्नुड। गो आं कशो थुंमी लोव पाइनुड। 2 गो परमप्रभु कली 'आं कली सजाइ मगेयीनी' देनुड। आं कली मारदे निसाफ पाइनीनी, मेको शेंदीनी। 3 गे मुर आन कली दिप्शा, ग्येरनीनी? इन सेल्शो आन कली ममिन्चा रिम्शो लाक्नीनी? इन अरेशो लोव मटीबमी मरिम्शो पशो दाक्नीनी? 4 इन मिक्च मुर आन मिक्च खोदेशो बाक्बा? गे मुर आन कोवशो खोदेशो पा कोवनीनी? १सामुएल १६:७ 5 इन नाक्ती बेक्शा लाइब मुर आन नाक्त खोदेशो बाक्नीमी? इन ब्रोंइतीक बर्स मुर आन बर्स खोदेशो बाक्नीमी? 6 गे आं मरिम्शो पशो माल्शा, आं पाप थिश्शा गुंइनीनी? 7 गो दोस मताइब बाक्नुड, दे गे तुइक्ताक्नी हना यो, इन गुइ रे आं कली सुइम प्रोंइने मचाप्ब, दे यो तुइक्नीनी। 8 डोंइती गे आं कली सेल्लतीनी। मुल आं कली खतम पोक्नीनी? भजन संग्रह १३९:१४ 9 गे आं कली खप के सेल्लतीनी। मेको मिम्तीन। मिनु मुल फुरक सेल्लतीनी? अय्युब ३३:६; उत्पत्ती २:७; उत्पत्ती ३:१९ 10 गे आं कली दूध मोइश्शो खोदेशो पा आं ममा आ कोवजीम वोइक्तीनी। मोदेशो

पा आं रां सेलतीनी? 11 गे आं कली श्ये नु कुशुलम ग्योम्शा, रुश नु नाडीम बोइक्ताक्यीनी। 12 गे आं कली ब्रोंइतीक सोक्त गेतीनी। मिनु गेना हना यो दाक्ताकनी। मिनु आं कली ब्रोंइचा गेचा कली कोव्रशा वोइक्तीनी। 13 आं कली श्येत गेचा कली डोंइती रे इन थुंम खुइश्शा वोइक्तीनी। मेको इन थुंम बाक्त, दे तुइक्ताकड। 14 गो पाप पाता हना, गे आं कली कोव्रना कोव्रन बाक्तीनी। मिनु आं मरिम्शो पशो मक्याम्नीनी। 15 गो थमान इन अरेशो मटीब बाक्ती हना, आं कली हिंचा डा दुम्ल। गो ठीक पाइब बाक्ती हना यो, आं पिया पोक्ने मचाप्नुड। मारदे हना गो आं मुनेम ब्रीशा, आं श्येत तना तन बाक्नुड। 16 गो ठेयब लेशो बाक्ती हना, गे गुप्स कली सिखार ग्यारशो खोदेशो पा आं कली माल्यीनी वा। मिनु लेशा इन ठेयब सक्तिम श्येत गेयीनी वा। यसैया ३८:१३ 17 गे आं मरिम्शो पशो आ पबर्म नक सांकछी चाक्तीनी। मिनु आं पबर्म इन गाइक्तीक तेम्नीनी। आं पबर्म इन हुल हुल लडाइ पाइबपुकी चाक्तीनी। 18 गे मारदे आं कली जरमेपपाइक्ती? आं कली सुइम मतथु, बेक्शो नड हना, रिम्शो दुम वा। अय्युब ३:११; येरमीया २०:१४ 19 गो जरमेसीन मजरमेशो नड हना, शाम्सीशा तुरसुम जाक्दीशो नड हना, दुम वा। 20 आं ब्रोंइतीक नाक्ती शुश मबाक्तीम। आं कली आं कान प्रोंइयीनी। मिनु आं थुं इच्का नांइसीबा कों? 21 लेशा मजाक्तीक रागीम लचा क्येडा डोंइती, थम छिडछिड नु क्येर नाक्दो 22 नु ग्रांग्ये माग्ये दुम्तीकेम लचा क्येडा डोंइती आं कली आं कान प्रोंइयीनी। मेकेर डा छेडछेड यो छिडछिड दुम्त” दे अय्युबम परमप्रभु कली देंमाक्त। अय्युब ७:१०

11

सोफारमी अय्युब कली दोस गेशो

1 मिनु नामा डा सोफारमी 2 “मार, गो एको इश्का लोव्र आ पबर्म लोव्र मलेत्नुडा? मार एको लोव्रमाते आ लोव्र नेल्ल ठीक बाक्बा डा? 3 इन गेनायो मनुप्तीक लोव्रम मुर आन कली सिक्सी पपाइक्बा? गे शुक्शी पनीनु, इन कली मुने मदुम्बा? 4 गे ‘आं शेंशो ठीक बाक्ब। परमप्रभु, आ डोंइती गो ग्रांग्रा मदिशो बाक्ती’ देंनीनी। अय्युब ९:२१; अय्युब १०:७ 5 परमप्रभु ब्वाक्ल। मिनु इन कली लोव्र पवल दे आस पाइनुड। 6 मिनु मेकोमी खुइश्शो तुइक्तीक इन कली शेंदल। मारदे हना तुइक्तीक शुश बाक्तीम। परमप्रभुम इन मरिम्शो पशो आ पा डा तचा माल्शो सजाइ मगेव। इच्का ला गेप्नु। 7 मार, गे परमप्रभु आ खुइश्शोम मिम्शो तुइक्ने चाप्नीनी? गे नेल्ल क्येडा ठेयब सक्ति पाइश्शोम मार पने चाप्बा, मेको तुइक्ने चाप्नीनी? 8 मेको सरीड क्येडा यो इर बाक्ब। गे मार पने चाप्नीनी डा? मेको बेक्शो मुर आन बाक्तीक क्येडा यो लुक्च लशो बाक्ब। गे मार तुइक्ने चाप्नीनी डा? 9 मेको पुक्शोनु रागी क्येडा यो लाइश्शो बाक्ब। मिनु समुन्द्र क्येडा यो ब्रेम्शो बाक्ब। 10 मेको जाक्शा, मुर आन कली जेल्खानम चोक्शा, मुर आन कली निसाफ पचा कली खुप्ताक्व हना, सुम मेको कली तेक्ने चाप्बा डा? 11 सु सु शोर गाक्शो मुर बाक्मा, मेको परमप्रभुमी तुइक्ब। मेकोमी मरिम्शो पाइब आन कली तुइक्ब। 12 मूर्ख मुर रुप्व दुम्ने मचाप्ब। मेको मो दुम्त हना, ब्वाकी डा गधा आ चाइक्ब मुर दुम्शा जरमेशो खोदेशो दुम्ब। 13 मो हना यो गे इन थुं परमप्रभु गे हिरनीनी, गे इन गुइ पोक्शा, मेको कली पुंइनीनी। 14 मिनु गे मरिम्शो पाइन बाक्तीनी हना, मेको कली थुमीन। मिनु परमप्रभु यावे आ अरेशो मटितीक इन ताम्बुम बाक्चा मगेन। 15 नोले गे थमा पा मारेइ दोस मतथु इन पिया पोक्नीनी। रिम्शो पा महिंथु बाक्तीनी। 16 मिनु गे इन श्येत प्रेंनीनी। गे मेको कली शाइश्शा लशो ब्वाक्कु खोदेशो मिम्नीनी। 17 इन ब्रोंइतीक नाक्त डा छेडछेड खोदेशो दुम्ब। मिनु इन श्येत डा छिडछिड सुनी डा छेडछेड खोदेशो दुम्ब। 18 गे थमा सुइक्तीनी। मारदे हना मेकेर आस बाक्ब। गे कोव्रचा पुंइसीशा, महिंथु रिम्शो पा बाक्तीनी। भजन संग्रह ४:९ 19 गे सुइ आन क्येडा महिंथु इप्नीनी। मिनु शुश मुरुम इन शिशी तचा कली आस पाइनीम। 20 तन्न परमप्रभु यावे आ अरेशो मटीब आन मिक्च मताइनीम। मेको आन प्रोक्तीक लां देक्ब। मिनु मेको आन आस बेक्चा बाक्ब” दे सोफारम अय्युब कली देंमाक्त। अय्युब ८:१४

12

अय्युबम सोफार कली लोव्र पशो

1 मिनु अय्युबम लोव्र लेशा 2 “गेपुकी थमा पा हिक्सीशो मुर बाक्तीनी। मिनु तुइक्तीके गेपुकी नु बेक्शा लाइब। गो मेको तुइक्नुड। 3 तन्न इन खोदेशो रुप्तीक थुं आं के यो बाक्ब। गो यो इन खोदेशो जोक्ब तुइक्ब नड। मेको मुर नेल्लेम तुइक्तीम। 4 आं वारचपुकीमी आं पबर्म रिन्तीम। गो परमप्रभु कली पुंइता। मिनु मेकोमी लोव्र लेत्ताक्यी। गो

ठीक पाइब दोस मताइब मुर बाक्ती हना यो, आं पबर्म रिन्नीम। 5 श्येत मजाइब, रिम्शो पा बाक्ब मुरपुकीम हिंचा डा श्येत जाइब आन कली तशा ग्रांग्रा दीनीम। गे श्येत जशा ग्रेक्चा चिक्शो कली श्येत तेम्नीनी। 6 मिनु रोइक्ब आन ताम्बुम थुं नाइशशा बाक्नीम। मिनु परमप्रभु कली गाइक्पाइक्बपुकी रिम्शो पा ब्रोंइशा बाक्नीम। मेकोपुकीम आंम सक्ति कली ठेयब सेल्नीम। हबकुक् १:११

7 मुल ब्वाकी डा जन्तु आन कली हिल्लो पने। मेकोपुकीम इन कली शेनीम। सरीडम बेरब चिक्ब आन कली हिल्लो पने। मेकोपुकीम इन कली देंनीम। 8 गे खप कली हिल्लो पने। मेकोमी इन कली शेंब। समुन्द्र डा डांइपुकीम इन कली शेनीम। 9 परमप्रभु यावेम मेको नेल्ल पशो बाक्ब, दे सुम मतुइक्नीमी डा? 10 ब्रोंइशा बाक्ब नेल्ल आन ब्रोंइतीक नु मुर नेल्ल आन ब्रोंइतीक सोक्त मेको आ गुइमी बाक्ब। गन्ती १६:२२; प्रेरित १७:२८ 11 जचा थोव्रक ब्रोव्रशो नु मब्रोव्रशो लेंम तुइशशो खोदेशो पा, पशो लोव्र रिम्शो नु मरिम्शो नोफाम मनेंबा डा? 12 खाल्पा आन दातेम तुइक्तीक बाक्ब। खूशो आन दातेमी रुप्तीक बाक्ब। अय्युब ८:८

13 मिनु परमप्रभु नु तुइक्तीक नु सक्ति बाक्शो बाक्ब। मेको नु अर्ती गेतीके नु रुप्तीक थुं बाक्शो बाक्ब। 14 मेकोमी प्रेतु हना, मेको लेंशा सेल्ने मचाप्नीम। मेकोमी मुर कली जेल्खानम चोक्तु हना, सुइमी मेको कली गुंइने मचाप्नीम। प्रकाश ३:७ 15 मेकोमी ब्वाक्कु तेक्तु हना, रू नेल्ल सोव्रनीम। मेकोमी ब्वाक्कु प्रोंइतु हना, रागी खतम पोक्ब। १राजा १७:१,७; उत्पत्ती ७:१९-२३ 16 सक्ति नु तुइक्तीक परमप्रभु नु बाक्ब। दूली पाइब नु दूली पपाइक्ब, निम्फा आ केन बाक्नीस। १राजा १२:२८-३०; २राजा १९:१०-३७ 17 मेकोमी अर्ती गेब आन कली मुने दोक्पाइक्ब। मिनु निसाफ पाइब आन कली मूर्ख सेल्ब। 18 पिप आन फेक्शो वा पुइक्ब। मिनु मेको आन कली किप्शुर क्यिप्पाइक्ब। 19 चढेब आन कली मुने दोक्पाइशशा सोइक्ब। डोंइती रे गेय पाइब आन कली गुंइब। १सामुएल २:३०-३२; १सामुएल २२:१८-१९ 20 थमा सुइक्चा पुंइसीशो शेंब आन कली सिक्सी पपाइक्ब। खाल्पा आन तुइक्तीक लोव्र शोर गाक्शो सेल्ब। 21 हुकुम पाइब आन कली शुक्शी पचा पुंइसीब सेल्ब। सक्ति पाइशशो आन कली मचाप्ब सेल्ब। १सामुएल १७:५; १सामुएल ३१:९; २राजा १९:३७; दानीएल ४:२९,३० 22 मेकोम छिडछिड आगाम बाक्शो गुंइब। मिनु थम छिडछिड कली छेडछेड सेल्ब। 23 रागी रागी आन कली हिक्सीशो सेल्ब। नोले मेको आन कली खतम सेल्ब। रागी रागी आन कली ठेयब सेल्शा, मेकेर डा मुर आन कली एर ओंथ ब्रपाइक्ब। 24 रागी डा हुकुम पाइब आन कली मरुप्ब सेल्ब। मिनु नोले मेको आन कली लां मबाक्शो गोरशो रागीम एर ओंथ हिरपाइक्ब। 25 मिनु मेकोपुकी हाम्सो मबाक्तीके, छिडछिडम सुल्शा गाक्नीम। मेको आन कली दुक्शो मुर खोदेशो पा गोल्चा चिक्शा गाक्पाइक्ब।

13

अय्युब आ लोव्र

1 गो मेको नेल्ल ताता। गो मेको नेंशा रुप्ता। 2 इन तुइशशो, गो यो तुइक्नुड। गो इन क्येडा मतुइक्ब मनड। 3 तन्न गो नेल्ल क्येडा ठेयब सक्ति पाइशशो आ डोंइती लोव्र पाइनुड। मिनु गो परमप्रभु नु लोव्र पा, आं पबर्म हिल्लो पाइनुड। 4 गेपुकीम चहिं इन जोल लोव्र पा ठेयब सेल्सीनीनी। गे शोर गाक्शो लेम्ब बाक्नीनी। 5 गेपुकी सिक्सी पा बाक्शो ननी हना, तुइक्ब मुर बाक्नीनी, दे तुंइस वा। हितोपदेस १७:२८ 6 मुल आं लोव्र नेनीन। पचा माल्शो लोव्र इन नोफा दाइशशा नेनीन। 7 गेपुकी परमप्रभु आ लोव्र पखु पाइनीनी? मोदेशो जोल लोव्र कली थमा बाक्ब, दे थमा सेल्नीनी? 8 मार गेपुकी परमप्रभु आ कुल कोव्रशा, मेको आ पा डा पचा माल्शो लोव्र देंनीनी? 9 परमप्रभुमी इन कली नाक्शा कोव्रडानु, गे नेल्ल ठीक बाक्नीनी? मार, मुर आन मिक्च सिल्शो खोदेशो पा, मेको आ मिक्च यो सिल्ने चाप्नीनी? 10 गे खूइशशोमी कुल कोव्रनीनी, परमप्रभुम इन कली थमा पा हुइक्ब। 11 परमप्रभु आ मान ततीकेम इन कली महिंपाइक्बा? मेको आ हिंच कोंइशोमी इन कली ग्येत्थ लुक्च मसेल्बा? 12 इन आं कली देशो लोव्र पुलु ला बाक्नीम। इन बोल्यो अर्ती खप के बाक्नीम।

13 सिक्सी पा बाक्कीन। मिनु गो लोव्र पाइनुड। मिनु आं पबर्म मार मार दुम्बा, दुम्ल। 14 गो ब्रोंइनुडा देय मब्रोंइनुडा। गो बेक्नुडा कों ब्रोंइनुडा। 15 मेकोम आं कली साइक्ब। गो आस मपाइनुड। तन्न मुल गो आं लोव्र मेको आ डोंइती वोइक्नुड। 16 परमप्रभु कली मटीब मुर मेको आ डोंइती जाक्ने मचाप्नीम। मेको आं कली प्रोंइतीक दुम्ब। 17 नोफा दाइशशा, आं लोव्र नेनीन। मिनु आं शेंशो रिम्शो पा नेनीन। 18 गो आं देंचा माल्शो लोव्र ठीक पाता। मिनु नोले गो दोस मताइब बाक्नुड, दे तुइक्नुड। 19 सुमी आं कली कछडी बाक्शा, दोस गेने चाप्बा? मोदेशो दुम्त हना, गो सिक्सी पा फाल्शा बाक्शा, बेक्नुड। 20 परमप्रभु, गो इन कली थोव्रक निक्शी पुंइनुड। मिनु गो इन डोंइती रे मखुइक्नुड। 21 आं

कली श्येत मगेयीनी। मिनु इन हिंपाइक्तीकेमी आं कली महिंपतीन। अय्युब ९:३४ 22 गे आं कली ब्रेत्तीनी। मिनु गो लोव्र लेत्नुड। डोंइती गो ब्वाक्नुड। मिनु गे आं कली लोव्र लेत्तीनी। 23 आं मरिम्शो पशो नु आ पाप गिश बाक्नीमी? आं हेंथे पशो नु आं पाप तुइक्पाइय्यीनी। 24 गे मारदे इन कुल खुइक्नीनी? मिनु आं कली इन जोरी सत्रु खोदेंशो पाइनीनी। अय्युब १९:११ 25 गे बेरशो सफा कली यो हिंच कोंइनीनी? गे सोव्रशो भूस आ नोले खोइक्नीनी? 26 गे आं पर्वम कशो लोव्र ब्रेक्नीनी। मिनु आं ठिटा ना डा मरिम्शो पशो आ पर्वम सजाइ गेतीनी। भजन संग्रह २५:७ 27 आं खोइलीम ठेंडरो थोक्ताक्नी। आं लां नेल्ल कोव्रशा, वोइक्नीनी। अय्युब ३३:११ 28 मोपतीके मुर राक्शो थोव्रक खोदेंशो पा जाम्नीमी। तुम्बुम खोइश्शो वा खोदेंशो पा नुष्शो बाक्नीमी” दे अय्युबमी देंमाक्त।

14

ब्रोंइचा नु बेक्चा आ पर्वम लोव्र

1 मिनु लेंशा अय्युबमी “मीश मुर रे जरमेशो बेक्शा लाइब मुर इच्का नाक्त ब्रोंइशा, श्येत ला जाइब। 2 मेको फू खोदेंशो पा बोइश्शा, सोल सुल बेक्ब। वांकु जाम्शो खोदेंशो पा जाम्शा लाइब। भजन संग्रह १०:५ 3 गे मोदेंशो कोव्रनीनी? मिनु गे आं कली निसाफ पाइनीनी? 4 सुमी ग्रान्ग्रा दिशो रे ग्रान्ग्रा मदिशो सेल्ले चाप्बा? सुइमी मचाप्ब। 5 मुर आ ब्रोंइतीक नाक्ती हिक्शा वोइश्शो बाक्नीम। मिनु मेको गिश महिना ब्रोंइशो बाक्नीमी, मेको तुइक्नीनी। इन देंशो नाक्त लाक्ने मचाप्नीम। भजन संग्रह ३१:१६; भजन संग्रह ३९:५ 6 गे मुर आन कली मकोव्रडीन। मिनु नाक्त किंत किंत गेय पाइब मुर खोदेंशो ग्येरशा बाक्चा गेन। अय्युब ७१-२

7 रवा कली आस बाक्ब। तिम्शो नोले यो कोच्चा दाप्ब। मिनु वाना वान बाक्नीम। 8 मेको आ शाक्श खप आगाम चोक्ताक्व हना यो, मेको आ ठुटा खप आगाम राक्त हना यो, 9 लेंशा इच्का ब्वाक्कु तवानु, वाब। मिनु ठेयब रवा खोदेंशो पा राशी दाप्ब। 10 तन्न बेक्शा लाइब मुर बेक्शा जाम्शा लाइनीम। मुर आ सोक्त लाइब। मिनु ते लाइबा मतुइसीब? 11 दोपा दोम्ली डा ब्वाक्कु इच्का पा सोव्रना सोव्रन लाइबा, दोपा खोला आइक्च दुम्ना दुम्न लशा सोव्रबा, 12 मोपा बेक्शा लाइब मुर गोल्ब। मिनु मेको लेंशा गेनायो मबोक्ब। सरीड मक्याम्से सम्म, बेक्शो मुर लेंशा मबोक्नीम। मेको आन निन्द्रा रे मसेंसीनीम। अय्युब ७:१० 13 गे आं कली बेक्शो मुर आन बाक्तीकेम खुइक्तीन। इन गाइश्शो मनाइक्तीनी सम्म आं कली खुइक्तीन। मिनु नोले आं कली फ्रुक्शा, गो नु ग्रुम्तीक नाक्त का वोतीन। यसैया २६:२० 14 मार, बेक्शो मुर लेंशा ब्रोंइनीमी डा? गो रिम्शो नाक्त कली रिम्शा बाक्नुड। आं श्येत मथुमु सम्म रिम्शा बाक्नुड। 15 मिनु गे आं कली ब्रेन्नी नोले, गो इन कली लोव्र लेत्नुड। मिनु गे इन आंम गुइम सेल्लो मुर, आं कली, शिशो पाइनीनी। 16 गे आं पशो नेल्ल मकोव्रनीनी। गे आं पाप हिक्शा मवोइक्नीनी। 17 आं हेंथे पशो नेल्ल बेक्शा, इन थैलोम वोइश्शो बाक्ब। गे आं मरिम्शो पशो नेल्ल सुम्शा वोइश्शो बाक्नीनी। होसे १३:१२

18 मिनु डांडा ब्रेश्शा, जाम्शा लाइब। सेरथे फुल्लु मेको आ बाक्तीक रे याक्सीशो बाक्नीम। 19 ब्वाक्कुम फुल्लु आन कली योल्ब। बारशो ब्वाक्कुम रागी डा खप योल्ब। मोपा गे मुर आन आस थुम्पाइक्नीनी। रोमी ५:५ 20 गे मेको आन कली गेना हना यो ग्रानीनी। मिनु मुर बेक्नीम। गे मुर आन रां फाइश्शा ताइक्नीनी। 21 मेको आन आल ठेयब दुम्शा मान पाइक्चा पुंडसाक्म हना यो, मेकोपुकीम मतुइक्नीम। आइक्च सेल्ला पुंडसाक्म हना यो, मतुइक्नीम। 22 मेकोपुकीम आन रां डा श्येत ला तुइक्नीम। मिनु आन पर्वम ला रोंका पाइनीम” दे अय्युबमी देंमाक्त।

15

एलीफाजमी लोव्र पशो

1 मिनु तेमान डा एलीफाजमी 2 “मार, जोक्ब तुइक्ब मुरुम ओदेंशो डर ना पुं डा लोव्र पा लोव्र लेत्चा दुम्बा? मेको आ कोव्रजीम फश लोव्रमी प्रिंचा दुम्बा? 3 जोक्ब तुइक्बमी इन कली शोर गाक्शो लोव्र लेत्चा दुम्बा? मारेइ रिम्शो मपाइब लोव्र लेत्चा दुम्बा? 4 गे परमप्रभु कली मान पा हिंतीके तेक्नीनी। मिनु परमप्रभु कली मिम्शा पुंइचा यो तेक्नीनी। 5 इन देंशो नेल्ल इन मरिम्शो पतीके रे पिशो बाक्ब। गे मिलो शिलो पशो दाक्नीनी। 6 इन आंम लोव्रमी इन कली दोस ताइब सेल्ब। गो इन कली दोस मगेनुड। इन लोव्र इन पर्वम सांकछी बाक्ब।

7 गे मुर आन दातेमी नेल्ल क्येडा डोंइती जरमेशो ननी? मार गे डांडा आन क्येडा डोंइती दुम्शो ननी? 8 गे परमप्रभु आ अर्ती गेतीकेमी बाक्शा नेंनी? तुइक्तीक इन के ला बाक्ब, दे मिम्नीनी? अय्युब ११:७; रोमी ११:३३ 9 गो आंइ मतुइश्शो गे मार तुइक्नीनी डा? गो आंइ मरुष्शो गे मार रुप्नीनी डा? अय्युब १३:२ 10 मिनु खाल्पा नु खूशोपुकी गो

नु बाक्नीमी। इन आफ क्येडा यो खूशो मुर गोपुकी नु बाक्नीमी। 11 परमप्रभुम इन कली लेम्शो आइक्च मिम्नीनी? इन कली आइक्च सेंदाम रिम्शो लोत्र पशोमी इन कली मगाम्मे? 12 मारदे इन थुंमी इन कली दूली सेल्बा? मिनु गे मारदे गाइश्शा, मिक्च केक्शा कोत्रनी? 13 मारदे गे इन गाइक्तीक परमप्रभु कली कोंडनीनी? मिनु गे ओदेशो लोत्र पाइनीनी? 14 बेक्शा लाइब मुर नेल्ल दोस ताइब दुम्नीम। मीश मुर रे जरमेशो सु ठीक पाइब बाक्ने चाप्बा डा? अय्युब १४:४ 15 परमप्रभुम आंम आ मुर आन कली थमा मसुइक्ब। मिनु स्वर्गम बाक्ब यो मेको आ डोंडती दोस ताइब बाक्नीम। अय्युब ४:१८; अय्युब २५:५ 16 मेको आन क्येडा ग्रांग्रा दिशो नु खराप दुम्शो कली दोपा थमा सुइक्बा डा? मेकोमी मरिम्शो पतीक ब्वाक्कु तूशो खोदेशो पा तूब कली दोपा थमा सुइक्बा डा? 17 मिनु गो इन कली शेंनन्नी। आं लोत्र नेनीन। गो आं तशो इन कली शेंनन्नी। 18 जोक्ब तुइक्बमी आन किकी पिपी रे आन तशो नेंशो लोत्र मखुइक्तमे बाक्त। 19 मेको आन कली रागी आंम के सेल्चा कली गेशो बाक्माक्त। मेको आन दातेम अर्को रागी डा मुर सुइ मबाक्मा बाक्त। 20 परमप्रभु यावे आ अरेशो मटीब ब्रोंडमा सम्म श्येत जाइनीम। मरिम्शो मुर आन ब्रोंडतीक बर्स नेल्ल मोदेशो बाक्नीम। उत्पती ४:१४ 21 मेकोपुकीम हिंचा डा रेयके नेंनीमी। मेको मारेइ मारेइ गाप्शा बाक्मानु, मेको आन कली खतम सेल्ब जाक्ब। 22 मेकोपुकीमी 'छिडछिड रे लेत्ने मचाप्नीक' दे हिंनीम। मेकोपुकी तरवारम क्योरचा पुंडसीनीम। 23 मेकोपुकी जचा थोत्रक माल्शा, हिरना हिरन बाक्नीमी। मिनु आन श्येत जतीक नाक्ती जाक्चा चिक्शो बाक्ब, दे तुइक्नीमी। 24 मेकोपुकी श्येत नु हिंतीके आ पर्वम खिंखि पाइनीम। मेकोपुकीमी परमप्रभु कली लडाइ तोइनीम। लडाइ पचा चिक्शो पिप खोदेशो पा सासीशो बाक्नीम। 25 मारदे हना मेकोपुकीम परमप्रभु आ पर्वम आन गुइ क्युक्शो बाक्नीम। मिनु नेल्ल क्येडा ठेयब सक्ति पाइश्शो कली 'गो इन क्येडा ठेयब नकी' दे मेको कली मटीनीम। 26 मिनु ठेयब नु बोल्यो तेक्तीक शेशा परमप्रभु कली लडाइ तोचा कली बारशो बाक्नीम। 27 मारदे हना मेकोपुकी शुश जशा, दोम्शो बाक्नीम। 28 मेकोपुकी ब्रेशो सहर नु मुर मबाक्चा डा खिंम बाक्नीम। मेको खिं ब्रेशा फुल्लु देल्शो बाक्नीम। 29 मेकोपुकी शोंप पाइश्शो मदुम्नीम। मेको आन शोंप मलीब। मेको रागीम मलीनीम। 30 मेकोपुकी छिडछिड रे ब्रोंडने मचाप्नीम। मीम मेको आन ठोसा सोत्रपाइक्ब। मेको आन फु कली फशेम योल्ब। 31 मेकोपुकीम मबाक्शो लोत्र कली थमा मसुदमेक्ल। मोपा आंम आन कली मरिम्शो मसेल्मेक्ल। मारदे हना मेकोपुकीम मेको आ पा डा मारेइ मताइनीम। 32 मेको आन नाक्त जाक्चा क्येडा डोंडतीन मेको आन मारेइ मारेइ नुप्ब। मिनु मेको आन राशी गिगी मदुम्नीम। 33 मेकोपुकी क्येखीन हेम्शो अडगुर बोट खोदेशो दुम्नीम। मेको फू हेम्शो तेल रवा खोदेशो दुम्नीम। 34 मारदे हना परमप्रभु आ अरेशो मटीब नु गाक्ब शोर गाक्शो बाक्ब। घूस जाइब आन ताम्बुपुकी मीम नेक्ब। 35 मेकोपुकीम आल कुरशो खोदेशो पा मरिम्शो मिम्तीके कुरनीम। मिनु मरिम्शो पतीके जरमेनीम। मेको आन थुंम मरिम्शो पचा कली ठीक दुम्नीम" दे एलीफाजम अय्युब कली देंमाक्त। यसैया ५९:४

16

अय्युबमी लोत्र लेशो

1 मिनु अय्युबमी 2 "गो ओदेशो लोत्र शुश नेता। गे नेल्ल मोशा लेम्खु पाइब ला बाक्नीनी। 3 मार मेको फश लोत्र गेनायो मनुप्बा? मारम इन कली ओदेशो लोत्र पपाइक्बा? 4 गे आं खोदेशो बाक्नी हना, गो यो इन खोदेशो पा लोत्र पने चबु वा। गो इन कली यो मोदेशो लोत्र पड वा। गो इन कली शुक्शी पा आं पिया हिक्शा कोंडदन्नी वा। भजन संग्रह २२:८ 5 गो इन थुं बारपाइक्तीक लोत्र पड वा। मिनु आं शिशी पाइक्तीकेमी इन कली लेम्द वा। 6 गो ब्वाक्ती हना यो, आं खाइश्शो मसाब। गो सिक्सी पा बाक्ती हना यो, श्येत जस डा जस बाक्नुड। 7 थमा पा, परमप्रभुम आं कली थाम्पा दपाइक्ती। आं एर ओंथ डा नेल्ल आन कली खतम सेल्लु। 8 मेकोम आं कली रोम्पाइक्ती। मिनु एको आं पर्वम सांकछी दुम्शो बाक्ब। गो रुश नु कुशुल ला लीशो बाक्नुड। एको यो आं पर्वम सांकछी दुम्शो बाक्ब। 9 परमप्रभुमी आ गाइश्शोमी आं कली एर ओंथ फ्रशो बाक्ब। मिनु आं कली काइ मदाक्ब। मेकोम आं पर्वम आ खुइ शेषो बाक्ब। आं जोरी सत्रुमी आं कली सिम्ले पा कोत्रशो बाक्नीम। 10 मुरपुकीम आं कली शुक्शी पशो बाक्तेक्म। मेकोपुकीम आं चोत्रचो शुश राप्शो बाक्तेक्म। आं कली मरिम्शो पाइक्चा कली बुक्तेक्म। 11 परमप्रभुम आं कली थमा मसुइक्ब आन गुइमी गेशो बाक्ब। मिनु परमप्रभु यावेम आं कली आ अरेशो मटीब आन गुइम ब्वारशो बाक्ब। 12 गो रिम्शो पा बाक्शो नड। तन्न मेकोमी आं कली खोइक्तु। आं शुरम ग्याइश्शा चोकटा लाम्टा सेल्लती। मेकोम आं कली आ मिक्च आ क्रिक्बील सेल्लती। बिलाप ३:१२ 13 आ लिब्रा आप्बपुकीम आं एर ओंथ नेल्ल हिरशो बाक्नीम। मेकोम आं कली शिशी मपथु, आं चिच ख्रित्ताक्यी। मेकोम आं खाइल पुक्शा खपीम तोक्तु। 14 मेकोम

आं कली पाकना पाकन, लडाइ पाइब खोदेशो पा आं गे बारब। 15 गो आं रां सुम्चा कली भाडग्रा फेक्साक्यी। गो आं पिया फुरकुम पुम्ता। लेवी ३७:३४ 16 डाकशा डाकशा आं कुल लल जिशो बाकब। आं मिक्च आ एर ओथ नेल्ल क्येर दुम्शो बाकब। 17 मो हना यो आं गुइमी मरिम्शो मपशो बाकती। आं पुंइशो लोत्र रिम्शो बाकब। 18 ए खप, आं हुश मसुमो। आं पुंइशो लोत्र गेनायो मनांइसेक्ल। उत्पत्ती ४:१०; इजीकीएल २४:७-८ 19 मो हना यो आं सांकछी स्वर्गम बाकब। आं पबर्म लोत्र पाइब इर बाकशो बाकब। अय्युब १७:३ 20 आं वारचम आं कली शुक्शी पाइनीम। गो डाकशा परमप्रभु गे कोव्रनुड। १सामुएल २:२५ 21 मेकोमी परमप्रभु नु आंस दातेमी निसाफ पवल। मुर नु आ वारच आन दातेमी दोपा निसाफ पाइबा, मोपा पवल। 22 इच्का बर्स नोले गो गेनायो मलेत्चा डा पा लाइनुड” देमाकत। अय्युब १०:२१

17

परमप्रभु कली “वारच पने” दे पुंइशो

1 मिनु अय्युबमी “आं थुं जिक्शो बाकब। आं नाक्त नुप्शा लशो बाक्नीम। आं कली तुरस ठीक दुम्शो बाकब। 2 थमा पा, आं एर ओथ शुक्शी पाइब बाक्नीम। मेको आन शुक्शी पशो मारेइ ममिम्नुड। अय्युब १६:१९ 3 परमप्रभु, गे आंमा आं जाकटी दुमीन। अरु सु आं पबर्म जमानी बाक्ने चाप्बा डा? 4 गे मेको आन थुं रे रुप्तीक गुंइताक्नी। मोपतीके गे मेको आन कली ठेयब दुम्चा मगेनी। 5 सुमी आ शोप वारच आन कली कौंइशा योक्चा कली ब्रेप्बा, मेको आ आल जचा मताइनीम। 6 मेकोमी आं कली मुर नेल्ल आन दातेम कथा पतीक का सेल्शो बाकब। मुरपुकीमी आं डोंइती तोक्सीनीम। अय्युब ३०:९ 7 आं मिक्च श्येत जतीके ब्रा ब्रा दुम्शो बाकब। आं गुइ खोइल सोव्रशो बाक्नीम। गो वांकु खोदेशो बाक्नुड। 8 रिम्शो थुं पाइशो मुर मेको तशा, छक लाक्नीम। दोस मताइबपुकी परमप्रभु यावे आ अरेशो मटीब आन कली तशा गाइक्नीम। 9 मिनु ठीक पाइब मुर आंम लां रिम्शो पा गाक्नीम। मोदेशो मुर बोल्यो क्येडा यो बोल्यो दुम्ना दुम्न लाइनीम। 10 मुल गे नेल्ल लेतीन। गो इन दातेमी निप्स पाइशो मुर का यो मतडमी। 11 आं नाक्त नुप्तेक्म। आं मिम्शो नेल्ल मोशा दुम्त। मिनु आं थुं डा मिम्शो जाम्शा लत। 12 मेको मुरपुकीम नाक्दो कली नाक्त देंनीम। मिनु सुनी दुम्मेनु ‘नां रिक्त’ देंनीम। 13 गो आं आस पशो खिं बेक्शो मुर आन बाक्तीक बाक्त हना, आं ब्राख्ये छिडछिडम सेल्ता हना यो, 14 गो तुरस कली ‘गे आं आफ बाक्नीनी’ मिनु लुम्पु कली ‘आं ममा आं समी बाक्नीमी’ देंती हना, 15 आं आस पशो ते लाक्गा? मिनु सुम आं पबर्म आस पाइबा? 16 मार एको बेक्शो मुर आन बाक्तीक आ नेक्था लाइबा? मार, गो नेल्ल उइ फुरकुम काथा लाइनया?” दे अय्युबम देमाकत।

18

बिल्दादम लोत्र पशो

1 मिनु शुआह डा बिल्दादमी 2 “गे एको लोत्र गेना थुम्नीनी? डोंइती मिम्तीन। मिनु गो लोत्र पने चाप्नय। 3 मारदे आंइ कली बी ब्यफ खोदेशो मिम्तीनी? गे मारदे आंइ कली निप्स मपाइशो सुइक्नीनी? 4 गे इन गाइशोम आंम कली खतम सेल्सीनीनी। मार, इन पबर्म गो रागी प्रोंइनीकी? सेरथे फुल्लु आन बाक्तीक रे याक्चा? 5 थमा पा, परमप्रभु यावे आ अरेशो मटीब आन बत्ती काप्ब। मिनु मेको आन मी डा राप रे हाम्सो मगूब। हितोपदेस १३:९ 6 मेको आन ताम्बुम छेडछेड, छिडछिड दुम्ब। मिनु मेको आन बत्ती काप्शो बाकब। अय्युब २१:१७ 7 मेको आन लांमी आन खोइली ग्येत्थ लुक्च पाइब। मिनु मेको आन थुंम मिम्शा पशोमी मेको आन कली खोल्ब। 8 आंम खोइलीम मेको आन कली ब्वारदम लपाइक्ब। मेको ब्वारदम गिल्सीशा बिक्तीकेमी दोक्नीम। 9 मेको आन खोइली ब्रिम्सोम रेट्चा पुंइसीनीम। क्येयलम रेट्चा पुंइसीनीम। 10 मेको आन पबर्म खपीम ब्वारद आ डोरी खुइशो बाकब। मोपा आन लांमी ब्वारद दाइशो बाकब। 11 शुश हिंतीकेम मेको आन कली खिंखि पपाइक्ब। ते बाक्तेक्म हना यो, मेकेर हिंतीके यो बाकब। लेवी २६:३६ 12 मेकोपुकी शोव्रलु बेक्तीके सक्ति मपाइशो बाक्नीम। मिनु श्येत दुम्शा गोल्नीम। 13 रोइ पतीकेमी मेको आन कुशुल नेल्ल नेक्शो बाकब। बेक्पाइक्ब रोइमी मेको आन गुइ खोइली मदुक्ब सेल्ब। गन्ती १२:१०-१२ 14 मेको आन ब्रोंइशा बाक्तीक रां आन पबर्म ‘रिम्शो बाकब’ दे थमा सुइशो, मुल रां रे गुंइचा पुंइसीनीम। मिनु हिंपाइक्ब पिप आ बाक्तीके लाइक्चा पुंइसीनीम। 15 मेको आन ताम्बुम मारेइ मलीब। मेको आन बाक्तीकेम गन्धक ब्रुइशो बाकब। 16 मेको आन शाक्श खप आगाम सोव्रनीम। मिनु आन राशी सोल सुल

बेक्नीम। 17 रागी डा मुरुम मेको आन कली प्रेनीम। मेको आन नें ममिन्नीम। 18 मेको छेडछेड रे छिडछिडम खेरचा पुंडसीनीम। मिनु रागी रे गुंडचा पुंडसीनीम। 19 मेको आन आल मबाक्नीम। आन चच युड यो मबाक्नीम। मेको आन डोंडती डा बाक्तीकेमी सुइ ब्रोंडशा मबाक्नीम। 20 पच्छिम डा मुरपुकी मेको आन श्येत जशो नेंशा हिंनीम। पूर्व डा मुरपुकी शुश हिंशा खिंखि पाइनीम। भजन संग्रह ३७:१३ 21 थमा पा, परमप्रभु आ अरेशो मटीब मुर आन बाक्तीके मोदेशो दुम्ब। परमप्रभु कली मतुइक्व मोदेशोन दुम्नीम” दे बिल्दादम अय्युब कली लोत्र लेत्ता बाक्त।

19

अय्युबम लोत्र लेशो

1 मिनु अय्युबमी 2 “गे आं कली गेना सम्म श्येत गेनीनी? मिनु इन लोत्रमी आं कली मरिम्शो सेल्नीनी? 3 आं कली १० खेयप सम्म दोस गेतीनी। आं कली काइ मरिम्शो लोत्र पचा मुने मपाइनीनी? 4 गो थमा पा मरिम्शो पशो बाक्ती हना यो, मेको मरिम्शो पशो आं के बाक्ब। 5 थमा पा, गे आं क्येडा ठेयब दुम्चा मिन्नीनी। मिनु आं श्येत तशा, आं कली मरिम्शो सुइक्नीनी। 6 परमप्रभुमी आं कली मोशा श्येत गेती। आं एर ओंथ नेल्ल ब्वारद दाइशो बाक्ब। 7 गो ‘हुश खाक्श पोक्तीमी’ दे ग्रीती हना यो, आं कली लोत्र मलेप्ब। ‘वारच पाइय्यीनी’ दे पुंडता हना यो, निसाफ मताइनुड। येरमीया २०:८; हबकुक् १:२; अय्युब ३०:२० 8 मेकोमी आं लां तेक्शो बाक्ब। मिनु गूशा लने मचाप्नुड। मिनु मेकोमी आं लां छिडछिडम सुम्तु। अय्युब ३:२३; बिलाप ३:७,९ 9 मेकोमी आं मान ततीक रोइक्ताक्यी। आं पिया रे आं सिरपेच पुइक्तु। 10 मेकोम आं कली लुक्च लाइब सेल्ती। गो खतम दुम्ती। रवा तुल्शो खोदेशो पा आं आस नेल्ल नुप्पाइक्तु। 11 मेको आं पर्बम गाइक्ताक्व। मिनु आं कली आ जोरी सत्रु खोदेशो मिम्ताक्यी। अय्युब १३:२४; अय्युब ३३:१० 12 मेको आ लडाइ पाइबपुकी बुक्शा आं कली पुम्नीम। मेकोपुकीम आं ताम्बु आ एर ओंथ नेल्ल आन बाक्तीक सेल्नीम।

13 मेकोम आं खिं डा मुर आन कली आं क्येडा डोन वोइशो बाक्ब। आं वारच आं कली मतुइक्व दुम्शो बाक्नीम। भजन संग्रह ३१:१२ 14 आं नेक्था डा मुर नु गो नु गारब वारच आं क्येडा डोन दुम्तेक्म। भजन संग्रह ३८:१२ 15 आं खिंम पौना दुम्शा बाक्बपुकीम प्रेंताक्यीमी। आं वाइलीमपुकीम आं कली अर्को रागी डा मुर खोदेशो पा मतुइशो खोदेशो पाइनीम। 16 गो आं वाइल कली ब्रेत्नुड। तन्न मेकोम लोत्र मलेप्ब। गो मेको कली शुश लेम्शा पुंडचा माल्नुड। 17 आं सास आं मीश कली रिना नु ग्रांरा दिशो दुम्शो बाक्ब। गो आं खिं डा मुर आन कली ग्रांरा दिशो दुम्शो बाक्ती। 18 आइक्च आलपुकीमी यो आं कली तशा ग्रांरा दित्नीम। मिनु आं कली तामेनु, मेकोपुकीम शुक्शी पाइनीम। 19 गो नु गारब वारच नेल्लेम आं कली ग्रांरा दित्नीम। आं दाक्शो मुरपुकी आं पर्बम दूली पा बोक्शो बाक्नीम। 20 आं के रुश नु कुशुल ला लीशो बाक्ब। गो बेक्चा चिक्शो बाक्ती। 21 आं वारचपुकी, आं कली शिशी पाइय्यीनी, शिशी पाइय्यीनी। मारदे हना परमप्रभुम आं कली दिप्शा, श्येत गेशो बाक्ब। 22 गेपुकीमी यो परमप्रभुमी आं कली खेदा पशो खोदेशो पा मारदे खेदा पाइनीनी? मार, आं कली मिश डा श्येत गेशा मरूनी?

23 आं पशो लोत्र ब्रेक्शो हना, मेको किताबम ब्रेक्शो हना, रिम्शो दुम वा। 24 मेको फलाम के याम मुशा नु सिसाम ब्रेक्शो हना, फुल्लुम गेना हना यो लीचा डा पा मुशा ब्रेक्शो हना, रिम्शो दुम वा। 25 तन्न आं कली श्येत रे प्रोंडका बाक्ब। मेको नोले डा नाक्त रागीम जाक्शा आं सांकछी दुम्ब। मेको गो तुइक्नुड। यसैया ४१:१४; होसे १३:१४; अय्युब २६:६ 26 मिनु आं कुशुल राक्शा खतम दुम नोले, गो आं रांमी परमप्रभु कली ताइनुड। भजन संग्रह १७:१५; भजन संग्रह ७३:२४ 27 गो मेको कली आं मिक्चीमीन आं नेक्था ताइनुड। गो मेको तचा कली शुश रिम्ना रिम्न बाक्नुड। 28 गेपुकीम आं कली ‘एको कली दोपा खेदा पचा? मारदे हना श्येत आ शाक्श एको आ आगाम बाक्ब’ देंतीनी। 29 गेपुकी तरवार क्येडा हिनीन। मारदे हना गाइशो आ सजाइ तरवार रे पा जाक्ब। मिनु निसाफ का बाक्ब, दे तुइक्तीन” दे अय्युबम लोत्र लेत्तीमी बाक्त।

20

सोफारमी लोत्र पशो अय्युब १५:-; १८:-

1 मिनु नामा डा सोफारमी 2 “नोफा दाइक्तीन। आं मिम्शोम आं कली लोत्र लेप्पाइक्व सेल्ती। मारदे हना गो आं थुं काइ मनुशो बाक्नुड। 3 गो आं कली शुक्शी पशो लोत्र नेंशो बाक्नुड। आं थुं डा रुप्तीकेम आं कली लोत्र लेप्ब

सेल्शो बाक्ब। 4 गे एको माइत लोव्र तुइक्नीनी? मुर रागीम बाक्मा रे एको लोव्र बाक्शो बाक्ब। 5 एको मार लोव्र बाक्ब देशा हना, परमप्रभु यावे आ अरेशो मटीब आन ठेयब लेशशो इच्का नाक्त ला लीब। मेको आन ग्येरसीशो याम का ला लीब। 6 मेको आन ठेयब लेत्तीक सरीड खोइ लाइक्त हना यो नु मेको आन पियाम गोस्स कली थिप्नु हना यो, भजन संग्रह ३७:३५-३६ 7 मेको स्त्री खोदेशो पा जाम्नीम। मिनु मेको आन कली ताइब नेल्लेम 'मेको ते लाक्गमे, खोइ?' देंनीम। मीका ७:१० 8 मेकोपुकी डोमु पशो खोदेशो पा जाम्शा लाइनीम। मेको आन कली मथिंसीब। मेकोपुकी नाक्दो तशो ततीक खोदेशो पा जाम्शा लाइनीम। 9 मेको आन कली तुइक्बपुकीम लेशा गेनायो मताइनीम। मिनु आन बाक्तीके रे यो जाम्शा लाइनीम। भजन संग्रह ३७:१० 10 मेको आन आलपुकीम प्रुडग आन शिशी माल्नीम। मिनु मेको आन तौपुकीमी प्रुडग आन शोंप लाइशशा गेनीम। 11 मेकोपुकी ठिटा दुम्शा, सक्ति पाइशशा बाक्तेक्म हना यो, बेक्शा, तुरस डा फुरकुम वोइक्चा पुंडसीनीम।

12 परमप्रभु यावे आ अरेशो मटीब आन मरिम्शो पशो मेको आन कली ब्रोव्रशो बाक्त हना, मेको आन लें आगाम खुइशशा वोइक्नीम। 13 मेको आंम कली वोइशशा, मप्रोंइब। मेको आन शोव्रम वोइक्तेक्म हना यो, 14 मेको आन जचा थोव्रक आन कोव्रजम फांडसीब। मिनु मेकेर बुस्स आन बीस दुम्ब। 15 मेकोपुकीम मेको आन नेक्शो शोंप लेशा मेचा माल्नीम। परमप्रभुमी मेको आन कली मेपाइक्ब। 16 मेकोपुकीम बुस्स आ बीस युप्नीम। मिनु बीस पाइशशा बुस्सुमी मेको आन कली कोक्शा साइक्ब। 17 मेको आन के तर नु खुदो शुश बाक्त हना यो, ग्येरशा जचा तूचा मताइनीम। 18 मेको आन श्येत पा चेम्शो मारेइ मारेइ मजथु लेशशा गेचा माल्नीम। मिनु आन ग्याप्शा लेयशा चेम्शो क्येट ग्येरशा जचा मताइनीम। ब्यवस्था २८:३०-३३ 19 मारदे हना मेकोपुकीमी प्रुडग आन कली दिप्शा श्येत गेम्तेक्म। मेकोपुकीम आन मसेल्शो खिं आंम के सेल्शो बाक्नीम।

20 मेको आन शोव्रलु गेनायो मउइक्ब। मिनु मेको आन शोंप मलीब। 21 मेकोपुकीम जामे नोले मारेइ महेक्ब। मोपा आन शोंप नेल्ल नुप्शा लाइब। 22 मेको आन मिम्शो नेल्ल गाप्त हना यो, मेकोपुकी श्येत जाइनीम। मारेइ मारेइ श्येत मेको आन तार कांम्सीब। 23 मेकोपुकी रूने थुम्मे नोले, परमप्रभुम आ गाइशशा मेको आन तार मोइक्ब। दोशो जामे मोशो परमप्रभुम सजाइ गेचा पुंडसीनीम। 24 मेकोपुकी फलाम के या रे प्रोक्तेक्म हना यो, कांसा के डर पाइशशा ब्राम मेको आन कली खिंप्ब। 25 मेको ब्रा मेको आन कली खिंशशा गूनीम। मेको ब्रा आन टल्केशो डरम मेको आन खाइल पुक्शा ग्रुंडब। मोपा मेको शुश हिंनीम। ब्यवस्था ३२:४१ 26 मेको आन शोंप कली थम छिडछिडमी रिम्शा बाक्शो बाक्ब। थाम्पा ब्रशो मीम मेको आन कली दाक्ब। मिनु आन ताम्बुम लीशो मारेइ मारेइ नेक्ब। ब्यवस्था ३२:२२ 27 स्वर्गम मेको आन मरिम्शो पशो नेल्ल कोइब। रागी मेको आन कली दोस गेचा कली ठीक दुम्शो बाक्ब। 28 मेको आन खिं डा शोंप नेल्ल योल्नीम। मेको गाइक्ता नाक्त मेको नेल्ल योल्नीम। 29 मेको परमप्रभु यावे आ अरेशो मटीब आन भाग बाक्ब। परमप्रभुमी गेशो इनाम मेकोन बाक्ब" दे लोव्र लेत्ता बाक्त।

21

मटीब आन पर्वम शेंशो

1 मिनु अय्युबमी 2 "इन नोफा दाइशशा, आं लोव्र नेनीन। मेको आं कली इन गेशो लेम्तीके बाक्ब। 3 गो लोव्र पडानु, आं कली फाल्शा नेनीन। गो लोव्र थुमु नोले आं कली शुक्शी पने चाप्नीनी। 4 मार, आं थुं मनुथु पशो लोव्र बेक्शा लाइब मुर आन कली ममाइ। मारदे गो फाल्शा बाक्चा माल्नुडा? 5 आं कली कोव्रयीनी। मिनु सिक्सी पने। मारदे हना गो ग्रांग्रा दिचा डा तांडसीनुड। इन शोव्र सुम्सीन। अय्युब ४०:४ 6 गो आं कली 'मार दुम्बा' दे मिम्नुड। मिनु ग्रीचोक पा हिंनुड। आं रां नेल्ल थुर थुर पा खिंखि पाइब।

7 परमप्रभु यावे आ अरेशो मटीब मुर मारदे ब्रोंइना ब्रोंइन बाक्नीमी? मारदे मेकोपुकी खूशो दुम्मानु यो बोल्यो नु सक्ति पाइशशा दुम्नीमी? येरमीया १२:१ 8 मेको आन तमी तौ मेकोपुकी नु बाक्नीमी। मिनु मेकोपुकीम आन चच युइ नेल्ल ताइनीम। 9 मेको आन खिंम महिंथु बाक्नीम। परमप्रभुम मेको आन कली सजाइ मगेब। 10 मेको आन बी ब्यफ सोशा बोशा दुम्नीम। बी नेल्ल गिक्नीमी, गेनायो मशाम्नीम। 11 मेको आन आल आन कली क्यारश भेडा आन पाठा खोदेशो पा ग्यारथ सोइक्नीम। मिनु मेको आन आइक्च आल सिल पना पन प्रेक्शो बाक्नीम। 12 मेकोपुकी खैजडी नु बीना ताप्शा कुम्सो पाइनीम। मिनु बांसुरी ताप्शा ग्येरसीनीम। 13 मेकोपुकीम आन नाक्त ग्येरशा सोइक्नीम। मिनु मेको आन थुं नाइशशा बेक्शो मुर आन बाक्तीक लाइनीम। 14 मेकोपुकीम परमप्रभु कली आंइ रे पा डोन लन। गो इन लांम गाक्चा मदाक्नीकी, देंनीम। अय्युब २२:१७ 15 'नेल्ल क्येडा ठेयब सक्ति पाइशशा सु बाक्म? गो मारदे मेको आ गेय

पचा माल्नीकी? गो मेको कली पुंइशा मार ताइनीकी डा? देनीम। प्रस्थान ५:२; २ राजा १८:३५; भजन संग्रह १२:५; दानीएल ३:१५ 16 परमप्रभु यावे आ अरेशो मटीब आन सोशा बोशा लशो, मेको आंम आन पतीके ममाइ। मिनु आन मिम्शो तुइश्शा, गो ग्रांग्रा दीनुड। अय्युब २२:१८

17 परमप्रभु यावे आ अरेशो मटीब आन बत्ती गिश खेयप काम्सीबा? मेको आन पियाम गिश खेयप हिंचा डा श्येत जुक्बा? शुश खेयप मजुक्ब। परमप्रभु आ गाइश्शोमी मेको आन कली गिश खेयप श्येत गेबा? शुश खेयप मगेब।

18 गिश खेयप फशेम बेरशो पराल खोदेशो दुम्नीमी? मेकोपुकी गिश खेयप फश गिवारम बेरपाइश्शो भूस खोदेशो दुम्नीमी? शुश खेयप मदुम्नीम। भजन संग्रह १:४ 19 गेपुकीम 'परमप्रभुमी मेको आन मरिम्शो पतीके आन तमी तौ आन कली खेक्शा वोइक्ब' देनीनी। मोदेशो मदुम्ल। तन्न मेकोमी मेको नेल्ल आन कली सजाइ गेवल। मिनु मेकोपुकीम तुइक्वतमेक्ल। अय्युब २०:१०; प्रस्थान २०:५ 20 मेकोपुकीम आंमा आन कली खतम दुम्तीक तामेक्ल। मेकोपुकीम नेल्ल क्येडा ठेयब सक्ति पाइश्शो आ गाइश्शो तुइक्वतमेक्ल। 21 मुर आन ब्रोंइतीक नुम नोले मेको आन खिं कोवने चाप्नीमी डा? मेको आन ब्रोंइतीक नुपब। 22 मुरुम परमप्रभु कली जोक्तीक तुइक्तीक लोत्र शेंने चाप्नीमी डा? मेकोमी इर बाक्ब आन कली यो निसाफ पाइब। उपदेसक ५:७ 23 का निक्शी मुर आन माल्शो नेल्ल गाप्शा बेक्नीम। मेको काइ महिंथु रिम्शा बाक्नीम। 24 मेको आन रां दोम्शो बाक्नीमी। मेको आन रुशेम मासी बाक्ना बाक्न बेक्नीम। 25 का निक्शी चहिं श्येतम ब्रीशा, आन थुं कशो दुम्शा बेक्नीम। मेकोपुकीम गेनायो ग्येरचा मतामे। 26 मिनु मेको नेल्ल काथा थिम्चा पुंइसीनीम। मिनु लुस्पुमी मेको आन कली सुम्नीम। अय्युब ३:१८-१९

27 गेपुकी मार मिम्ना मिम्न बाक्नी, गो मेको रिम्शो पा तुइक्नुड। मेको आं पबर्म दूली मिम्तीक लोत्र बाक्ब, दे गो तुइक्नुड। 28 गेपुकीम 'मेको सासन पाइब आ खिं ते बाक्म? मेको परमप्रभु यावे आ अरेशो मटीब मुर आन ताम्बु ते बाक्नीमी?' दे हिल्लो पाइनीनी। 29 मार, गेपुकीम लां गाक्ब आन कली गेनायो हिल्लो मपनी? गे मेको आन देशो मतुइक्नीनी? 30 शुश हिंचा डा श्येत दुम्नेनु, परमप्रभु यावे आ अरेशो मटीबपुकी ब्रोंइचा ताइनीम। मिनु परमप्रभु आ गाइक्ची नाक्त मेकोपुकी प्रोंइचा पुंइसीनीम। 31 सुइम मेको आन कली दोस मगेनीम। सुइमी मेको आन मरिम्शो पशो आ पा डा क्येक्क मलेत्नीम। 32 मिनु मेको बेक्शा, कुरशा तुरसुम लाइक्चा पुंइसीनीम। मिनु मेको आन तुरसुम खाल पाइब वोइक्नीम। 33 तुरस डा खप यो मेको आन कली रिम्शो बाक्ब। मिनु शुश मुर मेको आन नोले खोइक्नीम। मिनु हिक्ने मचाप्चा डा पा शुश मुर मेको आन क्येडा डोंइती लाम्तेक्म। 34 गेपुकी इन देशो फश लोत्रम दोपा आं कली लेम्नीनी डा?" दे अय्युबमी सोफार कली लोत्र लेत्ता बाक्त।

22

एलीफाजमी अय्युब कली दोस गेशो

1 मिनु तेमान डा एलीफाजमी 2 "बेक्शा लाइब मुरुम परमप्रभु कली मार पने चाप्बा डा? शुश जोक्ब तुइक्ब मुरुम यो मेको कली मार गेय पने चाप्बा डा? 3 गे ठीक पाइब बाक्तीनी हना, नेल्ल क्येडा ठेयब सक्ति पाइश्शो कली मार रिम्शो दुम्बा डा? इन पशो नेल्ल दोस मततीक बाक्त हना, मेको कली मार रिम्शो दुम्बा डा? अय्युब ३५:६-८ 4 इन परमप्रभु कली मान पा हिंतीके आ पबर्म इन कली महुइक्ब। मेको आ पबर्म इन कली निसाफ मपाइब। 5 इन परमप्रभु यावे आ अरेशो मटितीके ठेयब बाक्ब। इन मरिम्शो पतीके गेनायो मनुपब। 6 गे मोशान इन लोक्ब आ वा जाकटी लाइक्तीनी। आन वा रोइश्शा शिन्ना सेल्तीनी। प्रस्थान २२:२५-२६; अय्युब २४:९-१० 7 गे तूतू दाक्शा, लकचा सोव्रशो मुर आन कली ब्वाक्कु मगेनी। मिनु शोव्रलु बेक्शो मुर आन कली जचा थोव्रक मगेनी। अय्युब ३१:१७; मत्ती २५:४२-४३ 8 सक्ति पाइश्शो मुर आन के शुश रू बाक्नीम। मेको आन दाक्शो मुर आन कली मेकेर बाक्चा गेनीम। 9 गे आन वोंइश बेक्शो मीश मुर आन कली श्येत्थ गुइ सोइक्ताक्नी। मिनु रोम रोइक्च आन तचा माल्शो मगेनी। अय्युब २९:१२-१३ 10 मोपतीके इन गाक्तीक लां आ एर ओंथ नेल्ल ब्वारद दाइश्शो बाक्नीम। मिनु इन कली इन मतुइक्चा डा पा शुश हिंतीके जाक्ब। 11 मिनु तने मचाप्चा डा छिडछिडम इन कली सुम्ब। मिनु ब्वाक्कु बारशा यिशा इन कली सुम्ब।

12 परमप्रभु इर स्वर्गम बाक्ब। सोरुल आन कली कोव्रडीन। गिश इर बाक्नीमी। 13 मोपतीके गे 'परमप्रभुमी मार तुइक्बा डा? मेकोम गोस्स आ छिडछिड रे दोपा निसाफ पाइबा डा? 14 गोस्स आ छिडछिड मेको कली सुम्तीके, मेकोम आंइ कली तने मचापब। मिनु मेको सरीडम एर ओंथ गाक्शा बाक्ब' देतीनी। 15 गे परमप्रभु यावे आ अरेशो मटीब आन माइत लां मप्रोंइब बाक्नीनी? 16 मेको आन नाक्त मजाक्थु साइक्चा पुंइसाक्म। मेको आन जग ब्वाक्कुम

योल्लाक्व। अय्युब १५:३२-३३; उत्पत्ती ७:२१ 17 मेको मुरपुकीम परमप्रभु कली 'आंइ रे पा डोन लन। नेल्ल क्येडा सक्ति पाइशोमी आंइ कली मार पने चाप्बा डा?' दैतेक्म। अय्युब २१:१४ 18 मो हना यो मेकोमी, मेको आन खिं रिम्शो थोव्रकमी प्रिंताक्व। तन्न परमप्रभु यावे आ अरेशो मटीब आन मिम्शो काइ मदाक्नुड। 19 ठीक पाइबपुकी मेको आन कली तशा ग्येरसीनीम। दोस मताइबपुकीम मेको आन कली शुक्शी पा रिन्नीम। भजन संग्रह १०७:४२ 20 मेकोपुकीमी 'थमा पा, इं जोरी सत्रु साइक्चा पुंडसाक्म। मिनु मेको आन शोंप मीम नेक्तु' देंनीम।

21 परमप्रभु नु गारीन। मिनु थुं नाइक्तीन। मो पाइतीनी हना इन रिम्शो दुम्तीके लेंशा ताइनीनी। 22 मेको आ शेंशो पने। मिनु इन थुंम वोतीन। 23 गे नेल्ल क्येडा ठेयब सक्ति पाइशो गे लेतीन। मिनु डोंइती डा खोदेशो दुम्नीनी। गे इन ठीक मपतीके इन क्येडा डोन वोतीन। अय्युब ८:५-७; अय्युब ११:१४-१५ 24 गे सुन फुरक खोदेशो मिम्ताक्नी हना, ओफीर डा सुन कली खोला डा फुल्लु खोदेशो मिम्ताक्नी हना, 25 नेल्ल क्येडा ठेयब सक्ति पाइशो इन शोंप दुम्ब। मेको इन सुन चांदी दुम्त हना, 26 मेना नेल्ल क्येडा ठेयब सक्ति पाइशो कली मिम्शा, ग्येरशा बाक्नीनी। मिनु गे इन पिया पोक्शा परमप्रभु गे कोव्रनीनी। 27 गे मेको कली पुंडनीनु, मेकोमी इन पुंडशो नेंब। मिनु गे इन जशो कसम खाप्नीनी। भजन संग्रह ५०:१४-१५ 28 गे मार पाइनुड, दे मिम्नीनी, मेको दुम्ब। मिनु इन लांम छेडछेड दुम्ब। 29 मारदे हना मेकोमी ठेयब लेशो लोव्र पाइब आन कली आइक्च सेल्ब। ब्रेम्शो मुर आन कली चहिं प्रोंइब। १ पत्रुस ५:५ 30 मेकोमी दोस ताइब आन कली यो प्रोंइब। गे दोस मताइब बाक्तीके मेको आन कली प्रोंइब" दे एलीफाजमी अय्युब कली लोव्र लेत्ता बाक्त। भजन संग्रह १८:२१, २५; २कोरिन्थी ५:२

23

अय्युबम लोव्र पशो

1 मिनु अय्युबमी 2 "मुलाक्ती आं देशो लोव्र थुं मनुचा डा बाक्ब। गो हुकयी पना पन बाक्ती हना यो, परमप्रभुमी आं कली श्येत गेना गेन बाक्ब। 3 गो मेको कली ते बाक्बा, मेको तुइक्तु हना, गो मेको आ बाक्तीके लाड वा। 4 गो आं श्येत मेको आ डोंइती नेल्ल शोव्रडु वा। गो मेको कली आं देंचा माल्शो लोव्र नेल्ल देंड वा। 5 मेकोमी आं कली मार लोव्र लेप्बाक्मे गो मेको तुइक्तु वा। मिनु गो मेकोम आं कली मार देंबाक्मे मेको रुबु वा। 6 मेको आ ठेयब सक्तिमी गो नु लोव्र पाइबा डा? ममाइ, परमप्रभुमी आं कली गेनायो दोस मगेब। 7 रिम्शो थुं पाइशो मुरपुकीमी मेको नु लोव्र पने चाप्नीम। मिनु गो आं निसाफ पाइब रे गेना हना यो प्रोंइचा पुंडसीड वा।

8 गो डोंइती गे लती हना, मेको मेक मबाक्ब। गो नोले गे लेत्ती हना यो, मेको मेक मबाक्ब। 9 मेकोमी पेरा गे खुइक्ताक्व हना, गो मेको कली मताइनुड। गो ग्युरा गे हिरसीडानु यो मेको कली तने मचाप्नुड। अय्युब ४२:५ 10 तन्न मेकोमी आं गाक्शो लां तुइक्ब। मेकोमी आं कली नाक्शा कोव्रयीनु, गो सुन खोदेशो दुम्नुड। भजन संग्रह १७:३; भजन संग्रह १३९:२३-२४ 11 गो मेको आ नोले खोइशो बाक्नुड। गो मेको आ लांम ला गाक्शो बाक्ती। गो ग्युरा पेरा मपड। 12 गो मेको आ शेंशो पाता। मेको आ लोव्र नाक्त किंत किंत डा आं जचा थोव्रक क्येडा यो शुश मिम्ताक्ड। 13 तन्न मेको आ कान बाक्ब। मिनु सुमी मेको कली तेक्ने चाप्बा डा? मेकोमी आ मिम्शो खोदेशो पाइब। 14 मेकोमी आं कली मार पचा मिम्बा, मेको नेल्ल पाइब। मिनु मोदेशो शुश मिम्ब। 15 मोपतीके गो मेको नु गुम्चा शुश हिंनुड। गो मेको कली मिम्शा हिंशा खिंखि पाइनुड। 16 परमप्रभुम आं थुं थपाइशो बाक्ब। नेल्ल क्येडा ठेयब सक्ति पाइशोमी आं कली हिंपाइक्ब। 17 छिडछिडमी आं कली सिक्सी पपाइक्ने मचाप्ब। मेको छिडछिडमी आं कली सुम्ने मचाप्ब" दे अय्युबमी देंमाक्त।

24

परमप्रभु कली मटीब

1 मिनु अय्युबमी "नेल्ल क्येडा ठेयब सक्ति पाइशोमी निसाफ पतीके नाक्त मतुइक्पदा? आ नेक्था बाक्बपुकीम यो मेको आन नाक्त मारदे मतुइक्नीमी? उपदेसक ३:११; उपदेसक ८:६ 2 परमप्रभु यावे आ अरेशो मटीब मुरपुकीम सांद डा फुल्लु याक्नीम। मेकोपुकीम क्यारश भेडा खुइ पशा योव्रनीम। ब्यवस्था २७:१७ 3 मेकोपुकीम रोम रोइक्च आन गधा खुल्शा लाइक्नीम। मिनु वोंइश बेक्शो मीश मुर आन ब्यफ जाकटी वोंइसीनीम। 4 मेकोपुकीम प्रुडग आन कली लां मेर चुशा थोक्शा गाक्नीम। रागी डा प्रुडग आन कली खुइक्पाइक्नीम। 5 व्वाकी डा गधा गोरशो रागीम जचा थोव्रक माल्शा गाक्शो खोदेशो पा, प्रुडगपुकी जचा थोव्रक माल्शा गाक्नीम। मिनु गोरशो रागीम मेको आन तमी

तौ आन कली जचा थोवक मालनीम। 6 प्रुडगपुकीम मुर आन रूम सिला मालनीम। परमप्रभु यावे आ अरेशो मटीब मुर आन अडगुर रूम सिला पाइनीम। 7 वा मबाक्तीके मेकोपुकी शिश्रा इप्नीम। मेको आन के ग्यूमी फेक्तीक मबाक्ब। 8 मेको पहाडम बाक्शा रेउम जित्नीम। फाम्सीतीके मबाक्तीके, फुल्लु आ नेक्था फाम्सीनीम। 9 परमप्रभु यावे आ अरेशो मटीबपुकीम रोम रोइक्च आन कली आन ममा आ थुकु रे रोइश्शा, लाइनीम। मिनु मारेइ मथीब मुर आन आल आन कली आन जेर आ पा डा लाइनीम। 10 मेकोपुकी वा मबाक्तीके शिश्रा गाक्नीम। शोव्लु बेक्शा यो, क्योवज चेरब आ मुठा कुरनीम। यसैया ५८:७ 11 मेकोपुकीम गारो आन दातेमी तेल खाक्नीम। अडगुर खाक्तेक्म हना यो तूतू, दाक्शो बाक्नीम। याकूब ५:४ 12 सहर रे बेक्चा चिक्शो मुर आन हुकयी पशो नेंसीब। मिनु गार दुम्शो मुरुम 'वारच पाइय्यीनी' दे वाइ ब्रेण्ब। मो हना यो परमप्रभुम मेको आन पुंडशो मनेंब। 13 का निक्शी मुर छेडछेड आ पर्वम मरिम्शो लोव्र पाइनीम। मेकोपुकीम छेडछेड डा लां मतुइक्थु, मगाक्नीम। 14 मुर साइक्ब मुर नां रिक्म नोले बोक्शा प्रुडग नु मारेइ मथीब आन कली साइक्ब। मिनु नाक्दो मेको खुइ खोदेशो दुम्ब। 15 मुर आन मीश नु मुर आन वोंइश नु इण्ब नां रिक्चा रिम्ब। मिनु मेकोमी 'नाक्दो सुइम आं कली मतुइक्तमेक्ल' दे आ कुल फाइक्ब। भजन संग्रह १०:११ 16 खुइपुकी नाक्दो खिं प्रोल्शा ओव्रनीम। मिनु नाक्त खुंडसीनीम। मिनु मेकोपुकीम छेडछेड मतुइक्नीम। 17 मारदे हना क्येर नाक्दो मेको आन कली सुनी बाक्ब। क्येर नाक्दो डा शुश हिंतीके मेको आन वारच बाक्ब। 18 मेको मोदेशो मुरपुकी ब्वाक्कु आ तार डा बोग्यो खोदेशो बाक्नीम। मेको आन थेरशो रू सराप चीले तशो बाक्नीम। सुइ मुर आन अडगुर रू गे मलाइनीम। 19 दोपा यशो फुं कली नां नु होशोम सोव्रपाइक्बा, मोपा बेक्शो मुर आन बाक्तीकेमी पापी आन कली साम्पाइक्ब। 20 मेको आन कली जरमेब कोव्रजीम मेको आन कली प्रेंब। मिनु लुस्पुमी 'मेको ब्रोव्रशो बाक्नीम' दे मिम्नीम। मुरुम मेको आन कली प्रेंनीमी। मोपा परमप्रभु यावे आ अरेशो मटीबपुकी दिम्शो रवा खोदेशो दुम्नीम। 21 मेकोपुकीमी आल मथीब मीश मुर आन कली श्येत गेनीम। मिनु आ वोंइश बेक्शो मीश मुर आन कली मारेइ रिम्शो मपाइनीम। 22 मो हना यो परमप्रभु आ सक्तिमी मेको बोल्यो मुर आन कली ब्रोंइचा गेब। तन्न गेना बेक्नीमी मतुइक्नीम। 23 परमप्रभुम मेको आन कली प्रोंइतु हना यो, मेकोमी मेको आन कली गेना हना यो कोव्रशो बाक्ब। 24 याम का कली मरिम्शो पाइबपुकी ग्येत्थ क्युक्चा पुंडसीनीम। मिनु नोले मेको जाम्नीम। अरु खोदेशो पा मेकोपुकी यो बेक्शा लाइनीम। मिनु मेकोपुकी चेरब पेशो खोदेशो पा पेट्सीनीम। 25 सुइमी आं कली 'गे जोल पाइब नवे' दे देंने मचाप्नीम। मिनु आं कली 'फश लोव्र पाइब' देंने मचाप्नीम" देंमाक्त।

25

बिल्दादमी लोव्र पशो

1 मिनु शुआह डा बिल्दादमी 2 "नेल्ल क्येडा ठेयब दुम्तीके नु मान पा हिंतीके परमप्रभु नु बाक्ब। मेकोमी इर स्वर्गम थुं नाइश्शा बाक्तीक सेल्ब। 3 मेको आ लडाइ पाइब हिक्ने मचाप्चा डा बाक्नीम। मेको आ छेडछेड नेल्ल आन बाक्तीके मजाक्बा डा? 4 बेक्शा लाइब मुर दोपा परमप्रभु आ डोंइती ठीक पाइब दुम्ने चाप्नीमी डा? मीश मुर रे जरमेशो मुर दोपा ग्रान्रा मदिचा डा दुम्ने चाप्नीमी डा? अय्युब ९:२; भजन संग्रह १४३:२ 5 मेको आ डोंइती तास्लाम ठीक पा छेडछेड मगेब। सोरुल आन छेडछेड मगारचा डा बाक्नीम। अय्युब १५:१५ 6 मिनु लुस्पु खोदेशो मुर, दोपा परमप्रभु आ डोंइती ठीक दुम्ने चाप्बा डा?" दे बिल्दादम देंमाक्त। यसैया ४१:१४

26

अय्युबमी लोव्र लेशो

1 मिनु अय्युबमी 2 "गे दोपा बोल मपाइश्शो मुर कली वारच पाइक्नी? योक्शो गुइ कली गे दोपा नाइक्चा गेनी? 3 गे मतुइक्ब मुर कली, अर्ती गेतीनी। मिनु गे शुश रिम्शो लोव्र शेंताक्नी। 4 ओदेशो लोव्र पचा कली गे ते शेंसीनी? मिनु तेको सोक्त रे पा ओदेशो लोव्र पनी?" दे अय्युबमी देंमाक्त।

5 "उइ डा मुर आन वांकु खिंखि पाइनीम। ब्वाक्कु नु मेकेर बाक्बपुकी यो खिंखि पाइनीम। 6 परमप्रभु आ डोंइती बेक्शो मुर आन बाक्तीके मखुंडसीशो बाक्ब। मिनु जाम्शा लतीके मसुम्सीशो बाक्ब। भजन संग्रह १३९:८; हितोपदेस १५:११; आमोस ९:२; प्रकाश ९:१ 7 मेकोम श्येत्थ बाक्तीकेमी उत्तर डा सरीड प्राक्ब। मिनु रागी कली मारेइ

मबाक्तीकेम क्युकब। 8 मेकोमी ब्वाक्कु कली क्येर गोस्सुम तेक्शा वोइक्ब। मिनु मेको गोस्स मप्रोल्लब। ब्वाक्कु मगूब। 9 मेकोमी पूर्ने डा तास्ला कली सुम्ब। मिनु आ गोस्सपुकी मेको आ तारी प्राक्ब। 10 मेकोमी ब्वाक्कु आ सुरम सांद वोइश्शो बाक्ब। छिडछिड नु छेडछेड फ्राचा कली मो पशो बाक्ब। 11 मिनु सरीड डा थामपुकी हिम्सीनीम। परमप्रभु आ हुइश्शोमी हिंशा सिक्सी पाइनीम। 12 मेकोम आ सक्तिम समुन्द्र कली थेल्तु। मिनु आ रुप्तीकेम राहाब माइश्शो समुन्द्र डा ठेयब जन्तु कली खतम सेल्तु। अय्युब ९:१३; भजन संग्रह ८९:११ 13 मेको आ फश पतीकेमी सरीड हाक्साक्व। मेकोम दोरशा प्रोक्ब ठेयब जन्तु कली साइक्तु। यसैया २७:१ 14 मेको आ सक्ति डा आइक्च गेय ला बाक्नीम। मेको रे गो आइक्च सेंदा डा लोव्र ला नेंतक। मिनु मेको आ सक्तिम पशो बुंबु, सुम रुप्ने चाप्बा डा?” देंमाक्त।

27

अय्युबम लोव्र पशो

1 मिनु लेंशा अय्युबमी 2 “परमप्रभु यावे ब्रोंइशा बाक्शो खोदेशो पा आं ठीक पशो आ पर्बम मारेइ मदे। नेल्ल क्येडा ठेयब सक्ति पाइश्शोम आं थुं खाइक्पाइश्शो बाक्ब। 3 गो आं रामं सोक्त बाक्म सम्म, परमप्रभु आ सोक्त आं नेंम बाक्म सम्म, 4 गो मारेइ जोल मपाइनुड। मिनु मिलो शिलो मपाइनुड। भजन संग्रह ३४:१४ 5 गो गेपुकी ठीक बाक्नीनी, दे मदेनुड। गो मबेक्डा सम्म आं रिम्शो पतीक मप्रोंइनुड। 6 गो आं ठीक पतीके कली गेनायो मप्रोंइनुड। गो मबेक्डा सम्म दोस मताइब बाक्नुड। प्रेरित २४:१६; १कोरिन्थी ४:४

7 आं जोरी सत्रु परमप्रभु यावे आ अरेशो मटीब खोदेशो दुम्मल। आं कली मदाक्बपुकी ठीक मपाइब खोदेशो दुम्मल। 8 परमप्रभु यावे आ अरेशो मटीब मुर बेक्चामेनु, परमप्रभुम मेको आन सोक्त लाइक्चावानु, मेको आन के मार आस बाक्बा डा? लूका १२:२० 9 श्येत जचा चिक्तमेनु, आन डाक्शो परमप्रभुमी नेंबा डा? 10 मार, मेकोपुकीम नेल्ल क्येडा ठेयब सक्ति पाइश्शो कली मिम्शा ग्येरसीनीमी? मेकोपुकीम गेना हना यो मेको कली मिम्शा पुंइनीमी डा? 11 गो इन कली परमप्रभु आ पशो आ पर्बम शेंनुड। गो नेल्ल क्येडा ठेयब सक्ति पाइश्शो आ मिम्शो मखुइक्नुड। 12 मेको गे नेल्लेम ताइतीनी। गेपुकी मारदे फश लोव्र पाइनीनी?

13 परमप्रभु यावे आ अरेशो मटीब आन कली गेशो भाग एकोन बाक्ब। नेल्ल क्येडा ठेयब सक्ति पाइश्शोम शिशी मपाइक्ब आन कली गेशो भाग एकोन बाक्ब। हितोपदेस १३:२२; उपदेसक २:२६ 14 मेको आन तौ शुश बाक्तेक्म हना यो, मेकोपुकी तरवारम क्योरशा साइक्चा पुंइसीनीम। मिनु मेको आन चच युइ रूथ्री जचा मताइनीम। अय्युब २१:१९ 15 मिनु लीशोपुकी बेक्तीक रोइ पा बेक्शा थिम्चा पुंइसीनीम। मिनु आन मीशपुकी रेंका मपाइनीम। 16 मेकोपुकीम फुरक खोदेशो पा चांदी खुप्ताक्म हना यो, खप खोदेशो पा शुश वासी तेल्लेक्म हना यो, 17 मेकोपुकीम तेल्लीमी, तन्न ठीक पाइबपुकीम फेक्नीम। मिनु मेको आन चांदी दोस मताइब आन कली योक्शा गेनीम। 18 मेको आन खिं ग्योव्र खोदेशो पा सेल्शो बाक्ब। अडगुर रू खाल पाइब मुर आन बाक्तीके खोदेशो दुम्ब। 19 मेको शोंप पाइश्शो दुम्शा इप्नीम। तन्न मुल रे मोदेशो मदुम्नीम। मेको बोक्मानु, मेको नेल्ल लने थुम्शो बाक्ब। 20 शुश हिंतीकेम मेको आन कली बारशो ब्वाक्कुम खोदेशो पा सुम्ब। मिनु नाक्दो फश गिवारमी मेको आन कली योल्ब। 21 पूर्ब डा फशेमी मेको आन कली बेर पा योल्ब। मिनु मेको आन बाक्तीके योल्चा पुंइसीनीम। 22 फशेमी शिशी मपथु, मेको आन कली योल्ब। मिनु मेकोपुकी मेकेर रे प्रोक्चा माल्लीम। 23 मेको फशेमी मेको आन कली तशा, आन गुइ फ्रेक्नीम। मेको आन बाक्तीकेम मेको आन कली शुक्शी पाइब” देंमाक्त।

28

सोफार आ लोव्र

1 मिनु अय्युबमी “चांदी आन खानी बाक्नीम। सुन यपाइश्शा रिम्शो सेल्तीक बाक्नीम। 2 फलाम दोशा खप रे गुंइनीम। फुल्लु रे तांबा यपाइश्शा गुंइनीम। 3 मुरुम छिडछिड कली थुम्पाइक्नीम। मेकोपुकी रागी आगा डा छिडछिडम खानी माल्ला माल्न गाक्नीम। 4 मुर आन बाक्तीक रे शुश डोन लाइनीम। मिनु मुरुम मथेक्तीक रागी लाइनीम। मेकोपुकीमी खानी आगा लतीक पोव्रला दोइनीम। मिनु मेकोपुकी सुइ मबाक्तीकेम डोरीम ग्युक्शा बिक्तीकेम गेय पाइनीम। 5 मिनु अन्न रू आन आगाम खानी दोना दोन बाक्नीम। मिनु नेल्ल खल्बल सेल्नीम। खप कली मी सेल्नीम। 6 मेको फुल्लु रे साफीर माइश्शो हीरा नु सुन के फुरक गुंइनीम।

7 तेकोइ सिखार पाइब चिक्बीम मेकेर लतीक लां मतुइक्ब। मिनु ब्वारदे आ शुश ताइब मिक्चीमी यो मेको मतशो बाक्ब। 8 ठेयब लेशशो जन्तु यो मेकेर मजाकदीत्नीम। मिनु गुप्सपुकी मेको लां रे मलाइनीम।

9 मुरुम आन गुइमी सारो फुल्लु क्योरनीम। मिनु पहाड आन कली दिंम सेल्नीम। 10 मेकोपुकीम रोंगुम पोत्रला मुइनीम। मिनु शुश क्येट लाइब हीरापुकी ताइनीम। 11 मेकोपुकीम खोला आ बुक्तीक माल्नीम। मिनु रागीम थिम्शा वोइश्शो शोंप गुंइनीम।

12 तन्न तुइक्तीक चहिं ते थिंसीबा? मिनु रुप्तीके ते बाक्बा? 13 बेक्शा लाइब मुरपुकीम मेको आ लां मतुइक्नीम। ब्रोंइशा बाक्ब मुर आन रागीम मेको मथिंसीब। 14 मिनु खप आ लुकच लशोमी 'मेको गो नु मबाक्ब' देंब। मिनु समुन्द्रमी यो 'मेको गो नु मबाक्ब' देंब। 15 मुरुमी सुनमी रुप्तीके ग्याप्ने मचाप्नीम। चांदी नाक्शा यो मेको कली थाप्ने मचाप्नीम। हितोपदेस ३:१३-१५ 16 रुप्तीके कली ओफीर डा सुन, शुश क्येट लाइब ओनीक्स नु साफीर माइश्शो हीरामी यो ग्याप्ने मचाप्नीम। 17 सुन नु सिसा आस क्येडा तुइक्तीके नु रुप्तीके ठेयब बाक्ब। क्येख सुन के गहाना नु यो मेको फाइक्ने मचाम्सीब। 18 लल मूगा नु टल्केब फुल्लु आ पर्बम लोत्र पचा ममाल्ब। तुइक्तीक थुं मोती आन क्येडा यो शुश क्येट लाइब बाक्ब। भजन संग्रह १११:१०; हितोपदेस १:७, ९:१० 19 एथीयोपीया रागी डा पुशपराज माइश्शो हीरा मेको नु उइक्थ दुम्ने मचाप्ब। मेको क्येख सुनम ग्याप्ने मचाप्नीम।

20 मिनु तुइक्तीक थुं ते रे जाक्बा? मिनु रुप्तीके ते बाक्बा? 21 मेको ब्रोंइशा बाक्ब नेल्ल आन डोंइती रे खुइश्शो बाक्ब। मेको सरीडम बेरब चिक्ब आन क्येडा यो खुइश्शो बाक्ब। 22 जाम्शा लतीके नु बेक्पाइक्बमी 'गो मेको आ पर्बम नेंशो ला बाक्नस्कु' देंनीस।

23 तन्न परमप्रभुमी मेको आ लां तुइक्ब। मेको ते रे जाक्बा मेको यो तुइक्ब। हितोपदेस ८:२२-३१ 24 मारदे हना मेकोमी रागी आ एर ओथ नेल्ल ताइब। मिनु सरीड आगा डा मारेइ मारेइ नेल्ल आन कली कोत्रब। 25 मेकोमी फश कली सक्ति गेप्टु। मिनु समुन्द्र आ सांद वोइक्तु। 26 मेकोम 'दोशो रेउ यिचा माल्बा' मेको अरेप्टु। मिनु बुंबु कली आ लां कोइताक्व। 27 मेना मेकोम रुप्तीक नु तुइक्तीक कली तशा 'एकेर बाक्ब। मोदेशो दुम्चा माल्ब। मेको रिम्शो बाक्ब' देंमाक्त। 28 मिनु मेकोमी मुर आन कली 'परमप्रभु यावे कली मान पा हिंतीके तुइक्तीक बाक्ब। मरिम्शो पतीक रे डोन बाक्चा रुप्तीके बाक्ब' देंत" दे अय्युबमी देंमाक्त। भजन संग्रह १११:१०; हितोपदेस १:७

29

डोंइती डा ग्येरशा बाक्शो मिम्शो

1 मिनु लेशा अय्युबमी 2 "गो डोंइती डा खोदेशो बाक्ड हना! मेना परमप्रभुमी आं कली कोत्रशो बाक्त। 3 मेना मेको आ छेडछेड आं पिया तार बाक्त। मिनु गो छिडछिडम मेको आ हाम्सोम गाक्ती। भजन संग्रह १८:२९ 4 गो आं थम रिम्शो नाक्तीम परमप्रभु आं वारच दुम्शा, आं नेक्था बाक्त। भजन संग्रह २५:१४ 5 मेना मेको नेल्ल क्येडा ठेयब सक्ति पाइश्शो गो नु बाक्शो बाक्त। मिनु आं तौपुकी आं एर ओथ बाक्तेक्म। 6 मेना आं लांम दूध शाइश्शो बाक्त। मिनु सेरथे फुल्लु रे तेल के खोला शाइश्शो बाक्त। 7 गो आं बाक्तीके रे सहर डा ठेयब लाप्चो रे पा लाडगा आं नित्तीकेमी नित्थ लडानु, 8 ठिटापुकीम आं कली तशा, लां प्रोंइशा गेतीमी। मिनु खूशोपुकी आं कली तशा मान पा राप्तेक्म। 9 ठेयब मुरपुकी सिक्सी पा बाक्तेक्म। मिनु मेकोपुकीम आन गुइमी आन शोत्र सुम्तेक्म। 10 सासन पाइब आन ब्वाक्चा देक्शा, सिक्सी पा बाक्तेक्म। 11 आं ब्वाक्शो नेंबपुकीम आं कली ठेयब सेल्तीमी। मिनु आं कली तशा 'रिम्शो बाक्ब' देंतेक्म। 12 मारदे हना गो 'वारच पाइक्की' देंब प्रुडग आन कली वारच पा प्रोंइतामी। वारच पाइब मबाक्शो रोम रोइक्च आन कली वारच पाइक्तामी। अय्युब ३१:१६; प्रस्थान २२:२१-२२ 13 मारेइ आस मबाक्शो मुरपुकीम आं कली आसीक गेतीमी। गो आन वोंइश बेक्शो मीश मुर आन थुं ग्येरपाइक्तामी। 14 गो ठीक पतीक कली वा फेक्सीशो खोदेशो पा फेक्साक्यी। आं ठीक निसाफ पतीके आ वा नु आं फेटा खोदेशो बाक्त। 15 गो मिक्च मताइब आन मिक्च दुम्ती। मिनु खोइल मदुक्ब आन खोइल दुम्ती। 16 मारेइ मथीब आन कली आन आफ खोदेशो दुम्ती। गो अर्को रागी डा मुर आन कली आन मुददा कोत्रशा गेतामी। अय्युब ३१:१८ 17 गो ठीक मपाइब आन सक्ति नेल्ल खतम पोक्तामी। मिनु मेको आन रोइश्शो लेप्पाइक्ता। 18 मेना गो आं खिंम श्येत मजथु बेक्नुड, दे मिम्शो नड। मिनु गो शुश बर्स ब्रोंइनुड, दे मिम्शो नड। 19 आं शाक्श बारशा ब्वाक्कु बाक्तीक गे लाम्तेक्म। मिनु आं राशीम सीत बाक्त। 20 आं सक्ति गेना हना यो बाक्त। मिनु आं गुइ डा लिब्रा गेना हना आप्ने चाप्शो बाक्ती।

21 गो लोव्र पडानु, मुर नेल्लेमी सिक्सी पा नेंतेक्म। मिनु नोफा दाइशशा आ अर्थ नेंतेक्म। 22 गो आं लोव्र थुमु नोले सुइमी अरु लोव्र तेम्चा ममाल्देम। आं लोव्र मेको आन थुंमी सीत खोदेशो पा जिन्ना जिन्न लत। 23 मेकोपुकीम बर्खा डा रेउ रिम्शो खोदेशो पा आं कली रिम्ताक्यीमी। मिनु नोले डा रेउ रिम्शो खोदेशो आन शोव्र वोक पाक्शा आं लोव्र नेंतेक्म। 24 गो ज्याउ रिस्सीडानु, आन थुं बारत। आं ग्येरशो कुल तशा, मेको आन कली लेम्तीक दुम्त। 25 गो मेको आन गाक्चा माल्शो लां योव्रशा गेतामी। मिनु गो 'ओं पने' दे अरेतामी। गो पिप आ लडाइ पाइब आन दातेम बाक्शो खोदेशो बाक्ती। गो रोंका पाइब आन कली लेम्ब खोदेशो दुम्ती" दे अय्युबमी देंमाक्त।

30

अय्युब आ थुं लुक्च लशो

1 मिनु अय्युबमी "मुल ठिटापुकी आं कली तशा शुक्शी पा रिस्साक्म। मेको आं क्येडा ठिटा बाक्नीम। मेको आन आफ आन कली गो आं क्यारश भेडा खाल पाइब कुचुमपुकी नु काथा वोइक्चा यो मशिरशो मिम्शो नड। अय्युब १९:१८ 2 मेको आन गेय आं कली शोर गाक्शो बाक्त। मारदे हना मेको आन सक्ति ग्युम्ने थुम्शो बाक्त। 3 मेकोपुकी शुश पुडग नु शोव्रलु बेक्शो बाक्तेक्म। मेकोपुकी गोरशो सोव्रशो रागीम आन जचा थोव्रक माल्तेक्म। 4 मेकोपुकीम हिक्सी डाम्शो सुवा, बुटा आन सफा सेक्शा जाइनीम। मिनु मार मार आन शाक्श दोम्तेक्म। 5 मेकोपुकी मुर आन दाते रे तिल्चा पुंडसीशो बाक्तेक्म। मुरपुकीम मेको आन कली खेदा पशो खोदेशो पा ग्रीतेक्म। 6 मेकोपुकी सोव्रशो खोलामी, पुक्खी आगा नु ब्रोल्शो सेरथे फुल्लु मेर बाक्तेक्म। 7 मेकोपुकीमी बुटा आन आगामी ग्रीतेक्म। मिनु बुटा आगामी बुक्तेक्म। 8 मेको निप्स मपाइशो, महिक्सीशो मुर बाक्तेक्म। रागी रे तिल्शा खेरचा पुंडसीशो बाक्तेक्म। 9 मुल गो मेको आन शुक्शी पतीके कुम्सो दुम्ती। आं पर्बम शुक्शी लोव्र ला पाइनीम। भजन संग्रह ६९:१३; बिलाप ३:६३ 10 मेकोपुकीम आं कली ग्रांग्रा दिशो मिम्नीम। आं क्येडा डोन बाक्नीम। आं कुलुम तोक्चा मुने मपाइनीम। अय्युब १७:६; मत्ती २६:६७ 11 मारदे हना परमप्रभुमी आं लिब्रा प्राक्शा, आं कली श्येत गेतीके, मेकोपुकीम आं डोंइती 'मारेइ मारेइ पने चाप्नीक' दे मिम्नीम। 12 आं ग्युरा गे थम मरिम्शो मुर बोक्नीम। मिनु आं खोइली ग्रेक्पाइक्नीम। मिनु मेकोपुकीम आं गाक्तीक लां तेक्नीम। 13 मेकोपुकीम आं लां प्रेत्नीम। आं श्येत तेम्नीम। मिनु सुइमी मेको आन कली 'मोदेशो मपचा' दे मतेक्नीम। 14 मेकोपुकी ठेयब पोव्रलाम रिक्थ्री मरिक्थ्री पा ओव्रनीम। मेकोपुकी ब्रेशो गारो रे नेम्मुशा जाक्नीम। 15 मिनु गो शुश हिंन हिंन बाक्नुड। मेकोम आं मान ततीक फशेम खोदेशो पा हुरुर पा योल्पाइक्तु। आं शोंप बाक्शा रिम्शो दुम्तीके गोस्स खोदेशो पा जाम्शा लत। 16 मुल आं थुं बेक्ना बेक्न लशो बाक्ब। मिनु श्येत जतीक नाक्त ला लीशो बाक्नीम। 17 नाक्दो आं रुश शुश खाइक्नीम। मेको खाइक्तीके गेनायो मनाइक्ब। 18 परमप्रभुमी आ ठेयब सक्तिमी आं वा फ्रुप्ब। मिनु वाम शुरम खाइशो खोदेशो पा खाइक्ब। अय्युब ७:५; अय्युब १६:८ 19 मेकोमी आं कली हिलोम ब्वारशो बाक्ब। मिनु गो फुरक नु पुलु खोदेशो दुम्शो बाक्नुड। 20 गो इन कली 'वारच पाइय्यीनी' दे पुंडता। तन्न गे आं कली लोव्र मलेत्तीनी। गो इन कली राप्शा रिम्शा बाक्ती। तन्न गे आं कली मकोव्रयीनी। अय्युब १९:७; भजन संग्रह २२:३ 21 गे आं कली ठेयब श्येत गेब दुम्शो बाक्नीनी। इन ठेयब सक्तिमी आं कली खेदा पाइनीनी। 22 गे आं कली क्युक्शा फश गिवारम बेरपाइक्तीनी। मिनु आं थुं लुक्च लपाइक्तीनी। 23 गे आं कली साइक्नीनी, गो मेको तुइशो बाक्नुड। ब्रोंइशो नेल्ल मेको लां लाइनीम। 24 थमा पा, मेकोमी पुडग आन कली श्येत मगेब। मुर श्येत जशा 'वारच पाइय्यीनी' दे ग्रीनीम। 25 मार, गो श्येत जशो मुर आन पर्बम मडाक्डा डा? मार, पुडग आन पर्बम आं थुं मखाइक्म डा? 26 मो हना यो गो रिम्शो दुम्तीक आस पाता। तन्न मरिम्शो कका जाक्त। छेडछेड रिम्शा बाक्ती। तन्न छिडछिड कका जाक्त। 27 आं थुं गेना हना यो ग्येत्थ लुक्च दुम्ब। गो गेना हना यो श्येत जचा माल्नुड। 28 गो क्येर नाक्दोम गाक्नुड। गो गुम्तीकेमी 'वारच पाइय्यीनी' दे पुंडनुड। 29 गो सिवार आन लोक्ब दुम्शो बाक्नुड। हुहुचील आन वारच दुम्शो बाक्नुड। 30 आं कुशुल क्येर दुम्शा, आं रुश नेल्ल चोइनीम। 31 आं बीना रोंका पा ग्रीब। आं बांसुरी डाक्शो मुर आन कली ताप्शो बाक्ब" देंमाक्त।

31

अय्युबमी "गो ठीक पाइब नड" देशो

1 मिनू अय्युबमी “गो सुइ मीश आल आन कली मरिम्शो थुंम मकोव्रचा कली, आं मिक्च नु कबल पाता। मत्ती ५:२८-२९ 2 मिनू परमप्रभुमी इर रे आं कली गेबा? नेल्ल क्येडा ठेयब सक्ति पाइशशोमी मार शोप गेबा? 3 मार, ठीक मपाइब आन कली शुश हिंचा डा श्येत मदुम्बा डा? मरिम्शो पाइब आन कली खतम दुम्तीकेम मसुम्बा डा? 4 परमप्रभुम आं पशो नेल्ल तुइक्ब। मिनू आं गाक्शो नेल्ल कोव्रब। अय्युब २३:१०

5 गो हेंथे गाक्शो बाक्ती हना, दूली लां गाक्शो बाक्ती हना, 6 परमप्रभुमी आं कली ठीक नाक्तीकेमी नाक्तील। मिनू मेकोमी आं गेना हना यो रिम्शो पशो तुइक्ब। 7 गो ठीक लां रे ग्येत्थ लुक्च लशो बाक्ती हना, आं थुंम आं मिक्चीम दाक्शो खोदेशो पा पशो बाक्ती हना, आं गुइमी ग्रान्ग्रा दिशो गेय पशो बाक्ती हना, 8 आं खुम्शो अन्न अरुम जामेक्ल। मिनू आं शोक्शो मारेइ मारेइ तुल्सीमल। उत्पत्ती २६:१६

9 आं कली मीश मुरुम हेंथे गाक्पाइक्ती हना, गो आं नेक्था डा मुर आन लाप्चोमी बाप्शा बाक्शो बाक्ती हना, 10 आं मीश अरु मुर आन वाइलीम दुम्शा लल। मिनू अरु मुर मेको नु इम्मल। २सामुएल १२:३२ 11 मारदे हना मेको थम मरिम्शो गेय बाक्ब। मेको निसाफ पचा कली मरिम्शो बाक्ब। 12 मेको जम्शा लतीकेम सोइक्ब मी खोदेशो बाक्ब। मेकोमी आं बाक्शो मारेइ मारेइ खतम पोक्ब।

13 गो आं वाइलीम वाइल आन थुं मनुशो लोव्र पाता हना, सिक्सी पपाइक्तामी। 14 परमप्रभु आं पर्बम बोक्मेनु, गो मार पाइनुडा? मेकोमी आं कली लोव्र पथ ब्रेत्ताक्व हना, गो मार लोव्र लेत्नुडा? 15 आं ममा आ कोव्रजम आं कली सेल्बम मेको आन कली यो मसेला डा? मेकोमीन आंइ कली आंइ ममा आ कोव्रजीम मसेला डा? हितोपदेस १४:३१; मत्ती २५:४०

16 गो पुडग आन कली आन माल्शो थोव्रक मगेशो बाक्ती हना, आन वोइश बेक्शो मीश मुर आन कली डाक्पाइशो बाक्ती हना, अय्युब २९:१२ 17 गो आं जचा थोव्रक आं कान जशो बाक्ती हना नु रोम रोइक्च आन कली योक्शा मगेशो बाक्ती हना, मोदेशो दुम्ल। 18 गो रोम रोइक्च आन कली आन आफोमी खोदेशो पा थुल्तामी। गो जरमेसीड रेन आन वोइश बेक्शो मीश मुर आन कली वारच पाइक्तामी। अय्युब २९:१६ 19 गो पुडग आन कली वा मफेक्शो ताता हना, नाक्दो फेक्तीक मबाक्शो बाक्त हना, 20 मेको आन कली आं भेडा आन ऊन रे सेल्शो फेक्तीकेम महोपाइक्तीके मेकोपुकीम आं कली आसीक मगेशो बाक्तेक्म हना, 21 गो रोम रोइक्च आन कली मरिम्शो पशो बाक्ती हना, ठेयब लाप्चोम बाक्बपुकीमी ‘गे ठीक पाइब बाक्नीनी’ देशो बाक्तेक्म हना, रूथ ४:१-१० 22 आं बला आं ची रे दोक्ल। आं गुइ जिक्शा दोक्ल। 23 तन्न गो परमप्रभु आ गेशो हिंचा डा श्येत तशा हिंनुड। मिनू गो मेको आ ठेयब मान ततीके फाल्ने मचबु।

24 गो सुन कली थमा सुइशो नड हना, क्येख सुनमी आं कली रिम्शो ब्रोंइचा गेब, दे मिम्शो नड हना, भजन संग्रह ५२:९ 25 गो आं ठेयब शोप तशा शुश ग्येरसीशो बाक्ती हना, आं शुश मारेइ मारेइ बाक्शो आ पर्बम आं कली रिम्शो बाक्चा गेब, दे मिम्शो नड हना, 26 गो नां गे कोव्रशा मेको कली ठेयब सेल्शो नड हना, तास्ला आ दारस कली ठेयब सेल्शो नड हना, ब्यवस्था ४:१९ 27 मेकोम आं थुं कली खुइशशोमी हेंथे मिम्ब सेल्शो बाक्ती हना, मेको कली पुक्पु पाइक्चा कली आं गुइ क्युक्शो बाक्ती हना, 28 मेको नेल्ल सजाइ तचा डा पाप दुम वा। मारदे हना गो स्वर्गम बाक्ब परमप्रभु आ पर्बम दूली लोव्र पाइब दुम्ड वा।

29 गो आं कली काइ मदाक्बपुकीमी श्येत जशो तशा ग्येरशो बाक्ती हना, मेको आन कली मरिम्शो दुम्तीकेम सुमानु, ग्येरसीशो बाक्ती हना, हितोपदेस २४:१७; भजन संग्रह ५:५; भजन संग्रह ३५:१३-१४ 30 गो ‘मेकोपुकी बेक्मल’ दे सराप चीले पा पाप मपड। १ पत्रुस ३:९ 31 आं गेय पाइब नेल्लेम गेनायो ‘अय्युब आ भोजम मुर मरूम’ मदेंम। 32 अर्को रागी डा मुरपुकी गेनायो लांम इप्चा ममाल्म। लां गाक्ब आन कली गेना हना यो आं खिं डा लाप्चो रोक्शो बाक्त। न्यायाधीस १९:२०-२१; १ पत्रुस ४:९; हिब्रू १३:२ 33 अरु मुरपुकीम आन हेंथे पशो खुइक्चा माल्शो खोदेशो पा, गो आं थुंमी आं मरिम्शो पशो मखुइक्तु। 34 मारदे हना गो हुलपुकीम मार देंनीमी, दे हिंती। मिनू खिं खिं डा आन शुक्शी पतीक रे शुश हिंती। मोपतीके गो सिक्सी पा बाक्ती। गो खिं रे मगूड।

35 गो आं लोव्र नेंब का बाक्शो हना, नेल्ल क्येडा ठेयब सक्ति पाइशशोमी आं लोव्र लेत्तल। आं कली दोस गेशा ब्रेक्शो ब्रेक्स ते बाक्बा? अय्युब २३:३-७ 36 थमा पा, गो मेको आं बलाम लाम्सीड वा। गो मेको सिरपेच खोदेशो पा गुक्सीड वा। 37 मिनू आं पशो गेय नेल्ल मेको कली शेंदु वा। गो मेको आ डोंइती ठेयब मुर कली ग्रुम्थ लशो खोदेशो पा लड वा।

38 आं रू आं कली दोस गेशा ग्रीशो बाक्त हना, मेकेर डा खप नेल्ल डाकशो नम हना, 39 मेकेर वाशो मार मार मथाप्यु, जशो बाक्ती हना, मेको रू आ होवप कली श्येत गेशो बाक्ती हना, 40 चेरब आ पा डा चोंक चू वामल। क्योव्रज आ पा डा सुवा वामल” देमाक्त। मोपा अय्युबमी आ लोव्र थुमा बाक्त।

32

एलीहु आ लोव्र

अय्युब ३२:- अय्युब ३७:-

1 मिनु मेको मुर सांमी अय्युब कली लोव्र पचा प्रोन्मे बाक्त। मारदे हना अय्युबम आंम कली “गो ठीक पाइब नड” देंस डा देंस पवा बाक्त। 2 मिनु राम आ खिं डा बूज डा बाराकेल आ तौ एलीहु गाइक्ता बाक्त। मारदे हना अय्युबमी आंम कली परमप्रभु आ डोंइती शुश पाप मपाइब खोदेशो सेल्से बाक्त। उत्पत्ती २२:२१; अय्युब १३:१८; अय्युब १९:६-७; अय्युब २५:५-६ 3 अय्युब आ वारच सां आन कली तशा यो गाइक्ता बाक्ब। मारदे हना मेकोपुकीमी अय्युब कली लोव्र लेन्ने मचाप्मे बाक्त। मो हना यो मेकोपुकीम अय्युब कली दोस ताइब सेल्मे बाक्त। अय्युब १५:४; अय्युब १८:२१; अय्युब २०:२९; अय्युब २२:५ 4 मेकोपुकी अय्युब नु लोव्र पामेनु एलीहु चहिं सिक्सी पा बाक्शो बाक्माक्त। मारदे हना, मेको आन क्येडा आल बाक्माक्त। 5 मिनु मेको सांमी अय्युब कली लोव्र लेन्ने मचाप्शो तशा, एलीहु गाइक्ता बाक्त।

6 मिनु बूज डा बाराकेल आ तौ एलीहुम “गो आइक्चीन बाक्नुड। गेपुकी खाल्पा बाक्नीनी। मोपतीके इन डोंइती आं तुइश्शो मदेंड, दे सिक्सी पा बाक्ती। 7 गो ‘खाल्पा मुर ब्वाक्चा माल्नीम। खूशोपुकीम आन तुइक्तीके शेंदमेक्ल’ देंती। अय्युब १२:१२ 8 बेक्शा लाइब मुरपुकी नु नेल्ल क्येडा ठेयब सक्ति पाइश्शो आ सोक्त बाक्ब। मिनु मेकोमी मुर आन कली रुप्तीक थुं गेब। 9 खाल्पापुकी ला जोक्ब तुइक्ब मबाक्नीम। खूशोपुकी यो मार ठीक बाक्बा, मेको मरुप्नीम। 10 मोपतीके गो आं लोव्र नेनीन। गो आं मिम्शो देंचा गेयीनी।

11 नेनीन। गो इन लोव्र नेंस डा नेंस बाक्ती। गो इन लोव्र रिम्ना रिम्न बाक्ती। इन मिम्शा पशो जोक्तीक तुइक्तीक लोव्र नोफा दाइश्शा नेंशा बाक्ती। 12 गो इन देशो लोव्र नेना नेन बाक्ती। तन्न गेपुकीम अय्युब कली शेंने मचाप्नी। मेको आ लोव्र यो लेन्ने मचाप्नी। 13 ‘गेपुकीम तुइक्तीक थुं तशो बाक्नीकी’ मदेनी। ‘मुरपुकीम ममाइ परमप्रभुमीन मेको कली सजाइ गेवल’ मदेनी। 14 तन्न अय्युबम आं पबंम मारेइ मदे। गो इन लोव्र खोदेशो पा मेको कली लोव्र मलेत्तु।

15 एकोपुकी श्येतथ दुम्शो बाक्नीमी। मिनु एकोपुकीमी मारेइ लोव्र लेन्ने मचाप्नीम। 16 एकोपुकी मब्वाक्तेक्म हना यो, गो रिम्शा बाक्नुडा डा? मारदे हना एकोपुकी राप्शा बाक्नीम, लोव्र चहिं मलेत्नीम। 17 मुल गो लोव्र लेत्नुड। आं मिम्शो लोव्र पाइनुड। 18 मारदे हना गो शुश लोव्र पचा माल्शो बाक्नुड। आं आगा डा सोक्तीमी आं कली लोव्र पपाइक्ब। 19 गो लोव्र पचा मताता हना, नक शांबुम ब्रीशो कुशुल के थैलो खोदेशो पा बुक्ने चाप्नुड। 20 आं थुं नाइक्पाइक्चा कली गो ब्वाक्चान माल्नुड। गो लोव्र लेत्चा माल्नुड। 21 गो सुइ आन कुल कोव्रशा लोव्र मपाइनुड। गो सुइ नु मिलो शिलो मपाइनुड। 22 मारदे हना गो मिलो शिलो पस मजोक्नुड। मो पाता हना आं कली सेल्बम आं कली रीब पा खतम पोक्ब।

33

1 अय्युब, मुल आं लोव्र नेनीन। आं देशो लोव्र नेल्ल नोफा दाइश्शा नेनीन। 2 कोव्रडीन, गो लोव्र लेत्चा कली ठीक दुम्शो बाक्नुड। आं शोव्र लोव्रम ब्रीशो बाक्ब। 3 गो आं लोव्रमी ‘गो रिम्शो थुं पाइश्शो मुर नड’ दे कोइनुड। गो मार लोव्र देंनुडा, मेको थमा बाक्ब। 4 परमप्रभु आ सोक्तीम आं कली सेलती। मिनु नेल्ल क्येडा ठेयब सक्ति पाइश्शोमी आ ब्रोंइतीक सोक्त गेती 5 गे चाप्नीनी हना, आं लोव्र लेत्तीनी। इन देंचा माल्शो लोव्र डोंइतीन मिम्तीन। मिनु गो नु लोव्र पने। 6 परमप्रभु आ डोंइती गो यो इन खोदेशोन नड। गो यो खप केन सेल्शो नड। अय्युब १०:९ 7 गे आं कली तशा महिनीन। गो इन कली श्येत मगेनुड।

8 गो इन देंचा माल्शो लोव्र नेल्ल नेंता। मिनु इन ब्वाक्शो नेंता। 9 गे ‘गो दोस मताइब नु हेंथे मपाइब बाक्नुड। गो मरिम्शो मपाइब, गेना हना यो रिम्शो पाइब बाक्नुड’ अय्युब १६:१७; अय्युब २७:६; अय्युब ३१:१-४० 10 मो हना यो ‘परमप्रभुम आं दोस थिन्ना थिन्न बाक्ब। मेकोमी आं कली आ जोरी सत्रु मिम्शो बाक्ब। अय्युब १३:२६; अय्युब १९:११ 11 आं खोइलीम ठेंडरो थोक्ताक्नी। आं लां नेल्ल कोव्रशा, वोइक्नीनी’ दे लोव्र पाइतीनी। अय्युब १३:२७

12 तन्न गे दूली मिम्ब बाक्नीनी। गो इन कली लोव लेत्नन्नी। बेक्शा लाइब मुर आन क्येडा परमप्रभु ठेयब बाक्ब। 13 गे मारदे परमप्रभु नु इन थुं मनुशो लोव पाइनीनी। मिनु गे 'मेकोम आं लोव काइ मलेप्ब' देंनीनी? 14 परमप्रभुमी खेयप का निक्शी लोव पाइब। तन्न मुरपुकीम मेको मरुप्नीम। 15 डोमुमी, नाक्दो ततीकेमी, निन्द्रा पशोनु, बेक्शा लाइब मुर ब्राख्येम गोलशा इम्मानु, अय्युब ४:१२-१६ 16 परमप्रभुम मेको आन नोफा नेंब सेल्ब। मिनु मेको आन कली शेंदानु, 'परमप्रभु आ लोव बाक्माक्त' दे तुइक्नीम। अय्युब ३६:१० 17 मेकोमी मुर आन कली आन मरिम्शो पशो रे रिम्शो सेल्चा कली नु मेको आन ठेयब लेत्तीक तेक्चा कली लोव पाइब। 18 परमप्रभुम मेको कली बेक्चा रे प्रोंइचा दाक्ब। मेको आन कली तरवार रे प्रोंइचा दाक्ब। 19 मिनु मुर खाइक्स डा खाइक्स पा आन ब्राख्येम इप्शा, सजाइ ताइनीम। मिनु आन रुश गेना हना यो ख्रिंख्रि पाइनीम। 20 मोपा मेकोपुकीम आन जचा थोवक ग्रान्गा दीनीम। मिनु थम ब्रोव्रशो जचा थोवक यो मदाक्नीम। 21 मिनु मेको आन रां गेयशा सोव्रनीम। मिनु मेको आन खुइश्शो रुश ताइसीनीम। 22 मेको आन सोक्त लचा चिक्शो बाक्ब। मेको आन ब्रोंइतीक नाक्त नुप्चा चिक्शो बाक्ब। 23 मो हना यो मेको मुर आन दातेमी का कली परमप्रभु आ हजार हजार स्वर्ग डा गेय पाइब कामी वारच पा, मेकोमी 'मेको रिम्शो थुं पाइश्शो मुर बाक्ब' देंत हना, 24 मिनु मेकोमी मुर कली शिशी पा 'मेको मुर कली बेक्चा रे प्रोनीन। मेको कली प्रोंइतीक थोवक गो नु बाक्ब' देंत हना, भजन संग्रह ४९:८-११ 25 मेको मुर आ श्ये ठिटा के खोदेशो पा नक दुम्ब। मेको आ ठिटा ना डा खोदेशो दुम्ब। भजन संग्रह १०३:५ 26 मिनु मेकोमी प्रार्थना पवानु, परमप्रभुमी नेंब। मेको परमप्रभु आ डोंइती बाक्शा, ग्येरसीशा कुम्सो पाइब। परमप्रभुम मेको आ ठीक पतीक लेंशा डोंइती डा खोदेशो सेल्ब। 27 मिनु मेको मुरुम मुर आन बाक्तीक जाक्शा, मेको आन कली 'गो पाप पाता। गो ठीक पतीके कली दूली सेल्ता। गो आं तचा माल्शो सजाइ मतड। 28 मेकोमी आं सोक्त कली बेक्तीक रे प्रोंइतु। मिनु गो छेडछेड तचा कली ब्रोंइती' देंब। 29 परमप्रभुमी एको नेल्ल बेक्शा लाइब मुर आन पर्वम पाइब। खेयप निक्शी, खेयप सां सम्म मो पाइब। 30 बेक्चा चिक्शो मुर आन कली तुरसुम लचा रे लेप्पाइक्ब। मोपा ब्रोंइतीक छेडछेड लेंशा ताइनीम। भजन संग्रह ५६:१४; भजन संग्रह १०३:४; भजन संग्रह ११६:९ 31 नेनीन अय्युब आं लोव नोफा दाइश्शा नेनीन। गे सिक्सी पा बाक्कीन। गो लोव पाइनुड। 32 इन देंचा माल्शो मारेइ लोव बाक्त हना, आं कली देनीन। गे ब्वाक्कीन। मिनु गो इन पोन बोक्नुड। 33 तन्न इन देंचा माल्शो लोव मबाक्त हना, सिक्सी पा आं लोव नेनीन। मिनु गो इन कली रुप्तीक लोव शेंनुड" दे एलीहुम देंमाक्त।

34

“परमप्रभु ठीक पाइब बाक्ब” देंशो

1 मिनु एलीहुमी 2 “जोक्ब तुइक्ब मुरपुकी आं लोव नेनीन। शुश जोक्ब मुरपुकी आं लोव इन नोफा दाइश्शा नेनीन। अय्युब १२:११ 3 मारदे हना दोपा नोफाम लोव नेंबा, मोपान लेंम जचा थोवक थाम्ब। 4 मोपतीके मार ठीक बाक्बा, मेको गो आंमा योव्रय। मिनु तेको लोव रिम्शो बाक्मे, मेको आंमा गारशा कोव्रय। 5 मारदे हना अय्युबम 'गो दोस मताइब मुर बाक्नुड। तन्न परमप्रभुम आं कली ठीक निसाफ मगेयी। अय्युब ३३:९; अय्युब २७:२ 6 गो ठीक पाइब बाक्ती हना यो, आं कली जोल पाइब सुइक्ती। गो हेंथे मपाता हना यो, आं गार मसा' देंत। अय्युब ९:१५, २०; अय्युब ६:४ 7 ब्वाक्कु तूशो खोदेशो पा शुक्शी पाइब, अय्युब खोदेशो अरु सुइ मबाक्नीम। 8 मेको मरिम्शो गेय पाइब नु बाक्ब। मिनु परमप्रभु यावे आ अरेशो मटीब नु गाक्ब। भजन संग्रह १:१ 9 मारदे हना मेकोमी 'परमप्रभु कली ग्येरशा टिचा, शोर गाक्शो बाक्ब' देंब। अय्युब ९:२२

10 मोपतीके मारेइ मारेइ तुइक्ब मुरपुकी आं लोव नेनीन। परमप्रभुम गेनायो मरिम्शो मपाइब। नेल्ल क्येडा ठेयब सक्ति पाइश्शोमी गेनायो दूली मपाइब। अय्युब ८:३; ब्यवस्था ३२:४; रइतिहास १९:७ 11 मेकोमी मुर आन कली मेको आन पशो खोदेशो पा पाइब। मार पाइनीमी, मेकोन ताइनीमी। 12 एको थमा लोव बाक्ब। परमप्रभुम गेनायो मरिम्शो मपाइब। नेल्ल क्येडा ठेयब सक्ति पाइश्शोमी दूली निसाफ मपाइब। अय्युब १९:६ 13 सुम रागी मेको आ जिम्माम गेवा? सुम मेको कली रागी नेल्ल डा अधिकार गेवा? 14 मेकोमी ब्रोंइचा गेब सोक्त नु आ सास लेशशा लाइक्चा मिम्ताक्व हना, 15 याम कामीन सोक्त पाइश्शो नेल्ल बेक्नीम। मिनु मुर लेंशा फुरकुम लेशशा लाइनीम। भजन संग्रह १०४:२९

16 गे इन के रुप्तीक थुं बाक्त हना, आं देंशो नेनीन। गो मार देंडा, मेको नोफा दाइश्शा नेनीन। 17 ठीक निसाफ कली काइ मदाक्ब मुर सासन पने चाप्बा डा? मार, गे ठीक पाइब नु सक्ति पाइश्शो कली दोस ताइब मिम्नीनी? 18 सुमी पिप

कली 'हिंचा डा मरिम्शो पाइब बाक्नीनी' देंबा? मिनु ठेयब मुर आन कली 'परमप्रभु यावे आ अरेशो मटीब बाक्नीनी' देंबा? 19 मेकोम पिप आ तौ आन कुल मकोव्रब। मेकोम शोप पाइश्शो नु पुडग नेल्ल आन कली उइक्थ मिम्ब। मारदे हना मेको नेल्ल आ सेल्शो नम। 20 मेकोपुकी याम कामीन बेक्शा लाइनीम। नाक्दो उइक्थ दुम्मेनु, मेकोपुकी खिंखि पा बेक्नीम। सक्ति पाइश्शो मुर यो सुइम मारेइ मपाइक्थु बेक्नीम।

21 मेकोमी मुर नेल्ल आन पतीके कोव्रशो बाक्ब। मिनु मेको आन गाक्शो नेल्ल कोव्रशो बाक्ब। अय्युब ३१:४; हितोपदेस ५:२१ 22 मेकेर मरिम्शो पाइब आन खुंडसीतीक छिडछिड मबाक्ब। भजन संग्रह १३९:११-१२ 23 परमप्रभुम आ डोंइती निसाफ पुंडथ जाक्ब मुर आन कली 'एको नाक्त जाक्कीन' मदेंशो बाक्ब। 24 मेकोम खुदील निदील मपथुन सक्ति पाइश्शो आन कली तिल्लब। मिनु मेको आन पा डा अरु आन कली वोइक्ब। 25 मारदे हना मेकोम मेको आन पशो गेय नेल्ल तुइक्ब। मिनु मेको आन कली काबु नाक्दोमीन तिल्लब। मिनु मेकोपुकी खतम दुम्नीम। 26 परमप्रभु यावे आ अरेशो मटिशो आ पर्बम मेको कली खतम पोक्ब। मिनु मेको मुर नेल्लेम ताइनीम। 27 मारदे हना मेकोपुकी मेको आ नोले खोइक्चा प्रोंइतेक्म। मिनु आ कोइशो लां ममिम्तेम। 28 मेकोपुकीम पुडग आन डाक्शो मेको आ डोंइती जाक्दीपपाइक्तेक्म। मेकोम मारेइ मथीब आन पुंडशा ब्रेशो नेंतु। उत्पत्ती १६:११ 29 तन्न मेको सिक्सी पा बाक्त हना, सुम मेको कली दोस गेने चाप्बा डा? मेकोम आ कुल खुइक्ताक्व हना, सुम मेको कली तने चाप्बा डा? रागी डा मुर नेल्ल कली नु मुर का कली मेको कान बाक्ब। 30 मिनु परमप्रभु कली मटीब मुरुम सासन मपवल। मिनु मुर आन कली श्येत गेब सासन पाइब मदुमल।

31 मिनु मेकोमी परमप्रभु कली 'गो सजाइ फाल्ता। गो मुल रे मरिम्शो गेय मपाइक्नुड। 32 आं मतुइश्शो आं कली शेंदीनी। गो मरिम्शो पाता हना यो, मुल रे मो मपाइनुड' देंब। 33 मार, मेकोम इन देंशो खोदेंशो पा इन कली पचा माल्बा डा? मारदे हना गे आ देंशो मबित्नीनी। गे इन लां योव्रचा माल्नीनी। गो मो मपाइनुड। मोपतीके इन तुइश्शो आं कली शेंदीनी। 34 निप्स पाइश्शो मुर नेल्लेम नु जोक्ब तुइक्ब कामी आं लोव्र नेंशा 35 'अय्युब मजोक्थु, लोव्र पाइब बाक्ब। आ लोव्र मरुप्चा डा बाक्ब' देंनीम। अय्युब ३८:२ 36 अय्युबम मेको क्येडा तेम्शा श्येत जवल। मारदे हना आ लोव्र परमप्रभु आ अरेशो मटीब आन लोव्र खोदेंशो बाक्ब। 37 मेकोमी आ पाप तेम्ब। आंइ दातेमी शुश हेंथे पना पन बाक्ब। मिनु मेकोमी परमप्रभु आ पर्बम मरिम्शो लोव्र शुश तेम्ब" दे एलीहुमी देंमाक्त।

35

एलीहु आ लोव्र

1 मिनु एलीहुमी 2 अय्युब कली "परमप्रभु आ डोंइती 'गो ठीक बाक्नुड' देंचा रिम्शो बाक्बा? अय्युब ३२:२ 3 गे मेको कली 'गो पाप मपाता हना, मार दुम्बा डा? मिनु पाप मपथु आं कली मार रिम्शो दुम्बा डा?' देंतीनी। अय्युब ३४:९ 4 गे नु इन वारच सां इन कली गो लोव्र लेत्नुड। 5 इर सरीड गे कोव्रडीन। इन क्येडा इर बाक्शो गोस्स कली कोव्रडीन। 6 गे पाप पाइतीनी हना, मेको कली मार दुम्बा डा? गे शुश हेंथे पाइतीनी हना यो, मेको कली मार दुम्बा डा? 7 गे ठीक पाइब दुम्तीनी हना, मेको कली मार गेनीनी डा? इन गुइ रे मेकोम मार ताइबा डा? अय्युब २२:२-३; रोमी ११:३५ 8 इन परमप्रभु यावे आ अरेशो मटितीके इन कली श्येत दुम्शो खोदेंशो पा अरु मुर आन कली यो श्येत दुम्ब। मिनु इन ठीक पतीके रिम्शो दुम्शो खोदेंशो पा अरु आन कली यो रिम्शो दुम्ब।

9 शुश दिप्चा पुंडसीतीके मुरपुकी वाइ ब्रेत्नीम। मिनु सक्ति पाइश्शो आन पर्बम पुंडशा ग्रीनीम। 10 तन्न सुइमी 'आं कली सेल्ब परमप्रभु ते बाक्बा? नाक्दो आं कली ठेयब सेल्तीक कुम्सो गेब, परमप्रभु ते बाक्बा? प्रेरित १६:२५ 11 मेकोमी आंइ कली रागी डा जन्तु आन क्येडा शुश शेंताक्की। मिनु सरीड डा चिक्ब आन क्येडा आंइ कली जोक्ब तुइक्ब सेल्तु?' मदेंनीम। 12 मिनु मुरपुकीम डाक्शा पुन्मेनु, मेको आन लोव्र मनेब। मारदे हना मेको मरिम्शो पाइबपुकी ठेयब लेशशो बाक्नीम। 13 थमा पा परमप्रभुमी मेको आन हेंथे पुंडशो लोव्र मनेब। नेल्ल क्येडा ठेयब सक्ति पाइश्शामी मेको लोव्र नोफा मदाइक्ब। यूहन्ना ९:३१ 14 मिनु गे 'गो मेको कली मतड' देंनीनी। इन पशो नेल्ले मेको आ डोंइती बाक्ब। मोपतीके रिम्दीन। अय्युब २३:८-९ 15 परमप्रभु आ गाइश्शोम सजाइ मगेब। मिनु हेंथे गाक्शो मकोव्रब। उपदेसक ८:११ 16 मोपतीके अय्युबम फश लोव्र ला पाप्तु। शुश फश लोव्र ला पाप्तु" देंमाक्त।

36

परमप्रभु आ गेय ठेयब बाक्ब

1 मिनू एलीहुमी लेंशा 2 “गो नु फाल्शा बाक्तीनी हना, इन कली मारेइ कोइनुड। गो मुल यो परमप्रभु आ पर्बम इन कली लोव्र पचा माल्नुड। 3 आं जोक्शो थुं डा लोव्र डोन रे चाक्नुड। आं कली सेल्ब ठीक पाइब बाक्ब। 4 थमा पा, आं लोव्र हेंथे मबाक्ब। आं लोव्र थम पा जोक्ब तुइक्ब मुर इन डोंइती बाक्ब। 5 थमा पा परमप्रभु सक्ति पाइश्शो बाक्ब। मेकोम सुइ आन कली आइक्च मसेल्ब। मेको आ जोक्तीक तुइक्तीक ठेयब बाक्ब। 6 मेकोमी आ अरेशो मटीब आन कली ब्रोंइचा मगेब। आइक्च मुर आन कली ठीक निसाफ पाइब। भजन संग्रह ७२:४,१२; भजन संग्रह १४६:७-९ 7 मेकोम ठीक पाइब आन कली कोव्रब। मिनू मेको आन कली गेना हना यो पिप नु वोइक्ब। मिनू मेकोपुकी ठेयब सेल्चा पुंइसीनीम। भजन संग्रह ११३:७-८ 8 तन्न मेको आन कली साडलोम पाइक्ताक्म हना, श्येत जाम्तेक्म हना, 9 मेको आन शुश हेंथे पशो नु ठेयब लेशो आ पर्बम परमप्रभुमी सजाइ गेशो बाक्ब। 10 मेकोमी मेको आन कली श्येत गेशा रुण्ब मुर सेल्ब। मिनू मेको आन मरिम्शो पतीक रे लेप्पाइक्चा कली अरेब। अय्युब ३३:१६ 11 मिनू मेकोपुकीम मेको आ लोव्र नेंतेक्म हना, मेको आ अरेशो टिशा आ गेय पाम्तेक्म हना, मेकोपुकीम आन लीशो नाक्ती रिम्शो पा बाक्चा ताइनीम। मिनू आन लीशो बर्स रिम्शो पा लाक्नीम। 12 तन्न मेकोपुकीम मेको आ लोव्र मनेतेक्म हना, मारेइ मतुइक्थु, तरवारम साइक्चा पुंइसीनीम। 13 परमप्रभु कली मान मपाइब मुर गाइक्स डा गाइक्स बाक्नीम। परमप्रभु रे पा सजाइ तामेनु, यो मेकोपुकीम ‘वारच पाइक्की’ दे मपुंइनीम। 14 मेकोपुकी ठिटा बाक्ची ना मुने दोक्शा बेक्नीम। 15 परमप्रभुमी श्येत जशो आन कली आन श्येत रे प्रोंइब। मोपा मेको आन श्येत तशा, रुण्ब दुम्नीम। 16 मोपा इन कली यो श्येत रे गुंइब। इन कली रिम्शो बाक्तीकेमी वोइक्ब। गे लेंशा ब्रोव्रशो जचा थोव्रक जचा ताइनीनी। 17 गे मुल चहिं परमप्रभु यावे आ अरेशो मटीब आन ततीक सजाइ तन तन बाक्नीनी। मोपान मेको आन दोस नु सजाइम इन कली यो ग्याइक्ब। 18 होस पा बाक्कीन। इन गाइक्तीकेम इन कली शुक्शी मपपदल। मिनू शुश घूस जतीकेमी इन कली हेंथे पाइब मसेलल। 19 गे इन कली ‘वारच पाइय्यीनी’ दे ग्रीचा शोर गाक्शो बाक्ब। इन शुश शोंप नु इन सक्तिम इन कली श्येत रे प्रोंइने चाप्बा डा? 20 गेना नां रिक्बा, मिनू इप्चा, दे ममिम्तीन। मारदे हना मुर आन इप्तीकेम साइक्चा पुंइसीनीम। 21 मरिम्शो पतीक गे मलन। होस पा बाक्कीन। मारदे हना गे मेको आ पर्बम श्येत जाइब दुम्तीनी। 22 परमप्रभु आ सक्तिम पतीके ठेयब सेल्चा पुंइसीब। मेको खोदेशो शेंब अर्को सु बाक्बा डा? भजन संग्रह २५:९ 23 सुम मेको कली आ लां कोइशो बाक्बा? मिनू मेको कली ‘गे दूली पाइतीनी’ दे सुम देंने चाप्बा डा?

एलीहु परमप्रभु कली ठेयब सेल्शो

24 गे मेको कली मेको आ गेय आ पर्बम ठेयब सेल्चा, मप्रेंदीन। मुरपुकीम मेको आ पर्बम कुम्सो पशो बाक्तेक्म। 25 मुर नेल्लेमी आ पशो तशा कोव्रतेक्म। तन्न डोन रे ला ताम्तेक्म। 26 परमप्रभु थमा पा ठेयब बाक्ब। मिनू गो मेको मतुइक्नीकी। मेको आ बर्स हिक्ने मचाम्सीब। 27 मेकोम ब्वाक्कु आ तेप्का गुण्ब। मिनू आ सेल्शो गोस्सुम वोइक्ब। 28 मिनू सरीड रे रेउ यीब। मेकोमी मुर आन कली शुश जिप्पाइक्ब। 29 सुम गोस्स आ ब्रशो रुप्ने चाप्बा डा? आ बाक्तीक रे बुंबु पशो सुम रुप्ने चाप्बा डा? 30 मेकोमी सरीड आ एर ओंथ आ चिला सोइक्ब। मिनू मेको समुन्द्र आगा सम्म लाइब। 31 मोपा मेकोम जात जात डा मुर आन कली सासन पाइब। मिनू मेको आन कली शुश जचा थोव्रक गेब। 32 मेको आ गुइम चिला बाक्ब। मिनू मेकोमी खपाइक्चा कली आप्ब। 33 मेको चिला आ पपाइश्शो रेयकेम मेको आ सक्ति आ पर्बम लोव्र पाइब। मेको हेंथे गाक्ब आन पर्बम रुश पा शुश गाइक्ब।

37

एलीहुम लेंशा लोव्र पशो

1 मेको तुइश्शा आं लुडगीर थाम्पा प्रेक्ब। मेको आ बाक्तीक प्रोंइशा प्रेक्ब। 2 नेनीन, आ सेंदाम बुंबु पशो नेनीन। मिनू मेको आ शोव्रम ब्वाक्शो ठेयब सेंदा नेनीन। 3 मेकोम सरीड आ एर ओंथ आ सेंदा नेंपाइक्ब। आ चिला रागी डा सुर सम्म दाप्पाइक्ब। 4 मेको आ नोले मेको आ ठेयब सेंदा नेंसीब। मेको आ मान पाइक्चा पुंइसीब सेंदा नेंसीब। मिनू मेकोम आ सेंदा नेंपाइक्ब। आ चिला पतीके मतेक्ब। 5 परमप्रभु आ सेंदा बुंबु पशो खोदेशो हिंचा डा पा नेंसीब। मेकोमी गोपुकीम मरुप्चा डा पा ठेयब गेय पाइब। 6 मेकोम फुं कली ‘रागीम दोक्को’ देंब। मिनू रेउ कली ‘धारा खोदेशो पा यीवो’ देंब। 7 मेको मुर नेल्ल आन चिन्ड का बाक्ब। मिनू आ सेल्शो मुर नेल्लेम ‘मेको परमप्रभुम पाप्तु’ दे तुइक्नीम। 8 मेना ब्वाकी डा जन्तु आन पुक्खी गे लाइनीम। मिनू मेकेर लशा बाक्नीम। भजन संग्रह १०४:२१-२२ 9 फश गिवार आ बाक्तीक रे गूब। मिनू फश रे पा ग्यू जाक्ब। 10 परमप्रभु आ सासमी फुं दुम्ब। मिनू ठेयब ब्वाक्कु

नेल्ल रीब पा फुं दुम्नीम। 11 मेकोमी ठेयब गोस्स कली ब्वाक्कु कुरपाइक्ब। मिनु गोस्सपुकीमी आ चिला तेइ तेइ फ्राइनीम। 12 मेकोपुकी आ कोइशो रागी आ एर ओंथ डा लां नेल्ल गाक्नीम। मोपा मेकोपुकीमी परमप्रभु आ देशो मुर बाक्शो रागी आ तार नेल्ल पाइनीम। 13 परमप्रभुम रागी जिप्पाइक्चा कली रेउ यिपाइक्ब। मेकोम मुर आन कली सजाइ गेचा कली नु आ रागी कली शिशी कोइचा कली रेउ यिपाइक्ब।

14 अय्युब, गे एको लोव्र नेनीन। सिक्सी पा बाक्शा परमप्रभु आ छक लाक्चा डा गेय मिम्तीन। 15 परमप्रभुम गोस्स आन गेय दोपा पपाइक्बा? मिनु आ गोस्स रे दोपा चिला दाप्पाइक्बा, मेको गे तुइक्नीनी डा? 16 गोस्सपुकी दोपा सरीडम ग्युक्शा बाक्नीमी? मेको आ छक लाक्चा डा गेय बाक्ब। मेको नेल्ल जोक्ब बाक्ब, दे गे मतुइक्नीनी? 17 दक्खिन डा फशेम इन फेक्शो वा होश सेल्ब। रागी नेल्ल कली सिक्सी पपाइक्ब। 18 मार, गे परमप्रभु खोदेशो पा कांसा के ऐना खोदेशो सारो सरीड कली प्राक्ने चाप्नीनी डा? 19 मेको कली मार देंचा माल्बा, गे मेको आंइ कली शेंदीन। मारदे हना गो छिडछिडम पतीके मारेइ मिम्ने मचाप्नीकी। 20 गो मार देंनुडा, मेको कली हिल्लो पचा माल्नुडा डा? सुइ मुरुम आंम कली दाक्चा पुंइसीचा मदाक्बा डा? 21 हाम्सो बाक्त हना यो, गोस्सुम सुम्शो नां कली मुरुम तने मचाम्सीब। फशेमी गोस्स आन कली योल्दा नोले ला नां कली तने चाम्सीब। 22 मेको उत्तर रे हो हो पा दाप्शा ग्रूब। मेको परमप्रभु आ एर ओंथ छक लाक्चा डा छेडछेड बाक्ब। 23 तन्न गो नेल्ल क्येडा ठेयब सक्ति पाइश्शो कली थिन्ने मचाप्नीकी। मेको आ नेल्ल क्येडा सक्तिम गेय पाइब बाक्ब। मेकोमी निसाफ पशो नु ठीक पतीके गेनायो दूली मपाइब। 24 मोपतीके मुरपुकीम मेको कली तशा मान पा हिंनीम। मिनु आन थुंम ‘गो जोक्ब तुइक्ब नड’ दे मिम्ब आन कली ठेयब ममिम्ब” दे एलीहुम देंमाक्त।

38

परमप्रभुम अय्युब कली लोव्र पशो
अय्युब ३८:-४२:-

1 मिनु परमप्रभु यावेमी अय्युब कली फश गिवार रे पा लोव्र लेशशा, अय्युब ३१:३५ 2 “दूली लोव्र पा अर्ती गेब सु बाक्म? मारेइ मजोक्थु मार लोव्र पवा? अय्युब ३४:३५ 3 गे बोल्यो मुर खोदेशो दुम्शा रपो। मिनु गो इ कली लोव्र हिल्लो पाइनुड। मिनु गे लोव्र लेत्ती।

4 गो रागी आ जग वोदुनु, गे ते बाक्डे? गे रुप्नेवे हना आं कली देनो। 5 मेको कली दोमो सेल्चा, दे सुम देंमे? गे तुइक्नेवे? मेको पुक्चा कली सुम डोरी कीडा। मेको गे तुइक्नेवे? हितोपदेस ३०:४ 6 मेको आ जग मार तार वोदा? मेको आ सुर डा फुल्लु सुम वोदा? 7 मेना सुनी डा सोरुलपुकीमी कालेम कुम्सो पाम्तेक्म। मिनु स्वर्गम बाक्ब नेल्ल ग्येरसीशा ग्रीतेक्म। भजन संग्रह १९:२; अय्युब १:६

8 समुन्द्र रागी आ कोव्रज रे बुक्शा ग्रूमानु, मेको ब्वाक्कु तेक्चा कली सुम लाप्चो चोक्गा? भजन संग्रह १०४:८-९; हितोपदेस ८:२९ 9 गो मेको कली गोस्स के फेक्तीक सेल्शा, क्येर नाक्दोम मेको कली गिल्ला वोइक्ता। 10 मेको आ सांद वोइश्शा, थरपु हिरशा, लाप्चोपुकी वोइक्ता। 11 मिनु गो मेको कली ‘गे ओशो सम्म ला जाक्ने चाप्नेवे। एकेर सम्म ला जाक्नेवे। इन ठेयब छालपुकी मेक उइ देक्चा माल्नीम’ दे माइक्तामी।

12 गे मुल सम्म ‘सुनी दुमो’ दे अरेवी? सुनी कली मेको आ बाक्तीके तुइक्पदी? 13 मेकोमी रागी आ सुर सम्म हाम्सो सेल्ब। आं अरेशो मटीब आन कली खेरचा कली हिम्ब। 14 दोपा खप रे मार मार सेल्सीबा, मोपा रागी फांइसीब। मेको वा कली रडम नुप्शो खोदेशो बाक्ब। 15 आं अरेशो मटीबपुकीम छेडछेड मताइनीम। मिनु मेको आन पोक्शो गुइ जिक्चा पुंइसीनीम।

16 गे समुन्द्र आ बुक्तीक सम्म जाक्दीने? आ नेल्ल क्येडा लुक्च डा बाक्तीकेम हिरशा गाक्डे? 17 बेक्पाइक्ब आ ठेयब लाप्चो इ कली कोइदमे? गे क्येर नाक्दो डा लाप्चोपुकी तवी? 18 गे रागी गिश ठेयब बाक्बा, दे तुइक्नेवे? गे मेको नेल्ल तुइक्नेवे हना, आं कली देनो।

19 छेडछेड आ लतीक लां ते बाक्बा? मिनु छिडछिड आ बाक्तीक ते बाक्बा? 20 गे मेको नेल्ल आन बाक्तीकेम लने चाप्नेवे? मिनु गे मेको आन बाक्तीक लतीक लां तुइक्नेवे? 21 थमा पा, गे मेको नेल्ल तुइक्नेवे। मारदे हना मेना गे जरमेने थुम्शो बाक्ते। मिनु गे शुश बर्स ब्रॉइने थुम्तीवी।

22 गे शुश फुं बाक्तीकेम ओव्रडे? गे शुश मुप्स बाक्तीक तवी? यहोसु १०:११; यसैया ३०:३० 23 गो मेको श्येत डा नाक्ती नु लडाइ डा नाक्त कली खेक्शा वोइक्ता। 24 तेको लां रे छेडछेड ब्राइबा? मिनु पूर्ब डा फश ते रे ग्रूबा?

25 सुम ठेयब रेउ लतीक लां सेला? बुंबु पतीक आ लां सुम सेला? अय्युब २८:२६ 26 मेको मुर मबाक्शो रागी नु गोरशो रागी जिप्पाइक्चा कली बाक्ब। 27 मुर मबाक्शो रागी नु सोव्रशो रागी गिगी सेल्चा कली सुम लां सेला? 28 मार रेउ आ आफ बाक्बा? सीत कली जरमेब सु बाक्बा? 29 सुका आ कोव्रज रे फुं जरमेसे? सरीड रे दोक्ब फुरश आ ममा सु बाक्बा? 30 ब्वाक्कु फुल्लु खोदेशो सारो दुम्ब। फुरश समुन्द्र आ तार सारो दुम्ब। 31 गे किरकिटी सोरुल आन कली पाइक्ने चाप्नेवे? गे मिर्गसीरा सोरुल कली खिक्शो डोरी आ गाठो प्राक्ने चाप्नेवे? अय्युब ९:९ 32 मार गे सोरुल आ हुल आन कली आन गाक्शो लां रे गुंइने चाप्नेवे? सप्तबर्सी सोरुल आन हुल कली लां कौंइने चाप्नेवे? 33 मार गे स्वर्ग डा फुल्लुमु मुशा ब्रेक्शो तुइक्नेवे? गे रागीम मेको मोदेशो सेल्ने चाप्नेवे? येरमीया ३३:२५ 34 गे गोस्स कली 'रेउ यीवो' दे अरेने चाप्नेवे? मिनु मोपा आंम कली जिप्पाइक्ने चाप्नेवे? 35 मार गे चिला कली आ लांम सोइक्ने चाप्नेवे? मार मेकोपुकीम 'गो एक बाक्तक' दे इ कली देंनीमी। 36 सुम थुं कली तुइक्तीक गेवा? सुम थुं कली रुप्तीक गेवा? 37 सरीड डा मारेइ मारेइ हिक्ने चाप्तीक तुइक्तीक थुं पाइश्शो सु बाक्बा? मिनु सरीड डा ब्वाक्कु वोइक्तीके रे सुम ब्वाक्कु थोक्ने चाप्बा? 38 मोदेशो दुम्त हना, फुरक हिलो दुम्शा, खप डल्ला दुम्शा ग्याइक्मुशा बाक्नीमी। 39 गे गुप्स कली आ सिखार माल्शा गेने चाप्नेवे? मेको आ शोव्रलु बेक्शो रूपाइक्ने चाप्नेवे? 40 मेको आन पुक्खीम बाक्नीम। खुइश्शा सिखार बाप्शो बाक्नीम। गे मेको कली रूपाइक्ने चाप्नेवे? 41 एर ओंथ हिरशो खद आन चाइक्बमी जचा मतथु परमप्रभु कली पुन्मे नोले सुम मेको आन कली थुल्बा?" दे परमप्रभुमी अय्युब कली देंमाक्त। भजन संग्रह १४७:९

39

परमप्रभु आ हिल्लो पशो लोव्र

1 परमप्रभुमी अय्युब कली "रोकोश गेना गिक्बा, गे तुइक्नेवे? छाउरी किश्श गिक्मेनु मेको तशो बाक्नेवे? 2 मेकोपुकीम कोव्रजम चाइक्ब कुरमेनु, गे मेको आन महिना हिक्ने चाप्नेवे? गे मेको आन गिक्ची ना तुइक्नेवे? 3 मेकोपुकी गिक्चा कली बाप्नीम। मिनु आन चाइक्ब जरमेनीम। मिनु आन चाइक्ब ब्रोंइशा बाक्नीम। 4 मिनु मेको आन चाइक्ब बोल्यो दुम्नीम। ब्वाकीम कोल्नीम। काबु ब्वाकी मेर लशा, लेशशा मजाक्नीम। 5 सुम ब्वाकी डा गधा कली प्रोना। सुम मेको आ डोरी पुदा। 6 गो मेको आन कली 'बाक्कीन' दे गोरशो रागी गेता। मिनु हिक्सी बाक्शो रागी मेको आन कली गेता। 7 मेको सहर डा रेयके रे डोन बाक्नीम। मिनु मेकोम शारा दोरपाइक्ब आन ग्रीशो मनेनीम। 8 मेकोम डांडा मेर आन जोतीक सेल्नीम। मिनु गिगी घांस नेल्ल माल्शा नेक्नीम। 9 मार ब्वाकी डा सांढे ब्यफोम इ गेय पने बिप्बा? मार मेको इ घांस लाप्तीकेम नां सोइबा? 10 गे मेको कली वाक्ने चाप्नेवे? मार मेकोमी दांदे पा इ रू दिंम सेल्बा? 11 मार गे मेको आ बोल तशा इ गेय पपाइक्नेवे? इन गेय नेल्ल पचा गेनेवे? 12 मेको इ अन्न कुरशा चाक्चा कली लेशशा जाक्ब, दे थमा सुइक्नेवे? 13 ठेयब चिक्बीम ग्येरशा आ फ्रां हाम्ब। तन्न मेको सारस खोदेशो पा बेरने मचाप्ब। 14 मेकोम आ ब्वोफु होल दे खपीम वोइक्ब। मिनु मेक उइ प्रोंइब। 15 मिनु मेको कली खोइलीम दिम्नीम, दे प्रेंब। ब्वाकी डा जन्तुपुकीम दिम्ने चाप्नीम, दे ममिम्ब। 16 मेकोम आंम चाइक्ब, आ के ममाइ खोदेशो पा, आन कली शिशी मपाइब। मेको आ ब्वोफु पतीके मोशा लत हना यो, महिंब। 17 परमप्रभुमी मारदे हना मेको कली तुइक्तीक थुं मपाइश्शो सेल्शो बाक्ब। मिनु मेको कली मारेइ मरुप्ब सेल्शा प्रोंइशो बाक्ब। 18 मिनु मेको दोरशा आ फ्रां प्राक्ब। मिनु शारा नु शारा डोइक्ब आन कली कोव्रशा रिप्ब। 19 गे शारा कली मेको आ बोल गेनेवे? मेको आ शुर चांम ग्योम्नेवे? 20 गे मेको कली सल्हा खोदेशो पा प्रेक्पाइक्नेवे? मेको आ ठेयब सेंदा पा ग्रीशोम नेल्ल आन कली हिंपाइक्ब। 21 मेकोम आ गेंचम प्रेक्ना प्रेक्न राप्ब। मेकोम आ बोल नेल्ल कोइशा, लडाइ पतीकेम लाइब। 22 मेकोम हिंतीक आ पर्बम मारेइ ममिम्ब। मेको तरवार तशा मप्रोक्ब। 23 मेको आ ब्रा हरुर पा ग्रीब। मिनु मेकेर तूतीक नु तरवार हिरनीम। 24 तन्न मेको थाम्पा आ जोंब बोक्शा, दोरशा लाइब। तुराही ताप्शो नेनानु, मेको सिक्सी पा बाक्ने मचाप्ब। 25 मेकोम तुराही ताप्शो नेंशा 'आहा' देंब। मिनु मेकोम डोन रेन लडाइ पाइब आन हुल नु लडाइ डा रिना नेंब। 26 ब्वारदे आ फ्रां हाम्शा दक्खिन गे बेरचा कली इ रुप्तीकेमी शेंदी? 27 मार ककाकुलीम आ ग्योव्र इर रोंगुम सेल्चा कली इ अरेशो बाक्बा? 28 मेको रोंगुम बास बाक्ब। मिनु आ ग्योव्र मेकेन सेल्ब। 29 मेकेर रे आ सिखार कोव्रना

कोव्रन बाक्ब। मेकोमी डोन डोन नेल्ल रिम्शो पा तने चाप्ब। 30 मेको आ चाइक्बपुकीम हुश तूनीम। मेको ते ते मार मार सिखार बाक्मा, मेको मेकेर बाक्नीम” दे परमप्रभुम अय्युब कली देंमाक्त। हबकुक् १:८; मत्ती २४:२८

40

अय्युबमी परमप्रभु कली लोव्र लेशशो

1 मिनु परमप्रभु यावेमी लेशा अय्युब कली 2 “नेल्ल क्येडा सक्ति पाइश्शो, गो आं कली दोस गेबमी आं कली लोव्र लेत्चा माल्ब” देंमाक्त। यसैया ४५:९

3 मिनु नोले अय्युबमी परमप्रभु यावे कली लोव्र लेशशा 4 “गो शोर गाक्शो मुरुम इन कली मार लोव्र लेन्ने चाप्नुडा डा? गो आं गुइम आं शोव्र सुम्नुड। उत्पत्ती ३२:९; यसैया ६:५; हितोपदेस ३०:३२ 5 गो खेयप का लोव्र पने थुम्ता। मुल लेशा लोव्र मपाइनुड। गो खेयप निक्शी ब्वाक्ती, मुल ब्वाक्तीक लोव्र मबाक्ब” देंमाक्त।

परमप्रभु यावेमी आ सक्ति कोंइशो

6 मिनु परमप्रभु यावेम अय्युब कली फश गिवार रे पा लोव्र लेशशा 7 “गे बोल्यो मुर खोदेशो दुम्शा रपो। मिनु गो इ कली लोव्र हिल्लो पाइनुड। मिनु गे लोव्र लेत्ती। अय्युब ३८:३ 8 गो आं कली ‘दूली पाइब’ देंनेवे? मिनु गे आंमा ठीक पाइब बाक्नुड देंचा कली आं कली दोस गेनेवे? 9 मार इ सक्ति परमप्रभु के खोदेशो बाक्बा? गे बुंबु पशो सेंदा खोदेशो पा ग्रीने चाप्नेवे?

10 चाप्नेवे हना, मान ततीकेम नु ठेयब दुम्तीकेम आंम कली ग्योम्सो। गे इ एर ओंथ दारस नु छेडछेड वोंइसो। 11 इ गाइक्तीक कोंइदो। मिनु ठेयब लेशशो मुर आन कली कोव्रशा, मेको आन कली दिप्शा आइक्च सेलो। 12 ठेयब लेशशो मुर नेल्ल आन कली कोव्रडो। मेको आन कली आइक्च सेलो। मिनु आं अरेशो लोव्र मटीब आन कली आन राप्तीकेमी दिम्दीमी। 13 मेको नेल्ल आन कली खपीम खुइक्तीमी। मिनु रागी आगाम मेको आन कुल खुइक्पाइक्मी। 14 मिनु गो ‘इ ग्युरा गुइमी ग्राने चाप्बाक्ते’ दे थमा सुइक्नुड।

15 गो इ कली सेल्शो खोदेशो पा बेहेमोथ माइश्शो ठेयब जन्तु कली सेल्ता। मेकोमी बी ब्यफ खोदेशो पा घांस ब्वाइब। बेहेमोथ ब्वाक्कु डा ठेयब जन्तु बाक्ब। 16 मेको आ सक्ति आ फिलाम बाक्ब। मिनु आ बोल आ कोव्रजम बाक्ब। 17 मेको आ मीलु लेबानोन डा लाइश्शो रवा खोदेशो खकटा बाक्ब। मेको आ फिला डा नाडी थम खांइसीशो बाक्नीम। 18 मेको आ रुश कांसा खोदेशो बाक्नीम। मिनु मेको आ खोइली फलाम खोदेशो बाक्नीम।

19 मेको परमप्रभु आ नेल्ल क्येडा डोंइती डा ठेयब गेय बाक्ब। मो हना यो मेको कली सेल्ब तरवार शेंशा ला मेको आ नेक्था लने चाप्ब। 20 डांडामी मेको आ जोतीक बाक्ब। ब्वाकी डा जन्तु नेल्ल मेकेर ग्यारनीम। 21 मेको कमल फू आगाम इप्ब। मेको बुदी मीलु नु ब्वाक्कु बाक्तीक मेर खुइश्शा बाक्ब। 22 कमल फूमी मेको कली आ वांकु गेब। मेको आ एर ओंथ डा खोला मेर बुटा बाक्नीम। 23 मेको खोला बारशा कुत हना यो महिंब। बारशो खोला आ गे पित हना यो दिल थिश्शा इप्शा बाक्ब। 24 सुइ मुरुम मेको कली आ बोलसीम रत्ने मचाप्ब। सुम मेको आ मिक्च थिने चाप्बा? सुम मेको कली ब्वारदम रेशशा आ नें खिन्ने चाप्बा डा?” दे परमप्रभुमी अय्युब कली देंमाक्त।

41

लेव्याथन आ पर्बम लोव्र

1 परमप्रभुमी “गे लेव्याथन माइश्शो ठेयब जन्तु कली बोलसीमी रत्ने चाप्नेवे? मेको आ लें डोरीम नेप्ने चाप्नेवे? भजन संग्रह ७४:१४ 2 गे मेको आ नें खिश्शा डोरी लिक्ने चाप्नेवे? मेको आ शांप्ने बोलसीम ब्वेक्ने चाप्नेवे। 3 मेकोमी ‘आं कली प्रोंइयी, शिशी पाइय्यीनी’ दे पुंइबा? मेकोमी इ कली मिलो शिलो पाइबा डा? 4 मेकोम गे नु कबल पाइबा? ‘गो गेना हना यो वाइल दुम्नुड’ देंबा? 5 गे मेको नु चिक्ब खोदेशो पा ग्यारने चाप्नेवे? मार, मेको कली इ मीश आल नु ग्यारचा कली पाइश्शा वोइक्चा दाक्नेवे? 6 मार, मेको आन पर्बम ग्याप्ब लेयबपुकीम ‘ओशो लाइब’ देंनीमी? ग्याप्ब लेयबमी आन दातेमी मेको कली भाग भाग सेल्नीमी? 7 मार, गे मेको आ कुशुल कली तूतीकेम तूने चाप्नेवे? मार, डांइ साइक्तीक याम मेको आ पिया आप्ने चाप्नेवे? 8 गे ‘गो मेको नु लडाइ पाइनुड’ दे मिम्ताक्वी हना, मिनु राम्शी पाप्तीवी हना, गे मोदेशो लेशा गेनायो मपाइक्नेवे। 9 सुम मेको कली ‘ग्याइक्नुड’ दे मिम्बा, मेको मचाप्ब। सुम मेको कली ताइबा, मेको हिंशा गोल्लब। 10 मेको कली पोक्ने चाप्ब, सुइ मबाक्नीम। मोपा मेको आ डोंइती सु राप्ने चाप्बा डा? 11 गो आं कली लडाइ तोशा, सु ब्रोंइशा बाक्ने चाप्बा डा? सरीड आगा डा मारेइ मारेइ आं केन नम।

12 गो मेको आ खोइली आ पबर्म लोत्र पाइनुड। मेको आ सक्ति नु मेको आ दारस आ पबर्म इन कली लोत्र पाइनुड। 13 मेको आ फेक्शो वा सुम पुइक्ने चाप्बा? मेको आ तेक्तीक कली सुम तूने चाप्बा? 14 सुम मेको आ शोत्र पाक्ने चाप्बा? मेको आ खुइ हिंचा डा बाक्नीम। 15 मेको आ ची तेक्तीकपुकीम सेल्सीशो बाक्ब। मेको थम नेक्था नेक्था पा गार पाइश्शा वोइश्शो खोदेशो बाक्ब। 16 मेको का आ तार अर्को पा बाक्शो बाक्नीम। मोपतीके फश यो मेको आगा ओत्रने मचाप्ब। 17 मेकोपुकी का का पा अर्को नु खोम्सीशा मब्राचा डा पा बाक्शो बाक्नीम। 18 मेकोम हाक्च पवानु, मी गूब। मिनु मेको आ मिक्च सुनी डा नां खोदेशो बाक्ब। 19 मेको आ शोत्र रे रांको नु मी आ फिलीडगो गूनीम। 20 मेको आ नें रे कुन गूब। मेको शुश ब्रुइश्शो रे गूशो सोलोल खोदेशो बाक्ब। 21 मेको आ सासमी कोइला ब्रपाइक्ब। मिनु मेको आ शोत्र रे हुरुर पा ब्रशो मी गूब। 22 मेको आ शुर शुश बोल्यो बाक्ब। मेको आ एर ओंथ शुश हिंतीक बाक्ब। 23 मेको आ श्ये रोम्सीशो बाक्ब। मारेइम चिप्ताक्व हना यो, मेको कली मारेइ मदुम्ब। 24 मेको आ थुं फुल्लु खोदेशो पा खकटा बाक्ब। मेको यात आ आगा डा फुल्लु खोदेशो पा खकटा बाक्ब। 25 मेको बोक्शा राम्मेनु, बोल्यो नेल्ल हिंनीम। मेकोम लडाइ तोवानु, मेको नेल्ल नोले शोइसीनीम। 26 तेकोइ तरवारमी मेको कली साइक्ने मचाप्ब। तूतीक, ब्रा नु अरु आप्तीकेम मेको कली मारेइ मपाइब। 27 मेकोम फलाम कली पराल खोदेशो मिम्ब। कांसा कली राक्शो शी खोदेशो मिम्ब। 28 तेकोइ ब्राम मेको कली प्रोक्पाइक्ने मचाप्ब। हुरद डा फुल्लु मेको कली भूस खोदेशो बाक्ब। 29 थात्ला मेको कली भूस खोदेशो बाक्ब। तूतीक शेशा बाक्शोनु, मेकोम रिश्शा कोत्रब। 30 मेको आ कोत्रजीम हेश्शो गम्टे खोदेशो बाक्ब। मेको गाक्मेनु दांटे पशो खोदेशो पा गाक्ब। 31 मेकोम समुन्द्र डा ब्वाक्कु कली ब्रुइश्शो खोदेशो सेल्ब। मिनु समुन्द्र कली ग्योंबुम मलम खाल्शो खोदेशो पा खाल्ब। 32 मेको गाक्मेनु आ नोले टल्केशो लां प्रोइशा गाक्ब। मेको लां ठेयब समुन्द्र डा बुश चां खोदेशो तांइसीब। 33 रागीम मेको नु उइक्थ मारेइ मबाक्नीम। मेको हिंतीक मपाइश्शो बाक्ब। 34 मेकोमी ठेयब लेशो नेल्ल आन कली आइक्च मिम्ब। मेको ठेयब लेशो नेल्ल आन पिप बाक्ब” देमाक्त।

42

अय्युब परमप्रभु कली तुइक्ब दुम्शो

1 मिनु अय्युबम परमप्रभु यावे कली 2 “गे मारेइ मारेइ पने चाप्नीनी, दे गो तुइक्नुड। इन मिम्शो मारेइ मारेइ सुइम क्याम्ने मचाप्नीम। 3 ‘दूली लोत्र पा अर्ती गेब सु बाक्म? मारेइ मजोक्थु मार लोत्र पवा?’ देतीनी गो थमा पा, आंमा मरुप्थु लोत्र पाता। मेको आं रुप्ने मचाप्शो थम छक लाक्चा डा बाक्नीम। अय्युब ३८:२ 4 मुल गो लोत्र पाइनुड। नेनीन। गो इन कली लोत्र हिल्लो पाइनुड। मिनु गे आं लोत्र लेत्तीनी। अय्युब ३८:४ 5 इन पबर्म नेशो ला बाक्ती। तन्न मुल गो इन कली ताता। अय्युब १९:२६-२७ 6 मोपतीके गो आं कली आइक्च मिम्ताक्ड। मिनु गो फुरक नु पुलुम बाक्शा, माफ पुंइनुड” दे अय्युबमी देमाक्त।

अय्युब आ रिम्शो नाक्ती लेशो

7 मिनु परमप्रभु यावेम अय्युब नु लोत्र पने थुम्शा, मेकोम तेमान डा एलीफाज कली “गे नु इ वारच निक्शी इन कली तशा, गो गाइश्शो बाक्नुड। मारदे हना गे आं पबर्म थमा लोत्र मपनी। तन्न आं गेय पाइब अय्युबमी आं पबर्म थमा लोत्र पाप्नु। 8 मोपतीके गे ७ ओटा ब्यफ नु ७ ओटा सांड लाइश्शा आं गेय पाइब अय्युब आ बाक्तीके लने। मिनु गेपुकीम इन पबर्म चोशा चढेतीक चढेने। मिनु आं गेय पाइब अय्युबमी इन पबर्म आं कली माफ पुंइचा माल्ब। मिनु गो मेको आ पुंइशो लोत्र नेनुड। मिनु गे इन मूर्ख लोत्र पशो डा सजाइ मगेनन्नी। मारदे हना गे आं पबर्म थमा लोत्र मपनी। तन्न आं गेय पाइब अय्युबमी आं पबर्म थमा लोत्र पाप्नु” देमाक्त। १इतिहास १५:२६; इजीकीएल १४:१४ 9 मिनु तेमान डा एलीफाज, शुआह डा बिल्दाद नु नामा डा सोफारमी परमप्रभु यावेम देशो खोदेशो पामे बाक्त। मिनु परमप्रभु यावेमी अय्युब आ पुंइशो लोत्र नेना बाक्त।

10 मोपा अय्युबम आ वारच आन पबर्म पुना नोले, परमप्रभु यावेम अय्युब आ शोप नेल्ल लेशशा गोवा बाक्त। मिनु मेको आ शोप नेल्ल, डोइती डा क्येडा निक्शी खेयप शुश गोवा बाक्त। अय्युब १:२; अय्युब ८:७ 11 मेको नोले अय्युब आ लोक्ब नेल्ले, आ समी नेल्ले नु मेको आ डोइती डा तुइश्शो मुर नेल्ल जाक्शा, मेको आ खिंम भोज जामे बाक्त। मिनु मेकोपुकीमी अय्युब कली “गे परमप्रभु यावे आ गुइ रे शुश श्येत नु मरिम्शो दुम्तीके ताइतीनी” दे मेको कली थम रिम्शो लोत्र पामे बाक्त। मिनु नेल्लेम मेको कली सुन के क्येट नु सुन के औंठी गेमे बाक्त। अय्युब १९:१३-१४, १९ 12 मिनु परमप्रभु यावेम अय्युब कली आ नोले डा ब्रोइशो नाक्ती कली आ डोइती डा ब्रोइशो नाक्ती क्येडा शुश

आसीक गोवा बाक्त। मिनु मेको के १४ हजार भेडा, ६ हजार दलओंठ, हजार का हाल ब्यफ नु हजार का गधा दुम्मा बाक्त। 13 मिनु मेको के ७ जना तौ नु तमी सां दुम्मा बाक्त। अय्युब १:२ 14 मेकोमी आ डोंइती जरमेशो तमी आ नें येमीमाह, माइली आ नें केसीया नु कान्छी आ नें केरेन-हाप्पुक वोइक्मी बाक्त। 15 मिनु रागी नेल्लेम अय्युब आ तमी खोदेशो दारशो अरु सुइ मबाक्मा बाक्त। मिनु मेको आन आफोम मेको आन कली आन लोक्बपुकी नु उइक्थ उइक्थ पा शोंप योक्शो गेमी बाक्त। गन्ती २७:८-११ 16 मेको नोले अय्युब सहे का ४० बर्स सम्म ब्रोंइमाक्त। मेकोम आ तौपुकी नु ४ पाला सम्म डा चच युइ नेल्ल तवा बाक्त। भजन संग्रह ९०:१० 17 मिनु नोले अय्युब आ नाक्त नेल्ल नेक्शा, शुश ब्रोंइशा खूशो दुम्शा बेक्माक्त। उत्पत्ती २५:८; उत्पत्ती ३५:२९; १इतिहास २९:२८

भजन संग्रह

ब्रेक्ब मुर: भजन संग्रह कली हिबू लोवमी “ठेयब सेल्टीक कुम्सो” देनीम। १५० ओटा कुम्सोमी ७३ ओटा कुम्सो पिप दाऊदम ब्रेक्शो बाक्ब। २ ओटा भजन संग्रह सोलोमनमी सेल्शो बाक्ब। ५० ओटा कुम्सो आन ब्रेक्ब मुर मतुइसीब। लीशो २५ ओटा कुम्सो कोराह आ तौपुकी, आसाफ, मोसा, एथान नु हेमान आन सेल्शो बाक्नीम। भजन संग्रह आगामी ५ ओटा किताब बाक्नीम।

१. डोंइती डा किताब १-४१ सम्म मेको कली दाऊद आ किताब देने चाम्सीब।
२. मेको आ नोले डा किताब ४२-७२ सम्म कोराह आ तौ आन सेल्शो कुम्सो रे गोइब। एकेर आसाफ, दाऊद नु अरु मतुइशो मुर आन के यो बाक्नीम। मेको कली कोराह आ तौ आन किताब देनीम।
३. मेको आ नोले डा किताब ७३-८९ सम्म एकेर आसाफ आ ८ ओटा कुम्सो बाक्नीम। तन्न कोराह आ तौपुकी, दाऊद, हेमान नु एथान आन कुम्सो यो बाक्नीम। एको कली आसाफ आ किताब देनीम।
४. मेको आ नोले डा किताब ९०-१०६ सम्म मोसा आ कुम्सो, दाऊद आ कुम्सो निक्शी नु मतुइशो मुर आन के १४ ओटा कुम्सो बाक्नीम। मोपतीके मेको कली मतुइशो मुर आन ब्रेक्शो किताब देनीम।
५. नेल्ल क्येडा नोले डा किताबम १०७-१५० सम्म बाक्ब। एकेर २८ ओटाकुम्सो मतुइशो मुर, दाऊद आ १५ ओटा कुम्सो नु सोलोमन आ कुम्सो का बाक्नीम। एको किताब कली चाड डा कुम्सो किताब देनीम।

गेना ब्रेक्शो: एको कुम्सो नेल्ल गेना ब्रेक्शो बाक्नीमी, देने मचाप्सीब। तन्न पिप दाऊद रे इजीकीएल सम्म ३०० बर्समी ब्रेक्शो बाक्नीम। का निक्शी कुम्सो मेको क्येडा माइत यो बाक्नीम।

मार ब्रेक्शो: भजन संग्रह डा लोव नेल्ल क्येडा शुश माइत नु नक लोव डा किताबम यहूदी आन ठेयब किताब बाक्ब। मेको शुश मुर आन पर्वम लोव बाक्ब हना यो, भजन संग्रह डा ठेयब लोव परमप्रभु यावे कली ठेयब सेल्टीक कुम्सो बाक्नीम।

1

परमप्रभु कली टीब नु मटीब

1 सु परमप्रभु आ अरेशो लोव मटीब नु मगाक्बा, पापी आन लां मखोइक्बा नु परमप्रभु आ पर्वम शुक्शी पाइब नु मबाक्बा, मेको ग्येरसीशो मुर दुम्ब। भजन संग्रह २६:४; भजन संग्रह ११९:१; हितोपदेस ४:१४; येरमीया १५:१७
2 मेको मुरुमी परमप्रभु यावे आ अरेशो लोव दाक्शा, नाक्दो नाक्ती मेको कली मिम्ना मिम्न बाक्ब। भजन संग्रह ११९:१४८; यहोसु १:८

3 मिनु मेको मुर खोला आ नेक्था खुम्शो रवा खोदेशो बाक्ब। दोपा मेको आ फल सित्ची ना सिप्बा नु आ सफा यो महेम्थु बाक्बा, मोपा मेको मुर आ पतीक नेल्ल रिम्शो बाक्ब। भजन संग्रह ९२:१३-१५; येरमीया १७:८

4 परमप्रभु आ अरेशो मटीबपुकी चहिं मोदेशो मबाक्नीम। मेकोपुकी फशेमी बेरपाइशो भूस खोदेशो बाक्नीम।
5 मिनु मेको निसाफ दुम नाक्ती जाम्शा लाइनीम। पापीपुकी ठीक पाइबपुकी नु बाक्चा मताइनीम। 6 परमप्रभु यावेमी ठीक पाइब आन कली लां कोंइब। आ अरेशो मटीब आन लां चहिं जाम्शा लाइब।

2

परमप्रभु आ तौ आ सासन

1 मारदे रागी रागी डा मुर नेल्ल गारशा, परमप्रभु यावे आ पर्वम गाइक्नीमी? मारदे जात जात डा मुर जाम्शा लाइब मरिम्शो ला मिम्नीमी? प्रेरित ४:२५-२६; प्रकाश ११:१८
2 मारदे रागी डा पिपपुकी ठेयब मुरपुकी नु गारशा, परमप्रभु यावे नु आ तेल लुक्शा सोइशो आस पर्वम 3 “मेको आस देंशो मपय, मेको आस कली मटिय” दे लोव पमुइनीमी? येरमीया ५:५

4 मिनु स्वर्गम बाक्ब परमप्रभु चहिं मेको मुर आन कली तशा, रिप्ब। मेको आन पशो तशा शुक्शी पाइब। भजन संग्रह ५९:९ 5 मिनु नोले मेको गाइशशा, लोव पाइब। मोपा चुरशा, मेको आन कली हिंच कोंइब। यसैया ३४:२; प्रकाश ६:१५-१७ 6 मिनु मेकोमी “गो आं सियोन डांडामी आं तेल लुक्शा सोइशो पिप कली वोइक्ता” देंत। जकरिया ८:३

7 परमप्रभु यावेमी लोव पा आं कली “गे आं तौ नवे, मुलाक्ती गो इ कली सेल्ला” देंत। भजन संग्रह ८९:२७-२८; २सामुएल ७:१४; प्रेरित १३:३३; हिब्रू १:५, हिब्रू १:५; हिब्रू ५:५

8 मिनु लेंशा परमप्रभु यावेमी आं कली “गे आं कली पुंडतीवी हना, गो रागी रागी डा मुर इ कली गेनुड। रागी डा सुर सम्म नेल्ल इ कली गेनुड। दानीएल ७:१३-१४; हिब्रू १:२ 9 गे मेको आन कली फलाम के कोक्केमी खप के सेल्शो ग्योंब प्रोल्शो खोदेशो पा प्रोल्नेवे” दे लोव पाप्तु। प्रकाश २:२७; प्रकाश १२:५; प्रकाश १९:१५

10 मोपतीके गे पिपपुकी, जोक्ब तुइक्ब दुम्शा बाक्कीन। गे निसाफ पाइब हिंशा, होस पा रूप्ब दुमीन। 11 परमप्रभु यावे कली मान पा हिंशा, मेको आ देशो गेय पने। हिंशा खिंखि पा मेको आ डोंइती ग्येरशा बाप्पीन। फिलिप्पी २:१२; हिब्रू १२:२८ 12 मिनु आ तौ आ डोंइती बाप्शा, आ खोइल पुक्पु पने। मेको गाइक्ताक्व हना, गेपुकी लांमीन जाम्शा लाइनीनी। मो मपाइतीनी हना, गाइक्चा चिक्को बाक्ब। सु सु मेको कली थमा सुइशशा, आ नेक्था लाइनीमी, मेको ग्येरसीशो मुर दुम्नीमी।

3

सुनी डा कुम्सो

आ तौ अब्सालोम रे प्रोक्म ना डा दाऊद आ कुम्सो। २सामुएल १५:-

1 परमप्रभु यावे, आं कली श्येत गेब शुश बाक्नीमी। आं जोरी सत्रु शुश बाक्नीम। 2 मिनु मेकोपुकीमी आं पबर्म “परमप्रभुमी मेको कली श्येत रे मप्रोंइब” देंनीम। ठेयब सेंदा पा। 3 परमप्रभु यावे, गे आं एर ओंथ वोइशशो तेक्तीके खोदेशो बाक्नीनी। गे आं कली ठेयब सेल्पाइक्ब, आं थुं बारपाइक्ब नु आं पिया पोक्ब बाक्नीनी। उत्पत्ती १५:१ 4 गो परमप्रभु यावे कली ब्रेत्नुड। मिनु आं कली आ योव्रशो डांडा रे लोव लेक्ब। ठेयब सेंदा पा।

5 गो इप्शा, निन्द्रा पा, सेंसाक्यी, मारदे हना परमप्रभु यावे आं कली कोव्रब बाक्ब। भजन संग्रह ४:९ 6 गो आं कली हजार हजार मुरपुकीमी पुम्ताक्यीमी हना यो, महिनुड। भजन संग्रह २७:३

7 आं परमप्रभु यावे, बोक्कीन। आं परमप्रभु, आं जोरी सत्रु रे प्रोंइयीनी। मिनु गे मेको आन चोव्रचो राप्तीने। इन अरेशो लोव मटीब आन खुइ जिक्तीने। गन्ती १०:३५ 8 परमप्रभु यावे, गे मुर आन कली प्रोंइब बाक्नीनी। इन आसीक इन मुर नु बाक्ब। ठेयब सेंदा पा।

4

नाक्दो डा पुंडशो लोव

कुम्सो पपाइक्ब कली तार पाइशशो ताप्तीके ताप्शा पतीक दाऊद आ कुम्सो।

1 गो इन कली लोव पडानु, आं कली लोव लेत्तीने। गे आं कली ठीक सेल्ब परमप्रभु बाक्नीनी। गो श्येत जडानु, आं कली बाक्तीक गेतीनी। गे आं कली शिशी पने। आं पुंडशो नेंशा गेयीनी। 2 गे मुरपुकी, गेना सम्म आं कली मान मपाइनीनी? गेना सम्म गेपुकी जाम्शा लाइब थोव्रक दाक्नीनी नु जोल पाइनीनी? ठेयब सेंदा पा। 3 परमप्रभु यावेमी आ कली टीब आन कली आ नेक्था वोइक्चा कली योव्रशो बाक्त, दे तुइक्तीन। मिनु परमप्रभु यावेमी आं पुंडशो लोव नेंब। 4 गेपुकी गाइशशा, पाप मपने। इन ब्राख्येम इप्शा, इन थुं नु लोव पने। मिनु सिक्सी पा बाक्कीन। ठेयब सेंदा पा। एफिसी ४:२६ 5 मिनु परमप्रभु यावे कली ठीक पतीक चढेने। आ देशो लोव थमा सुइशशा पने। भजन संग्रह ५१:१९, २१; १पत्रुस २:५ 6 शुश मुरुमी “सुमी आंइ कली रिम्शो बाक्चा गेबा” दे हिल्लो पाइनीम। परमप्रभु यावे, इन कुल डा छेडछेड आंइ तार ब्रपतीन। गन्ती ६:२५ 7 मेकोपुकी नु अन्न नु अडगुर रस शुश बाक्त हना यो, गे आं कली मेको आन क्येडा ग्येरपाइक्तीनी। 8 गो हेम पा बाक्शा, इप्शा निन्द्रा पाइनुड। मारदे हना परमप्रभु यावे, गे आं कली श्येत मजपाइक्थु, बाक्चा गेनीनी। भजन संग्रह ३:६

5

सुनी डा पुंडशो लोव

कुम्सो पपाइक्ब कली मुराली ताप्शा पतीके। दाऊद आ कुम्सो।

1 परमप्रभु यावे, आं देशो लोव नेनीने। आं हुकयी पशो नेनीन। 2 आं पिप, परमप्रभु, आं ठेयब सेंदा नेनीने। मारदे हना गो इन कली लोव पा पुंडनुड। 3 परमप्रभु यावे, गे सुनी कना आं सेंदा नेनीनी। गो मार माल्नुडा, मेको इन कली

पुंडशा, रिम्शा बाक्नुड। 4 मिनु गे मरिम्शो पाइब आन कली मदाक्ब परमप्रभु बाक्नीनी। इन अरेशो मटीब काइ यो गे नु बाक्ने मचाप्नीम। 5 ठेयब लेशशो मुरपुकी इन डोंइती राप्ने मचाप्नीम। गे मरिम्शो पाइब आन कली मदाक्नीनी। 6 गे जोल पाइब आन कली खतम पाइनीनी। मिनु हुश खाक्श पोक्ब नु थमा मसुइक्ब मुर आन कली ग्रांग्रा दित्नीनी। 7 गो चहिं इन गेना हना यो ठेयब दाक्तीकेमी इन खिं ओव्रचा ताइनुड। मिनु गो इन कली मान पा हिंशा, इन खिं गे कोव्रशा, पोक्च थेक्शा ठेयब सेल्नुड। भजन संग्रह २६:८

8 आं जोरी सत्रु शुश बाक्नीमी। मोपतीके आं कली इन ठीक पतीके लां कोंइदीने। आं डोंइती इन लां ठीक सेलीन।

9 आं जोरी सत्रुमी जोल ला पाइनीम। आन थुमी “दोपा खतम सेल्नुडा” दे ला मिम्नीम। आन लकचा मुर थिम्तीके खोदेशो बाक्ब। मेकोपुकी मिलो शिलो पाइब बाक्नीम। रोमी ३:१३ 10 परमप्रभु, मेको आन मरिम्शो पशो आंम आन कली दुम्ल। मेको आन शुश मरिम्शो पशो आ पबंम मेको आन कली इन डोंइती रे तिलीन। मारदे हना मेको इन कली मटीब बाक्तेक्म। 11 सुमी इन कली थमा सुइक्नीमी, मेको ग्येरसीनीम। मेकोपुकी गेना हना यो शुश ग्येरशा, इन खाल पतीकेमी ग्येरशा बाक्नीम। मिनु इन कली तुइश्शा, इन नें दाक्शा, ग्येरशा कुम्सो पाइनीम। 12 मिनु परमप्रभु यावे, गे मेको ठीक पाइब आन कली आसीक गेनीनी। इन दाक्तीके मेको आन कली एर ओंथ वोइश्शो तेक्तीक खोदेशो बाक्ब।

6

श्येत जाइब आ पुंडशो लोव

कुम्सो पपाइक्ब कली ८ ओटा तार पाइश्शो ताप्तीके ताप्शा पतीके दाऊद आ कुम्सो।

1 परमप्रभु यावे, गे आं कली तशा गाइक्ताक्नी हना यो, सजाइ मगेयीनी। गे गाइक्ताक्नी हना यो, आं कली श्येत मगेयीनी। येरमीया १०:२४ 2 परमप्रभु यावे, गे आं कली शिशी पने। मारदे हना गो बेक्चा चिक्शो बाक्नुड। गे आं कली सापाइय्यीनी। मारदे हना आं खोइली खिंखि पाइब। 3 मिनु आं थुं यो हिंशो बाक्ब। परमप्रभु यावे, गे गेना सम्म आं कली मोदेशो पा बाक्पाइक्नीनी?

4 परमप्रभु यावे, गे आं गे लेतीने। इन गेना हना यो दाक्तीकेमी आं थुं बेक्चा रे प्रोंइयीनी। 5 मारदे हना बेक्शो नोले सुइ मुरुमी इन कली ममिम्नीम। मिनु बेक्शो मुर आन बाक्तीकेमी सुइमी इन कली ठेयब मसेल्नीमी। भजन संग्रह ३०:१०; भजन संग्रह ८८:११; भजन संग्रह ११५:१७-१८; यसैया ३८:१८ 6 गो थुं खाइश्शा, डाक्शा दती। गो नाक्दो आं खाट नेल्ल प्रेक्कुमी जिप्पाइक्नुड। आं इप्तीकेमी डाक्शा ला बाक्नुड। 7 सुर्ता पतीके मिक्च मताइब खोदेशो दुम्ती। मारदे हना आं जोरी सत्रु शुश बाक्नीम। 8 गे मरिम्शो पाइबपुकी, आं क्येडा डोन लने। मारदे हना परमप्रभु यावेमी आं डाक्शो नेंतु। 9 परमप्रभु यावेमी आं पुंडशो लोव नेंतु। मिनु परमप्रभु यावेमी आं पुंडशो गेब। 10 आं जोरी सत्रु नेल्ल मुने दोक्शा, शुश श्येत जाइब दुम्नीम। मिनु मुने दोक्शा, आन बाक्तीके लेत्नीम।

7

परमप्रभु ठीक निसाफ पाइब

दाऊदमी बेन्यामीन थर डा कूश माइश्शो मुर रे श्येत जशा, परमप्रभु यावे आ डोंइती पशो कुम्सो।

1 परमप्रभु यावे, आं परमप्रभु, गो इन कली जिम्मा गेंसीनुड। मिनु खेदा पाइब नेल्ल आन गुइ रे आं कली प्रोंइयीनी। 2 गे आं कली मप्रोंइतीनी हना, मेकोपुकीमी आं कली गुप्सम खोदेशो पा दिप्शा ब्वाइनीम। मिनु सुइमी आं कली मेको आन गुइ रे प्रोंइने मचाप्नीम।

3 परमप्रभु यावे, आं परमप्रभु, मेको आन देशो खोदेशो पा, गो आं गुइमी मरिम्शो पाता हना, अय्युब ३१:७-३४ 4 गो गे नु दुशा बाक्ब आन कली श्येत गेता हना, आं कली बित्चीम श्येत गेमेनु, गो क्येक्क लेत्ताक्डमी हना, 5 आं जोरी सत्रुम आं कली खेदा पा ग्रामल। मिनु आं कली खपीम दिप्शा साइय्यीमील। मिनु आं नें जाम्शा लल। ठेयब सेंदा पा।

6 परमप्रभु यावे, गे गाइश्शा, बोक्कीन। आं जोरी सत्रु आन पशो तशा, आं कली वारच पथ बोक्कीन। गे “गो निसाफ पचा माल्नुड” दे लोव पाइतीनी। 7 मिनु रागी रागी डा मुरपुकी इन डोंइती राप्नीम। मोपतीके इर डा इन बाक्तीकेम मेको आन कली निसाफ पचा कली इन ठेयब नित्तीकेमी निस्सीन। 8 परमप्रभु यावे जात जात डा मुर आन कली निसाफ पाइब बाक्ब। परमप्रभु यावे, आं ठीक पशो नु आं आगाम बाक्शो ठीक पाइब थुं तशा, आं कली निसाफ पने। भजन संग्रह १८:२१-२७ 9 इन अरेशो मटीब आन मरिम्शो पतीके थुम्पतीन। मिनु नोले गे ठीक पाइब आन कली बोल्यो सेलीन। ठीक पाइब परमप्रभु, गे मुर आन थुं नु आन पतीके नाक्ब बाक्नीनी। भजन संग्रह १०४:३५;

भजन संग्रह १३९:१; येरमीया ११:२०; प्रकाश २:२३ 10 परमप्रभु आं तेक्तीके बाक्ब। मेकोमी रिम्शो थुं पाइश्शो आन कली श्येत रे प्रोंइब। 11 परमप्रभु ठीक निसाफ पाइब बाक्ब। नाक्त कित कित मेको पापी आन कली तशा गाइक्ब। 12 थमा पा आ जोरी सत्रुम आन तरवार शेप्नीम। आन लिब्रा कीशा आप्चा कली ठीक पाइनीम। ब्यवस्था ३२:४१ 13 मिनु आन साइक्तीक या आंम कली ठीक पशो बाक्नीम। आन ब्राम मी ब्रपाइश्शो बाक्नीम। 14 नेनीन, मेकोमी मरिम्शो ला मिम्नीम। मिनु श्येतम ब्रीशा, जोल पना पन बाक्नीम। 15 मेकोपुकीमी बिक्तीक दोइनीम। मिनु नोले आंम आन दोशो बिक्तीकेमी आंमा बिक्नीम। हितोपदेस २६:२७ 16 मुर आन कली गेचशो श्येत आंमान जाइनीम। मेको आन हुश ख्राक्श पोक्शो आंम आन पियामीन मोंइसीब।

17 गो परमप्रभु यावे आ ठीक पशो तशा, मेको कली “गे रिम्शो पाइब बाक्नीनी” दे कुम्सो पाइनुड। गो परमप्रभु यावे, नेल्ल क्येडा ठेयब आ नें आ पर्बम कुम्सो पाइनुड।

8

परमप्रभुम आ रिम्स कोइशो

कुम्सो पपाइक्ब कली गित्तीथ कुम्सो आ लायो डा दाऊद आ कुम्सो।

1 परमप्रभु यावे, आंइ परमप्रभु, रागी नेल्लेमी इन नें ठेयब बाक्ब। गे इन छेडछेड सरीड क्येडा आइक्था वोइक्तीनी। प्रस्थान ३:१३-१५ 2 आइक्च आल नु बुकलु आलपुकीमी इन कली ठेयब सेल्पांइसाक्नी। मोपा गे इन जोरी सत्रु नु क्येक्क लेप्ब आन कली ब्वालेइ पपाइक्तीनी। मत्ती २१:१६ 3 गो सरीड गे कोव्रडुनु, इन सेल्शो तास्ला नु सोरुल तातामी, 4 गे मोपा ठेयब थोव्रक सेल्तीनी हना, मुर आन पर्बम दोपा मिम्ने चाप्नीनी? दोपा मेको आन कली कोव्रनीनी। हिब्रू २:६-८ 5 गे मुर आन कली इन स्वर्ग डा गेय पाइब आन क्येडा इक्का ला आइक्च सेल्तीनी। मुर आन कली मान नु छेडछेडमी सिरपेच गुप्शो खोदेशो पा ग्योम्ताक्नी। हिब्रू २:६-८ 6 मिनु इन सेल्शो मारेइ मारेइ आन कली हुकुम पाइब सेल्तीनी। मोपा मुर इन सेल्शो आन दातेमी नेल्ल क्येडा ठेयब बाक्ब। उत्पत्ती १:२७ 7 भेडा, बी ब्यफ, ब्वाकी डा जन्तु, 8 चिक्ब, समुन्द्रमी बाक्ब डांइ नु समुन्द्रमी मार मार बाक्मा, मेको नेल्ल आन कली हुकुम पाइब सेल्तीनी। १कोरिन्थी १५:२७ 9 परमप्रभु यावे, आंइ परमप्रभु, रागी नेल्लेमी इन नें ठेयब बाक्ब।

9

“गे रिम्शो पाइतीनी” दे कुम्सो पशो

कुम्सो पपाइक्ब कली मुथ-लाब्बेन कुम्सो आ लायो। दाऊद आ कुम्सो।

1 परमप्रभु यावे, गो आं थुं नेल्लेमी इन कली “गे रिम्शो पाइतीनी” दे इन कली ठेयब सेल्नुड। इन पशो छक लाक्चा डा गेय नेल्ल आन कली नेंपाइक्नुडमी। भजन संग्रह ४४:२ 2 इन कली तुइश्शा, ग्येरनुड। शुश ग्येरशा, गो इन कली ठेयब सेल्तीक कुम्सो पाइनुड। गे नेल्ल क्येडा ठेयब बाक्नीनी। 3 आं जोरी सत्रु इन कली तशा, आन जाक्शो लां रे लेशशा प्रोक्शा लमानु, गुल गाल थिश्शा, साइक्चा पुंइसाक्म।

4 मारदे हना गे ठीक निसाफ पाइब बाक्शा, इन ठेयब नित्तीकेमी निश्शो बाक्तीनी। मिनु आं ठीक गेय पशो तुइश्शा, गे आं कली निसाफ पाइतीनी। 5 मिनु गे रागी रागी डा मुर आन कली हुइक्ताक्नी। इन अरेशो मटीब आन कली साइक्तीनी। मेको आन नें लेशा ममिम्चा डा पा क्याम्ताक्नी। 6 परमप्रभु, आं जोरी सत्रु आन खिं गेनायो मसेल्चा डा पा प्रेत्तीनी। गे मेको आन सहर हु हा प्रेत्तीनी। मिनु मेको आन नें यो काइ मलीथु, जाम्शा लत। भजन संग्रह ३४:१७

7 तन्न परमप्रभु यावे गेना हना यो बाक्ब। निसाफ पचा कली आ ठेयब नित्तीके ठीक पशो बाक्ब। 8 मिनु रागी रागी डा मुर आन कली आ ठीक पतीकेमी निसाफ पाइब। जात जात डा मुर आन कली आन कुल मकोव्रथु, निसाफ पाइब। 9 परमप्रभु यावे दिप्चा पुंइसीशो मुर आन कली बोल्यो दरवार खोदेशो बाक्ब। श्येत जशो आन कली बोल्यो खुइश्शा बाक्तीक बाक्ब। 10 परमप्रभु यावे, इन नें तुइक्बपुकीमी इन कली थमा सुइक्नीम। मारदे हना गे इन कली माल्ब आन कली मप्रोंइनीनी। 11 सियोन डांडामी बाक्ब परमप्रभु यावे कली ठेयब सेल्तीक कुम्सो पने। जात जात डा मुर आन कली आ पशो शेंदीने। 12 मिनु परमप्रभुमी मुर साइक्ब आन कली आन क्येक्क लेप्ब। मिनु श्येत जशो आन डाक्शो मिम्ब। उत्पत्ती ४:१०; उत्पत्ती ९:५; भजन संग्रह ७२:४; उत्पत्ती १६:११

13 परमप्रभु यावे, आं कली शिशी पने, आं कली मदाक्बपुकीमी गेशो श्येत कोव्रडीन। गे आं कली बेक्चा चिक्शो रे प्रोंइतीनी। 14 मिनु ब्रोंइशा, गो परमप्रभु आ योव्रशो सियोन डा ठेयब लाप्चोम मुर आन कली “परमप्रभुमी आं कली

खिमी बाकब। आ ठेयब नित्तीके स्वर्गम बाकब। मिनु उइ कोव्रना कोव्रन मुर आन कली नाकब। हाबाकुक २:२०; यसैया ६६:१; भजन संग्रह ३३:१३-१४ 5 परमप्रभु यावेमी ठीक पाइब नु आ अरेशो मटीब आन कली नाकब। मिनु हुश खाकश पोक्चा दाकब आन कली काइ मदाकब। 6 परमप्रभुमी आ अरेशो मटीब आन तारी मी नु गन्धक यिपाइकब। मिनु मेको आन तारी होश फश पपाइकब। मरिम्शो पाइब मोदेशो पाइकचा पुंडसीशो बाकनीम। 7 परमप्रभु यावे ठीक पाइब बाकब। मोपतीके ठीक पतीके दाकब। मिनु रिम्शो थुं पाइशो मुरपुकीमी आ कुल ताइनीम। मत्ती ५:८

12

मरिम्शो पाइब आन पर्वम लोव

कुम्सो पपाइकब कली ८ ओटा तार पाइशो ताप्तीके ताप्शा पतीके दाऊद आ कुम्सो।

1 परमप्रभु यावे, वारच पाइककी। इन लां खोइकब जाम्शा लाम्तेकम। मुर आन दातेमी इन कली थमा सुइकबपुकी यो मबाकनीम। 2 नेल्लेमी आन नेक्था डा मुर नु जोल ला पमुइनीम। चिप्लो लोव पाइब थुं निकशी पाइशो ला बाकनीम।

3 परमप्रभु यावेमी, मिलो शिलो पाइब नु ठेयब लेशो लोव पाइब नेल्ल आन कली क्यामदल। 4 मोदेशो ठेयब लेशो लोव पाइबपुकीमी “आंइ लोवमीन ग्राणीकी। गो जोकब तुइकब बाकनीकी। आंइ प्रभु सु बाकबा डा?” देनीम। भजन संग्रह ७३:८-९; अय्युब २१:१४-१५

5 परमप्रभु यावेमी “गो पुडग आन कली दिप्शो ताता। श्येत जाइब आन डाकशो नेता। मोपतीके गो मुल बोक्नुड, मेको आन कली श्येत मजतीकेम वोइक्नुड” देंब।

6 परमप्रभु यावे आ लोव थमा बाकब। मेको ७ खेयप यपाइशो क्येख चांदी खोदेशो बाकब।

7 परमप्रभु यावे, गे इन मुर आन कली कोव्रशा, आंइ कली मरिम्शो पाला डा मुर रे प्रोइकी। 8 मारदे हना मुर आन दातेमी इन अरेशो मपाइब शुश दुम्शा, मरिम्शो पाइबपुकी तेइ तेइ ब्रशो बाकनीम।

13

“वारच पने” दे पुंडशो

कुम्सो पपाइकब कली दाऊद आ कुम्सो।

1 परमप्रभु यावे, आं कली गेना सम्म प्रेनीनी? गेना सम्म इन कुल खुइक्नीनी? भजन संग्रह ७७:८; हाबाकुक १:२ 2 गो गेना सम्म सुर्ता पा, नाक्त किंत किंत आं थुं खाइशशा बाकचा माल्नुडा? आं जोरी सत्रु गेना सम्म आं क्येडा बोल्यो बाकनीमी?

3 परमप्रभु यावे, आं परमप्रभु, आं कली मिम्शा, आं लोव लेत्तीनी। आ बोल लेंशा गेयीनी। मो मपाइतीनी हना, गो बेक्नुड। 4 मोदेशो दुम्मेनु, आं जोरी सत्रुम “गो मेको कली ग्राणीकी” दे आं कली हिम्सीशो तशा, ग्येरसीनीम।

5 तन्न गो “गे गेना हना यो दाकब बाकनीनी” दे थमा सुइक्नुड। इन वारच पा प्रोइतीके तशा, आं थुं ग्येरना ग्येरन बाकब। 6 परमप्रभु यावेमी आं कली रिम्शो वारच पाइकती। गो मेको कली कुम्सो पाइनुड।

14

थमा मसुइकब आन ब्रुतीके

कुम्सो पपाइकब कली दाऊद आ कुम्सो। भजन संग्रह ५३:-

1 मूर्खपुकीमी “परमप्रभु मबाकब” दे मिम्नीम। मेकोपुकी ग्रांघा दिचा डा दुम्शा, मरिम्शो गेय पाइनीम। मेको आन दातेमी रिम्शो पाइब सुइ मबाकनीम। 2 परमप्रभु यावेमी स्वर्ग रे मुर आन कली कोव्रब। मारदे कोव्रब देशा हना, मुर आन दातेमी जोकब तुइकब परमप्रभु कली माल्ब, सुइ बाकमा कों, दे कोव्रब। 3 तन्न मुर नेल्ल परमप्रभु कली प्रोइशा, दूली पाइब दुम्तेकम। रिम्शो पाइब का यो मबाकनीम। उत्पत्ती ६:१२; रोमी ३:१०-१२

4 मरिम्शो पाइबपुकीमी परमप्रभु यावे कली मतुइक्नीम। आ मुर आन कली शोब्ले जशो खोदेशो पा नेक्नीम। मेकोपुकीमी परमप्रभु यावे कली यो मपुंडनीम। मीका ३:३ 5 मिनु नोले मेकोपुकी शुश हिंशा, खिंखि पाइनीम। मारदे हना परमप्रभु ठीक पाइब आन दातेमी बाकब। 6 मुरपुकीमी पुडग आन मिम्शो बिग्रेचा दाकनीम। तन्न परमप्रभु यावे मेको आन खुइक्तीके बाकब।

7 सियोन रे इस्राएली आन ब्रोंइतीके तामेक्ल। परमप्रभु यावेमी आ मुर आन कली प्रोनानु, याकूब आ चच युड, इस्राएली नेल्ल ग्येरसीमल। भजन संग्रह १२६:१

15

सु परमप्रभु नु बाक्ने चाप्बा डा?

दाऊद आ कुम्सो। भजन संग्रह २४:२-६; यसेया ३३:१४-१६

1 परमप्रभु यावे, इन बाक्तीकेमी सु बाक्ने चाप्बा डा? इन डांडाम सु बाक्चा ताइबा डा? उपदेसक ४:१७

2 सुमी रिम्शो पना पन बाक्शा, ठीक गेय ला पाइबा नु आ थुं नेल्लेमी थमा लोत्र ला पाइबा, 3 सुमी अरु आन लोत्र मपाइबा, आ नेक्था डा मुर आन कली काइ मरिम्शो मपथु, शुक्शी मपाइबा, 4 सुमी परमप्रभु आ अरेशो मटीब आन कली महिक्थु, परमप्रभु यावे कली मान पा हिंब आन कली चहिं हिक्ना हिक्न बाक्बा, कसम जशा, श्येत दुम्मेनु यो, आ कसम जशो मप्रोंइथु बाक्बा, 5 सुमी क्येट जेर गेशा, चाइक्ब मताक्बा, सुमी दोस मताइब कली श्येत गेचा कली घूस मजाइबा, मोदेशो मुर गेना हना यो महिम्सीथु, परमप्रभु यावे आ बाक्तीकेम बाक्चा ताइब। प्रस्थान २२:२४; ब्यवस्था २३:२०-२१

16

दाऊदमी परमप्रभु नु लोत्र पशो

दाऊद आ कुम्सो।

1 “परमप्रभु, आं कली कोव्रयीनी। मारदे हना गो इन कली जिम्मा गेंसीशो बाक्नुड। 2 गो परमप्रभु यावे कली ‘गे आं परमप्रभु बाक्नीनी। गो इन क्येडा अर्को मारेइ रिम्शो मतुइक्नुड’ देंती। भजन संग्रह ७३:२५ 3 रागीम बाक्ब इन योव्रशो मुर, थमा पा ठेयब मुर बाक्नीम। गो मेको मुर आन कली तशा ग्येरसीनुड। 4 मिनु देवी देवता आन नोले खोइक्ब आन श्येत बारना बारन लाइब। मेको आन तूतीक चढेतीक डा हुश गेनायो मचढेनुड। मेको आन नें यो मथीनुड।

5 परमप्रभु यावे, गे आं भाग बाक्नीनी। मिनु आं कचौरा प्रिनीनी। गे आं थेरशो रू कोव्रब बाक्नीनी। भजन संग्रह ७३:२६; गन्ती १८:२०; बिलाप ३:२४ 6 इन गेशो रू रिम्शो बाक्ब। गो थम रिम्शो शोंप ताता। 7 आं कली अर्ती गेब, परमप्रभु यावे कली ठेयब सेल्लुड। नाक्दो यो आं थुंमी आं कली मोदेशो पचा शेंब। 8 गो परमप्रभु यावे कली गेना हना यो आं डोंइती वोइक्ता। मोपा मेको आं ग्युरा गे बाक्मेनु, गो महिम्सीनुड। प्रेरित २:२५-२८ 9 मोपतीके आं थुं ग्येरसीब। गो आं थुंमी कुम्सो पाइनुड। गो महिथु बाक्ने चाप्नुड। 10 मारदे हना गे आं कली बेक्चा मगेनीनी। इन योव्रशो कली राक्चा मगेनीनी। प्रेरित १३:३५ 11 गे आं कली ब्रोंइतीक लां कोंइनीनी। गो इन डोंइती बाक्डानु, आं थुं ग्येरतीकेम ब्रीब। इन ग्युरा गे बाक्डानु, गेना हना यो थम रिम्शो दुम्नुड” दे लोत्र पाता।

17

परमप्रभु कली “वारच पने” देशो

दाऊद आ पुंइशो लोत्र।

1 “परमप्रभु यावे, गे ठीक पशो आ पबर्म आं लोत्र नेनीन। आं ब्रेशो नेनीन। आं जोल मपथु पुंइशो लोत्र इन नोफा दाइश्शा नेनीन। 2 आं ठीक दुम्तीके इन लां रे जाक्मल। गे आं ठीक पतीके ताइनीनी। भजन संग्रह ४३:१ 3 गे आं कली नाक्ताक्नी। नाक्दो यो आं कली नाक्शा, आं आगामी मारेइ मरिम्शो मथिन्नी। गो मरिम्शो लोत्र मपाइनुड, दे आं थुं फ्रेंशा बाक्ती। भजन संग्रह १३९:१ 4 मुर आन पतीके तशा, गो इन लोत्र मिम्शा, हुश खाक्श पोक्ब आन लां मखोइक्नुड। 5 आं खोइली मग्रेक्चा डा पा इन लांम थेक्शो बाक्ती।

6 गो इन कली लोत्र पाता, मारदे हना गे आं लोत्र नेनीनी। परमप्रभु, इन नोफा आं गे दाइश्शा, आं लोत्र नेनीन। 7 आं कली इन गेना हना यो दाक्तीक इन ग्युरा गुइमी इन कली थमा सुइक्ब आन कली आन जोरी सत्रु रे प्रोंइनीनी। 8 मिक्च दोदेशो रिम्शो पा वोइश्शो बाक्बा, मोदेशो पा आं कली यो रिम्शो पा वोतीन। इन फ्रां आगाम पुप्तीनी। ब्यवस्था ३२:१०; भजन संग्रह ६१:५; भजन संग्रह ६३:८; प्रस्थान ३७:७-९ 9 मोपा इन अरेशो मटीब, आं कली साइक्चा कली पुम्बपुकीमी आं कली मथिन्नीम। 10 मेको आन थुं खकटा पा, ठेयब लेशो लोत्र ला पाइनीम। 11 गो ते लती हना यो, मेकोपुकीमी आं कली पुम्नीम। आं कली साइक्चा माल्नीम। 12 मेकोपुकी शोव्रलु बेक्शो गुप्स खोदेशो बाक्नीम। ठिटा गुप्सम बाप्शो खोदेशो पा बाप्शो बाक्नीम।

13 परमप्रभु यावे, बोक्कीन। मेको आन कली दोक्पतीन। आं कली इन तरवारमी इन अरेशो मटीब मुर रे प्रोंइयीनी। गन्ती १०:३५ 14 परमप्रभु यावे, इन गुडमी रागी दाक्ब मुर आन गुड रे प्रोंइयीनी। मेकोपुकी मबेक्मा सम्म रिम्शो ला ताइनीम। गे मेको आन कोव्रज ब्रोव्रशो थोव्रकम प्रिनीनी। मेको आन तौपुकी यो रूथ्री जाइनीमी। मिनु आन लीशो मारेइ मारेइ आन तौपुकीम ताइनीम। 15 गो चहिं ठीक पा बाक्शा, थमा पा इन कुल ताइनुड। सुनी सेंसीशा, इन कली तशा, रूशो खोदेशो दुम्शा, ग्येरसीनुड” देंती।

18

परमप्रभु कली ठेयब सेल्शो

कुम्सो पपाइक्ब कली परमप्रभु यावे आ गेय पाइब दाऊद आ कुम्सो। परमप्रभु यावेमी दाऊद कली आ जोरी सत्रु नु सावल आ गुड रे प्रोना नोले दाऊद आ पशो कुम्सो।

२सामुएल २२:- 1 परमप्रभु यावे, गे आं सक्ति बाक्नीनी। गो इन कली दाक्नुड। 2 परमप्रभु यावे आं सेरथे फुल्लु, आं बोल्यो दरवार नु आं जोरी सत्रु रे प्रोंइब बाक्ब। आं परमप्रभु, गे आं खुइक्तीके सेरथे फुल्लु बाक्नीनी। परमप्रभु आं तेक्तीके नु आं कली ग्येरपाइक्ब, आं कली प्रोंइब नु आ बोल्यो दरवार बाक्ब। ब्यवस्था ३२:१८ 3 गो परमप्रभु यावे नु लोव्र पाइनुड। मेको ठेयब सेल्चा पुंइसीब बाक्ब। मेकोम आं कली आं जोरी सत्रु रे प्रोंइब।

4 गो साइक्चा पुंइसीचशो दुम्शा, हेरा बेक्ती। आं कली साइक्ब ब्वाक्कु आ छाल खोदेशो पा जाक्शा, हिंपाइक्ती। भजन संग्रह ११६:३ 5 थमा पा साइक्चा पुंइसीब दुम्ती। साइक्बमी आं कली ब्वारदम खोदेशो पा रुक्ताक्यी। 6 गो श्येत जडानु, परमप्रभु यावे कली “वारच पने” दे आं परमप्रभु कली ठेयब सेंदा पा पुंइता। मिनु परमप्रभु आ बाक्तीकेम बाक्शा, आं सेंदा नेंतु। आं पुंइशो लोव्र रुप्तु।

7 रागी हिम्शा, खिनु कुत। मिनु डांडा नेल्ल हिम्साक्म। मारदे हिम्साक्म देंशा हना, परमप्रभु आ गाइक्तीकेम हिम्साक्म। 8 आ नें रे कुन कुत। आ शोव रे ठेयब मी गूशा, ब्रशो कोइला हुरुर पा बेरतेक्म। प्रस्थान १९:१८ 9 मिनु परमप्रभु सरीड रे यित। आ खोइल आगामी क्येर गोस्स के छिडछिड बाक्त। भजन संग्रह १४४:५-७ 10 मेको करूब का डोइश्शा, फशेम बेरत। भजन संग्रह ९९:१ 11 छिडछिडमी खुइश्शा, आ एर ओंथ नेल्ल ब्वाक्कु कुरशो क्येर गोस्स बाक्तेक्म। 12 परमप्रभु आ छेडछेड रे मुप्स, मी ब्रशो कोइला नु चिला खोदेशो पा गोस्स गूतेक्म। 13 परमप्रभु यावेमी सरीड रे बंबु पशो खोदेशो पा आ सेंदा नेंपाइश्शो बाक्त। 14 मिनु मेकोमी आ ब्रा आबानु, आं जोरी सत्रु ब्रपाइक्तीमी। ठेयब चिला पपाइश्शा, प्रोक्पाइक्तीमी। 15 परमप्रभु यावे इन हुइक्तीकेमी नु इन नें रे गूशो सोक्तमी समुन्द्र नु रागी आ जग गूत।

16 परमप्रभुमी इर रे आं गुड ग्याइश्शा, ठेयब ब्वाक्कु रे कीशा गुंइताक्यी। 17 मिनु आं कली मदाक्बपुकी नु आं क्येडा बोल्यो जोरी सत्रु रे प्रोंइती। 18 श्येत जडा नाक्त आं जोरी सत्रुम पुम्ताक्यीमी, तन्न परमप्रभु यावेमी वारच पाइक्ती। 19 मिनु आं कली प्रोंइशा, रिम्शो ब्रोंइशा बाक्तीकेम चाक्ती। मारदे हना आं कली दाक्शो बाक्त।

20 गो दोदेशो पा ठीक पडा, मोदेशो पा परमप्रभु यावेमी आं कली पाप रे डोन बाक्शो तशा, आं कली रिम्शो पाइक्ती। 21 मिनु गो परमप्रभु यावे आ लां गाक्शा, आ अरेशो टिशा, आं परमप्रभु रे नोले मशोंइसीड। 22 आ पतीके लोव्र नेल्ल आं डोंइती बाक्तेक्म। गो मेको आ फुल्लुम मुशा ब्रेक्शो लोव्र का यो मप्रोनु। 23 मिनु मेको आ डोंइती गो दोस मताइब बाक्ती। मिनु गो ठीक मपतीके रे डोन बाक्ती। 24 गो दोदेशो पा ठीक पडा, मोदेशो पा परमप्रभु यावेमी आं कली आ डोंइती पाप रे डोन बाक्शो तशा, रिम्शो पाइक्ती। 25 गे जमान खाप्ब आन कली जमान खाप्ब बाक्नीनी। गे ठीक पाइब आन कली इन ठीक पतीके कोंइनीनी। 26 गे पाप रे डोन बाक्ब आन कली इन पाप रे डोन बाक्तीके कोंइनीनी। तन्न गे दूली पाइबपुकी नु काइ मगारनीनी। 27 गे दिप्चा पुंइसीशो मुर आन कली श्येत रे प्रोंइनीनी। मिनु ठेयब लेशो मुर आन कली आइक्च सेल्नीनी। अय्युब २२:२९ 28 गे आं बत्ती ब्रपाइक्नीनी। परमप्रभु यावे, आं परमप्रभु, गे आं छिडछिड कली छेडछेड सेल्नीनी। 29 इन वारच पाइक्तीके गो शुश जोरी सत्रु नु ग्रानुड। इन वारच पाइक्तीके गो ठेयब गारो प्रेक्शा खाक्ने चाप्नुड।

30 परमप्रभु आ लां ठीक बाक्ब। परमप्रभु यावे आ लोव्र क्येख सुन खोदेशो बाक्ब। सु सु मेको कली जिम्मा गेंसीनीमी, मेको आन कली तेक्तीक बाक्ब। 31 परमप्रभु यावे क्येडा अर्को सु परमप्रभु बाक्बा डा? आंइ परमप्रभु क्येडा अर्को तेको सेरथे फुल्लु बाक्बा डा? 32 परमप्रभुमी आं कली शुश सक्ति पाइश्शो सेल्ती। मेकोमी आं लां ठीक सेल्ब। 33 मेकोमी आं खोइली किश्श आ खोइली खोदेशो सेल्शा, लाइश्शो इर डा बाक्तीकेमी राप्पाइक्ती।

34 मेकोमी आं कली लडाइ पचा नु आं गुड कली कांसा के लिब्रा खुक्चा शेंब। 35 गे ब्रोंइतीके डा इन तेक्तीक आं कली गेतीनी। इन ग्युरा गुइमी आं कली वारच पाइश्शा, ठेयब सेलतीनी। 36 आं लां ठेयब सेलतीनी। मोपतीके आं खोइली मप्रेक्थु, गाक्ने चाप्नुड।

37 गो आं जोरी सत्रु आन कली खेदा पा थित्तामी। मेको आन कली साइक्ने मथुमु सम्म गो मलेडड। 38 गो मेको आन कली बोक्ने मचाप्चा डा पा तुप्तामी। मेकोपुकी आं खोइलीम गोल्तेक्म। 39 मारदे हना गे आं कली लडाइ पचा कली शुश सक्ति गेतीनी। आं जोरी सत्रु आन कली आं खोइलीम बाप्पाइक्तीनी। 40 गे आं जोरी सत्रु आन कली प्रोक्पाइक्तीनी। मिनु गो आं कली काइ मदाक्ब आन कली साइक्तामी। 41 मेकोपुकीमी “वारच पाइक्की” दे ग्रीमानु, मेको आन कली प्रोंइब सुइ मबा। परमप्रभु यावे कली पुंइतेक्म हना यो, मेकोमी मेको आन कली लोत्र मलेत्त। हितोपदेस १:२८ 42 मिनु गो मेको आन कली फशेम बेरपाइश्शो फुरक खोदेशो पा फस सेलतामी। गो मेको आन कली लां डा ग्रांग्रा खोदेशो पा ताइक्ताक्डमी। 43 गे मुर आन साइक्तीक रे आं कली प्रोंइतीनी। रागी रागी कली सासन पाइब सेलतीनी। आं मतुइश्शो जात डा मुरपुकी आं गेय पाइब दुम्तेक्म। 44 आं अरेशो नेन्मेनु, मेकोपुकीम टिम्तेक्म। अर्को रागी डा मुरपुकी आं डोंइती बाप्तेक्म। 45 अर्को रागी डा मुरपुकी खिंखि पा हिंशा आन बोल्यो दरवार रे गूतेक्म।

46 परमप्रभु यावे ब्रोंइशा बाक्ब आं सेरथे फुल्लु ठेयब दुम्ल। आं कली प्रोंइब परमप्रभु मान ताइब बाक्ल। 47 परमप्रभुमी आं कली क्येक्क लेत्तीक सक्ति गेशा, जात जात डा मुर आन कली आं सासनम बाक्ब सेल्लु। 48 मेकोमी आं जोरी सत्रु रे प्रोंइती। मेको आन क्येडा आं कली ठेयब सेलती। मिनु आं कली दिप्शा हुश खाक्श पोक्ब आन क्येडा प्रोंइती।

49 मोपतीके परमप्रभु यावे, रागी रागी डा मुर आन दातेमी गो इन नें ठेयब सेल्शा, इन कली कुम्सो पाइनुड। रोमी १५:९ 50 परमप्रभुमी आ पिप कली शुश ग्राब सेल्लु। आ तेल लुक्शो पिप दाऊद नु आ चच युइ आन कली गेना हना यो दाक्ब। २सामुएल ७:१२-१६

19

परमप्रभु आ सेल्शो नेल्ल रिम्शो बाक्ब

कुम्सो पपाइक्ब कली दाऊद आ कुम्सो।

1 सरीडमी परमप्रभु आ छेडछेड आ पर्वम लोत्र पाइब। सरीड आ ठेयब दुम्तीकेमी परमप्रभु आ गेय आ पर्वम लोत्र पाइब। रोमी १:१९-२० 2 नाक्त कामी अर्को नाक्त कली शेंब। नाक्दो कामी अर्को नाक्दो कली देंब। 3 मारेइ लोत्र मबाक्ब। ब्वाक्शो यो मनैसीब। 4 मो हना यो रागी नेल्लेम तुइक्नीम। मेकोमी सरीडम नां कली बाक्तीक सेल्लु। रोमी १०:१८

5 मेको नां ग्युंवे पचा चिक्शो ग्युम्ले खोदेशो बाक्ब। मेको ग्येरसीशा आ लां गाक्ब। 6 मेको पूर्व रे दाप्शा, तेइ तेइ हिरसीब। मेको आ नाप्शो रे मारेइ खुइश्शा लीने मचाप्नीम।

7 परमप्रभु यावे आ अरेशो लोत्र नेल्ल आन कली गारब। मेकोमी लेंशा ब्रोंइपाइक्ब। परमप्रभु यावे आ देंतीके थमा लोत्र बाक्ब। मेकोमी मतुइक्ब आन कली तुइक्ब सेल्लु। 8 परमप्रभु यावे आ ब्रेक्शा अरेशो लोत्र ठीक बाक्शा, मुर आन थुं ग्येरपाइक्ब। परमप्रभु यावे आ शेंशोमी मुर मिक्च ताइब दुम्नीम। 9 परमप्रभु यावे कली मान पा हिंचा रिम्शो दुम्शा, गेना हना यो लीब। परमप्रभु यावे आ निसाफ पतीक लोत्र थमा नु गेना हना यो ठीक बाक्नीम। 10 मेको सुन क्येडा यो शुश माल्चा डा, क्येख सुन क्येडा यो क्येट लाइब खोदेशो बाक्ब। मेको चाका रे याप्शो खुदो क्येडा यो जिज बाक्ब।

11 मेकोमी इन गेय पाइब कली होस पा बाक्पाइक्ब। मेको लोत्र टीबपुकीम ठेयब इनाम ताइनीम। 12 आ मतुइक्थु दूली पशो, सुम तुइक्बा डा? आं मतुइक्थु मरिम्शो पशो माफ गेयीनी। अय्युब ४२:३-६ 13 इन गेय पाइब कली ठेयब लेशो दुम्तीक रे तेक्कीन। ठेयब लेशो दुम्तीकेमी आं कली हुकुम मपवल। मोपा गो दोस नु हेंथे पतीक रे ब्रोंइनुड।

14 परमप्रभु यावे, आं सेरथे फुल्लु नु आं कली श्येत रे प्रोंइब, आं पशो लोत्र नु आं मिम्शो ब्रने।

20

ग्राचा कली पुंइशो लोत्र

कुम्सो पपाइक्ब कली दाऊद आ कुम्सो।

1 गे श्येत जनीनु, परमप्रभु यावेमी इन लोव्र लेत्तल। याकूब आ परमप्रभु आ नें आ पबर्म इन जोरी सत्रुम थिन्ने मचाप्मेक्ल। हितोपदेस १८:१० 2 मेकोमी आ बाक्तीक रे इन कली वारच पाइब सोइक्तल। सियोन रे इन कली वारच पवल। 3 मेकोमी इन चदेशो नु चोशा चदेशो नेल्ल मिम्शा ब्रवल। ठेयब सेंदा पा। 4 मेकोमी इन दाक्शो नेल्ल गेवल। इन मिम्शो नेल्ल खबल। भजन संग्रह २१:३ 5 गो इन ग्राशो तशा, ग्येरशा ग्रीशा आंइ परमप्रभु आ नेंमी छेदर पोक्नीकी। परमप्रभु यावेमी इन पुंइशो नेल्ल गेवल।

6 परमप्रभु यावेमी आ तेल लुक्शो पिप कली प्रॉइब, दे मुल तुइक्ताकड। आ स्वर्ग डा बाक्तीकेमी यो इन लोव्र नेंशा, आ सक्ति पाइशो ग्युरा गुइमी वारच पाइब। प्रस्थान १५:६ 7 कोइ मुरपुकीमी शारा, बग्गी तशा, ग्रानीकी, दे मिम्नीम। तन्न गोपुकी परमप्रभु यावे, आंइ परमप्रभु आ नें मिम्शा, ग्रानीकी। भजन संग्रह ३३:१७; ब्यवस्था २०:१; यसैया ३१:१ 8 मेकोपुकी गोल्लीम। तन्न गोपुकी राप्स डा राप्स बाक्नीकी।

9 परमप्रभु यावे, आंइ पिप कली ग्रापतीन। गो पुंइकानु, आंइ लोव्र लेत्तीन।

21

परमप्रभुम पिप कली वारच पशो

कुम्सो पपाइक्ब कली दाऊद आ कुम्सो।

1 परमप्रभु यावे, इन सक्ति तशा, पिप ग्येरसाक्व। इन प्रॉइतीकेमी मेको शुश ग्येरसाक्व। 2 गे आ थुं डा दाक्शो गेतीनी। आ पुंइशो “मगेनुड” मदेनी। ठेयब सेंदा पा। भजन संग्रह २०:५; भजन संग्रह ३७:४

3 गे मेको कली आसीक गेशा, रिम्शो पाइक्तीनी। मिनु आ पियाम क्येख सुन के सिरपेच गुप्ताक्नी। 4 मेकोमी “ब्रॉइचा गेयी” दे इन कली पुंइतु। मिनु गे मेको कली गेना हना यो ब्रॉइशा, बाक्चा गेतीनी। भजन संग्रह ६१:७ 5 इन प्रॉइतीकेमी आ दारस ठेयब दुम्त। शोंप नु मान ततीके मेको तारी वोइक्तीनी। 6 गे मेको कली गेना हना यो आसीक राइब सेल्शा, इन डोंइती ग्येरपाइक्तीनी।

7 मारदे हना पिपमी परमप्रभु यावे कली थमा सुइशशा, नेल्ल क्येडा ठेयब आ गेना हना यो दाक्तीकेमी पोक्च थेक्शा बाक्ब। 8 गे इन गुइमी इन जोरी सत्रु नेल्ल आन कली माल्शा ग्याइक्नीनी। इन कली काइ मदाक्ब आन कली इन ग्युरा गुइमी साइक्नीनी। 9 इन जाक्ची ना मेको आन कली ठेयब चुप्लुम हुम्शो खोदेशो पा हुम्नीनी। परमप्रभु यावे, गे चुरशा, मेको आन कली दाक्शो खोदेशो पा मीम दाक्पाइक्नीनी। 10 मेको आन चच युइ आन कली रागी रे क्याम्नीनी। आन आल आन कली मुर आन दाते रे क्याम्नीनी। 11 मेकोपुकीमी इन कली मरिम्शो पचा, दे मिम्शो बाक्तेक्म हना यो, आन मिम्शो पने मचाप्नीम। यसैया ८:१० 12 गे मेको आन कली प्रोक्पाइशशा, आन कुलम ख्रपाइक्चा कली लिब्रा कीनीनी।

13 परमप्रभु यावे, इन सक्तिम बोक्नीनी। गोपुकीमी कुम्सो पशा, इन सक्ति ठेयब बाक्ब, दे इन कली ठेयब सेल्नीकी।

22

श्येत जाप्तु हना यो, छेडछेड ताइब

कुम्सो पपाइक्ब कली सुनी डा किशश आ लायो डा दाऊद आ कुम्सो। यसैया ५३:-; मत्ती २७:३५-४६

1 आं परमप्रभु, आं परमप्रभु, गे मारदे आं कली प्रॉइयीनी? मारदे गे आं कली वारच मपथु, डोन बाक्नीनी। मारदे आं थोशो मनेनीनी। मत्ती २७:४६ 2 आं परमप्रभु, गो इन कली नाक्त ब्रेडडानु, गे लोव्र मलेत्तीनी। गो नाक्दो ब्रेडडानु यो, आं थुं नाइक्चा मतड। 3 मिनु इस्राएलीपुकीम इन कली ठेयब सेल्तीक कुम्सो पामेनु, गे का ला मेको आन तार बाक्नीनी। 4 आंइ किकी पिपीम इन कली थमा सुइक्ना सुइक्न बाक्शो बाक्मा बाक्त। गे मेको आन कली आन जोरी सत्रु रे प्रॉइशो बाक्तीनी। 5 इन कली पुंइशा ब्रेशशा, ब्रॉइचा तशो बाक्तेक्म। इन कली जिम्मा गेंसीशा, थमा सुइशशा, मुने मदोक्म। भजन संग्रह २५:२-३ 6 गो चहिं मुर मदुम्थु, लुस्पु खोदेशो दुम्ती। मुरपुकीम आं कली शुक्शी पा ग्रांग्रा दिन्नीम। अय्युब २५:६; यसैया ४१:१४ 7 आं कली ताइब नेल्लेमी आं पबर्म रिशशा, ठेयब लेशो लोव्र पशा, आन पिया हिम्नीम। अय्युब १६:१० 8 मिनु मेकोपुकीमी “परमप्रभु यावे कली थमा सुइक्ब, परमप्रभु यावेमी इन कली श्येत रे प्रोनल। मारदे हना परमप्रभुमी इन कली दाक्ब” दे शुक्शी पाइनीम। मत्ती २७:४३ 9 गो मोदेब दुम्ती हना यो, गे आं कली जरमेपपाइक्तीनी। गो आं ममा आ दूध तूडु रे आं कली कोव्रतीनी।

10 डोंइती रे गो इन के दुम्ती। आं ममामी थियी रे गो आं परमप्रभु बाक्नीनी। 11 गो आं रे डोन मबाक्कीन। मारदे हना गो श्येत जचा चिक्शो बाक्नुड। वारच पाइब सुइ मबाक्नीम।

12 ठेयब सांठेपुकीमी पुम्ताक्कीमी। बाशान रागी डा हिंचा डा सांठेपुकीमी यो पुम्ताक्कीमी। 13 शोव्रलु बेक्शा ग्रीशो गुप्स खोदेशो पा आन शोव्र पाक्शा, ग्राम्चा चिक्ताक्कीमी। 14 गो लुक्शो ब्वाक्कु खोदेशो दुम्ती। आं रुश नेल्ल गलाक गुलुक दुम्तेकम। आं लुङगीर मयीन खोदेशो दुम्शा, यशो बाक्ब। 15 आं सक्ति ग्युम्त। ब्रोल्लशो खप के गर खोदेशो दुम्त। आं शोव्र सोव्रत। मिनु गो आं कली साइक्चा ठीक पाइतीनी। यूहन्ना १९:२८

16 कुचुमपुकीमी आं कली पुम्ताक्कीमी। काइ मरिम्शो पाइब आन हुल आं एर ओथ बाक्नीम। आं गुइ खोइली ख्रित्ताक्कीमी। यूहन्ना २०:२५, २७ 17 गो आं रुश का का पा हिक्ने चाप्नुड। मेकोपुकीमी आं कली शुक्शी पा कोव्रस डा कोव्रस बाक्नीम। 18 आं वासी योक्सीशा, आं फेक्शो वा आ पर्वम “सुम ताइबा” दे फेन्टे ग्यारनीम। यूहन्ना १९:२४ 19 परमप्रभु यावे, गो आं क्येडा डोन मबाक्कीन। गो आं कली सक्ति गेब बाक्नीनी। गो रीब पा आं कली वारच पाइय्यीनी।

20 आं कली तरवार नु कुचुम रे प्रोंइयीनी। 21 गुप्स आ शोव्र नु ब्वाकी डा सांठे आन ग्रोव्र रे प्रोंइयीनी। दानीएल ६:२३

22 गो “इन नें ठेयब बाक्ब” दे आं लोक्ब आन कली शेनुडमी। मिनु थमा सुइक्ब आन गुम्तीकेमी इन नें ठेयब सेल्नुड। भजन संग्रह २६:१२; हिब्रू २:१२ 23 गो परमप्रभु यावे कली मान पा हिंबपुकीमी, मेको कली ठेयब सेलीन। याक्ब आ चच युइ, मेको कली “गे नेल्ल क्येडा ठेयब बाक्नीनी” देनीन। इस्राएल आ चच युइ नेल्ल मेको कली मान पा हिनीन। 24 मारदे हना मेकोमी श्येत जाइब आन श्येत तशा, आ कुल मखुइक्थु, आं ब्रेश्शो नेंतु। हिब्रू १५:७

25 ठेयब गुम्तीकेमी आं इन कली ठेयब सेल्ल्तीक कुम्सो इन लां रे जाक्ब। आं कसम जशो इन कली मान पा हिंब आन डोंइती खाप्नुड। 26 प्रुङग मुरपुकी जशा रूनीम। मिनु परमप्रभु यावे कली माल्बपुकीमी “परमप्रभु यावे ठेयब बाक्ब” देनीम। गेपुकी गेना हना यो ब्रोंइशा बाक्चा ताइनीनी। भजन संग्रह ६९:३३ 27 रागी रागी डा मुरपुकीमी आं कली मिम्शा, परमप्रभु यावे गे लाइनीम। मिनु रागी डा खिं खिं डा मुरपुकी परमप्रभु आ डोंइती बाप्नीम। 28 मारदे हना मेको राज्य परमप्रभु यावे केन बाक्ब। मिनु मेकोमी रागी रागी डा मुर आन कली सासन पाइब। 29 रागी रागी डा जाइब तूब, शुश क्येक थीबपुकी परमप्रभु आ डोंइती बाप्नीम। मिनु बेक्शा, फुरक दुम्ब नेल्ले मेको आ डोंइती बाप्नीम। 30 मिनु मेको आन चच युइपुकीमी मेको कली सेवा पाइनीम। मिनु आन नोले डा पाला डा मुर परमप्रभु यावे आ पर्वम शेचा पुंडसीनीम। 31 मेकोपुकीम नोले जरमेशो मुर आन कली परमप्रभु आ ठीक पतीके आ पर्वम शेनीम। मेकोमी प्रोंइतु, दे नेल्ल आन कली तुइक्पाइक्नीम।

23

रिम्शो गोठला
दाऊद आ कुम्सो।

1 परमप्रभु यावे आं गोठला बाक्ब। आं माल्लशो नेल्ल बाक्ब। उत्पत्ती ४८:१५; यसैया ४०:११; यूहन्ना १०:११-३० 2 आं कली रिम्शो घांस बाक्तीकेम इप्पाइक्ब। ब्रोल्लशो ब्वाक्कु आ नेक्था चाक्दीप्व। इजीकीएल ३४:१३-१४; प्रकाश ७:१७ 3 मेकोमी आं थुं बारपाइक्ब। आं कली आम आ नें आ पर्वम ठीक लां कोंइब। 4 मिनु गो बेक्चा डा बेसीम गाक्ती हना यो, महिंनुड। मारदे हना गो गो नु बाक्नीनी। इन कोक्के तशा आं थुं नाइश्शा ग्येरनुड। भजन संग्रह ४६:३ 5 गो आं कली आं जोरी सत्रु आन डोंइती थुल्नीनी। आं पिया तार तेल लुक्नीनी। आं कचौरा क्युप्या डा पा प्रिंताक्नी। भजन संग्रह ३६:९ 6 थमा पा गो मबेक्डा सम्म परमप्रभु आ रिम्शो पतीके नु आ दाक्तीके गो नु बाक्ब। मिनु गो गेना हना यो परमप्रभु यावे आ खिंम बाक्नुड। भजन संग्रह ८४:५

24

परमप्रभु आ बाक्तीक ओव्रशो
दाऊद आ कुम्सो।

1 रागी नेल्ल, मेकेर डा मारेइ मारेइ नु मेकेर डा ब्रोंइशा बाक्ब नेल्ल परमप्रभु यावे केन बाक्नीम। यूहन्ना १:११; १कोरिन्थी १०:२६ 2 मारदे हना परमप्रभुमी मेको नेल्ल आन कली ब्वाक्कु तारी सेल्शा, शुश ब्वाक्कु तारी लीमल, दे सेल्शो बाक्त।

3 सु परमप्रभु यावे आ डांडा डोइक्चा ताइबा डा? सु आ योव्रशो बाक्तीकेम बाक्ने चाण्बा डा? भजन संग्रह १५:- 4 आन गुइमी काइ मरिम्शो मपाइबपुकी, रिम्शो थुं पाइश्शोपुकी, मूर्ति आन डोंइती सेउ मपाइबपुकी नु जोल पा कसम मजाइबपुकी ला मेकेर डोइक्ने चाप्नीम। 5 मेकोपुकीमी परमप्रभु यावे आ आसीक ताइनीम। मिनु पाप रे प्रोंइब परमप्रभुमी मेको आन कली आ ठीक पतीके गेब। यसैया ४८:१८ 6 मोदेशो मुरपुकी परमप्रभु कली माल्ब बाक्नीम। मिनु “याकूब आ परमप्रभु, इन कुल तचा दाक्नीक” देंनीम। ठेयब सेंदा पा।

7 मिनु “गे ठेयब लाण्चोपुकी इन पिया पोक्कीन। माइत लाण्चोपुकी रोक्सीन। मिनु मेकेर रे छेडछेड डा पिप ओव्रल। २सामुएल ६:१-१९; यसैया ४०:३-४ 8 मेको छेडछेड डा पिप सु बाक्मे? मेको मारेइ मारेइ पने चाण्ब ठेयब सक्ति पाइश्शो परमप्रभु यावे बाक्ब। परमप्रभु यावे लडाइम ग्राब बाक्ब। 9 गे ठेयब लाण्चोपुकी इन पिया पोक्कीन। माइत लाण्चोपुकी रोक्सीन। मिनु मेकेर रे छेडछेड डा पिप ओव्रल। 10 मेको छेडछेड डा पिप सु बाक्मे? मेको मुर नेल्ल आन परमप्रभु यावे बाक्ब। मेको छेडछेड डा पिप बाक्ब”। ठेयब सेंदा पा।

25

परमप्रभुमी माफ गेशा, लां कोंइब

दाऊद आ कुम्सो।

1 परमप्रभु यावे, गो आं थुंमी इन नेक्था दुम्नुड। 2 आं परमप्रभु, गो इन कली मिम्शा, महिंथु बाक्शो बाक्नुड। गो मुने मदोक्डल। आं जोरी सत्रु आं क्येडा मग्रामल। 3 इन लां कोव्रब नेल्ल मुने मदोक्मल। मोशान श्येत गेबपुकी चहिं मुने दोक्मल।

4 परमप्रभु यावे, आं कली इन लां कोंइदीनी। इन गाक्तीक लां शेंदीनी। 5 इन थमा पतीकेम आं कली गाक्चा, शेंदीनी। मारदे हना गे आं कली श्येत रे प्रोंइब परमप्रभु बाक्नीनी। गो नाक्त रे इन लां कोव्रशा, बाक्नुड। 6 परमप्रभु यावे, इन शिशी नु गेना हना यो दाक्तीके कली मिम्तीन। मारदे हना मेको साइ डोंइती रेन बाक्त। 7 गो ठिटा बाक्डा ना आं पशो पाप नु आं मरिम्शो पशो प्रेंदीन। परमप्रभु यावे, इन गेना हना यो दाक्तीके नु रिम्शो पतीकेम आं कली मिम्तीन। 8 परमप्रभु यावे रिम्शो नु रिम्शो थुं पाइश्शो बाक्ब। मोपतीके मेकोमी पाप पाइब आन कली आ लां आ पबर्म शेंब। 9 ब्रेम्शो आन कली ठीक लां कोंइशा, आ लां शेंब। 10 परमप्रभु यावे आ कबल नु आ देशो टीब नेल्ल परमप्रभु आ गेना हना यो दाक्तीके नु आ दाक्शा मप्रोंइतीकेमी ब्रीशो बाक्नीम। 11 परमप्रभु यावे, आं पाप ठेयब बाक्त हना यो, इन नें आ पबर्म आं ठीक मपशो माफ गेयीनी। प्रस्थान ३४:६-७

12 सु सुमी परमप्रभु यावे कली मान पा हिंनीमी, मेको आन कली तेको लां लचा माल्नीमी, मेको शेंब। 13 मिनु मेको आन माल्शो नेल्ल तशा, आन थुं नाइक्नीम। मेको आन आलपुकीम मेको रागी ताइनीम। भजन संग्रह ३७:९ 14 परमप्रभु यावे आ कली मान पा हिंब आन वारच बाक्ब। मिनु मेको आन कली आ कबल शेंब। 15 गो गेना हना यो परमप्रभु यावे गे ला कोव्रनुड। मारदे हना मेकोमी आं खोइली ब्वारद रे प्रोंइब।

16 गे आं गे हिरसीने। मिनु आं कली शिशी पाइय्यीनी। मारदे हना गो आं का दुम्शा, श्येत जशो बाक्नुड। 17 आं थुं डा श्येत बारशो बाक्नीम। मेको श्येत रे प्रोंइयीनी। 18 आं श्येत जशो नु आ थुं खाइश्शो कोव्रडीन। मिनु आं पशो पाप नेल्ल क्याम्दीने। 19 आं जोरी सत्रु आन कली कोव्रडीन, मारदे हना मेको शुश बाक्नीम। मिनु मेकोपुकीमी आं कली काइ मदाक्नीम। भजन संग्रह ३५:१९ 20 आं कली खाल पा प्रोंइयीनी। गो मुने मदोक्डल। मारदे हना इन कली जिम्मा गेसाक्यी। 21 रिम्शो पतीके नु रिम्शो थुं बाक्तीकेमी आं कली खाल पयील। मारदे हना गो इन लां कोव्रशो बाक्नुड। 22 परमप्रभु, इस्राएल कली आ श्येत नेल्ल रे प्रोनीन। भजन संग्रह १३०:८

26

परमप्रभु आ डोंइती लोव्र पशो

दाऊद आ कुम्सो।

1 परमप्रभु यावे, आं कली निसाफ पने। गो मारेइ दोस तचा डा गेय मपड। परमप्रभु यावे, गो इन कली जिम्मा गेसीशा, महिम्सीथु बाक्ती। 2 परमप्रभु यावे, गे आं कली नाक्तीन। आं थुं नु मिम्तीक नाक्शा कोव्रडीन।

3 इन गेना हना यो दाक्तीक आं डोंइती बाक्ब। मिनु गो इन कली मप्रोंइथु, गाक्शो बाक्नुड। 4 गो दूली पाइब मुरपुकी नु मबाक्ड। मिनु जोल पाइबपुकी नु गारशा गेय मपड। भजन संग्रह १:३ 5 मरिम्शो पाइब आन देल्टीके ग्रांग्रा

6 गो परमप्रभु यावे कली ठेयब सेल्लुड। मारदे हना “आं कली वारच पाइय्यीनी” दे आं पुंडशो नेंतु। 7 परमप्रभु यावे आं सक्ति नु आं तेक्तीके बाक्ब। गो मेको कली थमा सुइक्ता। मोपा आं कली वारच पाइक्ती। मोपतीके गो थाम्पा ग्येरसीशो बाक्नुड। गो आं कुम्सोमी मेको कली ठेयब सेल्लुड।

8 परमप्रभु यावे आ मुर आन सक्ति बाक्ब। आ तेल लुकशो पिप कली प्रोंइब बाक्ब। 9 इन मुर आन कली प्रोनीन। इन रागी कली आसीक गेने। मिनु मेको आन कली गेना हना यो गोठला खोदेशो पा योत्रशा, गुप्शा, कुरशा पने।

29

परमप्रभु कली ठेयब सेल्लो

दाऊद आ कुम्सो।

1 गे सक्ति पाइशो आन तौपुकी, परमप्रभु यावे कली “गे सक्ति नु छेडछेड पाइशो बाक्नीनी” देनीन। भजन संग्रह १०३:२०-२१ 2 गे परमप्रभु यावे कली “इन नें नेल्ल आन क्येडा ठेयब बाक्ब” देनीन। गे परमप्रभु यावे आ दाक्तीकेमी ग्योम्सीशा परमप्रभु यावे आ डोंइती बाप्पीन। 3 परमप्रभु यावे आ सेंदा ब्वाक्कु तारी बाक्ब। छेडछेड डा परमप्रभुमी ठेयब ब्वाक्कु तारी बुंबु पपाइक्ब। परमप्रभु यावे ब्वाक्कु तारी बाक्ब। 4 परमप्रभु यावे आ सेंदा सक्ति पाइशो बाक्ब। परमप्रभु यावे आ सेंदा नेल्ल मान ततीक बाक्ब। 5 परमप्रभु यावे आ सेंदामी लेबानोन डा लाइशो रवा आन कली जिक्ब। परमप्रभु यावे आ लोवमी लेबानोन डा लाइशो रवा आन कली जिक्ब। 6 मेकोमी लेबानोन डांडा कली बाछा नु हेरमोन डांडा कली ब्वाकी डा ब्यफ खोदेशो पा प्रेक्पाइक्ब। ब्यवस्था ३:८-९ 7 परमप्रभु यावे आ सेंदा चिला खोदेशो बाक्ब। 8 परमप्रभु यावे आ सेंदामी गोरशो रागी हिम्पाइक्ब। परमप्रभु यावेमी कादेश माइशो गोरशो रागी हिम्पाइक्ब। 9 परमप्रभु यावे आ सेंदामी ठेयब रवा कली जिक्पाइक्ब। ब्वाकी डा रवा नेल्ल शोल्मो पा खोल्ब। मिनु नेल्लेमी “परमप्रभु ला ठेयब बाक्ब” दे आ बाक्तीकेमी लोव पाइनीम।

10 परमप्रभु यावे आ ठेयब नित्तीके ब्वाक्कु तारी बाक्ब। मेको आ ठेयब नित्तीकेम निश्शा, गेना हना यो सासन पाइब। 11 परमप्रभु यावेमी आ मुर आन कली सक्ति गेब। परमप्रभु यावेमी आ मुर आन कली आसीक गेशा, थुं नाइक्पाइक्ब।

30

बेक्चा रे प्रोंइशो

परमप्रभु यावे आ खिं सेल्ले नुम्मेनु पतीक, दाऊद आ कुम्सो।

1 परमप्रभु यावे, गो इन कली मान पाइनुड। मारदे हना गे आं कली उइ रे ग्येत्थ पोक्तीनी। मिनु आं जोरी सत्रु आन कली आं पर्वम ग्येरचा मगेनी। 2 परमप्रभु यावे, आं परमप्रभु, इन कली “वारच पाइय्यीनी” दे ब्रेडडानु, गे आं कली सापाइक्तीनी। 3 परमप्रभु यावे, गे आं कली बेक्शो मुर आन बाक्तीक रे गुंडताक्यीनी। बेक्शो मुर आन दातेमी आं कली ब्रोंइतीक सोक्त गेशा, प्रोंइतीनी। भजन संग्रह ११६:३,४, ७-९

4 परमप्रभु यावे कली टीबपुकी, मेको कली कुम्सो पने। मिनु आ नें ठेयब सेलीन। 5 मारदे हना आ गाइक्तीक इक्का ला बाक्ब। तन्न आ शिशी पतीके ब्रोंइशो सम्म लीब। मुर नाक्दो रे डाक्चा माल्ताक्व हना यो, सुनी ग्येरपाइक्चा पुंडसीब। यसैया ५४:७-८

6 गो थुं नाइशशा बाक्डानु “गो गेनायो महिम्सीनुड” देंती। 7 परमप्रभु यावे गेमी शिशी पा आं डांडा बोल्यो सेल्लतीनी। मिनु नोले इन कुल खुइक्तीनीनु, गो हिंती। 8 परमप्रभु यावे, गो इन कली पुंडता। गो इन कली ब्रेत्ती। 9 गो बेक्डानु, इन कली मार रिम्शो दुम्बा डा? फुरकुमी इन कली ठेयब सेल्बा डा? मार, इन दाक्शा गेनायो मप्रोंइतीक आ पर्वम शेंबा डा? भजन संग्रह ६:६ 10 परमप्रभु यावे, आं लोव नेनीन। आं कली शिशी पाइय्यीनी। आं कली वारच पाइब दुमीन।

11 गो रोंका पाइब मुर, सिल पाइब दुम्ती। आं रोंका पतीक अरन्डी प्रुइशशा, ग्येरतीक किप्शुर खोदेशो पा किप्ताक्यीनी। 12 गो सिक्सी पा मबाक्थु, इन पर्वम कुम्सो पाइनुड। परमप्रभु यावे, गेना हना यो बाक्ब आं परमप्रभु, गो इन कली ठेयब सेल्लुड।

31

परमप्रभु कली जिम्मा गेंसीशो

कुम्सो पपाइक्ब कली दाऊद आ कुम्सो।

1 परमप्रभु यावे गो इन कली जिम्मा गेसीनुड। गो गेनायो मुने मदोवडल। इन ठीक पतीकेमी आं कली प्रोंइयीनी। 2 इन नोफा दाइक्तीने, आं कली रीब पा प्रोंइयीनी। गे आं खुइक्तीक सेरथे फुल्लु नु आं कली प्रोंइब बोल्यो दरवार दुमीन। भजन संग्रह ७१:३ 3 इन नें आ पर्वम आं कली शेंशा, लां कोंइदीनी। मारदे हना गे आं सेरथे फुल्लु नु आं बोल्यो दरवार बाक्नीनी। 4 मेकोपुकीमी आं कली मतचा डा पा ब्वारद दाइक्ताक्म। आं कली प्रोंइयीनी। मारदे हना गे आं सक्ति बाक्नीनी। 5 आं सोक्त इन गुइमी जिम्मा गेनुड। परमप्रभु यावे, गे आं कली श्येत रे प्रोंइतीनी। गे इन मुर आन कली दाक्शा मप्रोंइब परमप्रभु बाक्नीनी। लूका २३:४६ 6 गो शोर गाक्शो मूर्ति आन कली सेउ पाइब आन कली ग्रॉग्रा दिन्नुडमी। गो परमप्रभु यावे इन कली जिम्मा गेसाक्यी। 7 इन गेना हना यो दाक्तीक तशा, ग्येरना ग्येरन बाक्ती। मारदे हना गे आं श्येत तशा, आं थुं लुकच लशो तुइश्शो बाक्नीनी। 8 गे आं कली आं जोरी सत्रु आन गुइमी मगेनी। गे आं कली रिम्शो ठेयब बाक्तीकेमी बाक्पाइक्तीनी।

9 परमप्रभु यावे, आं कली शिशी पाइय्यीनी। मारदे हना गो श्येत जशो बाक्नुड। आं थुं लुकच दुम्तीके आं मिक्च ओव्रशो नु आं रां सोव्रशो बाक्ब। 10 आं थुं ग्येतथ लुकच लतीके, गो बेक्चा चिक्शो बाक्ती। हुकयी पतीकेमी आ ब्रोंइतीक नाक्ती योल्तेक्म। आं ठीक मपशोमी आं बोल नेल्ल ग्युम्शो बाक्ब। मिनु आं रुश नेल्ल मुक्शो बाक्नीम। 11 आं जोरी सत्रु आन क्येडा आं नेक्था डा मुरपुकीमी शुश शुक्शी पाइक्चा पुंइसीब दुम्ती। आं तुइश्शो मुर आं कली तशा हिंनीम। आं कली लांम गुम्ब मुरपुकी आं कली तशा हिंशा प्रोक्नीम। 12 बेक्शो मुर खोदेशो पा सुइमी आं कली ममिम्नीम। गो ब्रोल्लशो गर खोदेशो दुम्ती। 13 गो ते लती हना यो हिंतीके ला बाक्ब। मारदे हना शुशेमी आं पर्वम जोल पा लोव्र पशो नेंता। मेकोपुकी बुक्शा, आं कली साइक्चा कली सल्ला पाम्तेक्म। येरमीया २०:३

14 तन्न परमप्रभु यावे, इन कली जिम्मा गेंसीशो बाक्नुड। गो “गे आं परमप्रभु बाक्नीनी” देंती। 15 आं ब्रोंइतीक नाक्ती इन गुइमीन बाक्ब। आं जोरी सत्रु नु आं कली खेदा पाइबपुकी रे प्रोंइयीनी। भजन संग्रह १३९:१६; उपदेसक ३:१-८ 16 इन छेडछेड डा कुल इन वाइल तारी वोतीन। इन शिशी पतीकेमी आं कली प्रोंइयीनी। भजन संग्रह ८०:४; गन्ती ६:२५ 17 परमप्रभु यावे, गो मुने मदोवडल। मारदे हना गो इन कली “वारच पने” दे पुंइता। इन अरेशो मटीबपुकी मुने दोक्मल। मेकोपुकी बेक्शो मुर आन बाक्तीकेम सिक्सी पा बाक्मल। 18 ठेयब लेशशो मुरपुकीम ठीक पाइब आन कली आइक्च सेल्शा, मरिम्शो पाइनीम। जोल पा लोव्र पाइनीम। मेको आन शोव्र ख्रेप्तीन।

19 गो इन कली मान पा हिंब आन कली गेना हना यो शुश दाक्नीनी। इन कली जिम्मा गेंसीब आन कली दाक्तीके मुर आन डोंइती कोंइनीनी। 20 इन मुर आन कली मरिम्शो मुर आन क्येडा प्रोंइचा, दे इन बाक्तीकेमी खुइक्नीनी। गे इन मुर आन कली मरिम्शो लोव्र पाइब आन क्येडा खुइक्नीनी। भजन संग्रह २७:५

21 परमप्रभु यावे ठेयब बाक्ब। आं कली बोल्यो सहरम पुम्शो खोदेशो पा आ छक लाक्चा डा दाक्तीके कोंइताक्यी। 22 डोंइती गो हिंशा “गे आं कली मताइनीनी” देंती हना यो “वारच पाइय्यीनी” दे आं पुंइशो लोव्र नेंतीनी।

23 परमप्रभु यावे आ मुर नेल्लेमी परमप्रभु कली दाक्तीन। परमप्रभु यावेमी आ कली थमा सुइक्ब आन कली कोव्रब। ठेयब लेशशो आन कली आन क्येक्क लेप्ब। 24 परमप्रभु यावे आ लां कोव्रशा रिम्बपुकी, सक्ति पाइश्शा, ठेयब थुं पाइश्शो दुमीन।

32

मरिम्शो पशो क्याम्चा पुंइसीशो
शेंतीक लोव्र डा दाऊद आ कुम्सो।

1 सु सु आन हेंथे पशो क्याम्चा पुंइसीशो बाक्मा, मेको ग्येरसीशो मुर बाक्नीम। मारदे हना आन पाप सुम्शो बाक्ब। रोमी ४:६-८ 2 परमप्रभु यावेमी सु सु आन मरिम्शो पशो ममिम्बा, मेको ग्येरसीशो बाक्नीम। मेको आन थुमी जोल पतीक काइ मबाक्ब।

3 गो आं मरिम्शो पशो आ पर्वम सिक्सी पा बाक्शा, नाक्त रे आं श्येत जशोमी हुकयी पाता। मिनु आं रुश नेल्ल मुक्ताक्मे। 4 मारदे हना नाक्दो नाक्ती इन गुइमी चिप्ताक्यीनी। गो नाप्शो नांम किक्शो खोदेशो दुम्ती। ठेयब सेंदा पा। भजन संग्रह ३८:१९; हितोपदेस २८:१३; याकूब ५:१६; यसैया ३८:१७ 5 मिनु “गो परमप्रभु यावे कली आं पाप शोव्रनुड” देंशा, गो आं मरिम्शो पशो इन डोंइती मखुइक्नु। मिनु गे आं मरिम्शो पशो क्याम्ताक्नी। ठेयब सेंदा पा।

6 मोपतीके इन कली टीब मुर नेल्लेम श्येत जशा, इन कली लोत्र पाइनीम। मिनु ब्वाक्कु बारशा जाक्त हना यो, मेको आन बाक्तीके मजाक्दीपब। 7 गे आं खुइश्शा बाक्तीके बाक्नीनी। गे आं कली श्येत रे प्रॉइनीनी। गे आं कली श्येत रे प्रॉइतीक कुम्सो पपाइक्नीनी। ठेयब सेंदा पा।

8 मिनु परमप्रभुमी “गे तेको लांम गाक्चा माल्नीनी, मेको इन कली शेंनन्नी। गो इन कली कोत्रशा, लां कोइनन्नी। 9 गे मिम्तीके मपाइश्शो शारा नु खच्चर खोदेशो मदुमीन। मेको आन कली बिप्पाइक्चा कली लगम नु चलेतीके माल्ब। मो मदुम्त हना, मेकोपुकी इन नेक्था मजाक्नीम” देंत।

10 इन अरेशो मटीबपुकी शुश श्येत जाइनीम। तन्न परमप्रभु यावे कली थमा सुइक्बपुकी आ गेना हना यो दाक्तीक ताइनीम। 11 गे ठीक पाइबपुकी, परमप्रभु यावे कली मिम्शा ग्येरसीने। रिम्शो थुं पाइश्शोपुकी ग्येरशा, कुम्सो पने।

33

परमप्रभु कली ठेयब सेल्शो कुम्सो

1 ठीक पाइबपुकी परमप्रभु यावे कली मिम्शा ग्येरसीने। रिम्शो थुं पाइश्शोपुकीमी परमप्रभु यावे कली ठेयब सेल्तीक कुम्सो पचा शिरनीम। 2 बीना ताप्शा, परमप्रभु यावे कली ठेयब सेलीन। १० ओटा तार पाइश्शो ठेयब ताप्तीक ताप्शा, मेको कली कुम्सो पने। 3 मेको कली नक कुम्सो का पने। रिम्शो पा ताप्शा, ग्येरसीने। भजन संग्रह ४०:४; भजन संग्रह ९६:१; भजन संग्रह ९८:३; भजन संग्रह १४४:९; भजन संग्रह १४९:१; यसैया ४२:१०; प्रकाश ५:९ 4 मारदे हना परमप्रभु यावे आ लोत्र थमा बाक्ब। मिनु मेको आ गेय नेल्ल आ दाक्शा मप्रॉइतीकेमी पाइब। 5 मेकोमी ठीक पतीके नु ठीक निसाफ दाक्ब। रागी नेल्ल परमप्रभु यावे आ गेना हना यो दाक्तीकेमी ब्रीशो बाक्ब।

6 परमप्रभु यावेमी लोत्र पशा, सरीड सेल्लु। आ मुइश्शोमी सोरुल नेल्ल दुम्तेक्म। उत्पत्ती १:६, १४ 7 मेकोमी समुन्द्र डा ब्वाक्कु कली गारो खोदेशो पा राप्पाइश्शो बाक्त। मिनु मेको कली वोइक्तीकेमी वोइश्शो बाक्त। भजन संग्रह १०४:९ 8 रागी नु मेकेर बाक्ब मुर नेल्ले परमप्रभु यावे कली मान पा हिंमल। 9 मारदे हना परमप्रभुमी लोत्र पा मारेइ मारेइ दुम्शो बाक्त। मेकोमी अरेवानु, दुम्शो बाक्तेक्म। भजन संग्रह १४८:५ 10 परमप्रभु यावेमी रागी रागी डा मुर आन मिम्शा पशो खतम सेल्ब। मेकोमी जात जात डा मुर आन मिम्शो गेय शोर गाक्शो सेल्ब। 11 परमप्रभु यावे आ मिम्शो गेना हना यो लीब। आ थुंम मिम्शो नेल्ल पाला सम्म लीब। 12 तेको रागीम परमप्रभु, आं परमप्रभु यावे बाक्बा, मेको ग्येरसीशो रागी बाक्ब। मारदे हना मेको योत्रसीशो रागी बाक्ब। ब्यवस्था ३३:२९ 13 परमप्रभु यावेमी स्वर्ग रे कोत्रशा, मुर नेल्ल आन कली ताइब। 14 मेकोमी आ बाक्तीक रे रागीम बाक्ब मुर नेल्ल आन कली कोत्रब। 15 मेकोमी मुर नेल्ल आन थुं डा मिम्तीके सेल्ब। मुर नेल्ल आन पशो यो कोत्रब। हितोपदेस २१:१

16 मिनु सुइ पिप लडाइ पाइब आन पतीकेमी ब्रॉइने मचाप्नीम। लडाइ पाइब मुर आन ठेयब बोलम ब्रॉइने मचाप्नीम। १सामुएल १७:- 17 मिनु “लडाइम शुश शारा बाक्तीके ब्रॉइनीकी” देंचा जोल बाक्ब। मेको आन ठेयब सक्तिम यो प्रॉइने मचाप्ब। भजन संग्रह २०:८ 18 परमप्रभु यावेमी आ कली मान पा हिंम नु आ गेना हना यो दाक्तीक कली रिम्ब आन कली कोत्रब। 19 मिनु मेको आन कली बेक्चा रे प्रॉइब। मिनु अन्काल दुम्मेनु, ब्रॉइपाइक्ब। 20 गोपुकी परमप्रभु यावे आ लां कोत्रशो बाक्नीक। मेको आंइ कली वारच पाइब नु तेक्तीके बाक्ब। 21 मिनु परमप्रभु आ पबर्म आंइ थुं ग्येरब। मारदे हना गोपुकी मेको आ नेमी जिम्मा गेसाक्क। 22 परमप्रभु यावे, गो दोपा इन लां कोत्रका, मोपा इन गेना हना यो दाक्तीके गोपुकी नु बाक्ल।

34

परमप्रभुमी कोत्रशो

दाऊद आ कुम्सो। दाऊदमी पिप अबीमेलेक क्येडा हिंशा, निप्स ग्यशो दुम्ची ना पशो कुम्सो। अबीमेलेकमी दाऊद कली खेरानु, दाऊद लशो। १सामुएल २१:१४-१६

1 गो परमप्रभु यावे कली गेना हना यो ठेयब सेल्लुड। मेको कली ठेयब सेल्तीक लोत्र गेना हना यो आं शोत्रम बाक्ब। 2 परमप्रभु यावे कली मिम्तीके आं थुं बारशा, ग्येरब। ब्रेम्शो थुं पाइश्शोपुकी यो एको नेंशा, ग्येरसीनीम। 3 गे गो नु परमप्रभु यावे कली ठेयब सेलीन। मिनु गो नेल्ल गारशा, आ नें ठेयब सेल्ल्य।

4 मिनु गो परमप्रभु यावे कली माल्ता। मेकोमी आं लोत्र लेत्ताक्यी। मेकोमी आं कली हिंतीक नु श्येत रे प्रॉइती। 5 मेको आ लां कोत्रबपुकी ग्येरशो दुम्नीम। मेकोपुकी मुने मदोक्मल। 6 एको श्येत जाइबम पुंइतु। मिनु परमप्रभु यावेमी

आ लोत्र नेंशा, आ श्येत रे प्रोंइतु। 7 परमप्रभु यावे आ स्वर्ग डा गेय पाइबम परमप्रभु कली मान पा हिंब नेल्ल आन एर ओथ बाक्शा, खाल पाइब। मिनु मेको आन कली आन श्येत रे प्रोंइब। भजन संग्रह ९१:११; उत्पत्ती ३२:२-३; २राजा ६:१७ 8 परमप्रभु यावे कली कोवडीन, मेको रिम्शो बाक्ब। मेको कली जिम्मा गेंसीबपुकी ग्येरसीशो बाक्नीम। १ पत्रुस २:३ 9 परमप्रभु यावे आ मुरपुकी मेको कली मान पा हिनीन। मारदे हना मेको कली मान पा हिंबपुकी मारेइ मारेइम गाप्शो बाक्नीम। 10 शुश क्येट थीब आन तमी तौ जचा ब्वचा मतथु, शोत्रलु बेक्नीम। तन्न परमप्रभु यावे कली माल्ब मारेइ मारेइम गाप्शो बाक्नीम। लूका १:५३

11 आलपुकी, एक जाक्कीन। मिनु आं लोत्र नेनीन। गो इन कली परमप्रभु यावे कली मान पा हिंतीके आ पर्बम शेनन्नी।

12 सु सुमी शुश नाक्ती ब्रोंइचा नु रिम्शो तचा दाक्नीमी, 13 मेको मरिम्शो लोत्र नु जोल पतीके रे डोन बाक्चा माल्नीम। 14 मरिम्शो पतीके रे लेशशा, रिम्शो पने। थुं नाइशशा बाक्तीके माल्शा बाक्कीन।

15 परमप्रभु यावेमी ठीक पाइब आन गे कोवशा, मेको आन पुंइशो नेंब। 16 परमप्रभु यावेमी मरिम्शो पाइब आन कली कोवना कोवन बाक्ब। मिनु मेको आन कली मिम्तीके का यो मवोइक्थु रागी रे क्याम्ब। हितोपदेस १०:७ 17 ठीक पाइबपुकीमी पुंइनीम। मिनु परमप्रभु यावेमी मेको आन पुंइशो नेंशा, आन श्येत नेल्ल रे प्रोंइब। 18 परमप्रभु यावे थुं लुक्च लशो आन नेक्था बाक्ब। आन थुं बेक्शो आन कली प्रोंइब। भजन संग्रह ५१:१९ 19 ठीक पाइबपुकी शुश श्येत जाइनीम। तन्न परमप्रभु यावेमी मेको आन कली श्येत नेल्ल रे प्रोंइब। २कोरिन्थी १:५ 20 मिनु मेकोमी आन रुश नेल्ल कोवब। मुरुम का यो मजिक्नीम। यूहन्ना १९:३६; प्रस्थान १२:४६ 21 मिनु परमप्रभु आ अरेशो मटीब आन मरिम्शो पतीकेमी साइक्चा पुंइसीनीम। ठीक पाइब आन कली मदाक्बपुकी दोस तशा सजाइ ताइनीम। 22 परमप्रभु यावेमी आ गेय पाइब आन कली श्येत रे प्रोंइब। मेको कली जिम्मा गेंसीबपुकी दोस मतथु, काइ सजाइ मताइनीम।

35

जोरी सत्रु कली निसाफ पने, देशो

दाऊद आ कुम्सो।

1 परमप्रभु यावे, आं कली जिचा तोइब आन कली जिचा तोने। आं कली लडाइ तोइब आन कली लडाइ तोने। 2 ठेयब तेक्तीक नु या शेशा, आं कली वारच पथ बोक्कीन। 3 इन तूतीक नु तरवार शेशा, आं कली खेदा पाइब आन लां तेक्कीन। मिनु आं थुं कली “गो इ कली प्रोंइब नड” देनीन। 4 आं कली साइक्चा माल्बपुकी खतम दुम्शा, मुने दोक्मल। आं कली मरिम्शो पाइक्चा, दे मिम्बपुकी नोले लेशशा, मुने दोक्मल। 5 मेकोपुकी फशेम योल्शो भूस खोदेशो दुम्मल। मिनु परमप्रभु यावे आ स्वर्ग डा गेय पाइबमी मेको आन कली खेदा पस डा पस पवल। 6 मेको आन लां छिडछिड नु ग्रेक्शा थित्तीके दुम्ल। मोपा यो परमप्रभु यावे आ स्वर्ग डा गेय पाइबमी खेदा पवल।

7 मारदे हना मेकोपुकीमी मोशान आं कली ब्वारद दाइक्ताक्कीमी। मिनु मोशान आं कली साइक्चा कली बिक्तीक दोम्तेक्म।

8 मेको आन मतुइक्थु, हिंचा डा ठेयब श्येत दुम्ल। मिनु मेको आन खुइशशा दाइशो ब्वारदम आंमान रेम्मल। मेको आन दोशो बिक्तीकेमी आंमान बिक्शा, बेक्मल। 9 गो चहिं परमप्रभु यावेमी आं कली प्रोंइशो तशा ग्येरसीनुड। 10 मिनु गो आं रां नेल्लेमी “परमप्रभु यावे, इन खोदेशो सु बाक्बा?” देंनुड। गे मचापब नु श्येत जाइब आन कली बोल्यो मुर आ गुइ रे प्रोंइनीनी।

11 जोल पाइब सांक्छीपुकी ग्रीनीम। मिनु आं मतुइशो लोत्र हिल्लो पाइनीम। 12 गो मेको आन कली रिम्शो पाता। मेकोपुकीम चहिं मरिम्शो पाइक्तीमी। गो का ला दुम्ती, सुइम आं कली वारच मपाइय्यीमी। 13 मेकोपुकी रोइ पामेनु, गो अरन्डी फेक्शा, माइजा बाक्शा, सुर्ता पाता। गो बाप्शा मेको आन पर्बम परमप्रभु कली पुंइता। अय्युब ३१:२९ 14 आं वारच नु आं लोक्ब आन पर्बम खोदेशो पा, मेको आन पर्बम रोंका पाता। आं ममा आ पर्बम खोदेशो पा आं पिया खुक्शा, रोंका पाता। रोमी १२:१५ 15 तन्न गो दाइल पांइसीडानु, मेकोपुकी रिशशा, आं पर्बम शुक्शी पचा कली बुक्तेक्म। आं मतुइशो शुक्शी पाइबपुकी आं कली मरिम्शो पचा कली बुक्तेक्म। मिनु मेकोपुकीम आं कली शुक्शी पस डा पस पतीमी। 16 मेकोपुकी नेल्ल क्येडा मरिम्शो दुम्शा, शुक्शी पा, आन खुइ शेप्नीम।

17 परमप्रभु, गे गेना सम्म मेको आन कली कोवशा बाक्नीनी? परमप्रभु मरिम्शो पाइबपुकी रे आं कली प्रोंइयीनी। आं कली नेल्ल क्येडा बोल्यो मुर रे प्रोंइयीनी? 18 मिनु गो शुश मुर आन डोंइती इन कली “गे ठेयब बाक्नीनी”

देंनुड। ठेयब हुल आन दातेमी इन कली कुम्सो पा ठेयब सेल्लुड। 19 मेकोपुकी मोशान आं जोरी सत्रु दुम्शा, आं पर्वम ग्येरचा मतामेक्ल। मोशान खेदा पाइबपुकी आं पर्वम आन मिक्च रिक्चा मतामेक्ल। भजन संग्रह २५:१९; भजन संग्रह ६९:५ 20 मारदे हना मेकोपुकी थुं नाइश्शा बाक्तीक आ पर्वम लोत्र मपाइनीम। रागीम थुं नाइश्शा बाक्ब आन कली जोल पा दोस गेचा कली मिम्नीम। 21 मेकोपुकीमी ठेयब शोत्र सेल्शा, आं पर्वम “आहा आहा, आंइ मिक्चीम तचा ताइतक” देंनीम। 22 परमप्रभु यावे, गे एको ताइतीनी। मिनु सिक्सी पा मबाक्कीन। परमप्रभु यावे आं क्येडा डोन मदुमीन। 23 बोक्कीने। मिनु आं कली वारच पाइय्यीनी। परमप्रभु, आं परमप्रभु यावे, आं पोन बोक्कीन। 24 परमप्रभु यावे, आं परमप्रभु, इन ठीक पतीकेम आं कली निसाफ पने। आं पर्वम मेकोपुकी ग्येरचा मतामेक्ल। 25 मेकोपुकीमी आन थुंमी “आहा, आंइ मिम्शो दुम्त” देंचा मतामेक्ल। मेकोपुकीमी “गो मेको कली खतम पोक्तक” देंचा मतामेक्ल। 26 गो श्येत जडानु, आं पर्वम रिप्ब नेल्ले मुने दोक्मल। मिनु मेको “क्येडा ठेयब नकी” देंबपुकी मुने दोक्शा आइक्च सेल्चा पुंइसीमल। 27 आं कली दाक्बपुकी आं ठीक पशो तशा, ग्येरसीशा कुम्सो पामेक्ल। मिनु मेकोपुकीमी गेना हना यो “परमप्रभु यावे आ नें ठेयब बाक्ल। मेकोमी आ गेय पाइब कली रिम्शो दुम्शो तचा दाक्ब” देंमल। 28 मिनु गो नाक्त रे इन ठीक पतीके नु इन ठेयब दुम्तीके आ पर्वम लोत्र पाइनुड।

36

परमप्रभु आ रिम्शो पतीके

कुम्सो पपाइक्ब कली परमप्रभु यावे आ गेय पाइब दाऊद आ कुम्सो।

1 परमप्रभु आ अरेशो मटीब आन थुंमी हेंथे पतीक लोत्र बाक्ब। मार लोत्र बाक्ब देशा हना “मेकोपुकीम परमप्रभु कली मान पा महिनीम” देशो लोत्र बाक्ब। रोमी ३:१८ 2 मेकोपुकी ठेयब लेशशा “आंइ मरिम्शो पशो गेनायो मतुंडसीब, गो दोस मताइनय” दे मिम्नीम। रोमी ३:१८ 3 मेको आन लोत्र मरिम्शो नु जोल ला बाक्ब। मेकोपुकीमी रुप्ब थुंम मिम्शा, रिम्शो पचा प्रोंइने थुम्शो बाक्नीम। 4 मेको आन ब्राख्येम बाक्मानु, आन मरिम्शो पतीक ला मिम्ना मिम्न बाक्नीम। मेको मरिम्शो लां खोइक्नीम। मेकोमी आन थुंमी “मरिम्शो पशो ग्रांग्रा दिशा मपाइनीकी” दे मदेंनीम। मीका २:१ 5 परमप्रभु यावे, इन गेना हना यो दाक्तीके सरीड सम्म जाक्दीश्शो बाक्ब। इन दाक्शा मप्रोंइतीके गोस्स क्येडा इर बाक्ब। 6 इन ठीक पतीके ठेयब डांडापुकी खोदेशो नु इन निसाफ पशो शुश लुक्च लशो समुन्द्र खोदेशो बाक्ब। गे मुरपुकी, बी ब्यफ, क्यारश भेडा नु जन्तु आन कली कोवशा, श्येत रे प्रोंइनीनी। 7 परमप्रभु, इन गेना हना यो दाक्तीक थम रिम्शो बाक्ब। मिनु मुरपुकी इन फ्रां आगाम फाम्सीनीम। 8 मेकोपुकी इन खिं डा जचा तूचामी रूनीम। गे मेको आन कली इन ग्येरतीकेमी ग्येरपाइक्नीनी। 9 मारदे हना गे नु ब्रोंइतीके बाक्ब। मिनु गो इन छेडछेडमी हाम्सो ताइनीकी। येरमीया २:१३; यूहन्ना ४:१४

10 इन गेना हना यो दाक्तीके इन कली तुइक्ब आन तार मोतीन। इन ठीक पतीके रिम्शो थुं पाइश्शो आन तार मोतीन। 11 मिनु ठेयब लेशशो मुर आन खोइलीम आं कली मदिम्दीमील। इन अरेशो मटीबपुकीमी आं कली मखेरयीमील। 12 मरिम्शो पाइबपुकी गोल्शा, खतम दुम्शो बाक्नीम। मेकोपुकी बोक्ने मचाप्चा डा पा गोल्शो बाक्नीम।

37

टीब नु मटीब आन पर्वम

दाऊद आ कुम्सो।

1 परमप्रभु आ अरेशो मटीब आन कली तशा, गाइश्शा, चुरशा मपने। दूली पाइब आन कली तशा, गेहे मपने। हितोपदेस २४:१९ 2 मारदे हना मेकोपुकी घांस खोदेशो पा रीब पा सोवनीम। गिग खाइ खोदेशो पा सोल सुल बेक्नीम। 3 परमप्रभु यावे कली जिम्मा गेंसीशा, रिम्शो पने। रागीम रिम्शो दुम्शा बाक्चा ताइनीनी। 4 परमप्रभु यावे कली तुइश्शा, ग्येरसीने। मेकोमी इन थुंम पुंइशो गेब। भजन संग्रह २०:५ 5 गे परमप्रभु यावे कली जिम्मा गेसीने। मिनु मेकोमी इन पर्वम गेय पाइब। 6 मेकोमी इन ठीक दुम्तीके छेडछेड खोदेशो पा गूपाइक्ब। इन ठीक पतीके नाक्ती खोदेशो दुम्पाइक्ब। मीका ७:९ 7 परमप्रभु यावे आ डोंइती सिक्सी पा बाक्शा, मेकोमी पाइब, दे रिम्दीन। आन दला दाक्स पाइब नु मरिम्शो मिम्शा पाइब आन पर्वम मचुरीने। 8 गाइक्चा नु चुरचा प्रोनीन। मगाइक्तीन। मारदे हना मो पतीकेमी इन कली मरिम्शो पपाइक्ब। 9 परमप्रभु आ अरेशो मटीब क्याम्चा पुंइसीनीम। तन्न परमप्रभु यावे आ लां कोवबपुकी रागीम बाक्चा ताइनीम। 10 इक्का नाक्त नोले परमप्रभु आ अरेशो मटीब मलीनीम। गेपुकीमी मेको आन

कली मालतीनी हना यो, मथिल्तीनी। मेको आन बाक्तीके श्येतथ बाक्ब। 11 ब्रेम्शोपुकी रागीम बाक्चा ताइनीम। मारेइ मारेइ तशा ग्येरशा, ठेयब थुं पा बाक्चा ताइनीम। मती ५:५

12 मिनु परमप्रभु आ अरेशो मटीबपुकीमी ठीक पाइब मुर आन पर्वम “दोपा श्येत गेचा नमी” दे मिम्शा, आन खुइ शेप्शो बाक्नीम। 13 तन्न परमप्रभु मेको आन कली तशा, रिम्ब। मारदे हना मेको आन नाक्त नुप्शो तुइश्शो बाक्ब। अय्युब १८:२० 14 परमप्रभु आ अरेशो मटीबपुकीमी पुडग नु श्येत जाइब आन कली साइक्चा कली तरवार शोइक्नीम। आन लिब्रा कीनीम। रिम्शो थुं पाइश्शो मुर आन कली साइक्चा माल्नीम। 15 तन्न मेको आन तरवारमी आंमा आन लुङ्गीर तूचा पुंइसीनीम। आन लिब्रा जिक्नीम।

16 परमप्रभु आ अरेशो मटीब आन शुश शोंप क्येडा ठीक पाइब आन इक्का खोइ शोंप रिम्शो बाक्ब। हितोपदेस १५:१६ 17 मारदे हना परमप्रभु यावे आ अरेशो मटीब आन गुइ जिक्चा पुंइसीनीम। परमप्रभु यावेमी ठीक पाइब आन कली रिम्शो पा बाक्चा गेब। 18 परमप्रभु यावेमी दोस मताइब आन नाक्ती तुइक्ब। मिनु मेको आन शोंप गेना हना यो लीब। उपदेसक ८:१२ 19 ठेयब श्येत दुम नाक्ती मेकोपुकी मुने मदोक्नीम। मिनु अन्काल दुम नाक्ती मेकोपुकी जशा रूचा ताइनीम। हितोपदेस १०:३ 20 परमप्रभु आ अरेशो मटीबपुकी खतम दुम्नीम। मिनु परमप्रभु यावे आ जोरी सत्रु दिंम डा रिम्शो घांस खोदेशो बाक्नीम। मिनु मेकोपुकी सोल सुल बेक्शा, कुन खोदेशो पा जाम्शा लाइनीम।

21 परमप्रभु आ अरेशो मटीबपुकीमी जेर जशा, मथाप्नीम। मिनु ठीक पाइबपुकीमी हाइश्शो दुम्शा गेनीम। 22 परमप्रभु रे आसीक ताइबपुकीमी रागी ताइनीम। परमप्रभु रे सराप ताइबपुकी जाम्शा लाइनीम। 23 परमप्रभु यावेमी आ मुर आन थेक्तीक बोल्यो सेल्ब। मेको आन कली तशा ग्येरब। 24 मेको दाइल पांइसाक्म हना यो, मगोल्नीम। मारदे हना परमप्रभु यावेमी मेको आन गुइ ग्याइश्शा, तिक्ब। हितोपदेस २४:१६

25 गो ठिटा बाक्ती, मुल खाल्पा दुम्ती। तन्न ठीक पाइबपुकी नु आन तमी तौ नु चच युइमी मुल सम्म पुंइशा जशो गेनायो मतड्मी। 26 मिनु मेकोपुकीमी नेल्ल नाक्ती हाइश्शो दुम्शा, पुडग आन कली मार मार गेनीम। मिनु मेको आन आलपुकीमी आसीक ताइनीम। 27 मरिम्शो पतीके रे डोन बाक्कीन। रिम्शो पने। मिनु गे गेना हना यो ब्रोंइचा ताइनीनी। 28 मारदे हना परमप्रभु यावेमी ठीक निसाफ दाक्ब। आ कली मप्रोंइब आन कली नेल्ल नाक्त गेना हना यो कोव्रब। ठीक पाइब गेना हना यो रिम्शो बाक्चा ताइनीम। तन्न आ अरेशो मटीब आन तमी तौ नु चच युइ तिल्चा पुंइसीनीम। 29 ठीक पाइबपुकीमी रागी ताइनीम। मिनु गेना हना यो मेकेर बाक्नीम। यसैया ६०:२१

30 ठीक पाइबपुकीमी जोक्तीक तुइक्तीक लोव्र पाइनीम। मिनु मेकोपुकीमी ठीक पतीके शेंनीम। 31 आन परमप्रभु आ अरेशो लोव्र मेको आन थुंमी बाक्ब। मिनु हेंथे मपथु, परमप्रभु आ लांम गाक्नीम। 32 परमप्रभु आ अरेशो मटीबपुकीमी बाप्शा, ठीक पाइब आन कली साइक्चा माल्नीम। 33 तन्न परमप्रभु यावेमी ठीक पाइब आन कली मेको आन गुइम दुम्चा मगेब। ठीक पाइब आन निसाफ दुम्मेनु, दोस मताइब दुम्पाइक्ब। 34 परमप्रभु यावे कली रिम्दीन। मेको आ लांम गाक्कीन। मेकोमी इन कली ठेयब सेल्शा, रागी इन कली गेब। मिनु गे परमप्रभु आ अरेशो मटीब आन कली खतम सेल्चा ताइनीनी।

35 गो परमप्रभु आ अरेशो मटीब लेबानोन डा ठेयब रवा खोदेशो दुम्शो ताता। १सामुएल ३५:२-३८; इजीकीएल ३१:३-१४ 36 मिनु गो आ बाक्तीक कोव्रता, मेको मुर मबा। गो मेको कली माल्ता, मथिदु। 37 दोस मताइब आन कली कोव्रडीन। रिम्शो थुं पाइश्शो मुर कली कोव्रडीन। मारदे हना मेकोपुकी थुं नाइश्शा बाक्शो बाक्नीम। उत्पत्ती ३९:७-९ 38 तन्न हेंथे पाइब नेल्ल खतम दुम्नीम। परमप्रभु आ अरेशो लोव्र मटीब नेल्ल खतम दुम्नीम। आन तमी तौ चच युइ यो तिल्चा पुंइसीनीम। 39 परमप्रभु यावे ठीक पाइब आन कली वारच पाइब बाक्ब। मिनु मेको आन कली श्येत दुम्मेनु, मेको आन फाम्सीतीके दरवार बाक्ब। 40 परमप्रभु यावेमी मेको आन कली वारच पा प्रोंइब। मिनु आ अरेशो मटीब आन गुइ रे प्रोंइब। मारदे हना मेकोपुकी परमप्रभु कली जिम्मा गेंसीशो बाक्नीम। लूका १८:७-८

38

मरिम्शो पशो क्याम्चा, दे पुंइशो
मप्रेंथु मिम्चा कली दाऊद आ कुम्सो।

1 परमप्रभु यावे इन गाइक्तीकेमी आं कली महुइक्तीनी। इन चुरतीकेमी आं कली सजाइ मगेयीनी। 2 मारदे हना इन ब्राम आं कली देशो बाक्नीम। मिनु इन गुइमी आं कली चिप्शो बाक्ब। अय्युब ६:४ 3 इन गाइक्तीकेमी आं रां

नेल्ल खाइशो बाक्ब। आं मरिम्शो पतीकेम आं रुश नेल्ल मुक्शो खोदेशो बाक्नीम। 4 आं मरिम्शो पशोमी आं पिया सम्म गुम्शो बाक्ब। मेको आं कुरने मचाप्चा डा पा हेल्लो बाक्नीम। बिलाप १:१४;

5 आं निप्स काप्शो आ पबर्म आं गार राक्शा, रिना पाइशो बाक्नीम। 6 गो नाक्त रे आं पिया खुक्शा, रोंका पा गुर ब्वेशा गाक्शो बाक्नुड। 7 आं ची नेल्ल खाइशो बाक्ब। आं रां नेल्ल सेस मबाक्ब। 8 गो गलाक गुलुक दुम्शा, काइ सक्ति मपाइशो दुम्शो बाक्ती। आं थुं डा श्येतम शुश हुकयी पाइनुड।

9 आं परमप्रभु, गे आं दाक्शो नेल्ल तुइशो बाक्नीनी। आं हुकयी पतीके यो तुइशो बाक्नीनी। 10 आं लुडगीर प्रेक्शा, आं सक्ति जाम्त। आं मिक्च ब्रा ब्रा दुम्शो बाक्ब। 11 आं वारच नु आं खिं डा मुर आं श्येत तशा, डोन बाक्नीम। मिनु आं नेक्था डा मुरपुकीमी डोन रे कोवनीम। भजन संग्रह ६९:९; भजन संग्रह ८९:९; अय्युब १९:१३-१९ 12 आं कली साइक्चा माल्बपुकीमी ब्वारद दाइशो, वोइशो बाक्नीम। आं कली श्येत दुम्शो कोवकोव दाक्बपुकीमी “मेको कली दोपा श्येत गेचा, दोपा मेको आ पबर्म जोल पचा” दे नाक्त रे लोव पाइनीम। 13 गो नोफा मनैब मुर खोदेशो दुम्ती, मनैनुड। ब्वाक्ने मचाप्ब मुर खोदेशो दुम्ती, काइ लोव मपाइनुड। भजन संग्रह ३९:९३ 14 गो थमा पा नोफा मनैब खोदेशो दुम्शा, मारेइ लोव मलेत्नुड। 15 परमप्रभु यावे, गो इन कली रिम्नुड। गे आं लोव लेत्नीनी। गे परमप्रभु यावे, आं परमप्रभु बाक्नीनी। 16 मिनु गो “मेकोपुकीमी आं पबर्म शुक्शी पा ग्येरचा मतामेक्ल। आं कली प्रेक्शो तशा, बोरचा मतामेक्ल” देती। 17 मारदे हना गो दाइल पांइसीचा चिक्शो बाक्नुड। गो श्येत जस डा जस बाक्नुड। 18 गो आं काइ मरिम्शो पशो शोवनुड। आं मरिम्शो पशो मिम्शा सुर्ता पाइनुड। भजन संग्रह ३२:५; 19 आं जोरी सत्रु चहिं रिम्शो पा ब्रोंइशा, बोल्यो दुम्शो बाक्नीम। आं कली मोशान मदाक्ब शुश बाक्नीम। 20 मुरपुकीमी आं रिम्शो पशो आ पा डा आं कली मरिम्शो पाइनीम। मारदे हना गो रिम्शो पाइब बाक्ती हना यो, आं कली खेदा पाइनीम। 21 परमप्रभु यावे, आं परमप्रभु, आं कली मप्रोंइयीनी। आं क्येडा डोन मदुमीन। 22 परमप्रभु, आं कली वारच पाइशो, श्येत रे प्रोंइचा कली रीब पा जाक्कीन।

39

मुर आ ब्रोंइतीक इक्का ला बाक्ब

कुम्सो पपाइक्ब येदुथून कली। दाऊद आ कुम्सो।

१इतिहास २५:१,३ 1 मिनु गो “गो आं गेय नेल्ल होस पा पाइक्नुड। गो लोव पचा यो होस पा पाइक्नुड। मरिम्शो पाइबपुकी आं नेक्था बाक्तेक्म हना, गो सिक्सी पा बाक्नुड” देती। 2 गो मब्वाक्थु, सिक्सी पा बाक्ती। मिनु रिम्शो लोव यो मपथु, आं थुं डा श्येत बारत। भजन संग्रह ३८:१४ 3 आं थुं चोशो बाक्त। शुश मिम्शा, मी ब्रशो खोदेशो दुम्ती।

4 “परमप्रभु यावे, आं बेक्तीक नाक्त कोंइदीनी। आं ब्रोंइचा गिश नाक्त लीमे तुइक्पाइय्यीनी। गो रीब पा जाम्शा लाइब मुर बाक्नुड। भजन संग्रह ९०:१२; अय्युब १४:५ 5 गे आं ब्रोंइतीक नाक्त बिक्ता का निक्शी खोदेशो सेल्तीनी। आं ब्रोंइतीक नाक्त इन डोंइती मारेइ ममाइ। मुर नेल्ले आन ब्रोंइतीके जाम्शा लाइब फश खोदेशो बाक्नीम” देती। भजन संग्रह ९०:५-६ठेयब सेंदा पा। 6 मुरपुकी वांकु खोदेशो पा गाक्शो बाक्नीम। मेकोपुकी मोशा सुर्ता पाइनीम। शुश शोप तेल्नीम। मेको सुम जाइबा मतुइक्नीम। भजन संग्रह ४९:१७-२१; उपदेसक २:१८-२१; लूका १२:१५-२१

7 “परमप्रभु, गो मार कली रिम्ना रिम्न बाक्नुडा? गो इन लां ला कोवशा बाक्नुड। 8 आं मरिम्शो पशो रे प्रोंइयीनी। मूर्खपुकीम आं कली शुक्शी मपामेक्ल। 9 गो सिक्सी पा बाक्शा मब्वाक्ड। मारदे हना गे मो पपाइक्तीनी। 10 इन याम पाइशो लेत्तीन। गो इन तुप्शोमी जाम्शा लाइब दुम्ती। 11 गे मुर आन कली पाप पशो आ पबर्म तुप्तीनी। आ दाक्शो तुम्बुम वा नेक्शो खोदेशो पा जाम्शा लाइब। थमा पा मुर नेल्ले आन ब्रोंइतीक जाम्शा लाइब फश खोदेशो बाक्नीम। ठेयब सेंदा पा।

12 परमप्रभु यावे, आं पुंइशो लोव नेनीन। आं वाइ ब्रेशो नेनीन। आं डाक्शो तशा, वारच पाइय्यीनी। मारदे हना गो इन डोंइती आं किकी पिप खोदेशो पा, रागी डा पौना खोदेशो बाक्नुड। भजन संग्रह ११९:१९; लेवी २५:२३; १ पत्रुस २:११; हिब्रू ११:१३ 13 आं बेक्चा डोंइती आं पबर्म गाइक्चा प्रोनीन। मिनु गो लेंशा ग्येरशा बाक्चा तडल” दे पुंइता।

40

“परमप्रभुमी वारच पाप्तु” देशो

कुम्सो पपाइक्ब कली दाऊद आ कुम्सो।

1 गो परमप्रभु यावे कली रिम्स डा रिम्स बाक्ती। मेकोमी आं गे कोवशा, आं वाइ ब्रेशशा, पुंइशो लोव नंतु। 2 मेकोमी आं कली ग्रांरा दिचा डा हिलोम बिक्शा बेक्तीक रे गुंडताक्यी। मिनु आं कली सेरथे फुल्लु का तार राप्पाइक्ती। मिनु महिम्सीचा डा पा नाइक्पाइक्ती। 3 मेकोमी आं कली नक कुम्सो का पपाइक्ती। आंइ परमप्रभु कली ठेयब सेल्टीक कुम्सो पपाइक्ती। मिनु शुश मुरुम एको तशा, नेंशा, परमप्रभु यावे कली मान पा हिंशा, मेको कली थमा सुइक्नीम। भजन संग्रह ३३:३ 4 सु सुमी परमप्रभु यावे कली थमा सुइक्नीमी, मेको ग्येरसीशो मुर बाक्नीमी। मेकोपुकी ठेयब लेशो नु जोल डा सक्ति पाइशो देवी देवता गे लाइब नु मबाक्नीम।

5 मिनु गो “परमप्रभु यावे, आं परमप्रभु, गे आंइ पबंम पशो छक लाक्चा डा गेय नु इन मिम्शो कोंइताक्की। मेको शुश बाक्नीम। इन खोदेंशो सुइ मबाक्नीम। गो मेको आन कली शेंशें दाक्ती, देंती हना यो, नेल्ल शेने मचबु। मारदे हना मेको शुश बाक्नीम। भजन संग्रह १३९:१७-१८ 6 गे मार मार क्योरशा चढ़ेशो नु जचा चढ़ेशो तशा मग्येरसीनी। तन्न इन अरेशो लोव नेंचा कली नोफा दाइक्ब सेल्टीनी, चोशा चढ़ेशो नु पाप आ पबंम चढ़ेशो मपुंडनी। भजन संग्रह ५०:८-१३; भजन संग्रह ५१:१८; १सामुएल १५:२२; हिब्रू १०:५-१० 7 मिनु गो ‘गो एक बाक्ती, दे परमप्रभु यावे आ लोवमी आं पबंम ब्रेक्शो बाक्ब’ देंती। 8 परमप्रभु, गो इन दाक्शो पशोमी आं कली ग्येरपाइक्ब। इन अरेशो लोव आं थुंम बाक्ब। 9 गो ठेयब गुम्तीकेमी इन रिम्शो ब्रोंइतीक लोव आ पबंम लोव पाइनुड। परमप्रभु यावे, गो सिक्सी पा मबाक्नुड। मेको गे तुइक्नीनी। 10 गो इन मुर आन कली श्येत रे प्रोंइतीके आं थुंम खुइशशा मवोइक्थु, इन दाक्शा मप्रोंइतीके नु मुर आन कली श्येत रे प्रोंइतीके आ पबंम लोव पाता। गो इन गेना हना यो दाक्तीके नु दाक्शा मप्रोंइतीके आ पबंम मखुइक्थु, ठेयब गुम्तीकेमी शेंताक्डमी। 11 परमप्रभु यावे, गे इन शिशी पतीके मतेक्कीन। इन गेना हना यो दाक्तीक नु दाक्शा गेनायो मप्रोंइतीकेम आं कली गेना हना यो खाल पयीसील। 12 मारदे हना हिक्ने मचाप्चा डा श्येतपुकीमी आं कली पुम्शो बाक्नीम। आं मरिम्शो पतीकेम आं पिया खुक्शो बाक्ती। मेकोपुकी आं पिया डा चां क्येडा यो शुश बाक्नीम। मोपा आं थुं लुकच लशो बाक्ब। 13 परमप्रभु यावे, श्येत रे प्रोंइयीनी। परमप्रभु यावे, आं कली वारच पाइक्चा कली रीब पा जाक्कीन। भजन संग्रह ७०:- 14 आं कली साइक्चा माल्ब नेल्ले मुने दोक्शा, ग्येत्थ लुकच दुम्मल। आं कली श्येत जशो दाक्ब नेल्ल लेशशा लशा, खतम दुम्मल। 15 आं कली शुक्शी पाइबपुकीमी ‘आहा, आहा’ देंशो, नेल्ल रे मुने दोक्मल। 16 तन्न सु सुमी इन कली माल्नीमी, मेको नेल्ले इन पबंम शुश ग्येरसमल। आन श्येत रे प्रोंइचा पुंडसीब नेल्लेमी गेना हना यो ‘परमप्रभु यावे ठेयब बाक्ब’ देंमल। 17 गो पुडग नु श्येत जाइब बाक्ती हना यो, परमप्रभुम आं कली मिम्ब। गे आं कली वारच पाइब नु आं कली श्येत रे प्रोंइब बाक्नीनी। आं परमप्रभु देश मपने” दे लोव पाता।

41

रोइ पाइबमी परमप्रभु कली पुंइशो

कुम्सो पपाइक्ब कली दाऊद आ कुम्सो।

1 सु सुमी पुडग मुर आन पबंम सुर्ता पा, वारच पाइनीमी, मेको आन कली परमप्रभु यावेमी आन श्येत रे प्रोंइब। हितोपदेस १४:२१; मत्ती ५:७ 2 परमप्रभु यावेमी मेको आन कली कोवशा, खाल पा प्रोंइब। मेको रागीम बाक्मानु, ग्येरसमल। गे मेको आन कली आन जोरी सत्रु आन गुडम मगेनीनी। 3 मेकोपुकी रोइ पा गोल्शा बाक्मानु, परमप्रभु यावेमी मेको आन रोइ सापाइक्ब। 4 गो “परमप्रभु यावे आं कली शिशी पा सापाइय्यीनी। मारदे हना गो इन कली मरिम्शो पाता” देंती। 5 आं जोरी सत्रुमी “मेको गेना बेक्बा डा, आ नें क्याम्सीबा?” देंनीम। 6 मिनु आं कली सु सुम कोवथ जाक्नीमी, मेकोमी आं कली रिम्शो लोव पखु पाइनीम। मिनु नोले आं पबंम “मार, मरिम्शो लोव पड” दे मिम्शा, मरिम्शो लोव ब्रपाइक्नीम। 7 आं कली ग्रांरा दिप्ब नेल्ल गुम्शा, आं पबंम “मार मरिम्शो पाइक्चा” दे नोफा मुइक्मुइक्नीम। 8 मेकोपुकीमी “मेको कली बेक्तीक रोइमी ग्याइशो बाक्ब, आ गोल्टीक रे मबोक्ब” देंनीम। 9 गो आं नेक्था डा वारच, आं शोब्ले जाइबमी यो, आं कली ताइक्चा कली आ खोइल क्युक्तु। 10 परमप्रभु यावे, गे आं कली शिशी पाइशशा, पोक्यीनी। मिनु गो मेको आन कली क्येक्क लेन्ने चबुल। भजन संग्रह ५५:१३-१५; यूहन्ना १३:१८; प्रेरित १:१६

11 मोदेंशो पाइतीनी हना, गे आं कली दाक्नीनी, दे तुइक्नुड। मारदे हना आं जोरी सत्रु आं पबंम ग्येरचा मताइनीम। 12 आं रिम्शो थुं आ पबंम गे आं कली ग्योम्ताक्यीनी। मिनु गे आं कली गेना हना यो इन डोंइती राप्पाइक्तीनी।

13 परमप्रभु यावे, इस्राएली आन परमप्रभु कली “गे गेना हना यो ठेयब बाक्नीनी। मेको थमा बाक्ब” देंमल। आमेल आमेन। भजन संग्रह ७२:१८; भजन संग्रह ८९:५३; भजन संग्रह १०६:४८; भजन संग्रह १५०:६

42

ठेयब श्येतम परमप्रभु कली मिम्शो

कुम्सो पपाइक्व कली शेंतीक कुम्सो। कोराह आ तौ आन कुम्सो। १इतिहास ६:१६,२२; २इतिहास २०:१९

1 दोपा रोकेशेमी खोला डा ब्वाक्कु तूत दाक्शा ब्वाक्कु मिम्बा, मोपा आं थुंमी यो परमप्रभु, इन कली मिम्ब। 2 मोपा आं थुं ब्रोंइशा बाक्ब परमप्रभु आ नेक्था बाक्चा दाक्ब। गो गेना परमप्रभु आ डोंइती बाक्चा ताइनुडा? भजन संग्रह ६३:२; भजन संग्रह ८४:३; भजन संग्रह १४३:६ 3 आं प्रेक्कु नाक्दो नाक्ती आं जचा थोवक दुम्शो बाक्ब। मारदे हना मुरपुकीमी नाक्त किंत किंत “इ परमप्रभु ते बाक्मे?” दे शुक्शी पा हिल्लो पस डा पस बाक्नीम। भजन संग्रह ७९:१० 4 मिनु गो मेको नेल्ल मिम्शा, परमप्रभु, इन खिं लाइब शुश मुर आन कली लां कोंइशा, मेकोपुकी नु लना लन बाक्डानु, ग्येरसीशा “गे रिम्शो पाइब बाक्नीनी” दे गो नेल्लेमी कुम्सो पा चाड मानेतक। भजन संग्रह २७:४

5 आं थुं, गे मारदे लुक्च लाइनेवे? मारदे ग्येत्थ लुक्च दुम्नेवे? परमप्रभुमी मार पाइबा, मेको रिम्दो। मिनु नोले मेकोमी आं कली श्येत रे प्रोंइशो तशा, गो परमप्रभु कली ठेयब सेल्लुड। मारदे हना मेको आं कली श्येत रे प्रोंइब नु आं परमप्रभु बाक्ब। 6 आं परमप्रभु, आं थुं, ग्येत्थ लुक्च दुम्त। गो यर्दन डा दिंम नु हेरमोन डा मिसार डांडा रे इन कली मिम्नुड। 7 मिनु इन बारशो ब्वाक्कु आ ग्रीशोमी अर्को ब्वाक्कु कली ब्रेप्ब। मेको इन ब्वाक्कु आ छालमी आं कली सुम्शो बाक्ब।

8 मिनु गो नाक्ती परमप्रभु यावे आ गेना हना यो दाक्तीके तुइक्नुड। मिनु नाक्दो आ कुम्सो आं थुंमी बाक्ब। मेको आं कली ब्रोंइचा गेब परमप्रभु नु लोव पतीके बाक्ब।

9 गो परमप्रभु, आं सेरथे फुल्लु कली “गे मारदे आं कली प्रेंदीनी? गो मारदे आं जोरी सत्रु रे पा खेदा पचा पुंइसीशा, थुं ग्येत्थ लुक्च दुम्शा, गाक्चा माल्डा?” देंती। ब्यवस्था ३२:४ 10 आं कली दिप्बपुकीमी आं रुश जिकशो खोदेंशो पा शुक्शी पाइनीम। मिनु मेकोपुकीमी गेना हना यो “इ परमप्रभु ते बाक्मे” दे शुक्शी पा, हिल्लो पस डा पस बाक्नीम।

11 आं थुं, गे मारदे लुक्च लाइनेवे? मारदे ग्येत्थ लुक्च दुम्नेवे? परमप्रभुमी मार पाइबा, मेको रिम्दो। मिनु नोले आं कली श्येत रे प्रोंइशो तशा, गो परमप्रभु कली ठेयब सेल्लुड। मारदे हना मेको आं कली श्येत रे प्रोंइब नु आं परमप्रभु बाक्ब।

43

“वारच पाइय्यीनी” दे पुंइशो

1 परमप्रभु, आं कली वारच पाइय्यीनी। इन कली थमा मसुइक्व मुर आन पर्वम आं पोन बोक्कीन। मिनु जोल पाइब नु मरिम्शो पाइब मुरपुकी रे आं कली प्रोंइयीनी। 2 परमप्रभु, गे आं कली प्रोंइब बोल्यो दरवार बाक्नीनी। गे आं कली मारदे प्रोंइयीनी? गो मारदे आं जोरी सत्रुम खेदा पचा पुंइसीशा, रोंका पचा माल्डा? 3 इन छेडछेड नु इन थमा पतीके सोइक्तीन। मिनु मेकोमी आं कली लां कोंइशा इन डांडा नु इन बाक्तीकेमी चाक्यील। 4 मेना गो परमप्रभु कली चढेतीकेम जाक्नुड। मिनु परमप्रभुमी आं कली शुश ग्येरपाइशा, आं थुं नाइक्पाइक्ब। परमप्रभु, आं परमप्रभु, गो ठेयब ताप्तीक ताप्शा, कुम्सो पा इन कली ठेयब सेल्लुड।

5 आं थुं, गे मारदे लुक्च लाइनेवे? मारदे ग्येत्थ लुक्च दुम्नेवे? परमप्रभुम मार पाइबा, मेको रिम्दो। मिनु नोले आं कली श्येत रे प्रोंइशो तशा, गो परमप्रभु कली ठेयब सेल्लुड। मारदे हना मेको आं कली श्येत रे प्रोंइब नु आं परमप्रभु बाक्ब।

44

“लेंशा वारच पने” दे पुंइशो

कुम्सो पपाइक्व कली सेल्लो शेंतीक कुम्सो। कोराह आ तौ आन कुम्सो।

1 परमप्रभु, साइ आंइ किकी पिपीमी आन पालामी पशो इन गेय नेल्ल आंइ कली शेंताक्म। मिनु गो मेको नेल्ल नेंतक। ब्यवस्था ६:२०-२५ 2 गे रागी रागी डा मुर आन कली खेरशा, आंइ किकी पिपी आन कली बाक्पाइशो बाक्तीनी। गे मेको मुर आन कली क्याम्शा, आंइ किकी पिपी आन कली सोशा बोशा ब्रपाइशो बाक्तीनी। मोपा मेको आन कली प्रोंइशो बाक्तीनी। 3 मेको आन तरवारम मेको रागी मग्राशो बाक्तेक्म। आन सक्तिमी यो मग्राशो बाक्तेक्म। इन सक्ति नु इन कुल डा छेडछेडमी ग्रातेक्म। मारदे हना गे मेको आन कली दाक्शो बाक्तीनी।

4 गे आं पिप नु आं परमप्रभु बाक्नीनी। याकूब कली ग्रापतीन। 5 इन पतीकेमी आंइ जोरी सत्रु आन कली ग्रानीकी। इन नेमी आंइ जोरी सत्रु आन कली दिम्शा साइक्नीकी। 6 गो आं लिब्राम ग्राती, मदेनुड। मिनु आं तरवारम यो आं कली ग्रापाइक्ने मचापब। 7 तन्न गे आंइ कली आंइ जोरी सत्रु आन क्येडा ग्रापाइक्तीनी। मिनु आंइ कली काइ मदाक्ब आन कली वाम ग्याम सेलतीनी। 8 गोपुकीमी नाक्त कित कित परमप्रभु कली मिम्शा, आंइ नें बोरपाइक्नीकी। मिनु गोपुकीमी गेना हना यो “इन नें ठेयब बाक्ब” दे ठेयब सेलतीनी। ठेयब सेंदा पा।येरमीया ८:२२-२३

9 तन्न गे आंइ कली प्रोइशा, श्येत जपाइक्तीनी। मिनु गे आंइ लडाइ पाइब नु मलनी। 10 मिनु गे आंइ कली आंइ जोरी सत्रु आन क्येडा ब्रुपाइक्तीनी। मिनु आंइ कली मदाक्बपुकीमी आंइ मार मार रोइशा लाइक्तेक्म। 11 गे आंइ कली क्योरचा पुंडसीब भेडा खोदेशो पा प्रोइतीनी। मिनु आंइ कली रागी रागीम ब्रुपाइक्तीनी। 12 गे इन मुर आन कली मोशा लेयतीनी। मिनु मेको आन कली लेयशा, मारेइ ताक्चा थुं मपनी।

13 आंइ नेक्था डा मुर आन डोंइती आंइ कली गाइशा, शुक्शी पाइक्चा पुंडसीब सेलतीनी। गे मुर आन कली आंइ पबर्म तोक्शो नु मरिम्शो लोव्र पपाइक्तीनी। १कोरिन्थी १५:३१; रोमी ८:३६; भजन संग्रह ७९:४; १राजा ९:७ 14 गे आंइ कली रागी रागी डा मुर आन दातेम शुक्शी पाइक्चा पुंडसीब सेलतीनी। मुरपुकीमी आंइ कली तशा, आन पिया हिम्नीम। 15 गो नाक्त कित कित मुने दोक्नुड। आं मुनेमी आं कुल सुम्सीशो बाक्नुड। 16 आं कली शुक्शी पाइब, मरिम्शो लोव्र पाइब, जोरी सत्रुमी पतीके नु क्येक्क लेपब आन पतीके मोदेशो दुम्शो बाक्नुड।

17 मोदेशो दुम्त हना यो, गो इन कली मप्रेंदक। मिनु इन कबल यो मप्रोंइक। 18 गो नोले मशोंइसक। इन लां रे ग्येत्थ लुकच मपक। 19 तन्न गे आंइ कली फस पोक्शा, सिवार आन बाक्तीक खोदेशो पा छिडछिडमी सुम्तीनी।

20 गो आंइ परमप्रभु आ नें प्रेंशो नकी नु अरु देवी देवता आन कली पूजा पशो नकी हना, 21 मार, परमप्रभुमी मतुइक्बा डा? मारदे हना परमप्रभुमी मुर आन थुं डा खुइशो नेल्ल तुइक्ब। 22 मो हना यो गो इन पबर्म नाक्त रे साइक्चा पुंडसीनीकी। मिनु क्योरचा चिक्शो भेडा खोदेशो पा हिक्सीशो बाक्नीकी। १कोरिन्थी १५:३१; रोमी ८:३६ 23 बोक्कीन, परमप्रभु, गे मारदे इप्नीनी? सेंसीने। आंइ कली मो पा मप्रोनीने। 24 गे मारदे इन कुल खुइक्नीनी? मिनु आंइ श्येत नु आंइ कली दिप्शो प्रेंनीनी? 25 आंइ थुं लुकच लशो बाक्ब। आंइ रां खपीम गोल्लो बाक्ब। 26 बोक्कीन। मिनु आंइ कली वारच पने। इन गेना हना यो दाक्तीकेमी आंइ कली एको श्येत रे प्रोंइकी।

45

पिप आ ग्युंवे कली कुम्सो

कुम्सो पपाइक्ब कली लिली फू डा कुम्सो आ लायो। शेंतीक कुम्सो। कोराह आ तौ आन कुम्सो। ग्युंवे डा कुम्सो।

1 आं थुं रिम्शो लोव्रमी ब्रीतीके गो पिप कली कुम्सो पाइक्नुड। आं लें थाम्पा ब्रेक्स जोक्ब मुर आन कलम खोदेशो दुम्शो बाक्ब।

2 गे वोंइश मुर आन दातेमी नेल्ल क्येडा रिम्शो बाक्नीनी। इन लोव्र यो शुश रिम्शो बाक्ब। मारदे हना परमप्रभुमी इन कली गेना हना यो लीब आसीक गेशो बाक्ब। 3 गे बोल्यो मुर, इन किप्शुर किप्शा इन तरवार पिम्सीन। मिनु इन दारस नु इन मान ततीके कोंइदीन। 4 इन मान ततीकेमी, थमा पतीके, ब्रेम्शो थुं दुम्तीके नु इन ठीक पतीकेमी गाक्शा, इन सक्तिमी छक लाक्चा डा गेय कोंइदीन। 5 गे इन हेरशो ब्रामी इन जोरी सत्रु आन लुडगीरमी देत्नीम। जात जात डा मुर इन डोंइती साइक्चा पुंडसीनीम। 6 परमप्रभु, इन ठेयब नित्तीके गेना हना यो लीब। इन ठीक पतीके इन राज दन्द खोदेशो बाक्ब। हिब्रू १:८-९ हिब्रू १:८,९ 7 गे ठीक पतीके दाक्नीनी। इन अरेशो मटीब आन कली चहिं काइ मदाक्नीनी। मोपतीके परमप्रभु, इन परमप्रभुमी इन वारच नेल्ल आन क्येडा इन कली दाक्शा, इन कली तेल लुकशो खोदेशो पा ग्येरपाइक्नु। 8 इन वा नेल्ल एलोव्र, मूरे नु ब्रोव्रशो रिना पाइशो बाक्नीम। हात्ती आ दारामी दारपाइशो दरवारम बाक्शा, तार पाइशो ताप्तीके ताप्शा इन कली ग्येरपाइक्ब। 9 इन कली मान पाइब आन दातेमी पिप आन तमी यो बाक्नीम। इन ग्युरा गे ओफीर डा सुनम ग्योम्सीशो पिपीम रापब।

10 आं तमी, नोफा दाइशा, नेनो। इ रागी नु इ खिं डा मुर आन कली प्रेंदो। 11 पिपमी इ दारस तशा, इ कली दाक्शो बाक्ब। मेको कली जिम्मा गेंसीशा मान पावो। मारदे हना मेको इ प्रभु बाक्ब। 12 टायर सहर डा मीश आलपुकी कोसेली चाक्शा, जाक्नीम। रागी रागी डा शुश क्येट थीब मुरपुकीम इन शिशी माल्नीम।

13 पिप आ तमी थम दारशो नु सुन के श्येलेम प्रोव्रशो वा फेक्शा, आ बाक्तीकेम बाक्ब। 14 मिनु बुटा आप्शो वा फेक्पाइशा, मेको कली पिप आ बाक्तीके चाक्नीम। मेको आ गेय पाइब मीश आल आ नोले खोइक्पाइशा,

पिप आ बाक्तीकेमी जाक्नीम। 15 मिनु मुरपुकीमी मेको आन कली ग्येरशो कुम्सो पा लां कोंइनीम। मिनु पिप आ खिं ओइनीम।

16 मिनु इन आफ आ पा डा इन तौपुकी दुम्नीम। गे मेको आन कली रागी डा सासन पाइब सेल्नीनी। 17 गो इन नें इन चच युइ आन पाला नेल्ल मिम्पाइक्नुड। मोपतीके जात जात डा मुरपुकीमी इन कली गेना हना यो ठेयब सेल्नीम।

46

परमप्रभु आंइ नेक्था बाक्ब

कुम्सो पपाइक्ब कली अलामोथ कुम्सो आ लायो। कोराह आ तौ आन कुम्सो।

1 परमप्रभु आंइ खुइश्शा बाक्तीके नु आंइ सक्ति बाक्ब। गो श्येत जकानु, गेना हना यो आंइ नेक्था बाक्शा वारच पाइब बाक्ब। 2 मोपतीके गो महिनीकी। रागी नु डांडापुकी हिम्सीशा समुन्द्रम ग्रुम्तेक्म हना यो गो महिनीकी। 3 मिनु समुन्द्र ग्रीशा, बोग्यो पोक्तु हना यो नु बुइश्शा कुशा, डांडापुकी हिम्ताक्व हना यो गो महिनीकी। ठेयब सेंदा पा।

4 मिनु ठेयब खोला का बाक्ब। मेको रे पा ब्राशो आइक्च खोलापुकीमी परमप्रभु आ बाक्तीके सहर कली ग्येरपाइक्नीम। मेको नेल्ल क्येडा ठेयब आ बाक्तीके सहर बाक्त। यसैया १२:५ 5 मिनु परमप्रभु मेको सहरम बाक्ब। मिनु मेको महिम्सीब। परमप्रभुमी मेको सहर कली नां सोत्रम रेन वारच पाइब। 6 मिनु रागी रागी डा मुरपुकी जिशा खेशा पाइनीम। राज्यपुकी क्याम्चा पुंइसीनीम। परमप्रभुमी आ सेंदा नेंपाइक्तु हना, रागी नेल्ल याइनीम।

7 मुर नेल्ल आन परमप्रभु यावे गोपुकी नु बाक्ब। याकूब आ परमप्रभु आंइ बोल्यो दरवार बाक्ब। ठेयब सेंदा पा।

8 परमप्रभु यावे आ ठेयब गेय कोत्रथ जाक्कीन। मेकोमी रागी खतम पोक्शो कोत्रडीन। २राजा १९:३५ 9 मेकोमी नेल्ल क्येडा डोन रागी सम्म डा लडाइ तेक्ब। मेकोमी लिब्रा जिक्शा नु तूतीक नेल्ल टुक्रा टुक्रा सेल्ब। तेक्तीके नेल्ल मीम हुम्ब। भजन संग्रह ७६:४ 10 मेकोमी “सिक्सी पा बाक्कीन। गो परमप्रभु नड, दे तुइक्तीन। गो रागी रागी डा मुर आन दातेमी ठेयब दुम्नुड। गो रागी नेल्लेमी नेल्ल क्येडा ठेयब दुम्नुड” देत।

11 मुर नेल्ल आन परमप्रभु यावे गोपुकी नु बाक्ब। याकूब आ परमप्रभु आंइ बोल्यो दरवार बाक्ब। ठेयब सेंदा पा।

47

परमप्रभु रागी नेल्ल डा पिप बाक्ब

कुम्सो पपाइक्ब कली कोराह आ तौ आन कुम्सो।

1 जात जात डा मुर नेल्लेमी इन गुइ फ़ोक्तीन। गे ग्येरशा, परमप्रभु कली कुम्सो पने। 2 मारदे हना परमप्रभु यावे, नेल्ल क्येडा ठेयब नु हिंचा डा बाक्ब। मेको रागी नेल्ल डा ठेयब पिप बाक्ब। 3 मेकोमी रागी आन कली आंइ के सेल्शा, शुश मुर आन कली आंइ कली हुकुम पचा गेपु। 4 मेकोमी आंइ कली शोंप योत्रशा गेपु। मेको याकूब आ दाक्शो रागी बाक्त। मारदे हना परमप्रभुमी याकूब कली शुश दाक्ताक्व। ठेयब सेंदा पा। ब्यवस्था ३२:९

5 मुरपुकी शुश ग्येरसमानु, परमप्रभु आ नित्तीकेम लाइब। परमप्रभु यावे तुराही ताप्शो नेंशा लाइब। 6 परमप्रभु कली ठेयब सेल्तीक कुम्सो पने। लेंशा ठेयब सेल्तीक कुम्सो पने। आंइ पिप कली ठेयब सेल्तीक कुम्सो पने। लेंशा ठेयब सेल्तीक कुम्सो पने। 7 मारदे हना परमप्रभु रागी नेल्ल डा पिप बाक्ब। मेको कली ठेयब सेल्तीक कुम्सो का पने। भजन संग्रह ९३:१ 8 परमप्रभुमी रागी रागी नेल्ल आन कली सासन पाइब। मिनु परमप्रभु आंम आ ठेयब नित्तीकेमी निप्ब। 9 मिनु जात जात डा सासन पाइबपुकी नु अब्राहाम आ परमप्रभु आ मुर नेल्ल मेकेर ग्रुम्शो बाक्नीम। मारदे हना रागी रागी डा पिपपुकी परमप्रभु आ गुइमी बाक्नीम। मेको थम ठेयब बाक्ब।

48

सियोन आ दारस नु सक्ति

कोराह आ तौ आन कुम्सो।

1 परमप्रभु यावे ठेयब बाक्ब। परमप्रभु आ बाक्तीक सहरम बाक्शा, मान पाइक्चा पुंइसीब बाक्ब। भजन संग्रह ४६:५-६ 2 आ डांडा दारशो नु लाइश्शो बाक्ब। मुर नेल्ले मेको तशा ग्येरसीनीम। सियोन डांडा उत्तर गे बाक्ब। मेको ठेयब पिप आ बाक्तीक सहर बाक्ब। बिलाप २:१५; मत्ती ५:३५ 3 मिनु परमप्रभु मेको सहर डा बोल्यो दरवारम बाक्ब। मेको ठेयब नु सक्ति पाइश्शो बाक्ब, दे नेल्लेम तुइक्नीम। 4 पिप नेल्ले ग्रुम्शा, हुल हुल पा लडाइ पचा कली आ

डोंडती बारतेकम। २राजा १८:१७-१८; मलाकी १:११ 5 मिनु मेकोपुकीमी मेको तशा, छक लाक्शा, हिंशा, प्रोक्तेकमे। 6 मिनु मेक उइ गिक गिक पा खिखि पांतेकम। आल थिची ना डा रोइ पशो मीश मुर खोदेशो दुम्तेकम। 7 गे टारसीस डा जहाज आन कली पूर्व डा फश पतीकेमी खतम सेलतीनी। 8 आंइ डोंडती नेंशो लोत्र, मुर नेल्ल आन परमप्रभु यावे आ सहरम ताइतक। मार ताइतक देशा हना, आंइ परमप्रभुमी आ सहर गेना हना यो लीपाइक्चा कली बोल्यो सेल्लु। ठेयब सेंदा पा। 9 परमप्रभु, गो इन खिंमी बाक्शा, इन गेना हना यो दाक्तीके मिंशा, बाक्नीकी। 10 परमप्रभु इन नें नु इन कली ठेयब सेल्लुके रागी आ सुर सम्म बाक्ब। गे इन सक्तिमी ग्राना ग्रान बाक्नीनी। 11 सियोन डांडा ग्येरसेक्ल। यहूदा डा सहर नेल्ले इन निसाफ पशोमी ग्येरसमल। 12 सियोन आ एर ओंथ हिरशा, मेकेर डा लाइशो खिं हिककीन। 13 मेकेर डा बोल्यो गारोपुकी रिंशो पा कोवडीन। आ बोल्यो दरवार यो रिंशो पा कोवडीन। मिनु नोले गे इन चच युइ आन कली मेको आन पर्बम शेने चाप्नीनी। 14 मारदे हना मेको परमप्रभु, आंइ परमप्रभु बाक्ब। मेकोमी गेना हना यो आंइ कली लां कोइब। यसैया २५:९

49

शुश क्येटीम बेक्चा रे प्रोंइने मचाप्ब

कुम्सो पपाइक्ब कली कोराह आ तौ आन कुम्सो।

1 जात जात डा मुर नेल्ले, नेनीन। 2 ठेयब नु आइक्च, क्येट थीब नु प्रुडग नेल्लेमी नोफा दाइशशा, नेनीन। 3 मिनु गो जोक्शा तुइशशा लोत्र पाइनुड। आं थुंमी मिंशा पशो लोत्रमी मुर आन कली रुप्ब सेल्ब। 4 गो अर्ती डा लोत्र का नेता। गो ठेयब ताप्तीके ताप्शा, आं लोत्र रुप्पाइक्नुड। 5 मिनु श्येत जतीक नाक्ती जाक्मेनु, श्येत गेबपुकीमी आन ठीक मपशोमी आं एर ओंथ रे पुम्दीमीनु, गो मारदे हिंनुडा डा? 6 मेकोपुकीमी आन शुश क्येटीम थमा सुइक्नीमी। आन शुश क्येटीम ठेयब लेत्नीमी। 7 सुइमी आंम लोक्ब कली क्येट थाप्शा, बेक्चा रे प्रोंइने मचाप्ब। मोपा मेकोमी परमप्रभु कली शुश क्येट थाप्शा आ गिंम प्रोंइने मचाप्ब। मीका ६:६-८; मत्ती १६:२६ 8 बेक्चा रे ब्रोंइतीक शुश ठेयब बाक्ब। मेको मुरुम गेनायो ग्याप्ने मचाप्नीम। मत्ती १६:२६ 9 गेना हना यो ब्रोंइशा बाक्ब, सुइ मबाक्नीम। मुर नेल्ले थिंमचा पुंइसीनीम।

10 मिनु नेल्लेमी जोक्ब तुइक्ब मुर, मूर्ख नु मिंतीक मपाइशो नेल्ल बेक्नीम, दे तुइशो बाक्नीम। मिनु आन शुश क्येट नेल्ल अरु आन कली प्रोंइशा लाइनीम। उपदेसक २:१६; उपदेसक ६:२ 11 मिनु आन तुरस गेना हना यो मेको आन खिं दुम्ब। मोदेशो पाला नेल्ल आन कली दुम्ब। मिनु मेकोपुकीमी आन नें आन रू कली वोइशो बाक्तेकम हना यो, मोदेशो दुम्नीम।

12 गिश क्येट थीब बाक्तेकम हना यो, मुरपुकी मलीनीम। मेकोपुकी बेक्शा लाइब जन्तु खोदेशो बाक्नीम। उपदेसक ३:१९ 13 आंम आन मिंशो थमा सुइक्ब नु मेको आन लोत्र नेंशा, ग्येरसीब मेको आन नोले डा मुर यो मोदेशो दुम्नीम। ठेयब सेंदा पा।

14 मेकोपुकी भेडा खोदेशो पा बेक्चा कली बाक्नीम। बेक्पाइक्बमी मेको आन कली दाक्ब। सुनी कना रिंशो थुं पाइशो मुरपुकीमी मेको आन कली हुकुम पाइनीम। मेको आन बाक्तीके रे डोन दुंशा, आन रां तुरसुम राक्शा लाइनीम। 15 तन्न परमप्रभुमी आं कली तुरस रे प्रोंइब। मेकोमी थमा पा आ बाक्तीकेम लाइक्ब। ठेयब सेंदा पा। होसे १३:१४; भजन संग्रह ७३:२४

16 मिनु गे शुश क्येट चेम्शा, आन खिं दारपाइक्ना पाइक्न बाक्ब मुर आन कली तशा, महिनीन। अय्युब २१:७-१५ 17 मारदे हना मेको बेक्मानु, मारेइ मलाइक्नीम। मेको आन मार मार आन नोले खोइशशा, मलाइनीम। उपदेसक ५:१४; १तिमोथी ६:७ 18 मिनु मेको ब्रोंइमा सम्म “गो आसीक ताइब नकी” देंनीम। मुरपुकीमी थीब मुर आन कली ठेयब सेल्लुमी। १तिमोथी ६:७ लूका १२:१६-२१; लूका १६:१९-३१ 19 मो हना यो मेको बेक्शा, आन किकी पिपी आन बाक्तीके लाइनीम। मेकोपुकीमी गेनायो हाम्सो मताइनीम। 20 मुर गिश क्येट थीब बाक्तेकम हना यो, मेको बेक्शा लाइब बस्तु भाव खोदेशो बाक्नीम।

50

परमप्रभु रिंशो निसाफ पाइब
आसाफ आ कुम्सो।

1 ठेयब सक्ति पाइशो, परमप्रभु, परमप्रभु यावेमी लोव्र पाप्तु। नां दाप्तीक रे नां पेरतीक सम्म डा रागी कली लोव्र पाप्तु। १इतिहास २५:१ 2 परमप्रभु सियोन रे आ दारसम ग्योम्सीशा छेडछेड दुम्शा, गूशो बाक्ब। यसैया ६२:१ 3 आंइ परमप्रभु जाक्शा, सिक्सी पा मबाक्ब। मेको आ डोंइती ग्राव गू दाक्ब मी ब्राइब। मिनु आ एर ओंथ नेल्ले कुमीर गिमीर पा फश गिवार पाइब। 4 मेकोमी आ मुर आन कली निसाफ पचा कली सरीड नु रागी डा नेल्ल आन कली ब्रेप्ब। ब्यवस्था ३२:१; यसैया १:२ 5 परमप्रभुमी “आं कली थमा सुइक्ब आन कली खुप्तीन। मेकोपुकीमी मार मार क्योरशा चढ़ेशा, गो नु कबल पाप्तेक्म” देंब। प्रस्थान २४:४-११ 6 मिनु स्वर्गम बाक्बपुकीमी “एको ठीक पाइब बाक्ब। मारदे हना परमप्रभुमी एको मुर आन कली निसाफ पाइब” देंनीम। ठेयब सेंदा पा।

7 मिनु परमप्रभुमी “आं मुरपुकी, नेनीन। गो इन कली लोव्र पाइनुड। गो इस्राएली इन कली दोस गेशा, लोव्र पाइनुड। गो परमप्रभु, इन परमप्रभु नड। प्रस्थान २०:२ 8 इन मार मार चढ़ेशो आ पर्बम गो इन कली दोस मगेनुड। इन चोशा चढ़ेशो गेना हना यो आं डोंइती बाक्नीम। भजन संग्रह ४०:७; १सामुएल १५:२२; यसैया १:११ 9 गो इन खिं डा ब्यफ नु इन गोठ डा बोकापुकी ममाल्नुड। 10 मारदे हना ब्वाकी डा जन्तु नेल्ल नु हजार हजार डांडा डा बी ब्यफ नेल्ल आं केन नम। 11 मिनु गो सरीड डा चिक्ब नेल्ल आन कली तुइक्नुड। मिनु रागी डा सोक्त पाइशो नेल्ल आं केन नम। 12 गो शोव्रलु बाक्शो नड हना यो, इन कली मदेड वा। मारदे हना रागी नु रागीम बाक्शो मारेइ मारेइ आं केन नम। 13 मार, गो ब्यफ आन श्ये ब्वाइनुडा डा? बोका आन हुश तूनुडा डा? 14 गे आं कली ‘गे रिम्शो पाइब बाक्नीनी’ देनीन। मिनु नेल्ल क्येडा ठेयब, आं कली इन कसम जशो खपीन। योना २:१० 15 मिनु श्येत जनी नाक्त आं कली पुनीन। मिनु गो इन कली श्येत रे प्रोंइनन्नी। मिनु आं कली ‘गे ठेयब बाक्नीनी’ देंनीनी” देंत। भजन संग्रह ९१:१५

16 तन्न परमप्रभुमी आ अरेशो मटीब आन कली “आं फुल्लुम मुशा ब्रेक्शो लोव्र मारदे पढेनी? आं कबल आ पर्बम मारदे लोव्र पनी? रोमी २:२१-२३ 17 गे आं शेंशो लोव्र ग्रांरा दीतीनी। मिनु आं लोव्र प्रोंइतीनी। 18 गे खुइ आन कली गुम्नीनु, खुइ आन वारच दुम्तीनी। मिनु गे खुइ नु हेंथे गाक्ब नु गारतीनी। 19 गे मरिम्शो लोव्र पाइब नु जोल पाइब बाक्नीनी। 20 मिनु गे इन लोक्ब आन कली दोस गेशा बाक्नीनी। मिनु कयी का रे जरमेशो इन लोक्ब आन कली शुक्शी पाइनीनी। उत्पत्ती २:२१ 21 गे मेको नेल्ल पाइतीनी हना यो, गो सिक्सी पा बाक्ती। गे आं खोदेशो मिम्साक्नी। तन्न गो इन कली हुइशशा, इन दोस कोइनन्नी। 22 गे परमप्रभु कली प्रेंबपुकी तुइक्तीन। मो मपाइतीनी हना, गो इन कली साइक्नन्नी। मिनु इन कली सुइमी प्रोंइने मचाप्नीम। 23 सु सुमी ‘गे रिम्शो पाइब बाक्नीनी’ देंनीमी, मेकोपुकीमी आं कली ठेयब सेल्नीम। मिनु गो मेको आन कली लां सेल्नुड। गो मेको आन कली आं पाप रे प्रोंइतीके कोइनुडमी” दे परमप्रभुमी देंत।

51

आं पाप क्याम्दीन, दे पुंइशो

कुम्सो पपाइक्ब कली दाऊदमी बाथशेबा नु हेंथे पवा नोले नाथान जाक्मेनु, पशो दाऊद आ कुम्सो। २सामुएल १२:१-१५

1 परमप्रभु इन गेना हना यो दाक्तीकेमी आं कली शिशी पने। इन शुश शिशीमी आं हेंथे पशो क्याम्दीन। लूका १८:१७ 2 परमप्रभु, इन शिशी पतीकेमी आं मरिम्शो पशो नेल्ल मुरशा गेयीनी। मिनु आं कली पाप रे प्रोंइयीनी। 3 मारदे हना गो आं मरिम्शो पशो तुइक्नुड। मिनु आं पाप गेना हना यो मिम्नुड। 4 गो इन डोंइती ला पाप पाता। इन डोंइती इन मदाक्शो पाता। गे आं कली निसाफ पा, ठीक पाइब बाक्नीनी। आं कली निसाफ पा सजाइ गेतीनी, गे मेको आ पर्बम दोस मताइब बाक्नीनी। 5 थमा पा, गो जरमेसी डा रेन मरिम्शो पाइब बाक्ती। आं ममा आ कोव्रजम जोल्डा रेन मरिम्शो पाइब बाक्ती। रोमी ३:४; यूहन्ना ३:६ 6 गे आं पर्बम आंम थुं डा थमा मिम्तीकेम दाक्नीनी। मोपतीके गे आं थुं कली जोक्तीक तुइक्तीक शेंदीने।

7 गे हिस्सोप के ब्राक्सुमी आं पाप क्याम्दीन। मिनु आं पाप क्याम्सीशो बाक्ब। मिनु आं कली चिक्तीनी। मिनु गो फुं क्येडा बुश दुम्नुड। प्रस्थान १२:२२-२३; यसैया १:१८ 8 आं कली ग्येरतीके नु थुं नाइक्तीके लोव्र नेंपाइय्यीनी। मिनु इन फस पोक्शो आं रुश लेंशा ग्येरसमल। भजन संग्रह ३२:३-४ 9 इन कुल आं पाप रे खुइक्तीन। मिनु आं मरिम्शो पशो नेल्ल क्याम्दीन।

10 परमप्रभु, आं थुं क्येख सुन खोदेशो सेलीन। मिनु नक नु ठीक पाइब सोक्त गेयीनी। मत्ती ५:८; इजीकीएल ३६:२६-२७ 11 आं कली इन डोंइती रे मखेरयीनी। इन सोक्त आं रे मलतीन। 12 इन पाप रे प्रोंइतीके आ पर्बम ग्येरशो लेंशा गेयीनी। आं थुं इन देशो खोदेशो सेलीन।

13 मिनु गो मरिम्शो पाइब आन कली इन लां कोंइनुडमी। मिनु पाप पाइबपुकी इन गे लेत्नीम। 14 परमप्रभु, गे आं कली पाप रे प्रोंइब परमप्रभु बाक्नीनी। आं हुश खाक्श पोक्शो पाप रे प्रोंइयीनी। मिनु गो इन प्रोंइतीके आ पबर्म कुम्सो पाइनुड। 15 परमप्रभु आं कली लोव्र पपाइय्यीनी। मिनु गो इन कली ठेयब सेल्लुड। 16 गे मार मार क्योरशा, चढेशोमी मग्येरनीनी। ग्येरसीनी हना, गो क्योरशा चढेड वा। गे चोशा चढेशोम मग्येरसीनीनी। भजन संग्रह ४०:७ 17 परमप्रभु, गे मरिम्शो पशो आ पबर्म जिक्शो थुं नु ब्रेम्शो मुर आन थुं दाक्नीनी। भजन संग्रह ३४:३९

18 इन दाक्शो खोदेशो पा सियोन कली रिम्शो दुम्तीक गेने। यरूसलेम डा गारो लेंशा सेलीने। 19 मिनु नोले मुरपुकीमी ठीक पा चढेनीम। मुरपुकीमी इन कली ग्येरपाइक्चा कली चोशा चढेतीक नेल्ल चढेनीम। मिनु इन कली ब्यफ चढेनीम।

52

परमप्रभु आ शिशी नु निसाफ

कुम्सो पपाइक्ब कली। शेंतीक कुम्सो एदोमी दोएगमी सावल कली “दाऊद अहीमेलेक आ बाक्तीकेम खुंडसाक्व” देंचा नोले डा दाऊद आ कुम्सो। १सामुएल २२:९-१९

1 गे थम बोल्यो मुर, मारदे मरिम्शो पचा आ पबर्म बोरनीनी? परमप्रभु आ शिशी नाक्त रे लीब। 2 गे नाक्त रे खतम सेल्चा आ पबर्म मिम्नीनी? इन शोव्र शेषो करद खोदेशो बाक्ब। गे जोल पाइब ला बाक्नीनी। 3 गे रिम्शो पचा क्येडा मरिम्शो पचा ला दाक्नीनी। थमा लोव्र पचा क्येडा जोल पचा ला दाक्नीनी। ठेयब सेंदा पा। 4 गे जोल पाइब मुर, मारेइ मारेइ खतम सेल्लतीक लोव्र ला दाक्नीनी।

5 परमप्रभुमी थमा पा इन कली गेना हना यो कली खतम सेल्ब। मेकोमी इन कली इन बाक्तीके रे कीशा, गुंडब। मिनु मेकोमी इन कली ब्रोंइशा बाक्तीक रागी रे इन शाक्श सुन्दा उइशशा, ताइक्ब। ठेयब सेंदा पा। 6 ठीक पाइबपुकी मेको आन कली तशा, हिंनीम। मिनु मेकोपुकीमी रिशशा कोव्रशा भजन संग्रह ९१:८ 7 एको मुर कली कोव्रडीन। एकोमी परमप्रभु कली जिम्मा मगेंसे। आ शुश शोंपोम “गो मारेइ मारेइ पने चाप्नुड देंशा, अरु आन कली खतम पोक्शा, बोल्यो दुम्त” दे रिशशा, कोव्रनीम।

8 तन्न गो परमप्रभु आ खिंमी गिग तेल रवा खोदेशो बाक्नुड। गो आं कली गेना हना यो दाक्ब परमप्रभु कली थमा सुइक्नुड। भजन संग्रह ९२:१३-१६ 9 गो “इन पशो आ पबर्म गेना हना यो इन कली ठेयब सेल्लुड। गो इन नें ‘पाप रे प्रोंइब बाक्ब’ दे आस पाइनुड। मारदे हना इन नें रिम्शो बाक्ब। गो इन कली थमा सुइक्ब आन दातेमी ठेयब सेल्लुड” देंती।

53

मुर आन मरिम्शो पशो

कुम्सो पपाइक्ब कली महलाथ नें पाइशो कुम्सो आ लायो। दाऊद आ शेंतीक कुम्सो। भजन संग्रह १४:-

1 मूर्खपुकीमी आन थुंमी “परमप्रभु मबाक्ब” देंनीम। मेकोपुकी काइ मरिम्शो दुम्शा ग्रांग्रा दिचा डा गेय पाइनीम। रिम्शो पाइब का यो मबाक्नीम।

2 मिनु परमप्रभुमी स्वर्ग रे मुर आन कली कोव्रब। मारदे कोव्रब देंशा हना, आ कली माल्ब, रुप्व मुर का बाक्म कों, दे कोव्रब। 3 मुर नेल्ले हेंथे लां खोइशो बाक्नीम। मेको नेल्ले दूली पाइब बाक्नीम। रिम्शो पाइब का यो मबाक्नीम। 4 मार, मरिम्शो पाइबपुकी मारेइ मशेंसीनीमी? मेकोपुकीमी शोब्ले जशो खोदेशो पा आं मुर आन कली नेक्नीम। मेकोपुकीमी परमप्रभु कली काइ मपुंडनीम। 5 मिनु नोले मेकोपुकी थाम्पा हिंनीम। डोंइती मोपा हिंतीके मबा। मारदे हना परमप्रभुमी थमा मसुइक्ब आन रुश फ्राइब। मिनु मेकोपुकी मुने दोक्नीम। मारदे हना परमप्रभुमी मेको आन कली तिल्शो बाक्ब। 6 इस्राएल कली श्येत रे प्रोंइब सियोन रे जाक्शो हना, गिश रिम्शो दुम वा। परमप्रभुमी आ मुर आन कली थुं नाइशशा, रिम्शो पा बाक्तीक लेंशा गेप्तु हना, याकूब आ मुर कुम्सो पाइनीम। मिनु इस्राएल डा मुर ग्येरसीनीम।

54

“जोरी सत्रु रे प्रोनीन” दे पुंडशो

कुम्सो पपाइक्ब कली तार पाइशो ताप्तीके ताप्शा, शेंतीक कुम्सो। जीफ डा मुरपुकीमी सावल कली “दाऊद आंइ दातेमी खुंडसीब” देंशो ना डा दाऊद आ कुम्सो। १सामुएल २३:१९; १सामुएल २६:१

1 परमप्रभु, इन नेमी आं कली प्रोइयीनी। इन ठेयब सक्तिमी आं कली दोस मताइब बाक्ब, दे कोइदीन। 2 परमप्रभु, आं लोव्र नेनीन, आं पुंइशो लोव्र नेनीने।

3 मरिम्शो पाइबपुकी आं गे बारतेक्म। हुश खाक्श पोक्बपुकीमी साइक्चा माल्तीमी। मेकोपुकी परमप्रभु कली ममिम्थु, महिनीम। ठेयब सेंदा पा।

4 परमप्रभु थमा पा आं कली वारच पाइब बाक्ब। मेको आं कली ब्रोंइचा गेब बाक्ब। 5 सु सुम आं कली मरिम्शो पाइनीमी, मेको आन कली मरिम्शो दुम्ल। इन दाक्शा मप्रोंइतीकेमी मेको आन कली खतम पोक्कीन।

6 परमप्रभु, गो इन कली आं दाक्तीके चढेनुड। परमप्रभु यावे, गो इन कली “गे रिम्शो पाइब बाक्नीनी” दे इन नें ठेयब सेल्लुड। मारदे हना परमप्रभु यावे रिम्शो पाइब बाक्ब। 7 गे आं श्येत नेल्ल रे प्रोंइतीनी। मिनु गो आं जोरी सत्रु आन कली ग्राती।

55

“आ वारचम प्रोनानु” पुंइशो

कुम्सो पपाइक्ब कली तार पाइशो ताप्तीके ताप्शा शेंतीक। दाऊद आ कुम्सो।

1 परमप्रभु, आं लोव्र नेनीन। आं डोंइती रे इन कुल मखुइक्तीन। 2 आं पुंइशो नेंशा, लोव्र लेत्तीनी। गो श्येत जशा, आं थुं ग्येत्थ लुक्च दुम्शा, मारदे रोंका पा गाक्ती देंशा हना, 3 गो आं जोरी सत्रु आन लोव्र नेंशा, इन अरेशो मटीबपुकीम श्येत गेतीके रोंका पा गाक्ती। मारदे हना मेकोपुकी गाइशशा आं जोरी सत्रु दुम्शा, श्येत गेतीमी।

4 आं थुं ग्येत्थ लुक्च पशो बाक्ब। आं कली बेक्चा डा हिंतीकेमी सुम्ती। 5 गो हिंशा खिंखि पाता। गो साप्पा हिंनुड। 6 गो आं के “ढुकुर खोदेशो पा फ्रां बाक्शो हना, बेरशा लशा, नांइसीड वा” देंती। 7 गो थमा पा बेरशा डोन लशा, गोरशो रागीम बाक्ड वा। ठेयब सेंदा पा। 8 गो फश गिवार रे प्रोक्शा, रीब पा फाम्सीड वा।

9 परमप्रभु, मरिम्शो पाइब आन मिम्शो खतम पा गेने। मेको आन लोव्र खाल्शा गेने। मारदे हना गो सहरमी हुश खाक्श पोक्शो नु जिशो खेशो ला ताता। 10 मेकोपुकी नाक्दो नाक्ती सहर डा गारो डोइशशा एर ओंथ हिरशो बाक्नीम। मेको सहरम मरिम्शो पतीके नु श्येत ला बाक्ब। 11 मेको सहरम मारेइ मारेइ खतम पोक्ब बाक्ब। मुर आन कली दिप्तीके नु जोल पतीके सहर प्रोंइशा मलाइनीम।

12 आं कली काइ मदाक्बमी शुक्शी पाइय्यी हना, गो फाल्ने चबु वा। जोरी सत्रुमी आं कली लडाइ तोशो नम हना, गो मेको आन क्येडा प्रोक्शा खुंइसीड वा। भजन संग्रह ४१:१० 13 तन्न गे आ खोदेशो मुर बाक्ते। गो नु बाक्ब आं वारच बाक्नेवे। 14 डोंइती गो गे नु ग्येरशा बाक्शो बाक्ती। गो मुरपुकी नु परमप्रभु आ खिम काथा गाक्शो नय।

15 बेक्पाइक्बमी आं जोरी सत्रु आन कली आन मतुइक्चा डा पा जाक्शा दाक्गल। मेकोपुकी सेलीन बेक्शो मुर आन बाक्तीके लमल। मारदे हना मेको आन दातेमी मरिम्शो पतीके बाक्ब। गन्ती १६:३१-३३ 16 तन्न गो परमप्रभु कली पुंइनुड। मिनु मेकोमी आं कली प्रोंइब। 17 गो सुनी, नाक्दो, नाक्ती श्येत जडानु, परमप्रभु कली आं श्येत आ पबर्म पुंइनुड। मिनु मेकोमी आं लोव्र नेंब। 18 मेकोमी आं कली लडाइ रे मारेइ दुम्पाइक्थु, प्रोंइब। शुश मुरुमी आं कली मदाक्ताक्कीमी हना यो, प्रोंइब। 19 परमप्रभु गेना हना यो ठेयब नित्तीकेमी निशशो बाक्ब। मेकोमी मेको आन लोव्र नेंशा, श्येत गेब। ठेयब सेंदा पा। मारदे हना मेकोपुकीमी आन लां गेनायो ठीक मसेल्लनीम। परमप्रभु कली मान पा महिनीम। 20 आं वारचमी आं कली जोल पा श्येत गेती। मेकोमी आ कबल प्रोंइतु। 21 मिनु मेकोमी मिलो शिलो लोव्र पाप्तु। तन्न मेको आ थुंमी जिचा खेचा ला बाक्ब। मेको आ लोव्र तेल खेक्शो खोदेशो बाक्ब। तन्न आ आगाम शोइशशा तरवार बाक्ब। येरमीया ९:७

22 इन थुं डा श्येत नु मार पचा दो पचा देंतीके परमप्रभु यावे आ डोंइती वोतीन। मिनु मेकोमी इन कली कुक्ब। मेकोमी ठीक पाइब आन कली गेनायो हिम्सीचा मगेब। १पत्रुस ५:७ 23 तन्न परमप्रभु, गे मरिम्शो पाइब आन कली खतम दुम्तीकेमी ताइक्नीनी। हुश खाक्श पोक्ब नु जोल पाइब आन ब्रोंइतीक नाक्त उइक्थ यो मब्रोंइनीम। तन्न गो इन कली थमा सुइशशा बाक्नुड। भजन संग्रह १०२:२५

56

थमा सुइक्ब थुं महिंब थुं बाक्ब

कुम्सो पपाइक्ब कली डोन डा रवाम बाक्शो ढुकुर आ कुम्सो आ लायो। पलिस्तीपुकीमी गाथ सहरम दाऊद कली ग्याइक्ची ना डा दाऊद आ कुम्सो। १सामुएल २१:१०-१५

1 परमप्रभु आं कली शिशी पाइय्यीनी। मारदे हना मुरपुकीमी आं कली शुश खेदा पाइनीमी। नाक्त रे आं कली दिप्शो बाक्नीम। 2 नेल्ल क्येडा ठेयब, नाक्त रे आं कली दिप्बपुकीमी आं कली श्येत गेनीमी। आं कली खेदा पाइब शुश बाक्नीम। 3 गो हिंडानु, इन कली थमा सुइक्नुड। 4 मिनु गो परमप्रभु आ लोत्र ठेयब सेल्लुड। मेकोमी प्रोंइब, दे थमा सुइश्शा, महिंथु बाक्नुड। मुरपुकीमी आं कली मार पाइक्ने चाप्नीमी डा? भजन संग्रह २७:१; भजन संग्रह ११८:६; यसैया १२:२; यसैया ५१:१२; मत्ती १०:२८

5 नाक्त रे मेकोपुकीमी आं लोत्र दूली सेल्ला लोत्र पाइनीम। मेको आन मिम्शो नेल्ले आं कली श्येत गेचा कली ला बाक्ब। 6 मिनु मेकोपुकीमी आं कली क्यारी पा बाप्शा साइक्चा माल्नीम।

7 परमप्रभु, मेको आन कली काइ प्रोक्चा मगेन। इन गाइक्चामी मेको मुर आन कली खतम पोक्कीन। 8 आं रोंका पशो मिम्तीन। आं प्रेक्कु इन ग्योबुम कुर पा वोतीन। मार, मेको इन लोत्र ब्रेक्शो किताबम ब्रेक्शो मबाक्बा डा?

9 मिनु गो इन कली “वारच पाइय्यीनी” दे पुनु, आं जोरी सत्रु लेशशा प्रोक्नीम। मिनु परमप्रभुमी आं कली दाक्ब, दे तुइक्नुड। 10 गो परमप्रभु आ लोत्र ठेयब सेल्लुड। गो परमप्रभु यावे आ लोत्र आ पर्बम ग्येशशा लोत्र पाइनुड। 11 गो “परमप्रभुमी श्येत रे प्रोंइब” दे थमा सुइश्शा, महिंथु बाक्नुड। मुरपुकीमी आं कली मार पाइक्ने चाप्नीमी डा?

12 परमप्रभु, गो गे नु कसम जशो, खाप्चा माल्लुड। गो इन कली “गे रिम्शो पाइब बाक्नीनी” दे चढेतीके चढेनुड। 13 मारदे हना गे आं कली बेक्चा रे प्रोंइतीनी। मिनु आं कली गोल्ला रे प्रोंइतीनी। परमप्रभु, गो ब्रोंइशो आन छेडछेडम गाक्चा तडल। अय्युब ३३:३०

57

श्येत रे प्रोंइब, दे पुंडतीक

कुम्सो पपाइक्ब कली खतम मसेलो देशो कुम्सो आ लायो। दाऊद सावल रे प्रोक्मेनु, पुक्खीम बाक्शा, पशो कुम्सो। १सामुएल २२:१

1 परमप्रभु शिशी पने। आं कली शिशी पाइय्यीनी। मारदे हना आं थुं गे नु खुंडसीब। एको खतम पोक्ब फश गिवार मनुम्म सम्म गो इन फ्रां आगामी खुंडसीशा बाक्नुड। भजन संग्रह १७:८; भजन संग्रह ९१:१-२

2 गो नेल्ल क्येडा ठेयब, परमप्रभु कली ब्रेल्लुड। परमप्रभुमी आं पर्बम आ मिम्शो खाप्ब। 3 मेकोमी स्वर्ग रे वारच पाइब सोइश्शा, आं कली प्रोंइब। मिनु आं कली खेदा पाइब आन कली हुइक्ब। ठेयब सेंदा पा। परमप्रभुमी आं कली गेना हना यो दाक्ब। आ दाक्शा मप्रोंइतीकेमी आं कली कोत्रब।

4 गो गुप्स आन दातेमी बाक्शो बाक्नुड। गो मुर ब्वाइब जन्तु आन दातेमी गोल्लो बाक्नुड। मेको मुर आन खुइ तूतीक नु ब्रा खोदेशो बाक्नीम। मेको आन लें हेश्शो तरवार खोदेशो बाक्ब।

5 परमप्रभु, गे सरीड क्येडा ठेयब बाक्नीनी। मिनु रागी इन सक्तिम प्रिंदीन। 6 मेकोपुकीमी आं खोइली रेप्पाइक्चा कली ब्वारद दाइक्ताक्म। गो श्येत जशा गुर ब्वेशो बाक्नुड। मेकोपुकीमी आं लाम खाल्ला दोम्तेक्म। तन्न मेकोपुकी मेकेर आंमा बिक्तेक्म। ठेयब सेंदा पा।

7 परमप्रभु, आं थुं ग्येत्थ लुक्च मपथु बाक्ब। गो ताप्तीक ताप्शा कुम्सो पाइनुड। भजन संग्रह १०८:२-६ 8 आं थुं सेंशा बोक्को। ताप्तीकपुकी ठीक पा बाक्कीन। मारदे हना गो नां सोत्रचा क्येडा डोंइती कुम्सो पाइनुड।

9 परमप्रभु, गो जात जात डा मुर आन दातेमी इन कली ठेयब सेल्लुड। गो रागी रागी आन दातेमी इन पर्बम कुम्सो पाइनुड। 10 मारदे हना इन गेना हना यो दाक्तीके सरीड सम्म जाक्दीश्शो ठेयब बाक्ब। मिनु इन दाक्शा मप्रोंइतीके गोस्स सम्म जाक्दीश्शो ठेयब बाक्ब। 11 परमप्रभु, गे सरीड क्येडा ठेयब बाक्नीनी। मिनु रागी इन सक्तिम प्रिंदीन।

58

मरिम्शो पाइब कली सजाइ

कुम्सो पपाइक्ब कली कुम्सो आ लायो, खतम मसेलो देशो दाऊद आ सेल्लो कुम्सो। भजन संग्रह ८२:२-४

1 गे निसाफ पाइबपुकी, ठीक लोत्र पाइनीनी? गे मुर आन कली ठीक निसाफ पाइब बाक्नीनी? 2 ममाइ, गे इन थुंमी ठीक ममिन्नीनी। मिनु गे रागीम हुश ख्राक्श पोक्नीनी। 3 परमप्रभु आ अरेशो मटीबपुकी जरमेसमा रेन मरिम्शो पाइनीम। कोत्रज रेन मरिम्शो पाइब दुम्शो बाक्नीम। मिनु जोल पाइनीम। 4 मेको आन बीस बुस्स आन बीस खोदेशो बाक्ब। मेको थम ठेयब बुस्स आन नोफा सुशो खोदेशो बाक्नीम। 5 मिनु मन्तर तन्तर पाइब नु नु टुना मुना पाइब आन लोत्र मनेनीम।

6 परमप्रभु, मेको आन खुइ जिक्तीन। परमप्रभु यावे, गुप्स आन खुइ तुल्दीन। 7 मेकोपुकी शाइशो ब्वाक्कु खोदेशो पा जाम्शा, लमल। मेकोपुकीमी लिब्राम ब्रा आप्मेनु, मेको आन ब्रा हेंथे लमल। 8 मेकोपुकी गाक्ना गाक्न यशा, दे खोदेशो दुम्मल। मेकोपुकीमी शाम्शो आलपुकीम खोदेशो पा नां मतामेक्ल।

9 इन ग्योबपुकी सोत्रशो चूमी ब्रशो मीम होचा क्येडा डोंडती, मरिम्शो पाइबपुकी जाम्शा लाइनीम। 10 मिनु ठीक पाइबपुकी मरिम्शो पाइब आन कली क्येक्क लेशो तशा, ग्येरसीनीम। मिनु मेको आन हुशेम गाक्नीम। 11 मिनु मुरपुकीमी “ठीक पाइबपुकीमी थमा पा इनाम ताइनीम। थमा पा, परमप्रभु रागीम निसाफ पाइब बाक्ब” देंनीम।

59

“जोरी सत्रु रे प्रोनीन” दे पुंइशो

कुम्सो पपाइक्ब कली खतम मसेलो देंशो कुम्सो आ लायो। दाऊद आ कुम्सो। सावलमी दाऊद आ खिंम बाक्म कों, मेको कली साइक्चा, दे क्यारी पथ सोइशो बाक्त। १सामुएल १९:११

1 आं परमप्रभु, आं जोरी सत्रु रे प्रोंइयीनी। आं कली मरिम्शो पाइब आन क्येडा प्रोंइयीनी। 2 आं कली मरिम्शो पाइब नु हुश ख्राक्श पोक्ब आन रे प्रोंइयीनी। 3 कोत्रडीन, मेकोपुकीमी आं कली साइक्चा कली बाप्शा बाक्शो बाक्नीम। परमप्रभु यावे, गो मारेइ मरिम्शो मपथु, मेको मुर साइक्बपुकीमी आं कली जिचा तोशो बाक्नीम। 4 गो मारेइ मरिम्शो मपथु, मेकोपुकीमी आं कली साइक्चा चिक्शो बाक्नीम। आं श्येत जशो कोत्रडीन। मिनु वारच पाइक्चा कली बोक्कीन। 5 परमप्रभु यावे, मुर नेल्ल आन परमप्रभु, इस्राएल आ परमप्रभु, रागी रागी आन कली सजाइ गेचा कली बोक्कीन। इन कली प्रोंइशा, मरिम्शो पाइब आन कली काइ शिशी मपने। ठेयब सेंदा पा।

6 नाक्दो कुस कुस मेकोपुकी सहर आ एर ओंथ कुचुम खोदेशो पा डरर डरर पा हिरसीनीम। 7 मेकोपुकीमी आन शोत्र रे मार गुंइबाक्मा? मेकोपुकीमी साइक्चा डा लोत्र पाइनीम। मिनु मेकोपुकीमी “सुम नेंबा डा” देंनीम। 8 तन्न परमप्रभु यावे, गे मेको आन पर्बम रिक्तीनी। गे रागी रागी नेल्ल आन पर्बम रिक्तीनी।

9 गे आं सक्ति बाक्नीनी। गो इन कली ठेयब सेल्शा कुम्सो पाइनुड। परमप्रभु, गे आं बोल्यो दरवार बाक्नीनी। भजन संग्रह ९:१०-११ 10 परमप्रभुम आं कली गेना हना यो दाक्तीकेम गुम्ब। मिनु मेकोमी आं कली आं जोरी सत्रु आन कली ग्रापाइक्ब। 11 मेको आन कली मसतीन। मो पाइतीनी हना, आं मुरपुकीमी प्रेंनीमी। परमप्रभु, गे आंइ तेक्तीक बाक्नीनी। गे मेको आन कली इन सक्तिमी एर ओंथ ब्रपाइशशा, आइक्च सेलीन। 12 मेको आन पशो लोत्रमी, आन ठेयब लेशो कोंइनीमी। गे गाइशशा मेको आन सराप पतीके नु जोल पतीके खतम पोक्कीन। 13 मेको आन कली इन गाइक्तीकेमी सतीन। गे मेको आन कली रागी रे क्याम्ताक्नी हना, मुर नेल्लेमी परमप्रभुमी याक्ब कली सासन पाइब, दे तुइक्नीम। ठेयब सेंदा पा।

14 नाक्दो कुस कुस मेकोपुकी सहर आ एर ओंथ कुचुम खोदेशो पा डरर डरर पा हिरसीनीम। 15 मेकोपुकी जचा थोत्रक माल्थ गाक्नीम। मिनु मरूतेक्म हना, ग्रीनीम। 16 तन्न गो चहिं इन सक्ति आ पर्बम कुम्सो पाइनुड। सुनी कना गो इन गेना हना यो दाक्शो आ पर्बम कुम्सो पाइनुड। मारदे हना गे आं ब्रोंइशा बाक्तीक बोल्यो दरवार बाक्नीनी। मिनु श्येत जडानु, आं खुइक्तीक बाक्नीनी। 17 गे, आं सक्ति बाक्नीनी, गो इन कली ठेयब सेल्तीक कुम्सो पाइनुड। गे आं बोल्यो दरवार नु आं कली गेना हना यो दाक्ब परमप्रभु बाक्नीनी।

60

लडाइ ब्रुशा पुंइशो

कुम्सो पपाइक्ब कली कबल डा फू आ लायो। दाऊद आ सेल्शो शेंतीक कुम्सो। मेकोमी अराम-नहाराइन नु अराम-सोबाह नु लडाइ पवानु, योआब लेशशा, १२ हजार एदोमी कली हिक्सी दिंमम साइक्तु। २सामुएल ८:३,१३; २सामुएल १०:१३,१८

1 परमप्रभु, गे आंइ कली वारच पाइक्चा प्रोंइशो बाक्तीनी। गे आंइ लडाइ पतीके कली प्रोंइशो बाक्तीनी। गे आंइ पर्बम थाम्पा गाइक्ताक्नी। मुल आंइ कली डोंइती डा खोदेशो पा रिम्शो सेलीन। 2 गे खिनु कुपाइक्तीनी। मिनु रागी कली चेततीनी। मेको जेशो लेंशा सेलीन। मारदे हना हिम्सीन सीन बाक्ब। 3 परमप्रभु, गे इन मुर आन कली ठेयब श्येत जपाइक्तीनी। गे आंइ कली दिड दाड गोल्ब तूचा थोवक तूपाइक्तीनी। भजन संग्रह ७५:९

4 मिनु इन क्येडा मान पा हिंब आन कली प्रोक्तीक लां कोंइचा कली चिन्ड का वोइक्तीनी। मेकेर लमानु, ब्राम मख्राइनीम। ठेयब सेंदा पा। प्रस्थान १७:१५

5 इन सक्तिमी आंइ कली प्रोनीन। मिनु इन दाक्शो मुरपुकी ब्रोंइचा तामेक्ल। भजन संग्रह १०८:७-१४ 6 परमप्रभुमी आ बाक्तीक रे “ग्येरपाइक्तीकेमी, गो शेकेम कली योक्नुड। सुक्कोथ डा दिंम पुक्नुड। 7 गिलाद नु मनस्से आं के बाक्नीस। एफ्राइम आं पियाम गुप्तीक बाक्ब। यहूदा आं राज दन्ड बाक्ब। उत्पत्ती ४९:१० 8 मोआब आं चिक्तीके बोस बाक्ब। गो एदोम तार आं जुता ब्वारनुड। गो पलिस्ती आन कली ग्रानुड।

9 सुम आं कली गारो हिरशो सहर सम्म चाक्दीप्बा? सुम आं कली लां कोंइशा, एदोम सम्म चाक्दीप्बा?” देंत। 10 परमप्रभु, गे आंइ क्येडा डोन मलनी? गे आंइ कली प्रोंइतीनी। गे आंइ लडाइ पाइबपुकी नु मलाइनीनी।

11 मिनु आंइ जोरी सत्रु क्येडा ग्राचा कली आंइ कली वारच पने। मारदे हना मुर आन वारच पशो शोर गाक्शो बाक्ब। 12 गो परमप्रभु आ वारच पाइशोमी ग्राणीकी। मिनु मेकोमी आंइ जोरी सत्रु आन कली दिम्ब।

61

परमप्रभुमी वारच पशो

कुम्सो पपाइक्ब कली तार पाइशो ताप्तीके ताप्शा पतीक, दाऊद आ कुम्सो।

1 परमप्रभु, आं ब्रेशो नेनीन। आं पुंइशो लोव्र नेनीन। 2 गो डोन रागी रे इन कली ब्रेत्नुड। आं थुं ग्येतथ लुक्च दुम्मेनु, ब्रेत्नुड। आं कली लाइशो सेरथे फुल्लु तार लाइय्यीनी। 3 मारदे हना गे आं खुइक्तीके बाक्नीनी। गे डोंइती रे आं जोरी सत्रुमी मथित्तीके बोल्यो लाइशो खिं बाक्नीनी। भजन संग्रह ७१:३; हितोपदेस १८:१०

4 गे आं कली इन ताम्बुमी गेना हना यो बाक्चा गेने। मिनु इन फ्रां आगाम खुंइसीनुड। ठेयब सेंदा पा। भजन संग्रह १७:८ 5 परमप्रभु, गे आं कसम जशो नेतीनी। गे इन नें कली मान पा हिंब आन कली गेशो खोदेशो पा, आं कली यो गेतीनी।

6 पिप कली शुश ब्रोंइतीक नाक्त गेने। शुश पाला सम्म आ ब्रोंइतीक नाक्त बारपतीन। भजन संग्रह २१:५ 7 मेको परमप्रभु आ डोंइती गेना हना यो आ नित्तीकम बाक्चा तवल। इन गेना हना यो दाक्तीके नु इन दाक्शा मप्रोंइतीकेमी मेको कली खाल पपतीन। २सामुएल ७:१६

8 मेना गो इन नें गेना हना यो ठेयब सेल्टीक कुम्सो पाइनुड। मिनु नाक्त कित कित गो आं कसम जशो खाप्नुड।

62

परमप्रभुमी प्रोंइब, देशो

कुम्सो पपाइक्ब येदुथून कली दाऊद आ कुम्सो।

1 आं थुंम सिक्सी पा परमप्रभु कली रिम्ब। मेकोमी आं कली प्रोंइब। यसैया ३०:१५ 2 मेको ला आं सेरथे फुल्लु नु आं कली वारच पाइब बाक्ब। मेको आं बोल्यो दरवार बाक्ब। गो गेनायो महिम्सीनुड। भजन संग्रह १८:३

3 गे नेल्लेमी मुर का कली गेना सम्म बाप्शा साइक्चा माल्नीनी? गे गोल्चा चिक्शो गारो नु ब्रेत्चा चिक्शो थरपु खोदेशो मुर कली खोल्नीनी? 4 मेकोपुकीमी ठेयब मुर कली साइक्चा माल्शो बाक्नीम। मेकोपुकी जोल पतीकेमी ग्येरसीनीम। मिनु शोव्रम आसीक गेखु पाइनीम। तन्न आन थुंमी चहिं सराप पाइनीम। ठेयब सेंदा पा।

5 आं थुंम सिक्सी पा परमप्रभु कली ला रिम्ब। मारदे हना गो मेको कली आस पाइनुड। 6 मेको ला आं सेरथे फुल्लु नु आं कली वारच पाइब बाक्ब। मेको आं बोल्यो दरवार बाक्ब। गो महिम्सीनुड। 7 आं कली श्येत रे प्रोंइतीके नु मान ततीके परमप्रभु रे जाक्ब। परमप्रभु आं खुइक्तीक सेरथे फुल्लु नु आं बोल्यो दरवार बाक्ब। 8 मुर नेल्ले, गेना हना यो परमप्रभु कली थमा सुतीन। मेको आ डोंइती इन थुं डा लोव्र देनीन। मारदे हना परमप्रभु इं खुइक्तीके बाक्ब। ठेयब सेंदा पा।

9 महिक्सीशो मुरपुकी फश ला बाक्नीम। हिक्सीशो मुर आन ठेयब दुम्तीके जोल ला बाक्ब। मेकोपुकी नाक्सीमानु, मारेइ मबाक्नीम। हिक्सीशो नु महिक्सीशो मुर नेल्ल मुठी का सोक्त डा ला बाक्नीम। 10 मुर आन कली दिप्शा “रिम्शो दुम्नुड” दे ममिम्तीन। खुइ पशो मार मार तशा, ठेयब मलेतीन। इन शोंप शुश दुम्त हना यो, मेको कली थमा मसुतीन। मत्ती १९:२२; लूका १२:१५-२१; १तिमोथी ६:९,१७

11 परमप्रभुमी लोव्र पाप्तु। गो लोव्र निक्शी नेता “परमप्रभु के सक्ति बाक्ब। 12 परमप्रभु यावे गेना हना यो दाक्ब बाक्ब” देशो नेता। गे थमा पा मुर नेल्ल आन कली आन पशो खोदेशो पा गेनीनी। रोमी २:६-११

63

परमप्रभु नु बाक्चा दाक्शो

यहूदा आ गोरशो रागीम बाक्शो ना डा दाऊद आ कुम्सो। १सामुएल २२:५

1 परमप्रभु, गे आं परमप्रभु बाक्नीनी। गो इन कली थमा पा माल्नुड। गो ब्वाक्कु तूतू दाक्शो खोदेशो पा आं थुंमी इन कली माल्नुड। गो ब्वाक्कु मबाक्शो रागीम ब्वाक्कु माल्शो खोदेशो पा इन कली माल्स डा माल्स बाक्नुड। भजन संग्रह ४२:३

2 गो इन कली इन बाक्तीकेमी ताता। मिनु इन सक्ति नु छेडछेड ताता। 3 आं ब्रोंइतीके क्येडा इन गेना हना यो दाक्तीके ठेयब बाक्ब। मोपतीके गो इन कली ठेयब सेल्लुड। 4 गो मबेक्डा सम्म इन कली ठेयब सेल्लुड। मिनु गो आं गुइ पोक्शा, इन कली प्रार्थना पाइनुड। 5 ब्रोंव्रशो जशो खोदेशो पा इन कली मिम्शा ग्येरनुड। गो कुम्सो पा इन कली ठेयब सेल्लुड। 6 गो आं ब्राख्येम बाक्डानु, इन कली मिम्नुड। मिनु नाक्दो यो इन कली मिम्शा बाक्नुड। येरमीया २६:९ 7 मारदे हना गे आं कली वारच पाइब बाक्नीनी। मोपतीके गो इन प्रोंइतीके तुइश्शा, कुम्सो पाइनुड। भजन संग्रह १७:८ 8 आं थुं गे नु बाक्ब। गे आं कली कोव्रब बाक्नीनी।

9 तन्न आं कली साइक्चा माल्बपुकी खतम दुम्शा, खप आगा ओव्रनीम। 10 मेकोपुकी तरवारम साइक्चा पुंइसीनीम। मिनु सिवारम मेको आन कली ब्वाइनीम।

11 तन्न पिप चहिं परमप्रभु नु थुं नाइश्शा ग्येरशा बाक्ब। परमप्रभु आ नेम कसम जाइबपुकीमी मेको कली ठेयब सेल्लनीम। तन्न जोल पाइबपुकी ब्वाक्चा मताइनीम।

64

परमप्रभुमी निसाफ पवल

कुम्सो पपाइक्ब कली दाऊद आ कुम्सो।

1 परमप्रभु, आं कली श्येत गेशो आ पर्वम इन कली शेंदुनु, आं लोव्र नेनीन। आं कली आं जोरी सत्रु आन क्येडा प्रोंइथीनी। 2 इन अरेशो मटीब आन क्येडा खुइक्तीनी। मरिम्शो पाइब आन खुइश्शा मिम्शो रे खुइक्तीनी।

3 मेकोपुकीमी तरवार खोदेशो पा आन लें हेप्पाइक्नीम। मेको आन लोव्रमी साइक्ब ब्रा खोदेशो पा आप्नीम। 4 मेकोपुकीमी बाप्शा, दोस मपाइश्शो मुर आन कली आप्नीम। मेकोपुकीमी मेको आन कली महिंथु ब्रा बु आप्नीम।

5 मिनु मेकोपुकीमी आन मरिम्शो पशो आ पर्वम आंमा आंमा ठीक पाइतीनी, देंमुइनीम। खुइश्शा ब्वारद दाइक्तीक आ पर्वम लोव्र पाइनीम। मेकोपुकीमी “इं कली सुम ताइबा डा” देंनीम। भजन संग्रह ९४:७ 6 मेकोपुकीमी मरिम्शो पतीक आ पर्वम गारशा “गो शुश मिम्शा, गेय पाइतय” देंनीम। थमा पा मुर आन मिम्तीके नु थुं मरिम्शो बाक्ब।

7 तन्न परमप्रभुमी मेको आन कली ब्रा आप्ब। मिनु मेको आन मतुइक्थु गोल्लनीम। 8 परमप्रभुमी मेको आन कली आन लोव्र आ पर्वम खतम सेल्लब। मेको आन कली साइक्ब। मिनु मेको आन कली ताइब नेल्लेमी हिंशा आन पिया हिक्नीम। 9 नोले मुर नेल्ल हिंनीम। मिनु परमप्रभु आ पशो आ पर्वम लोव्र पाइनीम। मिनु मेको आ पशो मिम्नीम। प्रस्थान ८:१५ 10 ठीक पाइबपुकी परमप्रभु यावे आ पर्वम ग्येरसीने। मिनु मेको नु खुंइसीन। रिम्शो थुं पाइश्शो मुर नेल्ले ग्येरसीन।

65

परमप्रभु कली ठेयब सेल्लो

कुम्सो पपाइक्ब कली। दाऊद आ कुम्सो।

1 परमप्रभु, सियोनमी इन कली ठेयब सेल्टीक कुम्सो पाइनीमी। मिनु आंइ कसम जशो नेल्ल इन डोंइती खाप्नीकी। 2 गे प्रार्थना नैब बाक्नीनी। मोपतीके मुर नेल्ल इन डोंइती जाक्नीम। 3 गो आंइ पापमी गुम्कानु, आंइ मरिम्शो पशो माफ गेतीनी। 4 सु सु इन योव्रचा पुंइसीशो बाक्नीमी, मेकोपुकी ग्येरसीशो बाक्नीमी। मेको आन कली इन खिंम बाक्पाइक्चा कली चाक्नीनी। गो इन खिं, इन आंम बाक्तीके डा ब्रोव्रशो थोव्रकमी रूनीकी। भजन संग्रह ६३:३-४; भजन संग्रह ८४:२-५; ब्यवस्था ४:७

5 आंइ पुंइशो लोव्र इन ठेयब गेयमी आंइ कली प्रोंइशा लोव्र लेत्नीनी। परमप्रभु, आंइ कली श्येत रे प्रोंइब बाक्नीनी। गे डोन बाक्ब रागी नु नेल्ल क्येडा डोन डा समुन्द्र आ नेक्था बाक्ब आन आस बाक्नीनी। 6 गे इन सक्तिमी डांडा नेल्ल सेल्टीनी। गे ठेयब सक्ति पाइशो बाक्नीनी। 7 गे समुन्द्र आन ग्रीशो सिक्सी पपाइक्तीनी। गे समुन्द्र आन बोक्शो नाइक्पाइक्तीनी। मिनु जात जात डा मुर आन जिचा खेचा साम्नीनी। भजन संग्रह ८९:१० 8 मिनु डोन डोन रागीम बाक्बपुकी इन छक लाक्चा डा गेय तशा हिंनीम। परमप्रभु, गे नां दाप्तीके नु नां पेरतीकेम बाक्ब आन कली ग्येरसीशा कुम्सो पपाइक्तीनी। 9 गे रागी हिरशा, रेउ यिपाइक्तीनी। गे मेको कली शुश ग्रेल्पाइक्तीनी। परमप्रभु आ खोला ब्वाक्कुम ब्रीशो बाक्नीम। मोपा मुर आन कली शुश अन्न खेलनीनी। मारदे हना मेकोन इन मिम्शो बाक्ब। भजन संग्रह ६७:७ 10 गे रू नेल्ल ब्वाक्कुम जिप्पाइक्तीनी। मेको कली थेल्नीनी। रेउ यिपाइशशा, मेको कली मार मार वापाइक्ब सेल्नीनी। मिनु मेकेर सिशो अन्न कली आसीक गेनीनी। भजन संग्रह १०४:१३-१६ 11 गे इन गेना हना यो दाक्तीकेमी शुश अन्न ग्रेल्ब सेल्नीनी। इन बग्गी मारेइ मारेइम ब्रीशो बाक्नीम। 12 गोरशो रागी डा बी ब्यफ योव्रतीके गिग दुम्नीम। पहाड थाम्पा ग्येरसीशो बाक्नीम। 13 योव्रतीके नेल्ल क्यारश भेडापुकीमी ब्रीशो बाक्नीम। दिंमपुकी अन्नमी सुम्सीशो बाक्नीम। मेकोपुकी शुश ग्येरसीशा कुम्सो पाइनीम।

66

परमप्रभु वारच पाइब बाक्ब

कुम्सो पपाइक्ब कली कुम्सो का।

1 ए रागी डा मुर नेल्ले, ग्येरशा परमप्रभु कली कुम्सो पने। 2 गे परमप्रभु कली “इन नें ठेयब बाक्ब” दे कुम्सो पने। मेको कली रिम्शो कुम्सो पने। 3 मिनु परमप्रभु कली “इन गेय ठेयब नु हिंचा डा बाक्नीमी। इन जोरी सत्रु इन डोंइती हिंशा, खिंखि पा बाप्नीम। मारदे हना इन सक्ति थम ठेयब बाक्ब” देनीन। 4 रागी डा मुर नेल्ल इन डोंइती बाप्नीम। मेकोपुकीमी इन कली ठेयब सेल्शा, कुम्सो पाइनीम। मिनु इन नें कली ठेयब सेल्शा, कुम्सो पाइनीम। ठेयब सेंदा पा।

5 जाक्कीन, परमप्रभु आ गेय कोव्रडीन। मेकोमी मुर आन दातेमी ठेयब नु हिंचा डा गेय पाप्तु। 6 मेकोमी समुन्द्रम सोव्रशो लां सेल्लु। मुरपुकी सोव्रशो लांम गाक्शा, खोला शोक्साक्म। मेकेर गो मेको आ पब्रम ग्येरसाक्क। प्रस्थान १४:२१-२२; यहाँसु ३:१६-१७ 7 मेकोमी आ सक्तिमी गेना हना यो सासन पाइब। मेकोमी रागी रागी आन कली कोव्रब। मेको कली मटीब ठेयब मलेम्मल। ठेयब सेंदा पा।

8 जात जात डा मुरपुकी, आंइ परमप्रभु कली ठेयब सेलीन। मेको कली ठेयब सेल्शो लोव्र नेंसेक्ल। 9 मेकोमी आंइ कली बेक्चा रे प्रोंइतु। आंइ कली ग्रेक्चा मगेव। 10 मारदे हना परमप्रभु, गे आंइ कली नाक्ताक्नी। गे आंइ कली चांदी यपाइशो खोदेशो पा यपाइक्तीनी। हितोपदेस १७:३ 11 गे आंइ कली जेल्खानम चोक्पाइक्तीनी। मिनु हेल्शो भारी कुरपाइक्तीनी। 12 गे मुर आन कली आंइ पियाम थेक्पाइक्तीनी। गो मी नु ब्वाक्कुम गाक्तक। तन्न गे आंइ कली ठेयब रागीम चाक्तीनी। यसैया ४३:२

13 गो इन खिंमी चोशा चढ़ेचा कली जाक्नुड। मिनु आं पशो कसम खाप्नुड। 14 गो श्येत जडानु, कसम जाता। मिनु मुल खाप्नुड। 15 गो इन कली दोम्शो बस्तु चढ़ेनुड। गो बोका चढ़ेनुड। गो ब्यफपुकी नु क्यारश चढ़ेनुड। ठेयब सेंदा पा।

16 परमप्रभु कली मान पा हिंबपुकी, नेल्ल जाक्शा नेनीन। मेकोमी आं पब्रम मार पवा, मेको गो इन कली शेंनुड। 17 गो मेको कली ठेयब सेंदा पा पुंइता। गो मेको कली ठेयब सेल्ता। 18 आं थुंमी पाप बाक्शो हना, परमप्रभुमी आं लोव्र मनेन वा। हितोपदेस २८:९ 19 तन्न परमप्रभुमी आं लोव्र थमा पा नेंतु। मेकोमी आं पुंइशो लोव्र नेंतु। 20 परमप्रभु ठेयब बाक्ल। मारदे हना मेकोमी आं पुंइशो लोव्र गेती। मिनु आं कली गेना हना यो दाक्ब।

67

“रिम्शो पाइतीनी” दे कुम्सो पशो

कुम्सो पपाइक्व कली तार पाइशो ताप्तीके ताप्शा पतीक कुम्सो।

1 परमप्रभुमी इं कली शिशी पा आसीक गेवल। मिनु इं कली आ शिशी कोंइदल। ठेयब सेंदा पा। गन्ती ६:२४-२५

2 रागी रागी डा मुरपुकीमी इन लां नु इन प्रोंइतीक सक्ति तुइक्वमेक्ल।

3 परमप्रभु, जात जात डा मुरपुकीमी इन कली ठेयब सेल्मेक्ल। मिनु मुर नेल्लेमी इन कली ठेयब सेल्मेक्ल। 4 रागी रागी डा मुरपुकी ग्येरशा सोम्शा, कुम्सो पामेक्ल। मारदे हना गे जात जात डा मुर आन कली कुल मकोव्रथु निसाफ पाइनीनी। मिनु रागी रागी डा मुर आन कली इन लां कोंइनीनी। ठेयब सेंदा पा। 5 परमप्रभु, जात जात डा मुरपुकीमी इन कली ठेयब सेल्मेक्ल। मिनु जात जात डा मुर नेल्लेमी इन कली ठेयब सेल्मेक्ल। 6 मिनु रूम अन्न खेल्ब। इं परमप्रभुमी इं कली आसीक गेब। भजन संग्रह ६५:१० 7 परमप्रभु, इं कली आसीक गेना गेन बाक्व। मिनु रागी डा मुर नेल्ले मेको कली मान पा हिंनीम।

68

परमप्रभु कली कुम्सो पशो

कुम्सो पपाइक्व कली दाऊद आ कुम्सो।

1 परमप्रभु बोक्व। मिनु आ जोरी सत्रु ब्रशा, आ डोंइती रे प्रोक्नीम। गन्ती १०:३५ 2 दोपा फशेमी कुन बेरपाइशशा योल्बा, मोपा मेको आन कली बेरपाइशशा योल्पतीन। मी आ नेक्था मयीन यशो खोदेंशो पा परमप्रभु आ अरेशो मटीबपुकी मेको आ डोंइती जाम्शा लाइनीम। 3 तन्न ठीक पाइबपुकी परमप्रभु आ डोंइती ग्येरसमल। मेकोपुकी ग्येरशा सोम्शा बाक्मल।

4 परमप्रभु कली कुम्सो पने। मेको आ नें आ पबर्म कुम्सो पने। गोस्स तार गाक्व कली ठेयब सेल्तीक कुम्सो पने। मेको आ नें परमप्रभु यावे बाक्व। गे मेको आ डोंइती ग्येरशा सोम्शा बाक्कीन। यसैया ५७:१४ 5 परमप्रभु आ बाक्तीकेमी बाक्शा, रोम रोइक्च आन आफ बाक्व। वोंइश बेक्शो मीश मुर आन कली वारच पाइब यो बाक्व। भजन संग्रह १०:१४ 6 परमप्रभुमी आ का ला बाक्शो मुर कली बाक्तीक खिं गेब। मेकोमी चोक्सीशो आन कली प्रोंइशा रिम्शो सेल्ब। तन्न मटीबपुकी चहिं नांम दुप्शा सोव्रशो रागीम बाक्चा माल्नीम।

7 परमप्रभु, गे इन मुर आन डोंइडोंइती गाक्तीनी। गे मेको आन कली गोरशो रागीम खुल्नीनी। ठेयब सेंदा पा। प्रस्थान १३:२१ 8 परमप्रभु सीनैम बाक्व। इस्राएली आन परमप्रभु आ डोंइती खिनु कुत। मिनु शुश रेउ यित। प्रस्थान १९:१६-१८ 9 परमप्रभु, गे ठेयब रेउ यिपाइक्तीनी। इन सोव्रने थुम्शो रागी जिप्पाइक्तीनी। 10 इन मुर आन कली मेको रागीम बाक्पाइक्तीनी। मिनु गे, परमप्रभु, इन दाक्तीकेमी श्येत जाइब आन कली थुल्तीनी।

11 परमप्रभुमी आ लोव्र नेंपाइक्तु। मिनु मेको लोव्र शेंब मीश मुर शुश दुम्तेक्म। यसैया ५२:७ 12 लडाइ पाइब आन पिप हिंशा दाम दाम पा प्रोक्नीम। मिनु मीश मुरपुकीमी मेको प्रोक्व आन प्रोंइशो मारेइ मारेइ योक्सीनीम। 13 गे चहिं भेडा आन दातेमी इप्चा दाक्नीनी? चांदीम गिल्शो फ्रां पाइशो दुकुर बाक्व। मिनु आ ओफलापुकी टल्केशो सुनमी गिल्शो बाक्नीम। 14 मिनु नेल्ल क्येडा सक्ति पाइशोमी पिप आन कली ब्रपाइक्ची ना सल्मोन डांडामी फुं यिपाइक्तु। न्यायाधीस ५:१६

15 बाशान डा डांडा परमप्रभु आ डांडा बाक्व। मेको थम ठेयब बाक्व। मेकेर डांडा शुश बाक्नीम। 16 गे शुश डांडा पाइशो पहाड, मारदे गे परमप्रभु आ सासन पचा कली योव्रशो डांडा गे कोव्रशा, गेहे पाइनीनी? मेकेर परमप्रभु गेना हना यो बाक्व। भजन संग्रह १३२:१३ 17 परमप्रभु आ बग्गी हजार हजार क्येडा शुश बाक्नीम। मिनु परमप्रभु सीनै रे आ बाक्तीकेम जाक्शो बाक्व। 18 गे इर डोइशशा लाइतीनी। ग्याइशो मुर आन कली लाइक्तीनी। मुर आन दातेमी गे मारेइ मारेइ ताइतीनी। डोंइती मटीब आन दातेमी यो ताइतीनी। परमप्रभु यावे मेकेर बाक्व। एफिसी ४:८-१० 19 परमप्रभु कली नाक्त किंत किंत ठेयब सेल्मेक्ल। मेको आंइ श्येत कुरशा, आंइ जोरी सत्रु रे प्रोंइब बाक्व। ठेयब सेंदा पा। १कोरिन्थी १०:१३

20 आंइ परमप्रभु श्येत रे प्रोंइब बाक्व। मिनु परमप्रभु यावेमी बेक्चा रे प्रोंइब।

21 परमप्रभुमी थमा पा आ जोरी सत्रु आन पिया प्रोल्ब। मेको मुर आन चां पाइशो पिया पापम ब्रीशो बाक्ब। 22 मिनु परमप्रभुमी “गो मेको आन कली बाशान रे चाक्नुडमी। मेको आन कली समुन्द्र आगा रे गुंडुनुडमी। 23 गेपुकीमी इन खोइली इन जोरी सत्रु आन हुशेम खुम्नीनी। मिनु इन कुचुमपुकीमी यो आन भाग ताइनीम” देंत।

24 परमप्रभु, मुरपुकीमी इन कली ताइनीम। आं परमप्रभु, आं पिप कली आ बाक्तीकेम लशो ताइनीम। भजन संग्रह २४:७; २सामुएल ६:१३-१५ 25 डोंडोंडोंइती कुम्सो पाइबपुकी गाक्नीम। मेको आन नोले मार मार ताप्बपुकी गाक्नीम। मिनु मेको आन एर ओंथ खैजडी ताप्ब मीश आलपुकी गाक्नीम। प्रस्थान १५:२० 26 परमप्रभु कली गुम्तीकेमी ठेयब सेलीन। परमप्रभु यावे कली इस्राएली आन गुम्तीकेमी ठेयब सेलीन। यसैया ४८:१ 27 नेल्ल क्येडा आइक्च थर बेन्यामीन आ खिं डा मुरपुकीमी मेको आन कली लां कोंइनीम। यहूदा आ थर डा ठेयब मुर, जबूलून आ थर नु नाप्ताली आ थर डा ठेयब मुर मेको हुलम बाक्नीम। 28 परमप्रभु इन सक्ति कोंइदीन। डोंइती पशो खोदेशो पा परमप्रभु, इन सक्ति कोंइदीन। 29 मिनु पिपपुकीमी इन कली यरूसलेम डा इन खिं आ पर्वम मार मार चाक्नीम। भजन संग्रह ७२:१० 30 बुदी मीलु आन दातेम बाक्ब जन्तु खोदेशो मुर आन कली हुइक्तीन। जात जात डा बाछा आन दातेम बाक्ब ब्यफ खोदेशो मुर आन हुल कली खेरीन। मेकोपुकी ब्रुमा नोले चांदी चाक्चा माल्नीम। लडाइ पचा दाक्ब जात जात डा मुर आन कली ब्रपतीन। 31 इजीप्त रे मुर जाक्नीम। एथियोपीया डा मुरपुकी परमप्रभु कली जिम्मा गेंसीनीम। यसैया १८:७; यसैया १९:२१; यसैया ४५:१४ प्रेरित ८:२७ 32 ए रागी डा राज्यपुकी, परमप्रभु कली कुम्सो पने। परमप्रभु यावे कली ठेयब सेल्टीक कुम्सो पने। ठेयब सेंदा पा। 33 परमप्रभु डोंइती रे स्वर्गम बाक्ब। मेको आ सेंदा बुंबु पशो खोदेशो सक्ति पाइशो बाक्ब। 34 परमप्रभु सक्ति पाइशो बाक्ब। मेको कली इस्राएलीम मान पाइनीम। मेको आ सक्ति सरीडम बाक्ब। 35 परमप्रभु, इन बाक्तीकेमी हिंचा डा बाक्नीनी। इस्राएली आन परमप्रभुम आ मुर आन कली सक्ति नु बोल गेब। परमप्रभु ठेयब बाक्ब।

69

“वारच पने” दे पुंडुशो

कुम्सो पपाइक्ब कली लिली फू आ लायो। दाऊद आ कुम्सो।

1 “परमप्रभु, आं कली श्येत रे प्रोंइयीनी। मारदे हना ब्वाक्कु आं शुर सम्म जाक्शो बाक्ब। 2 गो थेक्तीक मबाक्शो हिलो आगाम गुम्ना गुम्न बाक्नुड। शुश लुकच लशो ब्वाक्कुमी गुम्ना गुम्न बाक्नुड। आं एर ओंथ ब्वाक्कु ला बाक्ब। 3 गो ‘वारच पने’ दे प्रवा क्वा पा दती। आं सेंदा सोवती। आं परमप्रभु कली माल्शा आं मिक्च ब्राब्रा दुम्ती। 4 आं कली मोशा काइ मदाक्बपुकी आं चां क्येडा यो शुश बाक्नीम। मिनु मेकोपुकी मोशा आं जोरी सत्रु दुम्शो बाक्नीम। मेकोपुकीमी आं कली साइक्चा माल्शो बाक्नीम। आं मरोइशो मार मार थोव्रक, मेकोपुकीमी ‘लेत्तो’ देंनीम। यूहन्ना १५:२५

5 परमप्रभु, गे आं दूली पशो तुइशो बाक्नीनी। आं दोस इन डोंइती मखुइशो बाक्ब।

6 इन कली आस पाइबपुकी आं पतीके मुने मदोक्मल। परमप्रभु, मुर नेल्ल आन परमप्रभु यावे, इन कली माल्बपुकी आं पतीके मुने मदोक्मल। गे इस्राएली आन परमप्रभु बाक्नीनी। 7 गो इन पर्वम शुक्शी पाइक्चा पुंडुसीनुड। मिनु मुनेमी आं कुल सुम्सीशो बाक्नुड। भजन संग्रह ४४:२३ 8 गो आं लोक्ब आन दातेमी मतुइशो मुर खोदेशो दुम्शो बाक्नुड। गो आं ममा आ तौ आंइ दातेमी अर्को रागी डा मुर खोदेशो दुम्ती। भजन संग्रह ३८:१२ 9 मारदे हना इन खिं कली दाक्तीके नाक्त किंत किंत आं डोंइती बाक्ब। इन कली पशो शुक्शी आं कली दुम्त। भजन संग्रह ११९:१३९; यूहन्ना २:१७; रोमी १५:३ 10 गो डाक्शा, माइजा बाक्डानु, मुरपुकीमी रिक्ताक्यीमी। 11 गो भाडग्रा फेक्सीडानु, मुरपुकीमी आं कली शुक्शी पाइक्तीमी। 12 ठेयब लाप्चोम बाक्बपुकीमी आं कली शुक्शी पाइनीम। दुक्शो मुरपुकीमी आं पर्वम कुम्सो पाइनीम। अय्युब ३०:९

13 तन्न परमप्रभु यावे, गो इन कली इन शिशी पाइक्ची ना लोव्र पाइनुड। इन गेना हना यो दाक्तीकेमी आं पुंडुशो श्येत रे प्रोंइतीके गेयीनी। परमप्रभु आं कली लोव्र लेत्तीनी। यसैया ४९:८ 14 आं कली हिलोमी गुम्तीक रे प्रोंइयीनी। आं कली गुम्चा मगेयीनी। आं कली काइ मदाक्बपुकी रे प्रोंइयीनी। मेको बारशो ब्वाक्कु रे प्रोंइयीनी। 15 बारशो ब्वाक्कुम आं कली मसुम्यील। ब्वाक्कुम मयोल्दील। बेक्शो मुर आन बाक्तीकेमी आं कली मब्रेत्तील। उत्पत्ती २९:३ 16 परमप्रभु यावे, इन गेना हना यो दाक्तीकेमी आं कली लोव्र लेत्तीनी। इन ठेयब शिशी आं गे लेत्तीन। गन्ती ६:२६ 17 इन कुल इन गेय पाइब रे मखुइक्तीन। गो श्येत जशो बाक्नुड। आं कली रीब पा लोव्र लेत्तीनी। 18 आं

नेक्था जाक्कीन। मिनु आं कली प्रोंइयीनी। आं जोरी सत्रु रे आं कली प्रोंइयीनी। 19 मुरपुकीमी आं पर्वम दोपा रिक्तीमी, मुने तोक्कीमी नु शुक्शी पाइय्यीमी, गे मेको नेल्ल तुइक्कीनी। आं जोरी सत्रु नेल्ल इन डोंइती बाक्नीम। 20 आं कली रिक्शा कोव्रशो आ पर्वम आं थुं जिक्शो बाक्ब। मिनु गो मारेइ पने मचापब दुम्शो बाक्ती। आं कली शिशी पाइब 'सुइ बाक्मा को' दे कोव्रता, तन्न सुइ मबाक्म। लेम्ब यो सुइ मबाक्म। 21 मेकोपुकीमी आं जचा थोव्रकमी खाइल कुर पा गेतीमी। गो तूतू दाक्डानु, ग्युरशो तूचा थोव्रक गेतीमी। मती २७:३४,४८

22 मेको आन जचा थोव्रक आन ब्वारद दुम्ल। मेको आन कली वारच पाइब आन बेक्तीक दुम्ल। रोमी ११:९-१०
23 मेको आन मिक्ची ब्राब्रा दुम्शा, मताइब दुम्मल। मेको आन ची गेना हना यो गुर ब्वेशो दुम्ल। 24 गे इन गाइक्चा मेको आन कली मोइक्तीन। इन गाइक्शो मेको आन कली दुम्ल। 25 मेको आन बाक्तीके श्येतथ दुम्ल। मेको आन ताम्बुम सुइ मलीमल। प्रेरित १:२० 26 मारदे हना इन तुप्शो मुर कली खेदा पाइनीम। मेकोपुकीमी इन खाइक्पाइक्शो मुर आन कली लडाइ तोइनीम। 27 मेको आन ठीक मपतीकेम ठीक मपतीक तेम्दीन। मेकोपुकीम इन पाप रे प्रोंइतीके मतामेक्ल। 28 ब्रोंइतीक किताब रे मेको आन नें क्याम्सेक्ल। ठीक पाइब आन नें ब्रेक्शो किताबमी मेको आन नें मबाक्ल। प्रस्थान ३२:३२-३३; दानीएल १२:१; लूका १०:२०; फिलिप्पी ४:३ 29 परमप्रभु, गो श्येत जशा, रोइ पशो बाक्नुड। इन प्रोंइतीकेमी आं कली खाल पर्यील" दे परमप्रभु कली लोव्र पाता।

30 गो कुम्सो पा, परमप्रभु आ नें ठेयब सेल्लुड। "गे रिक्शो पाइब बाक्नीनी" दे मेको कली ठेयब सेल्लुड। 31 मार मार क्योरशा, चढेशो क्येडा एको कुम्सो नेंशा, परमप्रभु यावे ग्येरसीब। ग्रोव्र नु गेंच पाइक्शो ब्यफ चढेशो क्येडा यो शुश ग्येरसीब। भजन संग्रह ५०:८-१३ 32 दिप्चा पुंइसीशो मुरपुकी मेको तशा ग्येरसीनीम। परमप्रभु यावे कली माल्बपुकी, इन थुं ग्येतथ लुक्च मदुम्ल। 33 परमप्रभु यावेमी प्रुडग आन पुंइशो नेंब। मिनु ग्याइक्चा पुंइसीशो आ मुर आन कली आइक्च ममिम्ब। 34 सरीड नु रागीमी मेको कली ठेयब सेल्लेक्ल। समुन्द्र नु मेकेर बाक्शो नेल्लेमी मेको कली ठेयब सेल्लेक्ल। 35 मारदे हना परमप्रभुमी सियोन कली प्रोंइब। मिनु यहूदा डा सहरपुकी लेंशा सेल्लेक्ल। मिनु मुरपुकी मेकेर बाक्शा, मेको आन के दुम्ब। 36 मिनु मेको आ गेय पाइब आन आल आन के यो दुम्ब। मेको आ नें दाक्बपुकी मेकेर बाक्नीम।

70

“आं कली राइक्तीनी” दे पुंइशो

कुम्सो पपाइक्ब कली मिम्पाइक्चा कली दाऊद आ कुम्सो। भजन संग्रह ४०:१४-१८

1 “परमप्रभु, आं कली राइक्चा कली रीब पा जाक्कीन। परमप्रभु यावे आं कली वारच पचा कली रीब पा जाक्कीन।
2 आं कली साइक्चा माल्बपुकी मुने दोक्शा, वाम ग्याम दुम्मल। आं कली मरिक्शो दुम्शो दाक्बपुकी प्रोक्शा, ठेयब मुने दोक्मल। 3 मिनु सुमी आं पर्वम 'ठीक दुम्त!' देंमा, मेको मुने पा लल गोंगो जिमल। 4 तन्न सु सुमी इन कली माल्नीमी, मेकोपुकी इन पर्वम ग्येरशा सोम्शा बाक्मल। सु सुमी इन पाप रे प्रोंइतीक दाक्नीमी, मेकोपुकीमी गेना हना यो 'परमप्रभु ठेयब बाक्ब' देंमल।

5 गो प्रुडग नु श्येत जाइब बाक्ती हना यो, परमप्रभु रीब पा आं बाक्तीक जाक्कीन। गे आं कली वारच पाइब नु आं कली राइक्ब बाक्नीनी। परमप्रभु यावे, रीब पा जाक्कीन” दे पुंइता।

71

खाल्पा दुम्शो ना डा पुंइशो

1 परमप्रभु यावे, गो इन कली जिम्मा गेंसीशो बाक्नुड। गो गेनायो मुने मदोक्डल। 2 इन ठीक पतीकेम आं कली राइक्शा प्रोंइयीनी। आं लोव्र नेंशा, आं कली प्रोंइयीनी। 3 आं प्रोक्शा लशा खुइक्शा बाक्तीके सेरथे फुल्लु दुमीन। गे आं कली प्रोंइचा कली ब्रोंइशा बाक्तीक दरवार बाक्नीनी। मारदे हना गे आं सेरथे फुल्लु नु आं ब्रोंइशा बाक्तीक दरवार बाक्नीनी। भजन संग्रह ३१:३-४ 4 आं परमप्रभु, गे आं कली इन अरेशो मटीब आन गुइ रे राइक्तीनी। ठीक मपाइब नु तुप्शा दिप्ब मुर आन गुइ रे राइक्तीनी।

5 मारदे हना परमप्रभु यावे, गे आं आस बाक्नीनी। गो आ ठिटा दुम्डा रेन इन कली थमा सुइक्ता। 6 गो जरमेसीडा रेन इन कली थमा सुइक्ता। गे आं ममा आ कोव्रज रेन आं कली कोव्रब बाक्तीनी। गो इन कली गेना हना यो ठेयब

सेल्लुड। 7 शुश मुरपुकीमी आं कली तशा “परमप्रभुमी मेको कली ताइक्ताक्व” दे मिम्नीम। तन्न गे आं खुइश्शा बाक्तीक बाक्नीनी। 8 गो इन कली गेना हना यो ठेयब सेल्लुड। गो नाक्तर रे इन नें ठेयब सेल्लुड।

9 गो खूशो दुम्डानु, आं कली मप्रोंइयीनी। आं सक्ति जाम्मेनु यो आं कली मप्रोंइयीनी। 10 मारदे हना आं जोरी सत्रुमी आं पबर्म मरिम्शो लोव्र पाइनीम। आं कली साइक्चा माल्बपुकीमी लोव्र गारपाइक्नीम। 11 मेकोपुकीमी “परमप्रभुमी मेको कली वारच पचा प्रोंइशो बाक्ब। मेको कली खेदा पा ग्याइक्तय। मारदे हना मेको कली राइक्ब सुइ मबाक्नीम” देंनीम। 12 परमप्रभु, आं क्येडा डोन मबाक्कीन। आं परमप्रभु, आं कली राइक्चा कली रीब पा जाक्कीन। 13 आं कली दोस गेबपुकी मुने दोक्शा खतम दुम्मल। आं कली साइक्चा माल्बपुकी तोक्शा लोव्र पाइक्चा, शुक्शी पाइक्चा नु आइक्च सेल्चा पुंडसमल।

14 तन्न गो चहिं इन कली आस पस डा पस बाक्नुड। गो इन कली डोंइती क्येडा ठेयब सेल्लुड। 15 गो इन ठीक पतीके आ पबर्म लोव्र पाइनुड। गे आं कली गिश खेयप प्रोंइयीनी, मतुइक्ताक्ड हना यो, गो इन श्येत रे प्रोंइतीके आ पबर्म नाक्तर रे लोव्र पाइनुड। 16 परमप्रभु, गो इन सक्ति पाइश्शो गेय आ पबर्म शेंना शेंन गाक्नुड। मिनु इन ठीक पतीके आ पबर्म इन कली ठेयब सेल्लुड। 17 परमप्रभु, गो ठिटा बाक्डा रेन, गे आं कली शेंताक्यीनी। मिनु गो मुल सम्म इन छक लाक्चा डा गेय आ पबर्म लोव्र पाइनुड। 18 परमप्रभु, गो खूशो दुम्शा, आं चां बोइक्म सम्म यो, आं कली मप्रोंइयीनी। मिनु गो आं नोले डा पाला डा मुर आन कली इन सक्ति नु इन ठीक पतीके आ पबर्म शेंनुड। यसैया ४६:४

19 मिनु इन ठीक पतीके ठेयब दुम्शा, इर सरीड थीब। गे थम ठेयब गेय पाइतीनी। परमप्रभु, इन खोदेशो अरु सु बाक्नीमी डा? 20 गे आं कली शुश नु ठेयब श्येत जपाइक्तीनी हना यो, लेंशा ब्रोंइचा गेनीनी। गे आं कली लुक्च लतीक रे लेंशा ग्येत्य लपाइक्नीनी। १सामुएल २:६ 21 गे आं कली लेंशा मान ताइब सेल्शा लेम्नीनी।

22 आं परमप्रभु, गो इन दाक्शा गेनायो मप्रोंइतीके आ पबर्म ठेयब तार पाइश्शो ताप्तीके ताप्शा, ठेयब सेल्लुड। गे इस्राएली आन का ला परमप्रभु बाक्नीनी। गो बीना ताप्शा इन कली कुम्सो पाइनुड। गे इस्राएली आन का ला परमप्रभु बाक्नीनी। २राजा १९:२२; यसैया ४३:३ 23 गे आं कली श्येत रे प्रोंइब बाक्तीनी। मोपतीके गो ग्येरशा सोम्शा इन कली कुम्सो पा ठेयब सेल्लुड। 24 गो इन ठीक पतीके आ पबर्म नाक्तर रे लोव्र पाइनुड। मारदे हना आं कली खती पचा माल्बपुकी मुने दोक्शा, मार पचा ना मार पचा दुम्तेक्म।

72

पिप आ पबर्म पुंडशो

सोलोमन आ कुम्सो।

1 परमप्रभु, पिप कली इन निसाफ डा लोव्र गेने। पिप आ तौ कली इन ठीक पतीके गेने। 2 मेकोमी इन मुर आन कली ठीक पतीकेमी निसाफ पवल। इन पुडग मुर आन कली ठीक पा निसाफ पवल। 3 मोदेशो ठीक पतीके तशा, डांडा नु पहाड डा रूपुकी अन्न ग्रेल्ब दुम्मल। 4 मेकोमी मुर आन दातेमी पुडग आन कली कोव्रडल। मिनु श्येत जाइब आन तमी तौ आन कली प्रोनल। मेकोमी दिप्ब आन कली खतम पोक्गल।

5 नां तास्ला बाक्सा सम्म नु मुर नेल्ल आन पाला सम्म मेको ब्रोंइशा बाक्ल। 6 मिनु मेको घांस रिक्शो दिंममी रेउ यिशो खोदेशो दुम्ल। रेउमी रागी कली जिप्पाइश्शो खोदेशो दुम्ल। 7 मेको आ पालामी मुर आन दातेमी ठीक पतीके ठेयब दुम्ल। मिनु तास्ला लीम सम्म मुर आन थुं नाइक्तीक दुम्ल।

8 मेकोमी समुन्द्र का रे अर्को समुन्द्र सम्म नु ठेयब खोला रे रागी आ सुर सम्म सासन पवल। जकरिया ९:१० 9 गोरशो रागी डा मुरपुकी मेको आ डोंइती बाम्मल। मिनु आ जोरी सत्रुमी फुरक तुक्गमेक्ल। 10 टारशीश नु डोन डा टापु डा पिपपुकीमी मेको कली तिरो थाप्तमेक्ल। शेबा नु सेबा डा पिपपुकीमी मेको कली कोसेली चाक्गमेक्ल। यसैया ६०:९; भजन संग्रह ६८:३०; १राजा १०:१-२ 11 पिप नेल्ल मेको आ डोंइती बाम्मल। मिनु रागी रागी डा मुर नेल्लेमी मेको कली गेय पामेक्ल।

12 मारदे हना मेकोमी आ कली पुंडब श्येत जाइब आन कली प्रोंइब। वारच पाइब मबाक्शो पुडग आन कली वारच पाइब। अय्युब ३६:१५ 13 मचाप्ब नु श्येत जाइब आन कली शिशी पाइब। मेकोमी पुडग आन कली साइक्तीक रे प्रोंइब। 14 मेको आन कली दिप्तीक नु हुश खाक्श पोक्तीक रे प्रोंइब। मारदे हना मेको आ डोंइती हिक्सीशो बाक्नीम। भजन संग्रह ९:१३; भजन संग्रह ११६:१५

15 मेको शुश नाक्त ब्रोंडल। शेबा डा सुन मेको कली चाक्गमेक्ल। मुरपुकीमी मेको आ पर्वम प्रार्थना पस डा पस पामेक्ल। नाक्त रे मेको कली आसीक गेमेक्ल। 16 मिनु रागी शुश अन्नम ब्रील। डांडा तार यो अन्न ग्रेल्ल। मिनु फल फुल लेबानोन डा खोदेशो पा सिल्ल। सहरम बाक्ब मुर घांस खोदेशो पा सोशा बोशा शुश दुम्मल। 17 मेको आ नें गेना हना यो लील। नां बाक्म सम्म आ नें ठेयब बाक्ल। रागी रागी डा मुर नेल्लेम मेको रे पा आसीक तामेक्ल। मिनु मेकोपुकीमी मेको आ पर्वम “ग्येरसीशो मुर बाक्ब” देंमल। उत्पत्ती १२:३; उत्पत्ती २२:१८

18 परमप्रभु, परमप्रभु यावे, इस्राएली आन परमप्रभु ठेयब बाक्ब। मेकोमी ला छक लाक्चा डा गेय पाइब। भजन संग्रह ४१:१४ 19 मेको आ नें गेना हना यो ठेयब बाक्ब। रागी नेल्ल आ सक्तिमी ब्रील। आमन, मेको थमा बाक्ब। यसैया ६:३ 20 येस्से आ तौ दाऊद आ प्रार्थना एकोन बाक्नीम।

73

“परमप्रभु, गो इन मुर नड” देंशो

आसाफ आ कुम्सो।

1 परमप्रभु इस्राएल डा मुर आन कली थमा पा रिम्शो पाइब बाक्ब। आन पाप कयाम्चा पुंडसीशा, रिम्शो थुं पाइश्शो आन कली रिम्शो पाइब बाक्ब। अय्युब २१:७ 2 तन्न गो ग्रेक्शा, आं थेक्तीक साम्चा चिक्शो बाक्ती। 3 मारदे हना गो परमप्रभु आ अरेशो मटीब आन रिम्शो दुम्शो तशा नु मेको आन ठेयब लेशशो तशा, गेहे पाता। 4 मेको आन कली श्येत मबाक्ब। मेकोपुकी रोइ मपशो नु बोल्यो बाक्नीम। 5 मेकोपुकी अरुपुकीम खोदेशो पा श्येत मजाइनीम। मेकोपुकी अरु खोदेशो पा श्येत मदुम्नीम। 6 मोपतीके ठेयब लेत्तीके मेको आन माला खोदेशो दुम्ब। आन दिप्शा हुश ख्राक्श पोक्तीके आन फेक्तीक वा खोदेशो दुम्ब। 7 मेको आन खकटा थुंम मरिम्शो पतीके बाक्ब। मेको आन थुं डा मरिम्शो पतीके मिम्शा, मिम्ने मजाप्शो बाक्ब। 8 मेकोपुकीमी शुक्शी पा मरिम्शो लोत्र पाइनीम। मिनु आन ठेयब लेत्तीकेमी मुर आन कली हिंच कोइनीम। 9 मेकोपुकीमी “स्वर्ग नेल्ल आंइ के बाक्ब” देंनीम। मिनु रागी नेल्ल आंम के सेल्नीम। 10 मोपतीके मुरपुकी मेको आन गे लेत्नीम। मिनु आन लोत्र थमा सुइश्शा आन नोले खोइश्शा मेको आन कली ठेयब सेल्नीम। 11 मिनु मेकोपुकीमी “परमप्रभुमी दोपा तुइक्बा डा? मार मेको नेल्ल क्येडा ठेयब तुइक्ब बाक्बा डा?” देंनीम। भजन संग्रह १०:११ 12 परमप्रभु आ अरेशो मटीबपुकी मोदेशो बाक्नीम। मेकोपुकी महिंथु, क्येट चेम्ना चेम्न बाक्नीम। 13 गो आयेसो ला रिम्शो थुं पाइश्शो दुम्डा बाक्त। मिनु मोशा दोस मताइब दुम्डा बाक्त। मलाकी ३:१४ 14 गो नाक्त रे हिंचा डा श्येत जाता। मिनु सुनी कुस कुस सजाइ ताता। 15 गो मेको आन खोदेशो पाता हना, गो इन मुर आन कली मरिम्शो पदुमी वा। 16 गो एको नेल्ल रुप्चा माल्ता, आं कली थम श्येत दुम्त। 17 मिनु गो परमप्रभु आ खिं ओव्वती। मेना गो मेको आन कली नोले मार दुम्बा, मेको नेल्ल तुइक्ताक्ड।

18 गे मेको आन कली थमा पा ग्रेक्तीके लांम गाक्पाइक्नीनी। गे मेको आन कली खतम पोक्नीनी। 19 मेको मतुइक्थु रीब पा खतम दुम्नीम। मेकोपुकी हिंतीकेमी योल्चा पुंडसीशो बाक्नीम। 20 दोपा मुरपुकी सुनी सेंसीमानु, डोमु पशा, थमा ममाइ, दे तुइक्नीमी, मोपा परमप्रभु, गे बोक्ची ना मेको आन कली कयाम्नीनी।

21 डोंइती आ थुं लुक्च लशा, कशो दुम्शो बाक्त। 22 गो ममिम्ब नु मारेइ मतुइक्ब बाक्ती। इन डोंइती जन्तु खोदेशो बाक्ती। 23 मो हना यो गो गेना हना यो गे नु काथा बाक्नुड। गे आं ग्युरा गुइ ग्याइश्शो बाक्नीनी। रोमी ८:३५-३९ 24 गे आं कली इन लोत्रमी लां कोइनीनी। मिनु नोले गे आं कली छेडछेडम ताक्नीनी। भजन संग्रह ४९:१६ 25 स्वर्गम इन डा लाक्शा, अरु आं के सु बाक्नीमी डा? रागीमी यो आं माल्शो इन डा लाक्शा अरु सुइ मबाक्नीम। 26 आं रां नु आं थुं निम्फा ग्येत्थ लुक्च दुम्शो बाक्नीस। तन्न परमप्रभु गेना हना यो आं सक्ति नु आं भाग बाक्ब। भजन संग्रह १६:५

27 इन क्येडा डोन बाक्बपुकी थमा पा जाम्शा लाइनीम। गे इन क्येडा नोले शोंइसीशो नेल्ल आन कली खतम पोक्नीनी। 28 तन्न गो चहिं परमप्रभु आ नेक्था बाक्चा दाक्नुड। परमप्रभु यावे आं प्रोक्शा लशा बाक्तीक बाक्ब। गो इन पशो गेय नेल्ल आन पर्वम लोत्र पाइनुड।

74

“श्येत रे प्रोंइयीकी” दे पुंइशो

शेंतीक कुम्सो। आसाफ आ कुम्सो।

1 परमप्रभु, गे मारदे आंइ कली मदाक्थु, गेना हना यो प्रोंइनीनी? इन भेडा आन कली तशा मारदे गाइक्नीनी? 2 साइ इन ग्याप्शो मुर आन कली मिम्तीन। इन के सेल्चा कली श्येत रे प्रोंइशो मुर आन कली मिम्तीन। गे इन बाक्तीक सियोन डांडा कली मिम्तीन। भजन संग्रह ७६:३ 3 मिनु गे इन ब्रेशो खिं कली कोव्रथ लने। इन जोरी सत्रुमी इन खिं मोदेशो पा खतम पोक्तेक्म। 4 इन जोरी सत्रुमी इन बाक्तीक नेल्ल खतम पोक्तेक्म। मेकोपुकीमी मेकेर आन छेदर ग्युक्ताक्मे। 5 मेकोपुकीमी रवा तिम्शा, नेल्ल श्येतथ पोक्ब मुर खोदेशो पा पाम्तेक्म। 6 मेकोपुकीमी ग्येतथ डा लाप्चो डा बुटा आप्शो गारो डा शी नेल्ल आन खा नु घनमी खतम पोक्तेक्म। 7 मेकोपुकीमी इन खिं कली मी सुइक्ताक्म। रागीमी इन गुम्तीक खिं नेल्ल मी सुइश्शा खतम सेल्लेक्म। २राजा २५:९ 8 मेकोपुकीमी आन थुमी “गो एको आन कली नेल्ल खतम पोक्नीकी” देतेक्म। मेकोपुकीमी रागीम बाक्शो इन नेम बुक्तीके खिं नेल्ले मी सुइक्ताक्म। 9 गोपुकीमी मारेइ छक लाक्चा डा गेय मतक। मुल परमप्रभु आ लोव्र पाइब सुइ मलीम। गेना सम्म एको ओदेशो दुम्बा, गो सुइम मतुइक्नीकी।

10 परमप्रभु, इन जोरी सत्रुमी इन कली गेना सम्म शाक्नीमी? मार, जोरी सत्रुमी इन ने आ पर्बम गेना हना यो शुक्शी पस डा पस बाक्नीमी? 11 गे मारदे इन सक्ति मकोइनीनी? इन गुइ इन वा आगा रे गुंइदीन। मिनु मेको आन कली खतम पोक्कीन।

12 परमप्रभु, गे साइ नेसी रे डा आं पिप बाक्नीनी। गे रागी रागी आन कली प्रोंइनीनी। 13 गे इन सक्तिमी समुन्द्र कली फ्राताक्नी। गे समुन्द्रमी बाक्ब ठेयब जन्तु आन पिया प्रोल्तीनी। भजन संग्रह १०४:६-८; प्रस्थान १४:२१-२२; यसैया २७:१ 14 गे लेव्याथन आ पियापुकी प्रोल्तीनी। मिनु मेको कली गोरशो रागी डा जन्तु आन कली ब्वचा गेतीनी। अय्युब ४०:२५ 15 ब्वाक्कु बुक्पाइक्ब नु खोल्सा सेल्ब गे बाक्नीनी। मिनु गे गेना हना यो यिस डा यिस बाक्ब ठेयब खोला आन कली सोव्रपाइक्तीनी। 16 नाक्दो इन के बाक्ब। मिनु नाक्ती यो इन के बाक्ब। गे नां नु तास्ला सेल्लतीनी। भजन संग्रह १०४:१९ 17 गे रागी रागी आन सांद वोइक्तीनी। गे हिंउद नु बर्खा सेल्लतीनी।

18 परमप्रभु यावे इन जोरी सत्रुमी इन कली दोपा शाक्मे। मिनु इन कली मटीबपुकीमी दोपा इन ने आ पर्बम शुक्शी पामे? मेको मिम्तीन। 19 गे इन ढुकुर ब्वाकी डा जन्तु आन कली मगेने। गे इन श्येत जशो मुर आन कली गेना हना यो मिम्शा बाक्कीन। 20 गे इन कबल खपीन। मारदे हना रागी डा खुइक्तीके नेल्ले हिंतीके नु हुश ख्राक्श पतीकेमी ब्रीशो बाक्नीम। 21 दिप्चा पुंइसीब आन कली मुने दोक्चा मगेने। पुडग नु श्येत जाइबपुकीमी इन ने ठेयब सेल्लेक्म। 22 परमप्रभु, बोक्कीन। मिनु इन पर्बम लडाइ पने। मटीबपुकीमी नाक्त रे इन कली शाक्शो, मिम्तीन। भजन संग्रह १४:१-३ 23 इन पर्बम दूली लोव्र पाइब आन रेयके नु इन जोरी सत्रु आन लडाइ पस डा पस पशो मप्रेदीन।

75

परमप्रभुमी निसाफ पशो

कुम्सो पपाइक्ब कली खतम मसेलो देशो कुम्सो आ लायो। आसाफ आ कुम्सो।

1 परमप्रभु, गो इन कली “गे आंइ कली रिम्शो पाइतीनी” देनीकी। मारदे हना इन ने आ पर्बम नेशो बाक्नीकी। मुरपुकीमी इन छक लाक्चा डा गेय आ पर्बम लोव्र पना पन बाक्नीम। यसैया ४६:१३

2 गे “गो आं देशो नाक्ती गो ठीक निसाफ पाइब नड। 3 रागी रागीम खिनु कुमेनु, मुर नेल्ले खिंखि पाइनीम। तन्न रागी डा जग वोइक्ब गो नड” देतीनी। ठेयब सेंदा पा।

4 गे ठेयब लेशो आन कली “ठेयब लेशो मदुमीन” देशा, इन अरेशो मटीब आन कली “मबोरीन” देतीनी। 5 गे “स्वर्ग आ पर्बम ठेयब लोव्र मपने। मिनु इन शुर किरशा लोव्र मपने” देतीनी।

6 पूर्व, पच्छिम नु गोरशो रागी तेइ रे सुइमी मुर आन कली ठेयब सेल्ले मचाप्नीम। 7 तन्न परमप्रभुमी मुर आन कली निसाफ पाइब। मेकोमी का निक्शी आन कली दिप्ब, का निक्शी आन कली क्युक्ब। १सामुएल २:७

8 परमप्रभु यावे आ गुइमी बोटको का बाक्ब। मेकेर मार मार सुप्शो बोग्यो बोक्शो अडगुर शांबु बाक्ब। परमप्रभुमी मेको तूचा गेब। मिनु रागी रागी डा आ अरेशो मटीबपुकीमी मेको तूचा माल्नीम। भजन संग्रह ६०:५; येरमीया २५:१५-१६ 9 तन्न गो चहिं मुर आन दातेमी शुश ग्येरसीशो लोव्र पाइनुड। गो याकूब आ परमप्रभु कली ठेयब सेल्लशा, कुम्सो पाइनुड। 10 गे इन अरेशो मटीब नेल्ल आन कली आइक्च सेल्लनीनी। तन्न ठीक पाइबपुकी ठेयब सेल्लचा पुंइसीनीम।

76

सक्ति पाइशो परमप्रभु यावेमी ग्राब

कुम्सो पपाइक्व कली तार पाइशो ताप्तीके ताप्शा पतीके, आसाफ आ कुम्सो।

1 यहूदा आ रागीमी परमप्रभु कली तुइक्नीम। मेको आ नें इस्राएल रागीमी ठेयब बाक्व। 2 आ ताम्बु सालेम सहरमी बाक्व। आ बाक्तीके सियोनमी बाक्व। भजन संग्रह १३२:१३ 3 मेकोमी मेकेर ब्रशो ब्रापुकी, तेक्तीकपुकी, तरवार नु लडाइ पतीक मारेइ मारेइ जिक्तीमी। ठेयब सेंदा पा। भजन संग्रह ४६:१०

4 गे छेडछेडमी नां खोदेशो तांइसीनीनी। गे गेना हना यो लीब पहाड क्येडा यो ठेयब बाक्नीनी। 5 महिंब मुरपुकी रोइक्चा पुंडसाक्म। मेकोपुकी साइक्चा पुंडसाक्म। लडाइ पाइब आन दातेमी कामी यो आन गुइ क्युक्ने मचबेम। 6 याकूब आ परमप्रभु, इन हुइशोमी शारा नु शारा डोइक्व निम्फा बेक्ताक्स। 7 गे मान पा हिंचा मालशो बाक्नीनी। गे गाइक्तीनीनु, इन डोंइती सु राप्ने चाप्बा डा? 8 गे स्वर्ग रे इन निसाफ नेंपाइक्तीनी। मिनु रागी हिंशा, सिक्सी पाप्तु। भजन संग्रह ४६:१; हबकुक् २:२० 9 मेना परमप्रभु, गे रागीम दिप्चा पुंडसीशो नेल्ल आन कली प्रोंइचा कली निसाफ पथ बोक्तीनी। ठेयब सेंदा पा। 10 थमा पा, मुर आन गाइक्तीकेमी इन कली ठेयब सेल्ब। मिनु इक्का लीशो गाइक्तीकेमी इन कली ठेयब सेल्ब।

11 परमप्रभु यावे, इन परमप्रभु आ नें थिशा कसम जशो खपीन। मेको आ नेक्था बाक्व नेल्लेमी मान पा हिंचा डा परमप्रभु कली कोसेली चाक्मेक्ल। 12 मेकोमी सासन पाइब आन ठेयब लेक्तीके फस पोक्व। मेको रागी डा पिप आन कली हिंपाइक्व बाक्व।

77

श्येत दुम्मेनु, लेम्शो

कुम्सो पपाइक्व शेंब येदुथून कली आसाफ आ कुम्सो।

1 गो परमप्रभु कली “वारच पाइय्यीनी। आं लोव्र नेनीन” दे ठेयब सेंदा पा ब्रेक्ती। 2 गो श्येत जडानु, परमप्रभु कली माल्ता। गो नाक्दो यो मदथु, परमप्रभु कली पुंडता। आं थुं खाइक्स डा खाइक्स बाक्त।

3 गो परमप्रभु कली मिम्ताक्ड, गो रोंका पाता। गो आं श्येत मिम्ना मिम्न बाक्ती। मिनु आं थुं लुकच लत। ठेयब सेंदा पा। 4 “गे आं कली निन्द्रा पचा यो मगेनीनी। मिनु गो शुश श्येत जशा, ब्वाक्ने यो मचबु। 5 गो डोंइती डा नाक्त नु साइ डा बर्सपुकी मिम्ताक्ड। भजन संग्रह १४३:५ 6 गो नाक्दो आं थुंमी रिम्शो बाक्बा देय मरिम्शो बाक्बा” दे मिम्स डा मिम्स बाक्ती।

7 मार, परमप्रभुमी गेनायो आं कली मब्राइबा? मिनु मेकोमी गेनायो शिशी मपाइबा? 8 मेको आ गेना हना यो दाक्तीक जाम्शो बाक्बा? मेको आ थोक्शा पशो लोव्र शोर गाक्शो दुम्शो बाक्बा? 9 मार, परमप्रभुमी शिशी पचा प्रेंशो बाक्बा? मेको गाइशशा, आ शिशी पतीके तेक्शो बाक्बा? ठेयब सेंदा पा। 10 मिनु गो “नेल्ल क्येडा ठेयबमी आ थुं फाइक्तीके आं कली श्येत दुम्त” दे मिम्ताक्ड।

11 मिनु “परमप्रभु यावे, गो इन पशो मिम्नुड। गो इन साइ डोंइती डा पशो छक लाक्चा डा गेय मप्रेनुड। 12 गो इन पशो नेल्ल मिम्स डा मिम्स बाक्नुड। साइ डोंइती डा इन छक लाक्चा डा गेय आ पर्बम मिम्नुड। 13 परमप्रभु, इन लां ठीक बाक्व। आंइ परमप्रभु खोदेशो ठेयब अरु तेको देवता बाक्बा डा? प्रस्थान १५:११ 14 गे छक लाक्चा डा गेय पाइब परमप्रभु बाक्नीनी। गे जात जात डा मुर आन दातेमी इन सक्ति कोंइताक्नी। 15 गे इन सक्तिमी इन मुर आन कली प्रोंइतीनी। गे याकूब, योसेफ नु आ चच युइ आन कली प्रोंइतीनी। ठेयब सेंदा पा।

16 परमप्रभु, समुन्द्र डा ब्वाक्कु इन कली तशा हितेक्म। शुश लुकच लशो समुन्द्र खिंखि पाप्तु। 17 मिनु गोस्सुमी रेउ यिपाइक्तेक्म। सरीड रे ठेयब बुंबु पाप्तु। इन चिला तेइ तेइ ब्रत। 18 फश गिवारम इन बुंबु पशो नेंसाक्व। इन चिलामी रागी नेल्ल छेडछेड दुम्त। रागी खिंखि पा हिम्साक्व। 19 इन लां समुन्द्र रे पा लशो बाक्त। इन गाक्शो लां ठेयब समुन्द्र आ दातेमी बाक्त। मो हना यो इन खोइलीम दिम्शो मारेइ मतांइसे। प्रस्थान १४:२१-३१ 20 मोसा नु हारून आस गुइ रे पा, गे इन मुर आन कली भेडा आन हुल खुल्शो खोदेशो पा गाक्पाइक्तीनी” दे परमप्रभु कली लोव्र पता।

७८

परमप्रभुमी मार मार पवा

शेंतीक कुम्सो। आसाफ आ कुम्सो।

भजन संग्रह १०६:- १ आं मुरपुकी, आं शेंशो लोव्र नेनीन। इन नोफा दाइशशा आं लोव्र नेनीन। २ गो कथा पा लोव्र शेंनुड। साइ डोंइती डा लोव्र पाइनुड। मती १३:३५ ३ एको लोव्र आंइ किकी पिपीमी आंइ कली नेंपाइशशो नु तुइक्पाइशशो बाक्नीम। प्रस्थान १३:१४; ब्यवस्था ४:९-१० ४ गोपुकी एको लोव्र मेको आन तौ चच आन क्येडा मखुइक्नय। मिनु नोले दुम्ब पाला डा मुर आन कली यो परमप्रभु यावे आ ठेयब नु सक्ति पाइशशो छक लाक्चा डा गेय आ पर्वम शेंनीकी।

५ मेकोमी याकूब आ मुर आन कली दोपा बाक्चा माल्बा, मेको देंत। मेकोमी इस्राएलमी मेको आ अरेशो लोव्र वोइक्तु। मिनु परमप्रभुमी आंइ किकी पिपी आन कली “इन आल आन कली शेंदीने” दे माइक्तीमी। ६ मेको आन नोले डा पाला डा मुरपुकीमी एको लोव्र नेल्ल तुइक्तमेक्ल। मिनु मेको आन क्येडा नोले जरमेशो आल कोल्शा तुइशशा, मेकोपुकीमी आन आल आन कली शेंदमेक्ल। ७ मोपा मेकोपुकीमी परमप्रभु कली थमा सुदमेक्ल। मिनु आ पशो मप्रेंदमेक्ल। मिनु आ शेंशो टीमेक्ल। ८ मेको आन किकी पिपी खोदेंशो मदुम्मल। मेकोपुकी खकटा थुं पाइशशो नु मटीब पाला डा मुर बाक्तेक्म। मेकोपुकी नोले शोंइसीशा, परमप्रभु कली प्रोंइतेक्म। ब्यवस्था ३२:५-६

९ एफ्राइम डा मुरपुकी लिब्रा शेशा, ठीक दुम्शा, लडाइ दुम्मेनु, प्रोक्तेक्म। न्यायाधीस २:११-१३ १० मेकोपुकीमी परमप्रभु आ कबल पशो मटीम। मिनु मेको आ अरेशो लोव्र मटीम। ११ मेकोपुकीमी परमप्रभु आ गेय नु आन डोंइती पशो छक लाक्चा डा गेय प्रेंताक्म। १२ मेकोमी मेको आन किकी पिपी आन डोंइती इजीप्त नु सोआन रागीमी छक लाक्चा डा गेय पशो बाक्त। १३ मेकोमी समुन्द्र कली फ्राशा, लां सेल्लु। मिनु मेको लां रे पा मेको आन कली आइक्वी हांबु शोक्ताक्मी। मेकोमी ब्वाक्कु कली गारो खोदेंशो पा एर ओंथ राप्पाइक्तु। प्रस्थान १४:२१-२२ १४ मेकोमी मेको आन कली नाक्त गोस्सुम नु नाक्दो मी आ हाम्सोमी लां कोइताक्व। प्रस्थान १३:२१ १५ मेकोमी गोरशो रागीमी सेरथे फुल्लु कली प्रोल्शा ब्वाक्कु बुक्पाइक्तु। मिनु शुश ब्वाक्कु तूचा गेम्तीमी। प्रस्थान १७:६; गन्ती २०:७-११; ब्यवस्था ३२:१८ १६ सेरथे फुल्लु रे पा ब्वाक्कु बुक्पाइक्तु। मिनु खोला खोदेंशो पा शाइक्पाइक्तु।

१७ तन्न मेकोपुकीमी गोरशो रागीमी नेल्ल क्येडा ठेयब कली मटिथु, मरिम्शो पा डोंइती क्येडा शुश पाप पाप्तेक्म। १८ मेकोपुकीमी आन दाक्शो पा जचा थोव्रक पुंडशा, परमप्रभु आ थुं नाक्ताक्म। प्रस्थान १६:३; गन्ती ११:४ १९ मेकोपुकीमी थमा मसुइक्थु “मार, परमप्रभुम गोरशो रागीम जचा थोव्रक गेने चाप्बा डा? २० मेकोमी सेरथे फुल्लु तुप्शा प्रोल्शा ब्वाक्कु बुक्पाइशशा, शुश खोला सेल्लु। मार, मेकोमी आ मुर आन कली शोब्ले नु श्ये यो गेने चाप्बा डा?” देंतेक्म।

२१ मिनु परमप्रभु यावे मेको आन लोव्र नेंशा, थाम्पा गाइक्ताक्व। मिनु परमप्रभुमी याकूब कली दाक्पाइक्चा कली मी सोइक्ताक्व। मिनु इस्राएली आन पर्वम शुश चुरत। गन्ती ११:१ २२ मारदे हना मेकोपुकीमी परमप्रभु कली थमा मसुदेम। मिनु “परमप्रभुमी आंइ कली प्रोंइने मचाप्ब” देंतेक्म। २३ मो हना यो मेकोमी सरीड कली अरेशा सरीड डा लाप्चो रोक्पाइशशा गेप्तु। २४ मेकोमी मुर आन कली थुल्चा कली सरीड रे मन्ना यिपाइक्तु। मेको आन कली स्वर्ग डा अन्न गेप्तु। प्रस्थान १६:४, १४, १५ २५ मुर नेल्लेमी परमप्रभु आ स्वर्ग डा गेय पाइब आन शोब्ले जाप्तेक्म। परमप्रभुमी मेको आन कली शुश जचा गेप्तु। २६ मेकोमी सरीडमी पूर्व डा फश सोइक्ताक्व। मिनु मेको आ सक्तिमी दक्खिन रे फश पपाइक्तु। गन्ती ११:३१-३३ २७ मेकोमी फुरक खोदेंशो पा श्ये यिपाइक्तु। समुन्द्र डा बाल्वा खोदेंशो पा चिक्ब यिपाइक्तु। २८ मेको चिक्ब आन कली आन बाक्तीके एर ओंथ दोक्पाइक्तु। २९ मिनु मेकोपुकी मेको ब्वशा रूतेक्म। मारदे हना परमप्रभुमी मेको आन कली आन पुंडशो खोदेंशो पा गेप्तु। ३० तन्न मेकोपुकीमी ब्वना ब्वन, आन ब्वशो श्ये आन शोव्रम बाक्ना बाक्न, ३१ परमप्रभु शुश गाइक्ताक्व। मिनु मेको आन दातेम नेल्ल क्येडा बोल्यो मुर आन कली साइक्तीमी। इस्राएल डा ठिटा नेल्ल आन कली साइक्तीमी।

३२ मो पा यो मेकोपुकीम पाप पस डा पस बाक्तेक्म। मेको आ छक लाक्चा डा गेय तशा यो, मेकोपुकीमी थमा मसुदेम। ३३ मोपतीके परमप्रभुमी मेको आन नाक्त मोशा नु मेको आन बर्सपुकी श्येत जपाइशशा साम्तु। गन्ती १४:२२-२३; १कोरिन्थी १०:५ ३४ परमप्रभुमी मेको आन दातेमी का निक्शी सदानु, मेको लीशोपुकी मेको गे लेशशा, मेको कली थाम्पा माल्तेक्म। ३५ मिनु मेकोपुकीमी परमप्रभु आन सेरथे फुल्लु नु नेल्ल क्येडा ठेयब परमप्रभु मेको आन कली श्येत रे प्रोंइब बाक्माक्त, दे तुइक्ताक्म। ३६ तन्न मेकोपुकीमी आन शोव्रम ला लोव्र पाप्तेक्म। मेकोपुकीमी जोल ला

पाम्तेक्म। 37 आन थुंमी थमा पा मेको आ नोले मखोदेम। आ पशो कबल मटीमे। 38 मो हना यो परमप्रभु शिशी पाइब बाक्तीके मेको आन ठीक मपशो माफ गेम्तीमी। मेको आन कली मसद। खेयप खेयप मेको आन पबर्म आ गाइशो तेवतु। मेकोमी आ गाइशो नेल्ल मगुंडद। 39 परमप्रभुमी “मेको मुर ला बाक्नीम। फश खोदेशो पा लाक्नीम। मिनु लेशशा मजाक्नीम” दे मिम्ताक्व। भजन संग्रह १०३:१४-१६ 40 मेकोपुकीमी गोरशो रागीम शुश खेयप परमप्रभु कली मटीमे। परमप्रभु कली मुर मबाक्तीकेमी श्येत गेम्तेक्म। 41 मेकोपुकीमी लेना लेन आ थुं नाक्ताक्म। मिनु इस्राएली आन का ला बाक्शो परमप्रभु कली गाइक्पाइक्तेक्म। 42 मेकोपुकीमी आ सक्ति ममिम्तेम। मेको आन कली आन जोरी सत्रु रे प्रोंइशो यो ममिम्तेम। 43 परमप्रभुमी इजीप्तमी आ चिन्ड कोंइशा, सोआन रागीमी छक लाक्चा डा गेय पची ना 44 खोला डा ब्वाक्कु हुश सेल्शो बाक्त। मिनु इजीप्तीपुकीमी मेको ब्वाक्कु तूने मचबेम। प्रस्थान ७:१९-२० 45 मेकोमी मेको आन बाक्तीकेमी चुरमु बोपाइशो बाक्त। मिनु मेकोपुकीमी मेको आन कली क्राइक्तेक्म। मिनु परमप्रभुमी क्रुकक्रु गूपाइक्तु। मेकोपुकीमी मेको आन कली खतम सेल्तेक्म। प्रस्थान ८:२०; प्रस्थान ८:२ 46 परमप्रभुमी मेको आन बाली नाली माले आन कली गेम्तीमी। मेको आन शुश गेय पा वापाइशो बाली नाली सल्हापुकीम नेक्पाइक्तु। प्रस्थान १०:१३ 47 मेकोमी मेको आन अङ्गुर बोट मुप्सीमी नु आन फोवशी फुरशेम खतम पोक्पाइक्तु। प्रस्थान ९:२५ 48 मेकोमी मेको आन बी ब्यफ मुप्सीम नु क्यारश भेडा आन कली चिलामी आप्तु। 49 मेको आन पबर्म गाइशशा, चुरशा, श्येत गोपाइक्चा कली खतम सेल्ब स्वर्ग डा गेय पाइब आन कली सोइक्ताक्व। 50 मेकोमी आ गाइक्तीक कली लां का सेल्लु। मिनु मेको आन कली बेक्चा रे मप्रोन। मेको आन कली मुर बेक्तीक रोइ पपाइक्तीमी। प्रस्थान ९:८-१२ 51 मेकोमी इजीप्त डा मुर, हाम आ चच युइ आन डोंइती जरमेशो तौ नेल्ल साइक्तु। प्रस्थान १२:२९ 52 मिनु नोले आ मुर आन कली भेडा खोदेशो पा गुंडताक्व। मिनु मेको आन कली भेडा आन हुल खोदेशो पा गोरशो रागीमी लां कोंइशा गाक्पाइक्तीमी। भजन संग्रह ७७:२१ 53 मेकोमी मेको आन कली मारेइ श्येत मदुम्पाइक्थु गाक्पाइक्तीमी। मोपतीके मेकोपुकी काइ महिम। आन जोरी सत्रु समुन्द्रम गुम्शा बेक्तेक्म। प्रस्थान १४:१९, २२, २७ 54 मोपा परमप्रभुमी आ मुर आन कली आ रागीमी चाक्तु। आ सक्तिमी ग्राशो डांडाम चाक्तु। प्रस्थान १५:१७ 55 रागी रागी डा मुर आन कली मेको आन डोंइती रे खेरतु। मिनु इस्राएली आन कली मेको रागी योक्शा, गेम्तीमी। मिनु इस्राएल आ थर थर डा मुर आन कली आन ताम्बुमी बाक्चा गेम्तीमी।

56 तन्न मेकोपुकीमी परमप्रभु आ थुं थाम्तेक्म। नेल्ल क्येडा ठेयब परमप्रभु कली मटीम। मिनु मेको आ अरेशो लोव्र मबिस्सम। 57 मेको आन किकी पिपी खोदेशो पा नोले शोंइसाक्म। मिनु मेकोपुकी ब्रोइक्चशो लिब्रा खोदेशो पा दूली पाइब दुम्तेक्म। 58 मेकोपुकीमी आन मूर्ति वोइशो डांडामी परमप्रभु कली गाइक्पाइक्तेक्म। मेको आन सेल्शो मूर्तिमी मेको कली गेहे पपाइक्तेक्म। ब्यवस्था ३२:२१ 59 परमप्रभुमी मेको नेंशा, थाम्पा गाइक्ताक्व। मिनु इस्राएली आन कली थमा पा वारच मपाइक्थु प्रोंइतीमी। 60 मेकोमी शिलो डा आ बाक्तीके प्रोंइतु। मेको ताम्बु मुर आन बाक्तीके आन दातेमी वोइशो बाक्त। १सामुएल १:३; १सामुएल ४:११; येरमीया ७:१२ 61 मेकोमी आ कबल पशो सन्दोस आ जोरी सत्रु आन गुडमी गेपु। मोपा सक्ति पाइशो कली रोइक्पाइक्तु। भजन संग्रह १३२:८; १सामुएल ४:२१ 62 मेकोमी आ मुर आन कली तरवारम साइक्पाइक्चा कली गेपु। मिनु आ योव्रशो मुर आन कली तशा, थाम्पा गाइक्ताक्व। 63 मिनु मीम मेको आन ठिटा वोंइश मुर आन कली दाक्तीमी। मिनु आन तमी आन कली ग्युबे पाइक्चा मतामे। 64 मेको आ चढेबपुकी तरवारम क्योरचा पुंडसाक्म। मिनु मेको आन मीश रोंका पने मचबेम। १सामुएल ४:१७-२० 65 मिनु नोले परमप्रभु निन्द्रा रे सेंसीशो खोदेशो पा सेंसाक्व। लडाइ पाइब मुर अङ्गुर शांबु तूशा नोले रिम्शो दुम्शो खोदेशो पा, ठेयब सेंदाम ग्रीत। 66 मिनु मेकोमी आ जोरी सत्रु आन कली एर ओंथ ब्रपाइक्तु। मेकोमी मेको आन कली गेना हना यो मुने दोक्पाइक्तु। १सामुएल ५:६-१२

67 मेकोमी योसेफ आ थर डा मुर आन कली प्रोंइतु। एफ्राइम आ खिं डा मुर आन कली यो मयोव्रड। 68 तन्न मेकोमी यहूदा आ खिं डा मुर आन कली योव्रतु। मेकोमी आ दाक्शो सियोन डांडा कली यो योव्रतु। २इतिहास ६:६ 69 मेकोमी आ बाक्तीके लाइक्पाइशशा, इर स्वर्ग खोदेशो सेल्लु। आ गेना हना यो कली सेल्शो रागी खोदेशो पा सेल्लु। 70 मेकोमी आ गेय पाइब दाऊद कली भेडा गोठ रे योव्रतु। 71 परमप्रभुमी दाऊद कली गिक्शो भेडा आन कली योव्रतीक गेय रे गुंडताक्व। मेकोमी दाऊद कली याकूब आ थर डा, परमप्रभु आ मुर आन कली कोव्रचा कली गुंडताक्व। मेको इस्राएल डा मुर परमप्रभु आ शोप बाक्नीम। १सामुएल १६:११-१२; २सामुएल ७:८ 72 दाऊदमी आ थुं डा रिम्शो पतीकेमी मेको आन कली कोव्रतीमी। मेकोमी जोक्ब तुइक्ब दुम्शा, मेको आन कली लां कोंइताक्मी।

79

यरूसलेम आ पर्वम रोंका पशो
आसाफ आ कुम्सो।

1 परमप्रभु, रागी रागी डा मुरपुकी इन योव्रशो रागीम जाक्तेक्म। मेकोपुकीमी इन खिं कली प्रांग्रा दिशो सेल्लेक्म। यरूसलेम कली प्रेशा, फुल्लु देल्लो खोदेशो सेल्लेक्म। 2 मेकोपुकीमी इन गेय पाइब आन बेक्शो रां चिक्ब आन कली ब्वचा गेम्तेक्म। मिनु इन योव्रशो मुर आन श्ये ब्वाकी डा जन्तु आन कली ब्वचा गेम्तेक्म। 3 मेकोपुकीमी मेको आन हुश ब्वाक्कु खोदेशो पा यरूसलेम आ एर ओथ नेल्ल शाइक्पाइक्तेक्म। मिनु मेको आन कली थिम्ब सुइ मबाक्म। 4 आंइ नेक्था बाक्ब मुरपुकीमी आंइ कली शुक्शी पाइक्नीम। मिनु आंइ एर ओथ डा मुरपुकीमी आंइ कली रिशशा तोक्शा लोव्र पाइनीम। भजन संग्रह ४४:१४

5 परमप्रभु यावे, गे गेना सम्म गाइक्स डा गाइक्स बाक्नीनी? इन गेहे पतीके गेना सम्म मी खोदेशो पा ब्रस डा ब्रस बाक्बा? 6 इन कली मतुइक्ब रागी रागी डा मुर नु इन नें मथीब राज्य आन तार इन गाइक्चा मोतीन। येरमीया १०:२५ 7 मारदे हना मेकोपुकीमी याक्ब आ थर डा मुर आन कली खतम सेल्लो दाक्तेक्म। मिनु आन बाक्तीक खिं प्रेशा खतम सेल्लेक्म।

8 आंइ किकी पिपी आन पशो पाप आ क्येक्क आंइ कली मलेत्तीन। आंइ कली रीब पा इन शिशी गेकी। मारदे हना आंइ थुं लुक्च लशो बाक्ब। 9 आंइ कली श्येत रे प्रोंइब परमप्रभु, इन नें डा सक्तिमी आंइ कली वारच पने। इन नें आ पर्वम आंइ कली प्रोनीन। मिनु आंइ पाप क्याम्दीने। 10 मारदे रागी रागी डा मुरपुकीमी “मेको आन परमप्रभु ते बाक्म?” दे हिल्लो पाइनीमी। रागी रागी डा मुरपुकीमी इन मुर आन कली आन डोंइती साइशो आ क्येक्क लेप्ब, दे तुइक्तमेक्ल। भजन संग्रह ११५:२; योएल २:१७ 11 चोक्चा पुंइसीशो आन हुकयी पशो इन डोंइती जाक्ल। साइक्चा पुंइसीब दुम्शो आन कली इन सक्तिमी प्रोनीन। 12 परमप्रभु आ पर्वम शुक्शी पा मुरपुकीमी मुने तोक्चा माल्लो बाक्नीमी। मेको मो पशो डा आंइ नेक्था डा मुर आन कली ७ खेयप क्येक्क लेत्तीन। भजन संग्रह १३७:७-९ 13 गो इन मुर, इन योव्रशो भेडा खोदेशो नकी। गो इन कली “गे रिम्शो पाइब बाक्नीनी” दे आंइ चच युइ आन पाला सम्म ठेयब सेल्लनीकी। मिनु इन पर्वम लोव्र पाइनीकी।

80

परमप्रभु, आंइ कली लेंशा सेल्की

कुम्सो पपाइक्ब कली लिली फू आ लायो डा कबल पतीक, आसाफ आ कुम्सो।

1 इस्राएल डा गोठला, आंइ लोव्र नेनीन। गे योसेफ कली भेडा आन हुल खोदेशो पा खुल्लतीनी। गे करूब आन तार ठेयब नित्तीकेमी नित्तीनी। भजन संग्रह १८:११; २सामुएल ६:२ 2 एफ्राइम, बेन्यामीन नु मनस्से आन डोंइती इन छेडछेड कोइदीन। मिनु इन सक्ति कोइशा, आंइ कली प्रोंइथ जाक्कीन।

3 परमप्रभु, आंइ कली लेंशा सेल्की। इन कुल डा छेडछेड आंइ तार वोतीन। मिनु गो ब्रोंइने चाप्कल।

4 परमप्रभु यावे, मुर नेल्ल आन परमप्रभु, इन मुर आन पुंइशो आ पर्वम गेना सम्म गाइक्नीनी? 5 गे मेको आन कली श्येत डा शोब्ले जपाइक्तीनी। मिनु आन प्रेक्कु तूचा ब्वाक्कु खोदेशो पा शुश दुम्त। 6 गे आंइ कली आंइ नेक्था डा मुर आन कली जीब सेल्लो बाक्तीनी। मिनु आंइ जोरी सत्रुमी आंइ कली शुक्शी पाइब सेल्लतीनी।

7 मुर नेल्ल आन परमप्रभु, आंइ कली लेंशा सेल्की। इन कुल डा छेडछेड आंइ तार वोतीन। मिनु गो ब्रोंइने चाप्कल।

8 गे इजीप्त रे अडगुर बोट का चाक्तीनी। मिनु रागी रागी डा मुर आन कली खेरशा, मेको खुम्तीनी। यसैया ५:१-७; येरमीया २:२१ 9 गे मेकेर मेको कली खुम्तीक रू का सेल्लतीनी। मिनु मेको शाक्श थोक्शा, रागी नेल्ल ब्रीत। 10 पहाड नेल्ल मेको आ वांकुम सुम्साक्म। मिनु मेको आ लाइशो परमप्रभु आ राशीम रवा नेल्ल सुम्साक्म। 11 मेको आ राशी समुन्द्र सम्म जाक्दीत्तेक्म। मिनु मेको आ कोच्चा चहिं ठेयब खोला सम्म जाक्दीत्तेक्म। होसे १०:१ 12 मारदे गे मेको आन गारो प्रेन्नी? मेकेर गाक्ब नेल्लेमी मेको आ फल सेक्नीम। 13 ब्वाकी डा पोव्रपुकीमी मेको कली खतम पोक्नीम। मिनु ब्वाकी डा जन्तुपुकी मेकेर जोइनीम।

14 मुर नेल्ल आन परमप्रभु, आंइ कली कोव्रडीन। सरीड रे उइ कोव्रडीन। मेको अडगुर बोट कली कोव्रडीन। होसे ११:१ 15 इन सक्तिमी खुम्शो बोट कली कोव्रडीन। गे इन तौ इन कली कोल्पाइक्तीनी। 16 आंइ जोरी सत्रुमी मेको कली तुल्ला, मीम चोम्तेक्म। मेकोपुकी इन हुइशोमी खतम दुम्मल। इजीकीएल १५:२-४ 17 इन ग्युरा गे बाक्ब मुर

आ तारी इन गुड लील। मेको कली थुलशा कोल्पाइक्तीनी। 18 मिनु गो इन डोंइती रे गेनायो नोले मशोंइसीनीकी। आंइ कली ब्रोंइचा गेकी। मिनु गो इन नें थिशा, प्रार्थना पाइनीकी। 19 परमप्रभु यावे, मुर नेल्ल आन परमप्रभु, आंइ कली लेंशा सेल्की। इन कुल डा छेडछेड आंइ तार वोतीन। मिनु गो ब्रोंइनीकी।

81

इसाएलीपुकीमी मटिशो

कुम्सो पपाइक्ब कली गित्तीथ ताप्शा पतीके, आसाफ आ कुम्सो।

1 आंइ कली सक्ति गेब परमप्रभु कली कुम्सो पने। ग्येरशा सोम्शा ठेयब सेंदा पा याकूब आ परमप्रभु कली कुम्सो पने। 2 खैजडी ताप्शा, कुम्सो पने। रिम्शो बीना नु तार पाइश्शो ठेयब ताप्तीक ताप्शा कुम्सो का पने। 3 औंसी, पूर्ने नु इं ठेयब चाड नाक्त तुराही तापीन। लेवी २३:२४ 4 मारदे हना मोदेशो चाड मानेचा इस्राएल डा गेना हना यो पतीके बाक्ब। मेको याकूब आ परमप्रभु आ अरेशो बाक्ब। 5 मेको लोत्र परमप्रभुमी इजीप्त रे गुंइशो योसेफ आ मुर आन कली अरेशो लोत्र बाक्ब। गो मतुइश्शो सेंदा का नेंतक। 6 मेको सेंदामी “गो इन बला रे भारी शोल्ता। गे भारी कुरचा ममाल्नीनी। प्रस्थान ६:६; यसैया ९:३ 7 गे श्येत जनीनु, आं कली ब्रेत्ताक्नी। मिनु गो इन कली प्रोंइतन्नी। गो इन कली बुंबु रे लोत्र लेत्ताक्नी। गो मेरीबा डा ब्वाक्कुमी इन कली थुं थाम्शा कोव्रतन्नी। ठेयब सेंदा पा। प्रस्थान १९:१६; प्रस्थान १७:२-७; गन्ती २०:१३ 8 आं मुरपुकी, आं अरेशो नेनीन। इस्राएलीपुकी, गे आं लोत्र नेंशो ननी हना, रिम्शो दुम वा। 9 इन दातेमी देवी देवता आन कली बाक्चा मगेने। अर्को रागी डा देवी देवता आन डोंइती बाप्शा, सेउ मपने। प्रस्थान २०:२-३ 10 गो परमप्रभु यावे, इन परमप्रभु नड। गो इन कली इजीप्त रे गुंइशा एक चाक्तन्नी। इन शोत्र पाक्कीन, मिनु गो प्रिनन्नी। 11 तन्न आं मुरपुकीमी आं लोत्र मनेनेम। इस्राएल आ मुरपुकीम आं कली मदाक्थु, आं देशो मबिस्सम। 12 मोपतीके गो ‘आन दाक्स पामेक्ल’ दे आन दला दाक्स पचा गेतामी। 13 आं मुरपुकीमी आं लोत्र नेंशो नम हना, इस्राएल डा मुर आं लांम गाक्शो नम हना, 14 गो मेको आन कली रीब पा आन जोरी सत्रु रे प्रोनुमी वा। मेको आन जोरी सत्रु आन कली खतम पोक्गुमी वा। 15 परमप्रभु यावे कली काइ मदाक्बपुकी हिंशा आं डोंइती बांबा पा गाक्म वा। मिनु मोदेशो गेना हना यो दुम वा। 16 मिनु गो इस्राएल डा मुर, इन कली नेल्ल क्येडा रिम्शो चेरब जचा गेन्नी वा। मिनु रोका खुदोमी रूपाइक्नी वा” दे परमप्रभुमी देंत। ब्यवस्था ३२:१३

82

हुकुम पाइब आन कली हुइश्शो

आसाफ आ कुम्सो।

1 परमप्रभु आ मुर आन गुम्तीकेमी बाक्शो बाक्ब। मेकोमी आ मुर आन दातेमी निसाफ पाइब। १राजा २२:१९ 2 मेकोमी “गे गेना सम्म ठीक निसाफ मपाइनीनी? गे गेना सम्म परमप्रभु यावे आ अरेशो मटीब आन कुल कोव्रनीनी? ठेयब सेंदा पा। ब्यवस्था १:१७

3 गे मचाप्ब नु रोम रोइक्च आन कली ठीक पा निसाफ पने। पुडग नु दिप्चा पुंइसीशो आन कली ठीक निसाफ पने। यसैया १:१७ 4 मचाप्ब नु श्येत जाइब आन कली, परमप्रभु यावे आ अरेशो मटीब आन गुइ रे प्रोनीन।

5 हुकुम पाइबपुकीमी मारेइ मजोक्नीम, मतुइक्नीम। मेकोपुकी छिडछिडम गाक्शो बाक्नीम। रागी आ जग नेल्ल हिम्सीशो बाक्नीम। 6 गो इन पर्वम ‘गे अधिकार पाइश्शो बाक्नीनी। गे नेल्ल क्येडा ठेयब आ तौ बाक्नीनी। यूहन्ना १०:३४ 7 मो हना यो गे मुर खोदेशो पा बेक्नीनी। अरु मरिम्शो पा हुकुम पाइब खोदेशो पा खतम दुम्नीनी’ ” दे परमप्रभुम देंत। उत्पत्ती १८:२५ 8 परमप्रभु बोक्कीन। मिनु रागी कली निसाफ पने। मारदे हना रागी नेल्ल इन के बाक्नीम।

83

लडाइ पची ना पुंइशो लोत्र

आसाफ आ कुम्सो।

1 “परमप्रभु, गे सिक्सी पा मबाक्कीन। मारेइ पने मचाप्ब खोदेशो मदुमीन। 2 इन जोरी सत्रु शुश ग्याल्शो बाक्नीमी। कोव्रडीन, मेकोपुकी बारशा, ग्राचा चिक्शो बाक्नीम। 3 मेकोपुकीमी इन मुर आन कली दोपा साइक्चा, दे लोत्र गारपाइक्नीम। इन कोव्रशो मुर आन कली मरिम्शो पचा कली खुइश्शा लोत्र गारपाइक्नीम। भजन संग्रह ३५:२०

4 मेकोपुकीमी 'जाक्कीन, गो मेको आन रागी मलीचा डा पा क्यामदय। मिनु इस्राएल आ नें मलील' देंनीम। 5 मेकोपुकी थुं का दुम्शा, इन कली मरिम्शो पचा कली लोत्र गारपाइक्नीम। 6 मेको एदोम, इश्माएल, मोआब नु हाग्री आ मुरपुकी, 7 गेबाल, अम्मोन, अमालेक, पलिस्ती नु टायर डा मुरपुकी बाक्नीम। 8 अस्सुर यो मेकोपुकी नु गारशो बाक्ब। मेको नेल्ल लोत आ खिं डा सक्ति पाइश्शो मुर बाक्नीम। ठेयब सेंदा पा।

9 मिदयानी आन कली पाइश्शो खोदेशो पा मेको आन कली पतीन। सीसेरा नु याबीन कली किशोन खोलाम पाइश्शो खोदेशो पतीन। न्यायाधीस ७:१४; यसैया ९:३; न्यायाधीस ४:२ 10 मेकोपुकी एन-डोर सहरम खतम दुम्शा, रू कली मोत्रल खोदेशो दुम्तेक्म। 11 गे मेको आन कली नु मेको आन ठेयब मुर आन कली ओरेब नु जेयब आस कली खोदेशो सेलीन। मेको आन सासन पाइब नेल्ल कली जेबाह नु साल्मुन्ना खोदेशो सेलीन। न्यायाधीस ७:२५; न्यायाधीस ८:२१ 12 मेकोपुकीमी 'परमप्रभु आ रिम्शो रागी इं के सेल्य' देंमुम्तेक्म।

13 आं परमप्रभु, मेको आन कली फशेम योल्शो फुरक नु फशेम बेरपाइश्शो भूस खोदेशो सेलीन। 14 दोपा मीम ब्वाकी नेक्बा नु आ होशेमी पहाड जेप्बा, 15 मोपा इन फश गिवारम मेको आन कली खेदा पने। इन फश गिवारम मेको आन कली हिंच कोइदीन। 16 मेको आन कली मुने तोक्कीन। मोपा मुरपुकीमी परमप्रभु यावे, इन कली माल्मेक्ल। 17 मेकोपुकी गेना हना यो मुने दोक्मल। आन थुं लुकच लमल। मेकोपुकी मुने दोक्शा, खतम दुम्मल। 18 मेकोपुकीमी इन नें परमप्रभु यावे बाक्ब, दे तुइक्तमेक्ल। गे रागी डा नेल्ल क्येडा ठेयब बाक्नीनी” दे परमप्रभु कली ठेयब सेल्ला। होसे १२:१६

84

परमप्रभु आ खिं कली दाक्शो

कुम्सो पपाइक्ब कली गित्तीथ ताप्शा पतीके कोराह आ तौ आन कुम्सो। १इतिहास २६:१

1 “मुर नेल्ल आन परमप्रभु यावे, इन बाक्तीके गिश रिम्शो बाक्ब। 2 गो आं थुं नेल्लेमी परमप्रभु यावे आ खिं डा लाङ्गा लचा दाक्नुड। गो ग्येरशा सोम्शा ब्रोइशा बाक्ब परमप्रभु कली कुम्सो पाइनुड। भजन संग्रह ४२:३

3 मिनु चिक्बपुकीमी यो इन चढेतीके आ नेक्थामी ग्योत्र सेल्शा, आन चाइक्ब पुक्नीम। गे, मुर नेल्ल आन परमप्रभु यावे, आं पिप नु आं परमप्रभु बाक्नीनी। 4 इन खिंम बाक्चा ताइब आसीक तशो बाक्नीम। मेकोपुकीमी गेना हना यो इन कली कुम्सो पा ठेयब सेल्नीम। ठेयब सेंदा पा। भजन संग्रह ६५:५ 5 गे इन सक्ति ताइब नेल्ल ग्येरसीशो बाक्नीम। मेको आन थुंमी सियोन कली मिम्ना मिम्न बाक्नीम। 6 मेकोपुकी बाका माइश्शो गोरशो रागी डा दिंम रे पा लमानु, मेकोपुकीमी मेकेर ब्वाक्कु बुक्शो रागी सेल्नीम। डोंइती रेड यिशा, ब्वाक्कु देम्ब। 7 मेकोपुकी शुश बोल्यो दुम्नीम। मेकोपुकी परमप्रभु आ डोंइती सियोनम जाक्नीम। 8 परमप्रभु यावे, मुर नेल्ल आन परमप्रभु, आं पुंइशो लोत्र नेनीन। याक्ब आ परमप्रभु आं लोत्र नेनीन! ठेयब सेंदा पा। 9 परमप्रभु, आंइ कली कोत्रब कली कोत्रडीन। इन आंइ कली गेशो पिप कली कोत्रडीन।

10 मिनु हजार का नाक्त ते ते बाक्चा क्येडा काबु नाक्त इन खिंम बाक्चा रिम्शो बाक्ब। इन अरेशो मटीब आन ताम्बुम बाक्चा क्येडा आं परमप्रभु आ खिं डा लाप्चो खाल पाइब दुम्चा दाक्नुड। भजन संग्रह २७:४ 11 मारदे हना परमप्रभु, परमप्रभु यावे नां नु तेक्तीक बाक्ब। परमप्रभु यावेम ठेयब दुम्तीक नु मान गेब। मेकोमी ठीक लां खोइक्ब आन कली रिम्शो पाइब। 12 मुर नेल्ल आन परमप्रभु यावे, इन कली जिम्मा गेंसीशो थमा सुइक्बपुकी ग्येरसीशो बाक्नीम” देंती।

85

थुं नाइक्तीक लोत्र

कुम्सो पपाइक्ब कली कोराह आ तौ आन कुम्सो।

1 परमप्रभु यावे, गे इन रागी कली शिशी पाइतीनी। याक्ब आ रिम्शो दुम्तीके लेंशा सेल्तीनी। 2 गे इन मुर आन ठीक मपशो माफ गेतीनी। मेको आन पाप नेल्ल सुम्तीनी। ठेयब सेंदा पा। 3 गे इन गाइक्चा नेल्ल साम्तीनी। मिनु चुरचा प्रोंइतीनी।

4 आंइ कली पाप रे प्रोंइब परमप्रभु, आंइ कली लेंशा डोंइती डा खोदेशो सेल्की। मिनु इन आंइ कली मदाक्तीके समीन। 5 मार, गे गेना हना यो गोपुकी नु गाइक्स डा गाइक्स बाक्नीनी? गे गोपुकी नु आंइ चच युइ आन पाला सम्म

गाइक्स डा गाइक्स बाक्नीनी? 6 मार, गे इन मुर आंइ कली गे नु ग्येरसीचा कली लेंशा, मबोकपाइक्नीनी? 7 परमप्रभु यावे, गे इन गेनायो मनुपुब दाक्तीके कोइदीकी। मिनु आंइ कली श्येत रे प्रोंइकी।

8 परमप्रभु, परमप्रभु यावेमी मार देंबा, आं कली नेंपतीन। मेकोमी आ मुर, आ लोव्र टीब नु आंम कली जिम्मा गेंसीशो मुरपुकी नु थुं नाइक्तीक लोव्र पाइब। मेको आन कली लेंशा दूली गाक्चा मगेने। येरमीया २९:११; मीका ५:४ 9 परमप्रभु कली मान पा हिंब मुर ब्रोंइचा ताइनीम। मेको आ छेडछेड इं रागीम बाक्ल।

10 गेना हना यो दाक्तीक नु थमा पा दाक्शा मप्रोंइतीक गारनीस। ठीक पतीक नु थुं नाइक्तीक पुक्पु पमुइनीस। 11 थमा पा दाक्शा मप्रोंइतीके खप रे वाशो खोदेशो पा गूब। मिनु ठीक पतीकेमी सरीड रे कोव्रब। 12 परमप्रभु यावेमी मार रिम्शो बाक्मे, मेको गेब। मिनु आंइ रागीम बाली नाली ग्रेल्पाइक्ब। 13 ठीक पतीकेमी मेको आ डोंइती गाक्शा, आन लां सेल्ब।

86

श्येत जशोनु, पुंइशो लोव्र

दाऊदमी परमप्रभु कली पुंइशो लोव्र।

1 परमप्रभु यावे, आं पुंइशो लोव्र नेनीन। मिनु लोव्र लेत्तीनी। मारदे हना गो पुडग नु श्येत जशो बाक्नुड। 2 आं कली खाल पा साइक्चा मगेयीनी। मारदे हना गो इन कली थमा सुइश्शा, इन गेय पाइब नड। गे आं परमप्रभु बाक्नीनी। 3 परमप्रभु, आं कली शिशी पाइय्यीनी। मारदे हना गो नाक्त रे इन कली ब्रेश्शो बाक्नुड। 4 इन गेय पाइब आ थुं ग्येरपतीन। मारदे हना गो आं थुं परमप्रभु, इन कली जिम्मा गेनुड। 5 परमप्रभु, गे रिम्शो पाइब नु माफ गेब बाक्नीनी। इन कली पुंइब नेल्ल आन कली गेना हना यो दाक्नीनी। 6 परमप्रभु यावे आं पुंइशो लोव्र नेनीने। मिनु शिशी पाइक्चा कली आं पुंइशो नेनीन। 7 गो श्येत जडानु इन कली पुंइनुड। मिनु गे आं लोव्र लेत्तीनी। भजन संग्रह ५०:१५

8 परमप्रभु, देवी देवता आन दातेमी इन खोदेशो अरु तेकोइ मबाक्नीम। इन पशो गेय खोदेशो पा अरु सुइम मपाइनीम। भजन संग्रह १३५:५; प्रस्थान १५:११ 9 परमप्रभु, इन सेल्शो रागी रागी डा मुर इन डोंइती बाप्शा, इन नें थिशा, इन कली ठेयब सेल्चा माल्नीम। 10 मारदे हना गे ठेयब बाक्नीनी। मिनु छक लाक्चा डा गेय पाइनीनी। गे ला परमप्रभु बाक्नीनी। 11 परमप्रभु यावे, आं कली इन लां खोइक्चा शेंदीनी। मिनु गो इन थमा पतीकेमी गाक्नुड। आं कली थुं का पा इन कली मान पा हिंब सेल्यीनी। यूहन्ना १४:६ 12 परमप्रभु यावे, आं परमप्रभु, गो आं थुं नेल्लेमी “गे रिम्शो पाइब बाक्नीनी” देंनुड। मिनु गो गेना हना यो इन नें ठेयब सेल्लुड। 13 मारदे हना इन गेना हना यो आं कली दाक्तीके ठेयब बाक्ब। गे आं कली बेक्शो मुर आन नेल्ल क्येडा आगा डा बाक्तीके रे प्रोंइतीनी। 14 परमप्रभु, शिशी मपाइब मुरपुकीमी आं कली खेदा पतीमी। मरिम्शो पाइब आन हुलमी साइक्चा माल्तीमी। मेकोपुकीमी इन कली ममिम्नीम। 15 तन्न परमप्रभु, गे दाक्ब नु शिशी पाइब परमप्रभु बाक्नीनी। रीब पा मगाइक्ब, गेना हना यो दाक्शा मप्रोंइब बाक्नीनी। भजन संग्रह १०३:८; प्रस्थान ३४:६ 16 आं कली कोव्रशा, शिशी पाइय्यीनी। इन गेय पाइब कली इन सक्ति गेने। इन वाइलीम आ तौ कली श्येत रे प्रोनीन। 17 गे इन दाक्तीके चिन्ड का गेयीनी। मिनु आं कली काइ मदाक्बपुकी मेको तशा, मुने दोक्मल। मारदे हना परमप्रभु यावे, गे आं कली वारच पाइतीनी। मिनु लेम्ताक्यीनी।

87

मुर आन नें आ किताबम ब्रेक्शो

कोराह आ तौ आन कुम्सो।

1 परमप्रभुम आ डांडामी आ सहर सेल्लु। 2 परमप्रभु यावेमी याक्ब आ मुर आन बाक्तीके क्येडा सियोन सहर डा गारो डा लाप्चो दाक्ब। 3 परमप्रभुम आ सहर आ पर्वम रिम्शो लोव्र पशो बाक्ब। ठेयब सेंदा पा।

4 राहाब नु बेबीलोनम आं कली तुइक्नीस। पलिस्ती आन रागी, टायर नु एथीयोपीया यो मेको नु बाक्नीम। मिनु मेको आन पर्वम “एको नु मेको मेकेर जरमेशो नम” देंनीम। इजीप्त रागी कली राहाब यो देंनीम। भजन संग्रह ६७:४-५ 5 सियोन आ पर्वम चहिं “मुर नेल्ल मेकेर रेन जरमेशो बाक्नीम। मारदे हना नेल्ल क्येडा ठेयबमी मेको कली रिम्शो सेल्शा कोव्रब” देंनीम। 6 परमप्रभु यावेमी जात जात डा मुर आन नें का का पा आ किताबमी ब्रेक्ब। मिनु “एको नु मेको सियोनमी जरमेशो बाक्ब” दे ब्रेक्ब। ठेयब सेंदा पा। 7 कुम्सो पाइब नु सिल पाइबपुकीमी “आंइ आसीक नेल्ल सियोनम बाक्ब” दे कुम्सो पाइनीम। भजन संग्रह ३६:१०

88

“वारच पाइय्यीनी” दे पुंइशो

कुम्सो पपाइक्ब कली महलेथ आ कुम्सो। कोराह आ तौ आन कुम्सो। एज्राह आ मुर हेमान आ सेल्लशो शेंतीक कुम्सो।

१ इतिहास ६:१८ 1 परमप्रभु यावे, आं परमप्रभु, गे आं कली श्येत रे प्रोंइब बाक्नीनी। नाक्दो नाक्त गो इन डोंइती पुंइशो बाक्नुड। 2 आं पुंइशो लोत्र इन डोंइती जाक्ल। आं लोत्र नेनीन।

3 मारदे हना आं थुं श्येतम ब्रीशो बाक्ब। मिनु गो बेक्चा चिक्शो बाक्नुड। 4 गो बेक्शा लाइब मुर नु हिक्सीशो दुम्ती। गो सक्ति मपाइशो मुर खोदेशो दुम्ती। 5 गो बेक्शो मुरपुकी नु तिल्ला पुंइसीशो बाक्नुड। तुरसुम बाक्शो साइक्चा पुंइसीशो मुर खोदेशो दुम्ती। मोपा इन क्येडा डोन बाक्शो इन मफ्रुक्शो मुर खोदेशो दुम्ती। 6 गे आं कली बेक्शो मुर आन बाक्तीके छिडछिड डा नेल्ल क्येडा आगा डा बाक्तीकेमी वोइक्तीनी। 7 इन गाइक्तीकेमी आं कली दिप्शो बाक्ब। मिनु इन छालम आं कली सुम्तीनी। ठेयब सेंदा पा।

8 गे आं वारच आन कली गो नु गुम्चा हिंपाइक्तीनी। गो आं वारच आन कली हिंचा डा दुम्ती। गो चोक्सीशो, श्येत रे ब्रोंइशा, प्रोक्ने मचाप्नुड। भजन संग्रह ३८:१२ 9 सुर्ता पतीके आं मिक्च ब्रा ब्रा दुम्ती। परमप्रभु यावे, गो नाक्त किंत किंत इन कली पुंइना पुंइन बाक्नुड। मिनु इन नेमी आं गुइ पोक्नुड। 10 मार, गे बेक्शो मुर आन कली छक लाक्चा डा गेय पाइनीनी? मार, मेको बेक्शो मुरपुकीम बोक्शा, इन कली ठेयब सेल्नीमी? ठेयब सेंदा पा। भजन संग्रह ६:६; यसैया ३८:१८

11 मार, गे इन गेना हना यो दाक्तीके आ पर्वम बेक्शो मुर आन बाक्तीकेमी लोत्र पाइनीमी? इन दाक्शा मप्रोंइतीके आ पर्वम तुरसुम शेंनीमी? 12 मार, इन छक लाक्चा डा गेय छिडछिडमी तुइक्नीमी? इन श्येत रे प्रोंइतीके बेक्शो मुर आन दातेमी तुइक्नीमी डा?

13 परमप्रभु यावे, गो चहिं सुनी कना इन कली लोत्र पाइनुड। 14 परमप्रभु यावे, गे आं कली मारदे प्रोंइयीनी? मारदे इन कुल खुइक्तीनी? 15 गो ठिटा रेन श्येत जशा, बेक्चा चिक्शो बाक्नुड। इन हिंच कोंइशोमी गो श्येत जशो बाक्नुड। मिनु आं थुं लुक्च लशो बाक्ब। 16 गे आं पर्वम गाइक्ताक्नी। इन हिंच कोंइशोमी आं कली खतम पोक्शो बाक्ब। 17 मेकोपुकीम नाक्त रे ब्वाक्कु खोदेशो पा आं एर ओंथ नेल्ल हिरशो बाक्नीम। मेकोपुकीम आं कली पुम्शा हिंच कोंइताक्यीमी। 18 गे आं कली दाक्ब नु आं वारच आन कली आं कली तशा हिंपाइक्तीनी। मिनु छिडछिड आं नेक्था डा वारच दुम्शो बाक्ब।

89

परमप्रभुम आ दाक्तीके मप्रोंइब

एज्राह आ मुर एथान आ कुम्सो।

1 परमप्रभु यावे, गो इन गेना हना यो दाक्तीक आ पर्वम कुम्सो पाइनुड। गो नेल्ल पाला डा मुर आन कली इन दाक्तीकेम गेनायो मप्रोंइब बाक्नीनी, दे शेनुड। 2 गे इन दाक्तीक गेना हना यो लीपाइक्चा कली वोइक्तीनी। इन दाक्शा गेनायो मप्रोंइतीके सरीड खोदेशो ठेयब बाक्ब। 3 गे “गो आं योत्रशो नु कबल पाता। आं गेय पाइब दाऊद नु कसम जाता। मार कसम जाता देशा हना, यसैया ५५:३; भजन संग्रह १३२:११ 4 गो गेना हना यो इ चच युइ रे पिप का सेल्लुड। मिनु इ पिप दुम्तीके नेल्ल आन पाला सम्म लीपाइक्नुड” देंतीनी। ठेयब सेंदा पा। २सामुएल ७:१६; प्रेरित २:३०

5 परमप्रभु यावे, स्वर्गम बाक्ब नेल्लेमी इन छक लाक्चा डा गेय आ पर्वम इन कली ठेयब सेल्नीम। इन मुर आन गुम्तीकेमी इन दाक्शा गेनायो मप्रोंइतीके आ पर्वम इन कली ठेयब सेल्नीम। 6 सरीडमी परमप्रभु यावे कली सु नु थाप्ने चाम्सीबा डा? मिनु स्वर्गम बाक्ब आन दातेमी सु परमप्रभु यावे खोदेशो बाक्बा डा? १राजा २२:१९ 7 आंम मुर आन बुक्तीकेमी परमप्रभु कली मान पा हिंनीम। मेको आ एर ओंथ बाक्ब नेल्ल आन क्येडा मेको शुश ठेयब नु मान पा हिंचा माल्लशो बाक्ब। 8 परमप्रभु यावे, मुर नेल्ल आन परमप्रभु, इन खोदेशो ठेयब सक्ति पाइशो सु बाक्बा डा? इन दाक्शा मप्रोंइतीके इन एर ओंथ बाक्ब। 9 गे बारशो समुन्द्र कली हुकुम पाइनीनी। मिनु मेको आन छाल बोक्मेनु गे नाइक्पाइक्नीनी। भजन संग्रह ६५:८; मत्ती ८:२६ 10 गे राहाब कली बेक्शो जन्तु खोदेशो पा साइक्तीनी। इन जोरी सत्रु आन कली इन सक्तिमी एर ओंथ ब्रपाइक्तीनी। इजीप्त रागी कली राहाब यो देंनीम। भजन संग्रह ८७:४ अय्युब ९:१३; अय्युब २६:१२; यसैया ३०:७; यसैया ५१:९ 11 सरीड नु रागी निम्फा इन के बाक्नीस। रागी नु मेकेर बाक्शो

नेल्ल इन सेल्लशो बाक्नीम। भजन संग्रह २४:१ 12 उत्तर नु दक्खिन इन सेल्लशो बाक्नीस। ताबोर नु हेरमोन इन नेम ग्येरशा कुम्सो पाइनीस। 13 गे सक्ति पाइशो बाक्नीनी। गे बोल्यो नु ठेयब बाक्नीनी। 14 ठीक पतीक नु कुल मकोवथु निसाफ पतीके इन राज्य डा सक्ति बाक्ब। इन दाक्खा गेनायो मप्रोंइतीके इन डोंइती बाक्ब। 15 इन कली ग्येरशा ठेयब सेल्लपुकी ग्येरसीशो मुर बाक्नीम। मारदे हना मेकोपुकी, परमप्रभु यावे, इन डोंइती डा छेडछेडमी गाक्नीम। 16 मेकोपुकी नाक्तरे इन नेमी ग्येरसीनीम। मिनु इन ठीक पतीकेमी थुं नाइशो बाक्नीम। 17 मारदे हना गे मेको आन सक्ति गेब बाक्नीनी। मिनु गो इन शिशीमी आंइ पिया पोक्शो बाक्नीकी। 18 आंइ तेक्तीके, आंइ पिप इस्माएल डा परमप्रभु यावे केन बाक्ब।

19 साइ डोंइती गे इन कली मप्रोंइब मुर आन कली कोंइतीक कोंइशा, लोव्र पाइतीनी। मिनु गे “गो लडाइ पाइब का कली सक्ति गेता। गो मुर आन दाते रे का कली ठेयब सेल्ला। १सामुएल १३:१४; १सामुएल १६:१३ 20 गो आं गेय पाइब, दाऊद कली थित्ता। गो मेको तारी तेल लुक्ताक्ड। 21 मिनु गो मेको कली कोव्रनुड। मिनु सक्ति गेनुड। 22 आ जोरी सत्रुमी मेको कली ग्राने मचाप्नीम। परमप्रभु आ अरेशो मटीबपुकीमी मेको कली दिप्ने मचाप्नीम। 23 मेको आ जोरी सत्रु आन कली मेको आ डोंइती खतम पोक्नुड। मिनु मेको कली काइ मदाक्ब आन कली साइक्नुडमी। 24 आं दाक्खा मप्रोंइतीके नु आं गेना हना यो दाक्तीके मेको नु बाक्ब। मिनु आं नेमी मेकोमी आ पिया पोक्ने चाप्ब। आ सक्ति बारब। 25 गो मेको कली समुन्द्र नु ठेयब खोला नेल्ल कली हुकुम पाइब सेल्लनुड। भजन संग्रह ७२:८ 26 मेकोमी आं कली ‘गे आं आफ बाक्नीनी। आं परमप्रभु, आं कली श्येत रे प्रोंइब सेरथे फुल्लु बाक्नीनी’ देंब। २सामुएल ७:१४ 27 गो मेको कली आं डोंइती जरमेशो तौ सेल्लनुड। रागी डा पिप नेल्ल आन पिप सेल्लनुड। 28 गो मेको कली गेना हना यो दाक्नुड। मिनु मेको नु पशो कबल खाप्नुड। 29 गो मेको आ चच युइ आन कली गेनायो मग्याम्चा डा पा वोइक्नुड। मिनु मेको आ सासन पतीके सरीड लीम सम्म बाक्ब। 30 तन्न मेको आ चच युइपुकीमी आं अरेशो लोव्र प्रोंइतेक्म हना, आं निसाफ पतीके लोव्र मटिम्तेक्म हना, 31 आं पचा देंशो, आं फुल्लुम मुशा ब्रेक्शो लोव्र मपाम्तेक्म हना, आं शेंशो मटिम्तेक्म हना, 32 गो मेको आन पाप आ पर्वम कोक्केमी सजाइ गेनुडमी। गो मेको आन ठीक मपशो आ पर्वम तुप्शा सजाइ गेनुडमी। 33 तन्न गो मेको आन कली आं गेना हना यो दाक्तीकेम मप्रोंइनुड। आं दाक्खा मप्रोंइतीके मेको नु लीब। 34 गो आं कबल नेल्ल खाप्नुड। आं डोंइती देंशो लोव्र थमा पा पाइनुड। 35 गो आं नेमी काले कसम जाता, गो दाऊद कली जोल मपाइनुड। 36 मेको आ चच युइ गेना हना यो लीनीम। मिनु मेको आ सासन पतीके आं डोंइती नां बाक्म सम्म बाक्ब। भजन संग्रह ७२:१७ 37 तास्ला खोदेंशो पा मेको आ सासन पतीके गेना हना यो बाक्ब। सरीड बाक्शो खोदेंशो पा गेना हना यो बाक्ब” देंतीनी। ठेयब सेंदा पाउत्पती ९:१३

38 तन्न गे इन तेल लुक्शो कली प्रोंइशो बाक्तीनी। गे इन तेल लुक्शो आ पर्वम शुश गाइक्ताक्नी। 39 गे इन गेय पाइब नु पशो कबल प्रोंइशो बाक्तीनी। गे मेको आ सिरपेच खपीम ताइशो, ग्रॉग्रा दिशो सेल्लतीनी। 40 आ गारो नेल्ल प्रेशा, आ दरवार नेल्ल खतम पोक्तीनी। 41 मेको लां रे पा लाइब नेल्लेमी मेको आ मार मार रोइशो लाइक्तेक्म। मेको आ नेक्था डा मुरपुकीमी मेको कली शुक्शी पाइक्तेक्म। 42 गे मेको आ जोरी सत्रु आन कली बोल्यो सेल्लतीनी। गे मेको आ जोरी सत्रु नेल्ल आन कली ग्येरपाइशो बाक्तीनी। 43 गे मेको कली ब्रुपाइक्तीनी। मिनु लडाइमी वारच मपाइक्नी। 44 गे मेको आ ठेयब दुम्तीके खतम पोक्तीनी। मिनु मेको आ सासन पतीके साम्शा गेतीनी। 45 मेको आ ब्रोंइतीके नाक्तरे इच्का ला सेल्लतीनी। गे मेको कली मुनेम सुम्पाइक्तीनी। ठेयब सेंदा पा।

46 परमप्रभु यावे, गे गेना सम्म खुइशो बाक्नीनी? इन गाइक्चा गेना सम्म मी खोदेंशो पा ब्राइबा? 47 परमप्रभु, आं ब्रोंइशा बाक्तीक नाक्तरे इच्का ला बाक्ब। गे मुर नेल्ल आन कली जाम्शा लाइब सेल्लशो बाक्नीनी। 48 मार, मुर गेनायो मबेक्थु, ब्रोंइशा बाक्नीमी? सुम आंम कली बेक्तीक रे प्रोंइने चाप्बा डा? ठेयब सेंदा पा।

49 परमप्रभु यावे, इन साइ डा गेना हना यो दाक्तीके ते लाक्गा? गे दाऊद कली कसम जशा, इन दाक्खा मप्रोंइतीकेमी लोव्र पाइतीनी। 50 परमप्रभु यावे, दोपा इन गेय पाइब, गो शुक्शी पा रिशो कोव्रचा पुंइसीडा, मेको मिम्तीन। गो मारदे जात जात डा मुरपुकीमी शुक्शी पाइशो फाल्चा माल्डा? मेको यो मिम्तीन। भजन संग्रह ४४:१-२५ 51 परमप्रभु यावे, मारदे इन जोरी सत्रुमी आं कली शुक्शी पाइय्यीमी? मेकोपुकीमी मारदे इन तेल लुक्शो, आं कली ते ते थेक्तु, मेक मेक शुक्शी पाइय्यीमी? 52 परमप्रभु यावे गेना हना यो ठेयब बाक्ल। मेको थमा बाक्ब, आमैन। भजन संग्रह ४१:१४

परमप्रभु आ मुर मोसा आ पुंइशो लोव ।

1 परमप्रभु गे नेल्ल पाला सम्म आंइ बाक्तीके दुम्शो बाक्नीनी । 2 मिनु पहाड दुम्चा क्येडा डोंइती नु रागी सेल्चा क्येडा डोंइती गे गेना हना यो बाक्ब परमप्रभु बाक्तीनी ।

3 गे मुर आन कली लेंशा फुरक दुम्पाइक्नीनी । मिनु गे “मुरपुकी, आं गे लेतीन” देंनीनी । भजन संग्रह १४६:४; उपदेसक १:४ 4 हजार का बर्स इन कली सिनाक्त खोदेशो बाक्ब । नाक्दो का इन कली याम का खोदेशो बाक्ब । २पत्रुस ३:८ 5 गे मुर आन कली फिक्शा, लाइक्नीनी । मुर आन ब्रोंइतीक डोमु तशो खोदेशो बाक्ब । मेकोपुकी सुनी नक वाशो घांस खोदेशो बाक्नीम । भजन संग्रह १०२:१२; भजन संग्रह १०३:१५; अय्युब १४:२; यसैया ४०:६; १पत्रुस १:२४-२५ 6 मेको सुनी गिग दुम्नीम । मिनु नाक्दो सोल सुल बेक्नीम ।

7 गो इन गाइशोमी खतम दुम्शो बाक्नीकी । मिनु इन चुरशो तशा हिंकीकी । 8 आंइ मरिम्शो पशो इन डोंइती वोइशो बाक्तीनी । आंइ खुइशशा पशो इन कुल डा छेडछेड आ डोंइती बाक्ब । 9 गो आंइ नाक्त नेल्ले इन गाइशोमी लाक्शो बाक्नीकी । आंइ नाक्त नेल्ल हुकयी पशो खोदेशो पा लाक्नीम । 10 आंइ ब्रोंइतीके ७० बर्स ला बाक्ब । बोल पा ब्रोंइतक हना, ८० बर्स सम्म ब्रोंइनीकी । मो हना यो आंइ ब्रोंइतीक नाक्ती नेल्ल श्येत नु मरिम्शो दुम्तीके ला बाक्ब । ब्रोंइतीक नाक्ती रीब पा नुप्ब । मिनु गो बेक्शा लाइनीकी । उपदेसक १:३

11 इन गाइक्तीक सक्ति सुम तुइक्बा? गो इन गाइक्तीके आ पबर्म इन क्येडा हिंकीकी । 12 मोपतीके आंइ ब्रोंइतीक नाक्ती गिश बाक्नीमी मिम्शा, हिक्चा शेंदीकी । मिनु गो जोक्ब तुइक्ब थुं पाइशो दुम्कल । भजन संग्रह ३९:५-७

13 परमप्रभु यावे, गेना सम्म डोन बाक्नीनी? आंइ गे लेतीन । इन गेय पाइब आंइ कली शिशी पने । 14 सुनी आंइ कली इन गेना हना यो दाक्तीकेमी ग्येरपाइक्की । मिनु गो ब्रोंइका सम्म ग्येरशा कुम्सो पा बाक्ने चाप्कल । 15 गे गिश नाक्त सम्म आंइ कली श्येत गेनी? मिश नाक्त सम्म आंइ कली ग्येरपाइक्की । गो शुश बर्स श्येत जाइतक । 16 इन गेय पाइबपुकीमी इन गेय तुइक्तमेक्ल । मिनु मेको आन आल आन कली इन छेडछेड डा सक्ति कोइदीन । यसैया ५:१२ 17 परमप्रभु यावे, आंइ परमप्रभु, इन शिशी आंइ तार बाक्ल । मिनु आंइ गुइ डा गेय रिम्शो दुम्ल । थमा पा, आंइ पशो नेल्ल रिम्शो सेलीन ।

91

श्येत रे प्रोंइतीके

1 सु नेल्ल क्येडा ठेयब आ फाप्तीकेम बाक्बा नु नेल्ल क्येडा सक्ति पाइशो आ नेक्था बाक्बा, 2 मेकोमी परमप्रभु यावे कली “गे आं खुइक्तीक नु आं बोल्यो दरवार बाक्नीनी । गे आं परमप्रभु बाक्नीनी । गो इन कली थमा सुइक्नुड” देंब । 3 मेकोमी इ कली चिक्ब ग्याइक्ब मुर आ ब्वारद नु मुर साइक्ब रोइ रे प्रोंइब । 4 मेकोमी इ कली आ फ्रांमी फाप्ब । मिनु गे मेको आ फ्रां आगामी खुइशशा बाक्नेवे । मेको आ दाक्शा गेनायो मप्रोंइतीके इ तेक्तीक नु गारो दुम्ब । 5 मिनु गे नाक्दो डा हिंतीके नु नाक्ती बेरशा जाक्ब ब्रा तशा महिंनेवे । 6 छिडछिडम जाक्ब मुर साइक्ब रोइ नु नाक्ती याक्सीब रोइ तशा महिंनेवे । 7 मिनु हजार का जना मुर इ डोंइती साइक्चा पुंइसीनीम । मिनु इ ग्युरा गे १० हजार मुर साइक्चा पुंइसाक्म हना यो, गे साइक्चा मपुंइसीनेवे । 8 परमप्रभु कली मटीबपुकी दोपा क्येक्क लेत्चा पुंइसीनीमी, गे मेको ताइनेवे । 9 मारदे हना गे “परमप्रभु यावे आं खुइक्तीके बाक्ब” देते । मिनु गे नेल्ल क्येडा ठेयब कली इ बाक्तीक सेल्तीवी । 10 इ कली मारेइ मरिम्शो मदुम्ब । इ बाक्तीक आ नेक्था मारेइ हिंचा डा मदुम्ब । 11 मारदे हना मेकोमी आ स्वर्ग डा गेय पाइब आन कली इ लां नेल्लेमी इ कली वारच पपाइक्ब । मत्ती ४:६ 12 मेकोपुकीमी इ कली आन गुइ गुइम ताक्शा कुरनीम । इ खोइली फुल्लुम मथोकपाइक्चा कली मोदेशो पाइनीम । 13 गे गुप्स नु बीस पाइशो बुस्स दिम्नेवे । मेको बोल्यो बाक्तेक्म हना यो, मेको आन कली दिम्शा साइक्नेवे । लूका १०:१९

14 मिनु परमप्रभुमी “मेकोमी आं कली दाक्तीके, गो मेको कली श्येत रे प्रोंइनुड । मेकोमी आं नें तुइक्तीके, गो मेको कली फाप्नुड । 15 मेकोमी आं कली थोइब । मिनु गो आ लोव लेत्नुड । मेको श्येत जवानु, गो मेको नु बाक्नुड । मेको कली श्येत रे प्रोंइशा, मान ताइब सेल्नुड । भजन संग्रह ५०:१५ 16 गो मेको कली शुश ब्रोंइचा गेशा, आं प्रोंइतीके तपाइक्नुड” दे परमप्रभुमी देंत । यसैया ५२:१०

92

परमप्रभु कली पुंड्रशो

नाइक्तीक नाक्त पतीक कुम्सो।

1 परमप्रभु यावे कली “गे रिम्शो पाइब बाक्नीनी” देंचा रिम्शो बाक्ब। मिनु “इन नें नेल्ल क्येडा ठेयब बाक्ब” दे कुम्सो पचा रिम्शो बाक्ब। भजन संग्रह १४७:१ 2 सुनी इन गेना हना यो दाक्तीके नु नाक्दो इन दाक्शा मप्रोंइतीके आ पबर्म लोत्र पचा रिम्शो बाक्ब। 3 बेन्जो नु तार पाइशो ठेयब ताप्तीक ताप्शा, बीना आ लायोमी मोदेशो कुम्सो पचा रिम्शो बाक्ब। 4 मिनु गो “परमप्रभु यावे, इन पशोमी आं कली ग्येरपाइक्तीनी” दे इन पशो तशा, ग्येरशा कुम्सो पाइनुड। 5 परमप्रभु यावे, इन गेय थम ठेयब बाक्नीम। इन मिम्तीके यो थम ठेयब बाक्ब। भजन संग्रह १०४:२४; यसैया ५५:९ 6 निप्स मपाइशो मुरपुकीमी मेको तुइक्ने मचाप्नीम। मूर्खपुकीमी मेको रुप्ने मचाप्नीम। 7 मिनु परमप्रभु आ अरेशो मटीबपुकी घांस खोदेशो पा बारनीम। मरिम्शो पाइबपुकी फू खोदेशो पा बोइक्नीम। नोले मेकोपुकी गेनायो मलीचा डा पा क्याम्चा पुंड्रसीनीम। 8 तन्न परमप्रभु यावे, गे गेना हना यो ठेयब सेल्चा पुंड्रसीनीनी। 9 परमप्रभु यावे, इन जोरी सत्रु क्याम्चा पुंड्रसीनीम। मरिम्शो पाइब नेल्ल एर ओंथ ब्राइनीम।

10 गे आं कली ब्वाकी डा ब्यफ खोदेशो पा सक्ति गेतीनी। आं कली नेल्ल क्येडा रिम्शो तेल लुक्ताक्यीनी। भजन संग्रह २३:५ 11 गो आं जोरी सत्रु बुशो तशा ग्येरसीनुड। आं कली मरिम्शो पाइबपुकी खतम दुम्शो लोत्र नेंशा, ग्येरसीनुड।

12 ठीक पाइबपुकी चहिं खजूर रवा खोदेशो पा बारनीम। मेकोपुकी लेबानोन डा लाइशो रवा खोदेशो पा लाइक्नीम। भजन संग्रह १:३; भजन संग्रह ५२:१० 13 मेकोपुकी आंइ परमप्रभु यावे आ खिंमी खुम्शो दुम्शा, आंइ परमप्रभु आ लाङ्गाम बोइक्नीम। 14 मिनु मेकोपुकी शुश बर्स दुम्मानु यो, फल सित्नीम। मेकोपुकी गिग नु नक डा नक लीनीम। 15 मिनु गो “परमप्रभु यावे गेना हना यो ठीक पाइब बाक्ब। मेको आं सेरथे फुल्लु बाक्ब। मेको नु मारेइ मरिम्शो मबाक्ब” देंनुड। ब्यवस्था ४२:४

93

परमप्रभु आ ठेयब दुम्तीके

1 परमप्रभु यावेमी सासन पाइब। मेको पिप आ वाम ग्योम्सीशो बाक्ब। परमप्रभु यावेमी आ सक्ति किम्सीशो बाक्ब। रागी आ जग बोल्यो बाक्ब, मेको गेनायो महिम्सीब। भजन संग्रह ४७:८; भजन संग्रह ९६:१०; भजन संग्रह ९७:१; भजन संग्रह ९८:६; भजन संग्रह ९९:१; भजन संग्रह १४६:१०; प्रस्थान १५:१८ 2 इन ठेयब नित्तीके साइ डोंइती रे वोइशो बाक्त। गे साइ रेन बाक्शो बाक्तीनी। 3 परमप्रभु यावे, समुन्द्र बारशा कुशो बाक्ब। मेको आ छाल आ रेयके ठेयब दुम्शो बाक्ब। 4 ठेयब समुन्द्र आ रेयके नु समुन्द्र आ बोल्यो छाल क्येडा इरीम बाक्ब। परमप्रभु यावे नेल्ल क्येडा ठेयब सक्ति पाइशो बाक्ब। 5 इन देंशो लोत्र गेना हना यो बाक्नीम। परमप्रभु यावे, इन खिं गेना हना यो इन सक्तिमी ब्रीशो बाक्ब।

94

ब्रोंइचा आ पबर्म पुंड्रशो लोत्र

1 परमप्रभुमी क्येक्क लेप्ब। परमप्रभु यावे, परमप्रभु, इन छेडछेड कोइदीन। ब्यवस्था ३२:३५ 2 रागी कली निसाफ पाइब, बोक्कीन। मिनु ठेयब लेशो आन कली आन पशो डा क्येक्क लेत्तीन। उत्पत्ती १८:२५ 3 परमप्रभु यावे, इन अरेशो मटीबपुकी गेना सम्म ठेयब लेत्नीमी?

4 मेकोपुकीम ठेयब लेशो लोत्र ला पाइनीम। मरिम्शो पाइब नेल्लेम आन नें बोरपाइक्नीम। 5 परमप्रभु यावे, मेकोपुकीमी इन मुर आन कली दिम्शा ताइशा पशो बाक्नीम। इन योत्रशो रागी खतम पोक्शो बाक्नीम। 6 मेकोपुकीमी आन वोंइश बेक्शो मीश मुर नु अर्को रागी डा मुर आन कली साइशो बाक्नीम। मिनु रोम रोइक्च आन कली यो साइशो बाक्नीम। 7 मिनु मेकोपुकीमी “परमप्रभु यावेमी मताइब। याकूब आ परमप्रभुमी मतुइक्ब” देंनीम। भजन संग्रह १०:११

8 गे, निप्स मपाइशो मुरपुकी रुपीन। गे, मूर्खपुकी गेना जोक्ब तुइक्ब दुम्नीनी? 9 इन नोफा सेल्बमी मनेंबा डा? मिक्च सेल्बमी मताइबा डा? प्रस्थान ४:११ 10 रागी रागी डा मुर आन कली सजाइ गेबमी इन कली सजाइ मगेबा

डा? मेकोमी मुर आन कली मारेइ मारेइ तुइक्पाइक्ब। 11 परमप्रभु यावेमी मुर आन मिम्शो तुइक्ब। मेकोमी इं मिम्शो नेल्ल जाम्शा लाइब, दे यो तुइक्ब। १कोरिन्थी १:२०

12 परमप्रभु यावे, गे सु सु कली सजाइ गेशा, शेंदीनी, मेको ग्येरसीशो मुर दुम्नीम। मारदे हना मेको आन कली इन अरेशो लोव्र शेंनीनी। अय्युब ५:१७ 13 इन अरेशो मटीब मबेक्मा सम्म, गे मेको इन शेंशो आन कली श्येत रे नाइक्चा गेनीनी। 14 मारदे हना परमप्रभु यावेमी आ मुर आन कली मप्रोंइब। मिनु आ योव्रशो रागी यो मप्रोंइब। यसैया ३७:३३-३५ 15 ठीक मुर लेंशा ठीक पतीके ताइनीम। ब्रेम्शो थुं पाइशो मुर ठीक लां खोइक्नीम।

16 परमप्रभु आ अरेशो लोव्र मटीब आन पर्वम सु पोन बोक्बा? मरिम्शो पाइब आन पर्वम सु पोन बोक्बा? भजन संग्रह ११५:१७ 17 परमप्रभु यावेम आं कली वारच मपाइशो हना, गो बेक्शो मुर आन बाक्तीके जाक्दीड वा। 18 गो “आं खोइल ग्रेक्त” देंती। मिनु परमप्रभु यावे, इन गेना हना यो दाक्तीकेमी तिक्तीनी। 19 गो आं थुंमी थाम्पा सुर्ता पाता। इन लेम्शोमी आं थुं नांइसाक्व। २कोरिन्थी १:४-५ 20 मार, इन अरेशो मटीब हुकुम पाइबपुकी गे नु गारनीमी डा? मेकोपुकीमी इन फुल्लुम मुशा ब्रेक्शो लोव्र दूली सेल्शो बाक्नीमी। 21 मेकोपुकीमी ठीक पाइब आन पर्वम दोपा मरिम्शो पचा, दे लोव्र गारपाइक्नीम। मिनु दोस मताइब आन कली साइक्नीम। 22 तन्न परमप्रभु यावे आं बोल्यो दरवार नु आं खुइक्तीक सेरथे फुल्लु बाक्ब। 23 मेकोमी मेको आन मरिम्शो पशो आन पिया तार मोइक्ब। मिनु मेको आन अरेशो मटितीके मेको आन कली साइक्ब। परमप्रभु यावे, आंइ परमप्रभुमी मेको आन कली खतम पोक्ब।

95

ठेयब सेल्लिक कुम्सो पय

1 जाक्कीन, ग्येरसीशा परमप्रभु यावे कली कुम्सो पय। इं कली श्येत रे प्रोंइब सेरथे फुल्लु कली ठेयब सेंदा पा कुम्सो पय। 2 “गे रिम्शो पाइब बाक्नीनी” देना देन, मेको आ डोंइती लय। कुम्सो पा मेको कली ठेयब सेल्य। 3 मारदे हना परमप्रभु यावे ठेयब परमप्रभु बाक्ब। देवी देवता नेल्ल आन ठेयब पिप बाक्ब। प्रस्थान १५:११ 4 मिनु रागी डा उइ रे डांडा डा इर सम्म नेल्ल मेको आ गुडम बाक्ब। 5 समुन्द्र नु सोव्रशो रागी नेल्ल मेको आ सेल्शो बाक्ब।

6 जाक्कीन, मेको कली बाप्शा ठेयब सेल्य। इं कली सेल्ब, परमप्रभु यावे आ डोंइती पोक्च थेक्तय। 7 मारदे हना मेको इं परमप्रभु बाक्ब। गो मेको आ योव्रशो भेडा नय। मिनु मुलाक्त मेको आ सेंदा नेनीन। भजन संग्रह १००:३; यूहन्ना १०:२७-२८

8 गेपुकी मेरीबाम पशो खोदेशो पा इन थुं खकटा मसेलीन। गेपुकी गोरशो रागी मास्साह माइशोमी बाक्ची ना पशो खोदेशो मपने। हिब्रू ३:७-८; हिब्रू ४:७ 9 परमप्रभुमी “इन किकी पिपीमी आं पशो गेय नेल्ल ताम्तेक्म हना यो, मेकोपुकीमी आं कली नाक्शा कोव्रतीमी। प्रस्थान १७:२,७ 10 गो ४० बर्स सम्म मेकोपुकी नु गाइक्ताक्ड। एको दूली पाइब मुर बाक्नीम। आं कली मटीब बाक्नीम। 11 मोपतीके गो आं गाइक्तीकेमी “एको आन कली आं थुं नाइक्पाइक्तीके मगेनुड” दे कसम जाता” दे परमप्रभुम देंत। गन्ती १४:२२-२३; हिब्रू ४:३

96

परमप्रभु रागी नेल्ल डा पिप बाक्ब

१इतिहास १६:२३-३३

1 परमप्रभु यावे कली नक कुम्सो का पय। रागी रागी डा मुर नेल्लेमी परमप्रभु यावे कली कुम्सो पने। 2 परमप्रभु यावे कली कुम्सो पने। आ नें ठेयब सेलीन। गे नाक्त किंत किंत मेको मुर आन कली श्येत रे प्रोंइशो आ पर्वम रागी रागी डा मुर आन कली शेंदीने। 3 रागी रागी डा मुर आन दातेमी मेको आ सक्ति आ पर्वम लोव्र पने। जात जात डा मुर आन दातेमी आ छक लाक्चा डा गेय आ पर्वम लोव्र पने। 4 मारदे हना परमप्रभु यावे ठेयब बाक्ब। ठेयब सेल्शा मान पाइक्चा पुंडसीब बाक्ब। मेको देवी देवता नेल्ल आन क्येडा मान पा हिंचा माल्शो बाक्ब। 5 मारदे हना जात जात डा मुर आन देवी देवता शोर गाक्शो मूर्ति ला बाक्नीम। तन्न परमप्रभु यावेमी सरीड सेल्लु। 6 मान ततीके नु नेल्ल क्येडा ठेयब दुम्तीके मेको नु बाक्ब। मेको आ बाक्तीक सक्ति नु छेडछेडम ब्रीशो बाक्ब।

7 गे रागीम बाक्ब खिं खिं डा मुरपुकीमी परमप्रभु यावे कली “गे सक्ति नु छेडछेड पाइशो बाक्नीनी” दे ठेयब सेलीन। 8 गेपुकीमी परमप्रभु यावे आ नें थिशा, मेको कली “गे ठेयब बाक्नीनी” देनीन। चढेतीक चाक्शा, मेको आ बाक्तीक डा लाडगाम जाक्कीन। 9 रिम्शो पतीकेमी ग्योम्सीशा, परमप्रभु यावे कली “गे ठेयब बाक्नीनी” दे लोव्र पने।

रागी डा मुर नेल्ले मेको आ डोंइती मेको कली मान पा खिंखि पने। 10 गे रागी रागी डा मुर आन दातेमी “परमप्रभु यावे पिप बाक्ब” दे शेंदीन। रागी महिम्सीचा डा पा सेल्शो बाक्ब। मेको मयाक्सीब। मेकोमी जात जात डा मुर आन कली कुल मकोव्रथु निसाफ पाइब। भजन संग्रह ९३:१ 11 सरीड नु रागी ग्येरसीसल। समुन्द्र नु मेकेर बाक्ब नेल्ल रेयके पामेक्ल। भजन संग्रह ९८:७-९; यसैया ४९:१३ 12 रू नु मेकेर वाशो नेल्ल ग्येरसीमल। मिनु ब्वाकीम बाक्शो रवा नेल्ल ग्येरशा, 13 परमप्रभु यावे आ डोंइती कुम्सो पाइनीम। मारदे हना परमप्रभु यावे जाक्ब। मेको रागी कली निसाफ पथ जाक्ब। मेकोमी रागी नेल्ल कली ठीक पतीकेमी निसाफ पाइब। मिनु जात जात डा मुर आन कली थमा पा आन कुल मकोव्रथु निसाफ पाइब। भजन संग्रह ८२:८; प्रेरित १७:३

97

परमप्रभु नेल्ल क्येडा ठेयब बाक्ब

1 परमप्रभु यावे पिप बाक्ब। रागी ग्येरसेक्ल। डोन डोन डा रागी डा मुरपुकी यो ग्येरसीमल। भजन संग्रह ९३:१ 2 मेको आ एर ओंथ गोस्स नु ठेयब छिडछिड बाक्ब। ठीक पतीके नु ठीक निसाफ मेको आ सासन पतीक जग बाक्ब। 3 मेको आ डोंइडोंइती मी लशा, आ एर ओंथ डा जोरी सत्रु नेल्ल आन कली दाक्ब। हबकुक् ३:४ 4 मेको आ चिलामी रागी नेल्ल हाम्सो दुम्ब। रागी रागी डा मुर मेको तशा खिंखि पाइनीम। 5 परमप्रभु यावे आ डोंइती डांडा मयीन खोंदेशो पा याइनीम। रागी नेल्ल परमप्रभु यावे आ डोंइती मोदेशो दुम्ब। यहोसु ३:१३

6 मिनु स्वर्गम मेको आ ठीक पतीके नेल्ल कोंइब। जात जात डा मुर नेल्लेमी मेको आ छेडछेड ताइनीम। भजन संग्रह ६७:५-६; यसैया २४:२१-२२ 7 मूर्ति पूजा पाइब नेल्ल मुने तोक्चा पुंडसीनीम। मूर्ति कली थमा सुइक्बपुकी मुने दोक्नीम। देवी देवता नेल्ल परमप्रभु आ डोंइती बाप्पीन। येरमीया ४६:२५; हिब्रू १:६

8 परमप्रभु यावे आ निसाफ पशो नेंशा, सियोन नु यहूदा डा सहर नेल्ल ग्येरसीनीम। 9 मारदे हना परमप्रभु यावे, गे रागी डा नेल्ल क्येडा ठेयब बाक्नीनी। देवी देवता नेल्ल आन क्येडा गे शुश ठेयब बाक्नीनी। प्रस्थान १५:११

10 परमप्रभु यावेमी मरिम्शो पतीक कली काइ मदाक्ब मुर आन कली दाक्ब। आ कली थमा सुइक्ब आन कली कोव्रब। मेको आन कली आ अरेशो मटीब आन गुइ रे प्रोंइब। 11 ठीक पाइब आन कली छेडछेड बाक्ब। मिनु ब्रेम्शो थुं पाइश्शो मुर आन कली ग्येरतीक बाक्ब। 12 ठीक पाइबपुकी परमप्रभु यावे नु ग्येरसीन। मेको कली “गे रिम्शो पाइब बाक्नीनी” देनीन।

98

परमप्रभुमी वारच पाइब

कुम्सो का।

1 परमप्रभु यावे कली नक कुम्सो का पय। मारदे हना मेकोमी छक लाक्चा डा गेय पाप्तु। मेको आ ठेयब सक्तिमी ग्रात। भजन संग्रह ३३:३; यसैया ५९:१६; यसैया ६३:५ 2 परमप्रभु यावेमी आ ग्रातीके कोंइशा, आ श्येत रे प्रोंइतीके रागी रागी आन डोंइती कोंइताक्ब। 3 मेकोमी इस्राएली आन कली आ गेना हना यो दाक्तीके नु आ दाक्शा मप्रोंइतीके कोंइताक्ब। रागी नेल्ल डा मुरपुकीमी आंइ परमप्रभुम मेको आन कली श्येत रे प्रोंइशो ताम्तेक्म। यसैया ५२:१०

4 रागी रागी डा मुर नेल्ल परमप्रभु यावे कली ग्येरसीशा कुम्सो पने। साप्पा ग्येरसीशा मेको कली ठेयब सेलीन। 5 गे ठेयब नु आइक्च तार पाइश्शो ताप्तीक ताप्शा परमप्रभु यावे कली कुम्सो पा ठेयब सेलीन। 6 आंइ पिप, परमप्रभु यावे आ डोंइती ग्येरसीशा तुराही नु ग्रोत्र ताप्पीन। भजन संग्रह ९३:१

7 समुन्द्र नु मेकेर बाक्ब नेल्लेमी परमप्रभु कली ठेयब सेलीन। रागी नु रागीम बाक्ब नेल्लेमी यो परमप्रभु कली ठेयब सेलीन। भजन संग्रह ९६:११-१३ 8 समुन्द्र डा छालपुकीमी आन गुइ फ्रोक्चा माल्नीम। डांडा नेल्ल ग्येरसीशा परमप्रभु यावे आ डोंइती कालेम कुम्सो पने। 9 मारदे हना परमप्रभु यावे रागी कली निसाफ पथ जाक्ब। मेकोमी ठीक पा जात जात डा मुर आन कुल मकोव्रथु निसाफ पाइब।

99

परमप्रभु यावे पिप बाक्ब

3 मारदे हना आं नाक्त कुन बुद पा जाम्नीम। मिनु आं रुश नेल्ल ठेयब मीम नाप्शो खोदेशो पा चोशो बाक्नीम। 4 आं थुं घांस खोदेशो पा बेक्ब। मोपतीके गो आं शोब्ले यो जने मचबु। 5 हुकयी पा आं कुशुल नेल्ल रुशेम क्येप्शो बाक्नीम। 6 गो गोरशो रागी डा हुहुचील खोदेशो दुम्शो बाक्नुड। गो ब्रेशो खिं आन दातेम बाक्ब बुक्स खोदेशो दुम्शो बाक्नुड। 7 गो इप्ने मचाप्थु, खिं तार आ का ला बाक्शो चिक्ब खोदेशो दुम्शो बाक्नुड। 8 नेल्ल नाक्त आं जोरी सत्रुमी आं कली शुक्शी पा बाक्नीम। आं कली शुक्शी पाइबपुकीमी आं नें थिशा साराप पाइनीम। 9 मारदे हना गो शोब्ले खोदेशो पा पुलु जाइनुड। मिनु प्रेक्कु ब्वाइशो ब्वाक्कु तूनुड। 10 एको नेल्ल इन गाइक्तीकेमी दुम्शो बाक्ब। मारदे हना गे आं कली क्युक्शा, ताइक्ताक्यीनी। 11 आं ब्रोंइतीक नाक्त पेरचा चिक्शो नां खोदेशो बाक्ब। मिनु गो घांस खोदेशो पा बेक्शो बाक्नुड। भजन संग्रह ९०:५-६

12 परमप्रभु यावे, गे गेना हना यो पिप बाक्नीनी। मिनु गे नेल्ल पाला सम्म बाक्नीनी। भजन संग्रह १३५:१३ 13 गे बोक्शा, सियोन कली थमा पा शिशी पाइनीनी। मेको कली शिशी पतीक नाक्त जाक्शो बाक्ब। 14 मारदे हना इन गेय पाइबपुकीमी मेकेर डा फुल्लु यो दाक्नीम। मिनु मेकेर डा फुरक कली यो शिशी पाइनीम। 15 रागी रागी डा मुरपुकी परमप्रभु यावे आ नें नेंशा हिंनीम। रागी डा पिप नेल्ले मेको आ सक्ति तशा हिंनीम। 16 मारदे हना परमप्रभु यावेमी सियोन कली लेंशा सेल्ब। मिनु आ छेडछेडमी गूब। 17 मेकोमी श्येत जाइब आन पुंडुशो नेंब। मिनु आन पुंडुशो गेब।

18 एको लोव्र मुल जाक्ब पाला आन कली ब्रेक्चा माल्ब। मिनु नोले जरमेबपुकीमी परमप्रभु यावे कली ठेयब सेल्नीम। 19 मारदे हना परमप्रभु यावेमी इर आ बाक्तीक रे कोव्रशो बाक्ब। परमप्रभु यावेमी स्वर्ग रे कोव्रशो बाक्ब। भजन संग्रह १४:२ 20 मेकोमी ग्याइशो चोक्चा पुंडुसीशो आन हुकयी पशो नेंब। मिनु साइक्चा पुंडुसीब आन कली प्रोंइब। 21 मोपा “परमप्रभु यावे ठेयब बाक्ब” दे सियोन डा मुर आन कली शेंदमेक्ल। मिनु यरूसलेम डा मुरपुकीम मेको कली ठेयब सेल्मेक्ल। 22 मिनु जात जात नु राज्य राज्य डा मुर बुक्शा, परमप्रभु यावे कली ठेयब सेल्नीम। भजन संग्रह ८७:४; येरमीया ६०:३-१०; लूका १३:२९-३०

23 गो ठिटा बाक्ना बाक्न, परमप्रभुमी आं सक्ति क्युम्ताक्यी, आं ब्रोंइतीक नाक्त क्युम्ताक्यी। 24 मिनु गो “आं परमप्रभु, आं कली बेक्ची मजाक्थु, मलाइय्यीनी। इन नाक्त नेल्ल पाला सम्म लीनीम” देंती। भजन संग्रह ५५:२४

25 साइ डोंइती गे रागी आ जग सेल्शो बाक्तीनी। मिनु सरीड इन गुइ डा गेय बाक्ब। हिब्रू १:१०-१२ 26 मेको नेल्ल जाम्शा लाइनीम। तन्न गे गेना हना यो बाक्नीनी। मेको रागी नु सरीड वा खोदेशो पा माइत दुम्शा जेक्नीम। गे फेक्तीके वा फाइशो खोदेशो पा, मेको आन कली फाइक्नीनी। मिनु मेकोपुकी जाम्शा लाइनीम। २पत्रुस ३:१० 27 तन्न गे गेना हना यो खाल का डा बाक्नीनी। मिनु इन नाक्त गेनायो मनुप्नीम। 28 इन गेय पाइब आन चच युइ रिम्शो पा बाक्चा माल्नीम। मिनु आन चच युइ इन डोंइती बोल्यो दुम्शा बाक्नीम।

103

परमप्रभु कली ठेयब सेल्शो

दाऊद आ कुम्सो।

1 आं थुं, परमप्रभु यावे कली ठेयब सेलो। मिनु गो आं थुं नेल्लेमी आ नें ठेयब सेल्नुड। 2 आं थुं, परमप्रभु यावे कली ठेयब सेलो। मिनु इ कली रिम्शो पशो नेल्ल मप्रेंदो। ब्यवस्था ४:९ 3 मेकोमी इ मरिम्शो पशो नेल्ल क्याम्शा गेशो बाक्ब। मिनु इ रोइ नेल्ल सापाइक्ब। भजन संग्रह ३२:१ 4 मेकोमी इ कली खतम दुम्तीक रे प्रोंइब। इ कली आ गेना हना यो दाक्तीके नु शिशी पतीकेमी कोव्रब। 5 मेकोमी इ ब्रोंइतीक नाक्त नेल्ल इ माल्शो खाप्शा गेब। मिनु इ ब्रोंइतीके ककाकुली के खोदेशो पा लेंशा ठिटा सेल्ब। यसैया ४०:३१ 6 परमप्रभु यावेमी दिप्चा पुंडुसीशो नेल्ल आन कली वारच पा ठीक निसाफ पाइब। 7 मेकोमी मोसा कली आ लां नु इस्राएल डा मुर आन कली आ गेय कोंइताक्व। प्रस्थान ३३:१३ 8 परमप्रभु यावे शिशी पाइब नु रिम्शो पाइब बाक्ब। मेको रीब पा मगाइक्थु, आ गेना हना यो दाक्तीके शुश कोंइब। भजन संग्रह ८६:१५ 9 मेकोमी गेना हना यो “गे दूली पाइतीनी” मदेंब। मिनु गेना हना यो मगाइक्ब। यसैया ५७:१६ 10 मेकोमी इ पशो पाप आ पर्बम सजाइ मगेब। मिनु इ मरिम्शो पशो डा क्येक्क मलेप्ब। 11 रागी रे सरीड दोशो इर बाक्बा, मोशोन आ गेना हना यो दाक्तीके आ कली मान पा हिंब आन कली पशो बाक्ब। भजन संग्रह ३६:६; यसैया ५५:८-९ 12 नां दाप्तीक रे नां पेरतीक दोशो डोन बाक्बा, मोशोन आइ मरिम्शो पशो नेल्ल डोन तिल्शो बाक्ब। 13 आफोमी आ तमी तौ आन कली दोदेशो पा शिशी पाइबा, मोदेशो पा परमप्रभु यावेमी आ कली मान पा हिंब आन

कली शिशी पशो बाक्ब। लूका १५:११-२४ 14 मारदे हना गो दोपा सेल्सीशो बाक्नीकी, मेकोमी तुइक्ब। मेकोमी गो फुरक ला बाक्नीक, दे यो तुइक्ब। उत्पत्ती २:७; उत्पत्ती ३:१९

15 मुर आन ब्रोंडतीके घांस खोदेशो बाक्ब। रूमी बोइश्शो फू खोदेशो पा बोइक्ब। भजन संग्रह ९०:५-६; अय्युब ७:१० 16 मिनु फश पवानु, मेको जाम्शा लाइब। मिनु आ बाक्तीक यो मतुइक्ब। 17 तन्न परमप्रभु यावे आ गेना हना यो दाक्तीक आ कली मान पा हिंब नु गेना हना यो लीब। मिनु आ ठीक पतीके आन तौ चच आन पाला सम्म लीब। लूका १:५० 18 सु सुमी कबल पा, आ शेंशो टीनीमी, मेकोपुकी नु आ गेना हना यो दाक्तीक लीब।

19 परमप्रभु यावेमी आ ठेयब नित्तीके स्वर्गम वोइश्शो बाक्ब। मिनु स्वर्ग नु रागीम बाक्शो नेल्ल कली सासन पाइब। 20 परमप्रभु यावे आ स्वर्ग डा गेय पाइबपुकी, परमप्रभु यावे कली ठेयब सेलीन। गे सक्ति पाइश्शो, आ देशो टीबपुकी मेको कली ठेयब सेलीन। यसैया ६:१-४; भजन संग्रह २९:१; भजन संग्रह १४८:-; दानीएल ७:१० 21 गे स्वर्ग डा गेय पाइबपुकी परमप्रभु यावे कली ठेयब सेलीन। आ गेय पाइब नेल्ल परमप्रभु यावे आ दाक्शो पने। 22 परमप्रभु यावे आ सासन पतीकेमी बाक्शो, आ सेल्शो नेल्लेमी परमप्रभु यावे कली ठेयब सेलीन। आं थुं, परमप्रभु यावे कली ठेयब सेलो।

104

परमप्रभु ठेयब बाक्ब

1 आं थुं, परमप्रभु यावे कली ठेयब सेलो। परमप्रभु यावे, आं परमप्रभु गे थम ठेयब बाक्नीनी। ठेयब दुम्तीके नु मान ततीके इन के बाक्ब। 2 गे छेडछेड कली वा फेक्शो खोदेशो पा फेक्शो बाक्नीनी। मिनु सरीड कली ताम्बु खोदेशो पा प्राक्शा कीशो बाक्नीनी। 3 गे इन बाक्तीक डा थाम ब्वाक्कु तारी सेल्शो बाक्नीनी। गे गोस्स कली इन बग्गी सेल्शो बाक्नीनी। मिनु गे फश आ फ्रां तार डोइश्शा गाक्ब बाक्नीनी। उत्पत्ती १:६-८; भजन संग्रह १८:१०-१२ 4 मिनु गे फश कली इन लोव्र चोव्रब नु मी कली इन गेय पाइब सेल्शो बाक्नीनी। हिब्रू १:७ 5 रागी गेना यो महिम्सेक्ल, दे आ जग वोइक्तीनी। मत्ती २४:३५; प्रकाश २१:१ 6 गे मेको कली वा बुद पा ब्वाक्कुमी सुम्तीनी। मिनु ब्वाक्कु डांडा तार सम्म जाक्दीश्शो बाक्ब। 7 गे हुइक्तीनीनु, मेको प्रोक्ब। इन बुंबु पशो सेंदामी मेको दोरोर पा लाइब। 8 मेको ब्वाक्कु डांडा ग्येत्थ बारशा, दिंम मेर शाइक्ब। मिनु इन देशो बाक्तीके सम्म लाइनीम। 9 मेको लेंशा रागी कली सुम्थ मजाक्मल, दे गे सांद सेल्तीनी। अय्युब ३८:८-११; हितोपदेस ८:२९

10 गे दिंम मेर ब्वाक्कु बुक्तीक सेल्तीनी। मिनु मेको डांडा आन दाते रे शाइश्शा लाइनीम। 11 गे ब्वाकी डा जन्तु नेल्ल आन कली तूचा गेनीनी। ब्वाकी डा गथापुकीमी यो मेकेर डा ब्वाक्कु तूशा, ब्रोंडनीम। 12 मेको खोला आन नेक्था चिक्बपुकीमी आन ग्योव्र सेल्नीम। मिनु राशीम बाक्शा कुम्सो पाइनीम। 13 इन इर डा बाक्तीक रे रेउ यिपाइश्शा डांडा आन कली जिप्पाइक्नीनी। इन गेय पशोमी रागी नेल्ल ग्येरसीनीम।

14 गे बी ब्यफ आन कली घांस वापाइक्नीनी। मिनु खप रे मुर आन कली जचा थोव्रक वापाइक्नीनी। 15 मिनु गे मुर आन थुं ग्येरपाइक्चा कली अडगुर सिप्पाइक्नीनी। मिनु आन कुल दारपाइक्चा कली तेल नु आन रां बोल्यो सेल्चा कली शोब्ले गेनीनी। 16 परमप्रभु यावे आ खुम्शो लेबानोन डा लाइश्शो रवा शुश ब्वाक्कु ताइब बाक्नीमी। 17 मेकेर चिक्बमी आन ग्योव्र सेल्नीम। मिनु ठेयब बुश चिक्बपुकीमी सला रवाम आन ग्योव्र सेल्नीम। 18 लाइश्शो डांडापुकी ब्वाकी डा क्यारश आन कली बाक्नीम। सेरथे फुल्लु आइक्च जन्तु आन खुइक्तीके बाक्नीम।

19 मिनु गे बर्खा नु हिंउद कोइंचा कली तास्ला सेल्तीनी। नांमी आ दाप्तीक पेरतीक तुइक्ब। भजन संग्रह ७४:१६ 20 गे छिडछिड सेल्तीनी। मिनु नाक्दो दुम्ब। मेना ब्वाकी डा जन्तु ग्रूनीम। 21 मिनु गुप्स आ चाइक्बपुकीमी सिखार माल्शा, ग्रीशा आन जचा थोव्रक परमप्रभु आ गुइ रे पुंइनीम। 22 मिनु नां दाप्मेनु, मेको आन पुक्खीम लशा, खुइश्शा गोल्नीम। 23 मुरपुकी चहिं आन गेय पथ लाइनीम। मिनु नाक्दो सम्म गेय पाइनीम।

24 परमप्रभु यावे, इन गेय ठेयब नु शुश बाक्नीम। गे जोक्ब तुइक्ब दुम्शा, नेल्ल सेल्तीनी। रागी नेल्ल इन सेल्शो मारेइ मारेइम ब्रीशो बाक्ब। उत्पत्ती १:३१ 25 मेकेर ठेयब नु ब्रेम्शो समुन्द्र बाक्ब। मिनु मेकेर हिक्ने मचाप्चा डा पा ठेयब नु आइक्च जन्तु रमल ग्यमल पा बाक्नीम। 26 मेकेर रे जहाजपुकी यो गाक्नीम। मिनु गे मेकेर ग्यारचा कली लेव्याथन यो सेल्तीनी।

27 मिनु मेको नेल्लेमी “जचा थोव्रक गेकी” दे इन कली कोव्रनीम। भजन संग्रह १४५:१५-१६ 28 गे मेको आन कली गेनीनु, मेकोपुकीमी खुप्नीम। इन मुठी प्राक्नीनु, मेकोपुकी ब्रोंव्रशो नु रिम्शो थोव्रकीमी रूनीम। 29 मिनु इन कुल

खुइक्तीनीनु, मेकोपुकी श्येत जाइनीम। मेको आन सोक्त लाइक्नीनु, मेकोपुकी बेक्नीम। मिनु लेंशा फुरक दुम्नीम। उत्पत्ती ३:१९ 30 मिनु इन सोक्त सोइश्शा, मेको आन कली सेल्नीनी। मिनु गे रू आन कली लेंशा सेल्नीनी।

31 परमप्रभु यावे आ सक्ति गेना हना यो लीशा बाक्ल। परमप्रभु यावे आ गेय तशा, आंमा ग्येरसेक्ल। 32 गे रागी कली कोवनीनु, मेको खिंखि पाइब। गे डांडा कली थिनीनु, कुन गूब। 33 गो ब्रोंडडा सम्म परमप्रभु यावे कली कुम्सो पना पन बाक्नुड। गो मबेक्डा सम्म आं परमप्रभु कली ठेयब सेल्शा, कुम्सो पना पन बाक्नुड। 34 मेकोमी आं मिम्शो दाक्तल। मारदे हना गो परमप्रभु यावे कली मिम्शा ग्येरसीनुड। 35 पाप पाइबपुकी रागी रे क्याम्चा पुंइसीमल। मिनु आ अरेशो मपाइबपुकी मलीमल। आं थुं परमप्रभु यावे कली ठेयब सेलो। परमप्रभु यावे कली ठेयब सेलो।

105

परमप्रभु कली मान पतीके

1 परमप्रभु यावे कली “गे रिम्शो पाइब बाक्नीनी” दे लोत्र पने। जात जात डा मुर आन कली परमप्रभु आ पशो तुइक्पतीन। इतिहास १६:८-२२ 2 मेको कली कुम्सो पने। मेको कली ठेयब सेल्तीक कुम्सो पने। मुर आन कली आ पशो छक लाक्चा डा गेय शेंदीन। 3 गे परमप्रभु आ नें तुइक्तीके ग्येरसीन। परमप्रभु यावे कली माल्ब आन थुं ग्येरसीमल। 4 गे परमप्रभु यावे नु आ सक्ति मालीन। गे गेना हना यो मेको आ नेक्था बाक्चा मालीन। 5 गे मेको आ पशो रिम्शो गेय मिम्तीन। आ छक लाक्चा डा गेय नु आ निसाफ पशो मिम्तीन। 6 मेको आ गेय पाइब अब्राहाम आ चच युइ नु याकूब आ तौपुकी, आ योत्रशो नेल्ल मिम्तीन।

7 मेको परमप्रभु यावे, आंइ परमप्रभु बाक्ब। मेको आ निसाफ रागी नेल्ल कली बाक्ब। 8 मेकोमी आ पशो कबल गेना हना यो मिम्ब। आ देंशो लोत्र हजार हजार पाला सम्म मिम्ब। ब्यवस्था ७:९ 9 मेकोमी अब्राहाम नु मेको कबल पशो बाक्त। मिनु इसहाक नु यो थोक्शा लोत्र पशो बाक्त। 10 मेकोमी आ फुल्लुम मुशा ब्रेक्शो लोत्र याकूब कली गेशो बाक्त। मिनु मेको इस्राएल कली गेना हना लीब कबल बाक्ब। 11 मेकोमी “गो इ कली कनान रागी गेनुड। मेको इन के दुम्ब” देंशो बाक्त। उत्पत्ती १२:७ 12 मेना मेको आन कली हिक्शोनु, इक्का खोइ ला बाक्मा बाक्त। मिनु मेकेर अर्को रागी डा मुर यो बाक्मा बाक्त। 13 मेकोपुकी रागी का रे अर्को रागी नु राज्य का रे अर्को राज्य पा हिरना हिरन बाक्बाक्मा बाक्त। 14 परमप्रभुमी मेको आन कली सुइमी श्येत गेचा मगेमी बाक्त। मिनु मेको आन पर्वम पिप आन कली हुइक्तीमी बाक्त। गन्ती २३:७-१० 15 मेकोमी “आं तेल लुक्शो आन कली मथिने। आं लोत्र पाइब आन कली मारेइ मपतीन” दे हुइक्तीमी बाक्त।

16 मिनु परमप्रभुमी मेको रागीमी अन्काल सोइश्शा, अन्न नेल्ल खतम सेल्शा, उत्पत्ती ४१:५४ 17 मुर का कली मेको आन डोंइती सोइक्ता बाक्त। मेको योसेफ वाइल सेल्चा कली लेयचा पुंइसीशो बाक्त। उत्पत्ती ३७:२८ 18 मिनु मेको कली आ खोइलीम साडलो पाइश्शा, आ शुरमी फलाम के साडलो पाइक्तमे बाक्त। 19 मिनु योसेफ आ लोत्र थमा मदुम सम्म, परमप्रभु यावेमी मेको कली वारच पवा बाक्त। 20 मिनु पिपमी मुर सोइश्शा, मेको कली प्रोना बाक्त। जात जात डा मुर आन कली सासन पाइबमी मेको कली प्रोना बाक्त। उत्पत्ती ४१:१४ 21 मिनु मेकोमी योसेफ कली आ दरवार डा ठेयब मुर सेल्शा, आ शोंप नेल्ल आन होत्रप सेला बाक्त। 22 मिनु आ आइक्च हुकुम पाइब आन कली शेंचा नु खाल्पा आन कली तुइक्ब सेल्चा कली योसेफ कली वोदा बाक्त।

23 मिनु इस्राएल डा मुर इजीप्तीमी ओत्रमा बाक्त। मिनु याकूब हाम आ रागीमी बाक्ब दुम्माक्त। उत्पत्ती ४६:१,७ 24 मिनु परमप्रभु यावेमी आ मुर आन कली शुश सोशा बोशा सेल्मी बाक्त। मिनु मेको आन कली आन जोरी सत्रु आन क्येडा बोल्यो सेल्मी बाक्त। प्रस्थान १:७,१२ 25 परमप्रभुमी इजीप्ती आन थुं इस्राएली आन कली काइ मदाक्ब सेल्मी बाक्त। मिनु इस्राएली आन कली काइ मरिम्शो पाइब सेल्मी बाक्त।

26 मिनु परमप्रभुमी आ योत्रशो गेय पाइब मोसा नु हारून आस कली मेकेर सोइक्ता बाक्त। प्रस्थान ३:१०; प्रस्थान ४:१४-१६ 27 मेको निक्शीमी हाम आ रागी डा मुर आन दातेमी परमप्रभु आ चिन्ड नु छक लाक्चा डा गेय कोंइदसे बाक्त। प्रस्थान ७:-१२:- 28 मेकोमी छिडछिड सोइक्ता बाक्त। मिनु मेकेर छिडछिड दुम्माक्त। तन्न मेकोपुकीमी मेको आ लोत्र मटीमे बाक्त। 29 मेकोमी मेको आन ब्वाक्कु हुश सेलानु, मेकेर डा डांइ नेल्ल बेक्मा बाक्त। 30 आन रागीमी क्रुक्कुपुकी जाक्शा, आन पिप आन बाक्तीके सम्म जाक्दीम्मा बाक्त। 31 परमप्रभुमी लोत्र पवानु, आन रागी भुस्ना नु चुरमुमी ब्रीमा बाक्त। 32 मेकोमी रेउ आ पा डा मुप्स यिपदा बाक्त। मिनु मेको रागी नेल्लेमी चिला दाप्पदा बाक्त। 33 मिनु मेकोमी आन अडगुर बोट नु फोत्रशी रवा नेल्ल खतम सेल्शा, रागी नेल्ल डा रवा फस पोक्गा

बाक्त। 34 मेकोमी लोव्र पवानु, माले जाक्मा बाक्त। हिकने मचाप्चा डा पा माले नु आन चाइक्ब शुश जाक्मा बाक्त। 35 मेकोपुकीमी मेको रागी डा बाक्शो गिग नु फल फुल नेल्ल नेक्गमे बाक्त। 36 मिनु मेकोमी आन डोंइती थिशो तौ सदा बाक्त। आन डोंइती डा बोल डा आल खतम सेला बाक्त।

37 मिनु नोले परमप्रभुमी इस्राएली आन कली सुन चांदी कुरपाइश्शा मेक रे गुंडदीमी बाक्त। मिनु मेको रे गूब नेल्ल बोल्यो बाक्मा बाक्त। प्रस्थान १२:३५ 38 मिनु इजीप्त रागी डा मुरपुकी इस्राएलीपुकी गूशा लमानु, शुश ग्येरसामा बाक्त। मारदे हना मेको आन कली तशा शुश हिंशो बाक्मा बाक्त। 39 मिनु परमप्रभुमी आ मुर आन कली सुम्चा कली गोस्स सोइक्ता बाक्त। मिनु नाक्दो गाक्चा कली मी के थाम गेमी बाक्त। प्रस्थान १४:२० 40 मेको आन पुंडतीके मेको आन कली चिक्ब गेमी बाक्त। मिनु सरीड रे जचा थोव्रक यिपदा बाक्त। प्रस्थान १६:१३-१५ 41 मेकोमी सेरथे फुल्लु रे ब्वाक्क बुक्पदा बाक्त। मिनु मेको गोरशो रागीमी खोला खोदेंशो पा शांडसे बाक्त। प्रस्थान १७:६ 42 मारदे हना परमप्रभुमी आ थोक्शा पशो लोव्र नु आ गेय पाइब, अब्राहाम कली मिम्ता बाक्त।

43 मोपा परमप्रभुमी आ योव्रशो मुर आन कली ग्येरपाइश्शा गुंडदीमी बाक्त। मिनु मेकोपुकी कुम्सो पा गूमा बाक्त। 44 मिनु परमप्रभुमी रागी रागी डा मुर आन रागी नु आन शोप मेको आन कली गेमी बाक्त। 45 मेकोपुकीमी परमप्रभुमी फुल्लुम मुशा ब्रेक्शो लोव्र, आ अरेशो लोव्र टीमेक्ल, दे मोदेंशो पवा बाक्त। परमप्रभु यावे कली ठेयब सेलीन।

106

ठेयब सेल्टीके

1 परमप्रभु यावे कली ठेयब सेलीन। गेपुकीमी “गे रिम्शो पाइब बाक्नीनी” दे लोव्र पने। मारदे हना मेको रिम्शो पाइब बाक्ब। मिनु आ दाक्तीके गेना हना यो लीब। भजन संग्रह १००:४-५; प्रस्थान १०७:१; प्रस्थान ११८:१; इतिहास १६:३४ 2 सुमी परमप्रभु यावे आ सक्ति पाइश्शो गेय आ पर्बम देने चाप्बा डा? सुमी मेको कली ठेयब सेल्टीक नेल्ल देने चाप्बा डा? यूहन्ना २१:२५; हिब्रू ११:३२ 3 सु सुमी ठीक पा निसाफ पाइनीमी नु गेना हना यो ठीक बाक्नीमी, मेको ग्येरसीशो मुर बाक्नीम।

4 परमप्रभु यावे, गे इन मुर आन कली शिशी पनी ना, आं कली यो मिम्तीन। मेको आन कली प्रोंइनीनु, आं कली यो वारच पन। 5 मिनु मोपा गो इन योव्रशो मुर आन रिम्शो पा बाक्शो तने चाप्नुड। मिनु इन मुर ग्येरसीशा बाक्शो तशा, ग्येरसीनुड। गो इन योव्रशो मुर दुम्शा ग्येरसीनुड।

6 गोपुकी नु आंइ किकी पिपीम पाप पाइतक। गोपुकीमी मरिम्शो पा इन अरेशो लोव्र मटिक। दानीएल ९:५ 7 इजीप्त रागीम बाक्शो आंइ किकी पिपीम इन छक लाक्चा डा गेय ममिम्शो बाक्तेक्म। मिनु इन शुश गेना हना यो दाक्तीके प्रेंशो बाक्तेक्म। मिनु लल समुन्द्रमी नेल्ल क्येडा ठेयब कली गाइश्शा लोव्र पशो बाक्तेक्म। प्रस्थान १४:११-१२ 8 मोदेंशो पाम्तेक्म हना यो, परमप्रभुमी आ नें आ पर्बम मेको आन कली श्येत रे प्रोंइशो बाक्त। मोदेंशो पा आ ठेयब सक्ति कोंइशो बाक्त। 9 मेकोमी लल समुन्द्र कली हुइक्तानु, सोव्रशो बाक्त। मिनु मेको आन कली गोरशो रागी खोदेंशो पा, समुन्द्र डा लां रे खुल्शो बाक्त। 10 मिनु मेको आन कली आन जोरी सत्रु आन गुइ रे प्रोंइशो बाक्त। मोपा आ प्रोंइशो मुर दुम्शो बाक्तेक्म। 11 मेको ब्वाक्कुमी आन जोरी सत्रु आन कली सुम्शा साइश्शा, का यो मलीशो बाक्तेक्म। 12 मिनु नोले आ देंशो थमा सुइश्शो बाक्तेक्म। मिनु परमप्रभु कली ठेयब सेल्टीक कुम्सो पशो बाक्तेक्म। प्रस्थान १५:२१

13 तन्न मेकोपुकीमी परमप्रभु आ पशो रीब पा प्रेंशो बाक्तेक्म। मेको आ अर्ती नेंचा मबिश्शो बाक्तेक्म। 14 मिनु मेकोपुकी गोरशो रागीम बाक्मानु, आन शोव्र रक सुइश्शो बाक्त। मिनु परमप्रभु कली गोरशो रागीम नाक्शा कोव्रशो बाक्तेक्म। गन्ती ११:४-६ 15 मिनु परमप्रभुमी मेको आन पुंडशो गेशो बाक्त। तन्न मेको आन दातेमी बेक्तीक रोइ सोइश्शो बाक्त।

16 मिनु मेकोपुकीमी परमप्रभु यावे रे पा योव्रसीशो मोसा नु हारून आस कली गेहे पशो बाक्तेक्म। गन्ती १६:१-३ 17 मिनु रागी जेशशा, दाथान कली दाक्शो बाक्त। मिनु अबीराम आ हुल कली सुम्शो बाक्त। गन्ती १६:३१-३५ 18 मिनु मेको आन दातेमी मी गूशा, परमप्रभु आ अरेशो मपाइब आन कली ग्राव गु दाक्शो बाक्त।

19 मेकोपुकीमी होरेब डांडाम बाछा का सेल्शा, मेको मूर्ति कली पूजा पशो बाक्तेक्म। प्रस्थान ३२:१-६ 20 मेकोपुकीमी आन मान पशो परमप्रभु आ पा डा घांस ब्वाइब ब्यफ आ मूर्ति कली ठेयब सेल्शो बाक्तेक्म। रोमी १:२३ 21 मेकोपुकीमी आन कली श्येत रे प्रोंइब नु इजीप्तम ठेयब गेय पाइब आन परमप्रभु कली प्रेंशो बाक्तेक्म। ब्यवस्था ३२:१८ 22 मेकोमी हाम आ रागीमी छक लाक्चा डा गेय नु लल समुन्द्र आ नेक्था शुश हिंचा डा गेय पशो

बाक्त। 23 मोपतीके मेकोमी “मेको आन कली खतम सेल्लुड” दे मिम्शो बाक्त। तन्न आ योव्रशो मुर मोसामी “मेको आन कली मोदेशो मपचा” दे पुंइशो बाक्त। मिनु आ गाइशो नाइशो बाक्त। प्रस्थान ३२:११, ३२; ब्यवस्था ९:२५-२९; इजीकीएल १३:४-५

24 मिनु नोले मेकोपुकीमी परमप्रभु आ गेशो रागी मदाक्शो बाक्तेक्म। आ थोक्शा पशो लोव्र थमा मसुइशो बाक्तेक्म। गन्ती १४:२-४; ब्यवस्था ८:७-१० 25 मेकोपुकीमी आन ताम्बुम गन गन पशो बाक्तेक्म। मिनु परमप्रभु यावे आ देशो मटिशो बाक्तेक्म। 26 मोपतीके मेको आन कली “गो इन कली गोरशो रागीम साइक्नुड। 27 मिनु इन चच युइ आन कली रागी रागीम फ्राइनुड” दे कसम जशो बाक्त।

28 मिनु मेकोपुकीमी पेओर डा बाल कली पूजा पशो बाक्तेक्म। मिनु बेक्शो मुर आन कली चढ़ेशो जशो बाक्तेक्म। गन्ती २५:३ 29 मेकोपुकीमी आन पतीकेमी परमप्रभु कली गाइक्पाइशो बाक्तेक्म। मिनु मेको आन दातेम बेक्तीक रोइ गूशो बाक्त। 30 मिनु फिनेहास बोक्शा परमप्रभु कली पुंइशो बाक्त। मिनु मेको मुर बेक्तीक रोइ नांइसीशो बाक्त। गन्ती २५:१२-१३ 31 मेको आ पुंइतीके इस्राएलीपुकीमी “फिनेहास ठीक पाइब बाक्ब” दे शुश पाला सम्म मिम्शो बाक्तेक्म। 32 मेकोपुकीमी मेरीबा डा ब्वाक्कु आ नेक्था परमप्रभु कली गाइक्पाइशो बाक्तेक्म। मोपतीके मेको आन पर्बम मोसा कली मरिम्शो दुम्शो बाक्त। गन्ती २०:२-१३ 33 मेकोपुकीमी मोसा कली गाइक्पदमेनु, मोसाम मरिम्शो लोव्र पशो बाक्त।

34 मिनु मेकोपुकीमी परमप्रभु यावे आ देशो खोदेशो पा जात जात डा मुर आन कली मसदमे बाक्त। ब्यवस्था ७:१२; ब्यवस्था १२:२-३; न्यायाधीस १:२८; न्यायाधीस २:२३-३:६ 35 मेकोपुकीमी रागी रागी डा मीश आल आन कली ग्युंभे पामे बाक्त। मिनु रागी रागी डा मुर आन पशो यो पामे बाक्त। 36 मेकोपुकीमी मेको आन मूर्ति आन कली पूजा पामे बाक्त। मिनु मेको आन कली ग्याइल खोदेशो दुम्माक्त। 37 मेकोपुकीमी आंम तमी तौ वोल आन कली चढ़ेमे बाक्त। २राजा २१:६, १६ 38 मेकोपुकीमी आन पाप मपशो तमी तौ आन कली कनानी आन मूर्ति कली चढ़ेशा, आन हुश जारदमे बाक्त। मेको आन हुशेमी मेको रागी ग्रांग्रा दिशो दुम्माक्त। 39 मोपा मेको आन गेयम पतीके ग्रांग्रा दिशो दुम्शा, तेल्लेम खोदेशो दुम्मा बाक्त।

40 मोपतीके परमप्रभु यावे आ मुर नु गाइक्ता बाक्त। आ योव्रशो मुर आन कली तशा ग्रांग्रा दिमाक्त। 41 मिनु मेकोमी मेको आन कली रागी रागी डा मुर आन गुडम गेमी बाक्त। मिनु मेको आन जोरी सत्रुम मेको आन कली सासन पामे बाक्त। न्यायाधीस २:१४ 42 मिनु आन जोरी सत्रुमी मेको आन कली दिप्शा, आन सक्तिम हुकुम पामे बाक्त। 43 मिनु परमप्रभुमी मेको आन कली शुश खेयप प्रॉइमी बाक्त। तन्न मेकोपुकीमी गेनायो परमप्रभु कली मटीमे बाक्त। मेको आन मरिम्शो पतीकेमी खतम दुम्मा बाक्त। 44 तन्न परमप्रभुमी मेको आन डाक्शो नेंशा, आन श्येत जशो रे प्रॉइमी बाक्त। 45 मिनु मेकोमी मेको आन कली पशो कबल मिम्ता बाक्त। मिनु मेको आ गेना हना यो शुश दाक्तीक डा शिशी कोंइदीमी बाक्त। 46 मिनु परमप्रभुमी इस्राएली आन कली सासन पाइब आन थुंमी शिशी पतीक कुर पवा बाक्त। 47 मिनु गे “परमप्रभु यावे, आंइ परमप्रभु, आंइ कली प्रोनीन। मिनु इन कली ‘गे रिम्शो पाइब बाक्नीनी’ देंचा कली नु इन नें ठेयब सेल्ला ग्येरसीचा कली आंइ कली रागी रागी रे खुप्तीन। ब्यवस्था ३०:३; इतिहास १६:३५

48 परमप्रभु यावे, इस्राएली आन परमप्रभु गेना हना यो ठेयब बाक्ल। मिनु मुरपुकीमी ‘मोदेशो दुम्ल। आमैन’ देनीन” परमप्रभु यावे ठेयब बाक्ब। भजन संग्रह ४१:१४; इतिहास १६:३६

107

“गे रिम्शो पाइब बाक्नीनी” देशो

1 गे परमप्रभु यावे कली “गे रिम्शो पाइब बाक्नीनी” दे कुम्सो पने। मारदे हना मेको आ दाक्तीके गेना हना यो लीब। भजन संग्रह १०६:१ 2 परमप्रभु यावेमी श्येत रे प्रॉइचा पुंइसीशोपुकीमी मोपा कुम्सो पचा मालनीम। 3 मेको आन कली रागी रागी रे खुप्ताक्मी। पूर्व, पच्छिम, उत्तर, दक्खिन नु ब्वाक्कु बुक्तीके रे नु ब्वाक्कु शाइक्तीक रे खुप्ताक्मी।

4 का निक्शी गोरशो रागी मेर हिरशा, मुर बाक्तीक सहर मथिदेम। 5 मेकोपुकी जचा तूचा मतथु बेक्चा चिक्ताक्मे। 6 मोपा श्येत जशा, परमप्रभु यावे कली पुंइतेक्म। मिनु मेकोमी मेको आन कली आन श्येत रे प्रॉइतु। 7 मेकोमी मेको आन कली पित्थ लांम खुल्तीमी। मिनु मुर बाक्तीक सहरम चाक्दीत्तीमी। 8 मेकोपुकीमी परमप्रभु यावे कली “गे रिम्शो पाइब बाक्नीनी” देंचा मालनीम। मारदे हना मेकोमी मुर आन कली गेना हना यो दाक्शा, मेको आन कली वारच

पा, छक लाक्चा डा गेय पाइब। 9 मेकोमी तूतू दाक्ब आन कली तूपाइक्ब। मिनु शोत्रलु बेक्शो आन कली ब्रोत्रशो जचा थोत्रकमी रूपाइक्ब। लूका १:५३

10 का निक्शी श्येत जशा छिडछिडम बाक्तेक्म। चोक्चा पुंडसीशोपुकी साडलोम पाइक्चा पुंडसीशा, श्येत जशो बाक्तेक्म। 11 मारदे हना मेकोपुकीमी परमप्रभु आ लोत्र मटिशो बाक्तेक्म। नेल्ल क्येडा ठेयब आ अर्ती मनेनेम। 12 मोपतीके मेकोपुकीमी शुश गेय पचा माल्तेक्म। मेकोपुकी गोल्लेक्म। तन्न मेको आन कली वारच पाइब सुइ मबाक्म। 13 मोपा श्येत जशा, परमप्रभु यावे कली पुंडतेक्म। मिनु मेकोमी मेको आन कली आन श्येत रे प्रॉइतु। 14 मेकोमी मेको आन कली आन श्येत नु छिडछिड रे गुंडताक्मी। मिनु मेको आन साडलो प्रोइक्तु। 15 मेकोपुकीमी परमप्रभु यावे कली “गे रिम्शो पाइब बाक्नीनी” देंचा माल्नीम। मारदे हना मेकोमी मुर आन कली गेना हना यो दाक्शा, मेको आन कली वारच पा, छक लाक्चा डा गेय पाइब। 16 मेकोमी कांसा के लाप्चोपुकी प्रोल्ब। मिनु फलाम के बार जिकब।

17 का निक्शी मूर्ख दुम्शा, आंम आन मरिम्शो पतीकेमी श्येत जाम्तेक्म। 18 मेकोपुकीमी जचा थोत्रक ग्रांग्रा दिशा, मारेइ जत मदाक्म। मिनु बेक्चा चिक्ताक्म। 19 मोपा श्येत जशा, परमप्रभु यावे कली पुंडतेक्म। मिनु मेकोमी मेको आन कली आन श्येत रे प्रॉइतु। 20 मेकोमी आ लोत्र सोइश्शा, मेको आन कली सापाइक्तु। मेको आन कली बेक्चा रे प्रॉइतु। 21 मेकोपुकीमी परमप्रभु यावे कली “गे रिम्शो पाइब बाक्नीनी” देंचा माल्नीम। मारदे हना मेकोमी मुर आन कली गेना हना यो दाक्शा, मेको आन कली वारच पा, छक लाक्चा डा गेय पाइब। 22 मेकोपुकीमी “गे रिम्शो पाइब बाक्नीनी” दे चढेमेक्ल। मिनु परमप्रभु आ पशो नेल्ल ग्येरशा कुम्सो पा शेंदमेक्ल।

23 का निक्शी जहाज डोइश्शा, समुन्द्रम लाम्तेक्म। मेकोपुकी ग्याप्ब लेयब दुम्शा, ठेयब समुन्द्रम गाक्तेक्म। 24 परमप्रभु यावेमी ठेयब समुन्द्रम मार मार छक लाक्चा डा गेय पवा, मेको ताम्तेक्म। 25 मिनु मेकोमी अरेशा, ठेयब फश गिवार पपाइक्तु। मिनु ठेयब समुन्द्र आ छाल पोक्तु। 26 मेकोपुकी सरीड सम्म जाक्दीत्तेक्म। मिनु लेंशा ठेयब समुन्द्रमी दोक्तेक्म। मिनु मेकोपुकी शुश हिंशा वाम ग्याम दुम्तेक्म। 27 मिनु मेकोपुकी दुक्शो मुर खोदेंशो पा गोल्ला चिक्शा गाक्तेक्म। मिनु मारेइ पने मचाप्ब दुम्तेक्म। 28 मोपा श्येत जशा, परमप्रभु यावे कली पुंडतेक्म। मिनु मेकोमी मेको आन कली आन श्येत रे प्रॉइतु। 29 मेकोमी फश गिवार दिक्पाइक्तु। मिनु ठेयब समुन्द्र आ छाल दिक्तेक्म। 30 मिनु फश गिवार दिक्मेनु, मेकोपुकी ग्येरसाक्म। मिनु मेकोमी मेको आन कली आन जहाज नाइक्तीकेम चाक्दीत्तु। 31 मेकोपुकीमी परमप्रभु यावे कली “गे रिम्शो पाइब बाक्नीनी” देंचा माल्नीम। मारदे हना मेकोमी मुर आन कली गेना हना यो दाक्शा, मेको आन कली वारच पा, छक लाक्चा डा गेय पाइब। 32 मेकोपुकीमी मुर आन ग्रुम्तीकेमी परमप्रभु कली ठेयब सेल्मेक्ल। खाल्पा आन दातेमी “परमप्रभु ठेयब बाक्ब” देंमल।

33 मेकोमी खोला आन कली गोरशो रागी सेल्ब। ब्वाक्कु बुक्तीके आन कली सोत्रशो रागी दुम्पाइक्ब। 34 मेकोमी ग्रेल्ब रू कली हिक्सी रू सेल्ब। मारदे हना मेकेर बाक्ब मुर आ अरेशो मटीब बाक्नीम। उत्पत्ती १९:२४-२५ 35 मेकोमी गोरशो रागी कली दोम्ली बाक्शो रागी सेल्ब। मिनु थाम्पा सोत्रशो रागीम शुश ब्वाक्कु बुक्पाइक्ब। 36 मेकेर शोत्रलु बेक्शो मुर आन कली बाक्चा गेब। मिनु मेकोपुकीमी मेकेर बाक्तीक सहर सेल्नीम। 37 मेकोपुकीमी रूमी वांचेर शोक्नीम। अडगुर खुम्नीम। मिनु मेको नेल्ल शुश ग्रेल्नीम। 38 मेकोपुकी परमप्रभु आ आसीक तशा, सोशा बोशा दुम्नीम। मिनु आन बी ब्यफ आन कली यो शुश दुम्पाइक्ब।

39 मिनु मेकोपुकी दिप्चा पुंडसीतीके नु श्येत जतीके शुश मलीशो बाक्तेक्म। 40 मिनु परमप्रभुमी मेकेर डा हुकुम पाइब आन कली लां मबाक्शो गोरशो रागीम गाक्पाइक्तीमी। अय्युब १२:२१ 41 तन्न मेकोमी श्येत जाइब आन कली श्येत रे प्रॉइब। मिनु मेको आन खिं डा मुर आन कली भेडा आन हुल खोदेंशो पा शुश सेल्ब। 42 मिनु रिम्शो थुं पाइश्शो मुरपुकी मेको तशा, ग्येरसीनीम। मिनु परमप्रभु आ अरेशो मटीब कोत्रस डा कोत्रस दुम्शा ब्वाक्ने मचाप्नीम। अय्युब २२:१९-२० 43 सु जोक्ब तुइक्ब बाक्मे, मेकोमी एको लोत्र रुबल। मिनु परमप्रभु यावे आ गेना हना यो दाक्तीके आ पर्बम मिम्तल।

108

ठेयब सेल्तीक कुम्सो
दाऊद आ कुम्सो।

1 परमप्रभु, गो थमा सुइक्ब दुम्ती। गो थमा पा इन नोले खोइक्ब दुम्ती। गो ताप्तीक ताप्शा कुम्सो पाइनुड। आं थुं मुल सेंसो! भजन संग्रह ५७:८-१२ 2 ठेयब तार पाइश्शो ताप्तीके नु बीना बोक्कीस। गो सुनी कली सेंपाइक्नुड। 3 परमप्रभु यावे गो जात जात डा मुर आन दातेमी इन कली “गे रिम्शो पाइब बाक्नीनी” देंनुड। मिनु रागी रागी डा मुर आन दातेमी इन कली ठेयब सेल्शा कुम्सो पाइनुड। 4 मारदे हना इन गेना हना यो दाक्तीक सरीड खोदेशो ठेयब बाक्ब। मिनु इन दाक्शा मप्रोंइतीके गोस्स खोदेशो पा इर डोन लाइब। भजन संग्रह ३६:६; भजन संग्रह ५७:११

5 परमप्रभु, गो सरीड क्येडा यो ठेयब बाक्नीनी। इन छेडछेड रागी नेल्ल आन तार बाक्ल। 6 मिनु इन सक्तिमी आंइ कली वारच पने। मिनु आं लोव लेत्तीनी। इन दाक्शोपुकी ब्रोंइमल। भजन संग्रह ६:७-१४

7 परमप्रभुमी आ बाक्तीक रे “गो ग्येरसीशा शेकेम कली योक्नुड। मिनु सुक्कोथ डा दिंम पुक्शा, योक्नुड। 8 गिलाद आं के बाक्ब। मिनु मनस्से यो आं केन बाक्ब। एफ्राइम आं फलाम के ताकी बाक्ब। यहूदा आं राज दन्ड बाक्ब। 9 मोआब आं ब्वाक्कु तेम्तीक बोस बाक्ब। गो एदोम तार आं जुत्ता ब्वारनुड। गो पलिस्ती आन कली ग्राशा, ग्येरशा ग्रीनुड” देंत।

10 सुम आं कली गारो हिरशो सहर सम्म चाक्दीप्बा? सुम आं कली लां कोंइशा एदोम सम्म चाक्दीप्बा? 11 परमप्रभु गे आंइ कली प्रोंइतीनी। मुल गे आंइ लडाइ पाइब नु मगाक्नीनी। 12 गे आंइ जोरी सत्रु आन कली फुचा कली वारच पने। मारदे हना मुर आन वारच पशो शोर गाक्शो बाक्ब। 13 गो परमप्रभु आ वारच पशोम ला ग्रानीकी। मिनु मेकोमी आंइ जोरी सत्रु आन कली दिम्ब।

109

क्येक्क लेत्चा कली पुंइशो लोव

कुम्सो पपाइक्ब कली दाऊद आ कुम्सो।

1 “परमप्रभु, गो इन कली ठेयब सेल्लुड। गे सिक्सी पा मबाक्कीन। 2 मारदे हना इन अरेशो मटीब नु जोल पाइबपुकीमी आं पबर्म जोल पा लोव पाइनीम। 3 मेकोपुकीमी आं कली काइ मदाक्थु, लोव पा, आं कली जिचा तोशा मोशा ग्राम्नीम। 4 मेकोपुकीमी आं दाक्शो आ पा डा, आं कली दोस गेनीम। मो हना यो गो मेको आन पबर्म पुंइनुड। 5 मोपा मेकोपुकीमी आं रिम्शो पाइश्शो आ पा डा मरिम्शो पाइनीम। आं दाक्शो आ पा डा आं कली काइ मदाक्नीम।

6 मेकोपुकीमी मेको कली दोस गेचा कली परमप्रभु आ अरेशो मटीब का वोतीन। मेको कली दोस गेचा कली मेको आ ग्युरा गे राप्चा माल्ब। मत्ती ५:४३,४४; लूका २३:३४ 7 मिनु मेको आ निसाफ दुम्मेनु, मेको दोस ताइब दुम्ल। मिनु मेको आ परमप्रभु कली पुंइतीक लोव पाप दुम्ल। 8 मेको आ ब्रोंइतीके नाक्त इच्का ला दुम्ल। मिनु मेको आ गेय अर्कोम पवल। प्रेरित १:२० 9 मेको आ तमी तौ रोम रोइक्च दुम्मल। मिनु मेको आ मीश वोंइश बेक्शो मीश दुम्ल। 10 मिनु आ तमी तौ हिरशा पुंइशा जाइब दुम्मल। मेको आन ब्रेशो खिं रे यो खेरचा पुंइसीमल। 11 मेको कली जेर गेबमी मेको आ मारेइ मारेइ नेक्गल। अरु मुरुमी मेको आ चेम्शो नेल्ल रोइक्तमेक्ल। 12 सुइमी मेको कली शिशी मकोंइदमेक्ल। आ तमी तौ आन कली यो शिशी मपामेक्ल। 13 मेको आ खिं डा मुर नेल्ल क्याम्सीमल। मिनु आ तमी तौ आन पालाम मेको आन नें क्याम्सेक्ल। इजीकीएल १८:२०-२३ 14 मिनु परमप्रभु यावेमी मेको आ किकी पिपी आन पशो पाप मिन्चा माल्ब। मेको आ ममा आ पशो पाप मक्याम्सेक्ल। प्रस्थान २०:५ 15 मेको आन पाप गेना हना यो परमप्रभु यावे आ डोंइती लील। मिनु सुइमी मेको आन कली रागीम ममिम्तमेक्ल। 16 मारदे हना मेकोमी काइ शिशी मपव। तन्न पुडग, श्येत जाइब नु थुं लुक्च लशो मुर आन कली साइक्चा कली खेदा पाप्तु। 17 मेकोमी सराप चीले पचा दाक्ताक्व। मिनु मेको सराप चीले रल। मेकोमी आसीक गेचा मदाक्त। मोपतीके आसीक मेको रे डोन बाक्ल। 18 मेकोमी सराप चीले वा फेक्सीशो खोदेशो पा फेक्साक्व। सराप आ राम ब्वाक्कु खोदेशो पा बाक्ल। तेल खोदेशो पा मेको आ रुशेम ब्रील। गन्ती ५:२४ 19 मेकोमी सराप चीले आ वा खोदेशो पा फेक्सेक्ल। मिनु किप्शुर खोदेशो पा नाक्त किंत किंत किम्सेक्ल।

20 परमप्रभु यावेमी आं कली दोस गेब नु आ पबर्म मरिम्शो लोव पाइब कली मोदेशो सजाइ गेवल। 21 तन्न परमप्रभु यावे, परमप्रभु, गो इन नें आ पबर्म आं कली वारच पाइय्यीनी। मारदे हना इन गेना हना यो दाक्तीके ठेयब बाक्ब। 22 गो पुडग नु श्येत जाइब दुम्ती। मिनु आं थुं खाइश्शो बाक्ब। 23 गो नां लाक्शो ना डा वांकु खोदेशो पा जाम्शो

बाक्नुड। थुर थुर पाइशशो सल्हा खोदेशो बाक्नुड। 24 गो माइजा बाक्डानु, आं खोइली योक्शो बाक्ब। मिनु गेयशो बाक्नुड। 25 आं कली दोस गेबपुकी आ कली तशा गाइक्नीम। मिनु आन पिया हिम्नीम।

26 परमप्रभु यावे, आं परमप्रभु, वारच पाइय्यीनी। इन गेना हना यो दाक्तीकेमी आं कली प्रोंइयीनी। 27 मेकोपुकीमी ‘परमप्रभु यावेम आं कली वारच पाइब’ दे तुइक्तमेक्ल। 28 मेकोपुकीमी सराप चीले पामेक्ल। तन्न गे आसीक गेने। मेकोपुकी बोक्मानु, मुने दोक्मल। तन्न इन गेय पाइब ग्येरसीब। लूका ६:२७-२८ 29 आं कली दोस गेब आन कुल मुनेम सुम्सीमल। मिनु आन मुने दोक्तीके फेक्तीके वा खोदेशो पा फेक्सीमल। 30 गो परमप्रभु यावे कली ‘गे थम रिम्शो पाइब बाक्नीनी’ देंनुड। शुश मुर आन दातेमी गो मेको कली ठेयब सेल्नुड” देंती। 31 मारदे हना मेको श्येत जाइब आन कली साइक्ब आन गुइ रे प्रोंइशा वारच पाइब बाक्ब।

110

परमप्रभुम पिप कली अधिकार गेब

दाऊद आ कुम्सो।

1 परमप्रभु यावेमी, आं परमप्रभु कली “गे आं ग्युरा गे निस्सो। मिनु गो इ जोरी सत्रु आन कली इ खोइल थेक्तीके सेल्नुडमी। मत्ती २२:४४; प्रेरित २:३४; हिब्रू १:१३; १कोरिन्थी १५:२५; फिलिप्पी २:८-११; हिब्रू १०:१२-१३

2 परमप्रभु यावेमी सियोन रे पा इन सक्ति डा राज दन्ड दिंब। मिनु गे इन जोरी सत्रु आन कली सासन पने” देंत। भजन संग्रह २:६ 3 गे लडाइ पनी नाक्ती इन मुर आन थुंम ग्येरशा इन नोले खोइक्नीम। सुनी डा सीत खोदेशो पा इन रागी डा ठिटापुकी खुम्सीशा इन नेक्था जाक्नीम। 4 मिनु परमप्रभु यावेमी “गे मेल्कीसेदेक खोदेशो पा गेना हना यो चढेब दुम्नेवे” दे कसम जाप्तु। मेकोमी आ थुंमफाइक्ब। उत्पत्ती १४:१८-२०; हिब्रू ५:६,१०; हिब्रू ६:२०; हिब्रू ७:१७,२१ 5 परमप्रभु इन ग्युरा गे बाक्ब। मेको गाइक्ता नाक्ती पिप आन कली खतम पोक्ब। भजन संग्रह २:२,५,९ 6 मेकोमी रागी रागी डा मुर आन कली निसाफ पाइब। मिनु मेको आन रागी बेक्शो मुरुम प्रिब। मिनु बेक्शो मुर आन पिया रागी मेर फ्राइब। दानीएल २:४४ 7 मेकोमी लां आ नेक्था डा खोला डा ब्वाक्कु तूब। मोपतीके मेको सक्ति पाइशशो दुम्शा ग्राब।

111

परमप्रभु कली ठेयब सेल्तीक कुम्सो

1 परमप्रभु यावे कली ठेयब सेलीन। गो रिम्शो थुं पाइशशो मुर आन दातेमी आं थुं नेल्लेमी “परमप्रभु, गे रिम्शो पाइब बाक्नीनी” दे गुम्तीकेम देंनुड। 2 परमप्रभु यावे आ गेय थम ठेयब बाक्नीम। सु सुम मेको कली दाक्नीमी, मेकोपुकीमी मेको शेंसीनीम। 3 मेको आ गेय ठेयब नु मान पाइक्चा पुंइसीब बाक्नीम। मिनु परमप्रभु आ ठीक पतीके गेना हना यो लीब। 4 मेकोमी आ छक लाक्चा डा गेय मिम्पाइशशो बाक्ब। परमप्रभु यावे दाक्ब नु शिशी पाइब बाक्ब। प्रस्थान १२:१-२२ 5 मेकोमी आ कली मान पा हिंब आन कली जचा गेब। मिनु आ पशो कबल गेना हना यो मिम्ब। भजन संग्रह १४५:१५ 6 मेकोमी आ मुर आन कली रागी रागी डा मुर आन शोंप गेशा, आ सक्ति कोंइशो बाक्ब। 7 मेको आ गेय नेल्ल आ देशो खोदेशो नु ठीक बाक्नीम। आ अरेशा ब्रेक्शो लोत्र नेल्ल थमा सुइक्चा माल्शो बाक्नीम। 8 मेको गेना हना यो लीब बाक्नीम। मुरपुकीमी मेको मप्रोंइथु, आन थुं नेल्लेमी टिचा माल्नीम। 9 मेकोमी आ मुर आन कली श्येत रे प्रोंइतु। मेकोमी आ पशो कबल गेनायो मक्व्याम्चा कली सेल्शो बाक्त। मेको आ नें का ला मान पा हिंचा डा बाक्ब। 10 परमप्रभु यावे कली मान पा हिंचा तुइक्ब दुम्चा कली गोतीक बाक्ब। मिनु सु सुमी मेको पाइनीमी मेको शुश रुप्ब दुम्नीम। परमप्रभु कली ठेयब सेल्तीके गेना हना यो लीब। हितोपदेस १:७

112

दाक्चा मप्रोंइब आन ग्येरशो

1 परमप्रभु यावे कली ठेयब सेलीन। सु परमप्रभु यावे कली मान पा हिंबा, मेको ग्येरसीशो मुर बाक्ब। मेकोमी परमप्रभु आ शेंशो शुश दाक्ब। भजन संग्रह १:२; हितोपदेस २०:७ 2 मेको आ चच युइ रागीम ठेयब मुर दुम्नीम। रिम्शो थुं पाइशशो मुर आन पाला आसीक राइनीम। 3 मेको आन खिंमी शोंप बाक्ब। मेको आन ठीक पतीके गेना हना यो लीब। 4 रिम्शो थुं पाइशशो मुर छिडछिडम बाक्तेकम हना यो, छेडछेड दुम्ब। मेको मुर आन कली दाक्ब, शिशी पाइब

नु ठीक पाइब बाक्नीम। 5 हाइशो दुम्शा, गेब मुर आन कली रिम्शो दुम्ब। मेकोपुकीमी आन गेय ठीक पतीकेमी पाइनीम। 6 ठीक पाइबपुकी गेनायो मप्रेसीनीम। मेको आन कली मिम्तीके गेना हना यो लीब। 7 मेको मरिम्शो लोव्र नेंशा, महिनीम। मेको आन थुं नेल्लेमी परमप्रभु यावे सक्ति पाइशो बाक्ब, दे तुइक्नीम। 8 मेको आन थुं ग्येत्थ लुक्च मपथु, महिनीम। मिनु नोले आन जोरी सत्रु आन कली बुशो ताइनीम। भजन संग्रह ९१:८ 9 मेकोपुकीमी हाइशो थुं पा पुडग आन कली मार मार गेम्तेक्म। मेको आन ठीक पतीके गेना हना यो लीब। मेको मान ताइब बाक्नीम। २कोरिन्थी ९:९ 10 मिनु परमप्रभु आ अरेशो मटीबपुकीमी मेको नेल्ल तशा आन थुं खुरसीनीम। मेको आन खुइ शेप्शा, थाम्पा गाइक्नीम। मेको आन मिम्शो गेनायो मजाक्दीप्ब।

113

परमप्रभु आ मान ततीके

1 परमप्रभु यावे कली ठेयब सेलीन। परमप्रभु यावे आ गेय पाइबपुकी परमप्रभु यावे आ नें ठेयब सेलीन। गे “परमप्रभु यावे आ नें ठेयब बाक्ब” देनीन। 2 परमप्रभु यावे आ नें मुल रे गेना हना यो ठेयब सेल्मेक्ल। 3 नां दाप्तीक रे नां पेरतीक सम्म परमप्रभु यावे आ नें ठेयब सेल्चा माल्नीम। भजन संग्रह ५०:१ 4 परमप्रभु यावे रागी रागी डा नेल्ल आन क्येडा ठेयब बाक्ब। मेको आ छेडछेड स्वर्ग क्येडा यो इर बाक्ब। 5 परमप्रभु यावे, आंइ परमप्रभु खोदेंशो अर्को सु बाक्बा डा? सु नेल्ल क्येडा इर निश्शो बाक्बा डा? प्रस्थान १५:११; यसैया ५७:१५ 6 मेकोमी सरीड नु रागी कोव्रब। 7 मेकोमी पुडग आन कली फुरकुम निश्शो रे पोक्ब। मिनु श्येत जाइब आन कली ग्रांग्रा दितीक रे पोक्ब। १सामुएल २:८; लूका १:४८; उत्पत्ती ४१:४०-४१ 8 मेको आन कली आ मुर आन ठेयब मुर नु निप्पाइक्चा कली पोक्ब। 9 मिनु मेकोम आल मथीब मीश मुर आन कली ग्येरसीशो ममा सेल्ब। परमप्रभु यावे कली ठेयब सेलीन। उत्पत्ती २१:२ १सामुएल १:२०; लूका १:५७-५८

114

इस्त्राएलीपुकी इजीप्त रे ब्रोंइशो

1 इस्त्राएली इजीप्त रे ब्रोंइशा जाक्मानु, याकूब आ खिं डा मुर अर्को जात डा लोव्र ब्वाक्तीक रे गूशा जाक्मानु, प्रस्थान १२:४१ 2 यहूदा परमप्रभु आ बाक्तीक नु इस्त्राएल आ राज्य दुम्त। 3 मोदेंशो दुम्शो तशा समुन्द्र प्रोक्त। यर्दन खोला दूली पा शाइक्त। प्रस्थान १४:२१-२२; यहोसु ३:१३, १६ 4 डांडा बोका खोदेंशो पा प्रेक्तेक्म। पहाड भेडा खोदेंशो पा प्रेक्तेक्म। 5 समुन्द्र, गे मारदे प्रोक्डे? यर्दन खोला, मारदे दूली गे शांडसे? यहोसु ४:२३-२४ 6 डांडा गे मारदे बोका खोदेंशो पा प्रेक्नी? पहाड गे मारदे भेडा खोदेंशो पा प्रेक्नी? 7 रागी, परमप्रभु आ डांडी खिंखि पावो। याकूब आ परमप्रभु आ डांडी खिंखि पावो। प्रस्थान १९:१८ 8 मेकोमी सेरथे फुल्लु कली फाइशशा, ब्वाक्कु देम्तीके सेल्लु। मिनु शेराल फुल्लु फाइशशा, ब्वाक्कु बुक्तीके सेल्लु। प्रस्थान १७:६

115

परमप्रभु यावे ला परमप्रभु बाक्ब

भजन संग्रह १३५:१५-२०

1 परमप्रभु यावे, आंइ कली ममाइ, इन नें ठेयब सेल्चा गेने। इन गेना हना यो दाक्तीके नु दाक्शा मप्रोंइतीके आ पर्बम इन नें ठेयब सेल्चा माल्शो बाक्ब। 2 रागी रागी डा मुरपुकीमी “मेको आन परमप्रभु ते बाक्म?” दे मारदे हिल्लो पाइनीमी? भजन संग्रह ४२:४

3 आंइ परमप्रभु स्वर्गम बाक्ब। मेकोमी मार दाक्ता, मेको पाइब। 4 मेको आन मूर्तिपुकी मुर आन गुइम सेल्शो सुन नु चांदी के बाक्नीम। ब्यवस्था ४:२८; यसैया ४४:९-२० 5 मिनु मेको आन के शोव्र बाक्नीम, तन्न ब्वाक्ने मचाप्नीम। मिक्च बाक्नीम, तन्न तने मचाप्नीम। 6 मिनु मेको आन के नोफा बाक्नीम। तन्न नेंने मचाप्नीम। नें बाक्नीम, तन्न नाम्ने मचाप्नीम। 7 मेको आन के गुइ बाक्नीम, तन्न सुल्ले मचाप्नीम। खोइल बाक्नीम, तन्न गाक्ने मचाप्नीम। मेकोपुकीमी आन शोव्र रे मारेइ सेंदा गुंइने मचाप्नीम। 8 मेको आन कली सेल्ब यो मोदेंशोन बाक्नीम। मिनु मेको आन कली थमा सुइक्ब यो मोदेंशोन दुम्नीम।

9 गे इस्राएलीपुकी, परमप्रभु यावे कली थमा सुतीन। मेको इन कली वारच पाइब नु तेक्तीक बाक्ब। 10 हारून आ खिं डा मुरपुकी, परमप्रभु यावे कली थमा सुतीन। मेको इन कली वारच पाइब नु तेक्तीक बाक्ब। 11 सु सुम परमप्रभु यावे कली मान पा हिंशा, थमा सुइक्नीमी, मेको आन कली वारच पाइब नु तेक्तीक बाक्ब।

12 परमप्रभु यावेमी आंइ कली मिम्ब। मिनु आसीक गेब। मेकोमी इस्राएल डा मुर आन कली आसीक गेब। मेकोमी हारून आ खिं डा मुर आन कली आसीक गेब। 13 मेकोमी परमप्रभु यावे कली मान पा हिंब आइक्च ठेयब नेल्ल आन कली आसीक गेब।

14 परमप्रभु यावेमी इन कली नु इन आल आन कली सोशा बोशा दुम्पदल। 15 सरीड नु रागी सेल्ब परमप्रभु यावेमी इन कली आसीक गेवल। भजन संग्रह १३४:३

16 स्वर्ग परमप्रभु यावे केन बाक्ब। तन्न रागी चहिं मुर आन कली गेशो बाक्ब। 17 बेक्शो मुर नु बेक्शो मुर आन बाक्तीकेम लाइबपुकीमी परमप्रभु यावे कली ठेयब मसेल्नीम। यसैया ३८:१८ 18 तन्न गो दा मुल रे गेना हना यो परमप्रभु यावे कली ठेयब सेल्नीकी। परमप्रभु यावे कली ठेयब सेलीन।

116

परमप्रभु कली ठेयब सेल्शो

1 गो परमप्रभु यावे कली दाक्नुड। मारदे हना मेकोमी आं पुंइशो नु ब्रेशो नेशो बाक्ब। 2 मेकोमी आं लोव्र नेंतु। मोपतीके गो ब्रोंइडा सम्म मेको कली पुंइशा लोव्र पाइनुड। 3 गो बेक्चा चिक्शो बाक्ती। हेररा तुरसुम लाइक्चा पुंइसीशो बाक्ती। सुर्ता पतीके नु हिंतीके थुंम सुम्शो बाक्ती। 4 मेना गो परमप्रभु यावे आ नें थोशा “परमप्रभु यावे, आं कली ब्रोंइचा गेयीनी” दे पुंइता।

5 परमप्रभु यावे शिशी पाइब नु ठीक पाइब बाक्ब। आंइ परमप्रभु शुश दाक्ब बाक्ब। 6 परमप्रभु यावेम आइक्च थुं पाइशो आन कली कोव्रब। आं थुं लुक्च लमेनु, मेकोमी आं कली श्येत रे प्रोंइती। 7 आं थुं लेशा नांइसो। मारदे हना परमप्रभु यावेमी इ कली रिम्शो पाइशो बाक्ब। भजन संग्रह ४२:६

8 गे आं सोक्त कली बेक्चा रे प्रोंइशो बाक्तीनी। आं कली डाक्तीक नु दाइल पाइक्तीक रे प्रोंइतीनी। 9 गो ब्रोंइशो मुर आन बाक्तीक रागीमी परमप्रभु यावे आ डोंइती गाक्नुड। भजन संग्रह १४२:६ 10 गो शुश श्येत जशा यो, आं थमा सुइक्तीक मप्रोनु। 11 गो सुर्ता पा श्येत जडानु “मुर नेल्ले जोल पाइब ला बाक्नीम” देंती। रोमी ३:४

12 परमप्रभु यावेमी आं कली गिश रिम्शो पाइय्यी, गो मेको आ पा डा मेको कली मार गेनुडा? 13 गो “गे आं कली श्येत रे प्रोंइतीनी” देंशा, परमप्रभु यावे आ नें थिशा, मेको कली ठेयब सेल्नुड। 14 गो परमप्रभु यावे आ डोंइती मुर आन दातेमी आं जशो कसम खाप्नुड। 15 परमप्रभु यावे आ मुर बेक्चा मेको कली थम ठेयब बाक्ब। भजन संग्रह ७२:१४ 16 परमप्रभु यावे, गो इन गेय पाइब नड। गो इन गेय पाइब मीश मुर आ तौ, इन वाइल नड। गे आं कली बेक्तीक रे प्रोंइतीनी। 17 गो इन कली “गे रिम्शो पाइब बाक्नीनी” दे चढेतीक चढेनुड। मिनु परमप्रभु यावे, इन नें थिशा, इन कली ठेयब सेल्नुड। योना २:१० 18 गो परमप्रभु यावे आ मुर नेल्ल आन डोंइती आं जशो कसम खाप्नुड। 19 परमप्रभु यावे आ खिं डा लाडगा नु यरूसलेमम बाक्बपुकी परमप्रभु यावे कली ठेयब सेलीन।

117

परमप्रभु कली ठेयब सेलीन

1 रागी रागी डा मुर नेल्लेम परमप्रभु यावे कली ठेयब सेलीन। जात जात डा मुर नेल्लेम मेको कली मान पने! रोमी १५:११ 2 मारदे हना परमप्रभु यावे आ गेना हना यो दाक्तीके नु आ दाक्शा गेनायो मप्रोंइतीके ठेयब बाक्ब। मिनु आ दाक्शा गेनायो मप्रोंइतीके गेना हना यो लीब। मोपतीके परमप्रभु यावे कली ठेयब सेलीन। प्रस्थान ३४:६

118

ठेयब सेल्तीक कुम्सो

1 परमप्रभु यावे कली “गे रिम्शो पाइब बाक्नीनी” देनीन। मारदे हना मेको रिम्शो पाइब बाक्ब। मिनु आ दाक्तीके गेना हना यो लीब। भजन संग्रह १०६:१ 2 इस्राएलीपुकीमी “मेको आ दाक्तीके गेना हना यो लीब” देंमल। 3 हारून आ

खिं डा मुरपुकीमी “मेको आ दाक्तीके गेना हना यो लीब” देंमल। 4 परमप्रभु यावे कली मान पा हिंबपुकीमी “मेको आ दाक्तीके गेना हना यो लीब” देंमल।

5 गो श्येत जडानु, परमप्रभु यावे कली पुंडता। मिनु मेकोमी आं लोव लेत्ताक्यी। मिनु आं कली श्येत रे प्रोंइती। 6 परमप्रभु यावे गो नु बाक्तीके गो महिंनुड। मुरपुकीमी आं कली मार पाइवने चाप्नीमी डा? रोमी ८:३१; भजन संग्रह ५६:५; हिब्रू १३:६ 7 परमप्रभु यावे गो नु बाक्शा, आं कली वारच पाइब बाक्ब। गो आं कली काइ मदाक्ब आन कली ग्राशा कोंडनुडमी। 8 मुर आन कली तशा “मेकोमी वारच पाइनीम” देंचा क्येडा परमप्रभु यावे नु फाम्सीचा रिम्शो बाक्ब। भजन संग्रह १४६:३ 9 मिनु हुकुम पाइब मुर आन कली तशा “मेकोमी वारच पाइनीम” देंचा क्येडा परमप्रभु यावे नु फाम्सीचा रिम्शो बाक्ब। 10 रागी रागी डा मुर नेल्लेमी आं कली पुम्ताक्यीमी। तन्न गो परमप्रभु यावे आ नेमी नेल्ल आन कली खतम पोक्ताक्यी। 11 मेकोपुकीमी आं कली तेइ तेइ रे पुम्ताक्यीमी। तन्न गो परमप्रभु यावे आ नेमी नेल्ल आन कली खतम पोक्ताक्यी। 12 मेकोपुकीमी आं कली सुरबुम खोंदेशो पा गिलतीमी। मेकोपुकी चूम ब्रशो मी खोंदेशो पा ब्राम्तेक्म। तन्न गो परमप्रभु यावे आ नेमी मेको आन कली खतम पोक्ताक्यी। 13 गो नेप्चा पुंडसीशा, गोल्चा चिक्शो नड। तन्न परमप्रभु यावेमी वारच पाइक्ती। 14 परमप्रभु यावे आं बोल नु सक्ति बाक्ब। मिनु मेको आं कली श्येत रे प्रोंइब दुम्शो बाक्ब। प्रस्थान १५:२ 15 ठीक पाइब आन ताम्बुमी ग्येरशो नु ग्राशा कुम्सो पशो नेंसीब। परमप्रभु यावेमी सक्ति पाइश्शो गेय पाइब। 16 परमप्रभु यावेमी “गो ग्राती” दे आ ग्युरा गुइ पोक्शो बाक्ब। परमप्रभु यावेमी सक्ति पाइश्शो गेय पाइब। 17 गो मबेक्नुड, तन्न ब्रोंइशा बाक्शा, परमप्रभु यावे आ पशो नेल्ल शेंनुडमी। 18 परमप्रभु यावेमी आं कली शुश सजाइ गेती। तन्न बेक्चा मगेयी। २कोरिन्थी ६:९

19 आं कली परमप्रभु यावे आ खिं डा लाप्चो रोक्कीन। मिनु गो ओव्रशा, परमप्रभु यावे कली “गे रिम्शो पाइब बाक्नीनी” देंनुड। 20 एको परमप्रभु यावे आ लाप्चो बाक्ब। ठीक पाइबपुकी एको लाप्चो रे ओव्रनीम। यसैया २६:२ 21 गे आं पुंडशो नेंशा, लोव लेत्ताक्यीनी। मोपतीके गो इन कली “गे रिम्शो पाइब बाक्नीनी” देंनुड। गे आं कली श्येत रे प्रोंइब दुम्तीनी। 22 खिं सेल्बपुकीमी गारो प्रोव्रडमेनु “एको फुल्लु मगार” दे ताइक्तमे बाक्त। मिनु मेको मगारथु ताइश्शो फुल्लु चहिं जग डा सुरे फुल्लु दुम्माक्त। यसैया २८:१६; मत्ती २१:४२ 23 मेको परमप्रभु यावेमी पशो बाक्ब। गो मेको तशा, छक लाक्नीकी। 24 परमप्रभु यावेमी मुलाक्ती डा नाक्ती सेल्शो बाक्ब। गोपुकी कुम्सो पा ग्येरसय।

25 परमप्रभु यावे आंइ कली श्येत रे प्रोंइकी। परमप्रभु यावे आंइ गेय रिम्शो दुम्ल। 26 परमप्रभु यावे आ नेमी जाक्ब आसीक रशो बाक्ब। गो परमप्रभु यावे आ खिं रे पा इन कली आसीक गेनीकी। मत्ती २१:९; मत्ती २३:३९ 27 परमप्रभु यावे ला परमप्रभु बाक्ब। मेकोमी आ छेडछेड आंइ तार दाप्पाइश्शो बाक्ब। रवा आ राशी शेशा, ग्येरशा, चढेतीक आ प्रोव्र ग्योम्दीन। प्रस्थान २७:१-२ 28 गे आं परमप्रभु बाक्नीनी। गो इन कली “गे रिम्शो पाइब बाक्नीनी” देंनुड। गे आं परमप्रभु बाक्नीनी। मिनु गो इन कली मान पा ठेयब सेल्नुड। 29 गे परमप्रभु यावे कली “गे रिम्शो पाइब बाक्नीनी” देनीन। मारदे हना मेको रिम्शो पाइब बाक्ब। मिनु आ दाक्तीके गेना हना यो लीब। भजन संग्रह १०६:१; भजन संग्रह १०७:१; भजन संग्रह ११८:१; भजन संग्रह १३६:१

119

परमप्रभु आ अरेशो लोव्र ठेयब सेल्शो

एको भजन संग्रह कली सुन के हिब्रू आकछेर यो देंनीम। मारदे हना मेको आ टुक्रा टुक्रा हिब्रू लोव्र डा आल्फाबेट रे पा गोइनीम। डोंइती डा टुक्रा आलेफ देंसीब, अध्याय नेल्ल आन डोंइती डा हिब्रू आकछेर लोव्रमी आलेफ बाक्ब।

आलेफ

1 सु सु रिम्शो पाइनीमी नु दोस मताइब बाक्नीमी, मेको ग्येरसीशो मुर बाक्नीम। मारदे हना मेकोपुकीमी परमप्रभु यावे आ अरेशो टिशो बाक्नीम। भजन संग्रह ११२:१-२ 2 सु सुमी परमप्रभु आ देंशो मिम्शा पाइनीमी नु आन थुं नेल्लेमी मेको कली मालनीमी, मेकोपुकी ग्येरसीशो मुर बाक्नीम। 3 मेको मुरपुकी काइ मरिम्शो मपथु, परमप्रभु आ लांम गाक्नीम। 4 गे इन ब्रेक्शा अरेशो आंइ कली होस पा पचा कली गेशो बाक्तीनी। 5 गो गेना हना यो इन फुल्लुम मुशा ब्रेक्शो लोव्र पशा गाक्डल। 6 गो इन शेंतीके नेल्ले होस पा पशो नड हना, मुने मदोक्ड वा। 7 गो इन निसाफ पतीक लोव्र शेंसाक्यी हना, इन कली रिम्शो थुंमी ठेयब सेल्ने चाप्नुड। 8 गो इन फुल्लुम मुशा ब्रेक्शो लोव्र टीनुड। आं कली काइ मप्रोंइयीनी।

बेथ

9 ठिटा वोंइश मुर दोपा हेंथे मपथु, आन लांम गाक्ने चाप्नीमी? मेको इन लोव्र टिशा ला मो पने चाप्नीम। 10 गो आं थुं नेल्लेमी इन कली माल्लुड। आं कली इन शेंतीके रे डोन लचा मगेयीनी। 11 गो मरिम्शो मपडल, दे इन लोव्र आं थुंम वोइशो बाक्नुड। 12 परमप्रभु यावे, इन नें ठेयब बाक्ब। आं कली इन फुल्लुम मुशा ब्रेक्शो लोव्र शेंदीनी। भजन संग्रह ११९:२६, ६४, ६८ 13 गो इन देशो पतीक लोव्र नेल्ल शेंनुडमी। 14 गो शुश शोप तशा ग्येरसीशो मुर खोदेशो पा इन देशो लां तशा ग्येरसाक्यी। 15 गो इन ब्रेक्शा अरेशो मिम्ना मिम्न, इन लां कोव्रशा गाक्नुड। 16 गो इन फुल्लुम मुशा ब्रेक्शो लोव्र तुइशशा, ग्येरसाक्यी। इन लोव्र मप्रेंनुड।

गिमेल

17 इन गेय पाइब कली रिम्शो पने। मिनु गो इन लोव्र टिशा ब्रोंइडल। 18 गे आं कली मिक्च ताइब सेल्यीनी। मोपा गो इन अरेशो लोव्र डा छक लाक्चा डा गेय तने चबुल। 19 गो रागीम पौना का बाक्नुड। गे इन शेंतीके लोव्र आं मतुइक्चा डा पा मखुइक्तीन। भजन संग्रह ३९:१३ 20 आं थुं गेना हना यो इन पतीक लोव्र तुइक्चा कली माल्स डा माल्स बाक्ब। 21 गे इन शेंशो प्रोंइब ठेयब लेशशो नु सराप रशो मुर आन कली हुइक्नीनी। ब्यवस्था २७:२६; गलाती ३:१० 22 गे मेको आन शुक्शी पतीके नु दोस गेतीके आं क्येडा डोन वोतीन। मारदे हना गो इन देशो टीब मुर बाक्ती। 23 मिनु सासन पाइबपुकी बुक्शा, आं कली मरिम्शो पाइक्चा कली लोव्र गारपाइक्नीम। मो हना यो गो, इन गेय पाइबमी, इन फुल्लुम मुशा ब्रेक्शो लोव्र मिम्स डा मिम्स बाक्नुड। 24 इन देशो लोव्र आं थुं ग्येरपाइक्ब नु आं कली अर्ती गेब बाक्नीम।

दालेथ

25 आं थुं लुक्च लशो बाक्ब। इन लोव्र पतीकेमी आं थुं बारपाइय्यीनी। 26 गो इन कली आं पशो तुइक्पाइक्तन्नी। मिनु गे आं लोव्र लेत्ताक्नी। इन फुल्लुम मुशा ब्रेक्शो लोव्र शेंदीनी। 27 गे इन ब्रेक्शा अरेशो लोव्र रुप्पाइय्यीनी। मिनु गो इन छक लाक्चा डा गेय मिम्स डा मिम्स बाक्नुड। 28 आं थुं सुर्ता पा लुक्च लत। इन लोव्र पतीकेमी आं कली ब्रोंइचा गेयीनी। 29 दूली लां आं क्येडा डोन वोतीन। मिनु गे शिशी पा इन अरेशो लोव्र शेंदीनी। भजन संग्रह ११९:१०४, १२८ 30 गो इन कली मप्रोंइतीक लां योव्रता। गो इन पतीक लोव्र आं डोंइती वोइक्ता। 31 परमप्रभु यावे, गो इन देशो थमा पा पाइनुड। आं कली मुने मदोक्पाइय्यीनी। 32 गो इन शेंशो पना पन बाक्ती। मिनु गे आं रुप्तीक थुं बारपाइक्नीनी।

हे

33 परमप्रभु यावे, इन फुल्लुम मुशा ब्रेक्शो लोव्र शेंदीनी। मिनु गो मेको नोले सम्म मप्रोंइनुड। 34 गे आं कली रुप्तीक थुं गेयीनी। मिनु गो इन अरेशो लोव्र आं थुं नेल्लेमी पाइनुड। 35 इन शेंतीके लांम गाक्पाइय्यीनी। मारदे हना गो मेको कली दाक्नुड। 36 आं थुं कली इन देशो ला मिम्पतीन। शुश क्येट चेम्तीके ममिम्पतीन। 37 मरिम्शो थोव्रक मकोव्रपाइय्यीनी। इन दाक्चा डा पा ब्रोंइचा गेयीनी। 38 गे इन गेय पाइब कली इन थोक्शा पशो लोव्र खाप्पीन। इन थोक्शा पशो लोव्र इन कली मान पा हिंब आन कली बाक्ब। 39 हिंचा डा शुक्शी पाइक्चा पुंडसीतीक आं क्येडा डोन वोतीन। मारदे हना इन पतीक लोव्र रिम्शो बाक्नीम। 40 इन ब्रेक्शा अरेशो लोव्र शुश दाक्नुड। इन निसाफ पतीकेमी आं कली ब्रोंइचा गेयीनी।

वाव

41 परमप्रभु यावे, इन गेना हना यो दाक्तीक आं कली दुम्ल। इन थोक्शा पशो लोव्र खोदेशो पा आं कली श्येत रे प्रोंइयीनी। 42 मिनु गो आं कली शुक्शी पाइब आन कली लोव्र लेन्ने चाप्नुड। मारदे हना गो इन लोव्र थमा सुइक्नुड। 43 गे इन थमा लोव्र पचा कली मतेक्यीनी। मारदे हना गो इन पतीक लोव्र आस पा बाक्नुड। 44 गो इन अरेशो लोव्र थमा पा गेना हना यो टीनुड। 45 मिनु गो सुइ क्येडा महिंथु बाक्नुड। मारदे हना इन ब्रेक्शा अरेशो लोव्र मालता। 46 गो पिप आन डोंइती इन देशो लोव्र आ पबर्म लोव्र पाइनुड। मिनु मुने मदोक्नुड। मत्ती १०:१८ 47 गो इन शेंतीके तुइशशा ग्येरसीनुड। मारदे हना गो मेको कली दाक्नुड। 48 गो इन शेंशो लोव्र ठेयब सेल्चा दाक्नुड। मोपा इन फुल्लुम मुशा ब्रेक्शो लोव्र मिम्ना मिम्न बाक्नुड।

चायीन

49 इन गेय पाइब कली पशो लोव्र मिम्तीन। आं कली मेको आ लां कोव्रपाइय्यीनी। 50 गो श्येत जडानु, इन थोक्शा पशो लोव्रमी आं कली लेम्शा ब्रोंइचा गेब। 51 ठेयब लेशशो मुरुमी आं कली शुश शुक्शी पाइनीम। तन्न गो इन अरेशो लोव्र मप्रोंइनुड। 52 परमप्रभु यावे, गो इन साइ डोंइती डा पतीक लोव्र मिम्शा, आं थुं नाइक्नुड। 53 इन अरेशो लोव्र

प्रोंइब मुर आन पबर्म गो गाइशशा चुरशा बाक्ती। 54 गो ते बाक्ती हना यो, इन फुल्लुम मुशा ब्रेक्शो लोव्र आं कुम्सो दुम्शो बाक्तेक्म। 55 परमप्रभु यावे, गो नाक्दो इन कली मिम्शा, इन अरेशो लोव्र पाइनुड। 56 गो आसीक राइब दुम्ती। मारदे हना गो इन ब्रेक्शा अरेशो लोव्र टिशा बाक्ती।

हेथ

57 परमप्रभु यावे, गे आं परमप्रभु बाक्नीनी। गो इन लोव्र टिना टिन बाक्नुड। 58 गो आं थुं नेल्लेमी इन कली पुंइता। इन थोक्शा पशो लोव्र खोदेशो पा, आं कली शिशी पाइय्यीनी। 59 गो इन पतीके मिम्शा, इन देशो लोव्र डा लांम गाक्नुड। 60 गो इन शेंतीके रीब पा टीनुड। गो देश मपाइनुड। 61 इन अरेशो लोव्र मटीबपुकीमी आं कली फ्रेंताक्कीमी हना यो, गो इन अरेशो लोव्र मप्रेंनुड। 62 गो नाक्दो बोक्शा, इन निसाफ पतीक लोव्र आ पबर्म इन कली ठेयब सेल्लुड। भजन संग्रह ४२:९ 63 गो इन कली मान पा हिंब नु इन ब्रेक्शा अरेशो लोव्र टीब आन वारच नड। 64 परमप्रभु यावे, रागी इन गेना हना यो दाक्तीकेमी ब्रीशो बाक्ब। इन फुल्लुम मुशा, ब्रेक्शो लोव्र शेंदीनी।

टेथ

65 परमप्रभु यावे, इन लोव्र खोदेशो पा गे इन गेय पाइब कली रिम्शो पाइक्तीनी। 66 आं कली रुप्व नु तुइक्ब सेलीन। मारदे हना गो इन शेंतीके थमा सुइक्नुड। 67 गो श्येत जचा क्येडा डोंइती हेंथे लां खोइशशो नड। तन्न मुल इन लोव्र टीनुड। 68 गे रिम्शो पाइब नु दाक्ब बाक्नीनी। मोपतीके आं कली इन फुल्लुम मुशा, ब्रेक्शो लोव्र शेंदीनी। 69 ठेयब लेशशो मुरपुकीमी आं पबर्म जोल पाइनीम। गो चहिं आं थुं नेल्लेमी इन ब्रेक्शा अरेशो लोव्र पना पन बाक्नुड। 70 मेको आन थुं थांइशो बाक्ब। तन्न गो इन अरेशो लोव्र तुइशशा ग्येरसीशो बाक्नुड। 71 गे आं कली श्येत जपाइक्तीनी, मेको रिम्शो बाक्त। मोपा इन फुल्लुम मुशा ब्रेक्शो लोव्र शेंसाक्की। 72 मिनु हजार हजार टुक्रा सुन चांदी क्येडा इन अरेशो लोव्र आं कली रिम्शो बाक्ब।

योध

73 गे आं कली सेल्लतीनी। मिनु इन शेंशो लोव्र शेंसीचा कली रुप्तीक थुं गेयीनी। 74 इन कली मान पा हिंबपुकी आं कली तशा ग्येरसीनीम। मारदे हना गो इन लोव्र डा लां कोव्रना कोव्रन बाक्नुड। 75 परमप्रभु यावे, इन निसाफ पतीके ठीक बाक्नीम। गो मेको तुइक्नुड। गे आं कली इन दाक्शा मप्रोंइतीकेमी श्येत गेतीनी। 76 इन गेय पाइब, आं कली इन गेना हना यो दाक्तीकेमी इन थोक्शा पशो लोव्र खोदेशो पा लेम्दीनी। 77 गे आं कली शिशी पाइतीनी हना, गो ब्रोंइनुड। मारदे हना इन अरेशो लोव्र तुइशशा, ग्येरसाक्की। 78 ठेयब लेशशो मुर मुने दोक्मल। मारदे हना मेकोपुकीमी आं कली मो दिम्ताक्कीमी। गो चहिं इन अरेशा ब्रेक्शो लोव्र मिम्ना मिम्न बाक्नुड। 79 इन कली मान पा हिंब आं नेक्था जाक्मल। मोपा इन देशो लोव्र रुप्मेक्ल। 80 गो इन फुल्लुम मुशा ब्रेक्शो लोव्र पशा दोस मतडल। मोपा मुने मदोक्डल।

काफ

81 गो आं श्येतम इन प्रोंइतीक शुश माल्लुड। मिनु गो इन लोव्र डा लां कोव्रना कोव्रन बाक्नुड। 82 गो इन थोक्शा पशो लोव्र शुश रिम्ना रिम्न बाक्नुड। मिनु “आं कली गेना लेम्नीनी?” दे हिल्लो पाइनुड। 83 मारदे हना गो कुनम वोइशशो कुशुल के थैलो खोदेशो बाक्नुड। मो हना यो गो इन फुल्लुम मुशा ब्रेक्शो लोव्र मप्रेंनुड। 84 गो, इन गेय पाइब, दोशो सम्म फाल्चा माल्लुडा? गे आं कली खेदा पाइब आन कली गेना निसाफ पाइनीनी? 85 ठेयब लेशशोपुकीमी आं कली खाल्टा दोम्तेक्म। मेकोपुकी इन अरेशो काइ मपाइब बाक्नीम। 86 इन शेंतीके नेल्ले गेना हना यो लीनीम। मिनु मेकोपुकीमी आं कली मोशा खेदा पाइनीम। आं कली वारच पाइय्यीनी। 87 मेकोपुकीमी आं कली रागी रे हेररा क्याम्ताक्कीमी। गो चहिं इन ब्रेक्शा अरेशो लोव्र मप्रोनु। 88 इन गेना हना यो दाक्तीकेमी ब्रोंइपाइय्यीनी। मोपा गो इन देशो टिना टिन बाक्नुड।

लामेध

89 परमप्रभु यावे गेना हना यो बाक्ब। इन लोव्र स्वर्गम वोइशशो बाक्ब। यसैया ४०:८ 90 इन मुर आन कली दाक्शा मप्रोंइतीके पाला पाला सम्म लीब। गे रागी सेल्शा वोइक्तीनी। मिनु मेको महिम्सीब। 91 इन लोव्र पतीकेमी मेको महिम्सीब। मारदे हना नेल्लेमी इन लोव्र टीनीम। 92 इन अरेशो लोव्रम आं कली मग्येरपाइशशो हना, गो आं श्येतम बेक्ड वा। येरमीया १५:१६ 93 गो इन अरेशा ब्रेक्शो लोव्र गेनायो मप्रेंनुड। मारदे हना गे मेको आ पतीकेमी आं कली ब्रोंइपाइक्तीनी। 94 गो इन मुर नड। आं कली प्रोंइयीनी। मारदे हना गो इन ब्रेक्शा अरेशो लोव्र माल्ला। 95 इन अरेशो लोव्र मटीबपुकीमी आं कली साइक्चा कली बाप्शो बाक्नीमी। गो चहिं इन देशो मिम्शा बाक्नुड। 96 मुरुमी नेल्ल क्येडा रिम्शो मारेइ सेल्ले मचाप्नीम। गो मेको तुइक्नुड। तन्न इन शेंशो लोव्र नेल्ल क्येडा रिम्शो बाक्ब।

मेम

97 गो इन अरेशो लोव्र शुश दाक्नुड। गो नाक्त कित कित मेको आ पबर्म मिम्नुड। भजन संग्रह १:२ 98 गो इन शेंशो लोव्रम आं जोरी सत्रु आन क्येडा आं कली तुइक्ब सेल्ब। मारदे हना मेको गेना हना यो गो नु बाक्ब। 99 मिनु आं कली शेंब आन क्येडा गो जोक्ब तुइक्ब दुम्ती। मारदे हना इन देशो मिम्ना मिम्न बाक्ती। 100 गो खाल्पा आन क्येडा यो जोक्ब तुइक्ब दुम्ती। मारदे हना इन ब्रेक्शा अरेशो लोव्र टिना टिन बाक्नुड। 101 गो इन लोव्र टिचा कली मरिम्शो लां मखोइक्थु बाक्नुड। 102 गो इन देशो पतीक लोव्र रे डोन मलड। मारदे हना गे आं कली शेंताक्यीनी। 103 इन देशो लोव्र ब्रोव्रशो बाक्ब। मेको खुदो क्येडा यो जिजी बाक्ब। 104 इन ब्रेक्शा अरेशो लोव्र रे रुप्व दुम्ती। मोपतीके गो दूली पतीक नेल्ल काइ मदाक्नुड। भजन संग्रह ११९:२९

नुन

105 इन लोव्र आं खोइली कली छेडछेड बाक्ब, आं लां तचा कली रांको खोदेशो बाक्ब। २पत्रुस १:१९ 106 गो इन निसाफ पतीक लोव्र पाइनुड, दे कसम जशा खाप्ता। 107 परमप्रभु यावे, गो शुश श्येत जाइनुड, इन लोव्रम देशो खोदेशो पा आं कली ब्रोइचा गेयीनी। 108 परमप्रभु यावे, गो इन कली ठेयब सेल्शो, चढेतीक खोदेशो पा बने। मिनु आं कली इन पतीक लोव्र शेंदीनी। भजन संग्रह १९:१५ 109 गो गेना हना यो बेक्चा चिक्शा बाक्ती। मो हना यो गो इन अरेशो लोव्र मप्रेंनुड। 110 इन अरेशो लोव्र मटीबपुकीमी आं कली ब्वारद दाइशो बाक्नीम। मो हना यो इन ब्रेक्शा अरेशो लोव्र मप्रेंनुड। 111 इन देशो लोव्र गेना हना यो आं शोंप बाक्ब। मारदे हना मेकोमी आं थुं शुश ग्येरपाइक्ब। 112 गो इन फुल्लुम मुशा ब्रेक्शो लोव्र मबेक्डा सम्म पाइनुड, दे आं थुं फ्रेशा बाक्ती।

सामेख

113 गो थुं निक्शी पाइशो मुर आन कली काइ मदाक्नुड। मिनु इन अरेशो लोव्र दाक्नुड। भजन संग्रह ३१:७; १राजा १८:२१ 114 गो आं खुइक्तीक नु तेक्तीक बाक्नीनी। गो इन लोव्र डा लां कोव्रना कोव्रन बाक्नुड। 115 गो आं परमप्रभु आ शेंतीके पने चबुल, गे मरिम्शो पाइबपुकी, आं क्येडा डोन लने। 116 इन थोक्शा पशो लोव्र खोदेशो पा आं कली ब्रोइचा गेयीनी। मिनु गो इन लां कोव्रशा, मुने मदोक्डल। 117 आं कली प्रोइचा कली वारच पाइय्यीनी। गो गेना हना यो इन फुल्लुम मुशा ब्रेक्शो लोव्र दाक्नुड। 118 इन फुल्लुम मुशा ब्रेक्शो लोव्र डा लां रे हेंथे गाक्ब नेल्ल आन कली तिल्लीनी। मारदे हना मेको आन लां जोल बाक्त। 119 रागी डा इन अरेशो मटीब नेल्ल आन कली पुलु खोदेशो पा फिक्तीनी। मोपतीके गो इन देशो लोव्र दाक्नुड। यसैया १:२५ 120 गो इन कली मान पा हिंशा खिंखि पाइनुड। मिनु गो इन निसाफ पतीक मिम्शा हिंनुड।

आयीन

121 गो ठीक निसाफ पाता। आं कली दिप्ब आन कली जिम्मा मगेयीनी। 122 इन गेय पाइब कली वारच पा, रिम्शो पने। इन कली मटीबपुकीमी आं कली दिप्चा मगेने। 123 गो इन प्रोइतीक नु इन ठीक निसाफ पा पशो लोव्र कली शुश कोव्रशा रिम्नुड। 124 इन गेय पाइब कली इन गेना हना यो दाक्तीकेमी वारच पने। मिनु आं कली इन फुल्लुम मुशा ब्रेक्शो लोव्र शेंदीनी। 125 गो इन गेय पाइब नड। आं कली रुप्तीक थुं गेयीनी। मोपा गो इन देशो रुप्ने चबुल। 126 परमप्रभु यावे, इन गेय पची ना दुम्शो बाक्ब। मारदे हना मुरपुकीम इन अरेशो लोव्र मटीम। 127 गो सुन नु क्येख सुन क्येडा इन शेंतीके दाक्नुड। 128 मोपतीके गो आं लां नेल्लेमी इन ब्रेक्शा अरेशो लोव्र मिम्नुड। मिनु दूली लां नेल्ल काइ मदाक्नुड। भजन संग्रह ११९:२९

पे

129 इन देशो लोव्र शुश रिम्शो बाक्नीम। मोपतीके गो मेको टिना टिन बाक्नुड। 130 इन लोव्र नेंशोनु, रुप्तीक थुं गेब। मतुइक्ब आन कली तुइक्ब सेल्ब। 131 गो ब्वाक्कु तूतू दाक्शो खोदेशो पा इन शेंशो लोव्र मालना मालन बाक्नुड। 132 गो आं गे लेशशा शिशी पने। इन नें दाक्ब आन कली शिशी पशो खोदेशो पा आं कली यो शिशी पने। 133 आं कली इन थोक्शा पशो लोव्र डा लां गाक्पाइय्यीनी। मरिम्शो पतीकेम आं कली हुकुम पचा मगेने। 134 आं कली मुर आन दिप्तीक रे प्रोइयीनी। मिनु गो इन ब्रेक्शा अरेशो लोव्र पने चबुल। 135 इन कुल इन गेय पाइब तार नां खोदेशो पा ब्रपतीन। मिनु इन फुल्लुम मुशा ब्रेक्शो लोव्र आं कली शेंदीनी। 136 गो डाक्नुड। मारदे हना मुरपुकीमी इन अरेशो लोव्र मटीम।

चाधे

137 परमप्रभु यावे, गे रिम्शो पाइब बाक्नीनी। मिनु इन पशो निसाफ ठीक बाक्नीम। 138 गे इन देशो लोव्र ठीक निसाफ पतीकेमी वोइक्तीनी। गो मेको कली थमा सुइक्नीकी। 139 गो चुरना चुरन बाक्नुड। मारदे हना आं कली खेदा पाइबपुकीमी इन लोव्र प्रेंताक्म। भजन संग्रह ६९:१० 140 इन थोक्शा पशो लोव्र शुश रिम्शो बाक्ब। मिनु गो, इन गेय पाइबमी मेको दाक्नुड। 141 गो आइक्च बाक्नुड। आं कली सुइमी महिक्नीम। मो हना यो गो इन ब्रेक्शा अरेशो लोव्र मप्रेंनुड। 142 इन निसाफ पतीके गेना हना यो ठीक बाक्ब। मिनु इन अरेशो लोव्र थमा लोव्र बाक्ब। 143 गो हिंती नु श्येत जाइब दुम्ती हना यो, इन शेंतीकेम आं कली ग्येरपाइक्ब। 144 इन देशो गेना हना यो ठीक बाक्नीम। आं कली रुप्तीक थुं गेतीनी हना, गो ब्रोंइनुड।

क्वोफ

145 गो आं थुं नेल्लेमी इन कली पुंइनुड। परमप्रभु यावे आं लोव्र लेत्तीनी। गो इन फुल्लुम मुशा ब्रेक्शो लोव्र टिना टिन बाक्नुड। 146 गो इन कली “गे आं कली श्येत रे प्रोंइयीनी” दे पुंइनुड। मिनु गो इन देशो पाइनुड। 147 गो नां मदाप्यु बोक्शा, इन कली “वारच पाइय्यीनी” दे पुंइनुड। गो इन लोव्र डा लां कोव्रना कोव्रन बाक्नुड। 148 गो इन थोक्शा पशो लोव्र मिन्चा कली नाक्दो सेना सेन बाक्ती। 149 इन गेना हना यो दाक्तीकेमी आं पुंइशो नेनीन। परमप्रभु यावे, इन निसाफ पतीकेमी आं कली ब्रोंइचा गेयीनी। 150 आं कली खेदा पाइबपुकी आं कली साइक्चा कली आं नेक्था जाक्नीम। मेकोपुकी इन अरेशो लोव्र रे डोन बाक्नीम। 151 तन्न परमप्रभु यावे, गे आं नेक्था बाक्नीनी। इन शेंशो लोव्र नेल्ल थमा बाक्ब। 152 गो डोंइती रे इन देशो लोव्र पढेशा, मेको गेना हना यो कली सेल्लो बाक्ब, दे तुइक्ताक्ड।

रेश

153 आं श्येत जशो कोव्रडीन, गो श्येत जाइनुड। मिनु आं कली प्रोंइयीनी। मारदे हना गो इन अरेशो लोव्र मप्रेंदु। 154 गे आं निसाफ पाइब दुमीन। मिनु आं कली प्रोंइयीनी। इन थोक्शा पशो लोव्र खोदेशो पा ब्रोंइचा गेयीनी। 155 इन अरेशो लोव्र मटीब आन कली गे श्येत रे मप्रोंइनीनी। मारदे हना मेकोपुकीमी इन फुल्लुम मुशा ब्रेक्शो लोव्र पचा ममलेम। 156 परमप्रभु यावे, इन शिशी ठेयब बाक्ब। इन निसाफ पतीक लोव्र खोदेशो पा आं कली ब्रोंइचा गेयीनी। 157 आं कली खेदा पाइब नु आं जोरी सत्रु शुश बाक्नीम। मो हना यो गो इन देशो लोव्र मप्रोनु। 158 मेको नोले शोंइसीशो आन कली तशा ग्रांग्रा दीती। मारदे हना मेकोपुकीमी इन शेंशो टिचा प्रोंइतेक्म। 159 गो इन ब्रेक्शा अरेशो लोव्र दाक्नुड, दे मिम्तीन। परमप्रभु यावे, इन गेना हना यो दाक्तीकेमी आं कली ब्रोंइचा गेयीनी। 160 इन लोव्र नेल्ले थमा बाक्ब। मिनु इन निसाफ पतीक लोव्र गेना हना यो ठीक बाक्नीम। यूहन्ना १७:१७

सिन नु शिन

161 ठेयब मुरपुकीमी आं कली बित्चीम खेदा पाइनीमी। तन्न आं थुं इन लोव्र क्येडा हिंब। 162 गो शुश शोप तशा, ग्येरसीचा क्येडा इन लोव्र तशा ग्येरसाक्यी। 163 दूली पतीके नु जोल पतीक काइ मदाक्थु, ग्रांग्रा दीनुड। तन्न इन अरेशो लोव्र दाक्नुड। 164 गो इन निसाफ पतीक लोव्र आ पर्वम इन कली नाक्त किंत किंत ७ खेयप ठेयब सेल्लुड। 165 इन अरेशो लोव्र दाक्बपुकी थुं नाइशशा बाक्चा ताइनीम। मेको आन कली मारेइ श्येत मदुम्ब। 166 परमप्रभु यावे, गो इन श्येत रे प्रोंइतीक कली रिम्शा बाक्नुड। मिनु इन शेंशो पाइनुड। 167 गो इन देशो लोव्र टिना टिन बाक्ती। मिनु गो मेको कली थाम्पा दाक्नुड। 168 इन ब्रेक्शा अरेशो लोव्र नु इन देशो लोव्र टिना टिन बाक्नुड। मारदे हना आं पशो नेल्ल इन डोंइती बाक्नीम।

थाव

169 परमप्रभु यावे, आं पुंइशो लोव्र नेनीन। इन लोव्रम देशो खोदेशो पा आं कली रुप्व थुं गेयीनी। 170 आं पुंइशो लोव्र नेनीन। इन थोक्शा पशो लोव्र खोदेशो पा श्येत रे प्रोंइयीनी। 171 गे आं कली इन फुल्लुम मुशा, ब्रेक्शो लोव्र शेंताक्यीनी। मोपतीके गो इन कली ठेयब सेल्ला सेल्लन बाक्नुड। 172 गो इन थोक्शा पशो लोव्र आ पर्वम कुम्सो पाइनुड। मारदे हना इन शेंशो लोव्र नेल्ल ठीक बाक्ब। 173 गे आं कली वारच पाइय्यीनी। मारदे हना गो इन ब्रेक्शा अरेशो लोव्र योव्रशा, आं के सेल्लामी। 174 परमप्रभु यावे, गो इन श्येत रे प्रोंइतीक कली रिम्नुड। इन अरेशो लोव्र दाक्शा ग्येरसीनुड। 175 गे आं कली ब्रोंइचा गेयीनी। मिनु गो इन कली ठेयब सेल्लुड। मिनु इन पतीक लोव्रमी आं कली वारच पवल। 176 गो जाम्शो भेडा खोदेशो पा लां जाम्शो बाक्नुड। इन गेय पाइब, आं कली माल्यीनी। मारदे हना गो इन शेंशो लोव्र मप्रेंनुड। यसेया ५३:६

120

“वारच पाइय्यीनी” दे पुंइशो

लां डा कुम्सो।

1 गो श्येत जडानु, परमप्रभु यावे कली पुंइनुड। मिनु मेकोमी आं लोव्र लेण्व। 2 परमप्रभु यावे, आं कली जोल पाइब नु लें निक्शी पाइशो मुर रे प्रोइयनी। 3 मिनु गे जोल पाइब, इ कली मार पचा? गे लें निक्शी पाइशो मुर इ कली अरु मार पाइक्चा माल्बा? 4 लडाइ पाइबमी आ हेशो ब्रा आप्व। मिनु ब्रशो कोइला इ तार जुक्पाइक्नीम।

5 गो श्येत जाइब दुम्ती। गो मेशेक रागीम बाक्चा माल्नुड। केदार आ ताम्बु आन दातेम बाक्चा माल्नुड। 6 गो थुं नाइशा बाक्चा काइ मदाक्ब आन दातेमी शुश बाक्ती। 7 गो थुं नाइशा बाक्चा दाक्ब मुर नड। तन्न गो लोव्र पडानु, मेकोपुकी लडाइ पचा कली ठीक दुम्नीम। रोमी १२:१८

121

परमप्रभुम वारच पा, श्येत रे प्रोइशो

लां डा कुम्सो।

1 गो डांडा गे कोव्रनुड। आं कली वारच पाइब ते रे जाक्बाक्मे? 2 सरीड नु रागी सेल्व परमप्रभु यावेमी आं कली वारच पाइब।

3 मेकोमी इ खोइल ग्रेक्चा मगेब। इ कली कोव्रब गेनायो मइण्व। 4 इस्राएली आन कली वारच पाइब थमा पा गेनायो मनांइसीब, गेनायो मइण्व।

5 परमप्रभु यावे इ कली खाल पाइब बाक्ब। परमप्रभु यावे इ ग्युरा गे डा फाम्सीतीके बाक्ब। 6 मिनु नाक्ती नांम इ कली मनाण्व। नाक्दो तास्लाम इ कली मारेइ मरिम्शो पने मचाण्व।

7 परमप्रभु यावेमी इ कली श्येत नेल्ल रे प्रोइब। मेकोमी इ कली ब्रोंइचा गेब। गन्ती ६:२४-२६ 8 परमप्रभु यावेमी गे लाडगा खिंडगा पवीनु यो इ कली खाल पाइब। मुल रे गेना हना यो मो पाइब। ब्यवस्था २८:६

122

यरूसलेम आ पर्बम पुंइशो

लां डा कुम्सो। दाऊद आ कुम्सो।

1 मेकोपुकीमी आं कली “परमप्रभु यावे आ खिं लय” देंतेक्म। मिनु गो ग्येरसाक्यी। भजन संग्रह २६:८; इजीकीएल ४८:३५ 2 गोपुकीमी “यरूसलेम, इ ठेयब लाप्चोपुकीमी राप्शो बाक्नीकी” देंतेक।

3 यरूसलेम रिम्शो पा सेल्लो सहर बाक्ब। मेकेर खिं नेक्नेक्था बाक्नीम। 4 मिनु इस्राएल आ थर थर डा मुरपुकी परमप्रभु यावे आ मुर दुम्तीके मेकेर लाइनीम। परमप्रभु यावेमी इस्राएली आन कली दोपा अरेवा, मोपा मेकोपुकीमी मेकेर लशा “गे रिम्शो पाइब बाक्नीनी” दे आ नें ठेयब सेल्लनीम। 5 मेकेर निसाफ पाइब आन नित्तीक बाक्नीम। मेकेर दाऊद आ चच युइ आन नित्तीके बाक्नीम।

6 यरूसलेम कली “रिम्शो दुम्ल” दे आसीक गेने। मिनु “यरूसलेम, इ कली दाक्बपुकी रिम्शो दुम्मल। जकरिया ४:७ 7 इ गारो आगामी थुं नाइशा बाक्तीक दुम्ल। इ गारो डा लाइशो खिंमी मारेइ श्येत मदुम्ल” देनीन। 8 मिनु गो आं लोक्ब नु आं वारच आन पर्बम “इ आगामी थुं नाइशा बाक्तीक दुम्ल। 9 मिनु परमप्रभु यावे, आंइ परमप्रभु आ खिं आ पर्बम इन कली रिम्शो दुम्शो तचा दाक्नुड” देंती।

123

“शिशो पने” दे पुंइशो

लां डा कुम्सो।

1 इर स्वर्ग डा नित्तीकेम बाक्ब, गो इन गे कोव्रशा इन कली पुंइनुड। 2 दोपा वाइलपुकीम आन होव्रप आन गुइ गे कोव्रनीमी नु वाइलीमपुकीमी आन होव्रपोक्म आन गुइ गे कोव्रनीम, मोपा गोपुकीमी परमप्रभु यावे गे कोव्रनीकी। आंइ कली शिशो मपवा सम्म मोपा कोव्रनीकी।

3 परमप्रभु यावे, आंइ कली शिशो पने। आंइ कली शिशो पने। मारदे हना गो शुश दिप्चा पुंइसीशो बाक्नीकी। 4 ठेयब लेशोपुकी नु मरिम्शो पाइबपुकीमी आंइ कली महिक्थु शुश श्येत गेतीके गो ब्रीताक्क।

124

परमप्रभु यावेमी वारच पशो

लां डा कुम्सो। दाऊद आ कुम्सो।

1 परमप्रभु यावे गोपुकी नु मबाक्शो हना, 2 मुरपुकीमी आंइ कली लडाइ तोवमेनु, परमप्रभु यावे गोपुकी नु मबाक्शो हना, 3 मेकोपुकीमी आंइ कली तशा गाइक्तमेनु, आंइ कली सेलीन दाक्गेम वा। 4 मिनु बारशा जाक्शो ब्वाक्कुम आंइ कली योल्द वा। मिनु मेको ब्वाक्कुम आंइ कली सुम वा। भजन संग्रह ६९:१६; भजन संग्रह ४२:८ 5 मेको बारशो ब्वाक्कुम आंइ कली मोशा योल्शा लद वा।

6 परमप्रभु यावे ठेयब बाक्ब। मारदे हना मेकोमी आंइ कली क्रिम्चा मगेव। 7 मिनु गोपुकी सिखारी आन ब्वारद रे ब्रोंइशो चिक्ब खोदेशो पा प्रोक्तक। मेको ब्वारद ब्रोंइक्त। मिनु गोपुकी प्रोक्तक।

8 सरीड नु रागी सेल्ब परमप्रभु यावेमी आंइ कली वारच पशो बाक्ब।

125

परमप्रभु आ मुर नु बाक्ब

लां डा कुम्सो।

1 परमप्रभु यावे कली थमा सुइक्बपुकी सियोन डांडा खोदेशो बाक्नीमी। मेको याक्ने मचाप्सीब। गेना हना यो बाक्ब। 2 यरूसलेम आ एर ओंथ नेल्ल पहाड बाक्नीम। मिनु मुल रे गेना हना यो परमप्रभु यावेमी मेको खोदेशो पा आ मुर आन एर ओंथ बाक्ब। 3 परमप्रभु आ अरेशो मटीब आन हुकुम पतीके ठीक पाइब आन रागीम मदुम्ब। मिनु ला ठीक पाइबपुकीमी दूली मपाइनीम।

4 परमप्रभु यावे, रिम्शो पाइब नु रिम्शो थुं पाइश्शो मुर आन कली रिम्शो पने। 5 तन्न परमप्रभु यावेमी नोले शोंइसीशा मरिम्शो लां खोइक्ब आन कली मरिम्शो पाइश्शा खतम पोक्ब। इस्राएलमी थुं नाइश्शा बाक्तीक दुम्ल। भजन संग्रह १२८:६; गलाती ६:१६

126

“वारच पने” दे पुंइशो

लां डा कुम्सो।

1 परमप्रभु यावेमी ग्याइश्शा लाइक्चा पुंइसीशो आन कली सियोनम लेशशा चाक्गानु, गोपुकी डोमु तशो खोदेशो दुम्तक। भजन संग्रह १४:७ 2 मिनु गोपुकी शुश ग्येरसीशा रिम्साक्क। थाम्पा ग्येरशा ग्रीतक। मिनु रागी रागी डा मुरपुकीमी “परमप्रभु यावेमी मेको आन कली वारच पा, ठेयब गेय पाप्तु” देंमुम्तेक्म। 3 परमप्रभु यावेमी आंइ कली थमा वारच पा ठेयब गेय पाप्तु। मिनु गो शुश ग्येरसाक्क।

4 परमप्रभु यावे, दोदेशो पा नेगेब रागी डा बारशो खोला शाइश्शा लाइनीमी, मोदेशो पा आंइ रिम्शो दुम्तीके लेशशा चाक्कीन। 5 मिनु डाक्ना डाक्न शोक्बपुकीमी ग्येरसीशा खुप्नीम। मती ५:४ 6 डाक्ना डाक्न शोक्थ लाइनीम। तन्न ग्रेल्शो क्योव्रज चेरब कुरशा, ग्येरसीशा कुम्सो पा खिं लेत्नीम। यसैया ३५:१०

127

परमप्रभु रिम्शो नाक्त गेब बाक्ब

लां डा कुम्सो। सोलोमन आ कुम्सो।

1 परमप्रभु यावेमी खिं मसेल्शो हना, खिं सेल्ब आन गेय मोशा दुम वा। परमप्रभु यावेम सहर खाल मपशो हना, खाल पाइब आन खाल पशो मोशा दुम वा। 2 गे सुनी कना बोक्शा, नाक्दो सम्म शुश गेय पाइनीनी। मिनु इन शोब्ले सुर्ता पा जाइनीनी। मेको मोशा बाक्ब। मारदे हना परमप्रभुमी आ दाक्शो मुर आन कली इप्ची ना आन माल्शो गेब। हितोपदेस १०:२२

3 तमी तौ परमप्रभु यावे आ गेशो बाक्नीम। आलपुकी मेको आ गेशो इनाम बाक्नीम। भजन संग्रह १२८ ३-४; उत्पत्ती ३०:२; उत्पत्ती ३३:५ 4 मिनु ठिटा ना थिशो तौपुकी लडाइ पाइब आन गुइम बाक्शो ब्रा खोदेशो बाक्नीम।

5 सु सु आन ब्रा कुरतीके मेकोमी ब्रीशो बाक्नीमी, मेको मुर ग्येरसीशो बाक्नीम। मिनु मेकोपुकी ठेयब लाप्योमी आन जोरी सत्रुमी लोत्र पा जिचा पोक्गामेनु, मुने मदोक्नीम।

128

परमप्रभु आ आसीक

लां डा कुम्सो।

- 1 परमप्रभु यावे कली मान पा हिंबपुकी आसीक तशो बाक्नीम। मेकोपुकी परमप्रभु यावे आ लांम गाक्शो बाक्नीम।
- 2 गे इ पशो गेय रे जाइनेवे। गे ग्येरसीशा मारेइ मारेइमी दारनेवे।
- 3 मिनु इ मीश इ खिंमी सिशशो अडगुर बोट खोदेशो बाक्ब। इ आल इ खिंम तेल रवा आ कोच्वा दाप्यो खोदेशो बाक्नीम। भजन संग्रह १२७:३
- 4 मोपा परमप्रभु यावे कली मान पा हिंब मुर आसीक ताइब।
- 5 परमप्रभु यावेमी इ कली सियोन रे आसीक गेब। गे मबेक्थु नाक्त किंत किंत यरूसलेममी रिम्शो दुम्शो ताइनेवे।
- 6 मिनु गे इ चच युइ आन कली ताइनेवे। इस्राएली आन थुं नाइशशा बाक्मल। उत्पत्ती ४८:११; भजन संग्रह १२५:५

129

जोरी सत्रु आन पबर्म पुंइशो

लां डा कुम्सो।

- 1 इस्राएलमी “मेकोपुकीमी गो ठिटा बाक्डा रेन आं कली थाम्पा श्येत गेतीमी” देंत। 2 मिनु लेंशा “मेकोपुकीमी गो ठिटा बाक्डा रेन आं कली थाम्पा श्येत गेतीमी। मो हना यो आं क्येडा ग्राने मचबेम। 3 ब्यफ वाक्बपुकीमी आं चीमी वाक्ताक्म। मिनु आं ची नेल्ल चेततेक्म” देंत। यसैया ५१:२३
- 4 परमप्रभु यावे ठीक पाइब बाक्ब। मेकोमी आ अरेशो मटीब आन जोरी प्रोइशशा गेप्टु।
- 5 सियोन कली काइ मदाक्बपुकी मुने दोक्शा, लेशशा लमल। 6 मेकोपुकी खिं तार वाशो घांस खोदेशो दुम्मल। मेको बारचा क्येडा डोंइती सोव्रनीम। 7 घांस रिक्बपुकीम मेको मुठी का यो रिक्ने मचाप्नीम। मुठा फ्रेंबपुकीम मेको अडला का यो प्रिंने मचाप्नीम। 8 मिनु मेको रे पा लाइबपुकीमी “गे परमप्रभु यावे आ आसीक रावो। परमप्रभु यावे आ नेम इ कली आसीक गेनीकी” मदेंनीम। रूथ २:४

130

शुश श्येत दुम्ची ना पुंइशो

लां डा कुम्सो।

- 1 परमप्रभु यावे, गो हिंचा डा श्येत जडानु, इन कली पुंइनुड। 2 परमप्रभु यावे, आ लोत्र नेनीन। “शिशो पाइय्यीनी” दे आं पुंइशो लोत्र इन नोफा दाइक्तीन।
- 3 परमप्रभु यावे, गे आंइ मरिम्शो पशो मिम्ताक्नी हना, इन डोंइती राप्ने चाप्नीमी डा? 4 गे माफ गेनीनी। मोपतीके मुर इन कली मान पा हिंचा माल्नीम। यसैया ५५:७; रोमी ६:१-२
- 5 गो परमप्रभु यावे कली रिम्नुड। आं थुं नेल्लेमी यो रिम्नुड। मिनु गो इन लोत्र आस पाइनुड। यसैया २१:११; लूका १२:३५-३६
- 6 नाक्दो खाल पाइबमी गेना नां सोव्रबा, दे रिम्शो क्येडा यो, गो आं थुं नेल्लेमी परमप्रभु कली शुश रिम्नुड। 7 इस्राएल, परमप्रभु यावे कली आस पा बाक्को। मारदे हना परमप्रभु यावेमी गेना हना यो दाक्ब। मेको नु मरिम्शो पशो रे प्रोइतीक शुश बाक्ब। 8 मिनु मेकोमी इस्राएली आन कली आन मरिम्शो पशो नेल्ल रे प्रोइब। मत्ती १:२१

131

ब्रेम्शो थुं पाइशशो मुर ग्येरसीशो

लां डा कुम्सो। दाऊद आ कुम्सो।

- 1 परमप्रभु यावे, गो ठेयब मलेशशो बाक्नुड। गो मबोरशो बाक्नुड। गो आं मचाप्चा डा नु ठेयब गेयम मग्योल्नुड।
- 2 मिनु आं थुं ग्येत्य लुक्च मपथु, नाइशशा बाक्ब। आं थुं आ ममा नु बाक्शो आइक्च आल खोदेशो दुम्ब। आं थुं

सिक्सी पा बाक्ब आल खोदेशो बाक्ब। भजन संग्रह ६२:२³ इस्राएल, गे मुल रे गेना हना यो परमप्रभु यावे कली आस पा बाक्को।

132

परमप्रभु आ खिं आ पबर्म पुंइशो

लां डा कुम्सो।

1 परमप्रभु यावे दाऊद कली फ्रुक्कीन। मेको आ श्येत फाल्शो नेल्ल मिम्तीन। 2 मेकोमी परमप्रभु यावे आ नेम कसम जशो बाक्त। मिनु याकूब आ नेल्ल क्येडा सक्ति पाइशो आ नेम कसम जाप्टु। 3 गो आं खिं मओव्रनुड। मिनु आं ब्राख्येम मइपुनुड। २सामुएल ७:२; प्रेरित ७:४६ 4 गो निन्द्रा मपाइनुड। गो मइपुनुड। 5 मारदे मोदेशो पाइनुड देशा हना, गो याकूब आ नेल्ल क्येडा सक्ति पाइशो आ बाक्तीक मथिदु, सम्म मो पाइनुड।

6 गोपुकीमी एफ्राथाहमी परमप्रभु यावे आ कबल पशो सन्दोस आ पबर्म नेतय। मिनु गोपुकीमी मेको यार सहर डा दिंमम थित्तय। १सामुएल ७:१; १इतिहास १३:५-६ 7 गो मेको आ बाक्तीक लय। मिनु मेको आ खोइल थेक्तीक आ डोंइती बाप्य।

8 परमप्रभु यावे बोक्कीन, इन नाइशशा बाक्तीके नु इन सक्ति पाइशो कबल पशो सन्दोस बाक्तीकेम जाक्कीन। गन्ती १०:३५; २इतिहास ६:४१; भजन संग्रह ७८:६१ 9 इन कली चढेबपुकीमी ठीक पतीके वा फेक्शो खोदेशो पा फेक्समल। मिनु इन मुरपुकी ठेयब सेंदा पा ग्येरसमल। 10 इन गेय पाइब दाऊद आ पबर्म इन तेल लुक्शो कली मप्रोनीन।

11 परमप्रभु यावेमी दाऊद नु लोव्र पा कसम जशो बाक्त। मेकोमी “गो इ सासन पतीकेमी इ तौ का वोइक्नुड” दे लोव्र पशो बाक्त। परमप्रभु यावेमी आ पशो लोव्र खाप्व। भजन संग्रह ८९:४-५; हिब्रू ६:१७ 12 मेकोमी “इ तौपुकीमी आं कबल नु आं देशो पाम्तेक्म हना, मेको आन तौपुकी यो इ सासन पतीकेम सासन पचा ताइनीम” देशो बाक्त।

13 परमप्रभु यावेमी सियोन कली योव्रशो बाक्ब। “आं बाक्तीके मेकेर बाक्ब” दे मिम्शो बाक्ब। भजन संग्रह ६८:१७; भजन संग्रह ७६:३ 14 मिनु परमप्रभुमी “एकेर नाइक्नुड। एकेर गेना हना यो बाक्नुड, मारदे हना गो मेको दाक्नुड। 15 मिनु गो मेकेर डा मुर आन कली शुश जचा तूचा गेशा, आसीक गेनुडमी। प्रुडग आन कली रूथ्री जचा गेनुडमी। 16 गो मेकेर डा चढेब आन कली मरिम्शो पतीके रे ब्रोंइतीक दोदेशो बाक्बा तुइक्पाइक्नुडमी। मेकेर डा थमा सुइक्बपुकी कुम्सो पा ग्येरसीनीम। 17 गो मेकेर दाऊद आ खिं डा मुर आन मान बारपाइक्नुड। आं तेल लुक्शो मुर कली रिम्शो तौ का गेता। १सामुएल २:१०; १राजा ११:३६ 18 गो मेको आ जोरी सत्रु आन कली मुने तोक्नुडमी। मिनु मेको रिम्शो पा सासन पाइब दुम्ब” दे परमप्रभुमी देंत।

133

लोकबपुकी गारशो

लां डा कुम्सो। दाऊद आ कुम्सो।

1 लोकबपुकी गारशा बाक्चा शुश रिम्शो बाक्ब। उत्पत्ती १३:८ 2 मेको पियाम लुक्शो शुश क्येट थाप्शो तेल खोदेशो बाक्ब। मेको हारून आ गल शोक्रे रे शाइशशा, आ वा सम्म जाक्दीप्व। 3 मेको हेरमोन डांडा डा सीत सियोन डांडाम यिशो खोदेशो बाक्ब। मेको गेना हना यो ब्रोंइतीक परमप्रभु यावे आ आसीक बाक्ब।

134

नाक्दो डा कुम्सो

लां डा कुम्सो।

1 नाक्दो परमप्रभु यावे आ खिंम बाक्शा, परमप्रभु यावे आ गेय पाइब नेल्लेमी परमप्रभु यावे कली ठेयब सेलीन। 2 मिनु परमप्रभु यावे आ खिंमी इन गुइ पोक्शा, परमप्रभु यावे कली ठेयब सेलीन। 3 सरीड नु रागी सेल्ब परमप्रभु यावेमी सियोन रे इन कली आसीक गेवल। भजन संग्रह ११५:१५

135

परमप्रभु यावे आ ठेयब गेय

1 परमप्रभु यावे कली ठेयब सेलीन। परमप्रभु यावे आ नें ठेयब सेलीन। परमप्रभु यावे आ गेय पाइबपुकी, मेको कली ठेयब सेलीन। 2 गे परमप्रभु यावे आ खिंमी गेय पाइबपुकी नु आ खिं डा लाडगाम बाक्बपुकी, आंइ परमप्रभु कली ठेयब सेलीन। 3 परमप्रभु यावे कली ठेयब सेलीन। मारदे हना परमप्रभु यावे रिम्शो पाइब बाक्ब। मेको कली कुम्सो पने। मारदे हना मेको रिम्शो बाक्ब। 4 परमप्रभु यावेमी याकूब कली आ मुर दुम्पाइक्चा कली नु इस्राएल कली आंम के सेल्चा कली योवशो बाक्ब। प्रस्थान १९:५-६

5 परमप्रभु यावे थम ठेयब बाक्ब। मेको गो तुइक्नुड। मिनु आंइ परमप्रभु देवी देवता नेल्ल आन क्येडा ठेयब बाक्ब। भजन संग्रह ८६:८ 6 परमप्रभु यावेमी सरीड, रागी, समुन्द्र नु समुन्द्र आ आगामी मार दाक्बा, मेको पाइब। 7 मेकोमी रागी आ सुर सुर रे गोस्स पोक्ब। मेकोमी चिला दाप्पाइश्शा, रेउ यिपाइक्ब। मिनु मेकोमी आ बाक्तीक रे फश पपाइक्ब। येरमीया १०:१३ 8 मेकोमी इजीप्त रागीमी मुर नु बी ब्यफ, क्यारश भेडा मारेइ मारेइ आन डोंइती जरमेशा नेल्ल आन कली साइक्तीमी। प्रस्थान १२:२९ 9 मेकोमी इजीप्त रागीमी फाराओ नु आ गेय पाइब मुर नेल्ल आन डोंइती चिन्ड नु छक लाक्चा डा गेय कोंइताक्ब। भजन संग्रह ७८:४२-५२ 10 मेकोमी शुश रागी आन कली खतम पोक्तीमी। मिनु मेकोमी बोल्यो पिप आन कली साइक्तीमी। गन्ती २१:२१-३५ 11 मेकोमी एमोरी आन पिप सीहोन, बाशान डा पिप ओग नु कनान डा पिप नेल्ल आन कली साइक्तीमी। 12 मिनु मेकोमी मेको आन रागी आ मुर, इस्राएली आन कली आन के सेल्चा कली गेम्तीमी। यहोसु १२:१-६

13 परमप्रभु यावे इन नें गेना हना यो बाक्ब। परमप्रभु यावे इन नें गेनायो मक्याम्सीब। भजन संग्रह १०२:१३ 14 मारदे हना परमप्रभु यावेमी आ मुर आन कली निसाफ पतीकेमी वारच पाइब। मिनु आ गेय पाइब आन कली शिशी पाइब। ब्यवस्था ३२:३६

15 रागी रागी डा मुर आन मूर्ति सुन नु चांदी के बाक्नीम। मेको नेल्ले मुर आन सेल्शो ला बाक्नीम। भजन संग्रह ११५:४-११ 16 मेको आन के शोव बाक्ब, तन्न मब्वाक्नीम। मिक्च बाक्ब, तन्न मताइनीम। 17 नोफा बाक्ब, तन्न मनेंनीम। मेकोपुकीमी आन सोक्त कीने मचाप्नीम। 18 मेको आन कली सेल्बपुकी यो मोदेशो दुम्मल। मिनु मेको आन कली थमा सुइक्बपुकी यो मोदेशोन दुम्मल।

19 इस्राएल आ खिं डा मुरपुकी, परमप्रभु यावे कली ठेयब सेलीन। हारून आ खिं डा मुरपुकी परमप्रभु यावे कली ठेयब सेलीन। 20 लेवी आ मुरपुकी, परमप्रभु यावे कली ठेयब सेलीन। परमप्रभु यावे कली मान पा हिंबपुकी, परमप्रभु यावे कली ठेयब सेलीन। 21 सियोन रे परमप्रभु यावे कली ठेयब सेल्मेक्ल। यरूसलेमम बाक्बपुकीमी परमप्रभु यावे कली ठेयब सेल्मेक्ल। परमप्रभु यावे कली ठेयब सेलीन।

136

परमप्रभु आ दाक्तीके लीब

1 परमप्रभु यावे कली “गे रिम्शो पाइब बाक्नीनी” देनीन। मारदे हना मेको रिम्शो पाइब बाक्ब। मेको आ दाक्तीके गेना हना यो लीब। भजन संग्रह १०१:६ 2 मिनु देवी देवता आन परमप्रभु कली “गे रिम्शो पाइब बाक्नीनी” देनीन। मारदे हना मेको आ दाक्तीके गेना हना यो लीब। 3 मिनु परमप्रभु, आन परमप्रभु कली “गे रिम्शो पाइब बाक्नीनी” देनीन। मारदे हना मेको आ दाक्तीके गेना हना यो लीब। 4 मेकोमी ला ठेयब छक लाक्चा डा गेय पाइब। मारदे हना मेको आ दाक्तीके गेना हना यो लीब। 5 मेकोमी जोक्ब तुइक्ब दुम्तीकेमी सरीड सेल्लु। मारदे हना मेको आ दाक्तीके गेना हना यो लीब। 6 मेकोमी ब्वाक्कु तार रागी सेल्लु। मारदे हना मेको आ दाक्तीके गेना हना यो लीब। 7 मेकोमी नां तास्ला सेल्लु। मारदे हना मेको आ दाक्तीके गेना हना यो लीब। उत्पत्ती १:१४-१८ 8 मेकोमी नाक्ती कली नां सेल्लु। मारदे हना मेको आ दाक्तीके गेना हना यो लीब। 9 मेकोमी नाक्दो कली तास्ला नु सोरुल सेल्लु। मारदे हना मेको आ दाक्तीके गेना हना यो लीब।

10 मेकोमी इजीप्त रागीमी डोंइती जरमेशो नेल्ल आन कली साइक्तीमी। मारदे हना मेको आ दाक्तीके गेना हना यो लीब। भजन संग्रह १३५:८-१२ 11 मेकोमी इस्राएली आन कली इजीप्ती आन दाते रे गुंडशा चाक्तीमी। मारदे हना मेको आ दाक्तीके गेना हना यो लीब। 12 मेकोमी आ ठेयब सक्तिमी मेको आन कली गुंडशा चाक्तीमी। मारदे हना मेको आ दाक्तीके गेना हना यो लीब। 13 मेकोमी लल समुन्द्रमी लां सेल्लु। मारदे हना मेको आ दाक्तीके गेना हना यो लीब। 14 मेकोमी इस्राएली आन कली मेको लां रे पा शोक्पाइक्तीमी। मारदे हना मेको आ दाक्तीके गेना हना यो लीब। 15 मेकोमी फाराओ नु आ लडाइ पाइब आन कली लल समुन्द्रमी योल्पाइक्तु। मारदे हना मेको आ दाक्तीके गेना हना यो लीब। 16 मेकोमी आ मुर आन कली गोरशो रागीम लां कोंइताक्मी। मारदे हना मेको आ दाक्तीके गेना

हना यो लीब। 17 मेकोमी ठेयब पिप आन कली साइक्तीमी। मारदे हना मेको आ दाक्तीके गेना हना यो लीब। गन्ती २१:२३-३५ 18 मेकोमी सक्ति पाइश्शो पिप आन कली साइक्तीमी। मारदे हना मेको आ दाक्तीके गेना हना यो लीब। 19 मेकोमी एमोरी आन पिप सीहोन कली साइक्तु। मारदे हना मेको आ दाक्तीके गेना हना यो लीब। 20 मेकोमी बाशान डा पिप ओग कली साइक्तु। मारदे हना मेको आ दाक्तीके गेना हना यो लीब। 21 मेकोमी मेको आस रागी आ मुर आन कली योक्शा, गेम्तीमी। मारदे हना मेको आ दाक्तीके गेना हना यो लीब। 22 मेकोमी मेको रागी आ गेय पाइब इस्राएली आन कली गेम्तीमी। मारदे हना मेको आ दाक्तीके गेना हना यो लीब।

23 मेकोमी गो श्येत जकानु, आंइ कली मिम्ताक्व। मारदे हना मेको आ दाक्तीके गेना हना यो लीब। 24 मेकोमी आंइ कली आंइ जोरी सत्रु आन गुइ रे प्रोंइतु। मारदे हना मेको आ दाक्तीके गेना हना यो लीब। 25 मेकोमी ब्रोंइब नेल्ल आन कली जचा गेब। मारदे हना मेको आ दाक्तीके गेना हना यो लीब। भजन संग्रह १४५:१५

26 स्वर्ग डा परमप्रभु कली “गे रिम्शो पाइब बाक्नीनी” देनीन। मारदे हना मेको आ दाक्तीके गेना हना यो लीब।

137

बेबीलोनम बाक्ब आन कुम्सो

1 गो बेबीलोन डा खोला आ नेक्था बाक्शा, सियोन कली मिम्शा डाक्तक। 2 गोपुकीमी आंइ तार पाइश्शो ताप्तीके मेकेर डा रवामी क्युक्तक। 3 मारदे हना आंइ कली ग्याइश्शा लाइक्बपुकीमी मेकेर कुम्सो पपाइक्तेक्म। मिनु आंइ कली श्येत गेबपुकीमी ग्येरतीक कुम्सो पपाइक्तेक्म। मेकोपुकीमी आंइ कली “सियोन डा कुम्सो का पने” देतेक्म।

4 गो आंइ मतुइश्शो रागीमी परमप्रभु यावे आ कुम्सो दोपा पने चाप्नीकी? 5 गो यरूसलेम, इ कली प्रेंताक्ड हना, आं ग्युरा गुइ मदुक्ब दुम्ल। येरमीया ५१:५० 6 गो इ कली ममिम्शो नड हना, गो यरूसलेम कली आं नेल्ल क्येडा ठेयब ग्येरतीके बाक्ब, दे ममिम्शो नड हना, आं लें आं कुंकुम क्येप्लत।

7 परमप्रभु यावे, यरूसलेम खतम दुम नाक्ती एदोम डा मुर मार पामे, मेको मिम्तीन। मेकोपुकीमी “एको कली प्रेतीन। जग रेन खतम पोक्कीन” दे वाइ ब्रेत्तेक्म। भजन संग्रह ७९:१२; ओबदिया १०:१५ 8 बेबीलोन सहर, गे मुल खतम पोक्चा पुंइसीनेवे। गे मार पवी मेको आ क्येक्क लेप्ब ग्येरसीशो मुर बाक्ब। 9 इन आल आन कली ग्याइश्शा, फुल्लु तार राप्शा साइक्ब, ग्येरसीशो बाक्नीम। यसैया १३:१६; रोमी १२:१९

138

ठेयब सेल्लिक कुम्सो

दाऊद आ कुम्सो।

1 परमप्रभु, गो आं थुं नेल्लेमी इन कली ठेयब सेल्लुड। गो देवी देवता आन डोंइती इन कली ला ठेयब सेल्लिक कुम्सो पाइनुड। 2 गो इन खिं गे बाप्शा, इन कली “गे रिम्शो पाइब बाक्नीनी” देनुड। मारदे हना इन गेना हना यो दाक्तीकेमी दाक्शा मप्रोंइनीनी। मिनु इन नें नु इन लोत्र नेल्ल आन क्येडा ठेयब बाक्नीम। 3 गो इन कली ब्रेडडानु, आं लोत्र लेत्ताक्यीनी। गे आं कली महिं ब थुं गेशा, बोल्यो सेल्लिनी।

4 परमप्रभु यावे, रागी डा पिप नेल्लेमी इन लोत्र नेतेक्म। मोपतीके मेकोपुकीमी इन कली ठेयब सेल्लेक्ल। यसैया २:३ 5 मिनु मेकोपुकीमी परमप्रभु यावे आ लां आ पबर्म कुम्सो पामेक्ल। मारदे हना परमप्रभु यावे आ सक्ति थम ठेयब बाक्ब। 6 परमप्रभु यावे नेल्ल क्येडा ठेयब बाक्त हना यो, मेकोमी आइक्च मुर आन कली कोत्रब। तन्न ठेयब लेशो मुर आन क्येडा डोन बाक्ब।

7 मिनु गो शुश श्येत जाता हना यो, गे आं कली प्रोंइनीनी। गे आं कली तशा आं जोरी सत्रु आन गाइश्शो रे प्रोंइनीनी। गे इन सक्तिमी आं कली प्रोंइनीनी। 8 परमप्रभु यावेमी आं पबर्म आ पचा माल्लो नेल्ल पाइब। परमप्रभु यावे इन दाक्तीके गेना हना यो लीब। इन सेल्लो मुर, आं कली मप्रोनीन।

139

परमप्रभुम मुर आन थुं तुइक्ब

कुम्सो पपाइक्ब कली दाऊद आ कुम्सो।

1 परमप्रभु यावे, गे आं कली नाक्शा तुइश्शो बाक्नीनी। भजन संग्रह ७:१०; येरमीया १७:१० 2 गे आं निश्शो बोक्शो तुइश्शो बाक्नीनी। आं मिम्शो नेल्ल तुइक्नीनी। 3 गे आं गाक्शो इप्शो थमा पा तुइक्नीनी। आं पशो नेल्ल गे तुइश्शो

बाकनीनी। 4 परमप्रभु यावे, गे आं ब्वाक्चा क्येडा डोंइती आं लोत्र नेल्ल तुइक्नीनी। 5 गे आं एर ओंथ नेल्ल बाक्शा, इन गुइ आं तार वोइक्तीनी। 6 मेको तुइक्तीके आं कली थम ठेयब बाक्ब। मिनु गो मेको रुप्ने मचाप्नुड।

7 मिनु गो इन सोक्त क्येडा ते लशा खुइक्ने चाप्नुडा डा? गो इन डोंइती रे ते प्रोक्ने चाप्नुडा डा? 8 गो सरीड लती हना यो, गे मेके बाकनीनी। गो बेक्शो मुर आन बाक्तीकेम आं बाक्तीक सेल्ला हना यो, गे मेके बाकनीनी। आमोस ९:२ 9 गो नां दाप्तीक सम्म बेरशा लती हना यो, शुश डोन समुन्द्र तार लती हना यो, योना १:३ 10 गे मेकेर यो आं कली लां कोंइनीनी। मिनु गे इन सक्तिमी आं कली वारच पाइनीनी। 11 मिनु गो “छिडछिडम आं कली सुम्शा, आ एर ओंथ डा छेडछेड नेल्ल नाक्दो खोदेशो दुम्ल” देंती हना यो, अय्युब ३४:२२ 12 छिडछिड इन कली छिडछिड मदुम्ब। नाक्दो नाक्त खोदेशो पा छेडछेड दुम्ब। मारदे हना छिडछिड इन कली छेडछेड खोदेशो बाक्ब।

13 मिनु गे आं आगा डा मारेइ मारेइ सेल्लतीनी। गे आं कली आं ममा आ कोव्रजम सेल्लतीनी। 14 गो इन कली ठेयब सेल्लनुड। मारदे हना गे आं कली छक लाक्चा डा नु रिम्शो पा सेल्लतीनी। इन गेय नेल्ल छक लाक्चा डा बाक्नीम। गे आं कली थमा पा तुइश्शो बाक्नीनी। 15 गो खुइश्शा जोल्ना जोल्न बाक्डानु, गे आं कली तशो बाक्तीनी। मेना गो रागी आगाम जोल्ना जोल्न बाक्शो नड। 16 गे आं मजोल्शो रां तशो बाक्तीनी। मिनु आं कली गेशो ब्रोंइतीक नाक्ती नेल्ले इन किताबम ब्रेक्शो बाक्तेक्म। मेको दुम्चा क्येडा डोंइतीन ब्रेक्शो बाक्त। भजन संग्रह ३१:१६ 17 परमप्रभु, इन मिम्शो आं कली थम ठेयब बाक्ब। इन मिम्तीके शुश बाक्नीमी। भजन संग्रह ४०:६ 18 गो मेको आन कली हिक्चा माल्लो नड हना, मेको बाल्वा क्येडा यो शुश दुम वा। गो सेंसीडानु, गो गे नु बाक्शो बाक्नुड। भजन संग्रह ६३:७

19 परमप्रभु, गे इन अरेशो मटीब आन कली साइक्नी हना, रिम्शो दुम वा। हुश ख्राक्श पोक्ब आं क्येडा डोन लमल। 20 मेकोपुकीमी इन पर्बम मरिम्शो लोत्र पाइनीमी। मिनु ठेयब लेशशा, शुश मरिम्शो पाइब बाक्नीमी। 21 परमप्रभु यावे, इन कली काइ मदाक्ब आन कली गो यो काइ मदाक्नुडमी। मिनु गो इन कली मरिम्शो पचा कली बोक्ब आन कली तशा ग्रांग्रा दिन्नुडमी। 22 गो मेको आन कली थमा पा काइ मदाक्नुडमी। मिनु गो मेको आन कली आं जोरी सत्रु मिन्नुडमी। 23 परमप्रभु, गे आं कली नाक्शा, आं थुं कोव्रयीनी। मिनु आं कली कोव्रशा आं मिम्शो तुइक्तीन। 24 गो आं थुंम इन अरेशो मटितीके बाक्म कों? कोव्रडीन। मिनु गे आं कली गेना हना यो ब्रोंइशा बाक्तीक लांम खुल्लयीनी।

140

ब्रोंइचा आ पर्बम पुंइशो

कुम्सो पपाइक्ब कली दाऊद आ कुम्सो।

1 परमप्रभु यावे, आं कली मरिम्शो पाइब आन गुइ रे प्रोंइयीनी। आं कली हुश ख्राक्श पोक्ब आन गुइ रे प्रोंइयीनी। 2 मेकोपुकीमी आन थुंमी मरिम्शो पतीक मिम्ना मिम्न बाक्नीम। मिनु जिचा पोक्नीम। 3 मेकोपुकी कोक्चा चिक्शो बुस्स खोदेशो बाक्नीम। मेको आन लोत्र बुस्स आन बीस खोदेशो बाक्ब। ठेयब सेंदा पा। रोमी ३:१३

4 परमप्रभु यावे, इन अरेशो मटीब नु हुश ख्राक्श पोक्ब मुर आं क्येडा डोन वोतीन। मेकोपुकीमी आं कली दाइल पपाइक्चा माल्लनीम। 5 ठेयब लेशशो मुरपुकीमी खुइश्शा आं कली ब्वारद दाइक्ताक्म। डोरी के ब्वारद दाइक्ताक्म। मेकोपुकीमी आं लांमी ब्वारद दाइक्ताक्म। ठेयब सेंदा पा

6 मिनु गो परमप्रभु यावे कली “गे आं परमप्रभु बाक्नीनी। परमप्रभु यावे, गे आं पुंइशो लोत्र नेनीन। भजन संग्रह २२:११ 7 परमप्रभु यावे, आं परमप्रभु, गे इन सक्तिमी आं कली प्रोंइनीनी। लडाइ दुम्मेनु, गे आं कली प्रोंइनीनी। 8 परमप्रभु यावे, इन अरेशो मटीब आन मिम्शो दला दाक्स दुम्चा मगेने। मो दुम्त हना, मेकोपुकी ठेयब लेत्नीम। ठेयब सेंदा पा।

9 मेको ठेयब लेशशोपुकी आं एर ओंथ बाक्शो बाक्नीम। मेको आन मरिम्शो पशो आंमा रमल। ठेयब सेंदा पा। 10 गे मेको आन तारी ब्रशो कोइला मोतीन। मेकोपुकी गेनायो ग्रूने मचाप्चा पा खाल्टाम बिक्मल। 11 मुर आन पर्बम जोल पाइब रागीम मदुम्मल। हुश ख्राक्श पोक्बपुकी रीब पा खतम दुम्मल।

12 परमप्रभु यावे, श्येत जशो आन कली वारच पाइब नु पुडग आन कली ठीक निसाफ पाइब बाक्नीनी, दे तुइक्नुड। 13 ठीक पाइबपुकीमी, थमा पा इन नें ठेयब सेल्लनीम। मिनु रिम्शो थुं पाइश्शो मुर इन डोंइती बाक्नीम” देंती।

141

“आं कली कोव्रयीनी” दे पुंइशो

दाऊद आ कुम्सो।

1 परमप्रभु यावे, गो इन कली पुंइनुड। मिनु गे रीब पा जाक्कीन। गो इन कली पुंइशा ब्रेडडानु, आं ब्रेशो नेनीन। 2 आं पुंइशो लोव्र इन डोंइती धूप खोदेशो दुम्ल। मिनु आं गुइ क्युकुशो नाक्दो डा चदेशो खोदेशो दुम्ल। प्रस्थान ३०:७; प्रस्थान २९:३९

3 परमप्रभु यावे, आं शोव्रमी खाल पाइब का वोतीन। आं कली मरिम्शो लोव्र पचा मगेयीनी। भजन संग्रह ३९:२; याकूब ३:५-६ 4 आं थुं कली मरिम्शो मिम्चा मगेने। मरिम्शो पाइब नु गारशा, इन मदाक्शो गेय पचा मगेने। मिनु गो मेको आन ब्रोव्रशो जचा थोव्रक जचा मदाक्नुड।

5 ठीक पाइबमी आं कली तुप्यील। मेको आं शिशी बाक्ब। मेकोमी आं कली हुइक्तील। मेको आं पियाम लुकुशो तेल खोदेशो दुम्ब। तन्न इन अरेशो मटीब आन तेल आं पियाम मलुम्सेक्ल। मो हना यो गो मेको आन मरिम्शो पशो आ पर्वम पुंइना पुंइन बाक्नुड। लेवी १९:१७; हितोपदेस २७:५-६ 6 मेको आन निसाफ पाइब रोगु रे तोक्चा पुंइसामानु, मरिम्शो पाइबपुकीमी आं लोव्र “थमा बाक्त” दे रुप्नीम। 7 दोपा फुल्लु प्रोलशा रू मेर फ्राइनीमी, मोपान मेको आन रुश बेक्शो मुर आन बाक्तीकेमी ब्रशो बाक्नीम।

8 तन्न परमप्रभु यावे, आं परमप्रभु, गो इन गे कोव्रनुड। गो गे नु फाम्सीनुड। गे आं कली बेक्चा मगेयीनी। 9 गे आं कली मेको आन दाइशो ब्वारद रे प्रोंइयीनी। आं कली मरिम्शो पाइब आन दाइशो ब्वारद रे प्रोंइयीनी। 10 इन अरेशो मटीब नेल्ले आंम आन दाइशो ब्वारदम रेम्मल। गो चहिं मारेइ मदुम्थु लाक्नुड।

142

“श्येत जशोनु, वारच पाइय्यीनी”

शेंतीक कुम्सो। पुक्खीम बाक्शा, दाऊद आ सेल्शो कुम्सो। १ सामुएल २४:४

1 गो परमप्रभु यावे कली वाइ ब्रेत्नुड। गो परमप्रभु यावे कली पुंइनुड। 2 आं लोव्र नेल्ल मेको आ डोंइती वोइक्नुड। गो मेको कली आं श्येत नेल्ल देनुड। 3 आं थुं लुकच लत हना, गो मार पचा माल्नुडा, गे मेको तुइक्नीनी। मुरपुकीमी आं गाक्तीक लांमी ब्वारद दाइक्ताक्म। 4 गो आं ग्युरा गे कोव्रता, मिनु आं कली मिम्ब सुइ मबाक्म। आं कली खुइक्तीके तेइ मबाक्ब। सुइमी आं कली वारच मपाइय्यीमी।

5 परमप्रभु यावे गो इन कली ब्रेत्ताक्ड। गो “गे आं खुइक्तीके बाक्नीनी। ब्रोंइशा बाक्ब आन रागीमी गे आं भाग बाक्नीनी” देंती। भजन संग्रह २७:१३ 6 आं पुंइशो लोव्र नेनीन। मारदे हना आ थुं शुश लुकच लत। आं कली खेदा पाइब रे प्रोंइयीनी। मारदे हना मेकोपुकी आं क्येडा बोल्यो बाक्नीम। 7 आं कली आं चोक्सीतीके रे प्रोंइयीनी। मिनु गो इन कली “गे रिम्शो पाइब बाक्नीनी” देने चबुल। मिनु आं कली रिम्शो पशो तशा, ठीक पाइबपुकी आं एर ओंथ बाक्शा ग्येरसीनीम।

143

श्येत जामेनु, पुंइशो

दाऊद आ कुम्सो।

1 परमप्रभु यावे, आं पुंइशो लोव्र नेनीन। “गो शिशी तडल” दे इन दाक्शा मप्रोंइतीकेमी आं पुंइशो लोव्र नेनीन। मिनु इन ठीक पतीकेमी आं लोव्र लेत्तीनी। 2 मिनु इन गेय पाइब कली निसाफ पा दोस मगेने। मारदे हना ब्रोंइशोपुकी इन डोंइती ठीक पाइब सुइ मबाक्नीम। भजन संग्रह १३०:३; अय्युब ९:२; रोमी ३:२०

3 आं जोरी सत्रुमी आं कली खेदा पतीमी। आं कली खपीम खोल्ला, साइक्चा चिक्ताक्यीमी। मेकोपुकीमी आं कली बेक्शो मुर आन बाक्तीकेम खोदेशो पा छिडछिडम बाक्पाइक्तीमी। 4 मोपतीके आं थुं लुकच लत। मिनु गो वाम ग्याम दुम्ती।

5 गो साइ डोंइती डा नाक्त मिम्नुड। मिनु इन गेय नेल्ल मिम्ना मिम्न बाक्नुड। इन गुइम पशो नेल्ल मिम्नुड। भजन संग्रह ७७:६ 6 गो आं गुइ इन गे दिनुड। मिनु कोक्त रूमी ब्वाक्कु माल्शो खोदेशो पा, आं थुंमी इन कली माल्ब। ठेयब सेंदा पा। भजन संग्रह ४२:२-३

7 परमप्रभु यावे, गे आं कली रीब पा लोत्र लेत्तीनी। आं थुं लुकच लशो बाक्ब। इन कुल आं क्येडा मखुइक्तीन। मो दुम्त हना, गो बेक्शो मुर आन बाक्तीक लाइब मुर खोदेशो दुम्नुड। 8 आं कली सुनी इन गेना हना यो दाक्तीके आ पबर्म नेंपाइय्यीनी। मारदे हना गो इन कली थमा सुइक्नुड। गो तेको लां गाक्चा माल्नुडा, मेको आं कली शेंदीनी। गो इन लां कोत्रशा बाक्नुड। 9 परमप्रभु यावे, गे आं कली आं जोरी सत्रु रे प्रोंइयीनी। मारदे हना गो इन बाक्तीकेमी खुइक्थ जाक्नुड। 10 आं कली इन दाक्शो पचा कली शेंदीनी। मारदे हना गे आं परमप्रभु बाक्नीनी। इन रिम्शो सोक्तीम आं कली ठीक लांम गाक्पाइय्यीनी।

11 परमप्रभु यावे, इन नें आ पबर्म आं कली ब्रोंइचा गेयीनी। इन निसाफ पतीकेमी आं कली श्येत रे प्रोंइयीनी। 12 इन गेना हना यो दाक्तीकेमी आं जोरी सत्रु आन कली खतम पोक्कीन। मिनु आं जोरी सत्रु नेल्ल आन कली सतीन। मारदे हना गो इन गेय पाइब बाक्नुड।

144

ग्राचा कली पुंइशो लोत्र
दाऊद आ कुम्सो।

1 परमप्रभु यावे, आं सेरथे फुल्लु, ठेयब बाक्ब। मेकोमी आं कली लडाइ पचा शेंब। 2 गो आं कली दाक्ब, आं दरवार, आं खुइश्शा ब्रोंइशा बाक्तीके, आं कली श्येत रे प्रोंइब नु आं तेक्तीक बाक्नीनी। गो इन बाक्तीकेमी खुइश्शा बाक्नुड। गे आं कली मुर आन कली सासन पाइब सेल्नीनी। भजन संग्रह १८:३

3 परमप्रभु यावे, मुर आइक्च बाक्तेक्म हना यो, गे मेको आन कली कोत्रनीनी। बेक्शा लाइब मुर मार नमी डा? तन्न गे मेको आन कली मिम्नीनी। 4 मुर कीशो सोक्त खोदेशो बाक्नीम। मेको आन ब्रोंइतीक नाक्ती जाम्शा लाइब वांकु खोदेशो बाक्नीम। अय्युब १४:२

5 परमप्रभु यावे, इन सरीड रे तोइश्शा यिने। डांडा आन कली थिशा, कुन गूपतीन। भजन संग्रह १८:१०-१७ 6 चिला दाप्पाइश्शा, मेको एर ओंथ ब्रपतीन। इन ब्रा आप्शा मेको आन कली खेदा पने। 7 इर रे इन गुइ दिंदीन। मिनु आं कली बारशो खोला नु अर्को रागी डा मुर आन गुइ रे प्रोंइयीनी। 8 मेकोपुकीमी जोल नु मरिम्शो ला पाइनीम।

9 परमप्रभु, गो इन कली नक कुम्सो का पाइनुड। १० ओटा तार पाइश्शो ताप्तीक ताप्शा, इन कली कुम्सो पाइनुड। भजन संग्रह ३३:३ 10 गे पिप आन कली ग्रापाइक्नीनी। गे इन गेय पाइब दाऊद कली बेक्चा रे प्रोंइतीनी। 11 आं कली मुर साइक्ब तरवार रे प्रोंइयीनी। अर्को रागी डा मुर आन गुइ रे प्रोंइयीनी। मेकोपुकीमी जोल नु मरिम्शो ला पाइनीम।

12 मिनु आंइ तौपुकी कोल्मानु, रवा खोदेशो दुम्मल। आंइ तमीपुकी दरवारम बाक्शो मुशो थाम खोदेशो दुम्मल। 13 आंइ अन्न वोइक्तीके शुश खाल डा अन्नमी ब्रीमल। आंइ भेडा हजार हजार दुम्मल। आंइ भेडा आंइ रूम लाख लाख दुम्मल। 14 आंइ बीपुकी गिक्ब दुम्मल। आंइ गारो मब्रेल्ल। आंइ कली सुइमी ग्याइश्शा मलदमेक्ल। मिनु आंइ लांमी सुइ डाक्शो मनेंसीब। 15 मोदेशो आसीक ताइब मुर ग्येरसीशो बाक्नीम। सु मुर आन परमप्रभु, परमप्रभु यावे बाक्बा, मेको ग्येरसीशो मुर बाक्नीम। ब्यवस्था ३३:२९

145

ठेयब सेल्तीक कुम्सो
परमप्रभु कली “ठेयब बाक्नीनी” देशो दाऊद आ कुम्सो।

1 आं परमप्रभु, गे आं पिप बाक्नीनी। गो इन कली मान पाइनुड। इन नें गेना हना यो ठेयब सेल्नुड। 2 गो इन कली नाक्त किंत किंत ठेयब सेल्नुड। गो इन नें गेना हना यो ठेयब सेल्नुड। 3 परमप्रभु यावे ठेयब बाक्ब। मेको ठेयब सेल्चा शिरशो बाक्ब। मिनु मेको आ ठेयब दुम्तीके सुइमी रुप्ने मचाप्नीम।

4 पाला का डा मुरुम आन नोले डा पाला डा मुर आन कली “इन गेय ठेयब बाक्नीम” दे शेंचा माल्नीम। मेकोपुकीमी इन सक्ति पाइश्शो गेय आ पबर्म लोत्र पचा माल्नीम। 5 आं पिप, गो इन शुश दारस डा मान ततीके नु इन छक लाक्चा डा गेय आ पबर्म मिम्ना मिम्न बाक्नुड। भजन संग्रह १९:२-७ 6 मुरपुकीमी इन ठेयब सक्ति आ पबर्म लोत्र पचा माल्नीम। मिनु गो इन ठेयब दुम्तीके आ पबर्म शेंनुडमी। 7 मेकोपुकीमी इन शुश रिम्शो पतीके आ पबर्म चाड मानेचा माल्नीम। मिनु इन ठीक पतीके आ पबर्म ठेयब सेंदा पा कुम्सो पचा माल्नीम।

8 परमप्रभु यावे दाक्ब नु शिशी पाइब बाक्ब। मेको रीब पा मगाइक्ब। मिनु मेको आ गेना हना यो दाक्तीके ठेयब बाक्ब। प्रस्थान ३४:६ 9 परमप्रभु यावे नेल्ल आन कली रिम्शो पाइब बाक्ब। मिनु आ सेल्शो नेल्ल आन कली शिशी पाइब। 10 परमप्रभु यावे, इन सेल्शो मारेइ मारेइमी इन कली “गे रिम्शो पाइब बाक्नीनी” देंचा माल्नीम। मिनु इन कली थमा सुइक्बपुकीमी ठेयब सेल्चा माल्नीम। 11 मेकोपुकीमी इन राज्य डा रिम्शो दुम्तीके आ पर्वम लोव्र पचा माल्नीम। इन सक्ति आ पर्वम लोव्र पचा माल्नीम। 12 मेकोपुकीमी इन ठेयब सक्ति पाइशो गेय नु इन राज्य डा दारस आ पर्वम मुर आन कली तुइक्पाइक्चा माल्नीम। 13 इन राज्य गेना हना यो लीब राज्य बाक्ब। इन सासन पतीके पाला पाला सम्म बाक्ब। परमप्रभु यावेमी आ देशो नेल्ल पाइब। मिनु आ पशो मारेइ मारेइ शिशीम पाइब।

14 मिनु परमप्रभु यावेमी गोल्लो नेल्ल आन कली पोक्ब। मेकोमी आन थुं लुक्च लशो आन कली आन थुं बारपाइक्ब। भजन संग्रह १४६:८ 15 मारेइ मारेइमी इन गे कोव्रनीम। मारदे हना गे मेको आन कली आन जची ना जचा थोव्रक गेनीनी। भजन संग्रह १०४:२७-२८; भजन संग्रह १३६:२५ 16 गे हाइशो दुम्शा, ब्रोंइब नेल्ल कली रूपाइक्नीनी। 17 परमप्रभु यावे नेल्ल ठीक पाइब बाक्ब। मिनु आ गेय नेल्ले शिशीम पाइब। 18 परमप्रभु यावे आ कली पुंडब नेल्ल आन नेक्था बाक्ब। सु सुमी मेको कली थमा पा पुंडनीमी, मेको आन नेक्था बाक्ब। 19 मेकोमी आ कली मान पा हिंब नेल्ल आन दाक्शो गेब। मेकोमी मेको आन पुंडशो नेंब। मिनु मेको आन कली श्येत रे प्रोंइब। हितोपदेस १०:२४ 20 परमप्रभु यावेम आ कली दाक्ब नेल्ल आन कली कोव्रब। तन्न मेकोमी आ अरेशो मटीब नेल्ल आन कली खतम पोक्ब।

21 गो परमप्रभु यावे कली ठेयब सेल्शा, लोव्र पाइनुड। सोक्त पाइशो नेल्लेमी मेको कली गेना हना यो ठेयब सेल्नीम।

146

मचाप्ब कली वारच पाइशो

1 परमप्रभु यावे कली ठेयब सेलो। आं थुं, परमप्रभु यावे कली ठेयब सेलो। 2 गो ब्रोंइडा सम्म परमप्रभु यावे कली ठेयब सेल्लुड। गो मबेक्डा सम्म आं परमप्रभु कली कुम्सो पा ठेयब सेल्लुड। 3 गे रागी डा सासन पाइब मुर आन कली थमा मसुतीन। मारदे हना मेकोपुकीमी अरु आन कली वारच पने मचाप्नीम। भजन संग्रह ११८:८-९; येरमीया १७:५ 4 मेको आन सोक्त लाइब। मिनु मेकोपुकी खप दुम्नीम। मेना मेको आन मिम्शा पशो नेल्ल जाम्शा लाइब। उत्पत्ती ३:१९; उपदेसक ३:२०

5 याकूब आ परमप्रभु वारच पाइक्चा पुंडसीब मुर, ग्येरसीशो बाक्नीम। मेकोपुकीमी परमप्रभु यावे, आन परमप्रभु आ लां कोव्रशो बाक्नीम। येरमीया १७:७ 6 मेको सरीड नु रागी समुन्द्र नु मेकेर बाक्ब आन कली सेल्ब बाक्ब। मेकोमी आ देशो गेना हना यो पाइब। 7 मेकोमी दिप्चा पुंडसीब आन कली ठीक निसाफ पाइब। शोव्रलु बेक्शो आन कली जचा गेब। परमप्रभु यावेमी चोक्चा पुंडसीशो आन कली प्रोंइब। 8 परमप्रभु यावेमी मिक्च मताइब आन कली ताइब सेल्ब। मिनु आन थुं लुक्च लशो मुर आन कली आन थुं बारपाइक्ब। परमप्रभु यावेमी ठीक पाइब आन कली दाक्ब। भजन संग्रह १४५:१४ 9 मिनु परमप्रभु यावेमी अर्को रागी डा मुर आन कली कोव्रब। मेकोमी वोंइश बेक्शो मीश मुर नु रोम रोइक्च आन कली यो कोव्रब। तन्न आ अरेशो मटीब आन मिम्शो दुम्चा मगेब। प्रस्थान २२:२०-२१ 10 परमप्रभु यावेमी गेना हना यो सासन पाइब। सियोन, इ परमप्रभुमी पाला पाला सम्म सासन पाइब। परमप्रभु यावे कली ठेयब सेलीन। भजन संग्रह ९३:१

147

परमप्रभु कली ठेयब सेल्शो

1 परमप्रभु यावे कली ठेयब सेलीन। मारदे हना आंइ परमप्रभु कली ठेयब सेल्तीक कुम्सो पचा रिम्शो नु शिरशो बाक्ब। भजन संग्रह ९२:२ 2 परमप्रभु यावेमी यरूसलेम कली सेल्ब। मेकोमी इस्राएल रे खेरशो ब्रशा बाक्शो मुर आन कली खुप्ब। 3 मेकोमी थुं जिक्शो आन कली सापाइक्ब। मिनु मेको आन कली वाम फ्रेंब। यसैया ६१:१ 4 मेकोमी सोरुल आन कली हिक्शा, का का पा आन नें वोइक्ब। यसैया ४०:२६ 5 आंइ परमप्रभु ठेयब बाक्ब। मेको आ सक्ति नेल्ल क्येडा ठेयब बाक्ब। आ रुप्तीक सक्ति सुइम तुइक्ने मचाप्नीम। लूका १:५२ 6 परमप्रभु यावेम श्येत जाइब आन कली कोव्रब। तन्न आ अरेशो मटीब आन कली खपीम ताइक्ब।

7 गे परमप्रभु यावे कली ठेयब सेलतीक कुम्सो पने। तार पाइशो ताप्तीके ताप्शा आंइ परमप्रभु कली कुम्सो पा ठेयब सेलीन। 8 मेकोमी सरीड कली गोस्सुम सुम्पाइक्व। रागी कली रेउ यिपाइक्व। मिनु डांडाम घांस वापाइक्व। 9 मेकोमी जन्तु नु बी ब्यफ आन कली थुल्ब। खद आन चाइक्व आन कली यो जचा गेब। अय्युब ३८:४१ 10 मेको शारा आन सक्ति तशा मग्येरसीब। मुर आन रीब पा दोरशो मारेइ ममिम्ब। 11 तन्न परमप्रभु यावेमी आ कली मान पा हिंब नु आ गेना हना यो दाक्तीके कली रिम्ब आन कली दाक्ब।

12 यरूसलेम, परमप्रभु यावे कली ठेयब सेलो। सियोन, इ परमप्रभु कली ठेयब सेलो। 13 मारदे हना मेकोमी इ सहर डा लाप्चोपुकी बोल्यो सेल्लो बाक्ब। मिनु इ आगाम बाक्ब आल आन कली आसीक गेब। 14 मेकोमी इ सांदमी लडाइ मदुम्पाइक्व। मेकोमी इ कली रिम्शो चेरबीम रूपाइक्व।

15 मेकोमी आ शेंतीके रागीम सोइक्व। मेको आ लोत्र रीब पा तेइ ते ब्राइब। अय्युब ३८:२२-३० 16 मेकोमी ऊन खोदेशो पा फुं यिपाइक्व। मिनु पुलु खोदेशो पा फुरश यिपाइक्व। 17 मेकोमी फुल्लु खोदेशो पा मुप्स यिपाइक्व। मेको आ काइशो फशेमी सु राप्ने चाप्बा डा? 18 मेकोमी लोत्र पा फुरश यपाइक्व। मेकोमी फश पपाइक्व। मिनु ब्वाक्कु शाइक्पाइक्व। 19 मेकोमी आ लोत्र याकूब कली शेंब। मिनु इस्राएल कली आ फुल्लुम मुशा ब्रेक्शो लोत्र नु आ पतीक लोत्र शेंब। ब्यवस्था ४:८; प्रेरित १४:१६; रोमी ३:२ 20 मेकोमी अर्को रागी डा सुइ मुर आन पर्वम मोदेशो मपावो। मिनु मेकोपुकीमी आ पतीक लोत्र मतुइक्नीम। परमप्रभु यावे कली ठेयब सेलीन।

148

परमप्रभु कली ठेयब सेल्लो

1 परमप्रभु यावे कली ठेयब सेलीन। परमप्रभु यावे कली सरीड रे ठेयब सेलीन। इर रे मेको कली ठेयब सेलीन। भजन संग्रह १०३:२०-२२ 2 आ स्वर्ग डा गेय पाइबपुकी, मेको कली ठेयब सेलीन। आ स्वर्गम बाक्ब नेल्लेमी मेको कली ठेयब सेलीन। 3 नां नु तास्ला मेको कली ठेयब सेलीस। छेडछेड पाइशो सोरुल नेल्लेमी मेको कली ठेयब सेलीन। उत्पत्ती १:१-२७ 4 नेल्ल क्येडा इर सरीड नु मेको आ तार बाक्ब ब्वाक्कु नेल्लेमी मेको कली ठेयब सेलीन। 5 मेकोपुकीमी परमप्रभु यावे कली ठेयब सेल्लेक्व। मारदे हना मेकोमी लोत्र पवानु, मेको दुम्तेक्म। भजन संग्रह ३३:९ 6 मेकोमी मेको आन कली गेना हना यो बाक्मल, दे वोइक्तु। मिनु मेकोमी मेको आन कली अरेवानु, आन बाक्तीकेम बाक्शा टिम्तेक्म।

7 रागी रे पा ब्वाक्कुम बाक्ब ठेयब जन्तु नु शुश लुक्च लशो ब्वाक्कु, परमप्रभु यावे कली ठेयब सेलीन। 8 मी नु मुप्स, फुं नु फुरश नु फश गिवारमी आ देशो टीनीम।

9 पहाड नु डांडा, फल फुल सिप्ब रवा नु लाइशो रवा नेल्ले, 10 ब्वाकी डा जन्तु नु बी ब्यफ नेल्ले, आइक्च खपीम गेशा गाक्ब जन्तु नु बेरब चिक्ब नेल्ले 11 रागी डा पिपपुकी नु जात जात डा मुर नेल्ले, रागी डा सासन नु हुकुम पाइब नेल्ले, 12 वोंइश आल नु मीश आल, खाल्पा खाल्पी नु आल नेल्लेमी परमप्रभु यावे कली ठेयब सेलीन। 13 मेको नेल्लेमी परमप्रभु यावे आ नें ठेयब सेल्लेक्व। मारदे हना मेको आ नें ला ठेयब बाक्ब। मेको आ मान ततीक डा छेडछेड रागी नु सरीड तार बाक्ब। 14 मेकोमी आ मुर आन कली सक्ति पाइशो नु ठेयब सेल्लु। आ कली थमा सुइक्ब नेल्ले नु आ नेक्था बाक्ब इस्राएलीपुकीमी परमप्रभु यावे कली ठेयब सेलीन। ब्यवस्था ४:७-८

149

परमप्रभु कली ठेयब सेल्लो

1 परमप्रभु यावे कली ठेयब सेलीन। परमप्रभु यावे कली नक कुम्सो का पने। थमा सुइक्ब आन गुम्तीकेमी मेको कली ठेयब सेलीन। भजन संग्रह ३३:३ 2 इस्राएल आ कली सेल्ले आ पर्वम ग्येरसेक्व। सियोन डा मुर आन पिप आ पर्वम ग्येरसमल। भजन संग्रह १००:३; भजन संग्रह ९३:१ 3 मेकोपुकीमी सिल पना पन मेको आ नें ठेयब सेल्लेक्व। खैजडी नु बीना ताप्शा, मेको कली कुम्सो पामेक्व। 4 मारदे हना परमप्रभु यावे आ मुर आन पर्वम ग्येरसीशो बाक्ब। आइक्च मुर आन कली ग्रातीकेमी ग्योम्ब। 5 थमा सुइक्बपुकी शुश ग्येरसमल। मिनु आन ब्राख्येमी यो ग्येरशा कुम्सो पामेक्व।

6 मेकोपुकीमी परमप्रभु कली ठेयब सेल्लेक्व कुम्सो पामेक्व। मेको आन गुइमी निम्फा गे क्योरतीक पाइशो तरवार बाक्व। 7 मेकोपुकीमी रागी रागी डा मुर आन कली सजाइ गेशा, क्येक्क लेत्नीम। 8 मिनु मेको आन पिप

आन कली साडलो नु मेको आन ठेयब मुर आन कली फलाम के फ्रेंतीकेम फ्रेंने चाप्नीम। 9 मिनु मेकोपुकीमी ब्रेक्शा अरेशो कोव्रशा, मेको आन कली निसाफ पाइनीम। मेको परमप्रभु आ मुर आन रिम्शो बाक्ब। परमप्रभु यावे कली ठेयब सेलीन। यसैया ३४:-; यसैया ६३:४-६; योएल ४:२-२४

150

परमप्रभु कली ठेयब सेल्शो

1 परमप्रभु यावे कली ठेयब सेलीन। परमप्रभु कली आ बाक्तीकेमी ठेयब सेलीन। परमप्रभु यावे कली आ सरीड डा ठेयब बाक्तीकेमी ठेयब सेलीन। 2 मेको कली आ सक्ति पाइश्शो गेय आ पर्बम ठेयब सेलीन। मेको कली आ नेल्ल क्येडा ठेयब दुम्तीके आ पर्बम ठेयब सेलीन।

3 तुराही ताप्शा, मेको कली ठेयब सेलीन। तार पाइश्शो ताप्तीक नु ठेयब ताप्तीक ताप्शा, मेको कली ठेयब सेलीन। 4 खैजडी ताप्शा, सिल पा मेको कली ठेयब सेलीन। तार पाइश्शो ताप्तीक नु बांसुरी ताप्शा, मेको कली ठेयब सेलीन। 5 आइक्च बुप्केल ताप्शा, मेको कली ठेयब सेलीन। ठेयब सेंदा पा मुरब बुप्केल ताप्शा, मेको कली ठेयब सेलीन। 6 सोक्त पाइश्शो नेल्लेमी परमप्रभु यावे कली ठेयब सेलीन। परमप्रभु यावे कली ठेयब सेलीन। भजन संग्रह ४१:१४; प्रकाश ५:१३

हितोपदेश

ब्रेक्ब मुर: सोलोमनमी मुर आन देशो लोत्र खुप्शा नु आं थुं डा तुइक्तीक लोत्र एको किताबम ब्रेक्शो बाक्ब। गेना ब्रेक्शो: एको किताब सोलोमोन आ सासन पची ना १६५-१२६ बि. सी.म ब्रेक्शो बाक्ब।

गेना ब्रेक्शो: एको किताब सोलोमोन आ सासन पची ना १६५-१२६ बि. सी. ब्रेक्शो बाक्ब।

मार ब्रेक्शो:

१. सोलोमनम “जोक्ब तुइक्ब थुं मालीन” हितोपदेश १:- ९:-

२. सोलोमोनम “हेंथे मगाक्कीन” हितोपदेश १०:-२४:३४

३. अरु जोक्ब तुइक्बम ब्रेक्शो रिम्शो पतीक लोत्र हितोपदेश २२:१७-२४:३४

४. सोलोमनम “मुर आन दातेमी रिम्शो बाक्कीन” हितोपदेश २५:-२९:-

५. आगुर नु लेमुएलम “खिं डा मुर ग्येरसीशो दुम्चा माल्नीम” दे ब्रेक्शो बाक्ब। हितोपदेश ३०:-३१:-

हितोपदेश किताब डा शेंसीचा माल्शो लोत्र: परमप्रभु यावे कली मान पा हिंब मुर जोक्ब तुइक्ब दुम्शा, रिम्शो दुम्नीम।

एको किताब आ शेंशो लोत्र

१ एको दाऊद आ तौ इस्राएली आन पिप सोलोमोन आ देशो लोत्र बाक्ब। १ राजा ५:९-१२ २ एको किताबम तुइक्तीके नु अर्ती टिचा आ पबर्म शेंसीतीके लोत्र बाक्ब। मेको शेंसाक्नी हना, गे रुप्ब नु जोक्ब तुइक्ब दुम्नीनी। ३ मिनु ब्रेक्ब मुर आ अर्ती सुमी टीबा, मेकोमी तुइश्शा गेय पने चाप्ब। ठीक पतीके, ठीक निसाफ पतीके नु कुल मकोव्रथु रिम्शो पने चाप्ब। ४ मारेइ मजोक्ब आन कली निप्स खाप्शा गेय पचा शेंब। ठिटा आन कली जोक्ब नु होस पाइब सेल्ब। ५ जोक्ब तुइक्ब नेल्लेमी एको लोत्र रिम्शो पा नेंबमी तेम्शा शुश रुप्ब दुम्नीम। निप्स पाइश्शो मुर जोक्ब दुम्शा, ६ एको देंतीक लोत्र, कथा, जोक्ब तुइक्ब आन लोत्र नु खुइश्शो लोत्र रुप्नीम। ७ परमप्रभु यावे कली मान पा हिंचा तुइक्तीक दुम्चा कली गोतीक बाक्ब। मूर्खपुकीमी तुइक्तीके नु अर्ती मदाक्नीम। हितोपदेश ८:१३; हितोपदेश ९:१०; अय्युब २८:२८; भजन संग्रह १११:१०

मरिम्शो पाइब नु मगाक्को

८ आं तौ, इ आफ आ अर्ती नेनो। इम्मा आ शेंशो मप्रोनो। हितोपदेश ६:२०; ब्यवस्था २१:१८-२१ ९ मारदे हना मेको इ पिया डा ग्योम्तीके नु इ कली सुन के माला नस। १० आं तौ, मरिम्शो पाइब मुरुम इ कली “हेंथे पय” दे लोत्र पाम्तेक्म हना, मेको आन लोत्र मबिस्सो। हितोपदेश १६:२९; ब्यवस्था १३:७-९ ११ मेकोपुकीमी “पिवो, मुर साइक्चा कली बाप्शा बाक्ब। रिम्शो पाइब कली बाप्शा, १२ मेको कली बेक्शो मुर आन बाक्तीकेम सोइक्तय। गो मेको कली सेसीन तुरसुम सोइक्तय। १३ मिनु गोपुकीम आ बाक्शो शोंप नेल्ल रोइक्नय। मेको रोइश्शोमी आंम आंम खिं प्रिनय। १४ गे, गोपुकी नु लते हना, नेल्ल गारशा योक्सय” देंतेक्म हना यो, १५ आं तौ, गे मेकोपुकी नु मलावो। मेकोपुकी नु मगाक्को। १६ मारदे हना मेकोपुकी मरिम्शो गेय पचा कली रीब पा दोरनीम। हुश खाक्श पोक्चा कली चुइक्नीम। १७ चिक्बीमी तचा डा पा ब्वारद दाइश्शो शोर गाक्शो गेय बाक्ब। १८ मेको मुरपुकी साइक्चा पुंइसीचा कली बाप्शो बाक्नीम। आंमान खतम दुम्चा कली बाप्शा बाक्नीम। १९ मुर आन मार मार रोइश्शा, तेलसीबपुकी मोदेशो पा साइक्चा पुंइसीनीम।

तुइक्तीकेमी मुर आन कली अरेब

२० लां मेर तुइक्तीके लोत्र नेंसीब। सहर मेर आ सेंदा ग्रूब। हितोपदेश ८:१-३ २१ मेको शुश मुर आन देलतीके मेर ब्रेन्ना ब्रेन्न बाक्ब। सहर ओव्रतीक ठेयब लाप्चोमी आ लोत्र पाइब। २२ मार लोत्र पाइब देशा हना “गे मारेइ मजोक्बपुकी, गेना सम्म मारेइ मजोक्ब दुम्चा दाक्नीनी? गे शुक्शी पाइबपुकी, गेना सम्म शुक्शी पचा दाक्नीनी? गे मूर्खपुकी, गेना सम्म तुइक्तीके कली काइ मदाक्नीनी? २३ गे आं हुइश्शो लोत्र नेनीन। आं मिम्शो इन कली देंनुड। आं लोत्र इन कली तुइक्पाइक्नुड। २४ मिनु गो इन कली ब्रेत्तुनु, गेपुकीम मनेनी। गो आं गुइ हामुनु, सुइ मपिनी। यसैया ६५:२, १२ २५ आं अर्ती नेल्ल मटितीके, आं हुइश्शो नेंचा मदाक्तीके, २६ गो यो गे श्येत जनी ना, रिश्शा बाक्नुड। मिनु गे शुश हिंनीना, गो शुक्शी पाइनुड” दे लोत्र पाइब। ब्यवस्था २८:६३ २७ शुश हिंतीके ठेयब फश खोदेशो पा इन तारी जाक्त हना, श्येत

फश गिवार खोदेशो पा इन तार जाक्त हना, श्येत नु हिंतीकेम इन कली सुम्तु हना, 28 मेना आं कली थोनीनु, गो इन कली लोत्र मलेत्नुड। गेपुकीमी आं कली शुश माल्तीनी हना यो, मथित्नीनी। यसैया ५९:२; मीका ३:४ 29 मेकोपुकीम जोक्तीक कली काइ मदाक्तीके नु परमप्रभु यावे कली मान मपथु महिंतीके, 30 आं अर्ती मनेंतीके, आं हुइशो नेंचा मदाक्तीके, 31 मेकोपुकीमी आन आन पशो मरिम्शो गेय आन इनाम तचा माल्नीम। मिनु आन आन मरिम्शो पतीकेमी ब्रीमल। 32 मारदे हना मारेइ मजोक्ब आन मटितीके साइक्चा पुंडसीनीम। मूर्ख आन मारेइ ममिम्तीके खतम दुम्नीम। 33 तन्न सु सुम आं लोत्र नेंनीमी, मेकोपुकी श्येत मजाइनीमी। महिंथु, रिम्शो दुम्शा बाक्नीमी।

2

तुइक्तीकेमी बेक्तीक रे प्रोंइब

1 आं तौ, गे आं लोत्र नेनो, आं शेंशो इ थुंम वोइक्तीवी हना, 2 गे इ नोफा दाइशशा, तुइक्तीक लोत्र नेंतीवी नु रुप्तीके दाक्तीवी हना, 3 गे जोक्तीके तुइक्तीक माल्शा, रुप्तीके कली ठेयब सेंदा पा पुंडतीवी हना, याकूब १:५ 4 गे मेको कली चांदी खोदेशो पा माल्तीवी नु थिम्शा वोइशशो शोंप माल्शो खोदेशो पा दोप्तीवी हना, 5 गे परमप्रभु यावे कली दोपा मान पा हिंचा माल्बा, मेको तुइक्ने चाप्नेवे। मिनु गे परमप्रभु कली तुइशशा शेंसीने चाप्नेवे। 6 मारदे हना परमप्रभु यावे तुइक्तीक थुं गेब बाक्ब। आ शोत्र रे जोक्तीक नु रुप्तीक लोत्र गूब। दानीएल २:२०-२३ 7 मेकोमी रिम्शो थुं पाइशशो मुर आन कली तुइक्तीक थुं गेब। मेको दोस मताइब आन कली तेक्तीके बाक्ब। भजन संग्रह ७:११ 8 परमप्रभु यावेमी ठीक निसाफ बाक्बा देय मबाक्बा मेको कोत्रब। आ लां गाक्ब आ मुर आन कली कोत्रब। 9 मिनु गे ठीक पतीके नु ठीक निसाफ, कुल मकोत्रथु रिम्शो पतीके नु रिम्शो लां मार बाक्मे रुप्नेवे। 10 मेना तुइक्तीके इ थुंमी ओत्रब नु इ जोक्तीकेमी इ थुं कली ग्येरपाइक्ब। १कोरिन्थी १:३० 11 मिनु होस पतीकेमी इ कली खाल पाइब। रुप्तीकेमी इ कली कोत्रब। 12 मेकोमी इ कली मरिम्शो लां नु दूली लोत्र पाइब मुर रे प्रोंइब। 13 मेकोपुकी रिम्शो थुं पाइशशो मुर आन लांम गाक्चा प्रोंइशा, छिडछिड डा लांम गाक्नीमी, 14 मेकोपुकी थम मरिम्शो पचा कली ग्येरसीनीम। शुश दूली नु मरिम्शो पतीकेमी ग्येरसीनीम। 15 मेको आन पतीक काइ मरिम्शो बाक्ब। हेंथे लां गाक्ब बाक्नीम।

16 होस पतीके नु रुप्तीकेमी इ कली हेंथे पाइब मीश मुर नु आ वाल्चा डा लोत्र रे यो प्रोंइब। 17 मेकोमी आ ग्युंभे पशो वोंइश कली प्रोंइशा, परमप्रभु यावे आ डोंइती पशो कबल प्रेंताक्ब। 18 मेको आ खिं ओत्रब नेल्ल बेक्तीक लां लाइनीम। मेको आ खिं डा लां बेक्शो मुर आन बाक्तीक लतीक लां बाक्ब। 19 मोदेशो मीश मुर आ बाक्तीक लाइबपुकी गेनायो लेन्ने मचाप्नीम। मिनु ब्रोंइतीक लां यो मताइनीम।

20 मोपतीके रिम्शो मुर आन लां गाक्को। ठीक पाइब आन लां गाक्को। 21 मारदे हना रिम्शो थुं पाइशशो मुर रागीम बाक्चा ताइनीम। दोस मताइबपुकी रागीम लीनीम। भजन संग्रह ३७:९; मत्ती ५:५ 22 तन्न परमप्रभु यावे आ अरेशो मटीबपुकी आन शाक्श रेन रागी रे तुल्चा पुंडसीनीम। थमा मसुइक्बपुकी सुवा खोदेशो पा ताइक्चा पुंडसीनीम। भजन संग्रह ३७:१०

3

थमा सुइक्बमी आसीक ताइनीम

1 आं तौ, आं अरेशो मप्रेंदो। मिनु आं शेंशो लोत्र इ थुंमी वोतो। लेवी १८:५ 2 मारदे हना मेकोमी इ कली शुश बर्स ब्रोंइतीक नु थम रिम्शो बाक्चा गेनीस। 3 गेना हना यो दाक्शा गेनायो मप्रोंइथु, बाक्को। मेको निक्शी कली माला खोदेशो पा रेल्ला, इ थुंम ब्रेक्शो खोदेशो पा वोतो। ब्यवस्था ६:८; येरमीया ३१:३३ 4 मो पाप्तीवी हना, गे परमप्रभु आ आसीक ताइनेवे। मुर नेल्लेमी इ कली रिम्शो देंनीम।

5 गे इ थुं नेल्लेमी परमप्रभु यावे आ देंशो मिम्शा, थमा सुतो। इ आंम जोक्शो तुइशशो थमा मसुतो। 6 इ पतीक नेल्लेमी “परमप्रभु यावेमी मार दाक्बा” दे मिम्तो। मो पाप्तीवी हना, परमप्रभु यावेमी इ कली ठीक लां कोइब। 7 गे “गो जोक्ब तुइक्ब मुर नड” दे ममिम्तो। तन्न परमप्रभु यावे कली मान पा हिनो। मरिम्शो पतीके रे डोन बाक्को। यसैया ५:२१ 8 मो पाप्तीवी हना, मेको इ रां कली सापाइक्तीके बाक्ब। मिनु इ गुइ खोइल बोल्यो दुम्नीम।

9 इ शोंपोमी परमप्रभु यावे कली मान पावो। मिनु इ बाली नाली रे नेल्ल क्येडा डोंइती सिशशोमी आ नें ठेयब सेलो। प्रस्थान २३:१९ 10 मो पाप्तीवी हना, इ कोठो भकारी अन्नमी शुश ब्रीशो बाक्नीम। इ अडगुर खाक्तीके अडगुर रसम ब्रीशो बाक्नीम।

11 आं तौ, परमप्रभु यावेमी इ कली देशो रिम्शो पावो। आ हुइशो नेंशा, मरिम्शो मसुतो। हिबू १२:५-६; अय्युब ५:१७-१९ 12 मारदे हना परमप्रभु यावेमी आ दाक्शो मुर आन कली ला हुइक्ब। मेकोमी रिम्शो आफोमी आ दाक्शो तौ कली खोदेशो पा सजाइ गेब। १कोरिन्थी ११:३२; प्रकाश ३:१९

तुइक्तीकेमी मुर कली रिम्शो सेल्ब

13 तुइक्तीके ताइब नु रूप्बपुकी ग्येरसीशो मुर बाक्नीम। 14 मारदे हना तुइक्तीके चेम्शो चांदी क्येडा शुश रिम्शो बाक्ब। मिनु आ चेम्शो सुन क्येडा यो शुश क्येट लाइब बाक्ब। हितोपदेस ८:१० 15 तुइक्तीके हीरा क्येडा शुश क्येट लाइब बाक्ब। इ माल्शो मारेइ मारेइ नेल्ल मेको क्येडा आइक्च बाक्नीम। 16 मेको आ ग्युरा गुइमी शुश ब्रॉइतीक नाक्त बाक्नीम। आ पेरा गुइमी शोप नु मान ततीके बाक्ब। 17 मेको आ लां रिम्शो नु थुं नाइक्तीके बाक्नीम। 18 मेको नु बाक्बपुकी शुश नाक्त ब्रॉइनीम। मेको कली मुष्शा बाक्ब आन पर्बम मुरपुकीमी “मेकोपुकी ग्येरसीशो मुर बाक्नीम” देंनीम। हितोपदेस ११:३०; हितोपदेस १३:१२; हितोपदेस १५:४

19 परमप्रभु यावेमी आ तुइक्तीकेमी रागी सेल्लु। आ रूप्तीकेमी सरीड वोइक्तु। हितोपदेस ८:२२-३१ 20 आ जोक्तीकेमी ब्वाक्कु बुक्पाइक्तु। मिनु गोस्स रे फुरश यिपाइक्तु।

21 आं तौ, आं देशो गेय पचा क्येडा डोंइती मिम्शा, गेनायो मप्रोनो। ठीक तुइक्तीके नु होस पतीके गे नु बाक्ल। 22 मारदे हना मेको इ ब्रॉइतीक नु इ दारस बाक्नीस। 23 मिनु गे इ लांम रिम्शो पा गाक्डे नु इ खोइल दाइल मपाइब। 24 गे निस्सेनु, हिंचा ममाल्नेवे। इमेनु ब्रॉव्शो निन्द्रा पाइनेवे। भजन संग्रह ३:६ 25 शुश हिंचा डा दुम्मेनु, महिनो। फश पवानु, परमप्रभु यावे आ अरेशो मटीबपुकी खतम दुम्मानु, गे महिनो। 26 मारदे हना परमप्रभु यावे गे नु बाक्ब, मेकोमी इ खोइल कली रेल्लिक रे प्रॉइब। हितोपदेस १०:२९

मुर आन कली वारच पावो देशो

27 मिनु मुर आन कली गेचा डा गेवो। इ गुइमी बाक्त हना, शिम मदुमो। 28 गे नु बाक्त हना “दीसा जाक्को। मिनु गेनन” दे इ नेक्था डा मुर आन कली मदेनो।

29 इ नेक्था बाक्ब कली मरिम्शो पचा ममिम्तो। मारदे हना इ कली थमा सुइशशा, इ नेक्था बाक्ब। 30 इ कली मारेइ मरिम्शो मपथु जिचा मपोक्को। 31 रोइक्ब मुर आ मारेइ मारेइ तशा, मवलो। मेको आ लांम काइ मगाक्को। 32 मरिम्शो दूली पाइब तशा, परमप्रभु यावे ग्रांग्रा दीब। रिम्शो थुं पाइशोपुकी चहिं मेको नु बाक्चा ताइनीम। भजन संग्रह २५:१४ 33 परमप्रभु यावेमी आ अरेशो मटीब आन खिं डा मुर आ सराप राइब। तन्न ठीक पाइब आन खिंम आसीक राइब। 34 मिनु परमप्रभु यावेमी ठेयब लेशो शुक्शी पाइब मुर आन कली शुक्शी पाइब। ब्रेम्शो थुं पाइशो आन कली चहिं शिशी पाइब। १ पत्रुस ५:५ 35 तुइक्ब मुरपुकी मान पाइक्चा पुंइसीनीम। तन्न मटीब मूर्खपुकी मुने दोक्नीम।

4

तुइक्तीक थुं रिम्शो बाक्ब

1 आं तौपुकी, आं अर्ती नेनीन। गे जोक्ब तुइक्ब दुम्चा कली इन नोफा दाइशशा नेनीन। 2 गो इन कली रिम्शो पा अरेनुड। आं शेंशो लोव्र मप्रोनीन। 3 गो यो आं आफ नु बाक्शो बाक्ती। गो आं ममा आ दाक्शो तौ बाक्ती। 4 मिनु आं आफोमी आं कली “आं लोव्र इ थुंमी वोतो। मिनु आं शेंशो टिशा ब्रोनो। लेवी १८:५ 5 तुइक्तीके मालो नु जोक्ब तुइक्ब दुमो। आं देशो लोव्र मप्रोनो। 6 मेको कली मप्रॉइतीवी हना, इ कली कोव्रब। मेको कली दाक्ताक्वी हना, इ कली खाल पाइब। 7 तुइक्तीके आ गोतीक मार बाक्त देशा हना, तुइक्तीके शुश माल्चा माल्नेवे। मार ताप्तीवी हना यो, नेल्ल क्येडा ठेयब जोक्ब तुइक्ब दुमो। 8 मेको कली ठेयब सेल्लतीवी हना, इ कली ठेयब सेल्ब। गे मेको कली मुप्तीवी हना, इ कली मान ततीक गेब। 9 मेकोमी इ पिया दारशो पा ग्योम्पाइक्ब। इ पिया तारी रिम्शो सिरपेच गुक्ब” दे शेंताक्यी।

तुइक्तीकेमी ब्रॉइचा गेब

10 आं तौ, इ नोफा दाइशशा, आं लोव्र नेंशा, ब्रावो। मो पाप्तीवी हना, गे शुश ब्रॉइनेवे। हितोपदेस ३:२ 11 गो इ कली तुइक्तीक लां शेंताक्न। गो इ कली रिम्शो थुं डा मुर आन लांम गाक्पाइक्तन। 12 गे गाक्डेनु, इ कली सुइम मतेक्नीम। मिनु दोरते हना, दाइल मपांइसीनेवे। 13 अर्ती कली मिम्शा, मेको कली मप्रेंदो। मेको कली टिवो। मारदे हना मेको इ

ब्रोंडतीक बाक्ब। 14 परमप्रभु यावे आ अरेशो मटीब नु मगाक्को। मरिम्शो पाइब आन लां मगाक्को भजन संग्रह १:१ 15 मेकोपुकी नु मगाक्को। आन लां मलावो। आन लां हेरशा लावो। 16 मारदे हना मेकोपुकी मरिम्शो मपामे सम्म इप्ने मचाप्नीम। मुर कली मथिपदमे सम्म निन्द्रा मपाइनीम। भजन संग्रह ३६:५; मीका २:१ 17 परमप्रभु यावे आ अरेशो मटितीके मेको आन जचा थोत्रक खोदेशो बाक्ब। हुश खाक्श पोक्तीके आन तूचा थोत्रक खोदेशो बाक्ब। 18 तन्न ठीक पाइब आन लां सुनी डा छेडछेड खोदेशो बाक्ब। मेको नाक्ती उइक्थ दुम सम्म बारना बारन शुश छेडछेड दुम्ब। हितोपदेस २४:२० 19 परमप्रभु यावे आ अरेशो मटीब आन लां क्येर नाक्दो डा छिडछिड खोदेशो बाक्ब। मेकोपुकीम मारेइमी दाइल पाइक्नीम, दे मतुइक्नीम। 20 आं तौ, आं लोत्र नेनो। इ नोफा दाइश्शा, आं देशो नेनो। 21 आं लोत्र कली गेना हना यो मिम्तो। मिनु मेको कली इ थुंमी वोतो। 22 मारदे हना सु मेको ताइबा, मेको आ ब्रोंडतीक दुम्ब। मिनु मेको आ रां नेल्ल कली सापाइक्तीक बाक्ब। हितोपदेस ३:८ 23 नेल्ल आन क्येडा इ थुं कली कोवडो। मारदे हना मेको रे इ ब्रोंडतीक जाक्ब। 24 इ शोत्र कली मरिम्शो लोत्र पचा मगेवो। हेंथे लोत्र इ क्येडा डोन वोतो।

25 इ मिक्ची मरिक्थु ठीक पा डोंडती कोवडो। सिका मपथु डोंडती गे कोवडो। हितोपदेस १७:२४ 26 ठीक लां ला गाक्को। मिनु इ पतीके नेल्ल रिम्शो दुम्नीम। 27 ग्युरा पेरा मलावो। मरिम्शो पतीक नेल्ल रे डोन बाक्को। यहोसु १:७

5

तेल्लेम क्येडा होस पचा

1 आं तौ, आं तुइक्तीक नेंशा शुश मिम्तो। आं रुप्तीक तुइक्चा कली इ नोफा दाइक्तो। 2 मोपा गे होस पा बाक्शा, जोक्शा लोत्र पने चाप्नेवे।

3 हेंथे पाइब मीश मुर आ शोत्र रे खुदो याप्ब। मिनु मेको आ लोत्र तेल क्येडा ग्रेन्देल बाक्ब। हितोपदेस २:१६-१९ 4 नोले मेको मीश मुर ककीर खोदेशो कशो नु निम्फा गे हेश्शो धार पाइश्शो तरवार खोदेशो दुम्ब। 5 मेको आ लां बेक्चा कली लुक्च लाइब। मेको बेक्शो मुर आन बाक्तीके लचा कली आंम कली तेक्ने मचाप्ब। 6 मिनु मेको ब्रोंडचा गेब लां रे डोन लाइब। मेको आ लां हेंथे बाक्त हना यो, मेकोमी मारेइ मतुइक्ब।

7 मुल आं तौपुकी, आं लोत्र नेनीन। आं देशो लोत्र मनेशो खोदेशो मपने। 8 मोदेशो मीश मुर क्येडा डोन बाक्कीन। मिनु आ खिं डा लाप्चो आ नेक्था मलने। 9 लाइतीनी हना, गे इन मान अरु आन कली गेशा, साइक्ब आ गुइमी दुम्नीनी। 10 मिनु अरु मुरुमी इन शोंप नेल्ले जाइनीम। इन श्येत पा चेम्शो मारेइ मारेइ अरु आन खिं लाइब। 11 मिनु नोले गे श्येत जशा, बेक्चा चिक्शा हुकयी पा, रां नेल्ल सोवशा गेयशो दुम्नीनी। 12 मिनु गे “गो मारदे परमप्रभु आ शेंशो मपडा, माइ? मारदे आ हुइश्शो मटिडा माइ? 13 गो आं कली शेंब आन लोत्र मनेंनु। आं कली अर्ती गेब आन लोत्र मटिड। 14 मुल गो खतम दुम्ती। मुर नेल्ल आन तुइक्चा डा पा खतम दुम्ती” देंनेवे। ब्यवस्था २२:२८-२९ 15 मिनु गे आंम कुवा डा ब्वाक्कु नु आंम बुक्तीके डा ब्वाक्कु तूशो खोदेशो पा गे इ मीश नु बाक्को। 16 इ बुक्शो ब्वाक्कु, लां मेर लचा गेनेवे? अरु मीश रे थिशो आल लांमी बाक्मानु, इ कली रिम्शो दुम्बा? 17 इ आल इ के ला दुम्ल। मेको अरु आन के मदुम्ल। 18 इ बुक्शो ब्वाक्कुम आसीक तवल। इ ठिटा बाक्ची ना ग्युंबे पशो मीश आल नु ग्येरसीशा बाक्को। उपदेसक ९:९ 19 मेको दारशो किश्श नु रिम्शो रोकोश खोदेशो बाक्ब। मेको आ दारस नु दाक्तीकेमी गे गेना हना यो ग्येरशा बाक्को।

20 आं तौ, गे मारदे मारेइ मतुइक्थु हेंथे मीश मुर नु गाक्नेवे? गे मारदे अरु मुर आ मीश कली मुप्नेवे? 21 मारदे हना परमप्रभु यावेमी मुर आ पशो नेल्ल ताइब। मेकोमी मुर आन लां नाक्ब। 22 परमप्रभु यावे आ अरेशो मटीब मुर आ मरिम्शो पशोमी ग्याइक्चा पुंइसीब। मेको आ पाप आ ग्याइलीमी रेट्चा पुंइसीब। 23 आंम कली चलेने मचाप्थु, हुइश्शो मटितीके मेको बेक्ब। आ मरिम्शो पतीकेम मेको जाम्शा लाइब।

6

४ ओटा होस पतीके

1 आं तौ, इ नेक्था डा मुर आ जमानी दुम्ते हना, सल्ला पने थुम्शो बाक्ते हना, हितोपदेस ११:१५; हितोपदेस २०:१६; हितोपदेस २२:२६ 2 गे इ लोत्रमी फ्रेंसीशो बाक्ते हना, गे गुम्चशो बाक्नेवे। 3 मुल मार पचा माल्नेवे देशा हना, गे आंम कली प्रोनो। मारदे हना गे इ नेक्था डा मुर आ गुइमी बाक्नेवे। मेको कली नमो सिमो पा आ डोंडती

बाप्पो। 4 इप्शा मबाक्को। काइ निन्द्रा मपावो। 5 किश्श सिखारी आ गुइ रे ब्रोंइशो नु चिक्ब ग्याइक्ब आ गुइ रे बेरशो खोदेशो पा, गे यो आंम कली प्रोनो।

6 गे अल्से, रकमिक्च आन कली कोवडो। आन पशो कोवडो। मिनु जोक्ब तुइक्ब दुमो। हितोपदेस १०:४; हितोपदेस २०:४ 7 मेको आन कली अरेब, सासन पाइब नु हुकुम पाइब मबाक्तेक्म हना यो, 8 मेकोपुकीमी जचा थोव्रक खेक्चा कली खुप्ची ना खुप्नीम। 9 गे अल्से, गेना सम्म इप्शा बाक्नेवे? गेना निन्द्रा रे सेंसीशा बोक्नेवे? 10 याम का डा निन्द्रा पतीके, याम का डा मुकु जिशा बाक्तीके नु याम का कुचुमी गुइ वोइश्शा, नाइश्शा बाक्तीकेमी, हितोपदेस २४:३३-३४ 11 प्रुडग दुम्तीके खुइ खोदेशो पा जाक्ब। इन मार मार माल्तीके या कुरशो लडाइ पाइब खोदेशो पा जाक्ब।

12 हिंचा डा मरिम्शो पाइब नु शोर गाक्शो मुर हेंथे लोव्र पा गाक्नीम। हितोपदेस १०:३१-३२ 13 मिक्च रिक्शा, खोइलीमी चाल पा, ब्रेचोमी यो चाल पाइनीम। हितोपदेस १०:१० 14 मेको आन दूली थुंमी मरिम्शो मिम्नीम। मेकोपुकीमी गेना हना यो मुर आन कली जिपाइक्नीम। 15 मोपतीके मेको आन मतुइक्चा डा पा मेको आन तार श्येत जाक्ब। मिनु मारेइ पचा मतथु, खतम दुम्नीम।

16 परमप्रभु यावेमी ६ ओटा थोव्रक काइ मदाक्ब। ७ ओटा थोव्रक पशो तशा ग्रांग्रा दीब। 17 मेको मार बाक्नीम देंशा हना, ठेयब लेत्तीके, जोल पतीके, दोस मताइब मुर आन कली हुश खाक्श पोक्तीके, 18 मरिम्शो पचा कली मिम्ब थुं, मरिम्शो पचा चुइक्तीके, 19 जोल पाइब सांकछी बाक्तीके नु वोबु आन दातेम जिचा पोक्ब काइ मदाक्ब। मेको ७ ओटा थोव्रक बाक्नीम।

वोंइश मुर आन कली अर्ती

20 आं तौ, इ आफ आ अरेशो टिवो, इम्मा आ शेंशो लोव्र मप्रोनो। हितोपदेस १:८ 21 मेको गेना हना यो इ थुंम वोतो। मेको कली माला खोदेशो पा रेल्लो। 22 मिनु गे ते लते हना यो, मेकोमी इ कली लां कोंइनीस। गे इप्ते हना, मेकोमी इ कली खाल पाइनीस। गे सेंसेनु, गे नु लोव्र पाइनीस। भजन संग्रह ११९:१७२ 23 मारदे हना मेको अरेशो बत्ती नु शेंशो छेडछेड बाक्नीस। ठीक पचा कली हुइक्तीके ब्रोंइचा गेब लां बाक्ब। 24 मेकोमी हेंथे गाक्ब मीश मुर रे डोन बाक्पाइक्नीम। मिनु हेंथे गाक्ब ग्युंवे पशो मीश मुर आन ग्रेन्देल लोव्र रे डोन बाक्पाइक्नीम। हितोपदेस २:१६ 25 मेको आ दारशो कुल तशा इ थुंमी मवलो। मेको आ कोव्रशोमी इ कली हेंथे मगाक्पदल। 26 तेल्लेम आ गाल्च शोब्ले का डा ला बाक्ब। तन्न ग्युंवे पशो मीश मुर नु बाक्चा वोंइश मुर आ ब्रोंइतीक नेल्ल रोइक्ब। 27 मुरुमी आ कुचुमी मी वोइक्तु हना, आ वा मदुप्बा डा? 28 मुर ब्रशो कोइला तार गाक्त हना, मेको आ खोइली मचोइबा डा? 29 अरु मुर आ मीश नु इप्ब मुर मोदेशो दुम्शा, सु मेको मीश मुर कली थीबा, मेको सजाइ मतथु, मब्रोंइब। हितोपदेस ५:८-१४ 30 खुइमी शोव्रलु बेक्शा, जचा थोव्रक खुइ पाप्तु हना, मेको मुने मदोक्ब। 31 तन्न मेको ग्याइक्चा पुंइसाक्ब हना, आ खुइ पशो ७ खेयप तेम्शा थाप्चा माल्ब। मेकोमी आ खिं आ शोंप नेल्ल थाप्चा माल्ब। प्रस्थान २१:३७ 32 मोपा मुर आन मीश नु इप्ब, निप्स मपाइश्शो मूर्ख बाक्ब। मोदेशो पाइबमी आंम कली खतम सेल्ब। 33 मेको तुप्चा नु मुने तोक्चा पुंइसीब। मेको आ मुने गेनायो मक्याम्सीब। 34 मिनु मेको मीश मुर आ वोंइश शुश गाइक्ब। मिनु मेकोमी क्येक्क लेत्ची नाक्ती मेको कली मारेइ शिशी मपाइब। 35 मेको कली गिश क्येट गेप्तीवी हना यो, मेकोमी मताक्ब।

7

हेंथे पाइब मीश मुर

1 आं तौ, आं लोव्र टिवो। आं शेंशो लोव्र इ थुंम वोतो। 2 गे आं अरेशो मप्रेंताक्वी हना, गे ब्रोंइनेवे। आं शेंशो इ मिक्च खोदेशो पा होस पा वोतो। 3 मेको कली इ ब्रेचोम फ्रेंदो। इ थुंमी ब्रेक्शा वोतो। 4 गे तुइक्तीक कली “आं समी ननी” देनो। मिनु जोक्तीक तुइक्तीके कली “आं नेल्ल क्येडा गारब वारच बाक्नीनी” दे लोव्र पावो। 5 मो पाप्तीवी हना, मेकोमी इ कली हेंथे पाइब ग्युंवे पशो मीश मुर आ ग्रेन्देल लोव्र रे प्रोंइब।

6 मिनु गोमी आं खिं डा झेल रे कोंवता। गोमी लां गे कोंवता। 7 मिनु गो मार ताता देंशा हना, मारेइ मजोक्ब नु ठिटा आन दातेमी निप्स मपाइश्शो ठिटा का कली ताता। 8 मेको वोंइश आल लां मेर गाक्शो ताता। मेको हेंथे गाक्ब मीश मुर आ खिं गे लना लन पशो ताता। 9 गो मेको कली नां रिचावानु, छिडछिड दुम्ची ना ताता। 10 मेको मीश मुर मेको कली गुम्चा कली गूत। तेल्लेम खोदेशो पा फेक्शा “मेको कली हेंथे खोइक्पाइक्नुड” दे मिम्शो बाक्त। 11 मेको मीश मुर मारेइ महिंब नु मुने मपाइब बाक्ब। मेको गेनायो आ खिंम बाक्चा मदाक्ब। 12 मिनु मेको लां एर ओंथ, शुश

मुर बाक्तीके मेरे हिरशा, कुना मेर रिम्ना रिम्न बाक्ब। 13 मिनु मेको मीश मुरुमी मेको कली ग्याइशशा, पुक्पु पा मुने मपथु 14 “गो मुलाक्ती दुशा बाक्चा आ पर्बम चढेतीके चढेचा माल्शो नड। मेको आं कसम मुलाक्ती खाप्ता। लेवी ७:१५-१७ 15 मोपतीके गो इ कली गुमथ जाक्ती। गो इ कली शुश माल्शा थित्ता। 16 गो आं ब्राख्येमी बरखी ब्राता। मेको इजीप्त रागी डा श्येलेम प्रोव्रशो बाक्ब। 17 गो आं ब्राख्येमी मूरे, एलोव्र नु सिन्कौलीमी ब्रोव्रशो रिना पपाइक्ता। 18 पिवो। गो निक्शी इप्स। नेल्ल नाक्दो काथा ग्येरसीशा इप्स। 19 मारदे हना आं वोंइश खिंमी मबाक्ब। मेको डोन लत। 20 मेको शुश क्येट कुरसीशा लत। मोपतीके पूर्ने सम्म मजाक्ब” देत।

21 मोपा शुश लेम्शा, मेकोमी वोंइश आल कली लाइक्तु। आ मिलो शिलो लोव्रमी मेको कली हेंथे खोइक्पाइक्तु। 22 मिनु मेको वोंइश आल मेको मीश मुर आ नोले रीब पा खोइक्तु। क्योरचा कली खुल्शो ब्यफ खोदेशो पा गाक्त। ब्वारदमी रेत्चा कली प्रेक्शो किश्श खोदेशो पा मेको आ नोले लत। 23 मिनु ब्राम ख्रशा, बेक्चा सम्म रिम्ब। चिक्ब ब्वारदम रेत्चा चिक्शो खोदेशो पा “बेक्नुड” दे मतुइक्ब।

24 मुल आं तौपुकी, आं लोव्र नेनीन। इन नोफा दाइशशा, आं लोव्र नेनीन। 25 इन थुं मोदेशो मीश मुर आ लांम लचा मगेने। मेको आ हेंथे लां मलने। 26 मेकोमी शुश मुर आन कली खतम सेल्लु। आ साइशशो शुश बाक्नीम। 27 मेको आ खिं बेक्शो मुर आन बाक्तीक लतीक लां खोदेशो बाक्ब। मेको लां बेक्तीक कोठा जाक्दीप्ब।

8

तुइक्तीके ठेयब बाक्ब

1 तुइक्तीकेमी लोव्र मपाइबा डा? रुप्तीकेमी ठेयब सेंदा पा मब्रेप्बा डा? हितोपदेस १:२०-२३ 2 मेको लां आ नेक्था डा डांडा तारी नु ब्रालाम दोक राप्ब। 3 ठेयब लाप्चो आ नेक्था सहर आ डोंइती, मेको आ ओव्रतीकेमी ठेयब सेंदामी ग्रीब। 4 मार देशा ग्रीब देशा हना, मुरपुकी, गो इन कली लोव्र पाइनुड। मुर नेल्ल आन कली लोव्र पाइनुड। 5 मारेइ मजोक्बपुकी होस पतीके शेंसीन। निप्स मपाइशशो बाक्तीनी हना, निप्स पाइशशो दुमीन। 6 नेनीन, गो रिम्शो लोव्र पाइनुड। आं लोव्र ठीक बाक्ब। 7 गो थमा लोव्र ला पाइनुड। परमप्रभु यावे आ अरेशो मटितीके तशा, गो ग्रांग्रा दीनुड। 8 गो ठीक लोव्र ला पाइनुड। दूली नु हेंथे लोव्र मपाइनुड। 9 मिनु मेको आं लोव्र रुप्ब आन कली मखुइशशो लोव्र बाक्ब। जोक्ब आन कली ठीक लोव्र बाक्ब। 10 चांदी आ पा डा आं अर्ती खुप्तीन। क्येख सुन आ पा डा जोक्ब थुं मालीन। हितोपदेस ३:१४ 11 मारदे हना हीरा क्येडा तुइक्तीके रिम्शो बाक्ब। इ माल्शो मारेइ मारेइ नेल्ल मेको क्येडा आइक्च बाक्नीम। 12 गो तुइक्तीके नड। गो होस पतीक नु बाक्नुड। गो जोक्ब नु मिम्ब दुम्नुड। 13 परमप्रभु यावे कली मान पा हिंचा, मरिम्शो पचा कली काइ मदाक्चा बाक्ब। फुरती कोइचा, ठेयब लेशशो दुम्चा, मरिम्शो थुं डा गेय पचा नु दूली लोव्र पचा काइ मदाक्नुड। 14 अर्ती नु ठीक पा तुइक्तीक गो नु बाक्नीस। गो नु जोक्तीक तुइक्तीक नु बोल यो बाक्नीम। 15 गो रे पा पिपपुकीमी सासन पाइनीम। हुकुम पाइबपुकीमी ठीक पा अरेतीक लोव्र पाइनीम। हितोपदेस १६:१२ 16 आं पतीकेमी रागी रागी डा हुकुम पाइबमी हुकुम पाइनीम। 17 सुमी आ कली दाक्नीमी, गो यो मेको आन कली दाक्नुड। सुम आं कली शुश माल्नीमी, मेकोमी आं कली थित्नीम। 18 शोंप नु मान गो नु बाक्नीस। मिनु मनुप्ब शोंप नु सोशा बोशा ग्येत्थ लतीक गो नु बाक्नीस। 19 सुन नु क्येख सुन क्येडा आं गेशो फल रिम्शो बाक्ब। आं रे पा गूशो मारेइ मारेइ चांदी क्येडा रिम्शो बाक्नीम। 20 गो ठीक पतीक लां गाक्नुड। ठीक निसाफ पाइनुड। 21 आं कली दाक्ब आन कली गो शुश शोंप गेनुड। गो मेको आन मार मार वोइक्तीक नेल्ल प्रिंशा गेनुड।

22 मिनु मेकोमी “परमप्रभु यावेमी नेल्ल सेल्चा क्येडा डोंइती आं कली सेल्लती। अय्युब २८:२३-२८ 23 नेल्ल क्येडा डोंइती डा गो नड। रागी क्येडा डोंइती यो गो नड। 24 समुन्द्र दुम्चा क्येडा डोंइती गो नड। ब्वाक्कु बुक्चा क्येडा डोंइती गो बाक्ती। 25 डांडापुकी दुम्चा क्येडा डोंइती नु पहाड दुम्चा क्येडा डोंइती गो नड। 26 मेकोमी रू नु रागी सेल्चा क्येडा डोंइती गो नड। खप सेल्चा क्येडा डोंइती गो नड। 27 मेकोमी सरीड प्राक्शा वोइक्ची ना गो नड। 28 गोस्स कली सरीडमी वोइक्ची ना नु खप आगा डा ब्वाक्कु बुक्तीके कली ठीक पा वोइक्चा ना, 29 ठेयब समुन्द्र आ शुंइच वोइक्ची ना नु रागी आ जग वोइक्ची ना गो नड। भजन संग्रह १०४:९ 30 मेना गो परमप्रभु यावे आ नेक्था जोक्ब तुइक्ब गेय पाइब खोदेशो पा बाक्शो नड। मेकोमी नाक्त किंत किंत आं कली तशा ग्येरसाक्ब। गो यो मेको नु ग्येरसीशा बाक्ती। 31 मिनु आ मुरपुकीमी ब्रीशो रागी तशा ग्येरसाक्ची। गो मुर आन कली तशा ग्येरसाक्ची।

32 आं तौपुकी, मुल आं लोव्र नेनीन। आं कोइशो लां गाक्बपुकी ग्येरसीशो मुर दुम्नीम। 33 आं अर्ती नेशा जोक्ब तुइक्ब मुर दुमीन। मेको कली मप्रोनीन। 34 सुम आं लोव्र नेबा, मेको ग्येरसीशो मुर दुम्ब। मेको मुरुम नाक्त किंत किंत

आं लाप्यो कोवशा आं कली रिम्ब। 35 सुम आं कली थिप्बा, मेको ब्रोंडचा ताइब। मिनु परमप्रभु यावेमी मेको कली दाक्ब। 36 आं कली मथिप्बपुकी चहिं आंम कली खतम सेल्नीम। आं कली काइ मदाक्ब नेल्ले बेक्चा दाक्नीम” देंत।

9

तुइक्तीके नु मारेइ मतुइक्तीके

1 तुइक्तीकेमी आंम खिं सेल्शा, ७ ओटा थाम खुक्तु। 2 मेकोमी भोज सेल्लु अडगुर शांबु ब्रोवपाइश्शा, राडी ब्रशा, जचा कली ठीक पशो बाक्त। 3 आ वाइलीम आन कली “सहर डा डांडा रे मुर आन कली ब्रेत्तीन” दे सोइक्ताक्ब। 4 “मारेइ मजोक्ब नेल्ल एक जाक्कीन” देंत। निप्स मपाइश्शा आन कली 5 “जाक्कीन, आं शोब्ले जने। आं ब्रोव पा सेल्शो शांबु यो तूडीन” देंत। 6 क्येख मुर आन लां गाक्चा प्रोनीन। मिनु जोक्ब तुइक्ब आन लां गाक्शा, ब्रोंडशा बाक्कीन।

7 सुमी शुक्शी पाइब आन कली “रिम्शो दुमो” देंबा, मेको दिप्चा पुंडसीब। सुमी परमप्रभु यावे आ अरेशो मटीब आन कली हुइक्बा, मेको मरिम्शो पाइक्चा पुंडसीब। 8 सुमी शुक्शी पाइब आन कली हुइक्बा, मेको काइ मदाक्चा पुंडसीब। सुमी चहिं जोक्ब तुइक्ब आन कली हुइक्बा, मेको दाक्चा पुंडसीब। 9 जोक्ब तुइक्ब आन कली अर्ती गेशोनु, डोंडती क्येडा जोक्ब तुइक्ब दुम्नीम। ठीक पाइब आन कली शेंशोनु, मेको क्येडा ठीक पचा शेंसीनीम।

10 परमप्रभु यावे कली मान पा हिंचा जोक्तीक तुइक्तीक गोतीक बाक्ब। मिनु सुमी मेको का ला परमप्रभु यावे कली तुइक्बा, मेको रुप्व दुम्ब। हितोपदेश १:७ 11 मारदे हना आं पतीकेमी गे शुश नाक्ती ब्रोंडनेवे। इ ब्रोंडतीक शुश बर्स तेम्चा पुंडसीनेवे। 12 गे जोक्ब तुइक्ब दुम्ते हना, मेको इ कलीन दुम्ब। गे शुक्शी पाइब दुम्ते हना, मेको रे पिशो दोस नेल्ल इ केन बाक्ब।

13 मूर्ख मीश मुर शुश रेयके पाइब। मेको मारेइ मजोक्ब नु मारेइ मतुइक्ब बाक्ब। 14 मेको आ खिं डा लाप्योमी निप्ब। सहर आ इर डा नित्तीकेमी निप्ब। 15 सु सु आन गेय पा मेको लां गाक्नीमी, मेकोमी मेको आन कली ब्रेप्ब। 16 मिनु “सु सु मारेइ मजोक्ब बाक्नी, एक जाक्कीन” देंब। मिनु मेकोमी निप्स मपाइश्शा आन कली 17 “खुइ पशो ब्वाक्कु ब्रोवशा बाक्ब। मिनु खुइश्शा जशो जचा थोव्रक यो थाम्पा ब्रोवब” देंब। हितोपदेश २०:१७ 18 मिनु मेको लां गाक्ब मुरपुकीमी “मेको आ खिं बेक्शो मुर आन बाक्तीके बाक्ब” दे मतुइक्नीम। मिनु मेको आ पौनामी आन कली बेक्शो मुर आन बाक्तीकेमी ब्रेश्शा बाक्नीम, दे मतुइक्नीम।

10

सोलोमन आ ब्रेक्शो लोव

1 जोक्ब तुइक्ब तौमी आ आफ कली ग्येरपाइक्ब। तन्न मूर्ख तौमी चहिं आ ममा कली सुर्ता पपाइक्ब। 2 परमप्रभु यावे कली मटिथु, चेम्शो शोंप शोर गाक्ब। सु ठीक पाइब बाक्मे मेको बेक्तीक रे ब्रोंडब। 3 परमप्रभु यावेमी ठीक पाइब मुर आन कली शोव्रलु बेक्पाइश्शा मवोइक्ब। तन्न आ अरेशो मटीब आन कली आन जत दाक्शो मगेब। भजन संग्रह ३७:१९, २५ 4 सु अल्से बाक्मे, मेको प्रुडग दुम्ब। शुश गेय पाइब मुर चहिं शोंप पाइश्शा दुम्ब। हितोपदेश ६:६ 5 सु अन्न खुप्ची ना खुप्बा, मेको होस पाइब तौ का बाक्ब। अन्न रुप्ची ना इप्ब तौमी आ आफ कली मुने तोक्ब। 6 ठीक पाइब मुर आसीक राइनीम। तन्न परमप्रभु यावे आ अरेशो मटीब आन कली आन मरिम्शो पशोमी सुम्ब। 7 ठीक पाइब कली मिम्शा आसीक गेब। परमप्रभु यावे आ अरेशो मटीब आन नें चहिं जाम्शा लाइब। अय्युब १८:१७; भजन संग्रह ९:६ 8 जोक्ब तुइक्ब थुं पाइश्शा मुरुमी शेंशो लोव टीब। तन्न हेंथे लोव पाइब मूर्ख खतम दुम्ब। 9 गेना हना यो रिम्शो पाइब मुर कली सुइमी मारेइ मपाइनीम। सु चहिं दूली लां गाक्बा, मेको आ पर्वम नेल्लेमी “मरिम्शो पाइब” दे तुइक्नीम। 10 मिक्च रिक्बपुकीमी मुर आन कली श्येत गेनीम। तन्न सुमी महिंथु हुइक्बा मेकोमी थुं नाइश्शा बाक्चा गेब। हितोपदेश ६:१२-१३ 11 ठीक पाइब मुर आन लोव पतीकेमी ब्रोंडनीम। तन्न परमप्रभु यावे आ अरेशो मटीब आंम आन लोव पतीकेमी खतम दुम्नीम। 12 मुर आन कली काइ मदाक्शोनु, जिचा बोक्ब। मुर आन कली दाक्शोनु चहिं, आन मरिम्शो पशो नेल्ल सुम्सीब। १३ 13 मिम्ब मुर आन लोव रुप्चा डा बाक्ब। तन्न ममिम्ब मुरपुकी तुप्चा पुंडसीनीम। 14 जोक्ब तुइक्ब मुर नु जोक्तीक बाक्ब। तन्न हेंथे लोव पाइब मूर्खमी खतम दुम्तीक चाक्ब। 15 शोंप पाइश्शा मुर आन शोंप मेको आन बोल्यो दरवार खोदेंशो बाक्ब। प्रुडग मुर आन श्येत दुम्तीकेम मेको आन कली

खतम सेल्ब। हितोपदेश १८:११ 16 ठीक पाइब मुर आन गेय पतीकेमी ब्रोंडनीम। परमप्रभु यावे आ अरेशो मटीब आन चेम्शो नेल्ल मरिम्शो गेय पा नुष्शा लाइब। 17 सु सुमी अर्ती टीनीमी, मेको ब्रोंडचा गेब लां गावनीम। हुइश्शो मनेंब चहिं हेंथे लां गावनीम। 18 सुमी मुर काइ मदाक्बा, तन्न “दाक्नुड” देंबा, मेको मुर जोल्फे बाक्ब। सुम मुर आन पर्बम जोल फ्राइबा, मेको मूर्ख बाक्ब। 19 शुश लोत्र पाइब मुरपुकीमी शुश गल्ती पाइनीम। होस पाइब मुर शुश मब्वाक्नीम। 20 ठीक पाइब मुर आन लोत्र रिम्शो चांदी खोदेशो बाक्ब। परमप्रभु यावे आ अरेशो मटीब आन थुं शोर गाक्शो बाक्ब। 21 ठीक पाइब मुर आन लोत्रमी शुश मुर आन कली रिम्शो दुम्ब। तन्न मूर्ख आन निप्स मपाइक्तीके बेक्शा लाइनीम। 22 परमप्रभु यावे आ आसीकम मुर आन कली शोप पाइश्शो सेल्ब। मेकोमी मारेइ श्येत मतेम्ब। भजन संग्रह १२७:२ 23 मूर्ख मरिम्शो पचा कली ग्येरसीनीम। रूप्ब मुर जोक्ब तुइक्ब गेय तशा ग्येरसीनीम। 24 परमप्रभु यावे आ अरेशो मटीब मुर आन हिंशोम श्येत जाइनीम। तन्न ठीक पाइब मुर आन दाक्शो ताइनीम। हितोपदेश १:२७; भजन संग्रह ३७:४ 25 श्येत फश गिवार खोदेशो पा जाक्मेनु परमप्रभु यावे आ अरेशो मटीबपुकी जाम्शा लाइनीम। तन्न ठीक पाइब मुर गेना हना यो ब्रोंडशा बाक्नीम। हितोपदेश १२:७ 26 दोपा ग्युरशोमी खुइ ग्रिम्बा नु कुनमी मिक्च दुक्बा, मोपा अल्सी पाइब आन होत्रप आन कली दुम्नीम। 27 परमप्रभु यावे कली मान पा हिंतीकेमी ब्रोंडतीक नाक्त तेम्सीब। तन्न परमप्रभु यावे आ अरेशो मटीब आन ब्रोंडतीक नाक्ती खोंडसीब। 28 ठीक पाइब आन आस पतीके तशा ग्येरसीनीम। तन्न परमप्रभु यावे आ अरेशो मटीब आन आस पतीके जाम्शा लाइब। भजन संग्रह ९:१९; अय्युब ८:१३ 29 परमप्रभु यावे आ लां रिम्शो थुं पाइश्शो मुर आन कली खुइश्शा ब्रोंडशा बाक्तीक बाक्ब। तन्न मरिम्शो पाइब आन कली मेको लां खतम दुम्तीक बाक्ब। 30 ठीक पाइब मुर गेनायो ग्येत्थ लुक्च मदुम्नीम। परमप्रभु यावे आ अरेशो मटीबपुकी चहिं रागीमी मलीनीम। हितोपदेश २:२२ 31 ठीक पाइब मुरुमी तुइक्तीक लोत्र पाइब। तन्न दूली लोत्र पाइब मुर आ लें फेल्चा पुंडसीब। भजन संग्रह ३७:३० 32 ठीक पाइब मुरुमी रिम्शो लोत्र पस जोक्ब। तन्न परमप्रभु यावे आ अरेशो मटीबपुकी दूली ला ब्वाक्स जोक्नीम।

11

गेब मुरुमी तेम्शा गेचा पुंडसीब

1 परमप्रभु यावेमी जोल पा नाक्तीक तशा, ग्रांग्रा दीब। तन्न ठीक नाक्तीक तशा शुश ग्येरसीब। लेवी १९:३५-३६ 2 ठेयब लेशो मुर मदाक्चा पुंडसीब। तन्न तुइक्तीक ब्रेम्शो मुर नु बाक्ब। हितोपदेश १६:१८ 3 रिम्शो थुं पाइश्शो मुर आन कली गेना हना यो आन रिम्शो पतीकेमी लां कोंडब। तन्न थमा सुइक्चा मपुंडसीब मुर आन कली आन मरिम्शो पतीकेमी खतम सेल्ब। 4 गाइश्शो नाक्ती शुश शोप शोर गाक्शो दुम्ब। तन्न ठीक पतीकेमी बेक्तीक रे प्रोंडब। लूका १२:२०; हितोपदेश १०:२ 5 दोस मताइब आन ठीक पतीकेमी मेको आन लां थेल्ब। तन्न परमप्रभु यावे आ अरेशो मटीब आन मटितीकेमी खतम दुम्नीम। 6 रिम्शो थुं पाइश्शो मुर आन ठीक पतीकेम ब्रोंडचा ताइनीम। तन्न थमा सुइक्चा मपुंडसीब मुर आन मरिम्शो पतीकेमी ग्याइक्चा पुंडसीनीम। 7 परमप्रभु यावे आ अरेशो मटीब मुर बेक्मानु, आन आस यो जाम्शा लाइब। मेको आन मिम्शो नेल्ल मदुम्ब। हितोपदेश १०:२८ 8 ठीक पाइब मुर हिंचा डा श्येत रे प्रोंडचा पुंडसीनीम। तन्न परमप्रभु यावे आ अरेशो मटीबपुकी मेको श्येतमी हुम्सीनीम। 9 मरिम्शो मुर आन लोत्रमी आन नेक्था डा मुर आन कली खतम सेल्नीम। तन्न ठीक पाइब मुर मेको आन जोक्तीकेमी प्रोंडचा पुंडसीनीम। 10 ठीक पाइब मुर आन कली रिम्शो दुम्त हना, सहर डा मुर नेल्ल ग्येरसीनीम। परमप्रभु यावे आ अरेशो मटीब खतम दुम्मानु, मुर नेल्ल थाम्पा ग्येरसीनीम। 11 रिम्शो थुं पाइश्शो मुर आसीक तामेनु, सहर कली रिम्शो दुम्ब। तन्न परमप्रभु यावे आ अरेशो मटीब आन लोत्रमी सहर कली मरिम्शो दुम्ब। हितोपदेश २८:१२ 12 सुमी अरु मुर आन कली आइक्च सेल्बा, मेको निप्स मपाइश्शो बाक्ब। तन्न निप्स पाइश्शो मुर सिक्सी पा बाक्ब। भजन संग्रह १५:३ 13 लोत्र क्याल्बमी खुइश्शो लोत्र यो फ्राइनीम। तन्न थमा सुइक्चा पुंडसीब मुरुमी मोदेशो लोत्र खाप्शा वोइक्नीम। 14 लां कोंडब मबाक्त हना, रागी खतम दुम्ब। तन्न अर्ती गेब शुश बाक्तेक्म हना, मेको लीब। 15 अरु मुर आन जमानी बाक्शोनु, मरिम्शो दुम्ब। तन्न जमानी मबाक्शो रिम्शो दुम्ब। हितोपदेश ६:१-२ 16 रिम्शो थुं पाइश्शो मीश मुर कली मान पाइनीम। तन्न मरिम्शो पाइब मीश मुनेमी सुम्सीशो बाक्ब। गेय मपाइब मुर प्रुडग दुम्ब। तन्न आंट पा गेय पाइबमी क्येट चेम्ब। 17 रिम्शो पाइब मुरपुकीमी आंम कली रिम्शो पाइनीम। तन्न मरिम्शो पाइबपुकी श्येत गेंसीनीम। 18 परमप्रभु यावे आ अरेशो मटीब मुरुमी क्येट चेम्ब, तन्न मलीब। तन्न ठीक पाइब मुरुमी इनाम ताइनीम। 19 सु गेना हना यो ठीक पाइब

बाकबा, मेको ब्रोंडब। तन्न सु मरिम्शो पचा कली चुइक्बा, मेको बेक्ब। हितोपदेश १९:२३ 20 मरिम्शो थुं परमप्रभु यावे कली ग्रांग्रा बाक्ब। तन्न दोस मताइब रिम्शो थुं पाइश्शो मुर आन लां गाक्शो तशा ग्येरसीब। 21 मरिम्शो पाइब मुर सजाइ मतथु मब्रोंडनीम। मेको थमा बाक्ब। तन्न ठीक पाइब आन चच युइ ब्रोंडचा ताइनीम। 22 निप्स मपाइश्शो दारशो मीश मुर सुन के मुन्द्री पांइशो पोव खोदेशो बाक्ब। हितोपदेश ३१:३० 23 ठीक पाइब मुर आन दाक्शो थमा पा ताइनीम। परमप्रभु यावे आ अरेशो मटीबम गाइक्पाइक्नीम। 24 का निक्शी मुरुम शुश गेनीम हना यो, आन शोंप मेको क्येडा बारब। का निक्शी चहिं आन गेचा माल्शो मगेथु, पुडग दुम्नीम। मत्ती २५:२९; २कोरिन्थी ९:६ 25 हाइश्शो मुरुमी शुश ताइब। सुम अरु आन कली वारच पाइक्बा, मेकोमी आंमा यो वारच पाइक्चा पुंइसीब। 26 अरु आन कली अन्न मगेथु खेक्शा वोइक्ब मुर सराप पाइक्चा पुंइसीब। तन्न अन्न लेयब मुर आसीक ताइब। 27 सुम रिम्शो पतीके माल्शा पाइबा, मेकोमी शिशी माल्ब। सुम मरिम्शो पतीके माल्बा, मेको मरिम्शो पाइक्चा पुंइसीब। 28 सुमी आ शोंप कली थमा सुइक्बा, मेको रीब पा बेक्ब। ठीक मुर चहिं गिग घांस खोदेशो पा बारशा लाइब। भजन संग्रह ५२:९-१० 29 आंम खिं डा मुर आन कली श्येत चाक्बमी मारेइ मथेरब। मिनु मूर्खपुकी जोक्ब तुइक्ब आन वाइल दुम्नीम। 30 ठीक पाइब मुर आन पतीके ब्रोंडचा गेब रवा खोदेशो बाक्ब। तन्न हुश ख्वाक्श पोक्बमी मुर आन कली साइक्ब। हितोपदेश ३:१८ 31 ठीक पाइब मुरपुकीम रागीम बाक्मानु, आन ठीक पशो डा इनाम ताइनीम। परमप्रभु यावे आ अरेशो मटीब नु मरिम्शो पाइबपुकीमी यो आन मरिम्शो पशो डा इनाम ताइनीम। १ पत्रुस ४:१७-१८

12

परमप्रभु आ अरेशो टिचा माल्शो

1 सु सुमी शेंसीतीके दाक्नीमी, मेकोमी जोक्तीक दाक्नीम। सुमी हुइक्तीक काइ मदाक्नीमी, मेको निप्स मपाइश्शो बाक्नीम। हितोपदेश १३:१; हितोपदेश १३:१८ 2 परमप्रभु यावेमी रिम्शो पाइब मुर आन कली दाक्ब। दूली मिम्शा हेंथे पाइब आन कली चहिं दोस गेब। 3 परमप्रभु यावे आ अरेशो मटीब रिम्शो मबाक्नीम। तन्न ठीक पाइब बोल्यो शाक्श पाइश्शो रवा खोदेशो बाक्नीम। 4 रिम्शो मीश आ वोंडश आ सिरपेच खोदेशो बाक्ब। मुने तोक्ब मीश चहिं आ वोंडश कली राक्शो रुश खोदेशो बाक्ब। हितोपदेश ३१:१०-३१ 5 ठीक पाइब मुर आन मिम्शो ठीक बाक्ब। तन्न परमप्रभु यावे आ अरेशो मटीब आन अर्ती चहिं दूली बाक्ब। 6 परमप्रभु यावे आ अरेशो मटीब आन लोव्र मुर साइक्तीक बाक्ब। तन्न रिम्शो थुं पाइश्शो मुर आन लोव्रमी मेको आन कली प्रोंडब। 7 परमप्रभु यावे आ अरेशो मटीबपुकी बेक्शा जाम्शा लाइनीम। ठीक पाइब नु मेको आन खिं डा मुर नोले सम्म लीनीम। हितोपदेश १०:२५ 8 निप्स पाइश्शो मुरपुकी मान ताइनीम। दूली थुं पाइश्शो मुर आन कली चहिं महिक्नीम। 9 “ठेयब मुर नड” देखु पा जचा मताइब मुर दुम्चा क्येडा महिक्सीशो दुम्शा, वाइल का बाक्शो रिम्शो बाक्ब। 10 ठीक पाइब मुरपुकीमी आंम बी ब्यफ, क्यारश भेडा आन कली रिम्शो कोव्रनीम। तन्न परमप्रभु यावे आ अरेशो मटीबपुकीमी शिशी मपाइनीम। प्रस्थान २३:५ 11 सु सुमी आंम रूम शोक्नीमी, मेकोमी जचा शुश ताइनीम। तन्न सु सुमी शोर गाक्शो लोव्र पा गाक्नीमी, मेको निप्स मपाइश्शो बाक्नीम। हितोपदेश २८:१९ 12 परमप्रभु यावे आ अरेशो मटीबपुकी रोइश्शो थोव्रकीम आस पाइनीम। तन्न ठीक पतीके आ शाक्शम फल सिप्पाइक्ब। 13 मरिम्शो पाइब मुर आंम मरिम्शो लोव्रमी ग्याइक्चा पुंइसीनीम। तन्न ठीक पाइब मुर श्येत रे ब्रोंडचा ताइनीम। 14 मुरपुकी आंम लोव्रम पतीके मान ताइनीम। मिनु गेय पाइब मुरपुकीमी आन गेय डा इनाम ताइनीमी। हितोपदेश १८:२० 15 मूर्खपुकी आंम लां नेल्ले “ठीक बाक्ब” दे मिम्नीम। तन्न जोक्ब तुइक्बमी अर्ती नेंनीम। 16 मूर्खपुकीमी आन गाइक्चा रीब पा कोइनीम। तन्न होस पाइश्शो मुर कली मरिम्शो लोव्र पाम्तेक्म हना यो, सिक्सी पा बाक्ब। 17 सुमी थमा लोव्र पाइबा, मेकोमी ठीक पतीके कोइब। तन्न जोल पाइब सांकछीमी गेना हना यो दूली लोव्र पाइब। 18 मुर आन ममिम्थु पशो लोव्रमी तरवार खोदेशो पा थोक्ब। तन्न जोक्ब तुइक्ब मुर आन लोव्रमी सापाइक्ब। हितोपदेश १३:३ 19 थमा लोव्र पाइब मुर गेना हना यो लीनीम। तन्न जोल पाइब मुर याम का ला लीनीम। 20 मरिम्शो मिम्ब आन थुंमी जोल ला बाक्ब। तन्न थुं नाइक्तीक अर्ती गेब ग्येरशा बाक्नीम। 21 ठीक पाइब मुर आन कली श्येत मदुम्ब। तन्न परमप्रभु यावे आ अरेशो मटीब आन कली श्येतम गिल्शो बाक्नीम। 22 परमप्रभु यावेम जोल पाइब आन कली तशा ग्रांग्रा दीब। जोल मपथु, आ अरेशो टीब आन कली तशा ग्येरसीब। 23 निप्स पाइश्शो मुरुमी आ तुइश्शो मकोइब। तन्न मूर्खमी मूर्ख लोव्र पाइब। 24 शुश गेय पाइब मुर हुकुम पाइब दुम्नीम। तन्न अल्सी पाइब चहिं वाइल दुम्नीम। 25 सुर्ता पतीकेम मुर आन थुं लुक्च लपाइक्ब। तन्न रिम्शो लोव्रमी मेको आन कली ग्येरपाइक्ब।

हितोपदेश १६:२४ 26 ठीक पाइबपुकीमी आन वारच आन कली रिम्शो अर्ती गेनीम। तन्न परमप्रभु यावे आ अरेशो मटीबपुकीमी दूली लां कोइनीम। 27 अल्से सिखारीम सिखार मताइनीम। तन्न शुश गेय पतीकेमी मुर आन कली शोंप पाइशो सेल्ब। 28 ठीक पतीक लांमी ब्रोंइतीक बाक्ब। मेको लां गाक्बपुकी मबेक्नीम।

13

ब्रोंइचा गेब मार बाक्बा?

1 जोक्ब तुइक्ब तौमी आ आफ आ शेंशो दाक्ब। तन्न शुक्शी पाइबमी हुइशो मनेंब। हितोपदेश १:८; १२:३ 2 आन लोत्रम पतीके मुरपुकीम मारेइ मारेइ रिम्शो ताइनीम। तन्न थमा मसुइक्चा डा मुरपुकी दूली पचा ला दाक्नीम। 3 मिम्शा लोत्र पाइब मुरुम आंम कली ब्रोंइपाइक्नीम। तन्न ममिम्थु ब्वाक्बपुकीमी आंम कली खतम सेल्नीम। हितोपदेश १२:१८; हितोपदेश २१:२३ 4 अल्सेपुकी वालनीमी। मिनु मारेइ मताइनीम। तन्न शुश गेय पाइब मुरपुकीमी मारेइ मारेइ ताइनीम। 5 ठीक पाइब मुरुमी जौल मदाक्नीम। तन्न परमप्रभु यावे आ अरेशो मटीब मुरुमी मुने दौक्चा डा नु दोस तचा डा गेय ला पाइनीम। 6 ठीक पतीकेमी रिम्शो थुं पाइशो मुर आन कली कोत्रब। तन्न परमप्रभु यावे आ अरेशो मटीब आन पाप पतीकेमी मेको आन कली खतम सेल्ब। 7 का निक्शी मुर पुडग बाक्शा यो “क्येट थीब नड” देखु पाइनीम। का निक्शी मुर चहिं क्येट थीब बाक्शा यो “पुडग नड” देखु पाइनीम। प्रकाश २:९; प्रकाश ३:१७ 8 शुश शोंप बाक्शो मुरुमी आंम कली प्रोंइने चाप्ब। तन्न पुडगपुकी हिंच कोइचा मपुंडसीनीम। 9 ठीक पाइब मुर बत्ती खोदेशो छेडछेड पा ब्राइनीम। तन्न परमप्रभु यावे आ अरेशो मटीब आन बत्ती काप्शा लाइब। अय्युब १८:५-६ 10 ठेयब लेशो नु सुइ कली ममिम्ब मुर जिचा पोक्ब बाक्ब। तन्न अर्ती नेंब मुर तुइक्तीके नु बाक्ब। हितोपदेश १:५ 11 मरिम्शो पा चेम्शो शोंप नुप्शा लाइब। तन्न इक्का इक्का पा चेम्शो शोंप बारना बारन लाइब। 12 शुश आस पा यो मदुम्त हना, थुं लुकच लाइब। तन्न आ मिम्शो गाप्त हना, ब्रोंइचा गेब रवा बाक्ब। 13 अर्ती डा लोत्र मदाक्ब मुरुम आंम कली श्येत चाक्ब। तन्न अरेशो टीबपुकीमी इनाम ताइनीम। 14 जोक्ब तुइक्ब मुर आन शेंशो ब्रोंइचा गेब ब्वाक्कु बुक्तीके खोदेशो बाक्ब। मेको रे पा मुर मबेक्नीम। 15 रिम्शो मिम्ब मुर कली नेल्लेमी दाक्नीम। तन्न खराप मुर आन लां हिंचा डा बाक्ब। 16 जोक्ब तुइक्ब मुरुमी निप्स खाप्शा नेल्ल गेय पाइब। तन्न मूर्खमी आंम मूर्ख दुम्तीके कोइब। 17 मरिम्शो लोत्र कुरबमी श्येत चाक्ब। तन्न थमा सुइक्चा डा लोत्र कुरब मुरुम थुं नाइक्चा डा लोत्र चाक्ब। 18 सुमी अर्ती मनेंबा, मेको पुडग नु सुइम मदाक्शो मुर दुम्ब। तन्न हुइशो नेंब मुरुम मान ताइब। 19 मुर आंम दाक्शो तामेनु, आन थुं कली रिम्शो दुम्ब। तन्न मूर्खमी आन मरिम्शो पतीके रे लेत्चा मदाक्नीम। 20 सु जोक्ब तुइक्ब नु गाक्बा, मेको जोक्ब तुइक्ब दुम्ब। तन्न मूर्ख नु गाक्ब श्येत जाइब। 21 मरिम्शो पाइब आन कली श्येतम खोइक्ब। तन्न ठीक पाइब आ माल्शो मारेइ मारेइ जाक्दीप्ब। हितोपदेश २८:८; अय्युब २७:१३-१७; उपदेसक २:२६ 22 रिम्शो मुरुमी आ चच युइ आन कली शोंप हेंशा वोइक्ब। तन्न मरिम्शो पाइब आन शोंप ठीक पाइबपुकीम ताइनीम। 23 पुडग आन रूमी शुश अन्न खेल्ब। तन्न ठीक मपाइबमी मेको रोइशो लाइब। हितोपदेश २२:१५ 24 सुमी आ तौ कली शेंशा मतुप्बा, मेकोमी आ तौ कली मदाक्ब। तन्न सुमी आ तौ कली दाक्बा, मेकोमी आ तौ कली शेंब। 25 ठीक पाइबमी रूत्री जचा ताइनीम। तन्न परमप्रभु यावे आ अरेशो मटीब शोत्रलुन बाक्चा मालनीम।

14

ठीक पतीकेमी रागी बारपाइक्ब।

1 जोक्ब तुइक्ब मीश मुरुमी आंम खिं रिम्शो सेल्ब। तन्न मूर्ख मीश मुरुमी आ खिं कली आंम गुइमी प्रेप्ब। 2 सु रिम्शो थुं पाइशो मुर बाक्मे, मेकोमी परमप्रभु यावे कली मान पा हिंब। तन्न सु हेंथे गाक्बा, मेको मुरुमी परमप्रभु यावे कली मदाक्ब। 3 मूर्ख आन लोत्रमी आंम आन कली तेप्ब। तन्न जोक्ब तुइक्ब मुर आन लोत्रमी मेको आन कली कोत्रब। 4 ब्यफ मबाक्त हना, अन्न वोइक्तीके श्येतथ बाक्ब। तन्न बोल्यो ब्यफ पाइशो मुर के शुश अन्न बाक्ब। 5 थमा लोत्र पाइब सांकछीमी जौल मपाइब। तन्न जौल पाइब सांकछीमी जौल पना पन बाक्ब। प्रस्थान २०:१६; प्रस्थान २३:१ 6 शुक्शी पाइबमी तुइक्तीके मालना मालन बाक्त हना यो, मथिप्ब। रूप्ब मुर मोशा जोक्ब दुम्नीम। 7 मूर्खपुकी नु मगाक्को। मारदे हना मेकोपुकी नु जोक्तीक लोत्र मबाक्ब। 8 निप्स पाइशो मुर आन तुइक्तीकेमी तेको लां गाक्चा मालनीमी तुइक्नीम। तन्न मूर्ख आन मूर्ख पतीकेमी हेंथे लां कोइब। 9 मूर्खमी पाप आ पर्वम चढेतीके कली शुक्शी पाइनीम। तन्न रिम्शो थुं पाइशो मुरुमी परमप्रभु आ दाक्शो तशा ग्येरब। 10 थुं डा श्येत थुंम ला तुइक्ब।

मिनु थुं आ ग्येरसीशो थुंमी ला तुइक्ब। रोमी १२:१५ 11 परमप्रभु यावे आ अरेशो मटीब आ खिं प्रेत्या पुंडसीब। तन्न रिम्शो थुं पाइश्शो मुर आन ताम्बु सोशो बोशो दुम्शा लाइब। हितोपदेश १२:७ 12 मुर आन कली आंम पशो लां ठीक तांडसीब हना यो, नोले मेको बेक्पाइक्ब लां बाक्ब। 13 मुर आ कुल रिस्साक्ब हना यो, आ थुं खाइश्शो बाक्ने चाप्ब। ग्येरसीशो थुं नोले सुर्ता पाइब बाक्ब। 14 दूली पाइब आन दूली पशो डा ताइनीम। मिनु रिम्शो पाइबमी आन रिम्शो पशो डा ताइनीम। 15 मारेइ मजोक्ब मुरुमी मारेइ मारेइ लोत्र थमा सुइक्ब। तन्न निप्स पाइश्शो मुरुमी आन पशो नेल्ल मिम्नीम। 16 जोक्बपुकी होस पा मरिम्शो पतीक रे डोन लाइनीम। तन्न मूर्ख मारेइ ममिम्थु, होस मपाइब। 17 रीब पा गाइक्ब मुरुमी मूर्ख गेय पाइब। मिनु मुर आन कली दोपा श्येत गेडा, दे मिम्ब। मेको सुइम मदाक्चा पुंडसीब। 18 मारेइ मजोक्ब मूर्ख गेयम ग्योम्सीशो बाक्नीम। तन्न निप्स पाइश्शो मुर जोक्तीके सिरपेच गुप्शो खोदेशो बाक्नीम। 19 मरिम्शो पाइब मुरपुकी रिम्शो मुर आन डोंइती बाप्नीम। मिनु परमप्रभु यावे आ अरेशो मटीबपुकी ठीक पाइब आन लाप्चोमी बाप्नीम। 20 आंम नेक्था डा मुरुमी प्रुडग कली मदाक्नीम। तन्न शोप पाइश्शो मुर आन के वारच शुश बाक्नीम। 21 सुम आ नेक्था डा मुर कली दिप्बा, मेकोमी पाप पाइब। तन्न सुमी प्रुडग आन कली वारच पाइबा, मेको ग्येरसीशो मुर बाक्ब। भजन संग्रह ४१:२ 22 मार, मरिम्शो मिम्शा पाइब हेंथे लां मगाक्नीमी, डा? रिम्शो पचा मिम्शा पाइबमी गेना हना यो दाक्शा मप्रोंइचा पुंडसीनीम। 23 गेय पतीक नेल्लेमी दारतीक बाक्ब। तन्न लोत्र पा ला बाक्ब मुर प्रुडग दुम्ब। 24 जोक्ब मुर आन तुइक्तीके आन सिरपेच खोदेशो बाक्ब। तन्न मूर्ख आन पशो आन माला खोदेशो बाक्ब। 25 थमा सांकछीमी मुर आन कली प्रोंइब। तन्न जोल पाइब सांकछीमी जोल ला पाइब। 26 परमप्रभु यावे कली मान पा हिंचा, मेको मुर आ खुइश्शा ब्रोंइशा बाक्तीक बाक्ब। मेको आ आलपुकीमी यो मेको ताइनीम। हितोपदेश १८:१० 27 परमप्रभु यावे कली मान पा हिंचा ब्वाक्कु बुक्तीक खोदेशो पा ब्रोंइतीक बाक्ब। मेको रे पा मुरपुकी बेक्पाइक्ब आ ब्वारद रे ब्रोंइनीम। 28 पिप आ दारस आ रागी डा शुश मुर बाक्नीम। तन्न मुर नुप्तेक्म हना, हुकुम पाइब जाम्शा लाइब। 29 रीब पा मगाइक्ब शुश रुप्ब मुर बाक्ब। तन्न रीब पा गाइक्ब मुर मूर्ख दुम्शा लाइब। हितोपदेश १६:३२; हितोपदेश १९:११ 30 नांडसीशो थुंमी मुर आन कली ब्रोंइचा गेब। तन्न गेहेमी मुर आन रुश मुपाइक्ब। 31 सुम प्रुडग आन कली दिप्बा, मेकोमी प्रुडग आन कली सेल्ब कली शुक्शी पाइब। तन्न सुमी प्रुडग आन कली शिशी पाइबा, मेकोमी परमप्रभु यावे कली मान पाइब। हितोपदेश १७:५; अय्युब ३१:१३-१५; मत्ती २५:४० 32 परमप्रभु यावे आ अरेशो मटीबपुकी मरिम्शो पतीकेमी जाम्शा लाइनीम। तन्न ठीक पाइब मुर आंम आन गेना हना यो रिम्शो पतीकेमी ब्रोंइशा बाक्चा ताइनीम। 33 रुप्ब मुर नु तुइक्तीक बाक्ब। तन्न मूर्ख आन थुंमी तुइक्तीक मथिंसीब। 34 रागीम ठीक पाइब शुश बाक्तेक्म हना, मेकोपुकीम मेको रागी ठेयब नु रिम्शो सेल्नीम। तन्न मरिम्शो पाइब शुश बाक्तेक्म हना, मेको रागी कली महिक्सीशो सेल्नीम। 35 पिपमी जोक्शा गेय पाइब कली दाक्ब। तन्न मुने पचा डा गेय पाइबमी पिप आ गाइश्शो डा सजाइ ताइब। उत्पत्ती ४१:३७-४०

15

हाक्शो कुलम ग्येरपाइक्ब

1 ब्रोंव्रशो पा लोत्र लेशशोनु, गाइक्तीके तेक्ब। तन्न हुइश्शा पशो लोत्रमी मुर आन कली गाइक्पाइक्ब। हितोपदेश २५:१५; १राजा १२:१३-१६ 2 जोक्ब तुइक्ब मुरपुकीमी लोत्र पाम्तेक्म हना, नेंबपुकी जोक्ब दुम्चा दाक्नीम। तन्न मूर्ख आन लोत्र शोर गाक्शो बाक्ब। 3 परमप्रभु यावेमी नेल्ल ताइब। मेकोमी रिम्शो पाइब नु मरिम्शो पाइब नेल्ल आन कली ताइब। २इतिहास १६:९ 4 रिम्शो लोत्र मुर आन कली ब्रोंइचा गेब रवा खोदेशो बाक्ब। तन्न दूली लोत्रमी मुर आन थुं जिक्ब। 5 मूर्खमी आ आम आफ आस शेंशो लोत्र मपाइब। तन्न सुमी शेंशो नेंशा पाइबा, मेको होस पाइब बाक्ब। 6 ठीक पाइब मुर आन खिंमी शुश शोप बाक्ब। तन्न परमप्रभु यावे आ अरेशो मटीबपुकी श्येत जाइनीम। 7 जोक्ब तुइक्ब मुर आन लोत्रमी जोक्तीक फ्राइब। मूर्ख आन लोत्र मोदेशो मबाक्ब। 8 परमप्रभु यावे आ अरेशो मटीब आन चदेशो तशा, परमप्रभु यावे ग्रान्ग्रा दीब। तन्न रिम्शो थुं पाइश्शो मुर आन पुंडशो नेंशा ग्येरसीब। हितोपदेश २१:२७; यसैया १:११, १५; हितोपदेश २८:९; लूका १८:९-१४ 9 परमप्रभु यावे आ अरेशो मटीब मुर आन लां परमप्रभु यावे कली ग्रान्ग्रा बाक्ब। तन्न सुमी ठीक पाइबा, मेको कली दाक्ब। 10 नोले शोंइसीशो मुर हिंचा डा सजाइ ताइनीम। तन्न हुइश्शो काइ मदाक्ब मुर बेक्चा मालब। 11 दोदेशो पा परमप्रभु यावेमी बेक्शो मुर आन बाक्तीके नु जाम्शा लतीके तुइक्बा, मोदेशो पा मुर आन थुं कली यो तुइक्ब। अय्युब २६:६; भजन संग्रह १३९:८; प्रकाश ९:१, ११; येरमीया १७:१० 12 मुरुम शुक्शी पाइब आन कली “मोदेशो मपावो” दे अरेशो काइ मदाक्नीम। मेकोपुकी जोक्ब तुइक्ब मुर

आन नेकथा मलाइनीम। 13 ग्येरशो थुं पाइशो मुर आ कुल हाकसीशो तांडसीब। तन्न सुर्ता पाइब आन थुं लुकच लाइब। 14 रूपब थुं पाइशो मुरुमी जोकतीके माल्ब। तन्न मूर्खमी मूर्खे पचा ला दाकनीम। 15 श्येत जाइब आन नाकती मरिम्शो बाकनीम। तन्न ग्येरसीशो थुं पाइशो मुर आन नाकती नेल्ल चाड खोदेशो बाकनीम। हितोपदेश १७:२२ 16 शुश शोप नु मेको आ पर्बम श्येत जचा क्येडा इच्का ला शोप बाकशा परमप्रभु यावे कली मान पा हिंचा रिम्शो बाकब। 17 काइ मदाकशो मुर नु ब्रोव्रशो श्ये खमे जचा क्येडा, दाकमुशा चूले खमे जशो रिम्शो बाकब। 18 शुश गाइकब मुरुमी जिचा पोक्ब। तन्न रीब पा मगाइकब मुरुमी जितीके तेकब। 19 अल्सी आन लां चूम ब्रीशो बाकब। तन्न रिम्शो थुं पाइशो मुर आन लां थेल्लशो बाकब। 20 जोकब तुइकब थुं पाइशो तौमी आ आफ कली ग्येरपाइकब। तन्न मूर्ख तौमी चहिं आ ममा कली महिकब। हितोपदेश १०:१ 21 निप्स मपाइशो मुर मूर्खे गेय पचा ग्येरसीनीम। तन्न रूपब मुर गेना हना यो आंम लांम गाकनीम। 22 अर्ती मनेंथु गेय पाइब आन गेय शोर गाकशो बाकब। तन्न अर्ती गेब शुश बाक्तेकम हना, मेको आन गेय रिम्शो दुम्ब। हितोपदेश ११:१४ 23 मुरुम ठीक पा लोव्र लेन्ने चापुतु हना, ग्येरपाइकब। माल्ची ना माल्शो लोव्र पचा, गिश रिम्शो बाकब। 24 जोकब तुइकब मुर ब्रोंइचा गेब ग्येतथ लां लाइब बाकनीम। मोपा बेकशो मुर आन बाक्तीक लतीक लुकच लां मलाइनीम। 25 परमप्रभु यावेमी ठेयब लेशो मुर आन खिं प्रेशा गेब। तन्न वोंइश बेकशो मीश मुर आन के रू डा सांद एर ओंथ दुम्चा मगेब। 26 परमप्रभु यावेमी मरिम्शो मुर आन मिम्शो लोव्र ग्रांग्रा दीब। तन्न रिम्शो मुर आन लोव्र तशा ग्येरसीब। 27 शिममी आंम खिं डा मुर आन कली श्येत गेनीम। तन्न घूस मजाइबपुकी ब्रोंइनीम। भजन संग्रह १५:५ 28 ठीक पाइब मुरपुकीमी लोव्र लेत्चा क्येडा डोंइती मिम्नीम। तन्न परमप्रभु यावे आ अरेशो मटीबपुकीम हेथे लोव्र पाइनीम। 29 परमप्रभु यावे आ अरेशो मटीब आन क्येडा डोन बाकब। तन्न ठीक पाइब आन पुंइशो लोव्र नेंब। हितोपदेश १५:२९; यूहन्ना ९:३१ 30 ब्रशो कुलमी थुं कली ग्येरपाइकब। रिम्शो लोव्रमी रां कली बोल्यो सेल्ब। 31 सुमी रिम्शो अर्ती नेंशा पाइबा, मेको जोकब तुइकब मुर आन दातेम बाकब। 32 सुमी रिम्शो अर्ती नेंशा मपाइबा, मेकोमी आंम कली यो मदाकब। तन्न अर्ती नेंबमी आ रुप्तीके बारपाइकब। 33 परमप्रभु यावे कली मान पा हिंतीके तुइक्तीक कली शेंसीतीक बाकब। मिनु मान तचा क्येडा डोंइती ब्रेम्शो थुं पाइशो दुम्चा माल्ब। हितोपदेश १८:१२; हितोपदेश २२:४

16

परमप्रभुम मुर आन कली लां कोंइब

1 मुर आन थुंमी मिम्ना मिम्न बाकनीम। तन्न लोव्र लेत्तीक परमप्रभु यावे रे जाकब। 2 आंमा पशो गेय आंमा कली ठीक मिम्सीब। तन्न परमप्रभु यावेमी मुर आन थुं नाकब। 3 इन पशो नेल्ल परमप्रभु यावे कली जिम्मा गेन। मिनु इन मिम्शो जाकदीपब। भजन संग्रह ३७:३ 4 परमप्रभु यावेमी मारेइ मारेइ नेल्ल गेय पचा कली सेल्लतु। आ अरेशो मटीब कली यो नोले डा श्येत नाकत कली सेल्लतु। रोमी ९:२२ 5 परमप्रभु यावे ठेयब लेशो आन कली तशा ग्रांग्रा दीब। मेकोपुकी सजाइ मतथु मब्रोंइनीम। 6 दाकशा गेनायो मप्रोंइतीकेमी मरिम्शो पतीक क्याम्सीब। मिनु सु परमप्रभु यावे कली मान पा हिंबा, मेको मरिम्शो रे डोन लाइब। 7 परमप्रभु यावेमी मुर आन पशो तशा ग्येरसाक्व हना, मेको कली आ जोरी सत्रु नु यो गारपाइशो वोंइकब। उत्पत्ती ३१:२४; उत्पत्ती ३३:४ 8 मरिम्शो पा चेम्शो शुश क्येट क्येडा रिम्शो पा चेम्शो इच्का खोइ क्येट ठीक बाकब। हितोपदेश १५:१६ 9 मुरुमी आंम आ लां आंमान मिम्नीम। तन्न परमप्रभु यावेमी मेको आन गाक्तीक लां कोंइब। हितोपदेश १९:२१; येरमीया १०:२३ 10 परमप्रभु यावेमी पिप कली व्वाक्पाइकब। मेकोमी निसाफ पशोनु, दूली निसाफ मपाइब। 11 ठीक पा नाक्तीक नु पुक्तीक परमप्रभु यावे केन बाकब। झोलाम बाकशो नाक्तीक फुल्लु नेल्ल आ सेल्लशो बाकनीम। हितोपदेश ११:१ 12 पिपमी मरिम्शो पाइब आन कली तशा ग्रांग्रा दीब। मारदे हना ठीक पतीकेमी आ राज्य बोल्यो सेल्ब। 13 पिपमी ठीक लोव्र पाइब आन कली तशा ग्येरसीब। थमा लोव्र पाइब आन कली दाकब। 14 पिप गाइक्ताक्व हना, मुर साइक्ने चापब। रूपब मुरुमी आ गाइक्चा नाइक्पाइक्ने चापब। हितोपदेश १९:१२; हितोपदेश २०:२ 15 पिप आ कुल हाकशो बाक्त हना, ब्रोंइचा गेब। मेको आ दाकशो सोव्रशो रू कली रेड खोदेशो बाकब। 16 क्येख सुन तचा क्येडा तुइक्तीक तचा रिम्शो बाकब। चांदी तचा क्येडा रुप्तीक तचा रिम्शो बाकब। 17 रिम्शो थुं पाइशो मुर मरिम्शो लां रे डोन बाकब। मिनु मरिम्शो मपथु, होस पा बाकब ब्रोंइचा ताइनीम। 18 मुर खतम दुम्चा क्येडा डोंइती ठेयब लेत्नीम। नुप्चा क्येडा डोंइती मुर बोरनीम। हितोपदेश १८:१२ 19 ठेयब लेशो आन रोइशो थोव्रक योक्सीचा क्येडा ब्रेम्शो दुम्शा, श्येत जशो आइक्च मुरपुकी नु बाक्चा रिम्शो बाकब। 20 सुम शेंशो लोव्र नोफा दाइशो नेंबा, मेको मुर सोशा बोशा ग्येतथ लाइब। सु परमप्रभु यावे कली थमा सुइक्बा, मेको ग्येरसीशो

बाकब। 21 जोकब तुइकब थुं पाइशशो मुर कली रूपब मुर देनीम। ब्रोव्रशो लोत्रम शेंतीक कली बारपाइकब। 22 सु नु तुइकतीके बाकबा, मेको ब्रोइचा गेब ब्वाक्कु बुक्तीके खोदेशो बाकब। तन्न मूर्ख आन मूर्ख पतीकेमी सजाइ ताइनीम। 23 जोकब तुइकब मुरुमी लोत्र पचा क्येडा डोंइती मिम्नीम। मोपा आन जोक्तीक बारना बारन लाइब। 24 ब्रोव्रशो लोत्र खुदो खोदेशो बाकब। मेकोमी थुं कली ब्रोव्रशो नु रां कली बोल्यो सेल्ब। हितोपदेश १२:२५ 25 मुरुमी का निकशी लां रिम्शो बाकब, दे मिम्नीम। तन्न नोले मेको लां बेक्तीक लां बाकब। 26 गेय पाइब आन कोव्रजमी मेको कली गेय पपाइकब। मेको आ शोव्रलुमी गेय पतीक थुं गेब। 27 हिंचा डा पा मरिम्शो पाइब मुरुमी मरिम्शो ला मिम्ब। मेको आ लोत्र मी खोदेशो पा ब्रशो बाकब। 28 दूली मुरुमी जिचा पोक्ब। मिनु नोफा मुइकबमी गारशो वारच आन कली फ्राब। 29 हुश खाक्श पोक्ब मुरुमी आ नेक्था डा मुर आन कली यो हेंथे पपाइकब। मिनु मेको आन कली मरिम्शो लां खोइकपाइकब। 30 मिक्च रिक्बमी दूली गेय पचा मिम्शो बाक्नीम। मोदेशो मिम्शा सिक्सी पा बाक्बमी मरिम्शो पचा चिक्शो बाकब। 31 बोइशशो चां मान ततीक सिरपेच खोदेशो बाकब। मेको ठीक पाइब मुर आन लांम ला थीसीब। हितोपदेश २०:२९ 32 लडाइ पाइब बोल्यो मुर दुम्चा क्येडा फाल्ब मुर दुम्चा रिम्शो बाकब। मिनु सहर कली ग्राब क्येडा आंम गाइक्चा कली तेक्ब रिम्शो बाकब। हितोपदेश १४:२९ 33 मुरुम फेन्टे आप्शा, परमप्रभु यावे कली हिल्लो पाइनीम। मिनु परमप्रभु यावेमी लोत्र लेप्ब।

17

ग्येरशो थुं

1 जिना जिन ब्रोव्रशो जचा क्येडा सिक्सी पा थुं नाइशशा पोकतो खमे जचा रिम्शो बाकब। हितोपदेश १५:१७ 2 जोकब तुइकब वाइलमी आ होव्रप आ मरिम्शो पाइब तौ कली अरेब। मिनु मेको वाइलमी खिं डा तौ खोदेशो पा रू ताइब। 3 सुन चांदी यपाइशशा नाक्चा कली ग्योब नु मी माल्ब। तन्न परमप्रभु यावेमी मुर आन थुं नाक्ब भजन संग्रह ६६:१० 4 मरिम्शो पाइब मुरुमी परमप्रभु यावे आ अरेशो मटीब आ लोत्र नेंब। जोल पाइबमी खतम सेल्लिक लोत्र नेंचा कली नोफा दाइकब। 5 सुम पुडग आन कली शुक्शी पाइबा, मेकोमी आ कली सेल्ब, परमप्रभु यावे कली आइक्च सेल्ब। सु मुर आन कली श्येत जशो तशा ग्येरसीबा, मेको सजाइ मतथु मब्रोंइब। हितोपदेश १४:३१ 6 खाल्पा खाल्पी आन सिरपेच आन चच युइ नमी। मिनु आल आन ग्योम्सीशो आन आम आफ बाक्नीम। 7 मूर्खपुकीमी रिम्शो लोत्र पचा मशिरनीम। मेको क्येडा ठेयब मुरपुकीमी जोल पचा मशिरब। 8 घूस गेबमी आ घूसमी मारेइ मारेइ पने चाप्ब, दे मिम्ब। मेको ते लत हना यो आ देशो खाप्ब। 9 सुमी अरु आन मरिम्शो पशो सुम्बा, मेकोम वारच सेल्ब। तन्न मुर आन मरिम्शो पशो देना देन बाक्बमी वारच आन कली फ्राब। 10 मूर्ख मुर कली सहे खेयप तुप्चा क्येडा जोक्ब तुइकब मुर खेयप का देशोनु रूपब। 11 मरिम्शो मुरपुकीमी गेना हना यो जिचा पोक्नीम। तन्न मेको कली सजाइ गेचा कली शिशी मपाइब मुर सोइशशो बाकब। 12 मूर्ख मुरुमी मूर्ख पवा ना गुम्चा क्येडा आ चाइक्ब रोंइसीशो वां कली गुम्चा रिम्शो बाकब। 13 सुमी रिम्शो पाइब आन कली मरिम्शो पाइबा, मेको आ खिं रे मरिम्शो गेनायो मलाइब। 14 दोपा प्रोंइशो ब्वाक्कु बोल पा शाइक्बा, मोपा जिचा पोक्तीक बाकब। मोपतीके जिचा ठेयब दुम्चा क्येडा डोंइती मेको कली तेक्कीन। 15 सुमी परमप्रभु यावे आ अरेशो मटीब आ पर्बम “ठीक पाइब बाकब” देंबा, मिनु ठीक पाइब आ पर्बम “ठीक पाइब मबाकब” देंबा, मेको निम्फा आस कली परमप्रभु यावेमी ग्रांग्रा दीब। यसैया ५:२३ 16 मूर्ख आ गुइमी तुइकतीक थुं ग्याप्चा कली क्येट मारदे माल्बा डा?। मेको के शेंसीतीक थुं मबाकब। 17 वारचमी गेना हना यो दाक्ब। लोक्बपुकी चहिं श्येत जशो ना वारच पचा कली जरमेशो बाक्नीम। 18 सु आ नेक्था डा मुर आ पर्बम जमानी बाक्चा कली सल्ला पाइबा, मेको मरुप्ब मुर बाकब। हितोपदेश ६:१-५ 19 जिचा दाक्बमी पाप कली यो दाक्ब। लाइशशो लाप्चो सेल्बमी मुर आन रुश जिक्पाइकब। 20 मरिम्शो थुं पाइशशो मुर आन कली मारेइम मगाप्ब। दूली पा जोल पाइब मुर हिंचा डा श्येत जाइब। 21 मूर्ख तौमी आ आम आफ आस कली सुर्ता पपाइकब। मूर्ख आ आफ गेनायो ग्येरचा मताइब। 22 ग्येरसीशो थुंमी रां कली सापाइकब। तन्न लुक्च लशो थुंमी मुर कली सोव्रपाइकब। हितोपदेश १५:१३-१५ 23 परमप्रभु यावे आ अरेशो मटीब मुरुमी निसाफ दूली सेल्चा कली खुइशशा घूस जाइब। प्रस्थान २३:८ 24 रूपब मुरुम आ तुइकतीके माल्ब। तन्न मूर्खमी रागी आ सुर सम्म कोव्रशो बाकब। हितोपदेश ४:२५ 25 मूर्ख तौमी आ आफ कली सुर्ता पपाइकब। आ आम कली गेना हना यो डाक्पाइकब। 26 दोस मताइब मुर कली सजाइ गेचा क्येडा ठेयब मुर आन कली रिम्शो पचा कली तुप्चा मरिम्शो बाकब। 27 जोकब थुं पाइशशो मुर शुश म्बवाक्नीम। रूपब

मुर आन गेय पचा डोंइती मिम्शा, बाकनीम। हितोपदेश १०:१९; याकूब १:१९ 28 मूर्ख ब्वालेइ पा बाक्त हना, मूर्ख मुर यो रुप्ब मुर खोदेशो तांडसीब। लोत्र मपाम्तेकम हना निप्स पाइशो खोदेशो तांडसीनीम। अय्युब १३:५

18

लोत्रमी बेक्तीक नु ब्रोंइतीक बाक्ब

1 सु मुर रे ब्राशा बाक्बा, मेकोमी आंम कली ला रिम्शो पचा दाक्ब। मेकोमी रुप्तीक थुं पाइशो मुर आन लोत्र काइ मनेब। 2 मूर्खमी मारेइ लोत्र रुप्चा थुं मपाइब। तन्न “गो जोक्नुड” दे आ मिम्शो लोत्र ला पाइब। 3 परमप्रभु यावे आ अरेशो मटितीक नु महिकमुतीके यो जाक्ब। मिनु मुने दोक्तीक नु मान मततीके यो जाक्ब। 4 मुर आन लोत्र शुश लुक्च लशो ब्वाक्कु खोदेशो बाक्ब। तुइक्तीके शुश ब्वाक्कु बुक्शा गूशो खोदेशो बाक्ब। 5 दोस ताइब आ कुल कोत्रशा, दोस मताइब कली दूली सेल्चा, ठीक निसाफ ममाइ। ब्यवस्था १:१७ 6 मूर्ख आ लोत्रमी जिचा पोक्ब। मिनु मेको तुप्चा पुंडसीब। 7 मूर्ख आ लोत्र पतीकेमी आंमान खतम दुम्ब। आ लोत्रमी मेको कली साइक्ब। 8 नोफा मुइक्ब आन लोत्र शुश ब्रोत्रशो जचा थोत्रक खोदेशो बाक्ब। मेको मुर आन थुं सम्म जाक्दीप्ब। हितोपदेश २६:२२ 9 अल्सी पाइब मुर हेंथे पाइब आ लोक्ब बाक्ब। हितोपदेश १०:४ 10 परमप्रभु यावे आ नें बोल्यो लाइशो खिं खोदेशो बाक्ब। ठीक पाइबपुकी मेकेर दोरशा लशा, ब्रोंइशा बाकनीम। हितोपदेश १४:२६; भजन संग्रह ६१:४ 11 थीब मुर आन शोंप मेको आन कली बोल्यो सहर खोदेशो बाक्ब। मेकोपुकीमी आन शोंप कली ठेयब गारो खोदेशो मिम्नीम। हितोपदेश १०:१५ 12 खतम दुम्चा क्येडा डोंइती मुर ठेयब लेत्नीम। मान तचा क्येडा डोंइती मुर ब्रेम्शो दुम्नीम। हितोपदेश १६:१८ 13 सुमी लोत्र नेंचा क्येडा डोंइती लोत्र लेप्बा, मेको मूर्ख दुम्तीके मुने दोक्ब मुर बाक्ब। 14 मुर आ थुंमी रां डा रोइ फाल्ने चाप्ब। तन्न आ थुं लुक्च लत हना, सुम फाल्ने चाप्बा डा? 15 निप्स पाइशो मुर आ जोक्तीके बारना बारन लाइब। जोक्ब तुइक्ब मुरुमी मेको क्येडा जोक्चा कली नोफा दाइक्ब। 16 सुमी कोसेली गेबा, मेकोमी ठेयब मुर नु लोत्र पचा यो ताइब। उत्पत्ती ४३:११ 17 सुमी जितीकेमी डोंइती ब्वाक्बा, मेको कली नोले डा मुर मब्वाक्म सम्म नेल्लेमी ठीक मिम्शा थमा सुइक्नीम। 18 फेन्टे आप्शोनु, जिचा खेचा देक्ब। मिनु ठेयब मुर आन जिचा नाइक्पाइक्ब। 19 थुं खाइक्पाइशो लोक्ब कली लेम्चा गारो हिरशो सहर ग्राचा क्येडा श्येत बाक्ब। मुर आन जितीक खेतीके बोल्यो खिं डा आग्लो खोदेशो बाक्ब। 20 मुर आन लोत्रमी ब्रोंइनीम। मेको आन रिम्शो लोत्र पशोमी जचा ताइनीम। हितोपदेश १२:१४ 21 मुर आन लोत्रमी बेक्तीक नु ब्रोंइतीक बाक्ब। तेको कली दाक्नीनी, मेको आ ततीक ताइनीनी। 22 सुमी मीश ताइबा, मेको कली रिम्शो दुम्ब। मेको मुर परमप्रभु यावे आ दाक्शो मुर दुम्ब। हितोपदेश १९:१४; हितोपदेश ३१:१० 23 प्रुडग मुरुमी ब्रेम्शो लोत्र पा पुंडनीम। तन्न शुश शोंप पाइशो मुरुमी ठेयब लेशो लोत्र लेत्नीम। 24 का निक्शी मुरुमी “वारच नड” देखु पाइनीम। तन्न आंम लोक्ब क्येडा थमा पा दाक्ब वारच गेना हना यो आ वारच नु काथा बाक्ब। हितोपदेश १७:१७

19

प्रुडग आन कली वारच पावो

1 दूली लोत्र पा गाक्ब मूर्ख दुम्चा क्येडा प्रुडग नु गेना हना यो रिम्शो पाइब मुर दुम्चा रिम्शो बाक्ब। हितोपदेश २८:६ 2 गे मार मार माल्नीनी मेको आ पबर्म मतुइक्ताकनी हना, मेको शोर गाक्शो बाक्ब। सु रीब पा गाक्बा, मेको आ लां जाम्ब। 3 मुर आन मूर्ख पतीकेमी खतम दुम्नीम। मो हना यो मेकोपुकीमी परमप्रभु यावे कली दोस गेनीम। बिलाप ३:३९ 4 शुश क्येट बाक्ब मुर नु शुश वारच बाक्नीम। तन्न प्रुडग आन कली आन बाक्शो वारचमी यो प्रोंइनीम। हितोपदेश १४:२० 5 जोल पा सांकछी बाक्ब मुर सजाइ मतथु मब्रोंइब। मिनु जोल पाइब यु बुइशो प्रोक्ने मचाप्ब। हितोपदेश २१:२८; ब्यवस्था १९:१८-२१ 6 शुश मुरुमी ठेयब मुर आन शिशी दाक्नीम। मिनु सुमी अरु कली गेबा, मेको आ वारच शुश बाक्नीम। 7 प्रुडग मुर कली आ लोक्बपुकीमी यो पोंइनीम। मेको आन क्येडा आ वारचपुकीमी प्रोंइनीम। मेकोमी मेको आन कली ब्रेप्ब, तन्न सुइम मनेनीम। 8 सुम आंम कली दाक्बा मेकोमी तुइक्तीक माल्ब। रुप्ब मुर सोशा बोशा ग्येत्थ लाइब। 9 जोल पा सांकछी बाक्ब मुर सजाइ मतथु मब्रोंइब। मिनु जोल पाइब मुर खतम दुम्नीम 10 मूर्ख मुर क्येट थीब मुर खोदेशो पा बाक्चा मशिरब। मिनु वाइलमी ठेयब मुर आन कली हुकुम पचा यो मशिरब। 11 निप्स पाइशो मुर ओखां पा गाइक्नीम। मिनु अरुमी थुं खाइक्तीक लोत्र पाम्तेकम हना यो, मेको सिक्सी पा बाक्चा आ मान बाक्ब। हितोपदेश १४:२९ 12 पिप आ गाइशो गुप्स आ ग्रीशो खोदेशो बाक्ब। आ दाक्तीक चहिं घांस तार

दोक्शो सुनी डा सीत खोदेशो बाक्ब। हितोपदेस १६:१४-१५ 13 निप्स मपाइशो तौ आ आफ कली श्येत बाक्ब। मिनु गेना हना यो जिचा पोक्ब मीश, तप तप पा याप्शो ब्वाक्कु खोदेशो बाक्ब। हितोपदेस २७:१५-१६ 14 खिं नु शोप आम आफ रे तांडसीब। तन्न होस पाइब मीश चहिं परमप्रभु यावे रे तांडसीब। हितोपदेस १८:२२ 15 अल्सी पतीकेमी निन्द्रा पपाइक्ब। अल्से शोवलुन बाक्चा माल्नीम। 16 सुमी परमप्रभु यावे आ शेंशो टीनीमी, मेको ब्रोइचा ताइनीम। सुमी मटीनीमी मेको बेक्चा माल्नीम। हितोपदेस १६:१७ 17 सुमी पुडग कली शिशी पा गेबा, मेकोमी परमप्रभु यावे कली गेब। मिनु परमप्रभु यावेमी मेको कली नेल्ल लेप्ब। हितोपदेस १४:३१; भजन संग्रह ४१:२-४; दानीएल ४:२४; मत्ती ५:७; मत्ती २५:४०; २कोरिन्थी ९:६ 18 आस बाक्म सम्म इ तौ कली शेंशा तुपो। तन्न मेको कली तुप्शा मसतो। ब्यवस्था २१:१८-२१ 19 रीब पा शुश चुरब मुर सजाइ ताइब। गे मेको कली तेक्चा माल्तीवी हना, मेको क्येडा शुश गाइक्ब। 20 नोफा दाइशशा अर्ती नेंशा, शेंतीक टिने। मो पाइतीनी हना, तुइक्तीक पाइशो मुर दुम्नीनी। 21 मुर आ थुमी शुश मिम्तीक बाक्नीम। तन्न परमप्रभु यावे आ मिम्शो ला दुम्ब। हितोपदेस १६:९ 22 शिशी पाइब मुर दुम्चा रिम्शो बाक्ब। जोल पाइब दुम्चा क्येडा पुडग दुम्चा रिम्शो बाक्ब। 23 परमप्रभु यावे कली मान पा हिंचा ब्रोइतीक बाक्ब। मो दुम्त हना, गे महिंथु, श्येत मजथु बाक्नीनी। 24 अल्सेपुकीमी आन गुइ खमेम खुम्नीम। तन्न आन गुइ शोव सम्म मचाक्नीम। हितोपदेस २६:१५ 25 शुक्शी पाइब आन कली तुप्शोनु, मारेइ मजोक्बपुकी होस पा बाक्चा शेंसीनीम। निप्स पाइशो मुर कली हुइशोनु, मेको क्येडा जोक्ब दुम्ब। हितोपदेस २१:११ 26 सुमी आ आफ कली श्येत गेबा नु आ आम कली खेरबा, मेको ग्रांग्रा दिशो नु मुने तोक्ब तौ बाक्ब। 27 आं तौ, गे जोक्ब मुर आन लोव रे हेंथे लचा प्रोनो। मो पाप्तीवी हना गे शेंशो लोव नेने चाप्नेवे। याक्ब १:२२ 28 शोर गाक्शो सांकछीमी निसाफ पतीक आ पर्बम शुक्शी पाइब। मेकोमी परमप्रभु यावे आ अरेशो मटीब। मरिम्शो पतीके जचा थोवक खोदेशो पा दाक्ब। 29 सजाइ शुक्शी पाइब आन कली बाक्ब। तुप्तीके मूर्ख आन ची कली माल्ब। हितोपदेस २६:३

20

जोल पा नाक्तीक

1 अडगुर शांबुमी हेंथे ब्वाक्पाइक्ब। राकसीमी राम्शी पपाइक्ब। सु मेको तूशा दुक्नीमी, मेको जोक्ब तुइक्ब मदुम्नीम। हितोपदेस २३:२९-३५; हितोपदेस ३१:५; होसे ४:११ 2 पिप आन शुश गाइशो गुप्स आन ग्रीशो खोदेशो बाक्ब। सुम मेको कली गाइक्पाइक्बा, मेको साइक्चा पुंडसीब। हितोपदेस १६:१४ 3 राम्शी पतीक रे डोन बाक्ब मुरुमी मान ताइब। तन्न मूर्ख नेल्ल रीब पा राम्शी पाइब बाक्नीम। 4 ग्यू दुम्तीके अल्सेमी ब्यफ मवाक्ब। मिनु अन्न रिक्ची ना मारेइ यो मताइब। हितोपदेस ६:६-११; 5 मुर आन थुं डा मिम्शो लुकच लशो ब्वाक्कु खोदेशो बाक्ब। तन्न निप्स पाइशो मुरुमी ला मेको कीशा गुंइने चाप्ब। 6 शुश मुरुमी “गो रिम्शो मुर नड” दे अरु आन कली तुइक्पाइक्नीम। तन्न थमा सुइक्चा डा मुर सु थिन्ने चाम्सीबा डा? 7 ठीक पाइब मुर गेना हना यो रिम्शो पाइब बाक्ब। मेको आ आलपुकी ग्येरसीशो बाक्नीम। भजन संग्रह ११२:१२ 8 निसाफ पाइब नित्तीकेम निश्शो पिपमी कोवशा, रिम्शो नु मरिम्शो नेल्ल तिल्लब। भजन संग्रह १०१:३ 9 मिनु सुमी “गो आं थुं रिम्शो सेल्ला। आं पाप क्याम्ताकड” देने चाप्बा डा? हितोपदेस ३०:१२; अय्युब ४:१७; अय्युब ९:२-३ 10 जोल पा नाक्तीक नु मगारशो पुक्तीक निम्फा परमप्रभु यावे कली ग्रांग्रा बाक्ब। 11 मिनु आल यो आन पतीकेमी दोदेशो दुम्नीमी मेको कोइनीम। ठीक पाइब नु रिम्शो थुं पाइशो आल बाक्ब, दे तुंडसीब। हितोपदेस २२:६ 12 नेंचा कली नोफा नु कोवचा कली मिक्च मेको निम्फा परमप्रभु यावेमी सेल्लु। 13 शुश मइप्पो, मारदे हना गे पुडग दुम्नेवे। सेंसीशा बाक्को। मिनु शुश जचा ताइनेवे। 14 ग्याप्ब मुरुमी “एको मरिम्शो बाक्ब। मरिम्शो बाक्ब” दे इक्का आइक्ची लशा “गो सस्तो ग्याप्ता” दे आ नें बोरपाइक्ब। 15 शुश सुन नु शुश क्येट लाइब हीरा बाक्नीम। तन्न मेको आन क्येडा जोक्तीक लोव पाइब मुर रिम्शो बाक्ब। 16 अर्को रागी डा मुर आ पर्बम जमानी दुम्शो मुर, आ वा रोइशशा लतीन। मुर आ पर्बम जमानी बाक्शो आ मारेइ मारेइ नेल्ले लतीन। हितोपदेस ६:१-२; हितोपदेस २७:१३ 17 खुइ पा जशो शोब्ले डोंइती शुश ब्रोवब। नोले मेको फुल्लु नाक्शो खोदेशो दुम्ब। हितोपदेस ९:१७ 18 अर्ती नेंब मुर आ मिम्शो रिम्शो दुम्ब। जोक्ब तुइक्ब आन लोव नेंशा ला लडाइ पावो। हितोपदेस २४:६ 19 लोव क्याल्ब मुरुमी खुइशशा पशो लोव यो फ्राइब। मोपतीके शुश लोव पाइब मुर नु वारच मदुमो। 20 सुम आ आम आफ आस कली सराप पाइबा, मेको आ बत्ती नेल्ल क्येडा छिडछिडमी काप्ब। हितोपदेस ३०:१७; प्रस्थान २१:१७ 21 डोंइती रीब पा थेशो रू नोले आसीक मराइब। 22 गे मरिम्शो पाइब कली क्येक्क लेत्नुड मदेनो। परमप्रभु यावेमी पाइब, दे रिम्दो। मिनु इ कली वारच पाइब। हितोपदेस २४:२९; रोमी १२:१७ 23 जोल पा

नाक्तीक तशा परमप्रभु यावे ग्रांग्रा दीब। मिनु दूली नाक्तीक ठीक मबाक्नीम। 24 परमप्रभु यावेमी मुर आन कली लां कोइब। सुमी आंम लां रुप्ने चाप्बा डा? 25 मुरुमी ममिम्थु “परमप्रभु यावे केन बाक्ब” देशा, कसम जचा, थम हिंचा डा बाक्ब। मारदे हना नोले मिम्शा, मार दुम्बा डा? 26 जोक्ब तुइक्ब पिपमी परमप्रभु यावे आ अरेशो मटीब आन कली तिल्ब। मिनु मेको आन कली साइक्ब। 27 मुर आन थुं परमप्रभु यावे आ बत्ती बाक्ब। मिनु मेकोमी रां नेल्ल कली कोव्रब। १कोरिन्थी २:११ 28 गेना हना यो दाक्शा गेनायो मप्रोंइतीकेमी पिप कली खाल पाइब। आ ठीक पतीकेमी आ सासन पतीके मजाम्ब। हितोपदेश १६:१२ 29 ठिटा आन दारस आन बोल्यो रां बाक्ब। मिनु खाल्पा आन दारस आन बोइश्शो चां बाक्ब। 30 तुप्शो गारमी लेंशा मरिम्शो मपपाइक्ब। मिनु तुप्शोमी यो मुर आन थुं कली रिम्शो पाइब सेल्ब।

21

परमप्रभु कली टीबम रिम्शो पाइब

1 पिप आ थुं परमप्रभु यावे आ गुइमी खोला डा ब्वाक्कु खोदेशो बाक्ब। दोथ गे लाइक्चा दाक्ता, मोथ गे लाइक्ब। भजन संग्रह ३३:१५ 2 मुरुमी आंम कली गेना हना यो “ठीक पाता” दे मिम्नीम। तन्न परमप्रभु यावेमी मुर आन थुं नाक्ब। 3 परमप्रभु यावे आ डोंइती मार मार चढेचा क्येडा ठीक पतीके नु रिम्शो निसाफ पतीके आ दाक्शा ब्रतीक बाक्ब। १सामुएल १५:२२; होसे ६:६ 4 ठेयब लेशो नु बोरशो मुर दुम्चा, परमप्रभु यावे आ अरेशो मटीब आन छेडछेड बाक्ब। मेको पाप बाक्ब। 5 शुश गेय पाइब आन मिम्तीकेमी सोशा बोशा ग्येत्थ लां खोइक्पाइक्ब। तन्न रीब पा ममिम्थु गेय पाइब मुर प्रुडग दुम्ब। 6 जोल पा शुश शोंप चेम्तीके फशेमी योल्शा जाम्शो कुन खोदेशो बाक्ब। मोदेशो पाइबपुकी साइक्चा पुंइसीनीम। 7 परमप्रभु यावे आ अरेशो मटीब आन हुश खाक्श पोक्तीकेमी साइक्चा पुंइसीनीम। मारदे हना मेकोपुकीमी मार ठीक बाक्मे, मेको पचा मबित्नीम। 8 दोस ताइब मुर आन लां हिरशो बाक्ब। दोस मताइब मुर आन पतीक चहिं ठीक बाक्ब। 9 गेना हना यो जिचा पोक्ब मीश नु ठेयब खिंम बाक्चा क्येडा, तला डा कुना कामी बाक्चा रिम्शो बाक्ब। 10 परमप्रभु यावे आ अरेशो मटीबपुकीमी मरिम्शो ला पचा दाक्नीम। मेकोपुकीमी आन नेक्था डा मुर आन कली यो शिशी मपाइनीम। 11 शुक्शी पाइब कली सजाइ गेशोनु, मारेइ मजोक्ब मुर इक्का जोक्ब तुइक्ब दुम्नीम। मिनु जोक्ब तुइक्ब मुर आन कली शेशोनु, आन जोक्तीके बारब। हितोपदेश १९:२५ 12 ठीक पाइबमी परमप्रभु यावे आ अरेशो मटीब मुर आन खिं कोव्रना कोव्रन बाक्ब। मिनु परमप्रभुमी आ अरेशो मटीब आन कली खतम पोक्ब। 13 सुमी प्रुडग आन पुंइशो मनेबा, मेकोमी यो पुनानु, सुइमी यो मनेनीम। 14 खुइश्शोमी मार मार गेशोनु, चुरब मुर यो मचुरनीम। मिनु वा आगामी खुइश्शा गेशोमी ठेयब गाइक्तीक तेक्ब। १सामुएल २५:१८-३५ 15 निसाफ दुम्मेनु ठीक पाइब ग्येरसीनीम। तन्न मरिम्शो पाइबपुकी हिंनीम। 16 सुइ मुर रुप्तीक लां प्रोंइतु हना, मेको बेक्शो मुर आन बाक्तीक लशा नाइक्ब। 17 सुम आंम दाक्शो पना पन बाक्बा, मेको प्रुडग दुम्ब। सुमी अडगुर शांबु नु तेल दाक्बा, मेको मुर यो प्रुडग दुम्ब। हितोपदेश २३:२१ 18 ठीक पाइब आन पा डा परमप्रभु यावे आ अरेशो मटीबपुकीम सजाइ ताइनीम। मिनु गेना हना यो रिम्शो पाइब आन पा डा थमा सुइक्चा मपुंइसीब मुर सजाइ ताइनीम। 19 शुश जिचा पोक्ब नु चुरब मीश नु बाक्चा क्येडा गोरशो रागीमी बाक्चा रिम्शो दुम्ब। 20 जोक्ब तुइक्ब मुर आन खिंम शुश क्येट लाइब शोंप नु तेल बाक्ब। तन्न मूर्खमी आ बाक्शो नेल्ल थुम्ब। 21 सु मुरुमी ठीक पतीके नु शिशी पतीके आ नोले खोइक्बा, मेको ब्रोंइशा, सोशा बोशा दुम्शा मान ताइब दुम्ब। 22 जोक्ब तुइक्ब मुर कामी बोल्यो लडाइ पाइब आन सहर कली लडाइ तोप्तु। मिनु मेकोमी आन बोल्यो, थमा सुइश्शो, ब्रोंइशा बाक्तीक सहर ग्रात। 23 सुमी मिम्शा ठीक लोव्र पाइबा, मेकोमी आंम कली श्येत रे प्रोंइब। हितोपदेश १३:३ 24 ठेयब लेशो, बोरशो मुर आ नें शुक्शी पाइब बाक्ब। मेकोमी ठेयब लेशो नु बोरशो गेय ला पाइब। 25 अल्से गेय मपतीके बेक्नीम। मारदे हना अल्से आन गुइम गेय पने मबिप्ब। हितोपदेश १३:४ 26 नाक्त रे अल्सेमी मारेइ मारेइ माल्ब। तन्न ठीक पाइबमी मखेक्थु, गेब। 27 परमप्रभु यावे आ अरेशो मटीब आन चढेशो ग्रांग्रा दिशो बाक्ब। मेकोमी मरिम्शो मिम्शा चढेशो शुश ग्रांग्रा बाक्ब। हितोपदेश १५:८ 28 जोल पाइब सांकछी जाम्शा लाइनीम। तन्न रिम्शो पा नोफा दाइश्शा नेंब मुर थमा डा सांकछी बाक्ब। हितोपदेश १९:५,९ 29 परमप्रभु यावे आ अरेशो मटीब मुर बोल्यो मुर खोदेशो पा गाक्नीम। तन्न गेना हना यो रिम्शो थुं पाइश्शो मुर मिम्ना मिम्न गाक्नीम। 30 मुर आन तुइक्तीक, रुप्तीके अर्ती गेतीके परमप्रभु यावे आ डोंइती थम आइक्च बाक्ब। भजन संग्रह ३३:१०-११ 31 लडाइ पची नाक्त कली शारा ठीक पशो बाक्त। तन्न ग्रातीक परमप्रभु यावे आ गुइमी बाक्ब। भजन संग्रह ३३:१७

22

श्येत गोबम श्येत जाइब

1 शुश क्येट शोप क्येडा मान पाइशो रिम्शो बाकब। सुन चांदी क्येडा दाक्चा पुंडसीचा रिम्शो बाकब। उपदेसक ७:१ 2 क्येट थीब नु पुडग मुर के गारतीक का बाकब। मेको मार बाकब देशा हना, परमप्रभु यावेमी मेको निम्फा आस कली सेल्लु। हितोपदेश २९:१३ 3 निप्स पाइशो मुर श्येत जाक्चा चिक्शो तशा, खुंडसीनीम। तन्न मारेइ मजोक्ब मुरुमी मारेइ मतुइक्थु श्येत जाइनीम। हितोपदेश २७:१२ 4 ब्रेम्शो थुं पाइशो नु परमप्रभु यावे कली मान पा हिंब मुर आन इनाम शोप, मान ततीक नु ब्रोंइतीक बाकब। हितोपदेश १५:३३ 5 दूली पाइब आन लांम चू नु ग्याइल बाक्नीम। होस पाइबपुकी मेको आन क्येडा डोन बाक्नीम। 6 इ तौ कली गारचा डा पा रिम्शो शेंदो। मेकोमी खाल्पा दुम्चा सम्म मेको लां मप्रोंइब। हितोपदेश २०:११ 7 क्येट थीबमी पुडग कली अधिकार पाइब। जेर ताक्ब मुर जेर गोब आ वाइल बाकब। 8 मुरुमी ठीक मपतीके शोक्तेक्म हना, ठेयब श्येत खुप्नीम। मिनु आ गाइक्तीके आ कोक्के जिक्ब। अय्युब ४:८ 9 हाइशो मुरुमी आसीक ताइब। मारदे हना मेकोमी आ जचा थोत्रक पुडग नु योक्ब। हितोपदेश १९:१७ 10 शुक्शी पाइब कली खेरो। मिनु जिचा खेचा नुप्ब। जिचा नु तुम्मुचा तेक्सीब। हितोपदेश २६:२० 11 सु रिम्शो थुं नु ठीक लोत्र पचा दाक्नीमी, मेको पिप आ वारच दुम्नीम। कलस्सी ४:६; भजन संग्रह १०१:६ 12 परमप्रभु यावेमी तुइक्ब मुर आन कली कोत्रब। तन्न हेंथे पाइब आन थमा सुइक्चा मपुंडसीब लोत्र थुम्पाइक्ब। 13 अल्सेमी “लाडगामी गुप्स का बाकब। गो लाडगा लती हना, आं कली साइक्ब” देंब। हितोपदेश २६:१३ 14 हेंथे गाक्ब मीश मुर आ लोत्र ठेयब खाल्टा खोदेशो बाकब। परमप्रभु यावे आ गाइशो ताइबपुकी मेको खाल्टाम बिक्नीम। हितोपदेश ५:३ 15 वोंइश आल आन थुंमी मरिम्शो पतीक यो बाकब। तन्न शेंशा इक्का तुप्शोनु, आ मरिम्शो पतीके प्रोंइब। हितोपदेश १३:२४; हितोपदेश २३:१३-१४; हितोपदेश २९:१७ 16 आंम कली शोप पाइशो सेल्चा कली पुडग आ थोत्रक लाइक्चा नु क्येट थीब कली कोसेली गेचा, मेको निम्फा पुडग दुम्तीक गेय बाकब।

जोक्ब तुइक्ब मुर आ लोत्र

17 इ नोफा दाइशा जोक्ब तुइक्ब दुम्शा, आं लोत्र नेनो। मिनु आं लोत्र इ थुंम वोतो! हितोपदेश २४:२३ 18 मारदे हना मेको लोत्र इ थुंमी वोइक्तीवी हना, इ कली रिम्शो दुम्ब। मिनु गे मेको गेना हना यो शेंने चाप्नेवे। 19 गे परमप्रभु यावे कली थमा सुतो, दे मुलाक्ती गो इ कली एको लोत्र शेंताक्ड। 20 गो इ कली ३० ओटा देंतीके, अर्ती नु जोक्तीक लोत्र मब्रेक्तु डा? 21 मारदे ब्रेक्ताक्ड देशा हना, इ कली मार ठीक बाक्बा नु मार थमा बाक्बा, दे कोंइचा कली ब्रेक्ताक्ड। मोपा गे इ कली सोइक्ब आन कली थमा लोत्र लेन्ने चाप्नेवे। 22 पुडग आन के मारेइ मबाक्ब, दे मेको आन के मारेइ मरोइक्तो। मिनु श्येत जाइब कली ठीक निसाफ पावो। प्रस्थान २३:६ 23 मारदे हना परमप्रभु यावेमी मेको आन कली वारच पाइब। मेकोमी मेको रोइक्ब आन ब्रोंइतीक रोइक्ब। 24 गाइक्ब मुर नु वारच मदुमो। मिनु शुश चुरब नु मगाक्को। हितोपदेश १५:१८ 25 मेको नु गाक्ते हना, मोदेशोन दुम्शा, ग्याइक्चा पुंडसीनेवे। 26 मुर आन जेर आ पर्बम कसम जशा जमानी मबाक्को। हितोपदेश ६:१ 27 मारदे हना गे थाप्ने मचाप्तीवी हना, इ ब्राख्ये यो रोइक्चा पुंडसीनेवे। 28 इ किक्की पिपीमी वोइशो सांद डा फुल्लु गेनायो मयाक्तो। हितोपदेश २३:१०; ब्यवस्था २७:१७ 29 जोक्ब गेय पाइब आन कली तनी? मेकोपुकी पिप आन कली गेय पाइब दुम्नीम। मेकोपुकीमी आइक्च मुर आन कली गेय मपाइनीम।

23

आल आन कली रिम्शो पा शेंदीन

1 सासन पाइब नु जथ बाक्डेनु, इ डोंइती मार बाक्मे, मेको रिम्शो पा कोत्रडो। 2 गे शुश जचा ब्वचा दाक्ताक्वी हना, इ लाकचामी छूरी वोतो। 3 मेको आ ब्रोंवशो जचा थोत्रक तशा मवलो। मारदे हना मेकोम इ कली खल्लब सेल्ब। 4 क्येट थीब मुर खोदेशो दुम्चा कली मिम्शा बोल मपावो। जोक्ब तुइक्ब दुम्शा मोदेशो मिम्चा प्रोनो। हितोपदेश २८:२२ 5 मेको याम का तशा नोले, चिक्ब खोदेशो पा बेरशा लाइब। मेको ककाकुली खोदेशो पा सरीड गे बेरशा लाइब। 6 शिम आ खिंमी भोज जथ मलावो। मेको आन ब्रोंवशो जचा थोत्रक तशा मवलो। 7 मारदे हना मेकोम इ लाकचामी चांम खोदेशो पा कारब। मेकोमी इ कली जने तूडीने देंत हना यो, मेको आ थुं गे नु मबाक्ब। 8 इ इक्का जशो नेल्ल मेचा कुइब। मेको कली इ ठेयब सेल्शा देंशो लोत्र नेल्ल मोशीन लाइब। 9 मूर्ख आ डोंइती लोत्र मपावो। मारदे हना इ जोक्ब तुइक्ब लोत्र नेंशा, शुक्शी ला पाइब। 10 गे साइ डोंइती वोइशो सांद डा फुल्लु मयाक्तो। मिनु रोम

रोइक्च आन रू मचाइक्तो। हितोपदेश २२:२८ 11 मारदे हना मेको आन कली श्येत रे प्रोंइब बोल्यो बाक्ब। मेकोमी मेको आन पर्बम इ कली श्येत गेब। 12 रिम्शो शेंतीक नेनो। जोक्तीक लोत्र नेंचा कली इ नोफा दाइक्तो। 13 इ आल आन कली रिम्शो पा शेंचा मप्रोनो। मेको आन कली सजाइ गेशा तुप्तीवी हना, मेको मबेक्नीम। हितोपदेश २२:१५ 14 गे मेको कली इच्का तुप्तीवी हना, मेको आन कली बेक्शो मुर आन बाक्तीक लतीक लां रे प्रोंइनेवे। 15 आं तौ, गे जोक्ब तुइक्ब दुम्ते हना, आं थुं यो ग्येरसीब। 16 गे ठीक लोत्र पवीनु, गो आं थुं रेन साप्पा ग्येरसीनुड। 17 पापी आन कली गेहे मपावो। तन्न नाक्त किंत किंत परमप्रभु यावे कली मान पा हिनो। 18 मो पाप्तीवी हना, इ ब्रोंइतीक नु इ मिम्शो नेल्ल जाक्दीप्ब। 19 आं तौ, आं लोत्र नेनो। जोक्ब तुइक्ब दुमो। मिनु इ थुं कली ठीक लांमी ग्येत्थ गाक्पतो। 20 शांबु तूब नु शुश श्ये ब्वाइबपुकी नु मबाक्को। 21 मारदे हना दुक्ब नु शुश जाइब ब्वाइब मुरपुकी पुडग दुम्नीम। शुश दुक्शा बाक्तीकेमी जेक्शो वा फेक्पाइक्ब। हितोपदेश २१:१७ 22 इ आफ आ लोत्र नेनो। इ आम खाल्पी दुम्नेनु, मेको कली आइक्च मसेलो। हितोपदेश १:८ 23 थमा पतीक कली ग्यापो। मेको कली गेनायो मलेयडो। तुइक्तीक, शेंतीक नु रुप्तीक ग्यापो। 24 ठीक पाइब तौ तशा, आ आफ ग्येरसीब। जोक्ब तुइक्ब थुं पाइश्शो तौ तशा आ आफ शुश ग्येरसीब। हितोपदेश १०:१ 25 इ आम आफ ग्येरसीसल। इ कली थीब गेना हना यो ग्येरशा बाक्ल।

26 आं तौ, इ थुं आं कली गेयी। आं पशो कोव्रडो। 27 तेल्लेम मीश मुर ठेयब खाल्टा खोदेशो बाक्ब। ग्युंभे पा यो हेंथे पाइब मीश मुर लुक्च लशो इनार खोदेशो बाक्ब। हितोपदेश २२:१४; हितोपदेश ७:१०-१४ 28 मेको खुइ खोदेशो पा लांमी बाप्शा बाक्ब। मिनु हेंथे गाक्ब वोंइश मुर शुश सेल्ब।

29 सु श्येत जाइबा? सु सुर्ता पाइबा? सुम राम्शी पोक्बा? सुम गाली पाइबा? सु बित्चीम गार दुम्बा? सु का आ मिक्च लल जिशो बाक्बा? हितोपदेश २०:१; यसैया ५६:१२ 30 मेको नाक्दो सम्म शुश अडगुर शांबु तूब बाक्नीम। ब्वाइश्शो अडगुर शांबु तूब बाक्नीम। 31 गे लल अडगुर शांबु कोव्रस डा कोव्रस मबाक्को। गिश दारशो बाक्मे, दे मकोव्रडो। मेको रिम्शो पा कोव्रजम लाइब। 32 मिनु मेकोमी नोले बुस्सुमी खोदेशो पा कोक्ब। मेको बीस पाइश्शो कोक्ब बुस्स खोदेशो बाक्ब। 33 मिनु इ मिक्चीमी मार मार ताइनेवे। मिनु दूली लोत्र पाइनेवे। 34 मिनु गे समुन्द्र आ दातेमी इप्शो खोदेशो दुम्नेवे। पला आ डल तारी इप्शो खोदेशो दुम्नेवे। 35 मिनु गे मार देनेवे, देशा हना “आं कली तुप्तीमी, तन्न मखाइक्ड। तुप्तीमी तन्न मतुइक्तु। मुल गेना सेंसीशा, लेंशा तूनुडा?” देनेवे।

24

रुप्ब मुर बोल्यो बाक्नीम

1 मरिम्शो पाइब मुर आन मार मार तशा, गेहे मपने। मिनु मेको नु मबाक्कीन। 2 मारदे हना मेको आन थुंमी हुश खाक्श पोक्चा ला मिम्नीम। मिनु मेकोपुकीमी मरिम्शो आ पर्बम ला लोत्र पाइनीम।

3 तुइक्तीकेमी खिं सेल्सीब। रुप्ब मुरुमी आ खिं सेल्शा रिम्शो पा बाक्ब। 4 जोक्तीकेमी मेको खिं डा कोठापुकी शुश क्येट लाइब नु रिम्शो थोव्रकीमी प्रिंभ। हितोपदेश ३१:१०-३१ 5 बोल्यो लडाइ पाइब आन क्येडा जोक्ब तुइक्ब लडाइ पाइब रिम्शो बाक्नीम। मिनु बोल पाइश्शो मुर आन क्येडा जोक्ब तुइक्ब मुरुमी अधिकार ताइब। 6 मारदे हना रिम्शो लां कोइब बाक्त हना, लडाइ पने चाप्नीनी। अर्ती गेब शुश बाक्तेक्म हना, लडाइ ग्रानीनी। हितोपदेश २०:२८; हितोपदेश ११:१४ 7 मूर्खपुकीमी तुइक्तीके रुप्ने मचाप्नीम। मेकोपुकीमी ठेयब लाप्चो डा ग्रुम्तीकेमी लोत्र पने मचाप्नीम।

8 सुमी काइ मरिम्शो पचा मिम्बा, मेको कली मरिम्शो पाइब देनीम। 9 मूर्ख गेय पाप बाक्ब। मिनु शुक्शी पाइब कली तशा मुर नेल्ल ग्रांग्रा दीनीम। 10 श्येत नाक्ती गोल्चा चिक्ताक्वी हना, इ बोल दोशो बाक्म डा? 11 मुर कली साइक्चा, दे कीशा लाइश्शो ताप्तीवी हना, मेको आन कली प्रोंइथ लावो। मिनु साइक्चा पुंइसीचा चिक्शो कली वारच पावो। भजन संग्रह ८२:४ 12 मिनु गे “गो मेको मतुइक्तु” देंते हना, थुं नाक्बम इ मरिम्शो पशो तुइक्ब। इ कली कोव्रबमी नेल्ल तुइक्ब। मेकोमी मुर आ मरिम्शो पशो डा क्येक्क लेप्ब। 13 आं तौ, खुदो जावो। मारदे हना मेको रिम्शो बाक्ब। चाका रे याप्शो खुदो जीजी पा ब्रोव्रब। 14 मार मिम्चा माल्नेवे देशा हना, जोक्तीक तुइक्तीक इ थुं कली खुदो खोदेशो जिज बाक्ब। मेको ताप्तीवी हना, इ कली नोले सम्म रिम्शो दुम्ब। इ मिम्शो जाक्दीप्ब।

15 गे परमप्रभु यावे आ अरेशो मटीब ठीक पाइब आन खिं खतम पोक्चा कली बाप्शा मबाक्को। मेको ठीक पाइब आ बाक्तीकेमी हुश खाक्श मपोक्को। 16 ठीक पाइब मुरपुकी ७ खेयप गोल्तेक्म हना यो, लेंशा बोक्नीम। तन्न परमप्रभु यावे आ अरेशो मटीबपुकी मबोक्चा डा पा गोल्नीम। भजन संग्रह ३७:२४ 17 इ जोरी सत्रु जाम्शा लाम्तेक्म

हना, मग्येरसो। मेकोपुकी दाइल पा थिस्साक्म हना, मरिस्सो। अय्युब ३१:२९ 18 गे मेको तशा ग्येरसाक्वे हना, परमप्रभु यावेमी इ पशो मदाक्ब। मिनु इ जोरी सत्रु आन पबर्म गाइशशो नाइशशा मेको आन कली वारच पाइब।

19 काइ मरिम्शो पाइब आन पबर्म मगाइक्तो। परमप्रभु यावे आ अरेशो मटीब आन पबर्म गेहे मपावो। भजन संग्रह ३७:१ 20 मारदे हना काइ मरिम्शो पाइब शुश नाक्त मलीनीम। मिनु परमप्रभु यावे आ अरेशो मटीब आन बत्ती काप्शा लाइब। हितोपदेश १३:९ 21 आं तौ, परमप्रभु यावे नु पिप कली मान पा हिनो। मेको आस कली मटीब नु मगाक्को। १ पत्रुस २:१७ 22 मारदे हना मेको आस पतीके रे गे मतुइक्थु श्येत जने चाप्नेवे। मिनु मेको आस खतम पोक्तीक सुम तुइक्बा?

अरु अर्ती

23 एको लोत्र जोक्ब तुइक्ब मुर आन देशो बाक्ब। निसाफ पतीकेमी कुल कोत्रमुचा मरिम्शो बाक्ब। लेवी १९:१५ 24 सुमी पाप पाइब कली “गे ठीक पाइब बाक्नीनी” देंबा, जात जात डा मुरपुकीमी मेको कली सराप पाइनीम। रागी रागी डा मुरपुकी मेको आ पबर्म ग्रांग्रा दीनीम। 25 तन्न सुमी मरिम्शो पाइब कली अरेबा, मेको ग्येरसीनीम। मिनु मेको शुश आसीक ताइनीम। 26 थमा लोत्र लेत्चा, मुर कली पुक्पु पशो खोदेशो बाक्ब। हितोपदेश १५:२३ 27 डोंइती इ लाडगा डा गेय थुमो। इ रूमी मार मार शोक्को। मिनु नोले इ खिं सेलो। 28 गे इ नेक्था डा मुरुम मारेइ मपथु, मेको आ पबर्म सांकछी मबाक्को। गे जोल मपावो। प्रस्थान २०:१६ 29 गे “मेकोम आं कली मार पवा, मेको कली यो मोदेशोन पाइनुड। गो मेको कली क्येक्क लेत्नुड” मदेनो। हितोपदेश २०:२२ 30 गो अल्से मुर का आ रू रे पा लती। निप्स मपाइशशो मुर आ अडगुर रू रे पा कोवना कोवना लती। 31 मिनु गो मार ताता देशा हना, मेको रू नेल्ल चूम सुम्शो बाक्त। खप नेल्ल चूले वाशो बाक्तेक्म। मिनु रू एर ओंथ डा गारो यो ब्रेशो बाक्त। 32 मिनु गो नेल्ल कोवशा, मिम्ताक्ड। मिनु शेंतीक लोत्र का रुप्ता। मार रुप्ता देशा हना, 33 याम का डा इप्चा। याम का डा निन्द्रा पचा। याम का गुइ फिल्मा पा बाक्चामी हितोपदेश ६:९-११ 34 पुडग दुम्तीके नु श्येत जतीके या कुरब मुर खोदेशो पा रीब पा मेको मुर तारी जाक्ब, दे रुप्ता।

25

सोलोमन आ अरु ब्रेक्शो लोत्र

1 एको सोलोमन आ अरु देंतीक लोत्र बाक्नीम। मिनु यहूदा डा पिप हिज्कीयाह आ मुरपुकीमी मेको ब्रेक्शो बाक्तेक्म। हितोपदेश १:१; हितोपदेश १०:१ 2 परमप्रभुमी का निक्शी लोत्र खुइशशा आ सक्ति कोइब। तन्न पिपमी नेल्ल तुइक्पाइशशा, आ सक्ति ठेयब सेल्ब। 3 सरीड गिश ग्येत्थ बाक्बा, रागी गिश लुकच लाइबा नु पिप आ थुंमी मार मिम्बा, मेको सुइमी यो तुइक्ने मचाप्नीम। 4 चांदी यपाइशशा, आ कस गुंडताक्म हना, चेम्बमी रिम्शो थोवक चेम्ने चाप्ब। 5 मोपा पिप आ डोंइती रे परमप्रभु यावे आ अरेशो मटीब आन कली तिलीन। मिनु पिप आ हुकुम पतीके बोल्यो दुम्ब। हितोपदेश १६:१२ 6 पिप आ डोंइती आंम कली ठेयब मसेलो। मिनु पिप आ ठेयब गेय पाइब आन बाक्तीक लचा ममालो। 7 मारदे हना ठेयब आन दातेमी इ कली “याक्सो”, माइक्चा पुंडसीचा क्येडा “एक कुने, निस्सीन” दे ब्रेशो रिम्शो बाक्ब। 8 गे मार मरिम्शो ताप्तीवी हना यो, रीब पा निसाफ पतीकेमी मलावो। मारदे हना इ नेक्था डा मुरुम इ कली मुने तोक्ते हना, मार पाइनेवे। लूका १४:७-११

9 गे इ नेक्था डा मुर नु आंमा रीब पा लोत्र पावो। मेको मुर आ मरिम्शो पशो मफ्रावो। हितोपदेश २०:१९ 10 मिनु इ फ्रशो लोत्र नेबमी इ कली मुने तोक्डे। मिनु इ नें गेना हना यो मरिम्शो लीब। 11 रिम्शो गारचा डा लोत्र पशोनु, चांदी के थालम वोइशशो सुन के स्याउ खोदेशो बाक्ब। हितोपदेश १५:२३ 12 जोक्ब तुइक्ब मुर आ हुइक्तीक लोत्र नेब मुर कली सुन के औंठी नु गहना खोदेशो बाक्ब। 13 थमा लोत्र क्याक्ब मुर, आ होवप कली हुप्शो नाक्त अन्न रुप्ची ना डा फुं खोदेशो पा रिम्शो बाक्ब। मेको लोत्रम आ होवप आ थुं बारपाइक्ब। 14 सु मुरुमी मारेइ मगेथु, गेता, दे ठेयब लोत्र पाइबा, मेको मुर रेउ मयिपाइक्ब गोस्स नु फश खोदेशो बाक्ब। 15 फाल्तीकेमी हुकुम कली बिप्पाइक्ने चाप्नीम। ब्रोवशो लोत्रमी रुश जिक्ने चाप्ब। हितोपदेश १५:१ 16 खुदो थित्तीवी हना, शुश मजावो, इ कली गाप्चा डा पा जावो। मारदे हना शुश जाप्तीवी हना, मेचा कुइक्ब। 17 इ नेक्था डा मुर आ खिं शुश मलावो। मारदे हना मेकोमी इ कली शुश जाक्शो तशा ब्रीब। 18 आंम नेक्था डा मुर कली जोल पा सांकछी गेब मुर कोक्के तरवार नु हेशशो ब्रा खोदेशो बाक्ब। 19 श्येत जशो ना थमा मसुइक्चा डा मुर कली थमा सुइक्चा खाइशशो खुइ नु मदुक्ब खोइल खोदेशो बाक्ब। 20 सुमी थुं खाइशशो मुर आन डोंइती कुम्सो पाइबा, मेको ग्यूमी वा रोइशशो नु गारमी हिक्सी खेक्शो खोदेशो बाक्ब। मिनु वा

खोइक्ब तुम्बु नु शी खोइक्ब बुस्स खोदेशो मेको सुर्ता पाइब मुर आ थुं बाक्ब। 21 इ जोरी सत्रु शोवलु बेक्तेक्म हना, मेको आन कली थुलो। तूतू दाक्तेक्म हना, मेको आन कली ब्वाक्कु तूचा गेवो। रोमी १२:२० 22 मो पाप्तीवी हना, मेको आन पिया तारी ब्रशो कोइला मोइशो खोदेशो दुम्ब। मिनु परमप्रभु यावेमी इ कली इनाम गेब। 23 उत्तर रे पा फशेमी रेउ यिपाइशो खोदेशो पा, खुइशो लोव फ्राइबमी मुर आन कुल राव किकपाइक्ब। 24 गेना हना यो जिचा पोक्ब मीश नु बाक्चा क्येडा खिं आ तला तारी कुना कामी लशा सिक्सी पा बाक्चा रिम्शो दुम्ब। 25 तूतू दाक्ब मुर कली ब्रोवशो ब्वाक्कु खोदेशो पा डोन रागी रे जाक्शो रिम्शो लोव बाक्ब। हितोपदेश १५:२५ 26 ठीक पाइब मुर परमप्रभु यावे आ अरेशो मटीब नु गारत हना, मेको हिलोम बुक्शो ब्वाक्कु नु शुश ग्रांग्रा बाक्शो कुवा खोदेशो बाक्ब। 27 शुश खुदो जचा नु आंम कली ठेयब मिम्शा मान पाइक्चा पुंइसीचा, निम्फा मुर कली मरिम्शो बाक्ब। 28 सुमी आंम कली ठीक पा चलेने मचाप्बा, मेको गारो ब्रेशो सहर खोदेशो बाक्ब। हितोपदेश २९:११

26

मुर आन दाते डा मरिम्शो गेय

1 हुप्शो महिनाम फुं नु अन्न रुप्ची ना रेउ यिशो खोदेशो पा मूर्ख आन कली मान पशो मगारचा डा बाक्ब। 2 फुर फुर पा बेरब भडगेरा नु हुरुर पा बेरब बेल्लुम खोदेशो पा मगारचा डा सराप शोर गाक्शो बाक्ब। 3 शारा कली सिरकाना, गधा कली करेली नु मूर्ख आ ची कली कोक्के माल्ब। हितोपदेश १९:२९ 4 मूर्ख कली मूर्ख खोदेशो पा लोव मलेत्तो। मो पाप्तीवी हना, गे यो मूर्ख दुम्नेवे। 5 मूर्ख कली आ मूर्ख खोदेशो पा लोव मपाप्तीवी हना, मेकोमी आंम कली निप्स पाइशो मिम्सीब। 6 सुम मूर्ख कली लोव चोवथ सोइक्बा, मेकोमी आंम खोइली खोइशो नु हुश खाक्श पोक्शा श्येत जशो खोदेशो बाक्ब। 7 मूर्ख आन देंतीके लोव खोरन्डे मुर आ खोइल खोदेशो पा शोर गाक्शो बाक्ब। 8 मूर्ख कली मान पचा, फुल्लु कली श्येलेमी फ्रेंशा आप्चा माल्शो खोदेशो बाक्ब। 9 शांबु दुक्शो मुर आ गुइमी चू ओवशो खोदेशो पा मूर्ख कली देंतीक लोव बाक्ब। 10 मूर्ख मुर नु लां गाक्ब मुर आन कली गेय पपाइक्चा, हेथे लिब्रा आप्शा गार सेल्ब मुर खोदेशो बाक्ब। 11 कुचुममी मेशा लेंशा जशो खोदेशो पा, मूर्ख मुरुमी मूर्ख गेय लेंशा पना पन बाक्ब। २ पत्रुस २:२२ 12 आंम कली “जोक्ब तुइक्ब मुर नड” दे मिम्ब मुर क्येडा मूर्खन रिम्शो बाक्ब। हितोपदेश ३:७ 13 अल्से मुरुमी “लाडगामी गुप्स का बाक्ब। लां मेर गुप्स हिरशो बाक्ब” देंब। हितोपदेश २२:१३ 14 लाप्चो रोकशो चोक्शो खोदेशो पा, अल्से मुर आ ब्राख्येमी एर ओंथ लोकसीशा इप्ब। हितोपदेश ६:९-११ 15 अल्से मुरुमी आ गुइ खमेम खुम्ब। मिनु मेको गुइ आ शोव सम्म लाइक्चा यो अल्सी पाइब। हितोपदेश १९:२४ 16 शुश रुप्शा लोव लेप्ब ७ जना मुर क्येडा मूर्खमी आंम कली “रुप्ब जोक्ब नड” दे मिम्सीब। 17 सु मुर आन जितीक खेतीकेम ओवबा, मेको लांम गाक्शो कुचुम आ नोफा ग्याइशशा कीशो खोदेशो बाक्ब। 18 दोपा निप्स ग्यशो मुरुमी ब्रशो लिब्रा हेथे पा आप्बा, 19 मोपा आ नेक्था डा मुर कली जोल पशा नोले “गो इ कली शाक्ता ला” देंब। 20 शी मबाक्त हना, मी काप्ब। मोदेशो पा नोफा मुइक्ब मुर मबाक्त हना, जिचा खेचा मबोक्ब। हितोपदेश २२:१० 21 दोपा मी मुइक्चा कली कोइला नु ब्रचा कली शी माल्बा, मोपा रीब पा गाइक्ब मुर जिचा पोक्ब बाक्ब। हितोपदेश १५:१८ 22 नोफा मुइक्ब आन लोव शुश ब्रोवशो जचा थोवक खोदेशो बाक्ब। मेको मुर आन थुं सम्म जाक्दीप्ब। हितोपदेश १८:८ 23 मरिम्शो थुं डा ब्रोवशो लोव खप के बोसुम चांदी खेक्शो खोदेशो बाक्ब। 24 जोरी सत्रुमी शोवमी रिम्शो लोव पाइनीम। तन्न आन थुंमी मरिम्शो मिम्नीम। मत्ती १२:४५ 25 इ जोरी सत्रुमी गे नु ब्रोवशो लोव पाप्तु हना यो, मेको कली थमा मसुतो। मारदे हना मेको आ थुंमी ७ ओटा ग्रांग्रा दिचा डा लोव खुइशशा बाक्नीम। 26 सुमी काइ मदाक्शो मुर कली “गो इ कली दाक्नुड” देंखु पाइबा, मेको आ देंखु पतीके मुर आन गुम्तीकेमी गूब। 27 सुमी मुर पिक्चा, दे खाल्टा दोइबा, मेको आंमान बिक्ब। सुमी मुर कली चिप्पाइक्चा, दे फुल्लु लोक्बा, मेको आंमा लोकसीशा थिशशा लाइब। भजन संग्रह ६:१६; उपदेशक १०:८ 28 जोल पाइबमी सु कली जोल पवा, मेको कली काइ मदाक्ब। मिलो शिलो लोव पाइब मुरुमी नेल्ल खतम सेल्ब।

27

आंम कली ठेयब मसेलो

1 “दीसा पाइनुड” दे ठेयब लेशो लोव मपावो। मारदे हना मेको नाक्त मार दुम्बा गे मतुइक्नेवे। याक्ब ४:१३, १४ 2 अरु मुरुमी इ कली ठेयब सेल्मेक्ल। गे आंमा आंम कली ठेयब मसेलो। अरु आन शोव रे ठेयब देंमल, इ आंम

शोत्रमी “गो ठेयब नड” मदेनो। 3 फुल्लु नु बाल्वा हेल्शो बाक्नीम। तन्न मूर्खमी गेशो श्येत मेको निम्फा आस क्येडा हेल्शो बाक्ब। 4 गाइक्चा मरिम्शो बाक्ब। चुरचा मेको क्येडा मरिम्शो बाक्ब। रुश पतीके कली सु फाल्ने चाप्बा डा? 5 खुइश्शा दाक्चा क्येडा नेल्लेमी तुइक्चा डा पा हुइक्चा रिम्शो बाक्ब। लेवी १९:१७ 6 वारचमी हुइश्शो रिम्शो पचा कली बाक्ब। तन्न मदाक्ब मुर आन पुक्पु पाइश्शो हिंचा डा बाक्ब। भजन संग्रह १४१:५; मत्ती २६:४९ 7 साप्पा रूशो कोव्रजमी खुदो यो मदाक्ब। तन्न शोत्रलु बेक्शो मुर कली मब्रोव्रशो जचा थोत्रक यो ब्रोव्रब। 8 खिं रे डोन लशो मुर ग्योत्र रे डोन बेरशो चिक्ब खोदेशो बाक्ब। 9 ब्रोव्रशो रिना पाइश्शो तेल नु धूपमी मुर आन थुं ग्येरशो सेल्ब। तन्न वारच आ अर्ती मेको क्येडा रिम्शो बाक्ब। 10 इ वारच कली नु इ आफ आ वारच कली मप्रोनो। श्येत जवी ना, इ लोक्ब आ खिं मलावो। मारदे हना डोन बाक्शो लोक्ब क्येडा नेक्था बाक्ब मुर रिम्शो बाक्ब। हितोपदेस १८:२४ 11 आं तौ, जोक्ब तुइक्ब दुमो। मिनु गो ग्येरनुड। मोपा गो इ पर्वम लोत्र पा आं कली आइक्च सेल्ब आन कली लोत्र लेन्ने चाप्नुड। 12 निप्स पाइश्शो मुर श्येत जाक्चा चिक्शो तशा, खुंइसीनीम। तन्न मारेइ मजोक्ब मुरुमी मारेइ मतुइक्थु श्येत जाइनीम। हितोपदेस २२:३ 13 अर्को रागी डा मुर आन पर्वम जमानी दुम्शो मुर, आ वा रोइश्शा लतीन। मुर आ पर्वम जमानी बाक्शो आ मारेइ मारेइ नेल्ले लतीन। हितोपदेस २०:१६ 14 सुमी सुनी कना बोक्शा, आ नेक्था डा मुर कली ठेयब सेंदामी आसीक पाइबा। मेको आसीक ताइबमी “सराप पाइक्ती” देंब। 15 गेना हना यो जिचा पोक्ब मीश रेड यिमेनु तप तप पा याप्ब ब्वाक्कु खोदेशो बाक्ब। हितोपदेस १९:२३ 16 मेको कली अरेचा फश गिवार कली नाइक्पाइक्चा खोदेशो नु ग्युरा गुइमी तेल गुप्चा खोदेशो बाक्ब। 17 फलाममी फलाम कली शेषो खोदेशो पा, मुर कामी अर्को कली शेषब। 18 सुमी फोव्रशी रवा खाल पाइबा, मेकोमी फल जचा ताइब। सुम आ होव्रप कली रिम्शो पा कोव्रबा, मेको मान पाइक्चा पुंइसीब। 19 दोपा ब्वाक्कुम कुल तांइसीबा, मोपा मुर आ थुं दोदेशो बाक्बा, मेको अर्कोम तुइक्बा। 20 बेक्शो मुर आन बाक्तीके नु जाम्शा लतीके गेनायो मरूशो खोदेशो पा, मुर आ मिक्च यो गेनायो मरूब। उपदेसक १:८ 21 चांदी यपाइक्चा कली गारचा डा ग्योब नु सुन यपाइक्चा कली यो गारचा डा ग्योब माल्शो खोदेशो पा, मुर आ पतीक अर्को मुर आन ठेयब सेल्लतीक रे पा तुंइसीब। 22 मूर्ख कली अन्न नु चुम्लुम वोइश्शा तूलीमी चुशा हना यो, आ मूर्खे पचा गेनायो मगूब।

23 इ क्यारश भेडा दोदेशो तांइसीनीमी रिम्शो पा कोव्रडो। इ बी ब्यफ आन कली होस पा कोव्रडो। 24 मारदे हना शोप गेना हना यो मलीब। सिरपेच यो नेल्ल पाला कली मलीब। 25 घांस जाम्शा लाइब। मिनु नक कोच्चा दाप्ब। मिनु पहाड रे घांस खुप्नीमी, 26 पाठा आ ऊन इन कली वा फेक्चा दुम्ब। बोका लेयशा रू ग्याप्ने चाप्नीनी। 27 क्यारश आ दूध इ कली, इ खिं डा मुर आन कली नु इ गेय पाइब आन कली तूचा गाप्ब।

28

परमप्रभु कली टीब ग्येरशो बाक्ब

1 परमप्रभु यावे आ अरेशो मटीब सुइम खेदा मपथु यो प्रोक्नीम। ठीक पाइबपुकी गुप्स खोदेशो पा महिंथु बाक्नीम। यसैया ५७:२१ 2 रागी डा मुरपुकीमी मरिम्शो पाम्तेक्म हना, हुकुम पाइब शुश दुम्नीम। तन्न निप्स पाइश्शो हुकुम पाइब बाक्त हना, गेना हना यो रिम्शो बाक्ब। 3 हुकुम पाइब मुरुमी प्रुडग आन कली दिप्तु हना, मेको बाली नाली बिग्रेब ठेयब रेड खोदेशो बाक्ब। 4 परमप्रभु यावे आ अरेशो प्रोइबपुकीमी अरु अरेशो मटीब आन कली ठेयब सेल्लनीम। तन्न परमप्रभु यावे आ अरेशो टीब मुरपुकीमी मरिम्शो पाइब आन कली तशा, मेको आन पर्वम सुर्ता पाइनीम। 5 मरिम्शो मुरपुकीमी निसाफ पतीके मार बाक्बा, दे मरुप्नीम। तन्न परमप्रभु यावे आ देशो पचा दाक्बपुकीमी नेल्ल रिम्शो पा रुप्नीम। 6 हेंथे गाक्ब, थुं निक्शी पाइश्शो नु शुश क्येट थीब मुर दुम्चा क्येडा रिम्शो थुं पाइश्शो ठीक लां गाक्ब प्रुडग मुर दुम्चा रिम्शो बाक्ब। हितोपदेस १९:१ 7 सुमी परमप्रभु यावे आ अरेशो टीबा, मेको जोक्ब तुइक्ब तौ बाक्ब। सु चहिं शुश जाइब नु दुक्ब मुर आ वारच दुम्बा, मेकोमी आ आफ कली मुने तोक्ब। 8 सुम आ क्येट मुर कली शुश चाइक्ब ताक्चा कली गेबा, मेको आ क्येट प्रुडग आन कली शिशी पाइब मुर कली हेक्ब। 9 सुमी परमप्रभु यावे आ अरेशो लोत्र नेंशा मटीबा, मेको आ परमप्रभु कली पुंइतीक लोत्र यो ग्रान्रा दिशो बाक्ब। हितोपदेस १५:८ 10 सुमी रिम्शो थुं पाइश्शो मुर कली मरिम्शो लां हेंथे गाक्पाइक्बा, मेको आंमा दोशो खाल्टामी बिक्ब। तन्न दोस मताइबपुकीमी रिम्शो ताइनीम। 11 शोप पाइश्शो मुरुमी आंम कली “गो जोक्ब तुइक्ब नड” दे मिम्ब। तन्न निप्स पाइश्शो प्रुडग मुरुमी मेको कली दोदेशो बाक्ब, दे रिम्शो पा तुइक्ब। 12 ठीक पाइबपुकी ग्रामानु, नेल्ल ग्येरसीनीम। तन्न परमप्रभु यावे आ अरेशो मटीबपुकी ठेयब दुम्तेक्म हना, मुरपुकी खुंइसीनीम। हितोपदेस ११:११ 13 सुमी आंम पशो मरिम्शो पतीके

खुइक्बा, मेको सोशो बोशो मदुम्ब। तन्न सुमी आंम पशो मरिम्शो शोव्बा नु प्रोंइबा, मेको शिशी ताइब। भजन संग्रह ३२:३-५; १यूहन्ना १:८-९ 14 परमप्रभु यावे कली मान पा हिंब मुर गेना हना यो ग्येरशा बाक्चा ताइब। तन्न मरिम्शो थुं पाइश्शो मुर श्येत जाइनीम। 15 परमप्रभु यावे आ अरेशो मटीबमी प्रुडग आन कली सासन पाप्तु हना, मेको ग्रीब गुप्स नु प्रेक्शा ग्राम्ब वां खोदेशो बाक्ब। 16 मरुप्ब हुकुम पाइब मरिम्शो दिप्ब मुर बाक्ब। तन्न जोल पा चेम्शो क्येट काइ मदाक्ब मुर शुश नाक्ती ब्रोंइब। 17 सुमी मुर साइक्बा, मेको मबेक्म सम्म प्रोक्शा गाक्चा माल्ब। सुइमी यो मेको कली वारच मपामेक्ल। उत्पत्ती ४:१४ 18 सु गेना हना यो रिम्शो पाइब बाक्बा, मेको रिम्शो बाक्ब। तन्न सु लां निक्शी हेंथे पा गाक्बा, मेको कालेम जाम्शा लाइब। 19 सुमी आंम रूमी गेय पाइबा, मेको मुर आ खिंमी शुश अन्न बाक्ब। शुश लोत्र पा बाक्ब मुर चहिं प्रुडग दुम्शा लाइनीम। 20 थमा सुइक्ब मुर शुश आसीक ताइनीम। तन्न सुम रीब पा क्येट चेम्चा दाक्बा, मेको सजाइ मतथु, मब्रोंइब। हितोपदेश १३:११ 21 कुल कोत्रमुचा मरिम्शो बाक्ब। तन्न मुरुमी आइक्च शोब्ले तचा कली मरिम्शो पाइनीमी कों। हितोपदेश १८:५; ब्यवस्था १:१७ 22 कुंइद मुर रीब पा क्येट थीब दुम्चा दाक्ब। मिनु “नोले थमा पा प्रुडग दुम्नुड” दे मेकोमी ममिम्ब। हितोपदेश २३:४; १तिमोथी ६:९ 23 मिलो शिलो पाइब मुर आन क्येडा मुर कली हुइक्ब नोले मान पाइक्चा पुंइसीब। 24 सुमी आ आम आफ आस मार मार रोइश्शा “आं शोंप बाक्ब” देंबा, मेको खतम पोक्ब आ वारच बाक्ब। मत्ती १५:५ 25 शिम मुरुमी जिचा पोक्ब। तन्न सुमी परमप्रभु यावे कली थमा सुइक्बा मेको आसीक ताइब। 26 सुमी आंम निप्स कली थमा सुइक्बा, मेको मूर्ख बाक्ब। तन्न सु तुइक्तीक थुं डा लां गाक्बा, मेको ब्रोंइचा ताइब। हितोपदेश ३:५-६ 27 सुमी प्रुडग कली गेबा, मेको आंमा यो श्येत मजाइब। तन्न सुमी प्रुडग आन पर्बम शिशी मपाइबा, मेको शुश सराप ताइब। 28 परमप्रभु यावे आ अरेशो मटीबपुकी ठेयब मुर दुम्तेक्म हना, मुरपुकी खुंइसीनीम। मिनु मेको बेक्तेक्म हना, ठीक पाइब मुर सोशा बोशा शुश दुम्नीम।

29

तुप्शो नु हुइश्शोम वारच पाइनीस

1 शुश हुइक्चा पुंइसीशा यो, काइ मटीब दुम्तेक्म हना, मेको आन मतुइक्थु वारच पाइक्चा मपुंइसीथु, खतम दुम्नीम। हितोपदेश १५:१० 2 ठीक पाइबपुकी सासन पाइब दुम्तेक्म हना, मुर नेल्ल ग्येरसीनीम। तन्न परमप्रभु यावे आ अरेशो मटीब मुरुमी सासन पाप्तु हना, मुर श्येत जाइनीम। हितोपदेश ११:१० 3 सुमी तुइक्तीक थुं दाक्बा, मेकोमी आ आफ कली ग्येरपाइक्ब। तन्न तेल्लेम नु गाक्ब मुरुम आ शोंप नेल्ल खेरब। लूका १५:१३, ३० 4 पिप आ ठीक पतीकेमी आ रागी लीब। तन्न मेकोमी शुश तिरो पोक्तु हना, आ रागी खतम सेल्ब। 5 सुमी आ नेक्था डा मुर कली क्युक्शा लोत्र पाइबा, मेकोमी मेको कली ग्याइल दाइश्शो बाक्ब। 6 मरिम्शो पाइब मुर आ मरिम्शो पतीकेमी श्येत जाइब। ठीक पाइब मुर चहिं शुश ग्येरसीशा कुम्सो पाइनीम। 7 ठीक पाइब मुरुम प्रुडग आन कली दोपा ठीक पचा, दे तुइक्नीम। तन्न परमप्रभु यावे आ अरेशो मटीबपुकीमी मारेइ मरुप्नीम। 8 शुक्शी पाइब मुरपुकीमी सहर खल्बल सेल्नीम। तन्न जोक्ब तुइक्ब मुरपुकीमी जिचा खेचा तेक्नीम। 9 जोक्ब तुइक्ब मुर मूर्ख नु निसाफ पतीकेमी लत हना, मेको मूर्खमी जिचा पोक्शा, रिश्शा मगारब। 10 हुश खाक्श पोक्ब मुरुमी दोस मताइब मुर आन कली काइ मदाक्ब। मेकोमी रिम्शो थुं पाइश्शो मुर कली साइक्चा माल्ब। 11 मूर्ख मुरुमी आ गाइक्चा नेल्ल कोंइब। जोक्ब तुइक्ब मुरुम चहिं आ गाइश्शो तेक्शा, मकोइब। हितोपदेश १२:२३; हितोपदेश २५:२८ 12 सासन पाइबमी जोल लोत्र नेंतु हना, मेको आ गेय पाइब नेल्ल परमप्रभु यावे आ अरेशो मटीब दुम्नीम। 13 प्रुडग नु मेको आन कली दिप्ब आन के थोत्रक का गारशो बाक्ब। मेको मार बाक्ब देशा हना, परमप्रभु यावेमी मेको निम्फा आस कली मिक्च ताइब सेल्शो बाक्त। हितोपदेश २२:२; अय्युब ३३:३०; भजन संग्रह १३:४ 14 प्रुडग आन कली ठीक पा निसाफ पाइब पिप आ सासन गेना हना यो लीब। हितोपदेश १६:१२ 15 वोंइश आल आन कली तुप्शा, हुइश्शोनु, जोक्ब तुइक्ब दुम्नीम। मारेइ मशेंशो वोंइश आलम चहिं आ आम कली मुने तोक्ब। हितोपदेश २२:१५; १राजा १:६ 16 परमप्रभु यावे आ अरेशो मटीब मुरपुकी शुश दुम्तेक्म हना, मरिम्शो पतीक बारशा लाइब। तन्न ठीक पाइबपुकीम मेको आन खतम दुम्शो ताइनीम। भजन संग्रह ३७:३५-३६ 17 इ तौ कली रिम्शो पा शेंदो। मिनु मेकोमी इ थुं नाइक्पाइश्शा इ कली ग्येरपाइक्ब। हितोपदेश २३:१३ 18 परमप्रभु यावे आ लोत्र पाइब मुर मबाक्तेक्म हना, मुर नेल्ल हेंथे पाइब दुम्नीम। तन्न मेकोपुकीम आन परमप्रभु यावे आ अरेशो टिम्तेक्म हना, ग्येरसीशो मुर दुम्नीम। 19 इ गेय पाइब कली लोत्रम ला शेंने मचाप्नेवे। मारदे हना

मेकोमी इ लोव्र रूप्तु हना यो मटीब। 20 ममिम्थु लोव्र पाइब क्येडा मूर्खन रिम्शो बाकब। उपदेसक १:२; याकूब १:१९ 21 इ वाइल कली आल रे नम पाइशशा थुलतीवी हना, नोले मरिम्शो दुम्ब। 22 चुरब मुरुमी राम्शी पोक्ब। गाइशशा बाकब मुरुमी शुश मरिम्शो पपाइक्ब। हितोपदेश १५:१८; हितोपदेश २२:२४ 23 मुर आन ठेयब लेशशोमी मेको कली आइक्च सेल्ब। ब्रेम्शो थुं पाइशशो मुर चहिं मान ताइब। 24 खुइ नु वारचु दुम्ब मुरुमी आंम आ कली मदाक्ब। खुइ पचा पुंडसीब मुर आ सराप नेंबमी यो मारेइ मदेब। लेवी ५:१ 25 मुर क्येडा हिंचा ब्वारद खोदेशो बाकब। तन्न परमप्रभु यावे कली थमा सुइक्चा ब्रोंइतीक बाकब। मती १०:२८ 26 शुश मुरुमी सासन पाइब नु गुम्चा दाक्नीम। तन्न परमप्रभु यावे रे मुरपुकीम ठीक निसाफ ताइनीम। 27 ठीक पाइबपुकीमी मरिम्शो पाइब तशा ग्रांग्रा दीनीम। तन्न परमप्रभु यावे आ अरेशो मटीबपुकीमी ठीक पाइब आन कली तशा ग्रांग्रा दीनीम।

30

आगुर आ लोव्र

1 एको मास्सा डा याकेह आ तौ आगुर आ देशो लोव्र बाकब। मेकोमी इथीएल नु उकल कली एको लोव्र पाप्तु। मेकोमी “गो परमप्रभु कली मालना मालन बाक्ती, तन्न मथिदु। उत्पत्ती २५:१२-१४ 2 थमा पा गो मुर आन दातेमी निप्स मपाइशशो मुर दुम्ती। गो नु मुर आन के खोदेशो रुप्तीक मबाक्ब। 3 गो जोक्ब तुइक्ब दुम्चा मशेंसीड। मिनु का ला बाक्शो परमप्रभु यावे कली मतुइक्नुड। 4 सु स्वर्ग लशा, लेशशा यिशो बाक्बा डा? सुम फश कली आ गुइमी ग्याइक्ने चाप्बा डा? सुम समुन्द्र डा ब्वाक्कु कुम्लो पने चाप्बा डा? सुम रागी आ सुर सेला? मेको आ नें मार बाक्बा? मेको आ तौ आ नें मार बाक्बा? गे तुइक्नेवे हना” देनो। अय्युब ३८:२८-३४

5 परमप्रभु आ लोव्र नेल्ल थमा बाक्ब। सु मेकेर लशा खुंडसीबा, मेको कली श्येत रे तेक्ब। भजन संग्रह १२:७ 6 मेको आ लोव्रमी मारेइ यो मतेम्दो। तेम्ताक्वी हना, इ कली हुइशशा, गे जोल पाइब मुर देंचा पुंडसीनेवे। ब्यवस्था ४:२ 7 मिनु “गो इन कली थोव्रक निक्शी पुंडनुड। आं बेक्चा क्येडा डोंइती मेको आं कली गेयीनी। 8 हेंथे पतीके नु जोल पतीक आं क्येडा डोन वोतीन। आं कली प्रुडग मसेल्यीनी नु शुश क्येट थीब यो मसेल्यीनी। आं कली माल्चा डा जचा थोव्रक गेयीनी। तिमोथी ६:६-८ 9 मारदे हना गो नु मारेइ मारेइ बाक्त हना, गो इन कली प्रेंनुड। मिनु ‘परमप्रभु यावे सु बाक्बा?’ देंनुडा कों? मिनु गो प्रुडग दुम्ती हना, खुइ पा आं परमप्रभु आ नें आइक्च सेल्शा मुने तोक्नुडा कों?” देंती। प्रस्थान ५:२

10 गेय पाइब आ पर्वम आ होव्रप नु मरिम्शो लोव्र मपावो। मो पाप्तीवी हना, मेकोमी इ कली सराप पाइब। मिनु गे श्येत जाइनेवे। 11 का निक्शी मुरुमी आन आफ कली सराप पाइनीम। मिनु आन आम कली आसीक मगेनीम। 12 का निक्शी मुरुमी आंम कली “गो गेना हना यो रिम्शो पाइब मुर नड” देंनीम। तन्न मेको आन मरिम्शो पशो मक्याम्सीशो बाक्ब। हितोपदेश २०:९ 13 का निक्शी मुर ठेयब लेशशो बाक्नीम। मेको शुश बोरशो बाक्नीम। 14 का निक्शी मुर आन खुइ तरवार नु छूरी खोदेशो बाक्ब। मेकोपुकीमी प्रुडग आन कली नाक्शा, श्येत जाइब आन कली ब्वाइनीम।

15 मिनु याफे आ तमी निक्शी बाक्नीस। मेको निक्शीमी “गेयी, गेयी” देंनीस। मिनु अरु थोव्रक सां बाक्नीम। मेकोपुकी गेनायो मरूनीम। अर्को ४ ओटा थोव्रक बाक्नीम। मेकोमी गेनायो “मोक्ल” मदेनीम। 16 बेक्शो मुर आन बाक्तीके, आल मथीब कोव्रज, ब्वाक्कु मतशो सोव्रशो रू नु मी, एको ४ ओटा थोव्रकमी गेनायो “गाप्ती” मदेनीम।

17 आफ कली शुक्शी पाइब नु आम कली मटीब मुर आन मिक्च खदीमी कोक्शा गुंडनीम। मिनु गिदपुकीमी ब्वाइनीम। हितोपदेश २०:२० 18 थोव्रक सां बाक्नीम। मेको तशा गो छक लाक्ती। ४ ओटा थोव्रक कली यो रुप्ने मचबु। 19 मेको मार बाक्तेक्म देशा हना, ककाकुली आ सरीडम बेरतीके, रोंगु मेर बुस्स आन गाक्तीके, ठेयब समुन्द्रमी जहाज आन गाक्तीके नु वोंइश मुर नु मीश आल आस लां मेको रुप्ने मचबु। 20 हेंथे गाक्ब मीश मुरुमी जाइब। मिनु आ शोव्र शोप्शा “गो मारेइ मरिम्शो मपड” देंब।

21 मिनु थोव्रक सांमी रागी कली खिंखि पपाइक्नीम। ४ ओटा थोव्रक मेको फाल्ने मचाप्चा डा बाक्नीम। उपदेसक १०:६-७ 22 मेको ४ ओटा थोव्रक मार बाक्तेक्म देशा हना, वाइल पिप दुम्शो, मूर्ख जशा ब्वशा रूशो, 23 मरिम्शो मीश आल कली ग्युंवे पशो नु वाइलीम आ होव्रपोक्म आ पा डा मेको खिं डा होव्रपोक्म दुम्शो, एको ४ ओटा फाल्ने मचाप्चा डा थोव्रक बाक्नीम। ब्यवस्था २४:१-४ 24 रागीम ४ ओटा आइक्च थोव्रक बाक्नीम। तन्न मेकोपुकी थम जोक्ब तुइक्ब बाक्नीम। 25 रकमिक्च शुश बोल मपाइशशो बाक्तेक्म हना यो, आन जचा थोव्रक खुप्ची ना खुप्शा तेलनीम। हितोपदेश ६:६-८ 26 ब्वित्ती खोदेशो जन्तु शुश बोल मपाइशशो बाक्नीम। मो हना यो मेकोमी आन खिं

रोंगुम सेल्नीम। 27 मिनु माले आन के पिप मबाक्ब। मोदेशो बाक्तेक्म हना यो, मेकोपुकी लडाइ पाइब खोदेशो पा तांती खिक्शा गाक्नीम। 28 खोते आन कली गुडम ग्याइक्ने चाम्सीब हना यो, मेकोपुकी पिप आ दरवारमी बाक्नीम। 29 मिनु थोत्रक सां बाक्नीम। मेको ठेयब मुर खोदेशो पा गाक्नीम। मिनु ४ ओटा थोत्रक बाक्नीम। मेको ठेयब लेशशा हिरनीम। 30 मेको मार बाक्नीम देशा हना, गुप्स, जन्तु नेल्ल आन दातेमी नेल्ल क्येडा बोल्यो बाक्ब। मेको सुइ क्येडा महिंब। 31 ठेयब लेशशा गाक्ब भाले, बोका नु आ सेना आन डोंइती गाक्ब पिप बाक्नीम। 32 गे मूर्ख दुम्शा, आंम कली ठेयब सेल्तीवी हना, गे मरिम्शो पचा मिम्शो बाक्ते हना, इ कुल सुम्सो। 33 मिनु दूध खाक्शोनु नौनी घ्यू गूब। नें तुप्शोनु, हुश यीब। मोपान गाइक्चा बोक्त हना, राम्शी बोक्ब।

31

लेमुएल आ देशो लोत्र

1 पिप लेमुएल आ लोत्र। मिनु पिप आ ममामी एको लोत्र पिप कली शेंशो बाक्त। हितोपदेश ३०:१ 2 मेकोमी “आं तौ, गो इ कली मार देनुडा डा? गो इ पबर्म परमप्रभु यावे कली पुंडता। 3 इ बोल मीश मुर आन कली मगेवो। मेको हेंथे गाक्बपुकीमी पिप आन कली खतम सेल्नीम। ब्यवस्था १७:१७; १राजा ११:१,४ 4 लेमुएल, पिप कली अडगुर शांबु तूचा मशिरब। मिनु सासन पाइबमी रकसी काइ तूचा मदुम्ब। हितोपदेश २०:१ 5 ठेयब मुरपुकी तूशा दुक्तेक्म हना, अरेशो लोत्र प्रेंनीम। मिनु श्येत जाइब आन कली निसाफ पतीकेमी दूली पाइनीम। मेको काइ मदुम्ब। 6 खतम दुम्चा चिक्शो मुर आन कली रकसी तूचा गेवो। मिनु अडगुर शांबु थुं लुक्च लशो आन कली गेवो। 7 मोपा तूशा, मेकोपुकीमी आन पुडग दुम्तीके प्रेंनीम। मिनु आन श्येत ममिम्नीम। 8 ब्वाक्ने मचाप्ब नु मग्येरसीशो नेल्ल आन पबर्म ठीक निसाफ पावो। अय्युब २४:१२ 9 श्येत जशो नु पुडग आन कली ठीक निसाफ पशा वारच पावो” देमाक्त।

रिम्शो गेय पाइब मीश मुर

10 रिम्शो गेय पाइब मीश आल सुम थिन्ने चाप्बा डा? मेको हीरा मोती क्येडा शुश क्येट लाइब बाक्ब। हितोपदेश १८:२२ 11 मेको आ वोंइशेमी मेको कली रिम्शो पा थमा सुइक्ने चाप्ब। मिनु आस माल्शो मारेइ मारेइ गाप्ब। 12 मेको ब्रोंइम सम्म आ वोंइश कली रिम्शो पाइब। मरिम्शो गेनायो मपाइब। 13 मेकोमी ऊन नु रुवा खुप्शा, पांइशा शुश गेय पाइब। 14 शुश लेयतीक मारेइ मारेइमी ब्रीशो जहाज खोदेशो पा मेकोमी खिंमी जचा थोत्रक चाक्ब। 15 मेको सुनी कना बोक्शा मार मार जचा तूचा क्येपाइक्ब। आ वाइलीम आन कली मार गेय पचा माल्बा, नेल्ल अरेब। 16 शुश मिम्शा नोले मेकोमी रू का ग्याप्ब। मिनु मेकेर आंमा चेम्शो क्येटीमी अडगुर खुम्ब। 17 मेको आ रिम्शो गेय पतीके आ गुइ बोल्यो बाक्नीम। 18 मेकोमी आ लेयतीक थोत्रक रिम्शो पा लेयसीशो ताइब। नाक्दो आ बत्ती मकाप्ब। 19 मेकोमी प्यूरी लाइशशा, पांइतो पांइब। आ वा आंमा प्रोत्रब। 20 मेकोमी पुडग आन कली वारच पाइब। मिनु श्येत जाइब आन कली आन माल्शो गेब। 21 मेको ग्यू पची ना महिंब। मारदे हना आ मुर नेल्लेमी होशो वा फेक्शो बाक्नीमी। 22 मेकोमी आ ब्रतीक रिम्शो पा सेल्ब। मेको आ फेक्तीक प्याजी रड डा रिम्शो पा किरशो सुती वा के बाक्नीम। 23 मेको आ वोंइश ठेयब मुर दुम्शा, सहर डा ठेयब लाप्चोमी बाक्मेनु, रागी डा खाल्पा आन दातेमी बाक्ब। 24 मेकोमी सुती के फेक्तीक वा सेल्शा लेयब। किप्शुर यो ग्याप्ब लेयब आन कली लेयब। 25 मेको नु सक्ति नु मान ततीके बाक्ब। मेकोमी दीसा मार दुम्बा, दे रिशशा सुर्ता मपाइब। 26 मेकोमी लोत्र पवानु, जोक्ब तुइक्ब लोत्र ला पाइब। मिनु मुर आन कली शिशी पचा कली शेंब। 27 मेकोमी आ खिं डा मुर आन कली रिम्शो पा कोत्रब। गेय मपथु, हेंथे पा मजाइब। 28 मेको आ आलपुकीमी “आंइ आम ग्येरसीशो बाक्ब” देनीम। आ वोंइशेमी यो मेको कली मान पाइब। 29 मेकोमी “शुश मीश मुरपुकीमी रिम्शो पाइनीम। मेको आन क्येडा गे रिम्शो पाइब बाक्नेवे” देंब। 30 मुर आन दारस जोल बाक्ब। मेको दारस जाम्शा लाइब। तन्न परमप्रभु यावे कली मान पा हिंब मीश मुर मान पाइक्चा पुंडसीब। हितोपदेश ११:२२ 31 मेको मीश मुर कली आ गेय पा चेम्शो गेवो। सहर डा ठेयब लाप्चोमी मुर नेल्लेमी मेको कली मान पामेक्ल।

उपदेसक

ब्रेक्ब मुर: सोलोमनम ब्रेक्शो बाक्ब देंसीब।

गेना ब्रेक्शो: सोलोमनमी एको किताब १३० बि. सी. क्येडा डोंइती, आ सासन पशो थुम्ची ना ब्रेक्शो बाक्ब, दे मिम्नीम।

मार ब्रेक्शो: मारेइ मारेइ जाम्शा लाइब। मुर ब्रोंइशो सम्म परमप्रभु आ गेशोम ग्येरशा बाक्चा माल्ब। थमा पा जोक्तीक तुइक्तीक थुं परमप्रभु कली मान पा हिंशा आ देंशो टिशा पचा माल्ब।

नेल्ल जाम्शा लाइब बाक्नीम

1 एको दाऊद आ तौ, यरूसलेम डा पिप आ शेंशो लोव बाक्ब। 2 मेको शेंबमी “जाम्शा लाइनीम, मारेइ मारेइ जाम्शा लाइब बाक्नीम। जाम्शा लाइनीम, नेल्ल जाम्शा लाइब बाक्नीम। 3 मुरुम रागीम श्येत पा गेय पा, मार ताइनीमी डा? नांम दुप्शा श्येत पा गेय पा, मार दुम्बा डा? उपदेसक २:२३ 4 पाला का लाइब। मिनु अर्को पाला जाक्ब। तन्न रागी गेना हना यो लीब। भजन संग्रह १०:३ 5 नां दाप्ब। मिनु नां पेरब। मेको लेंशा आ दाप्तीकेम रीब पा जाक्ब। 6 फश दक्खिन गे पाइब। मिनु उत्तर गे लाइब। मेको गेना हना यो आ हिरतीकेम हिरशा लेप्ब। 7 खोला नेल्ल शाइश्शा समुन्द्रम लाइनीम। तन्न समुन्द्र गेनायो मब्रीब। खोला ते गे शाइक्नीमी, मेक गेन शांडस डा शांडस बाक्नीम। 8 तेकोइ आइदी रे आइक्था सम्म रिम्शो मबाक्नीम। सुइमी देंशा देने मचाप्नीम। कोव्रशा मिक्च गेनायो मरूब। नेंशा नोफा गेनायो मदाइब। भजन संग्रह १०:१०; हितोपदेस २७:२० 9 मार मार दुम्शो बाक्मे, मेको लेंशा दुम्ब। मार पशो बाक्मे, मेको लेंशा पांडसीब। रागीम मारेइ नक मबाक्नीम” देंत। 10 मारेइ आ पबर्म सुइमी “कोव्रडीन, एको नक बाक्ब” देंने चाप्नीमी? मेको दा डोंइती रेन मेकेर बाक्त। मेको साइ डोंइती रेन बाक्त। 11 साइ डोंइती डा मुर आन कली सुइम ममिम्नीम। मिनु मुल जाक्ब मुर कली नोले डा मुरुम यो ममिम्नीम।

जोक्तीक तुइक्तीक जाम्शा लाइब

12 गो, एको लोव शेंबमी यरूसलेममी इस्राएल डा पिप दुम्शा सासन पाता। 13 गो आं जोक्तीक तुइक्तीकेम रागीमी मार मार पांडसीबा, मेको नेल्ल तुइक्चा दाक्ताक्ड। परमप्रभुमी मुर आन कली मोदेशो तुइक्चा माल्तीक थुं गेशा, श्येत गेप्टु। 14 गो रागीमी पशो गेय नेल्ल ताता। मेको नेल्ल जाम्शा लाइब बाक्नीम। मेको फश कली खेदा पशो खोदेशो बाक्ब। 15 मार रोम्सीशो बाक्बा, मेको कली दिंपाइक्ने मचाम्सीब। मबाक्शो थोव्रक हिकने मचाम्सीब। उपदेसक ७:१३

16 गो आं थुंमी “कोव्रडीन, गो आं क्येडा डोंइती यरूसलेममी सासन पाइब नेल्ल आन क्येडा शुश जोक्ब तुइक्ब थुं पाइश्शो मुर दुम्ती। गो मारेइ मारेइ तशा तुइक्ताक्ड। 17 गो जोक्तीक तुइक्तीक रुप्चा, बौला दुम्तीक नु मूर्ख दुम्तीक तुइक्चा थुं पाता। तन्न मेको दा फश कली खेदा पशो खोदेशो ला बाक्त, दे तुइक्ताक्ड। उपदेसक २:१२; उपदेसक ७:२५ 18 मारदे हना शुश जोक्तीक तुइक्तीकेम शुश श्येत जपाइक्ब। गे दोशो जोक्ब तुइक्ब दुम्नीनी, मोशो श्येत जाइनीनी” दे तुइक्ताक्ड।

2

नेल्ल जाम्शा लाइब बाक्ब

1 मिनु गो आंम कली “मुल गो ग्येरसीनुड। मिनु ग्येरसीशो थुं कली कोव्रशा दाक्नुड। तन्न मेको यो जाम्शा लाइब ला बाक्त, दे तुइक्ताक्ड। 2 रिस्सीचा यो मूर्ख गेय बाक्ब। मिनु ग्येरसीशा बाक्शोनु, मार रिम्शो दुम्बा डा? 3 गो आंम कली ग्येरपाइक्चा कली इक्का अडगुर शांबु तूता। मो पडानु आं थुंम बाक्शो जोक्तीक तुइक्तीक मला। मूर्ख आ गेय रुप्चा कली मोदेशो पाता। मिनु गो मुर आन कली इक्का नाक्त रागीम ब्रोंइचा कली रिम्शो गेय मार बाक्बा, दे रुप्चा माल्ता। हितोपदेस ३१:४ 4 गो ठेयब गेय पाता। गो आंम कली खिंपुकी सेल्शा, अडगुर रू यो सेल्तामी। 5 गो फल फुल रूपुकी नु बाक्तीकपुकी यो सेल्शा मेकेर नेल्ल खाल डा फल फुल रवापुकी खुम्तामी। 6 रिम्शो पा बारना बारन लशो रवा आन कली ब्वाक्कु लुक्चा कली ठेयब दोम्ली सेल्तामी। 7 गो वाइलीम वाइलपुकी ग्याप्तामी। आं खिंमी जरमेशो वाइलीम वाइल यो बाक्तेक्म। गो शुश बी ब्यफ नु क्यारश भेडा थुल्तामी। गो आं क्येडा डोंइती यरूसलेमम

बाक्ब सुइ आन के आं के खोइ बी ब्यफ नु क्यारश भेडा मबाक्म। 8 गो आं कली सुन चांदी नु रागी रागी डा पिप रे शुश शॉप तेलतामी। गो कुम्सो पाइब मीश मुर नु वोंइश मुर वोइक्ताक्मी। आंम कली ग्येरपाइक्चा कली शुश मीश चाक्तामी।

9 यरूसलेमी आं क्येडा डोंइती डा मुर नेल्ल आन क्येडा गो ठेयब दुम्ती। आं जोक्तीक तुइक्तीके गो नुन लीत। १राजा १०:२३ 10 गो मार कोव्रचा दाक्डा, मेकोन कोव्रता। आं दाक्शो नेल्ल पाता। मोपा आं पशो गेय नेल्लेमी आं थुं कली ग्येरपाइक्तु। मेको आ श्येत पा पशो गेय रे ताता। 11 मो हना यो मेको आं पशो गेय नेल्ले नु आं मार मार तचा कली श्येत पा पशो गेय नेल्ल कोव्रडुनु, मेको नेल्ल जाम्शा लाइब बाक्तेक्म। मेको नेल्ल फश कली खेदा पशो खोदेशो शोर गाक्शो गेय ला बाक्तेक्म।

तुइक्तीक नु मूर्ख जाम्शा लाइब

12 मिनु गो जोक्तीक तुइक्तीक, निप्स ग्यशो दुम्तीक नु मूर्ख दुम्तीके रुप्चा थुं पाता। पिपम डोंइती थुम्शो गेय आ क्येडा नोले जाक्बम मार पने चाप्बा डा? डोंइती नेल्ल पशो बाक्त। 13 मिनु गो मार ताता देशा हना, दोपा छिडछिड क्येडा छेडछेड रिम्शो बाक्बा, मोपान मूर्ख दुम्चा क्येडा जोक्तीक तुइक्तीक रिम्शो बाक्ब। 14 रुप्ब मुर मारेइ मारेइ ताइनीम। तन्न मूर्ख चहिं छिडछिडमी गाक्नीम। तन्न नोले मेको नेल्ल खाल का पा लाइनीम। 15 मिनु मूर्ख कली दुम्तीक आं कली यो दुम्ब। गो मारदे जोक्ब तुइक्ब दुम्डा? मिनु गो आंमा कली 'मेको यो जाम्शा लाइब बाक्ब' ” देंती। 16 मारदे हना जोक्ब तुइक्ब नु मूर्ख निम्फा आस कली नोले सुइम ममिम्नीम। मेको निम्फा आस कली प्रेंसीब। जोक्ब तुइक्ब दोदेशो पा बेक्बा, मूर्ख यो मोदेशो पा बेक्ब। भजन संग्रह ४९:११ 17 मोपतीके गो ब्रोंइचा मदाक्तु। मारदे हना रागीमी पशो गेय नेल्ल श्येत ला बाक्त। मेको नेल्ल जाम्शा लाइब बाक्तेक्म। मेको फश कली खेदा पशो खोदेशो ला बाक्त।

गेय पशो नेल्ल जाम्शा लाइब

18 रागीमी आं श्येत पशो गेय नेल्ल आन कली गो काइ मदाक्तु। मारदे हना मेको गो आं नोले जाक्ब आन कली प्रोंइचा मालनुड। उपदेसक २:२१; भजन संग्रह ३९:७ 19 मिनु मेको आ नोले जाक्ब जोक्ब तुइक्ब बाक्म कों मूर्ख बाक्म, दोपा तुइक्बा? मो हना यो आ श्येत पा पशो गेय नेल्ले मेको केन दुम्ब। मेको यो जाम्शा लाइब बाक्त। 20 मिनु आं श्येत पा मिम्शा पशो गेय नेल्लेम आं थुं लुकच लत। 21 मारदे हना सुइमी जोक्ब तुइक्ब दुम्शा शुश गेय पाप्तु हना यो, मेको आ पशो नेल्ल अरु मुर आन कली प्रोंइशा वोइक्चा माल्ब। मेको ताइब मुरुमी मेको आ पब्रम मारेइ श्येत मपशो बाक्ब। एको यो जाम्शा लाइब नु थम मरिम्शो बाक्ब। 22 मुरुमी रागीम बाक्शा शुश श्येत गेय पा, मार ताइनीमी डा? 23 मेको नाक्त किंत किंत श्येत जाइनीम। मिनु नाक्दो यो आन थुं नाइक्चा मताइनीम। मेको यो जाम्शा लाइब बाक्ब।

24 मुरुमी जचा, तूचा नु आंम गेयमी ग्येरशा बाक्चा क्येडा लाक्शा अरु मारेइ रिम्शो मबाक्ब। मेको यो परमप्रभु रे जाक्शो तशो बाक्नुड। उपदेसक ३:१२, २२; उपदेसक ५:१७; उपदेसक ८:१५; उपदेसक ९:७ 25 मारदे हना परमप्रभु रे मजाक्त हना, सुम जचा नु रिम्शो पा बाक्चा ताइबा डा? 26 परमप्रभुमी आ दाक्शो मुर कली जोक्तीक तुइक्तीके नु रुप्शा ग्येरतीक थुं गेब। तन्न मरिम्शो पाइब आन कली खुप्तीक नु तेलतीक गेय पपाइक्ब। मिनु नोले मेको नेल्ल आ दाक्शो मुर आन कली गेब। मेको यो जाम्शा लाइब नु फश कली खेदा पशो खोदेशो ला बाक्ब। हितोपदेस १३:२२; हितोपदेस २८:८

3

मारेइ मारेइ आन पतीक ना बाक्ब

1 मारेइ मारेइ के पतीक ना बाक्ब। रागीमी मारेइ मारेइ आन के पतीक ना बाक्ब। उपदेसक ८:६; भजन संग्रह ३१:१६ 2 जरमेतीक ना बाक्ब। मिनु बेक्तीक ना बाक्ब। खुम्तीक ना बाक्ब। मिनु तुलतीक ना बाक्ब। 3 साइक्तीक ना बाक्ब। मिनु सापाइक्तीक ना बाक्ब। प्रेत्तीक ना बाक्ब। मिनु सेलतीक ना बाक्ब। 4 डाक्तीक ना बाक्ब। मिनु रित्तीक ना बाक्ब। रोंका पतीक ना बाक्ब। मिनु सिल पतीक ना बाक्ब। 5 फुल्लु फ्रतीक ना बाक्ब। मिनु मेको खुप्तीक ना बाक्ब। मुप्तीक ना बाक्ब। मिनु ममुप्तीक ना बाक्ब। 6 माल्तीक ना बाक्ब। मिनु साम्तीक ना बाक्ब। वोइक्तीक ना बाक्ब। मिनु ताइक्तीक ना बाक्ब। 7 खाक्तीक ना बाक्ब। मिनु फेरतीक ना बाक्ब। सिक्सी पा बाक्तीक ना बाक्ब। मिनु लोत्र पतीक ना बाक्ब। 8 दाक्तीक ना बाक्ब। मिनु मदाक्तीक ना बाक्ब। लडाइ पतीक ना बाक्ब। मिनु दुशा बाक्तीक ना बाक्ब।

9 गेय पाइबमी आन श्येत पा गेय पशो रे मार ताइनीमी डा? 10 परमप्रभुमी मुर नेल्ल आन कली श्येत डा गेय गेपु। गो मुर मेको गेय पस डा पस तातामी। 11 मेकोमी मारेइ मारेइ आन कली गारपाइशशा सेल्लु। मेकोमी गेना हना यो ब्रोंइशा बाक्तीके मुर आन थुंम वोइक्तु। मो हना यो मेकोपुकीमी परमप्रभुमी डोंइती रे नोले सम्म मार पवा, मेको रुप्ने मचाप्नीम। उपदेसक ८:१७ 12 मुर ब्रोंइमा सम्म ग्येरशा नु रिम्शो पा बाक्चा माल्नीम। मेको क्येडा रिम्शो अरु मारेइ यो मबाक्ब, दे तुइक्नुड। उपदेसक २:२४ 13 परमप्रभु आ दाक्शो मार बाक्ब देंशा हना, मुर नेल्लेमी जशा, तूशा आन गेयम ग्येरशा बाक्मल, देंशो बाक्ब। 14 परमप्रभुमी मार पाइबा, मेको गेना हना यो लीब, दे गो तुइशशो बाक्नुड। मेकेर मारेइ तेम्ने नु गुंइने मचाम्सीब। मुर नेल्लेमी परमप्रभु कली हिंशा मान पामेक्ल, दे मोदेंशो पापु। 15 मार बाक्मे, मेको डोंइती रेन बाक्त। मेको मुल दुम्ब डोंइती रेन बाक्त। मिनु परमप्रभुमी डोंइती दुम्शो लेंशा दुम्पाइक्ब।

रागी डा ठीक निसाफ पतीके

16 मिनु गो रागीम अर्को का यो ताता। मार ताता देंशा हना, ठीक निसाफ पतीक आ पा डा काइ मरिम्शो पतीक बाक्बाक्त। ठीक पतीक आ पा डा जोल पतीक बाक्बाक्त। 17 गो आं थुंमी “परमप्रभुमी ठीक पाइब नु आ अरेशो लोव्र मटीब निम्फा आस कली निसाफ पाइब। मारदे हना मेकोमी मारेइ मारेइ नेल्ल कली नु गेय नेल्ल कली आ पतीक ना सेल्लु। उपदेसक १२:१४ 18 गो आं थुंमी मुरपुकी बस्तु भाव खोदेंशो नकी, दे तुइक्तमेक्ल, दे परमप्रभुमी मेको आन कली नाक्शा कोव्रब” दे यो मिम्ताक्ड। 19 मुर नु बस्तु भाव आन लां खाल का डा बाक्ब। मेको खाल का डा पा बेक्नीम। का दोपा बेक्बा, अर्को यो मोपान बेक्ब। मेको नेल्ल खाल का डा पा सोक्त कीनीम। मुर आन ततीके बस्तु भाव आन क्येडा रिम्शो मबाक्ब। मारदे हना नेल्ल जाम्शा लाइब बाक्नीम। भजन संग्रह ४९:१३,२१ 20 मेको नेल्ल बेक्नीम। मारदे हना मेको नेल्ल खप रे दुम्शो नम। मोपतीके मेको नेल्ल लेंशा खप दुम्नीम। 21 मिनु मुर आन सोक्त चहिं ग्येत्थ नु बस्तु भाव आन सोक्त चहिं खप लुक्च लाइब, दे सुम तुइशशो बाक्बा डा? 22 मोपतीके मुर नेल्ले आंम गेयमी ग्येरसीशा बाक्कीन। मेको नेल्ल क्येडा रिम्शो बाक्ब। मारदे हना मुरुमी आ नोले मार दुम्बा, दोपा तुइक्ने चाप्बा डा?

4

दिप्चा पुंइसीब नु श्येत जाइब

1 मिनु गो रागीम कोव्रडुनु, मेकेर थम मरिम्शो पशो ताता। गो दिप्चा पुंइसीशो आन डाक्शो ताता। मेको आन कली लेम्ब सुइ मबाक्म। मेको मरिम्शो पाइब सक्ति पाइशशो बाक्तेक्म। दिप्चा पुंइसीब आन कली चहिं लेम्ब सुइ मबाक्म। 2 बेक्शो मुर, ब्रोंइशो आन क्येडा ग्येरसीशो बाक्नीम, दे तुइक्ताक्ड। 3 तन्न मेको निम्फा आस क्येडा मुल मजरमेशो मुर ग्येरसीशो बाक्ब। मारदे हना मेकोमी रागीम मरिम्शो दुम्शो मतशो बाक्ब। उपदेसक ६:३

4 मिनु गो मार ताता देंशा हना, मुरपुकी श्येत पा अरु आन कली गेहे पतीके रे जोक्ब दुम्नीम। मेको यो जाम्शा लाइब नु फश कली खेदा पशो खोदेंशो ला बाक्ब। 5 मूर्ख मुर फिम्ला पा बाक्ब। मिनु आ खतम दुम्तीक आंमान चाक्ब। 6 फश कली खेदा पशो खोदेंशो पा, शुश श्येत पा शुश चेम्चा क्येडा, थुं नाइशशा इक्का खोइ चेम्चा रिम्शो बाक्ब। हितोपदेस १५:१६

7 मिनु गो लेंशा रागीम अरु जाम्शा लाइब थोव्रक तातामी। 8 मेको मार ताता देंशा हना तमी तौ नु सुइ लोक्ब मपाइशशो मुर का बाक्त। तन्न मेकोमी शुश श्येत पा गेय पाइबाक्त। आ गेय गेनायो मथुम्थु, आ शोंपोम थुं मनुइबाक्त। मिनु काबु मेकोमी आंम कली “गो मारदे मोदेंशो श्येत डा गेय पना पन बाक्नुड? गो मारदे आंम कली मारेइ रिम्शो मपाइनुडा?” देंत। मेको यो जाम्शा लाइब नु श्येत जतीक ला बाक्ब। 9 मिनु का क्येडा निक्शी दुम्शो रिम्शो बाक्ब। मारदे हना मेकोपुकीमी आंम श्येत पा पशो गेय रे पा रिम्शो ततीक ताइनीम। उत्पत्ती २:१८ 10 दोकका पा का थिस्साक्व हना, मेको आ वारचमी मेको कली पोक्ब। तन्न आबी, का ला दुम्शा थिश्शोनु, पोक्शा वारच पाइब मबाक्त हना, मरिम्शो दुम्ब। 11 मोदेंशो पा मुर निक्शी काथा इप्ताक्स हना, मेको निक्शी जेनीस। तन्न का ला इप्शोनु, दोपा जेचा डा? 12 का कली अरुमी फुइनीम। तन्न निक्शी दुम्ताक्स हना, आंम कली प्रोंइने चाप्नीस। थमा पा पोया सांमी किरशो डोरी रीब पा मब्रोंइक्ब।

रिम्शो दुम्चा यो जाम्शा लाइब

13 अर्ती मनेब खूशो मूर्ख पिप क्येडा जोकब तुड्ग टिटा का दुम्चा रिम्शो बाकब। 14 मेको जेल्खान रे गूशा पिप दुम्शो बाकम कौ? मेको पुड्ग बाकत हना यो पिप दुम्ने चाण्ब। 15 गो रागी डा मुर नेल्ल मेको पिप आ गेय पाइब टिटा आ नोले खोइशो तातामी। 16 मेकोमी शुश मुर आन कली वारच पाप्तु। तन्न मेको क्येडा नोले जाकबपुकी मेको तशा मग्येरसम। मेको थमा पा जाम्शा लाइब नु फश कली खेदा पशो खोदेशो बाकब।

5

परमप्रभु कली मान पा हिनीन

1 परमप्रभु आ खिं लनीनु, मूर्ख आन क्योरशा चढेशो चढेचा क्येडा परमप्रभु आ लोत्र होस पा नेंचा रिम्शो बाकब। मारदे हना मूर्खमी मरिम्शो पचा प्रोइस मजोक्नीम। भजन संग्रह १५:१; यसैया ३३:१४-१६; मत्ती ५:२३-२४; १सामुएल १५:२२ 2 ब्वाकचा कली मचुइक्तीन। परमप्रभु आ डोंइती रीब पा लोत्र मपन। परमप्रभु स्वर्गमी बाकब। गे चहिं रागीम बाक्नीनी। मोपतीके शुश मब्वाक्कीन। 3 दोपा शुश सुर्ता पतीकेम डोमु ताइनीमी, मोपा मूर्खमी शुश लोत्र पाइब। याकूब १:१९; मत्ती ६:७

4 गे परमप्रभु आ डोंइती कसम जनीनु, मेको खाप्चा कली देश मपने। परमप्रभु मूर्ख आन कली तशा मग्येरब। गे इन कसम जशो खाप्पीन। ब्यवस्था २३:२२; १सामुएल १:११,२८; भजन संग्रह ५०:१४ 5 कसम जशा मखाप्चा क्येडा, कसम मजशो रिम्शो दुम्ब। 6 इ लोत्रमी इ कली पाप मपपदल। मिनु परमप्रभु आ खिं डा लोत्र कुरब कली “आं कबल पशो प्रेंदु बाकत” मदेनीन। इ लोत्रमी पतीके परमप्रभु गाइशशा इ गेय नेल्ल खतम पोक्ब। 7 शुश लोत्र नु शुश डोमुमी जाम्शा लाइब सेल्ब। मोपतीके परमप्रभु कली मान पा हिनीन। येरमीया २३:२७-२८

शोंप यो जाम्शा लाइब बाकब

8 राज्य कामी पुड्ग आन कली दिप्शो नु मेको आन कली ठीक निसाफ मपशो ताइतीनी हना, छक मलाक्कीन। मारदे हना मेको आन क्येडा अधिकार पाइशो का बाकब। मिनु मेको नेल्ल आन क्येडा ठेयब अर्को का बाकब। प्रस्थान २३:६ 9 पिपमी रू डा गेय पाइब आन कली अरेशा रिम्शो कोत्रतु हना, मेको रागी रिम्शो दुम्ब।

10 सुमी क्येट दाक्बा, मेको कली क्येटीमी गेनायो मजाक्दीप्ब। सुम शोंप दाक्बा, मेको मुर आ चेम्शोमी गेनायो मरूब। मेको यो जाम्शा लाइब बाकब। हितोपदेस २८:२२; लूका १२:१५

11 शोंप शुश बारमेनु, मेको जाइबपुकी यो बारनीम। मिनु मेको होत्रप कली कोत्रचा डा लाक्शा, अरु मार रिम्शो दुम्बा डा?

12 शुश गेय पाइब मुर दोशो जाप्तु हना यो, निन्द्रा पचा दाक्ब। तन्न शोंप पाइशो मुर आ शुश शोंपोम पतीके मेको कली निन्द्रा मजाक्ब।

13 गो रागीमी थम श्येत लाक्चा डा मरिम्शो पशो का तशो बाक्नुड। मेको मार बाक्ब देशा हना मुरुमी आंमा खतम दुम्चा कली शोंप तेल्लो बाक्ब। मत्ती १९:२२ 14 मेकोमी दोकका पा आ शोंप थुमा नोले, मेको के आल दुम्ब। मेना मेको आ गुइमी मारेइ मबाक्ब। 15 मुर ममा आ कोत्रज रे पा शिश्रा जाक्ब। मिनु मेको दोपा जाक्मे, मोपान लेशशा लाइब। मेकोमी आ श्येत पा चेम्शो मारेइ लाइक्चा मताइब। अय्युब १:२१; भजन संग्रह ४९:१८; १तिमोथी ६:७ 16 एको यो श्येत लाक्चा डा मरिम्शो का बाक्ब। मुर दोपा जाक्बा, मोपान लेशशा लाइब। मिनु मेको कली मार रिम्शो दुम्बा डा? मारदे हना मेको आ पशो श्येत नेल्ल फश खोदेशो दुम्ब। 17 मुरुमी आन ब्रोंइतीक नाक्त सम्म श्येत पा जशा तूशा, हिंशा, रोइ पा, सुर्ता पाइनीम।

18 मिनु गो मार ताता देशा हना, परमप्रभुमी गेशो एको इक्का नाक्ती ब्रोंइतीकेमी रागीम जचा, तूचा नु आंम श्येत पा पशो गेयमी ग्येरसीचा मुर कली रिम्शो बाक्ब। मारदे हना मेकोन, मेको आ भाग बाक्ब। 19 मेको क्येडा लाक्शा परमप्रभुमी मुर आन कली शुश शोंप नु रूपुकी गेब। मिनु मेको कली मेको नेल्ल ताक्चा नु आंम गेयमी ग्येरशा बाक्चा गेब। मेको परमप्रभु आ गेतीक बाक्ब। 20 मेकोमी आ ब्रोंइतीक नाक्त शुश ममिम्ब। मारदे हना परमप्रभुमी मेको कली आ थुंमी ग्येरपाइशशा वोइक्ब। भजन संग्रह ७३:२६

6

परमप्रभुमी मारेइ मारेइ गेब

1 गो रागीमी अर्को मरिम्शो का यो तशो बाक्नुड। मेकोमी मुर आन कली थाम्पा दिप्शो बाक्ब। 2 परमप्रभुमी मुर आन कली शोंप, रू नु मान ततीक गेब। मोपा मेको कली आ दाक्शो पचा कली मारेइ श्येत मदुम्ब। तन्न परमप्रभुम मेको कली मेको ग्येरशा जचा मगेथु, अर्को मुर कली ग्येरशा जचा गेब। मेको यो जाम्शा लाइब बाक्ब। 3 सुइ मुर का के सहे का जना आल बाक्शा, मेको शुश बर्स ब्रोंइशा यो आ चेम्शो जशा मग्येरसीब, रिम्शो पा थिम्चा यो मपुंडसीब। मेको क्येडा शाम्शा लशो आल कली रिम्शो बाक्ब। उपदेसक ४:३ 4 शाम्शा लशो आल जाम्शा लचा कली जरमेसीशो बाक्ब। मिनु मेको छिडछिडमी जाम्शा लाइब। मिनु छिडछिडमीन मेको आ नें सुम्ब। 5 मेकोम गेनायो नां मतशो बाक्ब। मेकोम मारेइ मजोक्शो यो बाक्ब। मो हना यो मेको मुर क्येडा मेको आल आ नाइश्शो रिम्शो बाक्ब। 6 मेको मुर हजार का बर्स ब्रोंइशा यो आ दाक्शो पने मचाप्टु हना, मेको मार नाइक्चा ताइबा डा? मेको नेल्ल मबेक्नीमी डा?

7 मुर आ श्येत पशो नेल्ल आ कोव्रज प्रिंचा कली ला बाक्ब। मो हना यो मेको आ शोव्रलु बेक्तीक गेनायो मनुप्व। उपदेसक १:८ 8 मूर्ख मुर क्येडा जोक्ब तुइक्ब मारम रिम्शो बाक्नीमी? प्रुडग मुर अर्को आन डोंइती रिम्शो पस जोक्शा, मार ताइबा डा? 9 मार मार माल्नुड, दे शुश मिम्चा क्येडा आ तशोम ग्येरसीशा बाक्चा रिम्शो बाक्ब। मेको यो जाम्शा लाइब नु फश कली खेदा पशो खोदेशो बाक्ब।

10 मार बाक्बा, मेको नेल्ल आन नें वोइक्ने थुम्शो बाक्ब। मिनु मुर आ थुंम मार बाक्बा, मेको तुंडसीब। आंम क्येडा बोल्यो मुर कली सुइमी मारेइ देने मचाप्व। अय्युब ९:२-४,३२ 11 मेको शुश लोव्र पाप्टु हना यो, मेको क्येडा शोर गाक्शो बाक्ब। मिनु तेको रिम्शो बाक्बा? 12 मुर इक्का नाक्त ब्रोंइब बाक्ब, मार रिम्शो बाक्मे, मेको सुम तुइक्बा डा? मुर आ नाक्त वांकु खोदेशो पा लाक्ब। मेको बेक्शा लम नोले मार दुम्बा, दे सुम देने चाप्व डा? १इतिहास २९:१५; भजन संग्रह १४४:४

7

नेल्ल क्येडा ठेयब रुप्तीक

1 शुश क्येट लाइब खेक्तीक क्येडा रिम्शो नें ठेयब बाक्ब। मिनु जरमेशो नाक्त क्येडा बेक्तीक नाक्त रिम्शो बाक्ब। हितोपदेस २२:१ 2 भोज जतीक खिंम लचा क्येडा रोंका पशो खिंम लचा रिम्शो बाक्ब। मारदे हना मुर नेल्ल मोदेशो पा लाइनीम। मिनु मुल सम्म ब्रोंइशो मुरपुकीमी मेको आ पबर्म मिम्नीम। 3 रिक्चा क्येडा सुर्ता पचा रिम्शो बाक्ब। मारदे हना सुर्ता पतीकेम थुं कली रिम्शो सेल्ब। 4 जोक्ब तुइक्ब मुर आ थुं रोंका पतीक खिंम बाक्ब। तन्न मूर्ख आ थुं आंम दला दाक्स पतीक खिंम बाक्ब। 5 मूर्ख आ कुम्सो नेंचा क्येडा, जोक्ब तुइक्ब आ हुइश्शो नेंचा रिम्शो बाक्ब। 6 मूर्ख आ रिश्शो, चू चोशानु बुक्शो मी खोदेशो बाक्ब। मेको यो जाम्शा लाइब बाक्ब। 7 थमा पा दिप्वपुकीम जोक्ब तुइक्ब मुर आन कली मूर्ख सेल्नीम। घूसमी मुर आन थुं मरिम्शो सेल्ब। 8 गेय पचा गोशो क्येडा थुम्शो रिम्शो दुम्ब। ठेयब लेश्शो थुं पाइश्शो दुम्चा क्येडा फाल्तीक थुं पाइश्शो दुम्चा रिम्शो बाक्ब। 9 रीब पा मगाइक्तो। मारदे हना गाइक्तीक मूर्ख आन थुंम बाक्ब। याकूब १:१९ 10 गेपुकीम “डोंइती डा नाक्त, मुल डा नाक्त क्येडा मारदे रिम्शो बाक्मा?” दे मदेनीन। मारदे हना जोक्ब तुइक्बपुकीम मोदेशो लोव्र हिल्लो मपाइनीम। 11 जोक्तीक तुइक्तीके किकी पिपी आन गेशो शोंप खोदेशो पा रिम्शो बाक्ब। मिनु मेकोमी ब्रोंइब आन कली रिम्शो पाइब। 12 दोपा क्येटीम मुर आन कली वारच पाइबा, मोपा जोक्तीक तुइक्तीकेम यो मुर आन कली वारच पाइब। मिनु जोक्तीक तुइक्तीकेमी मुर आन कली ब्रोंइचा गेब। हितोपदेस ३:१-२ 13 परमप्रभु आ गेय मिम्तीन। मेको आ रोप्शो थोव्रक कली सुमी दिंपाइक्ने चाप्व डा? उपदेसक १:१५

14 नाक्त रिम्शो दुम्मेनु ग्येरसीन। तन्न नाक्त मरिम्शो दुम्मेनु मिम्तीन। मेको निम्फा परमप्रभुमी सेल्शो बाक्ब। मोपा मुरुमी नोले आंम कली मार दुम्बा, दे मतुइक्नीम।

15 गो आं इक्का नाक्त ब्रोंइतीकेमी ठीक पाइब मुर आ ठीक पशोमी खतम दुम्शो नु मरिम्शो मुर आ मरिम्शो पशोमी शुश बर्स ब्रोंइशो ताता। उपदेसक ८:१४; भजन संग्रह ७३:१२-१४ 16 शुश ठीक पाइब मदुमो। मिनु शुश जोक्ब तुइक्ब यो मदुमो। गे मारदे आंमा खतम सेल्सीनेवे? लूका १८:११-१२ 17 गे परमप्रभु आ अरेशो मटीब नु शुश मूर्ख यो मदुमो। गे मारदे बेक्ची मजाक्थु बेक्चा दाक्नेवे? 18 का कली वोतीन नु अर्को कली यो मप्रोनीन। मारदे हना परमप्रभु कली मान पा हिंब, मेको नेल्ल रे डोन बाक्नीम।

19 जोक्तीक तुइक्तीकेमी जोक्ब तुइक्ब मुर कली सहर डा १० जना हुकुम पाइब आन क्येडा यो सक्ति पाइश्शो सेल्ब।

20 थमा पा रागीमी मारेइ मारेइ ठीक पाइब नु गेनायो पाप मपाइब सुइ मबाक्नीम। भजन संग्रह १४:३

21 मुरपुकीमी देशो लोत्र नेल्ल मनेनो। मो पाप्तीवी हना इ वाइलीमी इ कली सराप पशो नेनेवे। 22 मारदे हना गे गिश खेयप अरु आन कली सराप पवी, मेको इ थुंम बाक्ब।

23 गो मारेइ मारेइ जोक्तीक तुइक्तीकेम नाक्शा कोव्रता। मिनु गो “थमा पा जोक्ब तुइक्ब दुम्नुड” देंती। तन्न रूप्ने मचबु। 24 शुश डोन बाक्ब नु शुश लुकच लशो थोव्रक सुम तुइक्ने चाप्बा डा? 25 मोपतीके गो जोक्तीक तुइक्तीक नु नेल्ल तुइक्चा थुं पाता। मिनु परमप्रभु आ अरेशो मटिचा मूर्ख गेय बाक्ब। मिनु मूर्ख गेयमी निप्स ग्यशो दुम्शो बाक्ब। भजन संग्रह १४:१ 26 मेको बेक्तीक क्येडा मरिम्शो ब्वारद दाइशो खोदेशो मीश मुर बाक्ब। मेको आ थुं थेम्लु नु मेको आ गुइ चहिं पाइक्तीक साडलो बाक्ब। सुम परमप्रभु कली ग्येरपाइक्बा, मेको रे ब्रोंइब। तन्न मेकोमी पाप पाइब कली चहिं आ ग्याइलीम रेप्ब। हितोपदेस २:१६-२२ 27 शेंबमी “गो मार तुइक्त्तु, मेको नेनीन। गो नेल्ल रिम्शो पा तुइक्चा कली नाक्ताक्ड। 28 गो रिम्शो मुर माल्ना माल्न बाक्डानु हजार का वोंइश मुर आन दातेमी मुर का ला रिम्शो पाइब थित्ता। तन्न मीश मुर आन दातेमी का यो मथिदु। 29 परमप्रभुमी मुर आन कली ठीक पाइब सेल्लु। तन्न मुरपुकीम आन दाक्शो पाइनीम” देंत। उत्पत्ती १:२७

8

पिप आ देशो टिने

1 जोक्ब तुइक्ब मुर खोदेशो सु बाक्बा? एको लोत्र आ अर्थ सुम तुइक्बा डा? जोक्तीक तुइक्तीकेमी मुर आन कुल हाक्शो सेल्ब। मिनु मेको आ किक्शो कुल फाइशशा रिम्शो सेल्ब।

2 पिप आ देशो टिवो। मारदे हना गे परमप्रभु आ डोंइती कसम जाप्तीवी। 3 पिप आ बाक्तीक रे गाक्चा कली मचुइक्तो। गे मरिम्शो मपावो। मारदे हना पिपमी मार पचा दाक्बा, मेको पाइब। 4 पिप आ लोत्रमी सक्ति बाक्ब। सुम मेको कली “हजुर, गे मार पनी” देंने चाप्बा? 5 सुम परमप्रभु आ शेंशो टीबा, मेको कली मारेइ मरिम्शो मदुम्ब। मिनु जोक्ब तुइक्ब मुरुमी ठीक गेय पची ना गेय पस जोक्ब। 6 मुरुमी मार मार पाइनीमी, मेको पतीके ना नु निसाफ पची ना बाक्ब। मुर आन मरिम्शो पतीकेम मुर आन कली दिप्ब। उपदेसक ३:१ 7 नोले डा लोत्र सुइमी मतुइक्नीम। मोपतीके सुइम मुर आन कली नोले मार दुम्बा, मेको देंने मचाप्नीम। उपदेसक १०:१४ 8 फश कली तेक्शा वोइक्तीक सक्ति सुइ के मबाक्ब। मोपान आंम बेक्तीक नाक्त्त कली सुइमी तेक्ने मचाक्ब। दोपा लडाइ पची ना सुइ खिं लचा मताइनीमी, मोपान मरिम्शो पतीकेमी मरिम्शो पाइब कली गेनायो मप्रोंइब। 9 गो रागीम पशो नेल्ल कोव्रडुनु, नेल्ल ताता। सक्ति पाइशो मुरुमी अरु आन कली दिप्शा वोइक्नीम।

ठीक पाइब नु ठीक मपाइब

10 मिनु गो परमप्रभु आ अरेशो मटीब मुर थिम्चा पुंइसीशो ताता। ठीक पाइब चहिं परमप्रभु आ सहर रे गुंइचा पुंइसीशो बाक्तेक्म। मिनु सहरमी सुइमी मेको आन कली ममिम्बाक्तेक्म। मेको यो जाम्शा लाइब बाक्ब। 11 मुरुमी मरिम्शो पाप्तु हना, रीब पा सजाइ मताप्तु हना, मेकोमी मरिम्शो पना पन बाक्ब। अय्युब ३५:१५-१६; मलाकी ३:१४-१५ 12 मरिम्शो पाइब मुर सहे का खेयप मरिम्शो पशा यो शुश नाक्त्त सम्म ब्रोंइशा बाक्नीम। मो हना यो परमप्रभु कली मान पा हिंन नु आ डोंइती बाक्ब आन कली रिम्शो दुम्ब, दे गो तुइक्नुड। भजन संग्रह ३७:१८; भजन संग्रह ७३:१७-२६ 13 तन्न परमप्रभु यावे आ अरेशो मटीब आन कली गेनायो रिम्शो मदुम्ब। मिनु शुश ब्रोंइचा यो मताइनीम। मारदे हना मेकोपुकीमी परमप्रभु कली मान पा महिंनीम।

14 रागीम अर्को जाम्शा लाइब गेय का यो दुम्ना दुम्न बाक्ब। ठीक पाइब बाक्नीम। मेकोम परमप्रभु आ अरेशो मटीब खोदेशो पा ताइनीम। मिनु परमप्रभु आ अरेशो मटीब बाक्नीम। मेको ठीक पाइब खोदेशो पा बाक्चा ताइनीम। एको यो जाम्शा लाइब बाक्ब। उपदेसक ७:१५ 15 मोपतीके गे ग्येरसीशा बाक्कीन। मारदे हना रागीमी मुर आन कली जचा तूचा नु ग्येरशा बाक्चा डा लाक्शा, अरु मारेइ रिम्शो मबाक्ब। परमप्रभुमी गेशो ब्रोंइतीकेमी गिश श्येत बाक्त्त हना यो, मेको पने चाप्नीम। उपदेसक २:२४

16 मिनु गो रागीमी मुरपुकीमी मइप्थु नाक्दो नाक्ती गेय पशो कोव्रचा कली नु जोक्तीक तुइक्तीक मार बाक्मे, मेको तुइक्चा कली आं थुं हिरताक्ड। 17 मिनु परमप्रभुमी पशो गेय नेल्ल ताता। रागीम मार दुम्बा, मेको सुइमी तुइक्ने मचाप्नीम। मुरपुकीमी मेको तुइक्चा कली शुश श्येत पाम्तेक्म हना यो, मेको नेल्ल रूप्ने मचाप्नीम। तेकोइ जोक्ब तुइक्ब मुरुमी “गो मेको तुइक्नुड” देंत हना यो, मेकोम थमा पा मतुइशो बाक्ब। उपदेसक ३:११; यसैया ५५:८-९

9

मुर आन दुम्तीक का बाकब

1 एको लोत्र नेल्ल रे पा गो मार मिम्ताकड देशा हना, ठीक पाइब नु जोकब तुइकब आन पतीक मारेइ मारेइ परमप्रभु आ गुइमी बाकबाकत। तन्न मुरुमी आंम कली दाक्तीक नु काइ मदाक्तीक ताइनीम। तन्न मेको मतुइकबाक्तेकम। 2 मारदे हना जाम्शा लतीक नु मरिम्शो दुम्तीके मुर नेल्ल आन कली दुम्ब। ठीक पाइब नु परमप्रभु आ अरेशो मटीब, रिम्शो पाइब नु मरिम्शो पाइब, ग्रान्ग्रा मदिशो नु ग्रान्ग्रा दिशो, चढेतीक चढेब नु मचढेब, पाप पाइब नु मपाइब नु कसम जाइब नु मजाइब, नेल्ल नोले खाल का डा पा जाम्शा लाइनीम। उपदेसक २:१४; अय्युब ९:२२ 3 रागीम दुम्तीक गेय नेल्लेमी मरिम्शो पतीक बाकब। मेको नेल्ल बेक्शा लाइनीम। मुर नेल्ल आन थुं मरिम्शो पतीकेमी ब्रीशो बाकब। मिनु मेकोपुकी ब्रोंइमा सम्म आन थुं हेंथे पतीकेम ब्रीशो बाकब। मिनु मेको नोले मेको बेक्शोपुकी नु बाकथ लाइनीम। उपदेसक ८:११ 4 तन्न ब्रोंइशा बाकबपुकी नु बाकब आन के आस बाकब। बेक्शो गुप्स क्येडा ब्रोंइशा बाकशो कुचुम रिम्शो बाकब। 5 ब्रोंइशा बाकशोपुकीम “गो बेक्नीकी” दे तुइश्शो बाक्नीम। तन्न बेक्शोपुकीम मारेइ मतुइक्नीम। मेको आन कली मारेइ इनाम मबाकब। मेको आन कली मिम्तीक यो जाम्शा लाइब। 6 मेको आन दाक्तीके, काइ मदाक्तीक नु गेहे पतीक नेल्ल जाम्शा लत। मेकोपुकीम रागीम मार दुम्शो बाकमे, मेको मारेइ ममिम्नीम।

7 आंम इ लां गाक्को, इ जतीक थोत्रक ग्येरशा जावो। ग्येरशा इ अडगुर शांबु तूडो। मारदे हना परमप्रभुमी इ पशो गेय दाकब। उपदेसक २:२४ 8 गेना हना यो रिम्शो वा फेक्शा इ ब्रोत्रशो तेल खेक्सो। 9 परमप्रभुमी गेशो इच्का नाकत ब्रोंइशा बाक्तीकेमी आंम दाक्शो मीश नु ग्येरशा बाक्को। मारदे हना रागीमी इ श्येत पा पशो गेय डा भाग मेको बाकब। हितोपदेस ५:१८-१९ 10 इ डोंइती मार गेय बाकमे, मेको इ सक्ति नेल्लेमी पावो। मारदे हना बेक्शो मुर आन बाक्तीकेम मारेइ मिम्तीके, जोक्तीके नु तुइक्तीके मबाकब।

11 गो रागीमी अर्को थोत्रक का यो तशो बाक्नुड। रीब पा दोरब मग्राब। सक्ति पाइश्शो लडाइ पाइबमी लडाइ मग्राब। जोकब तुइकबमी जचा मताइब। शुश निप्स पाइश्शो मुरुमी क्येट मचेम्ब। जोकब मुरुमी मान मताइब। तन्न नेल्लेमी आन गेय पतीक ना नु रागी दोपा बाक्बा, मुर आन गेय दुम्बा देय मदुम्बा मेको ताइनीम। हितोपदेस १६:९ 12 मिनु हिंचा डा श्येत गेना जाक्बा, सुइम मतुइक्नीम। शिशी मपाइब आन ग्याइलीम डांइ रेशो नु ब्वारदम चिक्ब रेशो खोदेशो पा मुरपुकी यो ममिम्थु हिंचा डा श्येत जशा बेक्नीम।

जोक्तीक तुइक्तीक ठेयब बाकब

13 गो रागीमी जोक्तीक तुइक्तीक का यो ताता। मेको थम ठेयब बाकत। 14 साइ डोंइती शुश मुर मबाक्शो आइक्च सहर का बाकत। मिनु मेको कली शुश सक्ति पाइश्शो पिपमी लडाइ तोवा बाकत। मेको सहर कली पुम्शा, गारो डोइक्तीक यो सेला बाकत। 15 मेको सहरमी जोकब तुइकब पुडग मुर का बाक्माकत। मिनु मेकोमी आ जोक्तीक तुइक्तीकेमी मेको सहर कली प्रोना बाकत। तन्न मेको पुडग मुर कली सुइमी ममिम्तमे बाकत। 16 मिनु गो “सक्ति क्येडा जोक्तीक तुइक्तीक ठेयब बाकब” देंती। तन्न मेको पुडग मुर आ जोक्तीक तुइक्तीक कली आइक्च मिम्ताकम। मेको आ लोत्र कली सुइमी यो ममिम्तेम। 17 ठेयब सेंदा पा मूर्ख सासन पाइब आ लोत्र क्येडा, जोकब तुइकब आ ओंखां पा देशो लोत्र टीनीम। 18 लडाइ पतीक या क्येडा जोक्तीक तुइक्तीक रिम्शो बाकब। तन्न पाप पाइब कामी शुश रिम्शो गेय आन कली खतम सेल्ब।

10

मूर्ख नु जोकब तुइकब

1 मिनु दोपा बेक्शो चुरमुमी ब्रोत्रशो रिना पाइश्शो खेक्तीक कली राक्पाइक्बा, मोपा इच्का खोइ मूर्ख दुम्तीकेमी जोक्तीक तुइक्तीक नु मान ततीक नेल्ल खतम पोक्ब। 2 जोकब तुइकब मुर ठीक लांमी गाक्शो बाकब। तन्न मूर्ख मुर दूली लांम गाक्शो बाकब। 3 मूर्ख मुर लांम गाक्मेनु, मारेइ ममिम्ब। मिनु नेल्ल आन कली आ मूर्ख दुम्तीके कोंइब। 4 इ ठेयब मुर इ तशा गाइक्ताक्व हना यो, इ गेय पचा मप्रोनो। सिक्सी पा बाक्शोनु, ठेयब मरिम्शो पशो यो जाम्शा लाइब।

5 गो रागीमी मरिम्शो का तशो बाक्नुड। मेको ठेयब दूली गेय सासन पाइबम ला पने चाप्व। 6 मूर्ख आन कली ठेयब मुर सेल्नीम। तन्न शोप पाइश्शोपुकी आइक्च दुम्शा बाक्नीम। 7 गो वाइलपुकी चहिं शारा डोइश्शा नु सासन पाइब

आ तौ चहिं वाइल खोदेशो पा खोइलीम गाकशो तशो बाकनुड। 8 बिक्तीक दोइब मुर मेको आंमान बिक्ने चापब। मिनु गारो प्रेब कली बुस्सुमी कोक्ने चापब। हितोपदेस २६:२७ 9 फुल्लु खोइक्ब मुर गार दुम्ने चाक्ब। मिनु शी खोइक्ब मुर आ गेय रे श्येत जने चापब। 10 खा महेशो बाक्त हना, मेको कली शुश बोल माल्ब। तन्न जोक्तीक तुइक्तीकेम मेको कली रिम्शो सेल्ब। 11 बुस्स कली लाटा सेल्चा क्येडा डोंइती कोक्तु हना, बुस्स चलेब कली मारेइ रिम्शो मदुम्ब। बजन संग्रह ५८:५-६

12 जोक्ब तुइक्ब मुर ब्वाक्मेनु, मान ताइब। तन्न मूर्ख चहिं आ लोवमीन खतम दुम्ब। 13 मेकोमी डोंइती मूर्ख लोव पाइब। मिनु नोले बौला नु निप्स ग्यशो लोव पाइब। 14 मूर्ख मुर ब्वाक्स डा ब्वाक्स पाइब। मार दुम्बा, सुइम मतुइक्नीम। मेको आ नोले मार दुम्बा, मेको सुम देंने चापबा डा? उपदेसक ५:२; उपदेसक ८:७ 15 मूर्ख आ श्येत पा पशो गेयमी दाइब। मेकोमी सहर लतीक लां यो मतुइक्ब।

16 आबी, तेको रागी डा पिप आल का बाक्बा, तेको रागी डा सासन पाइबपुकीमी सुनी कना भोज जाइनीमी, मेको रागी खतम दुम्शा लाइब। यसैया ३:४; यसैया ५:११ 17 तेको रागीमी रिम्शो खिं डा मुर पिप दुम्बा, मेको रागी ग्येसीशो बाक्ब। मेको रागी डा सासन पाइब भोज जची ना जाइनीम। मेकोपुकी दुक्चा कली ममाइ बोल तचा कली जाइनीम। 18 सुइ मुर अल्से बाक्त हना मेको आ खिं ब्रेपब। मेको फिम्ला पा बाक्त हना, मेको आ खिं यापब। 19 ग्येसीचा कली भोज सेल्नीम। मिनु अङ्गुर शांबुमी मुर कली ग्येपाइक्ब। तन्न मेको नेल्ल पचा कली क्येट माल्ब। बजन संग्रह १०४:१५ 20 इ मिम्तीकेमी यो पिप कली सराप मपावो। शोंप पाइशो मुर कली इ कोठाम सराप मपावो। मारदे हना सरीड डा चिक्बीम इ लोव लद। मिनु बेरशो चिक्बीम इ लोव शेंद।

11

मार पचा माल्ब

1 इ क्येट डोन सोइक्तो। मिनु शुश नाक्त नोले मेको लेंशा ताइनेवे। 2 गे इं के बाक्शो क्येट ७, ८ जना आन कली वोइक्चा गेमी। मारदे हना रागीम दोदेशो ठेयब श्येत जाक्बा, मेको गे मतुइक्नेवे। 3 गोस्सुम ब्वाक्कु ब्रीत हना, मेकोमी रागीम रेउ यिपाइक्ब। रवा दक्खिन गे गोल्लत हना यो, उत्तर गे गोल्लत हना यो, मेको ते गे गोल्ले, मेकेरन लीब। 4 फश कली मिम्बमी गेनायो मशोक्ब। मिनु गोस्स कोव्वबमी गेनायो मखुपब।

5 गे फश ते रे जाक्बा नु ममा आ कोव्वजमी आल दोपा ब्रोंइतीक सोक्त ताइबा, मेको मतुइक्नेवे। मोपा मारेइ मारेइ सेल्ब परमप्रभु आ गेय रुप्ने मचाप्नेवे। यूहन्ना ३:८; भजन संग्रह १३९:१३; उपदेसक ८:१७ 6 गे सुनी इ वांचेर शोक्को। मिनु नाक्दो यो गेय पचा मप्रोनो। मारदे हना मुल शोक्शो नु आपो शोक्शो तेको ग्रेल्बा, मतुइक्नेवे। निम्फा ग्रेल्नीसी कों? मतुइक्नेवे।

ठिटा आन कली अरेशो

7 हाम्सो रिम्शो बाक्ब। मुरुमी नां कली तचा दाक्ब। 8 मुर शुश बर्स ब्रोंइत हना यो, मेको आ ब्रोंइतीकेमी ग्येसेक्ल। तन्न मेकोमी छिडछिड डा नाक्त कली यो मिम्तल। मारदे हना मेको शुश बाक्नीम। मुल दुम्ब मारेइ मारेइ जाम्शा लाइब बाक्नीम।

9 ए ठिटा मुर, गे ठिटा बाक्डेनु ग्येसो। इ थुंमी गे ठिटा बाक्डेनु ग्येपदल। इ तशो नु इ थुंमी मिम्शो आस नोले खोतो। तन्न परमप्रभुमी मेको नेल्ल तुइशशा निसाफ पाइब, दे मिम्तो। उपदेसक २:२४ 10 मोपतीके सुर्ता पतीक कली इ थुं रे पा डोन वोतो। मिनु मरिम्शो नेल्ल इ रां रे डोन वोतो। मारदे हना ठिटा दुम्तीके नु बोल यो जाम्शा लाइब बाक्ब।

12

डोंइतीन पचा माल्ब देशो

1 इ ठिटा बाक्ना बाक्न इ कली सेल्ब कली मिम्तो। श्येत जतीक नाक्ती नु इ खूशो दुम्तीक बर्स जाक्मेनु “गो मेको नाक्त मदाक्नुड” देंचा क्येडा डोंइती मिम्तो। 2 नां नु नाक्त डा छेडछेड कली छिडछिडमी सुम्चा क्येडा डोंइती, तास्ला नु सोरुल ब्राब्रा दुम्चा क्येडा डोंइती नु गोस्सुम रेउ यिपाइशशा लेल्चा क्येडा डोंइती 3 खिं खाल पाइबपुकी खिंखि पाइनीम। बोल्यो मुरपुकी खूशो दुम्नीम। यात हिल्ब मीश मुर शुश मबाक्तीके, आन गेय नाइक्नीम। मिनु झेल रे कोव्वब आन मिक्च ब्राब्रा दुम्ब। 4 मेना लां डा लाप्यो चोक्सीब। यात हिल्शो सेंदा आइक्च दुम्ना दुम्न लाइब। मुरपुकी चिक्ब आन ग्रीशो नेंशा बोक्नीम। मीश आल आन कुम्सो नेल्ल आइक्च सेंदा पा नेंसीब। 5 मुरपुकी लाइशशो

खिं डोइक्चा नु लांम श्येत दुम्बा कों, दे हिंनीमी। बदाम बोइश्शा सिपब। घांस ब्वाइब माले आ कोव्रजमी गेशा गाक्ब। मारेइ ममाल्ब दुम्चा क्येडा डोंइती इ कली सेल्ब परमप्रभु कली मिम्तो। मारदे हना मुर नेल्ल बेक्नीम। मिनु रोंका पाइब लांम गाक्नीम। 6 चांदी के तार ब्रोइक्चा क्येडा डोंइती नु सुन के कचौरा ब्रोल्चा क्येडा डोंइती, खप के गर ब्वाक्कु बुक्तीकेम प्रोल्चा क्येडा डोंइती नु इनार डा गुगील जिक्चा क्येडा डोंइती 7 खप रे बोक्शो फुरक खपीमीन लेत्चा क्येडा डोंइती नु सोक्त गेब परमप्रभु आ बाक्तीकेम सोक्त लेत्चा क्येडा डोंइती परमप्रभु कली मिम्तो। उपदेसक ३:२०; उत्पत्ती ३:१९ 8 शेंबमी “जाम्शा लाइब! जाम्शा लाइब! नेल्ल जाम्शा लाइब बाक्नीम” देंब।

परमप्रभु कली मान पा हिनीन

9 मेको शेंब जोक्ब तुइक्ब मुर ला ममाइ, मेकोमी मुर आन कली जोक्ब तुइक्ब सेल्लु। मेकोमी कोव्रशा नाक्शा, दोदेशो लोव्र बाक्बा, दोपा शुश देंतीक ब्रेक्चा माल्बा, मेको शेंताक्व। 10 मिनु शेंबमी ठीक लोव्र माल्शा गुंइताक्व। मिनु मेकोम मार ब्रेक्ता, मेको ठीक नु थमा बाक्नीम।

11 जोक्ब तुइक्ब आन लोव्र गोठला आन कोक्के खोदेशो बाक्ब। मिनु मेको आन खुप्शो लोव्रपुकी बोल्यो पा थोक्शो कांटी खोदेशो बाक्ब। मेको नेल्ल गोठला का रे पान दुम्शो बाक्ब। यसैया २२:२३ 12 ए आं तौ, मेकेर तेम्शो लोव्र रे होस पा बाक्को। शुश किताब ब्रेक्तीक गेय गेनायो मनुप्ब। मिनु शुश पढेशोनु रां कली दपाइक्ब। 13 नेनो, नेल्ल क्येडा नोले डा लोव्र मार बाक्ब देंशा हना, परमप्रभु कली मान पा हिनो। मिनु मेको आ शेंशो टिवो। मारदे हना मुर नेल्ल आन पचा माल्शो एकोन बाक्ब। ब्यवस्था ६:२ 14 मारदे हना परमप्रभुमी इं पशो रिम्शो नु मरिम्शो गेय नेल्ल नु खुइश्शा पशो नेल्ल निसाफ पाइब। रोमी २:१६; २कोरिन्थी ५:१०

ठेयब कुम्सो

ब्रेक्ब मुर: एको कुम्सो सोलोमनमी ब्रेक्शो बाक्ब।

गेना ब्रेक्शो: सोलोमनमी १५६-१२६ बि. सी. आ सासन पची ना ब्रेक्शो बाक्ब।

मार ब्रेक्शो: एको किताबम शुनाम सहर डा गोठाल्नी मीश आल आ कथा बाक्ब। मेको सोलोमन आ दरवार चाक्चा पुंइसीशो बाक्ब। तन्न मेकोमी सोलोमन आ शोंप नु दारस तशा, यो आ दाक्शो नु ग्युंभे पचा चिक्शो गोठला मप्रोंइथु दाक्ना दाक्न बाक्ब। एको किताबम भाग सां बाक्ब:

१. पिप आ दरवारम वोइक्चा पुंइसीशो, ठेयब कुम्सो १:-३:५ मेकेर डा मीश आलम पिप आ ठेयब दुम्तीके कुम्सो पशो, सोलोमनमी शुलामीथ नु लोव्र पशो आ दाक्शो मुर कली मिम्ना मिम्न बाक्शो,
२. आ दाक्शो गोठला हेरा प्रोंइशो, ठेयब कुम्सो ३:६-८:४ सोलोमनम शुलामीथ कली ग्युंभे पचा मिम्शो शुलामीथम आ दाक्शो गोठला कली मिम्शो सोलोमन आ नोले डा पशो लोव्र
३. आ गोठला कली मप्रोंइथु, आ दाक्तीकेम ग्राशो ठेयब कुम्सो ६:५-८:१४ शुलामीथ खिं लेशशा, दरवार डा शोंप मिम्शो आ दाक्शो गोठलामी शुलामीथ आ सेंदा नेंचा दाक्शो

“पिप ठेयब बाक्ब” दे कुम्सो पशो

1 सोलोमन आ नेल्ल क्येडा ठेयब कुम्सो। 2 मेकोमी आं कली पुक्पु पवल। मारदे हना इन दाक्तीके अडगुर शांबु क्येडा यो रिम्शो बाक्ब। 3 इन खेक्तीक तेल ब्रोव्रशो रिना पाइशो बाक्ब। इन नें ब्रोव्रशो रिना पाइशो तेल मोइशो खोदेशो बाक्ब। मोपतीके मीश आलपुकीमी इन कली दाक्नीमी। 4 गे आं कली लाइय्यीनी। गो रीब पा लय। पिपमी आं कली आ बाक्तीकेम लाइक्ती। गो इन कली तशा ग्येरसीनीकी। गोपुकी अडगुर शांबु क्येडा यो, इन दाक्तीक कली ठेयब सेल्नीकी। मेकोपुकीम गे दारशो दुम्तीके इन कली दाक्नीमी।

आं कली आइक्च ममिम्तीन

5 गो क्येर बाक्ती हना यो, दारशो बाक्नुड। ए यरूसलेम डा तमीपुकी, गो केदार आ ताम्बु नु सोलोमन आ फारतीक वा खोदेशो क्येर बाक्नुड। आं कली आइक्च ममिम्तीन। 6 आं कली क्येर तशा, मकोव्रयीनी। मारदे हना चोक्शो नांमी आं कली क्येर सेल्ती। आं ममा आ तौपुकी गो नु गाइक्तीके आं कली अडगुर रू कोव्रब सेल्तीमी। तन्न गो आंम अडगुर रू कली चहिं मकोव्रडु। 7 ए आं दाक्शो मुर, इन क्यारश भेडा आन कली ते योव्रनीनी? मिनु नाक्त मेको ते नाइक्नीमी? गो मारदे हेंथे गाक्ब मीश मुर खोदेशो पा इन वारच आन बगाल आ नेक्था लचा माल्नुडा?

सोलोमनम शुलामीथ नु लोव्र पशो

8 मीश आल आन दाते डा नेल्ल क्येडा दारशो मीश आल, गे क्यारश भेडा आन गाक्तीक लां खोइशशा, गोठला आन गोठ आ नेक्था इ पाठा आन कली योव्रडो।

9 आं दाक्शो मीश आल, गो इ कली फाराओ आ बग्गी डा नेल्ल क्येडा दारशो छाउरी शारा नु थाप्शो बाक्नुड। 10 गहना पांइसीशो इ चोव्रचो गिश दारशो बाक्ब। सिक्री पांइसीशो इ शुर थम दारशो बाक्ब। 11 गो इ कली सुन नु चांदी खाक्शा सिक्री सेल्नीकी।

12 पिप आ इप्तीकेमी बाक्मेनु, आं तेल थम ब्रोव्रशो रिना पाइक्तु। 13 आं दाक्शो मुर आं कुचु आ दातेम ब्रोव्रशो रिना पाइब मूरेम ब्रीशो थैली खोदेशो बाक्ब। 14 आं दाक्शो मुर एन-गेदी डा अडगुर रूमी वाशो हेन्ना फू खोदेशो बाक्ब।

15 ए, आं दाक्शो मीश आल गे दारशो बाक्नेवे? शुश दारशो बाक्नेवे। इ मिक्च ढुकुर के खोदेशो बाक्ब। 16 ए आं दाक्शो मुर, गे यो दारशो बाक्नेवे। थमा पा दारशो बाक्नेवे। इस ब्राख्ये गिग बाक्ब। 17 इस खिं डा पैद्रा लेबानोन डा लाइशो रवा के बाक्नीम। सला के फलेकम साप्शो बाक्ब।

4

सोलोमन शुलामीथ नु लोत्र पशो

1 आं दाक्शो मीश आल, गे दारशो बाक्नेवे। गे थाम्पा दारशो बाक्नेवे। इ मिक्च इ सुम्तीके आगाम खुइशो डुकुर आ मिक्च खोदेशो बाक्ब। इ चां गिलाद डांडा रे पा ब्रुप्शो क्यारश आन हुल खोदेशो बाक्ब। 2 इ खुइ चां प्रेक्शा चिकशो भेडा आन हुल खोदेशो बाक्ब। मेको नेल्ल आन के जौले पाठा बाक्ब। नेल्ल मोदेशो बाक्नीम। ठेयब कुम्सो ६:५-६ 3 इ शंइच लल डोरी खोदेशो बाक्ब। इ शोत्र थम दारशो बाक्ब। इ सुम्तीके आगाम इ चोत्रचो चेशो दारीम खोदेशो बाक्नीस। ठेयब कुम्सो ६:७ 4 इ शुर दाऊद आ लाइशो खिं खोदेशो बाक्ब। मेकेर हजार का तेक्तीक क्युकशो बाक्नीम। मेको नेल्ल लडाइ पाइब आन तेक्तीक बाक्नीम। 5 इ दूध निकशी क्यारश पाठा खोदेशो बाक्नीस। मेको लिली फू आन दातेमी जोइब किशश आ जौले पाठा खोदेशो बाक्नीस। ठेयब कुम्सो ७:३ 6 ग्यू दुम्चा नु वांकु जाम्शा लचा क्येडा डोंइती, गो ब्रोत्रशो रिना पाइब डांडा नु धूप बाक्शो डांडा लाइनुड। ठेयब कुम्सो २:१७ 7 आं दाक्शो मीश आल गे नेल्लेम दारशो बाक्नेवे। इ के मारेइ मरिम्शो मबाक्ब।

आं दारशो मीश आल, आं ग्युम्ली!

8 आं ग्युम्ली, लेबानोन रे पा गो नु गाक्को। लेबानोन रे पा गाक्को। आमाना डांडा रे पा यीवो। सेनीर आ डर नु हेरमोन डांडा रे पा गाक्को। गुप्स आन पुक्खी नु जोइ आन बाक्तीक डांडा रे पा गाक्को। 9 ए आं समी, आं ग्युम्ली, गे आं कली कोत्रशा, आं थुं खुइ पाप्तीवी। इ माला के गेडा कामीन आं थुं खुइ पाप्तीवी। 10 ए, आं समी, आं ग्युम्ली इ दाक्तीक थम रिम्शो बाक्ब। तेकोइ अडगुर शांबु क्येडा यो, इ दाक्तीक रिम्शो बाक्ब। मस्ला नेल्ल आन क्येडा इ खेक्तीक ब्रोत्रशो रिना पाइशो बाक्ब। 11 इ शोत्र रे फू आ रस खोदेशो याप्ब। ए आं ग्युम्ली, इ लें आगाम दूध नु खुदो बाक्ब। इ वा डा ब्रोत्रशो रिना लेबानोन डा रिना खोदेशो बाक्ब।

12 ए आं समी, आं ग्युम्ली, गे चोक्शा वोइशो रू नु सुशा वोइशो ब्वाक्कु बुक्तीक खोदेशो बाक्नेवे। 13 इ रू दारीम रू खोदेशो बाक्ब। मेकेर नेल्ल क्येडा रिम्शो फल फुल बाक्नीम। हेन्ना बुटा नु ब्रोत्रशो रिना पाइब तेल बाक्नीम। 14 ब्रोत्रशो रिना पाइब तेल, हाव सुप्तीके, सुप्तीक बोट, सिन्कौली, शुश खाल डा ब्रोत्रशो रिना पाइशो धूप रवा, मूरे, ब्रोत्रशो रिना पाइशो शी के रवा नु नेल्ल खाल डा ब्रोत्रशो रिना पाइशो मस्ला बाक्नीम। 15 मेको रू डा ब्वाक्कु बुक्तीक ब्रोत्रशो ब्वाक्कु बुक्तीक बाक्ब। मिनु लेबानोन रे पा शाइशो खोला बाक्नीम।

16 उत्तर डा फश, बोक्को। ए दक्खिन डा फश, कुवो। आं रूमी फश पावो। मेको आ ब्रोत्रशो रिना डोन सम्म जाक्दील्ल। आं दाक्शो वोंइश मुर आ रूमी जाक्ल। मिनु मेकेर डा नेल्ल क्येडा ब्रोत्रशो फल जवल।

5

1 ए आं समी, आं ग्युम्ली, गो आं फल फुल रूमी जाक्ती। गो आं ब्रोत्रशो रिना पाइशो मूरे नु मस्ला खुप्ताक्डमी। गो आं सुरबु चाका नु आं खुदो जाइनुड। गो आं अडगुर शांबु नु आं दूध तूनुड। ए वारचपुकी, जने तूडीन। वारचपुकी दाक्तीकेम दुक्शो खोदेशो दुमीन।

डोमु पा आ गोठला कली माल्शो

2 गो गोलती, तन्न मइम्ड। नेनीन, आं दाक्शो मुरुमी लाप्चो खोकोल पाप्तु। “आं समी, आं दाक्शो मीश आल, आ डुकुर, मारेइ मारेइम रिम्शो बाक्शो मीश आल लाप्चो रोक्को। आं पिया सीतम जिशो बाक्ब। आं चां नाक्दो डा सीतम जिशो बाक्ब” दंत। 3 गो आं वा पुइक्ने थुम्ता। मिनु मार मेको लेंशा फेक्नुडा? गो आं खोइल चिक्ने थुम्ता। मिनु मार मुल लेंशा खप दिम्नुडा? ठेयब कुम्सो ३:१ 4 आं दाक्शो वोंइश मुरुमी लाप्चो रोक्का कली गुइ पिदानु, मेको तशा आं लुङगीर प्रेक्त। 5 मिनु गो आं दाक्शो वोंइश मुर कली लाप्चो रोक्का कली बोक्ती। आं गुइ रे ब्रोत्रशो रिना पाइशो मूरे याप्त। मिनु आं ब्रेप्चो रे ब्रोत्रशो रिना पाइशो मूरे याप्शा आग्लोम लुम्साक्व। 6 मिनु गो आं दाक्शो मुर कली लाप्चो रोक्ता, तन्न मेको गाक्ने थुमा बाक्त। मेको मेकेर मबा। मेको गाक्तीके गो सुर्ता पाता। गो मेको कली माल्ता। तन्न मथिदु। गो मेको कली ब्रेत्ताक्ड। तन्न मेकोम लोत्र मलेत्ती। 7 सहरम हिरशा खाल पाइबपुकीम आं कली थित्तीमी। मिनु मेकोपुकीम आं कली तुप्शा गारै गार सेल्तीमी। गारोम बाक्शा खाल पाइबपुकीमी आं फेक्शो वा यो रोइशला लाइक्तेक्म। 8 ए यरूसलेम डा तमी “गो इन कली ‘गेपुकीम आं दाक्शो मुर कली गुम्तीनी हना, मेको कली इन कली दाक्ब मुर दाक्तीकेम थशो बाक्ब’ देनीन” दंत। ठेयब कुम्सो २:५

9 मिनु मेकोपुकीमी “गे नेल्ल क्येडा दारशो मीश आल, इ दाक्शो वोंइश मुर दोपा अरु आन क्येडा दाक्शो दुम्मे? मारदे मेको इ दाक्शो वोंइश मुर ठेयब दुम्मे? मारदे आंइ कली मोदेशो पा अरेनेवे?” देतेक्म।

10 मिनु १० हजार आन दातेम यो आं दाक्शो मुर नेल्ल क्येडा दारशो नु आ कुल हाक्सीशो बाक्ब। 11 मेको आ पिया क्येख सुन के खोदेशो बाक्ब। मेको आ चां हिरशो नु खद खोदेशो क्येर बाक्ब। 12 मेको आ मिक्च खोला आ नेक्था बाक्ब हुकुर आ मिक्च खोदेशो बाक्ब। मेको दूधमी मुरशा केप्शो हीरा खोदेशो बाक्ब। 13 मेको आ चोव्रचो ब्रोव्रशो रिना पाइब मस्ला खोदेशो बाक्ब। मेको आ शुंइच ब्रोव्रशो रिना पाइशो मूरे याप्ब लिली फू खोदेशो बाक्ब। 14 मेको आ गुइ हीरा केप्शो सुन के खोदेशो बाक्ब। मेको आ रां हात्ती आ दाराम नीलो हीरा क्येप्शो खोदेशो बाक्ब। 15 मेको आ खोइल क्येख सुन के नित्तीक पाइशो बुश थाम खोदेशो बाक्ब। मेको कोव्रशोनु, लेबानोन डा लाइशो रवा खोदेशो पा दारशो बाक्ब। 16 ए यरूसलेम डा मीश आलपुकी, मेको आ शोव्र ब्रोव्रशो लोव्रमी ब्रीशो बाक्ब। मेको थम दारशो बाक्ब। मेकोन आं दाक्शो वोंइश मुर नु आं वारच बाक्ब।

6

1 ए नेल्ल क्येडा दारशो मीश आल, इ दाक्शो वोंइश मुर ते लमे? गो गारशा मेको कली माल्थ लय?

2 आं दाक्शो वोंइश मुर आंम फल फुल रू लत। मेको आ ब्रोव्रशो रिना पाइशो मस्ला रू मेर लत। मेको क्यारश भेडा योव्रचा कली नु लिली फू खुप्चा कली लत। 3 आं दाक्शो वोंइश मुर आं केन बाक्ब। मिनु गो मेको के बाक्नुड। मेकोमी आ क्यारश भेडा लिली फू आन दातेम योव्रब। ठेयब कुम्सो २:१६

सोलोमन आ नोले डा लोव्र

4 आं दाक्शो मीश आल, गे तिरचा सहर खोदेशो बाक्नेवे। यरूसलेम सहर खोदेशो रिम्शो तांइसीनेवे। गे छेदर क्युकशो लडाइ पाइब खोदेशो सक्ति पाइशो बाक्नेवे। 5 इ मिक्चीम आं कली मकोव्रयी। मारदे हना इ मिक्चीम आं कली मार पचा ना मार पचा सेल्ब। इ चां गिलाद डांडा रे पा ब्रुप्शो क्यारश आन हुल खोदेशो बाक्ब। 6 इ खुइ ऊन प्रेक्शा चिक्शो भेडा आन हुल खोदेशो बाक्नीम। मेको नेल्ल आन के जौले पाठा बाक्ब। नेल्ल मोदेशो बाक्नीम। ठेयब कुम्सो ४:१-२ 7 इ सुम्तीके आगाम इ चोव्रचो चेशो दारीम खोदेशो बाक्नीस। ठेयब कुम्सो ४:३ 8 मिनु ६० जना पिपीम बाक्तेक्म हना यो, ८० जना नोले चाक्शो मीश बाक्तेक्म हना यो, नु शुश मीश आल बाक्तेक्म हना यो, 9 आं मीश आल, आं हुकुर, आं नेल्ल क्येडा दारशो मीश आल, आ ममामी दाक्शो तमी बाक्ब। आ ममामी “थम दारशो मीश आल बाक्ब” देंब। मिनु मीश आलपुकीम मेको कली तशा “ग्येरसीशो मीश आल बाक्ब” देतेक्म। पिपीम नु नोले चाक्शो मीशपुकीम मेको कली ठेयब सेल्तेक्म। 10 सुनी खोदेशो पा दारशो, तास्ला खोदेशो पा दाप्शो, नां खोदेशो पा छेडछेड देशो, हिंचा डा लडाइ पाइब खोदेशो सु बाक्बा?

आ मीश आल लशो

11 गो फोरो रवा डा रू मेर दोशो कोच्वा दम्मा, दे कोव्रथ लती। अडगुर बोटमी कोच्वा दम्मा कों, दारीम फू बोइशो बाक्मा कों मबाक्मा, दे कोव्रथ लती। 12 मिनु गो आं तुइक्चा क्येडा डोंइती आं मिम्शोमी आं कली आं दाक्शो मुर आ नेक्था बग्गीम लाइक्ती।

13 शुलामीथ लेशशा पिवो! लेशशा पिवो! लेशशा पिवो। मिनु गो इ कली कोव्रने चाप्कल। गे मारदे शुलामीथ कली लडाइ पाइब आन डोंइती सिल पपाइशो खोदेशो पा कोव्रस डा कोव्रस बाक्चा दाक्नीनी?

7

गे नेल्लेम दारशो बाक्नेवे देशो

1 पिप आ तमी, जुत्ता लिक्शो इ खोइल गिश दारशो बाक्ब। इ क्रातो थाम्पा मार मार सेल्स जोक्बमी सेल्शो खोदेशो बाक्ब। मेको हीरा खोदेशो बाक्ब। 2 इ सपु कुल कुल देशो बोस खोदेशो बाक्ब। मेकेर ब्वाइशो अडगुर शांबुम ब्रीशो बाक्ब। इ कोव्रज लिली फूपुकीमी हिरशो पुक्शो चेरब खोदेशो बाक्ब। 3 इ दूध किशश आ जौले पाठा खोदेशो बाक्नीस। ठेयब कुम्सो ४:३ 4 इ शुर हात्ती आ खुइ के सेल्शो लाइशो खिं खोदेशो बाक्ब। इ मिक्च बाथ-राब्बीम डा लाप्चो आ नेक्था बाक्शो हेशबोन डा दोम्ली खोदेशो बाक्नीस। इ नें दमस्कस सहर गे कोव्रशो लेबानोन डा लाइशो खिं खोदेशो बाक्ब। 5 इ पिया कारमेल डांडा खोदेशो बाक्ब। इ चां पिप आ रड खोदेशो बाक्ब। मोपतीके पिपम इ कली दाक्शो बाक्ब।

6 आं दाक्शो मीश आल, गिश दारशो बाक्नेवे। गे नेल्ल क्येडा दारशो बाक्नेवे। 7 इ रां खजूर रवा खोदेशो बाक्ब। इ दूध अडगुर सिशशो खोदेशो बाक्ब। 8 मिनु गो “गो खजूर रवा डोइक्नुड। मिनु मेको आ राशी ग्याइक्नुड” देंती। इ दूध अडगुर सिशशो खोदेशो नु इ सास स्याउ आ रिना खोदेशो बाक्ब। 9 इ पुक्पु पाइशो ब्रोव्रशो अडगुर शांबु खोदेशो बाक्ब। अडगुर शांबु शोव्र नु खुइ रे ओखां पा शाइशो खोदेशो बाक्ब। 10 गो आं दाक्शो मीश आल के नड। मेकोमी आं कलीन मिम्शा बाक्ब। 11 आं दाक्शो मुर जाक्कीन। मिनु रू मेर हिरथ लस। मिनु नाक्दो गाउं मेर बास बाक्स। 12 गो सुनी कना अडगुर रू लस। अडगुर कोच्वा दाप्शा फू बोइशो बाक्म को? मिनु दारीम फू बोइशो बाक्म को। गो मेकेर इ कली आं दाक्तीक गेनन्नी। 13 आल थिपाइक्ब फलम ब्रोव्रशो रिना फ्रशो बाक्नीम। नेल्ल खाल डा रिम्शो फल आंइ लाप्चो आ तार बाक्नीम। आं दाक्शो मुर, नक नु सोव्रशो फल इ कली खेक्शा वोइशो बाक्नुड।

8

गो आं दाक्शो नु बाक्चा दाक्नुड

1 आं ममामी इ कली दूध तुंइशो आं लोक्ब नवे हना, इ कली लाडगाम गुमुनु, पुक्पु पड वा। मिनु सुइमी आं कली मरिम्शो मदेंम वा। 2 मिनु गो इ कली आं ममा आ खिं, आं जरमेसीशो कोठाम चाक्गु वा। मेकेर लाइशशा ब्रोव्रशो मार मार सुप्शो दारीम शांबु तूचा गेड वा। मेको आं दारीम रे सेल्शो बाक्ब। ठेयब कुम्सो ३:४ 3 मेको आ पेरा गुइ आं पिया आगाम बाक्ब। मिनु मेको आ ग्युरा गुइमी आं कली मुप्शो बाक्ब। 4 ए यरूसलेम डा तमीपुकी, गो इन कली, अरेनुड। आंम दाक्चा क्येडा डोंइती दाक्तीक कली मपोक्कीन। ठेयब कुम्सो २:६-७

आ गोठला कली दाक्तीक सक्ति

5 आंम दाक्शो मुर नु क्येम्सीशा, गोरशो रागी रे जाक्ब सु बाक्बा? गो स्याउ रवा आ पुंमी इन कली सेंताक्ड। मेकेर इन ममामी इन कली कुरतु। मेकेर इन कली थिचा कली आल थितीक रोइ पाप्तु।

6 आं कली इन थुंमी छाप थोक्शो खोदेशो पा वोतीन। इन गुइमी यो छाप थोक्शो खोदेशो पा वोतीन। मारदे हना दाक्तीके, बेक्पाइक्ब खोदेशो पा सक्ति पाइशो बाक्ब। मेको आ दाक्शो तुरस खोदेशो मटीब नु शुश ब्रशो मी क्येडा यो शुश ब्राइब बाक्ब। मत्ती २२:३०; रोमी ७:२; उत्पत्ती २:२४; मत्ती १९:५-६; एफिसी ५:२८-३३ 7 शुश ब्वाक्कुमी दाक्तीक कली क्याम्ने मचाप्ब। बारशो खोलामी यो मेको कली योल्ने मचाप्ब। सुइ मुरुमी आंम दाक्तीक आ पा डा खिं नु आ शोप नेल्ल गेप्तु हना, मुरुमी मेको कली शुक्शी पाइनीम।

आ खिं लेशो

8 इ के आइक्च समी का बाक्ब। मेको आ दूध मुल सम्म मबाक्ब। मेको कली ग्युबे पचा कली पुंइथ जाक्तेक्म हना, गो मार पय? 9 मेको गारो खोदेशो बाक्त हना, मेको तारी चांदी के दरवार सेल्य वा। मेको लाप्चो खोदेशो बाक्शो हना, मेको कली लेबानोन डा लाइशशो रवा आ फलेकमी सुशा वोइ वा।

10 गो गारो खोदेशो नड। मिनु आ दूध लाइशशो खिं खोदेशो बाक्ब। मोपतीके गो मेको कली आ थुं नाइक्पाइक्ब दुम्शो बाक्नुड। 11 सोलोमन के बाल-हामोनमी अडगुर रू का बाक्त। मिनु मेकोम आ रू खाल पाइब मुर आन कली गेवा बाक्त। मिनु मेको बुम्था पाइब नेल्लेमी फल फुल आ पा डा हजार का चांदी के शेकेल थाप्चा माल्बाक्मा बाक्त। शेकेल का ११.५ ग्राम चांदी के क्येट बाक्ब। 12 तन्न आं के यो अडगुर रू का बाक्ब। ए सोलोमन, मेको हजार का चांदी के शेकेल इन केन बाक्ल। मिनु सहे निक्शी शेकेल चहिं मेको फल फुल खाल पाइब आन के बाक्ल।

आं कली ला माल्शा ब्रेत्तो

13 अडगुर रूमी बाक्ब आं वारचपुकीम इ सेंदा नेंचा दाक्नीम। इ सेंदा आं कली नेंपाइय्यी। 14 आं दाक्शो मुर गे रीब पा मस्ला बाक्शो डांडा डा किशश खोदेशो नु ठिटा रोकोश खोदेशो दुमो।

यसैया

ब्रेक्ब मुर: एको किताब यसैयामी ब्रेक्शो बाक्त। का निक्शी मुरुम चहिं रे अर्को मुर काम ब्रेक्शो बाक्त देंनीम। मारदे हना मस्सीह आ पर्वम ब्रेक्शो लोत्र बाक्ब। तन्न परमप्रभु यावे आ सोक्तीम मेको लोत्र पपाइक्ब। मेको ब्रेक्ब यसैया आंमा यो दुम्ने चाप्ब।

गेना ब्रेक्शो: यसैया पिप उसीजाह ७४०-७३९ बि. सी. परमप्रभु यावे आ लोत्र पाइब दुम्शा ब्रेक्शो बाक्त। आ नोले डा ब्रेक्स पिप सन्हेरीब आ लडाइ पचा आ पर्वम बाक्ब। मेको ७०१ बि. सी.म बाक्शो बाक्त। यसैया ४० बर्स परमप्रभु यावे आ लोत्र पाइब बाक्शो बाक्त। मेकोमी पिप उज्जीयाह ७६७-७४०/३९ बि. सी., पिप योथाम ७४०/७३९-७३२/३१ बि. सी., पिप आहास ७३२/३१-७१६/१५ बि. सी. नु पिप हिज्कीयाह ७१६/१५-६८७/८६ बि. सी. आन सासन पची ना गेय पशो बाक्त।

मारदे ब्रेक्शो: यसैया आ लोत्र:

१. मेना बाक्शो मुर आन कली बाक्त। यसैया १:- ३९:-
२. मस्सीह, येसु ख्रीस्त आ पर्वम बाक्त। यसैया ४०:- ५५:-
३. रागी नेल्ल क्येडा नोले मार दुम्बा मेको आ पर्वम लोत्र। यसैया ५६:- ६६:-

डोंइती डा लोत्र

१ परमप्रभुमी आमोज आ तौ यसैया कली कोंइशो लोत्र एको बाक्ब। मार लोत्र कोंइशो बाक्त देशा हना, यहूदा नु यरूसलेम आस पर्वम तशो कोंइताक्ब। मेना पिप उज्जीयाह, योथाम, आहाज नु हिज्कीयाहमी सासन पशो बाक्तेक्म। २इतिहास २६:२२

यहूदाम परमप्रभु आ अरेशो मटिशो

२ सरीड नु रागीम बाक्बपुकी नोफा दाइश्शा नेनीन। मारदे हना परमप्रभु यावेमी “गो आं आल आन कली थुल्शा, कोल्पाइक्तामी। मेकोपुकीम चहिं आं कली मटीयीमी। ब्यवस्था ३२:१; ब्यवस्था ३२:५-६ ३ ब्यफोमी आ होत्रप कली तुइक्ब। गधामी आ होत्रप आ शुंगु तुइक्ब। तन्न इस्राएल डा मुर मतुइक्ब बाक्नीम। आं मुर मरुप्ब बाक्नीम।

४ आबी, पापम ब्रीशो रागी, मुरपुकी मरिम्शो पतीकेम ब्रीशो बाक्नीम। मेको आन आल काइ मरिम्शो पाइब दुम्तेक्म। मेकोपुकी शोर गाक्शो बाक्नीम। परमप्रभु यावे कली प्रोंइशो बाक्नीम। इस्राएली आन का ला बाक्शो परमप्रभु आ पर्वम ‘ममाल्नीकी’ देशो बाक्नीम। मेकोपुकी नोले शोंइसीशो बाक्नीम।

५ मारदे गो इन कली लेंशा, तुप्चा माल्डा? मारदे गे डोंइती क्येडा मटीब दुम्नी। इन पिया नेल्ल रोइ पशो खोदेशो बाक्ब। गे थशो खोदेशो बाक्नीनी। येरमीया २:३० ६ पिया रे खोइल सम्म तेइ सेस मबाक्ब। राक्शो गार नु तुप्शा हुश यिशो गार ला बाक्नीम। मेको नेने मपुक्शो, मफ्रेंशो नु तेल मखेक्शो बाक्नीम। ब्यवस्था २८:३५

७ इन रागी गोरशो रागी दुम्ब। इन डोंइती इन सहर मीम क्रोइक्तेक्म। इन डोंइती इन रू डा मारेइ मारेइ अर्को रागी डा मुरपुकीम नेक्तेक्म। मिनु मेकोपुकीम इन रागी लडाइम खोदेशो पा ग्रांग्ये माग्ये सेल्लेक्म। ८ सियोन आ तमी, यरूसलेम, चहिं अडगुर रू खाल पतीक खिं, वोबीस रू खाल पतीक गोठ नु एर ओंथ रे जोरी सत्रुम पुम्चा पुंइसीशो सहर खोदेशो बाक्ब” दे लोत्र पाप्नु। ९ मुर नेल्ल आन परमप्रभु यावेमी “का निक्शी मुर महेंशो हना, गेपुकी सोदोम नु गोमोररा खोदेशो दुम्नी वा” देंत। उत्पत्ती १९:२४-२५; रोमी ९:२९

१० सोदोम डा सासन पाइबपुकी, परमप्रभु यावे आ लोत्र नेनीन। गोमोररा डा मुरपुकी आंइ परमप्रभु आ शेंशो लोत्र नेनीन। ११ परमप्रभु यावेमी “इन शुश चढ़ेशो आं कली शोर गाक्शो बाक्ब। गो चोशा चढ़ेशो सांड नु थुल्शो बस्तु भाव आन बोंसोमी रूती। गो ब्यफ, पाठा नु क्यारश आन हुश मदाक्नुड। भजन संग्रह ४०:७-९; हितोपदेस १५:८; येरमीया ६:२०; आमोस ५:२२

१२ गे आं डोंइती जाक्शा, मोदेशो चढ़ेचा, दे सुम देम? आं लाडगा मथेक्तीन। १३ इन चढ़ेतीके मचाक्कीन। इन धूप चढ़ेशो तशा, गो ग्रांरा दीती। औसी नु नाइक्तीक नाक्ती डा गुम्तीके डा मरिम्शो पाइब आन हुल तचा मदाक्नुड। गन्ती १०:१० १४ इन औसी नु अरु चाडपुकी काइ मदाक्नुड। मेको आं थुंम ग्रांरा दिप्ब। मेको आं कली श्येत बाक्नीम। गो फाल्ने मचाप्नुड। १५ इन गुइ क्युक्शा, गो नु लोत्र पनीनु, आं कुल खुइक्नुड। गेपुकीम शुश पुंइतीनी हना यो, गो

मनेनुड। मारदे हना इन गुडम हुश खाक्श पशो बाक्ब। हितोपदेस १:२८; हितोपदेस १५:२९; यूहन्ना ९:३१ 16 गेपुकी चिक्सीन। ग्रांग्रा मदिशो दुमीन। मिनु आं डोंइती इन नाक्ती किंत किंत डा मरिम्शो पतीके प्रोनीन। 17 रिम्शो पचा शेंसीन। ठीक निसाफ पतीक मालीन। दिप्चा पुंडसीशो आन कली वारच पने। रोम रोइक्च आन कली वारच पने। वोंइश बेक्शो मीश मुर आन कली वारच पतीन” देत। येरमीया ७:५-६

18 मिनु परमप्रभु यावेमी “जाक्कीन, गोपुकी बुक्शा, लोव्रसी पय। इन पाप हुश खोदेशो लल बाक्त हना यो, फुं खोदेशो बुश दुम्ब। शुश लल बाक्त हना यो, मेको ऊन खोदेशो बुश दुम्ब। यसैया ४४:२२; भजन संग्रह ५१:९ 19 आं लोव्र नेंशा टीतीनी हना, एको रागी डा ब्रोव्रब्रोव्रशो थोव्रक जचा ताइनीनी। लेवी २५:१८-१९ 20 तन्न आं लोव्र मनेतीनी नु मटीतीनी हना, तरवारम क्योरचा पुंडसीनीनी” दे परमप्रभु यावेमी देत। लेवी २६:२५

खतम दुम्शो सहर

21 परमप्रभु यावेमी “आं थमा सुइशो सहर दोपा तेल्लेम दुम्मे? ठीक निसाफ नु ठीक पतीके मेको नु बाक्त। मुल मेको मुर साइक्ब मुरुम ब्रीतेक्म। 22 इ चांदी पुलु खोदेशो दुम्त। इ ब्रोव्रशो अडगुर शांबुम ब्वाक्कु ब्वाइक्ताक्म। इजीकीएल २२:१८-२२ 23 इ सासन पाइबपुकी मटीब नु खुइ आन वारच दुम्शा, घूस जशा, क्येट ताक्चा दाक्नीम। मेकोपुकीम रोम रोइक्च आन कली ठीक निसाफ मपाइनीम। वोंइश बेक्शो मीश मुर आन लोव्र मनेनीम” देत।

24 मोपतीके परमप्रभु, मुर नेल्ल आन परमप्रभु यावे, इस्राएली आन सक्ति पाइशो परमप्रभु यावेमी “गो आं जोरी सत्रु आन तारी आं गाइशो मोइशशा, क्येक्क लेत्नुडमी। 25 गो इन पबर्म आं गुइ क्युक्नुड। गो इन मरिम्शो पतीके पुलु खोदेशो पा फिक्शा, इन ग्रांग्रा दिशो नेल्ले गुंइनुड। भजन संग्रह ११९:१९ 26 मिनु गो इ निसाफ पाइब, सासन पाइब नु अर्ती गेब आन कली डोंइती डा खोदेशो सेल्नुड। नोले इ कली ‘ठीक पाइब नु परमप्रभु कली मप्रोंइब सहर’ दे नें वोइक्नीम। जकरिया ८:३

27 मिनु सियोन ठीक निसाफ पतीकेमी पाप रे प्रोंइचा पुंडसीब। सहरम बाक्ब ठीक पतीकेमी पाप रे प्रोंइचा पुंडसीनीम। यसैया ४६:३३ 28 तन्न परमप्रभु यावे आ देशो लोव्र मटीब, मेको कली प्रोंइबपुकी कालेमीन खतम दुम्नीम। परमप्रभु यावे कली प्रोंइबपुकी क्याम्चा पुंडसीनीम। 29 गे रवा आगाम पूजा पशो आ पबर्म मुने दोक्नीनी। इन दाक्शा योव्रशो रवा रू आ पबर्म शुश मुने दोक्नीनी। यसैया ५७:५; यसैया ६५:३ 30 गे सोव्रशो रवा डा सफा पाइशो नु ब्वाक्कु मतशो रू खोदेशो दुम्नीनी। 31 बोल्यो मुर झुलो खोदेशो दुम्ब। मेको आ गेय मी आ झिल्ला खोदेशो दुम्ब। मेको निम्फा कालेमीन ब्रसानु, सुइम मकाप्नीम” देत।

2

परमप्रभु आ नोले डा राज्य

1 आमोज आ तौ यसैयामी यहूदा नेल्ल नु यरूसलेम आ पबर्म कोंइशो नु तशो लोव्र एको बाक्ब। 2 नोले डा नाक्ती परमप्रभु यावे आ खिं सेल्लो डांडा, डांडा नेल्ल आन क्येडा लाइशो दुम्ब। पहाड नेल्ल आन क्येडा यो लाइशो दुम्ब। मिनु रागी रागी डा मुर नेल्ले मेको डांडाम जाक्नीम। मीका ४:१-३; यसैया १९:२३; येरमीया ३:१७ 3 रागी रागी डा शुश मुर जाक्शा “जाक्कीन, गोपुकी परमप्रभु यावे आ डांडा डोइशशा, याक्ब आ परमप्रभु आ खिं लय। मेकोमी इं कली आ लां शेंब। मिनु गोपुकी मेको आ लांम गाक्नय। मारदे हना परमप्रभु यावे आ शेंशो सियोन डांडा रे नु आ लोव्र यरूसलेम रे नेंसीब” देंनीम। ब्यवस्था ४:६; यूहन्ना ४:२२ 4 मिनु मेकोमी रागी रागी डा नु जात जात डा मुर आन कली निसाफ पाइब। मिनु मेकेर डा मुर आन कली अरेब। मेकोपुकीमी आन तरवार चेम्शा, फाली सेल्नीम। आन तूतीक चहिं गुये सेल्नीम। रागी का डा मुर अर्को रागी डा मुर नु लडाइ मपाइनीम। लडाइ पचा मशेंसीनीम। यसैया १:४

मूर्ति पूजा पाइबपुकी

5 याक्ब आ खिं डा मुर जाक्कीन। गोपुकी परमप्रभु यावे आ छेडछेडम गाक्क। 6 याक्ब आ खिं डा मुर, गे इन डोंइती डा लां प्रोंइतीनी। गे इन थुं पूब डा मुर आन पतीक गेयम ब्रीशो बाक्ब। गे पलिस्ती खोदेशो पा लिंक्कु कोव्रब दुम्तीनी। अर्को जात डा मुर नु खाल्साक्नी। 7 मेको आन रागी सुन चांदीम ब्रीशो बाक्ब। मेको आन शोंप हिक्ने मचाप्चा डा बाक्ब। मेको आन रागीमी शुश शारा बाक्नीम। मेको आन बग्गीपुकी हिक्ने मचाप्चा डा बाक्नीम। मीका ५:९ 8 मेको आन रागी मूर्तिम ब्रीशो बाक्ब। मेकोपुकी आंमा सेल्लो मूर्ति आ डोंइती बाप्नीम। आंमा गुइमी सेल्लो मूर्ति आ

डोंइती पोक्च थेक्नीम। 9 मोपतीके मुरपुकी ब्रेम्शो सेल्चा पुंडसीनीम। मुर नेल्ल आइक्च दुम्नीम। गे मेको आन कली माफ मगेन। 10 परमप्रभु यावे आ हिंच कोंइतीक नु आ छेडछेड रे पुक्खी आगाम खुंडसीन। फुरक आगाम खुंडसीन। 11 मुर नेल्ल आन ठेयब लेशशो आइक्च सेल्चा पुंडसीनीम। बोरशो मुर नेल्ल ब्रेम्शो सेल्चा पुंडसीनीम। मेको नाक्ती परमप्रभु यावे ला ठेयब दुम्ब। यसैया २:११

ठेयब नेल्ल आइक्च सेल्शो

12 मिनु मुर नेल्ल आन परमप्रभु यावेमी काबु नाक्ती ठेयब लेशशो, बोरशो मुर नु “गो ठेयब नड” देंब आन कली आइक्च सेल्ब। येरमीया ४६:१०; इजीकीएल ३०:३; योएल १:१५; आमोस ५:१८; सेफन्याह १:१४ 13 लेबानोन डा लाइशो रवापुकी, बाशान डा बोल्यो रवापुकी, 14 लाइशो डांडा नेल्ल नु ठेयब पहाड, 15 लाइशो खिं नु बोल्यो गारो, 16 टारसीस डा जहाज नेल्ल, रिम्शो नु शुश क्येट लाइब सेल्शो थोव्रकपुकी 17 नु मुर नेल्ल आन ठेयब लेशशो आइक्च सेल्चा पुंडसीनीम। बोरशो मुर नेल्ल ब्रेम्शो सेल्चा पुंडसीनीम। मेको नाक्ती परमप्रभु यावे ला ठेयब दुम्ब। यसैया २:१ 18 मेना मूर्ति नेल्ल जाम्नीम।

19 परमप्रभु यावेमी शुश रागी डा मुर आन कली हिंच कोंइब नु आ छेडछेड डा ठेयब सक्ति जाक्मेनु, गे पुक्खीम नु खपी आगा डा ढोडोडगाम ओव्रशा खुंडसीन। 20 मेको नाक्ती मुरपुकीम आन पूजा पचा कली सुन चांदी के सेल्शो मूर्ति थाक्यु नु पकातिकती आन डोंइती ताइक्नीम। यसैया ३१:७ 21 परमप्रभु यावे रागी डा मुर आन कली हिंच कोंइचा कली जाक्मेनु, मुरपुकी आ हिंच कोंइतीक छेडछेड डा ठेयब सक्तिम मतचा डा पा पुक्खी नु सेरथे फुल्लु डा कापम खुंडसीनीम। २थिस्सलोनिकी १:९-१० 22 मोपतीके नेम सास मुइक्चा पुंडसीशो बेक्शा लाइब मुर रे डोन लने। मेको मारेइ मनम।

3

यरूसलेम नु यहूदा कली निसाफ

1 मुल परमप्रभु, मुर नेल्ल आन परमप्रभु यावेमी यहूदा नेल्ल नु यरूसलेम रे मारेइ मारेइ लाइक्ब। मारेइ मारेइ जचा थोव्रक नु ब्वाक्कु नेल्ल यो लाइक्ब। लेवी २६:२६; इजीकीएल ४:१६ 2 मिनु बोल्यो मुर, लडाइ पाइब मुर, निसाफ पाइब, परमप्रभु यावे आ लोव्र पाइब, लिंक्यु कोव्रब, खाल्पापुकी, 3 मिनु ५० जना आन कप्तान, मान पाइक्चा पुंडसीब, सल्ला गेब, जोक्ब तुइक्ब, मन्तर तन्तर पाइब नु नेल्ल क्येडा जोक्ब नेल्ल सहर रे योल्ब। 4 मिनु गो वोंइश आल आन कली मेको आन ठेयब मुर सेल्लुड। मिनु आइक्च आलमी मेको आन कली हुकुम पाइनीम। उपदेसक १०:६ 5 मिनु मुरपुकी दिप्चा पुंडसीनीम। दिम्मुइनीम। आन नेक्था डा मुर आन कली दिप्नीम। आलपुकीमी खाल्पी खाल्पा आन कली मान मपाइनीम। महिक्सीशो मुरपुकीमी ठेयब मुर आन कली मान मपाइनीम।

6 मिनु मुर कामी आ खिं डा मुर का कली ग्याइशशा “इ के फेक्तीक वा बाक्ब। मोपतीके आंइ हुकुम पाइब दुमो। मिनु मेको ब्रेशशो खिं नेल्ल इ अधिकारम बाक्नीम” देंब। 7 तन्न मेको मुरुमी “गो वारच पाइब मनड। आं खिंमी जचा फेक्चा थोव्रक मबाक्ब। गे आं कली मुर आन कली हुकुम पाइब मसेल्यीनी” देंब। 8 मिनु यरूसलेम दाइल पांइसीशा गोल्त। यहूदा खतम दुम्त। मारदे हना मेकेर डा मुर आन लोव्र नु आन पतीके परमप्रभु यावे कली काइ मगारचा डा बाक्त। परमप्रभु आंमा मेको आन दातेमी बाक्शा यो, मेकोपुकीम महिंथु मरिम्शो पना पन बाक्नीम।

परमप्रभुमी निसाफ पशो

9 मेको आन कुलमी आन मरिम्शो पशो तुइक्पाइक्ब। सोदोम डा मुर खोदेशो पा मेकोपुकीम आन पाप मखुइक्थु शोव्रनीम। आबी, मेकोपुकीमी आंम कली ग्याइशशा लाइक्चा पुंडसीब सेल्सीनीम। उत्पत्ती १९:५-९ 10 दोस मताइब मुर आन कली रिम्शो दुम्ब। मारदे हना मेकोमी आ गेय पशो रे जाइब। 11 आबी, दोस ताइब कली हिंचा डा दुम्ब। मारदे हना दोपा मरिम्शो पवा, मोपा आ मरिम्शो पशो ताइब। 12 मिनु वोंइश आलपुकीमी आं मुर आन कली दिप्नीम। मीश मुरपुकीम मेको आन कली हुकुम पाइनीम। आं मुरपुकी, इन ठेयब मुरपुकीम इन कली दूली लां खोइक्पाइशशा, हेंथे गाक्पाइक्नीम।

13 परमप्रभु यावेमी निसाफ पचा चिक्शो बाक्ब। मेकोमी मुर आन कली निसाफ पाइब। 14 मिनु परमप्रभु यावेमी आ मुर आन दाते डा खाल्पापुकी नु हुकुम पाइब आन कली निसाफ पाइब। मेकोमी “गे अडगुर रू नेल्ल आंम के

सेल्टीनी। प्रुडग आन के रोइशशो मार मार इन खिंम बाक्नीम। यसैया ५:७ 15 दोपा गेपुकीमी आं मुर आन कली मो पने चाप्नी? प्रुडग आन कली चिनु प्रुडग सेल्टीनी” दे परमप्रभु, मुर नेल्ल आन परमप्रभु यावेमी देंत।

मीश मुर आन कली दोस गेशो

16 मिनु परमप्रभु यावेमी “मारदे हना सियोन डा तमीपुकी ठेयब लेशशो बाक्नीम। मेको आन पिया पोक्शा, आन मिक्च हिरशा, कल्ली लिक्शा, ग्रीपाइशशा गाक्नीम। १तिमोथी २:९ 17 मोपतीके गो सियोन डा तमी आन पिया श्येतथ सेल्शा, आन खुइशशो कोंइशा मुने तोक्नुडमी” दे परमप्रभु देंत।

18 मेना गो मेको आन खोइली डा पांइतीके, मेको आन सुन फू, सुन के गहना, 19 आन नोफा सुन, चुरा, कुल सुम्तीके, 20 कुप्नी, खोइलीम पांइतीके, काम्बरी, ब्रोवशो रिना पाइशशो खेक्तीके नु आन जन्तर, 21 छाप थोक्तीक औंठी नु मुन्द्री, 22 आन शुश क्येट लाइब वा, आ तार फेक्तीक वा, सुम्तीक वा, थैली, 23 पात्लो वा, रिम्शो सुती वा, आन पियाम गुप्तीक वा नु आन सुम्सीतीक वा नेल्ल लाइक्नुड। 24 मिनु “नोले ब्रोवशो रिना पाइशशो, ग्रांग्रा दिशो रिना पाइशशो दुम्ब। काम्बरी किप्तीकेमी, डोरी किप्चा माल्नीम। मेको आन रिम्शो सेल्शो चां, श्येतथ पिया दुम्नीम। आन दारशो शुश क्येट लाइब फेक्तीकेमी, रां सुम्चा कली अरन्डी फेक्चा माल्नीम। मेको आन दारस नेल्ले लशा, मीम ग्रोइशशो खोदेशो दुम्शा मुने दोक्नीम। 25 इन वोंइश तरवारम साइक्चा पुंइसीनीम। इन लडाइ पाइबपुकी लडाइम बेक्नीम। 26 सहर डा लाप्चो सुर्ता पा रोंका पाइनीम। सहर श्येतथ दुम्शा, खपीम निशशो मीश मुर खोदेशो दुम्ब” दे परमप्रभु यावेमी देंत।

4

1 मेना ७ जना मीश मुरपुकीमी वोंइश मुर का कली ग्याइशशा “गो आंइ जचा थोव्रक जाइनीकी। आंइ वा फेक्नीकी। आंइ कली इन नें गेशा, आंइ मुने साम्शा, आल थिपाइक्की” देंनीम।

यरूसलेम लेंशा रिम्शो दुम्शो

2 मेको नाक्ती परमप्रभु यावे आ राशी दारशो नु थम रिम्शो बाक्ब। मिनु रागी आ दारसम ब्रोंइशा लीशो इस्राएली आन कली आन थुं बारपाइशशा, ग्येरपाइक्ब दुम्ब। येरमीया ३३:१५ 3 मिनु सु सु सियोन नु यरूसलेम लीशो बाक्मा, मेकोपुकी “परमप्रभु के बाक्नीम” दे माइक्नीम। मेको आन नें यरूसलेम ब्रोंइचा कली ब्रेक्सीशो बाक्नीम। यसैया ६:१३; प्रस्थान ३२:३२; भजन संग्रह ६९:२९; मलाकी ३:१६ 4 परमप्रभु यावेमी सियोन डा तमी नु यरूसलेम डा मुर आन पाप निसाफ पतीक नु क्याम्तीकेमी क्याम्ताक्व हना, 5 मेना परमप्रभु यावेमी सियोन डांडाम आ बाक्तीके खिं नु आ मुर गुम्तीक सेल्ब। मेकेर नाक्ती गोस्स नु कुन वोइशशा, नाक्दो मी ब्रशो छेडछेड वोइक्ब। मिनु मेको छेडछेडम रागी नेल्ल कली सुम्ब। प्रस्थान १३:२१ 6 मेको सुम्तीकेम नाक्ती नांम मनाप्पाइक्तीके, फश गिवार पवानु नु रेउ यिमेनु, फाम्सीतीके दुम्ब।

5

अडगुर रू डा कुम्सो

1 गो आं दाक्शो कली कुम्सो का पाइनुड। आ अडगुर रू आ पर्बम कुम्सो का पाइनुड। आ दाक्शो के अडगुर रू का बाक्ब। आ अडगुर रू शुश ग्रेल्ब डांडाम बाक्ब। यसैया ३:१४; येरमीया २:२१; मर्कूस १२:१-९ 2 मिनु मेकोमी रू दोशा, फुल्लु गुप्शा ताइक्ताक्व। मिनु नेल्ल क्येडा रिम्शो अडगुर बोट खुम्तु। मेकोमी रू आ दातेमी खाल पतीक खिं का सेल्लतु। मिनु मेकेर कोल का यो सेल्लतु। मिनु अडगुर सिप्ब दे आस पाप्तु। तन्न ब्वाकी डा अडगुर कका सित्तेक्म।

3 यरूसलेमम बाक्ब नु यहूदा डा मुरपुकी, गो नु आं अडगुर रू आंस दातेमी निसाफ पने। 4 आं अडगुर रू कली गो नेल्ल पाता। गो मार मपडा डा? गो अडगुर सिप्ब, दे आस पा बाक्ती। तन्न मारदे ब्वाकी डा अडगुर कका सिम्मे?

5 मिनु मुल गो आं अडगुर रू कली मार पाइनुडा, इन कली देंनुड। आ थरपु नेल्ल गुंइनुड। मिनु मार मार ओवनीम। आ गारो नेल्ल प्रेशशा ताइक्नुड। मिनु दिम्शा ताइशशा पाइनीम। 6 गो मेको कली खतम सेल्लनुड। मेको कली ममुंइनुड, मरोक्नुड। मिनु चू नु चोंक वाशा, सुम्नीम। गो गोस्स कली “रेउ मयिपतो” दे माइक्नुड।

7 मारदे हना मुर नेल्ल आन परमप्रभु यावे आ दाक्शो अडगुर रू इस्राएल आ खिं डा मुर नु यहूदा डा मुरपुकी बाक्नीम। मिनु मेकोम ठीक निसाफ पतीके रिम्ताक्व। तन्न दूली निसाफ पाम्तेक्म। ठीक पतीके रिम्ताक्व, तन्न मरिम्शो पतीके ला दुम्त।

मुर आन मरिम्शो पशो

8 आबी, गे शुश खिं नु रू ग्याप्ब। नोले सुइ मुर इ नेक्था मबाक्नीम। मारदे हना रू नु खिं नेल्ल इ के बाक्नीम। ब्यवस्था ५:२१ 9 मुर नेल्ल आन परमप्रभु यावेमी “थमा पा इन खिं नेल्ल ब्रेत्नीम। मेको ब्रेशो खिं दारशो नु ठेयब बाक्तेक्म हना यो, मुर मबाक्नीम। 10 मिनु ५ बिगा अडगुर रूमी बाथ का अडगुर रस गूब। मिनु होमेर का वांचेरम एफाह का अन्न गूब” देंत। बाथ का २२ लिटर बाक्ब। होमेर का २२० लिटर बाक्ब। एफाह का २२ लिटर पुक्तीक का बाक्ब।

11 आबी, गे राकसी तूचा कली सुनी कना बोक्बपुकी, नाक्दो सम्म शांबु तूना तून दुक्शा बाक्नीनी। 12 बीना, तार पाइशो ठेयब ताप्तीके, खैजडी नु बांसुरी नेशा, शांबु दुक्नीनी। तन्न परमप्रभु यावे आ पशो प्रेंशा ममिम्नीनी। आ गुइ डा गेय मताइनीनी। आमोस ६:५-६; भजन संग्रह ४४:२ 13 मोपतीके आं मुर मारेइ मतुइक्थु आन रागी रे ग्याइशशा लाइक्चा पुंडसीनीम। मेको आन ठेयब मुरपुकी शोत्रलुम बेक्नीम। आन हुल शुश ब्वाक्कु तूतू दाक्नीम।

14 बेक्शो मुर आन बाक्तीकेम मेको आन कली दाक्चा कली आ शोत्र पाक्शो बाक्ब। मिनु यरूसलेम डा ठेयब मुर नेल्ल नु मेकेर रेयके पा बाक्ब नेल्ल नरक आ शोत्रम ओत्रनीम। 15 मुरपुकी बाप्शा, ब्रेम्शो दुम्नीम। ठेयब लेशो मुर आइक्च सेल्चा पुंडसीनीम। 16 तन्न मुर नेल्ल आन परमप्रभु यावे ठीक निसाफ पतीकेम ठेयब बाक्ब। मिनु आ का ला बाक्शो परमप्रभुम आ ठीक पतीके कोइब। यसैया २:११, १७ 17 मिनु पाठापुकी आंम रागीम खोदेशो पा जोइनीम। अर्को रागी डा मुरपुकीमी शोप नु लीशो मारेइ मारेइ जाइनीम।

18 आबी, गे मरिम्शो पतीके कली जोल के डोरीम नु पाप कली ठेयब डोरीम पाइशशा, इन नोले कीनीनी। 19 गेपुकीमी “मेकोम आ गेय रीब पा पवल। मिनु गो ताइनय। आंइ तचा डा पा इस्राएली आन का ला बाक्शो परमप्रभु आ पचशो दुम्ल” देंनीनी। येरमीया १७:१५; २पत्रुस ३:४ 20 आबी, मरिम्शो कली रिम्शो नु रिम्शो कली मरिम्शो देंबपुकी, छिडछिड कली छेडछेड नु छेडछेड कली छिडछिड देंबपुकी नु कशो कली जिज नु जिज कली कशो देंबपुकी श्येत जाइब बाक्नीनी। 21 आबी “गो जोक्ब तुइक्ब नु निप्स पाइशशो नड” देंबपुकी श्येत जाइनीनी। हितोपदेस ३:७ रोमी १२:१६ 22 गेपुकी शांबु तूचा कली बोल्यो दुम्खु पाइनीनी। राकसी ब्वाइक्स जोक्ब बाक्नीनी। 23 गेपुकीम घूस जशा, ठीक मपाइब कली “ठीक पाइब बाक्ब” नु ठीक पाइब कली “ठीक मपाइब बाक्ब” देंनीनी। प्रस्थान २३:८

24 मोपतीके दोपा मीम ठुटा नु सोत्रशो घांस नेक्बा, मोपा मेको आन शाक्श राक्ब। मिनु आन फू फुरक खोदेशो पा बेरशा लाइब। मारदे हना मेकोपुकीमी मुर नेल्ल आन परमप्रभु यावे आ लोत्र मटीम। मिनु इस्राएली आन का ला बाक्शो परमप्रभु आ लोत्र आ पर्बम शुक्शी पाम्तेक्म।

25 मोपतीके परमप्रभु यावे आ मुर आन पर्बम गाइक्ताक्व। मिनु आ गुइ क्युक्शा, मेको आन कली तुप्तु। मिनु डांडापुकी खिनु कुशा हिम्साक्म। शुश मुर आन बेक्शो रां लांमी ताइशो खोदेशो दुम्तेक्म। मोपा आ गाइक्चा मबेक्थु, मुल सम्म आ गुइ क्युक्स डा क्युक्स बाक्ब। यसैया ९:१; यसैया १६:२०; यसैया १०:४

26 मेकोमी छेदर क्युक्शा डोन रागी डा मुर आन कली ब्रेप्ब। मिनु रागी आ सुर डा मुर आन कली लाप पा ब्रेप्ब। मिनु मेकोपुकी रीब पा जाक्नीम। 27 मिनु मेको आन दातेमी सुइ मदाइनीम। दाइल मपाइसीनीम। मगोल्नीम। मिनु मइप्नीम। मेको आन किप्शुर मब्रुइक्ब, आन जुत्ता डा डोरी यो मब्रुइक्नीम। 28 मेको आन ब्रा हेशो बाक्नीम। आन लिब्रा आप्चा कली खुक्शो बाक्नीम। आन शारा मी आ झिल्ला खोदेशो बाक्नीम। आन बग्गी आन गुगील फश गिवार खोदेशो बाक्नीम। 29 मेको आन रेयके गुप्स आन ग्रीशो खोदेशो बाक्ब। मेको गुप्स आ चाइक्ब खोदेशो पा डरर डरर पाइनीम। मेको आन सिखार कली सुइम प्रोइने मचाप्नीम। 30 मेको नाक्ती समुन्द्र डा ब्वाक्कु ग्रीशो खोदेशो पा, इस्राएल डा मुर आन तारी रेयके पाइनीम। सुइम मेकेर कोत्रतेक्म हना, छिडछिड नु श्येत ला ताइनीम। गोस्सुमी छेडछेड कली सुम्ब।

6

परमप्रभुमी यसैया कली ब्रेशो

1 मिनु पिप उज्जीयाह बेक्शो बर्सम, गो परमप्रभु यावे कली इर डा ठेयब नित्तीकेमी निश्शो ताता। आ वा आ सुरमी आ खिं नेल्ल ब्रीशो बाक्त। २इतिहास २६:२२ 2 मेको आ इर गे स्वर्ग डा गेय पाइब सेराफ बाक्शो बाक्तेकम। मेको आन के ६, ६ ओटा फ्रां बाक्तेकम। मिनु फ्रां निक्शीमी आन कुल सुम्शो बाक्तेकम। फ्रां निक्शीम आन खोइली सुम्शो बाक्तेकम, फ्रां निक्शीमी बेरबाक्तेकम। १राजा २२:१९ 3 मिनु सेराफ कामी अर्को सेराफ कली “मुर नेल्ल आन परमप्रभु यावे का ला ठेयब सक्ति पाइश्शो बाक्ब। रागी नेल्ले आ छेडछेडम ब्रीशो बाक्ब” देंत। प्रकाश ४:८ 4 मेको आन ब्वाक्शो रेयकेमी परमप्रभु यावे आ खिं डा जग हिम्सीशा, कुनम ब्रीत। 5 मिनु गो “आबी, मुल बेक्ब दुम्ती। मारदे हना गो मरिम्शो लोत्र पाइब बाक्ती। मिनु मरिम्शो लोत्र पाइब आन दातेमी बाक्शो बाक्नुड। मो हना यो गो मुर नेल्ल आन परमप्रभु यावे, पिप कली ताता” देंती। प्रस्थान ३३:२०

6 मिनु सेराफ का थनारोम चढेतीक डा मी गुप्शा, आं नेक्था जाक्त। 7 मिनु मेकोमी आं शोत्र मीम थिपाइश्शा “मुल एको मीम इ शोत्र थिप्तु, इ दोस ततीक लोत्र नु इ पाप क्याम्साक्ब” देंत। 8 मिनु परमप्रभु यावेमी “गो सु कली सोइक्नुडा? आंइ पर्वम सु लाइबा?” दे लोत्र पशो नेंता। मिनु “गो बाक्ती। आं कली सोइक्तीनी” देंती। 9 मिनु आं कली “लावो। मेको मुर आन कली ‘नोफा दाइश्शा नेंशा यो, मरुप्ब दुमीन। कोत्रशा यो, मतुइक्ब दुमीन’ देनो। मत्ती १३:१०-१५; यूहन्ना १२:४०; प्रेरित २८:२६-२७ 10 मेको आन थुं खकटा सेलो। आन नोफा मनेब नु आन मिक्च मताइब सेलो। मोदेशो दुम्शा, मेको आन मिक्च मताइब नु नोफा मनेब दुम्नीम। मोदेशो मदुम्त हना, मेको आं गे लेत्नीम। मिनु गो मेको आन कली सापाइक्चा माल्नुड” देंत। ब्यवस्था २९:३; रोमी ११:८ 11 मिनु गो “परमप्रभु, गेना सम्म मो पचा माल्नुडा?” देंती। मिनु मेकोमी “सहर ब्रेश्शा मुर मबाक्तीके मदुम सम्म, खिं नेल्ल श्येत्थ नु रागी नेल्ल मुर मबाक्शो मदुम सम्म मोदेशो पावो। 12 गो मुर आन कली डोन मखेरुमी सम्म नु सहर शुश प्रॉइशो मदुम सम्म मो पचा माल्नुड। 13 मिनु १० भागम भाग का मुर लीतेकम हना, मेकोपुकी यो चोचा पुंइसीनीम। ठेयब नु बोल्यो रवा तिम्शा हना यो, आन टुटा लीब। मेको लीशो टुटा आं मुर, इस्राएल आ वांचेर बाक्नीम” देंत। आमोस ५:३; यसैया ७:३; यसैया १०:२०-२१

7

यसैयाम आहाज आ थुं बारपाइश्शो

1 आहाज यहूदा डा पिप बाक्त। मेको योथाम आ तौ नु उज्जीयाह आ चच बाक्त। आहाज आ सासन पची ना अराम डा पिप रेसीन नु इस्राएल डा पिप रेमाल्याह आ तौ पेकाह लडाइ पथ यरूसलेम जाक्ताक्स। तन्न ग्राने मचाप्बेम। २राजा १६:५ 2 मिनु मुरपुकीम दाऊद आ खिं डा मुर आहाज कली “अराम डा लडाइ पाइबपुकी एफ्राइम नु गारशा जाक्तेकम” दे शेंताकम। मेको नेंशा आहाज नु आ मुर, फशेम रवा हिम्शो खोदेशो पा आन थुं हिम्सीमा बाक्त।

3 मिनु परमप्रभु यावेमी यसैया कली “गे नु इ तौ शेआर-याशुब आहाज कली गुम्थ लसे। गे मेको कली आइक्था दोम्ली रे ब्वाक्कु यित्तीके, वा मुरब आन गेय पतीके डा ठेयब लांम थित्नीसी। 4 मिनु गे मेको कली ‘होस पा, सिक्सी पा बाक्कीन। महिनीन। इन थुं ग्येत्थ लुक्च मपपतीन। मेको कुन पाइब बुल्सी रेसीन, अराम नु रेमाल्याह आ तौ पेकाह, आन गाइश्शो तशा, महिनीन। इन थुं ग्येत्थ लुक्च मपपतीन। यसैया ३०:१५; 5 मारदे हना अराम, एफ्राइम आ मुर नु रेमाल्याह आ तौ पेकाह नु गारशा, इ कली मरिम्शो पचा कली मिम्शो बाक्नीम। 6 मेकोपुकीमी गोपुकी यहूदा लशा, यरूसलेम कली पुम्शा, ग्राशा ताबेल आ तौ कली मेकेर डा पिप सेल्य’ देंतेकम। 7 मोपतीके परमप्रभु, परमप्रभु यावेमी मार देंब देंशा हना ‘मेको आन मिम्शो मदुम्ब। मो पचा मताइनीम। 8 मारदे हना अराम आ पिया दमस्कस बाक्ब। मिनु दमस्कस आ पिया रेसीन बाक्ब। मिनु ६५ बर्स नोले एफ्राइम खतम दुम्शा, मलीब। 9 एफ्राइम आ पिया सामरीया बाक्ब। सामरीया आ पिया रेमाल्याह आ तौ बाक्ब’ गे थमा मसुइक्तीनी हना, थमा पा मलीनीनी” दे परमप्रभु यावेमी देंत। २इतिहास २०:२०

परमप्रभु आ चिन्ड इम्मानुएल

10 मिनु परमप्रभु यावेमी लेंशा आहाज कली 11 “इन परमप्रभु यावे, इन परमप्रभु कली चिन्ड का पुंइदीन। उइ बेक्शो मुर आन बाक्तीक रे हना यो, इर सरीड रे हना यो चिन्ड का पुनीन” देंत। 12 तन्न आहाजमी “गो मपुंइनुड। परमप्रभु यावे आ थुं मथाम्नुड” देंत। 13 मिनु यसैयामी “दाऊद आ खिं डा मुर नेनीन। मुर आन कली दपाइश्शो खोदेशो पा, आं परमप्रभु कली यो दपाइक्तीनी? 14 मोपतीके परमप्रभुमी इन कली चिन्ड का गेब। मेको चिन्ड मार बाक्ब देंशा

हना, कन्ने मीश आलम कोव्रज कुरशा तौ का थीब। मेको आ ने इम्मानुएल वोइक्नीम। मत्ती १:२३ 15 मेको दहि नु खुदो जची ना रेन रिम्शो पचा नु मरिम्शो मपचा तुइक्ब दुम्ब। 16 मिनु मेको वोइश आलम मरिम्शो मपचा, रिम्शो पचा तुइक्चा क्येडा डोंइती, इन कली हिंपाइक्ब पिप आस रागी श्येतथ दुम्ब। 17 परमप्रभु यावेमी अस्सुर डा पिप आ गुइ रे इन कली, इन मुर आन कली नु इन खिं डा मुर आन कली हिंचा डा श्येत गेपाइक्ब। मोदेशो श्येत एफ्राइम यहूदा रे ब्राम रे गेनायो मदुम्शो बाक्ब” देंत।

यहूदा कली श्येत गेशो

18 मेको नाक्ती परमप्रभु यावेमी इजीप्त डा नील खोला डा चुरमु नु अस्सुर रागी डा सुरब आन कली लाप पा ब्रेप्ब। 19 मेकोपुकी जाक्शा, बेंसीम, रोंगु आ कापम, चू बुटा तारी नु बस्तु भाव योव्रतीक नेल्लेम बाक्नीम। 20 मेको नाक्त परमप्रभुमी युफ्रेटीस खोला आइक्ची हांबु रे क्येट थाप्शा चाक्शो छूराम, अस्सुर डा पिपमी पिया डा चां नु गिरशी प्रेक्पाइक्ब। मेको छूरामी गाल शोके यो प्रेक्पाइक्ब। 21 मेना मुर कामी बी का नु भेडा निक्शी थुल्ब। 22 मिनु शुश दूध चिम्शा दहि जाइब। मारदे हना मेको रागीम लीशो मुर नेल्लेमी दहि नु खुदो जाइनीम। 23 मेना हजार का शेकेल चांदी लाइब हजार का अडगुर बोट खुम्शो रूम चू नु चोंक वानीम। शेकेल का ११.५ ग्राम डा चांदी के क्येट बाक्ब। 24 मोपा चू नु चोंक बाक्तीके, मुरपुकी लिब्रा कुरशा मेकेर लाइनीम। 25 डोंइती डांडा डा दोशा खुम्शो रूपुकी मेना चू चोंकम सुम्तीके मुरपुकी हिंशा, मेकेर मलाइनीम। बी ब्यफ नु क्यारश भेडा आन कली दिम्पाइक्चा कली सोइक्नीम।

8

परमप्रभु आ लोव्र पाइब आ तौ

1 मिनु परमप्रभु यावेमी आं कली “गे ठेयब कागज का चाक्को। मिनु रिम्शो पा रुप्या डा पा ‘माहेर-शालाल-हाश-बाज’ ब्रेक्तो” देंत। माहेर-शालाल-हाश-बाज आ अर्थ गा पा शुश रोइक्चा बाक्ब। 2 मिनु गो जोल मपाइब सांकछी निक्शी चढेब उरीयाह नु येबेरेकीयाह आ तौ जकरिया आस कली वोइक्तासी। 3 मिनु गो आं मीश नु बाक्ती। मिनु मेकोमी कोव्रज कुरशा तौ का थिप्तु। मिनु परमप्रभु यावेमी आं कली “मेको आ ने माहेर-शालाल-हाश-बाज वोतो। 4 मारदे हना मेको आलम आम आफ देस जोक्चा क्येडा डोंइती दमस्कस डा शोंप नु सामरीया डा रोइशो नेल्ले अस्सुर डा पिपम लाइक्ब” देंत। यसैया ७:१८; २राजा १६:९

5 मिनु परमप्रभु यावेमी आं कली लेंशा 6 “मेको मुरपुकीम शीलोआ डा रिम्शो ब्वाक्कु प्रोंइनीम। रेसीन नु रेमाल्याह आ तौ आस क्येडा हिंशा, मेको आस नोले खोइक्तेक्म। 7 मोपतीके गो यहूदा डा मुर आन कली श्येत गेपाइक्चा कली युफ्रेटीस खोला डा ब्वाक्कु खोदेशो पा अस्सुर डा पिप नु आ लडाइ पाइब शुश आन कली चाक्नुडमी। मिनु मेको खोला बारशो खोदेशो पा आ एर ओथ नेल्ल सुम्नीम। 8 मिनु मेको बारशा, यहूदा आ शुर सम्म जाक्दीत्नीम। आ लडाइ पाइबपुकीमी हाम्शो फ्राम खोदेशो पा इन रागी नेल्ल सुम्नीम। तन्न इम्मानुएल, परमप्रभु यावे गे नु बाक्ब” देंत। इम्मानुएल आ अर्थ “परमप्रभु यावे गे नु बाक्ब” देशो बाक्ब। यसैया ७:१४

यहूदा नु रागी डा मुर आन कली शेंशो

9 गे रागी रागी डा मुर गारशा सुर्ता पने। गे खतम दुम्पाइक्चा पुंडसीनीनी। गे डोन रागी डा मुर नोफा दाइशशा नेनीने। लडाइ पचा कली किप्शुर किम्सीन। मिनु हिनीन। लडाइ पचा कली ठीक दुमीन। मिनु सुर्ता पने। 10 गे सल्ला पा लोव्रसी गारपाइक्नीनी, तन्न मेको शोर गाक्शो दुम्ब। लोव्र पने, तन्न इन लोव्र मगाप्ब। मारदे हना परमप्रभु गो नु बाक्ब। 11 मिनु परमप्रभु यावेमी आं गुइ ग्याइशशा आं कली लोव्र पा “गे मेको मुर आन खोदेशो मपावो। मेको आन लांम मगाक्को। 12 मुरपुकीम अरु आन पबर्म खुइशशा मरिम्शो गेय पाइनीम। गे मोदेशो मपने। मेको मार तशा हिंनीमी, गे मेको तशा महिनीन। इन थुं ग्येतथ लुक्च मपपतीन। 13 मुर नेल्ल आन परमप्रभु यावे ला मिम्शा, मेको क्येडा हिनीन। मेको कली मान पा हिनीन। मत्ती १०:२८ 14 परमप्रभु इन कली नेल्ल क्येडा डोंइती डा मिम्तीके दुम्ब। तन्न इस्राएल आ खिं निक्शी डा मुर आन कली दाइल पाइक्तीके नु लां तेक्तीके फुल्लु दुम्ब। मेको यरूसलेम डा मुर आन कली रेप्पाइक्ब ब्वारद दुम्ब। रोमी ९:३३ 15 मिनु मुर शुश दाइल पाइशशा गोल्शा, ब्वारदम रेशशा, ग्याइक्चा पुंडसीनीम।

16 आं देशो लोव्र आं शेंसीब आन कली ला नेंपाइक्चा कली छाप थोक्शा, वोतो” दे माइक्ती। दानीएल १२:४ 17 मिनु गो याक्ब आ खिं डा मुर आन क्येडा आ कुल खुइक्ब परमप्रभु यावे आ लां कोव्रशा, रिम्शा बाक्नुड। 18 मुर

नेल्ल आन परमप्रभु यावे सियोन डांडाम बाक्ब। परमप्रभु यावेमी आं कली नु आं कली गेशो आलपुकी इस्राएली आन दातेमी चिन्ड नु कोइतीक सेल्लतीकी। यसैया ८:३; यसैया ७:३; हिब्रू २:१३ 19 मिनु मुरपुकीमी इ कली “बेक्शो मुर आन कली हिल्लो पावो। लिंक्यु कोव्रब चाक्को। वोल आन कली लोव्र पपतो” दे लोव्र पाइनीम। मेको वोल आन रेयके नेसीब। मिनु मार, सेस मुर आन पर्वम बेक्शो मुर आन कली हिल्लो पचा? मुरपुकीमी आन परमप्रभु कली हिल्लो पचा ममाल्नीमी डा? २राजा १:३ 20 गे शेंतीक नु अरेशो लोव्र आ पर्वम परमप्रभु कली हिल्लो पचा माल्नीनी। अरु लोव्र पाइब मुर काइ मरुप्ब बाक्नीम। 21 मेकोपुकी एको रागीम श्येत जशा, शोव्रलु बेक्शा हिरनीम। मिनु शोव्रलुमी गाइश्शा, ग्येत्थ गे कोव्रशा, आन पिप नु परमप्रभु कली सराप पाइनीम। 22 मेकोपुकीमी खप गे कोव्रशा, आन पिया खुक्नीम। मिनु मेकेर श्येत नु छिडछिड ताइनीम। हिंचा डा श्येत थम क्येर नाक्दो ला ताइनीम। मेको आन दातेम छेडछेड मबाक्ब। मिनु आन थुं लुकच लाइब।

9

श्येत रे प्रोंइशो

1 शुश हिंबपुकी नोले छिडछिडम मगाक्नीम। डोंइती परमप्रभु यावेमी जबूलून नु नाप्ताली आस रागी महिक्सीशो सेल्लु। तन्न नोले मेकोमी यर्दन आ आइक्ची हांबु, समुन्द्र आ नेक्था डा नु रागी रागी डा मुर आन गालील रागी रिम्शो सेल्ब। भजन संग्रह १०७:१०-१४; २राजा १५:२९; मती ४:१२-१६ 2 छिडछिडम गाक्बपुकीम ठेयब छेडछेड ताइनीम। थम छिडछिड डा रागीम बाक्ब आन तार थम छेडछेड दुम्ब। 3 परमप्रभु, गे रागी रागी डा मुर आन कली सोशा बोशा दुम्पाइक्तीनी। मेको आन कली थाम्पान ग्येरपाइक्तीनी। मेको आन कली इन डोंइती बाली नाली ओंइची ना खोदेशो पा ग्येरपाइक्तीनी। लडाइ ग्राशा, आन रोइश्शो मार मार योक्सीची ना खोदेशो पा ग्येरपाइक्तीनी। 4 मेको आन हेल्शो जुवा, मेको आन बला डा भार नु मेको आन कली दिप्ब मुर आन कोक्के जिक्ताक्नी। गे मिदयान रागी डा लडाइम खोदेशो पा मेको आन कली युक्ब आन युक्तीके जिक्तीनी। भजन संग्रह ८१:७; न्यायाधीस ७:१४; न्यायाधीस १५:२२ 5 मारदे हना लडाइ पाइब आन जुता नु आन फेक्तीक वा नेल्ल हुश लुम्सीशो बाक्नीम। मेको मीम चोतीक दुम्नीम। 6 मारदे हना आंइ कली आल का थिशो बाक्ब। तौ का गेशो बाक्ब। मेको आंइ कली रिम्शो पा सासन पाइब दुम्ब। मेको आ नें मार बाक्ब देशा हना, छक लाक्चा डा गेय पाइब, जोक्तीक तुइक्तीक अर्ती गेब, सक्ति पाइश्शो परमप्रभु, गेना हना यो बाक्ब आफ नु थुं नाइश्शा बाक्चा गेब पिप बाक्ब। यसैया २२:२२; मीका ५:१; मीका ४:३ 7 मेको आ अधिकार गेना हना यो बारब। दाऊद आ राज्य कली गेना हना यो थुं नाइक्तीके दुम्ब। मेको आ राज्य गेना हना यो ठीक निसाफ नु ठीक पतीकेमी बाक्ब। मेको मुर नेल्ल आन परमप्रभु यावेमी पाइब। २सामुएल ७:१२-१३; लूका १:३२; यसैया ११:१-५; भजन संग्रह ७२:३-४

परमप्रभु इस्राएल आ पर्वम गाइश्शो

8 परमप्रभुमी याक्ब कली लोव्र का सोइश्शो बाक्त। मेको इस्राएल रागी कली दुम्त। 9 मिनु मेको एफ्राइम नु सामरीयाम बाक्ब नेल्लेम तुइक्ताक्म। 10 मेकोपुकीमी ठेयब लेशशा “इंटांम सेल्शो खिं नेल्ल ब्रेत्तेक्म। तन्न गोपुकीम चेम्शो फुल्लुम लेंशा सेल्नीकी। आइक्च रवा नेल्ल तिम्तेक्म। तन्न मेकेर ठेयब दुम्ब रवा खुम्नीकी” देंनीम। 11 मोपतीके परमप्रभु यावेमी मेको आन कली श्येत गेब पोक्ब। मिनु मेको आन जोरी सत्रु आन कली “गो लडाइ ग्रानीकी” दे मिम्पाइक्ब। 12 मिनु अराम डा मुर नु रेसीन पूर्व रे नु पलिस्ती डा मुर पच्छिम रे जाक्शा, मेकोपुकीमी शुश पाक्शो शोव्रमी खोदेशो पा इस्राएली आन कली दाक्नीम। मोपा यो परमप्रभु आ गाइश्शो मनाइक्थु, आ गुइ दिस डा दिस बाक्त।

13 मो हना यो मुर आन कली तुप्ब गे मलेम्म। मिनु मेकोपुकीमी मुर नेल्ल आन परमप्रभु यावे कली ममाल्नीम। यसैया १०:३३ 14 मोपतीके परमप्रभु यावेमी इस्राएल रे पिया नु मीलु क्योरतु। खजूर रवा आ राशी नु बुदी मीलु घांस काबुमीन क्योरतु। 15 खाल्पा नु हुकुम पाइबपुकी पिया नम। जोल पा परमप्रभु यावे आ लोव्र पाइबपुकी चहिं मीलु नम। 16 मारदे हना इस्राएल डा मुर आन कली शेंबपुकीमी हेंथे लां गाक्पाइक्तेक्म। मिनु आन शेंशो नेंबपुकी लां मतुइक्ब दुम्तेक्म। 17 मोपतीके परमप्रभु यावेम मेको आन वोंइश आल आन कली तशा, शिशी मपावो। मेको आन रोम रोइक्च नु वोंइश बेक्शो मीश मुर आन कली तशा यो शिशी मपावो। मारदे हना मेको नेल्ल परमप्रभु आ अरेशो मटीब दुम्शा, काइ मरिम्शो पाइब ला बाक्तेक्म। मिनु नेल्लेमी मरिम्शो लोव्र पाम्तेक्म। मोपा यो परमप्रभु आ गाइश्शो मनाइक्थु, आ गुइ दिस डा दिस बाक्त।

18 परमप्रभु यावे आ अरेशो लोव्र मटीब मी खोदेशो पा ब्राइब। मिनु मेकोमी चू नु चोंक नेल्ल नेक्ब। मिनु मेको ब्वाकीमी कोक्त बुद पा ब्राइब। आ कुन गोस्स खोदेशो पा रोम्सीशा सरीड गे लाइब। 19 मुर नेल्ल आन परमप्रभु यावे आ गाइशोमी रागी नेल्ल ग्रोइशो बाक्ब। मिनु मुरपुकी चोतीक शी खोदेशो दुम्तेक्म। सुइम सुइ आन कली वारच मपामे। 20 मेकोपुकीमी ग्युरा गे डा रोइक्ताक्म। तन्न शोव्रलु बेक्तेक्म। आन पेरा गे डा ब्वाम्तेक्म। तन्न मरूम। मिनु आंम आन खिं डा मुर आन श्ये ब्वाम्तेक्म। 21 मनस्सेमी एफ्राइम कली ब्वाप्तु। मिनु एफ्राइममी मनस्से कली ब्वाप्तु। मिनु मेको निक्शी यहूदा नु लडाइ पाम्ताक्स। मोपा यो परमप्रभु आ गाइशो मनाइक्थु, आ गुइ दिस डा दिस बाक्त।

10

1 आबी, सु सुमी ठीक मदुम्शो ऐन कानुन सेल्नीमी, मुर आन कली दिप्चा डा अरेशो लोव्र ब्रेक्नीमी, यसैया ५:८-२३ 2 क्येट मथीब आन कली ठीक निसाफ मपाइनीमी, आन मुर आन दाते डा पुडग आन कली ठीक मपाइनीमी, मेकोपुकीम वोंइश बेक्शो मीश मुर आन मार मार योल्नीमी, रोम रोइक्च आन बाक्शो नेल्ल रोइक्नीम। 3 मिनु सजाइ गेतीक नाक्तीमी मार पाइनीनी? डोन रे जाक्शो हिंचा डा श्येतमी मार पाइनीनी? “वारच पाइय्यीनी” दे सु आ बाक्तीके प्रोक्नीनी? इन शोंप ते वोइक्नीनी? 4 मेको नाक्ती पाइशो मुर आन दातेमी मबाक्चा नु साइक्चा मपुंइसीचा कली ते प्रोक्नीनी? परमप्रभु आ गाइशो मनाइक्थु, आ गुइ दिस डा दिस बाक्त।

अस्सुर कली सजाइ

5 आबी, अस्सुर रागी, गे आं गाइक्तीक डा कोर्रा, आं गाइक्तीके कोक्के कुरब दुम्ते। यसैया १०:१५ 6 गो अस्सुर कली आं कली मटीब रागी कली लडाइ पथ सोइक्नुड। अस्सुर कली आं कली गाइक्पाइक्ब मुर नु सोइक्नुड। मारेइ मारेइ रोइक्पाइक्चा कली सोइक्नुड। मिनु मेको आन कली लांम दिम्पाइक्चा कली सोइक्नुड। 7 तन्न अस्सुरम मेको आ थुंम मवोइक्थु, मोदेशो ममिम्त। आ थुंमी खतम पोक्चा नु रागी रागी क्याम्चा ला बाक्त। 8 मिनु अस्सुरमी “आं कप्तान नेल्ल पिप मनमी डा? 9 मार, काल्नो सहर कारकेमीश खोदेशो ममाइ? हमाथ, अरपाद खोदेशो ममाइ? मिनु सामरीया दमस्कस खोदेशो ममाइ डा? 10 मिनु गो दोपा मूर्तिम ब्रीशो रागी ग्राडा, मोपा गो मेको आन क्येडा आइक्च मूर्ति बाक्शो रागी यरूसलेम नु सामरीया कली ग्रानुड। २राजा १८:३२-३५ 11 मिनु गो सामरीया नु आ मूर्ति आन कली दोदेशो पडा, मोदेशो यरूसलेम नु आ मूर्ति आन कली मपाइनुडा डा?” दैत।

12 मिनु परमप्रभुमी सियोन डांडा नु यरूसलेमम पशो गेय थुमा नोले मेकोमी अस्सुर डा ठेयब लेशो नु बोरोशो पिप कली सजाइ गेब। यसैया ३७:३६ 13 मारदे हना मेकोमी “गो आं सक्तिमी पाता। गो आं तुइक्तीके नु रुप्तीक थुंमी मोदेशो पाता। गो रागी रागी डा सांद याक्ताक्ड। मेकेर डा मुर आन शोंप नु मारेइ मारेइ रोइक्ताक्ड। गो आं ठेयब सक्तिमी मेको आन पिप आन कली लुक्च सोइक्ताक्डमी। 14 मिनु गो प्रोंइशो चिक्ब आन ग्योव्र खोदेशो पा बाक्तीक नु मुर आन शोंप थित्ता। गो चिक्बीम प्रोंइशो ब्वोफु खुप्शो खोदेशो पा, रागी रागी कली खुप्ताक्ड। मिनु फ्रां हिक्शा, तेक्ब सुइ मबाक्म। मिनु सुइम मारेइ मदेंम” दैत।

15 खा क्येडा खा चलेब ठेयब बाक्बा डा?। आरा क्येडा आरा कीब ठेयब बाक्बा डा?। मोदेशो मदुम्त हना कोक्केमी कोक्के गुप्ब कली याम्पाइक्बा डा?। मिनु शीमी शी कली गुप्ने चाप्बा डा?। यसैया १०:५ 16 मोपतीके परमप्रभु, मुर नेल्ल आन परमप्रभु यावेमी अस्सुर डा दोम्शो लडाइ पाइब मुर आन कली बेक्तीक रोइ सोइक्नुड। मिनु मेको आन रां चोशो खोदेशो पा जेशशा नुप्ब। 17 मिनु इस्राएली आन छेड्छेड मी दुम्ब। मिनु आन का ला बाक्शो परमप्रभु नाप्पाइक्ब दुम्ब। मिनु मेकोमी आन चू नु चोंक काबुमी नेक्पाइक्ब। ब्यवस्था ४:२४ 18 मिनु ब्वाकी डा दारस नु फल फुल नेल्ले मुर खोदेशो पा सोव्रना सोव्रन लाइनीम। मेको आन रां नु थुं निम्फा खतम दुम्नीम। रोइ पाइब मुर ओंखां पा बेक्शा लशो खोदेशो पा बेक्शा लाइनीम। 19 मिनु मेको आ ब्वाकी डा लीशो रवा शुश मबाक्नीम। मेको आल कामी यो हिक्शा ब्रेक्ने चाप्ब।

मुर का निक्शी ला लेत्नीम

20 मिनु मेको नाक्ती इस्राएल डा लीशो मुरपुकी नु याकूब आ खिं डा प्रोक्शा ब्रोंइशो मुरपुकी लेंशा, आंम कली तुप्ब गे मलाइनीम। तन्न मेकोपुकी थमा पा परमप्रभु यावे, इस्राएली आन का ला बाक्शो परमप्रभु आ नोले खोइक्नीम। यसैया ६:१३; यसैया ७:३ 21 मिनु का निक्शी याकूब आ मुरपुकी सक्ति पाइशो परमप्रभु गे लेत्नीम। 22 इन इस्राएल डा मुर समुन्द्र डा बाल्वा खोदेशो पा शुश बाक्तेक्म हना यो, का निक्शी ला लेत्नीम। अरु चहिं नेल्ल साइक्चा

पुंडसीनीम। मिनु ठीक पतीक ठेयब दुम्ब। रोमी ९:२७ 23 मारदे हना परमप्रभु, मुर नेल्ल आन परमप्रभु यावेमी डोंइती आ देशो खोदेशो पा रागी नेल्ल खतम सेल्ब। यसैया २८:२७

24 मोपतीके परमप्रभु, मुर नेल्ल आन परमप्रभु यावेमी “सियोनम बाक्ब, आं मुरपुकी अस्सुर डा मुर क्येडा महिनीन। इन कली इजीप्तम खोदेशो पा कोक्केम तुप्तेक्म हना यो, महिनीन। 25 मारदे हना इच्का नोले इन पर्वम आं गाइशो नुप्ब। मिनु अस्सुर डा मुर आन कली गाइशो साइक्नुडमी” देंत। 26 मुर नेल्ल आन परमप्रभु यावेमी मेको आन कली कोराम युक्ब। मेको ओरेब डा सेरथे फुल्लु आ नेक्था डा लडाइम मिदयान कली फुशो खोदेशो दुम्ब। मेकोम इजीप्तम खोदेशो पा आ कोक्के समुन्द्र तार दिंब। न्यायाधीस ७:२५; भजन संग्रह ८३:१०; प्रस्थान १४:२६-२७ 27 मेना इन कली गेशो श्येत नुप्ब। मिनु इन शुर डा जुवा दोक्शा जिक्ब। 28 इन जोरी सत्रु रिम्मोन रे जाक्शो आइयाथम जाक्दीत्तेक्म। मिग्रोन लशा, मिकमाश सहरम आन मार मार वोइक्नीम। 29 मिनु डांडा रे पा लशा, गिबाम बास बाक्नीम। रामाह हिंशा खिंखि पाइब। सावल आ सहर गेबा डा मुर प्रोक्नीम। 30 गाल्लीम डा तमीपुकी ठेयब सेंदा पा ग्रीडीन। गे लाइशाह डा मुर नेनीन। अनाथोथ डा मुर मेको आन कली लोत्र लेत्तीन। १सामुएल २५:४४ 31 मादमेनाह नु गेबीम डा मुर ब्रोंइचा कली प्रोक्नीम। 32 मेकोपुकी मुलाक्ती नोबम बाक्नीम। मिनु मेकोपुकीमी सियोन डांडा डा तमी नु यरूसलेम आ डांडा गे आन गुइ क्युक्शा, हिंच कोंइनीम। १सामुएल २१:२

33 मिनु परमप्रभु, मुर नेल्ल आन परमप्रभु यावेमी मेको आ राशी हिंचा डा सक्तिम खोइक्ब। नेल्ल क्येडा लाइशो रवा तिम्ब। ठेयब लेशो आन कली आइक्च सेल्ब। 34 मेकोमी ब्वाकी डा रवा आन कली खाम तिम्ब। लेबानोन डा ठेयब लाइशो रवा नेल्ल दिम्नीम।

11

यावे आ सोइशो पिप

1 येस्से आ टुटा रे ठोसा का दाप्ब। मेको आ शाक्श रे वाशो राशीम फल फुल सिप्ब। 2 मिनु परमप्रभु यावे आ सोक्त मेको तारी नाइशो बाक्ब। मेको जोक्ब तुइक्ब नु रुप्तीक सोक्त बाक्ब। अर्ती गेब नु सक्ति गेब सोक्त बाक्ब। मेको जोक्तीक तुइक्तीक थुं गेब नु परमप्रभु यावे कली मान पा हिंब सोक्त बाक्ब। 3 मेको आ दाक्शो परमप्रभु यावे कली मान पा हिंचा बाक्ब। मेकोमी मुर आन थुं कोक्शा निसाफ पाइब। सुइ आन लोत्र मनेंथु निसाफ पाइब। 4 ठीक पतीकेमी पुडग आन कली निसाफ पाइब। रागी डा आइक्च नु ठेयब मुर नेल्ल आन कली उइक्थ पा निसाफ पाइब। मिनु रागी डा मुर आन कली आ लोत्रमी तुप्ब। परमप्रभु यावे आ अरेशो लोत्र मटीब आन कली मुइशो साइक्ब। २थिस्सलोनिकी २:८ 5 मेको आ ठीक पतीके आ किप्शुर किप्शो खोदेशो बाक्ब। मेको थमा पा थमा सुइक्तीक आ किप्तीक बाक्ब।

6 मेना फर नु पाठा काथा बाक्नीम। जोइ क्यारश आ पाठा नु इप्ब। बाछा नु गुप्स आ चाइक्ब काथा जोइनीम। आइक्च आलमी मेको आन कली योत्रब। यसैया ६५:२५ 7 बी नु वां काथा जोइनीम। मेको आन चाइक्बपुकी काथा बाक्नीम। गुप्समी ब्यफ खोदेशो पा नल ब्वाइब। 8 मिनु दूध तूब आल बुस्स आन पोत्रलाम ग्यारनीम। दूध प्रोंइशो आलमी बीस पाइशो बुस्स आन बाक्तीकेम गुइ शुइक्नीम। 9 आं डांडामी मारेइ श्येत नु खतम दुम्तीके मबाक्ब। मारदे हना दोदेशो पा ब्वाक्कुम समुन्द्र ब्रीबा, मोदेशो पा परमप्रभु यावे कली तुइक्तीकेम रागी नेल्ल ब्रीब।

इसाएल नु यहूदा डा लीशो मुर

10 मिनु मेको नाक्ती येस्से आ शाक्श जात जात डा मुर आन कली चिन्ड दुम्ब। मिनु रागी रागी डा मुर नेल्लेमी मेको कली हिल्लो पाइनीम। मेको आ बाक्तीके छेडछेडम बाक्ब। रोमी १५:१२ 11 मेना परमप्रभुमी आ लीशो मुर आन कली लेशा प्रोंइशा चाक्ब। मिनु ते रे प्रोंइशा चाक्ब देशा हना, अस्सुर, इजीप्त, पथोस, एथीयोपीया, एलाम, शिनार, हमाथ नु समुन्द्र आ नेक्था रे प्रोंइशा चाक्ब। इजीकीएल ३७:२१-२२ 12 मेकोमी रागी रागी डा मुर आन कली चिन्ड का वोइक्ब। मिनु इसाएल डा प्रोक्शो मुर आन कली खुप्ब। यहूदा डा ब्रशो मुर आन कली यो तेइ तेइ रे खुप्ब। 13 एफ्राइम आ गेहे पतीके जाम्शा लाइब। यहूदा कली श्येत गेब साइक्चा पुंडसीनीम। मेना एफ्राइममी यहूदा कली गेहे मपाइब। मिनु यहूदामी यो एफ्राइम कली श्येत मगेब। 14 मिनु मेको निक्शी पलिस्ती नु लडाइ पचा कली पच्छिम गे बारनीस। मेकोपुकी गारशा, पूर्ब डा मुर आन मारेइ मारेइ रोइक्नीम। एदोमी नु मोआबी आन कली लडाइ तोइनीम। अम्मोनीपुकीमी मेको आन देशो टीनीम। 15 मिनु परमप्रभु यावेमी इजीप्त डा समुन्द्र डा ब्वाक्कु नेल्ल सोत्रपाइक्ब। मेकोमी युफ्रेटीस तारी यो आ गुइ क्युक्शा, मेको रे ७ ओटा खोला सेल्ब। मिनु मुरपुकी गाक्शा शोक्शा लाइनीम।

16 अस्सुर डा लीशो आ मुर इस्राएली आन कली जाक्चा कली ठेयब लां का दुम्ब। मेको लां इस्राएली इजीप्त रे गूशा गाक्शो लां खोदेशो दुम्ब। प्रस्थान १४:२९

12

श्येत रे प्रोइशोपुकीम कुम्सो पशो

1 मेको नाक्ती गेपुकीमी “परमप्रभु यावे, गे रिम्शो पाइब बाक्नीनी। गे आंइ पबर्म गाइक्ताक्नी हना यो, इन गाइक्चा नाइक्साक्व। मुल गे आंइ कली लेम्नीनी। 2 थमा पा, परमप्रभु आं कली पाप रे प्रोइब बाक्ब। गो मेको कली थमा सुइश्शा महिनुड। मारदे हना परमप्रभु यावे आं कली सक्ति नु बोल गेब बाक्ब। मेको आं कली श्येत रे प्रोइब बाक्ब” दे कुम्सो पाइनीनी। प्रस्थान १५:२

3 मेको नाक्ती गेपुकी ग्येरशा, पाप रे ब्रोइतीके इनार रे ब्वाक्कु कीशा प्रिनीनी। यसैया ५५:१; जकरिया १३:१ 4 मेको नाक्ती गेपुकीमी “परमप्रभु यावेमी रिम्शो पाप्तु” दे मुर आन कली देनीन। मेकोपुकी नु लोत्र पने। मेको आ गेय रागी रागी डा मुर आन कली तुइक्पतीन। आ नें नेल्ल क्येडा ठेयब बाक्ब, दे शेंदीने। १इतिहास १६:८; भजन संग्रह १०५:१ 5 परमप्रभु यावे कली ठेयब सेलतीक कुम्सो पने। मारदे हना मेकोमी थम सक्ति पाइश्शो गेय पशो बाक्ब। एको लोत्र रागी नेल्लेमी ब्रपतीन। 6 सियोनम बाक्बपुकी ठेयब सेंदा पा ग्येरशा परमप्रभु कली ठेयब सेलशा कुम्सो पने। मारदे हना इस्राएली आन का ला बाक्शो परमप्रभु इन दातेमी ठेयब बाक्ब।

13

बेबीलोन सहर कली निसाफ पशो

यसैया २१:१-१०; यसैया ४७:-; येरमीया ५०:५

1 आमोज आ तौ यसैयामी बेबीलोन आ पबर्म तशो नु तुइश्शो लोत्र एको बाक्ब। येरमीया २३:३३ 2 रवा मबाक्शो डांडामी छेदर का खुक्कीन। मिनु ठेयब सेंदा पा गुइ हिक्शा, मेको आन कली ठेयब मुर आन लाप्चो रे ओत्रपतीन। 3 परमप्रभुमी “गो आं मुर आन कली पोक्शा, आं ग्येरसीशो, बोल्यो लडाइ पाइब मुर आन कली आं गाइश्शो कोंइचा कली ब्रेत्ताक्डमी” देंत।

4 नेनीन, शुश रागी डा मुरपुकी डांडामी रेयके पाइनीम। मेको रेयके शुश राज्य डा खुम्सीशो मुर आन रेयके बाक्ब। मुर नेल्ल आन परमप्रभु यावेमी ठेयब हुल लडाइ पाइब पोक्ब। 5 मेकोपुकी डोन रागी रे जाक्नीम। रागी डा सुर रे पा जाक्नीम। मिनु परमप्रभु यावेमी गाइश्शा, या शेशा रागी नेल्ल खतम सेल्पाइक्ब। योएल १:१५

6 ठेयब सेंदा पा डाक्कीन। मारदे हना परमप्रभु यावे आ नाक्त जाक्चशो बाक्ब। नेल्ल क्येडा ठेयब सक्ति पाइश्शो परमप्रभु मेको नाक्ती खतम पोक्थ जाक्ब। 7 मोपतीके मुर नेल्ल आन थुं लुक्च लशा, मारेइ पने मचाप्नीम। 8 मिनु मुरपुकी शुश हिंशा, आन थुं लुक्च लशा, शुश सुर्ता पाइनीम। फाल्ने मचाप्चा डा पा खाइश्शा, आल थिचशो मीश मुर खोदेशो पा नक्चुर पाइनीम। हिंशा आन कुल कोत्रमुमानु, ब्रशो मी खोदेशो तमुइनीम।

9 नेनीन, परमप्रभु यावे आ नाक्ती हिंचा डा श्येतम जाक्ब। आ गाइश्शो चुरशोमी रागी नेल्ल मुर मबाक्तीके सेल्ब। मिनु पाप पाइब आन कली क्याम्ब। 10 सरीड डा सोरुलपुकीम आन छेड्छेड साम्नीम। नां दाप्ना दाप्न छिड्छिड दुम्ब। तास्लाम छेड्छेड मगेब। 11 परमप्रभुमी “गो रागी कली आ मरिम्शो पशो आ पबर्म सजाइ गेनुड। आं अरेशो लोत्र मटिथु, मरिम्शो पाइब आन कली सजाइ गेनुडमी। मिनु ठेयब लेशो आन ठेयब लेत्तीके साम्पाइक्नुडमी। ठेयब श्येत गेशा हुकुम पाइब आन कली ब्रेम्पाइक्नुडमी। 12 गो मुर आन कली क्येख सुन क्येडा यो रिम्शो सेल्नुडमी। मेको आन कली ओफीर डा सुन क्येडा रिम्शो सेल्नुडमी। 13 मिनु आं गाइक्तीक नाक्ती गो सरीड कली हिम्पाइक्नुड। रागी यो आं गाइश्शोमी आ बाक्तीक रे प्रेक्शा गूब” दे मुर नेल्ल आन परमप्रभु यावेमी देंत। 14 मुरपुकी खेदा पचा पुंइसीशो किश्श नु गोठला मबाक्शो भेडा खोदेशो दुम्नीम। मेकोपुकी आंम आंम मुर बाक्तीके लाइनीम। आंम आंम रागी मेर प्रोक्नीम। 15 खेदा पा थित्चा पुंइसीशोपुकी तूशा साइक्चा पुंइसीनीम। मिनु ग्याइक्चा पुंइसीशोपुकी तरवारम क्योरचा पुंइसीनीम। 16 आन आल आन कली आन डांइती खपीम राप्शा साइश्शो ताइनीम। मेको आन खिं डा मारेइ मारेइ योल्नीम। मेको आन मीश बिथोलो पाइनीम। भजन संग्रह १३७:८-९ 17 मिनु परमप्रभुमी “नेनीन, गो मादी आन कली गेपुकी नु लडाइ पपाइक्चा कली पोक्नुडमी। मेकोपुकीमी सुन चांदी ठेयब ममिम्नीम। 18 वोइश आल आन कली लिब्राम साइक्नीम। आइक्च आल नु ठेयब आल नेल्ल आन कली शिशी मपथु साइक्नीम। 19 ठेयब लेशो

कल्दी आन दाक्शो नु राज्य राज्य डा नेल्ल क्येडा दारशो बेबीलोन कली सोदोम नु गोमोररा खोदेशो सेल्लुड। उत्पत्ती १९:२४-२५ 20 मिनु मेको सहरम गेनायो लेंशा मुर मबाक्नीम। पाला पाला सम्म मुर मबाक्नीम। मेकेर अराबीपुकीम आन ताम्बु मकीनीम। गोठलापुकीमी आन बस्तु भाव मनाइक्पाइक्नीम। 21 तन्न मेको ब्वाकी डा जन्तु आन बाक्तीक दुम्ब। मेको आन खिंम बुक्स ब्रीशो बाक्नीम। मेकेर ब्वाकी डा ग्रीब जन्तु, ठेयब चिक्ब बाक्नीम। मिनु ब्वाकी डा क्यारश सिल पाइनीम। यसैया २३:१३ 22 मेको आन श्येतथ खिंम फर ग्रीनीम। आन दारशो दरवारमी सिवार ग्रीनीम। मोदेशो दुम्तीक नाक्ती जाक्चशो बाक्ब। मुल रीब पा जाक्ब” देंत।

14

इस्राएली कली ग्येरपाइशो

1 मिनु परमप्रभु यावेमी याकूब कली शिशी पा, इस्राएल कली योव्रशा लेंशा मेको आन कली आन रागीमी चोइक्ब। मिनु अर्को रागी डा मुरपुकी याकूब आ खिं डा मुर नु गारशा बाक्नीम। जकरिया १:१७ 2 मेना रागी रागी डा मुरपुकीमी इस्राएली आन कली आन रागी चोव्रदीनीम। इस्राएलीपुकीमी मेको रागी डा मुर आन कली परमप्रभु यावे आ रागीमी बाक्शा, आन वाइलीम वाइल सेल्लनीम। डोंइती आन कली ग्याइशशा चोक्ब आन कली ग्याइशशा चोक्नीम। मिनु आन कली दिप्ब आन कली हुकुम पाइनीम। यसैया ४९:२२; लेवी २५:२३

बेबीलोन डा पिप साइशो

3 मिनु परमप्रभु यावेमी इन कली श्येत जतीके, खेदा पचा पुंइसीतीके नु शुश गेय पतीक रे नाइक्चा गेप्टु हना, 4 गेपुकीमी बेबीलोन डा पिप आ पबर्म “मुर आन कली दिप्ब, दोपा थुम्से? आ श्येत गेशा हुकुम पतीके, दोपा बेक्मे?” दे शुक्शी लोव्र पाइनीनी। 5 परमप्रभु यावेमी आ अरेशो लोव्र मटीब आन कोक्के जिक्तु। मिनु श्येत गेब पिप आ सासन पतीक कोक्के रोइक्ताक्व। 6 डोंइती मेकोमी गाइशशा, मुर आन कली तुप्ना तुप्न बाक्त। मेको पिपपुकीमी रागी रागी कली आन गाइक्तीकेमी मनाइक्थु खेदा पा श्येत गेम्तेक्म। 7 मुल रागी डा मुर नेल्ल सिक्सी पा नाइशशा बाक्चा ताइनीम। मिनु ग्येरशा कुम्सो पाइनीम। 8 तोव्रशी रवापुकी नु लेबानोन डा लाइशशा रवापुकीमी यो ग्येरशा “गे खतम दुमे रे आंइ कली क्योरब सुइ मजाक्म” देंनीम। 9 मिनु बेक्शो मुर आन बाक्तीकेमी इ जाक्दीशो आ पबर्म ग्रांग्ये माग्ये दुम्नीम। रागी डा मुरपुकीमी “इन कली ताक्चा कली बोक्नीम। रागी रागी नु जात जात डा पिप आन कली आन नित्तीक रे पोक्शा राप्पाइक्नीम। 10 मेको नेल्लेमी इ कली ‘गे यो आंइ खोदेशो पा सक्ति मपाइशशा दुमे बाक्त। गे यो आंइ खोदेशो दुम्ते। 11 इ दारस नु इ ठेयब ताप्तीके नेल्ले यो बेक्शो मुर आन बाक्तीके जाक्तेक्म। लुस्पु इ ब्राख्ये दुम्नीम। बुस्स इ फेक्तीक दुम्ब’। इजीकीएल ३२:१८-१९

12 गे सुनी आ तौ, सुकुर सोरुल, दोपा सरीड रे दोक्डे? रागी रागी डा मुर आन कली ग्राब, दोपा क्योरचा पुंइसीशा दोक्डे?” देंनीम। 13 गे इ थुमी “गो स्वर्ग डोइशशा लाइनुड। परमप्रभु आ सोरुल आन क्येडा आइक्था आं नित्तीके वोइक्नुड। मिनु गो उत्तर डा देवी देवता गुम्तीक डांडाम नित्नुड। भजन संग्रह ४८:३; इजीकीएल २८:१४ 14 गो गोस्स क्येडा ग्येतथ डोइशशा लाइनुड। मोपा गो नेल्ल क्येडा ठेयब नु उइक्थ दुम्नुड” देंते। 15 तन्न गे बेक्शो मुर आन बाक्तीकेम तोक्चा पुंइसाक्वे। तुरस क्येडा यो उइ तोक्चा पुंइसाक्वे। 16 इ कली ताइबपुकीमी “मार, मेरे मुरुम रागी हिम्पाइशशा, राज्यपुकी खिंखि पपदा? 17 मेरेम रागी नेल्ल गोरशो रागी सेल्लशा, सहर नेल्ल खतम पोक्गा? चोक्सीशो मुर आन कली आन खिं लेत्चा मगेब मुर मेरेन बाक्बा?” देंनीम। 18 मिनु रागी नेल्ल डा बेक्शो पिपपुकी बेक्शो पिप आन कली वोइक्तीकेम वोइशशा बाक्नीम। 19 तन्न गे सोव्रशो राशी खोदेशो पा इ तुरस रे डोन ताइक्चा पुंइसाक्वे। तरवारम तूशा साइशशा मुर बाक्तीके लशो मुरपुकी इ सुम्तीके दुम्तेक्म। गे बेक्शा दिम्शो खोदेशो दुम्ते। यसैया ३४:३ 20 गे अरु पिप खोदेशो पा थिम्चा मपुंइसे। मारदे हना गे इ रागी खतम सेल्लशा इ मुर आन कली साइक्तीवी। मोपतीके मरिम्शो पाइब आन चच युइ आन नें गेनायो ममिम्सीब। 21 आन आफ आन मरिम्शो पशो आ पबर्म आन तौ आन कली क्योरचा कली ठीक दुमीन। मुर आन रागी कली आंम के सेल्लब नु रागी कली सहरम प्रिंब कली बोक्चा मगेन। प्रस्थान २०:५

22 मुर नेल्ल आन परमप्रभु यावेमी “गो बेबीलोन डा मुर आन नें, लीशो नु आन आल नु खिं डा मुर नेल्ल क्याम्नुड। 23 गो मेको आन सहर काशश आन बाक्तीके नु ब्वाक्कु देम्तीके सेल्लुड। गो मेको आन कली खतम सेल्लब ब्राक्सुम फिक्नुड” दे मुर नेल्ल आन परमप्रभु यावेम देंत।

अस्सुर आ सक्ति नुष्शो

24 मिनु मुर नेल्ल आन परमप्रभु यावेमी कसम जशा “थमा पा, आं डोंइती मिम्शो खोदेशो पा दुम्पाइक्नुड। गो आं देशो पाइनुड। 25 गो अस्सुर डा मुर आन कली आं रागीम साइशशा, आं डांडा दिम्पाइक्नुडमी। मोपा आं जुवा गुंडनुड। मिनु आन श्येत आन बला रे फेत्नुड। 26 एको रागी नेल्ल कली देशो लोत्र बाक्ब। एको रागी रागी नेल्ल तार दिंशो गुड बाक्ब। 27 मारदे हना मुर नेल्ल आन परमप्रभु यावेमी मोदेशो पचा कली मिम्शो बाक्ब। सुम मेको कली तेक्ने चाप्बा डा? आ दिंशो गुड सुम लेप्पाइक्ने चाप्बा डा? सुडम मचाप्नीम” दंत।

पलिस्ती आन कली लोत्र पशो येरमीया ४७:-

28 मिनु पिप आहाज बेक्शो बर्सम परमप्रभु यावेमी लोत्र पाप्तु। मार लोत्र पाप्तु देशा हना, २राजा १६:२० 29 “ए पलिस्तीपुकी, इन कली तुप्ब कोक्के जिक्त, दे मग्येरसीन। मारदे हना बुस्स आ चच युइ रे बीस पाइशशो बुस्स का गूब। मेको रे बीस पाइशशो बेरब बुस्स का गूब। 30 नेल्ल क्येडा डोंइती जरमेशो, प्रुडग आन दाते डा मुरुम जचा ताइनीम। मारेइ मथीब मुरपुकी यो महिंथु बाक्ने चाप्नीम। तन्न इन खिं डा मुर आन कली अन्कालम बेक्पाइक्नुड। मिनु इन लीशो मुर आन कली साइक्नुड। 31 सहर डा ठेयब लाप्चोपुकी, डाक्कीन। सहर नु पलिस्ती नेल्ल हिंशा खिंखि पने। मारदे हना उत्तर रे कुन कुशा, ठेयब हुल, नेल्ल काथा जाक्नीम।

32 मिनु रागी रागी डा लोत्र कुरब आन कली मार देंनीनी? परमप्रभु यावेमी सियोन सेल्लु। मिनु आ मुर आन दाते डा क्येट मथीब मेकेर रिम्शो पा बाक्नीम” दंत।

15

मोआबी आन कली श्येत येरमीया ४८:-; सेफन्याह २:८-११

1 मिनु परमप्रभु यावेम मोआब आ पर्वम यसैया कली “मारदे हना काबु नाक्दोमी आर-मोआब सहर खतम दुम्त। मिनु मोआब ग्रांग्ये माग्ये दुम्त। काबु नाक्दोमी कीर-मोआब सहर खतम दुम्त। मिनु मोआब ग्रांग्ये माग्ये दुम्त। 2 दीबोन डा मुर देवी देवता आन थान लाम्तेक्म। डांडा डा थानमी डाक्थ लाम्तेक्म। मोआबीपुकीमी नेबो नु मेदेबा सहर आस पर्वम रोंका पाइनीम। मेको नेल्लेम आन चां नु आन गाल शोक्ने प्रेक्शो बाक्नीम। 3 मेकोपुकी सहर डा लांमी अरन्डी फेक्शा, खिं तारी नु बजारम गुम्शा रोंका पा डाक्ना डाक्न बाक्नीम। 4 हेशबोन नु एलेआले सहर डा मुर वाइ ब्रेशशा डाक्नीम। मेको आन डाक्शो याहास सम्म नेंसीब। मोपतीके मोआब डा लडाइ पाइबपुकी खिंखि पा आन थुं लुक्च लाइब। यसैया १६:९-११ 5 आं थुं मोआब आ पर्वम वाइ ब्रेशशा डाक्ब। मेकेर डा मुरपुकी सोआर नु एगलाथ-शेलीशीया प्रोक्नीम। मेकोपुकी डाक्ना डाक्न लुहीथ डा डांडा डोइक्नीम। मेकोपुकीमी होरोनाइम डा लांमी खतम दुम्चा आ पर्वम रोंका पाइनीम। 6 निम्नीम डा ब्वाक्कु सोवनीम। घांस नेल्ल सोवनीम, नक खुम्शो मवानीम। गिगी नेल्ल सोवनीम। 7 मोपतीके मेकोपुकीमी आन लीशो मारेइ मारेइ लाइशशा रवा पाइशशो खोल्सा आइक्ची हांबु लाइक्नीम। 8 मारदे हना मोआब रागी नेल्लेमी मेको आन डाक्शो नेंसीब। मेको आन रोंका पशो एगलाइम नु बेयर-एलीम सम्म जाक्दीशशो बाक्ब। 9 मारदे हना दीबोन खोला डा ब्वाक्कु हुशेम ब्रीशो बाक्त। मोपा यो मेको आन कली चिनु श्येत गेनुड। मोआब रे प्रोक्शा ब्रोंइशो नु लीशो मुर आन नोले गुप्स का सोइक्नुड” दंत।

16

मोआबीम “वारच पने” देशो

1 गेपुकीम सेला सहर रे पा सियोन डा तमी आ डांडा डा पिप कली पाठा सोइक्तीन। 2 आन ग्योत्र रे खेरशो एर ओंथ ब्रशा बेरशो चिक्ब खोदेशो पा मोआब डा तमीपुकी अरनोन खोला आ नेक्था बाक्नीम। 3 गे अर्ती गेशा, ठीक निसाफ पने। नाक्त बाक्त हना यो, इन वांकु नाक्दो डा खोदेशो सेलीने। गुंडशो मुर आन कली खुइक्तीन। प्रोक्ब आन पर्वम मशेंदीन। 4 मोआब रे प्रोक्शो मुर आन कली गेपुकी नु बाक्चा गेने। मेको आन कली साइक्ब रे प्रोंइशा, वारच पने। मुर आन कली दिप्बपुकी मबाक्तेक्म हना, खतम दुम्तीके नुप्त हना, श्येत गेबपुकी रागी रे फिक्चा पुंडसाक्म हना, 5 गेना हना यो दाक्ब आ नित्तीक वोंइसीब। मेको दाऊद आ ताम्बुम बाक्ब। मिनु मेको नित्तीकेमी थमा सुइक्चा पुंडसीब ठीक निसाफ पा हुकुम पाइब का निस्सीब। मेकोमी रीब पा कुल मकोत्रथु, निसाफ पाइब।

6 गो मोआब आ ठेयब लेशशा पशो लोत्र नेंतय। मेको थम ठेयब लेशशो बाक्ब। मेको आ ठेयब लेत्तीके नु बोरशा लोत्र पतीके फश खोदेशो बाक्ब। 7 मोपतीके मोआबी रोंका पामेक्ल। मोआब आ पर्बम रोंका पामेक्ल। थाम्पा रोंका पने। किर-हारेसेथ डा अडगुर शोब्ले आ पर्बम रोंका पने।

8 हेशबोन डा रू खतम दुम्तेक्म। सिब्मा डा अडगुर बोट मलीनीम। मेको आ अडगुर शांबुमी रागी रागी डा हुकुम पाइब आन कली दुक्पाइक्तु। मेको आ अडगुर बोट याजेर सम्म लशा, गोरशो रागी सम्म जाक्दीत्त। मेको आन शाक्श ब्रशा, समुन्द्र आ आइक्ची हांबु सम्म जाक्दीत्तेक्म। 9 मोपतीके गो सिब्मा डा अडगुर बोट आ पर्बम याजेर खोदेब पा डाक्नुड। गो इस कली आं प्रेक्कुम जिप्पाइक्नुड। मारदे हना हेशबोन नु एलेआले, इस अडगुर नु अन्न ओइंची नाक्त मजाक्ब। यसैया १५:४-९ 10 मिनु ग्रेल्शो रू रे ग्येरशो सेंदा मनेंसीब। इस अडगुर रूमी ग्येरशा कुम्सो मपाइनीम। सुइमी अडगुर मखाक्नीम। आन ग्येरशा कुम्सो पतीके जात्त। येरमीया ४८:३३ 11 मोपतीके मोआब आ पर्बम आं थुं डाक्ब। मिनु कीर-हेरेस आ पर्बम आ थुं खाइक्ब। 12 मिनु मोआबी आन देवी देवता बाक्शो डांडा डोइशशा, शुश प्रार्थना पाम्तेक्म हना यो, मेको शोर गाक्शो दुम्ब।

13 एको परमप्रभु यावेमी मोआब आ पर्बम डोंइती देशो लोत्र बाक्ब। 14 मुल चहिं परमप्रभु यावेमी “गाल्च ताइबम आ बर्स हिक्शो खोदेशो पा बर्स सांमी मोआब आ दारस जाम्शा लाइब। मिनु आ ठेयब हुल शुश मलीनीम। मेको आ लीशो मुर शुश मदुम्थु, सक्ति मपाइशो दुम्नीम” देंत। यसैया २१:१६

17

दमस्कस नु इस्राएल कली श्येत

येरमीया ४९:२३-२७; आमोस १:३-५

1 मिनु परमप्रभु यावेम दमस्कस आ पर्बम यसैया कली “दमस्कस सहर खतम दुम्शा मलीब। मेकेर ब्रेशो खिं ला बाक्नीम। 2 आरोएर डा सहरपुकी प्रोंइसीशो दुम्शा, क्यारश भेडा योव्रतीके दुम्ब। मेको काइ महिक्सीशो नाइक्तीक दुम्ब। 3 एफ्राइम डा बोल्यो दरवार नुप्नीम। दमस्कस डा राज्य मलीब। अराम डा लीशो मुरपुकी इस्राएली आन जाम्शो छेडछेड खोदेशो दुम्नीम” दे मुर नेल्ल आन परमप्रभु यावेम देंत। २राजा १६:९

4 मिनु परमप्रभु यावेमी “मेको नाक्ती याक्ब आ मुर आन रिम्स नेल्ल लाइब। मेको नेल्ल गेयनीम। 5 मिनु दोदेशो पा चेरब रिक्ब मुरुमी गुइ कामी चेरब ग्याइशशा, अर्को गुइमी रिक्बा, मोदेशो पा रेफाइम डा बेसीम सिला गुप्तीक बाक्ब। 6 तेल रवा हिक्शा गेडा नेल्ल तोक्शा यो का निक्शी लीशो खोदेशो पा, मेको आ डल नु राशीमी का निक्शी ला लीनीम” दे परमप्रभु यावे, इस्राएली आन परमप्रभुमी देंत।

7 मेको नाक्ती मुरपुकीमी आंम कली सेल्ब कली मिम्नीम। मिनु इस्राएली आन का ला बाक्शो परमप्रभु यावे गे कोव्रनीम। 8 मेकोपुकीम आंम आन गुइमी सेल्शो देवी देवता आन कली चढेचा ममिम्नीम। आंमा आन सेल्शो मूर्ति पाइशो थाम नु धूप चोतीके कली मकोव्रनीम।

9 मेको नाक्ती आन बोल्यो सहरपुकी हिक्वी नु एमोरी आन प्रोंइशो सहर खोदेशो दुम्नीम। मेको आन सहर इस्राएली आन पर्बम प्रोंइशो बाक्तेक्म। मेकेर डा मारेइ मारेइ नेल्ल खतम दुम्शो बाक्तेक्म।

10 मारदे हना गे इन कली पाप रे प्रोंइब परमप्रभु कली प्रेंताक्नी। मिनु इन खुइक्तीक सेरथे फुल्लु कली मफुक्नी। गे अर्को रागी डा रिम्शो अडगुर खुम्तीनी। यसैया ६:२-३; ब्यवस्था ३२:१५ 11 गे दारशो बोट खुम्तीनी हना यो, मिनु आ दीसा सुनी बोइक्पाइक्तीनी हना यो, मेकेर खुप्चा कली मारेइ मलीब। श्येत जतीके नु खाइशो मसातीके नाक्त मोदेशो दुम्ब।

शुश रागी डा मुर आन हुल

12 आबी, शुश रागी डा मुर आन रेयके, समुन्द्र डा ब्वाक्कु खोदेशो पा नेंसीब। आबी, रागी रागी डा मुर आन ग्रीशो बारशो खोला आ रेयके खोदेशो बाक्ब। 13 रागी रागी डा मुरपुकी ठेयब ब्वाक्कु ग्रीशो खोदेशो पा ग्रीनीम। तन्न परमप्रभुमी मेको आन कली हुइक्ब। मिनु मेकोपुकी डोन प्रोक्नीम। मेको डांडा डा फश गिवारम बेरपाइशो भूस फुरक खोदेशो दुम्नीम। 14 नाक्दो हिंचा डा श्येत जाइनीम। नां सोव्रचा क्येडा डोंइती मेको नेल्ल बेक्नीम। आंइ मार मार रोइक्ब नु खुइ पाइबपुकी मोदेशो दुम्नीम। यसैया ३७:३६

18

कूश रागी आ पर्वम लोत्र पशो

1 आबी, शुश बेरशो रेयके नेसीशो एथीयोपीया खोला आ आइक्ची हांबुम बाक्शो रागी। सेफन्याह ३:१० 2 गे लोत्र कुरब मुर आन कली रीब पा डोंगाम समुन्द्रम सोइक्ताक्वी। गे लोत्र कुरबपुकी, लाइशो मुर नु रीब पा गेय पाइब मुर आन रागी लन। डोन नु नेक्था डा मुर नेल्ल मेको आन कली तशा हिंनीम। मेको सक्ति पाइशो नु ग्राब रागी डा मुर बाक्नीम। आन रागी शुश खोलाम चेशो बाक्ब।

3 गे रागी रागीम बाक्ब मुरपुकी, रागी नेल्लेम ब्रोंडबपुकी डांडाम छेदर खुक्शो ताइतीनी हना, कोवडीन। तुराही ताप्शो बाक्त हना, नेनीन। 4 मारदे हना परमप्रभु यावेमी आं कली “गो आं बाक्तीके रे पा सिक्सी पा कोवनुड। नाप्शो नां डा नाक्त खोदेशो नु बाली नाली रिक्ची ना हुप्शो नांमी गोस्स का गूशो खोदेशो पा सिक्सी पा कोवशा बाक्नुड। 5 अडगुर मीचा क्येडा डोंइती फू बोइशशा, गेडा सिप्ब, मिनु मीब। मेना मेकोमी अडगुर कली गुयेम मुंइशा, आ बरशो राशी खोइशशा ताइक्ब। 6 मिनु डांडा डा ठेयब चिक्ब नु रागी डा जन्तु आन कली ब्वचा गेब। होश दुम्तीके ठेयब चिक्ब मेको तारी नित्नीम। मिनु हिंडदम ब्वाकी डा जन्तुपुकीम मेको ब्वशा, मेको आ तारी इप्नीम” देत।

7 मेना लाइशो नु दारशो मुरपुकीमी मुर नेल्ल आन परमप्रभु यावे कली मार मार चाक्नीम। मिनु मेको आन कली तशा डोन नु नेक्था डा मुरपुकी हिंनीम। मेकोपुकी सक्ति पाइशो नु ग्राब रागी डा मुर बाक्नीम। मेको आन रागी खोलाम चेशो बाक्ब। मेको आन मार मार मुर नेल्ल आन परमप्रभु यावे आ बाक्तीके सियोन डांडाम चाक्नीम। भजन संग्रह ६८:३०-३२; प्रेरित ८:२७

19

इजीप्त कली निसाफ पशो

येरमीया ४६:-; इजीकीएल २९:-३२:-

1 मिनु परमप्रभु यावेम इजीप्त आ पर्वम यसैया कली “कोवडीन, परमप्रभु यावे रीब पा बेरब गोस्सुम इजीप्त रागी जाक्ब। मेकेर डा मूर्तिपुकी हिंशा खिंखि पाइनीम। इजीप्त डा मुर आन थुं लुक्च लाइब। 2 गो इजीप्त डा मुर आन कली आंम आंमा लडाइ पपाइक्नुडमी। मोपा मेको आन लोक्ब नु लडाइ पाइनीम। आन नेक्था डा मुर लडाइ पमुइनीम। सहर सहर लडाइ तोमुइनीम। राज्य राज्य लडाइ तोमुइनीम। 3 मिनु इजीप्त डा मुर आन थुं लुक्च लाइब। गो मेको आन मिम्शो खतम सेल्लुड। मिनु मेकोपुकीमी आन मूर्ति नु बेक्शो मुर आन सल्ला नेंचा मालनीम। 4 गो इजीप्त डा मुर आन कली शिशी मपथु, सासन पाइब आ गुइमी जिम्मा गेनुडमी। मिनु हिंचा डा पिपमी मेको आन कली सासन पाइब” दे परमप्रभु, मुर नेल्ल आन परमप्रभु यावेमी देत।

5 मिनु नील खोला डा ब्वाक्कु सोव्रना सोव्रन लशा, ब्वाक्कु मबाक्शो दुम्ब। 6 मेकेर डा ब्वाक्कु रिना पाइब। मिनु इजीप्त डा नील खोला डा आइक्च खोलापुकी सोव्रशा शुश मलीनीम। 7 नील खोला आ नेक्था दिंम दुम्शा, मुरपुकीम रू सेल्लनीम। तन्न आन शोक्शो मारेइ मारेइ सोव्रशा, फशेम योल्ब। 8 मिनु डांड साइक्ब मुर नेल्ल रोंका पाइनीम। बोलसी ग्यारबपुकी नु ग्याइल आप्बपुकी “मार पचा, दो पचा” देनीम। 9 श्येले सेल्ब नु वा प्रोव्रबपुकीम सुर्ता पाइनीम। वा प्रोव्रब हिंनीम। 10 प्रोव्रना प्रोव्रन बाक्बपुकी राव किक्नीम। मिनु गाल्च ताक्शा गेय पाइबपुकी रोंका पाइनीम।

11 सोआन डा ठेयब मुरपुकी मूर्ख बाक्नीम। फाराओ कली अर्ती गेबपुकीम दूली अर्ती गेनीम। गे दोपा फाराओ कली “गो जोक्ब तुइक्ब नड। गो साइ डोंइती डा पिप आ खिं रे पिशो बाक्नुड” देने चाप्नीनी? 12 गे, निप्स पाइशो मुरपुकी ते बाक्नी? गेपुकीम मुर नेल्ल आन परमप्रभु यावेमी इजीप्त कली मार पचशो बाक्मे, मेको लोत्र पा मुर आन कली तुइक्पतीन। 13 सोआन डा ठेयब मुरपुकी मूर्ख दुम्तेक्म। मेम्फीस डा ठेयब मुरपुकीम जोल लोत्र कली थमा सुइक्नीम। मिनु मेको आन नेल्ल क्येडा ठेयब मुरपुकीमी इजीप्त डा मुर आन कली हेंथे लां खोइक्पाइक्नीम। 14 परमप्रभु यावेमी मेको आन कली ग्रांग्ये माग्ये पोक्तीक सोक्तीम प्रिंताक्मी। मेकोपुकीम इजीप्त रागी कली दुक्शो मुर आन मेशो तार गाक्शो खोदेशो सेल्लेक्म। 15 इजीप्त रागी कली सुइमी वारच पने मचाप्नीम।

16 मेको नाक्ती इजीप्त डा मुर आन थुं मीश मुर आन थुं खोदेशो दुम्ब। मेकोपुकी मुर नेल्ल आन परमप्रभु यावेमी आ गुइ क्युक्शो तशा खिंखि पा हिंनीम। 17 इजीप्त रागी डा मुरपुकी यहूदा डा मुर आन क्येडा हिंनीम। मुर नेल्ल आन परमप्रभु यावेमी इजीप्त रागी कली मार पचशो बाक्बा, मेको लोत्र नेब नेल्ल हिंनीम।

रागी सां आन कली आसीक

18 मिनु मेको नाक्त इजीप्त रागी डा ५ ओटा सहरमी कनानी आन लोव्र ब्वाक्नीम। मिनु सहर डा मुरपुकीमी, मुर नेल्ल आन परमप्रभु यावे आ नेमी कसम जाइनीम। मेको सहर का आ नें इर-हेरेस बाक्ब। इर-हेरेस आ अर्थ नां आ सहर देंसीब। यसैया ६५:१६; येरमीया १२:१६ 19 मेको नाक्ती इजीप्त रागी आ दातेमी परमप्रभु यावे कली चढ़ेतीके का सेल्नीम। मिनु मेको आ सांदमी परमप्रभु यावे कली थाम का सेल्नीम। लेवी २६:१ 20 मेको थाम इजीप्त रागीमी मुर नेल्ल आन परमप्रभु यावे कली मिम्तीक चिन्ड का दुम्ब। मारदे हना मेकोपुकीमी श्येत गेचा पुंडसीतीके परमप्रभु यावे कली “वारच पाइक्की” दे लोव्र पाइनीम। मिनु परमप्रभु यावेमी मेको आन कली आन श्येत रे प्रोंइब का सोइक्ब। मेकोमी लडाइ पा मेको आन कली श्येत रे प्रोंइब। 21 मिनु परमप्रभु यावेमी आंम कली इजीप्त डा मुर आन डोंइती तुइक्पांडसीब। मिनु मेको नाक्त इजीप्त डा मुरपुकीमी परमप्रभु यावे कली थमा सुइक्नीम। मिनु मार मार चोशा चढ़ेतीक चढ़ेशा, कबल पा, आन पशो कबल खाप्नीम। यसैया ६६:१९ 22 परमप्रभु यावेमी इजीप्त डा मुर आन कली तुप्ब। मिनु सापाइक्ब। मिनु मेकोपुकी परमप्रभु यावे आ नोले खोइक्नीम। मिनु मेको आन पुंडशो लोव्र नेंशा। मेको आन कली सापाइक्ब।

23 मिनु मेको नाक्ती इजीप्त रे अस्सुर सम्म ठेयब लां का दुम्ब। मिनु अस्सुर रागी डा मुरपुकी इजीप्त जाक्नीम। इजीप्त डा मुरपुकी अस्सुर लाइनीम। मिनु इजीप्त नु अस्सुर डा मुर गारशा परमप्रभु यावे कली ठेयब सेल्नीम।

24 मिनु मेको नाक्ती इजीप्त, अस्सुर नु इस्राएल नेल्ल क्येडा नोले डा इस्राएल रागी दुम्ब। मेको रागी रागी आन दातेमी मेको सांफा आसीक ताइब दुम्नीम। ब्यवस्था ४:२०; रोमी १५:१० 25 मिनु मुर नेल्ल आन परमप्रभु यावेमी आसीक गेशा मेको आन कली “आं इजीप्त डा मुर, आं सेल्शो अस्सुर रागी नु आं योव्रशो इस्राएल डा मुरपुकी आसीक रमल” देंब।

20

अस्सुरमी ग्राशो

1 मिनु अस्सुर डा पिप सारगोन आ सासनमी आ कप्तान लडाइ पथ लशा, अशदोद सहर ग्रात। २ राजा १८:१७ 2 मेना परमप्रभु यावेमी आमोज आ तौ यसैया कली “इ फेक्शो अरन्डी नु जुत्ता प्रुतो” देंत। मिनु मोपा यसैया जुत्ता मलिकथु, वा मफेक्थु, शिश्रा गाक्चा गोप्तु। 3 मिनु परमप्रभु यावेमी “आं गेय पाइब यसैया दोपा शिश्रा नु जुत्ता मलिकथु बर्स सां सम्म इजीप्त नु एथीयोपीयाम चिन्ड कोंइचा कली गाक्मे, 4 मोपा अस्सुर डा पिपमी इजीप्त रागी नु एथीयोपीया डा मुर आन कली ग्याइशशा लाइक्ब। ठिटा नु खूशो नेल्ल आन कली शिश्रा, जुत्ता मलिकपाइक्थु नु देल्लो तपाइशशा लाइशशा, इजीप्त कली मुने तोक्ब। 5 मिनु सु सुमी ‘एथीयोपीया डा मुरुम आंइ कली वारच पाइनीम। इजीप्त बोल्यो बाक्ब’ देंनीमी, मेको नेल्ल मुने दोक्नीम। 6 मिनु मेको नाक्ती समुन्द्र आ नेक्था बाक्ब मुरपुकीमी ‘कोव्रडीन, डोंइती वारच पा अस्सुर नु लडाइ पन, दे ब्रेशो रागी आस कली अस्सुर डा पिपम ग्याइशशा लाइक्तु। गो मुल दोपा ब्रोंइचा’ देंनीम” देंत।

21

बेबीलोन आ पर्बम लोव्र पशो

यसैया १३:-; यसैया १४:-

1 मिनु परमप्रभु यावेम समुन्द्र आ नेक्था डा गोरशो रागी आ पर्बम यसैया कली “नेगेब रे फश पिना पिन बाक्ब। मेको गोरशो रागी रे पीब। मेको हिंचा डा रागी बाक्ब। 2 गो हिंचा डा लोव्र का नेंता। श्येत गेबपुकीम श्येत ला गेनीम। खतम पोक्बपुकीमी खतम ला पोक्नीमी। एलाम, गे कुवो। गे लशा, मादी रागी डा मुर पुम्दीने। गो मेको आन हुकयी पचा तेक्नुड” देंत। 3 मोपतीके आं पोक्च खिंखि पाइनीम। गो सुत्केरी रोइ पशो आल थिचशो मीश मुर खोदेशो दुम्ती। गो राप्ने मचाप्थु, नेने नु तने मचाप्चा डा श्येत जशो बाक्नुड। 4 गो ग्रांग्ये माग्ये दुम्शो बाक्नुड। आं दाक्शो हाम्सोमी नाइक्चा मलनु, आं कली खिंखि पपाइक्ती। 5 मेकोपुकीमी जचा कली ठीक सेल्नीम। वा ब्राइनीम। जाइनीम, तूनीम। ए, कप्तानपुकी, बोक्कीन इन तेक्तीक तेल खेक्तीन। 6 मारदे हना परमप्रभुमी आं कली “कोव्रब मुर का वोतो। मेकोम मार ताइबा, शोव्रडल। 7 मेकोमी शारा डोइक्ब आन कली जोड जोड पा जाक्ना जाक्न ताइब, गधा डोइक्ब नु दलओंठ डोइक्ब ताप्तु हना, शुश कोव्रशा, नोफा दाइशशा नेनल” देंत। 8 मिनु कोव्रब मुरुमी गुप्स खोदेशो पा, ठेयब सेंदा पा “परमप्रभु, गो नाक्दो नाक्ती खाल पतीकेमी खाल पा राप्शा बाक्शो बाक्नुड। 9 कोव्रडीन, शारा डोइक्ब जोर

जोर पा जाकना जाकन बाकनीम” देंत। मिनु मेकोमी “बेबीलोन ब्रुत। मेको आन देवी देवता आन मूर्ति नेल्ले खपीम ताइक्चा पुंडसाकम” देंत। प्रकाश १८:२ 10 गे आं तुप्शो नु क्राप्शो रागी डा मुरपुकी, मुर नेल्ल आन परमप्रभु यावे, इस्राएली आन परमप्रभु रे नेंशो लोत्र गो इन कली देंती।

एदोम आ पर्वम पशो लोत्र
येरमीया ४९:७-२२, २८-३३

11 मिनु परमप्रभु यावेमी दुमा आ पर्वम यसैया कली ब्यवस्था २:५ 12 गो सेइर रे सेंदा का नेंता। मेको सेंदामी “ए, खाल पाइब मुर, नाकदो दोशो दुम्मे? दोशो लीमे? ए, खाल पाइब नाकदो दोशो दुम्मे? दोशो लीमे?” देंत। मिनु खाल पाइबमी “नां सोत्रब, मिनु नां रिक्ब। मारेइ हिल्लो पचा बाक्त हना, आं बाक्तीक जाक्कीन। मिनु हिल्लो पयीनी” देंत।

अराब रागी आ पर्वम पशो लोत्र

13 मिनु परमप्रभु यावेमी गोरशो रागी आ यसैया कली “ए, अराब रागी डा मुरपुकी गे अराब डा मुर मबाक्तीकेमी बाक्स बाक्चा मालनीनी। गे दलओंठ डोइश्शा देदान आ थर डा ग्याप्ब लेयब पिने। 14 तेमा रागी डा मुरपुकी, ब्वाक्कु तूतू दाक्ब आन कली ब्वाक्कु चाक्कीन। प्रोक्शा जाक्ब आन कली शोब्ले कुरशा, गुमथ लने। 15 मारदे हना मेकोपुकी शोइश्शो तरवार, खुक्शो लिब्रा नु ठेयब लडाइ रे ब्रोंइशा जाक्शो बाकनीम” देंत।

16 मिनु परमप्रभुमी आं कली “गाल्च ताइबम आ बर्स हिक्शो खोदेशो पा बर्स का नोले केदार आ दारस नेल्ल जाम्ब। यसैया १६:१४ 17 मिनु केदार डा लडाइ पाइब लिब्रा आप्ब मुर का निक्शी ला लीनीम। मारदे हना एको परमप्रभु यावे, इस्राएली आन परमप्रभु आ देशो लोत्र बाक्ब” देंत।

22

यरूसलेम आ पर्वम लोत्र पशो

1 मिनु परमप्रभु यावेमी कोंइतीक बेंसी आ पर्वम यसैया कली “गे नेल्ल मार दुम्नी डा मीन, नेल्ल इन खिं तार डोंइसीनी? 2 गे, ग्रांग्ये माग्ये नु रेयकेम ब्रीशो सहर, इ बेक्शो मुरपुकी तरवारम क्योरशा साइश्शो मनम। लडाइम साइश्शो यो मनम। 3 इ सासन पाइब कालेम प्रोक्तेकम। लिब्रा मआप्थु ग्याइक्चा पुंडसाकम। डोंइती सु सु डोन प्रोक्तेकम हना यो, मेको कालेम ग्याइक्चा पुंडसाकम। 4 मोपतीके गो आं कली मकोत्रयीनी। गो हुइ हुइ पा डाक्नुड। आं कली लेम्चा थुं मपने। मारदे हना आं दाक्शो मुर खतम दुम्तेकम” देंत। येरमीया ८:२३ 5 मिनु नाक्त काम परमप्रभु, मुर नेल्ल आन परमप्रभु यावेमी कोंइतीक बेंसीम दिम्शा ताइश्शा नु ग्रांग्ये माग्ये पपाइक्ब। गारो प्रेशो डांडा सम्म “वारच पने” दे वाइ ब्रेशो सेंदा नेंसीब। 6 एलाममी ब्रा कुरतीके कुरतु। मुरपुकी बग्गी डोइश्शा गाक्चा गोम्तेकम। कीर सहर डा मुरपुकीमी तेक्तीके शोल्लेकम। 7 इ रिम्शो बेंसी बग्गीम ब्रीशो बाकनीम। शारा डोइक्ब सहर डा ठेयब लाप्चो आ डोंइती ठीक दुम्शो बाकनीम। 8 परमप्रभुमी यहूदा आ सुम्तीके हुक्तु। मेको नाक्ती गेपुकी पिप आ या वोइक्तीके, ब्वाकी डा खिं मिम्ताक्नी। 9 मिनु गेपुकीमी दाऊद आ सहर डा खिं शुश रेक्शो ताइतीनी। मिनु आइदी दोम्ली डा ब्वाक्कु ताप्तीनी। यसैया ७:३ 10 मिनु गे यरूसलेम डा खिं हिक्शा, प्रेशा, सहर डा गारो बोल्यो सेल्लतीनी। येरमीया ३३:४ 11 मिनु गे सहर डा गारो निक्शी आस दातेमी माइत दोम्ली डा ब्वाक्कु तेम्तीनी। तन्न इन कली मोदेशो पपाइक्ब कली ममिम्तीनी। डोंइती रे नेल्ल सेल्ब कली चहिं मान मपनी।

12 मेको नाक्ती परमप्रभु, मुर नेल्ल आन परमप्रभु यावेमी डाक्चा, रोंका पचा, चां खोइक्चा नु अरन्डी फेक्पाइक्चा कली इन कली ब्रेत्ताक्व। आमोस ८:१० 13 तन्न गेपुकीमी ग्येरशा, ब्यफ नु भेडा क्योरशा, ब्वशा, अडगुर शांबु तूशा “लो, जय ब्वय, तूय, मारदे हना दीसा बेक्नय” देंतीनी। १कोरिन्थी १५:३२ 14 मुर नेल्ल आन परमप्रभु यावेमी आं कली “मेको इन मरिम्शो पशो मबेक्नी सम्म लीब” दे परमप्रभु, मुर नेल्ल आन परमप्रभु यावेमी देंत।

एल्याकीम कली योत्रशो

15 मिनु परमप्रभु, मुर नेल्ल आन परमप्रभु यावेमी “गे खिं नेल्ल कली कोत्रब शेब्ना आ बाक्तीकेम लावो। यसैया ३६:३ 16 मिनु मेको कली ‘गे मार पना पन बाकनीनी? गे इ के एकेर मार बाक्बा डा। एकेर इ मुर सु बाक्नीमी। मारदे डांडामी तुरस मुपदी? मारदे सेरथे फुल्लु आगाम मुर बाक्तीके सेल्लनी?’ देंत 17 परमप्रभु यावेमी इन कली एक रे मरिम्शो पा डोन ताइक्ब। इन कली बोल्यो पा ग्याइक्ब। 18 इ कली हिरशा हुरद आप्शो खोदेशो पा ठेयब रागीमी

ताइक्ब। मिनु गे मेक उइ बेक्नेवे। इ दारशो बग्गी यो मेक उइ लीनीम। गे इ होवप आ खिं कली मुने तोक्ब बाक्नेवे 19 गो इ कली इ गेय रे गुंइशा, आइक्च सेल्नन।

20 मेको नाक्ती गो हिल्कीयाह आ तौ आं गेय पाइब एल्याकीम कली ब्रेत्नुड। 21 मिनु गो मेको कली इ वा फेक्पाइक्नुड। इ किप्शुर किप्पाइक्नुड। मिनु इ अधिकार मेको कली गेनुड। मिनु मेको यरूसलेम नु यहूदा डा मुर आन आफ दुम्ब। उत्पत्ती ४५:८ 22 गो दाऊद आ खिं डा सांचो मेको कली गेनुड। मेकोमी रोक्ब, सुइम मचोक्नीम। मेकोमी चोक्ब सुइम मरोक्नीम। प्रकाश ३:७ 23 मिनु गो मेको कली किला खोदेशो पा सारो खपीम ग्रुक्नुड। मेको आ किकी पिपी आन खिं डा मान पाइक्चा पुंइसीब दुम्ब। 24 मिनु आ आफ आ खिं डा ठेयब मुर नु आल चच युइ नेल्ले मेको आ अधिकारम बाक्नीम। खिं डा बोस नेल्ल मेको आ अधिकारम बाक्नीम” देंत। 25 मेको नाक्ती मुर नेल्ल आन परमप्रभु यावेमी “मेको सारो खपीम ग्रुक्शो किला हिम्पाइक्ब। मेको कली क्योरशा ताइक्नीम। मिनु आ पतीक अधिकार नेल्ल जाम्ब” दे परमप्रभु यावेमी देंत।

23

टायर आ पर्बम लोव्र पशो
इजीकीएल २६:-२८:-

1 मिनु परमप्रभु यावेमी टायर आ पर्बम यसैया कली “गे, टारसीस डा जहाजपुकी रोंका पने। मारदे हना टायर खतम दुम्शो बाक्ब। मेकेर खिं नु जहाज नाइक्तीके मलीब। साइप्रस टापु रे जाक्ब आन कली नेंपाइश्शो बाक्तेक्म। इजीकीएल २७:१२ 2 समुन्द्र आ नेक्था बाक्बपुकी रोंका पने। गे सीदोन डा ग्याप्ब लेयबपुकी इन मुर समुन्द्र शोक्साक्म। 3 इन मुर ठेयब ब्वाक्कु शोक्शा, लशो बाक्तेक्म। शीहोरम शोक्शो अन्न नु नील खोला आ एर ओंथ खुप्शो इन ग्याप्तीक लेयतीक बाक्त। मिनु गे रागी रागी डा मुर आन ग्याप्ब लेयब बाक्तीनी। 4 सीदोन, गे मुने पावो। मारदे हना समुन्द्र डा बोल्यो टायर सहरमी ‘गो सुत्केरी रोइ मपड। गो आल मथिड। गो वोंइश आल नु मीश आल आन कली मथुलु’ देंतीनी। 5 इजीप्त रागीम टायर आ पर्बम लोव्र जाक्दीम्मेनु, मेकेर डा मुर हिंनीम। 6 गेपुकी टारशीश शोक्शा, लने। समुन्द्र आ नेक्था बाक्ब मुरपुकी रोंका पने। 7 मार, मेको इन ठेयब सहर बाक्बा डा? मेको साइ डोंइती रेन बाक्शो सहर बाक्त। मेकेर डा ग्याप्ब लेयब मुरपुकी डोन डोन सम्म लाम्तेक्म। 8 सुमी टायर कली मोदेशो पचा मिम्ता? डोंइती टायर सिरपेच योक्ब बाक्त। आ ग्याप्ब लेयब मुर पिप आ तौ खोदेशो बाक्तेक्म। आ ग्याप्ब लेयबपुकी रागीम मान पाइक्चा पुंइसीब बाक्तेक्म। 9 मिनु मुर नेल्ल आन परमप्रभु यावेमी मेको मिम्ताक्व। आ शुश दारस आ पर्बम ठेयब लेत्तीके खतम सेल्चा नु आ मान पाइक्चा पुंइसीब आन कली मुने तोक्चा कली मिम्ताक्व। 10 टारशीश डा जहाजपुकी इन रागी लने। मुल रे मेकेर जहाज नाइक्तीके मबाक्ब। इजीकीएल २७:१२ 11 परमप्रभु आ गुइ समुन्द्र तार दिंशो बाक्ब। मिनु राज्य राज्य आन कली हिम्पाइश्शो बाक्ब। परमप्रभु यावेमी कनान रागी डा बोल्यो दरवार आन कली खतम सेल्चा” दे अरेशो बाक्ब। 12 मिनु मेकोमी “गे दिप्चा पुंइसीशो कन्ने तमी सीदोन, मुल रे ठेयब लेशो मबाक्नेवे। बोक्को, साइप्रस टापु गे लावो। गे मेकेर यो इ थुं नाइश्शा बाक्चा मताइनेवे” देंत।

13 कल्दी डा मुर आन रागी कोव्रडीन। अस्सुरम ममाइ, कल्दीपुकीम सहर नेल्ल मुर मबाक्तीके सेल्तेक्म। मेको टायर सहर ब्वाकी डा जन्तु आन बाक्तीक सेल्तेक्म। मेको सहर पुम्चा कली लाइश्शो खिं सेल्तेक्म। सहर डा दरवार प्रेत्तेक्म। सहर नेल्ल खतम सेल्तेक्म। 14 टारशीश डा जहाजपुकी रोंका पने। मारदे हना इन बोल्यो दुम्तीके प्रेत्तेक्म।

15 मिनु नोले टायर ७० बर्स, पिप का आ ब्रोंइतीके बर्स खोदेशो, मदुम्म सम्म प्रेंचा पुंइसीब। मिनु मेको ७० बर्स नोले टायर सहर तेल्लेम आ कुम्सो देशो खोदेशो दुम्ब। 16 गे प्रेंसीशो तेल्लेम, इ बीना रिम्शो पा ताप्शा, सहरम हिरसो। शुश कुम्सो पावो। मिनु इ कली फ्रुक्नीमी कों? 17 मिनु ७० बर्स नोले परमप्रभु यावेमी टायर सहर कली मिम्ब। मिनु मेकोम लेंशा आ तेल्लेम पशो डा क्येट ताइब। मिनु मेकोमी तेको तेको रागी डा राज्य डा पिपपुकी नु तेल्लेम पाइब। 18 मिनु आ तेल्लेम पा चेम्शो क्येट परमप्रभु यावे के दुम्ब। मेको क्येट महेंनीम। आ चेम्शो क्येट परमप्रभु यावे आ डोंइती बाक्ब। मेको क्येट मुर आन कली जचा फेक्चा कली गेनीम।

24

रागी नेल्ल आन कली निसाफ

1 परमप्रभु यावेमी रागी नेल्ल मुर मबाक्तीक सेल्लब। नेल्ल श्येतथ सेल्लब। रागी कली ग्येतथ लुक्च पा मेकेर डा मुर नेल्ल आन कली ब्रपाइक्ब। 2 मुर आन कली दोदेशो दुम्बा, चढेब आन कली यो मोदेशो दुम्ब। वाइल आन कली दोदेशो दुम्बा, आन होव्रप आन कली यो मोदेशो दुम्ब। वाइलीम आन कली दोदेशो दुम्बा, आन होव्रपोक्म आन कली यो मोदेशो दुम्ब। ग्याप्ब आन कली दोदेशो दुम्बा, लेयब आन कली यो मोदेशो दुम्ब। जेर थुइक्ब आन कली दोदेशो दुम्बा, जेर गेब आन कली यो मोदेशो दुम्ब। 3 रागी थमा पा श्येतथ नु मुर मबाक्तीके दुम्ब। मारदे हना मेको परमप्रभु यावे आ देशो लोव्र बाक्ब।

4 रागी फू खोदेशो पा सोल सुल बेक्ब। रागी नेल्ले मोदेशो दुम्नीम। रागी डा मान पाइक्चा पुंइसीब नेल्ल बेक्नीम। 5 रागीम बाक्ब मुरपुकीमी रागी कली खतम सेल्लनीम। मारदे हना मेकोपुकीमी परमप्रभु यावे आ अरेशो मटीम। परमप्रभु आ फुल्लुम मुशा ब्रेक्शो लोव्र कली ममिम्तेम। आ गेना हना यो लीब कबल पशो मखबेम। 6 मोपतीके सरापमी रागी कली खतम सेल्लशो बाक्ब। मिनु मेकेर बाक्ब आन पापम पतीके श्येत जाइनीम। का निक्शी ला लीनीम। 7 अडगुर शांबु ग्युरब। अडगुर बोट सोव्रनीम। डोंइती ग्येरसीशा बाक्ब मुर नेल्ल हुकयी पाइनीम। 8 बाजा ताप्ब आन ग्येरशो रेयके मनंसीब। ग्येरशो मुर आन सेंदा मलीब। बीना ताप्ब आन रेयके जाम्ब। 9 मुल रे अडगुर शांबु तूडमेनु, कुम्सो मपाइनीम। राकसी तूब आन कली राकसी काइब। 10 मेको ग्रांग्ये माग्ये सहर खतम दुम्ब। मेको खिं डा लाप्चो नेल्ल चोक्सीशा, सुइ ओव्रने मचाप्नीम। 11 लां गाक्ब मुरपुकी अडगुर शांबु मबाक्तीके सुर्ता पाइनीम। ग्येरसीतीके नेल्ल नुप्ब। रागी डा ग्येरसीतीके जाम्त। 12 सहर मुर मबाक्तीक दुम्शा, आ गारो डा ठेयब लाप्चो ब्रेत्तेक्म। 13 मोदेशो रागी नु रागी रागी डा मुर आन कली दुम्चा माल्ब। तेल रवा आन फल थेषा नु अडगुर सेक्शा यो सीला लीशो खोदेशो पा रागी नेल्ल मोदेशो दुम्चा माल्ब।

14 मिनु मेको लीशो मुरपुकी ग्येरशा ठेयब सेंदा पा “परमप्रभु यावे ठेयब बाक्ब” दे पच्छिम रे कुम्सो पाइनीम। 15 मोपतीके पूर्व डा मुर “परमप्रभु यावे ठेयब बाक्ब” दे मेको कली ठेयब सेलीन। समुन्द्र आ नेक्था बाक्ब आन कली “परमप्रभु यावे, इस्राएली आन परमप्रभु आ नें कली मान पने” देंमानु, मेको कली मान पाइनीम। 16 गो रागी आ सुर रे परमप्रभु कली ठेयब सेल्लतीक कुम्सो पशो नंतय। ठीक पाइब, परमप्रभु कली ठेयब सेल्लतीक कुम्सो बाक्नीम। तन्न गो शुश श्येत जाइब दुम्ती। आबी, गो श्येत जाइब दुम्ती। मारदे हना दूली पाइबम, मुल सम्म दूली पाइनीम। मिनु मेको क्येडा यो दूली पाइनीम।

17 गे रागी डा मुरपुकी, इन डोंइती शुश हिंचा डा बाक्ब। इन डोंइती बिक्तीके नु ब्वारद बाक्नीम। 18 मिनु सु सु शुश हिंचा डा रेयके नेंशा प्रोक्नीमी, मेको बिक्तीकेम बिक्नीम। सु सु बिक्तीके रे ग्रूनीमी, मेको ब्वारदम रेत्नीम। मारदे हना सरीड डा झेल रोक्सीशो बाक्नीम। मिनु रागी आ जग हिम्सीशो बाक्ब। येरमीया ४८:४३-४४; आमोस ५:१९; उत्पत्ती ७:११ 19 मिनु रागी एशशा, ब्रोल्लब। खिनुम हिम्सीब। २पत्रुस ३:१० 20 रागी अडगुर शांबुम दुक्शो मुर खोदेशो पा एर ओंथ हिम्सीब। खिनुम हिम्शो कटेरा खोदेशो पा हिम्सीब। मुर आन हेंथे पतीकेमी मेको मोदेशो सेल्लतु। मिनु रागी गेनायो मबोक्चा डा पा गोल्लब।

21 मेको नाक्ती परमप्रभु यावेमी स्वर्गम बाक्ब सक्ति पाइशो आन कली सजाइ गेब। मिनु रागी कली सासन पाइब पिप आन कली सजाइ गेब। दानीएल १०:१३; येरमीया ४६:२५ 22 जेल्खानम खुम्सीशो मुर खोदेशो पा बिक्तीकेमी खुम्सीचा पुंइसीनीम। मेको जेल्खानम चोक्चा पुंइसीशा, शुश नाक्त नोले सजाइ ताइनीम। 23 मेना तास्ला लल जीब, नां आ छेडछेड जाम्ब। मारदे हना मुर नेल्ल आन परमप्रभु यावेमी सियोन डांडा नु यरूसलेमम सासन पाइब। खाल्पा आन डोंइती आ छेडछेड कोंइब।

25

ग्येरशा कुम्सो पशो

1 परमप्रभु यावे, आं परमप्रभु बाक्नीनी। गो इन कली मान पशा, इन नें ठेयब बाक्ब, दे कुम्सो पाइनुड। मारदे हना गे छक लाक्चा डा गेय पाइतीनी। इन डोंइती मिम्शो मप्रोंइथु, थमा पा थुम्तीनी। 2 मारदे हना गे सहर कली फुल्लु तेलतीके खोदेशो सेल्लतीनी। गारो हिरशो सहर कली प्रेत्तीनी। अर्को रागी डा मुर आन दरवार मुल मली। मिनु मेको गेनायो मसेल्लनीम। 3 मोपतीके बोल्यो मुरपुकीम इन कली मान पाइनीम। बोल्यो राज्यपुकी इन क्येडा हिंनीम। 4 मारदे हना गे पुडग नु मारेइ मथीब आन कली वारच पाइब बाक्तीनी। फश गिवार पवानु, फाम्सीतीके नु नां पवानु, सितल थेरतीके बाक्तीनी। मारदे हना मेको शिशी मपाइक्ब आन गाइक्चा, फश गिवार गारोम थोक्सीशो खोदेशो बाक्ब।

यसैया ४:६ 5 सोव्रशो रागीमी नांम नाप्पाइशो खोदेशो पा, अर्को रागी डा मुर आन रेयके पतीक साम्तीनी। नां कली गोस्सुम सुम्शो खोदेशो पा, शिशी मपाइब आन ग्राशा ग्येरशा पतीके कुम्सो तेक्तीनी।

परमप्रभु आ गेशो भोज

6 मिनु मुर नेल्ल आन परमप्रभु यावेमी सियोन डांडामी रागी नेल्ल डा मुर आन कली थम ठेयब भोज का सेल्ब। ब्रोव्रशो नु चोक्शो अडगुर शांबु नु ब्रोव्रशो जचा थोव्रक के भोज गेब। मत्ती २२:२-४ 7 मिनु मेकोमी मेको डांडामी जात जात डा मुर आन थुं डा सुम्तीके हुक्ब। रागी रागी डा मुर आन सुम्तीके हुक्ब। मेना मेकोमी मुर आन कली मबेक्पाइक्ब। 8 मेना परमप्रभु, परमप्रभु यावेमी मुर नेल्ल आन प्रेक्कु फिक्ब। आ मुर आन कली मदाक्तीके रागी नेल्ल रे ग्रुंडब। मारदे हना परमप्रभु यावेमी मेको लोव्र पाप्तु। १कोरिन्थी १५:५५; प्रकाश ७:१७ 9 मिनु मेको नाक्ती मुरपुकीमी “कोव्रडीन, मेको आंइ परमप्रभु बाक्ब। गो मेको आ लां कोव्रतक। मिनु मेकोम आंइ कली श्येत रे प्रोइतु। मेको आंइ रिम्शा बाक्शो परमप्रभु यावे बाक्ब। गोपुकी आ प्रोइशो तशा ग्येरसाक्क। भजन संग्रह ४८:१५ 10 मारदे हना परमप्रभु यावे आ गुइ मेको डांडा तार बाक्ब। मिनु मोआब रागी डा मुर आन बाक्तीके दिम्चा पुंडसीनीम। मेको नेल्ल मोव्रल वोइक्तीके खोदेशो पा दिम्चा पुंडसीनीम। 11 मिनु दोपा दोम्ली ग्यारब मुरपुकीमी आन गुइ दिनीमी, मोपा मेकोपुकीमी आन गुइ दिनीम। मिनु परमप्रभुमी मेको आन ठेयब लेशो नु आन सक्ति आइक्च सेल्ब। 12 मिनु आ बोल्यो नु लाइशो गारो प्रेशा, आइक्च सेल्शा, खप नु उइक्थ सेल्ब। मिनु फुरक दुम्पाइक्ब” देनीम।

26

परमप्रभु आ मुर आन कुम्सो

1 मेको नाक्ती यहूदा रागी डा मुरपुकीम मार कुम्सो पाइनीम देशा हना “आंइ सहर बोल्यो बाक्ब। परमप्रभुमी आंइ कली ग्राचा गेब। लडाइ पाइब आन कली ओव्रने मचाप्तीके गारो हिरब। 2 मेको सहर डा गारो डा लाप्चो रोक्कीन। ठीक पाइब नु परमप्रभु यावे कली थमा सुइक्चा मप्रोइब ओव्रने चाप्मेक्ल। भजन संग्रह ११८:२० 3 गे ग्येतथ लुक्च मदुम्ब थुं पाइशो मुर आन कली थुं नाइक्चा गेनीनी। मारदे हना मेकोपुकी इन कली थमा सुइक्ब बाक्नीम। 4 गे परमप्रभु यावे कली गेना हना यो थमा सुतीन। मारदे हना परमप्रभु यावे गेना हना यो बाक्ब, सेरथे फुल्लु का बाक्ब। ब्यवस्था ३२:४ 5 मारदे हना मेकोमी ठेयब लेशो मुर ब्रेम्पाइक्तु। आन सहर कली आइक्च सेल्शा, खपीम वोइशशा, फुरक नु उइक्थ सेल्लु। 6 मुरपुकीम मेको कली दिम्नीम। पुडग मुरपुकीमी मेको कली दिम्नीम। क्येट मथीबम यो मेको कली दिम्नीम।

7 ठीक निसाफ पाइब आ लां ग्येतथ बाक्ब। गे ठीक पाइब आ लां थेल्लीनी। 8 परमप्रभु यावे, गो इन निसाफ पतीके कली रिम्नीकी। आंइ थुं नेल्लेमी इन नें नु इन कली मिम्शा बाक्नीकी। 9 गो नाक्दो इन कली शुश मिम्नुड। गो आं थुंमी इन कली मालना मालन बाक्नुड। मारदे हना गे रागी डा मुर आन कली निसाफ पाइतीनी हना, रागीम बाक्बपुकीमी ठीक पतीके शेंसीनीम। भजन संग्रह ६३:७ 10 परमप्रभु यावे आ अरेशो लोव्र मटीब मुरपुकीमी शिशी ताम्तेक्म हना यो, ठीक पतीके मशेंसीनीम। मेकोपुकीमी ठीक पाइब आन रागीमी दूली पाइनीम। मिनु परमप्रभु यावे कली मान मपाइनीम। 11 परमप्रभु यावे, इन गुइ मेको आन पर्वम क्युक्शो बाक्तीनी हना यो, मेकोपुकीमी मतुइक्नीम। गे इन मुर आन कली दाक्शो तशा, मेकोपुकी मुने दोक्मल। इन जोरी सत्रु आन कली नेक्ब मीमी मेको आन कली यो नेक्गल। यसैया ३७:३२ 12 परमप्रभु यावे, गे आंइ कली थुं नाइक्चा गेनीनी। मारदे हना मार रिम्शो पका, मेको नेल्ल इन रे पा पिशो बाक्ब। यसैया ९:६ 13 आंइ परमप्रभु यावे अरु ठेयब मुरुम आंइ कली हुकुम पाम्तेक्म। तन्न गे का ला आंइ कली अरेब बाक्नीनी। 14 बेक्शो मुर मब्रोइनीम। वांकु मबोक्नीम। मारदे हना गे मेको आन कली साइशशा, मेको आन कली मिम्तीक यो क्याम्ताक्नी। 15 तन्न गे रागी डा मुर आन कली सोपाइशशा बोपाइशशा शुश सेल्लतीनी। गे मान ताइब बाक्नीनी। गे मेको रागी कली ठेयब सेल्लतीनी। 16 परमप्रभु यावे, मेको मुरपुकीमी श्येत जशा, इन कली माल्तेक्म। इन गेशो सजाइ तशा, आइक्च सेंदाम इन कली पुंडतेक्म। होसे ५:१५ 17 दोपा आल थिचा चिक्शो मीश मुरुम आ आल थिची ना वाइ ब्रेशशा, रोम्सीबा, मोपा परमप्रभु यावे, गो इन डोइती बाक्तक। यूहन्ना १७:२१; प्रकाश १२:२ 18 मिनु गोपुकी यो कोव्रज कुरशा रोम्साक्क। तन्न फश ला थीतक। गोपुकी आंइ रागी कली प्रोइने मचाप्क। मिनु आल थिशा यो शुश दुम्ने मचाप्क। 19 इन बेक्शो मुरपुकी लेंशा ब्रोइनीम। आन बेक्शो रां सेंसीनीम। गे फुरकुम बाक्बपुकी, बोक्कीन। ग्येरसीशा कुम्सो पने। मारदे हना इन सुनी डा सीत छेडछेडम ब्रशो बाक्ब। मिनु रागीमी शुश डोइती बेक्शो मुर आन कली ग्रुंडब। इजीकीएल ३७:१-१४; मत्ती २७:५२-५३

20 आं मुरपुकी जाकशा, इन खिं ओवडीन। मिनु इन नोले लापचो चोक्कीन। गाइक्चा मनुम्म सम्म इक्का नाक्ती खुंडसीन। मत्ती ६:६ 21 मारदे हना परमप्रभु यावे आ बाक्तीके रे जाक्ब। मिनु रागीम बाक्ब मरिम्शो पाइब आन कली सजाइ गेब। मिनु रागी तार देम्शो हुश नु साइशो मुर नेल्ल मखुइक्थु कोइब” दे कुम्सो पाइनीम। उत्पत्ती ४:१०-११; प्रकाश १८:२४

27

इसाएल कली श्येत रे प्रोइशो

1 मेको नाक्ती परमप्रभु यावेमी आ हिंचा डा, ठेयब नु सक्ति पाइशो तरवारमी खेदा पना पन लेव्याथन माइशो बुस्स कली सजाइ गेब। गेशा गाक्ब बुस्स लेव्याथन नु समुन्द्रम बाक्ब ठेयब जन्तु कली साइक्ब। भजन संग्रह ७४:१४

अडगुर रू आ पर्वम नक कुम्सो

2 मिनु मेको नाक्ती “नेल्ल क्येडा रिम्शो अडगुर रू का बाक्ब” दे कुम्सो पने। यसैया ५:१-७ 3 गो, परमप्रभु यावेमी मेको कली गेना हना यो कोवशा, ब्वाक्कु लुक्नुड। मरिम्शो म्दुम्ल, दे गो मेको कली नाक्दो नाक्ती कोवनुड। 4 गो मगाइक्नुड। चू चोक् वाम हना, गो मेको आन कली लडाइ तोशो खोदेशो पा, तुल्शा चोडमी वा। 5 मोदेशो म्दुम्ल हना, मेको गो नु गारशा, आं कली वारच सेल्ब। आं कली वारच सेल्ब। 6 मिनु नोले डा नाक्तीमी याक्बम आ शाक्श थोक्ब। इसाएल फू बोइशो, नक राशी दाप्ब। मिनु रागी नेल्ल मेको आन फल फुलमी ब्रीब। 7 मार, परमप्रभुमी आ कली तुप्ब आन कली तुप्शो खोदेशो पा मेको आन कली यो तुप्बा? परमप्रभुम आ कली साइक्ब आन कली साइशो खोदेशो पा मेको यो साइक्चा पुंडसमा? येरमीया ३०:११ 8 ग्याइशो लाइक्चा पुंडसीशो रागी रे गुंडशो मुर नु लडाइ पाइतीनी। परमप्रभुमी मेको आन कली मुइशो, पूर्व डा फश पवानु, ठेयब फश गिवारमी योल्पाइक्ब। 9 मोपतीके मेको रे पा याक्ब आ मुर आन दोस क्याम्सीब। मेको आन पाप पशो आ पर्वम मो पचा पुंडसीशो बाक्तेक्म। मेकोमी चढेतीके डा फुल्लु खरी खोदेशो पा फस सेल्ब। मिनु मूर्ति पाइशो थाम नु धूप चोशा चढेतीक काइ मलीपाइक्ब। लेवी २६:३० 10 मारदे हना गारो हिरशो सहर मुर मबाक्तीके दुम्त। मेकेर गोरशो रागी खोदेशो पा मुर मबाक्नीम। मेकेर बाछा जोशा नांडसीनीम। मिनु आ राशी ब्वाइनीम। 11 मिनु मेको आ राशी सोवशा, जिक्नीम। मिनु मीश मुरपुकी जाकशा, चोचा कली शी खुप्नीम। मारदे हना मेकोपुकी रुप्तीक मपाइशो थर डा मुर बाक्नीम। मोपतीके मेको आन कली सेल्बमी मेको आन कली शिशी मपाइब। येरमीया ४:२२; ब्यवस्था ३२:१८

12 मिनु मेको नाक्ती परमप्रभु यावेमी युफ्रेटीस खोला रे इजीप्त डा ब्वाक्कु मबाक्शो खोला सम्म अन्न तुप्ब। गे इसाएल डा मुरपुकी का का पा खुप्चा पुंडसीनीनी। 13 मेको नाक्ती ठेयब तुराही का ग्रीब। मिनु अस्सुर रागीम जाम्शो नु इजीप्त रागीम खेदा पचा पुंडसीशो मुरपुकी जाक्नीम। मिनु यरूसलेम डा परमप्रभु यावे आ डांडामी आ कली ठेयब सेल्नीम। यसैया ११:११-१२; योएल ३:५

28

सामरीया कली निसाफ

1 आबी, गे एफ्राइम डा दुक्शो ठेयब लेशो मुरपुकी, इन दारस फू खोदेशो पा बेक्ब। मेकेर ब्रोवशो जाइब नु दुक्शो मुर ला बाक्नीम। अडगुर शांबुम मेको आन कली नेक्शो बाक्ब। 2 कोवडीन, परमप्रभु नु बोल्यो नु सक्ति पाइशो का बाक्ब। मेको मुप्स ब्वांडसीशो फश गिवार खोदेशो बाक्ब। शुश रेउ ब्वांडसीशो फश गिवार खोदेशो बाक्ब। परमप्रभुमी मेको कली रागी तार तोक्ब। २राजा १७:५-६ 3 एफ्राइम डा दुक्शो मुर आन दारशो माला कली दिम्शा ताइशो पाइनीम। 4 मिनु मेको आ पिया डा दारस, फू खोदेशो पा बेक्ब। मेकेर ब्रोवशो जाइब ला बाक्नीम। मेको नेल्ल क्येडा डोंइती मीशो फोवशी खोदेशो बाक्नीम। सुम मेको ताइबा, मेकोम सेक्शा ब्वाइब।

5 मेको नाक्ती मुर नेल्ल आन परमप्रभु यावे आ लीशो मुर आन कली छेडछेड पा ब्रशो सिरपेच नु पियाम चुइक्तीके दुम्ब। 6 निसाफ पाइब कली ठीक पतीक सोक्त दुम्ब। मिनु लडाइ पाइब आन कली सहर डा लापचो रे खेरतीक सक्ति गेब दुम्ब।

चढेब नु परमप्रभु आ लोव पाइब

7 चढेब नु परमप्रभु यावे आ लोव पाइबपुकी यो अडगुर शांबुम दुक्नीम। राकसीम दुक्शा, दिड दाड गोल्चा चिकशा गाक्शो बाक्नीम। चढेब नु परमप्रभु यावे आ लोव पाइबपुकी राकसीम दुक्शा गाक्नीम। अडगुर शांबुम दुक्तीके आन

मिम्तीके ग्रांग्ये माग्ये दुम्त। मेकोपुकी राकसीम दुक्शा, दिड दाड गोल्चा चिक्शा गाक्शो बाक्नीम। मेकोपुकीम फश लोत्र ला पाइनीम। मतुइक्थु दूली निसाफ पाइनीम। 8 मेको आन जतीक मेर नेल्ले आन मेशोम ब्रीशो बाक्नीम। नेल्ल ग्रांग्रा दिशो बाक्ब।

9 मेकोपुकीमी सु आन कली जोक्तीक तुइक्तीक लोत्र रुप्पाइक्नीमी? सु कली आन देशो लोत्र शेंनीमी डा? मेकोपुकीमी नक दूध प्रोइशो आल आन कली शेंचा चिक्त्मे? 10 मेकोपुकीम “परमप्रभु आ ब्रेक्शा अरेशो पावो कि पावो, पावो कि पावो, पावो कि पावो। इच्का एकेर इच्का मेकेर” देंनीमी।

11 थमा पा, मेकोमी अर्को रागी डा मरुप्चा डा लोत्र पा, आ मुर आन कली शेंब। ब्यवस्था २८:४९; येरमीया ५:१५; १कोरिन्थी १४:२१ 12 मिनु परमप्रभुमी मेको आन कली “मेको थुं नाइक्तीक बाक्ब। गे दशो मुर आन कली नाइक्चा गेने। थुं बारपाइक्तीक एकोन बाक्ब” देंत। मो हना यो मेकोपुकीमी मनेंथु मटीमे। यसैया ३०:१५; मत्ती ११:२८-२९ 13 मोपतीके परमप्रभु यावे आ लोत्र मेको आन कली यो आन खोदेशो पा मरुप्चा डा लोत्र दुम्ब। मिनु “ब्रेक्शो, अरेशो पावो कि पावो, पावो कि पावो, पावो कि पावो। इच्का एकेर, इच्का मेकेर” देशो बाक्ब। मिनु मेकोपुकी लशा, नोले गे गोल्शा आन गुइ खोइली जिक्नीम। मिनु ब्वारदम रेशशा, ग्याइक्चा पुंइसीनीम।

14 मोपतीके गे शुक्शी पाइबपुकी, परमप्रभु यावे आ लोत्र नेनीन। गे यरूसलेम डा मुर आन कली हुकुम पाइनीनी। 15 मिनु गेपुकीमी “गोपुकीमी बेक्पाइक्ब नु कबल पमुशो बाक्नीकी। बेक्शो मुर आन बाक्तीके नु सल्ला पाइतक। ठेयब श्येत जाक्त हना यो, आंइ कली मारेइ मदुम्ब। मारदे हना जोल पतीके नु गारशा खुइशो बाक्नीकी। दूली पतीकेमी फाम्सीशो बाक्नीकी” देंतीनी। 16 मोपतीके परमप्रभु, परमप्रभु यावेमी “कोवडीन गो सियोन डांडाम जग फुल्लु का वोइक्नुड। मेको रिम्शो नु बोल्यो सुर डा फुल्लु बाक्ब। मेको शुश क्येट लाइब थम बोल्यो जग डा फुल्लु बाक्ब। सु सु मेको कली थमा सुइक्नीमी, मेको आन थुं लुकच मलाइब। भजन संग्रह ११८:२२; एफिसी २:२०; यसैया ७:९ 17 गो ठीक निसाफ कली गारो प्रोव्रची ना क्युक्तीक डोरी खोदेशो सेल्लुड। मिनु ठीक पतीके कली घन्टी खोदेशो सेल्लुड। मिनु मुप्सीम मेको जोल पा खुइक्तीके खतम सेल्लुब। ब्वाक्कुमी फाम्सीतीके योल्ब। 18 मेना इन बेक्पाइक्ब नु पशो कबल नुप्ब। इन बेक्शो मुर आन बाक्तीक नु पशो सल्ला जाम्ब। मिनु मेको हिंचा डा श्येत जतीक जाक्शा, इन कली सुम्ब। 19 मेको गिश खेयप जाक्त हना यो, इन कली सुम्ब। मारदे हना मेको सुनी कुस कुस जाक्ब। नाक्दो नाक्ती यो जाक्ब। मेको लोत्र रुप्चा चहिं शुश हिंचा डा बाक्ब। 20 मुर दिसामानु ‘इप्तीके आइक्च दुम्ब। फेक्तीक वामी सुम्समानु’ आन रां मसुम्ब” देंत।

21 मारदे हना परमप्रभु यावे पेराजीम डांडाम बोक्शो खोदेशो पा बोक्ब। मेको गिबोन डा बेंसीम गाइशो खोदेशो पा गाइक्ब। मोपा मेकोम आ गेय पाइब। मेको आ गेय छक लाक्चा डा बाक्ब। मिनु मरुप्चा डा बाक्ब। २सामुएल ५:२०; १इतिहास १४:११; १इतिहास १४:१६ 22 शुक्शी लोत्र मपने। मो पाइतीनी हना इन कली फ्रेंशो डोरी खांइसीब। मारदे हना परमप्रभु, मुर नेल्ल आन परमप्रभु यावेमी “रागी नेल्ल खतम सेल्लुड” देशो नेंता। यसैया १०:२२-२३

23 नेनीन, आं लोत्र नेनीन। नोफा दाइशशा, होस पा बाक्शा आं लोत्र नेनीन। 24 मार, शोक्चा कली ब्यफ वाक्ब मुरुमी गेना हना यो ब्यफ वाक्बा? मार, गेना हना यो कुटीम दोशा, रू थेल्लीनी? 25 डल्ला प्रोल्चा कली लेडको पशा, सोंप नु मस्ला मशोक्नीमी? चेरब मशोक्नीमी? क्योव्रज रूम क्योव्रज शोक्नीम। मिनु मोव्रल कली भूस फ्राइनीम। 26 मारदे हना आन परमप्रभुमी मेको आन कली रिम्शो पा शेंताक्ब।

27 सोंप कली दांइ मपाइनीम। मस्ला कली तूलीमी मतुप्नीम। सोंप कली आइक्च कोक्के नु मस्ला कली सिरकनामी तुप्नीम। 28 शोब्ले चोचा कली चेरब हिल्लीम। तन्न मतुप्नीम। फस सेल्चा कली दांइ मपाइनीम। 29 मेको मोदेशो नेल्ल मुर नेल्ल आन परमप्रभु यावेमी शेंशो बाक्ब। मेको अर्ती गेतीकेम छक लाक्चा डा नु तुइक्तीकेम नेल्ल क्येडा ठेयब बाक्ब।

29

अरीएल सहर कली श्येत दुम्शो

1 आबी, अरीएल, अरीएल सहर। दाऊद मेकेर बाक्शो बाक्त। गे मेकेर बर्स बर्स बाक्शा, चाड मानेन मानेन बाक्तीनी। अरीएल चढेतीक बाक्तीके यरूसलेम आ याइनी नें बाक्ब। 2 मो हना यो, गो मेको कली श्येत गेनुड। मेकेर डाक्शा, रोंका पाइनीम। यरूसलेम आं कली अरीएल का बाक्ब। 3 गो दाऊदम खोदेशो पा इ कली पुम्पाइक्नुड। गारो डोइक्चा कली लाइशो खिं सेल्पाइक्नुड। गो मोदेशो गेय शुश पपाइक्नुड। लूका १९:४३ 4 गे उइ खप रे लोत्र

पाइक्नेवे। मिनु फुरक रे पा ब्वाक्नेवे। इ लोत्र फुरक रे नेंसीब। इ सेंदा वोल आन सेंदा खोदेशो पा खप आगा रे गूब। इ लोत्र फुरक आगा रे पा आइक्च सेंदा पा नेंसीब।

5 तन्न इ जोरी सत्रु आन हुल फुरक खोदेशो पा शुश दुम्नीम। सक्ति पाइशोपुकी बेरशो भूस खोदेशो दुम्नीम। मेको नेल्ल याम कामी दुम्ब। 6 मिनु मुर नेल्ल आन परमप्रभु यावे इ कली गुम्थ जाक्ब। मेको बुंबु, खिनु ठेयब रेयके नु जाक्ब। मेको हिरशो फश गिवार नु ठेयब मी नु जाक्ब। 7 रागी रागी डा शुश मुरुमी अरीएल नु लडाइ पाइनीम। लडाइ पाइब नेल्लेमी मेको आन बोल्यो दरवार प्रेशशा, श्येत गेनीम। मेको डोमु तशो नु नाकदो कोंइतीक तशो खोदेशो पा दुम्ब। 8 दोदेशो पा शोत्रलु बेक्शो मुर आन डोमुम जशो ताइनीमी, मिनु सेंसीमानु शोत्रलुम बाक्नीमी। दोदेशो पा तूतू दाक्ब मुरुमी डोमुम तूशो ताइनीमी, मिनु सेंसीमानु आन लाक्चा सोत्रशो बाक्बा, मोदेशो पा सियोन डांडा नु लडाइ पाइब रागी रागी डा मुरपुकी दुम्नीम।

परमप्रभु यावे आ गेय

9 छक लाक्शा कोत्रडीन। मिक्च क्रिप्शा, मिक्च मताइब दुमीन। दुक्शो दुमीन। तन्न अडगुर शांबुम ममाइ। गोल्चा चिकशा गाक्कीन, तन्न राकसीम ममाइ। 10 मारदे हना परमप्रभु यावेमी इन तार शुश निन्द्रा पपाइक्ब सोक्ती मोइशो बाक्ब। मेकोमी गे परमप्रभु यावे आ लोत्र पाइब इन कली मिक्च मताइब सेल्लु। मिनु इन पिया सुम्तु। 11 मेको इन कली कोंइशो लोत्र नेल्ले, इन कली छाप थोक्शो किताब खोदेशो दुम्त। मेको पढेस जोक्ब कली “पढेवो” दे गेतीनी हना, मेकोमी “गो पढेने मचाप्नुड, मारदे हना एको छाप थोक्शो किताब बाक्ब” देंब। 12 मेको पढेस मजोक्ब कली गेशा “एको पढेवो” देंतीनी हना, मेकोमी “गो पढेस मजोक्नुड” देंब।

13 परमप्रभु यावेमी “एको मुरपुकी लोत्र पशा आं नेक्था जाक्नीम। मिनु आन शोत्रमी आं कली ठेयब सेल्नीम। तन्न आन थुंम चहिं आं क्येडा डोन बाक्नीम। मेको आन आं कली मान पतीके मुर आन शेंशो ला बाक्ब। यसैया १:१५; यसैया ५८:२-३; मत्ती १५:८-९ 14 मोपतीके गो एको मुर आन दातेमी छक लाक्चा डा, हिंचा डा नु मरुप्चा डा गेय पाइनुड। मेको आन जोक्ब तुइक्ब मुर आन तुइक्तीके जाम्शा लाइब। निप्स खाप्शो गेय पाइब आन निप्स खाप्तीके खुइक्चा पुंडसीनीम। १कोरिन्थी १:१९; मत्ती ११:२५

15 गे सु सुमी आंमा मिम्शा पशो गेय परमप्रभु यावे आ डोंइती खुइक्नीनी नु छिडछिडम गेय पशा, इ कली सुम ताइबा डा? इ कली सुम तुइक्बा डा?” देंनीनी। भजन संग्रह १०:११ 16 गे दूली पाइबपुकी, खप के ग्योंब सेल्ब मुर खप खोदेशो मिम्सीबा? मिनु सेल्शो थोत्रकमी आ कली सेल्ब कली “मेकोम आं कली मसेल्यी” देंबा डा? सेल्सीशोमी सेल्ब कली “मेको मारेइ मरुप्ब बाक्ब” देंने चाप्बा? यसैया ४५:९

नोले रिम्शो दुम्ब, दे आस पशो

17 मिनु इक्का नोले लेबानोन फल फुल रू दुम्ब। फल फुल रू चहिं ब्वाकी खोदेशो दुम्ब। 18 मेको नाक्ती नोफा मनेबपुकी किताब डा लोत्र नेंनीम। गेना हना यो छिडछिडम बाक्ब, मिक्च मताइबपुकी मिक्च ताइब दुम्नीम। यसैया ३५:५; मत्ती ११:५ 19 मिनु ब्रेम्शो मुर परमप्रभु यावे कली मिम्शा ग्येरसीनीम। मिनु क्येट मथीबपुकी इस्राएली आन परमप्रभु यावे कली मिम्शा थाम्पा ग्येरसीनीम। 20 मारदे हना हिंचा डा मरिम्शो पाइब मलीनीम। शुक्शी पाइबपुकी जाम्शा लाइनीम। मरिम्शो पचा माल्बपुकी साइक्चा पुंडसीनीम। 21 मेकोपुकीमी मुर आन कली निसाफ पतीकेमी बुपाइक्नीम। मिनु ठीक पाइब नु निसाफ पाइब कली ब्वारदम रेप्पाइक्नीम। मारेइ मरिम्शो मपाइब कली मोशा दोस गेपाइक्नीम। आमोस ५:१०

22 मोपतीके अब्राहाम कली प्रोंइब परमप्रभु यावेमी याकूब आ खिं डा मुर आन कली “मुल रे याकूब आ खिं डा मुर मुने मदोक्नीम। आन कुल ग्येरसीशो तांइसीनीम। 23 मिनु मेकोमी आन आल आन दातेम, आं पशो गेय, ताइनीम। मिनु आं नें ठेयब सेल्नीम। याकूब आ का ला बाक्शो परमप्रभु यावे कली तशा मान पा हिंनीम। इस्राएली आन परमप्रभु कली तशा मान पा हिंनीम। 24 मिनु काइ मरुप्ब मुरपुकी रूप्ब दुम्नीम। मिनु गन गन पाइबपुकी परमप्रभु आ शेंतीके लोत्र नेंनीम” देंत।

1 मिनु परमप्रभु यावेमी “आबी, गे काइ मटीब आलपुकी, गे आंम इन मिमिशो पाइनीनी। तन्न आं देंशो मटीनीनी। गे कबल का पाइनीनी। तन्न आं दाक्शो मिमिशो कबल ममाइ। पाप तारी पाप तेम्नीनी। यसैया १:२ 2 मेकोपुकीमी आं अर्ती आ पबर्म हिल्लो मपथु, इजीप्त रागी लाइनीम। मिनु मेकेर डा पिप फाराओम वारच पपाइसीनीम। मेकोपुकीमी इजीप्त रागीम फाम्सीचा माल्नीम। २राजा १८:२१ 3 मिनु फाराओ आ वारच पतीकेम इन कली मुने तोक्ब। मिनु इजीप्त रागीम फाम्सीचा माल्तीके इन कली थम आइक्च सेल्ब। 4 मिनु इजीप्त डा ठेयब मुरपुकी सोआन नु मेको आन सोइश्शोपुकी हानेस जाक्दीश्शो बाक्नीम। 5 मेको नेल्ल मुने दोक्नीम। मारदे हना इन कली वारच पने मचापथु, शोर गाक्शो दुम्नीम। तन्न इन कली मुने दोक्ब नु शिशी मताइब सेल्नीम।

6 मिनु परमप्रभु यावेमी दक्खिन डा नेगेब डा जन्तु आन पबर्म यसैया कली मेको रागी हिंचा डा नु श्येत डा रागी बाक्ब। मेकेर गुप्सनी नु ग्रीब गुप्स, बुस्स नु बीस पाइश्शो बेरब बुस्स बाक्नीम। मिनु मुरपुकीमी आन शोंप गधा आन तारी नु शुश क्येट लाइब थोत्रक दलओंठ आन तारी कुरपाइश्शा गाक्नीम। मेको शोर गाक्शो नु वारच मपाइब आन कली गेचा कली कुरपाइक्नीम। ब्यवस्था ८:१५ 7 मारदे हना इजीप्त डा मुर आन वारच पतीके शोर गाक्शो नु थमा पा वारच मपतीके बाक्ब। मोपतीके गो मेको कली लोत्र मपाइब, राहाब, दे नें वोइक्ता” देंत। भजन संग्रह ८९:११

परमप्रभु कली मटीबपुकी

8 मिनु परमप्रभु यावेमी यसैया कली “मुल गे लावो, मेको मुर आन डोंइती आं लोत्र फुल्लु तार ब्रेक्तो। मिनु किताबम ब्रेक्तो। नोले सम्म लील, दे नु गेना हना यो सांकछी दुम्पाइक्चा कली ब्रेक्तो। 9 मारदे हना एको मुर काइ मटीब बाक्नीम। थमा मसुइक्ब आल बाक्नीम। मेको आलपुकीमी परमप्रभु यावे आ शेंतीक लोत्र नेंचा मदाक्नीम। 10 मेकोपुकीमी नोले दुम्ब लोत्र ताइब आन कली ‘मतने। मकोवडीन’ देंनीम। मिनु परमप्रभु यावे आ लोत्र पाइब आन कली ‘ठीक पचा आ पबर्म आंइ कली लोत्र मपने। जोल पा हना यो, आंइ दाक्शो लोत्र ला पने। आमोस २:१२ 11 परमप्रभु यावे आ लां प्रोनीन। एर ओंथ लने। इस्राएली आन का ला बाक्शो परमप्रभु आ पबर्म मशेंदीन’ देंनीम” देंत। 12 मोपतीके इस्राएली आन का ला बाक्शो परमप्रभुम “मारदे हना गेपुकीमी आं देंशो नेंचा मदाक्नीनी, मुर आन कली दिप्तीके नु दूली पतीके कली ला थमा सुइक्नीनी। मिनु मेको पाइनीनी। 13 मोपा इन मरिमिशो पशो ब्रेत्चा चिक्शो लाइश्शो गारो खोदेंशो दुमिशो बाक्ब। मेको इन मतुइक्थु याम काम ब्रेप्ब। 14 दोदेंशो पा मुरुमी खप के ग्योंब बोल्यो पा प्रोल्नीमी, मेको के चुप्लु रे मी कोइला गुप्चा नु कुवा रे ब्वाक्कु ताप्चा डा टुक्रा का यो मलीबा, मोदेंशो पा प्रोल्चा पुंइसीनीनी” देंत।

15 मिनु परमप्रभु, इस्राएली आन का ला बाक्शो परमप्रभु यावेमी “आं गे लेशशा, सिक्सी पा बाक्नी हना, ब्रोंइनी वा। सिक्सी पा बाक्तीनी नु थमा सुइक्तीनी हना, गे बोल्यो दुम्नी वा। तन्न गे मटिनी। यसैया ७:४; प्रस्थान १४:१४ 16 गेपुकीमी ‘ममाइ, गो शारा डोइश्शा प्रोक्नीकी’ देंनीनी ‘मोपतीके गे प्रोक्चा माल्नीनी’ देंत। मिनु गेपुकीमी ‘रीब पा दोरब शारा डोइक्नीकी’ देंनीनी। मोपतीके इन कली खेदा पाइबपुकी यो दोरनीम। 17 मिनु मुर कामी हिंच कोंइशोमी, हजार का मुर प्रोक्नीम। ५ जना मुरुम हिंच कोंइशोमी नेल्ल प्रोक्शा, डांडा तारी कोक्के का खुक्शो खोदेंशो पा लीनीनी। डांडा तार डा छेदर का खोदेंशो पा लीनीनी” देंत। ब्यवस्था ३२:३०

परमप्रभुम सियोन नु कबल पशो

18 मुल सम्म परमप्रभु यावेमी इन कली शिशी पचा कली रिम्ब। इन कली आ दाक्तीके कोंइचा कली बोक्ब। मारदे हना परमप्रभु यावे ठीक निसाफ पाइब परमप्रभु बाक्ब। सु सुम मेको कली रिम्नीमी, मेको ग्येरसीशो बाक्नीम। 19 यरूसलेमम बाक्ब सियोन डा मुरपुकी, गे लेंशा मडाक्नीनी। मेकोमी इन ब्रेश्शो नेंशा, इन कली थमा पा शिशी पाइब। इन लोत्र नेंशा, लोत्र लेप्ब। यसैया ६५:२४ 20 परमप्रभुमी इन कली श्येत डा शोब्ले नु श्येत डा ब्वाक्कु गेप्टु हना यो, मुल रे इन कली शेंब मखुंइसीब। गेपुकीमी इन कली शेंब कली ताइनीनी। 21 मिनु गेपुकीमी “ग्युरा लां लड कों, पेरा लां लड” देंनीनु, इन नोले लोत्र कामी “लां मेकोन बाक्ब, मेको लां गाक्कीन” देंशो नेंनीनी। ब्यवस्था ५:३२ 22 मेना इन मुशा सेल्शो चांदी नु सुनम गिल्शो मूर्तिपुकी ग्रांग्रा दीनीनी। गे मेको आन कली ग्रांग्रा दिचा डा वा खोदेंशो पा ताइक्नीनी। मिनु मेको आन कली “डोन लने” दे ताइक्नीनी। यसैया २७:९

23 मिनु परमप्रभुमी इन शोक्शो रू कली रेउ यिपाइश्शा, अन्न सिप्पाइक्ब। मिनु अन्न ग्रेल्शा, शुश जचा ताइनीनी। मेना इन बी ब्यफ ठेयब दिंममी जोइनीम। 24 इन गेय पपाइश्शो ब्यफ नु गधापुकीमी ग्योलोम क्राप्शा, हिक्सी सुप्शो जचा थोत्रक जाइनीम। 25 आइक्च नु ठेयब डांडा नेल्ल रे ब्वाक्कु बुक्शा, खोल्सा नु खोला यिशा, ठेयब लडाइ दुम

नाक्ती गारो डा लाइशो खिं यो ब्रेत्नीम। 26 मिनु तास्ला आ छेडछेड नां आ छेडछेड खोदेशो दुम्ब। नां आ छेडछेड चहिं ७ ओटा नां आ छेडछेड खोदेशो दुम्ब। मेको ७ नाक्त डा छेडछेड दुम्ब। मेना परमप्रभु यावेमी आ मुर आन गार फ्रेंब। तुप्शो गार सापाइक्ब।

अस्सुर कली निसाफ पशो

27 कोव्रडीन, परमप्रभु यावे डोन रे जाक्ना जाक्न बाक्ब। आ गाइशो मी खोदेशो पा ब्रशा, शुश कुन गूब। आ शोव चुरचामी ब्रीशो नु आ लें ग्राव ग्नु दाक्ब मी खोदेशो बाक्ब। 28 आ सास शुर सम्म खुम्ब बारशो खोला खोदेशो बाक्ब। मिनु मेकोमी रागी रागी डा मुर आन कली खतम सेल्लतीक ग्योलोम क्राप्शा, आन शोवमी हेंथे लां कोंइब लगम पाइक्ब।

29 गेपुकी चाड मानेतीक नाक्दोम कुम्सो पशो खोदेशो पा ग्येरसीनीनी। गेपुकी बांसुरी ताप्बपुकी नु परमप्रभु यावे, इस्राएली आन सेरथे फुल्लु आ डांडा लाइब खोदेशो पा ग्येरसीशो मुर बाक्नीनी। ब्यवस्था १६:१४ 30 मिनु परमप्रभु यावेमी आ ठेयब सेंदामी लोव पशा नेंपाइक्ब। मेकोमी गाइशो चुरशा, आ गुइ याम पाइशो, मारेइ मारेइ नेक्ब मी ब्रपाइशो, बंबु पपाइशो, रेउ नु मुप्स यिपाइशो कोंइब। 31 मिनु परमप्रभु यावेमी अस्सुर डा मुर आन कली कोक्केम तेप्ब। मेको आ सेंदा नेंशा, अस्सुर डा मुर साप्पान हिंनीम। २राजा १९:३५-३७ 32 मिनु परमप्रभु यावेमी गिश खेयप तुप्बा, मीश खेयप खैजडी नु बीना ताप्शो नेंसीब। परमप्रभु आंमा अस्सुर डा मुरपुकी नु लडाइ पाइब। 33 मारदे हना डोंइती रे ठेयब चोतीके का सेल्लो बाक्त। मेको थमा पा पिप कली सेल्लो बाक्त। मेको शुश लुकच लशो नु ब्रेम्शो बाक्त। मेकेर मी नु शुश शी बाक्त। परमप्रभु यावे आ मुइशो गन्धक खोदेशो पा मेको मी ब्राइब।

31

परमप्रभुमी यरूसलेम कली कोव्रब

1 आबी, इजीप्त रागी कली “वारच पाइक्की” दे लाइबपुकी, मेकोपुकी शारा कली थमा सुइक्ब बाक्नीम। बर्गी कली थमा सुइक्नीम। मारदे हना मेकेर शुश बाक्नीम। शारा डोइक्ब आन कली थमा सुइक्नीम। मारदे हना मेको शुश बोल्यो बाक्नीम। तन्न मेकोपुकीम इस्राएली आन का ला बाक्शो परमप्रभु यावे कली ममिम्थु, हिल्लो मपाइनीम। यसैया ३०:१-२; भजन संग्रह २०:८ 2 मो हना यो परमप्रभु तुइक्ब बाक्ब। मिनु श्येत दुम्पाइक्ब। आ मिम्शो पशा, मरिम्शो पाइब आन खिं नु मेको आन कली वारच पाइब नु लडाइ पाइब। आमोस ३:६; गन्ती २३:१९ 3 इजीप्त डा मुर, मुर ला बाक्नीम। मेको परमप्रभु मनम। आन शारा बेक्ब बाक्नीम। सोक्त मनम। परमप्रभु यावेमी आ गुइ दिंदानु, वारच पाइब दाइल पांडसीनीम। मिनु वारच पपांडसीब नेल्ले कालेमी बेक्नीम।

अस्सुर कली निसाफ

4 मिनु परमप्रभु यावेमी आं कली “गुप्स कि गुप्स आ चाइक्ब आन सिखार तारी डरर डरर पाइनीमी। गोठलापुकीमी मेको आन सिखार रोइक्चा, दे जाक्तेक्म हना, गुप्स मेको आन ग्रीशो नेंशा महिंनीम। मेको आन पशो रेयकेमी गुप्स आन कली मप्रोक्पाइक्ब। मोपा मुर नेल्ल आन परमप्रभु यावे सियोन डांडा नु आ आइक्च डांडामी लडाइ पथ यीब। 5 दोपा चिक्बपुकीमी आन चाइक्ब आन तार फिल फिल पा कोव्रथ बेरनीमी, मोपा मुर नेल्ल आन परमप्रभु यावेमी यरूसलेम कली कोव्रब। मेको कली कोव्रशा, प्रोंइशा, आ नेक्था बाक्शा खाल पाइब। मत्ती २३:३७

6 ए इस्राएली, गे हेंथे पा शुश डोन लाइबपुकी, परमप्रभु गे लेतीन। येरमीया ७:३-५ 7 मारदे हना मेको नाक्ती गे नेल्लेमी इन सुन नु चांदी के मूर्ति नेल्ल बेरपाइक्नीनी। गे मेको पाप पा इन आंम गुइमी सेल्लतीनी। यसैया २:२० 8 मेना अस्सुर तरवारम साइक्चा पुंडसीब। तन्न मेको तरवार बेक्शा लाइब मुर के ममाइ। मेकोमी नेल्ल आन कली खतम सेल्लब। मेको तरवार तशा मुर नेल्ल प्रोक्नीम। मिनु आन ठिटापुकी वाइल दुम्नीम। यसैया ३७:३६ 9 अस्सुर डा पिप, सेरथे फुल्लु खोदेशो बोल्यो बाक्त हना यो, हिंशा प्रोक्ब। आ कप्तान आन छेदर प्रोंइशा प्रोक्नीम। परमप्रभु यावेमी आं चुप्लु सियोनम नु आं मी यरूसलेमम बाक्ब” देंत। ब्यवस्था ३२:३१

32

नोले डा राज्य

1 कोव्रडीन, नोले ठीक पाइब पिप काम सासन पाइब। ठेयब मुर नेल्लेमी ठीक निसाफ पाइनीम। यसैया ३३:१७; येरमीया २३:५ 2 मिनु मेको मुर नेल्ल फश रे खुंडसीतीके, रेउ यिमेनु फाम्सीतीके, सोवशो रागीमी ब्वाक्कु यितीके नु

थम होश रागीमी ठेयब सेरथे फुल्लु आ वांकु खोदेशो बाक्नीम। 3 कोवब मुर आन मिक्च ब्राब्रा मदुम्नीम। नेंबपुकीमी नोफा दाइशशा नेनीम। 4 रिम्शो पा रूप्ने मचापबपुकीमी तुइक्तीक शेंनीम। लेम्से पाइबपुकी रिम्शो पा ब्वाक्ने चाप्नीम। यसैया ३५:६ 5 मेना मुरुमी मूर्ख आन कली रिम्शो थुं पाइशशो मुर मदेंनीम। खुइ नु जोल पाइब आन कली हाइशशो मुर मदेंनीम। हितोपदेस २८:१६ 6 मारदे हना मूर्ख मुर मूर्ख लोव ला पाइनीम। मेको आन थुंमी मरिम्शो पचा ला मिम्शा बाक्नीम। परमप्रभु यावे कली मटीनीम। मेको आ पर्वम दूली शेंनीम। शोव्रलु बेक्ब आन थुं श्येतथ लीपाइक्नीम। मिनु तूतू दाक्ब आन कली तूचा मगेनीम। 7 मोदेशो मरिम्शो पाइब आन गेय मरिम्शो बाक्ब। परमप्रभु यावे आ अरेशो मटीबम “दोपा आं दाक्शो पने चाप्नुडा?” दे पुडग आन कली जोल पा नु मारेइ मथीबम ठीक लोव पाप्तेक्म हना यो, मेको आन कली खतम सेल्नीम। 8 तन्न रिम्शो थुं पाइशशो मुरपुकीमी रिम्शो गेय ला मिम्नीम। मिनु गेना हना यो रिम्शो गेय पा बाक्नीम।

परमप्रभु आ सोक्त जाक्ब

9 गे ठेयब लेशशो मीश मुरपुकी बोक्कीन। मिनु आं लोव नेनीन। गे काइ महिंथु बाक्ब तमीपुकी इन नोफा दाइशशा, आं लोव नेनीन। यसैया ३:१६-४:१ 10 गे काइ महिंबपुकी बर्स का नोले श्येत जशा खिंखि पाइनीनी। मारदे हना अडगुर सेक्चा मताइनीनी। फल फुल मसित्नीम। 11 गे ठेयब लेशशो मीश मुर खिंखि पने। गे काइ महिंबपुकी खिंखि पा हिनीन। इन वा पुइशशा अरन्डी फेक्सीन। 12 इन रिम्शो रू नु अडगुर बोट आन पर्वम इन कुचु तुप्शा डाक्कीन। 13 आं मुर आन रूम चू नु चोक वानीम। ग्येरसीशो मुर आन खिं नु सहर नेल्ल मोदेशो दुम्ब। 14 मारदे हना दरवार डा मुर नेल्ल प्रोक्नीम। शुश मुर बाक्शो सहर श्येतथ दुम्ब। ओफेल माइशशो ग्येतथ लुकच गाक्तीक लां नु मेकेर खाल पाइब मुर आन बाक्तीक गेना हना यो पुक्खी दुम्नीम। मेकेर ब्वाकी डा गधा ग्येरसीशा बाक्नीम। मिनु क्यारश भेडा आन जोतीक दुम्ब। 15 मिनु नोले परमप्रभु यावेमी आ सोक्ती इं तार मोइक्ब। मेना मुर मबाक्तीके गोरशो रागी ग्रेल्शो रू दुम्ब। मिनु मेको ग्रेल्शो रू ब्वाकी खोदेशो दुम्ब। यसैया ४४:३; यसैया २९:१७

थुं नाइशशा बाक्तीक राज्य

16 मेना मुर मबाक्तीके रागीमी ठीक निसाफ पाइनीम। ठीक पाइबपुकी ग्रेल्शो रूमी बाक्नीम। 17 ठीक पतीकेम थुं नाइक्चा गेब। ठीक पतीके आ सित्तीके सिक्सी पा बाक्चा नु गेना हना यो थमा सुइक्चा बाक्ब। 18 आं मुरपुकी थुं नाइशशा, महिंथु बाक्तीकेम बाक्नीम। लडाइ मदुम्थु, रिम्शो बाक्तीकेमी सिक्सी पा बाक्नीम। येरमीया ३३:१६ 19 तन्न ब्वाकी नेल्ल जाम्शा लाइब। सहर श्येतथ दुम्ब। 20 ब्वाक्कु आ नेक्था वांचेर शोक्बपुकी गे ग्येरसीशो मुर बाक्नीनी। गे गधा नु बी ब्यफ आन कली जोथ मो सोइक्ने चाप्नीनी।

33

सियोन कली खतम पोक्ब रे प्रोइशो

1 आबी, गे खतम पोक्ब, मुल सम्म गे खतम पोक्चा मपुंडसीशो बाक्नेवे। गे रोइक्ब बाक्नेवे। तन्न सुइमी मारेइ मरोइक्थु, गे खतम पोक्चा पुंडसीनेवे। मिनु इ रोइक्चा नुप्त हना, इ मारेइ मारेइ रोइक्चा पुंडसीनेवे। मत्ती ७:२

2 परमप्रभु यावे, आंइ कली शिशी पाइक्की। गो इन कली रिम्ना रिम्न बाक्नीकी। गे सुनी कुस कुस आंइ सक्ति दुमीन। श्येत जची ना आंइ कली प्रोइब दुमीन। 3 शुश रेयके नेंशा, जात जात डा मुर प्रोक्नीम। इन सक्ति तशा, रागी रागी डा मुर एर ओथ ब्राइनीम। 4 मेकोपुकीमी सल्हा खोदेशो पा शुश मारेइ मारेइ रोइक्नीम। दोपा सल्हा प्रेक्शा दोरनीमी, मोपा मुरपुकी प्रेक्शा रोइक्चा कली दोरनीम। 5 परमप्रभु यावे मान ताइब बाक्ब। मेको इर, आ बाक्तीकेमी बाक्ब। मेकोमी सियोन डा मुर आन कली ठीक निसाफ नु ठीक पतीके पपाइक्ब। 6 मिनु सियोन इ नाक्ती नेल्ल रिम्शो दुम्ब। मेना शुश पाप रे प्रोइतीके, तुइक्तीके नु जोक्तीक गे नु बाक्ब। सियोन डा मुर आन शोप परमप्रभु यावे कली मान पा हिंचा बाक्ब।

7 नेनीन, मेको आन बोल्यो मुरपुकी लांम ग्रीनीमी। गारपइक्तीक लोव चाक्ब मुर हुइ हुइ पा डाक्नीम। यसैया २९:१ 8 ठेयब लां श्येतथ दुम्शो बाक्नीम। मुर मेको लांम मगाक्नीम। गारपाइक्तीक लोव क्याम्सीशो बाक्ब। सांक्छीपुकी महिक्सीब दुम्शो बाक्नीम। आन कसम जशो जाम्त। आन पचा माल्शो गेय मपाइनीम। 9 रागी रोंका पशा, गोरशो दुम्शो बाक्ब। लेबानोन मुने दोक्शा, बेक्त। शारोन गोरशो रागी खोदेशो दुम्त। बाशान नु कारमेलम आस सफा तोक्नीस।

10 परमप्रभु यावेमी “मुल गो बोक्नुड। गो गेय पचा गोइनुड। गो मान पाइक्चा पुंडसीनुड। 11 गेपुकीम भूस के कोव्रज कुरशा, पराल थीनीनी। इन सास मी बाक्ब। मेकोमी इन कली दाक्ब। 12 मिनु जात जात डा मुर बुलु खोदेशो पा ब्राइनीम। मेकोपुकी क्योरशो चू मीम जेशो खोदेशो पा जेत्चा पुंडसीनीम।

13 गे डोन रागी डा मुरपुकी, गो मार पशो बाक्नुडा, मेको नेनीन। गे आं नेक्था बाक्बपुकी आं सक्ति तुइक्तीन। 14 सियोनम बाक्ब पाप पाइबपुकी हिंनीम। परमप्रभु यावे आ अरेशो मटीब खिंखि पाइनीम। सु खतम पोक्ब मी नु ब्रोंइशा बाक्ने चाप्बा? आंइ दातेमी सु गेना हना यो ब्रशो मी नु ब्रोंइशा बाक्ने चाप्बा?” देंत। यसैया १०:१७; येरमीया २३:२९ 15 सु ठीक पाइबा, रिम्शो थुं डा लोव्र पाइबा, गेयी कि गेयी, दे क्येट मताक्बा, सुम घूस मजाइबा नु “हुश खाक्श पोक्क्य” देंमानु, मेको आन लोव्र मटीबा नु मरिम्शो पाइब आन पशो काइ तचा मदाक्बा। भजन संग्रह १५:-; भजन संग्रह २४:३-४ 16 मेको इर डा मुर बाक्नीम। मेको आन खुंडसीतीके सेरथे फुल्लु के सेल्शो दरवार बाक्ब। मेकोमी आन जचा थोव्रक ताइनीम। मेको आन ब्वाक्कु बुक्तीके शुश दुम्ब।

मान ताइब पिप आ रागी

17 गेपुकीमी पिप कली आ दारसम ग्योम्सीशा ताइनीनी। मिनु मेकोपुकीमी ठेयब रागी कली ताइनीम। 18 मिनु गेपुकी इन डोंइती डा हिंतीके मिम्नीनी। हिक्ब मुर ते लमा? क्येट पोक्ब मुर ते लाक्गमे? मिनु मेको लाइशो खिं हिक्ब ते बाक्मा? 19 गेपुकीम मेको मटीब मुर आन कली मुल रे मताइनीनी। मरुप्या डा लोव्र पाइब मुर आन कली लेंशा मताइनीनी। यसैया २८:११; ब्यवस्था २८:४९-५० 20 गो आंइ देशो ना डा चाड मानेतीक सहर सियोन कली कोव्रडीन। गे सिक्सी पा बाक्ब मुर आन सहर यरूसलेम कली ताइनीनी। यरूसलेम गेनायो मयाक्सीब ताम्बु खोदेशो बाक्ब। मेको आ किला गेनायो मतुल्सीब। आ डोरी गेनायो मप्रोंइसीब। 21 मेकेर आंइ मान तशो, परमप्रभु यावे गो नु बाक्ब। मेकेर ठेयब खोला नु नादी बाक्नीम। मेकेर दाप्लोम शाक्तीक डोंगा मगाक्नीम। मेकेर ठेयब जहाजपुकी यो लने मचाप्नीम। 22 मारदे हना परमप्रभु यावे आंइ कली निसाफ पाइब बाक्ब। परमप्रभु यावे आंइ कली सासन पाइब बाक्ब। परमप्रभु यावे आंइ पिप बाक्ब। मेकोमी आंइ कली श्येत रे प्रोंइब। 23 गे इन जहाज डा डोरी शुंडसीशो बाक्नीम। मुरपुकीम मेको डोंगा आ दातेम बाक्शो थाम बोल्यो पा राप्पाइशो सेल्ने मचबेम। मेकोपुकीम मेको आ वा क्युक्ने मचबेम। मेना रोइशो मार मार शुश योक्सीनीम। खोइल मदुक्बपुकीम यो रोइशो मार मार रे आन भाग ताक्नीम। 24 सियोनम बाक्ब सुइमी “गो रोइ पशो बाक्नुड” मदेनीम। मेकेर बाक्ब मुर आन मरिम्शो पशो क्याम्चा पुंडसीशो बाक्नीम। जकरिया १२:८

34

एदोम कली निसाफ

1 गे रागी रागी डा मुर, आं नेक्था जाक्कीने। जात जात डा मुर नोफा दाइशो नेनीन। रागी नु रागीम बाक्शो मारेइ मारेइम नेन्मेक्ल। 2 मारदे हना परमप्रभु यावे रागी रागी नेल्ल आन पर्बम गाइक्ब। मेको आन लडाइ पाइब आन पर्बम चुरब। मेको आन कली क्याम्चा कली साइक्ब कली गेशो बाक्ब। 3 मेको साइशो मुर आन कली ताइक्नीम। मेको आन रिना कुइब। डांडापुकी मेको आन हुशेम जित्नीम। 4 सरीड डा मारेइ मारेइ जाम्नीम। सरीड कागज खोदेशो पा ओल्सीब। सौरुल अडगुर बोट आ सोव्रशो सफा नु फोव्रशी रवा आ सोव्रशो गेडा खोदेशो दुम्नीम। प्रकाश ६:१३-१४

5 परमप्रभुमी “आं तरवारम सरीडमी गेय थुम्शा नोले, गो एदोम तारी लाइनुड। गो मेकेर डा मुर आन कली निसाफ पाइनुड” देंत। ब्यवस्था ३२:४१-४२; येरमीया ४९:७-२२ 6 परमप्रभु यावे आ तरवार हुशेम ग्रुम्शो बाक्ब। बोंसो लुम्सीशो बाक्ब। मेको क्यारश भेडा आन हुश नु बोका आन चिच डा बोंसो लुम्सीशो बाक्ब। मारदे हना बोजामी परमप्रभु यावेमी ठेयब चढेतीक गेय पाइब। एदोम रागीमी शुश मुर आन कली साइक्ब। यसैया ६३:१ 7 ब्वाकी डा ब्यफ मुरपुक नु गोलनीम। बाछापुकी बोल्यो सांढे ब्यफपुक नु गोलनीम। मेको आन रागी हुशेम जारशो बाक्ब। मेकेर डा खप बोंसोम ब्रीशो बाक्ब।

8 काबु परमप्रभु यावे आ क्येक्क लेत्तीक नाक्त बाक्ब। सियोन आ पर्बम ठीक सेल्चा कली क्येक्क लेत्तीक बर्स का बाक्ब। यसैया ६३:४ 9 मेना एदोम डा खोलापुकी अलकत्रा दुम्नीम। मिनु आ खप चिं गन्धक दुम्ब। एदोम रागी ब्रशो अलकत्रा दुम्ब। उत्पत्ती १९:२४ 10 मेको नाक्दो नाक्त गेनायो मकाप्ब। आ कुन गेना हना यो कुस डा कुस बाक्ब। मेको पाला पाला सम्म गोरशो रागी दुम्शा बाक्ब। मेकेर रे सुइ मगाक्नीम। मलाकी १:४ 11 तन्न मेकेर ठेयब चिक्ब नु काइश आन बाक्तीके दुम्ब। मेकेर हुहुचील नु खदपुकी बाक्नीम। परमप्रभुमी मेको रागी कली ग्रांग्ये माग्ये

सेल्ब। आ ठेयब मुर मार पचा दो पचा दुम्नीम। 12 मेको रागी कली राज्य मदेनीम। मेकेर हुकुम पाइब सुइ मलीम। 13 मेको आन दरवारम चू वानीम। मेको आन बोल्यो दरवारम चूले नु चोंक वानीम। मेकेर सिवार नु ठेयब चिक्ब आन बाक्तीके दुम्ब। यसैया १३:२१-२२ 14 मेकेर वां नु फर गुम्नीम। वोल ब्रेम्मुइनीम। ब्वाकी डा वोलम आ वारच कली ब्रेम्ब। नाक्दो डा वोल मेकेर बास बाक्नीम। 15 मेकेर बुक्सुम ग्योत्र सेल्शा, ब्वोफु पा पुक्शा, चाइक्ब गुंडब। मेकेर ब्वारदे गुम्शा, निक्शी निक्शी पा बाक्नीम। 16 परमप्रभु यावे आ किताबम माल्शा पढेने। मेकेर नेल्ल ब्रेक्शो बाक्ब। मेको नेल्ल निक्शी निक्शी बाक्नीमी। मारदे हना परमप्रभु यावेमी लोत्र पा मेको आन कली अरेप्टु। आ सोक्तीमी मोदेशो दुम्पाइश्शो बाक्ब। प्रस्थान ३२:३२ 17 परमप्रभुमी मेको आन कली मेको रागी पुक्शा योक्शा, गेशो बाक्ब। मेको रागी गेना हना यो मेको आन के दुम्शा, पाला पाला सम्म मेकेर बाक्नीम।

35

परमप्रभु आ मुर ग्येरसीशो

1 मुर मबाक्शो नु ब्वाक्कु मबाक्शो रागी ग्येरसीनीम। गोरशो रागी ग्येरसीशा शुश फू बोइक्पाइक्ब। यसैया ३२:१५ 2 मिनु मेको थाम्पा बोइश्शा, ग्येरसीशा कुम्सो पना पन बाक्नीम। लेबानोन, आ दारस मेकोम ताइब। कारमेल नु शारोन आन मान ततीक मेको कली गेशो बाक्ब। मेकोपुकीमी परमप्रभु यावे आ मान ततीके नु आंइ परमप्रभु आ छेडछेड ताइनीम।

3 इन मारेइ पने मचाप्ब गुइ बोल्यो सेलीन। इन खिंखि पाइब पोक्च बोल्यो सेलीन। हिब्रू १२:१२ 4 हिंब थुं पाइश्शो मुर आन कली “इन थुं फ्रेदीन। महिनीन” दे मतीन। इन परमप्रभु एक बाक्ब। मेको क्येक्क लेत्चा कली जाक्ब। परमप्रभुमी हिंचा डा सजाइ गेब। मेको जाक्शा इन कली प्रोइब।

5 मेना मिक्च मताइबपुकीमी ताइनीम। नोफा मनेबपुकीमी नेनीम। यसैया २९:१८ 6 खोइल मदुक्ब मुर किश्श खोदेशो पा प्रेक्नीम। मब्वाक्बपुकीम ग्येरसीशा कुम्सो पाइनीम। मारदे हना मुर मबाक्तीकेम ब्वाक्कु बुक्नीम। गोरशो रागीमी खोला यीनीम। 7 मिनु थम होश बाल्वा दोम्ली दुम्ब। सोत्रशो खप रे ब्वाक्कु बुक्ब। मिनु सिवार आन बाक्तीकेमी घांस नु बुदी मीलु वानीम। यसैया ४१:१८

8 मेकेर ठेयब लां का दुम्ब। मेको लां कली “परमप्रभु यावे आ लां बाक्ब” दे नें वोइक्नीम। ग्रांग्रा दिशो मुर मेको लां लचा मताइनीम। परमप्रभु आ मुर ला मेको लां लचा ताइनीम। सु सु मेको लां लाइनीमी, मेकोपुकी मूर्ख बाक्तेक्म हना यो, मजाम्नीम। यसैया ५६:३-८; येरमीया ३१:८ 9 मेकेर गुप्स मबाक्नीमी। मुर ब्वाइब जन्तु यो मलाइनीम, मबाक्नीम। तन्न पाप रे प्रोइशो मुर ला मेको लां गाक्नीम। 10 परमप्रभु यावेमी श्येत रे प्रोइशो मुर ला लेशशा जाक्नीम। मिनु सियोनमी कुम्सो पना पन ओवनीम। मेकोपुकी गेना हना यो ग्येरसीशा बाक्नीम। ग्येरसीना सीन बाक्नीम। आन श्येत जशा, हुकयी पतीके लेशशा मजाक्ब। यसैया ५१:११; प्रकाश २१:४

36

सन्हेरीबम यहूदा नु लडाइ पशो

२राजा १८:१३-२राजा १९:३७; २इतिहास ३२:१-२३

1 पिप हिज्कीयाहम सासनम पवा आ १४ बर्सम, अस्सुर डा पिप सन्हेरीबम यहूदा डा गारो हिरशो सहर आन कली लडाइ पा ग्रात। 2 मिनु अस्सुर डा पिपम लाकीश डा राब्शाके माइश्शो, आ कप्तान नु लडाइ पाइब शुश पिप हिज्कीयाह आ बाक्तीके यरूसलेममी सोइक्ताक्ब। मिनु मेको आइक्था दोम्ली डा ब्वाक्कु यितीके वा मुरब आन रू डा लांमी राप्तेक्म। यसैया ७:३ 3 मिनु दरवार कोत्रब, हिल्कीयाह आ तौ एल्याकीम, पिप आ ब्रेक्ब शेब्ना नु आसाफ आ तौ योआह लाडगा गूशा मेको आन बाक्तीक लाम्तेक्म। यसैया २२:२०

4 मिनु राब्शाकेमी मेको आन कली “गे हिज्कीयाह कली अस्सुर डा ठेयब पिपमी इन कली मार देत देशा हना, ‘गे मार कली आस पा थमा सुइक्नीनी?’ 5 गे इन फश लोत्रम लडाइ दोपा पचा तुइक्तीक नु लडाइ पतीक सक्ति बाक्बा? गे आं कली मटिथु, सु कली आस पा थमा सुइक्नेवे? 6 गे जिक्शो कोक्के खोदेशो इजीप्त कली थमा सुइक्नेवे? सु सु मेको कोक्के तिव्शा गाक्नीमी, मेको आन गुइ थोक्ब। सु सुमी इजीप्त डा पिप फाराओ कली थमा सुइक्नीमी, मेको कोक्केम थोक्शो खोदेशो दुम्नीम। इजीप्त डा फाराओ मोदेशो बाक्ब’ दे मतीन। इजीकीएल २९:६-७ 7 तन्न गे, आं कली ‘गोपुकी परमप्रभु यावे, आंइ परमप्रभु कली थमा सुइक्नीकी’ देतीनी हना, हिज्कीयाहमी मेको आ थान नु आ

चढ़ेतीकेपुकी मप्रेंदा डा? मिनु यहूदा नु यरूसलेमम बाक्ब आन कली 'गे एको चढ़ेतीके आ डोंइती चढ़ेचा माल्नीनी' मदेंमे? २राजा १८:४ ८गे आं होवप, अस्सुर डा पिप नु बाजी पावो। मिनु इ के शारा डोइक्ब मुर बाक्तेकम हना, गो इ कली हजार निक्शी शारा गेनन। ९गे बग्गी नु शारा डोइक्ब आन पर्बम इजीप्त कली थमा सुइक्नेवे। गे आं होवप आ नेल्ल क्येडा आइक्च कप्तान का कली यो खेरने मचाप्नेवे। १० मार, गो एको रागी खतम सेल्चा कली परमप्रभु यावे कली हिल्लो मपथु, जाक्डा डा? परमप्रभु यावेम आं कली 'लावो, मेको रागी कली खतम सेलो' दे माइक्ती" देंत।

११ मिनु एल्याकीम, शेब्ना नु योआहमी मेको राब्शाके कली "इन गेय पाइबपुकी नु अरामी लोव्र ब्वाक्कीन। गो मेको लोव्र रुप्नीकी। गारोम बाक्ब मुर नेल्ल आन नेंचा डा पा यहूदी लोव्र पा म्बवाक्कीन" देंतेकम। १२ तन्न राब्शाकेमी "मार, आं होवपमी इन होवप नु इन कली ला लोव्र पथ सोइक्ती डा? गारोम बाक्ब मुरपुकीम यो रुप्चा माल्नीमी। मारदे हना मेकोपुकीम यो इन खोदेंशो पा आन ख्री जचा नु आन चारनाक तूचा माल्नीम" देंत।

१३ नोले मेको राब्शाकेमी मुर आन नेक्था राप्शा यहूदी आन लोव्रमी ठेयब सेंदा पा "अस्सुर डा ठेयब पिप आ लोव्र नेनीन। १४ मेकोमी मार देंत हना 'हिज्कीयाह आ जोल लोव्र थमा मसुतीन। मेकोम इन कली प्रोंइने मचाप्ब। १५ हिज्कीयाहमी इन कली "परमप्रभु यावेम इन कली रिम्शो पाइब। परमप्रभु यावेमी इन कली थमा पा श्येत रे प्रोंइब। एको सहर अस्सुर डा पिप आ गुइमी मदुम्ब" देंशो लोव्र थमा मसुतीन। १६ हिज्कीयाह आ लोव्र मनेनीन, मारदे हना अस्सुर डा पिपमी इन कली "गो नु गारीन। मेकेर रे गूशा आं बाक्तीके जाक्कीन। मो पाइतीनी हना, गे नेल्ल इन रू डा अडगुर बोट नु इन फोव्रशी रवा ताइनीनी। मिनु इन आंम कुवा डा ब्वाक्कु तूचा ताइनीनी। १७राजा ५:५; मीका ४:४ १७ मिनु नोले गो इन कली आंम रागी खोदेंशो अर्को रागी काम लाइक्नन्नी। मेको रागीम शुश अन्न नु अडगुर शांबु बाक्ब। मेको शोब्ले नु अडगुर रूम ब्रीशो रागी बाक्ब" देंत। १८ हिज्कीयाहमी इन कली "परमप्रभु यावेमी इं कली श्येत रे प्रोंइब" देंशा, हेंथे लां कोंइचा मगेने। मार, रागी रागी डा देवी देवता काम यो आन रागी अस्सुर डा पिप आ गुइ प्रोंइने चाप्मे डा? यसैया ३७:१२ १९ हमाथ नु अरपाद डा देवी देवता ते लाक्गमे? सेफारवाइम डा देवी देवता ते लाक्गमे? मेकोपुकीमी सामरीया कली अस्सुर आ पिप गुइ रे प्रोंइने चाप्मे डा? २० एको रागी नेल्ले डा तेको देवी देवताम आ रागी आं गुइ रे प्रोंइने चाप्बा डा? मार, परमप्रभु यावेमी यरूसलेम कली आं गुइ रे प्रोंइने चाप्बा डा?" देंत।

२१ तन्न मेकोपुकी सिक्सी पा बाक्शा, राब्शाके कली काइ लोव्र मलेत्तेम। मारदे हना पिपमी मेको आन कली "लोव्र मलेत्तीन" दे माइश्शो बाक्त। २२ मिनु दरवार कोव्रब, हिल्कीयाह आ तौ, एल्याकीम, ब्रेक्ब शेब्ना नु इतिहास ब्रेक्ब आसाफ आ तौ, योआहम आन वा खाक्शा हिज्कीयाह आ डोंइती जाक्शा, मेको राब्शाके आ लोव्र नेल्ल शोव्रतेकम।

37

यरूसलेम कली प्रोंइशो

१ मिनु पिप हिज्कीयाहमी मेको लोव्र नेंशा, आ वा खाक्शा, अरन्डी फेक्शा परमप्रभु यावे आ खिं लत। २ मिनु मेकोमी आ दरवार कोव्रब एल्याकीम, ब्रेक्ब शेब्ना नु चढ़ेब आन दाते डा खूशो आन कली अरन्डी फेक्पाइश्शा, आमोज आ तौ यसैया आ बाक्तीक सोइक्ताक्व। ३ मिनु मेकोपुकीमी यसैया कली "हिज्कीयाहमी 'मुलाक्ती श्येत जतीके, तुप्पाइसीतीके नु शुक्शी पाइक्चा पुंइसीतीके नाक्त बाक्ब। आल थिचशो मीश मुरुमी आल थिचावानु, थिचा कली बोल मबाक्शो खोदेंशो दुम्त। ४ इन परमप्रभु यावे, इन परमप्रभुमी राब्शाके आ लोव्र नेंना माइ। अस्सुर डा पिपमी मेको कली गेना हना यो ब्रोंइशा बाक्ब परमप्रभु कली शुक्शी पथ सोइक्ताक्व। मेको आ लोव्र नेंशा, परमप्रभु यावे, इन परमप्रभुमी मेको कली सजाइ गेबा कों? मोपतीके लीशो मुर आन पर्बम पुनीन' देंत" दे मेकोपुकीमी देंतेकम।

५ मोपा हिज्कीयाह आ मुरपुकी यसैया आ बाक्तीक जाक्मानु, ६ यसैयामी मेको आन कली "गेपुकीमी पिप कली 'परमप्रभु यावेम इन कली मार देंशो बाक्ब देंशा हना, इन नेंशो अस्सुर डा पिप आ मुरुमी आं कली शुक्शी पशो लोव्र आ पर्बम महिनीन। ७ गो मेको कली हिंभ थुं का गेनुड। मिनु हिंचा डा लोव्र नेंशा, मेको आ रागी लेशशा लाइब। मिनु गो मेको कली आ रागीम क्योरशा साइक्पाइक्नुड देंत' दे मतीन" दे माइक्तीमी।

८ मिनु राब्शाके आ पिप बाक्तीके लेम्मेनु "पिपम लाकीश प्रोंइतु" देंशो लोव्र नेना बाक्त। मिनु लमेनु, अस्सुर डा पिप लिब्ना डा मुर नु लडाइ पना पन बाक्शो थिदा बाक्त। ९ अस्सुर डा पिपमी एथीयोपीया डा पिप तिरहाकाह "गे नु लडाइ पथ जाक्ना जाक्न बाक्ब" देंशो लोव्र नेना बाक्त। मिनु मेको लोव्र नेंशा, हिज्कीयाह आ बाक्तीकेमी आ मुर

आन कली लोव कुरब पा सोइक्ताक्व। 10 मार लोव सोइक्ताक्व देशा हना, यहूदा डा पिप हिज्कीयाह कली “इन थमा सुइश्शो परमप्रभुमी इन कली दूली लां मखोइक्पांडसीन। ‘यरूसलेम अस्सुर डा पिप आ गुइमी मदुम्ब’ देनीनी। 11 गे अस्सुर डा पिपपुकीमी रागी नेल्ल आन कली क्याम्शो, लोव नेंशो बाक्नीनी। मार गे चहिं ब्रोंइनीनी डा? 12 आं किकी पिपीम क्याम्शो रागी रागी गोजान, हारान, रेचेफ नु तेलास्सारम बाक्शो एदेन डा मुर आन देवी देवतामी मेको रागी प्रोंइने चाप्मे डा? यसैया ३६:१८ 13 हम्माथ, अरपाद, सेफारवाइम, हेना नु इव्वाह डा पिपपुकी ते लाक्गमे? दे मतीन” देंत।

हिज्कीयाह आ पुंइशो

14 मिनु हिज्कीयाहमी मेको लोव कुरब मुर आन गुइ रे मेको चिठी ताक्शा, पढेपुतु। मिनु मेको चिठी परमप्रभु यावे आ खिं लाइश्शा, परमप्रभु यावे आ डोंइती प्राक्शा वोइक्तु। 15 मिनु हिज्कीयाहमी परमप्रभु यावे कली 16 “मुर नेल्ल आन परमप्रभु यावे, इस्राएली आन परमप्रभु, गे करूब आस तार बाक्ब बाक्नीनी। गे ला रागी नेल्ल डा राज्य डा परमप्रभु बाक्नीनी। सरीड नु रागी इन सेल्लो बाक्नीस। 17 परमप्रभु यावे, आं लोव नेनीन। परमप्रभु यावे, कोवडीन। सन्हेरीबमी गेना हना यो ब्रोंइशा बाक्ब परमप्रभु, इन कली शुक्शी पथ सोइश्शो लोव नेनीन। 18 परमप्रभु यावे, थमा पा अस्सुर डा पिपपुकीमी रागी रागी नेल्ल क्याम्ताक्म। 19 मेको आन देवी देवता मीम हुम्ताक्म। मारदे हना मेकोपुकी मुर आन गुइमी सेल्लो, शी नु फुल्लु के बाक्नीम। मेकोपुकी इन खोदेशो मनम। मोपतीके खतम सेल्ला पुंइसाक्म। 20 परमप्रभु यावे, आंइ परमप्रभु, मुल आंइ कली सन्हेरीब आ गुइ रे प्रोनीन। रागी नेल्ल डा मुरपुकीम गे ला परमप्रभु यावे बाक्नीनी, दे तुइक्तमेक्ल” दे पुंइशा, लोव पापुतु। यसैया ४०:५; दानीएल ६:२७

यसैयामी पिप कली लोव पशो

21 नोले आमोज आ तौ यसैयामी हिज्कीयाह कली “परमप्रभु यावे, इस्राएली आन परमप्रभुमी ‘अस्सुर डा पिप सन्हेरीब आ पर्बम इ पशो लोव गो नेता’ देंत। 22 परमप्रभु यावेमी सन्हेरीब आ पर्बम मार देंत देशा हना ‘सियोन डा कन्ने तमी इ पर्बम शुक्शी पा रिश्शो बाक्ब। यरूसलेम डा तमीमी इ नोले कोवशा, आ पिया हिक्शो बाक्ब।

23 गे सु कली शुक्शी पवी? सु आ पर्बम गे ठेयब लेशशो लोव पवी? गे इस्राएली आन का ला बाक्शो परमप्रभु आ डोंइती ठेयब लेशशो दुमे? 24 मिनु इ सोइश्शो गेय पाइब मुर रे पा परमप्रभु कली शुक्शी लोव पपाइक्तीवी’ देंत। मिनु गे ‘आं शुश बग्गीमी डांडा डोंइसाक्यी। लेबानोन नेल्ल डोंइसाक्यी। गो मेकेर डा लाइश्शो रवा नु रिम्शो रवा नेल्ले आन कली तिम्तामी। गो नेल्ल क्येडा इर नु डोन नु ठेयब ब्वाकी सम्म जाक्दीत्ती। यसैया १४:८

25 गो इनार दोशा ब्वाक्कु तूता। आ खोइलीमी इजीप्त डा ठेयब खोला नेल्ल सोवपाइक्ता, दे शुक्शी पपाइक्तीवी।

26 गो आं डोंइती मिम्शो, गे मतुइक्ती? आं डोंइती मिम्शो गो मुल पाइनुड। गे गारो हिरशो सहर आन कली फुल्लु तेलतीक सेल्ला माल्नेवे। 27 मेकेर डा मुर आन सक्ति जाम्शा, हिंब दुम्शा, मुने पा, मारेइ पने मचबेम। मेकोपुकी रू डा घांस नु खिं तार वाशो घांस खोदेशो दुम्तेक्म। मेको वाचा क्येडा डोंइती सोवब।

28 गो इ बोक्शो, इ निश्शो नेल्ल तुइक्नुड। इ लशो, पिशो तुइक्नुड। मिनु गे आं पर्बम गाइक्ताक्वी। 29 मारदे हना गे आं पर्बम गाइक्तीनु, इ ठेयब लेशशो नेता। मोपतीके गो इ नेम बोलसी का ब्वेक्नुड। मिनु इ शोवमी लगम पाइश्शा इ जाक्शो लां लेप्पाइश्शा सोइक्नन’ देंत, दे मतीन” दे मुर सोइताक्मी।

30 मिनु परमप्रभु यावेमी हिज्कीयाह कली “इ कली एको चिन्ड दुम्ब। मुलाक्त थोचे आंमा वाशो बाली नाली जाइनीनी। माइक्थी आंमा दोक्शा वाशो बाली नाली जाइनीनी। तन्न न्युं चहिं आंमा शोक्शा खुप्तीन। अडगुर खुम्शा जने। 31 यहूदा आ खिं डा लीशोपुकी लेंशा, सोशा बोशा, शाक्श थोक्शा, फल सित्नीम। शुश दुम्नीम। 32 मारदे हना यरूसलेम रे लीशोपुकी लाइनीमी। सियोन डांडा रे हुल का ब्रोंइशोपुकी ग्रीनीम। मुर नेल्ल आन परमप्रभु यावेमी, गो मेको पाइनुड” देंत। यसैया ९:६

33 मोपतीके परमप्रभु यावेमी अस्सुर डा पिप आ पर्बम “मेको सहरम मजाक्ब। ब्रा का यो मआप्ब। सहर आ डोंइती ब्रा तेक्तीके मकुरनीम। सहर ओवचा कली गारो डोइक्तीक मसेलनीम। 34 मेको तेको लां जाक्मे, मेको लां लेप्ब। सहर मओवब। 35 गो मेको सहर कली आं पर्बम नु आं गेय पाइब दाऊद आ पर्बम आन गुइ रे प्रोंइशा, वोइक्नुड” देंत।

36 मिनु परमप्रभु यावे आ स्वर्ग डा गेय पाइब का अस्सुर डा मुर आन बाक्तीकेम लशा, लाख का ८५ हजार जना मुर सदा बाक्त। मिनु मुरपुकी सुनी बोक्शा कोवडमेनु, बेक्शो मुर ला ताम्तेक्म। यसैया १७:१४; यसैया ३१:८

37 मो दुम्मेनु अस्सुर डा पिप सन्हेरीब लेशशा लशा निनवे सहरम बाक्त। 38 मिनु आ देवता निस्रोक आ खिमी बाप्शा पूजा पना पन बाक्मेनु, आ तौ अद्राम्मेलेक नु शरेसेरमी मेको कली तरवारमी क्योरशा साइक्ताक्स। मिनु मेको निक्शी प्रोक्शा, आरारात रागी लाम्ताक्स। मिनु मेको आ पा डा आ तौ एसर-हददोन पिप दुम्त।

38

हिज्कीयाह रोइ पशो

२राजा २०:१-११; २इतिहास ३२:२४

1 मेना हिज्कीयाह रोइ पा बेक्चा चिक्ता बाक्त। मिनु परमप्रभु यावे आ लोव पाइब आमोज आ तौ, यसैया जाक्शा, पिप कली “परमप्रभु यावेमी इन कली ‘गे बेक्नेवे, मब्रोंइनेवे। इ खिं नेल्ल ठीक सेलो’ देंत” दे माइक्तु। 2 मिनु हिज्कीयाहमी, आ कुल गारो गे हिरशा, परमप्रभु यावे कली 3 “परमप्रभु यावे, गो इन डोंइती थमा पा थुं निक्शी मपथु, बाक्ती। मेको मिम्तीने। गो इन डोंइती नेल्ल रिम्शो पाता” देंत। मिनु हिज्कीयाह शुश डाक्त। २राजा १८:२-६

4 मिनु परमप्रभु यावेमी यसैया कली 5 “हिज्कीयाह आ बाक्तीक लावो। मेको कली परमप्रभु यावे, इ किकी दाऊद आ परमप्रभुमी इ कली ‘गो इ पुंइशो लोव नेता। इ प्रेक्कु ताता। नेनो, गो इ ब्रोंइतीक नाक्ती १५ बर्स तेम्नुड। 6 मिनु गो इ कली नु एको सहर कली अस्सुर डा पिप आ गुइ रे प्रोंइनुड। एको सहर कली वारच पाइनुड।

7 परमप्रभु यावेमी आ देशो पाइब दे इ कली आ गेशो चिन्ड मार बाक्ब देशा हना, 8 आहाज आ घरी आ वांकु उइ लने थुम्शो बाक्ब। मेको कली परमप्रभु यावेमी १० खेयप नोले लेप्पाइक्ब’ दे मतो” देंत। मिनु नां आ वांकु लाक्ने थुम्शा यो, १० खेयप नोले लेत्त।

हिज्कीयाह आ ब्रेक्शो लोव

9 यहूदा डा पिप हिज्कीयाह रोइ पा साम नोले आ ब्रेक्शो लोव मार बाक्त देशा हना, 10 गो थम रिम्शो पा बाक्ना बाक्न, बेक्शो मुर आन बाक्तीके लचा माल्लनुड। 11 मिनु गो परमप्रभु यावे कली “गो परमप्रभु यावे, इन कली ब्रोंइशो मुर आन रागी मताइनुड। गो मुल मुर आन कली मताइनुड। रागीम बाक्ब आन कली मताइनुडमी। भजन संग्रह २७:१३ 12 आं बाक्तीक खिं, गोठ खोदेशो पा, प्रेशशा आं रे डोन याक्ताक्म। तोव प्रोव्रबमी वा तोल्शो खोदेशो पा, गो आं ब्रोंइतीक नाक्त तोल्शो बाक्नुड। गो तोव रे खोइक्चा पुंइसाक्ड। नाक्दो नाक्ती आं कली बेक्पाइक्नीनी” दे परमप्रभु कली लोव पाता। 13 सुनी सम्म आं थुं कली रिम्पाइक्ना पाइक्न बाक्ती। गुप्सम खोदेशो पा आं खोइल जिक्ताक्यीनी। काबु नाक्दो नाक्तीमी गे आं कली खतम पोक्तीनी। 14 गो बेल्लुम नु बोकुला खोदेशो पा ग्रीती। हुकुर खोदेशो पा रोंका पाता। गो शुश ग्येत्थ कोव्रतीके आ मिक्च पारताक्यी। आं थुं लुक्च लत। गो “परमप्रभु, गो श्येत जाइनुड। आं कली वारच पाइय्यीनी। 15 तन्न गो मार देनुडा डा? मारदे हना गे आं कली लोव पाइतीनी। मोदेशो आंमा पाइतीनी। आं निन्द्रा नेल्ल प्रोक्त। आं थुं लुक्च लत हना यो गो इन कली ठेयब सेल्लनुड। 16 परमप्रभु, मोदेशो श्येत रे मुर ब्रोंइनीम। आं थुं यो मेको रे ब्रोंइब। गे आं कली सापाइश्शा, ब्रोंइचा गेतीनी। 17 एको श्येत थमा पा आं कली ब्रोंइचा कली बाक्त। गे आं कली दाक्शा, श्येत रे गुंइताक्यीनी। मारदे हना गे आं पाप नेल्ल क्याम्ताक्नी। भजन संग्रह ३२:५; मीका ७:१८-१९ 18 बेक्शो मुर आन बाक्तीकेमी इन कली ठेयब मसेल्ब। बेक्पाइक्बम इन कली ठेयब सेल्लने मचाप्ब। बेक्शो मुरुम इन वारच पाइक्तीक आस मपाइनीम। भजन संग्रह ६:६; भजन संग्रह ११५:१७ 19 ब्रोंइशोपुकीम ला इन कली ‘गे रिम्शो पाइब बाक्नीनी’ देंनीमी। मिनु गो मुलाक्ती मोदेशो पाइनुड। आफपुकीमी गे थमा सुइक्चा माल्लशो बाक्नीनी, दे आन आल आन कली शेंनीम” दे हिज्कीयाहमी देंत।

20 परमप्रभु यावेमी आं कली श्येत रे प्रोंइब। मोपतीके गोपुकीमी तार पाइश्शो ताप्तीके ताप्शा कुम्सो पाइनीकी। गो ब्रोंइका सम्म मोदेशो पाइनीकी। परमप्रभु यावे आ खिमी कुम्सो पा ताप्शा बाक्नीकी, दे हिज्कीयाहमी ब्रेक्शो बाक्त।

21 मिनु यसैयामी “सापाइक्चा कली फोव्रशी रवा आ फल रे सेल्शो ओरुत्ती चाक्शा, एको गार तार खेक्चा माल्लनीनी” देंत। यसैया ३८:२१-२२, यसैया ३८:६ नु ७ आन दातेमी वोइक्चा माल्लब। २राजा २०:७-८ मोदेशो बाक्ब। 22 डोंइती हिज्कीयाहमी “गो परमप्रभु यावे आ खिं लचा ताइनुड, देशो चिन्ड, मार दुम्बा डा?” दे हिल्लो पशो बाक्त।

39

बेबीलोन रे मुर जाक्शो

२राजा २०:१२-१९; २इतिहास ३२:२७-३१

1 मेना बेबीलोन डा पिप बालादन आ तौ मेरोदाक-बालादानमी हिज्कीयाह कली चिठी नु कोसेली कुर पाइशशा, मुर आन कली सोइक्ता बाक्त। मारदे हना मेकोमी “हिज्कीयाह रोइ पशा, छक लाक्चा डा पा सात” देशो लोव्र नेना बाक्त। 2 मिनु हिज्कीयाहमी मेको आन कली तशा, ग्येरशा आ शोंप वोइक्तीके खिं नेल्ल कोइदा बाक्त। मार कोइदा बाक्त देशा हना, सुन चांदी, मस्लापुकी, रिम्शो शुश क्येट लाइब थोव्रक, तेल, आ या वोइक्तीके नेल्ल नु आ शोंप नेल्ले कोइदा बाक्त। आ खिं नु आ रागीमी मेको आन कली मकोइशो मारेइ मलीमाक्त। 3 मिनु परमप्रभु यावे आ लोव्र पाइब यसैया, पिप हिज्कीयाह आ बाक्तीके जाक्शा “मेको मुरपुकीम मार देमा, ते रे जाक्मा?” देत। मिनु हिज्कीयाहमी “एकोपुकी डोन रागी बेबीलोन रे जाक्शो नम” देत। 4 मिनु “मेकोपुकीम इन खिंमी मार मार तामे?” दे हिल्लो पाप्तु। मिनु हिज्कीयाहमी “आं खिंमी बाक्शो मारेइ मारेइ ताम्तेक्म। मेको आन कली मारेइ मारेइ कोइताक्ड” देत।

5 मिनु यसैयामी हिज्कीयाह कली “मुर नेल्ल आन परमप्रभु यावे आ लोव्र नेनीन 6 ‘इ खिंम बाक्शो, इ किकी पिपीमी तेलशा वोइशो मुल सम्म बाक्शो मारेइ मारेइ काबु बेबीलोन चाक्दीत्नीम। मारेइ मलीनीम’ दे परमप्रभु यावेमी देत। २राजा २४:१३ 7 मिनु इ तौ कोइ कोइ आन कली लाइशशा, बेबीलोन डा पिप आ दरवारमी गेय पाइब सेलीनीम” देत। 8 मिनु हिज्कीयाहमी यसैया कली “इ देशो परमप्रभु यावे आ लोव्र रिम्शो बाक्ब” देत। मारदे हना मेकोम “गो ब्रोइडा सम्म लडाइ मदुम्ब रिम्शो दुम्ब” दे मिम्शो बाक्माक्त।

40

इसाएली आन थुं बारपाइशशो

1 इन परमप्रभुमी “आं मुर आन कली लेम्दीन, लेम्दीन। 2 यरूसलेम कली आ थुं बारपाइक्तीके लोव्र पने। आ श्येत नुप्त। आ मरिम्शो पशो क्याम्शो बाक्ब। मारदे हना परमप्रभु यावे रे पा आ मरिम्शो पशो आ परबम निक्शी खेयप सजाइ ताप्तु” देत। होसे २:१६; येरमीया १६:१८

3 मिनु ब्रेचब मुर आ सेंदा कामी “मुर मबाक्तीकेमी परमप्रभु यावे आ लां सेलीन। गोरशो रागीमी इ परमप्रभु कली लां रिम्शो पा फुल्लु ग्रीक्शा थेलीने। लूका ३:४-६; यूहन्ना १:२३ 4 बेसी नेल्ले ग्येत्थ पोक्चा पुंडसीनीम। डांडा नु पहाड फ्रेम्चा पुंडसीनीम। दिंम मदुम्शो बाक्तीके दिंम दुम्चा माल्ब। फुल्लु बाक्तीके रिम्शो दुम्चा माल्नीम। यसैया ४९:११ 5 मेना परमप्रभु यावे आ छेडछेड गूब। मेको मुर नेल्लेम ताइनीम। मारदे हना परमप्रभु यावेमी एको लोव्र देशो बाक्ब” दे लोव्र पाप्तु।

6 मिनु लोव्र पाइब कामी आं कली “शेंदो” देत। मिनु गो “मार शेंनुडा?” दे हिल्लो पाता। मिनु मेकोमी “मुर नेल्ले घांस खोदेशो बाक्नीम। मेको आन दारस नेल्ल रू डा फू खोदेशो बाक्ब। भजन संग्रह ९०:५-६; याकूब १:१०-११ 7 घांस सोव्रब, मिनु आ फू हेम्ब। मारदे हना परमप्रभु यावेमी मेको आन कली मुइक्ब। मुर थमा पा घांस खोदेशो बाक्नीम। 8 घांस सोव्रब, आ फू हेम्ब। तन्न आंइ परमप्रभु आ लोव्र गेना हना यो लीब” देत। भजन संग्रह ११९:८५; लूका २१:३३ 9 “गे ठेयब डांडा डोंइसीन। सियोन रिम्शो लोव्र कुरब बाक्ब। ठेयब सेंदा पा शेंदो। यरूसलेम रिम्शो लोव्र कुरब बाक्ब। महिंथु, ठेयब सेंदा पा शेंदो। यहूदा सहर डा मुर आन कली ‘इन परमप्रभु एकेर बाक्ब’ देनो। 10 कोव्रडीन, परमप्रभु, परमप्रभु यावे सक्ति पाइशशो दुम्शा जाक्ब। मिनु हुकुम पाइब। आ इनाम आ नु बाक्ब। आ गेतीके आ डोंइती बाक्ब। यसैया ६२:११ 11 आ बगाल कली गोठलाम खोदेशो पा योव्रब। मेकोमी आ पाठा पाठी आन कली मुप्शा कुरब। दूध तुंडब आन कली आन चाप्चा डा पा गाक्पाइशशा खुल्ब। यूहन्ना १०:११

परमप्रभु यावे आ पशो

12 सुमी ब्वाक्कु नेल्ल आ योलम पुक्गा? सुमी सरीड बित्ताम थाप्ता? सुमी रागी डा फुरक पुक्तीकेम पुक्गा? सुमी डांडा आन कली नाक्शा, पहाड आन कली नाक्तीक तारी वोदा? 13 परमप्रभु यावे आ सोक्त कली सुम शेंदा? आ कली अर्ती गेब सु बाक्बा? रोमी ११:३४; १कोरिन्थी २:१६ 14 सुम मेको कली मेको नेल्ल रुप्चा कली अर्ती गेवा? सुम मेको कली ठीक निसाफ पचा कली शेंदा? 15 रागी रागी डा मुर नेल्ले चिरशो गर डा लीशो ब्वाक्कु खोदेशो नु नाक्तीकेम लीशो फुरक खोदेशो बाक्नीम। टापु आन कली फुरक खोदेशो पा बेरपाइक्ब। 16 लेबानोन डा ब्वाकी डा शी मी मुइक्चा कली मगारब। मेकेर डा जन्तुपुकी चोशा चढ़ेचा कली मजाक्दीत्नीम। 17 रागी रागी डा मुरपुकी मेको आ डोंइती मारेइ मनम। मेको श्येत्थ नु मारेइ मबाक्शो बाक्नीम, दे मिम्ब।

18 मिनु गे परमप्रभु कली सु नु थाप्नीनी? मिनु सु आं नेक्था वोइक्ने चाप्नीनी। यसैया ४६:५; प्रस्थान २०:४; प्रेरित १७:२९ 19 मूर्ति का? मूर्ति चेम्बमी मूर्ति कली यपाइक्ब। सुन चेम्बमी मेको सुनम खुम्ब। मेको कली चांदी के साडली सेल्ब। 20 का निक्शीमी कोसेली गेचा कली बोल्यो, मराक्चा डा शी योवनीम। शी के गेय पाइब जोक्ब मुर का माल्ब। मिनु मेकोमी महिक्सीचा डा पा मूर्ति सेल्पाइक्ब।

21 गेपुकी मतुइक्तीनी, मनेनी? डोंइती रे इन कली मशेंदमे? रागी सेल्चा रे गे मरुप्नी? 22 एको रागी नेल्ल आन तार बाक्ब, मेकोन बाक्ब। रागीम बाक्बपुकी माले खोदेशो बाक्नीम। मेकोमी सरीड कली वा खोदेशो पा प्राक्ब। मिनु मेको मुर आन कली ताम्बु खोदेशो दुम्ब। 23 मेकोमी सासन पाइब आन कली शोर गाक्शो सेल्ब। हुकुम पाइब जाम्शा लाइनीम।

24 मेकोपुकी का निक्शी ला शोक्सीशो बाक्नीम। का निक्शी ला खुम्सीशो बाक्नीम। शाक्श थोक्ची ना दुम्मेनु, मेको आन तार मुइक्ब। मिनु मेको बेक्नीमी। मिनु फश गिवारमी पराल खोदेशो पा योल्ब। 25 आं कली सु नु थाप्नीनी। मिनु गो नु उइक्थ सु बाक्बा?” दे का ला बाक्शो परमप्रभुम देंत। 26 गेपुकी ग्येत्थ कोव्रडीन। मेको आन कली सुम सेला? मेकोमी शुश राप्पाइश्शा, मेको आन कली हिक्ब। मेको आन नें थिशा, ब्रेप्ब। मारदे हना मेको आ ठेयब सक्तिम पतीके का यो मजाम्नीम। भजन संग्रह १४७:४; उत्पत्ती १:१४-१८

27 गे मारदे ए याक्ब, देंनीनी? इस्राएलीपुकी “मारदे आं लां परमप्रभु यावे, आं परमप्रभु आ डोंइती खुइश्शो बाक्ब देंनीनी?। मारदे आं कली पशो दूली निसाफ मतुइक्ब” देंनीनी? 28 मिनु “मार, गे मतुइक्तीनी, मनेनी? परमप्रभु यावे गेना हना यो बाक्ब परमप्रभु बाक्ब। मेको रागी रागी कली सेल्ब बाक्ब। मेको मथाइब नु मदाइब। आ तुइक्तीके नेल्ल क्येडा ठेयब बाक्ब। 29 मेकोमी दाइब आन कली बोल गेब। मचाप्ब आन कली सक्ति गेब। 30 ठिटापुकी यो दशा थाइनीम। मिनु मचाप्थु गोल्नीम। 31 तन्न परमप्रभु यावे आ लां कोव्रबपुकी नक सक्ति ताइनीम। ककाकुली खोदेशो पा आन फ्रां प्राक्शा बेरशा ग्येत्थ लाइनीम। मेकोपुकी दोरशा, मदाइनीम। गाक्शा यो मथाइनीम” देंत। भजन संग्रह १०३:५

41

परमप्रभुमी मुर आन कली ब्रेश्शो

1 परमप्रभु यावेमी “समुन्द्र आ नेक्था बाक्ब मुरपुकी सिक्सी पा आं लोव्र नेनीन। जात जात डा मुरपुकीम आन सक्ति लेशा तामेक्ल। मिनु मेकोपुकी आं नेक्था जाक्शा, लोव्र पामेक्ल। गो काथा निसाफ पतीकेम बुक्क्य।

2 सुमी पूर्व रे आ गेय पचा कली ग्राब का कली पोक्गा? मेकोमी रागी रागी डा मुर आन कली आ गुइम गेब। मेकोमी पिप आन कली दिम्शा, आ तरवारम मेको आन कली फुरक खोदेशो सेल्ब। आ लिब्रामी फशेम बेरशो भूस खोदेशो सेल्ब। यसैया ४४:२८; यसैया ४५:१, १३; यसैया ४८:१४-१५ 3 मेकोमी मेको आन कली खेदा पवानु, मारेइ मदुम्थु आ खोइलीम लां कली हेरा मथीनीम। 4 मेको सुमी पपाइश्शा पवा? सुम साइ डोंइती रे पाला पाला डा मुर आन कली ब्रेत्ता? गो परमप्रभु यावे, नेल्ल क्येडा डोंइती डा नु नेल्ल क्येडा नोले डा नड। यसैया ४४:६; यसैया ४८:१२; प्रकाश १८:१७ 5 समुन्द्र आ नेक्था बाक्ब मुरपुकी मेको तशा, हिनीम। रागी आ सुर सम्म हिम्सीब। मिनु मेकोपुकी जाक्शा, आं नेक्था पिम्तेक्म। 6 वारच पमुशा, आन थुं बारपाइक्मुशा ‘ठेयब थुं पावो’ देंमुइनीम। 7 मिनु दारशो थोव्रक् सेल्स जोक्बमी चेम्ब आ थुं बारपाइक्ब। घन तुप्बमी चेम्ब आ थुं बारपाइश्शा ‘एको रिम्शो दुम्त’ देंशा, महिम्सेक्ल, दे कांटी थोक्ब” देंत।

इस्राएली आन कली लोव्र पशो

8 मिनु परमप्रभु यावेमी “आं गेय पाइब इस्राएल, आं योव्रशो याक्ब, आं वारच अब्राहाम आ चच युइ बाक्ब। यसैया ४२:१९; यसैया ४३:१०; यसैया ४४:१, २१; यसैया ४५:४; भजन संग्रह १३५:४; याक्ब २:२३ 9 इ कली रागी आ सुर रे ब्रेत्ताक्न। नेल्ल क्येडा डोन रे चाक्शा, गो इ कली ‘गे आं गेय पाइब बाक्नेवे’ देंती। गो इ कली योव्रता। मिनु गो गे नु बाक्नुड। 10 महिनो, मारदे हना गो गे नु बाक्नुड। आइक्च थुं मपावो। मारदे हना गो इ परमप्रभु नड। गो इ कली बोल्यो सेल्शा, वारच पाइनुड। गो इ कली आं ग्राब ग्युरा गुइमी वारच पाइनुड। यसैया ४३:१

11 गे नु गाइक्ब नेल्ल मुने दोक्शा, शिशी मताइनीम। इ जोरी सत्रु नेल्ल फश खोदेशो दुम्शा, जाम्शा लाइनीम। 12 गे मेको आन कली माल्तीवी हना यो, मथित्नेवे। इ कली लडाइ तोइबपुकी फश खोदेशो दुम्शा, जाम्शा लाइनीम। 13 मिनु गो परमप्रभु यावे, इ परमप्रभुमी इ ग्युरा गुइ ग्याइक्नुड। मिनु गो इ कली ‘महिनो’ देंशा, वारच पाइनुड।

14 गे महिक्सीशो याकूब महिनो। इच्छका ला लीशो इस्राएलीपुकी महिनीन। गो इ कली वारच पाइनुड, दे परमप्रभु यावेमी देंत। इ कली पाप रे प्रॉइब इस्राएली आन का ला बाक्शो परमप्रभु, गो नड। यसैया ४३:३ 15 मुल गो इ कली हेल्शो अन्न तुप्तीके सेल्लुड। मेको हेल्शो, नक नु खुइ पाइशो बाक्ब। गे डांडा आन कली तुप्शा, फस सेल्लेवे। पहाड आन कली भूस खोदेशो सेल्लेवे। 16 गे मेको आन कली हारशा, फशेम योल्पाइक्नेवे। मिनु फश गिवारम मेको आन कली एर ओंथ फ्रशा योल्ब। मेना गे परमप्रभु यावे कली तुइशशा, ग्येरनेवे। इस्राएली आन का ला बाक्शो परमप्रभु आ मुर दुम्शा, ग्येरसीनेवे” देंत।

17 मेकोमी लेंशा “पुडग नु क्येट मथीबम ब्वाक्कु माल्नीम। तन्न मथित्नीम। मेकोपुकी तूतू दाक्शा, आन लाकचा सोत्रब। गो, परमप्रभु यावेमी, मेको आन लोत्र नेंनुड। मिनु गो, इस्राएली आन परमप्रभुमी मेको आन कली मप्रॉइथु, मेको नु बाक्नुड। 18 गो गोरशो डांडामी ब्वाक्कु गूपाइक्नुड। बेसीमी ब्वाक्कु बुक्पाइक्नुड। गो मुर मबाक्तीकेम ब्वाक्कु देम्शो नु सोत्रशो रागीम ब्वाक्कु बुक्पा गूपाइक्नुड। यसैया ३५:१,७; यसैया ४३:१९; प्रस्थान १७:६; भजन संग्रह १०७:३५ 19 मुर मबाक्तीकेमी लेबानोन डा लाइशो रवा वापाइक्नुड। बोल्यो रवा, तेल रवा नु शुश अरु रवा खुम्नुड। गोरशो रागीमी तोत्रशी नु अरु रवा यो खुम्नुड। 20 मुर नेल्लेमी परमप्रभु यावे आ पशो बाक्ब, दे तशा, तुइशशा, मिम्शा रुप्चा माल्नीम। इस्राएली आन का ला बाक्शो परमप्रभुमी मोदेशो सेल्लु” देंत।

मूर्तिमी सक्ति कोइदमेक्ल, देशो

21 परमप्रभु यावेमी “इन लोत्र मार बाक्बा, देनीन। थमा बाक्ब, दे कोइदीन, दे गो, याकूब आ पिपमी देंनुड। 22 मेको आन कली चाक्गमेक्ल। मिनु मार मार दुम्मे, मेको देनीन। डांडती मार दुम्मे, मेको लोत्र पने। गे मेको आन कली मिम्शा, नोले मार दुम्बा, तुइक्चा कली शेंदीन। यसैया ४३:८,९; यसैया ४४:७ 23 नोले मार दुम्बा आंइ कली तुइक्पतीन। मोपा ला गे गेय पने चाप्ब बाक्नीनी, दे तुइक्नीकी। गे रिम्शो पने कि मरिम्शो पने। मोपा गो इन कली तशा तुइशशा शुश हिंनीकी। 24 गे मारेइ मननी। इन पशो नेल्ल फश बाक्ब। सु सुमी इन कली योत्रनीमी मेकोपुकी ग्रांघा दिशो बाक्नीम।

25 गो उत्तर रे का कली ब्रेत्ताक्ड। मिनु मेको जाक्त। नां दाप्तीके रे आं नेंमी लोत्र पाइब ब्रेत्ताक्ड। मेकोम ठेयब मुर आन तारी खप दिम्शो खोदेशो पा दिम्ब। खप के ग्योब सेल्लम दोदेशो पा खप नीबा, मोदेशो पा मेको आन कली नीब। 26 सुमी डांडती रे आंइ कली तुइक्पदा? मेको गो तुइक्चा माल्नीकी। मिनु सुमी डांडती शेंदा? ‘मेको ठीक बाक्ब’ देंने चाप्नीकी। सुइमी मशेंदेम, सुइमी लोत्र मपामे। मिनु सुइमी इन पशो लोत्र मनेनेम। 27 मिनु गो डांडती सियोन कली शेंताक्ड। गो यरूसलेम कली ग्येरपाइक्ब लोत्र पाइब का सोइक्ताक्ड। यसैया ५२:७ 28 तन्न गो कोत्रडुनु, सुइ मथिदु। अर्ती गेब सुइ मबाक्म। गो हिल्लो पाता, सुइम लोत्र मलेत्तीनी। 29 मेको नेल्ल फश बाक्नीम। आन गेय नेल्ल फश बाक्ब। मिनु देवी देवता आन मूर्ति फश बाक्नीम” देंत।

42

परमप्रभु यावे आ गेय पाइब

1 परमप्रभुमी “आं गेय पाइब कली कोत्रडीन। गो मेको कली सक्ति गेनुड। आं योत्रशो गेय पाइब तशा, आं थुं ग्येरसीब। गो मेको कली आं सोक्तीम प्रिंताक्ड। मेकोमी रागी रागी डा मुर आन कली ठीक निसाफ पाइब। यसैया ४९:१-६; यसैया ५०:४-११; यसैया ५२:१३-यसैया ५३:१२; मत्ती १२:१८-२१; मत्ती ३:१७ 2 मेकोमी जिचा मपोक्ब। शुश रेयके मपाइब। लां पित्थ आ सेंदा मनेसीब। 3 मेकोमी जिक्चशो किन्दा मजिक्ब, काप्चशो मी यो मकाप्ब। मेकोमी थमा पा ठीक निसाफ पाइब। भजन संग्रह ३४:१९ 4 मेकोम रागी नेल्लेम मुर आन कली ठीक निसाफ पतीक लां मकोइदा सम्म ग्युम्शा मगोल्ब। समुन्द्र आ नेक्थाम बाक्ब मुरपुकी आ शेंशो नेंचा दाक्शा, मेको कली रिम्नीम” देंत।

5 मेको परमप्रभु, परमप्रभु यावे आ लोत्र बाक्ब। मेकोमी सरीड कली सेल्शा प्राक्तु। मिनु रागी खप फ्राशा, मेकेर मार मार वापाइक्तु। मेकोमी मेकेर बाक्शो मुर आन कली आ ब्रॉइतीक गेब। मेकेर बाक्ब आन कली यो आ सोक्त गेब। उत्पत्ती १:- 6 मेकोमी “गो, परमप्रभु यावे नड। गो इ कली आं ठीक पतीकेमी ब्रेत्ताक्न। गो इ गुइ ग्याइशशा, इ कली कोत्रशा बाक्नुड। गो मुर आन पा डा इ कली आं कबल खाप्ब सेल्लतन। रागी रागी डा मुर आन कली छेडछेड दुम्पाइक्चा कली सोइक्ताक्न। यसैया ४९:६,८ 7 मारदे सोइक्ताक्न देशा हना, मिक्च मताइब आन कली तपाइक्चा, जेल्खानम बाक्ब आन कली प्रॉइचा नु छिडछिड रे गुंइचा कली सोइक्ताक्न। यसैया ३५:५; यसैया ४५:१९; भजन संग्रह १२६:१-४ 8 गो, परमप्रभु यावे नड। आं नें मेकोन बाक्ब। आं मान ततीक अरु आन कली मगेनुडमी। आं ठेयब

दुम्तीके मूर्ति आन कली मगेनुडमी। प्रस्थान ३:१५; यसैया ४८:११⁹ कोवडीन, डोंइती डा देशो लोव्र दुम्ने थुम्तु। गो दुम्चा क्येडा डोंइती नक लोव्र शेनुड। मेको दुम्चा क्येडा डोंइती इन कली तुइक्पाइक्नुड” देत। यसैया ४८:६

रागी डा मुरपुकीम कुम्सो पामेक्ल

10 परमप्रभु यावे कली नक कुम्सो का पने। रागी आ सुर डा मुरपुकी परमप्रभु यावे कली कुम्सो पशा ठेयब सेलीन। समुन्द्र नु समुन्द्रम बाक्बपुकी परमप्रभु कली ठेयब सेलीन। समुन्द्र आ नेक्था बाक्ब नेल्लेमी मेको कली ठेयब सेलीन। भजन संग्रह ३३:३ 11 गोरशो रागी नु मेकेर डा सहर कुम्सो पने। केदार आ बाक्तीक डा मुर नेल्ले कुम्सो पने। सेला डा मुरपुकी ग्येरशा कुम्सो पने। डांडा तार रे ठेयब सेंदा पा ग्रीडीन। 12 मेकोपुकीमी परमप्रभु यावे कली मान पामेक्ल। मिनु “परमप्रभु यावे गिश ठेयब बाक्बा” दे समुन्द्र आ नेक्था बाक्ब मुर आन कली शेंदमेक्ल। 13 परमप्रभु यावे बोल्यो लडाइ पाइब खोदेशो पा गूब। लडाइ पाइब खोदेशो पा आ जोंब बोक्पाइक्ब। मेको ठेयब रेयके पा ग्रीब। मिनु आ जोरी सत्रु आन कली आ ठेयब सक्ति कोइब।

14 मिनु “गो शुश सिक्सी पा बाक्ती, ब्वालेइ पा आंम कली तेक्शा बाक्ती। मुल आल थिचशो मीश मुर बुदी, वाइ ब्रेत्नुड। आं सोक्त कीनुड। 15 गो डांडा नु पहाड आन कली गोरशो सेल्लुड। गिगी मारेइ मारेइ सोव्रपाइक्नुड। गो ब्वाक्कु बाक्तीक कली सोव्रशो रागी सेल्लुड। दोम्ली सोव्रपाइक्नुड। 16 मिनु मिक्च मताइब आन कली आन मतुइश्शो लांमी खुल्लुडमी। आन मतुइश्शो गाक्तीक लांमी गाक्पाइक्नुडमी। मेको आन डोंइती बाक्शो छिडछिड कली छेडछेड सेल्लुड। मिनु फुल्लु बाक्तीक कली दिंम सेल्लुड। एको मप्रोंइथु पाइनुड। यसैया ४०:४ 17 मुशा सेल्लुशो मूर्ति नु चेम्शा सेल्लुशो मूर्ति आन कली थमा सुइश्शा ‘गे आं देवी देवता बाक्नीनी’ देंबपुकी गिम्सीशा, मुने दोक्नीम” देत।

18 परमप्रभु यावेम “गे नोफा मनेंबपुकी नेनीन। गे मिक्च मताइबपुकी एक कोवडीन। यसैया ४३:८ 19 आं गेय पाइब खोदेशो पा मिक्च मताइब सु बाक्नीमी? आं सोइश्शो लोव्र कुरब खोदेशो नोफा मनेंब सु बाक्नीमी? सु आं कली जिम्मा गेंसीशो खोदेशो मिक्च मताइब बाक्नीमी? सु परमप्रभु यावे आ गेय पाइब खोदेशो मिक्च मताइब बाक्नीमी डा? यसैया ४१:८ 20 मेकोमी शुश मार मार ताइब। तन्न मकोव्रब। मेको नोफा नेंब बाक्ब, तन्न मनेंब” देत। यसैया ५३:१

21 परमप्रभु यावेमी आ ठीक पतीके तशा, ग्येरसीशो बाक्त। मेकोमी आ शेंतीके ठेयब सेल्लुशो नु थम रिम्शो दुम्पाइक्ब। 22 तन्न मेको मुरपुकी रोइश्शो नु खुइ पचा पुंडसीशो बाक्नीम। मेको नेल्ल बिक्तीकेमी बिक्शो नु जेल्खानमी खुइश्शो बाक्नीम। मेको सिखार खोदेशो दुम्शो बाक्नीम। मेको आन कली प्रोंइब सुइ मबाक्ब। मेको रोइक्चा पुंडसीब दुम्शो बाक्नीम। मिनु “मेको आन कली लेंशा गेने” देंब सुइ मबाक्ब। 23 इन दातेमी मेको नेंशा वारच पाइब, सु बाक्बा? मुल रे नोफा दाइश्शा, होस पा बाक्ब, सु बाक्बा? 24 सुमी याकूब आ मुर आन कली रोइक्ब आन गुइमी गेवा? सुमी इस्राएली आन कली खुइ आन गुइमी गेवा? मेको पपाइक्ब परमप्रभु यावे ममाइ? मेकोपुकीम मेको कली पाप पाम्तेक्म। मेकोपुकी मेको आ लांम गाक्ने मबिस्सम नु आ अरेशो मटीम। 25 मोपतीके परमप्रभु यावे मेको आन पबंम शुश गाइक्ताक्व। मेको आन कली लडाइ डा श्येत दुम्पाइक्तु। मेको आन एर ओंथ नेल्ल मी जेत्ताक्व। मो हना यो मेकोपुकीमी काइ मरुबेम। मी जेशशा यो आन थुं परमप्रभु यावे गे मलेत्तेम।

43

परमप्रभुमी पाप रे प्रोंइशो

1 याकूब, इ कली नु इस्राएल कली सेल्ल परमप्रभु यावेमी “महिनीन। इन कली पाप रे प्रोंइता। गो इन नें थिशा ब्रेत्ती। गे आं मुर बाक्नीनी। 2 गे ब्वाक्कु शोक्शा, गाक्चा माल्ते हना यो, गो गे नु बाक्नुड। खोला शोक्साक्वे हना यो, मेकोम इ कली मयोल्ब। मीम गाक्शा लवेनु, मेकोम इ कली मजेप्ब। मेको मीम इ कली मदाक्ब। प्रस्थान १४:२१; भजन संग्रह ६६:१२; दानीएल ३:२५-२७ 3 मारदे हना गो परमप्रभु यावे, इ परमप्रभु नड। गो इस्राएली आन का ला बाक्शो परमप्रभु नड। गो इ कली पाप रे प्रोंइब नड। गो इजीप्त रागी इ पा डा गेता। मिनु एथीयोपीया नु सेबा रागी इ कली प्रोंइचा कली गेता। यसैया ४१:१४ 4 मारदे हना गे आं योव्रशो मुर बाक्नीनी। गे मान ताइब दुम्नीनी। गो इन कली दाक्नुड। मोपतीके गो इन पा डा अरु मुर आन कली गेनुड। इन बेक्चा आ पा डा रागी रागी डा मुर आन कली गेतामी। 5 महिनीन, गो गेपुकी नु बाक्नुड। गो इन आल आन कली नां दाप्तीक पूर्व रे चाक्नुड। मिनु नां पेरतीके पच्छिम रे खुप्शा तेल्लुड। यसैया ११:११-१६; येरमीया ३०:१० 6 गो उत्तर कली ‘प्रोंइशा सोइक्तीमी’ माइक्नुड। दक्खिन कली

‘मतेक्मी’ आं तौ आन कली डोन रागी रे चाक्कीन। मिनु आं तमी आन कली रागी आ सुर रे चाक्कीन। 7 आं नेंम ब्रेत्चा पुंडसीशो मुर नेल्ल चाक्कीन। गो मेको आन कली आं कली ठेयब सेल्चा कली वोइक्तामी। मेको आन कली सेल्ब गो नड। येरमीया १४:९

8 मेको मिक्च बाक्शा यो मताइब, नोफा बाक्शा यो मनेंब आन कली गुंडीन। 9 रागी रागी डा मुर नेल्ल खुम्समल। जात जात डा मुर नेल्ल बुक्मल। मेको आन दातेमी सुमी एको लोत्र पवा? मुल मार दुम्मे? सुम डोंइती मेको नोले दुम्ब लोत्र पवा? आ सांकछी ब्रेशा, चाक्गल। मिनु मुरुमी मेको नेंशा ‘थमा बाक्ब’ देंमल” देंत। यसैया ४१:२२, २६ 10 परमप्रभु यावेमी “गेपुकी आं सांकछी बाक्नीनी। मिनु गे आं योत्रशो गेय पाइब बाक्नीनी। गे आं कली तुइशशा थमा सुइक्ब दुम्शो बाक्नीनी। मिनु गो परमप्रभु नड, दे रुप्नीनी। आं डोंइती सुइ परमप्रभु मबा, आं नोले यो सुइ परमप्रभु मदुम्नीम। यसैया ४४:३ 11 गो परमप्रभु यावे नड। आं क्येडा लाक्शा पाप रे प्रोंइब मबाक्ब। यसैया ४५:२१; ब्यवस्था ३२:३९ 12 इन दातेमी देवी देवता मबाक्थु, गो इन कली शेंशा, पाप रे प्रोंइशा, लोत्र नेंपाइक्ता। गे आं सांकछी बाक्नीनी। 13 गो परमप्रभु नड। नोले सम्म गो मेको नड। सुइमी आं गुइ रे प्रोंइने मचाप्ब। गो गेय पडानु, सुइमी आं कली तेक्ने मचाप्ब” देंत।

14 मिनु परमप्रभु यावे, इन कली पाप रे प्रोंइब, इस्राएली आन का ला बाक्शो परमप्रभुमी “इन पा डा गो बेबीलोन सहर कली लडाइ पाइब सोइक्नुड। मेको आन ठेयब लाप्चो डा आग्लो जिकनुड। गो कल्दी आन ग्रीतीक कली रेंका पपाइक्नुड। 15 गो, इन परमप्रभु यावे, इन का ला बाक्शो परमप्रभु नड। गो इस्राएल कली सेल्ब, इन पिप नड” देंत। 16 मिनु परमप्रभु यावेमी “सुमी समुन्द्रमी लां का सेल्बा? सुमी ठेयब ब्वाक्कुमी गाक्तीक लां सेल्बा डा? प्रस्थान १४:२२; यहोसु ३:१६ 17 सुमी बग्गी नु शारा, लडाइ पाइब नु बोल्यो मुर आन कली मेको लांम सोइक्ता? मेकोपुकी गोल्ला, बोक्ने मचाप्नीम। मेकोपुकी सल्दो खोदेशो पा ग्याइशशा काप्चा पुंडसीनीम। प्रस्थान १४:२३-२८ 18 डोंइती डा दुम्शो ममिम्तीन। साइ डोंइती मार दुम्मे, मेको ममिम्तीन। 19 गो नक गेय का पचा चिक्शो बाक्नुड। मुल मेको दुम्चशो बाक्ब। गे मेको मतुइक्नीनी? गो मुर मबाक्तीकेम लां का सेल्नुड। यसैया ४१:१८ 20 मिनु ब्वाकी डा जन्तु, सिवार नु ठेयब चिक्बपुकीमी आं कली मान पाइनीम। मारदे हना गो मुर मबाक्तीकेमी रेड यिपाइक्नुड। गोरशो रागीमी खोला शाइक्पाइक्नुड। आं योत्रशो मुर आन कली तूचा गेचा, दे गो गोरशो रागीमी खोला शाइक्पाइक्नुड। 21 आं कली ठेयब सेल्चा कली मेको मुर आन कली सेल्तामी। १ पत्रुस २:९

22 तन्न याकूब, गे आं कली ठेयब मसेली। इस्राएल, गे आं नोले खोइक्चा आ पबर्म मारेइ ममिम्ती। 23 गे इ भेडा आं कली चोशा मचढेयी। इ चढेशोमी आं कली मान मपवी। गो इ कली जचा थोत्रक चढेचा माल्नेवे, दे श्येत मगेड। धूप चोचा माल्नेवे, दे मदेंड। यसैया १:११-१५ 24 गे आं कली ब्रोत्रशो रिना पाइब थोत्रक ग्याप्शा मचाक्गी। इ चढेशो आन बोंसो मगेयी। तन्न इ पाप पतीकेमी गे आं कली श्येत गेप्तीवी। इ मरिम्शो पतीकेमी आं कली श्येत जपाइक्ती। २कोरिन्थी ५:२१

25 गो नड, इ हेंथे पशो क्याम्नुड। गो मेको आं पबर्म पाइनुड। गो इ पाप लेंशा ममिम्नुड। यसैया ४४:२२; येरमीया ३१:३४ 26 आं कली दोस गेयी। निसाफ पथ लय। दोपा गे आं डोंइती ठीक बाक्नेवे, मेको लोत्र पावो। 27 इ डोंइती डा किकीम पाप पाप्तु। गे नु गारशा लोत्र पाइबम आं कली मरिम्शो पाम्तेक्म। यसैया ४१:८; उत्पत्ती ३५:११-१२ 28 मोपतीके गो आं खिंम चढेब आन कली ‘गेय पचा मदुम्ब’ सेल्तामी। गो याकूब कली खतम सेल्ता। मिनु इस्राएल शुक्शी पाइक्चा पुंडसीब सेल्ता” दे परमप्रभुमी देंत।

44

थमा पा इस्राएली मुर दुम्शो

1 मिनु “याकूब, आं गेय पाइब, मुल नेनो। आं योत्रशो इस्राएल, नेनो। 2 इ कली कोत्रजीम सेल्शा, वारच पाइब परमप्रभु यावेमी ‘आं गेय पाइब याकूब महिनो। येशुरुन गो इ कली योत्रता। येशुरुन इस्राएल आ नें का बाक्ब। ब्यवस्था ३२:१५ 3 मारदे हना गो सोत्रशो रागी तारी ब्वाक्कु लुक्नुड। सोत्रशो खपीम खोला शाइक्पाइक्नुड। गो इ चच युइ आन तारी आं सोक्त मोइक्नुड। इ आल आन कली आसीक गेनुड’। यसैया ३२:१५; योएल ३:१ 4 मेकोपुकी घांस खोदेशो पा शुश बारनीम। ब्वाक्कु आ नेक्था वाशो रवा खोदेशो दुम्नीम। 5 मिनु कामी ‘गो परमप्रभु यावे आ मुर नड’ देंब। अर्कोमी ‘आ नें याकूब बाक्ब’ देंब। मिनु अर्कोमी ‘गो परमप्रभु यावे आ मुर नड’ दे आ गुइम ब्रेक्शा ‘आं नें इस्राएल बाक्ब’ देंब” देंत।

6 मिनु परमप्रभु यावे, इस्राएली आन पिप नु मेको आन कली पाप रे प्रॉइब, मुर नेल्ल आन परमप्रभु यावेमी “गो नेल्ल क्येडा डोंइती नु नेल्ल क्येडा नोले डा नड। गो आं डा लाक्शा, अरु परमप्रभु मबाक्नीम। यसैया ४१:४; यसैया ४३:११; प्रकाश १:१७

7 सु आं खोदेशो बाक्बा? मेकोमी ‘गो परमप्रभु खोदेशो नड’ दे उरदी पवल। मेकोमी आं डोंइती देंल। सुम साइ डोंइती नोले दुम्तीक लोव्र पवा? मुल मार दुम्बा? मेकोमी देंल। यसैया ४१:२२; ब्यवस्था १८:२२ 8 गे खिखि पा महिनीन। गो साइ रे इन कली मदेंडा डा? गेपुकी आं सांकछी बाक्नीनी। गो आं डा लाक्शा अरु परमप्रभु बाक्नीमी? आं क्येडा लाक्शा अरु सेरथे फुल्लु मबाक्ब। गो मेको मतुइक्नुड” देंत। १सामुएल २:२

मूर्ति शोर गाक्शो बाक्नीम

9 मिनु “मूर्ति सेल्ब नेल्ल फश खोदेशो बाक्नीम। मेको आन सेल्चा दाक्शो मूर्ति शोर गाक्शो बाक्नीम। मेको आन पबर्म शेंबपुकी मिक्च मताइब खोदेशो दुम्शा, मारेइ मतुइक्नीम। मोपतीके मेको मुने दोक्नीम। यसैया ४५:१६; भजन संग्रह ११५:४-८; येरमीया १०:३-१६ 10 सुम यपाइशशा मुशा रिम्शो गेय पने मचाप्ब देवता आ मूर्ति सेल्बा? 11 मेको आ नोले खोइक्ब नेल्ल मुने दोक्नीम। मेको मूर्ति सेल्चा जोक्ब मुर ला बाक्नीम। मेकोपुकी बुक्शा, राम्मल। ग्रीचोक पा हिंमल। मिनु गेना हना यो मुने दोक्मल। यसैया ४२:१७

12 तुप्तीलमी मूर्ति चेम्ब। मेकोमी मीम गेय पाइब। बोल्यो गुइमी घनमी तुप्शा सेल्ब। मेको शोव्रलु बेक्शा, आ बोल साम्ब। ब्वाक्कु मतूथु, गेय पने मचाप्ब। यसैया ४०:१८-२० 13 शी मुइबमी शी कली श्येलेम थाप्शा, ब्रेक्स पा बस्लाम क्योक्शा, लेंशा थाप्शा, कोव्रशा ब्रेक्स पाइब। मिनु मुर खोदेशो पा सेल्ब। दारशो मुर खोदेशो पा सेल्ब। मिनु नोले मन्दीरम निप्पाइक्ब। 14 मेकोमी लेबानोन डा लाइशशा रवा तिम्ब। ब्वाकी डा बोल्यो शी के रवा का योव्रशा ब्वाकी डा अरु रवा नु कोल्पाइक्ब। लेबानोन डा लाइशशा रवा का खुम्ब। मेको तारी रेउ यिशा, मेको ठेयब दुम्ब। मिनु मेकोमी सला रवा का खुम्ब। रेउम मेको कली कोल्पाइक्ब। 15 मेको रवा आ शी चोचा कली दुम्ब। मेको शी रे मी मुइशशा थेरब। मेको शी चोशा, शोब्ले चोइब। मेको शी रेन मूर्ति यो सेल्शा, आ डोंइती सेउ पा बाप्ब। 16 मेकोमी आधा शी चोशा, मेको तार श्ये चोइब। मेको ब्वशा रूशा, मी थेरब। मिनु मेकोमी ‘गो होती, मी थेरचा ताता’ देंत। 17 मिनु आ लीशो शी रे मूर्ति का सेल्ब। मिनु मेको आ डोंइती बाप्शा पूजा पाइब। मिनु मेको कली ‘आं कली श्येत रे प्रॉइयीनी। मारदे हना गे आं परमप्रभु बाक्नीनी’ दे पुंइब” देंत।

18 मेको मुरपुकीमी मारेइ मतुइक्थु, मरुप्नीम। मारदे हना मेको मिक्च मताइनीमी। आन थुं मरोक्सीशो बाक्ब। मेकोपुकी मारेइ मरुप्ब बाक्नीम। 19 सुइमी मारेइ ममिम्ब कामी “गो मेको शी आधा मीम चोता। मेको मी तारी शोब्ले चोशा, श्ये वाल्शा ब्वाता। मुल गो मेको आ लीशो ठुटा रे ग्रांरा दिशो मूर्ति सेल्चा दुम्बा डा? गो मेको आ डोंइती बाप्चा दुम्बा डा?” देंब सुइ मबाक्ब। 20 सु सुमी पुलु कली सेउ पाइनीमी, मेको आन दूली थुंमी दूली मिम्पाइशशो बाक्नीम। मेकोमी आंम कली प्रॉइने मचाप्ब। मिनु “आंइ सेल्शो मूर्ति जोल बाक्ब” मदेनीम।

इस्राएली आन कली प्रॉइशो

21 याक्ब गे एको लोव्र मिम्तो। इस्राएल मिम्तो। मारदे हना गे आं गेय पाइब बाक्नेवे। गो इ कली सेल्तन, गे आं गेय पाइब बाक्नेवे। इस्राएल इ कली मप्रेनन। यसैया ४१:८ 22 गो इ पाप गोस्स खोदेशो पा जाम्पाइक्ता। इ हेंथे पशो यो क्याम्ताक्ड। गे आं गे लेतो। मारदे हना गो इ कली पाप रे प्रॉइतन। यसैया ४३:२५

23 गे सरीड कुम्सो पावो। रागी नेल्ल रेयके पा, शुश कुम्सो पने। गे डांडा, ब्वाकी नु रवा नेल्लेमी कुम्सो पने। मारदे हना परमप्रभु यावेमी याक्ब कली श्येत रे प्रॉइतु। इस्राएल रागीमी आं नें ठेयब सेल्शो बाक्ब। यसैया ४९:१३; यसैया ५५:१२; भजन संग्रह ९६:११-१३

पिप कोरेस कली गोठला वोइशशो

24 मिनु परमप्रभु यावे, इ कली श्येत रे प्रॉइब, इ कली कोव्रजीम सेल्बमी “गो मारेइ मारेइ सेल्ब परमप्रभु यावे नड। गो आं कामी सरीड प्राक्ता। रागी वोइक्ता। यसैया ४५:१२ 25 गो जोल पाइब आन नोले दुम्ब लोव्र शोर गाक्शो सेल्नुड। लिंक्यु कोव्रब आन निप्स क्यातामी। जोक्ब तुइक्ब आन कली दिप्शा, मेको आन जोक्तीके तुइक्तीके नेल्ल मूर्ख सेल्ता। यसैया २९:१४ 26 गो आं गेय पाइब आ लोव्र थमा बाक्ब। मिनु आं सोइशशो लोव्र कुरबम आं देंशो पाइब। गो यरूसलेम आ पबर्म ‘मेकेर शुश मुर दुम्नीम’ देंनुड। मिनु यहूदा डा सहर लेंशा सेल्चा पुंइसीनीम। मेको आन प्रेशो खिं नक सेल्नुड। 27 गो शुश लुक्च लशो ब्वाक्कु सोव्रपाइक्नुड। गो इ खोला आन कली सोव्रपाइक्नुड। यहोसु

४:२३ 28 कोरेस आं गोठला बाक्ब। मेकोमी आं मिम्शो गेय पाइब। मेकोमी 'यरूसलेम लेंशा सेल्चा माल्ब' देंब। आं खिं आ पर्बम 'नक जग सेल्नुड' " देंत। २इतिहास ३६:२३; एज्रा १:१-४

45

परमप्रभुमी कोरेस कली योत्रशो

1 मिनु परमप्रभु यावेमी कोरेस कली तेल लुक्शा, आ ग्युरा गुइ ग्याइक्ता बाक्त। मारदे मो पवा बाक्त देंशा हना, रागी रागी डा मुर आन कली फुपाइक्चा, रागी रागी डा पिप आन कली मुने तोक्चा नु आ डोंइती लाप्चो रोक्शा, मचोक्चा कली बाक्त। यसैया ४१:२ 2 परमप्रभु यावेमी मेको कली "गो इ डोंइडोंइती गाक्नुड। डांडा आन कली दिंम सेल्नुड। कांसा के लाप्चो जिक्नुड। फलाम के आग्लो जिक्नुड। 3 गो इ कली हिंचा डा छिडछिडम वोइश्शो शोंप गेनुड। इ कली खुइश्शा वोइश्शो सुन चांदी गेनुड। मिनु गे, परमप्रभु यावेमी इ कली नें थिशा ब्रेप्ब, इस्राएली आन परमप्रभु, गो नड, दे तुइक्नेवे। 4 आं गेय पाइब, याकूब, आ योत्रशो इस्राएल कली गो इ नें थिशा, ब्रेत्नुड। गो इ कली ठेयब नें गेशा ब्रेत्ताक्ड हना यो, गे आं कली मतुइक्ती। 5 गो परमप्रभु यावे नड। गो आं डा लाक्शा सुइ परमप्रभु मबाक्ब। गे आं कली मतुइक्ताक्की हना यो, गो इ कली ठीक सेलतन। प्रस्थान २०:३ 6 इ कली मार पचा कली ठीक सेलतन देंशा हना, नां दाप्तीक रे नां पेरतीक सम्म गो आं डा लाक्शा अरु सुइ परमप्रभु मबाक्ब, दे मुर नेल्ल आन कली तुइक्पाइक्चा कली ठीक सेलतन। गो परमप्रभु यावे नड, गो आं डा लाक्शा अरु सुइ परमप्रभु मबाक्ब। 7 गो छेडछेड नु छिडछिड सेल्ब नड। गो थुं नाइक्पाइक्ब नु श्येत जपाइक्ब सेल्ब नड। गो, परमप्रभु यावेमी, मेको नेल्ल पाइनुड। आमोस ३:६

8 सरीड, रेउ यिपतो। ठीक पतीके रेउ खोदेंशो पा यिल। रागी रोक्सेक्ल, पाप रे प्रोंइतीके ठोसा खोदेंशो पा ग्रूब। मेको ठीक पतीके नु कालेमीन कोल्सल। मेको नेल्ल सेल्ब, गो, परमप्रभु यावे नड।

9 आबी, सुमी आ कली सेल्ब कली दोस गेबा, मेको गर आ गम्टे का खोदेंशो बाक्ब। मार, खपीमी खप के ग्योब सेल्ब कली 'मार पवी?' देंबा डा? गेयमी गेय पाइब कली 'मजोक्ब बाक्ते' देंबा डा? अय्युब ४०:२; यसैया २९:१६; येरमीया १८:६; रोमी ९:२० 10 आबी, सुमी आ आफ कली 'मारदे आं कली सेल्की?' मिनु मीश मुर कली 'गे मारदे आल थितीक रोइ पाइनेवे?' " देंब। 11 मिनु परमप्रभु यावे, इस्राएली आन का ला बाक्शो परमप्रभु यावे नु इस्राएल कली सेल्बमी, मार देंब देंशा हना "गे आं कली 'आं आल ते लाइनीनी' दे हिल्लो पाइनेवे? आं गेय आ पर्बम आं कली अरेचा माल्नेवे? 12 गो रागी नु रागीम बाक्ब मुर आन कली सेलता। गो आं गुइमी सरीड प्राक्ता। मिनु मेकेर मार मार बाक्मा, मेको नेल्ल सेलतामी। यसैया ४४:२४ 13 गो कोरेस कली ठीक पचा कली पोक्ता। गो मेको आ लां नेल्ल दिंम सेल्नुड। मेकोमी आं सहर सेल्चा माल्ब। मिनु मेकोमी ग्याइश्शा लाइश्शो मुर आन कली प्रोंइब। मेकोम क्येट नु मारेइ कोसेली मताक्ब" दे मुर नेल्ल आन परमप्रभु यावेमी देंत। यसैया ४१:२

परमप्रभुम श्येत रे प्रोंइब देंशो

14 मिनु परमप्रभु यावेमी "इजीप्त डा शोंप, एथीयोपीया डा मारेइ मारेइ नु साबा रागी डा लाइश्शो मुरपुकी इ के दुम्नीम। मेको इ नोले खोइक्नीम। मेकोपुकी फ्रेंशो दुम्शा, इ गे जाक्शा, इ डोंइती बाप्शा 'थमा पा परमप्रभु गे नु बाक्ब। मेको डा लाक्शा अरु सुइ परमप्रभु मबाक्ब' दे पुंइनीम" देंत। 15 थमा पा, गे परमप्रभु बाक्नीनी। गे खुंइसीशो बाक्नीनी। गे इस्राएली आन परमप्रभु, श्येत रे प्रोंइब बाक्नीनी। रोमी ११:३३; यसैया ४३:११ 16 मूर्ति सेल्ब नेल्ल मुने दोक्शा, कालेम आन कुल राव किक्शा लाइनीम। यसैया ४४:९-११ 17 तन्न परमप्रभु यावेमी इस्राएल कली श्येत रे प्रोंइब। मेको गेना हना यो लीब श्येत रे प्रोंइतीकेमी बाक्ब। गे गेना हना यो मुने मदोक्थु, इन कुल मकिक्पाइक्नीनी।

18 मिनु परमप्रभु यावे सरीड नु रागी सेल्ब बाक्ब। मुर मबाक्तीके मसेल्थु, मुर आन कली बाक्तीक सेलतु। मेकोमी "गो परमप्रभु यावे नड। आं डा लाक्शा अरु सुइ परमप्रभु मबाक्ब। 19 गो छिडछिड डा रागीमी खुइश्शो लोत्र मपड। गो याकूब आ आल आन कली 'गे आं कली खल्बलम मालीने' मदेंड। गो, परमप्रभु यावेमी थमा नु ठीक लोत्र ला पाइनुड" देंत। यसैया ४८:१६

मूर्तिम बेबीलोन प्रोंइने मचाप्नीम

20 मिनु परमप्रभु यावेमी "गे नेल्ल खुम्सीशा बुक्कीन। गे रागी रागी डा लीशो मुर आं नेक्था जाक्कीन। शी के मूर्ति कुरबपुकी मारेइ मतुइक्ब बाक्नीमी। मेकोपुकीमी आन मूर्ति कली पुंइना पुंइन बाक्नीमी। तन्न मेकोपुकीमी श्येत रे

प्रॉइने मचाप्नीम। 21 इ लोव्र शेंशा, लोव्र पावो। लोव्र पमुने। साइ डोंइती एको लोव्र सुम देंमे? सुमी तुइक्पदा? मेको नोले दुम्ब लोव्र सुम पवा? गो, परमप्रभु यावे मनडा डा? आं डा लाक्शा, अरु सुइ परमप्रभु मबाक्ब। गो ठीक पाइब नु श्येत रे प्रॉइब परमप्रभु यावे नड। आं डा लाक्शा, अरु सुइ परमप्रभु मबाक्ब।

22 आं गे लेतीन। मिनु पाप रे प्रॉइचा पुंइसीन। रागी डा सुर सम्म मो पने। मारदे हना गो परमप्रभु नड। आं डा लाक्शा अरु सुइ परमप्रभु मबाक्ब। 23 गो आं नेंमी कसम जाता। गो ठीक लोव्र पाता। एको लोव्र मक्याम्सीब। मुर नेल्ले आं डोंइती पोक्च थेक्चा माल्नीम। आं नेंमी कसम जचा माल्नीम। रोमी १४:११; फिलिप्पी २:१०-११

24 ‘परमप्रभु यावे ला ठीक पतीके नु सक्ति गेब बाक्ब’ दे कसम जाइनीम। परमप्रभु यावे कली मटीब नेल्ल आं बाक्तीकेम जाक्शा मुने दोक्चा माल्नीम। येरमीया २३:६ 25 इस्राएल आ चच युइ नेल्लेम ‘परमप्रभु यावेमी इं कली ठीक सेल्ब। गोपुकी आ मुर दुम्तय’ दे ग्येरसीनीम” देंत। येरमीया ९:२२-२३

46

बेबीलोन डा मूर्ति खतम दुम्शो

1 बेल गुर ब्वेत। नेबो दिड गोल्लत। मेको आन मूर्तिपुकी बी ब्यफ आन कली कुरपाइक्नीम। इन कुरशो थोव्रक गे दशो बी ब्यफ आन कली कुरपाइक्नीनी। येरमीया ५०:२ 2 मिनु मेकोपुकी कालेम दिड गोल्लशा, गुर ब्वेनीम। आन भारी प्रॉइने मचाप्नीम। मिनु आंमा ग्याइशशा लाइक्चा पुंइसीनीम।

3 “याकूब आ खिं डा मुर, आं लोव्र नेनीन। इस्राएल आ खिं डा लीशो मुरपुकी आं लोव्र नेनीन। गे जरमेसीनी रे इन कली कुरता। गे कोव्रजीम बाक्नी रेन इन कली कुरता। 4 गेपुकी खूशो दुम्नी सम्म गो खाल का डा बाक्नुड। इन चां बोइक्म सम्म यो इन कली कुरनन्नी। गो इन कली सेल्शा, कुरनुड। इन कली कुरशा, पाप रे प्रॉइनन्नी। भजन संग्रह ७१:१८

5 गेपुकी आं कली सु नु थाप्नीनी, सु नु उइक्थ बाक्त देंनीनी। आं कली सु खोदेशो बाक्त देंनीनी? यसैया ४४:९-२० 6 मिनु शुश सुन थीब नु चांदी नाक्बपुकीमी चेम्ब कली ब्रेत्नीम। मिनु मेको रे मूर्ति सेल्पाइक्नीम। मेको आ डोंइती बाप्शा पूजा पाइनीम। 7 मिनु मेको कली गुप्शा, बलाम कुरशा, लाइशशा, आ बाक्तीकेम वोदमेनु, मेकेर मदुक्थु, मगाक्थु बाक्ब। सुइमी मेको आ डोंइती जाक्शा ‘प्रॉइयीनी’ देंत हना, मेकोमी लोव्र मलेप्ब। सुइ आन कली श्येत रे प्रॉइने मचाप्ब” देंत। १राजा १८:२६

परमप्रभुम आ मिम्शो पाइब

8 मिनु “गे हेंथे गाक्बपुकी, आं देशो मिम्तीन। साइ डा लोव्र इन थुंम वोतीन। 9 साइ डोंइती डा माइत लोव्र मिम्तीन। मारदे हना गो परमप्रभु नड, आं डा लाक्शा, अरु सुइ परमप्रभु मबाक्नीम। गो परमप्रभु नड, आं खोदेशो सुइ मबाक्नीम। यसैया ४४:६ 10 गो साइ डोंइती रे नोले सम्म मार दुम्मे, नेल्ल शेंनुड। डोंइती रे मुल सम्म मदुम्शो यो देंनुड। मिनु गो आं मिम्शो मफाइक्थु, नेल्ल पाइनुड। आ मिम्शो नेल्ल खाप्नुड। 11 गो पूर्व रे सिखार ग्यारब चिक्ब का ब्रेत्नुड। मिनु डोन रागी रे आं मिम्शो नेल्ल पाइब मुर का कली ब्रेत्नुड। गो आं देशो लोव्र खाप्नुड। आं मिम्शो पाइनुड। यसैया ४१:२

12 गे खकटा थुं पाइशोपुकी नेनीन। गे पाप रे प्रॉइतीके रे शुश डोन बाक्नीनी। 13 आं पाप रे प्रॉइतीक चाक्नुड, मेको डोन मबाक्ब। गो इन कली रीब पा पाप रे प्रॉइनुड। गो आं पाप रे प्रॉइतीक सियोनम वोइक्नुड। इस्राएल कली आं छेडछेड गेनुड” देंत।

47

बेबीलोन सहर खतम दुम्शो

1 मिनु “गे कन्ने तमी बेबीलोन तोइशशा फुरकुम निस्सो। बेबीलोन डा कल्दी आ तमी, ठेयब नित्तीक मबाक्थु, खपीम निस्सो। मारदे हना मुल रे इन कली ‘दारशो नु अरु आन क्येडा शुश दाक्शो तमी’ मदेनीम। 2 फस हिल्लो। इ कुल सुम्सीशो वा हाक्सो। इ गुने ग्येत्थ क्युक्सो फिला कोंइशा खोला शोक्सो। 3 इ वा हुक्शा, इ शिप्रा रां कोंइचा माल्नेवे। इ मुने दोक्तीके तांइसीब। गो इ कली क्येक्क लेत्नुड। गो सुइ कली मप्रॉइनुडमी। नहुम ३:५ 4 आंइ कली श्येत रे प्रॉइब, मुर नेल्ल आन परमप्रभु यावे, इस्राएली आन का ला बाक्शो परमप्रभु बाक्ब।

5 कल्दी आ तमी ब्वालेइ पा छिडछिडम लशा निस्सो। मारदे हना गे मुल रे राज्यपुकी डा पिपीम माइक्चा मपुंइसीनेवे। 6 गो आं मुर आन कली तशा गाइशशा, मेको आन कली ‘आं मुर मनम’ खोदेशो सेल्तामी। मेना इ

गुडमी गेतामी। मिनु गे मेको आन कली काइ शिशी मपदी। खूशो आन कली यो श्येत गेशा, हेल्शो जवा लाप्ताक्वी। जकरिया १:१५ 7 मिनु गे 'गो गेना हना यो पिपीम बाक्नुड' देते। गे आं मुर आन कली मरिम्शो पाप्तीवी। नोले मार दुम्बा, मेको ममिम्ती।

8 मोपतीके गे दला दाक्स पाइब, नेनो। गे रिम्शो पा महिंथु बाक्ते। इ थुंमी 'गो ठेयब नड, आं क्येडा लाक्शो अरु सुइ मबाक्ब। गो वोंइश बेक्शो मीश मुर मदुम्नुड। आं आल बेक्शो मताइनुड' देते। सेफन्याह २:१५; प्रकाश १८:७ 9 वोंइश बेक्शो मीश मुर दुम्तीके श्येत नेल्ल ताइनेवे। इ आल बेक्शो ताइनेवे। नाक्ती का, याम कामीन एको श्येत निक्शी इ कली दुम्नीस। शुश मन्तर तन्तर, ठेयब सक्ति पाइश्शो टुना मुना पाप्तीवी हना यो, मो दुम्शो ताइनेवे।

10 गे, परमप्रभु यावे आ अरेशो मटिथु 'आं कली सुइम मताइब' दे हेम्मा पा बाक्शा, मिम्ताक्वी। मिनु इ शुश तुइक्तीके नु जोक्तीकेम इ कली दूली लां खोइक्पाइक्तु। इ थुंमी 'गो नड। आं क्येडा लाक्शो अरु सुइ मबाक्नीम' देते। भजन संग्रह १०:११ 11 तन्न मुल गे शुश श्येत जाइनेवे। इ मन्तर तन्तरमी तिकने मचाप्नेवे। गे शुश हिंचा डा श्येत जाइनेवे। गे मेको तेक्ने मचाप्नेवे। मुल सम्म मतुइश्शो जाम्तीक नु नुप्तीक इ तारी जाक्ब।

12 गे इ टुना मुना नु मन्तर तन्तर शुश पावो। गे आल रेन मोदेशो पाप्तीवी। मेको पवीनु, ठीक दुम्बा को? मेको श्येत मजाक्बा को? दानीएल २:२ 13 गे शुश अर्ती नेंशा दशो बाक्नेवे। मिनु कल्दीपुकीमी सरीड कोव्रशा, इ कली पाप रे प्रोन्मेक्ल। मिनु सोरुल कोव्रबमी औंसीमी इ कली मार दुम्बा, मेको देंमल।

14 मेकोपुकी टुटा दुम्नीम। मिनु मीम मेको आन कली नेक्ब। आंमा मेको मी रे प्रोंइसीने मचाप्नीम। मेको मी थेरचा डा मदुम्थु, आ डोंइती बाक्ने मचाप्नीम। 15 गे नु गेय पाइब मुरपुकी मोदेशो मुर बाक्नीमी। गे आल रेन मेकोपुकी नु ग्याप्तीक लेयती गेय पाप्तीवी। मेको का का पा आन आंम लां खोइक्नीम। मिनु इ कली प्रोंइब सुइ मबाक्नीम" देते।

48

परमप्रभुम नोले दुम्ब लोव्र शेंशो

1 मिनु परमप्रभु यावेमी "याकूब आ खिं डा मुर, नेनीन। इन कली इस्राएल नें वोइश्शो बाक्ब। गे यहूदा आ चच युइ बाक्नीनी। गे परमप्रभु यावे आ नें थिशा, कसम जाइनीनी। गे इस्राएली आन परमप्रभु कली ठेयब सेल्खु पाइनीनी। यसैया ५१:१ 2 मेकोपुकी आंम आंमा 'गोपुकी परमप्रभु आ योव्रशो सहर डा नकी' देंनीम। इस्राएली आन परमप्रभु आ पर्वम मेकोम आंइ कली कोव्रब" दे मिम्नीनी। मेको आ नें मुर नेल्ल आन परमप्रभु यावे बाक्ब।

3 गो इन कली साइ डोंइती डा लोव्र डोंइती रेन शेंताक्नीनी। गो लोव्र पा नेंपाइक्तन्नी। नोले गो मेको याम काम पाता। मिनु दुम्तेक्म। 4 गे मटीब बाक्नीनी। इन शुर फलाम खोदेशो बाक्ब। इन कुप्फी कांसा खोदेशो बाक्ब। गो मेको तुइश्शो बाक्नुड। 5 मोपतीके गो इन कली मेको दुम्चा क्येडा डोंइती शेंताक्नीनी। मिनु गे "मेको आं मूर्तिम पाप्तु। आं मुशा सेल्शो मूर्तिम नु आं चेम्शा सेल्शो मूर्तिमी मेको पाप्तु" देंने मचाप्नी।

6 गे मेको नेल्ल नेंशो बाक्नीनी। मुल गे नेल्ल कोव्रडीन। मिनु मेको आ पर्वम लोव्र मपाइनीनी? मुल रे गो इन कली नक लोव्र नेंपाइक्नन्नी। इन मतुइश्शो खुइश्शो लोव्र शेंनन्नी। 7 मेको डोंइती डा ममाइ, गो मेको मुल पाता। डोंइती मनेशो ननी। मिनु गोपुकीमी "गो डोंइती रे तुइश्शो नकी" देंने मचाप्नीनी। 8 गे मेको मनेशो मतुइश्शो बाक्नीनी। साइ डोंइती रे नोफा मनेंब बाक्तीनी। गे जोल पा गेय पाइब बाक्नीनी। मेको गो तुइक्ताक्ड। आल रेन गे काइ मटीब बाक्तीनी, दे तुइक्ताक्ड।

9 आं नें आ पर्वम आं गाइक्तीके तेक्नुड। आं कली ठेयब सेल्तीके, गो इन पर्वम आं गाइक्तीके तेक्नुड। इन कली मसाइक्चा कली मो पाइनुड। 10 कोव्रडीन, गो इन कली यपाइक्ता, तन्न चांदी खोदेशो पा ममाइ। शुश श्येत जपाइश्शा, नाक्ताक्नीनी। ब्यवस्था ४:२० 11 गो आं पर्वम पाइनुड। मारदे आं नें ग्रांग्रा दिशो सेल्चा गेनुडा? आं छेडछेड नु सक्ति अरु आन कली मगेनुडमी। यसैया ४२:८

इस्राएल कली पाप रे प्रोंइशो

12 याकूब आं लोव्र नेनो। आं ब्रेशो इस्राएल नेनो। "गो, गो नड। गो नेल्ल क्येडा डोंइती नु नेल्ल क्येडा नोले डा नड। 13 गो रागी आ जग वोइक्ता। आं ग्युरा गुडमी सरीड प्राक्ता। मेको आन कली ब्रेत्तुनु नेल्ल गूशा राप्नीम।

14 गे नेल्ले खुम्सीशा, आं लोव्र नेनीन। मेको आन दातेमी सुम मोदेशो शेंदा? परमप्रभु यावेम मेको आन कली दाक्ब। मिनु मेको बेबीलोन आ पर्वम बोक्ब। कल्दी डा मुर आन कली लडाइ तोइब। यसैया ४१:२ 15 गो एको लोव्र

पाता। गो मेको कली ब्रेशशा, चाक्ता। मिनु मेकोमी आं मिम्शो गेय रिम्शो पा पाइब। 16 आं नेक्था जाक्शा, एको लोव्र नेनीन। गो डोंइती रे खुइश्शो लोव्र काइ मपड। एको गोशो रे गो बाक्शो नड। मुल परमप्रभु, परमप्रभु यावेमी आ सोक्त गेशा, आं कली सोइक्ताक्यी” देंत। यसैया ४५:१९

बेबीलोन रे गूडीन देशो

17 इन कली श्येत रे प्रोंइब इस्राएली आन का ला बाक्शो परमप्रभुमी “गो परमप्रभु यावे, इन परमप्रभु नड। गो इन कली रिम्शो दुम्चा कली शेंनुड। मिनु तेको लां लचा माल्नीनी, मेको कोंइनुड। 18 गेपुकी आं शेंशो टिशो ननी हना, इन सोशा बोशा लतीके ठेयब खोला खोदेशो दुम वा। इन रिम्शो दुम्तीके समुन्द्र खोदेशो दुम वा। ब्यवस्था ५:२९ 19 मिनु इन आल समुन्द्र डा बाल्वा खोदेशो पा शुश दुम वा। मिनु इन चच युइ अन्न खोदेशो पा शुश दुम वा। आन नें गेनायो मक्याम्स वा। मिनु आं डोंइती रे खतम मदुम वा। उत्पत्ती २२:१७

20 ‘बेबीलोन रे गूडीन। कल्दी आन रागी रे प्रोक्कीन’ दे ठेयब सेंदा पा नेल्ल आन कली नेंपतीन। रागी डा सुर सम्म नेंपतीन। गेपुकीमी ‘परमप्रभु यावेमी आ गेय पाइब याकूब कली पाप रे प्रोंइतु’ दे नेंपतीन” देंत। येरमीया ५१:६; प्रकाश १८:४ 21 मेकोमी मेको आन कली गोरशो रागीम लदानु, मेकोपुकी ब्वाक्कु तूतू मदाक्म। मारदे हना मेकोमी सेरथे फुल्लु रे ब्वाक्कु बुक्पाइक्तु। सेरथे फुल्लु प्रोलानु, शुश ब्वाक्कु गूत। 22 परमप्रभु यावेमी “आं अरेशो लोव्र मटीब आन थुं नाइक्चा मताइनीम” देंत। यसैया ५७:२१

49

परमप्रभु यावे आ गेय पाइब

यसैया ४२:१-४

1 गे समुन्द्र आ नेक्था बाक्बपुकी, होस पने। गे डोन रागी डा मुरपुकी, होस पने। परमप्रभु यावेमी आं कली आ जरमेचा क्येडा डोंइती रेन ब्रेशशो बाक्ता। गो आं ममा आ कोव्रजीम बाक्डानु, मेकोमी आं कली नें गेती। 2 मेकोमी आं शोव्र हेशो तरवार खोदेशो सेल्लु। आं कली आ गुइमी सुम्शा, खुइक्ताक्यी। मेकोमी आं कली हेशो ब्रा खोदेशो सेल्शा, आ ब्रा कुरतीकेम कुर पा खुइश्शा वोइक्ती। हिबू ४:१२; प्रकाश १:१६; यसैया ५१:१६ 3 मिनु आं कली “गे आं गेय पाइब बाक्नेवे। गे इस्राएल नवे। इ पतीकेमी आं सक्ति कोंइनुड” देंत। 4 मिनु गो “गो मो गेय पाता। आं बोल मो खेरता। गो मार पचा माल्लुडा। मेको परमप्रभु यावे नु बाक्ब। आं परमप्रभुमी आं तचा माल्लो गेब” देंती। १कोरिन्थी १५:५८

5 मुल परमप्रभु यावेम आ गेय पाइब सेल्लती। मिनु गो याकूब कली आ गे लेप्पाइक्चा कली नु इस्राएल मेको आ नेक्था खुप्शा वोइक्चा कली मेकोमी आं कली आं ममा आ कोव्रजीम सेल्लती। मारदे हना गो परमप्रभु यावे आ डोंइती मान ताइब दुम्ती। आं परमप्रभु आं सक्ति दुम्त। 6 मिनु मेकोमी “याकूब आ थर डा मुरपुकी नु इस्राएल डा लीशो मुर आन कली डोंइती डा खोदेशो सेल्चा कली इ कली आइक्च गेय का बाक्ब। गो इ कली रागी रागी डा मुर आन कली छेडछेड दुम्पाइक्नुड। मिनु मेको आं पाप रे प्रोंइतीके रागी डा सुर सम्म ब्रल” देंत। यसैया ४२:६; यसैया ६०:३; लूका २:१२; प्रेरित १३:४७

7 परमप्रभु यावेम, इस्राएली आन श्येत रे प्रोंइब, इस्राएली आन का ला बाक्शो परमप्रभु यावेमी काइ मदाक्शो नु रागी डा मुरुम खेदा पचा पुंइसीशो नु हुकुम पाइब आन वाइल आन कली “पिपपुकी मेको कली तशा, राप्नीम। हुकुम पाइबम आ देशो पाइब परमप्रभु यावे आ डोंइती बाप्नीम। इ कली योव्रब इस्राएली आन का ला बाक्शो परमप्रभु आ डोंइती बाप्नीम” देंत।

इस्राएली कली पाप रे प्रोंइब

8 मिनु परमप्रभु यावेमी “शिशी पतीक नाक्ता गो इ लोव्र नेशा, लोव्र लेत्ताक्न। प्रोंइतीके नाक्ता गो इ कली वारच पाता। गो इ कली कोव्रशा, आं कबल डा मुर सेल्लता। गो रागी लेंशा सेल्चा कली मोदेशो पाता। इन थेरशो रू लेंशा इन कली गेचा कली मो पाता। भजन संग्रह ६९:१४; २कोरिन्थी ६:२; यसैया ४२:६ 9 गो जेल्खानम बाक्ब आन कली ‘गूडीन’, छिडछिडम बाक्ब आन कली ‘छेडछेडम गूडीन’ देंचा कली ब्रेत्ताक्न। मेकोपुकी आं भेडा बाक्नीम। लांमी जोचा ताइनीम। गोरशो डांडा मेको आन रिम्शो पा जोतीके बाक्तीके दुम्ब। 10 शोव्रलु मबेक्नीम, तूतू मदाक्नीम। नां नु होश फश नु नांमी मेको आन कली मनाप्ब। मारदे हना मेको आन कली शिशी पाइबमी मेको आन कली खुल्ब। प्रकाश ७:१६ 11 मिनु गो आं डांडा नेल्ले लां सेल्लनुड। आं ठेयब लां रिम्शो पा सेल्पाइक्नुड। यसैया ४०:४ 12 नेनीन, मेकोपुकी

डोन रे जाक्नीम। मेकोपुकी उत्तर रे पच्छिम रे नु स्येने रागी रे जाक्नीम” देंत। स्येने रागी इजीप्त आ दक्खिनम यहूदी आन बाक्तीके का बाक्ब। मेको कली आस्वान यो देंनीम। लूका १३:२९

13 सरीड, ग्येरसीशा कुम्सो पावो। रागी, ग्येरसो। डांडापुकी ग्येरशा, कुम्सो पने। मारदे हना परमप्रभु यावेमी आ मुर आन कली लेम्ताक्व। मेकोमी श्येत जाइब आन कली शिशी पाइब। यसैया ४४:२३

सियोन डा शुश मुर

14 तन्न सियोनमी “आं परमप्रभु यावे, परमप्रभुम आं कली प्रॉइशा प्रेंताक्यी” देंत। 15 मिनु परमप्रभुम “सुइ मीश मुरुम आ दूध तूब आल कली प्रेंबा डा? आंम आ आल कली शिशी मपाइबा डा? मेकोम आ आल कली प्रेंने चाप्टु हना यो, गो इ कली मप्रेनुड। उत्पत्ती २१:१६; १राजा ३:२६; येरमीया ३१:२० 16 कोवडो, गो इ कली आं गुइमी ब्रेक्ताक्न। इ गारोपुकी गेना हना यो आं डोंइती बाक्नीम। 17 इ तमी तौ रीब पा जाक्नीम। इ कली खतम पोक्ब गूशा लाइनीम” देंत। 18 कोवडो, मिक्च हिरशा कोवडो। मेको नेल्ल गुम्शा, इ बाक्तीक जाक्नीम। परमप्रभु यावेमी “गो ब्रॉइशा बाक्शो खोदेशो पा, गे मेको लेशशा जाक्ब आन कली माला खोदेशो पा रेलसीचा माल्नेवे। ग्युम्ली खोदेशो पा मेकोपुकीमी ग्योम्सीचा माल्नेवे। यसैया ६०:४ 19 थमा पा इ प्रेशशो खिं, मुर मबाक्शो रागी नु इ खतम दुम्शो रागीम मुर मरिक्थ्री दुम्नीम। इ जोरी सत्रु डोन लाइनीम। 20 इन ब्राची ना डा जरमेशो आलपुकीमी इ कली ‘एको रागीम आंइ कली मरिक्त, अर्को बाक्तीक रू गेकी’ देंनीम। यसैया ५४:१ 21 मिनु गे इ थुंमी ‘एको आलपुकी आं कली सुम थिशा गेयी? गो आल मथीब दुम्शो बाक्ती। आं रागी रे ग्याइशशा लाइक्चा पुंइसाक्यी। सुम मेको आन कली थुल्शा कोल्पदा? गो दा आं का ला लीशो बाक्ती। एको ते रे जाक्मा?’ दे मिम्नेवे” देंत।

22 मिनु परमप्रभु, परमप्रभु यावेमी “गो आं गुइ रागी रागी गे दिनुड। गो जात जात डा मुर आन डोंइती आं छेदर खुक्शा कोंइनुड। मिनु मेकोपुकीमी इ तौ आन कली कुचुम मुप्शा नु इ तमी आन कली चीम कुरशा चाक्नीम। यसैया ६०:४ 23 मिनु पिपपुकी इ कली कोवब आफ नु पिपीमपुकी इ कली दूध तुंडब ममा दुम्नीम। मेकोपुकी इ डोंइती बाप्शा, इ फुरक लुम्सीशो खोइली तुक्नीम। मिनु गो परमप्रभु यावे नड, दे तुइक्नेवे। आं लां रिम्शा बाक्बपुकी मुने मदोक्नीम” देंत। भजन संग्रह ७२:९; यसैया ६०:१६

24 बोल्यो मुर आन रोइशशो सिखार सुम रोइक्ने चाप्नीमी डा? हिंचा डा पिपम चोक्शो मुर आन कली सुम प्रॉइने चाप्नीमी डा? 25 तन्न परमप्रभु यावेमी “बोल्यो मुर आन ग्याइशशो मुरपुकी यो लाइक्चा पुंइसीनीम। हिंचा डा पिपम चोक्शोपुकी प्रॉइचा पुंइसीनी। गे नु लडाइ पाइबपुकी नु गो लडाइ पाइनुड। इ आल आन कली गो कोवशा प्रॉइनुड। मती १२:२९ 26 इ कली श्येत गेब आन कली आंम आन श्ये ब्वपाइक्नुड। मेकोपुकी अडगुर शांबुम दुक्शो खोदेशो पा आंम आन हुशेम दुक्नीम। मिनु मुर नेल्लेमी ‘गो इ कली श्येत रे प्रॉइब, इ परमप्रभु यावे नड। गो इ कली पाप रे प्रॉइब, याक्ब आ सक्ति पाइशशो परमप्रभु नड’ दे तुइक्नीम” देंत।

50

परमप्रभुम इस्राएली कली हुइशशो

1 मिनु परमप्रभु यावेमी “गोम इन ममा कली प्रॉइशा गेशो छोड पत्र ते बाक्म? गो तेको आं कली जेर गेब कली इन कली लेयन्नी? ममाइ, गे इन पापम पतीके लेयसीशो ननी। इन हेंथे पतीकेमी इन ममा प्रॉइचा पुंइसीशो बाक्ब। यसैया ५४:६; ब्यवस्था २४:१; यसैया ५२:३ 2 गो जाक्डानु, मारदे सुइ मबाक्मा? गो ब्रेडडानु, मारदे सुइमी लोव मलेत्ता? आं गुइ इन कली पाप रे प्रॉइने मचाप्चा डा दुम्शो बाक्मे? इन कली प्रॉइने चाप्तीक सक्ति गो नु मबाक्बा? गो हुइक्तनु, समुन्द्र सोवब। खोलापुकी ब्वाक्कु मबाक्शो गोरशो रागी सेलनुड। ब्वाक्कु मबाक्तीके डांइपुकी बेक्शा, राक्शा, रिना पाइनीम। यसैया ५९:१; गन्ती ११:२३; प्रस्थान १४:२१ 3 गो सरीड कली छिडछिडम गिल्शा, अरन्डी फेक्पाइक्नुड” देंत।

परमप्रभु आ गेय पाइबमी टिशो

यसैया ४२:१-४

4 परमप्रभु, परमप्रभु यावेमी आं कली शेंब सेलती। गो मचाप्शो मुर आन कली लोव पा आन थुं बारपाइक्ब दुम्ती। मेकोम आं कली सुनी कुस कुस पोक्ब। आं कली शेंसीब खोदेशो पा नोफा दाइशशा नेंब सेल्ब। 5 परमप्रभु, परमप्रभु यावेमी आं कली आ लोव नेंपाइक्ती। मिनु गो आ लोव टिशा, नोले मशॉइसीड। भजन संग्रह ४०:७ 6 गो आं ची

तुप्ब आन कली तुप्चा गेतामी। गाल शोक्के ब्विप्ब आन कली चोवचो दाइशशा गेतामी। गो शुक्शी पाइक्चा नु तोक्चा पुंडसीतीक रे आं कुल मखुइक्त्तु। यूहन्ना १९:१; मत्ती २६:६७-६८

7 तन्न परमप्रभु, परमप्रभु यावेमी आं कली वारच पाइक्ती। मोपतीके गो शिशी मताइब मदुम्ड। आं कुल शेराल फुल्लु खोदेशो सेल्ला। गो मुने मदोक्नुड, दे तुइशशो नड। इजीकीएल ३:८-९ 8 “गे रिम्शो पाइब बाक्नेवे” देंब आं नेक्था बाक्ब। गो नु सु लडाइ पाइबा? कालेमी बोक्शा राप्य। दोस गेब, सु बाक्मा? मेको आं डोंइती जाक्मल। रोमी ८:३३ 9 परमप्रभु, परमप्रभु यावेमी आं कली वारच पाइब। आं कली दोस गेब, सु बाक्नीमी? मेको नेल्ले फेक्शो वा खोदेशो पा माइत दुम्नीम। मिनु तुम्बुम मेको कली नेक्नीम।

10 इन दातेमी परमप्रभु यावे कली मान पा हिंब सु बाक्नी? मिनु आं गेय पाइब आं देशो टीब सु बाक्नी? मेको छिडछिडम गाक्शा, छेडछेड काइ मताइब बाक्त हना यो, परमप्रभु यावेम “आं कली श्येत रे प्रोंइब” दे थमा सुइशशा, आ परमप्रभु कली जिम्मा गेंसीशो बाक्ब। 11 गे नेल्ल खिं सुइक्ब बाक्नीनी। कोक्त सुइक्ब बाक्नीनी। इन सुइशशो मीम गाक्कीन। गे आं गुइ रे मार ताइनीनी? गे गोल्ला शुश श्येत जाइनीनी।

51

सियोन आ थुं बारपाइशशो

1 परमप्रभु यावे कली माल्ब नु ठीक पचा दाक्ब आन कली “आं लोव्र नेनीन। तेको सेरथे फुल्लु रे मुचा पुंडसीशो बाक्नी नु तेको खप रे दोशा गुंडचा पुंडसीनी, मेको कली कोव्रडीन। यसैया ४८:१; ब्यवस्था ३३:२८ 2 इन किकी पिपी अब्राहाम नु इन कली थीब सारा आस कली कोव्रडीन। मारदे हना गो मेको कली आ का बाक्मेनु, ब्रेत्ताक्ड। मिनु मेको कली आसीक गेशा, आ चच युइ आन कली सोपाइशशा बोपाइशशा शुश सेल्लाक्मी” देंत। यसैया ४१:८; उत्पत्ती १२:१-२ 3 परमप्रभु यावेमी सियोन आ थुं बारपाइक्ब। आ खतम सेल्लो बाक्तीके नेल्ल नक सेल्लब। आ मुर मबाक्तीके कली एदेन खोदेशो सेल्लब। आ गोरशो रागी कली परमप्रभु यावे आ रू खोदेशो सेल्लब। मेकेर शुश ग्येरीम। “गे रिम्शो पाइब बाक्नीनी” दे कुम्सो पशो नेंसीब। उत्पत्ती २:८

4 मिनु परमप्रभुमी “आं मुरपुकी, आं लोव्र नेनीन। आं रागी डा मुरपुकी इन नोफा दाइक्तीन। मारदे हना गो आं लोव्र शेनुड। आं ठीक निसाफ जात जात डा मुर आन कली तुइक्पाइक्नुड। मेको आन कली छेडछेड दुम्ब। 5 गो आं ठीक पतीके रीब पा चाक्नुड। गो ग्राचा चिक्शो बाक्नुड। मिनु गो जात जात डा मुर आन कली निसाफ पाइनुड। समुन्द्र आ नेक्था बाक्ब मुरपुकीम आं लां कोव्रनीम। आं वारच पतीके रिम्नीम। यसैया ४२:४ 6 मिनु सरीड गे कोव्रडीन। खप गे कोव्रडीन। मारदे हना सरीड कुन खोदेशो पा जाम्ब। रागी वा खोदेशो पा जेक्ब। रागीम बाक्ब मुर नेल्ल भुस्ना खोदेशो पा बेक्नीम। आं पाप रे प्रोंइतीके चहिं गेना हना यो लीशा बाक्ब। आं ग्रातीके गेनायो मनुप्ब। भजन संग्रह १०२:२६-२७; मत्ती २४:३५

7 गे ठीक पतीके तुइक्बपुकी आं लोव्र नेनीन। आं शेंशो थुंमी वोइक्ब मुर आं लोव्र नेनीन। मुर आन शुक्शी पशो नेंशा महिनीन। मेको आन तोक्शा पशो लोव्र नेंशा सुर्ता मपने। यसैया मत्ती ५:११ 8 मारदे हना तुम्बुम वा नेक्शो खोदेशो पा, मेको आन कली नेक्नीम। बुस्सुम ऊन खोइशशो खोदेशो पा खोइक्नीम। आं ग्राचा चहिं गेना हना यो लीशा बाक्ब। आं पाप रे प्रोंइतीके पाला पाला नेल्ल आन कली लीब” देंत।

परमप्रभु यावे आ गेय

9 परमप्रभु यावे सेंसीन, सेंसीन। सक्ति पाइशशो दुमीन। साइ डोंइती आंइ किकी पिपी आन कली पशो खोदेशो पा, पने। साइ गे राहाब माइशशो समुन्द्र डा जन्तु कली मसाइक्नी डा? ठेयब बुस्स कली मतूदीनी डा? भजन संग्रह ८९:११ 10 समुन्द्र सोव्रपाइक्ब, गे मननी डा? गे समुन्द्र कली चेशशा आ पुंम लां मसेल्लनी डा? इन पाप रे प्रोंइशो, इन मुर आन कली शोक्पाइक्चा कली मोदेशो पाइतीनी। प्रस्थान १४:२१-२२ 11 परमप्रभु यावे आ प्रोंइशोपुकी लेत्नीम। मेकोपुकी कुम्सो पना पन सियोनम जाक्नीम। मिनु गेना हना यो ग्येरशा बाक्नीम। शुश ग्येरीतीके, मेको आन श्येत नु हुकयी पतीके जाम्शा लाइब। यसैया ३५:१०

12 परमप्रभुमी “गो इन कली थुं बारपाइक्ब नड। गे मुर तशा, मारदे हिंनीनी? मुरपुकी घांस खोदेशो पा बेक्नीम। भजन संग्रह ५६:५; मत्ती १०:२८; यसैया ४०:१,६ 13 गे इन कली सेल्लब परमप्रभु यावे कली प्रेंताक्नी। मेकोमी सरीड प्राक्त्तु। रागी आ जग वोइक्त्तु। इन कली श्येत गेब मुर गाइक्त्तमेनु, गे नाक्त्त किंत किंत हिंनीनी। मेकोमी इन कली खतम सेल्ला चिक्शो बाक्त्त। तन्न मुल आ गाइशशो ते लाक्गा? यसैया ४४:२४ 14 मिनु चोक्सीशा गु बाप्शो मुर कली

रीब पा प्रॉइनीम। मेकोपुकी मबेक्नीम। गेना हना यो जचा ताइनीम। 15 मारदे हना गो परमप्रभु यावे, इन परमप्रभु नड। गो समुन्द्र डा छाल पोक्नुड। आं नें मुर नेल्ल आन परमप्रभु यावे बाक्ब। येरमीया ३१:३५ 16 गो इ कली आं लोव्र पपाइक्ता। गो इ कली आं गुइ डा वांकुमी सुम्शा वोइक्तन। सरीड प्राक्ब नु रागी आ जग वोइक्ब गो नड। मिनु सियोन कली ‘गे आं मुर बाक्नीनी’ देशो बाक्नुड” देंत।

दिप्चा पुंडसीशो यरूसलेम बोक्को

17 यरूसलेम बोक्को। परमप्रभु यावे इ पर्वम गाइशशा, श्येत तूचा गेप्तु। गे दिड दाड गोल्पाइक्ब कचौरा तूशा श्येतथ सेल्लतीवी। भजन संग्रह ६०:५; भजन संग्रह ७५:९; येरमीया १३:१२-१३; प्रकाश १६:१९ 18 मेको आ थिशो आल आन दातेमी, मुर आन कली शेंब सुइ मबाक्म। आ कोल्शो आल आन दातेमी मेको आन कली लां कोंइब सुइ मबाक्म। 19 इ कली श्येत निक्शी जाक्ताक्स। मेको लां नेल्लेम गोल्शो बाक्नीम। डोंइती डा श्येत इन सहर प्रेशशा, खतम दुम्तीके नु नोले डा श्येत अन्काल नु लडाइम, बेक्तीके बाक्त। सुम इ थुं बारपाइक्बा? 20 इ आलपुकी थाम्तेक्म। मेको लांम गोल्शो बाक्नीम। मेको ब्वारदम रेशशो रोकोश खोदेशो दुम्शो बाक्नीम। परमप्रभु यावे आ गाइक्तीके नु हुइक्तीके मोदेशो दुम्शो बाक्नीम। बिलाप २:११,१९

21 मोपतीके गे गार पाइशशो मुर नेनीन। गे दुक्शो बाक्नीनी, तन्न अडगुर शांबुम ममाइ। 22 परमप्रभु यावे, इ होव्रप दुम्शा परमप्रभुमी “गो आं मुर आन कली वारच पाइब बाक्नुड। गो इ दिड दाड गोल्पाइक्ब कचौरा इ गुइ रे लाइक्ता। मुल रे गे आं गाइक्तीक कचौरा लेंशा तूचा ममाल्नेवे। 23 मिनु इ कली श्येत गेब आ गुइमी मेको कचौरा गेनुड। डोंइती मेकोपुकीमी इ कली लांम बाप्पो। ‘इ तारी गाक्नीक’ देंतेक्म। मिनु गे इ ची गाक्तीक लां खोदेशो सेल्लतीवी” देंत। भजन संग्रह १२९:३

52

परमप्रभुम सियोन कली ब्रेशशो

1 मिनु परमप्रभुमी “बोक्को। सियोन बोक्को। सक्ति पाइशशो दुमो। इ दारशो वा फेक्सो। यरूसलेम, गे परमप्रभु यावे आ सहर बाक्नेवे। मुल रे खोइक्तीक चिनु मखोइशशो नु ग्रांग्रा दिचा डा मुर मेकेर ओव्रने मचाप्नीम। 2 यरूसलेम, इ फुरक थुर थुर पाइसो। बोक्को। गे ग्याइशशा चोक्चा पुंडसीशो सियोन आ तमी, इ शुर डा साडलो पुतो” देंत।

3 परमप्रभु यावेमी “गे मोशान लेयसाक्नी। मिनु मोशान प्रॉइचा पुंडसीनीनी। यसैया ५०:१ 4 साइ डोंइती आं मुर उइ इजीप्त रागीम अर्को रागी डा मुर दुम्थ लाम्तेक्म। मिनु अस्सुर डा मुरपुकीमी यो मेको आन कली मोशान श्येत गेम्तेक्म” दे परमप्रभु, परमप्रभु यावेमी देंत। उत्पत्ती ४६:५-६; २राजा १७:६ 5 मिनु परमप्रभु यावेमी “गो मार पाइनुडा डा? आं मुर आन कली मोशान लाइक्तेक्म। मेको आन कली हुकुम पाइबपुकीमी ठेयब लेशशो लोव्र पा नाक्त रे आं नें आ पर्वम शुक्शी पाइनीम। इजीकीएल ३६:२० 6 मोपतीके आं मुर आन कली आं नें तुइक्पाइक्नुडमी। काबु नाक्ती मेकोपुकीमी ‘गो मेको लोव्र पाइब बाक्नुड’ दे तुइक्चा माल्नीम” देंत।

ग्येरपाइक्ब लोव्र

7 डांडा मेरे ग्येरपाइक्ब लोव्र शेंशा गाक्ब आन खोइली शुश रिम्शो बाक्नीम। मेकोपुकीमी थुं नाइक्चा आ पर्वम लोव्र शेंनीम। मेकोपुकी रिम्शो लोव्र पाइब बाक्नीम। पाप रे प्रॉइतीक शेंनीम। सियोन कली “इ परमप्रभुम सासन पाइब” देंनीम। यसैया ४१:२७; नहुम २:१; रोमी १०:१५ 8 नेनीन, इ कली कोव्रब नेल्लेमी ठेयब सेंदा पा ग्येरशा कुम्सो पाइनीम। मारदे हना मेकोमी परमप्रभु यावे सियोन गे लशा लेशशा पिशो ताइनीम। यसैया ६२:६; इजीकीएल ३:१७ 9 यरूसलेम डा ब्रेशशो खिं ग्येरशा कुम्सो पने। मारदे हना परमप्रभु यावेमी आ मुर आन थुं बारपाइक्तु। मिनु मेकोमी यरूसलेम कली श्येत रे प्रॉइतु। 10 परमप्रभु यावेमी रागी रागी डा मुर आन डोंइती आ सक्ति कोंइताक्व। मिनु रागी आ मुर सम्म डा मुर नेल्लेमी आंइ परमप्रभुमी दोपा पाप रे प्रॉइबा, मेको ताइनीम।

11 गूडीन, गूडीन, मेकेर रे गूडीन। ग्रांग्रा दिशो थोव्रक मथिने। मेको आन दाते रे गूडीन। परमप्रभु यावे आ खिं डा मार मार कुरबपुकी परमप्रभु आ डोंइती जाक्शा, इन कली ठीक सेलीन। 12 मारदे हना गे रीब पा लचा ममाल्नीनी। प्रोक्शा लचा यो ममाल्नीनी। मारदे हना परमप्रभु यावे इन डोंइती गाक्ब। मिनु मेको इस्राएली आन परमप्रभुमी इन कली लां कोंइशा खुल्ब। प्रस्थान १२:११; ब्यवस्था १६:३; प्रस्थान १३:२१

परमप्रभु आ गेय पाइब

यसैया ४२:१-४

13 कोव्रडीन, आं गेय पाइबम ग्राना ग्रान गाकब। मेको मान पा ठेयब सेल्चा पुंडसीशा, थम ठेयब दुम्ब। 14 मिनु शुश मुर मेको कली तशा हितेक्म। मारदे हना मेको काइ मरिम्शो तांडसीशो बाक्त। मुर मोदेशो मरिम्शो मतांडसीनीम। आ रां यो मुर आन रां क्येडा मरिम्शो बाक्त। मिनु मेको कली तशा, मुरपुकी हितेक्म। 15 मिनु मेकोमी रागी रागी डा शुश मुर आन कली छक लाकपाइकब। मिनु पिपपुकी मेको कली तशा, सिक्सी पा बाक्नीम। मारदे हना मेको आन डोंइती गेनायो मशेंसीशो ताइनीम। मेको आन मनेशो लोव्र आ पर्वम शुश मिन्चा माल्नीमी। यसैया ६५:१; रोमी १५:२१

53

परमप्रभु यावे आ गेय पाइब

1 आंइ नेशो लोव्र सुम थमा सुदमे डा? मिनु परमप्रभु यावे आ सक्ति सुम तामे डा? यूहन्ना १२:३८; रोमी १०:१६; यसैया ५२:१० 2 मेको आ डोंइती बिरवा खोदेशो पा कोलत। सोव्रशो खपीम शाक्श खोदेशो पा कोलत। मिनु मुरुम मेको कली कोव्रचा थुं मपाम। मेको दारशो नु मान ताइब खोदेशो काइ मतांडसीशो बाक्त। मेको मदारशो ममाल्चा डा मुर खोदेशो बाक्त। यसैया ११:१ 3 मिनु अरुमी मेको कली ग्रांग्रा दिशा प्रोंइतेक्म। मेको श्येत जाइब नु रोइ पाइकब बाक्त। मेको कली तशा, मुरुम आन कुल खुइक्ताक्म। मेको ग्रांग्रा दित्चा पुंडसेनु, सुइम महिक्गेम। भजन संग्रह २२:७-८; मर्कूस ९:१२

4 थमा पा मेकोमी आंइ श्येत कुरतु, आंइ रोइ पतीक नेल्ल लाइक्तु। मो हना यो गोपुकीमी मेको कली परमप्रभुमी सजाइ गेशा, तुप्शा, दिप्शो खोदेशो लाक्ताक। मत्ती ८:१७ 5 तन्न मेको आंइ हेंथे पतीके आ पर्वम तुप्शा गार सेल्चा पुंडसाक्व। आंइ मरिम्शो पशो आ पर्वम साइक्चा पुंडसाक्व। आंइ कली पाप रे प्रोंइचा कली सजाइ ताप्तु। मेको कली तुप्शो गारमी गोपुकी सातक। रोमी ४:२५; १पत्रुस २:२४ 6 गो नेल्ले भेडा खोदेशो दुम्शा लां साम्तक। गो नेल्ले आंम आंमा लां खोइक्ताक। परमप्रभु यावेमी आंइ मरिम्शो पशो नेल्ले मेको आ तारी वोइक्तु। १पत्रुस २:२५; १यूहन्ना ३:५

7 मिनु मुरपुकीमी मेको कली दिप्शा श्येत गेम्तेक्म। मिनु श्येत जशा यो सिक्सी पा मारेइ मदे। साइक्चा चिक्शो पाठा खोदेशो पा सिक्सी पा बाक्त। मिनु ऊन खोइक्ब आन डोंइती बाक्शो भेडा खोदेशो पा सिक्सी पाप्तु। मेको आन कली लोव्र का यो मपव। मर्कूस १४:६५; यूहन्ना १:२९; प्रेरित ८:३२ 8 मिनु मेको कली दूली निसाफ पा साइक्तेक्म। नोले मेको कली मार दुम्बा, सुम मेको मिन्ने चाप्बा डा? मेको ब्रोंइशो मुर आन बाक्तीक रे साइक्चा पुंडसाक्व। मुर आन हेंथे पतीके मेको सजाइ तशा साइक्चा पुंडसाक्व। 9 मुरपुकीमी मेको कली परमप्रभु यावे आ अरेशो मटीब आन कली थिम्तीकेमी थिम्तेक्म। आ तुरस क्येट थीब नु बाक्त। मेकोमी गेना हना यो ठीक ला पाप्तु। मिनु जोल मपव हना यो मेको कली मो पाम्तेक्म। १पत्रुस २:२२; १यूहन्ना ३:५

10 परमप्रभु यावेमी मेको कली मोदेशो पा तुप्शा, श्येत गेचा दाक्ताक्व। मेकोमी आ रां पाप क्याम्चा कली चढ़ेप्तु। मो हना यो मेको कली आ आल खोदेशो शुश थमा सुइक्ब आन कली ताइब। मिनु शुश नाक्त सम्म ब्रोंइब। मेको आ पतीके नेल्ल परमप्रभु यावे आ दाक्शो गेय दुम्ब। लेवी ५:१५; मत्ती २०:२८; भजन संग्रह २०:३१ 11 मेको आ श्येत जशो रे मेकोमी छेडछेड ताइब। मेको आ तुइक्तीकेमी शुश मुर आन कली ठीक पतीके तुइक्पाइक्ब। मेकोमी आन मरिम्शो पशो कुरब। १कोरिन्थी १:३०; यूहन्ना १:२९ 12 मोपतीके गो मेको कली ठेयब नु सक्ति पाइशो नु वोइक्नुड। मेकोमी बोल्यो मुर नु मार मार योक्सीब। मारदे हना मेको साइक्ब नु मरिम्शो मुरपुकी नु हिक्सीचा पुंडसाक्व। शुश पापी आन पाप कुरतु। मिनु हेंथे गाक्ब मुर आन पर्वम परमप्रभु यावे कली पुंडतु। मर्कूस १५:२८; लूका २२:३७; लूका २३:३३-३४

54

परमप्रभुम सियोन कली दाक्शो

1 मिनु परमप्रभु यावेमी “गे आल मथीब मीश मुर, कुम्सो पावो। आल थितीक रोइ गेनायो मपशो मीश मुर, कुम्सो पा ग्येरसो। मारदे हना ग्युंभे पशो मीश मुर आ आल क्येडा, आ का ला बाक्ब मीश मुर आ आल शुश दुम्नीम। यसैया ४९:२०; गलाती ४:२७ 2 इ ताम्बु ठेयब सेलो। इ बाक्तीक डा ब्रतीक ब्रावो। शिम मदुमो। इ ताम्बु डा डोरी लाइशो

सेलो। आ किलापुकी रिम्शो पा खुक्को। 3 मारदे हना गे शुश दुम्शा, ग्युरा पेरा गे ब्राइनीनी। मिनु इ चच युडमी रागी रागी डा मुर आन कली हुकुम पाइनीम। मिनु मुर मबाक्तीके मुर शुश दुम्शा ब्रीनीम।

4 गे महिनो। मारदे हना गे मुने मदोक्नेवे। इ थुं लुकच लचा मगेवो। गे शिशी ताइनेवे। गे इ ठिटी बाकडे ना डा मुने प्रेनेवे। इ वोंइश बेक्शो ना डा श्येत लेंशा ममिन्नेवे। भजन संग्रह २५:७; येरमीया ५१:५ 5 मारदे हना इ कली सेल्ब इ वोंइश बाक्ब। मेको आ नें मुर नेल्ल आन परमप्रभु यावे बाक्ब। इ कली श्येत रे प्रोंइब इस्राएली आन का ला बाक्शो परमप्रभु बाक्ब। मेको आ नें रागी नेल्ल डा परमप्रभु बाक्ब। 6 मारदे हना परमप्रभु यावेमी इ कली प्रोंइसीशो नु थुं लुकच लशो मीश मुर कली खोदेशो पा ब्रेत्ताक्व। मुल गे ठिटी ना चाक्शा नोले प्रोंइशो मीश आल खोदेशो बाक्नेवे। यसैया ५०:१ 7 गो इ कली याम का प्रोंइतन। तन्न गो इ कली शुश शिशी पा लेंशा खुप्ताक्न। भजन संग्रह ३०:६ 8 गो शुश गाइशा, याम का आं कुल इ डोंइती रे खुइक्ताक्ड। तन्न आं गेना हना यो दाक्तीकेमी इ कली शिशी पाइनन” दे इ कली पाप रे प्रोंइब परमप्रभु यावेमी देंत। यसैया ६०:१०; बिलाप ३:३१-३२

9 मिनु लेंशा “मेको आं कली नोआह आ नाक्ती खोदेशो बाक्ब। दोपा गो नोआह आ पाला डा ब्वाक्कुम लेंशा रागी कली मसुम्ब, दे कसम जडा, मोपा गे नु मगाइक्नुड, दे कसम जाता। मिनु गो इ कली महुइक्नुड। उत्पत्ती ९:११-१७ 10 डांडापुकी याक्सीनीम, पहाडपुकी हिम्सीनीम। तन्न आं गेना हना यो दाक्तीक इ क्येडा डोन मलाइब। इ थुं नाइक्चा गेब कबल मक्याम्सीब” दे इ कली शिशी पाइब परमप्रभु यावेमी देंत। इजीकीएल ३७:२६

11 मिनु लेंशा “गे श्येत जाइब, फश गिवारम राप्चा पुंडसीशा, थुं बारपाइक्चा मपुंडसीशो, गो इ गारो बोल्यो सेल्नुड। मिनु इ जग साफीर माइशो नीलो हीरा के सेल्नुड। प्रकाश २१:१८-२१ 12 इ खिं रूबीन माइशो लल हीराम साप्नुड। इ सहर डा ठेयब लाप्चो सिसा खोदेशो हीराम सेल्नुड। इ कली हिरशो गारो नेल्ले हीरा के सेल्नुड” देंत। 13 मिनु परमप्रभु यावेमी इ तमी तौ नेल्ल आन कली शेंब। मेको आन थुं नाइशा हेम्मा पा बाक्चा ताइनीम। यूहन्ना ६:४५ 14 मिनु ठीक पतीकेमी इ कली बोल्यो सेल्ब। गे श्येत गेब आन क्येडा डोन बाक्नेवे। मिनु गे काइ महिनेवे। मारदे हना हिंचा डा श्येत इ नेक्था मजाक्ब। 15 मिनु “सुइ इ कली श्येत गेचा कली खुम्साक्म हना, आं पशो ममाइ। सुमी इ कली लडाइ तोइबा, मेको इ पर्वम साइक्चा पुंडसीनीम। 16 कोवडीन, गो तुप्तीलपुकी सेलतामी। मेकोपुकीमी मी मुइशा, लडाइ पचा कली या सेल्नीम। गो खतम सेल्चा कली खतम सेल्ब कली यो सेल्ता। गो मारेइ मारेइ खतम सेल्ब आन कली यो सेलतामी। २सामुएल २४:१६ 17 गे नु लडाइ पचा कली सेल्शो यामी मग्रानीम। इ कली सुमी निसाफ पची ना दोस गेबा, मेको नेल्ल फ्रुचा पुंडसीनीम। मोपा ग्रातीके परमप्रभु यावे आं गेय पाइब आन अडस बाक्ब। मेको आं गेशो ठीक पतीके बाक्ब” दे परमप्रभु यावेमी देंत।

55

रागी नेल्ल डा मुर आन कली ब्रेशो

1 मिनु परमप्रभु यावेमी “तूतू दाक्बपुकी ब्वाक्कु बाक्तीकेम जाक्कीन। क्येट मथीबपुकी यो जाक्कीन। मिनु ग्याप्शा जने। क्येट मथाप्थु, मोशा अङ्गुर शांबु नु दूध ग्यापीन। यूहन्ना ७:३७; प्रकाश २२:१७ 2 मारदे जचा मदुम्शो थोव्रक कली क्येट थाप्नीनी? मारदे मरूपाइक्ब थोव्रक कली इन चेम्शो क्येट थाप्नीनी? आं लोव्र नोफा दाइशा नेनीन। रिम्शो थोव्रक जने। मिनु ब्रोव्रशो जशा, ग्येरसीने। 3 इन नोफा दाइशा, आं गे जाक्कीन। नेंशा, ब्रोंइनीनी। गे ब्रोंइशा बाक्चा कली आं लोव्र नेनीन। मिनु गो गेपुकी नु गेना हना यो लीब कबल का पाइनुड। दाऊद कली खोदेशो पा इन कली यो गेना हना यो दाक्नुड। २सामुएल ७:८-१६; येरमीया ३१:३१-३४; प्रेरित १३:३४ 4 नेनीन, गो मेको कली जात जात डा मुर आन कली सांकछी सेल्ता। जात जात डा मुर आन कली ठेयब मुर नु हुकुम पाइब सेल्ता। 5 नेनीन, गे इन मतुइशो रागी रागी डा मुर आन कली ब्रेत्नीनी। मिनु इन कली मतुइशो रागी रागी डा मुरपुकी इन गे जाक्नीम। परमप्रभु यावे, इन परमप्रभु, इस्राएली आन का ला बाक्शो परमप्रभु आ पर्वम मेकोपुकी जाक्नीम। मारदे हना मेकोमी इन कली आ खोदेशो रिम्शो पा सेल्शो बाक्त्” देंत।

6 परमप्रभु यावे कली मथिन्नी सम्म मालीने। मेको आ नेक्था बाक्मेनु, मेको कली पुनीन। येरमीया २९:१३-१४; आमोस ५:४ 7 परमप्रभु यावे आ अरेशो मटीबमी आन लां प्रोन्मेक्ल। मिनु ठीक मपाइबमी आन मरिम्शो मिम्शो प्रोन्मेक्ल। परमप्रभु यावे गे लेम्मल। मिनु मेकोमी मेको आन कली शिशी पाइब। मेकोपुकी आंइ परमप्रभु गे लेम्मल। मारदे हना मेकोमी शुश माफ गेब। इजीकीएल १८:२७; इजीकीएल ३३:१; भजन संग्रह १३०:४ 8 परमप्रभु यावेमी “आं मिम्शो इन मिम्शो खोदेशो ममाइ, इन लां आं लां खोदेशो ममाइ। रोमी ११:३३ 9 सरीड, रागी क्येडा इर बाक्शो

खोदेशो पा आं लां, इन लां क्येडा इर बाक्ब। मिनु आं मिम्शो इन मिम्शो, क्येडा इर बाक्ब। 10 सरीड रे रेउ नु फुं यिशा, मोशीन मलेप्ब। मेकोमी खप जिप्पाइशशा बाली नाली ग्रेल्पाइक्ब। शोक्ब कली वांचेर गेशा, मुर आन कली जचा गोब। 11 आ लोत्र यो मोदेशो बाक्ब। मेको श्येत्य मलेप्ब। गो मेको कली मार पथ सोइक्तु, मेको पाइब। आं दाक्शो थमा पा पाइब। आं मिम्शो पाइब। मत्ती १३:८

12 मिनु गेपुकी ग्येरसीशा लाइनीनी। रिम्शो पा लेत्नीनी। इन डोंइती डांडा नु पहाड कुम्सो पाइनीम। मिनु ब्वाकी डा रवा नेल्लेमी गुइ फ्रोक्नीम। यसैया ४४:२३ 13 मिनु चू आन पा डा सला रवा नु चूले आन पा डा दारशो आइक्च फू रवा वानीम” देंत। मेको परमप्रभु यावे कली मिम्तीके नु गेना हना यो मजाम्थु, चिन्ड का दुम्शा बाक्ब। यसैया ४१:१९-२०

56

नाइक्तीक नाक्ती आसीक ताइनीम

1 मिनु परमप्रभु यावेमी “ठीक निसाफ पने। मार ठीक बाक्मे मेको पने। मारदे हना आं पाप रे प्रोंइतीक रीब पा जाक्ब। मेना गो ग्राब बाक्नुड, दे नेल्लेम तुइक्नीम। 2 सु मेको पाइबा, मेको ग्येरसीशो मुर दुम्ब। आं नाइक्तीक नाक्ती नाइक्ब नु अरु नाक्ती खोदेशो पा गेय मपाइब नु मरिम्शो मपाइब, ग्येरसीशो मुर बाक्ब” देंत। यसैया ५८:१३; उत्पत्ती २:२-३; प्रस्थान १६:२३; प्रस्थान २०:८; येरमीया १७:२१-२२

3 परमप्रभु यावे आ लोत्र टीब अर्को रागी डा मुरुम “परमप्रभु यावेमी आं कली आ मुर रे तिल्ल” देंचा मगेने। मिनु आल मथीबपुकीमी “गो सोव्रशो रवा खोदेशो नकी” देंचा मगेने। यसैया १४:१; ब्यवस्था २३:२ 4 मारदे हना परमप्रभु यावेमी “आल मथीब मुरुमी आं नाइक्तीक नाक्ती नाइशशा, आं दाक्शो पाम्तेक्म नु आं कबल मप्रोंइथु बाक्तेक्म हना, 5 गो मेको आन कली आं खिंमी नु आ गारोमी मिम्तीके नु ठेयब नें गेनुडमी। आं तमी तौ आन क्येडा मेको आन कली रिम्शो नें गेनुडमी। मेको आन कली गेना हना यो लीब नें गेनुडमी। मेको आन नें मख्रोंइसीब दुम्ब।

6 मिनु परमप्रभु यावे आ नोले खोइक्ब, अर्को रागी डा मुरपुकी, सु सुमी आं कली ठेयब सेल्नीमी, आं कली दाक्नीमी, आं गेय पाइब दुम्नीमी, नाइक्तीक नाक्ती नाइशशा, अरु नाक्त खोदेशो गेय मपाइनीमी नु आं कबल पना पन बाक्नीमी। 7 मेको नेल्ल आन कली आं योव्रशो डांडाम चाक्नुडमी। आं प्रार्थना पतीक खिं ओंइशा, ग्येरपाइक्नुडमी। मेको आन चोशा चढेशो नु अरु चढेशो आं कली चढेतीकेम ब्राइनुड। मारदे हना आं खिं रागी डा मुर नेल्ल आन कली प्रार्थना पतीक खिं देंनीम” देंत। मर्कूस ११:१७ 8 मोदेशो लोत्र पाइब परमप्रभु, परमप्रभु यावेमी खेरशो इस्त्राएली आन कली खुप्ब। मिनु “गो मेको आन कली अरु खुप्शो मुर नु देल्पाइक्नुड। मेकोपुकी नु बाक्पाइक्चा कली तेम्नुडमी” देंत।

कोव्रब आन कली हुइशो

9 परमप्रभु यावेमी “गे जन्तु नेल्ल नु ब्वाकीम बाक्ब जन्तु नेल्लेम, जाक्शा ब्वने। येरमीया १२:९ 10 इस्त्राएली आन कली कोव्रब मुर मिक्च मताइब खोदेशो बाक्नीम। मेको मारेइ मजोक्ब मतुइक्ब बाक्नीम। मेकोपुकी सिक्सी पा बाक्शा, होक्ने मचाप्ब कुचुम खोदेशो बाक्नीम। मेको डोमु तचा, इप्चा नु निन्द्वा पचा ला दाक्नीम। इजीकीएल ३:१७; इजीकीएल ३३:६-९ 11 कुचुमपुकी शुश जचा ब्वचा दाक्नीम। गेनायो मरूनीम। मेको गोठला यो मोदेशो मरुप्ब बाक्नीम। मेको नेल्ल आंम आन लां खोइक्ब बाक्नीम। मारेइ मारेइ आंम के सेल्चा दाक्नीम। मेको नेल्ल खाल का डा बाक्नीम। येरमीया ६:१३ 12 मेकोपुकीमी “जाक्कीन, अडगुर शांबु ग्याप्य। राकसी तूशा, दुक्क्य। दीसा यो मुलाक्त डा खोदेशो दुम्ब। मेको क्येडा यो रिम्शो दुम्ब’ देंनीम” देंत।

57

परमप्रभु कली मटीबपुकी

1 ठीक पाइब बेक्नीम। सुइमी मेको आन पर्वम सुर्ता मपाइनीम। परमप्रभु यावे कली मप्रोंइथु, दाक्बपुकी लाइक्चा पुंइसीनीम। मारदे मो पाइनीमी, मेको सुइमी मरुप्नीम। ठीक पाइब हिंचा डा श्येत दुम्चा क्येडा डोंइती लाइक्चा पुंइसीनीम। मीका ७:२ 2 मेकोपुकी थुं नाइशशा बाक्तीकेम लाइनीम। रिम्शो थुं पाइशशो मुर आंम आन बाक्तीकेम नाइशशा बाक्नीम। २राजा २२:२०; दानीएल १२:१३

मूर्ति पूजा पाइबपुकी

3 “तन्न गेपुकी एक जाक्कीन। गे मन्तर तन्तर पाइब आ तमी तौ नु हेंथे गाक्ब वोंइश मुर नु तेल्लेम आ आलपुकी एक जाक्कीन। होसे २:४ 4 गे सुका आ पर्वम शुक्शी लोत्र पनी। सुका आ पर्वम इन शोत्र रोक्नी? मारदे इन लें गुंडनीनी? मार, गे हेंथे पाइब आन तमी तौ मननी डा? गे जोल पा थिशो आल बाक्नीनी। २राजा १६:२-४; येरमीया २:२०, २३, २४ 5 गे ठेयब रवा आन पुंमी तेल्लेम खोदेशो पा, मूर्ति पूजा पाइनीनी। गे गिगी रवा नेल्ल आन पुंमी मोदेशो पाइनीनी। गे इन आल आन कली खोल्सा नु सेरथे फुल्लुमी चढ़ेनीनी। 6 बेंसी डा खोला डा रिम्शो फुल्लु इन कली वारच पाइब बाक्नीम। मेको आन कली तूचा थोत्रक चढ़ेतीनी। मिनु अन्न यो चढ़ेतीनी। मार, गो मेको कोत्रशा इन पर्वम सिक्सी पा बाक्नुडा डा? 7 गे लाइशो नु ठेयब डांडामी इन ब्राख्ये सेलतीनी। गे मेकेर चढ़ेथ लाइतीनी। 8 मिनु इन लाप्यो डा शीम नु लाप्यो आ नोलेमी इन देवी देवता आन चिन्ड वोइक्तीनी। गे आं कली प्रोंइशा, इन ब्राख्ये हुक्तीनी। गे मोदेशो पशा, इन ब्राख्ये ठेयब सेलतीनी। गे इन पर्वम मेको नु कबल पाइतीनी। गे मेकोपुकी नु बाक्चा दाक्ताक्नी। मिनु मेको आन शिन्ना रां कोत्रतीनी। 9 गेपुकी तेल कुरशा मोलेक आ बाक्तीक लाइतीनी। ब्रोत्रशो रिना पाइब तेल शुश सेलतीनी। गेपुकीमी इन लोत्र कुरब आन कली डोन सम्म सोइक्ताक्नी। बेक्शो मुर आन बाक्तीके सम्म सोइक्ताक्नी। 10 गेपुकी इन लाइशो लां गाक्तीके दाइतीनी। मो हना यो मेको शोर गाक्शो दुम्त मदेनी। गेपुकी नक सक्ति ताइतीनी। मोपतीके मेको आन नोले खोइक्चा मप्रोंइनी। येरमीया २:२५

11 गे सु क्येडा शुश हिंशा, जोल पनी? मिनु आं कली मफुकथु ममिम्तीनी। गो सिक्सी पा बाक्शा, आं मिक्च क्रिप्ताक्ड। मिनु गे आं कली तशा महिंनी? भजन संग्रह ५०:२१ 12 गो इन ठीक पशो नु इन गेय तुइक्पाइक्नन्नी। तन्न मेको इन कली मारेइ रिम्शो मदुम्ब। 13 गेपुकी श्येत जशा, थोनीनु, इन खुप्शो मूर्तिपुकीम इन कली प्रोन्मेक्ल। तन्न फशेमी मेको आन कली बेरपाइशशा योल्ब। मुइशोमी मेको जाम्शा लाइनीम। तन्न सु सु आं गे जाक्शा पुंडसीनीमी, रागी मेको आन के दुम्ब। मिनु आं डांडा मेको आन के दुम्ब” देंत। भजन संग्रह ३७:९-११

परमप्रभुम पाप रे प्रोंइब

14 मिनु परमप्रभुमी “सेलीन, सेलीन। रिम्शो लां सेलीने। आं मुर आन गाक्तीक लां डा दाइल पाइब फुल्लु याक्तीन” देंत। यसैया ४०:३; यसैया ६२:१० 15 मिनु ठेयब नु इर डा, गेना हना यो बाक्ब आ नें का ला बाक्शो परमप्रभुमी “गो नेल्ल क्येडा इर डा आं बाक्तीकेमी बाक्नुड। मिनु गो थुं लुक्च लशो नु दिप्चा पुंडसीशो मुर नु बाक्नुड। गो दिप्शो मुर नु आन थुं लुक्च लशो आन थुं बारपाइक्चा कली मेकोपुकी नु बाक्नुड। भजन संग्रह ११३:५-९; यसैया ६६:१-२; भजन संग्रह ५०:१९ 16 मिनु गो गेना हना यो दोस मगेनुड। गाइक्स डा गाइक्स मबाक्नुड। मोपा बाक्ती हना, आंम आं सेल्शो मुर आन थुं थाइब। भजन संग्रह १०३:९ 17 मेको आन परमप्रभु यावे आ अरेशो मटिथु, शिम दुम्तीके गाइक्ताक्ड। गो मेको आन कली तुप्शा थाइशशा गाइक्ताक्ड। तन्न मेकोपुकी नोले शोंइसीशा आंम आन लां लाम्तेक्म। 18 गो मेको आन पशो ताता। तन्न गो मेको आन कली सापाइक्नुडमी। मेको आन कली कुक्शा, आन थुं बारपाइक्नुडमी। मेको आन दाते डा रोंका पाइब आन कली थुं बारपाइक्तीक लोत्र पाइनुड” देंत। प्रस्थान १५:२६ 19 मिनु परमप्रभु यावेमी “डोन नु नेक्था बाक्ब नेल्ल आन थुं नाइशशा बाक्मल। मिनु गो मेको आन कली सापाइक्नुडमी। गन्ती ६:२६; लूका २:१४; एफिसी २:१७; प्रस्थान १५:२६-; येरमीया १७:१४; यहूदा १:१३; यसैया ४८:२२; हितोपदेस २८:१ 20 तन्न आं अरेशो लोत्र मटीबपुकी समुन्द्र डा फशेम क्युकुशो समुन्द्र डा ब्वाक्कु खोदेशो बाक्नीम। गेना हना यो रेयके पाइब ब्वाक्कु खोदेशो बाक्नीम। मेको ब्वाक्कुमी ग्रांग्रा दिचा डा थोत्रक नु हिलो गुंडब” देंत। 21 आं परमप्रभुमी “आं अरेशो मटीब आन थुं नाइशशा बाक्चा मताइनीम” देंत।

58

माइजा बाक्चा आ पर्वम शेंशो

1 मिनु परमप्रभु यावेमी “ठेयब सेंदा पा ग्रीडो। तुराही खोदेशो पा ठेयब सेंदा पावो। आं मुर आन काइ मटिशो नु याक्ब आ खिं डा मुर आन पाप तुइक्पाइक्मी। मीका ३:८ 2 मेकोपुकी मटीब बाक्तेक्म हना यो, आं कली नाक्त किंत किंत मालनीम। आं लां तुइक्चा दाक्नीम। मेकोपुकी ठीक पाइब रागी डा मुर खोदेशो दुम्शा, आन परमप्रभु, आं ठीक पतीक लोत्र मप्रोंइशो खोदेशो बाक्नीम। मिनु आं कली ठीक निसाफ पुंडनीम। परमप्रभु आ नेक्था जाक्चा दाक्नीम। यसैया २९:१३-१४ 3 मेकोपुकीमी ‘गो मारदे माइजा बाक्का? गे मताइनीनी। गो मारदे आंम कली ब्रेम्शो सेल्का? गे मतुइक्तीनी’ देंतेक्म। गे इन माइजा बाक्ची ना इन आंम मिम्शो पाइनीनी। मिनु इन गेय पाइब नेल्ल आन

कली दिप्नीनी। येरमीया १४:१२ 4 गेपुकी जिशा खेशा तुम्मुचा कली ला माइजा बाक्नीनी। इन मुडकीमी तुप्चा कली ला माइजा बाक्नीनी। मोदेशो माइजा बाक्शा, इन सेंदा इर सम्म मजाक्दीप्ब। 5 आं योव्रशो माइजा बाक्तीक मोदेशो बाक्बा डा? मार, आंम कली काबु ला ब्रेमशो सेल्चा? बुदी मीलु घांस गुक्शो खोदेशो पा इन पिया खुक्शा, अरन्डी फेक्शो नु पुलु तार निश्शो कली माइजा बाक्शो देंनीनी? मेको परमप्रभु यावे आ दाक्शो बाक्ब, देंनीनी? जकरिया ७:५-६; मत्ती ६:१६-१८

6 आं दाक्शो माइजा बाक्तीके मार बाक्ब, देशा हना, ठीक निसाफ मतशो आन कली प्रोंइचा नु दिप्शा श्येत गेचा पुंडसीशो आन जुवा पुइक्चा बाक्ब। 7 आंम जचा थोव्रलु शोव्रलु बेक्ब नु योक्चा, खिं मबाक्शो नु पुडग आन कली इन खिंम बाक्चा गेचा, शिश्रा बाक्ब आन कली वा फेक्चा गेचा नु इन लोकब आन कली वारच पचा, आं दाक्शो माइजा बाक्तीक बाक्ब। ब्यवस्था १५:११; इजीकीएल १८:७; मत्ती २५:३५-३६ 8 मो पाइतीनी हना, गे सुनी डा नां दाप्शो खोदेशो दुम्नीनी। मिनु गे रीब पा सानीनी। इन कली वारच पाइब इन डोंइती गाक्ब। परमप्रभु यावे आ छेडछेडमी इन नोले खोइक्ब। भजन संग्रह ३७:६; यसैया ५२:१२

9 मेना गे पुंडनीनी। मिनु परमप्रभु यावेमी लोव्र लेप्ब। मिनु गे 'वारच पने' दे थोइनीनी। मिनु मेकोमी 'गो एके बाक्ती' देंब। गे इन दाते रे मरिम्शो पतीक जुवा ताइक्ताक्नी हना, ब्रेप्चो पोक्शा, मरिम्शो लोव्र पचा प्रोंइतीनी हना, रिम्शो दुम्ब। यसैया ३०:१९ 10 गे शोव्रलु बेक्ब आन कली इन जचा थोव्रक गेतीनी हना, श्येत जाइब आन माल्शो गेतीनी हना, इन छेडछेड छिडछिडम ब्राइब। इन नाक्दो डा छिडछिड नाक्ती डा छेडछेड खोदेशो दुम्ब। 11 मिनु परमप्रभु यावेमी इन कली गेना हना यो लां कोइब। गे श्येत जनी ना इन माल्शो नेल्ल गेब। मिनु इन रुश बोल्यो सेल्ब। गे ब्वाक्कु लाव्वेशो फल फुल रू खोदेशो बाक्नीनी। गे गेनायो मसोव्रब ब्वाक्कु बुक्तीके खोदेशो दुम्नीनी। येरमीया ३१:१२ 12 मिनु गे इन साइ डा ब्रेमशो खिंपुकी लेंशा सेल्नीनी। साइ डोंइती डा सेल्शो जग लेंशा वोइक्नीनी। मिनु इन कली गारो सेल्ब, खिं सेल्ब नु लां लेंशा सेल्ब, दे नें वोइक्नीम। यसैया ६१:४

13 गे नाइक्तीक नाक्ती अर्को नाक्त खोदेशो मसेल्तीनी हना, मेको आं नाक्तीमी इन गेय मपाइतीनी हना नु आं योव्रशो नाक्त कली रिम्शो नाक्त बाक्ब देंतीनी हना, परमप्रभु यावे आ नाक्त ठेयब बाक्ब देंतीनी हना, गे मेको नाक्ती कली ठेयब सेल्शा, इन गेय मपाइतीनी हना, इन दला दाक्स मपाइतीनी हना, यसैया ५६:२-४ 14 गेपुकी परमप्रभु यावे कली मिम्शा ग्येरसीनी वा। मिनु गो इन माल्शो नेल्ल गेन्नी वा। मिनु गो इन किकी याक्ब आ शोंप जचा गेनन्नी वा" दे परमप्रभु यावे आ देशो बाक्ब।

59

परमप्रभुम पाप क्याम्ब

1 कोव्रडीन, परमप्रभु यावे आ मुर आन कली पाप रे प्रोंइतीक सक्ति मपाइशो मदुम्शो बाक्ब। आ नोफा मथांइशो बाक्ब। यसैया ५०:२ 2 इन मरिम्शो पतीकेमी इन कली इन परमप्रभु रे फ्राशो बाक्ब। इन पाप आ पर्वम इन डोंइती रे आ कुल खुइशो बाक्ब। मोपतीके इन लोव्र मनेंब। 3 इन गुइ हुश लुम्सीशो बाक्नीम। गे नेल्ल मरिम्शो पाइब बाक्नीनी। गे जोल पना पन बाक्तीनी। गे ओल ओल लोव्र पाइनीनी। यसैया १:१५ 4 सुइमी ठीक निसाफ मपाइनीम। सुइमी ठीक निसाफ पाइक्चा मपुंडसीनी। गे जाम्शा लाइब कली थमा सुइशो, जोल पाइनीनी। मेकोपुकीम हेंथे पतीकेम ब्रीशा, मरिम्शो पतीके ला थीनीम। भजन संग्रह ७:१५ 5 बीस पाइशो बुस्स आ ब्वोफु रे चाइक्ब पुक्नीम। मारखा आ जाल प्रोव्रनीम। मेको ब्वोफु जाइब बेक्नीम। ब्वोफु दिम्शा पुक्तेक्म हना, बुस्स गूब। 6 मेको जाल फेक्सीचा नु सुम्सीचा मदुम्ब। मेको आन सेल्शो थोव्रकमी आन रां सुम्ने मचाप्नीम। मेको आन गेय मरिम्शो पतीक गेय बाक्ब। मेको हुश खाक्श पोक्ब बाक्नीम। 7 मेकोपुकी मरिम्शो पचा कली ला दोरनीम। दोस मताइब आन कली साइक्चा कली चुइक्नीम। मेको आन मिम्शो मरिम्शो बाक्ब। आन लांमी बिग्रेतीक नु खतम पोक्तीक बाक्ब। रोमी ३:१५-१७; हितोपदेस १:१६; येरमीया २:३४ 8 मेकोपुकीम थुं नाइक्पाइक्तीक आ पर्वम मारेइ मतुइक्नीम। मेको आन लांम ठीक निसाफ मबाक्ब। मेकोपुकी हेंथे लां खोइक्नीम। सु सु मेको हेंथे लां गाक्नीमी, मेको यो थुं नाइशो बाक्चा मताइनीम।

9 मोपतीके ठीक निसाफ पतीके आंइ क्येडा डोन बाक्ब। गो ठीक पतीके मताइनीकी। गोपुकी छेडछेड डा लां कली कोव्रनीकी, तन्न छिडछिड ला बाक्ब। गो नाक्त डा हाम्सो माल्नीकी, तन्न छिडछिड ला बाक्ब। 10 मिक्च मताइब खोदेशो पा गारो सुल्शा गाक्नीकी। मिक्च मपाइशो मुर खोदेशो पा सुल्नीकी। नाक्दो खोदेशो पा नाक्ती यो दाइल पांइसीनीकी। गो बोल्यो मुर आन दातेम बेक्शो मुर खोदेशो दुम्तक। ब्यवस्था २८:२९ 11 गो नेल्ल वां खोदेशो

पा ग्रीनीकी। ढुकुर खोदेशो पा रोंका पाइनीकी। गो ठीक निसाफ मालना मालन बाक्नीकी, तन्न मथित्नीकी। पाप रे ब्रोंइतीक माल्नीकी, तन्न मेको आंइ क्येडा डोन बाक्ब। 12 इन डोंइती आंइ हेंथे पशो शुश बाक्ब। आंइ पशो पापमी इन कली तुइक्पाइक्ब। गो मरिम्शो पाइब बाक्नीकी, दे तुइक्नीकी। आंइ हेंथे पशो थमा पा गोपुकी नु बाक्ब। गोपुकी आंइ मरिम्शो पशो तुइक्नीकी। येरमीया १४:७ 13 गोपुकी हेंथे गाक्शा, परमप्रभु यावे रे नोले शोंइसाक्क। आंइ परमप्रभु आ नोले खोइक्चा प्रोंइतक। आंइ लोत्र मुर आन कली दिप्चा नु परमप्रभु यावे कली मटिचा डा बाक्ब। गोपुकी जोल कली थमा सुइश्शा, ब्रपाइश्शो बाक्तक। 14 मिनु ठीक निसाफ मबाक्ब। ठीक पतीके डोन बाक्ब। सुइ सुइमी जोल पाइनीम। मिनु रिम्शो थुं पाइश्शो मुर बाक्ने मचाप्नीम। 15 थमा पतीक तेइ मथिंसीब। रिम्शो पाइब आन मारेइ मारेइ रोइक्चा पुंइसीनीम। मिनु परमप्रभु यावेमी मेको ताप्तु। मिनु ठीक निसाफ मबा, दे थम गाइश्शो बाक्त।

16 मिनु वारच पाइब सुइ मबाक्शो तशा, छक लाक्त। मोपतीके मेकोमी आंम आ सक्तिम ग्रात। आ ठीक पतीकेम आ कली वारच पाइक्तु। इजीकीएल १३:४-५ 17 मेकोमी ठीक पतीके कांसा के फेक्तीके खोदेशो पा फेक्शा, पाप रे प्रोंइतीक ताकी खोदेशो पा गुक्साक्व। क्येक्क लेत्तीक वा खोदेशो पा फेक्साक्व। आ थुंमी थमा पा पाइनुड, दे वा खोदेशो पा रुक्साक्व। 18 परमप्रभुमी मेको आन पशो खोदेशो पा मेको आन कली क्येक्क लेप्ब। आ जोरी आन कली आ गाइश्शो कोंइब। आ सत्रु आन कली क्येक्क लेप्ब। समुन्द्र आ नेक्था बाक्ब आन कली क्येक्क लेप्ब। 19 मिनु नां पेरतीकेमी बाक्ब मुरपुकीमी परमप्रभु यावे कली मान पा हिंनीम। नां दाप्तीक डा मुरपुकी परमप्रभु यावे आ छेडछेड तशा, मान पा हिंनीम। मारदे हना मेको परमप्रभु यावे बारशो खोला खोदेशो पा जाक्ब। मिनु आ फशेमी मेको आन कली मुइश्शा खेरब।

20 मिनु सियोनम का जाक्ब। मिनु मेकेर डा मुर आन कली पाप रे प्रोंइब। मेकोमी हेंथे पतीके रे लेप्ब याक्ब आ खिं डा मुर आन कली रोमी ११:२६ 21 “गो नु पशो कबल मार बाक्त देशा हना, आं सोक्त इन तार बाक्ब। गो आं लोत्र इन शोत्रम कुर पाता। मेकेर गेना हना यो बाक्शा इन आलपुकीम मेको लोत्र पना पन बाक्नीमी। मेको लोत्र गेना हना यो इन चच युइम यो पना पन बाक्नीम” दे परमप्रभु यावेमी देंत। येरमीया १:९

60

सियोन आ छेडछेड जाक्शो

1 परमप्रभुम “बोक्को। मिनु ग्येरसो। मारदे हना इ छेडछेड जाक्शो बाक्ब। परमप्रभु यावे आ छेडछेड इ तार जाक्शो बाक्ब। 2 छेडछेडम रागी कली सुम्तु। क्येर नाक्दोमी जात जात डा मुर आन कली सुम्तु। तन्न परमप्रभु यावे इ तारी गूब। आ छेडछेड इ तारी तांइसीब। 3 रागी रागी डा मुरपुकी इ छेडछेडम जाक्नीम। पिपपुकी इ सुनी डा छेडछेडम जाक्नीम। यसैया २:२-३; प्रकाश २१:२४

4 इ मिक्च हिरशा, कोत्रडो। इ मुर नेल्ल गुम्शा, इ बाक्तीके जाक्नीम। इ तौपुकी डोन रागी रे जाक्नीम। इ तमी आन कली मुप्शा कुरशा चाक्नीम। यसैया ४९:१८; यसैया ४९:२२; यसैया ६६:१२ 5 गे मेको तशा थाम्पा ग्येरनेवे। इ थुं ग्येरसीशा प्रेक्ब। मारदे हना समुन्द्रम चाक्शो मारेइ मारेइ इ के दुम्ब। रागी रागी डा शोंप नेल्ल इ के दुम्नीम। 6 गे शुश दलओठ ताइनेवे। मिदयान नु एफाह डा दलओठ आन चाइक्बपुकीमी इ रागी ब्रीनीम। मिनु शेबा रे यो चाक्नीम। मेकोपुकीमी सुन नु धूप चाक्शा ‘परमप्रभु यावे ठेयब बाक्ब’ दे ग्येरशा आं पबर्म शेंनीम। भजन संग्रह ७२:१०; मत्ती २:१-११ 7 केदार डा क्यारश भेडा नेल्ल इ बाक्तीकेमी देल्नीम। नेबायोथ डा सांडपुकीमी इ गेय पाइनीम। मेकोपुकी आं कली चढ़ेतीकेम गारचा डा बाक्नीम। मिनु गो आं दारशो खिं ग्योम्नुड।

8 गोस्स खोदेशो पा बेरब नु ढुकुर आ बाक्तीकेम बेरशा लशो खोदेशो पा बेरबपुकी सु बाक्मा? 9 समुन्द्र आ नेक्था डा मुरपुकीम आं लां कोत्रनीम। डोंइती टारसीस डा जहाजम इ आल आन कली डोन रागी रे चाक्नीम। मेको आन सुन चांदी यो मेकोपुकी नु बाक्ब। मेको परमप्रभु यावे, इ परमप्रभु आ नेमी जाक्नीम। इस्राएली आन का ला बाक्शो परमप्रभु आ पबर्म चाक्ब। मारदे हना मेकोमी इन कली दारशो सेल्शो बाक्ब। यसैया ४२:४; यसैया ५५:५ 10 मिनु अर्को रागी डा मुरपुकीम इ गारो प्रोत्रशा हिरनीम। मेको आन पिपपुकीमी इ गेय पाइनीम। डोंइती गाइश्शा, इ कली तुप्तन। तन्न मुल आं दाक्तीकेमी शिशी पाइक्तन। यसैया ५४:८ 11 इ सहर डा गारो डा लाप्चो रोक्स डा रोक्स बाक्नीम। नाक्दो नाक्ती इ लाप्चो मचोक्शो बाक्नीम। मोपा रागी रागी डा मुरपुकीमी आन शोंप चाक्नीम। मेको आन पिप आन डोंइती गाक्नीम। प्रकाश २:२५-२६ 12 मिनु तेक तेको रागी नु तेक तेको राज्य डा मुरपुकीमी इ गेय मपाइनीमी, मेकोपुकी खतम दुम्नीम। थमा पा क्याम्चा पुंइसीनीम। 13 लेबानोन डा दारस इ बाक्तीके चाक्नीम। मेकेर

डा लाइशो रवा आन शी आं बाक्तीके दारपाइक्चा कली चाक्नीम। मोपा गो आं बाक्तीके दारपाइक्नुड। 14 इ कली दिण्ब आन चच युइ इ बाक्तीकेम जाक्शा बाप्नीम। इ कली ग्रांरा दीब नेल्ल इ खोइलीम बाप्नीम। मिनु मेकोपुकीमी इ कली 'परमप्रभु यावे आ सहर नु इस्राएली आन का ला बाक्शो परमप्रभु आ सियोन' देंनीम। यसैया १४:२ 15 डोंइती गे प्रोंइचा पुंइसीशो नु काइ मदाक्चा पुंइसीशो बाक्ते। इ रागी रे पा सुइ मगाक्बाक्तेक्म। मुल गो इ कली गेना हना यो मान तपाइशशा, पाला पाला सम्म ग्येरसीतीके सेल्लन। यसैया ४९:१४ 16 गे रागी रागी डा दूध तूनेवे। मिनु गे पिप आन दूध तूनेवे। मिनु गो इ कली श्येत रे प्रोंइब बाक्नुड। याकूब आ सक्ति पाइशशो परमप्रभु इ कली पाप रे प्रोंइब बाक्नुड, दे तुइक्नेवे। यसैया ४९:२०

17 मिनु गो कांसा आ पा डा सुन चाक्नुड। फलाम आ पा डा चांदी चाक्नुड। शी आ पा डा कांसा नु फुल्लु आ पा डा फलाम चाक्नुड। मिनु गो थुं नाइक्तीके इ कली कोव्रब सेल्लुड। ठीक पतीके इ ठेयब मुर सेल्लुड। 18 मो दुम नोले इ रागीमी हुश खाक्श पोक्शो आ पर्बम मनेंसीब। इ सांदम खतम दुमशो लोव्र मनेंसीब। तन्न गे इ गारो कली पाप रे प्रोंइतीके नें वोइक्नेवे। गारो डा ठेयब लाप्चो आन कली ठेयब सेल्लीक नें वोइक्नेवे।

परमप्रभु सियोन डा छेडछेड बाक्ब

19 मेना इ कली नाक्त डा नां छेडछेड मदुम्ब। नाक्टो तास्ला हाम्सो मदुम्ब। मारदे हना इ परमप्रभु इ कली गेना हना यो छेडछेड बाक्ब। मिनु इ परमप्रभु इ दारस बाक्ब। यसैया २४:२३; प्रकाश २१:२३; प्रकाश २२:५ 20 मिनु मेना रे इ नां गेनायो मलाक्ब। मिनु इ तास्ला यो मलाक्ब। मारदे हना परमप्रभु यावे गेना हना यो इ छेडछेड बाक्ब। इ रोंका पतीक नाक्ती नुप्त। यूहन्ना ८:१२; याकूब १:१७ 21 इ रागी डा मुर नेल्ल ठीक पाइब दुम्नीम। मेको आन बाक्तीके रागी गेना हना यो आन के दुम्ब। मेकोपुकी आं खुमशो बाक्नीम। मेकोपुकी आं सेल्लो मुर दुमशा, आं कली ठेयब सेल्लनीम। 22 मेको नेल्ल क्येडा महिक्सीशो थर का दुम्नीम। मिनु नेल्ल क्येडा आइक्च मुरपुकी ठेयब रागी ब्रीशा, सक्ति पाइशशो दुम्नीम। मेना गो, परमप्रभु यावेमी मेको रीब पा पाइनुड” देंत।

61

सियोन कली श्येत रे प्रोंइतीके

1 “परमप्रभु, परमप्रभु यावे आ सोक्त आं तार बाक्ब। मारदे हना परमप्रभु यावेमी तेल लुक्ताक्यी। मेकोमी आं कली दिण्शो पुडग मुर आन कली ग्येरपाइक्ब लोव्र नेंपाइक्चा कली, थुं जिक्शो आन कली आन थुं बारपाइक्चा कली, चोक्चा पुंइसीशो मुर आन कली प्रोंइचा कली नु जेल्खान बाक्ब आन कली गुंइचा कली सोइक्ताक्यी। यसैया १:२; मत्ती ११:५; लूका ४:१८-१९ 2 मिनु आं कली परमप्रभु यावे आ शिशी पाइब बर्स नु आंइ परमप्रभु आ क्येक्क लेत्तीक नाक्त नु रोंका पाइब आन थुं बारपाइक्तीक नाक्त बाक्ब, दे तुइक्पाइक्चा कली यो सोइक्ताक्यी। लेवी २५:१०,१३; यसैया ६३:४ 3 मेकोमी आं कली सियोनम रोंका पाइब आन कली पुलु आ पा डा दारशो पियाम ग्योम्तीके ग्योम्पाइक्चा कली, हिशेक आ पा डा ब्रोव्रशो रिना पाइब तेल खेक्चा कली नु आइक्च थुं दुम्तीके आ पा डा ठेयब सेल्लीक थुं फेक्तीक खोदेंशो पा फेक्पाइक्चा कली सोइक्ताक्यी। मेको मुर आन कली 'ठीक पतीके रवा' दे नें वोइक्तेक्म। मेको परमप्रभु यावे आ खुमशो आ दारस कोंइतीके बाक्नीम। 4 मिनु मेकोपुकीमी साइ डोंइती खतम दुमशो ब्रेशो माइत खिंपुकी लेंशा सेल्लनीम। मेकोमी ब्रेशो सहर लेंशा सेल्लनीम। मिनु शुश पाला रे मुर मबाक्थु, श्येतथ दुमशो सहर लेंशा सेल्लनीम। यसैया ५८:१२

5 मिनु अर्को रागी डा मुर जाक्शा, इन क्यारश भेडा योव्रनीम। मेकोपुकीमी इन रू दोइनीम। इन अडगुर बोट मुंइनीम। यसैया ६०:१० 6 तन्न इन कली 'परमप्रभु यावे कली चढेब नम' देंनीम। मिनु 'आंइ परमप्रभु आ गेय पाइब नम' दे यो देंनीम। गेपुकीमी रागी रागी डा मुर आन शोंप ताइनीनी। मिनु मेको आन शोंपोम ग्येरनीनी। प्रस्थान १९:६; १पत्रुस २:५,९ 7 मारदे हना गे अरु क्येडा निक्शी खेयप मुने दोक्तीनी। मिनु इन कली ग्रांरा दित्ताक्म। मोपतीके गे इन रागीमी निक्शी खेयप रू ताइनीनी। मिनु गेना हना यो ग्येरसीतीके गे नु बाक्ब।

8 गो, परमप्रभु यावेमी, ठीक पतीके दाक्नुड। रोइक्तीक नु हेंथे पतीक गेय काइ मदाक्नुड। गो मेको आन कली थमा पा आन पशो खोदेंशो पा गेनुडमी। गो मेकोपुकी नु गेना हना यो लीब कबल पाइनुड। यसैया ५४:१०; यसैया ५५:३ 9 मिनु रागी रागी डा मुरुम मेको आन चच युइ आन कली तुइक्नीम। मिनु जात जात डा मुरुम मेको आन आल आन कली तुइक्नीम। मेको आन कली ताइब नेल्लेमी 'मेरे परमप्रभु यावे रे पा आसीक तशो मुर बाक्नीम' देंनीम।

10 गो परमप्रभु यावे कली मिम्शा, ग्येरसीनुड। आं थुं नेल्लेमी आं परमप्रभु कली मान पाइनुड। मारदे हना मेकोमी आं कली पाप रे प्रोंइतीके वा खोदेशो पा फेक्पाइश्शा, ठीक पतीकेमी सुम्ती। दोदेशो पा ग्युम्लेम माहुर चुइक्सीबा नु ग्युम्लीम ग्योम्सीबा, मोदेशो पा परमप्रभु यावेमी आं कली ग्योम्ताकयी। मत्ती २२:११-१२ 11 दोपा रूमी बाली नाली वापाइक्बा नु मेकेर वांचेर वापाइक्बा, मोपा परमप्रभु, परमप्रभु यावेमी ठीक पतीके नु ठेयब सेल्लतीके रागी रागी डा मुर आन डोंइती दुम्पाइक्ब” देंत।

62

सियोन आ नोले डा दारस

1 परमप्रभु यावेमी “गो सियोन आ पर्वम सिक्सी पा मबाक्नुड। यरूसलेम आ पर्वम गो मनांइसीनुड। मेको आ ठीक पतीके सुनी डा छेडछेड खोदेशो पा मग्रूम सम्म नु आ पाप रे प्रोंइचा पुंइसीतीके ब्रशो तोव्रशी खोदेशो मदुम सम्म मनांइसीनुड। 2 मिनु रागी रागी डा मुरुमी इ ठीक पशो ताइनीम। मिनु पिप नेल्लेमी इ छेडछेड ताइनीमी। मिनु इ कली नक नें थिशा ब्रेत्नीमी। मेको नें परमप्रभु यावेमी वोइश्शो बाक्ब। यसैया ६५:१५; प्रकाश २:१७ 3 गे परमप्रभु यावे आ गुडमी दारशो सिरपेच का दुम्नेवे। मिनु इ परमप्रभु आ गुडमी गे पिपीम आन सुन फू खोदेशो दुम्नेवे। २तिमोथी ४:८ 4 मिनु गे मेना रे ‘ताइक्चा पुंइसीशो’ माइक्चा मपुंइसीनेवे। इ रागी मुर मबाक्तीके रागी माइक्चा मपुंइसीब। ‘गो इ कली तशा ग्येरसाकयी’ दे नें वोइक्चा पुंइसीनेवे। इ रागी ग्युंवे पशो खोदेशो दुम्ब। मारदे हना परमप्रभु यावे इ कली तशा ग्येरसीब। इ रागी ग्युंवे पशो खोदेशो दुम्ब। यसैया ५४:६; यसैया ६०:१५; होसे २:२१ 5 दोपा टिटा वोंइश मुरुम मीश आल कली ग्युंवे पाइबा, मोपा इ कली सेल्बमी इ कली ग्युंवे पाइब। मिनु दोपा ग्युम्ले आ ग्युम्ली कली तशा ग्येरसीबा, मोपा परमप्रभु इ कली तशा ग्येरसीब। 6 यरूसलेम, गो इ गारो तार खाल पाइब मुर वोइक्ता। मेकोपुकी नाक्दो नाक्ती सिक्सी पा मबाक्नीम। परमप्रभु यावे कली मिम्पाइक्बपुकी, मनांइसीन” देंत। यसैया ५२:८ 7 परमप्रभु यावेम यरूसलेम कली बोल्यो नु ठेयब मसेला सम्म मेको कली यो नाइक्चा मगेन। मिनु रागी नेल्ल डा मुर आन डोंइती तुइक्पाइक्चा कली मेको पने। 8 परमप्रभु यावेमी आ ग्युरा गुइ क्युक्शा, कसम जाप्तु। मार कसम जाप्तु देशा हना “मुल रे गो इ अन्न इ जोरी सत्रु आन कली जचा मगेनुड। मिनु अर्को रागी डा मुर आन कली इ अडगुर शांबु तूचा मगेनुड। मारदे हना गे मेको आ पर्वम शुश श्येत पाप्तीवी। यसैया ६५:२१-२२ 9 सु सुमी अन्न ओंइनीमी, मेकोपुकीमी जचा ताइनीम। मिनु आं कली ठेयब सेल्नीम। मिनु सु सुमी खुप्नीमी, मेकोपुकीमी आं खिं डा लाडगाम तूनीम” दे कसम जाप्तु।

10 ओव्रडीन, ठेयब लाप्चो रे ओव्रडीन। मिनु मुर आन गाक्तीके लां थेल्ला, सेलीन। ठेयब लां रे फुल्लु याक्तीन। जात जात डा मुर आन कली चिन्ड वोतीन। यसैया ५७:१४ 11 परमप्रभु यावेमी रागी आ सुर सम्म डा मुर नेल्ल आन कली “सियोन आ तमी कली ‘इ कली पाप रे प्रोंइब जाक्ना जाक्न बाक्ब। इ कली गेतीक इनाम मेको नु बाक्ब। मेको इ ततीक इनाम आ डोंइती गाक्ब’ देशो बाक्ब। जकरिया ९:९; यसैया ४०:९-१० 12 मिनु मेको आन कली ‘परमप्रभु यावे आ मुर नम। परमप्रभु यावे आ पाप रे प्रोंइशो मुर नम’ दे ब्रेत्नीम। मिनु इ कली ‘माल्ला, थिश्शो नु गेनायो मप्रोंइसीब सहर’ माइक्चा पुंइसीनेवे” दे कसम जशा, लोव्र पशो बाक्ब। यसैया ३५:१०

63

परमप्रभुमी एदोम कली सजाइ गेशो

1 एदोम रे सु जाक्ना जाक्न बाक्बा? लल जिशो वा फेक्शा, बोज्रा रे जाक्ब सु बाक्मे? मेको दारशो वा फेक्शा, ठेयब सक्तिमी गाक्ब सु बाक्म। “गो ठीक पतीके लोव्र पाइनुड। गो पाप रे प्रोंइतीक सक्ति पाइश्शो नड” देंत। यसैया ३४:६

2 मिनु गो “इन फेक्शो वा मारदे लल जिशो बाक्मे? मारदे इन वा अडगुर खाक्ब आन के खोदेशो दुम्मे?” देंती। प्रकाश १९:१३ 3 मिनु मेकोमी “गो आं कान अडगुर खाक्ता। गो नु जात जात डा मुर सुइ मबाक्म। मिनु गो गाइश्शा, मेको आन कली खाक्ता। चुरशा मेको आन कली दिम्ताकडमी। मेको आन रस आं वाम ब्रुंइसाक्ब। मिनु आं वा नेल्ल लल दुम्त। योएल ४:१३; प्रकाश १४:२० 4 मारदे हना आं थुंम क्येक्क लेत्तीक नाक्त बाक्त। मिनु आं मुर आन कली प्रोंइतीके बर्स जाक्शो बाक्ब। यसैया १३:९; यसैया ३४:८; यसैया ६१:२ 5 मिनु एर ओंथ कोव्रडुनु, वारच पाइब सुइ मबाक्म। मिनु गो नु गेय पाइब सुइ मबाक्म। मोपतीके गो आं सक्तिमी ग्राती। आं गाइक्तीकेमी आं कली वारच

पाइक्ती। 6 मिनु गो गाइशशा जात जात डा मुर आन कली दिम्ताकडमी। गो चुरशा मेको आन कली खतम सेलतामी। गो मेको आन हुश खपीम जारताकड” देंत। यसैया ५१:१७

परमप्रभु आ शिशी पशो मिम्शो

7 गो परमप्रभु यावे आ मुर आन कली शिशी पतीक गेय मिम्नुड। मारदे हना मेको आ पर्वम परमप्रभु यावे कली ठेयब सेल्चा माल्नीकी। मिनु आंइ कली मार मार पशो आ पर्वम, इस्राएल आ खिं डा मुर आन कली शुश दाक्ताक्व। मिनु मेको आन कली शिशी कोइशा, गेना हना यो दाक्शो बाक्त। मोपतीके मेको कली ठेयब सेल्चा माल्नीकी। 8 मेकोमी “मेकोपुकी थमा पा आं मुर बाक्नीम जोल मपाइब आल बाक्नीम” देंत। मोपतीके परमप्रभु यावे मेको आन कली श्येत रे प्रॉइब दुम्त। ब्यवस्था ३२:५, २० 9 मेको आन श्येत तशा, आं सोइशशो मुर ममाइ, परमप्रभु यावे आ स्वर्ग डा गेय पाइब यो ममाइ, परमप्रभुमी मेको आन कली प्रॉइतु। आ दाक्तीके नु शिशी पतीकेमी मेको आन कली साइ डोंइती रे पाप रे प्रॉइशा, मेको आन कली मुप्शा, कुरशो बाक्त। प्रस्थान ३३:१४-१५ 10 तन्न मेकोपुकीमी काइ मटिथु, आ सोक्त कली थुं खाइक्पाइक्तेक्म। मोपतीके परमप्रभु यावे मेको आन जोरी सत्रु दुम्शा, आंमा मेकोपुकी नु लडाइ पाप्तु। 11 मिनु नोले मेकोपुकीमी साइ डोंइती डा नाक्ती मिम्ताक्म। मेको आ गेय पाइब मोसा आ पाला ना डा नाक्ती मिम्ताक्म। मिनु मेकोपुकीमी “समुन्द्र रे पा गोठला नु आ बगाल ग्रुंइब ते बाक्म? मेको आन कली परमप्रभु यावे आ सोक्त वोइक्ब, ते बाक्मे? प्रस्थान २:५; गन्ती ११:१७ 12 सुमी आ सक्ति पाइशशो गुइ मोसा आ ग्युरा गे गाक्चा कली वोदा? सुमी आंम कली गेना हना यो आ नें लीपाइक्चा कली समुन्द्रम लां सेला? प्रस्थान १४:२९ 13 सुम मेको आन कली समुन्द्र आगा डा लां रे पा खुला? मेकोमी गोरशो रागीम शारा आन कली गाक्पाइशशो खोदेशो पा दाइल मपपाइक्थु, गाक्पाइक्तु। 14 बी ब्यफ बेंसी ब्रुप्शो खोदेशो पा परमप्रभु यावे आ सोक्तीम मेको आन कली नाइक्पाइक्तु। इन नें ठेयब सेल्चा कली इन मुर आन कली मोदेशो पा खुलतीनी।

15 सरीड डा इन छेडछेड डा बाक्तीके रे उइ कोव्रडीन। इन वारच पचा दाक्तीके नु इन सक्ति ते बाक्मे? इन थुं डा आंइ कली दाक्तीके नु इन शिशी पतीके ते बाक्म? गो मेको मतक। ब्यवस्था २६:१५ 16 गे आंइ आफ बाक्नीनी। मिनु अब्राहाममी आंइ कली मतुइशशो बाक्त। इस्राएलम आंइ कली मतव। गे, परमप्रभु यावे, आंइ आफ, आंइ श्येत रे प्रॉइब बाक्नीनी। मेको साइ रे इन नें बाक्ब। ब्यवस्था ३२:६ 17 परमप्रभु यावे, गे मारदे आंइ कली इन लां रे हेंथे गाक्चा गेकी। गे मारदे आंइ कली इन कली मान पा महिंब दुम्चा कली आंइ थुं खकटा सेल्नी? गे इन गेय पाइब आन पर्वम नु इन जात डा मुर आन पर्वम लेतीन। यसैया ५७:१७ 18 इन योव्रशो मुरपुकी इक्का नाक्त सम्म ला एको रागीम बाक्चा ताम्तेक्म। तन्न मुल आंइ जोरी सत्रुमी इन योव्रशो बाक्तीके खतम सेलतेक्म। बजन संग्रह ७९:१ 19 गोपुकी डोंइती रे इन सासन पशो मुर खोदेशो मदुम्क। इन नेंमी ब्रेत्चा पुंइसीशो मुर खोदेशो मदुम्क” देंतेक्म।

64

1 परमप्रभु यावे, गे सरीड रोकशा, यिनी हना, रिम्शो दुम वा। इन डोंइती डांडा हिम्सीम वा। 2 मिनु दोपा मीम सोव्रशो राशी जेप्बा, मिनु ब्वाक्कु बुइक्पाइक्बा, मोपा इन जोरी सत्रु आन कली इन नें तुइक्पतीन। मिनु रागी रागी डा मुर इन डोंइती हिंशा खिंखि पाइनीम। 3 मिनु गे आंइ ममिम्शो हिंचा डा ठेयब गेय पाइनीनी। गे यिनीनु, इन डोंइती डांडा खिंखि पाइनीम। १कोरिन्थी २:९ 4 सु सुमी मेको कली रिम्नीमी, मेकोमी, मेको आन पर्वम गेय पाइब। मारदे हना साइ डोंइती रे गे डा लाक्शा अरु परमप्रभु बाक्ब, दे सुइम मनेंशो नु मतशो बाक्तेक्म। प्रस्थान ३२:५-१० 5 गे ग्येरशा ठीक पतीके मिम्शा पाइब आन कली वारच पाइब बाक्नीनी। मेको मुरपुकी इन लांम गाक्शा, इन कली मिम्ब बाक्नीम। गे आंइ पाप पशो आ पर्वम गाइक्ताक्नी। मारदे हना गे खुंइसाक्नी। मिनु गो हेंथे गाक्तक। 6 गो नेल्ल ग्रांग्रा दिशो मुर खोदेशो दुम्तक। आंइ ठीक पतीके नेल्ल ग्रांग्रा दिशो लुम्सीशो वा खोदेशो दुम्त। गो सफा खोदेशो पा सोल सुल बेक्नीकी। आंइ मरिम्शो पशो फश खोदेशो दुम्शा, आंइ कली बेरपाइक्ब। 7 मिनु इन नें थीब सुइ मबाक्नीमी। इन कली थिचा माल्ब सुइ मबाक्नीम। मारदे हना गे आंइ डोंइती रे इन कुल खुइक्ताक्नी। आंइ मरिम्शो पतीके मतेक्नी। यसैया ६३:१६; यसैया ४५:९; बिलाप ४:२; रोमी ९:२१ 8 मो हना यो परमप्रभु यावे, गे आंइ आफ बाक्नीनी। गो खप नकी, गे खप के ग्योंब सेल्ब बाक्नीनी। गो नेल्ले इन सेल्शो नकी। 9 परमप्रभु यावे, शुश मगाइक्तीने। आंइ मरिम्शो पशो गेना हना यो ममिम्तीन। आंइ कली कोव्रडीन, गो नेल्ल इन मुर बाक्नीकी। 10 इन योव्रशो सहरपुकी गोरशो रागी दुम्शो बाक्ब। सियोन यो गोरशो रागी दुम्शो बाक्ब। यरूसलेम मुर मबाक्तीके दुम्शो बाक्ब। भजन संग्रह २४:७ 11 आंइ योव्रशो नु दारशो, आंइ किकी पिपपुकीमी इन कली ठेयब सेल्शो खिं मीम प्रोइक्त। आंइ दाक्शो खिं नेल्ले

ब्रेन्ने थुम्तेक्म। 12 परमप्रभु यावे, गे मेको तशा यो, सिक्सी पा बाक्नीनी? ब्वालेइ पा बाक्शा, आंइ कली सजाइ जपाइक्नीनी?

65

परमप्रभुमी सजाइ गेशो

1 परमप्रभु यावेमी “गो आं कली मतुइक्ब आन कली माल्ब सेलतामी। आं कली ममाल्बमी आं कली थित्तीमी। आं नें मथीब रागी डा मुर आन कली गो ‘गो एके बाक्ती। गो एके बाक्ती’ दे माइक्तामी। रोमी १०:२० 2 गो काइ मटीब मुर आन कली नाक्तर आं गुइ हाम्शा वारच पाइक्चा माल्ता। मेकोपुकी आंम आन दला दाक्स पा मरिम्शो लां ला खोइक्तेक्म। रोमी १०:२१ 3 मेको मुरपुकीमी आं कली गेना हना यो गाइक्पाइक्स डा गाइक्पाइक्स पा फू बारीम चढेनीम। इंटा तारी धूप चोइनीम। 4 मेकोपुकी तुरस आगाम बाक्शा, खुंडसीशा नां सोंइताम। मेकोपुकीमी पोत्र श्ये ब्वाइनीम। आन ग्योबुम ग्रांग्रा दिशो श्ये क्येनीम। यसैया ६६:१७; लेवी १:७ 5 मेकोपुकीमी ‘गे मेके उइ बाक्कीन। आंइ नेक्था मपिने। मारदे हना इन थिशो मजाइनुड’ देंनीम। मेकोपुकी आं कली मरिम्शो रिना पाइश्शो कुन खोदेशो दुम्शा, गेना हना यो ब्रशो मी बाक्नीमी। 6 कोव्रडीन, आं डोंइती मार ब्रेक्शो बाक्तर देंशा हना ‘गो सिक्सी पा मबाक्नुड। तन्न गो क्येक्क लेत्नुड। गो थमा पा क्येक्क लेत्नुड’। 7 गो इन मरिम्शो पशो नु इन किकी पिपी आन मरिम्शो पशो कालेमी क्येक्क लेत्नुड। मेकोपुकीमी डांडा तार धूप चोशा, आं कली शुक्शी पाइक्तीमी। मिनु गो इन पशो आ क्येक्क लेत्नन्नी” दे परमप्रभु यावेमी देंत। मारदे हना मेकोपुकीमी डांडाम धूप चोशा, पहाड मेर आं पर्बम शुक्शी लोव्र पाम्तेक्म। मेको आन पशो पाप आन थुकुम प्रिंशा क्येक्क लेत्नुडमी। 8 मिनु परमप्रभु यावेमी “दोपा अडगुर आगाम रस बाक्बा, मिनु ‘मेको कली मताइक्चा, रस बाक्ब’ देंनीमी, मोपा मबिग्रेचा कली आ आगाम आसीक बाक्ब। गो मेको आं गेय पाइब आन पर्बम मोदेशो पाइनुड। यसैया ६:१३; उत्पत्ती १८:२६-३२ 9 मिनु गो याकूब आ चच युइ रे जाक्पाइक्नुड। मिनु यहूदा आ थर डा आं डांडा ताइब मुर गुंडनुड। मेको आं योव्रशो मुर आन के दुम्शा, आं गेय पाइब आन बाक्तीके दुम्ब। 10 मिनु शारोन आं मुर आन क्यारश भेडा योव्रतीके नु आकोर माइश्शो दिंमम बी ब्यफ जोपाइक्तीके दुम्ब। मेको आं कली माल्ब आन कली दुम्ब। यसैया ३३:९; यहोसु ७:२६ 11 तन्न गे परमप्रभु यावे कली प्रॉइबपुकी, आं योव्रशो डांडा प्रेंबपुकी गाद देवता कली चढेतीके सेलनीनी। मिनु गे मेनी देवी कली ब्वाइश्शो तूतीके चढेनीनी। 12 गो इन कली तरवारम साइक्पाइक्चा कली जिम्मा गेनन्नी। गे क्योरपांइसीचा कली गुर ब्वेनीनी। मारदे हना गो इन कली ब्रेत्तुनु, गे आं लोव्र मलेत्तीनी। गो लोव्र पडानु, गे मननेनी। गो आं डोंइती मरिम्शो नु आं मदाक्शो गेय ला योव्रशा, पाइतीनी” देंत। यसैया ६६:४; येरमीया ७:१३ 13 मोपतीके परमप्रभु यावेमी “आं गेय पाइबपुकी जचा ताइनीम। गे चहिं शोव्रलु बेक्नीनी। आं गेय पाइब तूचा ताइनीम। गे चहिं तूतू दाक्शा बाक्नीनी। आं गेय पाइबपुकी ग्येरनीमी, गे चहिं मुने दोक्नीनी। यसैया ५५:१ 14 आं गेय पाइबपुकी थुंम ग्येरसीशा, कुम्सो पाइनीमी। गेपुकी चहिं श्येत जशा, इन थुं लुक्च लशा खाइश्शा, वाइ ब्रेश्शा डाक्नीनी। 15 आं योव्रशोपुकीमी सराप पची ना इन नें थीनीम। मिनु नोले गो परमप्रभु, परमप्रभु यावेमी इन कली साइक्नन्नी। तन्न आं गेय पाइब आन कली नक नें वोइक्नुडमी। यसैया ६२:२ 16 मिनु सु सुम रागीमी आसीक पुंडनीमी, मेकोपुकी थमा सुइक्चा पुंडसीब परमप्रभु आ नेंमी आसीक ताइनीम। मिनु रागीमी सु सुमी कसम जाइनीमी, मेकोपुकीमी थमा सुइक्चा पुंडसीब परमप्रभु आ नेंमी कसम जाइनीमी। मारदे हना डोंइती डा श्येत नुष्शा, प्रेंने थुम्शो बाक्नीम। मिनु आं डोंइती रे खुंडसीशो बाक्नीम। यसैया १९:१८; येरमीया ४:२

नक सरीड नु नक रागी

17 मिनु गो नक सरीड नु नक रागी सेल्लुड। डोंइती डा नेल्ल प्रेंशा, लेंशा मारेइ ममिम्सीब। यसैया ६६:२२; २पत्रुस ३:१३; प्रकाश २१:१ 18 गेपुकी आं सेल्लोमी शुश ग्येरसीने। मारदे हना गो यरूसलेम कली कुम्सो पपाइश्शा, आ मुर नेल्ल आन कली ग्येरपाइक्नुडमी। यसैया ६६:२२; यसैया ३५:१०; यसैया २५:८; प्रकाश २१:४ 19 गो यरूसलेम तशा ग्येरसीनुड, आं मुर आन कली तशा, आं थुं ग्येरशा प्रेक्ब। मेना मेकेर डाक्शो नु श्येत जशा डाक्शो मननेसीब। 20 का निक्शी नाक्तर ला ब्रॉइब आल मेकेर मबाक्नीम। मिनु मेकेर सुइ यो खूशो दुम्चा क्येडा डोंइती मबेक्नीम। सहे का बर्स ब्रॉइशा बेक्ब कली ठिटा देंनीम। मिनु सहे का बर्स मगाप्थु, बेक्ब मुर कली ‘सराप रशो मुर का बाक्तर’ देंनीम। जकरिया ८:४ 21 मेकोपुकी खिं सेल्ला, बाक्नीम। मिनु मेकेर अडगुर खुम्शा, ग्येरशा ब्वाइनीम। यसैया ६२:८ 22 आंम आन सेल्लो खिंमी अरु मबाक्नीम। आन खुम्शो अडगुर अरुम मब्वाइनीम। आं मुरपुकी रवा खोदेशो पा

शुश बर्स ब्रोंडनीम। आं योव्रशो मुरपुकीम आंम आन गुइ डा गेय ग्येरशा जाइनीम। ब्यवस्था २८:३०; अय्युब १४:७ 23 मेकोपुकीमी मोशा गेय मपाइनीम। श्येत जपाइक्चा कली आल मथीनीम। मारदे हना मेकोपुकी परमप्रभु यावे आ आसीक ताइब आन आल बाक्नीम। मिनु आन आल मेको नु बाक्नीम। 24 मिनु गो मेको आन पुंइचा क्येडा डोंइती, लोव्र लेत्नुडमी। आन लोव्र पन पना नेंनुड। यसैया ३०:१९; यसैया ५८:९ 25 मेना फर नु पाठा काथ काथा जोइनीसी। गुप्सम चहिं ब्यफोम खोदेशो पा पराल ब्वाइब। बुस्सुम खप जाइब। आं योव्रशो डांडामी मारेइमी मरिम्शो मपाइनीम” दे परमप्रभु यावेमी देंत। यसैया ११:६-९; उत्पत्ती ३:१४

66

निसाफ पशो

1 मिनु परमप्रभु यावेमी “स्वर्ग आं नित्तीके नु रागी आं खोइल वोइक्तीक बाक्ब। गे आं कली दोदेशो खिं सेल्ले चाप्नीनी? तेकेर नाइक्नुडा? १राजा ८:२७; बिलाप २:१; प्रेरित ४:४९; प्रेरित १७:२४ 2 मारेइ मारेइ आं सेल्लो मनमी डा? मोपतीके मेको नेल्ल आं के नम” दे परमप्रभु यावेम देंत। मिनु लेंशा “मो हना यो गो आं लोव्र नेंशा, हिंशा, खिंखि पा श्येत जाइब नु आ थुं जिक्शो मुर आन कली कोव्रनुड।

3 मिनु सुमी ब्यफ साइक्बा, मेको मुर साइक्ब खोदेशो बाक्ब। सुमी पाठा का चढेबा, मेको कुचुम आ शुर जिक्ब खोदेशो बाक्ब। सुमी अन्न चढेबा, मेको पोव्र आ हुश चढेब खोदेशो बाक्ब। सुमी मिम्शा चढेतीके धूप चोइबा, मेको मूर्ति पूजा पाइब खोदेशो बाक्ब। मेको आन दला दाक्स पाइनीमी। आन ग्रांरा दिशो गेयमी ग्येरसीनीमी। १सामुएल १५:२२-२३ 4 गो मेको आन कली शुक्शी पाइनुड। मिनु आन हिंशो श्येत आन तार मोइक्नुड। मारदे हना गो मेको आन कली ब्रेडडानु, लोव्र मलेत्तेम। गो लोव्र पाता। तन्न मेकोपुकीम आं लोव्र मनेनेम। आं डोंइती मरिम्शो पाम्तेक्म। आं मदाक्शो ला पाम्तेक्म” देंत। यसैया ६५:१२

परमप्रभुम सियोन कली ठीक सेल्लो

5 परमप्रभु यावे आ लोव्र क्येडा हिंशा, खिंखि पाइबपुकीम “आं लोव्र नेनीन। इन लोकबपुकीमी गेपुकी आं मुर दुम्तीके इन कली काइ मदाक्थु, तिल्लीम। मेकोपुकीमी ‘परमप्रभु यावे कली ठेयब सेलल। मिनु गो इन ग्येरशा बाक्शो तकल’ देनीम। तन्न मेकोपुकी मुने दोक्नीम। लूका ६:२२

6 नेनीने, सहर रे ठेयब रेयके नेंसीब। परमप्रभु यावे आ खिं रे सेंदा का नेंसीब। मेको परमप्रभु यावे आ सेंदा बाक्ब। आ जोरी सत्रु आन कली क्येक्क लेत्चा कली ठेयब सेंदा पा लोव्र पाइब” देतेक्म।

7 मिनु परमप्रभु यावेमी “सियोनमी सुत्केरी रोइ पचा क्येडा डोंइती आल थिप्तु। सुत्केरी रोइ पचा क्येडा डोंइती तौ का थिप्तु। 8 मोदेशो लोव्र सुम नेन्मे, सुम तामे? मार, नाक्त कामी रागी का दुम्बा डा? याम कामी रागी का जरमेसीबा डा? सियोनमी सुत्केरी रोइ पचा चिक्तानु, आलपुकी थिप्तु। 9 गो आल थिचा चिक्पाइश्शा डा मीन, थिचा मगेनुडा डा? गो आल थिचा गेबमी, तेक्नुडा डा?” दे इन परमप्रभुमी देंत। यसैया ३७:३

10 मिनु गे यरूसलेम कली दाक्ब नेल्लेमी मेको नु ग्येरसीन। गे मेको आ पबर्म रोंका पाइब नेल्ल ग्येरसीन। 11 गेपुकी मेको आ दूध युप्शा, रूशा, इन थुं बारपतीन। मेको आ रिम्स तशा ग्येरसीने। यसैया ६०:१६

12 मारदे हना परमप्रभु यावेमी “गो ठेयब खोला खोदेशो पा मार मार गेनुड। मिनु बारशो खोला खोदेशो पा रागी रागी डा मुर आन शोंप गेनुड। मिनु गे जाइनीनी। गेपुकी मुप्शा, कुरचा पुंइसीनीनी। थुकुम ग्यारपाइक्चा पुंइसीनीनी। यसैया ६०:४ 13 दोपा आल आ ममामी आल आ थुं बारपाइक्बा, मोपा गो इन कली इन थुं बारपाइक्नन्नी। गे यरूसलेम सहरमी इन थुं बारपाइक्चा पुंइसीनीनी। बजन संग्रह १३१:२

14 गेपुकी मेको कली तशा, शुश ग्येरशा, इन थुं बारपाइक्नीनी। गे घांस बारशो खोदेशो पा बारनीनी” देंत। परमप्रभु यावेमी आ गेय पाइब आन कली वारच पाइब, दे मुर नेल्लेमी तुइक्नीम। मेको आ जोरी सत्रु आन पबर्म गाइक्ब। 15 परमप्रभु यावे मी नु जाक्ब। आ बग्गीपुकी फश गिवार खोदेशो पा गाक्नीम। आ गाइश्शो चुरशोमी क्येक्क लेप्ब। आ हुइक्तीके हुरुर पा ब्रशो मी खोदेशो बाक्ब। बजन संग्रह ५०:३; प्रकाश १९:११-१५ 16 मारदे हना परमप्रभु यावेमी मीमी निसाफ पाइब। मुर नेल्ल आन कली आ तरवारम निसाफ पाइब। मिनु परमप्रभु यावेमी मोपा साइश्शो शुश दुम्नीम। 17 मिनु “सु सु देवी देवता आन डोंइती जाक्चा कली चोव्रखेसीशा, आंम कली ठीक सेल्लेमी, फू रू लशा,

मेको रू आ दातेमी बाक्ब पोत्र श्ये ब्वाइब आ नोले खोइशशा, मेको यो पोत्र श्ये ब्वशा, ग्रांग्रा दिचा डा थोत्रकपुकी नु यिच ब्वाइनीमी, मेकोपुकी कालेमी साइक्चा पुंइसीनीम” देत। यसैया ६५:३-५; इजीकीएल ८:११

18 परमप्रभु यावेमी “गो मेको आन पतीके नु आन मिम्तीके तुइक्नुड। मिनु रागी रागी डा मुर नेल्ल नु नेल्ल खाल डा लोत्र पाइब मुर आन कली खुप्नुड। मिनु मेको मुर जाक्शा, आं छेडछेड ताइनीम। 19 मिनु गो मेको आन दातेमी चिन्ड का वोइक्नुड। मिनु मेको आन दाते डा प्रोंइशो आन कली रागी रागीम सोइक्नुडमी। गो मेको आन कली टारशीश, पूत नु लूद सोइक्नुडमी। लूद डा मुर चहिं लिब्रा आप्ब बाक्नीम। गो तूबल, यावान नु समुन्द्र आ नेक्था डा रागी मेर सोइक्नुडमी। मेकोपुकीमी आं नें मतुइक्ब आं छेडछेड मताइब रागी रागी डा मुर आन कली आं पबर्म शेनीम। मती १८:१९ तूबल नु यवान ग्रीस रागी बाक्ब। 20 मिनु इन लोकब नेल्ल आन कली रागी रागी रे परमप्रभु यावे आ डोंइती चदेशो खोदेशो पा यरूसलेमम चाक्नीम। मेकोपुकी शारा, बग्गी, कुरतीके, गधा नु दलओंठम डोइक्पाइशशा, आं योत्रशो डांडाम चाक्चा पुंइसीनीम। दोपा इस्राएलीपुकीमी आन अन्न चढ़ेतीके सफा ग्योंबुम परमप्रभु यावे आ खिं चाक्नीमी, मोपा मेकोपुकीमी पाइनीम। यसैया ६०:३-७ 21 गो मेको आन दाते रे चढ़ेब नु लेवी योत्रनुडमी” दे परमप्रभु यावेमी देत।

22 मिनु “दोपा आं सेल्शो नक सरीड नु नक रागी आं डोंइती गेना हना यो बाक्बा, मोपा इन नें नु इन चच युइ आन नें गेना हना यो लीनीम। यसैया ६५:१७ 23 मिनु नोले औंसी रे औंसी सम्म नु नाइक्तीक नाक्ती रे नाइक्तीक नाक्ती सम्म मुर नेल्ले आं कली ठेयब सेल्चा कली आं डोंइती जाक्नीम। गन्ती १०:१०

24 मिनु मेकोपुकी गूशा आं कली काइ मटीब आन बेक्शो रां कोत्रथ लाइनीम। मेको आन लुस्पु मबेक्नीम, आन मी यो मकाप्ब। मेको मुर नेल्ल आन कली ग्रांग्रा दितीके दुम्नीम” दे परमप्रभु यावेमी देत। मर्कूस ९:४८

येरमीया

ब्रेक्ब मुर: एको किताब येरमीयाम ब्रेक्शो बाक्ब। पिप योयाकीमम आ हुकुम पची ना येरमीयामी आ लोव्र नेल्ल आ ब्रेक्ब मुर बारुक कली ब्रेक्पाइवतु। साइ डोंइती रे यहूदी नु ख्रीस्तीयन नेल्लेम मेको किताब येरमीया आ ब्रेक्शो बाक्ब, दे तुइक्नीम।

गेना ब्रेक्शो: मेना अस्सुर रागी खतम दुम्त। मेदी नु कल्दी डा मुरपुकीमी अस्सुर डा ठेयब सहर निनवे कली लडाइ पा ग्रातेक्म। मिनु मेको रागी आस दातेमी योक्सक्स। ६०९-६०६ बि. सी. मेर पिप नेबुकदनेसरमी इजीप्त कली लडाइ पा ग्रात। नोले डोंइती डा यहूदी आन कली ग्याइशशा लाइक्तीके बाक्त। मेको ६०६ बि. सी.म बाक्त। मेको आ नोले डा ग्याइशशा लाइक्तीक ५९८ बि. सी.म बाक्त। मिनु नेल्ल क्येडा नोले डा ग्याइशशा लाइक्तीके ५८६ बि. सी.म बाक्त।

मारदे ब्रेक्शो: यहूदा डा मुर परमप्रभु गे मलेत्तेम हना, निसाफ पचा पुंइसीनीम। यरूसलेम सहर फुचा पुंइसीब। मिनु नोले थुं बारपाइक्तीके लोव्र शुश ताइब। मिनु इस्राएली मदुम्शो अर्को रागी डा मुर यो मेको नक कबल डा शिशी ताइब दुम्ने चाप्नीम।

येरमीया सु बाक्म

1 एको चढेब हिल्कीयाह आ तौ येरमीया आ लोव्र बाक्ब। मेको बेन्यामीन आ रागी अनाथोथ सहरम बाक्शो बाक्त। येरमीया ११:२१; यहोसु २१:१८; ब्यवस्था ३३:३२ 2 यहूदा डा आमोन आ तौ पिप योसीयाहम सासन पवा आ १३ बर्समी परमप्रभु यावेमी येरमीया कली लोव्र पाप्तु। २राजा २१:२४; २राजा २२:१ 3 मिनु यहूदा डा योसीयाह आ तौ येहो-याकीम आ पाला नेल्ले नु यहूदा डा योसीयाह आ तौ सिदकीयाहम सासन पवा आ ११ बर्स डा ५ महिनाम परमप्रभु यावेम येरमीया कली लोव्र पना पन बाक्त। मेना यरूसलेम डा मुर ग्याइशशा लाइक्चा पुंइसीशो बाक्तेक्म। २राजा २३:३४; २राजा २४:१७; २राजा २५:२-२१; येरमीया ३९:९

येरमीया कली ब्रेक्शो

4 मिनु परमप्रभु यावेमी आं कली मार लोव्र पाप्तु देशा हना, 5 “गो इ कली कोव्रजीम जोल्चा क्येडा डोंइती तुइक्ताकड। गो इ कली जरमेचा क्येडा डोंइती योव्रशा तिल्लन। मिनु इ कली रागी रागी डा मुर आन कली आं लोव्र पाइब सेल्लन” देंत। यसैया ४९:१; गलाती १:१५

6 मिनु गो “परमप्रभु, परमप्रभु यावे, गो दोपा ब्वाक्चा माल्नुडा, मजोक्नुड। गो आलन बाक्नुड” देंती। प्रस्थान ४:१०; यसैया ६:५-७ 7 तन्न परमप्रभु यावेमी आं कली “गो आल बाक्नुड मदेनो। गो इ कली सु सु आन बाक्तीक सोइक्नना, मेकेर लचान माल्नेवे। मिनु गो इ कली मार अरेडा, मेको देंचा माल्नेवे। 8 गे मेको आन क्येडा महिनो। मारदे हना गो इ कली प्रोंइचा कली गे नु बाक्नुड” दे परमप्रभु यावेमी देंत। प्रस्थान ३:१२ 9 मिनु नोले परमप्रभु यावेम आ गुइ दिंशा, आं शोव्र थिप्तु। मिनु आं कली “मुल आं लोव्र इ शोव्रम कुर पाता। प्रस्थान ४:१२ 10 नेनो, मुलाक्ती गो इ कली रागी रागी नु राज्य आन पर्बम लोव्र पाइब सेल्लन। तुल्चा नु प्रेत्चा कली, खतम पोक्चा, प्रांग्ये माग्ये पपाइक्चा नु सेल्चा नु खुम्चा कली वोइक्तन” देंत। येरमीया १८:७-१०

11 मिनु परमप्रभु यावेमी आं कली “येरमीया, गे मार, तवी?” देंत। मिनु गो “देसी बदाम रवा आ राशी का ताता” देंती। 12 मिनु परमप्रभु यावेमी “गे ठीक ताप्तीवी। मारदे हना गो आं लोव्र नेल्ल दुम्ल, दे योव्रकी पा बाक्ती” देंत। येरमीया ३१:२८ 13 मिनु परमप्रभु यावेमी लेंशा आं कली “गे मार, तवी?” दे हिल्लो पाप्तु। मिनु गो “बुइशो मार, मार बाक्शो ग्योब का उत्तर रे याक्सीशा यिशो ताता” देंती।

14 मिनु परमप्रभु यावेमी आं कली “उत्तर रे एको रागीम बाक्ब मुर नेल्ल आन कली श्येत जाक्ब। येरमीया ४:६; येरमीया ६:१, २२; येरमीया १०:२२; येरमीया २५:९; येरमीया ५०:४१ 15 गो उत्तर डा राज्य डा जात जात डा मुर आन कली ब्रेत्नुड। मिनु मेको नेल्ल जाक्शा, यरूसलेम डा ठेयब लाप्चो ओव्रतीक लांमी, एर ओंथ डा गारो नेल्ल नु यहूदा डा सहर आ डोंइती आन पिप आन नित्तीक वोइक्नीम। मेकोपुकी मेको आन पर्बम लडाइ पचा कली जाक्नीम। 16 मेकोपुकीमी आं कली प्रोंइशा, आं अरेशो मटितीके, गो मेको आन पर्बम आं निसाफ नेपाइक्नुडमी। मेकोपुकीमी अरु देवी देवता आन कली धूप चोम्तेक्म। मिनु आन गुइमी सेल्शो देवी देवता आन कली पूजा पाम्तेक्म। 17 गे चहिं

बोकशा, ठीक दुमो। मिनु गो इ कली मार, मार, अरेडा, मेको आन कली माइक्मी। गे मेको आन क्येडा महिनो। मो पाप्तीवी हना, गो इ कली मेको आन डोंइती हिंपाइक्नन। 18 मुलाक्ती गो इ कली गारो हिरशो बोल्यो सहर, फलाम के थाम नु कांसा के थरपु खोदेशो सेल्लतन। मोपा गे यहूदा डा पिपी, हुकुम पाइबपुकी, चढेबपुकी नु रागी डा मुर नेल्ले आन मरिम्शो पशो आ पबर्म लोव्र पने चाप्नेवे। येरमीया १५:२०; इजीकीएल ३:८-९ 19 मेकोपुकीमी इ कली लडाइ तोइनीम। तन्न इ क्येडा ग्राने मचाप्नीम। मारदे हना इ कली प्रोंइचा कली गो गे नु बाक्नुड” दे परमप्रभु यावेमी देंत।

2

इस्राएली आन कली प्रोंइशो

1 मिनु परमप्रभु यावेमी आं कली 2 “लावो, परमप्रभु यावेमी यरूसलेम कली मार देंत देंशा हना ‘गे इ ठिटी बाक्ची ना आं कली ग्युम्लीम खोदेशो पा दाक्ताक्यी। गे आं कली मारेइ मशोकशो गोरशो रागीमी आं नोले खोइक्ती। गो मेको मिम्नुड। होसे २:१६; होसे १३:५ 3 इस्राएल आंम परमप्रभु यावे कली आ का ला बाक्शो ग्युम्ली खोदेशो बाक्त। मेको, आ गेय डा डोंइती डा फल खोदेशो बाक्त। मेको कली नेक्ब नेल्ल दोस ताइब दुम्तेक्म। मेको श्येत जाम्तेक्म’ देनो” दे माइक्ती। प्रस्थान २८:३६; आमोस ६:१; याकूब १:१८

4 गे याकूब आ खिं डा मुर नु इस्राएल आ खिं डा मुर नेल्ले, परमप्रभु यावे आ लोव्र नेनीन। 5 परमप्रभु यावेमी मार देंत देंशा हना “इन किकी पिपीम आं कली मार, दोस गेयीमी? मारदे आं कली प्रोंइशा, डोन लमा? मेकोपुकी शोर गाक्शो मूर्ति आन नोले खोइक्तेक्म। मिनु मेको यो शोर गाक्शो दुम्तेक्म। मीका ६:३ 6 मेकोपुकीमी ‘आंइ कली इजीप्त रागी रे गुंडब परमप्रभु यावे ते बाक्बा? मेकोमी आंइ कली गोरशो रागीम लां कोंइशा गाक्पाइक्तु। मेको मुर मबाक्तीक गोरशो रागी नु शुश खाल्टा बाक्शो रागी बाक्त। ब्वाक्कु मबाक्शो नु छिडछिड डा रागी बाक्त। मेको सुइ मगाक्तीक नु सुइ मुर मबाक्तीक रागी बाक्त’ देंतेक्म। ब्यवस्था ८:१५ 7 गो इन कली रिम्शो रागीम चाक्तन्नी। मेकेर डा फल नु रिम्शो थोव्रक जपाइक्चा कली चाक्तन्नी। तन्न गेपुकी जाक्शा, आं रागी मरिम्शो सेल्लतीनी। आं रागी कली ग्रांरा दिशो सेल्लतीनी। ब्यवस्था १:२५; न्यायाधीस २:१-२ 8 चढेबपुकीम ‘परमप्रभु यावे ते बाक्बा?’ मदेम। आं अरेशो लोव्र शेंबपुकीम आं कली मतुइक्तीमी। सासन पाइबपुकी आं कली ममिम्थु, हेंथे गाक्तेक्म। आं लोव्र पाइबपुकीम बाल देवता आ नेम नोले दुम्ब लोव्र पाम्तेक्म। मिनु शोर गाक्शो मूर्ति आन नोले खोइक्तेक्म” देंत।

9 मोपतीके परमप्रभु यावेमी “गो इन कली लेंशा दोस गेचा माल्नुड। गो इन चच युइ आन कली दोस गेनुड। 10 कित्तीम माइश्शो साइप्रस डा समुन्द्र आ नेक्था बाक्ब आन कली कोव्रडीन। केदारमी क्यारी पाइब मुर सोइश्शा कोव्रडीन। मार, मेकेर मोदेशो गेय दुम्शो बाक्बा? 11 मार, तेकोइ रागी डा मुरुम आन देवी देवता फाइश्शो बाक्नीमी डा? मेको परमप्रभु मनम हना यो, मफाइक्नीम। तन्न आं मुरपुकीम आन ठेयब सक्ति पाइश्शो कली शोर गाक्शो मूर्तिपुकी नु फाइक्तेक्म। रोमी १:२३ 12 गे सरीडम बाक्बपुकी एको लोव्र नेंशा हिंशा, छक लाक्कीन। मिनु थाम्पा हिंशा थिर थिर पा खिंखि पने। 13 मारदे हना आं मुरपुकीम निक्शी खेयप मरिम्शो पाम्तेक्म। मेकोपुकीमी, ब्रोंइतीक ब्वाक्कु बुक्तीके, आं कली प्रोंइतेक्म। मिनु आंम कली सोव्रशो रागीमी ब्वाक्कु मदेम्तीक इनार दोम्तेक्म। येरमीया १७:१३; भजन संग्रह ३६:१०; यूहन्ना ७:३८

14 मार, इस्राएल वाइल का बाक्बा? आ होव्रप आ खिंम जरमेशो वाइल का बाक्बा डा? मेको मारदे रोइक्चा पुंइसे? 15 गुप्सपुकी मेको कली तशा ग्रीनीम। ठेयब सेंदा पा ग्रीनीम। मेकोपुकीमी आ रागी कली मुर मबाक्तीके सेल्लेक्म। मेको आ सहर नेल्ल ब्रेत्तेक्म। मिनु मेकेर मुर मबाक्नीम। येरमीया ४:७ 16 मेम्फीस नु ताहपनेस डा मुरपुकीम इन पिया डा सिरपेच पुइक्तेक्म। येरमीया ४४:१ 17 इन कली लां कोंइब, इन परमप्रभु यावे कली प्रोंइशा, गे मोदेशो श्येत आंमा इन कली मचाक्नी डा? 18 गे मारदे इजीप्त रागी लाइनीनी? नील खोला डा ब्वाक्कु तूथ लाइनीनी? गे अस्सुर रागी लनीनु, मार रिम्शो दुम्बा डा? गे युफ्रेटीस खोला डा ब्वाक्कु तूथ लाइनीनी? 19 इन परमप्रभु यावे आ अरेशो लोव्र मटितीकेमी इन कली सजाइ गेब। इन प्रोंइशोमी इन कली हुइक्ब। गेपुकीम इन परमप्रभु यावे कली प्रोंइशो थम मरिम्शो नु इन थुं कशो दुम्शो बाक्ब, दे तुइक्तीन। मिनु आं कली मान पा हिंतीके गे नु मबाक्ब” दे परमप्रभु, मुर नेल्ल आन परमप्रभु यावेमी देंत।

20 परमप्रभु यावेमी “साइ डोंइती रे गे इ जुवा जिक्तीवी। मिनु इ डोरी प्रोंइक्तीवी। मिनु गे ‘गो इ गेय मपाइनुड’ देंते। गे डांडा नु रवा नेल्ल आन पुंम तेल्लेम पाप्तीवी। यसैया ५७:५५; इजीकीएल ६:१३ 21 गो इ कली नेल्ल क्येडा रिम्शो अडगुर बोट खुम्ता। गे दोपा मरिम्शो दुम्शा ब्वाकी डा अडगुर बोट खोदेशो दुमे? भजन संग्रह ८०:९; यसैया

५:१-४ 22 गे इ कली मार, मार, हिक्सी नु शुश साबुनम चिकसाक्वे हना यो, इ दोस ततीके लुम्सीशो आं डोंइती बाक्ब” दे परमप्रभु, परमप्रभु यावेमी देंत। 23 मिनु “गे ‘गो ग्रांग्रा मदिशो नड’ दे दोपा देंने चाप्नेवे? ‘गो बाल देवता आ नोले मखोइशो बाक्नुड’ दे गे दोपा देंने चाप्नेवे? गे बेंसीम मार, पवी? मेको मिम्तो। गे थाम्पा एर ओंथ दोरशा गाक्ब दलओठ बाक्नेवे। 24 गे गोरशो रागीम बाक्चा दाक्ब, फश नाम्शा गाक्ब ब्वाकी डा गधैनी बाक्नेवे। मेको आ डागो माल्तीके सुम तेक्ने चाप्बा डा? सु सुमी मेको कली माल्नीमी, मेको मदाइनीम। मारदे हना ब्वांइसीतीक महिनाम मेको कली थित्नीम। 25 इ खोइल शिश्रा मगाक्को। गे तूतू दाक्शा खिं रे मलावो। तन्न गे ‘एको मोशा बाक्ब। मारदे हना गो अर्को रागी डा देवता आन कली दाक्ताक्ड। मिनु मेको आन नोले खोइक्नुड’ देंते।

26 दोपा खुइ ग्याइक्चा पुंइसेनु, मुने दोक्बा, मोपा इस्राएल आ खिं डा मुरपुकी मुने दोक्नीम। मेकोपुकी, आन पिपी, आन ठेयब मुरपुकी, आन चढेबपुकी नु मेको आन जोल पा परमप्रभु यावे आ लोत्र पाइबपुकी मुने दोक्नीम। 27 मेकोपुकीमी रवा कली ‘गे आं आफ नवे’ मिनु फुल्लु कली ‘गे आं कली जरमेब नवे’ देंनीम। मेकोपुकीमी आं कली आन ची हिरशा कोंइशो बाक्नीम। आन कुल ममाइ। मो हना यो मेको श्येत जामे नाक्ती जाक्शा ‘आंइ कली प्रोंइकी’ देंनीम। येरमीया ७:२४; येरमीया १८:१७; येरमीया ३२:३३ 28 तन्न आंम इन सेल्शो देवी देवता ते लाक्गमे? मेकोपुकीमी इन कली प्रोंइने चाप्तेक्म हना, इन श्येत जची ना मेको आन कली जाक्पतीन। मारदे हना यहूदा, गे इ के गिश सहर बाक्मा, मिश देवी देवता बाक्नीम। ब्यवस्था ३२:३७-३८; न्यायाधीस १०:१४; येरमीया ११:१३

29 गेपुकीम मारदे आं कली गन गन पाइनीनी? गे नेल्ल आं कली काइ मटीब दुम्शो बाक्नीनी। 30 गो इन आल आन कली मोशा तुप्तामी। गो मेको आन कली शेंचा दाक्ताक्ड। तन्न मबिस्सम। इन कली सोइशो आं लोत्र पाइब इन तरवारमी साइक्चा पुंइसाक्म। गेपुकी गु दाक्ब गुप्स खोदेंशो बाक्नीनी। यसैया १:५; मत्ती ५:१२; मत्ती २२:६; मत्ती २३:३७; मर्कूस १२:५ 31 मिनु गे, मुल डा पाला डा मुरपुकी, परमप्रभु यावे आ लोत्र मिम्तीन। मार, गो इस्राएली आन कली मुर मबाक्शो रागी नु थम छिडछिड डा रागी दुम्डा डा? मारदे आं मुरपुकीम ‘गो आंइ कली हिरचा कली सुइम तेक्ने मचाप्ब। गो इन डोंइती गेनायो लेंशा मजाक्नीकी’ देंमा? 32 मार, मीश आलम आ सुन चांदी नु ग्युम्लीम आ ग्युंवे पशो दारशो वा प्रेंने चाप्नीमी डा? तन्न आं मुरपुकीम दा आं कली शुश नाक्ती रे प्रेंताक्यीमी।

33 गे दाक्मुतीक माल्शा गाक्चा कली शुश जोक्ब बाक्नेवे? मिनु गे परमप्रभु यावे आ अरेशो लोत्र मटीब मीश मुर अरु लां शेंशा गाक्पाइक्तीवी। 34 इ फेक्शो वाम दोस मताइब नु पुडग आन हुश लुम्सीशो बाक्ब। मिनु गेमी मेको आन कली खिं प्रोल्शा खिं ओव्रशो मथिदी। मेको मोदेंशो नेल्ल दुम्ना दुम्न यो, येरमीया २६:२०-२३; प्रस्थान २३:७ 35 गे ‘गो दोस मताइब बाक्नुड। मेको थमा पा गो नु मगाइक्ब’ देंनेवे। मारदे हना गेमी ‘गो पाप मपड’ देंतीके गो इ कली निसाफ पाइनुड। यसैया ४३:२५-२६ 36 गे इ गाक्तीक लां फाइक्ना फाइक्न एर ओंथ पाइक्नेवे? दोपा अस्सुरम इ कली मुने दोक्पदा। मोपान इजीप्तमी यो इ मुने तोक्ब। २राजा २२:३३-३५; यसैया ३०:३ 37 गे मेकेर रे यो हिंचा डा पा प्रोक्चा माल्नेवे। मारदे हना परमप्रभु यावेमी थमा सुइक्चा कली योव्रशो आन कली आ नेक्था मजाक्चा डा पा तिल्लु। मेको आन वारच पतीके इ कली शोर गाक्शो बाक्ब” दे परमप्रभुम देंत।

3

नाता खोइशो

1 मिनु परमप्रभु यावेमी “वोंइश मुरुमी आ मीश कली प्रोंइशा, छोड पत्र गेपु हना, मेको मीश मुर अर्को वोंइश मुर आ मीश दुम्त हना, मेको वोंइश मुरुम लेंशा आ मीश कली चाक्बा कों? मो दुम्त हना मेको रागी ग्रांग्रा दिशो मदुम्बा डा? गे चहिं तेल्लेम का खोदेंशो पा शुश आन बाक्तीके जाक्दीशो बाक्ते। मिनु मार, गे आं गे लेशशा जाक्नेवे?” दे परमप्रभु यावेमी देंत। ब्यवस्था २४:१-४ 2 परमप्रभु यावेम “इर कोव्रडो। गोरशो डांडा मेर कोव्रडो। गे सु नु मइमे? गे मुर मबाक्तीके अराब खोदेंशो पा लांमी बाक्शा, गे नु इण्ब मुर आन कली रिम्ना रिम्न बाक्ते। गे इ तेल्लेम पतीके नु आं अरेशो मटितीकेम मेको रागी ग्रांग्रा दिशो सेल्तीवी। होसे ४:१३ 3 मोपतीके रेउ मयिशो बाक्त। मिनु बर्खा डा रेउ मयी। मो हना यो गे मुने मपाइशो बाक्नेवे। गे इ मुनेम लल मजिनेवे। येरमीया ३:१९; येरमीया ३१:९; यसैया ६३:१६ 4 मार, गे मुल नक आं कली ‘आं आफ, आं ठिटी रे डा वारच, देंते। 5 मार, मेको गेना हना यो गाइक्स डा गाइक्स बाक्बा डा? मार, इन गाइक्चा गेना हना यो बाक्बा डा?’ दे आं कली ब्रेत्ते। मिनु गे ओदेंशो लोत्र पाइनेवे। तन्न मार मरिम्शो बाक्मे, मेको नेल्ल पाप्तीवी” दे परमप्रभु यावेमी देंत।

थमा मसुइक्ब इस्राएली

6 योसीयाहम सासन पची ना परमप्रभु यावेमी आं कली “थमा सुइक्ने मचापब इस्राएलम मार, पवा, मतवी? मेकोमी डांडा नेल्ल डोइशशा, गिगी रवा नेल्ल आन पुंम तेल्लेम पाप्तु। येरमीया २:२० 7 मेकोमी मोदेशो नेल्ल पा आं गे लेपब, दे मिम्ताक्ड। तन्न मेको मले। मिनु मेको नेल्ले जोल पाइब आ लोकब यहूदाम ताप्तु। २कोरिन्थी ७:८-९; इजीकीएल २३:२, ४१ 8 मेको थमा सुइक्ने मचापब इस्राएल कली आ शुश तेल्लेम पतीके, गो छोड पत्र गेशा, सोइक्ताक्ड, दे तुइशशो बाक्त। मो हना यो आ लोकब देंखु पशो यहूदामी मेको तशा महिंथु। मेकोमी यो तेल्लेम पाप्तु। 9 इस्राएलमी आ तेल्लेम पतीके थम आइक्च मिम्ताक्व। मेकोमी फुल्लु नु रवापुकी नु यो लशा तेल्लेम पा रागी ग्रांग्रा दिशो सेल्लु। 10 मेको नेल्ल दुम्त हना यो, मेको आ लोकब देंखु पशो यहूदा आ थुं नेल्लेमी आं गे मले। आं गे लेशशो खोदेशो ला पखु पाप्तु” दे परमप्रभु यावेम देंत।

11 मिनु नोले परमप्रभु यावेमी आं कली “थमा सुइक्ने मचापब इस्राएल, जोल पा मरिम्शो पाइब यहूदा क्येडा ठीक पाइब दुम्त। 12 ‘गे लावो। मिनु एको लोव्र उत्तर गे शेंदीमी। थमा सुइक्ने मचापब इस्राएल, परमप्रभु यावेम लेतो। गो इ कली तशा मगाइक्नुड। मारदे हना गो शिशी पाइब नड। गो गेना हना यो मगाइक्नुड’। प्रस्थान ३४:६; 13 गे ‘गो पापी नड। गो आं परमप्रभु यावे कली काइ मटीब दुम्ती। मिनु गिगी रवा नेल्ल आन पुंमी अरु देवी देवता आन कली दाक्ताक्ड’ देंते। मिनु आं देंशो मटिवी। इ पाप शोव्रडो, दे मतो” देंत। 14 मिनु परमप्रभु यावेम मेको आन कली “लेतीन। थमा सुइक्ने मचापब आलपुकी लेतीन। मारदे हना गो इन होव्रप नड। गो सहर रे मुर का कली नु खिं रे मुर निक्शी आस कली योव्रनुडमी। मिनु इन कली सियोनम चाक्नन्नी। यसैया ६:१३

15 मिनु गो इन कली आं थुं नु गारब गोठलापुकी गेनुड। मिनु मेको जोक्ब नु रुपब दुम्शा, इन कली थुल्नीम। येरमीया २३:३-४; यसैया ४४:२८; इजीकीएल ३४:२३ 16 गे रागीम सोशा बोशा शुश दुम्तीनी हना, मुरपुकीम गेनायो ‘परमप्रभु यावे आ कबल पशो सन्दोस’ मदेनीम” देंत। मिनु परमप्रभु यावेम “मेकोपुकीमी मेको कली ममिम्नीम। मेको कली सुइमी ममाल्नीम। मेको खोदेशो लेंशा अर्को यो मसेल्नीम। गन्ती १०:३३-३६; २राजा २५:८-९; हिब्रू ४:१४-१६ 17 मेना यरूसलेम कली ‘परमप्रभु यावे आ ठेयब नित्तीके’ देंनीम। मिनु रागी रागी डा मुर नेल्ल मेकेर देल्नीम। मुर नेल्ल परमप्रभु यावे आ नेक्था यरूसलेमम देल्नीम। मेना रे आन थुं डा मरिम्शो लोव्र मपाइनीम। प्रस्थान १७:१६; यसैया २:२-४; मत्ती ४:२ 18 मेको नाक्ती यहूदा आ खिं डा मुर, इस्राएल आ खिं डा मुरपुकी नु गारनीम। मिनु मेकोपुकी कालेम उत्तर रे पा इन किकी पिपी आन कली गेशो रागीम जाक्नीम। यसैया १:१-१३

19 मिनु गो इन कली आंम आल आन दातेमी बाक्चा गेनुड। गो इन कली रिम्शो रागी का गेनुड। मेको रागी नेल्ल आन दाते डा नेल्ल क्येडा दारशो रिम्शो रागी बाक्ब। मिनु गे आं कली ‘आं आफ’ देंनीनी। गे नोले मशोइक्ब दुम्नीनी, दे मिम्ताक्ड। ब्यवस्था ७:६; ब्यवस्था ३२:६; ब्यवस्था ८:७; येरमीया ३:४ 20 तन्न दोपा थमा सुइक्ने मचापब मीश मुरुम आ वोंइश कली प्रोंइबा, मोपा गे थमा सुइक्ने मचापब, इस्राएल, गे आं कली प्रोंइती” दे परमप्रभु यावेम देंत।

21 गोरशो डांडाम वाइ ब्रेशशो सेंदा का नेंसीब। मेको इस्राएल आ आल आन शुश डाक्शो सेंदा बाक्ब। मारदे हना मेकोपुकी दूली लांम गाक्शो बाक्तेक्म। मेकोपुकीमी परमप्रभु यावे, आन परमप्रभु कली प्रेंशो बाक्तेक्म। येरमीया ३:२ 22 मिनु मेकोमी “थमा सुइक्ने मचापब आलपुकी लेतीन। इन थमा सुइक्ने मचापतीके सापाइक्नन्नी” देंत। मिनु मेकोपुकीमी “दुम्ब, गो इन गे लेशशा, जाक्नीकी। मारदे हना गे परमप्रभु यावे, आंइ परमप्रभु बाक्नीनी। 23 थमा पा, पहाड डा देवी देवता आन थान जोल बाक्नीम। डांडा मेर ठेयब चाड सेल्लतीके नेल्ल जोल बाक्नीम। थमा पा परमप्रभु यावे, आंइ परमप्रभु इस्राएल कली पाप रे प्रोंइब बाक्ब। 24 गोपुकी आंइ ठिटा ठिटी रेन मेको मुने तोक्ब गेयमी आंइ किकी पिपी रे श्येत पा गेय पशो नेल्ल नेक्तु। मेको आन क्यारश भेडा, आन बी ब्यफ नु आन तमी तौ आन कली नेक्तु। 25 मुल गो इं मुनेम ग्रुम्य। मिनु इं दोस ततीकेमी इं कली सुमल। मारदे हना गो परमप्रभु यावे, इं परमप्रभु कली पाप पाइतय। इं किकी पिपी नु गो इं ठिटा ठिटी रेन मुल सम्म परमप्रभु यावे, इं परमप्रभु आ देंशो मटिशो बाक्तय” देंतेक्म। येरमीया १४:७, २०

4

परमप्रभुमी इस्राएल कली ब्रेशशो

1 परमप्रभु यावेम “गे इस्राएलीपुकी, आं गे लेशशा जाक्तीनी हना, गेपुकीम इन ग्रांग्रा दिशो थोव्रक आं डोंइती रे ताइक्ताक्नी हना, गेपुकी हेंथे मगाक्ब दुम्नीनी। 2 कसम जची ना गेपुकीम ‘परमप्रभु यावे ब्रोंइशा बाक्शो खोदेशो पा’ दे कसम जाइतीनी हना, गे थमा लोव्र पा, ठीक निसाफ पाइब नु रिम्शो थुं पाइब मुर दुम्तीनी हना, रागी रागी डा मुर

परमप्रभु आ नें थिशा आसीक पमुइनीम। मिनु मेकोपुकी आ आल दुम्तीके ग्येरसीनीम” देंत। ब्यवस्था १०:२०; यसैया ६५:१६ ३ मिनु परमप्रभु यावेमी यहूदा डा मुर नु यरूसलेमम बाक्ब आन कली “इन कोक्त रूमी डल्ला थोक्तीन। चू आन दातेमी मशोक्कीन। इजीकीएल १०:१२ ४ परमप्रभु यावे आ पर्वम खोइक्तीक चिनु खोंइसीन। तन्न इन थुंम खोइक्तीक चिनु खोंइसीन। गे यहूदा डा मुरपुकी नु यरूसलेममी बाक्ब वोंइशमुरपुकी, मो मपाइतीनी हना, इन मरिम्शो पतीके आं गाइक्चा मी खोदेशो पा ब्रशा गूब। मिनु सुइम काप्ने मचाप्चा डा पा मेकोमी जेप्ब” देंत। येरमीया ९:२५; ब्यवस्था १०:१६; रोमी २:२९; कलस्सी २:११; येरमीया ६:७,१०

उत्तर रे श्येत जाक्शो

५ परमप्रभु यावेमी “यहूदामी शेंदीन। मिनु यरूसलेमम उरदी पने। गे रागी नेल्लेमी तुराही तपीन। ठेयब सेंदा पा ‘नेल्ल गुम्य। मिनु गो ठेयब गारो हिरशो सहरमी प्रोक्य’ ६ सियोन गे लचा कली छेदर क्युक्कीन। ब्रोंइचा आ पर्वम देश मपथु रीब पा प्रोकशा लने। मारदे हना गो उत्तर रे ठेयब श्येत नु खतम दुम्तीके चाक्नुड। येरमीया १:१४ ७ गुप्स का आ पुक्खी रे गूशा, जाक्शो बाक्ब। रागी रागी कली खतम पोक्ब का गूब। मेको आ बाक्तीक रे गूशा, इन रागी कली मुर मबाक्तीके सेल्ब। इन सहर डा खिं नेल्ल ब्रेत्नीम। मेकेर मुर बाक्ने मचाप्नीम। येरमीया २:१५; येरमीया ५:६; येरमीया २५:३८; येरमीया ४९:१९; येरमीया ५०:४४ ८ मोपतीके अरन्डी फेक्शा रोंका पने। मिनु डाक्कीन” देंत। मारदे हना परमप्रभु यावे आ हिंचा डा पा गाइशो इं रे मयाक्सीशो बाक्ब। येरमीया ६:२६

९ मिनु परमप्रभु यावेम “मेको नाक्ती पिप नु हुकुम पाइब नेल्ल आन थुं लुकच लाइब। चढेबपुकी हिंशा ग्येत्थ लुकच दुम्नीम। मिनु परमप्रभु यावे आ लोत्र पाइबपुकी ग्रीचोक पा हिंनीम” देंत। १० मिनु गो “परमप्रभु, ए परमप्रभु यावे, गो आंइ शुरमी तरवार जाक्मेनु यो, गे ‘इन थुं नाइशशा बाक्कीन’ दे गे एको मुर नु यरूसलेम कली मरिम्शो पा जोल पाइशो बाक्तीनी” देंती। येरमीया ६:१४

११ परमप्रभुमी “मेना मार लोत्र पाइनीम देंशा हना ‘एको मुर नु यरूसलेम कली गोरशो रागी डा डांडा रे होश फश आं प्रुडग मुर आन बाक्तीक जाक्ब। तन्न मेको फशेम क्राप्चा यो मदुम्ब, हारचा यो मदुम्ब। १२ मेको फशेम मेको पने मचाप्ब। मारदे हना मेको शुश बोल्यो फश गिवार बाक्ब। मिनु गो मेको आन कली निसाफ पतीक लोत्र पाइनुडमी। १३ कोव्रडीन, मेको गोस्स खोदेशो पा गाक्शो बाक्ब। मेको आ बग्गी फश गिवार खोदेशो पा जाक्नीम। मेको आ शारा ककाकुली आन क्येडा रीब पा दोरनीम। आबी, गो खतम दुम्तय’ दे लोत्र पाइनीमी” देंत। १४ मिनु परमप्रभु यावेम “ए यरूसलेम, गे पाप रे ब्रोंइचा तचा कली इ थुं इ परमप्रभु यावे कली मटितीके रे चिक्सो। गेना सम्म इ मरिम्शो मिम्तीक इ थुंम बाक्चा गेनेवे? येरमीया ६:८; यसैया १:१४ १५ दान रे सेंदा कामी ‘एफ्राइम डांडा रे खतम दुम्तीके जाक्ब’। १६ रागी रागी डा मुर आन कली एको लोत्र पावो। एक जाक्तेक्म। यरूसलेम कली डोन रागी रे सहर पुम्चा कली लडाइ पाइब जाक्शो बाक्नीम। मिनु यहूदा डा सहर आन पर्वम लडाइ पा ग्रीनीमी। १७ मेकोपुकी रू खाल पाइक्बपुकी खोदेशो पा, एर ओंथ नेल्ल हिरशा बाक्शो बाक्नीम। मारदे हना मेकेर डा मुरपुकी आं कली काइ मटीब बाक्नीम” दे परमप्रभु यावेमी देंत। येरमीया १:१५; येरमीया ६:३ १८ मिनु परमप्रभु यावेमी “इ दूली लां गाक्तीके नु इ पतीके इ कली मोदेशो दुम्शो बाक्त। इ सजाइ मेकोन बाक्ब। मेको शुश कशो बाक्ब। मिनु मेकोमी इ थुं खाइक्पाइक्तु” देंत।

१९ मिनु गो हिंती, हिंती। गो श्येत जशा हुकयी पाइनुड। आं लुडगीर खाइशशा, तुक तुक पाप्तु। गो सिक्सी पा बाक्ने मचाप्नुड। मारदे हना गो तुराही ताप्शो नेंता। मेको लडाइ डा रेयके बाक्ब। २० खतम दुम्तीक तार खतम दुम्तीक जाक्ब। रागी नेल्ल मुर मबाक्तीक दुम्त। आं ताम्बु नु फारतीक वा नेल्ल याम काम खतम दुम्तेक्म। २१ गो गेना सम्म लडाइ डा छेदर तचा माल्नुडा? मिनु गेना सम्म तुराही ताप्शो नेंचा माल्नुडा? २२ आं मुर मूर्ख बाक्नीम। मेकोपुकीमी आं कली मतुइक्नीम। मेको निप्स मपाइशो आल बाक्नीम। मेको आन के रुपतीक मबाक्ब। मेको मरिम्शो पचा कली जोक्ब बाक्नीम। तन्न रिम्शो पस मजोक्नीम। यसैया २७:११

२३ मिनु “गो रागी कली कोव्रता। मेको मारेइ मबा। मिनु मेकेर नेल्ल श्येत्थ बाक्त। मिनु सरीड गे कोव्रडुनु, मेकेर मारेइ छेडछेड मबाक्म। उत्पत्ती १:२ २४ मिनु गो डांडा आन कली कोव्रडुनु, मेकोपुकी खिंखि पशो बाक्तेक्म। पहाड नेल्ल एर ओंथ हिम्सीशो बाक्तेक्म। २५ मिनु गो कोव्रडुनु, सुइ मबाक्शो बाक्त। सरीड डा चिक्ब नेल्ल बेरशा प्रोक्ने थुम्शो बाक्तेक्म। २६ मिनु कोव्रडुनु, रिम्शो खप बाक्शो रू नेल्ल गोरशो रागी दुम्तेक्म। मिनु मेकेर डा सहर नेल्ल ब्रेशो बाक्तेक्म। मोदेशो पा परमप्रभु यावेमी आ शुश गाइक्तीकेमी पाप्तु” देंती। २७ मिनु परमप्रभु यावेम मार, देंत देंशा हना “रागी नेल्ल मुर मबाक्तीके दुम्त हना यो, गो मेको नेल्ल मक्याम्नुडमी। येरमीया ५:१८; येरमीया १०:२४; येरमीया

१८:३-८; आमोस ९:८ 28 मोपतीके रागीम रोंका पचा माल्ब। मिनु सरीड छिडछिड दुम्चा माल्ब। मारदे हना गो लोव पाता। गो डोंइती मिम्ताकड। आं थुं मलेप्ब। आं थुं महिरब।

29 शारा डोइक्बपुकी नु लिब्रा आप्ब आन सेंदा नेंशा, सहर नेल्ल डा मुरपुकी प्रोक्शो बाक्नीम। मिनु मेको ब्वाकीम प्रोक्शा खुइक्नीम। का निक्शी फुल्लु तार डोइश्शा लाइनीम। सहर नेल्ल प्रोंइशो बाक्नीम। मेकेर सुइ मबाक्नीम। 30 गे गोरशो सेल्चा पुंडसीशो रागी मार, पना पन बाक्डे? गे लल वाम ग्योम्सीशा, सुन के गहना पांडसीशा, आंम कली ग्योम्सीशो आ अर्थ मार, बाक्बा? गे मारदे गाजल खेक्सीशा इ मिक्च ठेयब सेल्नेवे? आंम कली दारशो सेल्चा मोशान बाक्ब। इ कली दाक्ब मुरपुकीम इ कली ग्रंग्रा दिश्शो बाक्नीम। इ कली साइक्चा माल्शो बाक्नीम। 31 गो सुत्केरी रोइ पशो मीश मुर आ सेंदा खोदेशो नेंता। मेको डोंइती डा आल थिचा चिक्शो मीश मुर आ सेंदा खोदेशो बाक्त। सियोन आ तमीमी आ गुइ दिंशा आ सास कीशा ‘आबी, आं कली साइक्ब आन डोंइती थाइनुड’ देंत” दे परमप्रभु देंत।

5

मुर का यो रिम्शो मबाक्नीम देशो

1 परमप्रभुमी “यरूसलेम डा लां आ एर ओथ कोव्रशा गाक्को। नेल्ल कोव्रशा इ तशो नेल्ल ब्रेक्तो। आ लाडगा मेर माल्शा कोव्रडो। मिनु मेकेर ठीक गेय पाइब नु थमा लोव माल्ब मुर का यो थित्तीवी हना, गो यरूसलेम कली माफ गेनुड। उत्पत्ती १८:२२-३२ 2 मेकोपुकीमी ‘परमप्रभु यावे ब्रोंइशा बाक्शो खोदेशो पा’ दे कसम जाइनीम। मो हना यो मेकोपुकीमी जोल लोव पाइनीम” देंत। येरमीया ४:२ 3 मिनु “परमप्रभु यावे, गे थमा लोव तचा ममाल्नीनी डा? गे मेको आन कली तुप्तीनी। तन्न मेकोपुकी मखाइक्म। गे मेको आन कली खतम सेल्तीनी। तन्न मेकोपुकीमी इन देशो पचा मबित्नीम। मेकोपुकीम आन कुल फुल्लु क्येडा यो खकटा सेल्तेक्म। मेकोपुकी लेशशा जाक्ने मबिस्सम। येरमीया २:३०; येरमीया ७:२८; येरमीया ९:२; यसैया ४८:४ 4 मेकोपुकी दा प्रुडग ला बाक्नीम। मेकोपुकी मूर्ख बाक्नीम। मारदे हना मेकोपुकीम परमप्रभु यावे आ लां मतुइक्नीम। आन परमप्रभु आ अरेशो मतुइक्नीम। 5 गो शुश क्येट थीब मुर आन बाक्तीके लशा, मेको आन कली लोव पाइनुड। मेकोपुकीम थमा पा परमप्रभु यावे आ लां, आन परमप्रभु आ अरेशो यो तुइक्नीम” देंती। तन्न मेकोपुकी खाल का डा दुम्शा, जुवा जिक्शो बाक्तेक्म। मिनु डोरी यो प्रोइश्शो बाक्तेक्म। येरमीया २:२०

6 मोपतीके परमप्रभुमी “ब्वाकी डा गुप्स कामी मेको आन कली ग्राम्शा साइक्ब। गोरशो रागी डा फर कामी मेको आन कली खतम सेल्ब। जोइ का मेको आन सहर कोव्रना कोव्रन बाक्शो बाक्ब। सु मेकेर रे गूबा, मेकोमी मेको कली क्राइश्शा चोकटा लाम्टा सेल्ब। मारदे हना मेकोपुकी शुश हेंथे गाक्ब बाक्नीम। मेको आन मटितीके ठेयब बाक्ब” देंत। येरमीया ४:७

7 मिनु परमप्रभु यावेम “गो इन कली दोपा माफ गेने चाप्नुडा डा? इन आलपुकीम आं कली प्रोंइतेक्म। मिनु परमप्रभु आ नेंम ममाइ, अर्को देवी देवता आन नेंमी कसम जाम्तेक्म। गो मेको आन माल्शो नेल्ल खाप्ता हना यो, मेकोपुकीम तेल्लेम पाम्तेक्म। मिनु तेल्लेम आन खिंम क्राक्शी चोक्शी दुम्तेक्म। 8 मेकोपुकी थाम्पा दोम्शो, गेय मपाइब शारा खोदेशो बाक्नीम। मेको आंम नेक्था डा मुर आन मीश आन पबर्म ग्रीनीम। इजीकीएल २२:११ 9 मार, गो एको आ पबर्म मेको आन कली सजाइ मगेनुडमी डा? मार, गो ओदेशो रागी डा मुर आन कली क्येक्क मलेत्नुडमी?” दे परमप्रभु यावेम देंत। येरमीया ५:२९; येरमीया ९:८

10 परमप्रभु यावेम आं कली “गे मेको आन अडगुर बोट दिम्शा ताइश्शा पावो। तन्न नेल्ल श्येत्थ मपोक्को। मेको आ राशी इत्तो। मारदे हना मेको परमप्रभु यावे आ मुर मनम। 11 मारदे हना इस्राएल नु यहूदा डा मुरपुकीम थमा पा प्रोंइतीमी” देंत। 12 मेकोपुकीमी परमप्रभु यावे आ पबर्म “मेको मतुइक्नीकी। मेकोमी मारेइ मपाइब। गो मारेइ मरिम्शो मताइनीक। गो लडाइ नु अन्काल मताइनीक। 13 परमप्रभु यावे आ लोव पाइबपुकी फश बाक्नीम। मारदे हना परमप्रभु यावे आ लोव मेकोपुकी नु मबा। तन्न मेको लोव मेको मो देंब आन कली दुम्ब” देंतेक्म।

14 मोपतीके परमप्रभु यावे, मुर नेल्ल आन परमप्रभुमी मार देंत देशा हना “मेकोपुकीमी मोदेशो लोव पतीके, गो आं लोव इ शोव्रम मी खोदेशो सेल्नुड। मेको मुर आन कली शी सेल्नुड। मिनु मेको मीम नेल्ल आन कली दाक्ब सेल्नुडमी। 15 ए इस्राएल, इन कली खतम सेल्चा कली डोन रागी डा मुर चाक्नुड। मेको रागी डा मुरपुकी शुश बोल पाइश्शो बाक्नीम। आन रागी साइ डोंइती डा बाक्ब। गे मेको मुर आन लोव मतुइक्नीनी। आन ब्वाक्शो मरुप्नीनी।

येरमीया ६:२२; यसैया २८:१ 16 मेको आन ब्रा कुरतीके रोकशो तुरस खोदेशो बाक्नीम। मेको मुर नेल्ल थम सक्ति पाइशो लडाइ पाइब बाक्नीम। 17 मेकोपुकीमी इन खुपशो अन्न नु जचा थोवक नेल्ल नेक्नीम। मिनु इन तमी तौ नेल्ल आन कली यो लाइक्नीम। मेकोपुकीमी इन क्यारश भेडा नु बी ब्यफ नेल्ल नेक्नीम। मेकोपुकीमी इन अडगुर नु फोवशी नेल्ल नेक्नीम। मिनु इन थमा सुइशो बोल्यो गारो हिरशो सहर नेल्ल तरवारम क्याम्नीम।

18 मो हना यो, गो मेको नाक्ती इन कली नेल्ल मसाइक्पाइक्नुड। येरमीया ४:२७ 19 मिनु इन मुरपुकीम 'मारदे इं परमप्रभु यावे, इं परमप्रभुमी इं कली ओदेशो पवा?' दे हिलो पाम्तेक्म हना, गो मेको आन कली 'गेपुकीम दोपा आं कली प्रोइशा, आंम रागीम अरु देवी देवता आन कली पूजा पनी, मोपा मुल गेपुकीम इन मतुइशो रागीम अर्को रागी डा मुर आन गेय पाइनीनी' देशो बाक्ब माइक्मी। येरमीया १६:१०-१४

20 याकूब आ मुर आन कली एको लोव्र माइक्मी। यहूदामी एको लोव्र ठेयब सेंदा पा नेल्ल आन कली नेपाइक्मी। यसैया ६:९-१०; मत्ती ८:१८ 21 गे मूर्ख नु मिम्तीक मपाइशो मुरपुकी, एको लोव्र नेनीन। इन मिक्ची बाक्ब, तन्न मताइनीनी। इन नोफा बाक्ब, तन्न मनेनीनी। 22 मार, गे आं कली मान पा हिंचा ममाल्नीनी डा? गे आं डोंइती खिंखि मपाइनीनी? गो समुन्द्र आ सांद कली बाल्वा वोइक्ता। आ छाल बोक्तेक्म हना यो, मेको कली खाक्ने मचाप्नीम। मेकोपुकी शुश बोल पाम्तेक्म हना यो, मेको कली लाक्ने मचाप्नीम। ठेयब रेयके पाम्तेक्म हना यो, लाक्ने मचाप्नीम। बजन संग्रह १०४:९ 23 तन्न मेको मुर आन थुं खकटा नु काइ मटीब बाक्ब। मेकोपुकी हिरशा लाम्तेक्म। 24 मेकोपुकीमी 'गेपुकी परमप्रभु यावे, इं परमप्रभु कली मान पा हिंय। मेकोमी माल्ची ना रेउ गेब। मेकोम बर्खा नु हिंउद डा रेउ गेब। मिनु अन्न रिक्शा खुपची ना डा नाक्ती गेब' मदेंम" देंत। ब्यवस्था ११:१४ 25 परमप्रभु यावेमी "इन मरिम्शो पशोम एको नेल्ल मरिम्शो दुम्त। इन पाप आ पर्बम गे मेको रिम्शो मताइनीनी। यसैया ५९:२ 26 आं मुर आन दातेमी मरिम्शो पाइब मुर बाक्नीम। मेकोपुकी चिक्ब साइक्ब मुर खोदेशो पा, बाप्शा बाक्शो बाक्नीम। मेकोपुकीम मुर आन कली ग्याइक्चा कली ब्वारद दाइक्नीम। 27 चिक्बीम ब्रीशो ओगील खोदेशो पा, मेको आन खिं खुइ पशो थोवकम ब्रीशो बाक्ब। मोपतीके मेको ठेयब मुर नु शुश क्येट थीब दुम्तेक्म। 28 मेकोपुकी दोम्शा लल जिशो नु शोंप पाइशो दुम्शो बाक्नीम। मेको आन परमप्रभु यावे आ अरेशो मटितीके कली तेक्तीक मारेइ मबाक्ब। मेकोपुकीम रोम रोइक्च आन कली रिम्शो दुम्ल, दे मेको आन कली ठीक निसाफ मगेनीम। मेकोपुकीमी क्येट मथीब आन कली वारच पा ठीक निसाफ मपाइनीम। प्रस्थान २२:२१; यसैया १:१७ 29 मार, एको आ पर्बम, गो मेको आन कली सजाइ मगेनुडमी? मिनु गो एको रागी डा मुर आन कली क्येक्क मलेत्नुडमी?" दे परमप्रभु यावेमी देंत। येरमीया ५:९

30 मिनु परमप्रभु यावेमी "एको रागीम ग्रांरा दिचा डा नु शुश हिंचा डा श्येत दुम्त। 31 परमप्रभु यावे आ लोव्र पाइबपुकीम जोल पा लोव्र पाइनीम। दोपा परमप्रभु यावे आ लोव्र पाइबपुकीम जोल पा लोव्र पाइनीमी, मोपा चढेबपुकीम मुर आन कली हुकुम पाइनीम। मिनु आं मुरपुकी चहिं मोदेशोन दुम्चा दाक्नीम। तन्न नोले डा नाक्ती मार, पाइनीनी?" देंत। इजीकीएल १३:६

6

यरूसलेम कली पुम्शो

1 परमप्रभु यावेमी "बेन्यामीन आ आलपुकी ब्रोंइशा बाक्चा कली यरूसलेम रे प्रोक्कीन। तेकोहा सहरमी तुराही ताप्पीन। बेथ-हक्केरेम तार चिन्ड कोइशा वोतीन। मारदे हना उत्तर रे मरिम्शो पतीक नु खतम दुम्तीके यिशो बाक्ब। आमोस १:१; येरमीया १:१४ 2 सियोन सहर दारशो योव्रतीके खोदेशो बाक्ब। तन्न सियोन आ तमी क्याम्चा पुंइसीब। 3 गोठला आन हुल सुन्दा मेको नु लडाइ पचा कली जाक्नीम। मेकोपुकीमी आन ताम्बु आ एर ओंथ कीनीम। मिनु नेल्लेम मेको आन हुल योव्रशा खतम सेल्नीम" देशो बाक्ब। येरमीया ४:१७ 4 मिनु मेकोपुकीम "मेको नु लडाइ पचा कली ठीक दुमीन। बोक्कीन। गोपुकीम नाक्त उइक्थ दुम्मेनु, मेको कली लडाइ तोय। नाक्ती लाक्ना लाक्न बाक्ब। नाक्दो डा वांकु लाइशो दुम्ना दुम्न बाक्ब। 5 बोक्कीन। गो नाक्दो मेको कली लडाइ तोय। मिनु मेको आ दरवार प्रेय्य" देंनीम। 6 मुर नेल्ल आन परमप्रभु यावेमी "मेको आ रवापुकी क्योरशा तिमीन। मिनु यरूसलेम डा गारो डोइक्तीक सेलीन। मेको सहर कली सजाइ गेचा माल्ब। मेको सहर मरिम्शो पतीकेम ब्रीशो बाक्ब। 7 इनारम दोपा आ ब्वाक्कु बारपाइक्बा, मोपा मेकोमी आ परमप्रभु यावे आ अरेशो मटितीके बारपाइक्ब। मेको आ आगाम काइ मरिम्शो पतीक नु मारेइ मारेइ खतम पोक्तीक आ पर्बम लोव्र नेसीब। मेको आ रोइ नु आ सेल्शो गार गेना हना यो

आं डोंइती बाक्नीम। 8 गे यरूसलेम, एको इ कली अरेशो मपाप्तीवी हना, गो इ कली तशा ग्रांग्रा दिशा प्रोंडनुड। गो इ कली गोरशो नु मुर मबाक्शो सेल्लुड” देंत।

9 मुर नेल्ल आन परमप्रभु यावेमी मार देंत, देशा हना “गे अडगुर रिम्शो पा सिला पशो खोदेशो पा इस्राएल डा लीशो मुर आन कली सिला पने। अडगुर सेक्ब मुर खोदेशो पा राशी ग्याइश्शा, फल सिला पने।

10 गो सु कली लोव्र पा हिंच कोंइदु? आं लोव्र सुम नेंबा? मेकोपुकीम नेंने मचाप्नीम। मेको आन नोफा सुशो बाक्नीम। परमप्रभु यावे आ लोव्र आ पबर्म गाइक्नीम। मेको नेंचा मदाक्नीम” देंत। येरमीया ४:४; प्रेरित ७:५१ 11 तन्न गो परमप्रभु यावे आ गाइक्तीकेम ब्रीशो बाक्नुड। गो मेको हेरा तेक्ने मचाप्नुड। मिनु मेकोमी “मेको लां मेर गाक्ब आल आन तार मोतो। बुक्शा बाक्शो ठिटा आन तार मोतो। मीश वोंइश निम्फा लाइक्चा पुंडसीनीस। खाल्पा नु खूशो लाइक्चा पुंडसीनीम। 12 मारदे हना गो आं गुइ मेको रागीम बाक्ब आन तार दिनुड, मेको आन खिं अर्को आन के दुम्नीम। आन रू नु आन मीश यो अरु आन के दुम्नीम” दे परमप्रभु यावेम देंत।

13 परमप्रभु यावेमी “नेल्ल क्येडा आइक्च मुर रे नेल्ल क्येडा ठेयब सम्म ठीक पा मचेम्शो क्येट तचा कली शिंम दुम्शो बाक्नीम। परमप्रभु यावे आ लोव्र पाइब रे चढेब सम्म नेल्ल जोल पाइब दुम्शो बाक्नीम। येरमीया ८:१०-१२; इजीकीएल १३:१०-१६; १थिस्सलोनिकी ५:३ 14 मेकोपुकीमी आं मुर आन कली ममिम्थु, आन गार सापाइक्खु पशो बाक्नीम। मेकोपुकीमी थुं नाइक्तीक मबाक्त हना यो ‘नाइसीन, नाइसीन’ देंनीम। 15 मेकोपुकीमी मुने दोक्चा डा गेय पाम्तेक्म। ग्रांग्रा दिशो गेय पाम्तेक्म। तन्न मेकोपुकी मुने मदोक्म। मुनेम लल जिचा देशो मार, बाक्बा, दे मतुइक्तेम। मोपतीके साइक्चा पुंडसीशो आन दातेमी साइक्चा पुंडसीनीम। गो मेको आन कली सजाइ गेडानु, मेको खतम दुम्नीम” दे परमप्रभु यावेमी देंत। 16 मिनु परमप्रभु यावेम मार, देंत देशा हना “लां ब्रातीकेम राप्शा कोव्रडीन। माइत लां आ पबर्म हिल्लो पने। मेको रिम्शो लां ते बाक्बा, दे हिल्लो पने। मिनु मेको लांमीन गाक्कीन। मिनु इन थुं नाइक्चा ताइनीनी। तन्न मेकोपुकीम ‘गो मेक मगाक्नीकी’ देंनीम। मत्ती ११:२९ 17 गो इन कली खाल पाइबपुकी योव्रतामी। मिनु गो इन कली ‘तुराही ताप्शो नोफा दाइश्शा नेनीन’ देंती। तन्न मेकोपुकीम ‘गो मनेनीकी’ देंतेक्म। 18 मोपतीके गे रागी रागी डा मुर नेनीन। बुक्तीक डा मुर नेल्लेमी मेको आन कली मार, दुम्बा, दे तुइक्तीन। 19 रागी नेल्ल नेनीन। गो एको मुर आन कली ठेयब श्येत चाक्नुड। मेको श्येत आन पशो आ पा डा बाक्ब। मारदे हना मेकोपुकीमी आं पचा देशो लोव्र मपामे। मिनु आं शेंशो लोव्र काइ मटीम। यसैया १:२ 20 गो शेबा रे चाक्शो धूप ममाल्लुड। डोन रागी रे चाक्शो बिक्च यो ममाल्लुड। गो इन चोशा चढेशो मब्राइनुड। गो इन क्योरशा चढेशोम मग्येरनुड” देंत। भजन संग्रह ४०:७; यसैया १:११-१५ 21 मोपतीके परमप्रभु यावेम मार, देंत देशा हना “कोव्रडीन, गो एको मुर आन डोंइती दाइल पाइक्तीके थोव्रक वोइक्नुड। मिनु आम आफ, आलपुकी कालेम नु आन नेक्था डा मुर नु आन वारच कालेम खतम दुम्नीम” देंत।

22 परमप्रभु यावेमी “कोव्रडीन, उत्तर डा रागी रे हुल का मुर जाक्नीम। रागी आ सुर रे ठेयब रागी डा मुर बारशा जाक्नीम। येरमीया ५:१५; ब्यवस्था २८:४९ 23 मेकोपुकी लिब्रा नु तरवार शेशा ठीक दुम्शो बाक्नीम। मेकोपुकी मरिम्शो पाइब नु काइ शिशी मपाइब बाक्नीम। आन रेयके समुन्द्र ग्रीशो खोदेशो बाक्ब। मेकोपुकी शारा डोइश्शा सियोन आ तमी, इ कली लडाइ तोचा कली ठीक दुम्शो बाक्नीम” देंत। येरमीया ५०:४२

24 गोपुकीम मेको आन पबर्म मारेइ मारेइ लोव्र नेंतक। मिनु आंइ गुइ खोइली योक्त। गो शुश हितक। गो सुत्केरी रोइ पशो मीश मुर खोदेशो दुम्तक। 25 “रू मेर मलने। लां मेर मगाक्कीन। मारदे हना इन जोरी सत्रु आन गुइमी तरवार बाक्ब। मिनु एर ओंथ नेल्ल शुश हिंतीक बाक्ब” देशो नेंतक। येरमीया २०:३

26 मिनु “आं श्येत जाइब मुरपुकी अरन्डी फेक्सीन। मिनु इन पिया तारी पुलु फुंडसीन। का ला बाक्शो आल बेक्शो आ पबर्म खोदेशो पा रोंका पने। मारदे हना आंइ कली साइक्ब याम काम जाक्ब” देंत। येरमीया ४:८; आमोस ८:१०

27 परमप्रभु यावेमी “गो इ कली आं मुर आन पशो नाक्ब नु रिम्शो सेल्ब सेल्लतन। मोपा गे मेको आन पशो तुइश्शा, मार, पाइनीमी, दे नाक्ने चाप्नेवे। 28 मेको नेल्ल आन थुं खकटा बाक्शा, काइ मटीब बाक्नीम। मेकोपुकी जोल पा सांकछी बाक्ब नु गाक्नीमी। मेकोपुकी कांसा नु फलाम खोदेशो खकटा बाक्नीम। मेको नेल्ल मरिम्शो बाक्नीम। इजीकीएल २२:१८ 29 मुरुमी यपाइक्चा कली भाटी कीना कीन मी ठेयब सेल्लनीम। तन्न यपाइक्तीक गेय मोशा दुम्त। मारदे हना परमप्रभु यावे आ अरेशो मटीब आन कली तिल्शो बाक्नीम। 30 तन्न मेको आन कली मरिम्शो तिल्शो चांदी, दे नें वोइक्नीम। मारदे हना परमप्रभु यावेम मेको आन कली तिल्शो बाक्त” देंत। १राजा ९:७

7

येरमीया कली लोव्र पपाइशो

येरमीया २६:-

1 परमप्रभु यावेम येरमीया कली, 2 “गे आं खिं डा लाप्चोम राप्शा ‘गे यहूदा डा मुर नेल्ल परमप्रभु यावे आ लोव्र नेनीन। गे परमप्रभु यावे कली ठेयब सेल्चा कली एक जाक्ब यहूदा डा मुर परमप्रभु यावे आ लोव्र नेनीन’ देनो” देंत। 3 मुर नेल्ल परमप्रभु यावे, इस्राएली आन परमप्रभुमी मार, देंत देशा हना “इन गाक्तीक लां नु इन पशो नेल्ल रिम्शो सेलीन। मो पाइतीनी हना, गो गेपुकी नु एकेर बाक्नुड। येरमीया १८:११; येरमीया २५:५; येरमीया २६:१३; यसैया १:१६ 4 मिनु ‘एको परमप्रभु यावे आ खिं बाक्ब। एको परमप्रभु यावे आ खिं बाक्ब। एको परमप्रभु यावे आ खिं बाक्ब’ देशो जोल लोव्र थमा मसुतीन।

5 गेपुकीम थमा पा इन गाक्तीक लां नु इन पशो रिम्शो सेलतीनी हना, गे थमा पा अरु मुर आन कली ठीक नु रिम्शो पाइतीनी हना, 6 गेपुकीमी अर्को रागी डा मुर आन कली, रोम रोइक्च नु आन वोंइश बेक्शो मीश मुर आन कली मदिप्तीनी हना, दोस मताइब मुर आन कली मसाइक्तीनी हना नु आंम इन कली श्येत सेल्चा, दे देवी देवता आन नोले मखोइक्तीनी हना, येरमीया ५:२८ 7 गो गेपुकी नु एक बाक्नुड। साइ डोंइती इन किकी पिपी आन कली गेशो रागीम गेना हना यो गेपुकी नु बाक्नुड।

8 तन्न गेपुकी दा जोल लोव्र कली थमा सुइक्तीनी। मेको नेल्ल मोशा बाक्नीम। 9 गेपुकीम खुइ पाइनीनी, मुर साइक्तीनी, मुर आन मीश नु इप्नीनी, जोल पा कसम जाइनीनी, बाल देवता कली पूजा पाइनीनी नु इन मतुइशो देवी देवता आन नोले खोइक्तीनी। होसे ४:२ 10 मो हना यो आं डोंइती आं नें बाक्शो खिंम राप्शा बाक्तीनी। आं डोंइती राप्शा ‘गे रिम्शो बाक्तीनी’ देनीनी। मेकेर रे लेशशा इन ग्रांग्रा दिचा डा गेय लेंशा पाइनीनी। 11 मार, आं नेमी बाक्शो आं खिं इन डोंइती रोइक्ब आन बाक्तीक खिं दुम्मे? गो यो इन कली कोव्रना कोव्रन बाक्नुड। मत्ती २१:१३ 12 मुल आं बाक्तीक शिलो लने। गो मेकेर डोंइती आं नेमी बाक्तीक सेल्शो नड। मिनु गो इस्राएल डा मुर आन कली आं अरेशो मटितीके मार पदु? मेकेर लशा कोव्रडीन। यहोसु १८:१; १सामुएल ४:४,१२; भजन संग्रह ७८:६० 13 मिनु गेपुकीम एको नेल्ल पना पन बाक्तीनु, गो इन कली गेना हना यो लोव्र पाता। तन्न गेपुकीम मनेनी। गो इन कली ब्रेत्ताक्तीनी, तन्न गेपुकीम लोव्र मलेत्तीनी। येरमीया २५:३; यसैया ६५:१२ 14 मोपतीके गो मेको आं नेम सेल्शो खिं कली नु इन किकी पिपी नु इन कली गेशो रागी कली शिलो खोदेशो सेल्नुड। गे मेको खिं कली थमा सुइक्तीनी। 15 मिनु गो इन कली आं डोंइती रे गुंइनन्नी। गो इन कली, इन लोक्ब एफ्राइम आ आल नेल्ल आन कली खोदेशो पा खेरनन्नी” दे परमप्रभु यावेमी देंत। २राजा १७:१८,२०,२३

16 परमप्रभु यावेम आं कली “गे मेको मुर आन पबर्म मपुनो। मेको मुर आन पबर्म मारेइ मपुनो। मेको आन पबर्म आं कली लोव्र मपावो। मारदे हना गो इ पुंइशो मनेनुड। येरमीया ११:१४; येरमीया १४:११; येरमीया ३७:३; येरमीया ४२:२; प्रस्थान ३२:१-११; १सामुएल १२:२३ 17 गे मेको यहूदा डा सहर नु यरूसलेम डा लां मेर पशो मतवी? येरमीया १९:१३; येरमीया ४४:१७-१९; यसैया ६:५,११ 18 मेको आन आलपुकीम शी खुप्नीम। आन आफपुकीम मी मुइक्तीम। मिनु मीश मुरपुकीम सरीड डा पिपीम कली बटुक चोचा कली फस नीनीम। अरु देवी देवता आन कली तूचा थोव्रक चढ़ेनीम। आं कली गाइक्पाइक्चा कली मो पाइनीम। 19 मिनु मार, मेकोपुकीमी आं कली गाइक्पाइक्चा कली मो पशो मनमी डा? मिनु मार, मेकोपुकीमी श्येत जचा कली मो पशो मनमी डा?” देंत 20 मोपतीके परमप्रभु, परमप्रभु यावेम “आं गाइशो नु आं चुरशो मेकेर मोइक्चा माल्ब। मुर, बी ब्यफ, क्यारश भेडा, रू डा रवा नु रागी डा मारेइ मारेइ आन तारी मोइक्चा माल्ब। मेको मकाप्ब मीम नेल्ल दाक्ब” दे परमप्रभु यावेमी देंत।

21 मिनु मुर नेल्ल आन परमप्रभु यावे, इस्राएली आन परमप्रभुमी मार देंत देशा हना “इन चोशा चढ़ेतीकेम क्योरशा चढ़ेतीके तेम्दीन। मिनु मेको श्ये ब्वने। १सामुएल १५:२२; भजन संग्रह ५०:७-१५; होसे ८:१३; मीका ६:६-८ 22 मारदे हना इन किकी पिपी आन कली इजीप्त रे गुंइशा चाक्शो नाक्ती, गो मेको आन कली चोशा चढ़ेतीक नु क्योरशा चढ़ेतीक आ पबर्म लोव्र मपड। मिनु मेको आन कली मअरेडमी। 23 तन्न गो मेको आन कली मार अरेतीक का गेतामी देशा हना ‘आं देशो टिने। मिनु गो इन परमप्रभु नड। मिनु गे आं मुर दुम्नीनी। गो इन कली तेको लां लचा, दे अरेनुडा, मेको लां गाक्कीन। मो पाइतीनी हना, इन कली रिम्शो दुम्ब’ देंती। येरमीया ११:४; येरमीया २४:७; येरमीया ३०:२२; येरमीया ३१:१,३३; येरमीया ३२:३८; लेवी २६:१२; इजीकीएल ११:२०; इजीकीएल १४:११; इजीकीएल ३४:३०; इजीकीएल ३७:२७ 24 तन्न मेकोपुकीमी आं अरेशो मटीम। आं लोव्र मनेनेम। मेको आन खकटा थुं डा

मरिम्शो पतीकेमी आंम दला दाक्स पांम्तेकम। आन ची हिरताकम, आं कुल गे मकोवयीमी। येरमीया ११:८; यसैया ६५:२ 25 इन किकी पिपी इजीप्त रे गूशा जाकमा रे मुल सम्म नाक्त कित कित आं गेय पाइब, आं लोव्र पाइब नेल्ल आन कली मेको आन बाक्तीके सोइक्ताकडमी। येरमीया २५:४ 26 तन्न मेकोपुकीमी आं लोव्र मनेनेम। आं लोव्रमी आन नोफा मदाइक्तेम। मटीब ला दुम्तेकम। मिनु मेकोपुकीमी आन किकी पिपी आन क्येडा यो शुश मरिम्शो पांम्तेकम। येरमीया १६:१२

27 मिनु गे मेको आन कली एको लोव्र नेल्ल देंचा माल्नेवे। तन्न मेकोपुकीमी इ लोव्र मनेनीम। गे मेको आन कली ब्रेत्तीनु, यो मेकोपुकीमी इ लोव्र मलेत्नीम। 28 गे मेको आन कली ‘एको परमप्रभु यावे, आन परमप्रभु आ लोव्र मटीब रागी डा मुर बाक्नीम। सजाइ तांम्तेकम हना यो, मरुबेम। मिनु मेको आ पचा माल्ब देंशो मपामे। थमा लोव्र जांम्त। मेकोपुकीम जोल ला पाइनीम। येरमीया ५:१ 29 गे इ चां प्रेक्शा ताइक्तो। मिनु गोरशो डांडा मेर रोंका पा गाक्को। मारदे हना परमप्रभु यावेमी आ कली गाइक्पाइक्ब आन पाला डा मुर आन कली प्रोंइशा तिल्लु’ देनो” देंत। मीका १:३६

मुर साइक्तीक बेंसी

30 परमप्रभु यावेम “यहूदा डा मुरपुकीम आं डोंइती मरिम्शो पशो बाक्नीम। मेकोपुकीमी आं नेम सेल्शो खिंम आन ग्रांग्रा दिशो थोव्रक वोइक्तेकम। मोपा आं खिं ग्रांग्रा दिशो दुम्त। येरमीया ३४:३२; २राजा २१:४-५ 31 मिनु मेकोपुकीमी तोफेथम आन थान सेल्तेकम। मेको हिन्नोम आ तौ आ बेंसी बाक्ब। मेकेर आंम तमी तौ आन कली मीम चोशा चढेम्तेकम। गो मोदेशो गेनायो ममिम्तु, मेको आन कली यो मअरेडमी। येरमीया १९:५-७; येरमीया ३२:३६; लेवी १८:२१ 32 मोपतीके होस पा बाक्कीन। मेको बेंसी कली तोफेथ नु हिन्नोम आ तौ आ बेंसी देंचा प्रोंइनीम। शुश नाक्त रिम्चा ममाल्नीनी। तन्न मुर साइक्तीक बेंसी, दे नें वोइक्नीम। मारदे हना तोफेथमी आन बेक्शो मुर मरिक्थी थिम्नीम। येरमीया १९:६ 33 मिनु मेको मुर आन बेक्शो रां सरीड डा चिक्बपुकी नु रागी डा जन्तु आन कली ब्वतीक दुम्ब। मेको आन कली हिंच कोंइशा, प्रोक्पाइक्ब सुइ मबाक्नीम। येरमीया ९:२१ 34 मिनु गो यहूदा डा सहर नु यरूसलेम डा लां रे थुं नाइश्शा बाक्तीक, ग्येरशो सेंदा नु ग्युम्ली ग्युम्ले आन सेंदा क्याम्नुड। मारदे हना रागी मुर मबाक्तीके दुम्ब” दे परमप्रभु यावेमी देंत। येरमीया १६:९; येरमीया २५:१०; येरमीया ३३:११

8

“मारैइ मारैइ मोशा दुम्नीम” देंशो

1 परमप्रभु यावेम “मेना यहूदा डा पिप आन रुश, सरकार आ गेय पाइब आन रुश, चढेब आन रुश, परमप्रभु यावे आ लोव्र पाइब आन रुश नु यरूसलेममी बाक्ब मुर आन रुश मेको आन तुरसर रे याक्नीम। 2 मिनु मेको रुश नेल्ल, नां, तास्ला नु सोरुल आन डोंइती फ्रचा माल्नीम। मारदे हना मेको मुरपुकीमी मेको आन कली गेय पा शुश दाक्ताकम। मेको आन नोले खोइक्ब दुम्तेकम। मेको आन कली लां कोंइब सेल्शा पूजा पांम्तेकम। मेको रुश आन कली खुप्शा थिम्चा मदुम्ब। मेको खप कली मोव्रल दुम्चा माल्नीम। ब्यवस्था ४:१९ 3 एको मरिम्शो खिं डा लीशो मुर नेल्लेमी, ते प्रोक्पाइक्तामी हना यो, मार देंनीम देशा हना ‘गो ब्रोंइचा क्येडा यो बेक्चा दाक्नीकी’ देंनीम” दे मुर नेल्ल आन परमप्रभु यावेमी देंत।

पाप कली सजाइ

4 गे मेको आन कली परमप्रभु यावेमी मार देंत, देशा हना “मुरपुकी गोल्नीमी। मिनु मार, मेको लेंशा मबोक्नीमी डा? मिनु सुइ लां जांम्शा ग्युरा पेरा गे लमानु, मेकोपुकी लेशशा मजाक्नीमी डा? 5 मो हना यो एको मुरपुकी मारदे ची हिरशा गाक्मा? मारदे मेको नोले शोंइसीना सीन बाक्नीमी? आन मरिम्शो पतीके मप्रोंइथु, लेशशा जाक्ने मबिन्नीम। 6 गो, आं नोफा दाइश्शा नेंनुनु, मेकोपुकीम आं कली ठीक लोव्र मपाइनीम। आन मटिशो आ पबर्म माफ मपुंइनीम। मेकोपुकीमी ‘गो मरिम्शो पाता’ मदेनीम। नेल्ल आन दला दाक्स पाइनीम। मेकोपुकी शारा खोदेशो पा लडाइम दोरनीम। 7 सरीडम बेरब सारसम आ लची ना नु लेत्ची ना तुइक्ब। मिनु ढुकुर, बेल्लुम नु बोकुला आन लची ना नु लेत्ची ना तुइक्नीम। तन्न आं मुरपुकीमी आंम परमप्रभु यावे आ देंशो पतीक लोव्र मतुइक्नीम। यसैया १:३

8 मिनु गेपुकीम दोपा ‘गो जोक्ब तुइक्ब बाक्नीकी। मिनु परमप्रभु यावे आ अरेशो लोव्र गो नु बाक्ब’ देंने चाप्नीनी? थमा पा देंशा हना, सास्त्री आन जोल पा ब्रेक्शोम मेको आन कली जोल सेल्शो बाक्ब। सास्त्री ब्रेक्चा जोक्ब मुर

बाक्नीम 9 जोक्ब तुइक्ब मुरपुकी मुने तोक्चा पुंइसीनीम। मेकोपुकी हिंनीम। मेकोपुकी लाइक्चा पुंइसीनीम। मारदे हना मेकोपुकी परमप्रभु यावे आ लोव्र मटीनीम। मेको आन जोक्तीक तुइक्तीक मार बाक्म माइ? 10 मोपतीके गो मेको आन मीश अरु आन कली नु मेको आन रू लडाइ ग्राब आन कली गेनुडमी। नेल्ल क्येडा आइक्च मुर रे नेल्ल क्येडा ठेयब सम्म ठीक पा मचेम्शो क्येट तचा कली शिम बाक्नीम। परमप्रभु यावे आ लोव्र पाइब रे चढेब सम्म नेल्ल जोल पाइब दुम्शो बाक्नीम। येरमीया ६:१३-१५; यसैया ५६:११ 11 मेकोपुकीमी आं मुर आन कली ममिम्थु, आन गार सापाइक्खु पशो बाक्नीम। मेकोपुकीमी थुं नाइक्तीक मबाक्त हना यो 'नांइसीन, नांइसीन' देंनीम। 12 मेकोपुकीमी मुने दोक्चा डा गेय पाम्तेक्म। ग्रांग्रा दिशो गेय पाम्तेक्म। तन्न मेकोपुकी मुने मदोक्म। मुनेम लल जिचा देंशो मार, बाक्बा, दे मतुइक्तेम। मोपतीके साइक्चा पुंइसीशो आन दातेमी साइक्चा पुंइसीनीम। गो मेको आन कली सजाइ गेनुड। मिनु मेको खतम दुम्नीम” दे परमप्रभु यावेमी देंत। 13 परमप्रभु यावेम “गो, अडगुर सेक्नुड देंडानु बोटम अडगुर मबाक्म। फोव्रशी रवाम फोव्रशी मबाक्म। मेको आन सफा यो सोव्रतेक्म। मेकोपुकी आं गेशो यो रोइक्चा पुंइसीनीम” दे परमप्रभु यावेमी देंत।

14 मुरुमी “गो मारदे एकेर निश्शा बाक्चा। मुर आन कली पुक्शा, गो गारो हिरशो सहर आ आगा मेर प्रोक्य। मिनु मेकेरेन बेक्य। मारदे हना परमप्रभु इं परमप्रभु यावेम इं कली बेक्पाइक्चा कली सोइश्शो बाक्ब। मिनु इं कली बीस ब्वाइश्शो ब्वाक्कु तूचा गेप्टु। मारदे हना गो परमप्रभु यावे कली पाप पाइतय। येरमीया ९:१४ 15 गोपुकीम थुं नाइश्शा बाक्तीक आस पाइतय। तन्न मारेइ रिम्शो मदुम। साचा आ पर्वम रिम्ताक्य। तन्न शुश हिंतीक ला दुम्त” देंतेक्म। येरमीया १४:१९

16 मिनु “दान रे जोरी सत्रु आन शारा आन सोंव सोंव पशो नेंसाक्व। मेको आन शारा आन ग्रीशो आ पर्वम रागी नेल्ल ख्रिख्रि पाइब। मेकोपुकी रागी नु मेकेर बाक्शो मारेइ मारेइ, सहर नु मेकेर बाक्ब नेल्ल आन कली दाक्चा कली जाक्शो बाक्नीम। येरमीया ४:१५ 17 कोव्रडीन, गो इन दातेम बीस पाइश्शो बुस्सपुकी सोइक्नुडमी। मेको बुस्स आन कली मारेइ मन्तर तन्तर मराइब। मिनु मेकोपुकीमी इन कली कोक्नीम” दे परमप्रभु यावेम देंत।

18 मिनु “गो आं ग्येरसीतीक नेल्ल जाम्त। गो आं थुं खाइक्ती। येरमीया ४:१९ 19 श्येत जशो आं मुर आन डाक्शो नेनीन। डोन रागी रे नेनीन। मार, परमप्रभु यावे सियोनम मबाक्शो बाक्बा डा? मेको आ पिप मेकेर मबाक्शो बाक्बा? मारदे मेकोपुकीमी आं कली आन मूर्ति नु आन शोर गाक्शो अर्को रागी डा देवी देवता आन पर्वम गाइक्पाइय्यीमी? 20 बाली नाली रिक्ची ना लाक्तु। बर्खा नुप्त। मो हना यो इं श्येत रे ब्रोइची ना मजा। 21 आं श्येत जशो मुर आ पर्वम गो रोंका पा थुं खाइक्ती। 22 मिनु गिलादमी मारेइ खेक्तीक मबाक्बा? मार, मेकेर इ कली ओरुती पाइब मबाक्बा? मारदे आं श्येत जशो मुर मसामा?” देंत। येरमीया ४६:११

9

परमप्रभुमी लोव्र पशो

1 परमप्रभुमी “आं पिया ब्वाक्कु बुक्तीक दुम्शो हना, नु आं मिक्ची प्रेक्कु बुक्तीक दुम्शो हना, गो नाक्दो नाक्ती डाक्ड वा। श्येत जशो साइश्शो आं मुर आन पर्वम डाक्ड वा। येरमीया १३:१७; लूका १९:४१ 2 गोरशो रागीम मुर आन कली बास बाक्तीक बाक्शो हना, गो आं मुर आन कली प्रोइशा, मेकेर लशा बाक्ड वा। मिनु मेको आन रे डोन लड वा। मारदे हना मेको नेल्ल आन नाता खोइश्शा अरु नु इप्नीम। मेको नेल्ल मरिम्शो हुल का बाक्नीम। 3 मेकोपुकीम जोल पस ला जोक्नीम। मोपा जोल पतीकेमी रागी डा ठेयब मुर दुम्तेक्म। थमा लोव्र पतीकेमी ममाइ। मेकोपुकी मरिम्शो पशो का रे अर्को मरिम्शो पाइनीम। मिनु आं कली मतुइक्नीम। येरमीया ५:१

4 आंम नेक्था डा मुरपुकी रे होस पा बाक्कीन। आंम लोक्ब आन कली यो थमा मसुतीन। मारदे हना इन लोक्ब नेल्ल मिक्च सिल्ल बाक्नीम। मिनु इन नेक्था डा मुरपुकी हिरशा, इन पर्वम जोल पा दोस गेना गेन बाक्नीम। येरमीया १२:६; भजन संग्रह ४१:१०; मीका ७:५-६ 5 मेको नेल्लेम आन नेक्था डा मुर आन कली जोल पाइनीम। सुइमी थमा लोव्र मपाइनीम। मेकोपुकीम जोल पचा शेंसीशो बाक्नीम। मेकोपुकीम मरिम्शो ला पाइनीम। 6 मेकेर दिम्मुतीके नु जोल पमुतीके ला बाक्ब। मेकोपुकीमी आं कली तुइक्चा मदाक्नीम” दे परमप्रभुमी यावे, मुर नेल्ल आन परमप्रभुमी देंत। 7 मोपतीके मुर नेल्ल आन परमप्रभु यावेम “गो मेको आन कली यपाइश्शा नाक्नुडमी। पाप पाइब आं मुर आन कली गो अरु मार पने चाप्नुडा डा? 8 मेको आन लें बीस पाइश्शो ब्रा खोदेंशो बाक्ब। मेकोपुकीम जोल लोव्र ला पाइनीम। मुर नेल्लेम आन नेक्था डा मुर नु रिम्शो लोव्र पखु पाइनीम। तन्न आन थुंमी दोपा मेको कली ब्वारद दाइक्चा, दे

मिम्नीम। बजन संग्रह १२:३ 9 मार, मोदेशो पशो आ पबर्म गो मेको आन कली सजाइ मगेनुडमी? ओदेशो रागी डा मुर आन कली गो सजाइ गेचा माल्नुड” दे परमप्रभु यावेम देंत। येरमीया ५:९, २९

10 गे डांडा आन पबर्म डाक्शा रोंका पने। मिनु गोरशो रागी डा योव्रतीक आन पबर्म बिलाना पने। मेको गोरशो सेल्शो बाक्नीम। मेकेर सुइ मगाक्नीम। मिनु मेकेर बी ब्यफ क्यारश भेडा आन ग्रीशो मनेंसीब। सरीड डा चिक्ब नु जन्तु नेल्ल प्रोक्शा लाम्तेक्म। येरमीया ४:२५; येरमीया १२:४ 11 गो यरूसलेम कली खिं ब्रेशशा देल्लतीके सेल्नुड। सिवार आन बाक्तीके सेल्नुड। गो यहूदा डा सहर आन कली मुर मबाक्तीके सेल्नुडमी। मिनु मेकेर सुइ मबाक्नीम। येरमीया २६:१८

12 मेको लोव्र रुप्या कली जोक्ब तुइक्ब सु बाक्बा डा? परमप्रभु यावेम सु कली लोव्र पवा, मेकोमी एको शेंने चाप्ब। मारदे मेको रागीम ब्रेशशो खिं ला बाक्नीमी? मारदे मेको मुर मबाक्तीके खोदेशो दुम्शा, सुइ लने मचाप्चा डा पा, श्येत्थ दुम्शो बाक्बा? लूका १९:४२ 13 मारदे हना मेकोपुकीमी आन डोंडती वोइश्शो आं अरेशो लोव्र प्रोंइतेक्म। आं देशो मटिथु आन दला दाक्स पाम्तेक्म। 14 मेको आन खकटा थुमी आन दला दाक्स पा बाल देवता आ नोले खोइक्तेक्म। मेको आन किकी पिपी शेंशो लाम गाक्तेक्म। येरमीया ७:२४ 15 मोपतीके परमप्रभु यावे, मुर नेल्ल आन परमप्रभु, इस्राएली आन परमप्रभुमी “गो एको मुर आन कली कशो थोव्रक उम्नुडमी। मिनु तूचा कली बीस ब्वाइश्शो ब्वाक्कु तूपाइक्नुडमी। येरमीया २३:१५; येरमीया ८:१४ 16 गो मेको आन कली रागी रागी डा मुर आन दातेमी फ्राइनुडमी। मेकेर आन मतुइश्शो नु आन किकी पिपी आन मतुइश्शो मुर बाक्नीम। मिनु गो मेको आन कली मसदुमी सम्म मेको आन नोनोले तरवार सोइक्नुड” देंत। लेवी २६:३३

17 मिनु मुर नेल्ल आन परमप्रभु यावेमी “मुल मिम्तीन। रोंका पाइब मीश मुर आन कली ब्रेत्तीन। मेको आन दाते डा नेल्ल क्येडा रोंका पस जोक्ब कली ब्रेत्थ सोइक्तीन” देंत 18 मेकोपुकीमी “रीब पा जाक्मल। मिनु आंइ पबर्म रोंका पामेक्ल। इं मिक्च नेल्ल प्रेक्कु मदुम सम्म नु इं मिक्च आ पारला रे ब्वाक्कु खोदेशो पा प्रेक्कु मदोक्म सम्म, मेकोपुकीमी रोंका पामेक्ल। 19 सियोन रे रोंका पशो नेंसाक्व। गोपुकी खतम दुम्तय। गोपुकी मुनेम सुम्सीशो बाक्नय। गोपुकीम आंइ रागी प्रोंइचा माल्नीकी। मारदे हना मेकोपुकीम आंइ खिं प्रेत्तेक्म” देंतेक्म।

20 मिनु गे मीश मुरपुकी परमप्रभु यावे आ लोव्र नेनीन। मेको आ लोव्र नेंचा कली इन नोफा दाइक्तीन। इन तमी आन कली रोंका पचा शेंदीन। आंम नेक्था डा मुर नु रोंका पतीक शेंमुने। 21 बेक्पाइक्ब झेल रे डोइश्शा आंइ बाक्तीकेम ओव्रत। मेको आंइ आल आन कली लां रे नु आंइ ठिटा आन कली बुक्शा बाक्तीक रे साइक्चा कली जाक्त। 22 परमप्रभु यावेमी “गे मुर आन कली मोदेशो लोव्र पावो ‘मुर आन बेक्शो रां रूम मोव्रल खोदेशो पा दोक्नीम। अन्न खुब्ब मुर आन नोले प्रोंइशो अन्न खोदेशो पा, गोल्ला लीशो बाक्नीम। मिनु मेको आन कली सुइम सिला मपाइनीम’ देंनो” देंत। येरमीया ७:३३; येरमीया १४:१६; येरमीया १६:४; येरमीया २५:३३; भजन संग्रह ७९:२

मार आ पबर्म नें बोरपाइक्चा

23 परमप्रभु यावेम “जोक्ब तुइक्ब मुरपुकी आन जोक्तीक तुइक्तीक आ पबर्म ठेयब मलेम्मल। सक्ति पाइश्शो मुरपुकी आन सक्ति आ पबर्म ठेयब मलेम्मल। शुश शोंप पाइश्शो मुरपुकी आन शुश शोंपोम ठेयब मलेम्मल। 24 तन्न सु ठेयब लेत्नीमी, मेकोपुकीम ‘गो परमप्रभु यावे कली तुइक्नुड’ देंमल ‘मेको थमा पा परमप्रभु यावे बाक्ब, दे तुइक्नुड, दे नें बोरपाइक्ने चाप्नीम। परमप्रभु यावेमी रागी कली शिशी पाइब, ठीक निसाफ नु ठीक पाइब बाक्ब’ देंमल। मारदे हना मेको आं दाक्शो बाक्ब, दे ग्येरसीनुड” दे परमप्रभु यावेम देंत। १कोरिन्थी १:३१; २कोरिन्थी १०:१७

चिनु मख्रोइश्शो खोदेशो दुम्शो

25 परमप्रभु यावेम “रांम ला खोइक्तीक चिनु खोइश्शो मुर आन गुम्तीक नाक्ती थमा पा जाक्ब। 26 गो इजीप्त, यहूदा, एदोम, अम्मोन, मोआब नु गोरशो रागीम बाक्ब, आन चां एर ओथ खोइक्ब मुर नेल्ल आन कली गुम्नुड। मारदे हना मेको नेल्ल खोइक्तीक चिनु मख्रोइश्शो बाक्नीम। मिनु इस्राएल आ खिं डा मुर नेल्ल यो आन थुंम खोइक्तीक चिनु मख्रोइश्शो बाक्नीम” देंत। लेवी १९:२७; येरमीया ४:४; लेवी २६:४१; ब्यवस्था ३०:६

1 गे इस्राएल आ खिं डा मुरपुकी, परमप्रभु यावेम इन कली मार, देंमे, मेको नेनीन। 2 परमप्रभु यावेम “रागी रागी डा मुर आन पतीक मशेंसीने। सरीड डा चिन्ड तशा, महिनीन। रागी रागी डा मुरपुकी मेको तशा हिंनीम। प्रस्थान २३:२४; २राजा २१:६ 3 मारदे हना जात जात डा मुर आन पतीक जोल बाकब। मेकोपुकीमी ब्वाकी डा रवा का तिम्नीम। मिनु शी के मार, मार, सेल्ब जोक्बमी मुशा मूर्ति सेल्नीम। यसैया ४४:१३-१७ 4 मिनु मुरपुकीमी, मेको कली सुन नु चांदीम गिलनीम। मिनु मेको महिम्सेक्ल दे घनमी कांटी थोक्नीम। मिनु मेको महिम्सीब। 5 मेको आन मूर्ति वोबीस रूम वोइश्शो खेरच खोदेशो बाक्नीम। मेको ब्वाक्ने मचाप्नीम। मेको आन कली कुरचा मालनीम। मारदे हना मेकोपुकी गाक्ने मचाप्नीम। मेको तशा महिनीन। मारदे हना मेकोपुकीमी मारेइ मरिम्शो पने मचाप्नीम। मारेइ रिम्शो यो पने मचाप्नीम” देंत। भजन संग्रह ११५:७; यसैया ४६:७

6 परमप्रभु यावे, इन खोदेशो सुइ मबाक्नीम। गे ठेयब बाक्नीनी। मिनु इन सक्तिमी इन नें ठेयब सेल्तीनी। भजन संग्रह ८६:८ 7 गे रागी रागी डा पिप, इन कली सुम मान पा महिनीमी डा? गे मान पाइक्चा शिरशो बाक्नीनी। रागी रागी डा मुर आन जोक्ब तुइक्ब नु मेको आन राज्य नेल्लेमी इन खोदेशो सुइ मबाक्नीम।

8 मूर्ति आन शेंतीक निप्स मपाइश्शो नु मूर्ख लोव्र बाक्ब। मेको शी क्येडा रिम्शो मबाक्ब। 9 टारशीश रे तुप्शो चांदी चाक्नीम। मिनु उफाज रागी रे सुन चाक्नीम। मेको मार मार सेल्स जोक्ब नु सुन चेम्बपुकी आन गेय बाक्ब। मिनु मेको आन कली नीलो नु प्याजी रड डा वा फेक्पाइक्नीम। मेको नेल्ल मार मार सेल्स जोक्ब मुर आन गेय बाक्नीम। 10 तन्न परमप्रभु यावे थमा डा परमप्रभु बाक्ब। मेको ब्रोंइशा बाक्ब परमप्रभु नु गेना हना यो लीब पिप बाक्ब। मेको गाइक्तानु, रागीम खिनु कुइब। मिनु रागी रागी डा मुरपुकीम मेको आ गाइश्शो फाल्ने मचाप्नीम। येरमीया ५:२

11 गे मेको आन कली “मेको सरीड नु रागी मसेल्ब देवी देवता रागी नु सरीड आगा रे क्याम्चा पुंडसीनीम। 12 तन्न मेकोमी आ सक्तिमी रागी सेल्लु। मेकोमी आ जोक्तीक तुइक्तीकेमी रागी रागी कली वोइक्तु। मिनु मेकोमी आ रुप्तीकेम सरीड प्राक्तु। येरमीया ५१:१५-१९ 13 मेकोमी लोव्र पवानु, सरीड रे रेउ यीब। मेकोमी रागी आ सुर रे गोस्स आन कली पोक्ब। मेकोमी रेउ नु चिला पपाइक्ब। मिनु फश आ बाक्तीक रे फश पपाइक्ब। भजन संग्रह १३५:७ 14 मुर नेल्ल निप्स मपाइश्शो नु मारेइ मतुइक्ब बाक्नीम। सुन चेम्ब नेल्ल आन मूर्तिम पतीके मुने दोक्नीम। मेको आन मूर्तिपुकी जोल बाक्नीम। मेको आन के सोक्त मबाक्ब। यसैया ४५:१६ 15 मेको शोर गाक्शो ला बाक्नीम। मुर आन मिम्शो ला बाक्नीम। मेको आन कली सजाइ गेशोनु, जाम्नीम। 16 परमप्रभु यावे, याकूब आ भाग बाक्ब। मेको मारेइ मारेइ सेल्ब बाक्ब। मिनु इस्राएल मेको आ शोंप बाक्ब। मेको आ नें मुर नेल्ल आन परमप्रभु यावे बाक्ब” देंनो। ब्यवस्था ३२:९

सजाइ जाक्ब देशो

17 गे पुम्चा पुंडसीशो सहर इ कुम्लो खप रे गुपो। 18 मारदे हना परमप्रभु यावेम “गो मेको रागी डा मुर आन कली ताइक्नुडमी। मेको आन कली शुश श्येत गेनुडमी। मिनु मेकोपुकीम तुइक्नीम” देंत।

19 आबी, तन्न आं गार आ पबर्म हिंती। आं गार मसाब। तन्न गो आंम कली “थमा पा, एको आं सजाइ बाक्ब। गो एको फाल्चा माल्नुड” देंती। 20 आं ताम्बु ब्रेत्त। मेको आ डोरी नेल्ल ब्रोंइक्तेक्म। आं आलपुकी गाक्तेक्म। मुल मेकोपुकी मबाक्नीम। मुल आं ताम्बु कीशा गेब नु आं बाक्तीकेम फारतीक वा वोइश्शा गेब सुइ मबाक्नीम। 21 गोठलापुकी निप्स मपाइश्शो बाक्नीम। मेकोपुकीमी परमप्रभु यावे कली हिल्लो मपाइनीम। मोपतीके मेकोपुकी रिम्शो मदुम्नीम। मेको आन क्यारश भेडा नेल्ल ब्राम्तेक्म। येरमीया २३:१

22 रेयके का जाक्शो बाक्ब। मेको नेनीन। उत्तर रागी रे ठेयब ग्रांग्ये माग्ये दुम्शो बाक्ब। मेकोमी यहूदा इन सहरपुकी मुर मबाक्तीके सेल्ब। मेको सिवार आन बाक्तीक दुम्नीम। येरमीया १:१४

येरमीया आ पुंडशो लोव्र

23 परमप्रभु यावे, मुर आन ब्रोंइतीक आंम आन गुइम मबाक्ब, गो मेको तुइक्नुड। बेक्शा लाइब मुरपुकीम आंम लां आंमा सेल्ने मचाप्नीम। हितोपदेस १६:९ 24 परमप्रभु यावे, आं कली रिम्शो सेल्यीनी। तन्न ठीक निसाफ पतीकेम ला रिम्शो सेल्यीनी। इन गाइक्तीकेम ममाइ। मो दुम्त हना, गे आं कली साइक्नीनी। येरमीया ३०:११; येरमीया ४६:२८; भजन संग्रह ६:२; हबकुक् १:१२

25 इन कली मतुइक्ब रागी रागी डा मुर नु इन नें थिचा मदाक्ब जात जात डा मुर आन तार इन गाइक्तीक मोतीन। मारदे हना मेकोपुकीमी याक्ब कली नेक्शा दाक्शा पशो बाक्नीम। मेकोपुकीमी मेको कली थमा पा दाक्शो बाक्नीम। मिनु मेको आ बाक्तीक मुर मबाक्तीके सेल्शो बाक्नीम।

11

कबल क्याम्शो

1 परमप्रभु यावेम येरमीया कली, 2 “गे एको कबल डा लोव्र नेनो। मिनु यहूदा डा मुरपुकी नु यरूसलेममी बाक्ब आन कली लोव्र पावो। 3 गे मेको आन कली ‘इसाएली आन परमप्रभु यावेम मार देंत देशा हना, सु सुमी एको कबल मखाप्नीमी, मेको सराप राइनीम। ब्यवस्था २७:२६; 4 गो मेको कबल डा पचा माल्शो गेय इन किकी पिपी आन कली श्येत जतीक इजीप्त रागी रे गुंडची ना अरेशो नडमी। गो मेको आन कली आं अरेशो यो टिने। इन कली अरेशो लोव्र नेल्ल पा आं मुर दुम्नीनी। मिनु गो इन परमप्रभु दुम्नुड। येरमीया ७:२३ 5 गो इन किकी पिपी आन कली दूध नु खुदो शुश बाक्शो रागी का गेनन्नी, दे कसम जशो खाप्नुड। मिनु मेको रागी मुल इन अधिकारम बाक्ब’ देनो” देंत। मिनु गो “परमप्रभु यावे, मोदेशो दुम्ल” दे लोव्र लेत्ताक्ड। प्रस्थान ३:८

6 मिनु परमप्रभु यावेम आं कली “यहूदा डा सहर नेल्लेम नु यरूसलेम डा लां मेर एको कबल डा लोव्र उरदी पा, मेको कबल डा लोव्र नेशा पने। 7 गो इन किकी पिपी आन कली इजीप्त रे प्रोइशा चाक्गुमी रे मुल सम्म ‘आं लोव्र टिने’ दे अरेना अरेन बाक्ती। येरमीया २५:४ 8 तन्न मेकोपुकीमी आन नोफा मदाइक्तेम। आं देशो लोव्र मटीमे। मेको आ पा डा मेकोपुकीमी आन खकटा थुंमी मरिम्शो पा काइ मटीमे। गो मेको आन कली आं कबल डा लोव्र नेल्ल पने, दे अरेता। तन्न मेको पने मबिस्सम” देंत। येरमीया ३:१७; येरमीया ७:२६; येरमीया १३:१०; येरमीया १८:१२; ब्यवस्था २८:१५-६८

9 मिनु परमप्रभु यावेम आं कली “यहूदा डा मुरपुकी नु यरूसलेममी बाक्बपुकीम मरिम्शो पचा मिम्नीम। 10 मेको आन किकी पिपी आन मरिम्शो पतीक गे लेशशा लाम्तेक्म। आं अरेशो मटीम। पाप गे लेशशा लाम्तेक्म। अरु देवी देवता आन कली पूजा पा, मेको आन नोले खोइक्तेक्म। गो मेको आन किकी पिपी नु पशो कबल इसाएल आ खिं डा मुर नु यहूदा आ खिं डा मुर नेल्लेमी क्याम्ताक्म” देंत। 11 मोपतीके परमप्रभु यावेमी “गो थमा पा, मेको आन कली ठेयब श्येत गेनुडमी। मिनु मेको रे प्रोक्ने मचाप्नीम। आं कली पुंइतेक्म हना यो, गो मेको आन लोव्र मनेनुड। भजन संग्रह १८:४२; यसैया १:१५; इजीकीएल ८:१८ 12 मिनु नोले यहूदा सहर डा मुरपुकी नु यरूसलेममी बाक्ब मुरपुकीमी लशा, मेको आन पूजा पशो देवी देवता आन कली पुंइनीम। तन्न मेकोपुकीमी मेको आन कली आन श्येत रे गेनायो मप्रोइनीम। येरमीया २:२८; ब्यवस्था ३२:३७-३८ 13 यहूदा, इ के दोशो सहर बाक्मा, मोशो इ देवी देवता दुम्तेक्म। यरूसलेममी गिश लां बाक्मा, मीश मुने दोक्तीक बाल देवता कली चढेतीक सेल्लेक्म। 14 येरमीया, गे मेको जात डा मुर आन पर्बम मपुनो। मेको आन पर्बम डाक्शा प्रार्थना पा मपुनो। मारदे हना मेकोपुकी श्येत जामे ना मेको आन पुंइशो मनेनुड। येरमीया ७:१६ 15 आं दाक्शो मुरपुकी आं खिं ओव्रचा मार अधिकार बाक्बा? मेको नेल्ल मरिम्शो पाइब बाक्नीम। आं कली चढेशो श्येम इन कली सजाइ गेतीक रे तेक्ने चाप्बा डा? मिनु गे ग्येरेने चाप्नीनी” दे परमप्रभु यावेमी देंत। रोमी ११:२८; होसे ८:१३ 16 परमप्रभु यावेम इन कली रिम्शो फल सिप्ब दारशो गिगी तेल रवा, दे नें वोइक्तु। तन्न मेकोम ठेयब फश गिवार पपाइश्शा, मेको कली मी सुइक्ब। मिनु मेकोम आ राशी आन कली दाक्ब। 17 मुर नेल्ल आन परमप्रभु यावेम इन कली खुम्तु। मिनु मेकोमी इन कली मरिम्शो पचशो बाक्ब। मारदे हना इसाएल आ खिं डा मुर नु यहूदा आ खिं डा मुरुम मरिम्शो पाम्तेक्म। परमप्रभुमी “मेकोपुकीमी बाल देवता कली मार मार चढेशा आं कली गाइक्पाइक्तीमी” देंत।

येरमीया कली साइक्चा माल्शो

18 परमप्रभु यावेम आं कली मेको मुरपुकीम मार पचा माल्शो बाक्मा, मेको कोइशा तुइक्पाइक्ती। गे आं कली, आन मरिम्शो पचशो कोइताक्यीनी। 19 गो साइक्चा कली लाइश्शो मारेइ पने मचाप्ब पाठा का खोदेशो बाक्ती। मेकोपुकीमी आं पर्बम “एको रवा कली आ फल सुन्दा तिम्य। एको कली ब्रोंइशा बाक्ब आन रागी रे क्योरशा ताइक्तय। मिनु एको आ नें गेनायो ममिम्सेक्ल” देशा मरिम्शो पशो गो मतुइक्तु। यसैया ५३:७ 20 तन्न गे, मुर नेल्ल आन परमप्रभु यावे, ठीक पा निसाफ पाइनीनी। मिनु थुं नु सोक्त नाक्शा कोव्रनीनी। गेमी मेको आन कली क्येक्क

लेशो गो कोवचा तडल। मारदे हना गो इन कली आं निसाफ पतीक जिम्मा गेशो बाक्नुड। भजन संग्रह ७:१०; येरमीया १७:१०; येरमीया २०:१२

21 मोपतीके आं कली साइक्चा माल्ब अनाथोथ डा मुर आन पबर्म परमप्रभु यावेम “मेको मुरपुकीम इ कली ‘परमप्रभु यावे आ नेमी लोव मपावो। लोव पाप्तीवी हना, गे आंइ गुइ रे बेक्नेवे’ देनीम। येरमीया १:१ 22 मोपतीके मुर नेल्ल आन परमप्रभु यावेम ‘गो मेको आन कली सजाइ गेनुडमी। मेको आन ठिटा मुरपुकी तरवारम क्योरशा साइक्चा पुंडसीनीम। मिनु मेको आन तमी तौ चहिं अन्कालम बेक्नीम। 23 मेकोपुकी सुइ मब्रोइनीम। मारदे हना मेको आन कली सजाइ गेतीक बर्सम गो अनाथोथ डा मुर आन तार ठेयब श्येत चाक्नुड’ ” देशो बाक्ब।

12

येरमीयामी लोव पशो

1 परमप्रभु यावे, गो इन कली दोस गेता हना, गे ठीक पाइब बाक्नीनी। तन्न गो आं निसाफ इन डोंइती वोइक्नुड। दोस ताइबपुकी मारदे सोशा बोशा लाइनीमी? थमा मसुइक्ब मुर मारदे रिम्शो दुम्ना दुम्न बाक्नीमी? भजन संग्रह ७३:३ 2 गे मेको आन कली खुम्तीनी। मिनु मेकोपुकीमी शाक्श थोक्शा, बारशा, फल गेनीम। मेको आन लोवम ला इन नेक्था बाक्नीम। तन्न मेको आन थुंमी इन क्येडा डोन बाक्नीम। 3 मो हना यो परमप्रभु यावे, गे आं कली तुइक्नीनी। गे आं कली कोवशा, नाक्नीनी। आं थुं गे नु बाक्ब। मेको आन कली साइक्चा कली लाइशो भेडा खोदेशो पा, कीशा लतीन। मिनु साइक्तीक नाक्त कली तिल्शा वोतीन। भजन संग्रह १३९:१ 4 रागीम गेना सम्म रोंका पाइबा? मिनु रू डा घांस गेना सम्म सोल सुल बेक्नीमी? मेकेर बाक्बपुकीम परमप्रभु यावे आ अरेशो लोव मटितीके, मेकेर डा जन्तु नु चिक्ब नेल्ल बेक्तेक्म। मोपा मेकोपुकीमी “आंइ कली मार, दुम्शो बाक्बा, मेकोमी मारेइ मतुइक्ब” देनीम। येरमीया १:९

परमप्रभुम लोव लेशो

5 परमप्रभु यावेम “गे दोरब मुरपुकी नु दोरते हना, मेकोपुकीमी इ कली दपाइक्तेक्मी हना, गे शारा नु दोपा दोरने चाप्नेवे? गे मारेइ मदुम्तीकेमी गोल्ले हना, यर्दन खोला डा ब्वाकीम मार पाइनेवे? 6 इ लोक्बपुकी नु इ खिं डा मुरपुकीमी इ कली मरिम्शो पाम्तेक्म हना, मेकोपुकी इ पबर्म ठेयब सेंदा पा रेयके पा जाक्नीम। मेकोपुकीमी गे नु रिम्शो लोव पाम्तेक्म हना यो, मेको आन कली थमा मसुइक्मी।

7 गो आं खिं प्रोंइता। आं थेरशो रू प्रोंइता। मिनु आं दाक्शो कली आ जोरी सत्रु आन गुइमी गेता। 8 आ थेरशो रू ब्वाकी डा गुप्स खोदेशो दुम्त। मेको आं कली कोवशा ग्रीब। मोपतीके गो मेको कली काइ मदाक्नुड। 9 मार, मेको सिवार आं थेरशो रू तशा गेहे पाइबा डा? आं डोंइती छिर छिर पाइशो सिखारी चिक्ब खोदेशो मदुम डा? मेको कली अर्को सिखारी चिक्बपुकीम पुम्शा राम्शी तोवमेक्ल। लावो, लशा ब्वाकी डा जन्तु नेल्ल आन कली पुक्मी। मिनु मेको कली ब्वपाइक्चा कली चाक्मी। यसैया ५६:९ 10 शुश गोठलापुकीम आं अडगुर रू खतम सेल्लेक्म। मेकोपुकीमी आं भाग दिम्शा ताइशो पाम्तेक्म। मेकोपुकीमी आं दारशो भाग कली गोरशो रागी खोदेशो पा मुर मबाक्तीक सेल्लेक्म। येरमीया ६:३ 11 मेकोपुकीम रागी गोरशो सेल्लेक्म। मेको रागी कली आं डोंइती सोवशो नु सुइ मबाक्तीक सेल्लेक्म। रागी नेल्ल गोरशो सेल्लेक्म। मिनु सुइ आन थुं मखाइ” देंत। 12 गोरशो रागी डा डांडा मेर नेल्ल श्येतथ पोक्बपुकी क्राक्थ्री चोक्थ्री पा जाक्शो बाक्नीम। मारदे हना परमप्रभु यावे आ तरवारम रागी आ सुर का रे अर्को सुर सम्म क्योरब। मिनु सुइ मब्रोइनीम। 13 मेकोपुकीमी चेरब शोक्नीम। मिनु चू सिप्पाइक्नीम। मेकोपुकीमी श्येत पा गेय पाइनीम, तन्न नेल्ल शोर गाक्ब। मोपतीके मेको आन खुम्शा मुने दोक्शो आंमा फाल्मेक्ल। मारदे हना परमप्रभु यावे आ ठेयब पा गाइशो इन तार जुक्शो बाक्ब। होसे ८:७

14 परमप्रभु यावेमी आं कली मरिम्शो पाइब आं नेक्था डा मुर आन पबर्म “गो आं मुर इस्राएली आन कली गेशो, मेको आन किकी पिपी आन शोंप रोइशो बाक्नीम। मोपतीके गो मेको आन कली आन रागी रे तुल्शा ताइक्नुडमी। मिनु गो यहूदा आ खिं डा आ मुर आन कली मेको आन दाते रे तिल्लुडमी। 15 तन्न गो मेको आन कली तुलुमी नोले लेंशा शिशी पाइक्नुडमी। मिनु मेको नेल्ल आन कली आन आन किकी पिपी आन शोंप गेशा, आन रागीम लेंशा चाक्नुडमी। 16 मिनु मेकोपुकीमी मोपा बाल आ नेम कसम जाम्तेक्म, मोपा आं मुर आन लां थमा पा शेंताक्म हना, मेकोपुकीम परमप्रभु यावे ब्रोंइशा बाक्शो खोदेशो पा, आं नेम कसम जाइनीम। आं मुर आन पतीके रिम्शो पा शेंसाक्म

हना, मेकोपुकी आं मुर आन दातेमी बाक्चा ताइनीम। ब्यवस्था ६:१८; येरमीया ४:२ 17 तन्न तेकोइ जात डा मुरुम मेको लोव्र मनेतेक्म हना, गो मेको आन कली तुल्शा ताइक्नुडमी” दे परमप्रभु यावेम देशो बाक्ब।

13

सुती के धोती

1 परमप्रभु यावेम आं कली “लशा सुती के धोती का ग्यापो। मिनु मेको पांडसो। तन्न मेको कली ब्वाक्कुम जित्चा मगेवो” दे माइक्ती। 2 मोपतीके गो परमप्रभु यावेम देशो खोदेशो पा, सुती के धोती का ग्याप्शा पांडसाक्यी। 3 मिनु लेंशा परमप्रभु यावेम आं कली 4 “बोक्को, इ ग्याप्शा पांडसीशो धोती कुरशा मुल युफ्रेटीस लावो। मिनु सेरथे फुल्लु आ आगाम बाक्शो जेशशो फुल्लुम मेको खुइश्शा वोतो” दे माइक्ती। 5 मोपतीके गो परमप्रभु यावेम देशो खोदेशो पा, मेको युफ्रेटीसम खुइश्शा वोइक्ता। 6 मिनु शुश नाक्त नोले परमप्रभु यावेम आं कली “बोक्को, युफ्रेटीस लावो। मिनु मेकेर गो डोंइती इ कली खुइश्शा वोतो देशो धोती चाक्को” दे माइक्ती। 7 मिनु गो युफ्रेटीसम लती। मिनु आं खुइश्शा वोइक्तीक रे मेको धोती दोशा गुंडताक्ड। तन्न मेको धोती नेल्ल मुक्ने थुमा बाक्त। मेको थमा पा, शोर गाक्शो दुम्माक्त।

8 मिनु परमप्रभु यावेम आं कली मार दंत देशा हना, 9 “ओदेशो पा गो यहूदा आ ठेयब लेत्तीक नु यरूसलेम आ थाम्पा ठेयब लेत्तीक खतम पोक्नुड। 10 मेको मरिम्शो पाइब मुरपुकीम आं लोव्र नेने मबिस्सम। मेकोपुकीमी आन खकटा थुमी आन दला दाक्स पतीकेमी अरु देवी देवता आन कली पूजा पचा कली नु मेको आन गेय पचा कली लाम्तेक्म। मिनु मेकोपुकी एको धोती खोदेशो दुम्नीम। मेको थमा पा शोर गाक्शो बाक्ब। येरमीया ११:८ 11 मारदे हना दोपा मुरुम आ धोती रामं पांडसीशो बाक्बा, मोपा गो इस्राएल आ खिं डा मुर नेल्ल नु यहूदा आ खिं डा मुर नेल्ल आन कली आं मुर दुम्मल, दे आं नेक्था वोइक्तामी। आं कली मान पामेक्ल, आं कली ठेयब सेल्मेक्ल, आं दारसम ग्योम्सीमल, दे पांडसाक्यी। तन्न मेकोपुकीमी आं देशो लोव्र आन नोफा मदाइक्तेम” दे परमप्रभु यावेम दंत।

अडगुर शांबुम ब्रीशो गर

12 परमप्रभु यावे, इस्राएली आन परमप्रभुमी “गर नेल्ल अडगुर शांबुम ब्रीचा माल्नीम देशो बाक्ब” दे माइक्मी। मिनु मेकोपुकीम “गर नेल्ल अडगुर शांबुम ब्रीचा माल्ब, दे गो मतुइक्नीकी डा?” दंतेक्म हना, 13 गो मेको आन कली परमप्रभु यावेम इन कली मार दंत देशा हना “गो एको रागी नेल्ल डा मुर आन कली, दाऊद पिप आ बाक्तीकेम बाक्ब पिप आन कली, चढेबपुकी, परमप्रभु यावे आ लोव्र पाइबपुकी नु यरूसलेममी बाक्ब नेल्ल आन कली दुक्पाइक्नुडमी। येरमीया २५:१५-२८; यसैया ५१:१७ 14 गो मुर आन कली जिपाइक्नुडमी। गो आम आफ नु आन तमी तौ आन दातेमी जिपाइक्नुडमी। गो मेको आन कली दाक्शा, शिशी पा साइक्तीक रे आं थुं मलेत्नुड, दे परमप्रभु यावेम” दंत। 15 नोफा दाइश्शा नेनीन। ठेयब लेशशो मदुमीन। मारदे हना परमप्रभु यावेम लोव्र पाप्तु। 16 मिनु “गे परमप्रभु यावे, इन परमप्रभुम छिडछिड चाक्चा क्येडा डोंइती मेको कली ‘ठेयब सेलीन’। नां रिक्चा क्येडा डोंइती डांडा मेर इन खोइल दाइल पाइक्चा क्येडा डोंइती मेको कली ‘परमप्रभु यावे ठेयब बाक्ब’ देनीन। गे हाम्सो आस पाइनीनी, तन्न मेकोमी छिडछिड सेल्शा थम क्येर सेल्ब। 17 तन्न गेपुकीम मेको मनेतीनी हना, गो इन ठेयब लेशशो आ पतीके, गो आं थुं सुइ आन मतुइक्चा डा पा डाक्नुड। परमप्रभु यावे आ हुल ग्याइश्शा लाइक्चा पुंडसीतीके गो हुइ हुइ पा डाक्नुड। मिनु आं मिक्च रे प्रेक्कु दोक्ब। येरमीया ८:२३; येरमीया १४:१७; लूका १९:४१

18 पिप नु पिप आ ममा आस कली ‘इन नित्तीक रे उइ तोंइसीन। मारदे हना इन पिपा रे इन ठेयब दुम्तीक सिरपेच दोक्ब’ माइक्सी” दंत। २राजा २४:१-१६; यसैया ६२:३; बिलाप ५:१६ 19 नेगेब रागी डा सहर आन लाप्चो चोक्सीनीम। मिनु मेको आन कली रोक्ब सुइ मबाक्नीम। यहूदा डा मुर नेल्ल ग्याइश्शा लाइक्चा पुंडसीशो बाक्नीम। मेको आन कली थमा पा ग्याइश्शा लाइक्तेक्म।

20 ए यरूसलेम, उत्तर रे जाक्ब जोरी सत्रु आन कली कोव्रडो। इ कली गेशो बगाल, इ दारशो भेडा ते बाक्नीमी? 21 गेमी आंम मुर सेल्चा कली इ लेम्शो मुर आन कली परमप्रभु यावेम इ कली हुकुम पाइब सेल्ब। मिनु गे मार, दंनेवे? मार, सुत्केरी दुम्चशो मीश मुर खोदेशो पा, इ कली श्येत मदुम्बा डा? 22 “मिनु गे इ थुंम ‘आं कली मारदे ओदेशो श्येत दुम्मे’ दंनेवे। गेमी शुश मरिम्शो पतीके इ गुने क्युक्साक्वे। मिनु इ रामी मरिम्शो पाइक्चा पुंडसाक्वे। यसैया ४७:२-३; इजीकीएल १६:३७ 23 मार, एथीयोपीयामी आ कुशुल डा रड फाइक्ने चाप्बा डा? मार, जोइमी आ चां डा थोप्ला

फाइवने चाप्या डा? गे मरिम्शो पचा बानी दुम्तीके रिम्शो पने मचाप्येवे। 24 गो इ कली गोरशो रागी रे जाक्शो फशेम योल्शो भूस खोदेशो पा फ्राइनन। 25 इ कली वोइश्शो आं गेशो भाग मेकोन बाक्ब” देशो बाक्ब। परमप्रभु यावेम “गेमी आं कली प्रेशो बाक्नेवे। मिनु जोल आन कली थमा सुइश्शो बाक्नेवे। 26 गो आंमा इ गुने इ शोत्र सम्मन क्युक्नुड। मिनु मोपा इ मुने नेल्ल तांडसीब। 27 गो पहाडीम नु रू मेर इ पशो ग्रांग्रा दिशो गेय ताता। इ मुरपुकी नु इप्शो, इ रेयके पशो नु इ मुने मपथु, तेल्लेम दुम्शो तशो बाक्नुड। आबी आबी, यरूसलेम गे ग्रांग्रा दिशो दुम्नेवे। गेना सम्म मोदेशो बाक्नेवे?” दंत।

14

रागी नेल्ल सोत्रशो

1 परमप्रभु यावेमी रेउ मयिचा आ पबर्म येरमीया कली मार, लोत्र पाप्तु देशा हना, 2 “यहूदा रोंका पाइब। मेको आ सहर डा ठेयब लाप्योपुकी सक्ति मपाइश्शो दुम्शो बाक्नीम। मेकोपुकी रू आ पबर्म सुर्ता पाइनीम। मिनु यरूसलेम आ वाइ ब्रेश्शो सरीड सम्म जाक्दीश्शो बाक्ब। 3 मेकेर डा ठेयब मुरपुकीम आन वाइल आन कली ब्वाक्कु ब्रथ सोइक्नीम। मिनु मेकोपुकी कुवाम लमानु ब्वाक्कु मथित्नीम। मिनु मेकोपुकी श्येतथ ग्योब कुरशा लेशशा जाक्नीम। मिनु मेकोपुकी मुने दोक्शा मारेइ पने मचाप्य दुम्शा, आमाइ, दे हिंशा आन पिया सुम्सीनीम। 4 रागीम रेउ मयितीके रागी नेल्ल सोत्रशा जेशो बाक्ब। रू डा गेय पाइबपुकी मारेइ पने मचाप्य दुम्शा, आमाइ, दे आन कुल सुम्सीनीम। योएल १:११ 5 घांस मबाक्तीके ब्वाकी डा किश्शेमी यो आ नक जरमेशो पाठा प्रोइशा गाक्ब। 6 ब्वाकी डा गधापुकी गोरशो डांडाम राप्शा सिवार खोदेशो पा ग्रीनीम। गिगी जोतीक ठाउं मबाक्तीके मेको आन मिक्ची ब्रा ब्रा दुम्नीम।

7 मिनु आंइ मरिम्शो पशोम आंइ पबर्म सांकछी गेम्तेक्म हना, परमप्रभु यावे, गे इन नें आ पबर्म शिशी पने। मारदे हना गो इन कली प्रोइशा, थम मरिम्शो दुम्तक। गोपुकीम इन पबर्म पाप पशो बाक्तक। दानीएल ९:४-९ 8 ए इस्त्राएल आ आस पतीके, श्येत जवानु मेको कली प्रोइब, गे एको रागीम मारदे अर्को रागी डा मुर खोदेशो दुम्नीनी? गे मारदे नाक्दो का ला बाक्ब, लां गाक्ब मुर खोदेशो दुम्नीनी? 9 गे मारदे इन थुं ग्येतथ लुक्च दुम्शा बाक्शो मुर खोदेशो दुम्नीनी? मारदे प्रोइने मचाप्य सक्ति मबाक्शो लडाइ पाइब खोदेशो दुम्नीनी? परमप्रभु यावे, गे आंइ दातेम बाक्शो बाक्नीनी। गो इन नेंमी ब्रेत्चा पुंडसीशो बाक्नीकी। आंइ कली मप्रोनीन” देंनीम। येरमीया १५:१६; यसैया ४३:७

10 परमप्रभु यावेमी मेको मुर आन पबर्म “मेकोपुकी थमा पा हिरना हिरन बाक्नीम। हेंथे गाक्चा दाक्नीमी। थमा पा ठीक लां मगाक्नीम। मोपतीके परमप्रभु यावेम मेको आन कली मब्राइब। मुल मेकोमी आन मरिम्शो पशो आ पबर्म मिम्ब। मिनु मेको आन कली आन पाप आ पबर्म सजाइ गेब” दंत।

11 मिनु परमप्रभु यावेम आं कली “एको जात डा मुर आन कली रिम्शो दुम्पाइक्चा कली मपुनो। येरमीया ११:१४; येरमीया ७:१६ 12 मेकोपुकी माइजा बाक्तेक्म हना यो, गो मेको आन पुंडशो मनेनुड। मेकोपुकीमी चोशा चढेतीके, अन्न चढेतीके चढेतेक्म हना यो, गो मेको आन कली मब्राइनुडमी। मेको आ पा डा गो मेको आन कली, तरवार, अन्काल नु बेक्तीक रोइम साइक्नुडमी” दे माइक्ती। यसैया ५८:३; येरमीया ६:२०

परमप्रभु आ लोत्र जोल पाइबपुकी

13 मिनु गो “परमप्रभु यावे, कोत्रडीन। इन लोत्र पाइबपुकीम दा मेको आन कली ‘गे तरवारम साइक्चा मपुंडसीनीनी। अन्काल मपाइनीनी। मिनु शुश नाक्ती सम्म एको रागीम थुं नाइश्शा बाक्चा ताइनीनी’ देशो बाक्नीम” देंती। 14 मिनु परमप्रभु यावेम आं कली “आं लोत्र पाइबपुकीम दा आं नेंम जोल पा लोत्र पशो बाक्नीम। गो मेको आन कली मसोइक्तुमी। गो मेको आन कली लोत्र मपड। मेकोपुकीमी इन कली जोल पा, लिंक्यु कोत्रशा, फश लोत्र पाइनीम। आन थुं डा जोल लोत्र पाइनीम। येरमीया २३:२१-२२; येरमीया २७:९, १४, १५; येरमीया २९:८-९; इजीकीएल १३:६ 15 मोपतीके परमप्रभु यावेम मेको आ लोत्र पाइब आन पबर्म, सुम आ नेंम लोत्र पाइनीमी, मेको आन कली सोइश्शो मनड। मो हना यो मेकोपुकीम ‘तरवार नु अन्कालम एको रागी कली मताइब’ देशो बाक्नीम। मुल तरवार नु अन्कालमीन जोल पा आं लोत्र पाइबपुकी साइक्चा पुंडसीनीम। ब्यवस्था १८:२० 16 मिनु जोल पा आं लोत्र नेंपाइक्चा पुंडसीबपुकी चहिं तरवार नु अन्कालम पतीके यरूसलेम डा लां मेर ताइक्चा पुंडसीनीम। मेको, मेको आन मीश नु मेको आन तमी तौ आन कली थिम्ब सुइ मबाक्नीम। मारदे हना गो मेको आन तचा डा श्येत मेको आन तारी मोइक्नुड” दे माइक्ती। येरमीया ९:२१

17 गे मेको आन कली “आं मिक्च रे नाकदो नाक्ती प्रेक्कु यिशा बाक्ल। मारदे हना आं मुर, ग्युंभे मपशो तमी थाम्पा श्येत जशो बाक्ब। ठेयब गार दुम्चा डा पा मेको तुप्चा पुंडसीशो बाक्ब। येरमीया १३:१७ 18 गो मेको रागी लती हना, तरवारम साइक्चा पुंडसीशोपुकी ताइक्नुडमी। गो मेकेर डा सहरम ओव्रती हना, मेकेर अन्काल पशो मुरपुकी ताइक्नुडमी। परमप्रभु यावे आ लोव्र पाइबपुकी नु चढेब नेल्ल मारेइ मतुइक्थु, आन गेय पना पन बाक्नीम” दे माइक्ती।

19 मिनु गो “मार, गे यहूदा कली थमा पा प्रोइने थुम्शो बाक्नीनी? मार, गे सियोन कली ग्रांग्रा दिशशो बाक्नीनी? गे आंइ कली मारदे मसापाइक्चा डा पा तुप्नी? गोपुकी थुं नाइशशा बाक्तीक आस पाइतक, तन्न मारेइ रिम्शो मदुम। सानीकी कों दे आंस पाइतक, तन्न हिंतीक कका जाक्त। येरमीया ८:१५ 20 परमप्रभु यावे, गोपुकीम इन अरेशो लोव्र मटिशो नु आंइ किकी पिपी आन मरिम्शो पशो शोव्रनीकी। गोपुकीम थमा पा इन डोंइती पाप पशो बाक्नीकी। येरमीया ३:२५; भजन संग्रह ५१:५-७; भजन संग्रह १०६:६ 21 इन नें आ पबर्म आंइ कली शोर गाक्शो ममिम्तीन। गो इन सक्ति पाइशो नित्तीक कली आइक्च मसेल्पाइक्नीकी। इन पशो कबल मिम्तीन। गे मेको मक्याम्दीन। 22 रागी रागी डा मुर आन देवी देवता आन दाते डा तेकोइमी रेउ यिपाइक्ने चाप्नीमी डा? मार, सरीड आमा रेउ यिपाइक्ने चाप्बा डा? मेको पाइब गे परमप्रभु यावे, आंइ परमप्रभु मननी डा? मोपतीके गो इन कली आस पाइनीकी। मारदे हना गे ला एको नेल्ल पने चाप्नीनी” देती।

15

परमप्रभुम लोव्र लेशशो

1 मिनु परमप्रभु यावेमी आं कली “मोसा नु सामुएलमी आं डोंइती जाक्शा पुंडताक्स हना यो, आं थुं एको जात डा मुर आन गे मलेप्ब। मेको आन कली आं डोंइती रे ग्रुंडदीमी। मेको आन कली लचा गेमी। प्रस्थान ३२:११; १सामुएल ७:९; इजीकीएल १४:१४ 2 मिनु मेकोपुकीमी ‘गो ते लाइनीकी?’ दे इ कली हिल्लो पाम्तेक्म हना, गे मेको आन कली परमप्रभु यावेमी ‘बेक्तीक रोइ पा बेक्चा ब्रेक्सीशो बाक्तीनी हना, बेक्तीक गेन लने। तरवारम साइक्चा पुंडसीचा ब्रेक्सीशो बाक्तीनी हना, तरवार गेन लने। शोव्रलुम बेक्चा ब्रेक्सीशो बाक्तीनी हना, शोव्रलुमीन बेक्कीन। ग्याइशशा लाइक्चा पुंडसीचा ब्रेक्सीशो बाक्तीनी हना, ग्याइशशा लाइक्चा पुंडसीन’ देनो। येरमीया ४३:११; जकरिया ११:९ 3 गो मेको आन कली ४ ओटा साइक्तीक श्येत सोइक्नुडमी। गो साइक्चा कली तरवार, कीशा लाइक्चा कली कुचुम, दाक्पाइक्चा कली नु खतम सेल्चा कली सरीड डा चिक्ब नु रागी डा जन्तु सोइक्नुडमी। इजीकीएल १४:२१; येरमीया ७:३३ 4 यहूदा डा पिप हिज्कीयाह आ तौ मनस्सेम यरूसलेममी मार पशो बाक्मे, मेको आ पबर्म गो मेको कली खतम पोक्नुड। मिनु मेको तशा रागी डा राज्य नेल्लेम ‘आबी, आबी’ दे हिंनीम। २राजा २१:११-१६; २राजा २३:२६ 5 गे यरूसलेम, सुमी इ कली शिशी पाइबा? इ पबर्म सुम रोंका पाइबा? गे दोदेशो बाक्नी? दे हिल्लो पचा कली सु दिक्बा? 6 गे आं कली प्रोइशो बाक्नेवे। गे नोले शोंइसीन सीन बाक्नेवे। मोपतीके गो आं गुइ क्युक्शा इ कली साइक्नुड। मुल गो आं गाइशशो मतेक्नुड। 7 गो मेको आन कली राज्य डा सहर डा ठेयब लाप्चोमी ग्योलोम हारशो खोदेशो हारताक्ड। गो आं मुर आन कली शुश श्येत गेशा खतम सेल्ता। मारदे हना मेको आन मरिम्शो पतीक रे मलेम्म। मती ३:१२ 8 मेको आन वोइश बेक्शो मीश मुरपुकी समुन्द्र डा बाल्वा क्येडा शुश दुम्तेक्म। नाक्ती उइक्थ दुम्मेनु, तौ नु आन ममा आन पबर्म साइक्ब का चाक्नुड। गो कालेम मेको आन तार सुर्ता पतीक नु ग्रीचोक पा हिंतीके चाक्नुड। 9 मिनु ७ जना बेक्शो तौ आन ममा थत। नाक्ती बाक्ना बाक्न मेको आ नां लाक्तु। मिनु मेको मुने दोक्शा शुक्शी पाइक्चा पुंडसाक्व। मेको क्येडा यो ब्रोंइशो आन कली आन जोरी सत्रुम तरवारम क्योरपाइशशा, साइक्पाइक्नुडमी” दे परमप्रभु यावेम देत। आमोस ८:९

10 आं ममा, मारदे आं कली जरमेनी। गो आं कली रागी नेल्लेम सुइ सुइम जिचा पोक्शा, गो नु सुइ मदुइनीम। गो मेको आन कली ना जेर गेशो बाक्नुडा, ना मेको आन रे जेर जशो बाक्नुडा। मो हना यो मुर नेल्लेम आं कली सराप पाइनीम। येरमीया २०:१४ 11 परमप्रभु यावेम आं कली “थमा पा, गो इ कली रिम्शो पा, प्रोइनन। गो थमा पा श्येत नु मरिम्शो दुम्मेनु इ जोरी सत्रु आन कली, इ गेय पपाइक्नुडमी। 12 मार, मुरुमी उत्तर डा फलाम नु कांसा जिकने चाप्बा डा? 13 इन पापम पतीके इन रागी नेल्लेम इन शोंप नु इन मारेइ मारेइ गो मोशान रोइशशो मार मार खोदेशो पा योक्शा गेनुडमी। येरमीया १७:३ 14 गो इन कली आंम इन मतुइशशो रागीम इन जोरी सत्रु आन वाइल सेल्नुड। मारदे हना आं गाइशशोम मी का जेप्ब। मेको गेना हना यो ब्रशा बाक्ब” दे परमप्रभु यावेमी देत। 15 मिनु गो “परमप्रभु यावे, गे नेल्ल तुइशशो बाक्नीनी। आं कली मिम्तीन। मिनु आं कली कोव्रडीन। आं कली श्येत गेब

आन कली क्येक्क लेत्तीन। गे मेको आन पबर्म शुश फाल्शा बाक्नीनी। आं कली मसाइय्यीनी। गो इन पबर्म शुक्शी पाइक्का पुंइसाक्की, गे मेको तुइक्नीनी। 16 इन लोव्र बाक्त हना, गो नोफा दाइश्शा नेंता। मेको आं कली ग्येरतीक नु आं थुं कली नाइक्पाइक्क दुम्त। मारदे हना परमप्रभु यावे, मुर नेल्ल आन परमप्रभु, गो इन के नड। ब्यवस्था ८:३; ब्यवस्था ३२:४६-४७; इजीकीएल ३:१-३; प्रकाश १०:८-९ 17 गो दला दाक्स पा बाक्क आन हुलम गेनायो मलड। गो मेकोपुकी नु मग्येरसीड। गो आं कान बाक्ती। मारदे हना इन गुइ आं तार बाक्त। मिनु गे आं कली गाइक्तीकेम प्रिंशो बाक्तीनी। 18 आं श्येत जतीक मारदे मनुम्मे? मिनु आं गार मारदे मसाब दुम्मे? गे आं कली मरिम्शो नु ब्वाक्कु मबाक्को खोला खोदेशो दुम्तीनी” देंती।

19 मोपतीके परमप्रभु यावेम “गे थमा पा लेत्ते हना, गो इ कली लेंशा ब्राइनुड। गे आं डोंइती रपो। रिम्शो लोव्र ला पाप्तीवी हना नु फश लोव्र मपाप्तीवी हना, गे आं लोव्र पाइब दुम्नेवे। मिनु एको मुरपुकी इ गे लेत्नीम। तन्न गे मेको आन गे मलेतो। 20 गो इ कली, एको मुर आन डोंइती कांसा के बोल्यो गारो सेल्लन। मेकोपुकीमी इ कली लडाइ तोइनीम। तन्न इ क्येडा मग्रानीम। मारदे हना गो इ कली प्रोंइचा कली नु वारच पाइक्का कली गे नु बाक्नुड। येरमीया १:१८-१९ 21 गो इ कली आं अरेशो मटीब आन गुइ रे प्रोंइनन। मिनु शिशी मपाइक्क आन गुइ रे यो प्रोंइनन” दे परमप्रभु यावेमी देंत।

16

परमप्रभुम निसाफ पशो

1 मिनु परमप्रभु यावेमी आं कली मार देंत देंशा हना 2 “गेमी एको रागीम ग्युंवे पचा नु तमी तौ थिचा मदुम्नेवे” देंत। 3 मारदे हना एको रागीम जरमेशो तमी तौपुकी नु आन आंम आफ आन पबर्म परमप्रभु यावेम 4 “मेकोपुकी मसाब रोइम बेक्नीम। मेको आन पबर्म सुइम रोंका मपाइनीम। मेको आन कली सुइम मथिम्नीम। मेकोपुकी खपीम मोव्रल खोदेशो पा बाक्नीम। मेको तरवार नु अन्कालम बेक्नीम। आन बेक्को रां सरीड डा चिक्क नु रागी डा जन्तु आन ब्वतीक थोव्रक दुम्नीम” देंत। येरमीया ९:२१

5 मारदे हना परमप्रभु यावेम “गे मुर बेक्को खिंमी रोंका पथ नु रोंका पाइब आन कली लेम्थ मलावो। मारदे हना गो मेको जात डा मुर रे थुं नाइक्तीक, गेना हना यो दाक्तीके नु शिशी पतीके लाइक्ने थुम्ता। 6 एको रागीम आइक्क नु ठेयब नेल्ल बेक्नीम। मेको आन कली सुइम मथिम्नीम। मेको आन पबर्म सुइम रोंका मपाइनीम। आंम रां रिक्सीब नु चां प्रेक्क सुइ मबाक्नीम। येरमीया ४१:५; येरमीया ४७:५; येरमीया ४८:३७८; लेवी १९:२७-२८; ब्यवस्था १४:१ 7 मिनु बेक्क आन पबर्म रोंका पाइब नु आम आफ आस कली लेम्चा कली सुइम तूचा थोव्रक मगेनीम। 8 गे भोज पशो खिंम मओव्रडो। मिनु मेकोपुकी नु जचा तूचा कली मनिस्सो। 9 मारदे हना मुर नेल्ल आन परमप्रभु यावे, इस्राएली आन परमप्रभुमी ‘गो एको रागी रे इन पालाम, इन डोंइती रे थुं नाइश्शा बाक्तीक, ग्येरशो सेंदा नु ग्युम्ली ग्युम्ले आस सेंदा क्याम्नुड’। येरमीया ७:३४ 10 मिनु गे एको मुर आन कली एको लोव्र नेल्ल देंनेनु, मेकोपुकीमी इ कली ‘मारदे परमप्रभु यावेम आंइ कली ओदेशो ठेयब मरिम्शो दुम्तीक देंमे? आंइ मरिम्शो पशो मार बाक्का? गो परमप्रभु यावे, आंइ परमप्रभु कली मार पाप पका डा?’ देंनीम। येरमीया ५:१९ 11 मिनु गे मेको आन कली ‘इन किकी पिपीमी आं कली प्रोंइशा, देवी देवता आन नोले खोइश्शा, मेको आन कली पूजा पा ठेयब सेल्लेक्कम। मोपा आं कली प्रोंइशा आं अरेशो मपामे। 12 गेपुकीमी इन किकी पिपी आन क्येडा शुश मरिम्शो पाइतीनी। नेनीन, गे एकेर बाक्क नेल्लेमी इन खकटा थुंमी इन दला दाक्स पाइनीनी। मिनु गे आं लोव्र नेंचा मदाक्नीनी। येरमीया ७:२६ 13 मोपतीके गो इन कली इन मतुइश्शो रागी नु इन किकी पिपी आन मतुइश्शो रागीम ताइक्नन्नी। मिनु गेपुकीमी मेकेर नाक्को नाक्ती देवी देवता आन कली पूजा पाइनीनी। मारदे हना गो इन कली शिशी मपाइनुड’ देनो” दे परमप्रभुमी आं कली देंत। ब्यवस्था २८:६४

14 मिनु परमप्रभु यावेमी “परमप्रभु यावे ब्रोंइशा बाक्को नु मुर आन कली इजीप्त रागी रे गुंइशा एक चाक्को खोदेशो पा मदेतीक नाक्ती थमा पा जाक्नीम। 15 तन्न मार देंनीम देंशा हना, मेकोपुकीमी ‘परमप्रभु यावे ब्रोंइशा बाक्को नु इस्राएली आन कली उत्तर डा रागी नु तेको तेको रागी रे चाक्को खोदेशो पा’ देंनीम। मारदे हना गो मेको आन कली आन किकी पिपी आन कली गेशो रागीम चाक्नुडमी। येरमीया २३:७-८ 16 मुल गो शुश ग्याइल आप्ब आन कली ब्रेशशा सोइक्नुडमी। मिनु मेकोपुकीमी मेको आन कली ग्याइक्नीम। नोले गो लेंशा शुश सिखारी आन कली ब्रेशशा सोइक्नुडमी। मिनु मेकोपुकीमी, मेको आन कली तेकोइ डांडा नु तेकोइ पहाड नु सेरथे फुल्लु डा काक्पे रे माल्शा

ग्रुंडनीम। 17 मारदे हना गो मेको आन लां नेल्ल तुइक्नुड। मेको आं डोंइती मखुइश्शो बाक्नीम। मेको आन मरिम्शो पशो यो आं डोंइती मखुइश्शो बाक्ब। अय्युब ३४:२१ 18 गो मेको आन मरिम्शो पशो नु आन पाप आ पबर्म मेको आन कली निक्शी खेयप सजाइ गेनुडमी। मारदे हना मेकोपुकीमी सोक्ती मपाइश्शो मूर्तिपुकीम आं रागी ग्रांग्रा दिशो सेल्लेक्म। मिनु आं थेरशो रू आन ग्रांग्रा दिशो देवी देवताम प्रिंताक्म” देंत। यसैया ४०:२ 19 मिनु मेकोपुकीमी “परमप्रभु यावे, गे आं सक्ति नु आं खुइश्शा, ब्रोंइशा बाक्तीक बाक्नीनी। गे श्येत जची ना आं खुइक्तीके बाक्नीनी। रागी रागी डा मुर रागी डा सुर रे इन डोंइती जाक्नीम। मिनु मेकोपुकीमी ‘आंइ किकी पिपी आन देवी देवता जोल ला बाक्तेक्म। मेको शोर गाक्शो बाक्तेक्म। भजन संग्रह ३६:७ 20 मार, बेक्शा लाइब मुरपुकीम आंम देवी देवता सेल्ले चाप्नीमी डा? तन्न मेकोपुकी देवी देवता मनम’ देंनीम। 21 मोपतीके गो मेको आन कली थमा पा रुप्पाइक्नुडमी। गो मेको आन कली आं सक्ति नु आं ठेयब दुम्तीके आ पबर्म शेनुडमी। मिनु मेकोपुकीमी आं नें यावे बाक्ब, दे तुइक्नीम” दे परमप्रभु यावेमी देंत। प्रस्थान ३:१२

17

पाप रे प्रोंइतीके नु निसाफ

1 परमप्रभु यावेमी “यहूदा आ पाप फलाम के मुतीकेम मुशा ब्रेक्शो बाक्ब। मेको हीरा पाइश्शो मुतीकेमी आन थुं नु आन चढेतीक डा ग्रात्रपुकीम मुशा ब्रेक्शो बाक्ब। २राजा २३:४-१८ 2 मेको आन आलपुकीमी यो आन चढेतीक नु आन मूर्ति पाइश्शो थाम आन कली मिम्नीम। मेको नेल्ल गिगी रवा आन पुंम नु लाइश्शो पहाड तार बाक्तेक्म। 3 मेको डांडा तार नु रूम बाक्तेक्म। मिनु इन रागी डा शोंप नु इन रिम्शो मारेइ मारेइ थोवक नेल्ल इन पाप पतीकेम रोइक्पाइक्नुड। येरमीया १५:१३ 4 इन पाप पतीकेम गो इन कली गेशो, इन थेरशो रू साम्नीनी। मिनु गो इन कली इन मतुइश्शो रागीम इन जोरी सत्रु आन वाइल दुम्पाइक्नन्नी। मारदे हना आं गाइक्तीके मी ब्रशो खोदेशो बाक्ब। मिनु मेको गेना हना यो ब्रस डा ब्रस बाक्ब” देंत।

5 परमप्रभु यावेम मार देंत देंशा हना “सु सुमी मुर आन कली थमा सुइक्नीमी, मेको सराप राइनीम। आन रां डा सक्ति थमा सुइक्ब यो सराप राइनीम। मारदे हना मेको आन थुं परमप्रभु यावे रे डोन लशो बाक्ब। भजन संग्रह ११८:८; भजन संग्रह १४६:३; २इतिहास ३२:८ 6 मेको गोरशो रागी डा पोश्चा रवा खोदेशो बाक्नीम। मेकोमी रिम्शो दुम्मेनु यो, मारेइ मताइनीम। मेको मुर मबाक्तीक रागी डा नेल्ल क्येडा सोव्रशो खपीम नु हिक्सी बाक्शो रागीम बाक्नीम। येरमीया ४८:६

7 परमप्रभु यावे कली थमा सुइक्ब मुर आसीक रशो बाक्नीम। मेकोपुकीम परमप्रभु यावे कली आस पशो बाक्नीम। बजन संग्रह १४६:५ 8 मेको ब्वाक्कु आ नेक्था ख्रुम्शो रवा खोदेशो बाक्नीम। मेकोमी आन शाक्श खोला आ सुर सम्म चाक्दीत्नीम। मेको हुप्तानु, महिनीम। मेको आन सफापुकी गेना हना यो गिगी बाक्नीम। नां पवानु मेको मारेइ सुर्ता मपाइनीम। मेको गेना हना यो फल सिप्ब बाक्नीम” देंत। भजन संग्रह १:३

9 मुर आन थुं नेल्ल क्येडा जोल पाइब बाक्ब। गेना हना यो दूली पाइब बाक्ब। मेको कली सुम रुप्ने चाप्बा डा? १सामुएल १६:७; बजन संग्रह ७:१०; हितोपदेस १५:११; रोमी २:६ 10 गो, परमप्रभु यावेमी मुर आन कली नाक्नुड। आन थुंम मार बाक्मे, मेको कोव्रनुड। आन गाक्शो लां नु आन पशो कोव्रशा, इनाम गेनुडमी।

11 मुर, आंम आ मपशो ब्वोफु पुप्ब क्येन्ने खोदेशो बाक्ब। मेकोमी हेंथे पा शोंप चेम्ब। मेको आ ब्रोंइतीक नाक्ती उइक्थ दुम्मेनु, मेको आ शोंपोम मेको मुर कली प्रोंइब। मिनु आ बेक्ची ना मेको कली मूर्ख मिम्सीब। लूका १२:२०

12 डोंइती रे मान तशा बाक्शो इन सक्ति पाइश्शो नित्तीके आंइ ब्रोंइशा बाक्तीक बाक्ब। येरमीया ३:१७ 13 गे इस्राएली आन आस पशो परमप्रभु यावे, इन कली प्रोंइब नेल्ल मुने दोक्नीम। इन कली प्रोंइशा गाक्ब मुर नेल्ल फुरकुम नें ब्रेक्शो खोदेशो ला बाक्नीम। मारदे हना मेकोपुकीमी गेना हना यो ब्रोंइचा गेब ब्वाक्कु, परमप्रभु यावे कली प्रोंइशो बाक्नीम। येरमीया २:१३

येरमीया आ पुंइशो

14 मिनु गो “परमप्रभु यावे आं कली सापाइय्यीनी। मिनु गो सानुड। आं कली प्रोंइय्यीनी। मिनु गो ब्रोंइनुड। मारदे हना गे आं सक्ति बाक्नीनी। प्रस्थान १५:२६; बजन संग्रह ६:३ 15 मेकोपुकीमी आं कली ‘परमप्रभु यावे आ लोव्र ते बाक्म? मुल मेको नेल्ल गाप्ल’ देंतेक्म। बजन संग्रह ५:१९ 16 तन्न गो इन गोठला दुम्तीक रे मप्रोक्ड। गे तुइक्नीनी। गो नोले डा नाक्ती सुर्ता पचा ममाल्नुड, दे मिम्शो बाक्नुड। गो मार देंडा, मेको इन डोंइती बाक्ब। 17 गे आं कली

हिंपाइक्ब मदुमीन। गो खतम दुम्चा डा नाक्ती गेन आं खुंडसीतीके बाक्नीनी। 18 आं कली खेदा पाइब आन कली मुने तोक्कीन। तन्न आं कली चहिं मुने मतोक्यीनी। मेकोपुकी हिंमल। तन्न आं कली चहिं हिंतीक रे प्रोड्यीनी। मेको आन ठेयब श्येत डा नाक्त चाक्कीन। मेको आन कली निक्शी खेयप डा श्येतम सतीन” देंती। बजन संग्रह ३५:४

नाइक्तीक नाक्त आ पर्वम लोव

19 परमप्रभु यावेम आं कली “गे मुर आन ओव्रतीक ठेयब लाप्चो आ नेक्था रपो। मेको लाप्चो रे यहूदा डा पिप लाडगा खिंडगा पाइब। यरूसलेम डा गारो डा लाप्चो नेल्ल आन डोंइती लशा रपो। नेहेम्याह १३:१५-२२ 20 मिनु मेको आन कली ‘एको ठेयब लाप्चो रे पा आगा ओव्रब यहूदा डा पिप, मेकेर डा मुर नेल्ल नु यरूसलेममी बाक्ब मुर नेल्ल परमप्रभु यावे आ लोव नेनीन’ देनो” देंत। 21 परमप्रभु यावेमी “गेपुकी होस पा बाक्कीन। मिनु गे नाइक्तीक नाक्त ठेयब लाप्चो आगाम मारेइ भारी मकुरीन। यरूसलेम डा गारो डा ठेयब लाप्चो रे पा आगा मारेइ मओइदीन। प्रस्थान २०:८-१० 22 ‘गेपुकी नाइक्तीक नाक्ती इन खिं रे भारी मकुरीन। मेको नाक्ती मारेइ गेय मपने। गो इन किकी पिपी आन कली शेंशो खोदेशो पा नाइक्तीक नाक्त कली अरु नाक्ती खोदेशो मपने। मारदे हना मेको आं नाक्त बाक्ब’ देंती। यसैया ५६:२ 23 तन्न मेकोपुकीमी मनेनेम। आन नोफा मदाइक्तेम। मिनु मेको आन थुं खकटा दुम्तीके मटीमे नु शेंशो नेने मबिस्सम। येरमीया ११:८ 24 तन्न गेपुकीम आं लोव नेतीनी हना, नाइक्तीक नाक्ती सहर नु ठेयब लाप्चो रे मारेइ भारी आगा मओइताक्नी हना नु नाइक्तीक नाक्त आं नाक्त मिम्शा, मारेइ गेय मपाइतीनी हना, 25 दाऊद आ नित्तीकेम निप्ब पिप, आन गेय पाइब मुरपुकी एको सहर डा ठेयब लाप्चो रे शाराम कीशो बग्गीम डोइशशा ओव्रनीम। यहूदा डा मुर नु यरूसलेममी बाक्ब जाक्नीम। मिनु एको सहरमी गेना हना यो मुर शुश बाक्नीम। येरमीया २२:४ 26 मिनु यहूदा डा सहर रे नु यरूसलेम आ एर ओंथ डा गाउं रे, बेन्यामीन आ रागी रे, शेफेलाह डा दिंम रे, पहाड रे नु नेगेब रे चोशा चढेतीके, क्योरशा चढेतीके, अन्न चढेतीके, धूप चढेतीक नु ‘गे रिम्शो पाइब बाक्नीनी’ दे चढेतीके चाक्शा, परमप्रभु यावे आ खिंम जाक्नीम। 27 तन्न गेपुकीम आं लोव मनेतीनी हना, नाइक्तीक नाक्ती आं नाक्त बाक्ब, दे ममिम्ताक्नी हना नु नाइक्तीक नाक्त भारी कुरशा यरूसलेम डा ठेयब लाप्चो आगा ओव्रतीनी हना, आं देशो मबिस्साक्नी हना, गो यरूसलेम डा ठेयब लाप्चोमी गेनायो मकाप्ब मी जेत्नुड। मिनु मेकोमी यरूसलेम डा दरवार दाक्ब” दे परमप्रभु यावेमी देंत। इजीकीएल २०:१२-१३

18

खप के ग्योब सेल्ब

1 परमप्रभु यावेमी आं कली मार लोव पाप्तु देशा हना 2 मेकोमी “उइ खप के ग्योब सेल्ब आ खिं लावो। मिनु गो इ कली आं लोव नेंपाइक्नुड” देंत। 3 मोपतीके गो उइ खप के ग्योब सेल्ब आ खिं लती। मिनु मेकेर मेकोमी आ गुगील हिरशा गेय पाप्तु। 4 मिनु मेको आ सेल्शो खप के ग्योब आ गुडम वारसाक्व। मिनु मेकोमी मेको खप के आ दाक्शो अर्को ग्योब का सेल्तु।

5 मिनु परमप्रभु यावेमी आं कली 6 “इस्त्राएल आ खिं डा मुर, एको खप के ग्योब सेल्बमी खोदेशो पा गो इन कली पाइक्ने मचाप्नुडा डा? इस्त्राएल आ खिं डा मुर, मेको खप के ग्योब सेल्ब आ गुडम खप बाक्शो खोदेशो पा, गे यो आं गुडम खप खोदेशो बाक्नीनी। यसैया ४५:९; रोमी ९:२१ 7 गो याम कामीन तेकोइ रागी, तेकोइ राज्य आन कली तुल्शा ताइशशा, जिक्शा खतम सेल्नुड। गो मेको पने चाप्नुड। येरमीया १:१० 8 तन्न मेको आ देशो रागी डा मुर आन मरिम्शो पतीक रे आं गे लेत्तेक्म हना, गो आं मिम्शो मेको आन कली ठेयब श्येत गेतीक रे फाइक्नुड। श्येत मगेनुडमी। येरमीया २६:३; इजीकीएल ३३:११; जोना ३:१० 9 मिनु अर्को याम काम गो तेकोइ रागी, तेकोइ राज्य आन कली सेल्शा वोइक्ने चाप्नुड। 10 तन्न मेकोपुकीम आं लोव मनेथु, आं डोंइती मरिम्शो पाम्तेक्म हना, गो मेको आन कली रिम्शो मसेल्नुडमी। 11 मोपतीके गे यहूदा डा मुर आन कली नु यरूसलेममी बाक्ब मुर आन कली परमप्रभु यावेम इन कली मार देंत देशा हना ‘नेनीन, गो इन कली मरिम्शो पाइनुड। गो इन कली श्येत गेनुड। मोपतीके गे इन मरिम्शो लां रे लेतीन। मिनु इन लां नु इन पतीके रिम्शो सेलीन’ देंनो। येरमीया ७:३ 12 तन्न मेकोपुकीमी ‘मो पचा मोशा बाक्ब। गो आंइ मिम्शो पाइनीकी। गो आंइ थुं खकटा सेल्नीकी, दे लोव लेत्ताक्म’ देंनीम” देंत। येरमीया ६:६; येरमीया ११:८

13 मोपतीके परमप्रभु यावेम “रागी रागी डा मुर आन दातेम लशा हिल्लो पावो। ओदेशो लोव सुम नेशो बाक्नीमी? ग्युंवे मपशो मीश आल इस्त्राएलम थम ग्रांरा दिशो गेय पशो बाक्ब। 14 मार, लेबानोन डा फुं सिरीयोन रोगु आ काक्पे रे जाम्बा?। मार, आ बुक्तीके पहाड रे गूशा यिशो खोला डा शाइशो ब्वाक्कु सोव्बा डा?। 15 तन्न आं मुरपुकीम आं

कली प्रेताक्म। मेकोपुकीमी शोर गाक्शो मूर्ति आन कली चोशा चढेम्तेक्म। मेको माइत लांम दाइल पपांइसाक्म। मिनु मेकोपुकी मेको माइत ठेयब लां प्रोइशा, आइक्च लां मेर गाक्तेक्म। 16 मेकोपुकीम आन रागी हिंचा डा सेल्लेक्म। मिनु मेको रागी गेना हना यो शुक्शी पतीक दुम्त। मेकेर रे सु सु गाक्मा मेको ग्रीचोक पा हिंनीम। मिनु 'आबी, आबी' देनीम। येरमीया १९:८ 17 गो मेको आन कली पूर्ब डा फशेम खोदेशो पा आन जोरी सत्रु आन डोंइती एर ओंथ ब्रपाइक्नुडमी। मेको आन हिंचा डा नाक्ती गो मेको आन कली आं ची कोंइनुडमी। आं कुल मकोंइनुडमी” देंत। येरमीया २:२७

18 मिनु मेकोपुकीम “मुल गोपुकीम येरमीया कली दोस गेय। मारदे हना चढेब आन शेंशो लोव्र मग्याम्ब। जोक्ब तुइक्ब आन अर्ती यो मग्याम्ब। मिनु परमप्रभु यावे आ लोव्र पाइब आन देंशो लोव्र यो मजाम्ब। मोपतीके मुल गो येरमीया कली दोस गेय। मिनु मेको आ देंशो तेकोइ लोव्र मनंय” देंतेक्म।

19 मिनु येरमीयामी “परमप्रभु यावे आं लोव्र नेनीन। आं कली दोस गेबपुकीम मार देंनीमी, मेको नेनीन। 20 मार, रिम्शो आ पा डा मरिम्शो पांइसीबा डा? मो हना यो आं कली खाल्टा दोशो बाक्तेक्म। गो मेको आन पर्बम पुंइना पुंइन बाक्ती, मेको मिम्तीन। मेको आन कली वारच पचा कली नु इन गाइश्शो तेक्चा कली पुंइता। 21 मोपतीके मेको आन आल आन कली अन्काल पपतीन। मेको आन कली तरवारम साइक्पतीन। मेको आन मीश आल मबाक्शो नु आन वोंइश बेक्शो मीश मुर दुम्मल। मेको आन वोंइश मुर बेक्तीक रोइम बेक्मल। मेको आन ठिटा वोंइश मुरपुकी लडाइम तरवारम साइक्चा पुंइसमल। 22 गेमी मेको आन कली आन मतुइक्थु साइक्ब चाक्नीनु, मेको आन खिं रे डाक्शो ब्रेश्शो नेंसेक्ल। मारदे हना मेकोपुकीमी आं कली ग्याइक्चा कली खाल्टा दोशो बाक्तेक्म। मिनु आं खोइल फ्रिम्चा कली खुइश्शा ब्वारद दाइश्शो बाक्तेक्म। 23 मिनु परमप्रभु यावे, आं कली साइक्चा माल्शो नु मरिम्शो पाइब नेल्ल आन कली तुइक्ताक्नी। मेको आन मरिम्शो पशो माफ मगेने। इन डोंइती रे मेको आन पाप मतिलीन। मेको इन डोंइती दाइल पांइसीमल। गे गाइक्तीनीनु, मेको आन कली मार पचा माल्बा, मेको पने” देंत। मत्ती ६:१५

19

ब्रोल्लो गर

1 परमप्रभु यावेमी “लशा खप के ग्योंब सेल्ब रे ब्वाक्कु कुर पतीक ग्योंब का ग्यापो। मिनु का निक्शी मुर आन दाते डा खाल्पा नु का निक्शी चढेब आन कली लाइक्मी। 2 मिनु गे हिन्नोम आ तौ आ बेंसीम बाक्शो गम्टे लाप्चोम लावो। गो इ कली मार शेंदु, मेको लोव्र मेकेर ठेयब सेंदा पा नेंपाइक्मी। येरमीया ७:३१ 3 यहूदा डा पिप नु यरूसलेमम बाक्ब मुरपुकी परमप्रभु यावे आ लोव्र नेनीन। मुर नेल्ल आन परमप्रभु यावे, इस्राएली आन परमप्रभुमी ‘आं लोव्र नेनीन। गो एको रागीम थम मरिम्शो दुम्पाइक्नुड’ मेको आ पर्बम लोव्र नेंब नेल्ल आन नोफा दाइक्नीम। २राजा २१:१२ 4 मेको मुरपुकीमी आं कली प्रोइतीमी। मिनु एकेर अर्को रागी डा देवी देवता आन कली चढेशा, एको रागी ग्रांग्रा दिशो सेल्लेक्म। मेको देवी देवता आन किकी पिपी नु यहूदा डा पिपम यो मतुइश्शो बाक्तेक्म। मिनु मेकोपुकीम रागी कली दोस मताइब आन हुशेम प्रिंताक्म। 5 मेकोपुकीमी आंम आल आन कली बाल देवता कली मीम चोशा चढेचा कली डांडाम थान सेल्ना सेल्न बाक्तेक्म। मेको मो पन, दे गो मअरेडमी। गो मेको मशेंदुमी। मोदेशो गेनायो ममिम्तु। येरमीया ७:३१-३३; लेवी १८:२१ 6 मोपतीके होस पा बाक्कीन। मेको बेंसी कली तोफेथ नु हिन्नोम आ तौ आ बेंसी, दे वोइश्शो नें प्रोइनीम। मेको शुश नाक्त रिम्चा ममाल्नीनी। तन्न मेको कली मुर साइक्तीक बेंसी, दे नें वोइक्नीम। येरमीया ७:३२ 7 गो एको रागीमी यहूदा नु यरूसलेम आस मिम्शो मदुम्पाइक्नुड। गो मेको आन कली आन जोरी सत्रु आन डोंइती तरवारम साइक्पाइक्नुडमी। सु सुम मेको आन कली साइक्चा दाक्नीमी, मेको आन गुइम गेनुडमी। आन बेक्शो रां चहिं सरीड डा चिक्ब नु रागीम बाक्ब ब्वाकी डा जन्तु आन कली ब्वचा गेनुडमी। 8 मिनु गो मेको सहर कली हिंचा डा सेल्लुड। मिनु मेको सहर गेना हना यो शुक्शी पतीक दुम्ब। मेकेर रे सु सु गाक्मा, मेको ग्रीचोक पा हिंनीम। मिनु आ खतम दुम्तीके आ पर्बम आबी, आबी देंनीम। येरमीया १८:१६ 9 मेको आन कली आन तमी तौ आन श्ये ब्वपाइक्नुडमी। सहर पुम्तीके मुर नेल्ल आन नेक्था डा मुर आन श्ये ब्वाइनीम। आन जोरी सत्रु नु मेको आन कली साइक्चा माल्ब आन गेशो श्येतम मोदेशो पाइनीम। लेवी २६:२९; ब्यवस्था २८:५३

10 मिनु नोले गे मेको ब्वाक्कु कुर पतीक खप के ग्योंब, गे नु लाइब आन डोंइती प्रोलो। 11 मिनु गे मेको आन कली मुर नेल्ल आन परमप्रभु यावेमी ‘दोपा खप के ग्योंब सेल्ब आ ग्योंब गेनायो मबोंइसीचा डा पा ब्रोल्ले, मोपा गो मेको मुर आन कली नु एको सहर आन कली प्रोल्लुड। तोफेथमी मुर थिम्तीक मनुम्म सम्म बेक्शो मुर थिम्नीम। यसैया ३०:१२-१४; येरमीया ७:३२ 12 गो एको सहर नु एकेर बाक्ब मुर आन कली मो पाइक्नुडमी। गो एको सहर कली

तोफेथ खोदेशो सेलनुड। 13 यरूसलेम डा खिंपुकी नु यहूदा डा पिप आन खिंपुकी तोफेथ खोदेशो पा ग्रांग्रा दिचा डा दुम्नीम। तेको तेको खिं तारी सरीड डा नां, तास्ला नु सौरुल आन कली चढेशा, अरु देवी देवता आन कली तूचा थोत्रक चढेमे, मेको खिं नेल्ल ग्रांग्रा दिचा डा दुम्नीम' देनो" दे परमप्रभु यावेमी दंत। येरमीया ३२:२९; २राजा २३:१२; सेफन्याह १:३

14 मिनु परमप्रभु यावेमी येरमीया कली लोत्र पथ, तोफेथ सोइक्ताक्व। मिनु येरमीया मेकेर रे जाक्शा, परमप्रभु यावे आ खिं डा लाडगाम बाक्शा, मुर नेल्ल आन कली 15 मुर नेल्ल आन परमप्रभु यावे, इस्राएली आन परमप्रभुमी मार दंत देशा हना "गो एको सहर नु आ नेक्था डा सहर डा मुर नेल्ल आन कली आं डोंइती देशो ठेयब श्येत जपाइक्नुडमी। मारदे हना मेको आन थुं खकटा बाक्ब। मिनु आं लोत्र नेंचा मदाक्नीम" दे माइक्तीमी।

20

येरमीया नु चढेब पशुर

1 मिनु इम्मर आ तौ चढेब पशुर परमप्रभु यावे आ खिंम गेय पाइब आन ठेयब मुर बाक्त। मेकोमी येरमीया आ लोत्र पशो नंतु। 2 मिनु पशुरमी परमप्रभु यावे आ लोत्र पाइब येरमीया कली तुप्तु। मिनु परमप्रभु यावे आ खिंम बाक्शो बेन्यामीन आ इर तला डा लाप्चोम बाक्शो ठेंडरो थोक्ताक्व। प्रेरित १६:२४ 3 मिनु आ दीसा पशुरमी येरमीया कली ठेंडरो रे गुंडदानु, येरमीयामी मेको कली "परमप्रभु यावेम इ नें पशुर मवोइक्थु 'एर ओंथ नेल्ल रे हिंतीक' दे इ नें वोइक्तु। येरमीया २०:१०; येरमीया ६:२५; येरमीया ४६:५; येरमीया ४९:२९; बजन संग्रह ३१:१४ 4 मारदे हना परमप्रभु यावेमी गो इ कली नु इ वारच नेल्ल आन कली शुश हिंचा डा सेलनुड। मेकोपुकी इ डोंइती आन जोरी सत्रु आन तरवारम साइक्चा पुंडसीनीम। गो यहूदा नु मेको आ मुर नेल्ल आन कली बेबीलोन डा पिप आ गुडम गेनुडमी। मेकोमी मेको आन कली ग्याइश्शा बेबीलोन लाइक्ब। मिनु तरवारम साइक्ब। 5 गो एको सहर डा शोंप नेल्ल, आ चेम्शो क्येट नेल्ल, आ शुश क्येट लाइब थोत्रक नेल्ल नु यहूदा डा पिप आन शोंप नेल्ल आन जोरी सत्रु आन कली गेनुडमी। मेकोपुकीमी आन मारेइ मारेइ रोइश्शा, मेको आन कली ग्याइश्शा बेबीलोन लाइक्नीम। यहोसु ३९:६ 6 पशुर, गे नु इ खिंम बाक्ब नेल्ल ग्याइक्चा पुंडसीशा बेबीलोनम लाइनीनी। गे बेबीलोन लशा, मेकेर बेक्नीनी। इन कली मेकेर थिम्नीम। गे परमप्रभु आ लोत्र दूली सेल्ला, शेंताक्वी। इ लोत्र नेंब इ वारच नेल्ल इ खोदेशो पा थिम्चा पुंडसीनीम" दंत।

येरमीयाम उजुर पशो

7 मिनु येरमीयाम "परमप्रभु यावे, गे आं कली लेम्शा, इन लोत्र पाइब सेलतीनी। मिनु गो इन लेम्शो लोत्र नेंशा बिस्साक्यी। इन सक्तिमी आं कली ग्रातीनी। मुल नाक्त रेन मुरुम आं कली शुक्शी पाइनीम। मुर नेल्लेमी आं कली शुक्शी पाइनीमी। येरमीया १:५-७ 8 गो लोत्र पची ना ठेयब सेंदा पा लोत्र पचा मालनुड। गो हुश खाक्श बोक्चा नु खतम दुम्चा आ पबर्म ला ग्रीनुड। परमप्रभु यावे आ लोत्र नाक्त रेन आं कली शुक्शी पाइक्तीक नु मरिम्शो पाइक्तीके दुम्त। 9 गो मेको आ पबर्म लोत्र मपाइनुड। आ नें थिशा लेंशा लोत्र मपाइनुड देंती हना यो, आ थुंमी ब्रशो मी खोदेशो दुम्त। आं रुशपुकीम तेक्शा वोदुनु, मी खोदेशो दुम्त। गो मेको कली तेक्शा दती। गो थमा पा, मेको कली तेक्ने मचाप्नुड। १कोरिन्थी ९:१६ 10 गो शुश मुरपुकीम नोफा मुइक्मुशा लोत्र पशो नेंता। मेकोपुकीमी 'एर ओंथ नेल्ल हिंचा डा श्येत बाक्ब। येरमीया कली दोस गेय। मेको आ पबर्म उजुर पय' देंनीम। आं नेक्था डा वारच नेल्लेमी 'गेना दाइल पांडसीबा' दे आं कली कोत्रनीम। मिनु लेंशा 'गो मेको आ पबर्म लोत्र पा मेको कली ग्राने चाप्नीकी। गो मेको क्येडा ग्राशा क्येक्क लेत्नय' देंतेक्म" देंत। येरमीया २०:३; येरमीया १८:१८ 11 तन्न परमप्रभु यावे बोल्यो लडाइ पाइब का खोदेशो पा गो नु बाक्ब। मोपतीके आं कली खेदा पाइबपुकी दाइल पांडसीशा, गोलनीम। मिनु मेकोपुकीम आं कली मग्रानीम। मेको थाम्पा मुने दोक्नीम। मारदे हना मेको आन मरिम्शो पशो गेनायो मप्रेंसीब। येरमीया १:८,१९ 12 मुर नेल्ल आन परमप्रभु यावे, गे ठीक पाइब आन कली नाक्शा कोत्रनीनी। गे मुर आन थुं नु आन मिम्तीके कोत्रनीनी। आं कली मेको आन कली क्येक्क लेशशो तचा गेयीनी। मारदे हना गो आं निसाफ पतीके इन कली जिम्मा गेता। येरमीया ११:२०

13 मिनु "परमप्रभु यावे कली कुम्सो पने। परमप्रभु यावे ठेयब बाक्ब" दे कुम्सो पने। मेकोमी क्येट मथीब आन कली मरिम्शो पाइब आन गुइ रे प्रोंइतु।

14 गो आं जरमेशो नाक्त सराप रल। आं ममाम आं कली जरमेशो नाक्त आसीक मतवल। येरमीया १५:१०; अय्युब ३:३-११; अय्युब १०:१८ 15 आं आफ कली “इ के आल का जरमेसाक्व। तौ का जरमेसाक्व” दे लोव्र शेंब सराप रल। मेकोमी आं आफ कली ग्येरपाइक्तु। 16 परमप्रभु यावेमी मेको मुर कली शिशी मपथु, मेको मुर खतम पोक्शो सहर खोदेशो दुम्ल। मेकोमी सुनी डाक्शो ब्रेशो नु नाक्ती लडाइ डा तुराही ताप्शो नेनल। उत्पत्ती १९:२४-२८ 17 मारदे हना मेकोमी आं कली आं ममा आ कोव्रज उइ मसाइय्यी। मो दुम्लो हना, आं ममा, आं तुरस दुम वा। मिनु आ कोव्रज गेना हना यो ठेयब दुम वा। 18 गो मारदे कोव्रज रे गूडा? गो शुश गेय नु सुर्ता पचा कली जरमेसाक्वी। मिनु नाक्त किंत किंत मुने दोक्चा कली जरमेसाक्वी।

21

पिप सिदकीयाह आ पुंडशो मनेशो

1 मिनु पिप सिदकीयाहम माल्कीयाह आ तौ पशहुर नु मासेयाह आ तौ चढ़ेब सेफन्याह आस कली लोव्र कुर पा येरमीया आ बाक्तीकेम सोइक्ताक्सी। मेना परमप्रभु यावेमी येरमीया कली लोव्र पाप्तु। येरमीया ३९:१-१०; येरमीया २९:२५-२६; येरमीया ३७:३; येरमीया ५२:२४ 2 मेको निक्शीमी “हजुर, परमप्रभु यावे कली आंइ पबर्म हिल्लो पने। मारदे हना बेबीलोन डा पिप नेबुकदरेसरमी आंइ कली लडाइ तोन तोन बाक्ब। साइ डोंइती शुश खेयप पशो खोदेशो पा परमप्रभु यावेमी आंइ पबर्म छक लाक्चा डा गेय पाइबा कों? मिनु मोपा मेकोपुकी आंइ रे पा लेशशा लाइनीमी कों?” देंताक्से। 3 मिनु येरमीयामी मेको आस कली 4 “परमप्रभु यावे, इस्राएली आन परमप्रभुमी मार लोव्र पाप्तु देशा हना, गे सिदकीयाह कली ‘गारो आ लाडगाम बाक्शो इन कली पुम्ब बेबीलोन डा पिप नु कल्दी नु लडाइ पशो इन गुइ डा यापुकी इन गे लेप्पाइक्नुड। मिनु गो मेको आन कली खुप्शा, एको सहर आगाम ओंइनुडमी। 5 गो आं दिंशो गुइ, सक्ति नु आं थाम्पा गाइशशा, चुरशा नु ग्युश्रा बोक्शा, गे नु लडाइ पाइनुड। 6 गो एको सहरम बाक्ब मुर नु बस्तु भाव नेल्ल आन कली साइक्नुडमी। मिनु मेकोपुकी ठेयब बेक्तीक रोइम बेक्नीम’ देंत, दे मतीस। 7 मिनु नोले परमप्रभु यावेमी ‘गो यहूदा डा पिप सिदकीयाह, मेको आ गेय पाइबपुकी नु मेको सहर डा बेक्तीक रोइ, तरवार नु अन्काल रे ब्रोंइशो मुर आन कली बेबीलोन डा पिप नेबुकदरेसर आ गुइम गेनुडमी। गो मेको आन कली साइक्चा माल्ब आन जोरी सत्रु आन गुइम जिम्मा गेनुडमी। मिनु मेकोमी मेको आन कली तरवारम साइक्पाइक्ब। मेकोमी मेको आन कली शिशी मपथु, मप्रोंइब नु दाक्तीके मकोंइथु, साइक्पाइक्ब’ मतीस” दे माइक्तीम्सी।

8 मेकोमी “गेमी मेको मुर आन कली ‘परमप्रभु यावेमी “गो इन डोंइती ब्रोंइशा बाक्तीक नु बेक्तीक लां वोइक्ता। ब्यवस्था ३०:१५ 9 मेको सहरम बाक्ब मुर तरवार, अन्काल नु मुर बेक्तीक रोइम बेक्चा माल्नीम। तन्न सु लाडगा गूशा, इन कली पुम्ब कल्दी आन कली जिम्मा गेंसीबा, मेको ब्रोंइब। मेकोम आ सोक्त ला प्रोंइब। येरमीया ३८:२ 10 गो एको सहर कली थमा पा क्याम्नुड। रिम्लो पचा कली ममिम्नुड। एको सहर बेबीलोन डा पिप आ गुइम गेनुड। मेकोमी एको सहर कली मीम क्रोइक्ब” देंत’ देनो” देंत। येरमीया ३४:२

11 परमप्रभु यावेम “यहूदा डा पिप आ खिं डा मुर आन कली ‘परमप्रभु यावे आ लोव्र नेनीन। 12 गे दाऊद आ खिं डा मुर सुनी कुस कुस ठीक निसाफ पने। रोइक्चा पुंडसीशो आन कली मरिम्शो पाइब आन गुइ रे प्रोनीन। मो मपाइतीनी हना, इन मरिम्शो पतीके आं गाइक्तीके मी खोदेशो पा ब्राइब। मेको सुइम काप्ने मचाप्चा डा पा ब्राइब। येरमीया २२:३; येरमीया ७:२० 13 एको दिंमम बाक्बपुकी रोंगु तार सेल्लो सहर गो इन कली लडाइ तोइनुड। गे आंइ कली जाक्शा, सुम लडाइ तोइबा डा? “आंइ खुइक्तीके सु ओव्रने चाप्बा डा? आंइ बाक्तीकेम सु ओव्रने चाप्बा डा?” देंनीनी। 14 गो इन कली इन पशो खोदेशो पा कोव्रशा, सजाइ गेनन्नी। गो इन ब्वाकीम मी सुइक्नुड। मिनु मेकोमी इन एर ओंथ बाक्शो मारेइ मारेइ नेक्ब, दे परमप्रभु यावेमी देंत’ देनो” देंत। गलाती ६:७; इजीकीएल २१:३

22

पिप शाल्लुम येहो-याकीम नु कोन्याह

1 परमप्रभु यावेम “उइ यहूदा डा पिप आ दरवारम लशा, मेकेर मार लोव्र पचा माल्नेवे देशा हना, 2 ‘दाऊद आ नित्तीकेम निप्ब, यहूदा डा पिप, इन गेय पाइबपुकी नु मेको ठेयब लाप्चो रे ओव्रबपुकी परमप्रभु यावे आ लोव्र नेनीन। 3 परमप्रभु यावेमी मार देंत देशा हना “गे ठीक निसाफ पने। ठीक गेय पने। रोइक्चा पुंडसीशो आन कली मरिम्शो पाइब आन गुइ रे प्रोनीन। अर्को रागी डा मुर, रोम रोइक्च नु आन वोंइश बेक्शो मीश मुर आन कली मरिम्शो मपने।

मिनु एको रागीम मारेइ दोस मताइब आन हुश मशाइकपतीन। येरमीया २१:१२ 4 मारदे हना गेपुकीम थमा पा एको आं लोव्र पाइतीनी हना, एको दरवार डा ठेयब लाप्चो रे पा ओव्रशा, दाऊद आ नित्तीकेम निप्ब पिप गेना हना यो बाक्ब। मेको बग्गी नु शाराम जाक्शा, मेको आ गेय पाइब मुरपुकी नु अरु मुरपुकी नु ओव्रब”। येरमीया १७:२३ 5 तन्न गेपुकीम एको आं लोव्र मपाइतीनी हना, परमप्रभु यावेम “गे आं नेमी कसम जशा, एको दरवार क्याम्नुड” दे मतो” देंत। १राजा ९:८ 6 मारदे हना यहूदा डा पिप आ दरवार आ पर्वम परमप्रभु यावेमी “गे आं कली गिलाद नु लेबानोन डा डांडा खोदेशो बाक्नेवे। गो इ कली गोरशो रागी नु मुर मबाक्शो सहर खोदेशो सेल्लुड, दे कसम जाता। 7 गो इ कली या कुरशा, खतम सेल्ब आन कली ठीक पाइनुड। मेकोपुकीम इ नेल्ल क्येडा रिम्शो लाइशो लेबानोन डा रवा तिम्नीम। मिनु मीम हुम्नीम। 8 मिनु शुश रागी रागी डा मुरपुकी एको सहर रे पा लाइनीम। मिनु मेको नेल्लेमी ‘परमप्रभु यावेम, मारदे एको ठेयब सहर कली ओदेशो पवा?’ देमुइनीम। 9 मिनु मेको आन कली ‘मारदे हना मेकोपुकीमी परमप्रभु यावे, आन परमप्रभु आ कबल पशो प्रोंइशा, देवी देवता आन कली पूजा पा, मेको आन कली गेय पांतेक्म’ देशा लोव्र लेत्चा पुंडसीनी” देंनीम। 10 बेक्शा लशो आन पर्वम मडाक्कीन। मेको आन पर्वम रोंका मपने। मेको क्येडा यो ग्याइशशा लाइशो मुर आन पर्वम डाक्कीन। मारदे हना मेको गेनायो मलेप्ब। मेकोमी आ रागी गेनायो मताइब। २राजा २३:२९-३४

पिप शाल्लुम आ पर्वम लोव्र

11 परमप्रभु यावेम यहूदा डा पिप योसीयाह आ तौ शाल्लुम आ पर्वम लोव्र पाइब। मेको आ आफ आ पा डा यहूदा डा पिप दुम्त। मिनु मुल मेको एक रे लत। मेको एक लेशशा मजाक्ब। शाल्लुम कली योआहास यो देंनीम। १इतिहास ३:१५; २इतिहास ३६:१-४ 12 मेको कली तेको रागीम ग्याइशशा लदमे। मेको मेक उइ बेक्ब। मेकोमी एको रागी लेशा गेनायो मताइब। 13 “आबी, आबी, सुमी पाप पतीकेमी आ खिं सेल्बा, सुम आ खिं डा आइक्था डा कोठा ठीक मपतीकेमी सेल्बा, मेकोमी आ नेक्था डा मुर आन कली मोशा गेय पपाइक्ब। मिनु मेको आन कली आन गेय पशो डा गाल्च मगेब। २राजा २४:१४; मीका ३:१०; लेवी १९:१३; याकूब ५:४ 14 मेकोमी ‘गे आं कली तला तार शुश ठेयब कोठा पाइशो खिं का सेल्लुड’ देंब। मेकोमी झेलपुकी सेल्ब। मेको कली लेबानोन डा लाइशो रवा आ शीम क्येप्शा, मेको कली लल रड खेक्ब। 15 मार, गे पिप नवे? मारदे हना गे गारो नेल्ल बोल्यो शीम क्येप्नेवे? इ आफ नु जचा तूचा थोव्रक बाक्त। मेकोमी ठीक निसाफ नु ठीक गेय पाप्तु। मिनु मेको कली रिम्शोन दुम्त। 16 मेकोमी प्रुडग नु मारेइ मथीब आन कली ठीक निसाफ पाप्तु। मिनु मेको कली रिम्शोन दुम्त। मेको आं कली तुइक्ब मुरुम पाइनीम” दे परमप्रभु यावेम देंत। 17 तन्न इ मिक्च नु इ थुंम ठीक पा मचेम्शो क्येट ला बाक्ब। गे दोस मताइब आन हुश शाइक्पाइक्नेवे। गे मुर आन कली दिप्शा हुश ख्वाक्श पोक्नेवे। मरिम्शो पचा नु रोइक्चा ला दाक्नेवे। 18 मोपतीके परमप्रभु यावेम “यहूदा डा पिप योसीयाह आ तौ येहो-याकीम आ पर्वम ‘आबी, मुरपुकीमी मेको आ पर्वम रोंका पची ना आं लोक्ब, आबी, आ समी मदेनीम’ मेको आ पर्वम मडाक्कीनीम। मिनु ‘आबी, आं प्रभु, आबी, मान ताइब पिप’ दे मेको आ पर्वम मडाक्कीनीमी। २राजा २३:३४ 19 मेको कली गधा का थिम्शो खोदेशो पा, कीशा लाइशशा यरूसलेम डा ठेयब लाप्चो आ डोंइती गुंडशा ताइक्नीम” देंत। येरमीया ३६:३०

20 लेबानोनम लशा ठेयब सेंदा पा ग्रीडो। इ सेंदा बाशानम नेंपाइक्मी। अबारीम पहाड रे ठेयब सेंदा पा ग्रीडो। मारदे हना इ दाक्शो मुर नेल्ल बेक्तेक्म। 21 गे रिम्शो पा बाक्डेनु, गो इ कली लोव्र पाता। तन्न गे “गे मेको मनेनुड” देंते। गे ठिटा बाक्डे ना रेन मोदेशो बाक्ते। गे आं देशो मटिची। 22 इ गोठला नेल्ल आन कली फशेम बेर पाइशशा योल्ब। मिनु इ वारच नेल्ल ग्याइशशा लाइक्चा पुंडसीनीम। मेना गे इ मरिम्शो गेयम पतीके मुने दोक्शा, आमाइ, मेको श्येत नेल्ल परमप्रभु यावे आ अरेशो मटितीके दुम्शो बाक्ब। 23 लेबानोनम बाक्ब मुर, लेबानोन डा लाइशशा रवा आन दातेमी खिं सेल्ब मुरपुकी, श्येत नु सुत्केरी रोइ पशो खोदेशो दुम्तीनी हना, दोपा हुकयी पाइनीनी।

24 परमप्रभु यावेम “गे दोपा ब्रोंइशा बाक्डा, मोपा यहूदा डा पिप येहो-याकीम आ तौ कोन्याह माइशशा येहो-याकीम कली ‘गे आं ग्युरा गुइ डा छाप थोक्तीक औंठी नवे हना, गो इ कली गुंडशा ताइक्तन वा। कोन्याह कली योयाकीम यो देंनीम। २राजा २४:८-१६; येरमीया २४:१ 25 गो इ कली साइक्चा माल्ब मुर आन गुइम गेनन। गे मेको आन कली तशा हिंनेवे। गो इ कली मेको बेबीलोन डा पिप नेबुकदरेसर नु कल्दी आन गुइम गेनन। 26 गो गे नु इ कली जरमेब इ ममा इस कली अर्को रागीम ताइक्नन्सी। मिनु गे निम्फा मेकेर बेक्नीसी। 27 तन्न मेको आस लेत्चा माल्शो रागीम, लेत्चा मताइनीस। 28 मार, एको कोन्याह माइशशा मुर सुइम मदाक्शो ब्रोल्लो ग्योब खोदेशो बाक्बा डा? मेको मोदेशो ग्योब कली सुइम ममाल्नीम। मोपतीके मेको नु मेको आ आल आन मतुइशशा रागीम ताइक्चा पुंडसीनीमी?” देंत।

कोन्याह माइशो येहो-याकीम आ तौ कली येकोन्याह यो देंनीम। येरमीया २४:१ 29 ए रागी, रागी डा मुर नेल्ल, परमप्रभु यावे आ लोव्र नेनीन। 30 परमप्रभु यावेमी “मेको मुर आ नें क्याम्सीब, दे ब्रेक्शा वोतो। मेको मुर बाक्म सम्म मारेइ पने मचापब। मेको आल मपाइशो मुर दुम्ब। मारदे हना मेको के तेकोइ मुर रिम्शो मदुम्नीम। मेको आ चच युइ दाऊद आ नित्तीकेम नित्चा मताइनीम। मेकोपुकीमी यहूदा आ नित्तीकेम निश्शा हुकुम पचा मताइनीम” देंत। १इतिहास ३:१७-२४

23

मरिम्शो गोठला आन पर्वम लोव्र

1 परमप्रभु यावेमी “आबी, गे आं भेडा आन कली एर ओंथ ब्रपाइक्ब गोठला” देंत। इजीकीएल १४:-; येरमीया १०:२१; जकरिया ११:५ 2 मोपतीके परमप्रभु यावे, इस्राएली आन परमप्रभुमी आ मुर आन कली योव्रब गोठला आन पर्वम “गेपुकीम आं बगाल आन कली फ्राइतीनी। मिनु मेको आन कली खेरतीनी। मेको आन कली मकोव्रनी। मोपतीके गो इन मरिम्शो पशो आ पर्वम कोव्रनुड। इन कली सजाइ गेनुड” दे परमप्रभु यावेमी देंत। 3 परमप्रभु यावेमी “गो आं लीशो बगाल नेल्ल आन कली इन खेरशो रागी रे खुप्शा लेशशा, आन बगालम चाक्नुडमी। मिनु मेकोपुकी मेकेर सोशा बोशा शुश दुम्नीम। 4 गो मेको आन कली योव्रब गोठलापुकी वोइक्नुडमी। मिनु मेको आन कली योव्रनीम। मेना भेडा महिनीम। सुर्ता मपाइनीम। मेको आन दाते डा का यो मजाम्नीम” दे परमप्रभु यावेमी देंत। येरमीया ३:१५

5 परमप्रभु यावेम “गो दाऊद आ मुर रे ठीक पाइब राशी का वापाइक्नुड। मेको नाक्त थमा पा जाक्ना जाक्न बाक्ब। पिप कामी आ जोक्तीक तुइक्तीकेम सासन पाइब। मिनु मेकोमी आ रागीमी ठीक निसाफ नु ठीक गेय पाइब। जकरिया ३:८; यसैया ३२:१ 6 मेकोम सासन पवा ना यहूदा श्येत रे प्रोंइचा पुंइसीब। मिनु इस्राएल मारेइ मदुम्थु बाक्ब। मेको आ नेम मेकोपुकी तुइक्चा पुंइसीनीमी। मेको आ नें ‘परमप्रभु यावे आंइ कली ठीक पाइब बाक्ब’ देंनीम” देंत। ब्यवस्था ३३:२८; येरमीया ३३:१६; यसैया ४५:२४

7 मिनु परमप्रभु यावेमी “परमप्रभु यावे ब्रोंइशा बाक्शो खोदेशो नु मुर आन कली इजीप्त रागी रे गुंइशा एक चाक्शो मदेंतीक नाक्ती थमा पा जाक्नीम। 8 तन्न मार देंनीम देंशा हना, मेकोपुकीमी ‘परमप्रभु यावे ब्रोंइशा बाक्शो खोदेशो नु इस्राएली आन चच युइ आन कली उत्तर डा रागी नु तेको तेको रागी रे चाक्शो’ देंनीम। मारदे हना मेको आन रागीम बाक्चा ताइनीम” देंत। येरमीया १६:१४-१५

दूली लोव्र पाइब

इजीकीएल १३:२-१६

9 परमप्रभु यावेम आ लोव्र पाइब आन पर्वम लोव्र पशो बाक्ब। मेको नेंशा आं थुं जिक्त। आं रुश नेल्ल खिंखि पाइनीम। गो दुक्शो मुर खोदेशो दुम्ती। गो अडगुर शांबु शुश तूशा दुक्शो खोदेशो दुम्ती। गो परमप्रभु यावे आ पर्वम नु आ लोव्र आ पर्वम मोदेशो दुम्ती। 10 मारदे हना एको रागी तेल्लेम पतीकेम ब्रीशो बाक्ब। सराप रतीके, रागीम रोंका पाइब। मुर मबाक्तीके बस्तु योव्रतीके सोव्रतेक्म। परमप्रभु यावे आ लोव्र पाइब आन पतीके काइ मरिम्शो बाक्ब। आन सक्ति दूली पा चलेनीम। येरमीया १२:४ 11 परमप्रभु यावेमी “आं लोव्र पाइब नु चढेब नेल्ल आं कली ममानेब दुम्तेक्म। मेकोपुकीमी आं खिंमी यो आं अरेशो लोव्र मटीनीम। येरमीया ५:३१ 12 मोपतीके मेको आन लां छिडछिड दुम्शा ग्रेक्ब दुम्ब। मिनु मेकोपुकी मेकेर गाक्मानु, ग्रेक्शा गोल्नीम। मारदे हना गो मेको आन कली सजाइ ततीक बसंम ठेयब श्येत गेनुड। येरमीया १३:१६; बजन संग्रह ३५:६ 13 गो सामरीया डा आं लोव्र पाइब आन दातेमी ग्रांग्रा दिशो गेय ताता। मेकोपुकीमी बाल देवता आ नेम नोले दुम्ब लोव्र पाइब। मिनु आं मुर इस्राएली आन कली हेंथे लां खोइक्पाइक्तेक्म। ब्यवस्था १८:२०-२२; यसैया १:१०; इजीकीएल १३:२३ 14 तन्न यरूसलेम डा आं लोव्र पाइब आन दातेम सामरीया क्येडा यो ग्रांग्रा दिचा डा गेय ताता। मेकोपुकीम तेल्लेम पशा जोल ला पाइनीम। मरिम्शो पाइब आन कली बोल्यो सेल्नीम। मोपतीके सुइ मुर परमप्रभु यावे आ अरेशो मटितीक रे मलेत्नीम। मेको नेल्ल आं कली सोदोम खोदेशो नु यरूसलेम डा मुरपुकी चहिं गोमोररा खोदेशो दुम्तेक्म” दे परमप्रभु यावेमी देंत। 15 मोपतीके मुर नेल्ल आन परमप्रभु यावेम आ लोव्र पाइब आन पर्वम “गो मेको आन कली कशो थोव्रक उम्नुडमी। मिनु तूचा कली बीस ब्वाइशो ब्वाक्कु तूचा गेनुडमी। मारदे हना यरूसलेम डा परमप्रभु यावे आ लोव्र पाइब रेन रागी नेल्लेम परमप्रभु यावे कली थमा मसुइशो बाक्नीम” देंत। येरमीया ९:१५

16 मुर नेल्ल आन परमप्रभु यावेम “गेपुकी आं लोव्र पाइब आन लोव्र मनेनीन। मेकोपुकीमी जोल लोव्र पा इन कली हेंथे गाक्पाइक्नीम। परमप्रभु यावे आ लोव्र ममाइ, तन्न आन थुंम मिम्शो लोव्र नु आन डोमु तशो ना डा लोव्र शेंनीम। आन खकटा थुं कली खोइशशा गाक्ब आन कली ‘गे ठेयब श्येत मताइनीनी’ देंनीम। येरमीया ६:१३-१४; येरमीया १४:१४ 17 मेकोपुकीम आं लोव्र मदाक्ब आन कली गेना हना यो ‘परमप्रभु यावे इन कली थुं नाइशशा बाक्तीक दुम्ब’ देंनीम। मिनु मेकोपुकीम मटिथु आन थुं डा मिम्शोम गाक्ब आन कली ‘इन कली मारेइ हिंचा डा श्येत मदुम्ब’ देंनीम। 18 तन्न सु परमप्रभु यावे आ लोव्र नेंचा नु रुप्चा कली मेको आ अर्ती गेतीकेम बाक्म डा? सुम मेको आ लोव्र शेंचा कली नोफा दाइशशा नेंशो बाक्म डा? 19 कोव्रडीन परमप्रभु यावे आ गाइशशो फश गिवार खोदेशो पा बोक्ब। परमप्रभु यावे आ अरेशो लोव्र मटीब आन पियामी फश गिवार जुक्ब। 20 परमप्रभु यावे आ गाइशशो मलेप्ब। आ मिम्शो नेल्ल पने थुमा नोले ला लेप्ब। नोले डा नाक्ती एको लोव्र रिम्शो पा रुप्नीनी। 21 मेको आं लोव्र पाइब आन कली गो मसोइक्तुमी। मो हना यो मेकोपुकी आन लोव्र कुरशा दोरशा लाम्तेक्म। गो मेकोपुकी नु लोव्र मपड। मो हना यो मेकोपुकीमी लोव्र पाम्तेक्म। येरमीया १४:१४ 22 मेकोपुकी आं अर्ती गेतीकेमी बाक्शो हना, मेकोपुकीमी आं मुर आन कली आं लोव्र नेंचा डा पा देंम वा। मिनु मेको आन कली आन मरिम्शो लां नु आन मरिम्शो गेय रे लेत्तेक्म वा” देंत।

23 परमप्रभु यावेम “मार, गो नेक्था डा ला परमप्रभु यावे नडा डा? डोन डा चहिं परमप्रभु मनडा डा? 24 मिनु मुर आं डोंइती रे खुइशशा बाक्ने चाप्नीमी डा? मिनु गो मेको आन कली तने मचाप्नुडमी डा? मार, सरीड नु रागी निम्फा कली गो प्रिने मचाप्नुडा डा?” दे परमप्रभु यावेमी देंत। बजन संग्रह १३९:७-१६ 25 मिनु मेकोमी “गो आं नेंमी जोल पाइब आन लोव्र नेंता। गो डोमु ताता। गो डोमु ताता। 26 गेना सम्म मोदेशो दुम्बा? मेको आं लोव्र पाइब आन थुं गेना आं गे लेप्बा? मेको जोल पाइब आंम थुं डा दूली लोव्र पाइबपुकी गेना आं गे लेत्नीमी। 27 मेकोपुकीमी आन डोमु आन परबम लोव्र पा आं नें प्रेपाइक्चा माल्नीम। आन किकी पिपी खोदेशो पा आं नें आ पा डा बाल आ नें ठेयब सेल्शा, आन डोमु डा लोव्र शेंमुम्तेक्म। न्यायाधीस ३:७ 28 सुइ आं लोव्र पाइबम डोमु ताप्तु हना, आ डोमु शोव्रडल। तन्न सुइ नु आं लोव्र बाक्त हना, मेकोमी थमा पा आं लोव्र शेंदल। पराल नु चेरब मगारनीस” देंत। 29 परमप्रभु यावेमी “मार, आं लोव्र मी खोदेशो मबाक्बा डा? मेको सेरथे फुल्लु कली प्रोल्ब घन खोदेशो मबाक्बा डा?” दे परमप्रभु यावेमी देंत। हिव्रू ४:१२ 30 मिनु परमप्रभु यावेमी “कोव्रडीन, गो मेको आन कली देंशो लोव्र खोदेशो पा, मेकोपुकीमी अरु आन कली देंशो आं लोव्र आंम के सेल्शा, खुइ पा शेंनीम। मोदेशो पा आं लोव्र पाइब आन कली काइ मदाक्नुड। 31 कोव्रडीन, मेकोपुकीमी आंम थुं डा लोव्र पशा ‘परमप्रभु यावे आ लोव्र बाक्ब’ देंनीम। गो मोदेशो लोव्र पाइब आन कली काइ मदाक्नुड। 32 कोव्रडीन, मेकोपुकीमी जोल पा डोमु डा लोव्र पाइब बाक्नीम। गो मोदेशो पा आं लोव्र पाइब आन कली काइ मदाक्नुड। मेको आन जोल शेंतीकेमी आं मुर आन कली हेंथे लां खोइक्पाइक्नीम। मेकोपुकीमी काइ महिंब बाक्नीम। गो मेको आन कली मसोइक्तुमी। गो मेको आन कली मयोव्रडुमी। मोपतीके मेको आन लोव्र मुर आन कली शोर गाक्शो बाक्ब” दे परमप्रभु यावेमी देंत। येरमीया १४:१४

जोल पाइब आन लोव्र

33 मिनु मुर का, आं लोव्र पाइब का कि चढेब काम इ कली “परमप्रभु यावे आ देंशो श्येत लोव्र मार बाक्बा?” दे इ कली हिल्लो पाप्तु हना, गे मेको कली “मेको श्येत गे बाक्नीनी” देनो। मिनु परमप्रभु यावेमी “गो इन कली ताइक्नन्नी, देंत, माइक्मी” देंत। २राजा ९:५५; यसैया १३:१ 34 परमप्रभु यावेम “तेकोइ आं लोव्र पाइब, तेकोइ चढेब नु अरु सुइमी ‘एको परमप्रभु यावे आ देंशो श्येत बाक्ब’ देंतेक्म हना, गो मेको आन कली नु मेको आन खिं डा मुर आन कली सजाइ गेनुडमी” देंत, दे माइक्मी। 35 मिनु इन दातेम अर्को कली “परमप्रभु यावेम मार लोव्र पवा? दे हिल्लो पचा माल्नीनी। 36 तन्न गे लेंशा ‘परमप्रभु यावे आ देंशो श्येत लोव्र बाक्ब’ मदेनीन। मारदे हना मुर नेल्ल आन पशो लोव्र श्येत दुम्ब। मोपा गेपुकीम ब्रोंइशा बाक्ब परमप्रभु, मुर नेल्ल आन परमप्रभु यावे, इं परमप्रभु आ लोव्र दूली सेल्नीनी। 37 मिनु गे आं लोव्र पाइब नेल्ल आन कली ‘परमप्रभु यावेम इन कली मार, लोव्र लेत्ता? परमप्रभु यावेम मार लोव्र पवा?’ दे हिल्लो पचा माल्नेवे। 38 तन्न गेपुकीमी ‘एको परमप्रभु यावे आ देंशो श्येत डा लोव्र बाक्ब’ देंनीनी। मोपतीके परमप्रभु यावेमी ‘मारदे हना गे परमप्रभु यावे आ देंशो श्येत डा लोव्र बाक्ब’ देंतीनी। तन्न गो इन कली ‘एको परमप्रभु यावे आ देंशो श्येत बाक्ब, मदेनीन’ देंती। 39 मोपतीके गो थमा पा इन कली क्युक्शा, आं डोंइती रे ताइक्नुड। इन कली नु इन किकी पिपी आन कली गेशो सहर पोक्शा ताइक्नुड। 40 मिनु गो इन कली गेना हना यो शिशी मपथु, गेना हना यो मुने दोक्पाइक्नन्नी। मेको गेना यो मप्रेंसीब” दे परमप्रभु यावेमी देंत। येरमीया २०:११

24

रिम्शो नु मरिम्शो फोव्रशी गेडा

1 बेबीलोन डा पिप नेबुकदरेसरमी यहूदा डा पिप येहो-याकीम आ तौ येकोन्याह, यहूदा डा पिप आ गेय पाइब, मार मार सेल्स जोक्ब नु तुप्तील आन कली यरूसलेमम ग्याइशशा बेबीलोन लदा बाक्त। मेको नोले परमप्रभु यावेमी आं कली आ खिं आ डोंइती डालो निक्शी फोव्रशी गेडा कोंइताक्यी। येहो-याकीम आ नें २राजा २४:६ योयाकीन बाक्ब। तन्न येरमीया किताबम २२:२४ आ नें कोन्याह बाक्ब। मिनु येरमीया २४:१ येकोन्याह यो देंनीम। २राजा २४:१४-१६ 2 मिनु डालो कामी डोंइती डा थम रिम्शो मीशो फोव्रशी गेडा बाक्तेक्म। तन्न अर्को डालोम काइ मरिम्शो फोव्रशी गेडा बाक्तेक्म। मेको जचा यो मदुम्चा डा थम मरिम्शो बाक्तेक्म। 3 मिनु परमप्रभु यावेम आं कली “येरमीया गे मार, तवी” दे माइक्ती। मिनु गो “फोव्रशी गेडा तातामी। थम रिम्शो फोव्रशी गेडा नु थम मरिम्शो फोव्रशी गेडा बाक्तेक्म। मेको मरिम्शो फोव्रशी गेडा जचा यो मदुम्चा डा बाक्नीम” देंती।

4 मिनु परमप्रभु यावेमी आं कली इजीकीएल ११:१४-२१ 5 परमप्रभु यावे, इस्राएली आन परमप्रभुमी “मेको रिम्शो फोव्रशी गेडा खोदेशो पा, गो यहूदा रे बेबीलोन रागीम ग्याइशशा लाइक्चा पुंइसीशो आन कली मिम्नुड। गो मेको आन कली एकेर रे कल्दी आन रागीम सोइक्ताक्ड। 6 गो मेको आन कली रिम्शो दुम्पाइक्चा कली कोव्रनुड। मिनु गो मेको आन कली एको रागीम लेशशा चाक्नुडमी। गो मेको आन थुं बारपाइक्नुडमी। आन थुं लुक्च मलपाइक्नुडमी। गो मेको आन कली खुम्नुडमी। मतुलनुडमी। येरमीया १:१०; येरमीया ३१:२८ 7 मिनु गो मेको आन कली ‘गो परमप्रभु यावे नड’ दे आं कली तुइक्तीक थुं गेनुडमी। मेकोपुकी आं मुर दुम्नीम। मिनु गो मेको आन परमप्रभु दुम्नुड। मारदे हना मेको आन थुं नेल्लेमी आं गे लेत्नीम। येरमीया ३१:३३-३४; येरमीया ७:२३

8 तन्न गो मेको जचान मदुम्चा डा काइ मदारशो फोव्रशी गेडा खोदेशो पा यहूदा डा पिप सिदकीयाह, मेको आ सरकार डा गेय पाइब, यरूसलेम डा लीशो मुरपुकी नु इजीप्त रागीमी बाक्ब आन कली मरिम्शो पाइनुड। २राजा २४:१७-२०; ब्यवस्था २:३१; येरमीया २९:१६-१९ 9 गो मेको आन कली रागी डा राज्य नेल्लेमी शुश हिंचा डा नु काइ मरिम्शो सेल्लुड। मेको आन कली शिशी मताइब, शुक्शी लोव्र नु सराप पाइक्चा पुंइसीब सेल्लुडमी। मेको आन कली खेरशो रागी नेल्लेम मोदेशो पाइनुडमी। १राजा ९:७ 10 गो मेको आन कली तरवार, अन्काल नु मुर बेक्तीक रोड सोइक्नुड। मेको आन कली नु आन किकी पिपी आन कली गेशो रागी रे मेको नेल्ल मबेक्मा सम्म मो पाइनुड” दे परमप्रभु यावेमी देंत।

25

ग्याइशशा लाइक्चा पुंइसीब

1 मिनु परमप्रभु यावेमी येरमीया कली यहूदा डा मुर आन पर्बम लोव्र पाप्तु। मेना यहूदा डा पिप योसीयाह आ तौ येहो-याकीमपिप दुम्शो ४ बर्स दुम्मेनु, बेबीलोन डा पिप नेबुकदरेसर पिप दुम्शो बर्स का दुम्शो बाक्त। येरमीया ३६:१ 2 मिनु परमप्रभु यावे आ लोव्र पाइब येरमीयामी यहूदा डा मुर नेल्ल नु यरूसलेममी बाक्ब मुर नेल्ल आन कली मेको लोव्र पाप्तु। 3 यहूदा डा पिप आमोन आ तौ योसीयाह पिप दुम्शो १३ बर्स रे मुल २३ बर्स सम्म परमप्रभु यावेमी आं कली लोव्र पना पन बाक्त। मिनु गो मेको लोव्र इन कली शेंस डा शेंस बाक्शो बाक्ती। तन्न गेपुकीम इन नोफा मदाइक्तीनी। येरमीया १:२; येरमीया ३६:२ 4 मिनु परमप्रभु यावेम आ लोव्र पाइब आन कली मोदें लोव्र पथ सोइक्स डा सोइक्स पाप्तु हना यो, गेपुकीम मेको आन लोव्र मनैनी। इन नोफा मदाइक्तीनी। येरमीया ७:२५-२६; येरमीया ११:७; येरमीया २६:५; येरमीया २८:८; येरमीया २९:१९; येरमीया ४४:४; २इतिहास ३६:१५-१६ 5 मेकोमी “गे नेल्ल इन मरिम्शो पशो नु परमप्रभु यावे आ अरेशो मटितीके रे लेतीन। मिनु परमप्रभु यावेम इन कली नु इन किकी पिपी आन कली गेना हना यो कली गेशो रागीम बाक्चा ताइनीनी। येरमीया ७:३ 6 अर्को रागी डा देवी देवता आन कली पूजा पशा, ठेयब सेल्चा कली मेको आन नोले मखोतीन। इन गुइम सेल्शोमी आं कली मगाइक्पाइय्यीनी। मिनु गो इन कली मारेइ श्येत मगेनुड” देशो बाक्त। 7 परमप्रभु यावेमी “तन्न गेपुकीम आं लोव्रमी नोफा मदाइक्तीनी। इन गुइम सेल्शोमी आं कली गाइक्पाइक्तीनी। मिनु गेपुकी आंमान सजाइ ताइब सेल्सीशो बाक्नीनी” देंत।

8 मोपतीके मुर नेल्ल आन परमप्रभु यावेमी “मारदे हना गेपुकीम आं लोव्र मटिनी। 9 गो उत्तर डा जात नेल्ल नु आं गेय पाइब बेबीलोन डा पिप नेबुकदरेसर कली ब्रेशशा चाक्नुडमी। गो मेको आन कली एको रागी डा मुर नु एर ओंथ डा जात नेल्ल आन पर्बम चाक्नुडमी। मिनु गो मेको नेल्ल आन कली साइक्पाइक्नुडमी। गो मेको आन कली

शुश हिंचा डा, शुक्शी पाइक्चा पुंडसीब नु शिशी मताइब सेल्लुडमी। दानीएल ३:३१-३३ 10 मिनु गो मेको आन रे थुं नाइश्शा बाक्तीके, ग्येशो सेंदा नु ग्युम्ली ग्युम्ले आन सेंदा क्याम्नुड। यात ग्रीशो नु बत्ती आ हाम्सो नेल्ल योल्नुड। येरमीया ७:३४ 11 एको रागी डा खिं नेल्ल ब्रेशो नु मुर मबाक्शो दुम्नीम। मिनु एको जात डा मुरपुकी ७० बर्स सम्म बेबीलोन डा पिप आ वाइल दुम्नीम। २इतिहास ३६:२१; येरमीया २९:१०; एज्रा १:१-२ 12 तन्न ७० बर्स गाम नोले, गो बेबीलोन डा पिप नु कल्दी आन रागी कली मेको आन मरिम्शो पशो डा सजाइ गेनुड। मेको आन रागी गेना हना यो मुर मबाक्तीके सेल्लुडमी” दे परमप्रभु यावेमी देंत। 13 परमप्रभु यावेमी “मेको रागी कली आं देशो लोव्र नेल्ल, एको किताबम ब्रेक्शो लोव्र नु आं लोव्र पाइब येरमीयामी रागी रागी नेल्ल डा मुर आन कली पशो नोले दुम्ब लोव्र नेल्ल मेको रागीम मोइक्नुड। 14 मिनु रागी रागी डा मुर नु ठेयब पिपमी यहूदा डा मुर आन कली वाइल सेल्लनीम। गो मेको आन पशो नु आन गुडमी सेल्लो कोव्रशा, मेको आन कली क्येक्क लेल्लुडमी” देंत। येरमीया २७:७

परमप्रभु आ गाइश्शो कचौरा

15 मिनु परमप्रभु यावे, इस्राएली आन परमप्रभुमी आं कली “आं गुड रे आं गाइश्शोमी ब्रीशो अडगुर शांबु बाक्शो कचौरा ताक्को। मिनु इ कली सोइश्शो रागी रागी डा मुर नेल्ल आन कली तूपाइक्मी। येरमीया ५१:७; यसैया ५१:१७; प्रकाश १४:१० 16 मेकोपुकीमी मेको तूशा, दिड दाड गोल्ला, मारेइ मिम्ने मचाप्नीम। मारदे हना गो मेको आन दातेमी तरवार सोइक्नुड” देंत।

17 मोपतीके गो मेको कचौरा परमप्रभु यावे आ गुड रे ताक्ता। मिनु गो परमप्रभु यावेमी सोइश्शो रागी नेल्ल नु मुर नेल्ल आन कली तूपाइक्तामी। 18 मिनु मुलाक्ती तशो खोदेशो पा यरूसलेम नु यहूदा डा सहर नेल्ल आन कली श्येतथ नु मुर मबाक्तीके सेलो। मेकेर डा पिप नु आन सरकार आ गेय पाइब मुर खतम दुम्नीम। मेको सहर शुक्शी पाइक्चा नु सराप पाइक्चा पुंडसीब दुम्त। 19 मेको प्रोंइशा यो इजीप्त डा पिप फाराओ, मेको आ गेय पाइब मुर नेल्ले, मेको आ सरकार डा मुरपुकी नु मेको आ मुर नेल्ल आन कली, 20 मेकेर बाक्ब अर्को रागी डा मुर नेल्ले, ऊज रागी डा पिप नेल्ले, पलिस्ती आन पिप नेल्ले, अश्कलोन, गाजा, एक्रोन नु अश्दोद सहरम लीशा बाक्शो मुर नेल्ल आन कली, 21 एदोम, मोआब नु अम्मोन डा मुर नेल्ल आन कली, 22 टायर नु सीदोन डा पिप नेल्ले, समुन्द्र आइक्ची हांबु डा पिप नेल्ल आन कली, 23 देदान, तेमा, बूज नु आन चां एर ओंथ खोइक्ब नेल्ल आन कली, येरमीया ९:२५ 24 अराब रागी डा पिप नेल्ल, गोरशो रागीम बाक्ब अर्को रागी डा मुर आन पिप नेल्ल आन कली, 25 जिम्री डा पिप, एलाम डा पिप नु मादी डा पिप नेल्ल आन कली, 26 मिनु उत्तर गे आ नेक्था नु डोन बाक्ब पिप नेल्ल आन कली का का पा तूपाइक्तामी। मिनु नोले अर्को रागीम बाक्शो राज्य नेल्ल डा मुर आन कली तूपाइक्तामी। मिनु मेको नेल्ल आन नोले शेशाक डा पिपमी यो मेको तूचा माल्ब। शेशाक बेबीलोन आ अर्को नें बाक्ब। येरमीया ५१:४१

27 मिनु नोले गे मेको आन कली “मुर नेल्ल आन परमप्रभु यावे, इस्राएली आन परमप्रभुमी मार देंत देशा हना ‘गे मेको तूशा दुक्शा मेने। मिनु गेना यो मबोक्चा डा पा गोलीन। गो इन दातेम सोइश्शो तरवार आ पर्बम मो दुम्ब’ दे माइक्मी।

28 तन्न मेकोपुकीमी इ गुड रे मेको कचौरा तूने मबिस्साक्म हना, गे मेको आन कली मुर नेल्ल आन परमप्रभु यावेमी ‘गेपुकीम मेको तूचान माल्नीनी’ देशो बाक्ब” दे माइक्मी। 29 मेकोमी “कोव्रडीन, मुल गो आं नेंम वोइश्शो सहर कली श्येत गेचा चिक्शो बाक्नुड। मिनु मार, गेपुकी चहिं सजाइ मतथु ब्रोंइनीनी डा? इन कली सजाइ मगेथु मप्रोंइसीब। मारदे हना गो रागीम बाक्ब मुर नेल्ल आन पर्बम तरवार का ठीक पशो बाक्ती, दे मुर नेल्ल आन परमप्रभु यावेमी देंत” दे माइक्मी। इजीकीएल ९:६; १पत्रुस ४:१७; येरमीया ४९:१२ 30 परमप्रभु यावेमी “मुल गे मेको नेल्ल आन पर्बम एको आं लोव्र पावो। मेको आन कली ‘परमप्रभु यावे इर आ बाक्तीक रे ब्वाक्ब। आ बाक्तीक रे आ सेंदा गुंडब। मिनु आंम रागी आ पर्बम मेको ठेयब सेंदा पा ब्वाक्ब। रागीम बाक्ब नेल्ल आन पर्बम अडगुर ख्वाक्ब खोदेशो पा ग्रीब। होसे ११:१०; योएल ४:१६; आमोस १:२ 31 मेको रेयके पा, थोप्ला दाइश्शो, रागी डा सुर सम्म नेंसीब। मारदे हना परमप्रभु यावेम रागी रागी आन कली दोस गेब। मिनु मेकोमी मुर नेल्ल आन कली निसाफ पाइब। मिनु दोस ताइब तरवारम क्योरचा पुंडसीनीम’ दे माइक्मी” देंत। 32 मुर नेल्ल आन परमप्रभु यावेमी “कोव्रडीन शुश श्येत दुम्तीक रागी का रे अर्को रागी सम्म ब्रना ब्रन लाइब। रागी आ सुर रे हिंचा डा फश गिवार जाक्ना जाक्न बाक्ब” देंत। 33 मेको नाक्ती परमप्रभु यावे आ साइश्शोपुकी रागी आ सुर का रे अर्को सुर सम्म बाक्नीम। मेको आन पर्बम सुइ रोंका मपाइनीम। मेको बेक्शो मुर आन कली सुइमी खुप्ला मथिम्नीम। मेको आन कली सुइम मथिम्नीम। मेकोपुकी

खपीम मोव्रल खोदेशो दुम्नीम। येरमीया ९:२१ 34 गे गोठलापुकी रोंका पने। मिनु वाइ ब्रेशशा डाक्कीन। गे मेको बगाल डा लां कोंइबपुकी पुलुम दिड दाड गोलीन। मारदे हना इन कली क्योरशा साइक्तीक नाक्त जाक्शो बाक्ब। गेपुकी गोल्नीनी। मिनु शुश क्येट लाइब ग्योब खोदेशो पा प्रोल्चा पुंडसीनीनी। येरमीया २३:१ 35 गोठला आन कली प्रोक्तीक तेइ मबाक्ब। बगाल डा लां कोंइब आन ब्रोंइतीक लां तेइ मबाक्ब। 36 गोठला आन डाक्शो नेनीन। बगाल आन कली लां कोंइब आन हिंमा क्येम्स पशो नेनीन। मारदे हना परमप्रभु यावेम मेको आन बस्तु योव्रतीके क्याम्चा चिक्शो बाक्ब। 37 परमप्रभु यावे आ ठेयब पा गाइश्शोम मेको रिम्शो बस्तु योव्रतीके खतम दुम्नीम। 38 गुप्सम खोदेशो पा मेकोमी आ बाक्तीके प्रोंइतु। मारदे हना मेको आन रागी साइक्ब तरवार नु परमप्रभु आ गाइक्तीक आ पबर्म मुर मबाक्तीके दुम्त। येरमीया ४:७

26

येरमीया कली हिंच कोंइशो

येरमीया ७:-

1 यहूदा डा पिप योसीयाह आ तौ येहो-याकीममी सासन पवा आ डोंइती डा बर्सम परमप्रभु यावेमी आं कली लोव्र पाप्तु। २राजा २३:३४-३७ 2 परमप्रभु यावेमी मार देंत, देशा हना “आं खिं डा लाडगाम रपो। मिनु आं कली ठेयब सेल्चा कली जाक्ब यहूदा सहर डा मुर नेल्ल आन कली गो इ कली देशो लोव्र नेल्ल मेको आन कली देनो। लोव्र का यो मफेवो। 3 मिनु मेको नेंशा, मेको नेल्ल आन मरिम्शो लां रे लेत्नीमी, कों? मिनु मेको आन मरिम्शो पशो आ पबर्म मेको आन कली ठेयब श्येत चाक्तीक रे आं थुं फाइक्नुडा, कों? गो मेको आन तार चाक्चशो खतम दुम्तीक मचाक्नुडा, कों? येरमीया १८:८; येरमीया ३६:३ 4 गेमी मेको आन कली ‘परमप्रभु यावेम आं लोव्र मार बाक्ब देशा हना, गे आं लोव्र पशो नोफा दाइश्शा मनेंतीनी हना, गो इन डोंइती वोइश्शो आं अरेशो मपाइतीनी हना, 5 गो गेना हना यो इन बाक्तीकेम सोइश्शो आं गेय पाइब, आं लोव्र पाइब आन लोव्र नोफा दाइश्शा मनेंतीनी हना, गेपुकीम मेको रिम्शो पा मनेंशो बाक्तीनी हना, येरमीया २५:४ 6 गो मेको खिं कली शिलो खोदेशो सेल्लुड। मिनु मेको सहर कली रागी नेल्ल डा मुर नेल्ल आन दातेमी सराप राइब सेल्लुड’ देनो” देंत। २राजा २५:९; येरमीया ७:१२

7 मिनु चढेबपुकी, परमप्रभु यावे आ लोव्र पाइबपुकी नु मुर नेल्लेमी परमप्रभु यावे आ खिंम येरमीयामी देशो लोव्र नेंतेक्म। 8 मिनु परमप्रभु यावे आ अरेशो लोव्र नेल्ल, येरमीयाम मुर नेल्ल आन कली नेंपाइक्ने थुमा चोटी चढेबपुकी, परमप्रभु यावे आ लोव्र पाइबपुकी नु मुर नेल्लेम मेको कली ग्याइश्शा “गे साइक्चान पुंडसीनेवे। 9 गे मारदे परमप्रभु यावे आ नेंम लोव्र पा ‘एको खिं शिलो खोदेशो दुम्ब। मिनु एको सहर चहिं श्येतथ नु मुर मबाक्तीके दुम्ब’ देने” देशा, परमप्रभु यावे आ खिंम येरमीया आ एर ओंथ मरिक्थ्री पा मुर देल्लेक्म।

10 मिनु यहूदा डा सरकार आ गेय पाइब मुरपुकीम मेको लोव्र नेंशा, मेकोपुकी पिप आ खिं रे परमप्रभु यावे आ खिंम जाक्तेक्म। मिनु परमप्रभु यावे आ खिं डा नक लाप्चो आ डोंइती बाक्तेक्म। 11 मिनु चढेबपुकी नु परमप्रभु यावे आ लोव्र पाइबपुकीम, सरकार आ गेय पाइब मुरपुकी नु मुर नेल्ल आन कली “एको मुर कली साइक्चान माल्ब। मारदे हना एकोमी एको सहर आ पबर्म मरिम्शो पा परमप्रभु यावे आ लोव्र पाप्तु। मेको गेपुकीम आंमा यो नेंतीनी” देंतेक्म। प्रेरित ६:१३

12 मिनु येरमीयामी सरकार आ गेय पाइब नु अरु मुर नेल्ल आन कली “परमप्रभु यावेम आं कली एको खिं नु एको सहर आ पबर्म इन नेंशो लोव्र पचा कली सोइश्शो बाक्ब। 13 मुल गेपुकीम इन पतीक नु इन गेय रिम्शो सेलीन। मिनु आंम परमप्रभु यावे, इन परमप्रभु आ अरेशो टिने। मिनु परमप्रभु यावेम इन कली खतम पोक्तीक रे आ थुं लेप्ब। येरमीया ७:३ 14 गो इन गुडिम बाक्शो बाक्नुड। इन कली मार रिम्शो नु ठीक दुम्बा, मेको पाइय्यीनी। 15 तन्न गे एको तुइक्तीन। गेपुकीम आं कली साइक्तीनी हना, आंम इन तारी, एको सहर तारी नु एकेर बाक्ब आन तारी दोस मताइब मुर का आ हुश शाइक्पाइश्शो दोस चाक्नीनी। मारदे हना परमप्रभु यावेम इन कली एको लोव्र नेल्ल नेंपाइक्चा कली आं कली सोइश्शो बाक्त” देंत। प्रस्थान २३:७; मत्ती २७:४,२५

16 मिनु सरकार आ गेय पाइब मुर नु अरु मुर नेल्लेम, चढेबपुकी नु परमप्रभु यावे आ लोव्र पाइब आन कली “एको मुर साइक्चा पुंडसीचा डा मुर ममाइ। एको मुरुम इं कली परमप्रभु यावे, इं परमप्रभु आ नेंम एको लोव्र नेंपाइक्तु” देंतेक्म। 17 मिनु मेको रागी डा शेंब खाल्पा का निक्शी बोक्शा, मेको देल्शा बाक्शो मुर आन कली 18 “यहूदा डा पिप हिज्कीयाह आ पालाम मोरेशेथ डा मीकाहम परमप्रभु यावे आ लोव्र पशो बाक्त। मेकोमी यहूदा डा मुर नेल्ल आन

कली 'मुर नेल्ल आन परमप्रभु यावेम सियोन कली रू खोदेशो पा वाक्सीब। यरूसलेम चहिं फुल्लु तेल्लो खोदेशो दुम्ब। परमप्रभु यावे आ खिं चहिं रवापुकी वाशा सुम्शो डांडा खोदेशो दुम्ब' देशो बाक्त" देतेक्म। मीका १:१; मीका ३:१२; येरमीया ९:१० 19 मिनु मेकोपुकीमी "मार, यहूदा डा पिप हिज्कीयाह नु यहूदा डा अरु सुइ मुरुम मेको कली सदमे डा? मिनु मार, परमप्रभु यावे क्येडा हिंशा हिज्कीयाहम मेको आ शिशी ममला डा? मिनु परमप्रभु यावेम मेको आन तार चाक्चशो खतम पोक्तीक रे आ थुं मलेत्ता डा? तन्न गोपुकीम आंम इं तार ठेयब खतम दुम्तीक चाक्चा चिक्शो बाक्तय" देतेक्म। येरमीया १८:८

20 मेकोपुकी नु अर्को मुर का यो बाक्त। मेकोमी परमप्रभु यावे आ नेमी लोत्र पाप्तु। मेको किरयथ-यारीमम बाक्ब शेमायाह आ तौ उरीयाह बाक्त। मेकोमी यो मेको रागी नु मेको सहर आस पबर्म येरमीयामी खोदेशो पा परमप्रभु यावेम मरिम्शो पचशो आ पबर्म लोत्र पाप्तु। यहोसु १:५९ 21 मिनु पिप येहो-याकीम नु मेको आ ठेयब मुरपुकी, आ कप्तान नेल्लेम उरीयाह आ पशो लोत्र नेतेक्म। मिनु पिपम मेको कली साइक्चा माल्तु। तन्न मेको लोत्र नेंशा उरीयाह हिं। मिनु प्रोक्शा इजीप्त रागी लत। 22 मो हना यो येहो-याकीममी आकबोर आ तौ एल्लनाथान नु मेको नु अर्को मुरपुकी इजीप्त रागीम सोइक्ताक्व। 23 मिनु मेकोपुकीमी उरीयाह कली इजीप्त रे चाक्तेक्म। मिनु पिप येहो-याकीम आ डोंइती राप्पाइक्तेक्म। मिनु पिपम मेको कली साइक्चा कली तरवार आप्पाइक्तु। मिनु मेको आ बेक्शो रां आइक्च आइक्च मुर आन कली ताइक्तीकेम ताइक्पाइक्तु।

24 तन्न शाफान आ तौ अहीकामम मुल यो येरमीया आ पोन बोक्शा लोत्र पाप्तु। मोपतीके येरमीया साइक्पांइसीचा कली मुर आन गुइम जिम्मा गेचा मपुंडसे। २राजा २२:१२

27

यहूदामी नेबुकदनेसर आ गेय पशो

1 यहूदा डा पिप योसीयाह आ तौ सिदकीयाहम सासन पवा आ डोंइती डा बर्सम परमप्रभु यावेम आं कली लोत्र पाप्तु। २राजा २४:१७-१८ 2 परमप्रभु यावेमी मार लोत्र पाप्तु देशा हना "कुशुल के डोरी नु थरपु डा शी के जुवा का सेलो। मिनु मेको इ शुरम लाम्सो। येरमीया २८:१० 3 मिनु यहूदा डा पिप सिदकीयाह आ बाक्तीके यरूसलेममी जाक्ब लोत्र कुरब आन कली एदोम, मोआब, अम्मोन, टायर नु सीदोन डा पिप आन बाक्तीकेम मेको लोत्र सोइक्तीमी। येरमीया २५:२१-२२ 4 मेको आन होत्रप आन कली एको लोत्र पा 'मुर नेल्ल आन परमप्रभु यावे इस्राएली आन परमप्रभुम गेपुकीम इन होत्रप आन कली 5 एको रागी, एको रागीम बाक्ब मुरपुकी, बस्तु भाव नु जन्तु नेल्ल आन कली आं ठेयब सक्ति नु आं बोलम सेल्लो नड। मिनु गो सु कली गेचा दाक्नुड, मेको कली गेनुड। येरमीया १२:१७ 6 मुल गेपुकी नु इन रागी नेल्ल आं गेय पाइब बेबीलोन डा पिप नेबुकदनेसर आ गुइम गेता। ब्वाकी डा जन्तु आन कली यो सासन पाइब सेल्लता। येरमीया २५:९; यसैया ४५:१,८; इजीकीएल २६:७; दानीएल २:३८ 7 मेको आंम इन रागी आ रिम्शो दुम्ची मजाक्म सम्म रागी रागी नेल्ल डा मुरपुकीम मेको आ तौ नु मेको आ चच आन गेय पचा माल्नीम। मेको नोले शुश रागी नु ठेयब पिपपुकीमी मेको कली आन वाइल सेल्लनीम।

8 तन्न तेकोइ रागी तेकोइ राज्य नु पिपम बेबीलोन डा पिप नेबुकदनेसर आ वाइल दुम्चा नु मेको आ जुवा आन शुरम वोइक्ने मबिस्साक्म हना, गो मेको रागी डा मुर आन कली तरवार, अन्काल नु मुर बेक्तीक रोइम सजाइ गेनुडमी। गो मेको आन कली मसाइक्पदुमी सम्म मो पाइनुड' दे परमप्रभु यावेम देंत। 9 मोपतीके गेपुकी 'बेबीलोन डा पिप आ वाइल दुम्चा माल्नीनी' देंब, इन नोले दुम्ब लोत्र पाइबपुकी, लिक्यु कोत्रबपुकी, डोमु डा लोत्र शेंबपुकी, टुना मुना नु मन्तर तन्तर पाइक्ब आन लोत्र मनेनीन। येरमीया १४:१३-१४ 10 मारदे हना मेकोपुकीमी इन कली देशो नोले दुम्ब लोत्र जोल बाक्ब। मेको लोत्र पतीके इन रागी रे डोन खेरचा पुंडसीनीनी। गो इन कली खेरनुड। मिनु गेपुकी बेक्नीनी। 11 तन्न तेको रागी आ शुर बेबीलोन डा पिप आ जुवा आगाम वोइक्बा, मेको आ वाइल दुम्बा, मेको रागी डा मुर आन कली गो आन रागीमीन दोचा कोक्चा नु बाक्चा गेनुडमी" दे परमप्रभु यावेम देंत।

12 मिनु गो मेको लोत्र यहूदा डा पिप सिदकीयाह कली देंती। मेको कली "बेबीलोन डा पिप आ जुवा इन शुरम वोतीन। मिनु मेको नु मेको आ मुर आन वाइल दुमीन। मिनु गे ब्रोंइनीनी। 13 परमप्रभु यावेम बेबीलोन डा पिप आ वाइल मदुम्ब, रागी डा मुर आन कली गे तरवार, अन्काल नु मुर बेक्तीक रोइम बेक्चा माल्नीनी। मारदे गे नु इन मुर बेक्चा दाक्नीनी? 14 गेपुकीम 'बेबीलोन डा पिप आ वाइल दुम्चा ममाल्नीनी देंब जोल पा परमप्रभु यावे आ लोत्र पाइब आन लोत्र मनेनीन। मारदे हना मेकोपुकीमी इन कली जोल पना पन बाक्नीम' देंनीनी। येरमीया १४:१४

15 परमप्रभु यावेम 'गो मेको आन कली मसोइक्तुमी। तन्न मेकोपुकीम आं नेम जोल पा लोव्र पाइनीम। मेको आन लोव्र नेतीनी हना, गो इन कली एको रागी रे खेरनन्नी। मिनु गे बेक्नीनी। गेपुकी नु इन कली जोल पा लोव्र पाइब मो दुम्नीनी' देती" देत।

16 मिनु गो चढेब नु मेको मुर नेल्ल आन कली "परमप्रभु यावेमी 'गेपुकी इन कली जोल पा आं लोव्र पाइब आन लोव्र मनेनीन। मेकोपुकीमी परमप्रभु यावे आ खिं डा ग्योब नु बोसपुकी रीब पा बेबीलोन रे चाक्सीब' देनीम। मेकोपुकीमी इन कली जोल पा नोले दुम्ब लोव्र पाइनीम। येरमीया २८:३; २इतिहास ३६:१० 17 मेको आन लोव्र मनेनीन। बेबीलोन डा पिप आ वाइल दुमीने। मिनु गेपुकी ब्रोंडनीनी। मारदे गेपुकीम एको सहर कली मुर मबाक्तीके दुम्पाइक्नीनी? 18 मेकोपुकी थमा पा परमप्रभु यावे आ लोव्र पाइब बाक्तेक्म हना नु मेकोपुकी नु परमप्रभु यावे आ लोव्र बाक्त हना, परमप्रभु यावे आ खिंम बाक्शो, यहूदा डा पिप आ खिंम बाक्शो नु यरूसलेममी बाक्शो मार मार बेबीलोन मलदमेक्ल, दे मुर नेल्ल आन परमप्रभु यावे कली पुन्मेक्ल। 19 मारदे हना मुर नेल्ल आन परमप्रभु यावेमी थाम, कांसा के ठेयब चिक्तीके बोस, मेको आ कांसा के नित्तीके नु सहरम लीशो बोस आन पर्बम लोव्र पाप्तु। १राजा ७:१५-३९; २राजा २५:१३-१७ 20 मेको बेबीलोन डा पिप नेबुकदनेसरमी यहूदा डा पिप येहो-याकीम आ तौ येकोन्याह माइशो येकोन्याह नु यहूदा नु यरूसलेम डा ठेयब मुर नेल्ल आन कली यरूसलेम रे ग्याइशशा लदमेनु, मेको बोस मलद। येहो-याकीम आ नें २राजा २४:६ योयाकीन बाक्ब। तन्न येरमीया किताबम २२:२४ आ नें कोन्याह बाक्ब। मिनु येरमीया २४:१ येकोन्याह यो देनीम। 21 मिनु मुर नेल्ल आन परमप्रभु यावे, इस्राएली आन परमप्रभुमी 'आं खिंमी लीशो बोसपुकी, यहूदा डा पिप आ दरवारमी वोइशो बोसपुकी नु यरूसलेममी प्रोंडशो ग्योबपुकी बाक्नीम। 22 मेको नेल्ल आन कली बेबीलोनम चाक्दीत्नीम। मिनु गो मेको आन पर्बम मकोव्रडु सम्म मेको मेकेर बाक्चा माल्नीम' देशो बाक्ब। मिनु 'गो मेको आन कली लेशा लेशशा चाक्नुडमी। मिनु लेशा आन बाक्तीकेमी वोइक्नुडमी' दे परमप्रभु यावेमी देत" दे माइक्ती। एज्रा १:१,११

28

हनन्याहम जोल पशो

1 मेको बर्समीन यहूदा डा पिप सिदकीयाहम सासन पशो ४ बर्स ५ महिनाम गिबोनम बाक्ब अज्जुर आ तौ परमप्रभु यावे आ लोव्र पाइब हनान्याहम परमप्रभु यावे आ खिंम चढेब नु मुर नेल्ल आन डोंडती लोव्र पा, आं कली २इतिहास १:३,१३ 2 "मुर नेल्ल आन परमप्रभु यावे, इस्राएली आन परमप्रभुमी 'गो बेबीलोन डा पिप आ जुवा जिक्ता। 3 बेबीलोन डा पिप नेबुकदनेसरमी आं खिं डा मार मार नु ग्योब एकेर रे बेबीलोनम लाइशो बाक्मे, मेको नेल्ल बर्स निक्शी क्येडा डोंडती गो लेशशा एक चाक्नुडमी। येरमीया २७:१६ 4 मिनु गो यहूदा डा पिप येहो-याकीम आ तौ येकोन्याह नु यहूदा रे ग्याइशशा लाइक्चा पुंडसीशो नेल्ल आन कली बेबीलोन रे चाक्नुडमी। मारदे हना गो बेबीलोन डा पिप आ जुवा जिक्शा गेनुड' " दे परमप्रभु यावेमी देत। येरमीया २७:२०

5 मिनु नोले परमप्रभु यावे आ लोव्र पाइब येरमीयाम परमप्रभु यावे आ खिंम राप्शा बाक्शो चढेब नु मुर नेल्ल आन डोंडती मेको परमप्रभु यावे आ लोव्र पाइब हनान्याह कली 6 "आमेन, परमप्रभु यावेम मो पवल। परमप्रभु यावेमी इ पशो लोव्र खबल। परमप्रभु यावे आ खिं डा मार मार ग्योबपुकी नु ग्याइशशा लाइक्चा पुंडसीशो नेल्ल आन कली बेबीलोन रे लेशशा चाक्गल। 7 तन्न इ डोंडती नु मुर नेल्ल आन डोंडती नेंचा डा पा आं देशो लोव्र नेनो। 8 गो नु गो इस डोंडती जाक्ब साइ डा परमप्रभु यावे आ लोव्र पाइबपुकीमी शुश रागी नु ठेयब राज्य आन पर्बम लडाइ, अन्काल नु मुर बेक्तीक रोइ आन पर्बम लोव्र पामे बाक्त। 9 तेको परमप्रभु यावे आ लोव्र पाइबम थुं नाइशशा बाक्तीक आ पर्बम लोव्र पवा, मेको आ लोव्र गाप्त हना ला, मेको थमा पा परमप्रभु यावेम सोइशो आ लोव्र पाइब बाक्ब, दे तुंडसीब" दे माइक्तु। ब्यवस्था १८:२१-२२

10 मिनु नोले परमप्रभु यावे आ लोव्र पाइब हनान्याहम परमप्रभु यावे आ लोव्र पाइब येरमीया आ शुर रे मेको जुवा शोल्शा जिक्तु। 11 मिनु हनान्याहम मुर नेल्ल आन डोंडती "परमप्रभु यावेमी मार देत देशा हना 'गो मोपा बर्स निक्शी क्येडा डोंडती रागी रागी डा मुर नेल्ल आन शुर रे बेबीलोन डा पिप नेबुकदनेसर आ जुवा जिक्शा गेनुड' " देत। मेना परमप्रभु यावे आ लोव्र पाइब येरमीया आ लां खोइक्तु। येरमीया २९:१०

12 मिनु परमप्रभु यावे आ लोव्र पाइब हनान्याहम, परमप्रभु यावे आ लोव्र पाइब येरमीया आ शुर डा जुवा जिक्शा गेवा आ इक्का नोले परमप्रभु यावेम येरमीया कली लोव्र पाप्तु। 13 मार लोव्र पाप्तु देशा हना "लशा, हनान्याह कली

परमप्रभु यावेमी इ कली मार देत देशा हना 'गे शी के जुवा जिक्तीवी। तन्न गो मेको आ पा डा फलाम के जुवा चाक्नुड' देशो बाक्ब मतो" देत। 14 मिनु मुर नेल्ल आन परमप्रभु यावे, इस्राएली आन परमप्रभुमी "बेबीलोन डा पिप नेबुकदनेसर आ वाइलीम वाइल दुम्पाइक्चा कली गो रागी नेल्ल डा मुर नेल्ल आन शुरम फलाम के जुवा लाप्नुडमी। थमा पा, मेको आ वाइलीम वाइल दुम्नीम। गो ब्वाकी डा जन्तु आन कली यो आ सासनमी गेतामी, देशो बाक्ब, देनो" देत। ब्यवस्था २८:४८; येरमीया २७:६ 15 मिनु परमप्रभु यावे आ लोत्र पाइब येरमीयाम, परमप्रभु यावे आ लोत्र पाइब हनान्याह कली "ए हनान्याह, नेनो। परमप्रभु यावेमी इ कली मसोइक्त। मिनु गे एको मुर आन कली जोल लोत्र पा थमा सुइक्पाइश्शो बाक्नेवे। 16 मोपतीके परमप्रभु यावेम 'गो इ कली एको रागी रे तिल्चा चिकशो बाक्नुड। गे एको बर्सम बेक्नेवे। मारदे हना गे परमप्रभु यावे कली काइ मटिथु जोल लोत्र पाप्तीवी' देत" देत।

17 मिनु मेको बर्स डा ७ महिनाम जोल पा परमप्रभु यावे आ लोत्र पाइब हनान्याह बेक्त।

29

येरमीया आ ब्रेक्स

1 परमप्रभु यावे आ लोत्र पाइब येरमीयामी, यरूसलेम डा ग्याइश्शा लाइक्चा पुंडसीशो आन दाते डा ब्रोंइशा लीशो खाल्पा आन कली एको चिठी ब्रेक्शा सोइक्ताक्व। बेबीलोन डा पिप नेबुकदनेसरम यरूसलेम रे चढेब, परमप्रभु यावे आ लोत्र पाइब नु मुर नेल्ल आन कली ग्याइश्शा बेबीलोन लाइश्शो बाक्त। 2 पिप येकोन्याह आ ममा, दरवार डा ठेयब मुरपुकी, यहूदा नु यरूसलेम डा सरकार आ गेय पाइब, रिम्शो पा मारेइ मारेइ सेल्स जोल्ब मुर नु तुप्तीलपुकी यरूसलेम रे ग्याइश्शा लाइक्चा पुंडसीमा नोले मेको चिठी ब्रेक्शो बाक्ब। येहो-याकीम आ नें २राजा २४:६ योयाकीन बाक्ब। तन्न येरमीया २२:२४ आ नें कोन्याह बाक्ब। मिनु येरमीया २४:१ येकोन्याह यो देंनीम। २राजा २४:१४-१५ 3 मेकोमी मेको चिठी शाफान आ तौ एलासाह नु हिल्कीयाह आ तौ गेमारायाह आस गुडम सोइक्ताक्व। मेको यहूदा डा पिप सिदकीयाहम पिप नेबुकदनेसर कली गेन, दे बेबीलोनम सोइश्शो बाक्त। मेको चिठीम मार ब्रेक्शो बाक्त देशा हना, 4 मुर नेल्ल आन परमप्रभु यावे, इस्राएली आन परमप्रभुमी मार ब्रेक्पाइश्शो बाक्त, देशा हना "यरूसलेम रे बेबीलोनम ग्याइश्शा लाइक्चा पुंडसीशो नेल्ल आन कली 5 गेपुकी मेकेर खिं सेल्शा बाक्कीन। रूम मार मार शोक्शा जने। 6 ग्युंवे पा, तमी तौ थिने। इन तौ आन कली चाइमी चाक्कीन। इन तमी आन कली ग्युंवे पा गेने। मिनु मेकोपुकीमी तमी तौ थीमेक्ल। मेकेर गेपुकी सोशा बोशा शुश दुमीन। जाम्शा मलने। 7 गो इन कली ग्याइश्शा लाइक्पाइश्शो सहर कली रिम्शो मिम्तीन। मिनु मेको आ पर्वम परमप्रभु यावे कली पुनीन। मारदे हना मेको कली रिम्शो दुम्चा इन कली यो रिम्शो दुम्चा बाक्ब" देशो बाक्त। 8 मुर नेल्ल आन परमप्रभु यावे, इस्राएली आन परमप्रभुमी "इन दातेम बाक्ब परमप्रभु यावे आ लोत्र पाइबपुकी नु लिक्क्यु कोत्रबपुकीम इन कली जोल पा थमा मसुइक्पदमेक्ल। आन डोमु डा लोत्र मनेनीन। येरमीया १४:१४ 9 मेकोपुकीमी जोल पा आं नेंमी नोले दुम्ब लोत्र पाइनीम। मेको आन कली गो मसोइक्तुमी" दे परमप्रभु यावेम देशो बाक्ब।

10 परमप्रभु यावेमी "बेबीलोनम मो पशो ७० बर्स गाम नोले गो इन बाक्तीक जाक्नुड। मिनु इन कली एको रागीम लेशशा चाक्नुड, दे आं शिशी पा देशो लोत्र खाप्नुड। येरमीया २५:११-१३ 11 मारदे हना गो इन पर्वम शुश मिम्शो बाक्नुड। गो मेको मिम्शो तुइक्नुड। आं मिम्शो इन कली रिम्शो दुम्चा कली बाक्ब। मरिम्शो दुम्पाइक्चा कली ममाइ। 12 गेपुकीम आं नेक्था जाक्शा पुंडनीनु, गो इन पुंडशो नेंनुड। 13 गेपुकीम इन थुं नेल्लेमी आं कली माल्तीनी हना, थित्तीनी। येरमीया ३०:३; ब्यवस्था ४:२९; यसैया ५५:६ 14 मिनु गो इन कली थिप्पाइसीनुड। इन जाम्शो शोंप इन कली गेनुड। गो इन कली ग्याइश्शा लाइक्पाइश्शो रागी नेल्ल रे खुप्नुड। तेको रागी रे इन कली ग्याइक्पदु, मेको रागीमी लेशशा चाक्नन्नी" देत। येरमीया ३०:३; येरमीया ३३:२६

15 गेपुकीम "परमप्रभु यावेम आंइ पर्वम बेबीलोनमी आ लोत्र पाइबपुकी योत्रतु" देंतीनी। 16 परमप्रभु यावेमी दाऊद आ नित्तीकेम निप्ब पिप नु एको सहरम बाक्ब मुर नेल्ल, इन नेक्था डा मुरपुकी नु ग्याइश्शा लाइक्चा मपुंडसीशो आन पर्वम मार देत देशा हना, 17 मुर नेल्ल आन परमप्रभु यावेमी "गो मेको आन पर्वम तरवार, अन्काल नु मुर बेक्तीक रोइ सोइक्नुड। मिनु गो मेको आन कली राक्शो फोत्रशी गेडा खोदेशो सेल्लुडमी। मिनु मेको थाम्पा राक्शा ब्वचा मदुम्चा डा बाक्नीम। येरमीया २४:८-१० 18 गो मेको आन कली तरवार, अन्काल नु बेक्चा डा रोइमी खेदा पाइनुडमी। मिनु गो मेको आन कली राज्य नेल्लेमी शुश हिंचा डा सेल्लुडमी। मेकोपुकी आं खेरशो रागी नेल्ल आन दातेमी, सराप पाइक्तीके, शुश हिंतीके, शुक्शी पाइक्तीके नु मुने तोक्तीके सेल्लुडमी। ब्यवस्था २८:३७ 19 मारदे

हना मेकोपुकीमी आं लोव्र मनेनेम। गो आं गेय नु आं लोव्र पाइब आन कली सोइक्ना सोइक्न बाक्ती हना यो मेको आन लोव्र मनेनेम” दे परमप्रभु यावेमी देंत। येरमीया २५:४ 20 मोपतीके गे यरूसलेम रे बेबीलोनम सोइश्शो ग्याइश्शा लाइक्चा पुंडसीशो मुल परमप्रभु यावे आ लोव्र नेनीन। 21 मुर नेल्ल आन परमप्रभु यावे, इस्राएली आन परमप्रभुमी “कोलायाह आ तौ आहाब नु मासेयाह आ तौ सिदकीयाहम आं नेमी जोल पाम्ताक्स। ‘गो मेको आस कली बेबीलोन डा पिप नेबुकदरेसर आ गुइमी गेनुडसी। मिनु मेकोमी इन डोंइती मेको आस कली साइक्ब। 22 मेको आस पतीकेन यहूदा रे बेबीलोनम ग्याइश्शा लाइक्चा पुंडसीशो आन दातेमी सराप पाइनीम। परमप्रभु यावेम इ कली सिदकीयाह नु आहाब आस कली खोदेशो सेलल। बेबीलोन डा पिप नेबुकदनेसरमी मेको आस कली मीम हुम्शो बाक्त’ देंनीम। 23 मारदे हना मेको निक्शीमी इस्राएलम थम ग्रांग्रा दिशो गेय पशो बाक्ताक्स। मेको निक्शी आस नेक्था डा मुर आन मीश नु इप्शो बाक्ताक्स। मिनु मेकोम आं मअरेशो लोव्र पाम्ताक्स। गो मेको नेल्ल तुइक्नुड। मिनु गो मेको आ सांकछी बाक्नुड” दे परमप्रभु यावेम देंत।

शेमायाह कली लोव्र सोइश्शो

24 मिनु गे नेहेलाम डा शेमायाह कली 25 “मुर नेल्ल आन परमप्रभु यावे, इस्राएली आन परमप्रभुमी ‘गे इ नेमी यरूसलेम डा मुर नेल्ल आन कली, मासेयाह, चढेब आ तौ सेफन्याह नु अरु चढेब नेल्ल आन कली चिठी ब्रेक्ताक्वी। गे सेफन्याह कली येरमीया २१:१ 26 परमप्रभु यावेम इ कली चढेब येहो-यादा आ पा डा चढेब सेल्लु’ मोपतीके गे परमप्रभु यावे आ खिं डा ठेयब मुर दुम्शा, मेको जिम्मा ताक्नेवे। गे मेकेर आन निप्स ग्राइश्शो नु जोल पा परमप्रभु यावे आ लोव्र पखु पाइब आन कली टेंडरो थोक्शा, आन शुरम फलाम क्युक्शा वोतो। येहो-यादा कली यो-यादा यो ब्रेक्शो बाक्ब। इजीकीएल ९:७; येरमीया २०:२ 27 मिनु गे ‘इन दाते डा परमप्रभु यावे आ लोव्र पखु पाइब अनाथोथ डा येरमीया कली मारदे महुइक्तीनी?’ 28 मेकोमी बेबीलोनम आंइ कली ओदेशो लोव्र सोइक्ताक्व। गे शुश बर्स मेकेर बाक्चा मालनीनी। मोपतीके खिं सेल्लशा बाक्कीन। मिनु रूम मार मार शोक्शा जने” दे ब्रेक्शो बाक्त।

29 मिनु चढेब सेफन्याहम मेको चिठी पदेशा परमप्रभु यावे आ लोव्र पाइब येरमीया कली नेपाइक्तु। 30 मिनु मेना परमप्रभु यावेम येरमीया कली लोव्र पाप्तु। 31 नेहेलाम डा शेमायाह आ पर्बम मार लोव्र पाप्तु देंशा हना “ग्याइश्शा लाइक्चा पुंडसीशो नेल्ल आन कली एको लोव्र सोइक्तो। शेमायाहम इन कली नोले दुम्ब लोव्र पाप्तु। तन्न गो मेको कली मसोइक्तु। मेकोमी आं लोव्र पा, इन कली जोल लोव्रमी थमा सुइक्पाइक्तु। 32 मोपतीके गो नेहेलाम डा शेमायाह नु मेको आ चच युइ आन कली सजाइ गेनुडमी। मेको आ मुर सुइमी आं मुर रिम्शो दुम्शो तचा मताइनीम। मारदे हना मेकोमी आं कली मटिथु आं पर्बम दूली लोव्र पाप्तु” दे परमप्रभु यावेमी येरमीया कली देंत।

30

इस्राएल कली लेंशा सेल्लो

1 मिनु परमप्रभु यावेम येरमीया कली लोव्र पाप्तु। 2 परमप्रभु यावे, इस्राएली आन परमप्रभुमी येरमीया कली मार लोव्र पाप्तु देंशा हना “गो इ कली देशो लोव्र नेल्ल किताबमी ब्रेक्तो। 3 आं मुर इस्राएली नु यहूदा डा मुर आन थुं लेशशा नाइक्चा गेतीक नाक्त थमा पा जाक्ब। मिनु गो मेको आन किकी पिपी आन कली गेशो रागीम लेंशा लाइक्नुडमी। मिनु मेकोपुकीमी मेको रागी आंम के सेल्लनीम” देंत। येरमीया २९:१४

4 इस्राएल नु यहूदा आस पर्बम परमप्रभु यावे आ लोव्र मार बाक्त देंशा हना 5 “शुश हिंब नु ग्रीब आन सेंदा नेंसीब। थुं नाइश्शा बाक्तीक जाम्त। 6 मार, वोंइश मुरुम आल थिने चाप्नीमी डा? दे हिल्लो पने। मारदे वोंइश मुर नेल्ल सुत्केरी रोइ पशो खोदेशो पा आन गुइम आन क्रातो दिप्शो ताइनुडमी? मारदे मुर नेल्ल आन कुल बुश दुम्शो बाक्नीमी? 7 आबी, मेको नाक्त दोदेशो हिंचा डा नाक्त दुम्बा। मेको नाक्ती खोदेशो अर्को तेकोइ नाक्ती मदुम्नीम। मेको नाक्ती याकूब कली शुश हिंचा डा श्येत जतीक नाक्ती दुम्ब। तन्न मेको श्येत रे प्रोंइचा पुंडसीब” देंत। योएल २:११; सेफन्याह १:१४-१५

8 मुर नेल्ल आन परमप्रभु यावेमी “गो मेको नाक्ती मेको आन बला रे जुवा जिक्नुड। मिनु गो मेको आन कली फ्रेंशो रे प्रोंइनुडमी। मिनु अर्को रागी डा मुरपुकीम मेको आन कली गेनायो वाइल मसेल्लनीम। येरमीया २३:५; येरमीया २७:१२; इजीकीएल ३४:२३; होसे ३:५ 9 तन्न मेकोपुकीम परमप्रभु यावे, आन परमप्रभु, आं कली नु आं सेल्लो पिप दाऊद आ गेय पाइनीम। 10 गे आं गेय पाइब याकूब महिनो। गे इस्राएल सुर्ता मपावो। गो इ कली डोन रागी रे

चाकनुड। इ आल आन कली ग्याइशशा लाइशशा रागी रे प्रोंइशा चाकनुड। याकूब कली लेंशा थुं नाइशशा, हेम्मा पा बाक्तीक दुम्ब। मेको कली सुइम हिंच कोंइने मचाप्नीम। येरमीया ४६:२७; यसैया ४३:५-६ 11 मारदे हना गो इ कली प्रोंइचा कली गे नु बाकनुड। इन कली फ्रशा वोइशशा रागी रागी डा मुर नेल्ल आन कली साइकनुडमी। तन्न गो इ कली गेनायो मक्याम्नुड। गो इ कली ठीक सजाइ गेनुड। गो इ कली थमा पा सजाइ मगेथु, मप्रोंइनुड” दे परमप्रभु यावेमी देंत। येरमीया १०:२४; ब्यवस्था ८:५

12 मिनु परमप्रभु यावेम “इ गार मसाब। मेको मरिम्शो बाक्ब। येरमीया १५:१८ 13 सुइ इ पोन मबोक्ब। इ गार सापाइक्तीक ओख्ती मबाक्ब। इ कली सापाइक्तीक मारेइ मबाक्ब। 14 इ वारच नेल्लेम इ कली प्रेने थुम्तेक्म। मेकोपुकीमी इ कली गेनायो ममिम्नीम। गो इ ठेयब दोस तशो नु इ शुश पाप आ पबर्म पतीके जोरी सत्रुम खोदेशो पा तुप्तन। मिनु शिशी मपाइक्बम खोदेशो पा गो इ कली सजाइ गेतन। 15 मारदे गे इ मसाब गार आ पबर्म वाइ ब्रेशशा डाक्नेवे? इ खाइशशा मसाब। मारदे हना इ दोस तशो नु इ शुश पाप पशो आ पबर्म गो इ कली मो पाइशशा बाकनुड। 16 मोपतीके गे इ कली दाक्ब नेल्ल दाक्चा पुंडसीनीम। इ जोरी सत्रु नेल्ल ग्याइशशा लाइक्चा पुंडसीनीम। इ कली रोइक्बपुकी रोइक्चा पुंडसीनीम। इ कली खतम पोक्ब आन कली गो खतम पोक्नुडमी। यसैया ३३:१; इजीकीएल ३९:१० 17 गो इ कली लेंशा डोंइती डा खोदेशो मारेइ मदुम्शो सेल्लुड। मिनु इ गारपुकी सापाइक्नुडमी। मारदे हना इ कली ‘प्रोंइचा पुंडसीशो नु सुइम मिम्चा मपुंडसीशो सियोन’ देंनीम” दे परमप्रभु यावेमी देंत। येरमीया ३३:६; यसैया ५७:१८-१९

18 परमप्रभु यावेमी “गो याकूब आ ताम्बु डा शोंप लेंशा गेनुड। मिनु मेको आ बाक्तीक रागी कली शिशी पाइनुड। मेको सहर डा ब्रेशशा नेल्ल आ डांडामी लेंशा सेल्लसीब। मिनु आ दरवार लेंशा डोंइती डा आ बाक्तीकेमी सेल्लसीब। 19 मेकेर ‘गे रिम्शो पाइब बाक्नीनी’ दे कुम्सो पशो नु थुं नाइशशा बाक्शो ग्येरशो सेंदा नेंसीब। गो मेको आन कली शुश सेल्लुडमी। मिनु मेकोपुकी इक्का का ला मदुम्नीम। गो मेको आन कली मान ताइब सेल्लुडमी। मिनु मेको आन कली सुइम शुक्शी मपाइनीम। 20 मेको आन आलपुकी डोंइती डा खोदेशोन दुम्नीम। मिनु मेको आन गुम्तीके आं डोंइती बाक्ब। मेको आन कली दिप्ब नेल्ल आन कली गो सजाइ गेनुडमी। 21 मेको आन कली हुकुम पाइब मेको आन दाते डा का दुम्ब। मेको आन कली सासन पाइब आंम आन मुर बाक्ब। गो मेको कली आं नेक्था चाकनुड। मिनु मेको आं नेक्था जाक्ब। मारदे हना आं नेक्था आंमा सु जाक्बा डा?” दे परमप्रभु यावेमी देंत। येरमीया ३०:९ 22 परमप्रभु यावेम “गे आं मुर दुम्नीनी। मिनु गो इन परमप्रभु दुम्नुड” देंत। येरमीया ७:२३

23 नेनीन, परमप्रभु यावे आ गाइशशोम फश गिवार बोक्ब। मेको आ अरेशो मटीब आन पियाम जुक्ब। येरमीया २३:१९-२० 24 परमप्रभु यावे आ थुंम मिम्शो मगाम्म सम्म मेको आ चुरशो मनांइसीब। गेपुकीमी नोले डा नाक्ती मेको रुप्नीनी।

31

परमप्रभुम इस्राएल कली दाक्शो

1 परमप्रभु यावेमी “गो इस्राएली आन खिं नेल्ल डा मुर आन परमप्रभु दुम्नुड। मिनु मेकोपुकी आं मुर दुम्नीम” देशो बाक्ब। येरमीया ७:२३ 2 परमप्रभु यावेमी “तरवार रे ब्रोंइशो मुरपुकीम गोरशो रागीम शिशी ताम्तेक्म। इस्राएल कली नाइक्पाइक्चा दाक्ताक्व हना, 3 परमप्रभु यावे डोन आ बाक्तीके रे जाक्ब। मिनु मेकोमी ‘गो इ कली गेना हना यो लीब दाक्तीकेम दाक्ताक्व। मोपतीके गो इ कली दाक्चा मप्रोंइनुड। 4 गो इ कली लेंशा सेल्लुड। गे लेंशा सेल्लुचा पुंडसीनेवे। मिनु गे कन्ने मीश आल, इस्राएल, गे लेंशा इ खैजडी शेशा, ग्येरसीशोपुकी नु सिल पथ लाइनेवे। 5 गे सामरीया डा डांडा मेर लेंशा अडगुर खुम्नेवे। मेको रू डा गेय पाइबपुकीम खुम्नीम। मिनु मेको आ फल जशा ग्येरसीनीम। 6 मेना एफ्राइम पहाड डा खाल पाइबपुकीम जाक्कीन, गोपुकी सियोनम बाक्ब परमप्रभु यावे, इ परमप्रभु आ बाक्तीक लय’ दे ब्रेत्तीक नाक्त जाक्ब” देंत।

7 परमप्रभु यावेमी “याकूब आ पबर्म ग्येरशा ठेयब सेंदा पा कुम्सो पने। मिनु रागी रागी डा नेल्ल क्येडा ठेयब रागी आ पबर्म ठेयब सेंदा पा ग्रीडीन। मिनु परमप्रभु यावेम आ मुर आन कली श्येत रे प्रोंइतु। इस्राएल डा लीशो आन कली प्रोंइतु। 8 नेनीन, गो मेको आन कली उत्तर डा रागी रे चाकनुडमी। मिनु गो मेको आन कली रागी डा सुर रे खुप्नुडमी। मेकोपुकी आन दातेमी मिक्च मताइब, गुइ खोइल मदुक्ब, कोव्रज कुरशो मीश मुर नु सुत्केरी रोइ पशो मीश मुर यो बाक्नीम। मेको आन ठेयब हुल लेशशा एकेर जाक्चा माल्नीम। यसैया ३५:८-१०; इजीकीएल ३४:१६ 9 मेकोपुकी

डाक्ना डाक्न जाक्नीम। गो मेको आन कली शिशी पा लेशशा चाक्नुडमी। गो मेको आन कली खोला आ नेक्था गाक्पाइक्नुडमी। दाइल मपांडसीचा डा पित्थ लांम खुल्नुडमी। मारदे हना गो इस्राएल आ आफ दुम्शो बाक्नुड। मिनु एफ्राइम आं डोंइती जरमेशो तौ बाक्ब।

10 गे रागी रागी डा मुरपुकी, परमप्रभु यावे आ लोव नेनीन। डोन डा समुन्द्र आ नेक्था डा रागी नेल्ल आन कली नेंपतीन। मेको आन कली 'इस्राएल कली ब्रपाइक्बम मेको आन कली ग्रुम्पाइक्ब। मिनु गोठलाम आन बगाल आन कली खाल पशो खोदेशो पा, मेकोमी इस्राएली आन कली कोव्रब' देंत। 11 मारदे हना परमप्रभु यावेम याकूब आ मुर आन कली प्रोंइतु। मिनु मेकोम आन कली आन क्येडा बोल्यो मुर आन गुड रे प्रोंइतु। 12 मेकोपुकी जाक्शा इर सियोनम ठेयब सेंदा पा कुम्सो पाइनीम। मेकोपुकीम परमप्रभु यावे आ रिम्शो पशो आ पर्बम ग्येरनीम। अन्न, अडगुर शांबु नु तेल तशा, क्यारश भेडा आन पाठा नु बी ब्यफ आन कली तशा ग्येरनीम। मेको ब्वाक्कुम जिश्शो फल फुल रू खोदेशो दुम्नीम। मेकोपुकी लेंशा गेनायो सुर्ता मपाइनीम। येरमीया ५८:१ 13 मेना ठिटी मीश मुर ग्येरशा सिल पाइनीम। ठिटा नु खाल्पा ग्येरनीम। गो मेको आन रोंका पतीके ग्येरतीकेम फाइक्नुड। गो मेको आन थुं बार पाइश्शा, सुर्ता पतीक आ पा डा ग्येरतीक थुं गेनुडमी। 14 गो चढेब आन कली शुश गेशा रूपाइक्नुडमी। मिनु आं मुरपुकी आं शुश गेशोम रूशा ग्येरनीम" दे परमप्रभु यावेम देंत।

15 परमप्रभु यावेम "रामाम सेंदा का नेंसाक्व। मेको रोंका पशो नु हिशेक पा डाक्शो बाक्ब। राहेल आ आल आन पर्बम डाक्ब। मेको लेम्शोनु, मबिस्से। मारदे हना मेको आ आल बेक्तेक्म" देंत। उत्पत्ती ३५:१६-२०; १सामुएल १०:२; मती २:१८ 16 परमप्रभु यावेमी "डाक्चा नाइक्तीन। इन मिक्च रे प्रेक्कु मतोक्कीन। मारदे हना इन गेय डा इनाम ताइनीनी। मेको आन जोरी सत्रु आन रागी रे लेशशा जाक्नीम। 17 नोले इन रिम्शो दुम्तीक लां कोव्रनीनी। इन तमी तौ आंम आन रागीम लेशशा जाक्नीम" देंत।

18 परमप्रभु यावेम "गो एफ्राइम आ डाक्शा पुंडुशो नेंता" देंत। मिनु एफ्राइममी "गे आं कली शेंताक्यीनी। गो इन शेंशो रुप्ता। गो मटीब बोहोर खोदेशो बाक्ती। आं कली लेत्चा गेयीनी। गो लेत्चा ताइनुड। मारदे हना गे परमप्रभु यावे, गे आं परमप्रभु बाक्नीनी। 19 गो नोले शोंइसीशा, इन गे लेत्ती। आं हेंथे पशो तुइक्तु नोले आं कुचु तुप्ता। गो मुने दोक्ती। मारदे हना गो आं ठिटा ना डा पाप कुरशो बाक्ती" दे डाक्शा देंत। 20 मिनु "मार, एफ्राइम आं दाक्शो तौ ममाइ डा? मेको आ पर्बम गो मग्येरनुडा? गो मेको कली हुइक्ताक्ड हना यो, मेको कली मिम्ना मिम्न बाक्ती। मोपतीके गो मेको कली मुल सम्म दाक्नुड। गो मेको कली थमा पा शिशी पाइक्नुड" दे परमप्रभु यावेम देंत। यसैया ४९:१५; होसे ११:८

21 लां तुइक्तीक चिन्ड वोतो। लां कोंइतीक थाम खुक्को। गे तेको ठेयब लां रे लाइनेवे, मेको लां रिम्शो पा मिम्तो। गे कन्ने मीश आल इस्राएल, लेतो। इ सहरम लेतो। 22 गे काइ मटीब तमी, गे गेना सम्म रिम्नेवे? मारदे हना परमप्रभु यावेम मेको रागी डा मुर आन पशो नक सेल्लु। मेको मीश मुरुम वोंइश मुर कली दाक्ब।

23 मुर नेल्ल आन परमप्रभु यावे, इस्राएली आन परमप्रभुमी "गो मेको आन शोंप लेशशा गेता हना, मेकोपुकीमी लेंशा यहूदा रागी नु मेको आ सहरपुकीम 'गे ठीक पाइब नु परमप्रभु यावे आ डांडा, परमप्रभु यावेमी इ कली आसीक गेवल' देंनीम। जकरिया ८:३ 24 यहूदा नु मेको आ सहर नेल्ले काथा बाक्नीम। रू डा गेय पाइब नु आन बगाल नु हिरब गोठला नेल्ल काथा बाक्नीम। 25 गो दशो आन कली लेंशा बोल्यो सेल्लुडमी। मिनु थशो आन कली लेंशा बोल गेनुडमी" देंत। 26 गो ओशोमीन सेंसाक्यी। मिनु एर ओंथ कोव्रशा, गो रिम्शो पा इप्ती, दे तुइक्ताक्ड। 27 मिनु परमप्रभु यावेमी "गो इस्राएल आ खिं डा मुर, यहूदा आ खिं डा मुर नु क्यारश भेडा, बी ब्यफ आन कली सोशा बोशा दुम्पाइक्तीक नाक्त थमा पा चाक्नुड। 28 गो दोपा मेको आन कली तुल्चा, प्रेत्चा, ताइक्चा नु खतम पोक्चा कली मरिम्शो पडा, मोपा गो मेको आन कली सेल्चा नु खुम्चा कली कोव्रनुड। येरमीया १:१० 29 मेको नाक्ती मुरपुकीम लेंशा 'आम आफोम ग्युरशो अडगुर ब्वाम्तेक्म। मिनु आन आल आन खुइ ग्रिम्तेक्म' मदेनीम। इजीकीएल १८:२; प्रस्थान २०:५; बिलाना ५:७ 30 तन्न मुर नेल्ल आन पाप आ पर्बम बेक्नीम। सुम ग्युरशो अडगुर ब्वाइबा, मेको आ खुइ ग्रिम्ब" देंत।

31 परमप्रभु यावेमी "गो इस्राएल आ खिं डा मुर नु यहूदा आ खिं डा मुर नु नक कबल का पाइनुड। मेको नाक्ती थमा पा जाक्ना जाक्न बाक्नीम। हिब्रू ८:८-१२ 32 मेको कबल मेको आन किकी पिपी आन कली इजीप्त रे ग्रुंडची ना पशो कबल खोदेशो ममाइ। गो मेको आन वोंइश खोदेशो बाक्ती हना यो, मेकोपुकीमी मेको कबल मखबेम। 33 तन्न इस्राएल आ खिं डा मुर नोले डा नाक्ती डा कबल मार बाक्त देंशा हना, गो आं अरेशो मेको आन थुंम वोइक्नुड।

मिनु आन थुंम मेको ब्रेक्शा गेनुडमी। मिनु गो मेको आन परमप्रभु दुम्नुड। मिनु मेकोपुकी आं मुर दुम्नीम। इजीकीएल ११:१९; हिब्रू १०:१६-१७; येरमीया ७:२३ 34 मेना रे परमप्रभु यावे कली तुइक्तीन, दे मुर कामी अर्को कली मशेनीम। मारदे हना आइक्च रे ठेयब नेल्लेम आं कली तुइक्नीम। गो मेको आन मरिम्शो पशो माफ गेनुडमी। मिनु लेंशा गेनायो मेको आन पाप ममिम्नुड” दे परमप्रभु यावेमी देंत। येरमीया ३३:८; यसैया ४३:२५; रोमी ११:२६-२७

35 मेको परमप्रभु यावेम नाक्ती हाम्सो सेल्चा कली नां वोइक्तु। मिनु तास्ला आ लां कोंइताक्व। नाक्दो हाम्सो सेल्चा कली सोरुल वोइक्तु। मेकोमी समुन्द्र आ छाल पोक्चा कली शाक्तु। मेको आ नें मुर नेल्ल आन परमप्रभु यावे बाक्ब। 36 मिनु परमप्रभु यावेमी “आं डोंइती नां, तास्ला नु सोरुल जाम्तेक्म हना ला, इस्राएली यो आं डोंइती रागी का मदुम्नीम” देंत। येरमीया ३३:२५; रोमी ११:१

37 परमप्रभु यावेमी “सरीड कली पुक्ने जाप्त हना, रागी आ जग माल्शा गुंइने चाम्साक्व हना, ला गो इस्राएल आ आल आन कली तिल्लुडमी” देंत।

38 परमप्रभु यावेम “हानानेल आ लाइश्शो खिं रे सुर डा ठेयब लाप्चो सम्म आं नेंम लेंशा सहर सेल्लिक नाक्ती थमा पा जाक्ना जाक्न बाक्नीम। 39 पुक्तीक डोरी मेको रे पा गारेब डा डांडा सम्म जाक्दीप्ब। मिनु मेको रे हिरशा गोआह सम्म जाक्दीप्ब। 40 बेक्शो मुर आन बेसी नेल्ल पुलु ताइक्तीक दिंम नु किद्रोन कोल्सा सम्म डा रू नेल्ल नु शारा लाप्चो डा कुना सम्म परमप्रभु यावे के दुम्ब। मिनु मेको गेनायो तुल्शा खतम मपोक्सीब” देंत।

32

येरमीयामी रू ग्याप्शो

1 परमप्रभु यावेम येरमीया कली लोत्र पाप्तु। मेना यहूदा डा पिप सिदकीयाहम सासन पशो १० बर्स दुम्मेनु, नेबुकदरेसर आ सासन पशो १८ बर्स दुम्शो बाक्त। 2 मेना बेबीलोन डा पिप आ लडाइ पाइबपुकीम यरूसलेम पुम्ताक्म। परमप्रभु यावे आ लोत्र पाइब येरमीया चहिं यहूदा डा पिप आ दरवार खाल पाइब मुर आ जेल्खानम बाक्त। मेको यहूदा डा पिप आ लाडगाम बाक्त। २राजा २५:१-२ 3 यहूदा डा पिप सिदकीयाहम मेको कली मेकेर चोक्शो बाक्त। मिनु मेकोमी “गे मारदे मोदेशो पा परमप्रभु यावे आ लोत्र पाइनेवे? परमप्रभु यावेमी ‘गो एको सहर बेबीलोन डा पिप आ गुइम गेचशो बाक्नुड। मिनु मेकोमी एको आंम के सेल्ब। येरमीया २१:७; येरमीया ३४:२ 4 यहूदा डा पिप सिदकीयाह कल्दी आन गुइ रे मब्रोंइब। मेको थमा पा बेबीलोन डा पिप आ गुइम गेचा पुंइसीब। मिनु मेको नु कोव्रमुशा, लोत्र पाइब। 5 मेकोमी सिदकीयाह कली बेबीलोन लाइक्ब। मिनु गो मेको कली मकोव्रडु सम्म मेकेर बाक्ब। गे कल्दी नु लडाइ पाप्तीवी हना मग्रानेवे’ दे परमप्रभु यावे आ लोत्र पवी” देंशा चोक्शो बाक्त। येरमीया ५२:११

6 मिनु येरमीयामी परमप्रभु यावेम आं कली लोत्र पाप्तु। मार लोत्र पाप्तु देंशा हना, 7 “इ बकान्छा शाल्लुम आ तौ हनामेल इ बाक्तीक जाक्शा, इ कली ‘अनाथोथम बाक्शो आं रू ग्यापीन। मारदे हना ग्याप्चा अधिकार इन के बाक्ब’ देंब” देंत। लेवी २५:२५; रूथ ४:३-४ 8 मिनु नोले परमप्रभु यावेम देंशो खोदेशो पा आं बकान्छा आ तौ हनामेल पिप आ खिं खाल पाइब आन लाडगा जाक्शा, मेकोमी “बेन्यामीन आ रागी अनाथोथम बाक्शो आं रू ग्यापीन। मेको ग्याप्चा अधिकार इन केन बाक्ब। मोपतीके गे मेको ग्याप्सीन” देंत। मिनु गो एको परमप्रभु यावे आ लोत्र बाक्माक्त, दे तुइक्ताक्ड।

9 मोपतीके गो आं बकान्छा आ तौ हनामेल आ अनाथोथम बाक्शो रू ग्याप्ता। मिनु गो मेको कली चांदी के १७ शेकेल नाक्शा गेता। शेकेल का ११.५ ग्राम डा चांदी के क्येट बाक्ब। 10 मिनु गो कागज ब्रेक्शा, छाप थोक्शा सांकछीपुकी वोइश्शा चांदी के शेकेल नाक्शा गेता। 11 मिनु गो आं रू ग्याप्शो ब्रेक्शो छाप थोक्शो कागज ताक्ता। छाप थोक्शो नु छाप मथोक्शो कागज यो ताक्ता। 12 मिनु गो मेको रू ग्याप्शो ब्रेक्शो कागज आं बकान्छा आ तौ हनामेलम आ डोंइती, सांकछी नु पिप कली खाल पाइब आ लाडगाम बाक्शो यहूदी आन डोंइती माहसेयाह आ चच, नेरीयाह आ तौ बारुक कली गेता। मेको सांकछी नेल्ल आन नें यो कागजम ब्रेक्शो बाक्तेक्म। 13 गो मेको नेल्ल आन डोंइती बारुक कली 14 “मुर नेल्ल आन परमप्रभु यावे, इस्राएली आन परमप्रभुमी मार देंत देंशा हना, मेको शुश नाक्त सम्म लील, दे मेको रू ग्याप्शो कागज, छाप थोक्शो नु मथोक्शो, निम्फा खप के ग्योंब कामी कुर पावो” देंत। 15 मारदे हना मुर नेल्ल आन परमप्रभु यावे, इस्राएली आन परमप्रभुमी “मेको रागीमी खिं, रू नु अडगुर रू ग्याप्नीम” देंत। येरमीया ३२:१५

16 मिनु गो नेरीयाह आ तौ बारुक कली मेको रू ग्याप्शो कागज गेडा नोले, गो परमप्रभु यावे कली एको लोत्र पा 17 “परमप्रभु, परमप्रभु यावे, इन ठेयब सक्ति नु दिंशो गुडम गे सरीड नु रागी सेलतीनी। इन कली मारेइ गेय मचाप्चा डा मबाक्ब। येरमीया २७:५; उत्पत्ती १८:१४; लूका १:३७ 18 हजार हजार पाला सम्म इन गेना हना यो दाक्तीक कोइनीनी। तन्न आम आफ आन हेंथे पशो आन नोले जाक्ब आन आल आन कली रपाइक्नीनी। गे ठेयब नु सक्ति पाइश्शो परमप्रभु बाक्नीनी। इन नें मुर नेल्ल आन परमप्रभु यावे बाक्ब। प्रस्थान २०:५-६ 19 इन अर्ती ठेयब नु इन गेय नेल्ल क्येडा सक्ति पाइश्शो बाक्नीम। मुर आन पशो मारेइ मारेइ इन डोंइती तचा डा पा बाक्नीम। गे मुर नेल्ल आन कली कोवनीनी। गे नेल्ल आन लां नु आन पशो तशा इनाम गेनीनी। रोमी २:६ 20 गे इजीप्त रागीमी चिन्ड नु छक लाक्चा डा गेय कोइताक्नी। मिनु मुल सम्म इस्राएल नु मुर नेल्ल आन दातेमी इन नें ठेयब सेलतीनी। 21 गे इन मुर इस्राएली आन कली इजीप्त रे चिन्ड नु छक लाक्चा डा गेय इन सक्ति नु बोल नु शुश हिंचा डा श्येत कोइशा ग्रुइताक्नी। 22 मिनु गे मेको आन किकी पिपी आन कली कसम जशो, मेको दूध नु खुदो शुश बाक्शो रागी गेतीनी। 23 मिनु मेकोपुकी ओव्रशा, मेको रागी आन के सेल्लेक्म। तन्न मेकोपुकीमी इन देशो, इन अरेशो नु मार पचा माल्बा शेंशो मबिस्सम। गे मेको आन कली पन देशा शेंशो लोत्र मेकोपुकीमी मटीमे। मोपतीके गे एको ठेयब श्येत नेल्ल मेको आन तार चाक्तीनी। 24 कोवडीन, एको सहर आन के सेल्चा कली नु गारो डोइक्चा कली लां सेल्चा कली मार मार तेल्लेक्म। मेको सहर कली तरवार, अन्काल नु मुर बेक्तीक रोइम पतीके, मेको लडाइ तोइब कल्दी आन गुडम दुम्त। गे मार देनी, मेको दुम्त। गे आंमा ताइनीनी। 25 मो हना यो परमप्रभु, परमप्रभु यावे, गे आं कली ‘एको सहर कल्दी आन गुडम दुम्त हना यो, क्येट गेशा, सांकछी आन कली ब्रेशा, रू ग्यापो’ देतीनी” दे येरमीया देत।

26 मिनु परमप्रभु यावेम येरमीया कली लोत्र पाप्तु। 27 मार, लोत्र पाप्तु देशा हना “गो परमप्रभु यावे, ब्रोंइशो नेल्ल आन परमप्रभु नड। मार, तेकोइ गेय आं पने मचाप्चा डा बाक्बा डा?” देत। गन्ती १६:२२; येरमीया ३२:१७ 28 मोपतीके परमप्रभु यावेमी “गो एको सहर कल्दी आन गुड नु बेबीलोन डा पिप नेबुकदरेसर आ गुडम गेचा चिक्ताक्ड। मिनु मेकोमी एको सहर ग्राब। 29 एको सहर कली लडाइ तोइब कल्दी जाक्शा मी सुइक्नीम। तेको खिं तारी आं कली गाइक्पाइक्चा कली बाल देवता कली चढेमे नु देवी देवता आन कली तूचा थोव्रक चढेशा लुक्तेमे, मेको नेल्ल क्रोइक्नीम। येरमीया १७:१३ 30 मारदे हना इस्राएल डा मुर नु यहूदा डा मुरुम आन ठिटा रेन आं डोंइती मरिश्शो गेय डा लाक्शा अरु मारेइ मपामे। थमा पा इस्राएल डा मुरपुकीम आन गुड डा गेयम आं कली गाइक्पाइक्चा डा लाक्शा, अरु मारेइ मपामे। 31 एको सहर सेल्ले नाक्ते रे मुल सम्म आं कली गाइक्पाइश्शा, चुरपाइश्शा पतीमी। मोपा गो एको कली आं डोंइती रे तिल्लुड। 32 मेको इस्राएल नु यहूदा डा मुरपुकीमी आं कली गाइक्पाइक्चा कली आन मरिश्शो पशो आन पबर्म पाइनुड। मेको आन पिप, आन सरकार डा गेय पाइब, आन चढेब, आं लोत्र पाइबपुकी, यहूदा डा मुरपुकी नु यरूसलेममी बाक्बपुकी नेल्लेम मोदेशो पाम्तेक्म। 33 मेकोपुकीमी आं कली आन ची हिरशा कोइशो बाक्नीम। आन कुल ममाइ। गो मेको आन कली शेंना शेंन बाक्ती हना यो, मनेनेम रिश्शो पचा कली ममिम्तेम। येरमीया २:२७ 34 मेकोपुकीमी आं नें वोइश्शो खिंम आन ग्रांग्रा दिशो देवी देवता वोइक्तेक्म। मिनु आं खिं कली ग्रांग्रा दिशो सेल्लेक्म। 35 मेकोपुकीम हिन्नोम आ तौ आ बेंसीम बाल देवता आन थान सेल्लेक्म। मिनु मेकोपुकीमी मेकेर आन तमी तौ आन कली मोलेक कली चोशा चढेम्तेक्म। गो मेको आन कली मेको मअरेडमी। गो मेको गेनायो ममिम्तु। मोदेशो ग्रांग्रा दिशो गेय पशा, यहूदा डा मुर आन कली पाप पपाइक्तेक्म” देत। येरमीया ७:३१; येरमीया १९:५; इजीकीएल २०:२५-२६

36 मोपतीके परमप्रभु यावे, इस्राएली आन परमप्रभुमी “गेपुकीमी एको सहर आ पबर्म ‘तरवार, अन्काल नु मुर बेक्तीक रोइम बेबीलोन डा पिप आ गुडम गेशो बाक्ब’ देनीनी। 37 कोवडीन, गो मेको आन कली आं गाइश्शो, चुरशो नु ठेयब ग्युश्शा बोक्तीकेमी तेको रागीम खेरुमी, मेको रागी नेल्ल रे गुम्पाइक्नुडमी। गो मेको आन कली लेंशा एको रागीम लेशशा चाक्नुडमी। मिनु मेको आन कली रिश्शो पा मारेइ मदुम्थु बाक्पाइक्नुडमी। ब्यवस्था ३०:३ 38 मिनु मेकोपुकी आं मुर दुम्नीम। मिनु गो मेको आन परमप्रभु दुम्नुड। येरमीया ७:२३ 39 गो मेको आन कली थुं का दुम्तीक नु गाक्तीक लां का गेनुडमी। मेकोपुकी गेना हना यो आं कली मान पा हिंनीम। मेको आंम आन कली नु आन आल आन कली रिश्शो दुम्ब। इजीकीएल ३६:२७ 40 गो मेकोपुकी नु गेना हना यो लीब कबल का पाइनुड। गो मेको आन कली रिश्शो पचा कली गेनायो मप्रोंइनुड। मिनु गो मेको आन थुंमी आं कली मान पा हिंतीके वोइक्नुड। मोपा मेकोपुकीम आं कली मप्रोंइनीम। येरमीया ३१:३१-३४ 41 गो मेको आन कली रिश्शो पना पन ग्येरसीनुड। मिनु थमा पा गो आं थुं

नु आं सोक्त नेल्लेम मेको आन कली एको रागीम वोइक्नुडमी” देत। ब्यवस्था २८:६३; आमोस ९:१५

42 परमप्रभु यावेमी “दोपा गो एको मुर आन कली ओं पा शुश श्येत गोडा, मोपा गो मुल आं देशो रिम्शो पतीक नेल्लेम, मेको आन कली रिम्शो पाइक्नुडमी। 43 एको रागीम रू ग्याप्नीम। मेको आ पबर्म गेपुकीम ‘एको मुर नु बस्तु भाव मारेइ मबाक्शो रागी बाक्ब। मारदे हना एको कल्दी आन गुइम गेशो बाक्ब’ देनीनी। 44 मेकोपुकीम क्येटीम रू ग्याप्नीम। मेको आन नें ब्रेक्शो ग्याप्शो कागज, सांकछी वोइश्शा, छाप थोक्नीम। मोदेशो बेन्यामीन आ रागी, यरूसलेम आ एर ओंथ, यहूदा डा सहरम, पहाडीम, शेफेलाहम नु नेगेबम मोदेशो पाइनीम। मारदे हना गो मेको आन शोप लेशशा गेनुड” दे परमप्रभु यावेम देत। येरमीया ३२:१५; येरमीया २९:१४, ३०

33

“यरूसलेम लेंशा सेल्लुड” देशो

1 परमप्रभु यावेमी येरमीया कली पिप आ दरवार खाल पाइब मुर आ जेल्खानम बाक्मेनु निक्शी खेयप लोत्र पाप्तु। येरमीया ३२:२ 2 मिनु रागी सेल्ब परमप्रभु यावेमी लोत्र पाप्तु। मेको रागी बोल्यो सेल्ब आं नें यावे बाक्ब। 3 मेकोमी “आं कली ब्रेत्ती। मिनु गो इ कली लोत्र लेत्नुड। मिनु गो इ मतुइश्शो ठेयब नु खुइश्शो थोत्रक शेनुड” देत। 4 इस्राएली आन परमप्रभु यावेमी “एको सहर डा खिं नु यहूदा डा पिप आन खिं प्रेशशा, कल्दी नु लडाइ पचा कली सहर आगा रे यो गारो डोइक्तीक लां सेल्नीम। यसैया २२:१० 5 कल्दी सहर ओत्रशा लडाइ पाइनीम। मेकोपुकीमी मेको खिं कली बेक्शो मुर आन रांमी प्रिनीम। गो आं गाइश्शो नु चुरशोम साइश्शो मुर आन बेक्शो रांम प्रिनीम। मारदे हना आं अरेशो लोत्र मटीब आन पतीके एको सहर रे आं कुल खुइक्ताक्ड। 6 गो आं मुर आन कली सापाइक्नुडमी। मिनु गो मेको आन कली सापाइश्शा, आन माल्शो गेशा मारेइ मदुम्थु रिम्शो पा बाक्चा गेनुडमी। येरमीया ३०:१७ 7 गो यहूदा नु इस्राएल डा मुर आन शोप लेशशा गेनुडमी। मिनु मेको आन कली डोंइती डा खोदेशो सेल्लुडमी। येरमीया २९:१४; येरमीया २४:६ 8 गो आं पबर्म पशो आन हेंथे पतीके नु पाप नेल्ल रे मेको आन कली ठीक सेल्लुडमी। मिनु गो मेको आन हेंथे पशो नु पाप पशो माफ गेनुडमी। येरमीया ३१:३४; येरमीया ५०:२० 9 मिनु एको सहर आं डोंइती ग्येरपाइक्तीक, ठेयब सेल्तीके नु आं कली मान पतीके दुम्ब। मिनु रागी रागी डा मुरुम गो इस्राएली आन कली मार मार रिम्शो पशो नेंनीम। मिनु मेको आन कली रिम्शो नु आन माल्शो क्येडा शुश गेशो तशा आं पबर्म हिंशा खिंखि पाइनीम” देत।

10 परमप्रभु यावेमी “मेको सहर आ पबर्म गेपुकीम ‘एको मुर नु बस्तु भाव मारेइ मबाक्शो रागी बाक्ब। यहूदा डा सहर नु यरूसलेम डा लां गाक्ब मुर नु बस्तु भाव, जन्तु मबाक्थु, श्येत्थ दुम्शो बाक्ब। मेको मारेइ मबाक्शो सहरम लेंशा, येरमीया ३२:४३ 11 थुं नाइश्शा बाक्तीक, ग्येरशो सेंदा, ग्युम्ली ग्युम्ले आन सेंदा, कुम्सो पशो सेंदा नु परमप्रभु यावे आ खिंम, गे रिम्शो पाइब बाक्नीनी’ देशा सेंदा लेंशा नेंसीब। मुर नेल्ल आन परमप्रभु यावे कली ‘परमप्रभु यावे, गे शिशी पाइब बाक्नीनी’ देनीन। मारदे हना मेको रिम्शो पाइब बाक्ब। मेको आ दाक्तीक गेना हना यो बाक्ब। गो रागी डा मुर आन कली डोंइती डा खोदेशो पा थुं नाइक्चा गेनुड” दे परमप्रभु यावेम देत। येरमीया ७:३४; एजा ३:११; बजन संग्रह १०६:१

12 मुर नेल्ल आन परमप्रभु यावेमी “मुर नु क्यारश भेडा, बी ब्यफ मबाक्शो रागीम लेंशा सहर नेल्लेमी गोठला आन क्यारश भेडा नाइक्तीक नु योत्रतीक दुम्ब। 13 मिनु पहाड डा सहर, शेफेलाह, नेगेब बेन्यामीन आ रागी यरूसलेम आ एर ओंथ नु यहूदा डा सहरम गोठलापुकीमी क्यारश भेडा लेंशा हिक्शा ओइनीम” दे परमप्रभु यावेम देत। येरमीया ३२:४४

दाऊद नु लेवी कली पशो कबल

14 परमप्रभु यावेम “इस्राएल आ खिं डा मुर नु यहूदा आ खिं डा मुर आन कली आं थोक्शा पशो लोत्र खाप्तीक नाक्त थमा पा जाक्ना जाक्न बाक्नीम। येरमीया २३:५-६; जकरिया ३:८ 15 मेको नाक्ती, मेना गो दाऊद आ खिं रे ठीक पाइब राशी का दाप्पाइक्नुड। मिनु मेकोमी रागीम ठीक निसाफ नु ठीक गेय पाइब। 16 मेको नाक्ती यहूदा श्येत रे प्रोंइचा पुंइसीब। मिनु यरूसलेम मारेइ मदुम्थु बाक्ब। मिनु मेको आ नें आंइ कली ठीक सेल्ब परमप्रभु यावे” देनीम। ब्यवस्था ३३:२८

17 मारदे हना परमप्रभु यावेम “गेना हना यो दाऊद आ खिं डा मुर का इस्राएलमी पिप दुम्ब। २सामुएल ७:१२-१३; १राजा ९:५; भजन संग्रह ८९:३० 18 गेना हना यो लेवी आ थर डा चढेब का आं डोंइती चोशा चढेचा कली, अन्न चढेचा कली नु क्योरशा चढेचा कली बाक्ब” देंत। गन्ती २५:१२-१३; नेहेम्याह १३:२९

19 परमप्रभु यावेम येरमीया कली लोव्र पाप्तु। 20 मार, लोव्र पाप्तु देशा हना “गेपुकीमी गो नु नाक्दो पशो कबल नु नाक्त पशो कबल क्याम्ने चाप्तीनी हना, नाक्दो नु नाक्ती आं देशो ना मदुम्तेक्म हना, येरमीया ३१:३५-३६; उत्पत्ती ८:२२ 21 ला आं गेय पाइब दाऊद नु आ तौ का पिप दुम्ब, देशो कबल क्याम्ने चाप्तीनी। मिनु गो आं लेवी थर डा मुर चढेब नु पशो कबल यो क्याम्ने चाप्तीनी। गन्ती २५:१२-१३; हिब्रू ९:११-१४ 22 दोपा सरीड डा सोरुल हिक्ने मचाप्चा डा बाक्नीमी नु समुन्द्र डा बाल्वा पुक्ने मचाप्चा डा बाक्बा, मोपा गो आं गेय पाइब दाऊद आ चच युइ नु आं कली गेय पाइब लेवी आ थर डा मुर आन कली सोपाइश्शा बोपाइश्शा शुश सेल्लुडमी” देंत। उत्पत्ती १५:५

23 परमप्रभु यावेम येरमीया कली लोव्र पाप्तु। 24 मार लोव्र पाप्तु देशा हना “मेको मुरपुकी मार, देना देन बाक्मा, मार, गे मनेनी? मेकोपुकीमी ‘परमप्रभु यावे आ योव्रशो खिं निक्शी डा मुर आन कली प्रोंइशा तिल्शो बाक्ब’ देंतेक्म। मो देंतीके मेको मुरपुकीमी आं मुर आन कली आइक्च सेल्शा, मुल रे रागी का यो मनम, दे मिन्मीम” देंत। 25 परमप्रभु यावेमी “गो नाक्दो नु नाक्त नु आं कबल मपाता हना, सरीड, रागीम आं देशो मपाम्तेक्म हना, 26 गो याकूब आ आल नु आं गेय पाइब दाऊद आ चच युइ आन कली तिल्लुडमी। मोपा मेको अब्राहाम, इसहाक नु याकूब आन मुर आन कली पिप दुम्चा कली मयोव्रनुडमी। तन्न गो मेको डोंइती खोदेशो पा, मेको आन थुं नाइक्चा गेनुडमी। मिनु मेको आन कली शिशी पाइनुडमी” देंत।

34

सिदकीयाह कली हिंच कोंइशो

1 परमप्रभु यावेम येरमीया कली बेबीलोन डा पिप नेबुकदरेसर, मेको आ लडाइ पाइब नेल्ल, रागी डा राज्य नेल्ल नु मेको आ सासन पशो रागी डा मुर नेल्लेम यरूसलेम नु आ एर ओंथ डा सहर नेल्ल आन कली लडाइ तोम्तेक्म। मेना इस्राएली आन परमप्रभु यावेमी येरमीया आं कली लोव्र पाप्तु। येरमीया ५२:४; २राजा २५:१-२ 2 मिनु परमप्रभु यावे, इस्राएली आन परमप्रभुमी आं कली “यहूदा डा पिप सिदकीयाह आ बाक्तीक लावो। मिनु मेको कली परमप्रभु यावेमी ‘गो एको सहर बेबीलोन डा पिप आ गुइम गेनुड। मिनु मेकोमी एको सहर कली मीम क्रोइक्ब। येरमीया २१:१० 3 गे मेको आ गुइ रे ब्रोंइचा मताइनेवे। गे थमा पा ग्याइक्चा पुंडसीशा मेको आ गुइम दुम्नेवे। गे बेबीलोन डा पिप कली तशा, मेको नु कोव्रमुशा लोव्र पाइनेवे’ दे बेबीलोन लचा माल्लेवे” देंत। येरमीया ३२:४ 4 मो हना यो ए यहूदा डा पिप सिदकीयाह, परमप्रभु यावे आ लोव्र नेनीन “गे तरवारम साइक्चा मपुंडसीनीनी। येरमीया ५२:११ 5 गे इन थुं नाइश्शा बेक्नीनी। मिनु दोपा इन किकी पिपी इन डोंइती डा पिप आन कली मुरपुकीमी ब्रोंव्रशो रिना पाइब थोव्रक चोशा थिम्मे, मोपा मेकोपुकीमी इन कली यो थिम्नीम। इन पर्बम ‘आंइ प्रभु’ दे रोंका पाइनीम। गो मेको लोव्र पाता, दे नेल्लेम नेंचा डा पा देनो” दे परमप्रभु यावेमी देंत। २इतिहास १६:१४; येरमीया २२:१८

6 मिनु येरमीयामी मेको लोव्र नेल्ल यरूसलेममी यहूदा डा पिप सिदकीयाह कली देंत। 7 बेबीलोन डा पिप आ लडाइ पाइब मुरपुकी यरूसलेम नु यहूदा डा अरु सहर नु लडाइ पना पन बाक्शो बाक्तेक्म। लाकीश नु आजेका नु यो मेकोपुकीमी लडाइ पचा मप्रोंइशो बाक्तेक्म। मेको यहूदा डा गारो हिरशो सहर निक्शी ला लीशो बाक्ताक्स।

वाइल आन कली प्रोंइतीक बर्स

8 मेना परमप्रभु यावेम येरमीया कली लोव्र पाप्तु। मेना यहूदा डा पिप सिदकीयाहम यरूसलेम डा मुर नेल्ल नु वाइलीम वाइल नेल्ल आन कली प्रोंइचा माल्लीम, दे कबल पशो बाक्त। येरमीया ३४:१४ 9 मेना मुर नेल्लेम आंम हिब्रू वाइलीम वाइल आन कली प्रोंइचा माल्लेक्म। सुइम यो आंम हिब्रू लोक्ब आन कली वाइलीम वाइल सेल्चा मदुम। 10 मिनु मेको लोव्र टीब ठेयब मुर नु कबल टीब मुर नेल्लेमी आंम आन वाइलीम वाइल आन कली प्रोंइचा नु लेंशा अर्को वाइलीम वाइल मवोइक्चा नम, देशो बिस्साक्म। मिनु मेकोपुकी गारशा, मेको आन कली प्रोंइतेक्म। 11 मिनु नोले लेंशा मेकोपुकीमी आन थुं लेशशा आन प्रोंइशो वाइलीम वाइल आन कली लेंशा चाक्शा वाइलीम वाइल सेल्लेक्म। 12 मिनु परमप्रभु यावेम येरमीया कली लोव्र पाप्तु। 13 मार, लोव्र पाप्तु देशा हना “परमप्रभु यावे, इस्राएली आन परमप्रभुमी ‘गो मेको आन किकी पिपी आन कली इजीप्त रागी डा वाइलीम वाइल दुम्तीक खिं रे प्रोंइशा

चाकतामी। मिनु गो मेकोपुकी नु कबल पाता। 14 तेकोइ ७ बर्सम इन कली लेयसीशो मुर इन हिब्रू लोक्बम इन कली ६ बर्स गेय पवा नोले, ७ बर्सम मेको कली प्रॉइचा माल्ब' देंती। तन्न इन किकी पिपीम आं लोव्र मटीम। आन नोफान मदाइक्तेम। प्रस्थान २१:२; लेवी २५:३९-४१; ब्यवस्था १५:१२ 15 गेपुकीम चहिं नक माफ पुंइशा आं डोंइती नेल्ल आन कली प्रॉइचा नम, देशो लोव्र ठीक पाइतीनी। मिनु गेपुकीमी आं नें बाक्तीक खिंम आं डोंइती कबल का पाइतीनी। लेवी २५:१० 16 तन्न नोले इन थुं फाइशशा आं नें ग्रांग्रा दिशो सेलतीनी। गे नेल्लेम इन डोंइती प्रॉइशा वाइलीम वाइल आन कली लेशशा चाक्तीनी, देशो बाक्ब" देंत। 17 मोपतीके परमप्रभु यावेमी "गेपुकीम आं देशो मटिनी। मिनु आंम रागी डा आंम नेक्था डा मुर नु आंम वारच आन कली वाइलीम वाइल दुम्टीक रे मप्रॉइनी। मोपतीके गो मुल इन कली प्रॉइनन्नी। गो इन कली तरवार, मुर बेक्तीक रोइ नु अन्कालम साइक्पाइक्चा कली प्रॉइनन्नी। गो इन कली राज्य नेल्लेम शुश हिंचा डा सेलन्नी। 18 आं कबल क्याम्ब नु आं डोंइती पशो कबल डा पतीके मपाइब मुर आन कली बाछा खोदेशो सेलनुडमी। मेको कली फेके निक्शी सेल्लेक्म। मिनु मेको आ दाते रे गाक्तेक्म। 19 मिनु मेको बाछा आ फेके निक्शी आस दाते रे गाक्ब यहूदा नु यरूसलेम डा सरकार आ गेय पाइब, दरवार डा ठेयब मुरपुकी, चढेबपुकी नु रागी डा मुर नेल्ल 20 आन जोरी सत्रु आन गुइम नु आन कली साइक्चा माल्ब आन गुइम गेचा पुंइसीनीम। मेको आन बेक्शो रां सरीड डा चिक्ब नु रागी डा जन्तु आन ब्वतीक दुम्ब। येरमीया ७:३३ 21 यहूदा डा पिप सिदकीयाह नु मेको आ सरकार डा गेय पाइब आन कली साइक्चा माल्ब, आन जोरी सत्रु आन गुइम नु बेबीलोन डा पिप आ लडाइ पाइब आन गुइम गेनुडमी। मेको लडाइ पाइबपुकी इन रे लेशशा लशो बाक्तेक्म" देंत। येरमीया ३७:५ 22 परमप्रभु यावेमी "गो मेको आन कली अरेनुडमी। मिनु गो मेको आन कली एको सहरमी लेशशा चाक्नुडमी। मेकोपुकीमी एको सहर नु लडाइ पा ग्रानीम। मिनु एको कली क्रोइक्नीम। मिनु गो यहूदा डा सहर कली मुर मबाक्शो सेलनुड" देंत। येरमीया ३७:८

35

येरमीया नु रेकाबी

1 यहूदा डा पिप योसीयाह आ तौ येहो-याकीमम सासन पवा ना परमप्रभु यावेम येरमीया कली लोव्र पाप्तु। २राजा २३:३४ 2 मार, लोव्र पाप्तु देशा हना "गे रेकाबी आन खिं लशा, मेकोपुकी नु लोव्र पावो। मेको आन कली परमप्रभु यावे आ खिं डा कोठा कामी ओइदीमी। मिनु मेको आन कली अडगुर शांबु खेत्तीमी" देंत। १इतिहास २:५५ 3 मोपतीके गो हाबासीन्याह आ तौ येरमीया, आ तौ याजन्याह नु मेको आ लोक्बपुकी, मेको आ तौ नेल्ल नु रेकाबी आन खिं डा मुर नेल्ल आन कली लाइक्तामी। 4 मिनु गो मेको आन कली परमप्रभु यावे आ खिंम परमप्रभु आ मुर हानान आ तौ आन कोठाम चाक्तामी। हानान परमप्रभु आ मुर यिग्दाल्याह आ तौ बाक्त। मेको कोठा चहिं ठेयब मुर आन कोठा आ नेक्था बाक्त। मेको शाल्लुम आ तौ लाप्चो खाल पाइब, मासेयाह आ कोठा आ तार बाक्त। 5 मेको नोले गो अडगुर शांबु आ गर नु बोटकोपुकी रेकाबी आन डोंइती वोइक्ता। मिनु मेको आन कली "अडगुर शांबु तूडीन" दे माइक्तामी। 6 तन्न मेकोपुकीमी "गो अडगुर शांबु मतूनीकी। मारदे हना रेकाब आ तौ आंइ किकी योनादाबम आंइ कली 'गेपुकी नु इन आलपुकीम गेनायो अडगुर शांबु मतूडीन। २राजा १०:१५ 7 मेको प्रॉइशा यो गेपुकीम गेनायो खिं मसेलीन। वांचेर मशोक्कीन। अडगुर मखुमीन। गेपुकीम मोदेशो गेय गेनायो मपने। तन्न इन बाक्शो रागीम शुश सम्म ब्रोंइमल, दे गेना हना यो ताम्बुपुकीम बाक्शा हिरशा गाक्कीन' दे शेंशो बाक्त। 8 मिनु गो आंइ किकी रेकाब आ तौ योनादाब आ शेंशो नेल्ल पाइतक। गोपुकी आंमा नु आंइ मीशपुकी नु आंइ तमी तौ नेल्लेम गेनायो अडगुर शांबु मतूक। 9 गो बाक्चा कली खिं यो मसेलनीकी। अडगुर रू, अरु रू नु वांचेर गोपुकी नु मबाक्ब। 10 गो ताम्बुम बाक्शा, आंइ किकी योनादाबम शेंशो नेल्ल पाइतक। 11 तन्न बेबीलोन डा पिप नेबुकदरेसरमी एको रागी कली लडाइ तोप्तु। मिनु गोपुकीम 'कल्दी नु अरामी आन लडाइ पाइबपुकी रे प्रोक्चा कली यरूसलेम लय' देंतक। मोपतीके गो यरूसलेममी बाक्शो बाक्नीकी" देंतेक्म।

12 मिनु नोले परमप्रभु यावेम येरमीया कली लोव्र पाप्तु। 13 मुर नेल्ल आन परमप्रभु यावे, इस्राएली आन परमप्रभुमी मार लोव्र पाप्तु देशा हना "गे यहूदा डा मुर नु यरूसलेममी बाक्ब आन कली लशा 'मार, गे आं देशो मपाइनीनी? मिनु आं लोव्र मटीनीनी?' देंत" दे माइक्मी। 14 परमप्रभु यावेमी "मार, रेकाब आ तौ योनादाबम आ चच युइ आन कली 'गेपुकीम अडगुर शांबु मतूडीन' दे शेंशो लोव्र मेकोपुकी टीनीमी। मोपतीके मेकोपुकीमी मुल सम्म अडगुर शांबु मतूनीम। मारदे हना मेकोपुकीमी आन किकी पिपीम शेंशो टिशो बाक्नीम। तन्न गो इन कली लोव्र पना पन बाक्ती।

मो हना यो गेपुकीम आं लोव्र मटिनी। येरमीया २५:४ 15 गो इन कली आं गेय नु आं लोव्र पाइब आन कली सोइक्ना सोइक्न बाक्ती। मेकोपुकीमी इन कली 'गे नेल्ल इन मरिम्शो लां रे लेतीन। मिनु इन मरिम्शो गेय रिम्शो सेलीन। मिनु देवी देवता आन कली पूजा पचा नु आन नोले खोइक्चा प्रोनीन। मिनु गे इन किकी पिपी आन कली गेशो रागीम बाक्चा ताइनीनी' देंती। तन्न गेपुकीम आं देंशो लोव्र मनेनी नु मटिनी। मत्ती २३:३७ 16 रेकाब आ तौ योनादाब आ चच युइमी आन किकी पिपीमी अरेशो टीनीम। तन्न एको मुरपुकीम आं देंशो मटिशो बाक्नीम" देंत। 17 मोपतीके मुर नेल्ल आन परमप्रभु यावे, इस्राएली आन परमप्रभुमी "नेनीन, गो यहूदा नु यरूसलेमम बाक्ब मुर आन कली आं देंशो ठेयब श्येत नेल्ल चाक्नुड। मारदे हना गो मेको आन कली लोव्र पाता, तन्न मेकोपुकीमी मनेनेम। गो मेको आन कली ब्रेक्ताक्डमी, तन्न मेकोपुकीमी लोव्र मलेत्तीमी" देंत। येरमीया ७:१३-१५

18 मिनु येरमीयामी रेकाबी आन चच युइ आन कली "मुर नेल्ल आन परमप्रभु यावे, इस्राएली आन परमप्रभुमी गेपुकीम इन किकी योनादाब आ देंशो टिना टिन नु मेको आ शेंशो नेल्ल नु इन कली अरेशो नेल्ल पाइतीनी। 19 मोपतीके रेकाब आ तौ योनादाब आ चच युइ का गेना हना यो आं डोंइती बाक्चा ताइब" दे मुर नेल्ल आन परमप्रभु यावे, इस्राएली आन परमप्रभुम देंत।

36

येहो-याकीमम तोल्शो कागज चोशो

1 यहूदा डा पिप योसीयाह आ तौ येहो-याकीममी सासन पवा आ ४ बर्सम परमप्रभु यावेम येरमीया कली लोव्र पाप्तु। येरमीया २५:१ 2 मार लोव्र पाप्तु देंशा हना "गो योसीयाहम सासन पवा रे मुल सम्म इ कली इस्राएल, यहूदा नु रागी नेल्ल डा मुर आन पर्बम देंशो लोव्र नेल्ल कागजम ब्रेक्तो। येरमीया २५:३ 3 मो दुम्मेनु, गो मेको आन कली गेचशो ठेयब श्येत दुम्तीके आ पर्बम यहूदा डा मुरपुकीम तुइश्शा, आन मरिम्शो पतीके रे लेत्नीमी कों? मिनु गो मेको आन मरिम्शो पशो नु आन पाप पशो क्याम्शा गेनुडमी" देंत। येरमीया २६:३

4 मिनु येरमीयामी नेरीयाह आ तौ बारुक कली ब्रेप्पाइक्तु। मिनु बारुकम येरमीयामी ब्रेक्पाइश्शो परमप्रभु यावेम देंशो लोव्र नेल्ल कागजम ब्रेक्ताक्व। येरमीया ३२:१२; येरमीया ४५:१ 5 मिनु येरमीयामी बारुक कली "गो परमप्रभु यावे आ खिं लने मचाप्नुड। 6 मोपतीके गे तेकोइ माइजा बाक्तीक नाक्त परमप्रभु यावे आ खिं लशा, आं इ कली ब्रेक्पाइश्शो कागजम बाक्शो लोव्र मुरपुकीम नेंचा डा पा पढेशा नेंपाइक्मी। यहूदा डा सहर रे जाक्शो मुर नेल्लेम नेंचा डा पा पढेशा नेंपाइक्मी। 7 मो दुम्मेनु मेकोपुकीमी आन पुंइशो लोव्र परमप्रभु यावे आ नेक्था चाक्नीमी, कों? मिनु मेको नेल्लेम आन मरिम्शो लां प्रोंइनीमी, कों? मारदे हना परमप्रभु यावेम आ मुर आन पर्बम गाइश्शा चुरशा देंशो लोव्र ठेयब बाक्ब" देंत। 8 मिनु नेरीयाह आ तौ बारुकम परमप्रभु यावे आ लोव्र पाइब येरमीया आ देंशो नेल्ल पाप्तु। मेकोमी मेको परमप्रभु यावे आ लोव्र ब्रेक्शो कागज परमप्रभु यावे आ खिंम पढेशा नेंपाइक्तीमी।

9 यहूदा डा पिप योसीयाह आ तौ येहो-याकीम आ सासन पशो ५ बर्स ९ महिनाम यरूसलेममी बाक्शो मुर नेल्ल नु यहूदा डा सहर रे जाक्शो मुर आन कली यरूसलेमम परमप्रभु यावे आ डोंइती नेल्ल आन कली नेंपाइश्शा माइजा बाक्तीक लोव्र पाम्तेक्म। 10 मिनु बारुकमी येरमीया आ ब्रेक्पाइश्शो लोव्र परमप्रभु यावे आ खिंम मुर नेल्लेमी नेंचा डा पा पढेत्तु। मेकोमी मेको लोव्र ब्रेक्ब शाफान आ तौ गेमारयाह आ बाक्तीके परमप्रभु यावे आ खिं डा नक लाप्चो आ नेक्था डा कोठाम बाक्शा, पढेत्तु। २राजा २२:३

11 मिनु गेमारयाह आ तौ शाफान आ चच मीकायामी मेको कागजम ब्रेक्शो परमप्रभु यावे आ लोव्र नेल्ल नेंतु। 12 मिनु मेको तोइश्शा, पिप आ खिंम ब्रेक्ब आ बाक्तीके ओव्रदीत्त। मेकेर ठेयब मुर नेल्ल बाक्तेक्म। मेकेर सु सु बाक्तेक्म देंशा हना, ब्रेक्ब एली-शामा, शेमायाह आ तौ देलायाह, आकबोर आ तौ एल्लनाथान, शाफान आ तौ गेमारयाह नु हनान्याह आ तौ सिदकीयाह बाक्तेक्म। येरमीया २६:२२ 13 मिनु मीकायामी बारुकम मुर नेल्लेम नेंचा डा पा पढेशो लोव्र नेल्ल नेंतु। मिनु मेको लोव्र नेल्ल मेको आन कली शेंताक्मी। 14 मिनु ठेयब मुर नेल्ल गारशा, नेथन्याह आ तौ शेलेम्याह आ चच कूशी आ युइ येहूदी कली "लशा, नेरीयाह आ तौ बारुक कली मुर आन कली पढेशा नेंपाइश्शो कागज कुरशा एक जाक्को मतो" दे सोइक्ताक्मे। मोपतीके गेदाल्याह आ तौ बारुक मेको कुरशा, आन बाक्तीके जाक्त। २राजा २२:११ 15 मिनु मेकोपुकीमी मेको कली "निश्शा, मेको आंइ कली पढेशा नेंपाइक्की" देंतेक्म। मोपतीके बारुकम मेको आन कली, मेको पढेशा नेंपाइक्तीमी। 16 मिनु मेकोपुकीमी मेको पढेशो नेल्ल नेंशा

हिंशा आन कुल कोत्रमुत्तेकम। मिनु मेकोपुकीमी बारुक कली “गोपुकीम एको लोत्र नेल्ल पिप कली नेंपाइक्चा माल्नीकी” देतेकम। 17 मिनु मेकोपुकीमी बारुक कली “गे एको लोत्र नेल्ल दोपा ब्रेक्ती? आंइ कली शेंदीकी। येरमीयामी इ कली ब्रेक्पदा?” दे हिल्लो पाम्तेकम। 18 मिनु बारुकम “मेकोमी आं कली एको लोत्र नेल्ल ब्रेक्पाइक्ती। मिनु गो एको कागज मसीम ब्रेक्ताक्ड” दे माइक्तीमी। 19 मिनु मेको ठेयब मुरपुकीम बारुक कली “गे नु येरमीया निम्फा लशा, खुंडसीस। गे निक्शी ते बाक्सी, दे सुइम मतुइक्तेकल” दे माइक्तेकम। येरमीया २५:८-११; येरमीया ७:२०; येरमीया ९:९-१०

20 मिनु मेकोपुकीमी मेको कागज ब्रेक्ब एली-शामा आ कोठाम वोइश्शा, पिप आ बाक्तीक लशा, पिप कली मेको लोत्र नेल्ल शेंताक्मे। 21 मिनु पिपमी मेको कली “कागज चाक्को” दे येहूदी कली सोइक्ताक्व। मिनु मेकोमी ब्रेक्ब एली-शामा आ कोठा रे गुंडशा चाक्कु। मिनु येहूदीम पिप नु पिप आ नेक्था बाक्ब ठेयब मुर आन कली मेको पढेशा नेंपाइक्कु। 22 मेना मेको बर्स डा ९ महिना बाक्तीके, पिप हिंडदम बाक्तीके, खिंम बाक्शो बाक्त। मेको आ डोंइती मी ब्रशो बाक्त। 23 मिनु येहूदीम सां नु ४ हरप पढेने थुमानु, पिपम कागज खोइक्तीकेम खोइश्शा, मीम हुम्ताक्व। मेको तोल्शो कागज नेल्ल मनुम्म सम्म पिपम मो पना पन बाक्त। 24 पिप नु मेको आ गेय पाइबपुकी मेको लोत्र नेंशा महिंम। मेकोपुकीमी आन वा यो मखाक्कोम। 25 एल्नाथान, देलायाह नु गेमारयाहम पिप कली “मेको कागज मचोने” दे पुन्मेनु यो, पिपमी मेको आन लोत्र मनेन। 26 मेको आ पा डा पिपमी आ तौ येराहमेल, अज्जीएल आ तौ सेरायाह नु अब्देल आ तौ शेलेम्याह आन कली मेको ब्रेक्ब बारुक नु परमप्रभु यावे आ लोत्र पाइब येरमीया कली फ्रेंशा चाक्चा नस, दे हुकुम गेम्तीमी। तन्न परमप्रभु यावेम मेको आस कली खुइक्ने थुम्शो बाक्त।

27 मिनु येरमीयामी ब्रेक्पाइश्शो बारुकम ब्रेक्शो मेको तोल्शो कागज पिपम चोने थुमा नोले, परमप्रभु यावेमी येरमीया कली 28 “अर्को कागज काम यहूदा डा पिप येहो-याकीममी चोशो डोंइती डा कागजम बाक्शो लोत्र नेल्ल लेंशा ब्रेक्तो” देंत। 29 मिनु गे यहूदा डा पिप येहो-याकीम आ पर्बम परमप्रभु यावेम “गे मेको तोल्शो कागज चोप्तीवी। मिनु गे बारुक कली गे मारदे बेबीलोन डा पिप थमा पा जाक्शा, एको रागी श्येत्य पोक्ब। मिनु मेकोमी मुर नु बस्तु भाव नेल्ल आन कली साइक्ब, दे कागजम ब्रेक्ती?” देंते। 30 मोपतीके परमप्रभु यावेमी यहूदा डा पिप येहो-याकीम आ पर्बम “मुल रे दाऊद आ नित्तीकेम मेको आ चच युइ तेकोइ मनिन्तीम। मेको पिप आ बेक्शो रां नाक्त नांम नु नाक्दो फुरशेम जिप्पाइक्चा डा पा तांडसीब। येरमीया २२:३०; येरमीया २२:१९ 31 गो मेको कली, मेको आ आल आन कली नु आ गेय पाइब आन कली आन मरिम्शो पशो आ पर्बम सजाइ गेनुडमी। गो मेको आन कली, यरूसलेममी बाक्ब आन कली नु यहूदामी बाक्ब नेल्ल आन कली आं देंशो ठेयब श्येत नेल्ल गेनुड। मारदे हना मेकोपुकीमी आं देंशो लोत्र मनेनेम” देंत।

32 मिनु येरमीयामी अर्को कागज का चाक्शा नेरीयाह आ तौ ब्रेक्ब बारुक कली गेप्टु। मिनु मेकोमी येरमीयाम देंशो खोदेंशो पा यहूदा डा पिप येहो-याकीममी मीम चोशो कागज डा लोत्र नेल्ल मेको कागजम ब्रेक्ताक्व। मिनु येरमीयामी अरु शुश लोत्र यो मेकेर तेम्ताक्व।

37

येरमीया कली चोक्शो

1 बेबीलोन डा पिप नेबुकदरेसरमी योसीयाह आ तौ सिदकीयाह कली यहूदा डा पिप सेल्शो बाक्त। मिनु येहो-याकीम आ तौ कोन्याह आ पा डा मेकोमी सासन पचा गोप्टु। येहो-याकीम आ अर्को नें कोन्याह बाक्ब। २राजा २४:१७ 2 मिनु मेको, मेको आ गेय पाइबपुकी नु मेको रागी डा मुर नेल्लेम परमप्रभु यावे आ लोत्र पाइब येरमीया आ देंशो परमप्रभु यावे आ लोत्र मनेनेम।

3 मो हना यो पिप सिदकीयाहम शेलेम्याह आ तौ येहुकल नु मासेयाह आ तौ चढेब सेफन्याह आस कली परमप्रभु यावे आ लोत्र पाइब येरमीया आ बाक्तीकेम “आंइ पर्बम इं परमप्रभु यावे नु पुंडशा गेने” देंथ, मुर सोइक्ताक्व। येरमीया ७:१६; येरमीया ४२:२ 4 मेना सम्म येरमीया मुर आन दातेमी एर ओंथ गाक्ना गाक्न बाक्त। मारदे हना मेना सम्म मचोक्सीशो बाक्त। 5 मेना फाराओ आ लडाइ पाइबपुकी इजीप्ट रे जाक्शो बाक्तेकम। मिनु कल्दी डा मुरपुकीमी यरूसलेम कली एर ओंथ नेल्ल रे पुम्शो लोत्र नेतेकम। मिनु मेकोपुकी यरूसलेम रे नोले शोंइसाक्म।

6 मिनु परमप्रभु यावेम येरमीया कली लोत्र पाप्टु। 7 मार लोत्र पाप्टु देंशा हना “परमप्रभु यावे, इस्राएली आन परमप्रभुमी ‘यहूदा डा पिपम आं कली हिल्लो पथ इ बाक्तीक सोइक्ताक्व। मेको कली इ कली वारच पाइक्थ

जाकब फाराओ आ लडाइ पाइब आन रागी इजीप्त लेशशा लाइनीम, दे मतो। 8 मिनु कल्दी लेशशा जाकनीम। मिनु एको सहर कली लडाइ तोइनीम। मिनु मेकोपुकीमी एको सहर ग्राशा, मीम क्रोइकनीम' देशो बाकब, दंत, मतो" दंत। येरमीया ३४:२२ 9 परमप्रभु यावेमी "गेपुकीमी कल्दीम थमा पा आंइ कली लडाइ तोइनीम, दे मिम्तीन। मारदे हना मो पाइनीम। 10 गेपुकी नु लडाइ पाइब कल्दी नेल्ल आन कली गे ग्रातीनी हना, मेको आन गार दुम्शोपुकी ला आन ताम्बुम लीतेक्म हना यो, मेकोपुकी जाकशा एको सहर कली मी सुइकनीम" दंत।

11 फाराओ आ लडाइ पाइबपुकीम पतीके कल्दी यरूसलेम रे नोले शोंइसीची ना 12 येरमीया आं रू डा भाग ताकचा कली यरूसलेम रे गूशा बेन्यामीन आ रागी गे लचा गोप्तु। येरमीया ३२:८-९ 13 मिनु मेको बेन्यामीन लापचोमी जाकदीम्मेनु, हनान्याह आ चच शेलेम्याह आ तौ खाल पाइब आन ठेयब मुर इरीयाहम येरमीया कली ग्याइशशा "गे प्रोक्शा कल्दी आन बाक्तीकेम लशो बाक्नेवे" दंत। 14 मिनु येरमीयामी "एको लोत्र थमा ममाइ। गो कल्दी आन बाक्तीके प्रोक्शा लशो मनड" दंत। तन्न इरीयाहम मेको आ लोत्र मनेन। मिनु मेकोमी येरमीया कली ग्याइशशा ठेयब मुर आन बाक्तीके चाकतु। 15 मिनु मेकोपुकी येरमीया तशा गाइक्ताक्म। मिनु मेको कली तुप्शा, ब्रेक्ब योनाथन आ खिंम चोक्शा वोइक्तेक्म। मारदे हना मेको खिंम जेल्खान सेल्शो बाक्तेक्म। येरमीया २०:२ 16 मेकोपुकीमी येरमीया कली जेल्खानम चोक्तेक्म। मिनु येरमीया थम छिडछिडम शुश नाक्त सम्म बाक्त।

17 मिनु पिप सिदकीयाहम मेको कली गुंडथ सोइक्ताक्व। मिनु मेको कली दरवारम चाकशा सुइम मतुइक्चा डा पा "मार, परमप्रभु यावे रे पा मारेइ लोत्र बाक्मे?" दे हिल्लो पाप्तु। मिनु येरमीयामी "ओं, बाकब। गे बेबीलोन डा पिप आ गुइम गेचा पुंडसीनीनी, देशो बाकब" दंत। 18 मिनु येरमीयामी पिप सिदकीयाह कली "गो इन कली, इन गेय पाइब ठेयब मुर आन कली नु एको मुर आन कली मार पडा डा? गे मारदे आं कली जेल्खानम चोक्तीनी? 19 इन कली नु एको रागी कली लडाइ तोचा कली बेबीलोन डा पिप मजाकब, दे इन कली देंब, परमप्रभु यावे आ लोत्र पाइबपुकी ते बाक्मा? 20 तन्न मुल आं प्रभु, पिप गो इन कली पुंडनुड। आं पुंडशो लोत्र नेनीन। आं देंचा माल्लशो लोत्र इन डोंइती देंचा तडल। गो आं कली ब्रेक्ब योनाथन आ खिंम मसोइक्तीनी। मो दुम्त हना, गो मेकेर बेक्नुड" दंत। 21 मिनु पिप सिदकीयाह आ हुकुममी येरमीया पिप आ दरवार खाल पाइब मुर आ जेल्खानम वोइक्चा पुंडसाक्व। मिनु सहर डा शोब्ले चोतीक रे मनुम्म सम्म, नाक्त किंत किंत मेको कली शोब्ले चाकशा गेम्तेक्म। मोपा येरमीया पिप आ दरवार खाल पाइब आ जेल्खान डा लाडगाम बाक्त। येरमीया ३२:२

38

येरमीया कली इनारमी तोक्शो

1 मिनु मत्तान आ तौ शेफत्याह, पशहुर आ तौ गेदाल्याह, शेलेम्याह आ तौ युक्ल नु माल्कीयाह आ तौ पशहुरमी येरमीयामी मुर नेल्ल आन कली देशो लोत्र नेतेक्म। मेको आ लोत्र मार बाक्त देशा हना, येरमीया २१:१ 2 परमप्रभु यावेम "सु सु एको सहरमी बाक्नीमी, मेकोपुकी तरवार, अन्काल नु मुर बेक्तीक रोइम बेक्नीम। तन्न सु सु गुइ पोक्शा, कल्दी आन बाक्तीके जाकदीत्नीमी, मेकोपुकी चहिं ब्रोंइनीम। मेको आन गिंम प्रोंइशा लडाइ रे ब्रोंइनीम" देशो बाक्त। येरमीया २१:९ 3 मिनु परमप्रभु यावेमी "एको सहर थमा पा बेबीलोन डा पिप आ लडाइ पाइब आन गुइम दुम्ब। मिनु मेकोपुकीमी एको सहर आन के सेल्नीम" दंत, दे येरमीयाम देशो बाक्त। 4 मिनु ठेयब मुरपुकीम पिप कली "एको मुर कली साइक्चा माल्लब। मारदे हना एकोमी ओदेशो लोत्र पा, एको सहरमी लीशो लडाइ पाइब नु मुर नेल्ल आन थुं लुक्च लपाइशो बाकब। एको मुरुम मुर आन कली रिम्शो ममाइ मरिम्शो पचा दाकब" देंतेक्म। 5 मिनु पिप सिदकीयाहम "मेको इन गुइमीन बाकब। गो इन कली मारेइ पने मचाप्नुड" दे माइक्तीमी। 6 मोपतीके मेकोपुकीमी येरमीया कली लाइशशा, पिप आ तौ माल्कीयाह आ इनारम तोक्तेक्म। मेको इनार पिप आ दरवार खाल पाइब आ लाडगाम बाक्त। मिनु मेकेर डोरीम फ्रेंशा इनारम तोक्तेक्म। मेको इनारमी ब्वाक्कु मबाक्माक्त। हिलो ला बाक्माक्त। मिनु येरमीया मेको हिलोम गुम्त।

7 मेकेर पिप आ खिंम गेय पाइब एबेद-मेलेक नें पाइशो मुर का बाक्त। मेको एथीयोपीया डा बाक्त। मेकोमी येरमीया कली इनारम तोक्शो नेंतु। मेना पिप बेन्यामीन लापचोमी बाक्शो बाक्त। येरमीया ३९:१५-१८ 8 मिनु एबेद-मेलेक पिप आ खिंम रे लशा पिप कली 9 "आं प्रभु, आं पिप, एको मुरपुकीम परमप्रभु यावे आ लोत्र पाइब येरमीया कली इनारम तोक्शा मरिम्शो पाम्तेक्म। सहरम शोब्ले नुम नोले मेको मेकेर शोत्रलुम बेक्ब" दंत। 10 मिनु पिपम कूशी, एथीयोपीया डा एबेद-मेलेक कली "एक रे मुर सां आन कली लाइशशा, मेको परमप्रभु यावे आ लोत्र पाइब येरमीया

कली बेक्चा क्येडा डोंइती इनार रे गुंडदीन” दे अरेप्टु। का निक्शी मुरुमी ३० जना मुर ब्रेशशो बाक्ब। 11 मोपतीके एबेद-मेलेकम मेको मुर आन कली लाइक्तु। मिनु पिप आ खिं डा मार मार वोइक्तीक आगा डा कोठाम लत। मिनु मेकेर रे माइत जेक्शो वासी गुंडताक्व। मिनु मेकोमी येरमीया कली मेको वासी डोरीम फ्रेंशा तोक्तु। 12 मिनु एथीयोपीया डा एबेद-मेलेकमी येरमीया कली “इ बला आगा नु डोरी आन दातेमी एको माइत जेक्शो वासी वोतो” देंत। मिनु येरमीयामी मो पाप्टु। 13 मिनु मेकोपुकीमी डोरीम येरमीया कली इनार रे गुंडताक्मे। मेको नोले येरमीया पिप आ दरवार खाल पाइब मुर आ जेल्खान डा लाडगाम बाक्त।

सिदकीयाहम लेंशा हिल्लो पशो

14 मिनु पिप सिदकीयाहम परमप्रभु यावे आ लोव्र पाइब येरमीया कली ब्रेत्थ सोइक्ताक्व। मिनु परमप्रभु यावे आ खिं डा निक्शी लापचो नोले डा ठेयब लापचो आ डोंइती चाक्पाइक्तीमी। मिनु पिपम येरमीया कली “गो इ कली लोव्र का निक्शी हिल्लो पाइनुड। आं डोंइती गे मारेइ लोव्र मखुइक्तो” दे माइक्तु। 15 मिनु येरमीयामी सिदकीयाह कली “गो इन कली लोव्र पाता हना, गे आं कली साइक्नीनी। गो इन कली अर्ती गेतन्नी हना, गे मेको मनैनीनी” देंत। 16 मिनु पिप सिदकीयाहम सुइ आन मतुइक्चा डा पा, येरमीया नु कसम जशा “परमप्रभु यावे ब्रोंइशा बाक्शो खोदेशो पा, गो इ कली सोक्त गेप्टु। गो मेको आ नैमी कसम जशा देंनुड। गो इ कली मसाइक्नुड। गो इ कली साइक्चा माल्ब मुर आन गुइम मगेनन” देंत। येरमीया ३८:४-५

17 मिनु येरमीयामी सिदकीयाह कली “मुर नेल्ल आन परमप्रभु यावे, इस्राएली आन परमप्रभुमी ‘गे बेबीलोन डा पिप आ ठेयब मुर आन कली आंमान जिम्मा गेसाक्नी हना, इन सोक्त ब्रोंइब। मिनु एको सहर क्रोइक्चा मपुंडसीब। मिनु इन खिं डा मुरपुकी यो ब्रोंइनीमी। 18 तन्न गे आंमान बेबीलोन डा पिप आ ठेयब मुर आन गुइम जिम्मा मगेसाक्नी हना, एको सहर कल्दी आन गुइम गेंसीब। मिनु मेकोपुकीमी एको कली क्रोइक्नीम। मिनु गे मेको आन गुइ रे मब्रोंइनीनी’ देशो बाक्ब” देंत। 19 मिनु पिप सिदकीयाहम येरमीया कली “कल्दी आन बाक्तीकेम प्रोक्शा लशो यहूदीपुकी तशा, गो हिंशो बाक्नुड। मारदे हना कल्दीपुकीम आं कली मेको आन गुइम जिम्मा गेतीमी हना, मेकोपुकीमी आं कली मरिम्शो पाइक्नीम” देंत। 20 मिनु येरमीयामी “मेकोपुकीमी इन कली मेको आन गुइम जिम्मा मगेनीम। गो इन कली देशो परमप्रभु यावे आ लोव्र टिने। मिनु इन कली रिम्शो दुम्ब। इन सोक्ती यो ब्रोंइब। 21 तन्न गे मेको आन गुइम जिम्मा गेंसीने मबिस्साक्नी हना, परमप्रभु यावेम आं कली कोंइशो एकोन बाक्ब। 22 यहूदा डा पिप आ दरवारम प्रोंइसीशो मीश मुर नेल्ल बेबीलोन डा पिप आ ठेयब मुर आन बाक्तीके लाइक्नीम। मिनु मेको मीश मुरपुकीम इन कली ‘इन थमा सुइश्शो इन वारचपुकीम इन कली जोल पाम्तेक्म। मुल इन खोइली हिलोम ग्रुम्शो बाक्ब। इन वारचपुकीम इन कली प्रोंइशो बाक्नीम’ देंनीम। 23 इन मीशपुकी नु इन आल नेल्ल कल्दी आन बाक्तीके चाक्दीत्नीम। गे आंमा यो कल्दी आन गुइ रे ब्रोंइचा मताइनीनी। बेबीलोन डा पिपम इन कली ग्याइक्ब। मिनु एको सहर चहिं क्रोइक्नीम, देशो बाक्ब” देंत। येरमीया ३२:४; येरमीया ३४:३

24 मिनु सिदकीयाहम येरमीया कली “एको लोव्रसी पशो सुइम मतुइक्तमेक्ल। मो मदुम्त हना, गे साइक्चा पुंडसीनेवे। 25 गो गे नु लोव्र पशो ठेयब मुरपुकीम तुइक्ताक्म हना, मिनु इ बाक्तीक जाक्शा ‘पिप कली मार, देंनी? मिनु पिपम मार, देंमे? आंइ रे मारेइ लोव्र मखुइक्तीन। मो पाइतीनी हना गो इन कली साइक्नीकी, दे इ कली हिल्लो पाम्तेक्म हना, 26 गेमी मेको आन कली “गो आं कली साइक्चा कली योनाथन आ खिंम मसोइक्तीनी” दे गो पिप नु लोव्र का ला पाता’ देनो” दे माइक्तु। 27 मिनु ठेयब मुर नेल्ल येरमीया आ बाक्तीक जाक्शा, हिल्लो पाम्तेक्म। मिनु मेकोमी पिपम देशो खोदेशो पा, मेको आन कली माइक्तीमी। मोपतीके मेकोपुकीमी मेको कली अरु मारेइ हिल्लो मपामे। मारदे हना पिप नु येरमीया आस दातेम पशो लोव्र सुइम मतुइक्तेम। 28 मिनु यरूसलेम ग्रातीक नाक्त सम्म येरमीया पिप आ दरवार खाल पाइब मुर आ लाडगा डा जेल्खानम बाक्शो बाक्त। येरमीया ३७:२१

39

यरूसलेम क्याम्चा पुंडसीशो

1 यहूदा डा पिप सिदकीयाहम सासन पवा आ ९ बर्स १० महिनाम बेबीलोन डा पिप नेबुकदरेसर नु मेको आ लडाइ पाइब नेल्ल जाक्शा, यरूसलेम कली लडाइ तोशा एर ओंथ नेल्ल रे पुम्ताक्म। येरमीया ५२:४-१६; २राजा २५:१-१२ 2 मिनु सिदकीयाहम सासन पशो ११ बर्स ४ महिना ९ नाक्ती मेको सहर डा गारो प्रेशशा ओव्रतेक्म। 3 मिनु

यरूसलेम ग्राशा, बेबीलोन डा पिप आ ठेयब मुर नेल्ल जाक्शा दाते डा लाप्चोमी बाक्तेक्म। नेरगल-शरेसेर, साम्गार-नेबो, सारसेकीम नेल्ल क्येडा ठेयब निसाफ पाइब नेरगल-शरेसेर नु बेबीलोन डा पिप आ ठेयब गेय पाइब मुर नेल्ल जाक्शा बाक्तेक्म। 4 मिनु यहूदा डा पिप सिदकीयाह नु आ लडाइ पाइब नेल्लेमे मेको आन कली ताम्तेक्म। मिनु मेकोपुकी गारो निक्शी आस दातेम बाक्शो लाप्चो, पिप आ फल फुल रू रे पा नाक्दोन सहर रे प्रोक्शा, अराबाह गे लाम्तेक्म। 5 तन्न कल्दी आन लडाइ पाइबपुकीम मेको आन कली खेदा पाम्तेक्म। मिनु सिदकीयाह कली यरीको डा दिमम थित्तेक्म। मिनु मेकोपुकीमी मेको कली ग्याइशशा, हमाथ रागी डा रिब्ला देशो सहरमी बेबीलोन डा पिप नेबुकदरेसर आ बाक्तीके चाक्दीत्तेक्म। मिनु मेकोमी सिदकीयाह कली सजाइ गेतीक देंत। 6 मेको रिब्लामी बेबीलोन डा पिपम सिदकीयाह आ तौ आन कली आ डोंइतीन साइक्तीमी। मिनु यहूदा डा ठेयब मुर आन कली यो साइक्तीमी। 7 मेकोमी सिदकीयाह आ मिक्ची फेत्ताक्व। मिनु बेबीलोन लाइक्चा कली साडलोमी फ्रेंपाइक्तु। 8 कल्दीपुकीम पिप आ दरवार नु मुर आन खिंम मी सुइक्ताक्मे। मिनु यरूसलेम डा गारो प्रेत्तेक्म। 9 मिनु पिप कली कोव्रब आन कप्तानम नेबुजरादानमी सहरमी प्रोंइचा पुंडसीशो लीशो मुरपुकी, मेको आन बाक्तीक प्रोक्शा जाक्ब नु अरु लीशो मुर आन कली फ्रेंशा बेबीलोन लाइक्तीमी। 10 तन्न पिप कली कोव्रब आन कप्तान नेबुजरादानमी मारेइ मपाइशो पुडग आन कली यहूदा रागीमी प्रोंइशा वोइक्तीमी। मिनु मेको आन कली मेकोमी अडगुर रू नु अरु रूपुकी गेम्तीमी।

11 मिनु बेबीलोन डा पिप नेबुकदरेसरमी आ कली कोव्रब आन कप्तान नेबुजरादान कली येरमीया आ पर्बम 12 “मेको कली लाइशशा, रिम्शो पा कोव्रशा वोतीन। मेको कली मारेइ मरिम्शो मपावो। मेकोमी इ कली देंशो खोदेंशो पा, गे मेको कली पावो” दे माइक्तु। येरमीया ४०:४ 13 मोपतीके पिप कली कोव्रब आन कप्तान नेबुजरादान, नेल्ल क्येडा ठेयब मुर नेबुशाज्वान, निसाफ पाइब ठेयब मुर नेरगल-शरेसेर नु बेबीलोन डा पिप आ अरु ठेयब मुरपुकीम 14 मुर सोइशशा, येरमीया कली जेल्खान डा लाडगा रे चाक्पाइक्तेक्म। मेको कली आ खिंम लाइक्तीक जिम्मा शाफान आ चच अहीकाम आ तौ गेदाल्याह कली गेम्तेक्म। मोपा येरमीया आ मुरपुकी नु बाक्त। येरमीया ३८:२८; येरमीया ४०:५-६, १४-१६

15 मिनु येरमीया जेल्खान डा लाडगाम बाक्मेनु, परमप्रभु यावेम येरमीया ३८:७ 16 मार, लोव्र पशो बाक्त देशा हना “लशा, कूशी एथीयोपीया डा मुर एबेद-मेलेक कली ‘मुर नेल्ल आन परमप्रभु यावे, इस्राएली आन परमप्रभुमी रिम्शो पा ममाइ, तन्न श्येत गेशा, एको सहर आ पर्बम गो मार पाइनुड देंशो बाक्डा, मेको खाप्चा चिक्शो बाक्नुड। मेको इ डोंइतीन मेको नाक्ती दुम्ब। 17 तन्न गो इ कली मेको नाक्ती प्रोंइनन। मिनु गे तेको मुर आन क्येडा हिंनेवे मेको आन गुडम मदुम्नेवे’ देंत मतो। 18 परमप्रभु यावेमी ‘गो इ कली थमा पा प्रोंइनन। गे तरवारम साइक्चा मपुंडसीनेवे। गे लडाइ रे इ गिंम प्रोंइशा प्रोक्नेवे। मारदे हना गे आं कली थमा सुइशशा बाक्नेवे देंशो बाक्ब’ दे मतो” दे परमप्रभु यावेमी देंत।

40

येरमीया कली प्रोंइशो

1 मिनु पिप कली कोव्रब आन कप्तान नेबुजरादानमी, येरमीया कली साडलोमी फ्रेंशा यरूसलेम नु यहूदा डा फ्रेंशो मुरपुकी नु बेबीलोन लाइक्चा चिक्शो थिदा बाक्त। मिनु येरमीयामी रामाह प्रोना नोले परमप्रभु यावेमी मेको कली लोव्र पाप्तु। येरमीया ३९:११-१४ 2 मिनु पिप कली कोव्रब आन कप्तानमी येरमीया कली थिश्शा, मेको कली “परमप्रभु यावे, इ परमप्रभुम एको रागीम ठेयब श्येत गेतीक आ पर्बम लोव्र पशो बाक्त। 3 मुल परमप्रभु यावेम एको रागी क्याम्ताक्व। मिनु मेकोमी आ देंशो खोदेंशो पाप्तु। मारदे हना गेपुकीम परमप्रभु यावे कली पाप पाइतीनी। मिनु मेको आ देंशो मटिनी। मोपतीके इन कली ओदेंशो दुम्त। 4 तन्न मुलाक्ती गो इ गुड डा साडलो पुइक्ताक्न। गे गो नु बेबीलोन लचा दाक्नेवे हना, गाक्को। गो इ कली रिम्शो पा कोव्रनुड। तन्न गे गो नु बेबीलोन लल मदाक्ते हना, बाक्को। कोव्रडो, एको रागी नेल्ल इ डोंइती बाक्ब। गे ते लल दाक्नेवे, मेक लने चाप्नेवे” दे माइक्तु। येरमीया ३९:१२ 5 मो हना यो येरमीया लचा चिक्तानु नेबुजरादानमी लेशशा कोव्रशा “शाफान आ तौ अहीकाम आ चच गेदाल्याह आ बाक्तीक लावो। मेको कली बेबीलोन डा पिपम यहूदा राज्य डा हुकुम पाइब सेल्शो बाक्ब। मेकेर मेको नु अरु मुरपुकी नु बाक्को। गे ते लत दाक्डे, मेक लावो” माइक्तु। मिनु मेको पिप कली कोव्रब कप्तानमी मेको कली जचा थोव्रक नु अरु कोसेलीपुकी गेप्तु। मिनु मेको कली प्रोंइतु। येरमीया ३९:१४ 6 मोपतीके येरमीया अहीकाम आ तौ गेदाल्याह आ बाक्तीके मिस्पा सहर लत। मिनु मेको नु रागीम प्रोंइशा वोइशशा मुरपुकी नु बाक्त।

गेदाल्याह यहूदाम हुकुम पशो

7 मिनू लडाइ पाइब आन ठेयब मुर नेल्ल नु आन मुरपुकीमी “बेबीलोन डा पिपमी अहीकाम आ तौ गेदाल्याह कली मेको रागी डा हुकुम पाइब सेल्लु। मिनू मेको रागी डा नेल्ल आन क्येडा पुडग मीश मुर, आल नु पुडग मुर आन कली फ्रेंशा बेबीलोन मलाइशो मेको गेदाल्याह नु बाक्नीम” देंशो नेतेक्म। २राजा २५:२२-२४ 8 मिनू मेको नेल्ल मिस्पाम सहरम गेदाल्याह आ बाक्तीकेम लाम्तेक्म। नेथन्याह आ तौ इश्माएल, कारेआह आ तौ योहानान नु योनाथन, तन्हुमेथ आ तौ सेरायाह, नेतोफाह आ मुर एफाइ आ तौपुकी, माकाथी आ तौ येजन्याह नु मेको आन मुर नेल्ल लाम्तेक्म। येरमीया ४१:१,११ 9 मिनू शाफान आ चच अहीकाम आ तौ गेदाल्याहम मेकोपुकी नु मेको आन मुर नु कसम जशा “कल्दी आन गेय पचा कली महिनीन। रागीम बाक्शा बेबीलोन डा पिप आ गेय पने। मिनू इन कली रिम्शो दुम्ब। 10 गो इं बाक्तीक जाक्ब कल्दी आन डोंइती इन ठेयब मुर दुम्शा लोत्र पचा कली मिस्पाम सहरमी बाक्नुड। गोपुकीम चहिं अडगुर, बर्खाम सिप्ब फल फुल नु तेल इन ग्योंबुम वोतीन। मिनू इन योत्रशो सहरमी बाक्कीन” दे माइक्तीमी। 11 मिनू मोआब, अम्मोन, एदोम नु अर्को रागीपुकीम बाक्ब यहूदी नेल्लेम मेको लोत्र नेतेक्म। बेबीलोन डा पिपम का निक्शी मुर आन कली यहूदामी प्रोंइशा वोइशो बाक्ब, दे नेतेक्म। मिनू शाफान आ चच अहीकाम आ तौ गेदाल्याह कली मेकेर डा हुकुम पाइब सेल्लशा वोइशो बाक्ब, दे यो नेतेक्म। 12 मिनू नोले यहूदी नेल्ल ते ते ब्रशो बाक्मा, मेक मेक रे लेशशा, यहूदा रागी मिस्पाम गेदाल्याह आ बाक्तीकेम जाक्तेक्म। मिनू मेकोपुकीम शुश फल फुल नु अडगुर नु पोत्रशी खुप्ताक्मे।

13 मिनू कारेआह आ तौ योहानान नु गाउं गाउंम बाक्शो लडाइ पाइब मुर आन ठेयब मुर गेदाल्याह आ बाक्तीके मिस्पाम जाक्तेक्म। 14 मिनू मेको कली “अम्मोनी आन पिप बालीसमी नेथन्याह आ तौ इश्माएल कली इन कली साइक्चा कली सोइशो बाक्ब, दे तुइक्नीनी?” देंतेक्म। तन्न अहीकाम आ तौ गेदाल्याहम मेको आन लोत्र थमा मसुद। 15 मिनू कारेआह आ तौ योहानानम मिस्पाम गेदाल्याह कली “सुइम मतुइक्चा डा पा नेथन्याह आ तौ इश्माएल कली साइक्चा कली आं कली हुकुम गेयीनी। एको लोत्र सुइम मतुइक्नीम। इन एर ओंथ नेल्ल देल्लशो यहूदी आन कली ब्रापाइक्चा कली नु यहूदामी लीशो आन कली साइक्चा कली मेकोमी मारदे इन कली साइक्चा मला?” देंत। 16 तन्न अहीकाम आ तौ गेदाल्याहम कारेआह आ तौ योहानान कली “गे मोदेशो गेय मपावो। मारदे हना इश्माएल आ पर्बम इ पशो लोत्र थमा ममाइ” दे माइक्तु।

41

गेदाल्याह कली साइशो
२राजा २५:२५

1 मिनू मेको ७ महिनाम पिप आ खिं डा मुर एली-शामा आ चच नेथन्याह आ तौ इश्माएल नु पिप आ नेल्ल क्येडा ठेयब गेय पाइब अरु १० जना मुर मिस्पाम सहरम अहीकाम आ तौ गेदाल्याह आ बाक्तीके जाक्तेक्म। मेको नेल्ल मेकेर काथा शोब्ले जन जन बाक्तेक्म। येरमीया ४०:८ 2 मेना नेथन्याह आ तौ इश्माएल नु मेको १० जना मुर बोक्शा, बेबीलोन डा पिपम हुकुम पाइब सेल्लशा वोइशो शाफान आ चच अहीकाम आ तौ गेदाल्याह कली तरवारम क्योरशा साइक्तेक्म। येरमीया ४०:५ 3 मिनू इश्माएलमी मिस्पाम गेदाल्याह नु बाक्शो यहूदी नेल्ल नु मेकेर बाक्शो लडाइ पाइब कल्दी आन कली यो साइक्तीमी।

4 मिनू मुरपुकीमी गेदाल्याह साइशो लोत्र तुइक्चा क्येडा डोंइती आ दीसा सुनी, 5 शेकेम, शिलो नु सामरीया रे आन गाल शोक्रे प्रेक्शो, आन वा खाक्शो नु आन रां चेशो ८० जना मुरपुकी परमप्रभु यावे आ खिंम अन्न चढेचा कली नु धूप चोचा कली जाक्तेक्म। येरमीया १६:६ 6 नेथन्याह आ तौ इश्माएल मिस्पाम रे डाक्ना डाक्न, मेको आन कली ग्रुमथ जाक्त। मिनू मेको आन कली ग्रुमशा मेकोमी “अहीकाम आ तौ गेदाल्याह आ बाक्तीक जाक्कीन” देंत। 7 मिनू मेकोपुकी सहर आ आगा ओत्रतेक्म। मिनू नेथन्याह आ तौ इश्माएल नु मेको आ मुरपुकीम मेको आन कली साइक्तेक्म। मिनू मेको आन बेक्शो रां इनार काम ताइक्ताक्म। 8 तन्न मेको आन दाते डा १० जना मुरपुकीम इश्माएल कली “आंइ कली मसाइक्की। गोपुकी नु रू कामी खुइशशा, वोइशो चेरब क्योत्रजी तेल नु खुदो बाक्नीम” देंतेक्म। मोपतीके मेकोमी मेको आन कली प्रोंइतीमी। मेको आन कली अरु नु मसुद।

9 मेको इनारम इश्माएलमी मुर आन कली साइशशा ताइशो बाक्त। मेको इनार पिप आसाम इस्माएल डा पिप बाशा क्येडा हिंशा ब्रोंइचा कली दोशो बाक्त। नेथन्याह आ तौ इश्माएलमी मेको इनार आ साइशो मुरपुकीम प्रिंताक्व। १राजा १५:१६-२४ 10 मेको नोले इश्माएलमी, मिस्पाम बाक्शो लीशो मुर नेल्ल, पिप आ तमीपुकी नु अरु मुर नेल्ल

आन कली ग्याइक्ताक्मी। मेको आन कली पिप कली कोव्रब आन कप्तान नेबुजरादानमी अहीकाम आ तौ गेदाल्याह आ गुडम गेशो बाक्त। मिनु नेथन्याह आ तौ इश्माएलम मेको नेल्ल आन कली ग्याइश्शा खोला आइक्ची हांबु अम्मोनी आन रागीम लाइक्चा कली गाक्त।

11 मिनु कारेआह आ तौ योहानान नु मेको नु बाक्शो लडाइ पाइब आन ठेयब मुर नेल्लेम नेथन्याह आ तौ इश्माएलमी मरिम्शो पशो नेल्ल नेतेक्म। येरमीया ४०:८, १३-१६ 12 मिनु मेको नेल्लेम आन मुर नेल्ल आन कली लाइश्शा नेथन्याह आ तौ इश्माएल नु लडाइ पथ गाक्तेक्म। मिनु मेकोपुकीमी मेको कली गिबोन डा ठेयब दोम्ली आ नेक्था थित्तेक्म। २सामुएल २:१३ 13 मिनु इश्माएलम ग्याइश्शा लाइश्शो मेको नु बाक्शो मुरपुकीम, कारेआह आ तौ योहानान नु मेको नु बाक्शो लडाइ पाइब आन ठेयब मुर नेल्ल आन कली तशा, ग्येरसाक्म। 14 मिनु इश्माएलमी मिस्पा रे ग्याइश्शा लाइश्शो मुर नेल्ल कारेआह आ तौ योहानान आ बाक्तीके लेश्शा जाक्तेक्म। 15 तन्न नेथन्याह आ तौ इश्माएल नु ८ जना अरु मुर योहानान रे प्रोक्शा अम्मोनी आन रागी लाम्तेक्म।

16 मिनु अहीकाम आ तौ गेदाल्याह कली सदमे नोले, नेथन्याह आ तौ इश्माएलमी गिबोन रे चाक्शो ब्रोंइशो आन कली लडाइ पाइबपुकी, मीश मुरपुकी, आलपुकी नु दरवारम गेय पाइब मुर आन कली, कारेआह आ तौ योहानान नु मेको नु बाक्शो लडाइ पाइब आन ठेयब मुरपुकीम गिबोन रे लेत्ताक्म। 17 मिनु मेकोपुकी इजीप्त लचा कली मिम्शा बेथलेहेम डा गेरुथ-किम्हामम बास बाक्तेक्म। २सामुएल १९:३८; येरमीया ४३:७ 18 मेकोपुकी कल्दी आन क्येडा हिंशो बाक्तेक्म। मारदे हना बेबीलोन डा पिपमी मेको रागी कली योव्रशा वोइश्शो हुकुम पाइब अहीकाम आ तौ गेदाल्याह कली नेथन्याह आ तौ इश्माएलमी साइश्शो बाक्त।

42

इजीप्त लशो

1 मिनु लडाइ पाइब आन ठेयब मुर नेल्ले, कारेआह आ तौ योहानान, होशयाह आ तौ येजन्याह नु आइक्च ठेयब मुर नेल्ले येजन्याह कली अजारयाह यो ब्रेक्नीम। 2 परमप्रभु यावे आ लोव्र पाइब येरमीया आ बाक्तीके जाक्तेक्म। मिनु मेको कली “गो आंइ पुंइशो नेनीन। मिनु परमप्रभु यावे, इन परमप्रभु कली आंइ पर्बम नु लीशो मुर नेल्ल आन पर्बम पुनीन। मारदे हना शुश मुर रे का निक्शी ला लीतक। मेको गे आंमा ताइतीनी। येरमीया ३७:३ 3 मिनु परमप्रभु यावे, इन परमप्रभुम गो ते लचा माल्नीकी, मार पचा माल्नीकी, मेको कोंइदल, दे पुनीन” देंतेक्म। 4 मिनु परमप्रभु यावे आ लोव्र पाइब येरमीयामी मेको आन कली “दुम्ब। गो इन पर्बम इन देशो खोदेशो पा परमप्रभु यावे इन परमप्रभु कली पुंइनुड। मिनु परमप्रभु यावेम मार देंमे, मेको नेल्ल इन कली शेंनुड। गो इन डोंइती मारेइ लोव्र मखुइक्नुड” देंत। 5 मिनु मेकोपुकीमी येरमीया कली “परमप्रभु यावे, इन परमप्रभुमी कोंइशो नु आंइ कली देशो लोव्र गोपुकीम मपाइतक हना, परमप्रभु यावे आंइ पर्बम थमा नु ठीक लोव्र पाइब सांकछी दुम्ल। 6 मेको रिम्शो दुम्ल कि मरिम्शो दुम्ल। गो परमप्रभु यावे, इं परमप्रभु आ बाक्तीक इन कली सोइक्ताक्क। गोपुकीम मेको आ अरेशो टीनीकी। मिनु परमप्रभु यावे, इं परमप्रभु आ लोव्र टितीके, गो आंइ कली रिम्शो दुम्ल” देंतेक्म।

7 मिनु १० नाक्त नोले परमप्रभु यावेम येरमीया कली लोव्र पाप्तु। 8 मिनु येरमीयामी कारेआह आ तौ योहानान नु मेको नु बाक्शो लडाइ पाइब आन ठेयब मुर नेल्ल, आइक्ची नु ठेयब मुर नेल्ल आन कली ब्रेत्ताक्मी। 9 मिनु येरमीयामी मेको आन कली “गे आं कली परमप्रभु यावे, इस्राएली आन परमप्रभु आ डोंइती पुंइथ सोइक्ताक्यीनी। 10 मिनु परमप्रभु यावेमी इन कली ‘एको रागीमीन बाक्तीनी हना, गो इन कली रिम्शो सेल्लन्नी, मप्रेत्नन्नी। गो इन कली खुम्नन्नी, मतुल्लन्नी। मारदे हना गो इन कली खतम पोक्शो आ पर्बम आं थुं खाइश्शो बाक्नुड। येरमीया १:१० 11 मुल गे बेबीलोन डा पिप क्येडा महिनीन। मारदे हना गो इन कली मेको आ गुइ रे प्रोंइचा नु श्येत मगेपाइक्चा कली गेपुकी नु बाक्शो बाक्नुड। 12 गो इन कली शिशी पाइक्नन्नी। मिनु मेकोमी इन कली शिशी पा इन बाक्शो रागीमीन वोइक्ब’ देशो बाक्ब। 13 तन्न गेपुकीम परमप्रभु यावे, इन परमप्रभु आ लोव्र मटीतीनी हना ‘गोपुकी एको रागीम मबाक्नीकी’ देंतीनी हना, येरमीया २९:१७-१८ 14 गोपुकी इजीप्त लशा बाक्नीकी। मारदे हना मेकेर लडाइ मतांइसीब, तुराही ताप्शो सेंदा मनेंसीब, शोब्ले जचा मतथु शोव्रलुम मबेक्सीब। गो मेकेन बाक्नीकी देंतीनी हना, 15 यहूदा डा लीशोपुकी, परमप्रभु यावे आ लोव्र नेनीन। मुर नेल्ल आन परमप्रभु यावे, इस्राएली आन परमप्रभुम ‘गेपुकी इजीप्त लशा मेकेर बाक्चा कली थमा पा मिम्शो बाक्तीनी हना, 16 तेको तरवार रे पा गे हिंशा प्रोक्शो बाक्नी, मेको तरवारमी इन कली इजीप्तमी साइक्ब। मिनु तेको अन्काल रे पा, गे हिंशो बाक्नी, मेको इजीप्तमी इन नोनोले

जाक्ब। मिनु गे मेकेर बेक्नीनी। 17 सु सु इजीप्त लशा बाक्नीमी, मेको नेल्ल तरवार, अन्काल नु मुर बेक्ती रोइम बेक्नीम। गो इन कली खतम पोक्तीक रे का यो मब्रोइनीनी' देशो बाक्ब" देत।

18 मुर नेल्ल आन परमप्रभु यावे, इस्राएली आन परमप्रभु "दोपा आं गाइशो नु चुरशो यरूसलेमम बाक्ब मुर आन तार मोइसे, मोपान गेपुकी इजीप्त लाइतीनी हना, आं चुरतीके इन तार मोइसीब। इन श्येत जशो तशा मुर हिंनीम। गेपुकी सराप राइब नु शुक्शी पाइक्चा पुंडसीब दुम्नीनी। गेपुकीम लेंशा एको रागी गेनायो कोत्रचा मताइनीनी" देशो बाक्ब। येरमीया २५:९; येरमीया ४४:१२ 19 ए यहूदा डा लीशोपुकी, परमप्रभु यावेमी इन कली "गेपुकी इजीप्त मलने, देशो लोत्र तुइशशा वोतीन। मुलाक्ती गो इन कली हिंच कोइशा लोत्र पाता। 20 गेपुकीम ठेयब मरिम्शो का पाइतीनी। गेपुकीम आं कली परमप्रभु यावे, इन परमप्रभु आ डोंइती परमप्रभु यावेम, आंइ परमप्रभु मार देंबा, मेको नेल्ल आंइ कली शेंदीकी। मिनु गो मेको नेल्ल पाइनीकी देंतीनी। 21 मुलाक्ती गो मेको नेल्ल इन कली शेंताक्नीनी। परमप्रभु यावे, इन परमप्रभु मार देंचा, दे सोइक्ती, मेको लोत्र इन कली देंती, तन्न मुल सम्म मटिशो बाक्नीनी। 22 मोपतीके मुल एको लोत्र थमा पा तुइशशा वोतीन। इन बाक्चा कली लचा दाक्शो रागीमीन गेपुकी तरवार, अन्काल नु मुर बेक्तीक रोइम बेक्नीनी देशो बाक्ब" देत।

43

येरमीया इजीप्त लाइक्चा पुंडसीशो

1 मिनु येरमीयामी परमप्रभु यावे, आन परमप्रभु आ पशो लोत्र नेल्ल मेको आन कली देने थुम्तु। परमप्रभु यावे, आन परमप्रभुमी येरमीया कली मेको आन कली मेको लोत्र पथ सोइशो बाक्त। 2 मिनु होशयाह आ तौ अजारयाह कारेआह आ तौ योहानान नु मटीब मुर नेल्लेम येरमीया कली "गे जोल पाइतीनी। गेपुकी इजीप्तम बाक्थ लचा मदुम्नीनी देंचा कली परमप्रभु यावे, आंइ परमप्रभुमी इन कली सोइशो ममाइ। येरमीया ४२:१९ 3 तन्न कल्दीपुकीम आंइ कली सदमेक्ल कि ग्याइशशा बेबीलोनमी लदमेक्ल, दे मिम्शा, नेरीयाह आ तौ बारुकमी इन कली आंइ पर्बम मरिम्शो पचा कली क्युक्शो बाक्ब" देंतेक्म। येरमीया ३६:३२ 4 मोपतीके कारेआह आ तौ योहानान, लडाइ पाइब आन ठेयब मुर नेल्ले नु अरु मुर नेल्लेम यहूदामी बाक्चा माल्ब, देशो परमप्रभु यावे आ लोत्र मटीम। 5 मेको आ पा डा कारेआह आ तौ योहानान नु लडाइ पाइब आन ठेयब मुर नेल्लेम यहूदामी बाक्शो मुर नेल्ल आन कली, जात जात डा मुर आन दातेम ब्रशा लेंशा यहूदामी बाक्थ जाक्शो मुर नेल्ल आन कली खुप्शा लाइक्तेक्म। 6 मेकोपुकीम पिप कली कोत्रब आन कप्तान नेबुजरादानमी शाफान आ चच अहीकाम आ तौ गेदाल्याह आ गुइम गेशो, मीश मुरपुकी, वोंइश मुरपुकी, आल ब्रेचपुकी, पिप आ तमीपुकी, येरमीया नु नेरीयाह आ तौ बारुक कली यो लाइक्तेक्म। 7 मोपा परमप्रभु यावे आ अरेशो मटिथु, मेकोपुकी इजीप्त लाम्तेक्म। मिनु ताहपनेसम जाक्दीत्तेक्म। येरमीया ४२:१४-१७; २राजा २५:२६

8 मिनु परमप्रभु यावेम ताहपनेसम येरमीया कली लोत्र पाप्तु। 9 मार लोत्र पाप्तु देशा हना "इ गुइमी ठेयब ठेयब फुल्लु क्युक्को। मिनु यहूदीपुकीम कोत्रना कोत्रन बाक्मानु, ताहपनेसम बाक्शो फाराओ, आ दरवार डा आगा ओत्रतीक लांमी खुइशशा थिम्शा वोतो। 10 मिनु मेको आन कली मुर नेल्ल आन परमप्रभु यावे, इस्राएली आन परमप्रभुमी 'गो आं गेय पाइब बेबीलोन डा पिप नेबुकदरेसर कली ब्रेत्नुड। मिनु आं खुइशशा वोइशो एको फुल्लु तार गो मेको आ नित्तीके सेल्लुड। मेकोमी मेको तार आ बाक्तीक ताम्बु कीब। येरमीया २५:९ 11 मेको जाक्शा इजीप्त कली लडाइ तोइब। मिनु बेक्तीक रोइम बेक्चा ब्रेक्शो, बेक्तीक रोइ पा बेक्नीम। ग्याइशशा लाइक्चा पुंडसीचा ब्रेक्शो, ग्याइशशा लाइक्चा पुंडसीनीम। मिनु तरवारम साइक्चा पुंडसीचा ब्रेक्शो, तरवार साइक्चा पुंडसीनीम। येरमीया १५:२ 12 मेकोमी इजीप्त डा मूर्ति आन खिंम मी सुइक्ब। मेकोमी मेको आन खिं आन कली क्रोइक्ब। मिनु मेको देवी देवता आन कली लाइक्ब। मिनु गोठलापुकीम दोपा आन वा रे नेक्स गुप्नीमी, मोपा मेकोमी इजीप्त रागी डा मूर्ति आन कली गुप्शा ताइब। मिनु मारेइ मदुम्थु आ रागी लेप्ब। येरमीया ४६:२५ 13 मेकोमी इजीप्त डा हेल्योपोलीस सहरम बाक्शो नां आ मूर्ति बाक्शो थामपुकी प्रेप्ब। मिनु इजीप्त डा देवी देवता आन खिंम मी सुइक्ब' देशो बाक्ब" देत।

44

मूर्ति पूजा पतीके जाम्शो

1 परमप्रभु यावेमी येरमीया कली इजीप्त मिगदोल, ताहपनेस, मेम्फीस नु पथ्रोस रागीम बाक्ब यहूदी नेल्ल आन पर्बम लोव्र पाप्तु। येरमीया ४३:७ 2 मुर नेल्ल आन परमप्रभु यावे, इस्राएली आन परमप्रभुमी मार लोव्र पाप्तु देशा हना “गो यरूसलेम नु यहूदा डा सहर नेल्ल आन कली शुश श्येत गेता। गेपुकीमी मेको आंमा ताइतीनी। मेको सहर कोव्रडीन। मुर मबाक्तीके श्येत्थ दुम्शो बाक्नीम। 3 मारदे मोदेशो दुम्त देशा हना, मेकेर डा मुरुमी आं अरेशो मटिथु, गाइक्पाइक्तीमी। मेकोपुकीमी देवी देवता आन कली चढेशा मेको आन नोले खोइक्तेक्म। डोंइती मेकोपुकी, गेपुकी नु इन किकी पिपीमी यो मेको आन कली मतुइश्शो बाक्तेक्म। 4 मो हना यो गो आं गेय पाइब आं लोव्र पाइब आन कली मेको आन बाक्तीके सोइक्ना सोइक्न ‘गो इन कली मेको आं काइ मदाक्शो ग्रांरा दिशो गेय मपन’ देपाइक्तामी। येरमीया २५:४ 5 तन्न मेकोपुकीमी मनेनेम। आन नोफान मदाइक्तेम। मेको आं अरेशो मटितीक रे मलेम्म। मेकोपुकीमी देवी देवता आन कली चढेचा मप्रनेम। 6 मोपतीके गो यहूदा डा सहर नु यरूसलेम डा लांम आं शुश गाइश्शो नु चुरशो मोइक्ता। मिनु मेको सहर ब्रेशो नु मुर मबाक्तीके दुम्तेक्म। मुलाक्ती मोदेशो बाक्ब” देत। 7 मिनु मुल मुर नेल्ल आन परमप्रभु यावे, इस्राएली आन परमप्रभुमी “मारदे गेपुकीम आंम इन कली मोदेशो श्येत गेनीनी? यहूदा आ दाते रे मीश मुर, वोंइश मुर, आल नु दूध तूब आल नेल्ल आन कली तिल्पाइश्शा, सुइ इन कली मलीपाइक्नी। येरमीया ४२:२२ 8 मारदे गेपुकीमी इन गेयमी आं कली गाइक्पाइक्नीनी? मारदे गे इजीप्तमी बाक्शा, देवी देवता आन कली चढेशा आं कली गाइक्पाइक्नीनी? गेपुकी क्याम्चा पुंइसीशा, रागी डा मुर नेल्ल आन दातेमी सराप चीले राइब नु शुक्शी पाइक्चा पुंइसीब दुम्नीनी। 9 गे इन किकी पिपी आन मरिम्शो पशो प्रेंदीनी? यहूदा डा पिप नु आन पिपीम आन मरिम्शो पशो, इन आंम मरिम्शो पशो, इन मीशेमी यहूदा रागीम नु यरूसलेम डा लांमी मरिम्शो पशो प्रेंदीनी? येरमीया ७:१७-१८ 10 मुल सम्म मेकोपुकीमी आंम कली ब्रेशो मसेल्सम। आं कली मान पा महिम। गो आं अरेशो नु आं फुल्लुम मुशा ब्रेक्शो लोव्र इन डोंइती नु इन किकी पिपी आन डोंइती वोइक्ता। मिनु मेको, गेपुकी नु इन किकी पिपीमी मटिनी” देत।

11 मोपतीके मुर नेल्ल आन परमप्रभु यावे, इस्राएली आन परमप्रभुमी “गो इन कली ठेयब श्येत गेशा, यहूदा डा मुर नेल्ल आन कली क्याम्नुड। आमोस ९:४ 12 इजीप्त लशा बाक्चा कली मिम्ब यहूदा डा लीशो मुर नेल्ल थमा पा जाम्शा लाइनीम। मेको नेल्ल इजीप्तमी साइक्चा पुंइसीनीमी। तरवार नु अन्कालमी बेक्नीम। ठेयब नु आइक्च नेल्ल तरवार नु अन्कालमी बेक्नीम। इन श्येत जशो तशा मुर हिंनीम। गेपुकी सराप राइब नु शुक्शी पाइक्चा पुंइसीब दुम्नीनी। येरमीया ४२:१४-१७ 13 गो दोपा यरूसलेम कली तरवार, अन्काल नु मुर बेक्तीक रोइम सजाइ गेडा, मोपा इजीप्तम बाक्ब आन कली यो सजाइ गेनुडमी। 14 मोपा इजीप्तम बाक्शो यहूदा डा लीशो मुर सुइ प्रोक्चा मताइनीम। सुइ मब्रोंइनीम। मिनु सुइ यहूदा रागी लेत्चा मताइनीम। मो हना यो मेकेर बाक्चा कली लचा दाक्नीम। डोंइती प्रोक्शा लशो का निक्शी ला लेत्चा ताइनीमी” देत।

15 मिनु आन मीशेम देवी देवता आन कली चढेशो तुइक्ब वोंइश मुर नेल्ल, ठेयब हुल मीश मुर नु इजीप्त रागी डा पथ्रोस रागीमी बाक्ब नेल्लेमी येरमीया कली यसैया ११:१ 16 “गे परमप्रभु यावे आ नेमी आंइ कली पशो लोव्र गो मनेनीकी। 17 मेको आ पा डा आंइ कसम जशो खाप्नीकी। गोपुकी सरीड डा पिपीम कली चढेशा, मेको कली तूचा थोव्रक लुक्नीकी। गोपुकी, आंइ किकी पिपी, आंइ पिपीपुकी नु आंइ ठेयब मुरपुकीम यहूदा डा सहर नु यरूसलेम डा लांम मोदेशो पाम्तेक्म। मेना गोपुकी शुश जचा ताइतक। मिनु आंइ माल्शो क्येडा शुश तशा, श्येत मजक। येरमीया ७:१७-१८; होसे २:७ 18 तन्न गोपुकीम सरीड डा पिपीम कली चढेचा प्रोंइशो रे नु तूचा थोव्रक लुक्चा प्रोंइशो रे मारेइ मतक। तरवार नु अन्कालम जाम्ना जाम्न लाइतक” देतेक्म। 19 मिनु मीश मुरपुकीम “गो थमा पा सरीड डा पिपीम कली चढेना ढेन बाक्नीकी। मिनु मेको कली तूचा थोव्रक लुक्नीकी। आंइ वोंइशेम वारच मपथु, मेको कली बटुक चोका नु तूचा थोव्रक लुक्तका डा?” दे लोव्र पाम्तेक्म। गन्ती ११-१३

20 मिनु येरमीयामी आ कली लोव्र लेप्ब वोंइश मुर नु मीश मुर नेल्ल आन कली 21 “गेपुकी, इन किकी पिपी, इन पिप, इन ठेयब मुर नु एको रागी डा मुरपुकीम यहूदा डा सहर नु यरूसलेम डा लांम चढेशो परमप्रभु यावेम मतुइक्बा डा? मार, मेकोमी ममिम्ता डा? 22 परमप्रभु यावेम इन मरिम्शो पशो नु इन पशो ग्रांरा दिशो गेय तशा फाल्ने मचब। मोपतीके इन रागी श्येत्थ नु मुर मबाक्तीके दुम्त। सराप चीले रशा, मुर मबाक्शो रागी दुम्त। मेको मुल सम्म मोदेशोन बाक्ब। 23 इन चोशा चढेतीके, इन परमप्रभु यावे कली पाप पशो, आ देशो मटिशो नु आ अरेशो, आ फुल्लुम मुशा ब्रेक्शो लोव्र नु आ शेंशो मटितीके इन कली ठेयब श्येत दुम्त। मेको आ पर्बम श्येत जाइनीनी” दे माइक्तीमी।

24 मिनु येरमीयामी मेको मुर नेल्ल नु मीश मुर नेल्ल आन कली “गे इजीप्तम बाक्ब यहूदा डा मुर नेल्ल परमप्रभु यावे आ लोव्र नेनीन। 25 मुर नेल्ल आन परमप्रभु यावे, इस्राएली आन परमप्रभुमी ‘गे नु इन मीश, इन देशो, गोपुकीमी आंइ कसम जशो खाप्नीकी। गो सरीड डा पिपीम कली धूप चढ़ेशा, मेको कली तूचा थोव्रक लुक्नीकी’ दे इन कसम जशो थमा पा खपीन। 26 मोपतीके गे इजीप्तम बाक्ब यहूदी नेल्ल परमप्रभु यावे आ लोव्र नेनीन। परमप्रभु यावेमी गो आं ठेयब नेमी कसम जाइनुड। मुल मेको इजीप्त रागीम बाक्ब यहूदा डा मुर आन शोव्र रे ‘परमप्रभु, परमप्रभु यावे ब्रोंइशा बाक्बो खोदेशो पा’ दे देंतीकेमी आं नें गेनायो मदेनीम। 27 मारदे हना गो मेको आन कली रिम्शो पचा कली ममाइ, मरिम्शो पचा कली कोव्रना कोव्रन बाक्नुड। इजीप्तम बाक्ब यहूदी नेल्ल मनुम्मा सम्म तरवार नु अन्कालम बेक्नीम। आमोस ९:४ 28 तरवार रे ब्रोंइशोपुकी इजीप्त रे यहूदा रागीमी का निक्शी ला लेत्चा ताइनीम। मिनु इजीप्तम बाक्ब यहूदा डा मुर नेल्लेमी ‘आं देशो थमा बाक्म देय मेको आन लोव्र थमा बाक्ब’ दे नोले तुइक्नीम” देंत। 29 मिनु परमप्रभु यावेम “आं देशो थमा पा पाइनुड। मेको आ चिन्ड मार बाक्ब देशा हना, गो इन कली मेको रागीमी सजाइ गेनुड। मेको नोले गो आ देशो पाइनुड, दे इन कली तुइक्तीके बाक्ब” देंत। 30 परमप्रभु यावेम “गो इजीप्त डा पिप फाराओ होफ्रा कली आ जोरी सत्रु नु मेको कली साइक्चा माल्ब आन गुइमी गेनुड। दोपा गो यहूदा डा पिप सिदकीयाह कली आ जोरी सत्रु बेबीलोन डा पिप नेबुकदरेसर आ गुइमी गेडा, मोपा इजीप्त डा पिप कली साइक्ब आन गुइमी गेनुड” दे परमप्रभु यावेमी देंत। इजीकीएल २९:१९

45

बारुक कली अरेशो

1 यहूदा डा पिप योसीयाह आ तौ येहो-याकीममी सासन पवा आ ४ बर्सम नेरीयाह आ तौ बारुकमी परमप्रभु यावे आ लोव्र पाइब येरमीया आ ब्रेक्पाइशो लोव्र कागजम ब्रेक्ना ब्रेक्न बाक्मेनु, येरमीयामी बारुक कली येरमीया ३६:४ 2 परमप्रभु यावे, इस्राएली आन परमप्रभुमी इ कली मार देब देशा हना, 3 गे “आबी, आबी, आं कली मार दुम्बा। परमप्रभु यावेमी आं श्येतम सुर्ता पतीक तेम्ताक्व। गो हुकयी पना पन दती। गो तेइ नाइक्चा मतड” देंते। 4 गे मेको कली “परमप्रभु यावेमी ‘आं डोंइती सेल्शो मुल प्रेतनुड। गो मार खुमु मेको नेल्ल तुल्शा ताइक्नुड। मेको रागी नेल्ल कली दुम्ब। 5 मिनु गे आंम इ कली मारेइ मारेइ ठेयब थोव्रक माल्नेवे? गे मेको ममालो। मारदे हना गो मुर नेल्ल आन कली ठेयब श्येत जपाइक्नुडमी। तन्न गे ते लाइनेवे, मेके गो इ कली लडाइ रे ब्रोंइचा गेनुड” दे परमप्रभु यावेमी बारुक आ पर्बम देंत। येरमीया ३९:१८; येरमीया ४३:४-६

46

इजीप्त रागी आ पर्बम शेशो

येरमीया ४६:-; येरमीया ५१:-; यसैया १९:-; इजीकीएल २९:- ३२:-

1 परमप्रभु यावेम रागी रागी आन पर्बम आ लोव्र पाइब येरमीया कली लोव्र पाप्तु। 2 मार लोव्र पाप्तु देशा हना “इजीप्त रागी आ पर्बम, इजीप्त डा पिप फाराओ नेको आ लडाइ पाइबपुकी युफ्रेटीस खोला आ नेक्था कारकेमीश सहरमी बाक्बो बाक्तेक्म। यहूदा डा पिप योसीयाह आ तौ येहो-याकीममी सासन पवा आ ४ बर्सम बेबीलोन डा पिप नेबुकदनेसरमी लडाइ तोशा ग्रात। २राजा २३:२९ 3 आइक्च नु ठेयब तेक्तीक ठीक पने। लडाइ पचा कली डोंइती बारीन। 4 शाराम लगम पाइक्तीन। शारा डोंइसीन। कांसा के ताकी गुक्शा इन तूतीक शेप्पीन। इन कांसा के फेक्तीक फेक्सीन। 5 गो मारदे मेको आन कली हिंशो तडमी? मेकोपुकी नोले शोंइसीशो बाक्नीम। मेको आन लडाइ पाइबपुकी आन थुं लुक्च लत। मेकोपुकी रीब पा प्रोक्तेक्म। मेकोपुकीमी नोले लेशशा मकोव्रनीम। तेइ तेइ हिंतीकेइ हिंतीके बाक्ब” दे परमप्रभु यावेम देंत। येरमीया २०:३

6 परमप्रभु यावेमी “रीब पा प्रोक्ब यो प्रोक्ने मचाप्नीम। लडाइ पाइबपुकी यो ब्रोंइचा मताइनीम। मेकोपुकी उत्तर गे डा युफ्रेटीस खोलाम दाइल पांइसीशा गोलनीम।

7 एको नील खोला खोदेशो पा बारशा जाक्ब, अरु ठेयब खोला बोक्शा कुशो खोदेशो पा जाक्ब, सु बाक्मे? 8 इजीप्त रागी नील खोला खोदेशो पा बारशा जाक्ब। ठेयब खोला बोक्शा कुशो खोदेशो पा जाक्ब। मेकोमी ‘आं कली बारशा रागी कली सुम्चा गेने। सहर नु मेकेर डा मुर आन कली साइक्चा गेयीनी। 9 शारापुकी दोरशा डोंइती लने। बग्गी खुल्बपुकी थाम्पा दोरपतीन। लडाइ पाइबपुकी बारीने। कूश एथियोपीया नु पूत डा मुरपुकीमी तेक्तीक

कुरनीम। लूद डा मुरपुकीमी लिब्रा आप्नीम। 10 मेको नाक्ती परमप्रभु, मुर नेल्ल आन परमप्रभु यावे आ नाक्त बाक्ब। मेको क्येक्क लेत्तीक नाक्ती बाक्ब। आंम जोरी सत्रु आन कली क्येक्क लेत्तीक नाक्ती बाक्ब। मुरुम तरवारम साइक्नीम। तरवार हुश तूशा, आ तूतू दाक्शो रूब। मारदे हना मुर नेल्ल आन परमप्रभु यावेमी उत्तर गे डा रागीमी, युफ्रेटीस खोला आ नेक्था क्योरशा चढेब। यसैया २:१२; ब्यवस्था ३२:४१-४२ 11 गे कन्ने मीश आल इजीप्त, इर गिलादम लशा खेक्तीके चाक्को। गे शोर गाक्शो शुश खाल डा ओख्ती खेक्साक्वे। तन्न गे मसानेवे। येरमीया ८:२२ 12 रागी रागी डा मुरपुकीम इ मुने दोक्शो लोव्र नेंतेक्म। इ वाइ ब्रेशशोम रागी नेल्ल ब्रीब। मारदे हना लडाइ पाइब, लडाइ पाइब नु थोक्मुइनीम। मिनु मेको नेल्ल कालेमी गोल्नीम’ ” दे परमप्रभु यावेमी देंत।

13 परमप्रभु यावेम बेबीलोन डा पिप नेबुकदरेसरम इजीप्त कली लडाइ तोथ जाक्चा आ पर्वम येरमीया कली लोव्र पाप्तु। 14 मार लोव्र पाप्तु देंशा हना “इजीप्तमी एको लोव्र नेंपतो। मिग्दोलमी एको लोव्र नेंपतो। मेम्फीस नु ताहपनेसमी यो एको लोव्र नेंपतो। गे नेल्ल ठीक दुम्शा आंम आंम राप्तीकेम रपीन। मारदे हना तरवारम इन एर ओंथ नेल्ल साइक्तु। 15 मारदे इ बोल्यो लडाइ पाइब प्रोक्नीमी। मारदे बोक्शा मराप्नीमी? मारदे हना परमप्रभु यावेम मेको आन कली साइक्तु। 16 इ लडाइ पाइबपुकी थोक्मुशा गोल्नीम। मिनु मेकोपुकीमी ‘लो, इ मुर आन बाक्तीक लय। इं जरमेशो रागी लेशशा लय’ दे साइक्ब तरवार आ पर्वम मो देंमुइनीम। 17 इजीप्त डा पिप फाराओ कली फश लोव्र पाइब, दे नें वोतीन। मेकोम आ गेय पतीक नाक्ती साम्तु” देंत।

18 परमप्रभु, पिपमी “आं ब्रोंडशा बाक्शो खोदेशो पा” देंत। मेको पिप आ नें मुर नेल्ल आन परमप्रभु यावे बाक्ब। पहाड आन दाते डा ताबोर पहाड खोदेशो पा का जाक्ब। मेको समुन्द्र आ नेक्था डा कारमेल खोदेशो पा जाक्ब। 19 गे इजीप्त डा दारशो तमी ग्याइशशा लाइक्चा पुंइसीचा कली इ मार मार कुम्लो पावो। मारदे हना मेम्फीस श्येतथ दुम्ब। मेको खिं नेल्ल ब्रेशशा, मुर मबाक्तीके दुम्ब।

20 इजीप्त रागी दारशो मगिक्शो बी का खोदेशो बाक्ब। तन्न उत्तर रे डांस का जाक्ब। 21 मेको आ गाल्च ताक्शा लडाइ पाइबपुकी यो दोम्शो बाछा खोदेशो बाक्नीम। मेको यो नेल्ल हिरशा लशा काथा प्रोक्तेक्म। मेको राप्शा मदिकनीम। मारदे हना मेको आन हिंचा डा श्येत जतीक नाक्ती जाक्शो बाक्ब। मेको आन सजाइ तची ना जाक्त।

22 मेकोमी गेशा गाक्शा, प्रोक्शो बुस्सुम खोदेशो पा रेयके पाइब। मारदे हना आ जोरी सत्रु डोंइती बारशा, खा कुरशा रवा तिम्ब मुर खोदेशो पा जाक्नीम। 23 परमप्रभु यावेमी “मेकोपुकीमी आ ब्वाकी नेल्ल तिम्चा मालनीम। मारदे हना हिक्ने मचाप्चा डा बाक्नीम। मेकोपुकी सल्हा क्येडा शुश बाक्नीम” देंत। 24 मिनु इजीप्त आ तमी मुने तोक्चा पुंइसीब। मेको उत्तर रे जाक्ब मुर आन गुइम जिम्मा गेचा पुंइसीब।

25 मुर नेल्ल आन परमप्रभु यावे, इस्राएली आन परमप्रभुम “गो थेबेस सहर डा आमोन फाराओ, इजीप्त रागी नु आ देवी देवता नु आ पिप आन कली सजाइ गेनुड। गो फाराओ नु मेको आ सक्ति कली थमा सुइक्ब नेल्ल आन कली सजाइ गेनुड। येरमीया ४३:१२-१३; यसैया २४:२१ 26 गो मेको आन कली साइक्चा माल्ब बेबीलोन डा पिप नेबुकदरेसर नु आ लडाइ पाइब आन ठेयब मुर आन गुइमी गेनुडमी। मेको नोले इजीप्त रागी डोंइती डा खोदेशो पा मुर बाक्तीक रागी दुम्ब” दे परमप्रभु यावेम देंत। इजीकीएल २९:१४

27 मेकोमी “आं गेय पाइब याक्ब, गे महिनो। इस्राएल गे सुर्ता मपावो। गो इ कली डोन रागी रे प्रोंइनुड। इ चच युइ आन कली ग्याइशशा लाइशशा, वोइशो रागी रे प्रोंइशा चाक्नुडमी। याक्ब लेंशा श्येत मजथु, थुं नाइशशा बाक्ब। मिनु मेको कली सुइम हिंच मकोइनीम। येरमीया ३०:१० 28 आं गेय पाइब याक्ब गे महिनो। मारदे हना गो गे नु बाक्शो बाक्नुड। गो इ कली तेको रागी डा मुर आन दातेमी ब्रपदु, मेको रागी डा मुर नेल्ल आन कली क्याम्नुडमी। तन्न गो इ कली मक्याम्नुड। गो इ कली ठीक सजाइ गेनुड। गो इ कली सजाइ मगेथु मप्रोंइनुड” देंत। येरमीया १०:२४; येरमीया ३०:११

47

पलिस्ती आन पर्वम देशो लोव्र

यसैया १४:२९-३२; इजीकीएल २५:१५-१७

1 फाराओमी गाजा कली लडाइ तोचा क्येडा डोंइती, पलिस्ती आन पर्वम परमप्रभु यावेम आ लोव्र पाइब येरमीया कली लोव्र पाप्तु। 2 परमप्रभु यावेमी मार लोव्र पाप्तु देंशा हना “कोव्रडीन उत्तर रे ब्वाक्कु बारशा यिशो बाक्ब। मेकोमी रागी नु मेकेर बाक्शो मारेइ मारेइ आन कली सुम्ब। सहरपुकी नु मेकेर बाक्शो नेल्ल आन कली खुम्ब। मिनु मुर नेल्ल वाइ ब्रेत्नीम। मेको रागीम बाक्ब मुर नेल्ल डाक्नीम। 3 प्रेक्शा दोरशा गाक्ब शारा आन खोइली आ रेयके

नु जोरी सत्रु आन बग्गी आन रेयकेमी आफपुकीम आन आल आन कली वारच पाइक्चा कली मलेत्नीम। मेको आन गुइ तिकने मचापब दुम्शा ग्युक्शो बाक्नीम। 4 मारदे हना पलिस्ती नेल्ल आन कली खतम पोक्शा साइक्तीक नाक्ती जाक्शो बाक्ब। टायर नु सीदोन आस कली वारच पाइक्ने चापब नेल्ल बेक्नीम। मारदे हना परमप्रभु यावेम पलिस्ती आन कली साइक्चा चिक्शो बाक्ब। काफ्तोर डा टापु आ शुंइचीम रे जाक्शो लीशो नेल्ल आन कली साइक्चा चिक्शो बाक्ब। आमोस १:६-७; सेफन्याह २:४; जकरिया ९:५; यूहन्ना १:२२; येरमीया १६:६; येरमीया ४८:३७; आमोस ९:७ 5 गाजाम रोंका पचा कली आ चां प्रेक्शो बाक्ब। अश्कलोन खतम दुम्शा, सिक्सी पाइब। गे लीशो अनाकीमपुकी गेना सम्म इन रां चेंइसीनीनी?” देशो बाक्ब। 6 “परमप्रभु यावे आ तरवार, गे ग्रीचा गेना नाइक्नेवे? इन तरवार खोतम पिप्तीन। गे नाइश्शा सिक्सी पा बाक्कीन। 7 गे दोपा सिक्सी पा बाक्ने चाप्नीनी? मारदे हना परमप्रभु यावेमी मेको कली अरेशो बाक्ब। मेकोमी मेको कली अश्कलोन नु समुन्द्र आ शुंइच डा रागी आन कली गेय पचा कली अरेशो बाक्ब?” देंत।

48

मोआब आ पर्बम लोत्र

यसैया १५:-; यसैया १६:-; इजीकीएल २५:८-११; आमोस २:१-३; सेफन्याह २:८-११

1 मुर नेल्ल आन परमप्रभु यावे, इस्राएली आन परमप्रभुमी मोआब आ पर्बम मार लोत्र पाप्तु देशा हना “नेबो सहर मुर मबाक्तीके दुम्ब। किरयथ-थाइम मुने दोक्ब। मेको ब्रुत। मेको आ बोल्यो दरवार नेल्ल मुने तोक्शा प्रेशशा ताइक्चा पुंइसाक्म। 2 मुल रे मोआब कली ठेयब मसेल्नीम। मुरपुकीम हेशबोनम लोत्र गारपाइक्तेक्म। मेकोपुकीमी ‘जाक्कीन, गो मेको कली रागी का मदुम्चा डा सेल्य। ए मादमेन सहर, इ कली यो सिक्सी पपाइक्नीम। इ कली तरवार शेशा खेदा पाइनीम’ देंतेक्म।

3 नेनीन, होरोनाइम रे वाइ ब्रेशो नेंसीब। खतम दुम्तीके नु क्याम्तीके आ पर्बम डाक्शो नेंसीब। 4 मोआब आ आलपुकीमी ‘मोआब खतम पोक्चा पुंइसाक्व’ दे वाइ ब्रेशशा डाक्नीम। 5 मेकोपुकी लुहीथ डा ग्येत्थ लांमी हिशेक पा डाक्ना डाक्न डोइक्नीम। मारदे हना होरोनाइम डा लुक्च लतीक लांमी श्येत जशा डाक्शो नेंसीब। 6 प्रोक्कीन, आंम कली प्रोंइचा कली दोरीन। गोरशो रागी डा गधा खोदेशो दुमीन। येरमीया १७:६ 7 गेपुकीम इन गेय नु इन शोंपोम थमा सुइक्तीनी। गेपुकी यो ग्याइश्शा लाइक्चा पुंइसीनीनी। केमोश देवता आ चढेब नु आ नोले खोइक्ब मुरपुकी नु ग्याइश्शा लाइक्चा पुंइसीब। गन्ती २१:२९; न्यायाधीस ११:२४; १राजा ११:७ 8 खतम पोक्ब सहर नेल्लेम जाक्ब। मिनु सहर का यो मप्रोंइसीब। बेसी क्याम्सीब। मिनु दिंम खतम दुम्ब। परमप्रभु यावे आ देशो मोदेशो बाक्त।

9 मोआब कली फ्रां गेन। मारदे हना मेको थमा पा ब्रुइब। मेको आ सहर श्येत्थ दुम्शा, मुर मबाक्तीके दुम्नीम” देंत।

10 सु सुमी परमप्रभु यावे आ गेय देश पा पाइनीमी, मेको सराप राइनीम। आंम तरवार कली हुश खाक्श पोक्तीके रे तेक्ब सराप राइनीमी। 11 मोआब आ ठिटा रेन नांइसीशा बाक्शो बाक्ब। मेको गरमी कुर पा वोइश्शो अडगुर शांबु खोदेशो बाक्ब। मेको ग्योंब का रे अर्को ग्योंबुम मलेशो बाक्ब। मेको ग्याइश्शा लाइक्चा मपुंइसीशो बाक्ब। मोपतीके मेको डोंइती डा खोदेशोन बाक्ब। मेको आ ब्रोव्रशो रिना मजाम्शो बाक्ब। सेफन्याह १:१२

12 मोपतीके परमप्रभु यावेमी “गो गर रे मोइक्ब आन कली मेको आ बाक्तीके सोइक्नुडमी। मिनु मेकोपुकीमी मेको मोइश्शा, गर श्येत्थ सेल्शा प्रोल्नीम। मेको नाक्त थमा पा जाक्ना जाक्न बाक्ब। 13 दोपा इस्राएल आ मुर आंम थमा सुइश्शो बेथेल रे पा मुने तोक्चा पुंइसमा, मोपा मोआब यो केमोश रे पा मुने तोक्चा पुंइसीब।

14 गेपुकीम ‘गेपुकी बोल्यो नु सक्ति पाइश्शो लडाइ पाइब बाक्नीकी’ दे दोपा देंने चाप्नीनी? 15 मोआब नु आ सहर आन कली खतम पोक्ब जाक्त। मेको आ नेल्ल क्येडा रिम्शो ठिटा मुर नेल्ल साइक्चा पुंइसीचा कली लाम्तेक्म” दे पिपम देंत। मेको आ नें मुर नेल्ल आन परमप्रभु यावे बाक्ब। 16 मेकोमी “हिंचा डा श्येत जतीक नाक्ती मोआब आ नेक्था जाक्शो बाक्ब। मेको आ श्येत जतीके रीब पा जाक्ब। 17 मेको आ एर ओंथ बाक्ब नेल्ल नु मेको आ पशो तुइक्ब नेल्ल मेको आ पर्बम रोंका पने। मिनु ‘दोपा सक्ति पाइश्शो राज्य क्याम्चा पुंइसे। पिप आ कोक्के दोपा जिक्मे’ देनीन।

18 ए दीबोन डा तमी, गे ठेयब नित्तीके रे तोइश्शा, सोव्रशो रागीम निस्सो। मारदे हना मोआब कली खतम पोक्ब इ कली लडाइ तोचा कली जाक्त। मेकोमी इ गारो हिरशो सहर नेल्ल खतम पोक्तु। 19 आरोएर सहरम बाक्बपुकी लांमी राप्शा कोव्रडीन। प्रोक्शो वोंइश मुर नु मीश मुर आन कली ‘मार, दुम्मे’ दे हिल्लो पने। 20 मोआब ब्रुत। मेको मुने दोक्त। रोंका पा डाक्कीन। ‘मोआब मुर मबाक्तीक दुम्त’ दे अरनोन खोला आ शुंइचीम लशा देनीन। 21 डांडा तार

डा दिंमम निसाफ पतीके नाक्ती जाक्शो बाक्ब। होलोन, याहसाह नु मेफा-आथ, 22 दीबोन, नेबो नु बेथ-दिब्लाथाइम आन तारी, 23 किरयोथ-थाइम बेथ-गामुल नु बेथ-मेओन, 24 केरयोथ, बोझा नु मोआब आ नेक्था नु डोन डा सहर नेल्ल आन तारी निसाफ पतीके जाक्शो बाक्ब। 25 मोआब आ ग्रोत्र खोइक्साक्व। मिनु मेको आ गुइ जिक्त” दे परमप्रभु यावेमी देंत। 26 मिनु लेंशा “मेको कली दुक्पतीन। मारदे हना मेको ठेयब लेशशो बाक्ब। मोआब आ मेशोमी दिड दाड गोल्ल। मिनु मेको शुक्शी पाइक्चा पुंडसीब दुम्ल। येरमीया २५:१५ 27 मार, गे इस्राएल कली शुक्शी पशो मनवे? मेको खुइ आन दातेमी ग्याइक्चा पुंडसे डा, मेको आ पर्वम लोत्र पामेनु, इ पिया हिकशा शुक्शी पवी?

28 मोआबम बाक्बपुकी, इन सहर प्रोइशा, फुल्लु मेर लशा बाक्कीन। रोंगु डा ढोडोडगा आ शोत्रम ग्योत्र सेल्ब ढुकुर खोदेशो दुमीन। 29 गो मोआब आ ठेयब लेशशो आ पर्वम लोत्र नेंतक। मेको आ ठेयब दुम्तीके, बोरतीके, ठेयब लेत्तीके नु थुं डा ठेयब दुम्तीके आ पर्वम नेंतक। 30 गो मेको आ ठेयब लेशशो तुइक्नुड। तन्न मेको आ ठेयब लेशशो मारेइ मबाक्ब। मिनु मेको आ गेय जाम्शा लाइब बाक्ब। 31 मोपतीके गो मोआब आ पर्वम रोंका पाइनुड। गो मोआब नेल्ल आन पर्वम डाक्नुड। गो कीर-हेरेस डा मुर आन पर्वम हिशेक पाइनुड। 32 गो याजेर डाक्शो क्येडा इ पर्वम शुश डाक्नुड। ए सिब्मा डा अडगुर बोटपुकी, इन राशी समुन्द्र आ आइक्ची हांबु जाक्दीत्तेक्म। मेकोपुकी याजेर डा समुन्द्र सम्म जाक्दीत्तेक्म। इ मीशो फल फुल नु इ अडगुर खतम पोक्ब जाक्तेक्म। 33 मोआब डा फल फुल रू रे ग्येरतीक नु थुं नाइश्शा बाक्तीके जाम्ने थुम्तु। गो अडगुर खाक्तीक तेक्ता। सुइमी ग्येरशा ग्रीशा, मखाक्नीम। मेको आन वाइ ब्रेश्शो ग्येरशा वाइ ब्रेश्शो ममाइ।

34 हेशबोन नु एलेआले वाइ ब्रेत्नीस। मेको याहास सम्म नेंसीब। सोआर रे होरोनाइम, एगलाथ-शेलीशीया सम्म वाइ ब्रेश्शो नेंसीब। मारदे हना निम्रीम डा ब्वाक्कु यो सोत्रने थुम्शो बाक्ब। 35 गो मोआब कली खतम सेल्लुड। डांडा डा थानम चढेब नु देवी देवता आन कली धूप चोइब आन कली खतम सेल्लुडमी” दे परमप्रभु यावेमी देंत। 36 मिनु परमप्रभु यावेमी “मोपतीके आं थुं बांसुरीम खोदेशो पा मोआब आ पर्वम रोंका पाइब। आं थुं कीर-हेरेस डा मुर आन पर्वम बांसुरीम खोदेशो पा रोंका पाइब। मेको आन चेम्शो शोंप नेल्ल जाम्त। यसैया १५:७

37 मेको नेल्लेम आन चां प्रेक्शो बाक्नीम। मिनु आन गल शोक्रे यो खोइश्शो बाक्नीम। मेको नेल्ल आन गुइ चेशशो बाक्नीम। मिनु आन क्रातो भाडग्रामी गिल्लीशो बाक्नीम। येरमीया १६:६ 38 मोआबी आन खिं तारी नु लां मेर रोंका पशो डा लाक्शा अर्को मारेइ मनेंसीब। मारदे हना गो मोआब कली सुइम ममाल्चा डा ग्योत्र खोदेशो पा प्रोल्ला” दे परमप्रभु यावेमी देंत। 39 मेको दोपा ब्रोल्मे, मोपा रोंका पाइनीम। मोआब दोपा मुने दोक्शा आ कुल खुइक्ता, मोपा मोआब आ एर ओंथ बाक्ब नेल्लेम मेको आन पर्वम शुक्शी पा हिंशा कोत्रचा डा दुम्शो बाक्ब। 40 मिनु परमप्रभु यावेमी “कोत्रडीन, मेको ककाकुली खोदेशो पा जुक्ब। मेको आ फ्रां हाम्शा, मोआब तारी जुक्ब। येरमीया ४९:२२ 41 केरयोथ नु अरु सहर बुइनीम। आन जोरी सत्रुमी मेको आन हिरशो सहर आन के सेल्लनीम। मेको नाक्ती मोआब डा लडाइ पाइब आन थुं सुत्केरी रोइ पशो मीश मुर आन थुं खोदेशो दुम्नीम। 42 मोआब रागी का दुम्शा मलीचा डा पा खतम दुम्त। मारदे हना मेको परमप्रभु यावे आ डोंइती ठेयब लेशशो बाक्त। 43 मोआबम बाक्बपुकी इन डोंइती हिंचा डा बिक्तीके नु ब्वारद बाक्नीम। यसैया २४:१७-१८ 44 हिंचा डा श्येत रे प्रोक्ब बिक्तीकेम बिक्नीम। मिनु बिक्तीके रे डोइश्शा गूब ब्वारदम रेट्चा पुंडसीनीम। मारदे हना गो मोआब कली आ सजाइ गेतीक बर्सम मोदेशो पाइनुड” दे परमप्रभु यावेमी देंत।

45 परमप्रभु यावेमी “प्रोक्बपुकी हेशबोन आ वांकुमी दिक्नीम। मारदे हना हेशबोन रे मी का गूत। सीहोन आ खिं रे मी गूत। मेकोमी मोआब आ कुप्फ नु जीब नु मरिम्शो पाइब आन पिया जेप्ब। गन्ती २१:२८-२९ 46 आबी, आबी, मोआब, केमोश देवता आ मुर बेक्तेक्म। इ तौपुकी ग्याइश्शा लाइक्चा पुंडसाक्म। इ तमी ग्याइश्शा लाइक्चा पुंडसाक्म। 47 मो हना यो गो नोले डा नाक्ती मोआब आ शोंप लेशशा गेनुड। मोपा मोआब आ निसाफ नुप्त” दे परमप्रभु यावेमी देंत।

49

अम्मोन आ पर्वम लोत्र

इजीकीएल २५:३-७; आमोस १:१३-१५; सेफन्याह २:८-११

1 अम्मोनी आन पर्वम परमप्रभु यावेमी “मार, इस्राएल आ तौपुकी मबाक्नीमी? मार, मेको आ हक ताइब सुइ मबाक्नीमी? मारदे मिल्लोम देवता आ मुरपुकीमी गाद आ बाक्तीके आन के सेल्मे? मिनु मारदे मिल्लोम आ मुर सहरम बाक्थ लमा?” देंत। मिल्लोम देवता मोलेक यो देंनीम। १राजा ११:५ 2 मोपतीके परमप्रभु यावेमी “गो अम्मोनी

आन रब्बाह कली लडाइ डा तुराही ताप्शो नेंपाइक्नुड। मेको श्येतथ डांडा खोदेशो दुम्ब। मिनु मेको आ एर ओंथ डा गाउं मीम क्रोइक्चा पुंडसीनीम। मेना इस्राएलमी आ कली रोइक्ब आन कली रोइक्ब” दे परमप्रभु यावेमी देंत।

3 परमप्रभु यावेमी “हेशबोन रोंका पावो। मारदे हना ऐ सहर खतम पोक्शो बाक्ब। गे रब्बाह डा तमी, वाइ ब्रेशशा डाक्कीन। भाङ्ग्रा फेंसीशा रोंका पने। वाम ग्याम दुम्शा एर ओंथ दोरीन। मारदे हना मिल्कोम, आ चढेबपुकी नु आ नोले खोइक्ब ग्याइशशा लाइक्चा पुंडसाक्म। 4 गे मारदे इ सक्तिम ठेयब लेशशा बाक्नेवे? इ सक्ति ग्युम्ब। गे हेंथे गाक्ब तमी, गे इ शोंप कली थमा सुइशशा ‘सुमी आं कली लडाइ तोइबा डा’ देंनेवे। 5 गो परमप्रभु, मुर नेल्ल आन परमप्रभु यावे नड। गो इ नेक्था बाक्ब मुर रे हित्तीक श्येत गेपाइक्नुड। गे नेल्ल एर ओंथ फ्रचा पुंडसीनीनी। मिनु प्रोक्शो आन कली खुप्ब सुइ मबाक्नीम। 6 मो हना यो गो नोले अम्मोनी आन शोंप लेशशा गेनुड” दे परमप्रभु यावेमी देंत। येरमीया ४८:४७

एदोम आ पर्वम लोत्र

यसैया २१:११; यसैया ३४:५-१५; इजीकीएल २५:१२-१४; आमोस १:११-१२

7 मुर नेल्ल आन परमप्रभु यावेमी एदोम आ पर्वम “मुल तेमान सहरम तुइक्तीक मबाक्बा डा? मार, रुप्ब मुर आन अर्ती जाम्शा लमे? मार, मेको आन रुप्तीक योल्मे? 8 ए देदानम बाक्बपुकी, लेशशा प्रोक्कीन। लुक्च लने। मारदे हना गो एसाव कली सजाइ गेची ना मेको कली हिंचा डा श्येत गेनुड। 9 अडगुर सेक्बपुकी इ बाक्तीके जाक्तेक्म हना, मार, मेकोपुकीम अरु सीला गुप्तीके मप्रोंइनीमी डा? मार, नाक्दो खुइ जाक्शो नम हना, मेकोपुकीमी आन कली माल्शो थोत्रक ला मलाइक्नीमी डा? 10 तन्न गो एसाव कली शिप्रा सेल्ला। गो मेको आ खुइक्तीक नेल्ल तांइसीतीके सेल्ला। मिनु मेको खुइक्चा मताइब। मेको आ आल, आ खिं डा मुर, आ नेक्था बाक्ब नु आंमा यो मली। 11 इ रोम रोइक्च आन कली प्रोंइशा वोतो। गो मेको आन कली कोत्रनुडमी। मिनु वोंइश बेक्शो मीश मुरपुकीमी यो आं कली थमा सुइक्चा तामेक्ल” देंत।

12 परमप्रभु यावेमी “श्येत डा कचौरा तूचा ममाल्शोमी यो मेको तूचा माल्ताक्व हना, मार, गे सजाइ मतथु ब्रोंइचा ताइनेवे? गे सजाइ तचा माल्नेवे। गे मेको तूचा माल्नेवे। येरमीया २५:१५, २८, २९; भजन संग्रह १३७:७ 13 मारदे हना बोझा ब्रेशशा हिंचा डा, शुक्शी पाइक्चा पुंडसीब, श्येतथ नु सराप पाइक्तीके दुम्ब, दे आं नेंम कसम जाता। मिनु आ सहर नेल्ले गेना हना यो कली ब्रेशशा लीनीम” देंत। 14 गो परमप्रभु यावे आ लोत्र कुरब रे पा लोत्र का नेंता। लोत्र कुरब का रागी रागी डा मुर आन पर्वम सोइशशो बाक्ब। मेकोमी “लडाइ तोचा कली बुक्कीन। लडाइ पचा कली सासीन” देंत। 15 परमप्रभु यावेम “मुल गो इ कली रागी रागी आन दाते डा नेल्ल क्येडा आइक्च सेल्लन। मुरपुकीमी इ कली महिक्नीम। 16 गे सेरथे फुल्लु आ पुक्खीम बाक्नेवे। इ हिंच कोइतीके नु इ थुं डा ठेयब लेत्तीकेमी इ कली जोल पाम्ताक्स। गे डांडा डा बाक्तीक आंम के सेल्लतीवी। गेमी इ बाक्तीक ककाकुली आ ग्योत्र खोदेशो पा इर सेल्लतीवी हना यो, गो इ कली मेकेर रे उइ तोक्नन” दे परमप्रभु यावेम देंशो बाक्ब। 17 परमप्रभु यावेम “एदोम थम हिंचा डा दुम्ब। सु सु मेकेर लाइनीमी, मेको एदोम आ शुश श्येत तशा हिंनीमी। मिनु शुक्शी पाइनीम। 18 दोपा सोदोम, गोमोररा नु मेको आस एर ओंथ डा सहर नेल्ल श्येतथ दुम्मा, मोपा मेकेर सुइ मलीनीम। सुइ मबाक्नीम। येरमीया ५०:४०; यसैया १:९ 19 यर्दन आ नेक्था डा ठेयब ब्वाकी रे बस्तु भाव योत्रतीकेम गुप्स जाक्शो खोदेशो पा गो एदोम कली याम कामी मेको आ रागी रे गुंडनुड। गो सु कली सासन पचा कली योत्रडु, मेको कली गेनुड। आं खोदेशो सु बाक्बा? आं कली सुम अरेने चाप्बा डा? तेको गोठला आं डोंइती राप्ने चाप्बा डा?” दे परमप्रभु यावेमी देंत येरमीया ५०:४४-४६ 20 मोपतीके परमप्रभु यावेम एदोम आ पर्वम पचा चिक्शो गेय नु तेमान सहरम बाक्ब आन पर्वम मेको आ मिम्शो दोदेशो बाक्बा, मेको नेनीन। थमा पा बगाल डा आइक्च कीशा लाइक्चा पुंडसीनीम। मेको आन पतीके आन योत्रतीक खतम दुम्ब। 21 मेको आन गोल्लशो रेयकेमी रागी खिंखि पाइब। मेको आन वाइ ब्रेशशो लल समुन्द्र सम्म नेंसीब। 22 कोत्रडीन, मेको ककाकुली खोदेशो पा बेरशा जाक्ब। मिनु मेको जुक्शा बोझा तार मेको आ फ्रां हाम्ब। मेको नाक्ती एदोम डा लडाइ पाइब आन थुं सुत्केरी रोइ पशो मीश मुर आन थुं खोदेशो दुम्ब। येरमीया ४८:४०

दमस्कस आ पर्वम लोत्र

यसैया १७:१-३; आमोस १:३-५

23 परमप्रभु यावेमी दमस्कस आ पर्वम “हमाथ नु अरपाद वाम ग्याम दुम्शो बाक्नीस। मारदे हना मेको निक्शीमी मरिम्शो लोत्र नेंताक्स। मेको हिंशा आस थुं ग्येतथ लुक्च दुम्शो बाक्नीस। मिनु समुन्द्र खोदेशो पा सिक्सी पा बाक्ने मचाप्नीस। 24 दमस्कस मचाप्ब दुम्शो बाक्ब। मेको प्रोक्त। मेको शुश हिंब। मेको सुत्केरी रोइ पशो मीश मुर खोदेशो

पा सुर्ता पा हिंब। 25 दोपा मेको नें चलेशो सहर प्रोइचा पुंडसे? मेको सहर डा मुर शुश ग्येरसाक्म। 26 मुल मेको आ टिटा मुरपुकी लां मेर गोल्नीम। मिनु मेको नाक्ती मेको आ लडाइ पाइब नेल्ल खतम दुम्नीम। 27 गो दमस्कस डा गारोपुकीम मी सुइक्नुडमी। मेकोमी बेन-हादाद आ गारो हिरशो सहर खतम सेल्ब” दे मुर नेल्ल आन परमप्रभु यावेम देंत।

केदार नु हासोर आस पबर्म लोत्र

28 बेबीलोन डा पिप नेबुकदरेसरम केदार नु हासोर आस कली ग्रात। एको केदार नु हासोर आस पबर्म पशो लोत्र बाक्ब। मिनु परमप्रभु यावेमी “बोक्कीन। केदार मेर लने। पूब डा मुर आन कली खतम पोक्कीन। यसैया २१:१६-१७; यहोसु ११:१० 29 मेको आन ताम्बु, मेको आन क्यारश भेडा, मेको आन वासी नु आन मारेइ मारेइ लतीन। आन दलओठ रोइशशा आंम के सेल्सीन। मिनु मुरपुकीम ‘एर ओथ नेल्ल हिंचा डा श्येत बाक्ब’ दे ग्रीचा मालनीम। येरमीया २०:३ 30 ए, हासोरम बाक्बपुकी, रीब पा प्रोक्कीन। लुक्च लशा खुइशशा बाक्कीन। बेबीलोन डा पिप नेबुकदरेसरमी इन कली मरिम्शो पचा मिम्शो बाक्ब। मेकोम इन कली मरिम्शो पचा कली गेय का पशो बाक्ब” दे परमप्रभु यावेमी देंत। 31 मिनु “बेबीलोन डा पिप नेबुकदनेसरमी इन कली श्येत गेचा मिम्ब। इन कली मरिम्शो पचा मिम्ताक्व। बोक्कीन, थुं नाइशशा रिम्शो पा बाक्ब मुर गे बारीन। मेको रागी डा मुर आन के ठेयब लाप्चो नु चोक्तीके मबाक्नीम। मेको रागी डा मुर अरु क्येडा डोन बाक्नीम। 32 मेको आन दलओठ रोइक्चा पुंडसीनीम। आन बी ब्यफ यो रोइक्चा पुंडसीनीम। मेको चां प्रेक्शो मुर आन कली तेइ तेइ ब्रापाइक्नुडमी। मिनु मेको आन कली हिंचा डा श्येत गेनुड। येरमीया २५:२३ 33 हासोर सिवार आन बाक्तीके दुम्ब। मेको गेना हना यो कली मुर मबाक्तीक रागी दुम्ब। मेकेर सुइ मबाक्नीम, मेकेर सुइ मुर बाक्थ मलाइनीम” दे परमप्रभु यावेम देंत। येरमीया ४९:१३

एलाम आ पबर्म लोत्र

34 यहूदा डा पिप सिदकीयाहम सासन पचा गोवा ना परमप्रभु यावेम आ लोत्र पाइब येरमीया कली एलाम आ पबर्म लोत्र पाप्नु। येरमीया २५:२५ 35 मुर नेल्ल आन परमप्रभु यावेम मार लोत्र पाप्नु देशा हना “गो एलाम आ लिब्रा जिक्नुड। मेको आन लिब्रा आन ठेयब सक्ति बाक्ब। यसैया २२:६ 36 गो एलाम डा मुर आन कली सरीड आ एर ओथ नेल्ल रे फश गिवार पपाइशशा एर ओथ ब्रापाइक्नुडमी। एलाम डा ग्याइशशा लाइक्चा पुंडसीशो नेल्ल रागी रागीम ब्राइनीम। 37 मेको एलाम डा मुर आन कली, आन जोरी सत्रु नु मेको आन कली साइक्चा माल्ब आन डोंइती शुश हिंब सेल्लुडमी। गो मेको आन कली ठेयब श्येत गेनुड। गो मेको आन कली साइक्ने मथुमु सम्म मेको आन नोले तरवार सोइक्नुड। इजीकीएल ३२:२४ 38 गो आं नित्तीके एलामम सेल्लुड। मिनु मेकेर डा पिपी नु मेको आन ठेयब मुर आन कली साइक्नुडमी” दे परमप्रभु यावेमी देंत। 39 परमप्रभु यावेमी “मो हना यो गो मुल नोले डा नाक्ती एलाम डा मुर आन शोप लेशशा गेनुडमी” दे परमप्रभु यावेमी देंत।

50

बेबीलोन आ पबर्म लोत्र

यसैया १३:-; यसैया १४:-

1 परमप्रभु यावेम बेबीलोन नु कल्दी आन रागी आ पबर्म येरमीया कली लोत्र पाप्नु। यसैया ४६:१ 2 मार लोत्र पाप्नु देशा हना “रागी रागी डा मुर आन दातेमी एको लोत्र नेंपतो। छेदर पोक्शा नेल्ल आन कली नेंपाइशशा ठेयब सेंदा पा देनो। लोत्र का यो मखुइक्तो। बेबीलोन ब्रुत। बेल देवता मुने दोक्त। मेरोदक देवता सुर्ता पाइब। मेको आन मूर्ति मुने दोक्नीम। मेको सुर्ता पाइनीम। बेल बेबीलोन सहर डा देवता बाक्ब। 3 उत्तर रे रागी का डा मुरपुकीम मेको कली लडाइ तोइनीम। मिनु मेको आ रागी श्येतथ सेल्नीम। मेकेर सुइ मबाक्नीम। मुर नु जन्तु नेल्ल प्रोक्नीम।

4 मेको नाक्ती इस्राएल डा मुरपुकी नु यहूदा डा मुरपुकी काथा डाक्ना डाक्न परमप्रभु यावे, आन परमप्रभु कली माल्थ गाक्नीम। येरमीया ३१:९ 5 मेकोपुकीमी ‘सियोन गे लतीक लां ते बाक्बा?’ दे हिल्लो पाइनीम। मिनु ‘इन गाक्शो लांन बाक्ब’ देंनीम। मेकोपुकीमी गेना हना यो लीब मप्रंतीके कबल पा परमप्रभु यावे कली जिम्मा गेंसीनीम। येरमीया ३२:४० 6 आं मुरपुकी जाम्शो भेडा खोदेशो बाक्तेक्म। मेको आन गोठलापुकीम मेको आन कली हेंथे गाक्पाइशशा बाक्तेक्म। मिनु मेको आन कली डांडा मेर हिरपाइशशा बाक्तेक्म। मेकोपुकी डांडा पहाड सम्म हिरसाक्म। मिनु आन गोठ प्रेंताक्मे। येरमीया २३:१ 7 मेको आन कली थिप्बपुकीम मेको आन कली नेक्तेक्म। मिनु मेको आन जोरी सत्रुमी

‘गो दोसी मनकी। मारदे हना मेकोपुकीमी परमप्रभु यावे कली पाप पाप्तेकम। मेको आन ठीक पा जोतीके नु आन किकी पिपी आन आस पशो, परमप्रभु यावे बाक्त’ दैतेकम।

8 बेबीलोन रे प्रोक्कीन। कल्दी आन रागी प्रोनीन। मिनु क्यारश भेडा आन कली लां कोंडब बोका खोदेशो दुमीन। येरमीया ५१:६; यसैया ४८:२० 9 मारदे हना गो उत्तर रे ठेयब रागी रागी डा लडाइ पाइब आन कली बेबीलोन आ पबर्म क्युकशो बाक्नुड। मेकोपुकी लडाइ पचा कली सासीनीम। मिनु मेको कली लडाइ तोइनीम। मेको आन ब्रा थाम्पा लडाइ पस जोक्ब मुर खोदेशो बाक्नीम। मेकोपुकी मोशा मलेत्नीम। 10 मोपा कल्दी रागी रोइक्चा पुंइसीब। मिनु मेको कली रोइक्ब नेल्ल रूनीम” दे परमप्रभु यावेम दैत।

11 परमप्रभु यावेम “गे ग्येरसीनीनी। शुश ग्येरसीने। गे आं शोंप रोइक्ब बाक्नीनी। दांइ पाइब मगिक्शो बी खोदेशो पा प्रेनीनी। गे शारा खोदेशो पा ग्रीनीनी। 12 इन ममा थाम्पा मुने दोक्ब। इन कली जरमेब शिशी मताइब। मेको इन रागी रागी आन दातेमी नेल्ल क्येडा आइक्च दुम्ब। मेको मुर मबाक्तीके सोव्रशो रागी नु गोरशो रागी दुम्ब। 13 परमप्रभु यावे आ चुरतीकेमी मेकेर सुइ मबाक्नीम। मेको थम श्येत्य रागी दुम्ब। बेबीलोन रे पा गाक्ब मेको तशा हिंनीम। मिनु मेको आ श्येत तशा शुक्शी पाइनीम। येरमीया ५१:३७ 14 गे लिब्रा आप्बपुकी, बेबीलोन आ एर ओंथ इन बाक्तीकेम राप्शा बाक्कीन। ब्रा कली का यो महेक्थु आप्पीन। मारदे हना मेकोमी परमप्रभु यावे कली पाप पाप्तु। 15 मेको आ एर ओंथ नेल्ल बाक्शा, ठेयब सेंदा पा ग्रीडीन। मेको इन कली जिम्मा गेंसीब। मेको आ बोल्यो दरवार एत्तेकम। मेको आ गारो प्रेत्चा पुंइसीशा दोक्तेकम। मारदे हना मेको परमप्रभु यावे आ क्येक्क लेशशो बाक्ब। मेको कली क्येक्क लेत्तीन। मेकोमी अरु आन कली पाइशो खोदेशो पा मेको कली यो पतीन। प्रकाश १८:६ 16 गे बेबीलोनम वांचेर शोक्ब आन कली खेरीन। मीशो अन्न रिक्ब आन कली खेरीन। खतम पोक्ब तरवारम पतीके नेल्ल आन कली आन आन खिं डा मुर आन बाक्तीके लेशशा लचा गेने। मेको नेल्ल आन आन रागी प्रोक्चा माल्नीम।

17 इस्राएल गुप्सपुकीम खेदा पा एर ओंथ ब्रपाइशो भेडा खोदेशो दुम्शो बाक्ब। मेको कली डोंइती अस्सुर डा पिपम दाक्तु। मिनु नेल्ल क्येडा नोले बेबीलोन डा पिप नेबुकदरेसरमी मेको आ रुश नेल्ल नेक्तु” दैत। 18 मोपतीके मुर नेल्ल आन परमप्रभु यावे, इस्राएली आन परमप्रभुमी “गो बेबीलोन डा पिप नु मेको आ रागी कली अस्सुर डा पिप कली सजाइ गेशो खोदेशो पा, सजाइ गेनुड। २राजा १९:३५ 19 गो इस्राएल कली आं कली योव्रतीकेम लेशशा चाक्नुड। मिनु मेको कारमेल नु बाशान मेर जोइब। एफ्राइम नु गिलाद डा पहाड मेर मेको आ शोवलु बेक्शो रूब। 20 मेको नाक्ती इस्राएल आ मरिम्शो पशो माल्शा कोव्रशा हना यो, मथिंसीब। यहूदा आ पाप माल्शा हना यो, मथिंसीब। मारदे हना गो आं प्रोंइशा वोइशो लीशो आन कली आन पाप माफ गेतामी। येरमीया ३३:७-८

21 मेराथाइम रागी कली लडाइ तोने। पेकोद आ मुर आन कली लडाइ तोने। मिनु नेल्ल खतम पोक्कीन। गो इन कली अरेशो खोदेशो पा, नेल्ल पने” दे परमप्रभु यावेमी दैत। 22 लडाइ डा रेयके नु ठेयब खतम दुम्तीके आन नेक्था बाक्ब। 23 दोपा रागी नेल्ल डा घन जिक्शा फस दुम्मे, मोपा बेबीलोन रागी रागी आन दातेमी शुश हिंचा डा दुम्ब। येरमीया ५१:२० 24 बेबीलोन, गो इ कली ब्वारद का दाइक्ताक्ड। गे मतुइक्थु ग्याइक्चा पुंइसीनेवे। मिनु इ कली थिश्शा, ग्याइक्चा ताइतक। मारदे हना गे परमप्रभु यावे कली मरिम्शो पशो बाक्ते। 25 परमप्रभु यावेम आ या वोइक्तीक खिं रोक्तु। मिनु आ चुरशो डा या गुंइताक्व। मारदे हना मुर नेल्ल आन परमप्रभु यावेमी कल्दी आन रागीम गेय का पचा माल्ब। 26 मेको आ एर ओंथ नेल्ल रे लडाइ पथ जाक्कीन। मेको आ अन्न वोइक्तीक खिं रोक्कीन। मेको कली अन्न खोदेशो पा तेलीन। मेको कली मारेइ मलीशो खतम सेलीन। मेको के मारेइ मलील। 27 मेको आ सांढे ब्यफ नेल्ल सतीन। मेको आन कली क्योरचा कली लतीन। आबी, आबी, मेको आन नाक्ती जाक्त। मेको आन कली सजाइ गेतीक नाक्ती जाक्त।

28 मिनु परमप्रभुमी “नेनीन, बेबीलोन रे प्रोक्ब मुर नु मेकेर बाक्ब अर्को रागी रे प्रोक्शो मुरुम सियोनम ‘परमप्रभु यावे, आंइ परमप्रभुमी क्येक्क लेप्ब। आ खिं आ पबर्म क्येक्क लेप्ब’ दे नेल्लेम नेंचा डा पा शेनीम।

29 बेबीलोनी आन कली लिब्रा आप्बपुकी ब्रेत्तीन। लिब्रा आप्ब नेल्ल आन कली ब्रेत्तीन। मेको आ एर ओंथ नेल्ल ताम्बु कीशा मुर आन कली तेक्कीन। मेकेर रे सुइ ब्रोंइचा मतामेक्ल। मेको आ पशो खोदेशो पा मेको कली क्येक्क लेत्तीन। मेकोमी पशो खोदेशो पा, मेको कली यो पतीन। मारदे हना मेकोमी इस्राएली आन का ला बाक्शो परमप्रभु यावे कली शुक्शी पाप्तु। येरमीया ५०:१५ 30 मोपतीके मेको आ ठिटा मुरपुकी लां मेर गोल्नीम। मिनु मेको आ लडाइ पाइब नेल्ल खतम दुम्नीम” दे परमप्रभु यावेम दैत।

31 परमप्रभु, मुर नेल्ल आन परमप्रभु यावेमी “गो इ कली ठेयब लेशशो दुम्तीके काइ मदाक्नुड। इ नाक्ती जाक्त। इ कली सजाइ गेतीक नाक्ती जाक्त। 32 ठेयब लेशशो मुर दाइल पा गोल्ब। मेको कली पोक्ब सुइ मबाक्नीम। मिनु गो मेको आ सहरम मी सुइक्नुड। मेको मीम मेको आ एर ओंथ बाक्ब नेल्ल आन कली दाक्ब” देंत।

33 मुर नेल्ल आन परमप्रभु यावेमी “इसाएल डा मुर नु यहूदा डा मुर श्येत गेचा नु दिप्चा पुंडसीनीम। मेको आन कली ग्याइशशा लाइक्बपुकीम मेको आन कली लचा मगेनीम। 34 मो हना यो मेको आन कली श्येत रे प्रॉइब सक्ति पाइशशो बाक्ब। मेको आ नें मुर नेल्ल आन परमप्रभु यावे बाक्ब। मेकोमी मेको आन कली आ सक्तिमी थमा पा वारच पाइब। मिनु रागी कली रिम्शो दुम्पाइक्ने चाप्ब। तन्न बेबीलोनम बाक्ब आन कली चहिं थुं नाइक्चा मगेब” दे परमप्रभु यावेमी देंत।

35 मिनु परमप्रभु यावेमी “कल्दी आन कली तरवार का जाक्त। बेबीलोनम बाक्ब नेल्ल आन कली, आन ठेयब मुर आन कली नु आन जोक्ब तुइक्ब मुर आन कली यो तरवार जाक्त। 36 मेको आ जादू कली यो तरवार का जाक्त। मोपतीके मेकोपुकी मूर्ख दुम्नीम। मेको आ लडाइ पाइब आन कली यो तरवार का जाक्त। मिनु मेको खतम दुम्नीम। 37 मेको आ शारा, आ बग्गी नु मेको आन दातेम बाक्ब अर्को रागी डा लडाइ पाइब आन कली साइक्चा कली तरवार जाक्त। मोपतीके मेकोपुकी मीश मुर खोदेशो दुम्नीम। मेको आ शोंप नेल्ल आन कली तरवार जाक्त। मेको नेल्ल रोइक्तीक दुम्ब। येरमीया ५१:३० 38 मेको आ ब्वाक्कु सोत्रचा कली काइ रेउ मयी। मारदे हना मेको शुश मूर्ति आन रागी बाक्ब। मिनु मेको आ देवी देवता आन पर्बम निप्स ग्राइशशो खोदेशो दुम्ब।

39 मोपतीके बेबीलोन सहरम ब्वाकी डा जन्तु नु फरपुकी बाक्नीम। मिनु मेकेर ठेयब चिक्ब बास बाक्नीम। मेकेर मुल लेंशा नेल्ल पाला सम्म मुर मबाक्नीम। 40 मिनु सोदोम, गोमोररा नु मेको आस एर ओंथ डा गाउं आन कली लोक्शो खोदेशो पा बेबीलोन सहरमी सुइ मबाक्नीम। मेकेर मुर मबाक्तीके दुम्ब” दे परमप्रभु यावेमी देंत। येरमीया ४९:१८; उत्पत्ती १९:२४-२५

41 कोव्रडीन, मुरपुकी उत्तर रे जाक्ना जाक्न बाक्नीम। शुश जात डा नु शुश पिप आन जोंब बोक्शा डोन रागी रे जाक्नीम। येरमीया १:१४ 42 मेकोपुकी लिब्रा नु तूतीक कुरशो, थम मरिम्शो पाइब नु शिशी मपाइक्ब बाक्नीम। मेको आन रेयके समुन्द्र ग्रीशो खोदेशो बाक्ब। मेकोपुकी शारा डोइशशा जाक्नीम। मेको लडाइ तोचा कली आन बाक्तीकेम राप्नीम। बेबीलोन आ तमी, इ कली लडाइ तोचा कली जाक्नीम। येरमीया ६:२३ 43 मिनु बेबीलोन डा पिपम मेको आन पर्बम लोत्र नेंतु। मिनु आ थुं लुक्च लत। मेको सुत्केरी रोइ पशो मीश मुर खोदेशो पा सुर्ता पा हिंत।

44 यर्दन आ नेक्था डा ठेयब ब्वाकी रे बस्तु योत्रतीकेम गुप्स जाक्शो खोदेशो पा गो मेको कली याम कामी मेको आ रागी रे ग्रुइनुड। गो सु कली सासन पचा कली योत्रडु, मेको कली गेनुड। आं खोदेशो सु बाक्बा? आं कली सुम अरेने चाप्बा डा? तेको गोठला आं डोंइती राप्ने चाप्बा डा? येरमीया ४९:१९ 45 मोपतीके परमप्रभु यावेम बेबीलोन आ पर्बम पचा चिक्शो गेय नु कल्दी रागी डा मुर आन पर्बम मिम्शो दोदेशो बाक्बा, मेको नेनीन। थमा पा लाइक्चा पुंडसीनीम। बेबीलोन डा पुडग मुर आन कली यो कीशा लाइक्चा पुंडसीनीम। मेको आन बाक्तीक मेको तशा हिं। 46 बेबीलोन कली ग्रामानु, मेको आन रेयकेम रागी खिंखि पाइब। मेको आन वाइ ब्रेशशो रागी रागी डा मुर आन दातेमी नेंसीब।

51

बेबीलोन खतम दुम्शो

1 मिनु परमप्रभु यावेमी “गो बेबीलोन नु लेब-कमाइ डा मुर आन पर्बम खतम सेल्ब फश गिवार कली सोइक्नुड। खतम सेल्ब फश गिवार कली यो खतम सेल्ब सोक्त देंसीब। 2 गो बेबीलोन कली क्राप्ब मुर सोइक्नुडमी। मेकोपुकीम बेबीलोन आ श्येत जतीक नाक्ती आ एर ओंथ नेल्ल रे जाक्शा, मेको आ रागी श्येतथ सेल्नीम। येरमीया १५:७ 3 लिब्रा आप्बम आ लिब्रामी ब्रा मचुइक्तल। मिनु लडाइ पाइबमी आ लडाइ डा वा मफेक्सेक्ल। मेको आ ठिटा मुर आन कली मप्रोनीन। मेको आ लडाइ पाइब नेल्ल आन कली सतीन। 4 मेकोपुकी कल्दी आन रागीम साइक्चा पुंडसीनीम। मेकोपुकी आ लां मेर गार दुम्शा गोल्नीम। 5 मिनु इसाएल नु यहूदा परमप्रभु, मुर नेल्ल आन परमप्रभु यावे रे मप्रॉइसीशो बाक्ब। मेको आन रागी इसाएली आन का ला बाक्शो परमप्रभु यावे कली पापम ब्रीशो बाक्ब। यसैया ५४:४; येरमीया ५०:२९

6 बेबीलोन आ दाते रे प्रोक्कीन। मुर नेल्ल आंम आंम गिंम प्रोंइचा कली प्रोक्कीन। मेको आ दोसम पतीकेम गे मबेक्कीन। मारदे हना मेको परमप्रभु यावे आ क्येक्क लेत्तीक नाक्ती बाक्ब। मेकोमी मेको कली आ तचा माल्शो सजाइ गेब। येरमीया ५०:८; प्रकाश १८:४ 7 बेबीलोन परमप्रभु यावे आ गुइम सुन के कचौरा का बाक्त। मेकोमी रागी नेल्ल डा मुर आन कली दुक्पाइक्तु। रागी रागी डा मुरपुकीम मेको आ अङ्गुर शांबु तूतेक्म। मोपतीके मेको रागी डा मुर निप्स ग्यशो दुम्तेक्म। प्रकाश १७:४; येरमीया २५:१५; प्रकाश १८:३ 8 बेबीलोन याम कामी गोल्लत। मिनु टुक्रा टुक्रा सेल्चा पुंइसाक्व। मेको आ पर्बम रोंका पने। मेको आ गारम खेक्का कली खेक्तीक चाक्कीन। मो पशोनु, मेको साबा कों। यसैया २१:९ 9 गोपुकीम बेबीलोन कली सापाइय्य वा। तन्न मेको मसाब। गो मेको कली प्रोंइतक। मिनु आंम आंम रागी लेत्तक। मारदे हना मेको आ निसाफ पशो सजाइ स्वर्ग सम्म जाक्दीशो बाक्ब। मेको सरीड सम्म बोक्शो बाक्ब। 10 परमप्रभु यावेमी आंइ ठीक पतीके कोंइताक्व। जाक्कीन, मिनु इं परमप्रभु यावेमी मार पवा, मेको सियोनमी नेंपाइशशा देंय।

11 इन ब्रा शेप्पीन। मिनु ब्रा कुरतीक प्रिंदीन। परमप्रभु यावेम मादी आन पिप कली लडाइ पपाइक्तु। मारदे हना मेकोमी बेबीलोन कली खतम सेल्चा कली मिम्ताक्व। मेको आ खिं आ पर्बम क्येक्क लेत्तीके बाक्ब। यसैया १३:१७; येरमीया ५०:२८ 12 बेबीलोन डा गारो आ डोंइती छेदर खुक्कीन। शुश कोव्रब वोतीन। खाल पाइब वोतीन। बाप्ब आन कली ठीक पा वोतीन। परमप्रभु यावेमी बेबीलोन डा मुर आन पर्बम आ मिम्शो पाप्तु। 13 गे शुश ब्वाक्कु आ नेक्था बाक्नेवे। इ शोंप शुश बाक्नीम। मुल इ नाक्ती जाक्त। इ ब्रोंइतीक नाक्त नुप्त। प्रकाश १७:१ 14 मुर नेल्ल आन परमप्रभु यावेम आ नेंम कसम जाप्तु। गो थमा पा सल्हा खोदेशो पा लडाइ पाइब मुर जाक्पाइशशा, इ रागी प्रिनुडमी। मिनु मेकोपुकीमी इ क्येडा ग्राशो आ पर्बम ठेयब सेंदा पा रेयके पाइनीम।

15 मेकोमी रागी कली आ सक्तिम सेल्लु। मेकोमी आ तुइक्तीकेम रागी कली वोइक्तु। मेकोमी आ रुप्तीकेम सरीड प्राक्तु। येरमीया १०:१२-१६ 16 मेकोमी लोव्र पवानु, सरीडमी रेड यिशा, गरड गुरुड पाइब। मेकोमी रागी आ सुर रे गोस्स पोक्ब। रेड नु काथ काथा चिला दाप्पाइक्ब। मिनु फश आ बाक्तीक रे गुंइशा, फश पपाइक्ब। बजन संग्रह १३५:७ 17 मुर नेल्ल मूर्ख नु मजोक्ब मतुइक्ब बाक्नीम। सुन चेम्ब नेल्ल आन मूर्तिम पतीके मुने दोक्नीम। मारदे हना मेको आन सेल्शो मूर्ति सोक्त मपाइशशा जोल बाक्नीम। 18 मेको शोर गाक्शो बाक्नीम। मेको मुर आन मिम्शो ला बाक्नीम। मेको आन कली सजाइ गेशोनु, मेकोपुकी खतम दुम्नीम। 19 परमप्रभु यावे मेको खोदेशो ममाइ। परमप्रभु यावे याक्ब आ भाग बाक्ब। मेको आन खोदेशो ममाइ। मारदे हना परमप्रभु यावे मारेइ मारेइ सेल्ब बाक्ब। मिनु इस्राएली मेको आ मुर बाक्नीम। मेको आ नें मुर नेल्ल आन यावे बाक्ब।

20 बेबीलोन, गे लडाइ पचा कली आं तुप्तीके नु लडाइ पतीक या बाक्नेवे। गो इ रे पा रागी रागी डा मुर आन कली तुप्तामी। गो इ रे पा राज्य आन कली खतम पोक्तामी। येरमीया ५०:२३ 21 गो इ रे पा शारा नु शारा डोइक्ब आन कली तुप्तामी। गो इ रे पा बग्गी नु बग्गी चलेब आन कली तुप्तामी। 22 गो इ रे पा वोंइश मुर नु मीश मुर आन कली तुप्तामी। गो इ रे पा खूशो नु ठिटा आन कली तुप्तामी। गो इ रे पा ठिटी नु ठिटा आन कली तुप्तामी। 23 गो इ रे पा गोठला नु मेको आ बगाल कली तुप्तामी। गो इ रे पा रू दोइब नु आन ब्यफ आन कली तुप्तामी। गो इ रे पा सरकार आ गेय पाइब नु हुकुम पाइब आन कली तुप्तामी। 24 गो इ डोंइती बेबीलोन नु कल्दी रागीम बाक्ब मुर नेल्लेम सियोनम मरिम्शो पशो आ पर्बम क्येक्क लेत्नुड” दे परमप्रभु यावेम देंत। येरमीया ५०:२९; अय्युब १:१७

25 परमप्रभु यावेमी “गे मारेइ मारेइ आन कली साइक्ब डांडा, गो इ कली काइ मदाक्नुड। गे रागी नेल्ल खतम सेल्नेवे। गो आं गुइ दिशा, इ कली रोंगु रे उइ तोक्नन। मिनु कोक्त जेशो डांडा सेल्नन। 26 खिं डा सुर वोइक्का कली इ रे पा फुल्लु का यो मलाइक्नीम। जग वोइक्का कली यो इ फुल्लु मलाइक्नीम। तन्न गे गेना हना यो कली श्येत्थ रागी दुम्चा माल्नेवे” दे परमप्रभु यावेम देंत।

27 मिनु परमप्रभु यावेमी “गे रागीम छेदर का खुक्कीन। रागी रागी आन दातेमी तुराही तपीन। मेको नु लडाइ पचा कली रागी रागी डा मुर आन कली ठीक सेलीन। राज्य आन कली बेबीलोन नु लडाइ पचा कली पोक्कीन। आरारात, मिन्नी नु अश्केनजमी बेबीलोन नु लडाइ पाइब आन ठेयब मुर का योव्रडीन। सल्हा आन हुल खोदेशो पा शुश शारा चाक्कीन। यसैया १३:३ उत्पत्ती १०:३ 28 मेको नु लडाइ पचा कली रागी रागी डा मुर आन कली पोक्कीन। मादी आन पिप, मेको आन हुकुम पाइब, मेको आन ठेयब मुर नु मेको आन हुकुम पशो रागी नेल्ल डा मुर आन कली पोक्कीन” देंत। 29 खिनु कुशा रागी खिंखि पाइब। मारदे हना परमप्रभु यावेम बेबीलोन कली श्येत्थ नु मुर मबाक्तीके सेल्नुड देशो लोव्र गाप्ब। 30 बेबीलोन डा लडाइ पाइबपुकीम लडाइ पचा प्रोंइतेक्म। मेको आन बोल्यो दरवारम बाक्नीम। मेको

आन सक्ति जाम्त। मेकोपुकी मीश मुर खोदेशो दुम्तेकम। मेको आन खिंम मी सुइवने थुम्तेकम। मेको आन लाप्यो डा आग्लो जिक्शो बाक्नीम। येरमीया ५०:३७ 31 लोव कुरबम अर्को लोव कुरब आन कली लांम गुम्नीम। मेकोपुकीमी बेबीलोन डा पिप कली “मेको सहर नेल्ल ग्रातेकम। 32 मिनु खोला शोक्तीके ग्रातेकम। जोरी सत्रु आन कली ओव्रचा मगेचा कली सेल्शो तेक्तीक नेल्ल मी सुइक्ताकमे। मिनु लडाइ पाइबपुकी शुश हिंशा वाम ग्याम दुम्तेकम” देशा पिप कली लोव नेंपाइक्नीम। 33 मिनु मुर नेल्ल आन परमप्रभु यावे, इस्राएली आन परमप्रभुमी “बेबीलोन आ तमी दांइ पतीक खला का खोदेशो दुम्ब। मेको दिप्चा पुंडसीब। इच्का नोले रिक्ची नाक्ती रीब पा जाक्ब” दंत।

34 सियोनमी “बेबीलोन डा पिप नेबुकदरेसरमी आं कली दाक्ती। आं कली खतम सेलती। आं कली श्येतथ गर खोदेशो सेलती। आं कली अजीडगरम खोदेशो पा दाक्ती। मिनु ब्रोव्रशो जचा थोव्रकम खोदेशो पा आ कोव्रज प्रिताक्व। मिनु नोले आं कली ताइक्ताकयी। 35 आं मुर आन कली साइशो आ पर्बम बेबीलोन क्येक्क लेत्चा पुंडसीब” दंत। सियोन डा यरूसलेममी “कल्दी रागीम बाक्ब मुरपुकीम ‘आं हुश आ क्येक्क लेत्चा पुंडसीनीम’ दंचा माल्नीम” दंत। 36 मोपतीके परमप्रभु यावेमी “गो इ पोन बोक्नुड। गो इ कली गेशो श्येत आ क्येक्क लेत्नुड। गो मेको आ समुन्द्र सोव्रपाइक्नुड। आ ब्वाक्कु बुक्तीके यो सोव्रपाइक्नुड। 37 मिनु बेबीलोन खिं ब्रेशा देल्शो, सिवार आन बाक्तीके, हिंचा डा नु शुक्शी पाइक्चा पुंडसीतीके नु मुर मबाक्तीक दुम्ब। येरमीया ५०:१३

38 मेकेर डा मुर नेल्ल गुप्स खोदेशो पा ग्रीनीम। मेकोपुकी गुप्स आन चाइक्ब खोदेशो पा डरर डरर पाइनीम। 39 नोले मेकोपुकी बोक्शा, मार मार माल्मेनु, गो मेको आन कली तूतीक खेत्नुड। मिनु गो मेको आन कली रिशशा ग्यारशा मपामे सम्म दुक्पाइक्नुडमी। मिनु गेना हना यो कली इप्नीम। मिनु गेनायो मसेंसीनीम” दे परमप्रभु यावेमी दंत। 40 मिनु परमप्रभु यावेमी “गो मेको आन कली क्योरचा कली कीशा लाइशो पाठा, सांड नु क्यारश खोदेशो पा चाक्नुडमी।

41 शेशाक सहर कली दोपा ग्राने चाप्मे? रागी नेल्ल डा ठेयब नु दारशो सहर बुत। बेबीलोन दोपा रागी रागी आन दातेमी शुश हिंचा डा दुम्मे? शेशाक बेबीलोन कली अरु नें का बाक्ब। येरमीया २५:२६ 42 समुन्द्र डोइशशा बेबीलोन कली सुम्तु। समुन्द्र आ ग्रीशो छालम मेको कली सुम्तु। 43 मेको आ सहरपुकी हिंचा डा दुम्तेकम। सोव्रशो, गोरशो नु मुर मबाक्तीके दुम्तेकम। मेको रे पा सुइ मगाक्नीम। 44 गो बेबीलोन डा बेल देवता कली सजाइ गेनुड। मिनु आ दाक्शो थोव्रक मेपाइक्नुड। मुल रागी रागी डा मुर मेकेर चोक्थी क्राक्थी पा मलाइक्नीम। बेबीलोन आ गारो ब्रेत। येरमीया ५०:२; यसैया ४६:१

45 आं मुरपुकी मेकेर रे गूशा पिने। गे नेल्ल ब्रोइचा कली प्रोक्कीन। परमप्रभु यावे आ ठेयब पा गाइशो रे प्रोक्कीन। 46 रागीम मारेइ रेयके नेंनीनु, इन थुं ग्येतथ लुकच मदुमीन। महिनीन। एको बर्सम खाल का डा रेयके नु अर्को बर्सम अर्को खाल डा रेयके नेंसीब। मेको रागीम हुश खाक्श पोक्शोनु, सासन पाइब कामी अर्को सासन पाइब कली जिचा तोशो रेयके बाक्ब।

47 गो बेबीलोन डा मूर्ति आन कली सजाइ गेनुडमी। मेको आ रागी नेल्ल मुने दोक्नीम। मिनु मेको आ मुर नेल्ल मेको आ दातेमी साइक्चा पुंडसीनीम। मोदेशो नाक्ती थमा पा जाक्ब। 48 मिनु नोले सरीड, रागी नु मेकेर बाक्ब नेल्लेमी बेबीलोन ब्रुशो आ पर्बम ग्येरशा वाइ ब्रेत्नीम। मारदे हना मेको आन कली क्येक्क लेप्ब उत्तर रे जाक्नीम” दे परमप्रभु यावेम दंत। प्रकाश १८:२० 49 परमप्रभु यावेमी “इस्राएली आन कली साइक्तीके बेबीलोन ब्रुचा माल्ब। बेबीलोनम रागी डा मुर आन कली साइक्तीके बेबीलोन यो साइक्चा पुंडसीब।

50 गो तरवार रे ब्रोइशा प्रोक्कीन। देश मपने। डोन रागीम बाक्शा, परमप्रभु यावे कली मिम्तीन। यरूसलेम इन थुंम वोतीन” दंत। भजन संग्रह १३७:५ 51 मेकोपुकीमी “आंइ कली शुक्शी पाइशो नेंशा, गो मुने दोक्तक। गो आंइ कुल सुम्तक। मारदे हना परमप्रभु यावे आ खिंम अर्को रागी डा मुर जाक्शा ओव्रतेकम” दंतैकम।

52 परमप्रभु यावेमी “गो मेको आ रागी नेल्लेमी आन मूर्ति आन कली सजाइ गेनुडमी। मिनु मेकेर गार दुम्शो मुर हुकयी पाइनीम। मेको नाक्ती थमा पा जाक्ब। 53 बेबीलोन इर सरीड सम्म बोक्त हना यो, आ इर डा सहर बोल्यो सेल्लु हना यो, गो मेको कली खतम सेल्बपुकी सोइक्नुडमी” दे परमप्रभु यावेमी दंत। उत्पत्ती ११:४; यसैया १४:१३

54 परमप्रभु यावेम “बेबीलोन रे वाइ ब्रेशो सेंदा नेंसीब। कल्दी डा मुर आन रागी रे मारेइ मारेइ प्रेशो रेयके नेंसीब। 55 परमप्रभु यावेम बेबीलोन कली श्येतथ सेल्ब। मिनु मेको आ ठेयब सेंदा सिक्सी पपाइक्ब। मेको आ छाल समुन्द्र खोदेशो पा रेयके पाइब। 56 बेबीलोन कली खतम पोक्ब जाक्ब। बेबीलोन डा लडाइ पाइबपुकी ग्याइक्चा पुंडसीनीम। मेको आन लिब्रा जिक्नीम। मारदे हना परमप्रभु यावे क्येक्क लेप्ब बाक्ब। मेकोमी आ पशो आ पा डा

नेल्ल गेब। ब्यवस्था ३२:३९-४१ 57 गो मेको आ सरकार डा गेय पाइब, जोक्ब तुइक्ब, मेको आ हुकुम पाइब, नु आ लडाइ पाइब नेल्ल आन कली दुक्पाइक्नुडमी। मिनु मेकोपुकी गेना हना यो कली इप्नीम। लेंशा मबोक्नीम” दे पिपम देंत। मेको पिप आ नें मुर नेल्ल आन परमप्रभु यावे बाक्ब।

58 मुर नेल्ल आन परमप्रभु यावेम “बेबीलोन डा ब्रेमशो गारो दिंम दुम्ब। मिनु मेको आ लाइशो ठेयब लाप्चोपुकी मीम नेक्ब। मुरपुकी मोशा गेय पाइनीम। रागी रागी डा मुर आन श्येत पा पशो गेय नेल्ल मी कली ला दुम्ब” दे परमप्रभु यावेमी देंत। हबकुक् २:१३

59 परमप्रभु यावे आ लोत्र पाइब येरमीयामी माहसेयाह आ चच नेरीयाह आ तौ सेरायाह पिप आ गेय पाइब कली अरेप्टु। मिनु मेको यहूदा डा पिप सिदकीयाहम सासन पवा आ ४ बर्सम पिप नु बेबीलोन लशो बाक्त। येरमीया ३६:४ 60 येरमीयामी बेबीलोनम जाक्चा चिक्शो श्येत आ पर्बम डा लोत्र कागज काम ब्रेक्ताक्व। बेबीलोन आ पर्बम नेल्ल ब्रेक्ताक्व। येरमीया ५०:१-५०, ५८ 61 मिनु येरमीयाम सेरायाह कली “गे बेबीलोनम जाक्दीनेनु, एको लोत्र नेल्ल पढेवो। 62 ‘परमप्रभु यावे, गे एको रागी कली खतम पोक्नुड’ देंतीनी। ‘एकेर मुर नु बी ब्यफ, क्यारश भेडा, मारेइ बास मबाक्चा डा पा श्येतथ रागी सेल्लुड। एको गेना हना यो मुर मबाक्तीके दुम्ब’ देंतीनी” देनो। 63 मोपा एको कागज पढेने थुम्शा, फुल्लु काम फ्रेंशा युफ्रेटीस खोलाम ताइक्तो। प्रकाश १८:२१ 64 मिनु “कागज ब्वाक्कुम गुम्शो खोदेशो पा बेबीलोन आं चाक्शो श्येत आ पर्बम गुम्ब। मेको गेनायो गूने मचाप्ब, देंचा माल्नेवे” देंत। मोपा येरमीया आ लोत्र नुप्त।

52

यरूसलेम खतम दुम्शो

येरमीया ३९:१-१०; २राजा २४:१८-२५-७; २इतिहास ३६:११-२१

1 सिदकीयाह पिप दुम्मेनु, २१ बर्स दुम्शो बाक्त। मिनु मेकोम यरूसलेममी ११ बर्स सासन पाप्नु। मेको आ ममा आ नें हामुतल बाक्त। मेको लिब्ना डा येरमीया आ तमी बाक्त। 2 मिनु मेकोम येहो-याकीममी खोदेशो पा परमप्रभु यावे आ डोंइती मार मरिम्शो बाक्मे, मेको पाप्नु। 3 मिनु यरूसलेम नु यहूदा डा मुरपुकीमी परमप्रभु यावे कली शुश गाइक्पाइक्तेक्म। मोपतीके मेकोमी मेको आन कली आ डोंइती रे तिल्लु। मिनु बेबीलोन डा पिप सिदकीयाहम कली मटीव। 4 सिदकीयाहम सासन पवा आ ९ बर्स, १० महिना, १० नाक्त बेबीलोन डा पिप नेबुकदरेसरमी आ लडाइ पाइब नेल्ल कुरशा, यरूसलेम नु लडाइ पथ जाक्त। मिनु मेकोपुकीमी सहर आ लाडगा रे पुम्ताक्म। सहर डा गारो डोइक्चा कली एर ओंथ डोइक्तीक सेल्लेक्म। 5 मोपा पिप सिदकीयाहम सासन पवा आ ११ बर्सम सहर आ एर ओंथ नेल्ल रे पुम्ताक्म। 6 मिनु ४ महिना डा ९ नाक्ती सहरम थम ठेयब अन्काल दुम्त। मिनु मेको सहर आ आगामी जचा कली मारेइ मबा। 7 मिनु सहर डा गारो प्रेत्तेक्म। मिनु लडाइ पाइब नेल्ल प्रोक्तेक्म। कल्दी डा मुरपुकी सहर आ एर ओंथ बाक्तेक्म। मो हना यो मेकोपुकी पिप आ फल फुल रू डा गारो निक्शी आस दाते डा लाप्चो रे पा गूशा प्रोक्तेक्म। मिनु मेकोपुकी अराबाह रागी गे लाम्तेक्म। 8 तन्न कल्दी डा लडाइ पाइबपुकीम पिप सिदकीयाह कली खेदा पाम्तेक्म। मिनु मेको कली यरीको डा दिंमम थित्तेक्म। मेको आ लडाइ पाइब नेल्ल ब्रशा एर ओंथ दुम्तेक्म। 9 मिनु मेको ग्याइक्चा पुंइसाक्व। मिनु मेकोपुकीमी पिप कली हमाथ रागी डा रिब्लामी बेबीलोन डा पिप आ डोंइती चाक्तेक्म। मिनु मेकेर बेबीलोन डा पिपमी मेको कली आ सजाइ नेंपाइक्तु। 10 मेको रिब्लामी बेबीलोन डा पिपमी सिदकीयाह आ तौ आन कली मेको आ डोंइतीन साइक्तीमी। मिनु यहूदा डा ठेयब मुर नेल्ल आन कली यो रिब्लाम साइक्तीमी। 11 मिनु मेकोमी पिप सिदकीयाह आ मिक्च फेत्ताक्व। मिनु मेको कली कांसा के साडलोमी पाइक्ताक्म। मिनु मेको कली बेबीलोनमी लाइशशा मबेक्म सम्म चोक्शा वोइक्तु। येरमीया ३२:५

12 बेबीलोन डा पिप नेबुकदरेसरमी सासन पवा आ १९ बर्स ५ महिना १० नाक्ती पिप कली खाल पाइब आन कप्तान नेबुजरादान यरूसलेममी जाक्त। 13 मिनु मेकोमी परमप्रभु यावे आ खिं, पिप आ दरवार नु यरूसलेम डा खिं नेल्लेम मी सुइक्ताक्व। मेकोमी ठेयब खिं नेल्लेम मी सुइक्ताक्व। 14 मिनु पिप कली खाल पाइब आन कप्तान नु बाक्शो कल्दी डा लडाइ पाइब नेल्लेम यरूसलेम आ एर ओंथ बाक्शो गारो नेल्ल प्रेत्तेक्म। 15 मिनु पिप कली खाल पाइब आन कप्तान नेबुजरादानमी नेल्ल आन क्येडा पुडग, सहरम प्रोंइशा वोइशो मुरपुकी बेबीलोन डा पिप आ बाक्तीके प्रोक्शा जाक्दीशो मुरपुकी नु लीशो मार, मार, सेल्स जोक्ब मुर आन कली ग्याइशशा लाइक्तीमी। 16 तन्न

पिप कली खाल पाइब आन कप्तान नेबुजरादानमी रागी डा अडगुर रू नु अरु रूम गेय पचा कली, थम प्रुडग आन कली ला प्रोइशा वोइक्तीमी।

17 कल्दीपुकीम परमप्रभु यावे आ खिंम बाक्शो कांसा के थामपुकी, कांसा के ठेयब चिक्तीके बोस, मेको आ कांसा के नित्तीके लाइक्तेक्म। कल्दीपुकीमी मेको नेल्ल प्रोल्शा, बेबीलोन लाइक्तेक्म। येरमीया २७:१९-२२; १राजा ७:१५-३९; २राजा २५:१३-१७ 18 मेकोपुकीमी बोसपुकी, बेलचापुकी, सल्दो खोइक्तीक कांइची, अरु बोसपुकी, डाडु नु कांसा के बोस नेल्ल नु चढ़ेचा कली माल्शो मारेइ मारेइ लाइक्तेक्म। 19 पिप कली खाल पाइब आन कप्तानम सुन नु चांदीम सेल्शो आइक्च लोटापुकी, कोइला कुर पतीक, बोसपुकी, बत्ती दातीकपुकी, डाडु, तूचा थोव्रक चढ़ेशोनु माल्तीक बोसपुकी नेल्ल लाइक्तु। १राजा ७:१५-३७ 20 पिप सोलोमनम परमप्रभु यावे आ खिं कली सेल्पाइशो ठेयब थाम निक्शी, कांसा के ठेयब चिक्तीके बोस मेको आगाम बाक्शो १२ ओटा कांसा के ब्यफ नु मेको आगाम बाक्शो नित्तीके बाक्तेक्म। मेको आन कांसा नाक्ने मचाप्चा डा शुश बाक्त। 21 मेको थाम निम्फा १८, १८ कुबीत लाइशो, १२, १२ कुबीत ब्रेमशो नु आस थांइशो ४, ४ अडगुल बाक्ताक्स। मिनु आस आगा चहिं श्येत्थ बाक्ताक्स। कुबीत का ०.५ मिटर खोदेंशो बाक्ब। 22 मेको आ तार कांसा के पिया पाइशो बाक्त। मेको आ पिया ५ कुबीत लाइशो बाक्त। मेको आ पिया कांसा के जाली नु दारीम आ बुटामी एर ओंथ नेल्ल हिरशो बाक्त। मिनु अर्को थाम यो डोइती डा खोदेंशो पा सेल्शो बाक्त। 23 मेको आस एर ओंथ नेल्ल ९६ ओटा दारीम बाक्तेक्म। मेको आस एर ओंथ नेल्ल डा जाली कली हिरशो दारीम सहे का बाक्तेक्म।

24 मिनु पिप कली खाल पाइब आन कप्तानमी ठेयब चढ़ेब सेरायाह, मेको आ नोले डा चढ़ेब सेफन्याह नु लाप्चो खाल पाइब सां आन कली ग्याइशो लाइक्तीमी। 25 मिनु मेकोमी सहरम मेना सम्म लीशो लडाइ पाइब आन कली कोव्रब कप्तान का नु पिप कली अर्ती गेब ७ जना मुर आन कली ग्याइशो लाइक्तीमी। मेको रागीम लडाइ पाइब आन कली पुक्ब आन कप्तान आ ब्रेक्ब मुर नु सहरमी थिंशो अरु ६० जना वोइश मुर आन कली यो ग्याइशो लाइक्तीमी। 26 मिनु मेको पिप कली खाल पाइब कप्तान नेबुजरादानमी मेको आन कली लाइशो रिब्लामी बेबीलोन डा पिप आ बाक्तीकेम चाक्तीमी। 27 मिनु बेबीलोन डा पिपम मेको आन कली हमाथ रागी रिब्ला सहरम साइक्तु। मोपा मेकोपुकी यहूदा आ रागी रे ग्याइशो लाइक्चा पुंइसाक्म।

28 मिनु नेबुकदरेसरमी सासन पवा आ ७ बर्सम ग्याइशो लाइशो मुरपुकी हिक्शोनु, हजार सां २३ जना यहूदी बाक्तेक्म। 29 मेकोमी सासन पवा आ १८ बर्सम यरूसलेम रे ८ सहे ३२ जना आन कली ग्याइशो लाइक्तु। 30 मेकोम सासन पशो २३ बर्स दुम्मेनु, पिप कली खाल पाइब आन कप्तान नेबुजरादानमी ७ सहे ४५ जना यहूदी आन कली ग्याइशो लाइक्तीमी। मिनु मेको मुर नेल्ल पा ४ हजार ६ सहे जना बाक्तेक्म।

येहो-याकीन कली प्रोइशो
२राजा २५:२७-३०

31 यहूदा डा पिप येहो-याकीन कली ग्याइशो लाइशो ३७ बर्समी एवील-मेरोदक बेबीलोन डा पिप दुम्त। मेको आ सासन पशो १२ महिना २५ नाक्ती दुम्मेनु, मेकोमी यहूदा डा पिप येहो-याकीन कली चोक्तीक रे प्रोइपाइक्तु। 32 मेकोमी मेको नु रिमशो पा लोव्र पा बेबीलोनम आं नु बाक्शो पिप नेल्ल आन क्येडा ठेयब सेल्शा, मेको कली मान गेशा वोइक्तु। 33 मोपा येहो-याकीनमी आ जेल्खानम फेक्तीक वा प्रुइशो, आ लीशो नाक्ती नेल्ल पिप नु जशा बाक्शा पाप्तु। 34 बेबीलोन डा पिपमी येहो-याकीन कली नाक्त किंत किंत मेको मबेक्म सम्म आ माल्शो मारेइ मारेइ गेप्तु।

बिलाप

ब्रेक्ब मुर: एको किताब येरमीयामी ब्रेक्शो बाक्ब।

गेना ब्रेक्शो: एको किताब ५८७-५८६ बि. सी. परमप्रभु यावे आ खिं नु यरूसलेम खतम दुम नोले ब्रेक्शो बाक्ब।

मारदे ब्रेक्शो: येरमीया आ सेल्शो बिलाप ५ ओटा कुम्सो बाक्नीम। मेको कुम्सोपुकीम मार लोत्र बाक्ब दंशा हना:

१. डोंइती डा लोत्र यरूसलेम सहर वोंइश बेक्शो मीश खोदेशो दुम्शो बाक्ब।
२. आ नोले डा लोत्र परमप्रभु यावे आ निसाफ पचा आ पर्बम बाक्ब।
३. नोले डा लोत्र ब्रेक्बमी आंम आ पर्बम ब्रेक्ब।
४. नोले डा लोत्र लेंशा ठेयब श्येत आ पर्बम बाक्ब।
५. मिनु नेल्ल क्येडा नोले डा लोत्र “परमप्रभु, गे लेत्चा गेयीनी” दे पुंइतीक बाक्ब।

यरूसलेममी “वारच पने” दे पुंइशो

१ मेको सहरम गिश श्येतथ दुम्मे। डोंइती मेकेर शुश मुर बाक्तेक्म। मेको आ वोंइश बेक्शो मीश मुर खोदेशो दुम्त। मेको डोंइती रागी रागी आन दातेमी ठेयब बाक्त। मेको रागी पिप आ तमी खोदेशो बाक्त। मुल मेको सहर वाइल खोदेशो दुम्त। येरमीया ५१:५ २ मेको नाक्दो हिशेक पा डाक्ब। आ प्रेक्क यिना यिन बाक्नीम। मेको आ दाक्शो मुर आन दाते डा सुइम मेको कली आ थुं बारपाइक्चा डा लोत्र मपाइनीम। आ वारच नेल्लेम मेको कली प्रोंइतेक्म। मुल मेको आ जोरी सत्रु दुम्तेक्म। भजन संग्रह ६९:२१ ३ यहूदा श्येत जशा, ग्याइशशा लाइक्चा पुंइसाक्व। मुल श्येत पा गेय पाइब दुम्त। मुल मेको रागी रागी डा मुर आन दातेमी बाक्ब। नाइक्चा कली बाक्तीक मबा। आ कली खेदा पाइबपुकीमी मेको कली श्येतमी ग्याइशशा लाइक्तेक्म। ४ सियोन लतीक लां रोंका पाइनीम। मारदे हना सुइमी चाड मानेचा कली मेकेर रे मगाक्नीम। सहर डा ठेयब लाप्चो नेल्ल श्येतथ बाक्नीम। आ चढेबपुकी हुकयी पाइनीम। आ मीश आल सुर्ता पाइनीम। मिनु सहरम श्येत जशो बाक्ब। ५ मेको आ जोरी सत्रु आ होत्रप दुम्तेक्म। मेको आन माल्शो शुश ताइनीम। मारदे हना परमप्रभु यावेमी मेको आ शुश हेंथे पशो तशा, यरूसलेम कली श्येत गेप्टु। मेको आ आल ग्याइशशा लाइक्चा पुंइसीशा, आन जोरी सत्रु आन डोंइती लाम्तेक्म। ६ सियोन आ तमी रे पा आ मान पचा पुंइसीतीके नेल्ल लने थुम्तु। आ पिप आ तौपुकी जोतीकेम थिशो रोकोश खोदेशो दुम्तेक्म। मेको बोल मपाइशो दुम्शा, आन कली खेदा पाइब आन डोंइती प्रोक्ना प्रोक्न बाक्नीम।

७ यरूसलेममी ठेयब श्येत जतीक नु सुर्ता पतीक नाक्ती जाक्चा क्येडा डोंइती आंम के बाक्शो शोप नेल्ल मिम्ब। मेको आ मुर आन जोरी सत्रु आन गुइमी गेचा पुंइसीची ना सुइमी मेको कली वारच मपाम। आ जोरी सत्रुम मेको आ श्येत तशा शुक्शी पाम्तेक्म। ८ यरूसलेममी ठेयब पाप पाप्टु। मोपतीके मेको शुक्शी पाइक्चा पुंइसाक्व। डोंइती मेको कली मान पाइब नेल्ले मुल महिक्नीम। मारदे हना मेकोपुकीमी मेको कली शिश्रा ताम्तेक्म। मेको आंमान हुकयी पा आ कुल खुइक्ब। ९ मेको आ ग्रांग्रा दितीके आ गुनेमी केम्साक्व। मेकोमी नोले डा नाक्त ममिम्त। मेको आ तशो श्येत हिंचा डा बाक्त। आ थुं बारपाइक्ब सुइ मबाक्म। मेकोमी “परमप्रभु यावे, आं श्येत कोत्रडीन। आं जोरी सत्रुमी आं कली ग्रातेक्म।

१० आ जोरी सत्रुमी आ शोप नेल्ल रोइक्ताकयीमी। गे मेको आन कली इन बाक्तीके खिंम ओत्रचा मगेतीनी हना यो, यरूसलेममी रागी रागी डा मुर इन खिं ओत्रचा ताम्तेक्म। येरमीया ५२:१७-१९; ब्यवस्था २३:४ ११ मेको आ मुर नेल्ल हुकयी पा, अन्न मालना मालन गाक्नीम। लेंशा बोल्यो दुम्चा कली आन शोप लेयनीम। परमप्रभु यावे, मुल आं कली कोत्रडीन। गो महिक्सीशो दुम्ती” देंती।

१२ गे एको लां रे पा लाइब तशा, आन पर्बम मारेइ ममिम्नीनी? एर ओंथ नेल्ल कोत्रडीन। आं श्येत क्येडा यो अरु हिंचा डा श्येत बाक्बा? परमप्रभु यावेमी आ शुश गाइक्तीकेमी आं कली मेको श्येत गेती। १३ मेकोमी इर रे मी सोइक्ताक्व। मिनु आं रुश आगा ओत्रपाइक्ती। आं खोइल कली ग्याइल दाइशशा रेप्पाइक्ती। आं कली आ डोंइती रे तिलती। मेकोमी नेल्ल नाक्त आं कली मुर मबाक्तीके नु बोल मपाइशो सेलती। १४ मेकोमी आं हेंथे पतीके जुवा खोदेशो सेलतु। मिनु मेको आ गुइमी फ्रेंसाक्व। मेको आं बला तारी शुश हेल्शो बाक्ब। मोपा आं बोल ग्युम्त। मिनु परमप्रभुमी आं कली आं ग्राने मचाप्चा डा मुर आन गुइमी गेती। १५ परमप्रभुमी आं दाते डा लडाइ पाइब नेल्ल आन

कली प्रोइतु। मुल मेकोमी आं कली वारच मपथु, आ ठिटा वोंइश मुर नेल्ल आन कली साइक्तु। परमप्रभुम अडगुर खाक्शो खोदेशो पा यहूदा डा कन्ने मीश आल, यरूसलेम कली खाक्शो बाक्ब। यसैया ६३:३ 16 गो मार कली डाक्नुडा, मार कली आं प्रेक्क यीनीम देशा हना, आं कली लेम्ब नु आं थुं बारपाइक्ब आ क्येडा डोन बाक्नीम। आं आल लने थुम्तेक्म। मारदे हना आं जोरी सत्रु आं क्येडा बोल्यो बाक्तेक्म।

17 सियोनमी पुंइचा कली आ गुइ दिंताक्व। तन्न आ थुं बारपाइक्ब सुइ मबाक्म। परमप्रभु यावेमी “याकूब आ नेक्था डा मुर आ जोरी सत्रु दुम्चा माल्नीम” दे अरेप्टु। मिनु मेको आन दातेम यरूसलेम ग्रांरा दिचा डा दुम्त। येरमीया १:८

18 परमप्रभु यावे ठीक पाइब बाक्ब। मारदे हना गो आ लोत्र काइ मटीब दुम्ती। तन्न गे जात जात डा मुर नेल्ल नेनीन। आं श्येत कोव्रडीन। आं मीश आल नु ठिटा वोंइश आल नेल्ल ग्याइशशा लाइक्चा पुंइसाक्म। येरमीया ३:४२; येरमीया ५:१६ 19 गो आं दाक्शो मुर आन कली ब्रेत्ताक्ड। तन्न मेकोपुकीमी आं कली प्रोइतीमी। आं चढेब नु खाल्पा आन बोल लेप्पाइक्चा कली जचा थोव्रक मालन मालना सहरम बेक्तेक्म। 20 “परमप्रभु यावे कोव्रडीन, गो शुश श्येत जाता। गो इन देशो मटीब दुम्तीके आं थुं चोती। आं थुं साप्पा सेक्बेर पाइब। लाडगाम तरवारमी साइक्ब। मिनु खिं आगाम बेक्तीक बाक्ब। 21 मुरपुकीमी आं हुकयी पशो नेतेक्म। आं कली थुं बारपाइक्ब सुइ मबाक्नीम। आं जोरी सत्रु नेल्लेमी आं श्येत जशो आ पबर्म नेतेक्म। आं कली मोदेशो दुम्शो तशा ग्येरसाक्म। गे इन देशो नाक्त जाक्ल। मेकोपुकी यो आं खोदेशो पा श्येत जामेक्ल। येरमीया ४:२१ 22 मेको आन मरिम्शो पशो नेल्ल इन डोंइती बाक्ल। मिनु गे आं हेंथे पशो आ पबर्म आं कली पशो खोदेशो पा मेको आन कली यो पतीन। गो शुश हुकयी पाइक्नुड। आं थुं लुक्च लत” देंत।

2

सियोन सुर्ता पशो

1 परमप्रभु गाइशशा, सियोन आ तमी कली मुने तोक्तु। इस्राएल आ दारस कली सरीड रे पा रागीमी तोक्तु। आ गाइशशो नाक्ती आंम खोइल वोइक्तीक सियोन कली यो प्रेंताक्व। भजन संग्रह १३२:७-८ 2 परमप्रभुमी शिशी मपथु याकूब आ बाक्तीक नेल्ल खतम सेल्लु। मोपा चुरशा यहूदा आ तमी आ गारो हिरशो सहर नेल्ल खतम सेल्लु। मेकोमी मेको राज्य नु आ सासन पाइब आन कली मान मताइब, आइक्च सेल्लु। 3 मेकोमी शुश चुरशा, इस्राएल डा सक्ति नेल्ल खतम सेल्लु। मेकोमी आ जोरी सत्रु आन डोंइती सियोन कली वारच पचा प्रोइतु। मेको याकूब आ बाक्तीके आ एर ओंथ नेल्ल ग्राव गु दाक्ब मी खोदेशो दुम्त। 4 परमप्रभुमी सियोन आ जोरी सत्रु खोदेशो दुम्शा, आ लिब्रा कीतु। आ जोरी सत्रु खोदेशो दुम्त। आंइ दाक्शो नेल्ल आन कली साइक्तु। परमप्रभुमी आ चुरशो मी खोदेशो पा सियोन आ तमी आ ताम्बु तारी मोइक्तु। 5 मुल परमप्रभु सियोन आ जोरी सत्रु खोदेशो दुम्त। मेकोमी इस्राएल कली खतम सेल्लु। आ दरवार नेल्ल आन कली खतम पोक्तु। आ गारो डा लाइशशो खिं नेल्ल प्रेत्तु। मिनु यहूदा आ तमी कली शुश रोंका नु हिशेक पपाइक्तु। 6 मेकोमी आंम ताम्बु कली रू डा कटेरा खोदेशो पा प्रेत्तु। मेकोमी आ बाक्तीके खतम सेल्लु। परमप्रभु यावेमी सियोनम चाड नु नाइक्तीक नाक्ती मानेतीक प्रोइतु। आ शुश गाइशशोम पिप नु चढेब नेल्ल आन कली मुने तोक्तु। अय्युब २:१३; येरमीया ५:१२ 7 परमप्रभुम आंम कली चढेतीक नु आ बाक्तीके निम्फा प्रोइतु। मेको आन दरवार डा गारो जोरी सत्रु आन गुइमी गेप्टु। मोपा मेकोपुकीमी परमप्रभु यावे आ खिंमी चाड डा नाक्त खोदेशो पा रेयके पाम्तेक्म। 8 परमप्रभु यावेमी सियोन आ तमी आ गारो प्रेत्चा कली मिम्ताक्व। मेको आ तारी पुक्तीके कीतु। मेकोमी खतम सेल्चा कली आ गुइ मतेक्म। मेकोमी गारो नु आ बोल्यो सेल्लतीके निक्शी कली रोंका पपाइक्तु। मिनु मेको कालेक्म ब्रेत्ताक्स। २राजा २१:१३ 9 मेको आ ठेयब लाप्चो खपीम दोक्तेक्म। मेकोमी आ आगलो जिक्शा खतम पोक्तु। मेकेर डा पिप नु आन तौ नेल्ल रागी रागी डा मुर आन दातेमी बाक्नीम। मेकेर लां कोंइब परमप्रभु यावे आ अरेशो मबाक्ब। मिनु परमप्रभु यावे आ लोत्र पाइबपुकीमी परमप्रभु यावे रे पा मारेइ लोत्र मताइनीम। 10 सियोन डा खाल्पा खपीम निशशा, सिक्सी पा बाक्नीम। मेकोपुकीमी आन पियामी फुरक फुंइसीनीम। मिनु भाडग्रा फेक्शा बाक्नीम। यरूसलेम डा मीश आलपुकीमी आन पिया खप सम्म बाप्पाइशशो बाक्नीम। 11 गो डाक्ना डाक्न बाक्नुड। आं थुं चोइब। आं थुं खाइक्ब। मारदे हना आं मुर खतम दुम्तेक्म। आल नु दूध तूब आलपुकी सहर डा लांम शोव्रलु बेक्नीम। 12 मेकोपुकीमी आन ममा आन कली “जचा तूचा थोव्रक ते बाक्म” दे हिल्लो पाइनीम। मेकोपुकी सहर डा लांम गार दुम्शो लडाइ पाइब खोदेशो पा थाइनीम। मिनु आन ममा आन थुकुम बेक्नीम। 13 ए यरूसलेम आ तमी,

गो इ पर्वम मार देंडा? गो इ कली मार नु थापु? ए सियोन आ कन्ने तमी इ थुं बारपाइक्चा कली इ कली मार नु थापु? इ श्येत समुन्द्र खोदेशो पा ठेयब बाक्ब। सुइम इ कली सापाइक्ने मचब। 14 इ परमप्रभु यावे आ लोव्र पाइब आन लोव्र नेल्ल जोल नु शोर गाक्शो बाक्तेक्म। मेकोपुकीमी इ कली रिम्शो दुम्ल, दे इ मरिम्शो पशो आ पर्वम लोव्र मपाम। तन्न मेकोपुकीमी इ पर्वम पशो लोव्र नेल्ल जोल नु दूली लां कोइब बाक्त। येरमीया १४:१४-१६; येरमीया २३:१६-२२ 15 इ नेक्था रे पा लाइब नेल्लेमी इ कली तशा शुक्शी पाइनीम। यरूसलेम आ तमी तशा शुक्शी पा आन पिया हिम्नीम। मेकोपुकीमी “एको सहर कली नेल्ल क्येडा दारशो नु रागी डा नेल्ल क्येडा दाक्शो सहर देंनीमी, ममाइ डा?” देंनीम। भजन संग्रह ४८:३; इजीकीएल १६:१४ 16 इ जोरी सत्रु नेल्लेमी इ पर्वम मरिम्शो लोव्र पा शुक्शी पाइनीम। मेकोपुकीमी आन गाइक्तीकेमी “गो मेको कली खतम सेल्लतक। एको नाक्ती कोव्रचा कली रिम्ताक्क। मुल गो ताइतक” देंनीम। 17 परमप्रभु यावेमी मार मिम्ता नु डोंइती मार पाइनुड देमे, मेको पापु। साइ डोंइती हिंच कोइशा देशो लोव्र मुल पापु। मेकोमी शिशी मपथु, नेल्ल खतम सेल्लतु। मिनु इ जोरी सत्रु आन कली इ पर्वम ग्येरपाइक्तु। इ जोरी सत्रु आन सक्ति ठेयब सेल्लतु। 18 गे सियोन आ तमी, आ गारो परमप्रभु कली ठेयब सेंदा पा पुनो। इ प्रेक्क खोला खोदेशो पा नाक्दो नाक्त यिपतो। याम का यो मनाइसो। शुश डाक्को। 19 बोक्को। नाक्दो डाक्शा पुनो। खाल पाइब आन गेय पची ना यो मो पावो। इ थुं डा श्येत परमप्रभु आ डोंइती ब्वाक्कु खोदेशो पा लुक्तो। लांमी बाक्ब इ शोव्रलु बेक्शो आल आन पर्वम इ गुइ परमप्रभु गे पोक्शा पुनो।

20 “परमप्रभु यावे कोव्रडीन। गे सु कली ओदेशो पा श्येत गेनी। मार मीश मुरपुकीमी आंम आल आन कली ब्वचा माल्नीमी? मार इन कली चढेब नु इन लोव्र पाइबपुकी इन बाक्तीकेमी साइक्चा पुंइसीचा माल्नीनी? ब्यवस्था २८:५३-५७; येरमीया १९:९ 21 ठिटा नु खालपापुकी लांम गोल्लशो बाक्नीम। आ ठिटी मीश मुर नु ठिटा वोंइश मुर तरवारमी साइक्चा पुंइसाक्म। गे इन गाइशो नाक्ती मेको आन कली शिशी मपाइक्थु साइक्तीनी। 22 गे एर ओंथ डा आं जोरी सत्रु आन कली चाड मानेचा कली खोदेशो पा ब्रेत्ताक्नी। परमप्रभु यावे आ गाइशो नाक्तीमी सुइ मुर प्रोक्शा ब्रोंइचा मताइनीम। गो आं थिशो नु कोल्पाइशो आल आन कली आं जोरी सत्रुमी साइक्तेक्म” देंती।

3

मुर आन पर्वम रोंका पशो

1 परमप्रभु आ चुरशोमी आं कली कोक्केम तुप्ती। 2 मेकोमी आं कली खेदा पा छेडछेड रे छिडछिडमी गाक्पाइक्ती।

3 मेकोमी नाक्त किंत किंत आं कली श्येत गेना गेन बाक्ब।

4 आं रां नु कुशुल नेल्ल सोव्रपाइक्ती। मिनु आं रुश जिक्तु। 5 मेकोमी आं कली सुर्ता पतीक नु श्येत जतीकेम पुम्शा गिल्पाइक्ती। 6 मेकोमी साइ नेसी डा बेक्शो मुर आन कली खोदेशो पा आं कली छिडछिडमी बाक्पाइक्ती।

7 मेकोमी आं कली प्रोक्ने मचबल, दे चोक्ती। आं कली हेल्शो साडलोमी पाइक्ताक्यी। 8 गो “वारच पाइय्यीनी” दे शुश ब्रेत्ती। तन्न आं ब्रेशो नेंशा यो सिकसी पा बाक्त। भजन संग्रह २२:३; भजन संग्रह ६९:४ 9 मेकोमी आं लां ठेयब फुल्लुमी तेक्तु। मिनु आं लां हिरशो सेल्लतु।

10 मेको ग्राम्चा कली बाप्शा बाक्शो वां खोदेशो बाक्ब। मिनु खुइशशा बाप्शा बाक्शो गुप्स खोदेशो बाक्ब।

11 मेकोमी आं कली आं लां रे पा लाइशशा, बेदर किदर पोक्ती। मेकोमी आं कली सुइ मपाइशशा सेल्लती। 12 मेकोमी आ लिब्रा कीशा, आं कली आप्ती। 13 मेको आ ब्रामी आं लुडगीर ख्रित्ताक्यी। 14 आं मुर नेल्ले आं पर्वम रिन्नीम। मेकोपुकी नाक्त किंत किंत आं पर्वम शुक्शी पा कुम्सो पाइनीम। अय्युब ३०:९ 15 मेकोमी आं थुं खाइक्पाइशशा, आं कली कशो तूचा थोव्रक तूपाइक्ती।

16 मेकोमी आं कली फुल्लु जपाइशशा, पुलुमी निप्पाइक्ती। 17 गो थुं नाइशशा बाक्चा मताइक्नुड। ग्येरशा बाक्चा मार बाक्मे, मेको प्रेंताक्ड। 18 मोपतीके गो “आं दारस नेल्ल जाम्शा लत। गो परमप्रभु यावे रे ताइनुड, दे आस पशो यो नेल्ल जाम्शा लत” देंती।

19 आं श्येत आ पर्वम मिम्तीके नु आं खिं मबाक्तीके खाइल खोदेशो पा कशो दुम्ती। 20 गो मेको गेना हना यो मिम्नुड। मोपतीके आं थुं लुक्च लत। 21 तन्न गो परमप्रभु आ लोव्र फुक्शा, आ लां कोव्रनुड। 22 परमप्रभु यावे आ गेना हना यो दाक्तीक गेनायो मनुप्ब। आ शिशी गेनायो मनुप्ब। नेहेम्याह ९:३१

23 मेको सुनी कुस कुस नक दुम्शो बाक्ब। इन देशो गेना हना यो थमा बाक्ब। 24 आं थुमी “परमप्रभु यावे आं भाग बाक्ब। मोपतीके गो मेको कली आस पाइनुड” देंती। भजन संग्रह १६:५; भजन संग्रह ३:२६ 25 परमप्रभु यावेमी

आ कली रिम्ब आन कली रिम्शो पाइब। सुमी मेको कली माल्नीमी, मेको आन कली रिम्शो पाइब। 26 सिक्सी पा परमप्रभु यावे आ श्येत रे प्रोंइतीके रिम्चा रिम्शो दुम्ब। रोमी ८:२५ 27 ठिटा बाक्शो ना आंम जुवा कुरचा रिम्शो दुम्ब। 28 परमप्रभुमी मुर कली आ का ला सिक्सी पा बाक्चा गेप्टु हना, मेको कली रिम्शो दुम्ब। 29 मुरुमी आ शोव खपीम वोदल। मोपा मेको के आस बाक्बा को? 30 मेको आ चोवचो राप्चा गेशा, शुश शुक्शी पाइक्चा पुंइसीब दुम्ब। मती ५:३९

31 परमप्रभुमी मुर आन कली आ डोंइती रे गेना हना यो मतिल्लब। यसैया ५४:८ 32 मेकोमी श्येत गेप्टु हना यो, लेंशा शिशी पाइब। मेको आ गेना हना यो दाक्तीक थम ठेयब बाक्ब। 33 मारदे हना मेकोमी सुइ मुर आन कली श्येत गेचा मदाक्ब।

34 रागी डा जेल्खानम चोक्चा पुंइसीशो नेल्ल आन कली खोइलीमी दिम्नीम। 35 नेल्ल क्येडा ठेयब आ डोंइती मुर आन कली ठीक निसाफ मगेथु, दूली पाइनीम। 36 मुर आन कली दूली निसाफ पाइनीम। परमप्रभुमी मेको नेल्ल मताइबा डा?

37 परमप्रभुम मअरेशो गेय सुमी अरेने नु पपाइक्ने चाप्बा डा? यसैया ४५:७; आमोस ३:६ 38 मार नेल्ल क्येडा ठेयब आ शोव रे रिम्शो नु मरिम्शो लोव मगूबा डा? 39 मारदे मुरुमी आंम पाप आन पर्बम सजाइ तामेनु, गन गन पाइनीमी?

40 गो आंम कली नाक्शा कोवशा, परमप्रभु यावे गे लेत्नय। 41 गो आंइ थुं नु गुइ स्वर्ग डा परमप्रभु गे पोक्क्य। 42 गोपुकीमी हेंथे गाक्शा, इन देंशो काइ मटिक। मिनु गे आंइ कली माफ मगेनी। भजन संग्रह १०६:६

43 गे चुरशा आंइ कली खेदा पाइतीनी। काइ शिशी मपथु साइक्तीनी। 44 आंइ पुंइशो इन बाक्तीक मजाक्चा डा पा, गे गोस्सुमी गिल्साक्नी। 45 गे आंइ कली शुश जात डा मुर आन दातेमी ग्रांघ्रा दिशो सेलतीनी।

46 आंइ जोरी सत्रु नेल्लेम आन शोव रोक्शा शुक्शी पाम्तेक्म। 47 शुश हिंचा डा मरिम्शो दुम्तीक आंइ तार जाक्त। 48 आं मुर नेल्ल खतम दुम्शो तशा, गो शुश डाक्ती।

49 गो डाक्स डा डाक्स बाक्नुड। नाइक्चा मताइनुड। 50 परमप्रभु यावेमी स्वर्ग रे पा उइ मकोवडा सम्म मो पाइनुड। भजन संग्रह १०२:२०-२१ 51 आं सहर डा मीश आल आन कली मरिम्शो दुम्शो तशा आं थुं खाइक्ती।

52 आं जोरी सत्रुमी आं कली मोशीन चिक्ब कली खोदेंशो पा सिखार ग्यारतेक्म। 53 मेकोपुकीमी आं कली सेसीन खाल्टामी ताइक्ताक्कीमी। आं कली फुल्लुमी यो आप्तीमी। 54 ब्वाक्कुम आं पिया सम्म सुम्ती। मिनु गो “मुल आं ब्रोंइस ओशोन बाक्माक्त।

55 परमप्रभु यावे, शुश लुक्च लशो खाल्टा रे पा गो इन नें थोवता। 56 गे आं थोशो लोव नेंतीनी। आं कली प्रोंइचा कली आ थोशो लोव नेनीन। इन नोफा मसुने। तन्न आं कली श्येत रे प्रोनीन। 57 गो इन कली थोडानु, गे आं नेक्था जाक्तीनी। मिनु आं कली ‘महिनो’ देंतीनी। 58 परमप्रभु गे आं कली वारच पाइक्तीनी। मिनु बेक्चा रे प्रोंइतीनी। 59 परमप्रभु यावे, गे आं कली पशो मरिम्शो नेल्ल ताइतीनी। आं कली निसाफ गेयीनी। 60 मेकोपुकीमी आं कली मरिम्शो पचा कली सल्ला पशो नेल्ल ताइतीनी।

61 परमप्रभु यावे, गे मेको आन आं कली हिंच कोइशा पशो लोव नेल्ल नेंतीनी। 62 मेकोपुकी नेल्ल नाक्त आं पर्बम खुइशो लोव पा, नोफा मुइक्मुतेक्मे। 63 मेकोपुकी निस्सामानु, बोक्मानु, आं पर्बम शुक्शी पा कुम्सो पाइनीम। येरमीया ३:१४

64 परमप्रभु यावे, मेको आन पशो कोवशा, मेको आन कली क्येक्क लेत्तीन। येरमीया १:२१; भजन संग्रह १३७:८; १पत्रुस २:२३; १पत्रुस ३:९ 65 मेको आन थुं सुम्शा गेन। इन सराप मेको आन कली रल। 66 मेको आन कली गाइशशा खेदा पन। परमप्रभु यावे, सरीड आगा रे मेको आन कली खतम पोक्कीन” देंती।

4

सियोन कली सजाइ

1 सुनमी आं दारस नेल्ल साम्तु। क्येख सुन मदारशो दुम्त। शुश क्येट लाइब हीरा नेल्ल लां मेर फ्राइसीशो बाक्नीम। 2 सियोन आ दाक्शो आलपुकी, डोंइती सुन खोदेंशो मिम्शो बाक्तेक्म। मुल खप के ग्योब खोदेंशो दुम्तेक्म। 3 सिवारेम आन चाइक्ब आन कली दूध तुंइनीम। तन्न आं मुरपुकी काइ मरिम्शो दुम्तेक्म। मेकोपुकी गोरशो रागीम बाक्ब ठेयब चिक्ब खोदेंशो दुम्तेक्म। अय्युब ३०:१४-१६ 4 दूध तूब आल आन लें शुश तूतू दाक्शा, आन कुंकुमी खोक्ताक्व। आलपुकीमी जचा थोवक पुंइनीम। तन्न सुइमी मेको आन कली मारेइ मगेनीम। 5 ब्रोंवशो ब्रोंवशो जाइबपुकी मुल

लां मेर बेक्नीम। दारशो वासी फेक्शा कोल्शो मुल पुलु ताइक्तीकेम बाक्नीम। 6 मारदे हना आं मुर आन कली गेशो सजाइ सोदोम कली गेशो सजाइ क्येडा ठेयब बाक्त। मेको कली याम कामीन लोकचा पुंडसाक्व। उत्पत्ती १८:२०; उत्पत्ती १९:२४-२५

7 मेकेर पिप आ तौपुकी फु नु दूध क्येडा बुश बाक्तेक्म। मेको आन रां मानीक हीरा क्येडा लल बाक्तेक्म। मेको आन चां नीर हीरा खोदेशो बाक्तेक्म। 8 मुल मेको आन रां कुंकी क्येडा क्येर दुम्तेक्म। मेको आन कली लां मेर यो सुइमी मतुइक्नीम। मेको आन कुशुल रुशेम केषो बाक्ब। मेकोपुकी शी खोदेशो पा सोव्रशो बाक्नीम। 9 जचा मतथु शोव्रलु पा बेक्बपुकी क्येडा तरवारमी क्योरशा साइक्चा पुंडसीबपुकी ग्येरसीशो बाक्नीम। रू डा फल मथित्थु, मेकोपुकी सोव्रशा लाइनीम। 10 ब्रेम्शो थुं पाइशो मीश मुरपुकीमी आंम आन आल क्येम्तेक्म। मेको आन जचा थोव्रक दुम्त। गो आ मुर आन कली खतम सेल्टीके मोदेशो दुम्त। येरमीया २:२० 11 परमप्रभु यावेमी आ चुरशो नेल्ल कोइताक्व। मेकोमी आ हिंचा डा पा गाइशो नेल्ल कोइताक्व। मोपा सियोनम मी सुइक्ताक्व। मिनु मेकेर डा जग नेल्ल दाक्तु।

12 आ जोरी सत्रु यरूसलेम डा ठेयब लाप्चो रे पा ओव्रनीम, देशो रागी नेल्ल डा पिप नु मेकेर बाक्ब मुर सुइमी यो थमा सुइक्ने मचबेम। 13 परमप्रभु यावे आ लोव्र पाइब आन पाप नु चढेब आन मरिम्शो पशो आन पर्बम मो दुम्शो बाक्त। मेकोपुकीमी सहर आ दातेम ठीक पाइब मुर आन कली हुश खाक्श पोक्तेक्म। 14 मेकोपुकी मिक्च मताइब खोदेशो पा लां मेर हिरसाक्म। मेकोपुकी हुश लुम्सीशो बाक्तेक्म। मेको आन वा सुइम मथिचा डा बाक्त। 15 मुरपुकीमी मेको आन कली “लने, ए ग्रान्रा दिशो मुर आंइ कली मथिने” दे ग्रीनीम। मोपतीके मेकोपुकी प्रोक्ब नु हिरब मुर दुम्तेक्म। रागी रागी डा मुरपुकीमी “मुल मेको गोपुकी नु बाक्चा मताइनीम” देतेक्म। लेवी १३:४५ 16 परमप्रभु यावेमी मेको आन कली मोपा ब्रपाइक्तीमी। मुल लेंशा मेको आन कली शिशी मपाइक्ब। सुइमी चढेब आन कली मान मपामे। खाल्पा आन कली यो महिक्गेम। येरमीया २:६; येरमीया ५:१२; लेवी १९:३२

17 वारच पाइब जाक्बा, कों देशा लां कोव्रशा मिक्च चोप्तु। रागी कामी आंइ कली वारच पाइबा कों, दे कोव्रशा बाक्तक। तन्न मेकोमी आंइ कली प्रोइने मचब। 18 मुरपुकीम आंइ नोले खोइक्तेक्म। मोपतीके गो आंइ लांमी गाक्ने मचाप्क। आंइ बेक्तीक नाक्ती जाक्त। आंइ नाक्त नुप्शो बाक्तेक्म। गो बेक्चा चिक्तक। 19 आंइ कली खेदा पाइबपुकी सरीडम बेरब ककाकुली क्येडा यो रीब पा जाक्तेक्म। मेकोपुकीमी आंइ कली पहाडम खेदा पाम्तेक्म। गोरशो रागीमी बाप्शा बाक्तेक्म। 20 मेकोपुकीमी परमप्रभु यावे आ तेल लुक्शो, आंइ कली ब्रोंइचा गेब कली ग्याइक्ताक्म। मेको आ पर्बम गोपुकीमी “मेको आ वांकुम रागी रागी डा मुर आन दातेम बाक्नीकी” दे मिम्शो नकी। 21 एदोम आ तमी ग्येरसो। गे ऊज रागीम बाक्नेवे। तन्न गे यो मेको श्येत डा कचौरा तूचा माल्नेवे। गे दुक्नेवे। मिनु शिन्ना सेल्सीनेवे। येरमीया ३:६४; भजन संग्रह १३७:७; येरमीया २५:१५, २१ 22 सियोन आ तमी इ हेंथे गाक्शो डा सजाइ नुप्त। मेकोमी इ कली ग्याइशो लाइशो रागी रे गुंडब। तन्न एदोम आ तमी, इ हेंथे गाक्शो डा सजाइ ताइनेवे। मेकोमी इ पाप कोइब। यसैया ४०:२; यसैया ३४:८-१०; इजीकीएल ३५:१४-१५

5

शिशी पन, दे प्रार्थना पशो

1 मिनु “परमप्रभु यावे, गो आंइ कली मार दुम्शो बाक्बा, मेको मिम्तीन। आंइ कली मरिम्शो पशो कोव्रडीन। 2 आंइ थेरशो रू अर्को रागी डा मुर आन के दुम्त। आंइ खिं यो अर्को रागी डा मुर आन के दुम्तेक्म। 3 गोपुकी रोम रोइक्च दुम्तक। आंइ ममा वोंइश बेक्शो मीश मुर खोदेशो दुम्तेक्म। 4 गोपुकीमी तूचा ब्वाक्कु यो ग्याप्चा माल्नीकी। शी यो ग्याप्चा माल्नीकी। 5 गोपुकी जुवा लाप्शो खोदेशो पा आंइ कली खेदा पाइनीम। गोपुकी दशो बाक्नीकी। तन्न नाइक्चा मताइनीकी। प्रस्थान २०:५; येरमीया ३१:२९ 6 गो इजीप्त नु अस्सुर रागी नु जचा थोव्रक तचा कली सल्ला पाइतक। 7 आंइ किकी पिपीमी पाप पाम्तेक्म। मिनु बेक्तेक्म। गोपुकी मेको आन हेंथे पशो राइतक। 8 वाइलपुकीमी आंइ कली हुकुम पाइनीम। आंइ कली मेको आन गुइ रे पा प्रोंइब सुइ मबाक्नीम। 9 गोपुकीमी आंइ जचा थोव्रक बेक्चा डा गोरशो रागीम लशा, चाक्चा माल्नीकी। 10 गो शोव्रलु बेक्तीके आंइ कुशुल चुप्लु खोदेशो पा होश दुम्त। 11 सियोनम मीश मुर आन कली बिथोलो पाइनीम। यहूदा सहरम कन्ने मीश आल आन कली बिथोलो पाइनीम। 12 मेकोपुकीमी सासन पाइब आन कली क्युक्शा साइक्तेक्म। खाल्पा आन कली मान मपामे। २राजा २५:१९-२१ 13 ठिटापुकीमी श्येत पा यात हिल्चा माल्नीम। वोंइश आलपुकीमी शी कुरशा गोल्चा चिक्शा गाक्नीम। 14 खाल्पापुकी सहर डा ठेयब लाप्चोमी ग्रुम्शा बाक्चा प्रोंइतेक्म। मिनु ठिटापुकीमी बाजा ताप्चा प्रोंइतेक्म। 15 आंइ थुं रे पा ग्येरशा बाक्तीक जाम्त।

गो आंइ सिल पतीक नेल्ल रोंका पतीके दुम्त। 16 सिरपेच आंइ पिया रे दोक्त। आबी, गो पाप पाइतक। येरमीया १३:१८ 17 मोपतीके आंइ थुं खाइक्त। मिनु आंइ मिक्च ब्रा ब्रा दुम्त। 18 सियोन डांडाम श्येत दुम्त। मेको सिवार आन बाक्तीके दुम्त। 19 तन्न गे, परमप्रभु यावे गेना हना यो सासन पाइनीनी। इन सासन पतीके नेल्ल पाला सम्म लीब। 20 गे मारदे आंइ कली प्रेंदीनी? गे मारदे आंइ कली इश डा नाक्त सम्म प्रोंइनी? 21 परमप्रभु यावे, आंइ कली इन गे लेप्पाइक्की। मिनु गो थमा पा इन गे लेत्नीकी। आंइ नाक्त डोंइती डा खोदेशो सेलीन। भजन संग्रह १२६: 22 गे आंइ कली थमा पा मप्रोंइशो बाक्तीनी हना नु आंइ तशा शुश मगाइशो बाक्तीनी हना, मोदेशो दुम्ल” दे पुंइतक।

इजीकीएल

ब्रेक्ब मुर: साइ रे एको किताब इजीकीएल आ ब्रेक्शो बाक्ब देनीम।

गेना ब्रेक्शो: ६२० रे ६०० बि. सी. आस दातेम ब्रेक्शो बाक्ब।

मार ब्रेक्शो:

१. परमप्रभुमी यरूसलेम खतम दुम्चा क्येडा डोंइती लोत्र पशो इजीकीएल १:- २४:-

२. परमप्रभुमी यरूसलेम आ नेक्था डा रागी आन पर्बम लोत्र पशो इजीकीएल २५:- ३२:-

३. परमप्रभुमी यरूसलेम खतम दुम नोले लेम्शा लोत्र पशो इजीकीएल ३३:- ४८:-

इजीकीएलम छेडछेड तशो

इजीकीएल १०:-

1 मिनु ३० बर्स डा ४ महिना डा ५ नाक्ती ग्याइशशा लाइक्चा पुंडसीशोपुकी नु गो केबार खोला आ नेक्था बाक्शो नड। मिनु मेना सरीड रोकसाक्व। मिनु गो परमप्रभु आ कोंइशो तातामी। इजीकीएल १:३; इजीकीएल ३:२३; इजीकीएल १०:१५, २०, २२; इजीकीएल ४३:३ 2 मेको महिना डा ५ नाक्ती पिप येहो-याकीन ग्याइशशा लाइक्चा पुंडसीशो ५ बर्स दुम्शो बाक्त। २राजा २४:१५ 3 मिनु परमप्रभु यावेमी बूजी आ तौ चढेब इजीकीएल, आ कली लोत्र पाप्तु। मेना गो कल्दी आन रागी, केबार खोला आ नेक्थाम बाक्ती। मेना परमप्रभु यावेमी आं कली थिती। इजीकीएल ३:२२-२३; इजीकीएल ८:१; इजीकीएल ३३:२२; इजीकीएल ३७:१; इजीकीएल ४०:१

4 मिनु गो कोव्रडुनु, उत्तर रे फश गिवार यिशो ताता। ठेयब छेडछेड पाइशशो गोस्स ताता। मेको आ दाते रे चिला दाप्शो खोदेशो पा आ एर ओंथ नेल्ल छेडछेड दुम्शो बाक्त। मिनु चिला खोदेशो पा एर ओंथ दोरत। मिनु मेको मी आगा रे कांसा खोदेशो जिल जिल पा ब्रशो तांइसाक्व। प्रकाश ४:- 5 मिनु मेको आ दातेमी ४ ओटा सोक्त पाइशशोपुकी तांइसाक्म। मेको मार खोदेशो तांइसाक्म देशा हना, 6 मेको आन के ४, ४ ओटा कुल नु ४, ४ ओटा फ्रां बाक्तेक्म। 7 मेको आन खोइल दिंसीशो बाक्तेक्म। बाछा आन गेंच खोदेशो बाक्तेक्म। मेको आन खोइल खुइशशो कांसा खोदेशो पा टल्केशो बाक्तेक्म। 8 मेको आन फ्रां आगा एर ओंथ नेल्ल मुर आन गुइ खोदेशो बाक्तेक्म। मेको ४ ओटा सोक्त पाइशशो आन कुल नु आन फ्रां दोदेशो बाक्तेक्म देशा हना, 9 मेको आन फ्रां थिमुशो बाक्तेक्म। मेकोपुकी तेइ लमानु डोंइती गे पा गाक्बाक्तेक्म। आन कुल एर ओंथ महिरथु ग्येत्थ गाक्बाक्तेक्म। 10 मेको आन कुल दोदेशो बाक्तेक्म देशा हना, मेको नेल्ल का का पा ४ ओटा कुल बाक्तेक्म। डोंइती डा कुल मुर आ कुल खोदेशो बाक्त। आ ग्युरा गे डा कुल गुप्स आ कुल खोदेशो बाक्त। पेरा गे डा कुल ब्यफ के खोदेशो बाक्त। मिनु आन नोले गे डा कुल ककाकुली के खोदेशो बाक्त। 11 मेको आन कुल मोदेशो बाक्तेक्म। मेको आन फ्रां इर गे प्राक्शो बाक्तेक्म। मेको आन फ्रां निक्शीमी अर्को आन फ्रांम थिमुशो बाक्तेक्म। मिनु फ्रां निक्शीमी आन आन रां सुम्सीशो बाक्तेक्म। 12 मेको नेल्ल ग्येत्थ डोंइती गे गाक्बाक्तेक्म। सोक्त ते ते लमे, मेक मेक लाइबाक्तेक्म। मेको आन कुल महिरथु गाक्बाक्तेक्म। 13 मेको सोक्त पाइशशो आन दातेमी ब्रशो कोइला खोदेशो बाक्त। मेको एर ओंथ गाक्शो तोव्रशी खोदेशो तांइसीबाक्त। मेको मी थम छेडछेड पा ब्रशो बाक्त। मिनु मेको रे चिला दाप्बाक्त। 14 मेको सोक्त पाइशशोपुकी चिला आप्शो खोदेशो पा एर ओंथ बेरबाक्तेक्म।

15 मिनु गो मेको सोक्त पाइशशोपुकी कोव्रडुनु, मेको ४ ओटा सोक्त पाइशशो आन नेक्था खपीम गुगील तातामी। मेको नेल्ल आन गुगील का का बाक्त। 16 मेको गुगील दोदेशो बाक्तेक्म देशा हना, मेको जिल जिल पाइब पीत मनी माइशशो हीरा खोदेशो बाक्तेक्म। मेको गुगील आगाम अर्को गुगील बाक्तेक्म। 17 मेकोपुकी गाक्मानु, तेइ महिरथु गाक्बाक्तेक्म। मेको सोक्त ते ते गाक्मे, मेको गुगील मेक मेक गाक्बाक्तेक्म। 18 मेको गुगील लाइशशो नु हिंचा डा बाक्तेक्म। मिनु मेको कली कोव्रडुनु, नेल्ल मिक्ची मिक्च पाइशशो बाक्तेक्म। 19 मिनु मेको सोक्त पाइशशोपुकी गाक्मानु, मेको ग्येत्थ क्युकसीमानु, मेको गुगील यो ग्येत्थ क्युकसीबाक्तेक्म। 20 मिनु सोक्त ते ते गाक्मे, मेको सोक्त पाइशशोपुकी यो मेक मेक गाक्बाक्तेक्म। मिनु मेको गुगील मेकोपुकी नु बोक्बाक्तेक्म। मारदे हना मेको सोक्त पाइशशो आन सोक्त मेको गुगीलम बाक्त। 21 मेको सोक्त पाइशशोपुकी गाक्मानु, मेकोपुकी यो गाक्बाक्तेक्म। मेको दिक्मानु, मेकोपुकी यो दिक्बाक्तेक्म। मेको रागी रे क्युकसमानु, मेको गुगील क्युकसीबाक्तेक्म। मारदे हना मेको सोक्त पाइशशो आन सोक्त मेको गुगीलम बाक्त।

22 मेको सोक्त पाइशो आन पिया इर गे जिल जिल सिसा खोदेशो बाक्तीक बाक्त। 23 मेको बाक्तीके आ दी गे आन फ्रां हाम्शो बाक्तेक्म। मेकोपुकी थिमुशो बाक्तेक्म। मेको सोक्त पाइशो आन फ्रां निक्शीम आन रां सुम्शो बाक्तेक्म। 24 मेको गाक्मानु, गो मेको आन फ्रां आन रेयके, ठेयब समुन्द्र आ रेयके खोदेशो नेता। मेको रेयके नेल्ल क्येडा सक्ति पाइशो बुंबु पाइब नु लडाइ पाइब आन ग्रांग्ये माग्ये पोक्शो रेयके खोदेशो नेता। मेको सोक्त पाइशोपुकी राम्मानु, आन फ्रां लुकच तोक्बाक्तेक्म। 25 मेको आन फ्रां लुकच तोक्शा दिक्मानु, मेको आन पिया इर गे बाक्तीके रे सेंदा का गूत। मेको सोक्त पाइशोपुकी राम्मानु, आन फ्रां लुकच तोक्बाक्तेक्म।

26 मेको आन पिया इर गे बाक्तीकेमी ठेयब नित्तीक का खोदेशो बाक्त। मेको कोवडुनु नीर हीरा खोदेशो तांडसाक्व। मिनु मेको ठेयब नित्तीकेम निप्ब आ रां मुर आ खोदेशो बाक्त। प्रस्थान २४:१०; प्रकाश ४:२-३; यसैया ६:१ 27 मिनु मेको आ क्रातो डा ग्येत्थ ब्रशो जिलजिल पाइशो कांसा चुप्लुम ब्रशो मी खोदेशो ताता। आ क्रातो डा लुकचु मी खोदेशो पा ब्रशा शुश छेडछेड बाक्त। 28 रेउ यिमेनु, गोस्सुम वाक्श दाप्शो खोदेशो पा, मेको आ एर ओंथ नेल्ल छेडछेड बाक्त। मेको परमप्रभु यावे आ छेडछेड बाक्त। मिनु गो मेको तशा, खुम्की पा बाप्ती। मिनु मुर ब्वाक्शो खोदेशो सेंदा नेता। इजीकीएल ३:२३; इजीकीएल ८:४; इजीकीएल ९:३; इजीकीएल १०:४,१८; इजीकीएल ११:२३; इजीकीएल ४३:४; इजीकीएल ४४:४

2

इजीकीएल कली ब्रेशो

1 मिनु मेकोमी आं कली “ए मुर, बोक्शा रपो। मिनु गो गे नु लोव्र पाइनुड” देंत। 2 मिनु आं कली लोव्र पवानु, परमप्रभु यावे आ सोक्त आं आगाम ओव्रशा, आं कली राप्पाइक्ती। मिनु आं कली लोव्र पशो नेता। 3 मिनु मेकोमी आं कली “ए मुर, गो इ कली इस्राएल जात डा मुर आन बाक्तीक सोइक्नन। मटीब रागी डा मुर आन बाक्तीक सोइक्नन। मेकोपुकीम आं कली मटिशो बाक्नीम। मेको आन किकी पिपी नु मेकोपुकीम मुल सम्म हेंथे पा आं कली मटिशो बाक्नीम। 4 मेको आन चच युइ आं कली मटीब नु खकटा थुं पाइशो बाक्नीम। गो इ कली मेको आन बाक्तीक सोइक्नन। मिनु गे मेको आन कली ‘परमप्रभु, परमप्रभु यावेमी इन कली लोव्र पाइब’ देंत। 5 मेकोपुकीम नेन्मेक्ल कि मनेन्मेक्ल, मेकोपुकी नु लोव्र पावो। मारदे हना मेको मटीब आन खिं डा मुर बाक्नीम। मिनु मेको आन दातेम परमप्रभु यावे आ लोव्र पाइब मुर का बाक्माक्त, दे तुइक्नीम। इजीकीएल २:७; इजीकीएल ५:११, २७ 6 मिनु गे मेकोपुकी नु मेको आन लोव्र नेंशा महिनो। गे इ एर ओंथ चू नु चोंक बाक्तेक्म नु गे बिच्छी आन दातेम बाक्ते हना यो, महिनो। मेकोपुकीम मार देंतेक्म हना यो, मेको आन लोव्र क्येडा महिनो। मेको आन कोव्रशोम ग्येत्थ लुकच मदुमो। मारदे हना मेको मटीब आन खिं डा मुर बाक्नीम। येरमीया १:८ 7 गे मेको आन कली आं लोव्र पचा माल्नेवे। मेकोपुकीम नेन्मेक्ल कि मनेन्मेक्ल। मारदे हना मेकोपुकी मटीब आन खिं डा मुर बाक्नीम।

8 तन्न गे आं लोव्र नेनो। गे मेको मटीब आन खिं डा मुर खोदेशो मदुमो। इ शोव्र पाक्को। मिनु गो मार गेना, मेको जावो” देंत। 9 मिनु गो कोव्रडुनु, गुइ का आं गे दिंशो ताता। मेकेर ब्रेक्शा ओल्शो कागज का बाक्त। प्रकाश १०:८ 10 मिनु मेकोम, मेको आं डोंइती प्राक्शा कोंइताक्यी। मेको आ डोंइती नु नोले, निम्फा पटटी ब्रेक्शो बाक्त। मेकेर हिशेक पतीके, रोंका पतीके नु आबी आबी, दे हिंतीके लोव्र ब्रेक्शो बाक्त।

3

इजीकीएलमी कागज जशो

1 मिनु मेकोमी आं कली “ए मुर, मेको इ डोंइती बाक्शो ओल्शो कागज जावो। मिनु लशा इस्राएल आ खिं डा मुर आन कली लोव्र पावो” देंत। येरमीया १५:१६; येरमीया १:९; प्रकाश १०:९-११ 2 मोपतीके गो आं शोव्र पाक्ता। मिनु मेकोमी मेको ओल्शो कागज आं कली जचा गेती। 3 मिनु मेकोमी आं कली “ए मुर, आं गेशो ओल्शो कागज जावो। मिनु इ कोव्रज प्रिंदो” देंत। मोपतीके गो मेको जाता। मिनु मेको आं शोव्रम खुदो खोदेशो पा जिज दुम्त। भजन संग्रह ११९:१०३

4 मिनु मेकोमी आं कली “ए मुर, इस्राएली आन खिं लावो। मिनु मेको आन कली आं देंशो लोव्र नेल्ल नेंपाइक्मी। 5 मारदे हना गो इ कली मतुइक्चा डा नु मरुप्चा डा लोव्र ब्वाक्ब मुर आन बाक्तीक मसोइक्तन। तन्न इस्राएली आन खिं डा मुर आन बाक्तीक सोइक्ताक्न। 6 गो इ कली मतुइक्चा डा नु मरुप्चा डा लोव्र ब्वाक्ब मुर आन दातेमी, मरुप्ब लोव्र पाइब मुर आन बाक्तीक मसोइक्तन। गो इ कली मोदेशो मुर आन बाक्तीके सोइशो नड हना, मेकोपुकीम इ

लोव्र नेनेम वा। 7 तन्न इस्राएली आन खिं डा मुरुम इ लोव्र मनेनीम। मारदे हना मेकोपुकीम आं लोव्र नेंचा मदाक्नीम। इस्राएली आन खिं डा मुर नेल्ले काइ मटीब नु खकटा थुं पाइशो बाक्नीम। 8 गो इ कुल मेको आन कुल क्येडा बोल्यो सेल्ला। इ थुं मेको आन थुं क्येडा बोल्यो सेल्ला। यसैया ५०:७; येरमीया १:१८ 9 गो इ थुं बोल्यो फुल्लु क्येडा बोल्यो चकमक खोदेशो सेल्ला। गे मेको आन क्येडा महिनो। मेको आन कोव्रशोम ग्येत्थ लुकच मदुमो। मारदे हना मेको मटीब आन खिं डा मुर बाक्नीम” देंत। 10 मिनु मेकोम आं कली “ए मुर, गो इ कली देंशो लोव्र नेल्ल इ थुंम वोतो। मिनु नेनो। 11 मिनु मेको ग्याइशशा लाइक्चा पुंडसीशो इ मुर आन बाक्तीक लावो। मिनु मेको आन कली लोव्र पावो। ‘परमप्रभु यावेमी इन कली लोव्र पाप्तु’ देनो। मेकोपुकीम नेन्मेक्ल कि मनेन्मेक्ल” देंत। इजीकीएल २:५,७

इजीकीएल खाल पाइब दुमशो

इजीकीएल ३३:१-९

12 मिनु परमप्रभु यावे आ सोक्तीम आं कली इर क्युक्ती। मिनु गो “परमप्रभु यावे आ छेडछेड ठेयब बाक्ब” देंशो नेंता। मिनु गो आं नोले गे ठेयब रेयके पशो नेंता। इजीकीएल १:२८ 13 मेको रेयके सोक्त पाइशो आन फ्रां थिमुशो रेयके मेको आन नेक्था डा गुगील रे गूशो रेयके नु खिनु कुशो रेयके बाक्त। 14 मिनु सोक्तीम आं कली क्युक्शा लाइक्ती। मिनु गो कशो थुं दुमशा, गाइशशा लती। मेना परमप्रभु यावे आ बोल्यो गुइम आं कली दिप्ती। 15 मिनु गो मेको केबार खोला आ नेक्था बाक्ब रागी रे ग्याइशशा लाइक्चा पुंडसीशो आन बाक्तीक तेल-अबीब सहरम जाक्ती। मिनु गो ७ नाक्ती सम्म मेको आन दातेम ब्रिथ्री बाक्ती।

16 मिनु ७ नाक्त नोले परमप्रभु यावेमी आं कली लोव्र पाप्तु। 17 मार लोव्र पाप्तु देंशा हना “ए मुर, गो इ कली इस्राएली आन खिं डा मुर आन कली खाल पाइब सेल्लतन। गे आं देंशो लोव्र नेंतीवी हना, मेको आन कली आं लोव्र रे पा हिंच कोंइदीमी। इजीकीएल ३३:७; यसैया ५२:८; हिब्रू १३:१७ 18 मिनु गो आं अरेशो लोव्र मटीब मुर का कली ‘गे थमा पा इ मटितीके आ पर्वम बेक्नेवे’ दे माइक्नुड। मिनु गे मेको कली ब्रोंइचा कली हिंच मकोंइताक्वी हना, मेको आं अरेशो मटीब आ मरिम्शो पशो आ पर्वम बेक्ब। मेको मुर आ हुश आ क्येक्क इ रे पा ताक्नुड। इजीकीएल १४:१० 19 तन्न गे मेको आं अरेशो लोव्र मटीब मुर कली हिंच कोंइताक्वी हना, नु मेको मुर आं अरेशो लोव्र मपतीक रे मलेत्त हना, मेको आं अरेशो मटिशो नु आ मरिम्शो पशो आ पर्वम बेक्ब। तन्न गे ब्रोंइनेवे। 20 मिनु ठीक पाइब मुर काम आ ठीक पतीक रे लेशशा मरिम्शो पाप्तु हना, गो मेको आ डोंइती दाइल पाइक्तीक फुल्लु वोइक्ता हना, मेको बेक्ब। गे मेको कली हिंच मकोंइतीके, मेको आ पापम पतीके बेक्ब। मेको आ डोंइती ठीक पशो मारेइ ममिम्सीब। मिनु गो मेको आ हुश आ क्येक्क इ रे पा ताक्नुड। इजीकीएल १८:२४ 21 तन्न गे मेको ठीक पाइब मुर कली ‘पाप मपावो’ दे हिंच कोंइताक्वी हना नु मेकोमी पाप मपाप्तु हना, मेको थमा पा ब्रोंइब। मारदे हना मेकोम हिंच कोंइशो टिशो बाक्ब। मिनु गे ब्रोंइनेवे” देंत।

22 मेना परमप्रभु यावे आ गुइम आं कली थिती। मेकोमी आं कली “बोक्को, बेंसीम लावो। मिनु गो मेकेर गे नु लोव्र पाइनुड” देंत। इजीकीएल १:३ 23 मोपतीके गो बोक्शा बेंसीम लती। मिनु गो केबार खोला आ नेक्थाम तशो परमप्रभु यावे आ छेडछेड मेकेर यो बाक्त। मिनु गो खुम्की पा बाप्ती। इजीकीएल १:२८ 24 मिनु सोक्त आं थुंम ओव्रत। मिनु मेकोम आं कली राप्पाइक्ती। मिनु आं कली लोव्र पा “लावो, इ खिं लशा, लाप्चो चोक्शा बाक्को। इजीकीएल २:२ 25 ए मुर, मेकोपुकीम इ कली डोरीम फ्रेंनीम। मिनु गे फ्रेंचा पुंडसीशा, मुर आन दातेम लचा मताइनेवे। 26 मिनु गो इ लें इ कुंकुम खोक्पाइक्नुड। मिनु गे मब्वाक्ब दुमशा, मेको आन कली हुइक्ने मचाप्नेवे। मारदे हना मेकोपुकी मटीब आन खिं डा मुर बाक्नीम। 27 तन्न गो, गे नु लोव्र पडानु, इ कली ब्वाक्ने चाप्ब सेल्लन। मिनु गे मेको आन कली ‘परमप्रभु, परमप्रभु यावेमी इन कली लोव्र पाइब। नेने दाक्बम नेन्मेक्ल। नेने मदाक्बमी मनेन्मेक्ल’ देनो। मारदे हना मेकोपुकी मटीब मुर आन खिं डा मुर बाक्नीम” देंत।

4

यरूसलेम आ पर्वम लोव्र

1 मिनु परमप्रभु यावेमी “ए मुर, गे इंटा का चाक्शा इ डोंइती वोतो। मिनु मेको तारी यरूसलेम सहर आ नकसा सेलो। 2 मिनु मेको कली पुमशो कोंइदो। मेको आ एर ओंथ लडाइ पचा कली लाइशो खिं सेलो। मिनु मेको आ गारो डोइक्चा कली खप तेलो। एर ओंथ लडाइ पाइब आन बाक्तीक सेलो। मिनु आ एर ओंथ मेको गारो प्रेत्चा कली मुडा ठीक सेलो। 3 मिनु नोले फलाम के ग्योंब का चाक्शा, सहर नु इ दातेम फलाम के गारो खोदेशो पा वोतो। मिनु

गे सहर गे कोव्रडो। मिनु मेको सहर कली पुम्शो सेल्शा कोइदो। शुश पुम्शो कोइदो। मेको इस्राएली आन खिं डा मुर आन कली चिन्ड का दुम्ब।

4 मिनु नोले गे पेरा गे हिरशा इपो। मिनु इस्राएली आन खिं डा मुर आन सजाइ ततीक इ तार वोतो। गे गिश नाक्ती सम्म मेक गे हिरशा बाक्नेवे, मिश नाक्ती सम्म मेको आन सजाइ ततीक कुरचा माल्नेवे। 5 मारदे हना गो इ कली गिश नाक्त मोपा बाक्चा माल्नेवे, मेको देंनुड। मेको सहे सां ९० नाक्त दुम्चा माल्ब। नाक्त का के बर्स का बाक्ब। मोपा गे इस्राएली आन खिं डा मुर आन सजाइ कुरचा माल्नेवे। 6 मिनु मेको नाक्त नेल्ल नुम नोले, लेंशा ग्युरा गे हिरशा इपो। मिनु मेना यहूदा आ खिं डा मुर आन सजाइ कुरचा माल्नेवे। मिनु मेको आ पबर्म गो इ कली ४० नाक्त बाक्पाइक्नुड। नाक्त का के बर्स का बाक्ब। 7 मिनु गे पुम्शो यरूसलेम गे कोव्रशा, इ गुइ डा वा तिल्शा, मेको सहर आ पबर्म नोले दुम्तीक लोव्र पावो। 8 कोव्रडो, गो इ कली डोरीम फ्रेंशा वोइक्नन। मोपा गे एको पुम्तीक नाक्ती नुप्चा क्येडा डोंइती एर ओंथ लोकसीने मचाप्नेवे।

9 मिनु मेको चेरब, क्योव्रज, सिबी, दाल, चिरस नु उवा चाक्शा ग्योब काम कुर पा इ कली शोब्ले चोंइसो। गे मेको सहे सां ९० नाक्त सम्म मलोकसीथु बाक्डेनु, मेको जचा माल्नेवे। 10 इ नाक्ती डा जचा थोव्रक नाक्शा २० शेकेल डा दुम्चा माल्ब। गे गेना हना यो गो देंडा ना जचा माल्नेवे। शेकेल का ११.५ ग्राम चांदी के क्येट बाक्ब। 11 गे तूचा कली ब्वाक्कु यो पुक्चा माल्नेवे। हिन का ६ भाग डा भाग का तूचा माल्नेवे। मेको गेना तूचा माल्नेवे, इ कली देंनुड। हिन का ४ लिटर खोदेशो बाक्ब। 12 गे क्योव्रज के बटुक खोदेशो सेल्शा जावो। गे मुर आन डोंइती मुर आन खी चोशा, मेको चोचा माल्नेवे” देंत। 13 मिनु परमप्रभु यावेमी “मोपा इस्राएल डा मुर आन शोब्ले जचा माल्नीम। गो मेको आन कली रागी रागी डा मुर आन बाक्तीक खेरनुडमी। मेको आन दातेम मोदेशो ग्रांग्रा दिशो शोब्ले जचा माल्नीम” देंत। होसे ९:३ 14 मिनु गो “परमप्रभु, परमप्रभु यावे, गो आल रेन मोदेशो ग्रांग्रा दिशो मदुम्शो नड। गो गेनायो आंमा बेक्शो नु ब्वाकी डा जन्तुम साइशो श्ये मब्वड। ग्रांग्रा दिशो गेनायो मजड” देंती। प्रस्थान २२:३०; प्रेरित १०:१४ 15 मिनु मेकोम आं कली “दुम्ब, गो इ कली मुर आन खी आ पा डा, इ शोब्ले चोचा कली गोबर गेनुड” देंत।

16 मिनु मेकोमी आं कली “ए मुर, गो यरूसलेम रे अन्न तेक्नुड। मेकोपुकीम हिंशा शोब्ले नाक्ना नाक्न जाइनीम। मिनु पुक्ना पुक्न सुर्ता पन पन ब्वाक्कु तूनीम। इजीकीएल ५:१६; लेवी २६:२६ 17 मेकोपुकीम शोब्ले नु ब्वाक्कु मताइनीम। मुर काम अर्को कली तवानु ग्रीचोक पा हिंनीम। मिनु मेकोपुकी सजाइ ततीके सोव्रना सोव्रन लाइनीम” देंत।

5

यरूसलेमम सजाइ तशो

1 मिनु मेकोमी “ए मुर, हेश्शो तरवार का शेवो। मिनु मेकोम चां प्रेक्ब आन छूरा खोदेशो पा इ चां नु इ गल शोक्रे प्रेक्को। मिनु मेको नाक्चा कली नाक्तीक चाक्को। मिनु मेको चां आन कली भाग सां पा योक्को। 2 मिनु मेको चां के भाग का सहर पुम्चा नुप्ची ना सहरम चोवो। मिनु अर्को भाग तरवारम सहर आ एर ओंथ फ्रावो। मिनु नोले डा भाग फशेम बेरपतो। मारदे हना गो मेको आन कली तरवारम खेदा पाइनुडमी। इजीकीएल ५:२ 3 तन्न गे मेको चां इच्का इ वाम तोल्शा वोइक्मी। 4 मिनु मेको रे यो इच्का गुंइशा मीम चोवो। मेको रे पा इस्राएल डा खिं नेल्लेम मी का ब्रशा गूब” देंत।

5 मिनु परमप्रभु यावेमी “यरूसलेम एको बाक्ब। गो मेको कली रागी रागी आन दातेम वोइक्ता। मेको आ एर ओंथ नेल्ल रागी बाक्नीम। 6 तन्न मेकोम आं निसाफ पतीक लोव्र नु आं फुल्लुम मुशा ब्रेक्शो लोव्र मटीव। आ एर ओंथ बाक्शो रागी रागी नु जात जात डा मुर आन क्येडा यो आं निसाफ पतीक लोव्र नु आं फुल्लुम मुशा ब्रेक्शो लोव्र मटीब बाक्ब” देंत। 7 मोपतीके परमप्रभु यावेमी “गे इ एर ओंथ रागी रागी डा मुर आन क्येडा मरिम्शो पाइब बाक्नेवे। गे आं फुल्लुम मुशा ब्रेक्शो लोव्र नु आं निसाफ पतीके लोव्र मेको आन क्येडा मटीब बाक्नेवे। तन्न इ एर ओंथ डा मुर आ निसाफ पतीक लोव्र पाइनेवे। 8 गो इ कली आंमा सजाइ गेनुड। गो रागी रागी डा मुर आन डोंइती इ कली निसाफ पाइनुड। 9 गो इ ग्रांग्रा दिशो मूर्ति आन कली पूजा पतीके गो इ कली डोंइती गेनायो मगेशो सजाइ गेनन। मिनु नोले मोदेशो सजाइ मगेनन। 10 थमा पा, इ दातेमी आम आफोम आन आल आन कली ब्वाइनीम। मिनु आलम यो आन आंम आफ आन कली ब्वाइनीम। गो इ कली सजाइ गेनन। मिनु इ लीशो मुर आन कली फशेम एर ओंथ बेरपाइक्नुडमी। ब्यवस्था २८:५३-५५ 11 मोपतीके परमप्रभु, परमप्रभु यावेमी “गो ब्रोंइशा बाक्शो खोदेशो पा,

मो पाइनुड। मारदे हना इ मूर्ति नु इ ग्रांघ्रा दिशो गेयम आं बाक्तीक ग्रांघ्रा दिशो सेलतीके, गो इ कली खतम सेलनुड। गो इ कली शिशी मपथु सुइ आन कली ब्रोंइचा मगेनुड। इजीकीएल ७:४; इजीकीएल ८:७-१८ 12 इ दातेमी, भाग सांम भाग का मुर बेक्तीक रोइम नु अन्कालम बेक्नीम। मिनु अर्को भाग तरवारम बेक्नीम। मिनु नोले डा भाग फशेम ते ते फ्राइनुडमी। मिनु गो मेको आन कली तरवारम खेदा पाइनुडमी। इजीकीएल ५:२

13 मिनु गो गाइक्ना गाइक्न, मेको आन कली आं चुरशो कोंइशा, आं थुं नाइक्पाइक्नुड। मिनु गो, परमप्रभु यावेमी आं रुश पतीकेमी मेको आन कली लोव्र पाता, दे तुइक्नीम। इजीकीएल १६:४२ 14 गो इ कली श्येतथ सेलनुड। गे रागी रागी डा मुर आन दातेम नु इ नेक्था रे पा लाइब नेल्ल आन डोंइती इ कली शुक्शी पाइक्चा पुंडसीब सेलनन। ब्यवस्था २८:३७; येरमीया २४:९ 15 गो आं गाइक्तीक नु चुरतीकेम इ कली निसाफ पाइनुड। मिनु गे शुक्शी पाइक्चा पुंडसीतीके, मुने दोक्तीके नु हिंच कोंइतीके नु शुश हिंचा डा दुम्नेवे। गो परमप्रभु यावेमी, एको लोव्र देती। 16 मिनु गो इ कली साइक्ब अन्काल नु खतम दुम्तीके ब्रा खोदेशो पा सोइक्नुड, साइक्ब नु खतम दुम्तीक चाक्नुड। मिनु मेको क्येडा अन्काल दुम्पाइक्नुड। गो इ अन्न नेल्ल तेक्शा, ब्यवस्था ३२:२३-२४; इजीकीएल ४:१६ 17 गो इ दातेमी अन्काल नु ब्वाकी डा जन्तुपुकी सोइक्ताक्ड हना, मेकोपुकीम इ आल रोइक्नीम। इ दातेम मुर बेक्तीक रोइ नु हुश ख्राक्श पोक्तीक दुम्शा बाक्ब। मिनु गो इ कली तरवारम साइक्नुड' गो परमप्रभु यावेमी, एको देती" देंत।

6

इस्राएली आन थान खतम सेल्शो

1 मिनु परमप्रभु यावेमी आं कली लोव्र पाप्तु। 2 मार लोव्र पाप्तु देंशा हना "ए मुर, गे इस्राएल डा पहाड गे कोव्रशा, मेको आन पर्बम नोले दुम्ब लोव्र पावो। इजीकीएल ३६:१; मीका ६:१ 3 गे 'ए इस्राएल डा पहाड परमप्रभु, परमप्रभु यावे आ लोव्र नेनीन। पहाड नु डांडा खोल्सा नु बेंसी आन कली परमप्रभु यावेमी, गो इन तार तरवार का चाक्नुड। मिनु गो इन डांडा डा थान आन कली खतम पोक्नुडमी। 4 इन थान श्येतथ दुम्नीम। मिनु इन धूप चोतीक ब्रोलनीम। मिनु गो इन साइशो मुर आन कली आन मूर्ति आन डोंइती ताइक्नुडमी। लेवी २६:३० 5 गो इस्राएल डा मुर आन बेक्शो रां मेको आन मूर्ति आन डोंइती वोइक्नुड। मिनु इन रुश इन चढ़ेतीक आन डोंइती एर ओंथ फ्राइनुडमी। २राजा २३:२४ 6 गेपुकी ते बाक्तीनी हना यो, इन सहर श्येतथ दुम्नीम। इन डांडा डा थान नेल्ल खतम दुम्नीम। मोपा इन चढ़ेतीक श्येतथ दुम्शा नु इन मूर्ति ब्रोलशा खतम दुम्नीम। इन धूप चोतीक जिक्नीम नु इन गेय जाम्शा लाइब। 7 इन दातेमी मुर साइक्चा पुंडसीशा गोलनीम। मिनु गेपुकीमी गो परमप्रभु यावे नड, दे तुइक्नीनी।

8 तन्न गो गे इन दाते डा का निक्शी आन कली ब्रोंइचा गेनुडमी। रागी रागी आन दाते डा का निक्शी साइक्चा मपुंडसीनीम। मेकोपुकी रागी रागीम ब्रशा लाइनीम। यसैया ६:१३ 9 मिनु मोदेशो रागी रागीम ब्रोंइशा लीशोपुकी ग्याइशशा लाइक्चा पुंडसीशो रागीम आं कली मिम्नीम। मिनु मेकोपुकीम आन दला दाक्स पशा, आं रे दिलशा लशा, आन मूर्ति आन नोले खोइक्नीम। मेको आन पशो मरिम्शो नु ग्रांघ्रा दिशो गेयम आंमा मुने दोक्नीम। 10 मिनु मेकोपुकीम गो परमप्रभु यावे नड, दे तुइक्नीम' देंचा माल्नेवे। गो मेको आन कली मोदेशो श्येत मोशा मगेडमी" देंत।

11 मिनु परमप्रभु, परमप्रभु यावेमी "इन गुइ पोक्कीन। मिनु इन खोइल थाइक्तीन। इस्राएल आ खिं डा मुर आन ग्रांघ्रा दिशो गेय आ पर्बम 'आबी आबी' देनीन। मारदे हना मेकोपुकी तरवार, अन्काल नु मुर बेक्तीक रोइम बेक्नीम। 12 मेको डोन बाक्बपुकी मुर बेक्तीक रोइम बेक्नीम। मिनु मेको आन नेक्था बाक्बपुकी तरवारम साइक्चा पुंडसीनीम। मिनु लीशो प्रोंइचा पुंडसीशोपुकी अन्कालम बेक्नीम। मोपा गो आं गाइशो मेको आन तार मोइक्नुड। 13 मेको आन साइशो मुर आन मूर्ति आन दाते आन चढ़ेतीक आन एर ओंथ बाक्नीम। नेल्ल डांडा डा थानम, नेल्ले पहाडम, नेल्ल रवा आन पुंम, शुश गिग रवा आन पुंम, नु मूर्ति आन कली धूप चोतीके नेल्लेम मोदेशो बाक्ब। १राजा १४:२३ 14 गो आं गुइ मेको आन पर्बम क्युक्नुड। मिनु आन रागी रे श्येतथ नु मुर मबाक्तीक सेलनुड। मेको गोरशो रागी रे रिब्ला सम्म मोदेशो पाइनुड। मेना मेकोपुकीमी गो परमप्रभु यावे नड, दे तुइक्नीम" देंत। २राजा २५:२१

7

इस्राएल आ खतम दुम्तीक जाक्ब

1 मिनु परमप्रभु यावेमी आं कली लोव्र पाप्तु। 2 मार लोव्र पाप्तु देंशा हना "ए मुर, परमप्रभु यावेमी इस्राएल रागी कली मार देंब देंशा हना 'रागी नुप्तीके, एर ओंथ डा सुर नेल्लेम जाक्ब। 3 मुल गे नुप्नेवे। गो इ कली तशा गाइक्ताक्ड।

गो इ पशो खोदेशो पा इ कली निसाफ पाइक्नुड। गो इ कली इ मूर्ति पूजा पशो आन पर्वम सजाइ गेनुड। 4 गो इ कली शिशी मपथु, सुइ आन कली ब्रोंइचा मगेनुड। गो इ कली इ गेय आ पर्वम नु इ मूर्ति पूजा आ पर्वम सजाइ गेनुड। मिनु गे, गो परमप्रभु यावे नड, दे तुइक्नेवे' ” देंत। इजीकीएल ५:११; इजीकीएल ८:१८; इजीकीएल ९:१०

5 परमप्रभु, परमप्रभु यावेमी “हिंचा डा श्येत, आ तार हिंचा डा श्येत दुम्ब। कोव्रडो, मेको जाक्ब। 6 नुप्तीक नाक्ती जाक्ब। मेको इन पर्वम बोक्शा जाक्ब। 7 गे रागीम बाक्ब इन खतम दुम्तीके जाक्ब। नुप्तीक नाक्ती जाक्शा, इन नेक्था बाक्ब। डांडापुकीम कुम्सो पतीके ममाइ, ग्रांग्ये माग्ये दुम्शो बाक्ब। 8 मुल गो रीब पा गाइक्नुड। मिनु आं चुरशो इ तार मोइक्नुड। गो इ पशो खोदेशो पा इ कली निसाफ पाइनुड। मिनु इ मूर्ति पूजा पशो नेल्ल आन पर्वम सजाइ गेनन। 9 गो इ कली शिशी मपथु, सुइ आन कली ब्रोंइचा मगेनुड। गो इ कली इ पशो खोदेशो पा सजाइ गेनुड। इ मूर्ति पूजा पशो इ दातेम बाक्ब। मिनु गो इ कली तुप्ब, परमप्रभु यावे नड, दे तुइक्नेवे। 10 मेको नाक्ती मुल बाक्ब। इ खतम दुम्तीके जाक्ना जाक्न बाक्ब। कोक्के आ कोच्चा दाप्त। ठेयब लेत्तीक फू खोदेशो पा बोइक्त। यसैया २:१२

11 हुश खाक्श पोक्तीके परमप्रभु यावे आ अरेशो मटीब आन कोक्के दुम्त। मेको आन दाते डा मारेइ मलीब। मेको आन बाक्शो मारेइ मारेइ, आन शोप नु आन ठेयब दुम्तीके मारेइ मलीब। 12 मेको खतम दुम्तीके जाक्चा चिक्शो बाक्ब। ग्याप्बपुकी मग्येरसमल। लेयबपुकी रोंका मपामेक्ल। मारदे हना मेको नेल्लेम परमप्रभु आ गाइशो ताइनीम। 13 मारदे हना मेको ब्रोंइम सम्म लेयचा मताइब। मारदे हना मेको तशो नेल्ल आन कली दुम्ब। मिनु आन मरिम्शो पतीके नेल्ल बेक्नीम। 14 मेकोपुकीम ग्रोव ताप्शा, मारेइ मारेइ ठीक पाम्तेक्म हना यो, का यो लडाइ पथ मलाइनीम। मारदे हना आं गाइशो मेको नेल्ल आन तार जुक्शो बाक्ब। 15 लाडगाम तरवारम साइक्ब। आगाम मुर बेक्तीक रोइ नु अन्कालम बेक्नीम। मिनु रूम बाक्ब आन कली तरवारम साइक्ब। सहरम बाक्ब अन्काल नु मुर बेक्तीक रोइम साइक्चा पुंडसीनीम। 16 मिनु ब्रोंइशा प्रोक्शो नेल्ल बेसी डा दुकुर खोदेशो पा पहाडम बाक्नीम। मेको आन मरिम्शो पशो आ पर्वम रोंका पा बाक्नीम। 17 मुर आन गुइ नेल्ल सक्ति मपाइशो दुम्नीम। आन पोक्च बोल मपाइशो दुम्नीम। यसैया १३:७ 18 मेकोपुकीम अरन्डी फेक्चा माल्नीम। शुश हिंतीकेमी मेको आन कली सुम्ब। मेको नेल्ल आन कुल मुनेम सुम्सीचा माल्नीम। मेको नेल्ल आन पिया प्रेक्सीचा माल्नीम। येरमीया ४८:३७ 19 मेकोपुकीम आन चांदी लांम ताइक्चा माल्नीम। मिनु आन सुन ग्रांग्रा दिशो थोव्रक खोदेशो दुम्चा माल्ब। मेको आन सुन चांदीम परमप्रभु यावे आ गाइशो नाक्ती मेको आन कली प्रोंइने मचाप्ब। मेको आन सुन चांदीम आन शोव्रलु साइक्ने मचाप्ब। मेकोमी आन कोव्रज प्रिंने मचाप्नीम। मारदे हना मेको आन कली मरिम्शो पपाइक्ब मेकोन बाक्त। हितोपदेस ११:४; सेफन्याह १:१८ 20 मारदे हना आन दारशो गहनामी ठेयब लेशशा, आन ग्रांग्रा दिशो मूर्ति सेल्लेक्म। मोपतीके गो मेको आन सुन चांदी मेको आन कली ग्रांग्रा दिशो सेल्लुड। 21 गो मेको नेल्ल अर्को रागी डा मुर आन कली रोइक्पाइक्नुडमी। गो रागीम बाक्ब परमप्रभु यावे आ अरेशो मटीब आन कली रोइक्पाइक्नुड। मिनु मेकोपुकीम मेको ग्रांग्रा दिशो सेल्लनीम। 22 गो आं कुल मेको आन रे खुइक्नुड। मिनु मेकोपुकीम आं दाक्शो बाक्तीके ग्रांग्रा दिशो सेल्लनीम। हुश खाक्श पोक्बपुकी मेकेर ओव्रशा, ग्रांग्रा दिशो सेल्लनीम। 23 साडलो का सेलीन। मारदे हना रागी हुश खाक्शेम ब्रीशो बाक्ब। मिनु सहर हुश खाक्श पोक्बपुकीम ब्रीशो बाक्ब। 24 गो रागी रागी डा नेल्ल आन क्येडा मरिम्शो पाइब मुर आन कली मेको आन खिं रोइक्पाइक्नुड। गो बोल्यो मुर आन ठेयब लेत्तीक नुप्पाइक्नुड। मिनु मेको आन चोव्रखो बाक्तीके ग्रांग्रा दिशो दुम्नीम। 25 शुश श्येत जाक्मेनु, मेकोपुकीम थुं नाइशशा बाक्चा माल्नीम। तन्न मथित्नीम। 26 हिंचा डा श्येत क्येडा हिंचा डा श्येत जाक्ब। हिंचा डा लोव्र क्येडा हिंचा डा लोव्र नेंसीब। मेकोपुकीम परमप्रभु यावे आ लोव्र पाइबपुकी रे ‘मुल मार दुम्बा’ दे तुइक्चा माल्नीम। चढेबपुकीमी मुर आन कली मशेंनीम। खाल्पा आन अर्ती गेतीक जाम्शा लने थुम्शो बाक्ब। 27 पिपम रोंका पाइब। पिप आ तौ आन थुं लुक्च लाइब। रागी डा मुर आन गुइ खिंखि पाइनीम। मेको आन पशो खोदेशो पन, गो मेकोपुकी नु पाइनुड। गो मेको आन पशो कोव्रशा, मेको आन कली निसाफ पाइनुड। गो मेको आन आंम कानुन आ पर्वम निसाफ पाइनुड। मिनु मेकोपुकीमी गो परमप्रभु यावे नड, दे तुइक्नीम” देंत।

8

1 मिनू ग्याइशशा लाइक्चा पुंडसीशो ६ बर्स डा ६ महिना डा ५ नाक्त गो आं खिंम बाक्शो नड। मेना यहूदा डा खाल्पापुकी आं डोंइती बाक्शो बाक्तेक्म। मिनू मेकेर बाक्शोनु, परमप्रभु, परमप्रभु यावेमी आं कली थिती। इजीकीएल १४:१ 2 मिनू गो कोव्रडुनु, मुर खोदेशो का ताता। मिनू मेको आ क्रातो डा लुकचु ब्रशो मी खोदेशो नु आ क्रातो डा ग्येत्थ जिलजिल पा टल्केशो कांसा खोदेशो बाक्त। इजीकीएल १:२७; इजीकीएल १:४ 3 मेकोम आ गुड दिशा आं चांम ग्याइशशा छुल पोक्ती। मिनू सोक्तीम आं कली सरीड नु रागी आस दातेम लाइक्ती। मिनू परमप्रभु यावे आ सोक्तीम आं कली यरूसलेमम लाइक्ती। मेकोमी आं कली परमप्रभु यावे आ खिं डा उत्तर गे डा आगा डा लाडगा आ ओव्रतीकेम चाक्ती। मेकेर रुश पपाइक्ब मूर्ति आन बाक्तीके बाक्त। मेकोमी रुश पपाइक्बाक्त। इजीकीएल ३:१२ 4 मिनू इस्राएली आन परमप्रभु यावे आ छेडछेड मेकेर बाक्त। गो मेको मोदेशो छेडछेड डोंइती बेंसीम कोंइतीकेम ताता।

5 मिनू परमप्रभु यावेमी आं कली “ए मुर, मुल गे उत्तर गे कोव्रडो” देंत। मिनू गो उत्तर गे कोव्रडुनु, चढ़ेतीक आ उत्तर गे डा लाप्चोम मेको रुश पपाइक्ब आ मूर्ति ताता। 6 मिनू मेकोमी आं कली “ए मुर, मेको आन पशो तवी? मार पन पन बाक्मा, गे मेको तवी? इस्राएली आन खिं डा मुरपुकीम आं कली आं बाक्तीक रे खेरचा कली मेको ग्रांग्रा दिशो गेय पना पन बाक्नीम। तन्न गे मेको क्येडा यो शुश ग्रांग्रा दिशो गेय ताइनेवे” देंत।

7 मिनू मेकोम आं कली लाडगा डा ओव्रतीकेम चाक्दीत्ती। मिनू गो मेकेर डा गारोम पोव्रला का ताता। 8 मिनू मेकोम आं कली “ए मुर, मेको गारो डा पोव्रला प्रेतो” दे माइक्ती। मिनू गो मेको गारो डा पोव्रला प्रेत्ता। मिनू मेकेर ओव्रतीक का बाक्त। 9 मिनू मेकोम आं कली “आगा ओव्रशा, मेकोपुकीम पशो थम मरिम्शो नु ग्रांग्रा दिशो गेय कोव्रडो” देंत। 10 मोपतीके गो आगा ओव्रशा कोव्रता। मिनू एर ओंथ नेल्ल गारोमी नेल्ल खाल डा गेशा गाक्ब जन्तु, ग्रांग्रा दिशो जन्तु, इस्राएली आन खिं डा मूर्ति नेल्ल मेकेर ब्रेक्स पा सेल्शो ताता। रोमी १:२३ 11 मिनू मेको आन डोंइती इस्राएल डा ७० जना खाल्पा राप्शो बाक्तेक्म। मिनू शाफान आ तौ याजन्याह मेको आन दातेम राप्शो बाक्त। मेको नेल्ल आन गुडम आन आन थनौरो बाक्तेक्म। मिनू धूप चोशो आ ब्रोव्रशो रिना इर गे बोक्शो बाक्त। प्रस्थान २४:१; गन्ती ११:१६; लूका १०:१७; यसैया ६६:१७ 12 नोले मेकोमी आं कली “ए मुर, इस्राएल आ खिं डा खाल्पा छिडछिडम मार पाइनीमी, मेको आन आन मूर्ति कोठाम मार पना पन बाक्मा, तवी? मेकोपुकीम ‘परमप्रभु यावेमी आंइ कली मताइब। परमप्रभु यावेमी एको रागी प्रॉइने थुम्शो बाक्ब’ देशो बाक्नीम” देंत। इजीकीएल ९:९ 13 मिनू लेंशा मेकोम आं कली “गे मेको क्येडा यो शुश ग्रांग्रा दिशो गेय पना पन बाक्शो ताइनेवे” देंत।

14 नोले मेकोमी आं कली परमप्रभु यावे आ खिं डा उत्तर गे डा ओव्रतीकेम चाक्दीत्ती। मिनू गो मेकेर तम्मुज देवता आ पर्बम डाक्शो मीश मुरपुकी तातामी। 15 मिनू परमप्रभुमी आं कली “ए मुर, गे मेको तवी? गे मेको क्येडा यो शुश ग्रांग्रा दिशो गेय ताइनेवे” देंत।

16 मिनू मेकोम आं कली परमप्रभु यावे आ खिं डा आगा डा लाडगा चाक्दीत्ती। मिनू मेकेर परमप्रभु यावे आ खिं नु चढ़ेतीक आस दातेम २५ जना खोइ वोंइश मुर बाक्तेक्म। मेकोपुकीम आन ची परमप्रभु यावे आ खिं गे हिरशो बाक्तेक्म। आन कुल चहिं पूर्ब गे कोव्रशा नां आ डोंइती बाप्शो बाक्तेक्म। ब्यवस्था ४:१९; ब्यवस्था १७:३; २राजा २३:५, ११; येरमीया ८:२ 17 मिनू मेकोम आं कली “ए मुर, गे मेको तवी? मार, यहूदा आ खिं डा मुर आन ग्रांग्रा दिशो गेय एकेर पचा मालनीमी? मार, मेकोपुकीम रागी कली हुश खाक्श पोक्तीकेम प्रिशा, आं कली मेको क्येडा गाइक्पाइक्चा मालनीमी? कोव्रडो, मेको आन नेंम राशी वोइक्नीम। आन नेंम राशी वोइक्तीके थम मरिम्शो पतीके बाक्ब। 18 मोपतीके गो मेको आन कली आं गाइक्तीकेम गेय पाइनुड। गो मेको आन कली शिशी मपथु, सुइ आन कली ब्रोंइचा मगेनुड। मेकोपुकीम ठेयब सेंदा पा पुंडशा ग्रीतेक्म हना यो, मेको आन लोव्र मनंनुड” देंत। इजीकीएल ७:४; यसैया १:१५

9

यरूसलेम खतम दुम्शो

1 मिनू परमप्रभुमी ठेयब सेंदा पा “सहर डा सजाइ गेब मुर आन नेक्था जाक्कीन। इन साइक्तीक या कुरशा जाक्कीन” दे ग्रीत। 2 मिनू गो ६ जना वोंइश मुर आइक्था डा उत्तर गे डा लाप्चो रे जाक्शो ताता। मेको नेल्लेमी साइक्चा कली या कुरशो बाक्तेक्म। मेको आन दातेमी बुश सुती वा फेक्शो ब्रेक्तीक कुरशो मुर का बाक्त। मेकोपुकी आगा ओव्रशा कांसा के चढ़ेतीक आ नेक्था राप्तेक्म। इजीकीएल १०:२; दानीएल १०:५

3 मेना इस्राएली आन परमप्रभु आ छेडछेड करूब आन दाते रे इर गे याक्सीशा परमप्रभु यावे आ खिं आ लाप्चोम जाक्दीन्ने थुम्शो बाक्त। मिनु मेकोमी मेको सुती के वा फेक्शो ब्रेक्तीक कुरशो मुर कली 4 “यरूसलेम सहर आ एर ओथ नेल्ल हिरशा मेकेर पशो मूर्ति पूजा नेल्ल आन पर्बम सुर्ता नु रोंका पाइब मुर नेल्ल आन कुप्फीम चिन्ड का वोतो” दे माइक्तु। प्रकाश ७:३ 5 मिनु मेकोमी आं नेंचा डा पा अरु आन कली “गेपुकी मेको आ नोले लशा, सहर एर ओथ गाक्शा मुर आन कली सतीन। मेको आन कली शिशी मपथु, सुइ आन कली ब्रोंइचा मगेने। 6 खूशो, ठिटा ठिटी, मीश मुर नु आल ब्रेप्च नेल्ल आन कली सतीन। तन्न आन कुप्फीम मेको चिन्ड पाइशो आन कली मथिने। आं बाक्तीक रे मेको मो पचा गोने” दे माइक्तीमी। मिनु मेकोपुकीम मेको परमप्रभु यावे आ खिं आ डोंइती बाक्शो खाल्पा आन रेन मो पचा गोम्तेक्म। येरमीया २५:२९ 7 मिनु मेकोमी मेको आन कली “आं खिं ग्रांरा दिशो सेलीन। साइशो मुर आन कली लाडगाम प्रिंदीने, लने” दे माइक्तीमी। मोपतीके मेकोपुकी सहरम लशा, मुर आन कली साइक्तेक्म। 8 मेकोपुकीम साइक्ना साइक्न लाम्तेक्म। गो चहिं आं का ला बाक्ती। मिनु गो खुम्की पा बाप्शा ठेयब सेंदा पा “परमप्रभु, परमप्रभु यावे, इन गाइशो यरूसलेम कली मोइक्नीनु, इस्राएल डा लीशो नेल्ल आन कली यो साइक्नीनी?” देंती। इजीकीएल ११:१३ 9 मिनु मेकोमी आं कली “इस्राएल नु यहूदा डा मुर आन खिं डा मुर आन दोस थम ठेयब बाक्ब। रागी नेल्ल हुश खाक्शेम ब्रीशो बाक्ब। मिनु सहर दूली पतीकेम ब्रीशो बाक्ब। मारदे हना मेकोपुकीम ‘परमप्रभु यावेमी एको रागी प्रोंइशो बाक्ब। मिनु परमप्रभु यावेमी मारेइ मताइब’ देंनीम। इजीकीएल ८:१२ 10 मोपतीके गो मेको आन कली शिशी मपथु सुइ आन कली ब्रोंइचा मगेनुड। मेको आन पशो खोदेशो पा सजाइ गेनुडमी” देंत। इजीकीएल ७:४

11 मिनु मेको सुती वा फेक्शो ब्रेक्तीक कुरशो मुरुम “गो इन अरेशो खोदेशो पाता” देंत।

10

परमप्रभु आ छेडछेड

इजीकीएल १:४-२८

1 मिनु कोव्रडुनु, मेको करूब आन पिया आन तारी डा बाक्तीके आ इर नीर माइशो हीरा खोदेशो बाक्त। मेको ठेयब नित्तीक का खोदेशो बाक्त। 2 मिनु परमप्रभु यावेमी मेको सुती के वा फेक्शो मुर कली “करूब आन दी गे बाक्शो गुगील आन दातेम लावो। मिनु मेको करूब आन दातेम बाक्शो मी आ कोइला हुइशशा, सहर आन तार फ्रावो” दे माइक्तु। मिनु आं कोव्रना कोव्रन, मेको आगा ओव्रत। इजीकीएल ९:२; प्रकाश ८:५ 3 मिनु मेको मुर आगा ओव्रमेनु, करूब परमप्रभु यावे आ खिं आ दक्खिन गे बाक्तेक्म। मिनु गोस्स काम परमप्रभु यावे आ खिं डा आगा डा लाडगा ब्रीत। 4 मिनु परमप्रभु यावे आ छेडछेड करूब आन रे परमप्रभु यावे आ खिं आ लाप्चो गे लत। मिनु गोस्सुम खिं ब्रीत। मिनु आ लाडगा परमप्रभु यावे आ छेडछेड डा हाम्सोम ब्रीत। इजीकीएल १:२८; प्रस्थान ४०:३४; यसैया ६:४ 5 मेको करूब आन फ्रां आन रेयके लाडगा सम्म नेंसी बाक्त। मेको परमप्रभु यावे ब्वाक्शो खोदेशो पा नेंसी बाक्त।

6 मिनु परमप्रभु यावेमी मेको सुती के वा फेक्शो मुर कली “मेको गुगील आन दातेम लशा करूब आन दाते डा मी पितो” दे अरेवानु, मेको गुगील आ नेक्था राप्त। 7 मिनु करूब काम आ गुइ करूब आन बाक्तीक डा मी गे दिंताक्व। मिनु मेकोमी मी आ कोइला हुइशशा, मेको सुती के वा फेक्सीशो मुर आ गुइम कुर पाप्तु। मिनु मेको मी कुरशा लाडगा प्रूत।

परमप्रभु आ छेडछेड लशो

8 मेको करूब आन फ्रां आगाम मुर आन गुइ खोदेशो तांइसाक्व। 9 मिनु कोव्रडुनु, मेकेर ४ ओटा गुगील करूब आन नेक्था बाक्तेक्म। करूब का आ नेक्था गुगील का बाक्त। मेको गुगीलपुकी टल्केशो पित मनी माइशो हीरा खोदेशो बाक्तेक्म। 10 मिनु मेको गुगील नेल्ल खाल का डा बाक्तेक्म। गुगील का आगाम अर्को गुगील बाक्शो खोदेशो तांइसाक्म। 11 मेकोपुकी गाक्मानु, तेइ महिरथु ग्येत्थ गे उत्तर, दक्खिन, पूर्व नु पच्छिम गे गाक्बाक्तेक्म। मेको डोंइती डा गुगील ते ते लमे, अर्को यो मेक मेक गे लाइबाक्तेक्म। 12 मेको आन रां नेल्ल, मेको आन ची, मेको आन गुइ, फ्रां नु मेको ४ ओटा करूब आन गुगील नेल्ल मिक्ची मिक्च पाइशो बाक्तेक्म। 13 गो मेको आन कली “गेय पाइब गुगील” देशो नेंता। 14 मेको करूब नेल्ल आन के ४ ओटा कुल बाक्तेक्म। डोंइती डा कुल करूब के, मेको आ नोले डा कुल मुर के, मेको आ नोले डा कुल गुप्स के नु नेल्ल क्येडा नोले डा कुल ककाकुली के खोदेशो बाक्तेक्म। इजीकीएल १:१० 15 मिनु मेको करूबपुकी इर गे लाम्तेक्म। मेको डोंइती डा सोक्त पाइशोपुकी बाक्तेक्म। डोंइती

गो मेको आन कली केबार खोला आ नेक्था तशो नडमी। इजीकीएल १:१ 16 मिनु मेको करूब गाक्मानु, मेको गुगील आन नेक्था गाक्बाक्तेक्म। करूब इर लचा कली आन फ्रां ग्येत्य क्युकगमेनु, मेको आन नेक्था बाक्शो गुगील महिरथु, गाक्बाक्तेक्म। इजीकीएल १:१९ 17 मिनु मेको करूब दिक्मानु, मेको गुगील यो दिक्बाक्तेक्म। मेको करूब इर गे बोक्मानु मेको गुगील यो मेको नु बोक्बाक्तेक्म। मारदे हना मेको सोक्त पाइशो आन सोक्त मेको गुगीलमीन बाक्त।

18 मिनु परमप्रभु यावे आ छेडछेड आ खिं डा लाप्चो रे गूशा, करूब आन तार गे दिक्त। इजीकीएल १:२८ 19 मिनु मेको करूबम आन आन फ्रां क्युकतेक्म। मिनु आं डोंइती खप रे इर गे लाम्तेक्म। मिनु मेको लमानु, मेको गुगील यो मेको नु इर गे लाम्तेक्म। मिनु मेकोपुकी परमप्रभु यावे आ खिं आ पूब गे डा लाप्चो आ नेक्था दिक्तेक्म। मिनु इस्राएल डा परमप्रभु आ छेडछेड मेको आन तार गे बाक्त।

20 मेको केबार खोला आ नेक्था इस्राएली आन परमप्रभु आ आगाम बाक्शो आं तशो सोक्त पाइशो बाक्तेक्म। मिनु गो मेको करूब बाक्मा बाक्त, दे तुइक्ताक्ड। 21 मेको नेल्ल आन के ४ ओटा कुल नु ४ ओटा फ्रां बाक्तेक्म। मिनु मेको आन फ्रां आगाम मुर आन गुइ खोदेशो बाक्तेक्म। 22 मेको आन कुल केबार खोला आ नेक्था आं तशो सोक्त पाइशो आन कुल खोदेशो बाक्तेक्म। मेकोपुकी तेइ लमानु, डोंइती गे पा गाक्बाक्तेक्म।

11

ठेयब मुर आन कली सजाइ

1 मिनु सोक्तीम आं कली क्युकशा, परमप्रभु यावे आ खिं डा पूब गे डा लाप्चोम चाक्ती। मेको पूब गे कोव्रशो बाक्त। मिनु मेको आगा ओव्रतीकेमी २५ जना मुर बाक्तेक्म। गो मेको आन दातेम इस्राएल डा ठेयब मुर अज्जुर आ तौ याजन्याह नु बेनायाह आ तौ पेलात्याह आस कली यो तातासी। इजीकीएल ३:१२ 2 मिनु परमप्रभु यावेमी आं कली “ए मुर, मेकोपुकीम एको सहरम मरिम्शो पचा कली नु परमप्रभु यावे आ अरेशो लोव्र मटिचा कली अर्ती गेशा शंशो बाक्तेक्म। 3 मेकोपुकीम ‘खिं सेल्टीक नाक्ती रीब पा मजाक्बा को? एको सहर कराइ खोदेशो बाक्ब। मिनु गो चहिं श्ये बाक्नय’ देंनीम। इजीकीएल २४:३-१४ 4 मोपतीके ए मुर, मेको आन पबर्म नोले दुम्ब लोव्र पावो। आं देशो लोव्र पावो” देंत।

5 मिनु परमप्रभु यावे आ सोक्त आं तार जाक्त। मिनु मेकोम आं कली “परमप्रभु यावेमी ‘ए इस्राएल आ खिं डा मुर, गे मार मिम्शो बाक्नीनी, गो मेको नेल्ल तुइक्नुड। 6 गेपुकीम एको सहरम शुश मुर आन कली साइशशा, आ लां नेल्ल बेक्शो मुरुम प्रिंपाइक्तीनी’ देंत। 7 मोपतीके परमप्रभु, परमप्रभु यावेमी ‘गे सहरम साइशशा इन ताइशशो मुर श्ये बाक्नीम। मिनु एको सहर कराइ बाक्ब। तन्न गो इन कली सहर रे ग्रुंइनुड। 8 गेपुकी तरवार तशा हिंतीनी। तन्न गो इन पबर्म तरवार चाक्शा साइक्पाइक्नन्नी। 9 गो इन कली सहर रे ग्रुंइनन्नी। मिनु अर्को रागी डा मुर आन गुइम गेनन्नी। मिनु इन कली निसाफ पाइक्नुड। 10 गेपुकी तरवारम साइक्चा पुंइसीशा गोलनीनी। गो इन कली इस्राएल आ सांदम निसाफ पाइनुड। मिनु गेपुकीम गोन परमप्रभु यावे नड, दे तुइक्नीनी। २राजा २५:२०-२१ 11 एको सहर इन कली कराइ मदुम्ब। मिनु गे मेको कराइ डा श्ये मदुम्नीनी। गो इन कली इस्राएल आ सांदम निसाफ पाइनुड। 12 मेना गेपुकीम गो परमप्रभु यावे नड, दे तुइक्नीनी। गेपुकीम आं फुल्लु मुशा ब्रेक्शो लोव्र मटिनी। आं निसाफ पतीक लोव्र यो मटिनी। तन्न गे इन एर ओंथ बाक्ब रागी रागी डा मुर आन पतीक लोव्र पाइतीनी” ” दे परमप्रभु यावेमी देंत।

13 गो परमप्रभु यावे आ लोव्र पना पन बाक्डानु, बेनायाह आ तौ पेलात्याह बेक्त। मिनु गो खुम्की पा बाप्शा ठेयब सेंदा पा “परमप्रभु, परमप्रभु यावे, मार, गे इस्राएल डा लीशो नेल्ल आन कली साइक्नीनी?” देंती। इजीकीएल ९:८

ग्याइक्चा पुंइसीशो आन कली लोव्र

14 मिनु परमप्रभु यावेमी आं कली लोव्र पाप्तु। 15 मार लोव्र पाप्तु देशा हना “ए मुर, इ लोक्बपुकी, इ खिं डा मुर, ग्याइशशा लाइक्चा पुंइसीशो इ लोक्बपुकी, इस्राएल आ खिं डा मुर नेल्ल आन पबर्म यरूसलेमम बाक्ब मुरपुकीमी ‘मेकोपुकी परमप्रभु यावे रे डोन लाम्तेक्म। मोपा एको रागी इं कली अधिकार पचा कली गेशो बाक्त’ देशो बाक्तेक्म” देंत। 16 मोपतीके परमप्रभु, परमप्रभु यावेमी “गो मेको आन कली डोन रागी रागी डा मुर आन दातेम सोइक्ताक्डमी। गो मेको आन कली राज्य राज्य आन दातेमी फ्रात हना यो, इक्का नाक्ती सम्म मेको आन परमप्रभु दुम्ती। इजीकीएल ६:८-१० 17 मोपतीके गे मेको आन कली ‘गो इन कली जात जात डा मुर आन दाते रे खुप्नन्नी। मिनु ब्रशा लशो रागी नेल्ले रे पा खुप्नन्नी। मिनु गो इन कली इस्राएल रागी गेनन्नी। येरमीया २४:५-६; येरमीया २९:२४ 18 मिनु मेकोपुकी

लेशशा जाकशा, मेकेर डा ग्रांग्रा दिशो थोवक नु मूर्ति नेल्ल गुंडशा ताइक्नीम। 19 मिनु गो मेको आन कली थुं का डा दुम्पाइक्नुडमी। मिनु मेको आन आगामी नक सोक्त का कुरपाइनुड। मिनु गो मेको आन फुल्लु खोदेशो थुं गुंडशा, श्ये के थुं कुरपाइनुडमी। इजीकीएल ३६:२६; येरमीया २४:७ 20 मिनु मेकोपुकीमी आं फुल्लुम मुशा ब्रेक्शो लोव्र पशा, आं निसाफ पतीक लोव्र टीनीम। मिनु मेकोपुकी आं मुर दुम्नीम। मिनु गो मेको आन परमप्रभु दुम्नुड। इजीकीएल १४:११; येरमीया ७:२३ 21 तन्न मेको आन ग्रांग्रा दिशो मारेइ मारेइ मूर्ति आन नोले खोइक्ब आन कली आन पशो नेल्ल आन पियामीन मोइक्नुडमी, दे परमप्रभु, परमप्रभु यावेमी देंत' दे मतो" देंत।

परमप्रभु आ छेडछेड इर गे लशो

22 मिनु नोले आ नेक्था गुगील बाक्शो करूबमी आन फ्रां प्राक्तेक्म। मेना इस्राएली आन परमप्रभु आ छेडछेड मेको आन तार बाक्त। इजीकीएल १:२८ 23 मिनु परमप्रभु यावे आ छेडछेड सहर आ दाते रे क्युक्सीशा इर गे लत। मिनु सहर डा पूर्व गे बाक्शो पहाड तार दिक्त। 24 मिनु परमप्रभु यावे आ सोक्तीम आं कली इर क्युक्ती। मिनु कोंइतीके कोंइशोमी आं कली कल्दी रागीम ग्याइश्शा लाइक्चा पुंडसीशो आन बाक्तीकेम चाक्दीत्ती। मिनु नोले मेको कोंइतीके आं रे इर गे लाक्तु। इजीकीएल ३:१२ 25 मिनु गो ग्याइश्शा लाइक्चा पुंडसीशो आन कली परमप्रभु यावे आ लोव्र नेल्ल शेंताक्डमी।

12

ग्याइश्शा लाइक्चा पुंडसीशो लेशो

1 परमप्रभु यावेमी आं कली लोव्र पाप्तु। 2 मार लोव्र पाप्तु देशा हना “ए मुर, गे काइ मटीब खिं डा मुर आन दातेम बाक्शो बाक्नेवे। मेको आन के मिक्च बाक्त हना यो, मताइनीम। मेको आन के नोफा बाक्त हना यो, मनेनीम। येरमीया ५:२१ 3 मारदे हना मेकोपुकी मटीब मुर आन खिं डा बाक्नीम। मोपतीके गे रागी रे ग्याइश्शा लाइक्चा पुंडसीशो मुर खोदेशो पा इ कुम्लो खिक्सो। मिनु नाक्तीन मेको आन डोंइती इ बाक्तीक रे ग्याइश्शा लाइक्चा पुंडसीशो खोदेशो पा अर्को ठांठ लावो। मेकोपुकी मटीब खिं डा मुर बाक्तेक्म हना यो, रुप्नीमी कों? 4 गे ग्याइश्शा लाइक्चा पुंडसीशो दुम्चा कली, मेको आन डोंइती नाक्तीन इ मार मार फ्रेंदो। मिनु मेको आन डोंइती रे ग्याइश्शा लाइक्चा पुंडसीशो मुर खोदेशो पा नाक्दो लावो। 5 मेकोपुकीम तचा डा पा गारोम पोव्रला खितो। मिनु इ कुम्लो मेकेर रे पा स्त्रीडो। 6 मेकोपुकीम कोव्रन कोव्रना गे इ कुम्लो इ बलाम कुरो। मिनु नां रिक्मेनु कुरशा गाक्को। रागी मतचा डा पा इ कुल सुम्सो। मारदे हना गो इ कली इस्राएल आ खिं डा मुर आन पर्बम चिन्ड का सेल्शो बाक्नुड” देंत। इजीकीएल २४:२४, २७

7 गो मेको आ अरेशो खोदेशो पाता। मिनु ग्याइश्शा लाइक्चा पुंडसीशो दुम्चा कली नाक्तीन आं कुम्लो फ्रेंशा गुंडताक्ड। मिनु नाक्दो गारोम पोव्रला खित्ता। मिनु मेको आन तन तना आं कुम्लो बलाम कुरशा नाक्दो गाक्ती।

8 मिनु आ सुनी परमप्रभु यावेमी आं कली लोव्र पाप्तु। 9 मार लोव्र पाप्तु देशा हना “ए मुर, मार, मेको इस्राएल डा मटीब खिं डा मुरपुकीम ‘गे मार पवी’ दे इ कली हिल्लो मपामे?” देंत। 10 मेको आन कली “परमप्रभु, परमप्रभु यावेमी मार देंत देशा हना ‘एको लोव्र यरूसलेम डा सासन पाइब नु इस्राएल डा मुर नेल्ल आन पर्बम बाक्ब’ दे माइक्मी। 11 मेको आन कली ‘गो गे इन कली चिन्ड का दुम्ती। गो मार पडा, मेको आन कली पाइनीमी। मेकोपुकी रागी रे ग्याइश्शा लाइक्चा पुंडसीनीम’ देंत। 12 मेको आन दातेम बाक्शो सासन पाइबमी नाक्दो आ बलाम मार मार कुरशा गाक्ब। मिनु लाङगा ग्राचा कली गारोम पोव्रला खिप्ब। मिनु मेकोम आ रागी मकोव्रचा कली आ कुल सुम्ब। २राजा २५:४ 13 गो मेको आ तार आं ग्याइल आप्नुड। मिनु मेको आं ग्याइलीम बिक्ब। मिनु गो मेको कली कल्दी आन रागी बेबीलोनम चाक्नुड। तन्न मेकोम, मेको रागी मताइब। मिनु मेकेरन बेक्ब। इजीकीएल १७:२०; येरमीया ३९:७ 14 मेको आ एर ओंथ बाक्ब आ गेय पाइबपुकी नु आ लडाइ पाइब नेल्ल आन कली फशेम एर ओंथ ब्रपाइक्नुडमी। मिनु तरवार शोइश्शा खेदा पाइनुडमी। 15 मिनु गो मेको आन कली रागी रागी डा मुर आन दातेम फ्राइनुडमी। राज्य राज्यम एर ओंथ ब्रपाइक्नुडमी। मिनु मेकोपुकीम गोन परमप्रभु यावे नड, दे तुइक्नीम। 16 तन्न गो मेको आन दाते डा का निक्शी आन कली तरवार, अन्काल नु मुर बेक्तीक रोइ रे प्रोंइनुडमी। मिनु मेकोपुकी ते ते बाक्नीमी, मेक मेक डा रागी रागी डा मुर आन दातेम आन ग्रांग्रा दिशो गेय पशो आ पर्बम बिक्चीम ला मो पका बाक्त देंमल। मिनु मेकोपुकीम गोन परमप्रभु यावे नड, दे तुइक्नीम” दे परमप्रभुम देंत। इजीकीएल ६:८

इजीकीएल चिन्ड दुम्शो

17 मिनु लेंशा परमप्रभु यावेम आं कली लोव्र पाप्तु। 18 मार लोव्र पाप्तु देशा हना “ए मुर, गे इ जचा थोव्रक जवीनु खिखि पा जावो। मिनु ब्वाक्कु तूडीनु, हिंशा गिक गिक पा खिखि पा तूडो। 19 मिनु रागी डा मुर नु यरूसलेम नु इस्राएल रागीम बाक्ब मुर आन कली परमप्रभु, परमप्रभु यावेमी ‘मेको आन जचा थोव्रक हिंशा जाइनीम। मिनु सुर्ता पा ब्वाक्कु तूनीम। मारदे हना मेकेर बाक्ब आन मरिम्शो पतीके, मेको रागी नु मेकेर बाक्शो मारेइ मारेइ गोरशो सेल्लुड। 20 मुर बाक्शो सहर नेल्ल श्येतथ दुम्नीम। मिनु रागी नुप्ब। मिनु गेपुकीम गो परमप्रभु यावे नड, दे तुइक्नीनी’ देशो बाक्ब” देंत।

21 मिनु लेंशा परमप्रभु यावेमी आं कली लोव्र पाप्तु। 22 “ए मुर, इस्राएल रागी आ पबर्म मार लोव्र बाक्बा? नाक्ती लाक्ना लाक्न बाक्नीम। मिनु परमप्रभु यावे आ कोंइतीके मखाप्नीम। २पत्रुस ३:४ 23 मोपतीके मेको आन कली ‘परमप्रभु, परमप्रभु यावेमी, गो मेको मो देंतीक लोव्र आ अर्थ साम्नुड। मिनु मेकोपुकीम इस्राएलम मेको देंतीक लोव्र गेनायो मदेनीम’ दे माइक्मी। मेको आन कली ‘नाक्त नेक्थान जाक्शो बाक्नीम। कोंइतीक नेल्ल गाप्ब। हबकुक् २:३ 24 मारदे हना मुल लेंशा गेनायो इस्राएली आन दातेम जोल पा कोंइतीके नु लेम्शा लिंक्नु कोव्रब मदुम्नीम। 25 मारदे हना गो, परमप्रभु यावे आं देशो लोव्र पशा, खाप्नुड। मेको देश मपाइब रीब पा दुम्ब। ए मटीब खिं डा मुर, इन पालामीन गो आं देशो लोव्र खाप्नुड’ दे परमप्रभु, परमप्रभु यावेमी देशो बाक्ब” देंत।

26 मिनु लेंशा परमप्रभु यावेमी आं कली लोव्र पाप्तु। 27 मेकोमी “ए मुर, इस्राएल आ खिं डा मुरपुकी, मेको आ कोंइतीकेमी कोंइशो लोव्र शुश बर्स नोले ला दुम्ब। मेको नोले दुम्ब लोव्र बाक्ब। 28 मोपतीके मेको आन कली ‘परमप्रभु, परमप्रभु यावेमी आ देशो लोव्र खाप्ब। लोव्र का यो मजाम्ब। मार देंबा, मेको पाइब’ दे माइक्मी, दे परमप्रभु, परमप्रभु यावेमी” देंत।

13

जोल पा परमप्रभु आ लोव्र पाइब

1 परमप्रभु यावेमी आं कली लोव्र पाप्तु। 2 मार, लोव्र पाप्तु देशा हना “ए मुर, इस्राएल डा आं लोव्र पाइब आन कली नु आंम आन मिम्शो लोव्र पाइब आन कली ‘परमप्रभु यावे आ लोव्र नेनीन’ देनो। 3 मेको निप्स मपाइशो आं लोव्र पाइब आन कली ‘आबी, मेको आंमा आन थुं डा लोव्र, आं कोंइतीके मतथु, लोव्र पाइनीम। येरमीया १४:१४ 4 ए इस्राएल, जोल पा आं लोव्र पाइब ब्रेशो खिंम बाक्ब सिवार खोदेशो बाक्नीम। 5 गे ब्रेशो गारो लेंशा मसेली। गे इस्राएल कली वारच मपनी। मोपतीके परमप्रभु यावे, आं नाक्त मेको बुइनीम’ देंत। यसैया २:१२ 6 मेको आन तशो लोव्र जोल बाक्शा, आन लिंक्नु कोव्रतीक जोल बाक्ब। मेकोपुकीम ‘परमप्रभु यावेमी देशो बाक्ब’ देंनीम। तन्न मेको परमप्रभु यावेमी सोइशो मनम। मो हना यो मेकोम आन लोव्र गाप्ब, दे आस पाइनीम। इजीकीएल २२:२८; येरमीया ५:३१ 7 गेपुकीम जोल पा कोंइतीके तशा, लिंक्नु कोव्रशा, जोल लोव्र ला पाइब दुम्तीनी। तन्न गो इन कली काइ लोव्र मपथु, गेपुकीमी ‘परमप्रभु यावे आ लोव्र बाक्ब देंतीनी’ दे माइक्मी” देंत।

8 मोपतीके परमप्रभु, परमप्रभु यावेमी “गेपुकीम फश लोव्र पा, जोल पा कोंइतीक आ पबर्म लोव्र पतीके, गो इन कली मरिम्शो पाइनुड। 9 ‘मेको दूली पा कोंइतीक लोव्र पाइब आन पबर्म नु जोल पा लिंक्नु कोव्रब आन पबर्म, गो आं गुइ इन गे क्युक्नुड। मेकोपुकी आं मुर आन दातेमी बाक्चा मताइनीम। मेको आन नें इस्राएली आन खिं डा मुर आन नें ब्रेक्तीकेम ब्रेक्चा मताइनीम। मेकोपुकी इस्राएल रागीम ओव्रचा मताइनीम। मिनु गेपुकीम गोन परमप्रभु यावे नड, दे तुइक्नीनी, देशो बाक्ब’ दे माइक्मी” देंत। इजीकीएल १४:९ 10 थमा पा, मेकोपुकीम आं मुर आन कली दूली लां खोइक्पाइशशा, थुं नाइक्तीके मबाक्थु, यो “थुं नाइशशा बाक्कीन” देंनीम। मिनु मुरपुकीम ब्रेत्चा चिक्शो गारो प्रोव्रनीमी, मेको जोल पा लोव्र पाइबम बुलु बुइशशा सुम्नीम। येरमीया ६:१४ 11 गे मेको बुलु बुइक्ब आन कली “थाम्पा ठेयब रेउ यीब। मिनु ठेयब मुप्स यीनीम। मिनु फश गिवार जाक्ब। 12 मिनु मेको गारो ब्रेप्ब। मार, मुरपुकीम इन कली ‘गे इन बुइशशा बुलु ते लाक्गा, दे हिल्लो मपाइनीमी? देशो बाक्ब’ दे माइक्मी” देंत। 13 मोपतीके परमप्रभु, परमप्रभु यावेमी “गो आं गाइशोम थम हिंचा डा फश गिवार पपाइक्नुड। मिनु आं चुरशोम खतम पोक्चा कली रेउ नु मुप्स जाक्ब। 14 मिनु मेकोमी इन बुलु बुइशशा गारो नेल्ल ब्रेप्पाइक्ब। आ जग यो तांइसीब। मेको प्रेदुनु, गे गारो आगाम बेक्नीनी। मिनु गेपुकीम ‘गोन परमप्रभु यावे नड’ दे तुइक्नीनी। 15 मोपा गो आं गाइशो मेको गारो नु मेको बुलु बुइक्ब आन तारी मोइक्नुड। मिनु गो इन कली ‘मुल मेको गारो मबा, मेको आन कली बुलु बुइक्ब यो मबाक्म’ देंनुड। 16 इस्राएल डा मेको जोल पा परमप्रभु यावे आ लोव्र पाइबपुकीम यरूसलेम आ पबर्म लोव्र पाम्तेक्म। मिनु

मेकेर थुं नाइशशा बाक्तीक मदुमथु यो 'थुं नाइशशा बाक्तीक ताइतक' देतेकम। 17 मेकोमी 'मुल ए मुर, इ मुर आन तमी आन कली हुइकतो। मेकोपुकीम आन थुंम मिम्शा लोव्र पाइनीम। गे परमप्रभु यावे आ लोव्र मेको आन कली पावो' देत। 18 'आबी आबी, गुइ कली फ्रेंतीक सेल्ब मीश मुर आन कली श्येत बाक्ब। मुर आन कली साइक्चा कली लाइशशो कोव्रशा, कुल सुम्तीक वा सेल्ब मीश मुर आन पर्वम आबी आबी। मार, गेपुकीम आं मुर आन कली साइक्नीनी? मिनु गे ब्रोंइचा ताइनीनी डा? मताइनीनी। 19 मुठी का निक्शी क्योव्रज, नु टुक्रा का निक्शी शोब्ले आ पर्वम साइक्चा ममाल्शो मुर आन कली साइक्तीनी। मिनु ब्रोंइचा मगेचा माल्शो मुर आन कली ब्रोंइचा गेतीनी। मिनु आं मुर आन कली जोल पा मोदेशो पाइतीनी' दे परमप्रभु, परमप्रभु यावेमी मेको आन कली माइक्मी" देत।

20 मोपतीके परमप्रभु, परमप्रभु यावेमी "गो इन फ्रेंतीक आ पर्वम इन कली मरिम्शो पाइनुड। गो इन गुइ रे चिक्ब खोदेशो पा साइक्चा चिक्शो मुर आन कली इन गुइ रे प्रोंइनुड। 21 गो मेको आन कुल सुम्तीक वा शोल्शा, आं मुर आन कली प्रोंइनुडमी। मेकोपुकी मुल रे इन गुइ डा सिखार मदुम्नीम। मिनु गेपुकीम गोन परमप्रभु यावे नड, दे तुइक्नीनी। 22 मारदे हना गे जोल पा दोस गेशा ठीक पाइब मुर आन कली आन थुं लुक्च लपाइक्तीनी। गो मोदेशो मपड। मिनु आं अरेशो लोव्र मटीब आन कली टीब मदुमीन, देशा ब्रोंइचा मगेनी। यरमीया २३:१४ 23 मोपतीके गेपुकीम मुल रे जोल पा कोइतीक मताइनीनी। गे लिंक्यु मकोव्रनीनी। गो आं मुर आन कली इन गुइ रे प्रोंइनुडमी। मिनु गेपुकीम गोन परमप्रभु यावे नड, दे तुइक्नीनी" दे परमप्रभुम देत।

14

मूर्ति पूजा पाइब आन कली दोस

1 इस्राएल डा खाल्पा का निक्शी जाक्शा, आं डोंइती निस्साकम। इजीकीएल २०:१ 2 मिनु मेना परमप्रभु यावेमी आं कली लोव्र पाप्तु। 3 मार लोव्र पाप्तु देशा हना "ए मुर, एको खाल्पापुकीम आन मूर्ति आन आन थुंम वोइशशो बाक्तेकम। मिनु मरिम्शो पा दाइल पाइसीतीक फुल्लु यो आन डोंइती वोइशशो बाक्नीम। मार, आन हिल्लो पशो लोव्र गो लेत्चा माल्नुडा, डा? 4 मोपतीके गे मेको आन कली 'परमप्रभु, परमप्रभु यावेमी इस्राएल आ खिं डा मुर सुइमी मूर्ति आन थुंम वोइशशा, आन मरिम्शो पा दाइल पाइसीतीक फुल्लु, आन डोंइती वोइशशा, आं लोव्र पाइब आन बाक्तीक जाक्तेकम हना, गो, परमप्रभु यावेमी, मेको आन थुंम मूर्ति वोइशशा जाक्शो मुर आन कली लोव्र लेत्नुडमी। 5 मिनु मेको मूर्तिम पतीके इस्राएल आ खिं डा मुरपुकीम आं कली प्रोंइतेकम। मो हना यो आन थुं फाइशशा, आं गे लेत्ने चाप्नुडा, को?'

6 मोपतीके इस्राएल आ खिं डा मुर आन कली 'परमप्रभु, परमप्रभु यावेमी इन ग्रान्ग्रा दिशो गेय नेल्ल प्रोंइशा, इन मूर्ति रे पा लेशशा आं गे जाक्कीन' देशो बाक्ब, दे माइक्मी। 7 इस्राएल आ खिं डा मुर सुइ नु मेकेर बाक्ब अर्को रागी डा मुर सुइमी आं कली प्रोंइशा, मूर्ति आन थुंम वोइशशा, आन मरिम्शो पा दाइल पाइसीतीक फुल्लु आन डोंइती वोइशशा, आं लोव्र पाइब आन बाक्तीक जाक्तेकम हना, गो, परमप्रभु यावेमी, मेको आन थुंम मूर्ति वोइशशा जाक्शो मुर आन कली लोव्र लेत्नुडमी। 8 गो मेको आन कली सजाइ गेनुडमी। मिनु गो मेको मुर कली कोइतीक नु शुक्शी पाइक्तीक सेल्लुड। गो मेको कली आं मुर आन दाते रे तिल्लुड। मिनु गोन परमप्रभु यावे नड, दे तुइक्चा माल्नीनी।

9 मिनु सुइ परमप्रभु यावे आ लोव्र पाइबम आ लोव्र मार बाक्बा, दे हिल्लो पाइब आन कली आंमा थुंम मिम्शा लोव्र पाप्तु हना, गो मेको कली मोदेशो पपाइक्ता। मिनु गो मेको कली आं गुइ दिंशा, सजाइ गेशा आं मुर इस्राएली आन दाते रे क्याम्नुड। १राजा २२:२०-२३ 10 मेको निम्फाम आस मरिम्शो पशो आ पर्वम सजाइ ताइनीस। आं लोव्र पाइब नु आं लोव्र हिल्लो पाइब, निम्फा आस सजाइ उइक्थ उइक्थ दुम्ब। इजीकीएल ३:१७-२० 11 मिनु इस्राएल आ खिं डा मुर गेनायो आं रे पा बरलेशा मलाइनीम। मिनु मेकोपुकीम गेनायो हेंथे पा आंम कली ग्रान्ग्रा दिशो मसेल्सीनीम। मिनु मेकोपुकी आं मुर दुम्नीम। गो मेको आन परमप्रभु दुम्नुड, दे परमप्रभु, परमप्रभु यावेमी देशो बाक्ब" देत। इजीकीएल ११:२०

परमप्रभुम गेशो सजाइ ठीक बाक्ब

12 मिनु परमप्रभु यावेमी आं कली लोव्र पाप्तु। 13 मार लोव्र पाप्तु देशा हना "ए मुर, तेकोइ रागी डा मुर आन थुं फाइशशा आं कली प्रोंइशा अर्को आ नोले खोइक्तेकम हना, गो मेको आन पर्वम आं गुइ दिंशा आन जचा थोव्रक खतम पोक्नुड। अन्काल चाक्शा, मेकेर डा मुर नु बी ब्यफ, क्यारश भेडा नेल्ल आन कली साइक्नुडमी। इजीकीएल ४:१६ 14 मेकेर नोआह, दानीएल नु अय्युब सांफा बाक्तेकम हना यो, मेकोम आन ठीक पतीकेम आंमा ला ब्रोंइचा

ताम वा, दे परमप्रभु, परमप्रभु यावेमी देशो बाक्ब” देंत। येरमीया १५:१ 15 गो मोदेशो रागी कली खतम सेल्चा कली ब्वाकी डा जन्तु सोइक्ताकडमी हना, जन्तुपुकीम पतीके मेको रागी रे सुइ एर ओंथ पने मचाप्तेक्म हना, 16 मिनु मेको मुर सां मेकेर बाक्तेक्म हना, गो आं ब्रोंइशा बाक्शो खोदेशो पा, मेकोम आन तमी तौ आन कली प्रोंइने मचबेम वा। मेकोपुकी आंमा ला ब्रोंइम वा। मिनु मेको रागी गोरशो रागी दुम वा। 17 मिनु परमप्रभु, परमप्रभु यावेमी “गो रागी आ पबर्म तरवार सोइइशा, मेको तरवार कली ‘मुर नु बी ब्यफ, क्यारश भेडा नेल्ल साइक्मी’ देंती हना, 18 मिनु मेको मुर सां मेकेर बाक्तेक्म हना यो, गो आं ब्रोंइशा बाक्शो खोदेशो पा मेकोम आन तमी तौ आन कली प्रोंइने मचबेम वा। मेकोपुकी आंमा ला ब्रोंइम वा। 19 मिनु गो मेको रागीम मुर बेक्तीक रोइ सोइइशा, हुश ख्राक्श पोक्शा, मेकेर डा मुर नु बी ब्यफ, क्यारश भेडा साइइशा आं गाइइशो मोइक्ता हना, 20 मिनु मेकेर नोआह, दानीएल नु अय्युब बाक्तेक्म हना यो, गो आं ब्रोंइशा बाक्शो खोदेशो पा मेकोम आन तमी तौ आन कली प्रोंइने मचबेम वा। मेको आन ठीक पतीकेम आंमा ला ब्रोंइम वा” देंत।

21 परमप्रभु, परमप्रभु यावेमी “गो यरूसलेम आं ४ ओटा हिंचा डा श्येत तरवार, अन्काल, ब्वाकी डा जन्तुपुकी नु मुर बेक्तीक रोइ सोइइशा मेकेर डा मुर नु बी ब्यफ, क्यारश भेडा आन कली साइक्तामी हना, सुइ मब्रोंइम वा। इजीकीएल ५:१७; लेवी २६:१६-२५; येरमीया १५:३; प्रकाश ६:८ 22 मो हना यो मुर आन दाते डा का निक्शी ब्रोंइशा बाक्नीम। मेको आं तमी तौ गूशा इ बाक्तीक जाक्नीम। मिनु गे मेको आन मिम्शो नु आन पशो ताइनेवे। मिनु गो यरूसलेम कली श्येत गेशो नु क्याम्शो आ पबर्म इ थुं नाइक्नेवे। 23 मेको आन मिम्शो नु आन पशो तशा, मेकोपुकीम इ थुं नाइक्पाइक्नीम। मिनु गो मेकेर मार मार पडा, मेको नेल्ल मोशीन मपड, दे तुइक्नेवे” दे परमप्रभु, परमप्रभु यावेमी देंत।

15

शोर गाक्शो अडगुर बोट

1 मिनु परमप्रभु यावेमी आं कली लोव्र पाप्तु। 2 मार लोव्र पाप्तु देशा हना “ए मुर, मार, ब्वाकीम बाक्ब अडगुर बोट आ शी ब्वाकी डा अरु तेकोइ रवा आन शी क्येडा रिम्शो बाक्बा डा? येरमीया २:२१ 3 मेको रे मारेइ थोव्रक सेल्चा दुम्बा डा? मुरपुकीम मार मार क्युक्चा कली मेको के कोडग सेल्नीमी डा? 4 मेको मीम चोइनीम। मेको मीम आ सुर निक्शी नेक्शा, आ दाते डा कोइला दुम्शा लीमेनु, मार दुम्बा डा? यूहन्ना १५:६ 5 मेको सेसीन बाक्मेनु ला यो मारेइ मदुम्त हना, मीम नेक्शा क्येर दुम्मेनु, मारेइ दुम्बा, डा?” देशो बाक्ब।

6 मोपतीके परमप्रभु, परमप्रभु यावेमी “दोपा ब्वाकी डा रवा आन दाते डा अडगुर बोट कली मीम चोचा कली गेडा, मोपा गो यरूसलेम डा मुर आन कली यो पाइक्नुडमी। 7 गो मेको आन कली सजाइ गेनुड। मेकोपुकी मी रे ब्रोंइतेक्म हना यो, मीम मेको आन कली दाक्ब। गो मेको आन कली सजाइ गेडानु, गोन परमप्रभु यावे नड, दे तुइक्चा माल्नीनी। 8 मिनु आन थुं फाइइशो अरु आन नोले खोइक्तीके मेको आन रागी मुर मबाक्तीके सेल्नुड” दे परमप्रभु, परमप्रभु यावेमी देंत।

16

यरूसलेम तेल्लेम खोदेशो दुम्शो

इजीकीएल २३:-

1 परमप्रभु यावेमी आं कली लोव्र पाप्तु। 2 मार लोव्र पाप्तु देशा हना “ए मुर, यरूसलेम कली मूर्ति पूजा पचा मदुम्ब, दे तुइक्पतो। 3 मिनु मेको कली परमप्रभु, परमप्रभु यावेमी यरूसलेम कली ‘इ गोतीके नु इ जरमेतीक रागी कनानी आन रागी बाक्ब। इ आफ एमोरी का बाक्त। इ ममा हित्ती बाक्त। 4 गे जरमेसेनु सुइम इ सपु मख्रोदेम। इ कली ब्वाक्कुम मचिक्तेम। सुइम इ रांम हिक्सी मख्रेक्तेम। इ कली सुइम वाम मगिलेम। 5 सुइम मेको नेल्ल पचा कली इ कली शिशी मकोंइदेम। तन्न गे जरमेसेनु, इ कली रूम ताइक्ताक्म। मारदे हना इ कली ग्रॉग्रा दित्ताक्म।

6 मिनु गो इ नेक्था रे पा लडानु, इ कली हुश लुम्सीशा बाक्शो ताइतन। मिनु गे मोपा लुम्सीशा बाक्डेनु, गो इ कली रू डा बोट खोदेशो पा कोल्शा, ब्रोंइशा, बाक्को’ देंती। 7 मिनु गे कोल्शा ठेयब दुम्ते। मिनु इ कुचु कोल्शा इ चां लाइइशो दुम्त। तन्न गे वा मफेक्शो शिश्रा बाक्ते।

8 गो लेंशा इ नेक्था रे पा लडानु, गे ग्युंवे पची ना दुम्शो बाक्ते। मिनु गो आं वा आ सुरमी इ शिश्रा रां सुम्ता। गो गे नु कबल का पाता। मिनु गे आं के दुम्ते। रूथ ३:९; प्रस्थान १९:५ 9 नोले गो इ कली ब्वाक्कुम चिक्शा इ हुश नेल्ले चिक्ताक्न। मिनु इ कली तेल खेक्ताक्न। 10 नोले गो इ कली बुटा आप्शो वाम ग्योम्ताक्न। मिनु इ खोइलीम रिम्शो कुशुल के जुत्ता लिक्ताक्न। गो इ कली रिम्शो पा किरशो सुती श्येले के वा फेक्ताक्न। मिनु शुश क्येट लाइब वाम इ कली ग्योम्ताक्न। 11 गो इ कली गहना पांडताक्न। इ गुइम चुरा लिक्ताक्न। इ शुरम सुन के माला रेलताक्न। 12 गो इ नेम मुन्द्री लिक्ताक्न। मिनु इ नोफाम माडवडी क्युक्ताक्न। इ पियाम दारशो सुन फू चुइक्ताक्न। 13 मोपा गे सुन चांदीम ग्योम्साक्वे। इ वा रिम्शो पा किरशो सुती श्येले के वा, शुश क्येट लाइब वा नु बुटा आप्शो दारशो वा दुम्तेक्म। इ जचा थोव्रक रिम्शो फस, खुदो नु रिम्शो तेल बाक्तेक्म। गे थम दारशो दुम्शा कोल्ते। मिनु गे पिपीम दुम्चा शिरते। 14 गे दारशो दुम्तीके इ नें रागी रागी डा मुर आन दातेम ब्रत। मारदे हना इ दारस मारेइ मदुम्शो रिम्शो बाक्ते। मेको नेल्ल आं इ कली गेशो ग्योम्तीके रे मोदेशो दुम्त, दे परमप्रभु, परमप्रभु यावेमी देशो बाक्ब” दंत।

15 मिनु परमप्रभुमी “तन्न गे इ दारसम थमा सुइक्तीवी। मिनु गे इ नें चेम्शा तेल्लेम का दुम्ते। इ नेक्था रे पा लाइब सु बाक्तेक्म हना यो, गे मेको नु तेल्लेम पाप्तीवी। येरमीया २:२० 16 गे इ वा रे लाइशशा, इ कली दारशो थान सेल्लतीवी। मिनु मेकेर गे तेल्लेम पाप्तीवी। मेको मोदेशो डोंइती गेनायो मदुम्शो बाक्ते। मिनु नोले यो गेनायो मदुम्ब। 17 गो इ कली गेशो दारशो गहना लाइशशा, मेको आं सुन चांदी के बाक्तेक्म। मिनु मेको रे वोंइश मुर मूर्ति सेल्साक्वे। मिनु मेको नु तेल्लेम पाप्तीवी। होसे ८:४ 18 गे इ बुटा आप्शो वा लाइशशा, मेको आन कली सुम्तीवी। मिनु गे आं तेल नु धूप मेको आन डोंइती चढ़ेप्तीवी। 19 गो इ कली जचा थोव्रक यो गेतन। गो इ कली रिम्शो फस, खुदो नु रिम्शो तेल जचा गेतन। तन्न गे मेको जचा थोव्रक मेको आन डोंइती ब्रोव्रशो रिना पपाइक्चा कली चढ़ेप्तीवी। मोदेशो दुम्त। 20 मिनु गे आं कली थिशो तमी तौ आन कली लाइशशा, मूर्ति आन कली जचा थोव्रक सेल्शा क्योरशा चढ़ेप्तीवी। मार इ तेल्लेम पशोमीन मगाम डा? इजीकीएल २०:२६; इजीकीएल २३:३७; ब्यवस्था १२:३१; २राजा १६:३; येरमीया ७:३१ 21 गे आं आल आन कली क्योरशा, मूर्ति आन कली चढ़ेप्तीवी। 22 मिनु इ मूर्ति पूजा नु इ तेल्लेम पशो नेल्लेम ठिठी दुम्शो डा नाक्ते ममिम्ती। मेना गे वा मफेक्सीशो शिश्रा नु हुश लुम्सीशो बाक्ते।

23 इ आं अरेशो मटिशो आ पर्वम परमप्रभु, परमप्रभु यावेमी इ पर्वम ‘आबी आबी’ दंत। येरमीया ११:१३ 24 गे इ कली चोक चोकम मूर्ति पूजा पतीके सेल्साक्वे। 25 मिनु गे लां गुम्तीक नेल्लेम इ कली लाइशशा बाक्तीके सेल्शा, इ दारसम तेल्लेम पाप्तीवी। मिनु मेको रे पा लाइब नेल्ल आन कली गे इ रां गेशा इ तेल्लेम पतीक बारपाइक्तीवी। 26 गे इ माल्शो, इ नेक्था बाक्ब इजीप्त डा मुर नु तेल्लेम पाप्तीवी। मोपा इ तेल्लेम पतीक बारपाइशशा, आं कली थाम्पा गाइक्पाइक्ती। 27 मोपतीके गो इ कली सजाइ गेतन। गो इ कली शुश जचा थोव्रक मगेथु, इ जोरी सत्रु आन गुइम गेतन। गो इ कली पलिस्ती आन दाक्शो सिखार दुम्पाइक्चा कली गेतामी। पलिस्ती आन तमीपुकी इ मरिम्शो पशो तशा मुने पाम्तेक्म। 28 गे अस्सुर डा मुर नु यो तेल्लेम पाप्तीवी। मारदे हना गे मोपा मरूशो बाक्ते। तेल्लेम पशा नोले यो मरूडे। इजीकीएल २३:१२ 29 गे मार मार ग्याप्ब लेयब रागी कल्दी नु यो इ तेल्लेम पतीक बारपाइक्तीवी। मेको मो पशा यो मरूडे” दंत।

30 मिनु परमप्रभु, परमप्रभु यावेमी “गे मोदेशो पचा कली इ थुंम दोदेशो पा रोइ पचा माल्दा? गे एको गेय नेल्ल मुने मपाइशशा तेल्लेममी खोदेशो पा पाप्तीवी। 31 गे गुम्तीक लां नेल्ल नु इ चोक चोकम इ लाइशशा बाक्तीके सेल्लतीवी। तन्न गे तेल्लेम खोदेशो मदुमे। मारदे हना गे इ गाल्च मताक्मी। 32 गे हेंथे पाइब मीश, इ वोंइश आ पा डा अर्को नु बाक्नेवे। 33 मुरपुकीम तेल्लेम नेल्ल आन कली गाल्च गेनीम। तन्न गे चहिं दूली पा इ कली दाक्ब आन कली कका गाल्च गेप्तीवी। गे मेको आन कली एर ओंथ नेल्ल रे चाक्शा, गे नु इप्पाइक्चा कली घूस गेप्तीवी। 34 मोपा गे इ तेल्लेम पतीकेम अरु मीश मुर खोदेशो मदुमे। इ कली सुइम मयोव्रडेम। मोपतीके गे गाल्च गेप्तीवी। गे इ गाल्च मतगी। मोपा गे अरु तेल्लेम खोदेशो मदुमे” दंत।

35 मोपतीके ए तेल्लेम, परमप्रभु यावे आ लोव्र नेनो। 36 परमप्रभु, परमप्रभु यावेमी “मारदे हना माल्तीके थम ठेयब बाक्ते, इ तेल्लेम पचा कली इ कली माल्शो मुर आन कली इ शिश्रा रां कोंइताक्वी। मेको नेल्ल इ ग्रांग्रा दिशो मूर्ति नु इ आल आन हुश जारशो आ पर्वम बाक्ब। 37 मोपतीके गो इ तेल्लेम पशो नु ग्येरसीशा बाक्शो इ दाक्शो मुर नेल्ल आन कली इ एर ओंथ रे खुप्नुडमी। इ कली दाक्ब नु मदाक्ब नेल्ल आन कली खुप्नुडमी। गो मेको नेल्ल एर ओं रे खुप्नुडमी। मिनु गो मेको आन डोंइती इ कली शिश्रा सेल्लन। येरमीया १३:२२ 38 गो इ कली हेंथे गाक्ब हुश खाक्श

पोक्ब मीश मुर खोदेशो पा आं निसाफ पतीक लोव कोवशा निसाफ पाइनुड। गो आं गाइशो नु रुश पशोमी सजाइ गेनुड। लेवी २:१० 39 मिनु गो इ कली इ मदाकशो मुर आन गुइम जिम्मा गेनुड। मिनु मेकोपुकीम इ लाइशो बाक्तीके नु लां डा बाक्तीके प्रेत्नीम। मेकोपुकीमी इ वा प्रुइशो इ दारशो थोवक रोइशो, इ कली शिश्रा सेल्शा प्रोइनीम। 40 मेकोपुकीम इ कली ग्रांग्ये माग्ये पोक्ब मुरपुकी चाक्नीम। मिनु फुल्लु आप्नीम। मिनु इ कली आन तरवारम चेकशा चोकटा लाम्टा सेल्नीम। ब्यवस्था २२:२३-२४ 41 मेकोपुकीम इ खिंम मी सुइक्नीम। मिनु शुश मीश मुर आन डोंइती इ कली सजाइ गेनीम। गो इ तेल्लेम पतीक तेक्नुड। मिनु इ मुर आन कली गाल्च गेतीक तेक्नुड। २राजा २५:९ 42 मिनु आं गाइशो नु आं रुश पशो, इ रे डोन नाइक्पाइक्नुड। मिनु गो सिक्सी पा बाक्शा मगाइक्नुड। 43 मारदे हना गे इ ठिटी बाक्डे ना डा नाक्त ममिम्ती। तन्न एको गेय नेल्लेमी आं कली गाइक्पाइक्ती। मोपतीके गो इ पशो इ पियामीन मोइक्ता। गे इ अरु ग्रांग्रा दिशो गेय नेल्ल प्रोइशा यो इ पतीक नेल्ल मरिम्शो सेल्शा, इ गेय मतेम्दी डा? गे मूर्ति पूजा पाइब क्येडा मरिम्शो पाइब मनवे डा?” देंत। 44 मेकोम “कथा पाइब नेल्लेम इ पबंम कथा पा ‘दोदेशो ममा मोदेशो तमी’ देंनीम। 45 गे इ ममा आ तमी बाक्नेवे। मेकोम आ वोंइश नु आ आल आन कली प्रोइतु। मिनु गे इ दिदी आ लोक्ब यो बाक्नेवे। मेकोम आ वोंइश नु आ आल आन कली प्रोइतु। इ ममा हिती का बाक्ब। इ आफ एमोरी का बाक्ब। इजीकीएल १६:३ 46 मिनु इ दिदी सामरीया बाक्ब। मेको इ उत्तर गे आ तमीपुकी नु बाक्शो बाक्त। इ लोक्ब नु आ तमी चहिं दक्खिन गे सोदोम सहरम बाक्नीम। मेको आ तमीपुकी नु बाक्शो बाक्ब। 47 गे मेको आन गाक्शो लांम ला मगाक्डे। मिनु मेको आन मूर्ति पूजा पशो आ नोले यो खोइक्तीवी। मिनु इक्का नाक्तीमीन इ पतीक नेल्लेम मेको आन क्येडा यो शुश मरिम्शो पाप्तीवी” देंत। 48 परमप्रभु, परमप्रभु यावेमी “गो आं ब्रोंइशा बाक्शो खोदेशो पा, इ लोक्ब सोदोम नु मेको आ तमीपुकीम इ मरिम्शो पशो खोदेशो गेनायो मपाम। मती १०:१५ 49 इ लोक्ब सोदोम आ दोस मार बाक्त देशा हना, मेको नु आ तमीपुकी ठेयब लेशशा, शुश जशा ब्वशा, शोंप पाइशो दुम्शा बाक्तेक्म। मेकोपुकीम पुडग नु मारेइ मथीब आन कली वारच मपदेम। 50 मेकोपुकी ठेयब लेशशा, आं डोंइती ग्रांग्रा दिशो गेय पाम्तेक्म। मोपतीके गो मोदेशो तशा मेको आन कली तिल्लामी। उत्पती १९:२४ 51 सामरीयामी इ पशो पाप क्येडा उइक्थ यो मपावो। गे मेको आन क्येडा शुश मूर्ति पूजा पाप्तीवी। मिनु गे इ पशो गेय नेल्ल रे पा, इ लोक्ब आस कली ठीक पाइब तांइसीब खोदेशो सेल्शो बाक्नेवे। येरमीया ३:११ 52 गे इ मरिम्शो पशो रावो। मारदे हना गे इ लोक्ब आस कली इ क्येडा आइक्च सजाइ ताइब सेल्तीवी। मारदे हना गे मेको आस पाप पशो क्येडा इ पशो मूर्ति पूजा शुश बाक्त। गे इ क्येडा मेको आस कली ठीक पाइब खोदेशो सेल्तीवी। मोपतीके मुने पावो, इ मरिम्शो पशो राव। मारदे हना गे इ लोक्ब आस कली ठीक पाइब खोदेशो सेल्शो बाक्ते।

परमप्रभुमी आ मुर आन कली दाक्ब

53 मिनु गो सोदोम नु आ तमी आन कली रिम्शो दुम्तीक नाक्ती लेशशा गेनुडमी। मिनु सामरीया नु आ तमी आन कली यो मोदेशो पाइनुड। मिनु इ रिम्शो दुम्तीके नाक्ती यो लेशशा गेनन। ब्यवस्था ३०:३ 54 मोपा गे इ मरिम्शो पशो राइनेवे। मिनु इ पशो नेल्ल आन पबंम गे मुने दोक्चा माल्नेवे। मिनु मेको आस कली थुं नाइक्तीके दुम्नेवे। 55 इ लोक्ब सोदोम नु आ तमीपुकी डोंइती डा खोदेशो पा रिम्शो दुम्नीम। मिनु सामरीया नु आ तमीपुकी यो डोंइती डा खोदेशो पा रिम्शो दुम्नीम। मिनु गे नु इ तमीपुकी यो डोंइती डा खोदेशो पा रिम्शो दुम्नीनी। 56 डोंइती इ ठेयब लेत्तीक नाक्ती गे इ लोक्ब सोदोम आ पबंम शुक्शी मपवी डा? 57 मेना मेकोपुकीम इ परमप्रभु यावे आ अरेशो मटिशो मतुइशो बाक्तेक्म। मुल अराम डा तमीपुकीमी इ कली शुक्शी पाइनीम। मेको आ नेक्था डा मुर, पलिस्ती आ तमीपुकीमी नु एर ओंथ डा मुर नेल्लेमी शुक्शी पा आइक्च मिम्नीम। अराम आ तमी एदोम यो बाक्ब। 58 गे इ मुने दोक्चा डा गेय नु इ मूर्ति पूजा पशो डा सजाइ तचा माल्नेवे” दे परमप्रभु यावेमी देंत।

गेना हना यो लीब कबल

59 परमप्रभु, परमप्रभु यावेमी “गे इ पशो खोदेशो पा गो इ कली पाइनुड। गे आं कसम जशो ममिम्ती। इस पशो कबल यो क्याम्ताक्वी। 60 मो हना यो गो इ ठिटी बाक्डे नाक्त डा गे नु पशो कबल मिम्नुड। गो गे नु गेना हना यो लीब कबल पाइनुड। लेवी २६:४५; होसे २:१७; इजीकीएल ३७:२६; येरमीया ३१:३१-३४ 61 मेना गे इ पशो नेल्ल मिम्शा, मुने दोक्शा, इ लोक्ब आस कली ब्राइनेवे। गो मेको आस कली इ तमी खोदेशो पा गेनन। तन्न मेको गे नु पशो कबलम पतीके पशो ममाइ। इजीकीएल २०:४३ 62 मिनु गो गे नु ग्येत्थ लुक्च मपाइब कबल पाइनुड। मिनु गे गोन परमप्रभु यावे नड, दे तुइक्नेवे। 63 मिनु गे इ डोंइती पशो मिम्शा मुने दोक्नेवे। गो इ पशो गेय नेल्ल आन पबंम

माफ गेनन। मिनु गे इ मुने आ पर्बम गे ठेयब लेशशो लोव्र पने मचाप्नेवे” दे परमप्रभु, परमप्रभु यावेमी देंत। इजीकीएल ३६:३१-३२

17

अडगुर बोट नु ककाकुली आस कथा

1 मिनु परमप्रभु यावेमी आं कली लोव्र पाप्तु। 2 मार लोव्र पाप्तु हना “ए मुर, कथा का देनो। गे इस्राएल आ खिं डा मुर आन कली लोव्र पावो। 3 मिनु परमप्रभु यावेमी मेको आन कली ‘लाइशशो, ठेयब फ्रां पाइशशो ठेयब ककाकुली का बाक्त। मेको आ शुश ओफला शुश रड डा बाक्तेक्म। मेको लेबानोनम जाक्शा, लाइशशो रवा आ डर प्रोइक्तु। 4 मेकोमी मेको रवा आ डर लाइशशा, ग्याप्तीक लेयतीक रागीम चाक्दीत्तु। मिनु मेको ग्याप्ब लेयब आन सहर काम खुम्तु। इजीकीएल १६:२९ 5 मिनु नोले मेकोमी रागी डा वांचेर लाइशशा, रिम्शो खपीम खुम्तु। मेकोम मेको वांचेर शुश ब्वाक्कु बाक्तीकेम खुम्तु। 6 मिनु मेको वाशा एर ओंथ नेल्ल गे ब्राइब लहारा का दुम्त। मिनु मेको आ राशी मेको ककाकुली गे लेत्तेक्म। तन्न मेको आ शाक्श चहिं आगामीन लीतेक्म। मोपा मेको लहारा का दुम्त। मिनु मेको आ राशी दाप्तेक्म। मिनु मेकेर रे शुश सफा गूतेक्म। इजीकीएल १९:१०

7 मिनु मेकेर अर्को ठेयब फ्रां पाइशशो नु शुश ओफला पाइशशो ठेयब ककाकुली का बाक्त। मिनु मेको लहाराम आ शाक्श मेको गे ब्रपाइक्तु। ब्वाक्कु तचा कली मेको आ राशी यो मेको ककाकुली गे ब्रपाइक्तु। मेको डोंइती डा खुम्तीके रे याक्शो बाक्त। 8 मेको के राशी दाम्मल। फल सिम्मल। मिनु मेको रिम्शो लहारा का दुम्ल, दे शुश ब्वाक्कु बाक्शो नु रिम्शो खपीम खुम्शो बाक्त’ देंशो बाक्ब। 9 मिनु परमप्रभु, परमप्रभु यावेमी ‘मार, मेको ग्रेल्बा डा? मार, मेको आ शाक्श तुल्चा मपुंडसीबा डा? मिनु मेको आ फल मसोवनीमी डा? मिनु मेको मबेक्बा डा? मेको आ नक वाशो कोच्वा नेल्ल बेक्नीम। मेको आ शाक्श तुल्चा कली शुश बोल्यो गुइ नु शुश मुर ममाल्नीम। 10 मेको कली याक्शा ला हना यो मेको ग्रेल्बा डा? पूर्ब डा फशेम आबानु मेको नेल्ल मसोवबा डा? रिम्शो खपीम खुम्शो बाक्त हना यो, फशेम आबानु मेको मसोवबा?’ दे मेको आन कली देंचा माल्नेवे” देंत।

कथा आ अर्थ शेंशो

11 मिनु परमप्रभु यावेमी आं कली लोव्र पाप्तु। 12 मार लोव्र पाप्तु देंशा हना “एको मटीब खिं डा मुर आन कली ‘एको लोव्र आ अर्थ मार बाक्बा, मेको मतुइक्नीनी?’ दे हिल्लो पामी। मेको आन कली ‘बेबीलोन डा पिप यरूसलेमम जाक्त। मिनु मेकोमी यरूसलेम डा पिप नु आ ठेयब गेय पाइब आन कली बेबीलोनम लाइक्तीमी। २राजा २४:१०,१५,१६ 13 मिनु मेकोम पिप आ खिं डा मुर का कली लाइशशा, कसम जपाइशशा, मेको नु कबल का पाप्तु। मिनु मेकोमी मेको रागी डा ठेयब मुर आन कली लाइक्तु। २राजा २४:१७; २इतिहास ३६:१३ 14 मेको रागी बोल्यो मदुम्ल। लेंशा बोक्ने मचबल नु मेकोम आ पशो कबल ला खाप्ने चाप्शा बाक्ल, दे मोदेंशो पाप्तु’ देंत। 15 तन्न यरूसलेम डा पिपमी मेको बेबीलोन डा पिप कली मटिथु, इजीप्त रागीम शारा नु ठेयब हुल का लडाइ पाइब गेयीनी, दे मुर सोइक्ताक्व। मार, मेको कली रिम्शो दुम्बा डा? मार मोदेंशो गेय पाइब मुर ब्रोंइने चाप्बा डा? कबल पशो प्रोंइशा यो, मेको ब्रोंइने चाप्बा डा?” देंत। 16 परमप्रभु, परमप्रभु यावेमी “गो आं ब्रोंइशा बाक्शो खोदेंशो पा, मेकोमी मेको कली पिप सेल्ब पिप नु जशो कसम प्रेंशा, आ पशो कबल प्रोंइशा, बेबीलोन डा पिप आ बाक्तीक सहरम बेक्ब। 17 फाराओ आ सक्ति पाइशशो लडाइ पाइब नु मेको आ मार मारमी मेको कली वारच पने मचाप्नीम। यरूसलेम कली पुम्ची ना नु गारो डोइक्तीक सेल्शा शुश मुर साइक्ची ना वारच मपाइब। 18 मारदे हना मेकोम आ जशो कसम ममिम्थु, आ पशो कबल प्रोंइशा, सल्ला पा यो, मोदेंशो मरिम्शो पतीके मेको ब्रोंइने मचाप्ब” देंशो बाक्ब। 19 मोपतीके परमप्रभु, परमप्रभु यावेमी “गो आं ब्रोंइशा बाक्शो खोदेंशो पा, मेकोम आ कसम जशो प्रेंशा, आं कबल प्रोंइशो नेल्ल मेको आ पियामीन मोइक्नुड। 20 गो आं ग्याइल मेको तार ब्वारनुड। मिनु मेको आं ग्याइलीम रेक्ब। मिनु गो मेको कली बेबीलोनम चाक्नुड। मिनु मेकोम आं थुं फाइक्तीके गो मेको कली निसाफ पाइनुड। इजीकीएल १२:१३ 21 मेको आ प्रोक्शा लशो लडाइ पाइब नेल्ल तरवारम साइक्चा पुंडसीनीम। मिनु ब्रोंइशो नेल्ल एर ओंथ ब्राइनीम। मिनु गो परमप्रभु यावेमीन एको लोव्र पशो नड, दे तुइक्नीनी” देंशो बाक्ब।

22 परमप्रभु, परमप्रभु यावेमी “गो लेबानोन डा लाइशशो रवा आ डर डा आइक्च राशी का प्रोइशशा लाइक्नुड। मिनु गो मेको कली नेल्ल क्येडा लाइशशो डांडाम खुम्नुड। यसैया ११:१ 23 गो मेको इस्राएल डा लाइशशो पहाड मेर खुम्नुड। मिनु मेकोम शुश राशी दाप्पाइशशा फल सिप्पाइशशा, थम दारशो लेबानोन डा लाइशशो रवा का दुम्ब। मिनु

नेल्ल खाल डा चिक्ब आ राशीम बाक्नीम। मिनु मेकेर ठेयब चिक्बपुकीम ग्योत्र सेल्शा, मेको आ वांकुम बाक्नीम। इजीकीएल २०:४०; १सामुएल २:७०८ 24 मिनु रू डा रवा नेल्लेम गो, परमप्रभु यावे नड, दे तुइक्चा माल्नीम। गो लाइशो रवा आन कली आइक्च सेल्लुड। आइक्च रवा आन कली लाइशो सेल्लुड। गो गिगी रवा आन कली सोत्रपाइक्नुड। मिनु सोत्रशो रवा आन कली गिगी दुम्पाइक्नुड। गो, परमप्रभु यावेमी एको लोत्र पाता। मिनु गो एको थमा पा पाइनुड” देंत।

18

बेक्चा नु ब्रोंइचा आंम गुइम बाक्ब

1 परमप्रभु यावेमी आं कली लोत्र पाप्तु। 2 मार लोत्र पाप्तु देंशा हना “इस्त्राएल रागी आ पर्वम लेंशा पशो कथा आ अर्थ मार बाक्बा, दे मिन्नीनी? ‘आम आफोम ग्युरशो अडगुर ब्वाम्तेक्म हना, आन आल आन खुइ ग्रिम्बा डा?’ ” दे हिल्लो पाप्तु। येरमीया ३१:२९ 3 लेंशा परमप्रभु, परमप्रभु यावेमी “गो आं ब्रोंइशा बाक्शो खोदेंशो पा, मुल रे गेपुकीम एको कथा इस्त्राएलम लेंशा काइ मदेनीन। 4 मारदे हना ब्रोंइशा बाक्ब नेल्ल आं केन नम, दे तुइक्चा माल्नीनी। आम आफ नु आल नेल्ल आं केन नम। सुम पाप पाइबा, मेको ला बेक्ब।

5 ठीक पाइब मुर का बाक्त हना, आं अरेशो टीब नु रिम्शो पाइब। 6 मेको डांडा मेर मजाइब नु इस्त्राएल आ खिं डा मुर आन मूर्ति आन कली पूजा मपाइब, मेको आ नेक्था डा मुर आन मीश नु मइप्ब, रां ब्रोंल्लो मीश मुर नु मइप्ब। लेवी १८:१९; लेवी १८:२० 7 मेकोम सुइ आन कली मदिप्ब, जाकटी वोइशो मार मार लेशशा गेब, मेकोम खुइ मपाइब, शोत्रलु बेक्शो आन कली आ जचा थोत्रक गेब। मिनु शिश्रा बाक्शो आन कली वा फेक्पाइक्ब। ब्यवस्था २४:१०-१३; यसैया ५८:७ 8 मेकोम जेर गेशा चाइक्ब मताक्ब, मेको मरिम्शो पतीक रे डोन बाक्ब नु मुर आन दातेम कुल मकोत्रथु ठीक निसाफ पाइब। प्रस्थान २२:२४; भजन संग्रह १५:५ 9 मेकोम आं फुल्लुम मुशा ब्रेक्शो लोत्र नु आं निसाफ पतीके लोत्र थुं मफाइक्थु पाइब। मोदेंशो मुर ठीक पाइब मुर बाक्ब। मिनु मेको थमा पा ब्रोंइचा माल्ब” दे परमप्रभु, परमप्रभु यावेमी देंशो बाक्ब।

10 मिनु “मेको मुर के तौ का बाक्ब। मेकोम हुश खाक्श पोक्ब नु मुर आन कली साइक्ब, 11 मेको आ आफोम मपशो गेय नेल्ले मेकोम पाइब, मेकोमी डांडा मेर जाइब, मेको आ नेक्था डा मुर आन मीश नु इप्ब। 12 फुडग नु मारेइ मथीब आन कली दिप्ब, मुर आन मार मार रोइक्ब। जाकटी वोइशो थोत्रक मलेप्ब, मूर्ति आन कली पूजा पाइब नु ग्रांग्रा दिशो गेय पाइब। 13 मेकोम आ चाइक्ब ताक्शा ला जेर गेब, मार मोदेंशो मुर ब्रोंइचा ताइबा डा? मेको ब्रोंइचा मताइब। मोदेंशो ग्रांग्रा दिशो गेय नेल्ल पतीके, मेको थमा पा बेक्चान माल्ब। मेको आ हुश आ दोस मेको आंमा राइब।

14 तन्न मेको मुर आ तौमी आ आफोम पशो पाप नेल्ल ताइब। मेको नेल्ल तशा, मोदेंशो गेय मपाइब। ब्यवस्था २४:१६ 15 मेकोम डांडा मेर मजाइब। इस्त्राएल आ खिं डा मुर आन मूर्ति आन कली पूजा मपाइब, मेको आ नेक्था डा मुर आन मीश नु मइप्ब। 16 मेकोम सुइ आन कली मरिम्शो मपाइब, मेकोमी जाकटी मताक्ब। मेकोम सुइ के मारेइ मरोइक्ब। तन्न शोत्रलु बेक्शो आन कली आ जचा थोत्रक गेब। शिश्रा बाक्शो आन कली वा फेक्पाइक्ब। 17 मेको मरिम्शो पतीक रे डोन बाक्ब, जेर गेशा आ चाइक्ब मताक्ब। मेकोम आं निसाफ पतीक लोत्र नेल्ल पाइब। मिनु आं फुल्लुम मुशा ब्रेक्शो लोत्र नेल्ल खाप्ब। मेको मुर आ आफ आ मरिम्शो पशो आ पर्वम बेक्चा ममाल्ब। मेको थमा पा ब्रोंइब। 18 तन्न मेको आ आफोम चहिं आ दला दाक्स पशा, आ लोक्ब आन कली रोइक्ताक्ब। आ मुर आन दातेम मरिम्शो पाप्तु। मेको आ मरिम्शो पशो आ पर्वम बेक्ब।

19 मो हना यो गेपुकीम मारदे आ आफ आ मरिम्शो पशो आ तौम कुरचा ममाल्दा? देंनीनी। आ तौम आं अरेशो टिशा, ठीक गेय पशो बाक्ब, मेकोम आं फुल्लुम मुशा ब्रेक्शो लोत्र होस पा टिशो बाक्ब। मोपतीके मेको थमा पा ब्रोंइब। प्रस्थान २०:५ 20 सुम पाप पाइबा, मेको ला बेक्ब। आलमी आ आम आफ आस मरिम्शो पशो आ पर्वम श्येत जचा ममाल्ब। आ आम आफोम यो आस आल आन मरिम्शो पशो आ पर्वम श्येत जचा ममाल्नीस। ठीक पाइब आ ठीक पशो आ कली दुम्ब। मिनु परमप्रभु यावे आ अरेशो मटीबमी आ मटिशो आ कलीन दुम्ब। २राजा १४:६

21 तन्न परमप्रभु यावे आ अरेशो लोत्र मटीब मुर कामी आ पशो पाप नेल्ल प्रोंइशा, आं फुल्लुम मुशा ब्रेक्शो लोत्र नेल्ल पाप्तु हना, आं अरेशो नु ठीक गेय पाप्तु हना, मेको थमा पा ब्रोंइब। मेको मबेक्ब। इजीकीएल ३३:१०-२० 22 मेको आ हेंथे पशो आ पर्वम लेंशा ममिम्सीब। मेको आ ठीक पतीकेम ब्रोंइब। यसैया ४३:२५ 23 मार, गो आं

अरेशो लोव्र मटीब मुर बेक्मेनु ग्येरनुडा डा? मेको क्येडा यो गो मेको आन मरिम्शो पशो प्रोंइशा ब्रोंइशा बाक्शो तचा मदाक्नुडा डा? १तिमोथी २:४ 24 तन्न ठीक पाइब मुरुम आ ठीक पतीक प्रोंइशा, मरिम्शो पाप्तु हना, आं अरेशो लोव्र मटीबपुकीम खोदेंशो पा ग्रांग्रा दिशो गेय पाप्तु हना, मार मेको ब्रोंइबा डा? मेको आ डोंइती पशो ठीक गेय मारेइ ममिम्सीब। मेको आ मरिम्शो पशो नु आ पाप आ पर्वम बेक्चा माल्ब। इजीकीएल ३:२०

25 मो हना यो गेपुकीम 'परमप्रभु आ पशो ठीक मबाक्ब' देंनीनी। इस्राएल आ खिं डा मुर नेनीन, मार, आं पशो ठीक मबाक्बा डा? मार, इन पशो कका ठीक बाक्बा डा? 26 ठीक पाइब मुरुम आ ठीक पतीक प्रोंइशा मरिम्शो पाप्तु हना, मेको आ ठीक मपतीकेम बेक्ब। मेको आ मरिम्शो पशो आ पर्वम बेक्चा माल्ब। 27 तन्न परमप्रभु यावे आ अरेशो मटीब मुरुम आ मटितीके प्रोंइशा, आं अरेशो ठीक गेय पाप्तु हना, मेको ब्रोंइब। 28 मारदे हना मेकोम मिम्शा, आ पशो मरिम्शो नेल्ल रे लेत्त हना, मेको थमा पा ब्रोंइब। मेको बेक्चा ममाल्ब। 29 मो हना यो इस्राएल आ खिं डा मुरपुकीमी 'परमप्रभु यावे आ पशो ठीक मबाक्ब' देंनीम। ए इस्राएल आ खिं डा मुर, मार, आं पशो ठीक मबाक्बा डा? मार, इन पशो कका ठीक बाक्बा डा?

30 मोपतीके ए इस्राएल आ खिं डा मुर, गो नेल्ल इन कली इन पशो कोव्रशा निसाफ पाइनुड। मिनु इन हेंथे पशो नेल्ल रे लेतीन। मो मपाइतीनी हना, इन मरिम्शो पशोम इन कली साइक्ब। 31 गे इन आं कली हेंथे पशो नेल्ल प्रोंइशा, गे नक थुं नु नक सोक्ती ताक्कीन। ए इस्राएल आ खिं डा मुर, गे मारदे बेक्चा दाक्नीनी? इजीकीएल ११:१९ 32 मारदे हना गो सुइ मुर बेक्शोम मग्येरसीनुड। मरिम्शो पतीक रे लेशशा, ब्रोंइशा बाक्कीन” दे परमप्रभु, परमप्रभु यावेमी देंत।

19

रोंका पतीक कुम्सो

1 गे इस्राएल डा पिप आ खिं डा मुर आन पर्वम रोंका पने। 2 इ ममा गुप्स आन दातेम ठेयब छाउरी गुप्स दुम्शा बाक्त। मेको आ चाइक्ब आन कली कोल्पाइक्ना पाइक्न ठिटा गुप्स आन दातेम गोल्शा बाक्बाक्त। उत्पत्ती ४९:९ 3 मिनु मेकोम आ चाइक्ब आन दाते डा का कली कोल्पाइश्शा, ठेयब सेल्लु। मिनु मेको ठेयब बोल्यो ठिटा गुप्स का दुम्त। मेकोम सिखार पचा शेंसाक्व। मिनु मुर आन कली ब्वाप्तु। 4 मिनु रागी रागी डा मुरपुकीम मेको आ पर्वम लोव्र नेंतेक्म। मिनु मेकोपुकीम मेको कली बिक्तीकेम पिक्शा ग्याइक्ताक्म। मिनु मुरपुकीम मेको कली कोंडगुम कीशा, इजीप्त रागी लाइक्तेक्म। २राजा २३:३१-३३; येरमीया २२:११-१२ 5 मिनु मेको छाउरी गुप्सम आ देंशो मदुम्शो नु आ मिम्शो मगाप्शो तशा, आ चाइक्ब आन दाते डा का कली योव्रतु। मिनु मेको कली बोल्यो ठिटा गुप्स का सेल्लु। २राजा २४:६,८,९ 6 मिनु मेको गुप्स आन दातेम एर ओंथ पचा गोप्तु। मारदे हना मेको ठेयब नु बोल्यो ठिटा गुप्स दुम्शो बाक्त। मिनु मेकोम सिखार पचा शेंसाक्व। मिनु मुर आन कली ब्वाप्तु। 7 मेकोम मुर आन बोल्यो दरवार प्रेतु। मिनु मेको आन सहर खतम सेल्लु। मेको आ डोरशो नेंशा, रागी नु मेकेर बाक्ब नेल्ल हितेक्म। 8 मिनु आ एर ओंथ डा रागी रागी रे मुरपुकी जाक्तेक्म। मिनु मेको कली ब्वारद दाइक्ताक्म। मेको कली बिक्तीकेम पिक्शा ग्याइक्ताक्म। 9 मिनु मेकोपुकीम मेको कली कोंडगुम कीशा ग्याइश्शा खोरम चोक्तेक्म। मिनु बेबीलोन डा पिप आ बाक्तीकेम लाइक्तेक्म। मेकोपुकीम इस्राएल डा डांडा मेर आ सेंदा गेनायो मनेंसेक्ल, दे मेको कली चोक्शा वोइक्तेक्म। २राजा २४:१५ 10 इ ममा ब्वाक्कु आ नेक्था खुम्शो अडगुर बोट खोदेंशो बाक्त। शुश ब्वाक्कु बाक्तीके, मेको शुश राशी पाइश्शा शुश गेडा सिश्शो बाक्त। इजीकीएल १७:६ 11 मेको आ बोल्यो राशी का पिप आन हुकुम पतीक कोक्के दुम्चा डा बाक्त। मेको शुश राशी आन दातेमी लाइश्शो नु कोल्शो दुम्शा, शुश राशी दाप्पाइश्शा लत। 12 तन्न मेको गाइश्शा चुरशा तुल्चा पुंइसाक्व। मिनु खपीम ताइक्चा पुंइसाक्व। मिनु पूर्व डा फशेम मेको कली सोव्रपाइक्तु। मिनु मेको आ गेडा नेल्ल हेम्तेक्म। आ बोल्यो राशी सोव्रशा, मेको कली मीम नेक्तु। 13 मिनु मुल मेको सोव्रशो ब्वाक्कु मबाक्शो गोरशो रागीम खुम्चा पुंइसाक्व। 14 मिनु मेको आ ठेयब राशी रे मी गूत। मिनु मेको आ फल नु आ आइक्च राशी नेल्ल नेक्तु। मोपा मेकेर हुकुम पतीक कोक्के दुम्चा डा बोल्यो राशी का यो मली। मिनु एको रोंका पतीक कुम्सो नेल्लेम तुइश्शा, पना पन बाक्तेक्म।

20

इस्राएली हेंथे गाक्शो

1 मिनु ७ बर्स डा ५ महिना डा १० नाक्ती इस्राएल डा खाल्पापुकी परमप्रभु यावे कली हिल्लो पचा कली जाक्शा आं डोंइती बाक्तेक्म। इजीकीएल १४:१ 2 मेना परमप्रभु यावेमी आं कली लोव्र पाप्तु। 3 मेकोमी “ए मुर, इस्राएल डा खाल्पा आन कली लोव्र पावो। गो, परमप्रभु, परमप्रभु यावेमी, मारदे गेपुकी आं कली हिल्लो पथ जाक्नी? गो आं ब्रोंइशा बाक्शो खोदेशो पा, इन कली लोव्र मलेत्नुड। इजीकीएल १४:३ 4 ए मुर, गे मेको आन कली निसाफ पाइनेवे? गे मेको आन कली निसाफ पाइनेवे? मो हना मेको आन किकी पिपी आन ग्रांग्रा दिशो गेय आन पर्बम मेको आन कली तुइक्पतो। इजीकीएल २२:२; इजीकीएल २३:३६ 5 गो इस्राएल कली योव्रडु नाक्ती याकूब आ खिं डा आ चच युइ नु कसम जाता। इजीप्त रागीमी गो मेको आन दातेम तुइक्पांडसाक्यी। मेको आन कली गो परमप्रभु यावे, इन परमप्रभु नड, दे कसम जाता। प्रस्थान ६:७-८ 6 गो मेको नाक्ती मेको आन कली इजीप्त रे गुंडशा, आन माल्शो रागीम चाक्नुडमी। मेको रागीम दूध नु खुदो शाइश्शो बाक्ब। मिनु मेको रागी, रागी नेल्ल आन क्येडा रिम्शो बाक्ब, दे कसम जशा देशो नड। प्रस्थान ३:८ 7 मिनु गो मेको आन कली इन कोव्रत दाक्शो ग्रांग्रा दित्चा डा थोव्रक ताइक्तीन। गे आंम कली इजीप्त डा मूर्तिपुकीम ग्रांग्रा दिशो मसेल्सीन। गो परमप्रभु यावे, इन परमप्रभु नड। यहोसु २४:१४,२३ 8 तन्न मेकोपुकीमी आं कली मटिथु, आं लोव्र मनेनेम। सुइम आन कोव्रत दाक्शो ग्रांग्रा दित्चा डा थोव्रक मताइक्तेक्म। सुइमी इजीप्त डा मूर्तिपुकी यो मप्रोनेम। मिनु गे इजीप्त रागीम बाक्नीनु, आं गाइश्शो नेल्ले इन तारी मोइक्नुड, दे मिम्ताक्ड। 9 तन्न गो आं नें रागी रागी डा मुर आन डोंइती मरिम्शो मदुम्ल, दे गो इन कली इजीप्त रागी रे गुंडताक्ड। इन बाक्शो रागी डा मुर आन कली यो आं नें तुइक्पाइक्ताक्मी। इजीकीएल २०:१४; इजीकीएल ३६:२१-२२; प्रस्थान ३२:१२ 10 मोपतीके गो मेको आन कली इजीप्त रागी रे गुंडशा गोरशो रागीम चाक्तामी। 11 गो मेको आन कली आं फुल्लुम मुशा ब्रेक्शो लोव्र तुइक्पाइक्तामी। मिनु आं निसाफ पतीक लोव्र कोइताक्डमी। सुम मेको टिशा पाइबा, मेको ब्रोंइब। लेवी १८:५; लूका १०:२८ 12 मेको प्रोंइशा मेको आन कली नाइक्तीक नाक्त गेतामी। मेको गो नु मेको आन दातेमी चिन्ड का बाक्ब। मिनु गो, परमप्रभु यावेमी मेको आन कली आं मुर सेल्ताक्मी, दे तुइक्तमेक्ल। प्रस्थान ३१:१३-१७ 13 तन्न इस्राएल आ खिं डा मुरपुकीमी गोरशो रागीम आं कली मटीयीमी। मेकोपुकीम आं फुल्लुम मुशा ब्रेक्शो लोव्र नु आं निसाफ पतीक लोव्र मपामे। मेको टिशा पाइब मुर मेको रे ब्रोंइनीम। मेकोपुकीमी आं नाइक्तीक नाक्त ग्रांग्रा दिशो सेल्तेक्म। मिनु गो एको गोरशो रागीमीन आं चुरशो मोइश्शा मेको आन कली साइक्नुडमी, दे मिम्ताक्ड। प्रस्थान ३२:१०-१२ 14 मिनु गो रागी डा मुर आन डोंइती मेको आन कली इजीप्त रागी रे गुंडताक्ड। गो आं नें मेको रागी रागी डा मुर आन डोंइती मरिम्शो मदुम्ल, दे मोदेशो पाता। 15 मिनु गो मेको आन कली गोरशो रागीमी गो इन कली गेशो, दूध नु खुदो शुश बाक्शो नेल्ल क्येडा दारशो रागीमी मलाइक्नुड, दे कसम जाता। गन्ती १४:३० 16 मारदे हना मेकोपुकीम आं निसाफ पतीक लोव्र होस पा मपाम। मिनु फुल्लुम मुशा ब्रेक्शो लोव्र मटीम। मिनु आं नाइक्तीक नाक्ती ग्रांग्रा दिशो सेल्तेक्म। मारदे हना मेको आन थुं आन मूर्ति गे हिरशो बाक्तेक्म। 17 मो हना यो गो मेको आन कली शिशी पा, गोरशो रागीम मसदुमी। मेको आन कली मक्यामदुमी।

18 गो गोरशो रागीम मेको आन आल आन कली ‘गे इन आम आफ आन शेंशो फुल्लुम मुशा ब्रेक्शो लोव्र मटिने। मेको आन निसाफ पतीक मपने। मेको आन मूर्तिम आंम इन कली ग्रांग्रा दिशो मसेल्सीन। 19 गो परमप्रभु यावे, इन परमप्रभु नड। गेपुकीम आं फुल्लुम मुशा ब्रेक्शो लोव्र टिशा, आं निसाफ पतीक लोव्र होस पा पने। 20 आं नाइक्तीक नाक्ती गेय मपने। मिनु मेको गे नु गो इं दातेम चिन्ड दुम्ल। मिनु गेपुकीम गो परमप्रभु यावे, इन परमप्रभु नड, दे तुइक्नीनी’ देंती। 21 तन्न मेको आलपुकी आं कली मटीब दुम्तेक्म। मेकोपुकीम आं फुल्लुम मुशा ब्रेक्शो लोव्रम मटीम। मिनु आं निसाफ पतीक लोव्र होस पा मपाम। मेको टिशा पाइब मुर मेको रे ब्रोंइनीम। मेकोपुकीम आं नाइक्तीक नाक्ती ग्रांग्रा दिशो सेल्तेक्म। मिनु एको गोरशो रागीमीन आं चुरशो आन तारी मोइश्शा, मेको आं गाइश्शा पशो गेय कोइनुड। 22 तन्न गो आं गुइ तेक्ता। मिनु गो रागी डा मुर आन डोंइती मेको आन कली इजीप्त रागी रे गुंडताक्ड। गो आं नें मेको रागी रागी डा मुर आन डोंइती मरिम्शो मदुम्ल, दे मोदेशो पाता। 23 मेको प्रोंइशा यो, गो गोरशो रागीम मेको आन कली गो इन कली रागी रागी डा मुर आन दातेम एर ओंथ ब्रपाइक्नुडमी। मिनु राज्य राज्यम एर ओंथ ब्रपाइक्नुडमी, दे कसम जाता। लेवी २६:३३ 24 मारदे हना मेकोपुकीम आं निसाफ पतीक लोव्र मपामे। मिनु आं फुल्लुम मुशा ब्रेक्शो लोव्र मटीम। आं नाइक्तीक नाक्त ग्रांग्रा दिशो सेल्तेक्म। मिनु मेकोम आन किकी पिप आन मूर्ति पूजा पाम्तेक्म। 25 गो मेको आन कली फुल्लुम मुशा ब्रेक्शो मरिम्शो लोव्र यो गेतामी। मिनु आं निसाफ पतीक लोव्रम यो मेकोपुकी ब्रोंइने मचाप्बाक्तेक्म। 26 गो मेको आन कली आन चढ़ेशो रे पा ग्रांग्रा दिशो दुम्चा गेतामी। आन डोंइती जरमेशो मारेइ मारेइ आन रे आं कली चढ़ेचा आ पर्बम मेको आन कली ग्रांग्रा दिशो दुम्पाइक्तामी। मेकोपुकी हिंशा ग्येत्थ लुकच दुम्ल,

दे मो पाता। मिनु मेकोपुकीम गो परमप्रभु यावे नड, दे तुइक्तमेक्ल, दे मो पाता” देत। इजीकीएल १६:२०; प्रस्थान १३:२, १३; प्रस्थान २२:२८

27 मोपतीके ए मुर, इस्राएल आ खिं डा मुरपुकी नु लोत्र पावो। मिनु मेको आन कली “परमप्रभु, परमप्रभु यावेमी इन कली मार देत देशा हना, इन किकी पिपीम आं कली जोल पा शुक्शी पाइक्तीमी। 28 गो कसम जशा मेको आन कली गेनुड देशो रागीम चाक्तामी। मेकोपुकीम मेकेर लाइशो डांडा नु शुश सफा पाइशो रवा ताम्तेक्म। मेकेर आन मार मार चढेम्तेक्म। आं कली गाइक्पाइक्चा कली आन पोक्शो मार मार चढेम्तेक्म। मेकेर आन ब्रोव्रशो रिना पाइशो धूप चोशा, आन तूचा थोत्रक चढेतीक चढेम्तेक्म। 29 मिनु गो मेको आन कली गे इन लशो लाइशो डांडा मार बाक्बा? दे हिल्लो पातामी। मुल सम्म यो मेको ठाउं आ नें बामाह देंसीब” दे परमप्रभु यावेमी देत। बामाह देशो लाइशो डांडा डा थान रुम्सीब।

परमप्रभु आ मुर आन कली पतीके

30 मोपतीके परमप्रभु, परमप्रभु यावेमी इस्राएल आ खिं डा मुर आन कली “गे यो इन किकी पिपी आन खोदेशो पा इन कली ग्रांग्रा दिशो सेल्सीनीनी? मिनु मेको आन ग्रांग्रा दिशो मूर्ति आन नोले खोइक्नीनी? 31 गेपुकीम मेको आन कली चढेनीनी। गे इन आल आन कली चोशा चढेनीनी। मिनु मुलाक्ती सम्म यो गे इन मूर्ति पूजा पतीकेम आंम इन कली ग्रांग्रा दिशो सेल्सीशो बाक्नीनी। ए इस्राएल आ खिं डा मुरपुकी, गो ब्रोंइशा बाक्शो खोदेशो पा, गे आं कली हिल्लो पचा मताइनीनी” दे परमप्रभु, परमप्रभु यावेमी देत।

32 मिनु परमप्रभुमी “इन थुंम ‘गोपुकी अर्को रागी डा मुर नु अर्को जात डा मुर खोदेशो दुम्चा दाक्नीक’ देंतीनी। गेपुकीमी ‘रागी डा जात जात डा मुर खोदेशो पा शी नु फुल्लु आन कली पूजा पाइब बाक्नीकी’ देंतीनी। तन्न इन मिम्शो गेनायो मजाक्दीप्ब” देत। प्रस्थान २३:२४

33 परमप्रभु, परमप्रभु यावेमी “गो ब्रोंइशा बाक्शो खोदेशो पा, सक्ति पाइशो गुइ दिंशा चुरशा गो इन कली सासन पाइनुड। 34 गो इन कली सक्ति पाइशो गुइ दिंशा चुरशा इन ब्रशा बाक्शो रागी रागी डा मुर आन दाते रे ग्रुंइशा चाक्नन्नी। मिनु गे इन ब्रशो रागी रे इन कली गुम्पाइक्नन्नी। 35 गो इन कली रागी रागी डा मुर आन गोरशो रागीम चाक्नन्नी। मिनु मेकेर इन कली निसाफ पाइनुड। होसे २:१६ 36 डोंइती गो दोपा इजीप्त डा गोरशो रागीम इन किकी पिपी आन कली निसाफ पडा, मोपा इन कली यो निसाफ पाइनुड। गन्ती १४:२२-२३ 37 गो इन कली हिक्शा आं कबल पपाइक्नन्नी। लेवी २७:३२; येरमीया ३३:१३ 38 इन दाते डा आं कली मटीब नु मरिम्शो पाइब आन कली तिल्लुडमी। गो मेको आन कली अर्को रागी डा मुर दुम्शा बाक्शो रागी रे ग्रुंइनुडमी। तन्न मेको इस्राएल रागी ओव्रचा मताइनीम। मिनु गेपुकीम गो परमप्रभु यावे नड, दे तुइक्नीनी। 39 ए इस्राएल आ खिं डा मुरपुकी, परमप्रभु यावेमी इन कली ‘लन। गे आं देशो टिचा मदाक्नीनी हना, मुल रे गे नेल्लेम इन इन मूर्ति आन कली पूजा पने। तन्न इन मूर्ति पूजा पतीकेमी आं नें कली गेनायो ग्रांग्रा दिशो मसेलीन।

40 मारदे हना आं डांडा, इस्राएल डा डांडामी इस्राएल आ खिं डा मुर नेल्लेम आं कली ठेयब सेल्नीम। मिनु गो मेकेर मेको आन कली ब्राइनुडमी। गो मेकेर इन गेशो, इन गेशो नेल्ल क्येडा रिम्शो थोत्रक नु इन चढेशो नेल्ल ताक्नुड। इजीकीएल १७:२३ 41 गो इन कली रागी रागी डा मुर आन दाते रे ग्रुंइशा नु इन कली इन ब्रशो रागी रे खुप्शा, ब्रोव्रशो रिना पाइशो धूप खोदेशो पा ब्राइनन्नी। मिनु रागी रागी डा मुर आन डोंइती आं कली तुइक्पांइसीनुड। 42 मिनु गो इन किकी पिपी आन कली गेनुड देशो इस्राएल रागीम इन कली चाक्नन्नी। मेना गेपुकीम गो परमप्रभु यावे नड, दे तुइक्नीनी। 43 मेकेर गे इन कली ग्रांग्रा दिशो सेल्ब थोत्रक नु मरिम्शो गेय नेल्ल मिम्नीनी। मिनु इन पशो मरिम्शो गेय नेल्ल आन पर्बम मिम्शा आंम इन कली ग्रांग्रा दीनीनी। इजीकीएल ३६:३१-३२ 44 ए इस्राएल आ खिं डा मुरपुकी, गे इन मरिम्शो पतीक नु इन हेंथे पशोम ममाइ, तन्न आं नें आ पर्बम गो इन कली रिम्शो पाइनुड। मिनु गेपुकीम गोन परमप्रभु यावे नड, दे तुइक्नीनी’ देनो” दे परमप्रभु, परमप्रभु यावेमी देत।

दक्खिन आ पर्बम लोत्र

45 परमप्रभु यावेमी आं कली लोत्र पाप्तु। 46 मार लोत्र पाप्तु देशा हना “ए मुर, दक्खिन गे कोव्रशा दक्खिन आ पर्बम आं लोत्र पावो। मेको दक्खिन नेगेब डा ब्वाकी आ पर्बम आं लोत्र पावो। 47 नेगेब डा ब्वाकी कली ‘परमप्रभु यावे आ लोत्र नेनो। परमप्रभु, परमप्रभु यावेमी गो इ कली मी सुइक्चा चिक्शो बाक्नुड। मिनु इ गिगी रवा नु सोव्रशो रवा आन कली मेकोम नेक्ब। मेको आ ब्रशो मकाप्ब। मिनु मेकोम पतीके दक्खिन रे उत्तर सम्म डा नेल्ल आन कुल

किक्ब। 48 मिनु मुर नेल्लेमी गो, परमप्रभु यावेमी मेको जेत्ताक्ड, दे तुइक्नीम। मेको काप्चा मदुम्ब' देनो" देंत। 49 मिनु गो "परमप्रभु, परमप्रभु यावे, मेकोपुकीम आं पर्बम 'मेकोमी कथा ला देंशो बाक्ब, ममाइ डा?' देंनीम" देंती।

21

परमप्रभुम आ तरवार हेशो सेल्शो

1 परमप्रभु यावेमी आं कली लोव्र पाप्तु। 2 मार लोव्र पाप्तु देंशा हना "ए मुर, यरूसलेम गे कोव्रशा, आं बाक्तीक आ पर्बम आं लोव्र पावो। इस्राएल रागी आ पर्बम आं लोव्र पावो। 3 मिनु इस्राएल डा खाल्पा आन कली परमप्रभु यावेमी मार लोव्र पाप्तु देंशा हना 'गे बारशा, आं तरवार खोत रे शोइश्शा, इन दाते डा ठीक पाइब नु आं अरेशो लोव्र मटीब नेल्ल आन कली साइक्नुडमी। 4 मिनु गो इन दाते डा ठीक पाइब नु आं अरेशो लोव्र मटीब नेल्ल आन कली साइक्नुडमी। मोपतीके दक्खिन रे उत्तर सम्म डा मुर नेल्ल आन पर्बम आं तरवार खोत रे गूशो बाक्ब। 5 मिनु मुर नेल्लेमी गो, परमप्रभु यावेमीन आं तरवार शोइश्शो बाक्नुड' दे तुइक्नीम। मेको लेंशा मपिम्सीब। 6 मोपतीके ए मुर, हुकयी पावो। जिक्शो थुंम थम श्येत जशा, मेको आन डोंइती हुकयी पावो। 7 मिनु मेकोपुकीम इ कली 'गे मारदे हुकयी पवी' देंतेक्म हना, मेको आन कली 'लोव्र नेंतीके हुकयी पाता। मुर नेल्ल आन थुं बेक्शा लाइब। आन गुइ योक्ब। आन थुं ग्येत्थ लुकच दुम्ब। मिनु मुर नेल्ल आन पोक्च बोल मपाइश्शो दुम्ब। मेको नाक्ती जाक्ना जाक्न बाक्ब। मेको थमा पा दुम्ब, दे परमप्रभु यावेमी देंशो बाक्ब' दे माइक्मी" दे परमप्रभु यावेमी देंत। इजीकीएल ७:१७

8 परमप्रभु यावेमी आं कली लोव्र पाप्तु। 9 मार लोव्र पाप्तु देंशा हना "ए मुर, परमप्रभु यावे आ लोव्र पा, परमप्रभु यावेमी 'तरवार का, तरवार का शेप्शा, हेशो सेल्शो बाक्ब। मेको टल्केशो बाक्ब। 10 मेको मुर साइक्चा कली शेप्शो बाक्ब। चिला दाप्शो खोदेंशो पा टल्केपपाइक्चा कली शेप्शो बाक्ब। दोपा ग्येरसीने चाप्नीनी? आं मुरपुकीम आं सजाइ गेतीके ममिम्तेक्म। 11 तरवार टल्केपपाइक्चा कली गेशो बाक्ब। मिनु गुइम शेशा, मेको शेप्शा टल्केपपाइश्शो बाक्ब। मेको साइक्ब कली गेशो बाक्ब। 12 ए मुर, डाक्शा रोंका पावो। मारदे हना मेकोम आं मुर आन कली साइक्ब। मेकोम इस्राएल डा पिप आ खिं डा मुर नेल्ल आन कली साइक्ब। मेको नु आं मुरपुकी यो तरवारम साइक्चा पुंइसीनीम। मोपतीके गे इ कुचु तुपो। 13 गे आं गेशो सजाइ ममिम्थु, मेको श्येत मजाक्ब, दे मिम्नीनी' देनो" दे परमप्रभु यावेमी देंत। यसैया १:५ 14 मिनु परमप्रभुमी "ए मुर, आं लोव्र पावो। तरवारम खेयप निक्शी खेयप सां सम्म क्योरब। मेको तरवार मारेइ मारेइ आन कली साइक्चा कली बाक्ब। मेको बोल्यो पा क्योरचा कली बाक्ब। मेकोम एर ओंथ नेल्ल रे क्योरब। 15 मोपतीके थुं लुकच लाइनीम। मिनु शुश गोलनीम। मेको आन ठेयब लाप्चो नेल्लेमी हुश खाक्श पोक्चा कली तरवार वोइश्शो बाक्ती। मेको चिला दाप्शो खोदेंशो पा साइक्चा कली शेप्शो बाक्ब। 16 तरवार, पेरा गे क्योरो। ग्युरा गे क्योरो। तेइ तेइ लावो। 17 मिनु गो यो साइक्ना साइक्न लाइनुड। मिनु आं चुरशो नाइक्नुड। गो, परमप्रभु यावेमीन लोव्र पाता" देंत।

18 परमप्रभु यावेमी आं कली लोव्र पाप्तु। 19 मार लोव्र पाप्तु देंशा हना "ए मुर, बेबीलोन डा पिप आ तरवार चाक्चा कली लां निक्शी योव्रडो। मेको लां निक्शी रागी का रे जाक्चा मालनीस। सहर गे लतीक लां आस डोंइती लां कोंइतीक का वोतो। 20 मेको तरवार जाक्चा कली अम्मोनी आन रब्बाह सहर, यहूदा नु गारो हिरशो यरूसलेम कली लां सेलीन। 21 मारदे हना बेबीलोन डा पिप मेको लां निक्शी गुम्तीकेम राप्ब। तेको लां लचा, दे मेकोमी लिंक्चु कोव्रब, ब्रा कली हिम्पाइक्ब। आ खिं डा मूर्ति आन कली हिल्लो पा आ आइदी कोव्रब। 22 मेको आ ग्युरा गुइम यरूसलेम कली बाजी दुम्त। मेकेर गारो डोइक्चा कली शी फुल्लु तेल्ला, लडाइ पचा कली, ग्रीचा कली ठेयब लाप्चो गे शी फुल्लु तेल्ला सहर पुम्चा कली, लाइश्शो खिं सेल्चा मालनीम। इजीकीएल ४:२ 23 तन्न यरूसलेम डा मुर आन कली मेको लिंक्चु कोव्रतीक दूली बाक्त, दे मिम्नीम। मारदे हना मोदेंशो मदुम्ब, दे कसम जशो लोव्र नेशो बाक्तेक्म। तन्न परमप्रभुम मेको आन मरिम्शो पशो मिम्पाइक्ब। मिनु मेको आन कली ग्याइक्पाइक्ब।

24 मोपतीके परमप्रभु, परमप्रभु यावेमी मारदे हना इन मरिम्शो पशो मिम्पाइक्तीनी। इन हेंथे पशो नेल्ल तुइक्नीम। इन पशो पाप नेल्ल तांइसीब। गे ग्याइश्शा लाइक्चा पुंइसीनीनी। 25 गे काइ मरिम्शो नु आं अरेशो लोव्र मटीब इस्राएल डा सासन पाइब इ नाक्त जाक्त। इ नोले डा सजाइ ततीक नाक्त जाक्त। 26 मेको आ पिया रे गुप्तीक पुतीन। मेको आ सिरपेच पुतीन। मुल दुम्शो खोदेंशो पा, लेंशा मदुम्ब। आइक्च आन कली ठेयब सेलीन। मिनु ठेयब आन कली आइक्च सेलीन। प्रस्थान २८:४; लूका १८:१४ 27 मारेइ मारेइ ब्रेशो बाक्ब। मेको गो पाता। मेको मोदेंशो गेनायो मदुम्शो बाक्त। मेको सासन पचा कली शिरशो दुम्शा जाक्त हना, मेको कली गेनुड" देंत। उत्पत्ती ४९:१०

28 ए मुर, गे चहिं आं लोव पावो। गो, परमप्रभु, परमप्रभु यावेमी अम्मोनी नु मेको आन शुक्शी पशो आ पबर्म मार देनुड देशा हना “साइक्चा कली तरवार शोइशो बाक्ब। साइक्चा कली शेप्शा टल्केशो बाक्ब। मेको चिला खोदेशो पा दाप्ब बाक्ब। इजीकीएल २५:२-७ 29 इन पबर्म जोल पा कोइतीके ताम्तेकम। इन पबर्म दूली पा लिंक्यु कोवतेकम। मेको मरिम्शो पाइब नु परमप्रभु यावे आ अरेशो लोव मटीब नु साइक्चा पुंडसीनीम। मेको आन नाक्त जाक्शो मुर आन कली मोदेशो पशो बाक्ब। मेको आन नोले डा सजाइ ततीक नाक्त जाक्शो बाक्ब। 30 मेको तरवार आ खोतम पिप्तीन। गो इन कली इन जरमेशो रागीम निसाफ पाइनुड। 31 गो आं गाइशो इन तार मोइक्नुड। आं चुरशो मी मुइशो खोदेशो पा गो इन तारी मोइक्नुड। गो इन कली साइक्चा कली हुश खाक्श पोक्ब नु सांडस जोक्ब आन गुइम जिम्मा गेनन्नी। 32 गे मी कली शी दुम्नीनी। इन हुश खपीम शाइक्ब। इन कली लेशा गेनायो ममिम्नीम। मारदे हना गो, परमप्रभु यावेमी एको लोव पाता” दैत।

22

यरूसलेम आ पाप नु सजाइ

1 परमप्रभु यावेमी आं कली लोव पाप्नु। 2 मार लोव पाप्नु देशा हना “ए मुर, मार गे मेको निसाफ पाइनेवे? गे मेको हुश खाक्श पोक्ब सहर कली निसाफ पाइनेवे? मो हना मेको आ ग्रांरा दिशो गेय नेल्ल आन पबर्म मेको कली शेंदो। इजीकीएल २४:६; इजीकीएल २०:४ 3 गे मेको कली ‘परमप्रभु, परमप्रभु यावेमी इ पबर्म मार दैत देशा हना “ए सहर, गे इ दातेमी हुश खाक्श पोक्तीवी। इ खतम दुम्तीक नाक्त जाक्त। गे मूर्ति सेल्सीशा, ग्रांरा दिशो दुम्ते। 4 गे हुश शाइक्पाइशो, दोस तशो बाक्नेवे। गे इ सेल्शो देवी देवता रे पा ग्रांरा दिशो दुम्नेवे। इ निसाफ नाक्त जाक्त। मिनु इ बर्स नुप्शो बाक्नीम। मोपतीके गो इ कली रागी रागी डा मुर आन दातेम शिशी मताइब नु शुक्शी पाइक्तीक मुर सेलतन। २राजा २१:१६; इजीकीएल ५:१५ 5 ए, हिक्चा मपुंडसीशो नु ग्रांग्ये माग्येम ब्रीशो सहर, इ नेक्था नु डोन बाक्ब मुरपुकीम इ कली शुक्शी पाइनीम।

6 मेकेर बाक्शो इस्राएल डा पिप आ तौ नेल्लेम आन सक्तिम हुश खाक्श पोक्शो बाक्तेकम। 7 मिनु मेकेरन आल आन आम आफ तशा महिक्नीम। मेकेरन अर्को रागी डा मुर आन कली दिप्नीम। मिनु रोम रोइक्च नु आन वोंइश बेक्शो मीश मुर आन कली मरिम्शो पाइनीम। प्रस्थान २२:२०-२१ 8 गे आं थोवक आन कली आइक्च मिम्शा, आं नाइक्तीक नाक्त कली ग्रांरा दिशो सेल्तीवी। 9 मेकेर मुर आन पबर्म जोल लोव पा साइक्पाइक्ब मुर बाक्नीम। मिनु डांडा डा थानम चढेशो मार मार जाइब मुर यो बाक्नीम। मेकोपुकीम थम मरिम्शो गेय पाइनीम। 10 मेकेर मुरपुकी आन आफ आन मीश नु इप्नीम। मेकेर मुरपुकी रां ब्रोल्लो मीश मुर नु इप्नीम। लेवी १८:७-८; लेवी १८:१९ 11 मेकेर मुरुम आन नेक्था डा मुर आन मीश नु इप्शा ग्रांरा दिशो गेय पाइनीम। मिनु का निक्शीमी आन चाइमी कली बिथोलो पाइनीम। का निक्शीमी आंम आफ आ तमी कली बिथोलो पाइनीम। लेवी १८:२०; लेवी १८:१५; लेवी १८:९ 12 मेकेर मुरपुकीम मुर साइक्चा कली घूस ताक्नीम। गे मुर आन कली जेर गेशा आ चाइक्ब के यो चाइक्ब ताक्नेवे। आंम नेक्था डा मुर आन कली दिप्शा आंम कली रिम्शो दुम्तीक गेय पाइनेवे। गे आं कली प्रेंताक्यी” ’ दे परमप्रभु, परमप्रभु यावेमी” दैत। प्रस्थान २२:२४

13 मिनु मेकोमी “गे जोल पा मरिम्शो पा क्येट चेम्शो तशा नु इ दातेम मुर साइशो हुश खाक्श पोक्शो आ पबर्म गो छक लाक्शा थाम्पा ग्रांरा दीती। 14 गो तेको नाक्ती इ कली निसाफ पाइनुडा, मेको नाक्ती गे इ सक्ति महिक्सीथु बाक्बा डा? मार इ गुइ बोल्यो लीनीमी डा? गो, परमप्रभु यावेमी मेको लोव पाता। गो मेको पाइनुड। 15 गो इ कली रागी रागी डा मुर आन दातेम एर ओंथ फ्राइनन। मिनु राज्य राज्यम ब्रपाइक्नन। मिनु गो इ आगाम दुम्शो ग्रांरा दिशो गेय नेल्ल क्याम्नुड। 16 मिनु गे रागी रागी डा मुर आन डोंइती महिक्सीशो दुम्नेवे। मिनु गोन परमप्रभु यावे नड, दे तुइक्नेवे” दे परमप्रभु यावेमी दैत।

परमप्रभुमी यपाइक्ब

17 परमप्रभु यावेमी आं कली लोव पाप्नु। 18 मार लोव पाप्नु देशा हना “ए मुर, इस्राएल आ खिं डा मुरपुकी आं पबर्म कस खोदेशो दुम्शो बाक्नीम। मेको नेल्ल मार मार यपाइक्तीकेम बाक्शो तांबा, टिन, फलाम नु सिसा रे गृशो कस खोदेशो दुम्शो बाक्नीम। मेकोपुकी कस खोदेशो ला बाक्नीम। यसैया १:२२-२५; येरमीया ६:२८ 19 मोपतीके परमप्रभु, परमप्रभु यावेमी “गे नेल्ल कस खोदेशो दुम्तीके गो इन कली यरूसलेममी पुक्नन्नी। 20 मिनु मुरपुकीम मी

फ्रशा यपाइक्चा कली दोपा चांदी, तांबा, फलाम सिसा नु टिन यपाइक्तीकेम कुर पाइनीमी, मोपा गो यो आं गाइश्शो नु चुरशोम इन कली पुक्नन्नी। मिनु कुर पा यपाइक्नन्नी। 21 गो इन कली पुक्शा, आं चुरशो मी खोदेशो पा इन तार मोइक्नुड। मिनु गे मेकेर याइनीनी। 22 दोपा चांदी यपाइक्तीकेम यपाइक्नीमी, मोपा गो इन कली यपाइक्नुड। मिनु गेपुकीम गो परमप्रभु यावेमीन आं चुरशो इन तार मोइक्ता, दे तुइक्नीनी' देनो" देंत।

इसाएल डा ठेयब मुर आन पाप

23 मिनु परमप्रभु यावेमी आं कली लोव्र पाप्तु। 24 मार लोव्र पाप्तु देशा हना "ए मुर, एको रागी कली गे आं गाइक्तीक नाक्त रेउम मशेक्शो, ग्रांग्रा दिशो रागी बाक्नेवे। 25 मेकेर बाक्ब पिप आ तौ आन सिखार ग्याइश्शो डरर डरर पाइब गुप्स खोदेशो बाक्नीम। मेकोपुकीम मुर आन कली नेक्तेक्म। शोप नु शुश क्येट लाइब, मार मार रोइक्ताक्म। मिनु मेको आन दाते डा शुश मीश मुर आन कली वोंइश बेक्शो मीश मुर सेल्लेक्म। इजीकीएल ३४:३,८; सेफन्याह ३:३; भजन संग्रह १४:४ 26 मेको आ चढ़ेबपुकीम आं शेंशो लोव्र प्रोंइतेक्म। आं थोव्रकपुकी ग्रांग्रा दिशो सेल्लेक्म। मेकोपुकीम आं मार मार मुर आन थोव्रक खोदेशो सेल्लेक्म। मेकोपुकीमी मार ग्रांग्रा दिशो नु मार ग्रांग्रा मदिशो बाक्नीमी, मेको मशेदेम। मेकोपुकीम आं नाइक्तीक नाक्त प्रेंताक्म। मोपा गो मेको आन दातेम महिक्सीशो दुमशो बाक्नुड। सेफन्याह ३:४; इजीकीएल ४४:२३; मत्ती २३:२५; लेवी १०:१० 27 मेकेर बाक्ब आन ठेयब मुर नेल्ल फर खोदेशो बाक्नीम। मेकोपुकीम सिखार ग्यारनीम। मुर आन कली साइक्नीम नु क्येट तचा कली मुर आन कली खतम सेल्लनीम। 28 मेको आं लोव्र पाइबपुकीम 'गो कोंइतीक ताता' देंखु पा, जोल पा शेंनीम। मेको आन पशो मरिम्शो नेल्ल बुलु बुइश्शो खोदेशो पा सुम्नीम। मेकोपुकीम गो मारेइ मदेंथु 'परमप्रभु, परमप्रभु यावेमी ओं देंत' दे फश लोव्र पाइनीम। 29 मिनु मेको रागी डा मुरपुकीम गेन कि गेन, दे क्येट लाइक्नीम। मेकोपुकीमी मार मार रोइक्नीम। मेकोपुकीम प्रुडग नु मारेइ मथीब आन कली दिप्नीम। मिनु अर्को रागी डा मुर आन कली दला दाक्स पाइनीम। 30 मिनु गो मेको आन दातेम गारो प्रोव्रशा गेब नु रागी मक्याम्दुल, दे रागी आ पर्वम आं डोंइती राप्ब मुर का माल्ता, तन्न मथिदु। इजीकीएल १३:५ 31 मोपतीके गो आ गाइश्शो मेको आन तार मोइक्नुड। आं चुरशो मीमी मेको आन कली खतम सेल्लुडमी" दे परमप्रभु, परमप्रभु यावेमी देंत। इजीकीएल २१:३६

23

मरिम्शो पाइब वोबु निक्शी

1 परमप्रभु यावेमी आं कली लोव्र पाप्तु। 2 मार लोव्र पाप्तु देशा हना "ए मुर, रागी काम मीश मुर निक्शी बाक्ताक्स। मेको ममा का आ तमी बाक्ताक्स। 3 मेको निक्शी इजीप्त रागीम तेल्लेम दुम्ताक्स। मेको निक्शी ठिटी दुम्सानु, तेल्लेम पचा गोम्ताक्स। मेको रागीम मेको आस कुचु थिम्तेक्म। मिनु मेको निक्शी कन्ने बाक्सानु, आस दूध थिचा पुंइसाक्स। 4 मिनु दिदी आ नें ओहोला नु आ लोक्ब आ नें ओहोलीबा बाक्त। मेको निक्शी आं के दुमशो बाक्ताक्स। मिनु मेको निक्शीमी तमी तौ थिम्ताक्स। मेको आस नें आ अर्थ मार बाक्त देशा हना, ओहोला सामरीया नु ओहोलीबा यरूसलेम बाक्त।

5 मिनु ओहोला आं के दुमशा, यो तेल्लेम पाप्तु। मेकोमी अस्सुर डा लडाइ पाइब आन कली खोइक्नु। 6 मेको नीलो वा फेक्शो लडाइ पाइबपुकी, हुकुम पाइबपुकी, लडाइ पाइब आन कप्तानपुकी, मेको नेल्ल दारशो ठिटा शारा डोइश्शा गाक्बपुकी बाक्तेक्म। 7 मेकोमी मेको आन कली दाक्शा, मेकोपुकी नु तेल्लेम पाप्तु। मेको अस्सुर डा योव्रशो नु दारशो मुर बाक्तेक्म। मिनु मेकोपुकी नु इप्शा, मेको आ माल्शो वोंइश मुर आन मूर्ति नेल्लेम आंम कली ग्रांग्रा दिशो सेल्लाक्व। 8 मेकोम इजीप्त रागीम पशो तेल्लेम गेय मप्रोन। मारदे हना मेको ठिटी बाक्मेनु, मुरपुकी मेको नु इप्तेक्म। मिनु मेकोपुकीमी आ कुचु थिम्तेक्म। मिनु आन दाक्शो मेको नु पाम्तेक्म। २राजा १७:४ 9 मोपतीके गो मेको कली आ दाक्शो अस्सुर डा मुर आन गुइम गेता। मेको, मेकोपुकी नु दाक्मुशो बाक्त। 10 मिनु मेकोपुकीमी मेको कली शिप्रा सेल्लेक्म। मिनु मेको आ तमी तौ आन कली ग्याइक्ताक्म। मिनु मेको कली तरवारम साइक्तेक्म। मेकोम सजाइ ताप्तु। मेको मीश मुर आन दातेम शुक्शी पाइक्चा पुंइसीब दुम्त।

11 मिनु मेको आ लोक्ब ओहोलीबामी मेको ताप्तु। तन्न मेकोम आ तेल्लेम पतीक नु खोइक्तीकेम आ दिदी क्येडा यो लाक्तु। 12 मेको यो अस्सुर डा मुर आन कली हुकुम पाइब, कप्तान, या कुरशा लडाइ पाइब नु शारा डोइक्ब बाक्तेक्म। मेको दारशो ठिटा आन नोले खोइक्तु। 13 मिनु गो मेको यो ग्रांग्रा दिशो दुमशो ताता। मेको निम्फा लां कामीन गाक्ताक्स। 14 तन्न मेकोम आ तेल्लेम पतीक डोंइती क्येडा शुश बारपाइक्तु। मेकोम गारोम मुशा सेल्लो वोंइश मुर

आन नकसा ताप्तु। मेको लल रडम सेल्शो कल्दी आन नकसा बाक्तेकम। 15 आन क्रातोम किप्शुर क्यिप्शो नु आन पियाम रोम्सीशो फेटा रुक्शो, नेल्ल ठेयब मुर खोदेशो तांडसीशो बाक्तेकम। मेको बेबीलोनम बाक्शो कल्दी डा मुर बाक्तेकम। 16 मिनु मेकोम मेको आन कली तशा, मेको आन कली दाक्शा कल्दी रागीम लोव्र कुरब मुर सोइक्ताक्व। 17 मिनु बेबीलोन डा मुरपुकी मेको आ बाक्तीकेम मेको नु इप्थ जाक्तेकम। मिनु आन दाक्तीकेम मेको कली ग्रांग्रा दिशो सेल्तेकम। मिनु मेकोपुकी रे ग्रांग्रा दिशो दुम नोले, मेको आन क्येडा रूशा, आ थुं लेत्ताक्व। 18 मोपा मेकोम नेल्लेम तचा डा पा तेल्लेम पा, आ शिप्रा रां नेल्ल आन कली कोंइताक्व। मिनु गो मेको आ दिदी कली खोदेशो पा, मेको कली यो ग्रांग्रा दिशा प्रोंइता। 19 मो हना यो मेकोम इजीप्त रागीम ठिटी बाक्म ना डा तेल्लेम पशो मिम्शा आ तेल्लेम पतीके शुश बारपाइक्व। 20 मेको मेकेर डा आ माल्शो मुर आन कली दाक्ताक्मी। मेको आन माल्शो मुरपुकी गधा नु शारा खोदेशो बाक्तेकम। 21 मो हना यो गे इजीप्त रागीम इ कुचु थिशो इ ठिटी ना डा मरिम्शो पशो नाक्ती मिम्ताक्वी” देंत।

ओहोलीबामी सजाइ तशो

22 मोपतीके ए ओहोलीबा, परमप्रभु, परमप्रभु यावेमी “डोंइती गो इ कली सजाइ गेनुड। मिनु इ कली दाक्शा, ब्रीशो मुर आन कली सजाइ गेनुड। मिनु मेको मुर आन कली इ पबर्म एर ओंथ रे पोक्नुड। 23 मेको बेबीलोन डा मुर नु कल्दी डा मुर नेल्ले, पेकोद, शोआ नु कोआ डा मुर, अस्सुर डा मुर नेल्ल, मेको नु बाक्शो दारशो ठिटा, हुकुम पाइब, कप्तान नु लडाइ पाइब, मेको नेल्ल नु शारा डोइक्ब नेल्ल आन कली इ पबर्म पोक्नुडमी। 24 मेकोपुकी गे नु लडाइ पचा कली उत्तर रे पा बग्गी नु शुश लडाइ पाइब नु जाक्नीम। मेकोपुकीमी ठेयब नु आइक्च तेक्तीक कुरशा, फलाम के गुक्तीक गुक्शा, इ कली पुम्नीम। मिनु गो इ कली सजाइ गेपाइक्चा कली मेको आन गुडम गेनन। मिनु मेकोम आन कानुन कोव्रशा इ कली सजाइ गेनीम। 25 गो आं गाइश्शोमी इ कली सजाइ गेपाइक्नुड। मिनु मेकोपुकी गे नु गाइश्शा चुरशा इ कली खतम पोक्नीम। मिनु मेकोपुकीम इ नें नु इ नोफा खोइक्नीम। मिनु इ लीशो मुर तरवारम साइक्चा पुंडसीनीम। मेकोपुकीम इ तमी तौ आन कली ग्याइश्शा लाइक्नीम। इ लीशो मुर मीम दुप्शा बेक्नीम। 26 मेकोपुकीम इ वा प्रुइश्शा शिप्रा सेल्नीम। मिनु इ दारशो गहनापुकी रोइश्शा लाइक्नीम। 27 मोपा गो इ इजीप्त रागीम गोशो तेल्लेम पतीक थुम्पाइक्नुड। गे मेको आन कली ममाल्थु, इजीप्त रागी कली ममिम्नेवे” दे परमप्रभु यावेमी देंत। 28 मिनु परमप्रभु, परमप्रभु यावेमी “गो इ कली इ काइ मदाक्शो मुर आन गुडमी गेनुड। गे डोंइती मेको आन क्येडा रूशा, इ थुं लेशो बाक्ते। 29 मिनु मेकोपुकीमी इ काइ मदाक्शो गेय पाइनीम। इ गेय पा तशो मारेइ मारेइ योल्शा, इ कली शिप्रा सेल्शा प्रोंइनीम। मिनु शिप्रा दुम्तीके इ तेल्लेम पशो नेल्ल तुंडसीब। इ ग्रांग्रा दिशो पशा, तेल्लेम पतीके गे मोदेशो दुम्नेवे। 30 मारदे हना गे रागी रागी नु तेल्लेम पा, गे मेको आन मूर्ति रे पा ग्रांग्रा दिशो सेल्साक्वे। 31 गे इ लोकब खोदेशो पाप्तीवी। मोपतीके गो मेको कली गेशो श्येत इ कली गेनन” दे परमप्रभु यावेमी देंत 32 परमप्रभु, परमप्रभु यावेमी “गे इ लोकब आ कचौरा तूचा माल्नेवे। मेको ठेयब श्येत जतीक बाक्ब। गे फाल्ने मचाप्चा डा शुक्शी पाइक्चा पुंडसीब दुम्नेवे। मारदे हना इ श्येत ठेयब दुम्ब। 33 गे दुक्शो दुम्शा सुर्ता पतीकेमी ब्रीनेवे। मेको इ लोकब सामरीया आ कचौरा शुश हिंतीक नु मुर मबाक्तीक बाक्ब। यसैया ५१:१७ 34 मिनु इ लोकब खोदेशो दुम्नेवे, गे मेको श्येतथ मदुम सम्म तूनेवे। मिनु मेको कचौरा आ टुक्रा नाक्नेवे। मिनु गे इ दूध रेल्लेवे। मारदे हना गो एको लोव्र पाता” दे परमप्रभु, परमप्रभु यावेम देंत। 35 मोपतीके परमप्रभु, परमप्रभु यावेमी “गे आं कली प्रेंताक्वी। मिनु आं कली प्रोंइती। मोपतीके गे इ ग्रांग्रा दिशो गेय नु तेल्लेम पशो आ पबर्म सजाइ ताइक्नेवे” देंत। येरमीया २:३२

वोबु निम्फामी सजाइ तशो

36 मिनु परमप्रभु यावेमी आं कली “ए मुर, गे ओहोला नु ओहोलीबा आस कली निसाफ पाइनेवे? मो हना मेको निक्शी आस पशो ग्रांग्रा दिशो गेय आन पबर्म मेको आस कली तुइक्पतो। इजीकीएल २०:४ इजीकीएल २०:४ 37 मारदे हना मेको निक्शीम हेंथे पाम्ताक्स। मिनु मेको आस गुडम हुश ख्राक्श पोक्ताक्स। मेकोमी आस मूर्ति नु हेंथे पाम्ताक्स। मेको निक्शीम आं कली जरमेशो आस तमी तौ आन कली, मूर्ति आन कली ब्वचा गेचा कली क्योरशा चढेम्ताक्स। इजीकीएल १६:२० 38 मेको निक्शीम आं कली मार पाम्ताक्स देशा हना, आं बाक्तीक ग्रांग्रा दिशो सेल्ताक्स। मिनु आं नाइक्तीक नाक्त कली अर्को नाक्त खोदेशो पा सेल्ताक्स। इजीकीएल ८:५-१८ 39 तेको नाक्ती मेको आस आल आन कली मूर्ति आन कली क्योरशा चढेम्से, मेको नाक्तीन आं बाक्तीकेम ओव्रताक्स। मिनु ग्रांग्रा दिशो सेल्ताक्स। मेको निक्शीम आं ख्विम मोदेशो गेय पाम्ताक्स।

40 मेको निक्शीम डोन डा मुर आन कली लोव कुरब मुर सोइशशा, ब्रेत्ताक्से। मिनु मेकोपुकी जाक्तेक्म। मिनु गे मेको आन पबर्म चिक्शा शोप्शा इ मिक्चीम गाजल खेक्साक्वे। मिनु गहना पांइशा आंम कली ग्योम्साक्वे। 41 गे आंम दारशो खाटम बाक्ते। मिनु मेको आ डोंइती आं धूप नु तेल वोइक्तीवी। 42 मिनु सहरम ठेयब ग्येरसीशो रेयके दुम्त। मिनु गोरशो रागी रे चाक्शो दुक्शो मुरपुकीमी मेकेर डा मीश मुर आन कली चुरा लिक्ताक्म। मिनु आन पियाम दारशो सुन फू चुइक्ताक्म।

43 मिनु गोरशो रागी रे जाक्शो मुरपुकी मेको तेल्लेम पचा रूशो मीश मुर नु इप्तेक्म। 44 मारदे हना मेकोपुकी तेल्लेम का नु इप्शो खोदेशो पा इप्तेक्म। ओहोला नु ओहोलीबा नु इप्शो मुर खोदेशो पा जाक्तेक्म। 45 तन्न ठीक निसाफ पाइबम मेको आस कली 'नाता खोइक्ब, हुश खाक्श पोक्शो आ पबर्म दोस ताइनीस' मारदे हना मेकोम हेंथे पा आस गुइम मुर साइशो हुश बाक्ब" देंत। इजीकीएल १६:३८,४०

46 मिनु परमप्रभु, परमप्रभु यावेमी "मेको आस पबर्म ग्रांग्ये माग्ये पोक्ब हुल का पोक्कीन। मिनु मेको आस कली शुश हिंपाइशशा मारेइ मारेइ रोइशशा लतीन। 47 मिनु मेको ग्रांग्ये माग्ये पोक्ब हुलपुकीम मेको आस कली फुल्लु आप्नीम। मिनु तरवारम क्योरशा साइक्नीम। मिनु मेकोपुकीम मेको आस तमी तौ आन कली साइक्नीम। मिनु मेको आन खिंम मी सुइक्नीम। 48 मोपा गो रागीम मेको ग्रांग्रा दिशो गेय थुम्पाइक्नुड। एको इ खोदेशो मपामेक्ल। मीश मुर नेल्ल आन कली हिंच कोइतीक दुम्ब। 49 गे इ ग्रांग्रा दिशो गेय आ पबर्म सजाइ ताइनेवे। मिनु इ मूर्ति पूजा पशो पाप राइनेवे। मिनु गोन परमप्रभु यावे नड, दे तुइक्नेवे" देंत।

24

यरूसलेम खिया जोशो ग्योब दुम्शो

1 मिनु ग्याइशशा लाइक्चा पुंइसीशो आ ९ बर्स डा १० महिना डा १० नाक्ती परमप्रभु यावेमी आं कली लोव पाप्तु। २राजा २५:१ 2 मार लोव पाप्तु देशा हना "ए मुर, मुलाक्ती तेको बर्स नु तेको नाक्ती बाक्बा, मेको ब्रेक्शा वोतो। मारदे हना मुलाक्ती बेबीलोन डा पिपम यरूसलेम कली पुम्शो बाक्ब। 3 एको मटीब खिं डा मुर आन कली, एको कथा नेंपाइक्मी। परमप्रभु, परमप्रभु यावेमी मार देंब देशा हना 'मी तार ग्योब कादीन। मिनु मेकेर ब्वाक्कु लुक्तीन। इजीकीएल ११:३ 4 मिनु मेकेर श्ये कुर पने। रिम्शो रिम्शो श्ये, आ फिला डा नु कुथु डा श्ये कुर पने। रिम्शो रुशेम प्रिंदीने। 5 बगाल डा नेल्ल क्येडा रिम्शो क्यारश भेडा योवशा चाक्कीन। मेको आ आगाम शी प्रोवडीन। मिनु मेकेर बुइक्पाइशशा रुश क्येने' देंत।

6 मोपतीके 'आबी आबी, एको हुश खाक्श पोक्ब सहर, मेको आ खिया ग्योब आगाम बाक्ब। मेको आ खिया मेकेर रे मलशो बाक्ब। मेको कली फेन्टे मआप्थु, श्येत्थ पोक्कीन। इजीकीएल २२:२; नहुम ३:१ 7 मारदे हना मेको आ हुश शाइक्पाइशशा मेको आ दातेमीन बाक्ब। मेकोम मेको हुश श्येत्थ फुल्लु तार शाइक्पाइशशा बाक्त। मिनु खपीम मसुम्शो बाक्त। 8 गो चुरशा क्येक्क लेत्चा कली, मेको आ शाइक्पाइशशा हुश मसुमल, दे श्येत्थ फुल्लु तार शाइक्पाइक्ता' दे परमप्रभु, परमप्रभु यावेमी देंत। 9 मिनु 'आबी आबी, मेको हुश खाक्श पोक्ब सहर, गो यो शी शुश तेल्लुड। 10 मोपतीके शी तेल्ला मी सुइक्तीन। मस्ला सुप्शा रिम्शो पा बुइक्पाइशशा श्ये क्येने। मिनु रुश नेल्ल किक्मल। 11 मेको नोले मेको ग्योब श्येत्थ सेल्शा मी तार कादीन। मिनु मेको होल। मिनु मेको आ तांबा लल दुम्ल। मेको आ आगा डा ग्रांग्रा दिशो नु खिया यशा लल। मिनु मीम नेक्गल। 12 आं सुर्ता पशो नेल्ल मोशीन दुम्त। मेको आ थांइशो खिया मीम यो मला। 13 मिनु गो इ कली इ ग्रांग्रा दिशो गेय रे ग्रुंइशा ग्रांग्रा मदिशो सेल्चा मालता। तन्न गे ग्रांग्रा मदिशो मदुमे। मोपतीके गो गेना सम्म आं गाइशशा नेल्ल इ तार मोइशशा, आं थुं मनाइक्पाइक्नुडा, मेना सम्म गे ग्रांग्रा मदिशो सेल्चा मपुंइसीनेवे। इजीकीएल ५:१३ 14 गो, परमप्रभु यावेमी एको लोव पाता। गो आं गेय पतीक नाक्ती जाक्शो बाक्ब। गो नोले मशोंइसीनुड। गो इ कली सुर्ता मपथु, शिशी मपाइक्नुड। इ पशो खोदेशो पा इ कली निसाफ पाइनुड" दे परमप्रभु, परमप्रभु यावेमी देंत। येरमीया १३:१४

इजीकीएल आ मीश बेक्शो

15 परमप्रभु यावेमी आं कली लोव पाप्तु। 16 मार लोव पाप्तु देशा हना "ए मुर, गो याम काम इ नेल्ल क्येडा दाक्शो मुर लाइक्चा चिक्शो बाक्नुड। मो हना यो गे रोंका मपावो। मडाक्को। मिनु इ मिक्च रे प्रेक्कु यो मतोक्को। 17 सिक्सी पा बाक्शा हुकयी पावो। बेक्शो मुर आ पबर्म रोंका मपावो। इ पियाम फेटा रुक्सो। खोइलीम जुत्ता लिक्सो। इ कुल

मसुम्सो। मलामी आन जचा थोव्रक मजावो” दंत। मीका ३:७; होसे ९:४ 18 मोपतीके गो मेको लोव्र सुनी कना मुर आन कली माइक्तामी। मिनु मेको नाक्दो आं मीश बेक्त। मिनु आ दीसा सुनी गो मार माइक्चा पुंडसीशो बाक्डा, मेकोन पाता।

19 मिनु मुरपुकीम आं कली “एको आ अर्थ मार बाक्बा? मार गे आंइ कली मशेंनीनी?” दंतेक्म। 20 मिनु गो मेको आन कली “परमप्रभु यावेमी आं कली लोव्र पाप्तु। 21 मार लोव्र पाप्तु देशा हना ‘इसाएल आ खिं डा मुर आन नेल्ल क्येडा दाक्शो, इन सक्ति, इन कोव्रत दाक्शो नु थुंम दाक्शो आं बाक्तीक गो ग्रंग्रा दिशो सेल्लुड। मिनु इन प्रोंइशा वोइशो इन तमी तौ तरवारम साइक्चा पुंडसीनीम 22 मिनु आं पशो खोदेशो पा गेपुकीम यो पचा माल्नीनी। गे इन कुल मसुमीन। मिनु मलामी आन जचा थोव्रक मजने। 23 गे इन फेटा रुक्चा माल्नीनी। मिनु इन जुत्ता लिक्चा माल्नीनी। गेपुकीम रोंका मपने। मडाक्कीने, तन्न इन मरिम्शो पतीकेम इन रां सोव्रशा लाइनीम। मिनु इन दातेम हुकयी पचा माल्नीनी। ब्यवस्था २६:३९-४० 24 मोपा इजीकीएल गे इन कली चिन्ड का दुम्ब। मेकोम पशो खोदेशो पा गे यो पचा माल्नीनी। मिनु एको लोव्र गाम्मेनु, गोन परमप्रभु, परमप्रभु यावे नड, दे तुइक्नीनी’ देशो बाक्ब” दंत। इजीकीएल १२:६, ११

25 मिनु “ए मुर, मेको नाक्ती गो मेको आन खुइशशा बाक्तीक, आन नेल्ल क्येडा दाक्शो, आन सक्ति, आन कोव्रत दाक्शो नु आन थुंम दाक्शो नु आन तमी तौ नेल्ल आन कली लाइनुडमी। 26 मेको नाक्ती प्रोक्शो मुर का इ बाक्तीक जाक्शा इ कली एको लोव्र नेल्ल नंपाइक्ब। इजीकीएल ३३:२१ 27 मेना गे ब्वाक्ने चाप्नेवे। मिनु गे मेको नु लोव्र पाइनेवे। मिनु गे सिक्सी पा मबाक्नेवे। मोपा गे मेको आन कली चिन्ड का दुम्नेवे। मिनु मेकोपुकीम गोन परमप्रभु यावे नड, दे तुइक्नीम” दंत।

25

अम्मोनी आन कली लोव्र पशो

1 परमप्रभु यावेमी आं कली लोव्र पाप्तु। 2 मार लोव्र पाप्तु देशा हना “ए मुर, अम्मोनी गे कोव्रशा, मेको आन पर्वम आं लोव्र पावो। 3 अम्मोनी आन कली “परमप्रभु यावे आ लोव्र नेनीन। परमप्रभु, परमप्रभु यावेमी इन कली मार दंब देशा हना, आं बाक्तीक ग्रंग्रा दिशो सेल्मेनु, इस्राएल रागी मुर मबाक्तीके सेल्मेनु नु यहूदा आ खिं डा मुर ग्याइशशा लाइक्चा पुंडसमानु, गेपुकी ग्येरसाक्नी। इजीकीएल ३६:२; बिलाप २:१६ 4 मोपतीके गो इन कली पूर्व डा मुर आन कली गेनन्नी। मिनु मेकोपुकीम इन दातेम आन लडाइ पाइब आन बाक्तीक सेल्नीम। मिनु इन दातेमीन आन ताम्बु कीनीम। मेकोपुकीम इन फल फुल जाइनीम। मिनु इन दूध तूनीम। 5 गो रब्बाह सहर कली दलओंठ जोतीक नु अम्मोन कली क्यारश भेडा आन गोठ सेल्लुड। मेना गेपुकीम गोन परमप्रभु यावे नड, दे तुइक्नीनी” दंत। 6 मारदे हना परमप्रभु यावेमी “गेपुकी इस्राएल रागी आ पर्वम इन गुइ फ्रोक्शा, खोइल थाइशो बाक्तीनी। मिनु इन थुंम ईख कुरशो नेल्ल गुंइशा ग्येरसाक्नी। 7 मोपतीके गो आं गुइ गे इन पर्वम क्युक्नुड। मिनु गो इन कली रागी रागी डा मुर आन गुइम गेनुड। मिनु गो जात जात डा मुर आन दाते रे इन नें क्याम्नुड। मिनु गो इन कली रागी नेल्ल रे क्याम्नुड। गो इन कली खतम पोक्नन्नी। मेना गेपुकीम गोन परमप्रभु यावे नड, दे तुइक्नीनी” दंत।

मोआबी आन कली लोव्र पशो

8 मिनु परमप्रभु, परमप्रभु यावेमी “मारदे हना मोआब रागीम ‘यहूदा आ खिं दा अर्को जात डा मुर आन खिं खोदेशो दुम्शो बाक्ब। यसैया १५:-; १६:-; येरमीया ४८:- 9 मोपतीके गो मोआब रागी डा सांद डा सहर रे गोशा बेथ-येशीमोथ, बाल-मेओन नु किरयथ-थाइम रागी रोक्सीशो सेल्लुड। 10 गो मोआबी, अम्मोनी नु पूर्व डा मुर आन गुइम गेनुडमी। मिनु रागी रागी डा मुर आन दातेम अम्मोन कली सुइम ममिन्नीम। 11 मिनु गो मोआब कली निसाफ पा सजाइ गेनुड। मेना मेकोपुकीम गोन परमप्रभु यावे नड, दे तुइक्नीम’ देशो बाक्ब” दंत।

एदोमी आन कली लोव्र पशो

12 परमप्रभु, परमप्रभु यावेमी “एदोम रागीम यहूदा आ खिं डा मुर आन कली क्येक्क लेत्ताक्व। मोपतीके मेको थाम्पा दोस ताइब दुम्त। इजीकीएल ३५:-; येरमीया ४९:७-२२; आमोस १:११-१२; ओबदिया १:-; भजन संग्रह १३७:७ 13 गो आं गुइ एदोम आ पर्वम क्युक्नुड। मिनु मेकेर डा मुर नु बी ब्यफ, क्यारश भेडा नेल्ल आन कली साइक्नुडमी। मिनु गो मेको कली मुर मबाक्तीके सेल्लुड। मिनु तेमान रे देदान सम्म डा मुर नेल्ल तरवारम साइक्चा पुंडसीनीम। 14 गो आं मुर इस्राएल रे पा एदोम कली क्येक्क लेत्नुड। मिनु मेकोपुकीम आं गाइशो नु आं चुरशो खोदेशो

पा एदोम कली पाइक्नीम। मिनु मेकोपुकीम आं गाइशो नु चुरशो खोदेशो पा क्येक्क लेत्नीम। मिनु मेकोपुकीमी परमप्रभु, परमप्रभु यावेमी क्येक्क लेशो बाक्ब, दे तुइक्नीम” दैत।

पलिस्ती आन कली लोत्र पशो

15 परमप्रभु, परमप्रभु, यावेमी “मारदे हना पलिस्तीपुकीम गेना हना यो जोरी सत्रु दुम्शा, क्येक्क लेत्ताक्म। आन थुंम ईख कुरशा, क्येक्क लेशशा खतम सेल्लेक्म। यसैया १४:२९-३२; येरमीया ४७:-; आमोस १:६-८; सेफन्याह २:४-५
16 मोपतीके गो पलिस्ती आन पर्वम आं गुइ क्युक्नुड। मिनु गो केरेथी आन कली साइक्नुडमी। मिनु समुन्द्र आ नेक्था डा बाक्तीक नेल्ल खतम सेल्लुड। 17 गो मेको आन कली आं चुरशोम ठेयब सजाइ गेशा थाम्पा क्येक्क लेत्नुडमी। मिनु गो मेको आन कली क्येक्क लेत्तुनु, मेकोपुकीम गोन परमप्रभु यावे नड, दे तुइक्नीम, देशो बाक्ब” दैत।

26

टायर सहर कली निसाफ पशो

आमोस १:९-१०; यसैया २३:-

1 मिनु ग्याइशशा लाइक्चा पुंडसीशो ११ बर्स डा महिना डा डोंइती डा नाक्ती परमप्रभु यावेमी आं कली लोत्र पाप्तु।
2 मार लोत्र पाप्तु देशा हना “ए मुर, यरूसलेम श्येत जशो तशा, टायर सहर ग्येरसीशो बाक्त। मेकोमी ‘आं डोंइती ठेयब लाप्चो ब्रेशो बाक्ब। मेको लाप्चो आं कली रोक्सीशो बाक्ब। मुल मेको जाम्शा लत। मुल आं कली रिम्शो दुम्ब’ ” दैत। इजीकीएल २५:३ 3 मोपतीके परमप्रभु, परमप्रभु यावेमी “कोव्रडो, ए टायर सहर गो इ कली सजाइ गेनुड। इ कली समुन्द्रम आ छाल पोक्शो खोदेशो पा गो शुश रागी डा मुर इ पर्वम पोक्नुडमी। 4 मेकोपुकीम टायर डा गारो प्रेत्नीम। मिनु मेको आ लाइशशो खिं खोल्नीम। गो मेको आ खप खोरशा श्येत्थ फुल्लु खोदेशो सेल्लुड। 5 टायर सहर समुन्द्र आ दातेम ग्याइल आप्तीक दुम्चा माल्ब, दे गो, परमप्रभु, परमप्रभु यावेमी एको लोत्र पाता। मेको सहर रागी रागी डा मुर आन रोइक्तीक दुम्ब। 6 मिनु मेको आ एर ओंथ डा सहर डा मुर तरवारम साइक्चा पुंडसीनीम। मेना मेकोपुकीम गोन परमप्रभु यावे नड, दे तुइक्नीम” दैत।

7 मिनु परमप्रभु, परमप्रभु यावेमी “गो उत्तर रे बेबीलोन डा पिप नेबुकदनेसर कली शारा, बग्गी, शारा डोइक्ब लडाइ पाइब नु ठेयब हुल बोल्यो लडाइ पाइब, टायर नु लडाइ पपाइक्थ चाक्नुड। येरमीया २७:६; दानीएल २:३७ 8 मिनु एर ओंथ डा सहर डा मुर नेल्ल तरवारम साइक्चा पुंडसीनीम। मेको बेबीलोन डा लडाइ पाइबपुकीमी सहर कली पुम्नीम। गारो डोइक्तीक सेल्नीम। मिनु तेक्तीक कुरशो शुश लडाइ पाइब इ गे बारनीम। 9 मिनु पिप नेबुकदनेसरमी मुडाम गारो ब्रेप्ब आन कली अरेब। मिनु इ लाइशशो खिं आ खापुकीम प्रेत्नीम। 10 मेको आन शुश शाराम पोक्शो फुरकुम इ कली सुम्ब। शारा डोइक्ब नु बग्गी आन गुगील आन रेयकेम इ गारो हिम्पाइक्ब। नेबुकदनेसर इ लाप्चो रे ओव्रमेनु, प्रेशो गारोम हिरशो सहर खोदेशो पा ओव्रब। 11 मेको आ शारा आन गेंचम इ सहर डा लां नेल्ल दिम्शा ताइशशा पाइनीम। मिनु मेकोमी इ मुर आन कली तरवारम साइक्ब। मिनु इ बोल्यो थाम खपीम गोल्नीम। 12 मेकोपुकीम इ शोप रोइशशा योल्नीम। इ लेयचा कली वोइशशो थोव्रक रोइशशा लाइक्नीम। मेकोपुकीम इ गारो नु इ दारदारशो खिं प्रेशशा खतम पोक्नीम। मिनु इ फुल्लु, खिं सेल्लुत्तीक शी नु खप समुन्द्रम ताइक्नीम। 13 गो इ कुम्सो थुम्पाइक्नुड। इ बीना ताप्शो लेंशा मनेसीब। आमोस ५:२३ 14 गो इ कली श्येत्थ फुल्लु सेल्लुड। गे ग्याइल आप्तीक दुम्नेवे। इ कली लेंशा गेनायो मसेल्नीम। मारदे हना गो, परमप्रभु यावेमी एको लोत्र पाता” दे परमप्रभु, परमप्रभु यावेमी दैत।

15 परमप्रभु, परमप्रभु यावेमी टायर सहर कली “लडाइ पा, गार दुम्शो आन हुकयी पशो इ गोल्शो रेयकेम समुन्द्र आ नेक्था डा सहर आन कली हिम्पाइक्ब। 16 मेना समुन्द्र आ नेक्था डा सहर आन कली सासन पाइब आन ठेयब नित्तीक रे बोक्शा तोइशशा, बुटा आप्शो वा प्रुइक्नीम। मेकोपुकी हिंशा खिंखि पशा, खपीम निशशा, हिम्सीनीम। मिनु इ कली तशा हिंनीम। 17 मिनु मेकोपुकीम सहर आ पर्वम रोंका पाइनीम। मिनु सहर कली ‘गे समुन्द्र रे क्याम्चा पुंडसाक्वे। ए दारशो सहर, गे नु इ मुरपुकी समुन्द्र डा सक्ति पाइशशो बाक्तीनी। मेकेर बाक्ब नेल्ल आन कली गे हिंपाइशशा थिर थिर पपाइशशो बाक्ते। 18 मुल गे जाम्शा लवे नाक्ती समुन्द्र आ नेक्था डा रागी डा मुरपुकी खिंखि पाइनीम। इ गोल्शा लशो खतम दुम्शो तशा समुन्द्र आ नेक्था डा रागी हिंनीम’ ” दैत।

19 मिनु परमप्रभु, परमप्रभु यावेमी “गो इ कली श्येत्थ सहर का सेल्लुड। गो इ कली मुर मबाक्शो सहर खोदेशो दुम्पाइक्नुड। मिनु गो इ कली समुन्द्र डा ब्वाक्कुम सुम्पाइक्नुड। 20 गे इ कली बेक्शा लशो मुर नु साइ डोंइती बेक्शो मुर आन बाक्तीके उइ तोक्नन। गो इ कली उइ डा रागीम साइ नेसी ब्रेशशो खिं आन दातेमी बाक्पाइक्नुड। गे नरक

लाइब नु बाक्नेवे। मिनु गे ब्रोंइशा बाक्ब आन बाक्तीकेम बाक्चा मताइनेवे। यसैया १४:११, १५; एफिसी ४:९; १पत्रुस ३:१९ 21 गो इ जाम्तीक हिंचा डा सेल्लुड। मिनु गे जाम्शा लाइनेवे। इ कली माल्नीम, तन्न सुइम मथिल्नीम” दे परमप्रभु यावेमी देंत।

27

टायर सहर आ पर्बम रोंका पशो
यसैया २३:-

1 परमप्रभु यावेमी आं कली लोव्र पाप्तु। 2 मार लोव्र पाप्तु देंशा हना “ए मुर, टायर सहर आ पर्बम रोंका पावो। 3 मेको समुन्द्र आ ओव्रतीक बाक्ब। मेको टायर सहर शुश मुर आन ग्याप्तीक लेयतीक बाक्ब। मिनु परमप्रभु, परमप्रभु यावेमी ए टायर, गे ‘गो नेल्ल क्येडा दारशो बाक्नुड’ देंते। होसे ९:१३ 4 इ सांद समुन्द्र आ आगाम बाक्त। इ कली सेल्लपुकीमी नेल्ल आन क्येडा दारशो पा सेल्लेमी। 5 मेकोपुकीम इ डोंगा नेल्ल सेनीर डा शी के सेल्लेक्म। आ दाते डा थाम लेबानोन डा लाइशो रवा आ शी के सेल्लेक्म। ब्यवस्था ३:८-९ 6 मेकोपुकीम इ ब्वाक्क शाक्तीके बाशान डा बोल्यो शी के सेल्लेक्म। इ थेक्शा गाक्तीक साइप्रस डा समुन्द्र आ शुंडच रे चाक्शो तोव्रशी रवा आ शी के सेल्लशा हात्ती आ दारा के बुटा आप्शा सेल्लेक्म। 7 इ जहाज डा वापुकी इजीप्त रागी डा दारशो बुटा आप्शा सेल्लशो रिम्शो किरशो सुती वा के बाक्तेक्म। मेको इ छेदर दुम्शो बाक्तेक्म। मेको एलीशाह रागी डा समुन्द्र आ शुंडच डा नीलो नु प्याजी रड डा चाक्शो बाक्त। उत्पत्ती १०:४ 8 सीदोन नु अरवाद डा मुरपुकी इ जहाजम गेय पाइब बाक्तेक्म। टायर, इन जोक्ब तुइक्ब मेकेर बाक्तेक्म। सेमेर सहर डा मुर इ जहाज चलेब बाक्तेक्म। 9 गोबाल डा खाल्पा नु दारशो थोव्रक सेल्लस जोक्ब तुइक्ब इ आगाम बाक्तेक्म। मेकोपुकी जहाज डा बिगेशो मार मार सेल्लब बाक्तेक्म। जहाज नु आ गेय पाइब नेल्ल इ आगाम बाक्तेक्म। मेकोपुकीमी लेयतीक नु ग्याप्तीक गेय यो पाम्तेक्म। यहोसु १३:५; १राजा ५:३२ 10 पारसी, लूद नु पूत रागी डा मुरपुकी इ लडाइ पाइब बाक्तेक्म। मेकोपुकी बोल्यो लडाइ पाइब बाक्तेक्म। मेको आन तेक्तीक नु ताकी इ आगामीन क्युक्शा इ दारस बारपाइक्तेक्म। 11 अरवाद नु हेलेक डा मुरपुकी इ गारो आ एर ओंथ खाल पाइब बाक्तेक्म। गमाद डा मुरपुकी इ लाइशो खिं खाल पाइब बाक्तेक्म। मेकोपुकीम आन तेक्तीक नु ब्रा कुरतीक इ एर ओंथ डा गारोम क्युक्बाक्तेक्म। मिनु मोपा इ दारस बारपाइक्तेक्म।

12 गे नु शुश शोप नु शुश मार मार बाक्तीके टारशीश डा मुरपुकीम गे नु ग्याप्तीक लेयतीक गेय पा चांदी, फलाम, टिन नु सिसा चाक्शा फाइक्तेक्म। 13 यावान तूबल नु मेशेक डा मुरपुकीम गे नु ग्याप्तीक लेयतीक गेय पाम्तेक्म। मेकोपुकीम वाइलीम वाइल नु कांसा के ग्योब चाक्शा इ मार मार नु फाइक्तेक्म। इजीकीएल ३८:२ 14 मिनु बेथ-तोगारमाह डा मुरपुकीम शारा, लडाइ पाइब शारा नु खच्चर चाक्शा इ मार मार नु फाइक्तेक्म। 15 रोडोस डा मुरपुकीम गे नु ग्याप्तीक लेयतीक गेय पाम्तेक्म। मिनु समुन्द्र आ नेक्था डा शुश रागी इ मार मार ग्याप्ब लेयब दुम्तेक्म। मेकोपुकीम इ कली हात्ती आ दारा नु शुश क्येट लाइब क्येर शी चाक्शा इ मार मार नु फाइक्तेक्म। 16 इ शुश मार मार बाक्तीके एदोम डा मुरपुकीमी गे नु ग्याप्तीक लेयतीक गेय पाम्तेक्म। मेकोपुकीम फिरोजा माइशो हीरा, प्याजी रड नुप्शा प्रोव्रशो वा, बुटा आप्शो वा, रिम्शो किरशो सुती वा, लल मूगा नु हीरा चाक्शा इ मार मार नु फाइक्तेक्म। 17 यहूदा नु इस्राएल डा मुरपुकीम गे नु ग्याप्तीक लेयतीक गेय पाम्तेक्म। मेकोपुकीम मिन्नीथ डा चेरब, फोव्रशी रवा आन फल, खुदो, तेल नु खेक्तीक चाक्शा इ मार मार नु फाइक्तेक्म। 18 मिनु इ शुश मार मार बाक्तीके नु इ शुश शोप बाक्तीके दमस्कस डा मुरपुकीम गे नु मार मार ग्याप्तीक लेयतीक गेय पाम्तेक्म। मेकोपुकीम हेल्बोन डा अडगुर शांबु नु बुश ऊन चाक्शा इ मार मार नु फाइक्तेक्म। 19 उजाल डा वेदान नु यावान डा मुरपुकीम गे नु ग्याप्तीक लेयतीक गेय पाम्तेक्म। मेकोपुकीम चेम्शो फलाम, सिन्कौली नु बच चाक्शा इ मार मार नु फाइक्तेक्म। 20 देदान डा मुरपुकीम शारा आ लगम कली जीन वा चाक्शा इ मार मार नु फाइक्तेक्म। 21 अराब रागी नु केदार डा पिप आन तौ नेल्ल इ मार मार ग्याप्ब मुर बाक्तेक्म। मेकोपुकीम भेडा पाठा, सांड, क्यारश चाक्शा इ मार मार नु फाइक्तेक्म। 22 शेबा नु रामाह डा ग्याप्ब लेयब मुरपुकीम गे नु ग्याप्तीक लेयतीक गेय पाम्तेक्म। मेकोपुकीम सुप्तीक, नेल्ल खाल डा हीरा नु सुन चाक्शा इ मार मार नु फाइक्तेक्म। उत्पत्ती १०:७ 23 हारान, कन्नेह, एदेन, शेबा, अशशुर नु किल्मद डा ग्याप्ब लेयबपुकीम गे नु ग्याप्तीक लेयतीक गेय पाम्तेक्म। 24 मेकोपुकीमी दारशो वा, नीलो श्येलेम प्रोव्रशो वा, बुटा आप्शो वा, शुश रड पाइशो गलैचा चाक्शा, इ मार मार नु फाइक्तेक्म। 25 टारसीस डा जहाजपुकीम इ ग्याप्तीक लेयतीक गेय पाम्तेक्म। गे हेल्शो ग्याप्तीक लेयतीक मार मारमी ब्रीशो समुन्द्रम बाक्ते। 26 मिनु इ कली शाक्बपुकीमी

इ कली समुन्द्र आ दातेम लाइक्तेकम। तन्न पूर्व डा फशेम इ कली समुन्द्र आ दातेमीन खतम पोक्तु। 27 मिनु इ खतम दुम्तीक नाक्ती इ शोंप, इ ग्याप्तीक लेयतीक मार मार, इ गेय पाइब, इ कली चलेब, इ जहाज कली सेल्ब, इ ग्याप्ब लेयब, इ लडाइ पाइब नु गे नु बाक्ब मुर नेल्ले समुन्द्र आ दातेमी गुम्शा खतम दुम्नीम। 28 मेको इ जहाज चलेब आन वाइ ब्रेशोम रागी ख्रिंख्रि पाइब। 29 मिनु ब्वाक्कु शाक्ब नेल्ले आन जहाज प्रोंइशा प्रोक्नीम। मिनु जहाजम गेय पाइब नु चलेबपुकी समुन्द्र आ नेक्थाम राप्नीम। 30 मिनु मेकोपुकी इ पबर्म ठेयब सेंदा पा रोंका पा डाक्नीम। आन पियाम फुरक फुंडसीनीम। मिनु पुलुम लोकसीनीम। 31 गे इ पतीके मेकोपुकीम आन पिया डा चां प्रेक्नीम। मिनु अरन्डी फेक्सीनीम। मिनु इ पबर्म आन थुं कशो दुम्शा डाक्नीम। शुश रोंका पाइनीम। 32 मेकोपुकीम इ पबर्म रोंका पा बिलाना पतीक कुम्सो पाइनीम ‘समुन्द्र आ दातेमी टायर खोदेशो पा अर्को तेको सहर खतम दुम्शो बाक्मे’ दे रोंका पाइनीम। 33 समुन्द्रम इ ग्याप्तीक लेयतीक मार मार चाक्गामेनु, गे शुश मुर आन कली आन थुं ग्येरपाइक्तीवी। गे इ शुश शोंप नु इ ग्याप्तीक लेयतीक मार मारम रागी डा पिप आन कली शोंप पाइश्शो सेल्लतीवी। 34 मुल समुन्द्रम खुम्चा पुंडसाक्वे। इ ग्याप्तीक लेयतीक मार मार नु इ मुर नेल्ल गे नु गुम्तेकम। 35 मिनु समुन्द्र आ नेक्थाम बाक्ब नेल्ल इ कली तशा हिंशो बाक्नीम। मेको आन पिप थाम्पा हिंशा ख्रिंख्रि पाइनीम। मेको आन कुल हिंशा किक्पाइश्शो बाक्नीम। 36 मिनु रागी रागी डा ग्याप्तीक लेयतीक गेय पाइबपुकीम इ कली शुक्शी पाइनीम। इ हिंचा डा नुप्तीक नाक्त जाक्शो बाक्त” देंत। इजीकीएल २८:१९

28

टायर डा पिप कली निसाफ पशो

1 परमप्रभु यावेमी आं कली लोव्र पाप्तु। 2 मार लोव्र पाप्तु देशा हना “ए मुर, टायर डा पिप आ तौ कली परमप्रभु, परमप्रभु यावेमी ‘गे इ थुं डा ठेयब लेत्तीकेम, गो परमप्रभु नड। गो समुन्द्र आ दातेम देवी देवता आन बाक्तीकेम बाक्नुड’ देंते। तन्न गे मुर ला बाक्नेवे। परमप्रभु मनवे। गे ठेयब लेशशा, इ थुंम ‘परमप्रभु खोदेशो जोक्ब तुइक्ब बाक्नुड’ दे मिम्साक्वे। यसैया ३१:३; दानीएल ५:२०; प्रेरित १२:२३ 3 गे दानीएल क्येडा यो जोक्ब तुइक्ब बाक्नेवे। मारेइ खुइक्तीक लोव्र इ रे मखुंडसीशो बाक्ब। इजीकीएल १४:१४; दानीएल १:१७ 4 गे इ रुप्तीक थुं नु मिम्तीकेम शुश शोंप चेम्शो बाक्नेवे। मिनु गे इ मार मार वोइक्तीकेम सुन नु चांदी तेल्लो बाक्नेवे। 5 गे इ रुप्तीक थुंम ग्याप्तीक लेयतीक गेय पा इ शोंप बारपाइश्शो बाक्नेवे। मिनु इ शोंपोम पतीके गे बोरशा ठेयब लेशशा बाक्नेवे, देशो बाक्ब” देंत। 6 मोपतीके परमप्रभु, परमप्रभु यावेमी “गे आंम इ कली परमप्रभु खोदेशो सुंडसीनेवे। 7 मोपतीके गो रागी रागी डा नेल्ल क्येडा मरिम्शो पाइब मुर आन कली चाक्नुड। मिनु मेकोमी आन तरवार इ दारस नु इ जोक्ब तुइक्ब थुं आ पबर्म शोइक्नीम। मिनु इ दारस ग्रांग्रा दिशो सेल्लनीम। 8 मेकोपुकीम इ कली तुरसुम चाक्दीत्नीम। मिनु गे समुन्द्र आ दातेम हिंचा डा दुम्शा बेक्नेवे। इजीकीएल २६:२० 9 मिनु मार, इ कली साइक्ब आन डोंइती गे मुर दुम्शा यो ‘गो देवता का नड’ देंनेवे डा? ‘इ कली साइक्ब आन गुइमी बाक्शा यो मोदेशो लोव्र पाइनेवे? 10 गे अर्को रागी डा मुर आन गुइम खोइक्तीक चिनु मखोइश्शो मुर खोदेशो पा बेक्चा माल्लेवे’ दे गो, परमप्रभु, परमप्रभु यावेमी लोव्र पाता” देंत।

11 परमप्रभु यावेमी लेंशा आं कली लोव्र पाप्तु। 12 मार लोव्र पाप्तु देशा हना “ए मुर, टायर डा पिप आ पबर्म रोंका पावो। मिनु मेको कली परमप्रभु, परमप्रभु यावेमी इ कली ‘गे रिम्शो पा थोक्शो छाप खोदेशो बाक्ते। मिनु रुप्तीक थुंम ब्रीशो नु थम दारशो बाक्ते। इजीकीएल २७:२ 13 गे परमप्रभु आ रू एदेनम खोदेशो बाक्ते। गे हीराम ग्योम्सीशो बाक्ते। लल मानीक, हाव पुशपराज, बुश नु नीलो पन्ना, पीतमनी, लल रड डा ओनीक्स, नीलो बिलौरा, बुश नीर, लल फिरोजा नु गिगी बेरूज माइश्शो हीराम ग्योम्सीशो बाक्ते। मिनु मेको हीरा ग्याइक्तीके नु आप्तीके सुन के बाक्तेकम। गे दुमे नाक्तीन मेको नेल्ल ठीक पशो बाक्तेकम। प्रस्थान २८:१७-२०; इजीकीएल ३१:८-९; उत्पत्ती २:८ 14 गो तेल लुक्शो करूब इ कली खाल पाइब सेल्लता। गे आं डांडाम बाक्शो नवे। गे मी ब्रशो फुल्लु आन दातेम गाक्बाक्ते। 15 गे सेल्चा पुंडसे नाक्त रे दोस मताइब बाक्ते। तन्न नोले मरिम्शो पाइब दुम्शो, बाक्ते। 16 मिनु इ एर ओंथ नेल्ल डा ग्याप्तीक लेयतीक आ पबर्म हुश ख्राक्श पोक्शा, पाप पाप्तीवी। मोपतीके गो इ कली ताइक्तीक थोव्रक खोदेशो पा आं डांडा रे ताइक्ताक्ड। मिनु इ कली खाल पाइब करूबम इ कली मी ब्रशो फुल्लु आन दाते रे खेरते। 17 गे इ दारसम पतीके इ थुं ठेयब लेशशा बोरत। इ शुश शोंप दुम्तीके इ जोक्ब तुइक्ब थुं मरिम्शो सेल्लतीवी। मोपतीके गो इ कली खपीम ताइक्ताक्न। मिनु इ कली पिप आन डोंइती शुक्शी पतीक सेल्लतन। 18 गे इ शुश मरिम्शो पशो नु इ जोल

पा ग्यापतीक लेयतीकेम इ आं कली ठेयब सेलतीके ग्रांघ्रा दिशो सेलतीवी। मोपतीके गो इ आगा रे मी का गुंडताकड। मिनु मेकोमी इ कली नेक्तु। मिनु गो इ कली मुर आन डोंइती पुलु सेलतन। 19 मिनु इ कली तुइक्ब मुर नेल्ल इ कली तशा हितेक्म। गे हिंचा डा दुम्शा बेक्ते। मिनु गे गेना हना यो बेक्शा लाइनेवे' देनो" देंत। इजीकीएल २७:३६

सीदोन सहर कली निसाफ पशो

20 परमप्रभु यावेमी आं कली लोव्र पाप्तु। 21 मार लोव्र पाप्तु देशा हना "ए मुर, सीदोन गे कोव्रडो। मिनु मेको आ पबर्म आं लोव्र पावो। यसैया २३:२-४ 22 परमप्रभु, परमप्रभु यावेमी 'ए सीदोन, गो इ कली सजाइ गेनुड। गो इ दातेमी आं सक्ति कोंडनुड। गो इ दातेमी आं सक्ति कोंइशा, निसाफ पाता हना, मेकोपुकीमी गोन परमप्रभु यावे नड' दे तुइक्नीम 23 गो मेको आ आगाम मुर बेक्तीक रोइ का सोइक्नुड। मिनु मेको आ लां मेर हुश शाइक्पाइक्नुड। मेको आन दाते डा मुर तेइ तेइ तरवारम साइक्चा पुंडसीनीम। मिनु मेकोपुकीम 'गोन परमप्रभु यावे नड' दे तुइक्नीम।

इस्राएली आन रागी लेत्नीम

24 इस्राएल आ खिं डा मुर नु मेको आन नेक्था डा मुर आन दातेमी मुल श्येत गेब मुर मुल मबाक्नीम। मेकोपुकीम 'गोन परमप्रभु, परमप्रभु यावे नड' दे तुइक्नीम" देशो बाक्ब। 25 परमप्रभु, परमप्रभु यावेमी "गो इस्राएल आ खिं डा मुर आन कली मेको आन ब्रशा बाक्शो रागी रागी डा मुर आन दाते रे गुम्पाइक्नुडमी। मिनु गो परमप्रभु यावे नड, दे रागी रागी डा मुर आन डोंइती तुइक्पांडसीनुड। मेना मेकोपुकी आं गेय पाइब याकूब कली गेशो रागीम बाक्चा ताइनीम। 26 मेकोपुकी मेकेर मारेइ मदुमथु बाक्नीम। मेकोपुकीम खिं सेल्नीम। मिनु अडगुर खुम्नीम। मिनु गो मेको आन कली तशा, ग्रांघ्रा दीब नेल्ल आन कली सजाइ गेनुडमी। गो मेको आन नेक्था बाक्ब मेको आन कली मदाक्ब आन कली निसाफ पडानु, मेकोपुकी रिम्शो पा बाक्नीम। मिनु मेकोपुकीम 'गोन परमप्रभु यावे, आन परमप्रभु नड' दे तुइक्नीम" देंत।

29

इजीप्त कली निसाफ पशो

यसैया १९:-; यसैया २०:-; येरमीया ४६:-

1 मिनु ग्याइशशा लाइक्चा पुंडसीशो १० बर्स डा १० महिना डा १२ नाक्त परमप्रभु यावेमी आं कली लोव्र पाप्तु। 2 मार लोव्र पाप्तु देशा हना "ए मुर, गे इजीप्त डा पिप फाराओ गे कोव्रडो। मेको आ पबर्म नु इजीप्त रागी नेल्ल आन पबर्म आं लोव्र पावो। 3 मिनु परमप्रभु, परमप्रभु यावेमी मेको कली 'ए इजीप्त डा पिप फाराओ, गो इ कली सजाइ गेनुड। गे खोला आन दातेम बाक्ब समुन्द्र डा ठेयब जन्तु खोदेशो बाक्नेवे। मिनु नील खोला आं केन बाक्ब। मेको आं सेल्शो बाक्ब' देंते। इजीकीएल ३२:२ 4 गो इ शापेम बोल्सी ब्वेक्नुड। मिनु गो इ खोला डा डांइ इ कत्लापुकीमीन क्येप्पाइक्नुडमी। गो खोला डा डांइ इ कत्लाम क्येप्पाइशशा, इ कली खोला रे कीशा गुंडनन। 5 मिनु गो इ कली नु इ खोला डा डांइ नेल्ल आन कली गोरशो रागीम ताइक्नन्नी। मिनु गे दिंमम गोल्नेवे। इन कली सुइम खुप्शा मथिम्नीम। गो इ कली रागी डा जन्तु नु सरीड डा चिक्ब आन कली ब्वचा कली गेनुड। 6 मेना इजीप्त रागीम बाक्ब नेल्लेम गोन परमप्रभु यावे नड, दे तुइक्नीम। गे इस्राएल आ खिं डा मुर आन कली बुदी मीलु के कोक्के खोदेशो दुम्शो बाक्नेवे। २राजा १८:२१ 7 मिनु मेकोपुकीम इ कली गुइम ग्याइक्तमेनु, गे जिक्बाक्ते। मिनु मेकोपुकीमी इ कली तिकसीमानु, गे जिक्शा, मेको आन खोइल रोप्पाइक्बाक्ते" देंत।

8 मोपतीके परमप्रभु, परमप्रभु यावेमी "गो इ पबर्म तरवार सोइक्नुड। गो इ मुर नु इ बी ब्यफ, क्यारश भेडा नेल्ल आन कली साइक्नुडमी। 9 मिनु इजीप्त रागी मुर मबाक्तीके नु गोरशो रागी दुम्ब। मेना मेकोपुकीम गोन परमप्रभु यावे नड, दे तुइक्नीम। गे 'नील खोला आं केन बाक्ब। गो मेको सेलता' देंते। 10 मोपतीके गो इ पबर्म नु इ खोला आन पबर्म बोक्नुड। मिनु गो मिग्दोल रे स्येने सम्म नु एथीयोपीया रागी आ सांद सम्म इजीप्त रागी कली गोरशो नु मुर मबाक्तीके सेलनुड। इजीकीएल ३०:६ 11 मेकेर सुइ मुर नु जन्तु मगाक्नीम। मेकेर ४० बर्स सम्म सुइ मबाक्नीम। गन्ती १४:३३-३४ 12 गो इजीप्त रागी कली मुर मबाक्शो रागी आन दातेमी मेको क्येडा मुर मबाक्शो रागी सेलनुड। मिनु मेको आ सहरपुकीम ४० बर्स सम्म मुर मबाक्नीम। मिनु गो इजीप्त रागी डा मुर आन कली रागी रागी नु राज्य राज्य डा मुर आन दातेम ब्रपाइक्नुडमी" देंत।

13 मो हना यो परमप्रभु, परमप्रभु यावेमी "मेको ४० बर्स नोले गो इजीप्त डा मुर आन कली मेको आन ब्रशा बाक्तीक रागी रागी डा मुर आन दाते रे खुप्नुडमी। 14 गो मेको आन कली लेंशा रिम्शो पाइनुड। मिनु मेको आन कली आन

किकी पिपी आन रागी पश्रोसम चाक्नुडमी। मिनु मेको मेकेर महिक्सीशो आइक्च राज्य का दुम्शा बाक्ब। पश्रोस रागी इजीप्त डा दक्खिन बाक्त। 15 मेको राज्य नेल्ल आन दातेमी नेल्ल क्येडा आइक्च राज्य दुम्ब। मेको अर्को रागी आन क्येडा गेनायो ठेयब मदुम्ब। गो मेको कली थम आइक्च सेल्लुड। मिनु मेकोम गेनायो अर्को रागी रागी आन कली सासन मपाइब। 16 मिनु इस्राएल आ खिं डा मुरपुकीमी इजीप्त रागी कली लेंशा गेनायो थमा मसुइक्नीम। तन्न इस्राएलम इजीप्त कली 'वारच पाइक्की' दे पुंइथ लशा आन पाप मिम्पाइक्नीम। मेना मेकोपुकीम गोन परमप्रभु, परमप्रभु यावे नड, दे तुइक्नीम" देंशो बाक्ब।

इजीप्त रागी नेबुकदनेसर के दुम्शो

17 मिनु ग्याइशशा लाइक्चा पुंइसीशो २७ बर्स डा डोंइती डा महिना डा डोंइती डा नाक्ती परमप्रभु यावेमी आं कली लोव्र पाप्तु। 18 मार लोव्र पाप्तु देंशा हना "ए मुर, बेबीलोन डा पिप नेबुकदरेसरम टायर कली लडाइ पाइब आन कली शुश श्येत पपाइक्तु। मिनु मुर नेल्ल आन पिया डा चां दुल्लत। आन बला खोरसीशा, गार दुम्त। मो हना यो टायर आ पबर्म पशो गेय आ पबर्म मेको नु मेको आ लडाइ पाइबम मारेइ मतामे। 19 मोपतीके परमप्रभु, परमप्रभु यावेमी 'गो इजीप्त रागी कली बेबीलोन डा पिप नेबुकदरेसर आ गुइम गेनुड' देंत। मिनु मेकोम मेको आ शोंप नेल्ल लाइक्ब। मेकोम मारेइ मारेइ रोइशशा, मेको रागी कली श्येत्थ पोक्ब। मिनु मेको आ रोइशशो शोंप मेको आ लडाइ पाइब आन गाल्च दुम्ब। 20 गो मेको आ पशो गेय आ पबर्म इजीप्त रागी कली मेको आ गाल्च सेल्शा गेता। मारदे हना मेकोपुकीम आं पबर्म शुश गेय पाम्तेक्म। इजीकीएल ३०:२४ 21 मेको नाक्ती गो इस्राएल आ खिं डा मुर रे ग्रोव्र का वापाइक्नुड। मिनु गो इ कली मेको आन दातेमी ब्वाक्पाइक्नन। मेना मेकोपुकीम गोन परमप्रभु यावे नड, दे तुइक्नीम" देंत।

30

इजीप्त रागीम सजाइ तशो

1 परमप्रभु यावेमी आं कली लोव्र पाप्तु। 2 परमप्रभु, परमप्रभु यावेमी मार लोव्र पाप्तु देंशा हना "ए मुर, आं लोव्र पावो। मेको नाक्त आ पबर्म रोंका पावो। 3 मारदे हना मेको नाक्त नेक्थान जाक्ना जाक्न बाक्ब। परमप्रभु यावे आ नाक्त नेक्थान जाक्शो बाक्ब। मेको गोस्सुम सुम्शो नाक्त बाक्ब। मेको रागी रागी डा मुर आन कली हिंचा डा नाक्त दुम्ब। योएल १:१५; सेफन्याह १:१४ 4 इजीप्त रागी तार तरवार का जाक्ब। मिनु एथीयोपीया रागीम यो श्येत दुम्ब। इजीप्त रागीम साइक्चा पुंइसीशो मुरपुकी खपीम गोल्नीम। मिनु मेको रागी डा शोंप लाइक्नीम। मिनु मेको आ जग प्रेत्नीम। 5 एथीयोपीया, पूत, लूद नु अराब रागी नेल्ल नु लिबीया नु अर्को आ नेक्था डा रागी डा मुर तरवारम साइक्चा पुंइसीनीम" देंत। येरमीया ४६:९

6 मिनु परमप्रभु यावेमी "मेको इजीप्त रागी कली वारच पतीके क्याम्चा पुंइसीनीम। मेको आ ठेयब लेशशो जाम्ब। मिग्दोल रे स्येने सम्म बाक्ब मुर नेल्ल तरवारम साइक्चा पुंइसीनीम। इजीकीएल २९:१० 7 मेकोपुकी मुर मबाक्शो रागी आन दातेम मुर मबाक्तीके दुम्नीम। मिनु मेको आन सहर ब्रेशशा, मुर मबाक्तीक सहर आन दातेम ब्रेशशो सहर दुम्नीम। 8 गो इजीप्त रागीम मी सुइशशा, मेको आ वारच नेल्ल फस सेल्लुड। मेना मेकोपुकीम गोन परमप्रभु यावे नड, दे तुइक्नीम। 9 मेको नाक्ती लोव्र कुरब मुर जहाजम डोइक्पा सोइक्नुड। मेको आन थुं नाइशशा बाक्शो एथीयोपीया डा मुर आन कली हिंच कोइचा कली लोव्र सोइक्नुड। इजीप्त रागी आ नुप्ची नाक्ती मेकोपुकी शुश हिंनीम। मेको नाक्त थमा पा जाक्ब" देंत। यसैया २०:३-४

10 परमप्रभु, परमप्रभु यावेमी "गो बेबीलोन डा पिप नेबुकदरेसर आ गुइ रे पा इजीप्त रागी डा लडाइ पाइब आन कली साइक्नुडमी। 11 नेबुकदनेसर नु आ लडाइ पाइब रागी डा नेल्ल क्येडा मरिम्शो पाइब बाक्नीम। मेको आन कली खतम सेल्चा कली चाक्नुडमी। मेकोम आन तरवार इजीप्त रागी आ पबर्म शोइक्नीम। मिनु साइशशो मुरपुकीम रागी ब्रीनीम। इजीकीएल २८:७ 12 गो नील खोला डा ब्राशो ब्वाक्कु सोव्रपाइक्नुड। मेको रागी कली मरिम्शो पाइब आन गुइम लेयनुड। गो मेको रागी नु मेकेर बाक्शो मारेइ मारेइ आन कली अर्को रागी डा मुर आन गुइ रे खतम पोक्नुड। गो, परमप्रभु यावेमी एको लोव्र पाता" देंत। यसैया १९:५

13 मिनु परमप्रभु, परमप्रभु यावेमी "गो देवी देवता आन कली खतम पोक्नुडमी। मिनु मेम्फीसम बाक्शो देवी देवता आन कली खतम पोक्नुडमी। इजीप्त रागीम गेनायो सासन पाइब मदुम्नीम। मोपा गो इजीप्त रागी डा मुर आन कली हिंतीक थुं गेनुडमी। मेम्फीस सहर कली नोफ यो देंनीम 14 गो पश्रोस कली मुर मबाक्तीके सेल्लुड। सोआन सहरम मी

सुइक्नुड। गो थेबेस सहर कली निसाफ पा सजाइ गेनुड। नहुम ३:८-९ 15 गो इजीप्त रागी डा बोल्यो दरवार पेलुसीयम तार आं गाइशो मोइक्नुड। मिनु थेबेस सहर डा शॉप नेल्ल खतम पोक्नुड। 16 गो इजीप्त रागी कली मी सुइक्नुड। मिनु पेलुसीयम श्येत जशा ग्येत्थ लुकच दुम्ब। थेबेस सहर डा गारो ब्रेत्नीम। मेम्फीस सहरम चहिं नाक्ती लडाइ दुम्ब। 17 ओन नु पी-बेसेथ डा ठिटापुकी तरवारम साइक्चा पुंडसीनीम। मिनु मेको सहर डा मुर ग्याइशशा लाइक्चा पुंडसीनीम। 18 मेको नाक्त तेहाफ-नेहेस सहर छिडछिड दुम्ब। गो मेकेर इजीप्त रागी आ जुवा जिक्नुड। मिनु मेको आ ठेयब लेशशो क्याम्नुड। गोस्सुमी मेको सहर कली सुम्ब। मिनु मेको आ एर ओंथ डा सहर डा मुर ग्याइशशा लाइक्चा पुंडसीनीम। येरमीया ४३:९ 19 मोपा गो इजीप्त रागी कली निसाफ पा सजाइ गेनुड। मिनु मेकोपुकीम गोन परमप्रभु यावे नड, दे तुइक्नीम” देंत।

इजीप्त डा पिप आ सक्ति जाम्शो

20 मिनु ग्याइशशा लाइक्चा पुंडसीशो ११ बर्स डा डोंइती डा महिना डा ७ नाक्ती परमप्रभु यावेमी आं कली लोव्र पाप्तु। 21 मार लोव्र पाप्तु देशा हना “ए मुर, गो इजीप्त रागी डा पिप फाराओ आ गुइ जिक्शा गेता। मेको साचा कली मारेइ मफ्रेसीशो बाक्ब। मोपा बोल्यो मदुम्ब। तरवार चलेने मचाप्ब। 22 मोपतीके परमप्रभु, परमप्रभु यावेमी गो इजीप्त रागी डा पिप फाराओ कली लोव्र का पाइनुड। गो मेको आ गुइ निम्फा जिक्नुड। आ बोल्यो गुइ नु आ डोंइती जिक्शो गुइ जिक्नुड। आ गुइ रे तरवार तोक्नुड। 23 गो इजीप्त डा मुर आन कली रागी रागी डा मुर आन दातेम फ्राइनुडमी। मिनु मेको आन कली रागी रागीम ब्रपाइक्नुडमी। 24 गो बेबीलोन डा पिप आ गुइ सक्ति पाइशशो सेल्लुड। मिनु आं तरवार मेको कली गेनुड। तन्न गो फाराओ आ गुइ जिक्नुड। मिनु मेको, मेको आ डोंइती बेक्चा डा पा गार दुम्शो मुर खोदेशो पा, नक्सुर पाइब। इजीकीएल २९:२० 25 गो बेबीलोन डा पिप आ गुइ सक्ति पाइशशो सेल्लुड। तन्न फाराओ आ गुइ सक्ति मपाइशशो दुम्ब। गो बेबीलोन डा पिप कली आं तरवार गेनुड। मिनु मेकोमी इजीप्त रागी आ पर्बम हिरब। मेना मेकोपुकीम गोन परमप्रभु यावे नड, दे तुइक्नीम। 26 गो इजीप्ती आन कली रागी रागी डा मुर आन दातेम फ्राइनुडमी। मिनु मेको आन कली रागी रागीम ब्रपाइक्नुडमी। मेना मेकोपुकीम गोन परमप्रभु यावे नड, दे तुइक्नीम” देंत।

31

लाइशशो रवा आ चिन्ड

1 मिनु ग्याइशशा लाइक्चा पुंडसीशो ११ बर्स डा महिना सां डा डोंइती डा नाक्ती, परमप्रभु यावेमी आं कली लोव्र पाप्तु। 2 मार लोव्र पाप्तु देशा हना “ए मुर, इजीप्त डा पिप फाराओ नु मेको आ लडाइ पाइब आन कली ‘इन ठेयब दुम्तीक सु नु थाप्ने चाम्सीबा? 3 अस्सुर रागी कली मिम्तीन। मेको लेबानोन डा लाइशशो रवा खोदेशो बाक्त। मेको आ दारशो राशीम ब्वाकी आन कली सुम्शो बाक्त। मेको आ डर लाइशशो दुम्शा गोस्स सम्म जाक्दीशशो बाक्त। 4 मिनु मेको कली ब्वाक्कुम जिशशा कोल्पाइक्नु। ब्वाक्कुम मेको कली लाइशशो सेल्लु। मेको आ एर ओंथ डा खोलापुकीम मेको कली जिप्पाइक्तेक्म। मिनु मेको खोलाम दिंम डा रवा नेल्ल आन कली जिप्पाइक्नु। 5 मोपा मेको दिंम डा रवा नेल्ल आन क्येडा लाइशशो दुम्त। शुश ब्वाक्कु बाक्तीके मेको आ राशी शुश दुम्तेक्म। मिनु शुश ब्वाक्कु रे मेको कोल्लत। 6 सरीड डा चिक्बपुकीम मेको आ राशीम आन ग्योव्र सेल्लेक्म। मेको आ राशी आगाम ब्वाकी डा जन्तु नेल्लेम आन चाइक्ब जरमेक्तेक्म। मिनु मेको आ वांकु आगाम रागी रागी डा मुर जाक्शा बाक्तेक्म। 7 मेको एर ओंथ ब्रशा लाइशशो राशी पाइशशो दारशो रवा का दुम्त। मारदे हना मेको आ शाक्श शुश ब्वाक्कु बाक्तीकेम बाक्तेक्म। 8 परमप्रभु आ रू डा लाइशशो रवापुकीम यो मेको कली ग्राने मचबेम। तेकोइ तोव्रशी रवापुकीम यो मेको आन राशी कली ग्राने मचबेम। परमप्रभु आ रू डा तेकोइ रवा मेको खोइ दारशो मबाक्म। 9 गो मेको कली एर ओंथ लशो राशीपुकीम ग्योम्शा, दारशो सेल्लता। मिनु परमप्रभु आ रू एदेन डा रवा नेल्लेम मेको कली गेहे पाम्तेक्म’ देनो” देंत।

10 मोपतीके परमप्रभु, परमप्रभु यावेमी “मेको मिश लाइशशो दुम्तीके नु मेको आ डरम आ राशी आन कली गोस्स आन दाते रे ख्रिशशा लपाइक्तीके आ लाइशशोम मेको ठेयब लेल्लत। 11 मोपतीके गो मेको कली रागी रागी डा सासन पाइब आ गुइम गेता। मिनु मेको लाइशशो रवाम दोपा आं अरेशो मटिवा, मोपा सजाइ ताप्तु। गो मेको कली तिल्लता। 12 मिनु अर्को रागी डा थम मरिम्शो मुरपुकीम मेको कली तिम्शा प्रोंइतेक्म। मेको आ राशीपुकी बेंसी नेल्ल नु पहाड मेर गोल्शा बाक्तेक्म। मिनु मेको आ ठेयब राशी रागी डा खोला नेल्लेम जिक्शा लीतेक्म। मिनु रागी डा मुर नेल्ले

मेको आ वांकु रे गूशा मेको कली प्रोइतेकम। 13 मिनु मेको दिम्शो रवाम सरीड डा चिक्ब नेल्ल बाक्तेकम। मिनु मेको आ राशी आगाम ब्वाकी डा जन्तु नेल्ल जाक्शा बाक्तेकम। 14 मोदेशो दुम्तीके ब्वाक्कु आ नेक्था वाशो रवा मेको मिश लाइशो पा मकोल्नीम। मिनु आन डर गोस्स सम्म मजाक्दीत्नीम। मारदे हना मेको नेल्ल बेक्चा माल्नीम। नेल्ल मुर खोदेशो पा बेक्चा माल्नीम। बेक्शो मुर आन बाक्तीके तुरसुम लाइनीम” देत।

15 परमप्रभु, परमप्रभु यावेमी “गो मेको लेबानोन डा ठेयब रवा कली बेक्शो मुर आन बाक्तीकेम तोक्नुड। मेको नाक्ती समुन्द्र रोंका पा खोला मशाइक्नीम। ब्वाक्कु बुक्तीके सोत्रनीम। मिनु गो लेबानोन डा रवा आन कली रोंका पपाइक्नुड। मिनु ब्वाकी डा रवा नेल्ल खिंखि पा हिम्पाइक्नुडमी। 16 गो मेको कली तुरस नु बेक्शो मुर आ बाक्तीके सोइशशा, रागी रागी आन कली आ गोल्लो रेयकेमी हिम्पाइक्नुड। मिनु एदेन डा रवा नेल्ले, लेबानोन डा नेल्ल क्येडा दारशो रवा नु शुश ब्वाक्कु तशो रवा नेल्लेमी रागी आगाम आन थुं नाइक्ताकम। इजीकीएल २८:८ 17 मेको तरवारम साइक्चा पुंइसीशो नु मेको रागी कली वारच पा अर्को रागी डा मुर आ वांकुम बाक्ब नेल्ल बेक्शो मुर आन बाक्तीक लाम्तेकम।

18 एदेन डा रवा आन दाते डा तेको रवा इ खोदेशो पा सक्ति पाइशो नु ठेयब बाक्बा डा? मो हना यो गे यो एदेन डा रवापुकी नुन रागी आगा तोक्चा पुंइसीनेवे। गे खोइक्तीक चिनु मखोइशो तरवारम साइक्चा पुंइसीशो आन दातेमी बाक्नेवे। मेकोपुकी फाराओ नु मेको आ लडाइ पाइब बाक्नीम, देनो” दे परमप्रभु, परमप्रभु यावेमी देत।

32

फाराओ आ पर्बम रोंका पशो

1 मिनु ग्याइशशा लाइक्चा पुंइसीशो १२ बर्स डा १२ महिना डा डोंइती डा नाक्त परमप्रभु यावेमी आं कली लोव्र पाप्तु। 2 मार लोव्र पाप्तु देशा हना “ए मुर, इजीप्त डा पिप फाराओ आ पर्बम रोंका पावो। मिनु मेको कली ‘गे रागी रागी डा मुर आन दातेम गुप्स का खोदेशो मिम्साक्वे। गे समुन्द्र डा ठेयब जन्तु का खोदेशो बाक्ते। गे खोला डा ब्वाक्कुम एर ओंथ पवीनु ब्वाक्कु कली पोक्ना पोक्न नु खोइलीम ब्वाक्कु कली खाक्ना खाक्न गाक्बाक्ते। मिनु खोला कली ग्रान्रा दिशो सेल्बाक्ते’ देनो” देत। इजीकीएल २९:३ 3 मिनु परमप्रभु यावेमी “गो मुर आन ठेयब हुल चाक्नुड। मिनु आं ग्याइल इ तार ब्वारनुड। मेकोपुकीम आं ग्याइलीम इ कली कीशा रागीम गुंइनीम। इजीकीएल १२:१३ 4 मिनु गो इ कली खपीम ताइक्नन। गो इ कली रागीम नेप्शा सोइक्नन। गो सरीड डा चिक्ब नेल्ल आन कली इ तार जुक्पाइक्नुडमी। मिनु गो रागी डा जन्तु नेल्ल आन कली इ श्ये प्रोइक्पाइक्नुडमी। इजीकीएल २९:५ 5 गो इ श्ये डांडा मेर फ्राइनुड। मिनु इ बेक्शो रांम बेंसी नेल्ल प्रिनुड। 6 मिनु गो इ हुशेम रागी जिप्पाइक्नुड। डांडा सम्म जिप्पाइक्नुड। मिनु खोल्सा नेल्ल इ श्येम प्रिनुड। 7 गो इ कली क्याम्दुनु, सरीड नेल्ल सुम्नुड। मिनु सोरुल आन कली छिडछिड सेल्नुडमी। गो नां कली गोस्सुम सुम्नुड। मिनु तास्लाम हाम्सो मगेब। यसैया १३:१० 8 गो सरीड डा छेडछेड नेल्ल आन कली इ तार छिडछिड सेल्नुडमी। मिनु गो इ रागी छिडछिड सेल्नुड” दे परमप्रभु यावेमी देत। 9 मिनु “गो इ कली रागी रागी डा मुर आन दाते, इ मतुइशो रागीम ग्याइशशा लाइक्पाइक्नन। गो शुश मुर आन थुं ग्येत्य लुक्च पपाइक्नुड। 10 गो शुश मुर आन कली इ कली तशा हिंब सेल्नुडमी। मेको आन पिप इ कली तशा शुश हिंनीम। गो आं तरवार मेको आन डोंइती हिरदुनु, मेको पिपपुकी बेक्चा कली हिंशा खिंखि पस डा पस बाक्नीम। इ बेक्तीक नाक्ती मेको नेल्ल बेक्चा कली खिंखि पना पन बाक्नीम” देत। 11 मारदे हना परमप्रभु, परमप्रभु यावेमी “बेबीलोन डा पिप आ तरवारम इ तार जाक्ब। 12 गो थम सक्ति पाइशो मुर आन तरवार रे इ लडाइ पाइब आन कली साइक्पाइक्नुडमी। मेको सक्ति पाइशो मुर रागी नेल्ल डा मुर आन क्येडा मरिम्शो पाइब बाक्नीम। मेकोपुकीम इजीप्त रागी आ ठेयब लेशो खतम पोक्नीम। मिनु मेको आ लडाइ पाइब नेल्ल आन कली साइक्नीम। 13 गो मेको आ शुश ब्वाक्कु बाक्तीक आ नेक्था योत्रशो बी ब्यफ, क्यारश भेडा नेल्ल आन कली साइक्नुडमी। मिनु मुर नु बी ब्यफोम, मेको ब्वाक्कु मदिम्नीम। 14 मिनु नोले गो मेको ब्वाक्कु रिम्शो सेल्नुड। मिनु मेको आ खोलापुकी तेल खोदेशो पा शाइक्पाइक्नुडमी” दे परमप्रभु, परमप्रभु यावेमी देत। 15 मेकोम “गो इजीप्त रागी कली मुर मबाक्शो रागी सेलनु, मेको रागी श्येत्य दुम्मेनु, मेकेर बाक्ब नेल्ल आन कली सदुमीनु, मेकोपुकीम गोन परमप्रभु यावे नड, दे तुइक्नीम। 16 मेको रोंका पतीक कुम्सो का बाक्ब। मेकोन पचा माल्नीम। रागी रागी डा मीश मुरपुकीम एको कुम्सो पचा माल्नीम। मेकोपुकीम इजीप्त रागी नु मेको आ लडाइ पाइब नेल्ल आन पर्बम एको कुम्सो पचा माल्नीम” दे परमप्रभु, परमप्रभु यावेमी देत।

बेक्शो मुर आन बाक्तीक

17 मिनु ग्याइशशा लाइक्चा पुंडसीशो १२ बर्स डा डोंडती डा महिना डा १५ नाक्त परमप्रभु यावेमी आं कली लोत्र पाप्तु। 18 मार लोत्र पाप्तु देशा हना “ए मुर, इजीप्त रागी डा लडाइ पाइब आन पबर्म रोंका पावो। मिनु मेको आन कली तुरसुम सोइक्तो। मिनु इजीप्त नु सक्ति पाइशशो रागी रागी डा मुर आन तमी आन कली बेक्शो मुर आन बाक्तीक सोइक्तो। तुरसुम लाइबपुकी नु सोइक्तो। इजीकीएल ३१:१६ 19 मार, गे अर्को जात आन क्येडा शुश शिशी ताइब बाक्नेवे डा? उइ लावो। मिनु खोइक्तीक चिनु मखोइशशोपुकी नु गोलशा बाक्को। यसैया १४:११,१५ 20 मेकोपुकी तरवारम साइशशो आन दातेम गोलनीम। इजीप्त तरवारम साइक्चा पुंडसीचा कली गेशो बाक्ब। आ लडाइ पाइब नु आ शोंप निम्फा लतीन। 21 मिनु ठेयब सक्ति पाइशशोपुकी नु आन वारच पाइबपुकीमी बेक्शो मुर आन बाक्तीकेम ‘मेकोपुकी उइ यिशो बाक्नीम। मेको गोलशो बाक्नीम। खोइक्तीक चिनु मखोइशशोपुकी तरवारम साइक्चा पुंडसीशो बाक्नीम’ देंनीम।

22 अस्सुर नु आ मुर नेल्ल मेकेर बाक्नीम। आ लडाइ पाइब नेल्ल आ तुरस आ एर ओंथ बाक्नीम। मेको नेल्ल तरवारम साइक्चा पुंडसीशो बाक्नीम। 23 मेको आन तुरस बेक्शो मुर आन बाक्तीके क्येडा दी गे वोइशशो बाक्ब। मेको आ लडाइ पाइबपुकी मेको आ तुरस आ एर ओंथ बाक्नीम। मेको नेल्ल तरवारम साइक्चा पुंडसीशो बाक्नीम। मेकोम ब्रोंइशा बाक्ब आन रागीम मुर आन कली शुश हिंपाइशशो बाक्तेक्म।

24 एलाम मेकेर बाक्ब। आ लडाइ पाइब नेल्ल आ तुरस आ एर ओंथ बाक्नीम। मेको नेल्ल तरवारम क्योरशा साइक्चा पुंडसीशो बाक्नीम। मेकोपुकी खोइक्तीक चिनु मखोइक्थु, उइ बेक्शो मुर आन बाक्तीक लाम्तेक्म। मेकोम ब्रोंइशा बाक्ब आन रागीम मुर आन कली शुश हिंपाइशशो बाक्तेक्म। मेकोपुकी बेक्शो मुर आन बाक्तीकेम लशो खोदेशो पा मुने दोक्नीम। येरमीया ४९:३७ 25 मेकोपुकीमी एलाम कली आ साइशशो लडाइ पाइब आन दातेमी तुरस सेल्लो बाक्नीम। आ लडाइ पाइब आन तुरस मेको आ एर ओंथ बाक्नीम। मेको नेल्ल खोइक्तीक चिनु मखोइक्थु तरवारम साइक्चा पुंडसीशो बाक्नीम। मारदे हना मेकोम ब्रोंइशा बाक्ब आन रागीम मुर आन कली शुश हिंपाइशशो बाक्तेक्म। मेकोपुकी बेक्शो मुर आन बाक्तीके लाइब खोदेशो पा मुने दोक्नीम। मेको साइक्चा पुंडसीशो मुर आन दातेमी बाक्नीम।

26 मेशेक, तूबल नु आस शुश मुर मेकेर बाक्नीम। आस मुर आस तुरस आस एर ओंथ बाक्नीम। मेको नेल्ल खोइक्तीक चिनु मखोइक्थु तरवारम साइक्चा पुंडसीशो बाक्नीम। मारदे हना मेकोम ब्रोंइशा बाक्ब आन रागीम मुर आन कली शुश हिंपाइशशो बाक्तेक्म। इजीकीएल २७:१३; इजीकीएल ३८:२ 27 मेकोपुकी साइ डोंडती साइशशो अरु लडाइ पाइब नु मबाक्नीम। मिनु मेको आन या सुन्दा बेक्शो मुर आन बाक्तीकेम लशो बाक्नीम। मेको आन तरवार आन पिया आगाम वोइशशो बाक्ब। मिनु आन तेक्तीके आन रुश तार वोइशशो बाक्नीम। मारदे हना मेको लडाइ पाइबम ब्रोंइशा बाक्ब आन रागी डा मुर आन कली शुश हिंपाइक्तेक्म। 28 इजीप्त गे यो खतम दुम्शा खोइक्तीक चिनु मखोइक्थु तरवारम साइक्चा पुंडसीशा गोल्ला माल्नेवे।

29 एदोम मेकेर बाक्ब। मेको आ पिप नु आ तौ नेल्ल मेकेर बाक्शो बाक्नीम। मेको आन के सक्ति बाक्त हना यो, मेको तरवारम साइक्चा पुंडसीशा गोल्ला बाक्शो बाक्नीम। मेकोपुकी खोइक्तीक चिनु मखोइशशो नु तुरसुम गोल्ला बाक्नीम। इजीकीएल २५:१२-१४

30 उत्तर रागी डा सासन पाइब नु सीदोन डा मुर नेल्ल मेकेर बाक्नीम। मेको आन सक्तिम मुर नेल्ल आन कली शुश हिंपाइक्तेक्म। मोपतीके मेकोपुकी तरवारम साइक्चा पुंडसीशो मुरपुकी नु मुने दोक्शा उइ लाम्तेक्म। मेकोपुकी खोइक्तीक चिनु मखोइक्थु तरवारम साइक्चा पुंडसीशो नु मुने दोक्शा तुरसुम बाक्शो बाक्नीम। इजीकीएल २८:२१-२३

31 फाराओमी मेको कली तशा, आ लडाइ पाइब नेल्ल तरवारम साइक्चा पुंडसीशो तुइशशा, आ थुं नाइक्ब। 32 मारदे हना मेकोमी ब्रोंइशा बाक्ब आन रागी डा मुर आन कली शुश हिंपाइक्तु। मोपतीके फाराओ खोइक्तीक चिनु मखोइक्थु तरवारम साइशशो मुर आन दातेमी बाक्ब” दे परमप्रभु, परमप्रभु यावेमी देंत।

33

इजीकीएल खाल पाइब दुम्शो

इजीकीएल ३:१६-२१

1 परमप्रभु यावेमी आं कली लोव पाप्तु। 2 मार लोव पाप्तु देशा हना “ए मुर, इ मुर आन कली ‘गो रागी का कली तरवार चाक्ता हना, मेको रागी डा मुरपुकीम आन रागी डा मुर का कली आन कली खाल पाइब का योवशा वोइक्नीम, 3 मिनु मेकोम आ रागीम तरवार कुरशा आ जोरी सत्रु जाक्शो तशा, आ मुर आन कली तुइक्पाइक्चा कली तुराही ताप्ब। 4 मिनु सुम मेको तुराही ताप्शो नेंशा मटीबा, मेको तरवारम साइक्चा पुंइसाक्व हना, मेको आ हुश आ दोस आंमा राइब। 5 मेकोम तुराही ताप्शो नेंशा यो, मटितीके, मेको आ हुश आ दोस आंमा राइब। तन्न मेकोम टिशो हना, ब्रोंइ वा। 6 तन्न मेको खाल पाइबम तरवार कुरशा लडाइ पाइब जाक्शो तशा यो, मुर आन कली नेंपाइक्चा कली तुराही मताप्तु नु तरवार जाक्शा सुइ मुर का कली साइक्त्तु हना, मेको मुर आ मरिम्शो पशो आ पर्बम बेक्ब। तन्न गो मेको खाल पाइब कली मेको आ हुश आ क्येक्क ताक्नुड।

7 ए मुर, गो इ कली इस्राएल आ खिं डा मुर आन कली खाल पाइब सेल्लतान। मोपतीके गेना इ कली लोव पडा, मेना गे मेको आन कली मेको आं लोव नेंशा, होस पा बाक्कीन’ देंचा माल्नेवे। हिबू १३:१७ 8 मिनु गो आं अरेशो मटीब मुर आन कली ‘ए आं अरेशो मटीब मुरपुकी गे थमा पा बेक्नीनी’ देंनुड, मिनु गे मेको आं अरेशो लोव मटीब मुर आन कली ‘इन मरिम्शो पशो प्रोनीन’ दे महिंपाइक्तीवी हना, मेको मरिम्शो पाइब मुर आन मरिम्शो पशो आ पर्बम बेक्नीम। तन्न गो मेको आन हुश आ क्येक्क इ रे पा ताक्नुड। 9 तन्न गे मेको परमप्रभु यावे आं अरेशो लोव मटीब आन कली इन मटितीके प्रोनीन, दे हिंच कोइताक्वी हना, मिनु मेकोपुकीम आं अरेशो लोव मटिम्तेक्म हना, मेको आन मटिशो आ पर्बम बेक्नीम। मिनु गे आंम कली प्रोंइनेवे” देंत।

परमप्रभुम निसाफ पाइब

इजीकीएल १८:२१-३२

10 मेकोम “ए मुर, गे इस्राएल आ खिं डा मुर आन कली ‘गेपुकीम आंइ हेंथे पशो नु पाप पशोम दिप्चा पुंइसीशो बाक्नीकी। मिनु मेको आ पर्बम आंइ बोल नुम्ना नुम्न लशो बाक्ब। गो दोपा ब्रोंइनीकी?’ देंनीनी” देनो। 11 मोपतीके गे मेको आन कली परमप्रभु, परमप्रभु यावेमी “गो आ ब्रोंइशा बाक्शो खोदेशो पा आं अरेशो लोव मटीब मुर बेक्मानु मग्थेरसीनुड। तन्न मेकोपुकीम आं अरेशो लोव टिशा ब्रोंइमल। गे इन मरिम्शो लां रे लेतीन। ए इस्राएल आ खिं डा मुरपुकी, गे मारदे बेक्चा दाक्नीनी? ब्यवस्था ३२:४०; यसैया ५५:७; योएल २:१२-१३ 12 मिनु ए मुर, गे इ मुर आन कली ठीक पाइब मुर हेंथे गाक्त हना, आ डोंइती ठीक पशोमी मेको कली प्रोंइने मचाप्ब। डोंइती आं अरेशो मटीब मुर, ठीक पाइब दुम्त हना, आं डोंइती मटिशो आ पर्बम मबेक्ब। मिनु ठीक पाइब मुरुम पाप पाप्तु हना, मेको आ डोंइती ठीक पशो आ पर्बम ब्रोंइचा मताइब। इजीकीएल ३:२० 13 गो मेको ठीक पाइब मुर कली ‘गे थमा पा ब्रोंइनेवे’ देंडानु, मेकोम आ ठीक पतीकेम थमा सुइश्शा, मरिम्शो पाप्तु हना, मेको आ डोंइती ठीक पशो मारेइ ममिम्सीब। मेको आ मरिम्शो पशो आ पर्बम बेक्ब। 14 तन्न गो मेको आं अरेशो लोव मटीब मुर कली ‘गे थमा पा बेक्नेवे’ देंती हना, मेकोम आ पाप पतीक प्रोंइशा आं अरेशो नु ठीक पाप्तु हना, 15 मिनु मेकोम आ जाकटी वोइश्शो थोवक लेत्ताक्व हना, आ रोइश्शो थोवक लेशशा गेप्तु हना, ब्रोंइचा कली आं फुल्लुम मुशा ब्रेक्शो लोव पशा, मरिम्शो मपाप्तु हना, मेको थमा पा ब्रोंइब। मेको मबेक्ब। ब्यवस्था २४:१०-१३; इजीकीएल १८:७; लूका १९:८ 16 मेको आ पशो तेकोइ पाप ममिम्सीब। मेकोमी आं अरेशो लोव नु ठीक गेय पाप्तु। मेको थमा पा ब्रोंइब।

17 मो हना यो इ मुरपुकीम ‘परमप्रभु आ पशो ठीक मबाक्ब’ देंनीम। तन्न थमा पा, मेको आन पशो कका ठीक मबाक्ब। 18 सुइ ठीक पाइब मुरुम मेको आ ठीक पतीके प्रोंइशा, मरिम्शो पाप्तु हना, मेको आ मरिम्शो पशो आ पर्बम बेक्ब। 19 मिनु सुइ आं अरेशो लोव मटीब मुरुम आं अरेशो लोव मटितीक प्रोंइशा, आं अरेशो नु ठीक पाप्तु हना, मेको मो पशो आ पर्बम ब्रोंइब। 20 मो हना यो गे ‘परमप्रभु आ पशो ठीक मबाक्ब’ देंनीनी। ए इस्राएल आ खिं डा मुर, गो इन कली इन पशो खोदेशो पा निसाफ पाइनुड” देंत।

यरूसलेम ब्रुशो

21 गो आंइ ग्याइश्शा लाइक्चा पुंइसीशो १२ बर्स डा १० महिना ५ नाक्त दुम्मेनु, यरूसलेम रे प्रोक्शा जाक्शो मुर का आं बाक्तीकेम जाक्शा “आंइ सहर ब्रुत” देंत। इजीकीएल १:२; इजीकीएल २४:२६; २राजा २५:२-४ 22 मेको मुर जाक्चा क्येडा डोंइती नाक्दो परमप्रभु यावे आ गुइम आं कली थिशो बाक्त। मिनु सुनी मेको मुर जाक्चा क्येडा डोंइती आं कली ब्वाक्ब सेल्ले थुम्शो बाक्त। मोपा गो ब्वाक्ब दुम्ती।

लीशो मुर आन पाप

23 मिनु परमप्रभु यावेमी आं कली लोव्र पाप्तु। 24 मार लोव्र पाप्तु देशा हना “ए मुर, इस्राएल रागीम बाकशो मेको ब्रेशो खिम बाकब मुरपुकीम ‘अब्राहाम दा मुर का ला बाक्त। मो हना यो मेको रागी मेको के दुम्त। तन्न गो शुश बाक्नय। मेको रागी थमा पा इं कली गेशो बाकब’ देनीम। यसैया ५१:२ 25 मोपतीके गे मेको आन कली ‘परमप्रभु, परमप्रभु यावेमी इन कली गेपुकी हुश सुन्दा श्ये ब्वाइनीनी। गे इन मूर्ति पूजा पाइनीनी। गेपुकीम हुश खाकश पोक्नीनी। मिनु मार, एको रागी इन के दुम्बा डा? १सामुएल १४:३२-३४ 26 गे इन तरवार कली थमा सुइक्नीनी। गेपुकीम मूर्ति पूजा पाइनीनी। गे नेल्लेम इन नेक्था डा मुर आन मीश कली ग्रांग्रा दिशो सेल्नीनी। मिनु मार, एको रागी इन के दुम्बा डा?’ देनो” दंत। इजीकीएल ११:१४-२१ 27 मिनु गे मेको आन कली “परमप्रभु, परमप्रभु यावेमी ‘गो आं ब्रोंइशा बाकशो खोदेशो पा ब्रेशो खिम बाकबपुकी तरवारम साइक्चा पुंडसीनीम। मिनु गो दिंमम बाकब आन कली ब्वाकी डा जन्तु आन कली ब्वचा गेनुडमी। बोल्यो दरवार नु पुक्खीम बाकबपुकी मुर बेक्तीक रोइम बेक्नीम। 28 गो मेको रागी कली मुर मबाकशो नु श्येत्थ सेल्लुड। मिनु मेको आ ठेयब लेत्तीक जाम्ब। मिनु इस्राएल डा डांडाम सुइ एर ओंथ पने मचाप्चा डा पा मुर मबाक्तीके दुम्ब। 29 गो मेको आन मूर्ति पूजा पशो आन पबर्म मेको रागी कली मुर मबाकशो नु श्येत्थ सेल्लुड। मेना मेकोपुकीम गोन परमप्रभु यावे नड, दे तुइक्नीम’ देशो बाकब” दंत।

30 मेकोम “ए मुर, इ पबर्म बुक्शो मुरपुकी काथा बुक्शा, गारो नु खिं डा लाप्चोम राप्शा ‘जाक्कीन परमप्रभु यावे आ लोव्र मार बाक्मे नेंय’ देंमुडनीम। 31 मेकोपुकीम आं मुर खोदेशो पा इ बाक्तीक जाक्शा इ डोंइती नित्नीम। मिनु इ लोव्र नोफा दाइशशा नेनीम। तन्न मेकोम इ लोव्र मटीनीम। मेकोम रिम्शो लोव्र पखु पा, आन थुंम चहिं दोपा क्येट चेम्चा, दे मिन्नीम। यसैया ५३:१ 32 मेकोपुकीम इ कली तशा रिम्शो ताप्तीक ताप्शा, रिम्शो सेदामी रिम्शो कुम्सो पाइब मुर का बाकब, दे मिन्नीम। इ देशो नेनीम, तन्न मपाइनीम। 33 मेको नेल्ल थमा दुम्ब। मेको थमा पा थमा दुम्ब। मेना मेकोपुकीम आन दातेम परमप्रभु यावे आ लोव्र पाइब का जाक्शो बाक्माक्त, दे तुइक्नीम” दंत। इजीकीएल २:५

34

इस्राएली आन मरिम्शो गोठलापुकी

इजीकीएल ३७:२४-२८

1 परमप्रभु यावेमी आं कली लोव्र पाप्तु। 2 मार लोव्र पाप्तु देशा हना “ए मुर, इस्राएल डा गोठला आन कली आं लोव्र पावो। परमप्रभु, परमप्रभु यावेमी इन कली मार देंब देशा हना ‘इस्राएल डा गोठलापुकी गे आंमा जशा ब्वशा बाक्तीनी। मार, गोठलापुकीम भेडा आन कली रिम्शो पा कोव्रचा ममाल्नीमी डा? येरमीया २३:१-४ 3 गे दोम्शो बोसो ब्वाइनीनी। मिनु ऊन के वा फेक्नीनी। मिनु दोम्शो भेडा आन कली क्योरनीनी। तन्न गे भेडा आन कली रिम्शो पा मकोव्रनीनी। 4 गेपुकीम मचाप्शो आन कली बोल्यो मसेल्नी। रोइ पशो आन कली मसापाइक्नी। गार दुम्शो आन कली आन गारमी ओख्ती मखेक्तीनी। गेपुकीम लां जाम्शो आन कली माल्थ लशा मलेत्तीनी। गे जाम्शो आन कली ममाल्थु, मरिम्शो पा सासन पशो बाक्तीनी। जकरिया ११:१५-१६; यूहन्ना १०:११ 5 मोपतीके मेकोपुकी ब्राम्तेक्म। मारदे हना मेको आन के गोठला मबाक्म। मेको मोपा ब्रशा ब्वाकी डा जन्तु आन जचा थोव्रक दुम्तेक्म’ दे 6 आं भेडा लां प्रेंशा, पहाड मेर नु लाइशशो डांडा मेर हिरसाक्म। आं भेडा रागी नेल्लेम ब्राम्तेक्म। मिनु सुइम मेको आन कली ममलेम। मेको आन पबर्म हिल्लो यो मपाम” देशो बाकब। मत्ती ९:३६

7 मोपतीके ए गोठलापुकी परमप्रभु यावे आ लोव्र नेनीन। 8 परमप्रभु, परमप्रभु यावेमी “गो आं ब्रोंइशा बाकशो खोदेशो पा, आं भेडा सिखार दुम्तेक्म। गोठला मबाक्तीके ब्वाकी डा जन्तु आन जचा थोव्रक दुम्तेक्म। मिनु आं गोठलापुकीम आं भेडा आन कली ममलेम। तन्न आंम कली ला कोव्रसाक्म। आं भेडा आन कली चहिं मकोव्रडेम। 9 मोपतीके गे गोठलापुकी परमप्रभु यावे आ लोव्र नेनीन। 10 परमप्रभु, परमप्रभु यावेमी इन कली ‘गो गोठला आन पबर्म लोव्र का पाइनुड। गो आं भेडा मेको आन गुइ रे गुंडनुड। मेको आन कली आं भेडा योव्रतीक रे गुंडनुड। मिनु मेकोपुकीम जशा ब्वशा दोम्चा मताइनीम। गो आं भेडा मेको गोठला आन शोव्र रे प्रोंइनुडमी। मोपा आं भेडापुकी मेको आन ब्वचा थोव्रक मदुम्नीम’ ” दंत। येरमीया २३:२

इस्राएली आन रिम्शो गोठला

11 मिनु परमप्रभु, परमप्रभु यावेमी “मुल गो आंमान आं भेडा आन कली माल्थ लाइनुड। गो मेको आन कली कोव्रनुड। येरमीया २३:२ 12 दोपा गोठलापुकीमी एर ओंथ ब्रशो क्यारश भेडा आन दातेमी आंम क्यारश भेडा

माल्दीनीमी, मोपान गो आं भेडा आन कली माल्थ लाइनुड। क्येर गोस्सुम सुम्शो नाक्त ते ते ब्रशो आं भेडा आन कली श्येत रे प्रॉइनुडमी। लूका १५:४ 13 गो मेको आन कली रागी रागी डा मुर आन दाते रे गुंइशा, आंम आन रागीम चाक्नुडमी। गो मेको आन कली इस्राएल डा पहाड मेर, मेको आ खोला आ नेक्था नु मुर बाक्शो रागी मेर योव्रनुडमी। 14 गो मेको आन कली रिम्शो पा योव्रनुडमी। मिनु इस्राएल डा पहाड मेको आन योव्रतीके दुम्ब। मेकोपुकी रिम्शो घांस बाक्तीकेम गोल्शा बाक्नीम। मिनु इस्राएल डा पहाड मेको आन रिम्शो पा जोतीक दुम्ब। भजन संग्रह २३:२ 15 गो आंमान आं भेडा आन कली कोव्रनुड। मिनु मेको आन कली नाइक्चा गेनुडमी। 16 गो जाम्शो आन कली माल्नुडमी। हेंथे गाक्शो आन कली माल्शा थिश्शा चाक्नुडमी। गो गार दुम्शो आन कली ओख्ती खेक्नुडमी। मचाप्शो आन कली बोल्यो सेल्नुडमी। तन्न गो दोम्शो नु सक्ति पाइश्शो आन कली साइक्नुडमी। गो मेको आन कली ठीक पा योव्रनुडमी” देंत।

17 मिनु परमप्रभु, परमप्रभु यावेमी “ए गे आं क्यारश भेडा, गो भेडा नु भेडा आन दातेमी निसाफ पाइनुड। गो सांड नु क्यारश आन दातेम निसाफ पाइनुड। मत्ती २५:३२ 18 मार, रिम्शो जोतीकेम जोशा यो, गे इन कली मगाम्मे? गे मारदे लीशो जोतीक कली इन खोइलीम दिम्नीनी? मार, रिम्शो सिक्स ब्वाक्कु तूशा यो, लीशो कली इन खोइलीम हिलो सेल्चा माल्नीनी? 19 मार, आं भेडा, इन दिम्शो जोतीकेम जोचा माल्नीमी? इन खोइलीम हिलो सेल्शो ब्वाक्कु तूचा माल्नीमी?” देंत।

20 मोपतीके परमप्रभु, परमप्रभु यावेमी मेको आन कली “गो आंमान दोम्शो नु ग्येशो भेडा आन दातेम निसाफ पाइनुड। 21 मारदे हना गेपुकीम दा ग्येशो आन कली इन फिलाम नु बलाम नेम्ना नेम्न नु मचाप्शो आन कली खुना खुन एर ओंथ ब्रपाइक्नीनी। 22 गो आं क्यारश भेडा नेल्ल आन कली प्रॉइनुडमी। मिनु मेको मुल रे रोइक्चा मपुंइसीनीम। मिनु गो भेडा आन दातेम निसाफ पाइनुड।

23 गो मेको आन कली गोठला का वोइक्नुड। आं गेय पाइब दाऊद कली वोइक्नुड। मिनु मेकोम मेको आन कली कोव्रब। मेको आन कली योव्रशा मेको आन गोठला दुम्ब। इजीकीएल ३७:२४; येरमीया ३०:९; होसे ३:५; यूहन्ना १०:१४-१६ 24 मिनु गो, परमप्रभु यावे मेको आन परमप्रभु दुम्नुड। मिनु आं गेय पाइब दाऊद चहिं मेको आन दातेम सासन पाइब दुम्ब। गो, परमप्रभु यावेमी एको लोव्र पाता” देंत।

25 मेकोमी “गो मेकोपुकी नु थुं नाइश्शा बाक्तीक कबल का पाइनुड। मिनु गो रागी कली ब्वाकी डा जन्तु रे प्रॉइनुड। मिनु मेकोपुकी महिंथु थुं नाइश्शा गोरशो रागी नु ब्वाकीम इप्चा ताइनीम। इजीकीएल ३७:२६; लेवी २६:६; होसे २:२० 26 गो मेको आन कली नु आं डांडा आ एर ओंथ नेल्ल डा रागी कली अरु आन कली आसीक गेब सेल्नुडमी। गो रेउ यिची ना मेको आन कली रेउ यिपाइक्नुड। मेको रेउ आसीक खोदेशो पा यीब। लेवी २६:४ 27 मिनु रूम बाक्शो रवाम फल सित्नीम। खपीम मारेइ मारेइ ग्रेलनीम। मिनु मुरपुकी आंम रूमी रिम्शो बाक्ने चाप्नीम। गो मेको आन जुवा जिक्शा, मेको आन कली वाइल सेल्ब आन गुइ रे प्रॉइनुडमी। मेना गोन परमप्रभु यावे नड, दे तुइक्नीम। 28 मिनु रागी रागी डा मुरपुकीमी मेको आन कली रोइक्ने मचाप्नीम। ब्वाकी डा जन्तुपुकीम यो मेको आन कली मब्वाइनीम। मेकोपुकी रिम्शो बाक्नीमी। मिनु सुइम मेको आन कली महिंपाइक्नीम। येरमीया ३०:१० 29 गो मेको आन कली शुश अन्न ग्रेलतीक रू गेनुडमी। मोपा मेकोपुकी रागीम लेंशा गेनायो शोव्रलु मबेक्नीम। मिनु रागी रागी डा मुर आन शुक्शी पाइश्शो फाल्चा ममाल्नीम। इजीकीएल ३६:३० 30 मिनु मुरपुकीमी गो, परमप्रभु यावे मेको आन परमप्रभु नड, दे तुइक्नीम। गो मेकोपुकी नु बाक्नुड, दे तुइक्नीम। मिनु मेकोपुकीम इस्राएल आ खिं डा मुर आं मुर नम, दे तुइक्नीम। इजीकीएल ११:२० 31 गो आं भेडा खोदेशो ननी। आं योव्रतीके डा भेडा बाक्नीनी। मिनु गो इन परमप्रभु नड” दे परमप्रभु, परमप्रभु यावेमी देंत। भजन संग्रह १००:३

35

एदोम गोरशो रागी दुम्चशो

1 मिनु परमप्रभु यावेमी आं कली लोव्र पाप्तु। 2 मार लोव्र पाप्तु देशा हना “ए मुर, गे सेइर पहाड गे कोव्रडो। मिनु मेको कली आं लोव्र पावो। इजीकीएल २५:१२-१४ 3 परमप्रभु, परमप्रभु यावेमी ‘ए सेइर पहाड, गो इ कली लोव्र का पचा माल्नुड। आं गुइ इ गे क्युक्नुड। मिनु इ कली मुर मबाक्तीके नु श्येतथ सेल्नन। 4 गो इ सहर प्रेतनुड। मिनु गे मुर मबाक्तीक दुम्नेवे। मिनु गोन परमप्रभु यावे नड, दे तुइक्नेवे। 5 गे साइ इस्राएल कली ईख कुरतीवी। मिनु इस्राएली आन श्येत जची ना नु आन नोले डा सजाइ तची ना तरवारम क्योरचा कली जिम्मा गेप्तीवी। भजन संग्रह १३७:७

6 मोपतीके परमप्रभु, परमप्रभु यावेमी, गो आं ब्रोंइशा बाक्शो खोदेंशो पा, गो इ कली हुश खाक्श पोक्ब आन गुडमी जिम्मा गेनन। मारदे हना गे हुश खाक्श पोक्चा दाक्तावी। हुश खाक्श पोक्तीकेम इ कली खेदा पाइब। 7 गो सेइर पहाड कली श्येतथ नु मुर मबाक्शो पहाड सेल्लुड। मेको रे पा एर ओंथ पाइब नेल्ल आन कली खतम सेल्लुडमी। 8 गो इ पहाड नेल्ल साइशो मुरपुकीम प्रिनुड। तरवारम साइशोपुकी इ डांडा मेर, इ बेंसी मेर नु इ खोल्सा मेर गोल्नीम। 9 गो इ कली गेना हना यो कली श्येतथ सेल्लन। इ सहर मुर मबाक्तीक दुम्नीम। मिनु गोन परमप्रभु यावे नड, दे तुइक्नेवे’।

10 गो परमप्रभु यावे मेक बाक्ती हना यो, गे ‘मेको रागी निक्शी नु राज्य निक्शी आं के दुम्ब। मिनु गो मेको आन कली हुकुम पाइनुड’ देंते। 11 मोपतीके परमप्रभु, परमप्रभु यावेमी गो आं ब्रोंइशा बाक्शो खोदेंशो पा गे इ गाइशो नु गेहे पतीक कोइताक्यी। मारदे हना गे इस्राएल कली काइ मदाक्ती। गो इ कली मोदेंशोन पाइनुड। गो इ कली निसाफ पडानु, इन दातेमी आं कली तुइक्पाइक्नुड। 12 मिनु गे गो परमप्रभु यावे नड, दे तुइक्नेवे। मिनु गो इस्राएल डा पहाड आन पर्वम इ शुक्शी पा पशो लोव्र नेल्ल नेंता। गे मार देंते देशा हना ‘इस्राएल डा पहाड नेल्ल मुर मबाक्तीके दुम्शो बाक्नीम। मिनु मेको आं कली गेशो बाक्ब’ देंते। 13 गे आं कली ठेयब लेशशा कोइताक्यी। मिनु गे आं पर्वम शुश मरिम्शो लोव्र पाप्तीवी। गो मेको नेल्ल नेंता। 14 रागी नेल्ल ग्येरसीशा बाक्मानु, गो इ कली चहिं मुर मबाक्तीक रागी सेल्लुड। 15 मारदे हना गे इस्राएल मुर मबाक्तीके दुम्मेनु, आं के दुम्त, दे ग्येरसीशो बाक्ते। मोपतीके, गो यो इ कली मोदेंशोन पाइनुड। गे सेइर पहाड नु एदोम नेल्ल मुर मबाक्तीके दुम्नीनी। मिनु गोन परमप्रभु यावे नड, दे तुइक्नीनी” देंत।

36

इस्राएली आन रागी लेत्नीम

1 परमप्रभु यावेमी “ए मुर, इस्राएल डा पहाड आन कली आं लोव्र पावो। मेको आन कली ए इस्राएल डा पहाड, परमप्रभु यावे आ लोव्र नेनीन। इजीकीएल ६:२ 2 मिनु परमप्रभु, परमप्रभु यावेमी इन जोरी सत्रुपुकीमी ‘मुल मेको माइत पहाड नेल्ल इं के दुम्तेक्म’ देंतेक्म। इजीकीएल २५:३ 3 मोपतीके आं लोव्र पावो, परमप्रभु, परमप्रभु यावेमी ‘मारदे हना मेकोपुकीम इन कली नेल्ल मुर मबाक्तीके सेल्शा, एर ओंथ रे श्येत गेम्तेक्म। मिनु गे रागी रागी डा लीशो मुर आन रागी दुम्तीनी। मिनु गे मुर आन दातेम शुक्शी पाइक्तीक दुम्शो बाक्तीनी। 4 मोपतीके गे इस्राएल डा पहाडपुकी, परमप्रभु, परमप्रभु यावे आ लोव्र नेनीन। परमप्रभु यावेमी डांडा, पहाड, खोल्सा, बेंसी, ब्रेशो सहर नु मुर मबाक्शो सहर गे इन कली इन एर ओंथ बाक्शो मुरपुकीमी रोइक्ताक्म। मिनु रिशशा इन कली आइक्च सेल्लेक्म। 5 मोपतीके परमप्रभु, परमप्रभु यावे आं लोव्र नेनीन। गो थाम्पा रुश पा, अर्को रागी नु एदोम रागी नेल्ल आन कली लोव्र पाइनुड। मारदे हना मेकोपुकीम आन थुं नेल्लेम ग्येरसीशा आं रागी आन के सेल्लेक्म। मारदे हना रिम्शो योव्रतीक जोतीक बाक्शा, मेको आंम कली रोंइसाक्म’ देंत। इजीकीएल ३५:१५ 6 मोपतीके इस्राएल रागी आ पर्वम आं लोव्र पावो। मिनु डांडा, पहाड, खोल्सा नु बेंसी आन कली परमप्रभु, परमप्रभु यावेमी ‘गो रुश पा शुश चुरशा लोव्र पाइनुड। गेपुकीम रागी रागी डा मुर आन शुक्शी पशो फाल्चा माल्तीनी’ देंत। 7 मोपतीके परमप्रभु, परमप्रभु यावेमी ‘गो गे इन एर ओंथ बाक्ब रागी रागी डा मुरपुकीम यो शुक्शी पाइक्चा पुंइसीनीम’ दे कसम जाइनुड।

8 तन्न गे इस्राएल डा डांडापुकी, गेपुकीम चहिं इन राशी डोन सम्म हाम्शा, आं मुर इस्राएली आन कली फल सिप्पाइक्नीनी। मारदे हना मेकोपुकी रीब पा आन खिं लेत्नीम। 9 कोव्रडीन मुल गो इन कली कोव्रनुड। गो इन गे लेशशा, इन कली दोपाइशशा, वांचेर शोक्पाइक्नुड। 10 गो इ मुर आन कली सोपाइशशा बोपाइशशा शुश सेल्लुड। इस्राएल आ खिं डा मुर नेल्ल आन कली मोदेंशो पाइनुड। मिनु सहरम लेंशा मुर बाक्नीम। मिनु ब्रेशो खिं नेल्ल लेंशा सेल्सीब। 11 गो इन मुर नु इन बी ब्यफ, क्यारश भेडा शुश सेल्लुडमी। मिनु मेको शुश दुम्शा, शुश गिक्नीम। गो डोंइती डा खोदेंशो पा इन बाक्तीकेम मुर बाक्पाइक्नुडमी। मिनु गो इन कली डोंइती डा क्येडा रिम्शो पाइनुड। मिनु गोन परमप्रभु यावे नड, दे तुइक्नीनी। लेवी २६:९ 12 गो आं मुर इस्राएली आन कली इ तार गाक्पाइक्नुड। गे मेको आन के दुम्नीनी। मिनु गे मेको आन शोंप दुम्नीनी। गेपुकीम गेनायो मेको आन तमी तौ रोइशशा मलाइक्नीनी” देंत।

13 मिनु परमप्रभु, परमप्रभु यावेमी “मुरपुकीम इन पर्वम ‘गे मुर ब्वाइनीनी। मिनु आंम इन रागी डा आल आन कली साइक्नीनी’ देंशो बाक्नीम” देंत। 14 मोपतीके परमप्रभु, परमप्रभु यावेमी “गेपुकीम मुल रे लेंशा गेनायो मुर मब्वाइनीनी। मिनु आंम रागी डा तमी तौ मसाइक्नीनी। 15 गो रागी रागी डा मुरपुकीम इन कली शुक्शी पचा मगेनन्नी। मिनु मुरपुकीम

इन कली दिप्शो फाल्चा ममालनीनी। मिनु इन रागी डा मुर आन कली दाइल मपपाइक्नीनी” दे परमप्रभु, परमप्रभु यावेमी देंत।

मुरुम परमप्रभु आ सोक्त ताइनीम

16 मिनु लेंशा परमप्रभु यावेमी आं कली लोव्र पाप्तु। 17 मार लोव्र पाप्तु देंशा हना “ए मुर, इस्राएली आंम आन रागीमी बाक्शो बाक्मानु, मेकोपुकीम मेको रागी कली आन पतीक नु आन गेयम ग्रांग्रा दिशो सेल्लेक्म। मेको आन मरिम्शो पशो मीश मुर आ रां ब्रोल्शो ग्रांग्रा खोदेंशो बाक्त। मेकोपुकीम रागीम हुश शाइक्पाइक्तीके नु आन मूर्तिम मेको रागी ग्रांग्रा दिशो सेल्लेक्म। मेको आन पतीके आं डोंइती रां ब्रोल्शो मीश मुर खोदेंशो ग्रांग्रा बाक्त। लेवी १८:२४-२५ 18 मारदे हना मेकोपुकी हुश ख्राक्श पोक्तीके नु मूर्ति रे पा मेको रागी ग्रांग्रा दिशो सेल्लेक्तीके गो आं चुरशो मेको आन तारी मोइक्ता। 19 गो मेको आन कली रागी रागी डा मुर आन दातेम ब्रपाइक्तामी। मिनु मेकोपुकी राज्य राज्यम एर ओंथ दुम्शा ब्राम्तेक्म। गो मेको आन पतीक नु मेको आन गेय खोदेंशो पा निसाफ पाता। 20 मिनु मेकोपुकी रागी रागी डा मुर आन दातेम जाक्शा, आं नें मरिम्शो सेल्लेक्म। मारदे हना मेको आन पर्वम ‘एकोपुकी दा परमप्रभु यावे आ मुर नम। मो हना यो आन रागी प्रोंइचा माल्लेक्म’ देंतेक्म। यसैया ५२:५ 21 तन्न गो आं का ला बाक्शो नें आ पर्वम मिम्ताक्ड। मेको आं नें रागी रागी डा मुर आन दातेम मरिम्शो सेल्लो बाक्तेक्म” देंत। इजीकीएल २०:९

22 परमप्रभु, परमप्रभु यावेमी “मोपतीके इस्राएल आ खिं डा मुर आन कली ‘ए इस्राएल आ खिं डा मुर, गो इन पर्वम एको गेय मपाइनुड। तन्न गो आं नें आ पर्वम गेय पाइनुड। गो इन लतीक रागी रागी डा मुर आन दातेम आं नें मरिम्शो सेल्लेक्तीनी। यसैया ४८:११; येरमीया १४:७ 23 गो आं ठेयब नें लेंशा रिम्शो सेल्लुड। मेको रागी डा मुर आन दातेम मरिम्शो सेल्लो बाक्त। मिनु रागी रागी डा मुरपुकीम गोन परमप्रभु, परमप्रभु यावे नड, दे तुइक्नीम। मत्ती ६:९; इजीकीएल ३७:२८ 24 गो इन कली रागी रागी डा मुर आन दाते रे गुंइनुड। मिनु राज्य नेल्ल रे इन कली खुप्शा, इन आंम रागीम चाक्नुड। 25 गो इन तार रिम्शो ब्वाक्कु बुइक्नुड। मिनु गे इन ग्रांग्रा दिशो गेय नु इन मूर्ति पूजा पतीक ताइश्शा रिम्शो दुम्नीनी। इन ग्रांग्रा दिशो दुम्शो नेल्ल रे ग्रांग्रा मदिशो सेल्लन्नी। जकरिया १३:१; हिब्रू १०:२२ 26 गो इन कली नक थुं का गेनुड। मिनु गो इन थुंम नक सोक्त का कुर पाइनुड। गो इन आगा रे फुल्लु के थुं गुंइशा, मेको आ पा डा श्ये के थुं कुर पाइनुड। इजीकीएल ११:१९-२०; येरमीया ३१:३३ 27 गो आं सोक्ती इन आगाम वोइक्नुड। मिनु आं फुल्लुम मुशा ब्रेक्शो लोव्र नु आं निसाफ पतीक लोव्र होस पा पाइब सेल्लुड। इजीकीएल ३९:२९; यसैया ४४:३; इजीकीएल ३७:२४ 28 मेना गेपुकी गो इन किकी पिपी आन कली गेशो रागीम बाक्नीनी। मिनु गे आं मुर दुम्नीनी। मिनु गो इन परमप्रभु दुम्नुड। इजीकीएल ११:२० 29 गो गे इन कली ग्रांग्रा दितीक रे प्रोंइन्नी। गो शुश अन्न ग्रेल्पाइक्नुड। मिनु गो गे इन कली अन्काल मपपाइक्नुड। 30 गो रवा आन फल नु रू डा मारेइ मारेइ आन कली शुश सेल्लुड। मोपा गेपुकी गेनायो रागी रागी डा मुर आन दातेम अन्काल पा मुने मदोक्नीनी। इजीकीएल ३४:२९; योएल २:१९ 31 मेना गे इन मरिम्शो पशो गेय नु मरिम्शो पशो आ पर्वम मिम्नीनी। मिनु गे इन मरिम्शो पशो नु मूर्ति पूजा पतीके आन आन पर्वम आंमान ग्रांग्रा दीसीनीनी। इजीकीएल २०:४३ 32 गो इन पर्वम एको गेय पशो मनड। मेको तुइक्चा माल्लीनी। ए इस्राएल आ खिं डा मुर इन पशो गेयम पतीके मुने दोक्शा सुर्ता पन’ ” देंत।

33 परमप्रभु, परमप्रभु यावेमी “मेको नाक्ती गो इन कली इन मरिम्शो पशो नेल्ल रे लेंशा रिम्शो सेल्लुड। गो इन सहर आन कली लेंशा मुर बाक्तीक सेल्लुड। मिनु ब्रेश्शो नेल्ल लेंशा सेल्पाइक्नुड। 34 लां गाक्ब मुरपुकीमी इन मशोक्शो रू तचा क्येडा डोंइती मेकेर मार मार शोक्चा कली लेंशा दोइनीम। 35 मिनु मेकोपुकीम ‘एको श्येत्थ रू एदेन आ फल फुल रू खोदेंशो दुम्शो बाक्ब। एको श्येत्थ दुम्शो मुर मबाक्शो नु ब्रेश्शो सहर मुल मुरपुकीम ब्रीशा गारो हिरशो बाक्नीम’ देंनीम। 36 मेना इन एर ओंथ लीशो रागी डा मुरपुकीम परमप्रभु यावेमी मेको ब्रेश्शो सहर कली लेंशा सेल्लु। मिनु श्येत्थ दुम्शो रागीम लेंशा मार मार वापाइक्तु, दे तुइक्नीम। गो परमप्रभु यावेमी मेको पाता। गो मेको यो पाइनुड” देंत। इजीकीएल १७:२४; येरमीया १:१०; येरमीया १८:७-८

37 मिनु परमप्रभु, परमप्रभु यावेमी “गो इस्राएल आ खिं डा मुर आन पुंइशो नेंशा, मेको आन मुर आन कली क्यारश भेडा खोदेंशो पा शुश सेल्लुडमी। मीका २:१२ 38 गो मेको आन कली यरूसलेम डा चाडम चढ़ेतीक भेडा खोदेंशो पा शुश सेल्लुडमी। मोपा सहर लेंशा शुश मुरपुकीम ब्रीनीम। मिनु मेकोपुकीम गोन परमप्रभु यावे नड, दे तुइक्नीम” देंत।

37

सोव्रशो रुश बाक्शो बेंसी

1 परमप्रभु यावेमी आं कली थिती। मिनु परमप्रभु यावे आ सोक्तीम आं कली बेंसी आ दातेमी चाक्ती। मेको बेंसी रुशेइ रुशेम ब्रीशो बाक्त। इजीकीएल १:३ 2 मेकोम आं कली मेको रुश बाक्तीकेम एर ओंथ पपाइक्ती। मेको बेंसीम शुश रुश बाक्तेक्म। मेको थाम्पा सोव्रशो बाक्तेक्म। 3 मिनु मेकोम आं कली “ए मुर, मार, एको रुश लेंशा ब्रोंइने चाप्नीमी डा?” दंत। मिनु गो “परमप्रभु, परमप्रभु यावे, गे ला मेको तुइक्नीनी” देंती। 4 मिनु मेकोम आं कली “एको रुश आन कली आं लोव्र पा ‘ए सोव्रशो रुश परमप्रभु यावे आ लोव्र नेनीन’ देनो” दंत। 5 मिनु परमप्रभु, परमप्रभु यावेमी “मेको रुश आन कली ‘गो इन आगाम सोक्त ओव्रपाइक्नुड। मिनु गे ब्रोंइनीनी। भजन संग्रह १०४:३० 6 गो इन कली नारीम बोइक्नन्नी। इन श्ये वापाइक्नुड, कुशुलम गिल्लन्नी। मिनु गो इन आगाम सोक्त कुर पाइक्नुड। मिनु गे ब्रोंइनीनी। मिनु गेपुकीम गोन परमप्रभु यावे नड, दे तुइक्नीनी” दंत। यसैया २६:१९

7 मोपतीके गो मेकोमी देशो खोदेशो पा परमप्रभु यावे आ लोव्र पाता। मिनु गो मेको परमप्रभु यावे आ लोव्र पन पन बाक्डानु, मेकेर करक कुरूक पशो नेता। मिनु मेको रुशपुकी का नु अर्को बोंइसीचा गोम्तेक्म। 8 मिनु गो आं कोव्रना कोव्रना मेको आन नारी बोंइसीशा, श्ये गूत। मिनु मेको कुशुलम गिल्लाक्म। तन्न मेकोपुकी नु सोक्त मबा। 9 मिनु मेकोमी आं कली “ए मुर, सोक्त कली आं लोव्र पावो। गे मुर, आं लोव्र पावो। मेको आन कली परमप्रभु, परमप्रभु यावेमी ‘ए सोक्त, पूर्व, पच्छिम, उत्तर दक्खिन रे जाक्कीन। मिनु एको बेक्शो आन कली मुइक्तीन। मिनु ब्रोंइमल’ देनो” दंत। 10 मिनु गो परमप्रभु यावे आ अरेशो पाता। मिनु मेको ब्रोंइतीक सोक्त मेको आन आगाम ओव्रत। मिनु मेकोपुकी ब्रोंइशा राप्तेक्म। मिनु थम ठेयब हुल का दुम्त।

11 मिनु मेकोम आं कली “ए मुर, एको रुश नेल्ल इस्त्राएल आ खिं डा मुर बाक्नीम। मेकोपुकीम ‘आंइ रुश नेल्ल सोव्रने थुम्तेक्म। मिनु आंइ आस नेल्ल जाम्त। गो थमा पा ताइक्चा पुंइसाक्क’ देंतेक्म। इजीकीएल ३७:१ 12 मोपतीके मेको नेल्ल आन कली आं लोव्र पा ‘गो, परमप्रभु, परमप्रभु यावेमी तुरस रोक्शा, इन कली गुंइनुड। आं मुरपुकी, गो इन कली लेंशा इस्त्राएल रागीम चाक्नन्नी। 13 ए आं मुरपुकी, गो इन तुरस रोक्शा गुंइदुनु, गेपुकीम गोन परमप्रभु यावे नड, दे तुइक्नीनी। 14 गो आं सोक्त इन कली कुर पाइक्नन्नी। मिनु गे ब्रोंइनीनी। मिनु गो इन कली आंम इन रूम बाक्पाइक्नुड। मिनु गेपुकीम गो परमप्रभु यावेमीन एको लोव्र पाता। मिनु मेको पाइनुड, दे तुइक्नीनी’ देनो” दे परमप्रभु, यावेमी दंत।

यहूदा नु इस्त्राएल रागी का दुम्शो

15 परमप्रभु यावेमी आं कली लोव्र पाप्तु। 16 मार लोव्र पाप्तु देशा हना “ए मुर, कोक्के का चाक्शा ‘यहूदा नु इस्त्राएल डा मुर’ दे ब्रेक्तो। मिनु नोले अर्को कोक्के का चाक्शा ‘योसेफ, एफ्राइम नु मेको नु बाक्ब इस्त्राएल आ खिं नेल्ल’ दे ब्रेक्तो। 17 मिनु मेको निम्फा फ्रिष्शा कान सेल्सी। मोपा मेको इ गुइम कोक्के कान दुम्ब। 18 मिनु इ मुरपुकीम इ कली ‘मेको आ अर्थ मार बाक्बा गे आंइ कली मशेंनीनी?’ दे हिल्लो पाइनीम। 19 गे मेको आन कली परमप्रभु, परमप्रभु यावेमी गो एफ्राइम आ गुइम बाक्शो योसेफ आ कोक्के, इस्त्राएली आन थर डा यहूदा आ कोक्के नु फ्रिप्नुड। मोपा गो मेको आस कली कोक्के कान सेल्लुड। मिनु मेको आं गुइम कान दुम्नीस। 20 मिनु मेको इन ब्रेक्शो कोक्के इन डोंइती इन गुइम ग्याइशशा बाक्नीस” दंत। 21 मेना परमप्रभु, परमप्रभु यावेमी मेको आन कली “इस्त्राएल डा मुर तेको तेको रागीम लमा, गो मेको आन कली रागी नेल्ल रे खुप्नुडमी। मिनु मेको आन कली आंम आन रागीम चाक्नुडमी। यसैया ११:१२-१३ 22 गो मेको आन कली इस्त्राएल रागी डा पहाडम रागी कान सेल्लुडमी। मिनु मेको नेल्ल आन के पिप कान दुम्ब। मिनु गेनायो रागी निक्शी मदुम्नीस। मिनु राज्य निक्शी मदुम्नीस। इजीकीएल ३४:२३; येरमीया ३:१८; होसे २:२ 23 मिनु मेकोपुकीम लेंशा गेनायो आन मूर्ति नु अरु ग्रांग्रा दिशो थोव्रक नु हेंथे मपाइनीम। मारदे हना गो मेको आन कली नेल्ल आन हेंथे पतीक रे प्रोंइनुडमी। मिनु मेको आन कली आं मुर सेल्लुडमी। मिनु मेकोपुकी आं मुर दुम्नीम। मिनु गो मेको आन परमप्रभु दुम्नुड। इजीकीएल ११:२०

24 आं गेय पाइब दाऊद मेको आन पिप दुम्ब। मिनु मेको आन गोठला कान दुम्ब। मिनु मेकोपुकीम आं निसाफ पतीक लोव्र टीनीम। मिनु मेकोपुकीम आं फुल्लुम मुशा ब्रेक्शो लोव्र होस पा पाइनीम। इजीकीएल ३४:२३; इजीकीएल ३६:२७ 25 मिनु मेकोपुकी आं गेय पाइब याक्ब कली गेशो रागीम बाक्नीम। मेकेर आन किकी पिपी बाक्शो बाक्तेक्म। मिनु मेकेर मेको आन आल, चच युइ गेना हना यो बाक्नीम। मिनु आं गेय पाइब दाऊद गेना हना यो मेको आन कली

सासन पाइब दुम्ब। लूका १:३२-३३ 26 गो मेकोपुकी नु थुं नाइशशा बाक्तीक कबल का पाइनुड। मेको गेना हना यो लीब कबल बाक्ब। गो मेको आन कली आसीक गेशा शुश दुम्पाइक्नुडमी। मिनु गो मेको आन दातेम गेना हना यो कली आं बाक्तीक सेल्लुड। प्रस्थान २५:८; इजीकीएल ३४:२५; यसैया ५४:३० 27 आं बाक्तीक मेकोपुकी नुन दुम्ब। मिनु गो मेको आन परमप्रभु दुम्नुड। मिनु मेकोपुकी आं मुर दुम्नीम। इजीकीएल ११:२० 28 मेना रागी रागी डा मुरपुकीम गो, परमप्रभु यावेमीन इस्राएली आन कली आं मुर सेल्ला। मिनु आं बाक्तीके मेको आन दातेम गेना हना यो बाक्ब, दे यो तुइक्नीम” दे परमप्रभु यावेमी देंत। इजीकीएल ३६:२३

38

गोग आ पबर्म लोव्र पशो

1 परमप्रभु यावेमी आं कली लोव्र पाप्तु। 2 मार लोव्र पाप्तु देशा हना “ए मुर, मागोग रागी डा ठेयब मुर, गोग आ बाक्तीक लावो। मेशेक नु तूबल डा सासन पाइब कली आं लोव्र पावो। इजीकीएल ३९:६; इजीकीएल २७:१३; इजीकीएल ३२:२६; उत्पत्ती १०:२ 3 मिनु परमप्रभु, परमप्रभु यावेमी मेको कली ‘ए मेशेक नु तूबल डा सासन पाइब गोग, गो इ कली लोव्र का पाइनुड। 4 गो इ कली हिरनुड। गो इ शापेम बोलसी ब्वेक्नुड। गो इ कली, इ लडाइ पाइब नेल्ल, इ शारा नु इ शारा डोइक्ब, या कुरब नेल्ल आन गुंइनुड। ठेयब नु आइक्च तेक्तीक कुरब, आन तरवार शेशा बाक्नीम। 5 पारसी, एथीयोपीया नु पूत डा मुरपुकी, मेकोपुकी नु बाक्नीम। मिनु मेको नेल्लेम आन तेक्तीक शेशा, लडाइ डा ताकी गुक्शो बाक्नीम। 6 गोमेर नु आ लडाइ पाइब नेल्ल, उत्तर डा बेथ-तोगारमाह नु आ लडाइ पाइब नेल्ले शुश मुरपुकी गे नु बाक्शो बाक्नीम। इजीकीएल २७:१४

7 गे सासीशा बाक्को। मिनु गे नु गारशा लडाइ पचा कली जाक्शो लडाइ पाइब नेल्ल आन कली सासीशा बाक्पतो। मिनु गे मेको नेल्ल आन ठेयब मुर दुम्शा, सासीशा बाक्को। 8 शुश नाक्त नोले लडाइ पचा कली इन कली ब्रेत्नीम। गेपुकीम लडाइम श्येत्थ दुम्शा लेंशा सेल्लो रागी कली लडाइ तोइनीनी। मेको मुर शुश रागी रे खुप्शा, इस्राएल डा पहाडम चाक्शो बाक्नीम। मेकेर शुश बर्स रे मुर मबाक्म। मेकोपुकी रागी रागी रे चाक्शो बाक्तेक्म। मिनु मुल मेको नेल्ल मारेइ मदुम्थु रिम्शो पा बाक्शो बाक्नीम। 9 गे फश गिवार खोदेशो पा बारचा माल्नेवे। गे गोस्स खोदेशो पा मेको रागी कली सुम्चा माल्नेवे। गे नु इ लडाइ पाइब नेल्ल नु गे नु बाक्ब नेल्लेम मोदेशो पचा माल्नीनी’ देनो” देंत।

10 परमप्रभु, परमप्रभु यावेमी “मेको नाक्ती इ थुंम मार मार मिम्नेवे। मिनु गे थम मरिम्शो पचा मिम्नेवे। 11 मिनु गेम ‘गो गारो महिरशो सहर कली लडाइ तोइनुड। गो सिक्सी पा रिम्शो पा गारो महिरशो, ठेयब लाप्चो मपाइशो नु आग्लो मपाइशो सहरम बाक्ब मुर आन रागी कली लडाइ तोइनुड। 12 मुल गो मेको रागी डा मार मार रोइशशा लाइक्चा कली लडाइ पाइनुड। मेकोपुकी श्येत्थ दुम्शो रागीम लेंशा खुम्सीशा बाक्शो बाक्तेक्म। मेकोपुकीम शुश बी ब्यफ, क्यारश भेडा थुल्शा शोप चेम्शा रागी आ दातेम बाक्शो बाक्नीम’ देंते। न्यायाधीस ९:३७ 13 शेबा नु देदान, टारशीश डा ग्याप्ब लेयबपुकी नु मेको आन ठिटा लडाइ पाइब नेल्लेम इ कली ‘मार, गे रोइक्थ जाक्शो नवे? मार गे रोइशशो मार मार तचा कली, सुन चांदी लाइक्चा कली, बी ब्यफ, क्यारश भेडा नु शुश मार मार रोइक्चा कली, जाक्नी?’ ” देंशो बाक्नीम।

14 मोपतीके “ए मुर, गोग कली आं लोव्र पावो। मेको कली ‘परमप्रभु, परमप्रभु यावेमी इ कली आं मुर इस्राएली मारेइ मदुम्थु रिम्शो पा बाक्मानु, गे मेक मलाइनेवे? 15 डोन इ बाक्तीक उत्तर रागी रे ठेयब हुल, सक्ति पाइशो लडाइ पाइब नु शुश जात डा मुर शारा डोइशशा, गो नु जाक्नीम। 16 गे आं मुर इस्राएली नु लडाइ पचा कली रागी कली सुम्ब गोस्स खोदेशो पा जाक्नेवे। ए गोग, नोले डा नाक्ती गो इ कली आं रागी नु लडाइ पपाइक्नुड। रागी रागी डा मुरुम आं कली तुइक्तमेक्ल, दे मोदेशो पाइनुड। मेको रागी रागी डा मुर आन डोंइती गो का ला परमप्रभु यावे नड’ दे कोंइनुड” देंत। 17 मिनु परमप्रभु, परमप्रभु यावेमी “साइ आं गेय पाइब, इस्राएल डा आं लोव्र पाइबम इ पबर्म लोव्र मपामे डा? मेना मेकोपुकीम शुश बर्स सम्म ‘गो इ कली इस्राएली नु लडाइ पथ सोइक्नुड’ दे आं लोव्र पाम्तेक्म” देंत। सेफन्याह ३:८

गोग कली सजाइ गेशो

18 परमप्रभु यावेमी “मेको नाक्त मार दुम्ब देशा हना, गोगम इस्राएल कली लडाइ तोइब। मिनु गो थाम्पा चुरनुड। 19 मेको नाक्ती गो आं जोंब बोक्शा, गाइशो चुरशोम इस्राएल रागीम ठेयब खिनु कुइब। 20 मेको नाक्ती समुन्द्र डा डांइ, सरीड डा चिक्ब, रागी डा जन्तु, खपीम प्रेशा गाक्ब जन्तु नेल्ल नु रागी डा मुर नेल्ल आं डोंइती खिंखि

पाइनीम। पहाड नेल्ल ब्रेत्नीम, रोंगु नेल्ल दोक्नीम। मिनु गारो नेल्ल गोल्नीम। 21 गो आं पहाड नेल्लेम गोग आ पर्वम तरवार का क्युक्नुड। मिनु मेको आ मुर नेल्लेम आन तरवार आन लोकब आन पर्वम शोइक्नीम। प्रकाश २०:८-९ 22 गो मुर बेक्तीक रोइम नु हुश खाक्श पोक्तीकेम मेको कली निसाफ पाइनुड। गो मेको आ लडाइ पाइब आन तार, मेको नु बाक्शो जात जात डा मुर आन हुल तार थम हिंचा डा रेउ, मुप्स, मी नु गन्धक यिपाइक्नुड। 23 मोपा गो आं ठेयब दुम्तीक नु गो आं बाक्शो परमप्रभु बाक्नुड, दे कोंइनुडमी। मिनु शुश रागी डा मुर आन डोंइती आं कली तुइक्पाइसीनुड। मेना मेकोपुकीम गोन परमप्रभु यावे नड, दे तुइक्नीम” देंत।

39

गोग नु आ लडाइ पाइबपुकी ब्रुशो

1 मिनु परमप्रभु यावेमी आं कली “ए मुर, गोग आ मुर आन कली आं लोव पावो। मिनु परमप्रभु, परमप्रभु यावेमी इ कली ‘गो इ कली लोव का पचा माल्नुड। गे मेशेक नु तूबल डा सासन पाइब बाक्नेवे। इजीकीएल ३८:२ 2 गो इ कली हिरशा, ग्येत्थ गे सोइक्नन। गो इ कली डोन उत्तर रे इस्राएल डा पहाड गे सोइक्नन। 3 गो इ पेरा गुइम बाक्शो लिब्रा तुप्शा तोक्नुड। मिनु इ ग्युरा गुइम बाक्शो ब्रा तोक्नुड। 4 गे इस्राएल डा पहाडमीन साइक्चा पुंइसीनेवे। इ लडाइ पाइब नेल्ल नु गे नु बाक्शो मुर नेल्ल मेकेर साइक्चा पुंइसीनीम। गो इ कली चिक्ब नु ब्वाकी डा जन्तु आन ब्वतीक सेल्लुड। 5 गे दिंमम गोल्नेवे। मारदे हना गो एको लोव पाता’ देंत। 6 गो मागोग डा मुर नु समुन्द्र आ नेक्था रिम्शो पा बाक्शो आन तार मी सोइक्नुड। मिनु मेकोपुकीम गोन परमप्रभु यावे नड, दे तुइक्नीम।

7 गो आं नें आं मुर इस्राएली आन दातेम तुइक्पाइक्नुडमी। मिनु आं नें कली मरिम्शो सेल्चा मगेनुड। मिनु रागी रागी डा मुरपुकीम गोन परमप्रभु यावे, इस्राएली आन बाक्शो परमप्रभु नड, दे तुइक्नीम। 8 मेको थमा पा दुम्ब। मेको थमा पा जाक्ब। आं देशो नाक्ती मेकोन बाक्ब” दे परमप्रभु, परमप्रभु यावेमी देंत। 9 मिनु परमप्रभु यावेमी “ले इस्राएल डा सहरम बाक्ब मुरपुकीमी या, आइक्च नु ठेयब तेक्तीके, लिब्रा नु ब्रा, कोक्के नु तूतीके नेल्ल खुप्शा चोइनीम। मेकोपुकीमी मेको ७ बर्स सम्म चोइनीम। यसैया ९:४ 10 मेकोपुकीम रू रे शी खुप्चा ममाल्नीम। ब्वाकी डा रवा तिम्चा ममाल्नीम। मारदे हना मेकोपुकीम मेको यामीन आन मी मुइक्नीम। मेकोपुकीम आन मार मार गुंइशा लाइक्ब आन के मार मार गुंइशा चाक्नीम। आन कली रोइक्ब आन कली रोइक्नीम” दे परमप्रभु, परमप्रभु यावेमी देंत। येरमीया ३०:१६

गोग कली थिम्शो

11 मिनु परमप्रभु यावेमी “मेको नाक्ती गो गोग आ मुर आन कली इस्राएल रागीम तुरस का गेनुड। मेको इस्राएल डा समुन्द्र आ पूर्ब गे मुर आन लतीक बेसी डा लांम बाक्ब। मेकेर गोग आ लडाइ पाइब नु मेको आन कली वारच पाइब हुल नेल्ल थिम्चा पुंइसीनीम। मोपतीके मेको बाक्तीक कली हामोन-गोग आ बेसी देंनीम। 12 इस्राएल आ खिं डा मुरपुकीम मेको आन कली ७ महिना सम्म थिम्ना थिम्न बाक्नीम। मिनु मोपा रागी कली ग्रांग्रा मदिशो सेल्नीम। 13 मिनु रागी डा मुर नेल्लेमी मेको आन कली थिम्नीम। गो आं सक्ति कोंइदु नाक्ती मेको आन कली ठेयब मिम्तीक का दुम्ब। 14 मेको रागी ग्रांग्रा मदिशो सेल्चा कली मुर वोइक्नीम। मेकोपुकीम नाक्त कित कित कोवशा माल्शा, थिश्शा थिम्नीम। मिनु आन माल्तीक गेय ७ महिना सम्म पचा माल्नीम। 15 मेकोपुकी रागी आ एर ओंथ नेल्ल लमानु, सुइमी मुर आन रुश का थित्तेक्म हना, मेकेर चिन्ड वोइक्चा माल्बाक्तेक्म। मिनु तुरस दोइबपुकीम मेको कली हामोन-गोग डा बेसीम लाइश्शा, थिम्बाक्तेक्म। 16 मेकेर हामोनाह देशो सहर का यो बाक्ब। मोपा मेकोपुकीम रागी कली ग्रांग्रा मदिशो सेल्नीम” दे परमप्रभु यावेम देंत। हामोनाह आ अर्थ “ठेयब हुल” देशो बाक्ब।

17 मिनु परमप्रभु, परमप्रभु यावेमी “ए मुर, नेल्ल खाल डा चिक्ब नु ब्वाकी डा जन्तु नेल्ल आन कली ‘एर ओंथ नेल्ल रे जाक्कीन। गो इस्राएल डा पहाडम इन कली ठेयब चढ़ेतीक भोज का सेल्लुड। गेपुकीम मेकेर श्ये ब्वाइनीनी। मिनु हुश तूनीनी। प्रकाश १९:१७-१८ 18 गेपुकीम शुश सक्ति पाइश्शो मुर आन श्ये ब्वाइनीनी। मिनु रागी डा पिप आन सासन पाइब, बाशान डा सांड, पाठा, बोका नु ब्यफ आन हुश तूनीनी। 19 गो इन कली चढ़ेतीक भोज का गेडानु, गे रूथ्री बोंसो ब्वने चाप्नीनी। गे मदुक्नी सम्म हुश तूने चाप्नीनी। 20 गेपुकी आं भोजम शारा, बग्गी डोइक्ब, सक्ति पाइश्शो मुर नु नेल्ल खाल डा लडाइ पाइब ब्वशा रूनीनी’ ” दे परमप्रभु, परमप्रभु यावेमी देंत।

इस्राएल लेंशा रागी का दुम्शो

21 मिनु परमप्रभु, परमप्रभु यावेमी “गो रागी रागी डा मुर आन डोंइती आं सक्ति कोंइनुड। मिनु रागी रागी नेल्लेम आं निसाफ पशो ताइनीम। आं सजाइ गेशो ताइनीम। 22 मिनु मेको नाक्त रे इस्राएल आ खिं डा मुरपुकीम गोन परमप्रभु यावे, मेको आन परमप्रभु नड, दे तुइक्नीम। 23 मिनु रागी रागी डा मुरपुकीम इस्राएल आ खिं डा मुर आन मरिम्शो पतीके ग्याइश्शा लाइक्चा पुंडसीशो बाक्तेक्म, दे तुइक्नीम। मारदे हना मेकोपुकीम आं कली मरिम्शो पाप्तेक्म। मोपतीके गो आं कुल मेको आन रे खुइक्ताक्ड। मिनु मेको आन कली आन जोरी सत्रु आन गुइम गेतामी। मिनु मेको नेल्ल तरवारम साइक्चा पुंडसाक्म। यसैया ५४:८ 24 मेको आन ग्रांग्रा दिशो नु आन हेंथे पशो आ पबर्म गो मेको आन कली सजाइ गेतामी। मिनु गो आं कुल मेको आन रे खुइक्ताक्ड” देंत।

25 मोपतीके परमप्रभु, परमप्रभु यावेमी “गो याकूब आ खिं डा मुर आन कली डोंइती डा खोदेंशो पा रिम्शो सेल्लनुड। मिनु इस्राएल आ खिं डा मुर नेल्ल आन कली शिशी पाइक्नुडमी। गो आं का ला बाक्शो नें आ पबर्म रुश पाइनुड। 26 मेकोपुकी रिम्शो पा महिंथु आन रागीम बाक्ची ना, आन मुने नु आं कली मरिम्शो पशो नेल्ल प्रेंनीम। 27 मिनु गो मेको आन कली रागी रागी डा मुर आन दाते रे चाक्नुडमी। मिनु मेको आन कली आन जोरी सत्रु आन रागी रे खुप्नुडमी। मिनु गो शुश रागी डा मुर आन डोंइती मेको आन रे पा गो का ला परमप्रभु नड, दे कोंइनुडमी। 28 मेना मेकोपुकीम गोन परमप्रभु यावे, आन परमप्रभु नड, दे तुइक्नीम। मारदे हना गो मेको आन कली रागी रागी डा मुर आन दातेम ग्याइश्शा लाइक्पाइक्तामी। मिनु का यो मजाम्चा डा पा खुप्शा आन रागीम चाक्नुडमी। 29 मुल रे गो आं कुल मेको आन डोंइती रे गेनायो मखुइक्नुड। मारदे हना गो आं सोक्त इस्राएल आ खिं डा मुर आन तार मोइक्नुड” दे परमप्रभु, परमप्रभु यावेमी देंत। इजीकीएल ३६:२६-२७; योएल ३:१

40

परमप्रभु आ खिं कली कोंइशो

1 गोपुकी ग्याइश्शा लाइक्चा पुंडसीशो २५ बर्स दुम्मेनु, डोंइती डा महिना डा १० नाक्त बाक्त। मेना यरूसलेम सहर फुचा पुंडसीशो १४ बर्स दुम्शो बाक्त। मेको नाक्तीन परमप्रभु यावेमी आं कली थिती। मिनु मेकोम आं कली मेकेर लाइक्ती। इजीकीएल १:३ 2 परमप्रभुमी आ कोंइतीकेम आं कली इस्राएल रागी लाइक्ती। मिनु आं कली थम ठेयब लाइश्शो डांडा काम वोइक्ती। मेको आ दक्खिन गे सहर का खोदेंशो तांडसीशो बाक्त। जकरिया १४:१० 3 मिनु मेकोम आं कली मेकेर लदानु, गो मेकेर मुर का ताता। मेकेर कांसा खोदेंशो टल्केशो मुर का बाक्त। मेको आ गुइम सुती के डोरी नु पुक्तीक कोक्के का बाक्त। मेको ठेयब लाप्चो आ नेक्था राप्शो बाक्त। इजीकीएल ४७:३; जकरिया २:५ प्रकाश २१:१५ 4 मिनु मेकोम आं कली “ए मुर, कोव्रडो। मिनु नोफा दाइश्शा नेनो। गो इ कली मार मार कोंइक्नुडा, मेको रिम्शो पा कोव्रशा, इ थुंम वोतो। मारदे हना गे मो पचा कली एक चाक्शो बाक्ते। मिनु गे मार ताइक्नेवे, मेको नेल्ल इस्राएल आ खिं डा मुर आन कली शेंदीमी” देंत।

पूर्ब डा ठेयब लाप्चो

5 मिनु गो मेकेर परमप्रभु यावे आ खिं आ एर ओंथ नेल्ल हिरशो गारो का ताता। मिनु मेको मुर आ गुइम बाक्शो पुक्तीक कोक्के ६ ठेयब कुबीत लाइश्शो बाक्त। मिनु मेकोम गारो पुक्गानु, ३ कुबीत ग्येत्थ नु ६ कुबीत थांइशो बाक्त। ठेयब कुबीत ०.५ मिटर बाक्ब। 1 राजा ६:- 6 मिनु मेको नोले लेंशा पूर्ब गे डा ठेयब लाप्चोम लत। मिनु मेको आ थेंका रे पा डोइश्शा लाप्चो ओव्रतीक पिंडी पुक्तु। मिनु मेको पुक्तीक कोक्के का लाइश्शो बाक्त। पुक्तीक कोक्के ३.२५ मिटर लाइश्शो बाक्ब। 7 मेकेर बाक्तीके कोठा बाक्तेक्म। मेको नेल्ल पुक्तीक कोक्के का ब्रेम्शो नु पुक्तीक कोक्के का लाइश्शो बाक्तेक्म। मेको कोठा आन दातेम गेय पतीक कोठा बाक्तेक्म। मिनु आन दाते डा बाक्तीके ५ कुबीत ब्रेम्शो बाक्त। मिनु परमप्रभु यावे आ खिं डा पिंडी डा लाप्चो लतीक लां पुक्तीक कोक्के का ब्रेम्शो बाक्त। कुबीत का आधा मिटर बाक्ब। 8 मिनु मेकोमी ठेयब लाप्चो आ आगा डा पिंडी पुक्गानु, मेको पुक्तीक कोक्के का लाइश्शो बाक्त। 9 मिनु मेको लतीक लां डा पिंडी पुक्गानु, ८ कुबीत लाइश्शो बाक्त। मेको आ थाम कुबीत निक्शी थांइशो बाक्तेक्म। मेको लाप्चो आ पिंडी चहिं परमप्रभु यावे आ खिं गे बाक्त। 10 मिनु पूर्ब डा लाप्चो आ एर गे नु ओंथ गे सां सां गेय पतीक कोठा बाक्तेक्म। मेको सांफान उइक्थ उइक्थ बाक्तेक्म। मेको एर नु ओंथ बाक्शो थाम उइक्थ उइक्थ बाक्तेक्म। 11 मिनु नोले मेकोमी लाप्चो ओव्रतीक आ ब्रेम्शो पुक्तु। मेको १० कुबीत ब्रेम्शो बाक्त। मेको लाप्चो नेल्ल १३ कुबीत लाइश्शो बाक्त। 12 गेय पतीक कोठा आन डोंइती आ दी गे कुबीत

का डा आइकच गारो बाक्तेकम। कोठा नेल्ल ६ कुबीत लाइशो नु ६ कुबीत ब्रेमशो बाक्तेकम। 13 मिनु नोले मेकोमी गेय पतीक कोठा का डा लापचो रे अर्को गेय पतीक कोठा सम्म पुक्गानु, गारो का रे अर्को गारो सम्म २५ कुबीत बाक्त। 14 मिनु सापशो लतीक लां २० कुबीत ब्रेमशो बाक्त। थाम आ नेक्था रे लाडगा लतीक लां यो बाक्त। 15 मिनु ओव्रतीक लापचो डा खिं नेल्ल लापचो रे लाडगा लतीक लां डा पिंडी सम्म ५० कुबीत लाइशो बाक्त। 16 गेय पतीक कोठा थाम आ नेक्था डा झेल डा गारो आ आइकथ मेरे थरपु हिरशो बाक्तेकम। एर ओंथ हिरशो सापशो लतीक लां नेल्ल झेल बाक्तेकम। मिनु पिंडीम यो मोदेशो झेल बाक्तेकम। मेको थामपुकीम खजूर रवा आ बुटा आपशो बाक्तेकम।

लाडगा गे डा अर्को लाडगा

17 मिनु मेकोमी आं कली परमप्रभु यावे आ खिं डा लाडगा गे डा अर्को लाडगाम चाक्ती। मेकेर कोठा बाक्तेकम। लाडगा आ एर ओंथ फुल्लु ब्रशो बाक्तेकम। मिनु मेको फुल्लु ब्रशो खपीम ३० ओटा कोठा बाक्तेकम। 18 मेको फुल्लु ब्रशो लां ओव्रतीक लापचो आ नेक्था बाक्त। मिनु मेको लापचो सम्म बाक्त। मेको उइ डा फुल्लु ब्रशो लां बाक्त। 19 मिनु मेकोम आइदी डा लापचो आ आगा गे लाडगा डा ब्रेमशो पुक्गानु, मेको सहे का कुबीत बाक्त।

उत्तर गे डा ठेयब लापचो

20 मिनु मेकोम उत्तर गे डा परमप्रभु यावे आ खिं डा लाडगा गे डा लाडगा आ लाइशो नु आ ब्रेमशो पुक्तु। 21 मिनु मेकेर अर्को ठेयब लापचो खोदेशो एर ओंथ कोठा सां सां बाक्तेकम। मेको आ थाम नु आ पिंडी डोंइती डा लापचो खोदेशो बाक्तेकम। मेको आ लाइशो ५० कुबीत नु आ ब्रेमशो २५ कुबीत बाक्त। कुबीत का ०.५ मिटर बाक्ब। 22 मेको आ झेल, आ पिंडी नु मेको खजूर रवा आ बुटा आपशो थाम नु पूर्ब गे कोव्रशो लापचो नेल्ल अर्को खोदेशो बाक्तेकम। मेकेर लचा कली ७ ओटा थेंका बाक्तेकम। मिनु मेको पिंडी आगाम बाक्त। 23 पूर्ब डा ठेयब लापचो आ डोंइती गे परमप्रभु यावे आ खिं डा लाडगाम लापचो का बाक्त। उत्तर डा ठेयब लापचो आ डोंइती गे यो परमप्रभु यावे आ खिं डा लाडगाम लापचो का बाक्त। मेको लापचो रे अर्को लापचो सम्म पुक्गानु, सहे का कुबीत लाइशो बाक्त। कुबीत का ०.५ मिटर बाक्ब।

दक्खिन गे डा ठेयब लापचो

24 मिनु मेकोम आं कली दक्खिन गे लाइक्ती। मिनु मेकेर ठेयब लापचो का बाक्त। मिनु मेकोम आ थामपुकी नु आ पिंडी पुक्तु। मिनु मेकोपुकी यो अर्को ठेयब लापचो खोदेशो पा उइकथ उइकथ बाक्तेकम। 25 मिनु मेकेर एर ओंथ नेल्ल नु पिंडीम झेल बाक्तेकम। मेको अर्को ठेयब लापचो खोदेशो बाक्तेकम। मेकोपुकी ५० कुबीत लाइशो नु २५ कुबीत ब्रेमशो बाक्तेकम। 26 मेकेर लतीक ७ ओटा थेंका बाक्तेकम। मेको आ पिंडी आगा गे बाक्त। निम्फा पटटी थाम बाक्तेकम। मिनु थाम खजूर रवा आ बुटा आपशो बाक्तेकम। 27 मेको आ आगा डा लाडगाम यो दक्खिन गे लापचो का बाक्त। मेकोम मेको लापचो रे ठेयब लापचो सम्म पुक्गानु, मेको सहे का कुबीत बाक्त।

आगा डा लाडगा डा लापचो

28 मिनु मेकोम आं कली दक्खिन गे डा ठेयब लापचो रे पा आगा डा लाडगाम चाक्ती। मिनु मेकोम दक्खिन डा लापचो पुक्तु। मिनु मेको ठेयब लापचो यो अर्को ठेयब लापचो खोदेशोन बाक्त। 29 मेको आ कोठा, आ थाम नु आ पिंडी अर्को खोदेशो बाक्तेकम। मेको आ पिंडी आ एर ओंथ नेल्ल झेल बाक्तेकम। मेको ५० कुबीत लाइशो नु २५ कुबीत ब्रेमशो बाक्त। 30 मेकेर एर ओंथ नेल्ल पिंडी बाक्तेकम। मेको २५ कुबीत लाइशो नु २५ कुबीत ब्रेमशो बाक्तेकम। कुबीत का ०.५ मिटर बाक्ब। 31 मेको आ पिंडी लाडगा गे कोव्रशो बाक्त। मिनु मेको आ थामपुकीम खजूर रवा आ बुटा आपशो बाक्तेकम। मिनु मेकेर लचा कली ८ ओटा थेंका बाक्तेकम।

आगा लाडगा डा पूर्ब डा लापचो

32 मिनु मेकोम आं कली पूर्ब गे डा आगा डा लाडगाम चाक्ती। मिनु मेको आ ओव्रतीक लापचो पुक्तु। मिनु मेको अर्को ठेयब लापचो खोदेशो बाक्त। 33 मेको आ कोठा, आ थाम नु आ पिंडी अर्को खोदेशो बाक्तेकम। मेको आ पिंडी आ एर ओंथ नेल्ल झेल बाक्तेकम। मेको ५० कुबीत लाइशो नु २५ कुबीत ब्रेमशो बाक्त। 34 मेको आ पिंडी लाडगा गे कोव्रशो बाक्त। मिनु मेको आ थामपुकीम खजूर रवा आ बुटा आपशो बाक्तेकम। मिनु मेकेर लचा कली ८ ओटा थेंका बाक्तेकम।

आगा लाडगा डा उत्तर डा लापचो

35 मिनु मेकोम आं कली उत्तर गे डा ठेयब लापचो रे पा आगा डा लाडगाम चाकती। मिनु मेको ठेयब लापचो यो अर्को ठेयब लापचो खोदेंशोन बाक्त। 36 मेको आ कोठा, आ थाम नु आ पिंडी अरु खोदेशो बाक्तेक्म। मेको आ पिंडी आ एर ओंथ नेल्ल झेल बाक्तेक्म। मेको ५० कुबीत लाइशो नु २५ कुबीत ब्रेमशो बाक्त। 37 मेको आ पिंडी लाडगा गे कोव्रशो बाक्त। मिनु मेको आ थामपुकीम खजूर रवा आ बुटा आप्शो बाक्तेक्म। मिनु मेकेर लचा कली ८ ओटा थेंका बाक्तेक्म।

चोशा चढ़ेतीक श्ये क्येतीक कोठा

38 पिंडी आ नेक्था लापचो पाइशो कोठा का बाक्त। मेकेर चोशा चढ़ेतीक ब्वाक्कुम मुरबाक्तेक्म। 39 आगा ओव्रतीक लापचो आ पिंडीम का पटटी गे टेबल निक्शी बाक्ताक्स। अर्को पटटी गे यो टेबल निक्शी बाक्ताक्स। मेकेर चोशा चढ़ेतीके, पाप आ पर्बम चढ़ेतीके नु दोस आ पर्बम चढ़ेतीके क्योरचा माल्बाक्तेक्म। 40 पूर्ब डा ओव्रतीक लां डा पिंडी आ डोंइती टेबल निक्शी बाक्ताक्स। मिनु अर्को पटटी डा पिंडी आ डोंइती यो टेबल निक्शी बाक्ताक्स। 41 मोपा आगा ओव्रतीक का पटटी ४ ओटा टेबल नु अर्को पटटी ४ ओटा टेबल बाक्तेक्म। मिनु नेल्ल पा ८ ओटा टेबल बाक्तेक्म। मेको टेबल तार चढ़ेतीक क्योरचा माल्तेक्म। 42 मेकेर यो चोशा चढ़ेतीक कली चेशो फुल्लु के ४ ओटा टेबल बाक्तेक्म। मेको कुबीत का नु आधा लाइशो नु कुबीत का नु आधा ब्रेमशो बाक्तेक्म। मेको कुबीत का ग्येत्थ लाइशो बाक्तेक्म। मेको आन तारी चोशा चढ़ेतीक नु अरु चढ़ेतीक क्योरचा कली मार मार माल्मा, मेको नेल्ल बाक्त। कुबीत का आधा मिटर खोदेशो बाक्ब। 43 मिनु श्ये क्युक्तीक अडगुल का ब्रेमशो ओव्रतीक आ एर ओंथ क्युक्शो बाक्तेक्म। मेकेर चढ़ेतीक श्ये वोइक्चा कली टेबल बाक्तेक्म।

चढ़ेब आन कोठा

44 मिनु आगा डा ठेयब लापचो आ लाडगा गे कोठा निक्शी बाक्ताक्स। कोठा का उत्तर गे डा ठेयब लापचो आ लाडगाम बाक्त। मेको दक्खिन गे कोव्रशो बाक्त। अर्को कोठा दक्खिन डा ठेयब लापचो आ लाडगा गे बाक्त। मेको उत्तर गे कोव्रशो बाक्त। 45 मिनु मेकोम आं कली “एको दक्खिन गे कोव्रशो कोठा चढ़ेब आन कली बाक्ब। मेको परमप्रभु यावे आ खिंम गेय पाइब आन के बाक्ब। 46 मिनु मेको उत्तर गे कोव्रशो कोठा चहिं मेको चढ़ेतीकेम गेय पाइब आन कली बाक्ब। मेकेर सादोक आ चच युइ बाक्नीम। मेको लेवी आन दाते डा मेकोपुकी ला परमप्रभु यावे आ डोंइती जाक्ने चाप्नीम” देंत। इजीकीएल ४३:१९; इजीकीएल ४४:१५; इजीकीएल ४८:११; १राजा १:८,३९; १इतिहास ५:३४-४१ 47 मिनु मेकोम मेको लाडगा पुक्तु। मेको सहे का कुबीत लाइशो नु सहे का कुबीत ब्रेमशो बाक्त। मेको ४ पाटे बाक्त। मिनु मेको चढ़ेतीक परमप्रभु यावे आ खिं आ डोंइती बाक्त। इजीकीएल ४३:१३

परमप्रभु यावे आ खिं

48 मिनु मेकोम आं कली परमप्रभु यावे आ खिं डा पिंडीम चाकती। मिनु मेकोम पिंडी डा थामपुकी पुक्तु। मेको निम्फा गे ५ कुबीत ब्रेमशो बाक्तेक्म। आगा ओव्रतीक ठेयब लापचो ३ कुबीत ब्रेमशो बाक्त। मिनु मेको आ आगा डा गारो ३ कुबीत ब्रेमशो बाक्ताक्स। 49 मेको पिंडी २० कुबीत लाइशो नु १२ कुबीत ब्रेमशो बाक्त। मेकेर लचा कली १० ओटा थेंका बाक्तेक्म। मिनु निम्फा गे थाम का का बाक्त। १राजा ७:२१

41

परमप्रभु आ खिं पुक्शो

1 मिनु नोले मेकोम आं कली परमप्रभु यावे आ खिं आ नेक्था चाकती। मिनु मेको आ लापचो निक्शी पटटी डा थाम पुक्तु। मेको ६ कुबीत ब्रेमशो बाक्तेक्म। कुबीत का ०.५ मिटर बाक्ब। 2 आगा ओव्रतीक १० कुबीत ब्रेमशो बाक्त। मिनु मेको आ एर ओंथ गे डा गारो निक्शी ५ कुबीत ब्रेमशो बाक्ताक्से। मिनु मेकोम परमप्रभु यावे आ खिं पुक्गानु, मेको ४० कुबीत लाइशो नु २० कुबीत ब्रेमशो बाक्त। 3 मिनु मेको आगा डा कोठा ओव्रत। मिनु मेको आ आगा ओव्रतीक लापचो डा थाम पुक्गानु, मेको कुबीत निक्शी ब्रेमशो बाक्ताक्स। मेको आगा ओव्रतीक ६ कुबीत ब्रेमशो बाक्त। मेको आगा ओव्रतीक आ एर ओंथ डा गारो निम्फा ७ कुबीत ब्रेमशो बाक्ताक्स। 4 मिनु मेकोम आगा डा कोठा पुक्गानु, आ लाइशो २० कुबीत नु आ ब्रेमशो २० कुबीत बाक्त। मिनु मेकोमी आं कली “एको चहिं नेल्ल क्येडा चोव्रखो बाक्तीके बाक्ब” देंत।

गारोम सेल्शो कोठापुकी

5 मिनु नोले मेकोम परमप्रभु यावे आ खिं डा गारो पुक्तु। मेको ६ कुबीत थांइशो बाक्त। मिनु मेको खिं आ लाडगा डा कोठा ४ कुबीत ब्रेमशो बाक्तेक्म। मेको खिं आ एर ओंथ नेल्ल मोदेशो पा सेल्शो बाक्तेक्म। 6 मेको लाडगा डा कोठा तला सां पा सेल्शो बाक्तेक्म। का आ तारी अर्को पा सेल्शो बाक्त। मिनु मेको तला नेल्लेमी ३०, ३० कोठा बाक्तेक्म। मिनु मेको परमप्रभु यावे आ खिं आ एर ओंथ नेल्ल डा गारोम कोठा तिकचा कली तिकतीक सेल्शो बाक्तेक्म। मेको तिकशोपुकी परमप्रभु यावे आ खिं आ आगा मओव्रचा डा पा सेल्शो बाक्तेक्म। 7 मिनु परमप्रभु यावे आ खिं आ एर ओंथ डा कोठा ओव्रतीक लां आगा डा तला क्येडा आ तार डा तला ठेयब बाक्त। मुरपुकी उइ रे इर सम्म लचा कली दाते डा लतीक रे लचा मालबाक्तेक्म। मेकेर एर ओंथ क्रेसी सेल्शो बाक्तेक्म। 8 मेको नोले गो परमप्रभु यावे आ खिं आ एर ओंथ नेल्ल रे पा पेटी सेल्शो बाक्त। मेको लाडगा डा कोठा आन जग ६ कुबीत ग्येत्थ लाइशो बाक्तेक्म। 9 मेको कोठा आन लाडगा गे डा गारो ५ कुबीत ब्रेमशो बाक्त। मेको परमप्रभु यावे आ खिं डा कोठा इजीकीएल ४२:१-३ 10 नु गारो डा कोठा आन दातेमी २० कुबीत ब्रेमशो लां बाक्त। मेको खिं नेल्ल एर ओंथ मोदेशो बाक्त। 11 मेको कोठा आन ओव्रतीक ब्रेमशो लां आगाम लाम्तेक्म। लाप्यो का उत्तर गे बाक्त, अर्को दक्खिन गे बाक्त। मेको आन दाते डा श्येत्थ लां ५ कुबीत ब्रेमशो बाक्त। जग आ एर ओंथ नेल्ल ५ कुबीत ब्रेमशो बाक्तेक्म।

12 मेको परमप्रभु यावे आ खिं आ लाडगा गे हिरशो पच्छिम गे डा खिं ७० कुबीत ब्रेमशो बाक्त। मेको खिं आ एर ओंथ डा गारो ५ कुबीत थांइशो बाक्त। मिनु मेको आ लाइशो ९० कुबीत बाक्त। कुबीत का ०.५ मिटर बाक्ब।

13 मिनु परमप्रभु यावे आ खिं पुक्गानु, मेको सहे का कुबीत लाइशो नु सहे का कुबीत ब्रेमशो बाक्त। आ आगा डा लाडगा नु खिं आ गारो नु मेको आ गारो सहे का कुबीत ब्रेमशो बाक्त। 14 परमप्रभु यावे आ खिं आ पूर्व गे डा लाडगा यो सहे का कुबीत बाक्त।

15 मिनु नोले मेकोमी परमप्रभु यावे आ खिं डा लाडगा पच्छिम गे पुक्गानु, निम्फा पटटी डा लतीक लां सहे का कुबीत बाक्त। मिनु परमप्रभु यावे आ खिं, आ चोव्रखो बाक्तीके नु आ डोंइती डा पिंडी डा गारो नेल्ल शीम क्येप्शो बाक्तेक्म। 16 मिनु मेको सांफा आन एर ओंथ नेल्ल गे झेल बाक्तेक्म। लाप्यो गे कोव्रचा कली नेल्ल शीम क्येप्शो बाक्त। उइ खप रे झेल सम्म शीम क्येप्शो बाक्तेक्म। 17 लाप्यो आ इर गे, चोव्रखो बाक्तीके नु परमप्रभु यावे आ बाक्तीके आगाम लतीक लाप्योम फारतीक वा बाक्तेक्म। मिनु खिं आ एर ओंथ डा गारो, चोव्रखो बाक्तीके नु खिं डा ठेयब कोठा नेल्ल बुटा आप्यो बाक्तेक्म। 18 मेकेर करूब नु खजूर रवा आन बुटा आप्यो बाक्तेक्म। मेको करूब का खजूर रवा का नु करूब का पा आप्यो बाक्त। मेको करूब नेल्ल आन के कुल निक्शी बाक्तेक्म। 19 मेको करूब आ मुर आ कुल खजूर रवा का गे कोव्रशो, नु अर्को ठिटा गुप्स आ कुल खोदेशो अर्को खजूर रवा गे कोव्रशो बाक्त। मेको परमप्रभु यावे आ खिं डा गारो नेल्लेम मुशा बुटा आप्यो बाक्तेक्म। 20 उइ खप रे लाप्यो इर सम्म करूब नु खजूर रवा आन बुटा मुशा आप्यो बाक्तेक्म।

21 परमप्रभु यावे आ खिं डा ओव्रतीक डा लाप्यो डा शी दारपाइक्चा कली ४ ओटा खोप्शो बाक्त। मिनु चोव्रखो बाक्तीके आ डोंइती यो मेको खोदेशो पा बाक्त। मिनु लाडगा डा चोव्रखो बाक्तीक ओव्रतीक लाप्यो डा शी नेल्ल उइक्थ उइक्थ पा ४ पाटे बाक्तेक्म। मिनु थम चोव्रखो बाक्तीक आ डोंइती गे डा लाप्यो डा शी यो मोदेशोन बाक्तेक्म। प्रस्थान २५:२३-३०; प्रस्थान ४०:२२-२३ 22 मेकेर शी के चढेतीक का बाक्त। मेको कुबीत सां ग्येत्थ लाइशो, कुबीत निक्शी पित्थ लाइशो नु कुबीत निक्शी ब्रेमशो बाक्त। मेको आ सुर, मेको आ तार नु आ एर ओंथ नेल्ल शी के बाक्त। मिनु मेकोमी आं कली “एको टेबल परमप्रभु यावे आ डोंइती बाक्ब” देंत। 23 परमप्रभु यावे आ खिं नु आ चोव्रखो बाक्तीक निक्शी के लाप्यो निक्शी बाक्तेक्म। 24 मेको लाप्यो आन के चोक्तीक निक्शी पाइशो बाक्तेक्म। 25 मिनु परमप्रभु यावे आ खिं डा लाप्योम गारो डा खोदेशो पा करूब नु खजूर रवा आन बुटा मुशो बाक्तेक्म। पिंडी आ डोंइतीम शी के खाट बाक्शो बाक्त। 26 पिंडी डा गारो आ निम्फा पटटी खजूर रवा आ बुटा मुशा आप्यो बाक्तेक्म।

42

चढेब आन कोठा

1 मिनु मेकोमी आं कली लाडगा गे डा लाडगा उत्तर गे चाक्ती। मिनु मेकोमी आं कली परमप्रभु यावे आ खिं नु उत्तर गे डा खिं आ आइक्ची डा कोठा गे लाइक्ती। इजीकीएल ४०:१७; इजीकीएल ४१:९, १०, १३ 2 मेको खिं उत्तर गे सहे का कुबीत लाइशो नु ५० कुबीत ब्रेमशो बाक्त। कुबीत का ०.५ मिटर बाक्ब। 3 आगा डा लाडगा २० कुबीत बाक्त।

लाडगा गे डा लाडगा डा फुल्लु ब्रशो लां गे कोव्रशो कोठा तारी अर्को तला सां बाक्तेक्म। 4 कोठा आन डोंइती आन आगा गे १० कुबीत ब्रेमशो नु सहे का कुबीत लाइशो लां का बाक्त। मेको आन लाप्यो उत्तर गे कोव्रशो बाक्तेक्म। कुबीत का ०.५ मिटर बाक्ब। 5 आ तार डा कोठा ठेयब लां बाक्तीके आगा नु दाते डा कोठा आन क्येडा आइक्च बाक्तेक्म। 6 मारदे हना मेको तला सां बाक्तेक्म। मेको आन के लाडगा डा थाम खोदेशो पा थाम मबाक्म। मोपतीके आइदी डा नु दाते डा कोठा आन क्येडा, मेको आ तार डा कोठा आइक्च बाक्तेक्म। 7 मेकेर कोठा आन डोंइती गारो का बाक्त। मेको गारो ५० कुबीत लाइशो बाक्त। 8 लाडगा गे डा लाडगा डा कोठा आन लहर ५० कुबीत लाइशो बाक्त। तन्न परमप्रभु यावे आ खिं आ आइक्था डा सहे का कुबीत लाइशो बाक्त। 9 पूर्व रे आगा डा कोठापुकी ओव्रचा कली लां का बाक्त। मोपा लाडगा गे डा लाडगा ओव्रने चाप्यो बाक्तेक्म। 10 मेको लां आ ब्रेमशो गारो सम्म थिशो बाक्त। परमप्रभु यावे आ खिं आ आइक्ची दक्खिन गे यो कोठा बाक्तेक्म। 11 मेको आन डोंइती गाक्तीक लां का बाक्त। मेको कोठा उत्तर डा खोदेशो बाक्तेक्म। मेको आन खोदेशो लाइशो नु ब्रेमशो बाक्तेक्म। लाडगा लतीके लाप्यो नु मेको आ एर ओथ नेल्ल खाल का डा बाक्तेक्म। 12 दक्खिन डा कोठा ओव्रतीक लां आ डोंइती अर्को लां ब्राशो बाक्त। मेको लां पूर्व गे लत।

13 मिनु मेकोमी आं कली “परमप्रभु यावे आ खिं डा श्येत्थ बाक्तीके आइक्ची उत्तर गे नु दक्खिन गे डा कोठापुकी चढेब आन कोठा बाक्नीम। मेकेर परमप्रभु यावे आ डोंइती बाक्शो चढेबपुकीमी नेल्ल क्येडा चोव्रखो चढेशो ब्वाइनीम। मेकेर नेल्ल क्येडा चोव्रखो चढेशो, अन्न चढेशो, पाप आ पबर्म चढेशो नु दोस आ पबर्म चढेशो वोइक्नीम। मारदे हना मेको चोव्रखो बाक्तीके बाक्ब। 14 मिनु चढेबपुकी चोव्रखो बाक्तीकेम ओव्रमानु, आन फेक्शो गेय पतीक वा मपुइक्थु, लाडगा गूचा मदुम्नीम। मारदे हना मेको चोव्रखो वा बाक्नीम। मेकोपुकी मुर आन दातेम लचा क्येडा डोंइती अर्को वा फेक्चा माल्नीम” देंत। इजीकीएल ४४:१९

परमप्रभु आ खिं पुक्शो

15 मिनु मेकोम परमप्रभु यावे आ खिं आगा पुक्ने थुम्तु। मिनु आं कली पूर्व डा लाप्यो रे पा लाडगा गुंडताक्यी। मिनु परमप्रभु यावे आ खिं आ एर ओथ लाडगा गे डा लाडगा नेल्ल पुक्तु। 16 मेकोमी आ पुक्तीकेम पूर्व गे पुक्तु। मेको ५ सहे कुबीत बाक्त। 17 मिनु मेकोम आ पुक्तीकेमी उत्तर गे पुक्तु। मेको यो ५ सहे कुबीत बाक्त। 18 मिनु मेकोम आ पुक्तीकेमी दक्खिन गे पुक्तु। मेको यो ५ सहे कुबीत बाक्त। 19 मिनु मेकोम आ पुक्तीकेमी पच्छिम गे पुक्तु। मेको यो ५ सहे कुबीत बाक्त। 20 मोपा मेकोमी पूर्व, उत्तर, दक्खिन नु पच्छिम नेल्ल पुक्तु। मेको आ एर ओथ गारो का बाक्त। मेको ५ सहे कुबीत लाइशो नु ५ सहे कुबीत ब्रेमशो बाक्त। परमप्रभु यावे आ बाक्तीके नु मुर आन बाक्तीके तिल्चा कली मोदेशो पशो बाक्त।

43

परमप्रभु आ छेडछेड लेशो

1 मिनु मेकोमी आं कली पूर्व डा लाप्यो आ नेक्था चाक्ती। 2 मिनु इस्राएली आन परमप्रभु आ छेडछेड पूर्व रे जाक्त। मेको आ रेयके ठेयब समुन्द्र आ रेयके खोदेशो नेंसाक्व। मिनु रागी नेल्ल मेको आ छेडछेडम हाम्सो दुम्त। इजीकीएल १:२८ 3 मेको आं डोंइती तशो परमप्रभु यावेमी सहर कली खतम सेल्ची ना जाक्मेनु, कोंइतीक खोदेशो बाक्त। मेको केबार खोला आ नेक्थाम तशो कोंइतीके खोदेशो बाक्त। मिनु गो खुम्की पा बाप्ती। इजीकीएल ८:-११:-; इजीकीएल १:- 4 मिनु परमप्रभु यावे आ छेडछेड मेको पूर्व डा लाप्यो रे पा आ खिं ओव्रत। इजीकीएल १०:१९ 5 मिनु सोक्तीम आं कली क्युक्शा, आगा डा लाडगाम ओइताक्यी। मिनु परमप्रभु यावे आ खिं छेडछेडम ब्रीत। इजीकीएल १:२८; प्रस्थान ४०:३४; १राजा ८:१०-११

6 मिनु मेको मुर आं नेक्था राप्शा बाक्मेनु, गो परमप्रभु यावे आ खिं रे आं कली लोव्र पशो नेंता। 7 मार लोव्र पाप्तु देंशा हना “ए मुर, एको दा आं ठेयब नित्तीक बाक्ब। मिनु एको आं खोइल नाइक्तीक यो बाक्ब। गो इस्राएल डा मुर आन दातेम गेना हना यो बाक्नुड। मुल रे इस्राएल आ खिं डा मुरुम आं नें कली मरिम्शो मसेल्नीम। मेको नु आन पिपम आन मूर्ति पूजा नु आन बेक्शो पिप आन पबर्म पतीके आं नें मरिम्शो मसेल्नीम। भजन संग्रह १३२:७-८ 8 मेकोपुकीम आं खिं आ नेक्था आन खिं सेल्लेक्म। आं लाप्यो आ डोंइती आन लाप्यो सेल्लेक्म। मिनु गो नु मेको आन दातेमी गारो का ला लीत। मिनु मेको आन ग्रांग्रा दिशो गेयम, आं नें ग्रांग्रा दिशो सेल्लेक्म। मोपतीके गो गाइशशा मेको आन

कली साइक्तामी। इजीकीएल ८:७-१८ 9 मुल मेकोपुकीम आन मूर्ति पूजा पतीक प्रोन्मेक्ल। मेको आन बेक्शो पिप आन पर्बम पतीके प्रोन्मेक्ल। मिनु गो मेको आन दातेमी गेना हना यो बाक्नुड।

10 ए मुर, इस्राएल आ खिं डा मुर आन कली आं खिं आ पर्बम शेंदीमी। मिनु मेको दोपा सेल्सीशो बाक्मे, मेको पुक्पतो। मिनु मेको आन मरिम्शो पशो आ पर्बम मुने दोक्मल। इजीकीएल ३६:३२ 11 मिनु मेकोपुकीम आन पशो आ पर्बम मुने पाम्तेक्म हना, मेको आन कली आं खिं दोपा सेल्सीशो बाक्मे, मेको तुइक्पतो। मेको आ लाडगा लतीके, खिंडगा ओव्रतीके, मेको दोदेशो तांडसीबा, आं देशो पतीक लोव्र, आं अरेशो लोव्र नु शेंतीक नेल्ले मेको आन डोंइती ब्रेक्तो। मोपा मेको नेल्ले अरेशो होस पा टीब दुम्मल। 12 परमप्रभु यावे आ खिं आ पर्बम आ अरेशो लोव्र मार बाक्त देशा हना, मेको डांडा आ एर ओंथ नेल्ल आं के बाक्तीक बाक्ब। मेको परमप्रभु यावे आ खिं आ पर्बम आ अरेशो लोव्र बाक्ब” देंत।

चढ़ेतीक

13 चढ़ेतीके गिश ठेयब बाक्त देशा हना, मेको नेल्ल पा कुबीतम पुक्शोनु, कुबीत का नु गुड का ब्रेम्शो बाक्त। मेको आ एर ओंथ दोशो जग कुबीत का लुकच नु कुबीत का ब्रेम्शो बाक्त। मिनु आ एर ओंथ नेल्ल डा सुर बित्ता का ब्रेम्शो बाक्त। मिनु मेको चढ़ेतीक आ राप्तीके दोदेशो बाक्त देशा हना, कुबीत का ०.५ मिटर बाक्ब। इजीकीएल ४०:४७; प्रस्थान ४७:१-८ 14 मेको चढ़ेतीक खपीम बाक्शो जग रे आइदी डा सुर सम्म कुबीत निक्शी लाइशो नु कुबीत का ब्रेम्शो बाक्त। मेको आ आइक्च सुर रे ठेयब सुर सम्म ४ कुबीत लाइशो नु कुबीत का ब्रेम्शो बाक्त। 15 मिनु मेको चढ़ेशो चोतीक ४ कुबीत ग्येत्थ लाइशो बाक्त। मेकेर रे मेको आ ४ सुर रे ४ ओटा ग्रोव्र सेल्शो बाक्तेक्म। 16 मेको चढ़ेशो थोव्रक चोतीक १२ कुबीत लाइशो नु १२ कुबीत ब्रेम्शो, ४ पाटे बाक्त। 17 मेको चढ़ेतीक आ ठेयब सुर १४ कुबीत लाइशो नु १४ कुबीत ब्रेम्शो बाक्त। मेको ४ पाटे बाक्त। मेको आ सुर एर ओंथ आधा कुबीत बाक्त। मिनु आ एर ओंथ दोशो जग कुबीत का ब्रेम्शो बाक्त। मेको चढ़ेतीक आ क्रेसी पूर्व गे कोव्रशो बाक्त।

चढ़ेतीक गेय पचा गोशो

18 मिनु मेकोम आं कली “ए मुर, परमप्रभु, परमप्रभु यावेमी ‘मेको चढ़ेतीके सेल्ने थुम्शो नाक्ती चोशा चढ़ेतीके चढ़ेचा नु हुश ब्रुइक्चा कली मेको चढ़ेतीके आ पर्बम पचा माल्शो गेय मार बाक्त देशा हना, 19 गेपुकीम आं कली चढ़ेब सादोक आ खिं डा लेवी आन कली पाप आ पर्बम चढ़ेचा कली बोहोर का गेचा माल्नीनी। मेकोपुकी आं गेय पचा कली आं नेक्था जाक्नीम’ दे परमप्रभु, परमप्रभु यावेमी देशो बाक्ब। इजीकीएल ४०:४६; लेवी ४:१-१२ 20 मेकोपुकीमी मेको आ हुश इक्का चाक्शा चढ़ेतीक आ ४ ओटा ग्रोव्र नु आइक्था डा सुर आन ४ कुना नेल्लेम खेक्तमेक्ल। मोपा गे चढ़ेतीक ग्रांग्रा मदिशो सेल्शा पाप क्याम्तीक गेय पचा माल्नीनी। 21 मिनु नोले गेपुकीम मेको पाप आ पर्बम चढ़ेशो बोहोर चाक्शा, परमप्रभु यावे आ खिं डा देशो बाक्तीकेम चोने।

22 मिनु गेपुकीम आ दीसा नाक्ती मारेइ मदुम्शो बोका का पाप आ पर्बम चढ़ेने। गेपुकीम बोहोर चढ़ेशोम चढ़ेतीक ग्रांग्रा मदिशो सेल्शो खोदेशो पा मेकोम यो चढ़ेतीक कली ग्रांग्रा मदिशो सेलल। 23 मिनु गेपुकीम चढ़ेतीक नेल्ल ग्रांग्रा मदिशो सेल्ने थुम्तीनी हना, मारेइ मदुम्शो बोहोर का नु बगाल रे मारेइ मदुम्शो सांड का चढ़ेने। 24 गेपुकीम मेको आस कली परमप्रभु यावे आ डोंइती वोइक्चा माल्नीनी। मिनु चढ़ेबपुकीम मेको तारी हिक्सी वोइशशा, परमप्रभु यावे आ डोंइती चोशा चढ़ेतीक सेल्शा चढ़ेचा माल्नीम। 25 गेपुकीम पाप आ पर्बम चढ़ेचा कली ७ नाक्त सम्म नाक्त किंत किंत क्यारश का, बोहोर का नु बगाल रे मारेइ मदुम्शो सांड का चाक्चा माल्नीनी। 26 मिनु मेकोपुकी ७ नाक्त सम्म चढ़ेतीक कली पाप क्याम्तीक गेय पचा नु ग्रांग्रा मदिशो सेल्शा माल्नीम। मो पशा मेको चढ़ेतीके चढ़ेचा कली जिम्मा गेचा माल्नीम। 27 मिनु मेको नाक्त नुम्मेनु, ८ नाक्त रे चढ़ेबपुकीम इन चोशा चढ़ेतीक नु दुशा बाक्चा आ पर्बम चढ़ेतीक चढ़ेचा माल्नीम। मिनु गो इन कली ब्राइनुड” दे परमप्रभु, परमप्रभु यावेमी देंत।

44

चोक्शो पूर्व डा ठेयब लाप्चो

1 मिनु नोले मेकोमी आं कली परमप्रभु यावे आ खिं डा पूर्व गे कोव्रशो लाडगा गे डा लाप्चोम चाक्ती। मिनु मेको चोक्शो बाक्त। इजीकीएल ४३:४ 2 मिनु परमप्रभु यावेमी आं कली “एको लाप्चो चोक्स डा चोक्स बाक्चा माल्ब। एको रोक्चा मदुम्ब। मेकेर रे सुइ ओव्रचा मताइनीम। मारदे हना परमप्रभु यावे, इस्राएली आन परमप्रभु एकेर रे ओव्रशो

बाक्ब। मोपतीके एको चोक्स डा चोक्स बाक्चा माल्ब। इजीकीएल ४६:२³ सासन पाइब ला एको लाप्चो आगा डा बाक्तीक परमप्रभु यावे आ डोंइती जचा कली लने चाप्ब। मेको एको लाप्चो आ पिंडी रे ओव्रचा माल्ब। मिनु मेको खाल का डा लां रे लेत्चा माल्ब” देंत।

सासन पाइब, लेवी नु चढेब

4 मिनु नोले मेकोमी आं कली उत्तर गे डा ठेयब लाप्चो रे पा परमप्रभु यावे आ खिं आ डोंइती चाक्ती। मिनु मेको कोव्रडुनु, परमप्रभु यावे आ छेडछेडम मेको आ खिं ब्रीशो बाक्त। मिनु गो खुम्की पा बाप्ती। 5 मिनु परमप्रभु यावेम आं कली “ए मुर, आं नेक्था जाक्शा, कोव्रडो। आं खिं आ पर्वम पचा माल्शो गेय नु मेको आ पर्वम अरेशो लोव्र नेल्ल इ नोफा दाइशशा रिम्शो पा नेनो। सु सु आं खिं ओव्रचा ताइनीमी नु सु सु मताइनीम, दे रिम्शो पा कोव्रशा अरेवो। 6 मेको मटीब मुर, इस्राएल आ खिं डा मुर आन कली परमप्रभु, परमप्रभु यावेमी इन कली ‘ए इस्राएल आ खिं डा मुरपुकी, गे इन ग्रांग्रा दिशो गेय नेल्ल प्रोनीन। 7 गेपुकी आं कली आं जचा थोव्रक बोंसो नु हुश चढेची ना आन थुं नु रांम खोइक्तीक चिनु मखोइशशो अर्को रागी डा मुर आन कली आं बाक्तीकेम ओव्रचा गेतीनी। मोपा गे आं खिं, मुर आ खिं खोदेंशो सेल्टीनी। मिनु इन ग्रांग्रा दिशो गेयम आं कबल प्रोंइतीनी। यसैया ५२:१; येरमीया ९:२५ 8 गेपुकीम आं कली चढेशो आ पर्वम होस मपनी। आं बाक्तीकेम इन गेय पचा कली गे अर्को रागी डा मुर आन कली वोइशशा आं खिं कोव्रब सेल्टीनी’ ” देंत।

9 मिनु परमप्रभु, परमप्रभु यावेमी “इस्राएली आन दातेम बाक्शो अर्को रागी डा आन थुं नु रांम खोइक्तीक चिनु मखोइशशो मुर आं बाक्तीकेम ओव्रचा मताइनीम। 10 तन्न इस्राएली हेंथे गाक्मानु, लेवीपुकी हेंथे गाक्शा, आं कली प्रोंइशा, आन मूर्ति कली पूजा पशो बाक्तेक्म। मेकोपुकीम आन पाप आ सजाइ तचा माल्नीम। 11 मिनु मेको लेवीपुकी आं बाक्तीकेम गेय पचा माल्नीम। मिनु आं खिं डा लाप्चो खाल पाइब दुम्चा माल्नीम। मिनु आं खिंम गेय पचा माल्नीम। मेकोपुकीम मुर आन पर्वम चोशा चढेतीक क्योरचा माल्नीम। मेकोपुकीम मुर आन कली वारच पा गेय पचा माल्नीम। 12 तन्न लेवीपुकीम मुर आन कली आन मूर्ति पूजा पतीकेम वारच पाम्तेक्म। मोपा मेकोपुकी इस्राएल आ खिं डा मुर आन कली मरिम्शो पपाइक्तेक्म। मोपतीके मेकोपुकी सजाइ तचा माल्नीम, दे कसम जाता। 13 मेकोपुकी चढेब आ गेय पचा कली आं नेक्था जाक्चा मताइनीम। मेकोपुकी तेकोइ आं कली चढेशो आ नेक्था जाक्चा मताइनीम। मारदे हना मेको चढेशो नेल्ल क्येडा चोव्रखो बाक्ब। तन्न मेको मुने दोक्चा माल्नीम। मिनु मेकोपुकीम आन मूर्ति पूजा पशो डा सजाइ तचा माल्नीम। 14 मो हना यो गो मेको आन कली आं खिं कली कोव्रशा नु मार मार पचा माल्शो गेय पपाइक्नुड।

चढेब आन गेय

15 तन्न चढेब लेवी आ थर डा सादोक आ चच युइ, इस्राएली आं रे हेंथे गाक्तेक्म हना यो, मेकोपुकीम आं खिं डा पचा माल्शो गेय रिम्शो पा कोव्रतेक्म। मेकोपुकी आं गेय पचा कली आं नेक्था जाक्चा ताइनीम। मेकोपुकी आं डोंइती बोंसो नु हुश चढेथ जाक्चा ताइनीम। इजीकीएल ४०:४६ 16 मेकोपुकी ला आं बाक्तीकेम ओव्रने चाप्नीम। मिनु आं टेबल आ नेक्था जाक्शा, आं गेय पचा ताइनीम। 17 मेकोपुकी आगा डा लाडगा डा लाप्चो रे ओव्रमानु, सुती के वा फेक्शो बाक्चा माल्नीम। मेकोपुकीम आगा डा लाडगा डा लाप्चो नु आं खिं आगाम गेय पामेनु, ऊन के मारेइ वा फेक्चा मदुम्नीम। लेवी १६:४ 18 मेकोपुकीम पियाम सुती के गुप्तीक गुप्चा माल्नीम। मिनु सुती के आगाम फेक्तीक वा फेक्चा माल्नीम। मेकोपुकीम गल शाइक्ब तेकोइ वा फेक्चा मदुम्नीम। 19 मेकोपुकी लाडगा गे डा लाडगा, मुर आन बाक्तीक लमानु, आगाम गेय पामेनु, फेक्शो वा पुइक्चा माल्नीम। मिनु मेको चोव्रखो कोठाम वोइशशा, अर्को वा फेक्चा माल्नीम। मोपा परमप्रभु आ थोव्रक नु मुर आ थोव्रक मखाल्दमेक्ल। इजीकीएल ४२:१४ 20 मेकोपुकीम आन चां प्रेक्चा मदुम्नीम। मेको शुश लाइशशो दुम्चा गेचा यो मदुम्ब। मेकोपुकीम आन चां खोइक्चा ला दुम्नीम। लेवी १९:२७ 21 चढेबपुकीम आगा डा लाडगा लमानु, अडगुर शांबु तूचा मदुम्नीम। लेवी १०:९ 22 मेको चढेबपुकीमी आन वोंइश बेक्शो नु प्रोंइचा पुंडसीशो मीश मुर ग्युंवे पचा मदुम्नीम। मेकोपुकीम इस्राएल आ खिं मुर रे जरमेशो कन्ने मीश आल नु आन वोंइश बेक्शो चढेब आन मीश कली ला ग्युंवे पने चाप्नीम। 23 मेकोपुकीम आं मुर आन कली आं मार मार नु मुर आन मार मार खाल का डा मबाक्नीम, दे शेंचा माल्नीम। मिनु मेको आन कली ग्रांग्रा दिशो नु मदिशो थोव्रक खाल का डा मबाक्नीम, दे कोंइचा माल्नीम। इजीकीएल २२:२६; लेवी १०:१० 24 मारेइ जितीक खेतीक दुम्मेनु, चढेबपुकीमीन निसाफ पाइब आन गेय पचा माल्नीम। मिनु आं निसाफ पतीक लोव्र खोदेंशो पा मेकोपुकीम

निसाफ पचा माल्नीम। मेकोपुकीम चाड मानेचा आ पर्वम आं अरेशो नु आं फुल्लुम मुशा ब्रेक्शो लोत्र खोदेशो पा पचा माल्नीम। मेकोपुकीम आं नाइक्तीक नाक्ती मानेचा माल्नीम। ब्यवस्था १७:८-९ 25 मेकोपुकीम बेक्शो मुर आ नेक्था लशा, आंम कली ग्रांग्रा दिशो सेल्सीचा मदुम्नीम। मो हना यो आन आम आफ, तमी तौ, आन लोकब नु ग्युंभे मपशो आंम समी आन बेक्शो रां आ नेक्था लशा ग्रांग्रा दिशो दुम्ने चाप्नीम। गन्ती १९:११; लेवी २१:१-४ 26 मिनु मेको ग्रांग्रा मदिशो दुम्मा नोले, ७ नाक्त सम्म रिम्चा माल्नीम। 27 मेकोपुकी आं खिं डा आगा डा लाडगाम गेय पचा कली ओत्रतीक नाक्त मेकोपुकीमी पाप आ पर्वम चढेचा माल्नीम” दे परमप्रभु, परमप्रभु यावेमी देंत।

28 मिनु परमप्रभुमी “चढेब आन शोंप गो नड। मेको आन कली इस्राएलम रू गेचा मदुम्ब। गो मेको आन शोंप नड। गन्ती १८:२० 29 मेकोपुकीम अन्न चढेशो, पाप आ पर्वम चढेशो नु दोस आ पर्वम चढेशो जचा माल्नीम। इस्राएलम परमप्रभु यावे कली गेचा माल्शो थोत्रक नेल्ल मेको आन के दुम्ब। गन्ती १८:१४ 30 डोंइती मीशो फल आन नेल्ल क्येडा रिम्शो फल नु इन चढेशो मारेइ मारेइ नेल्ल चढेब आन केन दुम्ब। गे इन खिंम आसीक तचा कली इन निशो फस नेल्ल क्येडा डोंइती डा डल्ला यो चढेब आन कली गेचा माल्नीमी। प्रस्थान २५:२; गन्ती १५:२०; नेहेम्याह १०:३८ 31 चढेबपुकीम आंमा बेक्शो चिक्ब नु बी ब्यफ, क्यारश भेडा कि जन्तुपुकीम साइशो, मारेइ ब्वचा मदुम्नीम” दे परमप्रभु यावेमी देंत। लेवी २२:८

45

परमप्रभु कली रू गेशो

1 मिनु गेपुकीम आंम इन शोंप सेल्चा कली रागी योक्शा गेनीनु, मेको रे परमप्रभु यावे कली १५ हजार कुबीत लाइशो नु २० हजार कुबीत ब्रेम्शो रू का तिल्चा माल्नीमी। मिनु मेको रू नेल्ल परमप्रभु यावे केन दुम्ब। कुबीत का ०.५ मिटर बाक्ब। 2 मेको रे पा ५ हजार कुबीत लाइशो नु ५ हजार कुबीत ब्रेम्शो रू का परमप्रभु यावे आ बाक्तीके दुम्ब। मेको आ एर ओंथ नेल्ल ५० कुबीत ब्रेम्शो श्येत्थ लां बाक्चा माल्ब। 3 मिनु मेको परमप्रभु यावे आ बाक्तीकेम २५ हजार कुबीत लाइशो नु १० हजार कुबीत ब्रेम्शो पुक्चा माल्नीमी। मेकेर परमप्रभु यावे आ खिं डा नेल्ल क्येडा चोत्रखो बाक्तीक दुम्चा माल्ब। 4 मेको बाक्तीक चहिं परमप्रभु यावे के बाक्ब। मेको परमप्रभु यावे आ खिंम गेय पाइब नु परमप्रभु आ नेक्था जाक्ब आन खिं कली नु परमप्रभु यावे आ खिं कली दुम्ब। 5 मेको अर्को २५ हजार कुबीत लाइशो नु १० हजार कुबीत ब्रेम्शो रू का परमप्रभु यावे आ खिंम गेय पाइब लेवी आन के दुम्ब। मेको आन बाक्तीक सहर कली दुम्ब।

6 गेपुकीम परमप्रभु आ रू प्रोंइशा अर्को ५ हजार कुबीत ब्रेम्शो नु २५ हजार कुबीत लाइशो रू का सहर कली चोइक्चा माल्नीमी। मेको इस्राएल डा मुर नेल्ल आन कली दुम्ब। इजीकीएल ४८:१५-२०

सासन पाइब आन भाग

7 मेको परमप्रभु यावे आ रू आ निम्फा पट्टी सासन पाइब आन के दुम्ब। मेको आ नेक्था डा सहर डा रू आन पूर्व गे नु पच्छिम गे सासन पाइब आन के दुम्ब। मेको थर का डा रू खोदेशो पा लाइशो दुम्ब। मेको पच्छिम डा सांद रे पूर्व डा सांद सम्म दुम्ब। इजीकीएल ४८:२१-२२ 8 मेको रू चहिं इस्राएलम सासन पाइब आन रू दुम्ब। मिनु मुल रे आं सासन पाइबपुकीम आं मुर आन कली दिप्चा मदुम्नीम। तन्न मेकोपुकीम इस्राएल आ खिं डा मुर आन कली, मेको आन थर थर खोदेशो पा आन रू आन के दुम्ब, दे रोइक्चा मताइनीम। इजीकीएल ४६:१८

9 मिनु परमप्रभु, परमप्रभु यावेमी “ए इस्राएल डा सासन पाइबपुकी। गेपुकीम हुश खाक्श पोक्तीनी। दिप्चा प्रोनीन। गेपुकीम थम रिम्शो नु ठीक गेय पने। आं मुर आन कली आन खिं रू रे मखेरीन। १राजा १२:४,११; १राजा २१; येरमीया २१:११-१२; मीका ३:१-३

10 गेपुकीम ठीक नाक्तीक नु पुक्तीकपुकी चलेचा माल्नीमी। लेवी १९:३६; ब्यवस्था २५:१५ 11 एफाह नु बाथ माइशो पुक्तीक खाल का डा दुम्चा माल्नीम। होमेर का १० बाथ दुम्चा माल्ब। मिनु १० एफाह यो होमेर का बाक्ब। होमेर चहिं थाप्तीक दुम्चा माल्ब। एफाह का २२ लिटर रिक्ब ठेयब अन्न पुक्तीक बोस बाक्ब। बाथ का २२ लिटर रिक्ब बोस बाक्ब। होमेर का २२० लिटर रिक्ब बोस ताप्तीक बाक्ब। 12 शेकेल का २० गेराह दुम्चा माल्ब। २० शेकेल, २५ शेकेल नु १५ शेकेल नेल्ल पा मीना का दुम्चा माल्ब” देंत। शेकेल का ११.५ ग्राम बाक्ब। गेराह का ०.६ ग्राम बाक्ब। मीना का ६०० ग्राम खोदेशो बाक्ब।

सासन पाइब आन चढ़ेचा माल्लो

13 मिनु परमप्रभु यावेमी “गेपुकीम चढ़ेचा माल्लो अन्न गिश बाक्ब देशा हना, होमेर का का चेरब रे एफाह डा भाग डा भाग का चढ़ेचा माल्लीनी। होमेर का का क्योव्रज रे एफाह डा ६ भाग डा भाग का चढ़ेचा माल्लीनी। 14 गेपुकीम चढ़ेचा माल्लो तेल कोर का बाथ डा १० भाग डा भाग का बाक्ब। मेको ४ माना खोदेशो बाक्ब। कोर नु होमेर उइक्थ उइक्थ बाक्नीम। मिनु होमेर का के १० बाथ बाक्नीम। कोर नु होमेर खाल का डा २२० लिटर बाक्ब। बाथ का एफाह का खोदेशो बाक्ब, मेको २२ लिटर बाक्ब। 15 गेपुकीम सहे निक्शी भेडा रे का चढ़ेचा माल्लीनी। मेको इस्राएली आन योव्रतीके रे चाक्चा माल्लीनी। मेको अन्न चढ़ेशो, चोशा चढ़ेशो नु दुशा बाक्चा आ पबर्म चढ़ेशो बाक्ब। मेको पाप क्याम्चा कली बाक्ब” दे परमप्रभु यावेमी देंत। 16 मिनु मेकोमी लेंशा “इस्राएल डा मुर नेल्लेमी मेको सासन पाइब कली मोदेशो गेचा माल्लीनी। 17 तन्न सासन पाइबमी मेको चोशा चढ़ेतीक, अन्न चढ़ेतीक नु तूचा थोव्रक चढ़ेतीक आं देशो चाडम चढ़ेचा माल्लब। मेकोमी औंसी, नाइक्तीक नाक्ती नु इस्राएल आ खिं डा मुर आन चाड नेल्लेमी चढ़ेचा माल्लब। मेकोमी पाप आ पबर्म चढ़ेतीक, अन्न चढ़ेतीक, चोशा चढ़ेतीक नु दुशा बाक्चा आ पबर्म चढ़ेतीक इस्राएली आन पाप क्याम्चा कली चाक्चा माल्लब” दे परमप्रभु यावेमी देंत। २सामुएल ६:१७-१८

परमप्रभु आ चाडपुकी

18 मिनु परमप्रभु, परमप्रभु यावेमी “डोंइती डा महिना नु डोंइती डा नाक्त, गेपुकीम मारेइ मदुम्शो बोहोर का चाक्चा, परमप्रभु यावे आ बाक्तीक ग्रांरा मदिशो सेल्चा माल्लीनी। 19 मिनु चढ़ेबमी पाप आ पबर्म चढ़ेशो आ हुश इक्का लाइशशा, परमप्रभु यावे आ खिं डा लाप्यो डा शीमी, चढ़ेतीक आ ४ कुना नु आ सुर नेल्लेम नु आगा लाडगा डा लाप्यो डा शीमी बुइक्चा माल्लब। 20 मिनु सुइम ममिथु मतुइक्थु पाप पशो बाक्त हना, महिना डा ७ नाक्त गेपुकीम मो पचा माल्लीनी। मोपा गे परमप्रभु यावे आ खिं कली यो पाप क्याम्तीक गेय पचा माल्लीनी। लेवी ४:२२; लेवी ५:१७-१८

21 मिनु डोंइती डा महिना डा १४ नाक्ती गेपुकीम पास्सा चाड मानेचा माल्लीनी। मेना गे ७ नाक्त सम्म बोरेब ओरुली मसुप्शो शोब्ले जचा माल्लीनी। 22 मेको नाक्त सासन पाइबमी आंम कली नु रागी डा मुर नेल्ल आन कली पाप आ पबर्म बोहोर का चढ़ेचा माल्लब। 23 मिनु मेकोमी मेको चाड डा ७ नाक्त नेल्लेम मारेइ मदुम्शो ७ ओटा बोहोर नु ७ ओटा सांड नाक्त किंत किंत चोशा चढ़ेचा माल्लब। मिनु चाड डा नाक्त किंत किंत पाप आ पबर्म बोका का का यो चढ़ेचा माल्लब। गन्ती २८:१७-२५ 24 मेको बोहोर का नु एफाह का अन्न चढ़ेचा माल्लब। सांड का नु एफाह का अन्न चढ़ेचा माल्लब। मिनु मेको का का पा, एफाह का कली हिन का तेल चढ़ेचा माल्लब। एफाह का २२ लिटर पुक्तीके बाक्ब। हिन का ४ लिटर बाक्ब।इजीकीएल ४६:५; गन्ती १५:४-१२ 25 मेकोम ७ महिना डा १५ नाक्त रे मेको ७ नाक्त डा चाड सम्म मेको मोदेशो चढ़ेचा माल्लब। मेको पाप आ पबर्म चढ़ेतीके, चोशा चढ़ेतीके नु अन्न चढ़ेतीक बाक्ब। मेको नु तेल यो चढ़ेचा माल्लब” देंत। लेवी २३:३४

46

नाक्त किंत किंत डा चढ़ेतीक

1 मिनु परमप्रभु, परमप्रभु यावेमी “मेको आगा लाडगा डा पूर्व गे कोव्रशो ठेयब लाप्यो मेको गेय पतीक ६ नाक्त चोक्शा चोइक्चा माल्लीनी। तन्न नाइक्तीक नाक्त नु औंसी नाक्त रोक्चा माल्लीनी। 2 सासन पाइब मेको पिंडी रे लाडगा डा लाप्यो रे पा ओव्रचा माल्लब। मिनु लाप्यो आ नेक्था राप्शा बाक्चा माल्लब। मिनु चढ़ेबपुकीम सासन पाइब आ चोशा चढ़ेतीक नु दुशा बाक्तीक आ पबर्म चढ़ेतीक चढ़ेचा माल्लीनी। मिनु सासन पाइबमी लाप्यो आ नेक्था राप्शा, खुम्की पा परमप्रभु यावे कली ठेयब सेल्चा माल्लब। मिनु नोले मेको लाडगा रे गूचा माल्लब। तन्न मेको लाप्यो नां मरिक्म सम्म रोक्स डा रोक्स बाक्चा माल्लब। इजीकीएल ४४:३ 3 मिनु रागी डा मुरपुकीम मेको ठेयब लाप्यो आ नेक्था नाइक्तीक नाक्ती नु औंसी नाक्ती खुम्की पा बाप्या माल्लीनी। 4 मेको सासन पाइबमी परमप्रभु यावे कली नाइक्तीक नाक्ती मार चढ़ेचा माल्लब देशा हना, चोशा चढ़ेचा कली मारेइ मदुम्शो ६ ओटा पाठा नु सांड का चढ़ेचा माल्लब। गन्ती २८:९-१० 5 मेको जचा थोव्रक चढ़ेचा कली सांड नु एफाह का अन्न चढ़ेचा माल्लब। मिनु पाठा नु अन्न गिश चढ़ेचा दाक्बा, मिश चढ़ेने चाप्ब। मिनु एफाह का का अन्न कली तेल चढ़ेचा माल्लब। एफाह का २२ लिटर पुक्तीक बाक्ब। हिन का ४ लिटर खोदेशो बाक्ब।इजीकीएल ४५:२४ 6 मिनु मेकोम औंसी नाक्त कली मार चढ़ेचा माल्लब देशा हना, मारेइ मदुम्शो बोहोर का ६ ओटा पाठा नु सांड का चढ़ेचा माल्लब। 7 मिनु जचा थोव्रक चढ़ेचा कली

बोहोर नु एफाह का अन्न नु सांड नु एफाह का अन्न चढ़ेचा माल्ब। मिनु पाठा नु अन्न गिश चढ़ेचा दाक्बा, मिश चढ़ेने चाप्ब। मिनु एफाह का का अन्न कली हिन का का तेल चढ़ेचा माल्ब। 8 मिनु सासन पाइब ओव्रमेनु, मेको ठेयब लाप्चो डा पिंडी रे पा ओव्रचा माल्ब। नोले मेको आ ओव्रशो लां रेन लाडगा गूचा माल्ब।

सासन पाइब आन चढ़ेशो

9 मिनु रागी डा मुरपुकी देशो नाक्त डा चाडम परमप्रभु यावे कली ठेयब सेल्चा कली आ डोंइती जाक्तेक्म हना, मेको उत्तर डा ठेयब लाप्चो रे ओव्रचा माल्नीम। नोले दक्खिन डा ठेयब लाप्चो रे पा गूचा माल्नीम। सु चहिं दक्खिन डा ठेयब लाप्चो रे ओव्रनीमी, मेकोपुकी उत्तर डा ठेयब लाप्चो रे गूचा माल्नीम। मेकोपुकी आगा ओव्रशो ठेयब लाप्चो रे लाडगा गूचा मदुम्नीम। आन ओव्रशो लाप्चो रे गूचा मदुम्नीम। ग्येत्थ पा अर्को ठेयब लाप्चो रे पा गूचा माल्नीम। 10 मेकोपुकी ओव्रमानु, सासन पाइब मेको नु ओव्रचा माल्ब। मिनु मेकोपुकी लाडगा गूमानु, मेको यो गूचा माल्ब।

11 मिनु चाडपुकी नु देशो नाक्त कली जचा थोव्रक चढ़ेचा कली बोहोर नु एफाह का अन्न नु सांड नु एफाह का अन्न चढ़ेचा माल्ब। मिनु पाठा नु अन्न गिश चढ़ेचा दाक्बा, मिश चढ़ेने चाप्ब। मिनु एफाह का का अन्न कली हिन का का तेल चढ़ेचा माल्ब। एफाह का २२ लिटर पुक्तीक बाक्ब। मेको ५ पाथी आधा खोदेशो बाक्ब। 12 मिनु सासन पाइबमी परमप्रभु यावे कली आ थुंम ग्येरशा चढ़ेतीक चढ़ेचा दाक्ताक्व हना, चोशा चढ़ेतीक कि दुशा बाक्तीक आ पबर्म चढ़ेतीक चढ़ेचा दाक्ताक्व हना, मेको ओव्रचा कली पूब डा ठेयब लाप्चो रोकशा गेचा माल्नीम। मिनु मेकोमी आ चोशा चढ़ेतीक नु दुशा बाक्चा आ पबर्म चढ़ेतीक, नाइक्तीक नाक्ती चढ़ेशो खोदेशो पा चढ़ेचा माल्ब। मिनु नोले मेको लाडगा लचा माल्ब। मिनु लम नोले मेको ठेयब लाप्चो चोक्चा माल्नीम।

13 मेकोमी परमप्रभु यावे कली नाक्त किंत किंत मारेइ मदुम्शो बर्स का गाप्शो पाठा का का सुनी कुस कुस चोशा चढ़ेचा कली गेचा माल्ब। प्रस्थान २८:३८-४२; गन्ती २८:३ 14 मेको नु सुनी कुस कुस चढ़ेतीक नु एफाह डा ६ भाग डा भाग का अन्न, हिन का डा ३ भाग डा भाग का तेल रिम्शो फस ब्वाइक्चा कली चढ़ेचा माल्ब। एको परमप्रभु यावे कली अन्न चढ़ेतीक बाक्ब। मिनु मेको गेना हना यो परमप्रभु यावे कली अन्न चढ़ेतीक बाक्ब। एफाह का २२ लिटर पुक्तीक बाक्ब। हिन का ४ लिटर खोदेशो बाक्ब। 15 मिनु मेको पाठा, अन्न चढ़ेतीक नु तेल सुनी कुस कुस चाक्शा, चोशा चढ़ेचा माल्ब” देशो बाक्ब।

सासन पाइब आ थेरशो रू

16 मिनु परमप्रभु, परमप्रभु यावेमी “सासन पाइबमी आ तौ का कली आ शोंप रे रू गेपु हना, मेको आ तौ चच युइ आन के दुम्ल। 17 तन्न मेकोम आ थेरशो रू रे आ गेय पाइब कली गेपु हना, मेको प्रोंइतीक बर्स सम्म ला मेको गेय पाइब आ शोंप दुम्ब। नोले मेको लेंशा सासन पाइब केन दुम्ब। आ तौ कली गेशो रू चहिं मेको केन दुम्शा लीब। लेवी २५:१०; येरमीया ३४:८ 18 सासन पाइबमी मुर आन थेरशो रू रे गुंडशा आ शोंप सेल्ने मचाप्ब। मेकोम आ तौ आन कली रू गेचा दाक्ब हना, आ शोंप रे गेचा माल्ब। मोपा सुइ आं मुर रू रोइक्चा मपुंडसीनीम” देंत। इजीकीएल ४५:८-९

चढ़ेशो श्ये क्येतीक कोठा

19 मिनु नोले मेकोमी आं कली उत्तर गे डा ठेयब लाप्चो डा ओव्रतीक आ नेक्था रे पा, चढ़ेब आन कली तिल्शा चोइशो कोठाम लाइक्ती। मिनु मेकेर बाक्तीक आ पच्छिम गे बाक्तीक का ताता। 20 मिनु मेकोम आं कली “एकेर चढ़ेबपुकीम दोस आ पबर्म चढ़ेतीक नु पाप आ पबर्म चढ़ेतीक आन श्ये लोप्नीम। मिनु चढ़ेशो अन्न के मार मार चोइनीम। मोपा मेकोपुकीम चढ़ेशो थोव्रक लाडगा गे डा लाडगाम मगुंडनीम। मारदे हना मुर आन कली मरिम्शो मदुम्ल” देंत।

21 मिनु नोले मेकोमी आं कली लाडगा गे डा लाडगा डा ४ सुर कोंइताक्यी। 22 मेको लाडगा गे डा लाडगा डा ४ सुरम ४ ओटा आइक्च लाडगा बाक्तेक्म। मेको नेल्ल खाल का डा ४० कुबीत लाइशो नु ३० कुबीत ब्रेम्शो बाक्तेक्म। 23 मेको नेल्ल आन एर ओंथ गारो हिरशो बाक्तेक्म। मेको ४ ओटा लाडगामी आन सुर सुरम लहर पा चुप्लु बाक्तेक्म। 24 मिनु मेकोमी आं कली “एको क्येतीक बाक्नीम। एकेर परमप्रभु यावे आ खिम गेय पाइबपुकीमी मुर आन चढ़ेशो मार मार लोप्नीम” देंत।

47

परमप्रभु आ खिं रे गूशो खोला

1 मिनु नोले मेकोमी आं कली परमप्रभु यावे आ खिं आ ओव्रतीक लाप्चोम लेशशा चाक्ती। मिनु गो मेको लाप्चो आ थेंका रे ब्वाक्कु यिशा, पूर्ब गे शाइशो ताता। मारदे हना मेको परमप्रभु यावे आ खिं पूर्ब गे कोव्रशो बाक्त। मिनु मेको ब्वाक्कु परमप्रभु यावे आ खिं आ दक्खिन चढ़ेतीक आ दक्खिन रे शाइशो बाक्त। उत्पत्ती २:१०-१४; योएल ४:१८; प्रकाश २२:१ 2 नोले मेकोमी आं कली उत्तर गे डा ठेयब लाप्चो रे पा लाडगा गुंडताक्यी। मिनु पूर्ब गे लेशशो लाडगा डा लाप्चो रे पा हिरशा चाक्ती। मेको ब्वाक्कु दक्खिन गे शाइशो बाक्त।

3 मिनु मेको पुक्तीक डोरी का शेशा पूर्ब गे लत। मिनु मेकोम हजार का कुबीत पुक्तु। मिनु नोले मेकोमी आं कली ब्वाक्कु शोक्पाइक्ती। मेको ब्वाक्कु दिम्ला सम्म जाक्शो बाक्त। कुबीत का ०.५ मिटर बाक्ब। इजीकीएल ४०:३ 4 मिनु लेंशा अर्को हजार का कुबीत पुक्तु। मिनु मेको ब्वाक्कुम शोक्पाइक्ती। मेको ब्वाक्कु पोक्च सम्म जाक्शो बाक्त। मिनु मेकोम लेंशा अर्को हजार का कुबीत पुक्तु। मिनु मेकोमी आं कली मेको ब्वाक्कुम शोक्पाइक्ती। मेको ब्वाक्कु क्रातो सम्म जाक्शो बाक्त। 5 मिनु मेकोम लेंशा अर्को हजार का कुबीत पुक्तु। मिनु गो मेको खोला शोक्ने मचबु। मारदे हना ब्वाक्कु बारशो बाक्त। मेको दोम्ली ग्यारचा डा दुमशो बाक्त हना यो, शोक्ने मचाप्चा डा बाक्त। 6 मिनु मेकोम आं कली “ए मुर, गे एको तवी” देंत। मिनु लेंशा खोला आ नेक्था लेप्पाइक्ती। 7 मिनु गो मेकेर जाक्डानु, मेको समुन्द्र आ ओंथ हांबु नु आइक्ची हांबु नेल्ल शुश रवा तातामी। 8 मिनु मेकोम आं कली “एको ब्वाक्कु पूर्ब रागी गे लशा, उइ अराबाह गे लशो बाक्ब। मिनु मेको हिकसी समुन्द्रम ब्वांइसीब। मिनु मेकेर डा ब्वाक्कु रिमशो दुम्ब। 9 मेको ब्वाक्कु शाइक्तीकेमी शुश खाल डा जन्तु बाक्नीम। मेकेर हिकने मचाप्चा डा पा, डांइ बाक्नीम। मारदे हना मेको ब्वाक्कु मेकेर जाक्दीशो बाक्ब। मेको ब्वाक्कु रिमशो दुम्तीके मेकेर मारेइ मारेइ ब्रोंइनीम। प्रस्थान १५:२३ 10 मेको आ एर ओंथ नेल्लेम ग्याइल आप्बपुकी राप्नीम। एन-गेदी रे एन-एग्लै सम्म ग्याइल आप्तीक दुम्नीम। मेकेर ठेयब समुन्द्र खोदेशो पा शुश खाल डा डांइ बाक्नीम। 11 तन्न मेको समुन्द्र आ सिम नु हिलो बाक्तीके डा ब्वाक्कु रिमशो मदुम्ब। मेको हिकसी गुंडचा कली बाक्नीम। 12 मेको समुन्द्र आ एर ओंथ नेल्ल शुश खाल डा फल फुल रवा वानीम। मेको आन सफा मसोव्रनीम। मेको आन फल गेनायो मनुप्नीम। मेको महिना महिनाम सिन्नीम। मारदे हना मेको आन कली माल्लशो ब्वाक्कु परमप्रभु यावे आ बाक्तीक रे लशो बाक्ब। मेको आन फल रूचा कली नु मेको आन सफा सापाइक्चा कली दुम्नीम” देंत। यसैया ३२:१५; प्रकाश २२:२

इस्त्राएल रागी डा सांद

13 मिनु परमप्रभु, परमप्रभु यावेमी “इस्त्राएल डा सांद आगा डा १२ थर आन थेरशो रू दोपा योक्चा माल्नीनी देशा हना, योसेफ कली भाग निक्शी गेचा माल्नीनी। उत्पत्ती ४८:५; यहोसु १७:१७ 14 मेको लीशो रागी इन दातेम उइक्थ उइक्थ पा योक्चा माल्नीनी। मिनु गो इन किकी पिपी आन कली गेनुड, दे कसम जतीके मेको रागी इन शोंप दुम्ब। उत्पत्ती १२:७

15 मेको रागी आ सांद ते बाक्चा माल्नीम देशा हना, उत्तर गे डा सांद ठेयब समुन्द्र रे हेथ्लोन डा लां, लेबो-हमाथ रे सेदाद सम्म दुमचा माल्ब। गन्ती ३४:२-१२ 16 मेको सांद बेरोथाह नु सिब्रैम सम्म दुमचा माल्ब। मेको दमस्कस नु हमाथ आस दातेम बाक्शो बाक्नीस। मेको सांद हासेर-हात्तीकोन सम्म जाक्दीप्ब। मेको हौरान डा सांद आ नेक्था बाक्ब। 17 मिनु ठेयब समुन्द्र रे हासर-एनोन सम्म बाक्ब। मेको दमस्कस आ उत्तर गे बाक्ब। मेको आ उत्तर गे हमाथ आ सांद बाक्ब। मेको उत्तर डा सांद बाक्ब।

18 पूर्ब गे डा सांद हौरान नु दमस्कस आस दातेम, यर्दन खोला आ नेक्था गिलाद नु इस्त्राएल रागी आस दातेमी बाक्ब। मेको पूर्ब डा समुन्द्र नु तामार सम्म बाक्ब। मेको पूर्ब डा सांद बाक्ब।

19 दक्खिन गे डा सांद तामार रे मेरीबाथ-कादेश डा ब्वाक्कु बाक्तीके सम्म दुमचा माल्ब। मिनु मेकेर रे इजीप्त डा खोल्सा रे ठेयब समुन्द्र सम्म जाक्दीप्ब। मेको दक्खिन डा सांद बाक्ब। गन्ती २०:१३; गन्ती ३४:५

20 पच्छिम गे डा सांद ठेयब समुन्द्र लेबो-हमाथ आ डोंइती सम्म दुमचा माल्ब। मेको पच्छिम डा सांद बाक्ब।

21 गे मेको रागी इन दातेम इस्त्राएल आ थर डा मुर आन कली योक्शा गेचा माल्नीनी। 22 गेपुकीम आंम इन थेरशो रू वोइक्चा माल्नीनी। इन दातेमी बाक्ब तमी तौ थिशो अर्को रागी डा मुर आन कली यो आन भाग योक्शा, गेचा माल्नीनी। गेपुकीम मेको आन कली इस्त्राएल रागीम जरमेशो आंम रागी डा मुर खोदेशो मिमचा माल्नीनी। मिनु गेपुकी

नु इस्राएल आ थर आन दातेम मेकोपुकीम आन थेरशो रू तचा माल्नीम। लेवी १९:३३-३४ 23 मेको अर्को रागी डा मुरपुकी तेको थर डा बाक्तीकेम बाक्नीमी, मेकेर मेको आन कली आन थेरशो रू गेचा माल्नीनी” दे परमप्रभु, परमप्रभु यावेम देंत।

48

इस्राएली आन कली रागी योक्शो

1 मिनू “मेको आन थर आन नें मार बाक्नीम देंशा हना, उत्तर गे डा सांद हेथ्लोन डा लां रे पा लेबो-हमाथ रे हासर-एनोन सम्म बाक्ब। हासर-एनान दमस्कस आ सांदम बाक्ब। मिनू हमाथ मेको आ उत्तर गे बाक्ब। मिनू मेको पूर्व रे पच्छिम सम्म बाक्ब। मेको दान आ थेरशो रू दुम्ब। इजीकीएल ४७:१५-१७ 2 मिनू पूर्व रे पच्छिम दान आ सांद थिशो रू आशेर आ थेरशो रू दुम्ब। 3 मिनू पूर्व रे पच्छिम आशेर आ सांद थिशो रू नाप्ताली आ थेरशो रू दुम्ब। 4 मिनू पूर्व रे पच्छिम नाप्ताली आ सांद थिशो रू मनस्से आ थेरशो रू दुम्ब। 5 मिनू पूर्व रे पच्छिम मनस्से आ सांद थिशो रू एफ्राइम आ थेरशो रू दुम्ब। 6 मिनू पूर्व रे पच्छिम एफ्राइम आ सांद थिशो रू रूबेन आ थेरशो रू दुम्ब। 7 मिनू पूर्व रे पच्छिम रूबेन आ सांद थिशो रू यहूदा आ थेरशो रू दुम्ब।

8 मिनू पूर्व रे पच्छिम गे यहूदा आ सांद सम्म थिशो भाग का तिल्चा माल्नीनी। मेको २५ हजार कुबीत ब्रेमशो नु आ लाइशो पूर्व रे पच्छिम सम्म थर थर आन कली गेशो थेरशो रू खोदेंशो लाइशो दुम्चा माल्ब। मिनू परमप्रभु यावे आ बाक्तीक मेको आ दातेम दुम्चा माल्ब। कुबीत का ०.५ मिटर बाक्ब। इजीकीएल ४५:१-८ 9 परमप्रभु यावे कली गेशो तिल्शो भाग चहिं २५ हजार कुबीत लाइशो नु २० हजार कुबीत ब्रेमशो दुम्चा माल्ब। 10 मिनू मेको परमप्रभु यावे कली गेशो तिल्शो भाग चढेब आन कली दुम्ब। मेको भाग उत्तर गे २५ हजार कुबीत लाइशो, पच्छिम गे १० हजार कुबीत ब्रेमशो, पूर्व गे १० हजार कुबीत ब्रेमशो नु दक्खिन गे २५ हजार कुबीत लाइशो दुम्चा माल्ब। मिनू परमप्रभु यावे आ बाक्तीक मेको आ दातेम दुम्चा माल्ब। 11 मिनू मेको परमप्रभु यावे कली चढेब आन भाग दुम्चा माल्ब। आं गेय पाइब सादोक आ चच युइ आन के दुम्ब। मेकोपुकी इस्राएली नु लेवीपुकी हेंथे गाक्तेक्म हना यो, मेकोपुकी हेंथे मगाक्थु, आं गेय पाम्तेक्म। इजीकीएल ४०:४६ 12 मिनू मेको आन कली परमप्रभु यावे कली तिल्शो रागी रे आन भाग दुम्ब। मेको आन नेल्ल क्येडा चोत्रखो बाक्तीक भाग, लेवी आन थेरशो रू थिशो बाक्ब। 13 चढेब आन थेरशो रू आ नेक्था लेवी आन थेरशो रू दुम्चा माल्ब। मेको २५ हजार कुबीत लाइशो नु २० हजार कुबीत ब्रेमशो दुम्चा माल्ब। मेको आ लाइशो नेल्ल २५ हजार कुबीत नु आ ब्रेमशो नेल्ल १० हजार कुबीत दुम्चा माल्ब। 14 मिनू मेकोपुकीमी मेको थेरशो रू लेयचा नु फाइक्चा मदुम्नीम। मेको रू नेल्ल क्येडा रिमशो बाक्ब। मिनू मेको सुइ आन कली गेने मचाप्नीम। मारदे हना मेको परमप्रभु यावे आ रू बाक्ब।

15 मिनू मेको लीशो ५ हजार कुबीत ब्रेमशो नु २५ हजार कुबीत लाइशो रू सहर कली बाक्ब। मेको मुर बाक्तीके नु सहर आ दाते डा रू दुम्चा माल्ब। 16 मेको लीशो रू उत्तर गे ४ हजार ५ सहे कुबीत, दक्खिन गे ४ हजार ५ सहे कुबीत, पूर्व गे ४ हजार ५ सहे कुबीत नु पच्छिम गे ४ हजार ५ सहे कुबीत दुम्चा माल्ब। प्रकाश २१:१६ 17 मिनू मेको सहर डा रू दुम्चा माल्ब। मिनू मेको लीशो सहर डा रू उत्तर गे सहे निक्शी ५० कुबीत, दक्खिन गे सहे निक्शी ५० कुबीत, पूर्व गे सहे निक्शी ५० कुबीत नु पच्छिम गे सहे निक्शी ५० कुबीत दुम्चा माल्ब। 18 मेको परमप्रभु यावे आ बाक्तीक आ सांद थिशा लीशो रू पूर्व गे १० हजार कुबीत नु पच्छिम गे १० हजार कुबीत दुम्चा माल्ब। मेको परमप्रभु यावे आ खिं आ का पटटी गे बाक्चा माल्ब। मेकेर सहरम गेय पाइब आन कली जचा थोत्रक लेयतीक दुम्चा माल्ब। 19 सहरम गेय पाइब इस्राएल आ थर डा मुर नेल्लेमी मेकेर बाक्शा, गेय पाइनीम। 20 गेपुकीमी तिल्शो बाक्तीक रू नेल्ल २५ हजार कुबीत ब्रेमशो नु २५ हजार कुबीत लाइशो दुम्चा माल्ब। मेको ४ पाटे दुम्ब। मेको परमप्रभु आ भाग नु सहर डा बाक्तीके बाक्ब।

21 मेको परमप्रभु यावे आ भाग नु सहर डा का पटटी गे लीत हना, सासन पाइब के दुम्चा माल्ब। मेको पूर्व गे परमप्रभु यावे कली तिल्शो २५ हजार कुबीत पूर्व डा सांद गे नु पच्छिम गे बाक्शो २५ हजार कुबीत पच्छिम डा सांद गे बाक्ब। मेको आ लाइशो थर थर आन रू रू गे लाइब। मेको सासन पाइब के दुम्ब। मिनू परमप्रभु यावे आ खिं मेको आ दातेम बाक्ब। इजीकीएल ४५:७ 22 मिनू लेवी आन रू नु सहर डा रू आन दातेमी मेको सासन पाइब आन रू बाक्ब। यहूदा नु बेन्यामीन आस दातेमी बाक्शो रू यो सासन पाइब आन के बाक्ब।

अरु थर आन थेरशो रू

23 मिनु लीशो थर आन कली पूर्व रे पच्छिम सम्म बेन्यामीन आ थेरशो रू, 24 पूर्व रे पच्छिम सम्म बेन्यामीन आ सांद थिशो सिमियोन आ थेरशो रू, 25 पूर्व रे पच्छिम सम्म सिमियोन आ सांद थिशो इस्साकार आ थेरशो रू, 26 पूर्व रे पच्छिम सम्म इस्साकार आ सांद थिशो जबूलून आ थेरशो रू, 27 पूर्व रे पच्छिम सम्म जबूलून आ सांद थिशो गाद आ थेरशो रू, 28 मिनु दक्खिन गे गाद आ थेरशो रू डा सांद तामार रे मेरीबाथ-कादेश डा ब्वाक्कु बाक्तीक सम्म नु इजीप्त डा खोल्सा आ नेक्था रे पा ठेयब समुन्द्र सम्म दुम्चा माल्ब। इजीकीएल ४७:१९ 29 गेपुकीम मेको रागी डा रू इस्राएल आ थर डा मुर आन कली आन थेरशो रू दुम्पाइश्शा योक्शा गेचा माल्नीनी। मिनु मेकोन मेको आन भाग दुम्ब” दे परमप्रभु, परमप्रभु यावेमी देंत।

यरूसलेम सहर डा ठेयब लाप्चो

30 परमप्रभु यावेमी “सहर डा गारो रे लाङगा गूतीक ते दुम्चा माल्नीम देंशा हना, उत्तर गे डा गारो पुक्शा ४ हजार ५ सहे कुबीत लाइश्शो दुम्चा माल्ब। कुबीत का ०.५ मिटर बाक्ब। 31 ठेयब लाप्चो आन नें इस्राएल आ थर आन नें खोदेशो दुम्चा माल्नीम। उत्तर गे डा गारो डा ठेयब लाप्चो सां, रूबेन आ लाप्चो, यहूदा आ लाप्चो नु लेवी आ लाप्चो दुम्नीम। 32 मिनु पूर्व गे डा गारो ४ हजार ५ सहे कुबीत लाइश्शो दुम्चा माल्ब। पूर्व गे डा गारो डा ठेयब लाप्चो सां, योसेफ आ लाप्चो, बेन्यामीन आ लाप्चो नु दान आ लाप्चो दुम्नीम। 33 मेको दक्खिन गे डा गारो ४ हजार ५ सहे कुबीत लाइश्शो दुम्चा माल्ब। दक्खिन गे डा गारो डा ठेयब लाप्चो सां, सिमियोन आ लाप्चो, इस्साकार आ लाप्चो नु जबूलून आ लाप्चो दुम्नीम। 34 मेको पच्छिम गे डा गारो ४ हजार ५ सहे कुबीत लाइश्शो दुम्चा माल्ब। पच्छिम गे डा गारो डा ठेयब लाप्चो सां, गाद आ लाप्चो, आशेर आ लाप्चो नु नाप्ताली आ लाप्चो दुम्नीम। 35 मिनु सहर आ एर ओंथ हिरशो गारो १८ हजार कुबीत दुम्ब। मेना रे मेको सहर आ नें ‘परमप्रभु यावे मेकेर बाक्ब’ देंशो नें वोइक्चा माल्ब” दे परमप्रभु यावेमी देंत। इजीकीएल ४३:७; यसैया ६०:१४; प्रकाश २१:३

दानीएल

ब्रेक्ब मुर: दानीएल यरूसलेम सहरम जरमेशो बाक्त। मेको रिम्शो पिप योसीयाहम सासन पवा ना कोलत। दानीएलमी परमप्रभु यावे आ लोव्र पाइब येरमीया नु सेफन्याह आस लोव्र नेशो बाक्त। मेको २० बर्स खोदेशो दुम्मेनु, आ वारच नु ग्याइशशा बेबीलोन रागी लाइक्चा पुंडसीशो बाक्त। माइत किताबपुकीमी एको किताब ब्रेक्ब दानीएल बाक्ब, दे नेल्लेम ब्रेक्शो बाक्नीम। एको किताब डा लोव्र कोइ हिबू नु कोइ आरामेइक लोव्रमी ब्रेक्शो बाक्ब। दानीएलमी मुर कली ब्रेक्पाइशशो बाक्म कों आंमा ब्रेक्शो बाक्म मेको मतुंडसीब।

गेना ब्रेक्शो: दानीएल नेबुकदनेसर पिप दुम्शो ६०४-५६१ बि. सी. रे कोरेस पिप दुम्शो बर्स सां सम्म बाक्शो बाक्त। मेको बेबीलोनम बाक्ची ना ७० बर्स खोदेशो दुम्शो बाक्त। एको किताब ६०६-५३५ बि. सी.म ब्रेक्शो बाक्त।

मार ब्रेक्शो: दानीएलमी पिप आन राज्य नु परमप्रभु यावे आ राज्य कोंइचा कली ब्रेक्शो बाक्त।

परमप्रभु यावेमी सु सु कली रागी कली सासन पाइब सेल्चा दाक्बा, मेको पाइब।

१. दानीएल नु आ वारच आन पबर्म लोव्र बाक्ब। दानीएल १:-६:-

२. दानीएल कली कोंइशो आ पबर्म लोव्र बाक्ब। दानीएल ७:-१२:-

दानीएल बेबीलोनम बाक्शो

१ यहूदा रागीमी येहो-याकीम पिप दुम्शो बर्स सां दुम्शो बाक्माक्त। मेना बेबीलोन डा पिप नेबुकदनेसर जाक्शा, यरूसलेम सहर कली पुम्ताक्मे। २राजा २४:१-२ २ मिनु परमप्रभुमी यहूदा डा पिप येहो-याकीम कली ब्रुपाइक्तु। मिनु परमप्रभुमी आ खिं डा बोस का निक्शी यो मेको कली गेप्टु। मिनु नेबुकदनेसरमी मेको बोसपुकी शिनार रागीमी लाइशशा, आ देवता आ खिं डा मार मार शोंप वोइक्तीके कोठाम वोइक्तु। शिनार रागी बेबीलोन रागी बाक्ब। उत्पत्ती ११:२ ३ मिनु पिपमी आ दरवार डा ठेयब गेय पाइब अशपेनास कली “ग्याइशशा लाइक्चा पुंडसीशो इस्त्राएली, पिप आ खिं डा नु ठेयब मुर आन खिं डा मुर आन कली योव्रशा एक चाक्को। २राजा २०:१८ ४ गे ठिटा वोंइश मुर, मारेइ मदुम्शो रिम्शो रां पाइशशो, दारशो, शुश निप्स पाइशशो, जोक्ब तुइक्ब, रुप्तीके थुं पाइशशो नु पिप आ दरवारमी गेय पने चाप्ब आन कली योव्रडो” दे अरेवा बाक्त। मिनु मेको आन कली कल्दी आन ब्रेक्स नु लोव्र शेंचा माल्बाक्माक्त। ५ मिनु पिपमी “मेको आन कली पिप आ खिं डा जचा थोव्रक नु अङ्गुर शांबु गेचा माल्ब” दे अरेशो बाक्माक्त। मिनु मेको आन कली बर्स सां सम्म शेशा, पिप आ खिंम गेय पपाइक्चा कली चाक्चा माल्बाक्माक्त। ६ मिनु मेको योव्रचा पुंडसीशो आन दातेमी यहूदा आ थर डा दानीएल, हनान्याह, मीशाएल नु अजारयाह बाक्तेक्म। ७ मिनु दरवार डा ठेयब गेय पाइबमी मेको आन नें फाइशशा, दानीएल कली बेल्लत-शजर, हनान्याह कली शद्रक, मीशाएल कली मेशक नु अजारयाह कली अबेद-नेगो वोदा बाक्त।

८ मिनु दानीएलमी पिप आ गेशो जचा नु तूचा थोव्रक जशा तूशा आंम कली ग्रांग्रा दिशो मसेल्सीनुड, दे मिम्ता बाक्त। मोपतीके दानीएलमी पिप आ ठेयब गेय पाइब कली “आं कली मोदेशो जचा तूचा गेशा, ग्रांग्रा दिशो दुम्चा मगेयीनी” दे पुंडतु। लेवी ११:- ९ मिनु परमप्रभुमी पिप आ ठेयब गेय पाइब आ थुंमी दानीएल कली शिशी पा दाक्तीकेमी प्रिंदा बाक्त। उत्पत्ती ३९:२१ १० मिनु पिप आ ठेयब गेय पाइबमी दानीएल कली “गो आं प्रभु, आं पिप नु शुश हिंनुड। मेकोमी इन कली मार मार जचा तूचा थोव्रक गेचा, दे अरेशो बाक्त। मेकोमी इन वारच क्येडा इन कली गेयशो ताप्टु हना, आं कली साइक्ब” देंत। ११ मिनु नोले दानीएलमी पिपमी आ दरवार डा ठेयब गेय पाइब आन कली कोव्रब मुर कली, आंम आ पबर्म नु हनान्याह, मीशाएल नु अजारयाह आन पबर्म लोव्र पाप्टु। १२ मिनु दानीएलमी “गे इन गेय पाइब आंइ कली १० नाक्त सम्म कोव्रडीन। जचा कली गिग खाइ नु तूचा कली ब्वाक्कु ला गेकी। १३ मिनु नोले गो आंइ कली पिप आ गेशो, आ खिं डा जचा थोव्रक जाइब तूबपुकी नु थाप्शा कोव्रकी। मिनु दोदेशो ताइनीनी मोदेशो पाइक्की” दे माइक्तु। १४ मिनु कोव्रबमी मेको लोव्र बिशशा, १० नाक्त सम्म आन देशो खोदेशो पाप्टु। १५ मिनु १० नाक्त जाक्दीम्मेनु, पिप आ गेशो जचा थोव्रक जाइब ठिटा नेल्ल आन क्येडा दानीएल नु आ वारच रिम्शो नु दोम्शो तांइसाक्म। १६ मिनु कोव्रबमी मेको कोव्रबमी मेको आन कली गेचा देशो पिप आ जचा तूचा थोव्रक प्रोंइशा, गिग खाइ ला गेम्तीमी। १७ मिनु परमप्रभुमी मेको ४ जना आन कली नेल्ल ब्रेक्तीकेमी नु तुइक्तीकेमी जोक्ब तुइक्ब सेला बाक्त। मिनु दानीएल कली मार पचा, दे ततीके नु डोमु रुप्तीक थुं यो गेप्टु। इजीकीएल २८:३

दानीएल नु आ वारच योव्रसीशो

18 मिनु पिप आ देशो नाक्ती आ दरवार डा ठेयब गेय पाइबमी मेको ठिटा नेल्ल आन कली पिप नेबुकदनेसर आ डोंइती राप्पाइक्तीमी। 19 मिनु पिपमी मेकोपुकी नु लोव्र पाप्तु। मिनु दानीएल, हनान्याह, मीशाएल नु अजारयाह खोदेशो जोक्ब तुइक्ब आ रागीमी अरु सुइ मथिद। मोपतीके मेको ४ जना पिप आ दरवारम गेय पचा कली योव्रचा पुंडसाकम। 20 मिनु पिपमी आ माल्लशो रुप्तीके नु तुइक्तीके आ पबर्म हिल्लो पवानु, आ रागी डा जादू नु मन्तर तन्तर पाइब नेल्ल आन क्येडा मेको ४ जना आन कली १० खेयप शुश जोक्ब तुइक्ब ताप्तु। 21 मिनु दानीएलमी पिप कोरेस आ सासन पशो आ डोंइती डा बर्स सम्म मेकेर गेय पाप्तु। एज्रा १:१

2

पिप नेबुकदनेसरमी डोमु तशो

1 मिनु पिप नेबुकदनेसर आ सासन पशो बर्स निक्शी जाक्दीम्मेनु, मेको पिपमी डोमु का तवा बाक्त। मिनु डोमु तशा नोले मेको मार पड, दो पड दुम्शा, आं थुं ग्येत्थ लुकच दुम्शा, लेंशा इप्ने मचबा बाक्त। 2 मिनु मेको पिपमी आ डोमु मार बाक्मे, दे तुइक्चा कली “जादू, मन्तर तन्तर पाइब, टुना मुना पाइब नु सोरुल कोव्रब कल्दी आन कली चाक्चा माल्नीनी” दे हुकुम पाप्तु। मिनु मेकोपुकी पिप आ डोंइती जाक्शा राप्तेक्म। यसैया ४७:१२-१३ 3 मिनु पिपमी मेको आन कली “गो डोमु का ताता। मेको तशा, आं थुं ग्येत्थ लुकच दुम्त” देंत। 4 मिनु सोरुल कोव्रब कल्दीपुकीमी आरामेइक लोव्र पा पिप कली “पिप, शुश ब्रोंइशा बाक्कीन। इन वाइल आन कली इन तशो डोमु शोव्रडीन। मिनु गो, इन वाइलपुकीमी, मेको रे मार रुम्सीबा मेको शेंनीकी” देंतेक्म। 5 मिनु पिपमी सोरुल कोव्रब कल्दी आन कली “गो मेको आ पबर्म हुकुम पाता। गेपुकीमी आं डोमु नु मेको रे मार रुम्सीबा, मेको शोव्रने मचाप्तीनी हना, इन गुइ खोइल खोइश्शा, साइक्नन्नी। मिनु इन खिं प्रेशशा गेनन्नी। 6 तन्न आं तशो डोमु नु मेको रे मार रुम्सीबा, मेको शोव्रतीनी हना, गो इन कली मार मार रिम्शो थोव्रक, इनाम नु ठेयब मान गेनुड। मोपतीके आं तशो डोमु शोव्रशा, मेको रे मार रुम्सीबा, शेंदीनी” दे माइक्तीमी। 7 मिनु मेकोपुकीमी लेंशा पिप कली “पिपमी इन वाइल, आंइ कली डोंइती इन तशो डोमु शोव्रडीने। मिनु नोले गोपुकीमी मेको रे मार रुम्सीबा इन कली शेंनीकी” देंतेक्म। 8 मिनु पिपमी “गो थमा पा तुइक्नुड, गेपुकीमी आं कली क्योल्नीनी। मारदे हना इन कली साइक्तीक हुकुम थमा बाक्ब। 9 गेपुकीमी आं कली आं तशो डोमु शोव्रने मचाप्तीनी हना, गे साइक्चा पुंडसीनीनी। गे आं कली जोल पा, शेंखु पतीक आ पबर्म गारशो बाक्नीनी। मोपतीके आं कली आं तशो डोमु मशोव्रतीनी हना, आ अर्थ मार बाक्बा, दे शेंने मचाप्तीनी, दे तुइक्नुड” दे माइक्तीमी। 10 मिनु सोरुल कोव्रब कल्दीपुकीमी पिप कली “एको रागी नेल्लेमी पिप आ हिल्लो पशो लोव्र शोव्रने चाप्ब सुइ मबाक्नीम। ठेयब नु सक्ति पाइश्शो पिपमी जादू, मन्तर तन्तर पाइब नु सोरुल कोव्रब कल्दी आन कली सुइम मोदेशो लोव्र गेनायो हिल्लो मपाम। 11 पिपमी हिल्लो पशो लोव्र सुइमी शोव्रने मचाप्चा डा बाक्ब। देवी देवतामी ला तुइक्पाइक्ने चाप्नीम। तन्न मेको देवी देवता मुर आन दातेमी मबाक्नीम” देंतेक्म। 12 मिनु मेको लोव्र नेंशा, पिप शुश गाइश्शा, बेबीलोन रागीम बाक्ब जोक्ब तुइक्ब नेल्ल आन कली साइक्चा नम, दे हुकुम पाप्तु। 13 मिनु पिपमी जोक्ब तुइक्ब मुर नेल्ल आन कली साइक्चा माल्ब देशो लोव्र ब्रेक्शा गुंडताक्व। मिनु मेको देशो खोदेशो पा दानीएल नु आ वारच आन कली यो साइक्चा कली माल्तेक्म।

दानीएल नु आ वारच साइक्चशो

14 मिनु दानीएलमी मेको नेंशा, शुश मिम्शा, पिप आ साइक्तीक गेय पाइब अरयोक् नु लोव्र पाप्तु। मेको बेबीलोन डा जोक्ब तुइक्ब मुर आन कली साइक्चा कली लशो बाक्त। दानीएल १:२० 15 मिनु दानीएलमी मेको पिप आ गेय पाइब कली “मारदे पिप आ हुकुम मोदेशो रीब पा पचा माल्नीमी? दे हिल्लो पाप्तु। मिनु अरयोक्मी दानीएल कली नेल्ल शेंताक्व। 16 मिनु मेको तुइक्ता नोले दानीएल पिप आ बाक्तीकेम लशा ‘इच्का नाक्त रिम्दीन। मिनु गो मेको डोमु नु मेको आ अर्थ इन कली शोव्रनन्नी’ ” दे पुंडतु।

दानीएल नु आ वारचपुकी

17 मिनु नोले दानीएल आ खिं लशा, आ वारच हनान्याह, मीशाएल नु अजारयाह आन कली मेको लोव्र नेंपाइक्तु। 18 दानीएलमी मेको आन कली “गोपुकी नु बेबीलोन डा जोक्ब तुइक्ब नेल्ल साइक्चा मपुंडसीचा कली स्वर्ग डा परमप्रभु कली मेको खुइश्शो डोमु तुइक्पाइसीचा कली आ शिशी पुंडय” देंत। 19 मिनु मेको नाक्दो परमप्रभुमी दानीएल

कली कोइतीकेमी मेको खुइशो डोमु नु आ अर्थ कोइताक्व। मिनु दानीएलमी स्वर्ग डा परमप्रभु कली 20 “परमप्रभु, इन नें गेना हना यो ठेयब बाक्ब। मारदे हना सक्ति नु जोक्ब तुइक्ब थुं इन केन बाक्ब। 21 गे हिउद नु बर्खा फाइक्ब, पिप आन कली वोइक्ब नु तिल्ल बाक्नीनी। गे जोक्ब तुइक्ब आन कली तुइक्तीक थुं गेनीनी। मिनु रुप्व थुं पाइशो मुर आन कली जोक्तीक थुं गेनीनी। दानीएल ४:१४, २२, २९ 22 गे ठेयब नु खुइशो लोत्र तुइक्पाइक्नीनी। छिडछिडम बाक्शो मारेइ मारेइ नेल्ल तुइक्नीनी। मारदे हना गे छेडछेडम बाक्नीनी। 23 आं किकी पिपी आन परमप्रभु, गो इन कली ‘गे रिम्शो पाइब बाक्नीनी। गे नेल्ल क्येडा ठेयब बाक्नीनी। मारदे हना गे आं कली तुइक्तीक थुं नु सक्ति गेतीनी। मिनु आंइ पुंइशो नेल्ल गेतीनी। पिप आ तुइक्चा माल्लो नेल्ल आंइ कली तुइक्पाइक्तीनी’ ” दे परमप्रभु कली ठेयब सेल्शा, देंत।

दानीएल पिप आ बाक्तीक लशो

24 मिनु दानीएल बेबीलोन रागी डा जोक्ब तुइक्ब मुर नेल्ल आन कली साइक्चा, दे योत्रचा पुंइसीशो मुर अरयोक् आ बाक्तीकेमी लशा, मेको कली “बेबीलोन रागी डा जोक्ब तुइक्ब मुर आन कली मसतीन। आं कली पिप आ डोंइती चाक्दीय्यीनी। मिनु गो पिप कली आ डोमु शोव्रनुड। मिनु मेको रे मार रुम्सीबा नेल्ल शेंनुड” देंत। 25 मिनु अरयोक्मी दानीएल कली दोरोर पा पिप आ डोंइती चाक्दीशशा, पिप कली “गो यहूदा रागी रे ग्याइशशा चाक्चा पुंइसीशो मुर आन दातेमी इन डोमु आ अर्थ शोव्रने चाप्ब मुर का थित्ता” देंत। 26 मिनु पिपमी बेल्ल-शजर नें वोइशो दानीएल कली “गे आं तशो डोमु शोव्रशा, मेको आ अर्थ मार बाक्बा मेको शेंने चाप्नेवे?” दे हिल्लो पाप्तु। 27 मिनु दानीएलमी पिप कली “पिप, इन हिल्लो पशो खुइशो लोत्र जोक्ब तुइक्ब, मन्तर तन्तर पाइब जादू नु चिन्ड आ अर्थ तुइक्ब सुइमी यो देंने मचाप्नीम। 28 तन्न स्वर्गमी परमप्रभु का बाक्ब। मेकोमी खुइशो लोत्र कोइब। मिनु मेकोमी पिप नेबुकदनेसर, इन कली रागी नुप्ची ना मार दुम्बा, दे कोइशो बाक्ब। मिनु इन इप्ची ना तशो डोमु मार बाक्त देंशा हना, उत्पत्ती ४१:१६ 29 गे इन इप्ची ना नोले ‘मार दुम्बा?’ दे मिम्ताक्नी। मिनु नोले मार दुम्बा, दे कोइबमी मेको इन कली तुइक्पाइक्तु। 30 गो मुर नेल्ल आन क्येडा शुश रुप्ने मचाप्नुड। तन्न इन डोमु आ अर्थ तुइक्पाइक्चा नु इन थुं डा लोत्र रुप्पाइक्चा कली परमप्रभुमी मेको आं कली तुइक्पाइक्शो बाक्त। उत्पत्ती ४१:३९

पिप आ तशो डोमु

31 हजुर, गे कोव्रशा बाक्नीनु, इन डोंइती ठेयब मूर्ति का राप्शो ताइतीनी। मेको मूर्ति थम ठेयब नु थाम्पान टल्केशो बाक्त। मिनु इन डोंइती शुश हिंचा डा मूर्ति का राप्शो ताइतीनी। 32 मेको आ पिया क्येख सुन के बाक्त। आ कुचु नु गुइ चांदी के नु आ कोव्रज नु फिला कांसा के बाक्तेक्म। 33 मेको आ पोक्च फलाम के बाक्त। मिनु आ खोइली फलाम नु खप ब्वांइसीशो बाक्त। 34 गे मेको कली कोव्रशा बाक्नीनु, फुल्लु का यित। तन्न मेको फुल्लु मुर आन गुइम मख्रोइशो बाक्त। मेकोमी मूर्ति आ फलाम नु खप ब्वांइसीशो खोइलीमी ख्राप्तु। मिनु मेको मूर्ति कली प्रोल्शा, रोब चिब सेल्लु 35 मिनु मेको फलाम, खप, कांसा, चांदी नु सुन नेल्ल ब्रोल चिल दुम्तेक्म। मिनु फशेमी खला डा भूस हुरशा लाइशो खोदेशो पा मारेइ मवोइक्थु, ग्यौ फिक्शा योल्ताक्व। मिनु मेको मूर्ति कली ख्रशो फुल्लु बारना बारन लशा, ठेयब डांडा दुम्शा, रागी नेल्ल ब्रीत।

डोमु आ अर्थ

36 इन तशो डोमु एकोन बाक्त। मुल पिप इन कली मेको डोमु आ अर्थ शेंनुड। 37 हजुर, गे पिप आन पिप बाक्नीनी। स्वर्ग डा परमप्रभुमी इन कली राज्य, सक्ति, अधिकार नु शुश मान गेशो बाक्ब। इजीकीएल २६:७ 38 मिनु मेकोमी तेइ तेइ बाक्ब मुर, ब्वाकी डा जन्तु नु सरीडम बेरब चिक्ब नेल्ल आन कली इन कली गेशो बाक्ब। मिनु गे मेको नेल्ल आन कली सासन पाइनीनी। गे मेको मूर्ति आ सुन के पिया बाक्नीनी। येरमीया २७:६; येरमीया २८:१४ 39 मिनु इन नोले इन क्येडा ग्युम्शो राज्य का जाक्ब। मिनु मेको आ नोले डा अरु कांसा के खोदेशो राज्य का जाक्ब। मिनु मेकोमी रागी नेल्ल आन कली अधिकार पाइब। 40 मिनु मेको आ नोले फलाम खोदेशो बोल्यो अर्को राज्य का जाक्ब। दोपा फलाममी मारेइ मारेइ रोबल चिबल सेल्बा, मोपान मेको राज्यमी अर्को राज्य नेल्ल आन कली ब्रोले चीले पा तेइ तेइ फ्राइब। 41 मिनु इन तशो फलाम नु खप ब्वांइसीशो खोइली नु ब्रेचोपुकी खोदेशो पा ब्राशो राज्य का यो जाक्ब। तन्न मेको राज्य फलाम खोदेशो इक्का बोल्यो बाक्ब। मेको फलाम खप ब्वांइसीशो बाक्त हना यो, मेको फलाम खोदेशो पा इक्का बोल्यो बाक्ब। 42 मिनु खोइली डा ब्रेचोपुकी फलाम नु खप ब्वांइसीशो बुद पा मेको राज्य सक्ति पाइशो बोल्यो नु सक्ति मपाइशो बाक्ब। 43 इन तशो फलाम नु खप ब्वांइसीशो खोदेशो पा मेको राज्य डा मुरपुकी ग्युंवे पा

बवांइसीनीम। मिनु फलाम नु खप मगारशो बुद पा मेको राज्य यो का दुम्शा, लीने मचापब। 44 मेको पिप आन पालामी स्वर्ग डा परमप्रभुमी अर्को राज्य का सेल्ब। मेको राज्य गेनायो ब्रोल चिल मदुम्ब। मेको राज्य डा मुर खाल का डा बाक्नीम। मेकोमी अरु राज्य नेल्ल आन कली रोब चिब पा थुम्पाइक्ब। तन्न मेको आ राज्य गेना हना यो लीब। दानीएल १४:२७; यसैया ९:६; १कोरिन्थी १५:२४; प्रकाश ११:१५ 45 मिनु गे दोदेशो पा मुरुमी मखोइक्थु डांडा रे फुल्लु का यिशो ताइतीनी। मिनु मेकोम फलाम, कांसा, खप चांदी नु सुन नेल्ल कली रोबल चिबल पोक्गा, मोदेशो पा ठेयब परमप्रभुमी ‘नोले मार दुम्बा’ दे पिप, इन कली कोंइशो बाक्ब। एको डोमु नु आ अर्थ यो थमा बाक्ब” देत।

दानीएलमी मान तशो

46 मिनु पिप नेबुकदनेसरमी खुम्की पा दानीएल आ डोंइती बाप्शा, मेको कली ठेयब सेल्लु। मिनु “दानीएल कली अन्न नु धूप चढ़ेचा” दे हुकुम पाप्तु। 47 मिनु पिपमी दानीएल कली “थमान, इन परमप्रभु देवी देवता आन परमप्रभु नु पिप आन परमप्रभु बाक्ब। मिनु खुइशो लोत्र तुइक्पाइक्ब बाक्ब। मोपतीके गे एको खुइशो लोत्र रुप्पाइक्ने चाप्तीनी” देत। दानीएल ३:२९; यहोसु २:११; भजन संग्रह ८६:८; यसैया ४२:८ 48 मिनु पिपमी दानीएल आ मान बारपाइक्तु। मिनु शुश शोंप गेप्तु। मिनु बेबीलोन रागी नेल्ल कली हुकुम पाइब नु जोक्ब तुइक्ब मुर नेल्ल आन ठेयब मुर सेल्लु। 49 मिनु दानीएलमी “शद्रक, मेशक नु अबेद-नेगो आन कली बेबीलोन रागी डा सासन पतीक गेय गेचा” दे पिप नु लोत्र पा पुंडतु। दानीएल चहिं पिप आ दरवारमीन बाक्त। दानीएल ३:१२

3

नेबुकदनेसर आ सुन के मूर्ति

1 मिनु पिप नेबुकदनेसरमी सुन के मूर्ति का सेल्लु। मेको मूर्ति ६० कुबीत ग्येत्थ लाइशो नु ६ कुबीत पित्थ ब्रेम्शो बाक्त। मिनु मेको कली बेबीलोन डा दुरा माइशो दिंममी राप्पाइशो वोइक्तु। कुबीत का आधा मिटर खोदेशो बाक्ब। 2 मिनु पिप नेबुकदनेसरमी मेको मूर्ति सेल्ले थुम्शा, पूजा गोतीके नाक्त मानेचा कली पारसी रागी डा हुकुम पाइब नेल्ल, अर्ती गेब, क्येट कोत्रशा हिक्ब, निसाफ पाइब, लल पिया आन ठेयब मुर नु सरकार डा अधिकार ताइब नेल्ल आन कली ब्रेत्ताक्व। 3 मिनु मेको पारसी रागी डा हुकुम पाइब नेल्ल, अर्ती गेब, क्येट कोत्रशा हिक्ब, निसाफ पाइब, लल पिया आन ठेयब मुर नु सरकार डा अधिकार ताइब नेल्ल पिप नेबुकदनेसर आ राप्पाइशो मूर्ति कली पूजा गोतीक नाक्ती बुक्तेक्म। मिनु मेकोपुकी मेको मूर्ति आ डोंइती राप्शा बाक्मानु, 4 लोत्र पाइब मुर कामी ठेयब सेंदा पा “नेनीन, जात जात डा, रागी रागी डा नु आंम आंम लोत्र पाइब मुर नेल्ल, इन कली अरेतीके लोत्र का बाक्ब। 5 गे गेव, मुराली, ठेयब नु आइक्च तार पाइशो नु मार मार ताप्तीक ताप्शो नेंनीनु, पिप नेबुकदनेसरमी राप्पाइशो सुन के मूर्ति आ डोंइती खुम्की पा बाप्शा, सेउ पचा माल्नीनी। 6 मिनु सु सुमी मोदेशो मपाइनीमी, मेको ठेयब मी ब्रतीकेमी हुम्चा पुंडसीनीम” दे ठेयब सेंदामी तुइक्पाइशो देत। 7 मोपतीके मुर नेल्लेमी गेव, मुराली, तार पाइशो ठेयब, आइक्च नु मार मार ताप्तीके ताप्शो नेन्मे चोटीन नेबुकदनेसर आ राप्पाइशो सुन के मूर्ति आ डोंइती जात जात डा, रागी रागी डा नु आंम आंम लोत्र पाइब मुर नेल्लेमी खुम्की पा बाप्शा सेउ पाम्तेक्म।

यहूदी आन कली दोस गेशो

8 मिनु मेना कल्दी का निक्शी पिप आ बाक्तीकेमी जाक्शा, यहूदी आन पबंम लोत्र पा मेको आन कली दोस गेम्तेक्म। 9 मिनु मेकोपुकीमी पिप नेबुकदनेसर कली “पिप, गे गेना हना यो ब्रोंइशा बाक्कीन। 10 हजुर, गे डोंइती ‘सुइ सुइमी गेव, मुराली, ठेयब नु आइक्च तार पाइशो नु मार मार ताप्तीक ताप्शो नेंनीनु, सुन के मूर्ति आ डोंइती खुम्की पा बाप्शा, सेउ पचा माल्नीम। दानीएल ६:१३ 11 मिनु सु सुमी खुम्की पा सेउ मपाइनीमी, मेको ठेयब मी ब्रतीकेमी हुम्चा पुंडसीनीम’ दे हुकुम पाइतीनी। 12 मिनु इन वोइशो बेबीलोन रागी कली सासन पाइब का निक्शी यहूदी बाक्नीमी। मेको आन नें शद्रक, मेशक नु अबेद-नेगो बाक्ब। मेकोपुकी इन कली काइ मटीब बाक्नीम। मिनु इन देवी देवता आन कली पूजा मपाइनीम। मिनु इन राप्पाइशो सुन के मूर्ति आ डोंइती यो खुम्की पा बाप्शा सेउ मपामे” देतेक्म। 13 मिनु मेको नेंशा, पिप नेबुकदनेसर शुश गाइशो, चुरशा “शद्रक, मेशक नु अबेद-नेगो आन कली आं डोंइती चाक्कीन” दे हुकुम पाप्तु। मिनु मेको आन कली चाक्शा, पिप आ डोंइती राप्पाइक्तेक्म। 14 मिनु नेबुकदनेसरमी मेको आन कली “शद्रक, मेशक, नु अबेद-नेगो, गेपुकीमी आं देवी देवता आन कली सेउ मपाइनीनी? मिनु आं सेल्लो सुन

के मूर्ति कली यो सेउ मपनी देशो लोव्र थमा बाक्बा? 15 गोपुकीमी मुल ग्रोव्र, मुराली, ठेयब नु आइक्च तार पाइशशो नु मार मार ताप्तीक ताप्शो नेंनीनु, आं सेल्शो मूर्ति आ डोंइती खुम्की पा बाप्शा, सेउ पाइतीनी हना, मेको इन कली रिम्शो दुम्ब। तन्न खुम्की पा बाप्शा, सेउ मपाइतीनी हना, इन कली ठेयब मी ब्रतीकेमी बो हुम्चा पुंइसीनीनी। मिनु इन कली आं गुइ रे तेको परमप्रभुम प्रोंइबाक्म?” दे माइक्तीमी। प्रस्थान ५:२; २राजा १८:३५ 16 मिनु शद्रक, मेशक नु अबेद-नेगोमी पिप कली “हजुर, पिप नेबुकदनेसर, गो मेको आ पबर्म इन कली मारेइ लोव्र पचा ममाल्नीकी। 17 गो आंइ परमप्रभु कली ठेयब सेल्नीकी। मेकोमी आंइ कली मेको ठेयब मी ब्रतीके रे प्रोंइने चाप्बा कों, मचाप्बा। तन्न इन गुइ रे प्रोनल। ब्यवस्था ४:२०; भजन संग्रह ६६:१२ 18 तन्न आंइ कली मप्रोंइतु हना यो, हजुर, इन कली एको लोव्र तुइक्पाइक्चा दाक्नीकी ‘गोपुकी इन देवी देवता आन कली सेउ मपाइनीकी। मिनु इन राप्पाइशशो सुन के मूर्ति आ डोंइती खुम्की पा मबाप्नीकी’ दैतेक्म” दे पिप कली माइक्तेक्म। प्रस्थान २०:३-५

दानीएल आ वारच मीम हुम्शो

19 मिनु मेको नेंशा नेबुकदनेसर शद्रक, मेशक नु अबेद-नेगो आन कली तशा, थाम्पान गाइशशा, आ कुल राव किक्पाइक्चु। मिनु मेकोमी “ब्रशो मी कली डोंइती क्येडा ७ खेयप नाप्शो सेल्चा माल्ब” दे हुकुम पाप्तु। 20 मिनु मेकोमी आ लडाइ पाइब आन नेल्ल क्येडा बोल्यो मुर आन कली “शद्रक, मेशक नु अबेद-नेगो आन कली फ्रेंशा, मेको ठेयब मी ब्रतीकेमी हुम्चा” दे हुकुम पाप्तु। 21 मिनु मेकोपुकीमी मेको आन कली आन फेक्शो वा नु ताकी सुन्दा फ्रेंशा, ठेयब मी ब्रतीकेमी हुम्ताक्म। 22 मारदे हना पिपमी “रीब पा पने” दे हुकुम पाप्तु। मिनु मेको मीम शद्रक, मेशक नु अबेद-नेगो आन कली हुम्थ लाइक्ब आन कली ग्नु दाक्तु। 23 मिनु मेको शद्रक, मेशक नु अबेद-नेगो सांफा फ्रेंसीशा, ठेयब मी ब्रतीकेमी दोक्तेक्म।

परमप्रभु नु मीम काथा बाक्शो

24 मिनु पिप नेबुकदनेसर थाम्पान छक लाक्शा, छुल बोक्शा, आ अर्ती गेब आन कली “गोपुकीमी मुर सां आन कली फ्रेंशा, मीम हुम्शो मनकी डा?” दे हिल्लो पाप्तु। मिनु मेकोपुकीमी “हुम्ताक्क, हजुर” देशा, लोव्र लेत्ताक्म। 25 मिनु पिपमी मेको आन कली “तन्न कोव्रडीन, मफ्रेंसीशो ४ जना मुर मी ब्रतीकेमी एर ओंथ हिरना हिरन बाक्नीम। मीम मेको आन कली मदुप्शो तांइसीनीम। मिनु का आ कुल देवी देवता आस तौ आ कुल खोदेशो तांइसाक्व” दैत। यसैया ४३:२ 26 मिनु पिप नेबुकदनेसर मेको ठेयब मी ब्रतीके आ लाप्चो आ नेक्था लशा, मेकोमी “शद्रक, मेशक नु अबेद-नेगो नेल्ल क्येडा ठेयब परमप्रभु आ मुर ग्नुशा, एक पिन” दे ब्रेत्ताक्मी। मिनु शद्रक, मेशक नु अबेद-नेगो मेको मी रे ग्नुतेक्म। 27 मिनु मेको पारसी रागी डा हुकुम पाइब नेल्ल नु पिप कली अर्ती गेब नेल्ल बुक्शा “मीम एको सां आन कली मारेइ मपव। आन चां यो मप्रोंइशशो बाक्त। मिनु आन वा यो मप्रोंइक्थु, मी आ रिना यो मबाक्शो बाक्त” दैतेक्म। हिब्रू ११:३३-३४ 28 मिनु नेबुकदनेसरमी “शद्रक, मेशक नु अबेद-नेगो आन परमप्रभु नेल्ल क्येडा ठेयब बाक्ब। मेकोमी आ स्वर्ग डा गेय पाइब सोइशशा, आ कली थमा सुइक्ब आन कली प्रोंइतु। मारदे हना मेकोपुकीमी पिप, आं देशो मबित्थु, साइक्चा पुंइसीब दुम्शा यो, आंम परमप्रभु कली डा लाक्शा, अर्को तेकोइ देवी देवता आन डोंइती बाप्शा सेउ मपामे। दानीएल ६:२३ 29 मोपतीके गो ‘जात जात डा, रागी रागी डा नु आंम आंम लोव्र पाइब मुर नेल्ल, सु सुमी शद्रक, मेशक नु अबेद-नेगो आन परमप्रभु आ पबर्म मरिम्शो लोव्र पा शुक्शी पाइनीमी, मेको आन गुइ खोइल खोइशशा साइक्चा पुंइसीनीम। मिनु मेको आन खिं यो प्रेशशा गेचा पुंइसीनीम’ दे हुकुम पाइनुड। मारदे हना मेको आन परमप्रभु का ला बाक्ब। देवी देवताम मोदेशो पा प्रोंइने मचाप्नीम” दैत। दानीएल २:४७ 30 मिनु पिपमी शद्रक, मेशक नु अबेद-नेगो आन कली बेबीलोन रागी डा डोंइती क्येडा ठेयब मुर सेल्लु।

4

पिपमी लेंशा डोमु तशो

1 मिनु पिप नेबुकदनेसरमी जात जात नु रागी रागी डा आंम आंम लोव्र पाइब नेल्ल आन कली “गे थुं नाइशशा बाक्कीन। दानीएल ६:२५ 2 नेल्ल क्येडा ठेयब परमप्रभुमी आं कली चिन्ड नु छक लाक्चा डा गेय कोइताक्की। मिनु मेको लोव्र इन कली शेंचा रिम्शो लाक्ती। 3 मेको आ कोइशो चिन्ड गिश ठेयब बाक्नीमी। मिनु आ छक लाक्चा डा गेय गिश सक्ति पाइशशो बाक्नीमी। आ राज्य गेना हना यो लीब। मिनु आ अधिकार यो गेना हना यो लीब। दानीएल २:४४; दानीएल ४:३१; दानीएल ६:२७; दानीएल ७:१४, २७; भजन संग्रह १४५:१३ 4 गो, नेबुकदनेसर, आं खिंमी

मारेइ मारेइमी गाप्शा, आं दरवारमी थुं नाइश्शा बाक्शो नड। 5 मिनु गो आं दरवारम बाक्डानु, डोमु का ताता। मेको तशा, थाम्पा हिंती। आं थुंमी मार मार मिम्शा, मेको कोंइतीके तशा, खिखि पाता। 6 मिनु गो बेबीलोन रागी डा जोक्ब तुइक्ब मुर नेल्ल आन कली ‘आं डोमु रे मार रुम्सीबा’? मेको तुइक्पांडसीचा कली आं बाक्तीकेमी ब्रेत्ताकडमी। 7 मिनु जादू, मन्तर तन्तर पाइब, सौरुल कोव्रब कल्दी नु चिन्ड आ अर्थ तुइक्ब जाक्तेक्म। मिनु गो मेको आन कली ‘गो डोमु का ताता’ दे शोव्रता। तन्न मेकोपुकीमी आं कली आं डोमु रे मार रुम्सीबा, मेको शेने मचबेम। 8 मिनु नेल्ल क्येडा नोले दानीएल आं डोंइती जाक्त। मेको आ नें आं देवता आ नें खोदेशो पा बेलत-शजर बाक्त। मिनु मेको आ आगाम नेल्ल क्येडा ठेयब देवता आ सोक्त बाक्त। मिनु मेको कली गो डोमु का ताता” दे शोव्रता। दानीएल ५:११,१४ 9 मिनु गो मेको कली “बेलत-शजर, जादू पाइब आन ठेयब मुर, इ आगाम नेल्ल क्येडा ठेयब देवी देवता आन सोक्त बाक्त। मिनु खुइश्शो लोव्र मारेइ मारेइ शेने चाप्ब बाक्नेवे। मोपतीके आं तशो डोमु आ कोंइतीक देनो। मिनु मेको रे मार रुम्सीबा शेंदी” दे माइक्ता।

10 गो इप्शा बाक्डानु, डोमु का ताता। मेको दोदेशो बाक्त देशा हना, रागी आ दातेमी सरीड थिचशो थम लाइश्शो रवा का बाक्त। 11 मिनु मेको रवा थम लाइश्शो बाक्त। मेको रवा ठेयब नु बोल्यो दुम्त। आ डरीमी सरीड थिप्तु। मिनु मेको रवा रागी रागी रे तांडसीबाक्त। 12 मेको आ सफा थम दारशो बाक्तेक्म। मिनु मेको रवाम शुश फल सिश्शो बाक्त। मिनु मेको रे नेल्लेमी जाइबाक्तेक्म। मिनु जन्तु मेको रवा आ पुंमी बाक्बाक्तेक्म। मिनु चिक्ब आ राशीम ग्योव्र सेल्बाक्तेक्म। मिनु ब्रोंइशा बाक्ब नेल्लेमी मेकेर रे जचा ताइबाक्तेक्म। 13 मिनु कोंइतीके कोव्रना कोव्रन बाक्डानु, स्वर्ग डा कोव्रब इर रे यिशो ताता। 14 मेकोमी ठेयब शेंदा पा “एको रवा कली तिमीन। आ राशी नेल्ल क्योरीन, आ सफा हेमीन। मिनु आ फल फ्रशा गेने। मिनु जन्तु आन कली आ पुं रे प्रोक्पतीन। मिनु चिक्ब आन कली मेको आ राशी रे खेरीन। 15 तन्न मेको आ टुटा नु शाक्श खपीम लीचा माल्नीम। मेको फलाम नु कांसा के पातामी फ्रेंशा, खपीमी लीचा माल्नीम। मिनु नाक्दो यिशो सीतमी जिश्शा बाक्ल। मिनु मेको जन्तुपुकी नु बाक्ल। जन्तु खोदेशो पा घांसम बाक्चा माल्दल। 16 मेको ७ बर्स मोदेशो दुम्चा माल्ब। मिनु मेको मुर आ थुं फांडसीशा, जन्तु आन थुं खोदेशो दुम्ब। 17 स्वर्ग डा कोव्रबपुकीमी ‘नेल्ल क्येडा ठेयब परमप्रभुमी राज्य नेल्ल कली सासन पाइब। मेकोमी आ दाक्शो मुर कली सासन पतीक गेय गेब। मेको नेल्ल क्येडा ब्रेम्शो मुर आ गुइमी गेब। मेको मुर नेल्लेमी तुइक्चा माल्नीम’ दे लोव्र पाम्तेक्म। दानीएल २:२१

दानीएलमी डोमु आ अर्थ शेंशो

18 मोपा गो पिप, नेबुकदनेसरमी डोमु का ताता। मुल बेलत-शजर, गे एको डोमु रे मार रुम्सीबा, मेको शेंदी। आं राज्यम बाक्ब जोक्ब तुइक्ब नेल्लेमी मेको शेने मचबेम। गे चहिं मेको शेने चाप्नेवे। मारदे हना इ आगाम ठेयब देवता आ सोक्त बाक्ब” दे माइक्ता।

19 मिनु मेको नेंशा, बेलत-शजर माइश्शो दानीएल आ थुं लुक्च लत। आ मिम्तीकेमी मेको कली शुश हिंपाइक्तु। मिनु गो, पिपमी मेको कली “बेलत-शजर, आं डोमु नु मेको आ रुप्तीकेमी इ कली हिंपाइक्चा मगेवो” देंती। मिनु दानीएलमी “हजुर, आं पिप, एको डोमु इन जोरी सत्रु आन कली दुम्ल। मिनु मेको आ रुप्तीक लोव्र इन जोरी सत्रुम राम हना, दुम वा। 20 इन डोमुम तशो रवा ठेयब नु बोल्यो दुम्शा, आ डरीमी सरीड थिप्तु। मिनु मेको रवा कली रागी रागी रे तांडसीबाक्त। इजीकीएल ३१:३-१४ 21 मेको आ सफा थम दारशो बाक्तेक्म। मेको रवाम शुश फल सिश्शो बाक्त। मिनु मेको रे नेल्लेमी जाइबाक्तेक्म। मिनु जन्तुपुकी मेको रवा आ पुंमी बाक्बाक्तेक्म। मिनु चिक्ब आ राशीम बास बाक्बाक्तेक्म। 22 हजुर, पिप, गे मेको रवा बाक्नीनी। गे ठेयब नु सक्ति पाइश्शो दुम्तीनी। इन सक्ति बारशा, सरीड सम्म जाक्दीश्शो बाक्त। मिनु इन अधिकार बारशा, रागी नेल्ल आन कली हुकुम पाइतीनी। 23 हजुर, पिप, गे स्वर्ग डा कोव्रब यिशो ताइतीनी। मिनु मेकोमी ‘एको रवा कली तिमीन। खतम पोक्कीन। तन्न मेको आ टुटा नु शाक्श खपीम लीचा माल्नीम। मेको फलाम नु कांसा के पातामी फ्रेंशा, खपीमी लीचा माल्नीनी। मिनु नाक्दो यिशो सीतमी जिश्शा बाक्ल। मिनु मेको जन्तुपुकी नु बाक्ल। ७ बर्स मलाक्गा सम्म मोदेशो दुम्चा माल्ब’ देंत। 24 मिनु हजुर, पिप, मेको डोमु डा रुप्तीक नु इन पबर्म नेल्ल क्येडा ठेयब परमप्रभु आ हुकुम मार बाक्त देशा हना, 25 गे मुर आन बाक्तीके रे खेरचा पुंडसीनीनी। मिनु गे जन्तुपुकी नु बाक्नीनी। बी ब्यफोमी खोदेशो पा घांस ब्वाइनीनी। मिनु नाक्दो डा सीतम जित्नीनी। मिनु ७ बर्स सम्म मोदेशो दुम्नीनी। नेल्ल क्येडा ठेयब परमप्रभुमी मुर आन राज्यम सासन पाइब। मिनु परमप्रभुमी मेको राज्य आ दाक्शो मुर आ गुइमी गेब, दे इन कली तुइक्पाइक्चा कली मोदेशो पाप्तु। 26 मिनु

रवा आ ठुटा नु शाकश खप उइ प्रोंइचा देशो हुकुम दुम्त। मिनु मेको रे मार रुम्सीब देशा हना, स्वर्ग डा परमप्रभु नेल्ल आन कली सासन पाइब बाक्ब, दे रुम्नी नोले इन राज्य लेंशा ताइनीनी। 27 हजुर पिप, मोपतीके आं गेशो अर्ती इन कली दुम्त। इन पाप कली ठीक पतीकेमी क्याम्दीन। मिनु इन मरिम्शो पशो, श्येत जाइब आन कली शिशी पतीकेमी क्याम्दीन। मो पाइतीनी हना, इन रिम्शो बाक्तीक शुश नाक्त सम्म लीब” देंत। हितोपदेस १९:१७; मत्ती ५:७

पिप आ डोमु गाप्शो

28 मिनु पिप नेबुकदनेसरमी दोदेशो डोमु तवा, मोदेशोन दुम्त। 29 मिनु १२ महिना नोले मेको पिप बेबीलोन आ दरवार आ कौसीमी हिरना हिरन बाक्शा, 30 मेकोमी “मार, एको बेबीलोन थम रिम्शो मबाक्बा डा? गो एको आं ठेयब सक्तिमी आं शुश शोंप वोइशशा, बाक्चा कली सेल्ला” देंत। हितोपदेस १६:१८ 31 मिनु पिपमी मेको लोव्र देंमेनु, स्वर्ग रे सेंदा कामी “पिप नेबुकदनेसर इ कली मार लोव्र देंशो बाक्त देंशा हना, एको राज्य इ गुइ रे रोइक्ने थुम्शो बाक्ब। 32 गे मुर आन बाक्तीके रे खेरचा पुंइसीनेवे। मिनु गे जन्तुपुकी नु बाक्नेवे। बी ब्यफोमी खोदेशो पा घांस ब्वाइनेवे। मिनु नाक्दो डा सीतम जिल्लेवे। मिनु ७ बर्स सम्म मोदेशो दुम्नेवे। नेल्ल क्येडा ठेयब परमप्रभुमी मुर आन राज्य कली सासन पाइब। मिनु परमप्रभुमी मेको राज्य आ दाक्शो मुर आ गुइमी गेब, दे इन कली तुइक्पाइक्चा कली मोदेशो पाइब” देंत। दानीएल ५:२१ 33 मिनु मेको लोव्र पशो नेना चोटीन नेबुकदनेसर थमा पा मोदेशो दुम्त। मेको मुर आन दाते रे खेरचा पुंइसाक्व। मिनु बी ब्यफोम खोदेशो पा घांस ब्वाचा गोप्तु। मिनु मेको आ रां नाक्दो डा सीतमी जित्त। मिनु मेको आ चां ककाकुली आ ओपला खोदेशो पा लाइशो नु आ गेय चिक्ब आ नडग्रा खोदेशो दुम्त।

पिपमी परमप्रभु कली मान पशो

34 मिनु पिपमी “मेको देशो नेल्ल जाक्दीम नोले, गो आं पिया पोक्शा सरीड गे कोव्रता। मिनु आं निप्स लेंशा रिम्शो दुम्त। मिनु गो नेल्ल क्येडा ठेयब नु गेना हना यो ब्रोंइशा बाक्ब परमप्रभु कली ठेयब सेल्ला, मान पाता। मेको आ सासन पतीके गेना हना यो लीब। मेको आ राज्य पाला पाला सम्म लीब। दानीएल ३:३३ 35 रागी डा मुरपुकी नेल्ल मेको आ डोंइती मारेइ मबाक्नीम। मेकोमी स्वर्ग डा गेय पाइब नु रागी डा मुर आन कली मार पचा दाक्बा, मेकोन पने चाप्ब। सुइमी मेको कली तेक्ने मचाप्नीम। मिनु सुइमी ‘गे मार पनी?’ देंने मचाप्नीम। यसैया ४०:१७; अय्युब ९:१२ 36 मेना आं निप्स लेंशा रिम्शो दुम्त। मिनु आं राज्य डा छेडछेड आं कली लेत्ताक्यी। आं कली अर्ती गेब नु आं ठेयब गेय पाइबपुकी आं कली ग्रुम्थ जाक्तेक्म। मिनु गो लेंशा पिप दुम्ती। मिनु गो डोंइती क्येडा शुश सक्ति नु मान ताता। 37 मुल गो, नेबुकदनेसरमी ‘स्वर्ग डा पिप ठेयब बाक्ब’ दे मान पाइनुड। मारदे हना आ पशो नेल्ल थमा बाक्ब। आ पतीके नेल्ल ठीक बाक्नीम। मेकोमी ठेयब लेशो मुर आन कली ब्रेम्शो सेल्ले चाप्ब” दे पिपमी देंत। लूका १:५१; लूका १८:१४

5

पिप बेल-शजर आ भोज

1 मिनु पिप बेल-शजरमी आ राज्य डा ठेयब अधिकार ताइब हजार का मुर आन कली भोज का सेल्लु। मिनु मेकोमी मेको आन डोंइती अडगुर शांबु तूतु। 2 मिनु मेको पिप शांबुमी दुक्शा “आं आफ नेबुकदनेसरमी यरूसलेम सहर डा परमप्रभु आ खिं रे चाक्शो सुन नु चांदी के बोसपुकी एक चाक्कीन। गो, आं राज्य डा ठेयब अधिकार ताइबपुकी, आं ग्युंबे पशो मीशपुकी नु आं अरु चाक्शो मीशपुकी गारशा, मेको बोसम तूनीकी” देंत। दानीएल १:२; २इतिहास ३६:१०; एज्रा १:७-११ 3 मिनु परमप्रभु आ खिं यरूसलेम रे चाक्शो सुन नु चांदी के बोसपुकी मेकेर चाक्तेक्म। मिनु पिप, आ राज्य डा ठेयब अधिकार ताइबपुकी, आ ग्युंबे पशो मीशपुकी नु आं अरु चाक्शो मीशपुकी गारशा, मेको बोसम तूतेक्म। 4 मिनु मेकोपुकीमी अडगुर शांबु तूशा, सुन, चांदी, कांसा, फलाम, शी नु फुल्लु के सेल्लो देवी देवता आन कली सेउ पाम्तेक्म।

5 मिनु मेना मुर आ गुइ का फो गूशा, बत्ती आ नेक्था दरवार डा सिल्लो गारोमी ब्रेक्ताक्व। मिनु पिपमी मेको गुइमी ब्रेक्ना ब्रेक्न पशो ताप्तु। 6 मिनु मेको तशा, पिप आ कुल लल गिग दुम्शा, शुश हित। आ खोइल खिंखि पा आ पोक्च थोक्सीशा, खोइल ललाक लुलुक दुम्त। 7 मिनु पिपमी “बेबीलोन रागी डा मन्तर तन्तर पाइब, सोरुल कोव्रब कल्दी नु चिन्ड आ अर्थ जोक्ब चाक्कीन” दे हुकुम पाप्तु। मिनु पिपम मेको बेबीलोन रागी डा जोक्ब तुइक्ब आन कली “सुमी एको ब्रेक्शो पढेशा, आं अर्थ आं कली शेंने चाप्बा, मेको प्याजी रड डा वा फेक्पाइशशा, सुन के माला रेल्ला

पुंडसीब। मिनु गो नु आं राज्य डा ठेयब गेय पाइब आ नोले डा हुकुम पाइब सेल्लुड” देंत। 8 मिनु पिप आ जोक्ब तुइक्ब मुर नेल्ल दरवारम जाक्तेक्म। तन्न मेकोपुकीमी मेको ब्रेक्स पढेने मचबेम। मिनु मार रुम्सीबा, मेको यो देने मचबेम। 9 मिनु पिप बेल-शजर शुश हिंशा, आ कुल लल गिगी जीत। मिनु आ राज्य डा ठेयब अधिकार ताइबपुकी मार पचा ना, मार पचा दुम्तेक्म। 10 मिनु पिपीममी पिप नु आ राज्य डा ठेयब अधिकार ताइबपुकी लोत्र पशो नेंशा, भोज जतीक कोठामी ओव्रत। मिनु मेकोमी “पिप, गे गेना हना यो ब्रोंइशा बाक्कीन। गे हिंशा इन थुं ग्येत्य लुक्च मपने। इन कुल लल गिगी मदुम्पतीन। 11 इन राज्यमी ठेयब देवता आन सोक्त पाइशो मुर का बाक्ब। इन आफ आ पालामी मेको नु देवी देवता के खोदेशो पा सोक्त आ मिम्शो रुप्तीके तुइक्तीके नु जोक्ब तुइक्ब थुं बाक्त। मोपतीके इन आफ पिप नेबुकदनेसर मी मेको कली जादू, मन्तर तन्तर पाइब, सोरुल कोत्रब कल्दी नु चिन्ड आ अर्थ जोक्ब आन ठेयब मुर सेल्शो बाक्त। दानीएल ४:५; दानीएल २:४८ 12 मिनु पिपमी मेको कली बेल्ल-शजर, दे नें वोइशो बाक्त। मारदे हना मेको बेल्ल-शजर माइशो दानीएल तुइक्तीक नु डोमु आ अर्थ शेंतीक, खुइशो लोत्र तुइक्ब नु मारेइ मारेइ ठेयब श्येत रे गुंइने चाप्ब बाक्ब। मिनु मुल मेको दानीएल कली ब्रथ सोइक्तीन। मिनु मेकोमी मेको ब्रेक्स पढेशा, रुप्पाइक्ने चाप्ब” देंत। दानीएल १:१७

13 मिनु नोले दानीएल कली पिप आ डोंइती चाक्तेक्म। मिनु पिपमी दानीएल कली “गे दानीएल नवे? आं आफोमी इ कली चाक्डे? गे यहूदा रागी रे ग्याइशशा चाक्चा पुंडसीशो नवे? 14 गो इ आगाम ठेयब देवता आन मिम्शो तुइक्तीक, रुप्तीक नु शुश जोक्ब तुइक्ब थुं बाक्ब, देशो लोत्र नेंता। 15 गो एको ब्रेक्स पढेशा मार रुम्सीबा, आं कली देंमल, दे शुश जोक्ब तुइक्ब नु मन्तर तन्तर पाइब आन कली एक चाक्पाइक्ता, तन्न मेकोपुकीमी एको ब्रेक्स आ अर्थ शेंने मचबेम। 16 मिनु गे एको चिन्ड आ अर्थ मार रुम्सीबा, दे शेंने चाप्ब नु मारेइ मारेइ श्येत रे गुंइने चाप्ब बाक्नेवे, देशो लोत्र नेंता। मिनु मुल एको ब्रेक्स पढेशा, मार रुम्सीबा मेको आं कली शेंने चाप्तीवी हना, गे प्याजी रड डा वा फेक्पाइशशा, सुन के माला रेल्ला पुंडसीनेवे। मिनु गे आं राज्य डा आं क्येडा नु आं ठेयब गेय पाइब आ नोले डा ठेयब हुकुम पाइब दुम्नेवे” देंत।

ब्रेक्स आ अर्थ शेंशो

17 मिनु दानीएलमी पिप कली “इन कोसेली आंमान वोंइसीन। मिनु अरु सुइ आन कली गेने। तन्न गो एको ब्रेक्स पढेशा, मार रुम्सीबा इन कली शेंनन्नी। 18 हजुर, नेल्ल क्येडा ठेयब परमप्रभुमी इन आफ पिप नेबुकदनेसर कली राज्य, ठेयब दुम्तीके, मान ततीके नु शुश शोंप गेशो बाक्त। दानीएल २:३७ 19 मोपा परमप्रभुमी मेको कली ठेयब दुम्तीके गेतीके जात जात नु रागी रागी डा आंम आंम लोत्र पाइब मुर नेल्ल मेको क्येडा हिंशा, खिंखिं पाम्तेक्म। मिनु मेकोमी सु कली साइक्चा दाक्ता, मेको कली साइक्तु। सु कली ब्रोंइचा गेचा दाक्ता, मेको कली ब्रोंइचा गेप्टु। मिनु मान बारपाइक्चा दाक्शो कली मान बारपाइक्तु। सु कली दिप्चा दाक्ता, मेको कली दिप्तु। 20 तन्न मेको ठेयब लेल्लतीके नु आ थुं खकटा दुम्पाइक्तीके पिप आ नित्तीक रे खेरचा नु आ छेडछेड रोइक्चा पुंडसाक्व। 21 मिनु मुर आन बाक्तीके रे खेरचा पुंडसीशा, आ थुं जन्तु आन थुं खोदेशो दुम्त। मेको ब्वाकी डा गधा नु बाक्शा, ब्यफोम खोदेशो पा घांस ब्वशो बाक्त। मिनु मेको नाक्दो डा सीतमी जित्त। नेल्ल क्येडा ठेयब परमप्रभु मुर आन राज्य कली सासन पाइब बाक्ब नु मेको राज्य आ दाक्शो मुर आन गुइमी गेब, दे तुइक्पाइक्चा कली मोदेशो दुम्शो बाक्त। दानीएल ४:२९ 22 मिनु गे, मेको आ तौ, बेल-शजरमी, मेको लोत्र नेल्ल तुइशशा यो, इन थुं मब्रेम्पाइक्नी। 23 ‘गो स्वर्ग डा परमप्रभु क्येडा ठेयब नड’ दे आंम कली ठेयब सेल्लतीनी। मिनु गे परमप्रभु आ खिं डा बोसपुकी चाक्पाइशशा, गे नु इन राज्यम अधिकार ताइब, इन ग्युंवे पशो मीशपुकी नु इन अरु चाक्शो मीशपुकीमी मेको बोसम अडगुर शांबु तूतीनी। मिनु सुन, चांदी, कांसा, फलाम, शी नु फुल्लु के सेल्शो मिक्च मताइब, मनंन, मरुप्ब देवी देवता आन कली सेउ पाइतीनी। तन्न इन कली ब्रोंइतीक सोक्त गेब नु इन लां कोइब परमप्रभु कली मान मपनी। 24 मोपतीके मेकोमी मेको गुइ सोइशशा, मेको ब्रेक्स ब्रेक्पाइक्तु। 25 मिनु मेको ब्रेक्शो मार बाक्ब देशा हना ‘मेने मेने टेकेल पेरेस’ दे ब्रेक्शो बाक्ब। यसैया ४७:११ 26 मेको आ अर्थ मार बाक्ब देशा हना, मेने आ अर्थ ‘परमप्रभुमी इन सासन पतीक नाक्त हिक्शा, थुम्तु’ देशो बाक्ब। 27 टेकेल आ अर्थ ‘गे नाक्तीकेम नाक्चा पुंडसीशा, सोपी दुम्तीनी’ देशो बाक्ब। 28 पेरेस आ अर्थ, इन राज्य निक्शी दुम्शा, मादी नु पारसी आन कली गेशो बाक्ब, देशो रुम्सीब। मेको आ अर्थ एको बाक्ब” दे दानीएलमी देंत। 29 मिनु पिप बेल-शजरमी “दानीएल कली प्याजी वा फेक्तीन। सुन के माला रेल्लदीन। मिनु मुर नेल्ल आन कली ‘मेको

राज्य डा पिप, आं क्येडा नु आं ठेयब गेय पाइब क्येडा नोले डा हुकुम पाइब बाक्ब' दे मुर नेल्ल आन कली शेंदीन" देंत। दानीएल २:२८; उत्पत्ती ४१:४२-४३

30 मिनु मेको नाक्दोन कल्दी आन पिप बेल-शजर साइक्चा पुंडसाक्व। 31 मिनु मादी रागी डा पिप दारामी राज्य ताप्नु। मेना पिप दारा ६२ बर्स दुम्शो बाक्माक्त। दानीएल ९:१; यसैया १३:१७

6

दानीएल रिम्शो पाइब दुम्शो

1 पिप दारामी आ राज्य कली सहे का २० जना हुकुम पाइब मुर वोइशशो बाक्त। मेको पारसी रागीमी ब्राशा बाक्शो बाक्तेक्म। दानीएल ५:१२ 2 मिनु पिप दाराम मारेइ मजाम्ल, दे मेको नेल्ल आन कली ठेयब कोव्रब मुर सां वोइशशो बाक्त। मिनु मेको सां आन दातेमी का दानीएल बाक्त। मेको हुकुम पाइबपुकीमी ठेयब कोव्रब मुर सां आन कली रागीम मार दुम्मे, मेको शोव्रचा माल्शो बाक्तेक्म। 3 मिनु दानीएल अरु ठेयब कोव्रब मुर नु पारसी रागी डा सहे का २० जना हुकुम पाइब नेल्ल आन दातेमी नेल्ल आन क्येडा निप्स पाइशशो नु रिम्शो थुं पाइशशो बाक्त। मोपतीके पिपमी "गो मेको कली रागी नेल्ल कली हुकुम पाइब सेल्लुड" दे मिम्ता बाक्त। 4 मिनु मेको ठेयब कोव्रब मुर नु सहे का २० जना पारसी रागी कली हुकुम पाइबपुकीमी गेहे पा दानीएल कली दोस गेचा, दे क्यारी पचा गोव्रमे बाक्त। तन्न मरिम्शो नु दोस गेतीक मारेइ मथिदमे बाक्त। मारदे हना दानीएल रिम्शो, मारेइ दोस मपाइशशो गेय पाइब मुर बाक्त। 5 मिनु मेकोपुकीमी "दानीएल कली आ परमप्रभु आ अरेशो लोव्र थमा सुइक्तीक क्येडा लाक्शा, अरु मारेइमी यो दोस गेने मचाप्नय" देंमुमा बाक्त। 6 मिनु मेको ठेयब कोव्रब निक्शी नु पारसी रागी कली हुकुम पाइब नेल्ल लोव्रसी पा गारशा, पिप आ दरवारमी जाक्शा पिप कली "हजुर, पिप दारा, गे गेना हना यो ब्रोंइशा बाक्कीन। 7 गो इन राज्य डा ठेयब कोव्रब, आइक्च नु ठेयब हुकुम पाइब, अर्ती गेब नु इन रागी डा ठेयब मुर नेल्ल नु गारशा, गे पिपमी, कानुन का सेल्चा माल्नीनी। मार कानुन सेल्चा माल्नीनी देंशा हना, मुल ३० नाक्त सम्म इन क्येडा लाक्शा, सुइ मुरपुकीम आंम देवी देवता नु मुर आन कली मारेइ पुंडने मचाप्नीम। इन क्येडा लाक्शा अरु सुइ कली पुंडतेक्म हना, मेको मुर गुप्स वोइक्तीकेमी ताइक्चा पुंडसीब, दे ब्रेक्शा छाप थोक्शा वोतीन। 8 हजुर पिप, मोपा कानुन का सेलीन। मिनु छाप थोक्तीन। मादी नु पारसी आन कानुन मफांडसीब" देंमा बाक्त। एस्तर १:१९; एस्तर ८:८ 9 मिनु पिप दारामी मेको कानुन ब्रेक्पा छाप थोक्शा गुंडताक्व।

दानीएल ग्याइक्चा पुंडसीशो

10 मिनु दानीएलमी पिप दारामी मोपा ब्रेक्शा छाप थोक्शा गुंडशो तुइशशा, यरूसलेम गे कोव्रशा सेल्शो खिं आ तला तारी लशा, पोक्च थेक्शा आ परमप्रभु कली प्रार्थना पाप्नु। मोपा नाक्त किंत किंत सां खेयप पार्थना पाप्नु। मिनु डोंइती खोदेशो पा परमप्रभु कली ठेयब सेल्लु। १२जा ८:४८ 11 मिनु दानीएल कली गेहे पाइबपुकी मेकेर जाक्शा, दानीएलमी प्रार्थना पा आ परमप्रभु कली ठेयब सेल्शा पुंडशो थित्तेक्म। 12 मिनु नोले मेकोपुकी पिप आ दरवार लशा, मेको ब्रेक्शो कानुन आ पर्बम "हजुर पिप, गे ३० नाक्त सम्म सुइमी इन क्येडा लाक्शा, अरु देवी देवता नु मुर आन कली मारेइ यो मपुंड्या, मो पाम्तेक्म हना, मेको आन कली गुप्स वोइक्तीकेमी पिक्चा, दे कानुन सेल्नी ममाइ?" देंतेक्म। मिनु पिपमी "एको लोव्र थमा बाक्ब। मादी नु पारसी आन कानुन गेनायो मफांडसीब" दे लोव्र पाप्नु। दानीएल ३:१० 13 मिनु मेकोपुकीमी पिप कली "आ रागी रे ग्याइशशा चाक्चा पुंडसीशो यहूदी दानीएलमी इन लोव्र लाक्शा, इन गुंडशो कानुन मटीव। मेकोमी नाक्त किंत किंत खेयप सां प्रार्थना पा पुंडब" देंतेक्म। 14 मिनु पिपमी मेको लोव्र नेंशा, आ थुं शुश लुक्च लत। मिनु दानीएल कली "दोपा प्रोंइनुडा?" दे नां मलाक्गा सम्म शुश मिम्शा बाक्माक्त। 15 मेको दानीएल कली गेहे पाइबपुकी पिप आ डोंइती जाक्शा "हजुर पिप, मादी नु पारसी आन पिपमी हुकुम पशो नु छाप थोक्शो कानुन मफांडसीब, दे एको लोव्र तुइक्नीनी" देंतेक्म।

दानीएल कली गुप्स खोरम तोक्शो

16 मिनु नोले पिपमी "दानीएल कली चाक्कीन। मिनु गुप्स आन कली वोइक्तीकेमी तोक्कीन" दे हुकुम पाप्नु। मिनु मेकोपुकीम दानीएल कली गुप्स आन बाक्तीकेम तोक्तेक्म। मिनु पिपमी दानीएल कली "इ मप्रोंइथु, ठेयब सेल्शो परमप्रभुमी इ कली प्रोनल" देंत। दानीएल ३:१५ 17 मिनु नोले गेय पाइबपुकीमी फुल्लु का चाक्शा, मेको गुप्स बाक्तीक आ ओव्रतीक चोक्तेक्म। सुइमी दानीएल कली मारेइ पने मचाप्मेक्ल, दे पिपमी आ छाप पाइशशो औंठीम

थोकशा, आ राज्य डा ठेयब अधिकार ताइब आन छाप यो थोकपाइवतु। 18 मिनु पिप आ दरवारम लेशशा लशा, मेको नाकदो माइजा बाकशा, मारेइ जचा थोवक आ बाक्तीकेम मचाक्पद। मिनु मइपथु, नां सोइताक्व।

परमप्रभुम दानीएल कली प्रोइशो

19 मिनु पिप नां मसोथु, सुनी कना बोक्शा, मेको गुप्स आन कली वोइक्तीकेम दोरशा लत। 20 मिनु गुप्स आन बाक्तीके आ नेक्था जाक्दीशशा, शुश हिंशा दानीएल कली “दानीएल, ब्रोइशा बाक्ब परमप्रभु आ गेय पाइब, इ गेना हना यो ठेयब सेलना सेलन बाक्शो परमप्रभुमी इ कली गुप्स रे प्रोना?” दे हिल्लो पा ब्रेत्ताक्व। दानीएल ३:१७ 21 मिनु दानीएलमी पिप कली “हजुर पिप, गे गेना हना यो ब्रोइशा बाक्कीन। 22 आं परमप्रभुमी आ स्वर्ग डा गेय पाइब सोइशशा, आं कली मारेइ मपाइक्पाइक्चा कली गुप्स आन शोव चोकपाइवतु। मारदे हना आं दोस मबा। हजुर पिप, इन डोंइती यो मारेइ मरिम्शो मपड” देत। दानीएल ३:२८; भजन संग्रह २२:२२; हिब्रू ११:३३ 23 मिनु पिप थाम्पा ग्येरसीशा “दानीएल कली गुप्स वोइक्तीके रे गुंडदीन” दे हुकुम पाप्तु। मिनु दानीएल कली कीशा गुंडताक्म। मिनु मेको मारेइ मदुम्शो बाक्त। मारदे हना मेकोमी आ परमप्रभु कली थमा सुइशशा बाक्त। 24 मिनु पिपमी “दानीएल कली दोस गेब, आन मीश नु आन तमी तौ नेल्ल आन कली गुप्स वोइक्तीकेमी तोक्कीन” दे हुकुम पाप्तु। मिनु मेको आन कली मेकेर तोक्तेक्म। मिनु मेकोपुकी गुप्स आन बाक्तीके मजाक्दीत्थु, गुप्सपुकी प्रेक्शा ग्राम्शा मेको आन रुश का यो मवोइक्थु नेक्तेक्म।

पिपम परमप्रभु कली मान पशो

25 मिनु नोले पिप दारामी जात जात नु रागी रागी डा आंम आंम लोव पाइब नेल्ल आन कली “गे थुं नाइशशा बाक्कीन। दानीएल ४:१ 26 आं राज्य डा मुर नेल्लेमी दानीएल आ परमप्रभु कली मान पा हिंचा माल्नीम। मारदे हना मेको गेना हना यो ब्रोइशा बाक्ब परमप्रभु बाक्ब। मेको आ राज्य गेना हना यो लीब। मिनु आ अधिकार गेनायो मनुप्व। 27 मेकोमी आ मुर आन कली प्रोइशा, श्येत रे गुंडने चाप्व। मेको सरीड नु रागीमी चिन्ड नु छक लाक्चा डा गेय पाइब बाक्ब। मेकोमी दानीएल कली गुप्स आन सक्ति रे प्रोइतु” दे हुकुम पा ब्रेक्ताक्व। 28 मिनु दानीएल पिप दारा नु पारसी आन पिप कोरेस आस पालामी शुश मान तशा, सक्ति पाइशशा दुम्त।

7

दानीएलमी कोइतीके तशो

दानीएल २:-

1 मिनु बेबीलोन डा बेल-शजर पिप दुम्शो डोंइती डा बर्समी दानीएल इम्मेनु, डोमु पा, कोइतीके का ताप्तु। मिनु मेकोमी आ तशो डोमु ब्रेक्ताक्व। दानीएल ५:१ 2 मिनु दानीएलमी गो, दानीएल, इप्शा डोमु पा, कोइतीक का ताता, सरीड पूर्व, पच्छिम, उत्तर, दक्खिन रे फश पा ठेयब समुन्द्र कली छाल पोक्पाइशशा ताता। 3 मिनु समुन्द्र रे ४ ओटा ठेयब जन्तु गूतेक्म। मेको दोदेशो तांइसाक्म देशा हना, प्रकाश १३:१-२ 4 मेको डोंइती डा जन्तु गुप्स खोदेशो बाक्शा, ककाकुली आ फ्रां खोदेशो फ्रां पाइशशा बाक्त। मिनु गो कोवशा बाक्डानु, मेको आ फ्रां तुल्चा पुंडसाक्व। मिनु मेको खप रे बोक्पाइशशा, मुर खोदेशो पा आ खोइल निक्शीमी राप्पाइक्चा पुंडसाक्व। मिनु मेकोमी मुर आ थुं ताप्तु। 5 मिनु मेको आ नोले अर्को जन्तु का गूत। मेको वां खोदेशो बाक्त। मेकोमी का पटटी रे बोक्शा, जेरी सां आ शोवम काम्शो बाक्त। मिनु मेको कली “बोक्को, श्ये शुश ब्वावो” देशो नेता। 6 मिनु गो कोवशा बाक्डानु, नोले अर्को जन्तु का गूत। मेको जोइ खोदेशो बाक्त। मेको आ चीमी ४ ओटा चिक्ब आ फ्रां खोदेशो फ्रां बाक्तेक्म। मिनु मेको के ४ ओटा पिया बाक्तेक्म। मिनु मेकोमी सासन पतीक अधिकार ताप्तु। 7 मिनु नोले गो नाकदो डा कोइतीकेमी नेल्ल क्येडा नोले डा जन्तु गूशो ताता। मेको शुश हिंचा डा, अर्को आन क्येडा बोल्यो बाक्त। मेको के फलाम के ठेयब खुइ बाक्तेक्म। मिनु श्ये ब्वना ब्वन बाक्शा, लीशो श्ये आ खोइलीमी दिम्ताक्व। मेको डोंइती डा जन्तु आन खोदेशो मबा। मारदे हना मेको के १० ओटा ग्रोव बाक्तेक्म। 8 मिनु गो मेको ग्रोव आन कली रिम्शो पा कोवडुनु, मेको आन दातेमी अर्को आइक्च ग्रोव का गूशो ताता। मेको आइक्च ग्रोव कली बाक्तीक गेचा कली डोंइती डा ग्रोव सां आन शाक्श सुन्दा एत्तेक्म। मेको नक गूशो ग्रोवमी मिक्च बाक्तेक्म। मेको मुर आ मिक्च खोदेशो बाक्तेक्म। मिनु मेको के ठेयब लेशशा लोव पाइब शोव का बाक्त। दानीएल ११:३६ 9 मिनु गो कोवना कोवन बाक्डानु, पिप आन शुश नित्तीक वोइशशा ताता। मिनु मेको शुश बर्स दुम्शो का ठेयब नित्तीकेमी निस्साक्व। मेको आ वा फुं खोदेशो बुश बाक्त। मिनु आ पिया

डा चां रिमशो ऊन खोदेशो पा बुश बाक्त। मिनु मेको आ ठेयब नित्तीके ठेयब ब्रशो मी खोदेशो बाक्त। मेको ठेयब नित्तीक आ गुगीलपुकी बाक्तेक्म। मेको के यो थम ठेयब मी खोदेशो बाक्तेक्म। इजीकीएल १:२६; प्रकाश ४:२; भजन संग्रह ९०:२ 10 मिनु मेको शुश बर्स दुमशो का आ डोंइती रे मी के खोला खोदेशो पा गूत। मिनु हजार हजार आ स्वर्ग डा गेय पाइबमी मेको कली गेय पाम्तेक्म। मिनु १०, १० हजार मेको आ डोंइती बाक्तेक्म। मिनु मेको निसाफ पचा कली निस्साक्म। मिनु किताबपुकी प्राक्शा वोइक्तेक्म। प्रकाश ५:११; भजन संग्रह ६९:२९; प्रकाश २०:१२ 11 मिनु गो मेको ठेयब लेशो लोत्र पाइब ग्रोत्र कली कोत्रना कोत्रन बाक्ती। मिनु गो कोत्रना कोत्रन बाक्डानु, मेको जन्तु कली साइक्तेक्म। मिनु मेको आ रां खतम सेल्शा, ठेयब मीमी हुम्ताक्म। प्रकाश १९:२० 12 मिनु लीशो जन्तु आन सासन पतीक अधिकार रोइक्चा पुंइसाक्म। तन्न मेको आन कली इक्का नोले सम्म ब्रोंइचा गेम्तेक्म। दानीएल २:२१ 13 मिनु नोले गो नाक्दो डा कोइतीकेमी मुर खोदेशो का ताता। मेको गोस्सुम गिल्सीशा पिना पिन पशो ताता। मिनु मेको कली शुश बर्स दुमशो का आ डोंइती राप्पाइशो ताता। लूका २१:२७; प्रकाश १:१३; प्रकाश १४:१४ 14 मिनु मेको कली सासन पतीक अधिकार, मान ततीक नु पिप सेल्शा राज्य गेशो ताता। मिनु जात जात नु रागी रागी डा आंम आंम लोत्र पाइब मुर नेल्लेमी मेको कली गेय पशो ताता। आ सासन पतीके अधिकार गेना हना यो लीबाक्त। आ पिप दुमशो राज्य गेनायो खतम मदुम्बाक्त।

15 मिनु गो, दानीएल, मेको कोइतीके तशा, आं थुं लुक्च लत। मिनु गो हिंती।

16 मिनु गो मेकेर राप्शा बाक्ब का कली “एको लोत्र रे मार रुम्सीबा?” दे हिल्लो पाता। मिनु मेकोमी “गो इ कली नेल्ल रुप्पाइक्नुड। 17 मेको ४ ओटा ठेयब जन्तु रागी डा ४ जना पिप बाक्नीम। 18 तन्न मेको नेल्ल क्येडा ठेयब आ मुरपुकीम मेको राज्य ताक्शा, गेनायो मनुप्या डा पा, गेना हना यो सासन पाइनीम” देत।

19 मिनु गो मेको नेल्ल आन क्येडा नोले डा जन्तु रे मार रुम्सीबा, दे रुप्चा थुं पाता। मेको अरु जन्तु खोदेशो मबा। मेको थम हिंचा डा बाक्त। मेको आ खुइ फलाम के नु नडग्रा कांसा के बाक्तेक्म। मेकोमी मारेइ मारेइ ब्वशा नाक्शा, लीशो श्ये चहिं आ खोइलीम दिम्ताक्व। दानीएल ७:७ 20 मिनु मेको आ पियामी बाक्शो १० ओटा ग्रोत्र नु अर्को ग्रोत्र का आ पबर्म रुप्चा थुं पाता। मेको ग्रोत्र का गूमेनु, डोंइती डा ग्रोत्र सां एल्तेक्म। मेको गूशो ग्रोत्र के मिक्च नु ठेयब लेशो लोत्र पतीक शोत्र बाक्त। मिनु मेको अरु ग्रोत्र आन क्येडा ठेयब बाक्त। मेको आ पबर्म यो रुप्चा थुं पाता। 21 मिनु गो कोत्रना कोत्रन बाक्डानु, मेको ग्रोत्रमी नेल्ल क्येडा ठेयब आ मुर नु लडाइ पा ग्रात। प्रकाश १३:७ 22 मिनु मेको शुश बर्स दुमशो का मजाक्म सम्म लडाइ ग्राना ग्रान बाक्त। मिनु नेल्ल क्येडा ठेयबमी आ मुर आन कली निसाफ पतीक अधिकार गेपु। मेना नेल्ल क्येडा ठेयब आ मुरुम मेको राज्य आंम के सेल्तेक्म। 23 मिनु आं कली रुप्पाइक्बमी नेल्ल आन क्येडा नोले डा जन्तु “रागीमी मेको नेल्ल आन क्येडा नोले डा जन्तु राज्य का बाक्ब। मेको अरु राज्य खोदेशो मबाक्ब। मिनु मेकोमी रागी नेल्ल आन कली गू दाक्ब। आ खोइलीमी दिम्शा नेल्ल आन कली रोबल चिबल पोक्ब। 24 मिनु मेको १० ओटा ग्रोत्र आ अर्थ मार बाक्ब देशा हना, मेको राज्य रे १० जना पिप गूनीम। मिनु मेको आन नोले अर्को पिप का गूब। मेको डोंइती डा पिप खोदेशो मदुम्ब। मिनु मेकोमी पिप सां आन कली फुइक्ब। प्रकाश १७:१२ 25 मिनु मेकोमी नेल्ल क्येडा ठेयब आ पबर्म मरिमशो लोत्र पा, नेल्ल क्येडा ठेयब आ मुर आन कली यो खतम सेल्ब। मिनु मेकोमी परमप्रभु आ देशो चाड नु आ अरेशो लोत्र कली फाइक्चा दाक्ब। मिनु परमप्रभु आ मुर आन पाला का, पाला निक्शी नु आधा पाला मेको आ अधिकारमी गेचा पुंइसीनीमी। प्रकाश १३:५-६; दानीएल १२:७ 26 मिनु नोले निसाफ पची ना जाक्ब। मेको आ सासन पतीक अधिकार लेंशा गेनायो मतचा डा पा आ गुइ रे रोइक्नीम। मिनु मेको कली साइशशा खतम पोक्नीम। 27 मिनु राज्य, सासन पतीक अधिकार नु राज्य नेल्ल आन ठेयब दुम्तीके नेल्ल क्येडा ठेयब आ मुर आन कली गेचा पुंइसीनीम। मेको आन राज्य गेना हना यो लीब राज्य दुम्ब। मिनु सक्ति पाइशो नेल्लेमी मेको आ गेय पा, मेको कली टीनीम” देत। 28 मेको आं डोमु तशो आ लोत्र बाक्ब। गो दानीएल, एको मिम्शा थाम्पा हिंती। मिनु आं कुल क्येर दुम्त। मिनु गो एको लोत्र नेल्ल आं थुंम वोइक्ता। दानीएल ८:१८; दानीएल १०:८, १६-१८

8

सांड नु बोका कोइशो

1 मिनु बेल-शजर पिप दुमशो बर्स सां जाक्दीमेनु, गो, दानीएलमी लेंशा कोइतीके ताता। दानीएल ७:१ 2 मिनु मेको कोइतीकेमी गो एलाम रागी डा सुसा माइशो ठेयब सहर डा उलाइ खोला आ नेक्था बाक्शो बाक्ती। 3 मिनु गो

कोव्रशा बाक्डानु, ग्रोव्र निक्शी पाइशशो सांड का ताता। मेको आ ग्रोव्र निम्फा दुइशशो बाक्ताक्स। का चहिं अर्को क्येडा दुइशशो बाक्त। मेको दुइशशो ग्रोव्र नोले गूशो बाक्त। 4 मिनु गो मेको सांडम पच्छिम, उत्तर नु दक्खिन गे खुना खुन पशो ताता। अरु जन्तु नेल्ल मेको आ डोंइती राप्ने मचाप्बाक्तेक्म। मिनु सुइमी मेको आ सक्ति रे प्रॉइने मचाप्बाक्तेक्म। मेकोमी आ दाक्शो पशा, आ सक्ति बारत। दानीएल ८:४ 5 मिनु गो मेको कोव्रशा बाक्डानु, पच्छिम रे बोका का फो गूत। मेकोमी आ खोइल खप मथिथु, रागी नेल्ल लाक्तु। मिनु मेको बोका आ मिक्च आस दातेमी ग्रोव्र का बाक्त। दानीएल ८:२१ 6 मिनु मेको बोका मेको खोला आ नेक्था बाक्शो ग्रोव्र निक्शी पाइशशो सांड आ बाक्तीक जाक्त। मिनु मेको सांड कली खुचा, दे शुश बोल पा दोरत। 7 मिनु गो मेको सांड गे दोरशो ताता। मेको थाम्पा गाइशशा, मेको सांड कली खुशा, आ ग्रोव्र निम्फा जिक्ताक्व। मेको सांड बोल मपाइशशो दुम्शा, मेको बोका कली मारेइ पने मचब। मेको बोकामी मेको सांड कली खपीम तोक्शा, आ खोइलीमी दिम्ताक्व। मिनु सुइमी मेको सांड कली बोका आ सक्ति रे प्रॉइने मचबेम। 8 मिनु नोले मेको बोकामी ठेयब सक्ति ताप्तु। मिनु मेको नेल्ल क्येडा सक्ति पाइशशो दुम्तीके मेको आ दुइशशो ग्रोव्र जिक्त। मिनु मेको जिक्शो ग्रोव्र आ पा डा अर्को ४ ओटा ग्रोव्र रागी आ पूब, पच्छिम, उत्तर, दक्खिन गे हिरशा गूतेक्म। दानीएल ११:४

9 मिनु मेको ४ ओटा ग्रोव्र आन दाते डा का रे अर्को इम्चीली ग्रोव्र का गूत। मिनु मेको नक गूशो ग्रोव्र दक्खिन, पूब गे नु दारशो रागी गे कोव्रशा थाम्पा ठेयब दुम्शा कोल्लत। दानीएल ७:८ 10 मिनु मेको कोल्शा, स्वर्ग डा लडाइ पाइब आन हुल बाक्तीक सम्म जाक्दीशशा, लडाइ पाइब का निक्शी नु सोरुल का निक्शी आन कली तोक्शा खोइलीमी दिम्ताक्व। 11 मेकोमी लडाइ पाइब आन नेल्ल क्येडा ठेयब कली यो ठेयब लेशशो लोव्र पा, नाक्त किंत किंत डा चोशा चढ़ेतीक रोइशशा, परमप्रभु यावे आ बाक्तीके खिं प्रेशशा गेप्तु। दानीएल ९:२७ 12 मिनु आ परमप्रभु कली काइ मटितीकेमी नाक्त किंत किंत डा चढ़ेतीक मचढ़ेचा डा पा गेय पाइब वोइक्तु। मिनु मेकोमी थमा पा शंतीक कली खतम पोक्शा, आ मरिम्शो पतीक चहिं बारना बारन लपाइक्तु। 13 मिनु नोले गो स्वर्गम बाक्ब कामी लोव्र पशो नेता। मिनु अरु स्वर्गम बाक्बमी मेको कली “नाक्त किंत किंत डा चोशा चढ़ेतीक रोइक्तीके, आ मरिम्शो पतीकेमी परमप्रभु आ खिं श्येत्य नु खतम सेल्लतीक नु परमप्रभु आ लडाइ पाइब आन कली खोइलीमी दिप्शा, कोंइतीके गेना नुप्बा?” दे हिल्लो पशो नेता। 14 मिनु अर्कोमी आं कली “हजार निक्शी सहे सां नाक्दो नाक्त सम्म मोदेशो दुम्ब। मिनु नोले परमप्रभु आ खिं लेशा सेल्लनीम” देंत।

परमप्रभुमी कोंइशो आ अर्थ शेंशो

15 गो, दानीएलमी, एको कोंइतीके रे मार रुम्सीबा, दे तुइक्चा माल्ता। मिनु वोंइश मुर खोदेशो का आं डोंइती गूशा, दोक राप्शो ताता। 16 मिनु गो उलाइ खोला रे “गाब्रीएल, एको मुर कली एको कोंइतीके रे मार रुम्सीबा, मेको शेंदो” देशो मुर आ सेंदा का नेता। दानीएल ८:२; दानीएल ९:२१; लूका १:१९,२६ 17 मिनु मेको परमप्रभु यावे आ स्वर्ग डा गेय पाइब आं राप्शा बाक्तीके आं नेक्था जाक्त। मिनु गो थाम्पा हिंशा खुम्की पा बाप्ती। मिनु मेकोमी आं कली “ए मुर, एको कोंइतीके नेल्ल क्येडा नोले डा नाक्त आ पबर्म बाक्ब, दे रुपो” देंत। प्रकाश १०:६ 18 मिनु मेकोमी आं कली लोव्र पवानु, गो खपीमी दिड गोल्शा बाप्शा, थशो खोदेशो दुम्ती। मिनु मेकोमी आं कली थिशा, पोक्शा राप्पाइक्ती। 19 मिनु मेकोमी “गो इ कली नोले डा गाइक्तीक नाक्ती मार दुम्बा, तुइक्पाइक्नन। मारदे हना एको कोंइतीके नेल्ल क्येडा नोले डा नाक्त कली बाक्ब। 20 इ तशो ग्रोव्र निक्शी पाइशशो सांड मादी नु पारसी रागी डा पिप बाक्नीस। 21 मिनु मेको बोका चहिं ग्रीस रागी डा पिप बाक्ब। मेको आ मिक्च आन दाते डा ठेयब ग्रोव्र, मेकेर डा नेल्ल क्येडा डोंइती डा पिप बाक्ब। दानीएल ११:३ 22 मिनु गे मेको ग्रोव्र जिक्शा मेको आ पा डा ४ ओटा ग्रोव्र गूशो ताप्तीवी। मेको आ रागी ४ ओटा राज्य दुम्नीम। तन्न मेकोपुकी डोंइती डा राज्य खोदेशो सक्ति पाइशशो मदुम्नीम। 23 मिनु मेको आन सासन पतीक अधिकार नुप्ची ना मेको आन मरिम्शो पतीकेम ब्रीतीके खकटा थुं पाइशशो, शुश मरिम्शो पाइब पिप का जाक्ब। दानीएल ११:२१ 24 मेको शुश बोल्यो दुम्ब। मिनु मेकोमी मारेइ मारेइ खतम पोक्ब। आ पतीक मारेइ मारेइमी ग्राब। मिनु मेकोमी सक्ति पाइशशो मुर नु थमा सुइक्ब आन कली खतम पोक्ब। 25 मेको आ निप्समी मुरुम मतुइक्चा डा पा जोल पतीकेमी ग्राब। मिनु आंम थुंमी ‘गो नेल्ल क्येडा ठेयब नड’ दे मिम्शा, शुश मुर आन कली साइक्ब। मिनु मेकोमी पिप आन पिप कली यो मरिम्शो पा बोक्ब। मिनु मेको खतम सेल्लचा पुंडसीब। तन्न मुर आन गुइ रे ममाइ। 26 मिनु मेको इ कली कोंइशो नाक्दो नाक्त आ पबर्म कोंइतीके कोंइशो थमा बाक्ब। तन्न गे

एको कोइतीके कली इ थुमी खुइशशा वोइक्चा माल्नेवे। मारदे हना एको शुश नोले दुम्ब लोत्र बाक्ब” दे माइक्ती। दानीएल ८:१४; दानीएल १२:४

27 मिनु नोले गो, दानीएल, काइ सोक्त मपाइशशो खोदेशो दुम्ती। मिनु का निक्शी नाक्त रोइ पा बाक्ती। मिनु नोले बोक्शा, पिप आ गेय पथ लती। मिनु मेको आं तशो कोइतीके आ पर्वम हिंती। मारदे हना मेको कोइतीके रुप्ब सुइ मबाक्ब।

9

दानीएलम परमप्रभु कली पुंडशो

1 मिनु पिप अहासूरस आ तौ दारा डोंइती डा बर्समी कल्दी रागी डा पिप दुम्त। पिप दारा मादी जात डा बाक्माक्त। दानीएल ६:१ 2 मिनु पिप दारा आ सासन पशो डोंइती डा बर्समी गो, दानीएलमी परमप्रभु यावेमी आ लोत्र पाइब येरमीया कली ब्रेक्पाइशशो लोत्र डा किताब पढेशा, यरूसलेम खतम दुम्चा कली ७० बर्स लीनीम, दे रुप्ता। येरमीया २५:११-१२; येरमीया २९:१० 3 मिनु गो माइजा बाक्शा, अरन्डी फेक्शा नु पुलु मोंइसीशा परमप्रभु, आं होत्रप कली लोत्र पा पुंडशा, मार लोत्र लेप्बा, दे रिम्शा बाक्ती। 4 मिनु गो परमप्रभु यावे, आं परमप्रभु कली लोत्र पा, गो मार मार मरिम्शो पडा, मेको नेल्ल शोत्रशा “परमप्रभु, गे ठेयब नु हिंचा डा परमप्रभु बाक्नीनी। गे इन कली दाक्ब नु इन शेंशो लोत्र टीब आन कली गेना हना यो दाक्नीनी। मिनु इन कबल मप्रोंइनीनी। येरमीया १४:७; ब्यवस्था ७:९; नेहेम्याह १:५ 5 गोपुकीमी पाप पशा, मरिम्शो पाइतक। मिनु इन अरेशो मटिथु नु इन कली गन गन पा, इन शेंशो नु निसाफ पतीके लोत्र प्रोंइतक। 6 गोपुकीमी इन गेय पाइब, इन लोत्र पाइब आन लोत्र मनेक। मेकोपुकीमी इन नेमी आंइ पिप, आंइ ठेयब मुर, आंइ किकी पिपी नु आंइ रागी डा मुर नेल्ल आन कली लोत्र पाम्तेक्म। 7 परमप्रभु, गे ठीक पाइब बाक्नीनी। गो चहिं मुने दोक्शो बाक्नीकी। मुलाक्ती यहूदा डा मुर, यरूसलेममी बाक्ब, इस्राएली नेल्ल आन नेक्था नु डोन रागीम खेरचा पुंडसीशो मुर नेल्ल इन कली प्रोंइशो आ पर्वम दोस ताइब दुम्तेक्म। 8 परमप्रभु यावे, आंइ पिपपुकी, आंइ ठेयब मुरपुकी, आंइ किकी पिपी नु गो नेल्लेमी इन डोंइती पाप पाइतक। एज्रा ९:७; यसैया ४३:२७ 9 गोपुकी इन देशो गन गन पा मटीतक हना यो, परमप्रभु, आंइ होत्रप, गे शिशी पाइब नु पाप क्याम्ब बाक्नीनी। भजन संग्रह १३०:४ 10 गोपुकीमी परमप्रभु यावे, आंइ परमप्रभु कली मटीब बाक्तक। इन लोत्र पाइबपुकीमी इन अरेशो लोत्र आंइ कली नेंपाइशशो बाक्तेक्म। तन्न गो मपक। 11 इस्राएली नेल्लेमी इन क्येडा डोन लशा, इन अरेशो मटिथु, इन देशो मपामे। मोपतीके गो इन गेय पाइब मोसामी ब्रेक्शो इन अरेशो लोत्रमी सराप नु कसम आंइ तारी मोइक्चा पुंडसीशो बाक्नीक। मारदे हना गोपुकीमी इन कली पाप पाइतक। लेवी २६:१४-३९; ब्यवस्था २८:१५-६८ 12 मिनु गे आंइ पर्वम नु आंइ निसाफ पाइब आन पर्वम इन देशो लोत्र खाप्तीनी। यरूसलेम कली गेशो खोदेशो श्येत रागी नेल्ल आन कली गेनायो मदुम्शो बाक्त। 13 मोसामी इन अरेशो लोत्रम ‘मेको कली मटीब श्येत जाइनीम’ दे ब्रेक्शो खोदेशो पा, मेको श्येत नेल्ल आंइ कली दुम्त। मिनु गोपुकीमी परमप्रभु यावे, आंइ परमप्रभु कली ‘इन थमा लोत्र कली रुप्तीक थुं गेकी’ दे मपुंडक। मिनु आंइ मरिम्शो पशो मप्रोंइक। इन कली दाक्शा मप्रोंइतीके ममिम्तक। 14 मोपतीके परमप्रभु यावेमी आंइ कली गेतीक, मेको ठेयब श्येत तेक्तु। थमा पा परमप्रभु यावे, आंइ परमप्रभु आ पशो नेल्ल ठीक बाक्ब। मारदे हना गोपुकीमी आ देशो मपक। 15 मिनु परमप्रभु यावे, आंइ परमप्रभु गे इन मुर आन कली इजीप्त रागी रे गुंडशा चाक्तीनी। मेको इन सक्ति नु इन ठेयब नें आ पर्वम मोदेशो पाइतीनी। गोपुकी पाप पा, इन अरेशो लोत्र मटीब दुम्तक। 16 परमप्रभु, इन ठीक पतीकेमी इन सहर यरूसलेम नु इन योत्रशो डांडा आ पर्वम मगाइक्तीन, मचुरीन। आंइ पशो पाप नु आंइ किकी पिप आन मरिम्शो पशो आ पर्वम यरूसलेम नु इन योत्रशो मुर आन नेक्था बाक्ब मुर रे पा शुक्शी पाइक्चा पुंडसीब दुम्तेक्म। 17 मोपतीके आंइ परमप्रभु, इन गेय पाइब, आं देशो नु पुंडशो लोत्र नेनीने। मिनु इन नें आ पर्वम इन ब्रेशो बाक्तीके कली लेंशा शिशी पा कोत्रडीन। 18 आं परमप्रभु इन नोफा दाइशशा नेनीन। मिनु आंइ कली दुम्शो श्येत नु इन नेंम सेल्शो सहर यरूसलेम कली कोत्रडीन। आंइ ठीक पतीके आ पर्वम ममाइ, तन्न इन शुश शिशी पतीके आ पर्वम पुंडनीकी। 19 आं परमप्रभु, नेनीन। परमप्रभु, आंइ पाप क्याम्दीन। परमप्रभु, नेनीन। मिनु इन नें आ पर्वम मरिम्थु गेय पने। मारदे हना इन सहर नु इन मुर इन नें रे ब्रेत्चा पुंडसीशो बाक्नीम” दे गो दानीएलमी परमप्रभु कली देंती। येरमीया १४:९

20 मिनु गो मो देशा परमप्रभु यावे, आं परमप्रभु आ डोंइती लोव्र पना पन, प्रार्थना पा, आं पाप नु आं मुर इस्राएली आन पशो पाप नेल्ल शोवशा, आं परमप्रभु आ डांडा, आ मुर आन पब्रम पुंडना पुंडन, बाक्डानु, 21 प्रार्थना पना पन, गो आं डोंइती आं कोंइतीकेमी तशो मुर गाब्रीएल बेरशा आं नेक्था जाक्त। मेना नाक्दो डा चढेची ना जाक्शो बाक्त। दानीएल ८:१६ 22 मिनु मेकोमी आं कली “दानीएल, मुल गो इ कली जोक्तीक तुइक्तीक नु रुप्तीक थुं गेथ जाक्ती। 23 मिनु गे गेना पुंड्या गोवी, मेना गो लोव्र का नेता। मिनु गो इ कली मेको लोव्र शेंथ जाक्ती। मारदे हना गे शुश दाक्चा पुंडसीशो मुर बाक्नेवे। मेको लोव्र मिम्शा, मेको कोंइतीक रुपो।

24 इ मुर नु परमप्रभु आ सहर ७० हप्ता सम्म श्येत जचा माल्नीम। मिनु मे नोले मरिम्शो नु पाप पतीके नुप्ब। मेना अरेशो मटितीके क्याम्तीके गेय पशो बाक्ब। मिनु ठीक पतीके गेना हना यो लीब। मिनु मेको कोंइतीक नु परमप्रभु यावे आ लोव्र पाइब कली छाप थोक्शा नोले परमप्रभु आ बाक्तीक लेंशा सेल्शा तेल खेक्नीम। 25 मोपतीके यरूसलेम लेंशा सेल्तीक लोव्र तेल लुक्शो पिप मजाक्म सम्म ७ हप्ता बाक्नीम। मिनु ६२ हप्ता लां नु खिं आ एर ओंथ लेंशा सेल्चा कली माल्ब, दे रुप्शा तुइक्तो। मेना श्येत जतीक ना बाक्ब। 26 मिनु ६२ हप्ता नोले मेको तेल लुक्शो का मारेइ मदुम्थु यो तिल्या पुंडसीब। मिनु मेको जाक्चा चिक्शो पिप आ लडाइ पाइब नु जाक्शा, मेको सहर नु परमप्रभु यावे आ बाक्तीक खतम पोक्ब। मिनु मेको आ नुप्ची ना ठेयब भोल यिशा, नोले सम्म लडाइ दुम्ब। डोंइती मोदेशो खतम दुम्तीक श्येत आ पब्रम देशो बाक्ब। यसैया २८:२२; लूका २१:२३-२४ 27 मेकोमी हप्ता का सम्म शुश मुर नु कबल पाइब। मिनु आधा हप्तामी चढेतीक नेल्ल तेक्ब। मिनु मेकोमी चढेतीक आ पा डा शुश प्रांग्रा दिचा डा गेय पाइब। मेको कली खतम सेल्तीक लोव्र मग्रूम सम्म मोदेशो पाइब” दंत। दानीएल ८:११; दानीएल ११:३१; दानीएल १२:११; मती २४:१५; यसैया १०:२२-२३

10

दानीएलम नोले डा कोंइतीके तशो

1 मिनु पारसी रागी डा कोरिस पिप दुम्शो बर्स सां दुम्मेनु, परमप्रभुमी बेल्ल-शजर माइशो दानीएल कली लोव्र का तुइक्पाइक्तु। मेको लोव्र थमा बाक्त। ठेयब श्येत आ पब्रम बाक्त। मेको दानीएलमी मेको कोंइतीक तशा, रुप्तीक थुं यो ताप्तु। दानीएल १:२१; दानीएल १:७ 2 मेना गो, दानीएल, हप्ता सां सम्म रोंका पाता। 3 मेको हप्ता सां सम्म गो ब्रोव्रशो मारेइ जचा थोव्रक मजड। श्ये मव्वड। अडगुर शांबु यो मतूडु। मिनु तेल यो मखेक्सीड। 4 मिनु डोंइती डा महिना डा २४ नाक्त टाइग्रीस माइशो ठेयब खोला आ नेक्था राप्शो बाक्ती। 5 मिनु गो इर गे कोव्रडुनु, सुती वा फेक्शो मुर का ताता। मेकोमी थम रिम्शो ओफीर डा सुन के किप्शुर किप्शो बाक्त। दानीएल ८:१५; दानीएल १२:६; इजीकीएल ९:२; प्रकाश १:१३-१५ 6 मिनु मेको आ रां बेरील माइशो हीरा खोदेशो बाक्त। आ कुल चिला खोदेशो बाक्त। आ मिक्च ब्रशो तोव्रशी खोदेशो बाक्त। मेको आ गुइ खोइली थाम्पा खुइशो कांसा खोदेशो पा टल्केशो बाक्तेक्म। मेको आ सेंदा शुश मुर आन लोव्र पशो खोदेशो नेंसाक्ब। इजीकीएल १:२७-२८ 7 गो, दानीएलमी मेको कोंइतीक ताता। गो नु बाक्ब मुर सुइमी मतामे। तन्न मेकोपुकी हिंशा खिंखि पा प्रोक्शा खुंइसाक्म। 8 मिनु मेको ठेयब कोंइतीक तचा कली गो का ला बाक्ती। मिनु मारेइ पने मचाप्ब दुम्ती। मिनु आं कुल बेक्चा चिक्शो मुर के खोदेशो दुम्शा, मारेइ बोल मपाइशो दुम्ती। 9 मिनु नोले मेकोमी लोव्र पशो नेता। मिनु मेको लोव्र नेंनु चोटीन, गो खपीमी दिड गोल्शा, थती।

10 मिनु गुइ काम आं कली थिती। मिनु गो गुइ नु पोक्च थेक्शा, बोक्ती। 11 मिनु मेकोमी आं कली “दानीएल, गे शुश दाक्चा पुंडसीशो मुर बाक्नेवे। आं देशो लोव्र नोफा दाइशशा नेनो। बोक्शा बाक्को। मारदे हना गो इ बाक्तीकेमी सोइक्चा पुंडसीशो बाक्नुड” दे माइक्ती। मिनु मेकोमी लोव्र पवानु, गो आ डोंइती खिंखि पा राप्ती। 12 मिनु मेकोमी आं कली “दानीएल, महिनो, गे रुप्चा माल्शा डोंइती डा नाक्ती रे इ परमप्रभु आ डोंइती आंम कली ब्रेम्शो सेल्साक्वे, इ पुंडशो नेतीके गो एक जाक्ती। 13 तन्न पारसी राज्य कली कोव्रब सैतान आ गेय पाइबमी गो नु २१ नाक्त सम्म लडाइ पा तेक्ती। मिनु परमप्रभु यावे आ स्वर्ग डा ठेयब गेय पाइब मिकाएल जाक्शा, आं कली वारच पाइक्ती। मिनु गो जाक्चा ताता। यसैया २४:२१ 14 नोले डा नाक्त इ मुर आन कली मार दुम्बा, दे गो इ कली रुप्पाइक्थ जाक्ती। मारदे हना इ तशो कोंइतीक क्येडा नोले डा नाक्त कली अर्को कोंइतीक का यो बाक्ब” दे माइक्ती।

15 मिनु मेकोमी आं कली लोव्र पवानु, गो आं पिया खुक्शा मारेइ लोव्र पने मचाप्ब दुम्शा बाक्ती। 16 मो दुम्मेनु, मुर खोदेशो काम आं शोव्र थिप्तु। मिनु गो लोव्र पने चाप्ता। मिनु गो आं डोंइती राप्शा बाक्ब कली “आं प्रभु, एको

कोंइतीके आ पबर्म खाइक्ती। मिनु आं के मारेइ बोल मली। यसैया ६:७; येरमीया १:९ 17 गो, इन वाइलम, गे नु दोपा लोव्र पने चापनुडा? मारदे हना गो खिंखि पा, आं बोल नेल्ल लशा, आ सोक्त हेररा मली” देंती।

18 मिनु मेको मुर खोदेंशोमी आं कली लेंशा थिशा, बोल्यो सेल्टी। दानीएल ८:१८ 19 मिनु मेकोमी आं कली “नेल्ल क्येडा दाक्चा पुंडसीशो, महिनो। इ कली मारेइ मदुम्ब। बोल्यो नु महिंब दुमो” दे माइक्ती। मेकोमी गो नु लोव्र पवा नोले, गो बोल्यो दुम्ती। मिनु गो “आं प्रभु, लोव्र पने। मारदे हना गे आं कली बोल्यो सेल्टीनी” देंती। प्रकाश १:१७ 20 मिनु मेकोमी “गो इ बाक्तीकेम मारदे जाक्डा, तुइक्नेवे? गो पारसी राज्य कली कोव्रब सैतान आ गेय पाइब नु लडाइ पचा कली लेत्चा मालनुड। गो ग्राडा नोले ग्रीस रागी डा सैतान आ गेय पाइब जाक्ब। 21 मिनु गो थमा लोव्र डा किताबमी मार ब्रेक्शो बाक्मे, मेको इ कली शोव्रथ जाक्ती। मेकेर मिकाएल क्येडा लाक्शा, अरु वारच पाइब सैतान आ गेय पाइब नु लडाइ पचा कली सुइ मबाक्नीम। परमप्रभु यावे आ स्वर्ग डा गेय पाइब, मिकाएल चहिं इस्राएली इन कली कोव्रब बाक्ब।

11

1 गो दारा मादी डा पिप दुम्शो डोंइती डा बर्समी मिकाएल कली वारच पाइक्चा नु अरु रे पा प्रोंइचा कली बाक्ती” देंत।

लडाइ आ पबर्म नोले दुम्ब लोव्र

2 मेकोमी लेंशा परमप्रभु यावे आ स्वर्ग डा गेय पाइबमी “मुल गो इ कली मेको थमा लोव्र पाइनुड। पिप दारा आ नोले पारसी रागीमी पिप सां दुम्नीम। मिनु मेको सांमी नोले जाक्ब पिप मेको डोंइती डा सां आन क्येडा शुश शोंप पाइश्शो दुम्ब। मिनु मेको पिपमी आ शोंपोमी आ सक्ति बारपाइक्ना पाइक्न लशा, रागी नेल्ल आन कली ग्रीस राज्य नु लडाइ पचा कली पोक्ब। दानीएल १०:२१ 3 मिनु नोले शुश लडाइ पाइब पिप का जाक्ब। मेकोमी शुश रागी कली सासन पाइब। मिनु मेकोमी मार दाक्बा, मेको पाइब। दानीएल ८:२१ 4 मिनु आ सक्ति बारना बारन लमेनु, आ राज्य पूर्व पच्छिम, उत्तर दक्खिन गे योक्सीब। मोपा योक्सीशा, आ तौ चचपुकीम मारेइ मताइनीम। मिनु मेको खोदेंशो पा सुइमी लेंशा सासन मपाइनीम। मारदे हना मेको आ राज्य नेल्ल खतम दुम्मेनु, अरु आन कली दुम्ब। दानीएल ८:८, २२ 5 मिनु नोले दक्खिन डा पिप शुश सक्ति पाइश्शो दुम्ब। तन्न आ कप्तान आन दाते डा का मेको पिप क्येडा बोल्यो दुम्ब। मिनु मेकोमी पिप आ शुश रागी रोइश्शा, हुकुम पाइब। 6 मिनु बर्स का निक्शी नोले मेको निक्शी गारशा, दक्खिन डा पिपम आ तमी मेको उत्तर डा पिप कली ग्युंवे पा गेब। तन्न मेको आ सक्ति मलीब। मिनु मेको आ तौ चच यो मलीनीम। मेको पिप आ तमी, आ गेय पाइब, आ आल नु मेको कली दाक्ब नेल्ल खतम पोक्चा पुंडसीनीम। 7 मिनु नोले मेको पिप आ तमी आ खिं डा मुर का गूब। मेकोमी उत्तर डा पिप नु मेको आ मुर नु लडाइ पा, आ गारो हिरशो सहर नु दरवार ओव्रनीम। मिनु मेकेर लडाइ पा ग्रानीम। 8 मेकोमी मेको आन देवी देवता आन मूर्तिपुकी नु सुन चांदी के बोसपुकी रोइश्शा, इजीप्त रागीमी लाइक्ब। मिनु मे नोले उत्तर डा पिप नु बर्स का निक्शी सम्म लडाइ मपाइब। 9 मिनु नोले उत्तर डा पिपमी दक्खिन डा पिप कली लडाइ तोइब। तन्न मेको आंम आ रागीमी लेशशा लाइब।

10 मिनु मेको उत्तर डा पिप आ तौपुकीमी शुश लडाइ पाइब मुर खुप्नीम। मिनु मेको तेक्ने मचाप्चा डा भोल बुद पा ग्राना ग्रान लाइनीम। मेको लेंशा गारो हिरशो सहर डा दरवार सम्म लाइनीम। 11 मिनु दक्खिन डा पिप गाइश्शा, उत्तर डा पिप नु लडाइ पचा कली बोक्ब। उत्तर डा पिपमी चहिं लडाइ पचा कली शुश लडाइ पाइब आन कली खुप्ब। तन्न मेको आन जोरी सत्रु रे पा ब्रुइनीम। 12 मिनु उत्तर डा लडाइ पाइब ग्याइक्चा पुंडसीमानु, दक्खिन डा पिप ठेयब लेशशा हजार हजार मुर आन कली साइक्ब। तन्न मोदेंशो पशा यो, ब्रुना ब्रुन लाइब। 13 मिनु उत्तर डा पिपमी डोंइती क्येडा शुश लडाइ पाइब खुप्ब। मिनु बर्स का निक्शी नोले लडाइ पचा कली शुश या कुरशा शुश लडाइ पाइब नु बारब। 14 मेना शुश रागी डा मुरपुकी यो दक्खिन डा पिप नु लडाइ पचा कली बोक्नीम। मिनु आ मुर आन दाते डा रोइक्ब नु साइक्ब यो बोक्नीम, दे कोंइतीके कोंइशो गाप्चा कली बाक्ब। तन्न मेकोपुकी मग्रानीम। 15 मिनु नोले उत्तर डा पिप जाक्शा, दक्खिन डा राज्य इन गारो हिरशो सहर पुम्शा, आंम के सेल्ब। दक्खिन डा लडाइ पाइब ब्रुइनीम। मिनु मेको आन नेल्ल क्येडा बोल्यो लडाइ पाइब आन सक्ति यो जाम्शा लाइब। 16 मिनु उत्तर डा पिपम मार पचा दाक्बा, मेको पाइब। मिनु सुइमी मेको कली तेक्ने मचाप्नीम। मिनु मेकोम नेल्ल क्येडा दारशो रागी आंम के सेल्शा, मारेइ मारेइ खतम सेल्ब। दानीएल ८:९ 17 मेकोमी कबल पा ‘गो दक्खिन डा पिप आ राज्य नेल्ल आंम के सेल्लुडमी’ दे मिम्ब। मिनु मेको कली खतम सेल्चा कली गारचा देखु पा, आ तमी कली ग्युंवे पा गेब। तन्न मेको आ मिम्शो खोदेंशो

मदुम्ब। 18 मिनु नोले मेकोमी समुन्द्र आ नेक्था बाक्शो रागी नु लडाइ पा, शुश रागी आंम के सेल्ब। तन्न आ लडाइ पाइब आन ठेयब मुर कामी मेको आ ठेयब लेशो थुं थमा पा खतम पोक्शा गेब। 19 मिनु नोले मेको पिप आ रागी डा दरवारम लेत्चा थुं पाइब, तन्न साइक्चा पुंडसीब।

20 मिनु मेको आ नोले अर्को मुर का पिप दुम्ब। मेकोमी आ राज्य कली शोंप तेल्ला कली ठेयब मुर का कली तिरो पोक्थ सोइक्ब। तन्न इच्का नाक्त नोले मेको पिप यो गाइक्चा मपुंडसीथु, लडाइ मपथु, बेक्ब। 21 मिनु मेको पिप आ नोले मारेइ मान मपाइशो मुर का जाक्शा, सुइमी मतुइक्चा डा पा, रिम्शो लोत्र पखु पा मेको राज्य आंम के सेल्ब। दानीएल ८:२३-२४ 22 मिनु मेको आ सक्ति बारना बारन लशा, नेल्ल आन कली ग्राब। मेकोमी परमप्रभु यावे आ कबल पशो का कली यो खतम पोक्ब। 23 मिनु मेकोमी लोत्र गारपाइशो दुशा बाक्शो देखु पा, जोल पाइब। मिनु आ मुर का निक्शी ला बाक्तेक्म हना यो, मेको सक्ति पाइशो दुम्ब। 24 मिनु सुइमी मारेइ मतुइक्थु, मेको नेल्ल क्येडा शोंप पाइशो रागी लशा, लडाइ तोइब। मेकोम आ किकी पिपीपुकीम गेनायो मपशो गेय पाइब। आ नोले खोइक्ब आन कली आ रोइशो शोंप नु रू योत्रशा गेब। मेकोमी अरु गारो हिरशो सहर आन कली दोपा ग्राचा, दे मिम्शा बाक्ब। तन्न मोदेशो मिम्शो नाक्त का निक्शी कली ला दुम्ब। 25 मिनु उत्तर डा पिपमी आ बोल्यो लडाइ पाइब आन कली लाइशो, आ सक्ति नेल्लेमी दक्खिन डा पिप नु लडाइ पाइब। मिनु दक्खिन डा पिपमी यो ठेयब हिकने मचाप्चा डा लडाइ पाइब लाइशो, मेको नु लडाइ पाइब। तन्न मेको पिप बुइब। मारदे हना आ मुरुमी मेको कली जोल पा मग्रापाइक्नीम। 26 मोदेशो पाइब आ नु जाइब बाक्नीम। मिनु मेको आ लडाइ पाइब ब्राशा, शुश साइक्चा पुंडसीनीम। 27 मेको पिप निक्शी मरिम्शो थुं पाइशो बाक्नीस। काथा जाम्ताक्स हना यो, जोल पमुइनीस। तन्न मेको रे मारेइ रिम्शो मदुम्ब। मारदे हना नोले डा नाक्त मजाक्शो बाक्ब। 28 मिनु उत्तर डा पिप शुश शोंप लाइशो, आ रागी लेशो लाइब। तन्न मेकोमी परमप्रभु यावे आ कबल पशो आ पर्वम शुश गाइशो बाक्ब। मिनु मेको पिपमी मार दाक्ता, मेको पाइब। मिनु आ रागीम लेशो लाइब।

29 मिनु डोंइती देशो नाक्त गाम्मेनु, मेको उत्तर डा पिप लेंशा दक्खिन डा पिप नु लडाइ पथ लाइब। तन्न डोंइती डा खोदेशो पा ग्राने मचाप्ब। 30 कितीम रे पा मेको नु लडाइ पचा कली जहाजपुकी जाक्नीम। मिनु मेको पिप आ थुं लुक्च लशा, आ रागी लेप्ब। मेकोमी परमप्रभु यावे आ कबल पशो आ पर्वम गाइशो, थमा सुइक्ब आन कली खेदा पाइब। मिनु परमप्रभु यावे आ कबल प्रोंइशो मुर नु गारब। 31 मिनु मेको पिप आ सोइशो लडाइ पाइबपुकीमी परमप्रभु यावे आ खिं नु दरवार कली ग्रांग्रा दिशो सेल्नीम। मिनु मेकोपुकीमी नाक्त किंत किंत चोशा चढेतीक गेय तेक्नीम। मिनु मेकेर ग्रांग्रा दिचा डा मार मार थोत्रक वोइक्नीम। दानीएल ९:२७ 32 मिनु मेको पिपमी परमप्रभु यावे आ कबल पशो मटीब मुर आन कली जोल पा आ नोले खोइक्ब सेल्ब। तन्न आन परमप्रभु कली तुइक्ब मुरपुकी बोल्यो दुम्शा, मेको कबल काइ मप्रोंइनीम। 33 मिनु मेको आन दाते डा जोक्ब तुइक्बपुकीमी शुश मुर आन कली रुपब सेल्नीम। मोपतीके नाक्त का निक्शी सम्म मेको तरवारम क्योरचा, मीम हुन्चा, ग्याइशो चोक्चा नु आन मार मार रोइक्चा पुंडसीनीम। 34 मिनु मोदेशो दुम्मेनु, इच्का वारच पाइक्चा पुंडसीनीम। मिनु शुश मुर मेको आन नोले खोइक्नीम। तन्न थुं पाइशो मुर ला मेको आन नोले खोइक्नीम। 35 मिनु मुरुम जोक्ब तुइक्ब आन कली मोदेशो खेदा पतीके रागीम नोले डा नाक्ती सम्म मेको आन कली सुन खोदेशो पा यपाइक्चा, नाक्चा नु रिम्शो दुम्पाइक्चा कली बाक्ब। मेको मुल सम्म मजाक्शो बाक्ब।

ठेयब लेशो पिप

36 पिपमी मार दाक्बा, मेको पाइब। मिनु मेकोमी 'देवी देवता नेल्ल आन क्येडा ठेयब नड' देंब। मिनु परमप्रभु नेल्ल आन क्येडा ठेयब परमप्रभु आ पर्वम गेनायो मनेंसीशो मरिम्शो लोत्र पाइब। मेको आ नोले डा नाक्त मजाक्म सम्म आ माल्शो ताइब। परमप्रभुमी मेको कली सजाइ मगेवा सम्म मोदेशो दुम्ब। मारदे हना परमप्रभुमी मार पचा मिम्बा, मेको पाइब। २थिस्सलोनिकी २:४; दानीएल ७:८, २५; प्रकाश १३:५-६ 37 मिनु मेको पिपमी आ किकी पिपी आन देवी देवता आन कली सेउ मपाइब। मिनु मीश मुर आन दाक्शो देवी देवता आन कली यो सेउ मपाइब। मारदे हना 'गो देवी देवता नेल्ल आन क्येडा ठेयब नड' दे मिम्सीब। इजीकीएल ८:१४ 38 तन्न बोल्यो दरवार डा देवता कली सेउ पाइब। आ किकी पिपीमी मेको कली मतुइशो बाक्तेक्म। मेको आन कली सुन, चांदी, हीरा नु शुश क्येट लाइब थोत्रक गेशा ठेयब सेल्ब। 39 मेकोमी अर्को रागी डा देवी देवता आन कली सेउ पशा, नेल्ल क्येडा बोल्यो दरवार कली ग्राब। सुमी मेको कली मान पाइबा, मेको शुश शोंप पाइशो दुम्ब। मिनु मेको आन कली रू शुश गेशा, शुश मुर आन कली हुकुम पाइब सेल्ब।

40 मिनु नोले डा नाक्ती दक्खिन डा पिपमी मेको कली लडाइ तोइब। मिनु उत्तर डा पिपमी फश गिवार खोदेशो पा मेको नु लडाइ पाइब। मेकोमी बग्गी, शारा डोइक्ब नु लडाइ पाइब जहाज शुश चाक्शा लडाइ पाइब। 41 मिनु मेको रागी रागी नु लडाइ पा, ठेयब खोला खोदेशो पा बारब। मिनु मेको दारशो रागी ओव्रशा, हजार हजार मुर आन कली साइक्ब। तन्न एदोम, मोआब रागी नु अम्मोनी आन रागी डा नेल्ल क्येडा ठेयब बाक्तीके मेको आ गुइमी मदुम्नीम। दानीएल ११:१६ 42 मेकोमी रागी रागी आन कली ग्राना ग्रान लाइब। मिनु इजीप्त रागी कली यो ग्रान। 43 मिनु मेकोमी इजीप्त डा सुन चांदी नु शोप नेल्ल आंम के सेल्लब। लिबीया नु एथीयोपीया डा मुर आ गेय पाइब दुम्नीम। 44 मिनु मेकोमी पूर्व नु उत्तर रे जाक्शो लडाइ पतीक लोव्र नेंशा, मेको शुश गाइश्शा, मुर आन कली शुश साइश्शा, रागी नेल्ल रोबल चिबल पोक्ब। 45 मिनु मेकोमी ठेयब समुन्द्र नु नेल्ल क्येडा दारशो परमप्रभु आ सहर डा डांडा आस दातेमी आ बाक्तीक ताम्बु कीब। मो पाप्तु हना यो, मेको बेक्ब। सुइमी मेको कली वारच मपाइनीम” दे स्वर्ग डा गेय पाइबम देंत।

12

बेक्शो मुर सेंसीशो

1 मिनु परमप्रभु यावे आ स्वर्ग डा गेय पाइबमी “मेना नेल्ल क्येडा ठेयब स्वर्ग डा गेय पाइब मिकाएल जाक्ब। मिनु मेकोमी इ रागी डा मुर आन कली कोव्रब। मेना रागी दुम नोले गेनायो मदुम्शो श्येत जाक्ब। तन्न इ मुर श्येत रे प्रोइचा पुंडसीनीम। सु सु आन नें किताबम बेक्शो बाक्मे, मेको ब्रोंइचा ताइनीम। दानीएल १०:१३; प्रकाश १२:७; मत्ती २४:२१; दानीएल ७:१० 2 मिनु खपीमी बेक्शा इप्शो नेल्ल बोक्नीम। का निक्शी गेना हना यो ब्रोंइचा कली बोक्नीम। का निक्शी चहिं गेना हना यो शुश मुने दोक्चा कली बोक्नीम। यूहन्ना ५:२९ 3 मिनु जोक्ब तुइक्बपुकी सरीड डा छेडछेड खोदेशो दुम्नीम। मिनु सु सुमी मुर आन कली ठीक लांमी गाक्पदमे, मेकोपुकी गेना हना यो सोरुल आ छेडछेड खोदेशो दुम्नीम। दानीएल ११:३३; हितोपदेस ४:१८; मत्ती १३:४३

4 तन्न गे दानीएलमी, एको लोव्र सुइ आन कली मदेनो। एको नोले डा नाक्त कली बेक्शो किताब मप्राक्थु, छाप थोक्शा वोतो। नोले डा नाक्तीम शुश मुर आन थुं मनाइक्थु, थमा लोव्र माल्शा शुश तुइक्ब दुम्नीम” देंत। प्रकाश १०:४

नोले डा नाक्त

5 मिनु गो, दानीएलमी, अर्को मुर निक्शी तातासी। का खोला आ ओंथ हांबु नु अर्को खोला आ आइक्ची हांबुम बाक्ताक्स। 6 मिनु कामी सुती वा फेक्शा आइक्ची हांबुम बाक्ब कली “एको लोव्र गाप्चा कली गिश नाक्त बाक्नीमी?” दे हिल्लो पाप्तु। 7 मिनु मेको आइक्ची हांबु बाक्ब बुश सुती वा फेक्शोमी आ गुइ निम्फा सरीड गे पोक्तु। मिनु गेना हना यो ब्रोंइशा बाक्ब आ नें थिशा कसम जशो नेंता। मिनु मेकोमी “एको पाला का बाक्शो ना, पाला निक्शी बाक्शो ना नु आधा पाला बाक्शो ना कली दुम्ब। मिनु परमप्रभु यावे आ मुर आन कली श्येत जची ना नुम्मेनु, मेको देशो लोव्र नेल्ल गाप्ब” दे गेना हना यो ब्रोंइशा बाक्ब आ नेंमी कसम जाप्तु। दानीएल ७:२५; प्रकाश १०:५-६ 8 गो मेको लोव्र नेंता, तन्न मरुबु। मोपतीके गो “आं प्रभु, एको नेल्ल रे मार दुम्बा?” दे हिल्लो पाता। 9 मिनु मेकोमी “दानीएल, गे इ लां खोतो। मारदे हना एको लोव्र नोले डा नाक्त सम्म खुइश्शा छाप थोक्शा वोइक्चा माल्लब। 10 मिनु शुश मुर नाक्चा, रिम्शो सेल्चा नु सुन यपाइश्शो खोदेशो पा रिम्शो सेल्चा पुंडसीनीम। तन्न परमप्रभु कली मटीब, मटिना टिन बाक्शा, मारेइ मरुप्नीम। तन्न जोक्ब तुइक्बपुकीमी एको लोव्र रुप्नीम। 11 मिनु नाक्त किंत किंत डा चोशा चढ़ेतीक चढ़ेचा नाइक्तमे नोले नु ग्रांग्रा दिशो थोव्रक चढ़ेमे सम्म हजार का, सहे निक्शी ९० नाक्त दुम्नीम। दानीएल ९:२७ 12 सु सु हजार का सहे सां ३५ नाक्त सम्म फाल्शा बाक्नीमी, मेको ग्येरसीशो मुर बाक्नीम। 13 तन्न गे, दानीएल, इ लां लशा, थुं नाइसो। मिनु नोले डा नाक्ती इ इनाम तचा कली बेक्चा रे सेंचा पुंडसीनेवे” देंत।

होसे

ब्रेक्ब मुर: एको किताब होसेमी ब्रेक्शो बाक्ब। होसे आ अर्थ “परमप्रभु, वारच पाइय्यीनी” देशो बाक्ब।

गेना ब्रेक्शो: होसेमी परमप्रभु यावे आ लोव्र इस्राएल डा उत्तर रागी डा पिप योआश आ तौ येरोबोआम आ सासन ७८२-७५३ बि. सी. रे हिज्कीयाह आ सासन ७२९/७१६-६८६ बि. सी. सम्म पशो बाक्ब। मेना परमप्रभु यावे आ लोव्र पाइब आमोस, यसैया नु मीका यो बाक्मा बाक्ब। गोत्ये माइश्शो ठेयब जोक्ब तुइक्ब मुर कामी “मेको किताब ८०० बि. सी.म हिब्रू लोव्र रे पा ब्रेक्शो बाक्ब” दे ब्रेक्शो बाक्ब।

मार ब्रेक्शो:

१. होसे आ ग्युंवे इस्राएली आन परमप्रभु यावे कली प्रोंइशो कोंइचा कली बाक्ब।
२. परमप्रभुमी इस्राएली आन कली दाक्शा, मप्रोंइतीके आ कोंइतीक यो बाक्ब। होसे १:-३:-
३. चढेब नु पिप आन कली मरिम्शो पचा कली दोस गेतीके यो बाक्ब। होसे ४:-१०:-
४. नोले परमप्रभु आ शिशी कोंइतीके बाक्ब। होसे ११:-१४:-

डोंइती डा लोव्र

१ परमप्रभु यावेमी बेयरी आ तौ होसे नु लोव्र पाप्तु। मेना यहूदा डा पिप उज्जीयाह, योथाम, आहाज नु हिज्कीयाह बाक्तेक्म। मिनु इस्राएल डा पिप योआश आ तौ येरोबाम बाक्ब। यसैया १:१; २राजा १४:२३; आमोस १:१

नोले शोंइसीतीके आ चिन्ड

२ मिनु परमप्रभु यावेमी होसे नु लोव्र पचा गोप्तु। मेकोमी होसे कली “लावो, मिनु तेल्लेम मीश मुर कली ग्युंवे पावो। मिनु मेको नु आल थिवो। मारदे हना एको रागी परमप्रभु यावे कली प्रोंइशा, तेल्लेम खोदेशो दुम्शो बाक्ब” देत। होसे ३:१; ब्यवस्था २३:१८ ३ मिनु होसे लशा दिब्लैम आ तमी गोमेर कली ग्युंवे पाप्तु। मिनु मेको मीशेमी आल कुरशा, तौ का थिप्तु।

४ मिनु परमप्रभु यावेमी होसे कली “मेको तौ आ नें येज्जेल वोतो। मारदे हना गो रीब पा येहू आ खिं कली येज्जेलमी पशो हुश खाक्श आ पर्बम क्येक्क लेत्नुड। मिनु इस्राएल राज्य खतम पोक्नुड। २राजा १०:१-१४ ५ गो मेको नाक्ती इस्राएल कली येज्जेल डा दिंममी खतम सेल्नुड” देत।

६ मिनु गोमेरमी लेंशा आल कुरशा, तमी का थिप्तु। मिनु परमप्रभुमी होसे कली “मेको आ नें लो-रूहामा वोतो। मारदे हना गो इस्राएल कली लेंशा शिशी मपाइनुड। मिनु मेको आन पाप मक्याम्नुड। होसे २:३, २५ ७ मिनु गो यहूदा आ खिं कली शिशी कोंइनुड। मिनु मेको आन कली जोरी सत्रु आन गुइ रे पा प्रोंइनुड। लिब्रा, तरवार नु लडाइ पाइब शारा नु शारा डोइक्बपुकी रे ममाइ, तन्न गो मेको आन कली आंमान प्रोंइनुडमी” दे परमप्रभु यावे, आन परमप्रभुमी देत। लो-रूहामा आ अर्थ “मदाक्नुड” देशो बाक्ब।

८ मिनु गोमेरमी लो-रूहामा कली दूध तुंइचा प्रोना नोले, आल कुरशा, अर्को तौ का थिप्तु। ९ मिनु परमप्रभुमी होसे कली “मेको आ नें लो-अम्मी वोतो। मारदे हना गेपुकी आं मुर मननी। गो इन परमप्रभु मनड। लो-अम्मी आ अर्थ ‘गे आं मुर मनवे नु गो इ परमप्रभु मनड’ देशो बाक्ब।

१० इस्राएलीपुकी समुन्द्र डा बाल्वा खोदेशो पा शुश दुम्नीम। मिनु सुइमी मेको आन कली पुक्ने नु हिक्ने मचाप्नीम। ते मेको आन कली ‘गेपुकी आं मुर मननी’ देशो बाक्मे मेकेर मेको आन कली ‘गेना हना यो ब्रोंइशा बाक्ब परमप्रभु आ मुर’ देनीम। उत्पत्ती २२:१७; रोमी ९:२६ ११ मिनु यहूदा आ मुर नु इस्राएल आ मुर लेंशा गारशा का दुम्नीम। मिनु मेकोपुकीमी मुर का कली सासन पाइब सेल्नीम। मिनु मेको रागी रे ग्रीनीम। मारदे हना येज्जेल आ नाक्त ठेयब दुम्ब” देत। यसैया ११:११-१३; येरमीया ३:१८; इजीकीएल ३७:२२

2

लेंशा रिम्शो पशो

१ मिनु परमप्रभुमी “गेपुकी आंम लोक्ब आन कली ‘गे आं मुर बाक्नीनी’ देनीन। मिनु इन समी आन कली ‘आं दाक्शो समी’ देनीन। होसे १:१९; होसे १:६ २ इन ममा कली हुइक्तीन। मेको कली शुश हुइक्तीन। मारदे हना मेको

आं मीश मबाक्ब। मिनु गो मेको आ वोंइश मनड। मेकोमी आ मिक्च वोंइश मुर गे हिरचा प्रोनल। मिनु आ दूध आस दाते डा नाता खोइश्शा, ग्रांग्रा दिशो गेय प्रोनल। इजीकीएल १६:२३; ३ मो मपाप्तु हना, गो मेको आ वा पुइश्शा, मेको जरमेशो नाक्ती खोदेंशो पा शिश्रा पोक्नुड। गो मेको कली गोरशो रागी खोदेंशो सेल्लुड। सोव्रशो रागी खोदेंशो पा ब्वाक्कु मबाक्शो सेल्लुड।

परमप्रभु रे नोले शोंइसीशो

४ गो मेको आ तमी तौ आन कली आं दाक्स मकोंइक्नुड। मारदे हना मेकोपुकी तेल्लेम पा थिशो आल बाक्नीम। ५ मेको आन ममा जोल पा अर्को मुर नु गाक्त। मेको आन कली मुने पा थिशो बाक्त। मेकोमी 'गो आं कली दाक्ब वोंइश खोइक्नुड। मिनु मेकोमी आं कली जचा तूचा, ऊन नु सुती वा, तेल नु अडगुर शांबु गेब' देंत। येरमीया ४४:१७ ६ मोपतीके गो मेको आ लां चूमी तेक्नुड। मेको आ लांम गारो सेल्शा, आ लां तेक्शा वोइक्नुड। मिनु मेकोमी तेइ लां मताइब। ७ मेकोमी आ दाक्शो मुर आन कली माल्थ लाइब। तन्न मेको आन कली ग्याइक्ने मचाप्ब। मेकोमी आ दाक्शो मुर आन कली कोव्रब। तन्न मथिप्ब। मिनु मेकोमी 'मुल गो डोंइती डा खोदेंशो पा आं वोंइश आ बाक्तीक लाइनुड। मारदे हना गो मुल क्येडा मेना ठीक बाक्ती' देंब। ८ गो मेको कली अन्न, नक अडगुर शांबु नु तेल गेता हना यो मेकोमी मतुइक्त। गोम मेको कली सुन चांदीम ग्योम्ताक्ड। तन्न मेकोमी आं गेशो नेल्ल बाल देवता कली गेप्तु। ब्यवस्था ७:१२-१३

९ मोपतीके बाली मीमेनु नु नक अडगुर शांबु बोक्मेनु, मेको गो लांइसीनुड। मिनु मेकोमी फेक्शो आं ऊन नु सुती वा यो लांइसीनुड। १० गो मेको आ दाक्शो मुर आन डोंइती मेको कली शिश्रा पा आ मुने कोंइक्नुड। मिनु सुइमी यो मेको कली आं गुइ रे मलाइक्नीम। येरमीया १३:२२ ११ गो मेको आ चाड नेल्ले मानेचा मगेनुड। मेको आ बर्स बर्स डा चाडपुकी नु औंसी डा चाड, मेको आ नाइक्तीक नाक्तपुकी नु मेको आ अरु चाड नेल्ल मानेचा मगेनुड। १२ गो मेको आ अडगुर बोटपुकी नु फोव्रशी रवापुकी खतम सेल्लुड। मेको आ पर्वम मेकोमी 'एको आं तेल्लेम पशो डा गाल्च नमी' देंशो बाक्त। गो मेको रवा रे ठेयब ब्वाकी सेल्लुड। मिनु ब्वाकी डा जन्तुपुकीमी मेको ब्वाइनीम। १३ गो मेको कली बाल देवता कली धूप चोशो नाक्ती सजाइ गेनुड। मेको नाक्त मेको ग्योम्सीशा वोंइश खोइक्तु। आं कली चहिं प्रेंताक्यी।

१४ मोपतीके मुल गो मेको कली लेम्शा, गोरशो रागीमी लाइक्नुड। मिनु मेको नु आ दाक्शो लोव्र पाइनुड। यसैया ४०:२ १५ मेकेर गो मेको कली आ अडगुर रू लेशशा गेनुड। गो आकोर माइश्शो दिंम कली चहिं आस पतीक रागी सेल्लुड। मेकेर मेकोमी आ ठिटी बाक्ची ना डा खोदेंशो नु इजीप्त रागी रे जाक्शो खोदेंशो पा कुम्सो पाइब" देंत। यहोसु ७:२४-२६

परमप्रभुमी लेंशा दाक्ब

१६ मिनु परमप्रभु यावेमी "मेको नाक्त गे आं कली 'आं वोंइश' देनेवे। मिनु 'आं बाल देवता' मदेनेवे। यसैया ५४:५ १७ गो बाल देवता आन नें यो मेको आ शोव्र रे ग्रुंडनुड। मिनु लेंशा मेकोमी मेको आन नें गेनायो मथोइब। १८ गो मेको नाक्त मेकोपुकी, ब्वाकी डा जन्तुपुकी, सरीड डा चिक्बपुकी नु खपीम गेशा गाक्ब जन्तुपुकी नु कबल का पाइनुड। मिनु मेको रागी डा मुरपुकीमी मेना रे लिब्रा, तरवार नु लडाइ मताइनीम। मिनु मुर नेल्ल हेम्म पा बाक्चा ताइनीम। उत्पत्ती ९:९-१०; इजीकीएल ३४:२५ १९ गो इ कली गेना हना यो आं मीश सेल्लन। गो इ कली थमा पा दाक्शा शिशी पा नु ठीक पा आं मीश सेल्लन। प्रकाश १९:७ २० गो इ कली मप्रोंइथु आं मीश सेल्लन। मिनु परमप्रभु यावे कली रिम्शो पा तुइक्नेवे" दे परमप्रभु यावेमी देंत। येरमीया ३१:३४ २१ परमप्रभु यावेमी "मेको नाक्त गो सरीड कली लोव्र लेत्नुड। सरीडमी रागी कली लोव्र लेप्ब। २२ मिनु रागीमी अन्न, नक अडगुर शांबु नु तेलमी येजेल कली लोव्र लेत्नीम। २३ गो मेको कली आं पर्वम आं रागीमी बाक्पाइक्नुड। गो मेको कली 'मदाक्नुड' देंशो कली आं शिशी कोंइनुड। मिनु गो 'गेपुकी आं मुर मननी' देंशो नड। मुल गो 'आं मुर ननी' देंनुड। मिनु मेकोपुकीमी आं कली 'गे आंइ परमप्रभु बाक्नीनी' देंनीम" दे परमप्रभुमी देंत। होसे १:६; होसे १:९; रोमी ९:२५; १पत्रुस २:१०

3

इसाएलम शिशी तशो

१ मिनु परमप्रभु यावेमी आं कली "इ मीशेमी अर्को वोंइश खोइश्शा, इ कली प्रोंइतु हना यो, मुल लशा, इ मीश कली लेंशा इ दाक्तीक कोंइदो। इसाएलीपुकीमी अर्को देवी देवता आन कली दाक्शा आन चढेशो थोव्रक जचा दाक्ताक्म

हना यो, परमप्रभु यावेमी इस्राएली आन कली दाक्ब” देंत। होसे १:२ 2 मोपतीके गो मेको मुर कली १५ शेकेल चांदी, होमेर का नु लेतेक का क्योव्रज गेशा आं मीश लेंशा ग्याप्ता। शेकेल का ११.५ ग्राम चांदी के क्येट बाक्ब। होमेर का २२० लिटर बाक्ब। लेतेक का ११० लिटर बाक्ब। 3 मिनु गोमी आं मीश कली “गे मुल शुश नाक्त सम्म गो नु बाक्चा माल्नेवे। गे मुल तेल्लेम मपावो। अरु वोंइश मखोतो। गो गे नु बाक्नुड” देंती। 4 मारदे हना इस्राएलीपुकी शुश नाक्त सम्म पिप नु सासन पाइब मबाक्थु, बाक्चा माल्नीम। मेकोपुकीमी चढ़ेचा कली मिम्तीक फुल्लु, एफोद माइशो चढ़ेब आ पांडतीक वा नु आन खिं डा मूर्ति यो मताइनीम। २इतिहास १५:३ 5 मिनु नोले डा नाक्तीमी इस्राएलीपुकी लेशशा, परमप्रभु यावे, आन परमप्रभु कली नु आन पिप दाऊद कली माल्नीम। मेकोपुकी खिंखि पा आन परमप्रभु यावे गे लेशशा, आसीक ताइनीम। येरमीया ३०:९; इजीकीएल ३४:२३-२४

4

चढ़ेबपुकीमी मरिम्शो पशो

1 गे इस्राएली, परमप्रभु यावे आ लोव्र नेनीन। मारदे हना परमप्रभु यावेमी रागीम बाक्ब इन कली दोस गेब। मार दोस गेब देंशा हना “एको रागी डा मुरुमी आं कली प्रोंइतीमी, आं कली मदाक्थु, आं कली मटीनीम। 2 एकेर कसम जचा, जोल पचा, मुर साइक्चा, खुइ पचा नु तेल्लेम पचा डा लाक्शा, अर्को मारेइ मबाक्ब। नेल्लेमी मरिम्शो ला पाइनीम। मेकोपुकीम मुर साइशशा, हुश खाक्श पोक्नीम। 3 मोपतीके एको रागीमी रोंका पाइब। एकेर बाक्ब नेल्ले ओंखां पा जाम्शा लाइनीम। बस्तु भाव, चिक्ब नु समुन्द्र डा डांइ बेक्शा, जाम्शा लाइनीम।

4 तन्न सुइमी सुइ कली दोस मगेमेक्ल। मुरुमी मुर आन कली ‘मरिम्शो पाइतीनी’ मदेंमल। मारदे हना गो गे चढ़ेबपुकी नु लोव्र का पचा माल्नुड। 5 गेपुकी काबु नाक्ती खतम दुम्नीनी। मिनु आं लोव्र पाइबपुकी यो गेपुकी नु काथा खतम दुम्नीम। मोपतीके गो इन खिं डा मुर नेल्ल गे नु खतम सेल्लुडमी। 6 आं मुर मारेइ मतुइक्तीके खतम दुम्नीम। मारदे हना गेपुकीमी तुइक्तीक कली ताइक्ताक्नी। मोपतीके गो यो इन कली आं कली चढ़ेब दुम्तीक रे ताइक्नन्नी। मारदे हना गेपुकीमी इन परमप्रभु, आं अरेशो लोव्र कली क्यारी मपनी। मोपतीके गो यो इन आल आन कली क्यारी मपाइनुड। 7 चढ़ेबपुकी दोशो बारमा, मोशोन आं कली मरिम्शो पाम्तेक्म। मेको आन ठेयब दुम्तीके ताइशशा, मुने दोक्तीक गेय पाम्तेक्म। 8 मेकोपुकी आं मुर आन पाप आ पबर्म चढ़ेशो ब्वशा दोम्नीम। मिनु मुरपुकीम पाप पशो दाक्नीम। लेवी ४:१३-२१, २७-३५; लेवी ६:१९ 9 मिनु मुरपुकी दोदेशो बाक्मा, मोदेशो चढ़ेबपुकी बाक्नीम। गो मुरपुकी नु चढ़ेब नेल्ल आन कली सजाइ गेनुड। मेकोपुकीमी दोदेशो पामे, मोदेशोन सजाइ गेनुड। 10 मेकोपुकीमी जाइनीम ब्वाइनीम, तन्न मरूनीम। मेकोपुकीमी तेल्लेम पशा, सोशा बोशा मलाइनीम। मारदे हना मेकोपुकीमी तेल्लेम पचा कली परमप्रभु यावे कली प्रोंइतेक्म।

इस्राएली आन मूर्ति पूजा

11 माइत अडगुर शांबु नु नक अडगुर शांबुम मुर आन रुप्तीके कली साम्ब। 12 आं मुरपुकीमी शी के मूर्ति कली हिल्लो पाइनीम। मिनु मेकोपुकीमी कोक्केमी साहीत कोव्रनीम। मारदे हना तेल्लेम पतीक थुंमी मेको आन कली हेंथे गाक्पाइशो बाक्ब। मेकोपुकीमी तेल्लेम पचा कली परमप्रभु कली प्रोंइतेक्म। येरमीया २:२७; होसे ५:४ 13 मेकोपुकीमी डांडामी चढ़ेनीम। मिनु पहाडमी तुल्च, पिपल नु सेक्ल रवा आन वांकुम धूप चोइनीम। मोपतीके इन तमी तेल्लेम दुम्नीम। मिनु इन चाइमीपुकी अरु आन वोंइश नु बाक्नीम। इजीकीएल ६:१३ 14 गो इन तमी आन तेल्लेम पशो नु इन चाइमी अरु आन वोंइश नु बाक्शो आ पबर्म सजाइ मगेनुड। मारदे हना मेको वोंइश मुर यो सुइ मबाक्तीकेमी तेल्लेम नु लशा देवी देवता आन कली चढ़ेनीम। मोदेशो मरुप्ब मुरपुकी जाम्शा लाइनीम। होसे १:२

15 गे इस्राएलीपुकी, तेल्लेम पाइतीनी हना यो, यहूदा डा मुर आन कली हेंथे मगाक्पतीन। गेपुकी गिल्लालमी नु बेथ-आवेनमी मलन। मिनु ‘परमप्रभु यावे ब्रोंइशा बाक्शो खोदेशो पा’ दे कसम मजने” दे परमप्रभुमी देंत। आमोस ५:५; होसे १०:५; आमोस ८:१४ 16 इस्राएलीपुकी मटीब बी खोदेशो बाक्नीम। दोपा परमप्रभु यावेमी भेडा कली योव्रशो खोदेशो पा योव्रने चाक्बा? 17 एफ्राइम मूर्ति आन वारच दुम्शो बाक्ब। मोपतीके मेको कली प्रोनीन। 18 मेकोपुकीमी शांबु थुम्शा यो तेल्लेम पना पन बाक्नीम। मेको आन सासन पाइब यो मुने दोक्नीम। 19 ठेयब फश गिवार पशा, मेको आन कली योल्ब। मिनु मेको आन चढ़ेशो आ पबर्म मुने दोक्नीम।

5

चढेब आन कली सजाइ

1 मिनु परमप्रभुमी “चढेबपुकी, एको लोव्र नेनीन। इस्राएलीपुकी इन नोफा दाइशशा नेनीन। पिप आ खिं डा मुरपुकी, नेनीन। एको निसाफ इन मरिम्शो पशो आ पर्वम बाक्ब। गेपुकी मिस्पा सहरमी दाइशशो ब्वारद नु ताबोर सहरमी ब्रशो ग्याइल खोदेशो दुम्शो बाक्नीनी। 2 मेकोपुकीमी शित्तीममी मुर बिक्शा बेक्तीक सेल्लेक्म। गो मेको नेल्ल आन कली सजाइ गेनुड।

इस्राएलीपुकीमी सजाइ तशो

3 गो एफ्राइम आ पर्वम नेल्ल तुइक्नुड। मिनु इस्राएल यो गो नु खुइक्ने मचाप्ब। एफ्राइम, गे तेल्लेम पतीकेमी ग्रुम्शो बाक्नेवे। इस्राएल ग्रांग्रा दिचा डा दुम्शो बाक्ब। होसे १:२; होसे ६:१० 4 मेको आन गेय आ पर्वम आन परमप्रभु गे लेत्ने मचाप्नीम। तेल्लेम पचा मेको आन थुंमी बाक्ब। मिनु मेकोपुकीमी परमप्रभु यावे कली मतुइक्नीम। होसे ४:१२ 5 इस्राएली आन ठेयब लेत्तीकेमी मरिम्शो पाइब बाक्नीम, दे आन सांकछी बाक्ब। एफ्राइम डा मुरपुकी आंम पाप पतीकेमी खतम दुम्नीम। यहूदा डा मुरपुकी यो मेकोपुकी नु खतम दुम्नीम। 6 मिनु मेको आन क्यारश भेडा नु बी ब्यफ लाइशशा, परमप्रभु यावे कली माल्थ लाइनीमी। तन्न मेकोपुकीमी मेको कली मथित्नीम। मारदे हना मेको आन क्येडा डोन लत। यसैया १:११-१५ 7 मेकोपुकी परमप्रभु यावे रे नोले शोइसीशो बाक्नीम। मेकोपुकीमी हेंथे पा आल थिशो बाक्नीम। मेको आन औंसी डा चाडमी आन बाली नाली नु मेको आन कली खतम सेल्ब। होसे २:१३

थर निक्शी आस कली सजाइ

8 गिबामी तुराही नु रामाह सहरमी ग्रोव्र ताप्पीन। बेथ-आवेनमी लडाइ डा तुराही ताप्पीन। बेन्यामीन डा मुरपुकी डोंइती बारीन। २राजा १५:३७; यसैया ७:१-९; होसे ४:१५ 9 सजाइ डा नाक्ती एफ्राइम गोरशो रागी खोदेशो दुम्ब। मुल मार मार दुम्बा, मेको इस्राएली आन कली देने थुम्ता। 10 यहूदा थर डा ठेयब मुरपुकी सांद डा फुल्लु याक्ब खोदेशो दुम्तेक्म। गो आं गाइक्तीक मेको आन तारी ब्वाक्कु खोदेशो पा मोइक्नुडमी। ब्यवस्था १९:१४ 11 एफ्राइम डा मुरपुकी सजाइ तशा, आन थुं लुक्च लत। मारदे हना मेकोपुकी जाम्शा लाइब मूर्ति आन नोले खोइक्तेक्म। 12 मिनु गो एफ्राइम डा मुर आन कली तुम्ब नु यहूदा डा मुर आन कली राक्शो खोदेशो दुम्शो बाक्नुड।

13 एफ्राइम नु यहूदामी आस श्येत तुइक्तसे नोले, एफ्राइममी अस्सुर डा ठेयब पिप कली ‘वारच पने’ दे पुंइथ मुर सोइक्ताक्व। तन्न मेकोमी इ कली वारच पने मचाप्ब। होसे ७:११; होसे १०:६; होसे १२:२ 14 मारदे हना गो एफ्राइम कली गुप्स खोदेशो नु यहूदा कली ठिटा गुप्स खोदेशो दुम्शो बाक्नुड। गो मेको आन कली खतम सेल्शा, आं लां खोइक्नुड। गो मेको आन कली कुरशा लाइक्नुड। मिनु मेको आन कली आं रे रोइक्ने मचाप्नीम। होसे १३:७; होसे ६:१

15 मिनु गो आं बाक्तीकेमी लेशशा बाक्नुड। मेकोपुकीमी आन मरिम्शो पशो तुइशशा, आं कली ममाल्मे सम्म बाक्नुड। मिनु मेकोपुकीमी शुश श्येत जशा, आं कली माल्नीम” दे परमप्रभुमी देंत। यसैया २६:१६

6

परमप्रभु गे लेशशा, कुम्सो पशो

1 मिनु मार लोव्र पाइनीम देशा हना “पिन, गोपुकी परमप्रभु यावे गे लेय्य। मेकोमी आंइ कली टुक्रा टुक्रा पशो बाक्त। मिनु आंइ कली सापाइक्ब। मेकोमी आंइ कली तुप्तु। मिनु मेकोमी आंइ कली ओख्ती पाइक्ब। होसे ५:१४ 2 नाक्त निक्शी नोले परमप्रभुमी आंइ कली लेंशा ब्रोंइचा गेब। मिनु नाक्त सां नोले आंइ कली आ डोंइती राप्पाइक्ब। मिनु मोपा गोपुकी मेको आ डोंइती ब्रोंइनीकी। ब्यवस्था ३२:३९ 3 गोपुकी परमप्रभु यावे कली तुइशशा, ठेयब सेल्य। मेको कली शुश तुइशशा मान पय। मेको नां दाप्शो बुद पा जाक्ब। हिंउद डा रेउ खोदेशो पा जाक्ब। बर्खा डा रू कली रिम्शो पा जिप्ब रेउ खोदेशो पा जाक्ब” दे लोव्र पाम्तेक्म।

4 मिनु परमप्रभुमी “एफ्राइम, गो इ कली मार पड? यहूदा इ कली मार पड? इस दाक्चा सुनी डा गोस्स खोदेशो नु रीब पा जाम्शा लाइब सीत खोदेशो बाक्ब। होसे ७:१६ 5 मोपतीके गो इस कली आं लोव्र पाइब रे पा टुक्रा टुक्रा पाता। आं लोव्रमी इस कली साइक्ता। आं निसाफ इस तारी चिला आप्शो खोदेशो बाक्ब। येरमीया २३:२९ 6 मारदे

हना गो क्योरशा चदेशो क्येडा दाक्मुतीक दाक्नुड। मिनु चोशा चदेशो क्येडा आं कली तुइशशा ठेयब सेल्शो दाक्नुड। १सामुएल १५:२२; हितोपदेस २१:३; मत्ती ९:१३; १२:७

रागीम मरिम्शो पशो

7 मेकोपुकीमी आदम सहर डा मुर खोदेशो पा गो नु पशो कबल प्रॉइतेक्म। मेकोपुकीमी आं कली थमा मसुइक्थु प्रॉइतेक्म। यहोसु ३:१६ 8 गिलाद मरिम्शो मुर आन सहर बाक्ब। मेको सहर डा लां हुशेम खुम्शो खोइल आ छापम ब्रीशो बाक्त। 9 दोपा रोइक्बपुकी बाप्शा बाक्नीमी, मोपा चढेबपुकी यो बुक्शा बाक्शो बाक्नीमी। मेकोपुकीमी शेकेम लतीक लांमी मुर साइक्नीमी। मेकोपुकीमी ठेयब मुने डा गेय पाइनीमी। 10 गो इस्राएली आन खिंमी हिंचा डा गेय का ताता। एफ्राइममी तेल्लेम पना पन नु इस्राएल ग्रांग्रा दित्चा डा दुम्शो बाक्त। होसे ५:३ 11 यहूदा, इ कली यो सजाइ गेतीक नाक्त जाक्ब” दे परमप्रभुमी देंत।

7

1 “गो इस्राएल डा मुर आन कली सापाइक्चा मिम्ताक्ड हना, एफ्राइम आ मरिम्शो पशो नु सामरीया आ पाप तांडसीब। मेकोपुकी जोल पना पन बाक्नीमी। खुइपुकी खिं ओव्रशा खुइ पाइनीमी। रोइक्बपुकीम लांमी मुर आन कली रोइक्नीमी। योएल ४:१ 2 गो मेको आन मरिम्शो पशो नेल्ल तुइशशा मिम्नुड। मेकोपुकीम मतुइक्नीमी। मेकोपुकीमी मरिम्शो ला पाइनीमी। मिनु मेको आन पाप गेना हना यो आं डोंइती बाक्नीमी” देंत।

नक पिप साइशो

3 परमप्रभुमी “मेको आन मरिम्शो पशोमी पिप कली ग्येरपाइक्नीमी। मिनु आन जोल पतीकेमी सासन पाइब आन कली ग्येरपाइक्नीमी। 4 मेको नेल्ल तेल्लेम बाक्नीमी। मेकोपुकी शोब्ले चोचा कली होइशो चुप्लु खोदेशो बाक्नीमी। मेको शोब्ले चोइबमी फस निवा रे मबोरम सम्म मी थुक्चा ममाल्ब। 5 आंइ पिप आ भोजम आ सासन पाइब अडगुर शांबु तूशा दुक्नीमी। मिनु पिपमी शुक्शी पाइबपुकी नु गुइ गारपाइक्ब। 6 मेको शुक्शी पाइब आन थुं मी खोदेशो पा ब्रशो बाक्ब। मेकोपुकी नमो सिमो पा पिप आ नेक्था जाक्नीमी। मेको आन थुंम बाक्शो पतीक नेल्ल नाक्दो मी पुम्शो खोदेशो पा बाक्ब। मिनु मेको सुनी ठेयब मी खोदेशो पा ब्राइब। 7 मेको नेल्ले मी खोदेशो पा ब्रशो बाक्नीमी। मिनु आन सासन पाइब आन कली साइक्नीमी। मेको आन पिप नेल्ल आन कली साइक्तेक्म। मिनु मेकेर डा सुइमी यो आं कली मथोइनीमी” देंत।

इजीप्त कली ब्रेशो

8 “एफ्राइम थर डा मुरपुकी रागी डा मुर नु ब्वांइसीनीमी। एफ्राइम मलोकशो शोब्ले खोदेशो बाक्ब। 9 अर्को रागी डा मुरपुकीमी मेको आ बोल नुप्पाइक्नीमी। तन्न मेकोमी मतुइक्ब। मेको आ चां का निक्शी बोइशो बाक्ब। तन्न मेकोमी मतुइक्ब। 10 इस्राएल आ ठेयब लेत्तीकेमी ‘मरिम्शो पाइब बाक्ब’ दे आन सांकछी बाक्ब। तन्न मेकोपुकी परमप्रभु यावे, आन परमप्रभु गे मलेत्नीमी। मिनु मेको कली ममाल्नीमी” देंत।

11 “एफ्राइम निप्स मपाइशो ढुकुर खोदेशो बाक्ब। मेको कली निप्स मपाइशो आन कली खोदेशो पा जोल पने चाम्सीब। मुल मेकोपुकीमी इजीप्त रागी कली ‘वारच पने’ दे ब्रेत्नीमी। इक्का नोले मेकोपुकीमी अस्सुर रागी कली ब्रेत्नीमी। होसे ५:१३ 12 मिनु मेकोपुकी लची ना, गो मेको आन तारी आं ग्याइल ब्वारनुड। गो मेको आन कली सरीड डा चिक्ब आन कली खोदेशो पा उइ तोक्नुडमी। गो मेको आन मरिम्शो पतीके कली सजाइ गेनुड। 13 आबी आबी, मेकोपुकी गो रे पा डोन लाम्तेक्म। मेकोपुकी खतम दुम्मल। मारदे हना मेकोपुकी आं कली मटीब दुम्शो बाक्नीमी। गो मेको आन कली श्येत रे प्रॉइचा दाक्नुड। तन्न मेकोपुकीमी आं पबर्म जोल पाइनीमी। भजन संग्रह ८१:१४-१५

14 मेकोपुकीमी आन थुं नेल्लेमी आं कली मब्रेत्नीमी। तन्न आन ब्राख्येमी रोंका पाइनीमी। अन्न नु नक अडगुर शांबु आ पबर्म बुक्नीमी। तन्न आं रे पा आन कुल हिरनीमी। 15 गो मेको आन कली शेंशा, बोल्यो सेल्ता। तन्न मेकोपुकीमी आं कली मरिम्शो पचा मिम्नीमी। 16 मेको नेल्ल क्येडा ठेयब गे मलेत्नीमी। मेकोपुकी जिक्शो लिब्रा खोदेशो बाक्नीमी। मेको आन ठेयब मुर आन मरिम्शो पशो लोव्र आ पबर्म तरवारमी साइक्चा पुंइसीनीमी। इजीप्त रागीमी मेको आन पबर्म शुक्शी पाइनीमी” देंत। भजन संग्रह ७८:५७

8

इस्राएलीपुकीम सजाइ तशो

1 मिनु “तुराही तापो। ककाकुली का परमप्रभु यावे आ खिं तारी बेरना बेरन बाक्ब। मारदे हना मुरपुकीमी आं पशो कबल प्रोंइतेक्म। आं अरेशो लोत्र मटीम। यसैया ५८:१; ब्यवस्था २८:४९; होसे ६:७ 2 मिनु इस्राएलमी आं कली ‘आंइ परमप्रभु, गो इन कली तुइक्नीकी’ दे देंनीम। 3 तन्न इस्राएलीपुकीमी रिम्शो पचा प्रोंइतेक्म। मिनु जोरी सत्रु काम मेको कली खेदा पाइब। 4 मेकोपुकीमी आं कली हिल्लो मपथु पिप योत्रनीम। मेकोपुकीमी गो आं मदेशु सासन पाइबपुकी योत्रनीम। मेकोपुकीमी खतम दुम्चा कली आन सुन चांदी रे पा आं कली मूर्ति सेल्नीम। २राजा १५:१०,१४,२५,३० 5 सामरीया डा मुरपुकी, इन बाछा आ मूर्ति ताइक्तीन। गो मेकोपुकी नु गाइशो बाक्नुड। गेना सम्म मेकोपुकी आं मुर दुम्चा मदाक्नीमी? प्रस्थान ३२:२०; १राजा १२:२८ 6 मेको बाछा इस्राएल रागी रे चाक्शो बाक्त। मूर्ति सेल्बम मेको कली सेल्लु। मेको परमप्रभु मबाक्ब। काबु नाक्ती मेको सामरीया डा बाछा टुक्रा टुक्रा दुम्ब।

7 मेकोपुकीमी फश शोक्नीम। मिनु ठेयब फश गिवार खुप्नीम। मेको आन चेरब बोटमी बाला मबाक्नीम। मिनु मेकोपुकीमी फस सेल्ने मचाप्नीम। आन बाला बाक्तेक्म हना यो, रागी रागी डा मुरपुकीमी मेको खुप्शा जाइनीम। येरमीया १२:१३ 8 इस्राएल खतम पोक्चा पुंइसाक्व। मुल मेकोपुकी रागी रागी डा मुर आन दातेमी शोर गाक्शो मुर खोदेशो दुम्शो बाक्नीम। येरमीया २२:२८ 9 ब्वाकी डा गधा हेंथे गाक्शो खोदेशो पा मेकोपुकी अस्सुरमी लाम्तेक्म। एफ्राइम डा मुरपुकी आं कली दाक्बपुकी कली लेयसीशो बाक्नीम। होसे ५:१३ 10 मेकोपुकी आं कली लेयसाक्म हना यो, मुल गो मेको आन कली खुप्नुडमी। मिनु मेकोपुकी सक्ति पाइशो पिप आ गुइ रे क्याम्चा पुंइसीनीम।

11 एफ्राइममी आ पाप पतीके चढेतीक शुश सेल्लु। मेको चढेतीके शुश सेल्लुके मेको कली पाप दुम्शो बाक्ब। 12 मिनु गो मेको आन कली आ अरेशो शुश ब्रेक्ताक्ड। तन्न मेकोपुकीमी आं लोत्र थमा मसुदेम। 13 मेकोपुकीमी आं कली चढेनीम। मिनु श्ये ब्वाइनीम। तन्न परमप्रभु यावे मेकोपुकी नु मग्येरसीशो बाक्ब। मुल परमप्रभु यावेमी मेको आन मरिम्शो पशो मिम्शा, मेको आन कली सजाइ गेब। मिनु मेकोपुकी इजीप्त रागीमी लेशशा लाइनीम। 14 इस्राएलीपुकीमी आं कली सेल्ब कली प्रेंशा, ठेयब दरवार सेल्शो बाक्नीम। यहूदा डा मुरपुकीमी शुश सहर एर ओंथ गारो सेल्शो बाक्नीम। तन्न गो मेको आन सहरमी मी सुइशशा दरवार नेल्ल क्रोइक्नुड” दे परमप्रभुम देंत। येरमीया १७:२७; आमोस २:५

9

होसेमी लोत्र पशो

1 इस्राएली, मग्येरसीन। अर्को रागी रागी डा मुर खोदेशो पा, सोम्शा मग्येरसीन। मारदे हना गे इन परमप्रभु क्येडा नोले शोंइसाक्नी। गे अन्न ओंइतीक चाडमी तेल्लेम पशो आ पर्बम क्येट ताक्चा दाक्नीनी। होसे १:२ 2 मुल अन्न आ खला डा अन्नम नु अडगुर कोल डा अडगुर शांबुम मुर आन कली मरूपाइक्ब। नक अडगुर शांबु मेको आन कली मजाक्दीप्ब। 3 मेकोपुकी परमप्रभु यावे आ रागीमी बाक्चा मताइनीम। एफ्राइम इजीप्त रागीमी लेशशा लाइब। मिनु मेकोपुकीमी अस्सुरमी ग्रांरा दिचा डा थोत्रकी जाइनीम। होसे ८:१३

4 मेकोपुकीमी परमप्रभु यावे कली अडगुर शांबु चढेनीम। क्योरशा चढेतीक मचढेनीम। आन जचा थोत्रक मोन खमे खोदेशो पा जाइनीम। मेको जाइब नेल्ल ग्रांरा दिशो दुम्नीम। मेको आन जचा थोत्रकीम मेको आन शोत्रलु साइक्चा ला दुम्ब। परमप्रभु यावे आ खिंमी चाक्ने मचाप्नीम।

5 गेपुकी इन ठेयब चाड नु परमप्रभु आ चाडमी मार पाइनीनी? 6 मेकोपुकी खतम दुम्चा कली प्रोक्तेक्म हना यो, इजीप्त रागीमी मेको आन कली खुप्ब। मिनु मेम्फीस डा मुरपुकीमी मेको आन कली थिम्नीम। मेको आन चांदी के सेल्शो थोत्रकपुकी चू नु चोंकम सुम्ब। मिनु आन ताम्बुमी चू वानीम। होसे १०:८

7 मिनु सजाइ गेतीक नाक्त जाक्शो बाक्ब। क्येक्क लेत्तीक नाक्त यो जाक्शो बाक्ब। इस्राएल डा मुरपुकीमी मेको तुइक्नीम। परमप्रभु यावे आ लोत्र पाइब गुक्शो खोदेशो पा बाक्नीम। मेकोपुकी गशो दुम्तेक्म। मारदे हना इन मरिम्शो पचा नु मदाक्चा आ पर्बम मोदेशो दुम्त। 8 परमप्रभु यावेमी आ लोत्र पाइब कली एफ्राइम कली कोत्रब सेल्लु। मेको आ लां नेल्लेमी चिक्ब रेत्तीक ब्वारद खोदेशो बाक्नीम। आ परमप्रभु आ खिंमी यो मेको कली काइ मदाक्नीम। 9 गिबा डा नाक्त खोदेशो पा मेकोपुकी काइ मरिम्शो गेय पाम्तेक्म। परमप्रभु यावेमी मेको आन मरिम्शो पशो मिम्शा सजाइ गेब। होसे १०:९; न्यायाधीस १९:२२-३०; न्यायाधीस २०:१३

डोंइती नु नोले डा इस्राएल

10 दोदेशो पा गोरशो रागीमी अडगुर थित्नीमी, मोदेशो पा गो इस्राएल कली थित्ता। फोव्रशी रवामी नेल्ल क्येडा डोंइती डा फोव्रशी फल सिशो खोदेशो पा गो इन किकी पिपी आन कली थित्तामी। तन्न मेकोपुकी बाल-पेओर गे लाम्तेक्म। मिनु मेकोपुकी आंम कली बाल कली जिम्मा गेसाक्म। मिनु मेको आन दाक्शो मूर्ति खोदेशो पा ग्रांग्रा दित्चा डा दुम्तेक्म। ब्यवस्था ३२:१०; गन्ती २५:३ 11 एफ्राइम आ सक्ति चिक्ब खोदेशो पा बेरशा लाइब। मेको आन दातेमी सुइ यो आल थीब मदुम्नीम। 12 मेकोपुकीमी आल थिशा कोल्पाइक्तेक्म हना यो, गो का सम्म यो मप्रोंइथु लाइक्नुड। मिनु गो मेको आन कली प्रोंइशा डोन लाइक्नुड। मिनु मेको आन कली ठेयब श्येत दुम्ब। 13 एफ्राइम आ तौपुकी साइक्चा पुंइसीनीम। एफ्राइममी आ तौ आन कली क्योरचा कली लाइक्चा माल्ब। इजीकीएल २७:३ 14 परमप्रभु यावे, गे मेको आन कली मार गेनीनी? मेको आन आल शाम्सेक्ल। मिनु मेको आन दूध सोव्रल। 15 मेको आन मरिम्शो पतीके नेल्ल गिल्गालम पाम्तेक्म। मेक रे गो मेको आन कली तशा ग्रांग्रा दिचा गोव्रता। मेको आन काइ मरिम्शो पतीके, गो आं खिं रे खेरनुडमी। मेको आन ठेयब मुर नेल्ल मटीब बाक्नीम। 16 एफ्राइम आप्चा पुंइसीशो बाक्ब। मेको आन शाक्श सोव्रशो बाक्ब। मेकोपुकी मसित्नीम। मेकोपुकीमी आल थित्तेक्म हना यो, गो मेको आन दाक्शो आल आन कली साइक्नुड। 17 आं परमप्रभुमी मेको आन कली प्रोंइब। मारदे हना मेकोपुकीमी आ देशो मटीम। मोपतीके मेकोपुकी रागी रागी डा मुर आन दातेमी हिरशा गाक्ब दुम्नीम।

10

चढेनीम तन्न दूली पाइनीम

1 डोंइती इस्राएल ब्राक्शो नु शुश फल सिप्ब अडगुर बोट का बाक्त। मिनु इस्राएल डा मुरपुकी शुश क्येट थीब दुम्तेक्म। मिनु मोपा मेकोपुकीमी फुल्लु के चढेतीक यो शुश सेल्लेक्म। मिनु मेको रागीमी दोशो क्येट चेम्मे, मोशोन मे कोपुकीमी आन थाम डा मूर्ति दारपाइक्तेक्म। येरमीया २:२१; लेवी २६:१ 2 मेको आन थुं दूली बाक्ब। मुल मेकोपुकीमी आन मरिम्शो पशो आ सजाइ तचा माल्नीम। परमप्रभुमी मेको आन चढेतीक नु आन खुक्शो फुल्लु प्रेप्ब। मेको आन थाम डा मूर्ति यो खतम सेल्ब।

श्येत जशा, थुं लेशो

3 मिनु मुल मेकोपुकीमी “गो परमप्रभु यावे कली मान पा महिंतीके गो आंइ के पिप मबाक्ब। मिनु पिप बाक्त हना यो मेकोमी आंइ कली मार पने चाप्बा डा?” देनीम। 4 मेकोपुकीमी शुश फश लोव्र पाइनीम। मार फश लोव्र पाइनीम देशा हना, जोल पा कसम जशा कबल पाइनीम। मोपतीके वाक्शो रूमी ओशेर पाइशो सुवा वाशो खोदेशो पा मुददा बारनीम।

मूर्ति पूजा पचा थुम्शो

5 सामरीयामी बाक्ब मुरपुकी बेथ-आवेन डा बाछा आ मूर्ति आ पर्बम हिंनीम। डोंइती मेको मूर्ति आ दारस तशा, ग्येरसीशो मुरपुकी मेको आ पर्बम रोंका पाइनीम। चढेबपुकी यो मेको आ पर्बम रोंका पाइनीम। मारदे हना मेको मूर्ति डोन लाइक्सीशो बाक्ब। होसे ४:१५ 6 मेको मूर्ति कली अस्सुर लाइक्नीम। मिनु ठेयब पिप कली सोइक्नीम। एफ्राइम मुने दोक्ब, इस्राएल चहिं आ मिम्शो आ पर्बम मुने दोक्ब। होसे ५:१३

7 सामरीया डा पिप ब्वाक्कुम बाक्शो जिक्शो राशी खोदेशो पा योल्सीब। 8 मिनु आन मरिम्शो पतीक मूर्ति बाक्शो आवेन डांडा खतम पोक्नीम। मेको इस्राएल डा मुर आन पाप पशो बाक्ब। मेको आन फुल्लु के चढेतीकेमी चुं नु चोंक वाशा सुम्नीम। मिनु मेकोपुकीमी पहाड कली “आंइ कली सुम्की” दे डांडा कली “आंइ तारी दोक्कीन” देनीम। होसे ९:६; लूका २३:३०; प्रकाश ६:१६

9 गे इस्राएलीपुकीमी गिबा आ नाक्त रे पाप पाइतीनी। मिनु मुल सम्म पाप पना पन बाक्नीनी। गिबा डा मरिम्शो पाइब मुर आन कली मार, लडाइमी मसदमे डा? होसे ९:९ 10 गो गेना दाक्नुडा, मेना मेको आन कली सजाइ गेनुड। मेको आन साप्पा मरिम्शो पशो आ पर्बम रागी रागी डा मुर आन हुलमी मेको आन कली फ्रेंशा लाइक्नीम।

आन दला दाक्स पशो

11 मिनु एफ्राइम मगिक्शो बी का खोदेशो बाक्ब। मिनु दांइ पशोनु, मेको ग्येरसीब। मोपतीके मेको आ दारशो बलामी गो जुवा लाप्नुड। गो एफ्राइम कली दोरपाइक्नुड। यहूदामी ब्यफ वाक्चा माल्ब। मिनु याक्बमी डल्ला प्रोल्चा माल्ब। 12 ठीक पतीक शोक्कीन। मिनु मप्रोंइचा डा दाक्तीक अन्न खोदेशो पा खुप्तीन। गे इन मवाक्शो रू वाक्तीन। मारदे

हना इन परमप्रभु यावे कली माल्ची नाक्त जाक्त। मिनु मेको जाक्शा, गे इन कली पाप रे प्रोंडब। येरमीया ४:३; यसैया ५५:६

13 तन्न गेपुकी परमप्रभु यावेमी अरेशो मटितीकेम गुम्शा बाक्तीनी। मिनु ठीक मदुम्तीके खुप्शा बाक्तीनी। गेपुकी जोल आ फल जाइब बाक्तीनी। मारदे हना गे आंम बोल नु इन लडाइ पाइब आन कली थमा सुइक्तीनी। अय्युब ४:८ 14 मोपतीके इन मुर आन कली लडाइ तोइनीम। मिनु शाल्मनमी बेथ-आरबेल कली खतम पोक्शो खोदेशो पा इन दरवार नेल्ल खतम पोक्शा गेनीम। मेना आल नु आ ममा कली यो साइक्नीम। 15 मारदे हना इन मरिम्शो पतीके मोदेशो ठेयब बाक्ब। मोपतीके मोदेशो दुम्ब। मेको नाक्त सुनी नां दाम चोटीन इस्राएल डा पिप आन कली खतम पोक्नीम।

11

परमप्रभुमी इस्राएल कली दाक्शो

1 मिनु परमप्रभुमी “इस्राएल आल बाक्मेनु, गो मेको कली दाक्ताक्ड। मिनु गो आं तौ कली इजीप्त रागी रे ब्रेत्ताक्ड। ब्यवस्था ७:८; प्रस्थान ४:२२-२३; मती २:१५ 2 मिनु गो दोशो इस्राएली आन कली ब्रेत्तु, मोशोन आं क्येडा डोन लाम्तेक्म। मेकोपुकीमी बाल देवता कली चढ्तेक्म। मिनु मूर्ति आन कली धूप चोम्तेक्म।

3 एफ्राइम कली गुइ ग्याइश्शा गाक्चा शेंब गो नड। गो मेको आन कली आल आन कली खोदेशो पा कुरता। तन्न गो मेको आन कली सापाइक्ता हना यो, मेकोपुकीमी मतुइक्तेम। 4 गोमी मेको आन कली मुर आन शिशी पशो खोदेशो पा खुल्ताक्मी। गो मेको आन कली शुश दाक्ताक्ड। गो मेको आन बलामी लाम्सीशो जुवा गुंइशा गेतामी। गो मेको आन डोंइती बाप्शा, मेको आन कली थुल्तामी।

5 मार, मेकोपुकी इजीप्त रागी लेत्चा माल्नीमी? मिनु अस्सुर मेको आन पिप दुम्चा माल्ब। मारदे हना मेकोपुकी आं गे लेत्चा मबिस्सम। 6 मेको आन सहरपुकीमी लडाइ दुम्नीम। मिनु मेको आन लाप्चो डा थाम मीम दुम्नीम। मेको आन मिम्शो नेल्ल खतम दुम्नीम। 7 आं मुरपुकी गेना हना यो, आं क्येडा डोन लाइनीम। मोपतीके मेकोपुकीमी जुवा कुरशो खोदेशो पा श्येत जचा माल्नीम। मिनु सुइमी मेको आन कली आन श्येत रे मप्रोंडब।

8 एफ्राइम, गो इ कली दोपा प्रोंइने चाप्नुडा? इस्राएल, गो इ कली दोपा इ जोरी सत्रु आन गुइमी गेने चाप्नुडा डा? गो इ कली दोपा अदमाह कली पाइश्शो खोदेशो पाइनुडा डा? गो इ कली दोपा सेबोयीम खोदेशो सेल्लुडा डा? मुल आं थुं फांइसाक्व। गो गाइक्चा रे लेशशा, शिशी पाइब दुम्ती। ब्यवस्था २९:२२; येरमीया ३१:२० 9 गो आं ग्याइश्शो कुरशा मगाक्नुड। गो एफ्राइम कली लेंशा खतम मपाइनुड। मारदे हना गो परमप्रभु नड। गो मुर मनड। गो इन दातेमी नेल्ल क्येडा सक्ति पाइश्शो दुम्शा, गाइश्शा मजाक्नुड। 10 मेकोपुकी परमप्रभु यावे आ नोले खोइक्नीम। मेको चहिं गुप्स खोदेशो पा ग्रीब। मिनु मोपा ग्रीमेनु, आ आलपुकी पच्छिम रे पा खिंखि पना पन जाक्नीम। येरमीया २५:३०; होसे २:१ 11 मेकोपुकी इजीप्त रागी रे चिक्ब खोदेशो पा बेरशा जाक्नीम। अस्सुर रे पा हुकुर खोदेशो पा खिंखि पना पन जाक्नीम। गो मेको आन कली आन खिंमी बाक्चा गेनुड” दे परमप्रभु यावेमी देंत। 12 एफ्राइममी आं कली जोल पना पन बाक्ब। मिनु इस्राएलीमी यो खाल का डा पा आं कली जोल पाइनीम। मिनु यहूदा आ का ला परमप्रभु आ नोले खोइक्चा कली थुं निक्शी पशो बाक्ब। तन्न मेकोमी मेको आन कली दाक्शा मप्रोंडब।

12

इस्राएलीम पाप पशो

1 एफ्राइममी आं कली लोत्र पाइब। मेकोमी नेल्ल नाक्त पूब डा फश कली खेदा पाइब। मेकोमी जोल नु हुश खाक्श पोक्चा बारपाइक्ब। मेको अस्सुर नु गारब। मिनु इजीप्त रागी कली तेल सोइक्ब। होसे ५:१३

2 परमप्रभु यावेमी यहूदा आ मरिम्शो पशो डा सजाइ गेपु। मेकोमी याक्ब आ मरिम्शो पशो आ पर्बम सजाइ गेब। मेकोपुकीमी दोदेशो पामे, मोदेशो पा सजाइ गेब। 3 मेकोमी आ ममा आ कोंवजीम आ लोक्ब आ गेंग्रे ग्याइक्ताक्व। मिनु ठेयब दुम्शा, परमप्रभु यावे नु राम्शी पापु। उत्पत्ती २५:२२, २६; उत्पत्ती ३२:२५-२९ 4 मेको परमप्रभु आ स्वर्ग डा गेय पाइब नु राम्शी पा ग्रात। मेकोमी डाक्शा “शिशी पाइय्यी” दे पुंइतु। मेकोमी परमप्रभु कली बेथेल सहरमी ग्रुमानु, परमप्रभुमी मेको नु लोत्र पापु। उत्पत्ती ३५:१५ 5 मिनु परमप्रभु यावे, मुर नेल्ल आन परमप्रभु आ नें यावे

बाक्ब। भजन संग्रह ८३:१९ 6 मिनु मेकोमी “गे परमप्रभु गे लेत्चा माल्नेवे। गे दाक्चा नु ठीक पचा मप्रोनीन। परमप्रभु यावे कली रिम्शा बाक्कीन” देंत।

7 मिनु जोल पा नाक्तीक चलेब ग्याप्ब लेयब मुरुमी जोल पचा दाक्नीम। 8 एफ्राइममी “गो शुश क्येट थीब दुम्ती। गो शोंप पाइशो बाक्नुड। आं शुश क्येट चेम्तीके ‘गे पाप पाप्तीवी’ दे दोस गेने मचाप्नीम” देंत। प्रकाश ३:१७ 9 मिनु “गो परमप्रभु यावे, इन परमप्रभु नड। गो इन कली इजीप्त रागी रे चाक्शो नड। गो डोंइती डा चाड नाक्ती खोदेशो पा इन कली लेंशा इन ताम्बुमी बाक्चा गेनुड” देंत। होसे १३:४

10 मिनु मेकोमी “गो नोले दुम्ब लोत्र पाइबपुकी नु लोत्र पाता। गो मेको आन कली कोंइतीके कोंइताक्ड। गो मेको आन कली कथा शेंपाइक्ता। 11 गिलाद मरिम्शो पाइब बाक्ब। मेको आ मुरपुकी शोर गाक्शो बाक्नीम। मेकोपुकीमी गिल्गालमी ब्यफ चढेम्तेक्म हना, आन फुल्लु के चढेतीक ब्रेशशा, फुल्लु देल्शो खोदेशो दुम्ब। होसे ६:८; होसे ९:१५ 12 मिनु याक्ब प्रोक्शा, अराम रागीमी लत। मेकेर इस्राएलमी मीश चाक्चा आ पर्बम गेय पाप्तु। मेकोम मेकेर भेडा योव्रतु। उत्पत्ती २७:४३; उत्पत्ती २८:५; उत्पत्ती २९:२० 13 मिनु परमप्रभु यावेमी आ लोत्र पाइब आ पतीके इस्राएली आन कली इजीप्त रागी रे गुंइताक्व। मिनु आ लोत्र पाइब रे पा मेको आन कली कोव्रतु। प्रस्थान ३:१० 14 तन्न एफ्राइममी परमप्रभु कली चुरपाइशो बाक्ब। मोपतीके परमप्रभुमी आ पशो हुश खाक्श पोक्तीके आ पर्बम सजाइ गेब। मेकोमी दोदेशो पवा, मोदेशो पा क्येक्क लेत्चा पुंइसीब” दे परमप्रभुम देंत।

13

परमप्रभु इस्राएल नु गाइशो

1 मिनु परमप्रभुमी “एफ्राइममी लोत्र पवानु, मुरपुकी खिंखि पाम्तेक्म। इस्राएलमी मेको कली मान पाम्तेक्म। तन्न मेको बाल देवता कली पूजा पतीके बेक्त। 2 मिनु मुल मेको क्येडा शुश पाप पाइनीम। मेकोपुकीमी आंम कली चांदी के मूर्ति सेल्नीम। मेको मूर्ति नेल्ल मुरुमी सेल्शो बाक्नीम। मिनु मुरुमी ‘मेको आन कली चढेन। बाछा कली पुक्पु पने’ देंनीम। यसैया ४४:१० 3 मोपतीके मेकोपुकी सुनी डा गोस्स, सुनी डा जाम्शा लाइब सीत, फशेमी योल्ब खला डा भूस नु झेल रे पा गूब कुन खोदेशो दुम्नीम” देंत। होसे ६:४; भजन संग्रह १:४

4 मिनु “गो परमप्रभु यावे, इन परमप्रभु नड। गो इन कली इजीप्त रागी रे गुंइताक्ड। गे गो आं डा लाक्शा अरु परमप्रभु मतुइक्नीनी। मिनु गो आं डा लाक्शा अरुमी पाप रे प्रोंइने मचाप्नीम। 5 मिनु गो गोरशो रागी नु शुश सोव्रशो रागीमी इन कली कोव्रता। होसे ९:१० 6 गो मेको आन कली रूपाइक्ता। मिनु मेकोपुकी ठेयब लेशशा, आं कली प्रेंताक्म। ब्यवस्था ३२:१५ 7 मोपतीके गो मेको आन कली गुप्स खोदेशो पा नु जोइ खोदेशो पा आन लांम बाप्शा बाक्नुड। होसे ५:१४ 8 चाइक्ब रोंइसीशो वां खोदेशो पा मेको आन कली ग्याइशशा आन रां चेतनुड। मिनु गुप्सुमी खोदेशो पा मेको आन कली ब्वाइनुड। मिनु ब्वाकी डा जन्तुमी साइशो खोदेशो पा साइक्नुड।

9 इस्राएलीपुकी, गो इन कली खतम सेल्नुड। इन कली सुम वारच पाइबा? येरमीया २:१७ 10 इन कली प्रोंइने चाप्ब ते बाक्मा? इन कली वारच पाइब सासन पाइब, ते लाक्गमे? मेको आ पर्बम गेपुकीमी ‘गो आंइ कली पिप नु सासन पाइब गेकी’ देंतीनी। १सामुएल ८:५-९ 11 मोपतीके गो गाइशशा इन कली पिप का गेता। मिनु गो चुरशा मेको कली पोक्शा लाइक्ता।

12 एफ्राइम आ पाप खुइशशा वोइशो बाक्ब। मेको आ पापपुकी ब्रेक्शा वोइशो बाक्नीम। 13 मीश मुर आल थितीक रोइ पशो खोदेशो पा मेको कली श्येत दुम्ब। तन्न मेको मारेइ यो मतुइक्ब आल खोदेशो बाक्ब। मेको दूली पा जरमेशो बाक्ब।

14 गो मेको आन कली तुरस रे प्रोंइनुडा डा? गो मेको आन कली बेक्चा रे पा प्रोंइनुडा डा? साइक्ब, इ साइक्तीक ते बाक्बा? तुरस, इ खतम सेल्तीक ते बाक्बा? गो शिशी मपाइनुड। २तिमोथी १:१०; प्रकाश २०:१४; १कोरिन्थी १५:५४-५५

15 मेको आ लोकब आन दातेमी रिम्शो दुम्शा सोशा बोशा लत हना यो, गो मेको कली शिशी मपाइनुड। परमप्रभु यावे रे पा पूर्ब डा फश गोरशो रागी रे पा जाक्ब। मिनु आ ब्वाक्कु बुक्तीक सोव्रब। मेको आ इनार यो सोव्रनीम। मोपा मेको आ शुश क्येट लाइब मारेइ मारेइ नेल्ल नुप्नीम। 16 सामरीया डा मुरपुकीमी आन पाप पशो डा श्येत जचा माल्नीम। मारदे हना मेकोपुकीमी आंम परमप्रभु कली मटीम। मेकोपुकी तरवारमी साइक्चा पुंइसीनीम। मेको आन आलपुकी खपीमी ताइशशा साइक्चा पुंइसीनीम। मेको आन कोव्रज कुरशो मीश मुर आन कोव्रज चेत्या पुंइसीनीम” देंत। २राजा १५:१६

14

परमप्रभु गे लेत्तीन, दे ब्रेशो

1 गे इस्राएली, परमप्रभु यावे, इन परमप्रभु गे लेशा जाक्कीन। मारदे हना गे इन मरिम्शो पतीके रे खतम दुम्तीनी।
2 परमप्रभु आ लोव्र मेको कली दंशा, परमप्रभु यावे गे लेतीन। मिनु गेपुकीमी मेको कली “आंइ पाप नेल्ल क्याम्दीने!
आंइ कली शिशी पा ब्रने। गो इन नें ठेयब सेल्नीकी। हिलू १३:१५ 3 अस्सुर डा मुरपुकीमी आंइ कली प्रॉइने मचाप्नीम।
गोपुकी लडाइ पथ शारा डोइशशा मगाक्नीकी। मिनु गो आंम सेल्शो थोव्रक कली ‘इं परमप्रभु’ दे गेनायो मदेनीकी।
मारदे हना रोम रोइक्चपुकीमी इन शिशी ताइनीम” दे परमप्रभु कली देंनीन।

4 मिनु परमप्रभुमी “गो इन नोले शोंइसीशो माफ गेनुड। गो इन कली शुश शिशी पा दाक्नुड। मारदे हना मुल इन
कली तशा मगाइक्नुड। 5 गो इस्राएल कली सीत खोदेशो दुम्नुड। मेको लिली फू खोदेशो पा बोइक्ब। लेबानोन डा
लाइशो रवा खोदेशो पा मेकोमी शाक्श थोक्ब। 6 मेको आ राशी लाइशो दुम्नीम। मेको आ दारस तेल रवा खोदेशो
दुम्ब। मेको आ ब्रोव्रशो रिना लेबानोन डा लाइशो रवा खोदेशो दुम्ब। 7 मुरपुकी लेंशा मेको आं वांकुमी बाक्नीम।
मेकोपुकीमी लेंशा अन्न खुम्नीम। मिनु अडगुर खोदेशो पा बोइक्नीम। मिनु मेको आन नें लेबानोन डा अडगुर शांबु
खोदेशो पा ठेयब दुम्ब। 8 एफ्राइम डा मुरपुकी, मूर्तिपुकी नु गो आं के मार गेय बाक्बा डा? गो इन कली लोव्र लेत्नुड।
मिनु इन कली कोव्रनुड। गो तोव्रशी रवा खोदेशो पा गिग बाक्नुड। इ फल फुल सित्चा आं सक्ति रे जाक्ब।

9 सु जोक्ब तुइक्ब बाक्बा, मेकोमी एको लोव्र तुइक्तल। सु के रुप्व थुं बाक्मे, मेकोमी एको लोव्र रुबल। परमप्रभु
यावे आ लां ठीक बाक्नीम। मिनु ठीक पाइबपुकी मेको आ लांमी गाक्नीम। तन्न आ दंशो मटीबपुकी मेको आ लांमी
दाइल पाइसीनीम” दे परमप्रभुम देंत।

योएल

ब्रेक्ब मुर: योएल आ नें आ अर्थ “परमप्रभु यावे, परमप्रभु बाक्ब” देशो बाक्ब। मेको आ आफ पेशुएल आ पबर्म मारेइ मतुंडसीब। योएलम यहूदा राज्यमी परमप्रभु आ लोत्र पशो बाक्ब।

गेना ब्रेक्शो: मुर काम अथाल्याहम आंम कली पिपीम सेल्सेनु, पिप आ तौ योआश चढेब येहो-यादाम परमप्रभु आ खिम खुइशशा वोइशशा ना, ८०० बि. सी.म खोदेशो एको किताब ब्रेक्शो बाक्ब, दे मिम्नीम।

मार ब्रेक्शो: मालेपुकीमी इस्राएल रागी कली निक्शी खेयप रागी नेल्ल खतम सेल्लेक्म। रेउ मयितीके परमप्रभु यावे आ गेशो सजाइ बाक्ब। मोपतीके योएलम मुर आन कली परमप्रभु यावे गे लेतीन। परमप्रभु यावेम आ गे लेशशो मुर आन कली माफ गेब। योएल २:१३ आन साम्शो नेल्ल लेप्ब। योएल २:२५ योएलमी “इस्राएली ला ममाइ, अर्को रागी डा मुरपुकीमी यो, परमप्रभु यावे आ श्येत रे प्रोइशो तने चाप्नीम” देशो बाक्ब।

सल्लाह मालेमी श्येत गेशो

1 परमप्रभु यावेमी पेशुएल आ तौ योएल कली देशो लोत्र एको बाक्ब। 2 मिनु मेको लोत्र मार बाक्ब देशा हना “गे खाल्पापुकी, एको लोत्र नेनीन। रागीम बाक्ब मुर नेल्ल इन नोफा दाइशशा नेनीन। मार, इन ब्रोंइतीक नाक्ती नु इन किकी पिपी आन ब्रोंइतीक नाक्तीम ओदेशो दुम्शो बाक्बे? 3 गे एको लोत्र इन तमी तौ आन कली देनीन। मिनु इन तमी तौपुकीमी आन तमी तौ आन कली दंपतीन। मिनु मेकोपुकीमी आन चच युइ आन कली देंमल। 4 घांस खोइशशा ब्वाइब मालेपुकीमी मार मार प्रोन्मे, मेको लेस्वा मालेपुकीमी नेक्तेक्म। मिनु लेस्वा मालेपुकीमी मार मार प्रोन्मे, मेको तोडले मालेपुकीमी नेक्तेक्म। मिनु तोडले मालेपुकीमी मार मार प्रोन्मे, मेको सल्लाह मालेपुकीमी नेक्तेक्म। योएल २:२५ 5 मिनु गे दुक्शा बाक्बपुकी सेंसीशा, डाक्कीन। मिनु अडगुर शांबु तूशा दुक्ब नेल्ल नक अडगुर शांबु आ पबर्म रोंका पने। मारदे हना मेको इन शोत्र रे रोंइसीशो बाक्ब। 6 ठेयब रागी डा मुरपुकी आं रागीम ओव्रतेक्म। मेको सक्ति पाइशशा नु हिकने मचाप्चा डा पा शुश बाक्नीम। मेको आ खुइ गुप्स आन खुइ खोदेशो बाक्नीम। मिनु मेको आन लाइशशा खुइ, छाउरी गुप्स आ खुइ खोदेशो बाक्नीम। योएल २:२ 7 मेकोपुकीमी आं अडगुर रू खतम पोक्शा, आं फोत्रशी रवा नेल्ल तिम्शा चेततेक्म। मेकोपुकीमी मेको आन कोक्ते नेल्ल थुरशा, ताइक्ताक्म। मेको आन राशी नेल्ल बुश दुम्तेक्म।

8 मिनु कन्ने मीश आलमी अरन्डी फेक्शा, आ ग्युंभे पचशो वोंइश आल आ पबर्म दोपा रोंका पाइबा, मोपा रोंका पने। 9 अन्न चढेतीके नु तूचा थोत्रक चढेतीके परमप्रभु यावे आ खिमी चढेचा देक्शो बाक्ब। परमप्रभु यावे आ डोंइती गेय पाइब चढेबपुकी रोंका पाइनीम। योएल २:१४ 10 मिनु रू नेल्ल श्येतथ दुम्शो बाक्नीम। खप रोंका पाइब। मारदे हना अन्न नेल्ल खतम दुम्शो बाक्ब। अडगुर आ रस सोव्रत। तेल रवा आन फल सोव्रतेक्म।

11 गे रूम गेय पाइबपुकी सुर्ता पने। अडगुर खुम्बपुकी रोंका पने। क्योत्रज चेरब आ पबर्म यो रोंका पने। मारदे हना बाली नाली खतम दुम्शो बाक्नीम। 12 अडगुर बोट सोल सुल बेक्तेक्म। फोत्रशी रवा यो सोव्रतेक्म। अनार, खजूर, स्याउ रवा नु रू डा रवा नेल्ल सोव्रतेक्म। थमा पा, मुर आन दातेमी मुर आन ग्येरतीक थुं यो मेको खोदेशो पा नुप्शो बाक्ब।

13 चढेबपुकी, सुर्ता पा अरन्डी फेक्शा रोंका पने। चढेतीकेमी गेय पाइबपुकी रोंका पने। आं परमप्रभु आ गेय पाइबपुकी, नाक्दो यो सुर्ता पा अरन्डी फेक्शा बाक्कीन। मारदे हना इन परमप्रभु आ खिमी अन्न चढेतीके नु तूचा थोत्रक चढेतीके देक्शो बाक्ब।

14 मिनु माइजा बाक्चा कली मुर आन कली खुप्तीन। परमप्रभु यावे आ खिम रागीम बाक्ब मुर नेल्ल बुक्शा, खाल्पा आन कली ब्रेत्तीन। गे खाल्पा नु मुर आन कली परमप्रभु यावे, इन परमप्रभु आ खिम पुक्कीन। मिनु परमप्रभु यावे कली ठेयब सेंदा पा ‘वारच पाइक्की’ दे पुनीन” देंत। भजन संग्रह १०४:१०,११; योएल २:१५

योएलमी रोंका पशो

15 मिनु योएलमी “परमप्रभु यावे आ जाक्चा चिक्शो नाक्त आ पबर्म आबी आबी, मारदे हना मुल मेको नाक्त जाक्ब। नेल्ल क्येडा सक्ति पाइशशा खतम पोक्तीके जाक्ब। योएल २:१; यसैया १३:६ 16 मार, इं जचा थोत्रक इं डोंइती रे मरोइक्से डा? मार, ग्येरशा सोम्शा बाक्तीके आंइ परमप्रभु आ खिं रे मयोल्म डा? ब्यवस्था १६:३१

17 वांचेर नेल्ल खप आगाम सोवशा रोमशा लीतेकम। अन्न वोडक्तीक खिं ब्रेशो बाक्नीम। अन्न वोडक्तीक श्येतथ दुम्तेकम। मारदे हना अन्न मदुम। 18 मिनु बस्तु भाव रोंका पाइनीमी। बी ब्यफ जोतीक मबाक्तीके हिरना हिरन बाक्नीम। क्यारश भेडा आन हुल यो श्येत जशो बाक्नीम।

19 परमप्रभु यावे, गो इन कली वाइ ब्रेशा थोइनुड। मारदे हना बी ब्यफ नु क्यारश भेडा आन जोतीके मीम नेक्शो बाक्ब। मिनु मीम रू डा रवा नेल्ल नेक्शो बाक्ब। योएल २:३ 20 मिनु ब्वाकी डा जन्तुपुकीमी यो इन कली थोशो बाक्नीम। मारदे हना खोला सोवशा बाक्नीम। मिनु मीम गोरशो रागी डा बस्तु भाव योवतीक डा घांस नेल्ल नेक्शो बाक्ब” देंत। भजन संग्रह १०४:१०-११

2

परमप्रभुम निसाफ पचा चिक्शो

1 सियोनमी तुराही ताप्पीन। आं डांडामी शुश ग्रीब ताप्तीक ग्रोव ताप्पीन। रागीम बाक्ब मुर नेल्ल गिक गिक पा खिंखि पामेक्ल। मारदे हना परमप्रभु यावे आ जाक्शो नाक्त नेक्था जाक्शो बाक्ब। मेको जाक्चा चिक्शो बाक्ब। योएल १:१५ 2 मेको नाक्ती छिडछिड नु हिंचा डा बाक्ब। मेको थम ठेयब गोस्स नु छिडछिडमी सुम्शो बाक्ब। मिनु ठेयब सक्ति पाइशो लडाइ पाइब आन हुलमी डांडा आन कली क्येर गोस्सुम सुम्शो खोदेशो पा सुम्शो बाक्नीम। मेको मोदेशो डोंइती गेनायो मदुम्शो बाक्त। मिनु नोले डा मुर आन पालाम यो मोदेशो गेनायो मदुम्ब। योएल १:६; प्रस्थान १०:१३-१५

3 मेको आन डोंइडोंइती मीम मारेइ मारेइ नेक्ब। मिनु मेको आन नोनोले मी ब्राइब। मेको आन डोंइती रूपुकी एदेन डा फल फुल रू खोदेशो बाक्नीम। मेको आन नोले गोरशो रागी खोदेशो दुम्नीम। मेकोपुकी रे मारेइ मब्रोंइनीम। योएल १:१९

4 मेको आन कुल शारा आन कुल खोदेशो बाक्नीम। लडाइ पाइब शारा डोइक्ब खोदेशो पा बारनीम। 5 मेकोपुकी बग्गी दोरशो रेयके खोदेशो पा पहाड तार दोरनीम। मीम आइक्च शी दाक्शो खोदेशो पा रेयके पाइनीम। मेकोपुकी सक्ति पाइशो लडाइ पाइब आन हुलमी लडाइ पचा चिक्शो खोदेशो बाक्नीम।

6 मिनु जात जात डा मुर मेको आन कली तशा हिंशा, आन कुल राव किक्पाइक्नीम। 7 मेकोपुकी लडाइ पाइबपुकी खोदेशो पा बारशा, गारो डोंइसीनीम। मेको का का पा आन गाक्शो लां मप्रोंइथु, आन लांम गाक्नीम। 8 मेकोपुकी मचुमुथु गाक्शा, लां का खोइक्नीम। मिनु या कुरशो आन जोरी सत्रु आन हुलम ओवनीम। मिनु सुइमी मेको आन कली तेक्ने मचाप्नीम। 9 मेकोपुकी सहर कली लडाइ तोचा कली गारो तार दोरनीम। मेकोपुकी खिं डा झेल रे खुइ खोदेशो पा ओवनीम।

10 मिनु मेको आन डोंइती रागीम खिनु कुइब। सरीड हिम्सीब। नां नु तास्ला छिडछिड दुम्नीस। मिनु सोरुलमी आन हाम्सो मकोंइनीम। योएल ३:४; यसैया १३:१० 11 मिनु परमप्रभु यावे आ लडाइ पाइब आन डोंइती ठेयब सेंदा पा लोव पाइब। मेको आ लडाइ पाइब सक्ति पाइशो नु शुश बाक्नीम। मिनु मेको आ देशो टीब हिक्ने मचाप्चा डा बाक्नीम। परमप्रभु यावे आ निसाफ पतीक नाक्ती ठेयब नु थम हिंचा डा बाक्ब। मेको सुम फाल्ने चाप्नीमी डा?

परमप्रभुमी “आं गे लेतीन” देशो

12 परमप्रभु यावेमी “इन थुं नेल्लेमी आं गे लेतीन। गे माइजा बाक्शा, डाक्शा नु रोंका पा आं गे लेतीन। इजीकीएल ३३:११ 13 गे रोंका पा इन वा मखाक्कीन। इन थुं खाक्कीन। गेपुकी परमप्रभु यावे, इन परमप्रभु गे लेतीन। मारदे हना मेकोमी शिशी पा दाक्ब। मेको रीब पा मगाइक्ब। गेना हना यो दाक्ब नु रीब पा सजाइ मगेब बाक्ब। प्रस्थान ३४:६ 14 मिनु परमप्रभु यावेमी आ थुं लेशशा, सजाइ मगेथु, आसीक गेबा कों? मेको सुम तुइक्बा डा? मिनु गेपुकीम परमप्रभु यावे, इन परमप्रभु कली अन्न चढेतीक नु तूचा थोवक चढेतीके चढेने। योना ३:९

15 सियोनमी तुराही ताप्पीन। माइजा बाक्चा कली मुर आन कली खुप्तीन। मिनु चाड मानेचा कली मुर आन कली ब्रेत्तीन। योएल १:१४ 16 मुर नेल्ल आन कली खुप्तीन। बुक्शो मुर नेल्ल आन कली परमप्रभु यावे आ डोंइती ठीक सेलीन। खाल्पा आन कली खुप्तीन। आल आन कली खुप्तीन। दूध तूब आल आन कली यो खुप्तीन। ग्युम्ले आ कोठा रे गूल। मिनु ग्युम्ली आ बाक्तीक रे जाक्ल।

17 परमप्रभु यावे आ डोंइती गेय पाइब चढेबपुकी परमप्रभु यावे आ खिं डा पिंडी नु चढेतीक आ दातेम डाक्मल” देंत। मेकोपुकीमी “परमप्रभु यावे इन मुर आन कली सजाइ मगेने। रागी रागी डा मुर आन डोंइती इन मुर आन कली

शुक्शी नु तोक्शा लोत्र पाइक्तीक दुम्चा मगेने। मिनु जात जात डा मुरपुकीमी ‘मार, मेको आन परमप्रभु ते बाक्म?’ देंचा मतामेक्ल” देतेक्म। भजन संग्रह ७९:१०

परमप्रभुमी लोत्र लेशशो

18 मिनु परमप्रभु यावेमी आ रागी आ पर्वम रुश पा, आ मुर आन कली शिशी पाप्तु। 19 मिनु परमप्रभु यावेमी आ मुर आन कली मिम्शा “गो इन कली अन्न, अडगुर शांबु नु तेल सोइक्नन्नी। मिनु गे रूनीनी। मिनु गो इन कली रागी रागी डा मुर आन दातेमी गेनायो शुक्शी पाइक्तीक दुम्चा मगेनन्नी। योएल २६:२७

20 गो उत्तर रे जाक्शो लडाइ पाइब आन कली इन क्येडा डोन खेरनुडमी। गो मेको आन कली कोक्त। मुल गोरशो रागीमी खेरनुडमी। मेको आन डोंइती डा हुल आन कली पूर्व डा समुन्द्र गे नु मेको आन नोले डा हुल आन कली पच्छिम डा समुन्द्र गे खेरनुडमी। मिनु मेको आन राक्शो रिना इर गे लाइब” दे परमप्रभुमी देत। मेकोमी थमा पा ठेयब गेय पशो बाक्ब।

21 रागी डा मुर महिनीन। गे ग्येरशा सोम्सीशा बाक्कीन। परमप्रभु यावेमी ठेयब गेय पशो बाक्ब। 22 गे ब्वाकी डा जन्तु महिनीन। मारदे हना गोरशो रागी डा योत्रतीक गिगी दुम्शो बाक्ब। रवाम फल सित्नीम। फोवशी रवा नु अडगुर आ बोटमी शुश फल सित्नीम।

23 गे सियोन डा मुरपुकी ग्येरसीन। गेपुकी परमप्रभु यावे, इन परमप्रभु आ पर्वम शुश ग्येरसीन। मारदे हना मेकोमी आ ठीक पतीकेम इन कली डोंइती डा रेउ गेशो बाक्त। मेकोमी इन कली शुश रेउ गेशो बाक्त। डोंइती नु नोले डा रेउ डोंइती खोदेशो पा गेशो बाक्त। येरमीया ५:२४ 24 मिनु खलापुकी अन्नमी ब्रीनीम। गरपुकी नक अडगुर शांबु नु तेलम ब्रीशा क्युप्नीम।

25 परमप्रभु यावेमी “गो इन कली लेस्वा माले, तोडले माले, सल्हा माले नु घांस खोइशशा ब्वाइब माले आन नेक्शो नेल्ल लेशशा गेनन्नी। मेको आं सोइशशो लडाइ पाइबपुकी बाक्तेक्म। गो मेको आन कली इन दातेमी सोइक्ताकडमी। योएल १:४

26 मिनु गे शुश जचा तशा रूनीनी। मिनु इन पर्वम छक लाक्चा डा गेय पाइब परमप्रभु यावे, इन परमप्रभु आ नें ठेयब सेल्चा माल्नीनी। मिनु आं मुरपुकी लेंशा गेनायो मुने मदोक्नीम। ब्यवस्था ८:१० 27 गो इस्राएली आन दातेमी बाक्शो बाक्नुड। गो परमप्रभु यावे, इन परमप्रभु नड। आं क्येडा लाक्शा, अर्को परमप्रभु मबाक्ब, दे गे तुइक्चा माल्नीनी। मिनु आं मुरपुकी लेंशा गेनायो मुने मदोक्नीम।

परमप्रभु आ सोक्त मोइक्तीके

प्रेरित २:१६-२१

28 मिनु नोले गो आं सोक्त मुर नेल्ल आन तार मोइक्नुड। मिनु इन तमी तौपुकीमी आं लोत्र पाइनीम। इन खाल्पापुकीमी डोमु ताइनीम। मिनु इन वोंइश आलपुकीमी आं कोइशो ताइनीम। गन्ती ११:२९; यसैया ४४:३; इजीकीएल ३९:२९; तीतस ३:५-६ 29 मेको नाक्ती गो वाइलीम वाइल आन तारी यो आं सोक्त मोइक्नुड।

30 गो सरीड नु रागीम चिन्ड कोइनुडमी। हुश, मी नु कुन के थाम कोइनुडमी। होसे ७:१ 31 परमप्रभु यावे आ ठेयब हिंचा डा नाक्त जाक्चा क्येडा डोंइती नां छिडछिड दुम्ब। मिनु तास्ला हुश दुम्ब” देशो बाक्ब। योएल २:२,१०,११; मत्ती २४:२९; प्रकाश ६:१२ 32 मेना परमप्रभु यावे आ नें थोइब नेल्ल ब्रोंइचा ताइनीम। मारदे हना परमप्रभु यावेमी देशो खोदेशो पा सियोन डांडा नु यरूसलेममी परमप्रभु यावेमी ब्रेशोपुकी ब्रोंइचा ताइनीम। मिनु मेको प्रोंइशो आन दातेमी परमप्रभु यावे आ योत्रशो मुर बाक्नीम। रोमी १०:१३; ओबदिया १७

3

मुर आन कली निसाफ पशो

1 परमप्रभु यावेमी “मेको नाक्ती गो यहूदा नु यरूसलेम आस रिम्शो दुम्तीक नाक्ती लेशशा चाक्नुड। होसे ७:१ 2 मिनु गो रागी रागी डा मुर नेल्ल आन कली खुप्शा, येहो-शाफात आ दिंममी चाक्नुडमी। मिनु मेकेर मेको आन कली निसाफ पाइनुड। मारदे हना मेकोपुकीमी आं मुर आन कली रागी रागी डा मुर आन दातेमी ब्रपाइक्तेक्म। मिनु आं रागी भाग भाग सेल्लेक्म। 3 मेकोपुकीमी आं मुर आन पर्वम फेन्टे ग्यारतेक्म। मिनु वोंइश आल लेयशा, तेल्लेम नु लाम्तेक्म। मीश आल आन कली लेयशा, अडगुर शांबु तूतेक्म।

4 टायर, सीदोन नु पलिस्ती आन रागी डा मुरपुकी आं कली मार पाइनीनी डा? मार, आं पशो आ पबर्म आं कली क्येक्क लेत्नीनी? गेपुकीमी आं कली क्येक्क लेत्ताकनी हना, गो मेको रीब पा इन पिया तार मोइक्नुड। 5 मारदे हना गे आं सुन, चांदी नु थम रिम्शो थोव्रक नेल्ल इन दरवारम लाइक्तीनी। 6 मिनु गे यहूदा नु यरूसलेम डा मुर आन कली मेको आन रागी रे लाइशशा, ग्रीस डा मुर आन कली लेयतीनी। 7 मुल गो मेको आन कली लेयशो रागी रे गुंइशा, चाक्नुडमी। मिनु गो इन श्येत गेशो लेंशा इन पिया तार मोइक्नुड। 8 मुल गो इन तमी तौ आन कली यहूदा डा मुर आन कली लेयनुडमी। मिनु मेकोपुकीमी मेको आन कली डोन साबा रागी डा मुर आन कली लेयनीम” दे परमप्रभु यावेमी देशो बाक्ब।

9 मिनु परमप्रभुमी “एको लोव्र रागी रागी डा मुर आन दातेम नेंपतीन। लडाइ पचा कली ठीक दुमीन। लडाइ पाइब आन कली ब्रेत्तीन। बुक्तीक आ नेक्था जाक्चा मालनीम। 10 गे इन फाली शोल्शा, तुप्शा तरवार सेलीन। मिनु इन गुये तुप्शा, तूतीक भाला सेलीन। मिनु गे हिंब मुरपुकीमी ‘गो बोल्यो लडाइ पाइब नकी’ देनीन। यसैया २:४

11 एर ओंथ बाक्शो रागी रागी डा मुर नेल्ल रीब पा जाक्कीन। गे नेल्ल मेकेर खुम्सीन। परमप्रभु यावे, इन बोल्यो लडाइ पाइब आन कली उइ यितीन। 12 मिनु रागी रागी डा मुर नेल्ल जोंब बोक्शा, खुम्सीशा येहो-शाफात आ दिंममी लमल। मारदे हना गो एर ओंथ डा रागी डा मुर नेल्ल आन कली निसाफ पाइनुड।

13 मिनु इन गुयेमी रिक्चा ठीक दुमीन। मारदे हना बाली नाली खुप्ची जाक्शो बाक्ब। मिनु ओव्रशा अडगुर खाक्कीन। मारदे हना कोल ब्रीशो बाक्त। गर ब्रीशा क्युप्शो बाक्नीम। मेको खोदेशो पा आन मरिम्शो पशो शुश दुम्त। प्रकाश १४:१५; यसैया ६३:३,६; प्रकाश १४:१८

14 मिनु निसाफ पतीक दिंममी शुश मुर जाक्स डा जाक्स बाक्नीम। मारदे हना मेको दिंममी परमप्रभु यावे आ निसाफ पतीक नाक्ती जाक्चा चिक्शो बाक्ब। 15 नां नु तास्ला छिडछिड दुम्नीस। मिनु सोरुलपुकीमी आन छेडछेड मकोइनीम” देंत। योएल २:१०; योएल ३:४

16 परमप्रभु यावेम सियोन रे ठेयब सेंदा पा लोव्र पाइब। यरूसलेम रे पा आ सेंदा नेंपाइक्ब। सरीड नु रागी खिंखि पाइनीस। तन्न परमप्रभु यावे आ मुर आन कली खुइशशा बाक्तीक नु इस्राएल डा मुर आन कली बोल्यो ब्रोइशा बाक्तीक दरवार दुम्ब। आमोस १:२

परमप्रभु सियोनम बाक्ब

17 “गो, परमप्रभु यावे, इन परमप्रभु आं डांडा सियोनम बाक्नुड, दे गे तुइक्नीनी। मिनु यरूसलेम आं के दुम्ब। मिनु रागी रागी डा मुर मेको सहर डा लां रे पा मलाक्नीम। इजीकीएल ३४:३०

18 मेको नाक्ती डांडाम शुश अडगुर सित्नीम। मिनु पहाडम दूध शुश बाक्ब। यहूदा डा खोला नेल्लेमी ब्वाक्कु शाइक्नीम। मिनु परमप्रभु यावे आ खिं रे पा ब्वाक्कु बुक्तीके शित्तीम डा दिंम जिप्पाइक्ब। आमोस ९:१३; इजीकीएल ४७:१

19 मिनु यहूदा डा दोस मताइब मुर आन कली मरिम्शो पतीके नु हुश खाक्श पोक्तीके इजीप्त रागी मुर मबाक्तीके दुम्ब। मिनु एदोम चहिं कोक्त रागी दुम्ब। 20 तन्न यहूदा रागीम गेना हना यो मुर बाक्नीम। मिनु यरूसलेम नेल्ल पाला डा मुर आन कली दुम्ब। ओबदिया १०:- 21 गो मेको आन हुश खाक्श पोक्शो क्येक्क लेत्नुडमी। मिनु आन पाप मक्याम्नुड” दे परमप्रभुमी देंत। परमप्रभु यावे सियोनम बाक्ब। ब्यवस्था ३२:४३; इजीकीएल ४८:३५

आमोस

ब्रेक्ब मुर: आमोस आ नें आ अर्थ “कुरब मुर” बाक्ब। एको किताब मेकोमीन ब्रेक्शो बाक्ब। आमोस ७:८; आमोस ८:१-२

गेना ब्रेक्शो: आमोस यहूदा रागी डा बाक्त हना यो, उत्तर रागी, इस्राएल डा मुर आन कली “होस पा बाक्कीन” देंत। परमप्रभु यावेमी मेको कली सोइश्शो बाक्त। मेकोमी यहूदा डा पिप उज्जीयाह ७९२-७४० बि. सी. नु इस्राएल, उत्तर रागी डा पिप येरोबाम ७९३-७५३ बि. सी. क्येडा डोंइती ब्रेक्शो बाक्त। मेको उत्तर रागी रे खेरचा पुंइसे नोले ब्रेक्शो बाक्ब, देंनीम।

मारदे ब्रेक्शो: आमोसमी मुर आन मरिम्शो पतीके आ पर्वम ब्रेक्शो बाक्ब। मेना शोंप पाइश्शो वोंइश मुर नु मीश मुर आन शुश जचा तूचा, दूली निसाफ पचा नु पुडग आन कली दिप्चा आ पर्वम ब्रेक्शो बाक्ब। आमोसमी मेको आन कली हिंचा डा सजाइ ताइनीम, दे ब्रेक्शो बाक्ब। मिनु मेको सजाइ मार बाक्ब, दे यो ब्रेक्शो बाक्ब। तन्न नोले श्येत रे प्रोंइतीक आ पर्वम यो ब्रेक्शो बाक्ब। आमोस ४:१; ६:४-६ आमोस ७:१-९; आमोस ८:१-१४; आमोस ९:१-६; आमोस ९:७-१५

सजाइ ताइब रागी

1 एको आमोस आ लोत्र बाक्ब। आमोस तेकोहा सहरमी बाक्ब गोठला आन दाते डा का बाक्त। परमप्रभु यावेमी मेको कली इस्राएल आ पर्वम लोत्र कोंइताक्व। मेना यहूदा डा पिप उज्जीयाह नु इस्राएल डा पिप योआश आ तौ येरोबाम बाक्ताक्व। एको खिनु कुचा क्येडा बर्स निकशी डोंइती डा लोत्र बाक्ब। आमोस ७:१४; २राजा १५:१; जकरिया १४:५; २राजा १४:२३ 2 मिनु मेकोमी “परमप्रभु यावे सियोन रे ठेयब सेंदा पा ग्रीब। मेकोम यरूसलेम रे पा ठेयब सेंदाम लोत्र पाइब। गोठला आन बी ब्यफ आन जोतीक रू नेल्ल सोत्रब। मिनु कारमेल डांडा आ डर यो सोत्रब” देंत। येरमीया २५:३०; योएल ४:१६

दमस्कस कली सजाइ गेशो

3 मिनु परमप्रभु यावेमी मार देंत देंशा हना “गो दमस्कस आ ३ खेयप नु ४ खेयप मरिम्शो पशो आ पर्वम ततीके सजाइ मतेक्नुड। मारदे हना मेकोपुकीमी गिलाद डा मुर आन कली फलाम के खुइ पाइश्शो दांदिमी दांइ पाम्तेक्म। यसैया १७:१-३ 4 मोपतीके गो हजाएल आ खिंमी मी सुइक्नुड। मेकोमी बेन-हादाद आ बोल्यो दरवार नेल्ल खतम पोक्ब। 5 गो दमस्कस डा ठेयब लाप्चो डा आगलो जिक्नुड। मिनु आवेन माइश्शो दिंमम बाक्ब मुर नेल्ल आन कली नु बेथ-एदेन डा पिप कली क्याम्नुडमी। अराम डा मुर आन कली ग्याइक्पाइश्शा कीर सहरमी लाइक्पाइक्नुडमी” दे परमप्रभु यावेमी देंत। २राजा १६:९

गाजा कली सजाइ गेशो

6 मिनु परमप्रभु यावेमी “गो गाजा आ ३ खेयप नु ४ खेयप मरिम्शो पशो आ पर्वम ततीके सजाइ मतेक्नुड। मारदे हना मेकोमी शुश मुर आन कली ग्याइश्शा लाइश्शा एदोम आ गुइमी लेयतु। २इतिहास २१:१६-१७; २इतिहास २८:१८; येरमीया ४७:१ 7 मोपतीके गो गाजा डा गारोम मी सुइक्नुड। मेकोमी मेको आ बोल्यो दरवार खतम पोक्ब। 8 गो अश्दोद सहरम बाक्ब मुर आन कली नु अश्कलोन डा पिप कली क्याम्नुडमी। गो एक्रोन कली युक्नुड। मिनु लीशो पलिस्ती नेल्ल जाम्शा लाइनीम” दे परमप्रभु यावेमी देंत।

टायर कली सजाइ गेशो

9 मिनु परमप्रभु यावेमी “गो टायर आ ३ खेयप नु ४ खेयप मरिम्शो पशो आ पर्वम ततीके सजाइ मतेक्नुड। मारदे हना मेकोमी शुश मुर आन कली एदोम आ गुइमी गेप्टु। मिनु आम लोकब आन दातेम पशो कबल प्रेंताक्व। यसैया २३:-; योएल ४:४; १राजा ५:२६ 10 मोपतीके गो टायर डा गारोम मी सुइक्नुड। मिनु मेकोमी मेको आ बोल्यो दरवार खतम पोक्ब” दे परमप्रभु यावेमी देंत।

एदोम कली सजाइ गेशो

11 मिनु परमप्रभु यावेमी “गो एदोम आ ३ खेयप नु ४ खेयप मरिम्शो पशो आ पर्वम ततीके सजाइ मतेक्नुड। मारदे हना मेकोमी शिशी मपथु, आ लोकब आन कली तरवार शेशा, खेदा पाप्टु। मेको आ गाइश्शो गेना हना यो लीशा, ईख

कुरशा बाक्त। ओबदिया १०:-; ब्यवस्था २३:८; येरमीया ४९:७ 12 मोपतीके गो तेमानम मी सुइक्नुड। मेकोमी बोझा डा बोल्यो दरवार खतम पोक्ब” दे परमप्रभु यावेमी देंत।

अम्मोन कली सजाइ गेशो

13 मिनु परमप्रभु यावेमी “गो अम्मोन आ ३ खेयप नु ४ खेयप मरिम्शो पशो आ पर्बम ततीके सजाइ मतेक्नुड। मारदे हना मेकोपुकीम गिलाद डा आल कुरशो मीश मुर आन कोव्रज तरवारम चेतकेम। मेको आन रागी ठेयब सेल्चा कली मो पाम्तेक्म। येरमीया ४९:१-६ 14 मोपतीके गो रब्बाह डा गारोम मी सुइक्नुड। मेकोम आन बोल्यो दरवार खतम पोक्ब। मिनु लडाइ पाइबपुकी शुश रेयके पा, फश गिवार खोदेशो पा जाक्शा, मेको आन कली खतम पोक्नीम। 15 मेकेर डा पिप नु मेको आ ठेयब गेय पाइब मुर नेल्ल ग्याइश्शा लाइक्चा पुंडसीनीम” दे परमप्रभु यावेमी देंत।

2

मोआब कली सजाइ गेशो

1 परमप्रभु यावेमी “गो मोआब आ ३ खेयप नु ४ खेयप मरिम्शो पशो आ पर्बम ततीके सजाइ मतेक्नुड। मारदे हना मेकोमी एदोम डा पिप आन रुश चोप्टु। यसैया १५:-; येरमीया ४८:- 2 मोपतीके गो मोआब रागीम मी सुइक्नुड। मेकोमी गारो हिरशो केरयोथ डा बोल्यो दरवार खतम पोक्ब। मिनु मोआब डा मुर लडाइ, शुश रेयके नु तुराही ग्रीशोम बेक्नीम। 3 गो मेको आ सासन पाइब नु मेको आ ठेयब गेय पाइब नेल्ल आन कली मेको नु काथा साइक्नुडमी” दे परमप्रभु यावेमी देंत। गन्ती २४:१७

यहूदा कली सजाइ गेशो

4 मिनु परमप्रभु यावेमी “गो यहूदा आ ३ खेयप नु ४ खेयप मरिम्शो पशो आ पर्बम ततीके सजाइ मतेक्नुड। मारदे हना मेकोपुकीमी परमप्रभु यावे आ अरेशो लोव्र मटीम। आ फुल्लुम मुशा ब्रेक्शो लोव्र मपाम। मेकोपुकीम आन किकी पिपीम खोदेशो पा जोल लोव्र थमा सुइश्शा हेंथे गाक्तेक्म। 5 मोपतीके गो यहूदा रागीम मी सुइक्नुड। मेकोमी यरूसलेम डा बोल्यो दरवार खतम पोक्ब” दे परमप्रभु यावेमी देंत। होसे ८:१४

इस्राएल कली सजाइ गेशो

6 मिनु परमप्रभु यावेमी “गो इस्राएल आ ३ खेयप नु ४ खेयप मरिम्शो पशो आ पर्बम ततीके सजाइ मतेक्नुड। मारदे हना मेकोपुकीमी ठीक पाइब आन कली चांदी के क्येटीम नु मारेइ मथीब आन कली जोर का चेपल ताक्शा लेयतेक्म। आमोस ८:६ 7 मिनु प्रुडग आन पिया फुरकुम खोल्शा दिम्नीम। श्येत जाइब आन कली नेप्शा गुंडनीम। पोबु निम्फा मीश आल का नु बाक्शा, आं नें ग्रांग्रा दिशो सेल्नीम। आमोस ८:४ 8 मेको आन देवता थानम जाकटी वोइश्शो वा तार बाक्शा, सजाइ आ पा डा थाप्शो क्येटीम, अडगुर शांबु ग्याप्शा तूनीम। प्रस्थान २२:२५

9 गो मेको आन डोंइती रे एमोरी आन कली साइक्तामी। मेकोपुकी लेबानोन डा लाइश्शो रवा खोदेशो लाइश्शो नु बोल्यो बाक्तेक्म। गो मेको आन इर डा फल नु उइ आगा डा शाक्श नेल्ल खतम सेल्ता। गन्ती २१:२१-२८ 10 मिनु गो इन कली एमोरी आन रागी गेचा कली इजीप्त रागी रे गुंडशा ४० बर्स सम्म गोरशो रागीमी लां कोंइशा गाक्पाइक्तन्नी। 11 गो इन वोंइश आल आन दाते डा का निक्शी आन कली आं लोव्र पाइब सेल्चा कली कोल्पाइक्तामी। इन तौ आन दाते डा का निक्शी आन कली नाजिरी दुम्पाइक्चा कली कोल्पाइक्तामी। ए इस्राएल डा मुरपुकी, मार एको लोव्र थमा ममाइ डा?” दे परमप्रभु यावेमी देंत। गन्ती ६:२-१३

12 मिनु परमप्रभु यावेमी “तन्न गे मेको नाजिरी दुम्शो मुर आन कली अडगुर शांबु तूपाइक्तीनी। आं लोव्र पाइब आन कली ‘परमप्रभु यावे आ लोव्र मपने’ दे माइक्तीनी। आमोस ७:१३, १६; येरमीया ११:२१

13 मोपतीके गे इन बाक्तीकेमी बाक्शा, इन कली बाला सुन्दा नलम ब्रीशो बग्गी दोपा हिम्बा, मोपा हिम्पाइक्नन्नी। 14 थाम्पा दोरबपुकी प्रोक्चा मताइनीम। मिनु बोल्यो मुर आन बोल जाम्शा लाइब। सक्ति पाइश्शोपुकीम यो आंम कली प्रोंइने मचाप्नीम। 15 लिब्रा आप्बपुकी राप्ने मचाप्नीम। फेरर पा दोरबपुकीमी यो आंम कली प्रोंइने मचाप्नीम। मिनु शारा डोइक्बपुकीम यो आंम कली प्रोंइने मचाप्नीम। 16 मेको नाक्त नेल्ल क्येडा सक्ति पाइश्शो आन दाते डा ठेयब थुं पाइश्शोपुकी शिश्रा प्रोक्नीम” दे परमप्रभु यावेमी देंत।

3

इस्राएल कली सजाइ

1 इस्राएल डा मुरपुकी, परमप्रभु यावेमी इन पर्वम लोत्र का पाप्तु। मेको लोत्र नेनीन। मेकोमी “एको लोत्र इजीप्त रागी रे आं चाक्शो खिं डा मुर नेल्ल आन पर्वम बाक्ब। 2 रागी डा खिं खिं डा मुर नेल्ल रे गो इन कली ला योव्रतन्नी। मोपतीके गो इन मरिम्शो पशो आ पर्वम सजाइ गेनुड। ब्यवस्था ४:३४ 3 मार, मुर निक्शी मगारसा सम्म काथ काथा गाक्नीसी डा? 4 मार, सिखार मथित्तु हना, ब्वाकीम गुप्स ग्रीबा डा? मार, गुप्स आ चाइक्बम मारेइ मथित्तु मेको आ पुक्खीमी डरर डरर पाइबा डा? 5 मार, खपीम ब्वारद मदाइक्थु, चिक्ब रेप्बा डा? मार, ग्याइक्चा कली मारेइ मबाक्थु, थेम्लु खप रे ग्येत्थ बोक्नीमी डा? 6 मार, तेकोइ सहरमी तुराही ताप्शोनु, मुर महिनीमी डा? मार, सहरम श्येत दुम्मेनु, मेको परमप्रभु यावे आ सोइश्शो ममाइ डा? यसैया ४५:७; बिलाप ३:३७ 7 थमा पा, परमप्रभु यावेमी आ लोत्र पाइब आन कली मदैथु, मारेइ मपाइब। उत्पत्ती १८:१७ 8 गुप्स ग्रीशो नेंशा, सु महिंबा? परमप्रभु यावे ब्वाक्मेनु, सुम आ लोत्र मपाइबा डा?

सामरीया कली सजाइ

9 ‘अशदोद डा बोल्यो दरवार नु इजीप्त रागी डा बोल्यो दरवार डा मुर आन कली गेपुकी सामरीया डा पहाडमी बुक्कीन। मिनु मेको सहरम दुम्शो ठेयब रेयके नु मुर आन कली श्येत गेशा, दिप्शो कोव्रडीन’ दे मुर आन कली देनीन। 10 मेकोपुकी ठीक गेय पस मजोक्नीम। हुश खाक्श पोक्शा नु मार मार रोइश्शा खुइ पशो आन बोल्यो दरवारम खेक्शा वोइक्नीम” दे परमप्रभु यावेमी देंत। 11 मोपतीके परमप्रभु यावेमी “इ जोरी सत्रुमी इ रागी पुन्नीम। मेकोपुकीमी लडाइ तोव्रमेनु, गे ब्रुइनीनी। मेकोमी इ बोल्यो दरवार नेल्ल रोइक्नीम” दे परमप्रभु यावेमी देंत। 12 मिनु परमप्रभु यावेमी “दोपा गोठलामी गुप्स आ शोव्र रे भेडा आ खोइल निक्शी कि नोफा आ टुक्रा का ला हना यो रोइक्बा, मोपा सामरीयाम नित्तीक आ कुना नु खाटम बाक्शा यो इस्राएल डा मुर प्रोइचा पुंइसीनीम” देंत।

13 मुर नेल्ल आन परमप्रभु यावेमी “नेनीन, याक्ब आ खिं डा मुर आन पर्वम सांकछी गेन। 14 गो तेको नाक्त इस्राएल कली आ मरिम्शो पशो आ पर्वम सजाइ गेनुडा, मेको नाक्त गो बेथेल डा चढेतीक कली यो सजाइ गेनुड। मिनु चढेतीक डा ग्रोव्रपुकी बेल्ला खपीम दोक्नीम। 15 गो हिंउदमी बाक्तीक खिं नु हुप्शोमी बाक्तीक खिं निम्फा प्रेतनुड। मिनु हात्ती आ दाराम दारशो सेल्शो खिं ब्रेत्नीम। मिनु ठेयब खिंपुकी यो खतम सेल्नुड” दे परमप्रभु यावेमी देंत। १राजा २२:३९; भजन संग्रह ४५:९

4

परमप्रभु गे मलेश्शो

1 सामरीया डा डांडाम बाक्ब, बाशान डा बी खोदेशो दोम्शो मीश मुर, गे प्रुडग आन कली दिप्नीनी। मारेइ मथीब आन कली फस पोक्नीनी। मिनु इन वोंइश आन कली “आंइ कली तूचा कली मार मार चाक्कीन” देंनीनी। 2 परमप्रभु यावेमी आ नेम कसम जशो बाक्ब। मेकोमी “नेनीन, इन कली कोंडगुम कीशा लाइक्नीम। इन लीशो आन कली बोल्सीमी ब्वेक्शा लाइक्तीक नाक्त जाक्ब। 3 गे नेल्ल का का पा एर ओंथ मकोव्रथु, गारो आ पोव्रला रे पा लाइनीनी। मिनु गे हारमोन मेर ताइक्चा पुंइसीनीनी” दे परमप्रभु यावेमी देंत। हारमोन हिबू लोत्र मार बाक्ब, दे मतुइक्नीम। 4 मिनु परमप्रभु यावेमी “बेथेल सहरम लशा, मरिम्शो पने। गिलगालमी लशा, मेको क्येडा यो शुश मरिम्शो पने। सुनी कुस कुस इन चढेतीक चाक्कीन। नाक्त सां सांमी इन १० भाग डा भाग का चाक्कीन। होसे १२:१२; ब्यवस्था १४:२८ 5 आं कली ‘गे इस्राएल डा मुर, रिम्शो पाइब बाक्नीनी’ दे बोरब ओस्ती सुप्शो शोब्ले चढेपने। मिनु थुंम ग्येरशा चढेतीक आ पर्वम ठेयब लोत्र पना पन गाक्कीन। मारदे हना गे मोदेशो पचा दाक्नीनी” दे परमप्रभु यावेमी देंत। लेवी २:११

6 मिनु परमप्रभु यावेमी “इन कली, सहर नेल्लेमी श्येत्थ कोव्रज नु शोब्ले जचा मतशो सेल्लन्नी। मो हना यो गेपुकी आं गे मलेन्नी” दे परमप्रभु यावेमी देंत।

7 मिनु “गो इन अन्न खुप्चा क्येडा महिना सां डोंइती रेउ मयिपदु। गो सहर का कली रेउ यिपाइक्ता, अर्को सहर कली मयिपदु। मिनु रू कामी रेउ यिपाइक्ता, अर्को रूम मयिपदु। मिनु मेको सोव्रत। १राजा १७:१ 8 मोपतीके मुरपुकी सहर सहर रे ब्वाक्कु तूचा कली सहर काम जाक्तेक्म। तन्न रूथ्री तूचा मताम। मो हना यो गेपुकी आं गे मलेन्नी” दे परमप्रभु यावेमी देंत।

9 मिनु परमप्रभु यावेमी “गो इन फल फुल रू नु अडगुर रूम सोवतीक नु बुक्खी डाइक्तीक रोइ सोइक्ताक्ड। सल्लाह मालेमी इन फोवशी रवा नु तेल रवा आन कली नेक्पाइक्तामी। मो हना यो गेपुकी आं गे मलेन्नी। हागै १:११; योएल १:४ 10 गो इन दातेम इजीप्त रागी कली खोदेशो पा बेक्चा डा रोइ सोइक्ताक्ड। गो इन ठिटा आन कली तरवारमी क्योरशा साइक्पाइक्तामी। इन शारा रोइक्पाइक्तामी। इन बाक्तीक डा मरिम्शो रिना इन नें आगाम प्रिंताक्ड। मो हना यो गेपुकी आं गे मलेन्नी” दे परमप्रभु यावेमी देंत। प्रस्थान ९:३

11 मिनु परमप्रभु यावेमी “गो इन दाते डा का निक्शी आन कली सोदोम नु गोमोररा कली खोदेशो पा खतम सेल्ला। गे ब्रशो मी रे पा गुंडशो बुल्सी खोदेशो बाक्तीनी। मो हना यो गेपुकी आं गे मलेन्नी” दे परमप्रभु यावेमी देंत। उत्पत्ती १९:२४-२५; जकरिया ३:२ 12 मोपतीके परमप्रभु यावेमी “ए इस्राएल डा मुरपुकी, गो इन कली मार पाइनुड देशा हना, गे इन परमप्रभु, आं कली गुम्चा माल्नीनी। 13 सुमी डांडा आन कली सेला, मेकोमी फश यो सेल्लो बाक्ब। मेकोमी मुर आन कली आ मिम्शो तुइक्पाइक्ब। मेकोमी सुनी कली छिडछिड सेल्लब। मिनु रागी डा लाइशो डांडा मेर गाक्ब। मेको आ नें मुर नेल्ल आन परमप्रभु यावे बाक्ब” देंत। मीका १:३

5

इस्राएली आन पर्बम रोंका पशो

1 मिनु आमोसमी “ए इस्राएल आ खिं डा मुरपुकी, इन पर्बम आं रोंका पशो नेनीन। 2 आं मीश आल इस्राएल लेंशा गेनायो मबोक्चा डा पा गोल्लत। मेको आ रागीमीन प्रोंइचा पुंडसीशो बाक्ब। मेको कली पोक्ब सुइ मबाक्नीम” देंत। 3 मिनु परमप्रभु यावेमी “तेकोइ सहर रे इस्राएल आ पर्बम हजार का जना मुर गूतेक्म हना, सहे का जना ला लीनीम। सहे का जना गूतेक्म हना, १० जना मुर ला लीनीम” देंत।

दिप्ब आन पर्बम लोव पशो

4 मिनु परमप्रभु यावेमी इस्राएल आ खिं डा मुर आन कली “आं कली मालीन। मिनु ब्रोनीन। 5 बेथेल कली ममालीन। मिनु गिलगाल मलने। बेयर-शेबामी मगाक्कीन। मारदे हना गिलगाल डा मुर थमा पा ग्याइशशा लाइक्चा पुंडसीनीम। मिनु बेथेल खतम दुम्ब। आमोस ४:४; होसे ४:१५

6 परमप्रभु यावे कली मालीने। मिनु ब्रोंइचा ताइनीनी। मो मपाइतीनी हना, मेको मी खोदेशो पा गाइशशा योसेफ आ खिम मी सुइक्ब। बेथेल कली खतम पोक्ब। मेको मी कली काप्ब सुइ मबाक्नीम। आमोस ६:१२; यसैया ५:२० 7 गेपुकी ठीक निसाफ कली दूली सेल्लनीनी। ठीक पतीक कली खतम सेल्लनीनी। 8 सोरुल आन कली सेल्लब, हिंचा डा छिडछिड रे सुनी डा हाम्सो सेल्लब, नाक्ती कली छिडछिड सेल्लब नु समुन्द्र डा ब्वाक्कु कली ब्रेशशा रागीमी मोइक्ब। आं नें परमप्रभु यावे बाक्ब। अय्युब ३८:३१; आमोस ९:६ 9 मेकोमी बोल्यो आन कली रीब पा खतम सेल्लब। मिनु आन बोल्यो दरवार खतम दुम्नीम।

10 मेकोपुकीम निसाफ पतीके लाप्चोम निश्शा अरेब कली काइ मदाक्नीम। मिनु थमा लोव पाइब आन कली ग्रांया दित्नीम। यसैया २९:२१ 11 मारदे हना गे पुडग आन कली दिम्नीनी। मेको आन कली गेन कि गेन, दे शुश अन्न थाप्पाइक्नीनी। गे खोइशशो फुल्लु के खिं सेल्लतीनी। तन्न मेकेर बाक्चा मताइनीनी। रिम्शो अडगुर रू सेल्लतीनी। तन्न अडगुर शांबु तूचा मताइनीनी। सेफन्याह १:१३ 12 मारदे हना गो इन शुश मरिम्शो पशो तुइक्नुड। गो इन पाप गिश ठेयब बाक्बा, मेको तुइक्नुड। गे ठीक पाइब आन कली श्येत गेनीनी। घूस ताक्नीनी। निसाफ पतीकेमी मारेइ मथीब आन कली नेप्शा गुंडनीनी। 13 मोपतीके निप्स पाइशशो मुर सिक्सी पा बाक्नीम। मारदे हना इस्राएलम काइ मरिम्शो दुम्शो बाक्ब।

14 गे ब्रोंइशा बाक्चा कली रिम्शो पचा मालीन। मरिम्शो पचा ममालीन। मिनु मुर नेल्ल आन परमप्रभु यावे गे नु बाक्ब। 15 मरिम्शो पतीक कली काइ मदाक्तीन। रिम्शो पतीक कली दाक्तीन। ठेयब लाप्चोमी ठीक निसाफ पने। मिनु मुर नेल्ल आन परमप्रभु यावेमी योसेफ आ लीशो मुर आन कली शिशी पाइबा कों?” दे परमप्रभु यावेमी देंत। भजन संग्रह ३४:१५; रोमी १२:९

16 मोपतीके मुर नेल्ल आन परमप्रभु यावेमी “लां डा मुर नेल्ल डाक्शा, रोंका पचा माल्नीम। आबी आबी, देंचा माल्नीम। रूम गेय पाइब आन कली रोंका पचा कली ब्रेत्तीन। रोंका पस जोक्ब आन कली यो ब्रेत्तीन। 17 अडगुर रू नेल्लेमी रोंका पचा माल्नीम। मारदे हना गो इन दाते रे पा गाक्शा लाइनुड” दे परमप्रभु यावेमी देंत।

परमप्रभु आ निसाफ पतीके नाक्त

18 मिनु परमप्रभु यावेमी “मारदे गे परमप्रभु यावे आ नाक्त जाक्शो दाक्नीनी? मारदे परमप्रभु यावे आ निसाफ पतीक नाक्त माल्नीनी? मेको नाक्त छिडछिड दुम्ब, छेडछेड मदुम्ब। योएल २:११ 19 मेको नाक्ती मुर का गुप्स रे प्रोक्शा, वां कली गुम्शो खोदेशो बाक्ब। खिं लशा बाक्चा कली आ गुइ गारोम वोदानु, बुस्सुम कोक्शो खोदेशो दुम्ब। 20 परमप्रभु यावे आ नाक्त छिडछिड दुम्ब। छेडछेड मदुम्ब। मेको छिडछिडमी छेडछेड काइ मबाक्ब।

21 गो इन चाड नु इन गुम्तीक आन कली काइ मदाक्नुड। यसैया १:११-१५ 22 गे आं कली चोशा चढ़ेतीक नु अन्न चढ़ेतीक चढ़ेतीनी हना यो, गो मेको मब्राइनुड। मिनु इन नेल्ल क्येडा दोम्शो बस्तु दुशा बाक्चा आ पबर्म चढ़ेशो यो मकोव्रनुड। मीका ६:६-७ 23 इन कुम्सो आन रेयके आं क्येडा डोन वोतीन। इन तार पाइश्शो ठेयब ताप्तीके ताप्शो नेंचा मदाक्नुड। 24 तन्न ठीक निसाफ पतीक ब्वाक्क खोदेशो पा शाइक्पतीन। ठीक पतीक गेनायो मसोव्रब खोला खोदेशो पा शाइक्पतीन।

25 गे इस्राएल आ खिं डा मुरपुकी गोरशो रागीम ४० बर्स गाक्नीनु, आं कली चढ़ेनी डा? येरमीया ७:२२-२४; प्रेरित ७:४२-४३ 26 गेपुकीमी इन पिप देवता साकुथ नु इन सौरुल देवता काइवान आस कली कुरशा लतीन। मेको आंमा इन कली सेल्शो मूर्ति बाक्नीसी। 27 मोपतीके गो इन कली ग्याइश्शा, दमस्कस क्येडा डोन लाइक्पाइक्नन्नी” दे परमप्रभु यावेम देंत। मेको आ नें मुर नेल्ल आन परमप्रभु यावे बाक्ब।

6

ठेयब लेशो आन कली हुइश्शो

1 मिनु “आबी, सियोन डा ठेयब मुर, मेकोपुकीमी सामरीया डा डांडामी ‘गो रिम्शो बाक्नीकी’ दे मिम्नीम। इस्राएल डा मुरपुकीमी मेको आन कली थमा सुइश्शा, जाक्नीम। 2 गे आइक्ची हांबु काल्नेह सहर लशा, कोव्रडीन। मिनु मेकेर रे ठेयब हमाथ रागी लन। मेको नोले पलिस्ती आन गाथ सहरमी लने। इन राज्य मेको आन राज्य क्येडा रिम्शो बाक्बा डा? मार, मेको इन रागी मेको आन रागी क्येडा ठेयब बाक्बा डा? उत्पती १०:१० 3 गे ‘श्येत जतीक नाक्त मजाक्ब’ दे मिम्नीनी। मिनु गे हुश खाक्श पोक्ब सासन पाइब चाक्नीनी। भजन संग्रह १०:५

4 आबी, मेको हात्ती आ दारा के सेल्शो खाटमी इप्नीमी। आन इप्तीकेमी गोल्ला बाक्नीमी। मेकोपुकीम क्यारश भेडा आन पाठा नु गोठ डा बाछा ब्वाइनीमी। 5 मेकोपुकीम हेंथे कुम्सो पा तार पाइश्शो ठेयब ताप्तीक ताप्नीमी। मिनु ‘गो दाऊद खोदेशो पा ताप्तीक सेल्नुड’ दे मिम्नीम। यसैया ५:१२ 6 मेकोपुकीम डाक्काम अडगुर शांबु तूनीमी। नेल्ल क्येडा रिम्शो तेल खेक्सीनीमी। तन्न योसेफ आ खिं डा मुरुम श्येत जामेनु, सुर्ता मपाइनीम। 7 मोपतीके मेको नेल्ल क्येडा डोंइती ग्याइश्शा लाइक्चा पुंइसीनीम। मोपा मेको आन चाड पतीके, ग्येरशा बाक्तीक नाक्त नुप्ब” देंत।

इस्राएल डा मुर आन ठेयब लेशो

8 परमप्रभु यावेमी आ नेंमी कसम जशो बाक्ब। मिनु मुर नेल्ल आन परमप्रभु यावेमी “गो याक्ब आ ठेयब लेशो तशा ग्रांग्रा दीनुड। मेको आ बोल्यो दरवार आन कली काइ मदाक्नुड। गो एको सहर नु आ मार मार नेल्ल आन जोरी सत्रु आन गुइमी गेनुडमी” देशो बाक्ब।

9 खिं काम १० जना मुर लीतेक्म हना यो, मेको नेल्ल बेक्नीम। 10 मिनु खिं डा मुर कामी मेको आन बेक्शो रां चोइब, खिं आगा रे बेक्शो मुर गुंइचा कली जाक्शा, मेकेर खुइक्ब का कली “गेपुकी नु अरु सुइ बाक्नीमी?” दे हिल्लो पाइब। मिनु मेकोमी “मबाक्ब” देंब। मिनु खिं डा मुरुमी “सिक्सी पावो। गोपुकीमी परमप्रभु यावे आ नें थिचा मदुम्ब” देंब। आमोस ८:३ 11 मारदे हना परमप्रभु यावेमी हुकुम पाइब। मिनु ठेयब खिं कली प्रेक्ब। मिनु आइक्च खिं यो प्रेक्ब। 12 मेकोमी “मार, शारा रोंगुम दोरनीमी डा? मार, मेकेर ब्यफ वाक्नीमी डा? तन्न गेपुकीम ठीक निसाफ कली दूली सेल्तीनी। ठीक पतीक कली कशो सेल्तीनी। आमोस ५:७ 13 गेपुकी लो-देबार सहर आ पबर्म ग्येरसाक्नी। मिनु ‘मार, गोपुकीमी इं सक्तिम कारनाइम सहर मग्रासे डा?’ देंनीनी। 14 ए इस्राएल आ खिं डा मुरपुकी, गो इन पबर्म रागी का डा मुर आन कली पोक्नुडमी। मिनु मेकोपुकीमी इन कली लेबो-हेमाथ रे अराबाह डा खोला सम्म श्येत गेशा खेदा पाइनीम” दे मुर नेल्ल आन परमप्रभु यावेमी देंत।

7

सल्हा माले कोंइशो

1 परमप्रभु यावेमी आं कली मार कोंइताक्यी देशा हना, पिप आ बाली नाली खुप्ने थुम्शा, अर्को बाली वामानु, मेकोम मारेइ मारेइ नेक्ब सल्ला माले आन कली ठीक पशो ताता। 2 मिनु मेकोपुकीमी रू डा घांस नेल्ल नेक्गमे नोले गो “परमप्रभु यावे माफ गेयीनी। याकूब आ रागी दोपा ब्रोंइने चाप्बा डा? मारदे हना मेको थम आइक्च बाक्ब” देंती। 3 मिनु परमप्रभु यावेमी “मेको मोदेशो मदुम्ब” देंत।

मी कोंइशो

4 मिनु परमप्रभु यावेमी आं कली मार कोंइताक्यी देशा हना परमप्रभु यावेमी आं कली ब्रशो मी का कोंइताक्यी। मिनु मेको मीम ठेयब समुन्द्र कली सोव्रपाइवतु। मिनु रागी कली यो नेक्तु। उत्पत्ती ७:११ 5 मिनु गो “परमप्रभु यावे नाइक्तीन, दे गो इन कली पुंइनुड। याकूब आ रागी दोपा ब्रोंइने चाप्बा डा? मारदे हना मेको थम आइक्च बाक्ब” देंती। 6 मिनु परमप्रभु यावेमी “मोदेशो यो मदुम्ब” देंत।

गारो प्रोव्रतीक घन्टी कोंइशो

7 मिनु परमप्रभु यावेमी आं कली मार कोंइताक्यी देशा हना, परमप्रभु यावे गारो काम गारो प्रोव्रतीक घन्टी शेशा, राप्शो बाक्त। 8 मिनु परमप्रभु यावेमी आं कली “आमोस गे मार तवी?” दे हिल्लो पाप्तु। मिनु गो “गारो प्रोव्रतीक घन्टी का ताता” देंती। मिनु परमप्रभुमी “कोव्रडो, गो आं मुर इस्राएली आन दातेमी गारो प्रोव्रतीक घन्टी का क्युकनुड। मिनु मुल गो मेको आन नेक्था बाक्शा, मार पाइक्बाक्मा, कोव्रनुडमी। यसैया ३४:११; आमोस ८:२ 9 इसहाक आ डांडा डा थान खतम दुम्नीम। मिनु इस्राएल डा थान नेल्ल ब्रेशा जाम्शा लाइनीम। मिनु गो तरवार शेशा येरोबाम आ खिं डा मुर साइक्चा कली बोक्शा लाइनुड” देंत।

आमोस नु अमस्याह

10 मिनु बेथेल डा चढेब अमस्याहमी इस्राएल डा पिप येरोबाम कली “इस्राएल आ खिं डा मुर आन दातेमी इस्राएलम बाक्ब आमोसमी इन पर्बम मरिम्शो पाइब। एको रागीमी मेको आ लोव्र फालने मचाप्ब। 11 आमोसमी ‘येरोबाम तरवारम साइक्चा पुंइसीब। मिनु इस्राएल डा मुर आन रागी रे ग्याइशशा लाइक्चा पुंइसीनीम’ देशो बाक्ब” दे आमोसमी देंत। 12 मिनु अमस्याहमी आमोस कली “ए, परमप्रभु यावे आ लोव्र पाइब, गे एक रे प्रोक्शा यहूदा रागी लावो। मिनु मेकेर क्येट चेम्शा शोब्ले ग्याप्शा जशा, परमप्रभु यावे आ लोव्र पावो। १सामुएल ९:९ 13 बेथेलमी लेंशा गेनायो परमप्रभु यावे आ लोव्र मपावो। मारदे हना मेको पिप आ देवी देवता थान नु राज्य डा पूजा पतीके बाक्ब” देंत। १राजा १२:२८-२९ 14 मिनु आमोसमी अमस्याह कली “गो परमप्रभु यावे आ लोव्र पाइब मनड। मिनु परमप्रभु यावे आ लोव्र पाइब आ तौ यो मनड। गो दा गोठला का नु फोव्रशी रवा कोव्रब मुर नड। 15 मिनु परमप्रभु यावेमी आं कली क्यारश भेडा योव्रतीक रे ब्रेत्ताक्यी। मिनु मेकोमी आं कली ‘लावो। आं मुर इस्राएली आन कली आं लोव्र शेंदीमी’ दे माइक्ती। 16 मोपतीके मुल परमप्रभु यावे आ लोव्र नेनीन। गे आं कली ‘इस्राएल आ पर्बम परमप्रभु यावे आ लोव्र मपावो। मिनु इसहाक आ खिं डा मुर आन पर्बम लोव्र मपावो’ देंतीनी। आमोस २:१२ 17 मोपतीके परमप्रभु यावेमी इ कली ‘इ मीश सहरम तेल्लेम का दुम्ब। इ तमी तौ नेल्ल तरवारमी क्योरचा पुंइसीनीम। मिनु इ रागी पुक्शा योक्सीनीम। गे चहिं ग्रांग्रा दिशो रागी काम बेक्नेवे। मिनु इस्राएल थमा पा आ रागी रे ग्याइशशा लाइक्चा पुंइसीब’ ” दे आमोसमी अमस्याह कली देंत।

8

मीशो फोव्रशीम ब्रीशो डालो

1 मिनु परमप्रभु यावेमी आं कली मीशो फोव्रशीम ब्रीशो डालो का कोंइताक्यी। 2 मिनु मेकोमी आं कली “आमोस, गे मार तवी?” दे हिल्लो पती। मिनु गो “मीशो फोव्रशीम ब्रीशो डालो का ताता” देंती। मिनु परमप्रभु यावेमी आं कली “आं मुर, इस्राएली आन नाक्त गाप्त। मुल गो मेको आन नेक्था बाक्शा, मार मार पाइनीमी, मेको कोव्रनुडमी। आमोस ७:८ 3 मेको नाक्ती दरवारम कुम्सो पाइब आन कुम्सो रेंका पतीके दुम्नीम” दे परमप्रभु यावेमी देंत। मिनु मेकोमी “बेक्शो मुर शुश बाक्नीम। लाडगाम गुंइशा ताइक्नीम। गे सिक्सी पावो” देंत। आमोस ६:१०

इस्राएल खतम दुम्शो

4 मिनु परमप्रभु यावेमी “गे मारेइ मथीब आन कली दिम्बपुकी नु रागी डा प्रुडग आन कली खतम सेल्बपुकी, नेनीन। आमोस २:७ 5 गेपुकीमी ‘औंसी गेना लाक्बा डा? गो अन्न लेयचा ताइनीकी। नाइक्तीक नाक्त गेना लाक्बा

डा? गो चेरब लेयचा ताइनीकी। गो एफाह आइक्च सेल्शा, शेकेल कली हेल्शो सेल्शा नु दूली पा नाक्शा, शुश क्येट चेम्नीकी' देंनीनी। एफाह का २२ लिटर लाइब पुक्तीक बाक्ब। शेकेल का ११.५ ग्राम डा क्येट बाक्ब। नेहेम्याह १३:१५ 6 गेपुकीम 'प्रुडग आन कली चांदीम ग्याप्नीकी। मारेइ मथीब आन कली जोर का चेपलमी ग्याप्नीकी। मिनु मक्राप्शो चेरब लेयनीकी' देंनीनी" देंत। आमोस २:६

7 परमप्रभु यावेमी याकूब आ सोशो बोशो मिम्शा, कसम जाप्तु। मार कसम जाप्तु देंशा हना "गो मेको आन पशो गेनायो मप्रेनुड। 8 मार, मेको आ पतीके रागी खिंखि मपाइबा डा? मेकेर बाक्ब नेल्लेमी रोंका मपाइनीमी डा? रागी नेल्ल नील खोला खोदेशो पा बारनीम। इजीप्त रागी डा नील खोला बारशा ग्युम्शो खोदेशो पा नुप्शा लाइनीम। आमोस ९:५

9 गो मेको नाक्ती नां कली नाक्ती उइक्थ दुम्मेनु, लाक्पाइक्नुड। मिनु नाक्त बाक्ना बाक्न नां रिक्पाइक्नुड। येरमीया १५:९ 10 गो इन चाड कली रोंका पतीक सेल्लुड। इन कुम्सो नेल्ल आन कली डाक्तीक सेल्लुड। गो नेल्ल इन कली अरन्डी फेक्पाइश्शा चां प्रेक्पाइक्नुड। गो आंम का ला बाक्शो तौ आ पबर्म रोंका पशो खोदेशो दुम्पाइक्नुड। मेको चाड नुप्तीक नाक्त कशो नाक्त दुम्ब" देंशो बाक्ब। येरमीया ६:२६

11 मिनु परमप्रभु यावेमी "गोम अन्काल सोइक्ची ना, थमा पा श्येत जतीक नाक्त जाक्ब। मेको अन्काल जचा नु तूचा के अन्काल ममाइ, तन्न परमप्रभु यावे आ लोत्र नेंतीक अन्काल बाक्ब। १सामुएल ३:१ 12 मुरपुकी परमप्रभु यावे आ लोत्र माल्शा, समुन्द्र का रे अर्को समुन्द्र सम्म लाइनीम। उत्तर रे पूर्व सम्म लाइनीम। मेकोपुकी एर ओथ गाक्शा, परमप्रभु यावे आ लोत्र मालनीमी। तन्न मथित्नीम।

13 मेको नाक्ती दारशो मीश आल नु बोल्यो वोंइश आल ब्वाक्कु तूचा मतथु, थाइनीम। 14 सु सु सामरीया डा देवता अशीमाह आ नेंमी कसम जशा 'ए दान, इ देवता ब्रोंइशा बाक्शो खोदेशो पा' नु 'बेयर-शेबा डा देवता ब्रोंइशा बाक्शो खोदेशो पा' देंशा कसम जाइब नेल्ल गेनायो मबोक्चा डा पा गोलनीम" दे परमप्रभु यावेमी देंत। न्यायाधीस १८:३०

9

नोले डा दुम्तीक कोंइशो

1 गो परमप्रभु कली चढेतीक आ नेक्था राप्शो ताता। मिनु मेकोमी आं कली "लाप्चो डा शी शुश हिम्पाइक्चा कली थाम आन डर तुपो। मिनु ब्रेशशा मुर नेल्ल आन पिया तार दोक्नीम। मिनु ब्रोंइशा लीशो आन कली तरवारमी क्योरनुडमी। मेको आन दाते डा का यो प्रोक्चा मताइनीम। का यो ब्रोंइचा मताइनीम।

2 मेकोपुकी बेक्शो मुर आन बाक्तीक लाम्तेक्म हना यो, मेकेर रे कीशा गुंइनुड। मिनु मेकोपुकी इर सरीड गे डोइश्शा लाम्तेक्म हना यो, गो मेको आन कली ग्याइश्शा लुक्च फ्रुप्नुडमी। अय्युब २६:६; भजन संग्रह १३९:८

3 मेकोपुकी कारमेल डांडामी खुंइसाक्म हना यो, गो मेको आन कली माल्शा, ग्याइश्शा चाक्नुडमी। मेकोपुकी आं क्येडा खुइश्शा समुन्द्र आगाम लाम्तेक्म हना यो, समुन्द्रम बाक्ब बुस्स कली 'मेको आन कली कोक्मी' दे अरेनुड। मिनु मेकोमी मेको आन कली कोक्ब। 4 मेको आन जोरी सत्रु आन डोंइती ग्याइश्शा लाइक्चा पुंइसाक्म हना यो, गो मेको आन कली क्योरशा साइक्चा कली तरवार कली अरेनुड। मिनु मेकोमी साइक्ब। गो मेको आन कली रिम्शो पचा कली ममाइ, तन्न मरिम्शो पचा कली कोव्रनुडमी" देंत।

5 मिनु मुर नेल्ल आन परमप्रभु यावेमी रागी कली थिप्तु हना, रागी याइब। मिनु मेकेर बाक्ब नेल्ल रोंका पाइनीम। मिनु रागी नेल्ल नील खोला खोदेशो पा बारब। मिनु इजीप्त डा नील खोला खोदेशो पा सोव्रब। आमोस ८:८ 6 मेकोमी स्वर्गम आ बाक्तीक सेल्ब। मिनु रागीमी मेको आ जग वोइक्ब। समुन्द्र डा ब्वाक्कु कली ब्रेशशा, रागीम मोइक्ब। मेको आ नें परमप्रभु यावे बाक्ब। भजन संग्रह १०४:३; आमोस ५:८

7 मिनु परमप्रभु यावेमी इस्राएल डा मुर आन कली "गे आं कली एथीयोपीया डा मुर खोदेशो बाक्नीनी। गो इस्राएली आन कली इजीप्त रागी रे, पलिस्ती आन कली काफतोर रागी रे नु अरामी आन कली कीर रागी रे गुंइशा चाक्शो मनडमी डा?" देंशो बाक्ब। ब्यवस्था ७:७; येरमीया ४७:४ 8 परमप्रभु यावेमी शुश पाप पाइब राज्य कली कोव्रना कोव्रन बाक्ब। मेकोमी "गो मेको आन कली रागी रे क्याम्नुड। मो हना यो गो याकूब आ खिं कली चहिं नेल्ल मक्याम्नुड" दे परमप्रभु यावेमी देंत।

9 परमप्रभु यावेमी "गो मार हुकुम पाइनुडमी देंशा हना, इस्राएल आ खिं डा मुर आन कली जात नेल्ल डा मुर आन दातेमी ग्योलोमी मार मार क्राप्शो खोदेशो पा, क्राप्नुडमी। मिनु इम्चीली फुल्लु का यो खपीम मदोक्ब। 10 मेकोपुकीम

‘हिंचा डा श्येत आंइ तारी मजाकब। इं कली मेकोम मथिपब’ दे पाप पाइब, आं मुर नेल्ल तरवारमी साइकचा पुंइसीनीम” देंत। आमोस ६:३

इस्त्राएल कली लेंशा सेल्शो

11 परमप्रभु यावे, इन परमप्रभुमी “गो मेको नाक्त दाऊद आ ब्रेशो खिं आन कली लेंशा सेल्लुड। मिनु मेको आ ब्रेशो गारो आ पोत्रला सुइनुड। मिनु मोपा नेल्ल साइ डोंइती डा खोदेशो सेल्लुड। १राजा १२:१९; प्रेरित १५:१६-१७
12 मिनु मेकोपुकीम एदोम डा लीशो नु आं नें पाइशो जात जात डा मुर नेल्ल आन के दुम्नीम” दे मोदेशो पाइब परमप्रभु यावेमी देंत।

13 मिनु परमप्रभु यावेमी “मेको नाक्त थमा पा जाकब। बाली नाली खुपबमी ब्यफ वाकब कली गुम्ब। मिनु वांचेर ब्वारबमी अडगुर खुम्ब कली गुम्ब। डांडा रे पा नक अडगुर रस यापब। मिनु डांडा नेल्ल अन्न बाला सित्नीम। लेवी २६:५; योएल ४:१८ 14 गो आं मुर इस्त्राएली आन कली आन मार मार लेशशा गेनुडमी। मिनु मेको आन ब्रेशो सहर कली लेंशा सेल्शा, मेकेर बाक्नीम। मेकोपुकीम अडगुर खुम्शा, अडगुर शांबु तूनीम। मेकोपुकीम फल फुल खुम्शा, मेको आन फल जाइनीम। ब्यवस्था ३०:३; यसैया ६५:२१ 15 गो मेको आन कली गेनायो मखेरपांइसीचा डा पा आन रागीमी वोइक्नुड। आं गेशो रागी रे मेको आन कली सुइमी गुंइने मचाप्नीम, दे इन परमप्रभु यावेमी देशो बाकब” देंत।

ओबदिया

ब्रेक्ब मुर: ओबदिया आ अर्थ “परमप्रभु यावे आ गेय पाइब” बाक्ब। एको किताब सुम ब्रेक्शो मेको मतुंडसाक्व हना यो, जोक्ब तुइक्ब शुशेमी एको किताब ओबदिया आंमा ब्रेक्शो बाक्ब, दे मिम्नीम।

गेना ब्रेक्शो: बेबीलोन डा पिप नेबुकदनेसरम ५८७ बि. सी. यरूसलेम सहर कली ग्राशा खतम सेल्शा, पिप दाऊद आ सासनमी दिप्शो एसाव आ चच युइमी एदोममी बेबीलोन डा लडाइ पाइब आन कली ग्येरशा वारच पशो बाक्तेक्म।

मारदे ब्रेक्शो: साइ नेसी रे एदोम डा मुर यहूदी आन जोरी सत्रु बाक्शो बाक्तेक्म। गन्ती २०:१४-२१ ओबदियामी एदोम डा मुर नेल्ल क्याम्चा पुंडसीनीम, दे लोव्र पशो बाक्त। तन्न परमप्रभुमी शुश खेयप मटीब इस्राएली आन कली शिशी पा दाक्ब, दे यो ब्रेक्शो बाक्ब। एको किताबम परमप्रभु यावे आ निसाफ पतीक नाक्त आ पर्बम ब्रेक्शो बाक्ब।

परमप्रभुम ओबदिया कली कोंइशो

येरमीया ४९:७-२२

1 परमप्रभु यावेमी ओबदिया कली कोंइशो लोव्र मार बाक्त देशा हना, परमप्रभु, परमप्रभु यावेमी एदोम आ पर्बम लोव्र पाप्तु। गोपुकीमी परमप्रभु यावे रे लोव्र का नेंतक। मेकोम रागी रागीम लोव्र कुरब मुर का सोइक्ताक्व। मेकोमी “बोक्कीन। गो मेको नु लडाइ पथ लय। 2 गो इ कली रागी रागी डा मुर आन दातेम नेल्ल क्येडा आइक्च सेल्लुड। मिनु गे महिक्सीशो दुम्नेवे। 3 इ थुं डा ठेयब लेत्तीकेमी इ कली जोल पाइश्शो बाक्ब। इ सहर ठेयब फुल्लु तार सेल्शो बाक्ब। गे डांडा तार बाक्नेवे। गे इ थुंमी ‘आं कली सुम उइ तोक्ने चाप्पा डा?’ दे मिम्नेवे। गन्ती २४:२१ 4 तन्न गे ककाकुली खोदेशो पा इर सरीड मेर बेरते हना यो, सोरुल आन दातेम इ ग्योव्र सेल्लतीवी हना यो, गो इ कली मेक रे तोक्नन” दे परमप्रभु यावेम देंत।

5 मिनु खुइपुकी इ बाक्तीक जाक्तेक्म हना, नाक्दो रोइक्बपुकी इ बाक्तीक जाक्तेक्म हना, गे दोदेशो पा खतम दुम्नेवे? मेकोपुकीम आन कली माल्शो खोइ ला रोइश्शा मलाइक्नीमी डा? अडगुर सेक्बपुकी इ बाक्तीक जाक्शा सेक्तेक्म हना, मेकोपुकीमी इक्कका अडगुर मप्रोंइनीमी डा? 6 तन्न एसाव आ शोंप दोपा रोंइसीबा? मेको आ खुइश्शा वोइश्शो शोंप दोपा माल्शा गुंडनीमी? 7 इ नेक्था डा रागी डा मुरपुकीमी इ कली जोल पाम्तेक्म। मेकोपुकीम इ कली खेदा पा खेरशा इ सांद सम्म चाक्तेक्म। इ वारचपुकीमी इ कली दिप्शा श्येत गेनीम। इ थुल्शो मुरपुकीमी इ कली ब्वारद दाइक्नीम। तन्न गे मारेइ मतुइक्नेवे। 8 परमप्रभु यावेमी “गो मेको नाक्त एदोम डा जोक्ब तुइक्ब मुर आन कली खतम सेल्लुड। एसाव आ डांडाम बाक्ब रुपब मुर आन कली साइक्नुडमी। 9 गे तेमान, इ लडाइ पाइबपुकी फ्राचा पुंडसीनीम। एसाव आ डांडाम बाक्ब मुर नेल्ल क्योरशा साइक्चा पुंडसीनीम। आमोस १:१२ 10 गे इ लोक्ब याक्ब कली हुश खाक्श पोक्शो आ पर्बम इ कली मुनेम सुम्ब। मिनु गे गेना हना यो कली जाम्शा लाइनेवे। योएल ४:१९ 11 मेको नाक्त गे डोन राप्शा बाक्ते। मेको नाक्त अर्को रागी डा मुरपुकीमी मेको आ शोंप नेल्ल रोइश्शा लाइक्तेक्म। अर्को रागी डा मुर मेको आ लाप्चो रे ओव्रतेक्म। मिनु यरूसलेम आ पर्बम फेन्टे आप्तेक्म। गे यो मेकोपुकी खोदेशो का बाक्ते। भजन संग्रह १३७:७ 12 तन्न गे इ लोक्ब श्येत जवानु, मेको कली मदिप्चा माल्शो नवे। यहूदा डा मुर खतम दुम्मा नाक्त गे मग्येरसीचा माल्शो नवे। मेकोपुकी श्येत जामे नाक्ती गे ठेयब लेश्शो लोव्र मपचा माल्शो नवे। 13 आं मुर हिंचा डा श्येत जामे नाक्त, गे मेको आन लाप्चो रे मओव्रचा माल्शो नवे। यहूदा डा मुर खतम दुम्मा नाक्ती, गे मेको मरिश्शो पाइबपुकी नु मगारचा माल्शो नवे। मेको हिंचा डा श्येत जामे नाक्ती गे मेको आन शोंप रोइश्शा मलाइक्चा माल्शो नवे। 14 मेको आ प्रोक्शा लशो मुर आन कली साइक्चा कली लां गुम्तीकेमी बाप्शा बाक्चा मदुम्शो नवे। मेको ब्रोंइशा प्रोक्शो आन कली मग्याइक्चा माल्शो नवे। 15 परमप्रभु यावे आ निसाफ पतीक नाक्त रागी रागी डा मुर नेल्ल आन नेक्था जाक्शो बाक्ब। गे दोदेशो पशो नवे, इ कली मोदेशोन पांडसीब। इ पशो गेय नेल्ल इ पियामीन मोंइसीब। योएल १:१५; येरमीया ५०:१५,२९ 16 गे दोपा आं डांडाम तूडी, मोपा इ एर ओंथ बाक्ब रागी रागी डा मुरुम गेना हना यो तूनीम। मिनु गेनायो मबाक्शो खोदेशो दुम्नीम। येरमीया २५:१५ 17 तन्न सियोन डांडाम चहिं प्रोक्शो मुरपुकी जाक्नीम। मेको परमप्रभु यावे आ डांडा बाक्ब। मिनु याक्ब आ खिंमी डोंइती आंम कली अधिकार पाइब आन कली अधिकार पाइनीम। योएल ३:५; योएल ४:१७ 18 याक्ब आ खिं मी दुम्ब। योसेफ आ खिं

ब्रशो मी दुम्ब। एसाव आ खिं चहिं नल खोदेशो दुम्ब। मेकोपुकीमी मेको कली मीम हुम्शा, खतम पोक्नीम। मिनु एसाव आ खिं डा मुर सुइ मब्रोइनीम” दे परमप्रभु यावेमी देत। जकरिया १२:६ 19 नेगेब डा मुरपुकीमी एसाव आ डांडा आन के सेल्नीम। शेफेलाह डा मुरपुकीम पलिस्ती आन रागी आन के सेल्नीम। मेकोपुकीमी एफ्राइम नु सामरीया डा रू आन के सेल्नीम। मिनु बेन्यामीनम चहिं गिलाद आंम के सेल्ब। १राजा १६:२४ 20 मिनु ग्याइश्शा लाइक्चा पुंडसीशो हालाहम बाक्शो इस्राएलीपुकीमी फोनीचीआ रे चारेफाथ सम्म डा रागी आन के सेल्नीम। मिनु यरूसलेम रे ग्याइश्शा लाइक्चा पुंडसीशो सेफाराद सहरम बाक्शो मुरपुकीम नेगेब डा सहर आन के सेल्नीम। 21 ब्रोइशोपुकी सियोन डांडा डोइश्शा कुइनीम। मिनु एसाव आ डांडा कली सासन पाइनीम। मिनु मेको राज्य परमप्रभु यावे के दुम्ब।

योना

ब्रेक्ब मुर: एको किताब सुम ब्रेक्शो बाक्बा, मेको आ पर्बम तेइ मब्रेक्शो बाक्ब। तन्न योना आ शेंसीबपुकीमी योना आ ब्रेक्शा वोइश्शो रे एको किताब ग्रुंइशो बाक्ब, दे मिम्नीम।

गेना ब्रेक्शो: इस्राएल डा पिप येरोबाम ८२५-७८४ बि. सी. आ पालाम योना बाक्त। २राजा १४:२५ मेना आमोस नु होसेमी यो परमप्रभु यावे आ लोव्र पशो बाक्ताक्स। एको किताब योना बेक्म नोले ब्रेक्शो बाक्ब।

मार ब्रेक्शो: परमप्रभु यावेमी इस्राएली मदुम्शो, अर्को रागी डा मुर आन कली इस्राएली आन कली खोदेशो पा दाक्ब। येसुमी यो योना आ सांकछी गेब। मत्ती १२:३८-४१; लूका ११:२९-३२

परमप्रभुमी योना कली सोइश्शो

1 परमप्रभु यावेमी अमीतै आ तौ योना कली मार लोव्र पवा बाक्त देशा हना, २राजा १४:२५ 2 “गे छुल बोक्शा, निनवे माइश्शो ठेयब सहरम लावो। मिनु मेकेर डा मुर आन मरिम्शो पशो आ पर्बम शेंदीमी। मारदे हना गो मेको आन मरिम्शो पशो नेल्ल ताता” दे मदा बाक्त।

योना परमप्रभु रे प्रोक्शो

3 तन्न योना परमप्रभु यावे आ डोंइती रे लशा, निनवे मलथु, टारशीश गे प्रोक्चा गोवा बाक्त। मिनु योप्पा सहरम यिशा, टारशीश लाइब डोंगा का थिश्शा, क्येट थाप्शा, परमप्रभु यावे आ डोंइती रे प्रोक्शा, डोंगाम डोंइसे बाक्त। भजन संग्रह १३९:७,९,१० 4 मिनु परमप्रभु यावेमी समुन्द्रमी ठेयब फश पपदा बाक्त। मोपा ठेयब फश गिवारम पतीके मेको डोंगा जिक्चा चिक्ता बाक्त। 5 मिनु डोंगाम गेय पाइबपुकी हिंशा, आन देवी देवता आन नें थिशा, ब्रेम्मा बाक्त। मिनु डोंगा सोपी पचा कली मेको आन बाक्शो मारेइ मारेइ समुन्द्रमी ताइक्तमे बाक्त। योना चहिं डोंगा आ आइदी तला लशा, इप्शो बाक्माक्त। 6 मिनु डोंगा चलेबमी योना आ इप्तीकेम लशा “गिश डा इमे। बोक्को, इ परमप्रभु कली थोवो। मेको परमप्रभु इं कली खतम दुम्चा रे प्रोंइबा, कों” देंमाक्त। 7 मिनु डोंगाम गेय पाइबपुकीमी “सुम पतीके ओदेंब श्येत दुम्माइ, तुइक्चा कली चिडगा कोव्रचा” देंमुशा, चिडगा कोव्रडमे बाक्त। चिडगा कोव्रडमेनु, योना आ नेम गूमाक्त। हितोपदेस १६:३३

8 मिनु डोंगाम गेय पाइबपुकीमी योना कली “गो मारदे ओदेंब श्येत जया? इ गेय मार में? गे ते रे पिवे? तेको रागी डा नवे? मार थर डा मुर नवे?” दे हिल्लो पामे बाक्त। 9 मिनु योनामी “गो हिबू नड। रागी नु समुन्द्र सेल्ब, सरीड डा परमप्रभु यावे कली थमा सुइक्ब नड” देंमाक्त। उत्पत्ती १:९-१० 10 मिनु मेको मुरपुकी डोंइती क्येडा हिंशा योना कली “गे मारदे ओपा प्रोक्डे?” दे हिल्लो पामे बाक्त। मारदे हना योनामी मेको आन कली “गो परमप्रभु यावे आ डोंइती रे प्रोक्ती” देशो बाक्माक्त। 11 मिनु मेकोपुकीमी योना कली “फश गिवार नाइक्पाइक्चा कली मार पचा माल्नीकी?” दे हिल्लो पामे बाक्त। मारदे हना फश गिवार पतीके ब्वाक्कु बारना बारन लमाक्त। 12 मिनु योनामी “आं कली समुन्द्रमी ताइक्ताक्यीनी हना, फश गिवार नाइक्ब। एको फश गिवार आं पतीके पशो बाक्ब, दे गो तुइक्नुड” देंमाक्त। 13 मिनु मेको मुरपुकीमी लेंशा डोंगा रागीम चाक्चा कली शुश खीयेमे बाक्त। तन्न मचाप्मे बाक्त। मारदे हना फश गिवार शुश बारशो बाक्माक्त। 14 मिनु मेकोपुकीमी परमप्रभु यावे कली “परमप्रभु यावे, एको मुर आ पर्बम गोपुकी बेक्चा ममाल्कल। एको मुर आ दोस मतकल। मारदे हना परमप्रभु यावे, इन दाक्शो यो मोदेशोन बाक्त” देंमा बाक्त। 15 मिनु योना कली समुन्द्रमी ताइक्तमे बाक्त। मिनु फश गिवार नु ब्वाक्कु खा दिम्शा, नांइसे बाक्त। 16 मिनु मेको मुरपुकी परमप्रभु यावे कली मान पा हिंशा, मेको कली चढ़ेशा “आ देशो नेल्ल टीनीकी” दे परमप्रभु यावे कली कसम जामे बाक्त। 17 मिनु परमप्रभु यावेमी योना कली दाक्पाइक्चा कली ठेयब डांइ का सोइक्ता बाक्त। मेको डांइमी योना कली गु दाक्गानु, योना सां नाक्दो नाक्ती आ कोव्रजीम बाक्माक्त। मत्ती १२:४०; मत्ती १६:४

2

योनाम परमप्रभु कली लोव्र पशो

1 मिनु योनामी डांइ आ कोव्रज रे पा परमप्रभु यावे कली लोव्र पवा बाक्त। 2 मिनु मेकोमी परमप्रभु यावे, आ परमप्रभु कली “गो आं श्येत जतीके रे लोव्र पाता। मिनु आं कली लोव्र लेत्ताक्यीनी। गो बेक्शो मुर आन बाक्तीके

रे ब्रेत्ती। मिनु गे आं सेंदा नेंतीनी। भजन संग्रह १२०:१ ३ गे आं कली समुन्द्र आगाम ताइक्ताक्यीनी। आं एर ओंथ ब्वाक्कु ला बाक्शो बाक्त। ब्वाक्कुमी आं कली गिल्शा, आ छाल आं तारी रे लाम्तेक्म। भजन संग्रह ४२:८ ४ गोमी 'इन क्येडा डोन दुम्शा, इन योत्रशो खिं मुल गेनायो मताइनुड' दे मिम्ताक्ड। भजन संग्रह ३१:२२ ५ आं एर ओंथ ब्वाक्कु बाक्तीके, हेरा बेक्ती। गो ब्वाक्कु आगाम बाक्डानु, आं पिया लेउम सुम्शो बाक्त। भजन संग्रह १८:५; भजन संग्रह ६९:२ ६ मिनु गो समुन्द्र आगा क्येडा यो लुकच गुम्ती। गो गेनायो मगूचा डा पा गुम्ती। तन्न परमप्रभु यावे, आं परमप्रभु गे आं कली बेक्चा रे प्रोंइतीनी। भजन संग्रह १०३:४ ७ आं थुं लुकच लशा, गो परमप्रभु यावे, इन कली मिम्शा, इन कली लोत्र पाता। मिनु इन बाक्तीके रे आं लोत्र नेंतीनी। भजन संग्रह १४२:२-४ ८ जाम्शा लाइब मूर्ति कली थमा सुइक्बपुकीमी इन शिशी मताइनीम। भजन संग्रह ३१:७ ९ गो चहिं 'गे रिम्शो पाइब बाक्नीनी' देंशा, इन कली ठेयब सेल्लुड। गो इन कली देंशो लोत्र खाप्नुड। परमप्रभु यावे, गे मुर आन कली श्येत रे प्रोंइब बाक्नीनी" दे लोत्र पवा बाक्त। भजन संग्रह ५०:१४; भजन संग्रह ११६:१७-१८

१० मिनु परमप्रभु यावेमी डांड कली "योना कली ब्वाक्कु रे गुंडशा रागीम तेवो" दे अरेवा बाक्त। मिनु डांडमी मेको कली ब्वाक्कु रे गुंडशा, रागीमी तेवा बाक्त।

३

लेंशा योना कली शेंथ सोइश्शो

१ मिनु परमप्रभु यावेमी लेंशा योना कली लोत्र पवा बाक्त। योना १:२ २ मिनु मेकोमी "गे बोक्को, निनवे माइश्शो ठेयब सहर लावो। गो इ कली मार शेंनुडा, मेको मेकेर डा मुर आन कली शेंदीमी" दे मदा बाक्त।

३ मिनु परमप्रभु यावे आ लोत्र टिशा, योना निनवे गे लचा गोवा बाक्त। निनवे थम ठेयब सहर बाक्माक्त। मेको निनवे सहर सुर का रे अर्को सुर जाक्दीत्चा कली नाक्त सां माल्बाक्माक्त। योना ४:११ ४ मिनु योनामी निनवे सहर ओत्रशा, नाक्त का गाक्शा, मुर आन कली "४० नाक्त नोले एको सहर खतम दुम्ब" दे ठेयब सेंदामी शेंदा बाक्त।

५ मिनु मेको नेंशा निनवे डा मुरपुकीमी परमप्रभु आ लोत्र थमा बाक्ब, दे थमा सुदमे बाक्त। मेकोपुकीमी "निनवे सहर डा आइक्च नु ठेयब मुर आन मरिम्शो पतीके रे लेत्तेक्म, दे कोइचा कली नेल्ल माइजा बाक्शा, अरन्डी फेक्सीन" दे नेल्ल आन कली नेंपदमे बाक्त। मत्ती १२:४१; योएल १:१४ ६ मिनु निनवे डा पिपमी यो मेको लोत्र नेना बाक्त। मेको आ ठेयब नित्तीके रे बोक्शा, पिप आ फेक्तीके वा पुइश्शा, अरन्डी फेक्शा, पुलु तारी निस्से बाक्त। ७ मिनु पिप नु आ मुरपुकीमी निनवे डा मुर आन कली "मुरपुकी नु बस्तु भावमी मारेइ मजामेक्ल, मतूडमेक्ल। बी ब्यफ, क्यारश भेडा आन कली यो मयोत्रडमेक्ल, ब्वाक्कु मतुंडमेक्ल। ८ मुरपुकीम अरन्डी सुम्सीशा, बी ब्यफ, क्यारश भेडा यो सुम्चा माल्नीम। मिनु मेकोपुकीमी परमप्रभु कली ठेयब सेंदाम पुंडुचा माल्नीम। मिनु नेल्ल आन मरिम्शो लां नु आन मरिम्शो पशो रे लेत्चा माल्नीम। ९ परमप्रभु आ शुश गाइक्तीके रे लेप्बा, को? मेकोमी आंड कली मसाइक्बा, को? सुम तुइक्बा, डा?" देमा बाक्त। योएल २:१४ १० मिनु परमप्रभुमी मेको मुर आन पशो नु आन मरिम्शो लां रे लेशो तशा "आं डांडीती पाइनुड देंशो, मुल मपाइनुड" दे मिम्ता बाक्त। मिनु परमप्रभुमी आ डांडीती मिम्शो मपवा बाक्त। येरमीया १८:७-८

४

योना परमप्रभु नु गाइश्शो

१ मिनु परमप्रभुमी मुर आन कली खतम मपशो तशा, योना चुरशा, शुश गाइक्ता बाक्त। मिनु परमप्रभु यावे कली २ "परमप्रभु यावे, आं रागीम बाक्डानु, गो एको तुइश्शो नड। मोपतीके गो टारशीश गे प्रोक्शो नड। गे नेल्ल कली शिशी पाइब नु दाक्ब परमप्रभु ननी। इन गाइक्चा रीब पा मबोक्ब। इन शिशी ठेयब बाक्ब। इन थुं श्येत गेचा बाक्त हना यो, इन थुं लेशशा, मेको आन कली मारेइ मपाइनीनी, दे गो तुइश्शो नड। प्रस्थान ३४:६ ३ मुल परमप्रभु यावे, आं कली साइय्यीनी। मारदे हना गो ब्रोंइचा क्येडा बेक्चा दाक्नुड" दे परमप्रभु यावे नु लोत्र पवा बाक्त। १राजा १९:४ ४ मिनु परमप्रभु यावेमी "इ गाइश्शो ठीक ममाइ" दे मदा बाक्त। ५ मिनु योना सहर रे लशा, पूर्ब गे डा डांडामी निस्से बाक्त। मेकेर गोठ का सेल्शा बाक्शो बाक्माक्त। मेकेर फाम्सीशा निश्शा "मेको सहरमी मार दुम्बा" दे कोत्रशा, रिम्दा बाक्त।

६ मिनु परमप्रभु, परमप्रभु यावेमी योना कली नां फाम्सीशा बाक्ल, श्येत मजवल, दे छक लाक्चा डा पा आइक्च रवा का आ बाक्तीकेमी वापदा बाक्त। मिनु योना मेको रवा तशा, शुश ग्येरसे बाक्त। ७ तन्न आ दीसा सुनी कना परमप्रभुमी

खोंकला का सोइक्ता बाक्त। मेकोमी मेको आइक्च रवा आ शाक्श खोदा बाक्त। मिनु रवा सोल बेक्माक्त। 8 मिनु नां दाम्मेनु, परमप्रभुमी योना आ बाक्तीकेम पूर्व रे होश फश सोइक्ता बाक्त। मिनु नांमी योना आ पिया नाप्शा, योना ओले पेटे दुम्शा, गोल्माक्त। मिनु योनामी “ब्रौइचा क्येडा बेक्चा दाक्नुड” देंमाक्त।

परमप्रभु आ शिशी

9 मिनु परमप्रभुमी योना कली “गे मेको रवा आ पबर्म गाइक्चा, ठीक दुम्बा डा?” दे लोत्र पवानु, मेकोमी “गो मबेक्डा सम्म गाइक्नुड” दे लोत्र लेत्ता बाक्त। 10 मिनु परमप्रभु यावेमी “गे इ मख्रुम्शो, मकोल्पाइश्शो, नाक्दो कामी वाशा, आ दीसा नाक्दो सोल बेक्शो रवा कली शिशी पाइनेवे। 11 मिनु गो मेको ठेयब सहर निनवे आ पबर्म शिशी मपाइनुडा डा? मेकेर आन ग्युरा पेरा गुइ मतुइक्ब लाख का २० हजार क्येडा शुश मुर नु बी ब्यफ, क्यारश भेडा यो बाक्नीमी। गो मेको आन कली शिशी पाइनुड” देंमाक्त।

मीका

ब्रेक्ब मुर: मीका इस्राएल डा दक्खिन हेब्रोन नु गाजा सहर आस दाते मोरेशेथ डा मुर बाक्त। मेको आ नें आ अर्थ “परमप्रभु यावे खोदेशो सुइ मबाक्ब” देशो बाक्ब। मीका आमोस खोदेशो पा रू डा गेय पाइब बाक्त। मेको अस्सुर डा लडाइ पाइब आन डोंइती रे प्रोक्शा, यरूसलेम सहरम परमप्रभु यावे आ लोत्र पशो बाक्त। एको किताब मीकामी ब्रेक्शो बाक्त।

गेना ब्रेक्शो: मीकामी ७५०-७२३ बि. सी.म परमप्रभु यावे आ लोत्र पशो बाक्त। मेकोमी सामरीया खतम दुम्चा क्येडा डोंइती मेको आ पर्वम परमप्रभु आ लोत्र पशो बाक्त। मीका १:६ हिज्कीयाह पिप दुम्शो ६ बर्स दुम्ची ना ७२२ बि. सी. सामरीया खतम दुम्शो आ पर्वम चहिं मीकामी मारेइ मब्रेक्शो बाक्त। मोपतीके मेकोमी एको किताब ७२२ बि. सी. क्येडा डोंइती ब्रेक्शो बाक्त।

मार ब्रेक्शो: परमप्रभुमी थुं नाइक्चा गेब। इस्राएल नु रागी रागी डा मुर नेल्ल आन कली मस्सीह सोइक्ब। मेकोमी आ गे जाक्ब मुर आन कली श्येत रे प्रोंइब।

सामरीया नु यरूसलेम कली निसाफ

1 परमप्रभु यावेमी मोरेशेथ डा मीकाह कली लोत्र पाप्तु। मेना यहूदा रागीमी योथाम पिप बाक्त। मेको आ नोले आहाज नु मेको आ नोले हिज्कीयाह पिप दुम्ताक्स। मिनु मेको परमप्रभु यावे आ लोत्र नु आ कोंइतीके सामरीया नु यरूसलेम आस पर्वम बाक्त। येरमीया २६:१८; यसैया १:१

2 मिनु परमप्रभु यावेमी मार कोंइशो नु देशो बाक्त देशा हना “जात जात डा मुर, गे नेल्लेमी नोफा दाइक्तीन। रागी नु मेकेर बाक्ब नेल्लेमी नेनीन। परमप्रभु, परमप्रभु यावे आ बाक्तीके रे पा इन मरिम्शो पशो आ पर्वम सांकछी दुम्ब। 3 लो कोत्रडीन, परमप्रभु यावे आ बाक्तीक रे जाक्ना जाक्न बाक्ब। मेको यीब नु रागी डा लाइशो डांडाम गाक्ब। आमोस ४:१ 3 4 मी आ नेक्था मयीन यशो खोदेशो पा, लुक्च लतीकेमी ब्वाक्कु शाइशो खोदेशो पा, मेको आ थेक्शो डांडापुकी याइनीम। मिनु दिंमपुकी ब्रोल्नीम। 5 मेको नेल्ल याक्ब आ मरिम्शो पशो नु इस्राएल डा मुर आन पाप आ पर्वम दुम्शो बाक्ब। याक्ब आ मरिम्शो पशो मार बाक्बा? मेको सामरीया ममाइ डा? यहूदा डा लाइशो डांडा मार बाक्बा? मार, मेको यरूसलेम ममाइ डा? येरमीया २३:१३-१४ 6 मोपतीके गो सामरीया कली फुल्लु तेल्लीक सेल्लुड। मेको अडगुर खुम्तीक रू दुम्ने चाप्ब। गो मेकेर डा फुल्लु दिंमम ताइक्नुड। मिनु मेको आ खिं प्रेशा, आ जग गुंइनुड। १राजा १६:२४; होसे १४:१ 7 मिनु मेको आ मूर्ति नेल्ल प्रोल्चा पुंइसीनीम। मेको आ गेय पा चेम्शो क्येट नेल्ल मीम हुम्चा पुंइसीब। गो मेको आ मूर्ति नेल्ल खतम पोक्नुड। मारदे हना मेको नेल्ल तेल्लेम पा चेम्शो क्येट खोदेशो पा खुप्शो बाक्नीम। मोपतीके मेको तेल्लेम पा चेम्शो क्येट खोदेशो पा जाम्शा लाइनीम” देंत। होसे २:७,१४

यहूदा सहर कली श्येत दुम्ब

8 मिनु गो मेको आ पर्वम रोंका पा डाक्ना डाक्न बाक्नुड। श्येतथ खोइल नु भेत्रे गाक्नुड। गो सिवार खोदेशो पा ग्रीनुड। मिनु बुक्स खोदेशो पा ग्रीनुड। 9 मारदे हना मेको आ गार मसाब। मेको यहूदा सम्म जाक्शो बाक्ब। मेको आं मुर आन बाक्तीक यरूसलेम सहर डा ठेयब लाप्चो सम्म जाक्दीशो बाक्ब। 10 एको लोत्र गाथ सहरम मनंपतीन। मिनु डाक्सीन मडाक्कीन। बेथ-लेआफ्रामी इन पियाम फुरक फुंइसीन। २सामुएल १:२० 11 शाफीर सहर डा मुरपुकी, भेत्रे दुम्शा, मुने दोक्शा इन लां लने। सानान सहर डा मुरपुकी लाडगा मग्रीनीम। बेथ-एचेलम डा मुर रोंका पाइनीम। मुल रे इ कली वारच पाइब मबाक्नीम। 12 मिनु मारोथ सहर डा मुरपुकीम हिंन हिंन रिम्शो दुम्तीके रिम्ना रिम्न बाक्नीम। परमप्रभु यावे रे हिंचा डा श्येत यित। मिनु मेको यरूसलेम डा ठेयब लाप्चो सम्म जाक्शो बाक्त। 13 लाकीश सहर डा मुरपुकी, शारा आन कली बग्गीम फ्रेशा लने। गे सियोन सहर डा मुर आन कली पाप पपाइक्तीनी। मिनु मेको कली पाप पपाइक्ब, गे बाक्नीनी। इस्राएल आ मरिम्शो पतीके इन दातेम थीसीब। 14 मोपतीके गे मोरेशेथ-गाथ सहर कली आ गाक्ची ना डा कोसेली गेचा माल्नीनी। अकजीब सहर डा मुर इस्राएली आन पिप आन कली ब्वाक्कु मबाक्तीकेम ब्वाक्कु बुक्शो खोदेशो बाक्नीम। 15 मिनु मारेशा सहर डा मुरपुकी, गो इन कली ग्रापाइक्चा कली मुर का चाक्नुड। मेको इस्राएल डा मान ततीके अदुल्लाम सम्म जाक्ब। 16 मिनु इन दाक्शो आल आन पर्वम इन चां प्रेक्कीन। चां नेल्ल प्रेक्शा, गिदद खोदेशो दुमीन। मारदे हना इन आल नेल्ल ग्याइशशा, मुर आन रागीम लाइक्चा पुंइसाक्म।

2

मरिम्शो ठेयब मुर आन पर्वम लोव

1 आबी आबी, सु सुम आन ब्राख्येम गोल्ला पाप नु मरिम्शो पचा ला मिम्नीमी। मिनु नां सोव्रम चोटीन मेको आन मिम्शो पाइनीम। मारदे हना मेको पने चाप्ब बाक्नीम। 2 मेकोपुकीम रिम्शो रू तशा वाल्ला, रोइक्नीम। रिम्शो खिं रोइक्नीम। मोपा मेकोपुकीमी मुर आन खिं नु आन थेरशो रू आंम के सेल्नीम। ब्यवस्था ५:२१; हितोपदेस २४:१५; यसैया ५:८ 3 मोपतीके परमप्रभु यावेमी मार देंत देंशा हना “गो मेको आन खिं डा मुर आन कली श्येत गेनुड। मेको रे आंम कली प्रोइने मचाप्नीम। ठेयब लेशशा गाक्ने मचाप्नीम। मारदे हना मेको थम श्येत जतीक नाक्त बाक्ब। आमोस ५:१३ 4 मेको नाक्ती मुरपुकीमी इन पर्वम शुक्शी पा कुम्सो पाइनीम। मिनु इन पर्वम रोंका पा डाक्नीम। मिनु मुरपुकीमी ‘गोपुकी थमा पा खतम दुम्तक। आंइ मुर आन थेरशो रू अर्को मुरुम लाइक्नीम। आंइ रू आंइ जोरी सत्रु आन दातेमी योक्सीनीम’ देंनीम” देंत। 5 मोपतीके गोपुकी परमप्रभु यावे आ मुर आन योक्शो रू रोइक्चा मताइनीनी। 6 मेकोपुकीम “परमप्रभु यावे आ लोव्र मपने” देंनीम। तन्न लोव्र पाइनीम। मिनु मेकोपुकीमी “मोदेशो श्येत आंइ कली मदुम्ब” देंनीम। आमोस ७:१६ 7 याकूब आ खिं डा मुरपुकी, मोदेशो देंचा दुम्बा? मार, परमप्रभु यावे आ फाल्तीक सक्ति नुम्मे डा? मेकोमी मोदेशो पाइबा डा? परमप्रभु यावेमी रिम्शो पाइब आन कली रिम्शो लोव्र मपाइबा डा? आमोस ६:३ 8 तन्न गे आं मुर आन डोंइती जोरी सत्रु खोदेशो दुम्शा बाक्नीनी। रिम्शो पाइब मुर आन फेक्तीक रोइशशा लाइक्नीनी। लडाइ मदुम्शो बाक्ब, दे इन कली थमा सुइशशा गाक्ब आन कली मोदेशो पाइनीनी। 9 गोपुकीम आं मुर आन मीश आन कली आन दारशो खिं रे गुंइनीनी। मेको आन आलपुकी रे आं गेशो आसीक गेना हना यो कली रोइशशा लाइक्नीनी। 10 बोक्शा लने। मारदे हना एकेर इन नाइक्तीक ममाइ। मारदे हना एको ग्रान्रा दितीकेमी मुर आन कली मरिम्शो सेल्ब। मेको मारेइ पने मचाप्चा डा पा खतम सेल्शो बाक्ब। 11 तेकोइ मुरुमी जोल पा दूली लोव्र पशा “गो इ कली अडगुर शांबु तूचा नु रकसी तूचा आ पर्वम लोव्र पाइनुड” देंत हना, मेको मुर मेको आन कली गारचा डा लोव्र पाइब बाक्ब।

श्येत रे प्रोइशो

12 परमप्रभुमी “याकूब गो थमा पा नेल्ल इन कली खुप्शा पुक्नन्नी। गो इस्राएलम लीशो आन कली थमा पा खुप्नुडमी। गो मेको आन कली भेडा बगालम वोइशशो खोदेशो पा नु योव्रतीकेम योव्रशो खोदेशो पा वोइक्नुड। मिनु मेकेर शुश मुर दुम्नीम। येरमीया ३१:१०; इजीकीएल ३६:३७; यसैया ५२:१२ 13 लां कोंइब मेको आन डोंइती गाक्ब। मेकोपुकी लाप्चो रे पा गूशा गाक्नीम। मेको आन पिप मेको आन डोंइती गाक्ब। परमप्रभु यावे मेको आन डोंइडोंइती बाक्ब” देंत।

3

ठेयब मुर आन कली हुइशशो

1 मिनु गो “गे, याकूब आ ठेयब मुरपुकी नु इस्राएली आन खिं डा हुकुम पाइबपुकी, इन नोफा दाइशशा नेनीन। गे ठीक निसाफ तुइक्चा ममाल्नीनी डा? येरमीया ५:५ 2 गोपुकी रिम्शो पचा काइ मदाक्नीनी। मिनु मरिम्शो पतीक दाक्नीनी। गोपुकीमी आं मुर आन कुशुल उक्नीनी। मिनु मेको आन रुश रे आन श्ये रिक्नीनी। 3 गोपुकीमी आं मुर आन श्ये ब्वाइतीनी। मेको आन कुशुल उक्तीनी। मिनु रुश टुक्रा टुक्रा पा जिक्तीनी। मिनु बोसुम क्येतीक श्ये खोदेशो पा मेको आन कली टुक्रा टुक्रा पा चेक्तीनी” देंती। भजन संग्रह १४:४ 4 मिनु मेकोपुकीमी परमप्रभु यावे कली पुंइनीम। तन्न मेकोमी मेको आन पुंइशो लोव्र मलेप्ब। आ अरेशो मटितीके मेकोमी मेको आन क्येडा आ कुल खुइक्ब। हितोपदेस १:२८; इजीकीएल ८:१८

5 मिनु परमप्रभु यावेमी आ लोव्र पाइब आन पर्वम मार देंत देंशा हना “सुम आं मुर आन कली दूली लांम गाक्पाइक्बा? आं लोव्र पाइबपुकीमी, सुमी मेको आन कली जचा गेमेनु ‘रिम्शो दुम्ब’ देंनीम। तन्न मेको आन कली जचा मगेमेनु, मेको आन कली लडाइ तोचा कली ठीक दुम्नीम। 6 मोपतीके इन कली मारेइ मततीक नाक्दो दुम्ब। परमप्रभु रे मारेइ मतुइक्चा डा पा छिडछिड दुम्नीनी। आं लोव्र पाइब आन कली नां रिक्ब। मिनु नाक्त मेको आन कली छिडछिड दुम्ब। 7 कोंइतीक ताइबपुकी शिशी मताइनीम। टुना मुना पाइबपुकी मुने दोक्नीम। मेको आन शोव्र सुम्सीचा माल्नीम। मारदे हना परमप्रभुमी मेको आन कली लोव्र मलेप्ब। आमोस ८:१२ 8 तन्न गो सक्ति पाइशशो बाक्नुड। गो परमप्रभु यावे आ सोक्ती, ठीक निसाफ पतीके नु आ सक्तिम ब्रीशो बाक्नुड। गो याकूब आ हेंथे पशो नु इस्राएल डा मुर

आन पाप शेंचा कली मोदेशो दुम्शो बाक्नुड। यसैया ५८:१ 9 याकूब आ खिं डा ठेयब मुरपुकी नु इस्राएल डा खिं खिं डा हुकुम पाइबपुकी एको लोत्र नेनीन। गोपुकीमी ठीक निसाफ पतीक कली ग्रांघ्रा दीनीनी। मिनु ठीक लोत्र नेल्ल दूली सेल्नीनी। 10 गोपुकीमी हुश शाइबपाइशशा सियोन कली सेल्नीनी। मिनु यरूसलेम कली मरिम्शो पतीकेम सेल्नीनी। हबकुक २:१२ 11 मेकेर डा ठेयब मुरपुकीमी घूस जशा निसाफ पाइनीम। मेकेर डा चढेबपुकीम शेंशो डा क्येट ताक्नीम। परमप्रभु यावे आ लोत्र पाइबपुकी क्येट तचा कली नोले दुम्ब लोत्र पाइनीम। मो हना यो मेकोपुकीमी ‘परमप्रभु यावे आंइ दातेमी बाक्ब। गो श्येत मजाइनीकी’ देंनीम। येरमीया ७:४ 12 मोपा इन पतीके सियोन वाक्शो रू दुम्ब। यरूसलेम ब्रेशशो खिं डा फुल्लु देलतीके दुम्ब। परमप्रभु यावे आ खिं डा डांडा ब्वाकी दुम्शो बाक्ब” देंत। भजन संग्रह ७९:१; येरमीया ९:१०; येरमीया २६:१८

4

परमप्रभु आ डांडा

1 मिनु नोले डांडा नेल्ल आन क्येडा परमप्रभु यावे आ खिं बाक्शो डांडा लाइशो दुम्ब। मिनु मेको नेल्ल आन क्येडा ग्येत्य लाइब बाक्ब। मिनु शुश मुर मेकेर लाइनीम। यसैया २:२-४ 2 मिनु रागी रागी डा मुरपुकी मेकेर जाक्शा, मेकोपुकीमी “जाक्कीन। गोपुकी परमप्रभु यावे आ डांडा लय। याकूब आ परमप्रभु आ खिं लय। मेकोम इं कली आ लां कोंइब। मिनु गोपुकी मेको आ लांम गाक्ने चाप्यल। मारदे हना शेंतीके सियोन रे नु परमप्रभु यावे आ लोत्र यरूसलेम रे गूब” देंत। लूका २४:४७ 3 मेकोमी शुश जात डा मुर आन दातेमी निसाफ पाइब। मिनु डोन बाक्शो बोल्यो रागी रागी डा मुर आन कली निसाफ पाइब। मिनु मेकोपुकीमी आन तरवार चेम्शा, फाली सेल्नीम। आन तूतीक भाला चेम्शा गुये सेल्नीम। मिनु रागी रागी डा मुर आन दातेमी लडाइ मपाइनीम। मेकोपुकीमी गेनायो लडाइ मशेंसीनीम। 4 तन्न मुर नेल्ल आन अडगुर नु फोवशी र्वा आन पुंम नित्नीम। मिनु मेको आन कली सुइमी हिंच मकोंइनीम। मारदे हना मुर नेल्ल आन परमप्रभु यावेमी लोत्र पशो बाक्ब। १ राजा ५:५; जकरिया ३:३० 5 मिनु “जात जात डा मुर नेल्ल आन देवी देवता आन नेंम गाक्नीम। तन्न गोपुकी चहिं गेना हना यो परमप्रभु यावे, इं परमप्रभु आ नेंम गाक्नय” देंतेक्म।

परमप्रभु आ मुरपुकीम शिशी ताइनीम

6 परमप्रभु यावेमी मार देंत देशा हना “मेको नाक्ती गो खोइल मदुक्ब आन कली खुप्नुडमी। मिनु गो खेरशो नु श्येत जशो आन कली खुप्नुडमी। येरमीया ३१:८; ब्यवस्था ३०:४ 7 मिनु खोइल मदुक्ब आन कली लीशो मुर आन दातेम वोइक्नुड। खेरचा पुंइसीशो आन कली बोल्यो रागी डा मुर सेल्नुडमी। मिनु परमप्रभु यावेमी मेको आन कली सियोन डांडा रे गेना हना यो कली सासन पाइब।

8 आं बगाल बाक्तीक डांडा, सियोन आ तमी इ सांद मिग्दाल-एदेर सहर सम्म जाक्दीप्ब। गे डोंइती डा राज्य लेंशा ताइनेवे। यरूसलेम डा तमीम आ राज्य लेंशा ताइब।

9 मुल गे मारदे वाइ ब्रेशशा ग्रीनेवे? मार इ पिप मबाक्बा डा? इ अर्ती गेब जाम्शा लमा? मिनु मारदे आल थितीक रोइ पशो मीश मुर खोदेशो पा वाइ ब्रेत्नेवे? येरमीया ८:१९ 10 सियोन आ तमी, आल थितीक रोइ पशो मीश मुर खोदेशो पा वाइ ब्रेशशा ग्रीडो। मारदे हना मुल गे एको सहर प्रोंइचा माल्नेवे। मिनु खिं मबाक्तीकेमी बाक्तीक सेल्चा माल्नेवे। गे बेबीलोनम लचा माल्नेवे। मिनु मेकेर रे प्रोंइचा पुंइसीनेवे। मेकेर परमप्रभु यावेमी इ कली इ जोरी सत्रु आन गुइ रे प्रोंइब। 11 मुल शुश रागी रागी डा मुर इ पबर्म दूली पा बोक्शा ‘सियोन ग्रांघ्रा दिशो दुम्ल। गो मेको कली कोव्रना कोव्रन बाक्चा तांडसेक्ल’ देंनीम” देंत। 12 तन्न मेकोपुकीमी परमप्रभु यावे आ मिम्शो मतुइक्नीम। मेकोपुकीमी आ पचा चिक्शो मतुइक्नीम। परमप्रभुमी मेको आन कली खला डा अन्न खुप्शो खोदेशो पा खुप्ताक्व। 13 सियोन आ तमी बोक्शा, अन्न तुपो। मारदे हना गो इ ग्रोत्र फलाम के सेल्नुड। गो इ गेंग्रे कांसा के सेल्नुड। मिनु गे शुश जात जात डा मुर आन कली फस पोक्नेवे। मेको आन रोइशो परमप्रभु यावे कली गेनेवे। मिनु मेको आन शोंप रागी नेल्ल डा परमप्रभु यावे कली चढेनेवे।

5

बेथलेहेम रे सासन पाइब का जाक्ब

1 गे गारो हिरशो सहर बाक्नेवे। लडाइ पाइबपुकीमी इ कली पुम्नीम। मिनु इस्राएल कली सासन पाइब कली कोक्केम चोव्रचोम तुप्नीम। उत्पत्ती ३५:१९; मत्ती २:५-६; यूहन्ना १:१-२

2 तन्न गे बेथलेहेम एफ्राथाह, गे यहूदा डा सहर आन दाते डा आइक्च बाक्ते हना यो, इ रे पा आं पा डा इस्राएल कली हुकुम पाइब का जाक्ब। मेको साइ डोंइती रेन बाक्शो बाक्त। यसैया ४:१७; यसैया ११:१२

3 मिनु परमप्रभु यावेमी इस्राएली आन कली काइ मकोव्रब। मिनु मीश मुरुमी आल थिवा नोले ला कोव्रब। मेना लीशो मुरपुकी इस्राएल डा मुर नु गारशा, लेत्चा पुंडसीनीम। इजीकीएल ३४:२३ 4 मिनु मेकोमी परमप्रभु यावे आ सक्तिमी आ बगाल आन कली योव्रब। मिनु मेकोमी आ परमप्रभु यावे आ ठेयब नेमी आ गेय पाइब। मिनु मेकोपुकी रिम्शो पा बाक्नीम। मारदे हना मेको रागी डा सुर सम्म नेल्ल क्येडा ठेयब दुम्ब। यसैया ९:५; एफिसी २:१४ 5 मिनु मेकोमी थुं नाइक्चा गेब। मिनु अस्सुर डा मुर इं रागी ओव्रशा लडाइ पचा गोम्तेक्म हना, गोपुकीमी ७ जना गोठला नु ८ जना हुकुम पाइब वोइक्नीकी।

6 मेकोपुकीमी अस्सुर रागी कली तरवारम हुकुम पाइनीम। निम्नोद रागी कली शोइशो तरवारमी हुकुम पाइनीम। मिनु मेकोपुकीमी इं कली “अस्सुरी इं रागी ओव्रतेक्म हना यो, इं कली प्रोंइनीम। इ रागी डा सांदम जाक्तेक्म हना यो, इं कली प्रोंइनीम” देनीम। भजन संग्रह ११०:३

7 याक्ब आ लीशो मुर शुश आन दातेम परमप्रभु यावे रे जाक्शो सीत नु घांस तार जुक्शो रेउ खोदेशो दुम्नीम। मेकोमी “सुइ मुरुम वारच पाइनीमी कों” दे मकोव्रनीम। मिनु मुर आन आस मपाइनीम। 8 याक्ब आ लीशो मुर शुश आन दातेमी ब्वाकी डा गुप्स खोदेशो दुम्नीम। मेकोपुकी भेडा गोठम बाक्शो गुप्स आ चाइक्ब खोदेशो दुम्नीम। गुप्स मेकेर लाम्तेक्म हना, साइशशा ब्वाइनीम। मिनु सुइमी मेको आन कली प्रोंइने मचाप्नीम। 9 मिनु परमप्रभु यावेमी “गे इन गुइ इन जोरी सत्रु क्येडा बोल्यो दुम्शा ग्रानीनी। मिनु इन जोरी सत्रु नेल्ल खतम दुम्नीम। जकरिया ९:१०

10 मेको नाक्ती गो इन शारा इन दाते रे खतम पोक्नुड। इन बग्गी प्रेशशा गेनुड। 11 गो इन रागी डा सहर नेल्ल खतम पोक्नुड। गो इन बोल्यो दरवार नेल्ल प्रेतनुड। 12 गो इन टुना मुना पशो आ पर्वम इन कली खतम पोक्नुड। मिनु इन दातेमी साहीत कोव्रब आन कली बाक्चा मगेनुड। जकरिया १३:२ 13 गो इन दाते डा मूर्ति नेल्ल खतम पोक्नुड। इन पूजा पचा कली खुक्शो फुल्लु खतम पोक्नुड। मिनु इन गुइमी सेल्शो थोव्रक आन डोंइती मबाप्नीनी। 14 गो इन दाते डा मूर्ति पाइशो थाम तुल्शा बेरपाइक्नुड। मिनु इन सहर आन कली प्रेतनुड। 15 गो गाइशशा चुरशा रागी रागी डा मटीब मुर आन कली क्येक्क लेत्नुडमी” देत।

6

परमप्रभु पाप आ पर्वम गाइशशो

1 परमप्रभु यावेमी मार देंबा, इन नोफा दाइशशा नेनीन “बोक्कीन। मिनु पहाड आन डोंइती इन देंचा माल्शो लोव्र शोव्रडीन। मिनु डांडापुकीमी इन लोव्र नेन्मेक्ल। इजीकीएल ६:२ 2 गे डांडापुकी नु गेना हना यो लीब रागी डा जग, परमप्रभु यावेमी दोपा निसाफ पाइबा, मेको नेनीन। मारदे हना मेकोमी आ मुर आन कली निसाफ पचा चिक्शो बाक्ब। आ दोस गेशो नोफा दाइशशा नेनीन। मारदे हना आ मुर आन कली मेको के लोव्र बाक्ब। मेकोम इस्राएल कली निसाफ पाइब।

3 आं मुरपुकी गो इन कली मार पडा? गो इन कली मार श्येत गेडा? आं कली देनीन। येरमीया २:५ 4 गो इन कली इजीप्त रे एक चाक्तन्नी। मिनु इन वाइलीम वाइल दुम्शो रागी रे प्रोंइतन्नी। इन कली लां कोंइचा कली मोसा, हारून नु मिरयाम आन कली सोइक्ताक्डमी। प्रस्थान १५:२० 5 आं मुरपुकी, मोआब डा पिप बालाकम मार सल्ला पशो बाक्मे, मेको मिम्तीन। बेओर आ तौ बालाममी मेको कली मार लोव्र लेत्ता, मेको मिम्तीन। शितीम रे गिल्गाल सम्म डा लामी गाक्शोनु, मार मार दुम्मे, मेको मिम्तीन। मिनु परमप्रभु यावेमी इन कली दोपा प्रोंइशो बाक्मे, मेको तुइक्नीनी” देत। गन्ती २२:-२४:-; यहोसु २:१; यहोसु ४:१९

6 गो मार कुरशा परमप्रभु यावे आ डोंइती जाक्डा? मार चाक्शा, इर डा परमप्रभु आ डोंइती बाम्डा? मार चोशा चढेतीक चाक्शा, आ डोंइती जाक्डा? मेको आ डोंइती बर्स का दुम्शो ब्यफ चाक्शा, जाक्डा? भजन संग्रह ५०:८-१३; आमोस ५:२२ 7 परमप्रभु यावे हजार हजार सांड तशा ग्येरबा? मार १० हजार तेल के खोला तशा ग्येरबा डा? गो आं पाप आ पर्वम आं डोंइती जरमेशो तौ गेचा माल्नुडा? मिनु आं थुं डा पाप आ पर्वम आं आल गेचा माल्नुडा? 8 परमप्रभु यावेमी इन कली, गे बेक्शा लाइब मुर, इन कली मार रिम्शो बाक्मे नु मार पचा माल्नीनी, मेको देशो बाक्ब।

मार देशो बाकब देशा हना, गे ठीक निसाफ पने, शिशी पतीक कली दाक्तीन। मिनु इन परमप्रभु आ डोंइती ब्रेम्शो दुम्शा गाक्कीन। ब्यवस्था १०:१२; १सामुएल १५:२२

यरूसलेम कली दोस गेशो

9 परमप्रभु यावेमी सहर कली “आं कली मान पा हिंचा इन कली श्येत रे प्रोंइतीक दुम्ब। गे थर डा मुर नु सहर डा गुम्तीक डा मुर आन लोव्र नेनीन। 10 गो मेको आ अरेशो मटीब आ खिं डा मरिम्शो पा चेम्शो शोंप प्रेंदु? इन आइक्च सेल्शो सराप रशो पुक्तीक प्रेंदु? लेवी १९:३५ 11 मार गो इन मरिम्शो नाक्तीक नु जोल पा नाक्तीक ढक के थैलो वोइक्ब कली दोस मताइब सेलु? हितोपदेस २०:१० 12 मेको आ शोंप पाइशो मुरपुकी हुश खाक्श पोक्तीकेम ब्रीशो बाक्नीम। मेको सहर डा मुरपुकी जोल पाइनीम। मेको आन शोव्र जोल पतीकेमी ब्रीशो बाक्ब। 13 मोपतीके गो इ कली खतम पोक्चा गोशो बाक्नुड। गो इ कली इ पाप आ पर्बम श्येतथ पोक्नुड। 14 गे जचा थोव्रक जाइनेवे, तन्न मरूनेवे। मिनु इ कोव्रज शोव्रलु बेक्शोन बाक्ब। गे खेक्चा दा खेक्नेवे, तन्न उप्शा वोइक्ने मचाप्नेवे। गे मार खेक्नेवे, मेको नेल्ल लडाइम खतम दुम्ब। 15 गे मार मार शोक्चा दा शोक्नेवे। तन्न खुप्चा मताइनेवे। तेल रवा आ फल खाक्चा दा खाक्नेवे, तन्न इ रांम तेल खेक्चा मताइनेवे। गे अडगुर खाक्चा दा खाक्नेवे, तन्न अडगुर शांबु तूचा मताइनेवे। ब्यवस्था २८:३८-४०; आमोस ५:११ 16 गे ओम्नी आ अरेशो लोव्र पाप्तीवी। मिनु आहाब आ खिं डा मुर आन पशो नेल्ल पाप्तीवी। मिनु मेको आन गेशो अर्ती टिप्तीवी। मोपतीके गो इ कली खतम पोक्नुड। मिनु इ मुर आन कली शुक्शी पतीक सेल्लुड। गे आं मुर आन गाइशो ताइनेवे” दे ब्रेन्न ब्रेन्न बाक्ब। १राजा १६:२९-३३

7

इस्राएल कली श्येत दुम्शो

1 गो दोदेशो पा श्येत जशो बाक्नुडा? गो फल सिशशा नोले, अडगुर रू डा सिला माल्ची नोले मारेइ जचा मताइनुड। आं माल्शो डोंइती मीशो फोव्रशी यो मबाक्ब। भजन संग्रह १२:२; यसैया ५७:१ 2 थमा सुइक्चा पुंइसीब मुर रागी रे जाम्शा लाम्तेक्म। मिनु गेना हना यो रिम्शो पाइब मुर मलीशो बाक्नीम। मुर नेल्ल मुर साइक्चा कली बाप्शा बाक्शो बाक्नीम। मुर नेल्लेमी ब्वारद दाइशशा आंम लोक्ब कली साइक्चा माल्शो बाक्नीम। 3 मेकोपुकी मरिम्शो पचा कली जोक्ब बाक्नीम। आन ठेयब मुर नु निसाफ पाइबपुकीमी घूस जाइनीम। सक्ति पाइशोपुकीमी मार मिम्तमे मेकोन पाइनीम। मोपा ठीक पतीके कली दूली सेल्लनीम। 4 मेको आन दाते डा नेल्ल क्येडा रिम्शो मुर चू रवा खोदेशो बाक्ब। मेको आन दाते डा गेना हना यो रिम्शो पाइब थरपु हिरशो चू खोदेशो बाक्ब। इन खाल पाइब आन नाक्त जाक्शो बाक्ब। मेको नाक्ती इन कली कोव्रबमी इन कली गुम्थ जाक्ब। मुल मेको आन कली खतम सेल्लतीक नाक्त जाक्ब। 5 इन वारच कली थमा मसुतीन। इन दाक्शो मुर कली थमा मसुतीन। गे नु काथा इप्शो मीश नु यो होस पा लोव्र पने। येरमीया ९:३-४ 6 मारदे हना तौमी आ आफ कली मरिम्शो पाइब। तमी आ ममा आ पर्बम दूली पाइब दुम्ब। चाइमीम आ शिमी आ पर्बम मरिम्शो पाइब। आंम खिं डा मुर इन जोरी सत्रु दुम्नीम। मत्ती १०:३५-३६ 7 तन्न गो परमप्रभु यावे गे कोव्रनुड। गो आं कली श्येत रे प्रोंइब परमप्रभु कली रिम्नुड। आं परमप्रभुमी आं पुंइशो नेंब।

परमप्रभुमी श्येत रे प्रोंइब

8 मिनु “आं जोरी सत्रु आं कली शुक्शी पा मग्येरसीन। गो गोलती हना यो, बोक्नुड। गो छिडछिडम बाक्ती हना यो, परमप्रभु यावे आं छेडछेड बाक्ब। ओबदिया १:१२; भजन संग्रह २७:१ 9 आं कली निसाफ पा वारच मपवा सम्म गो परमप्रभु यावे आ गाइशो फाल्चा माल्लुड। मारदे हना गो मेको कली पाप पाता। मेकोमी आं कली आ शिशी तपाइक्चा कली छेडछेडम गुंइब। येरमीया १४:७ 10 मेना आं जोरी सत्रुम मेको ताइनीम। मिनु मुने दोक्नीम। मारदे हना मेकोपुकीमी डोंइती ‘परमप्रभु यावे, इ परमप्रभु ते बाक्म?’ देशो बाक्तेक्म। गो मेको आन खतम दुम्शो ताइनुड। मुल यो मेकोपुकी लां डा हिलो खोदेशो पा दिम्चा पुंइसीशो बाक्नीम। भजन संग्रह ७९:१०

11 गे इन गारो लेंशा सेल्लतीक नाक्त नु इन सांदपुकी डोन डोन सम्म चाक्दीत्तीक नाक्त जाक्शो बाक्ब। 12 मेको नाक्त अस्सुर नु इजीप्त रे शुश मुर जाक्नीम। इजीप्त रे युफ्रेटीस सम्म, समुन्द्र रे समुन्द्र सम्म नु पहाड रे पहाड सम्म डा शुश मुर इन बाक्तीक जाक्नीम। 13 तन्न रागी रागी नेल्ल श्येतथ दुम्नीम। मुर आन मरिम्शो पशो आ पर्बम मोदेशो दुम्ब” देंत।

परमप्रभुम इस्राएल कली शिशी पाइब

14 गे इन मुर आन कली कोक्केम योत्रडीन। मेको ब्वाकीम बाक्शो बगाल इन के बाक्ब। मेको रिम्शो बाक्तीकेम बाक्नीम। मेको आन कली डोंइती डा खोदेशो पा बाशान नु गिलादमी जोचा गेन। मीका ५:३; येरमीया ५०:१९

15 गेपुकी इजीप्त रे ग्रूशो नाक्त खोदेशो पा गो इन कली छक लाक्चा डा गेय कोंइनुड। 16 मेको रागी रागी डा मुरपुकी शुश सक्ति पाइशो बाक्तेक्म हना यो, मेको तशा, मुने दोक्नीम। मेकोपुकीम आन गुइम आन कुल सुम्सीनीम। मिनु मेको आन नोफा लाटा दुम्ब। 17 मेकोपुकीम बुस्स खोदेशो नु खपीम ग्रेशा गाक्ब जन्तु खोदेशो पा, खप तुक्नीम। मेको आन बोल्यो दरवार रे हिंशा खिंखि पा गूनीम। मेकोपुकी हिंशा परमप्रभु यावे, आंइ परमप्रभु गे लेत्नीम। मिनु मेकोपुकीमी इन कली मान पा हिंनीम। भजन संग्रह ७२:९ 18 इन खोदेशो परमप्रभु अर्को सु बाक्बा डा? गे ठीक मपशो क्याम्ब बाक्नीनी। इन लीशो मुर आन मरिम्शो पतीके माफ गेनीनी। गे गेना हना यो गाइक्स डा गाइक्स मबाक्नीनी। तन्न शिशी पचा कली ग्येरशा बाक्नीनी। भजन संग्रह १०३:३,८-१३ 19 मेकोमी आंइ कली लेंशा शिशी पाइब। मेकोमी आंइ पाप कली दिम्ब। गे आंइ पाप शुश लुक्च लशो समुन्द्रमी ताइक्नीनी। 20 गे याकूब कली इन थमा सुइक्तीके कोंइनीनी। मिनु अब्राहाम कली दाक्शा मप्रोंइतीके कोंइताक्नी। गे साइ डोंइती आंइ किकी पिप आन कली कसम जशा लोत्र गेशो बाक्तीनी। उत्पत्ती २८:१३-१५; उत्पत्ती २२:१६-१८; लूका १:७३

नहुम

ब्रेक्ब मुर: एको किताब परमप्रभु यावे आ लोव पाइब नहुममी ब्रेक्शो बाक्ब।

गेना ब्रेक्शो: ६६३-६०६ बि. सी. मेर नहुम आ बाक्ची ना ब्रेक्शो बाक्ब।

मारदे ब्रेक्शो: एको किताब योना आ ब्रेक्शो किताब खोदेशो पा निनवे सहर आ पर्बम ला परमप्रभु यावे आ लोव बाक्ब।

१. निनवे सहर निसाफ पाइक्चा पुंडसीब
२. निनवे सहर लडाइम फुचा नु नेल्ल रोइक्चा पुंडसीब
३. निनवे सहर डा मुर आन मरिम्शो पशो

परमप्रभु निनवे सहर तशा गाइशो

१ एको निनवे सहर आ पर्बम परमप्रभु यावे आ पशो लोव बाक्ब। एको एल्कोश डा नहुममी तशा ब्रेक्शो लोव बाक्ब। मेकोमी मार ब्रेक्शो बाक्ब देशा हना, २ परमप्रभु यावे रुश पाइब नु क्येक्क लेप्ब परमप्रभु बाक्ब। परमप्रभु यावेमी आ जोरी सत्रु आन कली क्येक्क लेप्ब। मेको आन कली तशा गाइक्ब। परमप्रभु यावेमी आ जोरी सत्रु आन कली क्येक्क लेशशा, मेको आन कली तशा शुश चुरब। प्रस्थान २०:५; ब्यवस्था ४:२४ ३ परमप्रभु यावे ओंखां ओंखां पा गाइक्ब। तन्न मेको ठेयब सक्ति पाइशो बाक्ब। मिनु परमप्रभु यावेमी दोस ताइब आन कली सजाइ मगेथु मप्रोइब। मेको आ लां फश गिवारम बाक्ब। मिनु गोस्स मेको आ खोइल डा फुरक बाक्नीम। प्रस्थान ३४:६-७ ४ मेकोमी ठेयब समुन्द्र कली हुइक्तानु, सोवब। मेकोमी खोला नेल्ल आन कली सोवपाइक्ब। बाशान डा बी ब्यफ योवतीके नु कारमेल पहाड डा मारेइ मारेइ सोल सुल बेक्नीम। लेबानोन डा फू यो सोल सुल बेक्नीम। ५ मेको आ डोंइती डांडा नेल्ल खिंखि पाइनीम। मिनु पहाड दिंम दुम्नीम। रागी नु रागीम बाक्ब नेल्ल हिम्सीनीम। भजन संग्रह ९७:५

६ परमप्रभु यावे गाइक्तानु, मेको आ डोंइती सु राप्ने चाप्बा डा? मेको आ चुरशो सुम फाल्ने चाप्बा डा? मेको आ गाइशो मी खोदेशो पा ब्राइब। मिनु मेकोमी सेरथे फुल्लु आन कली प्रोल्लब। ७ परमप्रभु यावे रिम्शो पाइब बाक्ब। मेको श्येत जशो नाक्ती खुइशशा ब्रोंइशा बाक्तीक बाक्ब। सु मेकेर प्रोक्शा लाइबा, मेको खुइशशा बाक्चा ताइब। ब्यवस्था ४:३१; भजन संग्रह १:६ ८ मेकोमी बारशो ब्वाक्कुमी निनवे कली खतम सेल्ब। मेकोमी आ जोरी सत्रु आन कली खेरशा छिडछिडमी सोइक्ब। ९ गे मारदे परमप्रभु यावे कली मरिम्शो पचा कली लोव गारपाइक्नीनी? मेकोमी इन कली खतम पोक्ब। गे मेको आ पर्बम मरिम्शो पचा कली निक्शी खेयप बोक्ने मचाप्नीनी। १० आ जोरी सत्रु चूम रेशो खोदेशो पा रेशो बाक्नीम। मिनु दुक्शो मुर खोदेशो पा दुक्नीम। मिनु सोवशो नल खोदेशो पा मीम नेक्चा पुंडसीनीम। ११ निनवे, परमप्रभु यावे कली मरिम्शो पचा कली लोव गारपाइक्ब नु काइ मरिम्शो सल्ला पाइब इ दाते रे गूशो बाक्नीम।

१२ परमप्रभु यावे आ लोव मार बाक्ब देशा हना “मेको थम सक्ति पाइशो नु शुश मुर बाक्तेक्म हना यो, साइशशा क्याम्चा पुंडसीनीम। यहूदा, गो इ कली श्येत गेतन हना यो, मुल इ कली श्येत मगेनन। १३ मिनु मुल गो इ कली श्येत गेबपुकी रे प्रोंइनुड। मिनु इ कली फ्रेंशो डोरी प्रोइक्नुड” दे परमप्रभु यावेमी देशो बाक्ब।

१४ निनवे, परमप्रभु यावेमी इ पर्बम लोव का अरेशो बाक्ब। मेकोमी मार अरेशो बाक्ब देशा हना “मुल रे इ नें वोइक्ब मुर सुइ मलीनीम। गो इ परमप्रभु आ खिं रे इ मुशा सेल्शो मूर्ति नु चेम्शा सेल्शो मूर्ति गुंइनुड। गो इ कली तुरस ठीक सेल्नुड। मारदे हना गे काइ मरिम्शो पाइब बाक्नेवे” दे अरेशो बाक्ब।

१५ कोवडीन, रिम्शो लोव पाइब का पहाडम गाक्ब। मेकोम थुं नाइक्तीक लोव शेंब। यहूदा डा मुरपुकी, इन चाड मानेन। इन कसम जशो खपीन। मारदे हना काइ मरिम्शो पाइब इन बाक्तीकेमी लेंशा मजाक्नीम। मेको नेल्ल क्याम्चा पुंडसाक्म।

2

निनवे जाम्शा लाइब

1 निनवे, इ कली खतम सेल्ब जाक्शो बाक्ब। इ बोल्यो दरवार खाल पावो। इ लां रिम्शो पा कोव्रडो। इ किप्शुर किम्सो। इ बोल नेल्ल गुंडदो। यसैया ५२:७; नहुम १:११

2 मारदे हना परमप्रभु यावेमी याकूब आ मान ततीके लेशशा गेब। मिनु इस्राएल आ मान ततीके यो लेशशा गेब। मरिम्शो पाइबपुकी इ रागी लेंशा मओवनीम। मेकोपुकी खतम सेल्चा पुंडसीशो बाक्नीम।

3 मेको आ लडाइ पाइब आन तेक्तीक लल बाक्नीम। मिनु मेकोपुकीम लल वा फेक्शो बाक्नीम। मेको लडाइ पथ लची नाक्ती, आन बग्गी डा फलाम टल्केसीब। मेको आन तूतीके शेशा हिरनीम। 4 मेको आन बग्गीपुकी शुश दोरनीम। मेको सहर आ एर ओंथ शुश हिरशा गाक्नीम। मेको तौवशी खोदेशो तांडसीनीम। चिला दाप्शो खोदेशो पा गूनीम। 5 मेकोमी आ लडाइ पाइब आन कप्तान आन कली ब्रेण्ड। मेकोपुकी दाइल पा आ डोंइती जाक्नीम। मिनु रीब पा सहर डा गारो गे दोरनीम। मेकेर आन फाम्सीतीके सेल्शो बाक्ब। 6 ब्वाक्कु बारशा यीब। मिनु दरवार खिंखि पाइब। 7 मेको सहर डा पिपीम कली ग्याइशशा, आ वा पुइशशा लाइक्नीम। मेको आ वाइलीम नेल्ल ग्याइशशा डोन लाइक्चा पुंडसीनीम। मिनु मेकोपुकी कुचु तुप्शा डुकुर खोदेशो पा रोंका पा डाक्नीम। 8 निनवे ब्वाक्कु शाइक्ना शाइक्न लाइब दोम्ली खोदेशो बाक्ब। मिनु “रिम्दो रिम्दो” दे ब्रेशोनो यो, सुइमी लेशशा मकोवनीम। 9 मेको आ सुन नु चांदी रोइक्तीन। आ शोंप हिक्ने मचाप्चा डा पा शुश बाक्नीम। शुश क्येट लाइब मारेइ मारेइ बाक्ब।

10 मेको सहर मारेइ मारेइ रोइशशा श्येत्य नु खतम पोक्चा पुंडसीशो बाक्ब। मिनु मुर आन थुं लुकच लाइब, आन पोक्च खिंखि पाइनीम। मिनु आन ची यो खिंखि पशो बाक्नीम। मेको आन कुल बेक्शो मुर आन कुल खोदेशो दुम्नीम। 11 निनवे सहर डा गुप्स खोदेशो ठेयब मुर आ दरवार मार दुम्मे? मेको आ गाक्तीक नु आ तमी तौ आन बाक्तीके मार दुम्मे? आ आल मेकेर बाक्शो बाक्तेक्म। मिनु सुइमी मेको आन कली श्येत मगेम। यसैया १३:७-८ 12 गुप्स खोदेशो ठेयब मुरुमी आ तमी तौ आन कली शुश मार मार खुप्शो बाक्त। आ मीश कली मारेइ मारेइ चाक्शो बाक्त। आ दरवार शोंपोम प्रिंशो बाक्त। आ पुक्खी मार मार साइशशा चाक्शा प्रिंशो बाक्ब। 13 मिनु मुर नेल्ल आन परमप्रभु यावेमी “गो इ कली काइ मदाक्थु, इ पबर्म बोक्ती। गो इ बग्गी चोशा गेनन। मिनु गुप्स आ चाइक्ब खोदेशो इ तमी तौ तरवारमी साइक्चा पुंडसीनीम। इ रोइशशा, इ साइशशा रागी रे गुंडनुड। मिनु इ लोव्र कुरब मुर आन सेंदा मनेंसीब” देशो बाक्ब।

3

निनवे कली सजाइ

1 मिनु निनवे, गे हुश ख्राक्श पोक्ब सहर बाक्नेवे। इ दातेम शुश जोल पतीके बाक्ब। गे रोइशशा थोव्रकीम ब्रीशो बाक्नेवे। इ दातेमी रोइक्तीक गेनायो मनुप्ब। इजीकीएल ६:२,९ 2 मेकेर युक्शो रेयके, गुगील आन रेयके, शारा आन प्रेक्शो रेयके नु बग्गी आन दोरशो रेयके नेंसीशो बाक्ब। 3 शारा डोइक्ब दोरोर पा गाक्नीम। आन टल्केशो तरवार शेशा, आन तूतीक झिल्लील पा कोइनीम। बेक्शो मुर शुश बाक्नीम। हिक्ने मचाप्चा डा पा साइशशा मुर बाक्नीम। मुर शोल्मो पा साइशशा बाक्नीम। मुरपुकी बेक्शो मुर तार दाइल पांडसीन सीन गाक्नीम। 4 मेको तेल्लेम खोदेशो सहरम हिक्ने मचाप्चा डा पा मरिम्शो पतीकेमी रागी रागी डा मुर आन कली आ खोदेशो पपाइक्तीमी। रिम्शो मीश मुर नड, देखु पा, आ तुना मुना पतीकेमी जात जात डा मुर आन कली दूली लां खोइक्पाइक्तीमी। 5 मिनु मुर नेल्ल आन परमप्रभु यावेमी “गो इ कली काइ मदाक्थु, इ पबर्म बोक्ती। गो इ गुने इ कुल सम्म क्युक्नुड। मिनु रागी रागी डा मुर आन कली इ भेत्रे रां कोइनुडमी। राज्य राज्य डा मुर आन कली इ मुने दोक्तीक कोइनुडमी। यसैया ४७:३ 6 गो ग्रान्रा दिशो थोव्रक इ तारी ताइशशा, इ कली थम मरिम्शो पाइनुड। मिनु इ कली तशा मुर हिंतीक सेल्नुड। 7 मिनु इ कली ताइब नेल्ल इ क्येडा हिंशा, नोले शोंइसीनीम। मिनु मेकोपुकीम ‘निनवे खतम दुम्त। मेको आ पबर्म सु रोंका पाइबा डा? गो इ कली लेम्ब मुर ते थिन्ने चाप्नया डा?’ देंनीम।

निनवे आ खतम दुम्तीके

8 मार, गे थेबेस सहर क्येडा यो रिम्शो बाक्नेवे? मेको सहर नील खोला आ नेक्था बाक्शो बाक्ब। आ एर ओंथ नेल्ल ब्वाक्कु बाक्ब। मिनु मेको ब्वाक्कुमी मेको कली खाल पशो बाक्ब। मेको ब्वाक्कु गारो खोदेशो बाक्ब। येरमीया ४६:२५ 9 एथीयोपीया रागी मेको आ सक्ति बाक्त। इजीप्त गेना हना यो आ सक्ति बाक्त। पूत नु लिबीया डा मुर मेको कली चारच पाइब बाक्तेक्म।

10 मो हना यो मेको ग्याइशशा ग्रुंडचा पुंडसाक्व। मेको आ आलपुकी लांम ताइशशा साइक्चा पुंडसाक्म। आ ठेयब मुर आन कली बाजी आप्शा लाइक्तेक्म। मिनु मेको आन नेल्ल क्येडा ठेयब मुर नेल्ल साडलोमी फ्रेंचा पुंडसाक्म। योएल ४:३ 11 गे यो दुक्शो दुम्नेवे। मिनु खुइक्थ लाइनेवे। मिनु इ जोरी सत्रु रे पा ब्रोंइचा कली खुंडसीतीक माल्नेवे। येरमीया २५:१५ 12 इ बोल्यो दरवार नेल्ल फोव्शी रवा आ डोंइती मीशो गेडा खोदेशो बाक्नीम। मेको रवा हिम्शोनु, मेको ब्वाइब आन शोव्मी दोक्नीम। 13 इ लडाइ पाइब आन कली कोव्डो। मेको मीश मुर खोदेशो बाक्नीम। इ रागी डा ठेयब लाप्यो इ जोरी सत्रु आन कली रोक्सीशो बाक्नीम। लाप्यो आन आग्लो नेल्ल मीम नेक्शो बाक्नीम।

14 गे पुम्चा पुंडसीनेवे। मेको नाक्ती कली ब्वाक्कु प्रिंशा वोतो। इ गारो बोल्यो सेलो। हिलो निशा, इंटा सेलो। 15 मेकेर इ कली मीम दाक्ब। तरवारमी इ कली साइक्ब। मिनु मालेपुकीम मार मार नेक्शो खोदेशो पा इ कली नेक्ब। गे माले खोदेशो पा सोशो बोशो दुमीन। मिनु घांस ब्वाइब माले खोदेशो पा सोशा बोशा शुश दुमीन। योएल १:४ 16 गे सरीड डा सोरुल क्येडा इ ग्याप्ब लेयब मुर शुश सेल्टीवी। मेको माले खोदेशो पा आन कुशुल ताइशशा बेरनीम। 17 इ कली खाल पाइब घांस ब्वाइब माले खोदेशो बाक्नीम। मिनु इ सरकार डा ठेयब मुर माले आन हुल खोदेशो बाक्नीम। मेको ग्यू दुम्मेनु, गारो तार बाक्नीम। मिनु नां पवानु, मेको नेल्ल बेरशा लाइनीम। मेको ते लाइनीमी, सुइमी मतुइक्नीम।

18 अस्सुर डा पिप, इ गोठलापुकी इप्शो बाक्नीम। इ ठेयब मुरपुकी नाइशशा गोलशा बाक्शो बाक्नीम। इ मुर नेल्ल डांडाम ब्रशो बाक्नीम। मिनु मेको आन कली खुप्ब सुइ मबाक्नीम। 19 इ गार कली मारेइम यो सापाइक्ने मजाप्ब। इ गार बेक्चा डा बाक्ब। मिनु इ पर्बम लोव् नेंब मुर नेल्ल शुश हिंनीमी। मारदे हना इ गेनायो मनुप्ब मरिम्शो पतीकेमी सुइ ब्रोंइने मचाप्शो बाक्तेक्म” देंत।

हबकुक

ब्रेक्ब मुर: एको किताब हबकुकमी ब्रेक्शो बाक्ब। हबकुक आ अर्थ “मुप्ब मुर”, “शुश दाक्ब मुर” बाक्ब। मेको परमप्रभु यावे आ लोत्र पाइब बाक्त।

गेना ब्रेक्शो: कल्दी आन लडाइ पाइबपुकी ६०५ बि. सी.म निनवे ग्राशा, बारना बारन लशो बाक्तेक्म। हबकुक १:६ हबकुकम एको किताब यहूदा डा पिप योसीयाह आ पाला ६३९-६०९ बि. सी.म नु यहूदा डा पिप योयाकीम ६०९-५९८ बि. सी.म आस सासन पचा क्येडा डोंइती ब्रेक्शो बाक्त। हबकुक येरमीया आ लोत्र पची ना यो बाक्शो बाक्त।

मारदे ब्रेक्शो: परमप्रभु यावेमी इस्राएली आन कली निसाफ पाइब। इस्राएली आन कली श्येत गेब सजाइ गेचा पुंडसीनीम। ठीक पाइब आन थमा सुइक्तीके ब्रोंइनीम।

मरिम्शो दुम्तीके आ पर्वम लोत्र

1 एको परमप्रभु यावे आ लोत्र पाइब हबकुकमी परमप्रभु यावे रे पा नोले दुम्ब ततीक तशो बाक्ब। 2 मिनु हबकुकमी “परमप्रभु यावे, गो गेना सम्म इन कली ‘वारच पन’ दे पुंडनुडा? गे काइ मनेनीनी? ‘हुश खाक्श पोक्नीम’ दे थोइनुड। तन्न गे काइ मप्रोंइनीनी। 3 गे मारदे आं कली मरिम्शो पशो तपाइक्नीनी? गे मारदे आं कली श्येत जशो तपाइक्नीनी? खतम सेल्टीके नु जिचा पोक्तीक आं डोंइती बाक्नीस। तेइ तेइ राम्शी पचा नु जिचा ला पोक्नीम। 4 मिनु इन अरेशो मपाइनीम। ठीक पाइबपुकीमी ग्राने मचाप्नीम। इन अरेशो मटीबपुकीमी ठीक पाइब आन कली पुम्नीम। मिनु निसाफ पतीके दूली दुम्ब” देंती।

कल्दी आन पर्वम लोत्र पशो

5 मिनु परमप्रभुमी आं कली “रागी रागी डा मुर आन कली कोवडो। मेको आन कली कोवशा, गे छक लाक्नेवे। मारदे हना इन ब्रोंइतीक नाक्तीमी गेय का पशो बाक्ब। मेको इ कली देंतेक्म हना यो, गे मेको थमा मसुइक्नेवे। प्रेरित १३:४१ 6 गो कल्दी डा मुर आन कली पोक्नुडमी। मेको हिंचा डा नु शिशी मपाइक्ब बाक्नीम। मेकोपुकीमी रागी नेल्ल कली ग्राशा, मुर आन खिं नु बाक्तीके रोइक्नीम। 7 मेकोपुकी श्येत गेब नु शुश हिंचा डा बाक्नीम। मिनु ‘मार ठीक निसाफ पतीके बाक्बा? सु मान ताइब बाक्बा’ दे आंमान देंनीम। 8 मेको आन शारा जोइ आन क्येडा रीब पा दोरब बाक्नीम। मिनु नाक्दो गूब फर खोदेशो पा साइक्ब बाक्नीम। मेको आन शारा बारनीम। मेको आन शारा डोइक्ब डोन रागी रे जाक्नीम। ककाकुली खोदेशो पा बेरशा, रीब पा सिखार ग्याइक्नीम। सेफन्याह ३:३ 9 मेकोपुकी डोंइती बारशा, हुश खाक्श पोक्चा कली जाक्नीम। मिनु मुर आन कली बाल्वा खोदेशो हिक्ने मचाप्चा डा पा शुश ग्याइशशा, खुप्नीम। 10 मिनु पिप आन पर्वम शुक्शी पाइनीम। हुकुम पाइब आन पर्वम तोक्शो लोत्र पा रिन्नीम। मेकोपुकीमी बोल्यो दरवार आन पर्वम ‘गो ग्रानय’ दे खप तेल्ला डोइशशा लशा, आंम के सेल्लनीम। 11 मेको फश खोदेशो पा गाक्नीम। मिनु पाप पा दोस ताइब दुम्नीम। मेकोपुकीमी आंम सक्ति कली ला थमा सुइक्नीम” देंत।

हबकुकम परमप्रभु कली पुंडशो

12 मिनु हबकुकमी “परमप्रभु यावे, आं परमप्रभु, गे का ला आं परमप्रभु बाक्नीनी। गो मबेक्नीकी। परमप्रभु यावे, गे मेको आन कली निसाफ पचा कली योव्रतीनी। गे, आं सेरथे फुल्लु, गे मेको आन कली सजाइ गेचा कली वोइक्तीनी। येरमीया १०:२४ 13 गे मरिम्शो पशो काइ तने मचाप्नीनी। मरिम्शो पशो फाल्ने मचाप्नीनी। मोदेशो बाक्त हना यो, थम मरिम्शो पाइब आन कली तशा, मारदे मारेइ मदेनीनी? इन अरेशो मटीबपुकीमी आंम क्येडा ठीक पाइब मुर आन कली सदमेनु, गे मारदे सिक्सी पा बाक्नीनी? 14 गे मुर आन कली समुन्द्र डा डांइ खोदेशो सेल्लतीनी। सासन पाइब मबाक्शो ग्रेशा गाक्ब आइक्च जन्तु खोदेशो सेल्लतीनी।

15 मिनु आन जोरी सत्रुमी नेल्ल आन कली बोल्सीमी खोदेशो पा रेत्नीम। मेको आन कली ग्याइलीम पिक्शा, गुंडनीम। आन ग्याइक्तीकेमी खुप्नीम। मिनु डांइ रेशो खोदेशो पा ग्येरशो बाक्नीम। 16 मोपतीके मेकोपुकीमी आन ग्याइल कली क्योरशा चढ़ेनीम। आन ग्याइक्तीके कली चोशा चढ़ेनीम। मारदे हना मेको ग्याइल नु ग्याइक्तीके रे पा शुश तशा, ब्रोंइतो जाइनीम। 17 मार, मेकोपुकीमी आन ग्याइलीम रेन्ना रेन्न, रागी रागी डा मुर आन कली शिशी मपथु, खतम सेल्ला सेल्ल बाक्चा गेनीनी?” दे हबकुकमी परमप्रभु कली देंत।

2

परमप्रभुमी लोत्र लेशशो

1 गो नेल्ल तचा डा पा राप्शा बाक्नुड। गो गारो डोइशशा कोव्रनुड। मिनु परमप्रभु यावेमी आं कली मार देंबा, मेको नेल्ल तशा नेंशा बाक्नुड। आं कली मारेइ लोत्र लेप्बा कों, दे रिम्नुड। यसैया २१:८ 2 मिनु नोले परमप्रभु यावेमी आं कली “गे इ तशो नेंशो ब्रेक्तो। रिम्शो पा रुप्चा डा पा फुल्लु तार ब्रेक्तो। मिनु सु मेकेर लाइबा, मेकोम रीब पा पढेने चाप्ब। यसैया ३०:८; प्रकाश १:११, १९ 3 मारदे हना इ तशो आं देशो नाक्ती जाक्ब। मेको दीसा नित्थी मदुम्त हना यो, मेको कली रिम्शा बाक्को। मेको थमा पा दुम्ब। देश मपाइब। इजीकीएल १२:२३; २ पत्रुस ३:९ 4 गे ठेयब लेशशो कली कोव्रडो। मेको आ थुं मरिम्शो बाक्ब। तन्न ठीक पाइब आं कली थमा सुइशशा ब्रोंडब। 5 मिनु शुश शोंप कली थमा सुइक्चा दूली बाक्ब। ठेयब लेशशो मुर मलीब। मेको आ शोत्र तुरस खोदेशो पा पाक्शा बाक्ब। बेक्पाइक्ब खोदेशो पा गेनायो मरूब। रागी रागी डा मुर नेल्ल आन कली खुप्शा आंम के सेल्ब” देंत।

मुर आन कली दिप्ब कली हुइशशो

6 मिनु “मुर नेल्लेमी मोदेशो मुर आ पबर्म मुने तोक्चा डा लोत्र पाइनीम। मेको आ पबर्म शुक्शी लोत्र पा, आबी आबी, गे अरु मुर आन शोंप आंम कली तेल्लीवी। गे गेना सम्म अरु मुरुमी इ कली गेशो क्येट आंम कली वोइक्नेवे? 7 मार, इ कली जेर गेबपुकी कालेमीन मबोक्नीमी डा? मेकोपुकी सेंसीशा इ कली महिंपाइक्नीमी डा? मेना गे श्येत जाइब दुम्नेवे। 8 मारदे हना गे रागी रागी डा शुश मुर आन शोंप रोइक्ताक्नी। मुल चहिं इ साइक्तीक रे ब्रोंडशोपुकीमी इ के बाक्शो नेल्ल रोइक्नीम। गे मुर आन कली हुश खाक्श पोक्तीवी। गे रागी, सहरपुकी नु मेकेर बाक्ब मुर नेल्ल आन कली खतम सेल्लिवी” देंत। हबकुक २:१७

9 “आबी आबी, गे मरिम्शो पा क्येट चेम्नेवे। मोपा इ खिं डा मुर आन कली खतम सेल्नेवे। तन्न गे ‘श्येत मजाइनुड’ दे इ खिं इर सेल्लिवी। 10 गेम शुश जात जात डा मुर साइक्तीके, इ खिं डा मुर आन कली मुने तोक्शा, साइक्चा पुंडसीनेवे। 11 गारो डा फुल्लुमी इ पबर्म ‘वारच पने’ दे ग्रीनीम। मिनु थाम आ तार डा शीमी मेको कली लोत्र लेप्ब” देंत। लूका १९:४०

12 “आबी आबी, गे हुश खाक्श पोक्तीकेमी, सहर का सेल्लिवी। गे ठीक मपतीकेमी सहर आ जग वोइक्ब बाक्नेवे। येरमीया २२:१३; मीका ३:१० 13 जात जात डा मुर आन गेय नेल्ल मी कली ला दुम्ब। रागी रागी डा मुरपुकी मलीचा डा गेय पचा कली सोम्सीनीमी, दे मुर नेल्ल आन परमप्रभु यावे आ देशो मबाक्बा डा? येरमीया ५१:५८ 14 तन्न रागी नेल्ल परमप्रभु यावे आ सक्ति डा तुइक्तीकेम ब्रीशो बाक्ब। ब्वाक्कुमी समुन्द्र ब्रीशो खोदेशो पा ब्रीशो बाक्ब” देंत। यसैया ११:९

15 “आबी आबी, गे इ नेक्था बाक्ब मुर आन कली मुने तोक्चा कली इ दुक्तीक थोत्रक तुंडशा दुक्पाइक्नेवे। 16 गे ठेयब दुम्चा क्येडा शुश मुने दोक्नेवे। मुल इ पालो जाक्त। गे यो तूशा, दुक्शा दाइल पांडसो। परमप्रभु यावेमी आ ग्युरा गुइ डा कचौरा इ कली गेब। मिनु इ ठेयब दुम्तीके मुने दोक्ब। येरमीया २५:१५, २६ 17 गे लेबानोन डा ठेयब रवा नेल्ल तिम्तीवी। मेकेर डा ब्वाकी डा जन्तु नेल्ल आन कली मरिम्शो पाप्तीवी। मेको इ मरिम्शो पतीके क्येक्क लेत्चा पुंडसीब दुम्नेवे। मारदे हना गे मुर आन कली हुश खाक्श पोक्तीवी। मिनु रागी, सहरपुकी नु मेकेर बाक्ब मुर नेल्ल आन कली खतम सेल्लिवी” देंत।

मूर्तिम मारेइ पने मचाप्नीम

18 मिनु “मूर्तिम मार गेय पने चाप्बा डा? मुर आ चेम्शो मूर्ति जोल ला बाक्ब। मारदे हना मेको चेम्बमी आंम चेम्शो मूर्ति कली थमा सुइक्ब। तन्न मेको मूर्ति ब्वाक्ने मचाप्ब। यसैया ४४:१०-२० 19 आबी आबी, गे शी कली ‘सेंसो’ दे ब्वाक्ने मचाप्ब फुल्लु कली ‘बोक्को’ देनेवे। मार, मेकोमी मुर कली शेंने चाप्बा? मेको सुन चांदीमी गिल्शो बाक्त। तन्न मेको नु काइ ब्रोंडतीक सोक्त मबाक्ब। भजन संग्रह ११५:४-८ 20 मिनु परमप्रभु यावे आंम आ बाक्तीकेमी बाक्ब। रागी नेल्ल मेको आ डोंडती मान पा सिक्सी पवल” देंत। भजन संग्रह ११:११; भजन संग्रह ७६:९; जकरिया २:१७; प्रेरित ८:३

3

हबकुक ग्येरसीशो

1 परमप्रभु यावे आ लोत्र पाइब हबकुकमी परमप्रभु यावे कली लोत्र पा कुम्सो पा ठेयब सेल्लु। 2 “परमप्रभु यावे, गो इन पशो नेल्ल नेंता। परमप्रभु यावे, गो इन पशो तशा, इन कली ठेयब सेल्लुड। आंइ ब्रोंइतीक नाक्तीमी मेको लेंशा कोंइदीन। मेको तुइक्पतीन। गे गाइक्ताक्ती हना, यो इन शिशी मिम्तीन। 3 परमप्रभु तेमान रे पा जाक्त। मेको का ला परमप्रभु पारान डांडा रे जाक्त। ठेयब सेंदा पा आ ठेयब दुम्तीकेमी सरीड सुम्शो बाक्त। आ मान ततीकेम रागी नेल्ल ब्रीशो बाक्त। ब्यवस्था ३३:२

4 मेको आ छेडछेड नां दाप्शो खोदेशो बाक्त। आ गुइ रे पा चेयरे गूशो बाक्त। मेकेर आ सक्ति खुइशो बाक्ब। 5 आ डोंइती मुर आन कली साइक्तीक रोइ लत। आ नोले मुर बेक्तीक रोइम खोइक्तु। 6 मेको गाक्शा नाइशशा, रागी हिम्पाइक्तु। मेकोमी कोव्रडानु, रागी रागी डा मुर आन कली खिंखि पपाइक्तु। गेना हना यो बाक्ब डांडा ब्रेत्नीम। मेको गेना हना यो लीब पहाड नेल्ल यशो खोदेशो पा दिंम दुम्तेक्म। मेकोमी साइ डोंइती रे मोदेशो पशो बाक्त। भजन संग्रह १०४:३२ 7 गो कुशन रागी डा ताम्बुमी बाक्ब आन कली श्येत जशो ताता। मिदयान डा ताम्बु आन सुम्तीके हिम्साक्म। 8 परमप्रभु यावे, गे खोलापुकी नु गाइक्तीनी? गे ठेयब समुन्द्र आ पबर्म चुरनी? इन शारा नु बग्गी आन कली लां कोंइशा ग्रातीनी। 9 गे इन लिब्रा गुंइताक्ती। गे इन ब्रा ते देंनी मेक लत। गे खोला शाइक्तीकेमी रागी कली चेततीनी। 10 मिनु डांडापुकी इन कली तशा रोम्सीनीम। ठेयब रेड यित। ठेयब समुन्द्र आ रेयके नेंसाक्व। भजन संग्रह ७७:१७ 11 इन आप्शो ब्रा जिल पा ब्रशा बेरमेनु, इन तूतीक जिल्लील पवानु, नां मसोत्र। मिनु तास्ला सरीडम नांइसाक्व। यहोसु १०:१३ 12 गे गाइशशा रागी तार गाक्तीनी। चुरशा रागी रागी डा मुर आन कली दिप्शा साइक्तीनी। 13 गे इन आंम योव्रशो मुर आन कली प्रोंइचा, दे जाक्तीनी। इन तेल लुकशो मुर कली प्रोंइथ जाक्तीनी। तन्न गे इन अरेशो मटीब रागी डा ठेयब मुर आ खिं तला तारी रे जग सम्म प्रेततीनी। भजन संग्रह १८:८,१६ 14 मिनु गे मेको आ लडाइ पाइब आन ब्राम आन पिया खिंत्तीनी। मेकोपुकी खुइशशा बाक्ब प्रुडग मुर आन कली साइक्चा थुं पा फश गिवार खोदेशो पा जाक्शो बाक्तेक्म। 15 गे ठेयब समुन्द्रमी आन शारा ओत्रपाइशशा, ठेयब ब्वाक्कु नेल्ल शाक्पाइक्तीनी। प्रस्थान १४:२६-२९

16 गो इन सेंदा नेंनु, खिंखि पाता। आं शोत्र यो खिंखि पाप्तु। आं रुश आगा नेल्ल मुक्ताक्मे। खोइल खिंखि पाप्तु। मो हना यो आंइ कली मरिम्शो पाइब मुर आन कली श्येत दुम नाक्ती कली रिम्शा बाक्ती।

17 फोव्रशी रवा मबोइक्ब। अडगुर बोट मसिप्ब। तेल रवाम फल काइ मसिप्ब। रूमी अन्न मसिप्ब। गोठीम बी ब्यफ नु क्यारश भेडा मबाक्त हना यो, 18 गो परमप्रभु यावे कली तुइशशा ग्येरसीनुड। मिनु आं कली श्येत रे प्रोंइब परमप्रभु कली ठेयब सेल्लशा ग्येरसीनुड। यसैया ६१:१० 19 परमप्रभु यावे, आं परमप्रभु आं सक्ति बाक्ब। मेकोमी आं खोइल किशश आ खोइल खोदेशो सेल्लब। मेकोमी आं कली ठेयब लाइशशा डांडामी लतीक सक्ति गेब” दे कुम्सो पाप्तु।

मेको कुम्सो शेंब कली तार पाइशशा ताप्तीके ताप्शा, मेको कुम्सो पपाइक्चा माल्ब। भजन संग्रह १८:३४

सेफन्याह

ब्रेक्ब मुर: एको किताब सेफन्याहमी ब्रेक्शो बाक्ब। मेको मुर आ पर्बम शुश मतुंडसीब। मेको हिज्कीयाह आ युइ बाक्ब। मेको हिज्कीयाह पिप हिज्कीयाह यो दुम्ने चाप्ब। एको किताब आइक्च बाक्त हना यो, ख्रीस्त आ पर्बम शुश लोत्र बाक्ब।

गेना ब्रेक्शो: पिप योसीयाहम सासन पची ना ६४१-६१० बि. सी. मेर सेफन्याहमी एको किताब ब्रेक्शो बाक्त। अरेशो किताब थित्या क्येडा डोंइती एको किताब ब्रेक्शो बाक्त, दे मिन्नीम।

मार ब्रेक्शो:

१. परमप्रभु यावे आ निसाफ पतीक नाक्त जाक्ब। सेफन्याह १:१-४
२. निसाफ पशो मार कली बाक्बा? सेफन्याह १:५-१८
३. अर्को रागीम यो निसाफ ताइनीम। सेफन्याह २:१-३:८
४. नोले डा रिम्शो दुम्तीके जाक्ब। सेफन्याह २:-३:-

डोंइती डा लोत्र

1 यहूदा डा पिप आमोन आ तौ योसीयाहमी सासन पवा ना परमप्रभु यावेमी सेफन्याह कली लोत्र पाप्तु। सेफन्याह आ आफ कूशी बाक्माक्त। कूशी आ आफ गेदाल्याह बाक्माक्त। गेदाल्याह आ आफ अमारयाह बाक्माक्त। मिनु अमारयाह आ आफ हिज्कीयाह बाक्माक्त। येरमीया १:२

नेल्ल खतम दुम्तीक नाक्त जाक्ब

2 परमप्रभु यावेमी मार लोत्र पाप्तु देशा हना “गो रागी नेल्ल डा मारेइ मारेइ खतम सेल्लुड। 3 मुर नु बी ब्यफ, क्यारश भेडा, जन्तु नेल्ल आन कली खतम सेल्लुड। सरीड डा चिक्ब, समुन्द्र डा डांइ नेल्ल आन कली साइक्नुडमी। रागी डा मुर नेल्ल आन कली खतम सेल्लुड। परमप्रभु यावे आ अरेशो मटीब आन कली दाइल पपाइक्नुड। गो मुर नेल्ल आन कली रागी नेल्ल रे क्याम्नुड। मत्ती १३:४१

यहूदा डा मुर आन कली हुइश्शो

4 गो यहूदा रागी नु यरूसलेममी बाक्ब मुर नेल्ल आन पर्बम आं गुइ क्युक्नुड। मिनु मेकेर बाल देवता कली पूजा पतीके नु मेको कली चढेब आन नें मलीचा डा पा क्याम्नुड। २राजा २३:५; होसे १०:५ 5 खिं तार बाक्शा, नां तास्ला नु सोरुल आन डोंइती बाप्ब, परमप्रभु यावे आ डोंइती बाप्शा आ नें थिशा कसम जाइब। मोलेक आ नें यो थिशा कसम जाइब। येरमीया १९:१३; येरमीया ४९:१ 6 गो, परमप्रभु यावे, आं कली ममाल्थु, मपुंइथु आं नोले खोइक्चा प्रोंइशा, नोले शोंइसीब आन कली खतम पोक्नुडमी।

7 परमप्रभु, परमप्रभु यावे आ डोंइती सिक्सी पने। मारदे हना परमप्रभु यावे आ नाक्त जाक्चा चिक्शो बाक्ब। परमप्रभु यावेमी चढेतीक चाड का ठीक पाप्तु। परमप्रभु यावेमीआ ब्रेश्शो मुर आन कली ठीक सेल्लतीमी। हबकुक् २:२० 8 परमप्रभु यावे आ चढेतीक नाक्त गो सरकार आ ठेयब मुर, पिप आ तौपुकी नु अर्को रागी डा मुर आन वा फेक्ब नेल्ल आन कली सजाइ गेनुडमी। हबकुक् २:२० 9 मेको नाक्त सु सु लाप्चो रे ओवनीमी, मेको आन कली सजाइ गेनुड। मारदे हना मेकोपुकीमी आन होवप आ खिं तुम्मुचा, जिचा खेचा नु जोल पतीकेमी प्रिनीम” देंत।

10 मिनु परमप्रभु यावेमी “मेको नाक्त डांइ लाप्चो रे ठेयब सेंदा पा डाक्शो, नक सहर रे रोंका पशो नु डांडा रे पा ठेयब रेयके पशो नेंसीब। 11 गे माकतेशम बाक्बपुकी रोंका पने। मारदे हना ग्याप्ब लेयब नेल्ल खतम दुम्तेक्म। चांदी नाक्ब नेल्ल क्याम्चा पुंडसाक्म। माकतेश यरूसलेम सहर डा बजार का बाक्त। 12 मेना गो यरूसलेममी बत्ती दाशा मुर आन कली माल्शा, सजाइ गेनुड। मारदे हना मेकोपुकीमी अल्सी पा आन थुंमी ‘परमप्रभु यावेमी रिम्शो नु मरिम्शो मारेइ यो मपाइब’ दे मिन्नीम। 13 मेको आन शोंप नेल्ल रोइक्चा पुंडसीनीम। मेको आन खिं ब्रेत्नीम। मेकोपुकीमी खिं सेल्लेक्म हना यो, मेकेर बाक्चा मताइनीम। मेकोपुकीम अडगुर खुम्तेक्म हना यो, अडगुर शांबु तूचा मताइनीम। ब्यवस्था २८:३०, ३९; आमोस ५:११

परमप्रभु आ ठेयब नाक्त

14 परमप्रभु यावे आ ठेयब नाक्त जाक्चा चिक्शो बाक्ब। मेको रीब पा जाक्ब। नोफा दाइशशा नेनीन। परमप्रभु यावे आ ठेयब नाक्त, श्येत डा नाक्त बाक्ब। लडाइ पाइबपुकी थम ठेयब सेंदा पा ग्रीनीम। योएल १:१५ 15 मेको नाक्त गाइक्चा डा नाक्त दुम्ब। श्येत नु हिंचा डा नाक्त दुम्ब। नेल्ल ब्रेत्तीक नु खतम दुम्तीक नाक्त दुम्ब। मेको नाक्त छिडछिड नु हिंचा डा दुम्ब। गोस्सुम गिल्शो नु शुश छिडछिड डा नाक्त दुम्ब। 16 गारोम हिरशो सहरपुकी नु गारो डा कुनाम बाक्शो लाइशो खिं आन कली लडाइ तोचा कली तुराही ताप्शो नु लडाइ डा रेयके पशो नेंसीब। येरमीया ३०:७ 17 गो मुर आन कली शुश श्येत गेनुड। मिनु मेको मिक्च मताइब खोदेशो पा गाक्नीम। मारदे हना मेकोपुकीम परमप्रभु यावे आ डोंइती पाप पाम्तेक्म। मेको आन हुश फुरक खोदेशो नु श्ये ख्री खोदेशो पा ताइक्नीम। 18 परमप्रभु यावे गाइक्ची नाक्ती मेको आन चांदीमी मप्रोंइब। मेको आन सुनमी यो मेको आन कली प्रोंइने मचाप्ब। मेको आ मी खोदेशो पा गाइक्तीकेमी रागी नेल्ल क्रोइक्ब। मेकोमी रागीम बाक्ब नेल्ल आन कली थम मरिम्शो पा साइशशा क्याम्ब” दे परमप्रभु यावेमी देंत। इजीकीएल ७:१९

2

पलिस्ती आन कली लोव

1 मिनु मेकोमी “गे मुने मपाइशो रागी डा मुर, गे नेल्ल काथा बुक्कीन।

2 इन नाक्त फशेम बेरशो भूस खोदेशो पा लाक्नीम। आ योव्रशो नाक्त जाक्चा, परमप्रभु यावे आ शुश गाइशो इन तार जुक्चा नु परमप्रभु यावे आ गाइशो नाक्त जाक्चा क्येडा डोंइती, 3 गे रागी डा परमप्रभु यावे आ डोंइती ठीक पाइब नु ब्रेम्शो मुरपुकी परमप्रभु यावे कली मालीन। गे ठीक पाइब नु ब्रेम्शो थुं पाइशो दुम्चा मालीन। मिनु परमप्रभु यावेमी आ गाइशो नाक्त इन कली खुइक्बा कों? आमोस ५:१५ 4 गाजा मुर मबाक्थु, श्येतथ दुम्ब। अशकलोन नेल्ल ब्रेशशा खतम दुम्शा प्रोंइसीब। नाक्ती उइक्थ दुम्मेनु अशदोद डा मुर खेरचा पुंइसीनीम। एक्रोन चहिं तुल्चा पुंइसीब।

5 आबी आबी, समुन्द्र आ शुंगीम बाक्ब केरेथी जात डा मुर परमप्रभु यावे आ लोव इन कली ‘गे पलिस्ती आन रागी बाक्ब, कनानी, इ कली सुइ मुर मबाक्चा डा पा खतम सेल्लुड’ देंत। १सामुएल ३०:१४; येरमीया ४७:- 6 केरेथी आन बाक्तीक समुन्द्र आ शुंगी डा रागी बी ब्यफ, क्यारश भेडा योव्रतीके दुम्ब। भेडा गोठला आन बाक्तीक दुम्ब। मेको आन भेडा मेकेर वोइक्नीम। 7 मेको समुन्द्र आ शुंगी डा रागी यहूदा आ खिं डा लीशो मुर आन के दुम्ब। मेकोपुकीमी मेकेर आन बी ब्यफ, क्यारश भेडा योव्रनीम। नाक्दो मेकोपुकी अशकलोन आ खिंपुकीम इप्नीम। मारदे हना परमप्रभु यावे, आन परमप्रभुमी मेको आन कली कोव्रब। मिनु मेको आन कली डोंइती खोदेशो पा रिम्शो पा बाक्चा गेब” देंत। सेफन्याह ३:२०

मोआबी नु अम्मोनी आन लोव

8 मिनु “गो मोआब नु अम्मोनी आन शुक्शी पशो नेंता। मेकोपुकीमी आं मुर आन कली मरिम्शो पाम्तेक्म। मेको आन रागी कली ‘खतम पोक्नीक’ दे हिंच कोइताक्म। येरमीया ४८:-; येरमीया ४९:१-६ 9 मोपतीके मुर नेल्ल आन परमप्रभु यावे, इस्राएली आन परमप्रभुमी ‘गो ब्रोंइशा बाक्शो खोदेशो पा, मोआब सोदोम खोदेशो नु अम्मोन गोमोररा खोदेशो दुम्ब। मेको आन बाक्तीके चूले वाशो नु हिक्सी खाल्टा बाक्शो रागी दुम्ब। मेको गेना हना यो मुर मबाक्तीक रागी दुम्ब। आं लीशो मुरपुकीमी मेको आन मार मार रोइक्नीम। मिनु आं रागी डा ब्रोंइशो मुरपुकीमी मेकेर हुकुम पाइनीम। उत्पत्ती १९:२४-२५ 10 मेको आन ठेयब लेशो आ पा डा मोदेशो ताइनीम। मारदे हना मेकोपुकीमी मुर नेल्ल आन परमप्रभु यावे आ मुर आन कली शुक्शी पा आंम कली ठेयब सेल्शो बाक्नीम। 11 परमप्रभु यावेमी मेको आन कली थम मरिम्शो पाइब। रागी डा देवी देवता नेल्ल आन कली खतम पोक्ब। नेल्ल आन बाक्तीकेमी बाक्शा, मेको आ डोंइती बाप्चा मालनीम। रागी रागी समुन्द्र आ सुंगी नु टापु डा मुर नेल्ल परमप्रभु यावे आ डोंइती बाप्नीम’ देंत।

एथीयोपीया नु अस्सुर कली लोव

12 गे एथीयोपीया डा मुर यो आं तरवारमी साइक्चा पुंइसीनीनी” दे परमप्रभु यावेमी देंत। इजीकीएल ३०:९ 13 मेकोमी उत्तर गे आ गुइ दिंशा अस्सुर कली खतम पोक्ब। निनवे कली कोक्त नु गोरशो रागी खोदेशो सेल्ब। नहुम १:१

14 मेकेर बी ब्यफ नु ब्वाकी डा जन्तु नेल्ल इप्नीम। गोरशो रागी डा बुक्स नु ग्रीब बुक्सपुकीम मेको आन थाम तारी ग्योव्र सेल्नीम। बुक्स झेल रे पा ग्रीनीम। खदपुकी लाप्चोम ग्रीनीम। मिनु दारपाइक्चा कली क्येप्शो शी नेल्ल

लां रे तांडसीब। यसैया १३:२१; यसैया ३४:११ 15 मेको महिंथु थुं नाइशशा बाक्ब सहर मबाक्बा डा? मेकोमी आंम कली “गो गोन नड। आं क्येडा लाक्शा अरु सुइ मबाक्नीम” देंत। मेको मुल दोदेशो पा ब्रेशो दुम्मे? मेको ब्वाकी डा जन्तु आन बाक्तीके दुम्त। मेको लां रे पा गाक्ब नेल्ल मेको तशा आबी, दे हिंशा खिंखि पाइनीम। यसैया ४७:८

3

यरूसलेम आ नोले डा नाक्त

1 मेकोमी “आं देशो गेनायो मटीब, ग्रांग्रा दिचा डा नु मुर आन कली दिप्ब सहर बाक्ब। 2 मेकोमी सुइ आन देशो मटीब। रिम्शो पचा कली हुइशशो लोत्र मनेंब। मेकोमी परमप्रभु यावे कली थमा मसुइक्थु, आ परमप्रभु आ नेक्था मजाक्ब।

3 मेको सहर डा सरकार डा ठेयब मुर ग्रीब गुप्स खोदेशो बाक्नीम। मेको आ निसाफ पाइब नाक्दो गाक्शा, सुनी सम्म मारेइ महेंब फर नम। इजीकीएल २२:२७ 4 मेको आ परमप्रभु यावे आ लोत्र पाइबपुकी हेंथे पाइब नु थमा मसुइक्चा डा मुर बाक्नीम। मेको आ चढेबपुकीमी परमप्रभु यावे आ खिं ग्रांग्रा दिशो सेल्नीम। मेकोपुकीम परमप्रभु यावे आ अरेशो लोत्र हेंथे सेल्लेक्म। मीका ३:११ 5 मेको आन दातेम बाक्ब परमप्रभु यावे ठीक पाइब बाक्ब। मेकोमी मारेइ मरिम्शो मपाइब। मेकोमी सुनी कुस कुस निसाफ पाइब। तेकोइ सुनी मप्रोइब। तन्न ठीक मपाइबपुकी मुने दोक्शा लल मजिनीम।

6 गो रागी रागी डा मुर आन कली खतम पोक्ता। मेको आन ब्रोंइशा बाक्तीक खिं प्रेशशा गेता। मेको आन लां नेल्ल श्येतथ सेल्ला। मेकेर रे सुइ मगाक्नीम। मेको आन सहरपुकी श्येतथ बाक्नीम। मेकेर सुइ मुर मबाक्नीम। 7 मो पडा नोले मेको सहर डा मुरपुकी आं कली तशा मान पा हिंनीम। आं देशो पाइनीम, दे मिम्ताड। तन्न मेकोपुकीमी डोंइती क्येडा मरिम्शो गेय पाम्तेक्म” देंत।

8 परमप्रभु यावेमी “मोपतीके लोत्र पचा कली गो मजाक्डा सम्म आं कली रिम्शा बाक्कीन। गो रागी रागी डा मुर आन कली खुप्नुड। गो राज्य राज्य डा मुर आन कली गुम्पाइक्नुड। मेको आन तारी आं गाइशशो मोइक्नुड। मारदे हना आं मी खोदेशो पा गाइशशोमी रागी रागी नेल्ल ग्रीइशशा खतम दुम्नीम। योएल ४:२; भजन संग्रह ७९:६

9 मेना जात जात डा मुर आन कली रिम्शो लोत्र पाइब सेल्लुड। मिनु मेको नेल्लेमी परमप्रभु यावे कली पुंइशा ठेयब सेल्लेक्ल। मेको नेल्ल गारशा आ गेय पामेक्ल। 10 मिनु आं नें ठेयब सेल्ल एथीयोपीया डा खोला आइक्ची हांम डा ब्रशा बाक्शो आं मुरपुकीमी आं कली चढेतीक थोत्रक चाक्नीम। भजन संग्रह ६८:३२; यसैया १८:१; प्रेरित ८:२७

11 मेको नाक्त आं कली मटिशो आ पबर्म गे मुने दोक्चा ममाल्नीनी। मेना इ दाते डा ठेयब लेशशो मुर आन कली गुंइनुडमी। आं डांडामी गे लेंशा ठेयब लेशशो मदुम्नेवे। 12 गो इ दातेमी ब्रेशो नु प्रुडग मुर लीचा गेनुडमी। मेकोपुकीम ‘परमप्रभु यावे आंइ कली वारच पाइब बाक्ब’ दे थमा सुइक्नीम। इजीकीएल ६:८ 13 इस्राएल डा लीशोपुकीमी लेंशा दूली मपाइनीम। मेकोपुकीमी जोल मपाइनीम। हेंथे लोत्र मपाइनीम। मेकोपुकी जशा तूशा गोल्शा बाक्नीम। सुइम मेको आन कली हिंच मकोइनीम।

14 सियोन आ तमी, ठेयब सेंदा पा कुम्सो पावो। इस्राएल, ठेयब सेंदा पा ग्रीडो। यरूसलेम आ तमी इ थुं नेल्लेम ग्येरशा सोम्शा बाक्को। 15 परमप्रभु यावेमी इ सजाइ क्याम्शा गेशो बाक्ब। मेकोमी इ जोरी सत्रु आन कली सोइशशो बाक्ब। इस्राएली आन पिप, परमप्रभु यावे गे नु बाक्ब। मुल डा मेरे गे तेकोइ श्येत रे हिंचा ममाल्नेवे। जकरिया ९:९ 16 मेको नाक्त यरूसलेम कली सियोन डा मुर महिनीन। गे शुश गेय पने। 17 परमप्रभु यावे, इन परमप्रभु इन दातेमी बाक्ब। मेको बोल्यो बाक्शा, श्येत रे प्रोंइब बाक्ब। मेको इन कली तशा, शुश ग्येरशो बाक्ब। मेकोमी आ दाक्तीकेमी इन कली नक मुर सेल्लब। मेकोमी इन कली तशा ग्येरशा कुम्सो पाइब। यसैया ६२:५ 18 चाडमी ग्येरशो खोदेशो पा कुम्सो पाइब। आन क्येडा डोन बाक्ब आन कली खुप्नुड। मेको इन मुर नम। आं पबर्म शुक्शी पाइक्चा पुंइसीनीम। 19 मेना गो इन कली दिप्ब आन कली सजाइ गेनुड। गो खोइल मदुक्ब आन कली श्येत रे प्रोंइनुड। मिनु ब्रशा बाक्शो आन कली खुप्नुडमी। मेको आन कली मुने तोक्शो रागीम आं पा डा मान ताइब सेल्लुडमी। मीका ४:७ 20 मेना गो इन कली खुप्शा चाक्नन्नी। मारदे हना गो इन कली रागी नेल्ल डा मुर आन दातेमी ठेयब सेल्ला, मान ताइब सेल्लन्नी। मिनु गो नेल्ल आन तचा डा पा इन कली डोंइती खोदेशो पा रिम्शो पा बाक्चा गेनन्नी” दे परमप्रभु यावेमी देंत। सेफन्याह २:७; येरमीया २९:१४

हाग्वै

ब्रेक्ब मुर: एको किताब हाग्वैमी ब्रेक्शो बाक्ब। मेकोमी यहूदीपुकी ग्याइशशा लाइशशो, यरूसलेम लेशशो जकरिया नु परमप्रभु यावे आ खिं लेंशा सेल्चा गेय पशो बाक्त।

गेना ब्रेक्शो: यहूदी ग्याइशशा लाइशशा यरूसलेम लेशशो १६ बर्स नोले ५२० बि. सी.मी परमप्रभु यावे आ खिं सेल्चा कली जग वोइशशो बाक्तेक्म। मेको आ डोंइती नु सेल्ची ना हाग्वैमी एको लोव पा ब्रेक्शो बाक्त।

मारदे ब्रेक्शो: परमप्रभु यावे आ खिं लेंशा सेल्चा माल्नीम। मोपतीके हाग्वै आ शेंचा माल्शो लोव “गो श्येत जाइनीकी। मोपतीके परमप्रभु यावे आ खिं सेल्चा कली मारेइ गेने मचाप्नीकी” देंनीनी। तन्न “मारदे मगेनीनी, मोपतीके श्येत जाइनीनी” देंब।

परमप्रभु आं खिं सेलीन, दे अरेशो

1 पिप दाराम सासन पशो बर्स निक्शी, ६ महिना डा डोंइती डा नाक्त परमप्रभु यावेमी आ लोव पाइब हाग्वै कली लोव पाप्तु। मेको लोव यहूदा रागीम हुकुम पाइब जेरूब-बाबेल नु नेल्ल क्येडा ठेयब चढेब यहोसु आस कली बाक्त। जेरूब-बाबेल शाल्तीएल आ तौ बाक्त। यहोसु चहिं यहो-सादाक आ तौ बाक्त। एज्रा ४:२४; एज्रा ५:१; एज्रा ५:२ 2 मिनु हाग्वैमी “मुर नेल्ल आन परमप्रभु यावेमी मार देत देशा हना ‘एको मुरपुकीमी परमप्रभु यावे आ खिं मुल लेंशा सेल्ची मजाक्शो बाक्ब देंनीम’ ” देत। 3 मिनु हाग्वैमी परमप्रभु यावे आ लोव पा “परमप्रभु यावेमी मार देंब देशा हना 4 ‘आं खिं ब्रेक्शो खतम दुम्शो बाक्ब। गे चहिं दारशो शी क्येप्शो खिंम बाक्चा रिम्शो दुम्बा डा?’ देशो बाक्ब” देत। २सामुएल ७:२ 5 मिनु मुर नेल्ल आन परमप्रभु यावेमी “गे दोदेशो बाक्नीनी, मिम्तीन। 6 गे शुश शोक्तीनी, तन्न इच्का ला खुप्ताक्नी। गे जाइनीनी, तन्न मरूनीनी। गे तूनीनी, तन्न इन तूत दाक्तीके मबेक्ब। गे फेक्नीनी, तन्न इन रां महोइब। गे शुश गेय पा क्येट चेम्नीनी, तन्न होइशशो थैलीम कुर पा वोइक्नीनी” देत। ब्यवस्था २८:३८

7 मिनु मुर नेल्ल आन परमप्रभु यावेमी मार देत देशा हना “गे दोदेशो बाक्नी, मिम्तीन। 8 डांडा मेर डोइशशा शी यितीन। मिनु आं खिं सेलीन। मिनु गो मेको तशा, ग्येरशा बाक्ने चबुल। मोपा मुरपुकीम आं कली ठेयब सेल्यीमील। 9 गे शुश आस पाइतीनी, तन्न इच्का ला ताइतीनी। मिनु गे खिंमी मार चाक्नी, गो मेको कली मुइशशा बेरपाइक्ता। गो मारदे मोदेशो पाता देशा हना, आं खिं ब्रेन्ने थुम्शो बाक्ब। गे चहिं आंम खिं कली ला मिम्नीनी। 10 मोपतीके सरीड रे सीत यिचा प्रोंइतु। मिनु रूमी मारेइ मारेइ वाचा प्रोंइशो बाक्ब। १राजा १७:१ 11 मिनु गो रू नु डांडा तार रेउ मयिपदु। अन्न, अडगुर, तेल नु रूम सिप्ब मारेइ मारेइ मसिप्पदु। मुर नु रागीम ब्रोंइशो नेल्ल आन कली श्येत जपाइक्ता। मुर आन गेय नेल्ल शोर गाक्शो सेल्ता” देत। हाग्वै २:१७; आमोस ४:९

12 मिनु शाल्तीएल आ तौ जेरूब-बाबेल नु यहो-सादाक आ तौ, नेल्ल क्येडा ठेयब चढेब यहोसु नु लीशो मुर नेल्लेमी परमप्रभु यावे आन परमप्रभु आ लोव टिम्तेक्म। मिनु परमप्रभु यावे आन परमप्रभु आ देशो नु आ लोव पाइब हाग्वै आ देशो लोव टिम्तेक्म। मिनु मुरपुकी परमप्रभु यावे कली मान पा हितेक्म। 13 मिनु परमप्रभु यावे आ सोइशशो लोव पाइब हाग्वैमी “परमप्रभु यावेमी मुर आन कली ‘गो गेपुकी नु बाक्नुड’ देशो बाक्ब” देत। मलाकी २:७ 14 मिनु परमप्रभु यावेमी शाल्तीएल आ तौ, यहूदा रागीम हुकुम पाइब, जेरूब-बाबेल नु यहो-सादाक आ तौ, नेल्ल क्येडा ठेयब चढेब, यहोसु नु लीशो मुर आन थुं कली जोंब पोक्ताक्व। मिनु मेकोपुकीमी मुर नेल्ल आन परमप्रभु यावे, आ खिं सेल्चा गोम्तेक्म। 15 मिनु मेकोपुकीमी पिप दाराम सासन पशो बर्स निक्शी, ६ महिना, २४ नाक्तीमी परमप्रभु यावे आ खिं सेल्चा गोम्तेक्म।

2

परमप्रभु आ खिं लेंशा सेल्शो

1 पिप दारामी सासन पशो बर्स निक्शी, ७ महिना २१ नाक्तीम परमप्रभु यावे आन परमप्रभुमी हाग्वै कली लोव पाप्तु। मार लोव पाप्तु देशा हना, 2 “गे शाल्तीएल आ तौ यहूदा रागीम हुकुम पाइब, जेरूब-बाबेल नु यहो-सादाक आ तौ नेल्ल क्येडा ठेयब चढेब यहोसु नु लीशो मुर आन कली 3 ‘इन दाते डा सु सुमी परमप्रभु यावे आ डोंइती डा खिं आ दारस तनी? मुल एको खिं दोदेशो तांइसीबा? मार, एको मदारशो तांइसीबा? दे हिल्लो पावो’ ” देत। एज्रा

३:१२ 4 मिनु मुर नेल्ल आन परमप्रभु यावेमी “जेरूब-बाबेल, महिनो। यहो-सादाक आ तौ नेल्ल क्येडा ठेयब चढेब यहोसु गे यो महिनो। मिनु मेकेर डा मुर नेल्ल महिनीन। गेय पचा गोने। मारदे हना गो गेपुकी नु बाक्नुड। 5 गेपुकी इजीप्त रागी रे पा गूशा पिनीनु, गेपुकी नु कबल का पाता। आं सोक्त गेपुकी नु बाक्ब, दे कबल पाता। मोपतीके महिनीन” दे मुर नेल्ल आन परमप्रभु यावेमी देंत। प्रस्थान १९:५; जकरिया ४:६ 6 मिनु मुर नेल्ल आन परमप्रभु यावेमी “मुल इच्का नोले गो लेंशा सरीड, रागी, समुन्द्र नु गोरशो रागी कली हिम्नुड। हिब्रू १२:२६ 7 गो रागी रागी डा मुर आन कली हिम्नुड। मिनु रागी रागी डा शोप नेल्ल एकेर चाक्नीम। मिनु गो एको खिं कली आं दारसीम प्रिनुड। 8 सुन चांदी नेल्ल आं के बाक्ब। 9 मोपतीके एको खिं आ मुल डा दारस क्येडा नोले डा दारस शुश रिम्शो दुम्ब। मिनु एकेर आसीक शुश गेनुडमी” दे मुर नेल्ल आन परमप्रभु यावेमी देंत।

परमप्रभुम आसीक गेशो

10 पिप दारामी सासन पशो बर्स निक्शी ९ महिना २४ नाक्तीमी परमप्रभु यावेमी आ लोव्र पाइब हागै कली लोव्र पाप्तु। 11 मिनु हागैमी “मुर नेल्ल आन परमप्रभु यावेमी मार देंत देशा हना ‘चढेबपुकीम मार देंबाक्मा, दे हिल्लो पावो’ ” देंत। 12 मिनु हग्गाइम “सुइ मुरुमी किप्शुरम पोल्टो पा चढेशो श्ये कुरशो बाक्त हना नु मेको आ किप्शुर आ सुरमी शोब्ले, खाइ, अडगुर शांबु, तेल नु अरु मारेइ जचा थोव्रक थिप्तु हना, मेको चोव्रखो दुम्नीमी?” दे हिल्लो पाप्तु। मिनु चढेबपुकीम “मदुम्नीम” देंतेक्म। 13 मिनु हागैमी “बेक्शो मुर थिशा, ग्रांग्रा दिशो दुम्शो मुरुम मारेइ थोव्रक थिप्तु हना, मेको थोव्रक ग्रांग्रा दिशो दुम्बा?” दे हिल्लो पाप्तु। मिनु चढेबपुकीमी “मेको ग्रांग्रा दिशो दुम्ब” देंतेक्म। लेवी ५:२; गन्ती १९:२२ 14 मिनु हागैमी “परमप्रभु यावेमी मार देंब देशा हना ‘आं डोंइती बाक्शो एको रागी डा मुरपुकी मोदेंशोन बाक्नीम। मेकोपुकीम मार मार पाइनीमी, मार मार चढेनीमी मेको नेल्ल ग्रांग्रा दिशो बाक्ब’ देशो बाक्ब” देंत। एजा ४:१-३

मुर आन थुं बारपाइशो

15 मिनु परमप्रभुमी “गे मुलाक्त डा मेरे मार दुम्बा, मेको रिम्शो पा मिम्तीन। परमप्रभु यावे आ खिं सेल्शोन, फुल्लु तार फुल्लु वोइशशा गारो प्रोव्रचा क्येडा डोंइती दोदेंशो बाक्मे, मेको मिम्तीन। 16 गे दोदेंशो बाक्नी? गे २० सेआह बाक्ब, दे मिम्ताक्नी हना, मेकेर १० सेआह ला बाक्ब। अडगुर खाक्शा, ५० गर रस ताप्नुड, दे मिम्ताक्नी हना, २० गर ला दुम्ब। सेआह का ७ लिटर खोदेंशो बाक्ब। गर कली हिन यो देंनीम। हिन का ६,५ लिटर बाक्ब। हागै १:१६ 17 गो इन कली नु इन रूम खुम्शो मारेइ मारेइ खतम सेल्ला। मेको सोव्रपाइक्ब रोइ, बुंखी डाइक्तीक रोइ नु मुप्सीम खतम सेल्ला। मो हना यो गे आं गे मलेन्नी। हागै १:११ 18 मुल ९ महिना २४ नाक्ती, परमप्रभु यावे आ खिं डा जग वोइशशो नाक्त रे मार दुम्बा, मेको कोव्रडीन। 19 मार, गे नु वांचेर बाक्मे? अडगुर बोट, फोव्रशी रवा, अनार नु तेल रवामी मुल सम्म फल मसिश्शो बाक्मा? मुलाक्त डा मेरे गो इन कली आसीक गेनन्नी” दे परमप्रभु यावेमी देंत।

परमप्रभु आ लोव्र

20 मिनु ९ महिना डा २४ नाक्ती परमप्रभु यावेमी लेंशा हागै कली लोव्र पाप्तु। 21 मार लोव्र पाप्तु देशा हना “गे यहूदा रागीम हुकुम पाइब जेरूब-बाबेल कली ‘गो सरीड नु रागी हिम्चा चिक्शो बाक्नुड। 22 गो पिप आन राज्य खतम पोक्नुड। गो रागी रागी डा राज्य थुम्पाइक्चा चिक्शो बाक्नुड। गो बग्गी नु बग्गी डोइक्ब आन कली थिप्पाइक्नुडमी। शारा नु शारा डोइक्बपुकी आंम लोक्ब आन तरवारम क्योरचा पुंइसीनीम’ देनो” देंत। 23 मिनु मुर नेल्ल आन परमप्रभु यावेमी “मेको नाक्त शाल्तीएल आ तौ, आं गेय पाइब, जेरूब-बाबेल गो इ कली छाप पाइशो औंठी खोदेंशो सेल्लन। मारदे हना गो इ कली योव्रशो बाक्नुड” दे मुर नेल्ल आन परमप्रभु यावेमी देंत। जकरिया ४:६-७

जकरिया

ब्रेक्ब मुर: जकरिया बेरेक्याह आ तौ, इददो आ चच बाक्त। इददो चढेब आ खिं डा ठेयब मुर बाक्त। जकरिया यहूदीपुकी ग्याइशशा लाइक्चा पुंडसीमानु, बेबीलोनम जरमेशो बाक्त। डोंइती यरूसलेम लेप्ब चढेब आन दातेमी मेको यो बाक्त। एको किताब ब्रेक्ब परमप्रभु यावे आ लोत्र पाइब जकरिया बाक्ब।

गेना ब्रेक्शो: ५२०-५१८ बि. सी. पिप दाराम सासन पशो बर्स निक्शी दुम्मेनु, परमप्रभु यावे आ लोत्र पाइब जकरियामी गेय पशो बाक्त। मेना परमप्रभु यावे आ लोत्र पाइब हागैम यो लोत्र पशो बाक्त।

मार ब्रेक्शो: जकरियामी मुर आन शुश श्येत जची ना मेको आन कली थुं बारपाइक्तीक लोत्र पवा बाक्त। मेकोमी मस्सीह जाक्ब, दे परमप्रभु यावे आ लोत्र ब्रेक्शो बाक्ब। मस्सीह आ पर्वम:

१. मस्सीह गधा आ चाइक्ब डोइशशा यरूसलेम ओत्रब जकरिया ९:९; मत्ती २१:५
२. मस्सीह ३० ओटा चांदी के शेकेलम लेयचा पुंडसीब जकरिया ११:१२; मत्ती २६:१५
३. मेको क्येटीमी मार पाइनीम जकरिया ११:१३; मत्ती २७:९-१०
४. मस्सीह बेक्शो जकरिया ११:-; १३:७; यूहन्ना १०:११-१८
५. थमा सुइक्ब ब्रशो जकरिया १३:७; मत्ती २६:३१; जकरिया १२:१०; यूहन्ना १९:३७

परमप्रभु गे लेतीन, दे अरेशो

१ पिप दारामी सासन पशो बर्स का ८ महिना दुम्मेनु, परमप्रभु यावेमी इददो आ चच, बेरेक्याह आ तौ परमप्रभु यावे आ लोत्र पाइब जकरिया कली लोत्र पाप्तु। परमप्रभु यावेमी मार लोत्र पाप्तु देशा हना, एज्रा ५:१ ^२ “परमप्रभु यावे इन किकी पिपी आन पर्वम शुश गाइक्ताक्ब। ^३ मोपतीके मुर नेल्ल आन परमप्रभु यावेमी मुर आन कली मार दंत देशा हना ‘आं गे लेतीन। मिनु गो इन कली कोत्रनुड। मलाकी ३:७; याकूब ४:८ ^४ साइ डा आं लोत्र पाइबपुकीमी इन किकी पिपी आन कली लोत्र पाप्तेक्म। मेकोपुकीमी मुर नेल्ल आन परमप्रभु यावेमी इन कली मार लोत्र पाप्तु देशा हना इन मरिम्शो लां रे नु इन मरिम्शो पतीके रे परमप्रभु आ लां गे लेतीन, दे लोत्र पाप्तेक्म। तन्न इन किकी पिपीमी आं लोत्र मनेंथु मटीम। गेपुकी मेको आन खोदेशो मपने। येरमीया ३:१२; इजीकीएल ३३:११ ^५ इन किकी पिपी ते बाक्नीमी? आं लोत्र पाइबपुकी गेना हना यो ब्रोंइशा बाक्नीमी डा? ^६ तन्न गो आं गेय पाइब, आं लोत्र पाइब आन कली पशो लोत्र नु आं फुल्लुम मुशा ब्रेक्शो लोत्र इन किकी पिपी आन पाला रे मुल सम्म मबाक्म डा?’ मिनु मेकोपुकी परमप्रभु यावे गे लेत्चा माल्शा, मेकोपुकीमी ‘मुर नेल्ल आन परमप्रभु यावेमी आंइ मरिम्शो लां नु आंइ मरिम्शो पशो आ पर्वम आ देशो खोदेशो पा पाप्तु’ दैतेक्म” दे मुर नेल्ल आन परमप्रभु यावेमी दंत।

लल शारा डोइक्ब

^७ मिनु पिप दारामी सासन पशो बर्स निक्शी, शेबात माइशशो ११ महिना डा २४ नाक्ती इददो आ चच, बेरेक्याह आ तौ जकरिया, परमप्रभु यावे आ लोत्र पाइब आ बाक्तीकेमी परमप्रभु यावे आ लोत्र जाक्त। ^८ मिनु जकरियामी “गो नाक्दो लल शारा डोइक्ब का गाक्शो ताता। मेको दिंममी बाक्शो मूरे रवा आन दातेमी दिक्शा राप्शा बाक्शो बाक्त। मिनु मेको आ नोले अरु लल, खाइरो नु बुश शारापुकी राप्शो बाक्तेक्म। जकरिया ६:१-८ ^९ मिनु गो नु लोत्र पाइब, परमप्रभु यावे आ स्वर्ग डा गेय पाइब कली ‘आं प्रभु, मेको मार कली नमी?’ दे हिल्लो पाता। मिनु मेकोमी ‘एको मार कली नमी, दे गो इ कली कोंइनन’ दंत। ^{१०} मिनु नोले मूरे रवा आन दातेमी राप्शा बाक्ब मुरुमी लोत्र लेशशा ‘परमप्रभु यावेमी एको आन कली रागी नेल्ल हिरशा कोत्रचा कली सोइक्ताक्ब’ दंत। ^{११} मिनु नोले शारा डोइक्बपुकीमी मूरे रवा आन दातेमी बाक्ब परमप्रभु यावे आ स्वर्ग डा गेय पाइब कली ‘गो रागी नेल्ल हिरशा कोत्रतक। मिनु रागी नेल्ल डा मुर सिक्सी पा नाइशशा बाक्शो बाक्तेक्म’ दैतेक्म। ^{१२} मिनु परमप्रभु यावे आ स्वर्ग डा गेय पाइबमी ‘मुर नेल्ल आन परमप्रभु यावे, गे गेना सम्म यरूसलेम नु यहूदा सहर डा मुर आन कली शिशी मपाइनीनी? गे मेको आन कली मुल रे ७० बर्स सम्म गाइक्ना गाइक्न बाक्शो बाक्तीनी’ ” दंत। भजन संग्रह १०२:१४; दानीएल ६:२ ^{१३} मिनु परमप्रभु यावेमी गो नु लोत्र पाइब, आ स्वर्ग डा गेय पाइब कली रिम्शो नु थुं बारपाइक्तीक लोत्र पाप्तु। ^{१४} मिनु स्वर्ग डा गेय पाइबमी आं कली “परमप्रभु आ लोत्र नेल्ल आन कली नेपतो। मिनु मुर नेल्ल आन परमप्रभु यावेमी ‘गो यरूसलेम नु सियोन कली शुश रुश पशो बाक्नुड। ^{१५} रिम्शो पा बाक्ब रागी रागी डा मुर आन कली तशा शुश गाइशशो बाक्नुड।

गो डोंइती इच्का ला गाइक्ताक्ड। मिनु मुरपुकीमी तेम्शा मरिम्शो पचा गोम्तेक्म' देंत। येरमीया ४७:६ 16 मोपतीके परमप्रभु यावेमी मार देंत, देंशा हना 'गो शिशी पा यरूसलेम लेत्ती। मेकेर आं खिं लेंशा सेल्चा माल्नीम। मिनु यरूसलेम नेल्लेमी पुक्तीक डोरी कीचा माल्नीम' दे मुर नेल्ल आन परमप्रभु यावेमी देंत। जकरिया ८:३ 17 मिनु मुर नेल्ल आन परमप्रभु यावेमी मार देंत, देंशा हना 'आं सहरपुकी लेंशा शुश सोशो बोशो दुम्चा माल्नीम। परमप्रभु यावेमी सियोन कली लेम्शा शिशी पाइब। मिनु यरूसलेम कली योत्रब' ” देंत। यसैया ४०:१-२; यसैया १४:१

४ ओटा ग्रोत्र नु ४ जना तुप्तील

18 मिनु इर गे कोव्रडुनु, ४ ओटा ग्रोत्र ताता। 19 मिनु गो नु लोत्र पाइब, स्वर्ग डा गेय पाइब कली “एको मार में?” दे हिल्लो पाता। मिनु मेकोमी “एको ग्रोत्रपुकीमी यहूदा, इस्राएल नु यरूसलेम डा मुर आन कली एर ओंथ फ्राम्तेक्म” देंत। 20 मिनु नोले परमप्रभु यावेमी आं कली ४ जना तुप्तील कोइताक्यी। 21 मिनु गो “एको मार पचा कली जाक्मा?” दे हिल्लो पाता। मिनु मेकोमी “मेको ग्रोत्रपुकीमी यहूदा कली मबोक्चा डा पा खोल्शो बाक्तेक्म। मिनु मेको तुप्तीलपुकी रागी रागी डा मुर आन कली ब्रपाइक्ब ग्रोत्र खोदेंशो ठेयब हुकुम पाइब मुर आन कली श्येत गेशा साइक्चा कली जाक्शो बाक्तेक्म। मारदे हना मेकोपुकीमी यहूदा डा मुर आन कली फ्रना फ्रन बाक्तेक्म” देंत।

2

पुक्तीक डोरी

1 मिनु गो इर कोव्रडुनु, पुक्तीक डोरी शेशो मुर का आं डोंइती राप्शो ताता। इजीकीएल ४०:३ 2 मिनु गो मेको कली “गे ते गाक्नी?” दे हिल्लो पाता। मिनु मेकोमी आं कली “यरूसलेम पुक्शा, मेको दोशो दुइश्शो नु दोशो ब्रेम्शो बाक्मे, मेको कोव्रथ लती” दे माइक्ती।

3 मिनु मेको गो नु लोत्र पाइब, स्वर्ग डा गेय पाइब जाक्त। मिनु अर्को स्वर्ग डा गेय पाइब मेको कली ग्रुम्थ जाक्त। इजीकीएल ३८:११ 4 मिनु मेकोमी “दोरशा लशा मेको ठिटा कली ‘यरूसलेममी लेंशा शुश मुर बाक्चा माल्नीम। मुर नु बी ब्यफ, क्यारश भेडा शुश दुम्तीके यरूसलेम गारो मपाइश्शो गाउं खोदेंशो दुम्ब। 5 मिनु गो मेको आ एर ओंथ मी के गारो दुम्नुड। मिनु गो मेको आ आगा डा छेडछेड दुम्नुड’ दे परमप्रभु यावेमी देंत, देनो” देंत। जकरिया ९:८

इस्राएली लेशशा जाक्चा माल्शो

6 परमप्रभु यावेमी “जाक्कीन जाक्कीन, उत्तर डा रागी रे प्रोक्शा जाक्कीन। मारदे हना गो इन कली एर ओंथ डा फशेमी खोदेंशो पा फ्राता” दे परमप्रभु यावेमी देंत। 7 मेकोमी आं कली “आबी, सियोन, गे बेबीलोन डा मुर आन दाते रे बोक्शा, प्रोक्कीन। 8 मारदे हना मुर नेल्ल आन परमप्रभु यावेमी इन कली रोइक्ब रागी रागी डा मुर आन पर्बम मार देंत देंशा हना ‘सुमी इन कली थीबा, मेकोमी आं मिक्च आ क्रिक्बील थीब’ देंत। ब्यवस्था ३२:१० 9 मुल नेनीन, गो आं गुइ मेको आन पर्बम क्युक्नुड। मिनु मेको आन वाइलमी मेको आन कली रोइक्नीम। मिनु गेपुकीमी मुर नेल्ल आन परमप्रभु यावेमी आं कली सोइश्शो बाक्ब, दे तुइक्नीनी। ब्यवस्था ३२:१० 10 सियोन आ तमी, ग्येरशा सोम्शा कुम्सो पावो। मारदे हना गो इन दातेमी बाक्थ जाक्नुड। 11 मेको नाक्त शुश रागी डा मुरपुकी परमप्रभु यावे नु गारचा कली जाक्नीम। मेको नाक्ती मेको आं मुर दुम्नीम। मिनु गो गे इन दातेमी बाक्नुड। मिनु गेपुकीमी मुर नेल्ल आन परमप्रभु यावेमी आं कली इन कली लोत्र पथ सोइश्शो बाक्ब, दे तुइक्नीनी” दे परमप्रभु यावेमी देंत। यसैया ११:१० 12 परमप्रभु यावेमी यहूदा रागी कली आ के सेल्ब। मिनु यरूसलेम कली लेंशा योत्रब। जकरिया १:१७ 13 रागी डा मुर नेल्ल परमप्रभु यावे आ डोंइती सिक्सी पा बाक्कीन। मारदे हना मेको आ बाक्तीक रे पा गूशा जाक्शो बाक्ब। हबकुक २:२०

3

नेल्ल क्येडा ठेयब चढेब यहोसु

1 मिनु परमप्रभु यावे आ स्वर्ग डा गेय पाइबमी नेल्ल क्येडा ठेयब चढेब यहोसु कोइताक्यी। मेको परमप्रभु यावे आ स्वर्ग डा गेय पाइब आ डोंइती राप्शो बाक्त। मिनु सैतान मेको कली दोस गेचा कली आ ग्युरा गे राप्शो बाक्त। हागै १:१; अय्युब १:९; प्रकाश १२:१० 2 मिनु परमप्रभु यावेमी सैतान कली “सैतान, परमप्रभु यावेमी इ कली हुइक्ब। यरूसलेम कली योत्रब परमप्रभु यावेमी इ कली हुइक्ब। मार, एको मुर मी रे पा ग्रुंइशो बुल्सी खोदेंशो ममाइ डा?”

देंत। यहूदा :९ 3 यहोसु ग्रांग्रा दिशो लुम्सीशो वा फेक्शा, स्वर्ग डा गेय पाइब आ डोंइती राप्शो बाक्त। 4 मिनु मेको स्वर्ग डा गेय पाइबमी आ डोंइती बाक्ब आन कली “मेको आ ग्रांग्रा दिशो लुम्सीशो वा पुइक्तीन” देंत। मिनु मेकोमी यहोसु कली “गो इ मरिम्शो पशो नेल्ल क्याम्ताकड। गो इ कली रिम्शो वा फेक्नन” देंत। यसैया ६:७; यसैया ६१:३ 5 मिनु गो “मेको आ पियामी रिम्शो गुप्तीक का गुप्तीन” देंती। मिनु मेकोपुकीमी मेको कली रिम्शो गुप्तीके गुप्शा, रिम्शो वा फेक्ताकम। मिनु परमप्रभु यावे आ स्वर्ग डा गेय पाइब आ नेक्था राप्शा बाक्त। प्रस्थान २८:३९

6 मिनु नोले परमप्रभु यावे आ स्वर्ग डा गेय पाइबमी यहोसु कली 7 “मुर नेल्ल आन परमप्रभु यावेमी मार देंत देशा हना ‘गे आं लामी गाक्ते नु इ कली देशो लोत्र टिप्तीवी हना, गे आं खिं नु आं लाडगा नेल्ल कोत्रब दुम्नेवे। मिनु एकेर राप्शा बाक्ब आन दातेमी आं डोंइती जाक्ने चाप्नेवे। 8 यहोसु, नेल्ल क्येडा ठेयब चढ़ेब नु इ नेक्था बाक्ब इ खोदेशो गेय पाइबपुकी नोफा दाइशशा नेनीन। गो नोले आं गेय पाइब, राशी माइशशा चाक्नुड, मेकोपुकी मेको आ पर्बम चिन्ड बाक्नीम। यसैया ८:१८; जकरिया ६:१२; येरमीया २३:५; येरमीया ३३:१५ 9 मारदे हना गो यहोसु आ डोंइती फुल्लु का वोइक्ता। मेको आ तारी ७ ओटा मिक्च बाक्नीम। मिनु गो फुल्लु तारी मेको आ ब्रेक्स मुशा ब्रेक्नुड। मिनु गो काबुमीन मेको रागी डा मुर आन दोस नेल्ल क्याम्नुड। प्रस्थान ३९:६-७; जकरिया ४:१०; प्रकाश ५:६ 10 मेको नाक्ती गे नेल्लेमी आंम आंमा ब्रेम्मुशा अडगुर नु फोत्रशी आ पुंमी ग्येरशा गुम्नीनी’ दे मुर नेल्ल आन परमप्रभु यावेमी देंत” देंत। १ राजा ५:५; मीका ४:४

4

सुन के बत्ती दातीक

1 मिनु गो नु लोत्र पाइब, स्वर्ग डा गेय पाइब लेंशा जाक्त। मेकोमी आं कली मुर कली निन्द्रा रे पा पोक्शो खोदेशो पा सेंपाइक्ती। 2 मिनु मेकोमी आं कली “गे मार तवी?” दे हिल्लो पती। मिनु गो “सुन के बत्ती दातीक ताता। मेको आ तारी बोंस का बाक्त। मेको तारी ७ ओटा बत्ती बाक्तेकम। मेको बत्ती नेल्लेमी दातीक सल्लो वोइशशा बाक्तेकम। येरमीया १:११-१३; आमोस ८:२; प्रस्थान २५:३१-४० 3 मिनु मेको आ नेक्था तेल रवा निक्शी, का ग्युरा गे नु का पेरा गे बाक्ताक्स” देंती। 4 मिनु गो नु लोत्र पाइब, परमप्रभु यावे आ स्वर्ग डा गेय पाइब कली “आं प्रभु, मेको मार नसी?” दे हिल्लो पाता। 5 मिनु मेको गो नु लोत्र पाइब, परमप्रभु यावे आ स्वर्ग डा गेय पाइबमी “मेको मार नसी, गे मतुइक्नेवे?” देंत। मिनु गो “आं प्रभु, मतुइक्नुड” देंती। 6 मिनु मेकोमी आं कली “एको परमप्रभु यावेमी जेरूब-बाबेल कली पशो लोत्र बाक्ब। ‘बोलम ममाइ, सक्तिमी यो ममाइ, तन्न आं सोक्तीमी पाइनुड’ दे मुर नेल्ल आन परमप्रभु यावेमी देंत। 7 ठेयब डांडा गे मार नवे डा? जेरूब-बाबेल आ डोंइती गे दिंम दुम्चा माल्लेवे। मेकोमी परमप्रभु यावे आ खिं डा नोले डा फुल्लु वोदानु, मुर नेल्लेमी ठेयब सेंदा पा ‘रिम्शो दुम्त, रिम्शो दुम्त’ दे ठेयब सेंदा पा देंनीम” देंत। भजन संग्रह १२२:६

8 मिनु परमप्रभु यावेमी आं कली लोत्र पाप्तु। मार लोत्र पाप्तु देशा हना 9 “जेरूब-बाबेलमी एको परमप्रभु यावे आ खिं डा जग फुल्लु वोइशशा बाक्ब। मिनु मेकोमीन मेको खिं सेल्ले थुम्ब। मिनु मुर नेल्ल आन परमप्रभु यावेमी आं कली इन कली लोत्र पथ सोइशशा बाक्ब, दे तुइक्नीनी” देंती। एज्रा ३:८; एज्रा ६:१४-१६; जकरिया २:१३, १५ 10 मिनु “सु आइक्च गेय गोशो नाक्ती आइक्च सेल्बा? नोले मेकोपुकीमी जेरूब-बाबेल आ गुइमी गारो थाप्तीक श्येले तशा, ग्येरसीनीम। हागै २:३; जकरिया ४:७ मेको फुल्लु डा ७ ओटा मिक्च परमप्रभु यावे आ मिक्च बाक्नीम। मेको मिक्चीमी रागी नेल्ल कोत्रशो बाक्नीम” दे परमप्रभु आ लोत्र बाक्ब।

तेल रवा निक्शी

11 मिनु नोले गो मेको कली “एको बत्ती दातीक आ ग्युरा नु पेरा गे बाक्शो तेल रवा निक्शी मार में?” दे हिल्लो पाता। 12 मिनु लेंशा मेको कली “मेको सुन के तेल लुक्तीके निक्शीमी तेल लुक्ना लुक्न पशो, एको तेल रवा निक्शी आस राशी मार में?” दे हिल्लो पाता। 13 मिनु मेकोमी “एको मार बाक्बा, दे मतुइक्नेवे?” दे हिल्लो पती। मिनु गो “आं प्रभु, मतुइक्नुड” देंती। 14 मिनु मेकोमी “मेको रागी नेल्ल डा परमप्रभु यावे आ डोंइती राप्शा कली तेल लुक्चा पुंइसीशो बाक्नीसी” देंत। जकरिया ६:५; प्रकाश ११:४

5

तोल्शा प्राक्शो ब्रेक्स

1 मिनू गो इर गे कोव्रडुनु, प्राक्सीशो ब्रेक्स का बेरशो ताता। 2 मिनू मेकोमी आं कली “गे मार तवी?” दे हिल्लो पती। मिनू गो “२० कुबीत लाइशो नु १० कुबीत ब्रेमशो तोल्लो प्राक्सीशो ब्रेक्स बेरशो ताता” देंती। कुबीत का ०.५ मिटर बाक्ब। 3 मिनू नोले मेकोमी आं कली “एको रागी नेल्ल कली जाक्चशो सराप बाक्ब। मेको तोल्ला प्राक्शो ब्रेक्स निम्फा गे ब्रेक्सीशो बाक्ब। का गे खुइ आन पर्वम ब्रेक्सीशो बाक्ब। मारदे हना मेको मुल सम्म सजाइ मतशो बाक्तेक्म। अर्को गे जोल पा कसम जाइब आन पर्वम ब्रेक्सीशो बाक्ब। मारदे हना मेको यो मुल सम्म सजाइ मतशो बाक्तेक्म” देंत। 4 मिनू मुर नेल्ल आन परमप्रभु यावेमी “गो मेको ब्रेक्स सोइक्ताक्ड। मिनू मेको खुइ नु आं नेमी जोल पा सांकछी बाक्ब आन खिमी ओव्रब। मेकेर बाक्शा, खिं खतम सेल्शा, शी फुल्लु का यो मलीपाइक्ब” देंत।

डालोम निशशो मीश मुर

5 मिनू गो नु लोव्र पाइब, स्वर्ग डा गेय पाइबमी आं नेक्था जाक्शा “हरी इर कोव्रडो। मार गूमे?” देंत। 6 मिनू गो “मिरी मार में?” दे हिल्लो पाता। मिनू मेकोमी “मेकेर डालो का गूत” देंत। मिनू मेकोमी “एको रागी नेल्ल डा मुर आन दोस बाक्ब” देंत। 7 नोले हेल्शो सिसा के सुम्तीक रोक्साक्व। मिनू मेको डालोम मीश मुर का निशशा बाक्शो ताता। 8 मिनू मेकोमी “परमप्रभु यावे आ अरेशो मटितीके एकोन बाक्ब” देंत। मिनू मेकोमी मेको मीश मुर कली डालो आगा नेप्शा, हेल्शो सिसा के सुम्तीकेमी सुम्तु। 9 मिनू इर कोव्रडुनु, मीश मुर निक्शी पिशो तातासी। मेको आस फ्रांमी फश बाक्त। मेको आस फ्रां सारस के खोदेशो बाक्त। मेको निक्शीमी मेको डालो कली सरीड नु रागी आस दातेमी क्युक्शा लाइक्ताक्स। 10 मिनू गो नु लोव्र पाइब, स्वर्ग डा गेय पाइब कली “मेको निक्शीमी मेको डालो ते लत्से?” दे हिल्लो पाता। उत्पत्ती ११:२ 11 मिनू मेकोमी “बेबीलोन डा शिनार माइक्तीकेमी मेको कली खिं का सेल्चा चिक्शो बाक्ब। मिनू सेल्ने थुम्मे नोले मेको डालो कली मेकेर आ बाक्तीकेम वोइक्नीम” दे माइक्ती।

6

४ ओटा बग्गी

1 मिनू गो लेंशा इर गे कोव्रडुनु आं डोंइती डांडा आस दाते रे ४ ओटा बग्गी यिशो तातामी। मेको डांडा कांसा के बाक्ताक्स। प्रकाश ६:१-८; जकरिया १:८ 2 डोंइती डा बग्गी लल शारापुकीमी कीशो बाक्तेक्म। मेको आ नोले डा बग्गी क्येर शारापुकीमी कीशो बाक्तेक्म। 3 मेको आ नोले डा बग्गी बुश शारापुकीमी कीशो बाक्तेक्म। मिनू नेल्ल क्येडा नोले डा बग्गी पाडग्रे शारापुकीमी कीशो बाक्तेक्म। प्रकाश ६:१-८; जकरिया १:८ 4 मिनू गो नु लोव्र पाइब, स्वर्ग डा गेय पाइब कली “आं प्रभु, एको मार नमी?” दे हिल्लो पाता।

5 मिनू मेको परमप्रभु यावे आ स्वर्ग डा गेय पाइबमी आं कली “एको स्वर्ग डा ४ ओटा फश नम। एको गूशा लचा कली रागी नेल्ल डा परमप्रभु यावे आ डोंइती जाक्तेक्म। जकरिया ४:१४ 6 क्येर शारा पाइशो बग्गी उत्तर रागी गे लाइब। बुश शारा पाइशो बग्गी पच्छिम रागी गे लाइब। पाडग्रे शारा पाइशो बग्गी दक्खिन रागी गे लाइब” देंत। 7 मेको शारा गूशा रागी कोव्रथ लचा कली चुइशो बाक्तेक्म। मिनू मेकोमी “रागी नेल्ल कोव्रथ लने” दे अरेप्टु। मिनू मेकोपुकी रागी कोव्रथ लाक्तेक्म। जकरिया १:१० 8 मिनू नोले मेकोमी ठेयब सेंदा पा आं कली “कोव्रडो, मेको उत्तर रागी गे लाइबमी आं सोक्त नाइक्पाइक्तेक्म” देंत।

यहोसु आ सिरपेच

9 मिनू परमप्रभु यावेमी आं कली लोव्र पाप्टु। 10 मार लोव्र पाप्टु देंशा हना “ग्याइशशा लाइक्चा पुंडसीशो बेबीलोन रे जाक्शो हेल्दाइ तोबीयाह नु येदायाह रे सुन चांदी पोक्को। मिनू मेको नाक्ती सेफन्याह आ तौ योसीयाह आ खिं लावो। 11 मेको सुन नु चांदी रे पा सिरपेच का सेलो। मिनू मेको सिरपेच लाइशशा, यहो-सादाक आ तौ नेल्ल क्येडा ठेयब चढ़ेब यहोसु आ पियामी गुप्टो। जकरिया ३:८ 12 मिनू मेको कली मुर नेल्ल आन परमप्रभु यावेमी मार देंत देंशा हना ‘मेकेर मुर का बाक्ब। मेको आ नें राशी बाक्ब। मेको राशी आ बाक्तीकेमी बारशा, परमप्रभु यावे आ खिं सेल्चा माल्ब। 13 मेकोमीन परमप्रभु यावे आ खिं सेल्चा माल्ब। मेको पिप आ मान तशा, शुश ग्योम्सीशो बाक्ब। मेको आ ठेयब नित्तीकेमी निशशा सासन पाइब। मेको आ नित्तीकेमी आ ग्युरा गे चढ़ेब का बाक्ब। मेको निक्शी दुशा गारशा गेय पाइनीसी। भजन संग्रह ११०:४ 14 मिनू मेको सिरपेच हेल्दाइ, तोबीयाह, येदायाह नु सेफन्याह आ तौ योसीयाह मिम्शा, परमप्रभु यावे आ खिंमी वोइक्चा माल्नीम। 15 शुश डोन बाक्ब मुरपुकी यो परमप्रभु यावे आ खिं सेल्चा कली

वारच पथ जाक्नीम। मिनु गेपुकीमी मुर नेल्ल आन परमप्रभु यावेमी आं कली इन कली लोव्र पथ सोइशो बाक्ब, दे तुइक्नीनी। गे इन थुं नेल्लेमी परमप्रभु यावे, इन परमप्रभु आ देंशो टीतीनी हना, मोदेशो दुम्ब” देंत। यसैया ६०:१०

7

माइजा बाक्चा आ पबर्म लोव्र

1 पिप दारामी सासन पशो ४ बर्स, किस्लेव माइशो ९ महिना ४ नाक्त परमप्रभु यावेमी जकरिया कली लोव्र पाप्तु। 2 मार लोव्र पाप्तु देंशा हना “बेथेल डा मुरपुकीमी शरेसेर, रेगम-मेलेक नु मेकेर डा मुर आन कली परमप्रभु यावे आ शिशी पुंइचा कली सोइशो बाक्तेक्म। 3 मिनु मुर नेल्ल आन परमप्रभु यावे आ खिंमी चढेब नु परमप्रभु यावे आ लोव्र पाइब आन कली ‘गेपुकी मुल सम्म शुश बर्स डोंइती रे पशो खोदेशो पा ५ महिनामी रोंका पा माइजा बाक्चा माल्नीकी डा?’ दे हिल्लो पचा कली सोइशो बाक्तेक्म” देंत। जकरिया ८:१९; २राजा २५:८-९; येरमीया ५२:१२-१३

4 मिनु मुर नेल्ल आन परमप्रभु यावेमी मार देंत देंशा हना 5 “रागी डा मुर नेल्ल नु चढेब आन कली ‘गेपुकीमी मेको ७० बर्स डा ५ नु ७ महिनामी रोंका पा माइजा बाक्तीनी। मार गे मेको आं पबर्म पनी डा? यसैया ५८:५ 6 मिनु गे जशा, ब्वशा तूतीनी हना, गे आंम इन पबर्म मपाइनीनी डा?’ देनो” देंत।

इसाएली आन कली निसाफ

7 परमप्रभुमी “यरूसलेममी शुश मुर बाक्शा, एर ओंथ डा सहर नेल्ल रिम्शो नु सोशो बोशो बाक्मेनु, नेगेब नु पच्छिम डा शेफेलाह नेल्ल रिम्शो पा बाक्मानु, डोंइती डा आं लोव्र पाइबपुकीमी मुर आन कली देंशो परमप्रभु यावे आ पशो लोव्र एकोन ममाइ डा?” देंत।

8 मिनु परमप्रभु यावेमी लेंशा जकरिया कली लोव्र पाप्तु। 9 मिनु मुर नेल्ल आन परमप्रभु यावेमी मार लोव्र पाप्तु देंशा हना “ठीक पा निसाफ पने, दाक्मुने नु शिशी पमुने, मीका ६:८ 10 वोंइश बेक्शो मीश मुर, रोम रोइक्च, अर्को रागी डा मुर नु प्रुडग आन कली मदिपीन। मरिम्शो पमुचा ममिम्तीन। प्रस्थान २२:२०-२१ 11 तन्न मेकोपुकीमी एको लोव्र मनेनेम। काइ मटीब दुम्शा, आन नोफा सुम्तेक्म। 12 मेकोपुकीमी परमप्रभु यावे आ अरेशो नु आ लोव्र मनेंचा डा पा आन थुं खकटा सेल्लेक्म। डोंइती मुर नेल्ल आन परमप्रभु यावेमी आ सोक्त रे पा आ अरेशो लोव्र नु मुर आन कली पतीक लोव्र पथ आ लोव्र पाइब आन कली सोइशो बाक्त। मोपतीके मुर नेल्ल आन परमप्रभु यावे शुश गाइशो बाक्ब। यसैया ४८:४ 13 दोपा मेकोपुकीमी आं लोव्र मनेन्मे, मोपा गो यो मेको आन पुंइशो लोव्र मनेनुड। 14 मिनु गो मेको आन कली फश गिवारमी खोदेशो पा आन मतुइशो रागी रागीम फ्रातामी। मोपतीके आन प्रोंइशो रागी मुर मबाक्शो दुम्त। मेकेर सुइ मलम। मोदेशो पा रिम्शो रागी खतम दुम्त” दे मुर नेल्ल आन परमप्रभु यावेमी देंत।

8

परमप्रभुमी आ मुर खुप्शो

1 मिनु मुर नेल्ल आन परमप्रभु यावेमी आं कली लोव्र पाप्तु। 2 मेकोमी मार लोव्र पाप्तु देंशा हना “गो सियोन आ पबर्म शुश रुश पाइनुड। गो मेको आ पबर्म थाम्पा रुश पा गाइशो बाक्नुड” दे परमप्रभु यावेमी देंत। जकरिया १:१४ 3 परमप्रभु यावेमी “गो सियोनमी जाक्शा, यरूसलेम आ दातेमी बाक्नुड। मिनु यरूसलेम थमा सुइक्चा पुंइसीब सहर दुम्ब। मिनु मुर नेल्ल आन परमप्रभु यावे आ डांडा आंम आ बाक्तीक डांडा दुम्ब” देंत। जकरिया १:१६; यसैया १:२१, २६; भजन संग्रह २:६ 4 मिनु मुर नेल्ल आन परमप्रभु यावेमी “खूशो खूशोम यरूसलेम डा लांम नित्नीम। शुश बर्स दुम्तीके कोक्के तिकशा बाक्नीम। यसैया ६५:२० 5 सहर डा लांमी ग्यारब मीश आल नु वोंइश आलम ब्रीशो बाक्नीम” देंत। 6 मुर नेल्ल आन परमप्रभु यावेमी “मेको लीशो मुरपुकीमी मेको थमा सुइक्ने मचाप्तेक्म हना यो, गो मोदेशो पने मचाप्नुडा डा?” देंत। लूका १:३७ 7 मुर नेल्ल आन परमप्रभु यावेमी मार देंत देंशा हना “गो आं मुर आन कली पूब डा रागी नु पच्छिम डा रागी रे पा प्रोंइनुडमी। 8 मिनु गो मेको आन कली यरूसलेममी बाक्पाइक्चा कली चाक्नुडमी। मेकोपुकी आं मुर दुम्नीम। मिनु गो मेको आन परमप्रभु दुम्नुड। गो मेको आन कली दाक्चा मप्रोंइथु, ठीक पाइनुड” देंत। येरमीया २४:७

9 मुर नेल्ल आन परमप्रभु यावेमी मार देंत देंशा हना “गेपुकी शुश गेय पने। डोंइती गे आं लोव्र पाइबपुकीम लोव्र पशो नेतीनी। मेकोपुकी मुर नेल्ल आन परमप्रभु यावे आं खिं लेंशा सेल्ची ना डा जग वोइक्ची ना बाक्तेक्म। यसैया ३५:३ 10 मेको क्येडा डोंइती मुर आन कली गाल्च मगेमे। बी ब्यफ, क्यारश भेडा आन कली क्येट यो मगेमे। मेको

आन जोरी सत्रुमी पतीके आन गेय पथ लने मचाप्शो बाक्तेक्म। मारदे हना गो मुर आन कली साइक्मुपाइक्तामी। 11 तन्न मुल रे एको लीशो आन कली डोंइती डा खोदेशो मपाइक्नुडमी” दे मुर नेल्ल आन परमप्रभु यावेमी देंत। 12 मेकोमी “मुल थुं नाइक्तीक दुम्शो बाक्ब। अडगुर आ बोटमी रिम्शो फल सिप्ब। रूमी अन्न खेल्ब। सरीड रे सीत यीब। गो मेको नेल्ल लीशो आं मुर आन कली गेनुडमी। 13 यहूदा नु इस्राएल डा मुरपुकी गे रागी रागी डा मुर आन दातेमी सराप रशो बाक्तीनी। दोपा गेपुकी सराप रनी, मोपा आसीक ताइब दुम्नीनी। महिनीन, बोल्यो दुमीन” देंत। उत्पत्ती १२:२

14 मिनु मुर नेल्ल आन परमप्रभु यावेमी “गो मोपा इन किकी पिपी आन कली आं कली गाइक्पाइक्तीके श्येत गेतामी। मिनु गो शिशी मपड। 15 गो मुल यरूसलेम नु यहूदा डा मुर आन कली रिम्शो पाइनुड। गेपुकी महिनीन। 16 गेपुकीमी मार पचा माल्नीनी देशा हना, गे इन दातेमी थमा लोव्र ला पमुने। इन ठेयब लाप्चोमी जिचा मबोक्चा डा पा थमा नु ठीक निसाफ पने। एफिसी ४:२५ 17 इन दातेमी थुंम मिम्शा, मरिम्शो मपमुने। जोल पा कसम मजने। मारदे हना मेको नेल्ल गो ग्रांग्रा दीनुड” दे परमप्रभु यावेमी देंत। जकरिया ७:१० 18 मुर नेल्ल आन परमप्रभु यावेमी आं कली लोव्र पाप्तु। 19 मिनु मेकोमी मार देंत देशा हना “४ महिना डा माइजा बाक्तीक, ५, ७ नु १० महिना डा माइजा बाक्तीके, मुल रे यहूदा डा मुर ग्येरशा सोम्शा पतीक नाक्त दुम्चा माल्नीम। मेको ग्येरशा बाक्तीक चाड दुम्चा माल्नीम। मोपतीके गे थमा लोव्र पचा नु थुं नाइक्चा दाक्तीन” दे मुर नेल्ल आन परमप्रभु यावेमी देंत। जकरिया ७:३, ५

परमप्रभुम श्येत रे प्रोंडब

20 मुर नेल्ल आन परमप्रभु यावेमी “शुश सहर डा मुर तेम्शा जाक्नीम। 21 सहर का डा मुरपुकीम अर्को सहर डा मुर आन कली ‘परमप्रभु यावे आ शिशी पुंइथ नु मुर नेल्ल आन परमप्रभु यावे कली माल्थ लने। गो आंमा यो लाइक्नीकी’ देंनीम। 22 शुश मुर नु बोल्यो रागी डा मुरपुकी मुर नेल्ल आन परमप्रभु यावे कली माल्थ, यरूसलेम सहरम जाक्नीम। मेकोपुकीमी परमप्रभु यावे आ शिशी पुंइनीम” देंत। 23 मुर नेल्ल आन परमप्रभु यावेमी मार देंत देशा हना “मेको नाक्ती रागी रागी डा आन आन लोव्र ब्वाक्ब १० जना मुरपुकीमी यहूदी का आ वा ग्याइश्शा ‘गो गे नु लाइनीकी। मारदे हना परमप्रभु यावे गेपुकी नु बाक्ब देशो नेंशो बाक्नीक’ देंनीम” दे परमप्रभुमी देंत।

9

परमप्रभु आ लोव्र

1 परमप्रभु यावेम हद्राक रागी नु दमस्कस सहर आस पबर्म लोव्र का पशो बाक्त। मारदे हना इस्राएल डा थर नेल्ल नु अर्को रागी डा मुर यो परमप्रभु यावे केन बाक्नीम। यसैया १७:- 2 शुश जोक्ब तुइक्ब बाक्तेक्म हना यो, हमाथ, टायर नु सीदोन सहर आन पबर्म परमप्रभु यावेमी लोव्र पशो बाक्ब। यसैया २३:-; येरमीया ४७:४; इजीकीएल २६:-; इजीकीएल २८:- 3 टायरमी आंम पबर्म बोल्यो दरवार का सेल्शो बाक्ब। मेकोमी फुरक खोदेशो पा चांदी नु लां मेर डा हिलो खोदेशो पा सुन तेल्लो बाक्ब। 4 तन्न परमप्रभुमी मेको आ बाक्शो मारेइ मारेइ रोइक्ब। मेको आ शोंप नेल्ल समुन्द्रमी ताइश्शा गेब। मिनु मेको मीम ग्रोइश्शा, खतम दुम्नीम। 5 मिनु अश्कलोन मेको तशा हिंब। गाजा हिंशा खिंखि पाइब, एक्रोन शुश सुर्ता पा आ आस पशो जाम्शा लाइब। गाजा डा पिप जाम्शा लाइब। अश्कलोनमी मुर मबाक्तीक दुम्ब। येरमीया ४७:- 6 अश्दोद सहरमी खाल्सीशो मुरपुकी बाक्नीम। मिनु गो पलिस्ती आन ठेयब लेत्तीक खतम पा गेनुड। ब्यवस्था २३:३ 7 गो मेको आन शोव्र रे पा हुश नु मेको आन खुइ रे ग्रांग्रा दिचा डा थोव्रक गुंइनुड। लीशो मुरपुकी आंइ परमप्रभु आ मुर दुम्नीम। मेकोपुकी यहूदा आ थर डा मुर खोदेशो दुम्नीम। एक्रोन डा मुर चहिं यबुसी खोदेशो दुम्नीम। उत्पत्ती ९:४; यहोसु १५:६३; २सामुएल २४:१८ 8 मिनु नोले गो आं खिं कली आंमा खाल पाइब खोदेशो बाक्नुड। मोपा सुइ मुर एर ओंथ गाक्ने मचाप्नीम। सुइमी आं मुर आन कली लडाइ मतोइनीम। मारदे हना मुल गो आंमान मेको आन कली कोव्रनुड। जकरिया २:९

सियोन डा पिप जाक्शो

9 सियोन आ तमी, साप्पा ग्येरसो। यरूसलेम आ तमी ग्येरशा ठेयब सेंदा पा ग्रीडो। मारदे हना इ पिप इ बाक्तीकेमी जाक्ना जाक्न बाक्ब। मेको ग्राशा ग्येरसीशा जाक्ब। मेको ब्रेम्शो बाक्ब। मेको गधा तार डोइश्शा जाक्ब। गधा आ चाइक्ब तार डोइश्शा जाक्ब। सेफन्याह ३:१४; मत्ती २१:५ 10 गो एफ्राइम रे पा बग्गीपुकी नु यरूसलेम रे पा लडाइ

पाइब शारा लाइक्नुड। लडाइ पाइब आन लिब्रा जिक्ब। मेकोमी रागी रागी डा मुर आन कली थुं नाइशशा बाक्चा गेब। मेकोमी समुन्द्र का रे अर्को समुन्द्र सम्म नु युफ्रेटीस खोला रे रागी डा सुर सम्म सासन पाइब। मीका ५:९

11 मे नु पशो आं हुश आ कबलम पतीके इ चोक्चा पुंडसीशो मुर आन कली ब्वाक्कु मबाक्शो खाल्टा रे गुंडनुडमी। प्रस्थान २४:८; उत्पत्ती ३७:२४ 12 आस पा बाक्शो चोक्चा पुंडसीशो मुरपुकी इन बोल्यो ब्रोंइशा बाक्तीके लेशशा लने। गो इन कली इन साम्शो क्येडा निक्शी खेयप खोइ शुश गेनुड। जकरिया १०:९; यसैया ६१:७ 13 गो यहूदा कली आं लिब्रा खुक्शो खोदेशो पा खुक्नुड। गो एफ्राइम कली मेको आ ब्रा खोदेशो सेल्लुड। सियोन, इ तौ आन कली गो ग्रीस रागी आ तौ आन पबर्म क्युक्नुड। मिनु गो इ कली बोल्यो लडाइ पाइब आ तरवार खोदेशो सेल्लुड। 14 मिनु नोले परमप्रभु यावे इन क्येडा इर गूब। मेको आ ब्रा चिला आप्शो खोदेशो पा बेरनीम। परमप्रभु, परमप्रभु यावेमी तुराही ताप्ब। मिनु दक्खिन डा फश गिवारम गाक्शा लाइब। 15 मुर नेल्ल आन परमप्रभु यावेमी मेको आन कली राइशशा प्रोंइब। मेकोमी आन जोरी सत्रु आन कली खतम पोक्ब। मेकोपुकीमी आन हुश अडगुर शांबु खोदेशो पा तूनीम। मेकोपुकी चढेतीक डा हुश कुर पतीक बोस खोदेशो पा ब्रीशो बाक्नीम। चढेतीक आ एर ओथ कुना कुना मेर फ्रशो हुश खोदेशो बाक्नीम।

16 मेको नाक्ती परमप्रभु यावे, आन परमप्रभुमी मेको आन कली श्येत रे प्रोंइब। मारदे हना मेकोपुकी आ बगाल खोदेशो बाक्नीम। मेको सिरपेच डा हीरा खोदेशो पा ब्राइनीम। मेकोपुकी परमप्रभु यावे, आन परमप्रभु आ रागीम हीरा खोदेशो पा ब्राइनीम। 17 मेको आ दाक्तीके नु आ शिशी पतीके थम ठेयब बाक्ब। वोंइश आल ग्रेल्शो अन्न खोदेशो पा शुश दुम्नीम। मीश आल नक अडगुर शांबु खोदेशो पा दारशो दुम्नीम।

10

परमप्रभु यावे कली पुनीन

1 परमप्रभु यावे कली नोले डा रेउ पुनीन। परमप्रभु यावे गोस्स नु फश सेल्ल बाक्ब। मिनु इन कली नु रू नेल्ल आन कली रेउ यिपाइक्ब। 2 खिं डा देवी देवतामी फश लोत्र पाइनीम। लिंक्यु कोत्रबपुकीमी जोल तशा, डोमु डोशा, हेंथे लोत्र पाइनीम। मिनु मुर आन कली फश लोत्र पा लेम्नीम। मोपतीके मुरपुकी गोठला मबाक्शो भेडा खोदेशो पा श्येत जशा प्रोक्नीम। मत्ती ९:३७

परमप्रभुम आ मुर बोल्यो सेल्ल

3 मिनु परमप्रभु यावेमी “गो गोठला आन कली तशा शुश गाइशशा बाक्नुड। मारदे हना मुर नेल्ल आन परमप्रभु यावेमी आ बगाल, यहूदा आ मुर आन कली कोत्रब। मेकोमी आ मुर आन कली लडाइ पा गेनायो मरूब शारा खोदेशो सेल्ल। जकरिया ११:५ 4 मिनु यहूदा रे सुर डा फुल्लु, ताम्बु कीतीक किला, लडाइ पाइब आन लिब्रा नु कप्तान नेल्ल गूनीम। येरमीया ३०:२१ 5 मिनु मेको नेल्ल लडाइम बाक्शो लडाइ पाइब खोदेशो बाक्नीम। मेकोपुकीम आन जोरी सत्रु लां डा हिलोम खोल्शा दिम्नीम। परमप्रभु यावे मेकोपुकी नु बाक्तीके मेकोपुकीमी लडाइ पाइनीम। शारा डोइक्ब आन कली मुने तोक्नीम।

6 गो यहूदा आ खिं डा मुर आन कली बोल्यो सेल्लुड। योसेफ आ खिं डा मुर आन कली श्येत रे प्रोंइनुड। मेको आन कली डोंइती डा खोदेशो सेल्लुड। मारदे हना गो मेको आन कली शिशी पाइनुड। मेकोपुकी गेनायो मतिल्शो खोदेशो दुम्नीम। मारदे हना गो परमप्रभु यावे, मेको आन परमप्रभु नड। गो मेको आन कली लोत्र लेत्नुडमी। 7 मिनु एफ्राइम आ खिं डा मुर लडाइ पाइब खोदेशो पा बोल्यो दुम्नीम। अडगुर शांबु तूशो खोदेशो पा ग्येरसीनीम। आन आलपुकीम मेको तशा शुश ग्येरसीनीम। मेकोपुकीमी ‘गो परमप्रभु यावे आ मुर नय’ दे शुश ग्येरसीनीम।

8 गो आं मुर आन कली ब्रेशशा, खुप्नुड। मारदे हना गो मेको आन कली श्येत रे प्रोंइता। मिनु मेकोपुकी डोंइती डा खोदेशो पा सोशा बोशा, शुश दुम्नीम। 9 गो मेको आन कली रागी रागीम फ्राता हना यो, मेकोपुकीमी डोन रागीम बाक्शा, आं कली मिम्नीम। मिनु मेको आन आल कोल्पाइशशा आन रागीम लेत्नीम। यसैया ६६:१९; येरमीया ५१:५० 10 गो मेको आन कली इजीप्त रागी रे आन आंम रागीम लेप्पाइक्नुड। गो मेको आन कली अस्सुर रे गुंडशा, गिलाद नु लेबानोनम चाक्नुड। नोले मेकेर शुश मुर दुम्तीके बाक्तीके मबाक्ब। 11 मेकोपुकी समुन्द्र डा ठेयब ब्वाक्कु खोदेशो श्येत जाइनीम। तन्न गो समुन्द्र डा छाल थुम्पाइक्नुड। मिनु नील खोला सोत्रपाइक्नुड। अस्सुर आ ठेयब लेशशो

जाम्ब। मिनु इजीप्त डा राज्य थुम्सीब। 12 गो मेको आन कली परमप्रभु यावे कली थमा सुइक्तीकेम बोल्यो सेल्लुड। मिनु मेकोपुकी मेको आं नेम गाक्नीम” दे परमप्रभु यावेमी देंत।

11

इसाएली आन मरिम्शो गोठला

1 लेबानोन, मीम इ लाइशो रवा आन कली नेक्पाइक्चा कली इ लाप्चोपुकी रोक्को। 2 तोव्रशी रवा रोंका पने। मारदे हना लेबानोन डा लाइशो रवा गोल्तेक्म। मेको दारशो रवा खतम दुम्तेक्म। बाशान डा बोल्यो शी के रवा रोंका पने। मारदे हना ठेयब ब्वाकी नेल्ल क्योव्रशो बाक्ब। 3 गोठला आन रोंका पशो नेनीन। मेको आन रिम्शो योव्रतीके खतम दुम्शो बाक्ब। गुप्स आन ग्रीशो नेनीन। यर्दन डा ब्वाकी नेल्ल खतम दुम्शो बाक्ब।

रिम्शो नु मरिम्शो गोठला

4 परमप्रभु यावे, आं परमप्रभुमी “क्योरचा पुंइसीब भेडा आन कली योव्रडो। 5 मेको ग्याप्बपुकीमी भेडा क्योरशा सजाइ मतथु ब्रोंइशा लाइनीम। मिनु मेको आन कली लेयबपुकीमी ‘परमप्रभु ठेयब बाक्ब। मारदे हना गो शोंप पाइशो दुम्तक’ देंनीम। मिनु मेको भेडा आन गोठलामी मेको आन कली शिशी मपाइनीम। येरमीया २३:-; इजीकीएल १३:-; इजीकीएल ३४:- 6 मुल रे गो रागी डा मुर आन कली शिशी मपाइनुड” दे परमप्रभु यावेमी देंत। मिनु परमप्रभुमी “गो नेल्ल आन कली आन नेक्था डा मुर आन गुइमी नु आन पिप आन गुइमी गेनुड। मिनु मेकोपुकीमी रागी कली खतम सेल्लनीम। मेको आन गुइ रे सुइ आन कली मप्रोंइनुडमी।

7 मोपतीके क्योरचा चिक्शो भेडा लेयब आन पा डा गो गोठला दुम्ती। गो कोक्के निक्शी ग्याइक्ताक्ड। मिनु गो का कली शिशी पतीक नु अर्को कली थुं का दुम्तीक नें वोइक्ता। मिनु गो भेडा आन कली योव्रतामी। 8 गो महिना कामी गोठला सां आन कली खेरतामी। गो मेको आन गेय तशा ब्रीशा, फाल्ने मचाप्शो बाक्ती। 9 मिनु गो मेको आन कली ‘गो इन गोठला दुम्ने मचाप्नुड। बेक्शा लाइबपुकी बेक्मल। खतम दुम्शा लाइबपुकी खतम दुम्मल। लीशोपुकीम आन श्ये ब्वमुमल’ ” देंती। येरमीया १५:२ 10 मिनु गो आं शिशी नें पाइशो कोक्के जिक्ता। मिनु गो मुर नु पशो कबल क्याम्ताक्ड। जात जात नेल्ल डा मुरपुकी नु फ्रेंशो कबल क्याम्ताक्ड, दे मेको कोक्के जिक्ता। 11 मेको कबल मेको नाक्ती क्याम्ताक्ड। भेडा लेयबपुकीमी आं कली कोव्रना कोव्रन बाक्तेक्म। मेकोपुकीमी एको परमप्रभु यावे आ लोव्र बाक्माक्त, दे तुइक्ताक्म। जकरिया ११:७ 12 मिनु गो मेको आन कली “गे ठीक लाक्तीनी हना, आं गाल्च गेयीनी। ममाइ हना वोंइसीन” देंती। मिनु मेकोपुकीमी आं कली ३० चांदी के शेकेल गेम्तेक्म। शेकेल का ११.५ ग्राम चांदी के क्येट बाक्ब। मत्ती २६:१५ 13 मिनु परमप्रभु यावेमी आं कली “मेको क्येट लाइशशा, खप के ग्योंब सेल्ब आ डोंइती ब्वारदो। मेको मिश डा क्येट आं पर्वम कुर पाम्तेक्म” देंत। मिनु गो मेको ३० चांदी के शेकेल लाइशशा, परमप्रभु यावे आ शोंप वोइक्तीकेमी यपाइक्ब आ डोंइती ब्वारताक्ड। मत्ती २७:५-१० 14 मिनु नोले गो थुं का दुम्तीक नें वोइशो कोक्के जिक्ता। मो पा गो यहूदा नु इस्राएल आस कली खिं का डा दुम्तीक रे फ्राताक्ड। इजीकीएल ३७:२२

15 मिनु परमप्रभु यावेमी आं कली “गे लेंशा शोर गाक्शो गोठला खोंदेशो दुमो। 16 मारदे हना मुल गो मेको रागीमी गोठला का सेल्लुड। मेकोमी बेक्शा लाइब आन कली मकोव्रब। ब्रशा गाक्शो आन कली मखुप्ब। रोइ पशो आन कली मसापाइक्ब नु रिम्शो भेडा आन कली मयोव्रब। तन्न मेकोमी दोम्शो भेडा आन श्ये ब्वशा, आन गेंग्रे यो चेशशा ब्वाइब। 17 आबी आबी, शोर गाक्शो गोठला। मेकोमी बगाल प्रोंइब। तरवारमी आ ग्युरा गुइ नु आ ग्युरा मिक्च कली आबल। मिनु मेको आ ग्युरा गुइ नेल्ल सोव्रल। आ ग्युरा मिक्च बुक्शा मताइब दुम्ल” देंत।

12

इस्राएल आ पर्वम लोव्र पशो

1 परमप्रभु यावेमी इस्राएल आ पर्वम पशो लोव्र एको बाक्ब। सरीड नु रागी सेल्ब नु मुर आन कली सोक्त गेब परमप्रभु यावेमी मार देंत देंशा हना 2 “गो यरूसलेम कली आ एर ओंथ रागी डा मुर आन गाइक्तीके सेल्चा चिक्शो बाक्नुड। मुरपुकीमी यरूसलेम पुम्नीम। यहूदा यो श्येत जाइब। यसैया ५१:१७; येरमीया २५:१५-२९ 3 मेको नाक्ती गो रागी डा मुर नेल्ल आन कली यरूसलेम हेल्शो फुल्लु सेल्लुड। तेको रागी डा मुरुमी क्युक्चा लोक्चा माल्नीमी, मेकोपुकी शुश खाइक्पांइसीनीम। मिनु रागी रागी डा मुर नेल्ल खुम्सीशा यरूसलेममी लडाइ पथ जाक्नीम। जकरिया

१४:३; योएल ४:१२ ४ मेको नाक्ती गो शारा नेल्ल आन कली शुश हिंपाइक्नुड। मिनु शारा डोइक्ब आन कली निप्स ग्यशो सेल्लुड। गो यहूदा आ खिं डा मुर आन कली कोव्रनुड। मिनु आन जोरी सत्रु आन शारा मिक्च मताइब सेल्लुड।

५ मिनु यहूदा आ खिं खिं डा मुरपुकीमी आंम आंम थुंमी 'यरूसलेम डा मुरपुकी बोल्यो बाक्नीम। मारदे हना मुर नेल्ल आन परमप्रभु यावे, मेको आन परमप्रभुमी मेको आन कली सक्ति पाइशो सेल्ल' देनीम। ६ मेको नाक्ती गो यहूदा आ खिं खिं डा मुर आन कली शी तारी वोइशो बुइशो बोस नु शी आन दातेमी ब्रशो तोव्रशी खोदेशो सेल्लुड। मिनु मेकोपुकीमी ग्युरा नु पेरा गे बाक्ब नु पुम्ब मुर नेल्ल आन कली साइक्नीम। तन्न यरूसलेम आ बाक्तीके उइ बाक्शा, लेंशा मेकेर मुर बाक्नीम। ओबदिया १८:-

७ मिनु परमप्रभु यावेमी डोंइती यहूदा डा मुर आन कली श्येत रे प्रोंइब। मोपा दाऊद आ खिं डा मान ततीके नु यरूसलेममी बाक्ब मुर आन मान ततीके यहूदा आन क्येडा शुश मदुम्ल" देंत।

८ मेको नाक्ती परमप्रभु यावेमी यरूसलेममी बाक्ब मुर आन कली वारच पाइब। मेकेर बाक्ब नेल्ल क्येडा मचाप्ब दाऊद खोदेशो बाक्नीम। मिनु दाऊद आ खिं डा मुर परमप्रभु खोदेशो बाक्नीम। मिनु परमप्रभु यावे आ स्वर्ग डा गेय पाइब मेको आन डोंइती गाक्ब। यसैया ३३:२४ ९ मिनु "मेको नाक्ती गो यरूसलेम कली लडाइ तोथ जाक्ब रागी रागी डा मुर आन कली खतम सेल्लुड" देंत।

साइशो आ पर्बम रोंका पशो
प्रकाश २०:९

१० मिनु परमप्रभुमी "गो दाऊद आ खिं डा मुर नु यरूसलेममी बाक्ब मुर आन तारी शिशी पतीक नु पुंइतीक लोव्र पतीके सोक्त मोइक्नुड। मो दुम्मेनु, आ साइशो आन कली तशा, मेको आन पर्बम आन का ला तौ आन पर्बम रोंका पशो खोदेशो पा, रोंका पाइनीम। मेको आन पर्बम, आन डोंइती जरमेशो तौ आन पर्बम खोदेशो पा डाक्नीम। योएल ३:१; यूहन्ना १९:३७; प्रकाश १:७ ११ मेको नाक्ती मेगीददो डा बेंसीमी हदाद-रिम्मोनमी रोंका पशो खोदेशो पा यरूसलेममी ठेयब रोंका पाइनीम। २राजा ५:१८ १२ रागी नेल्ल डा मुरपुकी रोंका पचा माल्नीम। खिं खिं डा मुरपुकीमी रोंका पचा माल्नीम। दाऊद आ खिं डा वोंइश मुरपुकीमी रोंका पचा माल्नीम। मिनु मेको आन मीश आन दातेमी रोंका पचा माल्नीम। नाथान आ खिं डा वोंइश मुरपुकीमी रोंका पचा माल्नीम। मिनु मेको आन मीश आन दातेमी रोंका पचा माल्नीम। १३ लेवी आ खिं डा वोंइश मुरपुकीमी रोंका पचा माल्नीम। मिनु मेको आन मीश आन दातेमी रोंका पचा माल्नीम। शिमेइ आ खिं डा वोंइश मुरपुकीमी रोंका पचा माल्नीम। मिनु मेको आन मीश आन दातेमी रोंका पचा माल्नीम। १४ लीशो खिं डा वोंइश मुर नेल्लेमी रोंका पचा माल्नीम। मिनु मेको आन मीश आन दातेमी रोंका पचा माल्नीम" देंत।

13

मूर्ति नु जोल पाइब

१ मेको नाक्ती दाऊद आ खिं नु यरूसलेममी बाक्ब मुर आन पाप नु आन मरिम्शो पशो क्याम्चा कली ब्वाक्कु बुक्तीके का बुक्शा गूब। यसैया १२:३; यसैया ५५:१ २ मुर नेल्ल आन परमप्रभु यावेमी मार देंत देशा हना मेको नाक्ती "गो रागी रे मूर्ति आन नें क्याम्नुड। मिनु सुइमी मेको आन कली ममिन्नीम। मिनु गो मेको रागी रे जोल पा नोले दुम्ब लोव्र पाइब नु ग्रांग्रा दिशो वोल आन कली गुंइशा खेरनुड। मीका ५:१२; येरमीया २९:८-९ ३ मिनु लेंशा सुइमी जोल पा नोले दुम्तीक लोव्र पाप्तु हना, मेको कली थीब आ आम आफोमी मेको कली 'गे बेक्चा माल्नेवे। मारदे हना गे परमप्रभु यावे आ नेंमी जोल लोव्र पाप्तीवी' देनीस। मिनु मेकोमी जोल पा नोले दुम्ब लोव्र पवानु, आ आम आफोमी मेको कली साइक्नीस। ब्यवस्था १३:६ ४ मेको नाक्ती नोले दुम्ब लोव्र पाइब नेल्ल आंम तशो नु आंम लोव्र आ पर्बम मुने पाइनीम। मेकोपुकीमी दलओंठ आ चां के प्रोव्रशो वा मफेक्नीम। ५ तन्न मेकोपुकीमी 'गो दा नोले दुम्ब लोव्र पाइब मनड। गो रू डा गेय पाइब बाक्नुड। मारदे हना गो ठिटा बाक्डा रेन रू डा गेय पा जशा ब्रोंइती' देनीम। ६ सुइमी मेको कली 'इ रां डा गार मार नमी? दे हिल्लो पाम्तेक्म हना, एको आं वारच आ खिंमी दुम्शो गार नम' देंब।

नाक्शा लीशो परमप्रभु आ मुर

७ मिनु मुर नेल्ल आन परमप्रभु यावेमी मार देंत देशा हना 'तरवार, आं गोठला आ पर्बम बोक्को। नेल्ल क्येडा आं नेक्था डा मुर आन पर्बम बोक्को। गोठला कली तुपो। मिनु भेडापुकी ब्रमल। मिनु गो आं गुइ आइक्च गोठला

आन पर्बम क्युकनुड। मत्ती २६:३१ ८ एको रागी डा मुर भाग सांमी भाग निक्शी साइक्चा पुंडसीनीम। मिनु भाग का ब्रोंडचा ताइनीम। यसैया ६:१३ ९ मिनु मेको लीशो भाग आन कली गो मीम कुरपाइनुडमी। चांदी याप्पाइशो खोदेशो पा याप्पाइक्नुडमी। मिनु सुन नाक्शो खोदेशो पा नाक्नुडमी। मिनु मेकोपुकीमी आं कली थोइनीम। मिनु गो मेको आन कली लोव लेत्नुडमी। मेकोपुकी आं मुर नम' देनुड। मिनु मेकोपुकीमी 'परमप्रभु यावे, आंइ परमप्रभु बाक्ब' देनीम" दे परमप्रभु यावेमी देत। होसे २:२५

14

परमप्रभु यावे आ नाक्ती

१ परमप्रभु यावे आ नाक्त का जाक्ब। मेना इन के रोइशशा लाइशो थोवक इन दातेमीन योक्सीनीनी। यसैया ३९:६ २ गो रागी रागी डा मुर नेल्ल आन कली यरूसलेम नु लडाइ पपाइक्चा कली पुक्नुडमी। मिनु सहर मेको आन के दुम्ब। मेको आन खिं डा मारेइ मारेइ रोइक्नीम। मिनु मीश मुर आन कली बिथोलो पाइनीम। सहर डा उइक्थ मुर ग्याइशशा लाइक्चा पुंडसीनीम। लीशो मेको सहर उइ बाक्नीम। ३ मिनु नोले परमप्रभु यावेमी मेको रागी रागी डा मुर नु लडाइ पाइब। मुरुमी लडाइ पशो खोदेशो पा लडाइ पाइब। जकरिया १२:३; यसैया ४२:१३; प्रकाश १९:१९ ४ मेको नाक्त आ खोइलीमी यरूसलेम आ डोंइती पूर्व गे बाक्शो जैतून डांडा कली थेक्ब। मिनु जैतून डांडा आ पूर्व रे पच्छिम सम्म ठेयब पा जेक्ब। मिनु डांडा उइक्थ उत्तर गे नु उइक्थ दक्खिन गे दुम्शा बाक्ब। मिनु दातेमी ठेयब बेसी का दुम्ब। ५ गेपुकी परमप्रभु यावे आ डांडा डा बेसी रे पा प्रोक्चा मालनीनी। मेको आस दाते डा बेसी आसाल सम्म जाक्दीशो बाक्ब। गेपुकी यहूदा डा पिप उज्जीयाह आ पालामी कुशो ख्रिनुमी मुरपुकी प्रोक्शो खोदेशो पा प्रोक्नीनी। मिनु नोले परमप्रभु यावे, आं परमप्रभु आ मुर नेल्ल नु यीब। आमोस १:१

६ मेको नाक्त नां नु तास्लाम छेडछेड मगेनीस। ग्यू यो मदुम्ब। ७ मिनु गेना हना यो नाक्त बाक्ब। मारदे हना नाक्दो दुम्ची ना छेडछेड बाक्ब। परमप्रभु यावेमी मेको नेल्ल तुइक्ब। मर्कूस १३:३२

८ मेको नाक्त यरूसलेम रे पा ब्रोंडचा गेब ब्वाक्कु शाइशशा यीब। मिनु मेको उइक्थ पूर्व डा समुन्द्र गे नु उइक्थ पच्छिम डा समुन्द्र गे शाइक्ब। मेको होशो नु सिक्शो नेल्ल नाक्त शाइक्ब। इजीकीएल ४७:१-८

९ परमप्रभु यावे रागी नेल्ल डा पिप दुम्ब। मेको नाक्त परमप्रभु यावे का ला बाक्ब। आ नें यो का ला बाक्ब। भजन संग्रह ९७:१; प्रकाश ११:१५

१० मिनु रागी नेल्ल दिंम दुम्ब। मेको गेबा रे पा यरूसलेम आ दक्खिन डा रिम्मोन सम्म दिंम दुम्ब। तन्न यरूसलेम बेन्यामीन लाप्चो रे, माइत लाप्चो लाक्शा, सुर डा लाप्चो सम्म नु हानानेल माइशो लाइशो खिं रे पिप आ अडगुर ख्राक्तीक सम्म बाक्ब। मिनु यरूसलेम आ इर डा बाक्तीकेम बाक्ब। यहोसु १५:३२; येरमीया ३१:३८ ११ मिनु यरूसलेममी मुरपुकी बाक्नीमी। मिनु मेको गेनायो लेंशा खतम मसेल्नीम। यरूसलेम मारेइ मदुम्थु बाक्ब। प्रकाश २२:३; येरमीया ३३:१६

१२ परमप्रभु यावेमी यरूसलेम कली लडाइ तोइब आन कली मार बेक्तीक रोइ पपाइक्ब देंशा हना, मुर गाक्ना गाक्ना आन श्ये राक्तीके, आन मिक्च आन बाक्तीकेम राक्तीके नु आन लें आन शोव्रमी राक्तीके रोइ पपाइक्ब। १३ मेको नाक्ती परमप्रभु यावे रे पा मुर शुश हिंनीम। मेको नेल्लेमी आन नेक्था डा मुर आन गुइ ग्याइक्नीम। मिनु नोले राम्शी पोक्नीम। १४ यहूदा आ मुरपुकीमी यो यरूसलेममी लडाइ पाइनीम। मिनु रागी रागी डा मुर आन शोप खुप्नीम। मार खुप्नीम देंशा हना, सुन चांदी नु वासी शुश खुप्शा तेलनीम। १५ मेको आन बाक्तीकेम बाक्शो शारा, खच्चर, दलओंठ, गधा नु मेकेर मार मार बी ब्यफ क्यारश भेडा बाक्मा, मेको नेल्ल मुर कली साइक्ब रोइ पाइनीम।

१६ मिनु यरूसलेम कली लडाइ तोइब रागी रागी डा मुर आन दाते डा सु सु ब्रोंडशा लीमा, मेकोपुकी बर्स बर्समी यरूसलेम लशा पिप नु मुर नेल्ल आन परमप्रभु यावे कली मान पा ठेयब सेल्चा मालनीम। मेकोपुकीमी गोठ सेल्शा मानेतीक चाड मानेचा कली यरूसलेम लचा मालनीम। जकरिया १४:९ १७ मिनु तेको रागी नु खिं डा मुर नु पिप, मुर नेल्ल आन परमप्रभु यावे कली मान पा ठेयब सेल्चा कली यरूसलेम मलाम्तेक्म हना, मेको आन कली रेड मयीब। १८ मिनु इजीप्त रागी डा मुरपुकी गोठ सेल्शा मानेतीक चाड मानेचा कली यरूसलेम मलाम्तेक्म हना, मेकोपुकी यो अर्को रागी डा मुर खोदेशो पा परमप्रभु यावेमी गेशो श्येत जाइनीम। १९ इजीप्त रागी नु रागी नेल्ल डा मुर सु मेको गोठ सेल्शा मानेतीक चाड मानेथ मलाइनीमी, मेको मोदेशो सजाइ ताइनीम।

20 मेको नाक्ती शारा आन किङ्गोम यो “परमप्रभु यावे कली ला बाक्नीम” दे मुशा ब्रेक्शो बाक्ब। मिनु परमप्रभु यावे आ खिं डा क्येतीक ग्योबपुकी, चढेतीक आ डोइती बाक्शो ग्योब खोदेशो पा “परमप्रभु यावे केन बाक्नीम” दे ब्रेक्शो बाक्ब। प्रस्थान २८:३६ 21 मिनु यरूसलेम नु यहूदामी बाक्शो क्येतीक ग्योब नेल्ल मुर नेल्ल आन परमप्रभु यावे कली ला बाक्नीम। सु सुमी चढेनीमी, मेकोपुकीम मेको ग्योबुम आन चढेशो श्ये लोप्ने चाप्नीम। मिनु मेको नाक्त रे मुर नेल्ल आन परमप्रभु यावे आ खिंमी ग्याप्ब लेयब मुर का यो मबाक्नीम। प्रकाश २१:२६-२७; मत्ती २१:१२

मलाकी

ब्रेक्ब मुर: हिब्रू लोवमी मलाकी आ अर्थ “आं लोव कुरब” बाक्ब। साइ डोंडती डा थमा सुइक्ब हिरोनिमुस शुश ब्रेक्ब मुर का बाक्ब। मेकोमी “आं लोव कुरब” नें पाइश्शो, परमप्रभु यावे आ खिं लेंशा सेल्ब, जोक्ब तुइक्ब एजा आ खुइश्शो नें बाक्ब, देंब। मुरपुकीम चहिं मेको दुम्ने मचाप्ब देंशो बाक्तेक्म।

गेना ब्रेक्शो: नेहेम्याहमी इस्राएली आन पर्बम ब्रेक्शो नु मलाकी किताबम ब्रेक्शो लोव शुश गारब। इस्राएली ग्याइश्शा लाइक्चा पुंइसीमा नोले लेशशा यरूसलेमम बाक्शो बाक्तेक्म। शुश मुरुमी अर्को रागी डा मीश चाक्शो बाक्तेक्म। मेना ४३२ बि. सी. बाक्शो बाक्ब।

मार ब्रेक्शो:

१. मुर आन थमा सुइक्चा गाम्त। मलाकी २:८; नेहेम्याह १३:२९
२. अर्को रागी डा मीश आल कली चाक्शो बाक्तेक्म। मलाकी २:११-१२; नेहेम्याह १३:२३-२५
३. १० भाग मगेब दुश्शो बाक्तेक्म। मलाकी ३:८-१०; नेहेम्याह १३:१० मेको नेल्ल तशा यो, परमप्रभु यावेमी “गो इन कली दाक्नुड। आं गे लेत्तीन। गो इन कली आसीक गेनुड” दे लोव कुरब का सोइश्शो बाक्ब।

परमप्रभुम इस्राएली आन कली दाक्शो

१ मलाकीमी इस्राएली आन कली परमप्रभु यावे आ पशो लोव देंत। २ परमप्रभु यावेमी “गो इन कली दाक्ताक्ड। गेपुकीमी चहिं ‘दोपा आंइ कली दाक्तीनी डा? मार, एसाव याकूब आ लोक्ब ममाइ डा?’ देंनीनी। मिनु परमप्रभु यावेमी गो याकूब कली शुश दाक्ताक्ड। उत्पत्ती २५:२३; रोमी ९:१३ ३ तन्न एसाव कली काइ मदाक्तु। मोपतीके मेको आ बाक्तीक पहाड कली गोरशो रागी सेल्ता। आ थेरशो रू सिवार आन बाक्तीक दुम्पाइक्ता” देंत। यसैया ३४:१३ ४ मिनु एदोम डा मुरपुकीमी “गेपुकी ब्रुंडसाक्ब हना यो, गो लेंशा मेको ब्रेक्शो नेल्ल सेल्नीकी” देंतेक्म। मुर नेल्ल आन परमप्रभु यावेमी “मेकोपुकीमी सेल्लेक्म हना यो, गो प्रेतनुड। मिनु अरु मुरपुकीमी मेको आ पर्बम ‘एको ठीक मपाइब रागी का बाक्ब। परमप्रभु यावे मेको रागी तशा, गेना हना यो गाइक्ब’ ” देंनीम। ५ गेपुकीमी मेको नेल्ल तशा “तेइ तेइ रागी डा मुरपुकीमी परमप्रभु यावे कली ठेयब सेल्नीम” दे लोव पाइनीनी।

ग्रांग्रा दिचा डा थोवक चढेशो

६ मिनु मुर नेल्ल आन परमप्रभु यावेमी आ नें आइक्च सेल्ब चढेब आन कली “तौपुकीमी आन आफ कली मान पाइनीम। मिनु गेय पाइबपुकीमी आन होवप कली यो मान पाइनीम। गो इन आफ नड हना, मारदे आं कली मान मपाइनीनी? गो इन होवप नड हना, मारदे आं कली मान पा महिनीनी?” देंत। मिनु गेपुकीमी “गो दोपा इन नें आइक्च सेल्का?” देंतीनी। प्रस्थान २०:१२ ७ परमप्रभुमी “गेपुकी आं कली ग्रांग्रा दिचा डा थोवक आं चढेतीकेमी चढेनीनी। मिनु गेपुकीमी ‘दोपा इन कली ग्रांग्रा दिपाइक्का?’ दे लोव पाइनीनी। परमप्रभु यावे आ टेबल कली मारेइ खोइ मलाक्नीनी। ८ गेपुकीमी मिक्च मताइब बस्तु चढेथ चाक्नीनी। मिनु मेको दूली मबाक्ब देंनीनी। खोइल मदुक्ब नु रोइ पशो बस्तु चढेचा दूली मबाक्ब देंनीनी। मिनु इन रागी डा ठेयब मुर कली मोदेशो गेनीनु, मार, मेको ग्येरशा ताक्शा, इन कली दाक्बा डा?” दे मुर नेल्ल आन परमप्रभु यावेमी देंत। लेवी २२:२०,२३

९ मिनु “परमप्रभु आंइ कली शिशी पन” दे पुनीन। “गेपुकीमी मोदेशो मरिश्शो थोवक चढेशा मरिश्शो पाइतीनी। मिनु इन कली दोपा शिशी पाइनुडा?” दे मुर नेल्ल आन परमप्रभु यावेमी देंत। १० मिनु लेंशा “गेपुकीमी आं चढेतीकेमी मो मी मुइक्चा क्येडा का लशा लाप्चो चोक्नी हना, रिश्शो दुम वा। गो इन कली तशा मग्येरसीशो बाक्नुड। मिनु इन चढेशो यो मताक्नुड” दे मुर नेल्ल आन परमप्रभु यावेमी देंत। मलाकी २:१३; यसैया १:१३ ११ “नां दाप्तीक रे नां पेरतीक सम्म रागी रागी डा मुर आन दातेमी आं नें ठेयब बाक्ब। रागी नेल्ल डा मुरपुकीमी आं कली धूप चोशा, रिश्शो थोवक चढेनीम। मारदे हना रागी रागी डा मुर आन दातेमी आं नें ठेयब बाक्ब” दे मुर नेल्ल आन परमप्रभु यावेमी देंत। यसैया ६०:१-७ १२ मिनु “गेपुकीमी ‘परमप्रभु आ टेबल ग्रांग्रा दिचा डा बाक्ब, मेक बाक्शो थोवक यो ठीक दुम्चा ममाल्ब’ दे आं नें कली आइक्च सेल्नीनी। १३ मिनु गेपुकीमी ‘एको गिश श्येत बाक्बा’ दे आं कली चढेतीक आ पर्बम इन नें कुप्नीनी। गेपुकीमी रोइश्शो बस्तु चाक्नीनी। खोइल मदुक्ब नु रोइ पशो बस्तु चढेथ चाक्नीनी। मार, गो इन चढेशो ग्येरशा ताक्चा माल्नुडा डा?” दे परमप्रभु यावेमी देंत। १४ “सु सुमी आंम बस्तु आन बगाल रे पा ‘रिश्शो बस्तु

चढ़ेनुड' देंनीमी, तन्न नोले मरिम्शो चढ़ेनीमी, मेको जोल पाइब सराप राइनीम। मारदे हना गो ठेयब पिप नड। आं नें रागी रागी नेल्ल डा मुर आन दातेमी हिंचा डा बाक्ब" दे मुर नेल्ल आन परमप्रभु यावेमी देंत। लेवी २२:१९

2

चढ़ेब आन कली अरेशो

1 मिनु मुर नेल्ल आन परमप्रभु यावेमी "गे चढ़ेबपुकी, एको शेंशो लोव्र इन कली बाक्ब। 2 गे इन नोफा मदाइक्ताकनी नु आं नें कली मान पचा कली ममिम्ताकनी हना, गो इन कली सराप पाइनन्नी। इन कली गेशो आसीक सराप दुम्ब। मारदे हना गे काइ मटीब बाक्नीनी। गो थमा पा इन आसीक कली सराप सेल्लुड। ब्यवस्था २८:१५ 3 गो इन पतीके इन आल आन कली हुइक्नुड। इन चढ़ेशो बस्तु आन गा कयी डा ग्रांग्रा इन कुलम देप्नुड। मिनु इन कली आं डोंइती रे तिल्लुड।

4 गो लेवी नु पशो कबल गेना हना यो लील, दे इन कली मेको शेंतीक सोइक्ताकड। 5 आं पशो कबल ब्रोंइतीक नु थुं नाइक्तीक कबल बाक्ब। गो मेको कबल आं कली मान पा हिल, दे गेता। मेकोमी आं कली मान पा आं नें थिंचा शुश हित। 6 मेकोमी रिम्शो शेंतीक लोव्र पाप्नु। गेनायो दूली मशेंद। थम रिम्शो नु ठीक पतीकेमी गो नु गाक्त। मिनु मेकोमी ठीक मपाइब शुश मुर आन कली आन मरिम्शो पतीक रे लेप्पाइक्तु।

7 चढ़ेबपुकीमी तुइक्तीक लोव्र होस पा पचा माल्नीम। मिनु मुरपुकीमी मेको आन शेंशो नेंचा माल्नीम। मारदे हना चढ़ेबपुकी मुर नेल्ल आन परमप्रभु यावे आ सोइश्शो लोव्र पाइब बाक्नीम। ब्यवस्था ३३:१०; हागै १:१३ 8 गेपुकी चहिं आं लां प्रोंइशा, हेंथे गाक्तीनी। इन दूली शेंतीकेमी गे शुश मुर आन कली हेंथे गाक्ब सेल्लतीनी। गेपुकीमी लेवी नु पशो कबल खतम सेल्लतीनी" दे मुर नेल्ल आन परमप्रभु यावेमी देंत। 9 परमप्रभुमी "मोपतीके गो इन कली मुर नेल्ल आन डोंइती आइक्च नु महिक्सीशो सेल्लता। मारदे हना गेपुकीमी आं लां प्रोंइतीनी। आं शेंशो लोव्र मटिथु, कुल कोव्रमुशा हुकुम पाइतीनी" देंत।

यहूदा आ मरिम्शो पशो

10 मार, गो नेल्ल इं आफ कान ममाइ डा? मार, परमप्रभु कामीन इं कली मसेला डा? मारदे गोपुकीमी कामी अर्को कली थमा मसुइक्थु, इं किकी पिपी आन कली गेशो कबल खोइक्नया? मलाकी १:६; अय्युब ३१:१५; एफिसी ४:६

11 यहूदामी आं कली प्रोंइती। मिनु इस्राएल नु यरूसलेममी ग्रांग्रा दित्चा डा गेय दुम्शो बाक्ब। मारदे हना यहूदामी परमप्रभु यावे आ दाक्शो बाक्तीके ग्रांग्रा दिशो सेल्लु। दोपा मोदेशो सेल्लु देशा हना, आंम तौ आन कली देवी देवता आन कली ठेयब सेल्लब मुर आन तमी चाक्तु। एज्रा ९:२ 12 परमप्रभु यावेमी मोदेशो पाइब मुर आन कली याक्ब आ मुर आन बाक्तीक ताम्बु रे तिल्लब। मिनु मेकोपुकीम मुर नेल्ल आन परमप्रभु यावे कली गेनायो चढ़ेचा मताइनीम।

13 गेपुकीमी अर्को मार पाइनीनी देशा हना, परमप्रभु यावे आ चढ़ेतीके आ नेक्था डाक्शा, रोंका पा इन प्रेक्कुमी जित्नीनी। मारदे हना इन चढ़ेशो ग्येरशा मब्राइब। मलाकी १:१० 14 मिनु गेपुकीमी "मारदे मब्राइबा"? दे हिल्लो पाइनीनी। मारदे हना गे इन ठिटा बाक्ची ना डा मीश प्रोंइतीनी। मेको आ पबर्म परमप्रभु यावे सांकछी बाक्ब। मेको इ वारच इ मीश बाक्ब, इ कबल पा चाक्शो मीश बाक्ब।

15 परमप्रभुम मेको निक्शी आस कली कान मसेला डा? मेको आस सोक्त नु गिंम परमप्रभु यावे के बाक्नीस। मारदे मेको निक्शी आस कली कान सेल्लु देशा हना, आस आल परमप्रभु आ मुर दुम्मल, दे कान सेल्लु। मोपतीके गेपुकी आंम थुं आ पबर्म होस पा, सुइमी आंम ठिटा बाक्ची ना डा मीश कली मप्रोनीन। 16 मारदे हना परमप्रभु यावे, इस्राएली आन परमप्रभुमी गो मीश, वोंइश कली प्रोंइब मुर काइ मदाक्नुड। आन जिशो मदाक्नुड। मोपतीके इन थुं फ्रेदीन। इन मीश मप्रोंइब दुमीन। ब्यवस्था २४:१

परमप्रभु आ निसाफ पतीक नाक्त

17 गे इन लोव्रमी परमप्रभु यावे कली ब्रीपाइक्तीनी। मोपा यो गेपुकीमी "गेपुकीमी मार लोव्रमी इन कली ब्रीपाइक्का?" देंतीनी। गेपुकीमी "दूली लोव्र पा मरिम्शो गेय पाइब नेल्ल परमप्रभु यावे आ डोंइती ठीक बाक्नीम। मिनु मेको, मेको आन कली तशा ग्येरसीशो बाक्ब" दे "निसाफ पाइब परमप्रभु ते बाक्बा डा?" दे यो देंनीनी। मलाकी ३:१३-१४

3

1 परमप्रभुमी “नेनीन, गो आं लोव्र पाइब आं डोंइती सोइक्नुड। मेकोमी आं डोंइती आं लां सेल्चा माल्ब। इन माल्शो प्रभु रीब पा आ खिंम जाक्ब। मेको इन माल्शो कबल डा लोव्र चोक्ब बाक्ब। गे मेको कली शुश दाक्नीनी” दे मुर नेल्ल आन परमप्रभु यावेमी देंत। मत्ती ११:१०; मर्कूस १:२; लूका १:१७ 2 मिनु मेकोमी “तन्न आ जाक्ची नाक्त सु फाल्ने चाप्बा डा? आ गूची ना सु राप्शा बाक्ने चाप्बा डा? मारदे हना मेको तुप्तीलमी मुइश्शो मी नु वा मुरब आ वा बुश सेल्तीक खोदेशो बाक्ब। यसैया १:२५ 3 मेको चांदी यपाइश्शा रिम्शो सेल्ब खोदेशो पा निसाफ पाइब बाक्ब। लेवी आ चच युइ आन कली सुन चांदी खोदेशो पा यपाइश्शा रिम्शो सेल्ब। नोले मेकोपुकीमी परमप्रभु यावे कली ठीक पा चढेनीम। जकरिया १३:९ 4 मेना परमप्रभु यावेमी यहूदा नु यरूसलेममी चढेशो साइ डोंइती डा खोदेशो पा ब्राइब” देंत।

5 तन्न मेको क्येडा डोंइती “गो निसाफ पचा कली इन बाक्तीकेमी जाक्नुड। गो टुना मुना पाइबपुकी, मुर आन मीश वोंइश नु इप्बपुकी, जोल पा कसम जाइबपुकी, गेय पाइब आन कली गाल्च मगेबपुकी, वोंइश बेक्शो मीश मुर, रोम रोइक्च, नु अर्को रागी डा मुर आन कली निसाफ पा मगेबपुकी नु आं क्येडा महिंब नेल्ल आन कली निसाफ पथ जाक्नुड” दे मुर नेल्ल आन परमप्रभु यावेमी देंत।

गेचा माल्शो १० भाग

6 मिनु मेकोमी “गो, परमप्रभु यावे, गेनायो मफांडसीनुड। मोपतीके गे याक्ब आ चच युइ मुल सम्म ब्रोंइशो बाक्नीनी। 7 इन किकी पिपी आन बाक्ची ना रे आं फुल्लुम मुशा ब्रेक्शो लोव्र मटिथु, हेंथे लां खोइक्तीनी। आं गे लेतीन। मिनु गो इन गे लेत्नुड” दे मुर नेल्ल आन परमप्रभु यावेमी देंत। तन्न गेपुकीमी “गो दोपा लेत्चा?” देंतीनी। जकरिया १:३ 8 परमप्रभुमी “मार, मुरपुकीमी परमप्रभु आ मार मार खुइ पने चाप्नीमी डा? तन्न गेपुकीम आं के खुइ पशो बाक्नीनी। मो हना यो गेपुकीमी ‘गोपुकीमी इन के मार खुइ पका डा?’ देंनीनी। इन १० भाग डा भाग का नु मार मार चढेतीकेमी खुइ पशो बाक्नीनी। प्रस्थान २५:२ 9 गे सराप रशो दुम्तीनी। मारदे हना गे आं मार मार खुइ पाइब बाक्नीनी। गे इस्राएल नु मुर नेल्लेमी आं कली रोइक्ताक्यीनी। हागै १:५-६ 10 गे नेल्लेमी इन १० भाग डा भाग का वोइक्तीकेमी चाक्कीन। मिनु आं खिंमी जचा थोव्रक बाक्ल। मोपा आं कली नाक्शा, कोव्रडीन। गो स्वर्ग डा लाप्चो रोक्शा, इन कली शुश आसीक गेबाक्डा, कों, मगेबाक्डा” दे मुर नेल्ल आन परमप्रभु यावेमी देंत। 11 मिनु “गो इन रू डा बाली नाली खतम मसेल्चा डा पा माले आन कली हुइक्नुडमी। इन रूम बाक्शो अडगुर सिश्शा ग्रेलनीम” दे मुर नेल्ल आन परमप्रभु यावेमी देंत। योएल १:४

परमप्रभुमी शिशी पाइब देशो

12 मिनु “रागी रागी डा मुर नेल्लेमी इन पर्वम ‘आसीक रशा, ग्येशो मुर बाक्नीमी’ देंनीम। मारदे हना इन रागी थम आसीक रशो रागी दुम्ब” दे मुर नेल्ल आन परमप्रभु यावेमी देंत।

13 मिनु परमप्रभु यावेमी “गे आं पर्वम मरिम्शो लोव्र पाइतीनी हना यो ‘इन कली मार मरिम्शो लोव्र पका डा?’ देंतीनी। 14 गेपुकीमी ‘परमप्रभु आ गेय पचा, मोशीन बाक्ब। आ शेंशो लोव्र पचा नु बेक्शो मुर आ पर्वम रोंका पशो खोदेशो पा मुर नेल्ल आन परमप्रभु यावे आ डोंइती रोंका पचा, मोशा बाक्ब। भजन संग्रह ७३:१३-१४; जकरिया ७:३, ५ 15 मुल गो ठेयब लेशो मुर आन कली रिम्शो मुर बाक्नीम, देंनीकी। मारदे हना मरिम्शो पाइबपुकी दारनीम। परमप्रभु कली मरिम्शो पाइब ब्रोंइशा बाक्नीम’ देंनीनी” देंत।

16 मिनु परमप्रभु यावे क्येडा हिंब आन दातेमी लोव्र पाप्तेक्म। मिनु परमप्रभु यावेमी नोफा दाइश्शा, मेको आन लोव्र नेंतु। मिनु आ डोंइती आ कली मान पा हिंब, आ नें ठेयब सेल्ब आन पर्वम मिम्तीक किताब ब्रेक्शो बाक्त। 17 मिनु मुर नेल्ल आन परमप्रभु यावेमी “मेको आं मुर दुम्नीम। आं निसाफ पतीक नाक्त आं नेक्था डा मुर दुम्नीम। दोपा मुरुमी आंम कली गेय पाइब तौ कली शिशी पा वोइक्बा, मोपा गो मेको आन कली शिशी पा वोइक्नुड। प्रस्थान १९:५ 18 मेको नाक्त ठीक पाइब नु परमप्रभु आ अरेशो मटीब खाल का डा मदुम्नीम। मेको ताइनीनी। परमप्रभु कली गेय पाइब नु गेय मपाइब खाल का डा मदुम्नीम। मेको यो ताइनीनी” देंत।

4

परमप्रभु यावे आ नाक्त

1 मुर नेल्ल आन परमप्रभु यावेमी “आं निसाफ पतीक नाक्ती जाक्ब। मेको ठेयब मी खोदेशो पा ब्रशो बाक्ब। मेना ठेयब लेशो नु मरिश्शो पाइब नेल्ल सोव्रशो टुटा खोदेशो बाक्नीम। मेको नाक्ती मीम मेको आन कली नेक्ब। मिनु मेको आन शाक्श नु राशी यो मलीब। 2 तन्न गे आं नें कली मान पाइब, इन डोंइती आं ठीक पतीके नां खोदेशो पा दाप्ब। इन रोइ यो सानीनी। गे गोठ रे पा गूशो बाछा खोदेशो पा प्रेक्ना प्रेक्न दोरनीनी। लूका १:७८ 3 मिनु गेपुकीमी आं अरेशो लोव्र मटीब आन कली इन खोइलीमी दिम्नीनी। आं निसाफ पतीक नाक्ती मेको इन खोइलीम दिम्शा, पुलु खोदेशो सेल्चा पुंइसीनीमी” दे मुर नेल्ल आन परमप्रभु यावेमी देंत।

4 परमप्रभुमी “आं वाइल मोसामी इन कली गेशो आं अरेशो लोव्र मिम्तीन। गो मेको फुल्लुम मुशा ब्रेक्शो लोव्र नु आं देशो ठीक पतीक लोव्र होरेब डांडामी इस्राएली नेल्ल आन कली अरेचा कली गेता। 5 नेनीन, आं ठेयब नु हिंचा डा नाक्त जाक्चा क्येडा डोंइती आं लोव्र पाइब एलीया कली इन बाक्तीकेम सोइक्नुड। मत्ती ११:१४; १७:११-१३; योएल ३:४ 6 मिनु मेकोमी आम आफ आस थुं आस आल गे नु आल आन थुं आम आफ गे लेप्पाइक्ब। मोदेशो मदुम्त हना, गो रागी कली सराप पाइक्नुड” दे परमप्रभु यावेमी देंत। लूका १:१७

मती

ब्रेक्ब मुर: एको किताब मती आ ब्रेक्शो बाक्ब। मती शेंसीब आन दाते डा का बाक्त। मेको कली अल्फयस आ तौ लेवी यो देंतेक्म। तन्न थमा सुदा नोले मती नें वोइक्तु।

गेना ब्रेक्शो: मती आ ब्रेक्शो ग्येरपाइक्ब लोव्र यरूसलेम खतम सेल्चा क्येडा डोंइती ब्रेक्ने थुम्शो बाक्त। एको ५८ ए. डी. हिब्रू लोव्रमी ब्रेक्शो बाक्त। नोले यहूदी नेल्ल ब्रातेक्म। मिनु मती मेको आन कली शेंचा कली लत। मेना ग्रीक लोव्र पाइबमी यो एको लोव्र रुप्चा दाक्शो बाक्तेक्म। मोपतीके मेकोमी आ ब्रेक्शो ग्येरपाइक्ब लोव्र लेंशा ग्रीक लोव्रम ब्रेक्शो बाक्त, दे मिन्नीम। मती आ ब्रेक्शो ग्येरपाइक्ब लोव्रम डोंइती नु नोले दुम्शो लोव्र इच्का खाल्शा ब्रेक्शो बाक्ब।

मारदे ब्रेक्शो: येसु ख्रीस्त पिप बाक्ब। परमप्रभु यावे आ राज्य आ पर्बम लोव्र पाइब।

येसु आ किकी पिपी
लूका ३:२३-२८

1 अब्राहाम आ तौ, पिप दाऊद आ तौ, येसु ख्रीस्त आ किकी पिपी आन नें एको बाक्नीम। १इतिहास १७:११; उत्पत्ती २२:१८

2 येसु ख्रीस्त आ किकी पिपी सु सु बाक्मा बाक्त देशा हना, डोंइती अब्राहाम बाक्माक्त। अब्राहाममी इसहाक थिमाक्त। इसहाकमी याकूब थिमाक्त। याकूबमी यहूदा नु आ वोबु थीमी बाक्त। उत्पत्ती २१:३,१२; उत्पत्ती २५:२६; उत्पत्ती २९:३५; उत्पत्ती ४९:१० 3 यहूदामी तामार रे पेरेस नु जेरह तौ निक्शी थिम्सी बाक्त। पेरेसमी हेस्रोन थिमाक्त। हेस्रोनमी अराम थिमाक्त। रूथ ४:१८-२२; उत्पत्ती ३८:२९-३० 4 अराममी अम्मीनादाब थिमाक्त। अम्मीनादाबमी नहशोन थिमाक्त। नहशोनमी साल्मोन थिमाक्त। 5 साल्मोनमी राहाब माइशो मीश रे बोआज थिमाक्त। बोआजमी रूथ माइशो मीश रे ओबेद थिमाक्त। ओबेदमी येस्से थिमाक्त। येस्सेमी दाऊद थिमाक्त। दाऊद चहिं पिप दुम्माक्त। यहोसु २:१; रूथ ४:१३-१७ 6 पिप दाऊदमी उरीयाह आ मीश चाक्शा, सोलोमन थिमाक्त। २सामुएल १२:२४ 7 सोलोमनमी रेहोबाम थिमाक्त। रेहोबाममी अबीयाह थिमाक्त। अबीयाहमी आसा थिमाक्त। १इतिहास ३:१०-१६ 8 आसामी येहो-शाफात थिमाक्त। येहो-शाफातमी योराम थिमाक्त। मिनु योराममी उज्जीयाह थिमाक्त। 9 उज्जीयाहमी योथाम थिमाक्त। योथाममी आहाज थिमाक्त। आहाजमी हिज्कीयाह थिमाक्त। 10 हिज्कीयाहमी मनस्से थिमाक्त। मनस्सेमी आमोन थिमाक्त। आमोनमी योसीयाह थिमाक्त। 11 योसीयाहमी येकोन्याह नु आ लोकब थीमी बाक्त। येकोन्याह आ पालामी बेबीलोन डा मुरपुकीमी यहूदी आन कली लडाइ पा ग्याइशशा बेबीलोन चाक्दीत्मे बाक्त। २राजा २५:७,११,२१

12 बेबीलोन चाक्दीत्मे आ नोले येकोन्याहमी शाल्तीएल थिम्माक्त। शाल्तीएलमी जेरूब-बाबेल थिमाक्त। 13 जेरूब-बाबेलमी अबीउद थिमाक्त। अबीउदमी एल्याकीम थिमाक्त। एल्याकीममी आजोर थिमाक्त। 14 आजोरमी सादोक थिमाक्त। सादोकमी अकीम थिमाक्त। अकीममी एलीउद थिमाक्त। 15 एलीउदमी एलाजर थिमाक्त। एलाजरमी मात्थान थिमाक्त। मात्थानमी याकूब थिमाक्त। 16 मिनु याकूबमी योसेफ थिमाक्त। योसेफ मरीयम आ वोंइश बाक्माक्त। मरीयममी येसु थिमाक्त। येसु कली ख्रीस्त देंमा बाक्त। लूका १:२७

17 अब्राहाम रे पा दाऊद सम्म १४ पाला दुम्मा बाक्त। मिनु दाऊद पिप रे पा बेबीलोन चाक्दीत्ची सम्म १४ पाला दुम्मा बाक्त। बेबीलोन चाक्दीशो रे ख्रीस्त जरमेसेनु १४ पाला दुम्मा बाक्त।

येसु जरमेशो

18 येसु ख्रीस्त जरमेचा कली दोदेशो दुम्माक्त देशा हना, मरीयम योसेफ कली गेशा लोव्र खोइक्ने थुम्शो बाक्माक्त। मिनु योसेफमी मरीयम कली ग्युंवे पा आ खिं लाइक्चा क्येडा डोंइती मरीयम आल कुरशो बाक्माक्त। मेको आल चहिं मुर आ आल ममाइ। परमप्रभु यावे आ सोक्त रे पा दुम्शो बाक्माक्त। लूका १:३५ 19 मिनु योसेफमी “मरीयम आल कुरशो बाक्माक्त” दे तुइशशा “मुल प्रोंइचा दुम्ती” दे मिम्ता बाक्त। योसेफ रिम्शो मुर बाक्माक्त। मोपतीके “मरीयम कली मुने मतोकचा” दे मिम्शो बाक्माक्त। 20 मिनु “गो प्रोंइचा दुम्ती” दे मिम्ना मिम्न बाक्मेनु, काबु डोमु तवा बाक्त। मिनु डोमु तवानु, परमप्रभु यावे आ स्वर्ग डा गेय पाइबमी “दाऊद आ तौ योसेफ नेनो। मरीयम कली प्रोंइनुड, दे ममिम्तो। महिंथु इ खिं लाइशशा वोंइसो। आ कोव्रजम बाक्शो चहिं परमप्रभु यावे आ सोक्त के बाक्त। 21 नोले तौ

का थीब। मेको कली येसु नें वोतो। मारदे हना मेकोमी आ मुर आन कली पाप रे प्रोंइब” दे तुइक्पदा बाक्त। लूका २:२१; प्रेरित ४:१२; भजन संग्रह १३०:८ 22 मेको मो दुम्शोमी परमप्रभु यावेमी साइ नेसी आ लोव्र पाइब पपाइशो लोव्र खाप्ताक्व। साइ नेसी परमप्रभु यावे आ लोव्र पाइबमी 23 “नेनीने, कन्ने मीश आलमी कोव्रज कुरशा, तौ का थीब। मेको आल आ नें इम्मानुएल वोइक्नीम। इम्मानुएल देशो ‘परमप्रभु यावे गोपुकी नु बाक्शो बाक्ब’ दे रुम्सीब” दे ब्रेक्शो बाक्ब। यसैया ७:१४ 24 योसेफ निन्द्रा रे सेंसीशा बोक्शा, परमप्रभु यावे आ स्वर्ग डा गेय पाइब आ लोव्र टिशा, मरीयम कली आ खिं लदा बाक्त। 25 मरीयम नु मइप्थु, तौ का थिमाक्त। मिनु मेको कली येसु नें वोदा बाक्त।

2

सोरुल कोव्रशा, जोक्ब तुइक्ब जाक्शो

1 येसु यहूदीया रागी डा बेथलेहेम सहरमी जरमेसे बाक्त। मेना मेकेर हेरोद पिप बाक्माक्त। मिनु येसु जरमेसेनु, सोरुल कोव्रशा, जोक्ब तुइक्ब नां दाप्तीक रे यरूसलेममी जाक्मा बाक्त। लूका २:१-७ 2 मिनु यरूसलेममी जाक्शा “यहूदी आन पिप ते जरमेसे? मारदे हना गोपुकीमी पूब डा रागीम आ सोरुल ताइतक। मिनु गो मेको कली ठेयब सेल्थ जाक्तक। ते बाक्मा?” देमा बाक्त। गन्ती २४:१७ 3 मिनु पिप हेरोद नु यरूसलेममी बाक्बपुकीमी मेको आन लोव्र नेंशा, आन थुं ग्येत्थ लुक्च दुम्मा बाक्त। 4 मिनु हेरोदमी ठेयब चढेब नु सास्त्री आन कली खुप्शा “ख्रीस्त ते जरमेसीबा?” दे हिल्लो पामी बाक्त। सास्त्री यहूदी आन कली परमप्रभु यावे आ अरेशो लोव्र शेंब बाक्शो बाक्तेक्म। 5 मिनु मेकोपुकीमी “यहूदीया डा बेथलेहेम सहरमी जरमेसीब। मारदे हना परमप्रभु यावे आ लोव्र पाइबमी मीका ५:१; यहून्ना ७:४२ 6 ‘ए यहूदीया डा बेथलेहेम सहर, यहूदीया डा सहर नेल्ल क्येडा आइक्च महिक्सीशो सहर मनवे। मारदे हना इं इस्राएली आन कली सासन पाइब बेथलेहेममी जरमेसीब’ दे ब्रेक्शो बाक्ब” दे शेंदमे बाक्त। मीका ५:२

7 मिनु हेरोदमी मेको आन लोव्र नेंशा सुइमी मतुइक्थु, नां दाप्तीके रे जाक्शो सोरुल कोव्रब आन कली ब्रेत्तीमी बाक्त। मिनु मेको सोरुल गेना ग्रूमे, दे रुबा बाक्त। 8 मिनु “लो, मुल बेथलेहेम सहर लने। मेकेर जाक्दीशशा, मेको आल मालीन। मिनु थिश्शा आं कली यो शेंदीन। गो यो लशा ठेयब सेल्लुड” दे सोइक्तीमी बाक्त।

9 मिनु मेकोपुकीमी पिप आ लोव्र नेंशा, आन लां खोदमे बाक्त। मिनु नां दाप्तीकेमी तशो सोरुलमी आन कली लां कोइदीमी बाक्त। लां कोइना कोइन नक थिश्शा आल बाक्तीके आ सोरुल खा दिक्माक्त। 10 सोरुल खा दिक्शो तशा, शुश ग्येरशा आल आ बाक्तीकेमी ओव्रमा बाक्त। 11 मिनु ओव्रशा, आल नु आल आ ममा मरीयम कली तामे बाक्त। मिनु आन पोक्च थेक्शा आल कली ठेयब सेल्मे बाक्त। मिनु आन कुरशो थैलो प्राक्शा, सुन धूप नु ब्रोव्रशो रिना पाइब थोव्रक गुंइशा खेत्तमे बाक्त। भजन संग्रह ७२:१०,१५; यसैया ६०:६ 12 आल कली गुम्ने थुम्शा, आन रागी लेत्ची ना परमप्रभु यावेमी डोमुमी “पिप हेरोद कली लेंशा मग्रुमीने” दे तुइक्पाइक्मी बाक्त। मिनु यरूसलेम लतीक लां हेरशा, आन रागी लेम्मा बाक्त।

इजीप्त रागी लशो

13 मेकोपुकी लमा नोले काबु योसेफमी डोमुमी परमप्रभु यावे आ स्वर्ग डा गेय पाइब का फो गूशो तवा बाक्त। मेकोमी “मोबु आस कली लाइशशा, एकेर रे प्रोक्शा, इजीप्त रागी जाक्दीशशा, लेत्तीन मदेड सम्म बाक्कीन। मारदे हना पिप हेरोदमी आल कली साइक्चा, दे माल्चा चिक्ताक्व” दे मदा बाक्त। 14 मिनु योसेफमी निन्द्रा रे सेंसीशा छुल बोक्शा, मोबु आस कली लाइशशा मेको, नाक्दोन इजीप्त प्रोक्मा बाक्त। 15 मिनु इजीप्त रागीमी जाक्दीशशा, पिप हेरोद मबेक्म सम्म मेकेर बाक्मा बाक्त। मो दुम्शोमी परमप्रभु यावे आ लोव्र थमा दुम्माक्त। साइ नेसी परमप्रभु यावेमी आ लोव्र पाइब रे पा “इजीप्त रे लेत्तो, दे आं तौ कली ब्रेत्ताक्ड” दे देशो बाक्माक्त। होसे ११:१

पिपमी आल आन कली साइक्पाइशो

16 पिप हेरोदमी मार पवा बाक्त देशा हना “मेको सोरुल कोव्रशा जोक्ब तुइक्बपुकीमी जोल पाइयीमी बाक्त” दे तुइशशा चुरमाक्त। मिनु आन देशो लोव्रमी “पिप मेना जरमेसीब” दे मिम्शा, मेको पिप दुम्ब आल कली थिन्ने मचाप्तीके बेथलेहेम सहर एर ओंथ गाउं डा बर्स निक्शी मलाक्शो वोंइश आल नेल्ल आन कली माल्ना माल्न साइक्पाइक्मी बाक्त। 17 मो पवानु, परमप्रभु यावे आ लोव्र थमा दुम्माक्त। साइ नेसी परमप्रभु यावेमी आ लोव्र पाइब येरमीया रे पा 18 “रामाह सहरमी रोंका पा डाक्शो नेंसीब। राहेलमी डाक्ना डाक्न बाक्ब। सुइमी लेम्ने मचाप्नीम। मारदे हना आ आल साइक्चा पुंइसाक्म” देमाक्त। येरमीया ३१:१५; उत्पत्ती ३५:१९

इजीप्त लां लेशशो

19 मिनू नोले पिप हेरोद बेक्माक्त। मिनू काबु इजीप्त रागीम बाक्शो योसेफ डोमु तवानु, परमप्रभु यावे आ स्वर्ग डा गेय पाइबमी 20 “मोबु आस कली लाइशशा, इस्राएल लेशशा लावो। आल कली साइक्चा माल्बपुकी बेक्तेक्म” देंमाक्त। प्रस्थान ४:१९ 21 मिनू योसेफमी मोबु आस कली इस्राएल लेत्ता बाक्त। 22 मिनू लेशशा जाक्दीशशा, यहूदीया रागीमी हेरोद आ तौ अरकीलाउस पिप दुम्शो बाक्त देंशो नेंशा, यहूदीया रागीमी बाक्चा हिंमाक्त। मिनू लेंशा डोमुमी “यहूदीयामी मबाक्कीन। गालील रागी लशा बाक्कीन” दे माइक्चा पुंडसे बाक्त। मिनू गालील रागी लमा बाक्त। 23 मिनू गालील डा नासरथ सहरमी जाक्दीशशा बाक्मा बाक्त। मारदे हना साइ नेसी परमप्रभु यावे आ लोव्र पाइब आन लोव्र थमा दुम्चा माल्बाक्माक्त। मेकोपुकीमी “मेको कली नासरी देंनीम” देंशो बाक्मा बाक्ब। लूका २:३९; यूहन्ना १:४६

3

ब्वाक्कुमी खुम्शा गुंडब यूहन्ना

मर्कूस १:२-८; लूका ३:१-१८

1 मेना ब्वाक्कुमी खुम्शा गुंडब यूहन्ना यहूदीया डा गोरशो रागीम बाक्शा लूका १:१३ 2 “इन थुं परमप्रभु यावे गे लेत्तीने। मारदे हना स्वर्ग डा राज्य जाक्चशो बाक्ब” दे मुर आन कली शेंना शेंन बाक्माक्त। मती ४:१७; रोमी १२:२ 3 साइ नेसी परमप्रभु यावे आ लोव्र पाइब यसैयामी “गोरशो रागीमी सेंदा कामी ओदेशो नेंसीब ‘प्रभु आ लां सेलीने। आ गाक्तीके फुल्लु गोकशा थेलीने’ देंशो नेंसीब” देंशो बाक्माक्त। मेको लोव्र पाइब यूहन्ना बाक्माक्त। यसैया ४०:३; यूहन्ना १:२३ 4 यूहन्नामी दलओंठ आ चां के प्रोव्रशो वा फेक्बाक्माक्त, कुशुल के पेटी किप्बाक्माक्त। मिनू सल्ला ब्वशा, रोका खुदो जशा बाक्बाक्माक्त। २राजा १:८ 5 मिनू गोरशो रागीम बाक्मेनु, यरूसलेम सहर नु यहूदीया रागी डा गाउं सहर डा मुर नेल्ल जाक्शा देल्मा बाक्त। यर्दन खोला आ नेक्था डा मुरपुकी यो शुश जाक्शा देल्मा बाक्त। 6 यूहन्ना आ लोव्र नेंशा, शुश मुरुमी आन मरिम्शो पशो शोव्रडमे बाक्त। मो पा शोव्रब आन कली यूहन्नामी यर्दन खोलामी खुम्शा गुंडदीमी बाक्त।

7 मिनू यूहन्नामी फरिसी नु सदुकी शुश जाक्शो तशा, मेको आन कली “गे बुस्स आ खलकपुकी, सुमी परमप्रभु यावे आ सजाइ रे ब्रोंइचा तांडसीब, दे शेंदीनी?फरिसी रिती थीती सेल्शा, रिम्शो पचा कली कोव्रब यो बाक्शो बाक्तेक्म। सदुकी यहूदी आन सरकार डा हुल ‘मुर मसेंसीनीम’ दे थमा सुइक्ब बाक्शो बाक्तेक्म। मती २३:३३ 8 परमप्रभु यावे गे इन थुं लेशशो तचा डा पा फल सिप्पा कोइदीने। 9 अब्राहाम इं आफ बाक्ब, दे शोर गाक्शा मबाक्कीन। मारदे हना परमप्रभु यावेमी एको फुल्लु रे अब्राहाम कली आल सेल्ने चाप्ब, दे तुइक्तीन। यूहन्ना ८:३३, ३९; रोमी २:२८:२९; रोमी ४:१२ 10 तिम्चा, दे रवा आ पुंमी खा वोइशशो बाक्ब। फल मसिप्ब रवा का का पा तिम्शा मीमी चोचा पुंडसीनीम, दे तुइक्तीन। लूका १३:६-९ 11 इन थुं लेत्चा कली इन कली ब्वाक्कुम खुम्शा गुंडनन्नी। गो ब्वाक्कुम खुम्शा गुंडब ला नड। आं नोले जाक्ब चहिं आं क्येडा शुश सक्ति पाइशशो ठेयब बाक्ब। गो मेको आ जुत्ता गुप्शा कुरचा लायो मशिरनुड। मेकोमी इन कली परमप्रभु यावे आ सोक्तीमी खुम्ब, मीमी यो हुम्ब। यूहन्ना १:२६, २७, ३३; प्रेरित १:५; प्रेरित २:३-४ 12 आ गुइमी ग्योल बाक्ब। मेकोमी लाडगामी हाम्शो चेरब हुरशा, भूस नु गेडा तिल्लब। गेडा कोठोमी कुर पा वोइक्ब। भूस चहिं गेनायो मकाप्ब मीमी चोइब” दे माइक्मी बाक्त। मती १३:३०

येसु ब्वाक्कुम खुम्शा गुंडशो

मर्कूस १:९-११; लूका ३:२१-२२; यूहन्ना १:३२-३४

13 मिनू काबु येसु गालील रागी रे यूहन्ना नु ब्वाक्कुम खुम्शा गुंडसीथ यर्दन खोला यूहन्ना आ बाक्तीकेमी जाक्माक्त। 14 मिनू यूहन्नामी “गेमी आं कली कका ब्वाक्कुम खुम्शा गुंडचा गारब। मिनू मार आं गे पीनीनी?” देंमाक्त। यूहन्ना १३:६ 15 मिनू येसुमी “मुल ओन पय। मारदे हना रिम्शो पतीके नेल्ल पचा माल्नय” देंमाक्त। मिनू यूहन्नामी “लो, मो हना” देंशा, येसु कली ब्वाक्कुम खुम्शा गुंडदा बाक्त। 16 मिनू ब्वाक्कु रे गूशा, खोला रे कुसानु, मार दुम्माक्त देंशा हना, येसुमी स्वर्ग रोक्सीशा, परमप्रभु यावे आ सोक्ती परवा खोदेशो दुम्शा, यिशा आ रांमी जुक्चशो तवा बाक्त। यसैया ११:२ 17 मिनू सरीड रे “एको आं दाक्शो तौ बाक्ब। एको कली तशा थाम्पा ग्येरसीनुड” देंशो सेंदा गूमाक्त। मती १७:५; यसैया ४२:१

4

येसु थाम्चा पुंडसीशो

मर्कूस १:१२-१३; लूका ४:१-१३

1 मिनु नोले सैतान रे पा थुं थाम्चा पुंडसीचा कली परमप्रभु यावे आ सोक्तीमी येसु कली गोरशो रागीमी चाक्दीदा बाक्त। हिब्रू ४:१५; 2 मिनु येसु ४० नाकदो नाक्त मजथु बाक्माक्त। मिनु ४० नाक्त जाक्दीम्मेनु, शोत्रलु बेक्माक्त। प्रस्थान ३४:२८; १राजा १९:८ 3 मिनु सैतानमी येसु कली “मार, गे परमप्रभु यावे आ तौ नवे हना, एको फुल्लु आन कली शोब्ले दुमीन देशा शोब्ले सेलो” देंमाक्त। उत्पत्ती ३:१-७ 4 मिनु येसुमी “परमप्रभु यावे आ लोत्रमी ‘मुर जशा ला मब्रोंइनीम, परमप्रभु यावे आ देशो लोत्रमी यो ब्रोंइनीम’ दे ब्रेक्शो बाक्त” दे लोत्र लेत्ता बाक्त। ब्यवस्था ८:३

5 मिनु नोले सैतानमी येसु कली यरूसलेम सहर लाइशशा, परमप्रभु यावे आ खिं डा नेल्ल क्येडा तारी लदा बाक्त। 6 मेकेर बाक्सानु, सैतानमी “मार, गे परमप्रभु यावे आ तौ नवे हना, एकेर रे प्रेक्को। मारदे हना परमप्रभु यावे आ ब्रेक्पाइशो लोत्रमी ‘परमप्रभु यावेमी आ स्वर्ग डा गेय पाइब आन कली सोइशशा, इ कली आन गुडम ताक्शा खपीम नाइकपाइक्ब। इ खोइल फुल्लु कामी यो मथोक्ब’ ब्रेक्शो बाक्ब” देंमाक्त। भजन संग्रह ९१:११,१२ 7 मिनु येसुमी “परमप्रभु यावेमी ब्रेक्पाइशो लोत्रमी ‘परमप्रभु यावे कली थुं मथाम्चा’ दे यो ब्रेक्शो” देंमाक्त। ब्यवस्था ६:१६

8 मिनु नोले सैतानमी येसु कली ठेयब लाइशशा डांडा तारी लदा बाक्त। मेकेर चाक्दीशशा, रागी डा नेल्ल राज्यपुकी नु आन दारस कोंइदा बाक्त। 9 मिनु “गे पोक्च थेक्शा, आं कली सेउ पाप्तीवी हना, एको नेल्ल गेनन” देंमाक्त। मती १६:२६ 10 मिनु येसुमी “लावो, सैतान। मारदे हना ‘परमप्रभु यावे कली ला सेउ पावो। मिनु ठेयब सेलो’ देशा ब्रेक्शो बाक्ब” देंमाक्त। ब्यवस्था ६:१३ 11 मिनु सैतानमी येसु कली प्रोंइशा लमाक्त। मिनु मार दुम्माक्त देशा हना, परमप्रभु यावे आ स्वर्ग डा गेय पाइबपुकी जाक्शा, येसु कली गेय पामे बाक्त। यूहन्ना १:५१; हिब्रू १:६,१४

येसुमी शेंचा गोशो

मर्कूस १:१४-१५; लूका ४:१४-१५

12 मिनु नोले येसुमी “यूहन्ना कली ग्याइशशा चोक्तेक्म” देशो लोत्र नेंशा, यहूदीया रागी रे लशा, गालील रागी जाक्दीम्माक्त। मती १४:३ 13 मिनु नासरथ रे लशा डा मिन, जबूलून नु नाप्ताली रागी डा समुन्द्र आ नेक्था डा कापेरनाउम सहरम जाक्दीशशा बाक्माक्त। 14 मोदेशो पा साइ नेसी परमप्रभु यावे आ लोत्र पाइब यसैया आ लोत्र थमा दुम्माक्त। यसैयामी 15 “जबूलून, नाप्ताली रागी, समुन्द्र आ एर ओंथ रागी, यर्दन खोला आइक्ची हांबु नु अर्को जात डा गालील रागीमी बाक्बपुकी, 16 डांडती छिडछिडम बाक्बपुकीमी मुल ठेयब छेडछेड ताम्तेक्म। बेक्चा डा रागी नु हिंशा बेक्चा डा रागीम बाक्ब आन कली छेडछेड दुम्त” दे ब्रेक्शो बाक्त। यसैया ८:२३; यसैया ९:१; यूहन्ना ८:१२

17 येसुमी मुर आन कली “इन थुं परमप्रभु यावे गे लेत्तीन। मारदे हना स्वर्ग डा राज्य जाक्चशो बाक्ब” दे शेंचा गोवा बाक्त। मती ३:२

येसुम शेंसीबपुकी योत्रशो

मर्कूस १:१६-२०; लूका ५:१-११; यूहन्ना १:३५-५१

18 मिनु काबु गालील डा समुन्द्र आ नेक्था गाक्मेनु, माझी वोबु निक्शीम एर ओंथ ग्याइल आप्शा, डांड रेन्ना रेन्न बाक्शो ताम्सी बाक्त। मेको निक्शी आस नें का पत्रुस माइशशा सिमोन बाक्माक्त, का अन्द्रीयास बाक्माक्त। 19 मिनु येसुमी “आं नोले खोइय्यीसी। मिनु मुर आन कली रेप्ब सेलनन्सी” दे ब्रेत्तीम्सी बाक्त। मती २८:१९-२० 20 मिनु ग्याइल थु था प्रोंइशा, येसु आ नोले खोदसे बाक्त। मती १९:२७

21 मिनु मेकेर रे लशा हिरसमानु, येसुमी जब्दी नु आ तौ याकूब नु यूहन्ना पोबु आन कली तामी बाक्त। मेको सांफा डोंगाम बाक्शा गाक्शो, ग्याइल प्रोत्रना प्रोत्रन बाक्मा बाक्त। मिनु येसुमी वोबु आस कली ब्रेत्तीम्सी बाक्त। 22 मिनु आस गेय प्रोंइशा, येसु आ नोले खोदसे बाक्त।

येसुम रोइ पाइब सापाइशो

मर्कूस १:३९; मर्कूस ३:७-१२; लूका ४:४४; लूका ६:१७-१९

23 मिनू गालील रागी तेइ तेइ हिरना हिरन लमानु, येसुमी ग्रुम्तीक खिंमी स्वर्ग डा राज्य डा ग्येरपाइक्ब लोत्र शेंना शेंन नु रोइ पशो नु रोइमी गुरशो मुर नेल्ल आन कली सापाइक्ना पाइक्न गाक्बाक्माक्त। 24 मिनू सिरिया रागी नेल्ल मेको आ पबर्म लोत्र ब्रम्माक्त। मिनू रोइ पशो मुर नेल्ल आन कली येसु आ बाक्तीकेमी चाक्स डा चाक्स पाइबाक्मा बाक्त। वोल्मी तशो, वोल्मी सुम्शो नु गुइ खोइल मदुक्ब मुर चाक्गमे बाक्त। मिनू येसुमी मेको नेल्ल आन कली सापाइक्मी बाक्त। मर्कूस ६:५५ 25 मिनू गालील, डेकापोलीस, यरूसलेम, यहूदीया रागी नु यर्दन खोला आइक्ची हांबु डा शुश मुरुमी येसु आ नोले खोदमे बाक्त।

5

डांडाम शेंशो लोत्र
लूका ६:२०-४९

1 मिनू येसुमी शुश मुर आ नोले खोइश्शो तशा, डांडा डोइश्शा निस्से बाक्त। मिनू मेकेर आ शेंसीबपुकी यो जाक्मा बाक्त। 2 मिनू मेकेर जाक्शो आन कली ठेयब सेंदा पा शेंना शेंन बाक्माक्त।

आसीक राइब सु बाक्नीम?

मिनू येसुमी 3 “महिक्सीशो मुरपुकी आसीक राइनीम। मारदे हना स्वर्ग डा राज्य मेको आन केन बाक्ब। यसैया ५७:१५ 4 आन थुं खाइश्शोपुकी आसीक राइनीम। मारदे हना आन थुं नाइक्चा ताइनीम। भजन संग्रह १२६:५; प्रकाश ७:१७ 5 ब्रेम्शोपुकी आसीक राइनीम। मारदे हना रागी आन केन दुम्ब। मती ११:२९; भजन संग्रह ३७:११ 6 ठीक पशो तचा दाक्बपुकी आसीक राइनीम। मारदे हना आन दाक्शो ताइनीम। लूका १८:९-१४; यूहन्ना ६:३५ 7 शिशी पाइबपुकी आसीक राइनीम। मारदे हना आं यो शिशी ताइनीम। मती २५:३५-४६; याकूब २:१३ 8 आन पाप क्याम्चा पुंइसीशा, रिम्शो थुं दुम्शोपुकी आसीक राइनीम। मारदे हना परमप्रभु यावे कली ताइनीम। भजन संग्रह २४:३-५; भजन संग्रह ५१:१२-१३; १यूहन्ना २:२-३ 9 दुशा गारशा बाक्बपुकी आसीक राइनीम। मारदे हना परमप्रभु यावे आ तमी तौ देंचा पुंइसीनीम। हिब्रू १२:१४ 10 ठीक पशा यो खेदा पचा पुंइसीबपुकी आसीक राइनीम। मारदे हना स्वर्ग डा राज्य मेको आन केन बाक्ब। १पत्रुस ३:१४ 11 आं पबर्म मुरपुकीमी इन कली हेला पा, खेदा पा, जोल पा, मरिम्शो लोत्र पाम्तेक्म हना यो, आसीक राइनीनी। मती १०:२२; प्रेरित ५:४१; १पत्रुस ४:१४ 12 ग्येरसीने। मारदे हना स्वर्गमी इन कली ठेयब इनाम वोइश्शो बाक्ब। साइ नेसी रे मुल सम्म परमप्रभु यावे आ लोत्र पाइब आन कली खेदा पा श्येत गेस डा गेस पाम्तेक्म। हिब्रू ११:३३-३८; याकूब ५:१०

रागी डा हिक्सी

13 गे रागी डा हिक्सी ननी। हिक्सी आ डाम्चा जाम्त हना, मारेइ काम मलाप्ब। लांमी ताइश्शा मुर गाक्मानु, दिम्शा खाक्चा पुंइसीब। मर्कूस ९:५०; लूका १४:३४-३५

रागी डा छेडछेड

14 गे रागी डा छेडछेड ननी। डांडामी सेल्शो सहर मारेइमी मफारसीब। यूहन्ना ८:१२ 15 सुइमी बत्ती दाशा, पाथीम गुप्शा मवोइक्नीम। खिं आगा नेल्ल छेडछेड पा तचा डा पा वोइक्नीम। मर्कूस ४:२१; लूका ८:१६ 16 मेको ब्रशो बत्ती खोदेंशो पा गेमी इन रिम्शो गेय रे पा इन छेडछेड मुर आन कली कोइदीने। मिनू इन रिम्शो पशो तशा, स्वर्गमी बाक्ब इन आफ कली ठेयब सुइश्शा मान पाइनीम। फिलिप्पी २:१४-१५; यूहन्ना १५:८; एफिसी ५:८-९

येसुमी नु अरेशो लोत्र

17 परमप्रभु यावे आ अरेशो लोत्र नु परमप्रभु यावे आ लोत्र पाइबपुकीमी ब्रेक्शो लोत्र क्याम्ब, दे ममिम्तीने। क्याम्चा कली ममाइ, नेल्ल पचा कली जाक्ती। मती ३:१५; रोमी ३:३१; रोमी १०:४; १यूहन्ना २:७ 18 नोफा दाइश्शा नेनीने, सरीड नु रागी मग्याम्म सम्म परमप्रभु यावे आ लोत्र का यो मग्याम्ब। नेल्ल थमा दुम्ब। लूका १६:१७ 19 सुमी परमप्रभु यावे आ अरेशो लोत्र के लोत्र का मपाइबा, मुर आन कली मो पचा शेंबा, मेको मुर स्वर्ग डा राज्यमी नेल्ल क्येडा आइक्च दुम्ब। सुमी लोत्र का यो मप्रोंइथु, नेल्ल पशा डा मिन, मुर आन कली शेंबा, मेको चहिं स्वर्ग डा राज्यमी ठेयब दुम्ब। याकूब २:१०

20 सास्त्री नु फरिसी आन पशो क्येडा गे रिम्शो ठीक गेय मपाइतीनी हना, गेपुकी यो स्वर्ग डा राज्य ओत्रचा मताइनीनी, दे इन कली देंनुड। मती २३:२-३३

साइक्चा मदुम्ब, दे शेंशो

21 साइ नेसी इं किकी पिपी आन कली 'मुर कली मसाइक्चा। सुइमी अरु कली साइक्चु हना, मेको सजाइ गेचा पुंडसीब' दे देशो लोव बाक्ब, दे तुइक्नीनी। प्रस्थान २०:१३, प्रस्थान २१:१२ 22 गोमी चहिं इन कली मार देंनुड देशा हना, सु मुर नु ईख पा ब्राशा बाक्बा, मेको सजाइ गेचा पुंडसीब। सुमी अर्को कली मरिम्शो लोव पाइबा, मेको कछडी पचा पुंडसीब। सुमी अर्को कली 'ए मूर्ख' देंबा, मेको नरक डा मीम हुम्चा पुंडसीब। १यूहन्ना ३:१५

23 मोपतीके गे परमप्रभु यावे कली मार मार चढ़ेचा सादीनीनु, सुइ गेपुकी नु गाइश्शो, चुरशो फुक्तीनी हना, 24 चढ़ेचा क्येडा डोंइती मेको आन कली ग्रुम्शा, दुशा गारशा ला चढ़ेने। मर्कूस ११:२५

25 इन कली मरिम्शो पाइब नु लांमी बाक्नीनुन, गारीने। मारदे हना मेकोमी इन कली अडडाम लाइश्शा, निसाफ पाइब आ डोंइती चाक्दीपब। मिनु निसाफ पाइबमी पुलीस आन गुइमी गेब। मिनु पुलीसम जेल्खानम चोक्नीम। मती १८:२३-३५; लूका १२:५८-५९ 26 नोफा दाइश्शा नेनीने, इन कली नोले डा क्वद्रन्स मथाप्पाइक्थु मप्रोंइनीम। क्वद्रन्स नेल्ल क्येडा आइक्च क्येट बाक्त।

मीश वोंइश आस नाता मखोइक्चा

27 ग्युंभे पशोपुकी आन मीश वोंइश नाता ब्राचा मदुम्ब देशो बाक्ब, दे तुइक्नीनी। प्रस्थान २०:१४ 28 गो मार देंनुड देशा हना, ग्युंभे पशो मुरुमी अर्को मीश मुर तशा वाल्त हना, आ थुंमी मीश वोंइश आस नाता खोइक्ब। २सामुएल ११:२; अय्युब ३१:१; २पत्रुस २:१४ 29 इ ग्युरा मिक्चीमी इ कली पाप पपाइक्चु हना, फेशशा ताइक्तो। मारदे हना रां नेल्ल नरकम खुम्चा पुंडसीचा क्येडा रां डा मिक्च का जाम्शा लशो रिम्शो दुम्ब। मती १८:८-९; मर्कूस ९:४७; कलस्सी ३:५ 30 इ ग्युरा गुइमी इ कली पाप पपाइक्चु हना, खोइश्शा ताइक्तो। मारदे हना रां नेल्ल नरकम खुम्चा पुंडसीचा क्येडा रां डा गुइ का जाम्शा लशो रिम्शो दुम्ब।

31 सु आ मीश नु ब्राबा, मेकोमी छोड पत्र ब्रेक्शा गेचा माल्ब, दे यो देशो बाक्ब। ब्यवस्था २४:१; मती १९:३-९; मर्कूस १०:४-१२ 32 गोमी मार देंनुड देशा हना, सुमी आ मीश आं नु फ्राशा सोइक्बा, मेकोमी आ मीश कली मीश वोंइश आस नाता खोइक्पाइक्ब। मीश मुरुमी आ वोंइश बाक्ना बाक्न अर्को वोंइश मुर नु मरिम्शो गेय पाप्तु हना, मोदेशो मीश मुर कली प्रोंइचा दुम्ब। सुमी छोड पत्र गेचा पुंडसीशो मीश मुर ग्युंभे पाइबा, मेकोमी यो मीश वोंइश आस नाता खोइक्ब। लूका १६:१८; १कोरिन्थी ७:१०-११

कसम मजचा

33 साइ नेसी इं किकी पिपी आन कली 'जोल पा कसम मजचा। परमप्रभु यावे कली मार मार गेनुड, पाइनुड, दे कसम जाइतीनी हना, मेकोन गेचा पचा माल्नीनी' दे देशो बाक्ब, दे यो तुइक्नीनी। लेवी १९:१२; गन्ती ३०:३ 34 गोमी मार देंनुड देशा हना, कसम का यो मजने। सरीड आ नेमी कसम मजने। मारदे हना सरीड परमप्रभु यावे आ नित्तीके बाक्ब। मती २३:१६-२३२; यसैया ६६:१ 35 रागी आ नेमी यो कसम मजने। मारदे हना रागी परमप्रभु यावे आ खोइल थेक्तीक बाक्ब। यरूसलेम सहर आ नेमी यो कसम मजने। मारदे हना यरूसलेम नेल्ल क्येडा ठेयब पिप आ सहर बाक्ब। भजन संग्रह ४८:३ 36 इन पिया थिशा यो कसम मजने। मारदे हना चां का यो बुश के क्येर, क्येर के बुश सेल्ले मचाप्नीनी। 37 इन देशो लोव चहिं 'दुम्ब हना दुम्ब, मदुम्ब हना मदुम्ब' देनीने। मेको क्येडा लाक्शो लोव चहिं मरिम्शो लां रे पीब। याकूब ५:१२

क्येक्क मलेत्चा

38 'सुइमी इन मिक्च पुक्ताक्म हना, मेको आन कली यो मिक्च पुक्तीने। सुइमी इन खुइ जिक्ताक्म हना, मेको आन कली यो खुइ जिक्तीने' देशो बाक्ब, दे तुइक्नीनी। प्रस्थान २१:२४ 39 गो मार देंनुड देशा हना, सुइमी इन कली मरिम्शो पाम्तेक्म हना यो, मेको आन कली आन क्येक्क मलेत्तीने। इन ग्युरा चोवचो राप्तेक्म हना, पेरा यो राप्चा गेने। बिलाप ३:३०; यूहन्ना १८:२२-२३; रोमी १२:१९, २१; १पत्रुस २:२०-२३ 40 इन कली मुददान कोप्शा, अडडाम लाइश्शा, इन फेक्शो वा लाइक्चा माल्तेक्म हना, इन बरखी यो गेशा सोइक्तीने। १कोरिन्थी ६:७; हिब्रू १०:३४ 41 इन कली आधा कोस सम्म लचा, दे ढिपी पाम्तेक्म हना, कोस का सम्म यो लने। 42 इन के मारेड थोवचो पुंडतेक्म हना, आन पुंडशो गेने, जेर पुंडतेक्म हना यो, मगेनीकी, दे श्येत्थी मसोइक्तीने।

जोरी सत्रु आन कली यो दाक्चा

43 'गेपुकी नु बाक्ब मुर आन कली दाक्तीने। जोरी सत्रु आन कली चहिं मदाक्तीने' देशो बाक्ब, दे तुइक्नीनी। लेवी १९:१८ 44 गोमी इन कली मार देनुड देशा हना, जोरी सत्रु आन कली दाक्तीने। इन कली हेला पा खेदा पाइब आन परबम परमप्रभु यावे कली पुनीने। प्रस्थान २३:४-५; लूका ६:२७-२८; रोमी १२:१४,२०; लूका २३:३४; प्रेरित ७:५९; लूका ६:२७-२८ 45 मो पाइतीनी हना, इन स्वर्ग डा आफ आ तमी तौ नकी, दे कोइनीनी। स्वर्गम बाक्ब आफोमी रिम्शो मरिम्शो पाइब नेल्ल आन कली नां दाप्पाइक्ब। नेल्ल आन कली रेउ यिपाइक्ब। एफिसी ५:१ 46 इन कली दाक्ब आन कली ला दाक्ताक्नी हना, मार इनाम ताइनीनी डा? तिरो पोक्बपुकीमी यो मो मपाइनीम डा? 47 इन जात, थर डा मुर आन कली ला मान पा सेत्ताक्नी हना, मार इनाम ताइनीनी डा? परमप्रभु कली मतुइक्बपुकीमी मसेम्मुइनीमी डा? 48 मोपतीके दोपा इन स्वर्ग डा आफोमी रिम्शो पाइबा, मोपा गे यो रिम्शो पने। लेवी १९:२

6

मथीब आन कली शिशी पचा

1 होस पांडसीने, मुर आन डोंइती कोइचा कली प्रुडग आन कली शिशी मपने। मारदे हना मोदेशो पाइब आन कली स्वर्गम बाक्ब इन आफोमी इनाम मगेब।

2 श्येत जाइब, मथीब आन कली मारेइ गेनीनु, इन डोंइती तुराही मतापीने। कपटीपुकीमी गुम्तीक खिंमी, लांमी मुर आन कली आन रिम्शो पतीके कोइशा ठेयब सेल्पांडसीनीम। नोफा दाइश्शा नेनीने, मेको आन तचा डा इनाम मारेइ मलीब। १कोरिन्थी १३:३ 3 श्येत जाइब, मथीब आन कली मारेइ गेनीनु, इन ग्युरा गुइमी गेशो, पेरा गुइ कली यो मतुइक्पाइक्थु गेने। मत्ती २५:३७-४०; रोमी १२:८ 4 मोदेशो पा इन गेशो खुइश्शोम बाक्ब। मिनु खुइश्शो यो नेल्ल तुइक्ब इन आफोमी इन कली इनाम गेब।

प्रार्थना पचा शेंशो

5 परमप्रभु यावे कली प्रार्थना पनीनु, कपटीपुकीमी पशो खोदेशो पा मपने। मेकोपुकीमी गुम्तीक खिंमी, लांमी मुर आन कुल राप्शा कोव्रपांडसीशा, प्रार्थना पाइनीम। नोफा दाइश्शा नेनीने, मेको आन तचा डा इनाम मारेइ मबाक्ब। 6 गे चहिं परमप्रभु यावे कली प्रार्थना पनीनु, इन खिं ओव्रशा, लाप्चो चोक्शा, सुइ आन मतुइक्थु, खुइश्शोमी बाक्ब इन आफ कली प्रार्थना पने। मिनु खुइश्शो यो नेल्ल तुइक्ब इन आफोमी इन कली इनाम गेब। 7 परमप्रभु यावे कली प्रार्थना पनीनु, अर्को रागी डा मुरपुकीमी खोदेशो पा हेथे शुश लोव्र मपने। मारदे हना शुश लोव्र पशोमी आन पुंइशो ताइनीम, दे मिम्नीम। यसैया १:१५ 8 मेको आन पशो खोदेशो मपने। मारदे हना पुंइचा क्येडा डोंइती इन आफोमी इन माल्शो तुइश्शो बाक्ब। 9 ओदें प्रार्थना पने 'स्वर्गम बाक्ब आंइ आफ, इन नें ठेयब बाक्ल। लूका ११:२-४; इजीकीएल ३६:२३ 10 इन राज्य जाक्ल। स्वर्गमी इन दाक्शो खोदेशो पा रागीमी यो मोदेशोन दुम्ला। लूका २२:४२ 11 काबु नाक्त डा जचा थोव्रक मुलाक्ती आंइ कली गेने। 12 आंइ मरिम्शो पशो क्याम्शा गेने। मारदे हना गो यो आंइ कली मरिम्शो पाइब आन कली माफ गेतक। मत्ती १८:२१-३५ 13 सैतानमी आंइ थुं हिरपाइक्चा मगेने। आंइ कली सैतान रे प्रोनीने। मारदे हना राज्य, सक्ति नु छेडछेड गेना हना यो इन के नम' आमने। यूहन्ना १७:१५; १कोरिन्थी १०:१३; १इतिहास २९:११-१३ 14 इन कली मरिम्शो पाइब आन कली माफ गेतीनी हना, स्वर्गमी बाक्ब इन आफोमी यो इन कली माफ गेब। मर्कूस ११:२५ 15 माफ मगेतीनी हना, इन आफोमी यो इन कली माफ मगेब।

बर्त बाक्चा शेंशो

16 बर्त बाक्नीनु, राव कीशो कुल मसेलीने। कपटीपुकीमी आंइ बर्त बाक्शो तांइसेक्ल, दे आन कुल राव कीपा कोइनीम। नोफा दाइश्शा नेनीने, मेको आन तचा डा इनाम मारेइ मबाक्ब। यसैया ५८:५-६ 17 गेपुकी चहिं बर्त बाक्नीनु, चांमी तेल खेक्शा, कुल चिक्शा, इन बुं जिप्शा बाक्कीन। 18 मो पाइतीनी हना, इन बर्त बाक्शो खुइश्शोमी बाक्ब। मिनु खुइश्शो यो नेल्ल तुइक्ब इन आफोमी इन कली इनाम गेब।

इन थुं शोप गे महिरदीने

19 एको रागीमी शोप खुप्शा, खेक्शा मवोतीने। मारदे हना बुस्सुम खोइक्ब, खिया जोइब, खुइपुकीमी खुइ पाइनीम। 20 स्वर्गमी इन शोप वोतीने। मेकेर बुस्सुम मखोइक्ब, खिया मजोइब, खुइपुकीमी यो खुइ मपाइनीम। मत्ती १९:२१; लूका १२:३३-३४; कलस्सी ३:१-२ 21 तेकेर इन शोप बाक्बा, मेकेरन इन थुं यो लीशो बाक्ब।

22 इन मिक्च रां डा छेडछेड बाक्ब। मिक्च ब्राब्रा मदुमशो बाक्त हना, इन रां नेल्ल छेडछेड बाक्ब। लूका ११:३४-३६ 23 मिक्च ब्राब्रा दुमशो बाक्त हना, इन रां नेल्ल छिडछिड दुम्ब। इन रां डा छेडछेड नेल्ल छिडछिड दुम्त हना, शुश छिडछिड दुम्ब। यूहन्ना ११:१०

24 सुइमी होवप निक्शी आस गेय पने मचापब। मारदे हना का कली मदाक्ब, का कली दाक्ब। का कली मान पा टीब, का कली मान मपथु मटीब। परमप्रभु यावे नु शोप निम्फा आस कली गेय पने मचाप्नीनी। लूका १६:१३; याकूब ४:४ 25 मोपतीके गो 'मार जचा, मार तूचा, मार फेक्चा' दे ममिम्तीने। मारदे हना जचा तूचा क्येडा ब्रोंइचा ठेयब बाक्ब। फेक्तीक क्येडा रां ठेयब बाक्ब। लूका १२:२२-३१; फिलिप्पी ४:६; १पत्रुस ५:७ 26 सरीडमी बेरब चिक्ब आन कली कोव्रशा मिम्तीने। मेकोपुकीमी वांचेर मशोक्नीम, अन्न मखुप्नीम, भकारीमी मवोइक्नीम। स्वर्गम बाक्ब इन आफोमी मेको आन कली थुल्शो बाक्ब। मेको आन क्येडा शुश ठेयब मननी डा? मती १०:२९-३१; लूका १२:६-७ 27 गेपुकीमी सुर्ता पा, इन रां हात का लाइशो सेल्ने चाप्नीनी डा? 28 मार फेक्चा, दे मारदे मिम्तीनी? लिली फू कली कोव्रशा मिम्तीने। गिश बोइशशा रिम्शो तांडसीनीमी। श्येत पा गेय मपाइनीम। पांडतो मपाइनीम। 29 पिप सौलोमन आ दारस नेल्ल कोंइताक्व हना यो, लिली फू खोदेशो रिम्शो ग्योम्सीशो मबाक्ब। १राजा १०:- 30 परमप्रभु यावेमी चीबेर बोइशशा, हेम्शा चोचा पुंडसीब फू, घांस आन कली लायो मिश रिम्शो ग्योम्ताक्व हना, गे थमा पा थमा सुइक्ने मचापबपुकी इन कली मफेक्पाइक्बा डा? 31 मोपतीके मार जचा, मार तूचा, मार फेक्चा, दे ममिम्तीने। 32 मारदे हना अर्को रागी डा मुरपुकीमी ला मोदेशो मिम्तीने। इन स्वर्ग डा आफोमी इन माल्शो नेल्ल तुइक्ब। 33 डोंइती परमप्रभु यावे आ राज्य नु आ ठीक पतीके मिम्शा मालीने। मिनु जचा तूचा फेक्चा यो ताइनीनी। रोमी १४:१७; १राजा ३:१३-१४; भजन संग्रह ३७:४, २५ 34 मोपतीके दीसा मार दुम्बा, दे सुर्ता मपने। मारदे हना दीसा डा श्येत दीसान दुम्ब। मुलाक्ती डा श्येतम दीसा डा श्येत मतेम्दीने। प्रस्थान १६:१९

7

नाक्मुचा आ पबर्म शेंशो

1 मुर आन कली मनाक्तीने। मुर आन कली नाक्ताक्नी हना, इन कली यो नाक्नीम। रोमी २:१; १कोरिन्थी ४:५
2 दोपा नाक्तीनी, मोपा नाक्चा पुंडसीनीनी। दोपा पुक्शा गेनीनी, मोपान पुक्शा ताइनीनी। यसैया ३३:१; मर्कूस ४:२४
3 मारदे इन लोकब आ मिक्चीम बाक्शो कसीडगर ताइनीनी। मिनु इन मिक्चीम बाक्शो मुढा चहिं मताइनीनी? 4 इन मिक्चीम मुढा बाक्त हना, दोपा इन लोकब कली 'इ मिक्चीम बाक्शो कसीडगर फेत्नुड' देने चाप्नीनी डा? 5 कपटी, डोंइती इन मिक्चीम बाक्शो मुढा फेत्तीने। मिनु ला मिक्च ठीक ताइब दुम्शा, इन लोकब आ मिक्चीम बाक्शो कसीडगर फेत्तीने।

6 हेंथे थिपाइक्चा मदुमशो थोव्रक कुचुम कली मगेने, पोव्र आन डोंइती इन मोती मब्बारदीने। मारदे हना दिम्नीम। मिनु बिर लेशशा इन कली ग्राम्थ पीनीम। मती १०:११; लूका २३:९

परमप्रभुमी इन पुंडशो नेंब

लूका ११:९-१३

7 परमप्रभु यावे कली पुनीने। मिनु इन पुंडशो ताइनीनी। मालीने, मिनु इन माल्शो थित्नीनी। बाक्नी? दे लाप्चो खोकोल पने। मिनु गे ओव्रचा ताइनीनी। मर्कूस ११:२४; यूहन्ना १४:१३; येरमीया २९:१३-१४ 8 मोपतीके सुम पुंडबा, मेकोमी आ पुंडशो ताइब। सुम माल्बा, मेकोमी आ माल्शो थिप्ब। सुम ओव्रडा? दे लाप्चो खोकोल पाइबा, मेको ओव्रचा ताइब। 9 गे नु बाक्ब सुइ इन तौमी 'शोब्ले जाइनुड' दे पुंडतु हना, शोब्ले आ पा डा फुल्लु जचा गेनीनी डा? 10 'डांइ ब्वाइनुड' दे पुंडतु हना, डांइ आ पा डा बुस्स ब्वचा गेनीनी डा? 11 गेपुकी मरिम्शो बाक्तीनी हना यो, इन तमी तौ आन कली रिम्शो थोव्रक गेस जोक्नीनी। इन पशो क्येडा स्वर्गमी बाक्ब इन आफोमी आ कली पुंडब आन कली रिम्शो थोव्रक मगेब डा?

परमप्रभु आ दाक्शो पचा

12 गेमी दोदेशो पपांडसीचा दाक्नीनी, गे यो मुर आन कली मोदेशो पने। मारदे हना परमप्रभु यावे आ अरेशो लोव्र नु परमप्रभु यावे आ लोव्र पाइब आन शेंतीक लोव्र मेकोन बाक्ब। मती २२:३६-४०; रोमी १३:८-१०; गलाती ५:१४

13 आइक्च लाप्यो रे ओव्रडीन। मारदे हना जाम्शा लतीक लाप्यो ठेयब नु लां ब्रेम्शो नु ग्युप्यो बाक्ब। मोपतीके शुश मुर मेकेर गाक्नीम। लूका १३:२४ 14 गेना हना यो ब्रोंडतीक लतीक डा लाप्यो आइक्च नु आ लां गाक्चा श्येत बाक्ब। मेको लां थिप्बपुकी का निक्शी ला बाक्नीम। मती १९:२४; प्रेरित १४:२२ 15 होस पांडसीने। मारदे हना परमप्रभु यावे आ लोव्र दूली शेंबपुकी बोक्नीम। मेकोपुकी भेडा खोदेशो तांडसीनीमी। मेको आन थुं चहिं फर के खोदेशो बाक्नीम। मती २४:४, ५, २४; २कोरिन्थी ११:१३-१५ 16 मेको आन पशो गेय तशा, रिम्शो नम, दे मरिम्शो नम रुम्सीब। चू रवामी अडगुर सिप्बा डा? सिउंडी आ बोटमी फोव्रशी सिप्बा डा? 17 रिम्शो फल रवामी ब्रोव्रशो फल सिप्ब, मरिम्शो फल रवामी मब्रोव्रशो फल सिप्ब। मती १२:३३ 18 रिम्शो फल रवामी मब्रोव्रशो फल मसिप्ब। मरिम्शो फल रवामी यो ब्रोव्रशो फल मसिप्ब। 19 मरिम्शो फल सिप्ब रवा कली तिम्शा शी चोइनीम। मती ३:१०; यूहन्ना १५:२, ६ 20 मोपतीके मेको आन सिश्शो फल तशा, रिम्शो नमी, दे मरिम्शो नमी तुइक्नीनी।

21 आं कली प्रभु, प्रभु देशा ला स्वर्ग डा राज्य ओव्रचा मताइनीम। स्वर्गमी बाक्ब आं आफ आ दाक्शो पाइबपुकी ला ओव्रचा ताइनीम। रोमी २:१३; याकूब १:२२ 22 मेको नाक्त शुशेमी आं कली ‘हे प्रभु, हे प्रभु, गोपुकीमी इन नेमी नोले दुम्ब लोव्र मपका डा? इन नेमी वोल आन कली मखेरका डा? चिन्ड नु छक लाक्चा डा गेय मपका डा?’ देंनीम। लूका १३:२५-२७; येरमीया २७:१५ 23 मोदेंब आन कली ‘गो इन कली गेनायो मतुइक्तन्नी। ए मरिम्शो पाइबपुकी, डोन लने’ दे हुइक्नुडमी। मती २५:१२; २तिमोथी २:१९

नेंशो लोव्र पचान माल्ब

24 सुमी आं लोव्र नेंशा, आं देशो पवा, मेको निप्स खाप्शा, खिं सेल्ब खोदेशो बाक्त। मेकोमी आ खिं सेरथे फुल्लु तारी सेल्लु। 25 मिनु ठेयब रेउ यिशा, भोल यिशा, फशेमी हुरदानु, मेको खिं मब्रे। मारदे हना सेरथे फुल्लु तारी सेल्लो बाक्त। 26 सुमी आं लोव्र नेंशा, आं देशो मपवा, मेको शोर गाक्शो मुर खोदेशो बाक्त। मेकोमी आ खिं बाल्वामी सेल्लु। 27 मिनु ठेयब रेउ यिशा, भोल यिशा, फश पवानु, मेको खिं ब्रेशशा योल्त। मिनु मेको के ठेयब खती दुम्त” दे येसुमी शेंदीमी बाक्त।

28 येसुमी शेंने थुमानु, मेकेर देल्शो शुश मुरुमी आ शेंशो आ पब्रम छक लाक्मा बाक्त। प्रेरित २:१२ 29 मारदे हना सास्त्रीपुकीमी शेंशो खोदेशो ममाइ, तन्न सक्ति पाइश्शो मुर बुदी शेंदा बाक्त। यूहन्ना ७:१६-४६

8

कोर पाइब कली सापाइश्शो

मर्कूस १:४०-४४; लूका ५:१२-१४

1 मिनु येसु डांडा रे लेशशा यिमेनु, शुश मुरुमी आ नोले खोदमे बाक्त। 2 मिनु मार दुम्माक्त देंशा हना, कोर पाइब का जाक्शा, येसु आ डोंडती आ पोक्च थेंक्शा “प्रभु, सापाइक्चा दाक्ताक्नी हना, आं कली सापाइक्चे चाप्नीनी” देंमाक्त। 3 मिनु येसुमी आ गुइ दिंशा, कोर पाइब कली थिशा “गो सापाइक्चा दाक्नुड” देंमेनु, ब्रा सामाक्त। 4 मिनु येसुमी “सुइ कली मशोव्रचा, चढेब आ डोंडती लशा, इ साशो रां कोंइदो। मिनु मोसामी मार चढेचा माल्ब देंशो बाक्मे, मेको चढेशा, सामाक्त, दे तुइक्पतो” दे मदा बाक्त। मर्कूस ८:३०; लेवी १४:२-३२

कप्तान आ गेय पाइब सापाइश्शो

लूका ७:१-१०; यूहन्ना ४:४६-५३

5 मिनु कापेरनाउम सहर लेशशा जाक्मेनु, कप्तान का येसु कली गुम्थ पिमाक्त। 6 मिनु “प्रभु, आं गेय पाइब रोइमी गुरशा, आ गुइ खोइल मदुक्ब दुम्शा, गोल्ला बाक्शो बाक्ब” दे शोव्रडा बाक्त। 7 मिनु येसुमी “इन खिंमीन पिशा सापाइक्नुड” दे मदानु 8 “प्रभु, श्येत मपने, गो इन कली आं खिं ओइचा मशिरनुड। लोव्र ला देनीने। मिनु आं गेय पाइब साब। 9 मारदे हना अधिकार तचा दा गो यो अधिकार तशो नड, अधिकार पाइनुड, अधिकारमीन बाक्नुड। गोमी सिपाही का कली ‘लावो’ दे सोइक्तनु, लाइब। का कली ‘पिवो’ दे ब्रेत्तनु, पीब। आं वाइल कली ‘एको गेय पावो’ दे मदुनु, पाइब” देंमाक्त। 10 येसुमी मोदेशो नेंशा, आ नोले खोइक्ब आन कली “ओहो, नोफा दाइश्शा नेनीने, एको कप्तान खोदेशो थमा सुइक्ब इं इस्राएल जात डा मुर सुइ मतडमी। मर्कूस ६:६; लूका १८:३ 11 गो मार देंनुड देशा हना, नां दाप्तीके नु नां पेरतीके रे शुश मुर जाक्नीम। मिनु स्वर्ग डा राज्यमी ओव्रशा, इं किकी पिपी अब्राहाम, इसहाक नु याकूब नु काथा बाक्नीम। लूका १३:२८-२९ 12 एको राज्य डा मुरपुकी चहिं तिल्ला, छिडछिडमी सोइक्चा

पुंडसीनीम। मेकेर मुरपुकी आन खुइ शेप्शा डाक्नीम” देंमाक्त। 13 मिनु येसुमी कप्तान कली “इन खिं लने, इन थमा सुइशो खोदेशो दुम्ल” दे सोइक्ता बाक्त। मो देंम रे आ गेय पाइब यो सामाक्त। मती ९:२९; मती १५:२८

पत्रुस आ खिंमी

मर्कुस १:२९-३४; लूका ४:३८-४१

14 मिनु येसु पत्रुस आ खिं जाक्दीशशा ओव्रमेनु, पत्रुस आ शिमी जरो पा गोल्शो तवा बाक्त। १कोरिन्थी ९:५ 15 मिनु आ गुइ थिवानु, जरोम थु प्रोना बाक्त। मिनु छुल बोक्शा, येसु कली जचा तूचा गेवा बाक्त।

16 में नाक्दो वोलमी सुम्शो शुश मुर आन कली चाक्गमे बाक्त। मिनु वोल आन कली लोव्र रे खेरमी बाक्त। रोइ पाइब नेल्ल आन कली सापाइक्मी बाक्त। 17 मो पवानु, साइ नेसी यसैयामी देशो लोव्र “मेकोमी आंइ गुरपाइक्ब रोइ लाइक्तु। आंइ रोइ नेल्ल कुरतु” देशो लोव्र थमा दुम्माक्त। यसैया ५३:४

निक्शी थुं मपथु, येसु कली खोइक्चा

लूका ९:५७-६०

18 मिनु येसुमी शुश मुर देल्शो तशा “एकेर रे लशा, समुन्द्र शोक्शा आइक्ची हांबु लय” देंमाक्त। 19 मिनु सास्त्री कामी येसु कली “शंब, तेक तेक लनी, मेक मेक गो यो लाइनुड” देंमाक्त। 20 मिनु येसुमी “फ्याउरे आन बाक्तीके ढोडोडगा बाक्ब। चिक्ब आन बाक्तीके ग्योव्र बाक्ब। रागीम जरमेशो के बाक्तीक मबाक्ब” देंमाक्त। २कोरिन्थी ८:९ 21 मिनु येसु आ नोले खोइक्ब मुर कामी “प्रभु, डोंइती लशा, आं आफ कली थिम्चा गेयीनी” देंमाक्त। मती १०:३७ 22 मिनु येसुमी “आं नोले खोइय्यी। बेक्शो मुरुमी बेक्शो कली थिम्मेक्ल” दे मदा बाक्त।

फश गिवार तेक्शो

मर्कुस ४:३५-४१; लूका ८:२२-२५

23 मिनु समुन्द्र शोक्सीचा कली डोंगाम डोंइसेनु, आ शेंसीबपुकीमी आ नोले खोदमे बाक्त। 24 मिनु शोक्समानु, ठेयब फश गिवार पतीके डोंगाम ब्वाक्कु ओव्रशा गुम्चामे बाक्त। येसु चहिं इप्शो बाक्माक्त। 25 मिनु शेंसीबपुकीमी हिंशा येसु कल पोक्शा “प्रभु, गो नेल्ल गुम्शा बेक्चांइतय, है” दे वाइ ब्रेम्मा बाक्त। 26 मिनु येसुमी “मारदे हिंनी? गे थमा पा थमा सुइक्ने मचाप्बपुकी” देशा बोक्शा, फश नु समुन्द्र आस कली हुइक्ता बाक्त। मिनु सिक्सी पाम्से बाक्त। भजन संग्रह ८९:१०; प्रेरित २७:२२, ३४ 27 मोदेब पशो तशा “ओहो, एको मुर सु बाक्म माइ? फश नु समुन्द्रमी यो आ लोव्र टीबाक्ताक्से” देंमुमा बाक्त।

वोल आन कली खेरशो

मर्कुस ५:१-१७; लूका ८:३६-३७

28 मिनु आइक्ची हांबु शोक्सीशा, गदरीनी आन रागी जाक्दीम्मा बाक्त। मेकेर लांम गाक्मानु, वोलम गपाइशो मुर निक्शी गुम्मे बाक्त। मेको निक्शी चहिं बेक्शो मुर वोइक्तीके पुक्खीम बाक्शा, लां गाक्ब आन कली बाप्शा, श्येत गेशा सुइ आन कली लचा मगेबाक्सा बाक्त। 29 मिनु मार दुम्माक्त देशा हना, मेको निक्शीमी “परमप्रभु यावे आ तौ, गे नु गोपुकी मार पमुइया डा? आंइ कली श्येत गेची मजाक्थु, मुल कना श्येत गेथ जाक्नी?” दे ग्रीसा बाक्त। लूका ४:४१; २पत्रुस २:४; याक्ब २:१९ 30 मेकेर आ नेक्था डा डांडामी शुश पोव्र जोन जोन बाक्शो बाक्मा बाक्त। 31 मिनु वोलपुकीमी “आंइ कली खेरनीनी हना, मेरे पोव्र आन रांमी ओव्रचा गेकी” दे पुन्मे बाक्त। 32 मिनु येसुमी “लने” दे सोइक्तीमी बाक्त। मिनु मुर रे गूशा, पोव्रमी ओव्रदीम्मा बाक्त। मिनु पोव्र नेल्ल गशा, डांडा रे यिना यिन समुन्द्रम प्रेक्ना प्रेक्न गुम्शा बेक्मा बाक्त। 33 पोव्र योव्रबपुकीमी मो दुम्शो तशा, प्रोक्शा सहरम जाक्दीशशा, मेको वोलम सुम्शो आस कली मार दुम्मे, मेको नेल्ल शोव्रडमे बाक्त। 34 मिनु सहर डा मुर नेल्ल येसु कली कोव्रथ जाक्मा बाक्त। मिनु “आंइ रागी रे लने” दे पुन्मे बाक्त।

9

गुइ खोइल मदुक्ब कली सापाइशो

मर्कुस २:१-१२; लूका ५:१७-२६

1 मिनु येसु मेकेर रे लशा, डोंगामी डोइशशा समुन्द्र शोक्शा, आ सहरमी जाक्माक्त। मती ४:१३ 2 मिनु मार दुम्माक्त देशा हना, आ गुइ खोइल मदुक्ब मुर का कली आ ब्राख्येमी कुरशा चाक्गमे बाक्त। मिनु येसुमी “मेको मुर कली

चाकबपुकीमी थमा सुइक्यीमी बाक्त” दे तुइशशा, मेको गुइ खोइल मदुकब कली “आं तौ, इ पाप क्याम्साक्व। मिनु इ थुं बारपतो” दे मदा बाक्त। प्रस्थान ३४:६-७; भजन संग्रह १०३:३ ३ सास्त्री का निक्शीमी “इ पाप क्याम्साक्व” देशो नेशा “मेकोमी परमप्रभु यावे कली शुक्शी पाइबाक्माक्त” दे मिन्तमे बाक्त। मती २६:६५ ४ मिनु येसुमी मेको आन मिन्शो तुइशशा, मेको आन कली “मारदे मरिम्शो मिन्तीनी? यूहन्ना २:२५ ५ ‘इ पाप क्याम्साक्व’ देंचा देय ‘छुल बोक्शा एर ओंथ हिरशा कोइदो’ देंचा तेको सज्जो बाक्बा? ६ रागीमी जरमेशोमी पाप क्याम्साक्व अधिकार तशो बाक्माक्त, दे गेपुकीमी यो तुइक्तीनील” देशा, गुइ खोइल मदुकब कली “छुल बोक्शा, इ ब्राख्ये कुरशा खिं लेत्तो” दे मदा बाक्त। यूहन्ना १७:२ ७ मिनु मेको छुल बोक्शा, आ खिं लेम्माक्त। ८ मोदेब दुम्शो तशा, मेकेर देल्शोपुकी हिंमा बाक्त। मिनु मुर आन कली मोदेशो अधिकार गेब परमप्रभु कली ठेयब सुइशशा मान पामे बाक्त।

मती कली गुम्शो

मर्कूस २:१३-१७; लूका ५:२७-३२

९ मिनु येसु मेकेर रे लमेनु, मती माइशशो तिरो पोक्ब मुर का आ अडडाम बाक्शो ताप्तु। मिनु येसुमी “आं नोले खोइय्यी” दे मदानु, मेको छुल बोक्शा, येसु आ नोले खोइक्तु। मती १०:३ १० मिनु येसु नु आ शेंसीबपुकी खिंमी जना जन बाक्मानु, तिरो पोक्ब नु पापीपुकी शुश यो मेकोपुकी नु काथा जाम्तेक्म। ११ मिनु फरिसीपुकीमी मेको नेल्ल आन कली काथा बाक्शा जशो तशा, येसु आ शेंसीब आन कली “मारदे इन शेंबमी तिरो पोक्ब नु पापीपुकी नु काथा बाक्शा जाइबा?” देतेक्म। १२ येसुमी मेको आन देशो नेशा “रोइ मपशो मुर सापाइक्ब ममाल्नीम। रोइ पशो मुर चहिं सापाइक्ब माल्नीम। इजीकीएल ३४:१६ १३ चढेतीक ममाइ, तन्न शिशी पशो तचा दाक्नुड, दे देशो आ अर्थ मार बाक्म, दे शेंसीने। ठीक पाइब आन कली ब्रेत्थ जाक्शो मनड। पापी आन कली ब्रेत्थ जाक्शो नड” दे माइक्तीमी। होसे ६:६; मती १२:७; १सामुएल १५:२२; मती १८:११

माइत नु नक मगारब

मर्कूस २:१८-२२; लूका ५:३३-३८

१४ मिनु यूहन्ना आ शेंसीबपुकी जाक्शा, येसु कली “मारदे गो नु फरिसीपुकी शुश बर्त बाक्नीकी, इन शेंसीबपुकी चहिं बर्त मबाक्नीमी?” दे हिल्लो पाम्तेक्म। लूका १८:१२ १५ मिनु येसुमी “जन्तीपुकी ग्युम्ले नु काथा बाक्मानु, हिशेक पा डाक्नीमी डा? काबु ग्युम्ले नु फ्राचा पुंइसीनीम। मिनु मेना बर्त बाक्नीम। यूहन्ना ३:२९ १६ सुइमी माइत वामी नक वा केप्शा मफेरनीम। फेरतेक्म हना, नक वा चुप्शा, माइत वा कली खाक्शा, डोंइती डा गाक्शो क्येडा ठेयब सेल्ब। रोमी ७:६ १७ सुइमी माइत कुशुल के थैलोमी नक अडगुर शांबु कुर मपाइनीम। कुर पाम्तेक्म हना, शांबु बोरशा, थैलो खाक्शा, क्युप्ब। नक शांबु कली नक थैलोमी कुर पचा माल्ब। मोपा कुर पशोनु, थैलो मगाक्बा, शांबु यो मक्युप्ब” दे शेंताक्मी।

बेक्शो आल कली सेंपाइशशो

मर्कूस ५:२१-४३; लूका ८:४०-५६

१८ मोदेशो शेंना शेंन बाक्मेनु, मेकेर डा गुम्तीक खिं डा ठेयब मुर का जाक्शा, पोक्च थेक्शा बाप्शा “आं तमी बेक्त। गे आं तमी तारी इन गुइ वोइक्तीनी हना, ब्रांइब” दे सेउ पाप्तु। १९ मिनु येसु नु आ शेंसीबपुकी मेको आ खिं लाम्तेक्म। २० मिनु मार दुम्त देशा हना, लना लन बाक्मानु, १२ बर्स डोंइती रे हुश याप्शा रोइ पशो मीश मुर कामी मेको आन नोले खोइशशा, येसु आ फेक्शो वा थिवा बाक्त। २१ मारदे हना “आ फेक्शो वा थिचा ताता हना, सानुड” दे थमा सुइशशो बाक्माक्त। मती १४:३६ २२ मिनु येसुमी फिर लेशशा कोव्रशा, मेको मीश मुर कली तशा “आं तमी, इ थुं बारपतो। इ थमा सुइशशोमी साते” दे माइक्तु। मो देमेनु, आ रोइ ब्रा सामाक्त।

२३ मिनु ठेयब मुर आ खिं जाक्दीम्मानु, येसुमी शुश मुर देल्शा बाजा ताप्शा, रोंका पा डाक्ना डाक्न बाक्शो ताप्तु। २४ मिनु मेको आन कली “कतीने। एको आल बेक्शो ममाइ, इप्शो बाक्ब” दे माइक्तीमी। मेकोपुकीमी “मबाक्शो लोव्र पाइबाक्त” दे शुक्शी पाम्तेक्म। यूहन्ना ११:११, १४, २५ २५ मेको आन कली सोइशशा, खिं ओव्रत। मिनु आल आ गुइ ग्याइक्तानु, छुल बोक्त। २६ मिनु मेको लोव्र मेको रागी नेल्लेम ब्रम्माक्त।

मिक्च मताइब आस कली सापाइशशो

२७ मिनु येसु मेकेर रे लमेनु, मिक्च मताइब निक्शीमी “ए दाऊद पिप आ तौ, आंस कली शिशी पांडस्की” दे रेयके पा वाइ ब्रेशशा, आ नोले खोइक्ताक्स। मती २०:३० २८ मिनु खिं ओव्रमेनु, मेको निक्शी यो ओव्रताक्स। मिनु येसुमी

“गो इस कली सापाइवने चाप्नन्सी, दे थमा सुइक्नीसी?” देंमेनु “थमा सुइक्नस्कु, प्रभु” देंताक्स। प्रेरित १४:९ 29 मिनु येसुमी आस मिक्च थिशा “इस थमा सुइश्शो बुदी दुम्ल” देंत। मत्ती ८:१३ 30 मिनु मिक्च ताइब दुम्लाक्स। मिनु “एको लोत्र सुइ कली मशोवडीसे” दे सोइक्ताक्म्सी। मत्ती ८:४ 31 तन्न मेको निक्शीमी चहिं आस रागी डा मुर नेल्ल आन कली येसु आ पशो तुइक्पदसे बाक्त।

वोलम सुम्शो लाटा कली सापाइश्शो

32 मिनु येसु नु आ शेंसीबपुकी मेको खिं रे गूशा लमानु, मार दुम्त देंशा हना, वोल्मी सुम्शो लाटा का चाक्तेक्म। 33 मिनु येसुमी वोल् कली गुंइताक्व। मिनु मेको मुरुमी लोत्र पाप्तु। मिनु मेकेर बाक्बपुकीमी छक लाक्शा “इं इस्राएलमी ओदेशो दुम्शो गेनायो मतशो नय” देंमुम्तेक्म। 34 फरिसीपुकीमी चहिं “वोल् आन पिप आ नें थिशा, वोल् आन कली गुंइबाक्त” देंतेक्म। मत्ती १२:२४-३२

बाली नाली रुप्बपुकी माल्शो

35 येसु गालील रागी डा सहर गाउं नेल्ल हिरना हिरन गुम्तीक खिंमी मुर आन कली स्वर्ग डा राज्य डा लोत्र शेंना शेंन, रोइमी गुरशो नु रोइ पशो मुर नेल्ल आन कली सापाइक्ना पाइक्न गाक्त। 36 शुश मुर आन कली तशा, शिशी पाइक्तीमी। मारदे हना गोठला मबाक्शो भेडापुकी खोदेंशो पा दशो बाक्मा बाक्त। १राजा २२:१७; इजीकीएल ३४:५; मर्कूस ६:३४ 37 मिनु आ शेंसीब आन कली “बाली नाली रुप्चा माल्शो शुश बाक्ब। रुप्ब मुर चहिं का निक्शी ला बाक्नीम। 38 मोपतीके ‘रुप्चा कली मुर योव्रशा सोइक्तीने’ दे बाली नाली आ परमप्रभु कली पुनीने” दे माइक्तीमी। लूका १०:२

10

शेंसीब आन कली ब्रेश्शो

मर्कूस ६:७; मर्कूस ३:१३-१९; लूका ९:१; लूका ६:१२-१६

1 मिनु आ शेंसीब १२ जना आन कली खुप्शा, वोल् आन कली गुंइशा, खेरतीक, रोइमी गुरशो नु रोइ पाइब आन कली सापाइक्तीक अधिकार गेम्तीमी। 2 मोदेंशो अधिकार ताइब आन कली “सोइश्शोपुकी” दे यो देंसीब। मेकोपुकी सु सु बाक्तेक्म देंशा हना, पत्रुस माइश्शो सिमोन नु आ दाग्यु अन्द्रीयास, जबदी आ तौ याकूब नु यूहन्ना, मर्कूस ३:१६-१९; लूका ६:१४-१६; प्रेरित १:१३ 3 फिलीप नु बारथोलोमाइ, थोमास, तिरो पोक्ब मत्ती, अल्फयस आ तौ याकूब, थदेयस, 4 कनानी सिमोन नु इस्कारीयोत डा यहूदा बाक्तेक्म। मेको यहूदा नोले येसु कली साइक्चा, दे माल्ब आन कली वारच पाइब दुम्बाक्माक्त।

शेंसीब आन कली सोइश्शो

मर्कूस ६:७-१३; लूका ९:२-६

5 येसुमी आ १२ जना शेंसीब आन कली सोइश्शा, मेको आन कली “अर्को जात डा मुर आन रागी मलने। सामरीया डा मुरपुकी आन रागी यो मलने। 6 तन्न गोठला मबाक्शो, लां जाम्शो भेडा खोदेंशो, इं इस्राएली आन बाक्तीके लने। मत्ती १५:२४; प्रेरित १३:४६ 7 ‘स्वर्ग डा राज्य जाक्चशो बाक्त’ दे शेंदीने। लूका १०:१-१२; मत्ती ४:१७ 8 रोइ पाइब आन कली सापतीन। बेक्शो मुर आन कली सेंपतीन। कोर पाइब आन कली सापतीन। वोल् आन कली गुंइशा खेरीन। मेको नेल्ल मोशा ताइतीनी। मिनु मोशा गेने। मर्कूस १६:१७ 9 सुन चांदी तांबा का यो मकुरीन। प्रेरित २०:३३ 10 लां कली फेक्तीक वा, जुत्ता जोड निक्शी, झोला नु कोक्के मकुरीन। मारदे हना गेय पाइबपुकीमी जचा गेचा पुंइसीनीम। गन्ती १८:३१; १कोरिन्थी ९:१४; १तिमोथी ५:१८

11 सहर गाउं तेइ जाक्दीन्नीनु, रिम्शो थुं पाइश्शो मुर आ खिं हिल्लो पा बाक्थ लने। मिनु बास गेम्तेक्म हना, गाक्की मजाक्म सम्म बाक्कीन। 12 मिनु खिं ओव्रनीनु ‘परमप्रभु यावेमी इन कली रिम्शो पवल’ दे आसीक गेने। 13 मेको खिंमी रिम्शो थुं पाइश्शो मुर बाक्तेक्म हना, आसीक रशा, आन थुं नाइक्चा ताइनीमी। मोदेंशो मुर मबाक्तेक्म हना चहिं मेको आन रचा डा आसीक गे राइनीनी। 14 मुरपुकीमी इन लोत्र मनेंथु, बास मगेम्तेक्म हना, इन खोइल डा फुरक थुर थुर पाइश्शा गाक्कीन। प्रेरित १३:५१ 15 नोफा दाइश्शा नेनीने, निसाफ पची नाक्त सोदोम नु गोमोररा सहर निक्शीमी बाक्ब मुर आन क्येडा इन लोत्र मनेंब मटीबपुकीमी शुश सजाइ ताइनीम। उत्पत्ती १९:१-२९

थमा सुइक्बपुकी खेदा पचा पुंडसीनीम

मर्कूस १३:९-१३; लूका २१:१२-१७

16 भेडा आन कली फर आन दातेम सोइश्शो खोदेशो पा सोइक्नन्नी। बुस्स खोदेशो पा निप्स पाइश्शो दुमीने। मिनु परवा खोदेशो दुम्शा, सुइ कली मरिम्शो मपने। लूका १०:३; रोमी १६:१९; एफिसी ५:१५ 17 होस पा गाक्कीन। मारदे हना मेको फरपुकीमी इन कली सभा कछडीम वोइक्नीम। गुम्तीक खिंमी लाइश्शा युक्नीम। प्रेरित ५:४०; २कोरिन्थी ११:२४ 18 इन कली श्येत गेबपुकी नु अर्को रागी डा मुर आन डोंइती सांकछी दुम्चा कली ठेयब मुर नु पिप आन डोंइती राप्पाइक्नीम। प्रेरित २५:२३; प्रेरित २७:२४ 19 इन कली मोपा राप्पदमेनु, मार लोव पका? मार देंका? दे सुर्ता मपने। मार देंचा माल्बा, मेको लोव तुइक्पाइक्चा पुंडसीनीनी। प्रस्थान ४:१२; लूका १२:११-१२; प्रेरित ४:८ 20 मारदे हना गे इन थुं रे पिशो लोव मपाइनीनी, तन्न इन आफ आ सोक्तीमी इन शोव रे पा लोव पाइब। १कोरिन्थी २:४ 21 लोक्बमी आ लोक्ब कली साइक्पाइक्चा गेब। आफोमी तमी तौ आन कली नु तमी तौपुकीमी यो आम आफ कली मरिम्शो पा साइक्पाइक्नीम। मीका ७:६ 22 आं नें आ पर्बम नेल्लेमी इन कली मदाक्नीम। तन्न सु सुमी चहिं नोले सम्म फाल्शा बाक्नीमी, मेकोपुकी परमप्रभु यावे नु ब्रोंइशा बाक्चा ताइनीमी। २तिमोथी २:१२; मती २४:९-१३ 23 सहर कामी खेदा पाम्तेक्म हना, प्रोक्शा अर्को सहरमी जाक्दीश्शा बाक्कीन। नोफा दाइश्शा नेनीने, रागीम जरमेशो मजाक्म सम्म इस्राएल डा सहर नेल्ल हिरशा मगुम्नीनी। प्रेरित ८:१; मती १६:२८

श्येत गेब आन कली तशा महिंचा

24 शेंब क्येडा शेंसीब नु होवप क्येडा गेय पाइब ठेयब मनमी। लूका ६:४०; यूहन्ना १३:१६; यूहन्ना १५:२० 25 शेंब नु शेंसीब, होवप नु आ गेय पाइब कांडचीक दुम्ने चाप्नीम। खिं डा ठेयब मुर कली बेल्ल्जीबुल, दे शुक्शी पाइक्तेक्म हना, आ खिं डा मुर आन कली शुक्शी मपाइनीमी डा? मती १२:२४ 26 मोपतीके मेको आन कली तशा महिनीन। मुल सम्म सुम्शा वोइश्शो नोले नेल्ल हाक्सीशा तांडसीब। मुल खुइश्शा वोइश्शो नोले तुंडसीब। लूका १२:२-९; मर्कूस ४:२२; लूका ८:१७ 27 गोमी इन कली छिडछिडमी माइश्शो लोव छेडछेडमी मतीने। इन कली नोफाम देशो लोव नोले ठेयब सेंदा पा नेंपतीने। 28 इन रां कली साइक्ने चाप्ब। तन्न इन सोक्ती कली साइक्ने मचाप्बपुकी आन कली तशा महिनीन। रां नु सोक्त निम्फा नरकमी खतम पने चाप्ब कली तशा चहिं हिनीन। हिबू १०:३१; याकूब ४:१२

29 अस्सारीयोन कामी भंगेरा निक्शी मग्याम्सीबा डा? मो हना यो इन आफोमी मदेंथु, का यो खपीम मदोक्ब। 30 इन पिया डा चां का का पा हिक्शा, गिश बाक्मा, दे तुइश्शो बाक्ब। अस्सारीयोन का आइक्च तांबा के क्येट बाक्त। प्रेरित २७:३४ 31 मोपतीके महिनीन। गे भंगेरा क्येडा शुश हिक्सीशो बाक्नीनी। मती ६:२६

32 सुमी मुर आन कली 'येसु आ मुर नड' देंबा, गो यो स्वर्गम बाक्ब आं आफ कली 'एको आं मुर बाक्ब' देंनुड। प्रकाश ३:५ 33 सुमी चहिं मुर आन कली 'येसु सु में? मतुइक्नुड' देंबा, गो यो स्वर्गम बाक्ब आं आफ कली 'मेको कली मतुइक्नुड' देंनुड। मर्कूस ८:३८; लूका ९:२६; २तिमोथी २:१२

येसु आ पर्बम मुर ब्रानीम, दे शेंशो

34 रागीमी नेल्ल आन कली गारपाइक्थ जाक्शो बाक्ब, दे आं पर्बम ममिम्तीने। दुपाइक्चा कली ममाइ, तन्न तरवार ग्यारपाइक्थ जाक्ती। लूका १२:५१-५३; मीका ७:६ 35 मारदे हना आ पर्बम तौ नु आफ, तमी नु ममा, चाइमी नु शिमी जिमुशा ब्रानीम। 36 मोदेशो पा आंम खिं डा मुर जोरी सत्रु दुम्नीम। 37 आं क्येडा आन आम आफ कली दाक्बपुकी आं नोले खोइक्चा मशिरनीम। आं क्येडा आन तमी तौ आन कली दाक्बपुकी यो आं नोले खोइक्चा मशिरनीम। ब्यवस्था १३:७-१२; ब्यवस्था ३३:९; लूका १४:२६-२७ 38 सुमी आं नोले खोइश्शा, श्येत फाल्ने मचाप्बा, मेको आं नोले खोइक्चा मशिरब। मती १६:२४-२५ 39 आंम कली प्रोंइचा दाक्ब जाम्शा लाइब। आं पर्बम जाम्शा लाइब चहिं ब्रोंइचा ताइब। लूका ९:२४; यूहन्ना १३:२०; गलाती ४:१४

रिम्शो पाइबमी इनाम ताइब

40 इन कली ब्राइबमी आं कली ब्राइब। मिनु आं कली ब्राइबमी आं कली सोइक्ब कली यो ब्राइब। 41 परमप्रभु यावे आ लोव पाइब बाक्माक्त, दे मिम्शा, परमप्रभु यावे आ लोव पाइब कली ब्राप्तु हना, परमप्रभु यावे आ लोव पाइब आ तचा डा इनाम मेकोम ताइब। ठीक पाइब मुर बाक्माक्त, दे मिम्शा, ठीक पाइब मुर कली ब्राप्तु हना, ठीक पाइब आ तचा डा इनाम मेकोम ताइब। १राजा १७:८-२४ 42 नोफा दाइश्शा नेनीने, सुमी महिक्सीशो मुर का कली

‘एको यो शेंसीब का बाक्माक्त’ दे मिम्शा, लोटा का ब्वाक्कु तूचा गेबा, मेकोमी दोपा यो आ तचा डा इनाम मसाम्ब” दे शेंताक्मी। मती २५:४०; मर्कुस ९:४१

11

शेंसीब आन कली शेंथ सोइश्शो
लूका ७:१८-२३

1 आ १२ जना शेंसीब आन कली मेको लोत्र शेंने थुम्शा, येसु मेकेर रे लशा, सहर सहरम हिरशा, शेंना शेंन गाक्त।
2 मिनु येसु शेंना शेंन गाक्मेनु, यूहन्ना जेल्खानमी बाक्माक्त। मिनु ख्रीस्तमी पशो गेय आ पबर्म नेंशा, आ शेंसीब आन कली मती १४:३ 3 “गे जाक्चा माल्शो बाक्नीनी देय अर्को कली लां कोव्रका?” दे हिल्लो पथ सोइक्तीमी बाक्त। मती ३:११; मलाकी ३:१ 4 मिनु मेकोपुकी जाक्शा, हिल्लो पामेनु, येसुमी “गे मार मार नेंनी, मार मार तनी, यूहन्ना कली मतीने 5 ‘मिक्च मताइबपुकीमी मिक्च ताइबाक्तेक्म, खोइल मदुक्बपुकी गाक्बाक्तेक्म, कोर पाइब साबाक्तेक्म, नोफा मनेंबपुकी नेंबाक्तेक्म, बेक्शो मुर बेक्शो रे सेंसीशा ब्रोंइबाक्तेक्म। महिक्सीशो मुरपुकीम ग्येरपाइक्ब लोत्र नेंबाक्तेक्म’ यसैया ३५:५-६; यसैया ६१:१ 6 सु सुमी आं कली तशा थुं मखाइक्पाइक्नीम, मेकोपुकी ग्येरसमल, दे मतीन” दे लेशशा सोइक्ताक्मी। मती १३:५७; मती २६:३१

यूहन्ना आ पबर्म शेंशो
लूका ७:२४-३५

7 मिनु मेकोपुकी लमा नोले, येसुमी मुर आन कली यूहन्ना आ पबर्म “साइ गोरशो रागीमी मार कोव्रथ लनी? फशेम हिम्शो किन्दा कोव्रथ लनी? मती ३:१, ५ 8 मिनु मार कोव्रथ लनी? दारशो वा फेक्शो मुर तांइसीबा कों, दे कोव्रथ लनी? नेनीने, दारशो वा फेक्ब पिप आन खिंमी बाक्नीम। 9 गेपुकी मार कोव्रथ लनी, मिनु? परमप्रभु यावे आ लोत्र पाइब तांइसीबा कों, दे कोव्रथ लनी? गे नेल्ल आन क्येडा ठेयब परमप्रभु यावे आ लोत्र पाइब ताइतीनी, दे इन कली देंनुड। लूका १:७६; लूका २०:६ 10 परमप्रभु यावेमी ब्रेक्पाइश्शो लोत्रमी मेको आ पबर्म मार ब्रेक्शो बाक्ब देंशा हना ‘गो आं लोत्र कुरब इ डोंइडोंइती सोइक्नुड। मेकोमी इ लां ठीक सेल्ब’ दे ब्रेक्शो बाक्ब। मलाकी ३:१

11 नोफा दाइश्शा नेनीने, रागी नेल्लेमी ब्वाक्कुम खुम्शा गुंइब यूहन्ना खोदेंशो ठेयब सुइ मबाक्ब। स्वर्ग डा राज्यमी चहिं नेल्ल क्येडा यो आइक्च यूहन्ना क्येडा ठेयब बाक्ब। मती १३:१७ 12 यूहन्नामी मुर आन कली शेंशा, ब्वाक्कुम खुम्शा गुंइदा रे मुल सम्म स्वर्ग डा राज्य ओव्रशा, आन के सेल्चा, दे दाम पा मुना मुन बाक्नीम। लूका १६:१६ 13 साइ नेसी परमप्रभु यावे आ लोत्र पाइब नेल्लेमी नोले दुम्ब लोत्र पा यूहन्ना आ पबर्म ब्रेक्शो बाक्तेक्म। 14 जाक्चा माल्शो एलीया सु बाक्बा, दे तुइक्चा दाक्ताक्नी हना, मेको यूहन्नान बाक्ब। मती १७:१०-३०; मलाकी ३:२३ 15 सु नोफा पाइश्शो बाक्मे, मेकोमी नेंनल।

16 सिनाक्त मुलाक्त डा मुर दोदेंशो बाक्नीम देंशा हना, बजारमी ग्यारब आलपुकीम 17 ‘ताप्तीक ताप्कानु, गे सिल मपनी, रोंका पा डाक्कानु, गे मडाक्नी’ दे ब्रेम्मुशो खोदेंशो बाक्नीम। यूहन्ना ५:३५ 18 मारदे हना यूहन्नामी बर्त बाक्शा, शांबु राकसी मतूडानु, वोल्म सुम्शो मुर बाक्माक्त देंनीम। मती ३:४ 19 रागीम जरमेशोमी चहिं जचा तूचा थोव्रक नेल्ल जाइब तूब। मेको कली तशा ‘थोक्रे, शांबु राकसीमी दुक्ब, तिरो पोक्ब नु पापी आन वारच बाक्माक्त’ देंनीम। मेको के दोशो तुइक्तीक बाक्मे, मेको आ गेय रे पा तुंइसीब” दे येसुमी मुर आन कली शेंताक्मी। मती ९:१०-१५; यूहन्ना २:२; १कोरिन्थी १:२४-३०

गालील डा सहर सजाइ ताइनीम
लूका १०:१३-१५

20 येसुमी शुश छक लाक्चा डा गेय नु चिन्ड कोंइशा यो सहर डा मुरपुकी आन थुं परमप्रभु यावे गे मलेत्तेम। मोपतीके ओदें हुइक्ताक्मी 21 “ए खोराजीन, ए बेथसैदा, गेमी तशो छक लाक्चा डा गेय नु चिन्ड टायर नु सीदोन डा मुरपुकीमी तशो नम हना, साइ कना भाडरा फेक्शा, पुलु खेक्सीशा, आन थुं परमप्रभु यावे गे लेत्तेम वा। जोना ३:६ 22 निसाफ पची नाक्त गेपुकी टायर नु सीदोन डा मुर आन क्येडा शुश सजाइ ताइनीनी, दे इन कली देंनुड। । 23 ए कापेरनाउम, मार गे स्वर्ग सम्म क्युक्सीनेवे डा? नरकम तोक्चा पुंइसीनेवे। मारदे हना गेमी तशो छक लाक्चा डा गेय नु चिन्ड सोदोम डा मुरपुकीमी तशो नम हना, आन थुं परमप्रभु यावे गे लेशशा सजाइ रे ब्रोंइचा ताम वा, मिनु सहर

मुल सम्म ली वा। मत्ती ४:१३; मत्ती ८:५; मत्ती ९:१; यसैया १४:१३,१५ 24 निसाफ पची नाक्त सोदोम डा मुर आन क्येडा कापेरनाउम सहर डा मुरपुकीमी शुश सजाइ ताइनीम, दे इन कली देंनुड” दे हुइक्ताकमी। मत्ती १०:१५

येसुमी मुर आन कली ब्रेशो

25 काबु येसुमी “आं आफ, सरीड नु रागी डा परमप्रभु, गे नेल्ल क्येडा ठेयब ननी। गे शुश रिम्शो पाइतीनी। जोक्ब तुइक्ब नड, दे मिम्ब आन कली इन लोत्र मरुप्तीक थुं गेतीनी। मजोक्ब मतुइक्ब आन कली रुप्तीक थुं गेतीनी। यसैया २९:१४; लूका १०:२१-२२; यूहन्ना १७:२५; १कोरिन्थी १:२८-२९ 26 आं आफ, गे मोदेशो पचा दाक्ताकनी। 27 आं आफोमी मारेइ मारेइ तुइक्पाइक्ती। सुइमी आं कली, आ तौ कली मतुइक्नीम। आं आफोमी ला तुइक्ब। सुइमी आं आफ कली मतुइक्नीम। आ तौमी ला तुइक्ब। मिनु तौमी सु सु आन कली योत्रडमी, मेको आन कली आ आफ आ पर्बम तुइक्पाइक्ब। मत्ती २८:१८; यूहन्ना ३:३५; यूहन्ना १७:२; फिलिप्पी २:९

28 गे श्येत जशो नु भारीम चिप्चा पुंडसीशोपुकी, आं गे जाक्कीन। मिनु नाइक्चा गेनन्नी। मत्ती १२:२०; मत्ती २३:४; येरमीया ३१:२५ 29 आं जवा लाम्सीशा, गो नु शेंसीने। मारदे हना गो शिशी पाइब नु ब्रेम्शो थुं डा नड। मिनु गे इन थुं नाइक्चा ताइनीनी। यसैया २८:१२; येरमीया ६:१६ 30 आं जवा ग्युप्चा डा बाक्ब। आं भारी कुरने चाप्चा डा बाक्ब” देंत। लूका ११:४६; १यूहन्ना ५:३

12

नाइक्तीक नाक्त डा लोत्र

मर्कूस २:२३-२८; लूका ६:१-५

1 काबु नाइक्तीक नाक्त येसु नु आ शेंसीबपुकी चेरब रू डा लां लना लन बाक्मानु, शेंसीबपुकी शोत्रलु बेक्शा, चेरब बाला शोइशशा नोक्शा जाम्तेक्म। ब्यवस्था २३:२६ 2 फरिसीपुकीमी मेको आन मो पशो तशा, येसु कली “कोत्रडीने, इन शेंसीबपुकीमी नाइक्तीक नाक्तीम पचा मदुम्शो गेय पाम्तेक्म” देंतेक्म। प्रस्थान २०:१० 3 मिनु येसुमी मो देंब आन कली “दाऊद नु आ वारचपुकी शोत्रलु बेक्मानु, मार पामे, दे परमप्रभु यावेमी ब्रेक्पाइशो लोत्र मपढेनी? १सामुएल २१:७ 4 दोपा दाऊदमी परमप्रभु यावे आ खिंमी ओत्रशा, परमप्रभु यावे कली चदेशो शोब्ले शोल्शा योक्शा जामे? मेको चदेशो शोब्ले चढेबपुकीमी ला जचा दुम्बाक्माक्त। अरु मुरपुकीमी जचा मदुम्ब बाक्माक्त। लेवी २४:९ 5 नाइक्तीक नाक्त चढेबपुकीमी परमप्रभु यावे आ खिंमी चढेनीम। मेकोपुकीमी गेय पाइनीम। मेकोपुकी चहिं दोस गेचा मपुंडसीनीम। परमप्रभु यावेमी ब्रेक्पाइशो एको लोत्र यो मपढेनी? 6 एकेर परमप्रभु यावे आ खिं क्येडा ठेयब मुर का बाक्ब, दे इन कली देंनुड। 7 ‘चढेतीक ममाइ, शिशी पशो तचा दाक्नुड’ देशो परमप्रभु यावे आ लोत्र आ अर्थ रुप्तीनी हना, दोस गेचा मपुंडसीब आन कली दोस मगेनी वा। होसे ६:६; मत्ती ९:१३ 8 रागीमी जरमेशो चहिं नाइक्तीक नाक्त मार पचा, मार मपचा अधिकार पाइब बाक्ब” दे माइक्तीमी।

नाइक्तीक नाक्त सापाइशो

मर्कूस ३:१-६; लूका ६:६-११

9 मिनु येसु मेकेर रे लशा, मेको आन गुम्तीक खिंमी जाक्दीशशा ओत्रत। 10 मिनु मेकेर गुइ सोत्रशो मुर का बाक्त। मेकोपुकीमी येसु कली दोस गेचा माल्शो बाक्मा बाक्त। मोपतीके “नाइक्तीक नाक्त सापाइक्तीक गेय पचा दुम्बा?” दे हिल्लो पखु पा योत्रकी पाम्तेक्म। 11 मिनु येसुमी “सुइ इन के कांइचीक भेडा नाइक्तीक नाक्त खाल्टाम बिक्त हना, मेको कली कीशा मपुंडनीनी डा? लूका १४:३-५ 12 भेडा का क्येडा मुर ठेयब ममाइ डा? मोपतीके नाइक्तीक नाक्त मुर आन कली शिशी पा रिम्शो पचा इं कानुन डा लोत्र नु गारब” दे माइक्तीमी। 13 मिनु गुइ सोत्रशो मुर कली “इ गुइ दिंदो” दे माइक्तु। मिनु मेकोमी गुइ दिंसेनु, ब्रा साशा, अर्को गुइ खोदेशो दुम्त। 14 मिनु फरिसीपुकीमी मेकेर रे गूशा खुम्सीशा “मेको कली दोपा साइक्चा ताइनया?” दे लोत्रसी पाम्तेक्म। यूहन्ना ५:१६

परमप्रभु आ गेय पाइब

मर्कूस ३:७-१२; लूका ६:१७-१९

15 मिनु येसुमी मेको आन लोत्र पशो तुइशशा, मेकेर रे गाक्त। मिनु शुश मुरुमी आ नोले खोइक्तेक्म। मेकोपुकी रोइ पाइबपुकी यो बाक्तेक्म। मेको नेल्ल आन कली सापाइक्तीमी। 16 सापाइशशा “सुइ कली मतुइक्पाइय्यीनी” दे माइशशा सोइक्ताकमी। मत्ती ८:४ 17 मोदेशो पा साइ नेसी परमप्रभु यावे आ लोत्र पाइब यसैयामी देशो लोत्र थमा

दुम्पाइवतु। 18 यसैयामी मार देशो बाक्त देशा हना “आं गेय पाइब कली कोवडीन। एको कली योवता। मिनु एको कली दाक्नुड। एको कली तशा शुश ग्येरसीनुड। आं सोक्तीम प्रिंशा, अर्को रागी डा मुर आन कली दोपा ठीक दुम्चा, दे तुइक्वपाइक्व। प्रेरित ३:१३, २६; मती ३:१७ 19 मेकोमी जिचा मपोक्व। शुश रेयके मपाइब। लां पित्थ आ सेंदा मनेसीब। 20 जिक्चशो किन्दा मजिक्व, काप्चशो मी मकाप्ब। ठीक पतीकेमी मग्राम सम्म मोदेशो पना पन बाक्त। 21 अर्को रागी डा मुरपुकीमी मेको आ नेमी आस पा बाक्नीम” दे ब्रेक्शो बाक्व। यसैया ४२:१-४

वोल ग्रुंडतीक अधिकार कोइशो

मर्कूस ३:२२-२७; लूका ११:१४-२३

22 मिनु मिक्च मताइब, नोफा मनेंब, मब्वाक्व वोलम तशो मुर का चाक्तेक्म। मिनु येसुमी मेको कली सापाइवतु। मिनु मिक्च ताप्तु, लोव्र यो पाप्तु। 23 मेकेर देल्शोपुकीमी “ओहो, एकोन दाऊद आ तौ बाक्म कोर में?” देमुम्तेक्म। मती २१:९; यूहन्ना ७:४२ 24 फरिसीपुकीमी चहिं मेको आन देशो नेशा “वोल आन पिप बेल्जीबुल आ सक्तिम कका वोल आन कली ग्रुंडशा खेरबाक्माक्त” दे मिम्शा लोव्र पामे बाक्त। 25 मिनु येसुमी मेको आन मिम्शा लोव्र पशो तुइशशा, मेको आन कली “राज्य का डा मुरपुकी जिशा ब्राशा गाक्तेक्म हना, राज्य जाम्शा लाइब। सहर का डा मुरपुकी जिशा ब्राशा गाक्तेक्म हना, सहर नुप्ब। खिं का डा मुरपुकी यो जिम्तेक्म हना, मेको खिं मलीब। मती ९:३४ 26 सैतानमी सैतान कली खेरतु हना, मेकोपुकी ब्रानीम। मिनु आ राज्य दोपा लीबा डा? 27 गो बेल्जीबुल आ सक्तिम वोल आन कली खेरतामी हना, इन तौपुकीमी सु आ सक्तिम खेरमे? मेकोपुकीमी गे इन कली निसाफ पाइनीम। 28 गोमी परमप्रभु आ सोक्तीमी वोल आन कली खेरनुड हना, परमप्रभु यावे आ राज्य जाक्शो बाक्माक्त, दे तुइक्तीन। १यूहन्ना ३:८ 29 नेनीने, बोल्यो मुर आ खिं खुइ पाइबमी डोंइती मेको खिं डा मुर कली ग्याइशशा फ्रेंशा मवोइवतु हना, आ खिं डा मारेइ मारेइ दोपा लाइक्ने चाप्बा डा? पाइशशा नोले ला मेको आ खिं डा मारेइ मारेइ लाइक्ने चाप्ब। मती ४:१-११; यसैया ४९:२४ 30 गो नु मगारब आं जोरी सत्रु दुम्नीम। गो नु गारशा मखुप्बमी आं खुप्शो यो फ्रशा ताइक्व। मर्कूस ९:४० 31 मोपतीके गो इन कली मार देनुड देशा हना, मुरपुकीमी पाप पा, परमप्रभु यावे कली शुक्शी लोव्र पाप्तेक्म हना, माफ गेचा पुंडसीनीम। परमप्रभु यावे आ सोक्त आ पबर्म शुक्शी लोव्र पशो पाप चहिं मक्याम्सीब, दे इन कली देनुड। मर्कूस ३:२८-३०; लूका १२:१०; १यूहन्ना ५:१६; हिब्रू ६:४-६; हिब्रू १०:२६ 32 रागीम जरमेशो आ पबर्म शुक्शी लोव्र पाप्तेक्म हना, माफ ताइनीम। तन्न सुमी परमप्रभु यावे आ सोक्त आ पबर्म शुक्शी लोव्र पाइबा, मेको आ पाप मुल मक्याम्सीब, बेक्शा लशा नोले यो मक्याम्सीब, गेना हना यो लीब। १तिमोथी १:१३

ब्रोव्रशो नु मब्रोव्रशो फल रवा

लूका ६:४३-४५

33 ब्रोव्रशो फल सिप्ब रवा खुम्तीनी हना, ब्रोव्रशो फल सिप्ब। मब्रोव्रशो फल सिप्ब रवा खुम्तीनी हना, मब्रोव्रशो फल सिप्ब। फल थाम्शा रिम्शो रवा बाक्म, दे मरिम्शो रवा बाक्म मेको तुंडसीब। मती ७:१६-१८ 34 ए बुस्स आ खलकपुकी, गे मरिम्शो थुं पाइशशो ननी। मिनु इन शोव्र रे दोपा रिम्शो लोव्र गूबा डा? थुं मारम ब्रीशो बाक्मे, मेकोन लोव्र पा गूब। मती ३:७ 35 रिम्शो थुं पाइशशो मुरुमी रिम्शो लोव्र पाइब। मरिम्शो थुं पाइशशो मुरुमी मरिम्शो लोव्र पाइब। 36 निसाफ पची नाक्त मुर नेल्लेमी आन हेंथे पशो लोव्र का का पा शोव्रचा माल्नीम, दे इन कली देनुड। याकूब ३:६; यहूदा १५ 37 मोपतीके होस पा बाक्कीन। मारदे हना इन पशो लोव्रमीन दोस गेचा नु ठीक सुइक्चा पुंडसीनीनी” दे माइक्तीमी।

चिन्ड कोव्रकोव्र दाक्शो

मर्कूस ८:११-१२; लूका ११:२९-३२

38 मिनु सास्त्री नु फरिसी का निक्शीमी “शेंब हजुर, चिन्ड का कोइदीकी” देतेक्म। 39 मिनु येसुमी “मरिम्शो थुं पाइशशो नु थमा मसुइक्वपुकीमी चिन्ड कोव्रकोव्र दाक्नीम। मेको आन कली परमप्रभु यावे आ लोव्र पाइब योना आ चिन्ड डा लाक्शा मारेइ चिन्ड मकोइनुडमी। 40 योना नाक्त सां सम्म डांइ आ कोव्रजम बाक्शो खोदेशो पा, रागीम जरमेशो यो नाक्त सां सम्म रागी आ कोव्रजम बाक्ब। योना २:१; एफिसी ४:९; १पत्रुस ३:१९ 41 निसाफ पची नाक्तीम निनवे सहर डा मुरपुकी बोक्शा, एको पाला डा आन कली दोसी सुइक्नीम। मारदे हना मेकोपुकीमी योना आ लोव्र नेशा, आन थुं परमप्रभु यावे गे लेत्ताक्म। नेनीने, एकेर का योना क्येडा ठेयब बाक्ब। जोना ३:५ 42 निसाफ पची नाक्त लुक्च रागी डा पिपीम बोक्शा, एको पाला डा मुर आन कली दोसी सुइक्ब। मारदे हना मेकोमी डोन रे कुशा,

पिप सोलोमनमी दोदेशो निप्स पा हुकुम पवा, दे कोव्रथ जाक्माक्त। नेनीने, एकेर सोलोमन क्येडा ठेयब का बाक्ब। १राजा १०:१-१०

वोल गूशा लशा यो लेन्ने चाण्व
लूका ११:२४-२६

43 मुर रे वोल कली गुंडशा खेरमेनु, ग्रांग्रा दिचा डा वोल गूशा लशा, ब्वाक्कु मबाक्तीकेमी नाइक्तीके माल्थ गाक्ब। माल्शा यो नाइक्तीके मथीब। 44 मिनु 'डोंइती आ बाक्तीकेमीन लेत्नुड' दे लेशशा जाक्ब। मिनु लेशशा जाक्मेनु, बाक्तीके फिक्शा, सिल्शा श्येत्थ वोइशशो थिण्व। 45 मिनु आ क्येडा ग्रांग्रा दिचा डा ७ ओटा वोल आन कली माल्थ लशा चाक्ब। मिनु ओव्रशा बाक्नीम। मिनु डोंइती क्येडा मेको मुर शुश मरिम्शो दुम्ब। एको मरिम्शो पाला कली मोदेशो दुम्ब" दे माइक्तीमी। २पत्रुस २:२०

येसु आ खिं डा मुर

मर्कूस ३:३१-३५; लूका ८:१९-२१

46 येसुमी मेको लोव्र पना पन बाक्मेनु, आ ममा नु आ लोकबपुकी ग्रुथ जाक्मा बाक्त। मती १३:५६ 47 मिनु मुर कामी "इन ममा नु लोकबपुकी ग्रुथ जाक्तेक्म" देंत। 48 मिनु येसुमी मो देंब कली "आं ममा नु आं लोकबपुकी सु नमी?" मती १०:३७; लूका २:४९ 49 देंशा, आ गुइ आ शेंसीबपुकी गे शुक्शा "कोव्रडीने, एकोपुकी आं ममा नु आं लोकबपुकी नम। हिब्रू २:११ 50 मारदे हना स्वर्गम बाक्ब आं आफ आ दाक्शो पाइबपुकीन आं ममा नु लोकबपुकी नम" देंत। रोमी ८:२९

13

वांचेर शोक्शो कथा

मर्कूस ४:१-९; लूका ८:४-८

1 मेको नाक्त येसु खिं रे गाक्शा, समुन्द्र आ नेक्था लशा निस्साक्व। 2 मिनु शुश मुर जाक्शा देल्लेक्म। मिनु येसुमी शुश मुर आन कली देल्शो तशा, डोंगा डोइशशा निस्साक्व। मुरपुकी चहिं समुन्द्र आ नेक्था बाक्तेक्म। 3 मिनु कथा सेल्शा, शुश लोव्र शेंताक्मी। कथा का ओं देंत "मुर कामी वांचेर शोक्थ लमाक्त। 4 मिनु ब्वारानु, गेडा का निक्शी लांमी जुक्तमे बाक्त। मिनु चिक्बीम गुप्शा जामे बाक्त। 5 का निक्शी ग्याडग्रो ठाउंमी जुक्तमे बाक्त। मिनु शुश खप मबाक्तीके जिव जाव वामा बाक्त। 6 तन्न नां पवानु, सोल सुल बेक्मा बाक्त। मारदे हना शाक्श मपाइशो बाक्मा बाक्त। 7 का निक्शी चू घारीमी जुक्तमे बाक्त। मिनु चूम सुम्शा, वाचा मगेवा बाक्त। 8 मिनु का निक्शी रिम्शो खपीम जुक्तमे बाक्त। मिनु वाशा शुश ग्रेल्शा, गेडा का के सहे का, ६०, ३० सिम्मा बाक्त। 9 सु नोफा पाइशो बाक्मे, मेकोमी नेंनल" देंत।

कथा सेल्शा शेंशो आ पर्बम

मर्कूस ४:१०-१२; लूका ८:९-१०

10 मिनु शेंसीबपुकीमी येसु कली "मारदे कथा सेल्शा, मुर आन कली शेंनीनी?" दे हिल्लो पाम्तेक्म। 11 मिनु येसुमी "इन कली स्वर्ग डा राज्य आ पर्बम खुइशशो लोव्र रुप्तीक थुं गेशो बाक्त। तन्न मेको आन कली मगेमी बाक्त। १कोरिन्थी २:१० 12 थीबमी तेम्शा गेचा पुंइसीब, मिनु शुश दुम्ब। मथीब चहिं बाक्शो यो रोइक्चा पुंइसीब। हितोपदेस ९:९; मती २५:२८-२९; मर्कूस ४:२४; लूका ८:१८ 13 कथा सेल्शा शेंनुडमी। मारदे हना कोव्रशा यो मताइनीम। नेंशा यो मरुप्नीम। यूहन्ना १६:२५; ब्यवस्था २९:३ 14 साइ नेसी यसैयामी देंशो नोले दुम्ब लोव्र मुल थमा दुम्त। मार ब्रेक्शो बाक्त देंशा हना 'नेंचा दा नेंनीनी, तन्न दोपा यो मरुप्नीनी। कोव्रचा दा कोव्रनीनी, तन्न दोपा यो मताइनीनी। 15 मेको मुर आन थुं ग्याम्शो बाक्नीम। आन नोफा थांइशो बाक्नीम। आन मिक्च क्रिण्शो बाक्नीम। मोदेशो मपशो नम हना, आन मिक्चीम ताम वा, नोफाम नेंनेम वा, थुंमी रुबेम वा, मिनु आं गे लेम्म वा, मिनु गो सापदुमी वा' दे ब्रेक्शो बाक्त। यसैया ६:९-१०; यूहन्ना ९:३९ 16 गेपुकी चहिं ग्येरसीने। इन मिक्च नु नोफा मेको आन के खोदेशो ममाइ। मिक्चीम ताइनीनी, नोफाम नेंनीनी। लूका १०:२३-२४ 17 नोफा दाइशशा नेनीने, गेमी मुल तशो नेंशो साइ नेसी रे परमप्रभु यावे आ लोव्र पाइबपुकीमी तचा नेंचा दाक्बाक्मा बाक्त। तन्न तचा नेंचा मतामे बाक्त। १पत्रुस १:१०

वांचेर शोक्शो कथा आ अर्थ शेंशो

मर्कूस ४:१३-२०; लूका ८:११-१५

18 वांचेर ब्वारशो कथा आ अर्थ शेंनन्नी, 19 सुमी परमप्रभु यावे आ राज्य डा लोव्र नेंशा मरुबा, मेको लांमी जुक्शो वांचेर खोदेशो बाक्ब। सैतानमी आ रुप्शो क्याम्शा गेब। 20 ग्याडग्रो खपीम शोक्शो खोदेशो बाक्त हना, देशो चोटी बिश्शा ग्येरसीब। 21 तन्न शाक्श थोक्चा मतथु शुश मलीब। परमप्रभु यावे आ लोव्र आ पर्बम श्येत जापु हना, थु प्रोइशा गाक्ब। 22 चू घारीम जुक्शा सुम्शो खोदेशो बाक्त हना, लोव्र नेंब। तन्न दोपा ठेयब दुम्नुडा? दोपा क्येट चेमु? दे मिम्शा, आ थमा सुइक्तीके देक्ब। मिनु नेंशो लोव्रमी फल मसिप्ब। मती ६:१९-३४; १तिमोथी ६:९ 23 सुमी नेंशा रुप्बा, मेको चहिं रिम्शो खपीम जुक्शो वांचेर खोदेशो शुश ग्रेल्शा, गेडा का के सहे का, ६०, ३० सम्म सिप्ब” दे शेंताक्मी।

सुवा नु चेरब शोक्शो कथा

24 मिनु अर्को कथा ओदें शेंताक्मी “स्वर्ग डा राज्य ओदेशो बाक्ब, मुर कामी आ रूमी रिम्शो वांचेर शोक्गा बाक्त। 25 मिनु नाक्दो इम्मेनु, आ जोरी सत्रुमी मेको तारी सुवा ब्वारशा गेवा बाक्त। 26 मिनु वांचेर वामेनु, सुवा यो वामाक्त। 27 मिनु गेय पाइबपुकीमी सुवा वाशो तशा, रू आ धनी कली ‘रिम्शो वांचेर शोक्नी ममाइ? मिनु सुवा दोपा वामा?’ देंमा बाक्त। 28 मिनु रू धनीमी ‘आं जोरी सत्रुमी ब्वारा बाक्त’ देंमाक्त। ‘मो हना मेको सुवा तुल्शा ताइक्तका? मार देंनीनी?’ देंमानु 29 ‘तुल्चा मदुम्ब। सुवा तुल्तीनी हना, चेरब यो दुल्ब। 30 मोपतीके रिक्ची मजाक्म सम्म बाक्ल। रुप्ची जाक्मेनु, आं गेय पाइब आन कली डोंइती सुवा रिक्शा फ्रेंशा चोचा कली तिल्शा वोतीने। मिनु चेरब रिक्शा तुप्शा आं भकारीम कुर पा वोतीने, दे माइक्नुडमी’ देंमाक्त” दे शेंताक्मी। मती ३:१२; मती १५:३; प्रकाश १४:१५

तोरी शोक्शो कथा

मर्कूस ४:३०-३२; लूका १३:१८-१९

31 येसुमी “स्वर्ग डा राज्य ओदेशो यो बाक्ब, मुर कामी आ रूमी तोरी शोक्गा बाक्त। 32 वांचेर नेल्ल क्येडा आइक्च गेडा तोरी गेडा बाक्माक्त हना यो, वाशा ठेयब रवा दुम्माक्त। मेको रवामी चिक्बीम ग्योव्र सेल्शा बाक्मा बाक्त” दे अर्को कथा का शेंताक्मी।

बोरपाइक्ब ओरुती कथा

33 मिनु येसुमी “स्वर्ग डा राज्य ओदेशो बाक्ब, मीश मुर कामी पाथी सां फसमी बोरपाइक्ब ओरुती सुप्शा, फस नेल्ल मबोरम सम्म सुम्शा वोदा बाक्त” दे अर्को कथा का शेंताक्मी। लूका १३:२०-२१

34 येसुमी मेको लोव्र नेल्ल कथा सेल्शा शेंताक्मी। कथा मसेल्थु मारेइ लोव्र मशेंदीमी। मर्कूस ४:३३-३४ 35 मारदे हना साइ नेसी परमप्रभु यावे आ लोव्र पाइबमी देशो लोव्र मुल थमा दुम्ल, दे कथा रे पा शेंताक्मी। मेको साइ ब्रेक्शो लोव्र चहिं मार बाक्ब देशा हना “सरीड नु रागी सेल्शो रे मुल सम्म खुइश्शो लोव्र कथा सेल्शा नेंपाइक्नुडमी” दे ब्रेक्शो बाक्त। भजन संग्रह ७८:२

चेरब शोक्शो कथा आ अर्थ शेंशो

36 मिनु येसु मुर आन कली प्रोइशा, खिं लेत्त। मिनु आ शेंसीबपुकीमी “रूमी वाशो सुवा आ कथा आ अर्थ शेंदीकी” देंतेक्म। 37 मिनु येसुमी “रिम्शो वांचेर शोक्ब देशो रागीम जरमेशो बाक्ब। 38 रू देशो रागी बाक्ब। रिम्शो वांचेर देशो राज्य डा सन्तान नमी। सुवा देशो सैतान आ सन्तान नम। १कोरिन्थी ३:९; यूहन्ना ८:४४ 39 सुवा ब्वारब सैतान बाक्ब। रुप्ची नाक्त चहिं निसाफ पची नाक्त बाक्ब। गेय पाइबपुकी परमप्रभु यावे आ गेय पाइब नम। 40 सुवा खुप्शा, मीम चोशो खोदेशो पा निसाफ पची नाक्त मार दुम्ब देशा हना, मोदेशोन दुम्ब। 41 रागीम जरमेशोमी परमप्रभु यावे आ गेय पाइब आन कली सोइक्ब। मिनु मेकोपुकीमी आ राज्य रे पाप पपाइक्ब नु पाप पाइब नेल्ल आन कली खुप्शा, मती २४:३१ 42 ठेयब मीम हुम्नीम। मेकेर मुरपुकी आन खुइ शेप्शा डाक्नीम। 43 परमप्रभु यावे आ डोंइती ठीक दुम्शोपुकी चहिं आं आफ आ राज्यमी नां खोदेशो छेडछेडम ग्येरशा बाक्चा ताइनीम। सु नोफा पाइश्शो बाक्मे, मेकोमी नेंनल। दानीएल १२:३

रूमी थिम्शो शोंप

44 स्वर्ग डा राज्य ओदेशो यो बाक्ब, रू कामी शोंप थिम्शा वोइश्शो बाक्माक्त। मिनु काबु मुर कामी मेको शोंप थिदा बाक्त। मिनु थम ग्येरसीशा, लेंशा थिम्शा वोइश्शा, आइक्के बाक्शो नेल्ल लेशशा, मेको रू ग्यबा बाक्त। मती १९:२९; लूका १४:३३; फिलिप्पी ३:७

शुश क्येट लाइब मोती

45 स्वर्ग डा राज्य ओदेशो यो बाकब, मोती ग्यापब लेयब कामी रिम्शो मोती ग्यापनुड, दे मिम्शा, माल्ना माल्न गाक्माक्त। 46 मिनु काबु शुश क्येट लाइब मोती तवा बाक्त। मिनु आइक्के बाक्शो नेल्ल लेयशा, मेको ग्यबा बाक्त।

डांइ रेशो कथा

47 स्वर्ग डा राज्य ओदेशो यो बाकब, समुन्द्रमी डांइ रेत्चा कली ग्याइल आप्शो बाक्माक्त। मेको आप्शो ग्याइलीम शुश थरी डा डांइ ओव्रमा बाक्त। मती २२:९-१० 48 मिनु ब्रीमेनु, माझीपुकीम ग्याइल कीशा समुन्द्र रे ग्रुंडमे बाक्त। ग्रुंडशा ब्वचा डा डांइ वोदमे बाक्त, मब्वचा डा डांइ ताइक्तमे बाक्त। 49 निसाफ पची नाक्त मोदेशोन दुम्ब। परमप्रभु यावे आ गेय पाइबपुकी जाक्शा, ठीक पाइब आन दाते रे पापी आन कली योव्रशा ग्रुंडशा, मती २५:३२ 50 ठेयब मीम हुम्नीम। मेकेर मुरपुकी आन खुइ शेप्शा डाक्नीम।

51 आं शेंतीक लोव्र नेल्ल रुम्नी?” दे हिल्लो पवानु “रुप्तक” देंतेक्म। 52 मिनु येसुमी “स्वर्ग डा राज्य आ पर्वम शेंसीशो जोक्ब तुइक्ब दुम्शो मुर खिं डा होव्रप खोदेशो बाकब। मेकोमी आ भकारी रे माइत नु नक थोव्रक शोल्ने चापब” देंत।

नासरथ सहरम येसु कली मब्रशो

मर्कूस ६:१-६; लूका ४:१६-३०

53 मिनु येसुमी मेको लोव्र शेंने थुम्शा, मेकेर रे लत। 54 मिनु लशा, आ बाक्शो सहरम जाक्दीशशा, ग्रुम्तीक खिंमी शेंताक्व। शेंदानु, आ लोव्र नेंबपुकीमी छक लाक्शा “आमाइ, एकोमी ओदेशो लोव्र दोपा जोक्गा? सु आ सक्तिमी छक लाक्चा डा गेय पवा? 55 शी के सेल्ब आ तौ ममाइ डा? आ ममा मरीयम ममाइ डा? आ लोक्ब याक्ब, योसेफ, सिमोन, यहूदा मनमी डा? 56 आ समीपुकी गोपुकी नु बाक्ब मनमी डा? मिनु मोदेशो आन तौमी दोपा जोक्शा ठेयब दुम्मे?” दे आन थुं मनुशो लोव्र पमुमा बाक्त। यूहन्ना ६:४२; यूहन्ना ७:१५, ५२ 57 मिनु येसुमी मेको आन थुं मनुशो तुइशशा, मेको आन कली “तेइ तेइ परमप्रभु यावे आ लोव्र पाइब आन कली ठेयब सुइशशा मान पाइनीम। आंम रागी, आंम खिंमी चहिं महिक्नीम” दे माइक्तीमी। यूहन्ना ४:४४ 58 मेकेर छक लाक्चा डा गेय का निक्शी ला पाप्तु। मारदे हना मेकोपुकीमी थमा मसुदेम।

14

यूहन्ना कली साइशो

1 येसुमी छक लाक्चा डा गेय पा शेंना शेंन गाक्मेनु, आ पशो नु आ शेंशो पिप हेरोदमी नेंना बाक्त। मेको पिप हेरोद चहिं मेको रागी डा ४ भागमी भाग का डा पिप बाक्माक्त। मोपतीके भाग का डा आन पिप, दे नें वोइशो बाक्माक्त। 2 मिनु पिप हेरोदमी येसु आ पशो नु शेंशो नेंशा, आ गेय पाइब आन कली “मेको ब्वाक्कुम खुम्शा ग्रुंडब यूहन्ना बेक्शो रे सेंसे बाक्त। मिनु शुश सक्ति पाइशशा, छक लाक्चा डा गेय पाइबाक्माक्त” देंमाक्त। 3 यूहन्ना बेक्शो रे सेंसे बाक्त, देशो दोपा देशा हना, हेरोदमी आ लोक्ब फिलीप आ मीश आ पर्वम यूहन्ना कली जेल्खानमी चोक्शो बाक्माक्त। मती ११:२ 4 मारदे हना यूहन्नामी हेरोद कली “इन लोक्ब आ मीश चाक्चा मदुम्ब” दे माइशो बाक्माक्त। प्रस्थान २०:१४ 5 मो देंतीके यूहन्ना कली साइक्चा माल्शो बाक्माक्त। तन्न मुर आन कली तशा हिंमाक्त। मारदे हना मुरपुकीमी यूहन्ना परमप्रभु यावे आ लोव्र पाइब बाक्ब, दे थमा सुइशो बाक्मा बाक्त। मती २१:२६

6 मिनु पिप हेरोद आ जरमेशो नाक्त जाक्माक्त। मिनु हेरोदनी आ तमीमी हेरोद आ भोजमी जाक्ब आन दातेमी सिल पशा, हेरोद कली ग्येरपदा बाक्त। 7 मेको कली सिल पशो तशा, हेरोद थाम्पा ग्येरशा, कसम जशा “मार पुंडतीवी हना यो, गो गेनन” दे मदा बाक्त। 8 मिनु मीश आल आ ममामी “ब्वाक्कुम खुम्शा ग्रुंडब यूहन्ना आ पिया क्योरशा, थालम कुर पा गेयीनी” दे पुंडपदा बाक्त। 9 मिनु हेरोदमी मेको लोव्र नेंशा, आ थुं मनुमाक्त। तन्न भोजमी जाक्ब आन कुल कसम जशा लोव्र गेतीके मगेनन देंने मचबा बाक्त। 10 मिनु आ सिपाही आन कली जेल्खानमी सोइशशा, यूहन्ना कली क्योरपा, 11 आ पिया थालम कुर पा चाक्पा गेपदा बाक्त। मिनु मीश आलम मेको थाल ताक्शा लाइशशा, आ आम्मा कली गेवा बाक्त। 12 मिनु यूहन्ना आ शेंसीबपुकीमी जेल्खानमी लशा, आ लास लाइशशा, थिम्मे बाक्त। मिनु येसु आ बाक्तीके जाक्शा, मो दुम्शो नेल्ल शोव्रतेक्म।

५ हजार मुर आन कली थुल्शो

मर्कूस ६:३१-४४; लूका ९:१०-१७; यूहन्ना ६:१-१३

13 मिनु येसुमी मेको लोव नेंशा डोंगा डोइशशा, सुइ मबाक्तीकेम लत। मिनु सहर डा शुश मुरुमी येसु लाम्माक्त देशो नेंशा, समुन्द्र हिरशा, आइक्की हांबु जाक्दीम्मा बाक्त। 14 मिनु येसु डोंगा रे तोइशशा, शुश मुर देल्शो तशा, मेको आन कली शिशी पा रोइ पाइब आन कली सापाइक्तीमी।

15 मिनु नां रिक्चावानु, आ शेंसीबपुकीमी “एको मारेइ मबाक्तीकेम मार जाइनीमी? देल्शो मुर आन कली लचा गेने। गाउं गाउं लशा, ग्याप्शा जामेक्ल” देंतेक्म। 16 मिनु येसुमी “लचा ममाल्नीम। गेपुकीमी एको आन कली जचा गेने” देंत। 17 “गोपुकी नु ५ ओटा शोब्ले नु डांइ निकशी डा लाक्शा मारेइ मबा” देंमानु 18 “लो, मेको शोब्ले नु डांइ गेयीनी” देंत। 19 मिनु मुर आन कली “निस्सीने” दे माइशशा, मेको शोब्ले नु डांइ शेशा, सरीड गे कोवशा “गे रिम्शो पाइब बाक्नीनी” देशा शोब्ले नु डांइ आ शेंसीब आन कली योक्शा गेपाइक्तीमी। 20 मिनु नेल्लेमी रूथ्री जाम्तेक्म। जशा हेंशो १२ डालो खुप्ताक्म। २राजा ४:४४ 21 जाइबपुकी चहिं आलपुकी नु मीश मुर आन कली प्रोंइशा, वोंइश मुर ला ५ हजार खोइ बाक्तेक्म।

येसु ब्वाक्कु तारी गाक्शो

22 मिनु येसुमी शेंसीब आन कली “आं डोंइती लने, गो मुर आन कली सोइशशा पीनुड” दे डोंगामी डोइक्पा सोइक्ताक्मी। 23 मिनु मुर आन कली सोइशशा, प्रार्थना पथ डांडाम डोंइसे बाक्त। नां रिक्मेनु यो मेकेरन आ कांइचीक बाक्माक्त। लूका ६:१२; लूका ९:१८ 24 शेंसीबपुकी चहिं समुन्द्र आ दातेम जाक्दीशशा, फश नु छालमी तेक्शा, श्येत जाम्तेक्म। 25 मिनु नां सोवचावानु, येसु ब्वाक्कु तारी गाक्ना गाक्न पिशो ताम्तेक्म। 26 मोपा पिशो तशा “आमाइ, वोल पित” दे हिंशा वाइ ब्रेम्मानु, 27 येसुमी “थुं बारपतीने। गो नड, महिनीन” देंत। लूका २४:३७

28 मिनु पत्रुसमी “प्रभु, गेन ननी हना, आं कली यो ब्वाक्कु तारी गाक्शा, इन गे पिचा कली ब्रेत्तीनी” देंत। 29 मिनु येसुमी “पिवो” दे ब्रेत्तानु, पत्रुस डोंगा रे तोइशशा, ब्वाक्कु तारी गाक्शा येसु गे लत। 30 मिनु फश गिवार पशो तशा हिंशा, गुम्चा माल्तु। मिनु “प्रभु प्रोंइयीनी” दे वाइ ब्रेत्त। 31 मिनु येसुमी फि ग्याइशशा कीशा “ए, गे थमा पा थमा सुइक्ने मचाप्ब, मार दल्गीर पवी?” दे माइशशा, 32 डोंगा डोंइसाक्स। मिनु फश यो दिक्त। 33 डोंगाम बाक्बपुकीम येसु आ डोंइती बाप्शा “थमान, परमप्रभु यावे आ तौ बाक्नी बाक्त” देशा सेउ पाम्तेक्म। मती १६:१६; यूहन्ना १:४९

मुर आन कली सापाइशशो

मर्कुस ६:५३-५६

34 मिनु समुन्द्र शोक्शा, गेनेसरेथ रागीम जाक्दीत्तेक्म। 35 मेकेर जाक्दीम्मानु, मुरपुकीमी येसु जाक्माक्त, दे तुइशशा “रोइ पाइब आन कली चाक्कीन, है” देशा डा मीन आन रागीम नेंपाइक्मुमा बाक्त। 36 मिनु रोइ पाइब आन कली चाक्गमेनु, मेकोपुकीमी “प्रभु, इन फेक्शो वा थिचा गेकी” दे पुंइतेक्म। मिनु सु सुमी थीमे, मेकोपुकी सातेक्म। मती ९:२१; लूका ६:१९

15

ग्रांरा दिचा आ पर्बम शेंशो

मर्कुस ७:१-१३

1 मिनु फरिसी नु सास्त्रीपुकी यरूसलेम रे येसु कली ग्रुथ जाक्शा 2 “इन शेंसीबपुकीमी जोक्ब तुइक्ब खाल्पा आन रिती थिती मारदे मपाइनीमी? जचा डोंइती गुइ चिक्चा माल्शो। मारदे मचिक्नीमी” देंमानु, लूका ११:३८ 3 येसुमी “गेपुकीमी मारदे इन पतीके पाइनीनी? परमप्रभु यावेमी अरेशो लोव चहिं मपाइनीनी। 4 परमप्रभु यावेमी अरेशो लोव का ‘आम आफ आस कली मान पचा’ मिनु ‘सु सुमी आम आफ आस कली सराप पाइनीमी, मेकोपुकी साइक्चा पुंइसीनीम’ दे ब्रेक्शो बाक्ब। प्रस्थान २०:१२; प्रस्थान २१:१७ 5 गेपुकीमी चहिं ‘सु सुमी आम आफ कली गेचा माल्शो थोव्रक परमप्रभु यावे आ खिं लाइशशा गेने थुम्तक’ देंनीम। मेकोपुकीमी आम आफ कली मान पचा ममाल्नीम, दे शेंनीनी। हितोपदेस २६:२४; १तिमोथी ५:८ 6 मोदेशो पा इन रिती थिती सेल्शा, परमप्रभु यावेमी अरेशो लोव क्याम्नीनी। 7 ए कपटीपुकी, यसैयामी इन कली गारचा डा लोव पा 8 ‘मेकोपुकीमी शोव्र नु लोव्रम ठेयब सेल्नीमी। आन थुमी चहिं आं कली मदाक्नीम। 9 आं कली मान पखु पशो खोदेशो पा आन सेल्शो शेंतीक लोव्र परमप्रभु यावेमी अरेशो लोव्र बाक्ब, दे मुर आन कली शेंनीम’ दे ब्रेक्शो बाक्त” दे माइक्तीमी। यसैया २९:१३

10 मिनू येसुमी मुर आन कली ब्रेशशा “नेंशा रूपीने, 11 शोव आगा ओवब थोवकीमी मुर कली ग्रांग्रा मसेल्ब। शोव रे गूशोमी चहिं मुर कली ग्रांग्रा सेल्ब” दे शेंताकमी। प्रेरित १०:१५; १तिमोथी ४:४; तीतस १:१५ 12 मिनू शेंसीबपुकीमी येसु कली “शेंब, इन देंशो नेंशा, फरिसीपुकी आन थुं मनुम दे तुइक्तीनी?” देंतेक्म। 13 मिनू येसुमी “स्वर्ग डा आं आफोमी मखुम्शोपुकी तुल्शा ताइक्चा पुंइसीनीम। प्रेरित ५:३८ 14 मेकोपुकीमी मारेइ पामेक्ल। मिक्च मताइब लां कोइब नम। मिक्च मताइबमी मिक्च मताइब कली कीशा लां कोइताक्व हना, निम्फा खाल्टाम बिक्नीस” देंत। मत्ती २३:२४; लूका ६:३९; रोमी २:१९ 15 मिनू पत्रुसमी “थमा, इच्ची ना मुर आन कली पशो लोव आ अर्थ मार में?” दे हिल्लो पवानु 16 “ए, गेपुकी यो आं लोव मरुप्ब बाक्नीनी? 17 शोव आगा ओवब थोवक कोवज जाक्दीशशा, खी दुम्शा लाइब, दे मतुइक्तीनी? 18 शोव रे गूशो चहिं थुं रे गूशो बाक्ब। मेकोमी मुर कली ग्रांग्रा सेल्ब। 19 मुर आन थुंमी मार मरिम्शो मिन्मीम देंशा हना, मुर साइक्चा, मुर आन मीश लाइक्चा, तेल्लेम पचा, खुइ पचा, जोल पा सांकछी बाक्चा, मुर आन पर्बम मरिम्शो लोव पचा, दे मिन्मीम। मेको चहिं शोव रे गूशा, उत्पत्ती ८:२१ 20 मुर आन कली ग्रांग्रा सेल्ब। गुइ मचिक्थु जशोमी चहिं मारेइ मपाइब” दे शेंताकमी।

कनानी रागी डा मीश मुर

मर्कूस ७:२४-३०

21 मिनू येसु मेकेर रे लशा, टायर नु सीदोन सहर आ नेक्था जाक्दीत्त। 22 मिनू मार दुम्त देंशा हना, कनानी रागी डा मीश मुर का जाक्शा “दाऊद आ तौ, प्रभु, शिशी पाइय्यीनी। आं तमी कली वोलम सुम्शा शुश श्येत गेपुतु। वोल कली खेरशा सापतीने” दे डाक्न डाक्न पुंइतु। 23 मिनू येसु सिक्सी पा बाक्त। मिनू शेंसीबपुकीमी “एको मीश मुरुम रेयके पना पन इं नोले खोइशशा पिन पिन बाक्ब। एको कली सोइक्तीने” देंतेक्म। 24 मिनू येसुमी “लां जाम्शो भेडा खोदेंशो दुम्शो इं इस्राएल डा मुर आन कली ला वारच पथ, सोइसीशो नड” देंत। मत्ती १०:५-६; रोमी १५:८ 25 मीश मुरुम चहिं येसु आ डोंइती पोक्च थेक्शा “प्रभु, आं कली वारच पयीनी” दे सेउ पापुतु। 26 मिनू येसुमी “आल आन कली वोइशशो शोब्ले लाइशशा, कुचुम कली गेचा मदुम” देंमेनु 27 “प्रभु, मेको थमा बाक्त हना, होवपमी हेंशा ताइशशो थोवक कुचुममी जचा ताइनीम” देंत। 28 मिनू येसुमी “ओहो, मेकोमी थमा पा थमा सुइय्यी बाक्त। मोपतीके इ पुंइशो जाक्दील” दे माइक्तु। मो देंमेनु, आ तमी ब्रा सामाक्त। मत्ती ८:११-१३

रोइ पाइब आन कली सापाइशशो

29 मिनू येसु मेकेर रे लशा, गालील समुन्द्र आ नेक्था जाक्दीशशा, डांडा का डोइशशा निस्साक्व। 30 मिनू शुश मुरुमी गुइ खोइल मदुक्ब, कूजी कुंजे, मिक्च मताइब, नोफा मनेंब, लोव मपाइब नु मार मार रोइ पाइबपुकी चाक्शा, आ डोंइती तेल्लेक्म। मिनू मेको नेल्ल आन कली सापाइक्तीमी। 31 मिनू शुश मुर आन कली साशो तशा “लाटापुकी लोव पाइबाक्तेक्म, कूजी कुंजे साबाक्तेक्म, खोइल मदुक्ब गाक्बाक्तेक्म, मिक्च मताइब मुल मिक्च ताइब दुम्बाक्तेक्म” दे छक लाक्शा, इस्राएली आन परमप्रभु यावे कली ठेयब सेल्शा मान पाम्तेक्म। मर्कूस ७:३७

४ हजार मुर आन कली थुल्शो

मर्कूस ८:१-१०

32 मिनू येसुमी आ शेंसीब आन कली ब्रेशशा “एको शुश मुर आन कली शिशी पाइनुडमी। मारदे हना नाक्त सां सम्म गो नु काथा बाक्तेक्मे। मिनू आन के जचा मारेइ मबा। जचा मगेथु, आन खिं सोइक्चा मदाक्नुड। सोइक्ताक्डमी हना, लांमी बेक्नीम” दे माइक्तीमी। मत्ती १४:१३-२१ 33 मिनू मेकोपुकीमी “गोरशो रागी मारेइ मबाक्तीकेमी इश्का मुर आन कली मार जचा गेचा नमी डा?” देंतेक्म। 34 मिनू येसुमी “शोब्ले दोशो कुरनी?” देंत। मिनू “शोब्ले ७ ओटा नु आइक्च डांइ का निक्शी” देंतेक्म। 35 मिनू मुर आन कली निप्पाइशशा, 36 मेको ७ ओटा शोब्ले नु डांइ शेशा “गे रिम्शो पाइब बाक्नीनी” दे शोब्ले जिक्शा, शेंसीब आन कली गेशा योक्पाइक्तीमी। 37 मिनू नेल्लेमी रूथ्री जाम्तेक्म। जशा हेंशो ७ डालो खुप्ताक्म। 38 जाइबपुकी चहिं मीश मुर नु आलपुकी प्रोंइशा, ४ हजार बाक्तेक्म। 39 मिनू मुर नेल्ल आन कली सोइशशा, आ शेंसीबपुकी नु काथा डोंगा डोइशशा समुन्द्र शोक्शा, माग्दाला रागीमी जाक्दीत्तेक्म।

16

चिन्ड कोवकोव दाक्शो

मर्कूस ८:११-१२; लूका १२:५४-५६

1 मिनू फरिसी नु सदुकीपुकी जाक्शा, येसु आ थुं थाम्चा कली “स्वर्ग डा चिन्ड का कोंइदीकी” देंतेक्म। मती १२:३८ 2 मिनू येसुमी मेको आन कली “नां पेरचावानु ‘दीसा हाक्ब। मारदे हना सरीड लल जिशो बाक्ब’ देंनीनी। 3 मिनू नां दाम्मेनु ‘मुलाक्त फश गिवार पाइब। मारदे हना गोस्सुम सुम्शा, सरीड लल जिशो बाक्ब’ देंनीनी। सरीड कोव्रशा हाक्बा, दे रेउ यीबा देंने चाप्नीनी। तन्न मुल मार दुम्चशो बाक्बा मेको आ चिन्ड मरुप्नीनी। मती ११:४ 4 मरिम्शो पाइब नु देवी देवता नु परमप्रभु यावे खाल्ब पालाम चिन्ड कोव्रकोव्र दाक्नीम। मेको आन कली योना आ चिन्ड डा लाक्शा मारेइ चिन्ड मकोंइनुडमी” देंशा, मेको आन कली प्रोंइशा गाक्त। मती १२:३९-४०

लोव्र नेंशा होस पांइसीने

मर्कूस ८:१४-२१

5 मिनू समुन्द्र शोक्शा, आइक्ची हांबु जाक्दीम्मानु, शेंसीबपुकीमी “ला, शोब्ले कुरचा प्रेंसे बाक्त” दे ति फुकशा देंमुम्तेक्म। 6 मिनू येसुमी “फरिसी नु सदुकी आन शोब्लेमी सुप्शो बोरपाइक्ब ओरुती रे होस पांइसीने” दे माइक्तीमी। लूका १२:१ 7 मिनू “शोब्ले कुरचा प्रेंदया बाक्त, दे तुइश्शा, मो देंम कों” देंमुम्तेक्म। 8 मिनू येसुमी मेको आन लोव्र तुइश्शा “ए, गे थमा पा थमा सुइक्ने मचाप्बपुकी, शोब्ले मबा, दे मारदे शुश लोव्र पमुनी? 9 मुल यो मारेइ मरुप्नीनी? ५ ओटा शोब्लेमी ५ हजार मुर आन कली रूथ्री जचा गेशा, गिश डालो हेंम? मती १४:१७-२१ 10 मिनू ७ ओटा शोब्लेमी ४ हजार मुर आन कली जचा गेशा, दोशो हेंम, दे ममिम्नीनी? मती १५:३४-३५ 11 फरिसी नु सदुकी आन शोब्लेमी सुप्शो बोरपाइक्ब ओरुती रे होस पांइसीने देंशो चहिं शोब्ले आ पबर्म शेंशो ममाइ। मुल यो मरुप्नीनी?” दे माइक्तीनु, 12 “गे फरिसी नु सदुकी आन शेंतीक लोव्र नेंशा, होस पांइसीन, दे शेंशो बाक्माक्त” दे रुप्तेक्म।

पत्रुसम “ख्रीस्त ननी” देंशो

मर्कूस ८:२७-३०; लूका ९:१८-२१

13 मिनू सिजरिया फिलिप्पी रागीम जाक्दीश्शा, येसुमी आ शेंसीब आन कली “मुरपुकीमी रागीम जरमेशो आ पबर्म मार देंनीमी?” दे हिल्लो पवानु 14 “का निक्शीमी ‘ब्वाक्कुम खुम्शा गुंडब यूहन्ना बाक्माक्त’ देंनीम। का निक्शीमी ‘एलीया बाक्माक्त’ का निक्शीमी ‘येरमीया बाक्म कों, परमप्रभु यावे आ लोव्र पाइब अर्को का बाक्म कों’ देंनीम” देंतेक्म। मती १४:२; मती १७:१०; लूका ७:१६ 15 मिनू येसुमी “गेपुकी चहिं आं कली सु सुइक्यीनी?” देंमेनु, 16 सिमोन पत्रुसमी “ब्रोंइशा बाक्ब परमप्रभु यावे आ तौ ख्रीस्त बाक्नीनी” देंत। यूहन्ना ६:६९ 17 मिनू येसुमी पत्रुस कली “योना आ तौ सिमोन, ग्येरसो। मारदे हना इ देंशो लोव्र मुरुमी शेंशो ममाइ। स्वर्गम बाक्ब आं आफोमी इ कली रुप्पाइक्तु। मती ११:२७; गलाती १:१५-१६ 18 गे पत्रुस नवे, एको सेरथे फुल्लु तारी आं खिं सेल्लुड। नरकमी मेको कली ग्राने मचाप्ब। यूहन्ना १:४२; एफिसी २:२० 19 गो स्वर्ग डा राज्य आ सांचो गेनन। एको रागीम मार कली फ्रेंनेवे, स्वर्गमी यो फ्रेंशो बाक्नीम। एको रागीमी मार कली प्रोंइनेवे, स्वर्गमी यो प्रोंइशो बाक्नीम” दे माइक्तु। मती १८:१८ 20 मिनू आ शेंसीब आन कली “ख्रीस्त एकोन बाक्माक्त दे सुइ आन कली मशोवडीने” दे माइक्तीमी। मती १७:९

येसु श्येत जचा माल्ब, दे शेंशो

मर्कूस ८:३१-३३; लूका ९:२२

21 मेना रे येसुमी आ शेंसीब आन कली “यरूसलेम लशा, जोक्ब तुइक्ब खाल्पा, ठेयब चढ़ेब नु सास्त्रीपुकी रे पा शुश श्येत जशा साइक्चा पुंडसीनुड। मिनू बेक्शा आ नित्थ नाक्त सेंसीनुड” दे शेंचा गोप्तु। मती १२:४०; यूहन्ना २:१९ 22 मिनू काबु लेंशा शेंदानु, पत्रुसमी येसु कली आइक्ची ब्रेशशा लाइश्शा “परमप्रभु यावेमी इन कली शिशी पवल। प्रभु, इन देंशो खोदेंशो गेनायो मदुम्ल” देंमाक्त। 23 मिनू येसुमी नोले हिरशा पत्रुस कली कोव्रशा “ए सैतान, इ कुल मकोंइदी। मारदे हना आं लां तेक्ब बाक्डे बाक्त। गे परमप्रभु यावे आ मिम्शो मपथु, मुरुमी मिम्शो लोव्र कका पाप्तीवी” दे हुइक्ताक्व।

येसु आ नोले खोइक्बपुकी

मर्कूस ८:३४-९:१; लूका ९:२३-२७

24 मिनू येसुमी आ शेंसीब आन कली “सुमी आं नोले खोइक्चा थुं पाइबा, मेकोमी आंम दला दाक्स पचा प्रोंइशा, श्येत जचा महिंथु, आ नोले खोइय्यील। मती १०:३८-३९; १पत्रुस २:२१ 25 आ गिंम प्रोंइचा दाक्बमी मेको साम्ब। आं पबर्म आ गिंम साम्बमी आ गिंम प्रोंइब। प्रकाश १२:११ 26 रागी नेल्ल आंम के सेल्शा, आ गिंम चहिं खतम दुम्त

हना, मार रिम्शो दुम्म डा? खतम दुम्शो गिंम मार गेशा लेन्ने चाप्बा डा? लूका १२:२०; भजन संग्रह ४९:९ 27 रागीम जरमेशो आ आफ आ दारसमी परमप्रभु यावे आ स्वर्ग डा गेय पाइबपुकी नु जाकब। मिनु मुर आन गेशो पशो कोव्रशा, आन गेशो का का पा लेशशा गेब। रोमी २:६ 28 नोफा दाइशशा नेनीने, मुल गो नु काथा बाकब का निक्शीमी रागीम जरमेशो आ राज्य जाकशो मतथु मबेक्नीम” दे शेंताक्मी। मत्ती १०:२३

17

येसुमी रां फाइशशा कोइशो

मर्कूस ९:२-१३; लूका ९:२८-३६

1 मिनु ६ नाक्त नोले येसुमी पत्रुस, याकूब नु आ लोकब यूहन्ना सां आन कली सुइ मबाक्तीके लाइशशा डांडामी लदा बाकत। मत्ती २६:३७; मर्कूस ५:३७; मर्कूस १३:३; मर्कूस १४:३३; लूका ८:५१ 2 मिनु मेको आन डोंइती येसु फांडसेनु, मेकोपुकीमी आ कुल नां खोदेशो नु आ फेक्शो वा बुबु पा जिलील पा बुश दुम्शो तामे बाकत। २पत्रुस १:१६-१८; प्रकाश १:१६ 3 मिनु मोसा नु एलीया जाकशा, येसु नु लोव्रसी पशो तामे बाकत। 4 मिनु पत्रुसमी येसु कली “हे प्रभु, इं कली एकेर बाकचा रिम्शो दुम्ब। गे दाक्नीनी हना, बाक्तीके सां सेल्लुड। इन कली का, मोसा कली का नु एलीया कली का सेल्लुड” देंमाकत। 5 मोदेशो लोव्र पना पन बाकमेनु, जिलील पा बुश तांडसीशो गोस्सुमी नेल्ल आन कली गिल्मी बाकत। मिनु गोस्स आगा रे “एको आं दाक्शो तौ बाकब। एको कली तशा ग्येरसाक्यी। आ लोव्र नेनीने” देशो सेंदा नेन्मे बाकत। मत्ती १:१७ 6 मोदेशो नेंशा, शेंसीबपुकी हिंशा खुम्की पा बाम्मा बाकत। 7 मिनु येसुमी मेको आन कली गुडमी थिशा “बोक्कीन, महिनीन” दे माइक्मी बाकत। 8 मिनु बोक्शा कोव्रडमेनु, येसु कली ला तामे बाकत।

9 मिनु डांडा रे ब्रुम्मानु, येसुमी “रागीम जरमेशो बेक्शो रे मसेंसे सम्म इन तशो सुइ आन कली मशेंदीने” दे माइक्मी बाकत। मत्ती १६:२० 10 मिनु शेंसीबपुकीमी “सास्त्रीपुकीमी ‘डोंइती एलीया जाकचा माल्ब’ दे शेंनीम ममाइ? मारदे मोदें शेंनीमी?” दे हिल्लो पामेनु मत्ती ११:१४ 11 “थमान, एलीया डोंइती जाकशा, नेल्ल ठीक सेल्ब। 12 तन्न एलीया डोंइती जाकत। आ जाकमेनु, सास्त्रीपुकीमी तुइक्तेम। मिनु मेको कली मार पचा दाकतमे, मेकोन पाम्तेक्म। मोदेशो पा रागीम जरमेशोमी यो आन गुइ रे पा श्येत गेचा पुंडसीब, दे गो इन कली देंनुड” देंमाकत। मत्ती १४:९-१० 13 मिनु “ब्वाक्कुम खुम्शा गुंडब यूहन्ना आ पबर्म लोव्र देशो बाक्माकत” दे रुप्मे बाकत। लूका १:१७

येसुमी वोल् कली खेरशो

मर्कूस ९:१४-२९; लूका ९:३७-४२

14 मिनु येसु नु आ शेंसीब सां शुश मुर देल्शा बाक्तीकेमी जाकमानु, मुर का येसु आ डोंइती जाकशा, पोक्च थेक्शा सेउ पा 15 “हे प्रभु, आं तौ कली शिशी पा सापतीने। आं तौ छारे रोइ पा मीम दुप्पांडसीशा ब्वाक्कुम ग्रुम्पांडसीशा, शुश श्येत जना जन बाकब। 16 इन शेंसीब आन कली सापतीने देंडानु, सापाइक्ने मचबेम” दे माइक्तु। 17 मिनु येसुमी “गे थमा पा थमा मसुइक्ब नु मटीबपुकी, गेना सम्म गेपुकी नु बाक्नुडा? ओदेशो इन पशो गेना सम्म फाल्शा बाक्नुडा डा? रोइ पाइब कली चाक्कीन” देंत। 18 मिनु चाक्गामेनु, येसुमी वोल् कली हुइशशा खेरतु। मिनु आल ब्रा सात। 19 मिनु मुर गाक्मा नोले शेंसीबपुकीमी येसु कली “मारदे गो मेको वोल् कली खेरने मचाप्का?” दे हिल्लो पामेनु, 20 येसुमी “थमा पा थमा सुइक्ने मचाप्बपुकी, नोफा दाइशशा नेनीने, रायो गेडा खोइ ला थमा सुइक्तीनी हना, इन पने मचाप्चा डा मारेइ मलीब। एको डांडा याक्सो देंनीनु, एको डांडा यो याक्सीशा लाइब। मत्ती २१:२१; लूका १७:६; १कोरिन्थी १३:२ 21 ओदेशो वोल् खेरचा कली चहिं बर्त बाक्शा, प्रार्थना पा ला गुंडने चाम्सीब” दे माइक्तीमी।

येसु श्येत जचा माल्ब, दे लेंशा शेंशो

मर्कूस ९:३०-३२; लूका ९:४३-४५

22 मिनु गालील रागीम बाकमानु, येसुमी “रागीम जरमेशोमी मुर आन गुइमी गेशा साइक्चा पुंडसीब। मत्ती १६:२१; मत्ती २०:१८-१९ 23 मिनु बेक्शो आ नित्थ नाक्त बेक्शो रे सेंसीब” देंमेनु, शेंसीब आन थुं थाम्पान खाइक्मा बाकत।

गुम्तीक खिं डा तिरो

24 मिनु नोले कापेरनाउम सहर जाक्दीम्मानु, गुम्तीक खिं डा तिरो पोक्बपुकीमी पत्रुस कली “इन कली शेंबमी तिरो मथाप्बा?” देंमानु प्रस्थान ३०:३३; २राजा १२:५-६ 25 “थाप्ब” देंमाकत। मिनु खिं लेशशा जाकमेनु, येसुमी पत्रुस कली

“ए सिमोन, पिपपुकीमी तिरो पोक्पदमेनु, आन तौ आन के यो पोक्नीमी देय अर्को रागी डा मुर आन के ला पोक्नीमी, मार देनेवे?” दे हिल्लो पाप्तु। 26 पत्रुसम “अर्को रागी डा मुर आन के ला पोक्नीम” देंत। “लो, मो हना तौपुकीमी तिरो थाप्या ममाल्बाक्मा बाक्त। 27 मोदेशो बाक्त हना यो, मेको आन थुं नुपाइक्चा कली तिरो थाप्तस। गे समुन्द्रमी लशा, बोलसी ग्यारशा, नेल्ल क्येडा डोंइती रेशो डांइ आ शोत्र पाक्को। आ शोत्र आगामी स्तातेर का थित्नेवे। मेको लाइशा, इस तिरो थाप्तो” दे माइशा सोइक्ताक्व। स्तातेर का ४ देनार बाक्ब। ग्रीक क्येट बाक्ब।

18

नेल्ल क्येडा ठेयब सु बाक्ब

मर्कूस ९:३३-३७; लूका ९:४६-४८

1 मिनु काबु शेंसीबपुकीमी येसु कली “स्वर्ग डा राज्यमी नेल्ल क्येडा ठेयब सु बाक्बा?” दे हिल्लो पाम्तेक्म। 2 मिनु येसुमी आल का कली ब्रेशा, आन दातेमी राप्पाइशा 3 “नोफा दाइशा नेनीने, गेपुकीमी दोपा ठेयब दुम्चा, दे मिम्चा प्रोइशा, आल खोदेशो मदुम्तीनी हना, स्वर्ग डा राज्य दोपा यो ओत्रचा मताइनीनी। मती १९:१४ 4 एको आल खोदेशो ब्रेशोपुकी स्वर्ग डा राज्यमी नेल्ल क्येडा ठेयब बाक्नीम। 5 सुमी आं नेम ओदेशो आल कली ब्राइबा, मेकोमी आं कली ब्राइब। मती १०:४०

पाप पपाइक्चा आ पबर्म शेंशो

मर्कूस ९:४२-४७; लूका १७:१-२

6 सुमी आं कली थमा सुइक्ब आल कली पाप पपाइक्बा, मेको आ शुरम यात क्युक्शा, समुन्द्रमी खुम्शा साइक्चा अरु सजाइ क्येडा रिम्शो बाक्ब। लूका १७:१-२ 7 पाप पपाइक्ब आन पबर्म, आबी आबी। एको रागीमी पाप पपाइक्ब शुश जाक्नीम। तन्न सुमी अरु आन कली पाप पपाइक्बा, मेको आन कली आबी आबी। 8 इ गुइ खोइलीमी इ कली पाप पपाइक्तु हना, खोइशा ताइक्तो। मारदे हना गुइ खोइल निम्फा बाक्शा, नरकम खुम्चा पुंइसीचा क्येडा दुंडे खोरन्डे दुम्शा, स्वर्ग डा राज्यम ओत्रचा तचा रिम्शो दुम्ब। मती ५:२९-३० 9 इ मिक्चीमी इ कली पाप पपाइक्तु हना, मिक्च फेशा ताइक्तो। मारदे हना मिक्च निम्फा पाइशा, नरकम खुम्चा पुंइसीचा क्येडा काना दुम्शा, स्वर्ग डा राज्यमी ओत्रचा तचा रिम्शो दुम्ब।

जाम्शो भेडा माल्थ लशो

लूका १५:४-७

10 होस पांइसीने, आल आन कली आइक्च मसेलीने। नोफा दाइशा नेनीने, आल आन कली कोत्रब परमप्रभु यावे आ स्वर्ग डा गेय पाइबपुकी स्वर्गम बाक्ब आं आफ आ डोंइती बाक्नीम। 11 रागीम जरमेशो जाम्शो आन कली माल्थ जाक्शो बाक्ब। हिब्रू १:१४ 12 मुर का के सहे का भेडामी का जाम्त हना, मेकोमी ९९ भेडा आन कली प्रोइशा वोइशा, जाम्शो का कली मथिदा सम्म माल्ना माल्न मगाक्बा डा? 13 नोफा दाइशा नेनीने, थिदानु, मजाम्शो ९९ भेडा क्येडा मेको थिशो का आ पबर्म शुश ग्येरसीब। 14 मेको बुदी स्वर्ग डा इन आफोमी आइक्च का यो मजाम्मल, दे मिम्ब।

माफ गेचा

15 इ लोकबमी इ कली मरिम्शो पाप्तु हना, गे निक्शी बाक्सीनु, एको ओदेशो मरिम्शो पाप्तीवी, दे तुइक्पतो। इ लोत्र बीसाक्व हना, मेको कली आम के सेल्नेवे। लेवी १९:१७; लूका १७:३; गलाती ६:१ 16 इ लोत्र मबिस्साक्व हना चहिं, मुर निक्शी सां दुम्शा लशा, सांकछी वोइशा लोत्र पावो। ब्यवस्था १९:१५ 17 मेको आन लोत्र यो मबिस्साक्व हना, मुर पुक्शा लोत्र पावो। मिनु मेको आन लोत्र यो मबिस्साक्व हना, अर्को रागी डा मुर खोदेशो बाक्माक्त, दे तिल्शा सोइक्तो। १कोरिन्थी ५:१३; २ थिस्सलोनिकी ३:६; तीतस ३:१० 18 नोफा दाइशा नेनीने, रागीमी मार पाइशा वोइक्नीनी, मेको स्वर्गम यो पाइशा बाक्ब। रागीमी मार प्रोइनीनी, मेको स्वर्गम यो प्रोइशा बाक्ब। मती १६:१९; यूहन्ना २०:२३ 19 मिनु रागीमी मुर निक्शी गारशा, थुं का पा मारेइ पुंइताक्स हना, स्वर्गमी बाक्ब आं आफ रे पा आस पुंइशो ताइनीस, दे इन कली देंनुड। मर्कूस ११:२४; मती २८:२० 20 मारदे हना तेकेर आं नेमी निक्शी सां खुम्सीनीमी, मेकेर गो यो बाक्नुड” दे येसुमी देंत।

21 मिनु पत्रुसमी “प्रभु, आं लोकबमी आं कली मरिम्शो पना पन बाक्त हना, गिश खेयप सम्म माफ गेचा माल्नुडा? मार ७ खेयप सम्म गेचा माल्नुडा?” देंमेनु, 22 येसुमी “गो माइक्नन, ७ खेयप ला ममाइ। ७ कली ७० खेयप हिक्शो क्येडा यो शुश माफ गेचा माल्नेवे। उत्पत्ती ४:२४; लूका १७:४; एफिसी ४:३२

23 मोपतीके स्वर्ग डा राज्य ओदेंशो बाक्ब, पिप कामी आं जेर लाइब आन के हिसाब ताक्चा, दे मिम्ता बाक्त। 24 मिनु हिसाब ताक्गानु, मुर कामी १० हजार टलेन्ट शुश जेर थुइश्शो बाक्माक्त। टालेन्ट का ६ हजार द्राक्मे कि ३४ किलो खोदेंशो बाक्त। 25 मिनु मेको जेर थाम्ने मचबानु, पिपीमी ‘गे, गे नु बाक्शो थोवकी, इ खिं रू, इ मीश तमी तौ, लेयशा, जेर थाप्ती’ दे मदा बाक्त। नेहेम्याह ५:५ 26 मो देंमेनु ‘हे पिप, गो इच्चीन थाम्ने मचाप्नुड। दीसा नित्थी दोपा हना यो थाप्नुड’ दे खुम्की पा बाप्शा सेउ पवा बाक्त। 27 मिनु पिपीमी शिशी पा ‘इ लाइश्शो जेर मुलाक्त डा मेरे थाप्चा ममाल्नेवे। एको हिसाब नेल्ल क्याम्शा गेनन’ दे आ जेर नेल्ल क्याम्दा बाक्त। 28 मेको जेर क्याम्चा पुंडसीब मेकेर रे लशा, आ वारच का कली गुमा बाक्त। मेको आ वारचमी मेको के सहे का देनार जेर लाइश्शो बाक्माक्त। मिनु गुम्सानु, ग्याइश्शा आ क्रोकक्रो निप्शा ‘साइ लाइश्शो क्येट मुलन थाप्ती’ दे मप्रोना बाक्त। देनार का रोमी आन चांदी के क्येट बाक्त। ग्रीक लोव्रमी द्राक्मे देंशो बाक्त। 29 मिनु मेकोमी ‘ए वारच, मुल मचाप्नुड, दीसा नित्थी दोपा हना यो, थाप्नुड’ दे खुम्की पा बाप्शा सेउ पवानु 30 ‘मुलाक्त मथाप्ताक्यी हना, इ कली प्रोंइसीन मप्रोंइनन’ दे लाइश्शा, जेर नेल्ल थाम्ने मथुमा सम्म जेल्खानम चोक्पा वोदा बाक्त। 31 मोपा चोक्पाइश्शो तशा, आ वारचपुकीमी आन थुं खाइश्शा, पिप कली मेको लोव्र नेल्ल तुइक्पदमे बाक्त। 32 मिनु पिपीमी चोक्पाइक्ब कली ब्रेश्शा ‘हिंचा डा बाक्डे बाक्त। गेम आं कली खुम्की पा बाप्शा सेउ पाप्तीवी। मिनु गो इ जेर नेल्ल क्याम्शा गेतेन। लूका ६:३६ 33 दोपा इ कली शिशी पाइना, मोपा गेमी यो इ वारच कली पचा ममाल्नेवे डा?’ दे गाइश्शा मदा बाक्त। १यूहन्ना ४:११ 34 मिनु मेको आ जेर नेल्ल मथाप्ता सम्म जेल्खान डा पुलीस आन गुइमी जिम्मा गेवा बाक्त। मती ५:२६ 35 मोपतीके होस पांडसीने। मारदे हना इन लोकब कली इन थुं गा रे पा माफ मगेतीनी हना, स्वर्गम बाक्ब आं आफोमी यो इन कली मोदेंशोन पाइब” दे शेंताक्मी। मती ६:१४-१५; याकूब २:१३

19

1 मिनु येसुमी मोदें शेंने थुम्शा, गालील रागी प्रोंइशा, यर्दन खोला शोक्शा, यहूदीया रागीम जाक्दीत्त। 2 मिनु शुश मुर आ नोले खोइश्शा लाम्तेक्म। मिनु येसुमी रोइ पाइब आन कली सापाइक्ना पाइक्न गाक्त।

मीश वोंइश आस पर्वम शेंशो

मर्कूस १०:१-१२

3 काबु फरिसीपुकी जाक्शा, येसु आ थुं थाम्चा कली “आन मीश आन कली मारेइ दोस गेशा प्रोंइचा तांडसीबा?” दे हिल्लो पाम्तेक्म। 4 मिनु येसुमी “नेल्ल क्येडा डोंइती परमप्रभु यावेमी वोंइश मुर नु मीश मुर सेल्ल्तीम्सी। उत्पत्ती १:२७ 5 मेको लोव्र मपढेनी? ‘मुरुमी आम आफ प्रोंइशा, आ मीश नु गारशा बाक्ब। मिनु मेको निक्शी रां का दुम्नीस’ दे ब्रेक्शो बाक्ब। उत्पत्ती २:२४ 6 मोपतीके वोंइश मीश निक्शी मनसी। निम्फा का नस, दे ब्रेक्शो बाक्ब। परमप्रभु यावेमी कांडचीक सेल्शो मुरुमी मफ्रादमेक्ल” दे माइक्तीमी। १कोरिन्थी ७:१०-११; उत्पत्ती २:२४ 7 मिनु फरिसीपुकीमी “मो हना मारदे मोसामी ‘छोड पत्र गेशा, मीश प्रोंइने चाम्सीब’ दे मुर आन कली शेंदा?” देंमानु, मती ५:३१ 8 येसुमी “मुरपुकीमी शिशी मपाइनीम, दे तुइश्शा, परमप्रभु यावेमी मोदेंशो पा इन मीश प्रोंइचा गेप्तु। तन्न डोंइती रे मोदेंशो मबाक्शो बाक्त। 9 सुमी आ मीश प्रोंइशा, अर्को चाक्बा, मेकोमी वोंइश मीश आस नाता फ्राब। मीश मुर आ वोंइश बाक्ना बाक्न अर्को वोंइश खोइक्तु हना चहिं, मोदेंशो मीश कली प्रोंइचा दुम्ब। सुमी छोड पत्र गेचा पुंडसीशो मीश मुर कली ग्युंवे पाइबा, मेकोमी यो वोंइश मीश आस नाता फ्राब, दे इन कली देंनुड” दे माइक्तीमी। मती ५:३२; लूका १६:१८

10 मिनु येसु आ शेंसीबपुकीमी आ लोव्र नेंशा “मोदेंशो बाक्त हना, ग्युंवे मपचा रिम्शो बाक्माक्त” देंतेक्म। 11 मिनु येसुमी “का निक्शी आन कली ला एको लोव्र रुप्तीक थुं गेशो बाक्ब। शुशेमी मरुप्नीम। १कोरिन्थी ७:७ 12 मुरपुकी मारदे ग्युंवे मपाइनीम देंशा हना, का निक्शी जरमेसे रे ग्युंवे पा, आल थिंचा मगारचा डा बाक्नीम। का निक्शी आन कली मुरुमी आल मथीब सेल्शो बाक्नीम। का निक्शी चहिं स्वर्ग डा राज्य आ पर्वम ग्युंवे मपथु बाक्नीम। मोपतीके सु सु आन कली रुप्तीक थुं गेशो बाक्मे, मेकोपुकीमी रुप्मेक्ल” दे शेंताक्मी।

आल आन कली आसीक गेशो

मर्कूस १०:१३-१६; लूका १९:१५-१७

13 मिनु मुरपुकीमी आल आन तारी आ गुइ चाक्शा प्रार्थना पवल, दे आल चाक्शामेनु, शेंसीबपुकीमी “आल मचाक्कीन” दे हुइक्ताकम। 14 मिनु येसुमी “आल आन कली आं बाक्तीके जाक्चा गेन। मारदे हना स्वर्ग डा राज्य मेको आन केन बाक्ब” देंत। मती १८:२-३ 15 मिनु आल आन तारी आ गुइ वोइश्शा प्रार्थना पाइक्तीमी। मिनु मेकेर रे गाक्त।

शोंप पाइश्शो आन पर्वम शेंशो

मर्कूस १०:१७-२७; लूका १८:१८-२७

16 मिनु मुर का जाक्शा, मेकोमी येसु कली “शेंब, गेना हना यो परमप्रभु यावे नु बाक्चा तचा कली रिम्शो पा मार पचा माल्नुडा?” देंमेनु, 17 येसुमी “रिम्शो पचा आ पर्वम मारदे हिल्लो पवी? रिम्शो पाइब का ला बाक्ब। गेना हना यो मेको नु ब्रोंइशा बाक्चा थुं पाप्तीवी हना, मेको रिम्शो पाइब आ देंशो लोव्र टिचा माल्नेवे” देंमेनु 18 “लोव्र शुश बाक्नीम। तेक तेको लोव्र टिचा माल्नुडा?” देंत। मिनु येसुमी “मसाइक्चा, मीश वोंइश आस नाता मफ्राचा, खुइ मपचा, जोल मपथु सांकछी बाक्चा। 19 आम आफ आस कली मान पा आस लोव्र टिचा। मिनु इ कली दाक्शो खोदेंशो पा इ नेक्था बाक्ब आन कली दाक्तो” देंत। प्रस्थान २०:१२-१६, लेवी १९:१८ 20 मिनु मेको ठिटामी “इन देंशो नेल्ल पना पन बाक्ती। में डा लाक्शा मार पचा माल्नुडा?” देंमेनु, 21 येसुमी “मेको डा लाक्शा पचा दाक्तावी हना, लशा इ शोंप नेल्ल लेयशा, जचा फेक्चा मताइब आन कली योक्शा गेमी। मिनु लेशशा, आं नोले खोइय्यी। मो पाप्तीवी हना, इ कली स्वर्गम शोंप वोइश्शो बाक्ब” देंत। मती ६:२०; लूका १२:३३ 22 मिनु मेको ठिटामी एको लोव्र नेंशा, आ कुल राव कीपाइश्शा गाक्त। मारदे हना शुश शोंप पाइश्शो मुर बाक्माक्त। भजन संग्रह ६२:११

23 मिनु येसुमी आ शेंसीब आन कली “नोफा दाइश्शा नेनीने, शुश शोंप पाइश्शो मुर स्वर्ग डा राज्य हेरा ओव्रचा मताइनीम। 24 मिनु शोंप पाइश्शो मुर परमप्रभु यावे आ राज्यमी ओव्रने चाप्चा क्येडा दलओंठ लूजे आ पोलामी ग्रीने चाप्ब, दे लेंशा इन कली देंनुड” देंत। 25 मिनु आ शेंसीबपुकीमी छक लाक्शा “मो हना सु ओव्रचा ताइनीमी डा?” देंतेकम। 26 मिनु येसुमी मेको आन कुल गे कोव्रशा “मुरपुकीमी पने मचाप्नीम। तन्न परमप्रभु यावेमी पने चाप्ब। मारदे हना परमप्रभु यावेमी मारेइ मारेइ पने चाप्ब” दे माइक्तीमी। अय्युब ४२:२

येसु कली खोइक्ब आन तशो

मर्कूस १०:२८-३१; लूका १८:२८-३०

27 मिनु पत्रुसमी “गोपुकीमी मारेइ मारेइ प्रोंइशा, इन नोले खोइक्तक। मिनु गो मार ताइनीकी” देंमेनु, मती ४:२०-२२ 28 येसुमी “नोफा दाइश्शा नेनीने, मार ताइनीनी देंशा हना, परमप्रभु यावेमी सेल्शो नक सरीड नु रागीमी दुम्शा, रागीम जरमेशो पिप दुम्मेनु, आं कली खोइक्बपुकी १२ ओटा ठेयब नित्तीकेम निश्शा, इं इस्राएल डा १२ थर आन कली निसाफ पाइब दुम्नीनी। लूका २२:३०; प्रकाश ३:२१; १कोरिन्थी ६:२ 29 सुमी आं नें आ पर्वम आ खिं, आ लोक्ब, दिदी बहिनी, आम आफ, तमी तौ, आ नु बाक्शो नेल्ल प्रोंइबा, मेकोमी आ प्रोंइशो क्येडा शुश ताइब। मिनु गेना हना यो परमप्रभु यावे नु बाक्चा ताइब। 30 डोंइती दुम्शोपुकी नोले दुम्नीम। नोले दुम्शोपुकी डोंइती दुम्नीम।

20

डोंइती नु नोले दुम्शो

1 स्वर्ग डा राज्य ओदेंशो बाक्ब, खिं का डा होव्रप सुनी कना बोक्शा, आ अडगुर रूमी गेय पाइब आन कली ब्रेत्थ लमाक्त। 2 काबु डा गाल्च देनार का गेनन्नी, दे गारपाइश्शा, अडगुर रूमी सोइक्तीमी बाक्त। 3 मिनु सुनी ९ बजे गे बजार लशा डा मिन, गेय मथिप्ब मुर आन कली तशा, 4 मेको आन कली ‘गे यो लशा, आं अडगुर रूमी गेय पने। इन गेय पशो डा गाल्च गारपा गेनन्नी’ दे सोइक्तीमी बाक्त। 5 मिनु मोपान १२ बजे नु ३ बजे यो अरु आन कली ब्रेश्शा, गेय पथ सोइक्तीमी बाक्त। 6 मिनु क्यारश चोक्ची सम्म यो गेय मथिप्ब आन कली तशा ‘गे सुनी रे मार गुइ फ्रेंशा बाक्नी’ दे हिल्लो पवा बाक्त। 7 मिनु मेकोपुकीमी ‘सुइमी गेय मगेमे। मिनु गो मार पाइनीकी?’ देंमानु ‘गे यो लशा, आं अडगुर रूमी गेय पने’ दे माइक्तीमी बाक्त।

8 मिनू नां रिक्शा गेय प्रोन्मे नोले, होत्रपमी आ क्येट योक्ब मुर कली 'गेय पाइब आन कली ब्रेशा, आन गाल्च योक्शा गेमी। नेल्ल क्येडा नोले जाक्शो आन कली डोंइती योक्शा गेमी' देंमाक्त। 9 मिनू क्यारश चोक्ची ना जाक्शो आन कली डोंइती ब्रेशा, काबु डा गाल्च देनार का का गेमी बाक्त। 10 मिनू सुनी कना रे गेय पाइबपुकीमी जाक्शा 'एको आन क्येडा शुश ताइनीकी' दे मिम्तमे बाक्त। तन्न नेल्लेमी देनार का का ला तामे बाक्त। 11 मिनू ताक्शा, मेको आन थुं मनुथु, होत्रप कली 12 'नेल्ल क्येडा नोले जाक्बपुकीमी इच्का ला गेय पाम्तेक्म। गोपुकी सुनी रे गेय पा नांम दुप्शा चोशा श्येत पा गेय पाइतक। तन्न आंइ कली उइक्थ उइक्थ गाल्च गेतीनी' दे गाइशशा देंमा बाक्त। 13 मिनू होत्रपमी मो देंब का कली 'आं वारच, इ कली मार मरिम्शो पडा? काबु डा गाल्च देनार का कली बिस्से ममाइ डा? 14 देनार का ताक्शा लावो। नोले जाक्ब कली यो इ कली गेशो खोदेशो पा गेचा दाक्ताक्ड। 15 आंम आं के बाक्शो आं दाक्शो पा योक्चा मताइनुडा डा? अरु आन कली शिशी पशो तशा, इ कुप्फीम मी ब्रवे?' दे मदा बाक्त। रोमी ९:१६, २१ 16 मोदेशो पान, नोले दुम्बपुकी डोंइती दुम्नीम, डोंइती दुम्बपुकी नोले दुम्नीम" दे शेंताक्मी।

येसुमी श्येत जचा माल्ब, दे शेंशो

मर्कूस १०:३२-३४; लूका १८:३१-३३

17 मिनू येसु यरूसलेम डा लां खोइशशा गाक्मेनु, आ शेंसीब १२ जना आन कली सुइ मबाक्तीकेम लाइशशा 18 "मुल यरूसलेम लाइनय। मिनू रागीम जरमेशो ठेयब चढेब नु सास्त्री आन गुइमी जिम्मा गेचा पुंइसीब। मिनू मेकोपुकीमी दोस गेशा, साइक्चा डा सजाइ गेनीम। यूहन्ना २:१३; मत्ती १६:२१; मत्ती १७:२२-२३ 19 शुक्शी पा युक्शा, शीम केप्शा कांटी थोक्शा, क्याइशशा साइक्थ अर्को जात डा मुर आन गुइमी गेनीम। बेक्शो आ नित्थ नाक्त बेक्शो रे सेंसीब" दे माइक्तीमी।

ठेयब दुम्चा कली गेय पचा माल्ब

मर्कूस १०:३६-४५

20 मिनू काबु जब्दी तौ आस ममामी आ तौ आस कली चाक्शा, येसु कली सेउ पाप्तु। मत्ती १०:२ 21 मिनू येसुमी "मार पुंइनेवे?" देंमेनु "हे शेंब, गे इन राज्यम आं तौ आस कली का इन ग्युरा, का इन पेरा गे बाक्चा गेचा कली मुल हुकुम दुम्ल" दे पुंइतु। मत्ती १९:२८ 22 मिनू येसुमी आ तौ आस गे हिरशा "इस पुंइशो मार बाक्मे, दे मरुप्नीसी। गोमी तूचशो कचौरा तूने चाप्नीसी?" देंमेनु "चाप्नस्कु" देंताक्स। मत्ती २६:३९ 23 मिनू येसुमी "थमा आं कचौराम तूनीसी। तन्न आं ग्युरा पेरा गे बाक्चा गेचा आं गुइमी ममाइ। आं आफोमी योत्रशो आन कली बाक्ब" दे माइक्तीम्सी। प्रेरित १२:२; प्रकाश १:९

24 मिनू शेंसीब १० जनामी मेको आस कली मो देशो नेंशा "एको निक्शी दोदेशो बाक्सा, है" दे आन थुं मनुम। लूका २२:२४-२७ 25 मिनू येसुमी नेल्ल आन कली खुप्शा "अर्को रागी कली हुकुम पाइबपुकीमी मुर आन कली दिप्शा वोइशशा, हुकुम पाइनीम, दे तुइक्नीनी। 26 गेपुकी इन दातेमी मोदेशो पचा मदुम्ब। इन दातेमी ठेयब दुम्चा माल्बम नेल्ल आन गेय पाइब दुम्चा माल्ब। मत्ती २३:११; १कोरिन्थी ९:१९ 27 इन दातेमी नेल्ल क्येडा डोंइती दुम्चा माल्बम नेल्ल आन वाइल दुम्चा माल्ब। मर्कूस ९:३५ 28 रागीम जरमेशो मान पपांइसीचा कली जाक्शो ममाइ। तन्न गेय पथ नु शुश मुर आन कली प्रोंइचा कली आ गिंम सोइक्थ जाक्शो बाक्ब" दे माइक्तीमी। फिलिप्पी २:७; १पत्रुस १:१८-१९

मिक्च मताइबम तशो

मर्कूस १०:४६-५२; लूका १८:३५-४३

29 मिनू काबु यरीको सहर रे गाक्मानु, शुश मुरुमी येसु आ नोले खोइक्तेक्म। 30 मिनू लांमी बाक्शा, मिक्च मताइब निक्शीमी येसु एको लां पित देशो नेंशा "हे प्रभु, दाऊद आ तौ, गो आंस कली शिशी पांइस्की" दे वाइ ब्रेत्ताक्स। 31 येसु नु काथा गाक्बपुकीमी "रेयके मपसे" दे हुइक्तेमेनु, डोंइती क्येडा वाइ ब्रेशा "प्रभु, दाऊद आ तौ, गो आंस कली शिशी पांइस्की" दे ब्रेत्ताक्स। 32 मिनू येसु खा दिक्शा, मेको आस कली ब्रेशा "इस कली मार पडा, मार पुंइसी?" देंमेनु 33 "प्रभु, आंस कली मिक्च ताइब सेलीने" दे पुंइताक्स। 34 मिनू येसुमी मेको आस कली शिशी पा आस मिक्च थिवानु, मिक्च ताइब दुम्शा, येसु आ नोले खोइक्ताक्स।

21

येसु मान पचा पुंडसीशो

मर्कुस ११:१-१०; लूका १९:२९-३८; यूहन्ना १२:१२-१९

1 मिनू यरूसलेम आ नेक्था जैतून डांडा डा बेथफागे माइशो गाउं जाक्दीत्तेकम। 2 मिनू येसुमी आ शेंसीब निक्शी आस कली “मेरे गाउं लसे। मेकेर जाक्दीशशा, गधा नु आ चाइक्ब पाइशशा वोइशो थित्नीसी। मेको निक्शी प्रोंइशा चाक्कीसे। 3 मुरपुकीमी “एको गधा मारदे लाइक्सी?” दैतेकम हना “प्रभु मेको कली माल्ताक्व” दैसीनु, लाइक्चा गेनीम” दे सोइक्ताक्सी। मती २६:१८ 4 मोदेशो दुम्चा माल्ब। मारदे हना साइ नेसी परमप्रभु यावे आ लोत्र पाइबमी 5 “सियोन डा तमी कली ओदें तुइक्पतीन। कोवडीन, इन पिप ब्रेम्शो दुम्शा, गधा गधैनी आ चाइक्ब डोइशशा, इन बाक्तीके गे पिन पिन बाक्ब” दे ब्रेक्शो बाक्ब। जकरिया ९:९ 6 मेको निक्शी लशा, येसु आ देशो खोदेशो पाम्से बाक्त। 7 मिनू गधा नु आ चाइक्ब चाक्शा, आन वासी गधा तारी ब्राम्तेकम। मिनू येसु डोंइसाक्व। 8 मिनू येसु आ नोले खोइक्बपुकीमी आन फेक्तीक वा लामी ब्राम्तेकम। खजूर रवा आ राशी जिक्शा, लामी ब्रशा दारशो सेल्लेकम। २राजा ९:१३ 9 मिनू आ डोंइती नोले गाक्बपुकीमी “दाऊद आ तौ कली होसन्ना, परमप्रभु यावे आ नेमी जाक्ब कली जाइ, गे ठेयब बाक्नीनी” दे रेयके पा ठेयब सेल्ला सेल्ला गाक्तेकम। भजन संग्रह ११८:२५-२६ 10 मिनू यरूसलेम सहर ओव्रमेनु, मेकेर बाक्बपुकीमी “मेको सु बाक्म, माइ” दे लोत्र पमुत्तेकम। 11 मिनू येसु नु काथा गाक्बपुकीमी “गालील रागी डा नासरथ रे जाक्शो परमप्रभु यावे आ लोत्र पाइब येसु एको बाक्ब” दैतेकम।

ग्याप्ब लेयब आन कली खेरशो

मर्कुस ११:१५-१९; लूका १९:४५-४८; यूहन्ना २:१३-१६

12 मिनू येसु परमप्रभु यावे आ खिं ओव्रत। मेकेर ग्याप्ब लेयब क्येट फाइक्ब आन कली खेरतीमी। क्येट फाइक्ब आन टेबल नु दुकुर लेयब आन नित्तीके खोल्ला गेम्तीमी। 13 मिनू “ ‘आं खिं आं कली मान पतीके बाक्ब’ दे ब्रेक्शो बाक्ब। गेपुकीमी चहिं खुइ आन बाक्तीके पुक्खी सेल्लतीनी” दे हुइक्ताक्मी। यसैया ५६:७, येरमीया ७:११

आलपुकीम येसु कली मान पशो

14 मिनू मिक्च मताइब नु खोरन्डेपुकी जाक्तेकम। मिनू येसुमी मेको आन कली सापाइक्तीमी। 15 मिनू ठेयब चढेब नु सास्त्रीपुकीमी येसुमी छक लाक्चा डा गेय पशो नु आलपुकीमी “दाऊद आ तौ कली होसन्ना” दे शुश रेयके पा येसु कली ठेयब सुइशशा मान पशो तशा, होसन्ना आ देशो “परमप्रभु वारच पने” बाक्ब। 16 येसु कली “मेकोपुकीमी मार देबाक्मा मनेनीनी?” दे गाइशशा दैतेकम। मिनू येसुमी “नेता। ‘आइक्च आल नु बुकलु आलपुकीमी इन कली ठेयब सेल्पाइसाक्नी’ दे ब्रेक्शो लोत्र मपढेनी?” दे माइक्तीमी। भजन संग्रह ८:२ 17 मिनू मेको आन कली प्रोंइशा, सहर रे गूशा, बेथानी जाक्दीशशा बास बाक्त।

सिश्शो फोव्रशी रवा

मर्कुस ११:१२-१४, २०-२४

18 आ दीसा सुनी यरूसलेम लेम्मेनु, शोव्रलु बेक्माक्त। 19 मिनू लां नेक्थामी फोव्रशी रवा का तशा, फोव्रशी सिश्शो बाक्म कों, दे कोव्रडानु, सफा ला ताप्तु। सफा ला तशा “मुल डा मेरे गेनायो मसिप्ब रवा दुमो” दे माइक्तु। मिनू रवा साव सोव्रत। लूका १३:६ 20 मिनू शेंसीबपुकीमी रवा सोव्रशो तशा “रवा दोपा साव सोव्रमे” दे छक लाक्तेकम। 21 मिनू येसुमी “नोफा दाइशशा नेनीने, दल्गीर मपथु थमा सुइक्तीनी हना, फोव्रशी रवा कली पशो खोदेशो पचा ला ममाइ, डांडा कली एकेर रे समुन्द्रमी याक्सो दैतीनी हना, मेको डांडा यो याक्सीशा लाइब। मती १७:२० 22 थमा सुइशशा प्रार्थना पा पुंडतीनी हना, इन पुंडशो ताइनीनी” दे माइक्तीमी।

येसु आ अधिकार ते रे जाक्बा?

मर्कुस ११:२७-३३; लूका २०:१-८

23 मिनू परमप्रभु यावे आ खिं ओव्रशा, मुर आन कली शेंना शेंन बाक्मेनु, ठेयब चढेब नु जोक्ब तुइक्ब खालपापुकी जाक्शा “तेको अधिकारमी मोदेशो पवी? एको अधिकार सुमी गेवे?” दैतेकम। यूहन्ना २:१८; प्रेरित ४:७ 24 मिनू येसुमी “गो इन कली लोत्र का हिल्लो पाइनुड। गेम आं लोत्र लेत्ताक्नी हना, तेको अधिकारमी एको गेय पडा, दे शेंनन्नी। 25 यूहन्नामी मुर आन कली ब्वाक्कुम खुम्शा गुंडतीके अधिकार स्वर्ग रे तवा, दे मुरपुकी रे तवा?” दे हिल्लो

पाम्तीमी। मिनु लोव्वसी पमुशा “स्वर्ग रे तवा बाक्त देंतय हना, मो हना यूहन्ना आ लोव्व मारदे थमा मसुइक्नी देंब। 26 मुरपुकी रे तवा बाक्त देंयानु, मुरपुकीमी इं लोव्व मनेथु मटीनीम। मारदे हना मुरपुकीमी यूहन्ना परमप्रभु यावे आ लोव्व पाइब बाक्त, दे थमा सुइश्शो बाक्नीम” देंमुक्तेकम। मती १४:५ 27 मोपतीके “मतुइक्नीकी” देंतेकम। मिनु येसुमी “मो हना तेको अधिकारमी एको गेय पडा, गो यो मशेंनन्नी।

येसु कली ग्येरपाइब

28 अर्को लोव्व का नेंशा मिम्तीने। मुर का के तौ निक्शी बाक्सा बाक्त। मिनु काबु आफोमी आ जेठा कली ‘आं तौ, मुलाक्ती अडगुर रूमी गेय पथ लावो’ देंमाक्त। 29 मिनु जेठामी ‘गो मलाइनुड’ देंमाक्त। नोले आ थुं लेशशा लमाक्त। 30 मिनु आफोमी कान्छा कली यो ‘आं तौ, मुलाक्ती अडगुर रूमी गेय पथ लावो’ देंमाक्त। मेकोमी ‘दुम्ब, गो लाइनुड’ देंमाक्त। तन्न मलमाक्त। मती ७:२१ 31 आस आफ आ दाक्शो सुमी पवा? जेठामी पवा, दे कान्छामी पवा?” दे माइक्मीनु “जेठामी पवा बाक्त” देंतेकम। मिनु येसुमी मेको आन कली “नोफा दाइश्शा नेनीने, इन क्येडा डोंइती तिरो पोक्ब नु तेल्लेम पाइबपुकी परमप्रभु यावे आ राज्य ओव्वचा ताइनीम। लूका १८:९-१४ 32 मारदे हना यूहन्नामी ठीक लां कोंइशा यो गेपुकीमी थमा सुइश्शा, इन थुं परमप्रभु यावे गे मलेत्तीनी। मेकोपुकीमी चहिं यूहन्ना कली थमा सुइश्शा, आन थुं परमप्रभु यावे गे लेत्ताकम” देंत। लूका ७:२९

मरिम्शो बुम्था पाइब

मर्कूस १२:१-२; लूका २०:९-१९

33 मिनु येसुमी “लो, अर्को कथा का नेनीने। मुर कामी अडगुर खुम्शा, थारपु हिरशा, अडगुर खाक्तीक नु वोइक्तीक सेल्शा, बुम्था पाइब माल्शा, मेको आन कली गेशा वोइश्शा, अर्को रागी लमाक्त। यसैया ५:१-२ 34 अडगुर मीशा सेक्ची जाक्मेनु, आ गेय पाइब आन कली आ भाग पोक्थ सोइक्तीमी बाक्त। 35 मिनु गेय पाइबपुकी जाक्दीम्मानु, बुम्था पाइबपुकीमी का कली तुप्मे बाक्त, का कली सदमे बाक्त, का कली फुल्लु आप्शा खेरमे बाक्त। 36 मिनु डोंइती सोइश्शो क्येडा शुश आन कली सोइक्तीमी बाक्त। मेको आन कली यो में मोदेशोन पामे बाक्त। 37 मिनु ‘आं तौ कली टीनीम को’ दे मिम्शा, आ तौ कली सोइक्ता बाक्त। 38 मिनु बुम्था पाइबपुकीमी आ तौ कली पिशो तशा ‘एको अडस ताइब बाक्ब। लो साइक्चा। मिनु रू, अडगुर नेल्ल इं केन दुम्ब’ देशा गारमा बाक्त। मती २६:३-५; यूहन्ना १:११ 39 मिनु फि ग्याइश्शा, रू रे गुंइशा, सदमे बाक्त। 40 मो पाइब आन कली रू होव्वप लेशशा जाक्शा, मार पाइबा?” देंमेनु 41 “मोदेशो मरिम्शो पाइब आन कली साइक्पाइक्ब। आ रू चहिं सुमी अडगुर मीमेनु, पोक्थ जाक्ब आन कली गेब, मेको आन कली गेब” देंतेकम। 42 मिनु येसुमी “ओदेशो ब्रेक्शो लोव्व मपढेनी? ‘खिं सेल्बपुकीमी गारो प्रोडमेनु, एको फुल्लु मगार, दे ताइक्तमे बाक्त। मेको मगारथु ताइश्शो फुल्लु चहिं सुर डा सुरे फुल्लु दुम्माक्त। परमप्रभु यावेमी मोदेशो पशो बाक्त। मिनु मेको इं दातेमी छक लाक्चा डा बाक्ब’ दे ब्रेक्शो बाक्ब।। भजन संग्रह ११८:२२-२३; प्रेरित ४:११; १पत्रुस २:४-८ 43 मोपतीके परमप्रभु यावे आ राज्य इन गुइ रे रोइक्चा पुंइसीनीनी। मिनु फल सिप्ब अर्को जात डा मुर आन कली गेब, दे माइक्तीमी। 44 सुमी एको फुल्लुम दाल पांइसीशा राम्सीबा, मेको फस दुम्ब। एको फुल्लुमी सु कली चिप्बा, मेको चिम्सीशा बेक्ब” देंत। 45 मिनु ठेयब चढेब नु फरिसीपुकीमी येसुमी देशो कथापुकी नेंशा “एहे, इं कली कका देशो बाक्माक्त” दे रुप्मे बाक्त। 46 मिनु ग्याइक्पाइक्चा माल्मे बाक्त। तन्न येसु कली “परमप्रभु यावे आ लोव्व पाइब बाक्ब” देंब आन कली तशा, हिंमा बाक्त।

22

पिप आ ग्युंबेम ब्रेश्शो

लूका १४:१६-२४

1 मिनु येसुमी लेंशा कथापुकी सेल्शा, मुर आन कली शेंना शेंन 2 “स्वर्ग डा राज्य ओदेशो बाक्ब, पिप कामी आ तौ आ ग्युंबे पा भोज पचवा बाक्त। यूहन्ना ३:२९ 3 मिनु आ गेय पाइब आन कली निम्तो ताइब आन कली ब्रेत्थ सोइक्तीमी बाक्त। तन्न निम्तो ताइबपुकी लचा थुं मपामे बाक्त। 4 मिनु लेंशा अरु गेय पाइब आन कली ‘नेनीने, गो जचा थोव्वकी सेल्शा ठीक पाता। लो, जथ जाक्कीन, दे मतीन’ दे ब्रेत्थ सोइक्तीमी बाक्त। 5 तन्न ब्रेत्चा पुंइसीब नेल्लेमी ग्युंबे जथ लचा थुं मपथु, का आ रूमी गेय पथ लमाक्त, का ग्याप्तीक लेयतीक गेय पथ लमाक्त। 6 लीशोपुकीमी ब्रेत्थ जाक्ब आन कली शुक्शी पा ग्याइश्शा तुप्शा सदमे बाक्त। मती २१:३५ 7 मिनु पिपमी मोदेशो

दुमशो तुइशशा चुरशा, आ सिपाही आन कली 'लने, मुर साइकब आन कली साइशशा, आन सहर गाउं क्रोइशशा गेने' दे सोइक्तीमी बाक्त। मती २४:२ ८ मिनू आ गेय पाइब आन कली 'आं तौ आ ग्युंभे भोज ठीक सेलता। ब्रेशोपुकी चहिं भोजम जाक्चा मशिरसीशो बाक्मा बाक्त। ९ मोपतीके मुल लां पित्थ लशा, सु सु आन कली थिन्नी, मेको आन कली चाक्कीने' दे सोइक्तीमी बाक्त। मती १३:४७ १० मिनू मेकोपुकीमी लां पित्थ लशा, रिम्शो मरिम्शो दोदेशो मुर थिदमे, मोदेशो नेल्ल आन कली खुप्शा चाक्गामे बाक्त। मिनू ग्युंभे खिं पौनापुकीमी ब्रीमाक्त। ११ मिनू पिपमी 'आं पौना दोपा बाक्मा, दोशो जाक्मा' दे कोव्रथ जाक्मेनु, ग्युंभे भोज डा वा मफेक्शो मुर का तवा बाक्त। प्रकाश १९:८ १२ मिनू 'ए वारच, ग्युंभे भोज डा वा मफेक्थु, दोपा एकेर ओव्रडे?' देंमेनु, सिक्सी पा मारेइ देंने मचबा बाक्त। १३ मिनू पिपमी आ गेय पाइब आन कली 'एको आ गुइ खोइल फ्रेंशा गुंडशा, छिडछिडमी ताइक्तीने। मेकेर मुरपुकी आन खुइ शेप्शा डाक्नीम' १४ ब्रेत्चा पुंडसीशो मुर शुश बाक्नीम, योव्रशो चहिं का निक्शी ला बाक्नीम" दे येसुमी शेंताक्मी।

तिरो थाप्चा देय मथाप्चा

मर्कूस १२:१३-१७; लूका २०:२०-२६

१५ मिनू फरिसीपुकीमी "एको कली दोपा आंम आ लोव्र खाइक्पपाइशशा दोस गेचा" दे लोव्रसी पमुमा बाक्त। १६ मिनू आन शेंसीब नु हेरोद आ वारच आन कली येसु आ बाक्तीके ओं माइक्थ सोइक्तीमी बाक्त "हे शेंब, गे थमा पाइब ननी। मुर आन कुल मकोव्रथु सुइ नु महिंथु, परमप्रभु यावे आ लोव्र थमा पा शेंनीनी, दे तुइक्नीक। यूहन्ना ३:२ १७ मिनू लोव्र का शेंदीकी, शेंब हजुर, मार लोव्र देंशा हना, सिजर सरकार कली तिरो थाप्चा माल्ब, दे मथाप्थु यो दुम्बा?" दे हिल्लो पखु पा, लोव्र खाइक्पपाइक्चा माल्तेक्म। १८ मिनू येसुमी मेको आन मरिम्शो मिम्शो तुइशशा "ए कपटीपुकी, मारदे आं थुं थाम्नीनी? १९ तिरो थाप्तीके क्येट का कोंइदीनी" देंमेनु, देनार का कोंइताक्म। २० मिनू "एको सु आ नेमी खोइशशा बाक्मे?" देंमेनु २१ "सिजर आ नेमी खोइशशा बाक्त, हजुर" देंतेक्म। मिनू येसुमी "लो मो हना, सिजर आ थोव्रक सिजर कली गेने। परमप्रभु यावे आ थोव्रक परमप्रभु यावे कली गेने" देंमेनु, रोमी १३:१,७ २२ मेकोपुकी छक लाक्शा, फ्रा फ्रु लेशशा गाक्तेक्म।

बेक्शो रे सेंसीचा आ पर्बम शेंशो

मर्कूस १२:१८-२७; लूका २०:२७-४०

२३ मिनू सदुकीपुकी जाक्तेक्म। सदुकीपुकीमी बेक्शो रे मसेंसीब, दे शेंनीम। मिनू येसु आ बाक्तीके जाक्शा प्रेरित ४:२; प्रेरित २१:६-८ २४ "हे शेंब, मोसामी ब्रेक्शो लोव्रमी 'मुर कामी आल मथिथु बेक्त हना, आ लोकबमी आ भोग्यु वोंइसीशा, आ दाग्यु आ पा डा सन्तान मजाम्मल, तमी तौ थिवल' दे ब्रेक्शो बाक्ब। ब्यवस्था २५:५-६ २५ खिं कामी ७ जना लोकब बाक्तेक्म। मिनू डोंइती जरमेशोमी ग्युंभे पाप्तु। २६ मिनू आल मथिथु बेक्त। मिनू माइलामी आ भोग्यु वोंइसाक्व। मिनू मेको यो आल मथिथु बेक्त। मिनू साइलामी आ भोग्यु वोइशशा, मेको यो आल मथिथु बेक्त। मोदेशो पा ६ जनामीन आन भोग्यु वोइशशा, आल मथिथु बेक्तेक्म। २७ मिनू नोले मेको मीश मुर यो बेक्त। २८ मुर बेक्शो रे सेंसीशा ब्रोंइमानु, मेको ७ जना वोंइश आन मीश दुमशो मीश मुर तेको आ मीश दुम्बा?" दे हिल्लो पाप्तेक्म। २९ मिनू येसुमी "गे दूली मिन्नीनी। मारदे हना परमप्रभु यावे आ लोव्र मरुप्नीनी, परमप्रभु यावे आ सक्ति यो मतुइक्नीनी। ३० बेक्शो रे सेंसीशा ब्रोंइमानु, मुरुमी ग्युंभे मपाइनीम। स्वर्गम बाक्ब परमप्रभु यावे आ गेय पाइब खोदेशो बाक्नीम। ३१ बेक्शो रे सेंशा ब्रोंइचा देंशो मार बाक्ब देंशा हना, ३२ परमप्रभु यावेमी 'गो अब्राहाम आ परमप्रभु यावे, इसहाक आ परमप्रभु यावे, याकूब आ परमप्रभु यावे नड' दे ब्रेक्शो बाक्ब। मेको लोव्र मपढेनी? परमप्रभु यावे बेक्शो मुर आन परमप्रभु यावे ममाइ। ब्रोंइशो आन परमप्रभु यावे बाक्ब" दे माइक्तीमी। प्रस्थान ३:६ ३३ मिनू मेकेर देल्शोपुकीमी येसु आ लोव्र नेंशा छक लाक्तेक्म।

नेल्ल क्येडा ठेयब अरेशो लोव्र

मर्कूस १२:२८-३१; लूका १०:२५-२८

३४ मिनू फरिसीपुकीमी "सदुकी आन कली लेन्ने मचाप्चा डा लोव्र पाइमी बाक्त" देंशो नेंशा, खुम्सीशा जाक्तेक्म। ३५ आन दाते डा आरेशो लोव्र जोक्ब तुइक्ब कामी येसु कली ३६ "हे शेंब, परमप्रभु यावे आ अरेशो लोव्र डा तेको नेल्ल क्येडा तुइक्चा माल्शो बाक्बा?" दे आ थुं थाम्चा कली हिल्लो पाप्तु। ३७ मिनू येसुमी "गेपुकी परमप्रभु यावे, इन परमप्रभु कली इन थुं नेल्लेमी, इन सोक्त नेल्लेमी नु इन बोल नेल्लेमी दाक्चा माल्नीनी" ब्यवस्था ६:५ ३८ मेको नेल्ल क्येडा ठेयब नु तुइक्चा माल्शो अरेशो लोव्र बाक्ब। ३९ मिनू आ नोले डा लोव्र 'आंम इ कली दाक्शो खोदेशो

पा, इ नेक्था बाक्ब कली यो दाक्तो' देशो बाक्ब। लेवी १९:१८ 40 एको अरेशो लोव्र निक्शीमी परमप्रभु यावे आ अरेशो लोव्र नु आ लोव्र पाइब आन लोव्र नेल्ल खाप्शो बाक्ब" दे येसुमी माइक्तीमी। रोमी १३:९-१०

ख्रीस्त सु आ तौ बाक्बा?

मर्कूस १२:३५-३७; लूका २०:४१-४४

41 काबु फरिसीपुकी खुम्समानु, येसुमी मेको आन कली 42 "ख्रीस्त आ पर्बम मार मिम्नीनी? मेको सु आ तौ सुइक्नीनी?" दे हिल्लो पाप्तु। मिनु "दाऊद आ तौ" देंतेक्म। यसैया ११:१; यूहन्ना ७:४२ 43 मिनु येसुमी "मो हना मारदे परमप्रभु यावे आ सोक्त रे पा दाऊदमी मेको कली प्रभु देंबा? 44 'परमप्रभु यावेमी आं प्रभु कली "इ जोरी सत्रु आन कली इ खोइल आगाम मवोदुमी सम्म आं ग्युरा गे बाक्को" देशा' ब्रेक्शो बाक्ब। भजन संग्रह ११०:१; मत्ती २६:६४ 45 दाऊदमी मेको कली 'प्रभु' देंब। मिनु दोपा आ तौ दुम्मे?" दे माइक्तीमी। 46 मिनु सुइमी लोव्र का यो लेन्ने मचबेम। में डा मेरे हिंशा, लोव्र हिल्लो पचा यो प्रॉइतेक्म।

23

कपटी आन कली हुइश्शो

मर्कूस १२:३८-४०; लूका २०:४५-४७; लूका ११:३९-५२

1 मिनु येसुमी मेकेर देल्शो शुश मुर नु आ शेंसीब आन कली शेंना शेंन 2 "सास्त्री नु फरिसीपुकी इं किकी पिपी मोसा आ पा डा दुम्शो बाक्नीम। 3 मेको आन शेंशो टिने, तन्न आन पशो खोदेशो मपने। मारदे हना मेकोपुकीमी देंनीम, तन्न मपाइनीम। मलाकी २:७-८; रोमी २:२१-२३ 4 हेल्शो भारी सेल्शा, मुर आन कली कुरपाइक्नीम। मेकोपुकीम चहिं ब्रेप्चो कामी यो नेप्शा मगेनीम। मत्ती ११:२८-३०; प्रेरित १५:१०,२८ 5 मार मार पामेनु, मुर आन डोंइती ला पाइनीम। ठेयब टालोमी परमप्रभु यावेमी अरेशो लोव्र ब्रेक्शा आन फेक्शो वामी केप्नीमी। मिनु आन वामी लाइश्शो झुम्का क्युक्सीनीम। मत्ती ६:१; गन्ती १५:३८-३९ 6 भोजमी नु गुम्तीक खिंमी मान पचा पुंइसीतीकेमी नित्चा दाक्नीम। लूका १४:७ 7 लां बजारमी गाक्मानु, मान पा सेउ पा 'शेंब, हजुर' देंपांइसीचा दाक्नीम। 8 गे इन कली सुइमी शेंब हजुर मदेंमल। मारदे हना इन कली शेंब का ला बाक्ब। गे नेल्ल वोबु ननी। 9 एको रागीमी सुइ आन कली आफ मदेनीने। मारदे हना इन आफ का ला स्वर्गम बाक्ब। 10 गे इन कली सुइमी होव्रप मदेंमल। मारदे हना इन होव्रप का ला ख्रीस्त बाक्ब। 11 इन दातेमी नेल्ल क्येडा ठेयब सु बाक्मे, मेको इन गेय पाइब दुम्ब। मत्ती २०:२६-२७ 12 ठेयब सुंइसीब हिक्चा मपुंइसीब। महिक्सीशो चहिं मान पाइक्चा पुंइसीब। अय्युब २२:२९; हितोपदेस २९:२३; इजीकीएल २१:३१; लूका १८:१४; १पत्रुस ५:५

13 सास्त्री नु फरिसीपुकी, गे कपटी, इन कली तशा थुं खाइक्ती। मारदे हना स्वर्ग डा राज्य ओव्रतीक लां तेक्नीनी। गे मओव्रनीनी, मिनु अरु आन कली यो ओव्रचा मगेनीनी। 14 सास्त्री नु फरिसीपुकी, गे कपटी, इन कली तशा थुं खाइक्ती। मारदे हना दुइश्शो प्रार्थना पा कोंइखु पा वोंइश बेक्शो मीश मुर आन शोंप नेल्ल नेक्शा गेनीनी। मोपतीके अरु आन क्येडा शुश सजाइ ताइनीनी। 15 सास्त्री नु फरिसीपुकी, गे कपटी, इन कली तशा थुं खाइक्ती। मारदे हना इन खोदेशो पा यहूदी धर्म पाइब का सेल्चा कली रागी नेल्ल हिरशा गाक्नीनी। मिनु इन लोव्र टीब सेल्शा, इन क्येडा शुश सजाइ तपाइश्शा, नरक सोइक्नीनी।

16 मिक्च मताइब दुम्शा यो लां कोंइखु पाइब, इन कली तशा थुं खाइक्ती। मारदे हना परमप्रभु यावे आ खिं थिशा कसम जशोमी मारेइ लोव्र मथोक्सीब, खिं डा सुन थिशा चहिं लोव्र थोक्सीब, दे शेंनीनी। मत्ती ५:३४-३७; मत्ती १५:१४ 17 मिक्च मपाइश्शो मूर्खपुकी, सुन ठेयब मिम्सीबा, दे सुनमी ग्योम्सीशो खिं ठेयब मिम्सीबा? 18 चढेतीके थिशा, कसम जशोमी लोव्र मथोक्सीब, चढेशो थोव्रकी थिशा कसम जशोमी चहिं लोव्र थोक्सीब, दे यो शेंनीनी। 19 मिक्च मपाइश्शोपुकी, चढेशो ठेयब मिम्सीबा, दे चढेतीके ठेयब मिम्सीबा? 20 चढेतीके थिशा कसम जाइबमी चढेतीके नु चढेशो थोव्रकी थिशा कसम जशो बाक्ब। 21 परमप्रभु यावे आ खिं थिशा कसम जाइबमी परमप्रभु यावे आ खिं नु मेकेर बाक्ब परमप्रभु यावे कली थिशा कसम जशो बाक्ब। 22 स्वर्ग कोव्रशा कसम जाइबमी परमप्रभु यावे आ नित्तीके नु मेकेर निप्ब कली कोव्रशा, कसम जशो बाक्ब, दे रुपीने।

23 सास्त्री नु फरिसीपुकी, गे कपटी, इन कली तशा थुं खाइक्ती। मारदे हना मसला खोरसानी डा १० भागमी भाग का परमप्रभु यावे कली चढेनीनी। तन्न परमप्रभु यावे आ अरेशो तुइक्चा माल्शो ठीक निसाफ पतीके, मुर आन कली

शिशु पतीके नु परमप्रभु यावे कली थमा सुइक्तीके लोव्र ममिम्नीनी। एको गेय पचा माल्शो ननी, मिनु इन पशो यो मप्रोंइचा माल्शो ननी। लेवी २७:३०; लूका १८:१२; मीका ६:८ 24 मिक्च मताइब दुम्शा यो लां कोइखु पाइबपुकी, तूचा ब्वाक्कुमी रकमिक्च ओव्रशो बाक्त हना, तिल्शा तूनीनी। दलओंठ खोदेशो ठेयब जन्तु ओव्रशो बाक्त हना, गु दाक्नीनी। 25 सास्त्री नु फरिसीपुकी, गे कपटी, इन कली तशा थुं खाइक्ती। मारदे हना बोस आ तार ला खुइश्शो खोदेशो पा गेपुकी लाडगा रे रिम्शो तांइसीनीनी। तन्न इन आगामी खुइ नु ग्रांग्रा दिचा डा गेय पतीकेमी ब्रीशो बाक्नीनी। मर्कूस ७:४,८ 26 ए मिक्च मपाइश्शो फरिसीपुकी, डोंइती बोस आगा खुइक्तीने। मिनु आ तारी यो रिम्शो तांइसेक्ल। यूहन्ना ९:४०; तीतस १:१५

27 सास्त्री नु फरिसीपुकी, गे कपटी, इन कली तशा थुं खाइक्ती। मारदे हना बुलु बुइश्शा दारपाइश्शो तुरस खोदेशो ननी। मेको आ तारी दारशो तांइसीब, तन्न आगाम रुश राक्शा, रिना पाइश्शा ग्रांग्रा दिचा डा बाक्ब। 28 मोदेशो पा गेपुकी यो मुर आन डोंइती धर्मी तांइसीनीनी, तन्न इन थुं कपट नु पापम ब्रीशो बाक्नीनी।

29 सास्त्री नु फरिसीपुकी, गे कपटी, इन कली तशा थुं खाइक्ती। मारदे हना बेक्शा लशो परमप्रभु यावे आ लोव्र पाइब नु ठीक पाइब आन तुरस दारशो सेल्नीनी। 30 मिनु ‘इं किकी पिपी आन पालामी गो यो बाक्शो नक हना, मेको आन परमप्रभु यावे आन कली साइक्पाइक्चा मगेक वा’ देंनीनी। 31 मो देशोमी ‘साइ नेसी परमप्रभु यावे आ लोव्र पाइब आन कली साइक्ब आन चच युइ गो नकी’ दे तुइक्पांइसीनीनी। येरमीया २६:२०-२३; मती ५:१२; प्रेरित ७:५२ 32 इन किकी पिपीम पचा मजाक्दीश्शो पाप गेपुकीमी खपीने। 33 गे बीख पाइश्शो बुस्स आ खलकपुकी, नरक लतीके सजाइ रे दोपा ब्रोंइनीनी डा? 34 मोपतीके गो इन बाक्तीके परमप्रभु यावे आ लोव्र पाइब, जोक्ब तुइक्ब मुर नु परमप्रभु यावे आ लोव्र शेंब सोइक्नुडमी। का निक्शी आन कली साइक्नीनी, का निक्शी आन कली शीमी क्याइश्शा साइक्नीनी, का निक्शी आन कली गुम्तीक खिंमी लाइश्शा, कोरामी युक्नीनी, मिनु तेइ बाक्चा मगेथु, खेदा पा खेरनीनी। 35 मेको मोपा खेदा पा साइश्शो पाप नेल्ल इन कली राइब। साइ नेसी रिम्शो पाइब हाबील साइश्शो रे बेरेक्याह आ तौ जकरिया साइश्शो सम्म डा आन हुशेमी लां मताइनीनी। जकरिया कली परमप्रभु यावे आ खिंमी चढेतीके आ डोंइती साइश्शो बाक्मा बाक्त। उत्पती ४:८; २इतिहास २४:२०-२१ 36 नोफा दाइश्शा नेनीने, मेको पाप एको पाला डा मुर आन कली राइब। लूका १३:३४-३५ 37 ए यरूसलेम, यरूसलेम, परमप्रभु यावे आ लोव्र पाइब आन कली साइक्तीवी। इ कली शेंथ सोइश्शो आन कली फुल्लु क्रोम्ताक्वी। पोथीमी आ चितोली आन कली आ फ्रा आगामी पुष्शो खोदेशो पा, गो शुश खेयप इ आल आन कली पुष्चा माल्ता, गे चहिं मबिस्से। 38 मिनु मार दुम्ब देशा हना, इ खिं ब्रेशा, मारेइ मलीब। येरमीया २२:५; भजन संग्रह ६९:२६; १राजा ९:७-८ 39 गो माइक्नन ‘परमप्रभु यावे आ नेमी जाक्ब कली आसीक रल’ दे मान मपवी सम्म आं कली लेंशा मताइनेवे” देंत। मती २१:९; मती २६:६४

24

परमप्रभु आ खिं मलीब

मर्कूस १३:१-२; लूका २१:७-१९

1 मिनु येसु परमप्रभु यावे आ खिं रे गूशा लमेनु, आ शेंसीबपुकीमी “एको खिं दोमो कोल्पा गिश दारपाइश्शा सेल्शो बाक्माक्त” देंतेक्म। 2 मिनु येसुमी “मुल ओमो ठेयब नु दारपा सेल्शो ताइतीनी। नोफा दाइश्शा नेनीने, नोले ब्रेशा, फुल्लु का यो खोप्शा मलीब” देंत। लूका १९:४४

श्येत दुम्चशो बाक्ब

3 मिनु जैतून डांडामी जाक्दीश्शा बाक्मेनु, आ शेंसीबपुकी यो जाक्शा “एको इन देशो लोव्र गेना दुम्बा? इन जाक्ची ना डा चिन्ड मार तांइसीनीमी? मिनु रागी नुप्चवा बाक्त, दे दोपा तुंइसीबा?” दे हिल्लो पाम्तेक्म। प्रेरित १:६-८ 4 मिनु येसुमी “सुइमी इन थुं मक्यामेक्ल, दे होस पा बाक्कीन। 5 मारदे हना शुश मुरपुकीमी आं नें ब्रशा ‘गो ख्रीस्त नड’ देशा, मुर आन थुं क्यानीम। यूहन्ना ५:४३; १यूहन्ना २:१८ 6 लडाइ दुम्शो लडाइ डा लोव्र शुश नेनीनी। मेको लोव्र नेंशा महिनीन। मोदेशो दुम्चा माल्ब, रागी नुप्चा चहिं इक्ची मजा। 7 मारदे हना डोंइती जात जात नु राज्य राज्यमी लडाइ पाइनीम। रागी रागीमी अन्काल दुम्ब, एर ओंथ खिनु कुइब। 8 मो दुम्मेनु, श्येत दुम्चा गोवा बाक्त, दे तुंइसीब।

आं मुर आइक्च सेल्चा पुंइसीनीम

9 इन कली खेदा पा शुश श्येत गेनीम, साइक्नीम। नेल्ल जात डा मुरपुकीमी आं पबर्म इन कली मदाक्थु आइक्च सेल्नीम। मती १०:२१-२२; यूहन्ना १६:२ 10 मिनु शुशेमी थमा सुइक्चा प्रॉइनीम। खेदा पाइब आन कली वारच पाइनीम। वारच आन दातेमी काइ मदाक्मुइनीम। 11 परमप्रभु यावे आ लोव्र दूली शेंबपुकी शुश बोक्शा, दूली पा शेंशा, शुश मुर आन थुं क्यशा गेनीम। मिनु परमप्रभु यावे आ राज्य डा लां प्रॉइपाइक्नीम। २पत्रुस २:१; १यूहन्ना ४:१ 12 पाप पचा शुश बारतीके शुशेमी वारच पमुचा, दाक्मुचा प्रॉइनीम। २तिमोथी ३:१-५ 13 सु सु चहिं नेल्ल क्येडा नोले सम्म थमा सुइक्चा मप्रॉइथु बाक्नीमी, मेकोपुकी श्येत जचा रे ब्रॉइशा, गेना हना यो परमप्रभु यावे नु बाक्चा ताइनीम। मती १०:२२; प्रकाश १३:१० 14 परमप्रभु यावे आ राज्य आ पबर्म चहिं नेल्ल रागी डा मुर आन कली तुइक्पाइसीब। मारदे हना नेल्लेमी तुइक्चा माल्नीम। मिनु नोले रागी नुप्ची जाक्ब।

श्येत शुश नाक्त मलीब

मर्कूस १३:१४-२३; लूका २१:२०-२४

15 परमप्रभु यावे आ खिं ग्रांग्रा सेल्नीम, दे परमप्रभु यावे आ लोव्र पाइब दानीएलमी ब्रेक्शो लोव्र थमा दुम्लो तनीनु 'पढेबपुकीमी रुप्मेक्ल' दानीएल ९:२७, दानीएल ११:३१ 16 यहूदीया रागीमी बाक्बपुकी डांडा ग्येत्थ प्रोक्मल। 17 बारदलीम बाक्बमी 'खिं ओव्रशा, मारेइ लाइक्चा ताइनुड' दे ममिम्तमेक्ल, तन्न दिव दाव प्रेक्शा प्रोक्मल। लूका १७:३१ 18 रूमी गेय पाइबपुकीमी 'फेक्तीक का लाइक्नीकी' दे खिं लेशशा मलमल, तन्न आन गेय थु था प्रॉइशा प्रोक्मल। लूका २३:२९ 19 आल कुरशो नु दूध तूब आल पाइशशो मीश मुर अरु क्येडा शुश श्येत जाइनीम। 20 नाइक्तीक नाक्त नु हिउंदमी मोदेशो श्येत मदुम्ल, दे परमप्रभु यावे कली पुनीने। 21 परमप्रभु यावेमी रागी सेला रे मुल सम्म सुइमी मतुइशशो श्येत जाइनीम। मोदेशो श्येत जचा लेंशा गेनायो मदुम्ब। दानीएल १२:१ 22 मोदेशो श्येत जतीक नाक्त शुश नाक्त दुम्त हना, सुइ मब्रॉइनीम वा। तन्न आ योव्रशो आन पबर्म परमप्रभु यावेमी मेको श्येत शुश नाक्त लीचा मगेब।

'ख्रीस्त जाक्त' देंब बोक्नीम

23 मिनु मुरपुकीमी 'ख्रीस्त एकेर जाक्त, मेरेक बाक्ब, कोव्रथ गाक्कीन' देंतेक्म हना, थमा मसुतीने। 24 मारदे हना शुशेमी 'गो ख्रीस्त नड' दे जोल पा गाक्नीम। 'परमप्रभु यावे आ लोव्र पाइब नकी' दे जोल पाइबपुकीमी चिन्ड नु छक लाक्चा डा गेय कोंइनीम। मो पशोमी परमप्रभु यावे आ योव्रशो आन कली यो लां प्रॉइपाइक्चा माल्नीम। ब्यवस्था १३:२-४; २थिस्सलोनिकी २:८-९; प्रकाश १३:१३ 25 मेको नेल्ल दुम्लो डांइतीन गो इन कली नेल्ल शेंशा तुइक्पाइक्तन्नी। 26 मेकोपुकीमी 'सुइ मबाक्तीके गोरशो रागीमी ख्रीस्त बाक्ब' देंतेक्म हना, थमा सुइशशा कोव्रथ मलने। 'खिं आगा डा कोठामी ख्रीस्त बाक्ब' देंतेक्म हना, थमा मसुतीन। लूका १७:२३-२४ 27 नां दाप्तीकेमी चिला पवानु, छेडछेड पा नां पेरतीकेमी सम्म तांइसीशो खोदेशो पा, रागीम जरमेशो आ जाक्ची ना दुम्ब। 28 सिनु बाक्तीकेमी गिद्ध आंमा बेरशा जाक्नीम। लूका १७:३७; प्रकाश १९:१७-१८

येसु लेंशा यीब

मर्कूस १३:२४-२७; लूका २१:२५-२८

29 रागीम मोदेशो श्येत दुम्ने नुम चोटी, सरीडमी चिन्ड तांइसीनीम। नां आ छेडछेड जाम्शा, जिक रिक्शो तांइसीब। तास्ला आ हाम्सो यो जाम्ब, सोरुल खपीम दोक्नीम। सरीड डा सक्ति हिम्सीनीम। यसैया १३:१०; प्रेरित ६:१२-१३; २पत्रुस ३:१० 30 मिनु सरीडमी रागीम जरमेशो आ चिन्ड तांइसीब। मिनु नेल्ल जात डा मुरपुकी डाक्नीम। रागीम जरमेशो कली गोस्स तारी बाक्शा, सक्ति नु ठेयब छेडछेडमी यिशो ताइनीम। प्रकाश १:७; मती २६:६४; दानीएल ७:१३-१४; प्रकाश १९:११-१३ 31 मिनु रागीम जरमेशोमी परमप्रभु यावे आ स्वर्ग डा गेय पाइब आन कली तुराही ताप्पा, रागी तेइ तेइ रे परमप्रभु यावे आ योव्रशो नेल्ल आन कली खुप्शा चाक्थ सोइक्ब। 32 फोव्रशी रवा कोव्रशा शेंसीने। फोव्रशी रवा आ कोच्वा दाप्शा कुशो तनीनु, बर्खा ओव्रमाक्त, दे तुइक्नीनी। 33 आं देंशो लोव्र थमा दुम्लो तनीनु, आ जाक्ची जाक्माक्त, दे तुइक्नीनी। 34 नोफा दाइशशा नेनीने, एको जात मनुप्थु, आं देंशो थमा दुम्ब। 35 सरीड नु रागी नेल्ल जाम्शा लाइनीम, आं लोव्र चहिं गेना हना यो लीब। मती ५:१८; यसैया ५१:६

सासीशा बाक्चा माल्ब

36 मोदेशो गेना दुम्बा, सुइमी मतुइक्नीम। परमप्रभु यावे आ स्वर्ग डा गेय पाइबपुकीमी यो मतुइक्नीम। तौमी यो मतुइक्ब। आफोमी ला तुइक्ब। प्रेरित १:७ 37 रागीम जरमेशो जाक्मेनु, मुरपुकीमी नोआह आ पालामी पशो खोदेशो पाइनीम। लूका १७:२६-२७; उत्पत्ती ६:९-७, २३ 38 नोआह आ ठेयब डोंगा मओव्रम सम्म मुरपुकीमी जना जन, तूना तून, ग्युंवे पना पन नु ग्युंवे पांडसीन सीन बाक्शो बाक्मा बाक्त। 39 नेल्ल आन कली ब्वाक्कुमी मयोल्दा सम्म मारेइ मतुइश्शो बाक्मा बाक्त। रागीमी जरमेशो आ जाक्ची नाक्त यो मोदेशो दुम्ब। 40 वोंइश मुर निक्शी रूमी बाक्नीसी, का लाइक्चा पुंडसीब, का प्रोंइशा वोइक्चा पुंडसीब। 41 मीश मुर निक्शी यात हिल्ला हिल्ल बाक्नीसी, का लाइक्चा पुंडसीब, का प्रोंइशा वोइक्चा पुंडसीब। लूका १७:३५ 42 इन प्रभु गेना जाक्बा, दे मतुइक्नीमी। मोपतीके गेना हना यो सासीशा बाक्कीन। मती २५:१३ 43 खिं डा मुरुमी 'आपो नाक्दो खुइपुकी खुइ पथ जाक्नीम' दे तुइक्ताक्व हना, मेको नाक्दो मइप्थु बाक्शा, खुइ पचा मगेन वा। १थिस्सलोनिकी ५:२ 44 गेना हना यो सासीशा बाक्कीन। मारदे हना रागीम जरमेशो इन मतुइक्थु जाक्ब।

होव्रप लेशशा जाक्ब
लूका १२:४१-४६

45 होव्रपमी आ खिं कोव्रब कली जची जाक्मेनु, जचा गेचा, दे अरेशा वोइक्चा पुंडसीशो खोदेशो रिम्शो थुं पाइश्शो गेय पाइब सु बाक्बा? 46 आ होव्रप लेशशा जाक्शा, आ गेय पाइबमी आ देशो टिशा पशो तशा 'रिम्शो' पाप्तीवी देंब। 47 नोफा दाइश्शा नेनीने, होव्रपमी आइक्के बाक्शो नेल्ल मेको आ गुइमी जिम्मा गेब। मती २५:२१-२३ 48 मरिम्शो थुं पाइश्शो गेय पाइबमी चहिं आ होव्रप लम नोले 'इक्ची ना मजाक्ब' दे मिम्शा, २पत्रुस ३:४ 49 अरु गेय पाइब आन कली जिचा पोक्शा, श्येत गेशा तुप्शा, शांबु राकसी दुक्ब नु काथा बाक्शा पाइब। 50 आ ममिम्शो मतुइश्शो नाक्त खिं डा होव्रप लेशशा जाक्ब। 51 मिनु मेको कली तुप्शा, फस सेल्शा कपटीपुकी नु काथा वोइक्ब। मेकेर मुरपुकी आन खुइ शेप्शा डाक्नीम।

25

निप्स पाइश्शो मीश आल

1 स्वर्ग डा राज्य ओदेशो दुम्ब, १० जना मीश आलमी तेल बत्ती कुरशा, ग्युम्ले गुमथ लाइनीम। लूका १२:३५-३६; प्रकाश १९:७ 2 ५ जना निप्स पाइश्शो बाक्नीम। ५ जना चहिं निप्स मपाइश्शो बाक्नीम। 3 निप्स मपाइश्शोपुकीमी बत्ती कुरशा तेल मकुरनीम। 4 निप्स पाइश्शोपुकीमी चहिं तेल यो कुरनीम। 5 मिनु ग्युम्ले जाक्ची जाक्शा यो मजाक्मेनु, नेल्ल मुकु जिशा इप्नीम।

6 मिनु १२ बजे नाक्दो 'ग्युम्ले जाक्त, गुमथ लन' देशा ब्रेशशो नेनीम। 7 मिनु छुल छाल बोक्शा, आन बत्ती का का पा जेत्नीम। 8 मिनु निप्स मपाइश्शोपुकीमी निप्स पाइश्शो आन कली 'आंइ बत्ती काप्चा चिक्ताक्म, इक्ची खोइ तेल आंइ कली यो गेचा नकी' दे पुंडनीम। 9 तन्न निप्स पाइश्शोपुकीमी 'गो आंइ कुरशो तेलमी गो नेल्ल इं बत्ती आन कली मजाक्दीप्ब। पसल लशा ग्याप्शा, चाक्शा दाडीन' देनीम। 10 मिनु मेकोपुकी तेल ग्याप्थ लमानु, ग्युम्ले जाक्ब। मिनु लचा कली सासीशा बाक्ब आन कली ग्युंवे भोज खिंमी ओंइशा, लाप्चो चोक्नीम। लूका १३:२५

11 मिनु नोले तेल ग्याप्थ लाइबपुकी यो जाक्शा 'प्रभु, लाप्चो रोक्शा गेचा नकी' देनीम। 12 मिनु प्रभुमी 'नोफा दाइश्शा नेनीने, गो इन कली मतुइक्नन्नी। सु ननी?' देंब। मती ७:२३ 13 मेको खोदेशो पा इन प्रभु गेना जाक्ब, दे मतुइक्नीमी। मोपतीके गेना हना यो सासीशा बाक्कीन। मती २४:४२-४४

होव्रप लेशशा हिसाब पाइब
लूका १९:१२-२७

14 ओदेशो यो दुम्ब, मुर कामी 'रागी हिरथ लाइनुड' दे थुं पशा, लचा डोंइती आ गेय पाइब आन कली ब्रेशशा, आ शोंप आन गुइमी गेब। 15 आन पने चाप्चा डा गेय तुइश्शा, का कली ५ टलेन्ट, का कली टलेन्ट निक्शी, का कली टलेन्ट का योक्शा गेशा वोइश्शा लाइब। रोमी १२:६

16 होव्रप गाक्म चोटी ५ टलेन्ट ताक्बमी ग्याप्तीक लेयतीक पचा गोइब। मिनु मोपा का डा निक्शी सेल्ब। 17 टलेन्ट निक्शी ताक्बमी यो में मोपा का डा निक्शी सेल्ब। 18 टलेन्ट का ताक्बमी चहिं आ होव्रप आ शोंप लाइश्शा थिम्शा खुइश्शा वोइक्ब। टलेन्ट का नेल्ल क्येडा ठेयब क्येट बाक्ब।

19 मिनु शुश बर्स नोले होत्रप लेशशा जाक्ब। मिनु आ गेय पाइब आन कली ब्रेशशा 'दोशो दोशो सेल्नी, कोंइदीनी' दे का का पा हिल्लो पाइब। 20 मिनु ५ टलेन्त ताक्बमी आ डोंइती जाक्शा 'हजुर, ५ टलेन्त गेतीनी। मिनु मार मार पा गो अर्को ५ टलेन्ट सेल्ता। मुल १० दुम्त' देंमेनु, 21 आ होत्रपमी 'रिम्शो पाप्तीवी। थमा सुइक्चा पुंडसीशो बाक्ते। इच्ची खोइ तशोमी शुश सेल्शा, रिम्शो गेय पाप्तीवी। मोपतीके शुश अधिकार गेनन। ग्येरसीशा बाक्स' देंब। मती २४:४५-४७ 22 मिनु टलेन्ट निक्शी ताक्बमी जाक्शा 'हजुर, टलेन्ट निक्शी गेतीनी। मिनु मार मार पशा, अर्को टलेन्ट निक्शी सेल्ता। मुल ४ दुम्त' देंमेनु, 23 मेको कली यो 'रिम्शो पाप्तीवी। इच्ची खोइ तशोमी शुश सेल्शा, रिम्शो गेय पाप्तीवी। थमा सुइक्चा पुंडसीशो बाक्ते। मोपतीके शुश अधिकार गेनन। ग्येरसीशा बाक्स' देंब।

24 मिनु टलेन्ट का ताक्ब जाक्शा 'हजुर, गे शिशी मपाइनीनी। मशोकशो रिक्नीनी, मक्राप्शो खुप्नीनी, दे तुइश्शो नड। 25 मोपतीके गो हिंती। मिनु इन टलेन्ट ताक्शा, मारेइ मपथु, थिम्शा खुइश्शा वोइक्ता। मुल फेशशा चाक्ता। लतीन' देंब। 26 मिनु आ होत्रपमी 'मरिम्शो थुं पाइश्शो अल्से, गोमी मशोकशो रिक्नुड, मक्राप्शो खुप्नुड, दे तुइश्शो नवे हना, एको आं गेशो टलेन्ट का लाइश्शा, अरु आन कली गेशा, आ चाइक्ब पपाइक्चा ममालनेवे डा? 27 मो पशो नवे हना, आं टलेन्ट क्येडा यो आ चाइक्ब ताक्चा तड वा। 28 एको टलेन्ट ताक्शा, ५ टलेन्टमी १० टलेन्ट सेल्ब कली तेम्शा गेचा' 29 मारदे हना शुश थीब आन कली तेम्शा, शुश बारपा गेचा पुंडसीनीम। इच्ची खोइ थीब आन इच्ची खोइ यो रोइक्चा पुंडसीनीम। मती १३:१२; हितोपदेस ११:२४-२५ 30 एको काम मलाप्शो अल्से कली ग्रुंइशा, लाडगा डा छिडछिडमी ताइक्तीने। मेकेर मुरपुकी आन खुइ शेषशा डाक्नीम।

नेल्ल निसाफ पचा पुंडसीनीम

31 रागीम जरमेशो परमप्रभु यावे आ स्वर्ग डा गेय पाइबपुकी नु आ छेडछेडमी जाक्शा, आ ठेयब नित्तीकेम निस्सीब। मती १६:२७; प्रकाश २०:११-१३ 32 मिनु आ डोंइती नेल्ल रागी डा मुर खुम्सीनीम। गोठलामी भेडा नु क्यारश आन कली ग्युरा नु पेरा गे तिल्शो खोदेशो पा रोमी १४:१०; मती १३:४९ 33 पिपमी भेडा आन कली ग्युरा गे क्यारश आन कली पेरा गे वोइक्ब। इजीकीएल ३४:१७

34 मिनु पिपमी आ ग्युरा गे राप्शो आन कली 'आं आफ आ आसीक तशोपुकी, आं नेक्थान जाक्कीने। रागी सेल्चा डोंइती एको राज्य इन कली सेल्शा वोइश्शो बाक्त। मुल बाक्कीने। 35 मारदे हना गेपुकीमी गो जचा मतथु बाक्डानु, जचा गेतीनी। तूतू दाक्डानु, तूचा गेतीनी। इन मतुइश्शो मुर इन खिं जाक्डानु, बाक्चा गेतीनी। यसैया ५८:७ 36 फेक्चा मतडानु, फेक्चा गेतीनी। रोइ पडानु, कोव्रतीनी। जेल्खानमी चोकशा वोइय्यीमीनु, गुम्थ जाक्तीनी' देंब। 37 मिनु मेकोपुकीमी 'प्रभु, इन कली गेना जचा मतनीनु, जचा गेका, तूचा मतनीनु तूचा गेका, 38 मतुइश्शो बाक्नीनु, बाक्चा गेका, फेक्चा मतनीनु, फेक्चा गेका, 39 गेना इन कली रोइ पशा नु जेल्खानमी चोकसीनीनु, गुम्थ जाक्का डा?' देंनीम। 40 मिनु पिपमी 'नोफा दाइश्शा नेनीने, आं लोकब नेल्ल क्येडा महिक्सीशो आन कली मार मार गेतीनी, मेको आं कली गेशो ननी' देंब। मती १०:४२; हितोपदेस १९:१७; हिब्रू २:११

41 मिनु आ पेरा गे राप्शो आन कली हिरशा 'सराप तशोपुकी, गो नु मबाक्कीने। सैतान नु आ गेय पाइब आन कली गेनायो मकाप्ब मी वोइश्शो बाक्ब। मेकेर लने। प्रकाश २०:१०,१५ 42 मारदे हना गो जचा मतडानु, जचा मगेयीनी। तूतू दाक्डानु, तूचा मगेयीनी। 43 इन मतुइश्शो मुर इन खिंमी जाक्डानु, बाक्चा मगेयीनी। फेक्चा मतडानु, फेक्चा मगेयीनी। रोइ पडानु, जेल्खानमी चोकशा वोइय्यीमीनु, गुम्थ मजाक्नी' देंब। 44 मिनु मेकोपुकीमी यो लोत्र लेशशा 'प्रभु, गेना इन कली जचा मतशो, तूचा मतशो, बास माल्शा गाक्शो, फेक्चा मतशो, रोइ पा बाक्शो, जेल्खानमी चोकशा वोइश्शो तका नु वारच मपका डा?' देंनीम। 45 मिनु पिपमी मेको आन कली 'नोफा दाइश्शा नेनीने, महिक्शो आइक्च मुर आन कली मार मार वारच मपनीनु, मेको आं कली यो मपनी' देंब।

46 मिनु मेकोपुकी गेना हना यो सजाइ ततीकेमी लाइनीम। परमप्रभु आ डोंइती ठीक दुम्शोपुकी चहिं गेना हना यो परमप्रभु यावे नु बाक्चा ततीकेमी लाइनीम" दे शेंताक्मी। यूहन्ना ५:२९; याकूब २:१३

26

येसु कली साइक्चा माल्शो

मर्कूस १४:- १६:-; लूका २२:- २४:-; यूहन्ना १८:- २१:-

1 मिनू येसुमी लोत्र नेल्ल शेंने थुम्शा, आ शेंसीब आन कली 2 “नित्थ नाक्त पास्सा चाड बाक्ब, दे तुइक्नीनी। मिनू रागीम जरमेशोमी शीमी केप्शा कांटी थोक्शा क्याइश्शा साइक्चा कली जिम्मा गेचा पुंडसीब” देंत। प्रस्थान १२:१-२०; मती २०:१८

3 मेना नेल्ल क्येडा ठेयब चढेब काइयाफास आ खिंमी ठेयब चढेब नु जोक्ब तुइक्ब खाल्पापुकी खुम्सीमा बाक्त। लूका ३:१-२ 4 मेकोपुकीमी “मुर आन मतुइक्थु येसु कली दोपा ग्याइश्शा साइक्पाइक्चा” दे सल्ला पामेनु 5 “पास्सा नाक्त साइक्पाइक्चा मदुम्ब। मारदे हना मुरपुकीमी जिचा पोक्नीम” देंमुमा बाक्त।

येसु कली ब्रोव्रशो तेल खेक्शो

लूका ७:३६-५०; यूहन्ना १२:१-८

6 काबु येसु नु आ शेंसीबपुकी बेथानी डा कोर पशो सिमोन आ खिंमी खमे जना जन बाक्मानु, 7 मीश मुर कामी ब्रोव्रशो रिना पाइब शुश क्येट लाइब तेल कुरशा जाक्शा, मेको तेल येसु आ पियामी लुक्ताक्व। 8 मिनू येसु कली तेल लुक्शो तशा, आ शेंसीबपुकीमी “ओदेशो तेल मारदे मो पवा? 9 लेयशा हना, शुश क्येट पी वा। मिनू श्येत जशो आन कली योक्शा, वारच पने जाम वा” दे आन थुं मनुमा बाक्त। 10 मिनू येसुमी मेको आन थुं मनुशो तुइश्शा “एको मीश मुर कली मारदे आ थुं खाइक्पाइक्नीनी? आं कली थम रिम्शो पाइक्ती। 11 श्येत जशो मुर गेना हना यो थित्नीनी, आं कली चहिं मथित्नीनी। ब्यवस्था १५:११ 12 एको तेल लुक्शोमी आं रां थिम्चा कली साशो दुम्त। 13 नोफा दाइश्शा नेनीने, रागीमी तेक तेक आं लोत्र नेंपाइक्नीमी, मेक मेक एको मीश मुर आ पशो आ पबर्म यो लोत्र पाइनीम” देंत।

यहूदा आ पशो

14 मिनू इस्कारीयोत डा यहूदा येसु आ शेंसीब का ठेयब चढेब आन कली गुम्थ लशा 15 “येसु कली इन गुडमी ग्याइक्पाइक्ता हना, दोशो गेनीनी” देंमेनु, ३० टुक्रा चांदी गेमे बाक्त। यूहन्ना ११:५७; जकरिया ११:१२ 16 मिनू मेको चांदी ताक्गा रे “गेना नु दोपा ग्याइक्चा वारच पदुमी” दे योत्रकी पना पन गाक्माक्त।

पास्सा चाड डा भोज

यूहन्ना १३:२१-२६

17 मिनू बोरब ओरुती मसुप्शो शोब्ले जची नाक्त येसु आ शेंसीबपुकीम “पास्सा मानेचा कली ते साचा, मार देंनीनी” दे हिल्लो पाम्तेक्म। प्रस्थान १२:१८-२० 18 येसुमी “सहर लशा, आं कली तुइक्ब मुर कली गुम्शा ‘शेंबमी आं कली दुम्चा माल्शो मुल दुम्चाप्तु। मोपतीके इन खिंमी बास गेशा, आं शेंसीब नु काथा बाक्शा, पास्सा मानेचा गेयी, दे पुंडथ सोइक्ताक्की’ दे मतीन” दे सोइक्ताक्मी। मती २१:३ 19 मिनू शेंसीबपुकीमी येसु आ देशो खोदेशो पा पास्सा मानेचा कली नेल्ल साताक्म।

20 मिनू नां रिक्मेनु, येसु आ शेंसीबपुकी नु काथा जचा कली निस्साक्व। 21 मिनू जना जन बाक्मानु, येसुमी “नोफा दाइश्शा नेनीने, मुल एक बाक्ब कामी आं कली ग्याइक्ब आन वारच पाइब दुम्ब” देंत। 22 मिनू नेल्लेमी शुश मरिम्शो लाक्शा “हे प्रभु, मेको वारच पाइब गो दुम्नुडा?” दे का का पा हिल्लो पाम्तेक्म। 23 मिनू येसुमी “गो नु कालेम शोब्ले शेक्कुम तेप्बमी आं कली ग्याइक्पाइक्चा वारच पाइब। 24 रागीम जरमेशो आ पबर्म ब्रेक्शो साइ नेसी डा लोत्र नेल्ल थमा दुम्चा माल्ब। मो दुम्चा माल्शो बाक्त हना यो, ग्याइक्पाइक्चा वारच पाइब कली थमा मरिम्शो दुम्ब। मोदेशो पाइब मुर मजरमेशो हना, मेको कली रिम्शो दुम्ब वा” देंत। लूका १७:१-२ 25 मिनू ग्याइक्चा वारच पाइब यहूदामी यो “शेंब, मेको गो दुम्नुडा?” देंमेनु “आंमा तुइक्नेवे” दे माइक्तु।

26 मिनू जना जन बाक्मानु, येसुमी आ गुडमी शोब्ले शेशा “गे रिम्शो पाइब बाक्नीनी” दे प्रार्थना पशा जिक्शा, शेंसीब आन कली योक्शा “दांडसीने, ताक्शा जने। एको आं रां बाक्ब” देंत। १कोरिन्थी १०:१६; १कोरिन्थी ११:२३-२५ 27 मिनू कचौरा शेशा “गे रिम्शो पाइब बाक्नीनी” दे प्रार्थना पशा, मेको आन कली तूचा गेशा “गे नेल्लेमी तूडीने। 28 एको आं हुश बाक्ब। आं हुशेमी परमप्रभु यावे आ नक कबल खाप्ता। आं हुश जारशोमी शुश मुर आन पाप क्याम्सीब। प्रस्थान २४:८; येरमीया ३१:३१; हिबू ९:१५-१६ 29 मुल डा मेरे एको अडगुर रस मतूनुड, नोले नेल्ल नक दुम्शा, आं आफ आ राज्यमी गेपुकी नु काथा बाक्शा ला तूनुड, दे इन कली देंनुड” दे माइक्तीमी। भजन संग्रह ११३:-११८:-

नेल्लेमी प्रोइनीम, दे शेंशो

30 मिनू कुम्सो का पशा डा मीन, मेकेर रे गाकशा, जैतून डांडा ग्येत्थ लाम्तेकम। 31 मिनू येसुमी “आपो नाकदो गे नेल्लेमी आं कली तशा, इन थुं ग्याइक्नीनी। मारदे हना साइ नेसी ओदें ब्रेक्शो बाक्ब। ‘गो गोठला कली तुप्शा क्रेक्नुड। मिनू भेडापुकी प्रोक्शा साव सुव ब्राइनीम’ दे ब्रेक्शो लोत्र थमा दुम्ब। जकरिया १३:७; यूहन्ना १६:३२ 32 नोले गो बेक्शो रे संपाइक्चा पुंडसीशा, इन डोंइती गालील रागीमी जाक्दीत्नुड” देंत। मती २८:७ 33 मिनू पत्रुसमी “मेको नेल्लेमी इन कली प्रोंइशा प्रोक्तेकम हना यो, गो मप्रोंइनन्नी” देंमेनु, 34 येसुमी “नोफा दाइश्शा नेनो, आपो नाकदो भाले ग्रीचा डोंइती खेयप सां सम्म ‘मेको कली मतुइक्नुड, सु बाक्मे?’ दे आं पर्बम देंनेवे” देंत। यूहन्ना १३:३८ 35 मिनू पत्रुसमी “मप्रोंइनन्नी। गे नु काथा बाक्शा, साइक्चा पुंडसाक्ड हना यो, गेनायो मप्रोंइनन्नी” दे लोत्र थोक्शा देंत। मिनू शेंसीब नेल्लेमी यो मोन देंतेकम।

गेथसेमनेमी प्रार्थना पशो

36 मिनू गेथसेमनेमी जाक्दीत्तेकम। मिनू येसुमी “लो, एक बाक्कीने, गो इक्का आइक्की लशा, प्रार्थना पशा लेशशा पीनुड” देंत। 37 पत्रुस नु जब्दी आ तौ निक्शी, सां आन कली इक्की आइक्की लाइक्तु। मेना येसु आ थुं शुश खाइश्शो बाक्माक्त। मती १७:१; हिब्रू ५:७ 38 मिनू सां आन कली “आं थुं शुश खाइश्शा, बेक्चा डा दुम्ती। मुल एकेर मइप्थु गो नु काथा बाक्कीन” देंमाक्त। यूहन्ना १२:२७ 39 मिनू इक्का डोंइती लशा, खुम्की पा खपीम बाप्शा “आं आफ, दुम्ब हना, एको कचौरा आं कली मतूपाइक्थु सोइक्तीने। तन्न आं दाक्शो मदुम्ल, इन दाक्शोन दुम्ल” दे प्रार्थना पशा, लेशशा जाक्माक्त। यूहन्ना १८:११; यूहन्ना ६:३८; हिब्रू ५:८ 40 मिनू लेशशा जाक्मेनु, सांफा आन कली इप्शो तामी बाक्त। मिनू पत्रुस कली “छिन का यो मइप्थु, बाक्ने मचाप्नी? लो, सेसीने। 41 थुं थाम्चा पुंडसीनीनु, पाप मपय, दे प्रार्थना पने। थुंमी पाइनुड चाप्नुड देंब, तन्न रांमी फाल्ने मचाप्ब” देंमाक्त। एफिसी ६:१८; हिब्रू २:१८ 42 मिनू लेंशा इक्का आइक्की लशा “आं आफ, गोमी एको मतूथु सोइक्चा मदुम्बाक्त हना, इन दाक्शो दुम्ल” दे प्रार्थना पवा बाक्त। 43 मिनू लेशशा जाक्मेनु, निन्द्रामी दुक्शा बाक्शो तामी बाक्त। 44 मिनू मेको आन कली निन्द्रामी दुक्शो तशा, लेंशा लशा डोंइती डा पशो खोदेंब पा प्रार्थना पवा बाक्त। २कोरिन्थी १३:८ 45 मिनू लेशशा, शेंसीब आन बाक्तीकेमी जाक्शा, मेको आन कली “इन दशो सानी, दे मुल यो इप्शो बाक्नी? तुइक्तीन, रागीम जरमेशो पापी आन गुइमी गेचा पुंडसीचा चिक्ताक्व। 46 बोक्कीन, लय। आं कली ग्याइक्पाइक्चा कली वारच पाइब जाक्चाप्तु” देंत।

येसु ग्याइक्चा पुंडसीशो

47 मो देंमेनु, आ शेंसीब यहूदामी ठेयब चढेब नु जोक्ब तुइक्ब खालपापुकीमी सोइश्शो हुलमी तरवार कोक्के कुरशा, येसु कली ग्याइक्थ चाक्तीमी। 48 यहूदामी “सु कली पुक्पु पदु, मेको कली ग्याइक्चा” दे ग्याइक्थ जाक्ब आन कली तुइक्पाइश्शो बाक्माक्त। 49 मिनू यहूदामी जाक्शा, येसु कली “रब्बी” दे बे मुप्शा पुक्पु पाइक्तु। 50 मिनू येसुमी “आं वारच, मार पथ जाक्डे लो पावो” देंत। मिनू ग्याइक्थ जाक्बपुकीमी येसु कली ग्याइक्ताक्म। 51 मिनू येसु नु काथा बाक्ब कामी तरवार ग्रि शोइश्शा, ठेयब चढेब आ गेय पाइब का आ नोफा दि खोइक्तु। 52 मिनू येसुमी “इ तरवार पिप्तो। मारदे हना तरवारम साइक्ब, तरवारमी साइक्चा पुंडसीब। उत्पत्ती ९:६ 53 आं आफ कली ‘आफ, इन स्वर्ग डा गेय पाइब हजार हजार आन कली सोइश्शा, आं कली वारच पा प्रोंइपाइय्यीनी’ दे पुंडता हना, गिश हना यो सोइश्शा, आं कली प्रोंइपाइक्ब, दे मतुइक्नीनी? १२ खेयप ६ हजार स्वर्ग डा गेय पाइब ब्रेक्शो बाक्ब। मती ४:११ 54 मोदें पुंडता हना, साइ नेसी डा लोत्र दोपा थमा दुम्ने चाप्बा डा?” दे माइक्तु। 55 मिनू येसुमी हुल आन कली “तरवार कोक्के कुरशा, खुइ पाइब कली ग्याइक्थ जाक्शो खोदेंब पा आं कली ग्याइक्थ जाक्नी? नाक्त किंत किंत परमप्रभु यावे आ खिंमी मुर आन दातेमी शेंना शेंन बाक्डानु, मग्याइक्तीनी। 56 परमप्रभु यावे आ लोत्र पाइब आन ब्रेक्शो लोत्र नेल्ल थमा दुम्चा माल्ब, मोपतीके आं कली ओदेंशो दुम्चा माल्ब” दे माइक्तीमी। मिनू आ शेंसीबपुकी येसु कली प्रोंइशा, साव सुव ब्राशा प्रोक्तेकम।

येसु ठेयब चढेब आ डोंइती

57 मिनू येसु कली ग्याइक्बपुकीमी मेकेर रे लाइश्शा, नेल्ल क्येडा ठेयब चढेब काइयाफास आ खिंमी चाक्दीत्ते बाक्त। मेकेर सास्त्री नु जोक्ब तुइक्ब खाल्पा नेल्ल खुम्सीशा बाक्शो बाक्मा बाक्त। 58 पत्रुस यो आन नोनोले खोइश्शा, मेकेर जाक्दीम्माक्त। मिनू लाडगा ओव्रशा, नेल्ल क्येडा ठेयब चढेब आ गेय पाइबपुकी नु काथा बाक्शा, मिनू गेपुकी परमप्रभु यावे, इन परमप्रभु कली इन थुं नेल्लेमी, इन सोक्त नेल्लेमी नु इन बोल नेल्लेमी दाक्चा माल्नीनी। कली मार पाइनीमी, मार देंनीमी, दे कोव्रशा बाक्माक्त। 59 मिनू ठेयब चढेब नु जोक्ब तुइक्ब खालपापुकी मार पामे

बाक्त देंशा हना, कछडी वोइशशा, जोल पा दोस गेचा माल्मे बाक्त। मारदे हना येसु कली साइक्पाइक्चा माल्शो बाक्मा बाक्त। 60 मिनु सांकछीपुकी शुश चाक्शा यो, मेको आन लोत्र मगारमाक्त। मोपतीके दोसी सेल्ने मचाप्बमे बाक्त। नोले सांकछी निक्शी आस लोत्र 61 “एको ग्याइशशो मुरुमी साबेर मार देंत देंशा हना ‘परमप्रभु यावे आ खिं प्रेशशा, नाक्त सांमी नक सेल्लुड’ देंत” देंसा बाक्त। प्रेरित ६:१४; यूहन्ना २:१९-२१ 62 मिनु नेल्ल क्येडा ठेयब चढेबमी बोक्शा, येसु आ डोंइती राप्शा “मेको निक्शीमी इ पबर्म देंशो लोत्र नेंशा, मार देनेवे?” देंमेनु, येसुमी मारेइ मदेंमाक्त। 63 मिनु नेल्ल क्येडा ठेयब चढेबमी “ब्रोंइशा बाक्ब परमप्रभु यावे आ नेमी हिल्लो पाइनन, गे परमप्रभु यावे आ तौ ख्रीस्त नवे, दे मनवे?” देंमेनु, मती २७:१२; यूहन्ना १०:२४ 64 येसुमी “गे आंमा देंतीनी। मुल डा मेरे रागीम जरमेशो कली नेल्ल सक्ति पाइशशो आ ग्युरामी बाक्शो ताइनीनी। गोस्स तारी बाक्शा, यिना यिन पशो ताइनीनी, दे गो इन कली देंनुड” दे मदा बाक्त। भजन संग्रह ११०:१; मती १६:२७; मती २४:३०; दानीएल ७:१३ 65 मिनु नेल्ल क्येडा ठेयब चढेबमी आ फेक्शो वा खाक्शा “ये, परमप्रभु यावे कली शुक्शी लोत्र पाइबाक्त। मार सांकछी लोत्र माल्दा डा? आ शुक्शी पशो लोत्र गे नेल्लेमी नेंशा, सांकछी दुम्तीनी। लेवी २४:१६; यूहन्ना १०:३३; यूहन्ना १९:७ 66 मार पय, मिनु?” देंमेनु “साइक्चा पुंइसीब” देंमा बाक्त। 67 मिनु साइक्चा पुंइसीब देंमानु, का निक्शीमी आ कुल तोक्तमे बाक्त, का निक्शीमी तुप्मे बाक्त, का निक्शीमी चोत्रचो राप्शा यसैया ५०:६ 68 “ए ख्रीस्त, सुमी राम्मे, लो देन” दे शुक्शी पा मरिम्शो पदमे बाक्त।

पत्रुसमी “मतुइक्नुड” देंशो

69 मेना पत्रुस लाङ्गामी बाक्माक्त। मिनु गेय पाइब मीश मुर कामी “गे यो गालील डा येसु नु काथा गाक्ब का नवे” देंमेनु, 70 मेकेर बाक्ब नेल्लेमी नेंचा डा पा “इ देंशो मरुबु। मार लोत्र पवी?” देंमाक्त। 71 मिनु लाङ्गामी गूमेनु, मेकेर गेय पाइब मीश मुर कामी “नासरथ डा येसु नु काथा गाक्ब का एको यो बाक्माक्त” दे मेकेर बाक्ब आन कली देंमाक्त। 72 मिनु पत्रुसमी “मेको मुर कली मतुइक्नुड” दे कसम जशा आ लोत्र थोक्शा देंमाक्त। 73 मिनु मेको एर ओंथ बाक्बपुकी जाक्शा, पत्रुस कली “गे यो काथा गाक्ब का बाक्डे बाक्त। इ ब्वाक्स नेंशा, गालील डा बाक्डे बाक्त, दे तुंइसीब” दे मदमे बाक्त। 74 मिनु पत्रुसमी “जोल पाता हना, परमप्रभु यावेमी सजाइ गेयील, एको मुर कली तुंइसीन मतुइक्नुड” दे कसम जशा, आ लोत्र थोक्शा देंमाक्त। मो देंमेनु, भाले ग्रीमाक्त। 75 मिनु पत्रुसमी “भाले ग्रीचा डोंइतीन सां खेयप सम्म मेको मुर कली मतुइक्नुड, देनेवे” दे येसुमी देंशो ति फ्रुक्गा बाक्त। मिनु गूशा शुश डाक्माक्त।

27

1 मिनु नां सोत्रमेनु, ठेयब चढेब नु जोक्ब तुइक्ब खाल्पापुकीमी येसु कली साइक्पाइक्चान, दे सल्ला पामे बाक्त।
2 मिनु फ्रेशा लाइशशा, पिलातस, सरकार डा ठेयब मुर आ गुइमी जिम्मा गेमे बाक्त।

यहूदा ग्युक्शा बेक्शो

3 ग्याइक्पाइक्चा वारच पाइब यहूदामी येसु कली साइक्चा, दे उजुर पाम्तेक्म देंशो नेंशा “मरिम्शो पडा बाक्त। मार पचा डा मुल” दे ठेयब चढेब नु जोक्ब तुइक्ब खाल्पा आन कली परमप्रभु यावे आ खिंमी गुम्थ लशा मती २६:१५
4 “रिम्शो मुर कली ग्याइक्पाइक्चा वारच पा पाप पाता” देंमेनु “गोपुकीमी मार पाइनीकी? गे आंमा तुइक्तो” देंमा बाक्त। 5 मिनु चांदी मेको आन डोंइती ताइशशा, मेकेर रे फो गूशा लशा, ग्युक्शा बेक्माक्त। प्रेरित १:१८-१९

हुशेम ग्याप्शो रू

6 ठेयब चढेबपुकीमी मेको ताइशशो चांदी गुप्शा “परमप्रभु यावे कली चढेशो क्येट नु काथा वोइक्चा मदुम्ब। मारदे हना हुश के दाम बाक्ब” देब्यवस्था २३:१९ 7 सल्ला पशा, खप के ग्योब सेल्ब आ रू का ग्याप्मे बाक्त। मेको रू यहूदी धर्म मपाइब यरूसलेममी बेक्शो मुर आन कली थिम्तीके पामे बाक्त। 8 मेको रू कली मुल सम्म “हुश रू” देंसीब। 9 मोदेंशो आन पशोमी साइ नेसी परमप्रभु यावे आ लोत्र पाइब येरमीयामी ब्रेक्शो लोत्र थमा दुम्त। आ ब्रेक्शो लोत्र चहिं ओदेंशो बाक्ब “इस्नाएल आ खिं डा मुरपुकीमी एको मुर आ मोल ३० टुक्रा चांदी डा बाक्ल देंतेक्म। 10 मिनु ३० टुक्रा चांदी लाइशशा, खप के ग्योब सेल्ब आ रू ग्याप्तेक्म, दे परमप्रभु यावेमी लोत्र पपाइक्ती” दे ब्रेक्शो बाक्ब। येरमीया ३२:९, जकरिया ११:१२-१३

येसु पिलातस आ डोंइती राप्शो

11 येसु सरकार डा ठेयब मुर आ डोंइती राम्मेनु, मेकोमी “यहूदी आन पिप नवे?” दे हिल्लो पवानु “गे आंमा देंतीनी” देंमाक्त। 12 मिनु ठेयब चढेब नु जोक्ब तुइक्ब खालपापुकीमी शुश दोस गेमेनु, ब्वालेइ पा बाक्माक्त। मत्ती २६:६३; यसैया ५३:७ 13 मिनु पिलातसमी येसु कली “एकोपुकीमी इ कली शुश दोस गेशा, लोव्र पशो मनैनी?” देंमेनु, 14 लोव्र का यो मलेत्ता बाक्त। मिनु सरकार डा ठेयब मुर आ छक लाक्माक्त। यूहन्ना १९:९

15 पास्सा नाक्त सरकार डा ठेयब मुर आन दाक्शो मुर का कली जेल्खान रे प्रोंइतीके पशो बाक्माक्त। 16 बारब्बा माइशो मरिम्शो पाइब मुर का चोक्सीशो बाक्माक्त। 17 मिनु सरकार डा ठेयब मुरुमी “बारब्बा कली प्रोंइचा, दे ख्रीस्त देशो येसु कली प्रोंइचा? तेको कली प्रोंइचा?” दे हिल्लो पामी बाक्त। 18 मारदे हना आन थुं चोशा, येसु कली ग्याइक्पदमे बाक्त, दे तुइक्ता बाक्त, मोपतीके येसु कली प्रोंइचा माला बाक्त। यूहन्ना १२:१९

19 मिनु निसाफ पचा कली बाक्मेनु, आ मीशेमी “मेको सुइ कली मरिम्शो मपाइब कली मारेइ मपतीने। मारदे हना मुलाक्दो इम्डानु, मेको आ पर्बम गो शुश श्येत जचा डा डोमु ताता” दे शोव्रथ सोइक्ता बाक्त। 20 तन्न ठेयब चढेब नु जोक्ब तुइक्ब खालपापुकीमी मुर आन कली हुल पोक्शा “बारब्बा कली प्रोंइचा, येसु कली साइक्चा” दे रेयके पा पुंइपदमे बाक्त। 21 मिनु पिलातसमी “मुल सु कली प्रोंइचा?” देंमेनु “बारब्बा कली प्रोंइचा, सरकार” देंमा बाक्त। 22 मिनु पिलातसमी “ख्रीस्त देशो येसु कली मार पदु, मिनु?” देंमेनु “शीमी केप्शा कांटी थोक्शा क्याइशशा साइक्चा माल्ब, सरकार” देंमा बाक्त। 23 मिनु “मार मरिम्शो पवा, मार दोस गेचा” देंमेनु “शीमी केप्शा कांटी थोक्शा क्याइशशा साइक्चा माल्ब” दे रेयके पामे बाक्त। 24 मुरपुकीमी मोदेशो रेयके पा प्रेक्शो तशा “मुल येसु कली प्रोंइने मचबु” दे मिम्शा “एको सुइ कली मरिम्शो मपाइब आ हुश इन गुइमी ला लुम्सेक्ल, आं गुइमी मलुम्सेक्ल” देशा, नेल्ल आन कुल आ गुइ चिक्शा कोंइदीमी बाक्त। ब्यवस्था २१:६ 25 मिनु हुलपुकीमी “आंइ कली नु आंइ चच युइ आन कली लुम्सेक्ल” दे रेयके पामे बाक्त। प्रेरित ५:२८ 26 मिनु बारब्बा कली प्रोंइशा सोइक्ता बाक्त। येसु कली कोराम युक्पाइशशा शीमी केप्शा कांटी थोक्शा क्याइशशा साइक्चा कली आ सिपाही आन गुइमी जिम्मा गेमी बाक्त।

येसु कली क्याइशशा साइशो

27 मिनु सिपाहीपुकीमी येसु कली हेरोद आ दरवार डा सिपाही बाक्तीकेमी चाक्दीशशा, आन पल्टन नेल्ल खुप्शा, शुक्शी पदमे बाक्त। 28 आ फेक्शो वा प्रुइशशा, लल वा फेक्पा 29 चू के सिरपेच सेल्शा, आ पियामी गुप्पा, सुन के कोक्के, दे किन्दा आ ग्युरा गुइमी शेपदमे बाक्त। मिनु आ डोंइती आन पोक्च थेक्शा “हे यहूदी आन पिप, सेउ ताक्कीन” दे शुक्शी पा सेउ पदमे बाक्त। 30 मिनु आ कुलम तोक्तमे बाक्त। मेको किन्दा रोइशशा, आ पियामी तेत्मे बाक्त। यसैया ५०:६ 31 मिनु शुक्शी पने थुम्शा, लल वा प्रुइशशा, आंमा आ वा फेक्पा शीमी केप्शा कांटी थोक्शा क्याइशशा साइक्चा कली लदमे बाक्त। 32 मिनु लना लन पामेनु, साइरेनी डा सिमोन नें पाइशशा मुर का गुम्मे बाक्त। मिनु मेको कली येसु कली क्याइक्तीक शी “लो, कुर कि कुर” दे कुरपदमे बाक्त।

33 मिनु गोलगथा माइक्तीकेमी चाक्दीत्मे बाक्त। गोलगथा कली खप्परे यो देंसीब। 34 मिनु ग्युरशो अडगुर शांबु खाइल ब्वाइशशा तूतीके सेल्शा, तूचा गेमेनु, येसुमी थाम्शा डा मिन, तूने मबिस्से बाक्त। भजन संग्रह ६९:२२ 35 मिनु शीमी केप्शा कांटी थोक्शा क्याइशशा, फेन्टे ग्यारशा आ वासी योक्सीशा, यूहन्ना १९:२४ 36 खाल पा बाक्मा बाक्त। 37 “यहूदी आन पिप येसु” दे आ कली दोस गेशा ब्रेक्शो आ पिया तार एरे शीमी केप्तमे बाक्त। 38 मिनु खुइ निक्शी आस कली यो आ कली खोदेशो पा आ ग्युरा नु पेरा गे क्युकगमे बाक्त। 39 मिनु कोव्रब मुर शुश जाक्शा, आन पिया हिम्शा भजन संग्रह २२:८ 40 “परमप्रभु यावे आ खिं प्रेशशा, सां नाक्तीमी नक सेल्नुड देंते। खोइ मिनु, सेल्ने चबी? थमान परमप्रभु यावे आ तौ नवे हना, शीमी केप्शा कांटी थोक्शा क्याइशशा रे ब्रोंइशा यीवो” दे शुक्शी पामे बाक्त। मत्ती २६:६१; यूहन्ना २:१९ 41 ठेयब चढेब, सास्त्री नु जोक्ब तुइक्ब खालपापुकीमी यो 42 “शुश आन कली श्येत रे प्रोंइना प्रोंइन गाक्बाक्माक्त। आंमा आ कली चहिं प्रोंइने मचाप्बाक्माक्त। इं इस्राएल डा पिप बाक्ब, मोपतीके शीमी केप्शा कांटी थोक्शा क्याइशशा रे ब्रोंइल। ब्रोंइने चाप्तु हना, गो आ लोव्र नेल्ल थमा सुइक्नय। 43 परमप्रभु यावे कली थमा सुइक्बाक्माक्त। मोपतीके परमप्रभु यावेमी एको कली दाक्ताक्व हना, एको श्येत रे प्रोनल। ‘परमप्रभु यावे आ तौ नड’ देंत, मोपतीके परमप्रभु यावे आ दाक्शो बाक्माक्त” दे शुक्शी पामे बाक्त। भजन संग्रह २२:९ 44 आ ग्युरा नु पेरा गे क्युकशो खुइ निक्शीमी यो मोदेशो पान शुक्शी पदसे बाक्त।

येसु बेक्शो

45 मिनु नाक्ती १२ बजे रे ३ बजे सम्म नेल्ल रागीमी नां रिक्शो खोदेशो पा छिडछिड दुम्त। 46 ३ बजे गे येसुमी “एली, एली, लामा आसबथानी” दे वाइ ब्रेम्माक्त। आ देशो मार रुम्सीब देशा हना “परमप्रभु यावे, आं परमप्रभु, आं कली मारदे प्रोइयीनी” देशो रुम्सीब। भजन संग्रह २२:२ 47 एर ओंथ बाक्बपुकीमी मो देशा वाइ ब्रेशो नेंशा “एलीया कली ब्रेत्ताक्व” देंमुमा बाक्त। 48 मिनु कामी रुवामी ग्युरशो तूतीके नुप्शा, कोक्केम फ्रेंशा, युप्चा गेचवा बाक्त। भजन संग्रह ६९:२२ 49 मिनु मेकेर बाक्बपुकीमी “कते, वारच पाइक्थ एलीया जाक्बा कों, कोव्रय” देंमा बाक्त। 50 मिनु येसुमी लेंशा वाइ ब्रेशो, आ सोक्त प्रोना बाक्त।

येसु बेक्मे नोले चिन्ड गूशो

51 मिनु बेक्म चोटी मार दुम्माक्त देशा हना, परमप्रभु यावे आ खिं डा आगा डा कोठामी बारेशो वा इर रे उइ सम्म उइक्थ पा जेर गाक्माक्त। खिनु कुशा, प्रस्थान २६:३१-३३; २इतिहास ३:१४ 52 सेरथे फुल्लु नेल्ल एशशा ब्रोल्मा बाक्त। लास थिम्तीके यो एशशा ब्रोल्मा बाक्त। मिनु परमप्रभु यावे कली थमा सुइशशा बेक्शोपुकी सेंसमा बाक्त। 53 येसु सेंसीशो नोले मेकोपुकी लास वोइक्तीके रे गूशा, सहर जाक्दीशशा, शुश मुर आन कली तपांडसाक्म।

54 येसु कली खाल पाइब कप्तान नु सिपाहीपुकीमी खिनु कुशा नु मोपा हिंचा डा गेय दुम्शो तशा, शुश हिंशा “एको परमप्रभु यावे आ तौ बाक्माक्त” देंमुमा बाक्त।

55 गालील रे यरूसलेम सम्म येसु कली वारच पना पन काथा गाक्ब मीश मुरपुकीमी डोन रे कोव्रशा बाक्मा बाक्त। लूका ८:२-३ 56 मोपा कोव्रब का माग्दाला डा मरीयम बाक्माक्त। का याकूब नु योसेफ आस ममा मरीयम बाक्माक्त। का जब्दी आ तौ निक्शी आस ममा बाक्माक्त।

येसु आ लास पुक्खीमी वोइशो

57 मिनु नां रिक्मेनु, येसु आ नोले खोइक्ब अरीमाथीया डा योसेफ माइशो शोप पाइशो मुर कामी पिलातस कली ग्रुम्थ लशा, ब्यवस्था २१:२२, २३ 58 “येसु आ बेक्शो रां लाइक्चा गेयीनी” दे पुना बाक्त। मिनु पिलातसमी लाइक्चा गेवा बाक्त। 59 मिनु योसेफमी लास बुश नक वामी गिल्शा, 60 आंम आ लास वोइक्तीके सेल्शो रोंगु डा पुक्खीम ओंइशा वोदा बाक्त। मिनु पुक्खी कली ठेयब फुल्लुमी सुशा वोइशशा गाक्माक्त। 61 माग्दाला डा मरीयम नु अर्को मरीयममी योसेफ आ नोले खोइशशा लशा, लास वोइक्तीके पुक्खी आ डोंइती बाक्सा बाक्त।

फुल्लुम लाहा छाप थोक्शो

62 मेको नेल्ल दुम्शो आ दीसा ठेयब चढेब नु फरिसीपुकीमी पिलातस कली ग्रुम्थ लशा मर्कूस १५:४२ 63 “सरकार, एको नेल्ल आन थुं क्याल्पाइक्ब मबेक्थु बाक्मेनु, मार देंत देशा हना ‘आं बेक्शो नित्थ नाक्त बेक्शो रे सेंपांडसीचा पुंडसीनुड’ देशो फ्रुक्तक। मती २०:१९ 64 मोपतीके मेको आ लास वोइक्तीकेमी सां नाक्त सम्म खाल पाइब वोइक्चा माल्ब। मारदे हना मेको आ नोले खोइक्बपुकीमी आ लास खुइ पा लाइशशा, मुर आन कली ‘बेक्शो रे सेंसाक्व’ दे शेंना शेंन गाक्तेक्म हना, डोंइती रे पशो क्येडा शुश जोल गूब” दे पुन्मे बाक्त। 65 मिनु पिलातसमी “लो, सिपाही आन कली सोइक्नुडमी। गेपुकी यो चाप्नी सम्म कोव्रडीन” देशा, आन देशो बिशशा सोइक्तीमी बाक्त। 66 मिनु सिपाहीपुकी नु लशा, मेक जाक्दीशशा, सुशो फुल्लुमी लाहा छाप थोक्शा, खाल पा बाक्मा बाक्त।

28

येसु बेक्शो रे सेंसीशा तपांडसीशो

मर्कूस १६:३-१०; लूका २४:१-१०; यूहन्ना २०:१-१८

1 मिनु नाइक्तीक नाक्त सां लाक्शा, हप्ता डा डोंइती नाक्त नां सोव्रसोव्रमी माग्दाला डा मरीयम नु अर्को मरीयम येसु आ लास वोइक्तीके कोव्रथ लसा बाक्त। प्रेरित २०:७; १कोरिन्थी १६:२; प्रकाश १:१० 2 मिनु जाक्दीस्सानु, ठेयब खिनु कुमाक्त। मारदे हना परमप्रभु यावे आ स्वर्ग डा गेय पाइब का यिशा, सुशो ठेयब फुल्लु तिल्शा, मेको आ तारी निस्से बाक्त। 3 मेको आ कुल चिला पशो खोदेशो नु आ वा बुबु पा छेडछेड तांडसे बाक्त। मती १७:२; प्रेरित १:१० 4 मेको कली तशा, मेकेर खाल पाइब सिपाहीपुकी हिंशा खिंखि पा थशा गोलमा बाक्त। 5 मिनु परमप्रभु यावे आ स्वर्ग डा गेय पाइबमी मीश मुर आस कली “महिनीसे। गे शीमी क्याइशशा साइशो येसु कली माल्थ पिसी ममाइ? 6 मुल एके मबा। मारदे हना डोंइती देशो खोदेशो पा बेक्शो रे सेंचा पुंडसाक्व। प्रभु कली वोइक्तीके कोव्रडीसे। मती १२:४०; मती १६:२१; मती १७:२३; मती २०:१९ 7 मुल एके रे फ्रा लेशशा लशा, आ शेंसीब आन कली ‘प्रभु बेक्शो

रे सेंचा पुंइसे बाक्त। इन डोंइती लशा, गालील जाक्दीण्ब। मिनु गे मेकेर गुम्चा ताइनीनी' दे शोव्रथ लसे। इस कली तुइक्पाइक्तन्सी, मिनु मप्रेंदीसे” दे सोइक्तीम्सी बाक्त। मत्ती २६:३२ ८ मिनु मेकेर रे गूशा, हिंसा यो बाक्त, ग्येरसीसा यो बाक्त। मिनु गुरुर पा दोरशा, मेको लोव्र शेंचा, दे आ शेंसीब आन कली गुम्थ लसा बाक्त।

९ मिनु दोरना दोरन लसानु, मार दुम्माक्त देंशा हना, येसुमी मेको आस कली गुम्सी बाक्त। मिनु “आसीक रसील” दे सेत्तीम्सीनु, आ नेक्था जाक्शा बाप्शा, आ खोइल थिशा मान पदसे बाक्त। १० मिनु येसुमी “महिनीसे। येसु कली गुम्थ गालील लने, दे आं लोकब आन कली शोव्रथ लसे” दे सोइक्तीम्सी बाक्त। हिब्रू २:११

खाल पाइबपुकीम घूस जशो

११ मेको निक्शी दोरना दोरन लसानु, सिपाही का निक्शी सहरमी जाक्दीशशा, ठेयब चढेब आन कली मेकेर मार दुम्मे, मेको नेल्ल शोव्रडमे बाक्त। १२ मिनु ठेयब चढेब नु जोक्ब तुइक्ब खाल्पापुकी खुम्सीशा “मुल मार पय?” दे लोव्रसी पमुमा बाक्त। मिनु सिपाही आन कली शुश क्येट गेशा १३ “लो, मुर आन कली मार देंचा देंशा हना, नाक्दो इप्कानु, आ शेंसीबपुकी जाक्शा, लास खुइ पामे बाक्त, दे लोव्र फ्रने। मत्ती २७:६४ १४ सरकार डा ठेयब मुरुमी नेंतु हना, नेल्ल गारपाइक्नीकी, इन कली मारेइ मदुम्ब” देंमा बाक्त। १५ मिनु सिपाहीपुकीमी क्येट ताक्शा लशा, मेको मोदेंशो लोव्र तेइ तेइ फ्रामे बाक्त। मुल सम्म यहूदी आन दातेमी एको लोव्र लीशो बाक्ब।

येसु आ लोव्र नेल्ल कली शेंदीन

१६ येसु आ शेंसीब ११ जना चहिं येसुमी तुइक्पाइशो गालील डा डांडामी जाक्दीत्तेक्म। १७ मिनु येसु कली तामेनु, मान पाम्तेक्म। का निक्शीमी चहिं दल्गीर पामे बाक्त। १८ मिनु येसु नेल्ल आन नेक्था जाक्शा “स्वर्ग नु रागी डा अधिकार नेल्ल आं कली गेशो बाक्ब। मत्ती ११:२७; एफिसी १:२०-२२ १९ मोपतीके रागीम नेल्ल हिरशा, नेल्ल जात, थर डा मुर आन कली आं पबर्मी शेंशा, आं नोले खोइक्ब शेंसीब सेलीने। आं आफ, परमप्रभु यावे, आ तौ नु परमप्रभु यावे आ सोक्त आन नेंमी मेको आन कली ब्वाक्कुम खुम्शा गुंडदीने। मत्ती २४:१४; मर्कूस १६:१५-१६; २कोरिन्थी ५:२० २० मिनु गोमी इन कली मार मार शेंदन्नी, मेको नेल्ल मेको आन कली शेंशा पपतीने। नेनीने, रागी मनुप्ची सम्म गो गेनायो गेपुक नु बाक्नुड” देंत। मत्ती १६:२०

मर्कूस

ब्रेक्ब मुर: एको किताब ब्रेक्ब मुर मर्कूस बाक्ब। मेकोमी आंम आ पबर्म मर्कूस १४:५१-५२ ब्रेक्शो बाक्ब। मेको आ यहूदी नें यूहन्ना बाक्त, मेको आ रोमी नें चहिं मर्कूस बाक्त। मर्कूस बारनाबास आ याच बाक्त। मेको पावल नु बारनाबास काथा लमा बाक्त। तन्न मेको आस कली प्रोंइशशा, यरूसलेम लेम्माक्त। प्रेरित १३:५, १३ नोले पवलम मेको आ पबर्म रिम्शो लोव्र पवा बाक्त। मेको कली लेंशा, रोम सहरम वारच पचा कली ब्रेक्शो बाक्त। २तिमोथी ४:११ मर्कूसमी पत्रुस कली वारच पा, आ शेंतीक लोव्र रोमी लोव्रम सेला बाक्त। मिनु मेको लोव्र मसाम्चा कली नेल्ल ब्रेक्ता बाक्त।

गेना ब्रेक्शो: मर्कूस ६३-६४ ए. डी. रोम सहर जाक्माक्त। मेना थमा सुइक्ब आन कली रोम डा सिजर नेरो आ पतीकेमी खेदा पचा गोव्रमे बाक्त। मिनु मेको किताब ६४-६५ ए. डी. मेर खोदेशो ब्रेक्शो बाक्ब। तन्न ७० ए. डी. क्येडा डोंइती दुम्चा माल्ताक्व। मारदे हना यरूसलेम सहर कली खतम सेल्लेके आ पबर्म मारेइ मब्रेक्शो बाक्त।

मारदे ब्रेक्शो: मर्कूसमी आ किताबम येसु आ पशो छक लाक्चा डा गेय आ पबर्म शुश ब्रेक्ताक्व। मेको पत्रुस आ शेंतीक लोव्र रे बाक्ब। येसु आ गेय डा नेल्ल क्येडा ठेयब लोव्र बाक्नीम। येसु परमप्रभु यावे आ गेय पाइब दुम्तीके किताब नेल्लेम कोंइशो बाक्ब, देशो बाक्ब। मर्कूस १०:४५

ब्वाक्कुम खुम्शा गुंडब यूहन्ना

मत्ती ३:१-१२; लूका ३:१-१८; यूहन्ना १:१९-२७

१ एको परमप्रभु यावे आ तौ येसु ख्रीस्त आ पबर्म ब्रेक्शो ग्येरपाइक्ब लोव्र बाक्ब। मेको लोव्र दोदेशो पा गोइब देशा हना, २ परमप्रभु यावे आ लोव्र पाइब यसैयामी ब्रेक्शो लोव्रमी मार ब्रेक्शो बाक्त देशा हना “नेनो, इ डोंइती आं लोव्र पाइब सोइक्नुड। मेकोमी इ लां थेल्लब। मत्ती ११:१० ३ गोरशो रागीमी सेंदा कामी ‘प्रभु आ लां थेलीने। आ गाक्तीके लां फुल्लु ग्रोक्शा थेलीने’ देशो नेंसीब” दे ब्रेक्शो बाक्ब। मलाकी ३:१; यसैया ४०:३ ४ ब्वाक्कुम खुम्शा गुंडब यूहन्ना गोरशो रागीम गूशा, मुर आन कली “इन पाप क्याम्चा कली इन थुं परमप्रभु यावे गे लेत्तीने। आंइ थुं लेत्ताक्क दे कोंइचा कली ब्वाक्कुम खुम्शा गुंडपांडसीने” दे लोव्र पाइक्बाक्माक्त। ५ मिनु यहूदीया रागी नु यरूसलेम सहर डा मुर नेल्ल मेकेर जाक्शा, आन पाप शोव्रशा, यूहन्ना रे पा यर्दन खोलाम खुम्शा गुंडचा पुंडसमा बाक्त।

६ यूहन्नामी दलओंठ आ चां के प्रोव्रशो वा फेक्बाक्माक्त। कुशुल के किप्शुर किप्बाक्माक्त। मिनु सल्ला माले ब्वशा नु रोका खुदो जशा बाक्बाक्माक्त। ७ मिनु मुर आन कली “आं नोले जाक्ब आं क्येडा सक्ति पाइशो बाक्ब। गो मेको आ डोंइती बाप्शा, आ जुत्ता पुइक्चा लायो मशिरनुड। ८ गो इन कली ब्वाक्कुम खुम्शा गुंडताक्न्नी। मेकोमी चहिं इन कली परमप्रभु यावे आ सोक्तीमी खुम्ब” दे मुर आन कली शेंना शेंन बाक्बाक्माक्त।

येसु ब्वाक्कुम खुम्शा गुंडचा पुंडसीशो

मत्ती ३:१३-४:११; लूका ३:२१-२२; लूका ४:१-१३; यूहन्ना १:३२-३४

९ मेना येसु गालील रागी डा नासरथ सहर रे गाक्शा, यूहन्ना आ बाक्तीकेमी जाक्माक्त। मिनु यूहन्ना रे पा यर्दन खोलामी ब्वाक्कुम खुम्शा गुंडपांडसे बाक्त। लूका २:५१ १० मिनु ब्वाक्कुमी गुम्शा गूमेनु, सरीड रोक्सीशा, परमप्रभु यावे आ सोक्त परवा खोदेशो पा यिशा, आ तारी जुक्शो तवा बाक्त। ११ मिनु सरीड रे “आं दाक्शो तौ नवे। इ कली तशा थाम्पा ग्येरसीनुड” देशो सेंदा नेंसे बाक्त। मर्कूस ९:७

येसु थुं थाम्चा पुंडसीशो

१२ मिनु नोले परमप्रभु यावे आ सोक्तीमी येसु कली गोरशो रागीम लदा बाक्त। १३ मिनु गोरशो रागीम ४० नाक्त सम्म बाक्माक्त। मेकेर बाक्मेनु, सैतान रे पा थुं थाम्चा पुंडसे बाक्त। मेको गोरशो रागी डा जन्तुपुकी नु बाक्माक्त। परमप्रभु यावे आ स्वर्ग डा गेय पाइबपुकीमी मेको कली वारच पामे बाक्त।

येसुम परमप्रभु आ लोव्र नेंपाइशो

14 यूहन्ना जेल्खानमी चोकचा पुंडसे नोले, येसुमी गालील रागीमी परमप्रभु यावे आ ग्येरपाइक्ब लोत्र नेंपाइक्ना पाइक्न गाक्माक्त। 15 मेकोमी “परमप्रभु यावे आ देशो नाक्त जाक्त। आ राज्य इन नेक्था जाक्शो बाक्ब। इन थुं परमप्रभु यावे गे लेशशा, आ ग्येरपाइक्ब लोत्र थमा सुतीने” दे नेंपाइक्ना पाइक्न गाक्माक्त। गलाती ४:४

येसुमी शेंसीब आन कली ब्रेशशो

मत्ती ४:१८-२२; लूका ५:१-११; यूहन्ना १:३५-५१

16 मिनु येसु गालील समुन्द्र आ नेक्था हिरसेनु, सिमोन नु आ लोक्ब अन्द्रीयास ग्याइल आप्शा, डांइ रेन्ना रेन्न बाक्शो तवा बाक्त। मेको निक्शी डांइ रेण्ब बाक्सा बाक्त। 17 मिनु येसुमी मेको आस कली “आं नोले खोइय्यीसी। मिनु मुर आन कली रेण्ब सेलनन्सी” दे माइक्सी बाक्त। 18 मिनु ग्याइल थु था प्रोंइशा, आ नोले खोइइशा गाक्सा बाक्त।

19 मिनु इच्ची आइक्ची लशा, जब्दी आ तौ निक्शी याकूब नु यूहन्ना वोबु आस कली डोंगाम बाक्शा, गाक्शो ग्याइल प्रोव्रना प्रोव्रन पशो ताम्सी बाक्त। 20 मिनु मेको आस कली यो ब्रेत्तीम्सी बाक्त। मिनु आस आफ जब्दी नु गेय पाइब आन कली प्रोंइशा, आ नोले खोदसे बाक्त।

वोल कली गुंडशो

मत्ती ८:१४-१७; लूका ४:३१-४४

21 मिनु कापेरनाउम सहरम जाक्दीम्मा बाक्त। मिनु नाइक्तीक नाक्त येसुमी गुम्तीक खिं लशा, मुर आन कली शेंदीमी बाक्त। 22 मेको आ शेंशो नेंशा, नेल्ल छक लाक्मा बाक्त। मारदे हना सास्त्री आन लोत्र खोदेशो ममाइ। अधिकार पाइशो लोत्र पा शेंदीमी बाक्त। सास्त्री यहूदी आन कली परमप्रभु यावे आ अरेशो लोत्र शेंब बाक्शो बाक्तेक्म। मत्ती ७:२८-२९ 23 मिनु मेको गुम्तीक खिंमी ग्रांग्रा दिचा डा वोलमी सुम्शो मुर का बाक्माक्त। 24 मिनु मेको वाइ ब्रेशशा “ए नासरथ डा येसु, मार पमुया डा? आंइ कली खतम पोक्थ जाक्नी? गो इन कली तुइक्नीकी। गे परमप्रभु यावे आ योव्रशो ननी” देंमा बाक्त। मर्कूस ५:७ 25 मिनु येसुमी वोल कली “सिक्सी पावो। मिनु गूडो” दे हुइक्ता बाक्त। मर्कूस ९:२६ 26 मिनु ग्रांग्रा दिचा डा वोलमी मुर कली दिड खोल्शा, वाइ ब्रेशशा गूमाक्त। 27 मोदुम्शो तशा, मुरपुकी छक लाक्शा “मार बाक्म माइ? नक शेंतीक लोत्र बाक्म कोर में? अधिकार पाइशो लोत्र पवानु, ग्रांग्रा दिचा डा वोलम लायो टीबाक्तेक्म” देंमुमा बाक्त। 28 मिनु गालील रागीमी तेइ तेइ येसु आ पर्बम लोत्र ब्रना ब्रन लमाक्त।

रोइ पाइब आन कली सापाइशो

29 मिनु वोल कली गुंडशा, येसु गुम्तीक खिं रे सिमोन नु अन्द्रीयास वोबु आस खिंम जाक्दीम्माक्त। मिनु याकूब नु यूहन्ना यो येसु नु काथा बाक्सा बाक्त। 30 मिनु जाक्दीम्मानु, सिमोन आ शिमी जरो पा गोलशो बाक्माक्त। मिनु येसु कली तुइक्पदमे बाक्त। 31 मिनु येसु मेको आ नेक्था लशा, आ गुइ ग्याइशशा पोक्गा बाक्त। मोपा पोक्गानु, जरो जाम्माक्त। मिनु सेस दुम्शा, मेको आन कली मान पा थुल्मी बाक्त।

32 मिनु नां रिक्मेनु, मेको सहर डा मुरपुकीमी रोइ पशो नु वोलम सुम्शो मुर नेल्ल आन कली चाक्मे बाक्त। 33 सहर डा मुर नेल्ल खिं डा लाप्चो आ डोंइती खुम्समा बाक्त। 34 मिनु येसुमी रोइ पशो शुश मुर आन कली सापदा बाक्त। मिनु शुश वोल आन कली हुइइशा खेरमी बाक्त। वोल आन कली लोत्र पचा मगेवा बाक्त। मारदे हना वोलपुकीमी येसु कली तुइइशो बाक्तेक्म। प्रेरित १६:१७-१८

35 आ दीसा सुनी नां मसोव्रथु, येसु बोक्शा मेकेर रे गाक्शा, सुइ मबाक्तीकेमी जाक्दीशशा, प्रार्थना पवा बाक्त। मत्ती १४:२३; मत्ती २६:३६; लूका ५:१६; लूका ११:१ 36 मिनु सिमोन नु मेको नु बाक्बपुकीमी येसु कली माल्मे बाक्त। 37 मिनु गुम्शा, येसु कली “मुर नेल्लेमी इन कली माल्शो बाक्नीम” दे मदमे बाक्त। 38 मिनु येसुमी “मेकेर रे लशा, एर ओथ गाउं सहर हिरशा लय। मारदे हना मेकेर यो शेंथ जाक्ती” देंमाक्त। 39 मिनु गालील रागी नेल्ल हिरशा, गुम्तीक खिंमी शेंबाक्माक्त। वोल आन कली खेरबाक्माक्त।

कोर पाइब कली सापाइशो

मत्ती ८:२-४; लूका ५:१२-१६

40 मिनु कोर पाइब का जाक्शा, येसु आ डोंइती आ पोक्च थेक्शा “सापाइक्चा दाक्ताक्नी हना, आं कली सापाइक्ने चाप्नीनी” दे सेउ पशा पुना बाक्त। 41 मिनु येसुमी शिशी पा आ गुइ दिंशा, कोर पाइब कली थिशा “गो सापाइक्चा दाक्नुड। साडो” देंमाक्त। 42 मो देंमेनु, कोर सामाक्त। 43 मिनु येसुमी “सुइ कली मशेंदो। मर्कूस ३:१२ 44 चढेब आ

डोंइती लशा, इ साशो रां कोंइदो। मिनु मुर नेल्ल आन कली ‘गो साती’ दे तुइक्पाइक्चा कली मोसाम देशो खोदेशो पा चढेवो” दे माइश्शा सोइक्ता बाक्त। मर्कूस ७:३६; लेवी १४:२-३२ 45 मिनु साशो मुर मेकेर लशा, दोपा सामे, मेको लोव्र तेइ तेइ ब्रपदा बाक्त। मोदेशो लोव्र ब्रतीके येसु सहर सहरमी गाक्ने मचबा बाक्त। मोपतीके शुश मुर मबाक्तीकेमी बाक्माक्त। तन्न मुरपुकी तेइ तेइ रे जाक्बाक्मा बाक्त।

2

गुइ खोइली मदुक्ब कली सापाइश्शो

मत्ती ९:१-८; लूका ५:१७-२६; यूहन्ना १:१९-२७

1 नाक्त का निक्शी नोले कापेरनाउम लेम्माक्त। मिनु मुरपुकीमी “येसु खिंमी बाक्ब” दे तुइक्तमे बाक्त। 2 मिनु मेकेर शुश मुर खुम्सीशा, लाप्चोमी यो मुरपुकी देल्मा बाक्त। मिनु येसुमी मेको आन कली परमप्रभु यावे आ लोव्र शेंदीमी बाक्त। 3 मिनु ४ जना मुरपुकीमी गुइ खोइल मदुक्ब मुर का कुरशा चाक्मे बाक्त। 4 शुश मुर देल्लतीके येसु आ डोंइती चाक्दीन्ने मचाप्मे बाक्त। मिनु खिं डोइश्शा, फुल्लु याक्शा, ओंइतीके सेल्मे बाक्त। मिनु गुइ खोइल मदुक्ब कली कुरशो ब्राख्ये एर ओंथ डोरीम पाइश्शा, ओंखां पा येसु आ डोंइती तोक्गामे बाक्त। 5 मिनु येसुमी मेको आन कली मो पशो तशा, थमा सुइय्यीमी बाक्त, दे तुइक्ता बाक्त। मिनु गुइ खोइली मदुक्ब कली “आं तौ, इ पाप क्याम्साक्व” देंमाक्त। 6 मेकेर सास्त्रीपुकी यो बाक्शो बाक्मा बाक्त। 7 मेकोपुकीमी येसु आ लोव्र नेंशा, आन थुंमी “दोदेशो लोव्र पवा? परमप्रभु यावे कली शुक्शी पाइबाक्त। सुमी पाप क्याम्ने चाप्बा डा?” दे मिम्तमे बाक्त। भजन संग्रह १३०:४; यसैया ४:३, २५ 8 मिनु येसुमी आन मिम्शो तुइश्शा, मेको आन कली “मारदे मोदेशो मिम्तीनी? 9 गुइ खोइल मदुक्ब कली ‘इ पाप क्याम्साक्व’ देंचा देय ‘छुल बोक्शा, इ ब्राख्ये कुरशा, एर ओंथ हिरशा कोंइदो’ देंचा, तेको सक्ति कोंइतीक लोव्र बाक्बा? 10 रागीमी जरमेशोमी पाप क्याम्चा अधिकार तशो बाक्ब, दे गेपुकीमी यो तुइक्ताक्नी” देंमाक्त। मिनु गुइ खोइली मदुक्ब कली 11 “छुल बोक्शा, इ ब्राख्ये कुरशा, इ खिं लेतो” दे मदा बाक्त। 12 मिनु नेल्ल आन डोंइती मेको बोक्शा, आ ब्राख्ये जो गुप्शा कुरशा, गाक्माक्त। मिनु नेल्लेमी छक लाक्शा “ओदेशो छक लाक्चा डा गेय मुल सम्म गेनायो मतशो नय” देंशा, परमप्रभु यावे कली ठेयब सेल्मे बाक्त।

लेवी कली ब्रेशो

मत्ती ९:९-१३; लूका ५:२७-३२

13 मिनु येसु मेकेर रे लशा, लेंशा समुन्द्र आ नेक्था बाक्माक्त। मिनु मेकेर शुश मुर देल्मा बाक्त। मिनु येसुमी मेको आन कली शेंदीमी बाक्त। 14 मिनु मेकेर रे लशा, तिरो पोक्ब अल्फयस आ तौ लेवी कली तिरो पोक्तीकेमी बाक्शो तशा “आं नोले खोइय्यी” दे ब्रेत्ता बाक्त। मिनु मेको बोक्शा, आ नोले खोदा बाक्त।

15 मिनु लेवी आ खिंमी जना जन बाक्मानु, तिरो पोक्ब नु पापी शुश नु काथा जामे बाक्त। मारदे हना शुशेमी येसु आ नोले खोदमे बाक्त। 16 मिनु फरिसी आन दाते डा सास्त्रीपुकीमी येसु कली पापी नु तिरो पोक्बपुकी नु काथा बाक्शा जशो तशा, येसु आ शेंसीब आन कली “मारदे तिरो पोक्बपुकी, पापीपुकी नु काथा बाक्शा जाइबा?” देंमा बाक्त। 17 मिनु येसुमी मेको आन लोव्र नेंशा, मो देंब आन कली “रोइ मपशो मुर डाक्टर ममालनीम। रोइ पशो मुर ला डाक्टर मालनीम। ठीक पाइब कली ममाइ, पापी आन कली ब्रेत्थ जाक्शो नड” दे माइक्मी बाक्त।

माइजा बाक्चा

मत्ती ९:१४-१७; लूका ५:३३-३८

18 यूहन्ना आ शेंसीबपुकी नु फरिसीपुकी माइजा बाक्बाक्मा बाक्त। मिनु मुरपुकीमी येसु आ नेक्था जाक्शा “यूहन्ना आ शेंसीबपुकी नु फरिसी आन शेंसीबपुकी माइजा बाक्नीम। इन शेंसीबपुकी चहिं माइजा मबाक्नीम। मारदे मो पशो नमी?” दे हिल्लो पामे बाक्त। फरिसी रिती थिती सेल्शा, रिम्शो पचा कली कोव्रब यो बाक्शो बाक्तेक्म। 19 मिनु मोदें हिल्लो पाइब आन कली येसुमी “जन्तीपुकी ग्युम्ले नु बाक्मानु, माइजा बाक्ने मचाप्नीम। 20 काबु चहिं ग्युम्ले नु फ्राचा पुंडसीनीम। मिनु माइजा बाक्नीम। 21 सुइमी माइत वामी नक वा क्येप्शा मफेरनीम। फेरतेक्म हना, नक वा चुप्शा, माइत वा कली खाक्शा, डोंइती डा गाक्शो क्येडा ठेयब सेल्ब। मारदे हना माइत नु नक मगारब। 22 सुइमी माइत कुशुल के थैलोमी नक अडगुर शांबु कुर मपाइनीम। कुर पाम्तेक्म हना, नक अडगुर शांबु बोरशा, थैलो खाक्शा क्युप्ब। थैलो यो गाक्ब। नक शांबु नक थैलोमी ला गारब” दे शेंदीमी बाक्त।

नाइक्तीक नाक्त आ पर्बम लोत्र
मत्ती १२:१-८; लूका ६:१-५

23 मिनु काबु नाइक्तीक नाक्त येसु नु आ शेंसीबपुकी चेरब रू लां गाकमा बाक्त। मिनु गाकमानु, शेंसीबपुकीमी चेरब बाला शोइक्चा गोत्रमे बाक्त। 24 मिनु फरिसीपुकीमी येसु कली “कोव्रडीन, नाइक्तीक नाक्तीमी पचा मदुम्ब गेय मारदे पाइनीमी?” दे मदमे बाक्त। 25 मिनु येसुमी “दाऊद नु आ चारचपुकी शोत्रलु बेकमानु, दाऊदमी मार पचा, मेको ब्रेक्शो लोत्र गेनायो मपढेनी? 26 टेयब चढेब अबीयाथार आ पालामी दाऊद परमप्रभु यावे आ खिं ओव्रशा, परमप्रभु यावे कली चढेशो शोब्ले शोल्शा जशा, आ चारच आन कली यो जचा गेवा बाक्त, दे मपढेनी? मेको शोब्ले चढेबपुकीमी ला जाइबाकमा बाक्त। अर्को मुरपुकीमी जचा मदुम्ब बाकमाक्त। १सामुएल २१:७; लेवी २४:९ 27 नाइक्तीक नाक्त मुर आन कली वोइश्शो बाक्ब। मुरपुकी नाइक्तीक नाक्त कली ममाइ। प्रस्थान २०:१० 28 मोपतीके रागीम जरमेशो दा नाइक्तीक नाक्त मार पचा, मार मपचा मेको अधिकार पाइब बाक्ब” दे शेंदीमी बाक्त।

3

नाइक्तीक नाक्त आ पर्बम लोत्र
मत्ती १२:९-१४; लूका ६:६-११

1 मिनु येसु ग्रुम्तीक खिं लेंशा ओव्रमाक्त। मेकेर गुइ सोव्रशो मुर का बाकमाक्त। 2 मिनु फरिसी नु सास्त्रीपुकीमी “नाइक्तीक नाक्ती सापाइक्तीक गेय पाइबा को” दे योव्रकी पा कोव्रडमे बाक्त, मारदे हना दोस गेचा माल्शो बाकमा बाक्त। 3 मिनु येसुमी गुइ सोव्रशो मुर कली “एक पिचो” दे मदा बाक्त। 4 मिनु योव्रकी पा कोव्रब आन कली “नाइक्तीक नाक्त शिशी पचा देय मरिम्शो गेय पचा? ब्रोंइचा गेचा देय साइक्चा? तेको लोत्र अरेतीक लोत्र नु गारबा?” दे हिल्लो पवानु, सिक्सी पामे बाक्त। 5 मिनु सिक्सी पा बाक्शो तशा, आ थुं खाइश्शा गाइश्शा, मेको आन कली का का पा कोव्रशा, गुइ सोव्रशो कली “इ गुइ दिंदो” दे मदा बाक्त। मिनु मेकोमी गुइ दिंसेनु सामाक्त। 6 मिनु फरिसीपुकी गूशा, हेरोदी आन कली शो शु खुष्शा “मेको कली दोपा साइक्चा ताइनय” दे लोत्रसी पामे बाक्त।

मुर आन कली सापाइश्शो
मत्ती १२:१५-१६; लूका ६:१७-१९

7 मिनु नोले येसु नु आ शेंसीबपुकी सहर रे गाक्शा, गालील डा समुन्द्र आ नेक्था जाक्दीम्मा बाक्त। शुश मुरुमी आन नोले खोदमे बाक्त। मेको खोइक्बपुकी ते ते डा बाकमा बाक्त देंशा हना, गालील नु यहूदीया रागी डा, मत्ती ४:२५ 8 यरूसलेम सहर डा, इदुमेआ रागी डा, यर्दन खोला आइक्ची हांबु डा टायर नु सीदोन सहर डा बाकमा बाक्त। मेकोपुकीमी येसु आ पशो गेय आ पर्बम शुश लोत्र नेंशा जाक्मा बाक्त। 9 मिनु येसुमी आ शेंसीब आन कली “डोंगा का चाक्शा वोतीन” देंमाक्त। मारदे हना शुश मुरपुकीमी नेप्शा चुशा, येसु आ नेक्था जाक्चा बोल पामे बाक्त। 10 येसुमी रोइ पाइब शुश आन कली सापदा बाक्त। रोइ पाइबपुकीमी “थिचा तडल” दे आ नेक्था जाक्मा बाक्त। 11 ग्रांग्रा दिचा डा वोलपुकीमी येसु कली तशा, पोक्च थेक्शा “परमप्रभु यावे आ तौ ननी” दे वाइ ब्रेम्मा बाक्त। लूका ४:४१ 12 मिनु येसुमी “एको लोत्र मब्रपाइक्चा” दे माइक्मी बाक्त। मर्कुस १:४३-४४

१२ जना शेंसीबपुकी वोइश्शो
मत्ती १०:१-४; लूका ६:१२-१६

13 काबु येसु डांडा डोंइसे बाक्त। मिनु सु सु आन कली योव्रडा, मेको आन कली आ नेक्था ब्रेत्ता बाक्त। मिनु मेको ब्रेश्शोपुकी जाक्मा बाक्त। 14 आं नु काथा बाक्चा कली नु शेंथ सोइक्चा कली 15 वोल खेरतीक अधिकार तशा बाक्मल, दे १२ जना आन कली वोइक्मी बाक्त। 16 मेको १२ जना आन नें सिमोन आ याइनी नें पत्रुस वोदा बाक्त। 17 जब्दी आ तौ याकूब नु आ लोकब यूहन्ना, मेको आस कली बोअनेरगेस नें वोदा बाक्त। बोअनेरगेस देंशो “बुंबु आ तौ नस” दे रुम्सीब। लूका ९:५४ 18 मिनु अन्द्रीयास, फिलीप, बारथोलोमाइ, मत्ती, थोमास, अल्फयस आ तौ याकूब, थदेयस, सिमोन कनानी 19 नु यहूदा इस्कारीयोती बाक्मा बाक्त। यहूदा चहिं नोले येसु कली साइक्ब आन कली लां कोइब दुम्माक्त।

येसु नु आ खिं डा मुर

20 मिनू लेंशा शुश मुर खुम्समानु, येसु नु आ शेंसीबपुकी जचा कली यो नाइक्चा मतामे बाक्त। 21 मिनू येसु आ खिं डा मुरपुकीमी मेको नेशा “आ निप्स ग्यशो दुम्माक्त, दोपा यो खिं लाइक्चा” दे ब्रथ लमा बाक्त। मर्कूस ६:४; यूहन्ना ७:५; यूहन्ना ८:८४

येसु नु वोल्पुकी

मत्ती १२:२४-३२; लूका ११:१४-२३

22 यरूसलेम रे यिशो सास्त्रीपुकीमी “बेल्जीबुलमी सुम्शो बाक्माक्त। वोल् आन पिप आ सक्तिमी वोल् आन कली खेरबाक्माक्त” देंमा बाक्त। मत्ती ९:३४ 23 मिनू येसुमी मेको आन कली आ नेक्था ब्रेशशा, कथा सेल्शा “सैतानमी सैतान कली खेरने चाप्बा डा? 24 राज्य का डा मुरपुकी जिशा ब्राशा गाक्तेक्म हना, मेको राज्य जाम्शा लाइब। 25 खिं का डा मुरपुकी जिम्तेक्म हना, मेको खिं मलीब। 26 सैतान आ राज्यम जिशा ब्रातेक्म हना, आ राज्य नुप्शा लाइब। 27 बोल्यो मुर आ खिंम सुइ खुइ पथ ओव्रने मचाप्नीम। बोल्यो मुर कली फ्रेशा पाइशशा वोइशशा ला, आ मारेइ मारेइ खुइ पने चाम्सीब। 28 नोफा दाइशशा नेनीन, मुरपुकीमी पाप पाम्तेक्म हना यो, आन पशो पाप क्याम्चा ताइनीम। मरिम्शो लोव्र पाम्तेक्म हना यो, मेको पाप यो क्याम्चा ताइनीम। 29 तन्न परमप्रभु यावे आ सोक्त आ पर्बम मरिम्शो लोव्र पशो पाप चहिं मक्याम्सीब। मोदेशो लोव्र पाइब आ पाप गेना हना यो लीब” देंमाक्त। हिबू ६:४-६ 30 मारदे हना मेकोपुकीमी येसु आ पर्बम “येसु ग्रान्रा दिचा डा वोल्म सुम्शो बाक्माक्त” देशो बाक्मा बाक्त। यूहन्ना १०:२०

येसु आ खिं डा मुर जाक्शो

मत्ती १२:४६-५०; लूका ८:१९-२१

31 मिनू येसु आ ममा नु आ लोकबपुकी आ बाक्तीक लाङगामी जाक्मा बाक्त। मिनू “गो गुम्थ जाक्तक” दे तुइक्पाइक्थ मुर सोइक्तमे बाक्त। 32 मेकोपुकी जाक्मानु, शुश मुर खुम्सीशा, येसु आ नेक्था बाक्शो बाक्मा बाक्त। मिनू मेको नेक्था बाक्बपुकीमी “इन ममा नु इन लोकबम लोकब लाङगाम जाक्शा, इन कली ब्रेत्ताक्मे” दे मदमे बाक्त। 33 मिनू येसुमी “आं ममा नु आं लोकबपुकी सु नमी?” देशा, 34 आ नेक्था निशशा बाक्ब आन कली कोव्रशा “एकेर बाक्ब आं ममा नु आ लोकबपुकी नम। 35 परमप्रभु यावे आ दाक्शो पाइबपुकी आं लोकब नु आं ममा नम” देंमाक्त।

4

वांचेर शोक्शो कथा

मत्ती १३:१-९; लूका ८:४-८

1 मिनू समुन्द्र आ नेक्था लशा, मेकेर बाक्शा, लेंशा शेंचा गोवा बाक्त। मेकेर शुश मुर खुम्सीशो बाक्मा बाक्त। आं चहिं डोंगा काम डोइशशा बाक्शो बाक्माक्त। आ लोव्र नेंबपुकी समुन्द्र आ नेक्था बाक्मा बाक्त। 2 मिनू कथा सेल्शा, शुश लोव्र शेंदा बाक्त।

3 मिनू शेंना शेंन “नेनीने, मुर का वांचेर शोक्थ लमाक्त। 4 मिनू ब्वारानु, गेडा का निक्शी लांमी जुक्तमे बाक्त। मिनू चिक्बीमी गुप्शा जामे बाक्त। 5 गेडा का निक्शी ग्याङ्ग्रो खपीमी जुक्तमे बाक्त। मिनू शुश खप मबाक्तीके थें थु बुक्शा, जिव जाव वामा बाक्त। 6 तन्न नां पवानु, सोल सुल बेक्मा बाक्त, मारदे हना शाक्श थोक्चा मतथु सोव्रमा बाक्त। 7 का निक्शी चू आ दातेमी जुक्तमे बाक्त। मिनू चूमी सुम्शा, बारचा मगेवा बाक्त। मिनू मसिम्माक्त। 8 का निक्शी चहिं रिम्शो खपीम जुक्तमे बाक्त। मिनू वाशा बारशा, शुश ग्रेल्शा, गेडा का के ३०, ६०, सहे का सम्म सिम्मा बाक्त” दे शेंदीमी बाक्त। 9 मिनू “सु के नेंब नोफा बाक्मे, मेकोमी नेंनल” देंमाक्त।

वांचेर शोक्शो कथा आ अर्थ

मत्ती १३:१०-१७; लूका ८:९-१०

10 मिनू आ लोव्र नेंबपुकी गाक्मा नोले, येसु नु गाक्ब नु आ १२ जना शेंसीबपुकीमी कथा सेल्शा शेंशो लोव्र आ पर्बम हिल्लो पामे बाक्त। 11 मिनू येसुमी “परमप्रभु यावे आ राज्य दोदेशो बाक्ब दे इन कली रुप्तीक थुं गेशो बाक्त। लाङगाम बाक्ब आन कली चहिं कथा सेल्शा शेंनुडमी। 12 मारदे हना आन मिक्चीमी कोव्रनीम, तन्न मताइनीम। आन नोफामी नेंनीम तन्न मरुप्नीम। कोव्रशा रुप्तेक्म हना, आन थुं लेशशा, आन पाप क्याम्चा ताम वा” देंमाक्त। यसैया ६:९-१०

वांचेर शोक्ब आ पर्बम शेंशो

मत्ती १३:१८-२३; लूका ८:११-१५

13 मिनु येसुमी “मेको कथा आ अर्थ मरुप्नी? मेको लायो मरुप्नी हना, अरु कथा डा शेंतीक दोपा रुप्ने चाप्नीनी? 14 वांचेर शोक्बमी परमप्रभु यावे आ लोत्र शोक्ब। 15 लांमी शोक्शो दोदेशो बाक्नीम देशा हना, लोत्र नेन्मेनु, सैतानमी आन थुंमी रुप्शो लोत्र योल्ब। 16 ग्याडग्रो खपीम शोक्शो खोदेशोपुकीमी लोत्र नेंशा, बिश्शा ग्येरसीनीम। 17 तन्न शाक्श थोक्चा मतथु, शुश मलीनीम। लोत्र आ पर्बम श्येत गेचा पुंइसाक्म हना, थु प्रोइशा गाक्नीम। 18 चू आ दातेमी जुक्शो खोदेशोपुकीमी लोत्र नेंनीम। 19 तन्न दोपा ठेयब दुम्नुडा? दोपा क्येट चेमु? दोपा मारेइ मारेइ ताइनुडा? दे मिम्शा, आ थुंमी तेक्ब। मिनु आ नेंशो लोत्रमी फल मसिप्ब। 20 रिम्शो खपीम शोक्शो खोदेशोपुकीमी चहिं परमप्रभु यावे आ लोत्र नेंशा, आन थुंमी वोइक्नीम। मिनु गेडा का के ३०, ६० सहे का गेडा सम्म सिश्शा ग्रेल्नीम” दे शेंदीमी बाक्त।

परमप्रभु आ राज्य आ पर्बम शेंशो

लूका ८:१६-१८

21 मिनु येसुमी “मार, बत्ती पाथीमी गुप्शा वोइक्चा कली, खाट आगामी वोइक्चा कली दानीमी डा? मफारथु वोइक्नीमी, ममाइ डा? मत्ती ५:१५ 22 खुइश्शो मखुइक्सीब, सुम्शा वोइश्शो यो हाक्सीब। मत्ती १०:२६-२७; लूका १२:२ 23 सुइ के नेंब नोफा बाक्त हना, नेंनल” देंमाक्त।

24 मिनु येसुमी “गे मार नेंनी, मेको नोफा दाइश्शा नेनीने। दोपा नाक्शा गेनीनी, मोपा नाक्चा पुंइसीनीनी। मत्ती ७:२ 25 मारदे हना थीब तेम्शा गेचा पुंइसीब, मथीबमी चहिं आइक्के बाक्शो यो रोइक्चा पुंइसीब” दे शेंदीमी बाक्त। मत्ती १३:१२-१३

26 मिनु “परमप्रभु यावे आ राज्य ओदेशो बाक्ब, मुर कामी आ रूमी वांचेर शोक्ब। 27 मिनु नाक्दो इप्ब, सुनी बोक्ब। शोक्शो वांचेर दोपा वाबा, दे मारेइ मतुइक्ब। याकूब ५:७ 28 रू आमा मेको वापाइक्ब। वाशा, बाला गूशा, आख सिप्ब। 29 तन्न मीमेनु, रिक्ब। मारदे हना रिक्ची जाक्शो बाक्ब” देंमाक्त।

तोरी वांचेर

मत्ती १३:३१-३२; लूका १३:१८-१९

30 मिनु “परमप्रभु यावे आ राज्य मार नु गारबा? दोदेशो कथा सेल्शा रुप्पाइक्नन्नी? 31 वांचेर नेल्ल आन क्येडा आइक्च तोरी गेडा बाक्ब। 32 तोरी गेडा वाशा, शुश राशी पाइश्शा गिग घांस आन क्येडा ठेयब रवा दुम्ब। मेको रवामी चिक्बीमी ग्योत्र सेल्शा, फाम्सीशा बाक्ने चाप्नीम। परमप्रभु यावे आ राज्य मेको खोदेशोन बाक्ब” दे शेंदीमी बाक्त।

33 मुरपुकीमी रुप्ने चाप्मेक्ल, दे शुश कथा सेल्शा, परमप्रभु यावे आ लोत्र शेंना शेंन बाक्माक्त। 34 कथा मसेल्थु, लोत्र मपाइबाक्माक्त। आ शेंसीब आन कली मेको कथा आन अर्थ यो नेल्ल रुप्पाइक्बाक्माक्त।

फश गिवार तेक्शो

मत्ती ८:२३-२७; लूका ८:२२-२५

35 मोपा शेंने थुम्शा डा मिन, नां रिक्मेनु, येसुमी आ शेंसीब आन कली “समुन्द्र शोक्शा, आइक्ची हांबु जाक्दीय्य” देंमाक्त। 36 मिनु देल्शो मुरपुकी नु ब्राशा, डोंगा का डोइश्शा, लमा बाक्त। अरु डोंगा का निक्शी यो लमा बाक्त। 37 मिनु लमानु, ठेयब फश गिवार पचा गोवा बाक्त। फश गिवार पवानु, ब्वाक्कु डोंगामी ओत्रशा, गुम्चवा बाक्त। 38 येसु चहिं पिया थांइसीशा इप्शा निन्द्रा पवा बाक्त। शेंसीबपुकीमी “ए शेंब, गो नेल्ल ब्वाक्कुमी गुम्शा बेक्चांइतय दे ममिम्तीनी?” देशा सेंदमे बाक्त। 39 मिनु येसु बोक्शा, फश गिवार कली हुइश्शा, समुन्द्र कली “ब्वालेइ पावो, मदुक्को” देंमेनु, फश गिवार खा दिक्माक्त। मिनु सिक्सी दुम्माक्त। 40 मिनु शेंसीब आन कली “मारदे हिंनी? आं कली थमा मसुइक्नीनी?” देंमाक्त। 41 मेकोपुकी चहिं छक लाक्शा, शुश हिंशा “फश नु ब्वाक्कुमी यो आ लोत्र टीबाक्ताक्से। एको सु बाक्म माइ?” दे लोत्र पमुमा बाक्त।

5

वोल आन कली पोत्रम ओत्रचा गेशो

मत्ती ८:२८-३४; लूका ८:२६-३९

1 मिनु आइक्ची हांबु गेरासीनी आन रागी जाक्दीम्मा बाक्त। 2 मिनु डोंगा रे तोंइसीशा, येसुमी बेक्शो मुर थिम्तीके रे पिशो ग्रांरा दिचा डा वोलमी ब्रीशो मुर का कली गुमा बाक्त। 3 मेको मुर बेक्शो मुर थिम्तीकेमी बाक्बाक्माक्त। सुइमी मेको कली खिंमी वोइक्ने मचाप्मे बाक्त। 4 आ गुइ खोइली फ्रेंशा, साडलोमी पाइश्शा वोदमेनु यो, साडलो प्रोइश्शा

प्रोक्बाक्माक्त। सुइमी मेको कली ग्राशा तेक्ने मचाप्बाक्मा बाक्त। 5 नाकदो नाक्ती बेक्शो मुर थिम्तीके नु डांडामी हिरशा, वाइ ब्रेशशा, फुल्लुमी थोक्सीशा, तेस्सीशा, गार सेल्सी बाक्माक्त। 6 मेको मुरुमी येसु कली डोन रे तशा, दोरशा पिशा, सेउ पवा बाक्त। 7 मिनु ठेयब सेंदामी ग्रीशा “परमप्रभु यावे, नेल्ल क्येडा ठेयब आ तौ, गो निक्शी मार पमुसा डा? परमप्रभु आ नें थिशा, श्येत मगेयीनी दे पुंडनन्नी” देंमाक्त। मर्कूस १:२४ 8 मारदे हना येसुमी वोल कली “ए ग्रांग्रा दिचा डा वोल, एको मुर रे गूडो” दे माइशो बाक्माक्त। 9 मिनु “श्येत मगेयीनी, दे पुंडनन्नी” देंमेनु, येसुमी “इ नें मार में?” दे हिल्लो पवा बाक्त। मिनु मेकोमी “आं नें फौज बाक्ब, मारदे हना गो शुश बाक्नीकी” देंमाक्त। 10 मिनु “आंइ कली एको रागी रे मखेरचा नकी” दे पुना बाक्त। 11 मेको डांडामी शुश पोत्र जोन जोन बाक्शो बाक्मा बाक्त। 12 मोपतीके वोलपुकीमी “मेको पोत्र गे लशा, आन रांमी ओत्रचा गेकी” दे पुन्मे बाक्त। 13 मिनु येसुमी लशा, ओत्रचा गेमी बाक्त। मिनु ग्रांग्रा दिचा डा वोलपुकी मुर रे गूशा लशा, पोत्र आन रांमी ओत्रमा बाक्त। मिनु मेको हजार निक्शी पोत्रपुकी रोंगु रे यिना यिन, समुन्द्रमी गुम्शा बेक्मा बाक्त।

14 पोत्र योत्रबपुकीमी मो दुम्शो तशा, प्रोक्शा, सहर नु मेको रागीमी लोत्र ब्रपदमे बाक्त। मिनु मुरपुकीमी “मार दुम्मे? दो दुम्मे?” दे तुइक्थ जाक्मा बाक्त। 15 मिनु येसु आ नेक्था जाक्शा, डोंइती वोलमी ब्रीशो मुर वा फेक्शा, साशा, येसु नु निश्शो तामे बाक्त। मेको कली साशो तशा, हिंमा बाक्त। 16 मिनु आन मिक्चीमी तशो तुइक्बपुकीमी नक जाक्शो मुर आन कली मार मार दुम्मे, मेको नेल्ल शोत्रडमे बाक्त। 17 मिनु मुरपुकीमी येसु कली “आंइ रागी रे गूशा लने” देंमा बाक्त।

18 मिनु येसु डोंगामी डोंइसेनु, डोंइती वोलमी ब्रीशो मुरुमी “गे नु बाक्चा गेयीनी” दे पुना बाक्त। 19 मिनु येसुमी चहिं बाक्चा मगेथु “इ खिं लेशशा लशा, इ मुर आन कली प्रभुमी इ कली दोदेशो रिम्शो पवा, गिश शिशी कोंइदा तुइक्पतो” दे आ खिं सोइक्ता बाक्त। 20 मिनु लशा, आ खिंमी ला ममाइ, डेकापोलीस रागी नेल्ल हिरशा, येसुमी दोदेशो रिम्शो पवा शुश मुर आन कली तुइक्पदा बाक्त। मिनु नेंबपुकीमी “गिश रिम्शो दुम्माक्त” दे छक लाक्मा बाक्त। मर्कूस ७:३१

याइरस आ तमी

मत्ती ९:१८-२६; लूका ८:४०-५६

21 मिनु येसु डोंगा डोइशशा, समुन्द्र शोक्शा, आइक्ची हांबु जाक्दीशशा, समुन्द्र आ नेक्था बाक्माक्त। मिनु शुश मुर देल्मा बाक्त। 22 मिनु याइरस नें पाइशो गुम्तीक खिं डा ठेयब मुर का जाक्शा, येसु कली तशा, आ डोंइती बाप्शा, आ पोक्च थेक्शा 23 “आं तमी बेक्चा चिक्ताक्व। आं खिं लशा, इन गुइ आं आल आ तार वोतीने। मिनु आ रोइ साशा ब्रोंइब” दे पुना बाक्त। 24 मिनु येसु मेको नु लमाक्त।

मिनु शुश मुर मेको आ नोले खोइशशा, हुल पा क्राक्शा लमा बाक्त। 25 मेको शुश मुर आन दातेमी १२ बर्स डोंइती रे हुश याप्शो रोइ पाइब मीश मुर का यो बाक्माक्त। 26 शुश डाक्टर आन कली कोंइशा यो, आ रोइ मसाशो बाक्माक्त। डाक्टर आन गुइ रे पा शुश श्येत जशो बाक्माक्त। आ रोइ चहिं मसाथु, डोंइती क्येडा सारो दुम्शो बाक्माक्त। आ बाक्शो मारेइ मारेइ यो नुप्शो बाक्माक्त। 27 मेको मीश मुरुमी “मेको येसु माइशो मुरुमी रोइ पशो आन कली सापाइक्ने चाप्ब” देंशो लोत्र नेंशो बाक्माक्त। मिनु शुश मुर आन दातेमी ओत्रशा, नोले रे पा येसु आ फेक्शो वा थिवा बाक्त। 28 मारदे हना “आ फेक्शो वा थिचा ला ताता हना यो, सानुड” दे मिम्शो बाक्माक्त। 29 मिनु थिवानु, आ हुश याप्चा देक्माक्त। मिनु साडा बाक्त दे तुइक्ता बाक्त। 30 येसुमी आइक्के सापाइक्तीक सक्ति गूशो तुइशशा, फिर लेशशा कोत्रशा “सुम आं फेक्शो वा थिवा?” दे हिल्लो पवा बाक्त। लूका ६:१९ 31 मिनु शेंसीबपुकीमी “मिश डा मुरुमी इन कली नेप्नीम। मिनु गे ‘सुम थियी’ देंनीनी?” देंमा बाक्त। 32 येसुमी चहिं एर ओंथ नेल्ल मिक्च हिरशा, सुम थियी दे तुइक्चा मला बाक्त। 33 मिनु मीश मुरुमी हिंशा खिंखि पा पिशा, येसु आ डोंइती बाप्शा, पोक्च थेक्शा, लोत्र नेल्ल शोत्रडा बाक्त। 34 मिनु येसुमी “आं तमी, गे थमा सुइक्तीवी, मिनु इ रोइ साते। इ थुं नाइशशा बाक्को। मुल सास डा सास बाक्को” देंशा डा मिन सोइक्ता बाक्त।

35 मोपा येसुमी मीश मुर नु लोत्र पवानु, याइरस आ खिं रे जाक्शो मुरपुकीमी याइरस कली “इ तमी बेक्त। शेंब कली मारदे श्येत गेचा” दे मदमे बाक्त। 36 येसुमी मेको आन देंशो मनैखु पा, याइरस कली “महिनी। थमा सुइक्ना सुइक्न बाक्को” देंमाक्त। 37 मिनु आ नोले खोइक्ब आन कली लचा मगेथु, पत्रुस, याकूब नु आ लोकब यूहन्ना आन कली ला काथा लदा बाक्त। मत्ती १७:१ 38 मिनु जाक्दीशशा, रोंका पा डाक्ब मुर शुश तवा बाक्त। 39 मिनु खिं ओत्रशा, डाक्ब आन कली “मारदे रोंका पा डाक्नीनी? मेको आल बेक्शो ममाइ, इप्शा बाक्शो बाक्ब” देंमाक्त।

यूहन्ना ११:११ 40 मिनु मेकोपुकीमी आ देशो थमा मसुदमे बाक्त। “हत्तै, दोदेशो लोव्र पचा” देमानु, येसुमी मेको आन कली गुंडदीमी बाक्त। मिनु आल आ आम आफ नु आ शेंसीब आन कली आल आ बाक्तीके ओइदा बाक्त। 41 मिनु आल आ गुइ ग्याइशा “तालीता कूमी” देमाक्त। मेको लोव्र आ अर्थ “ए आल, बोक्को” देशो रुम्सीब। लूका ७:१४; प्रेरित ९:४० 42 मिनु आल छुल बोक्शा, एर ओंथ हिरसे बाक्त। मेको आल १२ बर्स डा बाक्माक्त। मिनु मेकेर बाक्बपुकी मोदेशो दुम्शो तशा, थाम्पा छक लाक्मा बाक्त। 43 मिनु येसुमी “सुइ आन कली मशेंचा। आल कली जचा गेसे” दे आम आफ आस कली देमाक्त।

6

मुरपुकीम येसु कली थमा मसुइशो

मत्ती १३:५३-५८; लूका ४:१६-३०

1 मिनु मेकेर रे लशा, आ बाक्तीके सहरमी जाक्दीम्माक्त। आ शेंसीबपुकी यो खोइशा लमा बाक्त। 2 मिनु नाइक्तीक नाक्त गुम्तीक खिं लशा, मुर आन कली शेंचा गोवा बाक्त। मिनु आ शेंशो नेंब शुशेमी छक लाक्शा “मेकोमी ओदेशो शेंचा ते रे शेंसे माइ? ओदेशो निप्स पाइशो लोव्र पचा दोपा जोक्गा? मेको आ गुइ रे दोदेशो सक्ति पाइशो गेय दुम्मे? यूहन्ना ७:१५ 3 शी मुइब ममाइ डा? मरीयम आ तौ ममाइ डा? याकूब, योसेस, यहूदा नु सिमोन आन लोकब ममाइ डा? आ लोकबपुकी गोपुकी नु मबाक्नीमी डा?” दे आन थुं मनुशो लोव्र पमुमा बाक्त। यूहन्ना ६:४२ 4 मिनु येसुम मो देंब आन कली “तेइ तेइ परमप्रभु यावे आ लोव्र पाइब आन कली ठेयब सेल्शा मान पाइनीम। आम रागी डा नु आम जात डा, आम खिं डा मुरपुकीमी चहिं महिक्नीम” दे माइक्मी बाक्त। 5 मिनु का निक्शी रोइ पशो मुर आन कली आ गुइम थिशा सापाइक्चा डा लाक्शा, अरु सक्ति पाइशो गेय कोइने मचबा बाक्त। 6 मिनु “थमा मसुइय्यीमी बाक्त” दे तुइशा, छक लाक्माक्त। मिनु एर ओंथ डा गाउं गाउंमी हिरशा, शेंना शेंन गाक्माक्त।

शेंसीब आन कली सोइशो

मत्ती १०:१, ५; लूका ९:१-६

7 मिनु काबु आ १२ जना शेंसीब आन कली ब्रेशा, निनिक्शी पा शेंथ सोइक्चा गोवा बाक्त। शेंसीब आन कली वोल खेरतीक सक्ति गेवा बाक्त। लूका १०:१ 8 मिनु “जचा थोव्रक, क्येट, झोला मारेइ मलाइक्चा। कोक्के कुरशा, 9 जुत्ता लिक्शा, फेक्तीक वा का ला फेक्शा गाक्कीन। 10 गाउं सहर जाक्दीशशा, खिं कामी ओव्रशा, बास बाक्कीन। मेको गाउं सहर रे गाक्की मजाक्म सम्म बाक्कीन। खिं खिं याक्शा मबाक्कीन। 11 इन कली बाक्चा मगेथु इन शेंशो लोव्र यो मनैतेक्म हना, इन खोइली डा फुरक थुर थुर पाइशशा गाक्कीन। इन मो पशोमी मेको आन कली चिन्ड दुम्ब” दे माइशशा सोइक्तीमी बाक्त। 12 मिनु शेंसीबपुकी लशा, मुर आन कली “इन थुं परमप्रभु यावे गे लेत्तीन” दे नैपाइक्ना पाइक्न गाक्मा बाक्त। 13 मिनु वोल आन कली गुंडशा खेरबाक्मा बाक्त। रोइ पशो मुर आन कली तेल खेक्शा, प्रार्थना पा सापाइक्बाक्मा बाक्त। याकूब ५:१४-१४

यूहन्ना कली साइशो

मत्ती १४:१-१२; लूका ९:७-९; लूका ३:१९-२०

14 मिनु हेरोद पिपमी मेको लोव्र नेंना बाक्त। मारदे हना येसु आ नें तेइ तेइ ब्रशो बाक्माक्त। का निक्शी मुरपुकीमी “ब्वाक्कुमी खुम्शा गुंडब यूहन्ना बेक्शो रे सेंचा पुंडसे बाक्त। मोपतीके सक्ति पाइशो गेय पाइबाक्माक्त” देबाक्मा बाक्त। 15 का निक्शीमी “एलीया बाक्माक्त” देबाक्मा बाक्त। का निक्शीमी “साइ डा परमप्रभु यावे आ लोव्र पाइब आन दाते डा का, माइ” देबाक्मा बाक्त। 16 हेरोद पिपमी मोदेशो लोव्र नेंना “गो आ पिया क्योरपाइशो यूहन्ना बेक्शो रे सेंचा पुंडसे बाक्त” देमाक्त। 17 हेरोदमी हेरोदनी कली ग्येरपाइशशा, यूहन्ना कली ग्याइक्पाइशशा, जेल्खानमी चोक्पाइशशा वोइशो बाक्माक्त। मारदे हना हेरोदमी आ लोकब फिलीप आ मीश लाइशो बाक्माक्त। 18 मिनु यूहन्नामी हेरोद कली “इन लोकब आ मीश लाइक्चा मदुम्ब” दे माइशो बाक्माक्त। प्रस्थान २०:१४; लेवी १८:१६ 19 मोदेशो आ पर्बम हेरोद आ मीशेमी चुरशा, यूहन्ना कली साइक्पाइक्चा माल्शो बाक्माक्त। 20 तन्न साइक्पाइक्ने मचाप्शो बाक्माक्त। मारदे हना हेरोद पिपमी “यूहन्ना ठीक पाइब नु रिम्शो थुं पाइशो मुर बाक्ब” दे तुइशा, यूहन्ना क्येडा हिंबाक्माक्त। मोपतीके साइक्चा मगेथु वोइशो बाक्माक्त। मिनु यूहन्ना आ लोव्र नेंनें दाक्शा, आ थुं ग्येत्थ लुकच दुम्शा, नोफा दाइशशा नेंबाक्माक्त।

21 काबु मार दुम्माक्त देशा हना, पिप आ जरमेशो नाक्ती मिम्चा कली हेरोद पिपमी आ दरवार डा गेय पाइब, सरकार डा गेय पाइब नु गालील डा ठेयब मुर नेल्ल आन कली ब्रेशा, ठेयब भोज का गेवा बाक्त। 22 मिनु हेरोदनी आ तमीमी सिल कोइदा बाक्त। मिनु हेरोद नु मेकेर खुम्सीशा बाक्बमी मेको सिल पशो तशा, शुश दाक्शा, नेल्ल ग्येरसमा बाक्त। मिनु पिपमी मेको मीश आल कली “इ दाक्शो पुनो। गो मेको गेनन” देमाक्त। 23 मिनु लोव्र थोक्शा “मार पुंइतीवी हना यो, इ पुंइशो नेल्ल गेनन। राज्य उइक्थ उइक्थ पा योक्शा यो गेनन” दे कसम जशा, लोव्र गेवा बाक्त। एस्तर ५:३-६ 24 मिनु मीश आल गूशा, आ ममा कली “मार पुनु माइ” दे हिल्लो पवानु, आ ममामी “ब्वाक्कुम खुम्शा गुंइब यूहन्ना आ पिया गेचा नड, दे पुनो” देमाक्त। 25 मिनु मीश आल फ्रा लेशा, ओव्रशा पिप कली “ब्वाक्कुम खुम्शा गुंइब यूहन्ना आ पिया थालमी कुर पा गेयीनी” दे पुना बाक्त। 26 मेको आ पुंइशो नेंशा, पिप आ थुं शुश खाइक्माक्त। तन्न मेकेर बाक्ब आन कुल कसम जशा डा मिन “इ पुंइशो गेनन” देतीके “मगेनन” देने मचबा बाक्त। 27 मोपतीके सिपाइ का कली “लशा, यूहन्ना आ पिया क्योरशा चाक्को” दे सोइक्ता बाक्त। 28 मिनु आ पिया थालम कुर पा चाक्शा, मीश आल कली गेवा बाक्त। मिनु मीश आलमी आ ममा कली गेवा बाक्त। 29 मिनु यूहन्ना आ शेंसीबपुकीमी “यूहन्ना साइक्चा पुंइसे बाक्त” देशो नेंशा, जेल्खानमी लशा, आ बेक्शो रां लाइशशा, थिम्मे बाक्त।

शुश मुर आन कली रूथ्री थुल्शो

मत्ती १४:१३-२१; लूका ९:१०-१७; यूहन्ना ६:१-१३

30 येसु आ सोइशोपुकी लशा शेंशा, लेशा जाक्मा बाक्त। मिनु मार पामे, मार शेंदमे, मेको लोव्र येसु कली शोव्रडमे बाक्त। लूका ९:१०; लूका १०:१७ 31 मिनु येसुमी “मुर मबाक्तीके लशा नांइसय” देमाक्त, मारदे हना शुश मुर गुम्थ जाक्बाक्मा बाक्त। मिनु येसु नु आ शेंसीबपुकीमी जचा कली यो नाइक्चा मतामे बाक्त।

32 मिनु डोंगा डोइशशा, समुन्द्र शोक्शा लमा बाक्त। मुर मबाक्तीके जाक्दीशशा, नाइक्चा, दे थुं पामे बाक्त। 33 तन्न शुश मुरुमी येसु नु आ शेंसीब आन कली लशो तुइशशा, डोंगाम डोइशशा तशा, आइक्ची हांबु गे लमा बाक्त दे तुइशशा, समुन्द्र हिरशा, दोरशा जाक्दीम्मा बाक्त। 34 मिनु येसु डोंगा रे तोंइसीशा, शुश मुर देल्शा बाक्शो तशा, शिशी पवा बाक्त। मारदे हना मेको आन कली गोठला मपाइशशा भेडा खोदेशो दुम्शो तामी बाक्त। मिनु शुश लोव्र शेंचा गोवा बाक्त। मत्ती ९:३६

35 मिनु शेंस डा शेंस पवानु, नां रिक्चवा बाक्त। मिनु शेंसीबपुकीमी येसु कली “मुर मबाक्तीके बाक्ब, नां रिक्चापुतु। 36 एको देल्शो मुर आन कली सोइक्चा। मारदे हना गाउं सहर लशा, आम कली जचा थोव्रक ग्याप्मेक्ल” दे मदमेनु, मर्कूस ८:१-९ 37 येसुमी “गेपुकीमी एको आन कली जचा गेने” दे माइक्मी बाक्त। मिनु शेंसीबपुकीमी “गोपुकी लशा, सहे निक्शी देनार खोइ डा शोब्ले ग्याप्शा, चाक्शा, थुल्चा देनी?” दे हिल्लो पामेनु, देनार का नाक्त का डा गाल्च बाक्त। मेको रोम डा चांदी के क्येट बाक्त। 38 “शोब्ले दोशो कुरनी? कोव्रथ लने” देमाक्त। मिनु कोव्रशा “शोब्ले ५ ओटा नु डांइ निक्शी बाक्त” देमा बाक्त। 39 मिनु येसुमी मुर आन कली गिग घांस बाक्तीके दिममी “लस्कर पा निप्पतीन” दे माइक्मी बाक्त। 40 मिनु सहे, सहे नु ५०, ५० डा लस्कर पा निस्समा बाक्त। 41 मिनु येसुमी शोब्ले नु डांइ शेशा, सरीड गे कोव्रशा “परमप्रभु गे रिम्शो पाइब बाक्नीनी” देशा, शोब्ले जिक्शा, निप्पाइशशा मुर आन कली “योक्शा गेने” दे आ शेंसीब आन कली गेवा बाक्त। डांइ यो योक्पाइक्मी बाक्त। मर्कूस ७:३४ 42 मिनु नेल्लेमी रूथ्री जामे बाक्त। 43 मिनु जशा, हेंशो शोब्ले नु डांइ गुप्मेनु, १२ डालो ब्रीमाक्त। 44 जाइबपुकी वोंइश मुर ला ५ हजार बाक्मा बाक्त।

येसु ब्वाक्कु तार गाक्शो

मत्ती १४:२२-३३; यूहन्ना ६:१५-२१

45 मिनु येसुमी आ शेंसीब आन कली “आं डोंइती लशा, समुन्द्र शोक्शा, बेथसैदा सहरमी जाक्दीतीन” दे डोंगामी डोइक्पाइशशा, सोइक्तीमी बाक्त। 46 मिनु नोले प्रार्थना पथ डांडा डोंइसे बाक्त। 47 मिनु नां रिक्मेनु, डोंगा समुन्द्रमी बाक्माक्त। येसु चहिं डांडाम बाक्माक्त। 48 मिनु येसुमी आ शेंसीबपुकीमी श्येत जामे बाक्त, दे तुइक्ता बाक्त। मारदे हना फशेमी डोंगा तेक्गा बाक्त। मिनु नां सोव्रचावानु, येसु ब्वाक्कु तारी गाक्शा पिमाक्त। 49 “मेको आन कली दाम पाइक्नुड” दे मिम्शा, पेट्चावानु, शेंसीबपुकीमी येसु कली ब्वाक्कु तारी गाक्शो तशा, वोल दाप्शा, हिंशा वाइ ब्रेम्मा बाक्त। 50 मारदे हना नेल्लेमी तामे बाक्त। मिनु शुश हिंमा बाक्त। मिनु येसुमी मेको आन कली सेशशा “महिनीन, गो नड, इन थुं बारपतीन” देमाक्त। 51 मिनु डोंगा डोंइसे बाक्त। मिनु फश गिवार दिक्माक्त। मिनु शेंसीबपुकी थाम्पा

छक लाक्मा बाक्त। मर्कूस ४:३९ 52 दोपा शोब्ले बारपदा, दे मारेइ ममिम्शो बाक्मा बाक्त। मारदे हना रुप्चा थुं मपाइबाक्मा बाक्त। मर्कूस ८:१७

रोइ पाइब आन कली सापाइशो

मत्ती १४:३४-३६

53 मिनु समुन्द्र शोक्शा, गेनेसरेथ जाक्दीम्मा बाक्त। 54 मिनु डोंगा रे तोइसामानु, मुरपुकीमी येसु बाक्ब दे तुइक्तमे बाक्त। 55 मिनु येसु ते ते लमे, मेक मेक दोरशा लशा, रोइ पशो आन कली कुरशा, आ नेक्था चाक्मे बाक्त। 56 येसु गाउं सहर ते ते लमे, मेक मेक रोइ पशो आन कली चाक्बाक्मा बाक्त। मिनु येसु कली “इन फेक्शो वा थिचा गेयीनी” दे पुंइबाक्मा बाक्त। मिनु सु सुमी आ फेक्शो वा थीमे, मेकोपुकी साबाक्मा बाक्त। मर्कूस ५:२७-२८; प्रेरित ५:१५; प्रेरित १९:११-१२

7

साइ डा पतीके आ पर्बम शेंशो

मत्ती १५:१-२०

1 फरिसीपुकी नु सास्त्री का निक्शी यरूसलेम रे यिशा, येसु आ बाक्तीकेम जाक्मा बाक्त। 2 मिनु काथा बाक्मानु, येसु आ शेंसीबपुकीमी गुइ मचिक्थु जशो तामे बाक्त। 3 फरिसी नु यहूदी नेल्लेमी गुइ मचिक्थु मजाइनीम। आन जोक्ब तुइक्ब खाल्पापुकीमी वोइशो पतीके नेल्ल पाइनीम। 4 बजार लशा लेशशा, खिं जाक्शा, चोत्रखेसीशा ला जाइनीम। कचौरा, लोटा, गाग्री, नित्तीके नेल्ल चोत्रखेचा माल्ब। मेको मोदेशो पतीके शुश पाइनीम। मत्ती २३:२५ 5 मोपतीके येसु आ शेंसीबपुकीमी गुइ मचिक्थु जशो तशा, येसु कली “इन शेंसीबपुकीमी किकी पिपीमी वोइशो रिती थिती मारदे मपाइनीमी? मचोत्रखेसीथु गुइ मचिक्थु जाइबाक्तेक्म” दे मदमे बाक्त। 6 मिनु येसुमी मेको आन कली “गे कपटीपुकी, यसैयामी पशो नोले दुम्ब लोत्र इन कली गारमाक्त। मार ब्रेक्शो बाक्त देशा हना ‘मेकोपुकीमी शोत्र रे पा ला आं कली मान पाइनीम। आन थुंमी चहिं मदाक्नीम, आं देशो यो मपाइनीम। यसैया २९:१३ 7 आं कली सेउ पखु पा, परमप्रभु यावे आ लोत्र बाक्त, दे शेंनीमी, तन्न मुरुमी मिम्शो ला शेंनीम’ दे ब्रेक्शो बाक्त। यसैया २९:१३ 8 परमप्रभु यावे आ अरेशो लोत्र प्रोंइशा, मुरुमी वोइशो पतीके पाइनीनी” दे माइक्मी बाक्त। 9 मिनु लोत्र बोइशशा “गिश जोक्ब तुइक्ब ननी। परमप्रभु यावे आ देशो शेंचा प्रोंइशा, आंम सेल्शो इन पतीके ला शेंनीनी। 10 मोसामी ब्रेक्शो लोत्र का ‘आम आफ आस कली मान पचा’ मिनु लोत्र का ‘सु सुमी आम आफ आस कली मरिम्शो लोत्र पामे, मेकोपुकी साइक्चा पुंइसमल’ दे ब्रेक्शो बाक्त। प्रस्थान २०:१२; प्रस्थान २१:१७ 11 गेपुकीमी चहिं सुमी आम आफ आस कली ‘इन कली गेचा माल्शो थोत्रक लाइशशा, कुरबन कली गेता’ दे माइक्बा, मेकोमी आम आफ आस कली मारेइ गेचा ममाल्ब दे शेंनीनी। ‘कुरबन गेता’ देशो चहिं ‘परमप्रभु कली गेता’ देशो रुम्सीब। 12 मोपा इन शेंतीक लोत्रमी आम आफ आस कली वारच पचा तेक्नीनी। 13 इन वोइशो रिती थितीमी परमप्रभु यावे आ देशो टिचा प्रोंइपाइक्नीनी। मिनु मोदेशो कपटी गेय शुश पाइनीनी” दे हुइक्तीमी बाक्त।

ग्रांग्रा दिशो सेल्ब थोत्रक

14 मिनु येसुमी मुर आन कली लेंशा ब्रेशशा “गे नेल्लेमी नोफा दाइशशा नेंशा रुपीने। 15 लाडगा रे ओव्रशो थोत्रकीमी मुर कली ग्रांग्रा दिशो सेल्ने मचाप्ब। मुर रे गूशो थोत्रकीमी चहिं मुर कली ग्रांग्रा दिशो सेल्ब। प्रेरित १०:१४-१५ 16 सु के नेंब नोफा बाक्मे, मेकोमी नेंनल” दे शेंदीमी बाक्त। मर्कूस ४:२३ 17 मिनु मुर आन कली प्रोंइशा, खिं ओव्रमेनु, आ शेंसीबपुकीमी “इन शेंशो लोत्र थमा पा मार रुम्सीबा?” दे हिल्लो पामे बाक्त। 18 मिनु येसुमी “मार, गे यो एको लोत्र मरुप्नी? लाडगा रे ओव्रशो थोत्रकीमी मुर कली ग्रांग्रा दिशो सेल्ने मचाप्ब, 19 मारदे हना मुर आ थुंमी मओव्रब। आ कोव्रजीम ओव्रशा ग्रिम्शा, कयी लां पा गूब, दे मतुइक्नीनी?” दे शेंदीमी बाक्त। मो देशोमी जचा थोत्रक नेल्ल ग्रांग्रा मबाक्नीम, दे शेंदा बाक्त। 20 मिनु मेकोमी “मुर रे मार गूबा, मेकोमी मुर कली ग्रांग्रा दिशो सेल्ब। 21 मुर आ थुं रे दोदेशो ग्रांग्रा दितीके गूब देशा हना, तेल्लेम पचा, खुइ पचा, साइक्चा, 22 ग्युंबे पशो मुर अर्को नु इप्चा, शिम पचा, जोल पचा, गेहे पचा, नें तोक्चा, ठेयब लेत्चा, ममिम्थु गेय पचा। 23 मोदेशो पतीके मुर आ थुंम बाक्ब। मेको गूशा, मुर कली ग्रांग्रा दिशो सेल्ब” दे शेंदीमी बाक्त।

सुरोफोनीसीया डा मीश मुर

मत्ती १५:२१-२८

24 मिनु बोक्शा, मेकेर रे टायर नु सीदोन गे लशा, खिं का ओव्रमाक्त। सुइमी मतुइक्तमेक्ल देंत हना यो, खुइश्शा बाक्ने मचबा बाक्त। 25 मिनु ग्रांरा दिचा डा वोल्म सुम्शो आइक्च आल आ ममामी “येसु जाक्माक्त” देशो नेंशा, येसु आ बाक्तीके जाक्दीम्माक्त। 26 मेको मीश मुर अर्को रागी डा, सुरोफोनीसीयामी जरमेशो डा बाक्माक्त। मिनु मेको जाक्शा, येसु आ डोंइती खुम्की पा बाप्शा “आं तमी रे वोल् गुंडीदीने” दे पुना बाक्त। 27 मिनु येसुमी “डोंइती आल आन कली थुल्चा माल्ब। आल आन कली गेचा माल्शो शोब्ले कुचुम आन कली गेचा मदुम्ब” दे मदा बाक्त। 28 मिनु मेको मीश मुरुमी “मदुम्ब, प्रभु, तन्न कुचुमपुकीमी यो आलपुकीमी तोक्शो शोब्ले जचा ताइनीम” देमाक्त। 29 मिनु येसुमी “इ मो देंतीके इ पुंइशो गेतन। वोल् इ तमी रे गूत” दे मदा बाक्त। 30 मिनु आ खिं लेशशा जाक्मेनु, वोल् गूशा, आल सेस दुम्शा इप्शो बाक्माक्त।

नोफा मनेंब कली सापाइश्शो

31 मिनु टायर रे लेशशा, सीदोन नु डेकापोलीस सहर दाते लां पा लशा, गालील डा समुन्द्र जाक्दीम्माक्त। मत्ती १५:२९-३१; मर्कूस ५:२० 32 मिनु नोफा मनेंब मुर का चाक्शा “एको तार इन गुइ वोतीने” दे पुन्मे बाक्त। 33 मिनु येसुमी मेको नोफा मनेंब कली हुल रे फ्राशा लदा बाक्त। मिनु आ ब्रेप्चो मुर आ नोफामी ओंइशा, थुथु पा तोक्शा, नाक्चुकमी आ लें थिशा, 34 सरीड गे कोव्रशा, लाइश्शो सोक्त कीशा “हेफाता” दे मदा बाक्त। मेको चहिं “रोक्सो” देशो रुम्सीब। 35 मिनु आ नोफा रोकसीशा, नोफा नेंब दुम्माक्त। आ लें लोकसीशा, लोव्र पाइब दुम्माक्त। 36 मिनु “सुइ आन कली मशेंदीने” दे माइक्मी बाक्त। मशेंदीने माइक्मी बाक्त हना यो, मेकोपुकीमी तेइ तेइ शेंना शेंन गाक्मा बाक्त। मर्कूस १:४३-४५ 37 मिनु आ लोव्र नेंबपुकी थाम्पा छक लाक्शा “मेकोमी नेल्ल रिम्शो सेल्बाक्त। नोफा मनेंब आन कली नोफा नेंब सेल्बाक्त। लोव्र पस मजोक्ब आन कली लोव्र पाइब सेल्बाक्त” देमा बाक्त।

8

४ हजार मुर आन कली थुल्शो

मत्ती १५:३२-३९

1 मिनु लेंशा शुश मुर देल्शा बाक्शो बाक्मा बाक्त। मेकोपुकी नु मारेइ जचा थोव्रक मबाक्माक्त। मिनु येसुमी आ शेंसीब आन कली ब्रेश्शा 2 “एको आन कली शिशी पातामी। मारदे हना साबेर नाक्त रे मुल सम्म गो नु काथा बाक्शा, मारेइ जचा मतामे। मर्कूस ६:३४-४४ 3 जचा मगेथु आन खिं खिं सोइक्ताक्डमी हना, लांमी गाक्ना गाक्न थाइनीम। का निक्शी शुश डोन रे जाक्शो बाक्नीम” देमाक्त। 4 मिनु शेंसीबपुकीमी “ओदेशो गोरशो रागीमी इश डा मुर आन कली शोब्ले गेशा, दोपा रूपाइक्चा डा?” देमा बाक्त। 5 मिनु येसुमी “शोब्ले दोशो कुरनी?” दे हिल्लो पवानु “७ ओटा” देमा बाक्त। 6 मिनु मुर आन कली “निस्सीन” दे दिंममी निप्पपाइक्मी बाक्त। मिनु मेको ७ ओटा शोब्ले शेशा, परमप्रभु कली “गे रिम्शो पाइब बाक्नीनी” देशा, शोब्ले जिक्शा, शेंसीब आन कली गेशा, योक्पदा बाक्त। मिनु मेकोपुकीमी मुर आन कली गेमे बाक्त। 7 आइक्च डांइ का निक्शी यो बाक्माक्त। मेको डांइ यो शेशा “गे रिम्शो पाइब बाक्नीनी” देशा “योक्कीन” दे गेमी बाक्त। 8 मिनु मुरपुकीमी रूथ्री जामे बाक्त। जशा लीशो गुप्शा, ७ डालो प्रिंइमे बाक्त। 9 जाइबपुकी ४ हजार खोइ बाक्मा बाक्त। मिनु येसुमी मुर आन कली आन खिं खिं सोइक्ता बाक्त। 10 मिनु छुल छाल बोक्शा, आ शेंसीबपुकी नु डोंगा डोइश्शा, दल्मानुथा रागी जाक्दीम्मा बाक्त।

फरिसीमी चिन्ड कोव्रचा माल्शो

मत्ती १६:१-४

11 मिनु फरिसी जाक्शा, येसु आ थुं थाम्चा कली “सरीड डा चिन्ड का कोइदीकी” देमा बाक्त। यूहन्ना ६:३० 12 मिनु येसुमी लाइश्शो सोक्त कीशा “सिनाक्त मुलाक्त डा मुरपुकीमी मारदे चिन्ड कोव्रचा माल्नीमी? नोफा दाइश्शा नेनीन, चिन्ड का यो मकोइन्नी” देमाक्त। 13 मिनु मेको आन कली प्रोंइशा, डोंगा डोइश्शा, समुन्द्र शोक्शा, आइक्ची हांबु जाक्दीम्मा बाक्त।

फरिसी आन बोरब ओरुक्ती

मत्ती १६:५-१२

14 शेंसीबपुकीमी शोब्ले लाइक्चा प्रेंशो बाक्मा बाक्त। डोंगाम शोब्ले का ला लीशो बाक्माक्त। 15 मिनु येसुमी आ शेंसीब आन कली “नेनीने, फरिसीपुकी नु पिप हेरोद आन बोरपाइक्ब ओरुक्ती क्येडा होस पांइसीन” दे माइक्मी बाक्त। लूका १२:१; मर्कूस ३:६ 16 मिनु “शोब्ले कुरचा प्रेंदमे बाक्त, दे तुइश्शा, मो देंम को?” देमुमा बाक्त। 17 मिनु

येसुमी आन लोत्र तुइशशा “शोब्ले मबा दे मारदे शुश लोत्र पाइनीनी? गे मुल यो मारेइ मरुप्नीनी? ममिप्नीनी? तुइक्चा यो ममाल्नीनी? मर्कूस ६:५२ 18 मिक्च पाइशशो बाक्तीनी हना यो, मताइनीनी? नोफा पाइशशो बाक्तीनी हना यो, मनेनीनी? मुल यो मारेइ मिम्ने मचाप्नीनी? मत्ती ११:१३,१६ 19 गोम ५ ओटा शोब्ले जिक्शा योक्शा, ५ हजार मुर आन कली थुलुनु, जशा लीशो गिश डालो प्रिंदीनी?” देमेनु “१२ डालो” देमा बाक्त। मर्कूस ६:४१-४४ 20 “मिनु ७ ओटा शोब्लेमी ४ हजार मुर आन कली थुलुनु, जशा लीशो गिश डालो प्रिंदीनी?” देमेनु “७ डालो” देमा बाक्त। मर्कूस ८:८-९ 21 मिनु “मुल यो मारेइ मरुप्नीनी?” देमाक्त।

मिक्च मताइब कली सापाइशशो

22 येसु नु आ शेंसीबपुकी बेथसैदा जाक्दीम्मा बाक्त। मिनु मुरपुकीमी मिक्च मताइब का चाक्शा “मेको कली थिने” दे पुन्मे बाक्त। मर्कूस ६:५६ 23 मिनु येसुमी मिक्च मताइब कली गुइमी ग्याइशशा डा मिन, कीशा गाउं रे गुंइशा लदा बाक्त। मिनु आ मिक्चीम थुथु पा तोक्शा, आ गुइ आ तारी वोइशशा “मुल मार मार तवी?” दे हिल्लो पवा बाक्त। यूहन्ना ९:६ 24 मिनु मेकोमी इर गे कोव्रशा “मुरपुकी गाक्शो ताता, तन्न मेको मुरपुकी रवा खोदेशो तांडसाक्म” देमाक्त। 25 मिनु लेंशा आ गुइ आ मिक्च तारी वोदा बाक्त। मिनु मेकोमी कोव्रस डा कोव्रस पा तवा बाक्त। 26 मिनु येसुमी “गाउं हेरशा, इ खिं लावो” दे सोइक्ता बाक्त।

ख्रीस्तमी श्येत जचा माल्ब, दे शेंशो

मत्ती १६:१३-२०; लूका ९:१८-२१; यूहन्ना ६:६७-६९

27 येसु नु आ शेंसीबपुकी सिजरिया फिलिप्पी गे लमा बाक्त। मिनु लांमी गाक्मानु, येसुमी “मुरपुकीमी आं पबर्म मार देनीमी?” दे हिल्लो पवानु, 28 “का निक्शीमी ‘ब्वाक्कुम खुम्शा गुंइब यूहन्ना बाक्माक्त’ देनीम। का निक्शीमी ‘एलीया बाक्माक्त’ देनीम। का निक्शीमी ‘परमप्रभु यावे आ लोत्र पाइब का बाक्माक्त’ देनीम” दे मदमे बाक्त। मर्कूस ६:१५ 29 मिनु येसुमी “गेपुकी चहिं आं कली सु सुइय्यीनी?” दे हिल्लो पवानु, पत्रुसमी “गे ख्रीस्त बाक्नीनी” देमाक्त। 30 मिनु आ शेंसीब आन कली “एको ख्रीस्त बाक्ब, दे सुइ आन कली मशेंदीन” दे माइक्मी बाक्त। मर्कूस ९:९

साइक्चा पुंइसीचा आ पबर्म शेंशो

मत्ती १६:२१-२३; लूका ९:२२

31 मिनु येसुमी आ शेंसीब आन कली “रागीम जरमेशोमी शुश श्येत जचा माल्ब। जोक्ब तुइक्ब खाल्पा, ठेयब चढेब नु सास्त्रीपुकीमी मेको कली मब्राइनीम, साइक्पाइक्नीम। मिनु बेक्शो आ नित्थ नाक्ती सेंसीब” दे लोत्र मखुइक्थु शेंदीमी बाक्त। मर्कूस ४:३१; मर्कूस १०:३२-३४ 32 मिनु पत्रुसमी येसु कली एर आइक्ची लाइशशा, हुइक्ता बाक्त। 33 मिनु येसु हिरशा, अर्को शेंसीबपुकी गे कोव्रशा “ए सैतान, इ कुल मकोइदी। परमप्रभु यावे आ मिम्शो ममाइ, मुर आन देशो नेंबाक्ते” दे पत्रुस कली हुइक्ता बाक्त।

दोपा ख्रीस्त आ नोले खोइक्चा

मत्ती १६:२४-२६; लूका ९:२३-२७

34 मिनु आ शेंसीबपुकी नु मेकेर देल्शो आन कली ब्रेशशा “सुमी आं नोले खोइक्चा थुं पाइबा, मेकोमी आंम दला दाक्स पचा प्रोइशा, श्येत जचा महिंथु, आं नोले खोइय्यील। 35 सुमी आंम कली प्रोइचा माल्बा, मेको जाम्शा लाइब। सुमी आं पबर्म नु परमप्रभु यावे आ लोत्र आ पबर्म आंम कली जिम्मा गेबा, मेको ब्रोंइब। मत्ती १०:१९ 36 रागी नेल्ल आंम के सेल्ने चाप्ब, तन्न बेक्त हना, मेको मार रिम्शो दुम्बा डा? 37 मारदे हना गे मार गेशा ब्रोंइने चाप्नीनी डा? 38 सुमी हेंथे गाक्ब नु पाप पाइब आन पालामी आं पबर्म नु आं लोत्र आ पबर्म मुर आन कली देंचा मुने पाइबा, मेको आ पबर्म रागीम जरमेशोमी यो आ आफ आ छेडछेड नु आ स्वर्ग डा गेय पाइबपुकी नु जाक्मेनु मेको कली तशा मुने पाइब” दे माइक्मी बाक्त। मत्ती १०:३३

9

1 मिनु “नोफा दाइशशा नेनीने, मुल गो नु काथा बाक्शो का निक्शीमी परमप्रभु यावे आ राज्य सक्ति पाइशशा जाक्शो मतामे सम्म मबेक्नीम” देमाक्त।

येसु आ रां फाइशशो

मत्ती १७:१-१३; लूका ९:२८-३६

2 मिनु ६ नाक्त नोले येसुमी पत्रुस, याकूब नु यूहन्ना, सां आन कली सुइ मबाक्तीके डांडामी लदा बाक्त। मिनु मेको आन डोंइती येसु फांडसे बाक्त। 3 दोपा फांडसे बाक्त देंशा हना, आ फेक्शो वा बुबु पा जिलील बुश दुम्शो तामे बाक्त। मोदेशो बुश सुइमी सेल्ले मचाप्नीम। 4 मिनु एलीया नु मोसा गूशो तामे बाक्त। मेको निक्शीमी येसु नु लोव्रसी पाम्से बाक्त। 5 मिनु पत्रुसमी येसु कली “ए शेंब, इं कली एकेर बाक्चा रिम्शो दुम्ब। बाक्तीके सां सेल्य। इन कली का, मोसा कली का नु एलीया कली का सेल्य” देंमाक्त। 6 मारदे हना मार देंचा दे मतुइक्ता बाक्त। मिनु शुश हिंमा बाक्त। 7 मिनु गोस्सुमी नेल्ल आन कली गिल्मी बाक्त। गोस्स आगा रे सेंदा का गूशा “एको आं दाक्शो तौ बाक्ब। आ लोव्र नेनीने” देंशो नेन्मे बाक्त। मर्कूस १:११; २पत्रुस १:१७ 8 मिनु एर ओंथ कोव्रडमेनु, येसु ला तामे बाक्त।

9 मिनु डांडा रे बुम्मानु, येसुमी “रागीम जरमेशो बेक्शो रे सेंचा मपुंडसे सम्म इन तशो सुइ आन कली मशेंदीने” दे माइक्मी बाक्त। मर्कूस ८:३० 10 मिनु मोदेशो दुम्शो सुइ आन कली मशेंदमे बाक्त। “बेक्शो रे सेंचा पुंडसीचा देंशो मार बाक्म माइ” दे हिल्लो पमुमा बाक्त। 11 मिनु आ शेंसीबपुकीमी येसु कली “डोंइती एलीया जाक्चा माल्ब, दे सास्त्रीपुकीम शेंनीम। मारदे मोदें शेंनीमी?” दे हिल्लो पामेनु, 12 येसुमी “एलीया डोंइती जाक्शा, नेल्ल ठीक सेल्लब। मिनु रागीम जरमेशो श्येत जाइब नु महिक्सीशो दुम्ब, दे ब्रेक्शो बाक्बा, ममाइ डा? मलाकी ३:१३; यसैया ५३:३-५ 13 एलीया डोंइती जाक्त। मिनु आ पर्बम डोंइती ब्रेक्शो खोदेंशो दुम्शा, मेको कली मार पचा दाक्तमे, मेको पाम्तेक्म” दे शेंदीमी बाक्त। मत्ती ११:१४; १राजा १९:२-१०

वोलम तशो आल सापाइशो

मत्ती १७:१४-२०; लूका ९:३७-४२

14 मिनु अरु शेंसीब आन बाक्तीकेमी लेशशा जाक्शा, शुश मुर देल्लो नु सास्त्रीपुकीमी लीशो शेंसीब आन कली लोव्र हिल्लो पशो तामे बाक्त। 15 मिनु देल्लो मुरपुकीमी येसु कली तशा, छक लाक्शा, दोरशा पिशा, येसु कली सेउ पदमे बाक्त। 16 मिनु येसुमी “मेकोपुकी नु मार लोव्रसी पनी” दे हिल्लो पवानु, 17 देल्लो मुर आन दाते डा कामी “ए शेंब, आं तौ एक चाक्ता, मारदे हना वोल्मी तशा, लाटा दुम्शो बाक्ब। 18 वोल्मी सुमानु, गोल्लब। आ शोव्र रे बोग्यो गुंडब। आ खुइ शेक्ब। मिनु आ रां मदुक्ब दुम्ब। इन शेंसीब आन कली ‘वोल गुंडदीन’ दे पुंडता, तन्न वोल् गुंडने मचबेम” देंमाक्त। 19 मिनु येसुमी “गे थमा पा थमा मसुइक्बपुकी, गेना सम्म गेपुकी नु बाक्नुडा डा? ओदेंशो इन पशो गेना सम्म फाल्शा बाक्नुडा डा? रोइ पाइब कली चाक्कीन” दे माइक्मी बाक्त। 20 मिनु वोंइश आल कली येसु आ डोंइती चाक्मे बाक्त। मिनु वोल्मी येसु कली तवानु, आल तिड गोल्शा, रोम्सीशा, आ शोव्र रे बोग्यो गुंडदा बाक्त। 21 मिनु येसुमी आ आफ कली “गेना रे ओदेंशो दुम्शो?” दे हिल्लो पवानु, आ आफोमी “आइक्च रेन, 22 एको वोल्मी साइक्चा कली मीमी दुप्पदानु, ब्वाक्कुमी गुम्पदानु, शुश खेयप हेर हेरा बेक्त। गे मारेइ पने चाप्नीनी हना, शिशी पा एको श्येत जचा रे प्रोंइयीकी” देंमाक्त। 23 मिनु येसुमी “गे मारेइ पने चाप्नीनी कों देंनीनी। तन्न सु सुमी गेन चाप्नीनी देंशा, थमा सुइक्नीमी, मेकोपुकीमी आन पुंडशो ताइनीम” देंमाक्त। 24 मिनु आल आ आफोमी “थमा सुइक्ता, आं थमा मसुइक्ब थुं कली थमा सुइक्पतीने” दे थुं खाइशशा, डाक्शा देंमाक्त। 25 मिनु येसुमी शुश मुर आन कली एर ओंथ रे जाक्शो तशा, ग्रांरा दिचा डा वोल् कली “गे लाटा नु नोफा मनेंब वोल्, गेनायो लेंशा मओव्रचा डा पा गूशा लावो” दे हुइशशा, खेरा बाक्त। 26 मिनु वोल् वाइ ब्रेशशा, आल कली रोप्पाइशशा गूमाक्त। मिनु आल बेक्शो खोदेंशो दुम्माक्त। मुरपुकीमी “बेक्त” देंमा बाक्त। मर्कूस १:२६ 27 मिनु येसुमी आल आ गुइ ग्याइशशा पोक्गानु, राम्माक्त।

28 मिनु येसु नु आ शेंसीबपुकी खिं लमा बाक्त। मिनु शेंसीबपुकीमी “मारदे मेको वोल् कली गुंडने मचाप्का?” दे हिल्लो पामे बाक्त। 29 मिनु येसुमी “ओदेंशो वोल् कली प्रार्थना पशा ला गुंडने चाम्सीब” दे माइक्मी बाक्त।

रागीम जरमेशो श्येत जचा माल्लो

मत्ती १७:२२-२७; लूका ९:४३-४५

30 मिनु मेकोपुकीमी “इं गाक्शो सुइम मतुइक्तमेक्ल” दे गालील लां पा गाक्मा बाक्त। 31 मारदे हना आ शेंसीब आन कली “रागीम जरमेशो दा मुर आन गुइमी गेशा, साइक्चा पुंडसीशा, आ नित्थ नाक्ती बेक्शो रे सेंसीब” दे शेंचा दाक्ता बाक्त। मर्कूस ८:३१; मर्कूस १०:३२-३४ 32 शेंसीबपुकीमी चहिं आ शेंशो मरुप्मे बाक्त। मिनु हिल्लो पचा यो हिंमा बाक्त। लूका १८:३-४

नेल्ल क्येडा ठेयब सु बाक्बा

मत्ती १८:१-५; लूका ९:४६-४८

33 मिनु कापेरनाउम जाकदीम्मा बाक्त। मिनु खिं का ओव्रशा, येसुमी आ शेंसीब आन कली “लांमी गाक्यानु, मार लोव्रसी पनी?” दे हिल्लो पवा बाक्त। 34 तन्न मेकोपुकी सिक्सी पामे बाक्त, मारदे हना लांमी गाक्यानु “नेल्ल क्येडा ठेयब सु बाक्या माइ?” दे लोव्र पशो बाक्मा बाक्त। 35 मिनु निशशा, शेंसीब आन कली आ नेक्था ब्रेशशा “नेल्ल क्येडा डोंइती दुम्चा कली नेल्ल क्येडा नोले दुम्शा, नेल्ल आन गेय पाइब दुम्चा माल्ब” देंमाक्त। मर्कूस १०:४३-४४; मत्ती २९:११; लूका २२:२६-२७ 36 मिनु आल का आन दातेमी चाक्शा, आल कली मुष्शा 37 “सुमी आं नेमी ओदेशो आल कली ब्राइबा, मेकोमी आं कली ब्राइब। आं कली ब्राइबमी आं कली ममाइ, तन्न आं कली सोइक्ब कली यो ब्राइब” दे माइक्मी बाक्त। मत्ती १०:४०

रिम्शो पचा मतेक्चा
लूका ९:४९-५०

38 यूहन्नामी येसु कली “ए शेंब, गोपुकी नु मगाक्ब मुर कामी इन नें थिशा, वोल् आन कली खेरशो ताइतक। मिनु मो पचा मदुम्ब, दे माइक्तक” देंमाक्त। गन्ती १०:२७-२८ 39 मिनु येसुमी “मदुम्ब, दे मदेंचा, मारदे हना आं नें थिशा, ठेयब गेय पाइबमी आं पर्बम लोव्र मक्याल्ब। 40 इं कली मरिम्शो मपाइब मेको इं मुरुन बाक्ब। मत्ती १२:३०; लूका ११:२३ 41 नोफा दाइशशा नेनीने, सुमी आं नें थिशा, ख्रीस्त आ मुर नम देंशा, इन कली लोटा का ब्वाक्कु तूचा गेबा, मेकोमी दोपा यो आ इनाम ताइब। मत्ती १०:४२

थमा सुइक्चा मतेक्चा

मत्ती १८:६-९; लूका १७:१-२

42 सुमी आं कली थमा सुइक्ब आइक्च आल आ थमा सुइक्तीक क्याल्बा, मेको कली आ शुरम यात क्युक्शा, समुन्द्रमी ताइशशा साइक्चा रिम्शो बाक्ब। 43 इ गुइमी तेक्तु हना, मेको गुइ खोतो। मारदे हना निम्फा गुइ पाइशशा दुम्शा, गेनायो मकाप्ब नरक डा मीम ओव्रचा क्येडा, दुंडे दुम्शा, परमप्रभु यावे आ राज्यमी ओव्रचा तचा रिम्शो बाक्ब। मत्ती ५:३० 44 नरकमी बाक्ब आन लुस्पु मबेक्नीम, मी यो मकाप्ब। 45 इ खोइलीमी तेक्तु हना, मेको खोतो। मारदे हना खोइली निम्फा पाइशशा दुम्शा नरकम ओव्रचा क्येडा, खोरन्डे दुम्शा, परमप्रभु यावे आ राज्यमी ओव्रचा तचा रिम्शो बाक्ब। 46 नरकमी बाक्ब आन लुस्पु मबेक्नीम, मी यो मकाप्ब। 47 इ मिक्चीमी तेक्तु हना, मेको मिक्च फेशशा ताइक्तो। मारदे हना मिक्च निम्फा पाइशशा दुम्शा, नरकम ओव्रचा क्येडा, काना दुम्शा, परमप्रभु यावे आ राज्यमी ओव्रचा तचा रिम्शो बाक्ब। मत्ती ५:२९ 48 नरकमी बाक्ब आन लुस्पु मबेक्नीम, मी यो मकाप्ब। यसैया ६६:२४

49 नेल्ल मीम याक्पाइक्चा पुंडसीनीम। मारेइ चढेमेनु, हिक्सी सुष्शो चढेनीम। लेवी २:१३; गन्ती १८:१९ 50 हिक्सी डाम्ताक्व हना, ब्रोव्रब। हिक्सी आ डाम्तीक जाम्त हना, मारम डाम्पाइक्चा डा? हिक्सी डाम्शो दुमीन। मिनु दुशा बाक्कीन” दे शेंदीमी बाक्त। मत्ती ५:१३; लूका १४:१४; कलस्सी ४:६

10

1 मिनु मेकेर रे लशा, यहूदीया रागी नु यर्दन खोला आइक्ची हांबु जाकदीम्मा बाक्त। मिनु लेंशा शुश मुर देल्मा बाक्त। मिनु तेइ तेइ गाक्शा, दोपा शेंदा, मोपा मेको आन कली यो शेंदा बाक्त।

वोंइश मीश आस नाता

मत्ती १९:१-९

2 मिनु फरिसीपुकी जाक्शा, आ थुं थाम्चा कली “मीश कली प्रोंइचा दुम्बा देय मदुम्बा?” दे हिल्लो पामे बाक्त। 3 मिनु येसुमी “मोसामी इन कली मार पन देंमे?” देंमेनु 4 “छोड पत्र ब्रेक्शा, सोइक्चा दुम्ब देंत” देंमा बाक्त। ब्यवस्था २४:१; मत्ती ५:३१-३२ 5 मिनु येसुमी “मुरपुकीमी शिशी मपाइनीम, दे तुइशशा, मोदेशो पचा गेवा बाक्त। 6 नेल्ल क्येडा डोंइती परमप्रभु यावेमी वोंइश मुर नु मीश मुर सेल्टीम्सी। उत्पत्ती १:२७ 7 मोपतीके मुरुमी आम आफ प्रोंइशा, आ मीश नु गारशा बाक्ब। उत्पत्ती २:२४ 8 मिनु मेको निक्शी रां का दुम्नीस। मोपतीके वोंइश मीश निक्शी मनसी, निम्फा का नस। 9 परमप्रभु यावेमी कांइचीक सेल्लो आस कली मुरुमी मफ्रादमेक्ल” दे माइक्मी बाक्त।

10 मिनु खिंमी बाक्मेनु, आ शेंसीबपुकीमी “इन शेंशो मार रुम्सीबा” दे हिल्लो पामे बाक्त। 11 मिनु येसुमी “सुमी आ मीश प्रोंइशा, अर्को चाक्बा, मेकोमी वोंइश मीश आस नाता खोइक्ब। लूका १६:१८; १कोरिन्थी ७:८-११ 12 मीश मुरुमी आ वोंइश प्रोंइशा, अर्को खोइक्तु हना, मेकोमी यो वोंइश मीश आस नाता खोइक्ब” देंमाक्त।

येसु नु आलपुकी

मत्ती १९:१३-१५; लूका १८:१५-१७

13 मिनु येसुमी आ गुइ आल आन तारी वोदल दे आलपुकी चाकमे बाक्त। मिनु शेंसीबपुकीमी आल चाकब आन कली “मचाक्कीन” दे हुइक्तमे बाक्त। 14 मिनु येसुमी मेको तशा, आ थुं मनुथु, हुइक्ब आन कली “आल आन कली आं बाक्तीके जाक्चा गेने, मतेक्कीन। मारदे हना परमप्रभु यावे आ राज्य आल आन केन बाक्ब। 15 नोफा दाइशशा नेनीने, मुरपुकीमी आल आन थुं डा मिम्शो खोदेशो पा ममिम्ताकम हना, परमप्रभु यावे आ राज्यमी ओव्रचा मताइनीम” दे माइक्मी बाक्त। 16 मिनु आल आन कली मुष्शा, आ गुइ आन तारी वोइशशा, आसीक गेमी बाक्त।

शोंप आ पर्बम लोव्र

मत्ती १९:१-९

17 मिनु मेकेर रे लमेनु, मुर का दोरशा पिशा, येसु आ डोंइती पोक्च थेक्शा बाप्शा “शेंब, गे रिम्शो ननी। गेना हना यो ब्रोंइशा बाक्चा कली मार पचा मालनुडा?” दे हिल्लो पचा बाक्त। 18 मिनु येसुमी “मारदे आं कली रिम्शो मुर दे माइय्यी? सुइ रिम्शो मनमी। परमप्रभु यावे ला रिम्शो बाक्ब। 19 परमप्रभु यावे आ अरेशो लोव्र तुइक्नेवे। मसाइक्चा, वोंइश मीश आस नाता मखोइक्चा, खुइ मपचा, सांकछी बाक्शोनु, जोल मपचा, हिंच कोंइशा मारेइ मरोइक्चा, आम आफ आस कली मान पचा, दे ब्रेक्शो बाक्ब” दे मदा बाक्त। प्रस्थान २०:१२-१७ 20 मिनु मेकोमी “गो आल रेन मेको नेल्ल पन पन बाक्ती” देमेनु, 21 येसुमी मेको आ कुल शिरशा कोव्रशा, मेको कली दाक्शा “का चहिं मपवी। लशा, इ शोंप नेल्ल लेयशा, जचा फेक्चा मताइब आन कली योक्शा गेमी। मिनु लेशशा, आं नोले खोइय्यी। मिनु इ शोंप स्वर्गमी बाक्ब” देमाक्त। मर्कूस ८:३४; मत्ती १०:३८ 22 मेको लोव्र नेंशा, आ कुल राव किकपाइशशा, आ थुं खाइशशा, गाक्माक्त। मारदे हना मेको शुश शोंप पाइशशा मुर बाक्माक्त।

23 मिनु येसुमी एर ओंथ कोव्रशा, आ शेंसीब आन कली “शुश शोंप पाइशशा मुर परमप्रभु यावे आ राज्य ओव्रचा गिश श्येत बाक्बा” देमाक्त। 24 मेको लोव्र नेंशा, शेंसीबपुकी छक लाक्मा बाक्त। मिनु येसुमी लोव्र थोक्शा “आलपुकी, आन शोंपोम थमा सुइक्ब आन कली परमप्रभु यावे आ राज्य ओव्रचा शुश श्येत दुम्ब। 25 शोंप पाइशशा मुर परमप्रभु यावे आ राज्य ओव्रने चाप्चा क्येडा, दलओंठ लूजे आ पोलाम ग्रीने चाप्ब” देमाक्त। 26 मिनु शेंसीबपुकी थाम्पा छक लाक्शा “मो हना, सु ओव्रचा ताइबा डा?” देमुमा बाक्त। 27 मिनु येसुमी आन कुल गे कोव्रशा “मुरपुकीमी पने मचाप्नीम। तन्न परमप्रभु यावेमी पने चाप्ब, मारदे हना परमप्रभु यावेमी मारेइ मारेइ पने चाप्ब” दे माइक्मी बाक्त।

येसु आ नोले खोइक्ब आन इनाम

मत्ती १९:२७-३०; लूका १८:२८-३०

28 पत्रुसमी येसु कली “गो मारेइ मारेइ प्रोंइशा, इन नोले खोइक्तक” देमेनु, 29 येसुमी “नोफा दाइशशा नेनीन, सुमी आं पर्बम नु ग्येरपाइक्ब लोव्र आ पर्बम आ खिं, लोकबम लोकब, आम आफ, तमी तौ नु रू प्रोंइबा, 30 मेकोमी खेदा पा श्येत जचा पुंइसाक्ब हना यो, मुल आ प्रोंइशा क्येडा शुश खिं, लोकबम लोकब, आम आफ, तमी तौ नु रू ताइब। मिनु नोले गेना हना यो परमप्रभु यावे नु बाक्चा ताइब। 31 डोंइती दुम्शोपुकी नोले दुम्नीम। नोले दुम्शोपुकी डोंइती दुम्नीम” दे शेंदीमी बाक्त।

रागीम जरमेशो साइक्चा पुंइसीब देशो

मत्ती २१:१७-१९; लूका १८:३१-३४

32 मिनु यरूसलेम डा लां खोइशशा गाक्मानु, येसु नेल्ल आन डोंइती गाक्माक्त। आ नोले खोइक्बपुकी छक लाक्शा हिंमा बाक्त। मिनु १२ जना शेंसीब आन कली लेंशा आ नेक्था ब्रेशशा, आ कली मार दुम्बा दे तुइक्पाइक्चा गोवा बाक्त। मर्कूस ९:११ 33 मिनु “मुल यरूसलेम लाइनय। मिनु रागीम जरमेशो ठेयब चढेब नु सास्त्री आन गुइमी गेचा पुंइसीब। मिनु मेकोपुकीमी दोस गेशा, साइक्चा माल्ब, दे अर्को जात डा मुर आन गुइमी गेनीम। 34 मिनु मेकोपुकीमी शुक्शी पशा, आ कुलमी तोक्शा युक्नीम। मिनु साइक्नीम। मिनु बेक्शो आ नित्थ नाक्ती बेक्शो रे सेंसीब” दे तुइक्पाइक्मी बाक्त।

ठेयब सु बाक्बा?

मत्ती २०:२०-२८

35 मिनू जब्दी आ तौ याकूब नु यूहन्ना येसु आ नेक्था जाक्शा “ए शेंब, मार पुंडस्कु, मेको तस्कुल” दे पुन्से बाक्त। 36 मिनू येसुमी “मार पुंडनीसी?” दे हिल्लो पवानु, 37 मेको निक्शीमी “गे सक्ति पाइशो दुम्शा, हुकुम पाइब दुम्नीनु, का इन ग्युरा, का इन पेरा गे बाक्चा गेचा नस्कु” दे पुन्से बाक्त। 38 तन्न येसुमी “गे मार पुंडसी, मेको मरुप्नीसी। आं तूचा माल्शो कचौरा तूने चाप्नीसी? आं बुद पा श्येतम खुम्चा पुंडसीने चाप्नीसी?” देंमेनु मर्कूस १४:३६; लूका १२:५० 39 “चाप्नस्कु” देसा बाक्त। मिनू येसुमी “आं तूचा माल्शो कचौरा यो तूनीसी। आं बुद पा श्येतम खुम्चा यो पुंडसीनीसी। प्रेरित १२:२ 40 तन्न आं ग्युरा पेरा गे बाक्चा गेचा चहिं आं गुडमी ममाइ। परमप्रभु यावेमी योत्रचा पुंडसीशो मुर ला मेकेर बाक्चा ताइनीम” दे माइक्सी बाक्त।

41 मिनू शेंसीब १० जनामी मेको आस कली मोदेशो पुंडशो तशा “याकूब नु यूहन्ना दोदेशो बाक्सा” दे आन थुं मनुथु, लोत्र पमुमा बाक्त। लूका २२:२५-२७ 42 मिनू येसुमी नेल्ल आन कली खुप्शा “अर्को जात डा मुर आन कली हुकुम पाइनुड, दे मिम्बपुकीमी मुर आन कली दिप्शा वोइशशा, हुकुम पाइनीम, दे तुइक्नीनी। 43 तन्न इन दातेमी मोदेशो पचा मदुम्ब। सुमी ठेयब दुम्चा दाक्बा, मेको नेल्ल आन गेय पाइब दुम्चा माल्ब। 44 सु नेल्ल क्येडा डोंइती दुम्चा दाक्बा, मेको नेल्ल आन वाइल दुम्चा माल्ब। मर्कूस ९:३५; १पत्रुस ५:३ 45 मारदे हना रागीम जरमेशो यो मान पपांडसीचा कली ममाइ, तन्न वारच पथ नु शुश मुर आन कली प्रोंइचा कली आ गिंगं गेथ जाक्शो बाक्त” दे माइक्मी बाक्त।

मिक्च मताइब बारतीमै

मत्ती २०:२९-३४; लूका १८:३५-४३

46 मिनू यरीको सहरमी जाक्दीम्मा बाक्त। मिनू यरीको रे लशा, येसु नु आ शेंसीब आन नोले खोइशशा, शुश मुर गाक्मानु, तिमै आ तौ मिक्च मताइब पुंडब बारतीमै मेको लां उइ बाक्शो बाक्माक्त। 47 मिनू बारतीमैमी नासरथ डा येसु एको लां पिना पिन बाक्त देशो नेंशा “ए येसु, दाऊद आ तौ, शिशी पाइय्यीनी” दे वाइ ब्रेत्चा गोवा बाक्त। 48 मिनू शुशेमी “सिक्सी पावो” दे हुइक्तमे बाक्त। आं चहिं डोंइती क्येडा शुश वाइ ब्रेशशा “दाऊद आ तौ, शिशी पाइय्यीनी” दे ब्रेम्माक्त। 49 मिनू येसु खा दिक्शा “मेको कली एके ब्रेत्तीने” देंमाक्त। मिनू मिक्च मताइब कली “ठेयब थुं पावो। मिनू बोक्को। मारदे हना इ कली ब्रेत्ताक्व” दे मदमे बाक्त। 50 मिनू आ बरखी ताइशशा, छुल बोक्शा, येसु आ डोंइती जाक्माक्त। 51 मिनू येसुमी “इ कली मार पड, मार पुंडनेवे?” दे हिल्लो पवा बाक्त। मिनू मिक्च मताइबमी “ए शेंब, मिक्च ताइब सेल्यीनी” दे पुना बाक्त। 52 मिनू येसुमी “साशा लावो। इ थमा सुइशोमी साते” दे मदानु, ब्रा साशा मिक्च ताइब दुम्शा, येसु आ नोले खोदा बाक्त।

11

येसु यरूसलेमम जाक्दीशशो

मत्ती २१:१-११; लूका १९:२९-४०; यूहन्ना १२:१२-१९

1 मिनू यरूसलेम आ नेक्था जैतून डांडा बेथफागे नु बेथानी जाक्दीम्मा बाक्त। 2 मिनू येसुमी आ शेंसीब निक्शी आस कली “मेरे गाउं लसे। मिनू गाउं ओत्रसीनु, सुइ मडोइशशो गधा आ चाइक्ब पाइशशा, वोइशशो थित्नीसी। 3 मेको चाक्कीसे। मुरपुकीमी ‘मारदे लाइक्सी?’ देंतेक्म हना ‘प्रभु कली माल्ताक्व। नोले लेशशा सोइक्ब’ देंसीनु, लाइक्चा गेनीम” दे सोइक्तीम्सी बाक्त।

4 मिनू मेको निक्शी लशा, मेक जाक्दीशशा, लांमी लाप्चो आ डोंइती पाइशशो गधा आ चाइक्ब थित्से बाक्त। मिनू प्रोन्से बाक्त। 5 मेकेर बाक्ब मुरपुकीमी “मारदे प्रोंइसी?” देंमा बाक्त। 6 मिनू येसुमी देशो खोदेशो पा, लोत्र लेत्से बाक्त। मिनू लाइक्चा गेमे बाक्त। 7 मिनू गधा आ चाइक्ब चाक्से बाक्त। मिनू आन वासी ब्रामे बाक्त। मिनू येसु डोंइसे बाक्त।

8 मिनू शुशेमी आन बरखी लांमी ब्रामे बाक्त। अरुमी एर ओंथ डा राशी जिक्शा, लांमी ब्रामे बाक्त। 9 डोंइती नोले गाक्बपुकीमी “होसन्ना, प्रभु आ नेंमी जाक्ब ठेयब दुम्ल। होसन्ना आ देशो ‘परमप्रभु वारच पने’ बाक्ब। भजन संग्रह ११८:२५-२६ 10 मुल जाक्चशो इं किकी पिपी दाऊद आ राज्य कली जाइ। परमप्रभु कली होसन्ना” दे रेयके पा ठेयब सेल्ला सेल्लन गाक्मा बाक्त।

11 मिनू यरूसलेम जाक्दीशा, परमप्रभु यावे आ खिं ओत्रमाक्त। मिनू एर ओंथ मारेइ मारेइ कोत्रशा, आ शेंसीब १२ जना नु बेथानी लेम्माक्त। मारदे हना नां रिक्चशो बाक्माक्त।

फल मसिश्शो फोव्रशी रवा

मत्ती २१:१२-२२; लूका १९:४५-४८; यूहन्ना २:१३-१६

12 आ दीसा बेथानी रे पिशा, लांमी गाकमानु, येसु शोव्रलु बेक्माक्त। 13 मिनु इच्ची आइक्था सफा पाइश्शो फोव्रशी रवा तशा, फोव्रशी सिश्शो बाक्म कों दे कोव्रथ लमाक्त। मिनु जाक्दीश्शा कोव्रडानु, सफा ला तवा बाक्त। मारदे हना सिल्ची मजाक्शो बाक्माक्त। 14 मिनु “मुल डा मेरे सुइमी इ फल जचा मतामेक्ल” दे मदा बाक्त। आ शेंसीबपुकीमी मो देंशो नेन्मे बाक्त।

ग्याप्ब लेयब आन कली खेरशो

15 मिनु यरूसलेम जाक्दीम्मा बाक्त। जाक्दीश्शा येसु परमप्रभु यावे आ खिं ओव्रशा, मेकेर ग्याप्ब लेयब आन कली खेरचा गोवा बाक्त। क्येट फाइक्ब आन क्येट वोइक्तीके नु ढुकुर लेयब आन नित्तीके खोल्शा गेमी बाक्त। 16 मिनु सुइ कली मारेइ यो चाक्शा लेयचा मगेथु, 17 “जात जात डा मुरपुकीमी एकेर प्रार्थना पामेक्ल दे आं खिं वोइश्शो बाक्त दे ब्रेक्शो बाक्बा, ममाइ डा? गेपुकीमी चहिं खुइपुकीमी खुइ पा चाक्शा आन बाक्तीके पुक्खी सेल्टीनी” दे हुइक्तीमी बाक्त। यसैया ५६:७; येरमीया ७:११ 18 मिनु फरिसी नु सास्त्रीपुकीमी मेको नेंशा, दोपा साइक्चा दे लां कोव्रडमे बाक्त। तन्न येसु कली तशा, हिंमा बाक्त। मारदे हना मुर नेल्लेमी आ शेंशो नेंशा, छक लाक्बाक्मा बाक्त। 19 मिनु नां रिक्चावानु, येसु नु आ शेंसीबपुकी सहर रे लेम्मा बाक्त।

दल्गीर मपथु, प्रार्थना पचा

20 मिनु सुनी लां गाकमानु, फोव्रशी रवा आ डर रे पुं सम्म सोव्रशो तामे बाक्त। 21 मिनु पत्रुसमी ति फ्रुक्शा, येसु कली “ए शेंब, कोव्रडीन, इन सराप पशो फोव्रशी रवा सोव्रमाक्त” देमाक्त। 22 मिनु येसुमी मेको आन कली “परमप्रभु यावे कली थमा सुतीने। 23 नोफा दाइश्शा नेनीने, सुमी आं देंशो थमा दुम्ब, दे दल्गीर मपथु, मेको डांडा कली ‘एकेर रे समुन्द्रमी याक्सो’ देंत हना, मेको आ थमा सुइश्शोमी डांडा याक्सीशा लाइब। मर्कूस ९:२३; मत्ती १७:२० 24 मोपतीके ‘आं पुंइशो ताइनुड’ दे थमा सुइश्शा, प्रार्थना पा पुंइतीनी हना, इन पुंइशो ताइनीनी। मत्ती ७:७; यूहन्ना १४:१३; १यूहन्ना ५:१४-१५ 25 प्रार्थना पा बाक्नीनु, सुइ नु चुरशो बाक्तीनी हना, मेको कली माफ गेने। मिनु स्वर्गम बाक्ब इन आफोमी यो इन मरिम्शो पशो क्याम्शा माफ गेब। 26 माफ मगेतीनी हना, स्वर्गम बाक्ब इन आफोमी यो इन कली माफ मगेब” दे शेंदीमी बाक्त।

अधिकार आ पर्बम हिल्लो पशो

मत्ती २१:२३-२७; लूका २०:१-८

27 मिनु यरूसलेममी जाक्दीम्मा बाक्त। मिनु येसु परमप्रभु यावे आ खिंमी हिरसेनु, ठेयब चढेब, सास्त्री नु जोक्ब तुइक्ब खाल्पापुकी जाक्शा 28 “तेको अधिकारमी मोदेंशो पवी? मो पचा, दे सुमी अधिकार गेवे?” देमा बाक्त। 29 मिनु येसुमी “गो इन कली लोव्र का हिल्लो पाइनुड, मेको लोव्र लेत्तीने। मिनु तेको अधिकारमी एको गेय पडा शेंनन्नी। 30 यूहन्नामी मुर आन कली ब्वाक्कुमी खुम्शा ग्रुंइतीके अधिकार स्वर्ग रे तवा देय मुर रे तवा? लो देनीन” दे माइक्मीनु, 31 मेकोपुकीमी “स्वर्ग रे तवा बाक्त देंतय हना, मो हना यूहन्ना आ लोव्र मारदे थमा मसुइक्नी देंब। 32 मुर रे तवा बाक्त देंचा यो दोपा देंय” दे लोव्रसी पमुमा बाक्त। मोदेंशो देंचा हिंमा बाक्त। मारदे हना मुर नेल्लेमी यूहन्ना थमान परमप्रभु यावे आ लोव्र पाइब बाक्ब, दे थमा सुइश्शो बाक्मा बाक्त। लूका ७:२९-३० 33 मोपतीके “मतुइक्नीकी” देंमानु, येसुमी “मो हना तेको अधिकारमी एको गेय पडा दे गो यो मशेंनन्नी” दे माइक्मी बाक्त।

12

मरिम्शो बुम्था पाइब आन कथा

मत्ती २१:३३-४६; लूका २०:९-१९

1 मिनु येसुमी कथा सेल्शा, शेंचा गोवा बाक्त। मिनु “मुर कामी अडगुर खुम्शा, थारपु हिरशा, अडगुर खाक्तीक खाल्टा दोशा, धन्सार सेल्शा, बुम्था पाइब माल्शा, मेको आन कली गेशा वोइश्शा, अर्को रागी लमाक्त। यसैया ५:१-२ 2 मिनु अडगुर मीशा, सेक्ची जाक्मेनु, आ गेय पाइब का कली आ भाग पोक्थ सोइक्ता बाक्त। 3 मिनु मेको जाक्दीम्मेनु, बुम्था पाइबपुकीमी मेको कली तुप्शा, श्येतथ गुइ सोइक्तमे बाक्त। 4 मिनु लेंशा गेय पाइब का कली सोइक्ता बाक्त। मेको कली यो जिचा तोशा, पिया प्रोल्शा, गार सेल्शा सोइक्तमे बाक्त। २इतिहास ३६:१६ 5 मिनु

लेंशा का कली सोइक्तानु, मेको कली सदमे बाक्त। मोदें शुश खेयप गेय पाइब आन कली सोइक्तानु, का निक्शी आन कली तुप्मे बाक्त। का निक्शी आन कली सदमे बाक्त।

6 मिनु सोइक्ने चाप्चा डा का ला लीमाक्त। मेको आ दाक्शो तौ बाक्माक्त। मिनु 'आं तौ आ देशो टीनीम' दे मिम्शा, आ तौ कली सोइक्ता बाक्त। 7 मिनु बुम्था पाइबपुकीमी 'एको दा अडस ताइब बाक्त। लो साइक्चा। मिनु आ अडस नेल्ल इं केन दुम्ब' देंमुशा गारमा बाक्त। 8 मिनु ग्याइश्शा, साइश्शा, रू रे लाइश्शा ताइक्तमे बाक्त। हिबू १३:१२

9 मोदेशो दुम्त हना, रू आ होत्रपम मार पाइबा? जाक्शा, मेको बुम्था पाइब आन कली साइक्ब। मिनु आ रू अरु आन कली गेब। 10 'खिं सेल्बपुकीमी गारो प्रोव्रडमेनु, एको फुल्लु मगार, दे ताइक्तमे बाक्त। मेको मगारथु ताइश्शो फुल्लु चहिं सुर डा सुरे फुल्लु दुम्माक्त' दे ब्रेक्शो लोत्र मपढेनी? 11 मेको नेल्ल प्रभुमी पशो बाक्त। मिनु 'ओहो, गिश रिम्शो दुम्मे। एको छक लाक्चा डा बाक्ब' दे ब्रेक्शो बाक्ब" दे माइक्मी बाक्त। भजन संग्रह ११८:२२-२३ 12 मिनु "एको कथा इं कली कका देंमाक्त" दे रुप्शा, ग्याइक्पाइक्चा माल्मे बाक्त। तन्न शुश मुर देल्शो तशा हिंशा, ब्राशा लमा बाक्त।

तिरो थाप्चा देय मथाप्चा?

मत्ती २२:१५-२२; लूका २०:२०-२६

13 मिनु येसु कली लोत्र खाइक्पाइक्चा दे फरिसी नु हेरोदी का निक्शी येसु आ बाक्तीके सोइक्तमे बाक्त। 14 मिनु मेको सोइश्शोपुकी जाक्शा, येसु कली "शेंब, गे थमा पाइब ननी। मुर आन कुल मकोव्रथु सुइ तशा महिंथु, परमप्रभु यावे आ लोत्र थमा पा शेंनीनी, दे तुइक्नीकी। सिजर सरकार कली तिरो थाप्चान माल्ब देय मथाप्थु यो दुम्बा? 15 गोपुकीमी थाप्चा देय मथाप्चा? मार देंनीनी" दे हिल्लो पखु पा लोत्र खाइक्पाइक्चा माल्मे बाक्त। मिनु येसुमी मेको आन पचा माल्शो तुइश्शा, मेको आन कली "मारदे आं थुं थाम्नीनी? देनार का कोंइदीनी" देंमाक्त। देनार का नाक्त का डा गाल्च बाक्त। मेको रोम डा चांदी के क्येट बाक्त। 16 मिनु देनार का कोंइदमे बाक्त। मिनु येसुमी "एको सु आ नेमी खोइश्शो बाक्मे?" देंमेनु "सिजर आ नेमी खोइश्शो बाक्त" देंमा बाक्त। 17 मिनु येसुमी "सिजर आ मार मार बाक्मा, मेको सिजर कली गेने। परमप्रभु यावे आ मार मार बाक्मा, मेको परमप्रभु यावे कली गेने" दे माइक्मी बाक्त। मिनु नेल्ल छक लाक्मा बाक्त। रोमी १३:१७

बेक्शो रे सेंसीचा आ पर्बम शेंशो

मत्ती २२:२३-३३; लूका २०:२७-३८

18 मिनु सदुकीपुकी जाक्मा बाक्त। सदुकीपुकीमी बेक्शो रे मसेंसीब दे शेंनीम। मिनु येसु आ बाक्तीके जाक्शा 19 "ए शेंब, मोसामी बेक्शो लोत्रमी 'सुइ आ लोकब आल मथिथु बेक्त हना, मेकोमी आ भोग्यु वोंइसीशा, आ लोकब आ खिं डा मुर मजाम्मल, दे तमी तौ थिवल' दे बेक्शो बाक्त। ब्यवस्था २५:५-६ 20 मिनु खिं कामी ७ जना लोकब बाक्मा बाक्त। डोंइती जेठामी मीश चाक्गा बाक्त। मिनु आल मथिथु बेक्माक्त। 21 मिनु माइलामी आ भोग्यु वोंइसे बाक्त। मिनु आ यो आल मथिथु बेक्माक्त। मिनु साइलामी वोंइसे बाक्त। मेको यो आल मथिथु बेक्माक्त। 22 मोदेशो पा ७ जनान आल मथिथु, बेक्मा बाक्त। मिनु नोले मेको मीश मुर यो बेक्माक्त। 23 मुर बेक्शो रे सेंसीशा ब्रोंइमानु, मेको ७ जना वोंइश आन मीश दुम्शो मीश मुर तेको आ मीश दुम्बा?" दे हिल्लो पामे बाक्त। 24 मिनु येसुमी "गे परमप्रभु यावे आ लोत्र मरुप्नीनी। परमप्रभु यावे आ सक्ति यो मतुइक्नीनी। मोपतीके दूली मिम्नीनी, ममाइ? 25 बेक्शो रे सेंसीशा ब्रोंइमानु, मुरपुकीमी ग्युंबे मपाइनीम, स्वर्गम बाक्ब परमप्रभु यावे आ गेय पाइबपुकी खोदेशो दुम्नीम। 26 बेक्शो रे सेंसीचा आ पर्बम परमप्रभु यावेमी मोसा कली मी ब्रशो रवा आ नेक्था ग्रुम्शा 'अब्राहाम आ परमप्रभु यावे, इसहाक आ परमप्रभु यावे नु याकूब आ परमप्रभु यावे गो नड' दे मदा बाक्त दे मोसामी बेक्शो किताबमी बेक्शो बाक्ब। मेको लोत्र मपढेनी? प्रस्थान ३:६ 27 परमप्रभु यावे बेक्शो मुर आन परमप्रभु ममाइ, ब्रोंइशो आन परमप्रभु यावे बाक्ब। गे दूली मिम्बाक्नी बाक्त" दे माइक्मी बाक्त।

नेल्ल क्येडा तुइक्चा माल्शो लोत्र

मत्ती २२:३५-४०; लूका १०:२५-२८

28 मिनु सास्त्री कामी सदुकीपुकीमी येसु नु लोत्र पशो नेंशा, येसुमी मेको आन लोत्र लेन्ने चाप्बाक्त, दे रुप्शा डा मिन, येसु आ नेक्था जाक्शा "ए शेंब, परमप्रभु यावे आ अरेशो लोत्र तेको नेल्ल क्येडा डोंइती डा बाक्बा?" दे हिल्लो पवा बाक्त। 29 मिनु येसुमी "नेल्ल क्येडा डोंइती डा लोत्र एकोन बाक्ब 'ए इस्राएल नेनो, इ परमप्रभु यावे का बाक्ब।

30 थुं का पा, सोक्त का पा, मिम्तीके नु सक्ति नेल्लेमी परमप्रभु यावे, इ परमप्रभु कली दाक्तो' देशो एको लोत्र नेल्ल क्येडा डोंइती डा बाक्ब। ब्यवस्था ६:४-५ 31 मिनु आ नोले डा ठेयब लोत्र 'आंम इ कली दाक्शो खोदेशो पा इ नेक्था बाक्ब आन कली यो दाक्तो' देशो बाक्ब। एको लोत्र निक्शी क्येडा ठेयब लोत्र मबाक्ब" देंमाक्त। लेवी १९:१८ 32 मिनु सास्त्रीमी "शेंब, गे थमान ठीक लोत्र पाइतीनी। परमप्रभु यावे कानाइ बाक्ब। आ डा लाक्शा सुइ मबाक्ब। लूका २०:३९-४० 33 मिनु थुं का पा, रुप्तीक नु सक्ति नेल्लेमी परमप्रभु यावे कली दाक्चा, आंम कली दाक्शो खोदेशो पा इ नेक्था बाक्ब आन कली दाक्चा, देशो लोत्र नेल्ल क्येडा ठेयब बाक्त। मारेइ मारेइ क्योरशा चढेशो क्येडा मेको लोत्र टिशा पचा रिम्शो बाक्ब" देंमाक्त। १सामुएल १५:२२; होसे ६:६; मत्ती ९:१३ 34 मिनु येसुमी "एकोमी निप्स खाप्शो लोत्र पाइबाक्त" दे रुप्शा "गे परमप्रभु यावे आ राज्य रे डोन मबाक्नी बाक्त" दे मदा बाक्त। में डा मेरे हिंशा, सुइमी लोत्र हिल्लो मपामे बाक्त। प्रेरित २६:२७-२९

ख्रीस्त सु का आ तौ बाक्बा?

मत्ती २२:४१-४६; लूका २०:४१-४४

35 मिनु येसुमी परमप्रभु यावे आ खिंमी शेंना शेंन बाक्मेनु "ख्रीस्त दाऊद आ तौ बाक्माक्त, दे सास्त्रीपुकीमी दोपा शेंने चाप्नीमी डा? यसैया ११:१; यूहन्ना ७:४२; रोमी १:३ 36 दाऊदमी परमप्रभु यावे आ सोक्त रे पा 'प्रभुमी आं प्रभु कली इ जोरी सत्रु आन कली इ खोइली आगाम मवोदुमी सम्म आं ग्युरा गे बाक्को' देंत। भजन संग्रह ११०:१; २सामुएल २३:२ 37 दाऊदमी मेको कली प्रभु देंब। मिनु दोपा आ तौ दुम्ने चाप्बा डा?" दे शेंदा बाक्त। शुश मुरुमी आ शेंशो लोत्र नेंचा दाक्तमे बाक्त।

सास्त्री आन कली हुइशो

मत्ती २५:५-१४; लूका २०:४५-४७

38 मिनु शेंना शेंन "सास्त्री आन लोत्र क्येडा होस पांइसीने। मेकोपुकीमी लाइशो कोट फेक्शा गाक्चा दाक्नीम। बजारमी हिरशा, मान पपांइसीचा दाक्नीम। 39 गुम्तीक खिंमी ठेयब नित्तीकेमी नित्चा दाक्नीम। भोजमी मान पपांइसीचा डा नित्तीकेमी नित्चा दाक्नीम। 40 वोंइश बेक्शो मीश मुर आन शोंप नेल्ल नेक्शा गेशा, दुइशो दुइशो प्रार्थना पा कोंइखु पाइनीम। मोदेशो पाइबपुकीमी अरु आन क्येडा शुश सजाइ ताइनीम" देंमाक्त। याकूब १:२७

पुडग मीश मुरु आ चढेशो क्येट

लूका २१:१-४

41 मिनु येसुमी क्येट चढेतीक एरे निश्शा, शुश मुरुमी क्येट चढेशो कोव्रना कोव्रन बाक्माक्त। क्येट थीब शुशेमी शुश क्येट चढेमे बाक्त। २राजा १२:१० 42 मिनु आ वोंइश बेक्शो मारेइ मथीब पुडग मीश मुर का जाक्शा, लेप्तोन निक्शी चढेवा बाक्त। लेप्तोन का नेल्ल क्येडा आइक्च तांबा के क्येट बाक्त। 43 मिनु येसुमी आ शेंसीब आन कली ब्रेशशा "नोफा दाइशशा नेनीने, नेल्लेमी चढेशो क्येडा मेको पुडग मीश मुरुमी शुश चढेपुतु। 44 आ जशा ब्रोंइतीक क्येट नेल्ल गेपुतु। अरुमी चहिं आन गाप्शो रे गेम्तेक्म" देंमाक्त।

13

"परमप्रभु आ खिं मलीब" देशो

मत्ती २४:-; लूका २१:५-३६; लूका १७:२३-३७

1 मिनु येसु परमप्रभु यावे आ खिं रे गूमेनु, आ शेंसीब कामी "ए शेंब, कोव्रडीन, एको खिं ठेयब फुल्लु के सेल्शा, दोमो कोल्शो गिश दारशो तांइसाक्ब" देंमाक्त। 2 मिनु येसुमी "मुल ओमो ठेयब दारशो सेल्शो खिं ताप्तीवी। तन्न नोले ब्रेशशा, फुल्लु का यो खोप्शा मलीब" देंमाक्त।

श्येत दुम्चा गोइब

3 मिनु परमप्रभु यावे आ खिं तांइसीचा डा पा जैतून डांडामी निस्सेनु, पत्रुस, याकूब, यूहन्ना नु अन्द्रीयास जाक्शा, मत्ती १७:१ 4 येसु कली "एको इन देशो लोत्र गेना दुम्बा? एको नेल्ल दुम्चापुतु, दे तुइक्पाइक्चा डा चिन्ड दोपा तांइसीनीमी? शेंदीकी" देंमा बाक्त। 5 मिनु येसुमी "सुइमी इ थुं मक्यामेक्ल, दे होस पा बाक्कीन। 6 शुश मुरुमी आं नें ब्रशा 'गो एको नड' देशा, मुर आन थुं क्याइक्नीम। यूहन्ना ८:४९ 7 शुश लडाइ दुम्शो लोत्र नेनीनु, महिनीन। मोदेशो

दुम्चान माल्ब। रागी नुप्ची चहिं मजा। 8 रागी नुप्चा क्येडा डोंइती जात जात नु राज्य राज्यमी लडाइ पमुइनीम। रागी रागीमी खिनु कुइब। अन्काल दुम्ब। मो दुम्मेनु, श्येत दुम्चा गोवा बाक्त, दे तुंडसीब।

थमा सुइक्ब ग्याइक्चा पुंडसीनीम

9 आंम इन कली मिम्शा होस पा बाक्कीन। कछडी वोइक्चा पुंडसीनीनी। गुम्तीक खिंमी तुप्चा पुंडसीनीनी। आं नें आ पबर्म हुकुम पाइब नु पिप आन डोंइती राप्पाइक्चा पुंडसीशा, सांकछी दुम्चा माल्नीनी। 10 मोदेशो दुम्चा क्येडा डोंइती रागी नेल्ल डा मुर आन कली ग्येरपाइक्ब लोत्र नेंपाइक्ने थुम्शो दुम्चा माल्ब। मर्कूस १६:१५ 11 मिनु इन कली ठेयब मुर आन डोंइती राप्पदमेनु, मार लोत्र पय, मार देंय? दे हिंशा, मिम्स डा मिम्स मबाक्कीन। इन कली दोदेशो लोत्र पचा गेशो बाक्मे, मोदेशो लोत्र पने। मारदे हना गे लोत्र मपाइनीनी, परमप्रभु यावे आ सोक्तीम इन कली लोत्र पपाइक्ब।

12 लोक्बमी आ लोक्ब कली साइक्पाइक्चा गेब। आफोमी तौ कली साइक्पाइक्ब। मिनु तमी तौपुकीमी आम आफ आस कली ग्याइक्पाइक्चा साइक्पाइक्नीम। 13 आं नें आ पबर्म सुइम इन कली मदाक्नीम। सु सु चहिं नेल्ल क्येडा नोले सम्म थमा सुइक्चा मप्रोंइथु बाक्नीमी, मेकोपुकी श्येत जचा रे ब्रोंइशा, गेना हना यो परमप्रभु यावे नु बाक्चा ताइनीम। यूहन्ना १५:१८,२१

मुल सम्म मदुम्शो श्येत दुम्ब

14 परमप्रभु यावे आ खिं गेनायो मदुम्चा डा पा बिथोलो दुम्मेनु, मेको मुल पढेबपुकीमी रुप्मेक्ल, यहूदीया रागीम बाक्बपुकी डांडा ग्येत्थ प्रोक्मल। दानीएल ९:२७; दानीएल ११:३१; दानीएल ११:३१ 15 बारदालीम बाक्बपुकीमी 'तोइश्शा, खिं ओव्रशा मारेइ लाइक्चा ताइनुड' दे ममिम्तमेक्ल, दिव दाव प्रेक्शा प्रोक्मल। 16 रूमी गेय पाइबपुकीमी 'फेक्तीक का लाइक्नुड' देंशा, खिं मलेम्मल। तन्न आन गेय थु था प्रोंइशा प्रोक्मल। 17 कोव्रज कुरशो नु दूध तूब आल पाइश्शो मीश मुर अरु क्येडा शुश श्येत जाइनीम। 18 हिउदमी मोदेशो श्येत मदुम्ल, दे परमप्रभु यावे कली पुनीने। 19 परमप्रभु यावेमी रागी सेला रे मुल सम्म सुइमी मतुइश्शो श्येत दुम्ब। मोदेशो श्येत लेंशा गेनायो मपीब। दानीएल १२:१ 20 प्रभुमी मोदेशो श्येत जतीक नाक्त शुश वोइश्शो हना, सुइ ब्रोंइने मचाप्नीम। तन्न आ योव्रशो आन पबर्म प्रभुमी मेको श्येत शुश नाक्ती लीचा मगेब।

21 मिनु मुरपुकीमी 'ख्रीस्त एकेर जाक्त, मेरेक बाक्ब, लो कोव्रडीन' देंतेक्म हना, थमा मसुतीन। 22 शुशेमी 'गो ख्रीस्त नड' दे जोल पा गाक्नीम। 'परमप्रभु यावे आ लोत्र पाइब नकी' दे जोल पाइबपुकीमी चिन्ड नु छक लाक्चा डा गेय पा कोइनीम। मेकोपुकीमी परमप्रभु यावे आ योव्रशो आन कली यो लां प्रोंइपाइक्चा माल्नीम। 23 मेको दुम्चा डोंइतीन नेल्ल शेंशा तुइक्पाइक्तन्नी। एको लोत्र मिम्शा मप्रेंथु बाक्कीन।

रागीम जरमेशो जाक्ब

24 रागीमी मोदेशो ठेयब श्येत नुम्मेनु, सरीडमी चिन्ड तांडसीनीम। नां आ छेडछेड जाम्शा, जिक् रिक्शो दुम्ब। तास्ला आ हाम्सो यो जाम्ब। 25 सोरुल खपीम दोक्नीम। सरीडमी बाक्शो सक्तिपुकी हिम्सीनीम। हिब्रू १२:२६ 26 मिनु मुरपुकीमी रागीम जरमेशो कली गोस्सुमी गिल्सीशा, शुश सक्ति पाइश्शा, यिना यिन पशो ताइनीम। दानीएल ७:१३ 27 मिनु रागीम जरमेशोमी परमप्रभु यावे आ गेय पाइब आन कली रागी तेइ तेइ रे परमप्रभु यावे आ योव्रशो नेल्ल आन कली खुप्शा चाक्थ सोइक्ब। मत्ती १३:४१

28 फोव्रशी रवा कोच्वा दाप्शा कुशो तनीनु, बर्खा जाक्माक्त दे तुइक्नीनी। 29 आं देंशो लोत्र थमा दुम्शो तनीनु, आं जाक्ची जाक्माक्त दे तुइक्नीनी। 30 नोफा दाइश्शा नेनीने, एको जात डा मुर मनुप्यु, आं देंशो थमा दुम्ब। 31 सरीड नु रागी नेल्ल जाम्शा लाइनीम, आं लोत्र चहिं गेना हना यो मजाम्थु लीब।

32 मोदेशो गेना दुम्ब, दे सुइमी मतुइक्नीम। परमप्रभु यावे आ स्वर्ग डा गेय पाइबपुकीमी यो मतुइक्नीम। तौमी लायो मतुइक्ब। आं आफोमी ला तुइक्ब।

सासीशा बाक्चा माल्ब

33 मोदेशो गेना दुम्बा मतुइक्नीनी। मोपतीके सासीशा बाक्कीन। लूका १२:३५-४०; लूका २१:३६ 34 दोदेशो दुम्ब देंशा हना, मुर का तेइ तेइ हिरथ लमेनु, लचा डोंइती आ गेय पाइब आन कली का का पा आन गेय योक्शा, लाप्चो खाल पाइब कली 'गेना हना यो लां कोव्रशा बाक्को' दे माइश्शा लाइब। 35 आं खिं डा प्रभु गेना लेशशा जाक्बा, दे मतुइक्नीनी। नां रिक्शा जाक्बा को? नाक्दो जाक्बा को? भाले ग्रीची ना जाक्बा को? सुनी जाक्बा को? दे मारेइ

मतुइक्नीनी। मेको इन मतुइक्थु जाक्ब। लूका १२:३८³⁶ इन मतुइक्थु जाक्मेनु, इन कली इप्शो मथिदल।³⁷ मोपतीके लां कोव्रशा सासीशा बाक्कीन दे माइक्तन्नी। मोदेशो नेल्ल आन कली माइक्नुडमी” दे शेंदीमी बाक्त।

14

येसु कली साइक्चा माल्लो

मत्ती २६: - २८:-; लूका २२: - २४:-; यूहन्ना १८: - २१:-

1 मिनु बोरब ओरुत्ती मसुप्शो शोब्ले जतीक पास्सा चाड आ निक्शी नाक्ती डोंइती ठेयब चढेब नु सास्त्रीपुकीमी “येसु कली दोपा मुर आन मतुइक्थु ग्याइश्शा, साइक्पाइक्चा” दे लोव्रसी पमुमानु² “चाड नाक्ती मदुम्ब, मुरपुकीमी मरिम्शो पाइनीम” देंमुमा बाक्त।

येसु तेल खेक्चा पुंइसीशो

3 येसु बेथानीमी कोर पाइब सिमोन आ खिंमी खमे जना जन बाक्मेनु, मीश मुर कामी शुश क्येट लाइब ब्रोव्रशो रिना पाइश्शो तेल कुरशा जाक्शा, मेको तेल येसु आ पियामी लुक्ता बाक्त।⁴ मिनु मेकेर बाक्ब का निक्शीमी “ओदेशो तेल मारदे एकोमी ओपा ताइक्ता? ⁵ लेयड हना, सहे सां देनार क्येडा शुश ताक्शा, श्येत जाइब आन कली योक्शा, वारच पने चाम्स वा” दे आन थुं मनुथु, मीश मुर कली हुइक्तमे बाक्त। देनार का नाक्त का डा गाल्च बाक्त। मेको रोम डा चांदी के क्येट बाक्त।⁶ मिनु येसुमी “महुइक्तीने, मारदे आ थुं खाइक्पाइक्नी? आं कली रिम्शो पाइक्ती।⁷ श्येत जशो मुर गेना हना यो थित्नीनी, मिनु शिशी पाइक्चा दाक्ताक्नी हना, गेना हना यो पाइक्ने चाप्नीनी। आं कली चहिं नोले मथित्नीनी। ब्यवस्था १५:११⁸ आ चाप्शो पाप्तु। बेक्चा क्येडा डोंइती आं रां थिम्चा कली तेल खेक्ताक्व।⁹ नोफा दाइश्शा नेनीने, रागीम ते ते आं लोव्र नेपाइक्नीमी, मेक मेक एको आ पशो आ पर्बम यो लोव्र पाइनीम” देंमाक्त।

इस्कारीयोत डा यहूदा आ पशो

10 इस्कारीयोत डा यहूदा येसु आ शेंसीब कामी ठेयब चढेब आन कली “येसु कली ग्याइक्चा वारच पाइनन्नी” दे लोव्र पथ लमाक्त। मिनु मेकोपुकीमी आ देशो नेंशा, ग्येरशा “लो, रिम्शोन दुम्त। क्येट गेनीकी” देंमा बाक्त।¹¹ में डा मेरे “गेना नु दोपा ग्याइक्चा वारच पदुमी” दे योव्रकी पना पन गाक्माक्त।

पास्सा चाड डा भोज

12 बोरब ओरुत्ती मसुप्शो शोब्ले जतीक चाड आ डोंइती डा नाक्ती पास्सा डा पाठा क्योरशा ब्वाइनीम। मिनु येसु आ शेंसीबपुकीमी “पास्सा मानेचा कली ते लशा साचा? मार देंनीनी?” दे हिल्लो पामे बाक्त।¹³ मिनु येसुमी शेंसीब निक्शी आस कली “सहर लसे। मिनु गाग्री कुरशो मुर का कली ग्रुम्नीसी। मेको आ नोले खोतीसे।¹⁴ मिनु मेको तेको खिं ओव्रबा, गे यो ओव्रडीसे। मिनु खिं डा मुर कली ‘शेंबमी सोइश्शो नस्कु। शेंबमी आ शेंसीबपुकी नु काथा बाक्शा, पास्सा ते मानेचा? दे हिल्लो पथ सोइक्ताक्सकी’ दे मतीसे। मर्कूस ११:३¹⁵ मो माइक्सीनु, मेकोमी इस कली तला तारी ठेयब कोठा का कोंइब। मेको कोठामी गुन्द्री पीरा ब्रशा वोइश्शो थित्नीसी। मिनु मेकेरन साचा” दे सोइक्तीम्सी बाक्त।¹⁶ मिनु मेको निक्शी लशा, सहर जाक्दीश्शा, येसुमी दोदेशो देंमे, मोदेशो थित्से बाक्त। मिनु पास्सा चाड डा भोज सादसे बाक्त।

17 मिनु नां रिक्मेनु, येसु नु आ १२ जना शेंसीब खुम्समा बाक्त।¹⁸ मिनु जना जन बाक्मानु, येसुमी “नोफा दाइश्शा नेनीन। मुल एक बाक्ब काम आं कली ग्याइक्ब आन कली वारच पाइब। मुल गो नु काथा जना जन बाक्ब” देंमाक्त। यूहन्ना १३:२१-२६¹⁹ मिनु नेल्लेमी शुश मरिम्शो लाक्शा “ए प्रभु, मेको वारच पाइब गो दुम्नुडा कों?” दे का का पा हिल्लो पामे बाक्त।²⁰ मिनु येसुमी “१२ जना शेंसीब इन दाते डा का बाक्ब। गो नु काथा शोब्ले शेक्कुम तेप्बमी आं कली ग्याइक्पाइक्चा वारच पाइब।²¹ मारदे हना रागीम जरमेशो आ पर्बम ब्रेक्शो लोव्र नेल्ल थमा दुम्चा माल्ब। मेको बेक्चा माल्ब। मो हना यो रागीम जरमेशो कली ग्याइक्पाइक्चा वारच पाइब कली शुश मरिम्शो दुम्ब। मो देशो पाइब मुर मजरमेस हना, मेको कली रिम्शो दुम्ब वा” दे माइक्मी बाक्त।

22 मिनु जना जन बाक्मानु, शोब्ले शेशा “गे रिम्शो पाइब बाक्नीनी” दे प्रार्थना पशा जिकशा, आ शेंसीब आन कली योक्शा “दांइसीने, एको आं रां बाक्ब” देंमाक्त। १कोरिन्थी ११:२३-२५²³ मिनु कचौरा शेशा “गे रिम्शो पाइब बाक्नीनी” दे प्रार्थना पा, मेको आन कली तूचा गेमी बाक्त। मिनु नेल्लेमी तूडमे बाक्त।²⁴ मिनु “एको आं हुश बाक्ब। आं हुशेमी परमप्रभु यावे आ गेशो नक लोव्र खाप्ता। आं हुश जारशोमी शुश मुर आन पाप क्याम्सीब। प्रस्थान २४:८;

हिब्रू १:१५-१६ 25 नोफा दाइशशा नेनीन, मुल डा मेरे एको अडगुर रे सेल्लशो तूतीके मतूनड। नोले नेल्ल नक दुमशा, परमप्रभु यावे आ राज्यमी बाकशा तूनड” दे माइकमी बाक्त। 26 मिनु कुम्सो पा बोक्शा, जैतून डांडा ग्येत्थ लमा बाक्त। भजन संग्रह ११३:- ११८:-

पत्रुसमी “गेनायो मप्रॉइनन्नी” देशो

27 मिनु लना लन बाकमानु, येसुमी “गे नेल्लेमी इन थुं ग्यशा, आं कली प्रॉइनीनी। मारदे हना ओदें ब्रेक्शो लोत्र थमा दुम्ब ‘गो गोठला कली तुप्शा खेरनुड। मिनु भेडापुकी प्रोक्शा, साव सुव ब्राइनीम’ देशो बाक्ब। जकरिया १३:७; यूहन्ना १६:३२ 28 नोले गो बेक्शो रे सेंचा पुंडसीशा, इन डोंइती गालील रागी जाकदीतनुड” देमाक्त। मर्कूस १६:७ 29 मिनु पत्रुसमी “मेको नेल्लेमी इन कली प्रॉइशा प्रोक्तेकम हना यो, गो मप्रॉइनन्नी” देमेनु, यूहन्ना १३:३८ 30 येसुमी “नोफा दाइशशा नेनो, में नाकदोन भाले खेयप निक्शी मग्रीथु, खेयप सां सम्म ‘मेको कली मतुइक्नुड, सु बाक्म’ दे आं पर्बम देनेवे” दे मदा बाक्त। 31 मिनु पत्रुसमी “मदेनुड, गे नु काथा बाक्शा, साइक्चा पुंडसाकयी हना यो, मोदेशो गेनायो मदेनुड” दे लोत्र थोक्शा देमाक्त। आ शेंसीब नेल्लेमी यो मो देमा बाक्त।

गेथसेमनेमी प्रार्थना पशो

32 मिनु गेथसेमने जाकदीम्मा बाक्त। मिनु येसुमी “लो, एक बाक्कीन। गो इक्की आइक्था लशा, प्रार्थना पाइनुड” देशा, 33 पत्रुस, याकूब नु यूहन्ना सां आन कली आइक्था लाइशशा लमाक्त। येसु आ थुं शुश खाइक्माक्त। मती १७:१ 34 मिनु सां आन कली “आं थुं शुश खाइशशा, बेक्चा डा दुम्ती। मइप्थु गो नु काथा बाक्कीन” दे माइकमी बाक्त। यूहन्ना १२:२७ 35 मिनु इक्का डोंइती लशा, खपीम बाप्शा “दुम्त हना, मुल दुम्चशो श्येत मदुम्ल” दे प्रार्थना पवा बाक्त। 36 मिनु “आब्बा, आं आफ, गे मारेइ मारेइ पने चाप्नीनी। एको कचौरा आं कली मतूपाइक्थु लतीने। तन्न आं दाक्शो मदुम्ल। इन दाक्शोन दुम्ल” दे प्रार्थना पशा, लेशशा जाक्माक्त। येसुमी आइक्च आल खोदेशो पा आ आफ कली आब्बा देंत। 37 लेशशा जाक्मेनु, सांफा आन कली इप्शो तामी बाक्त। मिनु पत्रुस कली “ए सिमोन, इमे? छिन का यो मइप्थु बाक्ने मचबी? मर्कूस १०:३८ 38 थुं थाम्चा पुंडसेनु, पाप मपड, दे मइप्थु बाक्शा प्रार्थना पावो। थुंमी पाइनुड, चाप्नुड देंब, तन्न रांमी फाल्ने मचाप्ब” दे मदा बाक्त। 39 मिनु लेंशा इक्का आइक्था लशा, डोंइती प्रार्थना पशो खोदेशो पा, प्रार्थना पवा बाक्त। 40 मिनु लेंशा लेशशा जाक्शा, निन्द्रामी दुक्शा बाक्शो तामी बाक्त। मेकोपुकीमी मार देंचा, दे मारेइ मतुइक्तमे बाक्त। 41 मिनु लेंशा प्रार्थना पथ लशा, लेशशा जाक्शा, मेको आन कली “गे मुल सम्म इप्शा बाक्नीनी? मुल गाप्त। रागीम जरमेशो पापी आन गुडमी गेचा पुंडसीचा चिक्ताक्व। 42 लो बोक्कीन, लय। आं कली ग्याइक्चा वारच पाइब जाक्चाप्तु” दे माइकमी बाक्त।

येसु ग्याइक्चा पुंडसीशो

43 मो माइकमीनु, आ शेंसीब यहूदामी ठेयब चढेब, सास्त्री नु जोक्ब तुइक्ब खालपापुकीमी सोइशशो तरवार कोक्के कुरब हुल, येसु कली ग्याइक्थ चाक्गा बाक्त। 44 यहूदामी “सु कली पुक्पु पदु, मेको कली ग्याइशशा लतीने” दे ग्याइक्थ जाक्ब आन कली तुइक्पाइशशो बाक्माक्त। 45 मिनु जाक्मानु, यहूदा येसु आ नेक्था लशा “रब्बी” दे बे मुप्शा, पुक्पु पवा बाक्त। हिब्रू लोत्रमी ठेयब शेंब कली रब्बी देंनीम। 46 मिनु ग्याइक्थ जाक्बपुकीमी येसु कली ग्याइक्तमे बाक्त। 47 मिनु येसु नु काथा बाक्ब कामी तरवार ग्रि शोइशशा, ठेयब चढेब आ वाइल का आ नोफा दि खोदा बाक्त। 48 मिनु येसुमी आ कली ग्याइक्ब हुल आन कली “तरवार कोक्के कुरशा, खुइ पाइब कली ग्याइक्थ जाक्शो खोदेशो पा आं कली ग्याइक्थ जाक्नी? 49 नाक्त किंत किंत परमप्रभु यावे आ खिंमी गेपुकी नु काथा बाक्शा, शेंना शेंन बाक्डानु, मग्याइक्तीनी। तन्न परमप्रभु यावेमी ब्रेक्पाइशशो लोत्र थमा दुम्चा कली ओदेशो दुम्त” दे माइकमी बाक्त। 50 मिनु आ शेंसीबपुकी येसु कली थु था प्रॉइशा, साव सुव ब्रशा प्रोक्मा बाक्त। 51 मिनु येसु कली ग्याइशशा फ्रेंशा लदमेनु, ठिटा का आन नोले खोदा बाक्त। मेको ठिटांम वा का ला गिल्सीशो बाक्माक्त। 52 मारदे हना मेको कली ग्याइक्तमेनु, आ फेक्शो वा प्रॉइशा, शिश्रा प्रोक्शो बाक्माक्त। आमोस २:१६

येसु कली चढेब आ डोंइती चाक्शो

53 मिनु येसु कली नेल्ल क्येडा ठेयब चढेब आ डोंइती चाक्दीत्मे बाक्त। मेकेर ठेयब चढेब, जोक्ब तुइक्ब खालपा नु सास्त्रीपुकी खुम्सीशा बाक्शो बाक्मा बाक्त। 54 पत्रुस मेको आन नोनोले खोइशशा लशा, नेल्ल क्येडा ठेयब चढेब आ लाडगा जाक्दीम्माक्त। मेकेर सिपाइपुकी नु काथा मी थेरशा बाक्माक्त।

55 ठेयब चढेब नु मेकेर बाकब नेल्लेमी मार पामे बाकत देशा हना, जोल पा दोस गेशा, येसु कली साइक्पाइक्चा माल्मे बाकत। तन्न दोस गेने मचाप्मे बाकत। 56 शुश मुरुमी जोल पा सांकछी गेमे बाकत, तन्न आन लोव्र मगारमाकत। 57 सांकछी का निक्शी बोक्शा “एको ग्याइश्शो मुरुमी साबेर मार देशो नेंतक देशा हना 58 ‘एको गुइमी सेल्शो परमप्रभु यावे आ खिं प्रेशा, नाकत सांमी अर्को सेल्नुड। मेको चहिं गुइमी सेल्शो ममाइ’ देशो नेंतक” देमा बाकत। यूहन्ना २:१९-२१ 59 मो देमा बाकत हना यो, आन लोव्र मगारमाकत। 60 मिनु नेल्ल क्येडा ठेयब चढेब बोक्शा, आन दातेमी राप्शा, येसु कली “एकोपुकीमी देशो लोव्र नेंशा, मार देनेवे?” दे हिल्लो पवा बाकत। मर्कूस १५:५; यसैया ५३:७ 61 मिनु येसु सिक्सी पा बाक्शा, लोव्र का यो मलेत्ता बाकत। मिनु नेल्ल क्येडा ठेयब चढेबमी “गे नेल्ल क्येडा मान ताइब परमप्रभु यावे आ तौ ख्रीस्त नवे?” दे हिल्लो पवानु, 62 येसुमी “गो नड। गे रागीम जरमेशो कली नेल्ल सक्ति पाइश्शो आ ग्युरा गे बाक्शो ताइनीनी। गोस्सुमी गिल्लीशा जाकना जाकन पशो ताइनीनी” दे मदा बाकत। भजन संग्रह ११०:१; दानीएल ७:१३-१४ 63 मिनु नेल्ल क्येडा ठेयब चढेबमी आंम आ फेक्शो वा खाक्शा “परमप्रभु यावे कली शुक्शी लोव्र पाइबाकत। 64 मार सांकछी माल्दा डा? आ शुक्शी पशो लोव्र गे नेल्लेमी नेंशा, सांकछी दुम्तीनी। एको कली मार पाइक्चा? मार देनीनी?” दे माइक्मीनु, नेल्लेमी “साइक्चा माल्ब” देमा बाकत। यूहन्ना १९:७ 65 मिनु साइक्चा माल्ब देशा डा मिन, का निक्शीमी आ कुलम तोकतमे बाकत। का निक्शीमी आ मिक्च सुम्शा, तुप्शा “सुमी तुमे? लो देन” दे शुक्शी पामे बाकत। मिनु सिपाइ आन गुइमी गेमे बाकत। मेकोपुकीमी तुप्ना तुप्न लदमे बाकत।

पत्रुसम “मेको कली मतुइक्नुड” देशो

66 आगाम मोदेशो दुम्मेनु, पत्रुस लाडगामी बाक्माकत। मिनु गेय पाइब मीश मुर कामी जाक्शा, 67 पत्रुस कली मी थेरशो तशा, शिरशा कोव्रशा “गे यो मेको नासरथ डा येसु नु काथा गाक्ब का बाकडे बाकत” देमाकत। 68 मिनु पत्रुसमी “इ देशो मरुबु। मारेइ मतुइक्नुड” देमाकत। मिनु गूशा, ठेयब लाप्चो डा लां जाक्दीम्माकत। 69 मिनु मेको गेय पाइब मीश मुरुमी पत्रुस कली लेंशा तशा, मेकेर बाकब आन कली “मेरे यो मेको नु गाक्ब का बाकत” देमेनु, 70 पत्रुसमी “गो मनड, मेको कली मतुइक्नुड” देमाकत। मिनु छिन का नोले मेकेर बाक्बपुकीमी यो “गे मेको नु काथा गाक्ब का बाकडे बाकत, मारदे हना गालील डा बाकडे बाकत, दे तुंडसीब” देमानु, 71 पत्रुसमी “जोल पाता हना, यावेमी सजाइ गेयील, इन देशो मुर कली तुंडसीन मतुइक्नुड” दे कसम जशा, आ लोव्र थोक्शा देमाकत। 72 मो देम चोटी भाले खेयप निक्शी ग्रीमाकत। मिनु पत्रुसमी “भाले खेयप निक्शी मग्रीथु, खेयप सां सम्म मेको कली मतुइक्नुड, सु बाक्म? देनेवे” दे येसुमी देशो लोव्र ति फ्रुक्गा बाकत। मिनु आ पशो मिम्शा डाक्माकत।

15

पिलातस आ डोंडती राप्पाइश्शो

1 मिनु नां सोव्रमेनु, ठेयब चढेब, जोक्ब तुइक्बखाल्पा नु सास्त्रीपुकी, सभाम बाक्ब नेल्ल खुम्सीशा, सल्ला पामे बाकत। मिनु येसु कली फ्रेंशा लाइश्शा, पिलातस आ गुइमी गेमे बाकत। 2 मिनु पिलातसमी येसु कली “गे यहूदी आन पिप नवे?” दे हिल्लो पवानु “गे आंमा देंतीनी” दे लोव्र लेत्ता बाकत। 3 ठेयब चढेबपुकीमी शुश दोस गेमे बाकत। 4 मिनु पिलातसमी येसु कली “इ कली शुश दोस गेम्तेक्मे। गे मेको आन कली मारेइ लोव्र मलेत्नेवे?” दे हिल्लो पवा बाकत। 5 मिनु येसुमी लोव्र का यो मलेत्ता बाकत। मिनु पिलातस छक लाक्माकत। मर्कूस १४:६१; यसैया ५३:७

6 पास्सा नाक्ती पिलातसमी मुरपुकीमी प्रोंइचा, दे पुंडशो जेल्खानमी चोक्सीशो मुर का कली प्रोंइबाक्माकत। 7 सरकार कली मरिम्शो पा जेल्खानमी चोक्चा पुंडसीशो मुर आन दाते डा बारब्बा माइश्शो का बाक्माकत। मेकोमी मुर साइश्शो बाक्माकत। 8 मिनु मुरपुकीमी पिलातस कली “साइ रे डा पशो खोदेशो पा मुर का कली प्रोनीन” दे पुन्मे बाकत। 9 मिनु पिलातसमी “यहूदी, इन पिप प्रोंइचा दे पुंडनी?” दे हिल्लो पवा बाकत। 10 मारदे हना ठेयब चढेबपुकीमी थुं चोशा, येसु कली ग्याइक्पदमे बाकत दे रुप्शा, प्रोंइचा माल्शो बाक्माकत। यूहन्ना ११:४८ 11 तन्न ठेयब चढेबपुकीमी मुर आन कली हुल पोक्शा “मेको कली मप्रोंइचा, बारब्बा कली प्रोंइचा, सरकार” दे पुंडपदमे बाकत। 12 मिनु पिलातसमी “गेपुकीमी यहूदी आन पिप देशो मुर कली मार पदु मिनु?” दे हिल्लो पवानु 13 “मेको कली शीमी क्येप्शा कांटी थोक्शा क्याइक्चा माल्ब” दे रेयके पचा गोव्रमे बाकत। 14 मिनु पिलातसमी “मार मरिम्शो पवा, मार दोस गेचा” देमेनु “शीमी क्येप्शा कांटी थोक्शा क्याइक्चा माल्ब” दे शुश रेयके पामे बाकत। 15 मिनु पिलातसमी

“हुल आन दाक्शो पचा” दे मिम्शा, बारब्बा कली प्रॉइपदा बाक्त। येसु कली चहिं युक्पाइश्शा, शीमी क्येप्शा कांटी थोक्शा क्याइक्चा कली सिपाइ आन गुइमी गेवा बाक्त।

येसु कली शीमी क्येप्शा क्याइश्शो

16 मिनु सिपाइपुकीमी येसु कली दरवार डा सिपाइ आन बाक्तीके चाक्दीश्शा, आन पल्टन नेल्ल खुप्शा डा मिनु, 17 आ फेक्शो वा प्रुइश्शा, पिप आन फेक्तीक रड पाइश्शो वा फेक्पाइश्शा, चू के सिरपेच सेल्शा, आ पियाम गुप्तमे बाक्त। 18 मिनु “यहूदी आन पिप, सेउ ताक्कीन” दे सेउ पखु पामे बाक्त। 19 मिनु रेक्के के कोक्केमी आ पिया तेत्मे बाक्त। आ कुल तोक्तमे बाक्त। मिनु आ डोंइती पोक्च थेक्शा बाप्शा, ठेयब सेल्खु पामे बाक्त। 20 मिनु शुक्शी पचा रूशा, वा प्रुइश्शा, आंम आ वा फेक्पाइश्शा, गुंइशा, शीमी क्येप्शा कांटी थोक्शा क्याइक्चा कली लदमे बाक्त।

21 मिनु लना लन बाक्मानु, आ गाउं रे पिशो साइरेनी डा सिमोन गुम्मे बाक्त। मेको सिमोन अलेकजन्डर नु रुफुस आस आफ बाक्माक्त। मेको कली गुम्शा, येसु कली क्येप्तीक शी “लो, कुर कि कुर” दे कुरपदमे बाक्त। रोमी १६:१३

22 मिनु येसु कली गोलगथामी चाक्दीत्मे बाक्त। गोलगथा कली खप्परे यो देंसीब। 23 मिनु अडगुर शांबुमी मूरे माइश्शो तेल कुर पशो तूतीके गेमेनु, येसुमी तूने मबिस्से बाक्त। 24 मिनु शीमी क्येप्शा कांटी थोक्शा क्यदमे बाक्त। क्याइश्शा डा मिनु, सुमी ताइबा, दे तुइक्चा कली वा वोइश्शा फेन्टे आप्मे बाक्त। भजन संग्रह २२:१८ 25 शीमी क्यदमेनु, सुनी डा ९ बजेशो बाक्माक्त। 26 “यहूदी आन पिप” दे दोस गेशा, ब्रेक्शो ब्रेक्स यो क्येप्शो बाक्माक्त। 27 खुइ निक्शी आस कली यो का आ ग्युरा गे, का आ पेरा गे क्याइश्शा वोदमे बाक्त। 28 मो पशोमी “मरिम्शो पाइब सुइश्शा, मरिम्शो पाइब नु काथा वोइक्चा पुंइसीब” दे परमप्रभु यावेमी ब्रेक्पाइश्शो लोव थमा दुम्माक्त। यसैया ५३:१२

29 मेकेर कोव्रब शुश मुर बाक्मा बाक्त। मेकोपुकीम आन पिया हिम्शा “परमप्रभु यावे आ खिं प्रेशशा, नाक्त सांमी नक सेल्नुड, देंते। खोइ मिनु, सेल्ने चबी? मर्कूस १४:५८ 30 शीमी क्येप्शो रे प्रॉइसीशा तोंइसो” दे शुक्शी पामे बाक्त। 31 ठेयब चढेब नु सास्त्रीपुकीमी यो शुक्शी पा “शुश मुर आन कली श्येत रे प्रॉइना प्रॉइन गाक्बाक्त, आंम कली चहिं प्रॉइसीने मचाप्बाक्त। 32 इस्राएल डा पिप, ख्रीस्तमी शीमी क्येप्शो रे प्रॉइसेक्ल। प्रॉइसीशो ताइतय हना, थमा सुइक्नय” देंमुमा बाक्त। आ ग्युरा नु पेरा गे वोइश्शो निक्शीमी यो शुक्शी पदसे बाक्त। मत्ती १६:१४

33 मिनु नाक्त १२ बजे नां जिक रिक्शा, ३ बजे सम्म रागी नेल्ल छिडछिड दुम्माक्त। 34 मिनु ३ बजे गे येसुमी “एली, एली, लामा असाब्थानी” दे वाइ ब्रेम्माक्त। आ देंशो मार रुम्सीब देंशा हना “आं परमप्रभु, आं परमप्रभु, मारदे प्रॉइयीनी?” देंशो रुम्सीब। भजन संग्रह २२:२ 35 एर ओंथ बाक्बपुकीमी मो देंशा वाइ ब्रेश्शो नेंशा “नेनीने, एलीया कली ब्रेत्ताक्व” देंमुमा बाक्त। 36 मिनु का दोरशा लशा, रुवामी ग्युरशो तूचा थोव्रक नुप्शा, कोक्केमी लिक्शा युप्चा गेशा “एलीया जाक्शा, प्रॉइबा कों? लो, कोव्रय” देंमाक्त। 37 मिनु येसु लेंशा काले वाइ ब्रेश्शा, नोले सोक्त कीशा बेक्माक्त। प्रस्थान २६:३१-३३; २इतिहास ३:१४ 38 मिनु बेक्म नोले मार दुम्माक्त देंशा हना, परमप्रभु यावे आ खिं आगा डा कोठामी बारेशो वा इर रे उइ सम्म उइक्थ पा जेर गाक्माक्त। 39 मिनु येसु आ डोंइती राप्शा बाक्शो कप्तानमी येसु वाइ ब्रेश्शा, नोले सोक्त कीशा बेक्शो तशा “थमा पा, एको मुर परमप्रभु यावे आ तौ बाक्माक्त” देंमाक्त।

40 येसु बेक्मेनु, शुश मीश मुरपुकीमी डोन रे कोव्रशो बाक्मा बाक्त। मोदेंशो कोव्रब का माग्दाला डा मरीयम बाक्माक्त। का याकूब नु योसेस आस ममा मरीयम बाक्माक्त। का सालोमे बाक्माक्त। 41 मेकोपुकी गालील रे यरूसलेम सम्म काथा गाक्शा, येसु कली वारच पना पन बाक्शो बाक्मा बाक्त। अरु यो काथा गाक्शा, यरूसलेम जाक्दीश्शो बाक्मा बाक्त। लूका ८:२-३

येसु आ रां पुक्खीमी वोइश्शो

42 येसु बेक्ची नाक्त चहिं नाइक्तीक नाक्त आ डोंइती नाक्त बाक्माक्त। मिनु नां रिक्मेनु, मार दुम्माक्त देंशा हना, 43 अरीमाथीया डा योसेफ माइश्शो, सभामी बाक्ब आन दाते डा हिक्सीशो मुर का बाक्माक्त। मेको परमप्रभु यावे आ राज्य तांइसेक्ल, दे आस पा बाक्शो बाक्माक्त। मेको मुरुमी महिंधु, पिलातस कली गुम्थ लशा “येसु आ बेक्शो रां लाइक्चा गेयीनी” दे पुना बाक्त। 44 मिनु पिलातसमी बेक्म कों? मबेक्म दे मारेइ मतुइक्थु कप्तान कली ब्रेश्शा “मेको येसु माइश्शो बेक्मे?” दे हिल्लो पवा बाक्त। 45 मिनु कप्तानमी “बेक्त” देंमेनु, लाइक्चा गेवा बाक्त। 46 मिनु योसेफमी बुश वा ग्याप्शा चाक्शा, येसु आ बेक्शो रां रे कांटी उइश्शा शोल्शा, बुश वामी गिल्शा लाइश्शा, पुक्खी

कामी ओंइशा वोदा बाक्त। मेको पुक्खी बेक्शो मुर वोइक्का कली फुल्लु मुशा, लाप्चो पाइश्शो सेल्शा वोइश्शो बाक्माक्त। मिनु बेक्शो मुर ओंइशा वोइश्शा, फुल्लुमी चोक्शा वोदा बाक्त। 47 मोपा वोइश्शो माग्दाला डा मरीयम नु योसेस आ ममा मरीयममी ताम्से बाक्त।

16

येसु बेक्शो रे सेंसाक्व, दे नेपाइश्शो

मत्ती २८:१-१०; लूका २४:१-१२; यूहन्ना २०:१-१०

1 मिनु नाइक्तीक नाक्त नोले माग्दाला डा मरीयम, याकूब आ ममा मरीयम नु सालोमेमी बेक्शो मुर आ राम खेक्का कली खेक्कीक ग्याप्मे बाक्त। 2 मिनु हप्ता डा डोंइती नाक्त सुनी कना बोक्शा, नां सोवमेनु, पुक्खी गे लमा बाक्त। 3 मिनु लमा लमा “फुल्लु सुमी याक्शा गेबा?” देंमुमा बाक्त। 4 मिनु जाक्दीश्शा कोवडमेनु, फुल्लु याक्ने थुम्शो तामे बाक्त। मेको फुल्लु शुश ठेयब बाक्माक्त। 5 मिनु पुक्खी ओवशा कोवडमेनु, बुश वा फेक्शो ठिटा का ग्युरा गे निश्शो तशा छक लाक्का बाक्त। 6 मिनु मेको ठिटामी “मार छक लाक्की? शीमी क्येप्शा कांटी थोक्शा क्याइश्शो नासरथ डा येसु कली माल्थ जाक्नी ममाइ? आ बेक्शो रां वोइक्तीके कोवडीन, मबाक्ब। बेक्शो रे सेंसाक्व। 7 मुल लशा, पत्रुस, शेंसीब नेल्ल आन कली नु इन डोंइती तुइक्पाइश्शो खोदेशो पा, इन डोंइती गालील जाक्दीप्ब। मेकेर ग्रुम्चा ताइनीनी, दे शोवथ लने” दे माइक्की बाक्त। मर्कूस १४:२८ 8 मिनु मीश मुरपुकी छक लाक्शा, हिंशा खिंखि पा फो फु गूशा प्रोक्का बाक्त। मिनु सुइ कली मारेइ मदेमा बाक्त। मारदे हना क्युल हिंशो बाक्का बाक्त।

येसुमी आंम कली तपांइसीशो

लूका २४:३६-४९; यूहन्ना २०:१९-२३

9 हप्ता डा डोंइती नाक्ती सुनी कना येसु बेक्शो रे सेंसीशा, ७ ओटा वोल गुंइचा पुंइसीशो माग्दाला डा मरीयम कली तपांइसे बाक्त। लूका ८:२; यूहन्ना २०:१-१८ 10 मरीयममी येसु कली तशा, लशा, डोंइती येसु नु काथा गाक्ब मुल आन थुं खाइश्शा बाक्ब आन कली “गो येसु कली बेक्शो रे सेंसीशा ब्रोंइशो ताता” दे शोवडा बाक्त। 11 मेकोपुकीमी मरीयम आ लोव्र थमा मसुदमे बाक्त।

12 नोले येसु कली थमा सुइक्ब निक्शी आस गाउं लसानु, लांमी येसुमी तपांइसे बाक्त। लूका २४:१३-३५ 13 मेको निक्शी फ्रा फ्रु लेशशा जाक्शा, अरु आन कली “येसु कली ताइतस्कु” देंसा बाक्त। मिनु मेको आस लोव्र यो थमा मसुदमे बाक्त।

14 मिनु नोले आ शेंसीब ११ जनामी खमे जना जन बाक्मानु, येसुमी मेको आन कली तपांइसे बाक्त। मिनु “मुल सम्म रुप्चा थुं मपनी? मुल यो थमा मसुइय्यीनी?” दे हुइक्तीमी बाक्त। मारदे हना “बेक्शो रे सेंसीशा ब्रोंइशो आंइ मिक्कीमी ताइतक” देंब आन लोव्र थमा मसुइश्शो बाक्का बाक्त। १कोरिन्थी १५:५

येसु आ नोले डा लोव्र

15 मिनु येसुमी आ शेंसीब ११ जना आन कली “रागी नेल्ल हिरशा, ग्येरपाइक्ब लोव्र नेल्ल आन कली नेपतीने। मर्कूस १३:१०; मत्ती २८:१६-२० 16 सुमी थमा सुइश्शा, ब्वाक्कुमी खुम्शा गुंइचा पुंइसीबा, मेको ब्रोंइचा ताइब। सुमी चहिं थमा मसुइक्बा, मेको सजाइ गेचा पुंइसीब। प्रेरित २:३८; प्रेरित १६:३१-३३ 17 थमा सुइक्बपुकी दोदेशो सक्ति पाइश्शो दुम्नीम देशा हना, आं नें थिशा वोल आन कली गुंइशा खेरनीम। परमप्रभु यावे आ सोक्तीमी पपाइश्शो लोव्र ब्वाक्कीम। प्रेरित १६:१८; प्रेरित १०:४६; प्रेरित १९:६ 18 बुस्स ग्याइक्ताक्म हना यो, ओश्येर तूतेक्म हना यो, मेको आन कली मारेइ मदुम्ब। रोइ पाइब आन तारी गुइ चाक्शा प्रार्थना पामेनु, सानीम” दे माइक्की बाक्त। लूका १०:१९; प्रेरित २८:३-६; याकूब ५:१४-१५

19 मेको लोव्र नेल्ल थुम्शा नोले प्रभु येसु स्वर्ग लाइक्का पुंइसे बाक्त। मिनु परमप्रभु यावे आ ग्युरा गे निस्से बाक्त। प्रेरित १:२; भजन संग्रह ११०:१; प्रेरित ७:५५ 20 मिनु येसु कली थमा सुइक्बपुकी लशा, ग्येरपाइक्ब लोव्र तेइ तेइ नेपाइक्का पाइक्न गाक्का बाक्त। प्रभु यो मेकोपुकी नु काथा बाक्शा, चिन्ड कोंइना कोंइन मेको आन लोव्र थमा बाक्ब देंबाक्माक्त। प्रेरित १४:३; हिब्रू २:४

लूका

ब्रेक्ब मुर: नेल्ल क्येडा डोंइती डा थमा सुइक्ब नु नोले थमा सुइक्ब आन इतिहास ब्रेक्ब येरोम नु यूसेबियसमी एको किताब लूकाम ब्रेक्शो बाक्ब, दे तुइक्तसे बाक्त। लूकामी प्रेरित किताब यो ब्रेक्शो बाक्ब। परमप्रभु यावे आ लोव्रमी लूका आ पर्वम सां खेयप लोव्र पशो बाक्ब। कलस्सी ४:१४; फिलेमोन:२४; तिमोथी ४:११ लूकामी, इस्राएली मदुम्शो, पावल नु गेय पवा बाक्त। मेको शुश शेंसीशो मुर बाक्माक्त।

गेना ब्रेक्शो: एको किताब गेना ब्रेक्शो बाक्ब ठीक पा मतुइक्नीम। तन्न ६०-८५ ए. डी. मेर दुम्चा माल्ब। लूका आ ब्रेक्शो क्येडा डोंइती अर्को ग्येरपाइक्तीक लोव्र ब्रेक्ने थुम्शो बाक्तेक्म। लूका १:१

मारदे ब्रेक्शो: लूकामी थियोफीलस माइशो ठेयब मुर कली येसु ख्रीस्त आ इतिहास नु आ शेंशो नेल्ल ब्रेक्शो बाक्ब। येसु आ किकी पिपी आदम सम्म डा लोव्र ब्रेक्शो बाक्ब। एको किताब यहूदी आन कली ला ममाइ, रागी नेल्ल डा मुर आन कली ग्येरपाइक्ब लोव्र बाक्ब। येसु नेल्ल मुर, पुडग नु श्येत जाइब आन कली यो पाप रे प्रोंइब बाक्ब।

डोंइती डा लोव्र

1 माननीय थियोफीलस, इं रागीम मार मार दुम्मे, मेको आ पर्वम शुश लोव्र ब्रशो बाक्माक्त। 2 डोंइती रे मेको ताइब नु तुइक्बपुकीमी मेको आन तशो, तुइशो लोव्र तेइ तेइ नेंपाइशो बाक्मा बाक्त। १यूहन्ना १:१-४ 3 गोमी ताइब तुइक्ब आन देंशो नेंशा, ब्रेक्ब आन ब्रेक्शो पदेशा “थमान बाक्माक्त” देंती। मिनु गो यो ब्रेक्तु देंशा, एको लोव्र का का पा इन कली ब्रेक्ताक्नी। प्रेरित १:१; कलस्सी ४:१४ 4 लोव्र का निक्शी डोंइती नेंनी माइ। एको आं ब्रेक्शो यो पढेतीनी हना, गोमी यो “थमा बाक्माक्त” दे थमा सुइक्नीनी।

जकरिया योव्रसीशो

5 यहूदीया रागीम हेरोद पिप आ पालामी अबीयाह आ हुल डा जकरिया नें पाइशो चढेब का बाक्माक्त। आ मीश हारून आ खिं डा चढेब आ तमी बाक्माक्त। आ नें एलीशीबा बाक्माक्त। १इतिहास २४:१०,१९ 6 मेको निक्शी परमप्रभु यावे आ डोंइती ठीक पाइब बाक्सा बाक्त। परमप्रभु यावे आ अरेशो लोव्र नु पतीके लोव्र नेल्ल टिशा, दोस मताइब दुम्शा बाक्शो बाक्सा बाक्त। 7 मेको निक्शी खाल्पी खाल्पा दुम्शो बाक्ताक्स हना यो, आल मथिशो बाक्सा बाक्त। मारदे हना एलीशीबा आल मथीब मीश मुर बाक्माक्त।

8 मिनु मार दुम्माक्त देंशा हना, चढेब आ गेय पचा कली अबीयाह आ हुल आन पालो जाक्माक्त। मिनु जकरिया यरूसलेम लमाक्त। मिनु मेकेर जाक्दीशशा, परमप्रभु यावे आ खिंमी गेय पवा बाक्त। 9 मिनु धूप चोचा कली चढेब योव्रचा माल्बाक्माक्त। मिनु चढेबपुकीमी यहूदी आन पतीके धूप चोइब मुर योव्रचा कली भोट तोक्गमे बाक्त। मिनु भोट तोक्गमेनु, जकरिया योव्रसे बाक्त। मिनु जकरियाम परमप्रभु यावे आ खिंमी धूप चोचा माल्दा बाक्त। प्रस्थान ३०:७ 10 मिनु धूप चोची ना मुर नेल्ल लाडगाम रिम्शा, परमप्रभु यावे कली पुंइना पुंइन बाक्मा बाक्त।

“तौ का थीनेवे” देंशो

11 मिनु आगामी चहिं मार दुम्माक्त देंशा हना, परमप्रभु आ स्वर्ग डा गेय पाइब का फो गूशा, धूप चोतीके आ ग्युरा गे राप्शा, जकरिया कली तपांइसे बाक्त। 12 मिनु जकरियामी मेको कली तशा, थाम्पा हिंमाक्त। 13 मिनु परमप्रभु यावे आ स्वर्ग डा गेय पाइबमी “जकरिया महिनो। परमप्रभु यावेमी इ पुंइशो गेब। इ मीश एलीशीबाम तौ का थीब। मिनु गे मेको आ नें यूहन्ना वोतो। 14 मेको आल थिशो तशा, गे ग्येरसीनेवे। शुश मुर मेको आल आ पर्वम ग्येरसीनीम। 15 मारदे हना मेको परमप्रभु आ डोंइती ठेयब दुम्ब। मेकोमी शांबु राकसी मतूब। मेको कोव्रजम बाक्मेनुन, परमप्रभु यावे आ सोक्तीम ब्रीशो बाक्ब। न्यायाधीस १३:४-५ 16 मेकोमी शुश इस्राएली आन थुं परमप्रभु, आन परमप्रभु यावे गे लेप्पाइक्ब। 17 मिनु मेकोमी एलीया आ सोक्त नु सक्ति तशा, आम आफ आ थुं आन तमी तौ गे लेप्पाइक्ब। मिनु मटीब आन कली ठीक पतीक लां जोक्ब तुइक्ब सेल्ब। मिनु मोपा मुर आन कली प्रभु नु गुम्पाइक्चा कली ठीक सेल्ब” देंमाक्त। मलाकी ३:१, २३, २४; मत्ती १७:११-१३ 18 मिनु जकरियाम परमप्रभु यावे आ स्वर्ग डा गेय पाइब कली “गो खाल्पा दुम्ती, आं मीश खाल्पी दुम्त। आल थीनस्कु, दे दोपा थमा सुइक्चा डा?” देंमाक्त। उत्पत्ती १८:११ 19 मिनु “गो परमप्रभु यावे आ स्वर्ग डा गेय पाइब गाब्रीएल नड। गो परमप्रभु यावे आ डोंइती बाक्नुड। परमप्रभु यावेमी इ

कली ग्येरपाइक्व लोव्र नेंपाइक्थ सोइक्ताक्यी। दानीएल ८:१६ 20 तन्न गे आं देशो लोव्र थमा मसुदी। मोपतीके आं देशो लोव्र नेल्ल मदुम सम्म गे इ सेंदा सोव्रशा व्वाक्ने मचाप्ब दुम्नेवे” देंमाक्त।

21 जकरिया आगाम बाक्मेनु, शुश मुर लाङगाम देल्शा “ना रेन आगा ओव्रशो मार पवा माइ, काइ मगू” देशा रिम्दमे बाक्त। 22 मिनु नोले जकरिया गूशा “लोव्र पड” देंमेनु, काइ लोव्र पने मचबा बाक्त। मिनु गुइ चाल पवा बाक्त। मिनु लाङगाम बाक्बपुकीमी “मेकोम परमप्रभु यावे कली गुमा बाक्त” दे तुइक्तमे बाक्त। 23 मिनु अबीयाह आ हुल डा पालो नुप्शा, जकरिया आ खिं लेम्माक्त।

24 मिनु आ मीशेम कोव्रज कुरा बाक्त। मिनु ५ महिना सम्म सुइ आन कली मतुइक्पाइक्थु, खिं डा खिं बाक्माक्त। 25 मिनु “मुरपुकीमी आं कली आल मथीब, दे महिक्गेम। मुल परमप्रभुमी आं कली हिकपाइक्चा कली शिशी पतीकेमी आल थीब दुम्पाइक्ती” देंमाक्त। उत्पत्ती ३०:२३

येसु जरमेसीब, दे तुइक्पाइक्थो

26 एलीशीबामी आल कुरशो ६ महिना दुम्मेनु, परमप्रभु यावे आ स्वर्ग डा गेय पाइब गाब्रीएल गालील रागी डा नासरथ सहर सोइक्चा पुंइसे बाक्त। 27 मेकेर मरीयम नें पाइक्थो मीश आल का बाक्माक्त। मरीयम दाऊद आ थर डा योसेफ माइक्थो वोंइश मुर नु ग्युंवे पचशो बाक्माक्त। मत्ती १:१६-१८ 28 गाब्रीएल मरीयम आ बाक्तीके जाक्शा, मरीयम कली “परमप्रभु गे नु बाक्ब। इ कली दाक्शा, आसीक गेते” दे सेउ पवा बाक्त। 29 मिनु मरीयममी परमप्रभु यावे आ स्वर्ग डा गेय पाइब कली तशा, आ लोव्र नेंशा छक लाक्शा “मार लोव्र माइ” दे मिम्ता बाक्त। 30 मिनु गाब्रीएलमी “ए मरीयम, महिनो। परमप्रभु यावेमी इ कली दाक्शा योव्रते। 31 गे मुल कोव्रज कुरशा, तौ का थीनेवे। मिनु इ तौ कली येसु नें वोतो। यसैया ७:१४; मत्ती १:२१-२३ 32 मेको ठेयब दुम्ब। मेको कली नेल्ल क्येडा ठेयब आ तौ देंनीम। मिनु परमप्रभु, परमप्रभु यावेमी मेको कली आ किकी पिपी दाऊद आ ठेयब नित्तीके गेब। यसैया ९:६ 33 मिनु मेको याक्ब आ खिं डा मुर, यहूदी आन पिप दुम्शा, हुकुम पाइब। मिनु आ राज्य गेनायो मनुप्ब” देंमाक्त। 34 मरीयममी मेको लोव्र नेंशा “गो मुल सम्म ग्युंवे मपशो बाक्नुड। गो वोंइश मुर नु मइम्ड। इन देशो दोपा दुम्ने चाप्बा डा?” दे हिल्लो पवानु 35 “परमप्रभु यावे आ सोक्तीमी इ कली सुम्ब। मिनु नेल्ल क्येडा ठेयब आ सक्ति ताइनेवे। मोपतीके इ आल परमप्रभु यावे के बाक्ब। मेको कली परमप्रभु यावे आ तौ देंनीम। मत्ती १:१८-२० 36 इ थर डा एलीशीबा कली यो मार दुम्त देशा हना, आल मथीब खाल्पी बाक्त हना यो, मुल कोव्रज कुरशो ६ महिना दुम्त। 37 मारदे हना परमप्रभु यावेमी पने मचाप्शो मारेइ मबाक्ब” देंमाक्त। उत्पत्ती १८:१४ 38 मिनु मरीयममी “गो परमप्रभु आ वाइलीम दुम्ती। मिनु इन देशो बुद पा आ दाक्शो पपाइय्यील” देंमाक्त। मिनु परमप्रभु यावे आ स्वर्ग डा गेय पाइब लेशशा लमाक्त।

मरीयमम एलीशीबा ग्रुम्शो

39 मिनु नोले मरीयम यहूदीया रागी डा पहाडी सहर कामी बाक्शो एलीशीबा कली ग्रुम्थ लमाक्त। 40 मिनु जकरिया आ खिं ओव्रशा, एलीशीबा कली सेउ पवा बाक्त। 41 मरीयम आ सेउ ताक्गानु, एलीशीबा आ कोव्रज डा आल प्रेक्माक्त। मिनु परमप्रभु यावे आ सोक्तीमी एलीशीबा कली प्रिंदा बाक्त। 42 मिनु ठेयब सेंदा पा मरीयम कली “मीश मुर नेल्ल आन दातेमी गे आसीक ताइब बाक्नेवे। इ कोव्रज डा आल आसीक ताइब बाक्ब। 43 आं प्रभु आ ममा दोपा आं खिंमी आं कली ग्रुम्थ जाक्नी? 44 गो इ सेउ ताक्गानु, आं कोव्रज डा आल ग्येरशा प्रेक्त। 45 गे परमप्रभु आ लोव्र नेंशा, आ देशो गेना हना यो जाक्दीप्ब, दे थमा सुइक्तीनी। परमप्रभु यावेम इन कली आसीक गेवल” देंमाक्त। लूका ११:२७-२८

परमप्रभु कली ठेयब सेल्शो

46 मिनु मरीयममी “आं थुंमी परमप्रभु कली ठेयब सेल्नुड। १सामुएल २:१-१० 47 मारदे हना मेको आं कली श्येत रे प्रोंइब, परमप्रभु बाक्ब। गो ग्येरसीनुड। 48 गो महिक्सीशो आइक्च नड। तन्न परमप्रभु यावेमी आं कली हिकती। मुल डा मेरे जात नेल्ल डा मुरपुकीमी आं कली आसीक गेनीम। 49 मारदे हना सक्ति पाइक्थोमी आं कली थम रिम्शो पाइक्ती। परमप्रभु यावे आ नें का ला बाक्ब। 50 सु सुम मेको कली मान पा हिंनीमी, मेको आन कली शिशी पाइब। भजन संग्रह १०३:१३, १७ 51 मेकोमी सक्ति कोइताक्व। मिनु ठेयब लेशशो आन कली आन मिम्शा हिंतीके मेको आन कली गेब। उत्पत्ती ११:८ 52 हुकुम पाइब आन सासन पशो रोइक्शा, महिक्सीशो आन कली ठेयब सेल्तु। भजन संग्रह १४७:६ 53 शोव्रलु बेक्शो आन कली जचा गेब। शोंप पाइक्थो आन कली श्येतथ गुइ सोइक्ब। भजन संग्रह ३४:११;

भजन संग्रह १०७:९ 54 मेकोमी आ शिशी कोंइशा, आ वाइल इस्राएल कली वारच पाप्तु। 55 मेकोमी इं किकी पिपी, अब्राहाम नु आ चच युइ आन कली गेना हना यो शिशी पचा कली मिम्ताक्व” दे मरीयममी परमप्रभु यावे कली मान पा देमाक्व। उत्पत्ती १७:७; उत्पत्ती १८:१८ 56 मिनु मरीयम एलीशीबा आ खिंमी महिना सां सम्म बाक्शा, आ खिं लेम्माक्व।

यूहन्ना जरमेशो

57 मिनु डोंइती देशो बुद पा एलीशीबामी तौ का थिमाक्व। 58 आ एर ओंथ बाक्ब नु आ खिं डा मुर नेल्लेमी “परमप्रभुमी मेको कली शिशी पा, तौ थीब सेल्लु” देशो नेंशा, नेल्ल मेको नु ग्येरसमा बाक्व।

59 मिनु आल ८ नाक्व दुम्मेनु, जकरिया आ खिंमी मुर देल्शा, खोइक्तीक चिनु खोइश्शा, आल आ नें वोइक्चामेनु, नेल्लेमी “आ आफ आ नें खोदेशोन वोइक्चा” देमा बाक्व। उत्पत्ती १७:१२ 60 तन्न आल आ ममामी “मदुम्ब, एको आ नें यूहन्ना वोइक्चा माल्ब” देमाक्व। 61 मिनु मुरपुकीमी “मुल सम्म इन खिं डा सुइ मुरुमी मोदेशो नें मवोदेम” देमा बाक्व। 62 मिनु नोले “आ आफ कली हिल्लो पय” दे जकरिया कली हिल्लो पामेनु, 63 जकरियाम ब्रेक्तीक का पितीन, दे चाल पा “आं तौ आ नें यूहन्ना वोतीने” दे ब्रेक्ता बाक्व। मिनु नेल्ले छक लाक्मा बाक्व। 64 मेना जकरिया आ सेंदा ग्रिश्शा, ब्वाक्ने चाप्ब दुम्शा, परमप्रभु यावे कली ठेयब सेला बाक्व। 65 मिनु लोत्र पाइब दुम्त देशो नेंशा, मुर नेल्ल छक लाक्शा हिंमा बाक्व। मिनु मेको लोत्र यहूदीया डा पहाड नेल्ल ब्रमाक्व। 66 नेंबपुकीमी मेको लोत्र आन थुंमी वोइश्शा “मेको आल नोले दोदेशो दुम्बा?” देमुमा बाक्व। मारदे हना परमप्रभु मेको आल नु बाक्माक्व।

जकरियाम परमप्रभु कली ठेयब सेल्शो

67 आल आ आफ जकरियामी परमप्रभु यावे आ सोक्तीम ब्रीशा, परमप्रभु यावे आ लोत्र पवा बाक्व। 68 मेकोमी “परमप्रभु, इस्राएली आन परमप्रभु यावे ठेयब बाक्ब। मारदे हना इस्राएल डा मुर इं कली शिशी पा पाप रे प्रोंइब सोइक्चाप्तु। लूका ७:१६ 69 मेकोमी आ गेय पाइब दाऊद आ खिं डा मुर रे इं कली सक्ति पाइश्शो पाप रे प्रोंइब सोइक्ताक्व। 70 साइ नेसी परमप्रभु यावेमी आ लोत्र पाइब आन कली मेको इस्राएल कली पाप रे प्रोंइब आ पर्बम लोत्र पपदा बाक्व। मिनु मेको लोत्र पाइबपुकीमी मार देमा बाक्व देशा हना 71 ‘परमप्रभु यावेमी गो इस्राएल डा मुर आंइ कली आंइ जोरी सत्रु आन गुइ रे नु आंइ कली काइ मदाक्ब रे प्रोंइब’ देमा बाक्व। 72 ‘परमप्रभु यावेमी आंइ किकी पिपी आन कली शिशी पाइनुड’ दे आ पशो कबल मिम्ताक्व। उत्पत्ती १७:७ 73 मोदेशो पा शिशी पाइनुड, दे इं किकी पिपी अब्राहाम नु कसम जशा लोत्र थोक्ता बाक्व। मार लोत्र थोक्शो बाक्व देशा हना उत्पत्ती २२:१६-१८; मीका ७:२० 74 ‘गो इं जोरी सत्रु आन गुइ रे प्रोंइचा पुंइसीनय। मिनु गो महिंथु परमप्रभु यावे कली ठेयब सेल्ने चाप्नय। 75 आ मुर दुम्शा, ब्रोंइका सम्म ठीक गेय पा बाक्ने चाप्पल’ दे परमप्रभु यावे आ लोत्र पाइबमी देमा बाक्व। तीतस २:१२-१४ 76 मिनु जकरियामी आ तौ कली ‘गे नेल्ल क्येडा ठेयब आ लोत्र पाइब’ देनीमी। मारदे हना गे प्रभु आ डोंइती गाक्शा, मेको आ लां सेल्नेवे। मलाकी ३:१ 77 गे मेको आ मुर आन कली आन पाप क्याम्सीशा, पाप रे ब्रोंइशो मुर दुमीन, दे शेनेवे। येरमीया ३१:३४ 78 आंइ परमप्रभु यावेमी इं कली दाक्शा, शिशी पा, रुप्तीक थुं सुनी डा छेडछेड खोदेशो पा इं तार मोइक्ताक्व। यसैया ६०:१-२ 79 मिनु मेको बेक्पाइक्ब आ छिडछिडम बाक्ब आन कली हाम्सो दुम्ब। मिनु मेकोमी आंइ कली थुं नाइश्शा बाक्तीकेम खुल्ब” देमाक्व। यसैया ९:१

80 मिनु यूहन्ना कोल्शा, परमप्रभु यावे आ सोक्तीम बोल्यो दुम्शा, खिं रे गाक्शा, मुर मबाक्तीके गोरशो रागीमी जाक्दीश्शा, इस्राएल डा मुर आन कली परमप्रभु यावे आ लोत्र मशेंदीमी सम्म मेकेर बाक्माक्व। मती ३:१

2

येसु जरमेशो

1 मिनु मेना सिजर अगस्टसमी “रागी नेल्ल डा मुर आन नें ब्रेक्शा हिक्चा नमी” दे हुकुम पवा बाक्व। 2 मोदेशो नें ब्रेक्तीके डोंइती गेनायो मपशो बाक्मा बाक्व। मुल पामेनु, सिरीया रागीम क्वीरीनीयसम सासन पशो बाक्माक्व। 3 मिनु मुर नेल्ल आन नें ब्रेक्पाइक्चा कली आन थर डा सोतीक बोतीक गाउं गाउं सहर सहरम जाक्दीम्मा बाक्व। 4 योसेफ पिप दाऊद आ खिं डा बाक्माक्व। पिप दाऊद आ खिं डा मुर आन सोतीक बोतीक बेथलेहेम सहर बाक्माक्व। मोपतीके योसेफ आ मीश मरीयम कली लाइश्शा, गालील रागी डा नासरथ सहर रे यहूदीया रागी डा बेथलेहेम सहर लमाक्व। 5 मोपा आस नें ब्रेक्पाइक्थ लसानु, मरीयम कोत्रज कुरशो बाक्माक्व। 6 मिनु बेथलेहेम सहरम जाक्दीस्सा

नोले मरीयम आल थितीक रोड पवा बाक्त। 7 मेकेर बास बाक्तीक खिं मथित्थु, गोठ कामी बास बाक्सा बाक्त। मिनु गोठम बाक्सानु, मरीयममी तौ का थिशा, वाम गिल्शा, शुंगुम इप्पदा बाक्त। मत्ती १:२५

गोठलापुकी जाक्शो

8 मेकेर गोठलापुकी बाक्सा बाक्त। मेकोपुकी नाक्दो रूम बाक्शा, आन भेडा खाल पशो बाक्सा बाक्त। 9 मिनु परमप्रभु यावे आ स्वर्ग डा गेय पाइब का गोठला आन बाक्तीकेम फो गूमाक्त। मिनु परमप्रभु आ छेडछेडमी मेको गोठला आन एर ओंथ ठेयब हाम्सो सेला बाक्त। मेको तशा गोठलापुकी शुश हिंमा बाक्त। 10 तन्न परमप्रभु यावे आ स्वर्ग डा गेय पाइबमी “महिनीने। गो इन कली नु मुर नेल्ल आन कली ग्येरपाइक्ब लोत्र नेंपाइक्थ जाक्ती। 11 एको ग्येरपाइक्ब लोत्र दोदेशो बाक्ब देशा हना, मुलाक्दो पिप दाऊद आ सहरम आल का जरमेसाक्व। मेको नक जरमेशो आल पाप रे प्रोइब, प्रभु येसु ख्रीस्त बाक्ब। 12 आं लोत्र थमा बाक्ब, दे दोपा तुइक्नीनी देशा हना, गे मेको नक जरमेशो आल कली वाम गिल्शा, शुंगुम इप्पाइश्शो थितीनी” देमाक्त। 13 मिनु सरीड रे परमप्रभु यावे आ स्वर्ग डा गेय पाइब शुश फो फु गूशा, परमप्रभु यावे कली ठेयब सेल्शा भजन संग्रह १०३:२०-२१ 14 “नेल्ल क्येडा इर डा परमप्रभु यावे नेल्ल क्येडा ठेयब बाक्ब। आ दाक्शो मुर आन कली थुं नाइश्शा बाक्चा गेब” दे कुम्सो पामे बाक्त। लूका १९:३८; गन्ती ६:२६; एफिसी २:१४,१७

15 मिनु परमप्रभु यावे आ स्वर्ग डा गेय पाइब सरीड गे लेशशा लमा बाक्त। मिनु गोठलापुकीमी “बेथलेहेम सहर लय। एको परमप्रभुमी तुइक्पाइश्शो लोत्र कोव्रथ लय” देमुमा बाक्त। 16 मिनु दोरशा जाक्दीश्शा कोव्रडमेनु, मरीयम नु योसेफ थित्मे बाक्त। मेकेर नक थिशो आल यो शुंगुम इप्पाइश्शो तामे बाक्त। 17 मेको नेल्ल तशा, आल आ पर्बम नेंशो लोत्र शुश मुर आन कली तुइक्पदमे बाक्त। 18 मिनु आन लोत्र नेंब नेल्ल छक लाक्सा बाक्त। 19 तन्न मरीयममी गोठला आन लोत्र नेंशा, आ थुंमी वोदा बाक्त। 20 गोठलापुकीमी आन तशो नु आन नेंशो आ पर्बम परमप्रभु यावे कली ठेयब सेल्ना सेल्न लेम्मा बाक्त।

येसु नें वोइश्शो

21 मिनु आल जरमेसे आ ८ नाक्ती खोइक्तीक चिनु खोदमे बाक्त। मिनु आ नें येसु वोदमे बाक्त। मारदे हना परमप्रभु यावे आ स्वर्ग डा गेय पाइबमी “मेको आ नें येसु वोइक्चा” दे आ कोव्रज कुरचा क्येडा डोंइती मरीयम कली देशो बाक्साक्त। लूका १:५९; उत्पत्ती १७:१२; लूका १:३१

येसु परमप्रभु आ खिं लाइश्शो

22 मिनु चोव्रखेतीक नाक्त जाक्मेनु, मोसामी ब्रेक्शो लोत्र टिशा, यरूसलेम सहर जाक्दीश्शा, आल कली परमप्रभु यावे आ खिं लाइश्शा “परमप्रभु यावे केन दुम्ल” देशा, परवा आ चाइक्ब निक्शी चढेम्से बाक्त। लेवी १२:१-४; गन्ती १८:१५ 23 मारदे हना परमप्रभुम अरेशो लोत्रमी “डोंइती थिशो वोइश् आल परमप्रभु यावे के बाक्ब” दे ब्रेक्शो बाक्ब। प्रस्थान १३:२,१५ 24 परमप्रभु आ अरेशो लोत्रमी आम्मा चोव्रखेचा कली “परवा आ चाइक्ब निक्शी चढेचा माल्ब” दे ब्रेक्शो बाक्ब। लेवी १२:६-८

25 यरूसलेममी सिमियोन माइश्शो मुर का बाक्साक्त। मेको ठीक पाइब नु परमप्रभु यावे कली मान पा हिंब बाक्साक्त। परमप्रभु यावे आ सोक्तीम ब्रीशा “परमप्रभु यावेमी इस्राएल डा मुर आन कली पाप रे प्रोइब का सोइक्ब” दे लां कोव्रशा बाक्शो बाक्साक्त। उत्पत्ती ४९:१८ 26 परमप्रभु यावे आ सोक्तीमी मेको कली “इ मबेक्थु, प्रभु, पाप रे प्रोइब ख्रीस्त गुम्पाइक्नन” देशो बाक्साक्त। 27 मिनु परमप्रभु यावे आ सोक्तीमी मेको कली “मुल परमप्रभु यावे आ खिं लावो” देंतीके लशा, परमप्रभु यावे आ खिं जाक्दीम्माक्त। मिनु मरीयम नु योसेफमी आल कली परमप्रभु यावे आ ब्रेक्पाइश्शो लोत्रमी मार पचा देशो बाक्मे, मेको पचा कली चाक्शो तवा बाक्त। 28 मिनु सिमियोनमी आल कली लाइश्शा, परमप्रभु यावे कली ठेयब सेल्शा 29 “परमप्रभु, इन देशो जाक्दीत्त। मुल इन वाइल थुं नाइश्शा बेक्ने चाप्ब। 30 मारदे हना इन सोइश्शो पाप रे प्रोइब कली आं मिक्चीम ताता। 31 मेको कली रागी रागी डा मुर नेल्ल आन पर्बम सोइक्ताक्नी। 32 अर्को जात डा मुर आन कली छेडछेड दुम्शा, मेको आन कली रुप्तीक थुं गेचा कली सोइक्ताक्नी। गो इस्राएली आंइ कली थम रिम्शो दुम्त” देमाक्त। यसैया ४९:६

33 मिनु आल आ आम आफोमी “मार, मिश रिम्शो लोत्र पवा” दे छक लाक्सा बाक्त। 34 मिनु सिमियोनम मेको आस कली आसीक गेशा, मरीयम कली “एको आल इस्राएली आन दातेमी लां कोइशा मुर आन कली फ्राब। का निक्शी खतम दुम्नीम, का निक्शी रिम्शो दुम्नीम। मिनु शुश मुरुमी एको कली मदाक्नीम। लूका २०:१७-१८; प्रेरित

२८:२२; १कोरिन्थी १:२३ ३५ मोपा मुर आन थुंम मिम्शो तुंडसीब। मिनु तरवार कामी इ थुं थोकब” देंमाक्त। यूहन्ना १९:२५

३६ यरूसलेममी आन्ना माइशो परमप्रभु यावे आ लोव्र पाइब खाल्पी का बाक्माक्त। मेको आशेर आ थर डा फनुएल आ तमी बाक्माक्त। मेको ग्युंभे पशो आ ७ बर्सम आ वोंइश बेक्शो बाक्माक्त। ३७ मिनु आ वोंइश बेक्म नोले शुश बर्स ब्रोंइशा, ८४ बर्स दुम्माक्त। मेकोमी परमप्रभु यावे आ खिं मप्रोंइथु, नाक्दो नाक्ती मेकेर माइजा बाक्शा प्रार्थना पा, परमप्रभु यावे कली ठेयब सेलना सेलन बाक्बाक्माक्त। १तिमोथी ५:५ ३८ मिनु मरीयम नु योसेफमी आल मेकेर लदसेनु, मेको खाल्पी गुम्से बाक्त। मिनु खाल्पीमी आल कली तशा, परमप्रभु यावे कली ठेयब सेला बाक्त। मिनु “परमप्रभु यावेमी पाप रे प्रोंइब सोइक्ब” दे आस पा बाक्ब यरूसलेम डा मुर आन कली मेको आल आ पर्बम लोव्र पा नेंपाइक्मी बाक्त।

३९ मिनु परमप्रभु आ अरेशो पचा माल्शो गेय नेल्ल थुम्शा, आल कली लाइशशा, गालील रागी डा नासरथ सहरम लेस्सा बाक्त। ४० मिनु नोले आल कोल्शा, जोक्ब तुइक्ब दुम्माक्त। मारदे हना परमप्रभु यावेमी दाक्शा मेको कली आसीक गेवा बाक्त।

येसु परमप्रभु आ खिंमी बाक्शो

४१ येसु आ आम आफ बर्स बर्समी पास्सा चाड मानेथ यरूसलेम लाइबाक्सा बाक्त। ब्यवस्था १६:१-८ ४२ मिनु येसु १२ बर्स जाक्दीम नोले पास्सा मानेथ लमानु, मार दुम्माक्त देंशा हना, ४३ पास्सा थुम्शा खिं लेम्मानु, आम आफोम मतुइक्थु, येसु मेकेरन लीमाक्त। तन्न आ आम आफोमी मतुइसे बाक्त। प्रस्थान १२:१८ ४४ मेको नाक्त का डा लां गाक्सानु, येसु आ वारच नु लत, दे मिम्तसे बाक्त। मिनु वारच नु बाक्शो मतथु, येसु कली माल्चा गोम्से बाक्त। नाक्त का डा लां ३०-४० किलो मिटर बाक्ब। ४५ मिनु माल्से माल्से तेइ मथित्से बाक्त। मिनु लेशशा माल्ना माल्न यरूसलेम जाक्शा यो मथित्से बाक्त। ४६ नाक्दो नाक्ती सां सम्म माल्ना माल्न गाक्सा नोले परमप्रभु यावे आ खिंम थित्से बाक्त। मेको परमप्रभु यावे आ लोव्र शेंबपुकी नु बाक्शा, आन लोव्र नेंशा, मेको आन कली लोव्र हिल्लो पना पन बाक्शो ताम्से बाक्त। ४७ मेको आ लोव्र नेंब नेल्लेमी “शुश जोक्ब तुइक्ब आल बाक्माक्त” दे छक लाक्मा बाक्त। ४८ आ आम आफोम मेको कली तशा, थाम्पा छक लाक्सा बाक्त। मिनु आ ममामी “आं तौ, गे मारदे आंस कली मोदेशो श्येत गेस्की? इ आफ नु गो इ कली ‘ते लाक्गा?’ दे शुश हिंशा माल्तास्कु” देंमाक्त। ४९ मिनु येसुमी “मारदे माल्थीसी? गो आं आफ आ खिंमी बाक्चा माल्नुड, दे मतुइक्तीसी?” देंमाक्त। यूहन्ना २:१६ ५० तन्न मेको आ लोव्र मरुप्से बाक्त। ५१ मिनु येसु आ आम आफ नु लेशशा, नासरथ आ खिं लमाक्त। में डा मेरे आ आम आफ आस लोव्र टिशा बाक्माक्त। आ ममामी मेको मोदेशो दुम्शो नेल्ल शुश मिम्शा थुंम वोदा बाक्त। ५२ येसु कोल्शा बारशा, शुश जोक्ब तुइक्ब दुम्माक्त। परमप्रभु यावेमी मेको कली दाक्ता बाक्त। मुरपुकीमी यो दाक्तमे बाक्त। १सामुएल २:२६

3

ब्वाक्कुम खुम्शा गुंडब यूहन्ना

मत्ती ३:१-१२; मार्कुस १:१-८

१ सिजर तिबेरीयुस आ हुकुम पशो १५ बर्स दुम्मेनु, इस्राएल रागीम सासन पाइब सु सु बाक्मा बाक्त देंशा हना, यहूदीया रागीम पन्तीयस पिलातस, गालील रागीम हेरोद, इतुरीया नु त्राकोनीतीस रागीम हेरोद आ लोक्ब फिलीप नु अबील्लेने रागीम लुसानीयस बाक्मा बाक्त। २ यरूसलेममी नेल्ल क्येडा ठेयब चढेब हन्नास नु काइयाफास बाक्सा बाक्त। जकरिया आ तौ यूहन्ना गोरशो रागी मुर मबाक्तीकेमी बाक्शो बाक्माक्त। मिनु परमप्रभु यावेमी यूहन्ना कली लोव्र पवा बाक्त। इजीकीएल १:३; होसे १:१ ३ मिनु यूहन्ना यर्दन खोला आ नेक्था जाक्दीशशा, एर ओथ परमप्रभु यावे आ लोव्र शेंना शेंन गाक्माक्त। मिनु शेंना शेंन मुर आन कली “इन थुं परमप्रभु यावे गे लेशशा, ब्वाक्कुम खुम्शा गुंडचा पुंडसीन। मिनु परमप्रभु यावेमी इन पाप क्याम्शा गेब” दे शेंदीमी बाक्त। ४ साइ नेसी परमप्रभु यावे आ लोव्र पाइब यसैयामी “गोरशो रागीमी सेंदा का नेंसीब। मेकोमी मार देंब देंशा हना, प्रभु आ लां सेलीने। आ गाक्तीकेम फुल्लु प्रोक्शा थेलीने। यसैया ४०:३-५ ५ बेंसी नेल्ल प्रिंचा पुंडसीनीम। डांडा नेल्ल दिंम सेल्चा पुंडसीनीम। हिरशो लां नेल्ले सोव्रजो सेल्चा पुंडसीनीम। मरिम्शो लां नेल्ले रिम्शो सेल्चा पुंडसीनीम। ६ मिनु मुर नेल्लेमी परमप्रभु यावेमी दोपा पाप रे प्रोंइबा मेको तुइक्नीम” दे ब्रेक्शो बाक्माक्त। यसैया ४०:३-५

7 मिनू शुश मुर यूहन्ना आ बाक्तीकेमी ब्वाक्कुम खुम्शा गुंडपांडसीचा कली जाक्मा बाक्त। मिनू यूहन्नामी मेको आन कली “गे बुस्स आ खलकपुकी, परमप्रभु यावे आ सजाइ रे ब्रोंडचा ताइनीनी, दे सुम शेंदा? 8 इन थुं परमप्रभु यावे गे लेशशा, रिम्शो फल सिशशो खोदेंशो गेय कोंडिदीने। गे ‘इं किकी पिपी अब्राहाम बाक्ब’ दे मिम्शा, देश पा मबाक्कीन। मारदे हना गो इन कली ‘परमप्रभु यावेमी एको फुल्लु रे अब्राहाम आ चच युइ सेल्ने चाण्व’ देंनुड। 9 तिम्चा, दे रवा आन पुंमी खा वोइशशो बाक्ब। रिम्शो फल मसिण्व रवा का का पा तिम्शा, मीम चोचा पुंडसीनीम, दे तुइक्तीन” दे माइक्मी बाक्त।

10 मिनू मुरपुकीमी “मुल मार पक?” दे हिल्लो पामे बाक्त। 11 मिनू यूहन्नामी “सु के फेक्तीक वा निक्शी बाक्मे, मेकोमी फेक्तीक का मबाक्शो कली गेचा माल्ब। सु के जचा थोत्रक बाक्मे, मेकोमी जचा मताइब कली गेचा माल्ब” देंमाक्त। 12 तिरो पोक्बपुकी यो जाक्शा यूहन्ना कली “शेंब, गो मार पक?” दे हिल्लो पामे बाक्त। 13 मिनू मेकोमी “सरकारम ताक्चा देंशो क्येडा शुश मताक्चा” देंमाक्त। 14 का निक्शी सिपाइपुकी यो जाक्शा “मिनू गो मार पक?” दे हिल्लो पामे बाक्त। मिनू मेको आन कली “सुइ आन कली हिंम हिंम पा जोल पा दोस गेशा आन मारेइ मारेइ मरोइक्तीन। इन गेय रे पा तशो क्येटम इन थुं नुशा बाक्कीन” दे माइक्मी बाक्त।

15 मिनू यूहन्ना आ लोत्र नेंबपुकीमी “एको मुर सु माइ? ख्रीस्त कोर में?” दे शुश मिम्तमे बाक्त। 16 यूहन्नामी मेको नेल्ल आन कली “गो इन कली ब्वाक्कुम खुम्शा गुंडननी। आं नोले जाक्ब चहिं आं क्येडा ठेयब बाक्ब। गो मेको आ डोंडती बाप्शा, आ जुत्ता पुइक्चा लायो मशिरनुड। मेकोमी इन कली परमप्रभु यावे आ सोक्ती नु मीम खुम्ब। 17 लाङ्गाम हाम्शो चेरब हुरशा, भूस नु गेडा तिल्चा कली मेको आ गुइमी ग्योल बाक्ब। गेडा कोठोम कुर पा वोइक्ब। भूस चहिं गेनायो मकाण्व मीम हुम्ब” दे माइक्मी बाक्त। 18 मोदेशो लोत्र पा अर्ती गेशा, रिम्शो लोत्र शेंदीमी बाक्त। 19 मेकोमी सासन पाइब हेरोद आ लोक्ब आ मीश चाक्चा आ पर्बम दोस गेवा बाक्त। मोपतीके मेकोमी यूहन्ना कली जेल्खानमी चोक्पदा बाक्त। मत्ती १४:३-४; मर्कूस ६:१७-१८ 20 हेरोद कली मार दोस गेवा बाक्त देंशा हना “इन लोक्ब आ मीश चाक्शा, पाटके पाइतीनी। अरु पाप यो शुश पाइतीनी” दे हुइशशो बाक्माक्त।

येसु ब्वाक्कुम खुम्पांडसीशो

मत्ती ३:१३-१७; मर्कूस १:९-११

21 मिनू यूहन्ना चोक्सीचा क्येडा डोंडती शुश मुर आन कली ब्वाक्कुम खुम्शा गुंडदा बाक्त। काबु येसु यो जाक्शा, ब्वाक्कुम खुम्शा गुंडचा पुंडसे बाक्त। मिनू ब्वाक्कु रे गूशा, प्रार्थना पना पन बाक्मेनु, सरीड रोक्से बाक्त। 22 मिनू सरीड रे परमप्रभु यावे आ सोक्त परवा खोदेंशो पा यिशा, येसु आ तारी जुक्ता बाक्त। मिनू सरीड रे “आं दाक्शो तौ नवे। इ कली तशा थाम्पा ग्येरसीनुड” देंशो सेंदा नेंसे बाक्त। यूहन्ना १:३२; लूका ९:३५

येसु आ किकी पिपी

मत्ती १:१-१७

23 मिनू येसुमी मुर आन कली परमप्रभु यावे आ लोत्र शेंचा गोवानु, ३० बर्स दुम्शो बाक्माक्त। मुरपुकीमी आ आफ योसेफ बाक्ब, दे मिम्तमे बाक्त। योसेफ हेली आ तौ बाक्माक्त। लूका ४:२२ 24 हेली मात्थात आ तौ बाक्माक्त। मात्थात लेवी आ तौ बाक्माक्त। लेवी मेल्की आ तौ बाक्माक्त। मेल्की यान्नाइ आ तौ बाक्माक्त। यान्नाइ योसेफ आ तौ बाक्माक्त। 25 योसेफ मत्थाथीयास आ तौ बाक्माक्त। मत्थाथीयास आमोस आ तौ बाक्माक्त। आमोस नाहुम आ तौ बाक्माक्त। नाहुम एस्ली आ तौ बाक्माक्त। एस्ली नग्गै आ तौ बाक्माक्त। 26 नग्गै माथ आ तौ बाक्माक्त। माथ मत्थाथीयास आ तौ बाक्माक्त। मत्थाथीयास सेमेइन आ तौ बाक्माक्त। सेमेइन योसेक आ तौ बाक्माक्त। योसेक योदा आ तौ बाक्माक्त। 27 योदा योआनान आ तौ बाक्माक्त। योआनान रेसा आ तौ बाक्माक्त। रेसा जेरूब-बाबेल आ तौ बाक्माक्त। जेरूब-बाबेल शाल्तीएल आ तौ बाक्माक्त। शाल्तीएल नेरी आ तौ बाक्माक्त। 28 नेरी मेल्की आ तौ बाक्माक्त। मेल्की अददी आ तौ बाक्माक्त। अददी कोसाम आ तौ बाक्माक्त। कोसाम एल्मादम आ तौ बाक्माक्त। एल्मादम एर आ तौ बाक्माक्त। 29 एर यहोसु आ तौ बाक्माक्त। यहोसु एलीएजर आ तौ बाक्माक्त। एलीएजर योरीम आ तौ बाक्माक्त। योरीम मात्थात आ तौ बाक्माक्त। मात्थात लेवी आ तौ बाक्माक्त। 30 लेवी सिमियोन आ तौ बाक्माक्त। सिमियोन यहूदा आ तौ बाक्माक्त। यहूदा योसेफ आ तौ बाक्माक्त। योसेफ योनाम आ तौ बाक्माक्त। योनाम एल्याकीम आ तौ बाक्माक्त। 31 एल्याकीम मेलेया आ तौ बाक्माक्त। मेलेया मेन्ना आ तौ बाक्माक्त। मेन्ना मात्ताथा आ तौ बाक्माक्त। मात्ताथा नाथान आ तौ बाक्माक्त। नाथान दाऊद आ तौ बाक्माक्त। २सामुएल ५:१४ 32 दाऊद येस्से आ तौ बाक्माक्त। येस्से ओबेद आ तौ बाक्माक्त। ओबेद बोआज आ तौ बाक्माक्त।

बोआज साल्मोन आ तौ बाक्माक्त। साल्मोन नहशोन आ तौ बाक्माक्त। रूथ ४:१७-२२ 33 नहशोन अम्मीनादाब आ तौ बाक्माक्त। अम्मीनादाब आदमीन आ तौ बाक्माक्त। आदमीन अरनी आ तौ बाक्माक्त। अरनी हेस्रोन आ तौ बाक्माक्त। हेस्रोन पेरेस आ तौ बाक्माक्त। पेरेस यहूदा आ तौ बाक्माक्त। उत्पत्ती ५:१-३२; उत्पत्ती ११:१०-२६; उत्पत्ती २१:२-३; उत्पत्ती २९:३५ 34 यहूदा याकूब आ तौ बाक्माक्त। याकूब इसहाक आ तौ बाक्माक्त। इसहाक अब्राहाम आ तौ बाक्माक्त। अब्राहाम तेराह आ तौ बाक्माक्त। तेराह नाहोर आ तौ बाक्माक्त। 35 नाहोर सेरूग आ तौ बाक्माक्त। सेरूग रेऊ आ तौ बाक्माक्त। रेऊ पेलेग आ तौ बाक्माक्त। पेलेग एबेर आ तौ बाक्माक्त। एबेर शेलाह आ तौ बाक्माक्त। 36 शेलाह केनान आ तौ बाक्माक्त। केनान अरपक्शाद आ तौ बाक्माक्त। अरपक्शाद शेम आ तौ बाक्माक्त। शेम नोआह आ तौ बाक्माक्त। नोआह लमेक आ तौ बाक्माक्त। 37 लमेक मेथुसेलाह आ तौ बाक्माक्त। मेथुसेलाह हनोक आ तौ बाक्माक्त। हनोक यरेद आ तौ बाक्माक्त। यरेद मा-हालालेल आ तौ बाक्माक्त। मा-हालालेल केनान आ तौ बाक्माक्त। 38 केनान एनोश आ तौ बाक्माक्त। एनोश सेथ आ तौ बाक्माक्त। सेथ आदम आ तौ बाक्माक्त। आदम चहिं परमप्रभु यावे आ सेल्लो बाक्माक्त।

4

येसु नाक्चा पुंइसीशो

1 येसु परमप्रभु यावे आ सोक्तीम ब्रीशा, यर्दन खोला रे लशा, परमप्रभु यावे आ सोक्तीमी गोरशो रागीमी चाक्दीत्चा पुंइसे बाक्त। 2 मिनु ४० नाक्ती गोरशो रागीम सैतान रे पा थुं नाक्चा पुंइसे बाक्त। मेको ४० नाक्त सम्म मारेइ मजथु बाक्शो बाक्माक्त। मिनु नोले शुश शोव्रलु बेक्माक्त। 3 मिनु सैतानमी “मार, गे परमप्रभु आ तौ नवे हना, एको फुल्लु कली ‘शोब्ले दुमो’ देन” देंमाक्त। 4 मिनु येसुमी “परमप्रभु यावेम ब्रेक्पाइशो लोव्रमी ‘मुर जशा ला मब्रॉइनीम’ दे ब्रेक्शो बाक्ब” देंमाक्त। ब्यवस्था ८:३ 5 मिनु नोले सैतानमी येसु कली इर लाइशशा, याम कामीन रागी नेल्ल कोइशा 6 “रागी, रागीमी बाक्शो नेल्ल शोंप आं के नम। रागी नेल्ल आन कली हुकुम पाइब यो गो नड। गो मेको इ कली गेनुड। मारदे हना सु कली गेचा दाक्तु, मेको कली गेने चाप्नुड। 7 गे आं डोंइती बाप्शा, आं कली ठेयब सेल्लीवी हना, मेको नेल्ल इ कली गेनन” देंमाक्त। 8 मिनु येसुमी “परमप्रभु यावे आ लोव्रमी ‘परमप्रभु यावे कली ला ठेयब सेलो। मेको कली ला गेय पावो’ दे ब्रेक्शो बाक्ब” देंमाक्त। ब्यवस्था ६:१३

9 मिनु नोले सैतानमी येसु कली यरूसलेम लाइशशा, परमप्रभु यावे आ खिं डा नेल्ल क्येडा तारी लदा बाक्त। मिनु “मार, गे परमप्रभु यावे आ तौ नवे हना, एकेर रे प्रेक्को। 10 मारदे हना ‘इ कली कोव्रचा कली आ स्वर्ग डा गेय पाइब आन कली सोइक्ब। 11 मिनु मेकोपुकीमी इ कली आन गुइम ताक्शा, खपीम नाइक्पाइक्नीम। इ खोइल फुल्लु कामी यो मथोक्ब’ दे ब्रेक्शो बाक्ब” देंमाक्त। भजन संग्रह ९:११,१२ 12 मिनु येसुमी “परमप्रभु, इन परमप्रभु यावे कली थुं मनाक्चा, दे यो देंशो बाक्ब” देंमाक्त। ब्यवस्था ६:१६ 13 मिनु सैतानमी नेल्ल नाक्ने थुमा नोले, मुल अर्को खेयप नाक्नुड, दे मिम्शा येसु कली प्रोंइशा मेक रे गाक्माक्त। हिब्रू ४:१५

येसुमी गालील रागीम शेंशो

मत्ती ४:१२-१७; मर्कूस १:१४-१५

14 मिनु नोले, येसु परमप्रभु यावे आ सोक्त आ सक्तीम गालील रागी लेम्माक्त। मेकेर एर ओंथ येसु आ पर्बम शुश लोव्र ब्रशो बाक्माक्त। 15 मेकोमी आन गुम्तीक खिं खिंमी शेंना शेंन गाक्मेनु, आ लोव्र नेंब नेल्लेमी “रिम्शो लोव्र पाइक्बाक्त” दे ठेयब सेल्ले बाक्त।

येसुमी नासरथ सहरम लोव्र पशो

मत्ती १३:५३-५८; मर्कूस ६:१-६

16 मोपा हिरना हिरन गाक्मेनु, काबु आ कोल्लतीक नासरथ सहरम जाक्दीम्माक्त। आल रेन नाइक्तीक नाक्ती गुम्तीक खिं लशो खोदेंशो पा, गुम्तीक खिं लशा, परमप्रभु यावे आ लोव्र पढेचा कली राम्माक्त। 17 मिनु गुम्तीक खिं डा गेय पाइबमी मेको कली यसैया आ ब्रेक्शो किताब गेवा बाक्त। मिनु किताब प्राक्शा कोव्रशा यसैया ६१:१-२ 18 “परमप्रभु यावे आ सोक्त आं तार बाक्ब। मारदे हना परमप्रभु यावेमी तेल लुक्ताक्यी। मेकोमी आं कली दिप्शो पुडग मुर आन कली ग्येरपाइक्ब लोव्र नेंपाइक्चा कली, ग्याइशशा चोक्चा पुंइसीशो मुर आन कली प्रोंइचा कली, मिक्च मताइब आन कली तपाइक्चा नु श्येत जाइब आन कली श्येत रे प्रोंइशा, रिम्शो पा बाक्चा गेचा कली सोइक्ताक्यी। यसैया ४२:७ 19 परमप्रभु यावे आ शिशी पतीक बर्स आ पर्बम शेंचा कली सोइक्ताक्यी” दे पढेशा

नेपाइकमी बाक्त। लेवी २५:१० 20 मिनू किताब गिल्शा, गुम्तीक खिं डा गेय पाइब कली गेशा, निस्से बाक्त। मिनू नेल्लेमी येसु कली मिक्च मयाक्थु कोव्रस डा कोव्रस पामे बाक्त। 21 मिनू येसुमी “एको इन नेंशो लोव्र मुलाक्त गाप्त” देंमाक्त। 22 नेंबपुकीमी मेको आ पर्वम रिम्शो लोव्र पामे बाक्त। येसु आ रिम्शो लोव्र नेंशा छक लाक्शा “एको योसेफ आ तौ ममाइ डा?” देंमुमा बाक्त। लूका ३:२३ 23 मिनू येसुमी मेको आन कली “गे इच्ची ना आं कली ‘मुर आन कली सापाइक्ब, गे इ कली यो सापतो’ देंतीक लोव्र देंनीनी। मिनू ‘गो कापेरनाउम सहरम चिन्ड नु छक लाक्चा डा गेय पशो नेंतक। मुल इ कोल्टीक सहरम, एकेर यो मोदेशो पावो’ दे आं कली देंनीनी” देंमाक्त। 24 मिनू येसुमी “थमा पा, मुरपुकीमी परमप्रभु यावे आ लोव्र पाइब आन कली आंम आन बाक्तीक सहरम काइ महिक्नीम। यूहन्ना ४:४४ 25 थमा लोव्र मार बाक्त देशा हना, एलीया आ पालाम इस्राएल रागीम शुश वोंइश बेक्शो मीश मुर बाक्शो बाक्तेक्म। मेना बर्स सां ६ महिना सम्म रेउ मयिमाक्त। मिनू रागी नेल्ल डा मुरपुकीमी जचा मतामे बाक्त। १राजा १७:१,९-२४ 26 तन्न परमप्रभु यावेमी एलीया कली मेको आन बाक्तीक मसोइक्त। तन्न सीदोन रागी डा सारेप्ता सहरम बाक्ब वोंइश बेक्शो मीश मुर का कली ला श्येत रे प्रोंइथ सोइक्ता बाक्त। सारेप्ता सहर कली हिब्रू लोव्रमी चारेफाथ देंनीम। 27 एलीशा आ पालामी यो इस्राएल रागीमी शुश कोव्रर पाइब मुर बाक्मा बाक्त। सुइ मसामा बाक्त। सिरीया डा नामान माइश्शो मुर ला सापाइक्चा पुंइसे बाक्त” दे येसुमी माइक्मी बाक्त। २राजा ५:१-१४ 28 गुम्तीक खिंम बाक्शो मुर नेल्लेम मेको लोव्र नेंशा चुरमा बाक्त। 29 मिनू छुल छाल बोक्शा, येसु कली आन गुम्तीक खिं नु सहर रे गुंइशा, डांडा तार सेल्शो सहर डा रोंगु रे तोक्चा, दे लदमे बाक्त। 30 तन्न येसु मेको आन दाते रे गूशा गाक्माक्त।

येसु कापेरनाउम जाक्दीश्शो

मत्ती ८:१४-१७; मर्कूस १:२१-३९

31 मिनू नोले गालील रागी डा कापेरनाउम सहर बुम्माक्त। मिनू नाइक्तीक नाक्ती गुम्तीक खिं लशा, मुर आन कली शेंदा बाक्त। 32 मिनू आ शेंशो नेंशा छक लाक्मा बाक्त। मारदे हना आ लोव्र अधिकार पाइश्शो बाक्माक्त। मत्ती ७:२८-२९; यूहन्ना ७:४६ 33 मेको गुम्तीक खिंमी ग्रांग्रा दिचा डा वोल आ सोक्तीम सुम्शो मुर का बाक्माक्त। मेकोमी वाइ ब्रेशशा 34 “ओहो, नासरथ डा येसु, मार पमुया डा? आंइ कली साइक्थ जाक्नी? इन कली तुइक्ताक्क। गे परमप्रभु यावे आ योव्रशो ननी” देंमाक्त। 35 मिनू येसुमी वोल कली “रेयके मपथु, गूडो” दे हुइक्ता बाक्त। मिनू वोलमी मुर कली श्येत मगेथु, दिड खोल्शा वोइश्शा गूमाक्त। 36 मो दुम्शो तशा, मुरपुकी छक लाक्शा “मार लोव्र बाक्म माइ? मारदे हना अधिकार नु सक्ति पाइश्शो लोव्र पवानु, वोलपुकी गूबाक्तेक्म” देंमुमा बाक्त। 37 मिनू मेको रागी नेल्ल येसु आ पर्वम लोव्र ब्रना ब्रन लमाक्त।

38 मिनू येसु गुम्तीक खिं रे गाक्शा, सिमोन आ खिं जाक्दीम्माक्त। सिमोन आ शिमी शुश जरो पा रोइ पा गोल्लो बाक्माक्त। मिनू खिं डा मुरुमी येसु कली “सापतीन” दे पुन्मे बाक्त। 39 मिनू येसु मेको आ नेक्था राप्शा, जरो कली हुइक्ता बाक्त। मिनू हुइक्तानु, जरो जाम्माक्त। मिनू साशा छुल बोक्शा, येसु नु आ वारच आन कली जचा गेमी बाक्त।

40 मिनू नां रिक्मेनु, शुश रोइ पाइब आन कली चाक्मे बाक्त। मिनू येसुमी रोइ पाइब आन कली आ गुइ आन तारी चाक्शा, नेल्ल आन कली सापाइक्मी बाक्त। 41 शुश मुर रे वोल गुंइदा बाक्त। वोल आन कली गुंइदानु, मेकोपुकीमी “परमप्रभु यावे आ तौ ननी” दे ग्रीमा बाक्त। तन्न येसुमी मेको आन कली लोव्र पचा मगेथु, हुइक्तीमी बाक्त। मारदे हना मेकोपुकीम “ख्रीस्त बाक्ब” दे डोंइती रे तुइश्शो बाक्मा बाक्त। मत्ती ८:२९; मर्कूस ३:११-१२

42 मिनू आ दीसा सुनी येसु मेकेर रे गाक्शा, मुर मबाक्तीकेम जाक्दीम्माक्त। मिनू मुरपुकीमी “ते लमे?” दे माल्ला, आ बाक्तीकेम जाक्दीम्मा बाक्त। मिनू “आंइ कली प्रोंइशा मगाक्कीन। आंइ सहरम बाक्कीन” देंमा बाक्त। 43 मिनू येसुमी “अर्को सहर लचा माल्लुड। मारदे हना गो मेकेर डा मुर आन कली यो परमप्रभु यावे आ राज्य डा लोव्र पचा माल्लुड। गो मेको गेय पचा कली सोइश्शो नड” देंमाक्त। 44 मिनू रागी नेल्ल हिरना हिरन यहूदीया डा गुम्तीक खिं खिंमी शेंना शेंन गाक्माक्त। मत्ती ४:२३

5

डोंइती डा शेंसीब योव्रशो

मत्ती ४:१८-२२; मर्कूस १:१६-२०

1 मिनू काबु येसुमी गेनेसरेथ समुन्द्र आ नेक्था जाकदीशशा, मुर आन कली परमप्रभु यावे आ लोव्र शेंदीमी बाक्त। मुरपुकीमी येसु कली डी डा चूमे बाक्त। 2 मिनू समुन्द्र आ शुइचम डोंगा निक्शी तवा बाक्त। डांइ रेण्बपुकी डोंगा रे तोइशशा आन ग्याइली मुरना मुरन बाक्मा बाक्त। 3 मिनू डोंगा का डोंइसे बाक्त। मेको डोंगा सिमोन के बाक्माक्त। मिनू येसुमी सिमोन कली “डोंगा इच्का आइक्ची लतो” दे मदा बाक्त। मिनू मोपा डोंगाम बाक्शा मुर आन कली शेंदीमी बाक्त।

4 मिनू शेंने थुम्शा, सिमोन कली “बवाक्कु आ दातेम जाकदीशशा, डांइ रेट्चा कली ग्याइली आपो” देंमाक्त। यूहन्ना २१:६ 5 मिनू सिमोनमी “शेंब, नाक्दो रे श्येत पा ग्याइली आप्ना आप्न बाक्तक। डांइ का यो मरे। मुल ‘गे आपो’ देंतीनी हना, गो आप्नुड” देंमाक्त। 6 मिनू ग्याइली आबानु, शुश डांइ रेशशा, ग्याइल गाक्चा गोवा बाक्त। 7 मिनू ग्याइली गाक्शी पा डांइ रेशशो तशा, आ वारच आस कली “ए, एक जाक्शा, वारच पसे” दे ब्रेशशा, डोंगा निम्फा डांइम प्रिंदमे बाक्त। मिनू डोंगा हेल्शा, बवाक्कुम गुम्चा चिक्ता बाक्त। 8 मिनू सिमोन पत्रुसमी मो दुम्शो तशा, येसु आ डोंइती पोक्च थेक्शा बाप्शा “प्रभु, गो पापी मुर नड। गे नु काथा बाक्चा मशिरनुड” देंमाक्त। लूका १८:१३ 9 मारदे हना सिमोन नु मेको नु बाक्ब नेल्ले मिश डांइ रेशशो तशा, छक लाक्मा बाक्त। 10 जब्दी आ तौ याकूब नु यूहन्ना यो छक लाक्सा बाक्त। मिनू येसुमी सिमोन कली “महिनी। मुल डां मेरे मुर रेण्ब दुम्नेवे” दे मदा बाक्त। 11 मिनू डोंगा गुंइशा, तोइशशा, सिमोन, याकूब नु यूहन्ना सांफामी आन गेय नेल्ल प्रोंइशा, येसु आ नोले खोइशशा, आ शेंसीब दुम्मा बाक्त।

कोव्र पाइब कली सापाइशशो

मत्ती ८:१-४; मर्कूस १:४०-४५

12 मिनू काबु येसु आ शेंसीबपुकी नु सहर कामी बाक्मेनु, कोव्र पाइब मुर का कली गुमा बाक्त। मिनू मेको कोव्र पाइबमी येसु कली तशा, आ डोंइती बाप्शा “प्रभु, सापाइक्चा दाक्ताक्नी हना, आं कली सापाइक्ने चाप्नीनी” देंमाक्त। 13 मिनू येसुमी कोव्र पाइब कली थिशा “गो सापाइक्चा दाक्नुड” देंमेनु, मेको कोव्र पशो मुर सामाक्त। 14 मिनू येसुमी “एको लोव्र सुइ कली मदेंचा। चढेब आ डोंइती लशा, इ साशो रां कोंइदो। मिनू मोसामी मार चढेचा माल्ब देंशो बाक्मे, मेको चढेशा, साती, दे तुइक्पतो” दे माइशशा, सोइक्ता बाक्त। लेवी १४:२-३२ 15 सुइ कली मदेंचा देंशो बाक्त हना यो, शुश मुरुमी येसु आ पर्बम लोव्र पांमे बाक्त। रागी नेल्लेम मेको लोव्र ब्रमाक्त। येसु आ लोव्र नेंचा कली नु रोइ रे साचा कली शुश मुर येसु आ बाक्तीकेम जाक्मा बाक्त। 16 तन्न येसु मेकोपुकी नु ब्राशा, सुइ मबाक्तीकेम लशा, परमप्रभु यावे कली प्रार्थना पवा बाक्त। मर्कूस १:३५

गुइ खोइल मदुक्ब कली सापाइशशो

मत्ती ९:१-८; मर्कूस २:१-१२

17 काबु येसुमी शेंना शेंन बाक्मेनु, गालील रागी, यहूदीया रागी, नु यरूसलेम सहर रे जाक्शो फरिसी नु अरेशो लोव्र शेंबपुकी देल्शा, येसु आ नेक्था निस्समा बाक्त। परमप्रभु आ सापाइक्तीक सक्ति येसु नु बाक्माक्त। 18 मेना मुरपुकीमी आ गुइ खोइल मदुक्ब मुर का कली ब्राख्येम कुरशा चाक्मे बाक्त। चाक्बपुकीम मेको कली येसु आ डोंइती चाक्दीत्चा, दे मिम्तमे बाक्त। 19 तन्न शुश मुर देल्लतीके येसु आ नेक्था चाक्दीन्ने मचाप्मे बाक्त। मिनू खिं डोइशशा, साप्शो फुल्लु याक्शा, रोइ पाइब आ ब्राख्ये आ एर ओंथ डोरीम फ्रेंशा, मेको कली ओंखां पा तोक्शा, येसु आ डोंइती वोदमे बाक्त। 20 मिनू येसुमी मेको आन थमा सुइक्शो तुइशशा, मेको कली “आं वारच, इ पाप क्याम्शा गेतन” दे मदा बाक्त। 21 मिनू फरिसी नु सास्त्रीपुकीमी “ओदेंशो शुक्शी लोव्र पाइब सु बाक्म? परमप्रभु यावेमी ला पाप क्याम्ने चाप्ब” दे मिम्तमे बाक्त। फरिसी रिती थिती सेल्शा, रिम्शो पचा कली कोव्रब यो बाक्शो बाक्तेक्म। सास्त्री यहूदी आन कली परमप्रभु यावे आ अरेशो लोव्र शेंब बाक्शो बाक्तेक्म। लूका ७:४९; भजन संग्रह १३०:४; यसैया ४३:२५ 22 मिनू येसुमी मेको आन मिम्शो तुइशशा, मेको आन कली “मारदे इन थुंम मोदेंशो मिम्तीनी? 23 इ पाप क्याम्शा गेतन देंचा देय छुल बोक्शा, एर ओंथ हिरशा कोंइदो देंचा तेको रिम्शो बाक्बा? 24 रागीम जरमेशोमी, पाप क्याम्चा कली अधिकार तशो बाक्ब, दे गेपुकीमी यो तुइक्तीन” दे गुइ खोइल मदुक्ब कली “छुल बोक्शा, इ ब्राख्ये कुरशा, इ खिं लावो” दे मदा बाक्त। यूहन्ना ५:३६ 25 मो देंमेनु, मेको मुर छुल बोक्शा, आ ब्राख्ये कुरशा, परमप्रभु यावे कली ठेयब सेल्ना सेल्न आ खिं लमाक्त। 26 मेको चिन्ड तशा, मुर नेल्ले छक लाक्शा, परमप्रभु यावे कली ठेयब सेल्शा, मान पा हिंशा “डोंइती गेनायो मतशो ताइतय” देंमुमा बाक्त।

लेवी कली ब्रेशो

मत्ती ९:९-१३; मर्कूस २:१३-१७

27 मिनु मेकेर रे लशा, येसुमी तिरो पोक्ब लेवी नें पाइशो मुर का आ गेय पतीकेमी बाक्शो तशा “आं नोले खोइय्यी” दे मदा बाक्त। 28 मिनु मेकोमी आ गेय प्रोइशा, येसु आ नोले खोदा बाक्त।

29 मिनु लेवीमी येसु कली मान पा थुल्चा, दे जचा तूचा सेला बाक्त। मिनु मेको नु तिरो पोक्ब, आ वारच नु अरु मुर यो जथ बाक्मा बाक्त। लूका १५:१ 30 मिनु फरिसी नु सास्त्रीपुकीमी मेको आन कली काथा बाक्शो तशा, आन थुं मनुथु येसु आ शेंसीब आन कली “मारदे गे तिरो पोक्ब नु पापीपुकी नु काथा बाक्शा जाइनीनी?” देंमा बाक्त। 31 मिनु येसुमी मेको आन लोत्र तुइशशा “रोइ मपाइब आन कली डाक्टर ममाल्नीम। तन्न रोइ पाइब आन कली डाक्टर माल्नीम। 32 ठीक पाइब आन कली ब्रेथ जाक्शो मनड। तन्न पापी आन कली ‘इन थुं परमप्रभु यावे गे लेत्तीन’ दे ब्रेथ जाक्शो नड” दे माइक्मी बाक्त।

माइजा बाक्चा आ पर्वम शेंशो

मत्ती ९:१४-१७; मर्कूस २:१८-२२

33 मिनु मेकोपुकीमी “यूहन्ना आ शेंसीबपुकी नु फरिसी आन शेंसीबपुकी शुश माइजा बाक्शा, प्रार्थना पाइनीम। तन्न इन शेंसीबपुकी माइजा मबाक्थु, जाइनीम तूनीम” देंमा बाक्त। 34 मिनु येसुमी मेको आन कली “ग्युम्ले नु काथा बाक्मानु, जन्ती आन कली माइजा बाक्पाइक्ने चाप्नीनी डा? 35 काबु ग्युम्ले लाइक्चा पुंडसीब। मेना माइजा बाक्नीम” दे माइक्मी बाक्त। 36 मिनु येसुमी मेको आन कली “सुइमी नक वा खाक्शा, माइत वाम मक्येप्नीम। मो पाम्तेक्म हना, नक वा मरिम्शो दुम्बा ममाइ? नक वा माइत वा तार क्येप्चा मगारब। 37 सुइमी माइत कुशुल के थैलोमी नक अडगुर शांबु कुर मपाइनीम। कुर पाम्तेक्म हना, नक अडगुर शांबु बोरशा थैलो बुक्ब। मिनु अडगुर शांबु क्युप्ब। मेको थैलो यो खतम दुम्ब। 38 नक शांबु नक थैलोमी कुर पचा माल्ब। 39 कशो शांबु तूशा बानी दुम्शोमी जीजी शांबु मदाक्नीम, मेकोमी ‘कशो ला ब्रोत्रब’ देंब” दे कथा का देंमाक्त।

6

नाइक्तीक नाक्ती

मत्ती १२:१-८; मर्कूस २:२३-२८

1 मिनु काबु नाइक्तीक नाक्ती येसु नु आ शेंसीबपुकी चेरब रू लां रे पा गाक्मानु, शेंसीबपुकीमी चेरब बाला शोइशशा, नोक्शा जामे बाक्त। लूका १३:१०-१७; लूका १४:१-६ 2 मिनु फरिसीपुकीमी मेको आन कली चेरब जशो तशा “नाइक्तीक नाक्ती पचा मदुम्ब गेय, मारदे पाइनीमी?” दे आन थुं मनुथु लोत्र पामे बाक्त। 3 मिनु येसुमी “दाऊद नु आ वारचपुकी शोत्रलु बेक्मानु, मार पामे, परमप्रभु यावेमी ब्रेक्पाइशो लोत्र मपढेनी? १सामुएल २१:७ 4 दोपा दाऊदमी परमप्रभु यावे आ खिंमी ओत्रशा, परमप्रभु यावे आ डोंइती कोंइतीक शोब्ले शोल्शा योक्शा जामे? मेको शोब्ले चढेबपुकीम ला जाइनीमी, ममाइ? अरु मुरपुकीमी जचा मदुम्बा, ममाइ डा?” दे माइक्मी बाक्त। लेवी २४:९ 5 मिनु येसुमी “रागीम जरमेशो दा नाइक्तीक नाक्ती मार पचा, मार मपचा मेको नेल्ल देंब बाक्ब” देंमाक्त।

गुइ सोत्रशो कली सापाइशो

मत्ती १२:९-१४; मर्कूस ३:१-६

6 मिनु अर्को नाइक्तीक नाक्ती येसुम गुम्तीक खिंमी शेंदानु, मेकेर आ ग्युरा गुइ सोत्रशो मुर का बाक्माक्त। 7 मिनु सास्त्री नु फरिसीपुकीमी “नाइक्तीक नाक्ती सापाइक्चा गेय पाइबा कों?” दे योत्रकी पा कोत्रडमे बाक्त। मारदे हना येसु कली दोस गेचा माल्शो बाक्मा बाक्त। 8 मिनु येसुमी मेको आन मिम्शो तुइशशा, आ गुइ सोत्रशो मुर कली “एक पिशा, राप्शा बाक्को” दे मदा बाक्त। मिनु मेको छुल बोक्शा राम्माक्त। 9 मिनु येसुमी योत्रकी पाइब आन कली “लोत्र का हिल्लो पाइनन्नी, नाइक्तीक नाक्ती शिशी पचा देय मरिम्शो गेय पचा? ब्रोंइचा गेचा देय बेक्चा गेचा? अरेशो लोत्रम मार देंबा?” दे हिल्लो पवा बाक्त। 10 मिनु मेकेर बाक्ब आन कली मिक्च मयाक्थु, कोत्रशा, गुइ सोत्रशो कली “इ गुइ दिंदो” दे मदा बाक्त। मिनु मेकोमी गुइ दिंसेनु, सामाक्त। 11 मिनु योत्रकी पाइबपुकी चुरशा “मेको कली मार पय?” दे लोत्र पमुमा बाक्त।

येसुमी आ १२ जना शेंसीब योव्रशो

मत्ती १०:१-४; मर्कूस ३:१३-१९

12 काबु येसु डांडा का डोइशशा, नाकदो रे परमप्रभु यावे कली प्रार्थना पवा बाक्त। मर्कूस १:३५ 13 मिनु आ दीसा नां सोव्रशा, आ नोले खोइक्ब आन कली ग्रुम्शा, १२ जना आन कली योव्रमी बाक्त। योव्रशो आन कली “सोइशशो” दे नें वोदा बाक्त। मत्ती १०:२-४; प्रेरित १:१३ 14 मेको १२ जना सु सु बाक्मा बाक्त देशा हना, सिमोन, मेको कली पत्रुस यो देंनीम। सिमोन आ लोकब अन्द्रीयास, याकूब, यूहन्ना, फिलीप, बारथोलोमाइ, 15 मत्ती, थोमास, अल्फयस आ तौ याकूब, सिमोन, मेको कली कनानी यो देंनीम, 16 याकूब आ तौ यहूदा नु इस्कारीयोत डा यहूदा बाक्मा बाक्त। इस्कारीयोत डा यहूदा चहिं नोले येसु कली साइक्चा, दे माल्ब आन कली वारच पाइब दुम्बाक्माक्त।

दिंमम शुश मुर सापाइशशो

17 मेको मुर आन कली योव्रशा, डांडा रे यिमा बाक्त। मिनु ठेयब दिंमम जाक्दीशशा बाक्मानु, येसु आ लोव्र नेंथ एर ओंथ रे शुश मुर खुम्सीशा देल्मा बाक्त। मेकोपुकी यहूदीया रागी, यरूसलेम सहर, टायर नु सीदोन सहर एर ओंथ रे जाक्शो बाक्मा बाक्त। 18 का निक्शी येसु आ लोव्र नेंथ जाक्मा बाक्त। का निक्शी आन रोइ सापांइसीथ जाक्मा बाक्त। मिनु वोल्म तशो मुरपुकी यो जाक्शा, सामा बाक्त। 19 रोइ पाइबपुकीमी येसु कली थिचा माल्मे बाक्त। मारदे हना येसु आ सक्तिम मेको नेल्ल आन रोइ साबाक्मा बाक्त।

ग्येरसीने, दे शेंशो

मर्कूस ५:३-१२

20 मिनु येसुमी शेंसीब आन कली कोव्रशा “गे पुडग मुर, ग्येरसीने। मारदे हना परमप्रभु यावे आ राज्य इन के बाक्ब। याकूब २:५ 21 मुल जचा मतथु बाक्बपुकी, ग्येरसीने, मारदे हना परमप्रभु यावेमी इन कली रूथ्री जचा गेब। मुल श्येत जशा, डाक्न डाक्न बाक्शोपुकी, ग्येरसीने। मारदे हना नोले ग्येरसीशा बाक्चा ताइनीनी। प्रकाश ७:१६-१७ 22 मुरुमी इन कली आं पबर्म काइ मदाक्थु, खेरशा हेला पामेनु, रागीम जरमेशो आ पबर्म इन कली दिप्मेनु, गे शुश ग्येरसीन। यूहन्ना १५:१८-१९ 23 मेको नाक्ती थाम्पा ग्येरसीने। मारदे हना परमप्रभु यावेमी इन कली स्वर्गम इनाम गेब। इन कली श्येत गेब आन किकी पिपीमी साइ रे परमप्रभु यावे आ लोव्र पाइब आन कली यो खेदा पा श्येत गेशो बाक्तेक्म।

हिनीन, दे शेंशो

24 गे शुश शोप पाइशशोपुकी, हिनीन। मारदे हना इन तशो रिम्शो नेल्ल थुम्तीनी। मत्ती १९:२३; याकूब ५:१ 25 मुल शुश जचा ताइबपुकी, हिनीन। मारदे हना नोले जचा मतथु शोव्रलु बेक्नीनी। मुल रिशशा बाक्बपुकी, हिनीन। मारदे हना नोले डाक्शा रोंका पचा माल्नीनी। 26 मुल मुरपुकी रे पा मान पाइक्चा पुंइसीशोपुकी, हिनीन। मारदे हना इन किकी पिपीमी यो जोल पा परमप्रभु यावे आ लोव्र पाइब आन कली मो पाइक्बाक्तेक्म” देंत।

इन कली मदाक्ब कली दाक्तीन

मत्ती ५:३९-४८

27 मिनु “आं लोव्र नेंबपुकी, नोफा दाइशशा नेनीन, इन जोरी सत्रु आन कली दाक्तीने। इन कली काइ मदाक्ब आन कली दाक्तीने। 28 इन कली सराप चीले पाइब आन कली आसीक गेने। इन कली शुक्शी पाइब आन पबर्म परमप्रभु यावे कली पुंइदीने। १कोरिन्थी ४:१२ 29 इन चोव्रचो का राण्ब आन कली अर्को चोव्रचो यो राण्चा गेने। इन दौरा लाइक्ब आन कली भोटो यो पुइशशा गेने। 30 सुइमी गे नु बाक्शो थोव्रकी पुंइतु हना, गेने। सुइमी गे नु बाक्शो थोव्रकी लाइक्तु हना, पितो, दे मपुनीन। 31 गेमी दोदेशो पचा पुंइसीचा दाक्नीनी, गे यो मुर आन कली मोदेशो पने। मत्ती ७:१२

32 इन कली दाक्ब आन कली ला दाक्ताक्नी हना, मार रिम्शो पनी डा? पापीपुकीमी यो आंम कली दाक्ब कली दाक्नीम। 33 इन कली रिम्शो पाइब आन कली ला रिम्शो पाइतीनी हना, मार रिम्शो पनी डा? पापीपुकीमी यो रिम्शो पाइब कली रिम्शो पाइनीम। 34 इन कली थाम्ने चाण्ब आन कली ला जेर गेतीनी हना, मार रिम्शो पनी डा? पापीपुकीमी यो लेंशा ताक्चा कली मोदेशो पाइनीम। ब्यवस्था १५:५-८ 35 इन जोरी सत्रु आन कली दाक्तीन। वारच पने। लेंशा ताक्चा ममिन्थु जेर गेने। मो पाइतीनी हना, गे ठेयब इनाम ताइनीनी। मिनु नेल्ल क्येडा ठेयब आ मुर दुम्नीनी। मारदे हना ‘रिम्शो पाइतीनी’ मदेब नु आ अरेशो मटीब आन कली रिम्शो पाइब। 36 दोपा इन आफोमी शिशी पवा, मोपा गेपुकीमी यो शिशी पने” देंमाक्त।

मुर आन कली मनाक्चा

मत्ती ७:१-५

37 मिनु येसुमी “मुर आन कली मनाक्तीने। मिनु इन कली मनाक्नीम। दोस मगेने। मिनु गे यो दोस मताइनीनी। माफ गेने, मिनु गे यो माफ गेचा पुंडसीनीनी। मत्ती ६:१४ 38 अरु आन कली मार मार माल्मा, मेको गेने। हाइशो दुम्शा गेतीनी हना, गे यो क्युप्चा डा पा प्रिशा ताइनीनी। दोपा पुक्शा गेनी, मोपा पुक्शा ताइनीनी” दे शेंदीमी बाक्त। मर्कूस ४:२४

39 मिनु येसुमी कथा सेल्शा “मिक्च मताइबमी मिक्च मताइब कली लां कोइने चापब डा? लांमी खाल्टा बाक्त हना, निम्फा खाल्टाम मबिक्नीसी डा? मत्ती १५:१४ 40 शेंब क्येडा शेंसीब ठेयब मनम। तन्न शेंसीबमी शुश शेंसीशा आ शेंब खोदेशो दुम्ब। मत्ती १०:२४-२५; यूहन्ना १५:२० 41 मारदे इन लोकब आ मिक्चीम बाक्शो कसीडगर ताइनीनी। मिनु इन मिक्चीम बाक्शो मुढा चहिं मताइनीनी? 42 इन मिक्चीम मुढा बाक्त हना, दोपा इन लोकब कली ‘आं लोकब, इ मिक्चीम बाक्शो कसीडगर फेत्नुड’ देने चाप्नीनी डा? गे कपटी, डोंइती इन मिक्चीम बाक्शो मुढा फेत्तीने। मिनु मिक्च ठीक ताइब दुम्शा ला, इन लोकब आ मिक्चीम बाक्शो कसीडगर फेन्ने चाप्नीनी।

रिम्शो रवाम रिम्शो फल सिप्ब

मत्ती १२:३३-३५

43 रिम्शो फल रवाम मरिम्शो फल मसिप्ब। मरिम्शो रवामी यो रिम्शो फल मसिप्ब। मत्ती ७:१६-१८ 44 फल थाम्शा, रिम्शो रवा नु मरिम्शो रवा तुंडसीब। चू बोटमी फोवशी मसिप्ब। खुमीच आ बोटमी अडगुर मसिप्ब।

45 रिम्शो थुं पाइशो मुरुमी रिम्शो पाइब। पापम ब्रीशो थुं पाइशो मुरुमी चहिं मरिम्शो पाइब। मुर आन थुंमी मार बाक्मे, मेको आन लोव्र नेशा रिम्शो देय मरिम्शो मेको तुंडसीब। मारदे हना थुंम मार बाक्मे, मेको शोव्र रे गूब।

खिं रे पा शेंतीक

46 मारदे आं कली प्रभु, प्रभु, देंनीनी। तन्न आं देशो मटीनीनी? मलाकी १:६; मत्ती ७:२१ 47 सुम आं लोव्र नेशा टीबा, मेको दोदेशो मुर दुम्बा, मेको गो इन कली माइक्नन्नी। 48 मेकोमी खिं सेलानु, जग दोशा, सेरथे फुल्लु तारी सेल्ब। मिनु रेउ यिशा भोल यिमेनु, मेको खिं मब्रेप्ब। मारदे हना जग बोल्यो पा सेल्शो बाक्ब। 49 सुमी आं लोव्र नेशा मपाइबा, मेकोमी खिं सेलानु, जग मदोथु सेल्ब। मिनु रेउ यिमेनु, मेको खिं नेल्ल ब्रेशा भोलम योल्ब” दे शेंदीमी बाक्त।

7

कप्तान आ गेय पाइब सापाइशो

मत्ती ८:५-१३; यूहन्ना ४:४६-५३

1 मिनु लोव्र शेने थुम्शा, मेकेर रे लशा, कापेरनाउम सहरम जाक्दीम्माक्त। 2 मेकेर रोमी कप्तान का बाक्माक्त। मेको आ दाक्शो वाइल का रोइ पा बेक्चशो बाक्माक्त। 3 मिनु मेको कप्तानमी येसु आ पबर्म लोव्र पशो नेशा, यहूदी आन जोक्ब तुइक्ब खाल्पा आन कली येसु ब्रथ सोइक्तीमी बाक्त। मेको आन कली “येसु एक पिशा, ‘आं वाइल कली सापतीन’ दे पुनीने” देंमाक्त। 4 मिनु मेकोपुकी येसु आ बाक्तीकेम जाक्शा, येसु कली “मेको कप्तान कली वारच पचा कली शिरशो बाक्ब। 5 मारदे हना मेकोमी यहूदी इं कली दाक्ब। मिनु इं गुम्तीक खिं यो सेल्पाइक्तु” दे येसु कली देंमा बाक्त। 6 मिनु येसु मेकोपुकी नु लमाक्त। मिनु कप्तान आ खिं आ नेक्था जाक्दीम्मेनु, कप्तानमी आ वारच आन कली येसु कली लोव्र पथ सोइक्ता बाक्त। मेकोपुकीमी येसु कली “प्रभु, श्येत मपने। गो इन कली आं खिंम ओइंचा मशिरनुड। 7 मोपतीके गो इन कली गुम्थ मपिड। गे सापाइक्तीक लोव्र का ला पने। मिनु आं वाइल साब। 8 गो यो अधिकार पाइशो मुर बाक्नुड। लडाइ पाइबपुकीम आं कली टीनीम। गो का कली ‘लावो’ देंती हना, मेको लाइब। मिनु अर्को कली ‘पिवो’ देंती हना, पीब। आं वाइल कली ‘मेको गेय पावो’ देंती हना, मेकोमी पाइब” दे माइक्थ सोइक्ता बाक्त। 9 मिनु येसुमी मेको लोव्र नेशा छक लाक्माक्त। मिनु आ नोले खोइक्ब आन कली हिरशा कोव्रशा “गो इस्राएली आन दातेमी मेको कप्तान खोदेशो थमा सुइक्ब मुर सुइ मतडमी” देंमाक्त। 10 मिनु मेको सोइशो मुर खिं लेशा जाक्मानु, वाइल साने थुम्शो तामे बाक्त।

बेक्शो मुर कली सेंपाइशो

11 इच्छा नाक्त नोले येसु नाइन सहर गे लमाक्त। आ शेंसीबपुकी नु शुश मुर यो मेको नु लमा बाक्त। 12 मिनु सहर डा ठेयब लाप्चो आ नेक्था जाक्दीम्मानु, मुरपुकीमी बेक्शो मुर का कुरशा पिशो तामे बाक्त। मेको वोंइश बेक्शो मीश मुर आ कांडचीक तौ बाक्माक्त। मेको मीश मुर नु सहर डा शुश मुर मलामी लशो बाक्मा बाक्त। 13 मिनु येसुमी मेको कली तशा, शिशी पा “मडाक्को” देंमाक्त। 14 मिनु बेक्शो मुर कुरशो पला थिवानु, कुरबपुकी खा दिक्मा बाक्त। मिनु मेकोमी “ए ठिटा, गो इ कली सेंसीशा बोक्को देंनुड” देंमाक्त। मर्कूस ५:४१ 15 मिनु बेक्शो मुर बोक्शा निशशा, लोत्र पचा गोवा बाक्त। मोपा सेंपाइशशा, आ ममा कली गेवा बाक्त। १राजा १७:२३; २राजा ४:३६ 16 मिनु मुरपुकी मोदेशो दुम्शो तशा, हिंमा बाक्त। मिनु मेकोपुकीमी परमप्रभु यावे कली ठेयब सेल्शा “इं दातेमी परमप्रभु यावे आ लोत्र पा छक लाक्चा डा गेय पाइब का ग्रूमाक्त। परमप्रभु यावेम इं कली थमा पा शिशी पाइक्बाक्त” देंमा बाक्त। मत्ती १६:१४; लूका १:६८ 17 मिनु यहूदीया नु एर ओंथ डा रागी नेल्लेमी मेको लोत्र ब्रमाक्त।

यूहन्नामी दल्गीर पशो

मत्ती ११:२-६

18 मिनु यूहन्ना आ शेंसीबपुकीमी यो मेको लोत्र नेंशा, यूहन्ना कली शेंदमे बाक्त। मिनु यूहन्नामी आ शेंसीब निक्शी आस कली ब्रेशशा 19 “जाक्चा माल्लो गेन ननी देय अर्को आ लां कोत्रक? दे प्रभु कली हिल्लो पथ लसे” दे सोइक्तीम्सी बाक्त। 20 मिनु मेको निक्शी येसु आ बाक्तीके जाक्शा “ब्वाक्कुम खुम्शा ग्रुंडब यूहन्नामी सोइशशो मुर नस्कु। जाक्चा माल्लो गेन ननी देय अर्को आ लां कोत्रक? दे हिल्लो पथ सोइक्ताक्स्की” देंसा बाक्त। 21 मेको निक्शी जाक्सानु, येसुमी शुश रोइ पाइब मुर आन कली सापाइक्ना पाइक्न बाक्शो बाक्माक्त। बेक्चा डा रोइ पशो, वोल्म सुम्शो मुर आन वोल् खेरना खेरन बाक्माक्त। मिक्च मताइब आन कली मिक्च तपाइक्ना पाइक्न बाक्माक्त। 22 मिनु येसुमी यूहन्ना आ शेंसीब आस कली “मार मार तसी, मार मार नेंसी, मेको नेल्ल यूहन्ना कली मतीसे। मिक्च मताइब मिक्च ताइबाक्तेक्म। खोइल मदुक्ब गाक्बाक्तेक्म। कोत्रर पाइब साबाक्तेक्म। नोफा मनेंबम नेंबाक्तेक्म। बेक्शो मुर बेक्शो रे सेंसीशा ब्रोंडबाक्तेक्म। मिनु महिक्सीशो मुरपुकी ग्येरपाइक्ब लोत्र नेंपांडसीबाक्तेक्म। 23 सु सुमी आं कली तशा, आन थुं मखाइक्पाइक्नीमी, दल्गीर मपाइनीमी, मेको ग्येरसमल, दे मतीसे” दे सोइक्तीम्सी बाक्त।

यूहन्ना आ पर्बम शेंशो

मत्ती ११:७-१९

24 मिनु यूहन्नामी सोइशशो मुर गाक्सा नोले, येसुमी मुर आन कली यूहन्ना आ पर्बम “साइ गोरशो रागीमी मार कोत्रथ लनी? फशेम हिम्शो किन्दा कोत्रथ लनी? 25 दारशो वा फेक्शो मुर तांडसीबा कों, दे कोत्रथ लनी? दारदारशो वा फेक्शो नु शोंप पाइशशो मुर पिप आन बाक्तीकेमी बाक्नीम। 26 मार कोत्रथ लनी, मिनु? परमप्रभु यावे आ लोत्र पाइब तांडसीबा कों, दे कोत्रथ लनी? गे परमप्रभु यावे आ लोत्र पाइब नेल्ल आन क्येडा ठेयब मुर ताइतीनी। लूका १:७६ 27 परमप्रभु यावेमी ब्रेक्पाइशशो लोत्रमी मेको आ पर्बम ‘गो आं लोत्र कुरब इ डोंडोंइती सोइक्नुड। मेकोमी इ लां ठीक सेल्ब’ दे ब्रेक्शो बाक्ब। मलाकी ३:१ 28 रागी नेल्लेम यूहन्ना खोदेशो ठेयब सुइ मबाक्ब। परमप्रभु यावे आ राज्यमी नेल्ल क्येडा आइक्च चहिं यूहन्ना क्येडा ठेयब बाक्ब” दे शेंदीमी बाक्त। लूका १:१५ 29 आ लोत्र नेंबपुकी नु तिरो पोक्ब का निक्शीमी डोंइती यूहन्ना आ लोत्र नेंशा “परमप्रभु यावे आ देशो ठीक बाक्माक्त” दे मिम्तमे बाक्त। मारदे हना मेको ब्वाक्कुम खुम्शा ग्रुंडपांडसीशो बाक्मा बाक्त। लूका ३:७,१२; मत्ती २१:३२ 30 फरिसी नु सास्त्रीपुकीमी चहिं यूहन्ना आ लोत्र नेंशा “ब्वाक्कुम मखुम्पांडसीनीकी” दे परमप्रभु यावे कली थमा मसुइक्थु बाक्मा बाक्त। मेकोपुकीमी परमप्रभु आ पावो, दे देंशो लोत्र मपामे बाक्त। प्रेरित १३:४६ 31 मेको आन कली येसुमी “एको पाला डा मुर दोदेशो नु सु खोदेशो नमी? 32 मेकोपुकी बजारम बाक्ब आलपुकी खोदेशो बाक्नीमी। हुल कामी अर्को हुल कली ‘गो बासुरी ताप्कानु, गे सिल मपनी। गो हिशेक पा डाक्कानु, गे मडाक्नी’ दे ब्रेम्मुइनीम। 33 यूहन्नामी माइजा बाक्शा, शांबु राकसी मतूडानु ‘वोल्म सुम्शो बाक्माक्त’ दे मरिम्शो सुइक्तीनी। मत्ती ३:४ 34 रागीम जरमेशोमी चहिं जचा तूचा थोत्रकी नेल्ल जाइब तूब। मेको कली तशा ‘धोक्के, शांबु राकसीमी दुक्ब, क्येट पोक्ब नु पापी आन वारच बाक्माक्त’ देंशा, मरिम्शो सुइक्तीनी। लूका १५:२ 35 परमप्रभु यावे आ तुइक्तीके आ नोले खोइक्बम ला तुइक्ने चाप्नीम” दे माइक्मी बाक्त। १कोरिन्थी १:२४-३०

येसुमी फरिसी आ खिम जशो

36 काबु फरिसी कामी येसु कली खमे जथ ब्रेत्ता बाक्त। मिनु येसु मेको आ खिमं लशा, खमे जचा कली निस्से बाक्त। लूका ११:३ 37 मिनु सहर डा मीश मुर का यो बाक्माक्त। मेको तेल्लेम बाक्माक्त। मेकोमी येसु मेको फरिसी आ खिमं जाक्शो बाक्ब, दे नेंशा, ब्रोव्रशो रिना पाइशशो तेल कुरशा, जाक्माक्त। मर्कूस १४:३ 38 मेको येसु आ खोइलीम बाक्शा डाक्माक्त। मिनु आ प्रेक्कुम येसु आ खोइल जिप्पाइशशा, आ चांमी फिक्गा बाक्त। मिनु आ खोइल पुक्पु पा मेको तेल खेक्ता बाक्त। 39 मिनु फरिसीमी मो पशो तशा “येसु परमप्रभु यावे आ लोव्र पाइब बाक्त हना, आ कली थीब मीश मुर दोदेशो बाक्म, दे तुइक्त वा। मारदे हना पापी बाक्ब” दे मिम्ता बाक्त। 40 मिनु येसुमी फरिसी कली “ए सिमोन, गो इ कली लोव्र का पाइनुड” देंमाक्त। मिनु मेकोमी “शेंब, मार देंनीनी?” देंमेनु 41 येसुमी “साइ होव्रप का के जेर लाइक्ब मुर निक्शी बाक्सा बाक्त। कामी ५ सहे देनार जेर थुइशशो बाक्माक्त। कामी ५० देनार जेर थुइशशो बाक्माक्त। इस्राएल डा क्येट देनार का नाक्त का डा गाल्च बाक्त। 42 मिनु निम्फामी थाप्ने मचाप्सेनु, होव्रपमी निम्फा आस कली प्रोंइदीम्सी बाक्त। मुल तेकोमी होव्रप कली शुश दाक्बा?” दे हिल्लो पवा बाक्त। 43 मिनु सिमोनमी “शुश जेर थुइशशोमी शुश दाक्ब, दे मिम्ताक्ड” देंमाक्त। मिनु येसुमी “ठीक देंते” देंशा, 44 मीश मुर कली कोव्रशा, सिमोन कली “एको मीश मुर कली तवी? गो इ खिमं जाक्डानु, आं खोइल चिक्चा कली ब्वाक्कु मगेयी। एकोमी दा आं खोइल आ प्रेक्कुम जिप्पाइशशा, आ चांमी फिक्तु। उत्पती १८:४ 45 गो जाक्डानु, आं कली मुप्शा पुक्पु मपाइय्यी। एकोमी दा इ खिमं बाक्डा रे आं खोइल पुक्पु पना पन बाक्ब। रोमी १६:१६ 46 गेमी आं पियाम तेल मखेक्ती। एकोमी दा आं खोइलीम तेल खेक्ताक्यी। 47 मोपतीके एको के शुश पाप नेल्ल क्याम्साक्व। मारदे हना एकोमी शुश आ दाक्तीके कोंइताक्व। सु के पाप इक्का ला क्याम्से, मेकोमी इक्का ला दाक्ब” दे मदा बाक्त। 48 मिनु मीश मुर कली “इ पाप क्याम्साक्व” दे मदा बाक्त। 49 मिनु येसु नु काथा जाइबपुकीमी “पाप क्याम्ने चाप्ब, एको सु बाक्म माइ?” देंमुमा बाक्त। लूका ५:२१ 50 मिनु येसुमी मीश मुर कली “इ थमा सुइशशोमी पाप रे ब्रोंइते। इ थुं नाइशशा ग्येरशा बाक्को” देंशा सोइक्ता बाक्त। लूका ८:४८; लूका १७:१९; लूका १८:४२

8

येसु नु गाक्शा, वारच पाइबपुकी

1 मिनु नाक्त का निक्शी नोले येसु सहर सहर, गाउं गाउं हिरशा, परमप्रभु यावे आ राज्य डा ग्येरपाइक्ब लोव्र शेंना शेंन गाक्माक्त। मेको नु आ १२ जना शेंसीब यो बाक्मा बाक्त। 2 मेको नु मीश मुर का निक्शी यो बाक्मा बाक्त। मेको वोल ग्रुंइशो नु रोइ रे साशो बाक्मा बाक्त। मेको आन दातेमी माग्दाला डा मरीयम बाक्माक्त। येसुमी मेको रे पा ७ ओटा वोल ग्रुंइशो बाक्माक्त। यूहन्ना २०:१,११-१८ 3 का हेरोद आ गेय पाइब कूजा आ मीश योअन्ना बाक्माक्त। का सुसन्ना बाक्माक्त। मिनु अरु मीश मुरपुकी यो बाक्मा बाक्त। मेको मीश मुरपुकीमी आन बाक्शो थोव्रक रे येसु नु आ शेंसीब आन कली मार मार माल्मा, मेको गेशा, वारच पाइक्बाक्मा बाक्त। मर्कूस १५:४०-४१

वांचेर शोक्शो कथा

मत्ती १३:१-९; मर्कूस ४:१-९

4 मिनु सहर सहर, गाउं गाउं रे शुश मुर जाक्शा, येसु आ बाक्तीकेम देल्मानु, मेकोमी कथा सेल्शा शेंदीमी बाक्त 5 “मुर का वांचेर शोक्थ लमाक्त। मिनु ब्वारानु, गेडा का निक्शी लांमी जुक्तमे बाक्त। मिनु मुर गाक्मानु, दिम्दमे बाक्त। मिनु चिक्बीम गुप्शा जामे बाक्त। 6 का निक्शी ग्याडग्रो खपम जुक्तमे बाक्त। मिनु वामा चोटी सिक्शो नु खप मतथु सोव्रशा बेक्मा बाक्त। 7 का निक्शी चू घारीम जुक्तमे बाक्त। मिनु चूम सुम्शा, कोल्चा मगेवा बाक्त। 8 मिनु का निक्शी रिम्शो खपीम जुक्शा वामा बाक्त। मिनु शुश ग्रेल्शा, गेडा का के सहे का गेडा सिम्मा बाक्त” दे शेंशा ठेयब सेंदा पा “सु के नोफा बाक्मे, मेकोमी नेनल” देंमाक्त।

कथा आ अर्थ हिल्लो पशो

मत्ती १३:१०-१७; मर्कूस ४:१०-१२

9 मिनु नोले आ शेंसीबपुकीमी “एको कथा आ अर्थ मार बाक्बा?” दे हिल्लो पामेनु, 10 येसुमी “इन कली परमप्रभु यावे आ राज्य आ पर्वम खुइशशो लोव्र रुप्तीक थुं गेशो बाक्ब। अरु आन कली चहिं कथा सेल्शा शेंनुडमी। मिनु कोव्रशा यो मतामेक्ल, नेंशा यो मरुप्मेक्ल। यसैया ६:९-१०

कथा आ अर्थ शेंशो

मत्ती १३:१८-२३; मर्कूस ४:१३-२०

11 आं देशो कथा आ अर्थ मार बाकब देशा हना, मेको वांचेर परमप्रभु यावे आ लोव बाकब। 12 लांमी जुक्शो गेडा देशो मुरपुकीमी परमप्रभु यावे आ लोव नेंनीम। तन्न सैतानमी मेको लोव प्रेंपाइक्ब। मोपा थमा मसुइक्नीम। मिनु पाप रे ब्रोंइचा मताइनीम। 13 ग्याडग्रो खपीम जुक्शो देशो मुरपुकीमी परमप्रभु यावे आ लोव नेंशा, बिश्शा ग्येरसीनीम। तन्न शाक्श थोक्चा मतथु शुश मलीथु, थुं थाम्चा पुंडसमानु, थमा सुइक्चा प्रोंइनीम। 14 चू घारीम जुक्शो देशो मुरपुकीमी परमप्रभु यावे आ लोव नेंशा, थुंम वोइक्नीम। तन्न नोले 'मार जचा, मार फेक्चा, दोपा शोंप पाइश्शो दुम्चा? दोपा गेय मपथु ग्येरशा बाक्चा तचा' दे मिम्शा, परमप्रभु यावे आ लोव कली सित्चा मगेनीम। 15 रिम्शो खपीम जुक्शो देशो मुरपुकीमी परमप्रभु यावे आ लोव नेंशा, आन रिम्शो थुंमी वोइश्शा, मिम्शा बाक्मानु, मेको लोव आन थुंमी सिप्ब। प्रेरित १६:१४

बत्ती आ पर्बम शेंशो

मर्कूस ४:२१-२५

16 सुइमी बत्ती दाशा सुम्शा मवोइक्नीम। खाट आगाम यो मखुइक्नीम। खिं ओव्रब आन कली हाम्सो दुम्ल, दे नेल्लेम ततीकेम वोइक्नीम। मत्ती ५:१५ 17 मुल खुइश्शो मारेइ मारेइ नेल्ल नोले तांइसीब। खुइश्शो लोव बाक्त हना यो, नोले नेल्लेम तुइक्नीम। मत्ती १०:२६; १कोरिन्थी ४:५ 18 होस पा, रिम्शो पा नेनीन। मारदे हना रुप्वमी तेम्शा रुप्पाइक्चा पुंडसीब, मरुप्बम चहिं इक्का खोइ रुप्शो यो, रोइश्शा लाइक्चा पुंडसीब” दे शेंदीमी बाक्त। मत्ती २५:२९

येसु आ खिं डा मुर

मत्ती १२:४६-५०; मर्कूस ३:३१-३५

19 काबु येसु आ ममा नु आ लोक्ब जाक्मा बाक्त। तन्न शुश मुर देलतीके येसु कली गुम्चा मतामे बाक्त। 20 मिनु मुर कामी “इन ममा नु इन लोक्ब इन कली गुम्थ जाक्शा, लाङगाम रिम्शा बाक्नीम” देंमाक्त। 21 मिनु येसुमी “परमप्रभु यावे आ लोव नेंशा, टीबपुकी कका थमा डा आं ममा नु लोक्ब नम” दे माइक्मी बाक्त।

फश गिवार तेक्शो

मत्ती ८:२३-२७; मर्कूस ४:३५-४१

22 काबु येसु नु आ शेंसीबपुकी डोंगाम डोइश्शा “समुन्द्र शोक्शा, आइक्ची हांबु लय” दे लचा गोव्रमे बाक्त। 23 मिनु मोपा लमानु, येसु निन्द्रा पवा बाक्त। मिनु फश गिवार पचा गोवा बाक्त। मिनु डोंगामी ब्वाक्कु ओव्रशा, डोंगा गुम्चवा बाक्त। 24 मोपतीके शेंसीबपुकीम येसु कली पोक्शा “शेंब, शेंब! मुल बेक्चांइतय, है” दे हिंशा खिंखि पा देंमा बाक्त। मिनु येसु बोक्शा, फश गिवार नु छाल कली हुइक्ता बाक्त। मिनु फश गिवार नाइश्शा ब्वाक्कु यो खा दिक्माक्त। मिनु सिक्सी दुम्माक्त। 25 मिनु शेंसीब आन कली “इन थमा सुइक्तीक ते लम?” देंमाक्त। मेकोपुकी चहिं हिंशा, छक लाक्शा “फश गिवार नु ब्वाक्कुमी यो आ लोव टीबाक्तेक्म, एको सु बाक्म माइ?” दे लोव पमुमा बाक्त।

फौज माइश्शो वोल कली गुंडशो

मत्ती ८:२८-३४; मर्कूस ५:१-२०

26 मिनु समुन्द्र शोक्शा, गेरासीनी आन रागी जाक्दीम्मा बाक्त। गेरासीनी आन रागी चहिं गालील रागी क्येडा आइक्ची हांबुम बाक्माक्त। 27 मिनु जाक्दीश्शा, डोंगा रे तोंइसामानु, वोलम सुम्शो मुर का सहर रे पिशा, येसु आ डोंइती जाक्माक्त। मेको मुर वोलम सुमा रे शिश्रा गाक्शा, खिंमी मबाक्थु, बेक्शो मुर वोइक्तीकेमी बाक्शो बाक्माक्त। मोपा बाक्शो शुश बर्स दुम्शो बाक्माक्त। 28 मेकोमी येसु कली तशा, वाइ ब्रेश्शा, आ डोंइती बाप्शा, ठेयब सेंदा पा “येसु, नेल्ल क्येडा ठेयब, आ तौ, गो मार पमुया डा? श्येत मगेयीनी, दे सेउ पाइनन्नी” देंमाक्त। 29 मारदे हना येसुमी ग्रान्रा दिचा डा वोल कली “ग्रूडो” दे माइश्शो बाक्माक्त। डोंइती शुश खेयप वोलम मेको मुर कली सुमानु, मुरपुकीमी साडलोम पाइश्शा चोक्शा वोइश्शो बाक्मा बाक्त। तन्न वोलम साडलो प्हुइक्पाइश्शा, गोरशो रागीम चाक्दीश्शो बाक्माक्त। 30 मिनु मेको येसु आ डोंइती बाप्शा बाक्मेनु, येसुमी वोल कली “इ नें मारम?” दे हिल्लो पवानु, मेकोमी “फौज” देंमाक्त। मारदे हना मेको मुर आ रांमी शुश वोल ओव्रशो बाक्मा बाक्त। 31 मिनु वोलपुकीम “आंइ कली नरकम मसोइक्तीकी” दे पुन्मे बाक्त।

32 मेको डांडामी शुश पोत्र जोना जोन बाक्शो बाक्मा बाक्त। मिनु वोलपुकीमी “मेको पोत्र आन रांम ओत्रचा गेकी” दे पुन्मे बाक्त। मिनु येसुमी ओत्रचा गेमी बाक्त। 33 मिनु वोलपुकी मुर रे गूशा, पोत्रमी ओत्रमानु, पोत्र नेल्ल गशा रोंगु रे दोरशा थिश्शा समुन्द्रम प्रेक्ना प्रेक्न बेक्मा बाक्त।

34 मिनु पोत्र योत्रबपुकीमी मो दुम्शो तशा प्रोक्शा, सहर नु सहर आ एर ओंथ नेल्ल मेको लोत्र शोत्रडमे बाक्त। 35 मिनु मुरपुकी मार दुम्मे, दे कोत्रथ जाक्मा बाक्त। मिनु येसु आ नेक्था वोल गूशो मुर वा फेक्शा, आ गशो थुं साशा, येसु नु निश्शो तशा, हिंमा बाक्त। 36 वोलम सुम्शो मुर दोपा सामे, मेको ताइबपुकीमी जाक्ब आन कली मार मार दुम्मे, मेको नेल्ल शेंदमे बाक्त। 37 मिनु गेरासीन रागीम बाक्बपुकीमी येसु कली “आंइ रागीम मबाक्कीन, लने” दे पुन्मे बाक्त। मारदे हना थाम्पा हिंमा बाक्त। मिनु येसु डोंगा डोइश्शा लेम्माक्त। 38 मिनु डोंगा डोइश्शा लचावानु, वोल गुंडचा पुंडसीशो मुरुमी “गे नु लचा गेयीनी” दे पुना बाक्त। 39 तन्न येसुमी “इ खिंम लशा, इ मुर आन कली परमप्रभु यावेमी इ कली दोदेशो रिम्शो पवा, मेको तुइक्पतो” दे सोइक्ता बाक्त। मिनु मेको लशा, आ खिंमी ला ममाइ, सहर डा मुर नेल्ल आन कली येसुमी दोदेशो रिम्शो पवा, मेको तुइक्पदा बाक्त।

याइरस आ तमी साशो

मत्ती ९:१८-२६; मर्कूस ५:२१-४३

40 मिनु येसु लेशशा जाक्मेनु, शुश मुरुमी येसु कली रिम्शा बाक्शो बाक्मा बाक्त। 41 मिनु मेकेर याइरस माइश्शो गुम्तीक खिं डा ठेयब मुर का येसु आ डोंइती पोक्च थेक्शा बाप्शा “आं तमी बेक्चा चिक्ताक्व। आं खिं लय” दे सेउ पा पुना बाक्त। 42 मेको के १२ बर्स जाक्दीश्शो तमी का ला बाक्माक्त। मिनु मेको रोइ पा बेक्चशो बाक्माक्त। मिनु येसु लमेनु, हुल डा मुरपुकीमी येसु कली डी डा चूमे बाक्त।

43 मेको हुलमी १२ बर्स रे हुश याप्शा रोइ पशो मीश मुर का बाक्माक्त। मेकोमी ओरुक्ती पा आ बाक्शो नेल्ल थुम्शो बाक्माक्त। तन्न सुइमी मेको कली आ रोइ सापाइक्ने मचाप्शो बाक्मा बाक्त। 44 मिनु मेकोमी येसु आ नोले जाक्शा, येसु आ फेक्शो वा थिवा बाक्त। मिनु आ हुश याप्चा दिक्माक्त। 45 मिनु येसुमी “सुमी थियी?” दे हिल्लो पवानु, नेल्लेमी “गो मथिड, गो मथिड” देंमा बाक्त। मिनु पत्रुसमी “शेंब, मुरपुकीमी हुल पा नेम्मुइनीम, चुमुइनीम। मिनु मार पचा?” देंमाक्त। 46 येसुमी चहिं “मुर कामी आं कली थिती। मारदे हना आं सक्ति लशो तुइक्ताक्ड” देंमाक्त। 47 मिनु मेको मीश मुरुमी खुइक्ने मचाप्नुड, दे मिम्शा हिंशा खिंखि पना पन येसु आ डोंइती बाम्माक्त। मिनु मेकोमी येसु कली मारदे थिवा चोटीन दोपा सामे, मेको लोत्र नेल्ल मुर आन डोंइती शोत्रडा बाक्त। 48 मिनु येसुमी “आं तमी, इ थमा सुइश्शोमी साते। इ थुं नाइश्शा लावो” दे सोइक्ता बाक्त। लूका ७:५०

49 येसुमी मेको मीश मुर नु लोत्र पवानु, याइरस आ खिं डा मुर का जाक्शा, याइरस कली “शेंब कली श्येत मगेने। इन तमी बेक्त” देंमाक्त। 50 येसुमी मेको मुर आ लोत्र नेशा, याइरस कली “महिनी। थमा सुइक्ना सुइक्न बाक्को। इ तमी साब” देंमाक्त। 51 मिनु खिंमी जाक्दीश्शा, येसुमी पत्रुस, याक्ब, यूहन्ना नु आल आ आम आफ आन कली ला लाइश्शा आगा ओत्रमा बाक्त। मत्ती १७:१ 52 मेकेर बाक्ब नेल्ल हिशेक पा डाक्शो बाक्मा बाक्त। मिनु येसुमी मेको आन कली “मडाक्कीन, आल मबेक्शो बाक्ब। मेको इप्शो बाक्ब” देंमाक्त। लूका ७:१३ 53 मेकेर बाक्बपुकीमी आल बेक्ने थुम्शो बाक्ब, दे तुइश्शा “एको मार लोत्र पवा?” दे शुक्शी पामे बाक्त। 54 मिनु येसुमी आल कली गुइम ग्याइश्शा “ए आल, सेंसो” देंमाक्त। 55 मो मदानु आ सोक्त लेशशा छुल बोक्माक्त। मिनु येसुमी “मेको आल कली इक्का जचा गेने” दे माइक्मी बाक्त। 56 मेको तशा, आल आ आम आफ छक लाक्सा बाक्त। मिनु येसुमी “एको लोत्र सुइ आन कली मशेंदीसे” दे माइक्सी बाक्त। लूका ५:१४; मर्कूस ७:३६

9

शेंसीब आन कली सोइश्शो

मत्ती १०:१, ५-१४; मर्कूस ६:७-१३

1 मिनु काबु येसुमी आ १२ जना शेंसीब आन कली खुप्शा, वोल आन कली गुंडतीक नु रोइ पशो मुर आन कली सापाइक्ती सक्ति नु अधिकार गेमी बाक्त। लूका १०:१-१२ 2 मिनु मेको आन कली परमप्रभु यावे आ राज्य डा लोत्र शेंथ नु रोइ पाइब आन कली सापाइक्थ सोइक्तीमी बाक्त। 3 मिनु लचामेनु, येसुमी मेको आन कली “कोक्के, झोला, जचा थोत्रक, क्येट मारेइ मलाइक्चा। फेक्तीक यो मकुरसीचा। 4 मिनु तेको खिंमी ओत्रनी, मेको खिंमी गाक्ची मजाक्म सम्म बाक्कीन। 5 दोकका पा मुरपुकीमी इन कली बाक्चा मगेम्तेक्म हना, मेको सहर रे गाक्ची ना इन खोइल

डा फुरकु थुर थुर पा ताइशशा गाक्कीन। मेको, मेको आन पबर्म चिन्ड दुम्ब” दे माइशशा सोइक्तीमी बाक्त। 6 मिनू लशा, गाउं गाउं, सहर सहरम परमप्रभु यावे आ राज्य आ पबर्म शेंना शेंन, रोइ पाइब आन कली सापाइक्ना पाइक्न हिरसमा बाक्त।

हेरोदमी येसु कली गुम्चा दाक्शो

मत्ती १४:१-२; मर्कूस ६:१४-१६

7 मिनू सासन पाइब हेरोदमी मेको लोव्र नेल्ल नेंशा, छक लाक्माक्त। मारदे हना मुर का निक्शीमी “ब्वाक्कुम खुम्शा ग्रुंडब यूहन्ना बेक्शो रे सेंसे बाक्त” देंबाक्मा बाक्त। 8 का निक्शीमी “एको एलीया बाक्माक्त थां का” देंबाक्मा बाक्त। का निक्शीमी “साइ डा परमप्रभु यावे आ लोव्र पाइब का बेक्शो रे सेंसे बाक्त” देंमा बाक्त। 9 मिनू हेरोदमी “गो यूहन्ना आ पिया क्योरपाइक्ता। तन्न एको सु का आ पबर्म लोव्र नेंनु?” दे मेको कली गुम्चा दाक्ता बाक्त। लूका २१:८

येसुम ५ हजार आन कली थुल्शो

मत्ती १४:१३-२१; मर्कूस ६:३१-४४; यूहन्ना ६:१-१३

10 मिनू येसु आ सोइशशोपुकी येसु आ बाक्तीके लेम्मा बाक्त। मिनू मार मार पामे, दो दो पामे, मेको नेल्ल शोव्रडमे बाक्त। मिनू येसुमी मेको आन कली बेथसैदा सहरम लाइक्मी बाक्त। 11 मिनू मुरपुकीम “येसु नु आ शेंसीब मेक लाम्तेक्म” दे तुइशशा, आन नोले खोइशशा लशा थित्मे बाक्त। मिनू येसुमी मेको आन कली बाक्चा गेशा, परमप्रभु यावे आ राज्य डा लोव्र शेंशा, रोइ पाइब आन कली सापाइक्मी बाक्त।

12 मिनू नां रिक्चावानु, आ १२ जना शेंसीबपुकीम “मुर आन कली सोइक्तीन। मिनू मेकोपुकी गाउं मेर लशा, जचा तूचा ताइनीम, बास यो थित्नीम। मारदे हना एकेर सुइ मुर मबाक्नीम” दे मदमे बाक्त। 13 मिनू येसुमी “गेपुकीमी एको आन कली जचा गेने” दे माइक्मी बाक्त। मिनू शेंसीबपुकीमी “इं के ५ ओटा शोब्ले नु डांइ निक्शी ला बाक्ब। सहर लशा, जचा थोव्रक ग्याप्शा नेल्ल आन कली थुल्चा देंनी?” देंमा बाक्त। 14 मेकेर देल्शो वोंइश मुर ला ५ हजार बाक्मा बाक्त। मिनू येसुमी शेंसीब आन कली “मुर आन कली ५०, ५० जना पा निप्पतीन” देंमाक्त। 15 मिनू मेकोपुकीमी निप्पदमे बाक्त। 16 मिनू येसुमी ५ ओटा शोब्ले नु डांइ निक्शी शेशा, सरीड गे कोव्रशा “गे रिम्शो पाइब बाक्नीनी” दे आसीक गेशा जिक्शा, शेंसीब आन कली योक्चा गेमी बाक्त। 17 मिनू नेल्लेमी रूथ्री जामे बाक्त। जशा हेंशो खुप्तमेनु, १२ डालो दुम्माक्त।

पत्रुसमी “ख्रीस्त ननी” देशो

मत्ती १६:१३-२९; मर्कूस ८:२७-२९; यूहन्ना ६:६७-६९

18 मिनू काबु आ शेंसीबपुकी नु बाक्शा प्रार्थना पा, येसुमी “मुरपुकीमी आं पबर्म मार देंनीमी?” दे हिल्लो पवा बाक्त। 19 मिनू मेकोपुकीमी “का निक्शीमी ब्वाक्कुम खुम्शा ग्रुंडब यूहन्ना, का निक्शीमी एलीया, का निक्शीमी साइ नेसी डा परमप्रभु यावे आ लोव्र पाइब का बेक्शो रे सेंसे बाक्त देंनीम” देंमा बाक्त। लूका ९:-८ 20 मिनू येसुमी “गेपुकी चहिं आं कली सु मिम्नीनी?” देंमेनु, पत्रुसमी “गे परमप्रभु यावे आ सोइशशो ख्रीस्त ननी” देंमाक्त। 21 मिनू येसुमी “एको लोव्र सुइ आन कली मशेंदीने” दे अरेमी बाक्त।

ख्रीस्तम “श्येत जचा माल्नुड” देशो

मत्ती १६:२०-२९; मर्कूस ८:३०-३१

22 येसुमी “रागीम जरमेशोमी शुश श्येत जचा माल्ब। जोक्ब तुइक्ब खाल्पापुकी, ठेयब चढेबपुकी नु सास्त्रीपुकीमी मेको कली मब्रथु साइक्पाइक्नीम। मिनू बेक्शो आ नित्थ नाक्ती सेंसीब” दे शेंदीमी बाक्त। लूका ९:४४-४५; लूका १८:३१-३४

आ नोले खोइक्ब “श्येत जाइनीम” देशो

मत्ती १६:२४-२८; मर्कूस ८:३४-९:१

23 मिनू येसुमी मेको आन कली “सुमी आं नोले खोइक्चा थुं पाइबा, मेकोमी आंम दला दाक्स पचा प्रोंइशा, नाक्त किंत किंत श्येत जचा महिंथु, आं नोले खोइय्यील। 24 सुमी आंम गिंम प्रोंइचा माल्बा, मेको आ गिंम योल्ब। आं पबर्म आ गिंम सोइक्बमी आ गिंम प्रोंइब। लूका १७:२३; मत्ती १०:३९; यूहन्ना १२:२५ 25 रागी नेल्ल आंम के सेल्शा, आ थुं खतम दुम्त हना, मार रिम्शो दुम्बा डा? 26 सुमी आं पबर्म नु आं लोव्र आं पबर्म देंचा कली मुने पाइबा, मेको आ

पर्वम रागीम जरमेशोमी, आ आफ आ छेडछेडमी, परमप्रभु यावे आ स्वर्ग डा गेय पाइबपुकी नु जाकमेनु 'मेको कली मतुइकुड, सु बाकमे?' देंब। मत्ती १०:३३; रतिमोथी १:८ 27 गो इन कली थमा लोत्र पाइनुड मुल गो नु काथा बाकब का निक्शीमी परमप्रभु यावे आ राज्य मतथु मबेक्नीम" दे माइक्मी बाक्त।

येसुमी आ रां फाइशशा तपांडसीशो

मत्ती १७:१-८; मर्कूस ९:२-८

28 मेको लोत्र पशो हप्ता का नोले, येसुमी पत्रुस, यूहन्ना नु याकूब सां आन कली प्रार्थना पथ डांडाम लाइक्मी बाक्त। 29 मिनु येसुमी प्रार्थना पवानु, फाइसीशा आ कुल बुबु देंशो नु आ फेक्शो वा यो बुबु पा तांडसे बाक्त। 30 मिनु मुर निक्शी, मोसा नु एलीया गूशा, येसु नु लोत्र पशो तामे बाक्त। 31 मेको यो छेडछेडम गिल्सीशा येसु नु लोत्रसी पामे बाक्त। मेकोपुकीम यरूसलेमम दोपा श्येत जशा, बेक्चा मेको आ पर्वम लोत्र पामे बाक्त। 32 मेको सांफा मोदेशो लोत्र पामेनु, पत्रुस, यूहन्ना नु याकूब मारेइ मतुइक्चा डा पा निन्द्रा पामे बाक्त। तन्न मेको आ डोंइती येसु नु मुर निक्शी राप्शो तामे बाक्त। येसु आ छेडछेडम मेको निक्शी नु बाक्शो तामे बाक्त। 33 मिनु मोसा नु एलीया गाक्चाम्सेनु, पत्रुसमी येसु कली "शेंब, इं कली एकेर बाक्चा रिम्शो दुम्ब। बाक्तीके सां सेल्नीकी। का इन कली, का मोसा कली, का एलीया कली" देंमाक्त। मोपा ब्वाक्शो आंमान मतुइक्ता बाक्त। 34 मिनु पत्रुसमी लोत्र पवानु, सरीड रे गोस्स यिशा, मेको आन कली सुम्मी बाक्त। मेको गोस्सुम गिल्मीनु, हिंमा बाक्त। 35 मिनु गोस्स आगा रे सेंदा का "एको आं योत्रशो तौ बाक्ब। मेको आ लोत्र नेनीन" देंशो नेन्मे बाक्त। लूका ३:२२; भजन संग्रह २:७; ब्यवस्था १८:१५ 36 मिनु मेको लोत्र नेन्मेनु, येसु का ला तामे बाक्त। मिनु मेको आन तशो नु नेंशो शुश नाक्ती सम्म सुइ आन कली मशेंथु, सिक्सी पा थुंमी वोदमे बाक्त।

वोलमी सुम्शो आल कली सापाइशशो

मत्ती १७:१४-२१; मर्कूस ९:१४-२९

37 मो दुम्मे आ दीसा डांडा रे यिशा, शुश मुर नु गुम्शा देल्मा बाक्त। 38 मेकेर मुर का जाक्शा ठेयब सेंदा पा "हे शेंब, आं तौ कली चारच पने। मारदे हना आं तौ का ला बाक्ब। 39 मेको कली वोल्म हो हु सुमानु, वाइ ब्रेशशा, शोत्र रे बोग्यो गुंडशा, खिंखि पना पन मोल मोल थाइब। 40 गो इन शेंसीब आन कली 'वोल गुंडदीने' दे पुंडता। तन्न गुंडने मचबेम" देंमाक्त। 41 मिनु येसुमी "गे थमा पा थमा मसुइक्ब नु दूली पाइब, गेना सम्म इन पशो फाल्शा बाक्नुडा डा? इ तौ एक चाक्को" दे मदा बाक्त। 42 मिनु चाक्गानु, वोल्म मेको वोंइश आल कली खोल्शा रोप्से पा, शोत्र रे बोग्यो गुंडपदा बाक्त। मिनु येसुमी ग्रांरा दिचा डा वोल्म कली हुइशशा, वोंइश आल कली सापाइशशा, आ आफ कली गेवा बाक्त। लूका ७:१५

रागीम जरमेशो श्येत जचा माल्ब देंशो

मत्ती १:२२-२३; मर्कूस ९:३०-३२

43 मिनु मुर नेल्लेमी परमप्रभु यावे आ गेय तशा छक लाक्शा "परमप्रभु यावे ठेयब बाक्ब" दे लोत्र पामे बाक्त। मिनु मुर नेल्लेमी येसु आ पशो तशा छक लाक्मानु, येसुमी आ शेंसीब आन कली 44 "नोफा दाइशशा नेनीन। आं देंशो लोत्र थुंमी वोतीन। रागीम जरमेशो दा मुर आन गुइमी गेशा साइक्चा पुंडसीब" देंमाक्त। लूका ९:२२; लूका १८:३१-३४ 45 तन्न मेकोपुकीमी मेको लोत्र काइ मरुप्मे बाक्त। मारदे हना मेको आन कली मेको लोत्र रुप्चा कली थुं मगेशो बाक्माक्त। येसु कली "एको लोत्र मार में?" दे हिल्लो पचा यो हिंमा बाक्त। लूका २४:४५

"ठेयब सु बाक्या माइ?" देंशो

मत्ती १८:१-५; मर्कूस ९:३३-३७

46 काबु शेंसीबपुकीमी "गो इं १२ जनामी नेल्ल क्येडा ठेयब सु बाक्या माइ?" दे लोत्र पमुमा बाक्त। 47 येसुमी मेको आन मिम्शो तुइशशा, आल का कली आ नेक्था वोइशशा 48 "सुमी एको आल कली आं नेमी ब्राइबा, मेकोमी आं कली ब्राइब। मिनु सुमी आं कली ब्राइबा, मेकोमी आं कली सोइक्ब कली यो ब्राइब। गे इन दातेमी सु नेल्ल क्येडा आइक्च सुंडसीबा, मेको नेल्ल क्येडा ठेयब दुम्ब" दे शेंदीमी बाक्त। मत्ती १०:४०

छक लाक्चा गेय पाइब का

मर्कूस ९:३८-४०

49 मिनू यूहन्नामी “शेंब, इं नोले मखोइक्ब मुरुमी इन नें थिशा, वोल आन कली खेरशो ताइतक। मिनू मो पचा मदुम्ब, दे माइक्तक। मारदे हना मेको इं नोले खोइश्शा मगाक्ब” दे मदा बाक्त। 50 मिनू येसुमी “मोदेचा मदुम्ब, मारदे हना इं कली मरिम्शो मपाइब इं मुरुन बाक्ब” दे शेंदा बाक्त। लूका ११:२३; फिलिप्पी १:१८

बास मगेचा पुंइसीशो

51 मिनू येसुमी परमप्रभु यावे आ बाक्तीके लची नाक्त आं नेक्था जाक्शो तुइश्शा, यरूसलेम लचा थुं पवा बाक्त। मर्कूस १०:३२ 52 मिनू सामरीया रागी डा गाउं आ नेक्था जाक्दीश्शा, मुर का निक्शी आन कली “आं डोंइती लशा, नेल्ल ठीक पने” दे सोइक्तीमी बाक्त। मिनू मेको सामरीया डा मुर आन गाउंमी ओव्रमा बाक्त। 53 तन्न मुरपुकीम बाक्चा गेने मबिस्समा बाक्त। मारदे हना येसुमी “यरूसलेम लाइनुड” देंशो बाक्माक्त। मिनू सोइश्शो मुरपुकी लेशशा जाक्शा “बास मगेनीकी, देतेक्म” दे येसु कली मदमे बाक्त। यूहन्ना ४:९ 54 मिनू आ शेंसीब याक्ब नु यूहन्नामी मेको लोव्र नेंशा, येसु कली “प्रभु, मेको गाउं डा मुर आन कली परमप्रभु यावे कली पुंइशा, सरीड रे मी तोक्पाइश्शा, खतम पपाइय्य?” दे हिल्लो पाम्से बाक्त। २राजा १:१०-१२ 55 तन्न येसुमी मेको आस गे हिरशा हुइक्तीम्सी बाक्त। 56 मिनू बास बाक्थ अर्को गाउं लमा बाक्त।

आ नोले खोइक्चा कली सु शिरबा?

मत्ती ८:१९-२२

57 मिनू लांमी गाक्मानु, मुर कामी येसु कली “प्रभु, गो इन नोले खोइक्चा दाक्नुड” देंमाक्त। 58 मिनू येसुमी “सिवार आन बाक्तीके ढोडोडगा बाक्ब, चिक्ब आन बाक्तीके ग्योव्र बाक्ब। तन्न रागीम जरमेशो के आ बाक्तीके खिं मबाक्ब” देंमाक्त।

59 नोले येसुमी अर्को मुर का कली “आं नोले खोइय्यी” दे मदानु, मेकोमी “डोंइती लशा, आं आफ कली थिम्चा गेयीनी” देंमाक्त। 60 मिनू येसुमी मेको कली “बेक्शो मुरुमी बेक्शो कली थिम्मेक्ल। गे चहिं परमप्रभु यावे आ राज्य डा लोव्र नेंपाइक्थ लावो” दे मदा बाक्त। 61 अर्को मुरुमी “प्रभु, गो इन नोले खोइक्चा दुम्ती, तन्न डोंइती आं खिं डा मुर आन कली तुइक्पाइक्थ लचा गेयीनी” देंमेनु, १राजा १९:२० 62 येसुमी “ब्यफ वाक्बमी वाक्तानु, आ नोले हिरशा मवाक्ब। नोले हिरशा कोव्रना कोव्रन वाक्ब मुर चहिं परमप्रभु यावे आ राज्य डा गेय पचा मशिरब” देंमाक्त। फिलिप्पी ३:१३

10

शेंसीब आन कली शेंथ सोइश्शो

मत्ती १०:७-१६

1 मिनू नोले प्रभुमी ७० जना अरु शेंसीब आन कली योव्रशा, डोंइती आ लशो सहर गाउंमी निक्निक्शी पा सोइक्तीमी बाक्त। का निक्शी किताबम ७२ देंनीम। लूका ६:१३-१६; लूका ९:१; मर्कूस ६:७ 2 मिनू गाक्चामेनु, मेको आन कली “बाली नाली रुप्चा शुश बाक्ब। रुप्ब मुर चहिं का निक्शी ला बाक्नीम। मोपतीके ‘बाली रुप्चा कली मुर योव्रशा सोइक्तीने’ दे बाली नाली आ परमप्रभु कली पुनीने। मत्ती ९:३७-३८; यूहन्ना ४:३५ 3 मिनू गे लने। भेडा पाठा आन कली फर आन दातेमी सोइश्शो खोदेशो पा सोइक्तान्नी। 4 लनीनु, क्येट, झोला, जुत्ता मकुरथु लने। लांमी मुर आन कली गुम्तीनी हना, लोव्र मपने। लूका ९:३-५; २राजा ४:२९ 5 मुर आन खिंमी जाक्दीश्शा ओव्रनीनु, मेको खिं डा मुर आन कली ‘थुं नाइश्शा बाक्कीन’ दे आसीक गेने। यूहन्ना २०:१९ 6 मेको खिंमी थुं नाइक्चा ताइब का बाक्त हना, इन थुं नाइक्तीक आसीक मेकोम राइब। तन्न मबाक्ब हना, मेको थुं नाइक्तीक आसीक गे राइनीनी। 7 मुरपुकीम बास गेम्तेक्म हना, गाक्ची मजाक्म सम्म मेकेरन बाक्कीन। खिं खिं याक्शा मबाक्कीन। इन कली मार जचा तूचा गेमे, मेको जने तूडीन। मारदे हना गेय पाइबपुकीमी आन गाल्च तचा माल्नीम। 8 सहरम जाक्दीन्नीनु, मुरपुकीम इन कली ब्रशा, बास गेशा थुल्लेक्म हना, मार जचा गेमे, मेको जने। 9 रोइ पाइब आन कली सापतीन। मिनू मुर आन कली ‘परमप्रभु यावे आ राज्य इन नेक्था जाक्शो बाक्ब’ दे नेंपतीन। 10 तन्न मुरपुकीमी इन कली मब्राम्तेक्म हना, सहर डा लांमी गाक्नीनु, 11 ‘आंइ खोइलीम क्येप्शो इन सहर डा फुरक यो फिक्नीकी। मो हना यो परमप्रभु यावे आ राज्य इन नेक्था जाक्शो बाक्ब, दे तुइक्तीन। 12 परमप्रभु यावे आ ठेयब निसाफ पची ना गे इन क्येडा सोदोम सहरम शिशी ताइब, देनीन।’ उत्पत्ती १९:१-२९

गालील डा सहर आ पर्वम लोव
मत्ती ११:२०-२४

13 ए खोराजीन, ए बेथसैदा, इन तशो चिन्ड नु छक लाक्का डा गेय टायर नु सीदोन डा मुरपुकीमी तशो नम हना, भाडरा फेक्शा, पुलुम निश्शा आन थुं परमप्रभु यावे गे लेत्तेम वा। 14 ठेयब निसाफ पची नाक्ती टायर नु सीदोन डा मुर आन क्येडा गे शुश सजाइ ताइनीनी। 15 ए कापेरनाउम, मार गे स्वर्ग सम्म क्युक्सीनेवे डा? ममाइ, बेक्शो आन बाक्तीक तोक्का पुंडसीनेवे।

16 सुमी इन शेंशो नेंना, मेकोमी आं शेंशो नेंब। सुमी इन कली मब्राइबा, मेकोमी आं कली मब्राइबा। आं कली मब्राइबमी आं कली सोइक्ब कली यो मब्राइब” दे माइश्शा सोइक्तीमी बाक्त। मत्ती १०:४०; यूहन्ना ५:२३

येसुमी ग्येरसीन देशो
मत्ती ११:२५-२७

17 मिनु मेको ७० जना लशा शेंने थुम्शा, येसु आ बाक्तीके लेशशा जाक्का बाक्त। मिनु जाक्शा, येसु कली “प्रभु, इन नें थिशा, हुइश्शोनो वोलम यो टिशा प्रोक्बाक्तेकम” दे थाम्पा ग्येरसीशा मदमे बाक्त। ७२ जना शेंसीब यो देंनीम। 18 मिनु येसुमी “सरीड रे चिला आप्शो खोदेशो पा गो सैतान कली दोक्शो ताता। यूहन्ना १२:३१; प्रकाश १२:८-९ 19 गे बुस्स नु बिच्छी दिम्ताक्नी हना यो, इन कली मकोक्नीम। मारेइ पने मचाप्नीम। मोदेशो पा सैतानमी इन कली मारेइ पने मचाप्ब। सुइमी यो इन कली मारेइ पने मचाप्ब। भजन संग्रह ९१:१३; मर्कूस १६:१८ 20 वोलम इन देशो टीनीम, दे तुइक्नीनी। मेको आ पर्वम मग्येरसीन। तन्न ‘परमप्रभु यावे आ मुर दुम्शा, इं नें परमप्रभु यावे नु ब्रोंइचा ताइब आन किताबम ब्रेक्सक्व’ दे तुइश्शा थाम्पा ग्येरसीने” दे माइक्मी बाक्त। प्रस्थान ३२:३२; यसेया ४:३; फिलिप्पी ४:३; प्रकाश ३:५

21 मिनु येसु परमप्रभु यावे आ सोक्तीम पतीके ग्येरशा “आं आफ, सरीड नु रागी डा परमप्रभु, गे नेल्ल क्येडा ठेयब ननी। गे शुश रिम्शो पाइतीनी। जोक्ब तुइक्ब नड, दे मिम्ब आन कली इन लोव रुप्तीक थुं मगेनी। मजोक्ब मतुइक्ब आन कली रुप्तीक थुं गेतीनी। गे मोदेशो पचा दाक्ताक्नी। १कोरिन्थी २:७ 22 आं आफोमी आं कली नेल्ल कली अधिकार पतीक सक्ति गेती। तन्न सुइमी आ तौ सु बाक्बा, मतुइक्नीम, आं आफोमी ला तुइक्ब। सुइमी आं आफ कली मतुइक्नीम। आ तौमी ला तुइक्ब। मिनु तौमी सु सु आन थुंम तुइक्तीक वोइक्बा, मेकोपुकीमी यो तुइक्नीम” देंमाक्त।

23 मिनु आ शेंसीब गे हिरशा, मेको आन कली “सुम इन खोदेशो पा ताइनीमी, मेकोपुकी ग्येरसीमल। मत्ती १३:१६-१७ 24 मारदे हना इन तशो नेंशो साइ नेसी रे परमप्रभु यावे आ लोव पाइब नु पिपीपुकीमी तचा नेंचा दाक्ताक्मे। तन्न तचा नेंचा मतामे” दे माइक्मी बाक्त। १पत्रुस १:१०

इ नेक्था डा मुर सु बाक्बा, दे शेंशो

25 मिनु येसुमी मुर आन कली शेंदानु, सास्त्री का बोक्शा, येसु आ थुं थाम्शा “हे शेंब, गो गेना हना यो ब्रोंइशा बाक्का कली मार पचा मालनुडा?” दे हिल्लो पवा बाक्त। मत्ती २२:३५-४०; मर्कूस १२:२८-३४; लूका १८:१८-२० 26 मिनु येसुमी “परमप्रभु यावे आ अरेशो लोवमी मार ब्रेक्शो बाक्मे? मेको मपढेनी?” देंमेनु, 27 मेकोमी “इ थुं नेल्लेमी, इ रां नेल्लेमी नु इ सक्ति नेल्लेमी परमप्रभु, इ परमप्रभु यावे कली दाक्तो। मिनु आंम कली दाक्शो खोदेशो पा इ नेक्था बाक्ब आन कली यो दाक्तो, दे ब्रेक्शो बाक्ब” देंमाक्त। ब्यवस्था ६:५; लेवी १९:१८ 28 मिनु येसुमी “ठीक देंते। मेको इ देशो खोदेशो पाप्तीवी हना, गेना हना यो ब्रोंइशा बाक्का ताइनेवे” देंमाक्त। लेवी १८:५; मत्ती १९:१७ 29 मिनु आंम कली ठीक सेल्शा, मेकोमी “आं नेक्था डा मुर सु बाक्नीमी, गो मतुइक्नुड” देंमाक्त। 30 मिनु येसुमी “मुर का यरूसलेम रे यिशा, यरीको सहर डा लां खोदा बाक्त। मिनु लमेनु, खुइपुकीमी लांम बाप्शा, मेको कली तुप्शा, थपाइश्शा, आ बाक्शो मारेइ मारेइ नेल्ल रोइश्शा, प्रोक्का बाक्त। 31 इक्का नोले मेको लां पा चढेब का पिशा, मेको तुप्शा बेक्चशो मुर कली तशा, हेरशा लाक्का बाक्त। 32 मिनु इक्का नोले लेवी आ थर डा मुर का यो मेको लां रे पिमाक्त। मेकोमी यो मेको बेक्चशो मुर कली तशा, हेरशा लाक्का बाक्त। 33 मिनु नोले सामरीया रागी डा मुर का पिमाक्त। मेकोमी बेक्चशो मुर कली तशा शिशी पवा बाक्त। 34 तुप्शो मुर आ गारमी तेल नु ओरुती खेक्शा वाम फ्रेंशा, आ गधा तारी डोइक्पाइश्शा, होटेल सम्म लाइश्शा, बास पुंइशा, जचा बाक्का गेवा बाक्त। 35 आ दीसा नाक्ती गाक्का क्येडा डोंइती निम्फा आस जशो नु बास डा नेल्ल थाप्शा, होटेल दाइक्ब कली क्येट गेशा वोइश्शा ‘मेको तुप्चा पुंइसीशो मुर कली रिम्शो पा कोवडिने। मसाम सम्म वारच पने। गो लेडडानु, मजाक्दीशो क्येट नेल्ल

थाप्नन्नी' दे लोव गार पा लमाक्त। 36 मेको लां गाक्ब सांमी सु चहिं तुप्शा रोइक्चा पुंइसीशो मुर आ नेक्था डा मुर दुम्मे?" दे हिल्लो पवा बाक्त। 37 मिनु सास्त्रीमी "शिशो पाइब मुर थमा पा आ नेक्था डा मुर बाक्त" देंमाक्त। मिनु येसुमी "मेको आ खोदेशो पावो" दे माइशशा सोइक्ता बाक्त। यूहन्ना १३:१७

मरीयम नु मारथा आस खिम बाक्शो

38 मिनु येसु नु आ शेंसीबपुकी यरूसलेम डा लां रे गाक्मानु, गाउं कामी जाक्दीम्मा बाक्त। मेकेर मारथा नें पाइशशो मीश मुर कामी येसु कली मान पा बास गोवा बाक्त। यूहन्ना ११:१ 39 मारथा आ लोकब मरीयम येसु आ खोइल आ नेक्था बाक्शा आ शेंशो नेना बाक्त। 40 मारथामी शुश गेय पा श्येत पशा "प्रभु, आं लोकबमी आं कली काइ वारच मपाइब। गे मोदेशो तशा यो मारेइ मदेनी? मेको कली 'बोक्शा, इ लोकब कली वारच पतो' दे मतीन" देंमाक्त। 41 मिनु येसुमी मारथा कली "मारथा, आं लोव नेनो। इ थुंमी ग्येतथ लुकच मिम्शा, पीर पाइबाक्ते। 42 तन्न थोव्रक का ला माल्ब। मरीयममी रिम्शो थोव्रक योव्रतु। मेको सुइम लाइक्ने मचाप्नीम" दे मदा बाक्त। मरीयम ६:३३

11

प्रार्थना पचा आ पर्बम शेंशो

मती ६:९-१३

1 काबु येसुमी प्रार्थना पवा बाक्त। मिनु प्रार्थना पने थुमानु, आ शेंसीब कामी "हे प्रभु, यूहन्नामी दोपा आ शेंसीब आन कली प्रार्थना पचा शेंदा, मोपा आंइ कली यो शेंदीकी" देंमाक्त। 2 मिनु येसुम "परमप्रभु यावे कली प्रार्थना पनीनु 'आं आफ, इन नें का ला ठेयब बाक्ल। इन राज्य जाक्ल। 3 नाक्त कित कित डा आंइ जचा थोव्रक गेकी। 4 आंइ मरिम्शो पशो क्याम्शा गेकी। मारदे हना गो यो आंइ कली मरिम्शो पाइब आन कली का का पा माफ गेनीकी। सैतानमी आंइ थुं थाम्चा मगेने' दे प्रार्थना पने" दे शेंदीमी बाक्त।

परमप्रभुम शिशो पाइब, दे शेंशो

मती ७:७-११

5 मिनु येसुमी "सुइमी नाक्दो इप्शो वारच कली पोक्शा 'ए वारचै, शोब्ले सां गेयी। 6 वारच का डोन रे जाक्त। मेको कली थुलु देंडानु, गो नु मारेइ जचा थोव्रक मबा। 7 मोपतीके जचा थोव्रक गेचा नड' दे पुंइतु हना, वारचम लाप्चो मरोक्थु, खिं आगा रे 'रियके मपावो। लाप्चो चोक्ता। आल इप्तेक्म। सेंसीनीम। बोक्शा, इ पुंइशो गेने मचाप्नुड' देंत हना, 8 तन्न मेकोमी पुंइस डा पुंइस बाक्त हना, मेको मगेनुड देंब मुरुमी वारच, दे ला ममाइ ढिपी पतीके मेको कली आ पुंइशो गेब।

9 परमप्रभु यावे कली पुनीने। मिनु इन पुंइशो ताइनीनी। मालीने। मिनु इन माल्शो थितनीनी। 'बाक्नी?' दे लाप्चो खोकोल पने। मो पाइतीनी हना ओव्रचा ताइनीनी। 10 मोपतीके सुम पुंइबा, मेकोमी आ पुंइशो ताइब। सुम माल्बा, मेकोमी आ माल्शो थिप्ब। सुम ओव्रनुड, दे लाप्चो खोकोल पाइबा, मेको ओव्रचा ताइब। लूका १३:२५ 11 तौमी आ आफ कली 'डांइ ब्वाइनुड' दे पुंइतु हना, मार, आ आफोमी डांइ, दे बुस्स ब्वचा गेबा डा? मती ७:९ 12 'ब्वोफु जाइनुड' दे पुंइतु हना, ब्वोफु, दे बिच्छी ब्वचा गेबा डा? 13 गे, मरिम्शो पाइब बाक्तीनी हना यो, इन आल आन कली रिम्शो थोव्रक गेने चाप्नीनी, इन पशो क्येडा स्वर्गम बाक्ब इन आफोमी आ तमी तौ आन कली आन पुंइशो गेब। मेकोपुकीमी 'इन सोक्त गेकी' दे पुंइतेक्म हना, आ सोक्त यो गेब" दे शेंदीमी बाक्त।

वोल गुंइचा आ पर्बम शेंशो

मती १२:२२-३०; मर्कूस ३:२२-२७

14 मिनु काबु येसुमी लाटा वोलम थिशो मुर का कली गुमा बाक्त। मिनु लाटा वोल कली गुंइशा खेरा बाक्त। वोल गूम नोले मेकोमी लोव पने चबा बाक्त। मेकोमी लोव पशो नेंशा, मुर नेल्ले छक लाक्मा बाक्त। 15 मिनु का निक्शीमी चहिं "वोल आन पिप बेल्जीबुल आ सक्तिम वोल आन कली गुंइशा खेरबाक्माक्त" देंमा बाक्त। 16 का निक्शीमी येसु कली थुं कोव्रचा कली चिन्ड कोइपाइक्चा माल्मे बाक्त। मर्कूस ८:११ 17 येसुमी मुर आन थुं डा लोव नेल्ल तुइशशा, मेको आन कली "राज्य का डा मुर जिशा ब्राशा गाक्तेक्म हना, राज्य जाम्शा लाइब। खिं का डा मुरपुकी जिशा ब्राशा गाक्तेक्म हना, मेको खिं मलीब। 18 सैतान आ राज्य डा सक्ति ब्रात हना, रीब पा आ राज्य जाम्शा मलाइबा डा? 'बेल्जीबुल आ सक्तिम वोल आन कली खेरबाक्माक्त' देंतीनी। 19 गो बेल्जीबुल आ सक्तिम वोल आन कली

खेरतामी हना, इन तौपुकीमी सुका आ सक्तिम खेरनीमी? इन तौपुकीमी इन कली निसाफ पाइनीम। 20 गोमी परमप्रभु यावे आ सक्तिम वोल आन कली खेरता हना, परमप्रभु यावे आ राज्य जाक्शो बाक्माक्त, दे तुइक्तीन। प्रस्थान ८:१५ 21 बोल्यो मुर कामी या शेशा आ दरवार खाल पाप्तु हना, आ शोंप सुइमी खुइ पने मचाप्नीम। 22 तन्न मेको क्येडा यो बोल्यो अर्को का जाक्त हना ला, मेको आ या नेल्ल रोइशशा, ग्राशा, शोंप नेल्ल आंम के सेल्ब। कलस्सी २:१५; १यूहन्ना ४:४ 23 गो नु मगारब आं जोरी सत्रु दुम्नीम। गो नु मखुप्बपुकीमी आं खुप्शो यो फ्राइनीम। लूका ९:५०

वोल लेशशा जाक्ब, दे शेंशो

मत्ती १२:४३-४५

24 ग्रांग्रा दिचा डा वोल मुर रे गूशा लशा, ब्वाक्कु मबाक्तीकेम नाइक्तीके माल्ब। मिनु नाइक्तीके मथित्तु हना 'डोंइती आं बाक्तीकेमीन लेत्नुड' दे लेप्ब। 25 मिनु लेशशा जाक्मेनु, आ डोंइती बाक्तीके फिक्शा सिल्शा वोइशशो ताइब। मिनु आ क्येडा ग्रांग्रा दिचा डा ७ ओटा वोल आन कली माल्थ लशा चाक्ब। मिनु ओव्रशा बाक्नीम। 26 मिनु डोंइती क्येडा मेको मुर शुश मरिम्शो दुम्ब" दे शेंदीमी बाक्त। यूहन्ना ५:१४

परमप्रभु कली टीब आसीक राइब।

27 येसुमी मेको लोव्र पवानु, मीश मुर कामी ठेयब सेंदा पा "इन कली थिशा थुल्शा कोल्पाइक्ब ममा आसीक रशो मुर बाक्माक्त" दे येसु कली ठेयब सेला बाक्त। लूका १:२८:४८ 28 मिनु येसुमी "आं ममा क्येडा परमप्रभु यावे आ लोव्र नेंशा, थुंमी वोइशशा पाइबपुकी आसीक राइब नम" देंमाक्त। लूका ८:१५:२१

चिन्ड कोव्रकोव्र दाक्बपुकी

मत्ती १२:३८-४२

29 येसु आ लोव्र नेंबपुकी बारना बारन लशा, शुश दुम्मा नोले येसुमी "सिनाक्त मुलाक्त डा मुर थम मरिम्शो बाक्नीम। मारदे हना चिन्ड ला कोव्रकोव्र दाक्नीम। मेको आन कली योना आ चिन्ड डा लाक्शा, मारेइ चिन्ड मकोइनुडमी। लूका ११:१६ 30 निनवे सहर डा मुर आन कली योना आ चिन्ड खोदेंशो पा, रागीम जरमेशो सिनाक्त मुलाक्त डा मुर आन कली चिन्ड दुम्ब। 31 निसाफ पची नाक्त दक्खिन रागी डा पिपीममी बोक्शा, एको पाला डा मुर आन कली दोस ताइब सेल्ब। मारदे हना मेकोमी डोन रागी रे पिप सोलोमन आ जोक्तीक तुइक्तीक नेंचा कली जाक्त। नेनीन, एकेर सोलोमन क्येडा यो ठेयब का बाक्ब। १राजा १०:१ 32 निसाफ पची नाक्ती निनवे सहर डा मुरपुकी बोक्शा, एको पाला डा मुर आन कली दोस ताइब सेल्नीम। मारदे हना मेकोपुकीमी योना आ लोव्र नेंशा, आन थुं परमप्रभु यावे गे लेत्ताक्म। नेनीन, एकेर योना क्येडा यो ठेयब का बाक्ब। योना ३:५

इन रां छेडछेड दुम्चा माल्ब

मत्ती ५:१५; मत्ती ६:२२-२३

33 बत्ती दाशा, सुइमी खुइशशा सुम्शा मवोइक्नीम। खिं ओव्रब आन कली हाम्सो दुम्ल, दे नेल्लेम ततीकेम वोइक्नीम। लूका ८:१६ 34 इन मिक्च इन रां डा छेडछेड बाक्ब। गे हेंथे मकोव्रतीनी हना, इन रां नेल्ल छेडछेड दुम्ब। गे मरिम्शो कोव्रचा दाक्ताक्नी हना, इन रां नेल्ल छिडछिड बाक्ब। 35 मोपतीके होस पांइसीने, इन रां डा छेडछेड छिडछिड मदुम्ल। 36 मिनु इन रां छिडछिड मदुम्थु, छेडछेडम ब्रीशो बाक्त हना, बत्ती दाशो खोदेंशो पा तांइसीनीनी" दे शेंदीमी बाक्त।

फरिसी नु सास्त्री कली हुइशशो

मत्ती २३:१-३६

37 काबु येसु फरिसी आ खिंमी खमे जथ लमेनु, आ गुइ मचिक्सीथु निस्से बाक्त। लूका ७:३६; लूका १४:१ 38 मिनु फरिसीमी येसु कली गुइ मचिक्थु जचशो तशा छक लाक्माक्त। मत्ती १५:२ 39 मिनु प्रभु येसुमी मेको कली "गे फरिसीपुकी बोस शेक्तीनीनु, आ तार ला शेक्नीनी। आगा मशेक्नीनी। मेको खोदेंशो पा इन थुंमी रोइक्तीके नु परमप्रभु कली मटितीकेमी ब्रीशो बाक्ब। 40 गे मूर्खपुकी, सुमी आ लाडगा डा सेला, आगा डा यो मेकोम सेल्शो ममाइ डा? 41 गे आगा डा थोव्रक मथीब आन कली गेने। मिनु इन कली नेल्ल रिम्शो दुम्ब।

42 तन्न आबी, फरिसीपुकी, गे खतम बाक्नीनी। मारदे हना सुप्तीके के १० भाग डा भाग का परमप्रभु यावे कली गेनीनी। तन्न गे मुर आन कली ठीक निसाफ मपथु, परमप्रभु यावे कली मदाक्नीनी। गे डोंइती नु नोले डा निम्फा पचा माल्नीनी। यूहन्ना ५:४२ 43 आबी, फरिसीपुकी, गे खतम बाक्नीनी। मारदे हना ग्रुम्तीक खिंमी मान तशो ठेयब

मुर आन नित्तीकेमी नित्चा दाक्नीनी। बजारमी गाक्नीनु, मुरपुकीमी मान पा सेउ पशो ताक्चा दाक्नीनी। लूका १४:७
 44 आबी, फरिसीपुकी, गे खतम बाक्नीनी। मारदे हना गे मततीक तुरस खोदेशो बाक्नीनी। मुरपुकीमी मेको कली
 मतुइक्थु, दिम्शा गाक्नीमी” देंत। 45 मिनु सास्त्री कामी “शेंब हजुर, इन हुइश्शो फरिसी आन कली ला ममाइ। आंइ
 कली यो हुइक्ताक्नी” देंमेनु, 46 येसुमी “आबी, सास्त्रीपुकी गे यो खतम बाक्नीनी। मारदे हना हेल्शो भारी सेल्शा,
 मुर आन कली कुरपाइक्नीनी। गे चहिं ब्रेचो कामी यो नेष्शा वारच मपाइनीनी। 47 आबी, गे खतम बाक्नीनी। मारदे
 हना इन किकी पिपीपुकीमी परमप्रभु यावे आ लोव्र पाइब आन कली साइक्तेक्म। मिनु गे मेको आन तुरस सेल्तीनी।
 प्रेरित ७:५२ 48 मोपा इन किकी पिपी नु गारशो दुम्तीनी। मेको आन पशो ठीक बाक्माक्त, दे आन पशो खोदेशो पाइब
 दुम्तीनी। मारदे हना इन किकी पिपीपुकीमी परमप्रभु यावे आ लोव्र पाइब आन कली साइक्ना साइक्न बाक्तेक्मे।
 गेपुकीमी चहिं तुरस सेल्ना सेल्न बाक्तीनी। 49 साइ नेसी परमप्रभु यावे आ तुइक्तीक पाइश्शोमी ‘गो आं लोव्र शेंब मुर
 सोइक्नुडमी। मेको आं सोइश्शो मुर का निक्शी आन कली खेदा पा श्येत गेनीम, का निक्शी आन कली साइक्नीम’
 देशो बाक्त। 50 साइ डोंइती रे मुल सम्म परमप्रभु यावे आ लोव्र पाइब शुश आन कली साइश्शो क्येक्क एको पाला
 डा मुर आन रे ताक्सीब। 51 डोंइती साइश्शो हाबील बाक्त। नेल्ल क्येडा नोले साइश्शो जकरिया बाक्त। मेको
 कली परमप्रभु यावे कली चढेतीक नु आ खिं आस दातेम साइश्शो बाक्त। मेको नेल्ल आन कली मोपा साइक्तीके
 सिनाक्ती मुलाक्ती डा मुर दोस गेने पुंइसीशा सजाइ ताइनीम। 52 आबी, सास्त्रीपुकी, गे खतम बाक्नीनी। मारदे हना
 गे जोक्तीक तुइक्तीक सांचो ताक्तीनी, तन्न मेकेर मओव्रनी। मिनु ओव्रचा दाक्ब आन कली यो ओव्रचा मगेनी” दे
 हुइक्तीमी बाक्त।

53 मिनु येसु फरिसी आ खिं रे गाक्चवानु, सास्त्री नु फरिसीपुकी गाइश्शा, शुश लोव्र हिल्लो पा आ थुं थाम्मे बाक्त।
 54 मारदे हना आ लोव्र खाइक्पाइश्शा, दोस गेचा माल्मे बाक्त। लूका २०:२०

12

परमप्रभु कली थमा सुइक्चा माल्ब

मत्ती १०:२६-३३

1 मिनु हजार, हजार मुर खुम्सीशा, नेम्मुशा, चुमुशा, येसु आ लोव्र नेथ जाक्मा बाक्त। मिनु येसुमी आ शेंसीब आन
 कली “फरिसी आन बोरपाइक्तीक ओख्ती रे होस पा बाक्कीन। मेको आन जोल पा शेंतीक बाक्ब। मत्ती १६:६; मर्कूस
 ८:१५ 2 सुम्शा वोइश्शो नोले नेल्ल हाक्सीशा तांइसीब। ख्रुइश्शा वोइश्शो लोव्र नेल्ल नोले तुंइसीब। लूका ८:१७
 3 मोपतीके इन छिडछिडम बाक्शा पशो लोव्र नोले छेडछेडम नेंसीब। मुल इन खिंमी बाक्शा, नोफाम मुइक्मुशा पशो
 लोव्र नोले ठेयब सेंदा पा देंनीम। 4 आं वारचपुकी, इन रां कली साइक्ने चाप्बपुकी तशा महिनीन। मारदे हना साइक्ने
 थुम्शा, नोले मारेइ पने मचाप्नीम। 5 तन्न परमप्रभु यावे कली मान पा हिनीन। मारदे हना मुर आन कली साइश्शा,
 नाराक सोइक्तीक सक्ति मेको नु बाक्ब। मोपतीके मेको कली तशा मान पा हिनीन। हिब्रू १२:२९ 6 आस्सारीयोन
 निक्शीम ५ ओटा भंगेरा मग्याम्सीबा डा? मो हना यो परमप्रभु यावेमी मेको आन कली कोव्रशो बाक्ब। आस्सारीयोन
 का नेल्ल क्येडा आइक्च तांबा के क्येट बाक्त। 7 मेको आन कली ला ममाइ। इन पिया डा चां का का पा हिक्शा,
 गिश बाक्मा, दे तुइश्शो बाक्ब। मोपतीके महिनीन। गे भंगेरा क्येडा शुश हिक्सीशो बाक्नीनी। लूका २१:१८ 8 सुमी
 मुर आन कली ‘गो येसु आ मुर नड’ देंबा, रागीम जरमेशोमी यो मेको आ पर्वम परमप्रभु यावे आ स्वर्ग डा गेय पाइब
 आन डोंइती ‘मेको आं मुर बाक्ब’ देंब। 9 सुमी चहिं मुर आन कली ‘येसु सु बाक्मे? मतुइक्नुड’ देंबा, मेको आ पर्वम
 परमप्रभु यावे आ स्वर्ग डा गेय पाइब आन डोंइती ‘मेको कली मतुइक्नुड’ देंब। लूका ९:२६; १सामुएल २:३० 10 सु
 सुमी रागीम जरमेशो आ पर्वम शुक्शी पामे, मेको का का पा माफ ताइनीम। सु सुमी चहिं परमप्रभु यावे आ सोक्त आ
 पर्वम शुक्शी लोव्र पामे, मेको आन पाप गेनायो मक्याम्सीब। मत्ती १२:३२; मर्कूस ३:२८-२९

11 इन कली आन गुम्तीक खिं डा ठेयब मुर नु हुकुम पाइब आन डोंइती लाइश्शा राप्पदमेनु ‘मुल मार देंचा, मार
 लोव्र लेत्चा’ दे सुर्ता मपने। 12 मोपा राप्पदमेनु, परमप्रभु यावे आ सोक्तीमी इन कली मार देंचा दो देंचा तुइक्पाइश्शा
 देंपाइक्ब” दे शेंदीमी बाक्त।

शोप गे थुं महिरचा, दे शेंशो

13 मिनु काबु आ लोव्र नेथ शुश मुर खुम्समानु, मुर कामी “शेंब, आं लोक्ब कली आं तचा डा अडस योक्शा गेवो,
 दे मतीन” दे पुना बाक्त। 14 मिनु येसुमी “मार गो इस अडस योक्ब नडा डा? मनड” देंमाक्त। 15 मिनु नोले मुर आन

कली “नेनीन, होस पा बाक्कीन। शिम मदुमीन। मारदे हना शुश शोंप बाक्शा ला ब्रोंडशा बाक्चा मतांइसीब” देमाक्त। उपदेसक ५:९; १तिमोथी ६:९-१०

शोंप पाइशो मूर्ख

16 मिनु कथा सेल्शा “शोंप पाइशो मुर का आ बाली नाली शुश ग्रेल्माक्त। 17 मिनु मेकोमी शुश ग्रेल्शो तशा ‘मुल अन्न वोइक्तीके खिं मजाक्दीपब। 18 मोपतीके खिं प्रेशशा अन्न वोइक्तीक ठेयब खिं सेल्शा, बाक्शो अन्न नेल्ल मेकेर उप्नुड’। 19 मिनु मेकोमी ‘शुश बर्स कली जाक्दीपब। शुश शोंप गे नु बाक्ब। मोपतीके जशा तूशा ग्येरशा बाक्को’ दे आंम थुं कली देमाक्त। भजन संग्रह ४९:१-२० 20 मिनु परमप्रभु यावेमी मेको कली ‘गे मूर्ख नवे। मारदे हना मुलाक्दो बेक्नेवे। मिनु इ खुप्शा उप्शो शोंप सुम जाइबा?’ दे मदा बाक्त। 21 परमप्रभु यावे कली ममिम्थु, शोंप ला मिम्ब मुर नेल्ल मोदेशो दुम्नीम” दे शेंदीमी बाक्त। मत्ती ६:२०

सुर्ता मपचा, दे शेंशो

मत्ती ६:२५-३३

22 मिनु आ शेंसीब आन कली “मार जचा, मार फेक्चा, दे सुर्ता मपने। 23 मारदे हना जचा क्येडा ब्रोंडचा ठेयब बाक्ब। फेक्चा क्येडा इन रां ठेयब मिम्तीने। 24 खद आन कली कोवडीने। मेकोपुकीमी मशोक्नीम, मारेइ मरुप्नीम मखुप्नीम। आन अन्न वोइक्तीक खिं यो मबाक्ब। तन्न परमप्रभु यावेमी मेको आन कली कोवशा थुल्ब। मिनु गे मेको चिक्ब आन क्येडा हिक्सीशो मबाक्नीनी डा? 25 मार, गेपुकीमी सुर्ता पा इन ब्रोंडतीक नाक्त बारपाइक्ने चाप्नीनी डा? 26 मोदेशो लायो मचाप्तीनी हना, मारदे अरु थोवक आन कली सुर्ता पाइनीनी? 27 लिली फू कली कोवशा मिम्तीने। गिश रिम्शो तांइसीनीमी। श्येत पा गेय मपाइनीम। पांइतो मपाइनीम। पिप सोलोमन गिश ग्योम्साक्व हना यो, मेको लिली फू खोइ दारशो मदुम्माक्त। 28 परमप्रभु यावेमी मेको घांस रिम्शो पा ग्योम्ताक्व बाक्त हना यो, याम का बाक्चा गेब। नोले मेको घांस मीम हुम्चा पुंइसीब। घांस कली लायो मिश रिम्शो पा ग्योम्ताक्व हना, गे रिम्शो पा थमा सुइक्ने मचापब इन कली मग्योम्बा डा?

29 मार जचा मार तूचा, दे थुंमी सुर्ता मपने। 30 रागी रागी डा मुर नेल्लेमी मोदेशो मिम्नीम। इन आफ, परमप्रभु यावेमी इन माल्शो नेल्ल तुइक्ब। 31 मोपतीके मोदेशो मिम्चा प्रोंडशा, परमप्रभु यावे आ राज्य मालीने। मिनु मारेइ मारेइ यो ताइनीनी।

32 गे आइक्च बगाल, महिनीन। मारदे हना इन आफोमी इन कली आ राज्यम वोइक्चा दाक्ब। लूका २२:२९ 33 इन के बाक्शो लेयशा, मथीब आन कली योक्शा गेने। मो पनीनु, स्वर्गम इन शोंप लीब। मिनु मेको मोपा वोइशो शोंप खुइमी खुइ पने मचाप्नीम, खिया मजोइब मराक्ब, गेनायो मजाम्ब। लूका १८:२२ 34 तेकेर इन शोंप बाक्बा, मेकेरन इन थुं यो लीशो बाक्ब।

सासीशा बाक्कीन, दे शेंशो

मत्ती २४:४३-५१

35 बत्ती दाशा वा फेक्शा सासीशा बाक्कीन। प्रस्थान १२:११; १पत्रुस १:१३; मत्ती २५:१-१३ 36 होवप ग्युंवे भोज जथ लमेनु, आ गेय पाइबपुकीमी ‘इं होवप लेशशा जाक्ब। मोपतीके लेशशा मजाक्म सम्म मइप्थु बाक्क्य, दे रिम्नीम। मिनु होवप जाक्शा, लाप्चो खोकोल पदानु, गु रोक्शा ओवचा गेनीम। प्रकाश ३:२० 37 मोदेशो गेय पाइब आसीक ताइब बाक्नीम। होवप लेशशा जाक्मेनु, आ गेय पाइब आन कली मइप्थु रिम्शा बाक्शो थित्तु हना, आ होवप थाम्पा ग्येरसीशा, मेको आन कली निप्पाइशशा थुल्ब। 38 होवप नाक्दो नाक्ती गेना हना यो लेशशा जाक्मेनु, आ गेय पाइब मइप्थु बाक्तेक्म हना, मेको मुर रिम्शो दुम्शा आसीक ताइनीम’। 39 नेनीने, खिं डा मुरुमी ‘मुल खुइ जाक्नीम’ दे तुइशो नम हना, मेकोम खिं मप्रोंडथु मइप्थु बाक्शा, खुइ पचा मगेम वा। १थिस्सलोनिकी ५:२ 40 मोदेशो पा गे यो मइप्थु सासीशा बाक्कीन। मारदे हना रागीम जरमेशो इन मतुइक्थु जाक्ब” दे शेंदीमी बाक्त।

41 मिनु पत्रुसमी “प्रभु, एको लोव गो आंइ कली ला शेंदीनी देय मुर नेल्ल आन कली शेंदीनी?” दे हिल्लो पवानु, 42 प्रभुमी “होवपमी आ खिं कोवब कली जची जाक्मेनु जचा गेचा, दे अरेशा वोइक्चा पुंइसीब। मेको खोदेशो निप्स पाइशो थमा सुइक्चा पुंइसीशो गेय पाइब सु बाक्बा? 43 आ होवप लेशशा जाक्मेनु, आ गेय पाइबमी आ अरेशो गेय पना पन बाक्शो थित्तु हना, मेको गेय पाइब आसीक राइब दुम्ब। 44 नोफा दाइशशा नेनीने, मेको होवपमी आ बाक्शो मारेइ मारेइ मेको गेय पाइब कली जिम्मा गेब। 45 तन्न मेको गेय पाइबमी ‘आं होवप इक्का नोले जाक्ब’ दे मिम्शा,

मेकोमी गेय पाइब वोंइश मुर, मीश मुर आन कली तुप्शा श्येत गेशा, जशा तूशा, दुक्शा पाप्तु हना, 46 आ ममिम्शो मतुइश्शो नाक्त आ होव्रप लेशशा जाक्ब। मिनु मेकोमी मेको गेय पाइब कली सजाइ गेशा, मरिम्शो गेय पाइबपुकी नु काथा वोइक्ब। 47 मिनु होव्रप आ देशो रुप्शा यो मतुइश्शो खोदेशो पा मेको आ देशो मटीब गेय पाइब शुश तुप्चा पुंडसीब। याकूब ४:१७ 48 होव्रप आ देशो मतुइक्थु, मरिम्शो पाप्तु हना, इच्का ला तुप्चा पुंडसीब। सुमी शुश रुप्शा तुइश्शो बाक्मे, मेकोम शुश जिम्मा ब्राइबा। मिनु सुमी शुश जिम्मा ब्राइबा, मेको शुश जिम्मा चारी दुम्ब” दे शेंदीमी बाक्त।

फ्राचा कली जाक्ती
मत्ती १०:३४-३६

49 मिनु येसुमी शेंना शेंन “गो एको रागीम मी जेतथ जाक्शो नड। एको मी आं क्येडा डोंइती जेशशो हना, रिम्शो दुम वा। 50 गो श्येत का जचा मालनुड। मेको बेक्चा डा श्येत मजडा सम्म परमप्रभु यावेम गेशो गेय पाइनुड। लूका १८:३१; मत्ती २०:२२; मत्ती २६:३८ 51 गो रागीमी नेल्ल आन कली गारपाइक्थ जाक्शो बाक्नुड, दे मिम्नीनी? तन्न गो इन कली फ्राथ कका जाक्ती। 52 खिं कामी ५ जना मुर बाक्तेक्म हना, मेको ५ जना ब्रानीम। सांमी थमा सुइक्नीम, निक्शीमी थमा मसुइक्नीसी। निक्शीम थमा सुइक्नीसी, सांमी थमा मसुइक्नीम। 53 आफोमी थमा सुइक्ब, आ तौमी थमा मसुइक्ब। मिनु आफ कली आइक्च सेल्ब। तौमी थमा सुइक्ब, आ आफोम थमा मसुइक्ब। मिनु आ तौ कली आइक्च सेल्ब। ममामी थमा सुइक्ब, तमीमी थमा मसुइक्ब। तमीमी थमा सुइक्ब, ममामी थमा मसुइक्ब। शिमीमी थमा सुइक्ब, चाइमीमी थमा मसुइक्ब। चाइमीमी थमा सुइक्ब, शिमीमी थमा मसुइक्ब। मोपा थुं का पा बाक्ने मचाप्नीम” दे शेंदीमी बाक्त।

54 मिनु मेकेर खुम्सीशो शुश मुर आन कली “नां पेरतीकेम गोस्स गूमेनु, ‘इच्ची ना रेउ यीब’ देंनीनी। मिनु रेउ यीब। मत्ती १६:२-३ 55 दक्खिन रागी रे फश पवानु ‘मुलाक्ती हुप्ब’ देंनीनी। मिनु हुप्ब। 56 गे कपटीपुकी, सरीड, रागी कोव्रशा, मुल मार दुम्बा, दे तुइक्नीनी। मुल मार दुम्चशो बाक्मे, मेको चहिं मारदे मरुप्नीनी? 57 तेको गेय पशोमी रिम्शो दुम्बा, तेको गेय पशोमी मरिम्शो दुम्बा, मेको मिम्ने मचाप्नीनी? 58 इन कली दोस गेमेनु, दुशा बाक्कीन। मारदे हना इन कली दोस गेशा, निसाफ पाइब आ डोंइती लाइक्तेक्म हना, मेकोमी इन कली लल पिया आन गुइमी जिम्मा गेशा, जेल्खानम चोक्पाइक्नीम। मत्ती ५:२५-२६ 59 नोफा दाइश्शा नेनीने, मेकोम इन कली नोले डा लेप्तोन सम्म मथाप्पाइक्थु मप्रोंइनीम” दे माइक्मी बाक्त। लेप्तोन का नेल्ल क्येडा आइक्च रोमी आन तांबा के क्येट बाक्ब।

13

इन थुं परमप्रभु गे लेत्तीन, दे शेंशो

1 मोपा शेंदीमीनु, आ लोव्र नेब का निक्शीमी “साइ गालील रागी डा मुरपुकीमी मारेइ मारेइ क्योरशा जारदमेनु, पिलातसमी सिपाइ सोइश्शा, मेको जारब आन कली क्योरपाइश्शा, मेको आन जारशो हुश नु ब्वाइक्ताक्व” देंमा बाक्त। 2 मिनु येसुमी मेको आन कली “मोपा साइक्चा पुंडसीब आन कली रागी डा मुर क्येडा मरिम्शो बाक्मा बाक्त, दे मिम्नीनी? ममाइ, मेको इन खोदेशोन नम। यूहन्ना ९:२ 3 इन थुं परमप्रभु यावे गे मलेत्ताक्नी हना, गे यो मोदेशो पा बेक्नीनी। 4 सिलोआमी नेल्ल क्येडा लाइश्शो खिं ब्रेम्मेनु, १८ जना चिप्शा बेक्मा बाक्त। मोपा बेक्शोपुकी यरूसलेम सहरम बाक्ब नेल्ल आन क्येडा मरिम्शो बाक्मा बाक्त, दे मिम्नीनी? ममाइ, मेको इन खोदेशोन नम। 5 इन थुं परमप्रभु यावे गे मलेत्ताक्नी हना, गे यो मोदेशो पा बेक्नीनी” दे माइक्मी बाक्त।

6 मिनु कथा सेल्शा “मुर कामी पोव्रशी रवा का खुमा बाक्त। मिनु फल सित्ची ना, सिदा कों, दे कोव्रथ लमाक्त। मिनु कोव्रडानु दा, काइ मसिश्शो बाक्माक्त। मत्ती २१:१९ 7 मोपा मसिश्शो तशा, आ गेय पाइब कली ‘एको रवा फल मसिप्ब। गो बर्स बर्सम खेयप सां कोव्रथ जाक्डानु, काइ मसिश्शो बाक्त। एको रवामी रू ला नेक्तु। मोपतीके एको कली तिम्शा ताइक्तो’ दे मदा बाक्त। 8 आ गेय पाइबमी चहिं ‘आं होव्रप, मुल बाक्ल। बर्स का सम्म आ पुं मेर दोशा, मोल कुर पाइनुड। २पत्रुस ३:९, १५ 9 मिनु सित्त हना, बाक्ल। मसित्त हना, तिम्शा ताइक्चा’ देंमाक्त” दे शेंदीमी बाक्त। लूका ३:९

कूजी कली सापाइश्शो

10 काबु नाइक्तीक नाक्ती गुम्तीक खिंमी मुर आन कली शेंदीमी बाक्त। लूका ६:६-११ 11 मेकेर वोल्म तशा, १८ बर्स कूजी दुम्शो मीश का मुर बाक्माक्त। मेको गुर ब्वेशो बाक्माक्त। रिम्शो पा राप्ने मचाप्बाक्माक्त। 12 मिनु येसुमी

मेको मीश मुर कली तशा “एक पिबो” दे ब्रेत्ता बाक्त। मिनु पिमेनु “आं तमी, कूजी दुमशो रे प्रोंइतन” देशा आ गुड मेको तारी वोदा बाक्त। 13 मोपा वोदानु, साशा राम्माक्त। मिनु ग्येरशा परमप्रभु यावे कली ठेयब सेला बाक्त।

14 मिनु गुम्तीक खिं डा ठेयब मुरुमी नाइक्तीक नाक्ती सापाइश्शो तशा, आ थुं मनुमाक्त। मिनु आ थुं मनुथु, मेकेर बाक्ब आन कली “साता कामी ६ नाक्त गेय पचा माल्ब। काबु नाइक्चा माल्ब। मिनु नाइक्तीक नाक्ती गेय पचा मदुम्ब। मोपतीके इन रोइ सापाइक्चा कली नाइक्तीक नाक्ती गेनायो मजाक्कीन। अरु नाक्त जाक्कीन” दे हुइक्तीमी बाक्त। प्रस्थान २०:९-१० 15 मिनु प्रभुमी हुइक्ब मुर कली “ए कपटी, गे नाइक्तीक नाक्ती इन ब्यफ नु गधा आन कली प्रोंइशा, ब्वाक्कु मतूपाइक्नीनी डा? लूका १४:५ 16 एको मीश मुर अब्राहाम आ तमी बाक्ब। सैतानमी एको कली १८ बर्स सम्म रोइम गुरपाइश्शा वोइश्शो बाक्त। मिनु एको कली नाइक्तीक नाक्ती मप्रोंइचा? मसापाइक्चा?” दे हुइक्ता बाक्त। लूका १९:९ 17 मोदेशो लोव्र पवानु, आ कली मरिम्शो देंब मुर मुने दोक्माक्त। मेकेर बाक्ब मुर नेल्ल येसु आ पशो रिम्शो गेय तशा, थाम्पा ग्येरसमा बाक्त।

परमप्रभु आ राज्य आ पर्बम शेंशो

मत्ती १३:३१-३३; मर्कूस ४:३०-३२

18 मिनु मेकोमी “परमप्रभु यावे आ राज्य दोदेशो बाक्ब देशा हना, 19 मुर कामी आ रूमी तोरी शोकगा बाक्त। मिनु वाशा ठेयब रवा दुम्माक्त। मेको रवाम चिक्बपुकीमी ग्योव्र सेलमे बाक्त।

20 मिनु परमप्रभु यावे आ राज्य दोदेशो बाक्ब देशा हना, 21 मीश मुर कामी सेआह सां फसीम बोरपाइक्ब ओख्ती सुप्ताक्व। मिनु मेको फस नेल्ल बोरत” दे शेंदीमी बाक्त। सेआह का १३ लिटर गारचा डा पुक्तीके बाक्ब। अरु ब्रेक्तीकेमी चहिं ७ लिटर पुक्तीके बाक्ब, दे ब्रेक्शो बाक्त। सेआह सां ३९ लिटर कि २१ लिटर पुक्तीके बाक्ब।

आइक्च लाप्चो आ पर्बम शेंशो

22 येसु गाउं सहर ते ते जाक्दीम्मे, मेक मेक शेंना शेंन यरूसलेम गे लमाक्त। 23 मिनु मुर कामी “शेंब हजुर, परमप्रभु यावे आ राज्य ओव्रचा ताइबपुकी का निक्शी ला बाक्नीमी?” दे हिल्लो पवा बाक्त 24 मिनु येसुमी “आइक्च लाप्चो रे ओव्रचा मालो। मेकेर रे शुश मुर ओव्रचा दाक्नीम, तन्न ओव्रने मचाप्नीम। मत्ती ७:१३-१४ 25 मारदे हना खिं डा मुरुमी लाप्चो चोक्ब। मिनु जाक्शोपुकी लाडगाम राप्शा ‘ओव्रचा गेकी, प्रभु’ दे ब्रेत्नीनी। तन्न खिं डा मुरुमी ‘इन कली मतुइक्नन्नी, ते रे जाक्शो ननी?’ देंब। मत्ती २५:११-१२ 26 मिनु गेपुकीमी ‘हजुर, गे नु काथा खमे जाइब नकी। आंइ गाउं सहर सहरमी शेंदीनीनु, गो इन लोव्र नेंतक’ देंनीनी। मत्ती ७:२२-२३ 27 तन्न मेकोमी इन कली ओव्रचा मगेथु ‘ते रे जाक्नी मतुइक्नुड। मरिम्शो पाइबपुकी आं रे पा डोन लने’ दे खेरब। 28 मोदेशो पा खेरचा पुंइसीशा, डाक्शा इन खुइ शेप्नीनी। मारदे हना इं किकी पिपी अब्राहाम, इसहाक, याकूब नु परमप्रभु यावे आ लोव्र पाइब नेल्ल आन कली परमप्रभु यावे आ राज्यम ओव्रशा, बाक्शो ताइनीनी। गे चहिं खेरचा पुंइसीनीनी। मत्ती ८:११-१२ 29 मुरपुकी पूर्व पच्छिम उत्तर दक्खिन रे जाक्शा, परमप्रभु यावे आ राज्यम ओव्रशा भोज जशा बाक्शो ताइनीनी। लूका १४:१५ 30 नेल्ल आन क्येडा नोले दुमशोपुकी डोंइती दुम्नीम। मिनु नेल्ल आन क्येडा डोंइती दुमशोपुकी नोले दुम्नीम” दे शेंदीमी बाक्त।

हेरोदम येसु कली साइक्चा माल्शो

31 येसुमी शेंना शेंन बाक्मेनु, फरिसीपुकी जाक्शा, येसु कली “पिप हेरोदम इन कली ग्याइश्शा साइक्चा माल्शो बाक्ब। मोपतीके एक रे रीब पा लने” देंथ जाक्मा बाक्त। 32 मिनु येसुमी “लशा, मेको फ्याउरे कली ‘मुलाक्ती नु दीसा वोल आन कली खेरनुडमी। रोइ पशो मुर आन कली सापाइक्नुडमी। मिनु नित्थ नाक्ती आं गेय थुम्नुड। 33 मुलाक्ती, दीसा नु नित्थ नाक्ती यरूसलेम मेर गाक्नुड। मारदे हना परमप्रभु यावे आ लोव्र पाइबपुकी साइ रेन यरूसलेम सहरम ला खतम दुम्नीम’ देनीन” दे सोइक्तीमी बाक्त।

यरूसलेम मिम्शा, येसु आ थुं खाइश्शो

मत्ती २३:३७-३९

34 मिनु यरूसलेम कली “ए यरूसलेम, यरूसलेम, परमप्रभु यावे आ लोव्र पाइब आन कली साइक्तीवी। इ कली शेंथ सोइश्शो आन कली फुल्लु क्रोम्ताक्वी। पोव्रथीमी आ चितोली आन कली पुप्शो खोदेशो पा, गो शुश खेयप इ आल आन कली पुप्चा माल्ती, गे चहिं मबिस्से। मत्ती २३:३७-३९; लूका १९:४१-४४ 35 मुल इ खिं ब्रेश्शा मारेइ

मलीब। ‘प्रभु आ नेमी जाकब ठेयब बाकब’ मदेने सम्म गे आं कली मताइनेवे” देमाक्त। येरमीया २२:५, भजन संग्रह ६९:२७; भजन संग्रह ११८:२६

14

नाइक्तीक नाक्ती सापाइशशो

1 मिनू काबु नाइक्तीक नाक्ती मार दुम्माक्त देशा हना, येसु फरिसी आ खिंमी खमे जथ लमाक्त। मिनू फरिसीपुकीम “मार पाइबा, मार शेंबा” दे योवकी पा बाक्मा बाक्त। लूका ६:६-११; लूका ११:३७ 2 मिनू मेकेर शुश ब्वाक्कुम ब्रीशा होम्शो रोइ पशो मुर का बाक्माक्त। 3 मिनू मेको रोइ पशो मुर येसु आ डोंइती बाक्मेनु, येसुमी सास्त्री नु फरिसी आन कली “नाइक्तीक नाक्ती सापाइक्चा दुम्बा, दे मदुम्बा?” दे हिल्लो पामी बाक्त। 4 मेकोपुकीमी आ लोव्र मलेत्थु ब्वालेइ पा बाक्मा बाक्त। मिनू येसुमी रोइ पाइब कली थिशा, सापाइशशा, आ खिं सोइक्ता बाक्त। 5 मिनू मेको योवकी पाइब आन कली “नाइक्तीक नाक्ती इन ब्यफ, इन गधा का इनारम बिक्त हना, मगुंइनीनी डा?” दे हुइक्तीमी बाक्त। लूका १३:१५; मत्ती १२:११ 6 मिनू मारेइ लोव्र लेन्ने मचाप्मे बाक्त।

लोव्र खाइक्पाइशशो

7 मिनू मेकेर खमे जथ जाक्शो शुशेमी ठेयब लेशशा, ठेयब मुर आन नित्तीकेमी नित्चा माल्लशो तशा मत्ती २३:६ 8 “जन्ती लनीनु, सम्दी नित्तीकेमी मनिस्सीन। हितोपदेस २५:६-७ 9 मारदे हना सम्दी जाक्मेनु, खिं डा मुरुमी इन कली पोक्शा याक्पाइक्ब। मिनू सम्दी नित्तीकेमी सम्दी कली निप्पाइक्ब। इन कली चहिं वाइलपुकी नु निप्पाइक्ब। मिनू मुने दोक्नीनी। 10 जन्ती लनीनु, वाइल आन नित्तीकेम निस्सीने। मिनू खिं डा मुरुमी इन कली वाइल नु निशशो तशा ‘ए जन्तीपुकी, एक पिने’ दे ब्रेशशा, इन कली मान पा ठेयब मुर नु निप्पाइक्ब। मिनू मेकेर बाक्बपुकीमी यो इन कली मान पाइनीम। 11 मारदे हना ठेयब सुंडसीब कली मुरपुकीमी महिक्थु मान मपाइनीमी। ठेयब मसुंडसीब कली चहिं मुरपुकीमी ठेयब सेल्शा, मान पाइनीम” दे शेंदीमी बाक्त। लूका १८:१४; मत्ती २३:१२; याकूब ४:६,१०

12 मिनू खमे जथ ब्रेप्ब कली “गे जचा तूचा सेल्शा मान पा गेवीनु, आंम मुर वारचपुकी नु शोप पाइशशो मुर आन कली मब्रेत्तीमी। मारदे हना इ कली यो लेंशा ब्रेशशा मान पा जचा गेशा, इ देदेड लेत्नीम। 13 भोज पवीनु, पुडग आन कली कूजी कुंजे, नु मिक्च मताइब आन कली ब्रेत्तीमी। ब्यवस्था १४:२९ 14 मिनू मेकोपुकीमी इ देदेड लेन्ने मचाप्नीम। तन्न परमप्रभु यावेमी निसाफ पची ना इ पशो नेल्ले ताइनेवे” देमाक्त। १कोरिन्थी १५:२३; प्रेरित २४:१५

ठेयब भोज

मत्ती २२:१-१०

15 मिनू मेकेर बाक्ब कामी येसु आ लोव्र नेंशा “सु परमप्रभु यावे आ राज्यम ओव्रशा, जचा खेत्चा पुंडसीबा, मेको ग्येरसेक्ल” देमाक्त। लूका १३:२९ 16 मो देब कली येसुमी “मुर कामी ठेयब भोज का गेचा कली, शुश मुर आन कली ब्रेत्ता बाक्त। 17 मिनू जचा तूचा सेल्शा, आ गेय पाइब का कली ‘जचा तूचा ठीक पाता। मुल जथ पिने’ दे ब्रेत्थ सोइक्ता बाक्त। 18 मिनू गेय पाइब लशा, खिं कामी जाक्दीशशा ‘लो जथ पिने’ देमेनु ‘गो रू ग्याप्ता। मुलाक्ती कोव्रथ लड देंती। मिनू पिचा मताइनुड, देंत, देनो’ देमाक्त। 19 मिनू अर्को आ खिंमी जाक्दीम्मेनु ‘गो ५ हाल ब्यफ ग्याप्ता। मिनू मुलाक्त ब्वाक्शा, कोव्रथ लाइनुड। मोपतीके गो पिचा मताइनुड, देंत, देनो’ देमाक्त। 20 मिनू अर्को खिं लमेनु, मेकोमी ‘गो ग्युंबे पाता। मिनू गो पिचा मताइनुड’ देमाक्त। का का पा ‘पिचा मताइनुड’ दे मेको गेय पाइब कली लोव्र लेत्मे बाक्त। १कोरिन्थी ७:३३ 21 मिनू गेय पाइबमी मेको लोव्र नेल्ल आ होव्रप कली शेंदा बाक्त। मिनू मेको गाइशशा ‘मो हना गे सहर मेर हिरशा लावो। मिनू पुडग, कूजी कुंजे, मिक्च मताइब नु गुइ खोइल मदुक्ब आन कली खुप्शा चाक्मी’ दे सोइक्ता बाक्त। 22 मिनू ब्रेत्थ लशा चाक्शा, आ होव्रप कली ‘इन देंशो नेल्ल पाता, चिनु नित्तीकेम मुर मब्रीम’ देमाक्त। 23 मिनू होव्रपमी ‘नित्तीके मब्रीम सम्म मुर आन कली “जाक्कीन है, जाक्कीन” दे ब्रेशशा चाक्मी। मिनू आं खिं ब्रील। 24 डोंइती आं ब्रेशशो सुइमी मारेइ यो जचा थोव्रक थाम्चा मतामेक्ल’ ” देमाक्त।

येसु आ नोले दोपा खोइक्चा

25 येसु गाक्मेनु, शुश मुरुमी आ नोले खोदमे बाक्त। मिनू येसुमी मेको आन कली कोव्रशा 26 “सु सु गो नु बाक्चा दाक्नीमी, मेकोपुकीमी आम आफ, आंम मीश, आंम वोइश, तमी तौ, लोक्बपुकी नु आंम कली यो ममिम्थु, आं नोले खोइय्यीमील। मारदे हना मेको मिम्बपुकीमी आं नोले खोइक्ने मचाप्नीम। लूका १८:२९-३०; ब्यवस्था ३३:९;

१ कोरिन्थी ७:२९ 27 सु सुमी आन श्येत कुरशा, आं कली मखोइक्नीमी, मेको आं शेंसीब दुम्ने मचाप्नीम। लूका ९:२३ 28 मार, गेपुकीमी लाइशो खिं सेल्चा क्येडा डोंइती, सेल्ने थुम्चा कली क्येट जाकदीप्बा देय मजाकदीप्बा, दे हिसाब मपाइनीनी डा? 29 हिसाब मपथु सेल्चा गोशा, खिं सेल्ने मथुम्थु क्येट नुप्त हना 30 ‘आ क्येट मजाकदीत्थु, मार सेल्चा गोवा?’ दे शुक्शी पाइक्चा पुंइसीशा मुने दोक्सीब। 31 पिप काम आ बाक्शो १० हजार लडाइ पाइब लाइशो, २० हजार लडाइ पाइब बाक्शो पिप नु लडाइ पचा थुं पाप्तु हना, मेकोमी ग्राने चाप्नुडा देय मचाप्नुडा, दे ममिम्बा डा? 32 ग्राने मचाप्नुड, दे मिम्ताक्व हना, डोन बाक्मानु ‘दुशा बाक्व’ दे लोव्सी पचा कली आ मुर सोइक्व। 33 मोदेशो पा गे यो आं नोले खोइक्चा क्येडा डोंइती ‘खोइक्ने चाप्नुडा देय मचाप्नुडा’ दे मिम्तीने। गे नु बाक्शो मारेइ ममिम्थु, आं नोले खोइय्यीनी। ममिम्थु मचाप्नीनी हना, आं शेंसीब दुम्ने मचाप्नीनी। लूका ९:६२

34 हिक्सीम ब्रोव्पाइक्व। तन्न आ डाम्चा जाम्त हना, मारम मेको कली डाम्पाइक्चा। मत्ती ५:१३; मर्कूस ९:५० 35 मेको ना रू कली दुम्बा, ना मुर कली दुम्बा। मोपतीके मुरुम मेको कली ताइक्नीम। सु के नोफा बाक्मे, मेकोमी नेनल” दे शेंदीमी बाक्त।

15

“जाम्शो थिश्शा ग्येरसमल” दे शेंशो

1 मिनु शुश तिरो पोक्व नु पापीपुकी येसु आ लोव् नेथ जाक्मा बाक्त। 2 मिनु फरिसी नु सास्त्रीपुकीमी तिरो पोक्व नु पापी शुश येसु नु काथा बाक्शा जशो तशा “मेको मुरुमी पापी आन कली ब्राइब। पापीपुकी नु काथा बाक्शा, खमे जाइब” दे आन थुं मनुथु, लोव् पामे बाक्त। लूका ५:३०; लूका १९:७ 3 मिनु येसुमी मेको आन थुं मनुथो तुइक्ता बाक्त।

जाम्शो भेडा आ कथा

4 मिनु “मुर कामी सहे का भेडा थुल्शा, मेको आन कली योव्डानु, भेडा का जाम्त हना, मार, मेकोमी लीशो ९९ भेडा आन कली प्रोंइशा, जाम्शो कली माल्थ मलाइबा डा? मथिदा सम्म माल्ना माल्न गाक्व। मत्ती १८:१२-१४; लूका १९:१०; इजीकीएल ३४:१२; यूहन्ना १०:११-१२ 5 मिनु मेको जाम्शो भेडा का कली थिश्शा, ग्येरसीशा, बलाम लाप्शा, आ खिं चाक्व। 6 मिनु आ वारच आन कली ‘आं जाम्शो भेडा थिश्शा चाक्ता। मोपतीके नेल्ल ग्येरसय’ देंब। 7 मारदे हना ९९ परमप्रभु यावे गे लेत्चा ममाल्शो रिम्शो पाइब आन क्येडा पापी कामी पाप पचा प्रोंइशो तशा, स्वर्गम बाक्वपुकी ग्येरसीनीम” दे शेंताक्मी।

जाम्शो क्येट आ कथा

8 मिनु “मार, मीश मुर कामी १० ओटा द्राक्मे वोइश्शोमी का जाम्त हना, बत्ती दाशा, खिं गा, कुना लाडगा नेल्ल हिरशा, मथिदा सम्म ममाल्बा डा? द्राक्मे ग्रीक लोव् बाक्व। मेको देनार का खोदेशो नाक्त का डा गाल्च बाक्त। देनार चहिं रोमी लोव् बाक्व। 9 मिनु थिश्शा आ वारच आन कली नु आ नेक्था डा मुर आन कली ब्रेशशा ‘आं के जाम्शो द्राक्मे का माल्शा थित्ता। मुल ग्येरसाक्वी’ देंब। 10 मोपा पापी मुर कामी पाप पचा प्रोंइशा, आ थुं परमप्रभु यावे गे लेत्ताक्व हना, परमप्रभु यावे आ स्वर्ग डा गेय पाइबपुकी ग्येरसीनीम” दे माइक्मी बाक्त।

जाम्शो तौ आ कथा

11 मिनु लोव् बोइश्शा “मुर का के तौ निक्शी बाक्सा बाक्त। 12 मिनु काबु कान्छा तौमी ‘आं आफ अडस योक्शा गेयी’ देंमाक्त। मिनु आफोमी जेठा नु कान्छा आस कली अडस योक्शा, गेम्सी बाक्त। 13 मिनु कान्छामी इक्का नाक्त नोले आ अडस नेल्ल खुप्शा, क्येट नेल्ल कुरशा गाक्माक्त। मिनु जशा, तूशा, तेल्लेम पा, जवा ग्यारशा, क्येट नेल्ल थुमा बाक्त। हितोपदेस २९:३ 14 मिनु मेको रागीमी अन्काल दुम्माक्त। मिनु कान्छामी श्येत जवा बाक्त। 15 मिनु मेको रागी डा मुर का आ खिंमी गेय पवा बाक्त। मिनु मेको मुरुमी कान्छा कली पोव् योव्ब सेला बाक्त। 16 मिनु जचा मतथु, शोव्लु बेक्शा, पोव् कली जचा गेशो थोव्की यो जड खोदेशो दुम्माक्त। तन्न सुइमी मारेइ जचा मगेमे बाक्त। हितोपदेस २३:२१ 17 मिनु शुश श्येत जशा ‘आं आफ आ खिंमी गेय पाइबपुकीमी रूथ्री जाइनीम। हेंथ्री दुम्ब। गो चहिं शोव्लुम बेक्चता। 18 मुल गो आं आफ आ खिं लेत्नुड। मिनु आं आफ कली “गो परमप्रभु यावे आ देंशो मटिड। इन देंशो यो मटिड। भजन संग्रह ५१:६; येरमीया ३:१२-१३ 19 मुल इन तौ देंचा मशिरनुड। मोपतीके इन गेय पाइब का सेल्यीनी” दे माइक्नुड’ दे मिम्ता बाक्त। 20 मिनु आ आफ आ खिं लेम्माक्त। मिनु आ आफ आ खिं जाकदीत्चावानु, आ आफोमी कान्छा कली पिशो तशा, शिशी पा दोरशा लशा मुप्शा पुक्पु पदा बाक्त। 21 मिनु मेकोमी ‘आं आफ,

गो परमप्रभु यावे आ देशो मटिड। इन देशो यो मटिड। मोपा मटितीके पापम ग्रुम्ती। इन तौ देंचा मशिरनुड' देंमाक्त। 22 मिनु आफोमी गेय पाइब आन कली 'नेल्ल क्येडा दारशो फेक्तीक वा गुंडशा, आं तौ कली फेक्तीने। आ गुडमी औंठी लिक्तीन। जुत्ता मुडक्पतीने। 23 मिनु दोम्शो बाछा क्योरशा, क्येशा जचा तूचा सेल्शा, नेल्ल ग्येरसय। 24 मारदे हना आं बेक्शो तौ सेस दुम्त। आं जाम्शो तौ थित्ता' देंमाक्त। मिनु जशा तूशा नेल्ले ग्येरसमा बाक्त। एफिसी २:५

25 मेकोपुकी ग्येरसीशा बाक्मानु, जेठा तौ रूमी गेय पथ लशो बाक्माक्त। मिनु लेशशा खिं आ नेक्था जाक्मेनु, शुश मुर खुम्सीशा सिल पा, जशा तूशा ग्येरसीशा बाक्शो तवा बाक्त। 26 मिनु गेय पाइब का कली 'इं खिंमी मार दुम्मे?' दे हिल्लो पवानु, 27 मेकोमी 'इन लोकब जाक्त। मिनु इन आफोमी जाक्शो तशा, ग्येरसीशा, दोम्शो बाछा क्योरपाइक्तु' देंमाक्त। 28 मिनु मेको नेल्ल नेंशा 'खिं मओव्रनुड' दे चुरशा बाक्माक्त। मत्ती २०:१५ 29 मिनु आफोमी लेम्शा 'ओव्रडो, गे यो ग्येरसो' देंमेनु 'मार ग्येरसीनुडा, गो शुश बर्स एको खिं डा गेय पना पन बाक्ती। इन लोव्र नेल्ल टिशा बाक्ती। गेना हना यो रिम्शो ला पाता। तन्न आं वारचपुकी नु बाक्शा ग्येरसीचा कली बोका का यो मगेनी। 30 इन तौ कान्छामी इं खिं डा बाक्शो नेल्ल लाइशशा, तेल्लेम पा थुम्तु। मोदेशो मुर लेशशा जाक्मेनु, दोम्शो बाछा क्योरतीनी। मिनु मचुरनुडा डा?' देंमाक्त। 31 मिनु आफोमी 'आं तौ, गे गो नु काथा बाक्ते। आं मार मार बाक्मा, मेको नेल्ल इ के नमी। 32 इ लोकब चहिं बेक्शा रे ब्रोंइत। जाम्शो रे थिस्साक्व। मोपतीके गो नेल्ल ग्येरसय' देंमाक्त" दे येसुमी शेंदीमी बाक्त।

16

थुं का पा परमप्रभु कली ठेयब सेल्लीन

1 काबु येसुमी आ शेंसीब आन कली "क्येट थीब मुर कामी आ मार मार बाक्मा, मेको नेल्ल हिसाब पाइब का कली जिम्मा गेशा वोइशशो बाक्माक्त। मिनु काबु मुरपुकीमी 'हजुर, इन हिसाब पाइबमी क्येट मारेइ मारेइ हेंथे पा थुम्तु' दे शेंदमे बाक्त। 2 मिनु क्येट थीबमी आ हिसाब पाइब कली ब्रेशशा 'गेमी आं क्येट थुम्शा गेयी बाक्त। डोंइती रे डा दोशो चेमी दोशो थुमी, लो, नेल्ल कोंइदी। मुल डा मेरे इ कली मवोइक्नन' दे मदा बाक्त। 3 मिनु मेकोमी 'आं गेय रोइशशा सोइक्ताक्यी। मुल गेय मताइनुड। कोदाली दोने यो मचाप्नुड। पुंइशा जचा कली यो मुने पाइनुड। 4 मुल मार पचा माल्नुडा। गो मेको तुइक्नुड। मुर आन खिं लडानु आं कली दोपा लोव्र पाइनीमी, मेको यो तुइक्नुड' दे मिम्ता बाक्त। 5 मिनु मेकोमी आ होव्रप आ जेर लाइब आन कली का का पा ब्रेशशा, डोंइती जाक्ब कली 'गे दोशो, मार लदी?' दे हिल्लो पवा बाक्त। 6 मिनु मेकोमी 'सहे का बाथ जचा तेल लाइशशो नड' देंमेनु 'लो, नक कागज का सेल्स। मिनु जोल पा ५० बाथ ला ब्रेक्ताक्स' देंमाक्त। बाथ का २२ लिटर खोदेशो बाक्ब। 7 मिनु अर्को कली 'गे दोशो मार लदी' दे हिल्लो पवानु, 'सहे का कोर चेरब लाइशशो नड' देंमेनु 'लो, नक कागज सेल्शा, जोल पा ८० कोर ब्रेक्ताक्स' दे नक कागज का सेल्से बाक्त। कोर का २२० लिटर बाक्ब। 8 मिनु जेर लाइक्ब नेल्ल आन के नक कागज सेल्शा, होव्रप कली कोंइदा बाक्त। मिनु मेकोमी कोव्रशा 'गे मेको आन कली वारच सेल्शा, निप्स पाइशशो गेय पा कोंइताक्यी' देंमाक्त। रागीमी थमा सुइक्ब क्येडा थमा मसुइक्बपुकीमी निप्स पाइशशो गेय पाइनीम। एफिसी ५:८-९ 9 मोपतीके गे यो निप्स पाइशशो गेय पा वारचपुकी सेलीने। इन शोंप क्येट मारेइ मारेइ यो मथीब आन कली शिशी पा गेतीनी हना, परमप्रभु यावेमी इन पशो खोदेशो पा गेब" देंमाक्त। लूका १४:१४; मत्ती ६:२०; मत्ती १९:२१

थुं निक्शी पाइशशो मदुमीन

10 मिनु लेंशा "सुमी थम आइक्च गेय कली रिम्शो पा पाइबा, मेकोमी ठेयब गेय यो रिम्शो पा पाइब। सुम आइक्च गेय, दे मरिम्शो पा पाइबा, मेकोमी ठेयब गेय यो मरिम्शो पा पाइब। लूका १९:१७ 11 मोपतीके गे रागी डा क्येट आ पर्बम जोल पाइब दुम्तीनी हना, स्वर्ग डा शोंप दोपा ताइब दुम्ने चाप्नीनी? 12 गे अर्को मुर आन थोव्रक आ पर्बम जोल पाइतीनी हना, आंमा इन शोंप इन कली सुम गेबा डा? 13 गेय पाइब कामी होव्रप निक्शी आस गेय पने मचाप्ब। मारदे हना का आ देशो टिप्तु हना, अर्को कली मटीब दुम्ब। का कली दाक्ताक्व हना, अर्को कली चहिं काइ मदाक्ब। मोपतीके गे यो परमप्रभु यावे नु शोंप निक्शी आस नोले खोइक्ने मचाप्नीनी" दे येसुमी शेंदीमी बाक्त। मत्ती ६:२४

फरिसी आन कली हुइशशो

14 फरिसीपुकीमी क्येट नु शोंप दाक्बाक्मा बाक्त। मिनु येसु आ लोव्र नेंशा गाइशशा, शुक्शी पामे बाक्त। 15 मिनु येसुमी "मुर आन कली 'गो ठीक नकी' देंखु पा कोंइनीनी। मिनु मुरपुकीमी इन कली ठेयब सेल्लीन। परमप्रभु यावेमी

चहिं इन मिम्शो नेल्ल तुइक्ब। मुर आन दातेमी हिक्सीशो नेल्ले परमप्रभु यावे आ डोंइती थम आइक्च दुम्नीम। लूका १८:९-१४

साइ ब्रेक्शो लोव्र आ पर्वम शेंशो

16 साइ डोंइती रे परमप्रभु यावे आ अरेशो लोव्र नु आ लोव्र पाइब आन ब्रेक्शो यूहन्ना आ पाला सम्म शेंताक्म। यूहन्ना जाक्म रे परमप्रभु यावे आ राज्य डा लोव्र नेंपाइक्नीम। मिनु शुश मुरुमी मेको लोव्र नेंशा, थमा सुइश्शा, परमप्रभु यावे आ राज्यम ओव्रचा बोल पाइनीम। मत्ती ११:१२-१३ 17 परमप्रभु यावेमी ब्रेक्पाइश्शो लोव्र का यो मग्याम्ब। मेको ग्याम्चा क्येडा सरीड नु रागी ग्याम्ब। मत्ती ५:१८; मत्ती १९:९

18 सुमी आ मीश कली प्रोंइशा, अर्को मीश चाक्बा, मेकोमी मीश वोंइश आस नाता खोइश्शा, हेंथे पाइब। सुमी आ वोंइश नु ब्राशा गाक्शो मीश चाक्बा, मेकोमी यो वोंइश मीश आस नाता खोइश्शा, हेंथे पाइब।

शोंप पाइश्शो मुर नु लाजरस

19 शुश शोंप पाइश्शो मुर का बाक्माक्त। मेको रिम्शो रिम्शो फेक्शा, ब्रोव्रब्रोव्रशो जशा बाक्बाक्माक्त। 20 आ खिं डा लाडगाम चहिं जचा मतथु, श्येत जशो लाजरस माइश्शो मुर का गोल्शा बाक्बाक्माक्त। मेको रोइ पा आ रां नेल्ल गार गूशा राक्शो बाक्माक्त। 21 मेको शोंप पाइश्शो मुरुम आ जशो रे खपीम दोक्शो जचा ताइनुडा कों, दे आस पा कोव्रशा बाक्बाक्माक्त। आ गार कुचुमपुकीमी तुक्बाक्मा बाक्त। 22 मिनु लाजरस शुश श्येत जशा बेक्माक्त। मिनु परमप्रभु यावे आ स्वर्ग डा गेय पाइबमी अब्राहाम आ थुकुमी वोदमे बाक्त। मेको नोले शोंप पाइश्शो मुर यो बेक्शा थिम्चा पुंइसे बाक्त। 23 मेको शोंप पाइश्शो मुर बेक्शो मुर आन बाक्तीक जाक्दीम्माक्त। मिनु शुश श्येत जशा, डोन रे कोव्रडानु, लाजरस कली अब्राहाम आ थुकुम बाक्शो तवा बाक्त। 24 मिनु ठेयब सेंदा पा ‘ए, आं आफ अब्राहाम, शिशी पाइय्यीनी। मारदे हना गो मीम दुप्शा, आं शोव्र सोव्रशा बेक्चता। लाजरस कली आ ब्रेप्चो ब्वाक्कु खुम्शा, ब्वाक्कु तोक्पाइक्थ सोइक्तीने’ दे ब्रेम्माक्त। 25 तन्न अब्राहाममी ‘डोंइती थम रिम्शो पा बाक्ते। लाजरस चहिं शुश श्येत जशा बाक्त। मुल चहिं लाजरस आ थुं नाइक्चा ताप्तु, गे चहिं श्येत जशा बाक्नेवे। लूका ६:२४ 26 मोशो ला ममाइ। परमप्रभु यावे आ राज्य डा मुर नरक मलाइनीम। मिनु नरक डा मुर यो परमप्रभु यावे आ राज्यम ओव्रचा मताइनीम’ देंमाक्त। 27 मिनु मेकोमी ‘आं आफ, सेउ पाइनन्नी, खिंमी आं के ५ जना लोकब बाक्नीम। 28 मेको आन कली “इन लोकब बेक्शा, नरक लशा श्येत जशा बाक्त। आ पशो खोदेंशो मपने। मो पाइतीनी हना, आ खोदेंशो दुम्नी” दे माइक्थ, लाजरस कली सोइक्तीने’ दे सेउ पवा बाक्त। 29 मिनु अब्राहाममी ‘परमप्रभु यावेमी मोसा कली ब्रेक्पाइश्शो लोव्र नु परमप्रभु यावे आ लोव्र पाइब आन ब्रेक्पाइश्शो लोव्र मेकोपुकी नु बाक्नीम। मेको पढेशा नेन्मेक्ल’ देंमेनु, २तिमोथी ३:१६ 30 ‘ममाइ, आ आफ, बेक्शो रे सेंसीशो मुर सोइक्ताक्नी हना ला, मेको आ लोव्र नेंशा टिशा, पाप पचा प्रोंइशा, आन थुं परमप्रभु यावे गे लेत्नीम’ दे सेउ पवा बाक्त। 31 मिनु अब्राहाममी ‘ममाइ, परमप्रभु यावे आ ब्रेक्पाइश्शो लोव्र मटिम्तेक्म हना, बेक्शो रे सेंसीशो मुर तशा यो थमा मसुइक्नीम’ देंमाक्त” दे येसुमी शेंदीमी बाक्त।

17

पाप पपाइक्ब बोक्नीम, दे शेंशो

मत्ती १८:६-७; मत्ती १५:२१-२२; मर्कूस ९:४२

1 काबु येसुमी आ शेंसीब आन कली “मुरपुकीमी पाप पपाइश्शा दाइल पाइक्चा गोइनीम। तन्न सुइमी अरु आन कली दाइल मपपदल, मारदे हना दाइल पपाइक्ब कली शुश मरिम्शो दुम्ब। मत्ती १८:६-७ 2 मेको आ शुरमी यात क्युक्शा, समुन्द्रमी खुम्शा साइक्चा अरु सजाइ क्येडा रिम्शो दुम्ब। 3 इन कली का का पा शेंनन्नी। मिनु नेनीने। इ लोकबमी पाप पाप्तु हना, मेको कली ‘मो मपचा’ दे अर्ती गेवो। इ अर्ती नेंशा माफ पुंइतु हना, माफ गेवो। मत्ती १८:१५ 4 काबुम ७ खेयप पाप पशा, ७ खेयप माफ पुंइथ जाक्त हना यो, ७ खेयप माफ गेवो” दे शेंदीमी बाक्त। मत्ती १८:२१-२२

थमा सुइक्तीक बारपाइक्चा, दे पुंइशो

5 मिनु शेंसीबपुकीमी येसु कली “प्रभु, आंइ थमा सुइक्तीक थुं बारपा गेकी” दे पुन्मे बाक्त। 6 मिनु प्रभुमी “रायो गेडा खोइ ला थमा सुइक्तीनी हना, इन पने मचाप्चा डा मारेइ मलीब। एको रवा कली ‘शाक्श सुन्दा दुल्शा समुन्द्रम याक्सो’ देंनीनु, एको रवा यो याक्सीब।

गेय पाइबम गाल्च ला ताइब, दे शेंशो

7 नेनीने, मिनु मिम्तीने। इन गेय पाइब कामी ब्यफ वाक्शा, कि बी योत्रशा, खिं लेशशा जाक्मेनु, खमे खेत्नीनी डा? ममाइ। 8 गेमी 'लो, मी मुइशशा, खमे क्येशा थुल्यी। मिनु गे यो जावो' देंनीनी। 9 गेय पाइबमी अरेशो गेय पवानु, आ ठेयब मुरुमी सेवासी गेबा डा? 10 गेपुकी गेय पाइब ननी। परमप्रभु यावेम इन कली आ गेय पाइब सेल्शा, गेय पपाइक्तु। मिनु एको गेय पशा 'परमप्रभु यावे आ देशो पाइतय। तन्न सेवासी गेने मपुंडसय। मारदे हना आ वोइशशो मुर नय' दे मिम्तीने" दे शेंदीमी बाक्त। १कोरिन्थी ९:१६

कोव्र पाइब आन कली सापाइशशो

11 मिनु यरूसलेम डा लां खोइशशा, गालील नु सामरीया रागी आन दाते डा लां लमा बाक्त। लूका ९:५१; लूका १३:२२ 12 मिनु काबु गाउं का जाक्दीम्मानु, १० जना कोव्र पशो मुरपुकीमी "येसु पीब" देशो नेशा, लां कोव्रशा बाक्मा बाक्त। लेवी १३:४५-४६ 13 मिनु मेकोपुकीमी "येसु, शेंब, आंइ कली शिशी पाइक्की" दे सेउ पा ब्रेम्मा बाक्त। 14 मिनु येसुमी मेको आन कली तशा "गेपुकी, चढेब आ डोंइती लशा, इन साशो रां कोइदीने" दे सोइक्तीमी बाक्त। मिनु लना लन लांमीन आन कोव्र सामा बाक्त। लूका ५:१४ 15 कामी आ रां साशो तशा, फ्रा लेशशा परमप्रभु यावे कली ठेयब सेला बाक्त। 16 मिनु दोरशा पिशा, येसु आ डोंइती बाप्शा खुम्की पा "प्रभु, गे आं कली रिम्शो पाइतीनी" दे सेउ पवा बाक्त। मेको सामरीया डा मुर बाक्माक्त। 17 मिनु येसुमी "१० जना आन कली सापदुमी ममाइ डा? अरु ९ जना ते लाग्मे? 18 मेको सामरीया डा मुर ला परमप्रभु यावे कली ठेयब सेल्शा 'गे रिम्शो पाइब बाक्नीनी' देंथ जाक्मे?" देंमाक्त। 19 मिनु "गे रिम्शो पाइब बाक्नीनी" देंथ जाक्ब कली "इ पिया पोक्को। आं कली थमा सुइक्तीवी। मोपतीके साते" देशा सोइक्ता बाक्त। लूका ७:५०

परमप्रभु आ राज्य आ पर्बम शेंशो

मत्ती २४:-; मर्कुस १३:-

20 मिनु फरिसीपुकीमी येसु कली "परमप्रभु यावे आ राज्य जाक्चशो गेना तांडसीबा, दोपा तांडसीबा?" दे हिल्लो पामे बाक्त। मिनु येसुमी "परमप्रभु यावे आ राज्य मिक्चीम तचा डा पा मतपांडसीब। यूहन्ना १८:३६ 21 एक जाक्त, मेरेक जाक्त, दे मदेनीम। नेनीन, परमप्रभु यावे आ राज्य जाक्ने थुम्शा, गेपुकी नु बाक्त" दे शेंदीमी बाक्त।

22 मिनु आ शेंसीब आन कली नोले दुम्ब लोव्र पा "दोपा मुल रागीम जरमेशो नु काथा बाक्चा तनी, मोपा नोले चिनु काथा बाक्चा दाक्नीनी। तन्न काथा बाक्चा मताइनीनी। 23 मिनु मुरपुकीमी 'परमप्रभु यावे आ सोइशशो हुकुम पाइब एक जाक्त, मेरेक जाक्त, इरी जाक्त, उयु जाक्त, कोव्रथ लय' देंमानु, मेको थमा मसुइक्थु, मेको आन नोले मखोतीन। लूका २१:८ 24 रागीम जरमेशोमी चिन्ड कोइशा तपांडसेनु, चिला पवानु, चिलाम नां दाप्तीक रे नां पेरतीक सम्म थिशो तांडसीशो बाक्ब। 25 मोपा तपांडसीचा क्येडा डोंइती शुश श्येत जचा माल्ब। मारदे हना एको पाला डा मुरपुकीमी आं कली मब्रथु, आं लोव्र मनेनीम, थमा मसुइक्नीम। लूका ९:२२ 26 रागीम जरमेशो जाक्मेनु, मुरपुकीमी नोआह आ पालामी पशो खोदेशो पाइनीम। 27 नोआह ठेयब डोंगाम मओव्रम सम्म मुरपुकी जशा तूशा, ग्युंवे पशा, ग्युंवे पांडसीशा बाक्मा बाक्त। मिनु रेउ थिशा मुर नेल्ल बेक्मा बाक्त। 28 लोत आ पालामी यो मोदेशो दुम्माक्त। मुरपुकीमी जचा फेक्चा, ग्याप्चा लेयचा, खुम्शा मीमेनु रिक्चा नु मार मार सेल्चा मिम्तमे बाक्त। उत्पत्ती १९:१५, २४-२५ 29 काबु चहिं लोत सोदोम प्रोंइशा प्रोक्मेनु, परमप्रभु यावेमी सरीड रे मी नु बारुक तोक्पदा बाक्त। मिनु सोदोम सहरम बाक्ब नेल्ल बेक्मा बाक्त। 30 रागीम जरमेशो जाक्शा तपांडसेनु, नोआह नु लोत आस पालाम दुम्शो खोदेशो दुम्ब। 31 में नाक्ती बारदलीम बाक्बमी खिं गाम मार मार बाक्मा, मेको ब्रदीचा ममालीन। रूमी गेय पाइब खिं मलेतीन। 32 लोत आ मीश दोपा बेक्मे, मेको मिम्तीने। उत्पत्ती १९:२६ 33 आ गिंम प्रोंइचा माल्ब के आ गिंम योल्ब। आ गिंम सोइक्बमी आ गिंम प्रोंइब। लूका ९:२४ 34 मिनु मुर निक्शी ब्राख्ये कामी इप्शो बाक्नीस। का लाइक्चा पुंडसीब, का प्रोंइशा वोइक्चा पुंडसीब। 35 मीश मुर निक्शी यात हिल्शा बाक्नीस। का लाइक्चा पुंडसीब, का प्रोंइशा वोइक्चा पुंडसीब। 36 वोंइश मुर निक्शी रूम गेय पा बाक्नीस। का लाइक्चा पुंडसीब, का प्रोंइशा वोइक्चा पुंडसीब, दे इन कली देंनुड" दे शेंदीमी बाक्त। मत्ती २४:४० 37 मिनु आ शेंसीबपुकीमी "प्रभु, इन देशो तेकेर दुम्बा?" दे हिल्लो पामेनु "तेकेर सिनु बाक्मे, मेकेरन गिद हिरसीनीम" देंमाक्त।

18

पुंडचा मप्रोंइचा, दे शेंशो

1 मिनू येसुमी आ शेंसीब आन कली “परमप्रभु यावे कली पुंइचा नु ‘गे रिम्शो पाइब बाक्नीनी’ देंचा गेनायो मप्रोंइचा” दे रूप्पाइक्चा कली कथा सेला बाक्त। १थिस्सलोनिकी ५:१७ 2 मिनू मेकोमी “सहर कामी निसाफ पाइब का बाक्माक्त। मेको सुइ नु महिंब बाक्माक्त। परमप्रभु यावे कली ममिथु, मुर आन लोत्र यो मनेंथु, आ थुमी मार पिये में ला पाइबाक्माक्त। 3 मेको सहरमी आ वोंइश बेक्शो मीश मुर का बाक्माक्त। मेको मीश मुर मेको निसाफ पाइब आ बाक्तीके जाक्ना जाक्न ‘आं कली दोस गेब आन कली सजाइ गेशा, आं कली ग्रापाइय्यीनी’ देंबाक्माक्त। 4 शुश नाक्ती सम्म निसाफ पाइबमी मेको कली आ पुंइशो मगेवा बाक्त। 5 काबु चहिं ‘परमप्रभु यावे कली मान पा महिंथु, मुर आन लोत्र यो मनेंथु, आं थुमी मार पिये में ला पा बाक्ती। तन्न मेको मीश मुरुम नाक्त किंत किंत जाक्शा, श्येत गेती। मुल आ लोत्र नेंचा ब्रीताक्ड, नेने यो मदाक्ड। आ देंशो मपाता हना, जाक्स डा जाक्स पाइब। मोपतीके मेको आ देंशो मपथु मप्रोंइनुड’ दे मिम्ता बाक्त। लूका ११:७-८ 6 मेको निसाफ पाइब आ मिम्शो मिम्तीने। 7 मारदे हना निसाफ पाइब आ पशो खोदेंशो पा परमप्रभु यावेमी आ योवशो आन कली आन पुंइशो मगेबा डा? मेकोपुकीमी नाक्त किंत किंत पुंइचा मप्रोंइथु बाक्नीम। मुल मगेपुतु हना, काबु डा काबु गेब। मिनू ग्रापाइक्ब। 8 रागीम जरमेशो तपांइसेनु, थमा सुइश्शा, परमप्रभु यावे कली पुंइशा ‘गे रिम्शो पाइब बाक्नीनी’ देंस डा देंस बाक्शोपुकी ताइबा को?” दे येसुमी देंमाक्त।

ठेयब मसुंइसीचा, दे शेंशो

9 काबु येसुमी अरु आन कली महिंथु, ठेयब सुंइसीशो आन कली लोत्र पवा बाक्त। मेकोपुकीमी “गो आंम पचा माल्शो पा ठीक दुम्तक” दे मिम्शो बाक्मा बाक्त। रोमी १०:३ 10 मोदेंशो ठेयब सुंइसीब आन कली “मुर निक्शी परमप्रभु यावे आ खिंमी परमप्रभु यावे कली प्रार्थना पथ लसा बाक्त। का फरिसी बाक्माक्त, का तिरो पोक्ब बाक्माक्त। 11 फरिसीमी मुर नेल्ल आन कली तपांइसीशा, चढेतीक आ नेक्था राप्शा ‘परमप्रभु यावे, गे रिम्शो पाइब बाक्नीनी। मारदे हना गो अरु मुर खोदेंशो पा मुर आन मार मार रोइक्ब मनड। गो जोल पाइब यो मनड। मीश वोंइश आस नाता खोइक्ब मनड। मेरे तिरो पोक्ब खोदेंशो पापी मनड। यसैया ५८:२-३ 12 साता कामी खेयप निक्शी माइजा बाक्नुड। क्येट ताक्गनु, १० भाग डा भाग का योक्शा गेनुड’ दे प्रार्थना पवा बाक्त। मत्ती २३:२३ 13 तिरो पोक्ब चहिं हारे बाक्शा, शुर खुक्शा ‘परमप्रभु यावे, गो पापी नड। शिशी पाइयीनी’ दे प्रार्थना पवा बाक्त। भजन संग्रह ५१:१३, १९ 14 परमप्रभु यावेमी मेको कली आ पाप क्याम्शा, ठीक दुम्पाइक्तु। मिनू ठीक दुम्शा, आ खिं लेत्त। फरिसी चहिं पाप क्याम्चा मतव। मारदे हना सुमी ठेयब सुंइसीबा, मेको महिक्शो दुम्ब। ठेयब मसुंइसीब कली चहिं परमप्रभु यावेमी ठेयब सेल्ब” दे येसुमी माइक्मी बाक्त। मत्ती २१:३१; लूका १४:११; मत्ती २३:१२

आल आन कली आसीक गेशो

15 मिनू मुरपुकीमी येसुमी आल आन कली थिवल, दे चाक्मेनु, शेंसीबपुकीमी आल चाक्ब आन कली हुइक्तमे बाक्त। 16 तन्न येसुमी मेको आन कली ब्रेश्शा “आल आन कली आं बाक्तीके चाक्चा मतेक्कीन। मारदे हना परमप्रभु यावे आ राज्य आल आन केन बाक्ब। 17 नोफा दाइश्शा नेनीने, मुरपुकीमी आल आन थुं डा मिम्शो खोदेंशो पा ममिम्ताक्म हना, परमप्रभु यावे आ राज्यम ओव्रचा मताइनीम” दे माइक्मी बाक्त।

शोंप आ पर्बम लोत्र

मत्ती १९:१६-२६; मर्कूस १०:१७-२७

18 मिनू ठेयब मुर कामी येसु कली “गे रिम्शो शेंब बाक्नीनी। गेना हना यो ब्रोंइशा बाक्चा कली मार पचा माल्नुडा?” दे हिल्लो पवानु, लूका १०:२५-२८ 19 येसुमी “मारदे आं कली रिम्शो मुर, दे माइय्यीनी? सुइ रिम्शो मनमी। परमप्रभु यावे ला रिम्शो बाक्ब। 20 परमप्रभु यावेम ब्रेक्पाइश्शो लोत्र तुइक्नीनी ‘वोंइश मीश आस नाता मखोइक्चा, मसाइक्चा, खुइ मपचा, सांकछी बाक्शोनु जोल मपचा, आम आफ आस कली मान पचा’ ” दे मदा बाक्त। प्रस्थान २०:१२-१६ 21 मिनू मेकोमी “आल रेन मोदेंशो पा पिशो नड” देंमाक्त। 22 मिनू येसुमी “नेल्ल पाप्तीवी, का चहिं मपवी। इ शोंप नेल्ल लेयशा, क्येट मथीब आन कली योक्शा गेमी। मिनू आं नोले खोइय्यी। मिनू इ शोंप स्वर्गम बाक्ब” देंमाक्त। मत्ती ६:२० 23 मिनू येसु आ लोत्र नेंशा, आ थुं खाइक्माक्त। मारदे हना मेको शुश शोंप पाइश्शो मुर बाक्माक्त। 24 येसुमी मेको आ थुं खाइश्शो तुइश्शा, मिक्च मयाक्थु कोव्रशा “शुश शोंप पाइश्शो मुर परमप्रभु यावे आ राज्य ओव्रचा गिश श्येत बाक्मे। लूका १९:९ 25 शोंप पाइश्शो मुर परमप्रभु यावे आ राज्य ओव्रने चाप्चा क्येडा दालओठ लूजे आ पोलाप

प्रीने चापब” देंमाक्त। 26 येसु आ लोव्र नेंबपुकीमी “मो हना सु ओव्रचा ताइबा डा?” देंमा बाक्त। 27 मिनु येसुमी “मुर आन पने मचापशो परमप्रभु यावेमी पने चापब” दे माइक्मी बाक्त।

नेल्ल प्रॉइबम मार ताइनीमी

मत्ती १९:२७-३०; मर्कूस १०:२८-३१

28 मिनु पत्रुसमी “गोपुकी आंइ खिं प्रॉइशा, इन नोले खोइक्तक” देंमाक्त। 29 मिनु येसुमी “नोफा दाइशा नेनीने, सुमी आ खिं, आ मीश, आ वोइश, आ लोक्बपुकी, आम आफ, तमी तौ नु मारेइ मारेइ नेल्ल परमप्रभु यावे आ राज्य आ परबम प्रॉइबा, मेकोमी मुल एको रागीम बाक्मेनुन आ प्रॉइशो क्येडा शुश ताइब। 30 मोशो ला ममाइ, नोले गेना हना यो परमप्रभु यावे नु बाक्चा ताइब” देंमाक्त।

रागीम जरमेशोम साइक्चा पुंडसीब

मत्ती २०:१७-१९; मर्कूस १०:३२-३४

31 मिनु येसुमी आ १२ जना शेंसीब आन कली “नेनीने, मुल यरूसलेम लाइनय। मेकेर जाक्दीशो नोले रागीम जरमेशो आ परबम साइ परमप्रभु यावे आ लोव्र पाइबपुकीम ब्रेक्शो लोव्र नेल्ल थमा दुम्ब। 32 रागीम जरमेशो अर्को जात डा मुर आन गुडमी गेचा पुंडसीब। मिनु मेकोपुकीमी शुक्शी पा, मेको आ कुलुम तोक्नीम। 33 मिनु युक्शा, हुश यिपाइक्नीम। मिनु नोले साइक्नीम। साइशो आ नित्थ नाक्त बेक्शो रे सेंसीब” दे शेंदीमी बाक्त। 34 आ लोव्र नेंशा, मारेइ मरुप्मे बाक्त। मारदे हना खुइशो लोव्र बाक्माक्त।

मिक्च मताइब कली सापाइशो

मत्ती २०:२९-३४; मर्कूस १०:४६-५२

35 मिनु यरीको सहर आ नेक्था जाक्दीम्मानु, लांमी मिक्च मताइब पुंडब मुर का बाक्माक्त। 36 मेको मिक्च मताइबमी शुश मुर लोव्रसी पा पिशो नेंशा “सु ननी? ते लनी? मार मालनी?” दे हिल्लो पवानु 37 “नासरथ डा येसु एको लां पित” देंमा बाक्त। 38 मिनु मिक्च मताइबमी “हे येसु, दाऊद आ तौ, शिशी पाइय्यी” दे ब्रेम्माक्त। 39 मिनु येसु आ डोंइती गाक्बपुकीमी “सिक्सी पावो” दे हुइक्तमे बाक्त। आं चहिं वाइ ब्रेशो “दाऊद आ तौ, शिशी पाइय्यी” देंमाक्त। 40 मिनु येसु खा दिक्शा “मेरे मिक्च मताइब कली एक चाक्कीन” देंमाक्त। मिनु चाक्मेनु 41 “इ कली मार पड? मार पुंडनेवे?” दे हिल्लो पवानु “प्रभु, मिक्च ताइब सेल्यीनी” दे पुना बाक्त। 42 मिनु “इ मिक्च साल। इ थमा सुइशोमी साते” दे मदा बाक्त। 43 मो मदानु, आ मिक्च ब्रा साशा, मिक्च ताइब दुम्शा, येसु आ नोले खोइशा, परमप्रभु यावे कली मान पवा बाक्त। मेको कली मिक्च ताइब दुम्शो तशा, मुर नेल्लेमी यो परमप्रभु यावे कली ठेयब सेल्मे बाक्त।

19

तिरो पोक्ब जक्कै

1 मिनु यरीको सहरम जाक्दीशा, बास मबाक्चा, दे गाक्मा बाक्त। 2 मेको सहरमी जक्कै नें पाइशो शुश शोंप पाइशो तिरो पोक्ब ठेयब मुर का बाक्माक्त। 3 मेकोमी “इं सहरम येसु जाक्ब” देंशो नेंशा “गो कोव्रथ लाइनुड” दे मिम्ता बाक्त। सहर डा मुरपुकी यो “येसु कली कोव्रचा” दे लांमी रिम्शा, आ लां कोव्रशा बाक्मा बाक्त। 4 जक्कै अरु आन क्येडा आइक्च बाक्माक्त। मिनु शुश मुरुमी लांमी रिम्शा फारशो तशा, मेको आन डोंइती लशा, रवा का डोइशा कोव्रडा बाक्त। 5 मिनु येसु मेको लां पिमेनु, जक्कै कली रवाम डोइशा बाक्शो तशा “ए जक्कै, फ्रु तोंइसो। मारदे हना मुलाक्दो इ खिंमी बास बाक्नुड” देंमाक्त। 6 मिनु जक्कै फ्रु तोंइसीशा, ग्येरसीशा आ खिं लाइशा, बास बाक्चा गेवा बाक्त। 7 मेकोमी मोदेंशो पशो तशा, मेकेर बाक्बपुकीमी “मेको पापी आ खिंम ओव्रशा बास बाक्त” दे आन थुं मनुथु, लोव्र पामे बाक्त। लूका १५:२ 8 मिनु जक्कैमी प्रभु कली खिंम ओइशा “हे प्रभु, आं शोंप क्येट नेल्ल उइक्थ पा योक्शा, मथीब आन कली गेनुडमी। सु सु कली हिम हिम पा मार मार ताक्गु, मेको आन कली ४ खेयप तेम्शा लेशो गेनुडमी” देंमाक्त। प्रस्थान २१:३७; इजीकीएल ३३:१४-१६ 9 मिनु येसुमी “थमा पा इ खिंमी बास बाक्शो रिम्शो दुम्त। मारदे हना गे पाप रे ब्रोंइते। इं किकी पिपी अब्राहाम आ तौ बाक्डे बाक्त। लूका १३:१६ 10 रागीम जरमेशो लां साम्शो आन कली लां कोंइथ जाक्त” देंमाक्त। लूका ५:३२; इजीकीएल ३४:१६; १तिमोथी १:१५

ठेयब मुर लेशशा जाकब, दे शेंशो

मत्ती २५:१४-३०

11 मिनु यरूसलेम आ नेक्था जाकदीम्मा बाक्त। मिनु शुश मुरुमी “यरूसलेम जाकदीशशा नोले येसु पिप दुम्ब। मिनु परमप्रभु यावे आ राज्य पशो तांडसीब” दे मिम्शो बाक्मा बाक्त। येसुमी मेको आन मिम्शो तुइशशा कथा सेल्शा 12 “खेयप का ठेयब मुर का पिप रे सासन पतीक ताक्चा कली डोन रागी लचा चिक्शो बाक्माक्त। 13 मिनु मेकोमी ‘गो शुश नाक्ती खिंम मबाक्नुड’ दे तुइशशा, लचा डोंइती आ गेय पाइब १० जना मुर आन कली ब्रेशशा, का का पा मीना का का गेशा ‘एको क्येटम खेलो पने। नोले जाकडानु, लेशशा गेयीनी’ दे गाक्माक्त। मीना का १०० देनार बाक्ब। देनार का नाक्त का डा गाल्च बाक्माक्त। देनार रोमी आन चांदी के क्येट बाक्माक्त। मत्ती २०:२ 14 मेको मुर गाक्म नोले मेको रागी डा मुरपुकीमी ‘मेको मुर आंइ कली सासन पाइब मदुम्ल’ दे लोत्र कुरब मुर मेको पिप आ बाक्तीक सोइक्तमे बाक्त। मारदे हना मेको कली मदाक्बाक्मा बाक्त। यूहन्ना १:११ 15 मो हना यो मेकोमी सासन पतीक अधिकार ताक्शा, खिं लेम्माक्त। मिनु जाक्शा, आ गेय पाइब आन कली ब्रेशशा, आ डोंइती राप्पाइशशा ‘आं गेशो क्येटमी मार पनी? गिश सेल्नी?’ दे हिल्लो पवा बाक्त। 16 मिनु डोंइती डा जाक्शा ‘आं होत्रप, इन गेशो क्येटमी, मार मार ग्याप्शा लेयशा, अर्को १० मीना चेम्ता’ देंमाक्त। 17 ‘गे रिम्शो गेय पाइब बाक्ते, आइक्च गेयमी रिम्शो पाप्तीवी। मोपतीके १० ओटा सहर कली अधिकार पाइब सेल्नन’ देंमाक्त। लूका १६:१० 18 मिनु मेको नोले अर्को जाक्शा ‘आं होत्रप, इन गेशो क्येटमी ग्याप्शा लेयशा, अर्को ५ मीना चेम्ता’ देंमाक्त। 19 मिनु मेकोमी ‘इ कली यो ५ ओटा सहर कली अधिकार पाइब सेल्नन’ देंमाक्त। 20 मिनु मेको आ नोले अर्को जाक्शा ‘आं होत्रप, इन क्येट एकेर बाक्त। गो मेको वाम गिल्शा खुइशशा वोइक्ता। 21 गो इन क्येडा हिंती। मारदे हना गे हिंचा डा होत्रप बाक्नीनी। इन मगेशो थोत्रक ताक्नीनी। इन मशोक्शो खुप्नीनी’ देंमाक्त। 22 मिनु ठेयब मुरुमी ‘गो इ लोत्रम इ कली निसाफ पाइनुड। आं देंशो मटीब गेय पाइब बाक्नेवे। मार मगेडा, मेको ताक्नुड। मार मशोक्गु, मेको खुप्नुड। गो मरिम्शो मुर नडा दे गे तुइशशोन नवे? 23 गे मारदे मेको क्येट वोइक्तीक खिंमी मवोदी? गो मेको आ चाइक्ब तड वा’ देंमाक्त। 24 मिनु मेकेर बाक्ब आन कली ‘मेको आ क्येट रोइशशा १० मीना चेम्ब कली गेने’ देंमाक्त। 25 मिनु मुरपुकीमी ‘हजुर, मेको नु १० मीना सुन बाक्ब’ देंमाक्त। 26 मिनु मेकोमी ‘सु नु बाक्मे, मेको तेम्शा गेचा पुंडसीब। सु नु मबाक्मे, मेको के बाक्शो यो रोइक्चा पुंडसीब। लूका ८:१८; मत्ती १३:१२ 27 तन्न आं कली मटीब आं जोरी सत्रु आन कली चहिं ग्याइशशा चाक्शा आं डोंइती क्योरशा सतीन’ देंमाक्त” दे शेंदीमी बाक्त।

येसु यरूसलेम जाकदीशशा

मत्ती २१:१-११; मर्कूस ११:१-१०; यूहन्ना १२:१२-१६

28 मिनु मेको लोत्र नेल्ल शेंने थुम्शा, यरूसलेम मेर लमा बाक्त। 29 मिनु जैतून डांडा जाकदीम्मा बाक्त। मेको डांडा आ आइदी बेथफागे नु बेथानी गाउं निक्शी बाक्सा बाक्त। 30 मेको गाउं आ नेक्था जाकदीशशा, येसुमी आ शेंसीब निक्शी आस कली “मेरे गाउं लसे। मिनु गाउं ओत्रसीनु, सुइमी मडोइशशा गधा आ चाइक्ब का पाइशशा थित्नीसी। मेको कली प्रोइशा चाक्कीसे। 31 मुरपुकीमी ‘मारदे प्रोइशा लाइक्सी?’ दे हिल्लो पाम्तेक्म हना ‘प्रभु कली माल्ताक्व’ दे मतीसे” दे माइशशा, सोइक्तीम्सी बाक्त। 32 मिनु लसानु, येसुमी देंशो खोदेंशो पा गधा पाइशशा वोइशशा थित्से बाक्त। 33 मिनु प्रोन्सेनु, गधा आ होत्रपमी “गधा मारदे प्रोइसी?” दे हिल्लो पवा बाक्त। 34 मिनु मेको निक्शीमी “प्रभु कली माल्ताक्व” देंसा बाक्त। 35 मिनु लाइशशा येसु आ बाक्तीकेम चाक्दीत्से बाक्त। मिनु येसु आ शेंसीबपुकीमी गधा तारी आन वा ब्रशा, येसु कली डोइक्पदमे बाक्त।

36 मिनु गाक्मा बाक्त। मिनु मुरपुकीमी आन फेक्शो वा लांमी ब्रामे बाक्त। 37 मेको जैतून डांडा लाक्शा ब्रुम्मा बाक्त। येसुमी शुश छक लाक्चा डा गेय पतीके मुर नेल्ल थाम्पा ग्येरशा, कुम्सो पा परमप्रभु यावे कली ठेयब सेल्ना सेल्न, 38 “परमप्रभु यावे आ नेमी जाक्ब पिप ठेयब बाक्ब। सरीडम यो ग्येरसमल। इर डा नेल्ल रिम्शो दुम्ल” दे रेयके पामे बाक्त। भजन संग्रह ११८:२६; लूका २:१४ 39 मेकेर फरिसी का निक्शी यो बाक्मा बाक्त। मेकोपुकीमी येसु कली “इन शेंसीब आन कली हुइक्तीन” देंमा बाक्त। 40 तन्न येसुमी “एकोपुकीमी सिक्सी पाम्तेक्म हना, फुल्लुमी यो रेयके पचा गोइनीम” देंमाक्त।

41 मिनु यरूसलेम सहर आ नेक्था जाक्शा, सहर तांडसेनु, येसु मेको सहर आ पर्वम डाक्शा 42 “थुं नाइक्तीक ते रे जाक्बा, दे तुइक्ती हना दुम वा। तन्न मुल मेको इ डोंइती रे खुइशशा बाक्ब। लूका १३:३४; मत्ती १३:१३, १४ 43 नोले इ जोरी सत्रु बोक्शा, इ कली एर ओंथ रे पुम्शा, तेइ लचा मगेथु, गारो डोइक्नीम। 44 मेकोपुकीमी इ कली नु

इ आल आन कली खपीम राप्नीम। मेकेर फुल्लु का सम्म ख्रोप्शा मलीनीम। मारदे हना गे इ कली गुम्थ जाक्ब कली मतुइक्ती” देंमाक्त। लूका २१:६

यरूसलेम सहरम बाक्शा, शेंशो

मत्ती २१:१२-१६; मर्कूस ११:१५-१८; यूहन्ना २:१३-१६

45 मिनु येसु सहरम जाक्दीशशा, परमप्रभु यावे आ खिं लमाक्त। मिनु मार मार लेयब आन कली खेरा बाक्त। 46 मिनु येसुमी मेको आन कली “परमप्रभु यावे आ लोव्रमी ‘आं खिं आं कली प्रार्थना पचा कली बाक्ब’ दे ब्रेक्शो बाक्ब। तन्न गेपुकीमी चहिं खुइ आन बाक्तीक पुक्खी सेलतीनी” दे हुइशशा खेरमी बाक्त। यसैया ५६:७; येरमीया ७:११ 47 मिनु येसुमी परमप्रभु यावे आ खिंमी बाक्शा, नाक्त किंत किंत मुर आन कली शेंदीमी बाक्त। ठेयब चढेब, सास्त्री नु ठेयब मुरपुकीमी येसु कली साइक्चा माल्मे बाक्त। 48 तन्न मेकोपुकीमी येसु कली मारेइ दोस गेने मचाप्मे बाक्त। मारदे हना मुर नेल्लेमी येसु आ शेंशो थाम्पा नोफा दाइशशा नेंन्मे बाक्त।

20

“इ कली सुम अधिकार गेवे?”

मत्ती २१:२३-२७; मर्कूस ११:२७-३३

1 मिनु काबु येसुमी परमप्रभु यावे आ खिंमी बाक्शा, मुर आन कली ग्येरपाइक्तीक लोव्र शेंना शेंन बाक्मेनु, 2 ठेयब चढेब, सास्त्री नु जोक्ब तुइक्ब खाल्पापुकीमी “तेको अधिकारमी मोदेशो पवी? इ कली अधिकार गेब सु बाक्बा, लो देन” देंमा बाक्त। 3 मिनु येसुमी “गो इन कली लोव्र का हिल्लो पाइनुड। मिनु आं हिल्लो पशो लोव्र लेत्तीने। 4 यूहन्नामी मुर आन कली ब्वाक्कुम खुम्शा गुंडीतीक अधिकार स्वर्ग रे तवा देय मुरपुकी रे तवा?” दे हिल्लो पामी बाक्त। 5 मिनु मेकोपुकीमी “स्वर्ग रे तवा बाक्त देंतय हना, मो हना यूहन्ना आ लोव्र मारदे थमा मसुइक्नी? देंब। लूका ७:२९-३० 6 मुरपुकी रे तवा बाक्त देंतय हना, एकेर बाक्बपुकीमी इ कली फुल्लु आप्शा साइक्नीम। मारदे हना यूहन्ना परमप्रभु यावे आ लोव्र पाइब बाक्त, दे थमा सुइक्ब बाक्नीम” दे शुश मिम्शा लोव्रसी पामे बाक्त। 7 मिनु शुश मिम्शा “यूहन्ना कली अधिकार सुमी गेवा सुम? गो मतुइक्नीकी” देंमा बाक्त। 8 मिनु येसुमी “मो हना तेको अधिकारमी एको गेय पडा, गो यो मशेंनन्नी” दे माइक्मी बाक्त।

मरिम्शो बुम्था पाइबपुकी

मत्ती २१:३३-४६; मर्कूस १२:१-१२

9 मिनु मुर आन कली कथा सेल्शा “मुर कामी ठेयब रूमी अडगुर खुमा बाक्त। मिनु नोले ‘गो रागी हिरथ लाइनुड’ दे मिम्शा, आ रू बुम्था पाइब आन कली गेशा वोदा बाक्त। मिनु लशा, शुश नाक्त मलेम्माक्त। 10 अडगुर मीशा सेक्की जाक्मेनु, होव्रपमी आ गेय पाइब का कली ‘अडगुर योक्शा चाक्को’ दे ब्रथ सोइक्ता बाक्त। मिनु गेय पाइब जाक्दीम्मेनु, बुम्था पाइबपुकीमी तुप्शा, श्येत्थ सोइक्तमे बाक्त। २इतिहास ३६:१५-१६ 11 मिनु लेंशा अर्को गेय पाइब का कली सोइक्ता बाक्त। मेको कली तुप्शा मुने तोक्शा, श्येत्थ सोइक्तमे बाक्त। 12 मोपा यो लेंशा गेय पाइब का कली सोइक्ता बाक्त। मेको कली यो हुश यिथ्री तुप्शा खेरमे बाक्त। 13 मिनु नोले ‘मार पड? मुल आं दाक्शो तौ कली सोइक्नुड। मेको कली तशा मान पाइनीमी कौ?’ दे मिम्ता बाक्त। मिनु आ तौ कली सोइक्ता बाक्त। 14 मिनु बुम्था पाइबपुकीमी आ तौ कली पिशो तशा ‘एको हक ताइब बाक्ब। लो, साइय्य। मिनु रू, अडगुर नेल्ल इं केन दुम्ब’ देंशा गारमा बाक्त। 15 मिनु रू रे गुंइशा सदमे बाक्त। रू आ होव्रपमी मोदेशो पाइब आन कली मार पाइबा? 16 जाक्शा मेको बुम्था पाइब आन कली साइक्ब। मिनु आ रू अरु आन कली गेब” दे शेंदीमी बाक्त। आ लोव्र नेंबपुकीमी मेको कथा नेंशा “मोदेशो मदुम्ल” देंमा बाक्त। 17 मिनु येसुमी आ लोव्र नेंब आन कली मिक्च मयाक्थु कोव्रशा “परमप्रभु यावेमी ब्रेक्पाइशो एको लोव्र रे मार रुम्सीबा, लो देनीन ‘खिं सेल्बपुकीमी गारो प्रोव्रडमेनु, एको फुल्लु मगार’ दे ताइक्तमे बाक्त। मेको मगारथु ताइशो फुल्लु चहिं सुर डा सुरे फुल्लु दुम्माक्त। भजन संग्रह ११८:२२ 18 सु मेको फुल्लु तारी थिप्बा, मेको खतम दुम्ब। मेको फुल्लुम सु कली चिप्ता, मेको फस दुम्ब” दे शेंदीमी बाक्त। दानीएल २:३४, ३५, ४४, ४५ 19 मिनु ठेयब चढेब नु सास्त्रीपुकीमी “इ कली कका एको कथा देंमाक्त” दे रुप्शा चुरशा, येसु कली ग्याइक्पाइक्चा माल्मे बाक्त। तन्न शुश मुरुमी आ लोव्र नेंशो तशा हिंमा बाक्त। लूका १९:४८

तिरो आ पबर्म लोत्र पशो

मत्ती २२:१५-२२; मर्कूस १२:१३-१७

20 सास्त्री नु ठेयब चढेबपुकीमी मुर योत्रशा, येसु आ थुं नाक्शा, आ लोत्र खुइ पथ सोइक्तमे बाक्त। मारदे हना दोस गेशा हुकुम पाइब आ गुइमी गेचा माल्शो बाक्मा बाक्त। मेको सोइश्शोपुकीमी येसु आ लोत्र नेंशा, थमा सुइश्शो खोदेशो पखु पामे बाक्त। लूका ११:५४; लूका २३:२ 21 मिनु मिलो शिलो पा “शेंब, गे रिम्शो शेंनीनी। सुइ कली तशा महिंथु, मुर आन कुल मकोत्रथु, परमप्रभु यावे आ लोत्र थमा पा शेंनीनी। मुल लोत्र का शेंदीकी, 22 मार लोत्र देशा हना, पिप सिजर कली तिरो थाप्चा माल्बा देय मथाप्थु यो दुम्बा?” दे हिल्लो पखु पा, लोत्र ख्राइक्पाइक्चा माल्मे बाक्त। 23 मिनु येसुमी मेको आन थुं डा लोत्र तुइश्शा 24 “देनार का कोइदीनी। एको सु का आ नेंमी खोइश्शो बाक्मे?” देंमेनु “सिजर आ नेंमी खोइश्शो बाक्त, हजुर” देंमा बाक्त। देनार का चांदी के क्येट बाक्त। मेको नाक्त का डा गाल्च बाक्त। 25 मिनु प्रभु येसुमी “मो हना पिप सिजर आ मार मार बाक्मे, मेको सिजर कली गेने। परमप्रभु यावे आ मार मार बाक्मे, मेको परमप्रभु यावे कली गेने” देंमाक्त। रोमी १३:१,७ 26 मिनु मेकेर देल्शो मुर आन डोंइती आ लोत्र ख्राइक्पाइश्शा मारेइ दोस गेने मचाप्मे बाक्त। आ लोत्र लेश्शो नेंशा छक लाक्शा सिक्सी पामे बाक्त।

बेक्शो रे सेंसीचा आ पबर्म शेंशो

मत्ती २२:२३-३३, ४६; मर्कूस १२:१८-२७, ३४

27 मिनु सदुकीपुकी जाक्मा बाक्त। सदुकीपुकीमी “मुर बेक्शो रे मसेंसीनीम” दे शेंबाक्मा बाक्त। 28 मेको जाक्बपुकीमी येसु कली “शेंब, मोसामी बेक्शो लोत्रमी ‘मुर का आल मथिथु बेक्त हना, आ लोकबमी आ भोग्यु वोंइसीशा, आ दाग्यु आ पा डा खिं डा मुर मजाम्मल, दे तमी तौ थिल’ दे बेक्शो बाक्ब। ब्यवस्था २५:५-६ 29 साइ ७ जना लोकब बाक्मा बाक्त। मिनु जेटाम ग्युंवे पवा बाक्त। मिनु आल मथिथु बेक्माक्त। 30 मिनु माइलामी आ भोग्यु वोंइसे बाक्त। मिनु मेको यो आल मथिथु बेक्माक्त। 31 मिनु साइलाम आ भोग्यु वोंइसे बाक्त। मेको यो आल मथिथु बेक्माक्त। मोदेशो पा ६ जनामी आन भोग्यु वोंइसीशा, आल मथिथु बेक्मा बाक्त। 32 नोले मेको मीश मुर यो बेक्माक्त। 33 मुर बेक्शो रे सेंसीशा ब्रोंइमानु, मेको ७ जना वोंइश आन मीश दुम्शो मीश मुर तेको आ मीश दुम्बा?” दे हिल्लो पामे बाक्त। 34 मिनु येसुमी मेको आन कली “एको रागीमी बाक्मानु, मुरपुकीमी ग्युंवे पांइसीनीम। ग्युंवे पा गेनीम। 35 तन्न बेक्शो रे सेंसीशा परमप्रभु यावे नु बाक्चा शिरशोपुकी ग्युंवे मपांइसीनीम, ग्युंवे पा यो मगेनीम। 36 मेकोपुकी गेनायो मबेक्ब दुम्शो बाक्नीम। बेक्शो रे सेंसीशा, परमप्रभु यावे आ स्वर्ग डा गेय पाइबपुकी खोदेशो दुम्नीम। मेकोपुकी परमप्रभु यावे आ तमी तौ बाक्नीम। १यूहन्ना ३:१-२ 37 बेक्शो रे सेंसीशा ब्रोंइचा तांइसीब, दे इं किकी पिपी मोसामी अरु आन कली तुइक्पदा बाक्त। दोपा तुइक्पदा बाक्त देशा हना, परमप्रभुमी मोसा कली मी ब्रशो बुटा रे तपांइसेनु, मोसामी परमप्रभु यावे कली ‘गे अब्राहाम, इसहाक नु याकूब आ परमप्रभु यावे ननी’ दे ब्रेत्ता बाक्त। प्रस्थान ३:६ 38 परमप्रभु यावे बेक्शो मुर आन परमप्रभु ममाइ। ब्रोंइशो आन परमप्रभु यावे बाक्ब। मारदे हना परमप्रभु यावे आ डोंइती नेल्ल ब्रोंइशो बाक्नीम” देंमाक्त। रोमी १४:८ 39 मिनु सास्त्री का निक्शीमी “शेंब, गे रिम्शो शेंताक्नी” देंमा बाक्त। 40 मारदे हना सदुकीपुकीमी लेंशा हिल्लो पचा हिंशा सिक्सी पामे बाक्त।

ख्रीस्त सुका आ तौ बाक्बा?

मत्ती २२:४१-४४; मर्कूस १२:३५-३७

41 मिनु येसुमी मेकेर बाक्ब आन कली “ख्रीस्त दाऊद आ तौ बाक्ब, दे दोपा देंनीमी? 42 मारदे हना दाऊद आ बेक्शो भजन संग्रह माइश्शो कुम्सो किताबम 43 ‘प्रभुमी आ प्रभु कली इ जोरी सत्रु आन कली इ खोइल थेक्तीके मसेलु सम्म आं ग्युरा गे बाक्को’ दे ब्रेक्ताक्व। भजन संग्रह ११०:१ 44 दाऊदमी मेको कली ‘प्रभु’ देंब। मिनु दोपा आ तौ दुम्मे? लो, देनीन” देंमाक्त।

“सास्त्री खोदेशो मपने” दे शेंशो

मत्ती २३:५-५

45 मेकेर बाक्ब शुश मुरुमी येसु आ लोत्र नेन्मे बाक्त। मिनु येसुमी आ शेंसीब आन कली 46 “लाइश्शो वा फेक्शा एर ओंथ गाक्ब, बजार मेर गाक्मानु, सेउ ताक्चा दाक्ब, गुम्तीक खिं लशा, ठेयब नित्तीकेम नित्चा दाक्ब नु भोजमी लशा, मान ताइब आन नित्तीकेम नित्चा माल्ब, सास्त्री आन कली तशा होस पा बाक्कीन। लूका ११:४३ 47 मेकोपुकीमी

वोंइश बेक्शो मीश मुर आन खिं रोइक्नीमी, दुइश्शो प्रार्थना पा कोंइखु पाइनीम। मोदेशो पाइबपुकी अरु आन क्येडा शुश सजाइ ताइनीम” देंमाक्त।

21

भेटी चढ़ेचा आ पबर्म शेंशो

मर्कूस १२:४१-४४

1 मिनु नोले येसुमी शोंप पाइश्शो मुरपुकीमी भेटी चढ़ेशो तवा बाक्त। 2 आ वोंइश बेक्शो मारेइ मथीब पुडग मीश मुरुमी जाक्शा, लेप्तोन निक्शी चढ़ेशो यो तवा बाक्त। लेप्तोन (ग्रीक लोव) नेल्ल क्येडा आइक्च तांबा के क्येट बाक्त। 3 मिनु येसुमी “नोफा दाइश्शा नेनीने, नेल्लेमी चढ़ेशो क्येडा एको पुडग मीश मुरुमी शुश चढ़ेपु। 4 मारदे हना आ बाक्शो नेल्ल गेपु। अरुमी चहिं आन गाप्शो रे गेम्तेक्म” देंमाक्त। २कोरिन्थी ८:१२

परमप्रभु आ खिं मलीब

मत्ती २४:१-३६; मर्कूस १३:१-३२

5 काबु मुरपुकीमी “परमप्रभु यावे आ खिं ठेयब नु दारशो सेल्शो बाक्त” देंमा बाक्त। 6 मिनु येसुमी “एको खिं मुल ठेयब नु दारशो सेल्शो ताइतीनी। नोले नेल्ल ब्रेशशा, फुल्लु का यो खोप्शा मलीब” देंमाक्त। लूका १९:४४

श्येत डा चिन्ड

7 मिनु मुरपुकीमी “शेंब, इन देंशो लोव्र गेना दुम्बा? मेको दुम्चशो चिन्ड दोपा तांइसीबा?” दे हिल्लो पामे बाक्त। 8 मिनु येसुमी “सुइमी इन थुं मक्याल्मेक्ल, दे होस पा बाक्कीन। मारदे हना शुश मुरपुकीमी आं नें ब्रशा ‘गो मेको नड। गो मेको नड देंतीक नाक्त नेक्था जाक्शो बाक्ब’ दे शेंनीम। मो देंब आन लोव्र थमा मसुइक्थु, आन नोले मखोतीन। 9 लडाइ दुम्शो, जुलुस बोक्शो लोव्र शुश नेनीनी। मेको लोव्र नेंशा महिनीन। मोदेशो दुम्चा माल्ब। मिनु इच्का नोले ला रागी नुप्ची नाक्त जाक्ब” देंमाक्त। 10 मिनु लोव्र बोइश्शा “जात जात नु राज्य राज्य लडाइ पाइनीम। 11 ठेयब खिनु कुइब। रागी रागीमी ठेयब अन्काल दुम्ब। शुश मुर रोइ पा बेक्नीम। हिंचा डा श्येत जाक्नीम। सरीडम ठेयब चिन्ड तांइसीनीम।

थमा सुइक्ब श्येत जाइनीम

12 मो दुम्चा क्येडा डोंइती थमा सुइक्ब इन कली खेदा पा ग्याइक्नीमी। मिनु ग्याइश्शा, आन गुम्तीक खिंम लाइश्शा दोस गेशा, जेल्खानमी चोक्नीम। आं नें आ पबर्म ठेयब मुर नु पिप आन डोंइती चाक्दीश्शा, राप्पाइक्चा पुंइसीनीनी। मत्ती १०:१८-२२, ३० 13 मोपा राप्पाइक्चा पुंइसीनीनु, सांकछी का दुम्नीनी। 14 ‘ठेयब मुर आन डोंइती मार देंचा?’ दे गेनायो पीर मपाइनुड, दे इन थुं फ्रेंशा बाक्कीन। लूका १२:११ 15 मारदे हना मोपा राप्पदमेनु, इन जोरी सत्रुमी लेन्ने मचाप्चा डा लोव्र इन शोव्र रे पपाइक्नन्नी। इन कली ठीक लोव्र पपाइक्नुड। मिनु मेकोपुकीमी इन लोव्र खोइक्ने मचाप्नीम। प्रेरित ६:१०

16 इन आम आफ, लोकबपुकीमी, इन जात डा मुर, इन वारचपुकीमी इन कली दोस गेशा, खेदा पा ग्याइक्पाइश्शा, चोक्पाइक्नीम। का निक्शी आन कली साइक्पाइक्नीम। 17 मुरपुकी नेल्लेमी आं नें आ पबर्म इन कली काइ मदाक्नीम। 18 तन्न इन पिआ डा चां का यो महम्ब। लूका १२:७ 19 मोपतीके थमा सुइक्चा मप्रोनीन। मिनु ला गे ब्रोंइचा ताइनीनी। हिब्रू १०:३६

‘यरूसलेम जाम्शा लाइब’ देंशो

20 यरूसलेम सहर आ एर ओंथ लडाइ पाइबपुकीमी पुम्शो ताइतीनी हना ‘मुल सहर खतम दुम्ची नाक्त जाक्माक्त’ दे तुइक्तीन। 21 मोपतीके यहूदीया रागीम बाक्बपुकी डांडा ग्येत्थ प्रोक्मल। सहरम बाक्बपुकी सहर प्रोंइशा प्रोक्मल। सहर एर ओंथ रू मेर बाक्बपुकी सहर मओव्रमल। 22 परमप्रभु यावे आ लोव्रमी एको ओदेशो दुम्ब, दे ब्रेक्शो बाक्ब। एको ब्रेक्शो नेल्ल थमा दुम्शा, सहर खतम दुम्ब। ब्यवस्था ३२:३५ 23 मेना आल कुरशो नु दूध तूब आल पाइश्शो मीश मुर आन कली श्येत दुम्ब। मारदे हना रागीमी शुश श्येत दुम्शा, मेको मुरपुकीमी परमप्रभु यावे आ गाइश्शो ताइनीम। 24 कोइ तरवारम बेक्नीमी। कोइ ग्याइश्शा अर्को रागीम लाइक्चा पुंइसीनीम। मिनु आन नाक्त मजाक्दीम सम्म अर्को जात डा मुरपुकीमी यरूसलेम कली दिप्शा वोइक्नीम। यसैया ६३:१८; प्रकाश ११:२; रोमी ११:२५

चिन्ड तांडसीब, दे शेंशो

25 मिनु सरीड नु रागीमी चिन्ड तांडसीनीम। सरीडमी नां, तास्ला नु सोरुल मार मार तांडसीब। रागीम समुन्द्रमी ठेयब ब्वाक्कु ब्रुइशशा, मुर नेल्ल आन कली हिंपाइक्ब। प्रकाश ६:१२-१३ 26 मुरपुकी सरीड नु रागी कोव्रशा, हिंशा थाइनीम। मारदे हना सरीड डा सक्ति हिम्सीनीम। 27 मिनु रागीम जरमेशो कली गोस्स तारी बाक्शा, सक्ति नु ठेयब छेडछेडमी यिशो ताइनीम। दानीएल ७:१३ 28 मेको चिन्डपुकी दुमशो तनीनु, इन पिया पोक्शा, ठेयब थुं पा ग्येरसीने। मारदे हना श्येत रे प्रॉइब इन नेक्था जाक्शो बाक्ब” दे शेंदीमी बाक्त। फिलिप्पी ४:४,५

29 मिनु कथा सेल्शा “फोव्रशी रवा नु अरु रवा कोव्रडीन। 30 कोच्चा दाप्शा कुशो तशा, रेउ यिची ना जाक्चा चिक्शो बाक्त, दे तुइक्नीनी। 31 आं देशो लोव्र थमा दुमशो तनीनु, परमप्रभु यावे आ राज्य इन नेक्था जाक्माक्त, दे तुइक्नीनी। 32 नोफा दाइशशा नेनीने, एको मुरपुकी मनुप्यु, आं देशो नेल्ल थमा दुम्ब। 33 सरीड नु रागी नेल्ल जाम्शा लाइनीम। तन्न आं लोव्र चहिं गेनायो मजाम्ब। 34 आं देशो मप्रेंथु होस पा बाक्कीन। शांबु राकसी दुक्शा मबाक्कीन। मार जचा मार फेक्चा, दो पचा, दे शुश ममिम्तीने। मारदे हना आं देशो लोव्र इन मतुइक्थु दुम्ब। मर्कूस ४:१९; १थिस्सलोनिकी ५:३ 35 मेको मोदेशो श्येत नेल्ल रागीम दुम्ब। 36 मोपतीके आं देशो मिम्शा बाक्कीन। परमप्रभु यावे कली ‘श्येत नेल्ल फाल्शा, थमा सुइक्तीक सक्ति गेकी। मिनु रागीम जरमेशो जाक्मेनु, सासीशा गुम्चा तकल’ दे पुंडना पुंडन बाक्कीन” दे अर्ती गेमी बाक्त।

नाक्त कित कित शेंशो

37 मिनु येसुमी नाक्त मुर आन कली शेंना शेंन नाक्दो चहिं जैतून डांडाम लशा इप्बाक्माक्त। 38 शुश मुरुमी नाक्त कित कित सुनी कना बोक्शा, परमप्रभु यावे आ खिं लशा, येसु आ लोव्र नेंबाक्मा बाक्त।

22

येसु कली साइक्चा, दे लोव्र पशो

मत्ती २६:- २८:-; मर्कूस १४:- १६:-; यूहन्ना १८:- २१:-

1 मिनु बोरब ओरुत्ती मसुप्शो शोब्ले जतीक पास्सा चाड जाक्चशो बाक्माक्त। 2 मिनु ठेयब चढेब नु सास्त्रीपुकीमी “येसु कली दोपा ग्याइशशा साइक्चा?” दे लोव्र पमुशा, साइक्चा माल्मे बाक्त। तन्न शुश मुरुमी येसु आ लोव्र नेंशो तशा, हिंमा बाक्त। लूका २०:१९

3 मिनु सैतान इस्कारीयोत डा यहूदा आ थुंम ओव्रमाक्त। मेको शेंसीब आन दाते डा का बाक्माक्त। यूहन्ना १३:२, २७ 4 मिनु मेको ठेयब चढेब नु ठेयब मुर आन कली गुमथ लशा “येसु ग्याइक्पाइक्चा कली वारच पाइनन्नी” दे माइक्मी बाक्त। 5 मिनु मेकोपुकीमी ग्येरशा “दुम्ब, ग्याइक्चा वारच पाप्तीवी हना, क्येट गेनीकी” देंमा बाक्त। 6 में डा मेरे यहूदामी “सुइमी मतुइक्थु, दोपा ग्याइक्पदु?” दे मिम्शा बाक्माक्त।

पास्सा चाड डा भोज

7 मिनु बोरब ओरुत्ती मसुप्शो शोब्ले जची चाड जाक्माक्त। मेको नाक्ती पाठा का क्योरचा माल्बाक्माक्त। प्रस्थान १२:१८-२० 8 मिनु येसुमी पत्रुस नु यूहन्ना आस कली “पास्सा चाड डा भोज साथ लसे” दे माइक्सी बाक्त। 9 मिनु मेको निक्शीमी “ते लशा साचा?” दे हिल्लो पाम्से बाक्त। 10 मिनु येसुमी “नेनीसे, मुल सहर लसे। सहरम जाक्दीस्सीनु, गाग्री कुरशा ब्वाक्कु दिथ पिशो मुर का गुम्नीसी। 11 मेको आ नोले खोइशशा, तेको खिं ओव्रबा, मेको खिं ओव्रडीसे। मिनु खिं डा मुर कली ‘शेंबमी सोइशशो नस्कु। शेंबमी, आ शेंसीबपुकी नु काथा बाक्शा, पास्सा ते मानेचा? दे हिल्लो पथ सोइक्ताक्स्की’ दे मतीसे। 12 मो माइक्सीनु, मेकोमी इस कली तला तारी ठेयब कोठा का कोंइब। मेको कोठामी गुन्द्री पीरा ब्रशा वोइशशो थित्नीसी। मिनु मेकेरन साचा” दे सोइक्तीम्सी बाक्त। 13 मिनु लसानु, येसुमी दोदेशो देंमे, मोदेशो थित्से बाक्त। मिनु पास्सा चाड डा भोज सादसे बाक्त। लूका १९:३२

14 मिनु भोज जचा कली येसु नु आ शेंसीबपुकी जथ निस्समा बाक्त। 15 मिनु जचामेनु, येसुमी “गो श्येत गेचा पुंडसीचा क्येडा डोंइती गेपुकी नु काथा बाक्शा, एको पास्सा मानेशा जत दाक्ती। 16 मारदे हना परमप्रभु यावे आ राज्य पशो मताइसे सम्म लेंशा गेपुकी नु काथा बाक्शा, पास्सा मानेचा मताइनुड” देंमाक्त। लूका १३:२९ 17 मिनु कचौरा शेशा “गे रिम्शो पाइब बाक्नीनी” दे प्रार्थना पशा “ताक्शा, का का पा तूडीन। 18 मुल डा मेरे एको अडगुर रस मतूनुड। परमप्रभु यावेमी राज्य पशो ताइसे नोले ला तूनुड, दे इन कली देंनुड” देंमाक्त। 19 मिनु शोब्ले शेशा “गे रिम्शो पाइब बाक्नीनी” दे प्रार्थना पा, जिक्शा योक्शा “एको आं रां बाक्ब। इन कली गेतन्नी। आं कली मिम्शा जने” दे

शोब्ले जपाइक्मी बाक्त। १कोरिन्थी ११:२३-२५ 20 मिनू जशा, कचौरा शेशा “एको तूनीनु, आं हुश चढेशो मिम्तीने। आं हुशेमी परमप्रभु यावे आ गेशो नक कबल खाप्ता। आं हुश जारशेमी शुश मुर आन पाप क्याम्सीब। 21 नेनीने, आं कली ग्याइक्ब आन कली वारच पाइब का गोपुकी नु काथा बाक्शो बाक्ब। यूहन्ना १३:२१-२२ 22 रागीम जरमेशो कली साइ मोदेशो दुम्चा माल्ब देशो लोव्र नेल्ल थमा दुम्चा माल्त हना यो, ग्याइक्ब आन कली वारच पाइब कली शुश मरिम्शो दुम्ब” देंमाक्त। 23 मिनू शेंसीबपुकीमी येसु आ लोव्र नेशा “मोदेशो पाइब सु बाक्म माइ?” दे लोव्रसी पमुचा गोत्रमे बाक्त।

नेल्ल क्येडा ठेयब सु बाक्या माइ?

24 मिनू लोव्रसी पस डा पस बाक्मानु “गो इं दातेम नेल्ल क्येडा ठेयब सु बाक्या माइ?” दे जिचा पोक्मे बाक्त। मत्ती २०:२५-२८; मर्कूस १०:४२-४५; लूका ९:४६ 25 मिनू येसुमी “अर्को रागी डा पिपपुकीमी इन कली हुकुम पाइनीम। मिनू मुरपुकीमी मेको आन कली मान पा ठेयब सेल्नीम। 26 गोपुकी चहिं मेको आन पशो खोदेशो पा ठेयब दुम्चा ममालीने। नेल्ल क्येडा ठेयबमी आइक्च सुंइसीशा, नेल्ल आन कली वारच पवल। 27 मान पा खमे योक्गमेनु, जाइब मुर आन कली मान पा ठेयब सेल्नीम। खेप्ब मुर चहिं आइक्च दुम्ब। गो इन कली खेप्ब मुर खोदेशो दुम्शा गेय पाता। यूहन्ना १३:४-१४ 28 आं कली थुं थाम्मेनु, वारच पाइब गे ननी। यूहन्ना ६:६७-६८ 29 आं आफोमी आ राज्यमी हुकुम पाइब सेल्ती। मिनू गो इन कली काथा वोइश्शा, हुकुम पाइब सेल्नन्नी। 30 आं राज्यमी गो नु काथा बाक्शा, जचा तूचा ताइनीनी। मिनू इं इस्राएल डा १२ थर आन कली निसाफ पाइनीनी” दे माइक्मी बाक्त। मत्ती १९:२८

पत्रुस कली लोव्र पशो

31 मिनू प्रभुमी सिमोन पत्रुस कली “ए सिमोन, नेनो। सैतानमी गे इ कली चेरब खोदेशो पा क्राप्चा गेयीनी, दे पुंइशो बाक्ब। २कोरिन्थी २:११ 32 गो चहिं इ पर्बम परमप्रभु यावे कली ‘पत्रुस कली थमा सुइक्चा प्रोंइपाइक्चा मगेने’ दे पुंइता। गे नोले थमा पा इ थुं परमप्रभु यावे गे लेशशा थमा सुइक्नेवे। मिनू थमा सुइक्ब आन कली ‘थमा सुइक्चा मप्रोनीन’ दे आन थुं बारपतो” दे अर्ती गेवा बाक्त। यूहन्ना १७:११,१५ 33 मिनू पत्रुसमी “प्रभु, इन कली जेल्खानम चोक्तेक्म हना, गो यो चोक्सीनुड। इन कली साइक्तेक्म हना, इन कली मप्रोंइथु, गो यो साइक्चा पुंइसीनुड” देंमाक्त। 34 मिनू येसुमी “पत्रुस, दीसा सुनी भाले ग्रीचा क्येडा डोंइती खेयप सां ‘गो मेको कली मतुइक्नुड, सु बाक्मे?’ देंनेवे” देंमाक्त।

“होस पांइसीने” देशो

35 मिनू शेंसीब नेल्ल आन कली “गोमी इन कली क्येट, झोला, जुत्ता, मारेइ मकुरथु, परमप्रभु यावे आ राज्य डा लोव्र शेंथ सोइक्तन्नीनु, जचा फेक्चा मतनी डा?” देंमेनु “मार माल्का, मेको नेल्ल थित्तक, ताइतक” देंमा बाक्त। लूका ९:३; लूका १०:४ 36 मिनू येसुमी “मुल क्येट बाक्त हना, क्येट कुरीन। झोला बाक्त हना, झोला कुरीन। तरवार मबाक्त हना, फेक्शो वा लेयशा यो ग्याप्शा कुरचा माल्ब। 37 आं पर्बम ब्रेक्पाइश्शो लोव्र नेल्ल थमा दुम्चापुतु। मार ब्रेक्शो बाक्ब देशा हना ‘मरिम्शो पाइब सुइश्शा, दोस गेनीम’ दे ब्रेक्शो बाक्ब। आं पर्बम ब्रेक्शो लोव्र नेल्ल थमा दुम्चा माल्ब” देंमाक्त। यसैया ५३:१२ 38 मिनू शेंसीबपुकीमी “प्रभु, गोपुकी नु तरवार निक्शी बाक्त” देंमानु “मोशो बाक्त हना दुम्त, लो गाक्य” देंमाक्त।

येसुमी प्रार्थना पशो

39 मिनू मेकेर रे गाक्शा, डोंइती डा खोदेशो पा जैतून डांडा जाक्दीम्माक्त। आ शेंसीबपुकीमी आ नोले खोदमे बाक्त। 40 मिनू मेकेर जाक्दीम्मानु, येसुमी आ शेंसीब आन कली “थुं थाम्चा पुंइसीनीनु, पाप मपय, दे प्रार्थना पने” दे माइक्मी बाक्त। 41 मिनू आन बाक्तीक आ ता एरे लशा, पोक्च थेक्शा 42 “आं आफ, इन दाक्शो बाक्त हना, एको कचौरा आं कली मतूपाइक्थु लतीने। तन्न आं पुंइशो मदुम्ल, इन दाक्शो दुम्ल” दे पुना बाक्त। मत्ती ६:१० 43 मिनू परमप्रभु यावे आ स्वर्ग डा गेय पाइब का गूशा, येसु कली बोल गेवा बाक्त। 44 मिनू लेंशा आ थुं खाइश्शा पुना बाक्त। आ थुं खाइश्शा पुनानु, आ पस्ना हुश खोदेशो दुम्शा खपीम दोक्माक्त। 45 मिनू लेशशा शेंसीब आन बाक्तीकेम जाक्मेनु, मेको आन कली यो आन थुं खाइश्शा इप्शा बाक्शो थिम्मी बाक्त। 46 मिनू “मारदे इम्नी? बोक्कीन, थुं थाम्चा पुंइसीनीनु, पाप मपय, दे प्रार्थना पने” दे पोक्मी बाक्त।

येसु ग्याइक्चा पुंइसीशो

47 मिनू शुश मुर फो फु गूमा बाक्त। मेको आन कली येसु आ शेंसीब यहूदामी लां कोंइशा चाक्शो बाक्माक्त। मिनू जाक्शा, यहूदामी येसु कली पुक्पु पचा कली आ डोंइती जाक्माक्त। 48 तन्न येसुमी “यहूदा, गे रागीम जरमेशो कली वारच दुम्बु पा पुक्पु पा ग्याइक्पाइक्नेवे?” देंमाक्त। 49 मिनू शेंसीबपुकीमी “ग्याइक्थ जाक्मा बाक्त” दे तुइश्शा “प्रभु, एको आन कली तरवारम क्योरशा खेदा पचा?” देंमानु 50 कामी तरवार ग्रि शोइश्शा, ठेयब चढेब आ गेय पाइब आ ग्युरा नोफा खोदा बाक्त। 51 येसुमी मेको खोइश्शो तशा “दुम्त मपने” दे नोफा सेस सेला बाक्त।

52 मिनू येसुमी मेकेर जाक्शो ठेयब चढेब, परमप्रभु यावे आ खिं ड़ा ठेयब मुर नु जोक्ब तुइक्ब खाल्पा आन कली “तरवार कोक्के कुरशा, खुइ पाइब कली ग्याइक्थ जाक्शो खोदेशो पा आं कली ग्याइक्थ जाक्नी? 53 नाक्त किंत किंत परमप्रभु यावे आ खिंमी गेपुकी नु काथा बाक्डानु, मग्याइक्तीनी। मुल चहिं छिडछिड ड़ा सक्ति नु इन पालो जाक्त” दे माइक्मी बाक्त। यूहन्ना ७:३०; यूहन्ना ८:२०

पत्रुसमी “मतुइक्नुड” देशो

54 मिनू येसु कली ग्याइश्शा लाइश्शा, नेल्ल क्येडा ठेयब चढेब आ खिंमी ओइदमे बाक्त। पत्रुस यो ड़ोन रे कोव्रना कोव्रन लमाक्त। 55 मेको खिं ड़ा लाडगाम मुर खुम्सीशा, मी थेरशा बाक्मा बाक्त। पत्रुस जाक्दीश्शा, मेकोपुकी नु मी थेरशा बाक्माक्त। 56 मिनू मेकेर गेय पाइब मीश मुर कामी पत्रुस कली मी थेरशो तशा, मिक्च मयाक्थु कोव्रशा “एको मुर मेरे नु काथा गाक्ब का बाक्त, है” देंमेनु 57 “मार लोव्र पवी? गो येसु कली मतुइक्नुड, सु बाक्मे?” देंमाक्त। 58 मिनू याम का नोले मेकेर बाक्ब कामी “मेरे नु काथा गाक्ब का गे नवे” देंमेनु “हत्तै गो मनड” देंमाक्त। 59 मिनू घन्टा का नोले अर्कोमी यो “मेरे नु काथा गाक्ब का एकोन बाक्ब। मारदे हना एको यो गालील ड़ा बाक्ब” देंमाक्त। 60 मिनू पत्रुसमी “गो इ देशो मरुबु” देंमाक्त। मो देंमेनुन, भाले ग्रीमाक्त। 61 मिनू प्रभुमी पत्रुस गे हिरशा, मिक्च मयाक्थु कोव्रडा बाक्त। मिनू पत्रुसमी “सुनी कना भाले ग्रीचा ड़ोंइती खेयप सां ‘मेको कली मतुइक्नुड, सु बाक्मे’ देंनेवे” देशो प्रभु आ लोव्र ति फ़ुक्गा बाक्त। 62 मिनू गूशा शुश डाक्माक्त। भजन संग्रह ५१:१९

येसु शुक्शी पाइक्चा पुंइसीशो

63 चढेब आ खिंमी चहिं मार पामे बाक्त देशा हना, येसु कली आ मिक्चीम वाम फ़ेंशा तुप्शा 64 “इ कली सुमी तुप्मे? लो देन” दे तुप्स ड़ा तुप्स पामे बाक्त। 65 तुप्स ड़ा तुप्स पा, तोक्शा लोव्र पा शुश श्येत गेमे बाक्त।

येसु कली राप्पाइश्शो

66 मिनू सुनी जोक्ब तुइक्ब खाल्पापुकीमी ठेयब चढेब नु सास्त्री आन कली खुप्शा कछडी बाक्मा बाक्त। मिनू येसु कली मेकेर चाक्शा राप्पदमे बाक्त। 67 मिनू “गे ख्रीस्त नवे हना, ख्रीस्त नड़ देनो” देंमा बाक्त। यूहन्ना ३:१२ 68 मिनू येसुमी “गो ख्रीस्त नड़ देंती हना, गे थमा मसुइक्नीनी। इन कली लोव्र का हिल्लो पाता हना, आं लोव्र मलेत्नीनी। 69 तन्न लोव्र का ‘मुल रागीम जरमेशो परमप्रभु यावे आ ग्युरा गे बाक्चा ताइब’ ” दे माइक्मी बाक्त। भजन संग्रह १००:१ 70 मिनू मेकोपुकीमी “मो हना गे परमप्रभु यावे आ तौ नवे?” देंमानु “परमप्रभु यावे आ तौ नवे, दे गेन देंतीनी” देंमाक्त। 71 मिनू मेकोपुकीमी “मार सांक्छी माल्दा ड़ा? आ देशो नैतय। आंम आ देशोमी दोस ताइब दुम्त” देंमुमा बाक्त।

23

पिलातस आ ड़ोंइती राप्पाइश्शो

1 मिनू मेकेर रे येसु कली पिलातस आ ड़ोंइती चाक्दीत्मे बाक्त। 2 मिनू पिलातस आ ड़ोंइती राप्पाइश्शा “हजुर, एको मुरुमी मुर आन थुं क्याल्ब। ‘सिजर कली ममानेचा। तिरो थाप्चा ममाल्ब। गो ख्रीस्त नड़। मिनू गोन पिप नड़’ दे शेंना शेंन गाक्त” दे दोस गेमे बाक्त। प्रेरित २४:५; लूका २०:२५ 3 मिनू पिलातसमी येसु कली “यहूदी आन पिप नवे?” दे हिल्लो पवानु “गे आंमा देंतीनी” दे लोव्र लेत्ता बाक्त। 4 मिनू पिलातसमी ठेयब चढेब नु येसु कली चाक्ब आन कली “एको दोस तचा ड़ा मुर मतड़, रिम्शो मुर ताता” देंमाक्त। 5 मिनू मेकोपुकीमी “एकोमी गालील रागी नु यहूदीया रागी नेल्ल हिरशा, एक यो जाक्शा, मुर आन कली ‘पिप कली ममानेन। आं कली मानेन’ दे आन थुं क्याल्तीमी। मिनू गाउं सहरमी पिप आ पर्बम दूली लोव्र पचा गोम्तेक्मे” दे दोस गेशा लोव्र थोक्शा देंमा बाक्त। 6 मिनू पिलातसमी येसु गालील ड़ा बाक्माक्त, दे तुइक्ता बाक्त। 7 गालील ड़ा हुकुम पाइब हेरोद बाक्माक्त। मेना हेरोद नाक्त का निक्शी कली यरूसलेम जाक्शो बाक्माक्त। मोपतीके मेकेर सोइक्ता बाक्त। लूका ३:१

8 मिनू हेरोदमी येसु कली तशा, ग्येरसे बाक्त। मारदे हना शुश नाक्त रे ग्रुम ग्रुम दाक्शो बाक्माक्त। मुर आन कली सापाइशो, चिन्ड कोइशो शुश लोव्र नेशा “मारैइ छक लाक्का डा गेय कोइबा को” दे मिम्शो बाक्माक्त। लूका ९:९
9 मिनू हेरोदमी शुश लोव्र हिल्लो पवा बाक्त। तन्न येसुमी लोव्र का यो मलेत्ता बाक्त। 10 ठेयब चढेब नु सास्त्रीपुकीमी शुश दोस गेमे बाक्त। 11 मिनू हेरोद नु आ सिपाइपुकीमी येसु कली शुक्शी पा पिपी आ वा फेक्पा “लो, मुल पिप दुम्ते” दे पिलातस आ बाक्तीकेमी लेशशा सोइक्तमे बाक्त। 12 डोंइती हेरोद नु पिलातस जोरी सत्रु खोदेशो दुम्शो बाक्सा बाक्त। मेको नाक्त रे वारचबु दुम्सा बाक्त।

13 मिनू पिलातसमी येसु कली पिप आ वा फेक्पा लेशशा चाक्शो तशा, ठेयब चढेब, ठेयब मुर नु शुश मुर आन कली खुप्शा 14 “एको मुरुमी ‘पिप ममानेचा’ दे शेंना शेंन गाक्ब दे दोस गेतीनी। गो चहिं दोस गुंडने मचबु। 15 हेरोदमी यो आ दोस थिन्ने मचाप्यु, लेशशा सोइक्ताक्व। साइक्का पुंडसीब मारेइ दोस मथिदु। 16 मोपतीके इक्का सजाइ गेशा, सोइक्का दुम्ती” देमाक्त। 17 पारसा नाक्ती जेल्खानमी चोक्सीशो मुर का प्रोंइचा माल्बाक्माक्त। 18 मिनू पिलातसमी येसु कली प्रोंइशा सोइक्का देंमेनु, मेकेर बाक्बपुकीमी “प्रोंइचा मदुम्ब। मुर का प्रोंइचा देंतीनी हना, बारब्बा कली प्रोंइशा सोइक्तीने। एको कली चहिं साइक्कान माल्ब” दे गुइ मुठी पा पोक्शा, रेयके पामे बाक्त। 19 बारब्बा चहिं डोंइती मरिम्शो गेय पा, सहरम हुल पोक्शा, मुर का कली साइशशा, जेल्खानमी चोक्सीशो बाक्माक्त। 20 पिलातसमी खुम्सीशो मुर आन कली लेंशा लोव्र पशा, येसु कली प्रोंइचा बोल पवा बाक्त। 21 तन्न मेकोपुकीमी शुश रेयके पा “शीम केप्शा कांटी थोक्शा क्याइशशा सतीने” दे वाइ ब्रेशशा, रेयके पामे बाक्त। 22 मिनू पिलातसमी लेंशा “मार मरिम्शो पवा? मार दोस गेचा? साइक्का डा दोस मारेइ मतड। तुप्पाइशशा, प्रोंइशा सोइक्नुड” देमाक्त। 23 मिनू मेकोपुकीमी “ब्रोंइचा मगेचा, सरकार, ब्रोंइचा मगेचा। शीम केप्शा कांटी थोक्शा क्याइशशा साइक्का माल्ब” दे वाइ ब्रेस्स डा ब्रेस्स बाक्मा बाक्त। 24 मिनू पिलातसमी मेको आन कली सिक्सी पपाइक्ने मचाप्तीके “मो हना, लो, सतीन” दे आन पुंडशो पचा गेमी बाक्त। 25 डोंइती मरिम्शो गेय पा, मुर साइशशा चोक्सीशो बारब्बा कली प्रोंइपाइशशा सोइक्ता बाक्त। येसु कली आन पुंडशो खोदेशो पा शीम केप्शा कांटी थोक्शा क्याइशशा साइक्का कली गेवा बाक्त।

येसु साइक्का पुंडसीशो

26 मिनू सिपाइपुकीमी येसु कली लदमे बाक्त। सहर रे गुंडदमेनु, आ रू रे पिशो साइरेनी डा सिमोन कली ग्याइशशा, येसु कली क्याइक्तीक शी कुरपा, येसु आ नोनोले खोइक्पाइशशा लदमे बाक्त।

27 शुश मुरुमी मेको आन नोले खोदमे बाक्त। मीश मुरपुकी डाक्शा रोंका पना पन गाक्मा बाक्त। 28 मोपा डाक्शा खोदमेनु, येसुमी आ नोले लेशशा कोव्रशा, डाक्ब मीश मुर आन कली “ए यरूसलेम डा तमीपुकी, आं कली तशा, मडाक्कीन। तन्न इन तमी तौ नु आंमा इन कली मिम्शा डाक्कीन। 29 मारदे हना काबु एको सहर डा मुर शुश श्येत जाइनीम। मोपा श्येत जाक्मेनु, आल मथीब नु दूध मतुंडब मीश मुर ग्येरसीनीम। मारदे हना शुश श्येत दुम्ब। लूका २१:२३ 30 मिनू मेकोमी रोंगु कली ‘ब्रेशशा चिप्शा, आंइ कली सुम्शा खुइक्तीकी’ दे पुंडनीम। होसे १०:८; प्रकाश ६:१६; प्रकाश ९:६ 31 क्येख शी लाइ यो चोव्रमेनु, सोव्रशो शी मार लीबा डा?” दे माइक्की बाक्त। भजन संग्रह २२:१९; १पत्रुस ४:१७

32 येसु कली लदमेनु, खुइ निक्शी आस कली यो साइक्थ लदमे बाक्त। 33 मिनू खप्परे माइक्तीकेमी चाक्दीशशा, मेको सांफा आन कली शी का का तारी इप्पा गुइ खोइलीम कांटी थोक्शा, शी पोक्शा, येसु आ ग्युरा गे का, आ पेरा गे का क्याइशशा वोदमे बाक्त। 34 मिनू क्यदमेनु, येसुमी “आं आफ, एको आन कली माफ गेने। मारदे हना एकोपुकीम मारेइ मतुइशो बाक्नीम” दे पुना बाक्त। सिपाइपुकीमी फेन्टे ग्यारशा, आ वा योक्समा बाक्त। यसैया ५३:१२; प्रेरित ७:१६; प्रेरित ३:१७; भजन संग्रह २२:१९ 35 मुर शुश मेकेर कोव्रना कोव्रन बाक्शो बाक्मा बाक्त। ठेयब मुरपुकीमी “एकोमी शुश मुर आन कली श्येत रे प्रोंइना प्रोंइन गाक्बाक्माक्त। परमप्रभु यावे आ योव्रशो ख्रीस्त बाक्त हना, मुल आंमा प्रोंइसेक्ल” दे शुक्शी पामे बाक्त। 36 सिपाइपुकीमी ग्युरशो थोव्रक तुंडशा 37 “गे यहूदी आन पिप नवे हना, मेकेर ब्रोंइशा लावो” दे शुक्शी पामे बाक्त। 38 येसु कली क्याइशशा शीमी “यहूदी आन पिप बाक्ब” दे ब्रेक्शा वोदमे बाक्त। 39 येसु नु काथा क्याइशशा खुइ कामी यो शुक्शी पा “ख्रीस्त मनवे डा? लो, मुल ब्रोनो। मिनू आंस कली यो प्रोंइस्की” देमाक्त। 40 मो देमेनु, अर्कोमी “गे यो परमप्रभु यावे कली तशा महिनेवे? गो सांफा कांइचीक सजाइ ताइतय। 41 गो सजाइ जचा माल्शो नस। मारदे हना खुइ पाइतस। एको मुरुमी चहिं मारेइ मरिम्शो मपावो” दे हुइक्ता बाक्त। 42 मिनू मेकोमी “येसु, गे परमप्रभु यावे आ राज्यमी हुकुम पचा गोनीनु, आं कली यो मिम्तीन” देमेनु, मती

२०:२१ 43 येसुमी “नोफा दाइशशा नेनो, मुलाक्ती गे गो नु काथा दुम्शा, परमप्रभु यावे नु बाक्का ताइनेवे” दे मदा बाक्त। २कोरिन्थी १२:४

44 मिनु नाक्ती १२ बजेसे बाक्त। मिनु घन्टा सां सम्म रागी नेल्ल छिडछिड दुम्माक्त। 45 मारदे हना नां आ छेडछेड जाम्माक्त। मिनु परमप्रभु यावे आ खिं आगा डा कोठामी फारशो वा उइक्थ पा जेरर गाक्काक्त। प्रस्थान २६:३१-३३; २इतिहास ३:१४

46 मिनु येसुमी “आं आफ, आं सोक्त इन गुइमी गेतन्नी” दे वाइ ब्रेशशा, आ सोक्त प्रोना बाक्त। भजन संग्रह ३१:६; प्रेरित ७:५८ 47 मेकेर बाक्ब कप्तानमी मो दुम्शो तशा “थमा पा, एको मुरुमी मरिम्शो गेय मपशो बाक्काक्त” देशा, परमप्रभु यावे कली ठेयब सेला बाक्त। 48 मेकेर कोव्रथ जाक्बपुकीमी मो दुम्शो तशा “ओहो, गो मरिम्शो गेय पया बाक्त” दे रुप्शा, आन कुचु तुप्शा, डाक्शा आन खिं खिं लेम्मा बाक्त। 49 गालील रागी रे यरूसलेम सम्म येसु नु काथा गाक्शो मीश मुर नु आ वारचपुकीमी डोन रे कोव्रशा, मोदेशो दुम्शो नेल्ल तामे बाक्त। लूका ८:२-३

येसु आ बेक्शो रां पुक्खीम वोइशशो

50 यहूदीया रागी अरीमाथीया सहर डा योसेफ नें पाइशशो ठेयब मुर का बाक्काक्त। मेको मुर यरूसलेम “येसु कली साइक्का” दे लोव्रसी पामेनु, मबिश्शो बाक्काक्त। 51 मेको रिम्शो थुं पाइशशो बाक्काक्त। मेकोमी “परमप्रभु यावे आ राज्य पशो तांइसेक्ल” दे थमा सुइशशा, आस पा बाक्शो बाक्काक्त। लूका २:२५, ३८ 52 मिनु मेको लशा, पिलातस कली “येसु आ रां लाइक्का गेयीनी” दे पुंइदा बाक्त। 53 मिनु पिलातसमी “लो, लतो” देमेनु, शी रे शोल्शा, बुश वाम गिल्शा लाइशशा, पुक्खी कामी ओइशा वोदा बाक्त। डोंइती मेको पुक्खीमी सुइ मवोइशशो बाक्काक्त। 54 सुक्रबार नाक्काक्दो ६ बजे क्येडा डोंइती मेकेर चाक्दीशशा वोदा बाक्त। मारदे हना ६ बजे रे नाइक्तीक नाक्त गोइबाक्काक्त। 55 गालील रे येसु नु काथा गाक्ब मीश मुरपुकीमी योसेफमी येसु आ रां लाइशशो तशा “ते वोइक्का?” दे कोव्रशो बाक्का बाक्त। 56 मिनु वोइक्तीके तुइशशा, सहर लेशशा लशा, रां मराक्ब ओरूती ग्याप्शा चाक्शा, साशा खिंम वोदमे बाक्त। मिनु आ दीसा नाइक्तीक नाक्त दुम्तीक गेय मपथु, नाइशशा बाक्का बाक्त। प्रस्थान २०:१०

24

पुक्खी श्येत्थ तशा, छक लाक्शो

मत्ती २८:१-१०; मर्कूस १६:१-८; यूहन्ना २०:१-१०

1 मिनु आ दीसा सुनी कना बोक्शा, मराक्ब ओरूती लाइशशा, पुक्खीमी जाक्दीम्मा बाक्त। 2 मिनु पुक्खी सुशो फुल्लु रोकशो तशा, 3 ओव्रशा कोव्रडमेनु, येसु आ रां मबाक्काक्त। 4 मिनु मबाक्शो तशा “ओदेशो मार दुम्मे?” दे छक लाक्कामानु, झिल झिल पाइशशो वा फेक्शो मुर निक्शी फो फु ग्रूशो तामे बाक्त। 5 मेको आस कली तशा, हिंशा कोव्रने मचाप्यु, खुम्की पा बाम्मा बाक्त। 6 मिनु मेको निक्शीमी “मारदे सेस मुर कली बेक्शो मुर वोइक्तीकेमी माल्नीनी? एकेर मबा, सेंसीचा पुंइसाक्व। गालील रागीम काथा बाक्नीनु, इन कली मार शेंदा, मेको ममिम्तीनी? 7 ‘रागीम जरमेशो पापी आन गुइमी जिम्मा गेने पुंइसीशा, शीम क्याइशशा कांटी थोक्शा साइक्का पुंइसीब। मिनु बेक्शो आ नित्थ नाक्ती बेक्शो रे सेंसीब’ दे शेशो प्रेंदीनी डा?” देसा बाक्त। लूका ९:२२ 8 मिनु येसु आ लोव्र ति फ्रुक्मे बाक्त। 9 मिनु मेकेर रे लशा, येसु आ शेंसीब ११ जना नु आ वारच नेल्ल आन कली तुइक्पदमे बाक्त। 10 मेको मो दुम्शो ताइब मीश मुर सु सु बाक्का बाक्त देशा हना, माग्दाला डा मरीयम, योअन्ना नु याक्कूब आ ममा मरीयम बाक्का बाक्त। मेको आन वारच का निक्शी यो बाक्का बाक्त। लूका ८:२-३ 11 येसु आ शेंसीबपुकीमी मीश मुर आन लोव्र नेंशा “एको मीश मुर आन लोव्र बाक्ब” दे थमा मसुदमे बाक्त। 12 पत्रुस चहिं दोरशा, कोव्रथ जाक्दीम्माक्त। जाक्दीशशा बाप्शा कोव्रडानु, बुश वा डा लाक्शा मारेइ मतवा बाक्त। मिनु छक लाक्शा आ खिं लेम्माक्त। यूहन्ना २०:६-१०

येसु कली एम्माउस डा लांम तशो

मर्कूस १६:१२-१३

13 मेको नाक्ती येसु आ वारच निक्शी यरूसलेम रे गाक्शा, एम्माउस माइशशो गाउं डा लां खोदसे बाक्त। एम्माउस गाउं यरूसलेम रे ६० स्तादीयोन डोन बाक्काक्त। स्तादीयोन का १८५ मिटर खोदेशो बाक्ब। 14 मिनु गाक्का गाक्क बाक्कसानु, ओदेशो मार दुम्मे, दे लोव्रसी पमुसा बाक्त। 15 मिनु गाक्क डा गाक्क लोव्र पाम्सेनु, येसु पिशा, गुम्शा, काथा गाक्का बाक्त। 16 काथा गाक्शा यो, येसु, दे मतुइक्तसे बाक्त। मारदे हना येसुमी आस कली मतुइक्पांइसे

बाक्त। 17 मिनू येसुमी “नाप्खे मार लोव्र पसी?” दे हिल्लो पवा बाक्त। 18 मिनू खा दिक्शा आस थुं खाइक्सा बाक्त। मिनू क्लेओपास माइशशोमी “यरूसलेममी मार दुम्मे, दे गेमी ला मतुइक्तीनी?” देंमेनु, 19 येसुमी “मार दुम” देंमाक्त। मिनू मेको निक्शीमी “मार दुम्त देंशा हना, नासरथ डा येसुमी परमप्रभु यावे आ लोव्र पवानु, शुश चिन्ड कोइताक्व। परमप्रभु यावे नु मुर नेल्ल आन डोइती मोदेशो पाप्तु। मती २१:११ 20 तन्न इं ठेयब चढेब नु ठेयब मुरपुकीमी दोस गेशा ‘साइक्चा पुंडसीब’ दे शीम क्येपशा कांटी थोक्शा क्याइशशा साइक्पाइक्तेकम। 21 मेको ‘परमप्रभु यावे आ सोइशशो इं इस्राएली कली प्रोइब बाक्ब’ दे थमा सुइशशा, आस पा बाक्तस्कु। आ बेक्शो नाक्त सां दुम्त। प्रेरित १:१६ 22 मुल सुनी गोपुकी नु बाक्शो मीश मुरपुकीमी आंस वारच नु गो नेल्ल आंइ थुं क्याल्तीकी। 23 मारदे हना सुनी कना येसु आ रां वोइक्तीक पुक्खीम लमानु, येसु आ रां मथिक्क। तन्न परमप्रभु यावे आ स्वर्ग डा गेय पाइब निक्शी गूशा ‘येसु ब्रोंइत, देंताक्स’ दे लेशशा पिशा लोव्र पाम्तेकम। 24 मिनू आंस वारच का निक्शी यो लशा, कोव्रशा लेशशा जाक्शा ‘मीश मुर आन लोव्र थमा बाक्त’ देंतेकमे। तन्न मुल सम्म सुइमी येसु कली मतामे” देंसा बाक्त। 25 मिनू येसुमी “गे मरुप्ब नसी। साइ नेसी परमप्रभु यावे आ लोव्र पाइब आन देंशो लोव्र रुप्शा थमा सुइक्ने मचाप्नीसी? लूका ९:२२ 26 ख्रीस्त श्येत जशा, सक्ति पाइशशो दुम्शा, राज्य पचा ताइब देंशो लोव्र मुल यो मरुप्नीसी?” देंमाक्त। 27 साइ नेसी मोसा नु परमप्रभु यावे आ लोव्र पाइबपुकीमी ख्रीस्त आ पर्बम मार मार ब्रेक्शो बाक्मा, मेको नेल्ल शेंदीम्सी बाक्त। ब्यवस्था १८:१५; भजन संग्रह २२:-; यसैया ५२:१३-५३

28 मिनू आस गाउं जाक्दीशशा, येसुमी “लो, बाक्कीसे, गो लाइनुड” देंमाक्त। उत्पत्ती १९:१५, २४, २५ 29 मेको निक्शीमी “मुल नां रिक्शा ते लाइनीनी? मुलाक्दो काथा बाक्य” देंसा बाक्त। मिनू येसुमी “मो हना दुम्ब, नां यो रिक्त” देंमाक्त। न्यायाधीस १९:९

30 मिनू खमे क्येशा, शोब्ले चोने थुम्शा जचामेनु, येसुमी शोब्ले शेशा, परमप्रभु यावे कली “गे रिम्शो पाइब बाक्नीनी” देंशा, जिक्शा योक्गा बाक्त। लूका ९:१६; लूका २२:१९ 31 मिनू मो पा तुइक्पांइसेनु “येसु कका बाक्माक्त” दे तुइक्तसे बाक्त। तुइक्तसे चोटी येसु यो जाम्माक्त। 32 मिनू मेको निक्शीमी “मेकोमी लांम गो निक्शी नु लोव्र पवानु, परमप्रभु यावे आ लोव्र शेंदानु, इस थुं रांमी नांम तशो खोदेशो मदुम्सा डा?” देंमुसा बाक्त। उत्पत्ती १९:२६ 33 मिनू मेको रीब पा लेशशा, यरूसलेम लसा बाक्त। यरूसलेमम जाक्दीशशा, येसु आ शेंसीब ११ जना नु मेको नु काथा बाक्बपुकी खुम्सीशा बाक्शो गुम्से बाक्त। लूका ९:२४ 34 मेकोपुकीमी यो “प्रभु, थमा पा बेक्शो रे सेंसाक्व। मिनू सिमोन पत्रुस कली तपांइसाक्व” देंमा बाक्त। १कोरिन्थी १५:४-५ 35 मिनू मेको निक्शीमी लां गाक्सानु, मार मार दुम्मे, आस खिं जाक्दीशशा मार दुम्मे, मेको नेल्ल तुइक्पदसे बाक्त। मिनू “शोब्ले योक्शा जचशोनु कका येसु बाक्माक्त, दे तुइक्तस्कु” देंसा बाक्त।

येसुमी तपांइसीशो

36 मिनू मोपा लोव्रसी पामेनु, येसुमी आंम कली तपांइसे बाक्त। मर्कूस १६:१४-१९; यूहन्ना २०:१९-२३; प्रेरित १:१-१४; १कोरिन्थी १५:५ 37 मिनू “वोल कोर में” दे थाम्पा हिंमा बाक्त। मती १४:२६ 38 मिनू येसुमी “मारदे आं कली तशा ‘वोल कोर में?’ दे हिंनी? वोल मनडा। वोल के श्ये रुश मबाक्ब। 39 आं कली थिशा कोव्रयीनी। 40 आं गुइ खोइलीमी कांटी थोक्शो गार कोव्रडीने” देंमेनु, कोव्रडमे बाक्त। यूहन्ना २०:२० 41 मिनू छक लाक्शा “येसु बाक्म कों, मबाक्म” दे दल्गीर पामे बाक्त। हिंमा यो बाक्त। ग्येरसमा यो बाक्त। मिनू येसुमी मेको आन कली दल्गीर पशो तशा “एक मारेइ जचा थोव्रकी बाक्म कों” दे पुना बाक्त। 42 मिनू वाल्शो डांइ का गेमे बाक्त। यूहन्ना २१:५, १०; प्रेरित १०:४१ 43 मिनू मेको डांइ ताक्शा, नेल्ल आन तचा डा पा ब्ववा बाक्त।

“साइ ब्रेक्शो लोव्र थमा दुम्ब” दे शेंशो

44 मिनू येसुमी आ शेंसीब आन कली “गो गे नु बाक्ची ना आ देंशो मोसा आ अरेशो लोव्र, परमप्रभु यावे आ लोव्र पाइब आन ब्रेक्शो नु भजन संग्रह आं पर्बम ब्रेक्शो लोव्र नेल्ल गाप्चा माल्ब, दे इन कली लोव्र पाता” देंमाक्त। लूका १८:३१-३३; लूका २४:२६-२७; लूका १८:३१ 45 मिनू नोले येसुमी परमप्रभु यावे आ ब्रेक्पाइशशो लोव्र रुप्चा कली रुप्तीक थुं गेमी बाक्त। लूका ९:४५; यूहन्ना १२:१६ 46 मिनू मार ब्रेक्पाइक्मी बाक्त देंशा हना “ख्रीस्त श्येत जशा, साइक्चा पुंडसीशा आ नित्थ नाक्ती बेक्शो रे सेंसीचा माल्ब। होसे ६:२ 47 मिनू यरूसलेम रे पा रागी नेल्ल डा मुर आन कली ‘गे इन थुं परमप्रभु यावे गे लेत्चा माल्नीनी। मिनू येसु ख्रीस्त आ नेमी पाप क्याम्चा तांइसीब’ दे नेंपाइक्चा माल्ब” देंमाक्त। प्रेरित २:३८ प्रेरित १७:३० 48 मिनू मेकोमी “गे मेको नेल्ल तशा, सांकछी दुम्तीनी। 49 नेनीने, गो आं

आफोम 'सक्ति गेनुड' देशो सक्ति इन कली सोइक्नुड। तन्न इर डा सक्ति मतनी सम्म यरूसलेममी रिम्शा बाक्कीन” दे माइक्मी बाक्त। यूहन्ना १५:२६; यूहन्ना १६:७; प्रेरित २:१-४

येसु परमप्रभु आ बाक्तीके लशो

50 मिनु नोले मेको आन कली यरूसलेम रे लाइशशा, बेथानी गाउं चाक्दीशशा, आ गुइ पोक्शा मेको आन कली आसीक गेमी बाक्त। 51 आसीक गेना गेन बाक्मेनु, सरीड गे लाइक्चा पुंइसे बाक्त। 52 मिनु शेंसीबपुकीमी आन पोक्च थेक्शा, येसु कली ठेयब सेल्शा, थाम्पा ग्येरसीशा यरूसलेम लेम्मा बाक्त। 53 मिनु परमप्रभु यावे आ खिंम बाक्ना बाक्न परमप्रभु यावे कली मान पा ठेयब सेल्मे बाक्त।

यूहन्ना

ब्रेक्ब मुर: एको किताब येसु आ शेंसीब यूहन्नामी ब्रेक्शो बाक्ब। मेको जब्दी आ तौ याकूब आ लोकब बाक्ब। यूहन्नामी एको किताब आं नें मब्रेक्शो बाक्त हना यो “येसु आ दाक्शो शेंसीब” दे आंम आ पबर्म ब्रेक्शो बाक्ब, दे नेल्लेम तुइश्शो बाक्नीम। यूहन्नामी “येसुमी दाक्शो शेंसीब” दे आंम कली खुइश्शो नें वोइश्शो बाक्ब। यूहन्ना १३:२३; यूहन्ना १९:२६; यूहन्ना २०:२; यूहन्ना २१:७, २०, २४

गेना ब्रेक्शो: यूहन्ना खाल्पा दुम्शा एफिसस सहरम बाक्शो बाक्त। मेना ८५-९८ ए. डी. मेर एको किताब ब्रेक्शो बाक्ब।

मार ब्रेक्शो:

१. येसु मुर दुम्शो यूहन्ना १:-
२. येसु रागीम बाक्शो यूहन्ना २:- १२:-
३. येसु नु आ शेंसीब यूहन्ना १३:- १७:-
४. येसु श्येत जशो यूहन्ना १८:- १९:-
५. येसु बेक्शा सेंसीशो यूहन्ना २०:- २१:- २२:- २३:-

यसु ख्रीस्त रागीम जाक्शो

१ नेल्ल क्येडा डोंइती लोत्र माइश्शो का बाक्त। मेको लोत्र माइश्शो परमप्रभु यावे नु बाक्शा, मेको नु उइक्थी बाक्त। यूहन्ना १७:५; उत्पत्ती १:१; १यूहन्ना १:१२; प्रकाश १९:१३ २ मिनु मेको रागी सेल्चा क्येडा डोंइती रे परमप्रभु यावे नु काथा बाक्शो बाक्त। ३ परमप्रभु यावेमी मेको कली नेल्ल सेल्पाइश्शो बाक्त। मार मार सेल्शो बाक्मे, मेको नेल्ल आ सेल्शो बाक्त। १कोरिन्थी ८:६; कलस्सी १:१६; हिबू १:२ ४ मेको नु ब्रोंइतीक सोक्त बाक्शो बाक्त। मिनु मेको ब्रोंइतीक सोक्ती मुर आन कली छेडछेड बाक्त। यूहन्ना ८:१२ ५ मेको छेडछेड छिडछिडमी ब्राइब। मिनु छिडछिडमी छेडछेड कली काप्ने मचाण्ब। यूहन्ना ३:१९

६ मिनु परमप्रभु यावे आ सोइश्शो मुर का बाक्त। मेको आ नें यूहन्ना बाक्त। मत्ती ३:१; मर्कूस १:४ ७ यूहन्नामी छेडछेड माइश्शो सु बाक्म, दे शेंथ जाक्त। यूहन्नामी “मुर नेल्लेमी लोत्र माइश्शो कली थमा सुइक्ब दुम्मल” दे शेंताक्व। प्रेरित १९:४ ८ यूहन्ना छेडछेड माइश्शो ममाइ, छेडछेड आ पबर्म शेंब ला बाक्त। ९ मिनु छेडछेड माइश्शोमी रागीमी बाक्शो मुर नेल्ल आन कली रुप्ब थुं गेचा कली रागीमी जाक्त। १० मिनु रागीमी जाक्मेनु, आ सेल्शो मुरपुकीमी मेको कली “आंइ कली सेल्ब बाक्ब” दे मतुइक्तेम। ११ आंम रागी जाक्मेनु, आंम सेल्शो मुरपुकीमी मेको कली मब्राम। भजन संग्रह २४:१ १२ सु सुमी चहिं ब्रामे नु थमा सुदमे, मेको आन कली परमप्रभु यावे आ तमी तौ दुम्चा गेप्तु। गलाती ३:२६ १३ ठेयब जातमी जरमेतीके, मुर आन दाक्शोमी जरमेतीके नु मुर आन थुंमी मिम्शोमी ममाइ तन्न परमप्रभु यावे आ पतीके ला आ तमी तौ दुम्ने चाप्नीम। यूहन्ना ३:५-६

१४ मिनु लोत्र माइश्शो मुर दुम्शा, गोपुकी नु बाक्शो बाक्त। मेको शिशी पाइब नु परमप्रभु यावे आ लां कोंइब बाक्त। गोपुकीमी “परमप्रभु यावे आ कांइचीक तौ बाक्ब” दे तुइश्शा, मेको कली परमप्रभु यावे आ छेडछेड, आ शिशी नु आ थमा पतीकेमी ब्रीशो ताइतक। १तिमोथी ३:१६; प्रस्थान ३३:१८; यसैया ६०:१; २पत्रुस १:१६-१७ १५ यूहन्नामी मेको आ पबर्म “मेको आं नोले जाक्त हना यो, आं क्येडा ठेयब बाक्ब। मिनु आं क्येडा डोंइती यो बाक्शो बाक्त” देंत। १६ आ शिशी पतीक गो शुश शिशी तना तन बाक्तक। यूहन्ना ३:३४; कलस्सी १:१९ १७ मोसामी परमप्रभु यावे आ अरेशो लोत्र गेप्तु। तन्न शिशी पाइब नु परमप्रभु यावे आ थमा लां कोंइब येसु ख्रीस्त रे बाक्ब। रोमी १०:४ १८ मुरपुकीमी परमप्रभु यावे कली गेनायो मतामे। तन्न परमप्रभु यावे नु बाक्ब आ कांइचीक तौमी मुर आन कली परमप्रभु यावे कली तुइक्पाइक्तु। यूहन्ना ६:४६; मत्ती ११:२७

यूहन्नामी येसु ख्रीस्त आ पबर्म शेंशो

मत्ती ३:१-१२; मर्कूस १:१-८; लूका ३:१-१८

१९ मिनु यरूसलेम सहर डा यहूदीपुकीमी चढ़ेब नु लेवी आ थर डा मुर आन कली यूहन्ना नु गुम्थ सोइक्ताक्म। मिनु मेकोपुकीमी यूहन्ना कली “गे सु ननी?” दे हिल्लो पाम्तेक्म। २० यूहन्नामी जोल मपथु, ठीक लोत्र पशा “गो परमप्रभु

यावे आ सोडशो ख्रीस्त मनड” देंत। 21 मेकोपुकीमी “मिनु, गे एलीया ननी?” दे हिल्लो पाम्तेक्म। मिनु यूहन्नामी “गो मेको यो मनड” देंत। मिनु मेकोपुकीमी लेंशा “गे परमप्रभु यावे आ लोव पाइब ननी?” दे हिल्लो पाम्तेक्म। मिनु मेकोमी “गो मेको यो मनड” देंत। मलाकी ३:२३; मत्ती १७:१०-१३; ब्यवस्था १८:१५ 22 मिनु नोले मेकोपुकीमी “मिनु, गे सु ननी? आंइ कली सोडक्ब आन कली मार माइक्चा, गे इन पर्बम मार देंनीनी?” दे हिल्लो पाम्तेक्म। 23 मिनु यूहन्नामी “परमप्रभु यावे आ लोव पाइब यसैया आ देशो खोदेशो पा ‘गो गोरशो रागीमी बाक्शा, प्रभु आ लां रिम्शो ग्रोक्शा थेलीने’ दे लोव पाइब नड” देंत। यसैया ४०:३

24 मिनु हिल्लो पाइब का निक्शी फरिसी आन सोडशो बाक्तेक्म। फरिसी रिती थिती सेल्शा, रिम्शो पचा कली कोवब यो बाक्शो बाक्तेक्म। 25 मिनु यूहन्ना कली “गे ख्रीस्त मननी हना, एलीया मननी हना, परमप्रभु यावे आ लोव पाइब यो मननी हना, मारदे मुर आन कली ब्वाक्कुमी खुम्शा गुंडतीक गेय पाइनीनी?” दे हिल्लो पाम्तेक्म। 26 मिनु यूहन्नामी “इन दातेमी मुर का बाक्शो बाक्ब, मेको कली गे मतुइक्नीनी। लूका १७:२१ 27 आं नोले जाक्शो बाक्त हना यो, गो मेको आ जुत्ता पुइक्चा यो मशिरनुड” देंत। 28 मेना यूहन्नामी यर्दन खोला आइक्ची हांबु बेथानी गाउंमी मुर आन कली ब्वाक्कुमी खुम्शा गुंडतीक गेय पना पन बाक्त।

ब्वाक्कुम खुम्ब यूहन्ना आ पर्बम लोव

मत्ती ३:१३-१७; मर्कूस १:९-११; लूका ३:२१-२२

29 आ दीसा यूहन्नामी येसु कली आ बाक्तीक गे पिना पिन पशो तशा “परमप्रभु यावे आ पाठा मेकोन बाक्ब। मेकोमी रागी नेल्ल डा मुर आन मरिम्शो पशो क्याम्ब। यसैया ५३:७ 30 गो मेको आ पर्बम मार लोव पाता देशा हना, मेको मुर आं क्येडा नोले जाक्त हना यो, आं क्येडा ठेयब बाक्ब। मिनु आं क्येडा डोंइती यो बाक्शो बाक्त। 31 डोंइती गो यो मेको कली मतुइक्ब बाक्ती। तन्न गो मुल इस्राएल डा मुर आन कली मेको आ पर्बम तुइक्पाइक्चा कली ब्वाक्कुमी खुम्शा गुंडतीक गेय पथ जाक्ती” दे यूहन्नामी मुर आन कली देंत। 32 यूहन्नामी “गो परमप्रभु यावे आ सोक्त कली परवा बुदी सरीड रे बेरशा, येसु आ तारी जुक्शो ताता। 33 डोंइती गो यो मेको कली मतुइक्ब बाक्ती। मिनु आं कली ब्वाक्कुमी खुम्शा गुंडतीक गेय पथ सोडक्बमी ‘तेको मुर तारी गेमी आं सोक्त जुक्शो ताइनेवे, मेको आं सोक्तीम खुम्ब बाक्ब’ दे परमप्रभु यावेमी माइक्ती। 34 मिनु गो मेको नेल्ल ताता। परमप्रभु यावे आ तौ मेकोन बाक्ब, दे तुइश्शा, इन कली तुइक्पाइक्तन्नी” दे यूहन्नामी देंत।

येसु ख्रीस्त आ शेंसीबपुकी

35 मिनु आ नित्थ नाक्त यूहन्ना आ शेंसीब निक्शी नु बाक्माक्त। 36 मिनु यूहन्नामी येसु कली हिरशा गाक्शो तशा “कोवडीसे, मेरेन परमप्रभु यावे आ पाठा बाक्ब” देंत। 37 मिनु मेको शेंसीब निक्शीमी यूहन्ना आ लोव नेंशा, येसु आ नोले खोइक्ताक्स। 38 मिनु येसुमी लेशशा कोवडानु, मेको आस कली खोइश्शो तशा “गे मार माल्सी?” दे हिल्लो पाप्तु। मिनु मेको निक्शीमी “शेंब, गे ते बाक्नीनी?” दे हिल्लो पाम्ताक्स। 39 मिनु येसुमी “गो नु पिशा, कोवडीस” देंत। मिनु मेको निक्शी आ बाक्तीक कोवथ लाम्ताक्स। मिनु मेको नाक्त येसु नु बाक्ताक्स। मारदे हना मेना ४ बजे खोदेशो दुम्शो बाक्त। 40 यूहन्ना आ लोव नेंशा, येसु आ नोले खोइक्ब का अन्द्रीयास बाक्त। अन्द्रीयास सिमोन पत्रुस आ लोक्ब बाक्त। मत्ती ४:१८-२० 41 मिनु मेकेर रे लशा, अन्द्रीयासमी सिमोन कली गुम्शा “गो निक्शीमी मस्सीह कली गुम्तस्कु” देंत। मस्सीह चहिं ख्रीस्त, दे रुम्सीब। मस्सीह आ देशो “परमप्रभु यावेमी मेको कली तेल लुक्शो बाक्ब” बाक्ब। 42 मिनु अन्द्रीयासमी सिमोन पत्रुस कली येसु नु गुम्पाइक्तु। येसुमी मेको कली तशा “गे योआन्नेस आ तौ सिमोन नवे। इ नें केफास देंचा माल्ब” देंत। केफास देशो फुल्लु बाक्ब। ग्रीक लोवमी पत्रुस बाक्ब।

43 मिनु आ सांबु नाक्ती येसुमी “गालील रागी लाइनुड” देंत। मिनु मेकेर लशा फिलीप कली गुम्तु। मिनु फिलीप कली “आं नोले खोइय्यी” देंत। 44 मेको फिलीप अन्द्रीयास नु पत्रुस खोदेशो पा बेथसैदा सहर डा बाक्माक्त। 45 मिनु फिलीपमी नथानेल माइश्शो मुर कली गुम्शा, मेको कली “मोसामी नु परमप्रभु यावे आ लोव पाइबपुकीमी यो परमप्रभु यावे आ सोडशो का आ पर्बम ब्रेक्शो बाक्तेक्म। मिनु गोपुकीमी मेको कली गुम्तक। मेको नासरथ सहर डा योसेफ आ तौ येसु बाक्माक्त” दे नथानेल कली देंत। यसैया ५३:२; ब्यवस्था १८:१८; येरमीया २३:५; इजीकीएल ३४:२३ 46 मिनु नथानेलमी चहिं “नासरथ सहर रे सु रिम्शो मुर जाक्ने चाप्बा डा?” दे फिलीप कली देंत। मिनु फिलीपमी “लो, कोवडो” देंत। यूहन्ना ७:४१ 47 मिनु येसुमी नथानेल कली आ बाक्तीक जाक्शो तशा, नथानेल आ पर्बम “काइ जोल मपाइब नु रिम्शो गेय पाइब इस्राएली का बाक्ब” देंत। 48 मिनु नथानेलमी येसु कली “गे आं कली दोपा तुइक्नीनी?”

दे हिल्लो पाप्तु। येसुमी “फिलीपमी इ कली गुम्चा डोंइती गो इ कली फोत्रशी रवा आ पुंमी निश्शो ताता” देत। 49 मिनू नथानेलमी “शेंब, गे परमप्रभु यावे आ तौ ननी। गे इस्राएल डा मुर आन पिप ननी” देत। यूहन्ना ६:६९; भजन संग्रह २:७; येरमीया २३:५; मत्ती १४:३३; मत्ती १६:१६ 50 मिनू येसुमी लेंशा “गो फोत्रशी रवा आ पुंमी इ कली ताता देशो आ पर्बम गे थमा सुइक्तीवी। गे मेको क्येडा ठेयब गेय पशो ताइनेवे” दे माइक्तु। 51 मिनू लोत्र बोइशशा “नोफा दाइशशा नेनीने, गेपुकीमी सरीड रोक्शो ताइनीनी। मिनू परमप्रभु यावे आ स्वर्ग डा गेय पाइबपुकी रागीमी जरमेशो आ तार जुक्शो नु स्वर्ग गे लेशशा लशो ताइनीनी” दे माइक्तीमी। उत्पत्ती २८:१२; मत्ती ४:११

2

डोंइती डा छक लाक्चा डा गेय

1 आ सांबु नाक्ती गालील रागी डा काना सहरमी ग्युंभे का बाक्शो बाक्त। मिनू येसु आ ममा यो मेकेर लशो बाक्त। 2 येसु नु आ शेंसीब आन कली यो ब्रेशो बाक्तेक्म। 3 मिनू अडगुर शांबु नुम्मेनु, येसु आ ममामी येसु कली “अडगुर शांबु नुप्त” देत। 4 मिनू येसुमी आ ममा कली “गो मार पचा माल्नुडा, आं कली मदेनीन। मुल सम्म आं पची मजा” दे माइक्तु। 5 मिनू आ ममामी गेय पाइब आन कली “एकोमी मार देमे, मोदेशो पने” दे माइक्तीमी। 6 मिनू मेकेर फुल्लु के मुशो ६ ओटा गर वोइशशो बाक्तेक्म। यहूदी आन रिती थितीमी मुर आन कली चिक्चा, दे वोइशशो बाक्तेक्म। मेको गर कामी २, ३ ठेयब पुक्तीक खोदेशो ब्वाक्कु रिक्ब। मेत्रेतस माइशशो ठेयब पुक्तीक का ३९ लिटर खोदेशो बाक्ब। मर्कूस ७:३-४ 7 मिनू येसुमी गेय पाइब आन कली “गर नेल्ल ब्वाक्कुमी प्रिंटीन” देत। मिनू मेकोपुकीमी गर नेल्ल ब्वाक्कुमी प्रिंताक्म। 8 मिनू “जचा योक्ब आन ठेयब मुर कली एको थाम्चा गेने” दे माइक्तीमी। मिनू मेकोपुकीमी आ देशो खोदेशो पाक्तेक्म। 9 मेको ठेयब मुरुमी मेको अडगुर शांबु दुम्शो ब्वाक्कु थाम्शा कोत्रडानु, जिजी कका पा ब्रोत्रशो बाक्माक्त। मेकोमी मेको अडगुर शांबु ते रे चाक्शो मतुइक्त। गेय पाइबपुकीमी ला तुइशशो बाक्तेक्म। मिनू मेको ठेयब मुरुमी ग्युंभे कली ब्रेशशा 10 “मुर नेल्लेमी डोंइती ब्रोत्रशो अडगुर शांबु योक्नीम। तूशा रांडदमे नोले मब्रोत्रशो योक्नीम। गे चहिं मुल सम्म ब्रोत्रशो अडगुर शांबु खेक्शा वोइशशो बाक्ते” दे माइक्तु। 11 मेको येसु आ डोंइती डा छक लाक्चा डा गेय बाक्त। मेको डोंइती पशो छक लाक्चा डा गेय गालील रागी डा काना माइशशो सहरमी पशो बाक्त। मोपा मुर आन कली आ सक्ति कोइशो बाक्त। मेको तशा आ शेंसीबपुकीमी येसु कली परमप्रभु यावे आ तौ बाक्त, दे थमा सुदमे बाक्त। यूहन्ना १:१४

12 मिनू नोले येसु, आ ममा, आ लोक्बपुकी नु आ शेंसीबपुकी नु कापेरनाउम सहरमी यिशा, मेकेर इक्का नाक्त सम्म बाक्मा बाक्त। यूहन्ना ७:३; मत्ती १३:५५

येसु परमप्रभु आ खिं लशो

मत्ती २१:१२-१७; मर्कूस ११:१५-१९; लूका १९:४५-४८

13 मिनू यहूदी आन पास्सा चाड जाक्चशो बाक्त। मोपतीके येसु यरूसलेम सहर लत। यूहन्ना ५:१; यूहन्ना ७:१०; मत्ती २०:१८; मर्कूस ११:१; लूका १९:२८ 14 परमप्रभु यावे आ खिं जाक्दीम्मेनु, मेकेर ब्यफ लेयबपुकी, भेडा लेयबपुकी, परवा लेयबपुकी नु क्येट फाइक्ब नेल्लेमी आन गेय पना पन बाक्शो ताप्तु। 15 मिनू येसुमी पले डोरी के युक्तीक सेल्शा, भेडा, ब्यफ लेयबपुकी नु क्येट फाइक्ब आन कली परमप्रभु यावे आ खिं रे खेरतीमी। क्येट फाइक्ब आन क्येट वोइक्तीक खोल्शा, क्येट नेल्ल फ्राम्तीमी। 16 मिनू येसुमी परवा लेयब आन कली “एको नेल्ल लतीन। आं आफ आ खिं कली ग्याप्तीक लेयतीक खिं मसेलीन” दे माइक्तीमी। 17 मिनू परमप्रभु यावे आ लोत्रमी “इन खिं कली थमा पा दाक्नुड। मेको दाक्तीक मी खोदेशो पा आं थुंम चोइब” दे ब्रेक्शो बाक्ब, दे आ शेंसीबपुकीमी फ्रुक्तेक्म। भजन संग्रह ६९:९ 18 मिनू यहूदीपुकीमी येसु कली “इ के मो पचा डा अधिकार बाक्ब, दे आंइ कली मार चिन्ड कोइने चाप्नेवे?” देंमानु, मत्ती २१:२३ 19 येसुमी “परमप्रभु यावे आ खिं प्रेतीन। गो नाक्त सांमी लेंशा सेल्ने थुम्नुड” दे माइक्तीमी। मत्ती २६:६१; मत्ती २७:४० 20 मिनू यहूदीपुकीमी “परमप्रभु यावे आ खिं सेल्चा कली ४६ बर्स माल्शो बाक्त। दोपा नाक्त सांमी सेल्ने चाप्नेवे डा?” देंतेक्म। 21 येसुमी आ रां आ पर्बम लोत्र पाप्तु। आ रां परमप्रभु यावे आ खिं बाक्ब। १कोरिन्थी ६:१९ 22 मिनू नोले परमप्रभु यावेमी येसु कली बेक्शो रे सेंदानु, आ शेंसीबपुकीमी डोंइती आ रां आ पर्बम पशो लोत्र फ्रुक्तेक्म। मिनू परमप्रभु यावेमी ब्रेक्पाइशशो लोत्र नु येसु आ देशो लोत्र थमा सुइक्तेक्म। होसे ६:२

23 मिनु येसु पास्सा चाडम यरूसलेममी बाक्शा, छक लाक्चा डा गेय पवानु, मेको तशा, शुश मुरपुकीमी “परमप्रभु यावे आ तौ बाक्त” दे थमा सुइक्तेकम। 24 येसुमी चहिं मेको आन कली थमा मसुद। 25 मारदे हना मुर नेल्ल आन कली तुइश्शा, आन पर्बम लोत्र नेंचा ममाल्द। आन थुमी मार बाक्मे, मेको नेल्ल तुइश्शो बाक्त। मर्कूस २:८

3

परमप्रभु आ राज्य आ पर्बम शेंशो

1 मिनु फरिसी आन हुल डा यहूदी आन ठेयब मुर का बाक्त। मेको आ नें निकोदेमस बाक्त। यूहन्ना ७:५०; यूहन्ना १९:३९ 2 मिनु नाक्दो मेको मुर येसु आ बाक्तीक जाक्शा, येसु कली “शेंब, गे परमप्रभु यावे आ सोइश्शो शेंब ननी, दे तुइक्नीकी। मारदे हना परमप्रभु यावे आ सोइश्शोमी ला गे इन खोदेशो पा छक लाक्चा डा गेय पने चाप्ब” देंत। 3 मिनु येसुमी “नोफा दाइश्शा थमा लोत्र नेनीन, मुर लेंशा, इर रे नक पा मजरमेसाक्व हना, परमप्रभु यावे आ राज्य तने मचाप्ब” देंत। १पत्रुस १:२३ 4 मिनु निकोदेमसमी “कोल्शो मुर दोपा लेंशा जरमेने चाप्बा डा? मेको लेंशा, आ ममा आ कोत्रज ओत्रशा, जरमेने चाप्बा डा?” दे हिल्लो पाप्तु। 5 मिनु येसुमी “नोफा दाइश्शा थमा लोत्र नेनीन, ब्वाक्कु रे नु परमप्रभु यावे आ सोक्त रे जरमेशो मुरपुकी ला परमप्रभु यावे आ राज्य ओत्रने चाप्नीम। इजीकीएल ३६:२५-२७; मत्ती ३:११; तीतस ३:५ 6 मुर आ रां रे जरमेशो मुरपुकी रागी कली ला गारनीम। परमप्रभु यावे आ सोक्त रे जरमेशो मुरपुकी चहिं परमप्रभु यावे आ राज्य कली गारनीम। यूहन्ना १:१३; रोमी ८:५-९ 7 मुर लेंशा जरमेचा माल्ब, दे आं लोत्र नेंशा छक मलाक्कीन। 8 फश ते रे जाक्ब, ते लाइबा मतुइसीब। आ रेयके नेंशा यो ते रे गूबा, ते ते लाइबा, मतुइसीब। परमप्रभु यावे आ सोक्त रे जरमेशो मुर मेको खोदेशो बाक्नीम” देंत। 9 मिनु निकोदेमसमी “इन देशो दोपा दुम्ने चाप्बा डा?” दे हिल्लो पाप्तु। 10 मिनु येसुमी “गे इस्राएली आन कली शेंब दुम्शा यो, एको लोत्र मतुइक्नीनी? 11 नोफा दाइश्शा थमा लोत्र नेनीन, गो आंइ तुइश्शो लोत्र पाइनीकी। आंइ तशो यो शेंनीकी। गे चहिं आंइ शेंशो थमा मसुइक्नीनी। 12 गो इन कली रागी डा लोत्र पडानु, गे थमा मसुइक्नीनी। मिनु गो स्वर्ग डा लोत्र पाता हना, गे दोपा थमा सुइक्ने चाप्नीनी? 13 मुर परमप्रभु यावे आ बाक्तीकेम मलम। स्वर्ग रे जाक्शो रागीमी जरमेशो ला परमप्रभु यावे आ बाक्तीकेमी बाक्शो बाक्त। 14 मोसा गोरशो रागीम बाक्मेनु, कांसा के बुस्स सेल्शा, मेको कली क्युक्शा वोदा बाक्त। मोपा रागीम जरमेशो यो क्युक्चा पुंइसीब। गन्ती २१:८-९ 15 मारदे क्युक्चा पुंइसीब देशा हना, सुमी मेको कली थमा सुइक्बा, मेको गेना हना यो ब्रोंइशा बाक्चा ताइब” देंत। 16 परमप्रभु यावेमी रागी डा मुर आन कली शुश दाक्ताक्व। मोपतीके आ कांइचीक तौ रागीमी सोइक्ताक्व। सु सुमी मेको कली थमा सुइक्नीमी, मेकोपुकी नरक मलाइनीम। तन्न गेना हना यो परमप्रभु यावे नु बाक्चा ताइनीम। रोमी ५:८; रोमी ८:३२; १यूहन्ना ४:९ 17 परमप्रभु यावेमी रागी डा मुर आन कली निसाफ पा नरकमी वोइक्चा, दे आ तौ मसोइक्त। तन्न रागी डा मुर आन कली नरक रे प्रोंइचा कली सोइक्ताक्व। लूका १९:१० 18 सुमी परमप्रभु यावे आ तौ कली थमा सुइक्बा, मेको स्वर्गमी निसाफ पचा मपुंइसीब। सुमी चहिं थमा मसुइक्बा, मेको डोंइती रेन निसाफ पा सजाइ तचा पुंइसीब दुम्शो बाक्ब। मारदे हना मेकोमी परमप्रभु यावे आ कांइचीक तौमी पाप रे प्रोंइब, दे थमा मसुइश्शो बाक्ब। यूहन्ना ५:२४ 19 मिनु निसाफ दोदेशो बाक्ब देशा हना, छेडछेड माइश्शो रागीम जाक्त। मुरपुकीमी छेडछेड क्येडा छिडछिड कली शुश दाक्ताक्व। मारदे हना आन पशो गेय मरिम्शो बाक्त। यूहन्ना १:५,९-११ 20 सुमी मरिम्शो गेय पाइबा, मेकोम छेडछेड कली काइ मदाक्ब। आ गेय मतांइसेक्ल, दे छेडछेडमी मलाइब। एफिसी ५:१३ 21 सुमी चहिं थमा पा रिम्शो गेय पाइबा, मेको छेडछेडमी लाइब। मारदे हना आ रिम्शो गेय परमप्रभु यावे कली टिशो नेल्ल तांइसेक्ल, दे छेडछेडमी लाइब। १यूहन्ना १:६-७

यूहन्नामी येसु आ पर्बम शेंशो

22 मिनु नोले येसु नु आ शेंसीबपुकी यहूदीया रागी लाम्तेकम। मेकेर आ शेंसीबपुकी नु बाक्शा, ब्वाक्कुमी खुम्शा गुंइतीक गेय पाम्तेकम। यूहन्ना ४:१-२ 23 यूहन्नामी यो सालीम सहर आ नेक्था एनोन बाक्तीक डा शुश ब्वाक्कु बाक्तीकेमी ब्वाक्कुमी खुम्शा गुंइतीक गेय पशो बाक्त। शुश मुर जाक्शा, ब्वाक्कुम खुम्शा गुंइचा पुंइसाक्म। 24 मेना यूहन्ना जेल्खानम चोक्चा मपुंइसीशो बाक्त। मर्कूस १:१४

25 मिनु यूहन्ना आ शेंसीबपुकीमी “दोपा पाप क्याम्सीबा?” दे यहूदी का नु लोत्र पाम्तेकम। 26 मिनु यूहन्ना कली गुम्शा “शेंब, मेको यर्दन खोला आइक्ची हांबुम गे नु बाक्ब, इन तुइक्पाइश्शो परमप्रभु यावे आ तौम ब्वाक्कुमी खुम्शा गुंइतीक गेय पाइब। मिनु मुर नेल्ल मेकेर लाइनीम” दे यूहन्ना कली देंतेकम। यूहन्ना १:२६-३४ 27 मिनु यूहन्नामी

“परमप्रभु यावेमी गेशो गेय डा लाक्शा, सुइमी मारेइ गेय पने मचाप्नीम। हिब्रू ५:४ 28 गे आं कली तुइक्नीनी। गो ख्रीस्त मनड। तन्न गो ख्रीस्त आ डोंइती शेंचा कली सोंइसीशो नड, दे आं शेंशो लोव्र तुइक्नीनी। यूहन्ना १:२०, २३, २७ 29 ग्युम्लेमी ग्युम्ली कली चाक्शो तशा, आ लोव्र नेंशा, आ वारच ग्येरसीब। मोपतीके गो थमा पा ग्येरसीनुड। मत्ती ९:१५ 30 मेको ठेयब दुमचा माल्ब। गो चहिं आइक्च दुमचा माल्नुड।

31 मेको स्वर्ग रे जाक्ब नेल्ल क्येडा ठेयब बाक्ब। रागी रे दुमशो चहिं रागी डा मुर बाक्ब। रागी डा मुर आन पर्बम ला तुइश्शा लोव्र पाइब। स्वर्ग रे जाक्शो चहिं नेल्ल आन क्येडा ठेयब बाक्ब। यूहन्ना ८:२३ 32 मिनु आ तशो नु आ नेंशो आ पर्बम लोव्र पाइब। तन्न सुइमी आ देशो लोव्र थमा मसुइक्नीम। 33 सु सुमी आ देशो थमा सुइक्नीम, मेकोपुकीमी ‘परमप्रभु यावेमी डोंइती देशो लोव्र थमा बाक्ब’ दे तुइश्शा गेय पाइनीम। 34 परमप्रभु यावे आ सोइश्शोमी परमप्रभु यावे आ लोव्र पाइब। मेकोमी परमप्रभु यावे आ सोक्तीमी ब्रीतीके आ लोव्र पाइब। यूहन्ना १:१६ 35 आफोमी आ तौ कली दाक्शा, मेको कली नेल्ल क्येडा ठेयब अधिकार गेप्टु। यूहन्ना ५:२०; मत्ती ११:२७ 36 सुमी आ तौ आ देशो थमा सुइक्बा, मेको गेना हना यो ब्रोंइशा बाक्चा ताइब। सुम चहिं आ देशो मटीबा, मेको गेना हना यो ब्रोंइशा बाक्चा मतथु, परमप्रभु यावे आ गाइश्शो ताइब” दे यूहन्नामी शेंताक्व।

4

येसुमी सामरी आन कली शेंशो

1 फरिसीपुकीम “प्रभु येसुमी यूहन्ना क्येडा शुश शेंसीब सेल्शा नु ब्वाक्कुमी खुमशा गुंडतीक गेय पाइब” दे तुइश्शो बाक्तेक्म। मेकोन येसुमी तुइक्ताक्व। यूहन्ना ३:२२-२६ 2 मेको गेय येसुमी आंमा मपथु, आ डोंइती डा शेंशो १२ जना शेंसीब आन कली पपाइक्तु। 3 मिनु आ शेंसीबपुकी नु यहूदीया रागी रे पा, गालील रागी गे लाम्तेक्म। 4 मिनु लमानु, सामरीया रागी जाक्दीत्तेक्म। 5 सामरीया रागीमी गाक्शा, सीकार सहर जाक्दीत्तेक्म। सीकार सहर आ नेक्था याकूब आ रू बाक्त। मेको रू आ तौ योसेफ आ थेरशो रू बाक्त। उत्पत्ती ४८:२२; यहोसु २४:३३ 6 मेकेर याकूब आ दोशो इनार यो बाक्त। मिनु येसु मेकेर जाक्दीश्शा, दशा, इनार तारी नांइसाक्व। मेना १२ बजे खोदेशो दुमशो बाक्त। 7 मेना सामरीया डा मीश मुर का ब्वाक्कु दिथ जाक्त। मिनु येसुमी मेको मीश मुर कली “ब्वाक्कु तूचा गेयी” दे पुंडतु। 8 मेना आ शेंसीबपुकी जचा थोव्रक ग्यापथ सहर लशो बाक्तेक्म। 9 मिनु मीश मुरुमी “गे यहूदी ननी। गो चहिं सामरीया डा नड। मिनु आं गुइ रे दोपा ब्वाक्कु तूचा पुंडनीनी?” दे येसु कली मदा बाक्त। मारदे हना सामरी डा मुर आन थिशो ब्वाक्कु यहूदीपुकीमी मतूबाक्मा बाक्त। सामरीया डा मुरपुकी आइक्च जात डा मुर नम। लूका ९:५२-५३ 10 मिनु येसुमी मेको मीश मुर कली “परमप्रभु यावेमी इ कली मार गेचा दाक्ब, दे तुइक्ताक्वी हना, नु ब्वाक्कु पुंडब, आं कली, सु बाक्नुड, दे तुइक्ताक्वी हना, आं कली ‘ब्वाक्कु गेयी’ दे पुंडी वा। मिनु ब्रोंइचा गेब ब्वाक्कु गेन वा” दे मदा बाक्त। यूहन्ना ७:३८-३९ 11 मिनु मीश मुरुमी “प्रभु, एको इनार दुइश्शो बाक्ब। इन के ब्वाक्कु गुंडतीक मबा। ते रे ब्रोंइचा गेब ब्वाक्कु गेनीनी? 12 आंइ किकी पिप याकूब क्येडा गे ठेयब ननी डा? याकूबमी आंइ कली एको इनार गेशो बाक्माक्त। एकेर डा ब्वाक्कु आंमा यो तूडा बाक्त। आ तौपुकी नु आ बी ब्यफपुकीमी यो एको ब्वाक्कु तूडमे बाक्त, दे मतुइक्नीनी?” देंत। 13 मिनु येसुमी “सुमी एको ब्वाक्कु तूबा, मेकोमी लेंशा तूतू दाक्ब। यूहन्ना ६:५८ 14 तन्न सुमी आं गेशो ब्वाक्कु तूबा, मेकोमी लेंशा तूतू मदाक्ब। आं गेशो ब्वाक्कु मुर आगामी बुक्शो खोदेशो पा बारशा, गेना हना यो ब्रोंइशा बाक्चा गेब” देंत। यूहन्ना ६:३५; यूहन्ना ७:३८-३९; भजन संग्रह ३६:१० 15 मिनु मीश मुरुमी “प्रभु, मेको ब्वाक्कु गेयीनी। मिनु तूतू मदाक्डल। ब्वाक्कु दिथ पिचा यो ममाल्डल” देंत।

16 मिनु येसुमी “इ वोंइश ब्रेशशा चाक्को” देंत। 17 मिनु मीश मुरुमी “आं वोंइश मबाक्ब” देंत। येसुमी “गे इ के वोंइश मबाक्ब, दे थमा लोव्र पाप्तीवी। 18 इ के ५ जना वोंइश बाक्तेक्म। मुल गे नु बाक्ब चहिं इ वोंइश ममाइ। इ लोव्र थमा बाक्ब” देंत। 19 मिनु “प्रभु, गे परमप्रभु यावे आ लोव्र पाइब का बाक्नी बाक्त। मोपतीके आं मारेइ मारेइ तुइक्ताक्नी। 20 आंइ किकी पिपीमी मेको डांडामी परमप्रभु यावे कली ठेयब सेल्शो बाक्तेक्म। गे यहूदीपुकीमी चहिं ‘यरूसलेम सहरमी परमप्रभु यावे कली ठेयब सेल्चा माल्ब’ दे देंनीनी” देंत। ब्यवस्था १२:५; भजन संग्रह १२२:- 21 मिनु येसुमी मेको मीश मुर कली “इच्का नोले गे इं आफ कली मेको डांडामी नु यरूसलेममी ठेयब मसेल्नीनी। गे आं देशो लोव्र थमा सुतो। 22 गे परमप्रभु यावे कली मतुइक्थु ठेयब सेल्नीनी। गो चहिं परमप्रभु यावे कली तुइश्शा ठेयब सेल्नीकी। मारदे हना पाप रे प्रोंइब यहूदी आन दाते रे जाक्ब। २राजा १७:२९-४१; यसेया २:३ 23 मिनु मुल नु

नोले थमा पा आं आफ कली ठेयब सेल्बपुकीमी आ सोक्त आ पतीकेमी थमा पा ठेयब सेल्नीमी। आं आफोमी मोदेशो मुर माल्ब। 24 परमप्रभु यावे सोक्त बाक्ब। मिनु सुम मेको कली ठेयब सेल्नीमी, मेकोपुकीमी आ सोक्त पतीकेमी थमा पा ठेयब सेल्चा माल्नीम” देंत। २कोरिन्थी ३:१७; रोमी १२:१ 25 मिनु मीश मुरुमी “मस्सीह जाक्ब, दे तुइक्नुड। मेको कली ख्रीस्त यो देंनीमी। मेको जाक्शा, आंइ कली नेल्ल शेंब” देंत। यूहन्ना १:४१ 26 मिनु येसुमी “गे नु लोव्र पाइब, गो मेको नड” देंत।

27 मेना येसु आ शेंसीब जाक्तेक्म। मेकोपुकीमी मेको कली सामरीया डा मीश मुर नु लोव्र पशो तशा, छक लाक्तेक्म। तन्न सुइमी “मारदे गे मेको नु लोव्र पाइनीनी? मार माल्नीनी?” दे हिल्लो मपाम। 28 मिनु मीश मुरुमी आ गर प्रोंइशा, सहर लत। मिनु सहर जाक्दीशशा, सहर डा मुर आन कली 29 “मुर का कली कोव्रथ पिने। मेकोमी आं पशो नेल्ल तुइशशा गो नु लोव्र पाप्तु। मेको ख्रीस्त बाक्म, को?” दे मुर आन कली माइक्मी बाक्त। 30 मिनु सहर डा मुर नेल्ल येसु कली कोव्रथ जाक्तेक्म।

31 मिनु आ शेंसीबपुकीमी “शेंब, लो जने” देंतेक्म। 32 तन्न येसुमी “इन मतुइशशो जचा थोव्रक गो नु बाक्ब” देंत। 33 मिनु शेंसीबपुकीमी “सुइमी जचा थोव्रक चाक्शा, गेमे को” देंमुतेक्म। 34 येसुमी मेको आन कली “आं जचा थोव्रक मार बाक्ब देंशा हना, आं कली सोइक्ब आ दाक्शो पचा नु आ देंशो गेय थुम्चा। मेको आं के जचा थोव्रक बाक्ब। यूहन्ना ६:३८; यूहन्ना १७:४ 35 गेपुकीमी ‘४ महिना नोले बाली नाली रुप्ची जाक्ब’ देंनीनी। गो चहिं रू कोव्रडीन, हो हो पा मीशा, रुप्ची जाक्शो बाक्ब। मत्ती ९:३७ 36 रुप्बमी गाल्च ताइब। मेकोमी गेना हना यो ब्रोंइशा बाक्चा कली मुर आन कली चाक्ब। मिनु शोक्ब नु रिक्ब नेल्ल कालेम ग्येरसीनीम। 37 मारदे हना ‘का निक्शीमी शोक्नीम, का निक्शीमी रुप्नीम’ देंशो लोव्र थमा बाक्ब, दे तुंइसीब। 38 मिनु गो इन कली इन मशोक्शो रुप्थ सोइक्नन्नी। अर्कोमी शोक्तीक गेय पाम्तेक्म। गे चहिं मेको आन शोक्शो रुप्नीनी” देंत।

39 मेको मीश मुरुमी सामरीया डा सीकार सहर डा मुर आन कली “आं पशो गेय नेल्ल माइक्ती” देंशो नेंशा, सामरीया डा मुर शुशेमी “मेकोन परमप्रभु यावे आ सोइशशो ख्रीस्त बाक्त” दे थमा सुदमे बाक्त। 40 मिनु सामरीया डा मुरपुकीमी येसु आ बाक्तीक जाक्शा “गो नु काथा बाक्कीन” दे पुंइतेक्म। मोपतीके येसु नाक्त निक्शी सम्म मेको नु बाक्त। 41 मिनु येसु आ शेंतीक लोव्र नेंशा, डोंइती क्येडा शुश मुरपुकीमी थमा सुइक्तेक्म। 42 मेकोपुकीमी मीश मुर कली “इ देंतीक गो थमा मसुइक्नीकी। तन्न आ शेंशो आंमा नेंतक। रागी डा मुर आन कली पाप रे प्रोंइब एकोन बाक्त, दे रुप्शा तुइक्ताक्क” देंतेक्म। प्रेरित ८:५-८

येसुमी आल कली सापाइशशो

मत्ती ८:५-१३; लूका ७:१-१०

43 मिनु नाक्त निक्शी बाक्शा, येसु मेकेर रे गालील रागी गे लत। मत्ती ४:१२ 44 येसुमी “आंम रागी डा मुरपुकीमी परमप्रभु यावे आ लोव्र पाइब कली काइ महिक्नीम” देंत। मत्ती १३:५७ 45 मिनु गालील रागी जाक्मेनु, गालील डा मुरपुकीमी मेको कली ब्राम्तेक्म। मारदे हना मेकोपुकीमी यो पास्सा नाक्त यरूसलेममी बाक्शा, येसु आ पशो नेल्ल तशो बाक्तेक्म। यूहन्ना २:२३

46 मिनु येसु डोंइती ब्वाक्कुरे अडगुर शांबु सेल्तीक गालील रागी डा काना सहरमी जाक्शो बाक्त। मिनु कापेरनाउम सहरमी पिप आ गेय पाइब कप्तान का बाक्शो बाक्त। मेको आ तौ रोइ पशो बाक्माक्त। यूहन्ना २:१,९ 47 मेको कप्तानमी “येसु यहूदीया रे गालील रागीमी जाक्त” दे नेंशा, येसु कली गुम्थ जाक्त। मिनु मेकोमी येसु कली “आं तौ बेक्चा चिक्ताक्व, सापतीने” देंत। 48 मिनु येसुमी “गे चिन्ड नु छक लाक्चा डा गेय मताइतीनी हना, आं कली थमा मसुइक्नीनी” देंत। यूहन्ना २:१८; १कोरिन्थी १:२२ 49 कप्तानमी “प्रभु, आं तौ मबेक्थु, आं खिं जाक्कीन” दे पुंइतु। 50 मिनु येसुमी “इन खिं लने, मारदे हना इन तौ साशा ब्रोंइब” देंशा सोइक्ताक्व। मिनु येसु आ देंशो थमा सुइशशा, आ खिं लेशशा लत। 51 मिनु लना लन बाक्मेनु, आ गेय पाइबपुकीमी लांमी गुम्शा “इन तौ सात” दे शोव्रडमे बाक्त। 52 मिनु “गेना रे आं तौ साचा गोवा?” दे हिल्लो पवानु “सिनाक्त छकाल रे जरो शिक उइक्ताक्व” देंमा बाक्त। 53 मेको आल आ आफोमी “इन तौ साशा ब्रोंइब” दे येसुमी देंमेनु, सामाक्त, दे तुइक्ता बाक्त। मिनु मेको नु आ खिं डा मुर नेल्लेमी थमा सुदमे बाक्त। 54 येसुमी यहूदीया रे गालील रागी जाक्शा, खेयप निक्शी डा आ पशो छक लाक्चा डा गेय एको बाक्ब। यूहन्ना २:११

5

येसुमी खोइल मदुक्ब सापाइशो

1 यरूसलेममी यहूदी आन के चाड का बाक्त। मिनु येसु यरूसलेम लत। यूहन्ना २:१३ 2 यरूसलेम सहर कली गारोमी हिरशो बाक्ब। मेको गारोमी लापचोपुकी बाक्नीम। मेको गारो डा ठेयब लापचो का कली भेडा लापचो देंनीम। मेको आ नेक्थामी हिब्रू लोत्रमी बेथेस्दा माइशो दोम्ली का बाक्ब। मेको दोम्ली बाक्तीकेमी ५ ओटा पाटी खिं बाक्नीम। नेहेम्याह ३:१ 3 मेको खिं आगामी शुश रोइ पाइब, मिक्च मताइब, गुइ खोइल मदुक्ब, रां सोव्रशो रोइ पाइबपुकी बाक्शो बाक्तेक्म। मेको मुरपुकी दोम्ली डा ब्वाक्कु गेना हिम्सीब, दे कोव्रचा कली बाक्शो बाक्मा बाक्त। 4 मारदे हना परमप्रभु यावे आ स्वर्ग डा गेय पाइबमी यिशा, दोम्ली डा ब्वाक्कु कली हिम्बाक्माक्त। मिनु ब्वाक्कु हिम्सेनु, नेल्ल क्येडा डोंइती दोम्लीम गुम्ब आ रोइ साबाक्माक्त। 5 मिनु मेकेर ३८ बर्स सम्म रोइ पशो मुर का बाक्त। 6 मिनु येसुमी मेको कली तशा “मेको मुर शुश बर्स रोइ पशो बाक्त” दे तुइशशा “गे साचा दाक्नेवे?” दे हिल्लो पाप्तु। 7 मेको रोइ पाइबमी “प्रभु, ब्वाक्कु हिम्सेनु, आं कली दोम्लीमी खुम्ब मुर सुइ मपिदु। मिनु गो हना यो ‘लड’ देंडानु, मुर का आं डोंइती ब्वाक्कुमी गुम्ब” देंत। 8 मिनु येसुमी “बोक्को, इ ब्राख्ये कुरशा गाक्को” दे माइक्तु। 9 मो देशोनु, मेको मुर आ रोइ साशा, छुल बोक्त। मिनु आ ब्राख्ये कुरशा गाक्त। मिनु मेको सापाइशो नाक्त चहिं नाइक्तीक नाक्त बाक्त। 10 मोपतीके यहूदीपुकीमी साशो मुर कली “मुलाक्त नाइक्तीक नाक्त बाक्ब। इ ब्राख्ये कुरचा मदुम्ब, दे मतुइक्ती?” देंतेक्म। प्रस्थान २०:१०; येरमीया १७:२१-२२ 11 मिनु मेकोमी “आं कली सापाइक्ब मुरुमी ‘इ ब्राख्ये कुरशा गाक्को’ दे माइक्ती” देंत। 12 मेकोपुकीमी “इ ब्राख्ये कुरशा गाक्को देंब मुर सु बाक्मे?” दे हिल्लो पाप्तेक्म। 13 मिनु मेकोमी “मतुइक्नुड” देंत। मारदे हना दोम्ली बाक्तीकेमी मुरपुकीमी पुम्दमेनु, येसु मेकेर रे गाक्ने थुम्शो बाक्त। 14 मिनु नोले येसुमी मेको साशो मुर कली परमप्रभु यावे आ खिंमी गुम्तु। मिनु “गे साते। मेको क्येडा ठेयब रोइ मपचा कली गे लेंशा पाप मपावो” दे माइक्तु। यूहन्ना ८:११ 15 मिनु साशो मुरुमी यहूदी आन कली गुम्थ लशा “आं कली सापाइक्ब दा येसु बाक्माक्त” दे माइक्ती बाक्त। 16 सापाइक्ची गेय नाइक्तीक नाक्ती पतीक यहूदीपुकीमी येसु कली श्येत गेचा गोम्तेक्म। मत्ती १२:१४ 17 मिनु येसुमी मेको आन कली “आं आफ मुल सम्म गेय पना पन बाक्ब। गो यो गेय पाइनुड” देंत। यूहन्ना ९:४ 18 आ लोत्र नेंशा, यहूदीपुकीमी येसु कली साइक्चा माल्तेक्म। मारदे हना नाइक्तीक नाक्ती गेय मपतीके क्याम्चा ला ममाइ “परमप्रभु यावे नु उइक्थ बाक्नुड। परमप्रभु यावे आं आफ बाक्ब” दे देंशोमी, मेकोपुकीमी येसु कली साइक्चा माल्तेक्म। यूहन्ना ७:३०; यूहन्ना १०:३३

येसुमी यहूदी आन कली शेंशो

19 मिनु येसुमी यहूदी आन कली “नोफा दाइशशा नेनीन, आं आफोमी मार पाइबा, आ तौमी मेको मतवा सम्म मारेइ पने मचाप्व। मिनु आफोमी दोदेशो पाइबा, तौमी मोदेशोन पाइब। यूहन्ना ३:११, ३२ 20 मारदे हना आं आफोमी आ तौ कली दाक्ब। मिनु आ पशो गेय नेल्ल आ तौ कली कोंइब। मिनु आं आफोमी मुल सम्म पपाइशो गेय क्येडा नोले ठेयब गेय कोंइपाइक्ब। मेको गेय तशा गेपुकी छक लाक्नीनी। ३:३५ 21 मिनु आं आफोमी बेक्शो आन कली दोपा सेंबा, मोपा आ तौमी यो सु कली बेक्शो रे सेंचा दाक्बा, मेको कली सेंपाइक्ब। दानीएल ७:१३-१४; प्रेरित १०:४२ 22 आं आफोमी मुर आन कली निसाफ मपाइब। तन्न नेल्ल निसाफ पचा डा गेय आ तौ कली पपाइक्ब। 23 मो दुम्मेनु, आं आफ कली मान पाइबपुकीमी आ तौ कली यो आफ कली खोदेशो पा मान पाइनीम। सुमी तौ कली मान मपाइबा, मेकोमी तौ कली सोइक्ब आं आफ कली यो मान मपाइब। फिलिप्पी २:१०-११; १यूहन्ना २:२३ 24 नोफा दाइशशा नेनीन, सुमी आं लोत्र नेंबा नु आं कली सोइक्ब आं आफ परमप्रभु यावे कली थमा सुइक्बा, मेको गेना हना यो ब्रोंइशा बाक्चा ताइब। सजाइ मताइब। मारदे हना बेक्शो रे गेना हना यो ब्रोंइशा बाक्चा ताइब। यूहन्ना ३:१६-१८ 25 नोफा दाइशशा नेनीन, बेक्शो मुरपुकीमी मुल परमप्रभु यावे आ तौ आ सेंदा नेंनीम। सुमी नेंबा, मेको गेना हना यो ब्रोंइशा बाक्चा ताइब। एफिसी २:५-६ 26 परमप्रभु यावे नु ब्रोंइतीक सोक्त बाक्ब। मिनु आ तौ कली यो मोदेशो ब्रोंइतीक सोक्ती गेशो बाक्त। यूहन्ना १:१-४ 27 मिनु आ तौ कली निसाफ पतीक अधिकार गेप्तु। मारदे हना आ तौ रागीमी जरमेसीशो बाक्ब। दानीएल ७:१३-१४ 28 आं देंशो आ पर्वम छक मलाक्कीन। मारदे हना इक्का नोले तुरसुमी बाक्शो बेक्शो मुर नेल्लेमी रागीमी जरमेशो आ सेंदा नेंनीम। 29 डोंइती रिम्शो पाइबपुकी गेना हना यो ब्रोंइशा बाक्चा कली सेंसीनीम। मरिम्शो पाइबपुकी चहिं सजाइ तचा कली सेंसीनीम। दानीएल १२:२; मत्ती २५:४६; २कोरिन्थी ५:१०

30 मिनु गो आंम अधिकारमी मारेइ पने मचाप्नुड। गो दोदेशो नेंनुड, मोदेशो पा निसाफ पाइनुड। आं निसाफ चहिं ठीक बाक्ब। मारदे हना आं दाक्शो मपथु, आं कली सोइक्ब आ देशो पाइनुड। यूहन्ना ६:३८

येसु सु बाक्म, देशो सांकछी

31 गो आं पर्वम लोत्र पाता हना, मेको लोत्र थमा बाक्ब, दे थमा मसुइक्नीनी। 32 आं पर्वम अर्कोमी लोत्र पाइब, गो मेको तुइक्नुड। 33 मेको लोत्र देंब चहिं यूहन्ना बाक्ब। गे मेको कली 'गे सु ननी?' दे हिल्लो पथ सोइक्ताक्नी। मिनु यूहन्नामी आं पर्वम थमा पा शेंताक्व। 34 आं पर्वम शेंशो चहिं मुरुमी शेंतीक ममाइ। पाप पशो आ पर्वम सजाइ रे ब्रोनीन, दे इन कली देंनुड। 35 यूहन्ना छेडछेड पा ब्रशो बत्ती खोदेशो बाक्त। गे मेको आ हाम्सोमी ग्येरशा बाक्चा दाक्ताक्नी। 36 मिनु यूहन्नामी आं पर्वम शेंशो ठेयब बाक्त हना यो, आं पर्वम मेको क्येडा ठेयब सांकछी का बाक्ब। आं सांकछी मार बाक्ब देशा हना, आं आफोमी आं कली पपाइश्शो गेय बाक्ब। मेको आं पशो गेयमी 'परमप्रभु यावेमी आं कली सोइक्ताक्व' दे इन कली शेंब। यूहन्ना ३:२; यूहन्ना १०:२५:३८ 37 आं कली सोइक्ब आं आफ आं सांकछी बाक्ब। गेपुकीमी आं आफ आ सेंदा गेनायो मनेनी। मेको कली गेनायो मतनी। मत्ती ३:१७ 38 आं आफ आ लोत्र इन थुंमी मबा। मोपतीके गेपुकीमी आं आफोमी सोइश्शो कली थमा मसुइक्नीनी। 39 गे परमप्रभु यावे आ लोत्र शेंसीन सीन बाक्नीनी। मारदे हना मो पशोनु, ब्रोइशा बाक्चा तांडसीब, दे मिम्नीनी। मिनु परमप्रभु यावे आ लोत्रमी आं पर्वम ब्रेक्शो बाक्त। लूका २४:२७,४४; २तिमोथी ३:१५-१७ 40 गे चहिं ब्रोइचा तकल, दे आं गे मपीनीनी।

41 गो मुर आन ठेयब सेल्टीके मब्राइनुड। 42 मिनु परमप्रभु यावेमी गेशो दाक्तीके गेपुकी नु मबाक्ब, दे गो तुइक्नुड। 43 गो आं आफ आ नेंमी जाक्ती। तन्न गेपुकीमी आं कली मब्रनी। सुइ मुर आंम आ नेंमी जाक्त हना, मेको कली चहिं ब्राइनीनी। मत्ती २४:५ 44 मोपा गे ठेयब सेलमुइनीनी। तन्न का ला परमप्रभु यावेमी इन कली 'रिम्शो ननी' देंचा मपुइसीनीनी। आं कली दोपा थमा सुइक्ने चाप्नीनी डा? यूहन्ना १२:४२-४३; १थिस्सलोनिकी २:६ 45 गो परमप्रभु यावे आ डोंइती इन कली दोस गेनन्नी, दे ममिम्तीन। गे मोसामी ब्रेक्शो लोत्रमी आस पाइनीनी। तन्न मेको मोसा आ ब्रेक्शो लोत्रमी इन कली दोस गेब। ब्यवस्था ३१:२४-२७ 46 गे मोसा आ लोत्र थमा सुइक्नी हना, आं कली यो थमा सुइक्नी वा। मारदे हना आं पर्वम ब्रेक्शो बाक्त। उत्पत्ती ३:१५; उत्पत्ती ४९:१०; ब्यवस्था १८:१५ 47 तन्न गे मोसा आ ब्रेक्शो लोत्र ठीक पा थमा मसुइक्नीनी। मिनु आं लोत्र दोपा थमा सुइक्ने चाप्नीनी डा?" दे येसुमी यहूदी आन कली देंत। लूका १६:३१

6

शुश मुर आन कली थुल्शो

मत्ती १४:१३-२१; मर्कूस ६:३०-४४; लूका ९:१०-१७

1 मिनु नोले येसु गालील डा समुन्द्र आइक्ची हांबु लत। गालील डा समुन्द्र कली तिबेरीयास समुन्द्र यो देंनीम। 2 मिनु शुश मुरपुकीमी येसु आ नोले खोइक्तेक्म। मारदे हना येसुमी छक लाक्चा डा गेय पा, रोइ पाइब आन कली सापाइश्शो तशो बाक्तेक्म। 3 मिनु येसु आ शेंसीबपुकी नु आइक्था डांडा गे डोइश्शा, तशो बाक्तेक्म। 4 मेना यहूदी आन पास्सा चाड जाक्चशो बाक्त। मोपतीके शुश मुर लांम गाक्शो बाक्तीक येसु आ नेक्था जाक्तेक्म। यूहन्ना २:१८; यूहन्ना ११:५५ 5 येसुमी शुश मुर जाक्शो तशा, फिलीप कली "शोब्ले ग्याप्शा, नेल्ल आन कली दोपा थुल्चा?" दे हिल्लो पाप्तु। 6 येसुमी चहिं "आं कली थमा सुइक्बा कों, मसुइक्बा" दे फिलीप आ थुं कोत्रचा कली मोदेशो देंत। येसुमी "गो छक लाक्चा डा गेय पाइनुड" दे तुइक्ताक्व। 7 मिनु फिलीपमी "मेको मुरपुकीमी इक्कका ला जाप्तेक्म हना, सहे निक्शी देनारमी यो मेको आन कली शोब्ले ग्याप्चा कली मजाक्दीप्ब" देंत। मेना देनार का काबु डा गेय आ गाल्च बाक्त। 8 मिनु सिमोन पत्रुस आ लोकब अन्द्रीयासमी येसु कली 9 "एकेर वोंइश आल का बाक्ब। मेको नु ५ ओटा क्योत्रज के शोब्ले नु डांड निक्शी बाक्ब। एको इश डा मुर आन कली ओशोमी मार गाप्बा डा?" देंत। 10 मिनु येसुमी "मुर आन कली निप्पतीन" देंत। मेकेर रिम्शो दिंम का बाक्त। मिनु मुरपुकी नेल्ल निस्साक्म। आल नु मीश मुर प्रोंइशा, ५ हजार खोइ वोंइश मुर बाक्तेक्म। 11 येसुमी मेको शोब्ले ताक्शा "गे रिम्शो पाइब बाक्नीनी" दे परमप्रभु यावे कली ठेयब सेल्शा, मुर आन कली शोब्ले योक्पाइक्तीमी। मोदेशो पा डांड यो योक्पाइक्तीमी। मिनु मुरपुकीमी दोशो जचा ब्वचा दाक्मा, मोशोन गेपाइक्तीमी। 12 मिनु मुर नेल्लेमी रूथ्री जामे नोले, येसुमी आ शेंसीब आन कली "एर ओंथ दोशो शोब्ले लीशो बाक्मे, मेको नेल्ल खुप्तीन" देंत। 13 मिनु गुप्शा, १२ डालो प्रिताक्म। मेको

लीशा गुप्शो शोब्ले डोंइती डा ५ ओटा रे दुम्शो बाक्तेकम। 14 मिनु मुरपुकीमी येसु आ पशो छक लाक्चा डा गेय तशा “रागीमी जाक्ब परमप्रभु यावे आ लोव्र पाइब एकोन बाक्त” देंतेकम। ब्यवस्था १८:१५ 15 मिनु येसुमी “आं कली ग्याइश्शा, पिप सेल्नीमी” दे तुइश्शा, आ का ला डांडा डोंइसाक्व। यूहन्ना १८:३६

येसु ब्वाक्कु तार गाक्शो

मत्ती १४:२२-२३; मर्कूस ६:४५-५२

16 मिनु नां रिक्चावानु, येसु आ शेंसीबपुकी गालील डा समुन्द्र आ नेक्था जाक्शा, 17 डोंगामी डोइश्शा, समुन्द्र शोक्शा, कापेरनाउम सहर गे लचा गोम्तेकमे। मेना नां रिक्शो बाक्त। येसु चहिं लेशशा मजाक्शो बाक्त। 18 मिनु ठेयब फश गिवार पा समुन्द्र डा ब्वाक्कु शुश मुइश्शा, डोंगा कली हिम्पाइक्तु। 19 मिनु येसु आ शेंसीबपुकी डोंगा डोइश्शा, २५ कि ३० स्तादीयोन खोदेशो जाक्दीम्मानु, येसु कली समुन्द्र डा ब्वाक्कु तार गाक्ना गाक्न आन डोंगा गे पिशो ताम्तेकम। मिनु मेको कली तशा “सु बाक्म” दे हिंतेकम। स्तादीयोन का १८५ मिटर खोदेशो बाक्ब। 20 मिनु येसुमी “गो नड, महिनीन” दे माइक्तीमी। 21 मिनु ग्येरसीशा, येसु कली डोंगामी डोइक्पाइक्तेकम। मिनु डोंगामी डोइक्पाइश्शा, कापेरनाउम जाक्दीत्तेकम।

येसु ब्रोंइचा गेब शोब्ले बाक्ब

22 मिनु आ दीसा नाक्त शोब्ले जाइब मुरपुकी मेक उइ बाक्शो बाक्तेकम। सिनाक्ती समुन्द्र आ नेक्था डोंगा का ला बाक्त। मिनु येसु आ शेंसीबपुकीमी मेको डोंगा लाइश्शा, कापेरनाउम गे लाम्तेकम, दे तुइक्ताकम। येसु चहिं आ शेंसीबपुकी नु डोंगामी मला, दे यो तुइक्ताकम। 23 तिबेरीयास सहर रे डोंगापुकी प्रभुमी परमप्रभु यावे कली “गे रिम्शो पाइब बाक्नीनी” देशा शोब्ले योक्तीक दिंम आ नेक्था जाक्तेकम। 24 मिनु मुरपुकीमी येसु नु आ शेंसीबपुकी मेकेर मबाक्शो तशा, डोंगा डोइश्शा, कापेरनाउम गे लशा, येसु कली माल्तेकम। 25 मिनु मेकेर जाक्दीश्शा, येसु कली थित्तेकम। मिनु मेकोपुकीमी “शेंब, एकेर गेना जाक्नी?” दे हिल्लो पाम्तेकम। 26 येसुमी “नोफा दाइश्शा नेनीन, आं छक लाक्चा डा गेय आ पर्बम ममाइ, तन्न शोब्ले जशा रूतीके आं कली माल्तीनी। 27 राक्चा डा जचा थोव्रक कली श्येत मपने। मराक्चा डा जचा थोव्रक कली चहिं गेय पने। मराक्चा डा जचा थोव्रक मार बाक्मे देशा हना, गेना हना यो ब्रोंइशा बाक्चा बाक्ब। रागीमी जरमेशोमी इन कली मेको जचा थोव्रक गेब। मारदे हना आ आफोमी रागीम जरमेशो कली आ छाप थोक्ताक्व” दे येसुमी शेंताक्व। यूहन्ना ५:३६ 28 मिनु येसु कली “परमप्रभु यावे आ देशो पचा कली मार गेय पचा माल्नीकी?” दे हिल्लो पाम्तेकम। 29 मिनु येसुमी “मेको परमप्रभु यावे आ गेय बाक्ब। गेपुकी परमप्रभु यावे आ सोइश्शा कली थमा सुइक्चा, परमप्रभु यावे आ गेय बाक्ब” दे माइक्तीमी। 30 मिनु मेकोपुकीमी लेंशा येसु कली “गे परमप्रभु यावे आ तौ ननी, दे कोंइचा कली मार छक लाक्चा डा गेय पाइनीनी? 31 आंइ किकी पिपीमी गोरशो रागीमी मन्ना शोब्ले जशो बाक्तेकम। ‘मेको आन कली सरीड रे शोब्ले गेम्तीमी’ दे ब्रेक्शो बाक्त” देंतेकम। भजन संग्रह ७८:२४; प्रस्थान १६:१३-१५ 32 मिनु येसुमी “नोफा दाइश्शा नेनीन, मोसामी इन कली स्वर्ग रे शोब्ले गेशो ममाइ, तन्न आं आफोमी इन कली थमा पा स्वर्ग रे शोब्ले गेब। 33 मारदे हना परमप्रभु यावेमी गेशो शोब्ले स्वर्ग रे यीब। मेकोमी रागी डा मुर आन कली गेना हना यो परमप्रभु यावे नु ब्रोंइचा गेब” दे माइक्तीमी। 34 मिनु मेकोपुकीमी “प्रभु, मेको शोब्ले गेना हना यो गेकी” दे पुंइतेकम।

35 मिनु येसुमी “गेना हना यो परमप्रभु यावे नु ब्रोंइचा गेब शोब्ले गो नड। सु सु आं गे पीनीमी, मेको शोव्रलु मबेक्नीम। मिनु आं कली थमा सुइक्बपुकी गेनायो तूतू मदाक्नीम। यूहन्ना ४:१४; यूहन्ना ७:३७ 36 गेपुकीमी चहिं आं कली तशो बाक्तीनी हना यो, थमा मसुइक्नीनी। 37 मिनु आं आफोमी आं कली गेशो मुरपुकी आं गे पीनीम। आं गे पीब आन कली गेनायो मतिल्लुडमी। मत्ती ११:२८ 38 मारदे हना गो आं दाक्शो गेय पथ ममाइ, तन्न आं कली सोइक्ब आ दाक्शो गेय पचा कली स्वर्ग रे जाक्शो नड। यूहन्ना ४:३४ 39 मिनु आं कली सोइक्ब आ दाक्शो मार बाक्ब देशा हना, आं कली गेशो मुर का यो मसाम्चा, नु नोले डा नाक्तीमी मेको आन कली सेंपाइक्चा बाक्ब। यूहन्ना १०:२८-२९; यूहन्ना १७:१२ 40 मिनु सु सुमी परमप्रभु यावे आ तौ, दे आं कली तुइक्नीमी नु थमा सुइक्नीम। मेको आन कली नोले डा नाक्तीमी सेंपाइश्शा, गेना हना यो ब्रोंइशा बाक्चा गेनुडमी। आं आफ आ दाक्शो गेय मेकोन बाक्त” दे यहूदी आन कली शेंताक्व। यूहन्ना ५:२९; यूहन्ना ११:२४

41 मिनु यहूदीपुकीमी येसु आ लोव्र नेंशा गन गन पाम्तेकम। मारदे हना येसुमी “गो स्वर्ग रे यिशो शोब्ले नड” देशो बाक्त। 42 मिनु मेकोपुकीमी “मार, एको योसेफ आ तौ येसु ममाइ? मेको आ आम आफ कली गो तुइक्नीकी”

देंतेक्म। मिनु मेकोमी “ ‘गो स्वर्ग रे जाक्शो नड’ दे दोपा देंने चाण्बा डा?” दे गन गन पाम्तेक्म। लूका ४:२२ 43 मिनु येसुमी मेको आन कली “गन गन मपने। 44 आं कली सोइक्ब आं आफोमी आं कली गेशो मुर ला आं गे पिने चापनीम। अरु चहिं मचापनीम। आं कली गेशो मुर आन कली नोले डा नाक्ती सेनुडमी। 45 मिनु परमप्रभु यावे आ लोत्र पाइब आन किताबमी ‘परमप्रभु यावेमी नेल्ल आन कली शेंब’ दे ब्रेक्शो बाक्त। तेकोमी आं आफ आ लोत्र नेंशा शेंसीबा, मेको आं गे पीब। यसैया ५४:१३ 46 सुइमी आं आफ कली मतामे। परमप्रभु यावे रे यीबमी ला आफ कली तशो बाक्त। यूहन्ना १:१८ 47 मिनु नोफा दाइशशा नेनीन, सुमी थमा सुइक्बा, मेको गेना हना यो ब्रोंइशा बाक्चा ताइब। यूहन्ना ३:१६ 48 मिनु गो ब्रोंइचा गेब शोब्ले नड। यूहन्ना ६:३५ 49 इन किकी पिपीमी गोरशो रागीमी मन्ना शोब्ले जचा ताम्तेक्म हना यो, बेक्तेक्म। १कोरिन्थी १०:३-५ 50 तन्न मुरपुकीमी स्वर्ग रे यिशो शोब्ले कली जाम्तेक्म हना, मबेक्थु ब्रोंइशा बाक्नीम। 51 गो स्वर्ग रे यिशो ब्रोंइतीक शोब्ले नड। सुमी मेको शोब्ले जाइबा, मेको गेना हना यो परमप्रभु यावे नु बाक्शा ब्रोंइब। मिनु रागी डा मुर आन कली ब्रोंइपाइक्चा, दे मार शोब्ले गेनुड देंशा हना, आं गेशो शोब्ले आं रां बाक्ब” दे शेंताक्व। मर्कूस १४:२२

52 मिनु यहूदीपुकीमी “एको मुरुमी आंइ कली दोपा आ रां ब्वचा गेने चाण्बा?” दे लोत्र पा जिम्तेक्म। 53 मिनु येसुमी “नोफा दाइशशा नेनीन, गे रागीमी जरमेशो आं रां मब्वाइतीनी हना, नु आं हुश मतूतीनी हना, गेना हना यो परमप्रभु नु ब्रोंइशा बाक्चा गेब सोक्त गे नु मबाक्ब। 54 सु सुमी आं रां ब्वाइनीमी नु आं हुश तूनीमी, मेको गेना हना यो ब्रोंइशा बाक्चा ताइनीम। मारदे हना गो मेको कली नोले डा नाक्ती सेंपाइक्नुडमी। मत्ती २६:२६-२८ 55 आं रां थमा जचा थोत्रक बाक्ब। आं हुश यो थम तूचा थोत्रक बाक्ब। 56 सुमी आं रां ब्वाइबा नु आं हुश तूबा, मेको आं आगाम बाक्ब। मिनु गो मेको आ आगाम बाक्नुड। यूहन्ना १५:४; १यूहन्ना ३:२४ 57 दोपा ब्रोंइशा बाक्ब आं आफोमी आं कली सोइशशा ब्रोंइपाइय्यी, मोपा आं रां ब्वाइब यो गो रे पा ब्रोंइचा ताइब। 58 मेको स्वर्ग रे यिशो शोब्ले बाक्ब। इन किकी पिपीमी शोब्ले जशा बेक्तेक्म। गो मेको खोदेशो शोब्ले मगेनुड। सुमी चहिं आं शोब्ले जाइबा, मेको गेना हना यो ब्रोंइशा बाक्ब” देंत। 59 मेको लोत्र येसुमी कापेरनाउम सहर डा ग्रुम्तीक खिंमी यहूदी आन कली शेंताक्व।

गेना हना यो ब्रोंइचा गेब लोत्र

60 मिनु मेको लोत्र नेंशा, येसु आ शेंसीबपुकी शुशेमी “एको आं शेंशो कका पा कशो लोत्र बाक्त। सु नेंने चाण्बा डा?” देंमुतेक्म। 61 येसुमी चहिं “आं शेंसीबपुकीमी आं लोत्र आ पबर्म गन गन पाम्तेक्म” दे तुइशशा, मेको आन कली “मार, आं पशो लोत्र नेंशा, चुरशा आं कली प्रोंइनीनी? 62 मिनु रागीमी जरमेशो आ डोंइती डा बाक्तीकेमी लेशशो ताइतीनी हना, मार मिम्नीनी? लूका २४:५०-५१ 63 परमप्रभु यावे आ सोक्त ब्रोंइचा गेब बाक्ब। मुरुम चहिं मारेइ पने मचापनीम। आं देशो लोत्र परमप्रभु यावे आ सोक्ती डा ब्रोंइचा गेब लोत्र बाक्ब। 64 तन्न गे का निक्शी आं कली थमा मसुइक्ब बाक्नीनी” देंत। मारदे हना येसुमी डोंइती रे आ कली थमा मसुइक्ब सु सु नमी, दे तुइशशा बाक्त। मिनु येसु आ शेंसीब का येसु कली साइक्ब आन कली वारच पाइब दुम्ब, दे यो तुइशशा बाक्त। 65 मिनु येसुमी “आं आफोमी आं कली गेशो मुर ला आं गे पिने चापनीम, दे डोंइती रे माइक्तन्नी” देंत।

66 मिनु मोदेशो शेंशो आ पबर्म शुशेमी येसु आ नोले खोइक्चा प्रोंइतेक्म। 67 मिनु येसुमी आ १२ जना शेंसीब आन कली “गेपुकी यो लाइनीनी?” दे हिल्लो पाम्तीमी। 68 मिनु सिमोन पत्रुसमी “प्रभु, गो सु का आ नोले खोइक्नीकी? गे गेना हना यो ब्रोंइशा बाक्चा डा लोत्र पाइनीनी। 69 गे परमप्रभु यावेमी योत्रशा सोइशशा ननी, दे तुइशशा थमा सुइक्नीकी” देंत। मत्ती १६:१६ 70 मिनु येसुमी “गो गे १२ जना इन कली योत्रतन्नी। तन्न इन दातेमी सैतान का बाक्ब” देंत। 71 येसुमी मेको लोत्र इस्कारीयोत डा सिमोन आ तौ यहूदा आ पबर्म देशो बाक्त। मारदे हना यहूदा मेको १२ जना आन दाते डा का दुम्शा यो येसु कली साइक्ब आन कली वारच पाइब दुम्त।

7

बाली ओंइतीक चाडम लशो

1 मिनु नोले येसु गालील रागीमी हिरना हिरन बाक्त। मारदे हना यहूदीपुकीमी येसु कली साइक्चा माल्तीके यहूदीया रागीमी लचा मदाक्शो बाक्माक्त। यूहन्ना ४:४३ 2 मिनु यहूदी आन बाली ओंइतीक चाड जाक्चशो बाक्त। लेवी २३:३४-३६ 3 मिनु आ लोकबपुकीमी येसु कली “इ शेंसीब आन कली इ गेय कोंइचा कली यहूदीया रागी लावो। यूहन्ना २:१२; मत्ती १२:४६; प्रेरित १:१४ 4 मुरपुकीमी इ कली तुइक्पांइसीचा दाक्नेवे हना, खुइशशा गेय मपावो। इ

पशो गेय मुर आन कली कोंइदीमी” दैतेक्म। 5 मारदे हना आ लोकबपुकीमी यो येसु कली थमा मसुइक्बाक्तेक्म। 6 मिनु येसुमी आ लोकब आन कली “मुल सम्म आं लची मजा। गेपुकी लने चाप्नीनी। यूहन्ना २:४ 7 रागी डा मुरपुकीमी इन कली श्येत मगेनीम। आं कली चहिं श्येत गेनीम। मारदे हना गो मेको आन कली ‘आन पशो गेय मरिम्शो बाक्ब’ दे कोंइनुडमी। यूहन्ना १५:१८ 8 गे लने, गो मुल मलाइनुड। मुल आं लची मजा” दे माइक्तीमी। 9 मो देंशा येसु गालील रागीमी बाक्त।

10 मिनु येसु आ लोकबपुकी चाड मानेथ लाम्तेक्म। मिनु नोले येसु यो मुर आन मतचा डा पा यरूसलेम लत। यूहन्ना २:१३ 11 मिनु चाडमी यहूदीपुकीमी येसु कली माल्शा “मेको ते बाक्मे” दे हिल्लो पाम्तेक्म। 12 मिनु मुरपुकीमी येसु आ पर्वम शुश खुइश्शा लोत्र पमुम्तेक्म। का निक्शीमी “रिम्शो मुर बाक्ब” दैतेक्म। का निक्शीमी चहिं “ममाइ, मुर आन कली हेंथे गाक्पाइक्ब बाक्ब” दैतेक्म। 13 नेल्लेमी यहूदी आन क्येडा हिंशा, खुइश्शा लोत्र पाम्तेक्म। यूहन्ना ९:२२; यूहन्ना १२:४२; यूहन्ना १९:३८

येसु चाडम बाक्शो

14 मिनु बाली ओंइतीक चाड डा नाक्त का येसुमी परमप्रभु यावे आ खिंमी लशा, मुर आन कली शेंताक्व। 15 मिनु यहूदीपुकीमी छक लाक्शा “मेको गेनायो मशेंसीशो मुरुम यो दोपा इश डा जोक्गा?” दैमुम्तेक्म। मत्ती १३:५६ 16 मिनु येसुमी मेको आन कली “आं शेंतीक आं के ममाइ, तन्न आं कली सोइक्ब के बाक्ब। 17 सु मुरुमी परमप्रभु यावे आ दाक्शो पाइबा, मेकोमी आं शेंतीके लोत्र परमप्रभु यावे के बाक्बा कों, आंम के बाक्बा, दे तुइक्ब। 18 सुम चहिं आंम लोत्र शेंबा, मेकोमी आंम कली ठेयब सेल्चा दाक्ब। आं कली सोइक्ब परमप्रभु यावे कली ठेयब सेल्चा दाक्ब चहिं थमा पा काइ पाप मपाइब बाक्ब। यूहन्ना ५:४१,४५

19 मोसामी इन कली परमप्रभु यावे आ अरेशो लोत्र गेशो बाक्त। मिनु गेपुकी मारदे मेको मपाइनीनी? मारदे आं कली साइक्चा माल्नीनी?” दैत। रोमी २:१७-२४; यूहन्ना ५:१६-१८ 20 मिनु मुरपुकीमी “सुमी इन कली साइक्चा माल्बा? वोल्मी इन कली सुम्शो बाक्तीके ‘गे आं कली साइक्चा माल्तीनी’ दे देंनीनी” दैतेक्म। यूहन्ना १०:२० 21 येसुमी “गो गेय का पाता। गे मेको तशा, छक लाक्तीनी। यूहन्ना ५:१६ 22 मोसामी इन कली ‘खोइक्तीक चिनु खोइक्चा माल्ब’ दे अरेशो लोत्र गेशो बाक्त। मेको मोसा आ अरेशो ममाइ, इं किकी पिपी आन अरेशो बाक्त। मिनु गेपुकीमी नाइक्तीक नाक्त खोइक्तीक चिनु खोइक्तीनी। उत्पत्ती १७:१०-१२; लेवी १२:३ 23 मोसा आ गेशो अरेशो लोत्र टिचा कली नाइक्तीक नाक्त यो खोइक्तीक चिनु खोइक्तीनी। गो चहिं मुर का आ रां नेल्ल सापदुनु, गेपुकी मारदे गाइक्तीनी? 24 कुल कोव्रशा, निसाफ मपने। तन्न कुल मकोव्रथु निसाफ पने” दे माइक्तीमी।

25 मिनु यरूसलेम डा मुर का निक्शीमी “मुरुमी मेको कली साइक्चा माल्शो ममाइ? 26 मिनु एकेर बाक्शा, मुर नेल्ल आन कली शेंब। मेको कली मारेइ मदेनीमी। मिनु ठेयब मुरपुकीमी ‘एको खीस्त बाक्त’ दे थमा पा तुइक्ताक्मे? 27 गोपुकीमी चहिं मेको मुर ते रे जाक्मे, दे तुइक्तीकी। तन्न खीस्त जाक्त हना, ते रे जाक्बा, दे सुइमी मतुइक्तीम” दे दैमुम्तेक्म। हिब्रू ७:३ 28 मोपतीके येसुमी परमप्रभु यावे आ खिंमी मुर आन कली ठेयब सेंदा पा “गेपुकीमी आं कली तुइक्तीनी। मिनु गो ते डा नड, मेको यो तुइक्तीनी? आंमा मिम्शा मजाक्ड। तन्न आं कली सोइक्ब थमा पा परमप्रभु यावे बाक्ब। मिनु गेपुकीमी मेको कली मतुइक्तीनी। 29 गो चहिं मेको कली तुइक्नुड। मारदे हना गो मेको आ बाक्तीक रे जाक्शो नड। मेकोम आं कली सोइक्ताक्यी” दे शेंताक्मी। मत्ती ११:२७ 30 मिनु यहूदीपुकीमी येसु कली ग्याइक्चा माल्तेक्म। तन्न सुइमी मग्याइक्तेम। मारदे हना येसु कली ग्याइक्ची ना मजाक्शो बाक्त। यूहन्ना ८:२०; लूका २३:५२ 31 मिनु शुश मुरपुकीमी मेको कली थमा सुइक्तेक्म। मेकोपुकीमी “खीस्त अर्को बाक्त हना, मेकोमी एको क्येडा शुश छक लाक्चा डा गेय पने चाप्बा डा?” दैतेक्म।

32 मिनु फरिसीपुकीमी मुर आन पशो लोत्र नेशा, ठेयब चढेब नु फरिसीपुकीमी “येसु कली ग्याइक्चा” दे पिप आ गेय पाइब ठेयब मुर आन कली सोइक्ताक्म। 33 मिनु येसुमी “गो गेपुकी नु इक्का नाक्ती सम्म बाक्नुड। मिनु नोले आं कली सोइक्ब आ बाक्तीकेमी लाइनुड। यूहन्ना १३:३३ 34 मेना गेपुकीमी आं कली माल्नीनी। तन्न मथित्नीनी। गे आं बाक्तीकेमी जाक्ने मचाप्नीनी” दे माइक्तीमी। यूहन्ना ८:२१ 35 मिनु यहूदीपुकीमी “एको ते लचा चिक्शो बाक्मे? मिनु गोपुकीमी एको कली मथित्नीकी? ग्रीस डा मुर आन बाक्तीक लशा, मेकेर ब्रशा बाक्शो यहूदी आन कली ममाइ, तन्न ग्रीस डा मुर आन कली शेंचा दाक्बा, को? 36 आ देंशो ‘गेपुकीमी आं कली माल्नीनी, तन्न मथित्नीनी’ मिनु ‘आं बाक्तीकेमी जाक्ने मचाप्नीनी’ दे एको दोदेंशो लोत्र पवा?” दैमुम्तेक्म।

यहूदीपुकी येसु आ पर्वम ब्राशो

37 मिनु बाली ओंइतीक चाड नुप्ची नाक्त नेल्ल क्येडा ठेयब नाक्ती बाक्त। मेना येसुमी मुर आन कली “सु सुमी तूतू दाक्नीमी, मेको आं गे पिशा तूडमेक्ल। लेवी २३:३६; यूहन्ना ४:१०; यसैया ५५:१; प्रकाश २२:१७ 38 सु सुमी आं कली थमा सुइक्नीमी, मेको आन रां रे ब्रोंइचा गेब ब्वाक्कु बुक्ब, दे परमप्रभु यावे आ लोव्वमी ब्रेक्शो बाक्ब” दे शेंताक्मी। यसैया ५८:११; येरमीया ३१:१२ 39 मेको आ शेंशो दोदेशो रुम्सीब देशा हना, येसुमी परमप्रभु यावे आ सोक्त आ पर्वम शेंशो बाक्त। येसु कली थमा सुइक्बपुकीमी मेको सोक्त कली तचशो बाक्तेक्म। तन्न मेना सम्म परमप्रभु यावे आ सोक्त थमा सुइक्ब आन कली मगेशो बाक्त। मारदे हना येसु आ आफ आ छेडछेडम लाइक्चा मपुंडसीशो बाक्त। यूहन्ना १६:१७

40 मिनु येसु आ शेंशो नेंशा, मुर का निक्शीमी “एकोन थमा परमप्रभु यावे आ लोव्व पाइब बाक्ब” देंतेक्म। यूहन्ना ६:१४ 41 का निक्शीमी “एकोन ख्रीस्त बाक्त” देंतेक्म। का निक्शीमी “ख्रीस्त गालील रागी रे जाक्बा डा? यूहन्ना १:४६ 42 परमप्रभु यावे आ लोव्वमी ‘ख्रीस्त दाऊद आ खिं डा मुर रे नु दाऊद आ गाउं बेथलेहेम रे जाक्ब’ मदेम डा?” देंतेक्म। मत्ती २२:४२; मीका ५:१; मत्ती २:५-६ 43 मोदुम्तीके मुरपुकी येसु आ पर्वम ब्रातेक्म। यूहन्ना ९:१६ 44 मिनु का निक्शीमी येसु कली ग्याइक्चा मालतेक्म। तन्न सुइमी मेको कली मग्याइक्तेम।

45 मिनु मेको पिप आ गेय पाइब ठेयब मुरपुकी ठेयब चढेब नु फरिसी आन बाक्तीक लेम्मा बाक्त। मिनु मेको आन कली “मारदे मेको कली मचाक्नी?” दे हिल्लो पामेनु, 46 “मेको मुरुम शेंशो खोदेशो पा सुइमी गेनायो मशेदेम” देंमा बाक्त। मत्ती ७:२८-२९ 47 मिनु फरिसीपुकीमी “इन कली यो हेंथे खोइक्पदा? 48 ठेयब मुरपुकी नु फरिसीपुकीमी यो मेको कली थमा सुदमे? 49 तन्न परमप्रभु यावे आ अरेशो लोव्व मजोक्बपुकी सराप रशो बाक्नीम” दे हुइक्तेमे बाक्त।

50 मिनु डोंइती येसु आ बाक्तीक जाक्शो फरिसी आन हुल डा निकोदेमस माइशो मुरुमी यूहन्ना ३:१-२ 51 “आंइ ऐन कानुनमी मुर आ पशो नेंशा ला निसाफ पाइनीम, ममाइ?” देंत। ब्यवस्था १:१६ 52 मेकोपुकीमी “गे यो गालील रागी डा नवे? परमप्रभु यावे आ लोव्व ब्रेक्शो किताब पढेशा कोव्वडो। गालील रे सुइ परमप्रभु यावे आ लोव्व पाइब मग्रूब, दे मतुइक्नेवे?” देंमा बाक्त। 53 मिनु नेल्ल छुल छाल बोक्शा, खिं लमा बाक्त।

8

फरिसीपुकीमी येसु आ थुं थाम्शो

1 मिनु मेको नेल्ल खिं लमानु, येसु चहिं जैतून डांडा डोंइसाक्व। 2 आ दीसा सुनी कना यिशा, परमप्रभु यावे आ खिं लत। मिनु मुर नेल्ल येसु आ नेक्था जाक्तेक्म। मिनु येसुमी निश्शा, मुर आन कली शेंताक्मी। 3 मिनु सास्त्री नु फरिसीपुकीमी येसु आ बाक्तीकेमी मीश मुर का चाक्तेक्म। मेको मीश मुर ग्युंवे पशा यो अरु वोंइश नु इप्शो बाक्माक्त। मेको कली मुर आन दातेमी राप्पाइक्तेक्म। सास्त्री यहूदी आन कली परमप्रभु यावे आ अरेशो लोव्व शेंब बाक्शो बाक्तेक्म। 4 मिनु येसु कली “शेंब, एको मीश मुर ग्युंवे पशो बाक्त हना यो, अरु आ वोंइश नु इप्शा बाक्शो थित्चा पुंडसाक्व 5 मिनु परमप्रभु यावे आ अरेशो लोव्वमी मोसामी ‘मोदेशो पाइब कली फुल्लु आप्शा साइक्चा’ दे आंइ कली अरेशो बाक्त। गे मार देंनीनी?” दे हिल्लो पाम्तेक्म। लेवी २०:१० 6 मेकोपुकीमी येसु आ थुं थाम्शा, दोस गेचा कली मो देंतेक्म। मिनु येसुमी बाप्शा, फुरक शाक्शा ब्रेक्ताक्व। 7 मेकोपुकीमी “एको मीश मुर कली मार पचा?” दे हिल्लो पना पन बाक्तेक्म। येसुमी चहिं राप्शा, मेको आन कली “गेनायो पाप मपाइबमी डोंइती फुल्लु आबल” देंत। रोमी २:१ 8 मिनु लेंशा बाप्शा, फुरक शाक्शा ब्रेक्ताक्व। 9 मिनु येसु आ लोव्व नेंशा, दोस गेब मुर जोक्ब तुइक्ब खाल्पा रे का का पा नेल्ल लाम्तेक्म। मिनु येसु नु मेको मीश मुर ला लीताक्स। 10 येसुमी नेल्ल लशो तशा, मीश मुर कली “इ कली चाक्बपुकी ते लमा? इ कली साइक्ब सुइ मलीमा?” दे हिल्लो पवानु 11 “प्रभु, सुइ मलीम” देंत। मिनु येसुमी “गो यो इ कली मसाइक्नुड। लावो, मिनु लेंशा पाप मपावो” देशा सोइक्ताक्व। यूहन्ना ५:१४

येसु रागी डा छेडछेड

12 मिनु येसुमी लेंशा फरिसी आन कली “गो रागी कली छेडछेड नड। आं नोले खोइक्बपुकी गेनायो छिडछिडमी मगाक्नीम। ब्रोंइतीक छेडछेड ताइनीम” देंत। यूहन्ना १:५,९; यसैया ४९:६; यसैया ६०:२०; मत्ती ५:१४-१६ 13 मिनु फरिसीपुकीमी येसु कली “गे इ पर्वम आंमा लोव्व पाइनेवे। मोपतीके इ लोव्व थमा ममाइ” देंतेक्म। 14 मिनु येसुमी मेको आन कली “गो आं पर्वम आंमा लोव्व पाता हना यो, आं लोव्व थमा बाक्ब। मारदे हना ते रे जाक्डा, ते लाइनुडा, मेको

तुइक्नुड। गेपुकी चहिं गो ते रे जाक्डा, ते लाइनुडा मतुइक्नीनी। यूहन्ना ५:३१; यूहन्ना ७:२८ 15 मिनु गेपुकी मुर आन कुल कोव्रशा निसाफ पाइनीनी। गो चहिं सुइ आन कली निसाफ मपाइनुड। यूहन्ना ३:१७ 16 गो निसाफ पाता हना यो, आं निसाफ ठीक बाक्ब। मारदे हना गो का ला दुम्शा निसाफ मपाइनुड। गो नु आं कली सोइक्ब आं आफोमी निसाफ पाइब। 17 इन ऐन कानुनमी यो 'मुर निक्शी आस देशो नेशो लोव्र थमा दुम्ब' दे ब्रेक्सीशो बाक्ब। ब्यवस्था १९:१५ 18 गो आं पर्वम लोव्र पाइनुड। मिनु आं कली सोइक्ब आं आफोमी आं पर्वम लोव्र पाइब" दे माइक्तीमी। 19 मिनु मेकोपुकीमी येसु कली "इ आफ ते बाक्बा?" दे हिल्लो पाम्तेक्म। येसुमी "गेपुकीमी आं कली मतुइक्नीनी। आं आफ कली यो मतुइक्नीनी। आं कली तुइक्तीनी हना, आं आफ कली यो तुइक्तीनी वा" दे माइक्तीमी। यूहन्ना १४:७ 20 येसुमी परमप्रभु यावे आ खिं डा शोप वोइक्तीक कोठा आ डोंइती बाक्शा, मोदेशो शेंशो बाक्त। परमप्रभु यावे आ खिंमी बाक्शा शेंशा यो, सुइमी मग्याइक्तेम। मारदे हना मेको कली ग्याइक्ची ना मजाक्शो बाक्त। यूहन्ना ७:३०

आ आफोमी येसु कली सोइश्शो

21 मिनु येसुमी लेशा यहूदी आन कली "गो लाइनुड, गे चहिं आं कली माल्नीनी। मिनु मरिम्शो पतीकेमी गुम्शा बेक्नीनी। गे आं लतीकेमी जाक्ने मचाप्नीनी" देंत। यूहन्ना ७:३४-३५; यूहन्ना १३:३३ 22 मिनु यहूदीपुकीमी "एकोमी आंम कली सांइसीबा, को? मारदे 'आं लतीकेमी जाक्ने मचाप्नीनी' देंबा" देंमुम्तेक्म। 23 मिनु येसुमी मेको आन कली "गेपुकी उइ डा ननी। गो चहिं इर डा नड। गेपुकी रागी डा ननी। गो चहिं रागी डा मनड। यूहन्ना ३:३१ 24 मोपतीके गो इन कली 'गे इन मरिम्शो पतीकेमी गुम्शा बेक्नीनी' देंती। गेपुकीमी 'गो मरिम्शो गेय रे प्रोंइब ननी' दे आं कली थमा मसुइक्तीनी हना, इन मरिम्शो पतीकेमी गुम्शा बेक्नीनी" देंत। यसैया ४३:१० 25 मिनु यहूदीपुकीमी "गे सु नवे" दे हिल्लो पाम्तेक्म। येसुमी मेको आन कली "गो इन कली डोंइती रे मार देंडा? मारदे गो गेपुकी नु लोव्र पडा? 26 गो इन पर्वम शुश लोव्र पचा नु शुश निसाफ पचा माल्नुड। आं कली सोइक्ब आं आफ आ लोव्र थमा लोव्र बाक्ब। मेको आ लोव्र नेशा, रागी डा मुर आन कली शेंनुड" देंत। 27 मिनु येसुमी आ आफ आ पर्वम लोव्र पाप्नु, दे मेकोपुकीमी मरुबेम। 28 येसुमी "गेपुकी रागीमी जरमेशो कली क्युक्नीनु, गो सु नडा, दे तुइक्नीनी। मिनु गो आंमा मिम्शो मारेइ मपाइनुड। तन्न आं आफोमी आं कली दोदेशो शेंदा, मोदेशो लोव्र इन कली शेंनुड। यूहन्ना ३:१४; यूहन्ना १२:३२ 29 मिनु आं कली सोइक्ब गो नु बाक्ब। आं कली गेनायो मप्रोंइब। मारदे हना गो आ दाक्शो गेय ला पाइनुड" दे मुर आन कली देंत।

थमा पा प्रोंइशो मुर

30 एको लोव्र नेशा, शुश मुरुमी येसु कली थमा सुइक्तेक्म। 31 मिनु येसुमी आ कली थमा सुइक्ब यहूदी आन कली "गेपुकी आं देशो पना पन बाक्तीनी हना, थमा पा आं शेंसीब ननी। यूहन्ना १५:७ 32 थमा माइश्शो सु बाक्मे, दे तुइक्नीनी। मिनु थमा माइश्शोमी इन कली प्रोंइब" दे येसुमी देंत। 33 मेकोपुकीमी "गो अब्राहाम आ चच युइ नकी। मुल सम्म गो सुइ आन वाइलीम वाइल मदुम्शो बाक्तक। मारदे 'थमा माइश्शोमी इन कली प्रोंइब' देंनीनी?" दे हिल्लो पाम्तेक्म। मत्ती ३:९ 34 येसुमी "नोफा दाइश्शा नेनीन, सु सुमी पाप पाइनीमी, मेको पाप आ वाइलीम वाइल बाक्नीम। 35 वाइलीम वाइल खिं डा मुर मबाक्नीम, तौ चहिं खिं डा मुर बाक्ब। 36 मिनु तौमी इन कली प्रोंइतु हना, गेपुकी थमा पा प्रोंइसीशो मुर दुम्नीनी" देंत। रोमी ६:१६,१८,२२

अब्राहाम आ आल नु सैतान आ आल

37 मिनु येसुमी "गेपुकी अब्राहाम आ चच युइ ननी, दे गो तुइक्नुड। मोपा यो गे आं कली साइक्चा माल्नीनी। मारदे हना आं लोव्र नेशा यो, थमा मसुइक्नीनी। 38 गो आं आफ आ पशो तशा, शेंनुड। गेपुकीमी चहिं इन आफ आ देशो नेशा, मार मार पाइनीनी" दे माइक्तीमी।

39 मेकोपुकीमी "गो आंइ आफ अब्राहाम बाक्ब" देंमानु, येसुमी "गेपुकी अब्राहाम आ चच युइ ननी हना, अब्राहाम आ पशो गेय खोदेशो पनी वा। 40 गो परमप्रभु यावेमी देशो नेशा, इन कली शेंथ जाक्शो बाक्ती हना यो, गेपुकीमी आं कली साइक्चा माल्नीनी। अब्राहाममी इन खोदेशो गेय गेनायो मपव। 41 गेपुकीमी चहिं इन आफ आ पशो गेय खोदेशो पाइनीनी" दे माइक्तीमी। मेकोपुकीमी "गेपुकी मुर आन तौ मनकी। गोपुकी आंइ के आफ का बाक्ब। मेको चहिं परमप्रभु यावे बाक्ब" देंतेक्म। 42 मिनु येसुमी "परमप्रभु यावे इन आफ बाक्त हना, गेपुकी आं कली दाक्तीनी वा। मारदे हना गो परमप्रभु यावे रे रागीमी जाक्ती। गो आंमा जाक्शो मनड। तन्न आं आफोमी सोइक्ताक्की। 43 आं देशो

लोत्र मारदे मरुप्नीनी? गे आं लोत्र नेशा, फाल्ने मचाप्नीनी। १कोरिन्थी २:१४ 44 इन आफ सैतान बाक्ब। मिनु गे इन आफ आ दाक्शो पचा दाक्नीनी। मेको चहिं डोंइती रे मुर आन कली साइक्ब नु जोल पाइब बाक्ब। मारदे हना मेको नु थमा देशो बाक्सीन मबा। मोपतीके जोल ला पाइब। मेको जोल पना पन बाक्ब। जोल आ आफ बाक्ब। १यूहन्ना ३८-१०; उत्पत्ती ३:४, १९ 45 गे आं कली थमा मसुइक्नीनी। मारदे हना गो थमा लोत्र पाइनुड। 46 गेपुकीमी आं कली 'गे मरिम्शो पाइब नवे' दे दोसी सेल्ने चाप्नीनी डा? गो थमा लोत्र पाता हना, मारदे आं कली थमा मसुइक्नीनी? २कोरिन्थी ५:२१; १पत्रुस २:२२; १यूहन्ना ३:५; हिब्रू ४:१५ 47 सु चहिं परमप्रभु यावे रे जाक्बा, मेको परमप्रभु यावे आ लोत्र नेंब। गेपुकी परमप्रभु यावे रे मजाक्नी। मोपतीके परमप्रभु यावे आ लोत्र नेंने मचाप्नीनी” दे माइक्तीमी। यूहन्ना १८:३७

48 मिनु यहूदीपुकीमी “गे सामरीया डा बाक्ते। गे वोल्मी सुम्शो बाक्ते, दे थमा लोत्र मपका डा?” देंतेक्म। यूहन्ना ७:२० 49 येसुमी “आं कली वोल्मी मसुम्यी। गो आं आफ कली मान पाइनुड। गे चहिं आं कली मान मपथु आइक्च सेल्नीनी। 50 गो आंम कली ठेयब मसेल्सीनुड। आं कली ठेयब सेल्ब का बाक्ब। मेको ठीक निसाफ पाइब यो बाक्ब” देंत। 51 मिनु येसुमी “नोफा दाइश्शा नेनीन, सुमी आं देशो लोत्र टीबा, मेको गेनायो मबेक्ब” देंत। यूहन्ना ६:४०, ४७ 52 मिनु यहूदीपुकीमी “गे वोल्मी सुम्शो बाक्ते, दे गो मुल तुइक्ताक्क। अब्राहाम नु परमप्रभु यावे आ लोत्र पाइबपुकी बेक्तेक्म। गे चहिं ‘सुमी आं देशो टीबा, मेको गेनायो मबेक्ब’ देंते। 53 आंइ किकी पिपी अब्राहाम बेक्माक्त। गे मेको क्येडा ठेयब नवे? मिनु परमप्रभु यावे आ लोत्र पाइब यो बेक्मा बाक्त। गे सु नवे डा?” देंतेक्म। 54 येसुमी “गे ठेयब सेल्साक्यी हना, गो ठेयब मदुम्नुड। आं आफोमी चहिं आं कली ठेयब सेल्ब। गे आं आफ कली ‘आंइ परमप्रभु यावे’ देंनीनी। यसैया ६३:१६ 55 गेपुकीमी मेको कली मतुइक्नीनी। तन्न गो तुइक्नुड। गो ‘मेको कली मतुइक्नुड’ देंती हना, इन खोदेशो जोल पाइब दुम्नुड। तन्न गो मेको कली तुइक्नुड। मिनु आ शेंशो पाइनुड। यूहन्ना ७:२८-२९ 56 इन किकी पिपी अब्राहाममी आं नाक्त जाक्शो तचा दाक्शो बाक्माक्त। मिनु आं जाक्शो तशा ग्येरसाक्व” दे येसुमी देंत। 57 मिनु यहूदीपुकीमी “गे मुल सम्म ५० बर्स मजाक्दीश्शो बाक्ते। मिनु अब्राहाम कली तशो बाक्नेवे डा?” देंतेक्म। 58 मिनु येसुमी “नोफा दाइश्शा नेनीन, गो अब्राहाम क्येडा डोंइती रे बाक्शो नड” देंत। यूहन्ना १:१२ 59 मिनु यहूदीपुकीमी “फुल्लु आप्शा साइक्चा” दे फुल्लु गुप्तेक्म। तन्न येसु खुंडसाक्व। मिनु परमप्रभु यावे आ खिं रे गूशा गाक्त। यूहन्ना १०:३१

9

मिक्च मताइब कली सापाइश्शो

1 मिनु येसु लना लन बाक्मेनु, जरमेशो रेन मिक्च मताइब मुर का गुम्तु। 2 मिनु आ शेंसीबपुकीमी येसु कली “शेंब, मारदे मेको मिक्च मताइब जरमेशो बाक्मे? मेकोमी पाप पवा देय आ आम आफोमी पाप पाम्से?” दे हिल्लो पाम्तेक्म। लूका १३:२ 3 मिनु येसुमी “एको मुरुमी पाप पशो ममाइ, आ आम आफोमी यो मपाम्से। तन्न परमप्रभु यावे आ गेय कोंइचा कली एको मिक्च मताइब दुम्शो जरमेशो बाक्त। यूहन्ना ११:४ 4 मिनु गोपुकीमी आं कली सोइक्ब आ गेय नाक्ती पचा माल्नय। नां रिक्मेनु, सुइमी गेय पने मचाप्नीम। यूहन्ना ५:१७; येरमीया १३:१६ 5 गो रागीमी बाक्डानु, रागी कली छेडछेड नड” देंत। यूहन्ना ८:१२; यूहन्ना १२:१५ 6 गो देशा येसुमी खपीमी तोक्शा, नाक्चुक नु खप निशा, मेको मुर आ मिक्चीमी खेक्ताक्व। मर्कूस ८:२३ 7 मिनु मिक्च मताइब कली “सिलोआ डा दोम्लीम लशा चिक्सो” दे माइक्तु। सिलोआ देशो चहिं सोइश्शो, दे रुम्सीब। मिनु मेको लशा चिक्से बाक्त। मिनु मिक्च ताइब दुम्शा, लेश्शा जाक्त।

सापाइश्शो मुर नु यहूदीपुकी

8 मिनु आ गाउं डा मुर नु मिक्च मताइब पुंडब मुर दे तुइक्बपुकीमी “मिक्च मताइब पुंडब एको ममाइ डा?” देंतेक्म। 9 का निक्शीमी “मेकोन बाक्त” देंतेक्म। का निक्शीमी चहिं “ममाइ, मेको खोदेशो बाक्त” देंतेक्म। आ चहिं “गो मेकोन नड, शां” देंत। 10 मुरपुकीमी “दोपा मिक्च ताइब दुमे, मिनु?” दे हिल्लो पाम्तेक्म। 11 मेकोमी “येसु माइश्शोमी खप निशा, आं मिक्चीम खेक्ताक्यी। मिनु ‘सिलोआ डा दोम्लीम लशा चिक्सो’ दे माइक्ती। मिनु गो दोम्ली लशा चिक्सीडानु, मिक्च ताइब दुम्ती” दे माइक्तीमी। 12 मिनु “येसु माइश्शो ते बाक्मे” दे हिल्लो पामेनु “डाद, ते लमे, गो मतुइक्नुड” दे माइक्तीमी।

13 मिनु आ मिक्च साशो मुर कली फरिसी आन बाक्तीक चाक्दीत्तेक्म। 14 येसुमी खप निशा, आ मिक्चीमी खेक्शा सापाइशो नाक्त चहिं नाइक्तीक नाक्त बाक्त। 15 मोपतीके फरिसीपुकीमी यो लेंशा मेको कली “दोपा मिक्च ताइब दुमे?” दे हिल्लो पाम्तेक्म। मिनु “खप निशा, आं मिक्चीमी खेक्ताक्यी। मिनु गो चिक्शा, मुल मिक्च ताइब दुम्ती” दे माइक्तीमी। 16 फरिसी का निक्शीमी “परमप्रभु यावे आ सोइशो ममाइ। मारदे हना नाइक्तीक नाक्त ममानेब” देंतेक्म। का निक्शीमी चहिं “पापी मुरुमी दोपा ओदेशो छक लाक्चा डा गेय पने चाप्बा डा?” देंतेक्म। मिनु मेकोपुकी ब्रातेक्म। 17 मिनु फरिसीपुकीमी लेंशा आ मिक्च साशो कली “मिनु इ कली मिक्च ताइब सेल्ब आ पर्बम मार देंनेवे?” दे हिल्लो पाम्तेक्म। मिनु मेकोमी “परमप्रभु यावे आ लोव्र पाइब बाक्त” देंत।

18 यहूदीपुकीमी “मेको मुर डोंइती मिक्च मताइब बाक्त” दे थमा मसुदेम। मोपतीके मेको आ आम आफ आस कली ब्रेत्ताक्म। 19 मिनु मेको आस कली “एको इस तौ ममाइ? डोंइती मिक्च मताइब जरमेसाक्व देंतीसी? मुल दोपा तने चबा?” दे हिल्लो पाम्तेक्म। 20 मिनु आम आफोमी “आंस तौ बाक्ब। मिनु मिक्च मताइब जरमेसाक्व। 21 मुल दोपा मिक्च ताइब दुम्मे, गो मतुइक्नस्कु। सुम ताइब सेला, मेको यो मतुइक्नस्कु। आ कली हिल्लो पने। आल ममाइ, आंमान देंने चाप्ब” देंताक्स। 22 आ आम आफोमी यहूदी आन क्येडा हिंशा मो देंताक्स। मारदे हिंसा देंशा हना, यहूदीपुकीमी “सुम सापाइक्ब कली ख्रीस्त दे थमा सुइक्बा, मेको कली यहूदी आन गुम्तीक खिं रे तिल्चा” दे सल्ला पशो बाक्तेक्म। यूहन्ना ७:१३; यूहन्ना १२:४२ 23 मोपतीके “आल ममाइ। आ कली हिल्लो पने” देंशो बाक्ताक्स।

24 मिनु मिक्च ताइब दुम्शो कली लेंशा ब्रेशशा “परमप्रभु यावे कली मान पावो। इ कली मिक्च तपाइक्ब पापी बाक्माक्त, दे तुइक्नीकी” देंतेक्म। 25 आ मिक्च साशो मुरुमी “मेको पापी बाक्म कों, मबाक्म, गो मतुइक्नुड। डोंइती मिक्च मताइब बाक्ती, मुल ताइब दुम्ती, मेको ला तुइक्नुड” दे माइक्तीमी। 26 मिनु मेकोपुकीमी “मेकोमी इ कली मार पवा? दोपा इ मिक्च ताइब सेला?” दे हिल्लो पामेनु 27 “गो ना कना माइक्तन्नी। गेपुकी चहिं मननेनीनी। मारदे लेंशा नेंचा दाक्नीनी? गेपुकी यो मेको आ शेंसीब दुम्चा दाक्नीनी?” दे माइक्तीमी। 28 मिनु “गे मेको आ शेंसीब नवे। गोपुकी चहिं मोसा आ शेंसीब नकी। 29 परमप्रभु यावेमी मोसा कली लोव्र पशो बाक्त, दे तुइक्नीकी। तन्न मेको मुर ते रे जाक्मे, दे गो मतुइक्नीकी” दे हुइक्ताक्म। 30 मिनु आ मिक्च साशो मुरुमी “गो इन कली तशा, छक लाक्ती। आं मिक्च सापाइक्तु हना यो, मेको ते रे जाक्मे, दे गेपुकीमी मतुइक्नीनी? 31 परमप्रभु यावेमी पापी आन लोव्र मननेब, दे गोपुकीमी तुइक्नय। तन्न सुमी परमप्रभु यावे कली मान पशा, आ दाक्शो पाइबा, परमप्रभु यावेमी मेको कली आ पुंइशो गेब। भजन संग्रह ६६:१८; यसैया १:१५; हितोपदेस १५:२९ 32 मिनु रागी सेल्चा गोशो रे जरमेशो रे मिक्च मताइब मुर मिक्च ताइब सेल्शो, दे गेनायो मननेय। 33 मेको परमप्रभु यावे आ सोइशो मबाक्त हना, छक लाक्चा डा गेय पने मचाप्ब वा” देंत। 34 मिनु “गे पापी जरमेशो बाक्ते। आंइ कली मार शेंनेवे?” दे हुइशशा, मेको कली गुंइताक्म।

सापाइशो मुर नु येसु

35 मिनु येसुमी मेको कली यहूदी आन गुम्तीक खिं रे तिल्लेक्म देंशो नेंशा, मेको कली गुम्शा “गे रागीमी जरमेशो कली थमा सुइक्नेवे?” दे हिल्लो पाप्तु। 36 मेकोमी “प्रभु, मेको सु बाक्मे, गो मेको कली थमा सुइक्नुड” देंत। 37 मिनु येसुमी “गे मेको कली तशो बाक्ते। गे नु लोव्र पाइब मेकोन बाक्त” देंमेनु, यूहन्ना ४:२६ 38 “प्रभु, गो थमा सुइक्नुड” देंशा, पोक्च थेक्शा, येसु कली ठेयब सेल्तु। 39 येसुमी “गो निसाफ पचा कली रागीमी जाक्ती। मिक्च मताइबपुकीमी तामेक्ल। मिक्च ताइब चहिं मताइब दुम्मल” देंत। मत्ती १३:११-१५ 40 येसु आ नेक्था बाक्ब फरिसी का निक्शीमी आ लोव्र नेंशा, येसु कली “गेपुकी मिक्च मताइब दुम्नीकी?” देंमानु, 41 येसुमी “गेपुकी मिक्च मताइब नकी देंतीनी हना, पाप मरनी वा। तन्न गोपुकी मिक्च ताइब नकी देंनीनी। मोपतीके पाप राइनीनी” दे माइक्तीमी। यूहन्ना १५:२२

10

रिम्शो भेडा गोठला

1 मिनु येसुमी लेंशा मेको आन कली “नोफा दाइशशा नेनीन, सु सु भेडा गोठ आ लाप्चो रे मओव्रनीमी। बार रे डोइशशा ओव्रनीमी, मेकोपुकी खुइ नु रोइक्ब नम। 2 सु लाप्चो रे ओव्रबा, मेको भेडा गोठला बाक्ब। 3 गोठला जाक्मेनु, लाप्चो खाल पाइबमी मेको कली लाप्चो रोक्ब। भेडापुकीमी गोठला आ सेंदा नेनीम। गोठलामी आंम भेडा आन नें थिशा ब्रेशशा, गोठ रे गुंइब। 4 मिनु नेल्ल आन कली गुंइशा, भेडा आन डोंइती गाक्ब। भेडापुकीमी गोठला आ नोले खोइक्नीम। मारदे हना आ सेंदा तुइक्नीम। 5 सेंदा मतुइशशा मुर आ नोले मखोइक्नीम। मेको कली तशा

प्रोक्नीम। मारदे हना आ सेंदा मतुइक्नीम” दे येसुमी शेंताक्मी। 6 येसुमी मुर आन कली मेको कथा शेंशो बाक्त। तन्न मार लोव्र शेंशो बाक्मे, मेकोपुकीमी मरुप्शो बाक्तेक्म।

7 येसुमी लेंशा मेको आन कली “नोफा दाइश्शा नेनीन, गो भेडा गोठ डा लाप्चो नड। 8 सु सु आं डोंइती जाक्मा, मेको नेल्ल खुइ नु रोइक्ब नम। मिनु भेडापुकीमी मेको आन लोव्र मटीनीमी। 9 गो लाप्चो नड। सु सु मेको लाप्चो रे ओव्रनीमी, मेकोपुकी श्येत रे ब्रोंइनीम। मिनु रिम्शो घांस बाक्तीकेमी लशा, जोचा ताइनीम। यूहन्ना १४:६ 10 खुइमी दा खुइ पथ, साइक्थ नु प्रेत्य ला जाक्ब। गो चहिं भेडा आन कली ब्रोंइचा गेशा, ग्येरसीशा बाक्मल, दे जाक्ती” दे शेंताक्व।

11 मिनु येसुमी “गो रिम्शो गोठला नड। रिम्शो गोठला भेडा आन पा डा साइक्चा पुंइसीब। भजन संग्रह २३:-; यसैया ४०:११; इजीकीएल ३४:११-२३; यूहन्ना १५:१३; हिब्रू १३:२० 12 मिनु खिं डा गोठला मबाक्थु, वोइश्शो गोठला बाक्त हना, मेकोमी भेडापुकी रिम्शो पा मकोव्रब। मारदे हना मेको आ भेडा मनमी। फर पिशो तशा, भेडा आन कली प्रोंइशा, प्रोक्ब। फरमी चहिं भेडा आन कली ग्याइश्शा साव सुव ब्रपाइक्ब। 13 मिनु मेको वोइश्शो गोठला प्रोक्ब। मारदे हना भेडा आइक्के मनम, मोपतीके रिम्शो पा मकोव्रब। 14 गो रिम्शो गोठला नड। दोपा गो आं भेडा आन कली तुइक्नुडमी, मोपा मेकोपुकीमी आं कली तुइक्नीम। २तिमोथी २:१९ 15 दोपा आं आफोमी आं कली तुइक्बा, मोपा गो आं आफ कली तुइक्नुड। मिनु भेडा आन पा डा गो साइक्चा पुंइसीनुड। 16 मेको गोठ डा ला ममाइ, अरु गोठ डा भेडा यो आं के बाक्नीमी। गो मेको आन कली यो चाक्चा माल्नुड। मेकोपुकीमी आं सेंदा नेंशा, आं कली टीनीमी। मोपा गोठला का नु बगाल का दुम्ब। यूहन्ना ११:५२; प्रेरित १०:३४-३५ 17 मेको आन साइक्चा पुंइसीचा डा गो साइक्चा पुंइसीनुड। मोपतीके आं आफोमी आं कली दाक्ब, मिनु आं कली बेक्शो रे सेंब। 18 गो साइक्चा मपुंइसाक्यी हना, सुइमी आं कली साइक्ने मचाप्नीम। गो आं के साइक्चा पुंइसीतीके अधिकार बाक्ब। मिनु बेक्शो रे सेंसीचा अधिकार यो बाक्ब। मेको अधिकार निम्फा आं आफोमी गेती” दे शेंताक्व। यूहन्ना ५:२६

19 येसु आ लोव्र नेंशा, यहूदीपुकी लेंशा ब्रातेक्म। यूहन्ना ७:४३; यूहन्ना ९:१६ 20 शुश यहूदीपुकीमी “एको वोलमी सुम्शा गशो बाक्त। मारदे आ लोव्र नेंनीनी?” देंतेक्म। यूहन्ना ७:२०; मर्कूस ३:२१ 21 का निक्शीमी चहिं “एको आ लोव्र वोलमी सुम्शो मुर आ पशो खोदेशो मनेसीब। वोलमी मिक्च मताइब मुर आ मिक्च तपाइक्ने चाप्बा डा?” देंतेक्म।

यहूदीपुकीम येसु कली खेदा पशो

22 मिनु यरूसलेममी परमप्रभु यावे आ खिं डा डोंइती ओव्रतीक चाड जाक्शो बाक्त। 23 मिनु मेको हिउंदम बाक्त। मिनु येसु परमप्रभु यावे आ खिं डा पिप सोलोमन आ सेल्शो लाडगामी हिरना हिरन बाक्त। प्रेरित ३:११ 24 यहूदीपुकी येसु आ एर ओथ देल्शा “गेना आंइ कली ठीक लोव्र पाइनीनी? गे खीस्त ननी हना, लोव्र महिरथु, थमा पा देनीन” देंतेक्म। 25 येसुमी “गो इन कली देंती। तन्न गेपुकीमी थमा मसुइक्नी। गो आं आफ आ गेय पाइनुड। मेको गेयमी ‘गो परमप्रभु यावे आ सोइश्शो नड’ दे इन कली तुइक्पाइक्ब। यूहन्ना ५:३६ 26 गेपुकीमी चहिं आं कली थमा मसुइक्नीनी। मारदे हना गे आं गोठ डा भेडा मननी। यूहन्ना ८:४५-४७ 27 गो आं भेडा आन कली तुइक्नुडमी। मिनु मेकोपुकीमी आं सेंदा नेंशा आं नोले खोइक्नीमी। भजन संग्रह ९५:७ 28 गो मेको आन कली परमप्रभु यावे नु गेना हना यो ब्रोंइशा बाक्चा गेनुडमी। मेको नरकम मलाइनीम। सुइमी आं गुइ रे रोइश्शा, लाइक्ने मचाप्नीम। 29 आं आफोमी मेको आन कली गेती। आं आफ नेल्ल क्येडा ठेयब सक्ति पाइश्शो बाक्ब। मोपतीके आं आफ आ गुइ रे सुइमी रोइक्ने मचाप्नीम। 30 गो नु आं आफ उइक्थ उइक्थ नस्कु” देंत।

येसु कली दोस गेशो

31 मिनु यहूदीपुकीमी लेंशा येसु कली साइक्चा, दे फुल्लु गुप्तेक्म। यूहन्ना ८:४९ 32 मिनु येसुमी “गो इन कली आं आफोमी पशो रिम्शो गेय कोंइताक्नीनी। तेको गेय आ पर्वम आं कली फुल्लु आप्शा साइक्चा मालनी?” देंत। 33 यहूदीपुकीमी “रिम्शो गेय पतीक आ पर्वम इ कली फुल्लु मआप्नीकी। तन्न परमप्रभु यावे आ पर्वम मरिम्शो लोव्र पतीके इ कली फुल्लु आप्चाइतक। गे मुर दुम्शा यो, परमप्रभु यावे नु उइक्थ नड देंनेवे” देंतेक्म। मती ९:३; मती २६:६५; यूहन्ना ५:१८ 34 येसुमी “परमप्रभु यावे आ लोव्र ब्रेक्शो किताबमी ‘गे नेल्ल परमप्रभु यावे आ तमी तौ ननी’ मदेंबा डा? भजन संग्रह ८२:६ 35 परमप्रभु यावेमी आ लोव्र नेंब आन कली आ तमी तौ देंब। मिनु मेको किताब डा लोव्र मक्याम्सीब। मती ५:१७ 36 परमप्रभु यावेमी आं कली रागीमी सोइक्चा कली ठीक सेल्लु। गेपुकीमी चहिं

‘परमप्रभु यावे आ पबर्म मरिम्शो लोत्र देनेवे’ देंनीनी। मारदे हना ‘गो परमप्रभु यावे आ तौ नड’ देंती। यूहन्ना ५:१७-२० 37 गो आं आफ आ गेय मपाता हना, आं कली थमा मसुतीन। 38 तन्न गो आं आफ आ गेय पाइनुड हना, गेपुकी आं कली थमा मसुइक्नीनी। आं पशो गेय परमप्रभु यावे के बाक्त, दे थमा सुतीन। मिनु गो आं आफ नु बाक्नुड। आं आफ गो नु बाक्ब, दे रुपीन” दे येसुमी यहूदी आन कली माइक्तीमी। 39 मेकोपुकीमी येसु कली ग्याइक्चा माल्तेक्म। तन्न मेको आन दाते रे गूशा गाक्त। यूहन्ना ८:५९; लूका ४:३०

40 येसु लेंशा यर्दन खोला आइक्ची हांबु लशा बाक्माक्त। डोंइती मेकेर यूहन्नामी ब्वाक्कुमी खुम्शा गुंडतीक गेय पशो बाक्माक्त। यूहन्ना १:२८ 41 आ नेक्था जाक्शा, शुश मुरपुकीमी “यूहन्नामी छक लाक्चा डा गेय मपव। तन्न मेको मुर आ पबर्म मार मार देंमे, मेको नेल्ल थमा बाक्माक्त” देंमुत्तेक्म। 42 मिनु शुश मुरुमी येसु कली थमा सुइक्तेक्म।

11

येसुमी लाजरस कली सेंशो

1 बेथानी गाउंमी लाजरस माइश्शो रोइ पशो मुर का बाक्त। मेको के समी निक्शी बाक्शो बाक्ताक्स। मेको आस नें मरीयम नु मारथा बाक्ताक्स। लूका १०:३८-३९ 2 मरीयम सु बाक्त देंशा हना, येसु आ खोइलीमी ब्रोव्रशो रिना पाइश्शो तेल खेक्शा, आ चांमी फिक्ब बाक्त। मेको आस लोकब लाजरस रोइ पशो बाक्त। यूहन्ना १२:३ 3 मिनु मेको समी निक्शीमी मुर का कली येसु आ बाक्तीक सोइश्शा “प्रभु, इन दाक्शो वारच रोइ पाप्तु” दे येसु कली ब्रेप्त्से बाक्त। 4 मिनु येसुमी “मेको रोइ बेक्चा डा रोइ ममाइ, तन्न परमप्रभु यावे आ सक्ति कोंइचा कली बाक्ब। मिनु मुरपुकीमी मेको रोइ आ पबर्म परमप्रभु यावे आ तौ कली ठेयब सेल्नीमी” देंत। यूहन्ना ९:३ 5 येसुमी मारथा नु मरीयम वोबु नु आस लोकब लाजरस आन कली दाक्शो बाक्माक्त। 6 मोपतीके लाजरस रोइ पाप्तु देंशो नेंशा, आन बाक्तीक लचा, नाक्त निक्शी सम्म रिम्ताक्व।

7 मिनु नोले येसुमी आ शेंसीब आन कली “लो, लेंशा यहूदीया रागी लय” देंत। 8 आ शेंसीबपुकीमी “शेंब, यहूदीपुकीमी इन कली फुल्लु आप्शा हेरा साइक्तेक्मे। मिनु गे मुल लेंशा मेकेर लचा दाक्नीनी?” दे हिल्लो पाम्तेक्म। यूहन्ना १०:३१ 9 मिनु येसुमी “काबु नाक्तीम १२ घन्टा बाक्बा, ममाइ? सु सु चहिं नाक्ती गाक्नीमी, मेको दाइल मपांइसीनीम, मारदे हना छेड्छेड्मी लां ताइनीम। यूहन्ना ९:४-५ 10 सु सु चहिं नाक्दो गाक्नीमी, मेकोपुकी दाइल पांइसीनीम, मारदे हना मेको छेड्छेड्मी मबाक्नीम” देंत। यूहन्ना १२:३५ 11 मो देंशा आ शेंसीब आन कली “इ वारच लाजरस इप्त। गो चहिं मेको कली सेंनुड” देंत। मत्ती ९:२४ 12 आ शेंसीबपुकीमी “प्रभु, इप्त हना, आ रोइ साब” देंतेक्म। 13 येसुमी चहिं लाजरस आ बेक्चा आ पबर्म लोत्र पशो बाक्त। आ शेंसीबपुकीमी “नाइक्चा कली इप्त” दे मिम्ताक्म। 14 मिनु येसुमी लोत्र महिरथु “लाजरस बेक्ने थुम्तु। 15 गो मेकेर मबाक्ड। मोपतीके गो ग्येरसीनुड। मारदे हना गेपुकीमी थमा सुइक्ने चाप्नीनी। मुल गोपुकी बेथानी लय” देंत। 16 आ याइनी नें जौले, थोमास माइश्शो शेंसीब का बाक्त। मेकोमी अरु शेंसीब आन कली “गोपुकी यो मेको नु बेक्थ लय” देंत। यूहन्ना २०:२४-२८

लाजरस कली सेंपाइश्शो

17 मिनु येसु बेथानी जाक्दीम्मेनु, मेकेर डा मुरपुकीमी “लाजरस बेक्शो ४ नाक्त दुम्त। मेको कली बेक्शो मुर वोइक्तीक कोठामी वोइक्तेक्म” दे येसु कली देंतेक्म। 18 बेथानी गाउं यरूसलेम आ नेक्था बाक्शो बाक्ब। बेथानी रे यरूसलेम सम्म १५ स्तादीयोन डा लां बाक्ब। स्तादीयोन का १८५ मिटर बाक्ब। 19 मिनु यरूसलेम डा शुश यहूदीपुकीमी मारथा नु मरीयम आस लोकब बेक्शो आ पबर्मी “सुर्ता मपाम्सेक्ल” दे लेम्चा कली जाक्मा बाक्त। 20 मिनु मारथामी “येसु पिन पिन बाक्ब” देंशो नेंशा, येसु कली गुम्थ जाक्त। मरीयम चहिं खिंमीन बाक्माक्त। 21 मिनु मारथामी येसु कली “प्रभु, एक बाक्शो ननी हना, आंस लोकब मबे वा। 22 तन्न मुल यो परमप्रभु यावे कली पुंइतीनी हना, परमप्रभु यावेमी इन पुंइशो गेब, दे तुइक्नुड” दे माइक्तु। 23 मिनु येसुमी “इ लोकब सेंसीब” देंत। यूहन्ना ५:२८-२९; यूहन्ना ६:४०; मत्ती २२:२३-३३ 24 मिनु मारथामी “नोले डा नाक्ती आंस लोकब सेंसीब दे गो तुइक्नुड” देंत। 25 मिनु येसुमी “गो सेंपाइक्ब नु ब्रोंइपाइक्ब नड। आं कली थमा सुइक्ब बेक्तेक्म हना यो, सेंसीनीम। 26 सु ब्रोंइबा, मिनु आं कली थमा सुइक्बा, मेको गेनायो मबेक्ब। एको लोत्र थमा सुइक्नेवे?” दे हिल्लो पाप्तु। यूहन्ना ८:५१ 27 मिनु मारथामी “प्रभु, गे रागीमी जाक्शो परमप्रभु यावे आ तौ, ख्रीस्त ननी, दे गो थमा सुइक्नुड” देंत। मत्ती १६:१६

28 मोदेशा मारथा खिं लेशशा, मरीयम कली “शेंब जाकशो बाक्त। मिनु इ कली ब्रेत्ताकव” दे मुर आन मनेंचा डा पा मदा बाक्त। 29 मिनु मरीयम मेको नेशा, छुल बोक्शा, येसु कली गुमथ लमाक्त। 30 मेना येसु मारथा गुमतीक उड बाकशो बाक्त। आस गाउं मजाकदीशशो बाक्माक्त। 31 मिनु मरीयम आ खिंम लेमथ जाकब यहूदीपुकीमी मरीयम कली छुल बोक्शा लशो तशा, आ नोले खोदमे बाक्त। मारदे हना मेकोपुकीमी “मरीयम तुरसुम डाकथ लाइबा, को” दे मिमशो बाक्मा बाक्त। 32 मिनु मरीयम येसु आ बाक्तीक जाकदीशशा, येसु आ खोइलीम बाप्शा “प्रभु, एक बाकशो ननी हना, आंस लोकब मबे वा” देंत। 33 मिनु येसुमी मेको कली नु में नु जाकशो यहूदी आन कली डाकशो तशा, येसु आ थुं खाइक्त। यूहन्ना १३:२१ 34 मिनु “गे मेको कली ते वोइकनी?” दे हिल्लो पवानु “प्रभु, कोव्रथ पिने” देंतेक्म। 35 मिनु येसु यो डाक्त। 36 यहूदीपुकीमी येसु कली डाकशो तशा “कोव्रडीन, येसुमी मेको कली यो शुश दाकशो बाक्माक्त” देंतेक्म। 37 का निक्शीमी “मिक्च मताइब मुर सापाइकबमी मेको कली बेक्चा मगेथु, सापाइकने मारदे मचाप्बा?” देंमुतेक्म। यूहन्ना ९:७

38 मिनु येसु आ थुं लेशा खाइशशा, बेकशो मुर वोइक्तीक कोठा आ नेक्था जाकदीत्त। मेको पुक्खी खोदेशो बाक्त। मेको पुक्खी चोक्चा, दे आ डोंइती फुल्लु का थारशो बाक्त। मत्ती २७:६० 39 मिनु येसुमी “फुल्लु तिलीन” देंत। मिनु बेकशो मुर आ समी मारथामी “प्रभु, मुल दा एको रिना पाइब। मारदे हना आ बेकशो ४ नाक्ती दुम्त” देंत। 40 मिनु येसुमी “गे थमा सुइक्तीवी हना, गे परमप्रभु यावे आ सक्ति ताइनेवे, दे इ कली ममाइकना डा?” देंत। 41 मिनु मुरपुकीमी पुक्खी आ डोंइती थारशो फुल्लु तिल्लेक्म। मिनु येसुमी सरीड गे कोव्रशा “आं आफ, गे आं लोव्र नेंतीनी, गो ग्येरसाक्यी। 42 गे आं देशो गेना हना यो नेंनीनी, दे तुइक्नुड। मिनु आं एर ओंथ बाकशो मुरपुकीमी गेमी आं कली सोइशशो ननी, दे थमा सुइक्पाइक्चा कली एको लोव्र पाता” देंत। यूहन्ना १२:३० 43 मिनु मो देशा, ठेयब सेंदा पा येसुमी “ए, लाजरस, गूडो” दे ब्रेत्ताकव। 44 मिनु मेको डोंइती बेकशो मुर येसु आ ब्रेशशो नेशा, आ गुइ खोइल आ रां नेल्ल वामी गिल्सीशा गूत। आ कुल यो रुमालमी फ्रेंशो तशा, येसुमी “गिल्शो वासी प्रुइशशा, लचा गेने” दे मुर आन कली माइक्तीमी।

येसु कली साइक्चा माल्शो

45 मरीयम कली लेमथ जाकशो शुश यहूदीमी मो दुमशो तशा, येसु कली थमा सुइक्तेक्म। 46 का निक्शी चहिं फरिसी आन कली गुमथ लशा, येसु आ पशो शोव्रडमे बाक्त। 47 मो दुमशा ठेयब चढेब नु फरिसीपुकी बुक्शा “मुल मार पय? मारदे हना मेको मुरुमी शुश छक लाक्चा डा गेय पाइबाक्त। मत्ती २६:३-४ 48 मेको कली मो पचा गेतय हना, नेल्लेमी मेको कली थमा सुइक्नीम। मिनु रोमीपुकीमी परमप्रभु यावे आ खिं नु इस्राएल रागी निम्फा खतम सेल्नीम” दे लोव्र पामे बाक्त। 49 मेकोपुकी नु काइयाफास माइशशो मुर का बाक्माक्त। मेको बर्स डा नेल्ल क्येडा ठेयब चढेब बाक्माक्त। 50 मिनु मेकोमी “गे मारेइ मतुइक्नीनी। गो नेल्ल रागी खतम दुमचा क्येडा, मुर का कली साइक्चा रिमशो बाक्ब” देंमाक्त। यूहन्ना १८:१४ 51 काइयाफासमी आंम मिमशो मदे, तन्न मेको बर्स डा नेल्ल क्येडा ठेयब चढेब दुमशा “इस्राएल रागी डा मुर आन पा डा येसु साइक्चा पुंइसीब” दे नोले दुम्ब लोव्र पशो बाक्त। 52 इस्राएल रागी डा मुर आन कली ला ममाइ, तन्न ब्रशा बाकशो परमप्रभु यावे आ तमी तौ नेल्ल आन कली काथा दुम्पाइक्चा, दे येसु साइक्चा पुंइसीब दुम्त। यूहन्ना ७:३५; यूहन्ना १०:१६; १यूहन्ना २:२ 53 मिनु मेको नाक्त रे येसु कली दोपा साइक्चा, दे सल्ला पामे बाक्त।

54 मोपतीके येसु यहूदीपुकी नु मबाक्थु, गोरशो रागी आ नेक्थान एफ्राइम सहर लत। मिनु मेकेर आ शेंसीबपुकी नु बाक्त। २सामुएल १३:२३

55 मिनु यहूदी आन पास्सा चाड जाकचशो बाक्त। पहाड डा शुश मुरपुकी आंम कली ठीक सेल्चा, दे पास्सा चाड आ डोंइती यरूसलेम लाइबाक्मा बाक्त। २इतिहास ३०:१७-१८ 56 मेकेर जाकदीशशा, परमप्रभु यावे आ खिंमी बाक्शा “गे मार मिम्नीनी? येसु पास्सा चाडम जाकबा देय मजाकबा” दे हिल्लो पमुशा, येसु कली माल्मे बाक्त। 57 मिनु ठेयब चढेब नु फरिसीपुकीमी “सुमी येसु ते बाक्बा, दे तुइक्ता, मेकोमी आंइ कली यो तुइक्पदल” दे मुर आन कली देशो बाक्मा बाक्त। मोपा येसु कली ग्याइक्चा माल्मे बाक्त।

1 यहूदी आन पास्सा चाड जाक्चा ६ नाक्त डोंइती येसु बेथानी गाउं जाक्दीत्त। मेकेर येसुमी लाजरस कली बेक्शो रे सेंपाइशो बाक्त। यूहन्ना ११:१,४३ 2 लाजरस आ खिमी येसु नु आ शेंसीब आन कली थुल्चा ठीक पशो बाक्तेक्म। मारथामी जचा थोव्रक योक्तु। लाजरस येसु नु काथा बाक्शो बाक्त। 3 मिनु मरीयममी मार पाप्तु देशा हना, लित्रा का शुश क्येट लाइक्ब ब्रोव्रशो रिना पाइशो तेल येसु आ खोइलीमी खेक्ताक्व। मिनु आ चांमी फिक्ताक्व। मो पशा खिं गा नेल्ल ब्रोव्रशो रिना पपाइक्तु। लित्रा का ३२७ ग्राम खोदेशो बाक्ब। लूका ७:३८ 4 मेकेर येसु आ शेंसीब इस्कारीयोत डा यहूदा यो बाक्त। मेको नोले येसु कली साइक्ब आन कली वारच पाइब दुम्बाक्माक्त। 5 मेकोमी “मारदे सहे सां देनारमी मेको तेल लेयशा, पुडग आन कली मयोक्गा?” दे लोत्र पाप्तु। देनार का नाक्त का डा गाल्च बाक्त। 6 यहूदामी पुडग आन कली शिशी पा मिम्शा ममाइ, तन्न क्येट कुरशा, क्येट खुइ पना पन बाक्बाक्माक्त। यूहन्ना १३:२९ 7 मिनु येसुमी यहूदा कली “मरीयममी आं बेक्चा डोंइती तेल खेक्ताक्यी। एको कली श्येत मगेवो। 8 पुडगपुकी दा गेपुकी नु गेना हना यो बाक्नीम। गो चहिं गेपुकी नु शुश नाक्त मबाक्नुड” दे माइक्तु।

9 मिनु शुश यहूदीपुकीमी येसु मेकेर बाक्त, दे तुइशशा, येसु आ पर्बम ला ममाइ, येसुमी बेक्शो रे सेंपाइशो लाजरस कली यो कोव्रचा, दे जाक्तेक्म। 10 ठेयब चढेबपुकीमी “लाजरस कली यो साइक्चा” दे सल्ला पामे बाक्त। 11 मारदे हना मेको आ पर्बम शुशेमी यहूदी आन शेंतीक प्रॉइशा, येसु कली थमा सुइक्तेक्म।

येसु यरूसलेम सहर ओव्रशो

मत्ती २१:१-११; मर्कूस ११:१-१०; लूका १९:२९-४०

12 मिनु आ दीसा शुश मुरुमी “येसु पास्सा नाक्त यरूसलेममी जाक्ब” देशो नेन्मे बाक्त। 13 मिनु खजूर रवा आ सफा शेशा, येसु कली गुम्थ जाक्तेक्म। मेकोपुकीमी “होसन्ना, परमप्रभु आ नेमी जाक्ब इस्राएली आन पिप आसीक रशो बाक्ब” दे ग्येरशा, ग्रीना ग्रीन येसु कली गुम्थ जाक्तेक्म। होसन्ना आ देशो “परमप्रभु वारच पने” बाक्ब। भजन संग्रह ११८:२५-२६ 14 मिनु येसुमी गधा आ चाइक्ब का डोंइसाक्व। परमप्रभु यावे आ ब्रेक्पाइशो किताबमी 15 “सियोन डा मुर, महिनीन। कोव्रडीन, इन पिप गधा डोइशशा पिना पिन बाक्ब” दे ब्रेक्शो बाक्त। जकरिया ९:९ 16 येसु आ शेंसीबपुकीमी डोंइती मेको लोत्र मरुप्शो बाक्तेक्म। तन्न येसु स्वर्ग लशा नोले ला “मेको लोत्र येसु आ पर्बम ब्रेक्शो बाक्माक्त। दोदेशो ब्रेक्शो बाक्मे, मोदेशो दुम्त” दे रुप्शो बाक्तेक्म। 17 मेको “होसन्ना” दे ग्रीबपुकी सु बाक्मा बाक्त देशा हना, येसुमी लाजरस बेक्शो रे सेंपाइशो ताइब बाक्मा बाक्त। मिनु मेकोपुकीमी मुर आन कली लाजरस सेंसीशो आ पर्बमी तुइक्पाइक्तेक्म। 18 मोपतीके मेकोपुकी येसु कली गुम्थ जाक्तेक्म। 19 मिनु फरिसीपुकीमी “गोपुकी मारेइ पने मचाप्नय। कोव्रडीन, मुर नेल्ल मेको आ नोले खोइक्नीम” देंमुम्तेक्म। यूहन्ना ११:४८

ग्रीस डा मुर येसु कली गुम्थ जाक्शो

20 मिनु पास्सा नाक्ती परमप्रभु यावे कली मान पचा कली का निक्शी ग्रीस रागी डा मुर यो जाक्शो बाक्तेक्म। 21 मेकोपुकी फिलीप माइशो शेंसीब नु लोत्र पचा कली जाक्तेक्म। फिलीप चहिं गालील रागी डा बेथसैदा सहर डा बाक्त। मिनु मेको ग्रीस रागी डा मुरपुकीमी “प्रभु, गोपुकी येसु कली गुम्चा दाक्नीकी” देंतेक्म। यूहन्ना १:४४ 22 फिलीपमी मेको आन लोत्र नेंशा, अन्द्रीयास कली माइक्तु। मिनु अन्द्रीयास नु फिलीपमी येसु कली “ग्रीस रागी डा मुरपुकी इन कली गुम्थ जाक्तेक्म” दे माइक्ताक्स। 23 मिनु येसुमी “मुल रागीमी जरमेशो परमप्रभु यावे आ बाक्तीक लाइब। मिनु ठेयब सेल्चा पुंडसीब। 24 नोफा दाइशशा नेनीन, चेरब गेडा खपीमी शोकशा मराक्त हना, मेको मोशा लीब। तन्न शोकशा राक्त हना, शुश ग्रेल्ब। रोमी १४:९; १कोरिन्थी १५:३६ 25 सुमी आंम दला दाक्स पाइबा, मेको गेना हना यो ब्रॉइशा बाक्चा मताइब। सुमी चहिं रागीमी बाक्शा, आंम कली ममिम्थु, परमप्रभु यावे आ देशो टीबा, मेको गेना हना यो ब्रॉइशा बाक्चा ताइब। मत्ती १०:३९; मत्ती १६:२५; लूका १७:३३ 26 सुमी आं गेय पाइबा, आं देशो यो पचा माल्बा, मेको आं बाक्तीकेमी बाक्चा ताइब। आं आफोमी आं गेय पाइब आन कली ठेयब सेल्ब” देंत। यूहन्ना १७:२४

येसुम आ बेक्चा आ पर्बम शेंशो

27 मिनु येसुमी “मुल आं थुं खाइक्ती। गो मार देंनुडा, आफ, आं कली मोपा साइक्चा रे प्रॉइयी, दे पुंडनुडा डा? गो साइक्चा पुंडसीचा कली रागीमी जाक्ती। मत्ती २६:३८ 28 आं आफ, इन सक्ति कोइदीन” दे येसुमी देंत। मिनु सरीड रे “गो आं सक्ति कोइताक्ड। लेंशा चिनु कोइनुड” देशो सेंदा का नेंसाक्व। यूहन्ना १३:३१; मत्ती ३:१७; मत्ती १७:५

29 मिनु मेकेर बाकशो मुरपुकीमी मेको सेंदा नेंशा “बुंबु पाप्तु” देंतेकम। का निक्शीमी “परमप्रभु यावे आ स्वर्ग डा गेय पाइब कामी मेको कली लोव्र पाप्तु” देंतेकम। 30 मिनु येसुमी “मेको लोव्र आं कली देंशो ममाइ, इन कली देंशो बाकब। यूहन्ना ११:४२ 31 मुल रागी नेल्ल डा मुर आन कली निसाफ पची नाक्त जाक्त। मुल रागी कली हुकुम पाइब कली तिल्लीम। यूहन्ना १४:३०; यूहन्ना १६:११; लूका १०:१८ 32 गो क्युकशा साइक्चा पुंडसीशा, मुर नेल्ल आन कली आं गे कीनुडमी” देंत। यूहन्ना ८:२८ 33 येसुमी दोपा साइक्चा पुंडसीचा चिकशो बाक्नुड, दे तुइक्पाइक्चा कली मो देंत। 34 मिनु मुरपुकीमी येसु कली “परमप्रभु यावे आ लोव्र ब्रेक्शो किताबमी ‘खीस्त गेनायो मबेक्थु बाक्ब’ देंशो नेंतक। गे चहिं ‘रागीमी जरमेशो क्युकशा साइक्चा पुंडसीब’ देंनीनी। मिनु मेको रागीमी जरमेशो चहिं सु बाक्म?” दे हिल्लो पाम्तेकम। भजन संग्रह ११०:४; दानीएल ७:१४ 35 मिनु येसुमी मेको मुर आन कली “मेको छेडछेड माइश्शो का गेपुकी नु इक्का नाक्त सम्म बाक्ब। छेडछेड बाक्म सम्म गाक्कीन। छेडछेडमी मगाक्तीनी हना, छिडछिडमी गाक्का माल्लीनी। सु छिडछिडमी गाक्बा, मेको ते लाइबा मतुइक्ब। 36 छेडछेड माइश्शो का बाक्म सम्म मेको कली थमा सुतीन। मो पाइतीनी हना, छेडछेड माइश्शो आ तमी तौ दुम्नीनी” देंत। मिनु येसुमी मेको लोव्र पशा, मेकेर रे गाक्शा खुंडसाक्व। एफिसी ५:८

यसैयाम यहूदी आन पर्वम ब्रेक्शो

37 मिनु येसुमी मुर आन डोंइती शुश छक लाक्चा डा गेय पाप्तु हना यो, मेकोपुकीम येसु कली थमा मसुदेम। 38 मोपा यसैया माइश्शो परमप्रभु यावे आ लोव्र पाइब आ ब्रेक्शो लोव्र थमा दुम्त। मार ब्रेक्शो बाक्त देंशा हना “प्रभु, आंइ देंशो लोव्र सुम थमा सुदा डा? इन पशो गेय सुम तुइक्ता डा?” दे ब्रेक्शो बाक्त यसैया ५३:१ 39 मोपतीके सुइमी थमा सुइक्ने मचबेम। यसैया ६:९,१० 40 मिनु यसैयामी “परमप्रभु यावेमी मेको आन कली मिक्च मताइब सेल्लतीमी। मोपा परमप्रभु यावे कली मतुइक्नीम। मेको आन कली मटीब सेल्लतीमी। मोपा मेकोपुकीमी परमप्रभु यावे आ लोव्र रुम्ने मचबेम। मिनु परमप्रभु यावे कली ‘आं कली सापतीन’ दे मपुंडनीम” दे यो यसैयामी ब्रेक्शो बाक्त। मत्ती १३:१४-१५ 41 मारदे हना यसैयामी येसु खीस्त आ छेडछेड डा सक्ति ततीके येसु आ पर्वम लोव्र पशा ब्रेक्शो बाक्त। यसैया ६:१ 42 ठेयब मुर शुशेमी येसु कली थमा सुइक्तेकम। मेकोपुकीमी “फरिसीपुकीमी आंइ कली यहूदी आन गुम्तीक खिं रे तिल्लीम” दे हिंशा, अरु आन कली “गो थमा सुइक्ब दुम्तक” दे मदेंम। यूहन्ना ९:२२ 43 मारदे हना मेकोपुकीमी “आंइ पर्वमी मुरपुकीमी मार देंनीमी” दे परमप्रभु यावे क्येडा मुरपुकी तशा हितेकम। यूहन्ना ५:४४

येसुम परमप्रभु आ शेंशो ला पाइब

44 मिनु येसुमी ठेयब सेंदा पशा “आं कली थमा सुइक्बमी आन थमा सुइश्शो आं कली ला ममाइ, तन्न आं कली सोइक्ब कली यो थमा सुइश्शो नम। 45 मिनु सुम आं कली ताइबा, मेकोमी आं कली सोइक्ब कली यो ताइब। यूहन्ना १४:९ 46 रागी डा मुर आन कली परमप्रभु यावे आ पर्वम तुइक्पाइक्चा कली गो रागी कली छेडछेड दुम्शा जाक्ती। मोपतीके सुम आं कली थमा सुइक्बा, मेको छिडछिडमी मबाक्ब। 47 मिनु सु सुमी आं देंशो लोव्र नेंशा यो मपाइनीमी, गो मेको आन कली निसाफ मपाइनुड। मारदे हना गो रागी डा मुर आन कली निसाफ पचा कली जाक्शो मनड। तन्न रागी डा मुर आन कली पाप रे प्रोंइचा कली जाक्शो नड। यूहन्ना ३:१७; लूका ९:५६ 48 सुम आं कली मब्रथु, आं देंशो लोव्र मपाइबा, मेको कली निसाफ पाइब का बाक्ब। मेको निसाफ पाइब सु बाक्ब देंशा हना, आं देंशो लोव्र बाक्ब। एको लोव्रमी मेको कली नोले डा नाक्ती निसाफ पाइब। 49 आं कली सोइक्ब आं आफोमी गो मार देंचा नु शेंचा माल्लनुडा, मेको नेल्ल माइक्ती। मोपतीके मेको आं लोव्र ममाइ। आं आफ आ लोव्र बाक्ब। 50 मेको आ देंशो लोव्र मार बाक्ब देंशा हना, गेना हना यो ब्रोंइशा बाक्चा गेब लोव्र बाक्ब। मेको आं आफोमी आं कली देंशो लोव्र बाक्ब। मोपतीके आं पशो लोव्र आं आफोमी आं कली डोंइती देंशो लोव्र बाक्ब” दे येसुमी मुर आन कली माइक्तीमी।

13

येसुम आ शेंसीब आन खोइल चिकशो

1 येसुमी पाससा चाड डोंइती “मुल रागी रे आं आफ आ बाक्तीक लची नाक्त जाक्त” दे तुइक्ताक्व। मिनु येसुमी नेल्ल क्येडा नोले डा नाक्त सम्म रागीमी बाक्शो आ मुर आन कली दाक्शो बाक्त। यूहन्ना ७:३०; यूहन्ना १७:१ 2 मिनु येसु नु आ शेंसीबपुकी नाक्दो डा खमे जना जन बाक्शो बाक्तेकम। आ शेंसीब सिमोन आ तौ इस्करीयोती डा यहूदा यो बाक्शो बाक्त। सैतानमी “येसु कली साइक्चा माल्ल आन कली वारच पावो” दे यहूदा कली मिम्पाइश्शो

बाक्त। लूका २२:३ ३ मिनू येसुमी “आं आफोमी आं कली नेल्ल सक्ति गेती। गो परमप्रभु यावे रे जाकशो नड। मिनू परमप्रभु यावे आ बाक्तीके लेत्नुड” दे तुइश्शा, यूहन्ना ३:३५; यूहन्ना १६:२८ ४ येसु बोक्शा, आ तार फेक्शो रिम्शो वा पुइश्शा, वा कामी गिल्साक्व। ५ मिनू चिकतीकेमी ब्वाक्कु कुर पा, आ शेंसीब आन खोइल चिकताक्मी। चिकशा डा मिन आ गिल्सीशो वाम फिकताक्मी। ६ मिनू सिमोन पत्रुस आ पालो जाक्मेनु, मेकोमी येसु कली “प्रभु, गेमी आं खोइल चिकचा दुम्बा डा?” देंत। ७ मिनू येसुमी “मुल आं पशो मरुप्नेवे। गे नोले ला रुप्नेवे” देंत। ८ पत्रुसमी “गो आं खोइल चिकचा काइ मगेनुड” देंत। मिनू येसुमी “गो इ खोइल मचिकताक्न हना, गे आं मुर मनवे” दे माइक्तु। ९ मिनू सिमोन पत्रुसमी “प्रभु, आं खोइल ला ममाइ, आं गुइ पिया यो चिकतीनी” देंत। १० येसुमी “चिकशो मुर आन कली लेंशा चिकचा ममाल्ब। खोइल ला चिकचा माल्ब। खोइल चिकशोनु, नेल्ल रिम्शो दुम्ब। गेपुकी चिकसीशो दुम्तीनी। काइ मचिकसीशो गेपुकी नु का बाक्ब” देंत। यूहन्ना १५:३ ११ येसुमी आ कली साइक्ब आन कली वारच पाइब कली तुइश्शा मो देंत।

१२ मिनू येसुमी आन खोइल चिकने थुम्शा, आ डोंइती पुइश्शो फेक्तीक फेक्शा, आ बाक्तीक लत। मिनू शेंसीब आन कली “इन कली पशो गेय आ अर्थ मार बाक्बा, गे तुइक्नीनी? १३ गेपुकीमी आं कली शेंब नु प्रभु देंनीनी। मेको ठीक देंतीनी। मारदे हना गो मेकोन नड। मत्ती २८:८,१० १४ गो प्रभु नु शेंब दुम्शा यो इन खोइल चिकताक्नीनी। गेपुकीमी यो इन खोइल चिकमुचा माल्नीनी। लूका २२:२७ १५ गो इन खोइल चिकताक्नीनी। मिनू गेपुकी आं खोदेशो पने। फिलिप्पी; १पत्रुस २:२१ १६ मिनू नोफा दाइश्शा नेनीन, खिं डा होव्रप क्येडा वाइल ठेयब ममाइ। मिनू सोइश्शो मुर सोइक्ब क्येडा ठेयब यो ममाइ। १७ गेपुकी आं देंशो लोव्र तुइश्शा पाइतीनी हना, गे आसीक रशा ग्येरसीशो मुर दुम्नीनी” दे येसुमी देंत। मत्ती ७:२४

यहूदा आ पर्बम लोव्र पशो

मत्ती २६:२१-२५; मर्कूस १४:१८-२१; लूका २२:२१-२३

१८ मिनू येसुमी “गो नेल्ल इन पर्बम लोव्र मपाइनुड। आं योव्रशो आन कली तुइक्नुड। परमप्रभु यावे आ ब्रेक्पाइश्शो लोव्रमी मार ब्रेक्शो बाक्ब देंशा हना ‘आं शोब्ले जाइबमी आं कली साइक्चा कली आ खोइल क्युक्तु’ दे ब्रेक्शो बाक्ब। मुल मोदेशो दुम्चा चिकताक्व। भजन संग्रह ४१:९ १९ मोदेशो दुम्चा डोंइती तुइक्पाइक्तन्नी। मिनू मो दुम्मेनु, गो मेकोन बाक्डा बाक्त, दे तुइक्नीनी। मिनू आं कली थमा सुइक्नीनी। २० नोफा दाइश्शा नेनीन। सुमी आं सोइश्शो कली ब्राइबा, मेकोमी आं कली ब्राइब। मिनू सुमी आं कली ब्राइबा, मेकोमी आं कली सोइक्ब कली यो ब्राइब” देंत। मत्ती १०:४० २१ मिनू येसुमी मेको लोव्र पशा आ थुं खाइक्त। मिनू “नोफा दाइश्शा नेनीन। गेपुकी नु का बाक्ब। मेकोमी आं कली साइक्ब आन कली वारच पाइब” दे आ थुं खाइश्शा देंत। यूहन्ना १२:२७ २२ मिनू येसु आ शेंसीबपुकीमी “सु आ पर्बम देंशो बाक्मे?” दे मतुइक्थु कोव्रमुम्तेक्म। २३ येसु आ नेल्ल क्येडा दाक्शो शेंसीब येसु आ नेक्था बाक्त। यूहन्ना १९:२६; यूहन्ना २०:२; यूहन्ना २१:२० २४ मिनू सिमोन पत्रुसमी मेको कली “सु आ पर्बम लोव्र पवा, हिल्लो पावो। मिनू आंइ कली देनो” देंत। २५ मिनू येसु आ नेक्था बाक्शो शेंसीबमी “प्रभु, मेको सु बाक्मे?” दे येसु कली हिल्लो पावु। २६ मिनू येसुमी “गो एको शोब्ले शेक्कुमी तेप्शा सु कली जचा गेडा, मेकोन बाक्ब” देंशा, येसुमी शोब्ले शेक्कुमी तेप्शा, सिमोन आ तौ इस्कारीयोत डा यहूदा कली गेपु। २७ यहूदामी शोब्ले ताक्तु। मेना सैतान आ थुंमी ओव्रत। मिनू येसुमी यहूदा कली “इ मिम्शो पावो” देंत। २८ शेंसीबपुकीमी येसुमी यहूदा कली मारदे मोदेशो देंमे, दे मतुइक्तेम। २९ का निक्शीमी “यहूदामी क्येट आ थैली कुरशो बाक्ब। मिनू येसुमी मेको कली पास्सा नाक्त कली ‘मार मार माल्नया, मेको ग्याप्थ लावो, दे मदा कों, पुड्ग आन कली क्येट योक्शा गेवो’ दे मदा कों?” दे मिम्ताक्म। ३० यहूदा शोब्ले ताक्शा, छुल बोक्शा लत। मेना छिडछिड दुम्शो बाक्त।

येसुम नक अरेशो लोव्र शेंशो

यूहन्ना १३:३१-१६:३३

३१ मिनू यहूदा लम नोले येसुमी “मुल रागीमी जरमेशोमी सक्ति तापुतु। मिनू मुरपुकीमी रागीमी जरमेशो आ पतीक तशा, परमप्रभु यावे कली ठेयब सेल्नीमी। यूहन्ना १२:२३, २८ ३२ मिनू परमप्रभु यावेमी रागीमी जरमेशो कली आंम आ सक्ति गेशा, ठेयब सेल्ब। एको मुल दुम्चा चिकशो बाक्त। यूहन्ना १७:१-५ ३३ आं आइक्च आलपुकी, गो इन कली शुश दाक्ताक्ड हना यो, गो गेपुकी नु शुश बाक्चा मताइनुड। गेपुकी आं कली माल्नीनी। मिनू गो यहूदी आन कली ‘आं लतीकेमी गेपुकी जाक्ने मचाप्नीनी’ देंशो खोदेशो, गो इन कली यो मो देंनुड। यूहन्ना ८:२१ ३४ मिनू इन कली नक

अरेशो लोत्र का पाइनुड। मार लोत्र पाइनुड देशा हना, गेपुकी दाक्मुने। गोम इन कली दाक्शो खोदेशो पा गेपुकी यो दाक्मुने। यूहन्ना १५:१२, १३, १७ 35 दाक्मुशो तशा, मुर नेल्लेमी 'गेपुकी आं शेंसीब ननी' दे तुइक्नीम" दे येसुमी देंत।

येसुम पत्रुस कली लोत्र पशो

मत्ती २६:३३-३५; मर्कूस १४:२९-३१; लूका २२:३१-३४

36 मिनु सिमोन पत्रुसमी येसु कली "प्रभु, ते लाइनीनी?" दे हिल्लो पाप्तु। येसुमी "गो ते लाइनुडा, मुल गे आं नोले खोइक्ने मचाप्नेवे। तन्न नोले खोइक्नेवे" देंत। यूहन्ना २१:१८-१९ 37 मिनु पत्रुसमी "प्रभु, मारदे इन कली मुल नोले खोइक्ने मचाप्नुडा डा? इन साइक्चा पुंडसीचा डा साइक्चा पुंडसाक्ड हना यो, गो बेक्नुड" देंत। 38 मिनु येसुमी "मार आं साइक्चा पुंडसीचा डा साइक्चा पुंडसीनेवे? इ नोफा दाइश्शा नेनो, भाले ग्रीचा क्येडा डोंइती गेमी खेयप सां आं कली मतुइक्नुड, दे देंनेवे" दे माइक्तु।

14

येसु परमप्रभु नु गुम्पाइक्ब लां बाक्ब

1 मिनु येसुमी आ शेंसीब आन कली "इन थुं ग्येत्थ लुक्च मपने। परमप्रभु यावे कली थमा सुतीन। आं कली यो थमा सुइय्यीनी। 2 आं आफ बाक्तीकेम शुश मुर आन कली बाक्तीक सेल्शो बाक्नीम। मोपतीके इन बाक्तीक ठीक पथ लाइनुड। 3 मिनु इन बाक्तीक ठीक पशा, लेंशा जाक्शा आं बाक्तीक लाइक्नन्नी। मिनु गो नु काथा बाक्नीनी। यूहन्ना १२:२६; यूहन्ना १७:२४ 4 मिनु आं लतीक लां तुइक्नीनी" देंत। 5 मिनु थोमासमी येसु कली "प्रभु, गे ते लाइनीनी? गो मतुइक्नीकी। मिनु लां दोपा तुइक्नीकी?" देंत। 6 मिनु येसुमी "गो थमा नु ब्रोंइचा गेब लां नड। सुइ आन पतीक गेना हना यो आं आफ नु बाक्चा मताइनीम। तन्न आं पतीके रे ला गेना हना यो परमप्रभु यावे नु बाक्चा ताइनीम। यूहन्ना १०:९; मत्ती ११:२७; रोमी ५:१-२; हिब्रू १०:२० 7 गेपुकी आं कली तुइक्ताक्नी हना, आं आफ कली यो तुइक्नीनी। मुल रे गेपुकी आं आफ कली तुइश्शा ताइनीनी" देंत।

8 मिनु फिलीपमी "प्रभु, इन आफ आंइ कली कोंइदीन। मिनु ग्येरनीकी" देंत। 9 मिनु येसुमी "गो नु शुश बाक्शा यो, गे आं कली मतुइक्नेवे, फिलीप? सुमी आं कली तयी, मेकोमी आं आफ कली यो ताप्तु। मारदे 'इन आफ कोंइदीन' देंनेवे? यूहन्ना १२:४५; हिब्रू १:३ 10 गो आं आफ आगामी बाक्नुड। मिनु आं आफ आं आगामी बाक्ब, दे थमा मसुइक्नेवे? आं देशो लोत्र आं के ममाइ, आं आफ आ लोत्र बाक्ब। आं आगामी बाक्शो आं आफोमी गेय पाइब। यूहन्ना १२:४९ 11 गो आं आफ आ आगामी बाक्नुड। आं आफ आं आगामी बाक्ब, दे थमा सुतीन। आं लोत्र नेंशा, थमा सुइक्ने मचाप्नीनी हना, आं पशो तशा थमा सुतीन। यूहन्ना १०:२५, ३८ 12 मिनु नोफा दाइश्शा नेनीन, सुमी आं कली थमा सुइक्बा, मेकोमी आं पशो गेय यो पाइब। मिनु आं क्येडा ठेयब गेय पाइब। मारदे हना गो आं आफ आ बाक्तीक लाइनुड। मत्ती २८:१९ 13 मिनु गेपुकी आं नेमी मार मार पुंडनीनु, गो गेनन्नी। गो इन पुंडशो गेशा, गो, आं पतीके आं आफ आ सक्ति कोंइनुड। यूहन्ना १५:७; यूहन्ना १६:२४; मर्कूस ११:२४; १यूहन्ना ५:१४-१५ 14 आं नेमी मार मार पुंडनीनी, गो मेको गेनन्नी।

परमप्रभु आ सोक्त आ पर्बम शेंशो

15 गेपुकी आं कली दाक्ताक्नी हना, आं अरेशो पाइनीनी। यूहन्ना १५:१०; १यूहन्ना ५:३ 16 गेपुकी नु काथा बाक्शा, वारच पाइब का सोइक्चा, दे आं आफ कली पुंडनुड। मेको गेपुकी नु गेना हना यो मप्रोंइथु बाक्ब। यूहन्ना १५:२६; यूहन्ना १६:७ 17 मेको वारच पाइब थमा डा सोक्त बाक्ब। आं कली थमा मसुइक्बपुकीमी मेको सोक्त ताक्ने मचाप्नीम। मारदे हना मेकोपुकीमी मेको सोक्त कली मतुइक्नीम। गेपुकी चहिं मेको कली तुइक्नीनी। मारदे हना मेको गेपुकी नु बाक्ब। मिनु इन आगामी बाक्ब। यूहन्ना १६:१३

18 गो इन कली रोम रोइक्च खोदेशो पा मवोइक्नन्नी। इन बाक्तीके जाक्नुड। 19 इक्का नोले थमा मसुइक्बपुकीमी आं कली लेंशा मताइनीम। गेपुकीमी चहिं आं कली ताइनीनी। मारदे हना गो ब्रोंइनुड। मिनु गेपुकी यो ब्रोंइनीनी। यूहन्ना २०:२० 20 मिनु आं आफ आ आगाम बाक्नुड। गेपुकी आं आगामी बाक्नीनी। मिनु गो इन आगामी बाक्नुड, दे मेना रुप्शा तुइक्नीनी। 21 सुमी आं अरेशो तुइश्शा पाइबा, मेकोमी आं कली दाक्ब। सुमी आं कली दाक्बा, आं आफोमी मेको कली यो दाक्ब। मिनु गो मेको कली दाक्शा, आं कली तुइक्पांइसीनुड" दे येसुमी देंत। १यूहन्ना ५:३; यूहन्ना १६:२७ 22 मिनु यहूदामी, इस्कारीयोत डा यहूदा चहिं ममाइ, येसु कली "प्रभु, गे आंइ कली तुइक्पांइसीनीनी।

थमा मसुइक्ब आन कली चहिं मतुइक्पांइसीनीनी, दोपा रुम्सीबा डा?" दे हिल्लो पाप्तु। 23 मिनु येसुमी "सुमी आं कली दाक्बा, मेकोम आं देशो लोव्र पाइब। आं आफोमी मेको कली दाक्ब। मिनु गो नु आं आफ मेको नु बाक्नस्कु। हितोपदेस ८:१७; एफिसी ३:१७ 24 आं कली मदाक्बमी चहिं आं देशो लोव्र यो मपाइब। आं देशो लोव्र आं के ममाइ, आं कली सोइक्ब आं आफ के बाक्ब। यूहन्ना ७:१६-१७

25 गेपुकी नु बाक्शा, एको लोव्र पाता। 26 आं नेमी आं आफोमी इन कली वारच पाइब आ सोक्त सोइक्ब। मेको सोक्तीमी इन कली मारेइ मारेइ शेंब नु आं देशो लोव्र नेल्ल फ्रुक्पाइक्ब।

येसु आ गेशो थुं नाइक्तीके

27 गो आं थुं नाइक्शा खोदेशो पा इन थुं नाइक्पाइक्नन्नी। मुरुमी पशो खोदेशो ममाइ, इन थुं ग्येत्य लुक्च मपने। महिनीने। यूहन्ना १६:३३; फिलिप्पी ४:७ 28 'गो लाइनुड। मिनु लेंशा जाक्नुड' दे आं देशो नेतीनी। गेपुकी आं कली दाक्ताक्वीनी हना, ग्येरसीनी वा। मारदे हना गो आं आफ आ बाक्तीक लाइनुड। आं आफ चहिं आं क्येडा ठेयब बाक्ब। 29 नेल्ल दुम्चा क्येडा डोंइती शेंताक्नन्नी। मेको दुम्मेनु, गेपुकी थमा सुइक्ब दुम्नीनी। 30 मुल डा मेरे शुश मशेंनन्नी। मारदे हना रागी डा मुर आन कली हुकुम पाइब जाक्ब। मेकोमी आं कली ग्राने मचाप्ब। यूहन्ना १२:३१; एफिसी २:२ 31 गो आं आफ आ देशो पाइनुड। मो पडानु, गो आं आफ कली दाक्नुड, दे रागी रागी डा मुरपुकीमी तुइक्तमेक्ल। लो बोक्कीन, गाक्य" देंत। यूहन्ना १०:१८

15

थमा डा अडगुर बोट

1 मिनु येसुमी "गो थमा डा अडगुर बोट नड। आं आफ चहिं अडगुर कली कोव्रब बाक्ब। भजन संग्रह ८०:९-१२; यसैया ५:१-७; येरमीया २:२१ 2 आं आफोमी फल मसिप्ब राशी आन कली खोइश्शा ताइक्ब। फल सिप्ब राशी कली मेको क्येडा शुश फल सिप्पाइक्चा, दे मुंइशा वोइक्ब। यूहन्ना १३:१०; १पत्रुस १:२३ 3 गेपुकी आं देशो लोव्र टितीके मुंइसीशो राशी खोदेशो दुम्तीनी। 4 गेपुकी आं आगामी बाक्कीन। मिनु गो इन आगामी बाक्नुड। राशी बोटमी मबाक्त हना, मेको राशी फल सिन्ने मचाप्ब। मोपतीके गेपुकी यो आं आगामी मबाक्तीनी हना, फल सिन्ने मचाप्पीनी। 5 गो अडगुर बोट नड। गेपुकी चहिं राशी ननी। सु आं आगाम बाक्बा, गो मेको आ आगामी बाक्नुड। मिनु मेकोमी शुश फल सिप्ब। तन्न गो रे डोन बाक्तीनी हना, मारेइ पने मचाप्पीनी। २कोरिन्थी २:५-६ 6 सु चहिं आं आगामी मबाक्बा, मेको खोइश्शा ताइश्शो राशी खोदेशो पा सोव्रब। मिनु मुरपुकीमी मोदेशो राशी कली खुप्शा मीम चोइनीम। 7 गेपुकी आं आगामी बाक्शा नु आं लोव्र इन आगामी बाक्त हना, इन दाक्शो पुनीन। मिनु इन पुंइशो ताइनीनी। मर्कूस ११:२४ 8 गेपुकी आं शेंसीब दुम्शा, शुश फल सिप्ब दुम्तीनी हना, आं आफ आ सक्ति कोइनीनी। मोपा गेपुकी आं शेंसीब दुम्तीनी। मत्ती ५:१६

दाक्मुचा माल्ब, दे शेंशो

9 आं आफोमी आं कली दाक्ब। मिनु आं आफोमी आं कली दाक्शो खोदेब पा, गो इन कली दाक्ताक्नन्नी। गेपुकी यो 'गो इन कली दाक्नुड' दे तुइश्शा बाक्कीन। 10 दोपा गो आं आफोमी देशो लोव्र टिशा, आं आफ नु दाक्मुइनस्कु, मोपा गेपुकी यो आं देशो लोव्र टीतीनी हना, गो नु दाक्मुशा बाक्नय। 11 इन कली एको लोव्र मारदे पाता देशा हना, आं ग्येरशो थुं इन थुंमी लील। मिनु इन थुं ग्येरसीशा बाक्ल, दे एको लोव्र पाता। यूहन्ना १७:१३

12 गो इन कली दाक्शो खोदेशो पा गेपुकी यो दाक्मुने, दे आं अरेशो बाक्ब। यूहन्ना १३:३४ 13 सु आ वारच आ पर्बम साइक्चा पुंइसीबा, मेको नेल्ल क्येडा ठेयब दाक्ब वारच बाक्ब। यूहन्ना १०:११; १यूहन्ना ३:१६ 14 गेपुकी आं देशो पना पन बाक्तीनी हना, आं वारच ननी। यूहन्ना ८:३१; मत्ती १२:५० 15 मुल रे गो इन कली वाइल मदेनुड। मारदे हना वाइल आ ठेयब मुरुमी मार गेय पचशो बाक्मे, मेको वाइलम मतुइक्ब। गो चहिं इन कली आं आफ आ देशो नेल्ल शेंताक्नन्नी। मोपतीके इन कली वारच देंनुड। 16 गेपुकीमी आं कली मयोव्रयीनी। तन्न गेपुकी लशा फल सिश्शा, इन सिश्शो फल लील, दे गो इन कली योव्रतन्नी। मिनु गेपुकीमी आं आफ कली आं नेमी इन दाक्शो पुंइनीनु, आं आफोमी इन कली गेवल, दे वोइक्तन्नी। 17 गो इन कली 'दाक्मुने' दे माइक्तन्नी" देंत।

थमा सुइक्ब श्येत जाइनीम

18 मिनू “रागी डा मुरपुकीमी इन कली मदाक्नीमी। इन कली मदाक्चा क्येडा डोंइती आं कली मदाक्नीम, दे तुइक्नीमी। यूहन्ना ७:७ 19 गेपुकी रागी डा मुर खोदेशो बाक्तीनी हना, रागी डा मुरपुकीमी इन कली दाक्नीमी। तन्न गे रागी डा मुर मननी। गो इन कली रागी डा मुरपुकी रे योव्रतन्नी। मोपतीके रागी डा मुरपुकीमी इन कली मदाक्नीम। यूहन्ना १७:१४; १यूहन्ना ४:४-५ 20 मिनू डोंइती गो इन कली ‘होव्रप क्येडा वाइली ठेयब ममाइ’ देती। मिनू आं देशो मिम्तीन। मुरपुकीमी आं कली श्येत गेतीमी हना, इन कली यो श्येत गेनीमी। मुरपुकीमी दोपा आं देशो लोव्र नेंशा टीमे, मोपा इन देशो लोव्र यो टीनीम। यूहन्ना १३:१६; मत्ती १०:२४-२५ 21 मुरपुकीमी आं नोले खोइक्ब इन कली श्येत गेनीम। मारदे हना आं कली सोइक्ब कली मतुइक्नीम। यूहन्ना १६:३ 22 गो रागीमी जाक्शा, मेको मुर आन कली शेंताक्डमी। आं लोव्र तुइशशा यो मटीमे। मोपतीके मेकोपुकी पाप राइनीमी। यूहन्ना ९:४१ 23 सुमी आं कली मदाक्बा, मेकोमी आं आफ कली यो मदाक्ब। लूका १०:३६ 24 गो मुर आन कली छक लाक्चा डा गेय कोंइताक्डमी। आं क्येडा डोंइती सुइमी आं खोदेशो गेय मकोंइदे। मेको गेय कोंइशा यो मुरपुकीमी आं आफ नु गो निम्फा आंस कली मदाक्नीम। 25 परमप्रभु यावेमी ब्रेक्पाइशशो लोव्र थमा दुम्चा कली आं कली मदाक्नीम। मार ब्रेक्पाइशशो बाक्त देशा हना ‘मेकोपुकीमी आं कली मोशा यो मदाक्नीम’ दे ब्रेक्शो बाक्त। भजन संग्रह ६९:४

26 मिनू वारच पाइब का जाक्ब। गो मेको कली आफ आ बाक्तीक रे सोइक्नुड। मेको परमप्रभु यावे रे जाक्शो थमा डा सोक्त बाक्ब। मेकोमी आं पबर्म शेंब। यूहन्ना १४:१६,२६; लूका २४:४९ 27 मिनू गेपुकी यो आं सांकछी दुम्शा, मुर आन कली आं पबर्म शेंनीनी। मारदे हना गेपुकी डोंइती रे गो नु बाक्शो ननी” देत। प्रेरित १:८,२१-२२; प्रेरित ५:३२

16

1 मिनू येसुमी “गो एको लोव्र नेल्ल मारदे शेंताक्नी देशा हना, थमा सुइक्तीक रे नोले मशोंइसीन, दे शेंताक्नी। 2 मुरपुकीमी इन कली गुम्तीक खिं रे तिल्लीम। थमा, इच्का नोले इन कली साइक्बपुकीमी ‘गो परमप्रभु यावे आ दाक्शो पना पन बाक्ती’ दे मिम्नीम। मत्ती १०:१७,२२; मत्ती २४:९ 3 मोदेशो पाइनीम। मारदे हना आं आफ नु आं कली मतुइक्नीम। यूहन्ना १५:२३ 4 मिनू गो मेको नेल्ल इन कली शेंताक्नी। आं देशो दुम्मेनु, गो इन कली डोंइती देशो मिम्तीन। डोंइती गो एको लोव्र इन कली मनैपाइक्नी। मारदे हना गेपुकी नु काथा बाक्ती।

परमप्रभु आ सोक्त आ गेय

5 मुल चहिं आं कली रागीमी सोइक्ब आ बाक्तीकेमी लाइनुड। गो लती हना यो, गेपुकी सुइमी ‘ते लाइनीनी?’ दे हिल्लो मपाइनीनी। 6 तन्न आं देशो नेंशा, इन थुं खाइक्ब। 7 नोफा दाइशशा नेनीन, आं लशो इन कली रिम्शो दुम्ब। गो मलती हना, थमा सुइक्ब आन कली वारच पाइब मजाक्ब। गो लती हना, मेको कली सोइक्नुड। यूहन्ना १४:१६,२६ 8 मिनू मेको जाक्शा, रागी डा मुर आन कली पाप आ पबर्म नु परमप्रभु यावे आ डोंइती मार ठीक बाक्ब नु परमप्रभु यावे आ निसाफ पतीक दोदेशो बाक्बा, दे शेंब। 9 मेको आन पाप मार बाक्त देशा हना, आं कली थमा मसुइशशो बाक्नीम। यूहन्ना १५:२२,२४ 10 परमप्रभु यावे आ डोंइती ठीक दुम्शा बाक्चा आ पबर्म मार शेंब देशा हना, गो आं आफ आ बाक्तीक लाइनुड। मो दुम्तीके गेपुकीमी आं कली मताइनीनी, दे शेंब। प्रेरित ५:३१; रोमी ४:२५ 11 मिनू निसाफ पचा आ पबर्म मार शेंब देशा हना, परमप्रभु यावेमी रागी डा मुर आन कली हुकुम पाइब सैतान कली निसाफ पने थुम्तु, दे शेंब। यूहन्ना १२:३१

12 मिनू इन कली शेंतीक लोव्र शुश लीब। तन्न मुल फाल्ने मचाप्नीनी। १कोरिन्थी ३:१ 13 मिनू थमा डा सोक्त जाक्शा, इन कली थमा लां कोंइशा शेंब। मेकोमी आंम मिम्शो मशेंब। तन्न मार मार नेंबा, मेकोन शेंब। नोले मार मार दुम्बा, मेको यो शेंब। यूहन्ना १४:२६; १यूहन्ना २:२७ 14 आं सक्ति कोंइब। गो मार देनुडा, मेको इन कली शेंब। 15 आं आफ आ सक्ति नु आं सक्ति कान बाक्ब। आं आफ नु मार मार बाक्मे, मेको आं के नम। मिनू परमप्रभु यावे आ सोक्तीमी आं लोव्र नेंशा, इन कली शेंब। यूहन्ना ३:३५; यूहन्ना १७:१०

‘परमप्रभु आ बाक्तीक लाइनुड’ देशो

16 इच्का नाक्त नोले आं कली मताइनीनी। मिनू इच्का नोले ताइनीनी” दे येसुमी आ शेंसीब आन कली माइक्तीमी। यूहन्ना १४:१९ 17 आ शेंसीब का निक्शीमी “इच्का नाक्त नोले आं कली मताइनीनी। मिनू लेंशा इच्का नाक्त नोले ताइनीनी। मिनू गो आं आफ आ बाक्तीक लाइनुड देत। एको लोव्र मार में” देमुम्तेक्म। 18 मिनू “इच्का नोले नाक्त

देशो लोत्र, मार में, आ देशो लोत्र मरुबय” देमुक्तेकम। 19 मिनु येसुमी आ कली हिल्लो पाइनीमी, दे तुइक्ताक्व। मिनु मेको आन कली “इच्का नाक्त नोले आं कली मताइनीनी। मिनु लेंशा इच्का नाक्त नोले ताइनीनी देशो लोत्र आ पबर्म मार लोत्र पमुनी? 20 नोफा दाइश्शा नेनीन, गेपुकी डाक्शा, हिशेक पाइनीनी। रागी डा मुरपुकी चहिं ग्येरसीनीम। इन थुं खाइश्शो बाक्नीनी। तन्न थुं खाइश्शो साशा ग्येरनीनी। मर्कूस १६:१० 21 मीश मुरुमी आल थिचावानु ‘आं थिची जाक्त’ दे हिंशा, श्येत जाइब। तन्न आल थिशा ‘आल का जरमेसाक्व’ दे ग्येरसीब। आ डोंइती डा हिंशो नु श्येत ममिम्ब। यसैया २६:१७ 22 मिनु मेको खोदेशो पा गेपुकी मुल थुं खाइश्शो बाक्नीनी। तन्न गो इन कली लेंशा तडानु, गेपुकी थमा पा ग्येरसीनीनी। मिनु इन ग्येरसीशो सुइमी क्याम्ने मचाप्नीम। 23 मेना गेपुकी आं कली मारेइ हिल्लो मपाइनीनी। नोफा दाइश्शा नेनीन, गे आं नेमी आं आफ कली मार मार पुंइनीनु, आं आफोमी इन कली गेब। यूहन्ना १४:१३-१४ 24 मुल सम्म गेपुकीमी आं नेमी मारेइ मपुंइनी। पुनीन, मिनु इन पुंइशो ताइनीनी। मेको तशा, गेपुकी थमा पा ग्येरसीनीनी।

25 गो इन कली कथा खोदेशो पा शेंताक्नी। नोले कथा पा मशेंनन्नी। मेना आं आफ आ पबर्म मारेइ मखुइक्थु शेंनन्नी। यूहन्ना १५:११ 26 आं नेमी पुंइनीनी। मिनु गो ‘आं आफ कली इन पबर्म पुंइनुड’ दे इन कली मदेनुड। 27 आं आफोमी इन कली दाक्ब। मारदे हना आं कली दाक्ताक्नी। गो आं परमप्रभु यावे रे जाक्शो नड, दे थमा सुइक्तीनी। यूहन्ना १४:२१ 28 गो आं आफ रे रागीमी जाक्ती। लेंशा रागी रे पा, आं आफ आ बाक्तीक लाइनुड” देत।

29 मिनु आ शेंसीबपुकीमी येसु कली “मुल गे कथा पा मशेंथु, मारेइ मखुइक्थु शेंनीनी। 30 गे नेल्ल तुइक्नीनी, दे गोपुकी मुल तुइक्ताक्क। मोपतीके इन कली शेंब ममाल्ब। गे परमप्रभु यावे आ बाक्तीक रे यिशो ननी, दे थमा सुइक्तक” देतेकम। 31 मिनु येसुमी “मार, गे मुल थमा सुइक्नीनी, मिनु? 32 नोले नेल्ल ब्राशा, इन खिं खिं लशा, आं कली प्रोंइनीनी। मिनु गो का ला बाक्नुड। तन्न गो का ला मदुम्नुड। मारदे हना आं आफ गो नु बाक्ब। जकरिया १३:७; मती २६:३१ 33 आं कली मिम्शा इन थुं नाइश्शा बाक्कीन, दे एको लोत्र शेंताक्नी। गेपुकी रागीम बाक्शा, श्येत जाइनीनी। तन्न थुं बारपाइश्शा ग्येरसीने। गो रागी कली ग्राती” देत। यूहन्ना १४:२७; रोमी ५:१; १यूहन्ना ५:४

17

येसुम आ आफ कली पुंइशो लोत्र

1 मिनु येसुमी मेको लोत्र पने थुम्शा, सरीड गे कोव्रशा “आं आफ, आं लची जाक्त, इन सक्ति गेयीनी। मिनु गो इन सक्ति कोंइनुड। 2 गे आं कली मुर नेल्ल आन कली अधिकार पचा गेतीनी। मिनु आं कली गेशो मुर नेल्ल आन कली गेना हना यो ब्रोंइशा बाक्चा गेनुडमी। मती ११:२७ 3 गेना हना यो गे नु ब्रोंइशा बाक्चा मार बाक्ब देशा हना, सुमी इन कली गे ला थमा परमप्रभु यावे बाक्नीनी नु गो, इन सोइश्शो येसु खीस्त नड, दे तुइक्नीमी, मेको ला गेना हना यो गे नु ब्रोंइशा बाक्चा ताइनीम। १यूहन्ना ५:२० 4 रागीम बाक्शा, इन पपाइश्शो गेय थुम्शा, इन सक्ति कोंइताक्डमी। 5 आं आफ, रागी सेल्चा क्येडा डोंइती गे नु इन छेडछेडमी बाक्ती। मुल लेंशा इन बाक्तीक जाक्चा चिक्ताक्ड। डोंइती डा खोदेशो पा गे नु इन छेडछेडमी बाक्चा गेयीनी। यूहन्ना १:१; फिलिप्पी २:६

6 गेमी रागी रे प्रोंइशो मुरपुकी गेतीनी। मेको आन कली इन नें तुइक्पाइक्तामी। मेको मुरपुकी इन के बाक्तेकम। मिनु गे आं कली गेतीनी। मेकोपुकीमी इन लोत्र टिना टिन बाक्नीम। 7 गे आं कली मार मार गेनी, मेको नेल्ल इन के बाक्ब, दे मेकोपुकीमी मुल तुइक्नीम। 8 गे आं कली शेंताक्यीनी। मिनु इन शेंशो लोत्र मेको आन कली शेंताक्डमी। मिनु थमा सुइक्तेकम। गो इन बाक्तीक रे जाक्शो नड, दे थमा पा तुइक्नीम। मेकोपुकीमी आं कली सोइक्ब, गे ननी, दे थमा सुइक्तेकम। यूहन्ना १६:३० 9 मिनु गो मेको आन पबर्म इन कली पुंइनुड। रागी डा मुर आन पबर्म मपुंइनुड। आं कली गेशो मुर आन पबर्म पुंइनुड। मारदे हना मेकोपुकी इन के नम। यूहन्ना ६:३७,४४ 10 आं मुर नेल्ल इन के नम। इन के आं के नम। मेकोपुकीमी आं सक्ति कोंइनीम। यूहन्ना १६:१५ 11 मुल गो रागीमी शुश नाक्त मबाक्नुड। गे का ला बाक्शो आं आफ, इन बाक्तीक जाक्चशो बाक्नुड। तन्न मेकोपुकी रागीमी बाक्नीम। आं आफ, आं कली गेशो मुर इन नें डा सक्तिमी रिम्शो कोव्रशा वोतीन। दोपा गो गे नु थुं का डा बाक्डा, मोपा मेकोपुकी यो थुं का दुम्शा बाक्मल, दे सक्ति गेने। 12 गो आं कली गेशो मुरपुकी नु बाक्डानु, इन नें डा सक्तिमी रिम्शो कोव्रशा वोइक्तामी। सुइ मजाम्म। इन ब्रेक्पाइश्शो लोत्र थमा दुम्चा, दे का चहिं जाम्शा, नरक लाइब दुम्त। यूहन्ना ६:३९; भजन संग्रह ४१:१० 13 मुल गो इन बाक्तीक जाक्चशो बाक्नुड। इन लोत्र रागीमी शेंताक्डमी। मारदे शेंताक्डमी देशा हना, आं ग्येरशो खोदेशो पा मेको यो ग्येरसीशा बाक्मल, दे शेंताक्डमी। यूहन्ना १५:११ 14 गो मेको आन कली इन देशो लोत्र शेंताक्डमी। मिनु

रागी डा मुरपुकीमी मेको आन कली श्येत गेम्तेक्म। मारदे हना रागी डा मनम। गो यो रागी डा मनड। यूहन्ना १५:१९ 15 मेको आन कली रागी रे प्रोनीन, दे इन कली मपुंडनुड। तन्न मेको आन कली सैतान रे प्रोनीन, दे पुंडनुड। मत्ती ६:१३; २थिस्सलोनिकी ३:३ 16 गो रागी डा मनड। मिनु आं खोदेशो पा मेकोपुकी यो रागी डा मनम। 17 मेको आन कली इन थमा पतीकेमी खुमीन। इन थमा पतीक चहिं इन लोत्र बाक्ब। भजन संग्रह ११०:१६० 18 गेमी आं कली रागीमी सोइशशो खोदेशो पा, गो यो मेको आन कली रागी रागीमी सोइक्ताक्डमी। यूहन्ना २०:२१ 19 मेको आन पबर्म गो इन कली जिम्मा गेसीनुड। मेकोपुकी यो थमा पतीकेमी खुम्शो मुर दुम्शा बाक्मल। हिब्रू १०:१०

20 गो मेको आन पबर्म ला इन कली मपुंडनुड। तन्न मेको आन शेंशो लोत्र रे आं कली थमा सुइक्ब दुम्ब आन पबर्म यो पुंडनुड। रोमी १०:१७ 21 मार पुंडनुड देशा हना, मेको नेल्ल थुं का डा दुम्मल। आं आफ, गे आं आगामी बाक्शो नु गो इन आगामी बाक्शो खोदेशो पा मेकोपुकी इस आगामी बाक्मल, दे पुंडनुड। मो दुम्त हना, रागी डा मुरपुकीमी गेमी आं कली सोइक्ताक्नी, दे थमा सुइक्नीम। गलाती ३:२८ 22 गेमी आं कली गेशो सक्ति मेको आन कली गेतामी। मारदे गेतामी देशा हना, गो निक्शी थुं का डा दुम्शो खोदेशो पा, मेकोपुकी यो गे नु थुं का डा दुम्मल, दे मेको सक्ति गेतामी। प्रेरित ४:३२ 23 गो मेको आन आगामी बाक्नुड। गे आं आगामी बाक्नीनी। मो पा बाक्शोनु, मेकोपुकी गे नु गो खोदेशो पा का दुम्नीम। मो दुम्शो तशा, रागी डा मुरपुकीमी गे आं कली सोइक्ताक्नी। मिनु गेमी आं कली दाक्ताक्नीनी। मोपा गेमी आं कली दाक्शो बुदी मेको आन कली यो दाक्ताक्नी, दे तुइक्तमेक्ल। १कोरिन्थी ६:१७ 24 आं आफ, आं कली गेशो मुरपुकी गो नु काथा बाक्मल, दे पुंडनुड। गे रागी सेल्चा डोंइती आं कली दाक्शा, इन सक्ति आं कली गेतीनी। मिनु मेकोपुकीमी यो आं सक्ति तामेक्ल। यूहन्ना १२:२६; हितोपदेस ८:२२-३१

25 आं आफ, गे नेल्ल रिम्शो नु ठीक पाइब बाक्नीनी। रागी डा मुरपुकीमी इन कली मतुइक्नीम। गो चहिं इन कली तुइक्नुड। मिनु आं शेंसीबपुकीमी गे आं कली सोइक्ताक्नीनी, दे तुइक्नीम। 26 गो मेको आन कली इन नें तुइक्पाइक्तामी। मिनु लेंशा तुइक्पाइक्नुडमी। मारदे इन नें तुइक्पाइक्नुडमी देशा हना, गेमी आं कली दाक्शो खोदेशो पा इन दाक्तीके मेको आन आगामी बाक्ल। मिनु गो मेको नु आन आगाम बाक्डल” दे येसुमी परमप्रभु यावे कली पुंडतु।

18

यहूदीपुकीमी येसु कली ग्याइशशो

यूहन्ना १३:-; मत्ती २६:-२८:-; मर्कूस १४:-१६:-; लूका २२:-२४:-

1 मिनु येसुमी परमप्रभु यावे नु मेको लोत्र पने थुम्शा, आ शेंसीबपुकी नु किद्रोन खोल्ला आइक्की हांबु लाम्तेक्म। मेकेर फल फुल रवा बाक्शो रिम्शो बाक्तीक बाक्त। मिनु येसु आ शेंसीबपुकी नु मेकेर ओव्रतेक्म। 2 डोंइती मेकेर येसु आ शेंसीबपुकी नु शुश ग्रुम्तीके बाक्त। मोपतीके येसु कली ग्याइक्ब आन कली चारच पाइब यहूदामी यो “मेकेर लाइनीम” दे तुइशशो बाक्त। लूका २१:३७ 3 मिनु यहूदामी ठेयब चढेब नु फरिसी आन सोइशशो सिपाहीपुकी नु सिपाही आन ठेयब मुर आन कली येसु नु आ शेंसीब आन बाक्तीक चाक्तु। मेकोपुकी तोव्रशी नु लालटिन दाशा, या कुरशा जाक्तेक्म। 4 मिनु येसुमी “आं कली ग्याइक्थ जाक्तेक्म” दे तुइशशा, मेको आन नेक्था लशा “सु कली माल्नी?” दे हिल्लो पाप्तु। 5 मिनु मेकोपुकीमी “नासरथ डा येसु कली माल्तक” देंतेक्म। मिनु येसुमी “गो नड” दे माइक्तीमी। येसु कली साइक्ब आन कली चारच पाइब यहूदा येसु कली ग्याइक्थ जाक्ब नु बाक्त। 6 मिनु येसुमी “गो नड” देंमेनु, मेको नेल्ल नोले गे दिल्ला गोल्लेक्म। 7 मिनु येसुमी लेंशा “सु कली माल्नी?” दे हिल्लो पवानु “नासरथ डा येसु कली माल्तक” देंतेक्म। 8 मिनु येसुमी “गो नड, देंती। आं कली माल्तीनी हना, अरु आन कली लचा गेने” दे माइक्तीमी। 9 डोंइती येसुमी परमप्रभु यावेमी गेशो मुर आन पबर्म “गो इन गेशो मुर सुइ मसाम्नुडमी” देशो लोत्र थमा दुम्चा कली मेको लोत्र पाप्तु। यूहन्ना १७:१२ 10 सिमोन पत्रुसमी तरवार कुरशो बाक्त। मिनु मेकोमी तरवार ग्रि शोइशशा, ठेयब चढेब आ वाइल आ नोफा दी खोइक्तु। मेको वाइली आ नें माल्कस बाक्त। 11 येसुमी “इ या खोतीमी पिप्तो। गो आं आफोमी देशो श्येत मजडल, दे मिन्नीनी? गो मेको श्येत जचा माल्नुड” देंत।

येसु हन्नास नु काइयाफास आस डोंइती

12 मिनु सिपाहीपुकी, आन कप्तान नु यहूदी आन ठेयब मुरपुकीमी येसु कली ग्याइशशा फ्रेंताक्म। 13 मेको बर्स डा नेल्ल क्येडा ठेयब चढेब काइयाफास माइशशो बाक्माक्त। मेको आ शिउ हन्नास माइशशो बाक्माक्त। मिनु

ग्याइक्बपुकीमी येसु कली डोंइती हन्नास आ बाक्तीकेम लाइक्तेकम। 14 डोंइती काइयाफासमी यहूदी आन कली “मुर नेल्ल आन साइक्चा डा मुर का कली साइक्चा रिम्शो दुम्ब” देशो बाक्माक्त। लूका ३:१-२; यूहन्ना ११:४९-५०

येसुम पत्रुस आ पर्बम देशो थमा दुम्शो

15 मिनु सिमोन पत्रुस येसु आ नोले खोइक्तु। अर्को शेंसीब कामी यो नोले खोइक्तु। नेल्ल क्येडा ठेयब चढेबमी मेको अर्को शेंसीब कली तुइश्शो बाक्त। मोपतीके मेको शेंसीब यो येसु नु नेल्ल क्येडा ठेयब चढेब आ खिं डा लाडगामी ओव्रत। 16 पत्रुस चहिं लाप्यो उइ बाक्माक्त। नेल्ल क्येडा ठेयब चढेब कली तुइक्ब अर्को शेंसीबमी लाप्यो कोव्रब मीश मुर कली लोव्र पशा गूत। पत्रुस कली खिं डा लाडगामी ओइताक्व। 17 लाप्यो कोव्रब मीश मुरुमी पत्रुस कली तशा “गे यो मेको मुर आ शेंसीब का मनवे डा?” देमेनु, पत्रुसमी “गो मनड” देत 18 ग्यू पशो बाक्त। मोपतीके वाइलपुकी नु मेकेर बाक्ब मुरपुकीमी मी मुइश्शा, एर ओंथ बाक्शा, मी थेरना थेरन बाक्तेकम। पत्रुस यो मी थेरशो बाक्त।

19 मेना नेल्ल क्येडा ठेयब चढेबमी येसु कली “इ शेंसीब आन कली मार शेनेवे?” दे हिल्लो पाप्तु। 20 मिनु येसुमी “गो मुर नेल्ल आन कली लोव्र पाता। गुम्तीक खिंमी नु परमप्रभु यावे आ खिंमी शुश यहूदी गुम्तीकेमी शेंताक्डमी। खुइश्शा मारेइ लोव्र मपड। यूहन्ना ७:१४,२६ 21 मारदे हिल्लो पयीनी? आं शेंशो लोव्र नेंब आन कली हिल्लो पने। मेकोपुकीमी आं शेंशो लोव्र तुइक्नीम” देत। 22 मिनु मो देमेनु, येसु आ नेक्था बाक्ब मुरुमी येसु कली चोव्रचो राप्शा “गे नेल्ल क्येडा ठेयब चढेब कली मोदेशो लोव्र पाइनेवे?” दे हुइक्ताक्व। 23 येसुमी “गो मरिम्शो लोव्र पाता हना, आं कली देनो। तन्न गो ठीक लोव्र पाता हना, मारदे राप्पी?” देत। 24 मिनु हन्नासमी येसु कली फ्रेंशो मप्रुइक्थु, नेल्ल क्येडा ठेयब चढेब काइयाफास आ बाक्तीकेमी सोइक्ताक्व।

25 मेना सिमोन पत्रुसमी थेरना थेरन बाक्शो बाक्त। मिनु मेकेर बाक्बपुकीमी पत्रुस कली “गे यो मेको मुर आ शेंसीब का मनवे डा?” देमानु “गो मनड” देत। 26 मेकेर नेल्ल क्येडा ठेयब चढेब आ वाइल का यो बाक्त। पत्रुसमी नोफा क्योरशो मुर आ खिं डा मुर का बाक्त। मेकोमी पत्रुस कली “गो इ कली मेको मुर नु फल फुल रूमी ताइतन, शां” देत। 27 मिनु पत्रुसमी लेंशा “गो मनड” देत। मो देमेनु, भाले ग्रीत।

येसुम पिलातस नु लोव्र पशो

28 मिनु नोले मेको ग्याइक्बपुकीमी येसु कली काइयाफास आ बाक्तीक रे पिलातस आ खिं गे लाइक्तेकम। मेना नां सोव्रचशो बाक्माक्त। मिनु मेकोपुकी पास्सा चाड डा भोज जचा कली ठीक दुम्शा बाक्शो बाक्तेकम। मोपतीके मेकोपुकी पिलातस रोमी दुम्शो आ पर्बम मथिचा डा बाक्त, दे आ खिं आगा मओव्रम। 29 मो दुम्तीके पिलातस लाडगा गूशा, मेको आन कली “एको मुर कली मार दोस गेनीनी?” दे हिल्लो पाप्तु। 30 मिनु मेकोपुकीमी “एको मुर मरिम्शो मबाक्शो हना, गोपुकीमी एको कली ग्याइश्शा, इन बाक्तीकेमी मारदे चाक्नीकी डा?” देतेकम। 31 मिनु पिलातसमी “एको कली लतीन। मिनु इन ऐन कानुनमी ब्रेक्शो कोव्रशा, निसाफ पने” दे माइक्तीमी। मिनु मेको यहूदीपुकीमी पिलातस कली “गो आंइ कली सुइ मुर साइक्चा मगारब” देतेकम। यूहन्ना १९:६-७ 32 येसुमी आ डोंइती देशो लोव्र “दोपा बेक्चा मालनुडा” देशो, थमा दुम्चा कली मोदेशो दुम्त। यूहन्ना १२:३२-३३; मत्ती २०:१९

33 मिनु पिलातस आ खिं ओव्रशा, येसु कली आगामी ब्रेश्शा “गे यहूदी आन पिप ननी?” दे हिल्लो पाप्तु। 34 येसुमी “गे आंमा मिम्शा मो देंनी देय मुरुमी देंमा?” दे हिल्लो पाप्तु। 35 मिनु पिलातसमी “गो यहूदी मनड। इन रागी डा मुरपुकी नु ठेयब चढेबपुकीमी इन कली निसाफ पचा कली आं कली जिम्मा गेतीमी। गे मार पनी?” दे हिल्लो पाप्तु। 36 येसुमी “गो एको रागी डा पिप मनड। गो रागी डा पिप नड हना, आं वारचपुकीमी राम्शी तोशा, ओपा यहूदीपुकीमी आं कली मग्याइक्थीमी वा। तन्न गो एको रागी डा पिप मनड” दे येसुमी देत। 37 पिलातसमी “मिनु गे पिपन ननी?” दे हिल्लो पाप्तु। मिनु येसुमी “गो पिप नड, दे गे आंमा देंतीनी। मिनु थमा मार बाक्बा, दे कोइंचा कली रागीम जरमेशा जाक्ती। सु थमामी बाक्बा, मेकोमी आं सेंदा नेंब” देत। १तिमोथी ६:१३ 38 मिनु पिलातसमी “थमा मार में?” देत। मिनु मेको देंम नोले पिलातस लेंशा लाडगा गूशा, यहूदी आन कली “एको मुर मरिम्शो पाइब, दे मसुइक्नुड। 39 मिनु पास्सा चाडमी मुर का प्रोंइतीकेमी गो एको यहूदी आन पिप प्रोंइशा सोइक्नुड। गेपुकी मार देंनीनी?” दे हिल्लो पाम्तीमी। 40 मेकोपुकीमी चहिं “एको कली मप्रोंइचा। तन्न बारब्बा कली प्रोंइचा” दे ग्रीतेकम। बारब्बा चहिं खुइ बाक्माक्त।

19

“येसु कली साइक्चा” दे ग्रीशो

1 मिनु पिलातसमी येसु कली युक्पाइक्तु। 2 आ सिपाहीपुकीमी चू के सिरपेच सेल्शा, येसु आ पियामी गुप्ताक्म। मिनु येसु कली पिप आ फेक्तीक वा फेक्ताक्म। 3 मिनु आ नेक्था जाक्शा “जय, यहूदी आन पिप” देशा, आ चोवचो राप्तेक्म। 4 मिनु पिलातस लेंशा, खिं रे गूशा, लाडगामी रिम्शा बाक्शो आन कली “कोवडीन, गो एको कली गुंडशा, गेपुकी नु गुम्पाइक्नुड। मारदे हना मरिम्शो पाइब मसुइक्नुड, दे तुइक्तीन” दे माइक्तीमी। 5 मिनु येसु चू के सिरपेच गुप्शा, पिप आ फेक्तीक वा फेक्शा गूत। पिलातसमी “लो, एको मुर कली कोवडीन” देंत। 6 मिनु ठेयब चढेब नु यहूदी आन ठेयब मुरपुकीमी “शीमी कांटी थोक्शा क्याइश्शा सतीन। शीमी कांटी थोक्शा क्याइश्शा सतीन” देना देन ग्रीतेक्म। मिनु पिलातसमी “गो एको कली मरिम्शो पाइब मसुइक्नुड। मोपतीके गेपुकी एको कली लाइश्शा, शीमी कांटी थोक्शा क्याइश्शा सतीन” दे माइक्तीमी। 7 यहूदीपुकीमी “आंइ ऐन कानुन बाक्ब। मिनु मेको ऐन कानुनमी ब्रेक्शो खोदेशो पा एको मुर बेक्चा माल्ब। मारदे हना एकोमी आंमा कली परमप्रभु यावे आ तौ सेल्सीशो बाक्त” देंतेक्म। यूहन्ना १०:३३; लेवी २४:१६

8 मिनु पिलातसमी मोदेशो नेंशा, डोंइती क्येडा हिंत। 9 मिनु येसु कली लेंशा खिं ओंइशा “गे ते रे जाक्शो ननी?” दे हिल्लो पाप्तु। मिनु येसुमी मारेइ लोव मलेत्त। 10 मोपतीके पिलातसमी “गे आं कली लोव मपाइनीनी? इन कली प्रोंइशा सोइक्चा नु शीमी कांटी थोक्शा क्याइश्शा साइक्चा गो नु निम्फा अधिकार बाक्ब, दे मतुइक्नीनी?” दे माइक्तु। 11 मिनु येसुमी “इन के अधिकार बाक्ब। इन कली गेशो अधिकार चहिं इर रे गेशो बाक्ब। मोपतीके इन मरिम्शो पशो क्येडा आं कली साइक्चा कली वारच पाइब आ मरिम्शो पशो ठेयब बाक्ब” देंत। 12 मिनु येसु आ लोव नेंशा नोले पिलातसमी येसु कली प्रोंइशा सोइक्चा माल्तु। तन्न मेको यहूदीपुकीमी पिलातस कली “गे एको कली प्रोंइशा सोइक्ताक्नी हना, गे रोमी आन पिप सिजर आ वारच मननी। मिनु सुमी ‘गो पिप नड’ देबा, मेको सिजर आ जोरी सत्रु दुम्ब” देंतेक्म। प्रेरित १७:७

येसु कली यहूदी आन गुडमी गेशो

13 मिनु यहूदी आन लोव नेंशा, पिलातसमी येसु कली खिं रे गुंडताक्व। मिनु पिलातस निसाफ पाइब आ नित्तीकेमी निस्साक्व। मेको निसाफ नित्तीक आ खपीमी फुल्लु ब्रशो बाक्तेक्म। मेको कली हिब्रू लोवमी गाब्बाथा देंनीम। 14 मेना नां सोक्चा चिक्शो बाक्त। मेको नाक्ती चहिं पास्सा चाड डा भोज सातीक नाक्ती बाक्त। मिनु पिलातसमी यहूदी आन कली “इन पिप कली कोवडीन” देंत। 15 मिनु यहूदीपुकीमी “सतीन, सतीन, एको कली शीमी क्येप्शा कांटी थोक्तीन” दे ग्रीतेक्म। पिलातसमी “गो इन पिप कली शीमी क्येप्शा कांटी थोक्नुडा डा?” दे माइक्तीमी। मिनु ठेयब चढेबपुकीमी “गो आंइ के सिजर का ला पिप बाक्ब” देंतेक्म। यूहन्ना १८:३७ 16 पिलातसमी “येसु कली शीमी क्येप्शा कांटी थोक्तीन” दे मेको आन कली जिम्मा गेप्तु।

येसु कली शीम केप्शा कांटी थोक्शो

17 मिनु नोले यहूदीपुकीमी येसु कली लाइक्तेक्म। मिनु आ कली कांटी थोक्शा क्याइश्शा साइक्तीक शी आंमा कुरपाइश्शा, खप्परे माइक्तीकेमी लाइक्तेक्म। हिब्रू लोवमी मेको कली गोलगथा देंनीम। 18 मेकेर जाक्दीश्शा, येसु कली शीमी केप्शा कांटी थोक्ताक्म। मोदेशो पा मुर निक्शी आस कली यो शीमी केप्शा कांटी थोक्ताक्म। मिनु येसु कली कांटी थोक्शो शी मेको आस दातेमी खुक्तेक्म। 19 मिनु पिलातसमी “नासरथ डा येसु, यहूदी आन पिप” दे ब्रेक्स ब्रेक्शा, येसु आ शीमी केप्शा वोइक्तु। 20 येसु कली साइक्तीक ठाउं यरूसलेम सहर आ नेक्था बाक्त। मिनु शुश यहूदीपुकीमी मेको ब्रेक्शो ब्रेक्स पढेम्तेक्म। मेको ब्रेक्स चहिं हिब्रू, रोमी नु ग्रीक लोवमी ब्रेक्शो बाक्त। 21 मिनु यहूदी आन ठेयब चढेबपुकीमी पिलातस कली “यहूदी आन पिप ममाइ, तन्न ‘गो यहूदी आन पिप नड’ देंत, दे ब्रेक्तीन” दे माइक्तेक्म। 22 मिनु पिलातसमी “गो मार ब्रेक्तु, मेकोन ठीक ब्रेक्ताक्ड” दे माइक्तीमी। 23 सिपाहीपुकीमी येसु कली कांटी थोक्शो शी खुक्ने थुम्शा, येसु आ वासी ४ जना सिपाहीपुकीमी उइक्थ उइक्थ पा योक्साक्म। येसु आ तारी फेक्तीक वा उइ रे इर सम्म प्रोवशो मफेरशो थम रिम्शो वा का बाक्त। 24 मोपतीके मेकोपुकीमी “एको चहिं मखाक्व। तन्न बाजी ग्यारय। मिनु सुम ग्राबा, मेकोमी ताइब” देंमुम्तेक्म। मो पामेनु “आं वासी योक्सीनीम। आं तारी फेक्तीक वा कली ‘सुम ताइबा?’ दे बाजी ग्यारनीम” दे ब्रेक्शो लोव थमा दुम्त। भजन संग्रह २२:१८ 25 मिनु सिपाहीपुकीमी

मो पामेनु, येसु आ ममा येसु आ शी आ नेक्था बाक्त। क्लोपास आ मीश मरीयम नु माग्दाला डा मरीयम यो मेकेर बाक्ताक्स। मिनु येसु आ नेल्ल क्येडा दाक्शो शेंसीब यो मेकेर बाक्त। 26 मिनु येसुमी आ ममा कली “आं ममा, मेको कली इ तौ मिम्तो” दे माइक्तु। यूहन्ना १३:२३ 27 मिनु आ शेंसीब कली “गेमी यो इम्मा खोदेशो मिम्तो” दे माइक्तु। मेना रे मेको शेंसीबमी येसु आ ममा कली आ ममा मिम्शा, आ खिंम वोइक्तु।

येसु बेक्चा आ पर्बम ब्रेक्शो लोव्र

28 मिनु नोले येसुमी “आं गेय पचा नुप्त” दे तुइक्ताक्व। मिनु परमप्रभु यावे आ ब्रेक्पाइश्शो लोव्र थमा दुम्चा कली येसुमी “गो तूतू दाक्ती” देंत। भजन संग्रह २२:१५ 29 मिनु मेकेर गर का ग्युरशो तूचा थोव्रक वोइश्शो बाक्त। मेकोपुकीमी कोक्केमी वा खोदेशो फ्रेंशा, मेको ग्युरशो तूचा थोव्रकीमी खुम्शा, येसु कली युप्पाइक्तेक्म। भजन संग्रह ६९:२१ 30 मिनु येसुमी युप्शा “मुल थुम्ता” देंत। मिनु आ पिया खुक्शा बेक्त।

31 मेको पास्सा चाड मानेचा कली सातीक नाक्त बाक्त। मोपतीके बेक्शो रां शीमी मबाक्मल, दे यहूदीपुकीमी पिलातस कली “मेको आन खोइल जिक्शा साइश्शा, शी रे शोलशा लदमेक्ल” देंतेक्म। मारदे हना मेको पास्सा आ डोंइती डा ठेयब नाक्त बाक्त। ब्यवस्था २१:२३ 32 मोदुम्तीके सिपाहीपुकीमी कांटी थोक्शो येसु आ ग्युरा नु पेरा गे डा निम्फा आस कली खोइल जिक्ताक्म। 33 मिनु येसु आ क्युक्तीकेमी जाक्मानु, येसु कली बेक्शो ताम्तेक्म। मिनु येसु आ खोइल मजिक्गेम। 34 सिपाही कामी येसु आ कोव्रखामी भालामी तूताक्व। मिनु तूदानु, हुश नु ब्वाक्कु यित। 35 मेको नेल्ल ताइबमी मेको दुम्शो आ पर्बम सांकछी बाक्शा, थमा लोव्र पाइब। गेपुकी यो थमा सुतीन दे मेकोमी थमा लोव्र पाइब। 36 परमप्रभु यावे आ ब्रेक्पाइश्शो लोव्र थमा दुम्चा कली मोदेशो दुम्त। लोव्र कामी “मेको आ रुश का यो मजिक्नीम” दे ब्रेक्पाइश्शो बाक्त। प्रस्थान १२:४६ 37 मिनु लोव्र कामी “मेको तूबपुकीमी आम तूशो मुर कली कोव्रनीम” दे ब्रेक्पाइश्शो बाक्त। जकरिया १२:१०; प्रकाश १:७

येसु आ बेक्शो रां वोइश्शो

38 अरीमाथीया गाउं डा योसेफ माइश्शो मुर का बाक्त। मेको यहूदी आन कली तशा हिंशा खुइश्शा, येसु आ शेंसीब दुम्शो बाक्त। मेकोमी पिलातस कली “येसु आ बेक्शो रां लाइक्चा गेयीनी” दे पुना बाक्त। मिनु पिलातसमी लाइक्चा गेवा बाक्त। मिनु योसेफ येसु आ बेक्शो रां ब्रथ जाक्त। यूहन्ना ७:१३ 39 डोंइती येसु नु लोव्र पचा कली नाक्दो जाक्शो निकोदेमसमी येसु आ बेक्शो रां गिल्चा, दे सहे का लित्रा मूरे नु एलोव्र माइश्शो के सेल्शो ब्रोव्रशो रिना पाइब थोव्रक चाक्शा जाक्त। लित्रा का ३२७ ग्राम बाक्ब। यूहन्ना ३:२ 40 मिनु येसु आ बेक्शो रां लाइश्शा, ब्रोव्रशो रिना पाइब थोव्रक नु वामी गिल्लतेक्म। मेकोन यहूदी आन के बेक्शो मुर आन कली पतीक बाक्ब। 41 येसु कली शीमी कांटी थोक्तीक आ नेक्था फल फल रू का बाक्त। मेको रूमी बेक्शो मुर कली वोइक्तीक नक पुक्खी का सेल्शो बाक्त। मेकेर सुइ मवोइश्शो बाक्त। 42 मेको नाक्त यहूदी आन पास्सा मानेचा कली सातीक नाक्त बाक्त। मोपतीके येसु कली नेल्ल क्येडा नेक्था डा पुक्खीमी वोइक्तेक्म।

20

येसु सेंशो

मत्ती २८:१-१०; मर्कूस १६:१-८; लूका २१:१-१२

1 मिनु साता डा डोंइती नाक्त नां मसोव्रथु, माग्दाला डा मरीयम बेक्शो मुर वोइक्तीक पुक्खी जाक्दीम्मेनु, पुक्खी कली सुशो ठेयब फुल्लु तिल्लो तवा बाक्त। 2 मिनु फुल्लु तिल्लो तशा, दोरशा लशा, सिमोन पत्रुस नु येसु आ दाक्शो शेंसीब आस बाक्तीक जाक्त। मिनु “प्रभु कली बेक्शो मुर वोइक्तीक पुक्खी रे लदमे बाक्त। ते वोदमे?” दे हिल्लो पाप्तु। यूहन्ना १३:२३ 3 मिनु पत्रुस नु अर्को शेंसीब बेक्शो मुर वोइक्तीक पुक्खी कोव्रथ लाम्ताक्से। 4 निम्फा दोरताक्स। मिनु अर्को शेंसीबमी पत्रुस कली दाम पाप्तु। दाम पशा, डोंइती बेक्शो मुर वोइक्तीक पुक्खी जाक्दीत। 5 मिनु खुम बाप्शा पुक्खी आगा कोव्रतु। मेकेर येसु कली गिल्लो वा ला तशा, आगा मओव्र। 6 सिमोन पत्रुस जाक्शा, पुक्खी गु ओव्रशा कोव्रडानु, येसु कली गिल्लो वा ताप्तु। 7 मिनु पियामी फ्रेंशो रूमाल मुक्शा, तिल्ला वोइश्शो ताप्तु। यूहन्ना ११:४४ 8 नोले डोंइती जाक्ब अर्को शेंसीब यो ओव्रत। मिनु मेको वा तशा थमा सुइक्तु। 9 मारदे हना मुल सम्म मेकोपुकीमी येसु बेक्शो रे सेंसीचा माल्ब, दे ब्रेक्पाइश्शो लोव्र मतुइश्शो बाक्तेक्म। भजन संग्रह १६:१०; लूका २४:२५-२७; प्रेरित २: २४-३२; १कोरिन्थी १५:४ 10 मिनु नोले मेको शेंसीब निक्खी खिं लेत्ताक्स।

येसुमी तपांडसीशो

11 मरीयम डाकना डाकन पुक्खी आ नेक्था बाक्शो बाक्माक्त। डाकना डाकन खुम बाप्शा, पुक्खी आगामी कोवडानु, 12 बुश वा फेक्शो परमप्रभु यावे आ स्वर्ग डा गेय पाइब निक्खी आस कली तवा बाक्त। मेको निक्खी येसु आ बेक्शो रां वोइक्तीकेमी का पिया गे का खोइल गे निश्शो ताम्सी बाक्त। 13 मिनु मेको निक्खीमी मरीयम कली “गे मारदे डाकनेवे?” दे हिल्लो पाम्से बाक्त। मिनु मरीयममी “मेकोपुकीमी आं प्रभु कली लदमे बाक्त। मिनु ते वोदमे मतुइक्नुड” दे माइक्सी बाक्त। 14 मो देशा मरीयममी फिर लेशशा कोवडानु, येसु कली राप्शा बाक्शो तवा बाक्त। मेको येसु बाक्ब, दे मतुइक्ता बाक्त। 15 मिनु येसुमी “गे मारदे डाकनेवे? सु कली मली?” दे हिल्लो पवा बाक्त। मरीयममी “मेको फल फुल रूमी गेय पाइब मुर बाक्माक्त” दाप्शा, मेको कली “हजुर, गे मेको बेक्शो रां कली एक रे लाइक्तीनी हना, ते वोइक्नी, आं कली देनीने। गो मेको कली लाइक्नुड” दे मदा बाक्त। 16 मिनु येसुमी मरीयम कली “मरीयम” देमेनु, मरीयममी फिर लेशशा, हिब्रू लोवमी “राब्बोनी” देमाक्त। हिब्रू लोवमी राब्बोनी देशो “शेंब” बाक्ब। 17 मिनु येसुमी “मग्याइक्ती। मारदे हना मुल सम्म आं आफ आ बाक्तीक मलड। आं लोक्ब आन बाक्तीक लशा, मेको आन कली ‘गो इं आफ, परमप्रभु यावे आ बाक्तीक लाइनुड’ गे मेको आन कली शेंदो” दे माइक्तु। हिब्रू २:११-१२ 18 मिनु मागदाला डा मरीयम शेंसीब आन बाक्तीकेमी लशा “गो प्रभु कली ताता” देंत। येसु आ देशो लोव यो तुइक्पाइक्तीमी।

येसुम शेंसीब आन कली तपांडसीशो

मर्कूस १६:१४-१८; लूका २४:३६-४९

19 मेको साता डा डोंइती नाक्त नां रिक्चावानु, येसु आ शेंसीबपुकी यहूदी आन क्येडा हिंशा, लाप्चो चोक्शा, खिं गाम बाक्तेक्म। मिनु येसु मेको आन बाक्तीकेमी जाक्शा “थुं नाइश्शा बाक्कीन” देंत। 20 मो देशा मेको आन कली आ गुइ नु आ कोवखा कोइदानु, आ शेंसीबपुकी प्रभु कली तशा ग्येरसाक्म। १यूहन्ना १:३ 21 मिनु लेंशा येसुमी मेको आन कली “इन थुं नाइश्शा बाक्कीन। आं आफोमी दोपा सोइक्ती, मोपा गो इन कली यो सोइक्ताक्नन्नी” दे माइक्तीमी। यूहन्ना १७:१८ 22 मो देशा येसुमी मेको आन कली मुइश्शा “परमप्रभु यावे आ सोक्त ताक्कीन। 23 गेपुकीमी सु सु कली माफ गेनीनी, मेकोम माफ ताइनीम। सु सु कली माफ मगेनीनी, मेको आन पाप लीब” देंत। मत्ती १८:१८

थोमास कली थमा सुइक्पाइश्शो

24 मिनु येसु आ शेंसीब १२ जना आन दाते डा का जौले माइश्शो थोमास येसु जाक्मेनु, मेकेर मबाक्शो बाक्त। यूहन्ना ११:१६; यूहन्ना १४:५ 25 अरु शेंसीबपुकीमी “प्रभु कली ताइतक” दे थोमास कली देमानु “येसु आ गुइमी कांटी थोक्शो गार मतडा सम्म, मेको गारमी आं ब्रेप्चो मलिकथु नु आ कोवखा डा गारमी मथिडा सम्म, गो थमा मसुइक्नुड” देंत। यूहन्ना १९:३४

26 मिनु मेको मो दुम्शो साता का नोले येसु आ शेंसीबपुकी लेंशा खिं आगाम बाक्तेक्म। मेना थोमास यो मेकोपुकी नु काथा बाक्शो बाक्त। लाप्चो चोक्शा, आगाम बाक्मानु, येसु मेको आन बाक्तीकेमी जाक्शा “थुं नाइश्शा बाक्कीन” देंत। 27 मिनु येसुमी थोमास कली “आं गुइ डा गारमी इ ब्रेप्चो लिक्शा, कोवडो। मिनु इ गुइमी आं कोवखा डा गार थिवो। गे थमा मसुइक्ब मदुमो। तन्न थमा सुइक्ब दुमो” दे माइक्तु। 28 थोमासमी “आं प्रभु, आं परमप्रभु यावे” देंत। यूहन्ना १:१ 29 मिनु येसुमी “गे आं कली तशा थमा सुइक्तीवी। सुमी आं कली मतथु, थमा सुइक्बा, मेको शुश ग्येरसीशो मुर बाक्ब” देंत। १पत्रुस १:८; हिब्रू ११:३

एको किताब मारदे ब्रेक्शो बाक्मे

30 मिनु येसुमी आ शेंसीब नु बाक्शा, शुश अरु छक लाक्चा डा गेय पाप्तु। मेको गेयपुकी एको किताबमी मब्रेक्शो बाक्नीम। 31 मिनु मेको ब्रेक्शो छक लाक्चा डा गेयपुकी मारदे ब्रेक्शो बाक्नीम देशा हना, गेपुकीमी “येसु ख्रीस्त, परमप्रभु यावे आ तौ बाक्ब” दे थमा सुइक्ने चापीन। मिनु थमा सुइश्शा, आ नेमी गेना हना यो ब्रोंइशा बाक्चा ताइनीनी, दे ब्रेक्शो बाक्ब। १यूहन्ना ५:१३

21

येसुम गालील रागीम तपांडसीशो

1 मिनु नोले येसु तिबेरीयास डा समुन्द्र आ नेक्थामी आ शेंसीब आन कली लेंशा तपांडसाक्व। दोपा तपांडसाक्व देशा हना, 2 सिमोन पत्रुस, जौले माइश्शो थोमास, गालील डा काना सहर डा नथानेल, जबदी आ तौ निक्खी नु येसु आ

शेंसीब अर्को निक्शी काथा बाक्तेकम। यूहन्ना १४:५ ३ मिनू सिमोन पत्रुसमी मेको आन कली “गो डांड रेत्य लाइनुड” देंत। मिनू “गो यो गे नु लाइनीकी” देंतेकम। मिनू लशा, डोंगा डोइशशा, डांड रेत्य लाम्तेकम। तन्न मेको नाकदो डांड का यो मरेम्म। ४ मिनू सुनी नां सोव्रची ना येसु समुन्द्र आ नेक्थामी बाक्शो बाक्त। आ शेंसीबपुकीमी येसु बाक्माक्त, दे मतुइक्तेम। यूहन्ना २०:१४; लूका २४:१६ ५ मिनू येसुमी “ए आलपुकी, डांड बाक्म कों?” दे ब्रेशशा, हिल्लो पाप्तु। मिनू “मबा” दे लोव्र लेत्ताकम। लूका २४:४१ ६ मिनू येसुमी “इन ग्याइल डोंगा आ ग्युरा गे आपीन। मेकेर रेतनीनी” दे माइक्तीमी। मिनू आ देशो खोदेशो पा ग्याइल आप्तेकम। मिनू आन ग्याइली गुंडने मचाप्चा डा पा शुश डांड रेततेकम। लूका ५:४-७ ७ मोदेशो तशा, येसु आ नेल्ल क्येडा दाक्शो शेंसीबमी पत्रुस कली “प्रभु बाक्ब” दे माइक्तु। मिनू सिमोन पत्रुसमी “प्रभु बाक्ब” देशो नेशा, आ डोंइती प्रुइशशो वा लेंशा फेक्साक्व। मिनू ब्वाक्कुमी प्रेक्त। यूहन्ना १३:२३ ८ मिनू अरु शेंसीबपुकीमी डोंगामी बाक्शा, ग्याइल कीना कीन पिम्तेकम। ग्याइल ब्रीशो बाक्त। मेकोपुकी समुन्द्रमी सहे निक्शी गज खोदेशो डोन जाक्दीशशो बाक्तेकम।

९ मिनू मेकोपुकीमी डोंगा रे गूशा, डांड नु शोब्ले मीमी चोशा, वोइशशो ताम्तेकम। १० मिनू येसुमी “इन रेशशो डांड का निक्शी पितीन” दे माइक्तीमी। ११ येसु आ देशो टिशा, सिमोन पत्रुस डोंगामी डोइशशा, ग्याइल कली कीशा, ब्वाक्कु रे गुंडताक्व। मेको ग्याइलीमी सहे का ५३ ओटा ठेयब ठेयब डांड बाक्तेकम। मिश डा डांड बाक्शा यो मेको ग्याइली मगाक्माक्त। १२ मिनू येसुमी “निस्सीन जने ब्वने” दे माइक्तीमी। मिनू शेंसीबपुकीमी “गे सु ननी?” दे हिल्लो मपाम। “प्रभु बाक्ब” दे तुइक्ताकम। १३ मिनू येसुमी शोब्ले लाइशशा, आ शेंसीब आन कली शोब्ले नु डांड योक्शा गेम्तीमी। यूहन्ना ६:११ १४ मो दुम्मेनु, येसु सेंसीशो नोले आ शेंसीब आन कली खेयप सां तपांडसाक्व।

येसुमी पत्रुस कली लोव्र पशो

१५ मिनू जने थुम्शा, येसुमी सिमोन पत्रुस कली “योआन्नेस आ तौ सिमोन, गे आं कली एको आन क्येडा दाक्नेवे?” दे हिल्लो पाप्तु। मिनू पत्रुसमी “दाक्नन्नी, प्रभु, गे तुइक्नीनी” दे माइक्तु। मिनू येसुमी “आं पाठा आन कली थुल्मी” देंत। यूहन्ना १:४२ १६ मिनू येसुमी लेंशा पत्रुस कली “योआन्नेस आ तौ सिमोन, गे आं कली दाक्नेवे” दे हिल्लो पाप्तु। मिनू पत्रुसमी “दाक्नन्नी, प्रभु, गे तुइक्नीनी” दे माइक्तु। मिनू येसुमी “आं भेडा आन कली कोव्रमी” देंत। १ पत्रुस ५:२,४ १७ लेंशा येसुमी “योआन्नेस आ तौ सिमोन, गे आं कली दाक्नेवे?” दे हिल्लो पाप्तु। मिनू येसुमी खेयप सां “आं कली दाक्नेवे?” दे हिल्लो पशो नेशा, पत्रुस आ थुं खाइक्त। मिनू “प्रभु, गे नेल्ल तुइक्नीनी। गो इन कली दाक्नन्नी, दे तुइक्नीनी” दे माइक्तु। मिनू येसुमी “आं भेडा आन कली योव्रमी। यूहन्ना १३:३८; यूहन्ना १६:३० १८ नोफा दाइशशा नेनो, गे ठिटा बाक्डेनु, किप्शुर किम्सीशा, इ दाक्शो लां खोइक्तीवी। खाल्पा दुमेनु, इ गुइ हाम्नेवे। मिनू अर्कोमी इ कली किप्शुर किप्शा, इ मदाक्शो लां लाइक्ब” दे माइक्तु। १९ येसुमी पत्रुस दोपा परमप्रभु यावे आ सक्ति कोंइशा, साइक्चा पुंडसीबा, दे मोदेशो देंत। मिनू येसुमी “आं नोले खोइय्यी” देंत। यूहन्ना १३:३६

२० मिनू पत्रुसमी येसु आ नोले खोइशशा, फिर लेशशा कोव्रडानु, येसु आ दाक्शो शेंसीब आस नोले खोइशशो ताप्तु। मेको शेंसीब सु बाक्त देशा हना, डोंइती नाकदो डा खमे जची ना येसु नु बाक्शो बाक्त। मेको “प्रभु, इन कली साइक्ब आन कली वारच पाइब सु में?” दे हिल्लो पाइब बाक्त। यूहन्ना १३:२३-२५ २१ मिनू पत्रुसमी मेको कली तशा “प्रभु, मेको कली मार दुम्बा?” दे हिल्लो पाप्तु। २२ मिनू येसुमी “गो लेंशा मजाक्डा सम्म मेकोमी रिम्शा बाक्चा माल्ब, दे मिम्ताक्ड हना यो, इ कली मार दुम्बा डा? गे आं नोले खोइय्यी” दे माइक्तु। २३ मिनू थमा सुइक्बपुकीमी मेको येसु आ दाक्शो शेंसीब आ पर्बम “मेको शेंसीब मबेक्ब” दे लोव्र पमुम्तेकम। तन्न येसुमी “मेको मबेक्ब” देशो ममाइ, तन्न “गो मजाक्डा सम्म मेको रिम्शा बाक्ल कों मबाक्ल, इ कली मार दुम्बा डा” दे माइशशो बाक्त।

२४ येसुमी “एको मबेक्ब” देशो शेंसीब सु बाक्त देशा हना, एको किताब ब्रेक्ब बाक्त। मिनू मेको आ ब्रेक्शो नेल्ल थमा बाक्ब, दे तुइक्नीकी। यूहन्ना १५:२७ २५ येसुमी मेको किताबमी ब्रेक्शो पशो गेय ला ममाइ, तन्न अरु शुश गेय यो पाइबाक्त। आ पशो गेय नेल्ल ब्रेक्ताक्व हना, मेको किताबपुकी वोइक्चा कली रागीमी यो मरिक्ब, दे मिम्नुड। यूहन्ना २०:३०; भजन संग्रह १०६:२

प्रेरित

ब्रेक्ब मुर: एको किताब लूकाम ब्रेक्शो बाक्ब। लूका यहूदी मबाक्थु यो, पावल नु गेय पवा बाक्त। प्रेरित १६:१०-१७; प्रेरित २०:५-१५; प्रेरित २१:१-१८ नु प्रेरित २७:१-२८:१६ एको किताबमी शुश खेयप “गोपुकी” ब्रेक्शो बाक्ब। मोपतीके लूका पावल नु काथा बाक्शो तुंडसीब। लूका डक्टर बाक्त। कलस्सी ४:१४

गेना ब्रेक्शो: एको किताब गेना ब्रेक्शो बाक्मे, मेको रिम्शो पा मतुंडसीब। तन्न पावल रोम सहरम चोक्चा पुंडसीशो बर्स निक्शी दुम्शो नोले ६३-६४ ए. डी. एको किताब ब्रेक्शो बाक्चा माल्ब। एको किताब मथुम्शो किताब का बाक्त। मारदे हना लूका ते लमे, सुइमी मतुइक्नीम। ६४ ए. डी.मी रोम सहरम ठेयब मी सुइक्तीके नु थमा सुइक्ब आन कली खेदा पतीके लूका बेक्म कों, प्रोक्म कों मारेइ मतुंडसीब।

मार ब्रेक्शो: लूका, यहूदी मुर मबाक्ब। आ ब्रेक्शो “लूका ग्येरपाइक्तीक” लोत्रमी अर्को रागी डा मुर येसु ख्रीस्त आ पतीकेमी पाप रे ब्रोंइचा ताइनीम, दे शुश ब्रेक्शो बाक्ब। येसु ख्रीस्त आ सोइश्शो आन पशो गेय नु परमप्रभु यावे आ सोक्त आ गेय आ पर्वम शुश ब्रेक्शो बाक्ब।

येसु स्वर्ग लाइक्चा पुंडसीशो

1 आं दाक्शो थियोफीलस, गो डोंइती डा किताबमी परमप्रभु यावे आ बाक्तीक लाइक्चा मपुंडसे सम्म येसुमी मार पवा, मार शेंदा, मेको नेल्ल ब्रेक्शा, तुइक्पाइक्ने थुम्तन्नी। लूका १:३ 2 येसुमी शेंसीब आन कली योव्रशा, मेको योव्रशा आन कली सोइश्शोपुकी नें वोइश्शो बाक्माक्त। मेको सोइश्शो आन कली परमप्रभु यावे आ सोक्त रे पा मार शेंचा, मार पचा, नेल्ल शेंना शेंन वोइक्मी बाक्त। मत्ती २८:१-२० 3 मेको आन कली शेंशो मार बाक्माक्त देशा हना, येसु श्येत जशा साइक्चा पुंडसीशा, बेक्शा, बेक्शो रे सेंपाइक्चा पुंडसीशा, ४० नाक्त सम्म आ सोइश्शो आन कली तपांडसीन सीन परमप्रभु यावे आ राज्य डा लोत्र शेंना शेंन बाक्माक्त। 4 मोदेशो पा काथा बाक्शा, मेको आन कली “परमप्रभु यावेमी आ देशो लोत्र मखबा सम्म यरूसलेम सहरमीन बाक्कीन। लूका २४:४९; यूहन्ना १५:२६ 5 इन कली डोंइती मार मार देंडा, मेको लेंशा देंनुड यूहन्नामी मुर आन कली ब्वाक्कुम खुम्शा गुंडताक्व। इन कली चहिं परमप्रभु यावेमी आ सोक्तीम खुम्ब। मेको दुम्चा कली शुश नाक्त मलीशो बाक्ब” दे शेंदीमी बाक्त। मत्ती ३:११

6 मिनु येसु नु आ सोइश्शोपुकी बुक्शा बाक्मानु, मेकोपुकीमी येसु कली “प्रभु, गे इस्त्राएल कली मुल लेंशा आंम राज्य सेल्नीनी?” दे हिल्लो पामे बाक्त। लूका १९:११; लूका २४:२१ 7 मिनु येसुमी “राज्य सेल्चा आं आफ आ गुइमी बाक्ब। मिनु गेना सेल्चा दाक्बा, मेना सेल्ब। मेको तुइक्चा यो ममाल्नीनी। मत्ती २४:३६ 8 मार चहिं तुइक्चा माल्नीनी देशा हना, परमप्रभु यावे आ सोक्त आ सक्ति ताइनीनी। सक्ति तशा यरूसलेम, यहूदीया, सामरीया नु रागी नेल्लेमी हिरशा, आं लोत्र शेंशा, आं सांकछी दुम्नीनी” दे माइक्मी बाक्त। लूका २४:४८; प्रेरित ८:१ 9 मिनु मोदेशो लोत्र पा, मेको आन तना तन ग्येत्थ ग्युक्शा, गोस्सुमी गिल्सीशा सरीड ग्येत्थ लमाक्त। मिनु नोले मेकोपुकीमी मतामे बाक्त। मर्कूस १६:१९; लूका २४:५१ 10 मोपा यो सरीड गे कोव्रना कोव्रन बाक्मानु, बुश वा फेक्शो मुर निक्शी फो फु गूशा, आन डोंइती राप्शो तामे बाक्त। लूका २४:४ 11 मिनु मेको निक्शीमी “ए गालील डा मुर, मार सरीड गे कोव्रना कोव्रन बाक्नी? येसु इन बाक्तीके रे परमप्रभु यावे आ बाक्तीके लाइक्चा पुंडसाक्व। दोपा लशो तनी, मोपा काबु लेशशा यीब, दे तुइक्तीने” देंसा बाक्त। लूका २१:२७ 12 मिनु मेकोपुकी जैतून डांडा रे यरूसलेम लेम्मा बाक्त। मेको लां चहिं नाइक्तीक नाक्त गाक्चा दुम्तीक लां बाक्माक्त।

13 मिनु यरूसलेम सहरम जाक्शा डा मीन, खिं का डा तला तारी ओव्रशा बाक्मा बाक्त। मोपा बाक्बपुकी सु सु बाक्मा बाक्त देशा हना, पत्रुस, यूहन्ना, याकूब, अन्द्रीयास, फिलीप, थोमास, बारथोलोमाइ, मत्ती, अल्फयस आ तौ याकूब, सिमोन, मेको कली कनानी यो देंसीब नु याकूब आ तौ यहूदा बाक्मा बाक्त। लूका ६:१३-१६ 14 मेकोपुकी नु मीश मुरपुकी, येसु आ ममा मरीयम नु येसु आ लोकबपुकी यो बाक्मा बाक्त। मेको नेल्ल थुं का डा दुम्शा, नाक्त किंत किंत परमप्रभु यावे कली ठेयब सेल्ना सेल्न, पुंडना पुंडन बाक्बाक्मा बाक्त। यूहन्ना ७:३

सोइश्शो का तेम्शो

15 मिनु काबु नाक्त पत्रुस थमा सुइक्ब सहे का २० जना मुर आन दातेमी बाक्मा बाक्त। यूहन्ना २१:१५-१९
 16 मिनु पत्रुस मेको आन दातेमी राप्शा, मेको आन कली “आं लोक्बपुकी, नेनीने, येसु कली ग्याइक्ब आन कली लां
 कोंइब यहूदा आ पबर्म लोत्र का निक्शी पाइनुड। साइ परमप्रभु यावे आ सोक्तीमी पिप दाऊद कली मार ब्रेक्पाइशो
 बाक्मे, मेको नेल्ल थमा दुम्चा माल्ब। मिनु मुल थमा दुम्त। भजन संग्रह ४१:१० 17 यहूदा १२ जना शेंसीब आंइ दाते
 डा वारच का बाक्त। मेको कली यो प्रभुमी गेय का पपाइक्चा कली योत्रशो बाक्त। 18 मेकोमी येसु कली ग्याइक्ब
 आन कली लां कोंइशा, वारच पा क्येट ताक्गा बाक्त। मिनु मेको क्येटमी रू ग्यबा बाक्त। मोपा मरिम्शो गेय पतीके
 क्यूली पा दोक्शा, आ कोत्रज ब्रोलशा आ क्यी गूशा बेक्माक्त। मत्ती २७:३-१० 19 मेको आ मरिम्शो पशो यरूसलेम
 सहरमी बाक्ब नेल्लेमी तुइक्ताक्म। मिनु मेको रू कली आन लोत्र रे पा आखेल्दामा, दे नें वोइक्तेक्म। आखेल्दामा
 देशो “हुश आ रू” रुम्सीब। 20 साइ पिप दाऊदमी ब्रेक्शो लोत्रमी मार ब्रेक्शो बाक्ब देशा हना ‘मेको आ खिं ब्रेशशा
 बाक्ल, मेकेर सुइ बाक्चा मतामेक्ल, आ पशो गेय अर्को मुरुमी पवल’ दे ब्रेक्शो बाक्ब। भजन संग्रह ६९:२५-२६;
 भजन संग्रह १०९:८

21 मुल यहूदा आ पा डा मुर का योत्रचा माल्ब। दोदेशो मुर माल्ब देशा हना, यूहन्नामी मुर आन कली ब्वाक्कुमी
 खुम्शा गुंइशो नाक्त रे येसु परमप्रभु यावे आ बाक्तीक लाइक्चा मपुंइसे सम्म, प्रभु येसु नु काथा बाक्ब, काथा गाक्ब,
 काथा जाइब मुर का माल्ब। यूहन्ना १५:२७ 22 मेको मुरुम ‘येसु बेक्शा, सेंसीशो ताता’ देने चाप्चा माल्ब” दे माइक्मी
 बाक्त। 23 मिनु आ लोत्र नेंशा बिशशा, आन दाते रे योत्रशा, मुर निक्शी आस कली नेल्ल आन डोंइती राप्पदमे बाक्त।
 मेको आस नें का के योसेफ बारसाबास, आ याइनी नें चहिं युस्तस बाक्माक्त। का के चहिं मत्तीयस बाक्माक्त।
 24 मिनु मेकोपुकीमी “परमप्रभु, गे मुर नेल्ल आन थुं तुइक्नीनी। मोपतीके एको निक्शीमी तेको कली योत्रनीनी, आंइ
 कली तुइक्पतीने। प्रेरित ६:६ 25 मिनु मेको यहूदा आ पा डा सोइशो का दुम्ल” दे प्रार्थना पामे बाक्त। 26 मिनु भोट
 तोक्गमे बाक्त। भोट तोक्गमेनु, मत्तीयस ग्रामाक्त। मोपा मत्तीयस यो सोइशो का दुम्शा तेम्सीशा, १२ जना सोइशो
 दुम्मा बाक्त। हितोपदेस १६:३३; निसाफ पाइब २१:१७

2

परमप्रभु आ सोक्तीम प्रिंचा पुंइसीशो

1 मिनु पेन्तीकोस नाक्त थमा सुइक्ब आन गुम्तीकेमी देल्मा बाक्त। लेवी २३:१५-२१ 2 मिनु सरीड रे हुरुर पा फश
 खोदेशो फो गूशा, आन बाक्तीक प्रिंशा थुरशा रेयके पवा बाक्त। 3 मिनु ब्रशो मी खोदेशो तांइसीशो परमप्रभु यावे आ
 सोक्त का का पा आन तारी जुक्ता बाक्त। मत्ती ३:११ 4 मिनु परमप्रभु यावे आ सोक्तीमी सोइशो आन कली प्रिंशा,
 मेको आन कली आन मतुइशो लोत्र पपाइक्मी बाक्त। प्रेरित ४:३१; प्रेरित १०:४४-४६ 5 यरूसलेममी परमप्रभु यावे
 कली मान पा हिंब, रागी नेल्ल रे जाक्शो यहूदी बाक्मा बाक्त। प्रेरित १३:२६ 6 मिनु मेकोपुकीमी मेको रेयके नेंशा,
 खुम्सीमा बाक्त। मिनु मेकेर आन लोत्र कका ब्वाक्शो नेंशा छक लाक्मा बाक्त। 7 मिनु छक लाक्शा “मेकोपुकी
 गालील डा मुर मनमी डा? तन्न इं लोत्र कका ब्वाक्तेक्म। 8 गालील डा मुरपुकीमी दोपा इं लोत्र नेल्ल ब्वाक्स जोक्गमे
 माइ?” देमुमा बाक्त। 9 मो दुम्शो ताइबपुकी ते ते डा बाक्मा बाक्त देशा हना, पारथेस, मेदी, एलाम, मेसोपोटामीया,
 यहूदीया, कापाडोसीया, पोन्टस, एसीया, 10 फ्रिगीया, पाम्फिलीया, इजीप्त, लिबीया नु साइरेनी एर ओंथ, रोम, क्रेट
 नु अरब रागी रे जाक्शो यहूदी नु यहूदी दुम्शोपुकी बाक्मा बाक्त। 11 मेकोपुकीमी “गो नेल्लेमी परमप्रभु यावे आ पशो
 छक लाक्चा डा गेय आ पबर्म आंइ लोत्र पशो नेंतय। 12 मोपा मेको नेंबपुकीमी ‘मार बाक्म माइ, मार दुम्बा’ देमुमा
 बाक्त। 13 का निक्शीमी चहिं ‘शांबु दुक्शो बाक्तेक्म’ ” दे शुक्शी पामे बाक्त।

साइ डा लोत्र थमा दुम्शो

14 मिनु पत्रुसमी सोइशोपुकी नु राप्शा, मुर आन कली “इं यहूदी नु यरूसलेममी बाक्बपुकी, आं लोत्र रुप्चा कली
 नोफा दाइशशा नेनीने। 15 इन मिम्शो खोदेब पा एकोपुकी दुक्शो मनमी। मुल सुनी डा ९ बजेशो बाक्ब, दे तुइक्तीने।
 भजन संग्रह १६:८-११ 16 मार रुपीन देशा हना, साइ परमप्रभु यावे आ लोत्र पाइब योएलमी ब्रेक्शो लोत्र मुल थमा
 दुम्त, दे रुपीने। साइ डा लोत्रम मार ब्रेक्शो बाक्त, देशा हना योएल ३:१-५ 17 ‘परमप्रभु यावेमी रागी नुप्ची नाक्त मुर
 नेल्ल आन कली आं सोक्तीम प्रिंनुडमी। मिनु इन तमी तौपुकीमी आं लोत्र पाइनीम। ठिटापुकीमी आं कोंइशो ताइनीमी,
 खाल्पापुकीमी डोमु ताइनीम। 18 आं वाइलीम वाइल आन कली यो आं सोक्तीम प्रिंनुडमी। मिनु मेकोपुकीमी यो आं

लोत्र पाइनीम। 19 मेको ठेयब नाक्त जाक्चा क्येडा डोंइती गो सरीड नु रागीमी चिन्ड नु छक लाक्चा डा गेय कोंइनुड। हुश यिपाइक्नुड, मी ब्रपाइक्नुड नु ठेयब कुन गूशो तपाइक्नुड। 20 नां छिडछिड दुम्ब। तास्ला हुश खोदेशो लल दुम्शो तांडसीब। मेको प्रभु आ ठेयब नाक्त आ क्येडा डोंइती मोदेशो दुम्ब। 21 मिनु सु सुमी प्रभु आ नें थिशा प्रोंइयीकी, दे ब्रेम्मा, मेकोपुकी पाप रे प्रोंइचा पुंडसीनीम' दे परमप्रभु यावेम देशो बाक्ब। योएल २:२७-३२

22 मोपतीके इस्राएल डा लोकबपुकी, आं लोत्र नेनीने। परमप्रभुमी नासरथ डा येसु कली योत्रशा, सक्ति पाइशो गेय, चिन्ड नु छक लाक्चा डा गेय इन दातेमी कोंइपाइक्नु। मेको गे यो तशो तुइशो बाक्नीनी। 23 गेपुकीमी येसु कली अरेशो मटीब आन गुइम गेशा, शीम केप्शा कांटी थोकशा क्याइशो साइक्पाइक्तीनी। डोंइती रे परमप्रभु यावेमी मोदेशो दुम्चा माल्ब, दे मिम्शा, इन कली मो पचा गेशो बाक्माक्त, दे रूपीन। प्रेरित ४:२८ 24 गेपुकीमी साइक्पाइक्तीनी हना यो, परमप्रभुमी येसु कली बेक्शो रे सेंताक्व। मारदे हना आ गेना हना यो ब्रोंइशा बाक्ब परमप्रभु बाक्ब। 25 मिनु पिप दाऊदमी येसु आ परबम 'प्रभु गेना हना यो आं ग्युरा गे बाक्ब, दे तुइशो महिनुड। भजन संग्रह १६:८-११ 26 गो ग्येरसीशा प्रभु कली ठेयब सेल्शा कुम्सो पाइनुड। मारदे हना प्रभु नु काथा बाक्शा, गेना हना यो ब्रोंइचा ताइनुड। 27 बेक्शा आं रां राक्शा लचा मगेब, दे तुइक्नुड। 28 परमप्रभुमी ब्रोंइतीक लां कोंइताक्वी। मिनु गेना हना यो प्रभु नु ग्येरसीशा बाक्नुड' दे येसु आ परबम बेक्शो बाक्त। भजन संग्रह १६:८-१० 29 आं लोकबपुकी, इं किकी पिपी दाऊद आ परबम का का पा देने चाप्नुड। दाऊद बेक्माक्त। मिनु लाइशो थिम्ने थुम्मे बाक्त। तेकेर थिम्मे गोपुकीमी मुल यो तुइक्नय। १राजा २:१० 30 परमप्रभु यावेमी आ लोत्र पाइब दाऊद कली 'इ चच युइ रे पिप का सेल्नुड' दे लोत्र गेशो तुइशो बाक्त। 31 मिनु दाऊदमी परमप्रभु यावे आ लोत्र पाइब दुम्तीके, मेको येसु, मस्सीह आ परबम लोत्र पाप्नु, दे तुइशो बाक्माक्त। मिनु मेकोमी 'मेको बेक्शो मुर आन बाक्तीकेम मलीब। आ रां मराक्बा' देशो बाक्माक्त। २सामुएल ७:१२-१३; भजन संग्रह ८९:४-५ 32 परमप्रभु यावेमी येसु कली बेक्शो रे सेंताक्व। मेको गो आंइ मिक्चीमी ताइतक। 33 मिनु येसु परमप्रभु यावे आ ग्युरा गे बाक्शा, आ आफ रे परमप्रभु यावे आ सोक्त ताक्शा, आंइ तारी मोइक्नु। मिनु मार मार नेंनी, मार मार तनी, मेको नेल्ल परमप्रभु यावे आ सोक्तीम पपाइशो बाक्माक्त, दे तुइक्तीने। यूहन्ना १५:२६ 34 पिप दाऊद सरीड ग्येत्थ क्युकचा मतवा। तन्न दाऊदमी 'प्रभुमी आं प्रभु कली, आं ग्युरा गे बाक्को। भजन संग्रह ११०:१ 35 इ जोरी सत्रु आन कली इ खोइल आगाम मवोदुमी सम्म आं ग्युरा गे बाक्को' दे बेक्शो बाक्त। मेको लोत्र दाऊद आ परबम ममाइ। येसु आ परबम बेक्शो बाक्ब, दे रूपीन। 36 मोपतीके इस्राएली नेल्लेमी मार तुइक्चा माल्नीनी देशा हना, गेपुकीमी शीम केप्शा कांटी थोकशा साइक्पाइशो येसु कली परमप्रभु यावेमी प्रभु नु ख्रीस्त सेल्लु' दे माइक्मी बाक्त। ख्रीस्त आ देशो मस्सीह बाक्ब। प्रेरित ५:३१

37 मिनु आ लोत्र नेंब आन थुं खाइक्माक्त। मिनु पत्रुस नु सोइशो आन कली "गो मार पक मिनु?" दे हिल्लो पामेनु, प्रेरित १६:३०; लूका ३:१० 38 पत्रुसमी "इन थुं परमप्रभु यावे गे लेशो, येसु कली थमा सुइशो, आ नेंमी ब्वाक्कुम खुम्शा गुंडपाइसीने। मिनु इन पाप क्याम्चा पुंडसीनीनी। परमप्रभु यावे आ सोक्तीम प्रिंचा यो पुंडसीनीनी। प्रेरित ३:१७-१९; लूका २४:४७ 39 मारदे हना परमप्रभु यावे आ गेशो लोत्र इन कली, इन तमी तौ चच युइ आन कली नु डोन रागीम बाक्ब आन कली गेशो बाक्त। मिनु परमप्रभु आंइ परमप्रभु यावेमी सु सु कली ब्रेशो बाक्मे, मेको आन कली गेशो बाक्त" दे शेंदीमी बाक्त। योएल ३:५ 40 मिनु पत्रुसमी शुश शेंशा "थमा मसुइक्ब मदुमीने। मरिम्शो पाइब रे डोन बाक्कीने" दे शुश अर्ती गेशा माइक्मी बाक्त। मत्ती १७:१७; फिलिप्पी २:१५ 41 मिनु शुश मुरुमी पत्रुस आ देशो बिशो, ख्रीस्त कली थमा सुइशो, ब्वाक्कुम खुम्शा गुंडचा पुंडसमा बाक्त। मोपा ब्वाक्कुम खुम्शा गुंडचा पुंडसीबपुकी हजार सां खोइ दुम्मा बाक्त। मोपा थमा सुइक्ब नु तेम्समा बाक्त। 42 मिनु नेल्ल काथा बाक्शा, सोइशोपुकीमी शेंशो लोत्र शेंसीशा, प्रभु भोज जशा, प्रार्थना पना पन बाक्बाक्मा बाक्त। प्रेरित २०:७

थुं का डा दुम्शा बाक्शो

43 मिनु सोइशोपुकीमी परमप्रभु यावे आ सोक्त रे पा शुश चिन्ड नु छक लाक्चा डा गेय कोंइना कोंइन बाक्बाक्मा बाक्त। मुरपुकीमी मेको आन कली मोदेशो पशो तशा छक लाक्शा हिंबाक्मा बाक्त। 44 थमा सुइक्ब नेल्ल थुं का दुम्शा, आन के बाक्शो मारेइ मारेइ नेल्ल इं के बाक्ब, दे मिम्बाक्मा बाक्त। प्रेरित ४:३२-३५ 45 रू, मारेइ लेयडमेनु, सु सु आन कली माल्मा, मेको आन कली योक्शा क्येट गेशा वारच पाइबाक्मा बाक्त। 46 मिनु नाक्त कित कित परमप्रभु यावे आ खिंमी गुम्शा शेंसीबाक्मा बाक्त। खिं खिं हिरशा, प्रभु भोज जाइबाक्मा बाक्त। हाइशो थुं डा दुम्शा, जचा तूचा योक्शा, ग्येरसीशो दुम्शा, 47 परमप्रभु यावे कली ठेयब सेल्ना सेलन बाक्बाक्मा बाक्त। मुरपुकीमी मेको

आन कली मोदेशो पशो तशा, रिम्शो मिम्बाक्मा बाक्त। प्रभुमी नाक्त किंत किंत येसु कली थमा सुइक्ब तेम्ना तेम्न बारपाइक्मी बाक्त। प्रेरित ४:४; प्रेरित ५:१४; प्रेरित ६:७; प्रेरित ११:२१; प्रेरित १४:१

3

खोइली मदुक्ब कली सापाइश्शो

1 मिनु काबु पत्रुस नु यूहन्ना ३ बजे डा प्रार्थना पची ना परमप्रभु यावे आ खिंमी जाक्सा बाक्त। 2 मेकेर जरमेसे रेन खोइल मदुक्ब मुर का बाक्माक्त। मेको कली नाक्त किंत किंत कुरशा चाक्शा, खिं ओव्रब आन कली पुंडीमील, दे “रिम्शो लाप्चो” नें पाइश्शो लाप्चो आ डोंइती वोइक्बाक्मा बाक्त। 3 मिनु मेको पुंडब मुरुमी पत्रुस नु यूहन्ना आस कली ओव्रचशो तशा, मारेइ गेनीसी कों, दे पुना बाक्त। 4 मिनु पत्रुस नु यूहन्नामी पुंडब कली कोव्रशा, पत्रुसमी “ओंथ कोव्रस्की” देंमाक्त। 5 मिनु पुंडबमी मार गेयीसी, दे आस पा कोव्रसी बाक्त। 6 मिनु पत्रुसमी “गो नु सुन चांदी मबा। मार बाक्मे, मेकोन गेनन। तन्न आं के मार मेकोन गेनन। नासरथ डा येसु ख्रीस्त आ नेंमी बोक्शा एर ओंथ हिरसो” देंशा, 7 पुंडब आ ग्युरा गुइ ग्याइश्शा कीशा छुल पोक्शा राप्पदा बाक्त। राप्पदानु, आ खोइल डा बोइसे नेल्ल दुक्ब दुम्शा, 8 दिव दाव प्रेक्शा, एर ओंथ गाक्ब दुम्माक्त। गाक्ब दुम्शा परमप्रभु यावे कली ठेयब सेल्शा, कुम्सो पना पन, प्रेक्ना प्रेक्न पत्रुस नु यूहन्ना नु काथा गाक्शा, परमप्रभु यावे आ खिं ओव्रमाक्त। 9 मिनु मेकेर बाक्बपुकीमी मेको पुंडब कली साशा, परमप्रभु यावे कली ठेयब सेल्शा गाक्शो तशा, 10 “रिम्शो लाप्चो आ डोंइती बाक्ब खोइल मदुक्ब दोपा साशा ओं पा गाक्मे” दे छक लाक्मा बाक्त। 11 पुंडबमी पत्रुस नु यूहन्ना कली काइ मप्रोंइथु काथा गाक्शा, पिप सोलोमन नें वोइश्शो थाम पाइश्शो बाक्तीके जाक्दीम्मा बाक्त। मिनु एर ओंथ डा मुर दोरशा जाक्शा पुम्दमे बाक्त। प्रेरित ५:१२; यूहन्ना १०:२३

12 मिनु मोपा पुम्शो तशा, पत्रुसमी “इ इस्राएलीपुकी, एको मुर साशो तशा छक लाक्तीनी। मिनु गो आंस सक्तिम सापाइश्शो बाक्माक्त, फेस्तस दे मिम्तीनी? आंस सक्तिम सापाइश्शो ममाइ। 13 इ किकी पिपी अब्राहाम, इसहाक नु याकूब आन परमप्रभु यावेमी आ गेय पाइब येसु कली ठेयब सेल्लु। गेपुकी चहिं मेको कली ग्याइक्पाइक्तीनी। पिलातसमी मेको कली प्रोंइचा थुं पवानु यो, गे मबिस्सीनी। 14 तन्न गेपुकीमी परमप्रभु यावे आ योव्रशो नु ठीक पाइब कली तिल्लीनी। मुर साइक्ब कली प्रोंइशा सोइक्चा कली पुंडीनी। मती २७:२०-२१ 15 मिनु गे ब्रोंइचा गेब कली साइक्तीनी। परमप्रभु यावेमी चहिं बेक्शो रे सेंताक्व। गो मेको तशा, सांकछी दुम्ताक्व। 16 परमप्रभु आ सक्ति येसु नु बाक्ब। मिनु येसु आ नें थिशा थमा सुइश्शा, सक्ति पाइश्शो गेय पचा तांडसीब, दे थमा सुइक्नीकी। मिनु आंइ कली थमा सुइश्शो तशा, परमप्रभुमी एको मुर कली सापाइश्शा कोंइताक्व। मिनु साशा सेस दुम्शो ताइतीनी।

17 आं लोक्बपुकी, इन ठेयब मुरपुकी नु गे नेल्लेमी येसु कली मतुइक्थु, साइक्पाइक्तीनी, दे तुइक्नुड। लूका २३:३४ 18 साइ डोंइती रे परमप्रभुमी यावे आ लोव्र पाइबपुकी रे ‘ख्रीस्त श्येत जशा साइक्चा पुंडीसीब’ दे लोव्र पाइक्बाक्माक्त। परमप्रभु यावेमी मेको लोव्र खाप्शो बाक्त। लूका २४:४४ 19 मुल चहिं इन थुं परमप्रभु यावे गे लेशशा, ख्रीस्त कली थमा सुतीन। मिनु मेकोमी इन पाप क्याम्ब। प्रेरित २:३८ 20 मिनु मेकोमी इन कली रिम्शो बाक्चा गेब। मिनु परमप्रभु यावेमी पाप रे प्रोंइब, येसु ख्रीस्त इन बाक्तीक सोइक्ब। मिनु इन थुं नाइक्पाइक्ब। 21 तन्न परमप्रभु यावे आ लोव्र पाइबपुकीमी साइ रे मार मार देंमा, मेको लोव्र थमा मदुम सम्म येसु ख्रीस्त परमप्रभु यावे नु स्वर्गम बाक्ब। 22 साइ नेसी परमप्रभु यावे आ लोव्र पाइब मोसामी ‘परमप्रभु, इन परमप्रभु यावेमी आं कली योव्रशो खोदेशो पा आ लोव्र पाइब इन मुर आन दाते रे योव्रशा, इन कली वारच पाइब नु लां कोंइब सेल्ब। मोपा योव्रशोमी इन कली मार मार शेंबा, मेको आ लोव्र नेंशा टिने। ब्यवस्था १८:१५, १९ 23 सु सुमी आ लोव्र मटीमे, मेकोपुकी जाम्शा लाइनीम’ दे देशो बाक्त। 24 मोसामी देशो लोव्र ला ममाइ। परमप्रभु यावे आ लोव्र पाइब सामुएल नु अरु शुशेमी मोसामी देशो खोदेशो लोव्र पामे बाक्त। 25 इन किकी पिपी अब्राहाम आ खिं डा मुर नमी। परमप्रभु यावेमी अब्राहाम कली ‘गे इ खिं डा मुर रे पा रागी डा मुर नेल्लेमी आसीक राइनीम’ दे कबल पशो बाक्माक्त। उत्पत्ती २२:१८ 26 मोपतीके परमप्रभु यावेमी आ गेय पाइब येसु कली डोंइती इन बाक्तीकेम सोइक्ताक्व। मारदे हना इन कली आसीक गेशा, इन मरिम्शो गेय रे लेत्चा, दे मोदेशो पाप्नु, दे रुपीने” दे शेंदीमी बाक्त। प्रेरित १३:४६

4

कछडीम राप्पाइक्चा पुंडसीशो

1 मिनू पत्रुस नु यूहन्नामी मोदेशो शेंना शेंन बाक्सानु, चढेबपुकी, परमप्रभु यावे आ खिं डा ठेयब मुर नु सदुकीपुकी जाकमा बाक्त। लूका २७:४:५२ 2 मिनू “येसु बेक्शो रे सेंसाक्व। मिनू मुर नेल्ले यो बेक्शो रे सेंसीनीम” दे शेंशो नेंशा, थुं मनुमा बाक्त। प्रेरित २३:८ 3 मिनू पत्रुस नु यूहन्ना आस कली ग्याइक्पाइशशा “मुल नां रिक्त। मोपतीके कछडीम दीसा बाक्चा” दे मेको नाकदो जेल्खानमी चौक्पदमे बाक्त। 4 पत्रुस नु यूहन्ना आस शेंशो लोव्र नेंशा, थमा सुइक्ब ५ हजार जना जाकदीशशो बाक्मा बाक्त। प्रेरित २:४७

5 मिनू आ दीसा कछडीम बाक्चा कली यरूसलेम डा हुकुम पाइब, जोक्ब तुइक्ब खाल्पापुकी नु सास्त्री नेल्ल बुक्मा बाक्त। 6 मेना ठेयब चढेब हन्नास बाक्माक्त। डोंइती डा ठेयब चढेब काइयाफास, यूहन्ना नु अलेकजन्डर बाक्मा बाक्त। ठेयब चढेब आन खिं डा मुर यो शुश जाक्शो बाक्मा बाक्त। लूका ३:१-२ 7 मेको नेल्ल खुम्सीशा बाक्मानु, पत्रुस नु यूहन्ना आस कली जेल्खान रे गुंडपाइशशा, आन बाक्तीके चाक्पाइशशा आन डोंइती राप्पदमे बाक्त। मिनू “मेको खोइल मदुक्ब मुर कली सु आ सक्तिमी, सु आ नें ब्रशा सापांडसी, लो देनीस” दे हिल्लो पामे बाक्त। मत्ती २१:२३

8 मिनू पत्रुस परमप्रभु यावे आ सोक्तीमी ब्रीशा, मेको आन कली “इं इस्राएल डा हुकुम पाइब नु खाल्पापुकी, आं लोव्र नेनीने। मत्ती १०:१९-२० 9 मेको खोइल मदुक्ब कली खोइल सापाइशशा, रिम्शो गेय पाइतस्कु। दोपा सापांडस्कु, दे तुइक्चा दाक्नीनी हना, शेंनन्नी। 10 गे ला ममाइ, तन्न इं इस्राएल डा मुर नेल्लेमी रुप्चा मालनीम। मेको खोइल मदुक्ब मुर नासरथ डा येसु ख्रीस्त आ नें ब्रशा साशा गाक्ने चाप्ब दुम्माक्त, दे रुपीने। मेको नासरथ डा येसु ख्रीस्त कली गेपुकीमी शीमी केप्शा कांटी थोक्शा क्वाइक्पाइशशा साइक्पाइक्तीनी। तन्न परमप्रभु यावेमी मेको कली बेक्शो रे सेंताक्व। प्रेरित ३:६, १३-१६ 11 खिं सेल्बपुकीमी गारो प्रोव्रडमेनु, एको फुल्लु मगार, दे ताइक्तमे बाक्त। मेको मगारथु, ताइशशो फुल्लु चहिं सुर डा जग फुल्लु दुम्माक्त, दे ब्रेक्शो लोव्र, मेको येसु आ पर्बम ब्रेक्शो बाक्ब, दे रुपीन। मत्ती २१:४२; भजन संग्रह ११८:२२ 12 मुर आन कली श्येत नु पाप रे प्रोंइब येसु ख्रीस्त का ला बाक्ब। परमप्रभुमी येसु ख्रीस्त कली अधिकार गेशा, मुर नेल्ल आन क्येडा ठेयब सेल्लु। मिनू आ नेमी ला ब्रोंइचा तांडसीब, दे तुइक्तीने” दे माइक्मी बाक्त। प्रेरित १०:४३; मत्ती १:२१

13 पत्रुस नु यूहन्ना शुश मशेंसीशो बाक्ताक्स हना यो, जोक्ब तुइक्ब खोदेशो पा महिंथु, ठेयब थुं पा लोव्र पाम्से बाक्त। मेको लोव्र नेंशा, कछडी पाइबपुकी छक लाक्मा बाक्त। मिनू मेको निक्शी थमा पा येसु नु काथा गाक्ब काथा बाक्ब बाक्सा बाक्त, दे तुइक्तमे बाक्त। 14 सापाइक्चा पुंडसीशो मुर पत्रुस नु यूहन्ना नु काथा राप्शा बाक्शो तशा, जोल पाम्से बाक्त देंशा, आस लोव्र जोल सेल्ले मचाप्थु, मारेइ देंने मचाप्मे बाक्त। प्रेरित ३:८-९ 15 मिनू पत्रुस, यूहन्ना नु साशो मुर सांफा आन कली गुंडशा वोइशशा “मुल मार पया” दे लोव्रसी पचा गोव्रमे बाक्त। 16 मिनू लोव्रसी पा “खोइल मदुक्ब कली सापाइशशा मेको निक्शीमी ठेयब छक लाक्चा डा गेय कोंइताक्स। इं यरूसलेममी बाक्बपुकीमी थमा लोव्र बाक्माक्त, दे नेल्लेमी तुइक्नीमी। मिनू गोपुकीमी थमा ममाइ देंने मचाप्नय। यूहन्ना ११:४७ 17 तन्न मोदेशो लेंशा मदुम्ल, दे मेको आस कली मार पचा देंशा हना, मुल डा मेरे येसु आ नें सुइ कली मतुइक्पाइक्चा नमी, आ नें ब्रशा सुइ कली मसापाइक्चा नम, दे माइक्चा नसी” दे सल्ला पामे बाक्त। 18 मिनू पत्रुस नु यूहन्ना आस कली खिंम ओइशा “हेरकादे, मुल डा मेरे येसु आ नें मब्रचा। सुइ मुर आन कली मशेंचा। मतुइक्पाइक्चा नम” देंमा बाक्त। 19 मिनू पत्रुस नु यूहन्नामी “परमप्रभु यावे आ देशो टिचा देय इन देशो टिचा? एको निक्शीमी परमप्रभु यावेमी तेको पचा देंबा, दे आंमा मिम्तीने। प्रेरित ५:२८-२९ 20 गो निक्शी चहिं आंस मिक्चीम तशो नु आंस नोफामी नेंशो लोव्र मदेंथु मचाप्नस्कु। मेको रुपीन” देंसा बाक्त। 21 मिनू मेको आस दोस थिन्ने मचाप्तीके मेकोपुकीमी “हेरकादे, मुल डा मेरे मोदेशो गेय मपसे” दे हिंच कोंइशा, लोव्र थोक्शा, सोइक्तमे बाक्त। शुश मुरुमी आस पशो छक लाक्चा डा गेय तशा, परमप्रभु कली ठेयब सेल्लना सेल्लन बाक्बाक्मा बाक्त। 22 साशो मुर चहिं ४० बर्स लाक्शो बाक्माक्त। मोपतीके मेको कली साशो तशा, नेल्ल छक लाक्मा बाक्त।

परमप्रभु कली ठेयब सेल्शो

23 मिनू पत्रुस नु यूहन्ना प्रोंइचा पुंडसीशा, वारच आन कली गुम्थ लसा बाक्त। मिनू सु सुमी मार मार पवा, मार मार देंमा, मेको नेल्ल शोव्रडसे बाक्त। 24 मिनू आस लोव्र नेंशा, नेल्ल थुं का पा परमप्रभु यावे कली ठेयब सेल्शा “परमप्रभु यावे, नेल्ल आन कली सासन पाइब, गे सरीड, रागी, समुन्द्र नेल्ल सेल्लतीनी। मिनू मेकेर बाक्शो मारेइ मारेइ सेल्लतीनी। मिनू मेको आन कली कोव्रनीनी। 25 साइ इन लोव्र पाइब किकी पिपी, आंइ आफ दाऊद कली इन सोक्त रे पा

‘अर्को रागी डा मुरपुकी मारदे गाइक्नीमी, मारदे चुरनीमी? मुरपुकीमी मारदे शोर गाक्शो दूली मिम्नीमी? 26 परमप्रभु यावे नु आ तेल लुक्शो, ख्रीस्त आस जोरी सत्रु दुम्शा, रागी डा पिपपुकी नु हुकुम पाइबपुकी थुं का दुम्शा बुक्नीम’ देंपाइक्तीनी। भजन संग्रह २:१-२ 27 मोपा साइ इन पपाइश्शो लोव्र सिनाक्त मुलाक्त गाम्ना गाम्न पित। मारदे हना इन सोइश्शो, इन गेय पाइब येसु, आ जोरी सत्रु आंइ मिक्चीमी ताइतक। पिप हेरोद का, पन्तीयस पिलातस का, अर्को रागी डा मुर नु इस्त्राएल डा मुर नेल्ल गारशा, आंइ सहरमी बुक्शो ताइतक। लूका २३:१२ 28 मेकोपुकीमी इन देंशो डा लाक्शा मारेइ पने मचबेम। इन देंशो ला पने चाप्तेक्म। प्रेरित २:२३ 29 परमप्रभु, मेकोपुकीमी हिंच कोंइताक्म हना यो, महिंथु ठेयब थुं पा इन लोव्र शेंतीक सक्ति तकल, दे पुंइनीकी। एफिसी ६:१९ 30 परमप्रभु यावे, इन गेय पाइब येसु आ नें ब्रशा, सापाइक्तीक गेय, छक लाक्चा डा गेय नु चिन्ड कोंइने चाप्कल, दे पुंइनीकी” दे प्रभु कली ठेयब सेल्शा पुन्मे बाक्त। 31 मोदेशो प्रार्थना पने थुम्मे चोटीन ख्रिनु कुशो खोदेशो पा आन बुक्शा बाक्तीके एर ओंथ नेल्ल हिम्से बाक्त। मिनु नेल्ले परमप्रभु यावे आ सोक्तीम प्रिंचा पुंइसमा बाक्त। मिनु महिंथु ठेयब थुं पा परमप्रभु आ लोव्र शेंना शेंन गाक्बाक्मा बाक्त।

थमा सुइक्ब नेल्ल थुं का डा दुम्शो

32 मिनु थमा सुइक्ब आन थुं नेल्ल कांइचीक दुम्शा, मेकोपुकी नु बाक्शो मारेइ मारेइ नेल्ल इं के मिम्बाक्मा बाक्त। सुइमी यो आं के, इं के मदेबाक्मा बाक्त। प्रेरित २:४४ 33 मिनु येसु आ सोइश्शोपुकीमी सक्ति पाइश्शो लोव्र पा प्रभु येसु बेक्शो रे सेंचा पुंइसाक्व, दे नेंपाइक्बाक्मा बाक्त। मेको नेल्ल शुश आसीक तामे बाक्त। प्रेरित २:४७ 34 मोपतीके श्येत जाइब का यो मबाक्मा बाक्त। मारदे हना रू खिं थीबपुकीमी रू खिं का निक्शी लेयशा, क्येट चाक्शा, प्रेरित २:४५ 35 मेको १२ जना सोइश्शो आन कली गेशा, सु सु कली माल्मा, मेको आन कली योक्शा गेचा नमी, दे गेबाक्मा बाक्त। मिनु मेकोपुकीमी योक्बाक्मा बाक्त। 36 मोदेशो गेब का चहिं योसेफ माइश्शो मुर का बाक्माक्त। मेको योसेफ साइप्रस रागीमी जरमेशो लेवी आ थर डा बाक्माक्त। सोइश्शोपुकीमी योसेफ आ याइनी नें बारनाबास वोइश्शो बाक्मा बाक्त। बारनाबास देंशो “आन थुं ग्येत्थ लुक्च दुम्शो मुर आन कली आन थुं नाइक्पाइक्ब” दे रुम्सीब। प्रेरित ११:२२-२६; प्रेरित १२:२५; प्रेरित १५:२; गलाती २:१कलस्सी ४:१० 37 मेको बारनाबासमी रू का लेयशा क्येट चाक्शा, सोइश्शो आन गुइमी गेवा बाक्त।

5

हनानीया नु सफीरा

1 मिनु हनानीया नु आ मीश सफीरामी यो आस रू का लेयडसे बाक्त। 2 मिनु क्येट ताक्शा, इच्का गो वोंइसीस, लीशो चहिं नेल्ल ओशो ला, दे सोइश्शो आन कली गेचा, दे लोव्रसी गारपदसे बाक्त। मिनु मोपा मेको लीशो क्येट हनानीयामी चोव्रदीम्माक्त। प्रेरित ६:३४-३७ 3 मिनु सोइश्शो आन बाक्तीके जाक्दीश्शा, क्येट गेवानु, पत्रुसमी “हनानीया, मारदे गे इ थुंम सैतान ओव्रचा गेशा, परमप्रभु यावे आ सोक्त कली जोल पवी? रू लेयशो क्येट नेल्ल ओशो ला बाक्ब, दे मारदे इच्का खुइश्शा वोदी? 4 मेको रू मलेयसी नु इस केन बाक्त। लेयसी नोले मेक रे जाक्शो क्येट यो इस केन बाक्त। मिनु मारदे जोल पसी? गे आंइ कली जोल मपसी, तन्न परमप्रभु यावे कली जोल पाइतीसी” दे मदा बाक्त। 5 मिनु हनानीयामी पत्रुस आ देंशो नेंशा, दिड गोल्शा बेक्माक्त। मिनु मुरपुकीमी मेको लोव्र नेंशा, शुश हिंमा बाक्त। 6 मेकेर खुम्सीशो ठिटापुकीमी आ बेक्शो रां लाइश्शा थिम्मे बाक्त।

7 मिनु हेररा घन्टा सां नोले हनानीया आ मीशेमी आ वोंइश बेक्त, दे मतुइक्थु, मेकेर जाक्माक्त। 8 मिनु पत्रुसमी “इस रू ओशोमीन लेयसी? लो, देनो” देंमेनु “ओशोमीन लेयतस्कु” देंमाक्त। 9 मिनु पत्रुसमी “गे निक्शी गारशा, मोदेशो पा परमप्रभु यावे आ सोक्त कली जोल पचा दुम्बा? इ वोंइश कली थिम्थ लाइबपुकी लेशशा जाक्चाप्तेक्म। इच्ची ना इ कली यो लाइश्शा थिम्नीम” देंमेनु, मीश मुर यो दिड गोल्शा बेक्माक्त। 10 मिनु ठिटापुकी जाक्शा कोव्रडमेनु, सफीरा यो बेक्शो तामे बाक्त। मिनु लाइश्शा आ वोंइश थिम्तीके आ नेक्था थिम्मे बाक्त। 11 मिनु थमा सुइश्शा बुक्बपुकी नु मेको लोव्र नेंब नेल्लेमी “मो देंशो हेंथे पा जोल पचा मदुम्बाक्माक्त” दे तुइश्शा, शुश हिंमा बाक्त।

सोइश्शोपुकीमी गेय पशो

12 मिनु सोइश्शोपुकीमी मुर आन दातेमी शुश चिन्ड नु छक लाक्चा डा गेय पाम्तेक्म। मेको नेल्ल सोलोमन नें वोइश्शो थाम पाइश्शो ठेयब कोठाम बाक्बाक्मा बाक्त। प्रेरित ३:११ 13 थमा मसुइक्बपुकी मेकोपुकी नु काथा गाक्चा

बाकचा हिंशा, मेको आन कली ठेयब सेल्शा, आन पर्बम रिम्शो लोत्र ला पाइबाकमा बाक्त। 14 मिनु वोंइश मुर नु मीश मुर शुशेमी प्रभु कली थमा सुइक्ब दुम्शा, तेम्सीन सीन शुश बारना बारन लमा बाक्त। प्रेरित २:४७ 15 सोइशोपुकीमी शुश छक लाकचा डा गेय पशो तशा, मुरपुकीमी रोइ पाइब आन कली चाक्शा, लां पित्थ इप्पाइशशा, वोइक्बाकमा बाक्त। मारदे हना पत्रुस मेको लां गाक्मेनु, आ वांकुम योइशशा साब, दे मिम्शा मो पाइबाकमा बाक्त। प्रेरित १९:११-१२ 16 यरूसलेम एर ओंथ सहर डा रोइ पशो नु वोल्म तशो मुर शुश आन कली चाक्बाकमा बाक्त। मेकोपुकी यो नेल्ल साशा लाइबाकमा बाक्त।

सोइशोपुकी खेदा पचा पुंइसीशो

17 सोइशोपुकीमी मोदेशो छक लाकचा डा गेय पशो तशा, ठेयब चढेब नु सदुकी आन थुंम गेहे पामे बाक्त। प्रेरित ४:१,६ 18 मिनु सोइशो आन कली ग्याइक्पा लाइशशा, जेल्खानमी चोक्पदमे बाक्त। 19 मिनु मेको नाक्दो परमप्रभु यावे आ स्वर्ग डा गेय पाइब कामी लाप्चो रोक्शा, मेको आन कली ग्रुंइदीमी बाक्त। प्रेरित १२:७ 20 मिनु ग्रुंइशा “परमप्रभु यावे आ खिं लशा, मुर आन कली येसु आ नेमी ब्रोंइतीक लां आ पर्बम शेंदीने” दे सोइक्तीमी बाक्त। 21 मेको लोत्र टिशा, सुनी कना परमप्रभु यावे आ खिं जाक्दीशशा, ओव्रशा शेंचा गोत्रमे बाक्त।

कछडीमी राप्पाइक्चा पुंइसीशो

मेको लोत्र टिशा, सुनी कना परमप्रभु यावे आ खिं जाक्दीशशा, ओव्रशा शेंचा गोत्रमे बाक्त। मिनु ठेयब चढेब, मेको नु बाक्बपुकी, इस्राएली आन जोक्ब तुइक्ब खाल्पापुकी खुम्सीशा “सिनाक्त चोक्पाइशशा आन कली चाक्चा” दे जेल्खान सोइक्तमे बाक्त। 22 मिनु गेय पाइबपुकी लशा कोव्रडमेनु, मेको चोक्चा पुंइसीशोपुकी मथिदमे बाक्त। मिनु लेशशा जाक्शा, देंमा बाक्त। 23 मेकोपुकीमी “जेल्खानमी जाक्दीकानु, खाल पाइब बाक्तेक्म। लाप्चो नेल्ल चोक्स डा चोक्स बाक्तेक्म। मिनु आगा कोव्रशोनु, इन मालशो मुरपुकी चहिं मबाक्म” देंमा बाक्त। 24 मिनु परमप्रभु यावे आ खिं डा कप्तान नु ठेयब चढेबपुकीमी मेको लोत्र नेंशा “ते लमा, दोपा ओदेशो दुम्मे?” दे छक लाक्शा, मुल मार पचा, दे मिम्ने मचाप्मे बाक्त। 25 मिनु मुर का जाक्शा “सिनाक्त गेपुकीमी जेल्खानमी चोक्पाइशशा मुरपुकीमी परमप्रभु यावे आ खिंमी मुर आन कली शेंना शेंन बाक्नीम” देंमाक्त। 26 मिनु कप्तान नु गेय पाइबपुकी परमप्रभु यावे आ खिं लशा, सोइशशा आन कली मारेइ मपथु, चाक्मे बाक्त। “मारदे हना मरिम्शो पाइतय हना, मुरपुकीमी इं कली फुल्लु आप्शा साइक्नीम” दे हिंमा बाक्त।

27 मिनु कछडीम चाक्शा, आन डोंइती राप्पाइक्मी बाक्त। 28 मिनु ठेयब चढेबमी “येसु आ नें मशेंचा, मुर आन कली मतुइक्पाइक्चा देंतक। गेपुकीमी चहिं यरूसलेम नेल्ल मेको लोत्र फ्रनी बाक्त। लोत्र फ्रशो ला ममाइ। मेको येसु कली गोपुकीमी साइशशा, दे आंइ कली दोस गेनी बाक्त” दे हुइक्तीमी बाक्त। प्रेरित ४:१८; मती २७:२५ 29 मिनु पत्रुस नु येसु आ सोइशशा नेल्लेमी “गेपुकीमी मुर आन लोत्र क्येडा परमप्रभु यावे आ लोत्र टिचा, दे थुं फ्रेंताक्क। प्रेरित ४:१९; दानीएल ३:१७-१८ 30 इं किकी पिपी आन परमप्रभु यावेमी गेपुकीमी शीम केप्शा, कांटी थोक्शा क्याइशशा साइक्पाइशशा येसु कली बेक्शो रे सेंताक्व। प्रेरित ३:१५ 31 परमप्रभु यावेमी इस्राएली आन थुं आ गे लेप्पाइक्ब, लां कोंइब कली नु पाप रे प्रोंइब सेल्शा, आ ग्युरा गे निप्पाइक्तु। प्रेरित २:३३ 32 मेको नेल्ल आंइ मिक्चीमी ताइतक। आ देशो टीब आन कली परमप्रभु यावेमी आ सोक्त गेब। मिनु परमप्रभु यावे आ सोक्तीमी ‘मेको लोत्र नेल्ल थमा बाक्ब’ दे तुइक्पाइक्ब, दे तुइक्तीने” देंमा बाक्त। लूका २४:४८; यूहन्ना १५:२६-२७ 33 मोदेशो लोत्र पशो नेंशा, गाइशशा “मेको आन कली मसाइक्थु मप्रोंइचा नमी” देंमा बाक्त।

गमालीएल आ देशो पशो

34 मिनु मेको आन दातेमी गमालीएल माइशशा फरिसी का बाक्माक्त। मेको निसाफ पतीक आ पर्बम शेंब बाक्माक्त। मुर नेल्लेमी मेको कली मान पाइबाकमा बाक्त। मिनु गमालीएलमी मेकेर बाक्ब आन कली मोपा गाइशशा तशा, सोइशशा आन कली लाडगा ग्रुंइशा वोइक्मी बाक्त। प्रेरित २२:३ 35 मिनु कछडीम बाक्ब आन दातेमी राप्शा, मेको आन कली “आं लोक्ब इस्राएलीपुकी, मेको मुर आन कली मार पचा चिक्तीनी, मेको होस पा पने। मोपतीके आं लोत्र का निक्शी नेनीने। 36 साइ थुदास माइशशा आ पर्बम गो नेल्लेमी तुइक्ताक्व। मेकोमी ठेयब सेल्सीशा, ४ सहे मुर आन कली आ नोले खोइक्ब सेल्लु। मिनु थुदास साइक्चा पुंइसाक्व। मिनु आ नोले खोइक्ब नेल्ल ब्राशा गाक्तेक्म। मिनु मेको आन लोत्रसी जाम्शा लत। 37 मेको नोले मुर आन कली हिक्तीक बर्समी गालील डा यहूदा माइशशा मुर का बोक्माक्त। मेकोमी यो आ नोले खोइक्ब मुर सेला बाक्त। मेको यो जाम्शा

लमाक्त। मिनु आ नोले खोइक्ब नेल्ल ब्राशा गाक्मा बाक्त। 38 मोपतीके मेको येसु माइश्शो आ नोले खोइक्ब आन कली मारेइ मपाइय्य। मो प्रोइशा सोइक्तय। मेको आन लोत्र मुरुमी मिम्शो लोत्र बाक्त हना, मारेइ मदुम्थु जाम्शा लाइब। मत्ती १५:३३ 39 परमप्रभु यावे आ पशो बाक्त हना चहिं, गेपुकीमी तेक्शा यो मतेक्सीब। मेको ला ममाइ। गेपुकी परमप्रभु यावे कली मरिम्शो पाइब दुम्नीनी” दे माइक्मी बाक्त। 40 मिनु गमालीएल आ लोत्र नेंशा, बिस्समा बाक्त। मिनु लाडगाम सोइश्शो आन कली खिं गा ब्रेश्शा, का का पा युक्पदमे बाक्त। मिनु “मुल डा मेरे येसु आ नेमी शेंशा मगाक्कीने” दे प्रोइशा सोइक्तमे बाक्त। मत्ती १०:१७ 41 मिनु सोइश्शोपुकी ग्येरसीशा, मेकेर रे लमा बाक्त। मारदे हना “येसु आ नेमी श्येत जचा रिम्शो दुम्ब” देंमा बाक्त। मत्ती ५:१०-१२; १पत्रुस ४:१३ 42 मिनु नाक्त किंत किंत परमप्रभु यावे आ खिंमी, आंम आन खिं खिंमी खुम्सीशा “येसु परमप्रभु यावे आ सोइश्शो ख्रीस्त बाक्ब” दे शेंना शेंन बाक्बाक्मा बाक्त।

6

गेय पाइब आन कली योत्रशो

1 मेना थमा सुइक्बपुकी शुश बारना बारन लमा बाक्त। ग्रीक लोत्र नु हिब्रू लोत्र पाइबपुकीमी गन गन पाम्तेक्म। मारदे हना नाक्त किंत किंत योक्तीक जचा थोत्रक मेको आन वोंइश बेक्शो मीश मुरपुकीमी ठीक पा मताइबाक्तेक्म। ग्रीक लोत्र नु हिब्रू लोत्र पाइबपुकी यहूदी बाक्तेक्म। प्रेरित ४:३८ 2 मेको लोत्र नेंशा सोइश्शोपुकीमी थमा सुइक्ब नेल्ल आन कली ब्रेश्शा “आंइ लोक्बपुकी, गो परमप्रभु यावे आ लोत्र शेंचा प्रोइशा, जचा फेक्चा योक्शा गाक्चा आंइ गेय ममाइ। 3 मोपतीके मेको योक्चा कली मुरपुकी वोइक्चा मालनय। दोदेशो मुर मालनय देंशा हना, मुरपुकीमी हिक्शो, परमप्रभु यावे आ सोक्तीमी ब्रीशो नु जोक्ब तुइक्ब ७ जना गेय पाइब मुर योत्रचा मालनय। १तिमोथी ३:८-१० 4 गो चहिं परमप्रभु कली प्रार्थना पना पन शेंथ गाक्चा मालनय” देंमा बाक्त। 5 सोइश्शो आन लोत्र नेंशा नेल्ल आन थुं नुशा, ७ जना मुर आन कली योत्रचा बिस्समा बाक्त। मिनु सु सु आन कली योत्रडमे बाक्त देंशा हना, रिम्शो थमा सुइक्ब परमप्रभु यावे आ सोक्तीम ब्रीशो स्तीफानस, फिलीप, प्रोकोरस, निकानोर, तीमोन, परमीनास नु एन्टीओक डा निकोलाउस आन कली योत्रडमे बाक्त। निकोलाउस चहिं अर्को रागी डा मुर बाक्शा यो यहूदी दुम्शो बाक्माक्त। प्रेरित ८:५ 6 मिनु योत्रशो आन कली सोइश्शो आन डोंइती राप्पदमे बाक्त। मिनु सोइश्शोपुकीमी योत्रशो आन तारी आन गुइ वोइश्शा, मेको आन पबंम परमप्रभु कली पुन्मे बाक्त। प्रेरित १:२४; प्रेरित १३:३; प्रेरित १४:२३ 7 मिनु परमप्रभु यावे आ लोत्र तेइ तेइ बारना बारन लमाक्त। यरूसलेममी शुश मुर येसु ख्रीस्त कली थमा सुइक्ब दुम्शा, तेम्सीन सीन बारना बारन लमा बाक्त। चढेब शुश यो थमा सुइक्ब दुम्मा बाक्त। प्रेरित २:४७; प्रेरित १९:२०

स्तीफासमी लोत्र पशो

8 मिनु स्तीफानस चहिं परमप्रभुमी शुश शिशी नु सक्ति गेचा पुंइसीशो बाक्माक्त। मोपतीके मुर आन कली शुश चिन्ड नु छक लाक्चा डा गेय नु चिनु कोंइशा बाक्बाक्माक्त। 9 मिनु लिबेरती माइश्शो गुम्तीक खिं नु साइरेनी, अलेकजेन्द्रीया, सिलीसीया नु एसीया रे जाक्शो शेंबपुकीमी स्तीफानस नु जिशो बाक्तेक्म। 10 तन्न स्तीफानस परमप्रभु यावे आ सोक्तीम ब्रीशा जोक्शो तुइश्शो ब्वाक्मेनु, सुइमी ग्राने मचाप्मे बाक्त। लूका २१:१५ 11 मोपा ग्राने मचाप्तीके सुइ आन मतुइक्थु, मुर आन कली पोक्शा “मेकोमी इं किकी पिपी मोसा नु परमप्रभु यावे आ पबंम हेंथे नु ग्रांग्रा दिशो लोत्र पशो नेंतक” दे जोल पा लोत्र ब्रपदमे बाक्त। मत्ती २६:६०-६६ 12 मोदेशो जोल लोत्र पाइब मुर, यहूदी आन जोक्ब तुइक्ब खाल्पा नु सास्त्री आन कली पोक्गामे बाक्त। मेको लोत्र पा बुइबपुकीमी स्तीफानस कली ग्याइश्शा, कछरीम राप्पदमे बाक्त। 13 मिनु जोल पा सांकछी वोइश्शा, मेको आन कली “एको मुरुमी परमप्रभु यावे आ खिं नु परमप्रभु यावे आ अरेशो लोत्र आ पबंम शुक्शी पा हेंथे लोत्र पाइब। येरमीया २६:९, ११ 14 मेको नासरथ डा येसुमी परमप्रभु यावे आ खिं प्रेक्ब। मोसामी गेशो पतीके लोत्र प्रोइशा, नक पतीक वोइक्ब, देंशो आंइ नोफामी नेंतक” दे ब्वाक्पदमे बाक्त। यूहन्ना २:१९ 15 कछडीम बाक्बपुकीमी स्तीफानस गे कोव्रडमेनु, आ कुल परमप्रभु यावे आ स्वर्ग डा गेय पाइब आन कुल खोदेशो पा महिंथु बाक्शो तामे बाक्त। मिनु कोव्रस डा कोव्रस दुम्मा बाक्त।

7

स्तीफानस आ लोत्र

1 मिनू ठेयब चढेबमी “एको आन देंशो लोव्र थमा देय जोल, लो देनो” देंमेनु, 2 स्तीफानसमी “आं आफ, बाजे नु आं लोकबपुकी, गो लोव्र का निक्शी पाइनुड। दोपा छेडछेड नु सक्ति पाइशो परमप्रभु यावेमी इं किकी पिपी अब्राहाम कली तपांइसे, गो मेको नेल्लेमी तुइक्नय। उत्पत्ती ११:- ५०:-; यहोसु २४:३२ 3 हारान जाकदीत्चा क्येडा डोंइती अब्राहाम मेसोपोटामीया रागीम बाक्शो बाक्माक्त। मेकेर बाक्मेनु, परमप्रभु यावेमी ‘इ रागी नु इ खिं डा मुर प्रोंइशा लावो। ते लशा बाक्चा माल्नेवे, नोले तुइक्पाइक्नन’ दे माइशो बाक्माक्त। 4 मिनू अब्राहाम कल्दी आन रागी प्रोंइशा, हारान सहर जाकदीशशा बाक्माक्त। मिनू आ आफ बेक्म नोले परमप्रभुमी अब्राहाम कली हारान रे मुल इं बाक्शो रागीमी चाक्गा बाक्त। 5 मेना परमप्रभु यावेमी अब्राहाम कली खोइल थेक्तीक रागी यो मगेशो बाक्माक्त। तन्न ‘एको रागी इ चच युइ आन कली गेनुडमी’ दे लोव्र पशो बाक्माक्त। मेना अब्राहाममी तमी तौ काइ यो मथिशो बाक्माक्त। 6 मिनू परमप्रभु यावेमी ‘नोले इ चच युइ मुर आन रागीमी लाइनीमी। मेको रागी डा मुरपुकीमी इ मुर आन कली वाइलीम वाइल सेल्शा, ४ सहे बर्स सम्म श्येत गेशा वोइक्नीम। उत्पत्ती १५:१३-१४; प्रस्थान १२:४० 7 तन्न गो मेको श्येत गेब आन कली सजाइ गेनुडमी। इ चच युइ चहिं मेको रागी प्रोंइशा एक लेशशा जाक्शा, आं कली ठेयब सेल्शा मानेनीम’ दे परमप्रभुमी अब्राहाम कली नोले दुम्ब लोव्र तुइक्पदा बाक्त। 8 मिनू नोले परमप्रभुमी अब्राहाम कली खोइक्तीक चिनु डा कबल गेवा बाक्त। मिनू अब्राहाममी आ तौ इसहाक थिशो, ८ नाक्त दुम्मेनु, मेको कली खोइक्तीक चिनु खोदा बाक्त। इसहाक याकूब आ आफ दुम्माक्त। मिनू याकूब आ १२ जना तौ आन आफ दुम्माक्त। मिनू मेको १२ जना तौ इं यहूदी १२ थर दुम्मा बाक्त।

9 मिनू याकूब आ तौ आन लोकब योसेफ कली गेहे पा, मेको कली इजीप्त रागी डा मुर आन कली लेयडमे बाक्त। तन्न परमप्रभु यावेमी मेको कली कोव्रशो बाक्माक्त। 10 मिनू आ श्येत रे प्रोंइबाक्माक्त। मिनू योसेफ इजीप्त रागी डा पिप फाराओ आं डोंइती जाक्मेनु, मेकोमी आ जोक्तीक तुइक्तीक थुं तशा, योसेफ कली शुश दाक्शो बाक्माक्त। मिनू पिप फाराओम योसेफ कली आ रागी डा ठेयब मुर सेला बाक्त। 11 मिनू इजीप्त नु कनान रागीमी ठेयब अन्काल दुम्तीके, मुरपुकीमी जचा मतामे बाक्त। इं किकी पिपीमी यो जचा मतामे बाक्त। 12 इजीप्तमी अन्न ग्याप्चा तांइसीब देंशो नेंशा, याकूबमी आ तौ आन कली इजीप्त सोइक्तीमी बाक्त। 13 मिनू ग्याप्शा चाक्मेनु, मजाक्दीत्थु, लेंशा सोइक्तीमी बाक्त। मोपा लमानु, योसेफमी आ लोकब आन कली ‘गो इन लोकब योसेफ नड’ दे तुइक्पपांइसे बाक्त। में डा मेरे फाराओमी मेकोपुकी योसेफ आ मुर बाक्मा बाक्त, दे तुइक्ता बाक्त। 14 मिनू योसेफमी आ आफ, आ लोकबपुकी आ खिं डा मुर नेल्ल आन कली इजीप्त रागी जाक्शा बाक्कीन, दे ब्रथ सोइक्तीमी बाक्त। मेको नेल्ल ७५ जना बाक्मा बाक्त। 15 मिनू याकूब इजीप्त जाक्दीशशा, शुश बर्स बाक्शा, मेकेर उइ बेक्माक्त। नोले इं किकी पिपी याकूब आ तौ यो मेकेर बेक्मा बाक्त। 16 इजीप्तमी बेक्तेक्म हना यो, आन बेक्शो रां शेकेम सहर लाइशशा थिम्मे बाक्त। अब्राहाममी शेकेम सहरम मेको थिम्तीके रू हमोर आ तौपुकी रे चांदी गेशा, ग्याप्शो बाक्माक्त।

17 मिनू परमप्रभु यावेमी अब्राहाम कली गेशो लोव्र जाक्दीम्माक्त। मोपतीके इजीप्त रागीमी इं मुर बारना बारन लशा, शुश दुम्मा बाक्त। प्रस्थान १:-३:- 18 मिनू इजीप्त रागीमी अर्को पिप दुम्माक्त। मेको योसेफ नु आ खिं डा मुर आन कली मतुइक्ब बाक्माक्त।

19 मेको पिपीमी इं मुर आन कली शिशी मपथु, शुश श्येत गेवा बाक्त। आल थीब आन कली यो आन आल थुल्चा मगेथु ताइक्पदा बाक्त। 20 मेना मोसा जरमेसे बाक्त। मेको परमप्रभु यावे आ डोंइती थम दारशो आल बाक्त। मोपतीके आम आफोमी मेको कली महिना सां सम्म आस खिंमी खुइशशा थुल्से बाक्त। 21 महिना सां नोले आल कली प्रोन्से बाक्त। मिनू फाराओ आ तमीमी मेको आल कली थिशशा लाइशशा, आ तौ सेला बाक्त। 22 मिनू पिप बाक्तीक खिंमी बाक्मेनु, इजीप्त रागी डा ठेयब मुर आन जोक्शो तुइशशा आं यो नेल्ल जोक्ब तुइक्ब दुम्माक्त। मिनू मोसा आ लोव्र नु आ गेय नेल्ल सक्ति पाइशशा दुम्माक्त।

23 मिनू मोसा ४० बर्स दुम्मेनु, आ लोकब इस्राएली आन कली गुम्चा थुं पवा बाक्त। 24 मिनू काबु गुम्थ लमेनु, इजीप्त डा मुरुमी इस्राएली कली तुप्शो तशा, मोसामी इस्राएली कली प्रोंइशा, इजीप्ती कली तुप्शा सदा बाक्त। 25 मोसामी ‘परमप्रभुमी आं कली आं लोकब आन कली श्येत रे प्रोंइब सेलती’ आं लोकबपुकीमी एको आंइ कली श्येत रे प्रोंइब बाक्माक्त, दे रुप्शा, आं कली ब्राइनीम, दे मिम्शो बाक्माक्त। आ लोकबपुकीमी चहिं मेको काइ मरुप्शो बाक्मा बाक्त। 26 मिनू आ दीसा मोसा लेंशा मेक जाक्दीम्मेनु, इस्राएली निक्शी आस कली जिशो तवा बाक्त। मिनू मेको आस कली ‘गे निक्शी, वोबु दुम्शा यो जिनीसी?’ देंमाक्त। 27 मिनू मरिम्शो पाइबमी गाइशशा मोसा कली ‘गो

आंस कली हुकुम नु निसाफ पाइब सुम सेले? प्रस्थान २:१४ 28 सिनाक्त एकेर इजीप्ती कली साइशो खोदेशो पा आं कली सटु, देने?’ दे नेप्ता बाक्त। 29 मेको लोव्र नेंशा, मोसा इजीप्त रागी रे प्रोक्शा, मिदयान रागीम जाकदीम्माक्त। मेकेर जाकदीशशा बाक्मेनु, तौ निक्शी थिमाक्त। प्रस्थान १८:३-४

30 मिदयान जाकदीशशा, बाक्शो ४० बर्स दुम्माक्त। मिनु काबु सीनै डांडा डा गोरशो रागीमी बाक्मेनु, परमप्रभु यावे आ स्वर्ग डा गेय पाइब कामी ब्रशो बुटा कोइदा बाक्त। 31 मोसामी मोपा ब्रशो तशा छक लाक्शा, ओदेशो मार ब्रमे, दे आ नेक्था लशा कोव्रडा बाक्त। मिनु नेक्था जाकदीशशा कोव्रडानु, परमप्रभु आ लोव्र नेंना बाक्त। प्रस्थान ३:५-१० 32 ‘गो इन किकी पिपी आन परमप्रभु यावे नड। गो अब्राहाम, इसहाक नु याकूब आन परमप्रभु यावे नड’ देशो नेंशा हिंशा, खिंखि पा बुटा गे यो कोव्रने मचबा बाक्त। 33 मिनु परमप्रभु यावेमी ‘इ थेक्शा राप्शा बाक्तीके आं बाक्तीक बाक्ब। मोपतीके इ जुत्ता पुइशशा, आं लोव्र नेनो। 34 इजीप्त रागीम बाक्ब आं मुरपुकीमी शुश श्येत जाम्तेक्म, दे तुइक्ताकड। आन श्येत ताता। मिनु आन डाक्शो यो नेंता। मिनु आं मुर आन कली मोदेशो श्येत रे प्रोंडपाइक्चा दुम्ती, दे इ कली इजीप्त सोइक्नन’ देशो नेना बाक्त। 35 ‘इ कली हुकुम पाइब नु निसाफ पाइब सुम सेले?’ दे खेरचा पुंइसीशो मोसा कली परमप्रभु यावेमी हुकुम पाइब नु प्रोंडब सेल्शा, आ स्वर्ग डा गेय पाइब रे बुटाम तपांइसीशा इजीप्त सोइक्ता बाक्त।

36 मिनु शुश चिन्ड नु छक लाक्चा डा गेय कोइशा, इस्राएली आन कली इजीप्त रे ग्रुंइशा, लल समुन्द्र चाक्दीम्मी बाक्त। मेकेर यो शुश छक लाक्चा डा गेय कोइदीमी बाक्त। मिनु लल समुन्द्र शोक्शा ४० बर्स सम्म गोरशो रागीमी हिरशा गाक्मानु, शुश छक लाक्चा डा गेय पाइबाक्माक्त। प्रस्थान ७:१०; प्रस्थान १४:२१ 37 मेको मोसामी इस्राएली आन कली ‘आं खोदेशो, परमप्रभु यावेमी आ लोव्र पाइब इन दाते रे का योव्रशा, आ लोव्र नेंपाइक्ब का सेल्ब’ दे तुइक्पाइक्मी बाक्त। ब्यवस्था १८:१५

38 इस्राएलीपुकी गोरशो रागीमी बाक्मानु, आन कली लां कोइब मेको मोसा बाक्माक्त। सीनै डांडामी परमप्रभु आ सोइशशा आ गेय पाइबमी इ किकी पिपी आन कली लोव्र पवानु, मेको मोसा रे पा नेंपाइक्मी बाक्त। मेको लोव्र चहिं मजाम्थु गेना हना यो लीब लोव्र बाक्ब। मुल सम्म गो इ कली गारशो लोव्र बाक्ब, दे तुइक्तीने। प्रस्थान १९:३; ब्यवस्था ९:१० 39 इ किकी पिपीमी मोसा आ लोव्र मटिथु मनेंथु, मोसा कली प्रोंइशा आन थुं इजीप्त रागी गे हिरदमे बाक्त। 40 मिनु हारून कली ‘इ कली इजीप्त रागी रे एक चाक्ब मोसा ते लाक्गा? बेक्म कों प्रोक्म कों? मतुंइसे। मुल लां कोइब का माल्ताक्व। मोपतीके देवता सेल्चा गेकी। मिनु मेको इ कली लां कोइब दुम्ल’ दे पुन्मे बाक्त। प्रस्थान ३२:१ 41 मिनु सुन के बाछा आ मूर्ति सेल्शा, मार मार क्योरशा जारदेमे बाक्त। आंम आन गुइमी सेल्शो मूर्ति तशा ग्येरसीशा, जचा तूचा सेल्शा डा मिन बुक्शा जामे तूडमे बाक्त। 42 मेकोपुकीमी मो पशो तशा, परमप्रभु यावे गाइशशा ‘मेकोपुकी नां नु तास्ला कली सेउ पाइब दुम्ल’ दे प्रोंइमी बाक्त। परमप्रभु यावे आ लोव्र पाइबमी ‘गे इस्राएलीपुकी, गोरशो रागीम ४० बर्स सम्म हिरशा गाक्नीनु, मार मार क्योरशा जारशा, आं कली चढेनी डा? 43 मो मपनी। गे मोलोक देवता आ ताम्बु कुरशा लाइक्तीनी। रिफन सोरुल आ मूर्ति सेल्शा लाइक्तीनी। मोपतीके इन रागी रे बेबीलोन लाइक्नन्नी’ दे ब्रेक्शो बाक्त। आमोस ५:२५-२७

44 इ किकी पिपी गोरशो रागीमी हिरसमानु, परमप्रभु यावे आ ताम्बु यो कुरशा गाक्मा बाक्त। परमप्रभु यावे आ ताम्बु चहिं दोपा सेल्चा, दे परमप्रभु यावेमी मोसा कली कोइशो खोदेशो पा मोसामी सेल्पाइशो बाक्माक्त। प्रस्थान २५:९ 45 मिनु नोले इ किकी पिपी यहोसु मेको आन लां कोइब दुम्शा, मेको ताम्बु कुरशा गाक्मा बाक्त। मिनु कनान रागीमी जाकदीम्मानु, मेको ताम्बु आन डोंइती कुरशा गाक्शो बाक्तेक्म। परमप्रभु यावेमी मेकेर बाक्ब मुर आन कली ग्राशा खेरशा, मेको रागी आन के सेल्शा, मेको ताम्बु मेकेन वोदमे बाक्त। मिनु पिप दाऊद आ पाला सम्म मेको ताम्बु मोदेशोन लीमाक्त। यहोसु ३:१४; यहोसु १६:१ 46 पिप दाऊद परमप्रभु यावे आ दाक्शो मुर बाक्माक्त। पिप दाऊदमी परमप्रभु यावे कली दाक्शा ‘याकूब आ परमप्रभु यावे कली खिं सेल्नुड’ दे थुं पवा बाक्त। २सामुएल ७:१-१६; भजन संग्रह १३२:३-५ 47 तन्न आ तौ सोलोमनमी परमप्रभु यावे आ खिं सेला बाक्त। १राजा ६:- 48 मिनु नेल्ल क्येडा ठेयब मुरुम सेल्शो खिंमी मबाक्ब। साइ नेसी परमप्रभु यावे आ लोव्र पाइबमी परमप्रभु यावेमी 49 ‘सरीड आं नित्तीके बाक्ब। रागीम आं खोइल थेक्तीक बाक्ब। मोपतीके आं कली दोदेशो खिं सेल्ने चाप्नीनी? गो आं नाइक्चा कली बाक्तीक मार सेल्ने चाप्नीनी? 50 सरीड नु रागी नेल्ल आं सेल्शो ममाइ डा?’ दे परमप्रभुमी देंमाक्त” दे लोव्र पवा बाक्त। यसैया ६६:१-२

51 “ए, गे परमप्रभु यावे आ लोव्र मनेथु मटीब फुल्लु खोदेशो थुं पाइशशोपुकी, गे परमप्रभु यावे कली मतुइक्ब मुर खोदेशो पाइनीनी। इन किकी पिपीमी पशो खोदेशो पा गे यो परमप्रभु यावे आ सोक्त आ देशो मटिथु दूली पाइनीनी। प्रस्थान १२:९; लेवी २६:४; रोमी २:२८-२९ 52 इन किकी पिपीमी मार पामे? परमप्रभु आ लोव्र पाइब सु कली श्येत मगेमे डा? नेल्ल आन कली श्येत गेम्तेक्म। श्येत गेशा ला ममाइ। इन कली पाप रे प्रॉइब ख्रीस्त जाक्ब, दे लोव्र नेंपा गाक्ब आन कली साइक्पाइक्ना पाइक्न बाक्तेक्म। इन कली पाप रे प्रॉइब ख्रीस्त जाक्त। मिनु गेपुकीमी मेको कली यो साइक्पाइक्तीनी। २इतिहास ३६:१६; मत्ती २३:३१ 53 परमप्रभु यावे आ स्वर्ग डा गेय पाइबपुकीमी मार पचा मार मपचा, दे परमप्रभु यावे आ अरेशो लोव्र शेंसीशा योव्रसीशो दुम्शा यो मटिनी” दे स्तीफानसमी हुइक्तीमी बाक्त। प्रस्थान २०:१-२१; गलाती ३:१९; हिब्रू २:२ 54 स्तीफानसमी मोदें हुइक्तीमीनु, नेल्ल गाइशशा, लल गोंगों जिशा, खुइ शेष्शा प्रेक्मा बाक्त। 55 स्तीफानस चहिं परमप्रभु यावे आ सोक्तीम ब्रीशा, सरीड गे कोव्रडा बाक्त। सरीड गे कोव्रडानु, ठेयब सक्ति पाइशशो नु छेडछेड पा तांइसीशो परमप्रभु यावे कली तवा बाक्त। परमप्रभु आ ग्युरा गे रागीम जरमेशो, येसु कली यो राप्शा बाक्शो तवा बाक्त। 56 मिनु “लो कोव्रडीन, गो स्वर्ग रोक्सीशा, परमप्रभु आ ग्युरा गे रागीमी जरमेशो कली राप्शा बाक्शो ताता” दे माइक्मी बाक्त। लूका २२:६९ 57 मो देंमेनु “एको आ लोव्र मनेंचा” दे शुश रेयके पा, गुइ पोक्शा प्रेक्शा ग्राम्शा ग्याइक्तमे बाक्त। 58 मिनु कीशा लाइशशा, सहर रे गुंडशा, फुल्लु क्रोम्चा गोव्रमे बाक्त। सांकछीपुकीमी आन वा प्रुइशशा, सावल नें पाइशशो ठिटा का आ डोंइती वोदमे बाक्त। लेवी २४:१६; प्रेरित २२:२० 59 मेको हुलमी स्तीफानस कली फुल्लु क्रोम्स डा क्रोम्स पामेनु, स्तीफानसमी “प्रभु येसु, आं सोक्त ताक्कीन” दे पुंडदा बाक्त। लूका २३:४६ 60 मिनु आ पोक्च थेक्शा ठेयब सेंदा पा “प्रभु, एको पाप एको आन कली मरल” देंशा, बेक्माक्त। लूका २३:३४

8

थमा सुइक्बपुकी खेदा पचा पुंडसीशो

1 स्तीफानस कली साइशशो तशा, सावलमी “एको कली साइक्चा माल्शो। मिनु साइशशा ठीक पाइतीनी” देंमाक्त। स्तीफानस कली सादमे नाक्त रे यरूसलेम सहरम बाक्ब थमा सुइक्ब नेल्ल आन कली खेदा पा श्येत गेचा गोव्रमे बाक्त। मिनु श्येत गेशा प्रोक्पदमेनु, मेकोपुकी ब्रशा गाक्शा, यहूदीया नु सामरीया रागीमी जाक्दीशशा बाक्मा बाक्त। १२ जना येसु आ सोइशशोपुकी ला यरूसलेम उइ बाक्मा बाक्त। प्रेरित १:८; प्रेरित ११:१९ 2 परमप्रभु यावे कली मान पा हिंबपुकीमी स्तीफानस आ बेक्शो रां लाइशशा, थिम्मे बाक्त। स्तीफानस कली साइशशो तशा, थमा सुइक्ब नेल्ल शुश डाक्मा बाक्त। 3 सावलमी चहिं “मेको आन थमा सुइशशो क्याम्चा” दे खिं खिं हिरशा ओव्रशा, थमा सुइक्ब वोंइश मुर, मीश मुर नेल्ल आन कली ग्याइक्पाइशशा, फ्रेंशा लाइशशा जेल्खानमी चोक्पाइक्बाक्माक्त। प्रेरित ९:१; प्रेरित २२:४; १कोरिन्थी १५:९

येसु आ लोव्र ब्रपाइशशो

4 प्रोक्शा ब्राशा गाक्बपुकीमी येसु आ लोव्र तेइ तेइ शेंना शेंन गाक्बाक्मा बाक्त। 5 फिलीप सामरीया सहरमी जाक्दीशशा, मेकेर बाक्ब मुर आन कली “परमप्रभु यावे आ सोइशशो ख्रीस्त येसु बाक्ब” दे शेंदीमी बाक्त। प्रेरित ६:५ 6 फिलीप आ शेंशो लोव्र नेंशा, आ पशो छक लाक्चा डा गेय तशा, नेल्लेमी थम नोफा दाइशशा नेन्मे बाक्त। 7 छक लाक्चा डा गेय चहिं मार कोंइबाक्माक्त देंशा हना, वोलम तशो मुर आन कली वोल खेरशा सापाइक्बाक्माक्त। वोल खेरानु, वोलम तशो मुर वाइ ब्रेशशा, वोल प्रोक्बाक्माक्त। गुइ खोइल मदुक्ब मुर शुश आन कली गुइ खोइल दुक्ब गाक्ब सेल्बाक्माक्त। मर्कूस १६:१७ 8 मोपतीके मेको सहरमी सापाइक्चा पुंडसीब मुर नेल्ले ग्येरसीबाक्मा बाक्त।

चटक कोंइब सिमोन

9 मेको सहरमी सिमोन नें पाइशशो मुर का बाक्माक्त। मेको डोंइती रे सामरीया रागी डा मुर आन कली चटक कोंइशा, ठेयब सुंडसीशो बाक्माक्त। 10 सहर डा मुर नेल्लेमी एको मुर परमप्रभु आ सक्ति तशो बाक्माक्त, दे ठेयब सेल्शा, मान पशो बाक्मा बाक्त। 11 शुश बर्स सम्म सिमोनमी चटक पा छक लाक्पाइक्तीके मुर नेल्लेमी सिमोन आ देशो नोफा दाइशशा आ पशो कोव्रशा बाक्शो बाक्मा बाक्त। 12 मिनु फिलीप जाक्शा, मुर आन कली येसु ख्रीस्तमी इं कली पाप रे प्रॉइब, दे परमप्रभु यावे आ राज्य डा लोव्र नु येसु ख्रीस्त आ पर्बम नेंपाइक्ना पाइक्न, शेंना शेंन गाक्मेनु, मीश मुर नु वोंइश मुर शुशेमी थमा सुइशशा, ब्वाक्कुम खुम्शा गुंडचा पुंडसमा बाक्त। 13 शुशेमी थमा सुइशशा तशा, मेको

चटक पा गाकब सिमोन यो थमा सुइक्ब दुम्शा, ब्वाक्कुम खुम्शा गुंडचा पुंडसे बाक्त। मिनु फिलीप कली मप्रोंइथु, काथा गाकबा दुम्माक्त। फिलीपमी चिन्ड नु छक लाक्चा डा गेय कोंइदानु, सिमोन यो छक लाक्बाक्माक्त।

14 मिनु नोले यरूसलेममी बाक्ब सोइश्शोपुकीमी “सामरीया डा मुरपुकीमी परमप्रभु यावे आ लोत्र थमा सुइक्ब दुम्तेक्म” देशो नेंशा, पत्रुस नु यूहन्ना आस कली सामरीया सोइक्तेमे बाक्त। 15 मिनु मेको निक्शीमी “परमप्रभु यावे आ सोक्त थमा सुइक्बपुकी नु लील” दे प्रार्थना पथ जाक्दीस्सा बाक्त। 16 मारदे हना सामरीया डा मुर सुइ आन कली परमप्रभु यावे आ सोक्त मगेशो बाक्माक्त। प्रभु येसु आ नेमी ब्वाक्कुम खुम्शा गुंडचा ला पुंडसीशो बाक्मा बाक्त। 17 मिनु पत्रुस नु यूहन्नामी आस गुइ थमा सुइक्ब आन तारी वोइश्शा, मेकोपुकी परमप्रभु यावे आ सोक्त तामे बाक्त। 18 मिनु सिमोनमी मेको सोइश्शो आस गुइ थमा सुइक्ब आन तारी वोइश्शा, परमप्रभु यावे आ सोक्त गेशो तशा, मेको आस कली “क्येट गेनुड। 19 मोदेशो सक्ति गेयी। गो गुइ वोइश्शा, पुनुनु, परमप्रभु यावे आ सोक्त मुरपुकीमी तामेक्ल” दे पुंडदा बाक्त। 20 मिनु पत्रुसमी “इ क्येट गे नुन जाम्शा लल। मारदे हना गे परमप्रभु यावे आ गेशो सक्ति क्येट थाप्शा, ग्याप्चा तांडसीब, दे मिम्ताक्वी। 21 गे मेको गेय पने मचाप्नेवे। मारदे हना इ थुं परमप्रभु यावे आ डोंइती मरिम्शो बाक्ब। 22 गे ओदेशो मरिम्शो थुं पचा प्रोंइशा, इ थुं परमप्रभु यावे गे लेत्तो। मिनु परमप्रभुमी इ पाप क्याम्शा गेबा कों? दे पुनो। 23 मुल इ थुं चोशा पापमी ब्रीशो मरिम्शो बाक्डे बाक्त, दे तुइक्ताक्ड” दे पत्रुसमी मदानु, 24 सिमोनमी “इन देशो खोदेशो मदुम्ल, दे आं पबर्म प्रभु कली प्रार्थना पने, हजुर” दे सेउ पवा बाक्त।

25 मिनु पत्रुस नु यूहन्नामी प्रभु आ लोत्र नेंपाइक्ने थुम्शा, यरूसलेम लेस्सानु, सामरीया डा गाउं लांमी शुश मुर आन कली ग्येरपाइक्ब लोत्र शेंना शेंन लेस्सा बाक्त।

एथीयोपीया डा मुर कली शेंशो

26 काबु परमप्रभु यावे आ स्वर्ग डा गेय पाइब कामी फिलीप कली “छुल बोक्शा यरूसलेम रे गाक्शा, गाजा लतीक लां लावो” दे माइश्शा, मेको लां सोइक्ता बाक्त। मेको लां गोरशो रागी लतीक लां बाक्माक्त। 27 परमप्रभु यावे आ स्वर्ग डा गेय पाइब आ लोत्र नेंशा, फिलीप छुल बोक्शा, गाजा सहर लतीक लां लमाक्त। मिनु मेको लां गाक्मेनु, एथीयोपीया रागी डा मुर का यो मेको लां लना लन बाक्माक्त। मेको एथीयोपीया डा पिपीम कान्दाके रे शुश अधिकार तशो, ठेयब मुर बाक्माक्त। यरूसलेममी परमप्रभु यावे कली मार मार चढेने थुम्शा, आ रागी लेशो बाक्माक्त। 28 मेको बग्गीम बाक्शा, परमप्रभु यावे आ लोत्र पाइब यसैयामी ब्रेक्शो पढेना पढेन बाक्माक्त। 29 मिनु परमप्रभु यावे आ सोक्तीमी फिलीप कली “मिरी लन लन पाइश्शो बग्गी आ नेक्था लावो” दे माइक्तीके फिलीप दोरशा, मेक जाक्दीम्माक्त। 30 जाक्दीश्शा, ठेयब मुर कली परमप्रभु यावे आ लोत्र पाइब यसैयामी आ ब्रेक्शो लोत्र पढेशो नेंशा “इन पढेशो लोत्र नेल्ल रुप्नी?” दे हिल्लो पवा बाक्त। 31 मिनु ठेयब मुरुमी “सुइमी मशेंथु, दोपा रुप्ने चाप्नुडा डा?” देशा, फिलीप कली बग्गीम डोइक्पाइश्शा निप्पाइश्शा, किताब कोंइदा बाक्त। 32 ठेयब मुरुम पढेना पढेन बाक्शो लोत्र चहिं “भेडा कली क्योरपाइक्थ लाइश्शो खोदेंब पा मेको कली लाइक्तेक्म। भेडा पाठा आ ऊन प्रेक्गमेनु, ब्वालेइ पा बाक्शो खोदेशो पा मेको ब्वालेइ पा बाक्त। 33 महिक्सीशो सेल्लेक्म। दोस गेशा ठीक निसाफ मपथु, दोसी सेल्लेक्म। आ खिं डा मुर सु लीबा डा? आल मथिथु साइक्चा पुंडसाक्व। मोपतीके आ खिं डा मुर सुइ मली” दे ब्रेक्शो लोत्र बाक्माक्त। यसैया ५३:७-८ 34 मिनु ठेयब मुरुमी फिलीप कली “परमप्रभु यावे आ लोत्र पाइबमी आंम आ पबर्म मोदेशो देंमे देय अरु आन पबर्म मोदेशो देंमे?” दे हिल्लो पवा बाक्त। 35 मिनु फिलीपमी मेको पढेशो लोत्र रे शेंचा गोशा, परमप्रभु यावे आ ब्रेक्पाइश्शो लोत्र शुश शेंशा, येसु आ पबर्म नेल्ल रूपदा बाक्त। 36 मोपा लसा लसा ब्वाक्कु बाक्तीकेमी जाक्दीस्सा बाक्त। मिनु ठेयब मुरुमी “एकेर ब्वाक्कु बाक्त, एको ब्वाक्कुम खुम्शा गुंडचा पुंडसीनुड, दुम्बा?” देंमाक्त। 37 मिनु फिलीपमी “गे येसु कली थमा सुइक्तीनी हना, ब्वाक्कुम खुम्शा गुंडचा शिरनीनी” देंमेनु “गो येसु ख्रीस्त परमप्रभु आ तौ बाक्ब, दे थमा सुइक्ता” देंमाक्त। 38 मिनु बग्गी तिक्शा तोइश्शा, फिलीपमी ठेयब मुर कली ब्वाक्कुम खुम्शा गुंडदा बाक्त। 39 मिनु ब्वाक्कु रे गूशा कुसानु, परमप्रभु यावे आ सोक्तीमी फिलीप कली लदा बाक्त। मिनु ठेयब मुरुमी मेको मतवा बाक्त। मो हना यो थाम्पा ग्येरसीशा, आ लां खोइश्शा गाक्माक्त। 40 नोले फिलीप अस्दोद सहरमी गूदीम्माक्त। मिनु मेकेर रे गाउं गाउं सहर सहरम येसु आ लोत्र नेंपाइक्ना पाइक्न गाक्शा, सिजरिया सहर जाक्दीम्माक्त। प्रेरित २१:८-९

1 सावल मुल यो थमा सुइक्ब आन कली खेदा पा श्येत गेशा साइक्नुडमी देना देन गाक्बाक्माक्त। प्रेरित २२:३-१६; प्रेरित २६:९-१८; प्रेरित ८:३ 2 मिनु काबु यरूसलेममी बाक्ब ठेयब चढेब आन कली गुम्शा, दमस्कस सहर डा गुम्तीक खिं खिं डा ठेयब मुर आन कली कागज ब्रेक्शा गेचा नड देशा पुना बाक्त। सावल आ पुंइशो लोत्र मार बाक्त देशा हना “दमस्कसमी बाक्ब येसु आ लां खोइक्ब मीश मुर वोंइश मुर सु सु थिदुमी, मेको नेल्ल आन कली ग्याइशशा फ्रेंशा, यरूसलेम चाक्नुडमी” दे पुंइशो बाक्माक्त। 3 मिनु मोदेशो कागज ताक्शा, दमस्कस सहर लशा जाक्दीत्चावानु, मार दुम्माक्त देशा हना, सरीड रे छेडछेड फो गूशा, आ एर ओथ नेल्ल कोइदा बाक्त। १कोरिन्थी १५:८ 4 मोपा छेडछेड तवानु, दिड गोल्माक्त। मिनु “सावल, सावल, गे मारदे आं कली खेदा पयी?” देशो लोत्र नेंना बाक्त। 5 मोदेशो नेंशा “प्रभु, गे सु ननी?” दे हिल्लो पवानु “इ खेदा पशो येसु गो नड। 6 मुल छुल बोक्शा दमस्कस सहर लावो। मिनु मेकेर जाक्दीशशा, गे मार गेय पचा माल्नेवे तुइक्पाइक्चा पुंइसीनेवे” देशो लोत्र नेंना बाक्त। 7 सावल नु काथा गाक्बपुकीमी मारेइ मतथु, लोत्र पशो ला नेंशा, वाम ग्याम दुम्मा बाक्त। 8 मिनु सावल बोक्शा मिक्च पाक्शा कोव्रडानु, मिक्च मताइब दुम्शो बाक्माक्त। मिनु आ वारचपुकीमी आ गुइ रे कीशा दमस्कसमी चाक्दीत्मे बाक्त। 9 दमस्कसमी जाक्दीशशा यो नाक्त सां सम्म मिक्च मतवा बाक्त। जचा तूचा यो, प्रोना बाक्त।

सावलमी येसु कली थमा सुइशो

10 दमस्कसमी हनानीया नें पाइशो थमा सुइक्ब मुर का बाक्माक्त। प्रभुमी मेको मुर कली कोइतीक कोइशा “हनानीया” दे ब्रेत्ता बाक्त। मिनु “मार देनी, प्रभु?” देमेनु 11 “छुल बोक्शा ग्येत्थ माइशो लां लावो। मेकेर जाक्दीशशा, यहूदा आ खिं लशा, टारसस डा सावल माइशो मुर कली मालो। मेकोमी प्रार्थना पाइब। 12 मिनु मेकोमी कोइतीकेमी हनानीया माइशो मुर ओव्रशा, मिक्च तपाइक्चा कली आ तारी गुइ वोइशो तशो बाक्ब” देशो लोत्र नेंना बाक्त। 13 मिनु हनानीयामी “आमाइ, प्रभु, गो शुश मुर आन शोव रे मेको मुर आ पर्बम शुश मरिम्शो लोत्र नेंता। मेकोमी यरूसलेममी बाक्ब थमा सुइक्ब आन कली शुश श्येत गेशा, खेदा पना पन बाक्ब देशो नेंता। 14 थमा सुइक्ब आन कली ग्याइशशा फ्रेंशा लाइक्चा कली ठेयब चढेबपुकी रे अधिकार तशो बाक्माक्त, दे तुइक्ताक्ड” देमाक्त। 15 प्रभुमी “मोदेशो तुइक्ताक्वी हना यो, मुल छुल बोक्शा लावो। मारदे हना अर्को रागी डा मुर, पिपपुकी नु इस्राएली आन कली आं नें तुइक्पाइक्चा, दे गो मेको कली योवने थुम्ता। प्रेरित १३:४६; प्रेरित २६:२; प्रेरित २७:२४ 16 आं नेंमी शुश श्येत जचा माल्नेवे देशा गो मेको कली आंमान तुइक्पाइक्नुड” दे प्रभुमी हनानीया कली माइशशा सोइक्ता बाक्त। २कोरिन्थी ११:२१-२८

17 मिनु हनानीया लशा, यहूदा आ खिं जाक्दीशशा ओव्रशा, सावल तारी आ गुइ चाक्शा “आं लोक्ब सावल, गे यरूसलेम रे पिवेनु, लांमी इ तशो प्रभु येसुम सोइक्ताक्यी। मिनु मिक्च ताइब दुमो, परमप्रभु यावे आ सोक्तीम ब्रीशो दुमो” देमेनु, 18 सावल आ मिक्च मारम फारशो बाक्मे, मेको दोक्शा, मिक्च ताइब दुम्माक्त। मिनु छुल बोक्शा, ब्वाक्कुम खुम्शा गुंइचा पुंइसे बाक्त। 19 मिनु जशा तूशा बोल तेम्सीशा, इक्का नाक्त दमस्कस डा थमा सुइक्बपुकी नु काथा बाक्माक्त।

सावलमी येसु आ लोत्र शेंशो

20 मिनु सावल गुम्तीक खिं खिं लशा “येसु परमप्रभु यावे आ तौ बाक्ब” दे शेंना शेंन यहूदी आन कली येसु आ पर्बम शुश लोत्र तुइक्पाइक्मी बाक्त। 21 मोदेशो मेको आ शेंशो नेंशा “आमाइ, यरूसलेममी येसु कली थमा सुइक्ब आन कली का यो मवोइक्नुडमी देब मेको ममाइ डा? इं सहर डा येसु कली थमा सुइक्ब आन कली यो ग्याइशशा लाइशशा, ठेयब चढेब आन डोंइती राप्पाइक्नुडमी, दे एक जाक्शो ममाइ डा?” दे छक लाक्शा देंमुमा बाक्त। प्रेरित ८:१; प्रेरित २६:१० 22 सावलमी शेंना शेंन आ शेंचा सक्ति बारपाइक्ना पाइक्न “येसु परमप्रभु यावे आ सोइशो ख्रीस्त बाक्ब” दे दमस्कसम बाक्ब यहूदी आन कली शेंदीमी बाक्त। मिनु सुइमी लोत्र लेन्ने मचाप्मे बाक्त। प्रेरित १८:२८ 23 मिनु शुश नाक्त मोपा शेंना शेंन गाक्मेनु, यहूदीपुकी गारशा सावल कली साइक्चा माल्मे बाक्त। 24 मिनु सावलमी “आं कली साइक्चा माल्तीमी” दे तुइक्ता बाक्त। नाक्दो नाक्त यहूदीपुकीमी सहर डा ओव्रतीक गूतीक लां मेर मेको कली बाप्बाक्मा बाक्त। 25 मोपतीके काबु नाक्दो थमा सुइक्बपुकीमी सावल कली डोकोमी कुर पशा, डोरीमी क्युक्शा, सहर डा गारो आ ची लुक्च तोइक्पा प्रोक्पदमे बाक्त। २कोरिन्थी ११:२२-२३

सावल यरूसलेम लेशो

26 सावल दमस्कस रे प्रोक्शा, यरूसलेम लेशशा जाक्दीम्माक्त। मिनु थमा सुइक्ब नु गारशा, काथा बाक्चा मला बाक्त। तन्न मेकोपुकीमी मेको येसु आ नोले खोइक्ब दुम्त, दे थमा मसुइक्थु, हिंशा मब्रामे बाक्त। गलाती १:१७-१९
27 बारनाबासमी चहिं सावल नु सोइश्शो आन कली गुम्पदा बाक्त। मिनु लांमी गाक्मेनु, प्रभु कली तशो, प्रभुमी लोव्र पशो, दमस्कसमी महिंथु, येसु आ नेमी शेंशा गाक्शो, मेको लोव्र नेल्ल बारनाबासमी रुप्पाइक्मी बाक्त। 28 मिनु सावल कली ब्रामे बाक्त। मिनु सावलमी यरूसलेम सहरमी सुइ सुइ आन कली तशा महिंथु, येसु आ नेमी शेंना शेंन गाक्माक्त।

29 शेंना शेंन गाक्मेनु, ग्रीक लोव्र पाइब यहूदीपुकी यो गुम्मी बाक्त। मिनु हिल्लो हिकसी पमुमानु, जिचा बोक्माक्त। मोदेशो दुम्मेनु, सावल कली साइक्चा माल्मे बाक्त। 30 मिनु थमा सुइक्ब लोकबपुकीमी साइक्चा माल्तेक्म, दे तुइश्शा, सिजरिया सम्म चोव्रदीशा, टारसस सोइक्तमे बाक्त। गलाती १:२१

31 मिनु यहूदीया, गालील नु सामरीया रागीमी बाक्ब थमा सुइक्बपुकी खेदा पचा मपुंइसीथु, बाक्चा तामे बाक्त। थमा सुइक्बपुकीमी प्रभु कली मान पा हिंशा, परमप्रभु यावे आ सोक्त रे पा वारच पचा पुंइसीशा, आन थुं बारना बारन लमाक्त। मिनु थमा सुइक्ब यो तेम्सीन सीन लमा बाक्त।

पत्रुस लिडडा जाक्दीश्शो

32 पत्रुस शेंना शेंन गाक्शा, लिडडा सहर जाक्दीम्माक्त। मिनु मेकेर बाक्ब प्रभु आ योव्रशो आन कली गुमा बाक्त। 33 मिनु काबु एनीयास माइश्शो मुर कली तवा बाक्त। एनीयास चहिं आ गुइ खोइल मदुक्ब रोइ पशा, ब्राख्ये रे बोक्ने मचाप्शो ८ बर्स दुम्शो बाक्माक्त। 34 मिनु पत्रुसमी “एनीयास, येसु स्त्रीस्तमी इ कली सापाइक्ब। मोपतीके बोक्शा, इ ब्राख्ये पोक्शा वोतो” देंमेनु, एनीयास छुल बोक्माक्त। 35 मिनु लिडडा सहरम नु शारोन रागीमी बाक्ब नेल्लेमी एनीयास कली मोपा साशो तशा, आन थुं प्रभु गे लेत्मे बाक्त।

तबीता कली बेक्शो रे सेंपाइश्शो

36 योप्पा सहरमी तबीता नें पाइश्शो थमा सुइक्ब मीश मुर का बाक्माक्त। ग्रीक लोव्रमी मेको आ नें दोरकास, किश्श रुम्सीब। तबीता गेना हना यो सुइ सुइ आन कली रिम्शो पाइबाक्माक्त। मथीब आन कली शुश वारच पाइबाक्माक्त। 37 मेको तबीता रोइ पा बेक्माक्त। मिनु आ मुरपुकीमी आ बेक्शो रां चिक्शा, खिं डा तला तार डा कोठा लाइश्शा वोदमे बाक्त। 38 लिडडा नु योप्पा नेक्नेक्था बाक्नीसी। मोपतीके थमा सुइक्बपुकीमी पत्रुस लिडडा जाक्शो बाक्ब, दे यो नेंशो बाक्मा बाक्त। मिनु आन मुर निक्शी योव्रशा, पत्रुस कली “आंइ बाक्तीक रीब जाक्शा, वारच पाइक्चा नकी” दे ब्रथ सोइक्तमे बाक्त। 39 मिनु पत्रुस मेको आस लोव्र नेंशा मेको नु काथा लमाक्त। मिनु जाक्मेनु, तला तारी लदमे बाक्त। तला तारी आन वोइश बेक्शो मारेइ मथीब मीश मुर खुम्सीशा डाक्ना डाक्न बाक्शो बाक्मा बाक्त। मिनु पत्रुस कली “तबीतामी शुश वारच पाइक्तीकी, ओदेशो वा फेरशा गेतीकी” दे तबीतामी फेरशा गेशो वापुकी कोइदमे बाक्त। 40 मिनु पत्रुसमी मेकेर डाक्शा बाक्ब नेल्ल आन कली लाडगा सोइक्तीमी बाक्त। मिनु आ पोक्च थेक्शा, प्रार्थना पवा बाक्त। मिनु तबीता आ बेक्शो रां गे हिरशा कोव्रशा “ए तबीता, छुल बोक्को” देंमेनु, तबीतामी आ मिक्च पाक्शा कोव्रडानु, पत्रुस कली तवा बाक्त। मर्कूस ५:४१ 41 मिनु पत्रुसमी आ गुइ कीशा पोक्गा बाक्त। मिनु लाडगा सोइश्शो नु प्रभु आ योव्रशो नेल्ल आन कली खिं गा ब्रेश्शा, तबीता कली बेक्शो रे सेंपाइश्शो कोइदा बाक्त। 42 मोदेशो दुम्त देशो लोव्र योप्पा सहरमी बाक्ब नेल्लेमी नेन्मे बाक्त। मिनु शुशेमी प्रभु कली थमा सुदमे बाक्त। 43 मिनु पत्रुस योप्पा डा कुशुल नोक्ब सिमोन आ खिंमी शुश नाक्त बाक्माक्त।

10

कोरनेलीयस आ तशो

1 सिजरिया सहरमी कोरनेलीयस नें पाइश्शो इटाली पल्टन डा कप्तान का बाक्माक्त। 2 मेको कप्तान परमप्रभु यावे कली मान पा हिंब मुर बाक्माक्त। आ खिं डा मुर नेल्लेमी यो आ खोदेशो पा प्रभु कली मान पा टीबाक्मा बाक्त। मेको कप्तानमी मारेइ मथीब आन कली शिशी पा शुश वारच पाइबाक्माक्त। परमप्रभु कली प्रार्थना पना पन बाक्बाक्माक्त। 3 मिनु काबु ३ बजे डा प्रार्थना पची ना कोइतीक का तवा बाक्त। मेको कोइतीकेमी परमप्रभु यावे आ स्वर्ग डा गेय पाइब का आ बाक्तीकेमी जाक्शा “ए कोरनेलीयस” देंमेनु, 4 कोरनेलीयसमी हिंशा, कोव्रस डा कोव्रस पा “मार देनी, प्रभु” देंमेनु “इ प्रार्थना पशो, प्रभु कली मान पा टिशो, इ शिशी पा वारच पशो नेल्ल परमप्रभु यावेमी तुइश्शो बाक्ब। 5 मुल गे योप्पा सहरमी बाक्शो सिमोन पत्रुस नें पाइश्शो मुर कली ब्रथ सोइक्तो। 6 मेको सिमोन पत्रुस

कुशुल नोकब सिमोन आ खिंमी बाकब। मेको आ खिं चहिं समुन्द्र आ नेकथा बाकब” देशा लशो नेना बाकत। प्रेरित ९:४३ 7 मोदेशो लोव्र देशो नेंशा, आ गेय पाइब निक्शी नु सिपाही का कली ब्रेत्ता बाकत। सिपाही यो प्रभु कली मान पा टीब का बाक्माकत। 8 मिनु मेको मुर सां आन कली मार दुम्मे, दोदेशो लोव्र नेंना, मेको लोव्र नेल्ल शेंशा, पत्रुस कली माल्शा, चाक्चा, दे योप्पा सहर सोइक्तीमी बाकत। प्रेरित ११:५-१७

परमप्रभुम सेल्शो कली ग्रांग्रा मदिचा

9 मिनु आ दीसा नाकत मेकोपुकी लमा लमा योप्पा सहर आ नेकथा जाक्दीम्मानु, पत्रुस प्रार्थना पथ खिं तारी डोंइसे बाकत। 10 मिनु डोइश्शा बाक्मेनु, शोव्रलु बेक्शा जज दाक्माकत। खिं डा मुरपुकी चहिं क्येना क्येन बाक्मा बाकत। मिनु पत्रुसमी प्रभुमी कोंइशो कोंइतीक तवा बाकत। 11 दोदेशो तवा बाकत देशा हना, सरीड रोक्सीशा ठेयब वा का हाम्सीशा क्युक्सीशो खोदेशो पा खप गे यिशो तवा बाकत। 12 मेको वामी मब्बचा डा, ग्रांग्रा दिचा डा जन्तु बुस्स चिक्ब बाक्मा बाकत। 13 मिनु “ए पत्रुस, एको आन कली साइश्शा ब्वामी” देशो नेंना बाकत। 14 मिनु पत्रुसमी “हत्तेरी ओदेशो ग्रांग्रा दिचा डा दोपा ब्बचा नमी डा, प्रभु? ओदेशो ग्रांग्रा दिचा डा गो गेनायो मब्बशो नड” देंमाकत। लेवी ११:-; इजीकीएल ४:१४ 15 मिनु लेंशा “परमप्रभु यावे आ चोव्रखो सेल्शो कली ग्रांग्रा मदित्तो” देशो नेंना बाकत। रोमी १४:१४ 16 खेयप सां मोदेशो दुम्शा, मेको ठेयब वा सरीड गे लशो तवा बाकत।

पत्रुस कोरनेलीयस आ खिं लशो

17 मिनु पत्रुसमी छक लाक्शा एको मार बाक्म माइ, दे मिम्ना मिम्न बाक्माकत। पत्रुस मोदेशो मिम्स डा मिम्स बाक्मेनु, कोरनेलीयसमी सोइश्शा मुरपुकी कुशुल नोकब सिमोन आ खिंमी जाक्दीश्शा, लाप्चो आ डोंइती राप्शा कोव्रशा 18 “एको खिंमी सिमोन पत्रुस बाक्मे?” दे हिल्लो पामे बाकत। 19 पत्रुसमी मुल यो आ तशो मार बाक्म माइ, दे मिम्न मिम्न बाक्मेनु, परमप्रभु यावे आ सोक्तीमी मेको कली “इ कली ब्रथ मुर सां जाक्तेक्मे। 20 तोइश्शा मेको आन कली ग्मुथ लावो। मिनु लचा, दे मलचा, दे थुं निक्शी मपथु, मेकोपुकी नु लावो। मारदे हना मेकोपुकी आं सोइश्शा नम” देशो नेंना बाकत। 21 मिनु पत्रुस फ्रु तोइश्शा “इन माल्शो मुर गो नड, आं कली मारदे माल्यीनी?” दे हिल्लो पवा बाकत। 22 मिनु मेकोपुकीमी “कोरनेलीयस आ सोइश्शा नकी। कोरनेलीयस कप्तान बाक्ब। परमप्रभु कली मान पा हिंब, रिम्शो मुर बाक्ब। यहूदीपुकीमी यो रिम्शो मुर बाक्ब, दे मिम्नीम। परमप्रभु आ स्वर्ग डा गेय पाइब कामी कोरनेलीयस कली ‘योप्पा सहरमी सिमोन पत्रुस माइश्शा कली माल्शा चाक्शा आ लोव्र नेंचा’ देंतीके इन कली ब्रथ जाक्तक” देंमा बाकत। 23 मिनु पत्रुस नु खिं डा मुरपुकीमी मेको आन कली खिं गा ओइशा जचा तूचा गेशा, बास गेमे बाकत। मिनु आ दीसा पत्रुस मेकोपुकी नु सिजरिया गे लमाकत। योप्पा सहर डा थमा सुइक्ब लोक्ब का निक्शी यो लमा बाकत।

कोरनेलीयस आ खिंमी

24 आ दीसा सिजरियामी जाक्दीम्मा बाकत। कोरनेलीयसमी आ मुर, आ वारच आन कली ब्रेश्शा, पत्रुस आ लां कोव्रशा बाक्शो बाक्मा बाकत। 25 मिनु पत्रुस कोरनेलीयस आ खिं ओव्रचवानु, कोरनेलीयसमी पत्रुस आ डोंइती बाप्शा आ खोइल गुप्शा सेउ पवा बाकत। 26 मिनु पत्रुसमी कोरनेलीयस आ पिया पोक्शा “गो यो इन खोदेशो मुर ला नड” देशा राप्पदा बाकत। प्रेरित १४:१५; प्रकाश १९:१० 27 मिनु लोव्र पना पन खिं गा ओव्रसा बाकत। खिं गामी शुश मुर खुम्सीशा देल्शो बाक्मा बाकत। 28 मिनु पत्रुसमी मेको देल्शा बाक्ब आन कली “गो आंइ यहूदी अर्को रागी डा मुरपुकी नु काथा बाक्चा, जचा, आन खिं ओव्रचा मदुम्ब, दे नेल्लेमी तुइक्नीनी। मोदेशो बाकत हना यो, परमप्रभु यावेमी आं कली सुइ आन कली आइक्च ममिम्चा, दे शेंताक्यी। 29 मोपतीके गेपुकीमी आं कली ब्रेत्तीनीनु, लचा, दे मलचा, दे थुं निक्शी मपथु, गिरिककै जाक्ती। मारदे ब्रेत्तीनी?” देंमाकत। 30 मिनु कोरनेलीयसमी “गाबेर नाकत आं खिंमी ३ बजे डा प्रार्थना पना पन बाक्डानु, जील्माक्श देशो वा फेक्सीशो मुर का फो गूशा, आं डोंइती राप्शो ताता। 31 मेकोमी आं नें थिशा ‘ए कोरनेलीयस, परमप्रभुमी इ प्रार्थना पशो नेंशो बाक्ब। इ शिशी पा मथीब आन कली मार मार गेशो तशो बाक्ब। 32 मोपतीके योप्पा सहरमी जाक्शा बाक्शो सिमोन पत्रुस नें पाइश्शा मुर कली ब्रथ सोइक्तो। मेको कुशुल नोकब सिमोन आ खिंमी बाक्शो बाक्ब। मेको खिं समुन्द्र आ नेकथा बाक्ब’ देंत। 33 मोपतीके ब्रथ सोइक्ताक्नी। गे बिश्शा गिरिककै जाक्शा, आंइ कली रिम्शो पाइतीनी। परमप्रभु गे नु बाक्ब। मिनु परमप्रभु यावेमी इन कली मार शेंपाइक्बा, मेको लोव्र नेल्ले नेंचा कली खुम्सीशा बाक्तक” देंमाकत। 34 मिनु पत्रुसमी “परमप्रभु यावेमी सुइ आन कली मतिल्लु, उइक्थ उइक्थ मिम्ब। ब्यवस्था १०:१७; १सामुएल १६:७; रोमी २:११ 35 मुर आन

के जात रागी मारेइ मकोव्रथु, आ कली मान पा हिंशा, आ लोव्र टिशा, रिम्शो पाइब आन कली दाक्शा, नेल्ल आन कली ब्राइब, दे मुल रुप्ता। यूहन्ना १०:१६ 36 परमप्रभु यावेमी येसु ख्रीस्त आ पतीकेम आंइ इस्राएल डा मुर आन कली ग्येरपाइक्ब लोव्र नेंपाइवतु। मिनु येसु ख्रीस्त नेल्ल आन प्रभु बाक्ब। एफिसी २:१७ 37 यूहन्नामी मुर आन कली शेंशा, ब्वाक्कुम खुम्शा गुंडदा नोले येसु ख्रीस्तमी गालील रे गोशा यहूदीया रागीम हिरशा, मुर आन कली शेंना शेंन गावत। मती ४:१२-१७ 38 परमप्रभु यावेमी मेको नासरथ डा येसु कली आ सोक्तीम प्रिंशा, आ सक्ति पाइश्शो सेल्लु। मिनु परमप्रभु यावे आ सक्ति पाइश्शो दुम्शा, तेइ तेइ गाक्शा मुर आन कली रिम्शो पाप्तु। वोलम तशो आन कली वोल खेरशा सापाइवतु। सैतानमी दिप्शा वोइश्शा श्येत गेशो आन कली श्येत रे प्रोंइतीमी। मारदे हना परमप्रभु यावे मेको नु बाक्वत। मती ३:१६ 39 यहूदीया रागी यरूसलेम सहरमी येसुमी मार मार पवा, मार मार दुम्मे, मेको नेल्ल गो नु आं वारचपुकीमी आंम आंइ मिक्चीम ताइतक। येसु शीमी केप्शा कांटी थोक्शा क्याइश्शा साइक्चा पुंडसाक्व। 40 साइक्चा पुंडसीशा यो आ बेक्शो आ नित्थ नाक्ती परमप्रभुमी बेक्शो रे सेंपाइश्शा कोंइताक्व। १कोरिन्थी १५:४-७ 41 हना यो मुर नेल्लेमी मताम। गोपुकीमी चहिं ताइतक। मारदे हना डोंइती रे गोपुकी सांकछी दुम्चा कली योव्रशो नकी। येसु बेक्शो रे सेंसीशा, गोपुकी नु बाक्शा काथा जाइतक, काथा तूतक। यूहन्ना १४:१९,२२; लूका २४:३०,४३ 42 मिनु मोदेशो पा काथा बाक्कानु, येसुमी आंइ कली ‘मुर आन कली आं पबर्म शेंदीने। मार शेंचा देंशा हना, परमप्रभु यावेमी येसु कली ब्रोंइशा बाक्ब नु बेक्शो मुर नेल्ल आन कली निसाफ पाइब सेल्लु, दे शेंशा गाक्कीन’ दे माइक्तीकी। यूहन्ना ५:२२ 43 सु सुमी येसु कली थमा सुदमे, मेकोपुकी येसु आ नेमी आन पाप क्याम्चा पुंडसीनीम। साइ डोंइती रे परमप्रभु यावे आ लोव्र पाइबपुकीमी मोदेशो देंशो बाक्नीम” दे शेंदीमी बाक्वत। यसैया ५३:५-६; येरमीया ३१:३४

मुरपुकी परमप्रभु आ सोक्तीम ब्रीशो

44 पत्रुसमी शेंना शेंन पवानु, परमप्रभु यावेमी आ लोव्र नेंब नेल्ल आन कली आ सोक्तीमी प्रिंशो बाक्वत। 45 पत्रुस नु काथा जाक्शो खोइक्तीक चिनु खोइश्शो थमा सुइक्ब यहूदीपुकीम अर्को रागी डा मुर यो परमप्रभु यावे आ सोक्तीम ब्रीशो तशा छक लाक्मा बाक्वत। 46 मेकोपुकीमी परमप्रभु यावे आ सोक्तीमी पपाइश्शो लोव्र पा परमप्रभु यावे कली ठेयब सेल्लो तशा तुइक्वतमे बाक्वत। प्रेरित २:४ 47 मिनु पत्रुसमी “मेकोपुकी आंइ खोदेशो पा परमप्रभु यावे आ सोक्तीम प्रिंचा पुंडसाक्म। मोपतीके एको आन कली ब्वाक्कुम खुम्शा गुंडचा मदुम्ब, दे सुम देने चाप्बा डा?” देंमाक्वत। 48 मिनु मेको आन कली येसु ख्रीस्त आ नेमी ब्वाक्कुम खुम्शा गुंडपदा बाक्वत। मिनु मेको नक थमा सुइक्बपुकीमी पत्रुस कली “नाक्वत का निक्शी गोपुकी नु बाक्कीन” दे तेक्गमे बाक्वत।

11

अर्को रागी डा मुर

1 मिनु यरूसलेममी बाक्ब सोइश्शोपुकी नु यहूदीया रागी तेइ तेइ बाक्ब थमा सुइक्ब लोकबपुकीमी “अर्को रागी डा मुरपुकीमी यो परमप्रभु यावे आ लोव्र नेंशा, थमा सुइक्ब दुम्मा बाक्वत” देंशो नेन्मे बाक्वत। 2 मिनु पत्रुस यरूसलेम लेशशा जाक्मेनु, खोइक्तीक चिनु खोइश्शो थमा सुइक्बपुकीमी पत्रुस कली 3 “मारदे खोइक्तीक चिनु मखोइश्शोपुकी नु काथा बाक्शा जवी” दे लोव्र पोक्मे बाक्वत। गलाती २:१२ 4 मिनु पत्रुसमी मेको लोव्र पोक्ब आन कली खुप्शा, दोपा मोदेशो दुम्मे, मेको नेल्ल रुप्पाइक्चा कली 5 “गो योप्पा सहरमी बाक्ती। मिनु काबु मार दुम्त देंशा हना, प्रार्थना पना पन बाक्डानु, प्रभुमी कोंइतीक कोंइताक्यी। सरीड रोक्सीशा ठेयब वा का हाम्सीशा क्युक्सीशो खोदेशो पा खप गे यिशो ताता। मिनु आं नेक्था जाक्शा दिक्वत। प्रेरित १०:९-४८ 6 मिनु गो गीशा कोव्रडुनु, मब्वचा डा, ग्रांग्रा दिचा डा, जन्तु, खोते नु चिक्ब तातामी। 7 मिनु ‘ए पत्रुस, मेको साइश्शा ब्वामी’ देंशो नेंता। 8 मिनु गोमी ‘हत्तेरी, ओदेशो ग्रांग्रा दिचा डा दोपा ब्वचा नमी डा, प्रभु, ओदेशो ग्रांग्रा दिशो गेनायो मब्वशो नड’ देंती। 9 मिनु ‘परमप्रभु यावेमी चोव्रखो सेल्लो कली गे ग्रांग्रा मदित्तो’ दे सरीड रे देंशो नेंता। 10 खेयप सां मोदेशो दुम्शा, मेको ठेयब वा सरीड गे लेशशा लत। 11 मोदेशो दुमे चोटीन सिजरिया रे आं कली ब्रथ सोइश्शो मुर सां आं बाक्शो खिंमी जाक्तेक्म। 12 मिनु परमप्रभु यावे आ सोक्तीमी ‘मेको आन जात मार नमी? दे ममिन्थु मेकोपुकी नु काथा लावो’ देंतीके गो मेकोपुकी नु लती। मुल एकेर गो नु बाक्ब थमा सुइक्ब ६ जना लोकब गो नु लाम्तेक्म। गो काथा गाक्शा, कोरनेलीयस आ खिं जाक्दीश्शा ओव्रतक। 13 आ खिं ओव्रशा बाक्कानु, कोरनेलीयसमी आंइ कली ‘परमप्रभु यावे आ स्वर्ग डा गेय पाइब का आं

डोंडती राप्शा, मेकोमी योप्पा सहरमी जाक्शा बाक्शो सिमोन पत्रुस कली ब्रथ सोइक्तो। 14 मेकोमी जाक्शा, गे नु इ खिं डा मुर नेल्ले आन कली गेना हना यो ब्रोंडशा बाक्तीक लोव्र शेंब, दे माइक्ती' देत।

15 मिनु गो मेकेर खुम्सीशा बाक्ब आन कली ख्रीस्त आ लोव्र शेंदुनु, साइ गोपुकी खोदेशो पा मेकोपुकी यो परमप्रभु यावे आ सोक्तीम पिंचा पुंडसाक्म। प्रेरित २:१-४ 16 परमप्रभु यावे आ सोक्तीम ब्रीचा पुंडसीशो तशा, गो इ प्रभु आ देशो लोव्र ति फ्रुक्ता। प्रभुमी मार देत देशा हना 'यूहन्नामी मुर आन कली ब्वाक्कुमी खुम्शा गुंडताक्व। गे चहिं परमप्रभु यावे आ सोक्तीमी खुम्चा पुंडसीनीनी' देत। प्रेरित १:५ 17 गोपुकीमी प्रभु येसु ख्रीस्त कली थमा सुइक्तीके परमप्रभु यावे आ सोक्तीम पिंचा पुंडसाक्म। मिनु अर्को रागी डा मुरपुकीमी यो येसु ख्रीस्त कली थमा सुइक्तीके आ सोक्तीम पिंचा पुंडसाक्म। मोदेशो दुम्शो तशा, मार पाइनुडा? गो परमप्रभु आ पशो गेय तेक्ने चाप्नडा?" दे रुप्पाइक्मी बाक्त। 18 पत्रुसम मो देशो नेंशा, मेको आन पोक्शो लोव्र साम्शा "मोदेशो बाक्त हना, परमप्रभु यावेमी इ कली गेशो खोदेशो पा अर्को रागी डा मुर आन कली यो आन थुं लेप्पा आन पाप क्याम्बाक्माक्त" दे परमप्रभु यावे कली ठेयब सेल्मे बाक्त।

अर्को रागीम येसु आ लोव्र शेंशो

19 स्तीफानस साइक्चा पुंडसे नोले खेदा पचा पुंडसीशा, प्रोक्शा गाक्शो थमा सुइक्ब का निक्शी फोनीसीया, का निक्शी साइप्रस, का निक्शी एन्टीओक जाक्दीशो बाक्मा बाक्त। मिनु मेकोपुकीमी येसु आ लोव्र यहूदी आन कली ला शेंदमे बाक्त। प्रेरित ८:१-४ 20 साइप्रस नु साइरेनी रे एन्टीओक सहर जाक्दीशो थमा सुइक्ब का निक्शीमी चहिं अरु ग्रीस रागी डा मुर आन कली यो प्रभु येसु आ पर्वम शेंदमे बाक्त। 21 मोदेशो शेंब आन कली प्रभुमी सक्ति गेवा बाक्त। मिनु मेको आन लोव्र नेंशा, शुश मुरुमी थमा सुइश्शा, आन थुं प्रभु गे हिरदमे बाक्त। प्रेरित २:४७

22 एन्टीओक सहरमी शुश मुर थमा सुइक्ब दुम्तेक्म, दे यरूसलेममी बाक्ब थमा सुइक्बपुकीमी यो नेन्मे बाक्त। मिनु बारनाबास कली रुथ सोइक्तमे बाक्त। प्रेरित ४:३६ 23 बारनाबास एन्टीओकम जाक्दीशो, परमप्रभु यावेमी शुश मुर आन कली शिशी पा आन थुं लेप्पाइश्शो तशा थाम्पा ग्येरसे बाक्त। मिनु मेको आन कली "मार दुम्त हना यो, प्रभु कली मप्रोंडचा, है" दे आन थमा सुइक्तीक थुं बारपाइक्मी बाक्त। 24 बारनाबास रिम्शो मुर बाक्माक्त। परमप्रभु यावे आ सोक्तीमी ब्रीशा, खोइल थेक्शो खोदेशो पा थमा सुइक्बाक्माक्त। आ पशो तशा, आ लोव्र नेंशा, शुश मुरुमी प्रभु कली थमा सुइक्ब दुम्मा बाक्त। प्रेरित ५:१४

ख्रीस्तीयन नें वोइक्चा पुंडसीशो

25 मिनु नोले बारनाबास सावल माल्थ टारसस सहर लमाक्त। प्रेरित ९:३० 26 मिनु थिश्शा एन्टीओकम जाक्शा बाक्सा बाक्त। मिनु बर्स का सम्म थमा सुइक्बपुकी नु काथा बाक्शा, शुश मुर आन कली प्रभु आ लोव्र शेंना शेंन बाक्सा बाक्त। एन्टीओक सहरमीन येसु आ लां खोइक्ब नेल्ल क्येडा डोंडती "ख्रीस्तीयन" दे नें वोइक्चा पुंडसमा बाक्त। मेना रे मेको नें लीमाक्त। गलाती २:११

श्येत जाइब आन कली क्येट सोइश्शो

27 मिनु काबु परमप्रभु यावे आ लोव्र पाइबपुकी यरूसलेम रे यिशा, एन्टीओकम जाक्मा बाक्त। प्रेरित १३:१; प्रेरित १५:३२ 28 मेको आन दातेमी अगाबस नें पाइश्शो मुर का बाक्माक्त। मिनु काबु थमा सुइक्बपुकी खुम्सीशा बाक्मानु, अगाबसमी परमप्रभु यावे आ सोक्त रे पा "रागी नेल्लेमी अन्काल दुम्शा, जचा मतांडसीब" दे लोव्र पवा बाक्त। मेको लोव्र पिप क्लौदीयस आ सासनम थमा दुम्माक्त। प्रेरित २१:१० 29 अन्काल दुम्ब देशो तुइश्शा, एन्टीओक डा थमा सुइक्बपुकीमी "यहूदीया रागीमी बाक्ब थमा सुइक्ब आन कली वारच पाइक्चा माल्ब, मोपतीके क्येट पोक्क्य" देमा बाक्त। 30 मिनु नेल्लेमी दो दोशो चाप्मे, मो मोशो क्येट पोक्शा, यरूसलेममी बाक्ब थमा सुइक्ब आन शेंब खाल्पा आन कली गेचा नमी, दे बारनाबास नु सावल आस कली चोव्रथ सोइक्तमे बाक्त। प्रेरित १२:२५; १कोरिन्थी १६:१-४

12

पत्रुस जेल्खान रे प्रोंडचा पुंडसीशो

1 मेको बर्समी पिप हेरोदमी यरूसलेम सहरम बाक्ब थमा सुइक्ब का निक्शी आन कली खेदा पा ग्याइश्शा, शुश श्येत गेमी बाक्त। 2 यूहन्ना आ लोक्ब याकूब कली तरवारमी क्योरपा साइक्पदा बाक्त। मत्ती २०:२०-२३ 3 हेरोदमी "आं पशो तशा यहूदीपुकी ग्येरसीनीम" दे तुइश्शा, मोदेशो खेदा पना पन लमाक्त। मिनु पत्रुस कली यो ग्याइक्पदा

बाक्त। पत्रुस कली ग्याइकपदानु, बोरब ओरुली मसुप्शो शोब्ले जतीक चाड जाकशो बाक्माक्त। 4 मोपतीके पाससा चाड थुम्शा, मुर आन डोंइती राप्पाइक्चा, दे जेल्खानमी चोक्शा, ४, ४ जना पालो पालो पा बाक्कीन, दे १६ जना सिपाही वोइकपदा बाक्त। 5 पत्रुस जेल्खानमी चोक्सीशा बाक्मेनु, थमा सुइक्ब नेल्ल थुं का दुम्शा “पत्रुस कली कोव्रडीने, प्रोंइशा सोइक्तीने” दे प्रार्थना पा बाक्मा बाक्त।

6 हेरोदमी पत्रुस कली मुर आन डोंइती राप्पाइक्चा देशो नाक्त आ डोंइती नाक्दो पत्रुस साडलो निक्शीमी पाइश्शा, सिपाही निक्शी आस दातेम इप्पाइश्शो बाक्माक्त। लाप्चो आ डोंइती यो खाल पाइबपुकी बाक्मा बाक्त। 7 मिनु मार दुम्माक्त देशा हना, परमप्रभु यावे आ स्वर्ग डा गेय पाइब का फो गूशा, पत्रुस आ डोंइती राम्माक्त। मिनु कोठा छेडछेड तांडसे बाक्त। मिनु परमप्रभु यावे आ स्वर्ग डा गेय पाइबमी पत्रुस कली “छुल बोक्को” दे चुशा पोक्गा बाक्त। मिनु बोक्मेनु, आ गुइमी पाइश्शो साडलो बुइश्शा खपीमी देल्माक्त। प्रेरित ५:१९ 8 मिनु “किप्शुर किम्सो, इ जुत्ता मुंडसो” देंमेनु, पत्रुसमी किप्शुर किप्शा, जुत्ता मुंडसे बाक्त। मिनु “इ किप्शुर किप्शा रुक्शा, आं नोले खोइय्यी” देंमाक्त। 9 मिनु पत्रुस मेको आ नोनोले खोइश्शा, कोठा रे गूसा बाक्त। पत्रुसमी चहिं एको नेल्ल गो कोंइतीक तना तन बाक्नुड, दे मिम्ता बाक्त। थमा कोठा रे गूडा बाक्त, दे मतुइश्शो बाक्माक्त। 10 मिनु कोठा रे गूशा, डोंइती बाक्ब खाल पाइब कली लाक्शा, नोले बाक्ब कली यो लाक्शा, फलाम के सेल्शो ठेयब लाप्चो जाक्दीस्सा बाक्त। मेकेर जाक्दीस्सानु, लाप्चो रोक्से बाक्त। मिनु गूशा गाक्सा बाक्त। मिनु लां का लाग्सेनु, परमप्रभु यावे आ स्वर्ग डा गेय पाइबमी पत्रुस कली प्रोंइशा गाक्माक्त। 11 मेना ब्रड सेंसीशा “परमप्रभुमी पिप हेरोद नु आं कली खेदा पाइब यहूदी आन गुइ रे प्रोंइथ, आ गेय पाइब सोइश्शा प्रोंइय्यी बाक्त” दे तुइक्ता बाक्त।

12 मेको तुइश्शा मर्कूस, यूहन्ना नें यो वोइश्शो, आ ममा मरीयम आ खिं गे लमाक्त। मरीयम आ खिंमी थमा सुइक्ब शुश खुम्सीशा, प्रार्थना पना पन बाक्शो बाक्मा बाक्त। प्रेरित १२:२५; प्रेरित १३:५,१३; प्रेरित १५:३७ 13 मिनु पत्रुस जाक्शा, लाडगा डा लाप्चो खोकोल पदा बाक्त। मिनु रोदा माइश्शो गेय पाइब मीश मुरुम सु जाक्मे, दे कोव्रथ गूमाक्त। 14 मिनु पत्रुस आ सेंदा नेंशा, पत्रुस जाक्माक्त, दे तुइश्शा, लाप्चो मरोक्थु फ्रा लेशशा, खिं गामी बाक्शो आन कली “आमाइ, लाप्चो डोंइती राप्शा बाक्ब दा पत्रुस कका बाक्त” दे माइक्मी बाक्त। 15 मोदेशो नेंशा “गे मार निप्स ग्यशो लोव्र पवी?” दे आ देशो थमा मसुदमे बाक्त। रोदामी चहिं लोव्र थोक्शा, “थमान पत्रुस जाक्त” देंमेनु “मो हना पत्रुस ममाइ। पत्रुस कली कोव्रब परमप्रभु यावे आ स्वर्ग डा गेय पाइब बाक्म माइ?” देंमा बाक्त। 16 मोपा लोव्र पना पन बाक्मानु, पत्रुसमी लाप्चो खोकोल पाइक्स डा पाइक्स बाक्माक्त। मिनु नोले लाप्चो रोक्शा कोव्रडमेनु, पत्रुस कली तशा “आल्लेइ” दे छक लाक्मा बाक्त। 17 मिनु पत्रुस ओव्रशा आ गुइ हिक्शा, आ शोव्र थीप थीप पा सिक्सी पा नेनीन देशा, दोपा प्रभुमी जेल्खान रे प्रोंइशा सोइक्ता, मेको नेल्ल तुइक्पाइक्मी बाक्त। मिनु “याकूब नु इं थमा सुइक्ब लोक्ब नेल्ल आन कली एको लोव्र नेंपतीन, है” देशा, मेकेर रे गाक्माक्त।

18 जेल्खानमी चहिं मार दुम्माक्त देशा हना, सुनी कना सिपाही नु खाल पाइबपुकीमी पत्रुस कली मतामे बाक्त। मिनु शुश हिंशा, मार दुम्मे, ते लाक्गा, दे वाइ की ब्रेम्मा बाक्त। प्रेरित ५:२१-२२ 19 मिनु पिप हेरोदमी पत्रुस कली माल्थ सोइक्तीमी बाक्त। माल्ना मालन गाक्मानु, यो तेइ मथिदमे बाक्त। मिनु थिन्ने मचाप्शो तशा, पिपमी खाल पाइब आन कली ब्रेशशा हिल्लो हिक्सी पशा यो मारेइ तुइक्ने मचाप्तीके खाल पाइब सिपाही आन कली साइक्पाइक्मी बाक्त। मिनु यहूदीया रागी रे सिजरिया सहर याक्सीशा बाक्माक्त।

पिप हेरोदमी सजाइ तशो

20 पिप हेरोद मेकेर बाक्मेनु, टायर नु सीदोन सहर डा मुर आन कली तशा चुरमाक्त। मोपतीके मेकोपुकीमी मुर निक्शी का योव्रशा, ब्लास्तस नें पाइश्शो पिप आ ठेयब गेय पाइब मुर नु गारशा, पिप कली गुम्थ जाक्मा बाक्त। मिनु मेकोपुकीमी “दुशा गारशा बाक्य, सरकार” दे सेउ पदमे बाक्त। मारदे हना पिप हेरोद आ रागी रे मचाक्थु जचा मजाक्दीम्माक्त। इजीकीएल २७:१७

21 मिनु काबु पिप हेरोदमी रकारी वा फेक्शा, आ ठेयब नित्तीकेमी निश्शा, मेको आन कली आ लोव्र नेंपाइक्मी बाक्त। 22 मिनु आ लोव्र नेंशा “मुर आ लोव्र ममाइ, देवता आ लोव्र बाक्माक्त” देशा, रेयके पा पिप कली ठेयब सेल्मे बाक्त। इजीकीएल २८:२ 23 पिप हेरोदमी परमप्रभु यावे कली मान मपथु, आंमान ठेयब सेल्सीतीके परमप्रभु यावे आ स्वर्ग डा गेय पाइबमी मेको कली रोइ पपदा बाक्त। मिनु मेको हेरोद लुस्पु जोल्शा बेक्माक्त। दानीएल ५:२०

24 परमप्रभु यावे आ लोव्र तेइ तेइ ब्रशा, शुश मुर थमा सुइक्ब दुम्मा बाक्त। प्रेरित ६:७ 25 बारनाबास नु सावल यरूसलेममी क्येट चोवने थुम्शा, एन्टीओक लेस्सा बाक्त। लेस्सानु, मर्कूस कली यो लदसे बाक्त। मर्कूस कली यूहन्ना नें यो वोइश्शो बाक्त। प्रेरित ११:२९-३०; प्रेरित १३:५

13

शेंब आस कली सोइश्शो

1 एन्टीओक सहर डा थमा सुइक्ब आन दातेमी परमप्रभु यावे आ लोव्र पाइब नु शेंब का निक्शी यो बाक्मा बाक्त। मोदेशो मुर सु सु बाक्मा बाक्त देशा हना, बारनाबास, क्येर माइश्शो सिमियोन, साइरेनी डा लुसीयस, पिप हेरोद आ गेय पाइब मानाएन नु सावल बाक्मा बाक्त। प्रेरित ११:२७; १कोरिन्थी १२:२८ 2 मिनु काबु थमा सुइक्बपुकी खुम्सीशा माइजा बाक्शा, प्रार्थना पना पन प्रभु कली ठेयब सेल्ना सेल्न बाक्मानु, परमप्रभु यावे आ सोक्तीमी “बारनाबास नु सावल आस कली आं गेय पथ योव्रतासी। मोपतीके मेको आस कली आं गेय पचा कली सोइक्तीने” दे तुइक्पाइक्मी बाक्त। प्रेरित ९:१५ 3 मिनु माइजा बाक्शा, प्रार्थना पा आसीक गेशा, प्रभु आ गेय पथ सोइक्तमे बाक्त। प्रेरित ६:६

4 मिनु मेको निक्शी परमप्रभु यावे आ सोक्तीमी योव्रशा सोइक्तीके एन्टीओक सहर रे ब्रुष्शा, सिलुसीया सहरमी जाक्दीस्सा बाक्त। मेकेर जहाज डोइश्शा समुन्द्र शोक्शा, साइप्रस टापु जाक्दीस्सा बाक्त। 5 मिनु सलामीस सहर जाक्दीश्शा, यहूदी आन गुम्तीक खिं लशा, परमप्रभु यावे आ लोव्र शेंदसे बाक्त। एन्टीओक रे काथा गाक्शा, यूहन्ना मर्कूसमी मेको आस कली वारच पस डा पस बाक्माक्त। प्रेरित १२:१२, २५

चटक कोंइब कली हुइश्शो

6 मिनु साइप्रस टापु नेल्ल हिरशा, गाक्मा गाक्मा पाफोस सहरमी जाक्दीम्मा बाक्त। मेकेर जाक्दीश्शा बाक्मानु, बार-येसु माइश्शो चटक कोंइब, यहूदी मुर का गुम्मे बाक्त। मेको “परमप्रभु यावे आ लोव्र पाइब नड” देखु पा गाक्बाक्माक्त। 7 मेको चटक कोंइब सेरगीयस-पावल नें पाइश्शो हुकुम पाइब आ खिंमी बाक्बाक्माक्त। मेको हुकुम पाइब जोक्ब तुइक्ब मुर बाक्माक्त। मिनु काबु बारनाबास नु सावल आस कली ब्रेशशा “परमप्रभु यावे आ लोव्र गो यो नेंनुड” दे माइक्सी बाक्त। 8 मेको चटक कोंइब बार-येसु कली ग्रीक लोव्रमी एलुमास यो देंबाक्मा बाक्त। मिनु मेकोमी हुकुम पाइब कली बारनाबास नु सावल आस शेंशो लोव्र थमा सुइक्चशो तशा “मेको आस शेंशो थमा मसुतीन” दे हुकुम पाइब आ थुं हिरपाइक्चा मला बाक्त। 9 सावल कली पावल यो देंनीमी। मिनु पावलमी चटक कोंइबमी हुकुम पाइब आ थुं हिरपाइक्चा माल्शो तुइश्शा, परमप्रभु यावे आ सोक्तीम ब्रीशा सक्ति पाइश्शो दुम्शा, चटक कोंइब कली मिक्च मयाक्थु कोव्रस डा कोव्रस पा 10 “गे सैतान आ तौ नवे। रिम्शो मदाक्थु, मरिम्शो ला दाक्नेवे। प्रभुमी सेल्शो रिम्शो लां कली मरिम्शो सेल्चा थुं पवी? मरिम्शो थुं पाइश्शो बाक्ते। मोपतीके प्रभुमी इ कली मुल सजाइ गेब। 11 गे मिक्च मताइब दुम्शा, शुश नाक्त सम्म छेडछेड मताइनेवे” दे हुइक्ता बाक्त। मो देंम चोटीन मेको चटक कोंइब मिक्च मताइब दुम्शा, आ गुइ कीशा लां कोंइब मुर माल्दा बाक्त। 12 मिनु हुकुम पाइबमी चटक कोंइब कली मिक्च मताइब दुम्शो तशा छक लाक्माक्त। मिनु “मेको आस लोव्र प्रभु आ सक्ति पाइश्शो लोव्र बाक्माक्त” दे रुष्शा, प्रभु कली थमा सुइक्ब दुम्माक्त।

पिसीदीया डा एन्टीओकम शेंशो

13 मिनु पावल नु आ वारचपुकी पाफोस सहरमी जहाज डोइश्शा समुन्द्र शोक्शा, पाम्फीलीया रागी डा पेरगा सहरमी जाक्दीम्मा बाक्त। यूहन्ना मर्कूस चहिं पावल नु बारनाबास आस कली प्रोंइशा, यरूसलेम लेम्माक्त। प्रेरित १५:३८ 14 पावल नु बारनाबास पेरगा रे गाक्शा, पिसीदीया रागी डा एन्टीओक सहरमी जाक्दीस्सा बाक्त। मिनु नाइक्तीक नाक्ती गुम्तीक खिं लशा, मेकेर देल्शो मुरपुकी नु निश्शा बाक्सा बाक्त। 15 मिनु गुम्तीक खिं डा ठेयब मुरपुकीमी मोसा नु परमप्रभु यावे आ लोव्र पाइबमी ब्रेक्शो लोव्र पढेपा नेंपाइक्ने थुम्शा, पावल नु बारनाबास आस कली ब्रेशशा “आंइ लोक्ब निक्शी, मुर आन कली शेंशा, आन थुं बारपाइक्चा डा लोव्र बाक्त हना, शेंदीसे” दे आस कली लोव्र पचा गेमे बाक्त। प्रेरित १५:२१ 16 मिनु पावल राष्शा “इस्त्राएली नु परमप्रभु यावे कली मान पा हिंबपुकी, इन नोफा दाइश्शा, नेनीन। 17 इस्त्राएली आन परमप्रभु यावेमी आंइ किकी पिपी आन कली योव्रशा, इजीप्त रागीमी बाक्मानु, शुश सोशा बोशा ठेयब जात दुम्पाइक्मी बाक्त। मिनु शुश सक्ति पाइश्शो गेय कोंइशा, मेको आन कली श्येत रे प्रोंइशा गुंइदीमी बाक्त। प्रस्थान १२:३७,४०,४१; प्रस्थान १४:८ 18 मिनु ४० बर्स सम्म गोरशो रागीमी लां कोंइना कोंइन लाइक्मीनु,

मेकोपुकीमी आ लोव्र मटिम्तेकम हना यो, फाल्शा रिम्शो पाइकमी बाक्त। भजन संग्रह १०६:१३-३३ 19 कनान रागीमी बाक्ब ७ रागी डा मुर नेल्ल आन कली साइशशा, मेको आन रागी आंइ किकी पिपी आन कली गेवा बाक्त। ब्यवस्था ७:१; यहोसु १४:२ 20 मोपा ४ सहे ५० बर्स बाक्शा नोले निसाफ पाइब योव्रशा वोदा बाक्त। नोले परमप्रभु यावे आ लोव्र पाइब सामुएल कली अधिकार गेवा बाक्त। न्यायाधीस २:१६; १सामुएल ३:२० 21 सामुएल आ पालामी आंइ किकी पिपीमी 'आंइ कली सासन पाइब पिप का गेचा नकी' दे पुन्मे बाक्त। मिनु परमप्रभु यावेमी बेन्यामीन थर डा कीश आ तौ सावल कली योव्रशा, आन पिप सेला बाक्त। मिनु सावल ४० बर्स सम्म पिप दुम्माक्त। १सामुएल ८:५; १सामुएल १०:२१-१४ 22 मिनु परमप्रभु यावेमी सावल नु आ खिं डा मुर आन कली पिप दुम्चा रे तिल्शा, दाऊद कली पिप सेला बाक्त। दाऊद आ पर्वम परमप्रभु यावेमी 'येस्से आ तौ दाऊद आं मिम्शो खोदेंशो पा आं यो मिम्ब। मिनु गो नु गारब। आं दाक्शो पाइब, दे तुइक्नुड' देंशो बाक्त। १सामुएल १३:१४ 23 परमप्रभु यावेमी इस्राएली आन कली पाप रे प्रोंइब का सोइक्नुड, दे लोव्र गेशो बाक्माक्त। मेको पाप रे प्रोंइब दाऊद आ खिं डा येसु बाक्ब। यसैया ११:१ 24 येसुम शेंचा क्येडा डोंइती ब्वाक्कुम खुम्शा गुंइब यूहन्नामी इस्राएली आन कली 'पाप पचा प्रोंइशा, इन थुं परमप्रभु यावे गे लेत्तीन' दे शेंशो बाक्माक्त। लूका ३:३ 25 मोपा शेंदानु, मुर आन कली 'आं कली तशा, पाप रे प्रोंइब एको बाक्म कोर में? मदेनीन। गो मनड। तन्न मुल जाक्चशो बाक्ब। गो मेको आ डोंइती बाप्शा, आ जुत्ता पुइक्चा यो मशिरनुड' दे शेंशो बाक्माक्त। लूका ३:१५; यूहन्ना १:२०; मर्कूस १:७; लूका ३:१६; यूहन्ना १:२७

26 आं लोकबपुकी, अब्राहाम आ खिं डा मुर बाक्तीनी हना यो, परमप्रभु यावे कली मान पा हिंब अर्को रागी डा मुर बाक्तीनी हना यो, गो नेल्ल इं कली परमप्रभुमी पाप रे ब्रोंइतीक लोव्र नेंपाइक्ब। 27 यरूसलेममी बाक्बपुकी नु आन ठेयब मुरपुकीमी येसु पाप रे प्रोंइब बाक्ब, दे मरुबेम। नाइक्तीक नाक्त कित कित परमप्रभु यावेमी ब्रेक्पाइशो लोव्र पडेशा नेंशा यो रुप्ने मचबेम। मोपा मारेइ रुप्ने मचाप्तीके येसु कली दोस गेम्तेकम। आन मो पशोमी साइ डा ब्रेक्शो लोव्र नेल्ल थमा सेल्लेकम। यूहन्ना १६:३ 28 साइक्चा पुंइसीचा डा दोस गुंइने मचाप्तेकम हना यो, हुकुम पाइब पिलातस कली मेको मुर साइक्चा पुंइसीब बाक्ब, दे साइक्पाइक्तेकम। मत्ती २७:२२-२३ 29 मिनु साइ डा ब्रेक्शो लोव्र नेल्ल थमा दुम्पाइक्तेकम। येसु शीम क्येप्शा कांटी थोक्शा क्याइशशा साइशशा खपीम फ्रुप्शा, आ बेक्शो रां थिम्तेकम। मत्ती २७:५९-६० 30 तन्न परमप्रभु यावेमी मेको कली बेक्शो रे सेंताक्व। प्रेरित ३:१५ 31 मिनु गालील रे यरूसलेम सम्म येसु नु काथा गाक्ब आन कली बेक्शो रे सेंसीशा शुश नाक्त तपांइसाक्व। मोदेंशो पा येसु कली सेंसीशो ताइबपुकीमी 'येसु बेक्शो रे सेंचा पुंइसाक्व। मुल यो ब्रोंइशो बाक्ब। आंइ मिक्चीमी ताइतक' दे शेंना शेंन गाक्नीम। 32 परमप्रभु यावेमी इं किकी पिपी आन कली डोंइती पशो लोव्र पाप रे प्रोंइब का सोइशशा खाप्शो, ग्येरपाइक्तीक लोव्र इन कली शेंनीकी। 33 मेको लोव्र साइ परमप्रभु यावेमी ब्रेक्पाइशो लोव्र नु गारब। मारदे हना भजन संग्रह कामी 'गे आं तौ नवे। मुलाक्ती गो इ कली थीतन' दे ब्रेक्शो बाक्ब। भजन संग्रह २:७ 34 लेंशा मबेक्चा डा नु मराक्चा डा पा बेक्शो रे सेंसीशो आ पर्वम परमप्रभुमी 'दाऊद कली गेशो खोदेंशो पा गो इ कली आसीक गेनन' दे ब्रेक्पाइशो बाक्ब। यसैया ५५:३ 35 मोपतीके दाऊदमी भजन संग्रह कामी 'परमप्रभु यावे, इन योव्रशो तौ कली बेक्शा लशा यो, राक्चा मगेनीनी' दे ब्रेक्शो बाक्त। भजन संग्रह १६:१०; प्रेरित २:२७ 36 दाऊदमी मेको लोव्र ब्रेक्शो बाक्त हना यो, आंम पर्वम ममाइ। मारदे हना दाऊदमी परमप्रभु यावेमी गेशो सासन पने थुम्शा बेक्शा, आ किकी पिपी आन कली थिम्तीकेमी थिम्चा पुंइसीशा राक्शा लमाक्त। 37 येसु चहिं बेक्शा मरा। मारदे हना परमप्रभु यावेमी मेको कली बेक्शो रे सेंताक्व। 38 मोपतीके आं लोकबपुकी, आं लोव्र रुपीने। मेको येसुमी मुर आन पाप क्याम्शा गेब, दे इन कली शेंनीकी। रोमी ८:३-४ 39 येसु कली थमा सुइक्ब नेल्ल आन पाप क्याम्चा पुंइसीनीम। मिनु आन पाप क्याम्चा पुंइसीशा, परमप्रभु आ डोंइती पाप मपथु बाक्शो तांइसीनीम। मोसामी ब्रेक्शो लोव्रमी इन पाप क्याम्ने मचाप्ब। मारदे हना मेको लोव्र नेल्ल टिने मचाप्तीके पापी दुम्तीनी। रोमी १०:४ 40 मोपतीके होस पांइसीने। साइ परमप्रभु यावे आ लोव्र पाइबमी 41 'ए, गे शुक्शी पाइबपुकी, छक लाक्चा डा पा पुलु दुम्शा लने। मारदे हना गो इन पालामीन गेय का पाइनुड। तन्न गे थमा मसुइक्नीनी। मिनु सुइमी इन कली शेंताक्म हना यो गे थमा मसुइक्नीनी' ” दे पावलमी शेंदीमी बाक्त। हबकुक् १:५

42 मिनु गुम्तीक खिं रे गूशा गाक्चाम्सेनु, आस लोव्र नेंबपुकीमी “मुल जाक्शो नाइक्तीक नाक्ती लेंशा शेंचा नकी” दे पुन्मे बाक्त। 43 मिनु गाक्सानु, यहूदी नु यहूदी धर्म मानेब शुशेमी मेको आस नोले खोदमे बाक्त। मेको निक्शीमी “परमप्रभु यावेमी इन कली शिशी पा खीस्त कली थमा सुइक्ब सेल्लु। मुल डा मेरे मेको थमा सुइक्तीक मप्रोनीन” दे मदसे बाक्त।

खेरचा पुंडसीशो

44 मिनु नाइक्तीक नाक्त जाक्मेनु, सहर डा मुर नेल्ल जाक्शा, परमप्रभु यावे आ लोव्र शेंशो नेंथ देल्मा बाक्त। 45 मोपा शुश मुर देल्शो तशा, यहूदी आन थुं चोव्रमे बाक्त। मिनु पावलमी लोव्र शेंदानु, मेकोपुकीमी आ लोव्र खोइश्शा, जिचा पोक्मे बाक्त। 46 मिनु पावल नु बारनाबासमी यो महिंथु ठेयब थुं पा “अरु आन क्येडा डोंइती इन कली परमप्रभु यावे आ लोव्र नेंपाइक्चा माल्शो। गेपुकीमी चहिं मनंनीनी, नोफा मदाइक्नीनी, थमा मसुइक्नीनी। इन मोदेशो पशोमी गेना हना यो ब्रोंइशा बाक्चा मताइनीनी। जाम्शा लाइनीकी, दे तुइक्तीने। मुल डा मेरे इन कली शेंचा प्रोंइशा, अर्को रागी डा मुर आन कली शेंथ गाक्नस्कु। प्रेरित ३:२५-२६; मत्ती १०:५-६ 47 आंमा शेंब दुम्शा, गाक्शो मनस्कु। परमप्रभु यावेमी आंस कली आ लोव्र शेंब सेल्लु। मिनु मेकोमी ‘गो इ कली नेल्ल रागी डा, नेल्ल जात डा मुर आन कली लां कोइशा, छेडछेड दुम्शा रुप्पाइक्चा कली सोइक्ताकड’ दे ब्रेक्शो बाक्ब” देसा बाक्त। यसैया ४९:६ 48 मिनु अर्को रागी डा मुरपुकीमी “मुल गो यो पाप रे ब्रोंइचा ताइबाक्तक” दे रुप्शा थाम्पा ग्येरसीशा, परमप्रभु यावे कली ठेयब सेल्मे बाक्त। परमप्रभु यावेमी डोंइती रे योव्रशोपुकीमी ख्रीस्त कली थमा सुइश्शा, गेना हना यो ब्रोंइशा बाक्चा ताइब दुम्मा बाक्त। रोमी ८:२९-३०

49 मिनु ख्रीस्त आ पर्वम शेंशो लोव्र मेको रागीमी तेइ तेइ ब्रमाक्त। 50 ख्रीस्त कली थमा मसुइक्ब यहूदीपुकीमी यहूदी धर्म मानेब ठेयब मीश मुर नु सहर डा सरकार डा ठेयब मुर आन कली पोक्शा, पावल नु बारनाबास आस कली मेको रागी रे गुंडदमे बाक्त। 51 मेको निक्शी चहिं आस खोइल डा फुरकु थुर थुर पा ताइश्शा, गाक्शा आइकोनीयम सहरमी जाक्दीस्सा बाक्त। प्रेरित १६:८; मत्ती १०:१४ 52 एन्टीओक सहरम बाक्ब थमा सुइक्बपुकी चहिं ग्येरसीशा, परमप्रभु यावे आ सोक्तीम प्रिंचा पुंडसमा बाक्त।

14

आइकोनीयम सहरमी शेंशो

1 पावल नु बारनाबास आइकोनीयम सहरमी जाक्दीश्शा, यहूदी आन गुम्तीक खिं लशा, मेकेर खुम्सीशा बाक्शो आन कली ख्रीस्त आ लोव्र शेंना शेंन बाक्सा बाक्त। मिनु ख्रीस्त आ लोव्र नेंशा, यहूदी नु ग्रीक शुशेमी थमा सुदमे बाक्त। 2 मिनु थमा मसुइक्ब यहूदीपुकीमी अर्को रागी डा मुर आन कली पोक्शा “मेको आस शेंशो लोव्र मनंचा” दे आन थुं हिरपा मरिम्शो पचा गौव्रमे बाक्त। 3 मो दुम्शा यो पावल नु बारनाबास शुश नाक्त सम्म मेकेर शेंना शेंन बाक्सा बाक्त। ठेयब थुं पा सुइ आन कली तशा महिंथु, ख्रीस्त आ लोव्र शेंदसेनु, प्रभुमी चिन्ड नु छक लाक्चा डा गेय पचा कली सक्ति गेशा, आस शेंशो लोव्र थमा सेला बाक्त। प्रेरित १९:११; हिब्रू २:४ 4 आस लोव्र नेंशा, चिन्ड नु छक लाक्चा डा गेय पशो तशा, सहर डा मुरपुकी ब्राशा, का निक्शी थमा मसुइक्ब यहूदीपुकी नु गारमा बाक्त, का निक्शी ख्रीस्त आ सोइश्शो नु गारमा बाक्त। 5 मिनु अर्को रागी डा मुर, यहूदी नु आन हुकुम पाइब गारशा “शेंब आस कली फुल्लु आप्शा मसाइक्थु मप्रोंइचा नसी” दे साइक्चा माल्मे बाक्त। रतिमोथी ३:११ 6 मिनु पावल नु बारनाबासमी मेको आन मो पशो तुइश्शा, सहर रे प्रोक्शा, लाइकाओनीया रागी डा लिस्त्रा नु डेरबे सहर लसा बाक्त। 7 मिनु मेकेर एर ओंथ डा गाउं गाउं हिरना हिरन ख्रीस्त आ लोव्र शेंना शेंन गाक्सा बाक्त।

लिस्त्रा सहरम शेंशो

8 मिनु लिस्त्रा सहरमी जरमेसे रे गाक्ने मचाप्ब आ खोइल मदुक्ब मुर का बाक्माक्त। 9 काबु मेको खोइल मदुक्ब मुरुमी पावल आ शेंशो लोव्र थाम्पा नोफा दाइश्शा नेंना बाक्त। मिनु पावलमी मोपा नोफा दाइश्शा नेंशो तशा, मेकोमी साबाक्ती, दे थमा सुदा बाक्त, दे तुइश्शा, मत्ती ९:२८ 10 मेको कली मिक्च मयाक्थु कोव्रशा, ठेयब सेंदा पा “इ खोइल दिंशा बोक्शा रपो” दे मदा बाक्त। मो मदानु, मेको छुल बोक्शा राप्शा एर ओंथ गाक्माक्त। 11 मिनु मोपा सापाइश्शो तशा, छक लाक्शा, मेकेर देल्शोपुकीमी आन लाइकाओनीया डा लोव्र पा “इ देवता मुर खोदेशो दुम्शा यिशा, गोपुकी नु काथा बाक्सा बाक्त” देमुमा बाक्त। प्रेरित २८:६ 12 मिनु बारनाबास कली जिउस नु पावल कली हेरमेस, दे देवता आस नें वोदमे बाक्त। मारदे हना पावल चहिं लोव्र पस जोक्बाक्माक्त।

13 सहर ओव्रतीक आ नेक्था जिउस देवता आ थान सेल्शो बाक्माक्त। मिनु जिउस कली चढेबमी चढेचा कली ब्यफ नु फू माला चाक्पाइक्मी बाक्त। 14 मिनु बारनाबास नु पावलमी मेकोपुकीमी गो इंस कली देवता मानेशा हुश जारशा चढेचशो बाक्नीमी, दे तुइश्शा, आस वा खाक्शा दोरशा लशा, मुर आन दातेमी जाक्दीस्सा बाक्त। 15 मिनु

ठेयब सेंदा पा “ए गेपुकी, मार पचानी? गो देवता मनस्कु, इन खोदेशो मुर कका नस्कु। इन कली ग्येरपाइक्ब लोव्र शेंथ जाक्शो नस्कु। मूर्ति पूजा पचा प्रोंइशा, गेना हना यो ब्रोंइशा बाक्ब परमप्रभु यावे गे इन थुं हिरदीने। मेकोमी सरीड, रागी, समुन्द्र नु मेकेर मार मार बाक्मा, मेको नेल्ल सेल्शो बाक्ब, दे तुइक्तीने। प्रेरित १०:२६ 16 साइ डोंइती रे मुल सम्म परमप्रभु यावेमी रागी नेल्ल आन कली आन दला दाक्स पचा गेशो बाक्त। प्रेरित १७:३० 17 आन दला दाक्स पा बाक्तेक्म हना यो, परमप्रभुमी मेको आन कली तुइक्पांइसीन सीन बाक्त। दोपा तुइक्पांइसीन सीन बाक्त देंशा हना, रेउ यिपा मार मार वापा इन कली जाक्दीत्चा डा पा जचा नु फेक्चा गेशा, ग्येरशा बाक्चा गेशो बाक्त” देंसा बाक्त। 18 मिनु देवता मानेशा हुश जारशा चढेचा ममाल्ब देंसानु यो, हेरर हेररा चढेमे बाक्त।

19 मिनु नोले एन्टीओक नु आइकोनीयम सहर रे थमा मसुइक्ब यहूदीपुकी जाक्मा बाक्त। मेकोपुकीमी सहर डा मुर आन कली पोक्शा, पावल कली साइक्चा कली फुल्लु क्रोम्पदमे बाक्त। मिनु बेक्त, दे आ रां लाइश्शा, सहर रे गुंइशा ताइक्तमे बाक्त। २कोरिन्थी ११:२५; २तिमोथी ३:११ 20 मिनु थमा सुइक्बपुकी कोव्रथ लशा, पावल आ एर ओंथ राम्मानु, सेंसीशा बोक्शा सहर लेम्माक्त। मिनु आ दीसा बारनाबास नु गाक्शा, डेरबे सहर जाक्दीस्सा बाक्त।

एन्टीओक लेशशो

21 मिनु डेरबे सहरमी शुश मुर आन कली येसु आ ग्येरपाइक्ब लोव्र शेंशा रूप्पदसेनु, शुश मुरुमी थमा सुदमे बाक्त। मिनु मेकेर रे लशा लेंशा लिस्त्रा, आइकोनीयम नु पिसीदीया डा एन्टीओकमी जाक्दीस्सा बाक्त। 22 मेको सांफा सहर डा थमा सुइक्ब आन कली “मार दुम्त हना यो, थमा सुइक्चा मप्रोनीन। इन खोइल थेक्शा बाक्कीने। ख्रीस्त आ नेंमी शुश श्येत जचा पुंइसीशा ला परमप्रभु यावे आ राज्य ओव्रचा ताइनय, दे रूपीने” दे आन थुं बारपदसे बाक्त। रोमी ५:३-५; १थिस्सलोनिकी ३:३ 23 मिनु ते ते थमा सुइक्बपुकी गुम्शा बाक्मा, मेक मेक शेंब खाल्पापुकी वोइक्ना वोइक्न, माइजा बाक्शा, प्रार्थना पना पन, प्रभु कली थमा सुइश्शा, थमा सुइक्ब आन कली प्रभु आ गुइमी जिम्मा गेना गेन गाक्सा बाक्त। प्रेरित ६:६ 24 मिनु पिसीदीया रागी रे गाक्शा, पाम्फीलीया रागी जाक्दीस्सा बाक्त। 25 मिनु पेरगा सहरमी ख्रीस्त आ लोव्र शेंशा, मेकेर रे ब्रुप्शा अत्तलीया जाक्दीस्सा बाक्त। 26 अत्तालीया सहरमी जहाज डोइश्शा, समुन्द्र शोक्शा, एन्टीओक सहरम जाक्दीस्सा बाक्त। डोंइती एन्टीओकम बाक्सानु, परमप्रभु यावेमी मेको आस कली ख्रीस्त आ लोव्र शेंथ योव्रशो बाक्माक्त। मिनु थमा सुइक्बपुकीमी मेको आस कली प्रभु कली जिम्मा गेशा, शेंथ सोइश्शो बाक्मा बाक्त। मिनु मुल शेने थुम्शा लेशशा जाक्सा बाक्त। प्रेरित १३:१-२ 27 मिनु जाक्शा थमा सुइक्ब आन कली खुप्शा, दोपा परमप्रभु यावेमी आं नु बाक्शा गेय पपाइश्शा आसीक गेवा, दोपा अर्को रागी डा मुर आन कली थमा सुइक्पा, पाप रे ब्रोंइतीक लां कोंइशा, आ मुर सेला, मेको लोव्र नेल्ल तुइक्पदसे बाक्त। १कोरिन्थी १६:९ 28 मिनु शुश नाक्त सम्म थमा सुइक्बपुकी नु काथा बाक्सा बाक्त।

15

खोइक्तीक चिनु आ पबर्म लोव्र

1 मिनु नोले यहूदीया रागी रे मुरपुकी यिशा, एन्टीओकमी जाक्मा बाक्त। मेकोपुकीमी “साइ मोसामी देंशो खोइक्तीक चिनु खोइक्चा माल्ब। मपाइतीनी हना, पाप रे ब्रोंइचा मताइनीनी” दे शेंबाक्मा बाक्त। गलाती ५:२ 2 मिनु पावल नु बारनाबासमी मोदें शेंशो नेंशा, मेको आन शेंशो लोव्र मबिस्सा बाक्त। मेकोपुकीमी खोइक्तीक चिनु खोइक्चा माल्ब देंमा बाक्त। पावल नु बारनाबासमी चहिं खोइक्चा ममाल्ब, देंसा बाक्त। मिनु लोव्र निक्शी दुम्तीके थमा सुइक्ब आन थुं ग्याल्माक्त। मिनु पावल, बारनाबास नु का निक्शी आन कली योव्रशा, यरूसलेममी बाक्ब सोइश्शोपुकी नु गुम्तीके डा शेंब खाल्पा आन कली हिल्लो पथ सोइक्तमे बाक्त। गलाती २:१ 3 मिनु योव्रशा सोइक्चा पुंइसीशोपुकी एन्टीओक रे गाक्शा, यरूसलेम डा लां खोइश्शा डोंइती फोनीसीया, नोले सामरीया रागीमी जाक्दीम्मा बाक्त। मिनु ते ते जाक्दीम्मा, मेक मेक डा थमा सुइक्ब आन कली गुम्शा “अर्को रागी डा मुरपुकीमी यो ख्रीस्त कली थमा सुइश्शा, पाप रे ब्रोंइचा ताम्तेक्म” दे तुइक्पाइक्ना पाइक्न गाक्मा बाक्त। मिनु नेंबपुकी शुश ग्येरसमा बाक्त।

अर्को रागी डा मुर आन पबर्म सल्ला पशो

4 मिनु यरूसलेममी जाक्दीम्मानु, थमा सुइक्बपुकी, ख्रीस्त आ सोइश्शो, थमा सुइक्ब आन शेंब खाल्पा नेल्लेमी मान पा ब्रामे बाक्त। मिनु परमप्रभु यावेमी पपाइश्शो गेय दोपा पामे, मार दुम्मे, मेको लोव्र नेल्ल देंमा बाक्त। 5 थमा सुइक्ब का निक्शी फरिसी बाक्मा बाक्त। मेकोपुकीमी बोक्शा “अर्को रागी डा मुरपुकीमी ख्रीस्त कली थमा सुइक्ब

दुम्मानु, इं यहूदी धर्म डा खोइक्तीक चिनु खोइक्चा माल्नीम, मोसामी अरेशो नेल्ल पचा माल्नीम” देमा बाक्त। 6 मिनु ख्रीस्त आ सोइश्शोपुकी नु थमा सुइक्ब शेंब खाल्पापुकी खुम्सीशा “मेको लोत्र निक्शीमी तेको लोत्र टिशा पचा?” दे लोत्रसी पमुमा बाक्त।

7 मिनु शुश लोत्र पमुमानु, पत्रुस बोक्शा “आं लोकबपुकी, नोफा दाइश्शा नेनीने, ख्रीस्त आ लोत्र ब्रचा गोवानु, परमप्रभु यावेमी अर्को रागी डा मुर आन कली शेंशा, ग्येरपाइक्ब लोत्र थमा सुइक्पाइक्थ, आं कली योत्रती, दे तुइश्शो ननी। प्रेरित १०:४४; प्रेरित ११:१५ 8 मुर नेल्ल आन थुं तुइक्ब परमप्रभु यावेमी यहूदी इं कली गेशो खोदेशो पा अर्को रागी डा मुर आन कली यो आन थुंमी आ सोक्त गेप्टु। 9 मेकोपुकीमी येसु ख्रीस्त कली थमा सुइक्तीकेमी माफ तशा, गो नेल्ल का दुम्शो बाक्नीकी। 10 परमप्रभु यावेमी मेको आन कली रिम्शो सेल्लु, दे तुइश्शा, इं किकी पिपीमी लाइ यो कुरने मचाप्चा डा भारी मेको आन कली कुरपाइक्चा दुम्बा डा? परमप्रभु क्येडा लाक्शा जोक्ब तुइक्ब दुम्चा शिरबा डा? मत्ती २३:४; गलाती ५:१ 11 मारदे हना प्रभु येसुमी इं कली शिशी पतीके पाप रे ब्रोइचा ताइतय, दे थमा सुइक्तय। मेकोपुकीमी इं खोदेशो पा प्रभु आ शिशी तशा थमा सुइक्ब दुम्तेक्म” दे पत्रुसमी माइक्मी बाक्त। मिनु नेल्ल ब्वालेइ पामे बाक्त। गलाती २:१६; एफिसी ४:२-१०

12 मिनु बारनाबास नु पावल आस पालो लोत्र पचा गोम्से बाक्त। अर्को रागी डा मुरपुकी नु बाक्सानु, दोपा परमप्रभु यावेमी चिन्ड नु छक लाक्चा डा गेय पपदा, मेको लोत्र नेल्ल तुइक्पदसे बाक्त। 13 मेको लोत्र पने थुम्से नोले याक्बमी “आं लोकबपुकी, इन नोफा दाइश्शा, आं लोत्र नेनीने। प्रेरित २१:१८; गलाती २:९ 14 परमप्रभु यावेमी अर्को रागी डा मुर आन कली यो योत्रशा, आ मुर सेल्लु, दे सिमोनमी तुइक्पाइक्तु। नेल्ल क्येडा डोंइती दोदेशो दुम्मे, मार दुम्मे, मेको लोत्र शेंताक्व। 15 अर्को रागी डा मुर आन कली योत्रशा, आ मुर सेल्लु, दे साइ नेसी परमप्रभु यावे आ लोत्र पाइबपुकीमी ब्रेक्शो आन लोत्र नु गारब। 16 ‘मेको नेल्ल दुम्शा नोले गो लेशशा जाक्नुड। मिनु साइ दाऊदमी सेल्पाइश्शो ब्रेश्शो खिं लेंशा सेल्लुड। मार मार ब्रेश्शो बाक्मा, मेको नेल्ल गो नक सेल्शा वोइक्नुड। 17 मारदे हना योत्रचा पुंइसीशो अर्को रागी डा मुरपुकीमी आं कली तुइश्शा, आं मुर दुम्मल, दे मो पाइक्नुड। 18 साइ रे गो मोदेशो लोत्र तुइक्पाइक्ना पाइक्न पिती’ दे ब्रेक्शो बाक्ब। आमोस ९:११-१२ 19 मोपतीके परमप्रभु यावे आ देशो तुइश्शा, दोदेशो मिम्चा माल्नय देशा हना, अर्को रागी डा थमा सुइक्ब आन कली श्येत मगेचा। 20 मेको आन कली ‘मूर्ति कली चढेशो मजचा, तेल्लेम मपचा, हुश मचुइक्थु साइश्शो श्ये मब्वचा, हुश मब्वचा’ दे चिठी ब्रेक्शो बाक्त। लेवी १९:४; लेवी १९:२९; लेवी ३:१७ 21 परमप्रभुमी मोसा कली ब्रेक्पाइश्शो लोत्र चहिं तुइक्नीम। मारदे हना साइ रे नाइक्तीक नाक्त इं गुम्तीक खिंमी नेंशा तुइक्नीम” दे माइक्मी बाक्त। प्रेरित १३:१५

अर्को रागी डा मुर आन कली चिठी

22 मिनु याक्ब आ लोत्र नेंशा, नेल्ल थुं का दुम्शा, आ देशो बिस्समा बाक्त। मिनु चिठी ब्रेक्शा, मेको चिठी चोत्रथ मुर योत्रशा, पावल नु बारनाबास, नु काथा एन्टीओक सोइक्चा, दे सल्ला पामे बाक्त। मेको योत्रशा का यहूदा नु का सिलास बाक्सा बाक्त। यहूदा आ याइनी नें बारसाबास बाक्माक्त। यहूदा नु सिलास थमा सुइक्ब आन कली शेंब खाल्पा बाक्सा बाक्त। 23 मेको चिठीम चहिं “एन्टीओक, सिरीया नु सिलीसीया डा अर्को रागी डा येसु ख्रीस्त कली थमा सुइक्ब आंइ लोकबपुकी, गो यरूसलेम सहरम बाक्ब ख्रीस्त आ सोइश्शो, आंइ गुम्तीक डा शेंब खाल्पा नु थमा सुइक्ब लोकब नेल्लेमी इन कली ‘रिम्शो बाक्कीन’ देशा ब्रेक्शा सोइक्ताक्क। 24 गोपुकी नु बाक्ब का निक्शी इन बाक्तीकेमी जाक्शा, इन थुं क्याल्तेक्म देशो लोत्र नेंतक। मेको आंइ सोइश्शो मबाक्नीम। 25 मोपतीके गो नेल्ल थुं का दुम्शा, मुल इन थुं नाइक्पाइक्चा कली इं दाक्शो बारनाबास नु पावल नु काथा लोत्र कुरब मुर इन बाक्तीक सोइश्शो बाक्नीकी। 26 बारनाबास नु पावल इं प्रभु येसु ख्रीस्त आ नेंमी बेक्चा यो महिंब बाक्नीसी। 27 आंइ मिम्शो नु आंइ देशो नेल्ल मेको आंइ सोइश्शो यहूदा नु सिलास निक्शीमी इन कली तुइक्पाइक्नीसी। मिनु गे लोत्र नेल्ल तुइक्नीनी। 28 इन कली रुप्पाइक्चा माल्शो लोत्र चहिं परमप्रभु यावे आ सोक्तीमी आंइ कली रुप्पाइश्शो लोत्र बाक्ब। मिनु मेको लोत्र इन कली शेंनीकी। इन कली हेल्शो भारी कुरपा गाक्पाइश्शो खोदेशो लोत्र ममाइ। 29 मेको लोत्र मार बाक्ब देशा हना ‘मूर्ति कली चढेशो मजचा, हुश मब्वचा, हुश मचुइक्थु साइश्शो श्ये मब्वचा, तेल्लेम मपचा’ एको लोत्र टीतीनी हना, गे रिम्शो दुम्नीनी। आंइ लोत्र ओशोन बाक्ब” दे ब्रेक्शो बाक्माक्त।

30 मिनु यरूसलेम रे ब्रुष्शा एन्टीओक जाक्दीश्शा, थमा सुइक्ब आन कली ब्रेश्शा, मेको चिठी गेम्से बाक्त। 31 मिनु मेकोपुकीमी चिठी प्राक्शा पढेशा, ग्येरसमा बाक्त। 32 यहूदा नु सिलास परमप्रभु यावे आ लोत्र पाइब यो

बाकसा बाक्त। मिनु मेको निकशीमी शुश लोव पा लोक्ब आन थुं बारपदसे बाक्त। प्रेरित ११:२७; प्रेरित १३:१ 33 मिनु शुश नाक्ती एन्टीओकम शेना शेन बाक्शा, यरूसलेम लेत्ची ना यहूदा ला लेम्माक्त। 34 सिलास चहिं एक उइ बाक्नुड, दे बाक्माक्त। 35 पावल नु बारनाबास एन्टीओकम बाक्शा अरु नु गारशा, प्रभु आ लोव तुइक्पाइक्ना पाइक्न शेना शेन बाक्सा बाक्त।

पावल नु बारनाबास ब्राशो

36 मिनु काबु पावलमी बारनाबास कली “डोंइती ते ते प्रभु आ लोव शेंथ हिरससा, मेक मेक डा थमा सुइक्बपुकी दो पामे, मार पामे, कोवथ लस” देमाक्त। 37 मिनु बारनाबासमी “यूहन्ना, आ याइनी नें मर्कूस कली यो काथा लाइश्शा लस” देमाक्त। प्रेरित १२:१२, २५ 38 पावलम चहिं मलाइक्चा, दे मबिस्से बाक्त। मारदे हना डोंइती काथा गाक्शा, पाम्फिलीया रागीमी बाक्मानु, गेय प्रोंइशा आ का ला लेशो बाक्माक्त। प्रेरित १३:१३ 39 मिनु बारनाबास लाइक्चा, पावलमी मलाइक्चा देतीके मेको आस लोव मगारथु, जिशा ब्रासा बाक्त। मिनु बारनाबासमी मर्कूस कली लाइश्शा, जहाज डोइश्शा साइप्रस लमाक्त। 40 पावलम चहिं सिलास कली योव्रडा बाक्त। मिनु थमा सुइक्बपुकीमी परमप्रभु यावेमी पावल नु सिलास आस कली रिम्शो कोवडल, आसीक गेवल, दे प्रार्थना पशा सोइक्तमे बाक्त। 41 मिनु मेकेर रे लशा, सिरिया नु सिलीसीया रागीमी जाक्दीश्शा, थमा सुइक्ब आन थुं बारपदसे बाक्त।

16

तिमोथी कली योव्रशो

1 मिनु डेरबे सहरमी जाक्दीश्शा, मेकेर रे लशा, लिस्त्रा सहरमी जाक्दीस्सा बाक्त। मिनु लिस्त्रामी तिमोथी नें पाइश्शा थमा सुइक्ब का गुम्से बाक्त। तिमोथी आ ममा ख्रीस्त कली थमा सुइक्ब यहूदी जात डा बाक्माक्त। आ आफ चहिं ग्रीक बाक्माक्त। प्रेरित १७:१४; प्रेरित १९:२२; प्रेरित २०:४; फिलिप्पी २:१९-२२; १थिस्सलोनिकी ३:२, ६; २तिमोथी १:५ 2 लिस्त्रा नु आइकोनीयम सहरमी बाक्ब थमा सुइक्ब नेल्लेमी तिमोथी रिम्शो मुर बाक्ब देबाक्मा बाक्त। 3 मिनु पावलमी तिमोथी कली गेय पाइब वारच सेल्शा, काथा लाइक्चा देमाक्त। मिनु यहूदीपुकीमी तिल्शा मवोदमेक्ल, दे खोइक्तीक चिनु खोइक्पदा बाक्त। मारदे हना तिमोथी आ आफ ग्रीक बाक्ब, दे नेल्लेमी तुइश्शा बाक्मा बाक्त। गलाती २:३ 4 मिनु काथा लाइश्शा, गाउं सहर हिरना हिरन गाक्शा, थमा सुइक्ब आन कली गुम्शा, यरूसलेमम बाक्ब ख्रीस्त आ सोइश्शोपुकी नु गुम्तीक डा शेंब खाल्पा आन देशो लोव नेंपदमे बाक्त। प्रेरित १५:२३-२९ 5 मोदेशो नेंपा गाक्मानु, थमा सुइक्ब आन थुं बारपदमे बाक्त। मिनु नाक्त किंत किंत थमा सुइक्बपुकी तेम्सीशा, शुश दुम्मा बाक्त।

परमप्रभु आ सोक्तीमी लां कोंइशो

6 मिनु परमप्रभु यावे आ सोक्तीमी पावल नु आ वारच आस कली एसीयामी शेंचा मगेतीके फ्रिगीया नु गलातीया रागी लमा बाक्त। प्रेरित १८:२३ 7 मिनु माइसीया आ नेक्था जाक्दीश्शा, मुल बिथीनीया रागी ओव्रचा, दे थुं पामे बाक्त। तन्न येसु आ सोक्तीमी लचा मगेमी बाक्त। 8 मोपतीके माइसीया लां रे पा बुष्शा, त्रोआस सहरम जाक्दीम्मा बाक्त।

मासीडोनीया लशो

9 मिनु त्रोआस सहरमी बाक्मानु, काबु नाक्दो प्रभुमी पावल कली कोंइतीक कोंइदा बाक्त। मार कोंइदा बाक्त देशा हना, मासीडोनीया रागी डा मुर का पावल आ डोंइती राष्शा “आंइ मासीडोनीया रागी पिशा, आंइ कली वारच पाइक्चा नकी, हजुर” दे पुंइशो तवा बाक्त। 10 मेको कोंइतीक तशा, पावल छुल बोक्शा “मासीडोनीया लय” देत। मोपतीके गो यो सासाक्क। प्रभुमी मासीडोनीया डा मुर आन कली ग्येरपाइक्तीक लोव शेंथ सोइक्ता बाक्त, दे नेल्लेमी रुप्तक। 11 मिनु त्रोआस सहरमी जहाज डोइश्शा तेइ महिरथु, सामोथ्रेस टापु लां पा आ दीसा नाक्ती निआपोलीस सहरमी जाक्दीत्तक। 12 मेकेर जाक्दीश्शा जहाज रे तोंइसाक्क। मिनु गाक्शा फिलिप्पी सहरमी जाक्दीत्तक। फिलिप्पी मासीडोनीया रागी डा ठेयब सहर का बाक्ब। मेको रागी रोमी आन गुइमी बाक्माक्त। गोपुकी फिलिप्पी सहरमी इक्का नाक्ती बाक्तक।

13 मिनु नाइक्तीक नाक्त सहर रे गूशा, खोला आ नेक्था लाइतक। मारदे हना खोला आ नेक्थामी यहूदी आन प्रार्थना पथ बुक्तीक बाक्म कों, दे मिम्शा, मेक जाक्दीत्तक। मिनु जाक्दीक्कानु, मीश मुरपुकी खुम्सीशा बाक्शो थित्तक। 14 मिनु मेको आन कली लोवसी पना पन येसु आं लोव शेंताक्क। आंइ लोव नेंब का चहिं थिआटीरा सहर

रे जाकशो वा पसल दाइक्ब लिडीया नें पाइशशो मीश मुर का बाक्त। मेको लिडीया परमप्रभु यावे कली मान पा ठेयब सेल्ब बाक्बाक्माक्त। मेकोमी पावल आ लोव्र थम नोफा दाइशशा नेंतु। मिनु प्रभुमी रुप्चा थुं गेपुतु। 15 मिनु थमा सुइक्ब दुम्शा, ब्वाक्कुम खुम्शा गुंडचा पुंडसाक्व। आ खिं डा मुर नेल्ले यो थमा सुइक्ब दुम्शा, ब्वाक्कुम खुम्शा गुंडचा पुंडसाक्म। ब्वाक्कुम खुम्शा गुंडचा पुंडसीशा नोले लिडीयामी “गेपुकीमी प्रभु कली थमा सुइक्ब बाक्माक्त, दे मिम्ताकयीनी हना, आं खिंमी बास बाक्थ जाक्कीन। आं खिंमी मजाक्थु मदुम्ब” दे माइक्तीकी। मिनु लिडीया आ खिं लशा बाक्तक।

येसु आ नें थिशा वोल खेरशो

16 मेकेर बाक्शा गो प्रार्थना पथ खोला आ नेक्था लना लन पकानु, काबु वाइलीम मीश आल का लांमी गुम्तक। मेको मीश आल वोलम गेशो सक्ति तशा, मुर आन कली नोले दुम्ब लोव्र नेल्ल तुइक्पाइक्बाक्माक्त। मोपा आ होव्रप आन कली शुश क्येट चेम्शा गेबाक्माक्त। 17 मिनु लांमी गुम्शा, आंइ नोले खोइशशा “एको मुर नेल्ल क्येडा ठेयब परमप्रभु यावे आ गेय पाइब नमी। पाप रे दोपा ब्रोंइचा, दे शेंशा गाक्ब नमी, इन कली लां कोइब नमी” दे रेयके पना पन पित। मर्कूस १:२४, ३४ 18 नाक्त किंत किंत मेकोमी मोदेशा, रेयके पवानु, पावल ब्रीताक्व। मिनु काबु पावल नोले हिरशा, कोव्रशा वोल कली “गो येसु ख्रीस्त आ नें थिशा गूशा लावो, देंनुड” दे हुइशशा खेरतु। मर्कूस १६:१७ 19 मिनु वोल गूशा, लम डा मेरे नोले दुम्ब लोव्र तुइक्तीक सक्ति जाम्त। मिनु आ होव्रपपुकीमी क्येट का यो मतामे। मिनु चुरशा, पावल नु सिलास आस कली ग्याइशशा कीशा, सहर डा दिंम कामी चाक्शा, ठेयब मुर निसाफ पाइब आन डोंइती राप्पाइक्तेक्म। 20 मिनु “एको मुर यहूदी नसी। इं सहरमी जाक्शा, मुर आन थुं ग्याल्पाइशशा शुश श्येत गेम्ताक्से। प्रेरित १७:६ 21 इं रोमी ऐन कानुनम मगारचा डा दूली शेंशा, आस पतीके पपाइक्चा बोल पाम्ताक्स” दे दोस गेम्तेक्म। 22 एर ओंथ जाक्शा देल्शोपुकीमी यो “एको आस कली तुप्चा माल्ब” दे रेयके पाम्तेक्म। मिनु निसाफ पाइबपुकीमी पावल नु सिलास आस कली आस फेक्शो वा पुइशशा, कोक्केम तुप्पाइक्तेक्म। २कोरिन्थी ११:२५; फिलिप्पी १:३०; १थिस्सलोनिकी २:२

जेल्खानम चोक्चा पुंडसीशो

23 मिनु तुप्शा जेल्खानमी चोक्चा देंतेक्म। मिनु जेल्खान डा ठेयब मुर कली “प्रोक्ने मचाप्चा डा पा चोक्पाइशशा वोतो” दे माइक्तेक्म। 24 मिनु मेकोमी मेको आस कली नेल्ल क्येडा आगा डा कोठा लाइशशा, ठेंडरो थोक्शा वोइक्पदा बाक्त।

25 नाक्दो पावल नु सिलासमी प्रार्थना पा कुम्सो पा परमप्रभु यावे कली ठेयब सेल्से बाक्त। आस प्रार्थना नु कुम्सो पशो जेल्खानमी चोक्सीशो नेल्लेमी नेन्मे बाक्त। 26 मिनु प्रार्थना नु कुम्सो पना पन बाक्सानु, ठेयब खिनु कुशा, जेल्खान डा जग यो हिम्पदा बाक्त। खिनुमी हिम्दानु, लाप्चो नेल्ल रोकसमा बाक्त। जेल्खानमी चोक्सीशो आन साडलो, ठेंडरो नेल्ल बुइक्मा बाक्त। 27 मो दुम्मेनु, जेल्खान डा ठेयब मुर ग्रीचोक पा सेंसीशा छुल बोक्माक्त। मिनु लाप्चो नेल्ल रोकसीशो तशा “आमाइ, चोक्शो नेल्ल प्रोक्शा गाक्मा बाक्त। मार पडा” दे आ तरवार ग्रि शोइशशा, क्योरसीशा बेक्नुड, दे क्योरसीचा मला बाक्त। 28 मिनु पावलमी क्योरसीचशो तशा “ए मपावो, मपावो, सुइ मप्रोक्क। नेल्ल बाक्तक” दे ब्रेम्माक्त। 29 मिनु बत्ती दाशा गेयीनी देंशा, चोक्शो आन बाक्तीके पावल नु सिलास आस डोंइती लशा, खिंखि पा बाम्माक्त। 30 मिनु मेको आस कली गुंडशा “हजुर, आं पशो पाप मार पा क्याम्सीबा?” दे हिल्लो पवा बाक्त। प्रेरित २:३७ 31 मिनु पावल नु सिलासमी “प्रभु येसु कली थमा सुतो। मिनु गे नु इ खिं डा मुर नेल्लेमी पाप क्याम्चा पुंडसीशा गेना हना यो ब्रोंइशा बाक्चा ताइनीनी” देंसा बाक्त। 32 मिनु मेको ठेयब मुर नु आ खिं डा मुर नेल्ल आन कली प्रभु आ लोव्र तुइक्पदसे बाक्त। 33 मिनु ठेयब मुर नु आ खिं डा मुर नेल्लेमी थमा सुइशशा ब्वाक्कुमी खुम्शा गुंडचा पुंडसमा बाक्त। पावल नु सिलास आस तुप्शो गार नेल्ल चिक्तमे बाक्त। 34 मिनु आ खिं लाइशशा, जचा तूचा सेल्शा थुल्मे बाक्त। मिनु नेल्लेमी “परमप्रभु यावे कली थमा सुइक्ब दुम्तय” दे थाम्पा ग्येरसमा बाक्त।

35 आ दीसा सुनी ठेयब मुर निसाफ पाइबपुकीमी “मेको आस कली प्रोंइचा नसी” दे सिपाही आन कली जेल्खानमी सोइक्तमे बाक्त। 36 मिनु जेल्खान डा ठेयब मुरुमी पावल कली “गे इस कली प्रोंइचा नसी, दे निसाफ पाइबपुकीम सिपाही कली सोइक्ताक्मे। सुइमी इस कली दोस गेने मचाप्नीम। रिम्शो पा लसे” देंमाक्त। 37 मिनु पावलमी सिपाही आन कली “गो मोशा मलाइनस्कु। मारदे हना सिनाक्त आंस कली मारेइ मरुप्थु दोस का यो मग्रुंइथु मुर नेल्ल आन कुल तुप्तीस्कीमी। तुप्शा ला ममाइ, जेल्खानमी यो चोक्तीस्कीमी। गो रोमी यो नस्कु। मिनु मो पचा मदुम्ब। आंस कली सुइ आन मतुइक्थु खुइशशा प्रोंइशा सोइक्चा मगारब। गो लसीन मलाइनस्कु। सिनाक्त आंस कली चोक्पाइक्बपुकी

जाकशा गुंडीस्कीमील” देशा सिपाही आन कली लेशशा सोइक्ता बाक्त। प्रेरित २२:२५ 38 मिनु सिपहीपुकी लशा, पावल आ देशो लोव्र मेको चोक्पाइक्ब आन कली देमा बाक्त। मिनु मेको निक्शी रोमी यो बाक्सा बाक्त देशो नेशा हिंमा बाक्त। 39 मिनु हिंशा “लो, प्रोइथ लचा माल्ब” देशा जेल्खानमी जाक्मा बाक्त। मिनु पावल नु सिलास आस कली “गो इस कली मतुइक्थु चोक्पाइश्शो, मगाइक्तीसे, आंइ सहर प्रोइशा, रिम्शो पा लसे” दे मिलो शिलो पा गुंडशा सोइक्तमे बाक्त। 40 मिनु जेल्खान रे गूशा, लिडीया आ खिं जाक्ताक्स। मिनु पावल नु आ वारचपुकीमी थमा सुइक्ब आन कली गुम्शा, आन थुं बारपाइश्शा वोइश्शा गाक्तेक्म।

17

थिस्सलोनीकी सहरम शेंशो

1 मिनु मेकेर रे लशा, अम्फी-पोलीस नु आपोल्लोनीया सहरमी हिरशा, थिस्सलोनीकी सहरमी जाक्दीम्मा बाक्त। मेकेर यहूदी आन गुम्तीक खिं का बाक्माक्त। १थिस्सलोनीकी २:२ 2 पावल हिरशा गाक्मेनु, सहर सहर डा यहूदी आन गुम्तीक खिं खिं ओव्रशा शेंबाक्माक्त। मोपा थिस्सलोनीकी सहरमी यो गुम्तीक खिं लशा, शेंचा गोवा बाक्त। 3 नाइक्तीक नाक्ती सां सम्म परमप्रभु यावे आ लोव्र रे पा यहूदी आन कली “पाप रे प्रोइब ख्रीस्त शुश श्येत जशा बेक्चा माल्ब। मिनु बेक्शो रे सेंसीचा माल्ब, दे बेक्शो बाक्ब। मेको मोदेशो श्येत जशा बेक्शा, बेक्शो रे सेंसीशो ख्रीस्त चहिं येसु बाक्त, दे रूपीने” दे शेंदीमी बाक्त। लूका २४:२६-२७, ४५-४६ 4 पावल आ लोव्र नेशा “आ देशो थमा बाक्माक्त” दे यहूदी का निक्शी थमा सुइक्ब दुम्शा, पावल नु सिलास नु गारमा बाक्त। परमप्रभु यावे कली मान पाइब ग्रीकपुकी नु ठेयब नें चलेशो मीश मुरपुकी शुशेमी यो पावल आ शेंशो नेशा थमा सुदमे बाक्त। १थिस्सलोनीकी १:१; २थिस्सलोनीकी १:१

5 शुश मुर आन कली थमा सुइश्शो तशा, थमा मसुइक्ब यहूदी आन थुं चोव्रमी बाक्त। मिनु हेंथे गाक्ब गेय मपाइश्शो मुर आन कली खुप्शा, सहरमी मरिम्शो मुर आन कली पोक्पाइश्शा, ठेयब रेयके पपदमे बाक्त। मिनु पावल नु सिलास यासोन आ खिंमी बाक्सा बाक्त, दाप्शा, यासोन आ खिं लशा “मेको आस कली गुंडशा, आंइ गुडमी गेचा नकी” दे रेयके पामे बाक्त। 6 तन्न पावल नु सिलास मेको खिंमी मबाक्शो बाक्सा बाक्त। मिनु मेको आस कली मथित्थु, यासोन नु थमा सुइक्ब आन कली ग्याइश्शा कीशा लाइश्शा, ठेयब मुर आन डोंइती चाक्दीत्मे बाक्त। मेकोपुकीमी “नेल्ल रागी डा मुर आन कली आन थुं ग्याल्पाइश्शा, दूली पपाइक्बपुकी इं सहरमी यो जाक्तेक्म। प्रेरित १६:२० 7 मिनु एको यासोनमी मेको आन कली बास गेशा थुल्शा वोइक्तीमी। मेकोपुकीमी इं रोमी पिप सिजर कली ममानेचा। येसु कका पिप बाक्ब, दे शेंना शेंन गाक्नीम” दे दोस गेमे बाक्त। लूका २३:२ 8 मेको लोव्र नेशा ठेयब मुर नु अरु नेल्ल आन थुं ग्याल्मा बाक्त। 9 मिनु यासोन नु आ वारच आन कली क्येट थाप्पाइश्शा प्रोइशा सोइक्तमे बाक्त। 10 मिनु थमा सुइक्बपुकीमी पावल, सिलास नु तिमोथी आन कली में नाक्दोन छुल छाल पोक्शा, बेरोइया सहर गे सोइक्तमे बाक्त। मिनु बेरोइया सहरमी जाक्दीश्शा, यहूदी आन गुम्तीक खिं लशा, शेंचा गोव्रमे बाक्त।

बेरोइया सहरमी शेंशो

11 बेरोइया सहर डा यहूदीपुकीमी थिस्सलोनीकी डा मुर आन पशो खोदेशो मपामे बाक्त। तन्न नोफा दाइश्शा पावल नु सिलास आस लोव्र नेशा परमप्रभुमी ब्रेक्पाइश्शो लोव्र नु मेको आस शेंशो लोव्र गारबा देय मगारबा कोव्रचा कली नाक्त किंत किंत जाक्मा बाक्त। यूहन्ना ५:३९ 12 मिनु शुश मुरुमी थमा सुदमे बाक्त। ग्रीक रागी डा नें चलेशो मीश मुर वोंइश मुर यो शुश थमा सुइक्ब दुम्मा बाक्त।

13 मिनु थिस्सलोनीकी सहरमी बाक्ब यहूदीपुकीमी “पावलमी बेरोइया सहरमी परमप्रभु यावे आ लोव्र शेंबाक्माक्त” देशो नेशा जाक्शा, मुर आन कली पोक्शा दूली पपाइश्शा, पावल कली खेदा पचा गोपदमे बाक्त। 14 मिनु थमा सुइक्बपुकीमी पावल कली समुन्द्र आ नेक्था गे सोइक्तमे बाक्त। सिलास नु तिमोथी चहिं मेक उइ बाक्सा बाक्त। प्रेरित १६:१

एथेन्स सहरमी शेंशो

15 पावल कली चोव्रदीबपुकीमी एथेन्स सहर सम्म चोव्रदीमा बाक्त। मिनु लेत्चामेनु, पावलमी मेको आन कली “सिलास नु तिमोथी आस कली आं बाक्तीके रीब पा सोइक्चा नसी” दे सोइक्तीमी बाक्त।

16 मिनु पावल एथेन्स सहरम मेको आस कली रिम्शा बाक्मेनु, सहरमी हिरशा गाक्माक्त। मिनु सहरमी गाक्मेनु, तेइ तेइ शुश मूर्ति सेल्शा वोइश्शो तशा, आ थुं मनुमाक्त। 17 मिनु यहूदी आन गुम्तीक खिं लशा, यहूदी नु परमप्रभु कली मान पाइब अर्को रागी डा मुर आन कली येसु आ पब्रम लोव्रसी पना पन बाक्माक्त। नाक्त किंत किंत सहरमी हिरशा, लांमी सु सु आन कली गुम्मी, मेको नेल्ल आन कली येसु आ पब्रम शेंना शेंन गाक्माक्त। 18 मोपा मुर आन कली गुमानु, इपीक्युरीपुकी, स्तोइकीपुकी नु यो गुम्शा लोव्र पवा बाक्त। मेकोपुकीमी पावल आ शेंशो नेंशा का निक्शीमी “एकोमी मार हेंथे फश लोव्र पना पन गाक्बाक्मे” देंमा बाक्त। का निक्शीमी चहिं “फश लोव्र ममाइ। मुल सम्म इं मतुइश्शो देवता आ पब्रम शेंबाक्त” देंमा बाक्त। देवता आ पब्रम शेंबाक्त, दे मारदे देंमा बाक्त देंशा हना, पावलमी “येसु आ ग्येरपाइक्ब लोव्र नु बेक्शो रे सेंसीशा ब्रोंइत” दे शेंबाक्माक्त। 19 कोरिन्थी ४:१२ 19 मिनु मेकोपुकी पावल कली अरीयोपागस माइश्शो आन देल्शा बाक्तीकेमी लोव्र पथ चाक्दीत्मे बाक्त। 20 मिनु मेकोपुकीमी “गो मारेइ मतुइक्नीकी। गो आंइ कली शेंदीने, रुप्पतीने। इन शेंशो लोव्र मार में, दे रुप्चा दाक्नीकी” देंमा बाक्त 21 एथेन्स डा मुर नु एथेन्स सहरमी बाक्ब नेल्लेमी नक नक लोव्र पचा नु नेंचा कली नाक्त किंत किंत हिरशा माल्शा बाक्बाक्मा बाक्त।

22 मिनु पावल अरीयोपागसमी राप्शा “एथेन्स सहरम बाक्बपुकी, गो इन सहरमी हिरशा गाक्डानु, तेइ तेइ मूर्ति सेल्शा वोइश्शो ताता। मोपतीके गे मूर्ति आन कली सेउ पाइबाक्तीनी, पूजा पाइबाक्तीनी, दे रुप्ता। 23 इन पूजा पशो मूर्ति कोव्रना कोव्रन गाक्डानु, मूर्ति कामी ‘मतुइश्शो देवता’ दे मुशा ब्रेक्शा वोइश्शो ताता। मुल सम्म इन मतुइक्थु मानेशो परमप्रभु आ पब्रम गो इन कली शेंथ जाक्ती। 24 सरीड रागीमी मार मार बाक्मा मेको नेल्ल परमप्रभुमी सेल्शो नम। मोपतीके सरीड रागी सेल्ब परमप्रभु मुरुमी सेल्शो थान मन्दीरमी मबाक्ब। 1 कोरिन्थी ८:२७ 25 मुरपुकीमी परमप्रभु कली मारेइ गेचा ममाल्नीमी। आं कका रागीमी बाक्ब नेल्ल आन कली ब्रोंइतीक सोक्त नु आन माल्शो नेल्ल गेशो बाक्ब। भजन संग्रह ५०:९-१२ 26 डोंइती मुर का सेल्शा, मेको मुर रे पा नेल्ल रागी डा मुर सेल्तीमी। दोशो ब्रोंइचा, ते बाक्चा, मेको नेल्ल परमप्रभुमी पने थुम्शो बाक्ब। ब्यवस्था ३२:८ 27 मुरपुकीमी परमप्रभु यावे कली माल्शा थिश्शा, मुर आन कली सेल्शा रागीमी वोइक्तीमी। मेको मुर आन क्येडा डोन मबाक्ब, इं नेक्थान बाक्शो बाक्ब। यसैया ५५:६ 28 मारदे हना परमप्रभु नु काथा बाक्शा ब्रोंइनय, दे तुइक्नय। गेपुकी नु बाक्ब ब्रेक्ब मुर कामी ‘गो नेल्ल परमप्रभु आ तमी तौ नय’ दे ब्रेक्शो बाक्त। 29 गोपुकी परमप्रभु यावे आ तमी तौ दुम्शा, मुर आन मिम्शो आन गुइमी सेल्शो सुन चांदी फुल्लु मार मार के मूर्ति तशा, परमप्रभु मोदेशो बाक्ब, दे मिम्चा मदुम्ब। उत्पत्ती १:२७; यसैया ४०:१८ 30 मुल सम्म गे मतुइक्तीनी। मिनु मतुइक्थु देवता आन कली सेउ पाइबाक्तीनी। मतुइक्थु मो पशो तुइश्शा, परमप्रभु यावेमी इन कली दोस मगेब। मुल चहिं परमप्रभुमी मुर नेल्ल आन कली ‘इन थुं आं गे लेत्तीन’ दे ब्रेप्ब। प्रेरित १४:१६; लूका २४:४७ 31 मारदे हना काबु नेल्ल आन कली ठीक पा निसाफ पाइब। मेको निसाफ पची नाक्त परमप्रभुमी योव्रशा वोइश्शो बाक्ब। निसाफ पाइब यो योव्रशा वोइश्शो बाक्ब। मेको निसाफ पाइब कली ‘आं योव्रशा बाक्ब’ दे कोइचा कली बेक्शो रे सेंताक्व” दे पावलमी शेंदीमी बाक्त। प्रेरित १०:४२; मत्ती २५:३१-३३

32 मिनु बेक्शो रे सेंचा पुंइसाक्व, मुर नेल्ल बेक्शो रे सेंचा पुंइसीनीम, दे शेंशो नेंशा, का निक्शीमी “एको फश लोव्र पाइक्बाक्त, है” दे रिस्समा बाक्त। का निक्शीमी चहिं “इन शेंशो रिम्शो लाक्तक, लेंशा नेंनीकी” दे गाक्मा बाक्त। 33 मिनु पावल मेकेर रे लमाक्त। 34 का निक्शीमी आ लोव्र थमा सुइश्शा, पावल नु गारमा बाक्त। मोदेशो आ नु गारब का डियोनीसीयस नें पाइश्शो अरीयोपागस डा मुर बाक्माक्त। का डामारीस नें पाइश्शो मीश मुर बाक्माक्त। अरु यो बाक्मा बाक्त।

18

कोरिन्थ सहरम शेंशो

1 मिनु नोले पावल एथेन्स रे लशा, कोरिन्थ सहरमी जाक्दीम्माक्त। 2 मिनु कोरिन्थ सहरम बाक्मेनु, नक इटाली रे जाक्शो अक्वीला नें पाइश्शो यहूदी नु आ मीश प्रिस्कीला आस कली गुम्सी बाक्त। अक्वीला पोन्टसमी जरमेशो बाक्माक्त। मेको निक्शी डोंइती रोम सहरमी बाक्शो बाक्सा बाक्त। तन्न क्लौदीयस माइश्शो रोमी पिपमी यहूदी नेल्ल आन कली रोम सहरम बाक्चा मगेथु, गुंइशा सोइक्तीके गाक्शा, कोरिन्थ सहरम जाक्शो बाक्सा बाक्त। रोमी १६:३ 3 मिनु पावल अक्वीला नु प्रिस्कीला गुम्शा, मेको नु काथा बाक्माक्त। मारदे हना डोंइती पावल मेको आस खोदेशो पा ताम्बु सेल्ब बाक्माक्त। मिनु सांफा दुम्शा गारशा, गेय पामे बाक्त। प्रेरित २०:३४; 1 कोरिन्थी ४:१२

4 नाइक्तीक नाक्ती पावल यहूदी आन गुम्तीक खिं लशा, यहूदी नु ग्रीक नेल्ल आन कली ख्रीस्त आ पबर्म रूप्पदुमी, दे शेंबाक्माक्त।

5 मिनु नोले सिलास नु तिमोथी मासीडोनीया रे जाक्शा, मेक जाक्सा बाक्त। मिनु पावलमी “शेंचा गेय ला पाडनुड” देंशा, यहूदी आन कली “येसु मेको ख्रीस्त बाक्ब, दे रूपीन” दे शेंना शेंन गाक्बाक्माक्त। प्रेरित १७:१४-१५: २कोरिन्थी १:१९ 6 मिनु यहूदीपुकीमी आ शेंशो थमा मसुइक्थु शुक्शी पामेनु, पावलमी आ फेक्शो वा डा फुरकु थुर थुर पा मेको आन कली “गे बेक्शा जाम्शा लाइतीनी हना, आं कली मारेइ देंचा मताइनीनी। मुल डा मेरे यहूदी इन कली शेंचा प्रोंइशा, अर्को रागी डा मुर आन कली शेंथ गाक्नुड” दे मेको आन कली प्रोंइशा गाक्माक्त। प्रेरित १३:५१; नेहेम्याह ५:१५; प्रेरित २०:२६

7 मिनु परमप्रभु यावे कली मान पाइब तीतीयस-युस्तस नें पाइश्शो मुर आ खिं लशा, मेकेर शेंचा गोवा बाक्त। मेको आ खिं गुम्तीक खिं आ नेक्थान बाक्माक्त। 8 गुम्तीक खिं डा क्रिस्पस माइश्शो ठेयब मुर नु आ खिं डा मुर नेल्ल प्रभु कली थमा सुइक्ब दुम्मा बाक्त। कोरिन्थी शुशेमी यो पावल आ शेंशो नेंशा, थमा सुइश्शा ब्वाक्कुम खुम्शा गुंइचा पुंइसमा बाक्त। १कोरिन्थी १:१४

9 मिनु काबु नाक्दो प्रभुमी पावल कली कोइतीक कोइदानु “सुइ कली तशा महिनो। शेंस डा शेंस बाक्को। येरमीया १:८; १कोरिन्थी २:३ 10 मारदे हना गे नु काथा बाक्शा, इ कली कोव्रनन। मिनु सुइमी इ कली मरिम्शो पने मचाप्नीम। मेको सहरमी बाक्ब शुश मुर आन कली योव्रने थुम्ता” देंशो नेंना बाक्त। यूहन्ना १०:१६ 11 मिनु पावल बर्स का ६ महिना सम्म कोरिन्थ सहरमी परमप्रभु यावे आ लोव्र शेंना शेंन बाक्माक्त।

हुकुम पाइब आ डोंइती रूप्पाइश्शो

12 आकाया रागीमी गाल्लीयो माइश्शो हुकुम पाइब बाक्मेनु, यहूदीपुकी खुम्सीशा, पावल कली ग्याइश्शा, हुकुम पाइब आ डोंइती चाक्दीत्मे बाक्त। 13 मिनु मेकोपुकीमी “एको मुरुम ‘परमप्रभु यावे आ अरेशो लोव्र मगारचा डा पा परमप्रभु कली ठेयब सेल्चा माल्ब’ दे मुर आन कली शेंब” दे दोस गेमे बाक्त। 14 मिनु पावलमी एको गेशो दोस आ पबर्म लोव्र लेत्चा चिक्शो, गाल्लीयोमी लोव्र पचा मगेथु, दोस गेब यहूदी आन कली “एको मुर मरिम्शो पशा, खुइ पा मुर आन कली साइश्शो हना, इन लोव्र नेंशा गो निसाफ पड वा। प्रेरित २५:१८-२० 15 तन्न लोव्र, नें नु इन परमप्रभु यावे आ अरेशो लोव्र आ पबर्म बाक्त हना, गो मेको निसाफ पचा मदाक्नुड। गे आंमा गारीने” दे हुइश्शा सोइक्तीमी बाक्त। यूहन्ना १८:३१ 16 मिनु मेको आन कली सोइक्ता बाक्त। 17 यहूदीपुकीमी गुम्तीक खिं डा ठेयब मुर सोस्थेनेस कली ग्याइश्शा, हुकुम पाइब आ डोंइती तुप्मे बाक्त। मोपा तुम्मुमानु यो, गाल्लीयोमी मारेइ मपवा बाक्त।

थमा सुइक्ब आन थुं बारपाइश्शो

18 मोदेंशो दुम्शा नोले पावल शुश नाक्ती सम्म कोरिन्थ सहरम बाक्माक्त। मिनु अक्वीला नु नोले थमा सुइक्ब लोकब आन कली “लो, मुल लची जाक्ती” देंशा, जहाज डोइश्शा, सिरीया गे लमाक्त। अक्वीला नु प्रिस्कीला यो पावल नु सिरीया गे लसा बाक्त। केन्क्रेया सहरमी जाक्दीश्शा, पावलमी आ चां प्रेक्गा बाक्त। मारदे हना कसम जशो बाक्माक्त। प्रेरित २१:२४-२६ 19 मिनु एफिसस सहरमी जाक्दीश्शा, प्रिस्कीला नु अक्वीला आस कली “लो, गे एके बाक्कीसे” दे प्रोंइशा वोइक्सी बाक्त। मिनु पावल चहिं गुम्तीक खिं लशा, यहूदीपुकी नु लोव्रसी पचा गोवा बाक्त। 20 मिनु यहूदीपुकीमी “इच्का नाक्त बाक्शा शेंदीकी” देंमानु “गो बाक्ने मचाप्नुड। 21 परमप्रभु यावेमी लेशशा सोइक्ताक्की हना, लेशशा जाक्शा शेंनन्नी” दे एफिसस रे लशा जहाज डोंइसे बाक्त। याकूब ४:१५ 22 मिनु सिजरियामी जाक्दीश्शा, यरूसलेम ग्येत्थ लशा, थमा सुइक्ब आन कली गुम्शा, एन्टीओकमी जाक्दीम्माक्त। प्रेरित २१:१५ 23 मिनु इच्का नाक्त एन्टीओकमी बाक्शा, मेकेर रे लशा, गलातीया नु फ्रिगीया रागीमी जाक्दीश्शा, तेइ तेइ हिरशा, थमा सुइक्ब आन कली गुम्शा, आन थुं बारपाइक्तीक लोव्र पना पन गाक्माक्त।

आपोल्लोसमी एफिससम शेंशो

24 मिनु एफिसस सहरमी मार दुम्माक्त देंशा हना, अलेकजेन्द्रीया रागीमी जरमेशो आपोल्लोस माइश्शो यहूदी मुर का जाक्माक्त। मेको शुश पढेशा, परमप्रभु यावे आ लोव्र रुप्शा, अरु आन कली यो रूप्पाइक्ने चाप्ब बाक्माक्त। १कोरिन्थी ३:५-६ 25 प्रभु येसु आ पबर्म शेंसीशा जोक्शो बाक्माक्त। सक्ति पाइश्शो लोव्र पने चाप्ब बाक्माक्त। मिनु

येसु आ लोव्र दोदेशो बाक्मे, मोदेशोन शेंबाक्माक्त। ब्वाक्कुम खुम्शा गुंडचा आ पबर्म चहिं यूहन्नामी दोदेशो पशो बाक्मे, मेको ला तुइश्शो बाक्माक्त। प्रेरित १९:३

26 मिनु मेको एफिससमी जाक्दीम रे यहूदी आन गुम्तीक खिंमी शेंचा गोवा बाक्त। सुइ कली तशा महिंथु, येसु आ पबर्म शेंदा बाक्त। मिनु प्रिस्कीला नु अक्वीलामी आपोल्लोस आ शेंशो नेंशा, आस खिं लाइश्शा, परमप्रभु यावे आ पबर्म शुश लोव्र तेम्शा रूपपदसे बाक्त।

27 मिनु काबु आपोल्लोसमी “आकाया रागीमी हिरशा, शेंथ लाइनुड” देंमेनु, थमा सुइक्ब लोकबपुकीमी “दुम्ब” देंमा बाक्त। मिनु आकाया रागीमी बाक्ब थमा सुइक्ब आन कली चिठी ब्रेक्शा “आपोल्लोस इन बाक्तीके जाक्मेनु, मान पा ब्रने, आ लोव्र नेनीने” दे ब्रेक्शा सोइक्तमे बाक्त। मिनु मेकेर जाक्दीश्शा, थमा सुइक्ब आन कली गुम्शा, आन थुं बारपाइक्मी बाक्त। 28 थमा मसुइक्ब यहूदी नु लोव्र पवानु, परमप्रभु यावे आ लोव्र रे पा शेंशा, येसु मेको ख्रीस्त बाक्ब, दे लोव्र शेंदा बाक्त। मिनु यहूदीपुकीमी मारेइ देंने मचाप्मे बाक्त। प्रेरित ९:२२; प्रेरित १७:३

19

परमप्रभु आ सोक्त आ पबर्म शेंशो

1 आपोल्लोस मोपा शेंना शेंन गाक्शा, कोरिन्थ सहरमी जाक्दीम्माक्त। पावल चहिं एफिससमी जाक्दीम्माक्त। मिनु प्रभु आ लां खोइक्ब आन कली गुमा बाक्त। 2 मिनु पावलमी मेको आन कली “गेपुकीमी थमा सुइक्ब दुम्नीनु, परमप्रभु यावे आ सोक्तीम प्रिंचा पुंडसीनी?” दे हिल्लो पवानु “ममाइ, गो परमप्रभु यावे आ सोक्त मतुइक्नीकी। मेको आ पबर्म मनेशो यो बाक्नीक” देंमा बाक्त। प्रेरित २:३८ 3 मिनु पावलमी “मो हना सु आ नेमी ब्वाक्कुम खुम्शा गुंडचा पुंडसीनी?” दे हिल्लो पवानु “यूहन्नामी देंशो टिशा, ब्वाक्कुमी खुम्शा गुंडचा पुंडसाक्क” देंमा बाक्त। 4 मिनु पावलमी “यूहन्नामी मुर आन कली ‘पाप पचा प्रोंइशा इन थुं परमप्रभु यावे गे लेत्तीने। मिनु आं नोले जाक्ब कली थमा सुतीने’ दे ब्वाक्कुम खुम्शा गुंडदीमी बाक्त। यूहन्ना आ नोले जाक्शो चहिं येसु बाक्ब” दे शेंदीमी बाक्त। मत्ती ३:११ 5 पावल आ लोव्र नेंशा, मेकोपुकीमी “लो दुम्ब” दे येसु आ नेमी ब्वाक्कुमी खुम्शा गुंडचा पुंडसमा बाक्त। 6 मिनु पावलमी आ गुइ आन पिया तारी वोदानु, परमप्रभु यावे आ सोक्तीम ब्रीमा बाक्त। मिनु आन मतुइश्शो लोव्र पा प्रभु कली ठेयब सेल्मे बाक्त। मिनु परमप्रभु यावे आ सोक्तीम गेशो लोव्र पामे बाक्त। प्रेरित ८:१७; प्रेरित १०:४४,४६ 7 मोदेशो दुम्शोपुकी १२ जना खोइ बाक्मा बाक्त।

पावल एफिससम बाक्शो

8 मिनु पावल महिना सां सम्म यहूदी गुम्तीक खिंमी परमप्रभु यावे आ राज्य डा लोव्र शेंना शेंन बाक्माक्त। सुइ तशा महिंथु, ठेयब थुं पा “थमा सुइश्शा परमप्रभु यावे आ राज्य ओव्रडीन” दे शेंना शेंन बाक्माक्त। 9 मिनु आ लोव्र नेबपुकीमी थमा मसुइक्थु, नक लां आ पबर्म गुम्तीक खिंमी शुक्शी लोव्र पतीके मेको मेकेर शेंचा प्रोना बाक्त। मिनु शेंसीचा दाक्ब आन कली चहिं काथा लाइश्शा, टिरान्नस आ इस्कुलमी नेंचा दाक्ब आन कली खुप्शा, नाक्त किंत किंत शेंना शेंन बाक्माक्त। 10 मिनु बर्स निकशी सम्म मोपा शेंना शेंन बाक्माक्त। मोपतीके एसीया डा यहूदी नु ग्रीक नेल्लेमी परमप्रभु यावे आ लोव्र नेंचा तामे बाक्त।

पावलमी छक लाक्चा डा गेय पशो

11 मिनु परमप्रभु यावेमी शुश छक लाक्चा डा गेय पावल आ गुइ रे पा कोंइदा बाक्त। प्रेरित १४:३; २कोरिन्थी १२:१२ 12 मुरपुकीमी आन फेक्शो वा, रूमाल लाइश्शा, पावल कली थीबाक्मा बाक्त। मिनु लेशशा चाक्शा रोइ पाइब आन कली थीपदमेनु, साबाक्मा बाक्त। वोलमी तशो आन वोल गूशा प्रोक्बाक्मा बाक्त। प्रेरित ५:१५ 13 मिनु वोल आन कली खेरशा गाक्ब यहूदी का निकशीमी पावल आ तस खोइश्शा, प्रभु येसु आ नें थिशा, वोल गुंडशा खेरचा गोव्रमे बाक्त। मेकोपुकीमी “पावलमी शेंशो येसु आ नेमी गूडो” दे वोल आन कली खेरचा बोल पाइबाक्मा बाक्त। लूका ९:४९ 14 यहूदी डा ठेयब चढेब स्केवा माइश्शो मुर आ ७ जना तौपुकीमी मोदेशो पाइबाक्मा बाक्त। 15 मिनु काबु वोलमी मेको आन कली “येसु कली तुइक्नुड। पावल कली यो तुइक्नुड, गेपुकी चहिं सु ननी?” देंमाक्त। 16 मिनु वोलम थिशो मुरुमी प्रेक्शा, ग्राम्शा, ग्याइश्शा खोल्शा तुप्स डा तुप्स पा हुश चुइश्शा, मेको आन वा खाक्शा, शिप्रा सेल्मी बाक्त। मिनु नेल्ल प्रोक्मा बाक्त। 17 मेको लोव्र तेइ तेइ ब्रशा, एफिससमी बाक्ब यहूदी नु ग्रीक नेल्लेमी नेन्मे बाक्त। मिनु “येसु आ नेमी हेंथे मब्वाक्चा बाक्माक्त” दे रुप्शा हिंशा, प्रभु येसु आ नें कली मान पा ठेयब सेल्मे

बाक्त। 18 मिनु येसु कली थमा सुइक्चा क्येडा डोंइती आन मन्तर तन्तर पशो आ पबर्म “मुल डा मेरे मपाइनीकी” दे थमा सुइक्ब नेल्ल आन कली नेपदमे बाक्त। 19 मिनु शुश मन्तर तन्तर पाइब आन मन्तर तन्तर डा किताब चाक्शा, मेको मुर आन डोंइती चोव्रमे बाक्त। मेको किताब कली ५० हजार चांदी के द्राकमे थाप्शो बाक्माक्त। द्राकमे का देनार यो देशो बाक्त। मेको नाक्त का डा गाल्च चांदी के क्येट बाक्ब।

परमप्रभु आ लोव्र बारशा लशो

20 मिनु परमप्रभु यावे आ लोव्र तेइ तेइ ब्रशा सक्ति पाइश्शो दुम्शा बारना बारन लमाक्त। प्रेरित १२:२४ 21 मेको नोले पावलमी “गो मासीडोनीया नु आकाया लां पा यरूसलेममी जाक्दीत्नुड। मेकेर काबु निक्बु बाक्शा, रोम सहर मजाक्दीत्थु मप्रोंइनुड” दे थुं पवा बाक्त। प्रेरित २३:११ 22 मोदेशो थुं पशा, तिमोथी नु इरास्तस आस कली मासीडोनीया सोइक्तीम्सी बाक्त। आं चहिं एसीया उइ बाक्माक्त। २तिमोथी ४:२०

मूर्ति सेल्बपुकी गाइश्शो

23 एफिससमी बाक्मेनु, मार दुम्माक्त देशा हना, प्रभु आ नक लां खोइक्चा आ पबर्म राम्शी पोक्चा गोव्रमे बाक्त। २कोरिन्थी १:८-९ 24 मारदे हना देमेत्रीयस माइश्शो सुन चांदी चेम्ब मुर कामी सुन के आरतेमीस देवी आ मूर्ति सेल्शा लेयशा, शुश क्येट चेम्बाक्माक्त। मूर्ति चेम्ब शुश बाक्मा बाक्त। मेकोमी शुश मुर आन कली गेय गेशो बाक्माक्त। आरतेमीस लतीन लोव्रमी दिआना बाक्ब। 25 मिनु काबु मेको आन कली ब्रेशा, खुप्शा “आं वारचपुकी, आं लोव्र का निक्शी नेनीने। मूर्ति चेम्शा लेयशा क्येट चेम्शो नय, दे गो नेल्लेमी तुइक्नय। 26 मुल चहिं एको पावल नें पाइश्शो मुरुमी एसीया नेल्ल हिरने थुम्शा, इं एफिससमी जाक्शा, मुर नेल्ल आन कली ‘मुर आन गुइ रे सेल्शो मूर्ति देवी ममाइ’ देशा शुश मुर आन थुंमी मूर्ति पूजा पचा प्रोंइपाइक्तीमी। मेको इं मिक्चीम ताइतय। 27 मोदेशो दुम्शा, इं गेय ला जाम्शो ममाइ, इं मानेशो आरतेमीस ठेयब देवी आ मन्दीर आ नें यो जाम्शा लचा चिक्ताक्व। मुरपुकीमी मेको कली सेउ पचा प्रोंइचाम्तेक्मे। साइ एसीयामी बाक्ब नेल्लेमी ठेयब सेल्शा, मान पना पन बाक्शो नमी, मुल मारेइ मान मलीब” दे आन थुं खुरपाइक्मी बाक्त। 28 मिनु मेकोपुकीमी “इं एफिसस डा आरतेमीस देवी नेल्ल क्येडा ठेयब देवी बाक्ब” दे शुश रेयके पचा गोव्रमे बाक्त। 29 मिनु मोदेशो पा सहर नेल्ल ठेयब रेयके दुम्माक्त। मुरपुकी दोरशा जाक्शा, सहर डा दिंममी खुम्समा बाक्त। मासीडोनीया रे जाक्शो पावल नु काथा गाक्ब गायस नु अरीस्तारकस आस कली ग्याइश्शा, मेको दिंममी चाक्मे बाक्त। प्रेरित २०:४ 30 मिनु पावलमी मोदेशो दुम्शो तशा, गो यो देल्लिकेमी लाइनुड देमेनु, थमा सुइक्बपुकीमी लचा मगेमे बाक्त। 31 एसीया रागी डा सरकार आ गेय पाइब डोंइती डा आ वारचपुकीमी यो “मेक लचा मदुम्ब, है” दे लोव्र नेंपाइक्थ मुर सोइक्तमे बाक्त। 32 दिंममी देल्शोपुकीमी कामी लोव्र का, अर्कोमी अर्को लोव्र पा रेयके ला पामे बाक्त। तन्न मारदे देल्शो, मारदे रेयके पशो, मेको लोव्र हुलपुकीमी मारेइ मतुइक्तमे बाक्त। 33 मिनु यहूदीपुकीमी पोक्शो अलेकजन्डर कली हुल आन डोंइती राप्पाइश्शा “लो, लोव्र पावो” दे मदमेनु, मेकोमी आ गुइ हिम्शा “सिक्सी पा आं लोव्र नेनीने, नेल्ल रुप्पाइक्नन्नी” देमाक्त। 34 तन्न आ लोव्र पशो रे “एको यहूदी कका बाक्माक्त” दे तुइश्शा “इं एफिसस डा आरतेमीस देवी नेल्ल क्येडा ठेयब देवी बाक्ब, जाइ आरतेमीस, जाइ आरतेमीस” दे घन्टा निक्शी सम्म रेयके पस डा पस ग्रीमे बाक्त।

35 मिनु नोले सहर डा ठेयब मुरुमी मेको आन कली रेयके पचा नाइक्पाइक्मी बाक्त। मिनु “इं एफिसीपुकी, आं लोव्र नेनीने। इं एफिसस सहरमी बाक्ब आरतेमीस देवी आ मन्दीर, आ नें यो नेल्ल क्येडा ठेयब बाक्ब, दे मुर नेल्लेमी ममिन्नीमी डा? सरीड रे दोक्शो मूर्ति कली मान पा ठेयब मसेल्नीमी डा? 36 रागी रागीम बाक्ब मुर नेल्लेमी मानेशा ठेयब सेल्नीमी। मिनु गेपुकीमी मार रेयके पनी? मोदेशो रेयके पचा मदुम्ब। 37 गेपुकीमी ग्याइश्शा चाक्शो मुर निक्शीमी आरतेमीस देवी आ मन्दीर आ नें मक्याम्देस, देवी कली शुक्शी लोव्र यो मपाम्स, मारेइ मरिम्शो मपाम्स। 38 देमेत्रीयस नु आ वारचपुकीमी सुइ कली मुददा पचा थुं पाम्तेक्म हना, निसाफ पाइब आ डोंइती लशा, उजुर पचा माल्शो। निसाफ पाइब आ डोंइती चाक्शा, दोस गुंइचा माल्शो। 39 निसाफ पाइबमी गारपाइक्ने मचाप्तु हना, गो सहर डा ठेयब जोक्ब तुइक्ब नेल्ल बुक्शा, लोव्र पा गेनीकी। 40 तन्न मुलाक्ती खोदेशो रेयके पचा मदुम्ब। मोदेशो पाइतय हना, गो नेल्ल मरिम्शो पा दोसी दुम्नय, दे रुपीने। मारदे हना एको रेयके मारदे दुम्मे, मेको देने मचाप्नय” दे माइक्मी बाक्त। 41 मो देने थुम्शा, मुर आन कली आन खिं खिं सोइक्तीमी बाक्त।

20

मासीडोनीया नु ग्रीसमी शेंशो

1 मिनु मेको रेयके नाइक्तमे नोले पावलमी थमा सुइक्ब आन कली ब्रेशशा खुप्शा “थमा सुइक्चा मप्रोंइथु, इन थुं बारपा बाक्कीन” देंशा आन कली मेक उइ प्रोंइशा मासीडोनीया लमाक्त। 2 कोरिन्थी २:१३ 2 मासीडोनीयामी हिरना हिरन थमा सुइक्ब आन कली गुम्शा शेंशा, आन थुं बारपाइक्ना पाइक्न गाक्शा, ग्रीस रागी जाक्दीम्माक्त। 3 मिनु ग्रीस रागीमी महिना सां सम्म बाक्शा “मुल जहाज डोइश्शा, सिरिया गे लाइनुड” दे लचावानु “यहूदीपुकीमी आं कली ग्याइक्चा कली लां बाप्शो बाक्नीम” दे तुइश्शा, जहाज डोइश्शा मलथु, गाक्शा मासीडोनीया लमाक्त। 4 पावल नु काथा गाक्ब सु सु बाक्मा बाक्त देंशा हना, बेरोइया डा पुरोस आ तौ सोपाटेर, थिस्सलोनीकी सहर डा अरीस्तारकस नु सेकुन्दस, डेरबे डा गायस, तिमोथी, एसीया डा तिखीकस नु त्रोफीमस बाक्मा बाक्त। प्रेरित १७:१०; प्रेरित १९:२०; प्रेरित १६:३; एफिसी ६:२१; प्रेरित २१:२९ 5 मेकोपुकी गो आंइ क्येडा डोंइती लशा, त्रोआस सहरमी रिम्शा बाक्मा बाक्त। 6 बोरब ओरुक्ती मसुप्शो शोब्ले जची नाक्त लाक्शा, फिलिप्पी सहर रे जहाज डोइश्शा, ५ नाक्त नोले त्रोआस सहरमी जाक्दीत्तक। मेकेर आंइ वारच आन कली गुम्शा, ७ नाक्त मेक उइ बाक्तक।

त्रोआसमी बाक्शो

7 आइतबार नाक्त प्रभु भोज जथ खुम्साक्क। मिनु पावलमी दीसा लचा माल्ब देंशा, नाक्दो उइक्थ दुम सम्म शुश लोत्र पाप्तु। मत्ती २८:१; प्रेरित २:४२,४६ 8 आंइ बाक्शो तला तारी डा कोठा शुश बत्ती दाशो बाक्त। 9 मेकेर युतीकस नें पाइश्शो ठिटा मुर का झेलमी निश्शो बाक्त। मिनु पावलमी शेंना शेंन शुश लाइश्शो लोत्र पवानु, युतीकस मुकु जिशा निन्द्रा पाप्तु। मिनु तला सां तार रे दोक्त। मिनु मुरपुकी कोत्रथ लमानु, बेक्ने थुम्शो थित्तेक्म। 10 मिनु पावल यो यिशा बाप्शा आ रां मुप्शा, एर ओंथ बाक्ब आन कली “मबेक्शो बाक्त। मोपतीके महिनीन” दे माइक्तीमी। 11 राजा १७:२१ 11 मिनु लेशशा कुशा, प्रभु भोज जने थुम्शा नां दाप्ची सम्म शेंना शेंन बाक्त। मिनु गो आंइ लची जाक्मेनु, 12 मेको ठिटा कली सेस तशा, नेल्ल आंइ थुं नाइश्शा ग्येरसाक्क।

मिलेटस जाक्दीश्शो

13 मिनु पावलमी “गे जहाज डोइश्शा, अस्सोस सहर लने। गो चहिं गाक्शा इन कली गुम्नन्नी” देंशा आंइ कली जहाजमी डोइक्पाइश्शा सोइक्ताक्की। मिनु अस्सोसमी जाक्दीत्तक। 14 मिनु अस्सोस सहरमी गुम्शा, पावल यो जहाजमी डोइश्शा गो नेल्ल मितीलेनेमी सहर जाक्दीत्तक। 15 आ दीसा नाक्त खिओस हांबु जाक्दीत्तक। आ नित्थ नाक्त सामोसमी जाक्दीत्तक। मिनु आ सांबु नाक्त मिलेटस जाक्दीत्तक। 16 पावलमी “पेन्तीकोस चाड मानेचा कली यरूसलेम जाक्दीत्तका माल्ब। मोपतीके लांमी मग्योल्चा, एसीयामी मनाइक्चा। एफिससमी यो मनाइक्चा” देंतीके मनाइक्थु गाक्तक। प्रेरित १८:२१

एफिसी आन कली लोत्र पशो

17 मिलेटसमी जाक्दीश्शा, पावलमी एफिससमी बाक्ब थमा सुइक्ब आन शेंब खाल्पा आन कली “मिलेटसमी गुम्थ जाक्कीने” दे ब्रथ सोइक्ताक्क। 18 मिनु मेकोपुकी जाक्मानु, पावलमी मेको आन कली “नेल्ल क्येडा डोंइती इन एसीया रागी जाक्डा रे मुल सम्म गेपुकी नु बाक्शा, गो मार शेंदन्नी दोपा लां कोंइदन्नी, दोपा गेपुकी नु बाक्डा, मेको नेल्ल तुइक्नीनी। प्रेरित १८:१९; प्रेरित १९:१० 19 गो प्रभु आ वाइल दुम्शा, ठेयब मलेत्थु प्रभु आ गेय पना पन गाक्ती। मोपा गाक्डानु, यहूदीपुकीमी खेदा पा शुश श्येत गेशा, आं थुं खाइक्पा डाक्पाइक्तीमी। 20 मो पाम्तेक्म हना यो, गो इन खिं खिं हिरशा, इन कली गुम्शा, का का पा शेंशा, इन कली रिम्शो दुम्ल, दे तुइक्पाइक्तन्नी। खिं खिं हिरशा ला ममाइ। गाउं सहरमी यो हिरशा, मुर आन बुक्तीकेमी जाक्दीश्शा, शेंना शेंन गाक्ती। 21 मोदेंशो शेंशा गाक्शा यहूदी, ग्रीक नु नेल्ल रागी डा मुर आन कली ‘पाप पचा प्रोंइशा, परमप्रभु यावे गे लेशशा, इं प्रभु येसु खीस्त कली थमा सुइक्चय’ दे शेंना शेंन गाक्ती। 22 मिनु मुल परमप्रभु यावे आ सोक्तीमी देंशो टिशा, यरूसलेम गे डा लां खोइश्शा गाक्शो बाक्नुड। यरूसलेममी जाक्दीश्शा, आं कली मार दुम्बा, दे मतुइक्नुड। प्रेरित १९:२१ 23 लोत्र का ला तुइक्नुड। मारदे हना सहर गाउं तेइ तेइ हिरशा गाक्डानु, परमप्रभु यावे आ सोक्त रे पा लोत्र पाइबमी ‘यरूसलेम जाक्दीश्शा, शुश श्येत जाइनेवे। जेल्खानमी चोक्चा पुंइसीनेवे’ दे नेंपाइक्तीमी। प्रेरित ९:१६; प्रेरित २१:४,११ 24 गो साइक्चा पुंइसाक्ड हना यो, एको आं गिंम मारेइ ममिम्नुड। प्रभु येसुमी आं कली पपाइश्शो लोत्र ‘परमप्रभु यावेमी मुर आन कली शिशी पाइब’ आ ग्येरपाइक्ब लोत्र कली तुइक्पाइक्नुड। प्रेरित २१:१३; २तिमोथी ४:७ 25 गो इन कली

परमप्रभु यावे आ राज्य डा लोव्र नेल्ल तुइक्पाइक्ने थुम्तन्नी। मुल डा मेरे मगुम्नय, दे तुइक्नुड। 26 बेक्शा जाम्शा लाइतीनी हना यो, आं के मारेइ दोस मदुम्ब, इन कली थमा पा देनुड। इजीकीएल ३:१७-१९; प्रेरित १८:६ 27 मारदे हना परमप्रभु यावेमी शेंपाइश्शो लोव्र का यो मखुइक्थु नेल्ल शेंताक्न्नी। 28 गे आंम कली कोव्रडीने। परमप्रभु यावे आ सोक्तीमी इन कली थमा सुइक्ब आन कली कोव्रब सेल्लु। गे परमप्रभु यावे आ मुर आन कली मुर आन कली कोव्रब रिम्शो गोठला दुमीन। मारदे हना मेकोपुकी आ तौ आ हुशेम ग्याप्शो बाक्नीमी। १तिमोथी ४:१६; १पत्रुस ५:२-४ 29 गो इन कली प्रोंइशा वोइश्शा, गाक्डा नोले फरमी बी क्यारश आन कली खेदा पशो खोदेशो पा खेदा पचा पुंइसीनीनी। मत्ती ७:१५ 30 गेपुकी नु काथा गाक्ब थमा सुइक्बपुकी यो मोदेशो खेदा पाइब फर खोदेशो दुम्नीम। मेकोपुकीमी दूली लोव्र शेंशा, थमा सुइक्ब आन थुं ग्येत्थ लुकच कयाल्पाइश्शा, आन नोले खोइक्ब सेल्नीम, दे तुइक्नुड। १यूहन्ना २:१८-१९ 31 मोपतीके होस पांइसीने। बर्स सां सम्म श्येत पा डाक्थ्री दुम्शा, गोमी इन कली शेंशो, वारच पशो काइ मप्रेदीने। 32 मुल गो इन कली परमप्रभु यावे आ गुइमी जिम्मा गेनुड। प्रभुमी इन कली शिशी पा आ लोव्र नेल्ल रुप्या गेशा, इन थुं बारना बारन लपाइश्शा, आ मुर नेल्ल आन कली गेतीक आसीक गेब, दे तुइक्नुड। 33 गेपुकी नु बाक्डानु, इन बाक्शो सुन चांदी वा नेल्ल तशा मवाल्ड। मारेइ मताक्गु। 34 गो आंम आं गुइमी गेय पना पन जाता। गो नु काथा गाक्ब आन कली यो गोन थुलतामी। प्रेरित १८:३; १कोरिन्थी ४:१२; १थिस्सलोनिकी २:९ 35 गो मार पाता हना यो, मचापब आन कली वारच पाइक्चा नमी, दे गेय पा कोइताक्न्। प्रभु येसु आ शेंशो लोव्रमी ‘ताक्चा क्येडा गेचा रिम्शो बाक्ब’ ” देंत। 36 मेको लोव्र पने थुम्शा, आ पोक्च थेक्शा मेकोपुकी नु प्रार्थना पाप्तु। प्रेरित २१:५ 37 पावलमी “मुल डा मेरे मगुम्नय” देशो लोव्रमी नेल्ल डाक्तेक्म। 38 मिनु पावल कली “लेंशा मतांइसीब” दे मुप्शा पुक्पु पशा, जहाज सम्म चोव्रतेक्म।

21

टायर सहरमी जाक्दीश्शो

1 मिनु गो पावल नु गाक्ब नेल्ले जहाजमी डोइश्शा, मिलेटस रे लशा, कोस टापुमी जाक्दीत्तक। आ दीसा नाक्ती रोदोस लाक्शा, पतारा सहर जाक्दीत्तक। 2 पतारामी जहाज रे तोइश्शा, फोनीसीया लाइब जहाज डोइश्शा लाइतक। 3 साइप्रस टापु तांइसीतीक जाक्दीश्शा, साइप्रस गे मलथु, आइदी रे पा ग्रीशा लशा, सिरीया रागी डा टायर सहरमी जाक्दीश्शा तोंइसाक्क। मारदे हना मेको जहाजमी कुरशो भारी शोल्चा माल्शो बाक्त। 4 मिनु सहर लशा, थमा सुइक्ब आन बाक्तीके माल्शा, ७ नाक्त सम्म मेकोपुकी नु बाक्तक। मिनु थमा सुइक्बपुकीमी परमप्रभु यावे आ सोक्त रे पा लोव्र पा पावल कली “यरूसलेम मलावो” दे माइक्तेक्म। प्रेरित २०:२३ 5 साता का नोले “गो आंइ लां खोइक्नीकी” देंकानु, मीश मुर वोंइश मुर, आल ब्रेप्च नेल्लेमी चोव्रथ सहर लाक्शा समुन्द्र आ नेक्था सम्म चाक्तेक्म। मिनु पोक्च थेक्शा प्रार्थना पशा ब्राशा, प्रेरित २०:३६ 6 गोपुकी जहाज डोंइसाक्का, मेकोपुकी चहिं आन खिं खिं लेशशा लाम्तेक्म।

पावल सिजरियाम बाक्शो

7 मिनु टायर रे लशा, तोलेमाइस जाक्दीश्शा तोंइसाक्क। मिनु थमा सुइक्ब आन कली गुम्थ लशा, काबु काथा बाक्तक। 8 मिनु आ दीसा नाक्ती सिजरिया जाक्दीश्शा तोंइसाक्क। मिनु ग्येरपाइक्ब लोव्र शेंब फिलीप आ खिं लशा बाक्तक। योव्रशो गेय पाइब ७ जना डा फिलीप का बाक्शो बाक्त। प्रेरित ६:५; प्रेरित ८:४० 9 फिलीप के ४ जना ग्युंवे मपशो तमी बाक्तेक्म। मेकोपुकी परमप्रभु यावे आ लोव्र पाइब बाक्तेक्म।

10 मोपा फिलीप आ खिंमी बाक्कानु, काबु अगाबस माइश्शो परमप्रभु यावे आ लोव्र पाइब मुर का यहूदीया रागी रे यिशा, आंइ बाक्तीकेमी जाक्त। प्रेरित ११:२८ 11 मिनु गोपुकी नु बाक्शा, पावल आ किप्शुरम आंम गुइ खोइल फ्रेंसीशा, “परमप्रभु यावे आ सोक्तीमी ‘एको किप्शुर किप्ब मुर कली यरूसलेमम जाक्दीश्शा बाक्मेनु, यहूदीपुकीमी एको ओं पा फ्रेंनीमी। मिनु अर्को रागी डा मुर आन गुइमी जिम्मा गेनीमी’ ” दे नोले दुम्ब लोव्र पाप्तु। प्रेरित २०:२३ 12 अगाबस आ मोदेशो लोव्र नेंशा, गो नेल्लेमी पावल कली “यरूसलेम मलावो, लचा मदुम्ब” दे माइक्तक। मत्ती १६:२२ 13 पावलमी चहिं “मारदे डाक्शा ब्रेश्शा, आं थुं खाइक्पाइक्नीनी? मलथु मप्रोंइनुड। यरूसलेम जाक्दीश्शा, प्रभु येसु आ नेमी फ्रेंसीचा ला ममाइ, बेक्चा माल्ती हना यो, बेक्नुड” देंत। प्रेरित २०:२४ 14 मिनु मलथु मप्रोंइबाक्माक्त, दे रुप्शा, गोपुकीमी “लो, मो हना प्रभु आ दाक्शो दुम्ल” देंतक। लूका २२:४२

पावल यरूसलेमम जाक्दीश्शो

15 मिनु नोले यरूसलेम लाइतक। 16 सिजरिया डा थमा सुइक्बपुकी यो गो नु गाक्तेकम। यरूसलेममी जाक्दीशशा, मेको गो नु गाक्बपुकीमी मनासोन आ खिंमी बास बाक्चा, दे चाक्दीत्तेकम। मनासोन चहिं साइप्रस टापु डा बाक्माक्त। साइ डोंइती रे ख्रीस्त कली थमा सुइक्ब बाक्माक्त। 17 यरूसलेममी जाक्दीककानु, मेकेर बाक्ब थमा सुइक्बपुकीमी आंइ कली तशा ग्येरशा ब्राइतीकी। 18 जाक्दीशशो आ दीसा पावलमी आंइ कली याकूब आ खिं लाइशशा, थमा सुइक्ब आन कली शेंब खाल्पा नु गुम्पाइक्तु। प्रेरित १५:१३ 19 मिनु गुम्शा सेउ पमुशा, पावलमी अर्को रागी डा मुर आन कली ख्रीस्त आ पर्वम शेंना शेंन गाक्मेनु, परमप्रभु यावेमी दोपा ठेयब गेय पपाइशशो बाक्मे, मेको लोव्र नेल्ल का का पा रुप्पाइक्तीमी। 20 आ लोव्र नेंशा, परमप्रभु यावे कली ठेयब सेल्लेकम। मिनु मेकोपुकीमी पावल कली “आंइ लोक्ब, इ देशो नेल्ल रिम्शो बाक्ब। तन्न गो इ कली लोव्र का निक्शी देंनीकी। इं यहूदीपुकी हजार हजार जना ख्रीस्त कली थमा सुइक्ब दुम्तेकम, दे तुइक्नेवे। मेकोपुकीमी थमा सुइशशा यो इं यहूदी अरेशो लोव्र काइ मप्रोंइथु पचा माल्ब देंनीमी। प्रेरित १५:१ 21 मेकोपुकीमी ‘पावलमी अर्को रागी डा मुर नु बाक्ब यहूदी आन कली मोसामी अरेशो लोव्र पचा प्रोनीने, इन आल आन कली खोइक्तीक चिनु मखोतीन’ दे शेंना शेंन गाक्ब, देशो नेंशो बाक्नीमी। प्रेरित १६:३ 22 पावल यरूसलेम जाक्माक्त, दे तुइक्नीम। 23 आंइ देशो पावो। मिनु मेको लोव्र जाम्ब। गो नु बाक्ब ४ जना मुर कसम पशो बाक्तेकम। प्रेरित १८:१८ 24 मोपतीके मेकोपुकी नु गारशा आन कसम जशो खाप्चा कली लावो। मिनु चोव्रखो दुम्शा, नेल्लेमी इन चां प्रेक्सीने। चां प्रेक्शो डा चहिं गे क्येट थाप्तीन। मो पाइतीनी हना, सुइमी मारेइ दोस गेने मचाप्नीमी। इं यहूदी अरेशो नेल्ल पशो बाक्ब, दे नेल्लेमी तुइक्नीमी। 25 अर्को रागी डा ख्रीस्त कली थमा सुइक्ब कली चहिं दोदेशो शेंचा, दे डोंइती कना ब्रेक्शा सोइक्ने थुम्तक। मेको आन कली ‘मूर्ति कली चढ़ेशो मजचा, हुश मब्वचा, हुश मचुइक्थु साइशशो श्ये मब्वचा, तेल्लेम मपचा’ दे नेंपाइक्ने थुम्तक” दे माइक्तेकम। प्रेरित १५:२१, २९ 26 मिनु पावलमी मेको आन लोव्र नेंशा, आ दीसा मेको ४ जना नु काथा लशा चोव्रखेचा पुंइसीशा, परमप्रभु यावे आ खिं ओव्रशा, चोव्रखेतीक नाक्त गेना नुप्बा नु नोले चढ़ेचा, दे चढ़ेब आन कली तुइक्पदमे बाक्त। गन्ती ६:१३-२१; १कोरिन्थी ९:२०

पावल कली ग्याइशशो

27 मेको चोव्रखेतीक ७ नाक्त दुम्चा चिक्तानु, यहूदीपुकी एसीया रे जाक्शा पावल कली ग्याइक्तेमे बाक्त। मेकोपुकीमी पावल कली परमप्रभु यावे आ खिंमी बाक्शो तशो बाक्मा बाक्त। 28 मिनु पावल कली ग्याइशशा, मेकेर बाक्ब मुर आन कली “इं इस्राएली, नेल्ल कोव्रथ पिन, है। गो आंइ ग्याइशशो मुर तेइ तेइ हिरशा, नेल्ल मुर आन कली इं यहूदी आ पर्वम मरिम्शो लोव्र पशो बाक्त। इं अरेशो मपचा, दे दूली शेंबाक्त। परमप्रभु यावे आ खिं आ पर्वम शुक्शी लोव्र पाइक्बाक्त। मोशो ला ममाइ, अर्को रागी डा ग्रीक आन कली परमप्रभु यावे आ खिंमी लाइशशा ओइशा, ग्रांग्रा दिशो सेल्शो आंइ मिक्चीमी ताइतक” दे शुश रेयके पा दोस गेमे बाक्त। प्रेरित ६:१३; इजीकीएल ४४:७ 29 परमप्रभु यावे आ खिं ग्रांग्रा दिशो सेल्शो बाक्माक्त, दे मारदे देंमा देशा हना, एफिसस सहर डा त्रोफीमस कली सहरमी पावल नु काथा गाक्शो तशा, परमप्रभु यावे आ खिं लाइशशा, ओंइने थुमा बाक्त, दे मिम्शो बाक्मा बाक्त। प्रेरित २०:४; रतिमोथी ४:२०

30 पावल कली दोस गेशो लोव्र सहर नेल्ल ब्रीमाक्त। मिनु सहर डा मुरपुकी दोरशा जाक्शा, शुश रेयके पामे बाक्त। पावल कली ग्याइशशा कीशा परमप्रभु यावे आ खिं रे गुंइशा लदमे बाक्त। मिनु परमप्रभु यावे आ खिं डा खाल पाइबपुकीमी ठेयब लाप्चो नेल्ल गु ग्रा चोक्गामे बाक्त। 31 मिनु मेको रेयके पाइबपुकीमी पावल कली साइक्चा चिक्तेमेनु, यरूसलेमम बाक्ब रोमी लडाइ पाइब आन ठेयब मुरुमी “सहरम क्योरमुशा साइक्मुचा चिक्ताकम” देशो नेंशा, 32 आ सिपाही आन कली लाइशशा दोरशा जाक्दीम्माक्त। मिनु मेकोपुकी जाक्शो तशा, पावल कली तुप्चा प्रोन्मे बाक्त। 33 मिनु लडाइ पाइब आन ठेयब मुरुम पावल कली ग्याइक्पाइशशा, साडलो निक्शी लिक्तीने देशा लिक्पाइशशा आ डोंइती राप्पदा बाक्त। मिनु “एको मुर ते डा बाक्मे? मार पवा?” दे मुर आन कली हिल्लो पचा गोवा बाक्त। प्रेरित २०:२३ 34 मिनु नेल्लेमी रेयके पामेनु, लडाइ पाइब आन ठेयब मुरुमी मारेइ रुप्ने मचबा बाक्त। मोपतीके सिपाही आन बाक्तीकेम लाइक्चा माल्ब, दे लदमे बाक्त। 35 मिनु सिपाही आन बाक्तीके जाक्दीशशा, पावल कली कुरशा, तला तारी लदमे बाक्त। 36 मारदे हना मुरपुकीमी “मेको कली मसाइक्थु मप्रोंइनीकी” दे रेयके पा कोक्के शेशा, मेको आन नोले खोइशशा लमा बाक्त। प्रेरित २२:२२; लूका २३:१८

37 मिनु तला तारी कुरशा ओंइदमेनु, पावलमी लडाइ पाइब आन ठेयब मुर कली ग्रीक लोत्र रे पा “हजुर, गो लोत्र का निक्शी पचा ताइनडा को?” देंमेनु, मेको छक लाकशा “ओहो, ग्रीक लोत्र यो ब्वाक्स जोक्बाक्ते। 38 इजीप्त रागी डा ४ हजार खुइ आन कली गोरशो रागीमी लां कोइब मुर दा मनवे” देंमाक्त। 39 मिनु पावलमी “गो इजीप्ती मनड। सिलीसीया डा टारसस सहरमी जरमेशो यहूदी का नड। टारसस सहर तेइ तेइ नेल्लेमी आं नें तुइक्नीमी। गे यो तुइक्नीनी माइ। मेको मुर आन कली लोत्र का निक्शी पचा गेयीनी” देंमाक्त। 40 मिनु लडाइ पाइब आन ठेयब मुरुमी “लो, लोत्र पचा गेनन” देंमाक्त। मिनु पावल गूशा तला तारी डा लाडगाम राप्शा “लो, सिक्सी पा आं लोत्र नेनीने” दे गुइ हिक्ता बाक्त। मिनु पावलमी हिब्रू लोत्र पा, मुर नेल्ल सिक्सी पामे बाक्त।

22

पावलमी सांकछी गेशो

1 मिनु पावलमी हिब्रू लोत्र पा “आं आफ नु लोक्बपुकी, लोत्र का निक्शी नेनीने” देंमेनु, मेकोपुकी थम सिक्सी पा नोफा दाइश्शा बाक्मा बाक्त। 2 मारदे हना पावलमी हिब्रू लोत्र पवानु, मेकोपुकी क्येडा सिक्सी पामे बाक्त। प्रेरित २१:४० 3 मिनु मेकोमी “गो सिलीसीया डा टारसस सहरमी जरमेशो यहूदी नड। आल रे इं यरूसलेममी बाक्शो नड। आं कली शेंब गमालीएल बाक्ब। मेको ठेयब शेंबमी आं कली इं किकी पिपी आन अरेशो लोत्र नेल्ल शेंताक्यी। मिनु गो मेको नेल्ल पना पन बाक्ती। इन पशो खोदेशो पा गो यो थुं का पा परमप्रभु यावे कली मान पा बोल पाता। प्रेरित ९:१-२९; प्रेरित २६:९-२०; प्रेरित ५:५४ 4 मोपा बाक्डानु, ख्रीस्त आ लां खोइक्ब आन कली साइक्चा सम्म डा श्येत गेतामी। मीश मुर वोंइश मुर आन कली खेदा पा ग्याइक्पाइश्शा, जेल्खानमी चोक्पाइक्तामी। प्रेरित ८:३ 5 एको आं देशो थमा बाक्ब, दे ठेयब चढेब नु जोक्ब तुइक्ब खाल्पा नेल्लेम तुइक्नीमी। मेकोपुकीमी दमस्कसमी बाक्ब यहूदी गुम्तीक खिं डा ठेयब मुर आन कली चिठी ब्रेक्शा, ख्रीस्त कली थमा सुइक्ब आन कली ग्याइश्शा यरूसलेम चाक्चा, दे अधिकार गेतीमी। मिनु थमा सुइक्ब आन कली ग्याइक्थ दमस्कस लती।

6 दमस्कस सहर जाक्दीत्चाडानु, १२ बजे खोइ दुम्शो बाक्त। मिनु मार दुम्त देशा हना, सरीड रे जेव हाक्सीशा यिशा, एर ओंथ नेल्ल थम छेडछेड दुम्त। 7 मिनु गो दिड गोलती। मिनु ‘सावल, सावल मारदे आं कली खेदा पा श्येत गेयी?’ देशो नेंता। 8 मिनु गो ‘प्रभु सु ननी?’ दे हिल्लो पडानु ‘गेमी खेदा पशो नासरथ डा येसु नड’ देशो नेंता। 9 गो नु काथा गाक्बपुकीमी छेडछेड दुम्शो ताम्तेक्मे। लोत्र पशो चहिं मारेइ मनेनेम। 10 मिनु गो ‘प्रभु, मुल गो मार पाइनुडा?’ देंडानु, प्रभुमी ‘मुल छुल बोक्शा दमस्कस लावो। मेकेर जाक्दीनेनु, मार पचा माल्नेवे, मेको नेल्ल तुइक्पाइक्चा पुंइसीनेवे’ देशो नेंता। 11 मेको छेडछेडम पतीके गो मिक्च मताइब दुम्ती। मिनु गो नु काथा गाक्ब वारचपुकीमी आं गुइ ग्याइश्शा कीशा, दमस्कस सहरमी चाक्दीत्तीमी।

12 दमस्कसमी हनानीया नें पाइश्शो मुर का बाक्माक्त। परमप्रभु यावे आ अरेशो नेल्ल टिशा, रिम्शो पाइब बाक्माक्त। मेकेर बाक्ब यहूदी नेल्लेमी मेको आ पर्वम ‘रिम्शो पाइब बाक्ब’ देंमा बाक्त। 13 मेको मुर आं कली गुम्थ जाक्त। मिनु आं डोंइती राप्शा ‘आं लोक्ब सावल, मिक्च ताइब दुमो’ देंमेनु, गो मिक्च ताइब दुम्शा, आं डोंइती राप्शो ताता। 14 मिनु हनानीयामी ‘इं किकी पिपीमी आन परमप्रभु यावेमी इ कली योत्रशा, आ दाक्शो पचा, दे तुइक्पाइक्ते। मेको ठीक पाइब कली तशा, आ लोत्र नेंतीवी। 15 दोदेशो पा गुमी, मार लोत्र नेंनी, मेको नेल्ल शुश मुर आन कली तुइक्पाइक्नेवे। 16 मुल कोत्रशा मबाक्को, छुल बोक्शा प्रार्थना पा, हे प्रभु येसु, आं पशो पाप क्याम्शा गेयीनी, दे पुंइशा, ब्वाक्कुमी खुम्शा गुंइने पुंइसो’ दे माइक्ती।

17 मिनु नोले यरूसलेम लेत्ती। मिनु काबु परमप्रभु यावे आ खिंमी प्रार्थना पा बाक्डानु, प्रभुमी कोंइतीक कोंइदीनु, 18 गो प्रभु कली ताता। मिनु प्रभुमी ‘यरूसलेम थु प्रोनो। मारदे हना एकेर बाक्बपुकीमी गेमी आं पर्वम शेंशो लोत्र मनेनीम’ देंत। 19 मिनु गो ‘प्रभु, गो थमा सुइक्ब आन कली जेल्खानमी चोक्पाइक्तामी। गुम्तीक खिं खिं हिरशा, थमा सुइक्ब आन कली माल्शा तुप्पाइक्तामी, दे तुइक्नीमी। 20 इन पर्वम लोत्र पाइब स्तीफानस कली फुल्लु क्रोम्शा सदमेनु, रिम्शो पाइतीनी, दे माइक्तामी। साइक्ब आन पुइश्शा वोइश्शो वा खाल पा बाक्शो नड। मेको लोत्र नेल्लेम तुइश्शो बाक्नीम’ देंडानु, प्रेरित ७:५८; प्रेरित ८:१ 21 प्रभुमी ‘मेकेर रे लावो। मारदे हना डोन डोन बाक्ब अर्को रागी डा मुर आन कली आं पर्वम शेंथ सोइक्नन’ देंत’ दे पावलमी देंमाक्त। प्रेरित १३:२ 22 डोन डोन बाक्ब अर्को रागी डा मुर आन कली ख्रीस्त आ पर्वम शेंथ सोइश्शो नड देंमे चोटीन आ लोत्र थुम्चा मगेथु “एको कली मसाइक्थु मप्रोंइय। ओं देशो मुर कली ब्रोंइचा गेचा मदुम्ब” दे शुश रेयके पामे बाक्त। प्रेरित २१:३६ 23 मिनु आन जोंब बोक्शा, आन

फेक्शो वा बेरपा फुरक फ्रशा, राम्शी पोक्शा, मरिम्शो पामे बाक्त। 24 मिनु लडाइ पाइब आन ठेयब मुरुमी मेकोपुकीमी मोदेशो मरिम्शो पशो तशा, पावल कली आगा ओंइपदा बाक्त। मिनु मुरपुकीमी एको मुर कली तशा, मारदे आन जोंब बोक्मा, एकोमी मार मरिम्शो पवा, दे तुइक्चा कली कोरामी युक्शा, हिल्लो पने, दे आ सिपाही आन गुइमी गेमी बाक्त। 25 मिनु सिपाहीपुकीमी पावल कली फ्रेंशा कोरामी युक्चा चिक्तमेनु, पावलमी मेकेर आ नेक्था राप्शा बाक्ब कप्तान कली “इं रोमी ऐन कानुनमी रोमी नागरिक आन कली मारेइ दोस मगुंडथु, गे कोरामी युक्चा ताइनीनी?” देंमाक्त। प्रेरित १६:३७; प्रेरित २३:२७ 26 मिनु कप्तानमी मुल मार पचा, दे सिपाही आन ठेयब मुर कली हिल्लो पथ लमाक्त। मिनु “कोरामी युक्चा पुंडसीचा डा मुर ममाइ बाक्त। आं यो रोमी नागरिक बाक्त” दे तुइक्पदा बाक्त। 27 मिनु लडाइ पाइब आन ठेयब मुर पिशा “गे थमान रोमी नागरिक नवे? लो देंनो” देंमेनु “नड, हजुर” देंमाक्त। 28 मिनु लडाइ पाइब आन ठेयब मुर “गो शुश क्येट थाप्शा, रोमी नागरिक दुम्शो नड” देंमेनु, पावलमी “गो दा जरमेशो रेन रोमी नड, हजुर” देंमाक्त। 29 मेको लोत्र नेंशा, कोरामी युक्शा हिल्लो पचा चिक्बपुकीमी “हेत्त, मो पचा मदुम्शो बाक्माक्त” देंमा बाक्त। मेको मुर रोमी नागरिक बाक्माक्त, दे तुइक्तमे डा मेरे लडाइ पाइब आन ठेयब मुर यो हिंमाक्त। मारदे हना रोमी नागरिक आन कली फ्रेंपाइक्चा लायो मदुम्बाक्माक्त। 30 मिनु मेको लडाइ पाइब आन ठेयब मुर “मेको मुर आ दोस मार बाक्म?” दे रुप्चा माला बाक्त। मोपतीके आ दीसा नाक्ती ठेयब चढेब नु कछडी बाक्ब मुर आन कली खुप्पाइश्शा, पावल कली आ गुइ डा साडलो पुइश्शा लाइश्शा, खुम्सीशो मुर आन डोंइती राप्पदा बाक्त।

23

पावल कली कछडी राप्पाइश्शो

1 मिनु पावल मेको आन डोंइती राप्शा, आन कली मिक्च मयाक्थु कोवशा, “आं लोकबपुकी, गो साइ रे मुल सम्म आं तुइश्शो जोक्शो रिम्शो ला पाता। एको लोत्र थमा बाक्ब, दे परमप्रभुमी तुइक्ब” देंमेनु, प्रेरित २४:१६ 2 हनानीया माइश्शो ठेयब चढेबमी पावल आ नेक्था बाक्ब आन कली “मेरे आ शोत्र रोप्तीने” देंमाक्त। 3 मिनु पावलमी “परमप्रभु यावेमी इ कली कका इ शोत्र रोप्तेक्ल। ब्रेत्चशो गारोमी, बुलु बुइश्शा, बुबु पा तांइसीशो खोदेशो नवे। अरेशो लोत्रमी दोदेशो पा ब्रेक्शो बाक्मे, मोदेशो पा आं कली निसाफ पचा माल्शो नवे। गे अरेशो लोत्र क्येडा दूली पा आं कली तुप्चा माल्ब, देंते” देंमाक्त। मत्ती २३:२७ 4 मिनु एर ओंथ बाक्बपुकीमी पावल कली “परमप्रभु यावेमी योत्रशा वोइश्शो ठेयब चढेब कली मोदेशो लोत्र पचा दुम्बा?” देंमा बाक्त। 5 पावलमी “मेको मोदेशो ठेयब चढेब, दे मतुइक्तु, आं लोकबपुकी। तुइश्शो नड हना, मोदेशो लोत्र मदेड वा। मारदे हना परमप्रभु यावे आ ब्रेक्पाइश्शो लोत्रमी ‘इन कली अधिकार पचा, दे वोइश्शो आन कली मरिम्शो लोत्र मपचा’ दे ब्रेक्शो बाक्ब” देंमाक्त। प्रस्थान २२:२८

6 मिनु पावलमी कछडीम बाक्बपुकी का निक्शी सदुकी, का निक्शी फरिसी बाक्नीम, दे तुइश्शा, ठेयब सेंदा पा “आं लोकबपुकी, गो फरिसी नड। गो फरिसी आ तौ नड। बेक्शो रे सेंसीशा ब्रोंइचा तांइसीब, दे थमा सुइश्शो लोत्रमी आं कली दोस गेशा, मुददा कोप्ताक्यीमी” देंमाक्त। प्रेरित २२:३; प्रेरित २६:५; गलाती १:१४ 7 मो देंमेनु, फरिसी नु सदुकी ब्राशा, जिचा गोत्रमे बाक्त। 8 मारदे हना सदुकीपुकीमी बेक्शो रे मसेंसीनीम, स्वर्ग डा गेय पाइबपुकी मबाक्नीम नु परमप्रभु यावे आ सोक्त मबाक्ब देंनीम। तन्न फरिसीपुकीमी चहिं मेको नेल्ल बाक्ब देंनीम। मत्ती २२:२३ 9 मोपतीके आन जिचा बारना बारन लशा, शुश रेयके पामे बाक्त। मिनु फरिसी डा शेंब का निक्शीमी बोक्शा “एको मुर के मारेइ दोस मबाक्ब, दे मिम्नीकी। मुर आ मिक्चीम मतांइसीब का नु लोत्र पवा को? परमप्रभु यावे आ स्वर्ग डा गेय पाइब नु लोत्र पवा को? मोदेशो यो दुम्ने चाप्ब” देंमा बाक्त। प्रेरित २५:२५ 10 मिनु आन जिचा बारना बारन लशा, तुम्मुचा गोत्रमे बाक्त। मिनु लडाइ पाइब आन ठेयब मुर “पावल कली साइक्नीमी कोर में” दे हिंशा, सिपाही आन कली ब्रेश्शा, पावल कली गुंइशा, सिपाही आन बाक्तीके लेशशा चाक्पदा बाक्त। 11 मिनु मेको नाक्दो प्रभुमी पावल आ नेक्था जाक्शा “दोपा यरूसलेममी आं पर्बम शेंदीमी, मोपा रोम सहरमी यो आं पर्बम शेंशा सांकछी दुम्नेवे। मोपतीके महिंथु, ठेयब थुं पा बाक्को” देंमाक्त। प्रेरित १:८; प्रेरित २५:११-१२; प्रेरित २७:२३-२४

पावल कली साइक्चा माल्शो

12 मिनु आ दीसा सुनी यहूदीपुकीमी “पावल कली साइश्शो मतया सम्म मारेइ मजय, मतूय” दे कसम जशा, पावल कली साइक्चा सल्ला पामे बाक्त। 13 मोदेशो पा कसम जाइब ४० जना क्येडा शुश बाक्मा बाक्त। 14 मेकोपुकीमी ठेयब चढेब नु यहूदी आन जोक्ब तुइक्ब खाल्पा आन कली गुम्थ लशा “पावल कली साइश्शो मतका सम्म गो मारेइ मजाइनीकी मतूनीकी, दे कसम जाइतक। 15 मोपतीके गे ठेयब मुर नेल्लेमी गारशा, लडाइ पाइब आन ठेयब मुर कली

‘पावल कली मारेइ मारेइ हिल्लो पाइनीकी। मिनु एकेर सोइक्तीन’ दे मतीन। मिनु एर लां रे ग्रुंडशा पिदमेनु, लां उइ साइक्नीकी” देंमा बाक्त।

16 मेको लोत्र पावल आ भानीजमी नेंना बाक्त। मिनु सिपाही बाक्तीके लशा, पावल कली माल्शा गुम्शा तुइक्पदा बाक्त। 17 मिनु पावलमी कप्तान का ब्रेशशा “एको ठिटा कली लडाइ पाइब आन ठेयब मुर नु गुम्पतीने। मारदे हना लोत्र का निक्शी तुइक्पाइक्चा माल्ताक्व” देंमाक्त। 18 मिनु कप्तानमी ठिटा कली लडाइ पाइब आन ठेयब मुर आ बाक्तीके चाक्दीशशा “हजुर, चोक्सीशो पावलमी आं कली ब्रेशशा, एको ठिटा कली इन बाक्तीके चाक्दीत्चा। मारदे हना इन कली लोत्र का निक्शी तुइक्पाइक्चा माल्ताक्व देंशा, हजुर, इन बाक्तीक चोत्रथ सोइक्ताक्यी” देंमाक्त। 19 मिनु लडाइ पाइब आन ठेयब मुरुमी पावल आ भानीज कली गुइमी ग्याइशशा, सुइ मबाक्तीक कोठामी लाइशशा “मार देंचा दाक्नेवे, लो देनो” दे हिल्लो पवानु, 20 पावल आ भानीजमी “हजुर, यहूदीपुकीमी गारशा, पावल कली ग्रुंडशा, आंइ बाक्तीके सोइक्तीने। लोत्र का निक्शी हिल्लो पचा माल्ताक्व देंखु पा इन कली पुंडनीम। 21 मेको आन लोत्र मनेंचा। मारदे हना ४० जना क्येडा शुश मुरुमी पावल कली साइक्चा, दे लांम बाप्शा बाक्नीम। मेकोपुकीमी ‘पावल कली साइशशो मतका सम्म मारेइ मजाइनीकी, मतूनीकी’ दे कसम जने थुम्तेक्म। मिनु हजुरमी पावल कली गेना सोइक्बा, तेको लां रे सोइक्बा, दे योत्रकी पा बाक्शो बाक्नीम” देंमाक्त। 22 मिनु लडाइ पाइब आन ठेयब मुर “एको लोत्र सुइ कली मशेंदो” देंशा सोइक्ता बाक्त।

पावल कली सिजरिया सोइशशो

23 मिनु लडाइ पाइब आन ठेयब मुरुमी कप्तान निक्शी आस कली ब्रेशशा “एको चोक्सीशो पावल कली सिजरिया सहर चोत्रदीचा माल्ताक्व। मोपतीके गे निक्शीमी आपो नाक्दो ९ बजे सहे निक्शी सिपाही, ७० जना शारा डोइक्ब नु सहे निक्शी भाला शेयब आन कली साशा वोतीसे। 24 पावल कली यो शारा का साशा वोतीसे। लांमी पावल कली सुइमी मारेइ पाइक्ने मचाप्मेक्ल, दे रिम्शो पा हुकुम पाइब फेलीक्स आ डोंइती चाक्दीत्तीसे” दे माइक्सी बाक्त। 25 मिनु हुकुम पाइब कली चिठी ब्रेक्ता बाक्त। 26 मेको चिठीमी “हुकुम पाइब फेलीक्स हजुर, गो क्लौदीयस लिसीयस आं के नमस्ते। हजुर, आं के लोत्र का निक्शी नेनीने। 27 एको मुर कली यहूदीपुकीमी ग्याइशशा, हेरर हेररा साइक्तेक्म। साइक्चाम्तेक्म देंशो नेंशा, गो सिपाही आन कली लाइशशा, आन गुइ रे प्रोंइता। रोमी नागरिक बाक्माक्त, दे यो तुइक्ताक्ड। प्रेरित २१:३३; प्रेरित २२:२५ 28 एको के मार दोस बाक्मे? दे हिल्लो पथ यहूदी आन कछडमी लाइक्पाइक्ता। प्रेरित २२:३० 29 हिल्लो हिकसी पामेनु, यहूदी आन अरेतीक लोत्र आ पर्बम दोस गेमे बाक्त। जेल्खानमी चोक्चा, साइक्चा पुंडसीचा डा गेय मारेइ मपशो बाक्त, दे रुप्ता। 30 मिनु यहूदीपुकीमी ‘मेको कली साइक्चा, दे गारशो बाक्नीम’ देंशो नेंशा, हजुर, इन बाक्तीक सोइक्ताक्ड। एको कली दोस गेब आन कली ‘सिजरिया डा हुकुम पाइब आ बाक्तीक लने’ दे माइक्नुडमी” दे ब्रेक्ता बाक्त।

31 मिनु लडाइ पाइब आन ठेयब मुरुमी दोदेंशो देंमे, मोदेंशो पा कप्तान नु सिपाहीपुकीमी पावल कली लाइशशा गाक्मा बाक्त। मिनु नाक्दो रे गाक्शा, एन्तीपात्रीसमी जाक्दीम्मा बाक्त। 32 मिनु आ दीसा खोइलीमी गाक्बपुकी यरूसलेम लेम्मा बाक्त। शारा डोइक्बपुकीमी पावल कली सिजरिया चाक्दीत्मे बाक्त। 33 मिनु चाक्दीशशा, पावल नु चिठी मेको हुकुम पाइब कली जिम्मा गेमे बाक्त। 34 मिनु मेकोमी चिठी पढेशा, पावल कली “इ खिं ते में? तेको रागी डा नवे?” दे हिल्लो पवानु “सिलीसीया रागी डा नड, हजुर” देंमाक्त। प्रेरित २२:३ 35 मिनु हुकुम पाइबमी “लो मो हना इ कली दोस गेबपुकी जाक्मल। मिनु इ मुददा कोत्रनुड” देंशा हेरोद आ दरवारमी लाइशशा, खाल पाइब आन दातेमी वोइक्पदा बाक्त।

24

हुकुम पाइब आ डोंइती राप्पाइशशो

1 मिनु ५ नाक्त नोले ठेयब चढ़ेब हनानीया, यहूदी आन जोक्ब तुइक्ब खाल्पा का निक्शी नु तेरतुल्लस नें पाइशशो निसाफ पाइब का सिजरियामी जाक्मा बाक्त। मिनु हुकुम पाइब आ डोंइती पावल कली दोस गेमे बाक्त। 2 मिनु कछडी बाक्मा नाक्ती पावल कली हुकुम पाइब आ डोंइती राप्पदमेनु, तेरतुल्लस निसाफ पाइबमी दोस गेशा “माननीय फेलीक्स सरकार, हजुर, इन रिम्शो पा हुकुम पशोमी गो यहूदी नेल्ल थुं नाइशशा बाक्चा ताइतक। आंइ रागी रिम्शो सेल्चा कली नक लां कोंइताक्नी। मिनु नेल्ल आंइ कली थम रिम्शो दुम्त। 3 इन पशो मारेइ मारेइ रिम्शो बाक्ब, दे गो

नेल्लेमी तुइक्नीकी। 4 हजुर, कली शुश मक्योल्चा, दे मिम्नुड। तन्न लोव्र का चहिं पचा गेयीनी। 5 मेको इन डोंइती राप्पा वोइशशो मुर कली गो रिम्शो पा तुइक्नीकी। मेको मुर थम हिंचा डा रोइ खोदेशो बाक्ब। रागी रागी हिरशा गाक्मेनु, यहूदी आन कली पोक्शा मरिम्शो पपाइक्बाक्त। एको नासरथ डा दूली थमा सुइक्ब आन ठेयब मुर बाक्ब। प्रेरित १७:६ 6 मोशो ला ममाइ, काबु परमप्रभु यावे आ खिं ग्रांग्रा पचशो बाक्त। मिनु गोपुकीमी ग्याइशशा, मो पचा मगेक। गो आंइ धर्म डा अरेतीक लोव्र कोव्रशा, सजाइ पाइक्चा देशो नकी। प्रेरित २१:२८-२९ 7 तन्न लिसीयस लडाइ पाइब आन ठेयब मुरुम लोव्र पचा मगेथु, आ सिपाहीपुकी चाक्शा, आंइ कली हिंम हिंम पा आंइ गुइ रे रोइशशा लाइक्तु। 8 मेकोमी आंइ कली ‘मेको मुर आ दोस मार बाक्मे, मेको लोव्र हुकुम पाइब फेलीक्स कली मतीन’ दे हजुर, इन बाक्तीके सोइक्ताक्की। मुल एको मुर कली गे आंमान हिल्लो पना पन आ दोस नेल्ल गुंइने चाप्नीनी। मिनु आंइ गेशो दोस थमा बाक्माक्त, दे तुइक्नीनी” देमाक्त। 9 मेकेर बाक्ब यहूदीपुकीमी यो “एको लोव्र थमा बाक्ब” दे निसाफ पाइब आ देशो लोव्र थोक्शा देमा बाक्त।

10 मिनु हुकुम पाइबमी पावल कली लोव्र पचा गेवा बाक्त। मिनु पावलमी “हुकुम पाइब, हजुर, एको रागीम शुश बर्स डोंइती रे निसाफ पाइब बाक्नीनी, दे तुइशशा, गो ग्येरसीशा ठेयब थुं पा आन गेशो दोस नेंशा लोव्र लेत्नुड। मार लोव्र बाक्मे, मेको लोव्र नेल्ल देंनुड। 11 परमप्रभु कली मान पथ, गो एसीया रे यरूसलेममी जाक्शो १२ नाक्त लाइ यो लाक्शो मबाक्ब। आं देशो थमा मदाप्तीनी हना, सु कली हिल्लो पाइतीनी हना यो, नेल्लेमी देंनीम। प्रेरित २१:१७ 12 गो यरूसलेममी बाक्डानु, परमप्रभु यावे आ खिंमी, गुम्तीक खिंमी, सहर तेइ तेइ हिरशा, सुइ कली जिचा पोक्चा डा लोव्र मपड। मुर आन कली पोक्शा मरिम्शो यो मपपदुमी। सुइमी मोदेशो मरिम्शो पशो ताइतक देंने मचाप्नीम। 13 आं कली शुश अरु दोस यो गेतीमी। तन्न थमा पा गुंइशा कोइने मचबेम। 14 लोव्र का चहिं हजुर, इन कली रुप्पाइक्नन्नी, गो येसु ख्रीस्त आ लां खोइशशा गाक्नुड। मेकोपुकीमी मेको लां दूली बाक्ब, दे मिम्शो बाक्नीम। ख्रीस्त आ लां खोइशशा, साइ आं किकी पिपी आन परमप्रभु यावे कली ठेयब सेल्लुड। गो मोसा आ अरेशो लोव्र नु परमप्रभु यावे आ लोव्र पाइबपुकीमी ब्रेक्शो लोव्र नेल्ल थमा सुइक्नुड। 15 गो नु अर्को यो ठीक पाइब नु ठीक मपाइब बेक्शो रे सेंसीचा पुंइसीनीम, दे थमा सुइक्नीकी। दानीएल १२:२; यूहन्ना ५:२८-२९ 16 मोपतीके गो परमप्रभु यावे नु मुर आन डोंइती रिम्शो पाइनुड, दे आं थुं फ्रेंशा बाक्नुड। प्रेरित २३:१

17 मिनु मुल मार देंनुड देशा हना, गो शुश बर्स मुर आन रागीमी हिरथ लशा, साबेर गाबेर यरूसलेम लेशशा जाक्ती। आंम आंइ यहूदी मारेइ मथीब आन कली मार मार गेथ नु परमप्रभु यावे कली मार मार चढेथ लेशशा जाक्ती। रोमी १५:२५-२६; गलाती २:१० 18 गो चोव्रखो दुम्शा, परमप्रभु कली मार मार चढेडानु, मेकोपुकीमी परमप्रभु यावे आ खिंमी ततीमी। मेना गो आं का ला बाक्शो नड। मुर आन कली पोक्शा, मरिम्शो यो मपड। मोदेशो एकोपुकीमी यो मतशो बाक्नीम। प्रेरित २१:२७ 19 एसीया रे जाक्शो यहूदीपुकी यो परमप्रभु यावे आ खिंमी बाक्तेक्म। मेकोपुकीमी आं कली दोस गेचा गोम्तेक्म। गो दोस गेचा पुंइसीब मुर नड हना, मेकोपुकी एकेर जाक्शा, हजुर इन डोंइती देंचा माल्शो नमी। 20 साबेर यरूसलेममी कछडी पामेनु, मुल इन डोंइती जाक्शोपुकी यो बाक्शो नम। आं कली मार दोस गुंइदमे, मेको लोव्र हजुर, इन कली तुइक्पाइक्चा माल्शो नमी। 21 आं देशो लोव्र का आ पबर्म दोस गेतीमी, दे तुइक्नुड। मेको आं देशो लोव्र मार बाक्ब देशा हना ‘मुर बेक्शो रे सेंसीनीम’ दे थमा सुइक्नुड। मेको आ पबर्म आं कली मुददा कोप्ताक्कीमी। मिनु इन डोंइती राप्पाइय्यीनी, दे माइक्तामी। मिनु मुल इन डोंइती राप्पाइक्तीमी” दे पावलमी देमाक्त। प्रेरित २३:६

22 मिनु फेलीक्स, हुकुम पाइबमी, ख्रीस्त आ लां खोइक्चा आ पबर्म शुश लोव्र तुइशशो बाक्माक्त। मोपतीके “लिसीयस, लडाइ पाइब आन ठेयब मुर, जाक्शा नोले ला इन लोव्र नेंशा, निसाफ कोव्रशा खोइशशा गेनन्नी” दे बैठक पोक्शा सोइक्तीमी बाक्त। प्रेरित २३:२६ 23 पावल कली कप्तान आ गुइमी जिम्मा गेशा “सिपाहीपुकीमी कोव्रशा, एर ओंथ गाक्चा गेचा। आ वारच जाक्तेक्म हना, गुम्चा गेचा” दे वोइक्पदा बाक्त। प्रेरित २७:३

पावल सांकछी दुम्शो

24 इक्का नाक्त नोले हुकुम पाइब फेलीक्स नु आ मीश दुसील्ला जाक्सा बाक्त। आ मीश यहूदी तमी बाक्माक्त। मिनु पावल कली चाक्पाइशशा, ख्रीस्त कली थमा सुइक्चा आ पबर्म लोव्र पपदसे बाक्त। 25 मिनु पावलमी “ठीक पशो नु ठीक मपशो मार बाक्बा, इं थुं नु रां कली दोपा अरेचा नु परमप्रभुमी मुर नेल्ल आन कली निसाफ पाइब” दे शेंदानु, फेलीक्स हिंशा “लो मोक्ल, मुलाक्ती ओशो ला लोव्र पय। इ लोव्र दीसा नित्थ लेंशा नेंनुड” दे सोइक्ता बाक्त।

26 फेलीक्समी “पावलमी क्येट सुइक्बा कों” दे यो आस पशो बाक्माक्त। मिनु लेंशा ब्रेप्बाक्माक्त। 27 मोपा ब्रेत्ता ब्रेत्ता बर्स निकशी योल्माक्त। मिनु फेलीक्स अर्को रागीमी याक्से बाक्त। आ पा डा हुकुम पाइब पोरसीयस फेस्तस जाक्माक्त। फेलीक्समी यहूदी आन कली ग्येरपाइक्चा, दे पावल आ मुददा मख्रोइक्थु, चोक्स डा चोक्स वोइश्शा गाक्माक्त।

25

फेस्तस आ डोंइती राप्पाइश्शो

1 फेस्तस हुकुम पाइब दुम्शा, आ सांबु नाक्ती सिजरिया रे गाक्शा, यरूसलेम ग्येत्थ लमाक्त। 2 मिनु यरूसलेममी बाक्मेनु, ठेयब चढेबपुकी यहूदी आन ठेयब मुरपुकीमी गुम्थ जाक्शा, फेस्तस कली पावल आ पर्बम लोत्र पामे बाक्त। 3 मार देमा बाक्त देशा हना “पावल कली यरूसलेम लेशशा सोइश्शा, आ मुददा कोव्रचा माल्ताक्व” दे शुश लोत्र पा पुन्मे बाक्त। मारदे हना, लांमी बाप्शा, साइक्चा, दे लोत्र पशो बाक्मा बाक्त। प्रेरित २३:१५ 4 मिनु हुकुम पाइब फेस्तसमी मेको आन लोत्र नेंशा, आन पुंइशो मगेथु “पावल कली सिजरियामी चोक्स डा चोक्स वोइश्शा पिती। मुल शुश नाक्त मबाक्थु, मेरेन लेशशा लाइनुड। 5 मोपतीके अधिकार तशो इन मुर का निकशी योव्रशा, गो नु सोइक्तीने। मिनु सिजरियामी जाक्दीश्शा, मुददा कोव्रनुड। मेको मुरुमी मरिम्शो पशो बाक्त हना, दोस गुंइने चाम्सीब” दे माइक्मी बाक्त। 6 मिनु ८, १० नाक्त बाक्शा, सिजरिया लेशशा यिमाक्त। मिनु आ दीसा नाक्ती कछडी वोइश्शा, पावल कली चाक्पाइश्शा, आ डोंइती राप्पदा बाक्त। 7 मिनु आ डोंइती राप्पदानु, यरूसलेम रे जाक्शो यहूदीपुकीमी शुश दोस गेमे बाक्त। तन्न लोत्र का यो थमा बाक्ब, दे कोंइने मचाप्मे बाक्त।

8 मिनु पावलमी “आंइ यहूदी आन अरेशो लोत्र का यो दूली मपड। परमप्रभु यावे खिं ग्रांग्रा मपड। रोमी पिप सिजर कली यो मरिम्शो मदेड” देमाक्त। 9 फेस्तसमी यहूदी आन कली ग्येरपाइक्चा दाक्ता बाक्त। मोपतीके पावल कली “गे यरूसलेम लचा दाक्नेवे? इ मुददा मेरेन कोव्रशा गेनन, दुम्बा?” दे हिल्लो पवा बाक्त। 10 मिनु पावलमी “मदुम्ब हजुर, मारदे हना सिजर आ निसाफ पाइबपुकीमी कका आं मुददा कोव्रचा माल्नीम। यहूदी आन कली मरिम्शो मारेइ मपड, दे हजुर, गे यो तुइक्नीनी। 11 गो दूली पाइब दुम्शा, साइक्चा पुंइसीचा डा बाक्ती हना, सजाइ जाइनुड। बेक्चा यो महिनुड। आं कली दोस गेबपुकीमी दोस गुंइने मचाप्तेक्म हना, आन गुइमी दोपा गेचा पुंइसीनुडा? सिजर पिपी कली आं मुददा कोव्रचा गेने, देनुड” दे मदा बाक्त। प्रेरित २३:११; प्रेरित २८:१९ 12 मिनु फेस्तसमी आ मुरपुकी नु पावल आ मुददा मार पचा, दो पचा, दे लोत्रसी पने थुम्शा, पावल कली “गे सिजर पिप कली इ मुददा कोव्रचा गेचा देते। मोपतीके सिजर पिप आ बाक्तीके सोइक्नन” दे माइश्शा, कछडी पोक्शा सोइक्तीमी बाक्त।

अग्रीप्पा नु फेस्तस लोत्र पशो

13 मिनु इक्का नाक्त नोले पिप अग्रीप्पा नु बेरनीस हुकुम पाइब फेस्तस कली गुम्थ सिजरिया जाक्सा बाक्त। 14 मिनु शुश नाक्त बाक्सानु, फेस्तसमी पिप कली पावल आ पर्बम “एक फेलीक्समी मुददा मख्रोइक्थु चोक्शा वोइश्शो मुर का बाक्ब। प्रेरित २४:२७ 15 मिनु यरूसलेम लडानु, ठेयब चढेब नु यहूदी आन शेंब खाल्पापुकीमी एको मुर आ पर्बम नेल्ल तुइक्पाइक्तीमी। शुश दोस गेम्तेक्म। मिनु मेको कली सजाइ गेचा, दे पुंइतेक्म। 16 गो मेको आन कली ‘कछडी वोइश्शा, दोस गेबपुकी नु दोस गेचा पुंइसीब कली मगुम्पाइक्थु, दोस मगुंइथु, सजाइ गेचा आंइ रोमी ऐन कानुनम मगारब। दोस गेचा पुंइसीबमी एको आन देशो थमा बाक्ब, दे मदेम सम्म सजाइ गेचा मदुम’ दे माइक्तामी। प्रेरित २२:२५ 17 मिनु दोस गेबपुकी एक जाक्मा आ दीसा नाक्त कछडी वोइश्शा गुम्पदुमीनु, 18 एको मुरुमी मुर साइश्शो बाक्मे कों, दे मिम्शो नड। तन्न दोस गेमेनु, दोस मारेइ मबा। 19 आन जिमुशो दा आन धर्म आ पर्बम कका बाक्माक्त। लोत्र का दोपा परमप्रभु कली मान पचा आ पर्बम, लोत्र का येसु माइश्शो मुर आ पर्बम बाक्माक्त। यहूदीपुकीमी मेको मुर बेक्त देबाक्तेक्म। तन्न पावलमी चहिं बेक्शो रे सेंसीशा ब्रोंइशो बाक्ब देबाक्त। 20 मिनु गो मार पड, दो पड दुम्ती। मोपतीके गो पावल कली ‘यरूसलेम लशा, मेरेन इ मुददा कोव्रचा दुम्बा?’ दे हिल्लो पाता। 21 मो देडानु, पावलमी ‘अगस्टस कली आं मुददा कोव्रचा गेने। सिजर आ बाक्तीकेमी मसोइक्तीनी सम्म चोक्शा वोइय्यीनी’ दे पुंइतु। मिनु गो रिम्शो पा वोइक्पाइक्ता। मिनु गेना सोइक्तु, दे लां कोव्रना कोव्रन बाक्ती” देमाक्त। 22 मिनु अग्रीप्पामी फेस्तस कली “गो मेको मुर आ लोत्र नेंचा दाक्नुड” देमेनु “सरकार, दीसान इन डोंइती राप्पाइक्नुड” देमाक्त। लूका २२:८

अग्रीप्पा आ डोंइती राप्पाइश्शो

23 मिनु आ दीसा अग्रीप्पा नु बेरनीस नु सहर डा सरकार आ ठेयब मुरपुकीमी सरकारी वा फेक्शा जाक्शा, दरवारमी देल्मा बाक्त। मिनु फेस्तसमी पावल कली चाक्पाइश्शा, नेल्ल आन डोंइती राप्पदा बाक्त। 24 मिनु फेस्तसमी “सरकार अग्रीप्पा, एकेर देल्शो हजुरपुकी, आं लोत्र का निक्शी नेनीने। एको इन डोंइती राप्पाइश्शो मुर कोवडीने। यहूदी नेल्लेमी एको कली मरिम्शो मुर, दे दोस गेनीमी। यरूसलेम नु एकेर कछडी वोदमेनु ‘मेको कली साइक्चा माल्ब’ देंन देंन रेयके पाम्तेकम। प्रेरित २२:२२ 25 गो चहिं मो देंशो साइक्चा पुंइसीब मुर मतड। मिनु एकोमी यो रोमी पिप सिजर अगस्टस कली आं मुददा कोवचा गेने, दे पुंइतु। मिनु सिजर आ बाक्तीके सोइक्तु देंती। 26 तन्न सिजर कली एको मुर आ पर्बम मार लोत्र ब्रेक्चा डा? आ दोस गुंइने मचबु। मोपतीके मुलाक्ती अग्रीप्पा सरकार नु हजुर नेल्ल इन डोंइती राप्पाइक्ता। गो नेल्लेमी हिल्लो हिक्सी पा दोस गुंइताक्य हना, सिजर पिप कली ब्रेक्शा सोइक्ने चाप्नुड। 27 मारदे हना ओं पा ग्याइश्शा फ्रेंशो मुर कली दोस का यो मगुंइथु, सिजर पिप बाक्तीके सोइक्ताकड हना, मुने दोक्सीब, दे मिम्ताकड” देंमाक्त।

26

पावलमी सांकछी गेशो

1 मिनु पिप अग्रीप्पामी पावल कली “इ लोत्र मार बाक्मे, मेको देनो” दे लोत्र पचा गेवा बाक्त। मिनु पावलमी गुड का पोक्शा, 2 “अग्रीप्पा सरकार, यहूदीपुकीमी शुश दोस गेतीमी। मिनु मेको दोस आ पर्बम हजुर नु लोत्र पचा तडानु, गो ग्येरसाक्यी। 3 मारदे हना यहूदी आन पतीके नु गारचा डा मगारचा डा लोत्र नेल्ल हजुरमी, रिम्शो पा तुइश्शो बाक्नीनी। लोत्र शुश बाक्ब। मोपतीके मब्रीथु, हजुरमी, नेंशा गेचा नड। 4 गो आल रे यरूसलेममी बाक्शा, यहूदी नेल्लेमी आं कली तुइश्शो बाक्नीमी। 5 मेकोपुकी गो शुश धर्म पाइब फरिसी का बाक्ती, दे डोंइती रे तुइक्नीमी। मेकोपुकीमी गो फरिसी का बाक्ती, दे सांकछी दुम्ने चाप्नीम। प्रेरित २३:६; फिलिप्पी ३:५ 6 परमप्रभु यावेमी आंइ किकी पिपी आन कली लोत्र गेशो बाक्माक्त। मिनु मेको लोत्र आ पर्बम दोस ताइब दुम्ती। प्रेरित २८:२० 7 मिनु मेको लोत्र नेल्ल खाप्ब, दे आंइ १२ थर डा यहूदी नेल्लेमी थमा सुइश्शा, परमप्रभु यावे कली नाक्दो नाक्त ठेयब सेल्शा बाक्नीकी। मेको आन थमा सुइश्शो खोदेशो पा गो यो थमा सुइक्ब का नड। मेको थमा सुइश्शो आ पर्बम आं कली दोस गेतीमी, अग्रीप्पा सरकार। प्रेरित २४:१५ 8 परमप्रभु यावेमी बेक्शा लशो आन कली सेंपाइश्शा गेना हना यो ब्रोंइशा बाक्चा गेब देंशो लोत्र थमा सुइक्तीक लोत्र ममाइ डा? हजुरपुकी, एको लोत्र मारदे थमा सुइक्ने मचाप्नीनी? प्रेरित २३:८

9 साइ गो दोपा यो मेको नासरथ डा येसु आ नें क्याम्चा, दे मिम्शो नड। प्रेरित ९:१-२९; प्रेरित २२:३-२१ 10 यरूसलेममी मेको आ नें क्याम्तीक गेय पा गाक्ती। ठेयब चढेबपुकी रे अधिकार तशा, थमा सुइक्ब शुश आन कली जेल्खानमी चोक्पाइक्तामी। मोशो ला ममाइ, थमा सुइक्ब आन कली सदमेनु, गोमी ‘रिम्शो पाइतीनी’ देंती। 11 थमा सुइक्ब आन कली आंइ गुम्तीक खिं खिंमी कीशा चाक्शा तुप्शा, येसु आ नें मरिम्शो सेल्पाइश्शा, मुल डा मेरे मेको लां मखोइक्नीकी देंपाइक्तामी। नेल्ल आन कली साइक्पाइक्नुडमी, दे जोंब बोक्शा गाक्ती। यरूसलेममी ला ममाइ, डोन डोन रागी लशा, खेदा पा श्येत गेतामी।

12 मोपा श्येत गेना गेन गाक्डानु, काबु ठेयब चढेब आन अधिकार तशा, वारच नु गारशा, दमस्कस सहर गे लाइतक। 13 अग्रीप्पा सरकार हजुर, मुल नोफा दाइश्शा नेनीन। नाक्ती उइक्थ दुम्मेनु गाक्कानु, मार दुम्त देंशा हना, नां पशो क्येडा छेडछेड सरीड रे यिशा, आंइ एर ओंथ कोइताक्व। 14 मोदेशो छेडछेड दुम्शो तशा, गो नेल्ल दिड दाड गोल्तक। मिनु हिबू लोत्र पा आं नें थिशा ‘सावल, सावल आं कली मारदे खेदा पा श्येत गेयी? गे आंमा श्येत जाइनेवे’ दे लोत्र पशो नेंता। 15 मिनु गोमी ‘प्रभु, सु ननी’ दे हिल्लो पडानु ‘इ खेदा पशो येसु नड। 16 मुल छुल बोक्को। इ कली योव्रशा आं लोत्र नेंपाइक्ब सेल्तन। मुलाक्त इ कली तपांइसाक्यी। मुल डा मेरे इ कली तपांइसीन सीन बाक्नुड। मिनु मुलाक्ती तशो नेंशो खोदेशो पा नोले यो नेंनेवे, ताइनेवे। मेको लोत्र नेल्ल नेंपाइक्ब सेल्तन। 17 आं लोत्र शेंथ सोइक्नन। आं लोत्र नेंपा गाक्डेनु, यहूदी नु अर्को रागी डा मुर आन गुड रे प्रोंइनुड। 18 मारदे हना मेकोपुकी मिक्च ताइब दुम्मल। छिडछिडमी बाक्शोपुकी छेडछेडमी बाक्चा तामेक्ल। सैतान आ अधिकारमी बाक्शोपुकी परमप्रभु यावे आ अधिकारमी बाक्ब दुम्मल। मेको आन पाप क्याम्चा पुंइसीशा, आं कली थमा सुइश्शोमी आं मुरपुकी नु काथा दुम्शा, आं मुर दुम्मल’ देंशो नेंता। प्रेरित २०:३२

19 अग्रीप्पा सरकार, परमप्रभुमी कोइशो कोइतीक तशा, आ लोव्र नेंशा, मेको लोव्र टीब दुम्ती। गलाती १:१६ 20 दमस्कसमी जाकदीशशा, लोव्र शेंचा गोव्रता। मिनु यरूसलेममी, यहूदीया रागी हिरशा गाक्ती। अर्को रागी डा मुर आन रागी रागी हिरशा गाक्ती। मोपा गाक्डानु, मुर आन कली 'पाप पचा प्रोइशा, इन थुं परमप्रभु यावे गे हिरदीने। मिनु परमप्रभु कली शिरशो गेय पा इन थुं थमा पा हिरशो बाक्त, दे कोइदीने' दे शेंना शेंन गाक्ती। 21 मोदेशो शेंशो आ पर्वम यहूदीपुकीमी परमप्रभु यावे आ खिमी ग्याइशशा दोस गेशा, साइक्चा पुंइसीब, दे साइक्चा माल्तीमी। प्रेरित २१:३०-३१ 22 खेदा पा शुश श्येत गेयीमीनु, परमप्रभु यावेमी श्येत फाल्तीक सक्ति गेती। मोपतीके गो ठेयब थुं पा इन डोंइती राप्शा, ठेयब मुर आइक्च मुर नेल्ल इन कली आं लोव्र मोसा नु परमप्रभु यावे आ लोव्र पाइब आन लोव्र नु गारब, दे रूपीन। लूका २४:४४-४७ 23 मेकोपुकीमी 'ख्रीस्तम श्येत जचा माल्ब' दे ब्रेक्शो बाक्शो बाक्तेक्म। मिनु बेक्शो रे सेंसीशा ब्रोइशा बाक्ब। बेक्शो रे सेंचा पुंइसीबपुकीमी नेल्ल आन क्येडा डोंइती मेको येसु ख्रीस्त बेक्शो रे सेंसाक्ब। मिनु मोपा यहूदी नु अर्को रागी डा मुर नेल्ल आन कली छेडछेड दुम्शो खोदेशो पा आन लां कोइब दुम्त" दे पावलमी सांकछी गेशा शेंदीमी बाक्त। १कोरिन्थी १५:२० 24 मोपा लोव्र पना पन लदानु, हुकुम पाइब फेस्तसमी आ लोव्र खोइशशा "पावल, गे बौला, शुश शेंसीशा जोक्ब तुइक्ब दुम्शा, निप्स ग्यशो कका दुमे बाक्त" दे ठेयब सेंदा पा देंमेनु, 25 पावलमी "माननीय फेस्तस हजुर, गो बौला मनड। गो थमा पा आं तुइशशो रिम्शो लोव्र पाता। 26 अग्रीप्पा सरकारमी आं देंशो लोव्र नेल्ल रुप्शो बाक्ब, दे तुइक्ताक्ड। मोपतीके आं ग्राकी लोकशा लोव्र पाता। सरकारमी ख्रीस्त आ पर्वम ब्रशो शुश लोव्र नेंशा रुप्शो बाक्माक्त। ख्रीस्त आ पर्वम दुम्शो चहिं का निक्शीमी ला तुइशशो मनमी। शुशेमी तुइशशो बाक्नीमी। यूहन्ना १८:२० 27 अग्रीप्पा सरकार, परमप्रभु यावे आ लोव्र पाइब आन लोव्र थमा सुइक्नुड मदेतीनी हना यो, इन थुंमी थमा सुइक्नीनी, दे तुइक्ताक्ड" देंमाक्त। 28 मिनु पिप अग्रीप्पामी "लोव्र का निक्शीमी गो ख्रीस्त कली थमा सुइक्ब दुम्ती" देंमेनु, 29 पावलमी "लोव्र का निक्शी पशा हना यो, शुश पशा हना यो, दोपा यो आं खोदेशो दुमीन, दे मिम्नुड। सरकार ला ममाइ, एकेर खुम्सीशा बाक्ब नेल्ल आं खोदेशो दुम्मल। तन्न ग्याइशशा साडलोम पाइशशा जेल्खानमी चोक्चा चहिं मपुंइसमल, दे पुंइनुड" देंमाक्त। 30 मो देंमेनु, पिप छुल बोक्शा गाक्माक्त। मिनु हुकुम पाइब, बेरनीस नु मेकेर बाक्ब नेल्ल छुल छाल बोक्शा गाक्मा बाक्त। 31 मिनु गाक्मानु "एको मुर रिम्शो बाक्माक्त, जेल्खानमी चोक्चा डा, साइक्चा पुंइसीचा डा मबा" देंमुशा गाक्मा बाक्त। 32 मिनु पिप अग्रीप्पामी हुकुम पाइब फेस्तस कली "एको मुरुमी सिजर कली आं मुददा कोव्रचा गेने, दे मपुंइशो हना, प्रोइशा सोइक्ने चाप्स वा" देंमाक्त। प्रेरित २५:११

27

पावल कली रोम सोइशशो

1 मिनु पावल कली सिजर बाक्तीके इटाली सोइक्ची जाक्माक्त। मिनु पावल नु अरु चोक्चा पुंइसीशो का निक्शी आन कली अगस्टस पल्टन डा युलीयस नें पाइशशो कप्तान आ गुइमी जिम्मा गेमे बाक्त। मिनु गो पावल आ वारच का निक्शी यो सासाक्क। प्रेरित २५:१२ 2 सिजरिया रे लशा, अद्रामीत्तीयम जाकदीशशा, एसीया लाइब जहाज डोइशशा लाइतक। मासीडोनीया डा थिस्सलोनीकी रे जाक्शो अरीस्तारकस पावल आ वारच का यो गोपुकी नु लत। प्रेरित २०:४ 3 मेकेर रे लशा, आ दीसा नाक्त सीदोन जाकदीत्तक। मेकेर जाकदीक्कानु, कप्तान युलीयसमी पावल कली रिम्शो पा आ वारच आन कली ग्रुथ लचा गेप्टु। मिनु मेकोपुकीमी पावल कली रिम्शो पाम्तेक्म। प्रेरित २४:२३; प्रेरित २८:१६ 4 मिनु लेशशा जाक्शा, जहाज डोइशशा, लाइतक। मिनु साइप्रस आ नेक्नेक्था जाकदीत्तक। मारदे हना फश गिवारमी आइदी लां लचा मगेव। 5 मिनु सिलीसीया नु पाम्फिलीया रागी आस दी डा लां पा लिसीया रागी डा मिरा सहरमी जाकदीशशा तोंइसाक्क। 6 मिनु कप्तानमी अलेक्जेन्दीया रे जाक्शो इटाली लाइब जहाज थिश्शा, नेल्ल आंइ कली मेकोमी डोइक्पाइक्तीकी। 7 मिनु लकानु, शुश फश गिवार पा तेक्तीके श्येत पा ओंखां ओंखां लशा, कनीदोस रागी आ नेक्था जाकदीत्तक। फश गिवार मलीथु, आइक्था रे पा साल्मोने नु क्रेट टापु आस नेक्नेक्था लां रे पा लाइतक। 8 मिनु श्येत पा क्रेट टापु डा जहाज नाइक्तीके जाकदीत्तक। मेको जहाज नाइक्तीके दारशो जहाज नाइक्तीक नें वोइशशो बाक्त। मेको लासेया सहर आ नेक्था सेल्शो बाक्त।

9 फश गिवारमी तेक्तीके क्रेटमी जाकदीत्तका यो शुश नाक्त लाक्शा, माइजा बाक्तीक लाइ यो लाक्तु। में डा मेरे जहाज चलेचा हिंचा पाइब। २कोरिन्थी ११:२५-२६; लेवी १६:२९ 10 मोपतीके पावलमी जहाज चलेब आन कली "हजुरपुकी, एक डा लाक्शा लाइतय हना, फश गिवारमी योल्ब। जहाज नु जहाजमी कुर पशो थोव्रक नेल्ल जाम्ब,

गोपुकी यो ब्रोंइचा मताइनय दे तुइश्शो बाक्नुड। मोपतीके मलचा” देंत। 11 कप्तानमी चहिं पावल आ देशो लोव्र थमा मसुइक्थु, जहाज आ होव्रप नु चलेब आन लोव्र नेंतु। 12 मेकोपुकीमी “हिउंदमी एकेर बाक्चा मदुम्ब” देंतेक्म। मो देंमानु, अरुमी यो “मो हना फोनीकस गे लचा” देंतेक्म। फोनीकसमी जाक्दीन्ने चाप्नय। मिनु मेकेरेन हिउंद लाक्चा रिम्शो दुम्ब देंतीके लाइतक। फोनीकस चहिं क्रेट टापु डा नेल्ल क्येडा पच्छिममी बाक्ब।

13 मिनु लना लन बाक्कानु, दक्खिन रे इचीची फश पवानु, मुल रिम्शो चलेसीब देंशा, जहाज तिकतीके क्युक्शा वोइश्शा, क्रेट आ नेक्था लां लाइतक। 14 मिनु में चोटीन टापु रे फश गिवार यिशा सुम्तु। मोदेशो फश गिवार कली उत्तर पूब डा फश, दे नें वोइश्शो बाक्ब। 15 मोपा सुम्कीनु, जहाज लतीक लां लाइक्ने मचबेम। मोपतीके फश गिवारमी तेइ योल्दल, दे चलेचा प्रोंइतेक्म। 16 मिनु कौदा माइश्शो टापु आ ता जाक्दीश्शा, टापुमी फश गिवार इचीची फारताक्व। मिनु शुश श्येत पा इम्ची डोंगा ब्वाक्कुम तोक्शा, मेको डोंगा रे गेय पा जहाज कली ठेयब ठेयब डोरीम फ्रेंशा बोल्यो सेल्लेक्म। 17 मिनु सिरतीस माइश्शो बाल्वा बाक्तीकेमी जहाज मओव्रदील, दे जहाज कीब वा फ्रुप्शा, ओंखां ओंखां पा जहाज लचा गेम्तेक्म। 18 फश गिवार काइ यो मनाइक्थु पना पन बाक्त। मिनु आ दीसा जहाज सोपी दुम्ल, दे जहाजमी कुर पशो भारी शोल्ला ताइक्ताक्मे। 19 मिनु आ नित्थ नाक्ती जहाज कली माल्लशो थोव्रक यो ताइक्ताक्मे। मिनु शुश नाक्ती सम्म फश गिवार पना पन नां तास्ला सोरुल मारेइ मतांइसे। 20 मिनु गोपुकीम ब्रोंइचा मतांइसीबाक्त, बेक्सीबाक्त देंतक।

21 गो शुश नाक्ती सम्म मारेइ मजथु बाक्तक। मिनु पावलमी जहाज चलेब आन डोंइती राप्शा “हजुरपुकी, साबेर आं देशो लोव्र टिचा माल्लशो ननी। गोमी क्रेट मलचा देंती। गोपुकीमी आं देशो टिशो ननी हना, जहाजमी कुर पशो नु जहाज डा थोव्रक मारेइ ताइक्चा ममाल्द वा। गो यो ओदेशो श्येत मजय वा। 22 मुल मोदेशो दुम्त हना यो, इन थुं बारपा बाक्कीने। मारदे हना सुइ यो मबेक्नय। जहाज ला जाम्शा लाइब, दे तुइक्ताक्ड। 23 दोपा तुइक्ताक्ड देंशा हना, गो परमप्रभु यावे कली ठेयब सेल्लुड, मेको आ मुर नड। परमप्रभु यावेमी आ स्वर्ग डा गेय पाइब का कली सोइश्शा, सिनाक्दो आं डोंइती राप्शो ताता। 24 मेकोमी ‘पावल, महिनो। गे सिजर पिप आ डोंइती राप्चा माल्लेवे। ब्वाक्कुम गुम्शा मबेक्नेवे। परमप्रभु यावेमी गे नु बाक्ब नेल्ल यो मबेक्थु, इन कली गेप्टु’ दे माइक्ती। प्रेरित २३:११ 25 मोपतीके इन थुं बार पा बाक्कीन, हजुरपुकी। परमप्रभुमी आ देशो का यो मप्रोंइथु, नेल्ल खाप्ब, दे थमा सुइक्नुड। प्रेरित २८:१ 26 मुल जहाज टापु जाक्दीश्शा, ख्रा दिक्ब, दे तुइक्नुड” दे माइक्तीमी।

27 मिनु १४ नाक्त मोपा योल्स डा योल्स पा अद्रीया समुन्द्र लाक्शा, काबु नाक्दो जहाज चलेबपुकीमी तेक कका डा रागी तांइसीशो खोदेशो ताम्तेक्म। 28 मिनु ब्वाक्कु पुक्तीके खुम्शा पुक्गामेनु, २० ओरग्या बाक्त। मिनु इच्ची नोले बारशा लशा लेंशा पुक्गामेनु, १५ ओरग्या बाक्त। ओरग्या का १,८५ मिटर बाक्ब। 29 मिनु सेरथे फुल्लुम थोक्सीशा, जहाज बिग्रेसीब देंशा जहाज तिकतीके ४ ओटा तोक्शा, जहाज कली तिकशा नाइक्पाइक्तेक्म। मिनु गेना नां सोव्रबा, दे रिम्शा बाक्तक। 30 नां मसोव्रथु जहाजम गेय पाइबपुकीमी जहाज तिकतीके तोक्खु पा आइक्च डोंगा तोक्शा, जहाज प्रोंइशा प्रोक्चा माल्ले बाक्त। 31 मिनु पावलमी मेको आन मो पचशो तुइश्शा, कप्तान कली “मेकोपुकी प्रोक्शा गाक्तेक्म हना, गो नेल्ल गुम्शा बेक्नय” दे माइक्तु। 32 मिनु सिपाहीपुकीमी डोंगा डा डोरी खोइश्शा तोक्शा, मेको आन कली प्रोक्चा मगेम।

33 मिनु नां सोव्रमेनु पावलमी नेल्ल आन कली “मजशो, मइप्शो मुलाक्त १४ नाक्त दुम्त। 34 मोपतीके मुल इच्ची खोइ जय। मिनु बोल ताइनय। महिनीन। मारदे हना सुइ के चां का यो महेम्ब” दे नेल्ल आंइ थुं बारपाइक्तु। मत्ती १०:३० 35 मिनु शोब्ले आ गुइमी शेशा, प्रभु कली “गे रिम्शो पाइब बाक्नीनी” देंशा, जिक्शा नेल्ल आंइ कली योक्तु। 36 मिनु नेल्ल आंइ थुं बारशा जाइतक। 37 मेको जहाजमी २७६ जना मुर बाक्शो नकी। 38 मिनु रूथ्री जशा, जहाजमी कुर पशो चेरब ताइक्ताक्म।

39 मिनु नां सोव्रमेनु, मेको डोंइती तांइसीशो रागी मार रागी बाक्मे, दे मतुइक्तक। बाल्वा ला तांइसाक्व। 40 मेको बाल्वा बाक्तीके चाक्दीश्शा, जहाज तिकतीके खोइश्शा, ब्वाक्कुमी प्रोंइतेक्म। मिनु चलेतीके आ डोरी प्राक्शा, वा क्युक्शा वोइश्शा, फशेमी जहाज कली गाक्पा बाल्वा गे लाइक्तेक्म। 41 मो पामेनु, जहाज बाल्वामी ओव्रदीश्शा, आ शोव्र गुक्साक्व। आ मीलु चहिं ब्वाक्कुम आप्शा जिक्त। 42 एको चोक्सीशा लाइश्शोपुकी प्रोक्नीमी कोर में, दे हिंशा, सिपाहीपुकीमी मेको आन कली प्रोक्चा मगेथु साइक्चा, दे मिम्शो बाक्मा बाक्त। 43 कप्तानमी चहिं “पावल कली मसाइक्थु ब्रोंइचा गेचा” दे आ थुं फ्रेंशो बाक्माक्त। मोपतीके सुइ कली साइक्चा मगेव। दोम्ली ग्यारस जोक्ब आन

कली दोम्ली ग्यारशा रागीमी गूडीन, दे सोइक्ताक्मी। 44 दोम्ली ग्यारस मजोक्बपुकीमी चहिं जहाज डा शी फलेक ग्याइश्शा डोइश्शा रागीमी गूमल देंत। मोपा सुइ मगुमथु नेल्ल ब्रोंइशा रागीमी गूतक। प्रेरित २७:२२-२५

28

माल्टाम बाक्शो

1 मेको रागीमी गूकानु, माल्टा नें पाइश्शो टापु बाक्माक्त, दे तुइक्ताक्क। 2 मेको टापुमी बाक्बपुकीमी आंइ कली तशा, शिशी पा शुश रिम्शो पा वारच पांम्तेक्म। मेकेर थम ग्यू पा रेउ यित। मोपतीके मेकोपुकीमी मी मुइश्शा थेरपाइक्तीकी। २कोरिन्थी ११:२७ 3 मी थेरना थेरन बाक्कानु, पावलमी एर ओंथ डा शी खुप्शा चाक्शा चोवानु, मीम होशा गूशो बुस्स कामी आ गुइमी गिल्शा कोक्तु। 4 टापुमी बाक्बपुकीमी पावल आ गुइ बुस्सुम गिल्शो तशा “एको मुर मुर साइक्ब बाक्माक्त। समुन्द्रमी फश गिवार पा गुम्शा हेररा बेक्शा यो ब्रोंइशा, रागीमी गूशा यो बुस्सुमी कोक्शा बेक्ब दुम्त” देंमुम्तेक्म। 5 पावलमी आ गुइ थुर थुर पा बुस्स कली मीम हुम्ताक्व। मिनु आ कली मारेइ मदुम। मर्कूस १६:१८ 6 मुरपुकीमी पावल कली कोव्रस डा कोव्रस पांम्तेक्म। मारदे हना बुस्सुमी कोक्शो मुर इच्ची होम्शा बेक्ब, दे मिम्शो बाक्मा बाक्म। मिनु कोव्रस डा कोव्रस बाक्मानु, मारेइ मदुम। मोपतीके आन थुं हिरशा “मुर साइक्ब मुर ममाइ, देवता कका बाक्माक्त, है” देंमुम्तेक्म। प्रेरित १४:११

ठेयब मुर आ आफ सापाइश्शो

7 मेको टापु डा ठेयब मुर आ नें पुब्लीयस बाक्माक्त। आंइ जाक्दीत्तीके आ नेक्था पुब्लीयस आ रू, खिं बाक्त। मिनु पुब्लीयसमी आंइ कली गुम्शा, आ खिं लाइश्शा, नाक्त सां सम्म बास जचा तूचा गेशा रिम्शो पाइक्तीकी। 8 पुब्लीयस आ खिंमी बास बाक्कानु, आ आफ ख्युर पा जरो पा रोइ पशो बाक्त। मिनु पावलमी रोइ पाइब कली गुम्थ लशा, आ गुइ मेको तारी वोइश्शा, प्रार्थना पा सापाइक्तु। 9 मोपा सापाइश्शो तशा, टापु डा रोइ पशो मुरपुकी जाक्शा, आन रोइ सापाइसाक्म। 10 मिनु टापु डा मुर नेल्लेमी ग्येरसीशा, आंइ कली मार मार चाक्शा गेम्तेक्म। गाक्चकानु लांमी जचा कली लाम्जी कुम्ज सेल्शा कुरपा सोइक्ताक्म।

रोम जाक्दीश्शो

11 मेको टापुमी महिना सां सम्म बाक्तक। अलेकजेन्द्रीया रे जाक्शो कस्तोर नु पोल्लुक्स माइश्शो जौले आस नें पाइश्शो जहाज माल्टामी हिउंदमी बाक्बाक्माक्त। मिनु हिउंद लाक्शा, मेको जहाज डोइश्शा गे लाइतक। 12 मिनु सिराकुसमी जाक्दीश्शा, नाक्त सां सम्म बाक्तक। 13 मेकेर रे लशा इच्ची हेरशा, रेगीयम जाक्दीत्तक। मिनु आ दीसा दक्खिन रे फश पशोमी नाक्त निक्शीमी पुटेओलीमी जाक्दीत्तक। 14 मेकेर जाक्दीश्शा, जहाज रे तोइश्शा, सहर लाइतक। मिनु थमा सुइक्ब लोकब आन कली गुम्कानु, मेकोपुकीमी “बाक्कीन, बाक्कीन” देंतीके ७ नाक्त सम्म बाक्तक। मिनु रोम सहर गे लाइतक। 15 रोम सहरमी बाक्ब थमा सुइक्ब लोकब ते गुम्थ जाक्चांम्तेक्म देशो नेंशा, सां-पाटी नु अप्पीयस बजारमी गुम्थ जाक्तेक्म। पावलमी मेको थमा सुइक्ब आन कली तशा, आ थुं बारशा, परमप्रभु यावे कली “गे रिम्शो पाइब बाक्नीनी” दे ठेयब सेल्लु। 16 मिनु रोम सहरमी जाक्दीत्तक। जाक्दीश्शो रे पावल ते ते बाक्चा दाक्ता, मेक मेक बाक्चा गेम्तेक्म। आ कली कोव्रब सिपाही का वोइक्तेक्म। प्रेरित २७:३

रोममी यहूदी आन कली गुम्शो

17 रोम सहरम जाक्दीश्शो आ सांबु नाक्ती पावलमी रोममी बाक्ब यहूदी आन ठेयब मुर ब्रेश्शा खुप्ताक्मी। मिनु मेको आन कली “आं लोकबपुकी, आं लोव्र का निक्शी नेनीन। इं यहूदी नु इं किकी पिपी आन पतीके पना पन बाक्ती हना यो, यरूसलेममी बाक्ब लोकबपुकीमी आं कली दोस गेशा ग्याइश्शा, रोमी सरकार आन गुइमी गेतीमी। प्रेरित २३:१ 18 मिनु रोमी निसाफ पाइबपुकीमी हिल्लो हिकसी पशा डा मिन, आं कली प्रोंइचा देंतेक्म। मारदे हना साइक्चा डा सजाइ गेचा पुंइसीब मारेइ दोस गुंइने मचबेम। 19 यहूदी लोकबपुकीमी प्रोंइचा मदुम्ब देना देंन बाक्मानु, गोमी सिजर कली आं मुददा कोव्रचा गेने, दे पुंइता। पिप आ डोंइती इं यहूदी सुइ आन कली मारेइ दोस मगेनुडमी। प्रेरित २५:११ 20 इन कली एको लोव्र नेल्ल रुप्पाइक्थ ब्रेश्शा खुप्ताक्नी। आं दोस चहिं मार बाक्ब देशा हना, इं इस्राएलीपुकीमी परमप्रभु यावेमी पाप रे प्रोंइब खीस्त कली रागीमी सोइश्शो देशो लोव्र थमा सुइश्शो आ पर्बम साडलो पाइक्चा पुंइसाक्ड” दे माइक्तीमी। प्रेरित २६:६-७ 21 मिनु मेकोपुकीमी पावल आ लोव्र नेंशा “इ पर्बम यहूदीया रे लोव्र, चिठी का यो मजा। मेक रे एक जाक्शो लोकब सुइमी इ पर्बम मरिम्शो लोव्र पा दोस मगेम। 22 गोपुकीमी एको

नक थमा सुइक्तीके आ पर्वम चहिं लोव नेंतक। मेको लोव तेक तेक ब्रामे, मेक मेक जिचा पोक्मे बाक्त, दे तुइश्शो नकी। मोदेशो दुम्त हना यो, गो इ मिम्शो तुइक्चा दाक्नीकी, लेंशा गुम्चा” दे लोवसी थुम्शा गाक्तेक्म। प्रेरित २४:१४; लूका २:३४

यहूदीपुकीम ख्रीस्त आ लोव नेंशो

23 मिनु गुम्ची नाक्ती पावल आ बाक्तीकेमी शुश मुर खुम्साक्म। मिनु सुनी रे नाक्दो सम्म पावलमी मेको आन कली एको लोव नेल्ल रूपपाइक्तीमी। मोसा आ अरेशो नु परमप्रभु यावे आ लोव पाइब आन ब्रेक्शो लोव रे शेंशा, परमप्रभु यावे आ सोइश्शो ख्रीस्त चहिं येसु बाक्ब देशा, परमप्रभु यावे आ राज्य डा लोव शेंताक्व। 24 आ लोव नेंबपुकी का निक्शीमी आ देशो थमा बाक्त, दे थमा सुइक्तेक्म। का निक्शीमी चहिं थमा मसुदेम। 25 थमा सुइक्ब नु थमा मसुइक्ब दुम्शा ब्रातेक्म। मिनु गाक्चामेनु, पावलमी थमा मसुइक्ब आन कली “परमप्रभु यावे आ सोक्तीम परमप्रभु यावे आ लोव पाइब यसैया इन किकी पिपी आन पर्वम ठीक लोव पशो बाक्त। 26 मेकोमी ‘मेको मुर आन कली गुम्थ लावो। मेको आन कली “नेंचा दा नेंनीन। तन्न गे यो मरुप्नीनी। कोव्रचा दा कोव्रनीन। तन्न मताइनीनी। 27 मेको मुर आन थुं ग्याम्शो बाक्नीम। आन नोफा थांइशो बाक्नीम। आन मिक्च क्रिप्शो बाक्नीम। मोदेशो मपशो नम हना, आन मिक्चीमी ताम वा, आन नोफाम नेंनेम वा, थुंमी रुबेम वा, आं गे लेम वा, गो सापदुमी वा” दे ब्रेक्शो बाक्त’। यसैया ६:९-१० 28 परमप्रभु यावेमी अर्को रागी डा मुर आन, कली आ लोव नेंपाइक्ब। मेकोपुकीमी नोफा दाइश्शा नेंशा टीनीम, दे तुइक्तीन” दे माइक्तीमी। 29 पावलमी मेको आन कली मोदेशो लोव पवानु, यहूदी लाम्तेक्म। का निक्शीमी “आ लोव थमा बाक्ब” देंतेक्म, का निक्शीमी “थमा ममाइ” देंतेक्म। मिनु हेरर हेररा जिशा बोक्तेक्म। प्रेरित १३:४६

पावलमी सांकछी गेचा तशो

30 मिनु पावल बर्स निक्शी सम्म मुर आ खिंमी क्येट थाप्शा बाक्मेनु, शुश मुर पावल कली गुम्थ जाक्मा बाक्त। मेको गुम्थ जाक्ब आन कली “निस्सीने, बाक्कीने, लोवसी पय” दे शुश लोव शेंबाक्माक्त। 31 शेंचा मदुम्ब, दे सुइमी मदेंबाक्मा बाक्त। मिनु ठेयब थुं पा परमप्रभु यावे आ राज्य नु प्रभु येसु ख्रीस्त आ पर्वम शेंना शेंन बाक्माक्त। एफिसी ६:२०

रोमी

ब्रेक्ब मुर: एको चिठी पावलम रोम सहर डा थमा सुइक्ब आन कली ब्रेक्शो बाक्ब।

गेना ब्रेक्शो: पावलम रोम सहर डा थमा सुइक्ब आन कली ग्रुम्चा दाक्शो बाक्त। कोरिन्थ सहरम बाक्शा, एको चिठी ब्रेक्शो बाक्त। मेको यरूसलेमम ग्याइक्चा पुंडसीशो ५८ ए. डी.म पेन्तीकोस क्येडा डोंइती दुम्शो बाक्त।

मार ब्रेक्शो:

१. डोंइती डा लोव्र रोमी १:१-१७
२. मुर नेल्लेम मरिम्शो पशो बाक्तेक्म। रोमी १:१८ - रोमी ३:२०
३. येसु ख्रीस्तमी थमा सुइक्ब आन कली परमप्रभु आ डोंइती ठीक सेल्ब। रोमी ३:२१ - रोमी ५:२१
४. थमा सुइक्तीकेम ग्राशो। रोमी ६:- ८:-
५. यहूदी नु रागी रागी डा मुर। रोमी ९:- ११:-
६. ठीक पाइब थमा सुइक्ब। रोमी १२:१ - १५:१३
७. नोले डा लोव्र। रोमी १५:१४ - १६:२७

डोंइती डा लोव्र

१ गो ख्रीस्त येसु आ वाइल पावल नड। आ सोइशो दुम्शा, परमप्रभु यावेमी आ ग्येरपाइक्ब लोव्र तुइक्पाइक्चा कली योव्रचा पुंडसाक्यी। प्रेरित ९:१५; प्रेरित १३:२; गलाती १:१५ २ मेको लोव्र साइ नेसी रे परमप्रभु यावे आ लोव्र पाइबपुकीमी ब्रेक्शो बाक्मा बाक्त। रोमी १६:२५-२६; लूका १:७०; तीतस १:२ ३ येसु ख्रीस्त पिप दाऊद आ थरमी मुर दुम्शा, जरमेशो बाक्माक्त। रोमी ९:५; २सामुएल ७:१२; मत्ती २२:४२ ४ तन्न मुर ला ममाइ। परमप्रभु यावे आ तौ यो बाक्ब। “आं तौ बाक्ब” दे तुइक्पाइक्चा कली परमप्रभु यावेमी आ सोक्त आ सक्तिम येसु ख्रीस्त कली बेक्शो रे सेंताक्व। मत्ती २८:१८; प्रेरित १३:३३ ५ मिनु येसु ख्रीस्तमी नेल्ल अर्को रागी डा मुर आन कली आ लोव्र तुइक्पाइक्चा कली शिशी पा योव्रती। मुरपुकीमी येसु ख्रीस्त आ लोव्र टीमेक्ल देंशा, शेंथ सोइक्ताक्यी। रोमी १५:१८; प्रेरित २६:१६-१८; गलाती २,७,९ ६ इन कली यो येसु ख्रीस्तमी “आं मुर दुम्मल” दे योव्रतु।

७ गे योव्रचा पुंडसीशा, परमप्रभु यावे आ दाक्शो रोम सहरम बाक्बपुकी इन कली एको लोव्र ब्रेक्ताक्ड। इं आफ परमप्रभु यावे नु प्रभु येसु ख्रीस्तम इन कली शिशी पा इन थुं नाइशशा बाक्चा गेम्सेक्ल। १कोरिन्थी १:२; २कोरिन्थी १:१-२; एफिसी १:१; गन्ती ६:२४-२६

रोमी आन कली ग्रुम्चा दाक्शो

८ गेपुकीमी येसु ख्रीस्त कली थमा सुइशो नेल्लेमी तुइक्नीम। मिनु गो आं परमप्रभु यावे कली “रोम सहरम बाक्ब आन कली रिम्शो पाइतीनी” दे ठेयब सेल्लुड। रोमी १६:१९ ९ मिनु गो परमप्रभु यावे आ सांकछी बाक्ब। गो गेय पना पान नु आ तौ आ ग्येरपाइक्ब लोव्र शेंना शेंन बाक्नड। गो इन पर्वम परमप्रभु यावे कली पुंडना पुंडन बाक्नुड, मेको थमा बाक्ब। एफिसी १:१६ १० मिनु परमप्रभु यावे आ दाक्तीकेमी “गो रोम सहरम बाक्ब थमा सुइक्ब आन कली रीब पा ग्रुम्पाइय्यीनी” दे यो पुंडना पुंडन बाक्नुड। रोमी १५:२३,३२; प्रेरित १९:२१ ११ मारदे हना इन थमा सुइक्तीक थुं बारपा बोल्यो सेल्लु, दे इन कली ग्रुम ग्रुम दाक्ती। रोमी १५:२९ १२ मिनु मोपा आं थमा सुइशोमी इन कली नु इन थमा सुइशोमी आं कली नेल्ल इं थुं बारपदल, दे मिम्ताक्ड। २पत्रुस १:१ १३ आं लोकबपुकी, गो शुश खेयप “रोम सहर पिड” देंती, तन्न मुल सम्म पिने मचबु। अर्को रागी डा मुर आन कली येसु ख्रीस्त आ लोव्र शेंना शेंन गाक्ती। मेको लोव्र शेंदुनु, शुशेम थमा सुइक्तेक्म। गेपुकी नु यो बाक्शा, येसु ख्रीस्त आ लोव्र पचा दाक्नुड। मो पडानु, का निक्शी थमा मसुइक्बमी यो थमा सुदमेक्ल, थमा सुइक्ब आन थुं बारल, दे मिम्नुड। १४ मारदे हना ग्रीक नु अर्को रागी डा, जोक्ब नु मजोक्ब, पढेशो मपढेशो, नेल्ल आन कली येसु ख्रीस्त आ लोव्र शेंचान माल्लुड। १५ मोपतीके रोमम बाक्ब इन कली यो ग्येरपाइक्ब लोव्र शेंचा माल्ती।

ग्येरपाइक्तीक लोव्र आ सक्ति

१६ ग्येरपाइक्तीक लोव्र शेंना शेंन गाक्डानु, मुने मपथु, शेंनुड। मारदे हना मेको लोव्रमी परमप्रभु यावे पाप रे प्रोंइतीक सक्ति बाक्ब। मेको लोव्र डोंइती यहूदी आन कली तुइक्पाइशो बाक्माक्त। नोले ग्रीक आन कली यो तुइक्पाइशो

बाक्माक्त। भजन संग्रह ११९:४६; २तिमोथी १:८; १कोरिन्थी १:१८, २४ 17 परमप्रभु यावेमी मुर आन कली दोपा ठीक दुम्पाइक्बा, मेको आ लोव्र रे पा तुंडसीब। मिनु “ठीक पाइब आं कली थमा सुइशशा ब्रोंडब” दे ब्रेक्शो बाक्ब। हबकुक् २:४; रोमी ३:२१-२२; गलाती ३:११

मुर आन मरिम्शो पतीके

18 मुरपुकीमी “थमा माइशशो सु बाक्मे?” दे तुइक्चा मदाक्थु, मरिम्शो थुं पाइशशो दुम्शा, मरिम्शो गेय पाम्तेक्म। मुर आन कली मोदेशो पशो तशा, परमप्रभु यावेम आ गाइशशो कोंइताक्व। 19 मारदे हना परमप्रभु यावे आ पर्बम मार तुइक्ने चाप्नीमी, मेको परमप्रभु यावेमी कोंइशो बाक्त। प्रेरित १४:१५-१७; प्रेरित १७:२४-२८ 20 मिनु रागी सेल्चा रे मतांडसीशो नु गेना हना यो सक्ति पाइशशो परमप्रभु यावे आ सरीड नु रागीमी सेल्शो मार मार रे तुंडसीब। मोपतीके मेकोपुकीम मतुइक्तेक देशा, माफ पुंडने मचाप्नीम। भजन संग्रह १९:२; हिब्रू ११:३ 21 परमप्रभु यावे नेल्ल क्येडा ठेयब बाक्ब, दे तुइशशा यो ठेयब मसेलेम। परमप्रभु यावे कली “गे रिम्शो पाइतीनी” दे यो मदेंम। तन्न आन मिम्तीकेमी दूली पना पन बाक्तेक्म। मिनु आन मरुप्ब थुं क्येडा मरुप्ब दुम्त। एफिसी ४:१८ 22 मजोक्थु यो ठेयब लेशशा बोरशा “गो शुश जोक्ब ठेयब नकी” देंतेक्म। मोपा मूर्ख दुम्तेक्म। १कोरिन्थी १:२० 23 मेकोपुकीम गेना हना यो बाक्ब परमप्रभु यावे आ छेडछेड कली बेक्शा लाइब मुर, चिक्ब, जन्तु नु गेशा गाक्ब जन्तु आन मूर्ति नु फाइक्तेक्म। प्रस्थान २०:४; ब्यवस्था ४:१५-१९; भजन संग्रह १०६; येरमीया २:११ 24 मिनु परमप्रभु यावेमी मो पशो तशा, मेको आन कली प्रोंइतु। मिनु आन थुंमी मरिम्शो मिम्शा, ग्रान्ग्रा दिचा डा गेय पशा बिग्रेपमुम्तेक्म। प्रेरित १४:१६ 25 मेकोपुकीमी परमप्रभु यावे आ थमा लोव्र कली जोल सेल्लेक्म। नेल्ल सेल्ल परमप्रभु यावे क्येडा आ सेल्शो मुर आन कली ठेयब सेल्लेक्म। गोपुकीमी मारेइ मारेइ सेल्ल परमप्रभु यावे कली गेना हना यो ठेयब सेल्ल, आमैन। 26 मोपतीके परमप्रभु यावेमी मेको आन कली आन मिम्शो ग्रान्ग्रा दिचा डा गेय पपाइक्चा कली प्रोंइतु। मेको आन मीशेमी यो मगारचा डा ग्रान्ग्रा दिचा डा गेय पाम्तेक्म। 27 मेकोपुकी वोंइश मुर नु मीश मुर ब्वांडसीचा प्रोंइशा, वोंइश मुर नु वोंइश मुर ब्वांडसाक्म। मोदेशो मरिम्शो गेय पतीके आन सजाइ ताम्तेक्म। लेवी १८:२२; लेवी २०:१३; १कोरिन्थी ६:९ 28 आन थुंमी “परमप्रभु यावे कली तुइक्चा ममाल्लब” दे मिम्ताक्म। मोपतीके परमप्रभु यावेमी मेको आन कली आन मरिम्शो मिम्शो पचा गेशा, प्रोंइतु। 29 मिनु आन थुं पापम ब्रीशो दुम्तेक्म। मिनु मार पाम्तेक्म देशा हना, मारेइ मारेइ मरिम्शो ला पमुम्तेक्म, शिम दुम्तेक्म, थुं चोमुम्तेक्मे, रुश पमुम्तेक्मे, मुर साइक्तेक्मे, जिम्तेक्मे, जोल पाम्तेक्मे, खुइशशा मुर आन लोव्र पाम्तेक्म। 30 मुर आन कली शुक्शी पाम्तेक्मे, परमप्रभु यावे कली काइ मदाक्थु, आइक्च सेल्लेक्मे, शुश तुम्मुम्तेक्मे, ठेयब लेत्तेक्मे, बोरतेक्मे। मारेइ मारेइ मरिम्शो पचा ला मिम्ताक्मे, आम आफ कली मटीमे, 31 बी ब्यफ खोंदेशो दुम्तेक्मे, देशो लोव्र मखबेमे, अरु आन कली वारच मपामे, सुइ आन कली मदाक्तेमे, शिशी यो मपामे। 32 परमप्रभु यावे आ निसाफ पतीक लोव्र तुइशशा यो मोदेशो मरिम्शो पना पन गाक्तेक्म। अरु आन कली आन खोंदेशो मरिम्शो पशो तशा “रिम्शो दुम्त” दे ग्येरसाक्म।

2

दोस गेब दोसी बाक्नीम

1 गे अरु आन कली दोस गेचा दाक्बपुकी, नेनीने, सु बाक्तीनी हना यो, दोस गेचा मदुम्ब, दे तुइक्तीन। दोस गेतीनी हना, दोसी दुम्नीनी, मारदे हना दोस गेबपुकी दोस ताइब आन पशो गेय खोंदेशोन पशो बाक्नीम, दे रूपीन। मत्ती ७:२; यूहन्ना ८:७; याकूब ४:१२ 2 परमप्रभु यावेमी मरिम्शो गेय पाइब आन कली ठीक निसाफ पशा, सजाइ गेब, दे तुइक्नय। 3 गे अरु आन कली दोस गेशा, गे चहिं खाल का डा पाइतीनी हना “गो परमप्रभु यावे आ सजाइ रे ब्रोंइचा ताइनीकी” दे मिम्नीनी? 4 मिनु गे परमप्रभु यावेमी मुर आन कली दाक्तीके, फाल्तीके नु आ गे लेत्नीनी कों, दे रिम्तीके कली आइक्च मिम्नीनी? परमप्रभु यावेमी “आन थुं आं गे लेत्नीमी कों” दे रिम्शो मतुइक्नीनी? २पत्रुस ३:९, १५ 5 इन थुं परमप्रभु यावे गे मलेत्तीके परमप्रभु यावे आ गाइशशो तेम्नीनी। मिनु आ ठीक निसाफ पची नाक्त शुश सजाइ ताइनीनी। 6 परमप्रभु यावेमी मुर आन पशो कोव्रशा, दोदेशो पामे मोदेशो पाइब। येरमीया ३२:१९; मत्ती १६:२७; २कोरिन्थी ५:१० 7 सुमी परमप्रभु यावे आ राज्य माल्शा, रिम्शो गेय पना पन बाक्नीमी नु गेना हना यो ब्रोंइचा माल्नीमी, मेको गेना हना यो परमप्रभु यावे नु बाक्चा ताइनीम। 8 तन्न आम कली ला मिम्बपुकी, थमा लोव्र मटीबपुकी, जोल लोव्र थमा सुइक्बपुकी परमप्रभु यावे आ गाइशशो चुरशो ताइनीम। २थिस्सलोनिकी १:८ 9 मरिम्शो पाइबपुकी

हिंशा बाक्शा, शुश श्येत जाइनीम। नेल्ल आन क्येडा डोंइती यहूदी सजाइ ताइनीम। मिनु ग्रीक यो सजाइ ताइनीम। 10 रिम्शो पाइबपुकी परमप्रभु यावे आ राज्य जाक्शा, मान तशा, आन थुं नाइश्शा बाक्चा ताइनीम। डोंइती यहूदी आन कली मोदेशो दुम्ब। मिनु ग्रीक आन कली यो मोदेशो दुम्ब। 11 मारदे हना परमप्रभु यावेमी मुर आन कली आइक्च जात, ठेयब जात मतिल्थु ठीक निसाफ पाइब। २इतिहास १९:७; प्रेरित १०:३४; कलस्सी ३:२५; १पत्रुस १:१७ 12 परमप्रभु यावे आ अरेशो लोव्र मतुइक्थु, पाप पाइबपुकी मेको आन मतुइश्शोमीन जाम्शा लाइनीम। परमप्रभु यावे आ अरेशो लोव्र तुइश्शा यो पाप पाइबपुकी मेको लोव्रमीन निसाफ पचा पुंइसीनीम। 13 परमप्रभु यावे आ अरेशो लोव्र नेंशा ला मुर ठीक मदुम्नीम। आ देशो पशा ला ठीक दुम्नीम। ब्यवस्था ६:२५; मत्ती ७:२१; याकूब १:२२ 14 मोपतीके अर्को रागी डा मुरपुकीमी परमप्रभु यावे आ अरेशो लोव्र मतुइक्ताकम हना यो, मार पचा दुम्बा, मार पचा मदुम्बा, दे तुइश्शा, गेय पाइनीमी, मेको आन आगामी अरेशो लोव्र बाक्ब। प्रेरित १०:३५ 15 मेको मुर आन थुंमी अरेशो लोव्र ब्रेक्सीशो बाक्ब, दे कोइनीम। मेको आन थुंमी आन पशो आ पर्बम रिम्शो बाक्ब देय मरिम्शो बाक्बा सांकछी गेब। रोमी १:३२ 16 मिनु परमप्रभु यावे आ निसाफ पची नाक्त मुर आन खुइश्शा पशो कली निसाफ पाइब। आं शेंशो ग्येरपाइक्तीक लोव्र परमप्रभु यावेमी येसु ख्रीस्त आ पतीकेमी निसाफ पाइब। लूका ८:१७

यहूदीम यो पाप पशो

17 मिनु गे “गो यहूदी ठेयब जात नकी। परमप्रभु यावे आ अरेशो ताइतक, आ योव्रशो मुर नकी” दे मिम्नीनी। 18 परमप्रभु यावे आ दाक्शो तुइक्नीनी, मार पचा दुम्बा, मार पचा मदुम्बा तुइक्नीनी। मारदे हना गे अरेशो लोव्र शेंसीशो बाक्नीनी, 19 इन थुंमी “गो जोक्ब नड, गो मिक्च मताइब आन कली लां कोइब नड। छिडछिडम बाक्ब आन कली बत्ती दाब नड। मत्ती १५:१४ 20 हेंथे गाक्ब आन कली रिम्शो लां कोइब नड। मशेंसीशो आन कली शेंब नड, गो अरेशो लोव्र जोक्ब तुइक्ब बाक्नुड” दे मिम्नीनी। 21 तन्न अर्को आन कली शेंशो, आम कली मशेंसीनीनी। खुइ मपचा दे शेंनीनी। तन्न गे खुइ पाइनीनी। भजन संग्रह ५०:१६-२१; मत्ती २३:२,४ 22 मुर आन मीश मलाइक्चा, दे शेंनीनी, तन्न लाइक्नीनी। मूर्ति कली तशा, ग्रांग्रा दीनीनी, तन्न मन्दीर रे मूर्ति खुइ पा लाइक्नीनी। 23 परमप्रभु यावे आ अरेशो लोव्र रिम्शो बाक्ब देंनीनी, तन्न इन मटितीकेमी परमप्रभु यावे कली आइक्च सेल्नीनी। 24 इन मोदेशो पशो आ पर्बम “अर्को रागी डा मुरपुकीमी परमप्रभु यावे आ नें आ पर्बम शुक्शी पाइनीम” दे ब्रेक्शो बाक्ब। यसैया ५२:५ 25 गे खोइक्तीक चिनु खोइश्शा, परमप्रभु यावे आ आ अरेशो लोव्र टीतीनी हना, रिम्शो दुम्ब। तन्न खोइक्तीक चिनु खोइश्शा आ अरेशो मटीतीनी हना, गे खोइक्तीक चिनु मखोइश्शो खोदेशो दुम्नीनी। 26 खोइक्तीक चिनु मखोइश्शो, तन्न परमप्रभु यावे आ ठीक पतीक नेल्ल पाइब हना, मेको खोइक्तीक चिनु खोइश्शो खोदेशो बाक्ब। गलाती ५:६ 27 मेको अर्को रागी डा खोइक्तीक चिनु मखोइश्शो मुरपुकीमी यहूदी आन क्येडा आंमा आन थुं रे ठीक पाइनीम। मिनु निसाफ दुम्ची ना परमप्रभु यावे कली मटीब यहूदी आन कली दोस गेनीम। 28 रांमी खोइक्तीक चिनु ला बाक्शा, परमप्रभु यावेमी योव्रशो यहूदी मदुम्नीम। येरमीया ४:४ 29 मार पा यहूदी दुम्नीम देशा हना, मार पचा दुम्बा, मार पचा मदुम्बा, मेको तुइश्शा, परमप्रभु यावे आ सोक्तीम थुंम खोइक्तीक चिनु खोइश्शा ला परमप्रभु यावे आ मुर दुम्नीम। मेको आन कली मुरपुकीमी ठेयब मसेल्नीम। तन्न परमप्रभु यावेमी नेल्ल तुइश्शा “रिम्शो पाइतीनी” देंब। ब्यवस्था ३०:६; फिलिप्पी ३:३; कलस्सी २:११

3

परमप्रभु आ निसाफ

1 मोदेशो बाक्त हना, यहूदीपुकीमी अरु आन क्येडा मार ताइनीमी? खोइक्तीक चिनु खोइश्शो मार दुम्बाक्डा? 2 अरु आन क्येडा शुश तशो बाक्तेकम। डोंइती परमप्रभु यावेमी मेको आन कली आ लोव्र तुइक्पाइक्चा कली योव्रतु। रोमी ९:४; ब्यवस्था ४:७-८; भजन संग्रह १४७:१९-२० 3 का निक्शीमी परमप्रभु यावे आ अरेशो लोव्र मटीमे। मो पाम्तेकम हना यो, परमप्रभु यावे आ लोव्र जोल मदुम्ब। रोमी ९:६; रोमी ११:२९; २तिमोथी २:१३ 4 मुर आन देशो लोव्र मजाक्दीप्व। परमप्रभु यावे आ देशो चहिं गेना हना यो थमा दुम्ब। “इन लोव्र ठीक बाक्ब। इन मुर आन कली निसाफ पतीक यो ठीक बाक्ब” दे ब्रेक्शो बाक्ब। भजन संग्रह ५१:६; भजन संग्रह ११६:११ 5 गो इं मरिम्शो पशो परमप्रभु यावे कली रिम्शो देशा कोइताक्य हना, गो मार देंनय डा? परमप्रभु यावेमी मो देंब आन कली सजाइ गेशो मरिम्शो बाक्बा डा? शुश मुरपुकीमी मोदेशो मिम्नीम। 6 तन्न परमप्रभु यावेमी मेको आन कली सजाइ गेशो मरिम्शो

ममाइ। परमप्रभु यावेमी निसाफ मपशो हना, मुर आन कली दोपा दोस गेशा, सजाइ पाइबा? 7 आं मरिम्शो पशोमी परमप्रभु यावे आ रिम्शो पतीके तपाइश्शा, परमप्रभु यावे कली ठेयब सेल्ला हना, मारदे पापी सुइक्का पुंडसीनुडा? 8 मुरपुकीमी आं लोव्र नेंशा “पापमी परमप्रभु यावे कली ठेयब सेल्लब, दे शेंब” दे आं देंशो लोव्र कली दूली सेल्लेक्क। गो दूली मशेंदुमी। मारदे हना पाप पशोमी परमप्रभु यावे कली ठेयब मसेल्लब। मोदेब आन कली परमप्रभु यावेमी सजाइ गेप्टु हना, ठीक दुम्ब। रोमी ६:३

मुर नेल्लेमी मरिम्शो पशो

9 मिनु मार देंचा देशा हना, अर्को जात क्येडा गो यहूदी रिम्शो मुर नया? मनय। मारदे हना गो यहूदीपुकी यो अर्को जात डा मुर खोदेंशो पा पापी बाक्नय। रोमी १:१८; रोमी २:२४ 10 मिनु “रिम्शो पाइब सुइ मबाक्नीम। रिम्शो पाइब का यो मबाक्ब। अय्युब ४:१७ 11 परमप्रभु यावे कली तुइक्ब सुइ मबाक्नीम। मेको कली ममाल्ब यो मबाक्नीम। 12 नेल्लेमी रिम्शो लां प्रोइशा हेंथे गाक्नीम। रिम्शो पाइब का यो मबाक्नीम” दे ब्रेक्शो बाक्ब। भजन संग्रह १४:१-३ 13 “ग्रांरा दिचा डा लोव्र ला पाइनीम। जोल पाइनीम। शुक्शी पा थुं खाइक्का डा लोव्र पाइनीम। भजन संग्रह ५:१०; भजन संग्रह १४०:४ 14 मेको आन शोव्र सराप नु कशो लोव्रमी ब्रीशो बाक्ब।” भजन संग्रह १०:७ 15 “मेकोपुकीमी मारेइ ममिथु मुर साइक्नीम। 16 ते ते गाक्मा, मेक मेक मारेइ महेंथु खतम पाइनीम। 17 दुशा गारशा बाक्का नु वारच पचा मतुइक्नीम।” यसैया ५९:७-८; लूका १:७९ 18 “परमप्रभु यावे कली मान पा महिनीम” दे ब्रेक्शो बाक्ब। भजन संग्रह ३६:२ 19 अरेशो लोव्र अरेशो टीब आन कली ब्रेक्शो बाक्ब। मेको लोव्र मटिम्तेक्क हना, सिक्सी पचा माल्नीम। यहूदी नु रागी डा मुर नेल्ल पापी दुम्तेक्क। मोपतीके परमप्रभु यावेमी मुर नेल्ल आन कली निसाफ पाइब। रोमी २:१२; गलाती ३:२२ 20 मिनु अरेशो लोव्र पशा, सुइ ठीक मदुम्नीम। मारदे हना आ अरेशो लोव्र तुइश्शा, गो मरिम्शो पाइब बाक्नय, दे तुइक्नय। भजन संग्रह १४३:२; गलाती २:१६; रोमी ७:७

दोपा ठीक सेल्लो

21 तन्न मुल रे अरेशो लोव्र मबाक्थुन, परमप्रभु यावे रे मुर आन कली ठीक पतीक जाक्शो बाक्ब। परमप्रभु यावेम ब्रेक्पाइश्शो लोव्र नु आ लोव्र पाइब आन देंशो गारब। रोमी १:१७; प्रेरित १०:४३ 22 परमप्रभु यावे आ ठीक पतीके येसु ख्रीस्त कली थमा सुइक्ब नेल्ल आन कली बाक्ब। यहूदी बाक्तेक्क हना यो, अर्को रागी डा मुर बाक्तेक्क हना यो, नेल्ल कान बाक्नीम। फिलिप्पी ३:९ 23 मारदे हना नेल्लेमी पाप पाम्तेक्क। मोपतीके परमप्रभु यावे आ छेडछेडम जाक्दीन्ने मचाप्नीम। उत्पत्ती ८:२१ 24 सु सुमी चहिं ख्रीस्त येसु कली थमा सुदमे, मेको आन कली परमप्रभु यावेमी आन थुं ठीक दुम्पाइक्ब। रोमी ५:१; २कोरिन्थी ५:१९; एफिसी २:८ 25 डोंडती परमप्रभु यावेमी रिम्शा, पापी आन कली सजाइ मगेवा बाक्त। नोले मेको आन जचा डा सजाइ येसु ख्रीस्त कली जपाइश्शा बेक्का गेशा, मेको आन पाप क्याम्ताक्व। 26 मोपा परमप्रभु यावेमी “ठीक निसाफ पाइनुड” दे कोंइताक्व। मिनु येसु कली थमा सुइक्ब आन कली “इन पाप ग्याम्शा, ठीक दुम्तीनी” देंब। लेवी १६:१५-१६; हिब्रू ४:१६

27 नेल्ल परमप्रभु यावेमी पशो बाक्ब। सुइमी ठेयब सेल्लेसीशा “गो गेय नेल्ल रिम्शो पा ठीक दुम्ती” देंने मचाप्नीम। ठीक दुम्तीके मुर आन गेय रे मपीब। तन्न थमा सुइक्तीके रे पीब। १कोरिन्थी १:२९, ३१ 28 गोपुकीम “परमप्रभु यावे आ अरेशो लोव्र डा गेयम मुर आन कली ठीक मसेल्लब” दे शेंनीकी। थमा सुइश्शोमी ला मुर आन कली ठीक सेल्लब। गलाती २:१६ 29 परमप्रभु यावे यहूदी आन परमप्रभु यावे ला बाक्बा डा? नेल्ल अर्को रागी डा मुर आन परमप्रभु यावे बाक्ब। रोमी १०:१२ 30 मारदे हना परमप्रभु यावे का ला बाक्ब। मिनु मेकोमी खोइक्तीक चिनु खोइश्शो नु मखोइश्शो आन थमा सुइक्तीके कोव्रशा, मुर आन कली ठीक दुम्पाइक्ब। रोमी ४:११-१२ 31 मो देंतय हना, परमप्रभु यावे आ अरेशो लोव्र क्याम्नीकी? ममाइ, येसु ख्रीस्त कली थमा सुइश्शोमी परमप्रभु यावे आ अरेशो लोव्र टीतय, दे रुब्य। मत्ती ५:१७

4

अब्राहाम मिम्शा शेंशो

1 इं किकी अब्राहाममी रिती थिती धर्म पशो तशा, परमप्रभु यावेमी ठीक दुम्पदा डा? ममाइ। 2 गेय पशा, ठीक दुम्शो हना, मुर आन कली “गो रिम्शो पाइब नड” देंने चाप्ब वा। तन्न परमप्रभु यावे कली चहिं मो देंने मचबा बाक्त।

3 मार ब्रेक्शो बाक्ब देंशा हना “अब्राहाममी परमप्रभु यावे कली थमा सुइक्त्तु। मिनु परमप्रभु यावेमी ठीक दुम्पाइक्त्तु” दे ब्रेक्शो बाक्ब। उत्पत्ती १५:६; गलाती ३:६

4 गेय पाइबपुकीमी गेय पशो डा गाल्च ताइनीम। तन्न शिशी पा गेशो ममाइ। रोमी ११:६ 5 तन्न सुमी गेय मपाइब, डोंइती मटीब मुर आन कली ठीक पाइब कली थमा सुइक्बा, मेको आ थमा सुइक्तीके ठीक बाक्ब। रोमी ३:२६ 6 इं किकी दाऊदमी “मुरुमी गेय मपथु, ठीक दुम्शा, मेको ग्येरसीशो मुर बाक्नीम, दे परमप्रभु यावे आ देंशो बाक्ब” देंशो बाक्त्त। 7 परमप्रभु यावे आ अरेशो मटितीके नु आन पाप क्याम्चा पुंडसीशो मुर ग्येरसीशो मुर बाक्नीम। 8 प्रभुमी पाप क्याम्चा पुंडसीशो मुर कली दोस मगेब। मेको ग्येरसीशो मुर बाक्ब। भजन संग्रह ३२:१-२

9 मिनु मुल मार देंचा? ग्येरसीशो मुर खोइक्तीक चिनु खोइश्शो बाक्नीम देय मबाक्नीमी? मारदे हना अब्राहाममी थमा सुइक्त्तु। मिनु परमप्रभु यावेमी मेको कली ठीक दुम्पाइक्त्तु। 10 खोइक्तीक चिनु खोइक्चा क्येडा डोंइती अब्राहाममी परमप्रभु यावे कली थमा सुइक्त्तु। मिनु परमप्रभु यावेमी आ कली थमा सुइश्शोमी अब्राहाम कली ठीक दुम्पाइक्त्तु। 11 आ थमा सुइश्शोमी ठीक दुम्पाइक्चा कली खोइक्तीक चिनु छाप खोदेंशो पा ताप्तु। मारदे हना मेको डोंइतीन थमा सुइक्ब बाक्त्त। मोपतीके मेको खोइक्तीक चिनु मखोइश्शो थमा सुइक्ब, ठीक दुम्शो नेल्ल आन आफ दुम्त्त। उत्पत्ती १७:१०-११ 12 अब्राहामम खोइक्तीक चिनु खोइक्ब आन आफ ला ममाइ, खोइक्तीके चिनु मखोइक्थु थमा सुइक्ब आन लां गाक्ब आन आफ यो दुम्त्त। मत्ती ३:९

13 परमप्रभु यावेमी अब्राहाम कली अरेशो लोव्र टितीके लोव्र मगेशो बाक्त्त। तन्न थमा सुइश्शो तशा “इ चच युइ शुश दुम्शा, रागी नेल्ल ब्रीनीम” दे लोव्र गेशो बाक्त्त। उत्पत्ती २२:१७-१८ 14 अरेशो लोव्र टीब ला परमप्रभु यावे आ मुर दुम्नीम हना, थमा सुइक्तीके नु थोक्शो लोव्र जाम्शा लाइब। 15 मारदे हना परमप्रभु यावे आ अरेशो लोव्रमी आ गाइक्तीक पोक्ब। मेको लोव्र मबाक्शो हना, पाप मतुंडस वा। रोमी ३:२०; रोमी ५:१३; रोमी ७:८,१० 16 थमा सुइक्तेक्म हना, शिशी ताइनीम। अरेशो टीबपुकीम यो शिशी ताइनीम। सु सुमी अब्राहामम खोदेंशो पा, परमप्रभु यावे कली थमा सुदमे, मेको आ थोक्शो लोव्र डा मुर नु अब्राहाम आ आल दुम्नीम। 17 अब्राहाम आ पर्बम “गो इ कली शुश रागी डा मुर आन किकी सेल्लन” दे ब्रेक्शो बाक्ब। अब्राहाममी “परमप्रभु यावे बेक्शो रे सेंब नु मारेइ मबाक्शो कली बाक्शो खोदेंशो पा ब्रेश्शा सेल्लब” दे थमा सुइश्शो बाक्ब। उत्पत्ती १७:५; २कोरिन्थी १:९; हिब्रू ११:१९ 18 “शुश रागी डा मुर आन किकी सेल्लन” दे परमप्रभु यावे आ गेशो लोव्र थमा सुइश्शा, आस पचा डा मबाक्माक्त्त हना यो, आस पा बाक्माक्त्त। उत्पत्ती १५:५ 19 मेको सहे का बर्स दुम्शा, आल मथिथु, आ रां बेक्शो खोदेंशो दुम्शा, आ मीश सारा शुश बर्स दुम्शो बाक्ब, दे तुइश्शा यो थमा सुइक्ना सुइक्न बाक्माक्त्त। उत्पत्ती १७:१७ 20 दाल्गीर मपथु, आ थमा सुइक्चा बारना बारन लशा, परमप्रभु यावे कली ठेयब सेला बाक्त्त। 21 परमप्रभु यावेमी आ गेशो लोव्र दोपा यो खाप्ने चाप्ब, दे थमा पा तुइश्शो बाक्माक्त्त। हिब्रू ११:११ 22 मोपा थमा सुइश्शोमी परमप्रभु यावेमी अब्राहाम कली ठीक दुम्पाइक्त्तु। उत्पत्ती १५:६ 23 मेको कली ठीक दुम्पाइक्त्तु, दे ब्रेक्शो लोव्र अब्राहाम कली ला ब्रेक्शो ममाइ। 24 गो नेल्ल इं कली यो ब्रेक्शो बाक्ब। मारदे हना सु सुमी इं प्रभु येसु कली बेक्शो रे सेंपाइक्ब परमप्रभु यावे कली थमा सुइक्नीमी, मेको आन कली ठीक दुम्पाइक्ब। 25 येसु ख्रीस्त इं पाप क्याम्चा कली साइक्चा पुंडसाक्ब। मिनु इं कली ठीक दुम्पाइक्चा कलीन बेक्शो रे सेंचा पुंडसाक्ब। रोमी ८:३२-३४; यसैया ५३:४-६

5

परमप्रभु आ गाइश्शो रे ब्रोंइशो

1 मिनु गो थमा सुइश्शोमीन ठीक दुम्पाइक्चा पुंडसीशा, इं प्रभु येसु ख्रीस्त रे पा परमप्रभु यावे नु दुशा बाक्तीक दुम्शो बाक्त्त। रोमी ३:२४,२८; यसैया ५३:५ 2 येसु ख्रीस्त आ पतीके गो परमप्रभु यावे आ शिशी ताइतय। मिनु परमप्रभु यावे नु बाक्चा ताइनीकी, दे आस पशा, ग्येरशा बाक्त्तय। यूहन्ना १४:६; एफिसी ३:१२ 3 मेको ला ममाइ। श्येत जयानु, ग्येरनय। मारदे हना श्येत जशोमी फाल्तीक सक्ति बारपाइक्ब। याकूब १:२-३ 4 मिनु श्येत फाल्बपुकी रिम्शो थुं पाइश्शो दुम्नीम। रिम्शो थुं पाइश्शोपुकी आस पाइब दुम्नीम, दे तुइक्ताक्य। याकूब १:१२ 5 मिनु मोदेंशो आस पतीकेम मुर आन कली बोल्यो सेल्लब। मारदे हना परमप्रभु यावे आ सोक्त्त आ पतीकेमी परमप्रभु यावे आ दाक्तीके इं थुंम मोइश्शो बाक्त्त। भजन संग्रह २२:६; भजन संग्रह २५:३,२०; हिब्रू ६:१८-१९

6 डोंइती मचाप्ब बाक्यानु, ख्रीस्त परमप्रभु यावे कली मटीब आन पर्बम बेक्त्त। 7 ठीक पाइब आन बेक्चा आ पा डा सुइ बेक्बा कों? रिम्शो पाइब आ पा डा सुइ बेक्ने चाप्बा कों? 8 तन्न परमप्रभु यावेमी इं कली शुश दाक्शा, गो

पापी, इं बेक्चा आ पा डा ख्रीस्त कली बेक्चा गेपु। यूहन्ना ३:१६; १यूहन्ना ४:१० 9 मोपतीके ख्रीस्त आ हुशेमी इं पाप क्याम्शा, ठीक सेल्चा पुंडसाक्य। मोशो ला ममाइ। गोपुकी येसु ख्रीस्त आ पतीकेमी परमप्रभु यावे आ गाइशो रे ब्रोंइचा ताइनय, दे तुइक्ताक्य। रोमी १:१८; रोमी २:५,८ 10 डोंइती गोपुकी परमप्रभु यावे आ जोरी सत्रु दुम्शा बाक्यानु, आ तौ आ बेक्शोमीन परमप्रभु यावेमी इं कली आ दाक्शो मुर सेल्लु। आ दाक्शो मुर दुम्शा, येसु आ ब्रोंइशोमीन सजाइ जचा रे मब्रोंइया डा? ब्रोंइतय। २कोरिन्थी ५:१८; रोमी ८:७; कलस्सी १:२१ 11 मेको ला ममाइ, इं प्रभु येसु ख्रीस्तम इं पशो पाप रे प्रोंइतीके आ पबर्म परमप्रभु यावे आ मुर दुम्शा ग्येरनय।

आदम नु येसु ख्रीस्त

12 मिनु डोंइती मुर कामी परमप्रभु यावे आ देशो लोत्र मटितीके मुर बेक्ब दुम्मा बाक्त। मिनु मेको आ तमी तौ चच युइ नेल्ले यो बेक्ब दुम्मा बाक्त। मारदे हना मेकोपुकीमी यो पाप पामे बाक्त। उत्पत्ती ३:१९; रोमी ६:२३; उत्पत्ती २:१७ 13 मेना परमप्रभु यावे आ अरेशो लोत्र मब्रेकपाइशो बाक्माक्त। मोपतीके पाप मग्रूशो बाक्माक्त। अरेशो लोत्र मबाक्थु, मुर दोस मताइब दुम्शो बाक्तेक्म। रोमी ४:१५ 14 तन्न आदम आ पाला रे मोसा आ पाला सम्म मुरपुकी बेक्ना बेक्न लमा बाक्त। आदम खोदेशो मरिम्शो मपामे बाक्त हना यो, बेक्मा बाक्त। आदम चहिं नोले डा पाला कली कोइतीक दुम्शो बाक्त। 15 आदम आ मटिशो परमप्रभु यावे आ शिशी पशो खोदेशो ममाइ। मुर का आ मटितीकेम मुर नेल्ल कली बेक्ब सेल्लतीमी। मेको क्येडा परमप्रभु यावे नु मुर का दुम्शो येसु ख्रीस्त आस गेशो शिशी ठेयब बाक्ब। 16 येसु ख्रीस्त आ गेशो आदम आ पशो खोदेशो ममाइ। मारदे हना आदम आ पशोमी मुर नेल्ल खतम दुम्तेक्म। येसु ख्रीस्त आ गेशो शिशीमी पाप पशो शुश मुर आन कली ठीक दुम्पाइक्तु। 17 दोपा आदम आ पशोमी बेक्तीकेम मुर आन कली हुकुम पवा, मोपा मेको आन क्येडा येसु ख्रीस्त आ गेशो शिशी नु आ ठीक सेल्लतीकेमी मुर आन कली ब्रोंइचा गेशा हुकुम पाइब।

मेको पपाइक्ब नेल्ल येसु ख्रीस्त बाक्ब। 18 दोपा मुर कामी पाप पतीके मुर नेल्ल जाम्शा लाइब दुम्मा, मोपा मुर का आ ठीक पतीकेम मुर नेल्ल आन पाप क्याम्शा, ठीक सेल्चा पुंडसीशा, ब्रोंइचा ताइनीम। १कोरिन्थी १५:२१-२२ 19 परमप्रभु यावे आ देशो मटीव मुर का आ पतीके दोपा पापी शुश दुम्मा, मोपा परमप्रभु यावे आ देशो टीब कामी चहिं शुश मुर आन पाप क्याम्शा, ठीक सेल्लतीमी। रोमी ३:२६; यसैया ५३:११ 20 परमप्रभु यावेमी आ अरेशो लोत्र ब्रेक्पदा रे पाप तुइक्ना तुइक्न लाम्तेक्म। मिनु पाप ठेयब दुम्मेनु, परमप्रभु यावे आ शिशी मेको क्येडा ठेयब दुम्त। रोमी ७:८,१३; गलाती ३:१९ 21 दोपा पापमी मुर आन कली बेक्पाइक्ब सेल्मी, मोपा येसु ख्रीस्त आ शिशी नु ठीक पतीकेमी मुर आन कली परमप्रभु यावे नु गेना हना ब्रोंइशा बाक्ब सेल्ब। मेको नेल्ल इं प्रभु येसु ख्रीस्तम पशो बाक्ब। रोमी ६:२३

6

पापम बेक्शा, ख्रीस्तम सेंसीशो

1 मिनु मो हना, मार देंचा? परमप्रभु यावेमी गो इं कली शुश शिशी पवल, दे गोपुकीमी पाप पस डा पस बाक्चा डा? रोमी ३:५-८ 2 मो पचा मदुम्ब। बेक्शो मुरपुकीम खांखा दोपा पाप पस डा पस बाक्ने चाप्नीमी डा? गो इं के पाप पतीक थुं बेक्त। 3 ख्रीस्त येसु कली थमा सुइशशा, आ नें नु आ बेक्तीकेमी ब्वाक्कुम खुम्शा, गुंडपांडसाक्य, दे गे मतुइक्नीनी? गलाती ३:२७ 4 मिनु ब्वाक्कुम गुम्यानु, गो येसु बेक्शा थिम्शो खोदेशो दुम्तय। मिनु परमप्रभु यावे आ सक्तिमी ख्रीस्त कली बेक्शो रे सेंपाइशो खोदेशो पा गो यो सेंसीशा, नक लांम गाक्तय। कलस्सी २:१२; १पत्रुस ३:२१ 5 गो दोपा मेको आ बेक्शो नु कान दुम्या, मोपा आ सेंसीशो नु यो कान दुम्तय। 6 येसु ख्रीस्त कली शीम केप्शा कांटी थोक्शा साइक्तीके इं पापम ब्रीशो थुं आ सक्ति जाम्त। मोपतीके मुल गो पाप आ वाइल मबाक्नय। गो मेको लोत्र तुइक्चा माल्नय। गलाती ५:२४ 7 बेक्शो मुर पाप रे ब्रोंइशो बाक्नीम। 8 गो येसु ख्रीस्त नु बेक्तय हना, मेको नुन ब्रोंइनय, दे थमा सुइक्नय। 9 मारदे हना येसु यो बेक्शो रे सेंसीशा, मुल गेनायो मबेक्चा डा पा ब्रोंइत। मुल मेको गेनायो मबेक्ब। 10 पाप क्याम्चा कली काले बेक्त। नोले सेंसीशा, मुल परमप्रभु यावे नु ब्रोंइशो बाक्ब। हिब्रू ९:२६-२८ 11 मोपतीके गोपुकीमी यो आंम कली पाप आ पबर्म बेक्शो नु ख्रीस्त येसु आ पतीकेमी परमप्रभु यावे कली ब्रोंइनय, दे मिम्तीन। २कोरिन्थी ५:१५; १पत्रुस २:२४

12 इन बेक्शा लाइब रां कली पापम हुकुम पचा मगेने। उत्पत्ती ४:७ 13 इन गुइ खोइली, मिक्च, शोव, रां नेल्ल कली मरिम्शो मपपतीन। तन्न बेक्शो रे सेंसीशो मुर खोदेशो पा, परमप्रभु यावे कली जिम्मा गेंसीशा, आ रिम्शो गेय पने। रोमी १२:१ 14 पापमी इन कली मारेइ पपाइक्ने मचाप्व, मारदे हना परमप्रभु यावे आ अरेशो लोवमी इन कली दोसी मसेल्थु, परमप्रभु यावेमी शिशी पाइक्चा पुंडसाक्नी। रोमी ७:४-६; १यूहन्ना ३:६; रोमी ५:१७, २१ 15 परमप्रभु यावे आ अरेशो लोवमी इं कली दोसी मसेल्थु, परमप्रभु यावे आ शिशी ताइतय हना, पाप पचा दुम्ब, दे मिम्चा डा? मोदेशो मिम्चा मदुम्ब। 16 तेको होवप आ वाइली दुम्या, मेको होवप कली टिचा मालनय, दे मतुइक्नीनी? “पाप पना पन बाक्य” देंतीनी हना, पाप आ वाइली दुम्शा, बेक्नीनी। “परमप्रभु यावे आ देशो टिय” देंतीनी हना, परमप्रभु यावे आ वाइली दुम्शा, ठीक पाइब दुम्नीनी। यूहन्ना ८:३४ 17 इन पर्बम परमप्रभु यावे कली “मेको आन कली रिम्शो पाइतीनी” दे ठेयब सेल्लुड। मारदे हना डोंइती गेपुकी पाप आ वाइल बाक्तीनी। मुल चहिं इन थुं रे पा परमप्रभु यावे आ शेंशो दाक्शा टीतीनी। 18 गेपुकी पाप रे ब्रोंइशा, ठीक पतीके आ वाइल दुम्तीनी। यूहन्ना ८:३२ 19 इन कली रुप्पाइक्चा कली चिनु लेंशा शेंनन्नी। दोपा गेपुकीमी इन गुइ खोइल, मिक्च, शोव, रां नेल्लेमी ग्रांग्रा दिशो गेय पशा, अरेशो लोव मटिनी, मोपा मुल इन थुं, रां नेल्ल ठीक पतीक आ वाइल दुम्चा कली परमप्रभु यावे आ गेय पाइब मुर दुमीन। 20 डोंइती पाप आ वाइली बाक्नीनु, ठीक पतीक रे डोन बाक्तीनी। 21 इन पशो मिम्शा, मुल यो मुने पाइनीनी। मारदे हना इन मरिम्शो पशो बेक्पाइक्ब बाक्त, दे तुइक्ताक्नी। रोमी ८:६, १३ 22 मुल गेपुकी मरिम्शो पचा रे प्रोंइचा पुंडसीशा, गे परमप्रभु यावे आ वाइल दुम्तीनी। मुल इन रिम्शो पतीके रे गे परमप्रभु यावे आ मुर दुम्शा, गेना हना यो मेको नु ब्रोंइशा बाक्चा ताइनीनी। 23 मरिम्शो पशो आ गाल्च बेक्चा बाक्ब। परमप्रभु यावे आ गेशो शिशी चहिं इं प्रभु येसु ख्रीस्त रे पा गेना हना यो ब्रोंइशा बाक्चा बाक्ब। रोमी ५:१२; उत्पत्ती २:१७; याकूब १:१५

7

अरेशो लोव प्रोंइशो

1 आं लोकबपुकी, मुल गो अरेशो लोव तुइक्ब इन कली शेंचा दाक्ती। मबेक्या सम्म ला अरेशो लोव कली टिचा मालनय। 2 ग्युंवे पशो मीश मुर आ वोंइश मबेक्म सम्म कानुनमी आस नाता लीब। आ वोंइश बेक्त हना, आस नाता मलीब। १कोरिन्थी ७:३९ 3 आ वोंइश मबेक्थु, अर्को वोंइश खोइश्शा लत हना, मेकोम आस नाता खोइक्ब। तन्न आ वोंइश बेक्शा नोले अर्को वोंइश खोइक्तु हना, मेको मीश अरेशो लोव रे मारेइ दोस गेचा मपुंडसीब, मारदे हना मेको आ वोंइश बेक्ने थुम्शो बाक्ब। 4 आं लोकबपुकी, येसु ख्रीस्त बेक्शोमी परमप्रभु यावे आ अरेशो लोव टिने मचाम्सीब देंतीक थुं बेक्त, दे रूपीन। मुल बेक्शो रे सेंचा पुंडसीशो ख्रीस्त नु काथा दुम्शा, इन पशो रे पा परमप्रभु यावे कली गेय पाइनय। 5 गो येसु ख्रीस्त रे डोन बाक्यानु, परमप्रभु यावे आ अरेशो लोव रे पा पाप तुइश्शा यो पाप आ ग्रांग्रा दिशोमी ब्रीशा शुश मरिम्शो पाइतय। मेको आ गाल्च बेक्तीक बाक्ब। रोमी ६:२१ 6 तन्न मुल गो अरेशो लोव रे ब्रोंइशा बाक्नय। मारदे हना गो मरिम्शो पतीक आ ग्याइश्शो रे बेक्तय। मुल गो येसु ख्रीस्त आ सोक्त रे पा नक गेय पाइनय। अरेशो बेक्शो लोव प्रोंइने थुम्तय। रोमी ८:१-२; रोमी ६:२-४

अरेशो लोव नु पाप

7 मिनु मुल मार देय देशा हना, परमप्रभु यावे आ अरेशो लोवमी पाप बाक्बा? मो देशो ममिम्चा। परमप्रभु यावे आ अरेशो लोव मपढेडा सम्म गो पाप मतुइक्तु। परमप्रभु यावे आ अरेशो लोवमी “मुर आन मार मार तशा मवलो” दे मबेक्शो हना, वाल्चा आ पर्बम गो मारेइ मतुइक्तु वा। प्रस्थान २०:१७ 8 मिनु पापम ब्रीशो आं थुमी शुश वाल्पाइक्ती। परमप्रभु यावे आ अरेशो लोव मबाक्शो हना, पाप मगू वा, मेको बेक्त। रोमी ५:१३; १कोरिन्थी १५:५६ 9 अरेशो लोव मपढेशो नड हना यो, पाप मतुइक्तु वा। तन्न मेको लोव तुइक्तु रे आं थुमी पाप बोक्त। मिनु बेक्ती। 10 परमप्रभु यावे आ अरेशो लोव ब्रोंइचा कली बाक्त हना यो, मेको लोवमीन बेक्ब सेल्लती। लेवी १८:५; याकूब १:१५ 11 मारदे हना मेको अरेशो लोव टिने मचाप्तीके पापम खुम्शा साइक्ती। हिबू ३:१३ 12 मिनु परमप्रभु यावे आ अरेशो लोव ठीक नु रिम्शो बाक्ब। १तिमोथी १:८ 13 मिनु मार? ठीक नु रिम्शो लोवमी आं कली साइय्यी डा? ममाइ। पापम कका साइक्ती। परमप्रभु यावे आ देशो लोव रे पाप शुश मरिम्शो बाक्ब, दे तुंडसीब। रोमी ५:२० 14 गोपुकीमी परमप्रभु यावे आ अरेशो लोव सोक्त पाइश्शो बाक्ब, दे तुइक्नय। गो चहिं रांम बाक्शा पाप आ वाइल बाक्ती। यूहन्ना ३:६ 15 गो आं पशो आंमा मरुण्ड। मारदे हना आं दाक्शो मपाइनुड, आं काइ मदाक्शो पाइनुड। 16 तन्न आं मदाक्शो पाता हना

यो, परमप्रभु यावे आ अरेशो लोव रिम्शो सुइक्नुड। 17 आं मदाक्शो पशो चहिं गो आं पशो ममाइ। आ आगाम बाक्शो पापम पपाइक्ती। 18 रिम्शो पतीके गो नु मबा, दे रुप्ता। रिम्शो पपदाक्ती हना यो, रिम्शो पने मचबु। उत्पत्ती ६:५; उत्पत्ती ८:२१ 19 मारदे हना रिम्शो गेय पड देती, तन्न पने मचबु। मरिम्शो मपड देंडानु यो मरिम्शोन पाता। 20 आं मदाक्शो पाता हना, गो आं पशो ममाइ। गो आ आगाम बाक्शो पापमी मोदेशो पपाइक्ती। 21 तन्न आ थुंमी गो रिम्शो पचा दाक्ती हना यो, मरिम्शो ला दुम्त। 22 गो आं थुंमी परमप्रभु यावे आ अरेशो लोव दाक्शा ग्येरसीनुड। 23 तन्न आं रांम अर्को अरेतीक का बाक्ब। मेको आं थुं डा दाक्शो अरेतीक नु जीब। मिनु आं रांम बाक्शो अरेतीकेमी आं कली ग्याइश्शा, पाप पपाइक्ब। गलाती ५:१७ 24 मोपतीके थुं खाइश्शा “मार मुर नडा? एको बेक्शा लाइब पाप पाइब रां रे सुम प्रोंइबा?” दे डाक्शा बाक्नुड। 25 गो परमप्रभु यावे कली इं प्रभु येसु ख्रीस्तम आ पतीके “गे रिम्शो पाइब बाक्नीनी” दे ठेयब सेल्लुड। परमप्रभु यावे आ सोक्तीम ब्रीशो थुं आ देंशो टीनुड। येसु ख्रीस्त नु मबेक्शो आं थुं नु रां चहिं पाप आ वाइली बाक्ब, दे तुइक्ताक्ड। १कोरिन्थी १५:५७

8

परमप्रभु आ सोक्त रे ब्रोंइशो

1 येसु ख्रीस्तमी बाक्ब आन कली सजाइ मबाक्ब। रोमी ३३:३४ 2 मारदे हना येसु ख्रीस्त आ ब्रोंइचा गेब सोक्त आ अरेशो लोवमी इन कली पाप पचा नु बेक्चा आ अरेशो लोव रे प्रोंइतु। 3 परमप्रभु यावेमी अरेशो लोव टिने मचाप्नीम, दे तुइश्शा, आ तौ कली पापी बुद पा रागीम सोइक्ताक्ब। मोपा मेको कली मुर आन पाप आ पबर्म सजाइ गेप्टु। प्रेरित १८:३८; प्रेरित १५:१०; हिब्रू २:१७ 4 मिनु परमप्रभु यावे आ ठीक पतीक लोव काप्चा कली ख्रीस्त सजाइ जपाइश्शा, बेक्चा गेप्टु। मोपा येसु आ पशोमी गो निसाफ ताइतय। परमप्रभु यावे आ सोक्त रे पा ब्रोंइशा बाक्नय। गो रागी डा मुर खोदेशो मबाक्नय। गलाती ५:१६, २५

5 सु सुमी रागी डा मुर आन थुं डा लोव ला मिन्नीमी, मेकोपुकीमी मुरुम पशो खोदेशो पाइनीम। सु सुमी परमप्रभु यावे आ सोक्तीम गेशो थुं डा लोव मिन्नीमी, मेकोपुकीमी चहिं परमप्रभु यावे आ सोक्त आ दाक्शो पाइनीम। 6 मारदे हना मुर आ थुंमी मिम्शो पाइबपुकी जाम्शा लाइनीम। परमप्रभु यावे आ सोक्तीम गेशो थुंमी मिम्शा पाइबपुकी परमप्रभु यावे नु ब्रोंइशा थुं नाइश्शा बाक्चा ताइनीम। रोमी ६:२१; गलाती ६:८ 7 मुर आ थुंमी परमप्रभु यावे कली मदाक्ब आ जोरी सत्रु दुम्शा, आ देंशो मटीब। मारदे हना परमप्रभु यावे आ अरेशो लोव थमा पा टिने मचाप्ब। याकूब ४:४ 8 रागी डा मुर आन थुंमी मिम्बपुकीमी परमप्रभु यावे कली ग्येरपाइक्ने मचाप्नीम।

9 इन थुंमी परमप्रभु यावे आ सोक्त थमा पा बाक्त हना, मुर आ थुंमी मिम्शो प्रोंइशा, परमप्रभु यावे आ सोक्त रे पा मिम्ब दुम्नीनी। ख्रीस्त आ सोक्त मुर आन थुंमी मबाक्त हना, मेको मुर येसु ख्रीस्त आ मुर मनम। 10 गे चहिं येसु ख्रीस्त आ मुर दुम्तीनी। बेक्चा दा बेक्नीनी। पाप पशोमी मुर बेक्ब दुम्तेक्म। तन्न ख्रीस्त आ ठीक पतीकेमी ब्रोंइनीनी। गलाती २:२० 11 परमप्रभु यावे आ सोक्तीमी दोपा ख्रीस्त येसु कली बेक्शो रे सेंदा, मोपान इं कली यो सेंशा ब्रोंइचा गेब। मारदे हना मुल मेको सोक्त इं आगाम बाक्शा, इं कली ब्रोंइचा गेब।

12 आं लोकबपुकी “परमप्रभु यावे आ सोक्त इन आगामी बाक्ब” दे तुइक्ताक्नी हना, मुर आन थुंमी मिम्शो पचा ममालनीनी। रोमी ६:७, १८ 13 मो पाइतीनी हना, जाम्शा लाइनीनी। तन्न गे परमप्रभु यावे आ सोक्त रे पा इन रां डा दला दाक्स पतीक कली साइक्तीनी हना, ब्रोंइनीनी। रोमी ७:२४; गलाती ६:८; एफिसी ४:२२-२४ 14 सु परमप्रभु यावे आ सोक्तीम खुल्चा पुंइसीशो बाक्मे, मेको परमप्रभु यावे आ तमी तौ बाक्नीम। 15 मारदे हना गेपुकी परमप्रभु यावे कली हिंब थुं ताक्शा, वाइल मबाक्नीनी। गोपुकी आ तमी तौ दुम्तीके मेको कली “आब्बा, आं दाक्शो आफ” दे ब्रेत्नय। गलाती ४:५-६; २तिमोथी १:७ 16 गोपुकीमी “आफ” देंयानु, इं थुंमी बाक्शो परमप्रभु यावे आ सोक्तीमी इं थुं कली “परमप्रभु यावे आ तमी तौ ननी” दे सांक्छी गेब। २कोरिन्थी १:२२ 17 परमप्रभु यावे आ तमी तौ दुम्शा, येसु ख्रीस्त नु काथा बाक्शा, अडस ताइब दुम्तय। मेको अडस तचा डोंइती येसु ख्रीस्त आ नेंमी श्येत जाइनय। नोले आ राज्य तांइसेनु, येसु ख्रीस्त नु काथा बाक्शा अडस ताइनय। गलाती ४:१७; प्रकाश २१:७

आस पा बाक्शो

18 मुल येसु ख्रीस्त आ नेंमी श्येत जाइतय। तन्न नोले परमप्रभु यावे आ बाक्तीक डा छेडछेडमी बाक्शा, मेको श्येत थम आइक्च मिन्नीनी। २कोरिन्थी ४:१७ 19 परमप्रभु यावे आ सेल्लो नेल्लेमी “परमप्रभु यावे आ तमी तौ दोदेशो

बाकनीमी” दे कोव्रचा दाकनीम। कलस्सी ३:४; १यूहन्ना ३:२ 20 डोंइती रे सेल्शो नेल्ल बेक्शा राक्ब दुम्शो बाक्मा बाक्त। तन्न परमप्रभु यावेमी “काबु नाक्त प्रॉइनन्नी” दे आस गेशो बाक्माक्त। उपदेसक १:४ 21 नोले परमप्रभु यावेमी आ तमी तौ आन कली बेक्शा राक्चा रे प्रॉइशो खोदेशो पा आ सेल्शो नेल्ल आन कली यो आ छेडछेडमी प्रोनानु, शुश रिम्शो दुम्ब। २पत्रुस ३:१३ 22 मुल सम्म आ सेल्शो मारेइ मारेइमी हिंमा क्येम्स पा परमप्रभु यावे कली “इन देशो रीब दुम्ल” दे पुंइना पुंइन बाकनीम। 23 मेको सेल्शोमी ला ममाइ। गो नेल्ल क्येडा डोंइती परमप्रभु यावे आ सोक्त ताइबपुकीमी यो हिंमा क्येम्स पा “आंइ रां बेक्चा रे प्रोनीन” दे पुंइना पुंइन आस पा बाक्नय। २कोरिन्थी ५:२ 24 मेको थमा मदुम सम्म आस पा बाक्नय। थमा दुम्शा नोले आस पा बाक्चा ममाल्नय। सुमी आ तने थुम्शो कली आस पाइबा डा? २कोरिन्थी ५:७ 25 तन्न गो इं मतशो मदुम सम्म “गेना दुम्बा?” दे लां कोव्रशा फाल्शा रिम्ब मुर बाक्नय। गलाती ५:५ 26 गोपुकीमी परमप्रभु यावे कली आस पा बाक्यानु, परमप्रभु यावे आ सोक्तीमी इं मतुइशो तुइक्ब। मिनु गो मार पुंइचा, दे मतुइक्ताक्क हना यो, इं पबर्म हिंमा क्येम्स पा पुंइब। 27 मारदे हना परमप्रभु यावे आ सोक्तीमी इं थुं डा लोव्र नेल्ल तुइक्ब, परमप्रभु यावेमी मार दाक्बा, मेको यो तुइशो, थाम सुइक्ब आन पबर्म पुंइब।

गो परमप्रभु आ दाक्शो बाक्नय

28 गो परमप्रभु यावे आ योव्रशो, मेको कली दाक्बपुकीमी दोदेशो श्येत जाम्तेक्म हना यो, दोदेशो ग्येरसाक्म हना यो, मार दुम्त हना यो, इं कली रिम्शो दुम्ब, दे तुइशो बाक्नय। एफिसी १:११ 29 मारदे हना आ डोंइती तुइशो मुर कली “आं तौ खोदेशो दुम्मल” दे योव्रतु। आ तौ मेको योव्रशो लोकब आन क्येडा डोंइती जरमेशो बाक्ब। कलस्सी १:१८; हिब्रू १:६ 30 आ तौ खोदेशो दुम्मल, दे योव्रचा पुंइसीब आन कली ब्रेत्ताक्व। मिनु ब्रेशो आन कली ठीक सेल्लु। मिनु ठीक दुम्शो आन कली बेक्चा रे प्रॉइशा, आ नु काथा बाक्चा गेब। १थिस्सलोनिकी २:१३,१४; रोमी ३:२६

31 मुल मार देंनुड देशा हना, परमप्रभु यावे गोपुकी नु बाक्त हना, सुइमी इं कली मारेइ पने चाप्नीमी डा? सुइमी मारेइ पने मचाप्नीम। भजन संग्रह ११८:६ 32 परमप्रभु यावेमी इं कली दाक्शा, आ दाक्शो तौ कली इं पाप क्याम्चा कली बेक्चा गेप्लु। मोपा आ दाक्शो तौ लाइ गेवानु, इं कली मार मार माल्या, मेको मगेबा डा? गेब। 33 परमप्रभु यावे आ योव्रशो आन कली सुमी दोस गेने चाप्बा डा? सुइमी मचाप्नीम। मारदे हना परमप्रभु यावेमी मेको आन कली ठीक दुम्पाइक्तु। यसैया ५०:८ 34 सुमी मेको आन कली सजाइ गेने चाप्बा डा? सुइमी मचाप्नीम। मारदे हना मेको आन बेक्चा डा बेक्शा, बेक्शो रे सेंसीशा, परमप्रभु यावे आ ग्युरा गे बाक्चा तशो ख्रीस्त येसुमी मेको आन पबर्म मपुंइबा डा? पुंइब। १यूहन्ना २:१; हिब्रू ७:२५ 35 ख्रीस्तमी इं कली शुश दाक्ब। मिनु सुमी इं कली ख्रीस्त आ दाक्तीके रे फ्राने चाप्बा डा? सुइमी मचाप्नीम। श्येतमी, हिंतीकेमी, खेदा पतीकेमी, जचा मततीकेमी, फेक्चा मततीकेमी, मुर साइक्तीकेमी नु लडाइमी काइ फ्राने मचाप्नीम। भजन संग्रह ७३:२३-२६ 36 श्येत जचा आ पबर्म “इन नें आ पबर्म साइक्चा पुंइसीन सीन बाक्नीकी। क्योरचा चिक्शो भेडा खोदेशो दुम्तक” दे ब्रेक्शो बाक्ब। भजन संग्रह ४४:२२; २कोरिन्थी ४:११ 37 मो दुम्त हना यो, मारेइ पने मचाप्नीम, मारदे हना येसु ख्रीस्तमी इं कली दाक्शा, गेनायो मप्रॉइब। मोपतीके सिक्सी पा ग्रानय। १यूहन्ना ५:४ 38 “बेक्चामी, ब्रॉइचामी, परमप्रभु यावे आ स्वर्ग डा गेय पाइबपुकीमी, अधिकार पाइबपुकीमी, मुल दुम्तीकेमी, नोले दुम्तीकेमी, एफिसी ६:१२ 39 इर डामी, उइ डामी नु रागीम बाक्शो मारेइ मारेइमी इं कली इं प्रभु ख्रीस्त येसुम बाक्शो परमप्रभु यावे आ दाक्शो रे फ्राने मचाप्नीम” दे यो तुइक्ताक्ड।

9

यहूदीपुकीमी थमा मसुइशो

1 ख्रीस्त आ नें ब्रशा, जोल मपथु, एको लोव्र पाइनुड। परमप्रभु यावे आ सोक्तमी आं थुमी थमा लोव्र बाक्ब, दे सांकछी गेब। 2 गो इं यहूदी लोकब आन कली तशा, आं थुं शुश खाइक्ती। मेको आन कली दो पड, मार पड देशा आं थुं खुरसाक्यी। 3 आं लोकब, आ खिं डा मुर आन पा डा गो सराप रशा, ख्रीस्त रे तिल्ला पुंइसीचा यो बिस्सीड वा। प्रस्थान ३२:३२ 4 मेकोपुकी इस्राएली नम। मेको परमप्रभु यावे आ तमी तौ बाक्नीम। आ छेडछेडम बाक्चा कली योव्रशो मुर नम, मेको आन कली कबल पशो बाक्त, आ अरेशो लोव्र तुइक्पाइशो बाक्त, परमप्रभु यावे कली दोपा मान पचा, दे तुइक्पाइशो बाक्त। परमप्रभु यावेमी मेको आन कली थोक्शो लोव्र पशो बाक्त। प्रस्थान ४:२२; ब्यवस्था ७:६; प्रस्थान ४०:३४; उत्पती १७:७; प्रस्थान २०:- 5 नेल्लेम तुइशो किकी पिपी एको जात डा बाक्मा

बाक्त। मिनु मेको आन दाते रे मेको नेल्ल आन क्येडा ठेयब दुम्शा ख्रीस्त जरमेसे बाक्त। गोपुकीम परमप्रभु यावे कली गेना हना यो मान पय, आमेन। रोमी १:३; मत्ती १:-; लूका ३:२३-३४

सु सु थमा इस्राएली बाक्नीम

6 परमप्रभु यावे आ लोव्र मदुम्थु मलीब। मारदे हना इस्राएल रागी डा मुर नेल्ल इस्राएली मदुम्नीम। गन्ती २३:१९; रोमी २:२८ 7 अब्राहाम आ चच युइ शुश बाक्तेक्म हना यो, मेको नेल्ल परमप्रभु यावे आ मुर मबाक्मा बाक्त। मेकोमी “इसहाक रे पा इ चच युइ लील” दे गेशो लोव्र खाप्शा, इसहाक कली ला योव्रडा बाक्त। उत्पत्ती २१:१२ 8 मोपा अब्राहाम आ खिम जरमेशा लायो, परमप्रभु यावे आ तमी तौ, दे ब्रेत्चा मपुंडिसम। तन्न परमप्रभु यावे आ लोव्र गेशोमी जरमेशोपुकीन अब्राहाम आ थमा चच युइ बाक्नीम। गलाती ४:२३ 9 परमप्रभु यावे आ गेशो लोव्र चहिं “बर्स का नोले लेशशा जाक्नुडानु, सारामी तौ थीब” देशो बाक्ब। उत्पत्ती १८:१० 10 सारा कली ला लोव्र गेशो ममाइ। इं किकी इसहाक रे पा आ मीश रेबेकामी कोव्रज कुरशा, जौले आल थिवानु, 11 मेको आल निम्फामी रिम्शो मरिम्शो मारेइ मतुइक्थु, आस जरमेचा डोंइती परमप्रभु यावेमी का कली योव्रडा बाक्त। आल आ पशो तशा, योव्रशो ममाइ। परमप्रभु यावे आ दाक्शो पा ब्रेशो बाक्त। 12 मेको आल आस गेय आ पर्बम ममाइ, परमप्रभु यावे आ दाक्शो पा आस ममा कली “आ दाग्युमी आ लोक्ब आ गेय पाइब” दे तुइक्पदा बाक्त। उत्पत्ती २५:२३ 13 मेको आल आस पर्बम “याकूब कली दाक्ताक्ड। एसाव कली काइ मदाक्तु” दे ब्रेक्शो बाक्ब। मलाकी १:२-३

परमप्रभुम आ दाक्शो कली योव्रब

14 मोदेशो बाक्त हना, गो मार देंचा? परमप्रभु यावेमी ठीक गेय मपवा डा? ममाइ। 15 परमप्रभु यावेमी मोसा कली “सु कली शिशी पचा दाक्डा, मेको कली शिशी पाइनुड। सु कली आ श्येत रे प्रोंइचा दाक्डा, मेको कली आ श्येत रे प्रोंइनुड” देशो बाक्त। प्रस्थान ३३:१९ 16 मारेइ मारेइ पशोमी परमप्रभु यावे आ शिशी पाइक्चा मपुंडिसीब। परमप्रभु यावेमी शिशी पचा दाक्ताक्व हना, शिशी पाइब। एफिसी २:८ 17 परमप्रभु यावेमी फाराओ कली “नेल्ल रागी डा मुरपुकीमी आं सक्ति तशा, आं नें तुइक्तमेक्ल, दे इ कली वोइक्ता” देशो बाक्त। प्रस्थान ९:१६ 18 मोपतीके परमप्रभु यावेमी सु कली शिशी पचा दाक्ता, मेको कली शिशी पाइब। सु कली आ लोव्र मटिपाइक्चा दाक्ता, मेको कली मटिपाइक्ब। प्रस्थान ४:२१; १पत्रुस २:८ 19 परमप्रभु यावेमी मो पाप्तु हना, मार, मुर आन कली दोस गेचा दुम्बा डा? आ पशो सुमी तेक्ने चाप्नीमी डा? देंनी माइ। 20 गे मुर दुम्शा परमप्रभु यावे कली दोस गेचा दुम्बा डा? सेल्चा पुंडिसीबमी सेल्ब कली “मारदे ओपा सेल्यी” देंबा डा? यसैया ४५:९ 21 खप के ग्योब सेल्बामी आ दाक्शो पा खप कांइचीक के गर, नाक्चुक तोक्तीके सेल्ने मचाप्बा डा? येरमीया १८:४-६

22 परमप्रभु यावेमी आ गाइशो कोइताक्व हना, मरिम्शो पाइब आन कली शुश फाल्शो बाक्त हना यो, नोले ला खतम दुम्पाइक्ब। रोमी २:४; हितोपदेस १६:४ 23 मेकोमी आ ठेयब गेय कोइचा कली का निक्शी आन कली शिशी पशा, गेना हना यो काथा बाक्शा, आ छेडछेड कोइचा कली योव्रतीमी। एफिसी १:३-१२ 24 इं यहूदी कली ला ब्रेशो योव्रशो ममाइ। अर्को रागी डा मुर आन कली यो ब्रेशो, आ मुर सेल्शा, आ नु बाक्चा ताइब सेलतीमी। 25 होसेमी “साइ आं कली मतुइक्ब आन कली आं मुर सुइक्नुडमी। डोंइती मदाक्शो कली मुल आं दाक्शो, दे ब्रेत्नुड। 26 डोंइती मेको रागीमी परमप्रभु यावे आ मुर मबाक्म। नोले चहिं ब्रोंइशा बाक्ब परमप्रभु यावे आ तमी तौ ब्रेत्चा पुंडिसीनीम” दे ब्रेक्शो बाक्त। होसे २:२५; होसे २:१

27 यसैयामी इस्राएली आन पर्बम “इस्राएल डा मुरपुकी समुन्द्र डा बाल्वा खोदेशो पा शुश दुम्तेक्म हना यो, मेको आन लीशो का निक्शी ला ब्रोंइचा ताइनीम। रोमी ११:५ 28 मारदे हना प्रभुमी आ देशो खाप्शा रीब पा पाइब” दे ब्रेक्शो बाक्ब। यसैया १०:२२-२३ 29 मिनु डोंइती यसैयामी “मुर नेल्ल आन परमप्रभु यावेमी आ तमी तौ सेल्चा कली का निक्शी मयोव्रशो हना, सोदोम नु गोमोररा सहर डा मुर खोदेशो दुम्शा, नेल्ल बेक्शा नुब्य वा” देशो बाक्त। यसैया १:९

थमा ठीक पतीके

30 मिनु मुल गो मार देंचा डा? अर्को रागी डा मुरपुकीमी ठीक दुम्चा ममाल्थु, ठीक दुम्तेक्म। तन्न आन ठीक दुम्तीके मेको आन परमप्रभु यावे कली थमा सुइक्तीक रे जाक्त। रोमी १०:२० 31 तन्न इस्राएलीपुकीमी चहिं ठीक दुम्चा कली परमप्रभु यावे आ अरेशो लोव्र टिचा माल्तेक्म हना यो, ठीक दुम्ने मचबेम। रोमी १०:२-३ 32 मारदे ठीक दुम्ने मचबेम देशा हना, थमा सुइशोमी ठीक दुम्चा ममालेम, रिती थिती डा गेय रे ठीक दुम्चा माल्तेक्म। मोपतीके

दाइल पाइब फुल्लुमी राम्साकम। मत्ती २१:४१,४४; १पत्रुस २:८ 33 मिनू “गो सियोनम फुल्लु का वोइक्नुड। मेको फुल्लुमी मुर आन कली दाइल पपाइक्ब। मिनू शुश मुर मेको फुल्लुम थोक्सीशा राम्सीनीम। सुमी मेको कली थमा सुइक्बा, मेको खतम मदुम्ब” दे ब्रेक्शो बाक्ब। यसैया ८:१४; यसैया २८:१६

10

1 आं लोकबपुकी, गो थमा मसुइक्ब इस्राएली आन पबर्म परमप्रभु यावे कली “थमा सुइक्पतीन” दे पुंडना पुंडन बाक्नुड। 2 परमप्रभु यावे कली तुइक्चा माल्नीम, दे तुइक्नुड। तन्न मेको आन के रुप्तीक थुं मबा। 3 परमप्रभु यावे आ डोंइती दोपा ठीक दुम्चा, मेको मरुबेम। मिनू आंमा गेय पतीकेमी ठीक दुम्चा माल्तेकम। मोपा परमप्रभु यावे कली थमा सुइक्तीके रे ठीक दुम्तीक मपामे। रोमी १:१७

थमा सुइक्तीक रे ठीक दुम्तीक

4 येसु ख्रीस्तमी परमप्रभु यावे आ अरेशो लोत्र खाप्ने थुम्तु। मिनू येसु ख्रीस्त कली थमा सुइक्बपुकी ठीक दुम्शो बाक्नीम। मत्ती ५:१७; हिब्रू ८:१३; यूहन्ना ३:१८; गलाती ३:२४-२५ 5 मिनू मोसामी परमप्रभु यावे आ अरेशो लोत्र पतीक रे ठीक दुम्तीके ब्रेक्शो बाक्ब। “परमप्रभु यावे आ अरेशो लोत्र टीबपुकी मेको लोत्र टितीकेन ब्रोंइनीम” दे ब्रेक्शो बाक्त देंनीम। लेवी १८:५ 6 थमा सुइश्शा, ठीक दुम्शोपुकीमी चहिं मार देंनीम देशा हना, स्वर्ग सु लाइबा डा? सुइ मलाइनीम मारदे हना येसु ख्रीस्त कली ब्रथ लचा ममाल्ब। ब्यवस्था ३०:११-१४ 7 बेक्शो मुर आन बाक्तीके सु लाइबा डा? सुइ मलाइनीम। मारदे हना येसु ख्रीस्त कली कुइक्थ लचा ममाल्ब। 8 तन्न मार देशो बाक्त हना “मेको लोत्र इं नेक्था, इ थुं नु इ शोत्रमी बाक्ब” देशो बाक्त। मेको थमा सुइक्तीक लोत्र कली शेंनीकी। 9 मिनू गेपुकीमी “येसु प्रभु बाक्ब” देशा इन थुंमी “परमप्रभु यावेमी मेको कली बेक्शो रे संताक्व” दे थमा सुइक्तीनी हना, गे ब्रोंइचा ताइनीनी। मत्ती १०:३२; २कोरिन्थी ४:५ 10 मुरुमी मेको थमा सुइश्शा, ठीक दुम्नीम। मिनू सु सुमी “येसु आं प्रभु बाक्ब” दे मुर आन डोंइती देंबा, मेको ब्रोंइचा ताइनीम, दे तुइक्नय। 11 मिनू परमप्रभु यावे आ लोत्रमी “सु सुमी मेको कली थमा सुइक्नीमी, मेको मुने मदोक्नीम” दे ब्रेक्शो बाक्ब। यसैया २८:१६

यहूदीमी “मतुइक्तक” देने मचाप्नीम

12 परमप्रभु यावेम नेल्ल आन कली कोत्रब। यहूदी नु अर्को रागी डा मुर नेल्ल आन कली कांइचीक मिम्ब। मेको आन कली प्रभु का बाक्ब। मेको कली प्रभु देंब आन कली आसीक गेशा, रिम्शो पाइब। प्रेरित १०:३४-३५; प्रेरित १५:९ 13 सु सुमी प्रभु आ नें थिशा “प्रोंइयीनी” दे पुंडबा, मेको कली प्रोंइब दे ब्रेक्शो बाक्ब। योएल ३:५

14 मेको कली थमा मसुइक्बपुकीमी “प्रोंइयीनी” दे पुंडने चाप्नीमी डा? आ पबर्म मनेशो कली थमा सुइक्ने चाप्नीमी डा? सुइ शेंब मबाक्त हना, मेको लोत्र नेंने चाप्नीमी डा? 15 शेंथ सोइश्शो मनम हना, शेंथ लाइनीमी डा? शेंथ सोइक्चा पुंडसीब आन पबर्म ओदेशो ब्रेक्शो बाक्ब “ग्येरपाइक्ब नु रिम्शो लोत्र शेंथ गाक्ब आन खोइल गिश रिम्शो बाक्ब” दे ब्रेक्शो बाक्ब। यसैया ५२:७ 16 मेको आन लोत्र नेंशा कोइमी थमा मसुदेम। मेको आन पबर्म यसैयामी “हे प्रभु, आंइ शेंशो लोत्र सुम थमा सुदा डा?” दे ब्रेक्शो बाक्त। यसैया ५३:१; यूहन्ना १७:२० 17 डोंइती ख्रीस्त आ लोत्र नेंशा तुइक्पाइक्चा माल्नीम। मेको लोत्र नेंशा ला थमा सुइक्ने चाप्नीम।

18 मार, येसु ख्रीस्त आ लोत्र यहूदीपुकीम मनेन्मे डा? नेंतेक्म। “एको लोत्र तेइ तेइ रागी नेल्लेमी ब्रशो बाक्त” दे ब्रेक्शो बाक्ब। भजन संग्रह १९:४ 19 मोपा यो इस्राएलीमी एको लोत्र मरुप्मे डा? मोसामी यहूदी आन पबर्म ओदेशो ब्रेक्शो बाक्त “अर्को रागी डा मुरपुकीमी आं कली थमा सुइक्चा गेनुडमी। मिनू गेपुकीमी अरु आन कली आं गे पिशो तशा, रुश पा थमा सुइक्नीनी, दे परमप्रभु यावेम देंत” दे ब्रेक्शो बाक्त। ब्यवस्था ३२:२१ 20 मिनू यसैयामी एको लोत्र तेम्शा “परमप्रभु यावेमी ‘आं कली ममाल्ब मुरपुकीमी आं कली थित्तीमी। आं कली ममिम्ब आन कली आं पबर्म तुइक्पाइक्तामी’ दे ब्रेक्शो बाक्त” देंत। यसैया ६५:१ 21 इस्राएल डा मुर आन कली चहिं परमप्रभु यावेमी “गो नेल्ल नाक्त मटीब नु जोप पाइब आन कली रिम्शो दुम्मल, दे आं गुइ दिस डा दिस बाक्नुड। तन्न मेकोपुकीमी आं देशो मटीम। आं कली मरिम्शो ला सुइक्तीमी” दे ब्रेक्शो बाक्त। यसैया ६५:२

11

लीशो इस्राएलीपुकी

1 मिनु मो दुम्मेनु, परमप्रभु यावेमी यहूदी नेल्ल आन कली प्रोंइमी डा? मप्रोंइमी। गो यो अब्राहाम आ चच युड बेन्यामीन थर डा इस्राएली का नड। भजन संग्रह १४:१४; येरमीया ३१:३७; फिलिप्पी ३:५ 2 डोंइती रे परमप्रभु यावेमी आ योव्रशो मुर आन कली मप्रोंइमी। एलीयामी इस्राएली आन पशो आ पबर्म परमप्रभु यावे कली देशो लोव्र मिम्तीन। 3 एलीयामी परमप्रभु यावे कली “परमप्रभु यावे, इन लोव्र पाइब आन कली साइक्तेक्म। इन कली चढेतीक नेल्ल प्रेशशा गेम्तेक्म। इन नोले खोइक्ब गो का ला लीती। आं कली यो साइक्चा कली माल्शा गाक्नीम” दे ब्रेक्शो बाक्त। १राजा १९:१० 4 परमप्रभु यावेमी एलीया कली मार लोव्र लेत्ता बाक्त देशा हना “आं नोले खोइक्ब, ७ हजार मुर योव्रतामी। मेकोपुकीमी बाल देवता आ डोंइती आन पोक्च मथेक्नीम” दे लोव्र लेशशो ममाइ डा? १राजा १९:१८

5 मुल यो परमप्रभु यावेमी शिशी पा योव्रशो का निक्शी लीशो बाक्नीम। रोमी ९:२७ 6 मेको आन पशोमी ममाइ, परमप्रभु यावेमी मोशा शिशी पा आ मुर सेल्टीमी। आन गेय आ पबर्म पशो हना, शिशी मली वा। 7 मिनु मार देंचा डा? इस्राएलम माल्शा यो आ माल्शो मथित्थु, परमप्रभु यावे आ योव्रशो का निक्शी ला ठीक दुम्तेक्म। अरु नेल्ल परमप्रभु यावे आ लोव्र मटीब दुम्तेक्म। रोमी ९:३१ 8 मेको आन पबर्म यसैयामी “परमप्रभु यावेमी मेको आन कली मरुप्ब थुं गेप्तु। मेकोपुकी मिक्च मताइब नु नोफा मनेंब दुम्शा बाक्शो बाक्नीम। मुल सम्म मोदेशो दुम्शा बाक्नीम” दे ब्रेक्शो बाक्त। यसैया २९:१०; ब्यवस्था २९:४ 9 दाऊदमी “मेको आन भोज आन कली ग्याइली खोदेशो दुम्ल। मेको आन कली बेक्तीक नु क्येक्क लेत्तीक दुम्ल। 10 मेको मिक्च मताइब दुम्मल। मिनु वाइलीम वाइल खोदेशो दुम्शा, श्येत जामेक्ल” दे ब्रेक्शो बाक्त। भजन संग्रह ६९:२१-२३

अर्को रागी डा मुर

11 मिनु मुल मार देंनुडा? मेकोपुकी गेनायो मबोक्चा डा पा राम्समा डा? ममाइ। इस्राएली आन मरिम्शो पतीके अर्को रागी डा मुरपुकीम शिशी तशो बाक्नीम। मेकोपुकीम रुश पामेक्ल, दे मोदेशो दुम्शो बाक्ब। प्रेरित १३:४६; रोमी १०:१९ 12 तन्न इस्राएली आन राम्सीतीके रागी नेल्ल आन कली रिम्शो नु अर्को रागी डा मुर आन कली शोंप दुम्त हना, मेको नेल्लेम थमा सुदेम हना, चिनु गिश रिम्शो दुम वा। 13 मिनु गो अर्को रागी डा मुर, इन कली “गो अर्को रागी डा मुर आन कली लोव्र शेंथ सोइक्चा पुंइसाक्यी। एको शेंतीक गेय शुश रिम्शो लाक्ती। 14 मारदे हना अर्को रागी डा मुर आन कली थमा सुइश्शो तशा, आं जात डा मुर का निक्शीमी यो रुश पा थमा सुइक्नीमी कों, दे आस पा बाक्ती।” १कोरिन्थी ९:२०-२२; १तिमोथी ४:१६ 15 परमप्रभु यावेमी मुल इस्राएली आन कली मकोव्रथु, अर्को रागी डा मुर आन कली शिशी पा ब्रशा, नोले यहूदी आन कली यो ब्रवानु, शुश रिम्शो मदुम्बा डा? एको दा बेक्शो रे सेंसीशो खोदेशो ठेयब दुम्ब। 16 निशो फस रे डोंइती डा शोब्ले परमप्रभु यावे के दुम्त हना, नेल्ल निशो फस रिम्शो दुम्ब। शाक्श रिम्शो बाक्त हना, राशी नेल्ल यो रिम्शो दुम्नीम। गन्ती १५:२०

17 रिम्शो तेल रवा खोदेशो इस्राएल रे राशी का निक्शी क्योरशा गुंइशो बाक्तेक्म हना, गे रागी रागी डा मुर ब्वाकी डा तेल रवा खोदेशो पा, मेको रवामी इन राशी क्येप्चा पुंइसाक्नी हना, गे मेको रवा आ शाक्श रे ताइनीनी। मेको मप्रेंदीन। एफिसी २:११-१४ 18 मो हना यो क्योरशा ताइश्शो राशी, दे मेको आन कली “गो इन क्येडा ठेयब दुम्तक” दे ठेयब लेशशो लोव्र मपने। मारदे हना गेपुकी यो राशीन ननी। राशीमी शाक्श कली मतिक्ब। शाक्शम राशी कली तिक्ब, दे तुइक्तीने। यूहन्ना ४:२२ 19 गेपुकीमी “मेको क्योरशा ताइश्शो राशी आ पा डा गो दुम्तय” देंतीनी। 20 इन देशो ठीक बाक्ब। मेकोपुकीमी थमा मसुदेम। मिनु परमप्रभु यावेमी मेको आन कली क्योरशा ताइक्ताक्व। इन थमा सुइश्शो तशा इन कली चहिं रिम्शो फल रवाम केप्शो खोदेशो पा आ मुर सेल्टु। काइ ठेयब मलेत्थु, परमप्रभु यावे कली मान पा हिंशा बाक्कीन। १कोरिन्थी १०:१२ 21 परमप्रभु यावेमी डोंइती डा राशी आन कली क्योरशा ताइक्ताक्व हना, मार, गे नोले केप्शो राशी इन कली मताइक्बा डा? 22 परमप्रभु यावेमी दोदेशो शिशी पाइबा, दोदेशो सजाइ गेबा, दे रुपीन। साइ डोंइती रे डा आ लोव्र थमा मसुइक्थु मटीब आन कली खोइश्शा ताइक्ताक्व। आ लोव्र मटिथु, थमा सुइक्चा प्रोंइतीनी हना, इन कली यो खोइश्शा ताइक्ब, दे तुइक्तीन। गे परमप्रभु यावे कली दाक्शा, थमा सुइक्चा मप्रोंइतीनी हना ला, इन कली यो दाक्चा मप्रोंइब। यूहन्ना १५:२-४; हिबू ३:१४ 23 मेको क्योरशा ताइश्शो राशी खोदेशो दुम्शो यहूदीपुकीमी आन थुं परमप्रभु यावे गे लेशशा, थमा सुइक्तेक्म हना, रिम्शो फल रवाम लेंशा केप्शो खोदेशो पा आ मुर सेल्ले चाप्ब। 24 डोंइती क्योरशा ताइश्शो राशी बोइक्चा कली श्येत मदुम्ब। तन्न अर्को ब्वाकी डा तेल रवा आ राशी माल्शा चाक्शा, केप्चा कली शुश श्येत बाक्ब। परमप्रभु यावेमी इन कली केप्ताक्व। मिनु इन कली केप्चा क्येडा यहूदी आन कली केप्चा श्येत मबाक्ब।

यहूदीपुकी यो ब्रोंडनीम

25 आं लोकबपुकी, आं शेंशो खुइशो लोव रिम्शो पा रुप्तीनी हना, गे ठेयब मलेत्नीनी। योवसीचा पुंडसीशो अर्को रागी डा मुर आन कली आ मुर सेल्ले मथुमा सम्म परमप्रभु यावेमी इस्राएली आन कली येसु ख्रीस्त आ पबर्म मरुप्ब सेल्लतीमी। यूहन्ना १०:१६ 26 योवसीचा पुंडसीशो अर्को रागी डा मुरपुकीमी थमा सुदमे डा मेरे इस्राएली नेल्लेमी रुप्शा, थमा सुइशशा, ब्रोंडचा ताइनीम। “सियोनमी पाप रे प्रोंडब का गूब। मेकोमी याकूब कली आ मरिम्शो पतीके रे प्रोंडब। मत्ती २९:३९; भजन संग्रह १४:७ 27 मेको आन पाप क्याम्नुड। मिनु मेको आन कली गेशो कबल खाप्नुड” दे ब्रेक्शो बाक्ब। यसैया ५९:२०, येरमीया ३१:३३

28 मुल सम्म इस्राएलीपुकीमी ख्रीस्त परमप्रभु यावे आ सोइशशो पाप रे प्रोंडब बाक्ब, दे थमा मसुइक्नीम। मोपतीके परमप्रभु यावे आ जोरी सत्रु दुम्तेक्म। आन थमा मसुइशशोमी इन कली चहिं रिम्शो दुम्त। परमप्रभु यावेमी आन किकी पिपी आन पबर्म मेको आन कली योवशा, दाक्ब। 29 परमप्रभु यावेमी गेशो नु आ योवतीक गेनायो मजाम्ब। गन्ती २९:१३ 30 गेपुकीमी यो परमप्रभु यावे आ लोव मटिनी। यहूदीपुकीम मटितीके परमप्रभु यावेमी इन कली शिशी पा थमा सुइक्चा गेप्तु। मिनु मुल गे परमप्रभु यावे आ शिशी ताइब दुम्तीनी। 31 यहूदीपुकीमी मुल सम्म परमप्रभु यावे आ लोव मटीमे। नोले परमप्रभु यावेमी मेको आन कली यो शिशी पाइब। 32 मारदे हना परमप्रभु यावेमी इस्राएली नु अर्को रागी डा मुर नेल्ल आन कली आ लोव मटिशो तशा, खाल का डा पा वोइक्तीमी। मिनु नोले नेल्ल आन कली शिशी पाइब। गलाती ३:२२; १तिमोथी २:४

परमप्रभु कली ठेयब सेल्य

33 परमप्रभु यावेमी नेल्ल तुइक्ब। परमप्रभु यावे सक्ति पाइशशो नेल्ल क्येडा ठेयब बाक्ब। मुरपुकीमी परमप्रभु यावे आ निसाफ पशो, मुर आन कली पाइशशो, सुइमी रुम्ने मचाप्नीम। यसैया ४५:१५; यसैया ५५:८-९ 34 मिनु “सुमी प्रभु आ थुं तुइक्ने चाप्नीमी डा? सुमी मेको कली अर्ती गेने चाप्नीमी डा?” दे ब्रेक्शो बाक्ब। १कोरिन्थी २:१६; येरमीया २३:१८; यसैया ४०:१३ 35 “सुमी परमप्रभु यावे कली मार मार गेशा, परमप्रभु यावेमी मार मार गेचा माल्ब, देंने चाप्बा डा?” दे ब्रेक्शो बाक्ब। अय्युब ४१:३ 36 परमप्रभु यावेमी मार बाक्त हना यो, आंमान सेल्लतु। मिनु मारेइ मारेइ आइक्के नम। मिनु आ गोशो गेय आंमान थुम्ब, दे तुइक्तय। मोपतीके “परमप्रभु यावे नेल्ल क्येडा ठेयब बाक्ब” दे ठेयब सेल्लतीक गेना हना यो लील। आमेन।

12

परमप्रभु आ दाक्शो पने

1 आं लोकबपुकी, इन कली मुल यो शुश शेंचा दाक्ताक्ड। परमप्रभु यावेमी इन कली शिशी पा आ मुर सेल्लतु। मोपतीके आ मुर दुम्शा, इन रां, थुं, गिंम नेल्ल, सेसीन परमप्रभु यावे आ दाक्शो चढेतीक खोदेशो पा जिम्मा गेसीन। मेको इन परमप्रभु यावे कली रिम्शो पशो गेय बाक्ब। रोमी ६:१३ 2 परमप्रभु यावे कली मटीब आन पशो खोदेशो मपने। तन्न परमप्रभु यावे कली इन थुं कली फाइक्चा गेन। मो पाइतीनी हना, परमप्रभु यावे आ मिम्शो मार में, रिम्शो मार में, आ दाक्शो मार में नु नेल्लेम ठीक दुम्शो तुइक्नीनी। एफिसी ४:२३; एफिसी ५:१०,१७

3 परमप्रभु यावेमी आं कली शिशी गेशा, शेंब सेल्लती। इन दातेमी सुइ आंम कली ठेयब मसेल्लसीन। परमप्रभु यावेमी इन कली दोदेशो थमा सुइक्तीक गेवा, मेको मिम्शा ब्रेम्शो दुम्शा बाक्कीन। मत्ती २०:२६; १कोरिन्थी ४:६; १कोरिन्थी 4 रां कामी गुइ, खोइल, मिक्च, नोफा, शोव बाक्नीमी। मेको नेल्ल आन के आन आन गेय बाक्ब। १कोरिन्थी १२:१२ 5 मोपा गोपुकी नेल्ल ख्रीस्तम रां का बाक्नय। गेय का का गेचा पुंडसाक्व। १कोरिन्थी १२:२७; एफिसी ४:४,२५

6 गोपुकीमी परमप्रभु यावे आ शिशी पा गेशो गेय का का पय। परमप्रभु यावेमी इ कली आ लोव तुइक्पाइशशा नेंपाइक्ब योवतु हना, थमा सुइशशा मेको लोव नेंपतो। १कोरिन्थी ४:७; १कोरिन्थी १२:४; १पत्रुस ४:१० 7 मुर आन कली वारच पचा कली योवने पुंडसाक्वे हना, वारच पावो। शेंब सेल्लचा पुंडसाक्वे हना, शेंब दुमो। १पत्रुस ४:११ 8 अर्ती गेब योवने पुंडसाक्वे हना, अर्ती गेचा मब्रीदो। मुर आन कली मार गेप्तीवी हना यो, ठेयब सेल्लसीचा कली मगेवो। थमा सुइक्ब आन लां कोइब दुम्ते हना, होस पा गेय पावो। शिशी पवीनु, ग्येरशा पावो। मत्ती ६:३; २कोरिन्थी ८:२; २कोरिन्थी ९:७

दाक्चा आ पबर्म

9 थमा पा दाक्मुशा बाक्कीन। मरिम्शो गेय रे डोन बाक्कीन। रिम्शो पने। १तिमोथी १:५; आमोस ५:१५
10 लोकबपुकीमी दाक्मुशा खोदेशो पा दाक्मुशा बाक्कीन। आंम कली मान पचा मपुंडसीथु, अरु आन कली मान पने।
यूहन्ना १३:४-१५; फिलिप्पी २:३ 11 पचा माल्लशो गेय अल्सी मपथु पने। परमप्रभु यावे आ सोक्तीम इन थुंम मी
ब्रशो खोदेशो आ प्रभु कली गेय पने। प्रकाश ३:१५; प्रेरित १८:२५; कलस्सी ३:२३ 12 आस पा ग्येरसीशा बाक्कीन।
श्येत जनीनु, फाल्ला बाक्कीन। प्रार्थना पना पन बाक्कीन। लूका १८:१-८; कलस्सी ४:२; १थिस्सलोनिकी ५:१७
13 थमा सुइक्ब आन कली आन माल्लशो गेशा, वारच पने। इन खिंमी जाक्ब आन कली बास गेशा थुलीन। ३यूहन्ना
५-८; हिब्रू १३:२

14 सराप चीले मपने। इन कली सराप चीले पाइब आन कली आसीक गेने। मत्ती ५:४४; प्रेरित ७:५९; १कोरिन्थी
४:१२ 15 ग्येरसीशोपुकी नु ग्येरसीने, डाक्शोपुकी नु डाक्कीन। भजन संग्रह ३५:१३-१४; २कोरिन्थी ११:२९ 16 थुं का
डा दुम्शा, दुशा गारशा बाक्कीन। जोक्ब तुइक्ब नड, दे ठेयब मलेत्तीने। आंम महिक्सीशो सुंडसीन। जोक्ब तुइक्ब
ममिम्सीने। रोमी १५:५; फिलिप्पी २:२; यसेया ५:२१ 17 इन कली मरिम्शो पाइब आन कली मरिम्शो मपने। मुर आन
कली मार रिम्शो बाक्बा, मेको मिम्तीन। हितोपदेस २०:२२; १थिस्सलोनिकी ५:१५; २कोरिन्थी ८:२१ 18 चाप्बी
सम्म मुर आन कली जिचा मतने। मुर नेल्ल नु दुशा गारशा बाक्कीन। मर्कूस ९:५०; हिब्रू १२:१४

19 आं दाक्शो लोकबपुकी, इन कली श्येत गेब आन कली आंमा क्येक्क मलेत्तीन। परमप्रभु यावेमी गाइशशा, मेको
आन कली मारेइ पवल, दे सिक्सी पा बाक्कीन। मारदे हना “क्येक्क लेत्तीक गेय आं केन बाक्ब। मिनु गोन पाइनुड,
दे परमप्रभु यावेमी देंब” दे ब्रेक्शो बाक्ब। ब्यवस्था ३२:३५; लेवी १९:१८; मत्ती ५:३८-४४ 20 क्येक्क मलेत्चा ला
ममाइ। “इ जोरी सत्रु शोत्रलु बेक्तेक्म हना, जचा गेवो। तूतू दाक्तेक्म हना, तूचा गेवो। मो पाप्तीवी हना, मेको आन
पियामी मी मोइशशो खोदेशो पा, मुने तोक्नेवे” दे ब्रेक्शो बाक्ब। हितोपदेस २५:२१-२२ 21 मरिम्शोमी रिम्शो कली
लाक्चा मगेव। रिम्शोमी मरिम्शो कली ग्रापतो।

13

सरकार आ पर्बम शेंशो

1 गो नेल्लेमी सरकार आ हुकुम टिचा माल्लनय। मारदे हना रागी डा नेल्ल सासन पाइब आन कली परमप्रभु यावेमी
योत्रशा, अधिकार गेशा वोइशशो बाक्नीम। तीतस ३:१; हितोपदेस ८:१५; यूहन्ना १९:११ 2 सरकार आ हुकुम मटिथु,
गेय पाम्तेक्म हना, सरकार कली मटिशो ला ममाइ, परमप्रभु यावे कली यो मटिशो खोदेशो दुम्ब। मिनु सजाइ गेचा
पुंडसीनीम। 3 रिम्शो पाइबपुकी सरकार आ हुकुम तशा महिनीम “रिम्शो पाइतीनी” देंनीम। मरिम्शो पाइबपुकी चहिं
हिंनीम। १पत्रुस २:१३-१४ 4 मुर आन कली रिम्शो पपाइक्चा कली परमप्रभु यावेमी सरकार वोइक्तु। गे मरिम्शो
पाइतीनी हना, सरकार क्येडा हिनीन। मारदे हना सरकारमी सजाइ गेचा कली परमप्रभु यावे रे अधिकार तशो बाक्ब।
मिनु मरिम्शो पाइब आन कली सजाइ गेब। २इतिहास १९:६-७ 5 “सरकारमी सजाइ गेब” दे मिम्चा ला ममाइ। रिम्शो
पय, दे इं थुं फ्रेंशा बाक्क्य। 6 मोपतीके परमप्रभु यावेमी सरकार कली योत्रशा, गेय पपाइक्तु, दे तुइशशा, गेपुकीमी तिरो
थाप्नीनी। 7 तिरो, भन्सार थाप्तीने। हिक्चा पुंडसीशो कली हिक्कीने, मान पचा पुंडसीशो कली मान पने। मत्ती २७:२१

दाक्तीकेम अरेशो लोत्र खाप्शो

8 मारेइ मारेइम दाक्मुशा बाक्कीन। दाक्ताक्नी हना, परमप्रभु यावे आ अरेशो लोत्र खाप्नीनी। गलाती ५:१४;
१तिमोथी १:५ 9 मेको लोत्रमी मार ब्रेक्शो बाक्ब देंशा हना “मीश वोंइश आस नाता मखोइक्चा, मुर मसाइक्चा, खुइ
मपचा, मवाल्चा” अरु मपचा डा गेय यो बाक्नीम। मिनु मार पा मेको लोत्र खाप्सीब देंशा हना, आंम कली दाक्शो
खोदेशो पा आंम नेक्था डा आन कली दाक्शा, खाप्सीब। प्रस्थान २०:१३-१७; लेवी १९:१८ 10 मोपा दाक्ताक्नी
हना, मुर आन कली मरिम्शो मपाइनीनी। दाक्शोमीन परमप्रभु यावे आ अरेशो लोत्र खाप्शो बाक्ब। १कोरिन्थी १३:४;
मत्ती २२:४०

छेडछेडम बाक्ब मुर दुम्य

11 आं देंशो टिशा रिम्शो पने। सेंसीशा बोक्शो खोदेशो दुम्य। मारदे हना साइ थमा सुइक्ब दुम्शो नाक्त क्येडा
मुल परमप्रभु यावे नु बाक्ची नाक्ती इ नेक्था जाक्त, दे तुइक्तय। १थिस्सलोनिकी ५:६-८; एफिसी ५:१४ 12 नाक्दो
लाक्शा नां सोक्शा, छेडछेडम बाक्शो खोदेशो दुम्शा, होस पा बाक्कीन। छिडछिड डा गेय ताइशशा, छेडछेड डा या
पिम्सीन। १यूहन्ना २:८; एफिसी ५:११ 13 नाक्ती छेडछेड दुम्शो खोदेशो पा रिम्शो गेय पय। छिडछिड डा गेय मार

बाक्नीम देशा हना, शुश जचा ब्वचा, दुक्शा हेंथे गाक्चा, तेल्लेम पा, ग्रांग्रा दिचा डा गेय पचा, जिचा खेचा नु रुश पचा बाक्नीम। लूका २१:३४; एफिसी ५:१८ 14 नक वा फेक्शो खोदेशो पा प्रभु येसु ख्रीस्त नु रां का दुम्शा, इन रां कली मरिम्शो पचा मगेने। गलाती ३:२७; १कोरिन्थी ९:२७; कलस्सी २:२३

14

दाल्गीर मपथु गेय पचा

1 मिनु का निक्शी आन थमा सुइक्तीके बोल्यो मदुम्शो बाक्त हना यो, इन ग्रुम्तीकेमी जाक्चा गेन। तन्न मेको नु आन मिम्तीक आ पबर्म लोव्र मपने। रोमी १५:१; १कोरिन्थी ८:९ 2 मुर कामी नेल्ल जचा दुम्बा, दे मिम्बा, आ थमा सुइक्तीकेम बोल्यो मदुम्शो मुरुम चहिं गिग खाइ ला ब्वाइब। उत्पत्ती १:२९; उत्पत्ती ९:३ 3 मिनु श्ये ब्वाइबमी श्ये मब्वाइब आन कली आइक्च मसेलीन। मिनु श्ये मब्वाइबमी श्ये ब्वाइब आन कली यो दोस मगेन। मारदे हना जचा ब्वचामी मारेइ मपाइब। परमप्रभु यावेमी मुर आन कली कांडचीक पा दाक्शा, आ मुर सेलतीमी। कलस्सी २:१६ 4 मुर आन गेय पाइब कली निसाफ पाइब गे सु बाक्ने? आ होव्रपमी ला मेको कली निसाफ पाइब। मेको ठीक दुम्ने चाण्व, मारदे हना परमप्रभु यावेमी मेको कली ठीक सेल्ले चाण्व। मत्ती ७:१; याकूब ४:११-१२

5 का निक्शी मुरुमी नेल्ल नाक्त कांडचीक मिम्नीम। का निक्शीम चहिं नाक्त का कली ठेयब मिम्नीम। तन्न मार रिम्शो बाक्बा, मेको आंमा तुइक्चा माल्नीम। गलाती ४:१० 6 थमा सुइक्बपुकीमी नाक्त का कली ठेयब मिम्तमेनु, परमप्रभु यावे कली मिम्शा ठेयब मिम्नीम। श्ये ब्वामेनु, परमप्रभु यावे कली मिम्शा ब्वाइनीम। श्ये मब्वाइबपुकीमी यो परमप्रभु यावे कली “गे रिम्शो पाइब बाक्नीनी” दे मिम्शा मब्वाइनीम। 7 गो नेल्ल आंम कली मब्रोंइनय, आंम कली मबेक्नय। 8 ब्रोंइतय हना यो, परमप्रभु यावे आ नें ठेयब सेल्ला कली ब्रोंइय। बेक्तय हना यो, परमप्रभु यावे आ नें ठेयब सेल्ला कली बेक्तय। ब्रोंइतय हना यो, बेक्तय हना यो, परमप्रभु यावे आ मुर नय। २कोरिन्थी ५:१५; गलाती २:२० 9 मारदे हना ख्रीस्त बेक्शा, बेक्शो रे सेंसीशा, नेल्ल आन कली कौव्रब दुम्त। बेक्शो, ब्रोंइशो मुर नेल्ल आन प्रभु बाक्ब। 10 मिनु मार, इं लोक्ब आन कली नाक्चा दुम्बा डा? आइक्च सेल्ला दुम्बा डा? काबु नाक्ती परमप्रभु यावेमी नेल्ल इं कली आ ठेयब नित्तीक आ डोंइती खुप्शा, का का पा निसाफ पाइब। मत्ती २५:३१-३२; प्रेरित १७:३१; २कोरिन्थी ५:१० 11 मारदे हना “प्रभुमी गो ब्रोंइशा बाक्शो खोदेशो पा, मुर नेल्लेमी आं डोंइती आन पोक्च थेक्नीम। मिनु नेल्लेमी परमप्रभु यावे कली ठेयब सेल्लनीम” दे ब्रेक्शो बाक्ब। यसैया ४५:२३; फिलिप्पी २:१०-११ 12 गो नेल्लेमी परमप्रभु यावे आ डोंइती मार पशो बाक्या, मेको का का पा शोव्रचा माल्नय। 13 मोपतीके आंम आंमा मनाक्मुय। थमा सुइक्ब लोक्ब आन थुं खाइक्पाइक्चा डा गेय मपमुय। १कोरिन्थी १०:३३ 14 गो प्रभु येसु आ मुर दुम्शा, मारेइ मारेइ जचा थोव्रक रिम्शो बाक्ब, दे शेंसाक्ड। तन्न सुमी ग्रांग्रा दिशो मिम्बा, मेको कली ग्रांग्रा दिशोन दुम्ब। मत्ती १५:११; प्रेरित १०:१५; तीतस १:१५ 15 गे मार मार जशा ब्वशा, इ लोक्ब आ थुं खाइक्पाइक्चेवे हना, इ मदाक्तीके कोंइनेवे। इ जचा थोव्रकम पतीके इ ख्रीस्त बेक्शो लोक्ब कली खतम मसेलो। १कोरिन्थी ८:११-१३ 16 मोपतीके गे मार दाक्नीनी, मेको कली मुरुम ग्रांग्रा दिचा मगेने। 17 परमप्रभु यावे आ राज्य जचा तूचा आ पबर्म ममाइ। परमप्रभु यावे आ सोक्त रे पा थमा सुइक्बपुकीमी रिम्शो गेय पशा, दुशा ग्येरशा बाक्चा आ पबर्म बाक्ब। १कोरिन्थी ८:८; हिब्रू १३:९ 18 गे मोपा ख्रीस्त आ गेय पाइतीनी हना, परमप्रभु यावे आ दाक्शो नु मुर आन डोंइती मान ततीक दुम्ब। 19 मोपतीके दुशा गारशा नु थमा सुइक्तीक थुं बारपाइक्मुशा बाक्य। रोमी १२:१८; रोमी १५:२ 20 गे जचा थोव्रक आ पबर्म परमप्रभु यावे आ गेय मक्याम्दीने। मारेइ मारेइ जचा ठीक बाक्ब। तन्न होस पने। मारदे हना इन जचा ब्वचामी इन लोक्ब आन थुं खाइक्पाइक्तीनी हना, मरिम्शो दुम्ब। 21 मोपतीके श्ये मब्वथु, अडगुर शांबु मतूथु, इन लोक्ब आन कली थुं मखाइक्पाइक्थु, बाक्चा रिम्शो दुम्ब। रोमी १४:२; १कोरिन्थी १०:२५-२७ 22 इ थमा सुइक्तीके परमप्रभु यावे आ डोंइती बाक्ब। इन जचा थोव्रक आ पबर्म दाल्गीर मपाइतीनी हना, गे ग्येरसीशो मुर दुम्नीनी। 23 दाल्गीर पा जाइब चहिं दोस ताइब दुम्ब। मारदे हना आ थमा सुइक्तीक रे मपाइब। मोपा थमा मसुइक्तीक रे पशो गेय नेल्ल पाप बाक्ब।

15

1 गो थमा सुइक्चामी बोल्यो दुम्शोपुकीमी, आंम कली ठेयब मसेल्लथु, बोल्यो मदुम्शो थमा सुइक्ब आन कली वारच पय। रोमी १४:१ 2 इं दातेम नेल्लेमी अरु आन कली रिम्शो पा आन थमा सुइक्तीक थुं बारपाइक्ब दुम्चा माल्नय। १कोरिन्थी ९:१९; १कोरिन्थी १०:२४, ३३ 3 ख्रीस्तमी यो आंमा दाक्शो मपव “इन कली पशो शुक्शी, आं

तार मोंइसाक्व” दे ब्रेक्शो बाक्ब। भजन संग्रह ६९:९ 4 डोंइती ब्रेक्शो नेल्ल इं कली शेंचा कली ब्रेक्शो बाक्ब। मेको लोव्र पढेशा, फाल्शा इं थुं बारपा, आस पा बाक्ब। १कोरिन्थी १०:११ 5 फाल्तीक सक्ति गेब नु थुं बारपाइक्ब परमप्रभु यावेमी इन कली थुं का दुम्शा, दुशा गारशा बाक्चा गेवल। दुशा गारशा बाक्तीनी हना, ख्रीस्त येसु आ गेय पाइब दुम्नीनी। फिलिप्पी २:२ 6 मिनु गे थुं का नु लोव्र का पा इं प्रभु येसु ख्रीस्त आ आफ परमप्रभु यावे कली ठेयब सेल्ब दुम्नीनी।

7 दोपा येसु ख्रीस्तमी इन कली दाक्शा ब्रवा। मोपान गेपुकी यो दाक्मुशा ब्रमुने। मो पनीनु, परमप्रभु यावे कली ठेयब सेल्नीनी। 8 इं किकी पिपी आन कली गेशो लोव्र खाप्चा कली ख्रीस्त यहूदी आन कली पाप रे प्रोंइब दुम्त। मोपा परमप्रभु यावे आ देंशो थमा बाक्ब, दे कोंइचा कली मोदेंशो दुम्त। मती १५:२४; प्रेरित ३:२५ 9 अर्को रागी डा मुरपुकीमी परमप्रभु यावे आ शिशी आ पर्वम मेको कली ठेयब सेल्मेक्ल। मोपतीके “अर्को रागी डा मुर आन दातेमी इन नें तुइक्पा कुम्सो पाइनुड” दे ब्रेक्शो बाक्ब। भजन संग्रह १८:४९ 10 मिनु लेंशा “अर्को रागी डा मुर आं योव्रशो मुरपुकी नु थुं का दुम्शा, ग्येरसीन” दे ब्रेक्शो बाक्ब। ब्यवस्था ३२:४३ 11 चिनु “ए, अर्को रागी डा मुर नेल्लेमी परमप्रभु यावे कली ठेयब सेलीन, जात नेल्लेमी मेको कली मान पचा माल्नीम” दे ब्रेक्शो बाक्ब। भजन संग्रह ११७:१ 12 यसैयामी “येस्से आ बडसर रे का गूशा, ठेयब दुम्शा, अर्को रागी डा मुर आन कली सासन पाइब। मिनु मेको कली सासन पशो तशा, नेल्लेमी ‘इं कली श्येत रे प्रोंइब’ दे ग्येरशा, आस पा बाक्नीम” दे ब्रेक्शो बाक्ब। यसैया ११:१०; प्रकाश ५:५ 13 आस गेब परमप्रभु यावे आ सोक्तीमी इन कली शुश ग्येरपा, थुं नाइक्पा बाक्चा गेवल। मोपा इन थमा सुइक्तीकेमी ठेयब आस पा बाक्कीन।

पावल आ गेय

14 आं लोकबपुकी, गे इन दातेमी दाक्मुशा, रिम्शो पा जोक्ब तुइक्ब दुम्शा नु शेंमुने चाप्ब दुम्शो बाक्नीनी, दे तुइक्ताक्ड। 15 परमप्रभु यावेमी आं कली शिशी पा शेंब सेल्ती। मोपतीके गो एको चिठीमी इक्का ठेयब लोव्र पा ब्रेक्ताक्ड। रोमी १:५; रोमी १२:३ 16 गो रागी रागी डा मुर आन कली ख्रीस्त येसु आ गेय पाइब दुम्ती। गो चढेब खोदेंशो पा परमप्रभु यावे आ गेय पाइनुड। परमप्रभु यावे आ सोक्त आ पतीकेमी रागी डा मुर नेल्ल आ दाक्शो चढेतीक खोदेंशो दुम्मल। रोमी ११:३३ 17 मेको शेंतीक गेय पचा कली ख्रीस्त येसुमी बोल नु सक्ति गेती। मिनु परमप्रभु यावे आ डोंइती “गो ठेयब गेय पाता” देंती। 18 ख्रीस्तमी पपाइशो गेय आ पर्वम ला लोव्र पाइनुड। गो आंमा गेय पा अर्को रागी डा मुर टीब दुम्मल, दे मेको आन कली शेंतीक गेय यो पना पन बाक्ती। २कोरिन्थी ३:५; रोमी १:५ 19 परमप्रभु यावे आ सोक्तीम गेशो सक्तिमी चिन्ड नु छक लाक्चा डा गेय कोंइताक्डमी। यरूसलेम सहर रे लशा, इल्लीरीकुम रागी सम्म जाक्दीशशा, सहर सहर, गाउं गाउंमी ख्रीस्त आ ग्येरपाइक्ब लोव्र नेल्ल शेंना शेंन गाक्ती। मर्कूस १६:१७; २कोरिन्थी १२:१२ 20 डोंइतीन ख्रीस्त आ लोव्र नेंने थुम्शो आन बाक्तीकेम, मलड। मुल सम्म ख्रीस्त आ नें मनेंशो आन कली शेंनुडमी देंशा, शेंना शेंन गाक्ती। २कोरिन्थी १०:१५-१६ 21 मिनु “आं लोव्र तुइक्पाइक्चा मपुंइसीशोपुकीमी तुइक्चा ताइनीम। मिनु मनेंशोपुकीमी रुप्नीम” दे ब्रेक्शो बाक्ब। यसैया ५२:१५

रोम लचा चिक्शो

22 गो मोदेंशो शेंना शेंन गाक्डानु रोममी बाक्ब थमा सुइक्ब आन कली गुम्थ लाइनुड, दे डोंइती रे देंती, तन्न मुल सम्म इन कली गुम्चा मतड। रोमी १:१३ 23 शुश बर्स रे इन कली गुम्तीक थुं पा बाक्ती। मुल एकेर डा गेय थुम्शा, 24 गो दीसा नित्थी एकेर रे गाक्शा, स्पेन रागी लाइनुड। मिनु इन बाक्तीके यो ओव्रशा गुम्नन्नी। गुम्यानु, ग्येरसीशा, आं थुं नाइक्चा तडल देंती। मिनु नोले आं कली स्पेन सम्म चोव्रदीनीनी कों, दे आस यो पाता।

25 स्पेन लचा डोंइती थमा सुइक्ब आन कली वारच पथ यरूसलेम लाइनुड। प्रेरित १८:२१; प्रेरित १९:२१; प्रेरित २०:२२; प्रेरित २४:१७ 26 मासीडोनीया नु आकाया रागीमी बाक्ब थमा सुइक्बपुकीमी “यरूसलेमम बाक्ब थमा सुइक्बपुकीमी जचा मतामे” देंशो नेंशा, क्येट पोक्शा गेतीमी। मोपतीके मेको आन कली क्येट चोव्रथ लाइनुड। १कोरिन्थी १६:१; २कोरिन्थी ८:१-४ 27 मारदे हना डोंइती यरूसलेमम बाक्ब थमा सुइक्बपुकीमी मेको आन कली येसु ख्रीस्त आ लोव्र शेंशो बाक्तेक्म। मोपतीके मुल मेको आन कली श्येत दुम्तीके, क्येट पोक्शा, चोव्रथ सोइक्ताक्कीमी। १कोरिन्थी ९:११; गलाती ६:६ 28 मेको आन कली सोइशो क्येट चोव्रशा, स्पेन लाइनुड। लडानु, इन बाक्तीके यो ओव्रनुड। 29 इन बाक्तीके जाक्डानु, ख्रीस्त आ आसीकम जाक्नुड, दे तुइक्ताक्ड।

30 आं लोकबपुकी, इं प्रभु येसु ख्रीस्तमी इं कली थुं का सेल्लु। परमप्रभु यावे आ सोक्तीमी दाक्मुपाइक्तु। मिनु थमा पा वोबु दुम्तय। मोपतीके आं पबर्म परमप्रभु यावे कली पुंइना पुंइन बाक्कीन। २कोरिन्थी १:११; २थिस्सलोनिकी ३:१
31 मार पुनीन देंनुड देंशा हना “पावल कली यहूदीया रागीम बाक्ब थमा मसुइक्ब आन गुइ रे प्रोनीन। मिनु यरूसलेम जाक्दीशशा, मेकेर बाक्ब थमा सुइक्ब आन कली वारच पचा गेने। 32 परमप्रभु यावे आ दाक्शो पा ग्येरसीशा यरूसलेम रे पिशा, आंइ कली गुम्पतीने। इन नेंमी थुं का दुम्शा, ग्येरपाइक्मुशा बाक्चा तकल” दे पुनीन। १थिस्सलोनिकी २:१५
33 नेल्ल इं थुं नाइक्पाइक्ब परमप्रभु यावे गोपुकी नु बाक्ल। आमेन।

16

रिम्शो बाक्कीन, दे माइशो

1 केन्क्रेया डा थमा सुइक्ब आन गुम्तीक खिंमी गेय पाइब फिबी दिदी आ पबर्म ब्रेक्शो बाक्नुड। 2 फिबी दिदीमी थमा सुइक्ब शुश आन कली वारच पाप्तु। आं कली यो शुश वारच पाइक्ती। मोपतीके फिबी दिदी कली प्रभु आ नेंमी मान पतीने। मार मार माल्दा, मेको गेशा वारच पतीने।

3 अक्वीला नु प्रिस्कीला साइ गो नु गारशा, ख्रीस्त येसु आ गेय पाम्ताक्से। मेको आस कली “रिम्शो बाक्कीस” देनीन। प्रेरित १८:२; प्रेरित १८:२६ 4 मिनु थमा मसुइक्बपुकीमी आं कली खेदा पामेनु, आं कली प्रोइचा, दे वारच पय्यीसीनु, हेरा साइक्चा पुंइसाक्स। मेको निक्शीमी आं कली प्रोइशो आ पबर्म परमप्रभु यावे कली “गे रिम्शो पाइब बाक्नीनी” देंनुड। गो ला ममाइ, नेल्ल रागी रागी डा थमा सुइक्बपुकीमी यो मेको निक्शी आस पशो मिम्शा, परमप्रभु यावे कली “गे रिम्शो पाइब बाक्नीनी” देंनीम। मोपतीके मेको आस कली “रिम्शो बाक्कीसे” दे मतीने। 5 आस खिंमी देल्ब थमा सुइक्ब नेल्ल आन कली यो “रिम्शो बाक्कीन” दे माइक्चा। आं दाक्शो एपेनेतस कली “रिम्शो बाक्को” दे माइक्चा। एपेनेतस एसीया रागी डा नेल्ल क्येडा डोंइती ख्रीस्त कली थमा सुइक्ब बाक्ब। 6 इन कली शुश वारच पाइब मरीयम कली यो “रिम्शो बाक्को” दे माइक्चा। 7 इं यहूदी जात डा अन्ड्रोनीकस नु युनीयस साइ येसु आ नेंमी गो नु जेल्खानम बाक्शो नसी। आं क्येडा डोंइती मेको निक्शीमी ख्रीस्त कली थमा सुइक्ताक्से। ख्रीस्त आ सोइशो आन दातेमी शुश जोक्ब दुम्ताक्से। मेको आस कली “रिम्शो बाक्कीसे” दे माइक्चा। 8 प्रभु आ नेंम आं दाक्शो अमप्लीआतस कली “रिम्शो बाक्को” दे माइक्चा। 9 गोपुकी नु ख्रीस्त आ गेय पा उरबानस कली “रिम्शो बाक्को” दे माइक्चा। आं दाक्शो स्ताकीस कली “रिम्शो बाक्को” दे माइक्चा। 10 ख्रीस्त कली रिम्शो पा थमा सुइक्ब अपेलेस कली “रिम्शो बाक्को” दे माइक्चा। अरीस्तोबलस आ खिं डा मुर नेल्ल आन कली यो “रिम्शो बाक्कीन” दे माइक्चा। 11 इं यहूदी जात डा हेरोदीयन कली “रिम्शो बाक्को” दे माइक्चा। नारसीसस आ खिं डा प्रभु कली थमा सुइक्ब नेल्ल आन कली यो “रिम्शो बाक्कीन” ने माइक्चा। 12 प्रभु आ गेय पाइब त्रिफेना नु त्रिफोसा दिदी आस कली यो “रिम्शो बाक्कीसे” दे माइक्चा। प्रभु आ शुश गेय पाइब आं दाक्शो पेरसीस दिदी कली यो “रिम्शो बाक्को” दे माइक्चा। 13 प्रभुम योव्रशो थमा सुइक्ब रुफुस कली “रिम्शो बाक्को” दे माइक्चा। साइ रुफुस आ ममामी आं कली आ तौ खोदेशो पती। मेको कली यो “रिम्शो बाक्को” दे माइक्चा। मर्कूस १५:२१ 14 असीनक्रीतस, फ्लेगन, हेरमेस, पत्रोबास, हेरमेस नु मेकोपुकी नु बाक्ब थमा सुइक्ब लोकब नेल्ल आन कली यो “रिम्शो बाक्कीन” दे माइक्चा। 15 फिलोलोगस, युलीया, नेरीयस, नेरीयस आ दिदी, ओलीम्पास नु मेको नेल्ल आन खिंम बाक्ब थमा सुइक्ब आन कली यो “रिम्शो बाक्कीन” दे मतीने। 16 येसु आ नेंमी मुम्मुशा, आसीक गेमुने। एक डा थमा सुइक्ब नेल्लेमी इन कली “रिम्शो बाक्कीन” देंतेक्म। १कोरिन्थी १६:२०

दूली शेंब आन लोव्र मनेंचा

17 आं लोकबपुकी, एको नेल्ल क्येडा नोले डा लोव्र पशा, अर्ती गेनन्नी। कोइ मुरुमी ख्रीस्त आ लोव्र नेंशा, दूली मिम्ताक्म। मेको मुरपुकीमी मुल सम्म दुशा गारशा बाक्शो थमा सुइक्ब लोकब इन कली फ्राचा माल्नीम। मेको आन क्येडा होस पा बाक्कीन। मती ७:१५; २थिस्सलोनिकी ३:६; तीतस ३:१० 18 मेकोपुकीमी येसु ख्रीस्त आ गेय मपाइनीम। आन कोव्रज प्रिंचा ला मिम्शा, गेय पाइनीम। मिलो शिलो लोव्र पा रिम्शो लोव्र नेंब आन थुं क्याल्नीम। मोदेशो मुर आन क्येडा होस पा बाक्कीन। फिलिप्पी ३:१९; कलस्सी २:४ 19 गे शेंतीक लोव्र नेंशा, टीब मुर ननी, दे नेल्लेमी तुइक्ताक्मे। एको नेंशा, गो ग्येरसाक्यी। तन्न रिम्शो गेय मरिम्शो गेय, थमा शेंतीक दूली शेंतीक, थमा नु जोल तुइक्ब दुमीने, देंनुड। मोपतीके ब्रेक्शा, शुश शेंताक्नी। रोमी १:८; १कोरिन्थी १४:२० 20 थुं नाइक्चा गेब परमप्रभु यावेमी रीब पा सैतान कली इन खोइल आगाम वोइक्ब। इं प्रभु येसु ख्रीस्तमी इन कली शिशी पवल।

“रिम्शो बाक्कीन” देशो

21 गो नु गेय पाइब तिमोथीमी इन कली “रिम्शो बाक्कीन” देत। यहूदी जात डा लुसीयस, यासोन, सोसीपाटर सांफामी यो इन कली “रिम्शो बाक्कीन” देतेकम। प्रेरित १६:१-३; प्रेरित १९:२२; फिलिप्पी २:१९-२२; प्रेरित १७:६; प्रेरित २०:४ 22 पावलमी अरेशा ब्रेक्पाइशो एको चिठी ब्रेक्ब गो तेरतीयस नड। मिनु प्रभु आ नेमी गो यो इन कली “रिम्शो बाक्कीन” दे ब्रेक्ताकड।

23 गोम चिठी ब्रेक्पदुनु, गायस आं खिमी बाक्तक। मिनु गायस नु आ खिमी देल्ब थमा सुइक्बपुकीमी यो इन कली “रिम्शो बाक्कीन” दे माइक्चा देतेकम। इरास्तस माइशो सरकार आ गेय पाइबमी यो इन कली “रिम्शो बाक्कीन” देत। थमा सुइक्ब इं लोकब क्वारटसमी यो इन कली “रिम्शो बाक्कीन” देत। १कोरिन्थी १:१४ 24 इं प्रभु येसु ख्रीस्त आ शिशी गेपुकी नेल्ल नु बाक्ल। आमेन।

नोले डा लोव

25 परमप्रभु यावेमी इन कली आ ग्येरपाइक्तीक लोव नु येसु ख्रीस्त आ पबर्म शेंतीक नेंशा, बोल्यो पा थमा सुइक्ब सेल्ने चाप्ब, दे तुइक्ताकड। मोपा साइ डा खुइशो लोव नेल्ल तुइक्पाइशो बाक्ब। १कोरिन्थी २:७; एफिसी १:९; एफिसी ३:४-९ 26 परमप्रभु यावे आ लोव पाइबपुकीम मेको खुइशो लोव ब्रेक्शो बाक्तेकम। मेको गेना हना यो बाक्ब परमप्रभु यावे आ दाक्शो बाक्ब। मेको लोव रागी रागी डा मुर आन कली तुइक्पाइशा थमा सुइक्ब सेल्चा कली बाक्त। 27 आ का ला बाक्शो मारेइ मारेइ तुइक्ब परमप्रभु यावे कली येसु ख्रीस्त रे पा गेना हना यो नेल्ल सक्ति नु ठेयब दुम्तीके बाक्ल। आमेन। रोमी १:५

१ कोरिन्थी

ब्रेक्ब मुर: एको चिठी ब्रेक्ब पावल बाक्ब। मेकोमी आ नें नेल्ल क्येडा डोंइती ब्रेक्शो बाक्त। पावलमी कोरिन्थ सहर कली थमा सुइक्ब आन गुम्तीक सेल्लु। मिनु पावल कली आफ, दे नें वोइक्तेक्म। १कोरिन्थी १:१; १कोरिन्थी ३:१०; १कोरिन्थी ४:१५

गेना ब्रेक्शो: पावल, बर्स निक्शी महिना सां एफिसस सहरम बाक्शा, मेकेर रे कोरिन्थ सहर डा थमा सुइक्ब आन कली चिठी ब्रेक्शो बाक्त। मेको ५७ ए. डी. डा डोंइती डा महिनाम ब्रेक्शो बाक्ब।

मार ब्रेक्शो: पावलमी मेको थमा सुइक्ब आन गुम्तीक खिं ५२ ए. डी. मेर आंमान सेल्ला, बर्स निक्शी मेकेर शेंशो बाक्त। मिनु मेको थमा सुइक्ब आन दातेम मार मार मरिम्शो दुम्मे, मेको र्ल्लोए आ खिं डा मुरुम पावल कली शेंथ जाक्शो बाक्तेक्म।

१. थमा सुइक्ब आन गुम्तीकेमी मीश मुर दोदेशो दुम्चा माल्नीमी।

२. मेकोपुकी हुल हुल दुम्शो बाक्तेक्म १कोरिन्थी १:१-१६

३. मुर आन हेंथे पा मरिम्शो पशो १कोरिन्थी ५:- १०:-

४. गुम्तीक डा मुरुम तुइक्चा माल्शो लोव्र:

मीश मुर आन पर्बम

प्रभु भोज आ पर्बम

परमप्रभु यावे आ सोक्तीम मार गेय पाइब

परमप्रभु यावे आ सोक्त आ नेल्ल क्येडा ठेयब गेय

परमप्रभु यावे आ सोक्त आ लोव्र पचा आ पर्बम

मुर बेक्शा, सेंचा आ पर्बम १कोरिन्थी ११:- १५:-

डोंइती डा लोव्र

१ परमप्रभु यावे आ दाक्शो पा ख्रीस्त येसु आ सोइश्शो ब्रेत्चा पुंइसीशो, गो पावल नड। इं लोकब सोस्थेनेस नु गोमी कोरिन्थ सहरम बाक्ब परमप्रभु यावे आ मुर दुम्शा देल्लब इन कली एको चिठी ब्रेक्शा सोइक्ताक्स्कु। २ गे कोरिन्थ सहर डा ख्रीस्त येसुमी योव्रचा पुंइसाक्नी। मोपतीके योव्रशोपुकी दे ब्रेत्चा पुंइसीनीनी। गेपुकी ला ममाइ, ते ते इं प्रभु येसु ख्रीस्त आ नेंमी खुम्सीनीमी, मेक मेक डा मुरपुकी यो इन खोदेशो पा योव्रशा, योव्रशोपुकी दे ब्रेत्चा पुंइसीनीमी। येसु ख्रीस्त आंइ प्रभु, इं प्रभु, थमा सुइक्ब नेल्ल आन प्रभु बाक्ब। मिनु आ नेंमी गो नेल्ल का दुम्तय। १कोरिन्थी ६:११; प्रेरित ९:१६; प्रेरित १८:१-१७ ३ इं आफ परमप्रभु यावे नु प्रभु येसु ख्रीस्तमी इन कली शिशी पा इन थुं नाइश्शा बाक्चा गेम्सेक्ल।

प्रार्थना पशो

४ गो इन पर्बम परमप्रभु यावे कली “गे रिम्शो पाइब ननी” दे ठेयब सेल्लुड, मारदे हना इन कली शिशी पा येसु ख्रीस्तमी तुइक्पाइक्तु। ५ मिनु तुइक्तीक नु रुप्तीक थुं शुश गेशा, अरु आन कली शेंब नु रुप्पाइक्ब सेल्लु। ६ मिनु इन पतीके मुरपुकीमी ख्रीस्त आ सक्ति ताइनीम। तीतस २:१३; २पत्रुस ३:१३-१४ ७ गेपुकी परमप्रभु यावे आ सोक्तीमी पपाइश्शो गेय नेल्ल पचा ताइतीनी। मारेइ मारेइम गाप्शा बाक्नीनी। इं प्रभु येसु ख्रीस्तमी तपांइसेक्ल, दे रिम्शा बाक्नीनी। ८ इं प्रभु येसु ख्रीस्त जाक्म नाक्ती आ डोंइती ठीक दुम्शा, इन कली सक्ति पाइश्शो गेय पना पन थिप्ब, दे तुइक्ताक्ड। मारदे हना इन कली नेल्ल क्येडा नोले सम्म थमा सुइक्चा मप्रोंइथु रिम्शा बाक्तीक सक्ति गेब। फिलिप्पी १:६; १थिस्सलोनिकी ३:१३ ९ परमप्रभु यावेमी इन कली आ तौ इं प्रभु येसु ख्रीस्त नु गेना हना यो काथा बाक्चा कली योव्रतु। मिनु आ देशो लोव्र नेल्ल खाप्ब। १थिस्सलोनिकी ५:२४

थुं का दुम्शा बाक्कीन

१० आं लोकबपुकी, इं प्रभु येसु ख्रीस्त आ नेंमी, इन कली अर्ती गेनन्नी। लोव्र का, शोव्र का नु थुं का दुम्शा बाक्चा मप्रोनीन। १कोरिन्थी ११:१८; रोमी १५:५; फिलिप्पी २:२ ११ “कोरिन्थीपुकी जिशा बाक्नीम” दे इन पर्बम र्ल्लोए आ खिं डा मुरपुकीमी तुइक्पाइक्तीमी। १२ इन जिशो मार बाक्ब देशा हना, का निक्शीमी “पावल आ नोले खोइक्ब

नकी” का निक्शीमी “आपोल्लोस आ नोले खोइक्ब नकी” का निक्शीमी “केफास आ नोले खोइक्ब नकी” नु का निक्शीमी “ख्रीस्त आ नोले खोइक्ब नकी” देंतीनी। १कोरिन्थी ३:४; प्रेरित १८:२४-२७; यूहन्ना १:४२ 13 मार ख्रीस्त देंशो शुश बाक्नीमी डा? पावलमी इन पाप क्याम्चा कली शीमी केप्शा कांटी थोक्शा क्याइश्शा साइक्चा पुंडसे डा? पावल आ नेमी ब्वाक्कुम खुम्शा गुंडचा पुंडसीनी डा? 14 गो परमप्रभु कली “गे रिम्शो पाइब ननी” देंनुड। मारदे हना गो क्रिस्पस नु गायस डा लाक्शा सुइ कली ब्वाक्कुम खुम्शा मगुंडदुमी। प्रेरित १८:८; रोमी १६:२३ 15 मुर आन कली ब्वाक्कुम खुम्शा गुंडतीक गेय पशो नड हना, मेकोपुकीमी “पावल आ नेमी ब्वाक्कुम खुम्शा गुंडचा पुंडसाक्क” देंम वा। 16 स्तीफानस आ खिं डा मुर आन कली ब्वाक्कुम खुम्शा गुंडताक्डमी। मेको डा लाक्शा, सुइ आन कली ब्वाक्कुम खुम्शा गुंडदुमी कों मगुंडदुमी, मारेइ मतुइक्नुड। १कोरिन्थी १६:१५ 17 ख्रीस्तमी मुर आन कली ब्वाक्कुम खुम्शा गुंडतीक गेय पथ मसोइक्ती। आ लोव्र नेंपाइक्चा कली सोइक्ताक्यी। लोव्रमी फू चुइश्शो खोदेंशो पा ममाइ। गो फू चुइश्शो लोव्र पाता हना, ख्रीस्त बेक्शो सक्ति क्याम्सीशा लाइब।

रागी डा जोक्ब तुइक्ब आन पर्बम

18 “ख्रीस्त पाप क्याम्चा कली साइक्चा पुंडसाक्क” देंशो लोव्र नेंशा, नरक लाइबपुकीमी “मूर्ख लोव्र बाक्ब” देंनीम। गो पाप रे ब्रोंइशोपुकीमी चहिं “एको लोव्रम परमप्रभु यावे आ सक्ति बाक्ब” दे तुइक्नय। २कोरिन्थी ४:३; रोमी १:१६ 19 मिनु “जोक्ब आन कली आन जोक्शो क्याम्शा, तुइक्ब आन कली आन तुइश्शो साम्शा गेनुडमी” दे ब्रेक्शो बाक्ब। यसैया २९:१४ 20 जोक्ब तुइक्ब सु सु नमी? पढेस जोक्ब सु सु नमी? सिनाक्त मुलाक्त शुश लोव्र पा ग्राब सु नमी? लो, मिम्तीने। एको रागी डा जोक्ब तुइक्ब लोव्र कली परमप्रभु यावेमी फश लोव्र मसेला डा? मत्ती ११:२५; रोमी १:२२ 21 परमप्रभु यावेमी मुर आन जोक्तीक तुइक्तीक रे आंम कली मतुइक्पांडसे। परमप्रभु यावेम आ दाक्शो पा, आंइ मूर्ख लोव्र नेंपाइक्ब। मिनु मेको लोव्रम थमा सुइक्ब आन कली पाप रे ब्रोंइचा गेब। 22 यहूदीपुकी चिन्ड नु छक लाक्चा डा गेय कोव्रकोव्र दाक्नीम। ग्रीकपुकीमी मुर आन जोक्तीक तुइक्तीक लोव्र माल्शा, नेंथ गाक्नीम। मत्ती १२:३८; यूहन्ना ४:४८; प्रेरित १७:१८-२१ 23 मेको आन दाक्शो, आन माल्शा गाक्शो नेल्ल तुइश्शा यो गोमी चहिं “ख्रीस्त पाप क्याम्चा कली साइक्चा पुंडसाक्क” दे आन कली नेंपाइक्नीकी। मोदेंशो नेंपाइक्कानु, ख्रीस्त लांमी वोइश्शो फुल्लु खोदेंशो दुम्शा, यहूदी आन कली दाइल पाइक्ब। मिनु राम्सीनीम। अर्को रागी डा मुरपुकीमी “मूर्ख लोव्र बाक्माक्त” दे काइ नेंचा मदाक्नीम। प्रेरित १७:३२; गलाती ५:११; १कोरिन्थी २:१४ 24 परमप्रभु यावेमी योव्रशो यहूदी नु ग्रीकपुकीमी चहिं मार देंनीम देंशा हना “परमप्रभु यावे आ सक्ति नु जोक्तीक तुइक्तीक नेल्ल ख्रीस्त नु थिंसीब” देंनीम। कलस्सी २:३ 25 परमप्रभु यावे आ मूर्ख लोव्र मुर आन जोक्तीक तुइक्तीक क्येडा ठेयब जोक्तीक तुइक्तीक लोव्र बाक्ब। परमप्रभु यावे आ आइक्च सक्ति यो मुर आन ठेयब सक्ति क्येडा ठेयब बाक्ब।

26 आं लोक्बपुकी, परमप्रभु यावेमी इन कली मारदे योव्रडा? इन पढेशो तशा देय, इन जोक्शो तुइश्शो तशा? गे शुश सक्ति पाइश्शो यो मननी। ठेयब खिं डा मुर यो मबाक्नी। लो, मेको मिम्तीन। यूहन्ना ७:४८; याक्ब २:१-५ 27 तन्न परमप्रभु यावेमी जोक्ब तुइक्ब आन कली मुने तोक्चा कली मजोक्ब मतुइक्ब मूर्ख आन कली योव्रतीमी। परमप्रभु यावेमी अधिकार सक्ति पाइश्शो आन कली मुने तोक्चा कली अधिकार सक्ति मपाइश्शो आन कली योव्रतीमी। 28 परमप्रभु यावेमी रागी डा महिक्सीशो आइक्च आन कली योव्रतु। मारदे हना हिक्सीशो नु ठेयब आन कली मुने तोक्चा कली मो पाप्तु। 29 मोपतीके सुइ मुर परमप्रभु यावे आ डोंइती ठेयब दुम्ने मचाप्नीम। रोमी ३:२७; एफिसी २:९ 30 मेकोमी येसु ख्रीस्त आ नेमी इन कली ब्रोंइचा गेब। मेको इन जोक्तीक तुइक्तीक, इन ठीक पतीके, परमप्रभु यावे आ मुर दुम्तीके नु पाप रे प्रोंइतीके बाक्ब। येरमीया २३:५-६; २कोरिन्थी ५:२१; यूहन्ना १७:३९; मत्ती २०:२८ 31 मोपतीके “प्रभु आ पतीके इं नें बोरपाइय्य” दे साइ नेसी देंशो लोव्र मिम्शा, परमप्रभु कली ठेयब सेल्य। येरमीया ९:२२-२३; २कोरिन्थी १०:१७

2

येसु ख्रीस्त आ पर्बम शेंशो

1 आं लोक्बपुकी, गो गेपुकी नु बाक्डानु, परमप्रभु यावे आ लोव्र नेंपदुनु, मुर आन जोक्तीक तुइक्तीक रे नु फू चुइश्शो लोव्र पा मशेंदन्नी। 2 मारदे हना येसु ख्रीस्त कली शीम केप्शा कांटी थोक्शा क्याइश्शा साइक्चा पुंडसीशो लोव्र डा लाक्शा अरु मशेंनुडमी, दे आं थुं फ्रेंशा जाक्शो नड। गलाती ६:१४ 3 मिनु इन कली शेंदन्नीनु, आं रांमी बल

मबाक्थु, हिना हिंन, खिंखि पा शेंताक्नी। गलाती ४:१३; प्रेरित १८:९; २कोरिन्थी १०:३ 4 मुर आन कली जोक्तीक तुइक्तीक कोइशा, ठेयब लोव्र मपड। तन्न परमप्रभु यावे आ सोक्तीम कोइशो सक्ति रे पा शेंताक्नी। मत्ती १०:२० 5 तन्न इन थमा सुइक्तीके मुर आन जोक्तीक तुइक्तीकेम मबाक्थु, परमप्रभु यावे आ सक्तिम बाक्ल। १थिस्सलोनिकी १:५

परमप्रभु आ जोक्तीक तुइक्तीक

6 मो हना यो गो जोक्तीक तुइक्तीक लोव्र रुपब आन कली लोव्र पाइनीकी। तन्न रागी डा नु सासन पाइब आन जोक्तीक तुइक्तीक डा लोव्र चहिं ममाइ। मारदे हना मेको बेक्शा लाइनीम। 7 तन्न गो दोदेशो जोक्तीक तुइक्तीक डा लोव्र शेंनीकी देशा हना, परमप्रभु यावे आ जोक्तीक तुइक्तीक डा लोव्र शेंनीकी। मेको लोव्र डोंइती खुइशो वोइशो बाक्त। मुल इन कली रिम्शो दुम्मल, दे शेंनीकी। मत्ती ११:२५; कलस्सी १:२६ 8 मेको लोव्र रागी डा ठेयब मुरपुकीमी मरुबेम। रुप्तेक्म हना, सक्ति पाइशो प्रभु कली शीम केप्शा कांटी थोक्शा क्याइशो मसदेम वा। 9 मिनु “मिक्चीम मतशो, नोफाम मनेशो, मुर आन थुंमी ममिम्शो लोव्र परमप्रभु यावेमी आ कली दाक्ब आन कली तुइक्पाइशो, रुप्चा गेम्तीमी” दे ब्रेक्शो बाक्ब। यसैया ६४:४ 10 मेको लोव्र परमप्रभु यावेमी आ सोक्त रे पा इं कली तुइक्पाइशो रुप्पाइक्तु। मारदे हना परमप्रभु यावे आ सोक्तीम नेल्ल तुइक्ब। खुइशो लोव्र यो माल्शा गुंइब। परमप्रभु यावे आ सोक्तीम परमप्रभु यावे आ थुं डा लोव्र यो नेल्ल तुइक्ब। 11 मुर आन थुंमी मार बाक्बा, सुमी तुइक्नीमी डा? आंम आन थुं डा लोव्र आंमा ला तुइक्नीम। परमप्रभु यावे आ सोक्त डा लाक्शा सुइमी परमप्रभु यावे आ थुं डा लोव्र मतुइक्नीम, आ सोक्तीम ला तुइक्ब। 12 गोपुकीम रागी डा सोक्त मतशो बाक्नय, परमप्रभु यावे आ सोक्त कली ताइतय। मोपतीके गो परमप्रभु यावे आ गेशो नेल्ल रुप्नय। यूहन्ना १४:१६-१७ 13 मोपतीके गो शेंदकानु, मुर आन जोक्तीक तुइक्तीक लोव्रम मशेंनीकी। परमप्रभु यावे आ सोक्तीम गेशो लोव्र पा शेंनीकी। मिनु परमप्रभु यावे आ सोक्तीम ब्रीशो मुर आन कली शेंशा रुप्पाइक्नीकी। 14 परमप्रभु यावे कली थमा मसुइक्ब मुरुम परमप्रभु यावे आ सोक्त डा गेय मताइनीम। मेको नेल्ल मेको आन कली मूर्ख गेय खोदेशो पा रुप्ने मचाप्नीम। मारदे हना मेको सोक्त डा लोव्र बाक्ब। यूहन्ना ८:४७; १कोरिन्थी १:२३ 15 परमप्रभु यावे आ सोक्त पाइशो मुरपुकीमी मारेइ मारेइ नाक्ने नु रुप्ने चाप्नीम। तन्न मेको आन कली नाक्ब सुइ मबाक्नीम। 16 मार ब्रेक्शो बाक्ब देशा हना “सुमी प्रभु आ थुं नाक्ने नु रुप्ने चाप्बा डा? सुमी प्रभु कली शेने चाप्बा डा?” दे ब्रेक्शो बाक्त। तन्न गोपुकी नु ख्रीस्त आ थुं बाक्ब। यसैया ४०:१३

3

आलम खोदेशो पाइतीनी, दे हुइशो

1 आं लोकबपुकी, इन कली शेंदुनु, परमप्रभु यावे आ सोक्तीम ब्रीशो मुर खोदेशो पा शेने मचबु। मारदे हना रागी डा मुर खोदेशो पा, ख्रीस्त कली थमा सुइक्तीकेमी आल खोदेशो बाक्नीनी। यूहन्ना १६:१२ 2 गो इन कली खमे मगेथु, दूध तुंइताक्नी। मिनु मुल सम्म यो दूध तुंइना तुंइन वोइक्तन्नी। १पत्रुस २:२ 3 गे मुल सम्म रागी डा मुर खोदेशो बाक्नीनी। गे जीनीनी, रुश पाइनीनी। मिनु रागी डा मुर खोदेशो मदुम्नी डा? १कोरिन्थी १:१०-११; १कोरिन्थी ११:१८ 4 का निक्शीमी “गो पावल आ नोले खोइक्ब नकी” का निक्शीमी चहिं “गो आपोल्लोस आ नोले खोइक्ब नकी” दे जिना जिन बाक्तीनी। मोपतीके रागी डा मुर खोदेशो मदुम्नी डा? १कोरिन्थी १:१२

गे परमप्रभु आ खिं बाक्नीनी

5 आपोल्लोस माइशो सु में? गो पावल माइशो सु नडा? प्रभुमी आंस कली आ लोव्र शेंथ योव्रशो नस्कु। गोपुकीमी आंस लोव्र नेंशा थमा सुइक्तीनी। 6 गो खुम्ता आपोल्लोसमी ब्वाक्कु लुक्ताक्व। मिनु परमप्रभु यावेमी कोल्पाइक्तु। प्रेरित १८:२४-२८ 7 मोपतीके खुम्ब ठेयब ममाइ, ब्वाक्कु लुक्ब यो ठेयब ममाइ। कोल्पाइक्ब, बारपाइक्ब परमप्रभु यावे ठेयब बाक्ब। 8 खुम्ब नु ब्वाक्कु लुक्ब कांइचीक बाक्नीस। मिनु आंइ कली पपाइशो गेय दोदेशो पा पका, मोदेशो पा गाल्च ताइनीकी। १कोरिन्थी ४:५ 9 गे परमप्रभु यावे आ रू नु आ खिं ननी। गोपुकी चहिं मेको रूमी गेय पाइब नु मेको खिं सेल्ब नकी। मत्ती १३:२-९; एफिसी २:२० 10 परमप्रभु यावेमी आं कली रिम्शो दारशो खिं सेल्ब सेल्लती। मिनु आ देशो टिशा, खिं डा जग दोशा, बोल्यो पा वोइक्ता। मेको जग तारी अरुमी प्रोव्रना प्रोव्रना लाइक्नीम। मेको प्रोव्रबपुकीमी दोपा रिम्शो दुम्बा, मेको मिम्शा गेय पामेक्ल। 11 थमा जग येसु ख्रीस्त ला बाक्ब। आ क्येडा लाक्शा अरु मारेइ जग मबाक्ब। मिनु सुइमी अरु जग वोइक्ने मचाप्नीम। १पत्रुस २:४-६ 12 मेको जग तारी मार

मार के खिं सेल्नीम देशा हना, सुन, चांदी, हीरा मोती, शी, खिंवा नु नल के खिं सेल्नीम। मुल मार के सेल्शो बाक्बा मतांडसीब। 13 ख्रीस्तम निसाफ पची नाक्त मार के सेल्तेक्म हना यो, मीम हुम्शा कोव्रब। मारदे हना मेना ख्रीस्तमी आ लोव्र शेंब आन गेय दोदेशो बाक्मे, मीम हुम्शा नाक्ब। १कोरिन्थी ४:५ 14 मेको जग तारी सेल्शो खिं लीत हना, सेल्बमी इनाम ताइब। 15 गेय मीम प्रोइशशा, पुलु दुम्शा लत हना, मेको मुर गेना हना यो ब्रोंइचा ताइब। तन्न इनाम मतथु, मारेइ मपाइशशा दुम्शा बाक्चा माल्ब। 16 गे परमप्रभु यावे आ खिं ननी, दे मतुइक्नीनी? मिनु परमप्रभु यावे आ सोक्त इन आगाम बाक्ब, दे मतुइक्नीनी? १कोरिन्थी ६:१९; २कोरिन्थी ६:१६ 17 मिनु सुमी परमप्रभु यावे आ खिं ग्रांग्रा दिशो सेल्बा, परमप्रभु यावेमी मेको कली यो ग्रांग्रा दिशो सेल्ब। मारदे हना परमप्रभु यावे आ खिं परमप्रभु यावे के ला बाक्ब। मिनु मेको गे बाक्नीनी।

सुइ ठेयब मसुंडसमल

18 सुइमी आंम कली जोल मपांडसेक्ल। इन दातेमी सुइमी आंम कली जोक्ब तुइक्ब मिम्साक्व हना, मेको मूर्ख दुम्ल। मोपा ला जोक्ब तुइक्ब दुम्ने चाप्ब। प्रकाश ३:१७-१८ 19 एको रागी डा जोक्तीक तुइक्तीक परमप्रभु यावे आ डोंइती मूर्ख लोव्र बाक्ब। मार ब्रेक्शो बाक्ब देशा हना “जोक्ब तुइक्बपुकी आंम आन जोक्तीक तुइक्तीक गेयमी आंम कली ग्याइक्पांडसीनीम” दे ब्रेक्शो बाक्ब। अय्युब ५:१३ 20 लेंशा “प्रभुमी एको रागी डा जोक्ब तुइक्ब आन मिम्शो जाम्शा लाइब, दे तुइक्ब” दे यो ब्रेक्शो बाक्ब। भजन संग्रह ९४:११ 21 मोपतीके सुइमी मुर आन नें आ पर्बम ठेयब मलेम्मल। मारदे हना नेल्ल इन के बाक्नीम। 22 इन कली शेंब, गो पावल, आपोल्लोस, केफास नु रागी, ब्रोंइचा नु बेक्चा, मुल मार दुम्शो बाक्बा नु नोले मार दुम्बा, नेल्ल इन के बाक्नीम। 23 तन्न गे ख्रीस्त आ मुर बाक्नीनी। मिनु ख्रीस्त परमप्रभु यावे आ तौ बाक्ब। १कोरिन्थी ११:३

4

मुर आन कली मनाक्चा

1 मिनु मुरपुकीमी गो शेंब, आंइ पर्बम मार मिम्चा माल्नीम देशा हना, गो ख्रीस्त आ गेय पाइब नु परमप्रभु यावे आ खुइशशा लोव्र तुइक्पाइक्चा कली शेंब नकी। तीतस १:७ 2 मोदेशो पा शेंबपुकी थमा सुइक्चा माल्शो मुर दुम्चा माल्नीम। लूका १२:४२ 3 गे नु अरु निसाफ पतीकेम आं कली नाक्तीनीनु, मेको नाक्शो मारेइ खोदेशो ममिम्नुड। गो आंमा यो मनाक्सीनुड। 4 गो मारेइ मरिम्शो मपड, दे मिम्नुड। तन्न मतुइक्थु, पडा कों? आं कली निसाफ पाइब प्रभु बाक्ब। 5 मोपतीके प्रभु आ निसाफ पतीक नाक्त मजाक्म सम्म मुर आन कली मनाक्तीन। आ निसाफ नाक्ती जाक्मेनु, खुइशशा वोइशशा लोव्र नेल्ल तुइक्पाइक्ब। छिडछिडम खुइशशा थुं डा थोव्रक नेल्ल छेडछेडम तांडसीनीम। मिनु परमप्रभु यावेमी मुर आन कली “गे रिम्शो पाइतीनी” देंब। १कोरिन्थी ३:८

मुर आन नें ब्रशा ठेयब मलेत्चा

6 आं लोक्बपुकी, गे परमप्रभु यावे आ लोव्र रिम्शो पा टिने चाप्नीनी, दे गो मेको नेल्ल पाइतक। गे “गो पावल आ शेंशो शेंसीब नड” अरुमी “गो आपोल्लोस आ शेंशो शेंसीब नड” दे ठेयब लेशशा, इन नें मबोरपतीने। रोमी १२:३ 7 सुमी इन कली ठेयब सेल्नी? इन पशोमी ठेयब दुम्नी डा? परमप्रभु यावे आ शिशी पशोमी कका ठेयब दुम्शो ननी। मिनु परमप्रभु यावे आ गेशोमी ठेयब लेत्चा दुम्बा डा?

8 मुल गे इन माल्शो नेल्ल ताइतीनी। शुश क्येट थीब दुम्तीनी। शेंब, आंइ कली हिल्लो मपथु, मुर आन कली हुकुम पाइतीनी। गे रिम्शो हुकुम पाइतीनी हना, गो यो गे नु गेय पाइब दुम्शो, रिम्शो दुम वा। प्रकाश ३:१७; प्रकाश ३:२१ 9 परमप्रभु यावेमी आ सोइशशा, आंइ कली मुर नेल्ल आन क्येडा आइक्च सेल्शा साइक्चा पुंडसीचा कली वोइक्तु, दे मिम्नुड। मारदे हना रागी रागी डा मुर नेल्ल नु परमप्रभु यावे आ स्वर्ग डा गेय पाइबम आंइ कली कोव्रना कोव्रन बाक्नीमी। रोमी ८:३६; हिब्रू १०:३३ 10 गो ख्रीस्त आ पर्बम मूर्ख दुम्तक। तन्न गे ख्रीस्त आ पतीकेमी जोक्ब तुइक्ब बाक्नीनी। गोपुकी मचाप्ब दुम्तक। गोपुकी चहिं बोल्यो बाक्नीनी। मुरपुकीमी इन कली मान पा ठेयब सेल्नीम। आंइ कली चहिं महिक्नीम। १कोरिन्थी ३:१८ 11 मुल यो जचा तूचा मतथु, मरिम्शो फेक्सीशा, श्येत जशा, आंइ बाक्तीक खिं यो मबाक्ब। २कोरिन्थी ११:२३-२७ 12 गो आंम गुइमी श्येत पा गेय पा बाक्तक। मुरपुकीमी आंइ कली शुक्शी लोव्र पामेनु, मेको आन कली आसीक गेतक। गिश खेदा पाम्तेक्म हना यो, फाल्शा बाक्तक। १कोरिन्थी ९:१५;

प्रेरित १८:३; मत्ती ५:४४; रोमी १२:१४ 13 जिचा पोक्शा, गाइशशा मरिम्शो पामेनु, गो मेको आन कली रिम्शो लोव्र पा, गारपाइक्नीकी। गोपुकी रागी डा ग्रांग्रा दिचा डा थोव्रक खोदेशो दुम्शा, नेल्ल क्येडा आइक्च महिक्सीशो मुर दुम्तक।

थमा सुइक्ब आन आफ मिम्सीशो

14 गो इन कली मुने तोक्चा कली एको मब्रेक्तु। गे आं दाक्शो तमी तौ इन कली रिम्शो अरेचा कली एको ब्रेक्ताक्ड।
15 ख्रीस्त आ पर्वम अर्ती गेब शेंब मुर शुश बाक्मा माइ। तन्न इन आफ खोदेशो मुर शुश मबाक्नीम। मारदे हना गो इन कली येसु ख्रीस्त आ ग्येरपाइक्ब लोव्र शेंशा, इन आफ दुम्ती। १कोरिन्थी ९:२; गलाती ४:१९ 16 मोपतीके गो इन कली अर्ती का गेनन्नी। आं पशो खोदेशो पने। १कोरिन्थी ११:१ 17 मोपतीके गो प्रभु आ पशोमी, आ रिम्शो नु दाक्शो तौ तिमोथी इन बाक्तीके सोइक्ताक्ड। मेकोमी गो ते ते मार मार लोव्र शेंदु, गो दोपा येसु ख्रीस्त आ लां खोदु, मेको नेल्ल इन कली शेंदल। प्रेरित १६:१-३ 18 मिनु इन दाते डा का निक्शीमी “पावल मजाक्ब” दे ठेयब लेशशो लोव्र पाम्तेक्म, दे लोव्र पशो नेंता। 19 तन्न प्रभुम इन कली गुम्चा गेती हना, गो रीब पा जाक्नुड। मेको ठेयब लेशशो मजाक्ब देंब आन लोव्र ममाइ, मेको आन सक्ति बाक्म कों मबाक्म दे ला कोव्रनुड। 20 मारदे हना परमप्रभु यावे आ राज्य फू चुइशशो ठेयब लोव्र रे पा मतांइसीब। सक्ति पाइशशो गेय रे पा तांइसीब। १कोरिन्थी २:४ 21 गे मार पांइसीचा दाक्नीनी? कोक्केम हिंच कोंइशो खोदेशो पा शेंदन्नी देय आं दाक्शो आल आन कली लेम्शो खोदेशो ब्रोव्रशो लोव्र पा शेंदन्नी? आमा मिम्शा देनीन। २कोरिन्थी १०:२

5

मरिम्शो आन कली तिल्चा माल्लशो

1 गे नु बाक्ब कामी हेंथे पाप्तु देशो लोव्र नेंता। मोदेशो पात्के अर्को रागी डा मुर आन दातेमी यो मबाक्ब। मुर कामी आ आफ आ मीश वोंइसाक्ब, देशो लोव्र नेंता। लेवी १८:८ 2 मिनु मुल सम्म ठेयब लेशशा बाक्नीनी? मोदेशो पशो तशा, इन थुं मखाइक्नीनी? मोदेशो पाइब कली तिल्चा माल्लनीनी। १कोरिन्थी ४:६-८

3 इन दातेम मबाक्ती हना यो, आं थुं गोपुकी नु काथा बाक्शो खोदेशो पा, मेको मुर कली येसु ख्रीस्त आ नेंमी निसाफ पने थुम्ता। कलस्सी २:५ 4 गे नेल्ल प्रभु येसु आ नेंम गुम्शो बाक्तीनी हना, आं थुं गे नु बाक्त हना, इं प्रभु येसु ख्रीस्त आ सक्तिम मत्ती १६:१९; मत्ती १८:१८; २कोरिन्थी १३:३० 5 मेको मुर कली सैतान आ गुइम गेचा माल्लनीनी। मेको आ रां खतम दुम्त हना यो, प्रभु आ निसाफ नाक्तीमी ब्रोंइचा तवल। १तिमोथी १:२०

6 इन ठेयब लेशशो रिम्शो ममाइ। इम्चीली डल्ला का बोरपाइक्ब ओरुत्तीमी फस नेल्ल डाम्शा, बोरब दे मतुइक्नीनी? गलाती ५:९ 7 मेको माइत बोरपाइक्ब ओरुत्ती ताइक्तीने। गे मारेइ मसुप्शो फस खोदेशो दुम्शा, नक दुम्शो बाक्नीनी। मारदे हना आंइ पास्सा चाड डा क्योरशो पाठा ख्रीस्त बाक्ब। प्रस्थान १२:३-२०; प्रस्थान १३:७; यसैया ५३:७; १पत्रुस १:१९ 8 मोपतीके माइत बोरब ओरुत्ती मसुप्शो फस खोदेशो दुम्शा, मरिम्शो थुं पाइशशो गेय पचा प्रोंइशा, नक मुर दुम्शा, पास्सा मानेय।

9 इन कली डोंइती ब्रेक्शो चिठीमी “पात्के पाइब नु काथा बाक्चा मदुम्ब” दे ब्रेक्ताक्न्नी। 10 आं देशो मार बाक्त देशा हना, रागी डा पात्के नु तेल्लेम पाइब, शिम पाइब, खुइ पा रोइशशा गाक्ब, मूर्ति कली पूजा पाइब नु काथा बाक्चा मदुम्ब, दे मशेंदन्नी। मोदेशोपुकी नु काथा बाक्चा मदुम्ब हना दा, रागीमी ते बाक्चा डा? 11 तन्न थमा सुइशशा प्रभु आ मुर दुम्ती देंब लोकबम पात्के पा तेल्लेम पा, शिम दुम्शा, मूर्ति पूजा पा, शुक्शी पा गाक्ब नु शांबु राक्सीमी दुक्शा, खुइ पा गाक्ब दुम्तेक्म हना, मेकोपुकी नु काथा बाक्शा जचा यो मदुम्ब। २थिस्सलोनिकी ३:६ 12 प्रभु आ मुर मदुम्शो आन कली मार निसाफ पाइनुडा डा? प्रभु आ मुर दुम्शो इन दाते डा आन कली चहिं गेपुकीमीन नाक्शा, सजाइ गेचा ममाल्लनीनी डा? 13 परमप्रभु यावेमी रागी डा मुर आन कली निसाफ पाइब। गेपुकी नु बाक्शो पात्के पाइब कली ग्रुंइशा सोइक्तीने। ब्यवस्था ११:६; मत्ती १८:१७

6

निसाफ पचा आ पर्वम

1 इन दाते डा का निक्शी जिम्तेक्म। मिनु मारदे निसाफ पाइब आन डोंइती लाइशशा मुददा कोप्शा, थमा मसुइक्ब निसाफ पाइब आन गुइमी गेनीनी? आंमा इन दातेम गारपाइक्चा माल्लशो ननी। 2 थमा सुइक्बपुकीमी नेल्ल रागी डा मुर आन कली निसाफ पाइनीम देशो लोव्र मतुइक्नीनी डा? गे रागी डा मुर आन कली निसाफ पाइतीनी हना, इन

दाते डा आइक्व लोत्र गारपाइक्ने मचाप्नीनी डा? मत्ती १९:२८ ३ गोपुकीमी परमप्रभु यावे आ स्वर्ग डा गेय पाइब आन कली लाइ यो निसाफ पाइनीकी देशो लोत्र यो प्रेदीनी? आंइ नाक्त कित कित डा पतीक मार बाक्बा डा? ४ इन दातेमी मोदेशो जीब खेब बाक्त हना, मारदे थमा मसुइक्ब, महिक्सीशो मुर आन गुइमी निसाफ पचा कली गेनीनी। ५ मोदेशो पशोमी गे मुने दोक्तीनी। इन दातेमी मोदेशो मुर कली निसाफ पाइब जोक्ब तुइक्ब लोक्ब का मबाक्बा डा? ६ तन्न लोक्बमी लोक्ब कली मुददा कोप्शा, थमा मसुइक्ब आन डोंइती चाक्दीशो तशा, गो थम मरिम्शो लाक्ती। ७ इन जिशो ठीक मलाक्नुड। इन के मार लाइक्तेक्म हना यो, मार पाम्तेक्म हना यो, मुददा मकोप्थु, फाल्शा बाक्ने मचाप्नीनी? मत्ती ५:३८-४८; १थिस्सलोनिकी ५:१५; १पत्रुस ३:९ ८ तन्न गे आंमा इन लोक्ब आन कली मरिम्शो पाइनीनी, रोइक्नीनी।

९ ठीक मपाइबपुकी परमप्रभु यावे आ राज्य ओव्रचा मताइनीम दे मतुइक्नीनी? दूली ममिम्तीने। मरिम्शो पाइबपुकीमी दोदेशो पाइनीम देशा हना, पात्के, तेल्लेम पाइनीमी, मूर्ति कली पूजा पाइनीमी, मुर आन मीश लाइक्नीमी, वोंइश मुर वोंइश मुर ब्वांइसीनीमी, १तिमोथी १:९-११; गलाती ५:१९-२१ १० खुइ पाइनीमी, शिम पाइनीमी, शांबु राक्सीमी दुक्शा गाक्नीमी, शुक्शी लोत्र पा गाक्नीमी, मुर आन के बाक्शो थोव्रक रोइशशा, श्येत गेनीमी। मोदेशो पाइबपुकी परमप्रभु यावे आ राज्यम ओव्रचा मताइनीम। ११ इन दातेमी का निक्शी मोदेशो बाक्मा बाक्त। तन्न मुल गे चिक्शो खोदेशो पा, परमप्रभु यावे आ मुर दुम्शा, प्रभु येसु ख्रीस्त आ नेमी नु इं परमप्रभु यावे आ सोक्तीम पतीके ठीक मुर सेल्चा पुंइसाक्नी। तीतस ३:३-७; १कोरिन्थी १:२; रोमी ३:२६

थमा सुइक्ब आन रां

१२ गो मार गेय पचा दाक्तु, मेको पने चाप्नुड। तन्न गेय का निक्शी आं कली रिम्शो मदुम्ब। गो मारेइ पने चाप्ता हना यो, मरिम्शो पतीक आ वाइल मदुम्नुड। १कोरिन्थी १०:२३ १३ जचा थोव्रक कोव्रज कली बाक्ब, कोव्रज जचा थोव्रक कली बाक्ब। मिनु परमप्रभु यावेमी निम्फा आस कली जाम्शा लाइब सेल्शो बाक्ब। मुर आ रां ग्रांग्रा दिशो तेल्लेम पचा कली मसेल्शो बाक्ब। तन्न रां प्रभु कली सेल्शो बाक्ब। मिनु प्रभु यो रां कली सेल्शो बाक्ब। १थिस्सलोनिकी ४:३-५ १४ परमप्रभु यावेमी प्रभु कली बेक्शो रे सेंताक्व। मिनु आ सक्तिम इं कली यो सेंब। १कोरिन्थी १५:२०; २कोरिन्थी ४:१४ १५ इन रां ख्रीस्त आ रां बाक्ब दे मतुइक्नीनी? मिनु ख्रीस्त आ रां लाइशशा, तेल्लेम आ रां सेल्चा डा? मोदेशो मपने। १६ तेल्लेम नु ब्वांइसीशोनु, रां कांइचीक दुम्सीब दे मतुइक्नीनी? मार ब्रेक्शो बाक्त देशा हना “मेको निक्शी रां का दुम्नीस” दे ब्रेक्शो बाक्ब। उत्पत्ती २:२४ १७ तन्न प्रभु आ मुर दुम्यानु, प्रभु आ सोक्त नु इं सोक्त का दुम्नीस। यूहन्ना १७:२१-२२ १८ ग्रांग्रा दिशो तेल्लेम पतीक रे डोन बाक्कीन। मारदे हना मारेइ मारेइ पाप पनीनु, रां आगामी मपाइनीनी। तेल्लेम पनीनु चहिं आंम रां कली पाप पाइनीनी। १९ इन रां परमप्रभु यावे आ सोक्त आ खिं बाक्ब दे मतुइक्नीनी? परमप्रभु यावेमी आ सोक्त इन रांमी वोइक्तु। मिनु इन रां इन के ममाइ। १कोरिन्थी ३:१६ २० गे ग्याप्शो मुर बाक्नीनी। मोपतीके इन रांमी परमप्रभु यावे कली ठेयब सेलीने। १कोरिन्थी ७:२३; १पत्रुस १:१८-१९; फिलिप्पी १:२८

7

ग्युंवे आ पर्वम लोत्र

१ साइ आं कली इन ब्रेक्शो चिठीमी गेपुकीमी “ग्युंवे पचा नु मपचा, तेको रिम्शो बाक्बा?” दे हिल्लो पशो बाक्तीनी। मिनु मुल मार देनुड देशा हना, वोंइश मुरुमी मीश मुर कली मथिथु बाक्चा रिम्शो दुम्ब। २ मो हना यो हेथे मगाक्मल देशा, ग्युंवे पा वोंइश मुर मीश का नु मीश मुर वोंइश का नु बाक्चा रिम्शो दुम्ब। ३ ग्युंवे पशा, वोंइश मीश दाक्मुशा टिमुशा बाक्सल। ४ मीश मुर आ रां आ वोंइश आ अधिकारम बाक्ब। आ वोंइश आ रां आ मीश आ अधिकारम बाक्ब। ५ वोंइश मीश गारशा, नाक्त का निक्शी काथा मइप्थु, प्रार्थना पना पन बाक्स, दे लोत्रसी गारपाइशशा बाक्चा यो रिम्शो दुम्ब। मेको डा लाक्शा चहिं ब्राशा बास मबाक्कीने। मारदे हना सैतानमी शुश नाक्त सम्म ब्राशा बाक्ने मचाप्नीम दे तुइशशा, इन कली तेल्लेम पपाइक्ने चाप्ब। ६ एको आं पशो लोत्र बित्चान माल्नीनी दे मदेनुड। तन्न आं देशो लोत्र बिस्साक्नी हना, इन कली रिम्शो दुम्ब। ७ मुर नेल्ले आं खोदेशो दुम्मल दे मिम्नुड। मो हना यो परमप्रभु यावेमी आ दाक्शो पा का निक्शी आन कली ग्युंवे पशा बाक्चा, का निक्शी आन कली चहिं ग्युंवे मपथु बाक्चा गेशो बाक्त। मत्ती १९:१२

कान बाक्शो आन पर्वम लोत्र

8 मुल सम्म ग्युंवे मपथु बाकब, आन वोंइश बेकशो मीश मुर नु आन मीश बेकशो वोंइश मुर आन कली “आं खोदेशो पा कान बाक्तेक्म हना, मेको इन कली रिम्शो दुम्ब” देनुड। 9 सु सु चहिं आन का ला बाक्ने मचाप्नीमी, मेकोपुकी ग्युंवे पांडसमल। मारदे हना वोंइश नु मीश माल्शा, हेंथे गाक्चा क्येडा ग्युंवे पचा रिम्शो दुम्ब। १तिमोथी ५:१४

ग्युंवे पशो आन कली शेंशो

10 मेको आं लोत्र ममाइ, ग्युंवे पशो आन कली, प्रभु आ देशो लोत्र मिम्पाइक्नुडमी। मीश मुरुमी आ वोंइश प्रोंइचा म्दुम्ब। मत्ती ५:१२ 11 प्रोंइशा गाक्त हना, अर्को वोंइश खोइक्चा म्दुम्ब। आ वोंइश नु बाक्चा दाक्ब हना, आ वोंइश नुन दुशा बाक्सल। वोंइश मुरुमी आ मीश कली मप्रोनल। मत्ती ५:३२

12 एको लोत्र डा लाक्शा, प्रभु आ लोत्र ममाइ, आं मिम्शो लोत्र मार देनुड देशा हना, थमा सुइक्ब लोकब आ मीश थमा मसुइक्ब बाक्त हना, तन्न आ वोंइश नु बाक्चा दाक्ब हना, आ वोंइशेमी मेको कली मप्रोनल। 13 थमा सुइक्ब मीश मुर आ वोंइश थमा मसुइक्ब बाक्त हना, तन्न आ मीश नु बाक्चा दाक्ब हना, आ मीशेमी यो मेको कली मप्रोनल। 14 मारदे हना थमा मसुइक्ब वोंइश आ मीश आ थमा सुइक्तीकेमी आसीक ताइब। मिनु थमा मसुइक्ब मीश मुर आ वोंइश आ थमा सुइक्तीकेमी आसीक ताइब। मोदेशो म्दुम्त हना, आन आल प्रभु के म्दुम्नीम। तन्न मोदेशो दुम्त हना, मेको आल परमप्रभु यावे के दुम्नीम। रोमी ११:१६ 15 थमा मसुइक्ब वोंइश मुर नु मीश मुरुमी थमा सुइक्ब आन वोंइश मीश आन कली प्रोंइशा ब्राशा बाक्चा दाक्ताक्म हना, लचा गेमेक्ल। काथा बाक्चान माल्ब देशो मबाक्ब। परमप्रभु यावेमी आ मुर आन कली दुशा बाक्शो तचा दाक्ब। रोमी १४:१९ 16 थमा सुइक्ब मीश मुर, गे इ वोंइश कली “थमा सुइक्ब सेल्ने चाप्नुड” दे दोपा तुइक्नेवे? थमा सुइक्ब वोंइश मुर, गे इ मीश कली “थमा सुइक्ब सेल्ने चाप्नुड” दे दोपा तुइक्नेवे? १पत्रुस ३:१

दोपा योत्रशा, मोपा बाक्कीन

17 प्रभुमी इन कली दोपा योत्रशा वोदा मोपान बाक्कीन। परमप्रभु यावेमी इन कली दोपा ब्रेत्ता मोपा बाक्कीन। मेको आं शेंतीक नेल्ल ग्रुम्तीक खिं आन कली बाक्ब। 18 गे ब्रेत्चा पुंडसीचा क्येडा डोंइती खोइक्तीक चिनु खोइक्चा पुंडसीशो बाक्तीनी हना, मख्रोंइसीशो दुम्चा बल मपने। मख्रोंइसीशो बाक्तीनी हना, ख्रोंइसीचा बल मपने। 19 मारदे हना खोइक्तीक चिनु खोइश्शो नु मख्रोंइश्शो आन पर्बम मारेइ ममिम्सीब। तन्न परमप्रभु यावे आ अरेशो टिचा, ठेयब बाक्ब। गलाती ५:६; गलाती ६:१५ 20 मुर नेल्ल इन कली दोदेशो पा ब्रेत्ता, मोदेशोन बाक्कीन। 21 मेना वाइलीम वाइल बाक्तीनी हना, वस्ता मपने। प्रोंइचा पुंडसाक्नी हना, ग्येरशा लने। फिलेमोन १६; एफिसी ६:६ 22 मारदे हना प्रभुमी ब्रेत्ची ना वाइलीम वाइल बाक्तीनी, प्रभु आ डोंइती प्रोंइचा पुंडसीशो मुर दुम्तीनी। ब्रेत्ची ना प्रोंइचा पुंडसीशो मुर बाक्तीनी हना, मुल ख्रीस्त आ वाइलीम वाइल दुम्तीनी। 23 गे थाप्शा, प्रोंइचा पुंडसीशो बाक्नीनी। मुल मुर आन वाइलीम वाइल म्दुमीन। १कोरिन्थी ६:२० 24 आं लोकबपुकी, परमप्रभु यावेमी इन कली दोपा योत्रशा ब्रेशशा वोदा, मोपान परमप्रभु यावे नु बाक्कीन।

ग्युंवे मपथु बाक्शो आन पर्बम

25 ग्युंवे मपथु बाक्ब आन पर्बम प्रभुमी आं कली मारेइ मअरेव। तन्न गो प्रभु आ शिशी पतीकेमी थमा सुइक्ब मुर दुम्ती, गो आं मिम्शो देनुड। 26 श्येत जचाइतय। मोपतीके मुल दोदेशो बाक्या, मोदेशोन बाक्तय हना, रिम्शो दुम्ब, दे मिम्नुड। १कोरिन्थी १०:११ 27 मीश बाक्शो मुरुमी मेको कली प्रोंइशा बाक्चा ममालीन। मीश मपाइश्शो बाक्तीनी हना, ग्युंवे पचा ममालीन। 28 तन्न ग्युंवे पनीनु, मरिम्शो मपाइनीनी। मीश आलम ग्युंवे पाप्तु हना, मेकोमी मारेइ यो मरिम्शो मपाइब। तन्न ग्युंवे पशोपुकीमी श्येत जाइनीम। मोपतीके मेकोपुकीम रागी डा श्येत मजामेक्ल, दे अर्ती गेत्तनी। 29 आं लोकबपुकी, प्रभु जाक्चा चिक्शो बाक्ब। मुल रे मीश बाक्शो मुर, मीश मबाक्शो खोदेशो पा बाक्कीन। रोमी १३:११; लूका १४:२६ 30 रोंका पाइबपुकी रोंका मपाइब खोदेशो पा बाक्कीन। मिनु ग्येरशा बाक्बपुकी मग्येरसीशो खोदेशो पा बाक्कीन। मारेइ मारेइ ग्याप्शा वोइक्बपुकीमी मारेइ मवोइश्शो खोदेशो मिम्तमेक्ल। 31 मुरपुकीम रागी डा गेय पाइनीम हना यो, रागी डा गेय मपशो खोदेशो पा बाक्मल। मारदे हना रागी जाम्शा लचा चिक्शो बाक्ब। १यूहन्ना २:१५-१७

32 गे सुर्ता मपथु, थुं नाइश्शा बाक्शो तचा दाक्नुड। ग्युंवे मपशो वोंइश मुरपुकीमी दोपा प्रभु आ दाक्शो पचा, दे मिम्नीम। 33 तन्न ग्युंवे पशो वोंइश मुरपुकीमी चहिं दोपा मीश कली ग्येरपाइक्चा? दे मिम्शा बाक्नीम। लूका १४:२० 34 मोपा गे निक्शी मिम्शो बाक्नीनी। ग्युंवे मपशो मीश मुर नु मीश आलपुकीमी प्रभु आ दाक्शो पा थुं नु रां

नेल्ले प्रभु कली जिम्मा गेचा कली मिम्नीम। तन्न ग्युंभे पशो मीश मुरपुकीम चहिं रागी डा गेय पा, दोपा आंम वोंइश कली ग्येरपाइक्चा, दे मिम्शा बाक्नीम। 35 इन कली रिम्शो दुम्ब, दे मोदेशो पाता। तन्न श्येत गेचा कली ममाइ। इन ग्रुम्तीकेमी नेल्ल रिम्शो दुम्ब नु इन थुं नेल्लेमी प्रभु कली खोइशशा, रिम्शो बाक्ने चापीन, दे मोदेशो लोत्र पाता।

36 सुइ मुरुमी ग्युंभे पचा कली मीश आल पुंइने थुम्शा, मेको मीश आल कली प्रोंइचा मरिम्शो बाक्ब, दे मिम्ब नु मेको कली दाक्ब हना, ग्युंभे पवल। मेको पाप मबाक्ब। 37 तन्न सुमी ग्युंभे मपाइनुड देशा, आ रां कली चलेब नु आ मीश आल कली मो वोइक्नुड, दे आ थुंम मिम्ब हना, मेको रिम्शो दुम्ब। 38 मोपतीके सुमी आ मीश आल कली ग्युंभे पाइबा, मेकोमी रिम्शो पाइब। सुमी मपाइबा, मेकोमी मेको क्येडा रिम्शो पाइब।

वोंइश बेक्शो मीश मुर आन पर्बम

39 आन वोंइश बाक्ना बाक्न मीश मुरुमी अर्को वोंइश मुर नु ग्युंभे पचा मताइनीम। आन वोंइश बेक्म नोले आन दाक्शो मुर कली ग्युंभे पने चाप्नीम। तन्न प्रभु कली थमा सुइक्ब दुम्चा माल्नीम। रोमी ७:२ 40 गो परमप्रभु यावे आ सोक्तीम ब्रीशो मुर नड। गो मार मिम्नुड देशा हना, लेंशा ग्युंभे पचा क्येडा ग्युंभे मपथु बाक्चा रिम्शो दुम्ब। मिनु ग्येरशा बाक्चा तांइसीब दे मिम्नुड।

8

मूर्ति कली चढ़ेशो श्ये

1 मूर्ति कली चढ़ेशो श्ये ब्वचा आ पर्बम गो नेल्लेमी तुइक्नय। गो शुश तुइक्ब नकी, दे तुइशशोमी मुर आन कली बोरशा ठेयब लेप्पाइक्ब। दाक्मुशा बाक्शोमी चहिं नेल्ल आन कली रिम्शो दुम्ब, नेल्ल आन थुं बारपाइक्ब। प्रेरित १५:२९ 2 मारेइ मारेइ जोक्ब तुइक्ब नड देंबमी आ माल्शो मतुइशशो बाक्ब। गलाती ६:३ 3 तन्न सु सुमी परमप्रभु यावे कली दाक्नीमी, मेको आन कली परमप्रभु यावेमी तुइशशो बाक्ब। १कोरिन्थी १३:१२

4 मूर्ति कली चढ़ेशो श्ये ब्वचा आ पर्बम मार देनुड देशा हना, मूर्तिपुकी सोक्त पाइशशो मनम। मेकोपुकी नु मारेइ मबाक्ब। परमप्रभु यावे डा लाक्शा सुइ मबाक्ब दे तुइक्ताक्ब। ब्यवस्था ६:४ 5 सरीड नु रागीमी शुश देवी देवता नु प्रभु माइशशो बाक्नीम हना यो, १कोरिन्थी १९:२०; भजन संग्रह १३६:२-३; रोमी ८:३८-३९ 6 इं कली परमप्रभु यावे का ला बाक्ब। मेको मारेइ मारेइ सेल्ब इं आफ बाक्ब। मिनु गोपुकी यो मेको आ सेल्शो बाक्नय। मिनु इं प्रभु का ला बाक्ब, मेको प्रभु येसु ख्रीस्त बाक्ब। मेको आ पतीकेम मारेइ मारेइ दुम्शा, गो ब्रोंइचा ताइनीकी। १कोरिन्थी १२:५-६; प्रस्थान २०:३; मलाकी २:१०; एफिसी ४:५-६; यूहन्ना १:३; कलस्सी १:१६

7 गोपुकी नु बाक्ब का निक्शीमी इं मिम्शो लोत्र मरुबेम। मेकोपुकीमी “देवी देवता बाक्नीम” दे डोंइती रे डा आन मिम्शो प्रोंइने मचबेम। मिनु मुल मूर्ति कली चढ़ेशो श्ये ब्वामेनु “पाप राइसीबा, कोर में?” दे मिम्शा, आन थुं क्याल्नीम। १कोरिन्थी १०:२८ 8 जचा थोत्रक जशा ब्वशा, परमप्रभु यावे आ डोंइती मारेइ मपाइब। जशोमी ठेयब मदुम्सीब, मजशोमी आइक्च यो मदुम्सीब, दे तुइक्नय। रोमी १४:१७ 9 मोदेशो तुइक्ताक्नी हना यो, होस पांइसीने। मारदे हना का निक्शीमी इन कली तशा, आन थुं क्याल्तेक्म। गलाती ५:१३ 10 मारदे हना सुइमी इ कली, जोक्ब तुइक्ब दुम्शा, मन्दीरम बाक्शा, मूर्ति कली चढ़ेशो श्ये ब्वशो ताप्तु हना, मेको मजोक्ब मुरुमी मूर्ति कली चढ़ेशो श्ये मब्वाइबा डा? 11 मिनु इन जोक्तीके तुइक्तीकेमी इन मजोक्ब लोक्ब आन कली पाप पपाइक्नीनी। मेको आ पर्बम ख्रीस्त साइक्चा पुंइसाक्ब। रोमी १४:१५ 12 गे इन लोक्ब आन थुं क्याल्पाइक्तीनी हना, गे ख्रीस्त कली मरिम्शो पशो बाक्नीनी। 13 मोपतीके मार देनुड देशा हना, आं कली श्ये ब्वशो तशा, आं लोक्बपुकीमी आन थुं क्याल्नीम दे तुइक्ताक्ब। मिनु मेको आन थुं मक्याल्मेक्ल देशा, मुल डा मेरे गो गेनायो श्ये मब्वाइनुड दे आं थुं फ्रेंशा, श्ये ब्वचा प्रोंइता। रोमी १४:२१

9

शेंबम आन माल्शो गेचा पुंइसीनीम

1 गो आं दाक्शो, आं मिम्शो पने मचाप्नुडा डा? गो ख्रीस्त आ सोइशशो मनडा डा? आं मिक्चीमी इं प्रभु येसु ख्रीस्त कली मतशो नडा डा? गो प्रभु आ गेय पडा रे गेपुकी यो प्रभु आ मुर मदुम्नी डा? १कोरिन्थी १५:८; प्रेरित ९:३-५, १५ 2 शुश मुरुमी आं पर्बम “आं कली ख्रीस्त आ लोत्र शेंथ सोइशशो ममाइ” दे मिम्ताक्म हना यो, इन कली शेंथ सोइशशो

नड। मारदे हना प्रभु आ मुर दुम्तीनी। गे आं सोइश्शो दुम्तीके आ छाप बाक्नीनी। १ कोरिन्थी ४:१५; २ कोरिन्थी ३:२-३ ३ आं शेंशो आ पबर्म हिल्लो पाइब आन कली कोरिन्थीपुकी दोपा थमा सुइक्ब दुम्मा? लो, मिम्तीन, दे माइक्नुडमी। ४ मिनु आंइ कली माल्शो जचा तूचा थोत्रक “गेन” दे पुंइने मचाप्नीनी डा? लूका १०:८ ५ केफास, प्रभु आ लोक्ब नु सोइश्शो नेल्लेमी शेंना शेंन गाक्मानु, आन मीश काथा लाइश्शा गाक्तेक्म। मिनु गोपुकी मेको आन बुद पा आंइ मीश लाइश्शा गाक्चा मताइनीकी डा? ६ शेंबपुकीम शेंशा जाइनीम। बारनाबास नु गो चहिं शेंशा गाक्स्कुनु, जचा मतथु, गेय पचा माल्नस्कु डा? प्रेरित ४:३६; २थिस्सलोनिकी ३:७-९ ७ लडाइ पाइब आन खिं डा जशा बाक्नीमी डा? अडगुर रू थीबपुकीमी श्येत पा खुम्शा, अडगुर मीमेनु, ब्वचा मताइनीमी डा? गोठलापुकीमी चिम्शो बी कली योत्रशा कोत्रशा, घांस लाप्शा, श्येत पा गेय पशा, दूध चिम्शा तूचा मताइनीमी डा? ८ आं देंशो लोत्र मुरुम देंशो लोत्र ला बाक्बा डा? परमप्रभु यावे आ अरेशो लोत्र नु मगारबा डा? ९ मोसामी “ब्यफ कली दांइ पपाइश्शोनु, फुडला मपाइक्चा” दे ब्रेक्शो बाक्त। परमप्रभु यावेमी ब्यफ आन पबर्म ला मोदेशो पचा दे ब्रेक्पदा डा? ब्यवस्था २५:४; १तिमोथी ५:१८ १० इं पबर्म यो ब्रेक्शो बाक्त दे रुपीन। अर्को लोत्र का निक्शी ब्रेक्शो बाक्ब “ब्यफ वाक्बपुकीमी बाली नाली मीमेनु, इच्का अन्न ताइनुड दे वाक्नीमी। चेरब तुप्बमी यो, इच्का चेरब ताइनुड, दे तुप्ब” दे ब्रेक्शो बाक्ब। ११ गोपुकीमी इन कली परमप्रभु यावे आ लोत्र शेंदकानु, इन जचा तूचा थोत्रक तचा, ठीक मदुम्बा डा? रोमी १५:२७ १२ अरु शेंबपुकीमी मेको ताम्तेक्म हना, मार, गो मेको आन क्येडा मताइनीकी डा? मो हना यो गो मोदेशो लोत्र मपाइनीकी। ख्रीस्त आ ग्येरपाइक्ब लोत्र शेंशोनु, श्येत मदुम्ल, दे मोदेशो लोत्र मपाइनीकी। प्रेरित २०:३३-३५ २ कोरिन्थी ११:९ १३ परमप्रभु यावे आ खिंमी गेय पाइबपुकीमी मेक रे जाइनीम। चढेतीकेम गेय पाइबपुकीमी मेक रे ब्वाइनीम, दे मतुइक्नीनी? गन्ती १८:१८-१९, ३१; ब्यवस्था १८:१-३ १४ प्रभुमी “आं ग्येरपाइक्ब लोत्र शेंबपुकी शेंशा गाक्मानु, मेकोपुकी मार मार माल्मा, मेको आं ग्येरपाइक्ब लोत्र शेंतीके रे तचा माल्नीम” देंशो बाक्त। लूका १०:७; गलाती ६:६

१५ मिनु मोदेशो बाक्त हना यो, गो मारेइ मपुनु, मारेइ मताक्गु। आं कली गेचा माल्नीनी दे यो मदेनुड। थमा सुइक्ब आन शोप मलाइक्चा, दे बोरनुड। अरु आन थोत्रक तचा क्येडा बेक्चान रिम्शो, दे मिम्नुड। प्रेरित १८:३ १६ गो शेंशा गाक्ती, आं ठेयब लेत्चा डा मारेइ मबाक्ब। मारदे हना लोत्र शेंथ सोइश्शो नड, दे तुइश्शा, गो प्रभु आ ग्येरपाइक्ब लोत्र मशेंथु बाक्ती हना, आं कली काइ मरिम्शो दुम्ब। येरमीया २०:९ १७ आं दाक्शो पा शेंथ गाक्शो नड हना, गाल्च ताक्गु वा। तन्न आं दाक्शो पा शेंशा गाक्शो मनड। “शेंथ गाक्को” दे माइक्चा पुंइसीतीके शेंशा गाक्ती। १ कोरिन्थी ४:१ १८ मिनु आं शेंशा गाक्शो डा मार ताक्गु डा? गो प्रभु आ ग्येरपाइक्ब लोत्र मारेइ मताक्थु शेंनुड। ग्येरपाइक्ब लोत्र शेंब आन तचा डा, ताक्चा मदाक्नुड।

नेंब मुर नु गारशा शेंशो

१९ गो आं दाक्शो पने चाप्नुड, मो हना यो शुश मुरुमी ख्रीस्त आ लोत्र रुप्शा, आ मुर दुम्मल, दे आन वाइल खोदेशो दुम्शा, शेंना शेंन गाक्ती। मत्ती २०:२७; रोमी १५:२ २० गो यहूदी आन कली शेंदुनु, ख्रीस्त आ लोत्र रुप्पाइश्शा, आ मुर दुम्मल, दे गो यहूदी दुम्ती। गो परमप्रभु यावे आ डोंइती डा पतीके पाइब आन कली शेंना शेंन, मेको ख्रीस्त आ मुर दुम्मल, दे गो परमप्रभु यावे आ डोंइती डा पतीके पाइब खोदेशो दुम्ती। तन्न गो मेको डोंइती डा पतीके पाइब मनड। १ कोरिन्थी १०:३३; प्रेरित १६:३; प्रेरित २१:२०-२६ २१ गो परमप्रभु यावे आ अरेशो लोत्र मतुइक्ब आन कली शेंदुनु, ख्रीस्त आ लोत्र रुप्पाइश्शा, आ मुर दुम्मल, दे गो परमप्रभु यावे आ अरेशो मपाइब खोदेशो दुम्ती। गो परमप्रभु यावे आ अरेशो मपाइब दुम्शा यो, मेको आ डोंइती ख्रीस्त आ अरेशो पाइब दुम्ती। गलाती २:३ २२ गो बोल मपाइश्शो मुर आन कली शेंशा, ख्रीस्त आ लोत्र रुप्पाइश्शा, आ मुर दुम्मल, दे गो बोल मपाइश्शो खोदेशो दुम्ती। का निक्शी ख्रीस्त आ लोत्र रुप्शा, आ मुर दुम्मल, दे गो मेको नेल्ल आन खोदेशो दुम्ती। रोमी ११:१४ २३ प्रभु आ ग्येरपाइक्ब लोत्र रागीम ब्रचा आ पबर्म मेको गेय पाइनुड। मिनु शुश मुरपुकीमी एको लोत्र रुप्शो तशा, आसीक तशा ग्येरसाक्यी।

इनाम तांइसीब, दे मिम्शा गेय पशो

२४ इनाम तांइसीब, दे दोरबपुकी “डोंइती जाक्दीत्नुड” दे मिम्शा दोरनीम। दोरमानु, नेल्ल क्येडा डोंइती जाक्दीप्बम ला इनाम ताइब दे मतुइक्नीनी? मोपतीके गे यो इनाम तकल दे मिम्शा दोरीने। २तिमोथी ४:७; फिलिप्पी ३:१४ २५ मोपा दोरबपुकीमी दोरने चबुल, दे हेंथे मजाइनीम मतूनीम। आन रां नेल्ल चलेस जोक्नीम। मोदेशो पाइबपुकीमी जाम्शा लाइब इनाम ला ताइनीम। गोपुकीमी चहिं गेनायो जाम्शा मलाइब इनाम ताइनय, दे तुइश्शा, मेको आन क्येडा रिम्शो पचा ममाल्नया डा? २तिमोथी २:४-५; १पत्रुस ५:४ २६ गो ते जाक्दीत्चा माल्बा, मेको मतुइक्थु हेंथे पा मदोरनुड। गो

हेंथे पा फशीम मुडकी मआप्नुड। 27 तन्न आं रां कली हेंथे पचा मगेथु, गेय पाइब वाइल खोदेशो सेल्लुड। मारदे हना अरु आन कली मोदेशो शेंताकडमी। मिनु गो आंम आं देशो मपाता हना, आं कली सुइमी महिकनीम। रोमी १३:१४

10

इसाएली आन पशो मिम्तीन

1 आं लोकबपुकी, गो आंइ इसाएली किकी पिपी आन पशो आ पबर्म लोव्र का निक्शी शेंनन्नी। आंइ किकी पिपी नेल्ल गोस्स आगाम बाकशा, समुन्द्र शोक्सीशा लमा बाक्त। प्रस्थान १३:२१; प्रस्थान १४:२२ 2 मिनु नेल्ल गोस्स आगा गाकशा, समुन्द्र शोक्शा, मोसा आ नेम ब्वाक्कुम खुम्शा गुंइचा पुंइसाक्मा बाक्त। 3 नेल्लेमी परमप्रभु यावेम गेशो जचा थोव्रक जामे बाक्त। प्रस्थान १६:४,३५; ब्यवस्था ८:३ 4 नेल्लेमी परमप्रभु यावेम गेशो सोक्त डा ब्वाक्कु तूडमे बाक्त। मिनु मेको आन नोले खोइक्बम सेरथे फुल्लु रे ब्वाक्कु तूडमे बाक्त। मिनु मेको सेरथे फुल्लु ख्रीस्त बाक्माक्त। प्रस्थान १७:६ 5 मो हना यो मेको का निक्शी आन कली तशा, परमप्रभु यावे गाइक्ता बाक्त। मिनु गोरशो रागीमी प्रोना बाक्त। गन्ती १४:२२-३२ 6 मोदेशो मरिम्शो थुं पाइशो मुर मदुमीन, होस पा बाक्कीन। 7 मेको आन दाते डा मूर्ति पूजा पाइब खोदेशो मदुमीन। मार ब्रेक्शो बाक्ब देशा हना “मुरपुकी जचा तूचा कली निस्साक्म। मिनु सिल पचा कली बोक्तेक्म” दे ब्रेक्शो बाक्ब। मेको आन पशो खोदेशो मपने। प्रस्थान ३२:६ 8 गोपुकीम तेल्लेम पचा मदुम्ब। मेको आन दाते डा का निक्शीमी ग्रांग्रा दिचा डा गेय पामे बाक्त। मिनु नाक्त कामीन २३ हजार मुर साइक्चा पुंइसाक्मा बाक्त। गन्ती २५:१९ 9 गोपुकीम प्रभु कली नाक्चा मदुम्ब। मेको आन दाते डा का निक्शीमी मो पाम्तेक्म। मिनु बुस्स रे पा साइक्चा पुंइसमा बाक्त। गन्ती २१:४-६

10 गोपुकीम गन गन पचा मदुम्ब। मेको आन दाते डा का निक्शीम मोदेशो पामे बाक्त। मिनु खतम पाइबमी मेको आन कली खतम पोक्गा बाक्त। गन्ती १४:२, ३५-३६; हिब्रू ३:११, १७ 11 मेको आन मोदेशो दुम्शो तुइशशा, गोपुकीमी रुब्यल, दे एको लोव्र नेल्ल ब्रेक्शो बाक्त। एको रागी नेल्ल जाम्शा लचा चिक्शो बाक्त। १पत्रुस ४:७ 12 “गो ठीक बाक्नुड” देब होस पा बाक्मल। मारदे हना पाप पने चाप्नीम। 13 मुल सम्म गे फाल्ने मचाप्चा डा पा थुं नाक्चा मपुंइसीनी। परमप्रभु यावे थमा सुइक्चा माल्शो बाक्ब। इन फाल्ने चाप्तीक सक्ति कोव्रशा, इन फाल्ने मचाप्चा डा पा थुं थाम्चा मगेब। तन्न गेप्टु हना यो, इन फाल्ने चाप्तीक सक्ति बारपाइक्ब दे तुइक्तीने। भजन संग्रह ६८:२०; २पत्रुस २:९

मूर्ति पूजा नु प्रभु भोज मगारब

14 आं दाक्शो लोकबपुकी, मूर्ति पूजा पचा प्रोनीन। १यूहन्ना ५:२१ 15 गो लोव्र रुप्व मुर आन कली लोव्र पाइनुड। मोपतीके आं देशो ठीक बाक्बा कों, ठीक मबाक्बा, मिम्ने चाप्नीनी। 16 गो कचौरा कली आसीक गेनीकी। मेको आसीक डा कचौरा रे तूयानु, ख्रीस्त आ हुश मिम्शा, आ मुर दुम्शा, मेको नु काथा बाक्शो दुम्नय। गोपुकीमी शोब्ले जिक्शा योक्शा जयानु, ख्रीस्त आ रां मिम्शा, आ मुर दुम्शा, काथा बाक्शो दुम्नय। १कोरिन्थी ११:२३-२६; मत्ती २६:२७; प्रेरित २:४२ 17 गो शुश बाक्यानु, रां का खोदेशो दुम्शा बाक्य। मोपतीके शोब्ले का बाक्ब। मिनु गो नेल्लेम मेको शोब्ले का रे जाइनय। १कोरिन्थी १२:२७; रोमी १२:५ 18 आंइ इसाएल डा चढेबपुकीमी चढेशो गेय मिम्तीने। चढेबपुकीमी मारेइ मारेइ क्योरशा, मेको चढेशो जाइनीम ब्वाइनीम। मो पामेनु, चढेतीके नु काथा बाक्शो खोदेशो दुम्नीम। लेवी ७:६ 19 मिनु आं देशो लोव्र मार रुम्सीब देशा हना, मूर्ति कली चढेशो ठेयब बाक्बा कों? मूर्तिपुकी ठेयब नमी कों? १कोरिन्थी ८:६ 20 अर्को रागी डा मुर आन चढेशो परमप्रभु यावे कली ममाइ, वोल आन कली चढेनीम। मोपा मेकोपुकी वोल नु काथा बाक्ब दुम्नीम। मिनु गो इन कली वोल नु काथा बाक्शो तचा मदाक्नुड। 21 गे प्रभु आ कचौरा रे तूतीनी हना, वोल आन कली चढेशो रे तूने मचाप्नीनी। गे प्रभु आ भोज नु वोल आन कली चढेशा जने मचाप्नीनी। मत्ती ६:२४; २कोरिन्थी ६:१५-१६ 22 गोपुकीम प्रभु कली रुश पपाइक्चा दुम्बा डा? गो प्रभु क्येडा ठेयब नया डा?

गेय नेल्लेम परमप्रभु कली मान पने

23 मारेइ मारेइ ठीक बाक्ब। तन्न गेय का निक्शी चहिं इन कली रिम्शो मदुम्ब। मारेइ मारेइ ठीक बाक्तेक्म हना यो, का निक्शीम इन थमा सुइक्तीक मबारपाइक्नीम। १कोरिन्थी ६:१२ 24 होस पांइसीने, आंम इन कली ला मिम्चा प्रॉइशा, अरु आन कली यो रिम्शो दुम्ल दे मिम्शा गेय पने। रोमी १५:२; फिलिप्पी २:४ 25 श्ये ब्वचा आ पबर्म “श्ये ग्याप्य लनीनु ‘चढेशो श्ये कों’ दे हिल्लो मपने। मारेइ ममिम्थु ग्यापीन” दे शेंनन्नी। रोमी १४:२-१०, २२

26 रागी नु रागीमी मार मार बाक्मा, मेको नेल्ल प्रभु के बाक्ब दे रुपीने। भजन संग्रह २४:१ 27 मिनु ख्रीस्त कली थमा मसुइक्बपुकीमी इन कली खमे जथ ब्रेम्मानु, गे लचा थुं पा लाइतीनी हना, मारेइ हिल्लो मपथु, ममिन्थु ग्येरसीशा जने ब्वने। 28 गे नु काथा बाक्शा जाइबपुकीमी “एको चढेशो बाक्ब” दे तुइक्पाइक्तेक्म हना, मेको मुर आ पर्वम नु थुं ग्येरसीशो दुम्चा आ पर्वम मेको मजने मब्वने। १ कोरिन्थी ८:७ 29 थमा सुइक्बपुकीमी चढेशो मजाइनीम मब्वाइनीम, दे तुइक्नीम। मिनु इन कली जशो ब्वशो तशा, मेको आन थुं क्याल्नीम। आं जचा ब्वचा आ पर्वम आं अधिकार बाक्ब। मारदे अरुम शेंचा माल्नीमी? 30 गो प्रभु कली “गे रिम्शो पाइब बाक्नीनी” देंशा, मारेइ मारेइ जाइनुड ब्वाइनुड। तन्न आं जशो ब्वशो सुइमी मरिम्शो मलाक्मल, दे यो मिम्नुड। १तिमोथी ४:४

31 मोपतीके मार जाइतीनी ब्वाइतीनी हना यो, तूतीनी हना यो, मार पाइतीनी हना यो परमप्रभु यावे कली ठेयब सेल्चा कली पने। कलस्सी ३:१७ 32 यहूदी नु ग्रीक आन कुल, परमप्रभु यावे कली थमा सुइक्ब आन कुल, मुर नेल्ल आन कुल, गेना हना यो रिम्शो गेय पने। रोमी १४:१३ 33 गो मोदेशो पा नेल्ल आन कली ग्येरपाइक्चा डा गेय पचा दाक्नुड। आंम आं कली ममिन्सीथु, मेको आन कली रिम्शो दुम्ल, दे मिम्शा, गेय पाइनुड। “शुशेमी ख्रीस्त कली थमा सुइश्शा, आ मुर दुम्मल” दे मिम्शा बाक्ती। १ कोरिन्थी ९:२०-२२

11

पिया सुम्सीचा आ पर्वम शेंशो

1 गो दोपा ख्रीस्त आ पशो खोदेशो पडा, मोपा गे यो आं पशो खोदेशो पाइब दुमीन। 2 इन कली शेंशो लोत्र का यो मप्रेंथु, टिशा बाक्तीनी दे तुइक्ताक्ड। मिनु गे आ शेंशो नेल्ल पाइतीनी। 3 वोंइश मुर नेल्ल आन पिया ख्रीस्त बाक्ब, मेको रुपीन। मीश मुर आन पिया मेको आन वोंइश बाक्ब। ख्रीस्त आ पिया परमप्रभु यावे बाक्ब दे रुपीन। उत्पत्ती ३:१६; एफिसी ५:२३; १ कोरिन्थी ३:२३

4 खुम्सीशा, प्रार्थना पनीनु, परमप्रभु यावेमी तुइक्पाइश्शो लोत्र पनीनु, वोंइश मुरपुकीमी पियामी मारेइ मसुम्सीचा। सुम्साक्नी हना, ख्रीस्त कली आइक्च सेल्शो खोदेशो दुम्ब। 5 मीश मुरपुकी चहिं आन पिया सुम्सीचा माल्नीम। मसुम्सीशो बाक्तेक्म हना, आन वोंइश आन कली आइक्च सेल्शो खोदेशो दुम्ब। मसुम्सीथु बाक्ब आन कली चां प्रेक्शो खोदेशो मिम्सीब। 6 पिया मसुम्नुड देंबम चहिं आन चां प्रेक्समल। चां प्रेक्शो आन कली मुरपुकीम मरिम्शो मिम्नीम, दे गो नेल्लेमी तुइक्नय। मोपतीके मीश मुरपुकीमी आन पिया सुम्समल। 7 वोंइश मुरुम पिया सुम्चा मदुम्ब। मारदे हना मेको परमप्रभु यावे खोदेशो पा सेल्सीशो नु आ दारस पाइश्शो बाक्नीम। मीश मुरपुकी चहिं आन वोंइश आन दारस पाइश्शो बाक्नीम। मोपतीके सुम्सीचा माल्नीम। 8 वोंइश मुर मीश मुर आ रां रे सेल्शो मबाक्ब। तन्न मीश मुर वोंइश मुर आ रां रे सेल्शो बाक्ब। उत्पत्ती २:२१:३ 9 वोंइश मुर मीश मुर कली वारच पचा कली सेल्शो ममाइ। तन्न मीश मुर आ वोंइश कली वारच पचा कली सेल्शो बाक्ब। उत्पत्ती २:१८ 10 मीश मुरुमी आन पिया सुम्सीचा माल्नीम। मारदे हना परमप्रभु यावे आ स्वर्ग डा गेय पाइबपुकीमी कोव्रशो बाक्नीम। 11 मोदेशो दुम्त हना यो, प्रभुमी “वोंइश मुर कली मीश मुर माल्ब। मीश मुर कली वोंइश मुर माल्ब। मबाक्थु मदुम्ब दे सेल्शो बाक्त” देंत। 12 मीश मुर वोंइश मुर आ रां रे सेल्शो बाक्त हना यो, मुल वोंइश मुर मीश मुर रे थिशो बाक्नीम। मेको मोदेशो परमप्रभु यावे आ पशो बाक्ब। 13 लो आंमा मिम्तीन मीश मुरपुकीमी आन पिया मसुम्थु परमप्रभु यावे कली प्रार्थना पचा दुम्बा? 14 वोंइश मुरपुकीमी लाइश्शो चां थुल्चा मुने दुम्ब, दे आंमा मतुइक्नीनी? 15 तन्न मीश मुरपुकीमी लाइश्शो चां थुल्शो चहिं आन मान ततीक बाक्ब। आन रां सुम्चा कली लाइश्शो चां गेशो बाक्ब। साइ डोंइती रे डा मोदेशो लोत्र बाक्ब दे मतुइक्नीनी डा? 16 गे नु बाक्ब आं शेंशो आ पर्वम जिचा पोक्ब आन कली मार देंनुड देंशा हना, तेइ तेइ शेंथ गाक्कानु, मोदेशो शेंनीकी। परमप्रभु यावे आ गुम्तीक खिंमी यो मोदेशो शेंनीकी।

प्रभु भोज आ पर्वम शेंशो

17 मुल इन कली शेंशो लोत्रम गे रिम्शो दुम्नीनी देंने मचाप्नुड। मारदे हना गुम्नीनु, इन कली रिम्शो ममाइ, मरिम्शो दुम्ब। 18 खुम्सीशा बाक्नीनु, थुं का दुम्शा मबाक्नीनी। एर ओंथ ब्राशा बाक्नीनी देंशो नेंता। एको लोत्र नेंशा, इक्का थमा सुइक्ता। १ कोरिन्थी १:१२; १ कोरिन्थी ३:३ 19 एर ओंथ ब्राशा बाक्चा चहिं दुम्चा माल्ब। मारदे हना लोत्र रुप्व नु मरुप्बपुकी दिल्नीम। मती १८:७; १यूहन्ना २:१९ 20 गे खुम्सीशा बाक्नीनु। मार मार जाइनीनी, मेको प्रभु भोज ममाइ। 21 मारदे हना आंम आंमा चाक्शो जचा थोव्रक जाइनीनी। मिनु मोपान का निक्शी जचा मतथु, शोव्रलु बेक्शो

बाकनीनी, का निक्शी दुक्शा बाकनीनी। यहूदा १२ 22 मार, मोदेशो पा जचा तूचा कली इन खिं मबाक्बा डा? मार, गे परमप्रभु यावे आ गुम्तीक खिं कली आइक्च मिम्नीनी? जचा तूचा मताइब आन कली मुने तोक्नीनी? मिनु मुल इन कली मार देनुडा? रिम्शो पाइतीनी देनुडा डा? गो मदेनुड। याकूब २:५-६

23 मारदे हना प्रभुमी आं कली मार शेंदा, मेको इन कली शेंताक्ड। मेको ग्याइक्चा पुंडसीशो नाक्दो प्रभु येसुम शोब्ले शेशा, मत्ती २६:२६-२८; मर्कूस १४:२२-२४; लूका २२:१९-२० 24 “परमप्रभु गे रिम्शो पाइब बाकनीनी” दे मेको शोब्ले जिक्शा “एको आ रां बाक्ब। एको इन कली बाक्ब। एको ओदेशो आं कली मिम्चा कली पने” देंत। 25 मिनु मोपान जने थुम्शा, कचौरा शेशा “एको कचौरा आं हुश डा नक कबल बाक्ब। गे गेना एको तूनीनी, मेना आं कली मिम्शा तूडीन” देंत। 26 गे गेना एको शोब्ले जाइनीनी नु कचौरा रे तूनीनी, मेना प्रभु लेशशा मजाक्म सम्म मेको आ बेक्शो आ पर्वम शेंनीनी। मत्ती २६:२९

27 सु सुमी हेंथे पा प्रभु भोज डा शोब्ले रे जाइबा नु कचौरा रे तूबा, मेकोमी पाप पा प्रभु आ रां नु आ हुश कली मरिम्शो सेल्ब। १कोरिन्थी १२:२१-२२ 28 तन्न गे नेल्लेमी आंम कली नाक्तीन। मिनु ला मेको शोब्ले जन नु कचौरा रे तूडीन। मत्ती २६:२२ 29 मारदे हना सु सुमी जशा तूशा, प्रभु आ रां बाक्ब, दे ममिम्नीमी, मेको सजाइ गेचा पुंडसीनीम। १कोरिन्थी १०:१६-१७ 30 मोपतीके इन दातेमी शुश मचाप्ब दुम्शो बाकनीनी। शुश रोइ पशो बाकनीनी। का निक्शी बेक्शा यो लाम्तेक्म। 31 तन्न गोपुकीमी आंम कली ठीक पा नाक्शा, प्रभु भोज जाइतय हना, सजाइ गेचा मपुंडसीनय। 32 तन्न प्रभुमी आंइ कली नाक्शा सजाइ गेब। मेको शेंचा कली बाक्ब। मोपा रागी डा मुर नु काथा बाक्शा, जाम्शा मलाइनीकी। हितोपदेस ३:११-१२

33 मोपतीके आं लोकबपुकी, गे जचा कली खुम्सीनीनु, नेल्ल जाक्ने थुम्मे नोले ला जने। 34 शोव्रलु फाल्ने मचाप्बपुकीमी आन खिंम जशा जाक्मल। मो मपाइतीनी हना, प्रभु भोज मरिम्शो सेल्शा नु दोसी दुम्नीनी। अरु थोव्रक आन पर्वम गो इन कली नोले जाक्ची ना शेंनुड।

12

परमप्रभु आ सोक्त आ पर्वम शेंशो

1 आं लोकबपुकी, इन कली परमप्रभु यावे आ सोक्तीम पपाइश्शो गेय मजोक्थु बाक्शो तशा, आं थुं मनुड। मोपतीके एको गेय आ पर्वम शेंनन्नी। 2 स्त्रीस्त कली थमा सुइक्चा क्येडा डोंइती गे मूर्ति पूजा पाइब बाक्तीनी। मिनु मेको मारेइ पने मचाप्ब मूर्ति गे इन थुं हिरशो बाक्तीनी। अय्युब २:१८-१९ 3 मिनु परमप्रभु यावे आ सोक्तीम पपाइश्शो लोव्र पा “येसु सराप रल” देंने मचाम्सीब। परमप्रभु यावे आ सोक्तीम पतीके ला “येसु इं प्रभु बाक्ब” देंने चाम्सीब, दे रूप्पाइक्नन्नी। मर्कूस ९:३९; १यूहन्ना ४:२-३

4 परमप्रभु यावे आ सोक्त का बाक्ब। आ पपाइश्शो गेय चहिं शुश बाक्नीम। एफिसी ४:४-६, ११; रोमी १२:६ 5 आ पपाइश्शो गेय शुश बाक्शा यो, प्रभु चहिं का बाक्ब। १कोरिन्थी १२:२८ 6 मेकेर शुश गेयपुकी बाक्नीमी। मिनु परमप्रभु यावेमी मुर नेल्ल आन कली का का पा मेको गेय पतीके थुं गेब। 7 परमप्रभु यावे आ सोक्तीमी पपाइश्शो गेय नेल्ल आन कली रिम्शो दुम्ल, दे पपाइश्शो बाक्ब। १कोरिन्थी १४:२६ 8 परमप्रभु यावे आ सोक्तीमी का कली जोक्तीक तुइक्तीक लोव्र पपाइक्ब। अर्को कली मेकोन सोक्तीमी शेंतीक सक्ति गेब। 9 का कली आ सोक्तीम पतीके थमा सुइक्तीक सक्ति गेब। अर्को कली सापाइक्तीक सक्ति गेब। 10 का कली छक लाक्चा डा गेय पतीक सक्ति गेब। का कली परमप्रभु यावे आ लोव्र पतीक सक्ति गेब। का कली परमप्रभु यावे आ सोक्त देय वोल आन सोक्त बाक्बा, दे तुइक्तीक सक्ति गेब। का कली परमप्रभु यावे आ सोक्त आ लोव्र पतीक सक्ति गेब। का कली मेको लोव्र आ अर्थ शेंतीक सक्ति गेब। १कोरिन्थी १४:-; प्रेरित २:४ 11 मोदेशो सक्ति पाइश्शो गेय नेल्ले परमप्रभु यावे आ सोक्तीमी पपाइश्शो बाक्ब। मिनु परमप्रभु यावे आ सोक्तीमी आ दाक्स पा सु सु आन कली गेचा दाक्बा, मेको आन कली गेब। रोमी १२:३; एफिसी ४:७

मुर आ रां

12 दोपा मुर आ रांम गुइ, खोइली, नोफा, मिक्च नु अरु मार बाक्तेक्म हना यो, रां का दुम्ब, मोपान स्त्रीस्त आ मुर शुश बाक्तेक्म हना यो, रां का खोदेशो बाक्नीम, दे मिम्सीब। 13 परमप्रभु यावे आ सोक्तीम पतीके यहूदी, ग्रीक, वाइलीम वाइल, होव्रप नु गो नेल्ल परमप्रभु यावे आ सोक्त डा दुम्तय। गलाती ३:२८

14 मारदे हना रां कांइचीक बाक्त हना यो, मेकेर शुश अरु मार मार बाक्नीम। 15 खोइलीमी “गो गुइ मनड। मोपतीके गो रां डा मनड” देंत हना, मार, मेको रां डा मदुम्बा डा? 16 नोफामी “गो मिक्ची मनड। मोपतीके गो रां डा मनड” देंत हना, मार मेको रां डा मदुम्बा डा? 17 मिनु रांमी मिक्च ला बाक्त हना, दोपा नेंचा डा? रांमी नोफा ला बाक्त हना, दोपा नाम्चा डा? 18 तन्न परमप्रभु यावेमी आ दाक्स पा नेंतीके, नाम्तीके, ततीके नु मारेइ मारेइ पतीके गारपाइशशा वोइक्तु। 19 मिक्च ला बाक्त हना, दोपा रां दुम्बा डा? 20 मेको मारेइ मारेइ शुश बाक्तेक्म हना यो, रां चहिं कांइचीक बाक्ब। 21 मिक्चीमी गुइ कली “इ कली ममाल्नुड” देंने मचाप्ब। पियामी खोइली कली “इ कली ममाल्नुड” देंने मचाप्ब। 22 रां डा आइक्च मिम्सीशोपुकी मबाक्थु मदुम्बो बाक्नीम। मेको रां कली शुश माल्शो बाक्नीम। 23 रां डा महिक्सीशो आन कली गो मान पाइक्नय, मदारशो मिम्सीशो आन कली दारपाइक्नय। 24 रां दारशो आन कली दारपाइक्चा ममाल्नय। आइक्च मिम्शो आन कली चहिं परमप्रभु यावेमी नेल्ल क्येडा मान पपाइशशो बाक्ब। 25 मोपा रां का दुम्शोपुकी मब्रामल, कांइचीक दुम्शा बाक्मल नु काम अर्को कली कोव्रमुमल। 26 मोदेशो पा कांइचीक दुम्शोपुकी, काम श्येत जाप्तु हना, नेल्ल श्येत जाइनीम। काम मान ताप्तु हना, नेल्ल गारशा ग्येरसीनीम।

गे ख्रीस्त आ रां बाक्नीनी

27 गे ख्रीस्त आ रां बाक्नीनी। मिनु का का पा मिक्ची, नोफा, शोव्र, गुइ, खोइली नु मार मार बाक्नीनी। रोमी १२:५ 28 परमप्रभु यावेमी थमा सुइक्ब आन ग्रुम्तीकेमी डोंइती ख्रीस्त आ सोइशशोपुकी, मेको आन नोले आ लोव्र पाइबपुकी, मेको आन नोले शेंबपुकी, मेको आन नोले छक लाक्चा डा गेय पाइबपुकी, मेको आन नोले सापाइक्बपुकी, मेको आन नोले वारच पाइबपुकी, मेको आन नोले कोव्रबपुकी नु मेको आन नोले सोक्त आ लोव्र पाइबपुकी वोइक्तीमी। एफिसी ४:११-१२ 29 मार, मेको नेल्ल ख्रीस्त आ सोइशशोपुकी नमी? मार, मेको नेल्ल परमप्रभु यावे आन लोव्र पाइब बाक्नीमी? मार, मेको नेल्ल शेंब बाक्नीमी? मार, मेको नेल्ल छक लाक्चा डा गेय पाइब बाक्नीमी? 30 मार, मेको नेल्ल सापाइक्ब बाक्नीमी? मार मेको नेल्लेम परमप्रभु यावे आ सोक्त आ लोव्र पाइनीमी? मार, मेको नेल्लेम लोव्र आ अर्थ शेंनीमी? 31 गो मार देंनुड देंशा हना, परमप्रभु यावे आ सोक्तीमी पपाइशशो गेय पनीनु, नेल्ल क्येडा ठेयब गेय पने। मिनु गो इन कली नेल्ल क्येडा रिम्शो लां कोइनन्नी। १कोरिन्थी १४:१,१२

13

दाक्ब मुर दुम्चा आ पर्वम शेंशो

1 गो मुर आन लोव्र पाता हना नु परमप्रभु यावे आ स्वर्ग डा गेय पाइब आन लोव्र यो पाता हना, तन्न मुर आन कली मदाक्ताक्ड हना, गो हेंथे पा ताप्शो किडगो नु रेयके पाइब बुप्केल खोदेशो दुम्नुड। 2 गो नु परमप्रभु यावे आ लोव्र पतीक सक्ति, खुइशशो लोव्र नेल्ल रुप्तीक सक्ति, नेल्ल जोक्तीक तुइक्तीक सक्ति नु डांडा याक्पाइक्तीक थमा सुइक्तीके बाक्त हना, तन्न गो नु दाक्तीक मबाक्त हना, गो मारेइ मनड। मत्ती ७:२२; मत्ती १७:२० 3 आं के बाक्शो थोव्रक नेल्ल योक्शा गेशा, आंम आं रां ग्रीइशशा बेक्चा कली गेता हना यो, दाक्ब मुर चहिं मदुम्ती हना, मार रिम्शो दुम्नुडा डा? गो शोर गाक्शो मदुम्नुडा डा? मत्ती ६:२

4 दाक्तीकेमी श्येत फाल्ने नु शिशी पने चाप्ब। दाक्तीकेमी गेहे मपाइब मबोरब। 5 दाक्तीकेमी ठेयब मलेप्ब नु मुने दोक्चा डा लोव्र मपाइब। दाक्तीकेमी आं के ला ठीक मदेब। दाक्तीकेमी रीब पा मचुरब, ईख मकुरब। फिलिप्पी २:४ 6 मरिम्शो पशो तशा मग्येरसीब। ठीक पशो तशा ग्येरसीब। रोमी १२:९ 7 दाक्तीकेमी मारेइ मारेइ सुम्ब, मारेइ मारेइ थमा सुइक्ब, मारेइ मारेइ आस पाइब नु नेल्ल फाल्ने चाप्ब। हितोपदेस १०:११; मत्ती १८:२१-२२; रोमी १५:१

8 दाक्तीक गेनायो मक्याम्सीब। परमप्रभु यावे आ लोव्र पतीक जाम्शा लाइब। परमप्रभु यावे आ सोक्त आ लोव्र यो नुप्ब। तुइक्तीक सक्ति नुप्शा लाइब।

9 मारदे हना आंइ जोक्तीक तुइक्तीक आइक्च बाक्ब। आंइ परमप्रभु यावे आ लोव्र पतीक यो नेल्ल रुप्चा डा मबाक्ब। 10 नोले चहिं गोपुकीमी नेल्ले तुइशशा रुप्नय। मिनु मरुप्शो नु मतुइशशो मारेइ मलीब। 11 गो आल बाक्डानु, आलम ब्वाक्स पा ब्वाक्ती। आलम मिम्स पा मिम्ताक्ड। आलम पस पा पाता। मिनु कोल्शा ठेयब दुम्शा, आलम खोदेशो मपड। 12 मुल गोपुकीमी ब्राब्रा पा ताइतय। मेना रिम्शो पा ताइनय। मुल गो इक्का ला रुप्नुड। मेना नेल्ल रिम्शो पा रुप्नुड। परमप्रभु यावेमी आं कली तुइशशो बुद पा, गो मेना नेल्ल तुइक्नुड। गन्ती १२:८; २कोरिन्थी ५:७; १कोरिन्थी ८:३ 13 थमा सुइक्चा, परमप्रभु यावेमी आ देशो नेल्ल खाप्ब, दे आस पा बाक्चा नु दाक्तीक सांफा बाक्नीम। मेको सांफामी दाक्तीक चहिं नेल्ल क्येडा ठेयब बाक्ब। १थिस्सलोनिकी १:३; १यूहन्ना ४:१६

14

मतुइश्शो नु रुष्शो लोव्र पचा

1 दाक्तीक पाइश्शो मुर दुमीने। परमप्रभु यावे आ सोक्तीम पपाइश्शो गेय शुश मालीन। परमप्रभु यावे आ लोव्र पतीक शुश मालीन। 2 परमप्रभु यावे आ सोक्त आ लोव्र पाइबमी मुर कली लोव्र मपाइब। तन्न परमप्रभु यावे कली लोव्र पाइब। सुइमी मेको आ लोव्र मरुप्नीम। मेकोमी परमप्रभु यावे आ सोक्त आ पतीकेमी खुइश्शो लोव्र पाइब। प्रेरित २:४; प्रेरित १०:४६ 3 परमप्रभु यावे आ लोव्र पामेनु, मुर आन थुं बारपाइक्ब। रिम्शो गेय पपाइक्ब, नु थुं खाइश्शो आन कली सापाइक्ब। 4 परमप्रभु यावे आ सोक्त आ लोव्र पाइबमी आंम थुं कली ला बारपाइक्ब। तन्न परमप्रभु यावे आ लोव्र पाइबमी गुम्तीक खिं डा मुर आन थमा सुइक्तीके बारपाइक्ब। 5 गे नेल्लेम परमप्रभु यावे आ सोक्त आ लोव्र पशो दाक्नुड। तन्न मेको क्येडा परमप्रभु यावे आ लोव्र पशो तचा दाक्नुड। परमप्रभु यावे आ सोक्त आ लोव्र पाइब क्येडा, परमप्रभु यावे आ लोव्र पाइब ठेयब बाक्ब। तन्न सोक्त आ लोव्र आ अर्थ शेंब बाक्त हना, गुम्तीक खिं डा मुर आन कली रिम्शो दुम्ब। १कोरिन्थी १२:१०

6 आं लोकबपुकी, गो परमप्रभु यावे आ सोक्त आ लोव्र पा, इन गुम्तीकेमी जाक्ती हना, इन कली मरुप्चा डा बाक्त। गो इन कली नोले दुम्तीक लोव्र, जोक्तीक तुइक्तीक लोव्र, परमप्रभु यावे आ लोव्र नु आ शेंतीक लोव्र पाता हना चहिं इन कली रिम्शो दुम्ब। १कोरिन्थी १२:८ 7 ताप्तीके मुराली, तार पाइश्शो ठेयब ताप्तीके ताप्मेनु, हेंथे पा ताप्तेक्म हना, मार ताप्शो बाक्बा, दोपा तुइक्नीमी? 8 लडाइ पची ना तुराही ताप्बमी मरुप्चा डा पा ताप्तु हना, लडाइ पाइब लाइनीमी डा? 9 मिनु गेपुकीमी सोक्त आ लोव्र पनीनु, इन देंशो लोव्र सुमी रुप्नीमी डा? इन मोदेशो पशो लोव्र नेल्ल फशेम योल्शो खोदेशो दुम्ब। 10 रागीमी लोव्र शुश बाक्नीमी। मेको लोव्र नेल्ल रुप्चा डा बाक्नीमी। 11 तन्न गो मेको लोव्र रुप्ने मचाप्ता हना, गो अर्को रागी डा मुर दुम्नुड। मिनु मेको लोव्र पाइब आं कली यो अर्को रागी डा मुर दुम्ब। 12 गे इन दातेमी मोदेशो बाक्ब। परमप्रभु यावे आ सोक्तीम पपाइश्शो गेय पचा दाक्ताक्नी हना, गे इन गुम्तीक खिं डा मुर आन थमा सुइक्तीक बोल्यो दुम्चा कली गेय पने।

13 मोपतीके सुमी परमप्रभु यावे आ सोक्त आ लोव्र पाइबा, मेकोमी आ अर्थ शेंचा कली पुनल। १कोरिन्थी १२:१० 14 गो सोक्त आ लोव्र पा प्रार्थना पडानु, आं थुंमी मारेइ मरुप्नुड। 15 गो मुल मार पाइनुड देंशा हना, गो सोक्त आ लोव्रमी प्रार्थना पडानु, आ थुंमी यो प्रार्थना पाइनुड। परमप्रभु यावे आ सोक्तीम कुम्सो पडानु, आं थुंमी यो कुम्सो पाइनुड। एफिसी ५:१९ 16 मिनु गेपुकी खुम्सीशा बाक्नीनु, सोक्त आ लोव्रम आसीक गेशा, परमप्रभु यावे कली “गे रिम्शो पाइब बाक्नीनी” देंतीनी हना, दोपा मरुप्ब मुरुमी “आमेन” देंने चाप्बा डा? 17 इन लोव्र रिम्शो बाक्त हना यो, अर्को मुर आ थुं मबारपाइश्शो बाक्त। 18 गो परमप्रभु यावे कली “गे रिम्शो पाइब बाक्नीनी” देंनुड। मारदे हना गो सोक्त आ लोव्र नेल्ल इन क्येडा शुश पाइनुड। 19 तन्न थमा सुइक्ब आन गुम्तीकेमी बाक्शा, मुर आन कली शेंचा नु रुप्पाइक्चा कली गो १० हजार सोक्त आ पशो लोव्र क्येडा रुप्चा डा ५ ओटा लोव्र पचा रिम्शो लाक्ती।

20 आं लोकबपुकी, आलमी मिम्शो खोदेशो पा ममिम्तीने। मरिम्शो गेय पचा कली मजोक्ब आल खोदेशो दुम्शा बाक्कीने। तन्न इन मिम्तीकेमी निप्स पाइश्शो मुरुम मिम्शो खोदेशो पा मिम्तीन। एफिसी ४:१४; यसैया २८:११-१२ 21 मिनु परमप्रभु यावेमी आ अरेशा ब्रेक्पाइश्शो लोव्रमी “गो डोन रागी डा मुर आन मतुइश्शो लोव्र पतीकेमी नु रागी डा मुर आन लोव्रमी मेको नु लोव्र पाइक्नुड। मो हना यो मेकोपुकीम आं लोव्र मनैनीम” दे प्रभुमी देंत, दे ब्रेक्शो बाक्ब। यसैया २८:११, १२ 22 परमप्रभु यावे आ सोक्त आ लोव्र पतीके थमा सुइक्ब आन कली ममाइ, थमा मसुइक्ब आन कली चिन्ड दुम्ब। परमप्रभु यावे आ लोव्र चहिं थमा मसुइक्ब आन कली ममाइ, थमा सुइक्ब आन कली बाक्ब। 23 मिनु थमा सुइक्ब नेल्ल खुम्सीशा बाक्मानु, मुर नेल्लेमी परमप्रभु यावे आ सोक्तीमी पपाइश्शो मतुइश्शो लोव्र पना पन बाक्तेक्म हना, अरु मुर, थमा मसुइक्ब ओव्रशा, इन मोदेशो लोव्र पशो नेंशा “गशो बाक्तेक्म” दे मदेनीमी डा? 24 तन्न गे नेल्ल परमप्रभु यावे आ लोव्र पना पन बाक्नीनु, थमा मसुइक्ब, अरु मुर ओव्रशा, इन मोदेशो नेंशा, आ थुंमी मिम्शा, आ मरिम्शो पशो नेल्ल फुक्ब। 25 आ थुं डा खुइश्शो नेल्ल तुइश्शा, बाप्शा “परमप्रभु यावे ठेयब बाक्ब” देंशा, परमप्रभु यावे थमा पा, इन दातेमी बाक्ब, दे तुइक्ब। यूहन्ना १६:८

26 आं लोकबपुकी, मुल मार देंनुड देंशा हना, गे खुम्सीशा बाक्नीनु, नेल्ल इन के गेय का का बाक्ब। कामी परमप्रभु यावे कली कुम्सो पाइब, कामी लोव्र शेंबा, कामी नोले दुम्तीक लोव्र पाइब, कामी परमप्रभु यावे आ सोक्त आ लोव्र पाइब नु अर्कोमी मेको लोव्र आ अर्थ शेंब। मेको गेय नेल्ल थुं बारपाइक्चा कली दुम्ल। १कोरिन्थी १२:८-१०; एफिसी

४:१२ 27 परमप्रभु यावे आ सोक्त आ लोव्र पामेनु, निक्शीमी कि सांमी पामेक्ल। मिनु का का पा पचा माल्नीम। मिनु मुर कामी आ अर्थ शेंचा माल्ब। 28 तन्न मेको लोव्र आ अर्थ शेंब मबाक्त हना, सिक्सी पा बाक्चा माल्नीम। सोक्त आ लोव्र पाइबमी आंम थुं बारपाइक्चा कली, परमप्रभु यावे कली लोव्र पवल। 29 परमप्रभु यावे आ लोव्र पामेनु, निक्शीमी कि सांमी पामेक्ल। मिनु नेंबपुकीमी “मेको लोव्र परमप्रभु यावे आ लोव्र नु गारबा देय मगारबा?” दे नाक्चा माल्नीमी। प्रेरित १७:११; १थिस्सलोनिकी ५:२१ 30 तन्न मेकेर बाक्ब कामी परमप्रभु यावे आ नोले दुम्ब लोव्र तुइक्ताक्व हना, डोंइती डा लोव्र पाइब सिक्सी पा बाक्ल। 31 गे नेल्लेमी का का पा परमप्रभु यावे आ लोव्र पने चाप्नीनी। मो पाइतीनी हना नेल्लेमी शेंसीने चाप्नीनी। गे नेल्ल इन थुं बारब। 32 परमप्रभु यावे आ लोव्र पाइब आन सोक्त मेको आन गुइम बाक्ब। 33 मारदे हना परमप्रभु यावे खल बल डा परमप्रभु मबाक्ब। मेको थुं नाइशशा बाक्तीक परमप्रभु बाक्ब।

थमा सुइक्ब आन गुम्तीकेमी

34 मीश मुरपुकी लोव्रसी मपथु, सिक्सी पा बाक्मल। मेकोपुकी ब्वाक्चा मताइनीम। मारदे हना अरेशो लोव्रमी मोदेशो ब्रेक्शो बाक्ब। मिनु मेको लोव्र मेकोपुकीम टिचा माल्नीम। १तिमोथी २:११-१२; उत्पत्ती ३:१६ 35 लोव्र मरुप्तेक्म हना, आन खिं लमा नोले आन वोंइश आन कली हिल्लो पामेक्ल। थमा सुइक्ब आन गुम्तीकेमी चहिं लोव्र मपामेक्ल, मारदे हना मुने दुम्ब। 36 मार, परमप्रभु यावे आ लोव्र इन रे पा जाक्म डा देय इन कली ला जाक्म? 37 इन दातेमी परमप्रभु यावे आ लोव्र पाइब नु आ सोक्तीम ब्रीशो मिम्ब मुरुमी आं ब्रेक्शो लोव्र प्रभु आ देशो लोव्र बाक्ब दे तुइक्तामेक्ल १यूहन्ना ४:६ 38 तन्न सुइमी “पावल आ शेंशो प्रभु आ लोव्र मबाक्ब” देंत हना, मेको आ लोव्र यो थमा मसुतीन। 39 मोपतीके आं लोक्बपुकी, परमप्रभु यावे आ लोव्र पचा कली शुश बोल पने। मिनु परमप्रभु यावे आ सोक्त आ लोव्र पाइब आन कली मतेक्कीन। 40 खुम्सीशा बाक्नीनु, खल बल मपथु, नेल्ल रिम्शो दुम्चा माल्ब। १कोरिन्थी १४:३३; कलस्सी २:५

15

येसु बेक्शो रे सेंसीशो

1 आं लोक्बपुकी, इन कली डोंइती येसु ख्रीस्त आ पर्बम शेंशो ग्येरपाइक्तीक लोव्र मिम्पाइक्नुड। गोपुकीमी एको लोव्र नेंशा थमा सुइक्तीनी। मिनु मुल यो थमा सुइक्ना सुइक्न बाक्तीनी। 2 एको लोव्र दोपा शेंदन्नी, मोपा थमा सुइक्ना सुइक्न बोल्यो दुम्तीनी हना, परमप्रभु यावे नु बाक्चा ताइनीनी। 3 मारदे हना आं ख्रीस्त रे तशो ठेयब लोव्र इन कली शेंताक्न्नी। दोदेशो लोव्र बाक्ब देशा हना, परमप्रभु यावे आ लोव्रमी ब्रेक्शो खोदेशो पा ख्रीस्त इं पाप आ पर्बम साइक्चा पुंइसाक्व। यसैया ५३:१२ 4 मेको थिम्चा पुंइसाक्व। मिनु परमप्रभु यावे आ लोव्रमी ब्रेक्शो खोदेशो पा आ नित्थ नाक्ती सेंचा पुंइसाक्व। होसे ६:२; लूका २४:२७,४४,४६ 5 मिनु सेंसीशा, डोंइती केफास कली तपांइसाक्व। मिनु नोले १२ जना शेंसीब आन कली तपांइसाक्व। लूका २४:३४; यूहन्ना २०:२६ 6 नोले कालेमी ५ सहे क्येडा शुश थमा सुइक्ब आन कली तपांइसाक्व। का निक्शी मुल बेक्शा लाम्तेक्म। शुश चहिं मुल यो बाक्नीम। 7 नोले याक्ब कली तपांइसाक्व। मिनु आ सोइशशो शेंसीब नेल्ल आन कली यो तपांइसाक्व। लूका २४:५० 8 मिनु नेल्ल क्येडा नोले गो महिना मजाक्दीत्थु जरमेशो आल खोदेशो आं कली तपांइसाक्व। १कोरिन्थी ९:१; प्रेरित ९:३-६ 9 मारदे हना गो सोइशशो आन दातेमी नेल्ल क्येडा आइक्च बाक्नुड। आं कली सोइशशो देंचा मशिरचा डा बाक्नुड। मारदे हना गो परमप्रभु यावे कली थमा सुइक्ब आन कली खेदा पाता। एफिसी ३:८; प्रेरित ८:३ 10 तन्न परमप्रभु यावेमी शिशी पा आ सोइशशो नु आ लोव्र शेंब सेलती। आ शिशी पशो यो मो मबाक्ब। मिनु गो नेल्ल आन क्येडा शुश गेय पाता। मेको नेल्ल आं पशो ममाइ, तन्न परमप्रभु यावे आ पपाइशशो बाक्ब। २कोरिन्थी ११:५, २३ 11 मोपतीके गोम शेंताक्न्नी हना यो, मेकोपुकीम शेंताक्म हना यो, गोपुकीमी थमा सुइक्तीनी।

येसु बेक्शो रे मसेंस दे लोव्र ब्रशो

12 मिनु ख्रीस्त बेक्शो रे सेंसाक्व, दे शेंशो बाक्त। तन्न इन दाते डा का निक्शीमी “बेक्शो मुर बेक्शो रे मसेंसीनीम” देशा दोपा देंने चाप्नीमी? 13 बेक्शो रे सेंचा मपुंइसीनीम हना, ख्रीस्त यो बेक्शो रे मसेंसीशो बाक्ब। 14 ख्रीस्त बेक्शो रे मसेंसीशो बाक्त हना, आंइ शेंशो फश लोव्र खोदेशो दुम्त। इन थमा सुइशशो यो मोशीन दुम्त। 15 गो आंइ परमप्रभु यावे आ पर्बम शेंशो यो जोल दुम्बाक्त। मारदे हना गोमी परमप्रभु यावेमी ख्रीस्त कली बेक्शो रे सेंताक्व दे शेंशो बाक्तक। तन्न मेकोम मपव। “बेक्शो रे मसेंसीनीम” देशो लोव्र थमा बाक्त हना, आंइ शेंशो जोल दुम्ब। प्रेरित १:२२ 16 मारदे

हना मुर बेक्शो रे मसेंसीनीम हना, ख्रीस्त यो बेक्शो रे मसेंस। 17 मिनु ख्रीस्त बेक्शो रे मसेंसाक्व हना, इन थमा सुइश्शो मोशीन दुम्त। इन पाप यो मक्याम्सीथु लीशो बाक्ब। 18 ख्रीस्त कली थमा सुइश्शा बेक्शोपुकी यो जाम्शा लाम्तेक्म। 19 एको रागीम ब्रोंइचा कली ला ख्रीस्त कली थमा सुइश्शो बाक्तक हना, गो मुर नेल्ल आन क्येडा शिशी पाइक्चा पुंडसीब नकी।

येसु रे नेल्ल ब्रोंइब दुम्नीम

20 तन्न ख्रीस्त बेक्शो रे सेंसीशो बाक्ब। बेक्शो आन दातेमी नेल्ल क्येडा डोंइती सेंसीब ख्रीस्त बाक्त। १कोरिन्थी ६:१४; कलस्सी १:१८ 21 दोपा मुर कामी नेल्ल मुर आन कली बेक्शा लाइब सेला, मोपा मुर कामीन मुर नेल्ल आन कली बेक्शो रे सेंचा पुंडसीब सेल्लु। उत्पत्ती ३:१७-१९; रोमी ५:१८ 22 दोपा आदम रे नेल्ल बेक्ब दुम्मा, मोपा ख्रीस्त रे पा नेल्ल ब्रोंइब दुम्तेक्म। 23 मिनु नेल्ल का का पा सेंसीनीम। डोंइती ख्रीस्त सेंसाक्व। मिनु नोले आ जाक्ची ना मेको कली थमा सुइक्बपुकी सेंसीनीम। १थिस्सलोनिकी ४:१६-१७ 24 मिनु नोले रागी नुप्ची ना जाक्ब। मिनु मेकोमी नेल्ल सासन, नेल्ल अधिकार नु नेल्ल सक्ति खतम सेल्शा, आ आफ परमप्रभु यावे कली आ राज्य गेब। रोमी ८:३८ 25 मारदे हना ख्रीस्तमी आ जोरी सत्रु आन कली आ खोइलीम मदिम्दा सम्म सासन पचा माल्ब। भजन संग्रह ११०:१; मत्ती २२:४४ 26 नेल्ल क्येडा नोले साइक्तीक चहिं जोरी सत्रु बेक्तीक बाक्ब। 27 मारदे हना परमप्रभु यावेमी रागी डा सक्ति नेल्ल कली आ खोइलीम दिप्शा वोइक्तु। रागी डा सक्ति नेल्ल आ खोइलीम दिम्शा वोइक्तु, आ चहिं दिम्सीशा मबा, दे रुम्सीब। भजन संग्रह ८:६ 28 मिनु सक्ति नेल्ल परमप्रभु यावे आ गुइम बाक्त हना, तौ यो आ गुइम बाक्ब। मारदे हना परमप्रभु यावे नेल्ल आन कली का ला परमप्रभु यावे बाक्ब।

29 बेक्शो रे मसेंसीब देशो लोव्र थमा बाक्त हना, बेक्शो मुर आन पा डा अरु थमा सुइक्ब मुर ब्वाक्कुम खुम्शा गुंडपांडसीचा, मार मिम्नीमी? बेक्शो मुर थमा पा मसेंसीनीम हना, मारदे अरु मेको आन पा डा ब्वाक्कुम खुम्शा गुंडचा पुंडसीनीमी? 30 मारदे गो शुश श्येत फाल्शा, एको लोव्र शेंना शेंन गाक्नुडा? रोमी ८:३६; गलाती ५:११ 31 आं लोकबपुकी, येसु ख्रीस्त, इं प्रभु आ मुर दुम्तीनी। मिनु इन कली तशा, आं नें बोरपाइक्नुड। तन्न शेंना शेंन गाक्शा, नाक्त किंत किंत बेक्चा डा खोदेशो दुम्नुड। २कोरिन्थी ४:१० 32 एफिसस सहरम शेंना शेंन बाक्डानु, मेकेर डा मुरपुकीमी जोइ वां खोदेशो पा खेदा पतीमी। मुर बेक्शो रे मसेंसीनीम हना, जय तूय मारदे हना दीसा बेक्नय। यसैया २२:१३ 33 सुइमी जोल थमा मसुतीन। मारदे हना मरिम्शो मुर नु बाक्बम, मुर कली मरिम्शो सेल्ब। 34 दूली मिम्चा प्रोनीन। लेंशा पाप मपने। इन दाते डा का निक्शीमी परमप्रभु यावे आ पर्बम मारेइ मतुइक्ब बाक्नीम। मेको इन कली मुने दोक्चा डा बाक्ब। १थिस्सलोनिकी ५:८

बेक्शो रे सेंसीशो आन रां

35 मिनु मुर कामी “मुर बेक्शो रे दोपा सेंसीनीमी? आन रां दोदेशो बाक्बा डा?” दे हिल्लो पाइनीम। 36 गे मूर्खपुकी, वांचेर शोक्नीनु, वांचेर मबेक्थु, कोच्वा मदाप्ब। यूहन्ना १२:२४ 37 मिनु इन शोक्शो, वाशो खोदेशो मबाक्ब। मेको गेडा ला बाक्ब। मेको चेरब बाक्त हना यो अरु वांचेर बाक्त हना यो मोदेशो बाक्ब। 38 तन्न परमप्रभु यावेमी नेल्ल आन कली आ योव्रशो रां गेब। मिनु वांचेरमी आंम आंम कोच्वा दाप्शो खोदेशो बाक्ब। 39 मारदे हना ब्रोंइशो नेल्ल खाल का डा मबाक्नीम। मुर खाल का डा बाक्नीम, जन्तु अर्को खाल डा बाक्नीम, बस्तु भाव अर्को खाल डा बाक्नीम, चिक्ब अर्को खाल डा बाक्नीम नु डांइ अर्को खाल डा बाक्नीम। 40 मिनु स्वर्ग डा रां बाक्नीम नु रागी डा रां बाक्नीम। स्वर्ग डा रां आन दारस का बाक्ब नु रागी डा रां आन दारस अर्को बाक्ब। 41 नां आ छेडछेड का बाक्ब नु तास्ला आ छेडछेड अर्को बाक्ब। मिनु सोरुल आन छेडछेड लेंशा अर्को बाक्ब। सोरुल का आइक्च नु अर्को ठेयब छेडछेड पाइश्शो बाक्ब।

42 मोदेशो मुर आन बेक्शो रे सेंसीचा यो बाक्ब। शोक्शो रां, वांचेर खोदेशो पा, जाम्शा लाइब। सेंसीशो रां चहिं गेना हना यो लीब रां बाक्ब। 43 शोक्शो रां मरिम्शो बाक्ब। सेंसीशो रां चहिं थम दारशो बाक्ब। शोक्शो रां मारेइ पने मचाप्ब दुम्शो बाक्ब। सेंसीशो रां चहिं सक्ति पाइश्शो बाक्ब। फिलिप्पी ३:२१; कलस्सी ३:४ 44 बेक्चा माल्शो रां शोक्शो बाक्ब, परमप्रभु यावे आ सोक्तीम गेशो रां सेंसीशो रां बाक्ब। बेक्चा माल्शो रां बाक्त हना, परमप्रभु यावे आ सोक्तीम गेशो रां यो बाक्ब। 45 मार ब्रेक्शो बाक्ब देशा हना “नेल्ल क्येडा डोंइती डा मुर, आदम, ब्रोंइब दुम्माक्त” दे ब्रेक्शो बाक्ब। नेल्ल क्येडा नोले डा आदम चहिं ब्रोंइतीक सोक्त गेब दुम्त। उत्पत्ती २:७; २कोरिन्थी ३:१७ 46 तन्न परमप्रभु यावे आ सोक्तीम गेशो रां डोंइती डा ममाइ। डोंइती बेक्चा माल्शो रां बाक्ब। नोले ला सोक्तीम गेशो रां

बाकब। 47 डोंइती डा मुर रागी डा खप के सेल्शो बाकत। नोले डा मुर स्वर्ग रे बाकब। 48 डोंइती डा मुर खप के सेल्शो खोदेंशो पा, खप के सेल्शो बाकतेकम। डोंइती स्वर्ग रे जाकशो मुर खोदेंशो पा, स्वर्ग डा मुर बाकनीम। 49 दोपा गो खप के सेल्शो मुर खोदेंशो बाकनया, मोपा गो स्वर्ग डा मुर खोदेंशो यो दुम्नय। उत्पत्ती ५:३

फाइक्चा पुंडसीनय दे शेंशो

50 आं लोकबपुकी, मुल हुश नु रुश पाइशो मुर परमप्रभु यावे आ राज्य ओवने मचाप्नीम। बेक्शा जाम्शा लाइब रां, गेना हना यो लीब रां दुम्ने मचाप्ब। 51 मुल इन कली खुइशो लोव्र का शेंनन्नी। गो का निक्शी बेक्शा लाइनय, का निक्शी ब्रोंइशा बाकनय। गो बेक्शा लशो नु ब्रोंइशा बाकशो नेल्ल फाइक्चा पुंडसीनय। १थिस्सलोनिकी ४:१५-१७ 52 मेको छिन काम दुम्ब। याम काम दुम्ब। नोले डा नाक्त डा तुराही ताप्ची ना मेको दुम्ब। मारदे हना मेको तुराही नेंसीब। बेक्शो मुर, मबेक्चा डा पा सेंसीनीम। मिनु गो फाइक्चा पुंडसीनय। मत्ती २४:३१ 53 मारदे हना मेको जाम्शा लाइब रां, मजाम्चा डा रां दुम्चा माल्ब। मेको बेक्शा लाइब रां, मबेक्चा डा रां दुम्चा माल्ब। २कोरिन्थी ५:४ 54 मिनु जाम्शा लाइब रां, गेना हना यो लीब रां दुम्चा माल्ब। बेक्ब रां, गेनायो मबेक्चा डा रां दुम्चा माल्ब। मेना मेको ब्रेक्शो लोव्र थमा दुम्ब “ब्रोंइतीक सक्तिमी बेक्चा कली ग्रात। 55 ए बेक्चा, इ ग्रातीक ते लमे? ए बेक्चा, इ हिंपाइक्तीक ते लमे?” दे ब्रेक्शो बाकब। यसैया २५:८,; होसे १३:१४ 56 पाप पशोमी बेक्चा कली हिंपाइक्ब। परमप्रभु यावे आ अरेशो लोव्र तुइक्बमी पाप पशो यो तुइक्ब। मेको आ अरेशो आ सक्ति बाकब। रोमी ७:८; रोमी ११:१३ 57 तन्न गो परमप्रभु यावे कली “गे रिम्शो पाइब बाकनीनी” देंनय। मारदे हना मेकोमी इं प्रभु येसु ख्रीस्त आ पशोमी ग्राचा गेप्टु।

58 मोपतीके आं दाक्शो लोकबपुकी, इन खोइली थेक्शा, दल्गीर मपथु, प्रभु आ गेय पना पन बाक्कीन। प्रभु आ नेंमी पशो गेय गेनायो मोशीन मलाइब, दे तुइक्तीन।

16

क्येट पोक्चा आ पर्वम लोव्र

1 क्येट पोक्चा आ पर्वम गलातीया रागी डा थमा सुइक्ब आन कली शेंशो इन कली यो शेंनन्नी। २कोरिन्थी ८:९; गलाती २:१० 2 हप्ता डा डोंइती नाक्ती गे नेल्लेमी आंम के बाकशो रे हेंशा, गो ओशो गेने चाप्नुड, दे वोतीने। मो पाइतीनी हना, गो जाकडानु, क्येट मबा दे खिं खिं हिरशा पुंडशा गाक्चा ममाल्नीनी। प्रेरित २०:७ 3 मिनु आं जाक्ची ना मेको क्येट चोव्रदीचा कली सु सु कली सोइक्चा दाक्नीनी, मेको आन कली योव्रशा वोतीने। मिनु गो चिठी ब्रेक्शा, मेको क्येट नु चिठी इन योव्रशो मुर कली यरूसलेम चोव्रथ सोइक्नुड। 4 गो यो लचा माल्ताक्यी हना, मेको गो नु लाइनीमी।

पावल आ बाक्चा नु गाक्चा आ पर्वम

5 गो मासीडोनीया रागी लाक्शा, इन कली गुम्थ जाक्नुड। प्रेरित १९:२१ 6 मिनु महिना का निक्शी हिउंद मलाक्गा सम्म गे नु बाक्नुडा कों? मिनु ते ते लाइनुडा, आं कली वारच पाइनीनी कों, दे मिम्शा बाक्ती। 7 मुल गुम्थ जाक्ती हना, काबु निक्बु ला बाक्चा ताइनुड। तन्न प्रभुमी गेपुकी नु शुश बाक्चा गेयील दे आस पा बाक्ती। प्रेरित २०:२ 8 पेन्तीकोस नाक्त सम्म गो एफिसस सहरमी बाक्नुड। प्रेरित १९:१,१० 9 मारदे हना शुश मुर आन कली ख्रीस्त आ पर्वम शेंचा नु नेंपाइक्चा ताइनुडमी। आं शेंशो लोव्र मदाक्बपुकी यो शुश बाक्नीम। २कोरिन्थी २:१२; कलस्सी ४:३

10 तिमोथीमी एको चिठी कुरशा जाक्मेनु, मेको कली रिम्शो पतीने। आ लोव्र नेनीने। मारदे हना गो नु बाक्शा, आं यो प्रभु आ गेय पना पन बाक्ब। १कोरिन्थी ४:१७; फिलिप्पी २:१९-२२ 11 सुइमी महिक्शो मुर खोदेंशो मपने। मान पा रिम्शो पा लेशशा आं बाक्तीक सोइक्तीने। मारदे हना गो मेको नु लोकब आन कली रिम्शा बाक्नुड।

12 डोंइती इं लोकब आपोल्लोस कली लोकबपुकी नु गारशा “कोरिन्थी आन कली गुम्थ लावो” दे शुश लोव्र पाता। आ चहिं “मुल लचा थुं मपड” दे लने मबिस्से। आ गेय गारत हना, इन कली गुम्थ पीब। १कोरिन्थी १:३२

नोले डा लोव्र

13 होस पा बाक्कीने। पोक्च थेक्शा थमा सुइशशा बाक्कीन। ठेयब थुं पा बाक्कीने। सक्ति पाइशो गेय पना पन बाक्कीन। एफिसी ६:१० 14 मार पाइतीनी हना यो, दाक्मुशा पने। 15 आं लोकबपुकी, आकाया रागीम नेल्ल क्येडा डोंइती थमा सुइक्बपुकी स्तीफानस नु आ खिं डा मुर बाक्तेकम दे तुइक्नीनी। मेकोपुकीमी थमा सुइक्ब आन कली वारच पा रिम्शो गेय पा शेंना शेंन गाक्नीम। १कोरिन्थी १:१६ 16 मेको आन पशो खोदेंशो पा शेंना शेंन गाक्ब नेल्ल

आन कली मान पा आन लोव्र नेंशा टिने। 17 स्तीफानस, फोरटुनातस नु अकाइकस एक जाक्मानु, गो ग्येरसाक्यी। मेको आन कली गुम्शा, इन कली गुम्शो खोदेशो पा, आं थुं नाइक्ताक्ड। 18 मारदे हना मेकोपुकीमी ग्येरपाइक्तीमी, आं थुं बारपाइक्तीमी। गे नु बाक्मानु, इन कली यो ग्येरपाइक्शा, इन थुं बारपदमे बाक्त दे तुइक्ताक्ड। मोदेशो मुर आन कली मान पतीने। १थिस्सलोनिकी ५:१२; फिलिप्पी २:२९

19 एसीयाम बाक्ब थमा सुइक्बपुकीमी इन कली “रिम्शो बाक्कीन” देंतेक्म। अक्वीला, प्रिस्कीला नु आस खिंमी गुम्ब थमा सुइक्बपुकीमी प्रभु आ नेमी “रिम्शो बाक्कीन” देंतेक्म। प्रेरित १८:२; रोमी १६:३,६ 20 लोकब नेल्लेमी इन कली “रिम्शो बाक्कीन” देंतेक्म। प्रभु आ नेमी मुम्मुशा आसीक गेमुने।

21 गो पावलमी “रिम्शो बाक्कीन” दे आंम गुइमी ब्रेक्ताक्ड। गलाती ६:११; कलस्सी ४:१८; २थिस्सलोनिकी ३:१७ 22 प्रभु कली मदाक्बपुकी सराप रमल। इं प्रभु जाक्कीन। प्रकाश २२:२० 23 प्रभु येसुमी इन कली शिशी पा कोव्रडल। 24 ख्रीस्त येसु आ नेमी गो नेल्ल इन कली दाक्शा बाक्नुड। आमेन।

२ कोरिन्थी

ब्रेक्ब मुर: एको चिठी ब्रेक्ब आ नें चिठी आ डोंइती “पावल नड” देंत।

गेना ब्रेक्शो: पावल मासीडोनीया रागीम बाक्शा, ५७ ए. डी. नोले डा महिना मेर ब्रेक्शो बाक्त।

मार ब्रेक्शो:

१. पावल थमा सुइक्ब आन दातेमी रिम्शो दुम्त, दे शुश ग्येरसीशो लोव्र। २कोरिन्थी १:१२-२:४
२. थमा सुइक्बपुकी हाइशो दुम्चा माल्नीम। २कोरिन्थी ८:१- ९:-१५
३. पावल नु यहूदी आन पतीके। २कोरिन्थी १०:१-१२:१८

डोंइती डा लोव्र

1 परमप्रभु यावे आ दाक्शो पा ख्रीस्त येसु आ सोइशो गो पावल नड। इं लोक्ब तिमोथी नु गोमी कोरिन्थ सहर डा परमप्रभु यावे कली थमा सुइशशा गुम्ब इन कली नु आकाया रागीम बाक्ब थमा सुइक्ब नेल्ल आन कली एको चिठी ब्रेक्शा सोइक्ताक्कु। १कोरिन्थी १:१ 2 इं आफ परमप्रभु यावे नु प्रभु येसु ख्रीस्तमी इन कली शिशी पा इन थुं नाइशशा बाक्चा गेम्सेक्ल।

परमप्रभु कली ठेयब सेल्शो

3 इं प्रभु येसु ख्रीस्त आ आफ परमप्रभु यावे कली “गे रिम्शो पाइब ननी” देशा ठेयब सेल्नीकी। मारदे हना मेको शिशी पाइब आफ, थुं नाइक्पाइक्ब नु थुं बारपाइक्ब परमप्रभु यावे बाक्ब, दे तुइक्नीकी। रोमी १५:५ 4 गो शुश श्येत जकानु, परमप्रभु यावेमी आंइ थुं नाइक्पाइशशा बारपाइक्ब। मिनु आंइ थुं नाइसीशा, गोपुकीमी यो श्येत जाइब आन कली आन थुं नाइक्पाइशशा, बारपाइक्बे चाप्नीकी। 5 ख्रीस्त आ नेमी गिश श्येत जाइनीकी, मिश ख्रीस्त आ नेमी थुं नाइक्पाइक्चा पुंडसीनीकी। भजन संग्रह ३४:२०; रोमी ८:१७; भजन संग्रह ९४:१९ 6 आंइ श्येत जशोमी इन थुं नाइक्पाइक्ब। मिनु रिम्शो दुम्ब। गो आंइ थुं नाइक्पाइक्चा पुंडसीशोमी गे इन थुं नाइक्पाइक्चा पुंडसाक्नी। गे आंइ खोदेंशो दुम्शा, श्येत फाल्शा बाक्तीनी हना, गे आंइ खोदेंशो पा थुं नाइक्पाइक्चा पुंडसीनीनी। २कोरिन्थी ४:८-११, १५ 7 आंइ जशो श्येत गे यो जाइनीनी। मिनु आंइ खोदेंशो पा थुं नाइक्पाइक्चा पुंडसीनीनी। आंइ खोदेंशो पा, थुं नाइक्पाइक्चा पुंडसीनीनी, दे तुइशशा, आस पचा मप्रोंइथु बाक्नीकी।

8 आंइ दाक्शो लोक्बपुकी, एसीया रागीमी बाक्कानु, शुश श्येत जाइतक। श्येत जचा आ पबर्म लोव्र मखुइक्थु, तुइक्पाइक्बन्नी। आंइ जशो श्येत मार बाक्ब देशा हना, बेक्चा डा सम्म दुम्शो नकी। प्रेरित १९:२३-४०; १कोरिन्थी १५:३२ 9 साइक्चा पुंडसीशो खोदेंशो दुम्तक। मो दुम्तक हना यो “परमप्रभु यावेम बेक्शो मुर आन कली सेंब। मोपतीके मेको कली थमा सुइय्य। मेको क्येडा लाक्शा सुइमी इं कली प्रोंइने मचाप्नीम” दे मिम्शा बाक्तक। 10 मिनु परमप्रभु यावेमी मोदेंशो बेक्चा डा दुम्शो रे प्रोंइतीकी। मिनु मुल नोले यो आंइ कली श्येत रे प्रोंइब, दे तुइक्नीकी। 11 मोपतीके परमप्रभु कली “श्येत रे प्रोंइयीकी” दे पुंडना पुंडन बाक्नीकी। मिनु गेपुकीमी यो “पावल नु आ वारच आन कली श्येत रे प्रोनीन” दे पुनीने। नोले आंइ कली श्येत रे प्रोंइशो तशा, शुश मुरुमी “गे रिम्शो पाइब ननी, आंइ पुंडशो गेतीकी, रिम्शो पाइतीनी” दे परमप्रभु कली ठेयब सेल्नीम, दे तुइक्नीकी। फिलिप्पी १:१९

रिम्शो पाइतक, दे लोव्र थोक्शो

12 गो आंइ नें बोरपा बाक्नीकी। मारदे हना परमप्रभु यावेमी सक्ति गेतीकी। मिनु मेको आन मुर दुम्शा, मुर नेल्ल आन कुल, इन कुल यो रिम्शो थुं रे पा गेय कोंइताक्क। आंम आंइ रागी डा जोक्तीक तुइक्तीक रे ममाइ। तन्न परमप्रभु यावे आ शिशीम पतीके बाक्ब। २कोरिन्थी २:१७; हिब्रू १३:१८; १कोरिन्थी १:१७ 13 मिनु गो इन कली नेल्ल रुप्चा डा नु पढेचा डा लोव्र ब्रेक्नीकी। मुल गे नेल्ल रुप्तीनी, दे गो आस पाइनुड। 14 गे दोपा आंइ पबर्म इन नें बोरपाइक्बे चाप्नीनी, मोपान इं प्रभु येसु आ नाक्ती जाक्मेनु, गोपुकीमी इन कली तशा, आंइ नें बोरपाइक्बे चाप्नीकी। २कोरिन्थी ५:१२; फिलिप्पी २:१६

15 मारदे हना गो मेको नेल्ल तुइक्ताक्क। गे शुश ग्येरसीशा बाक्कीन, दे डोंइती इन बाक्तीके जाक्चा मिम्ताक्क। 16 गो मासीडोनीया लडानु, इन कली गुम्नुड। मिनु मासीडोनीया रे लेडडानु, इन बाक्तीके जाक्नुड। मिनु गेपुकीमी आं कली यहूदीया रागी सम्म चोक्नीनी, दे आस पाता। १कोरिन्थी १६:५-६ 17 मोदेंशो आस पा, मरिम्शो पडा डा?

मार, मोदेशो मिम्शा, रागी डा मुर खोदेशो पडा डा? मार मेको आन खोदेशो काइले ना दुम्बा, काइले ना मदुम्बा देंन डा? 18 परमप्रभु यावेमी आ देशो खाण्ब, दे नेल्लेम तुइक्नीम। गोपुकीमी इन कली देशो लोव्र थमान बाक्ब। दुम्बा कों, मदुम्बा कों, मार तुइक्चा देशो लोव्र दुम्सीन मदुम्ब। 19 सिल्वानस, तिमोथी नु गो सांफामी इन कली परमप्रभु यावेमी आ तौ येसु ख्रीस्त आ लोव्र नेपाइक्तक। मेको लोव्र थमा दुम्बा कों मदुम्बा, मार तुइक्चा देशो लोव्र ममाइ। येसु ख्रीस्त थमा बाक्ब। प्रेरित १८:५ 20 परमप्रभु यावे आ गेशो लोव्र नेल्ल येसु ख्रीस्तमी खाप्तु। मोपतीके गो मेको आ नेमी आमन देंनीकी। मिनु परमप्रभु यावे कली “ठेयब बाक्नीनी” दे ठेयब सेल्नीकी। प्रकाश ३:१४ 21 परमप्रभु यावेमी आंइ कली नु इन कली ख्रीस्तमी काथा वोइश्शा, आ मुर दुम्पाइक्तु, आ गेय पाइब सेल्लु। १यूहन्ना २:२७ 22 मेकोमी इं कली छाप थोक्ताक्व। मिनु आ सोक्त इं थुंमी वोइक्तु। मेको सोक्त बैना खोदेशो पा गेप्तु। एफिसी १:१३; २कोरिन्थी ५:५; रोमी ८:१६

23 परमप्रभु यावे कली सांकछी वोइश्शा, इन कली थमा पा देंनुड, गो इन कली हुइक्चा कली कोरिन्थ मजाकड। 24 गो इन थमा सुइक्तीके कली हुकुम मपाइनीकी। इन ग्येरसीचा डा पा, गे नु गेय पाइनीकी। मारदे हना इन थमा सुइक्तीके बोल्यो बाक्ब। २कोरिन्थी ४:५; १पत्रुस ५:३

2

1 गो इन कली लेशा श्येत गेचा कली कोरिन्थ मपीनुड, दे मिम्ताकड। 2 मारदे हना गो इन कली श्येत गेता हना, आं श्येत गेशो मुर आन क्येडा लाक्शा, सुमी आं कली ग्येरपाइक्ने चाण्बा डा? 3 गो डोंइती मार मिम्शा ब्रेक्ताकड देशा हना, गो जाकडानु, सु मुरपुकीमी आं कली ग्येरपाइक्चा मालनीमी, मेको रे पा आं थुं मखाइक्ल, दे ब्रेक्ताकड। मारदे हना गो ग्येरसीडानु, गे नेल्ल ग्येरसीनीनी, दे थमा सुइक्नुड। 4 एको चिठी ब्रेक्तुनु, आं थुं खाइश्शा “दोपा अर्ती गेडमी? हुइश्शा रिम्शो दुम्नीमी कों? दोपा रिम्शो दुम्नीमी?” दे इन कली शुश मिम्शा, डाक्थी दुम्ती। इन थुं खाइक्पाइक्चा कली ममाइ, इन कली दाक्तीके मोदेशो दुम्त, दे मिम्तीन।

माफ पुंइब आन कली माफ गेचा

5 इन वारच कामी इन थुं खाइक्पदा बाक्त, दे रुप्ता। आं थुं खाइक्पाइश्शो क्येडा नेल्ल इन थुं खाइक्पाइक्तु। 6 मेको कली गे नेल्ल इन मिम्शा गेशो सजाइ ठीक बाक्ब। 7 मुल डा मेरे माफ गेने। आ थुं नाइक्पाइश्शा बारपतीन। मोदेशो मपाइतीनी हना, आ मारिम्शो पशो मिम्शा, आ कांइचीक बाक्शा, बेक्शो खोदेशो दुम्ब। 8 मोपतीके मेको कली ब्रशा, दाक्तीन, दे इन कली पुंइनुड। 9 गे टीनीनी देय मटीनीनी, दे गो इन कली डोंइती डा चिठी सोइश्शो नड। 10 गोपुकीमी सु सु आन कली माफ गेनी, गो यो मेको आन कली माफ गेता। माफ गेडानु, इन पर्बम ख्रीस्त आ डोंइती गेता। यूहन्ना २०:२३ 11 सैतानमी इं कली खतम सेल्चा मतवल। मारदे हना मेको आ मिम्शो गो नेल्ल तुइक्नय। लूका २२:३१; १पत्रुस ५:८

ख्रीस्त आ लोव्रमी ग्राना ग्रान लशो

12 गो त्रोआस सहरमी ख्रीस्त आ ग्येरपाइक्तीक लोव्र शेंथ जाकडानु, प्रभुमी आं कली नक लाण्चो का रोकशा गेती। प्रेरित १४:२७; १कोरिन्थी १६:९ 13 तन्न आं दाक्शो लोकब तीतस कली मगुम्थु, आं थुं मनाइक्स। मोपतीके मेको आन कली प्रोंइशा, मासीडोनीया लती। २कोरिन्थी ७:६; प्रेरित २०:१

14 तन्न परमप्रभु यावे कली “गे रिम्शो पाइब बाक्नीनी” दे ठेयब सेल्नीकी। मारदे हना ख्रीस्त आ नेमी ग्राना ग्रान लाइनीकी। मोपा शेंना शेंन हिरशा गाक्कानु, ब्रोव्रशो रिना पाइश्शो खोदेशो पा नेल्लेमी ख्रीस्त कली तुइक्नीमी। 15 मारदे हना गो पाप रे ब्रोंइशा बाक्ब नु जाम्शा लाइब आन दातेमी गो परमप्रभु यावे आ डोंइती ख्रीस्त आ ब्रोव्रशो नाम्सीशो बाक्नीकी। १कोरिन्थी १:१८ 16 गो जाम्शा लाइब आन कली बेक्चा डा रिना नु पाप रे ब्रोंइशा बाक्ब आन कली ब्रोंइचा डा रिना बाक्नीकी। मोदेशो लोव्र शेंचा कली सुम जिम्मा ब्रने चाप्नीमी? लूका २:३४; २कोरिन्थी ३:५ 17 तन्न गो परमप्रभु यावे आ लोव्र ग्याण्ब लेयब खोदेशो पा मलेयनीकी। गो ठीक पाइब मुर बाक्नीकी। गो परमप्रभु यावे आ सोइश्शो, परमप्रभु यावे आ डोंइती ख्रीस्त आ नेमी शेंनीकी। २कोरिन्थी १:१२; २कोरिन्थी ४:२; १पत्रुस ४:११

3

नक कबल डा गेय

1 गो मेकोपुकीमी लोव्र पशो खोदेंब पा ठेयब सेल्सीनीकी डा? मेकोपुकीमी सिफारीस कागज ग्रुंडनीमी। मिनु गोपुकी यो मोदेंशो कागज कुरशा, शेंना शेंन गाक्चा माल्नीकी डा? २कोरिन्थी ५:१२ 2 मोदेंशो आंइ कागज चहिं गेपुकी दुम्तीनी। गे आंइ थुंमी ब्रेक्शो बाक्नीनी। मिनु मुर नेल्लेमी इन पबर्म तुइक्ने चाप्नीम। १कोरिन्थी ९:२ 3 गे ख्रीस्तमी ब्रेक्शो चिठी दुम्तीनी। कागज मसीमी ब्रेक्शो ममाइ। फुल्लु मुशा ब्रेक्शो यो ममाइ। ब्रोंइचा गेब परमप्रभु यावे आ सोक्तीमी इन थुंमी ब्रेक्शो बाक्ब। प्रस्थान २४:१२

4 ख्रीस्त आ नेमी परमप्रभु यावे कली थमा सुइक्नीकी। 5 गो शेंदकानु, आंम जोक्तीक तुइक्तीक मकोइनीकी। आंइ लोव्र शेंतीके परमप्रभु यावेमी पपाइशो बाक्ब, दे तुइक्नीकी। २कोरिन्थी २:१६ 6 मेकोमी आंइ कली जोक्ब तुइक्ब सेल्शा, आ नक कबल डा लोव्र शेंथ सोइक्ताक्की। ब्रेक्शा ममाइ, तन्न आ सोक्तीमी गेप्तु। ब्रेक्शोमी साइक्ब, तन्न आ सोक्तीमी ब्रोंइचा गेब। येरमीया ३१:३१; १कोरिन्थी ११:२५; रोमी ७:६; यूहन्ना ६:६३

नक कबल ठेयब बाक्ब

7 बेक्तीक चाक्ब कबल फुल्लुमी मुशा, ब्रेक्शो बाक्माक्त। मेको आ छेडछेड थम ठेयब बाक्त। मेकोम पतीके इस्राएलीपुकीम मोसा आ कुल कोवने मचाबेम। तन्न नोले मेको छेडछेड ग्युम्ना ग्युम्न लत। प्रस्थान ३४:२९-३५ 8 परमप्रभु यावे आ सोक्त आ कबल मेको क्येडा छेडछेड मदुम्बा डा? गलाती ३:२, ५ 9 मारदे हना बेक्तीक कबल छेडछेड बाक्त हना, ठीक पतीके आ कबल मेको क्येडा शुश छेडछेड दुम्चा माल्ब। रोमी १:१७; रोमी ३:२१ 10 मेको डोंइती छेडछेड पाइशो बाक्त। मुल आ छेडछेड नेल्ल जाम्शा लत। मारदे हना मुल मेको क्येडा शुश छेडछेड पाइशो जाक्त। 11 डोंइती डा जाम्शा लाइब कबल छेडछेड पाइशो बाक्ब। मुल लीशो कबल आ छेडछेड गिश ठेयब बाक्म माइ?

12 मोदेंशो आस पतीके गो काइ महिंब दुम्शो बाक्नीकी। 13 साइ मोसामी पशो खोदेंशो मपाइनीकी। मोसामी इस्राएलीपुकीमी आ कुल डा छेडछेड ग्युम्ना ग्युम्न लशो मतामेक्ल, दे आ कुल वामी गिल्से बाक्त। 14 मोसामी इस्राएली आन कली परमप्रभु यावे आ देंशो लोव्र शेंदीमी बाक्त। मेकोपुकी चहिं मारेइ मरुप्ब दुम्मा बाक्त। मुल यो मरुप्ब बाक्नीम। साइ डा लोव्र नेपदमेनु, मेको आन थुं वाम गिल्शो खोदेंब दुम्शा, लोव्र मरुप्नीम। ख्रीस्तमी ला मेको आन थुंमी गिल्शो वा प्राक्शा रुप्ब सेल्ने चाप्ब। प्रेरित २८:२७; रोमी ११:२५ 15 मुल यो मोसाम ब्रेक्शो लोव्र नेन्मेनु, आन थुं गिल्सीशो बाक्ब। 16 तन्न सुमी आ थुं प्रभु गे हिरबा, मेको आ थुंमी गिल्शो वा हुक्सीशा, रुप्ब दुम्ब। रोमी ११:२३, २६; प्रस्थान ३४:३४ 17 मारदे हना प्रभु सोक्त बाक्ब। प्रभु आ सोक्ती ते बाक्बा, मेकेर पाप आ सजाइ रे ब्रोंइतीके बाक्ब। 18 गो नेल्ल इं थुं गिल्शो वा हुक्शा, प्रभु आ छेडछेड कोइशा, प्रभु आ छेडछेड पाइशो खोदेंशो दुम्शा फाइक्चा पुंइसाक्क्य। मेको फाइक्तीके बारना बारन लशा, इं कली छेडछेड का रे अर्को छेडछेडम फाइक्ब। मेको नेल्ल प्रभु रे जाक्ब। मेको सोक्त बाक्ब। २कोरिन्थी ४:६

4

ख्रीस्त आ वाइल दुम्शा, शेंशा गाक्शो

1 गोपुकी नु परमप्रभु यावे आ शिशी बाक्तीके मेको शेंब दुम्तक। मोपतीके गेनायो आइक्च थुं पाइशो मदुम्नीकी। २कोरिन्थी ३:६; १कोरिन्थी ७:२५ 2 गोपुकीमी मुने दोक्तीक खुइशो पतीक गेय प्रोंइशो बाक्नीक। मरिम्शो पा परमप्रभु यावे आ लोव्र फाइक्चा रे डोन बाक्नीकी। तन्न परमप्रभु यावे आ लोव्र तुइक्पाइक्तीकेमी मुर नेल्ल नु परमप्रभु यावे आ डोंइती ब्रचा डा बाक्नीकी। २कोरिन्थी २:१७; १थिस्सलोनिकी २:५ 3 आंइ शेंशो ग्येरपाइक्तीक लोव्र वाम गिल्सीशो बाक्त हना यो, जाम्शा लाइब मुर कली ला मोपा गिल्सीशो बाक्ब। १कोरिन्थी १:१८ 4 मेको आन थुं दोपा मोदेंशो दुम्त देंशा हना, रागी कली हुकुम पाइब सैतानमी मेको आन कली मिक्च मताइब खोदेंशो पा मरुप्ब सेल्शो बाक्त। मोपा ख्रीस्त आ ग्येरपाइक्ब लोव्र आ छेडछेड तने मचाप्नीम। ख्रीस्त परमप्रभु यावे आ कोइतीके बाक्ब। हिब्रू १:३ 5 गो आंम पबर्म मशेंनीकी। तन्न येसु ख्रीस्त प्रभु बाक्ब, दे शेंनीकी। मिनु येसु आ पतीके गो इन गेय पाइब दुम्तक। 6 परमप्रभु यावेमी “छिडछिड जाम्शा, छेडछेड दुम्ल” देंमाक्त। मेकोमी आंइ थुंमी छेडछेड ब्रपाइशो बाक्त। गो परमप्रभु यावे आ छेडछेड ख्रीस्त रे पा रुप्नीकी। उत्पत्ती १:३; २कोरिन्थी ३:१८

खप के गरम शोंप कुरशो

7 मेको ठेयब सक्ति परमप्रभु यावे के बाक्ब, दे कोइचा कली मेको छेडछेड खप के गर गो आंइ रां आगाम बाक्ब। १कोरिन्थी ४:११-१३; २कोरिन्थी ११:२३-२७ 8 गो शुश श्येत जाइतक हना यो, खतम मदुम्क। मारेइ पने मचाप्ब दुम्तक हना यो, आइक्च थुं पाइशो मदुम्क। 9 गो खेदा पचा पुंइसाक्क हना यो, आंइ कली कोव्रब बाक्ब। खोल्ला पुंइसाक्क हना यो, मनुष्क। 10 येसु आ लोव्र शेंना शेंन गाक्कानु, येसु बेक्चा डा श्येत जशो खोदेशो पा, गो यो बेक्चा डा श्येत जाइनीकी। तन्न येसु बेक्चो रे सेंचा पुंइसीशो खोदेशो पा, सक्ति पाइशो दुम्नीकी। १कोरिन्थी १५:३१; गलाती ६:१७ 11 ब्रोंइतक हना यो, येसु आ पब्रम बेक्चा डा बाक्नीकी। मोपा आंइ बेक्चा डा रांमी येसु आ ब्रोंइतीक सक्ति बाक्ब। रोमी ८:३६; फिलिप्पी ३:२१ 12 आंइ रांमी बेक्चा डा श्येत जशा, इन कली ख्रीस्त आ लोव्र शेंताक्क। आंइ गेय रे पा गे ब्रोंइचा ताइतीनी।

13 साइ डा लोव्र ब्रेक्ब कामी “गो थमा सुइक्नुड। मोपतीके आं थमा सुइशो नेंपाइक्नुडमी” दे ब्रेक्चो बाक्ब। मोदेशो ब्रेक्ब थमा सुइक्तीक सोक्त का दुम्शा, गो यो थमा सुइक्नीकी। मिनु आंइ थमा सुइशो मुर आन कली नेंपाइक्नीकी। भजन संग्रह ११६:१० 14 मार लोव्र थमा सुइशो, नेंपाइक्नीकी देशा हना “प्रभु येसु कली बेक्चो रे सेंबमी आंइ कली यो येसु नु सेंब” दे लोव्र बाक्ब। मिनु मेकोमी गे, गो नेल्ल इं कली आ डोंइती बाक्चा गेब। १कोरिन्थी ६:१४ 15 मारदे हना मेको नेल्ल इन पब्रम बाक्ब। परमप्रभु यावे आ शिशी शुश मुरुम नेंतेक्म हना, मेको क्येडा शुश मुरुम मेको कली ठेयब सेल्नीम। २कोरिन्थी १:६,११

16 ठेयब थुं पा शेंना शेंन गाक्नीकी। आंइ रां बेक्चो तांइसाक्क हना यो, आंइ थुं चहिं बारना बारन लशो बाक्ब। एफिसी ३:१६ 17 मारदे हना मुल जशो श्येत इक्का ला बाक्ब। नोले मेकोमी इं कली मरुप्चा डा ठेयब छेडछेडमी बाक्चा गेब। रोमी ८:१७-१८; १पत्रुस १:६ 18 मारदे हना गो मिक्चीमी तशो थोव्रक ममाइ। तन्न मिक्चीम मतशो थोव्रक ला कोव्रनीकी। तशो थोव्रक जाम्शा लाइनीम। मतशो थोव्रक चहिं मजाम्थु, गेना हना यो लीनीम। हिब्रू ११:१

5

प्रभु नु काथा बाक्चा दाक्चो

1 इं रां, रागी डा ताम्बु खोदेशो बाक्ब। मेको जाम्शा लाइब बाक्त। मेको जाम्शा लत हना यो, परमप्रभु यावेमी इं कली नक बाक्तीके गेब। मेको खिं गुइम सेल्शो मबाक्ब। मेको गेना हना यो लीब स्वर्ग डा खिं बाक्ब। २पत्रुस १:१४ 2 गो एकेर बाक्शा, रांका पाइनीकी, आंइ स्वर्ग डा खिं बाक्चा दाक्नीकी। 3 मेको नक बाक्तीके ओव्रचा चहिं माइत वा पुइशो, नक वा फेक्चो खोदेशो बाक्ब। मोपा शिश्रा मदुम्नीकी। 4 मुल सम्म रागी डा रांम बाक्नीकी, सुर्ता पना पन बाक्नीकी। शिश्रा दुम्चा कली ममाइ। तन्न नक फेक्चो खोदेशो पा, आंइ जाम्शा लाइब रां गेना हना यो ब्रोंइशा बाक्ब स्वर्ग डा रां दुम्ल। १कोरिन्थी १५:५१-५३ 5 मोदेशो दुम्चा कली परमप्रभु यावेमी आंइ कली ठीक पा वोइशो बाक्त। मेकोमी आंइ कली आ सोक्त बैना खोदेशो पा गेप्तु। २कोरिन्थी १:२२; रोमी ८:१६,२३; एफिसी १:१३-१४ 6 मोदेशो दुम्मेनु, ठेयब थुं पाइशो दुम्शा बाक्नय। रांमी बाक्कानु, प्रभु रे डोन बाक्नीकी। हिब्रू ११:१३ 7 मारदे हना गो थमा सुइक्तीकेमी गाक्नीकी। ततीकेमी मगाक्नीकी। 8 गो ठेयब थुं पाइशो बाक्नीकी। गो रां रे डोन दुम्शा, प्रभु नु बाक्चा दाक्नीकी। फिलिप्पी १:२३ 9 मोपतीके गो रांम बाक्शा हना यो, मबाक्शा हना यो, प्रभु कली ग्येरपाइक्चा दाक्नीकी। 10 मारदे हना गो नेल्ल ख्रीस्त आ डोंइती निसाफ पची ना जाक्चा माल्नीकी। रांम बाक्कानु, इं रांम पशो रिम्शो नु मरिम्शो नेल्ल ताइनीकी। प्रेरित १७:३१; रोमी २:१६; रोमी १४:१०; यूहन्ना ५:२९; एफिसी ६:८

पाप रे प्रोंइब कली ग्येरपाइय्य

11 गोपुकी प्रभु कली मान पा हिंशा तुइक्तीके गो मुर आन कली शेंनीकी। परमप्रभु यावेमी आंइ पशो नेल्ल तुइक्ब। मिनु गे यो तुइक्नीनी, दे आस पाइनीकी। 12 गो आंइ कली इन डोंइती ठेयब मसेल्सीनीकी। तन्न आंइ पब्रम बोरशा, आंम आन कली ठेयब सेल्सीबपुकीमी शोव्रमी ला गेय पाइनीम। थुंमी मारेइ ममिम्नीम। मोदेशो मुर आन कली लोव्र लेत्चा कली आंइ देशो लोव्र तुइक्ब दुमीने। २कोरिन्थी ३:१; २कोरिन्थी १०:१२ 13 गो मरुप्चा डा बाक्तक हना, गो परमप्रभु यावे कली ठेयब सेल्चा कली मोदेशो दुम्तक। गो रुप्चा डा बाक्तक हना, मेको इन कली दुम्ब। 14 मारदे हना ख्रीस्तमी इं कली दाक्ब, दे शुश मिम्नीकी। मेको नेल्ल मुर आन पब्रम बेक्चो, दे तुइशो, गो नेल्ल बेक्चा डा मुर बाक्नय, दे तुइक्नीकी। 15 मिनु मेको नेल्ल आन पब्रम बेक्चो। मिनु ब्रोंइशोपुकी मुल रे आंम पब्रम मब्रोंइमल। तन्न येसु कली ब्रोंइमल। मारदे हना मेको आन पब्रम साइशो, सेंसीचा पुंइसाक्क। रोमी १४:७-८

16 गो मुल रे मुर नेल्ल आन कली रागी डा मुर खोदेशो पा मकोवनीकी। खेयप का गो ख्रीस्त कली मुर खोदेशो पा कोवतक। मुल मोदेशो ममिन्नीकी। 17 सुइ ख्रीस्त आगाम बाक्त हना, मेको नक सेल्सीशो मुर का दुम्ब। डोंडती डा नेल्ल जाम्शा लत। नेल्ल नक दुम्ने नुप्त। रोमी ८:१०; गलाती २:२०; गलाती ६:१५; प्रकाश २१:५ 18 मेको नेल्ल परमप्रभु यावेम पशो बाक्ब। परमप्रभु यावेमी आंइ कली ख्रीस्त रे पा आं नु गारपाइक्तु। मिनु आंइ कली मेको गारपाइक्तीक गेय पपाइक्तु। रोमी ५:१० 19 परमप्रभु यावेमी ख्रीस्त रे पा मुर आन कली आ नु गारपाइक्तु। मेको आन मरिम्शो पशो नेल्ल प्रेशा, गारपाइक्तीक गेय आंइ कली गेप्तु। रोमी ३:२४-२५; कलस्सी १:१९-२० 20 मिनु गो ख्रीस्त आ पबर्म मुर आन कली गेय पाइब बाक्नीकी। परमप्रभु यावेमी आंइ पतीकेमी मुर आन कली ब्रेण्ब। गोपुकी ख्रीस्त आ पबर्म मुर नेल्ल आन कली “परमप्रभु यावे नु गारब दुमीने” दे शेंनीकी। लूका १०:१६ 21 परमप्रभु यावेमी काइ पाप मतुइशो ख्रीस्त कली पापी सेल्लु। मिनु गो ख्रीस्त आगाम बाक्शा, परमप्रभु यावे आ डोंडती ठीक दुम्नीकी। यूहन्ना ८:४६; यसैया ५३:४-६; गलाती ३:१२; रोमी १:१७; १कोरिन्थी १:३०

6

पावल आ पशो गेय

1 गो परमप्रभु यावे नु गेय पतीके इन कली “परमप्रभु यावे आ शिशी तशा, मप्रेंदीन” देनीकी। २कोरिन्थी १:२४ 2 मारदे हना मेकोमी “शिशी पची ना इ पुंइशो नेता। गो पाप रे प्रोंइतीक नाक्तीमी इ कली वारच पाता” दे ब्रेक्शो बाक्ब। नेनीने, मुल शिशी पची ना बाक्ब। नेनीन मुल पाप रे प्रोंइतीक नाक्त बाक्ब। यसैया ४९:८; लूका ४:१९, २१ 3 प्रभुमी पपाइशो गेयम मारेइ दूली मपाइनीकी। सुइ आन थुं मक्याल्नीकी। 4 तन्न परमप्रभु यावे आ गेय पाइब दुम्शा, आंइ गेय नेल्ल रिम्शो पाइनीकी। गो शुश फाल्नीकी, खेदा पतीकेमी, श्येत जतीकेमी, हिंतीकेमी, 5 तुप्चा पुंइसीनीकी, चोक्चा पुंइसीनीकी, आं पबर्म हुल बोक्चा पुंइसीनीकी। बेक्चा डा गेय पा दशा, इप्चा मतथु बाक्नीकी। माइजा बाक्नीकी, २कोरिन्थी ११:२३-२७; १कोरिन्थी ४:११-१३ 6 रिम्शो थुं कोइनीकी, जोक्शो तुइशो गेय कोइनीकी, मचबु देब मदुम्नीकी, शिशी कोइनीकी, परमप्रभु यावे आ सोक्तीम देशो टीनीकी, मुर आन कली दाक्नीकी। १तिमोथी ४:१२; २कोरिन्थी ४:२; १कोरिन्थी २:४; एफिसी ६:१४-१७ 7 थमा लोत्र पाइनीकी, परमप्रभु यावे आ सक्तिमी गेय कोइनीकी, ग्युरा नु पेरा निम्फा रे ठीक पतीके पाइशो बाक्नीकी। 8 आंइ नें चुइक्ताक्म हना यो, क्याम्ताक्म हना यो, आंइ कली मान पाम्तेक्म हना यो, ग्रांग्रा दिम्तेक्म हना यो, मेको आन पशो मारेइ मसुइक्नीकी। मुरपुकीमी आंइ पबर्म “जोल पा शेंशा, मुर आन थुं क्याल्शा हेंथे शेंनीम” देतेक्म हना यो, गो थमा लोत्र शेंनीकी। 9 आंइ कली मतुइक्नीमी, तन्न तुइशो बाक्नीमी। बेक्चा चिक्शो, तन्न मबेक्शो बाक्नीकी। सजाइ तशो, तन्न साइक्चा मपुंसीशो बाक्नीकी। २कोरिन्थी ४:१०-११; भजन संग्रह ११८:८; प्रेरित १४:१९ 10 सुर्ता पशो, तन्न गेना हना यो ग्येरसीशो बाक्नीकी। पुडग दुम्शो, तन्न शुश आन कली शोंप सेल्नीकी। मारेइ मथीब दुम्शो, तन्न मारेइ मारेइमी गाप्शो बाक्नीकी। फिलिप्पी ४:१२-१३

प्रभु आ मुर दुम्शो कोइदीने

11 गो कोरिन्थी इन कली शेंचा, शुश दाक्नीकी। 12 गोपुकीमी इन कली दाक्चा मतेक्नीकी। तन्न इन आंम थुंम आंइ कली दाक्चा तेक्ब। 13 मेको आ पा डा, गो आल आन कली लोत्र पशो खोदेशो पा, इन कली लोत्र पाइनुड। इन थुं आंइ गे हिरदीन। १कोरिन्थी ४:१४

14 नेनीन, थमा मसुइक्ब आन कली इन थुं मगेने। मारदे हना ठीक पतीके नु परमप्रभु यावे कली मटितीके दोपा गारनीस? छेड्छेड नु छिड्छिड दोपा गारनीसी? एफिसी ५:११ 15 ख्रीस्त नु सैतान बेलीआर दोपा उइक्थ उइक्थ दुम्ने मचाप्नीसी। थमा सुइक्ब नु मसुइक्ब मारम गारनीसी डा? 16 परमप्रभु यावे आ खिं नु मूर्ति दोपा गारनीसी डा? मारदे हना गो गेना हना यो ब्रोंइशा बाक्ब परमप्रभु यावे आ खिं बाक्नीकी। मिनु परमप्रभु यावेमी “आं मुर आगाम बाक्नुड। मेको आन दातेम गाक्नुड। मेको आन परमप्रभु यावे दुम्नुड। मिनु मेकोपुकी आं मुर दुम्नीम” देशो बाक्त। लेवी २६:११-१२; इजीकीएल ३७:२७; १कोरिन्थी ३:१६ 17 मोपतीके प्रभुमी “मेको आन दाते रे प्रूशा, पिने। मेको आन दाते रे ब्राडीने। ग्रांग्रा दिशो मारेइ मथिने। मिनु गो इन कली ब्राइनुड। प्रकाश १८:४ 18 मिनु गो इन आफ दुम्नुड। मिनु गेपुकी आं तमी तौ दुम्नीनी” दे नेल्ल सक्ति पाइशो परमप्रभु यावेमी देंत, दे ब्रेक्शो बाक्ब। यसैया ५२:११; इजीकीएल २०:४१; २सामुएल ७:१४; यसैया ४३:६; होसे २:१

7

पावल ग्येरसीशो

1 आं दाक्शोपुकी, गो नेल्लेमी परमप्रभु यावे आ गेशो लोव्र तुइश्शो बाक्नय। मोपतीके इं रां थुं नेल्ल मरिम्शो पतीक रे डोन बाक्नय। मिनु इं परमप्रभु यावे कली ला मान पा हिंशा ठेयब सेल्नय।

2 इन थुं आंइ गे हिरदीन। मारदे हना गो सुइ इन कली मरिम्शो मपक। सुइ आन कली मरिम्शो मसेल्क। सुइ रे पा मारेइ यो मताक्क। २कोरिन्थी १२:१७; प्रेरित २०:३२ 3 मेको इन कली दोस गेचा कली मदेंक। मारदे हना डोंइती देशो आं लोव्र लेंशा देंनुड, इन कली दाक्नीकी। बेक्चा माल्तय हना यो, काथा बेक्य। ब्रोंइचा ताइतय हना यो, काथा ब्रोंइय। २कोरिन्थी ६:११-१३; रोमी ६:८ 4 मिनु इन कली तशा, ग्येरसीशा, आं थुं बोरनुड। आं थुं नाइक्सीशा बारना बारन लत। श्येत जाता हना यो, इन कली तशा गो ग्येरस डा ग्येरस बाक्ती।

कोरिन्थी आन कली मिम्शा ग्येरशो

5 गो मासीडोनीया रागीम शेंना शेंन गाक्कानु, शुश श्येत जाइतक। मुरपुकीमी गडड मडड पा खेदा पा श्येत गेतीकी। मिनु शुश हिंचा माल्तक। प्रेरित २०:१-२; २कोरिन्थी ४:८ 6 तन्न परमप्रभु यावेमी आइक्च थुं पाइश्शो आन कली आन थुं बारपाइक्ब। मिनु तीतस जाक्शा आंइ थुं बारपाइक्तु। मिनु आंइ थुं बारत। २कोरिन्थी २:१३ 7 तीतस कली तशा ला ममाइ, तीतस आ लोव्र नेंशा, ठेयब थुं पाइश्शो दुम्तक। तीतसमी आंइ कली “कोरिन्थीपुकीमी थम रिम्शो पाइक्तीमी। आं कली शुश मान पशा कोंइताय्यीमी। आं थुं बारपाइक्तीमी” देंत। आ देशो नेंशा गो थाम्पा ग्येरसाक्यी।

8 डोंइती डा चिठीमी इन थुं खाइक्पाइक्तन्नी, दे तुइक्ताक्ड। मो हना यो मुल आं थुं मखाइक्ब। मारदे हना मेको इन थुं खाइश्शो शुश नाक्त मली, दे यो तुइक्ताक्ड। २कोरिन्थी २:४ 9 इन थुं खाइश्शो तुइश्शा, गो मग्येरसीड। आं ब्रेक्शो टिशा, इन थुं लेत्ताक्नी। गेपुकीम “परमप्रभु यावेमी इं कली लां कोंइचा नु रिम्शो सेल्चा कली थुं खाइक्पाइक्की बाक्त” दे रुप्तीनी। मोपतीके गो इन थुं लेशो तशा ग्येरसाक्यी। 10 परमप्रभु यावेमी थुं खाइक्पाइश्शो आन कली रिम्शो दुम्मल, दे मो पशो बाक्ब। रागी डा थुं खाइक्पाइक्मुशोमी चहिं थुं साइक्ब। मत्ती २६:७५; लूका १५:१७-२४; मत्ती २७:३-५ 11 परमप्रभु यावेमी इन थुं खाइक्पाइश्शोमी मार दुम्मे, दे तुइक्तीने। गे रिम्शो दुम्चा कली शुश गेय पाइतीनी। गे सल्ला पा, जिशा, हिंशा, रिम्शो दुम्चा कली शुश बोल पा दोस मताइब दुम्चा कली गे मेको मुर कली सजाइ गेतीनी। मोपा गे दोस मताइब बाक्नीनी, दे कोंइताक्नी। 12 मुल देंचा लीशो लोव्र नेनीने, इन कली डोंइती ब्रेक्शो चिठी मारदे ब्रेक्ताक्ड देशा हना, गेपुकी नु बाक्ब मरिम्शो पाइब नु मरिम्शो पचा पुंइसीब आस कली गारपाइक्चा लोव्र ला ममाइ। परमप्रभु यावेमी पावल कली अधिकार गेशो बाक्ब। मोपतीके आ देशो टिचा माल्ब, दे रुप्शा, गेय कोंइदीने, दे ब्रेक्ताक्ड। 13 मोपतीके गो इन कली आं देशो टिशो तशा, ग्येरसाक्क। मिनु आंइ थुं नाइक्ताक्क। गेपुकीमी तीतस कली आ थुं नाइक्पाइक्तीनी। आ थुं नाइश्शो तशा शुश ग्येरसाक्क। 14 मोदेशो पा तीतस कली यो “कोरिन्थीपुकीमी आं लोव्र टीनीमी, रिम्शो पाइनीम” दे थमा लोव्र पशो नड। मुल तीतसमी इन कली आं लोव्र टिशो तशा, थमा बाक्माक्त, दे तुइक्ताक्व। मोपा आं कली मुने मतोक्नी। मोपतीके आं नें बोरपा बाक्ती। 15 तीतसमी इन टिशो तशा, ग्येरसाक्क। गे हिंशा, खिंखि पा मेको कली ब्राइतीनी। मिनु इन कली शुश दाक्ताक्व। 16 गो इन रिम्शो पशो तशा ग्येरसाक्यी। मिनु इन कली थमा सुइक्ता।

8

क्येट पोक्शो

1 आं लोक्बपुकी, परमप्रभु यावेमी मासीडोनीया रागीमी बाक्ब थमा सुइक्ब आन कली शिशी पशो आ पर्बम इन कली शेंनीकी। रोमी १५:२६ 2 मेकोपुकी शुश श्येत जाम्तेक्म हना यो, ग्येरसीशो बाक्नीम। प्रुडग बाक्तेक्म हना यो, अरु आन कली योक्शा गेम्तेक्म। 3 सुइमी गेन की गेन मदेंथु, आंमा आन दाक्शो पा आन चाप्शो क्येडा यो शुश गेम्तेक्म। आन चाप्शो क्येडा शुश गेशो आं मिक्चीमीन ताता। 4 मेकोपुकीमी आं कली “गो यो थमा सुइक्ब आन कली क्येट पोक्चा दाक्नीकी” दे पुंइतेक्म। प्रेरित ११:२९ 5 मेको आन मोदेशो चहिं क्येट गेचा लोव्र ला ममाइ। डोंइती मेकोपुकीमी आन थुं प्रभु कली गेम्तेक्म। मिनु परमप्रभु यावे आ दाक्शो पा, गोपुकी नु गारशा बाक्तेक्म।

6 डोंइती तीतसमी इन कली क्येट पोक्पाइक्तु। मुल गो तीतस कली “इन क्येट पोक्तीके, रिम्शो गेय, थुमीन” दे अरेतक। 7 गे मार पाइतीनी हना यो, शुश पाइतीनी। इन थमा सुइक्चा, इन लोव्र पस जोक्चा, इन तुइक्चा, इन रिम्शो गेय पतीके नु इन आंइ कली दाक्तीकेमी शुश गेय पाइनीनी। मुल गे मेको दाक्तीक गेयमी यो रिम्शो गेय कोंइताक्नी।

१कोरिन्थी १:५; १कोरिन्थी १६:१-२ ८ इन कली अधिकार तशो लोव्र मपाइनुड। थमा पा दाक्चा दोपा तांडसीब देशा हना, सुइमी गेन की गेन माइक्चा मपुंडसीथु, आंम थुंमी मिम्शा गेशो रे तांडसीब। शुशेमी मोपा गेम्तेक्म। मिनु गेपुकीमी यो दाक्तीक गेय कोइदीने। ९ मारदे हना गे इं प्रभु येसु ख्रीस्त आ शिशी तुइक्नीनी। मेको शोंप पाइश्शो बाक्त हना यो इन पर्बम पुडग दुम्त। मेको पुडग दुम्तीकेम गे शोंप पाइश्शो दुमीन, दे मौ पापु। मत्ती ८:२०; फिलिप्पी २:७ १० मिनु गो इन कली मार देंनुड देशा हना “बर्स का डोंइती इन गोशो गेय थुम्चा मालीने” देंनुड। ११ इन गेचा दाक्शो नु इन गेने चाप्चा डा क्येट पोक्शा गारीन। १२ आंम के बाक्शो ला गेने जाप्ब, आंम के मबाक्शो गेने मजाप्ब। इन चाप्चा डा पा गेने। हितोपदेस ३:२७-२८; मर्कूस १२:४३ १३ इन कली मजाक्दीत्या डा पा वोइश्शा, अरु आन कली आन माल्शो क्येडा शुश गेन मदेनुड। इन कली गप्ल, मेको आन कली यो गप्ल देंनुड। १४ मुल इन के शुश बाक्मेनु, मथीब आन कली वारच पतीने। मिनु नोले मेको आन के शुश दुम्मेनु, इन कली यो वारच पाइनीम। मोपा वारच पा गेमुशोमी नेल्ल इं के बाक्शो उइक्थ उइक्थ दुम्ल, दे मिम्ताक्ड। १५ मार ब्रेक्शो बाक्त देशा हना “सु सुमी शुश खुप्तमे, मेको आन के महें। सु सुमी चहिं इक्का ला खुप्तमे, मेको आन कली यो जाक्दीत्त” दे ब्रेक्शो बाक्ब। प्रस्थान १६:१८

१६ गो परमप्रभु यावे कली “गे रिम्शो पाइब बाक्नीनी” दे ठेयब सेल्लुड। मारदे हना तीतसमी कोरिन्थी इन कली शुश मिम्ताक्व। १७ गोपुकीमी तीतस कली “कोरिन्थी आन कली ग्रुम्थ लावो की लावो” दे सोइक्ताक्क। आंइ देशो लोव्र टिशा, लशो ला ममाइ। आं यो ग्रुमग्रुम दाक्शा ग्येरसीशा पित, दे तुइक्नुड। २कोरिन्थी ८:६; २कोरिन्थी ७:७, १५ १८ तीतस नु गाक्ब वारच का यो सोइक्ताक्क। थमा सुइक्ब नेल्लेमी मेको कली तुइश्शो बाक्नीमी। मारदे हना मेको येसु ख्रीस्त आ ग्येरपाइक्ब लोव्र रिम्शो पा शेंब, दे नें चलेशो बाक्ब। २कोरिन्थी १२:१८ १९ आ नें चलेशो ला ममाइ। थमा सुइक्बपुकी गारशा मेको कली गो नु क्येट पोक्शा गाक्चा कली योव्रतेक्म। मेको गोपुकी नु शिशी पतीक गेय पाइब। गो मेको वारच पतीके प्रभु कली ठेयब सेल्चा कली पाइनीकी। गलाती २:१० २० मोपा सांकछी वोइक्कानु, मेको क्येट आ पर्बम मरिम्शो लोव्र पने मचाप्नीम। २१ गो प्रभु आ डोंइती रिम्शो पशो ला ममाइ। मुर नेल्ल आन डोंइती यो रिम्शो पशा कोइनीकी। २२ मोपतीके मेको निक्शी नु आंइ लोकब का यो सोइक्नीकी। डोंइती खेयप निक्शी सां सोइक्तकानु, मेको लोकबमी रिम्शो गेय पा कोइताक्व। मोपतीके मुल यो रिम्शो पाइब, दे तुइक्ताक्क। मेकोमी इन कली यो रिम्शो मिम्ब। २३ तीतस गो नु गारशा इन कली गेय पाइब बाक्ब। अर्को लोकब निक्शी थमा सुइक्ब आन सोइश्शो बाक्नीस। मेको ख्रीस्त आ नें ठेयब सेल्ब बाक्नीस। २कोरिन्थी ७:१३; २कोरिन्थी १२:१८ २४ मोपतीके मेको सां इन बाक्तीके जाक्मानु, मेको आन कली दाक्शा, वारच पतीने। मेको आन कली मार माल्दा, मेको गेने, आन लोव्र नेनीने। आं देशो पाइतीनी हना, गोमी इन पर्बम पशो लोव्र थमा दुम्ब। मिनु गो ग्येरसीनुड। थमा सुइक्ब नेल्लेमी यो “कोरिन्थीपुकीमी रिम्शो पामे बाक्त” दे तुइक्नीम। २कोरिन्थी ७:१४

9

दोपा शोक्गमे, मोपा खुप्नीम

१ मेको क्येट पोक्चा आ पर्बम इन कली लेंशा शेंचा ममाल्लुड। २ साइ थोचे क्येट पोक्चा माल्ब देशो नेंशा “पोक्नीकी की पोक्नीकी” दे प्रेक्तीनी। मिनु इन कली मोपा प्रेक्शो तशा, मासीडोनीयाम बाक्ब आन कली “आकाया डा मुरपुकीम ग्येरसीशा क्येट पोक्नीम” दे लोव्र नेंपाइक्तामी। मिनु शुशेमी “गो यो पोक्नीकी” देंतेक्मे। २कोरिन्थी ८:१९ ३ साइ थोचे डा बोरशो लोव्र जोल मदुम्ल। मिनु गे ठीक बाक्शा, लोकब सां आन कली क्येट पोक्शा वोतीन, दे इन बाक्तीक सोइक्ताक्क। ४ मारदे हना गो इन बाक्तीके जाक्डानु, मासीडोनीया डा मुर आन डोंइती गे क्येट मपोक्थु बाक्शा मुने मदोक्कीन, दे मेको सां आन कली इन बाक्तीक सोइक्ताक्ड। ५ मोपतीके मेको सां आन कली आं क्येडा डोंइती लने, दे सोइक्ताक्डमी। मिनु गो जाक्ची ना “मुल क्येट पोक्कीन” देशा, ग्रीचा ममाल्लुड। सुइमी आन थुं मखाइक्थु ग्येरशा, आंम आ दाक्स पा, चाप्स पा गेने चाप्मेक्ल, दे लोकब सां आन कली आं क्येडा डोंइती सोइक्ताक्डमी।

६ आंम आन दाक्स पा, चाप्स पा, गेचा चहिं दोदेशो रुम्सीब देशा हना, वांचेर शोक्गमेनु, इक्का ला शोक्बमी, इक्का ला खुप्चा ताइब। तन्न शुश शोक्बमी शुश खुप्चा ताइब। हितोपदेस ११:२४-२५; हितोपदेस १९:१७ ७ क्येट पोक्गु कों मपोक्गु, दे थुं निक्शी मपथु, सुइमी “गेव की गेव” माइक्चा मपुंडसीथु, आंम थुंमी मिम्शा, ग्येरसीशा गेचा माल्ब। ग्येरसीशा गेब कली परमप्रभु यावेमी दाक्ब। रोमी १२:८ ८ परमप्रभु यावेमी इन कली माल्शो क्येडा शुश गेने चाप्ब। मिनु मारेइ मारेइम गाप्शा, मारेइ वारच पचा डा गेय बाक्त हना यो, गे पने चाप्नीनी। ९ मार ब्रेक्शो बाक्त, देशा हना “मेकोमी वांचेर ब्वारब, पुडग आन कली गेब। मेको आ ठीक पशो गेना हना यो लीब” दे ब्रेक्शो बाक्ब। भजन

संग्रह ११२:९ 10 शोक्ब कली वांचेर गेब। जचा दाक्ब कली जचा थोवक गेबमी इन के बाक्शो यो बारपाइक्ब। मोपा इन ठीक पतीके डा फल बारना बारन लाइब। इजीकीएल १०:१२ 11 मिनु गे शुश थीब दुम्शा, हाइशशा गेशो तशा, गो परमप्रभु यावे कली “गे रिम्शो पाइब बाक्नीनी” दे ठेयब सेल्नीकी। 12 मोदेशो हाइशशा गेशोमी श्येत जशो थमा सुइक्ब आन कली रिम्शो दुम्ब। मोशो ला ममाइ, शुशेमी परमप्रभु यावे कली ठेयब सेल्नीम 13 एको क्येट पोक्तीक गेय पशा इन टितीक नाक्सीशो बाक्ब। मिनु गे परमप्रभु यावे कली ठेयब सेल्शो बाक्नीनी। मिनु इन हाइशशा मेको आन कली नु अरु आन कली गेशोमी गे ख्रीस्त आ ग्येरपाइक्ब लोव्र तुइक्ब बाक्नीनी, दे कोइनीनी। 14 परमप्रभु यावे आ शिशी गे नु बाक्तीके मेकोपुकीम इन कली प्रार्थना पाइनीमी। 15 परमप्रभु यावेमी इन कली देंने मचाप्या डा ठेयब कोसेली गेप्टु। मेको आ पर्वम मेको कली “गे रिम्शो पाइब बाक्नीनी” देंचा मप्रोंइनीक।

10

पावल आ गेय

1 गो, ख्रीस्त आ ब्रेम्शो नु रिम्शो पतीकेमी, इन कली शेंना शेंन बाक्नुड। गो इन नेक्था बाक्शा, ब्रेम्शो लोव्र पाइनुड। तन्न गो डोन बाक्ती हना, हुइशशा लोव्र पाइनुड। 2 गो इन बाक्तीके जाक्डानु, चिठीम ब्रेक्शो लोव्र खोदेशो पा हुइशशा लोव्र पचा ममाल्डल, दे मिम्शा ब्रेक्ताक्ड। आंइ पर्वमी “रागी डा मुर खोदेशो पा शेंनीम” देंब आन कली हुइशशा खोदेशो पा इन कली हुइक्चा मदाक्नुड। २कोरिन्थी १३:१-२; १कोरिन्थी ४:२१ 3 मारदे हना गो रागीम बाक्तक हना यो, रागी डा मुर खोदेशो पा मजीनीकी। 4 आंइ लडाइ पतीक या रागी डा खोदेशो मबाक्नीम। तन्न मेको परमप्रभु यावे आ सक्ति पाइशो बाक्नीम। मेकोमी मारेइ मारेइ खतम सेल्ने चाप्नीम। एफिसी ६:१३-१७ 5 परमप्रभु यावे कली थमा सुइक्ब आन कली तेक्बमी पशो लोव्र, ठेयब लेशशा थमा मसुइक्तीक लोव्र खतम सेल्लतक। मिनु ख्रीस्त आ लोव्र टीब दुम्पाइक्चा कली मटीब मिम्तीक नेल्ल ग्याइशशा लाइक्ब खोदेशो बाक्नीकी। 6 मिनु इन ख्रीस्त कली टिशो रिम्शो दुम्त हना, सु सुमी मटीमे, गो मेको आन कली सजाइ गेनीकी।

7 मिनु इन डोंइती दोपा बाक्नीकी, मेको कोव्रडीन। सु सुमी “गो ख्रीस्त आ मुर दुम्ती” दे आन नें बोरपदमे, मेकोपुकीमी आंइ कली यो ख्रीस्त आ मुर बाक्नीम, दे रुप्मेक्ल। 8 गो आंइ अधिकार आ पर्वम बोरती हना यो, मुने मदोक्नुड। मारदे हना मेको इन कली खतम सेल्चा कली ममाइ। तन्न इन कली रिम्शो सेल्चा कली प्रभुम गेती। २कोरिन्थी १३:१०; १कोरिन्थी ५:४-५ 9 आं ब्रेक्शो चिठी इन कली हिंपाइक्चा कली ममाइ, दे मिम्तीन। 10 मारदे हना मेकोपुकीमी “मेको आ ब्रेक्शो चिठी ठेयब नु बोल्यो लोव्रम ब्रीशो बाक्नीम। तन्न आंमान जाक्त हना, मारेइ पने मचाप्य नु ब्वाक्स मजोक्ब बाक्ब” देंनीम। 11 मोदेशो मुरपुकीमी मार रुप्या माल्नीम देशा हना “गो मबाक्ची ना हुइशशा शेंशा ब्रेक्शो लोव्र, आंइ बाक्ची ना मपाइनीकी” दे रुप्मेक्ल। २कोरिन्थी १३:२,१०

ठेयब मनकी, दे रुप्पाइशो

12 आंमान ठेयब सेल्सीबपुकी नु मगारनीकी। आन पशो खोदेशो यो मपाइनीकी। मेकोपुकीमी ठेयब सेल्सीशा, आंम आन जोक्तीक तुइक्तीक कोइमुइनीम। मोदेशो पशोमी “मारेइ मरुप्ब बाक्नीम” दे तुंइसीब। २कोरिन्थी ३:१; २कोरिन्थी ५:१२ 13 गो आंइ नें बोरपाइक्नीकी। मारदे हना परमप्रभु यावेमी आंइ कली अधिकार गेशा, इन कली शेंब सेल्लतु। आ गेशो अधिकार डा लाक्शा चहिं जोक्ब तुइक्ब नकी, दे बोरशा मगाक्नीकी। रोमी १५:२०; रोमी १२:३ 14 आंइ नें बोरपाइक्नीकी। मारदे हना आंइ क्येडा डोंइती इन बाक्तीके ख्रीस्त आ ग्येरपाइक्तीक लोव्र नेंपाइक्थ सुइम मजाक्म, दे तुइक्ताक्क। 15 अरु मुरपुकीमी इन कली शेंशो आ पर्वम गो मबोरनीकी। तन्न इन थमा सुइक्तीके बारना बारन लमेनु, आंइ शेंतीके यो मेको नु बारना बारन लाइब। 16 मिनु इन बाक्तीक क्येडा लाक्शा, एर ओंथ ख्रीस्त आ ग्येरपाइक्तीक लोव्र शेंने चाप्नीकी। मुर आन शेंने थुम्शो ग्रुम्तीके आ पर्वम आंइ नें मबोरपाइक्नीकी। 17 सु बोरनीमी, मेको प्रभु आ पर्वम नें बोरपदमेक्ल। येरमीया ९:२३-२४; १कोरिन्थी १:३१ 18 सुमी आंम कली शेंब सेल्बा, मेको कली मब्राइनीम। तन्न प्रभुमी शेंब सेल्शो कली ब्राइनीम। १कोरिन्थी ४:५

11

दूली शेंब आन पर्वम लोव्र

1 गो इक्का निप्स ग्राइशो लोव्र पाइनुड, गे आं लोव्र फाल्शा नेंशा गेयीनी। 2 इन कली मिम्शा, गो परमप्रभु यावेमी रुश पशो खोदेशो दुम्ती। मारदे हना रिम्शो ग्युम्ली ग्युंभे पा गेशो खोदेशो पा, इन कली ख्रीस्त कली गेतन्नी। एफिसी

५:२६-२७ ³ बुस्सुमी हव्वा कली मिलो शिलो पा जोल पा आ थुं हिरपा, परमप्रभु यावे कली मटीब सेल्शो खोदेशो पा, दूली शेंबपुकीमी इन थुं क्याल्शा, ख्रीस्त कली दाक्चा रे हेंथे लां खोइक्पाइक्नीम। उत्पत्ती ३:४, १३ ⁴ मारदे हना मुर का जाक्शा, मेकोमी इन कली अर्को येसु आ पर्वम शेंब आंइ शेंशो खोदेशो ममाइ, इन डोंइती ताक्शो ममाइ, अर्को सोक्त ताक्पाइक्ब। अर्को ग्येरपाइक्तीक लोव्र नेंपाइक्ब। मिनु गे रीब पा बिन्नीनी। गलाती १:८-९ ⁵ गो मेको शुश जोक्ब तुइक्ब देखु पशो सोइश्शो आन क्येडा आइक्च मनड। २कोरिन्थी १२:११ ⁶ ब्वाक्स मजोक्ब बाक्ती हना यो, शुश जोक्ब बाक्नुड। गो आंइ पतीकेमी कोंइताक्क। १कोरिन्थी २:१, २, १३; एफिसी ३:४

⁷ गो ब्रेम्शो दुम्शा, इन कली ठेयब सेल्चा कली परमप्रभु यावे आ ग्येरपाइक्तीक लोव्र क्येट मताक्थु शेंताक्ड। मार, मेको पाप मिन्नीनी? २कोरिन्थी १२:१३; मत्ती १०:८; १कोरिन्थी ९:१२-१८ ⁸ अर्को रागीम बाक्ब थमा सुइक्ब आन ग्रुम्तीके डा आन क्येट रोइश्शो खोदेशो पा ताक्शा, इन कली शेंताक्न्नी। फिलिप्पी ४:१०, १५ ⁹ गेपुकी नु बाक्शा शेंदन्नीनु, मासीडोनीया रागी रे जाक्शो थमा सुइक्ब लोक्बपुकीमी आं कली माल्शो थोव्रक गेशा, वारच पाइक्तीमी। मोपा आन पशोमी गेपुकीमी मोशा शेंसीचा ताइतीनी। मुल यो मारेइ ताक्चा ममाल्डल, दे मिम्ताक्ड। ¹⁰ ख्रीस्त थमा बाक्ब, देशो लोव्र लीशो खोदेशो पा “कोरिन्थी आन कली आन क्येट मताक्थु, मोशा शेंताक्व” देशो लोव्र आकाया रागीम ब्रशा लील, दे मिम्शा, मारेइ मताक्गु। ¹¹ मो पडानु, इन कली मदाक्ब दुम्नुडा डा? गोमी इन कली दाक्शो मदाक्शो परमप्रभु यावेमी तुइक्ब।

¹² मुल सम्म दोपा बाक्डा, मुल यो मोपान बाक्नुड। मारदे हना दूली लोव्र शेंबपुकीमी “पावल नु आ वारचपुकीमी पशो खोदेशो पा गो यो पाइनीकी” दे नें बोरपा गाक्नीम। मेको आन जोल गुंइचा कली गो मारेइ मताक्थु शेंनीकी। ¹³ मेकोपुकी परमप्रभु यावे आ सोइश्शो मनम। खुइश्शा जोल पा गेय पाइनीम। ख्रीस्त आ सोइश्शो दुम्खु पा शेंथ गाक्नीम। २कोरिन्थी २:१७ ¹⁴ मोपा गाक्तेक्म हना यो, मेको आन मोदेशो पशो छक लाक्चा डा ममाइ। मारदे हना सैतान यो परमप्रभु यावे आ स्वर्ग डा गेय पाइब खोदेब दुम्खु पा गेय पा गाक्ब। ¹⁵ मेकोपुकी रिम्शो गेय पाइब खोदेशो दुम्खु पा गाक्नीम। मेको आन जोल नोले गूब। मिनु आन गेय यो मलीब।

पावल श्येत जशो

¹⁶ गो इन कली लेंशा देंनुड, मार देंती हना यो, आं लोव्र नेंचा मप्रोनीन। गो निप्स ग्राइश्शो लोव्र पाइब खोदेशो पा, आ नें बोरपाइश्शो लोव्र पना पन बाक्ती हना यो, आं लोव्र नेनीने। २कोरिन्थी १२:६ ¹⁷ मुल इन कली देशो लोव्र प्रभुम गेशो अधिकार डा लोव्र ममाइ। आं नें बोरपाइक्तीक लोव्र पा, गो निप्स ग्राइश्शो लोव्र पड देंती। ¹⁸ मारदे हना शुश मुर रागी डा लोव्रमी ठेयब लेत्नीम। मोपतीके गो यो बोरनुड। ¹⁹ गे ग्येरसीशा निप्स ग्राइश्शो आन लोव्र फाल्नीनी। मिनु आंम कली जोक्ब तुइक्ब मिन्नीनी। १कोरिन्थी ४:१० ²⁰ सुइ मुरुमी इन कली वाइलीम वाइल सेल्तेक्म हना, रोइक्ताक्म हना, जोल पाम्तेक्म हना, बोरशा कोंइताक्म हना नु इन चोचो राप्तेक्म हना यो फाल्शा बाक्बाक्तीनी। ²¹ गो मुने पा देंनुड, मेको आन पशो खोदेशो पने मचाप्क। सुइ मुर मारेइ आ पर्वम ठेयब लेशशा बोरतेक्म हना, गो यो मेको आ पर्वम ठेयब लेशशा बोरनुड। गो मूर्ख खोदेशो पा ब्वाक्नुड। ²² मार, मेको हिबू नमी? गो हिबू नड। मार, मेको इस्राएली नमी? गो इस्राएली नड। मार, मेको अब्राहाम आ चच युइ नमी? गो यो अब्राहाम आ चच युइ नड। फिलिप्पी ३:५ ²³ मार, मेको ख्रीस्त आ गेय पाइब नमी? गो यो ख्रीस्त आ गेय पाइब नड। गो मेको आन क्येडा रिम्शो गेय पाइब नड। गो गशो मुरुम खोदेशो लोव्र पाइनुड। गो मेको आन क्येडा शुश गेय पाता। मेको आन क्येडा शुश चोक्चा पुंइसाक्यी। मेको आन क्येडा तुप्चा पुंइसाक्यी। हेर हेरा साइक्चा पुंइसाक्यी। १कोरिन्थी १५:१०; २कोरिन्थी ६:४-५ ²⁴ यहूदीपुकीमी आं कली ५ खेयप ३९ कोर्ग आप्तीनी। ब्यवस्था २५:३ ²⁵ खेयप सां कोक्केमी तुप्तीमी। काले फुल्लु आप्तीमी। खेयप सां आं डोइश्शो जहाज समुन्द्रम ग्रुम्शा हेरा बेक्ती। मो दुम्मेनु, काब नाक्दो नाक्ती समुन्द्रम बाक्ती। प्रेरित १६:२२; प्रेरित १४:१९ ²⁶ रागी रागी हिरशा गाक्डानु, खोला शोक्सीडानु, हेर हेरा योल्ताक्यी। लांम बाप्शा बाक्ब खुइपुकीमी हेर हेरा साइक्तीमी। आंम यहूदीपुकीमी यो शुश श्येत गेतीमी। अर्को रागी डा मुरपुकीमी यो हेर हेरा साइक्तीमी। सहर, गोरशो रागी, समुन्द्र ते ते हिरशा गाक्डा, मेक मेक हिंन हिंन गाक्चा माल्ताक्यी। आं लोक्ब दुम्खु पा, थमा सुइक्ब नकी देंब नु गाक्डानु, मेकोपुकीमी यो शुश श्येत गेतीमी। ²⁷ येसु आ लोव्र शेंना शेंन गाक्डानु, शुश गेय पा, शुश श्येत जशा, शुश नाक्दो इप्चा यो मतड। जचा तूचा यो मतड। ग्यूमी फेक्चा यो मतड। २कोरिन्थी ६:५ ²⁸ मोदेशो श्येत आं रांमी जशो ला ममाइ। आं थुं यो मनाइक्स। मारदे हना थमा सुइक्ब आन कली दोपा मार पा रिम्शो सेलुमी, दे मिम्स डा मिम्स बाक्ती। प्रेरित २०:१८-२१, ३१ ²⁹ मुरुमी “मचाप्नीकी” देंनीम। गो चहिं

गेना हना यो चाप्नुडा डा? मुरुम पाप पाप्तेकम हना, गो शुश सुर्ता पाइनुड। 30 गो आं नें बोरपा लोव्र पचा माल्नुड हना, आं मचाप्शो आ पर्वम आं नें बोरपाइक्नुड। २कोरिन्थी १२:५ 31 गेना हना यो ठेयब सेल्चा पुंडसीब प्रभु येसु आ आफ परमप्रभु यावेमी गो जोल मपाइनुड, दे तुइक्ब। 32 साइ दमस्कस सहरमी बाक्डानु, पिप अरेतस आ हुकुम पाइबमी आं कली ग्याइक्चा, दे सहर आ एर ओथ आ सिपाहीपुकी वोइक्मी बाक्त। 33 तन्न थमा सुइक्बपुकीमी आं कली डोकोम कुरपा गारो डा झेल रे ओंखां पा तोक्शा प्रोक्पाइक्तीमी। मोपा जोरी सत्रु आन गुइ रे ब्रोंइती। प्रेरित ९:२४-२५

12

मचाप्ब सक्ति पाइश्शा दुम्शो

1 नें बोरपाइक्तीक लोव्र शोर गाक्शो बाक्त हना यो, गो आं नें बोरपा लोव्र पचा मप्रोंइनुड। मारदे हना प्रभुमी छेडछेड पा तपांडसीशा तुइक्पाइक्ती, दे मुल सम्म इन मतुइश्शो लोव्र तुइक्पाइक्नन्नी। 2 गो ख्रीस्त आ मुर का कली तुइक्नुड। १४ बर्स डोंइती मेको स्वर्गम लाइक्चा पुंडसाक्ब। रांम बाक्म, कों मबाक्म, गो मतुइक्नुड। परमप्रभु यावेमी ला तुइक्ब। 3 मिनु गो मेको मुर परमप्रभु यावे आ बाक्तीके लाइक्चा पुंडसाक्ब, दे तुइक्नुड। रांम बाक्म, कों मबाक्म, गो मतुइक्नुड। परमप्रभु यावेमी ला तुइक्ब। 4 मिनु मेको मुरुमी खुइश्शो लोव्र नेंतु। मेको लोव्र मुरुम देंचा मदुम्ब। 5 मेको मुर आ पर्वम आं नें बोरपाइक्नुड। आं पर्वम चहिं आं नें मबोरपाइक्नुड। तन्न गो आं मचाप्शो आ पर्वम आं नें बोरपाइक्नुड। २कोरिन्थी ११:३० 6 मारेइ पने मचाप्ब दुम्तीके आं नें बोरपाइक्नुड देशोमी निप्स ग्राइश्शो लोव्र पाइब मदुम्नुड। मारदे हना गो थमा लोव्र पाइनुड। मारदे हना मुरपुकीमी आं कली तशा, आं लोव्र नेंशा आं पर्वम मार मिम्चा माल्बा, दे आंमा तुइक्तमेक्ल, दे मिम्शा बाक्नुड। २कोरिन्थी १०:८ 7 गो शुश कोंइतीके तशा, मेको आ पर्वम ठेयब लेशशा, नें मबोरपदुल, दे सैतान आ चू आं रांम गेती। मेको आं कली श्येत गेचा कली नु आं ठेयब लेत्तीक तेक्चा कली बाक्ब। 8 खेयप सां गो प्रभु कली “मोदेशो चू रे प्रोंइयीनी” दे पुंडता। 9 तन्न मेकोमी आं कली “आं शिशी इ कली गारब। मारदे हना मचाप्ब मुर आगाम आं सक्ति नेल्ल क्येडा ठीक बाक्ब” देंत। मोपा तुइक्तु रे ख्रीस्त आ सक्ति गो नु बाक्शो तांडसेक्ल, दे गो मारेइ पने मचाप्ब दुम्शोमी, थाम्पा ग्येरसीशा आं नें बोरपाइक्नुड। 10 मोपतीके ख्रीस्त आ सक्ति तांडसेक्ल, दे मारेइ पने मचाप्ब दुम्ती हना यो, शुक्शी लोव्र पाइक्चा पुंडसाक्यी हना यो, जचा फेक्चा मारेइम मजाक्दीत्ती हना यो, खेदा पचा पुंडसाक्यी हना यो नु दोदेंब श्येत गेचा पुंडसाक्यी हना यो, आं थुं नाइश्शा हेम्म पा बाक्नुड। मारदे हना गो मारेइ पने मचाप्ब दुम्डानु, सक्ति पाइश्शो बाक्नुड, दे रुप्ता। फिलिप्पी ४:१३

थमा सुइक्ब आन कली शेंशो

11 गो निप्स ग्राइश्शो लोव्र पाइब खोदेशो दुम्ती, दे तुइक्ताक्ड। गेपुकीमी मोदेशो पाइब सेलतीनी। मारदे हना गेपुकीमी आं कली ठेयब सेल्चा माल्शो, दे तुइक्चा माल्शो ननी। गो मेको शुश जोक्ब तुइक्ब देखु पशो सोइश्शो आन क्येडा आइक्च मनड। मो हना यो गो आइक्च दुम्ती। २कोरिन्थी ११:५ 12 ख्रीस्त आ सोइश्शोन बाक्माक्त, दे कोंइचा कली गेपुकी नु बाक्डानु, चिन्ड नु छक लाक्चा डा गेय कोव्रचा ताइतीनी। रोमी १५:१९; हिब्रू २:४ 13 तेइ तेइ येसु आ नेमी खुम्सीशा बाक्ब आन कली मारेइ मारेइ शेंशा, मारेइ मारेइ पशा कोंइशो खोदेशो पा इन कली यो पशा कोंइताक्न्नी। मिनु मार लीम डा? लोव्र का चहिं मार लीत देंशा हना, गेपुकी नु गो मारेइ मताक्गु। आं मताक्शोमी माफ गेयीनी। २कोरिन्थी ११:७-९ 14 मुल इन कली गुम्थ पिडानु, खेयप सां दुम्ब। गो इन कली श्येत मगेनुड। इन बाक्शो मारेइ मताक्नुड। तन्न इन कली माल्नुड। मारदे हना आलपुकीम आंम आफ कली शोंप मउप्नीम। तन्न आम आफोमी आन आल आ पर्वम शोंप उप्नीमी। 15 गो दोपा इन कली वारच पा रिम्शो थुं सेल्चा कली ग्येरसीशा, आं थुं गेनन्नी, मोपा इन कली दाक्चा डा गेय पाता। मिनु गो चहिं इक्का ला दाक्चा पुंडसीनुडा डा? फिलिप्पी २:१७ 16 इन मुर का निक्शीमी मार देंतेक्म देंशा हना “मारेइ मताक्नुड देंशा, जोल पा शुश ताक्बाक्त” देंतेक्म। 17 मार, आं सोइश्शो आन गुइ रे गो मारेइ ताक्गु डा? मार ताक्शा, इन कली श्येत गेमे डा? 18 गो तीतस कली कोरिन्थी आन कली गुम्थ लावो, दे सोइक्ताक्ड। तीतस नु लोक्ब का यो सोइक्ताक्ड। मिनु तीतसमी गेपुकी नु मारेइ ताक्गा डा? आंस सोक्त का पा गेय मपस्कु डा? २कोरिन्थी ८६, १६-१८

19 “पावल नु आ वारचपुकीमी ब्रोंइचा कली लोव्र पाइबाक्तेक्म” देंशो मिम्ताक्नी हना, गे दूली मिम्ताक्नी। आंइ दाक्शो लोक्बपुकी, गो इन कली शेंशा लोव्र पकानु, परमप्रभु यावे आ डोंइती जिम्मा ब्रशा ख्रीस्त आ अधिकार तशा, इन कली रिम्शो दुम्ल, दे मिम्शा शेंताक्क। 20 मुल गुम्यानु, मार दुम्बा, दो दुम्ब, दे थुं ग्येतथ लुक्च पा बाक्नुड।

मारदे हना ग्रुम्यानु, आं दाक्शो खोदेशो मपाइनीनी कों, गो यो इन दाक्शो खोदेशो मपाइनुडा कों? मिनु मगारथु, जिचा बोक्शा, गेहे पमुशा, गाइश्शा, आंम कली ठेयब सेल्मुशा, शुक्शी पमुशा, मुर आन पबर्म मरिम्शो लोव्र पा नोफा मुइक्मुशा, ठेयब लेशशा, खडड मडड दुम्नया कों? २कोरिन्थी १०:२ 21 गो लेशशा जाक्डानु, परमप्रभु यावेमी आं कली आइक्च सेल्बा कों, दे हिंनुड। मिनु डोंइती पाप पाइब नु परमप्रभु यावे गे मलेप्ब आन पबर्म सुर्ता पचा माल्नुडा कों? डोंइती मेकोपुकीमी ग्रान्गा दिचा डा, तेल्लेम नु हेंथे गेय पाम्तेक्म। २कोरिन्थी १३:२

13

हिंच कोइशो

1 मुल गो इन कली ग्रुम्य पिडानु, सां खेयप दुम्नुड। निसाफ पामेनु, सांकछी निक्शी सां वोइश्शा, मेको आन लोव्रमी दोस गुंइशा, सजाइ गेचा माल्ब। ब्यवस्था १९:१५; मती १८:१६ 2 मोपतीके सजाइ गेचा पुंइसीब आन कली सजाइ मगेथु, मप्रोंइनुड। मारदे हना एको क्येडा डोंइती जाक्डानु, मो मपचा, दे शेंशो नन्नी। 3 गोपुकीमी “पावल ख्रीस्त आ सक्ति तशा, अधिकार पाइश्शो बाक्माक्त” दे इन मिक्चीमी तचा माल्बाक्तीनी, दे तुइक्ताक्ड। ख्रीस्त इन दातेमी मचाप्ब ममाइ, शुश सक्ति पाइश्शो बाक्ब, दे कोइताक्व। 4 मारदे हना मेको मचाप्ब दुम्शा, शीम केप्शा कांटी थोक्शा क्याइश्शा साइक्चा पुंइसाक्व। तन्न परमप्रभु यावे आ सक्तिमी बेक्शो रे सेंचा पुंइसाक्व। मोदेशो पा गो यो मेको नु मारेइ पने मचाप्ब दुम्नीकी। तन्न गोपुकी नु बाक्कानु, बेक्शो रे सेंचा पुंइसीशा, परमप्रभु यावे आ सक्ति तशो सक्ति पाइश्शो गेय कोइनीकी।

5 इन थमा सुइक्तीके ठीक बाक्बा देय मबाक्ब आंमा नाक्शा कोव्रडीने। आंमा नाक्तीन। येसु ख्रीस्त इन आगाम बाक्ब, दे मप्रेंदीन। मबाक्त हना इन गेय शोर गाक्शो दुम्ब। 6 गो आंइ शेंशोमी इन कली रिम्शो पाइतक, दे तुइक्नीकी। मिनु गे यो मोदेशो मिम्नीनी, दे आस पाइनीकी। 7 गे मारेइ मरिम्शो मपन, दे गो परमप्रभु यावे कली पुंइनीकी। गो ग्राशो मुर खोदेशो दुम्चा ममाइ, तन्न ठीक पाइब दुम्मीन। गो ठीक मपाइब खोदेशो दुम्तक हना यो, गे रिम्शो पाइब दुम्नीकी। 8 गोपुकीमी थमा लोव्र थमा पाइनीकी। दूली नु जोल लोव्र कली थमा देंने मचाप्नीकी। 9 गो मारेइ पने मचाप्ब दुम्शो बाक्तक। तन्न इन कली बोल्यो दुम्शो तशा ग्येरनीकी। गो परमप्रभु यावे कली “कोरिन्थीपुकी रिम्शो दुम्मल” दे पुंइना पुंइन बाक्नीकी। 10 गो इन नेक्था मबाक्डानु, एको चिठी ब्रेक्नुड। मिनु आं जाक्ची ना गो इन कली हुइश्शा, प्रभुमी आं कली गेशो अधिकार कोइचा ममाल्डल। मेको अधिकार सेल्चा कली गेशो बाक्त, प्रेत्चा कली ममाइ। २कोरिन्थी १०:११; २कोरिन्थी १०:८

नोले डा लोव्र

11 आं लोकबपुकी, मुल रिम्शो बाक्कीन। रिम्शो पने। आं लोव्र नेंशा टीब दुमीने। इन दातेमी गारमुने। थुं नाइश्शा बाक्कीने। दाक्तीक नु थुं नाइक्तीक गेब परमप्रभु यावे गोपुकी नु बाक्ल। फिलिप्पी ४:४; रोमी १५:३३ 12 प्रभु आ नेंमी मुम्मुशा, आसीक गेमुने। 13 गो नु बाक्ब थमा सुइक्ब नेल्लेमी इन कली “रिम्शो बाक्कीन” देंतेक्म। 14 इं प्रभु येसु ख्रीस्त आ शिशी, परमप्रभु यावे आ दाक्तीके नु परमप्रभु यावे आ सोक्त गेना हना यो गोपुकी नु लील।

गलाती

ब्रेक्ब मुर: एको चिठी पावलम गलातीया रागीम बाक्ब यहूदी आन कली ब्रेक्शो बाक्त।

गेना ब्रेक्शो: एको चिठी ब्रेक्चा क्येडा डोंइती पावलामी निक्शी खेयप गलाती आन कली शेंचा कली मेकेर बाक्शो बाक्त। प्रेरित १६:६; प्रेरित १८:२३ मेको निक्शी खेयप लशा, लेंशा लची ना ब्रेक्शो बाक्त। मेको ५५ ए. डी. बाक्त।

मार ब्रेक्शो: गलातीपुकीमी पावल आ शेंशो मुल रे “येसु ख्रीस्त आ पतीक रे ला परमप्रभु यावे आ मुर दुम्ने चाप्नीम” दे शेंशो, दे मगारब मिम्तमे बाक्त। मेकोपुकी लेंशा “यहूदी आन माइत पतीके पचा माल्ब” दे दूली शेंब आन लोव्र नेंचा गोम्तेक्म। “येसु ला पाप रे प्रोंइब बाक्ब” देंशो एको चिठी डा ठेयब लोव्र बाक्ब।

डोंइती डा लोव्र

1 गो सोइश्शो ब्रेत्चा पुंइसीशो पावल नड। आं शेंतीके लोव्र मुर आन लोव्र ममाइ। मुरपुकीम सोइश्शो यो मनड। येसु ख्रीस्त कली बेक्शो रे सेंब इं आफ परमप्रभु यावे नु येसु ख्रीस्त आस सोइश्शो नड। गलाती १:११-१२ 2 गो नु काथा बाक्ब थमा सुइक्ब लोकबपुकीमी गलातीया रागीम बाक्ब येसु ख्रीस्त आ नेमी देल्ब इन कली एको चिठी सोइक्ताक्क। 3 इं आफ परमप्रभु यावे नु प्रभु येसु ख्रीस्तम इन कली शिशी पा इन थुं नाइश्शा बाक्चा गेम्सेक्ल। 4 प्रभु येसु ख्रीस्तमी इं पाप क्याम्चा नु रागीम गूशो मरिम्शो पतीके रे प्रोंइचा कली आ गिंम गेप्टु। आ मोदेंशो पशो चहिं इं आफ परमप्रभु यावे आ दाक्शो बाक्त। गलाती २:२०; १तिमोथी २:६; तीतस २:१४; १यूहन्ना ५:१९ 5 इं आफ परमप्रभु यावे कली ठेयब सेल्चा गेनायो मप्रोंइय। आमैन।

येसु ख्रीस्त आ लोव्र का ला बाक्ब

6 इन कली तशा, गो छक लाक्ती। मारदे हना इन कली येसु ख्रीस्त रे पा शिशी पा आ गे ब्रेप्ब कली प्रोंइशा, अर्को आन ग्येरपाइक्ब लोव्र नेंतीनी। 7 थमा लोव्र चहिं का ला बाक्ब, दे रूपीन। ख्रीस्त आ ग्येरपाइक्ब लोव्र दूली पा शेंबपुकी जाक्शा, आन दूली शेंशोमी इन थुं क्याल्पाइक्तेक्म। प्रेरित १५:१,२४ 8 मिनु गोपुकी डोंइती आंइ शेंशो ग्येरपाइक्ब लोव्र क्येडा अर्को ग्येरपाइक्ब लोव्र शेंताक्क हना, गोपुकी सराप रकल। परमप्रभु यावे आ स्वर्ग डा गेय पाइबमी मोपा अर्को ग्येरपाइक्ब लोव्र शेंताक्क हना मेको यो सराप रल। 9 गो इन कली “सु सुमी अर्को ग्येरपाइक्ब लोव्र शेंनीमी, मेको सराप रमल” दे लेंशा देंनुड। १तिमोथी ६:३ 10 मार, गो मुर आन थुं नुपाइक्चा माल्नुडा डा? गो परमप्रभु यावे आ थुं कका नुपाइक्चा माल्नुड। गो मुर आन थुं नुपाइक्तीके लोव्र पाता हना, ख्रीस्त आ गेय पाइब माइक्चा मपुंइसीनुड। १थिस्सलोनिकी २:४-६

पावलम आंम पर्बम लोव्र पशो

11 आं लोकबपुकी, गोमी इन कली शेंशो ग्येरपाइक्तीक लोव्र मुर आन लोव्र मबाक्ब। 12 गो मेको मुरुमी शेंशा नेंपाइश्शो मनड। येसु ख्रीस्तमी तपांइसीशा, शेंताक्यी। प्रेरित ९:१-१५ 13 साइ गो दोपा यहूदी धर्म ब्रडा, मेको नेंशा तुइश्शो बाक्नीनी। मेना गो येसु ख्रीस्त आ नेमी देल्ब आन कली खेदा पपाइश्शा ग्याइक्पाइश्शा चोक्पाइश्शा, श्येत गेतामी। मेको आन कली साम्चा, दे शुश गेय पाता। 14 आं पालामी नेल्ल आन क्येडा शुश धर्म पा आंइ यहूदी आन रिती थिती पाता। अरु आन कली यो आंइ किकी पिपीम पशो रिती थिती पपाइक्नुडमी, दे आं थुं फ्रेंशा बाक्शो नड। प्रेरित २३:६; प्रेरित २६:५ 15 परमप्रभु यावेमी चहिं काबु आं मोदेंशो पचा तेक्ती। मारदे हना आ दाक्शो पा आं जरमेचा डोंइती रे योव्रशा, आ लोव्र शेंब सेल्ने थुम्शो बाक्माक्त। येरमीया १:५; रोमी १:१ 16 मोपतीके आ तौ येसु ख्रीस्त कली तपाइक्ती। मिनु शुश अर्को रागी डा मुर आन कली आ तौ आ पर्बम शेंथ सोइक्ताक्यी। मेको शेंचा आ पर्बम गो सुइ नु लोव्रसी मपड। अर्को मुर आन अर्ती यो मनेनु। मत्ती १६:१७; गलाती २:७ 17 गो यरूसलेमम बाक्ब आं डोंइती ब्रेत्चा पुंइसीशा शेंथ सोइश्शो आन कली गुम्थ यो मलड। अराब रागी लशा हिरशा, दमस्कस सहर जाक्दीश्शा बाक्ती। 18 मिनु बर्स सां नोले केफास गुम्थ यरूसलेम लती। मिनु केफास नु १५ नाक्ती सम्म बाक्ती। यूहन्ना १:४२; प्रेरित ९:२६-२७ 19 मेना ख्रीस्त आ सोइश्शो सुइ आन कली मगुमुमी। प्रभु आ लोकब याक्ब चहिं गुम्ता। मत्ती १३:५५ 20 गोम इन कली ब्रेक्शो लोव्र थमान बाक्ब, देंनुड। जोल ममाइ, दे परमप्रभु यावेमी तुइक्ब। 21 नोले यरूसलेम रे गाक्शा, सिरीया नु सिलीसीया रागी हिरथ लती। प्रेरित ९:३० 22 यहूदीया रागीम बाक्ब ख्रीस्त कली थमा सुइक्ब

आन ग्रुम्तीकेमी आं कली गेनायो मतशो बाक्मा बाक्त। 23 मेकोपुकीमी आं पर्वमी “साइ इं कली खेदा पा एको लोव्र साम्चा देंबमी मुल एको लोव्रन शेंना शेंन ब्रपाइक्बाक्त” दे नेंशो बाक्तेक्म ने। 24 मेको नेंशा परमप्रभु यावे कली ठेयब सेल्लेक्म ने।

2

सोइशोपुकीमी ब्रशो

1 यरूसलेममी केफास नु याकूब ग्रुम्शा, १४ बर्स नोले लेंशा, यरूसलेम लती। गो नु बारनाबास यो लत। तीतस कली यो लाइक्तस्कु। प्रेरित १५:१-२९; प्रेरित ४:३६ 2 येसु ख्रीस्तमी यरूसलेमम बाक्ब सोइशोपुकी नु लोव्रसी पथ लावो, दे तुइक्पाइक्तीके लशो नड। मिनु जाक्दीशशा, सोइशोपुकी नु अरु आन कली लां कोंइब दुम्शो आन कली खुप्शा, अर्को रागी डा मुर आन कली मार मार शेंदुमी, मेको नेंपाइक्तामी। मारदे हना मेकोपुकीमी गोम शेंशो तुइक्चा माल्नीम। मतुइक्ताक्म हना, आं मिम्शो नु आन मिम्शो मगारब। मिनु आं देंशो मनेंनीम, दे मिम्शो नड। मिनु मेको नेंपदुमीनु, आं देंशो ठीक लाक्तेक्म। 3 मारदे हना गो नु लशो ग्रीक डा तीतस कली खोइक्तीक चिनु खोइक्पाइसो मदेथु, ब्राम्तेक्म। प्रेरित १६:३; १कोरिन्थी ९:२१ 4 तन्न मेकेर खुम्सीशा बाक्ब आन मतुइक्थु थमा सुइक्ब दुम्खु पा, दूली शेंब ब्वाइसाक्म। मोपा गोपुकी नु ब्वाइसीशा, आंइ थुं कोव्रशा बाक्तेक्म। गोपुकी ख्रीस्त येसुमी यहूदी आन रिती थिती पचा प्रोंइशा बाक्तक। तन्न मेकोपुकीमी यहूदी आन रिती थितीम लेप्पाइक्चा बोल पाम्तेक्म। 5 येसु ख्रीस्त आ लोव्र थमा बाक्ब देंशा, मेको दूली शेंब आन लोव्र नेंशा, छिन का यो गु ब्रेशशा मबाक्क। मिनु मोदेंशो पशोमी इन कली शेंशो ग्येरपाइक्ब लोव्र थमा बाक्ब, दे कोंइताक्क। गलाती ३:१

6 परमप्रभु यावेमी मुर आन कली ठेयब आइक्च मसेल्ब। मुर आन थुं नेल्ल तुइक्ब। मुल लां कोंइब दुम्शो आन कली मान पाइनुडमी। मेको लां कोंइबपुकीमी अर्को लोव्र शेंचा कली मतेम्देम। 7 मेकोपुकीमी आं कली परमप्रभु यावेमी अर्को रागी डा मुर आन कली शेंथ सोइक्ताक्व, पत्रुस कली चहिं यहूदी आन कली शेंथ सोइक्ताक्व, दे रुप्तेक्म। एफिसी ३:१२ 8 पत्रुस कली यहूदी आन कली शेंथ सोइक्ब नु आं कली अर्को रागी डा मुर आन कली शेंथ सोइक्ब कानाइ बाक्ब, दे रुप्तेक्म। 9 गो थमा पा एको शेंतीक गेय कली योव्रशो नड, दे रुप्शा, याकूब, केफास नु यूहन्ना सांफामी बारनाबास नु आं कली “गो इं यहूदी आन कली शेंनीकी। गे निक्शी चहिं अर्को रागी डा मुर आन कली शेंथ लसे” देंशा, ग्युरा गुइमी ग्याइशशा, लोव्रसी गारपाइक्तेक्म। यूहन्ना १:४२ 10 मिनु दोपा शेंचा, मार शेंचा, दे मारेइ मदेंम। मथीब आन कली शिशी पाइक्चा ला देंतेक्म। मेको आन लोव्र टिशा, शुश आन कली शिशी पाइक्तामी। प्रेरित ११:२९-३०; २कोरिन्थी ८:९

केफास कली हुइशो

11 काबु केफास एन्टीओकमी जाक्त। मिनु ग्रुम्स्कुनु हुइक्ताक्ड। मारदे हना आ पशो तशा आं थुं मनुड। 12 डोंइती मेकोमी अर्को रागी डा थमा सुइक्ब नु काथा जशा, नोले याकूबमी सोइशो वारच का निक्शी जाक्मा रे यहूदीपुकी नु ला जचा गोप्तु। मारदे हना यहूदी जात डा थमा सुइक्बपुकीमी आ कली मोदेंशो पा जशो तशा, मरिम्शो सुइक्नीम, आ लोव्र यो मनेंनीम, दे हिंशा मो पाप्तु। प्रेरित ११:२-३ 13 मोदेंशो पाइब आ ला ममाइ। यहूदी थमा सुइक्ब नेल्लेमी दिल्ला, जखु पा कोंइताक्म। बारनाबासमी यो आन पशो खोदेंशो पचा गोप्तु। 14 मिनु मेको आन मोदेंशो पशो चहिं ख्रीस्त आ लोव्र नु मगारब देंती। मोपतीके मेको आन कली खुप्शा, केफास कली “गे यहूदी नवे। तन्न इं यहूदी बुद पा आन पतीके पचा प्रोंइशा, अर्को रागी डा मुर खोदेंशो दुम्ते। मोपतीके अर्को रागी डा मुर आन कली इं यहूदी रिती थिती पपाइक्चा दुम्बा? 15 गोपुकी यहूदी नय। अर्को रागी डा मुरपुकीमी परमप्रभु यावे कली मतुइक्नीमी। आ अरेशो लोव्र मतुइक्थु, मटीनीम। गो मोदेंशो मनय। 16 इं यहूदी रिती थिती पतीके ठीक मदुम्नय। ख्रीस्त येसु कली थमा सुइक्तीके ठीक दुम्नय, दे रुप्तय। मोपतीके इं यहूदी रिती थिती पचा प्रोंइशा, ख्रीस्त येसु कली थमा सुइक्तय। गो लेंशा देंनुड, रिती थिती पतीके सुइ ठीक मदुम्नीम। परमप्रभु यावेमी मुर आन कली येसु ख्रीस्त कली थमा सुइशो तशा, ठीक दुम्पाइक्ब। रोमी ३:२०,२८; एफिसी २:८ 17 गो यहूदी बाक्तय हना यो, येसु ख्रीस्त कली थमा सुइक्तीके ठीक दुम्तय। मोपान अर्को रागी डा मुर खोदेंशो दुम्तय। मिनु येसु ख्रीस्तमी मुर आन कली पापी सेल्शा, पाप बारपाइक्ब, दे मिम्चा डा? मोदेंशो ममिम्चा। 18 गो रिती थिती पचा प्रोंइता। मुल लेंशा रिती थिती पशा, ठीक दुम्चा माल्ता हना, गो थमान परमप्रभु यावे आ लोव्र मटीब दुम्नुड, दे रुप्ता। 19 गो यहूदी आन पतीके आन पर्वम बेक्शो मुर दुम्ती। ख्रीस्त नु

काथा शीम कांटी थोक्शा, क्याइशशा साइक्चा पुंडसाक्यी। मुल गो परमप्रभु यावे आ दाक्शो पा ब्रोंइनुड। 20 तन्न गो मब्रोंइनुड। ख्रीस्त आं आगामी ब्रोंइब। तन्न आं मुल ब्रोंइतीके गो परमप्रभु यावे आ तौ कली थमा सुइशशा ब्रोंइनुड। मेकोमी आं कली शुश दाक्शा, आं पशो पाप आ पर्बम साइक्चा पुंडसाक्व। यूहन्ना १७:२३; प्रेरित १:४ 21 परमप्रभु यावेमी मो गेशो शिशी खेर मसोइक्नुड। यहूदी आन पतीके पाप रे ब्रोंइसीब हना, ख्रीस्त साइक्चा पुंडसीशा बेक्शो शोर गाक्शो मदुम्बा डा?” दे केफास नु मेकेर देल्शा बाक्ब आन कली माइक्तामी।

3

थमा सुइशशोमी ठीक दुम्सीब

1 ए गलातीपुकी, गे मरुप्ब मुर दुम्नी बाक्त। सुमी मोपा इन थुं हिरदा? येसु ख्रीस्त कली शीम केप्शा कांटी थोक्शा क्याइशशा साइक्तेक्म, दे इन मिक्चीमी तशो खोदेब पा नेपाइक्तान्नी। मुल मेको लोव्र प्रेंदीनी? 2 मुल लोव्र का निक्शी हिल्लो पाइक्नन्नी। परमप्रभु यावे आ सोक्त दोपा तनी? यहूदी आन पतीक पशोमी तनी देय ख्रीस्त आ लोव्र थमा सुइशशोमी तनी? लो देनीन। 3 मारेइ मरुप्ब मुर दुम्नी? परमप्रभु यावे आ सोक्तीम प्रिशो थुं गेचा पुंडसीशा, प्रभु आ लां खोइक्चा गोइतीनी। मिनु मुल मुर आ थुंमी मिम्शो पशा, जाक्दीय्य, दे मिम्तीनी? 4 प्रभु आ लां खोइशशा गाक्नीनु, मारेइ मारेइ ताइतीनी। मुल मेको लां प्रोंइतीनी हना, मेको नेल्ल मसाम्नीनी डा? 5 परमप्रभु यावेमी इन कली आ सोक्त गेशा, छक लाक्चा डा गेय कोंइताक्व। यहूदी आन पतीक पशो तशा, मोदेशो छक लाक्चा डा गेय कोंइदा डा? ख्रीस्त कली थमा सुइशशो तशा, कका छक लाक्चा डा गेय कोंइताक्व।

6 अब्राहाम आ पर्बम “अब्राहाममी परमप्रभु यावे कली थमा सुइक्तु। मिनु परमप्रभु यावेमी ठीक दुम्पाइक्तु” दे ब्रेक्शो बाक्ब। उत्पत्ती १५:६; रोमी ४:३ 7 थमा सुइक्तीके ठीक दुम्शो मुरपुकी अब्राहाम आ आल नम, दे रुपीने। 8 अर्को रागी डा मुरपुकी थमा सुइक्तीकेमी ठीक दुम्पाइक्चा पुंडसीनीम, दे परमप्रभु यावे आ लोव्रम ब्रेक्शो बाक्ब। मारदे हना अब्राहाम कली “इ लां रे पा नेल्ल रागी डा मुरपुकीमी आसीक ताइनीम” दे ब्रेक्शो बाक्ब। उत्पत्ती १२:३ 9 मोपतीके सु सुमी अब्राहाममी थमा सुइशशो खोदेशो पा थमा सुदमे, मेकोपुकी अब्राहाम आ आसीक यो ताइनीम। रोमी ४:१६ 10 सु सुमी चहिं यहूदी आन पतीक पा, ठीक दुम्चा माल्मे, मेकोपुकी सराप राइनीम। मिनु “परमप्रभु यावेमी अरेशो लोव्र नेल्ल टिचा माल्ब। सु सुमी लोव्र नेल्ल टिशा पशा, का चहिं मटीमे, मेकोपुकी सराप राइनीम” दे ब्रेक्शो बाक्ब। ब्यवस्था २७:२६ 11 सुइमी यहूदी आन पतीक पशा परमप्रभु यावे आ डोंइती ठीक मदुम्नीन, दे तुंडसीब। “थमा सुइशशो रे पा ठीक दुम्पाइक्चा पुंडसीब चहिं गेना हना यो ठीक बाक्नीम” दे ब्रेक्शो बाक्ब। हबकुक् २:४; रोमी १:१७; हिब्रू १०:३८ 12 परमप्रभु यावे आ अरेशो लोव्र येसु ख्रीस्त कली थमा सुइक्तीक रे मबाक्ब। “सुइम परमप्रभु यावे आ अरेशो पशो हना, मेको रे पा ब्रोंइ वा” दे ब्रेक्शो बाक्ब। लेवी १८:५ 13 ख्रीस्तमी सुइमी मेको लोव्र टिने मचाप्नीम, दे तुइशशा, इं पा डा सराप रशा, मेको सराप रे प्रोंइतु। मिनु “शीम क्याइशशा साइक्चा पुंडसीबपुकी सराप रशो बाक्नीम” दे ब्रेक्शो बाक्ब। ब्यवस्था २१:२३; २कोरिन्थी ५:२१ 14 ख्रीस्त येसु सराप रमेनु, अर्को रागी डा मुरपुकी यो अब्राहाम आ तशो आसीक ताइनीम। मिनु यहूदी आन पशो पतीक रे ममाइ। ख्रीस्त येसु कली थमा सुइशशो रे पा गोपुकीमी परमप्रभु यावेमी गेनुड देशो आ सोक्त ताइतय, दे रुब्य।

परमप्रभु आ गेशो नु अरेशो लोव्र

15 आं लोकबपुकी, कथा सेल्शा रुप्पाइक्नन्नी, कागज ब्रेक्शा, ब्रेप्चो दिम्ने थुम्शो डा मेरे मेको ब्रेक्शो लोव्र लीब। सुइमी मारेइ लोव्र क्याम्ने तेम्ने मचाप्नीम। 16 परमप्रभु यावेमी अब्राहाम नु अब्राहाम आ युइ का कली “इ लां रे पा रागी नेल्ल डा मुरपुकी आसीक राइनीम” दे आ लोव्र गेशो बाक्त। शुश आन कली ममाइ “इ युइ का कली” दे ब्रेक्शो बाक्ब। मेको लोव्र खाप्ब चहिं ख्रीस्त बाक्ब। उत्पत्ती २२:१८ 17 आं देशो रुपीन। परमप्रभु यावेमी अब्राहाम कली गेशो लोव्र कागज ब्रेक्शा, ब्रेप्चो दिप्शो खोदेशो बाक्ब। मेको लोव्र गेशा, ४ सहे ३० बर्स नोले आ अरेशो लोव्र तुइक्पाइशशो बाक्त। मेको अरेशो लोव्रमी डोंइती गेशो लोव्र खोइक्ने मचाप्ब। प्रस्थान १२:४० 18 अरेशो लोव्र पतीके हक ताइब दुम हना, परमप्रभु यावे आ गेशो लोव्र ख्रोत वा। परमप्रभु यावेमी “हक ताइनेवे” दे अब्राहाम कली आ लोव्र गेशो बाक्त। 19 अरेशो लोव्र शोर गाक्शो मदुम्बा डा? नेनीन, परमप्रभु यावेमी अब्राहाम कली गेशो लोव्र खाप्ब, दे तुइक्नय। मेको युइ मजरमेथु, परमप्रभु यावे आ अरेशो लोव्र रे पा पाप माइशशो मार में, दे तुंडसीशो बाक्त। मेको लोव्र परमप्रभु यावे आ स्वर्ग डा गेय पाइबमी गारपाइक्ब का आ गुइमी गेशा, मुर आन कली तुइक्पदा बाक्त। रोमी

५:२०; प्रेरित ७:३८, ५३; हिब्रू २:२; ब्यवस्था ५:५ 20 गारपाइक्तीक गेय पचा कली मुर का मदुम्ब। तन्न परमप्रभु यावे आ का ला बाक्शा लोत्र गेशो बाक्त।

21 अरेशो लोत्र नु परमप्रभु यावेमी गेशो लोत्र मगारचा डा लोत्र नसी डा? ममाइ। ब्रोंडचा गेचा कली अरेशो लोत्र का गेशो हना, थमा पा ठीक पतीके अरेशो लोत्र रे पा दुम वा। रोमी ८:२-४ 22 तन्न परमप्रभु यावेमी ब्रेक्पाइश्शो लोत्रमी “मुर नेल्ल पाप आ वाइलीम वाइल दुम्शो बाक्नीम” दे ब्रेक्शो बाक्ब। सु सुमी येसु ख्रीस्त कली थमा सुदमे, मेको आन थमा सुइश्शोमीन “पाप रे ब्रोंडचा ताइनीम” दे गेशो लोत्र खाप्शो ताम्तेक्म। रोमी ३:९-२०; रोमी ११:३२

23 थमा सुइक्तीक जाक्चा क्येडा डोंडती अरेशो लोत्र पना पन बाक्तक। मोपा थमा सुइक्तीक मजाक्म सम्म चोक्सीशो खोदेशो बाक्तक। गलाती ४:३ 24 मोपतीके मेको अरेशो लोत्रम आंइ कली हिंच कोंइशा, ख्रीस्त आ लां गाक्पाइक्ब दुम्त। मोदेशो बाक्त हना, थमा सुइक्तीक रे ठीक दुम्नय। 25 तन्न थमा सुइक्तीक जाक्चा नोले हिंच कोंइब ममालनय। रोमी १०:४ 26 ख्रीस्त येसु कली थमा सुइश्शा, गे नेल्ल परमप्रभु यावे आ तमी तौ दुम्तीनी। यूहन्ना १:१२; रोमी ८:१७ 27 गे ख्रीस्त आ नेमी ब्वाक्कुम खुम्शा गुंडपांडसीशोपुकी येसु ख्रीस्त फेक्शो खोदेशो पा, ख्रीस्त नु रां का दुम्तीनी। रोमी ६:३; रोमी १३:१४ 28 मोपा रां का दुम्शो आन कली यहूदी नु ग्रीक, वाइल नु होत्रप, मीश मुर नु वोंइश मुर मतिलसीब। मेको ख्रीस्त येसुम नेल्ल खाल का डा बाक्नीम। रोमी १०:१२; १कोरिन्थी १२:१३ 29 ख्रीस्त नु रां का दुम्शा, अब्राहाम आ चच युइ दुम्तीनी। परमप्रभु यावेमी अब्राहाम कली गेशो लोत्र गाप्शा, हक ताइब दुम्तीनी।

4

हक ताइब दुम्तय

1 मारेइ मतुइक्ब आल हक ताइब दुम्त हना यो, मेको खिं डा तौ बाक्त हना यो, गेय पाइब वाइल खोदेशो मिम्सीब। 2 मेको मकोल्म सम्म ठेयब मुर आन गुइमी बाक्ब। आ आफोमी “मुल आ हक गेचा” मदेम सम्म आ तचा डा हक मताइब। 3 गोपुकी मेको खिं डा आल खोदेशो बाक्तय। कोल्शा इं हक मतशो सम्म गो एको रागी डा सक्ति आन वाइल दुम्शो बाक्तय। गलाती ५:१; कलस्सी २:२० 4 मिनु नोले परमप्रभु यावेमी वोइश्शो नाक्त आ तौ कली सोइक्ताक्व। मेको आ तौ मीश मुर रे परमप्रभु यावे आ अरेशो लोत्रमी जरमेसाक्व। मर्कूस १:१५; एफिसी १:१० 5 मेकोमी मुर दुम्शा, यहूदी आन पतीक पाइब आन कली प्रोंइशा, परमप्रभु यावे आ तमी तौ सेलतीमी। 6 गो आ तमी तौ दुम्शोपुकी परमप्रभु यावेमी आ तौ आ सोक्त गेचा पुंडसाक्य। मेको सोक्तीमी “आब्बा, आं दाक्शो आफ” देंब। रोमी ८:१५ 7 मोपतीके गो वाइलीम वाइल दुम्चा प्रोंइशा, परमप्रभु यावे आ तमी तौ दुम्शा, हक ताइब दुम्तय। रोमी ८:१६-१७

तमी तौ दुम्शोपुकी

8 डोंडती गे परमप्रभु यावे कली मतुइक्थु, देवी देवता आन कली सेउ पा, मेको आन वाइलीम वाइल दुम्तीनी। 9 मुल चहिं परमप्रभु यावे कली तुइक्ताक्नी। मिनु परमप्रभु यावेमी यो इन कली तुइक्ताक्व। मिनु मुल लेंशा डोंडती पशो खोदेशो पचा दाक्नीनी? 10 गोपुकीमी बार, औंसी, पूर्न नु रीतु मानेनीनी। शुश मोदेशो रिती थिती पाइनीनी देशो नेंता। रोमी १४:५; कलस्सी २:१६, २०, २१ 11 गो शुश श्येत पा येसु ख्रीस्त आ लोत्र शेंताक्नी। इन कली शेंशा श्येत ला जडा कों, दे मिम्ताक्ड। २यूहन्ना ८

12 आं लोक्बपुकी, गो रिती थिती पचा प्रोंइशा, येसु ख्रीस्त कली थमा सुइक्ता। आं खोदेशो पा थमा सुइक्चा मप्रोंइथु बाक्कीन, दे इन कली देंनुड। साइ गोपुकी नु बाक्डानु, गारशा बाक्तय। गोपुकीमी आं कली वारच पशो मिम्शा, मुल यो मप्रेंनुड। 13 मेना गो रोइ पा, मचाप्थु यो येसु ख्रीस्त आ ग्येरपाइक्ब लोत्र शेंताक्नी। १कोरिन्थी २:३; प्रेरित १६:६ 14 आं कली मोदेशो रोइ पशो तशा ग्रांग्रा मदित्तीनी। मरिम्शो लोत्र यो मपाइय्यीनी। श्येत पा वारच पाइतीनी। परमप्रभु यावे आ स्वर्ग डा गेय पाइब कली ब्रशो खोदेशो पा मान पाइतीनी। ख्रीस्त येसु कली ब्रशो खोदेशो पा ब्रतीनी। 15 मेना ग्येरसीशा बाक्तीनी। मुल इन ग्येरसीशो ते लाक्गा? मेना इन मिक्च फेशशा, आं मिक्चीम केप्चा डा दुम्तीनी। आं बेक्चा डा गोपुकी बेक्चा ठीक दुम्तीनी। 16 मुल इन कली हुइश्शा, थमा लोत्र शेंदन्नीनु, आं कली मरिम्शो सुइक्नीनी? 17 नेनीने, दूली शेंबपुकीमी इन कली मिलो शिलो पा, येसु आ लां खोइक्चा प्रोंइपाइक्चा मालनीम। मेकोपुकीमी इन कली मान पखु पा, आंम आन कली मान पपांडसीनीम। गलाती १:७ 18 शेंब आन लोत्र नेंचा रिम्शो बाक्ब। गोपुकी नु बाक्ती हना यो, मबाक्ती हना यो, शेंब आन लोत्र नेंचा मप्रोनीन। तन्न शेंशो लोत्र थमा बाक्म कों दूली बाक्म, मेको रुप्चा मालनीनी। 19 आं दाक्शो आलपुकी, मीश मुरुमी आल थिचामेनु, श्येत जाइनीमी। शुश खाइक्ब। आल थिचशो

मीश मुरुमी श्येत जशा खाइशो खोदेशो पा, गो इन कली मिम्शा, श्येत जाइनुड। इन थुंमी ख्रीस्त बारल, दे मिम्शा, मोदेशो पा आं थुं खाइक्ती। १कोरिन्थी ४:१५ 20 गेपुकी नु काथा बाक्शा लोव्र पचा तड हना, गिश रिम्शो दुम वा। गो इन कली तशा मार पचा दो पचा दुम्शो बाक्नुड।

अब्राहाम आ तौ निक्शी

21 गे रिती थिती पचा दाक्बपुकी, अरेशो लोव्रमी मार ब्रेक्शो बाक्बा, मेको तुइक्नीनी? 22 मार ब्रेक्शो बाक्ब देशा हना, अब्राहाम आ तौ निक्शी बाक्ताक्स। का वाइलीम आ तौ बाक्त, का ग्युंवे पशो मीश आ तौ बाक्त, दे ब्रेक्शो बाक्ब। उत्पत्ती १६:१५; उत्पत्ती २१:२ 23 वाइलीम आ तौ मुर आ दाक्शो पतीकेम जरमेशा ब्रोंइशो बाक्त। ग्युंवे पशो मीश आ तौ चहिं परमप्रभु यावेमी अब्राहाम कली गेशो लोव्र गाप्शा, जरमेशा ब्रोंइशो बाक्त। रोमी ९:७-९ 24 अब्राहाम आ ग्युंवे पशो मीश नु आ वाइलीम मीशेमी कबल पशा लां निक्शी कोंइनीसी। लां का सीनै डा लां बाक्ब। मेकोपुकी वाइलीम वाइल बाक्तेक्म। मारदे हना हागार माइशो वाइलीम आ चच युइ बाक्तेक्म। गलाती ५:१; रोमी ८:१५ 25 हागार देशो मार रुम्सीब देशा हना, अराब रागी डा सीनै डांडा रुम्सीब। सिनाक्त मुलाक्त यरूसलेममी बाक्बपुकीमी हागार आ लां खोइशशा, रिती थिती पा वाइलीम वाइल दुम्शो बाक्नीम। 26 इर डा यरूसलेम चहिं प्रोंइसीशो बाक्ब। मेको यरूसलेम कली इं ममा मिम्नय। हिब्रू १२:२२; प्रकाश २१:२ 27 मारदे हना “ए गेनायो आल मथीब मीश मुर, कुम्सो पा ग्येरसो। गे आल मथिशो मुर बाक्ते हना यो, इ कली ममा देंब शुश दुम्नीम। ग्युंवे पा आल थिशो नेल्ल आन क्येडा गे मान पाइक्चा पुंइसीनेवे” दे ब्रेक्शो बाक्ब। यसैया ५४:१ 28 आं लोकबपुकी, इसहाक जरमेशो खोदेशो पा गे परमप्रभु यावे आ गेशो लोव्र गाप्शा, आ तमी तौ दुम्तीनी। 29 मुर रे जरमेशोमी मेको सोक्त रे जरमेशो कली मदाक्थु हेला पा खेदा पाइब। मेको मोदेशो मुल यो बाक्ब। 30 मिनु मार ब्रेक्शो बाक्त देशो हना “वाइलीम आ तौ कली गुंइशा खेरचा। मारदे हना वाइलीम आ तौ ग्युंवे पशो आ तौ नु हक मताइब” दे ब्रेक्शो बाक्ब। उत्पत्ती २१:१० 31 आं लोकबपुकी, वाइलीम आ चच युइ मनय। ग्युंवे पशो मीश आ चच युइ नय, दे रुब्बय।

5

परमप्रभु आ सोक्तीमी ब्रोंइशो

1 ख्रीस्तमी रिती थिती पतीके लां खोइक्चा प्रोंइपा, थमा सुइक्तीके लां कोंइशा, इं थुं हिरताक्व। मोपतीके जवा लाप्शो खोदेशो पा लेंशा रिती थिती पा वाइलीम वाइल मदुमीने। गलाती ४:५; प्रेरित १५:१० 2 गो पावलमी “खोइक्तीक चिनु रिती थिती पाइतीनी हना, ख्रीस्त इन पा डा बेक्शो, शोर गाक्शो मदुम्बा डा? शोर गाक्शो दुम्ब” देनुड। 3 लोव्र थोक्शा का का पा शेंनन्नी, खोइक्तीक चिनु ख्रोंइसीबपुकीमी अरेशो लोव्र नु रिती थितीम बाक्शो नेल्ल पचा माल्नीम। का यो प्रोंइचा मदुम्ब। 4 सु सुमी रिती थिती पशोमी ठीक दुम्चा माल्मे, मेकोपुकीमी ख्रीस्त आ पशो साम्शा, मेको रे डोन दुम्शा आ शिशी मताइनीम। 5 गोपुकी “ख्रीस्त आ पतीके ठीक दुम्तय” देशा, परमप्रभु यावे आ सोक्तीमी तुइक्पाइक्चा पुंइसाक्व। 6 ख्रीस्त येसु नु थुं का दुम्शा, खोइक्तीक चिनु ख्रोंइशो, मख्रोंइशो आन कली मतिल्थु, थमा सुइक्तीकेमी दुशा गारशा दाक्मुशा बाक्शोम सक्ति बाक्ब। गलाती ६:१५; रोमी २:२६; १कोरिन्थी ७:१९ 7 डोंइती गे रिम्शो पाइतीनी। तन्न सुम इन कली थमा लोव्र मनेंथु, दूली शेंब आन लोव्र नेंचा, दे इन थुं हिरदा? 8 इन कली आ तमी तौ सेल्बमी मोदेशो मपाइब। 9 बोरपाइक्ब ओस्ती इक्का खोइ सुप्शोमी शोब्ले नेल्ल बोरपाइक्ब, दे रूपीने। १कोरिन्थी ५:६ 10 गे आं शेंशो लोव्र थमा सुइक्चा मप्रोंइनीनी, दे प्रभु रे तुइक्ताक्ड। सु सुमी इन कली दूली लोव्र शेंशा, इन थुं क्याल्पाइशशा हिरदमे, मेको आन कली परमप्रभु यावेमी सजाइ गेब, दे यो तुइक्ताक्ड। गलाती १:७ 11 आं लोकबपुकी, नेनीन, गो खोइक्तीक चिनु ख्रोंइक्चा माल्ब, दे शेंथ गाक्शो नड हना, खेदा पा श्येत गेचा मपुंइसीड वा। गोमी येसु ख्रीस्त इं पा डा बेक्त, दे थमा सुतीन, दे शेंना शेंन गाक्शो नड। मेको शेंतीक आ पर्बम आन थुं मनुथु श्येत गेतीमी। १कोरिन्थी १५:३०; गलाती ६:१२; १कोरिन्थी १:२३ 12 इन थुं क्याल्पाइक्बपुकीमी आंम आन रांमी चिनु ख्रोंदमेनु, खसी पशो दुम्मल, देनुड।

परमप्रभु आ सोक्त नु मुर आ थुं

13 आं लोकबपुकी, प्रभुमी रिती थिती पचा प्रोंइपाइक्तीकी, दे गेनायो मप्रेंदीने। मोपा ब्रोंइशा यो इन दला दाक्स मपने। तन्न दाक्मुशा, वारच पमुशा बाक्कीने। १पत्रुस २:१६; २पत्रुस २:१९ 14 “आंम इ कली दाक्शो खोदेशो पा, इ

नेक्था बाक्ब आन कली यो दाक्तो” देशो लोवमी परमप्रभु यावे आ अरेशो लोव नेल्ल बाक्ब। लेवी १९:१८ 15 गेपुकी कुचुम जिशा क्राइक्मुशो खोदेशो पा जीतीनी हना, खतम दुम्नीकी, दे तुइक्तीन। याकूब ४:२

16 लोव थोक्शा, का निक्शी नु तेम्शा शेनन्नी, परमप्रभु यावे आ सोक्त रे पा ब्रोंडशा गेय पने। मो पाइतीनी हना ला, इन दला दाक्स मपाइनीनी, इन थुंमी मिम्शा मरिम्शो मपाइनीनी। 17 मुर आ थुंमी मिम्शो पचा नु परमप्रभु यावे आ सोक्तीम ब्रीशो थुं आ मिम्शो पचा मगारब। रिम्शो पय देंतीनी हना यो, रिम्शो पने मचाप्नीनी। रोमी ७:१५,२३ 18 परमप्रभु यावे आ सोक्तीमी चहिं इन कली गेय पपाइक्तु हना, रिम्शो पाइनीनी, अरेशो लोव मटीब यो मदुम्नीनी।

19 आन दला दाक्स पा मुर आ थुंमी मिम्शो पाइबपुकीमी दोदेशो गेय पाइनीम देशा हना, तेल्लेम पाइनीमी, ग्रांघ्रा दिचा डा गेय पाइनीमी, हेंथे गाक्नीमी, १कोरिन्थी ६:९-१० 20 मूर्ति पूजा पाइनीमी, मन्तर तन्तर पाइनीमी, जिचा पोक्नीमी, थुं खाइक्पाइक्नीमी, रुश पाइनीमी, शुश चुरनीमी, आंम कली ला मिम्नीमी, गाइश्शा बाक्नीमी, दुशा गारशा बाक्ब आन कली फ्रानीमी, 21 गेहे पाइनीमी, तूशा दुक्शा हेंथे पाइनीमी, शुश जाइनीमी। मारेइ मारेइ मरिम्शो पशा गाक्नीम। साइ गोमी मोदेशो गेय पाइबपुकी परमप्रभु यावे आ राज्य ओव्रचा मताइनीम, दे शेंताक्नी। मुल लेंशा मिम्पाइक्तन्नी। एफिसी ५:५; प्रकाश २२:१५

22 परमप्रभु यावे आ सोक्तीमी ब्रीशो थुं पाइश्शोपुकीमी परमप्रभु यावे आ सोक्त रे पा दोदेशो पाइनीम देशा हना, दाक्मुइनीमी, ग्येरनीमी, थुं नाइक्नीमी, शुश फाल्नीमी, रिम्शो पाइनीमी, शिशी पाइनीमी, कबल खाप्नीमी, 23 ब्रेम्शो दुम्नीमी नु आंम कली चलेस जोक्नीमी। मोदेशो पाइब मुर कली परमप्रभु यावे आ अरेशो लोवमी मारेइ मपाइब। १तिमोथी १:९

24 सु ख्रीस्त येसु आ मुर दुम्शो बाक्नीमी, मेकोपुकीमी आंम रां डा दला दाक्स येसु ख्रीस्त खोदेशो पा शीम क्याइक्ने थुम्शो बाक्नीमी। रोमी ६:६ 25 गो परमप्रभु यावे आ सोक्तीमी ब्रोंडतय हना, इं गेय यो परमप्रभु यावे आ सोक्तीमीन पय। रोमी ८:४ 26 मोपतीके ठेयब मसेल्सीय, मगाइक्मुय अरु आन कली रिम्शो दुम्शो तशा गेहे मपय। फिलिप्पी २:३

6

दाक्मुशा, रिम्शो गेय पा बाक्व

1 आं लोक्बपुकी, सुमी आ थुंमी मिम्शा, दला दाक्स पा प्रभु आ देशो मटिथु मरिम्शो दुम्मे, गे मेको कली परमप्रभु यावे आ सोक्तीमी ब्रीशो थुं पाइश्शोपुकीमी, ठेयब मलेत्थु, रिम्शो लोव पा, आ थुं परमप्रभु यावे गे लेप्पतीने। मो पनीनु, थुं थाम्चा मपुंडसेक्ल, दे होस पा बाक्कीन। मती १८:१५; याकूब ५:१९ 2 कामी अर्को कली वारच पने। मोपा गे ख्रीस्त आ अरेशो लोव खाप्नीनी। २कोरिन्थी ११:२९ 3 सुइ ठेयब मसुंडसेक्ल। मजोक्थु यो जोक्ब तुइक्ब नड, दे ठेयब लेप्बमी आंम कली जोल पांडसीब। 4 परमप्रभु यावे आ सोक्तीम गेय पडा कों, आंम दला दाक्स पडा कों, दे का का पा मिम्शा तुइक्तीने। मिनु ला गे “गो रिम्शो पाता” देंने चाप्नीनी। २कोरिन्थी १३:५ 5 मारदे हना नेल्लेमी आंम गेय आंमा पचा माल्ब। रोमी १४:१२

6 ख्रीस्त आ लोव शेंचा पुंडसीबमी शेंब कली आ नु बाक्शो रिम्शो थोक्शा योक्शा गेवल। १कोरिन्थी ९:१४ 7 परमप्रभु यावे कली कोंइखु पा जोल पचा मदुम्ब। परमप्रभु यावेमी नेल्ल तुइश्शो बाक्ब। मोपतीके दूली ममिम्तीने। मुरपुकीमी मार शोक्गमे, मेको रुप्नीम। येरमीया २१:१४ 8 आंम आन थुं डा मिम्शो गेय पाम्तेक्म हना, मेको आन गेय मलीथु जाम्शा लाइब। मिनु आ यो जाम्शा लाइनीम। परमप्रभु यावे आ सोक्तीम गेय पाम्तेक्म हना, परमप्रभु यावे आ सोक्त रे पा गेना हना यो ब्रोंडशा बाक्चा ताइनीम। रोमी ८:१३ 9 रिम्शो गेय पचा मदने। मोपा ला गो रुप्ची ना रुप्ने चाप्नीकी। २थिस्सलोनिकी ३:१३ 10 सुइ कली रिम्शो पचा ताइतय हना, रिम्शो पय। नेल्ल क्येडा डोंइती थमा सुइक्ब लोक्ब आन कली वारच पय। २पत्रुस १:७

नोले डा लोव

11 ठेयब ठेयब अच्छेर ब्रेक्शो तशा, पावल आ ब्रेक्शो बाक्त, दे तुइक्नीनी। 12 दूली शेंबपुकीमी खोइक्तीक चिनु खोइक्चा माल्ब देशा, इन कली यहूदी रिती थिती पपाइक्चा माल्नीम। “ख्रीस्त शीम केप्शा कांटी थोक्शा साइक्चा पुंडसाक्व” दे शेंतीक लोव आ पबर्म खेदा पचा पुंडसीब, दे तुइक्नीम। मोपतीके खेदा पचा मपुंडसेक्ल, दे दूली लोव शेंनीम। गलाती ५:११ 13 आंइ यहूदी रिती थिती नेल्ल मपाइनीमी, खोइक्तीक चिनु ला खोइक्नीम। मिनु इन कली खोइक्तीक चिनु खोइश्शो तचा दाक्नीम। मोदेशो पशो तशा “आंइ शेंशो पामे बाक्त” दे आन नें बोरपाइश्शा गाक्चा ताइनीम। 14 नें बोरपाइक्चा दा गो यो आं नें बोरपाइश्शा गाक्ती। तन्न मुर आन पशो तशा ममाइ। इं प्रभु येसु ख्रीस्त इं

पा डा शीम केप्शा कांटी थोक्शा साइक्चा पुंइसीशा, इं पाप क्याम्ताक्व, दे ख्रीस्त आ पशो मिम्शा, आं नें बोरपाइश्शा गाक्ती। ख्रीस्त आ गेय डा लाक्शा मारेइ ठेयब ममिम्नुड। रागी डा मिम्तीक पतीक नेल्ल बेक्शो खोदेशो मिम्ताक्ड। रागीमी यो आं कली बेक्शो खोदेशो मिम्ताक्व। १कोरिन्थी १:३१; १कोरिन्थी २:२ 15 खोइक्तीक चिनु खोइक्चा, मखोइक्चा मेको ममिम्तीने। ख्रीस्त येसु नु थुं का दुम्शा, नक मुर दुम्चा चहिं नेल्ल क्येडा ठेयब बाक्ब, दे रूपीने। गलाती ५:६; १कोरिन्थी ७:१९; २कोरिन्थी ५:१७ 16 गे सु सु आं देशो लोत्र टिशा पाइनीनी, मेको थुं नाइश्शा नु शिशी तशा बाक्चा ताइनीम। मेको ला ममाइ, परमप्रभु यावे कली थमा सुइक्ब, इस्राएली, दे नें वोइक्चा पुंइसीनीम। भजन संग्रह १२५:५

17 मुल डा मेरे सुइमी श्येत मगेयीमील। येसु आ नेमी श्येत जशा, तुप्चा, युक्चा पुंइसीशो चिनु आं रांमी शुश बाक्ब। २कोरिन्थी ४:१०

18 आं लोकबपुकी, इं प्रभु येसु ख्रीस्तमी इन कली शिशी पा, आ सोक्त इन थुंमी लीपदल। आमेन।

एफिसी

ब्रेक्ब मुर: एको चिठी पावलमी ब्रेक्शो बाक्ब।

गेना ब्रेक्शो: एको चिठी नु कलस्सी आन कली चिठी कालेमी ब्रेक्शो बाक्ब। मारदे हना तिखीकसम एको चिठी निकशी चाक्शो बाक्ब। एको चिठी रोम सहर रे ६२ ए. डी. नुच्ची ना कि ६३ ए. डी. गोची ना ब्रेक्शो बाक्ब।

मारदे ब्रेक्शो: तेइ तेइ थमा सुइक्बपुकी श्येत जशा, आन योवचा पुंइसीतीके नु येसु नु बाक्शा परमप्रभु यावे आ डोंइती ठीक दुम्तीके तुइशशा मिम्चा माल्नीम। एको चिठीम थमा सुइक्ब आन गुम्तीकेम मार पचा नु मार मपचा, दे शेंशो बाक्ब। एको का निकशी गुम्तीक कली ब्रेक्शो चिठी बाक्ब हना यो, अरु क्येडा डोंइती एफिसी डा गुम्तीक डा थमा सुइक्ब कली पढेचा कली चाक्शो बाक्ब।

डोंइती डा लोव

1 गो पावल नड। ख्रीस्त येसुम आं कली सोइक्ताक्यी। मेको परमप्रभु यावे आ दाक्शो बाक्ब। मिनु गो एको चिठी एफिसस सहरम बाक्ब येसु ख्रीस्त कली थमा सुइक्ब, परमप्रभु यावे आ मुर इन कली ब्रेक्ताक्यनी। 2 इं आफ परमप्रभु यावे नु इं प्रभु येसु ख्रीस्तमी इन कली शिशी पा थुं नाइशशा बाक्चा गेम्सेक्ल।

परमप्रभु कली ठेयब सेल्शो

3 इं प्रभु येसु ख्रीस्त आ आफ परमप्रभु यावे कली “गे ठेयब बाक्नीनी” देंय। मारदे हना मेकोमी स्वर्गम आ सोक्तीम पतीके इं कली आसीक गेपुतु। मेको नेल्ल ख्रीस्तम बाक्ब। 4 मोपतीके रागी सेल्चा क्येडा डोंइती परमप्रभु यावेमी इं कली योवतु। मार कली योवतु देंशा हना, गोपुकी परमप्रभु यावे आ मुर दुम्शा, दोस मताइब नु दाक्ब दुम्बल, दे योवतु। रोमी ८:२८-३०; एफिसी ५:२७ 5 मिनु परमप्रभु यावेमी इं कली दाक्शा “येसु ख्रीस्त कली थमा सुइक्ब दुम्नीम” दे आंम आ तमी तौ सेल्लु। मेकोन परमप्रभु यावे आ दाक्शो बाक्ब। 6 मिनु मेकोमी इं कली आ दाक्शो तौ आ पतीक रे मुरुमी मिम्ने मचाप्चा डा शिशीम ठेयब सेल्चा कली आ तमी तौ सेल्लु। मत्ती ३:१७ 7 मोपा गोपुकी येसु ख्रीस्त आ हुशेम पतीके माफ तशा ब्रोंइशा बाक्नय। इं हेंथे पशो आ पबर्म माफ ताइनय। दोपा माफ तशा ब्रोंइशा बाक्नय देंशा हना, मुरुमी मिम्ने मचाप्चा डा आ शिशी रे पा माफ ताइनय। कलस्सी १:१४; एफिसी २:७; एफिसी ३:८,१६ 8 मिनु मेको आ जोक्तीक तुइक्तीक नेल्लेमी आ शिशी इं तारी मोइशशो बाक्ब। एफिसी ३:३-६,९; रोमी १६:२५; कलस्सी १:२६-२७ 9 परमप्रभु यावेमी इं कली डोंइती ख्रीस्त रे आ थुंमी खुइशशा वोइशशो लोव तुइक्पाइक्चा दाक्ताक्ब। 10 मिनु मेको नेल्ल ठीक दुम्मेनु, परमप्रभु यावेमी ख्रीस्त कली रागीमी सोइक्ताक्ब। मोपा रागी नु स्वर्गमी बाक्ब, इस्राएली नु अर्को रागी डा मुर नेल्ल आन कली ख्रीस्तमी का सेल्लु। गलाती ४:४

11 परमप्रभु यावेमी ख्रीस्त रे पा आ आल सेल्शा, इं कली योवतु। मारदे हना डोंइती रे योवनुडमी, दे मिम्शो बाक्माक्ब। मेकोन पापुतु। कलस्सी १:१२ 12 गोपुकी डोंइती “ख्रीस्तमी आंइ कली मरिम्शो रे प्रोंइब” दे आस पाइतक। मोपतीके परमप्रभु यावेमी आंइ कली “आ सक्ति ठेयब बाक्ब” दे ब्रोंइचा गेचा कली योवतीकी।

13 मिनु गोपुकीमी यो “येसु ख्रीस्तमी पाप रे प्रोंइब” देंशो थमा ग्येरपाइक्ब लोव नेंतीनी। ख्रीस्त कली थमा सुइक्तीनी। मिनु परमप्रभु यावेमी डोंइती देंशो खोदेंशो पा आ सोक्तीमी छाप थोक्सीशो बाक्तीनी। एफिसी ४:३० 14 आ सोक्त चहिं गोपुकी परमप्रभु यावे नु बाक्ची मजाक्म सम्म कली परमप्रभु यावे आ तमी तौ दुम्ने थुम्शो नय, दे कोंइतीक बाक्ब। मोपतीके “परमप्रभु यावे आ सक्ति ठेयब बाक्ब” देंनय।

पावलम पशो प्रार्थना

15 गोपुकी प्रभु येसु कली थमा सुइक्तीनी। अरु थमा सुइक्ब आन कली दाक्ताक्यनी, दे गो इन पबर्म लोव नेंता। 16 मोपतीके गो इन कली मिम्शा, परमप्रभु यावे कली “गे एफिसस डा मुर आन कली रिम्शो पाइतीनी” दे ठेयब सेल्शा, लोव पना पन बाक्नुड। कलस्सी १:४,९ 17 मार लोव पना पन बाक्नुड देंशा हना “परमप्रभु यावे, आंइ प्रभु येसु ख्रीस्त आ आफ ननी। गे नेल्ल छेडछेड डा आफ बाक्नीनी। गे एफिसस डा थमा सुइक्ब आन कली येसु ख्रीस्त कली तुइक्तीकेमी रिम्शो गेय पस जोक्तीके नु नोले मार दुम्बा तुइक्तीक सोक्त गेने। 18 गे मेको आन कली मार कली ब्रेक्शो बाक्नीनी, थमा सुइक्ब आन ततीक मार बाक्बा, इन छेडछेड गिश ठेयब बाक्बा, मेको नेल्ल रुपतीक

थुं गेने। 19 मिनु गो थमा सुइक्व आंइ कली इन ठेयब सक्तिम मार पाइनीनी नु इन गेशो बोल गिश ठेयब बाक्मे, मेको रूप्तीक थुं यो गेने। 20 मेको सक्तिमी ख्रीस्त कली बेक्शो रे सेंशा, स्वर्ग डा इन बाक्तीकेमी इन ग्युरा गे निप्पाइक्तीनी। भजन संग्रह ११०:१ 21 मिनु हुकुम पाइब, अधिकार पाइश्शो, सक्ति पाइश्शो ठेयब दुम्शो नेल्लेमी ख्रीस्त कली प्रभु देंचा माल्नीमी। मेको नेल्ल आन क्येडा ठेयब नें बाक्ब। मुल ला ममाइ, नोले यो मोदेशोन बाक्ब। रोमी ८:३८-३९; फिलिप्पी २:९; कलस्सी २:१० 22 मिनु गेमी मारेइ मारेइ आन कली येसु ख्रीस्त आ खोइलीमी दिम्पाइक्तीनी। थमा सुइक्वपुकी रां का खोदेशो सेल्शा, येसु ख्रीस्त कली मेको रां आ पिया सेल्तीनी। भजन संग्रह ८:७; मत्ती २८:१८; एफिसी ४:१५ 23 मोपा थमा सुइक्वपुकी येसु ख्रीस्त आ रां दुम्तेक्म। मिनु मेको रां आ पिया येसु ख्रीस्त आंमान दुम्शा, मारेइ मारेइ खाप्शो बाक्त” दे लोव पाइनुड। एफिसी ३:३०; १कोरिन्थी १२:२७; कलस्सी १:१९

2

बेक्शो रे ब्रोंइशो

1 गोपुकी डोंइती बेक्शो मुर खोदेशो बाक्तीनी। दोपा मोदेशो बाक्तीनी देशा हना, मरिम्शो पशा, परमप्रभु यावे कली मटिथु, हेंथे गाक्शो बाक्तीनी। लूका १५:२४,३२; कलस्सी २:१३ 2 मिनु रागी डा मुर आन लां खोइक्तीनी। मोपा फशेम हुकुम पाइब, सैतान आ देशो टीब बाक्तीनी। मेको आ सोक्ती परमप्रभु परमप्रभु यावे कली मटीब आन आगाम बाक्ब। तीतस ३:३; एफिसी ६:१२; यूहन्ना १२:३१ 3 मिनु डोंइती गो नेल्ल मोदेशो रागी डा मुर बाक्तय। गोपुकी यो मार दाक्तय, मेकोन पाइतय। इं रां नु थुंमी मार दाक्ता, मेकोन पाइतय। मोपतीके गोपुकी यो अरु मुर खोदेशो पा गाइक्ब आ आल दुम्तय। १पत्रुस ४:३; कलस्सी ३:६ 4 तन्न परमप्रभु यावे शुश शिशी पाइब दुम्तीके इं कली तशा, शिशी पा दाक्ताक्व। 5 मेना गोपुकी मटिथु बेक्शो बाक्तय हना यो, मेकोमी इं कली ख्रीस्त नु कालेम सेंताक्व। मोपा आ शिशी रे गोपुकी ब्रोंइशो बाक्तय। 6 मिनु परमप्रभु यावेमी इं कली ख्रीस्त येसु नु सेंशा, मेको नु स्वर्गमी काथा बाक्पाइश्शा, फिलिप्पी ३:२० 7 मुरुमी मिन्ने मचाप्चा डा ठेयब शिशी आंम आ दाक्तीकेमी ख्रीस्त येसु रे नोले डा मुर आन कली कोंइचा कली पाप्तु। एफिसी १:७

8 मिनु गोपुकी परमप्रभु यावे आ शिशी तशा, थमा सुइक्तीके पाप रे ब्रोंइतीनी। मेको इन पतीके ममाइ, परमप्रभु यावेमी मोशा गेशो बाक्ब। रोमी ३:२३-२४; गलाती २:१६ 9 मेको मुरुम पशो ममाइ, मोपतीके सुइ ठेयब लेन्ने मचाप्नीम। रोमी ३:२८; १कोरिन्थी १:२९ 10 गोपुकी परमप्रभु यावे रे ख्रीस्त येसु आ पतीकेमी सेल्शो बाक्नय। परमप्रभु यावेमी इं कली रिम्शो गेय वोइश्शो बाक्त। मेको पचा माल्नय। तीतस २:१४

ख्रीस्तमी नेल्ल का बाक्नीम

11 डोंइती गोपुकी परमप्रभु यावे आ देशो लोव मतुइक्ब बाक्तीनी। मुर आन गुइ रे खोइक्तीक चिनु खोइश्शो, इस्राएलीपुकीमी इन कली “खोइक्तीक चिनु मखोइश्शो मुर नम” देंतेक्म। मेको मप्रेंदीन। एफिसी ५:८ 12 मेना गोपुकी ख्रीस्त रे डोन बाक्तीनी। इस्राएल डा मुरपुकी रे यो डोन बाक्तीनी। मोपा परमप्रभु यावेमी पशो कबल मतुइक्थु, आस मपाइश्शो नु परमप्रभु यावे कली मतुइक्ब मुर बाक्तीनी। रोमी ९:४; १थिस्सलोनिकी ४:१३ 13 मुल चहिं गे ख्रीस्त येसु रे डोन बाक्बपुकी ख्रीस्त आ हुशेम पतीके मेको आ नेक्था दुम्तीनी।

14 मेको इं कली दुशा बाक्चा गेब बाक्ब। मेकोमी इस्राएली नु अर्को रागी डा थमा सुइक्ब आन कली का सेल्लु। मिनु मेको आन दातेमी बाक्शो दुचा मगेब गारो प्रेशशा, जितीक खेतीक नेल्ल साम्तु। यसैया ९:५; गलाती ३:२८ 15 दोपा साम्तु देशा हना, यहूदी आन कली अरेशो, शेंशो, फुल्लुम मुशा ब्रेक्शो लोव डा गेय नेल्ल आ रां साइक्चा गेशा साम्तु। मिनु मेकोमी जात निक्शी के जात का सेल्शा, नक मुर सेल्लु। मोपा दुशा बाक्चा गेप्तु। कलस्सी २:१४

16 येसु ख्रीस्तमी इं कली परमप्रभु यावे नु गारपाइक्चा कली शीम कांटी थोक्चा पुंइसीशा बेक्त। मोपा इस्राएली नु अर्को रागी डा जिचा खेचा साम्शा, निम्फा आस कली परमप्रभु यावे नु गारपाइक्तु। 17 मिनु येसु ख्रीस्त रागीमी जाक्शा, डोन बाक्ब इन कली नु परमप्रभु यावे आ नेक्था बाक्ब आन कली परमप्रभु यावे नु दोपा दुशा बाक्चा, मेको शेंताक्व। यसैया ५७:१९ 18 मोपा गोपुकी परमप्रभु यावे आ सोक्तीम पतीके नेल्ल येसु ख्रीस्त रे पा इं आफ परमप्रभु यावे आ नेक्था जाक्दीत्नय। एफिसी ३:१२ 19 मोपतीके गोपुकी मुल रे डोन बाक्ब अर्को रागी डा मुर मननी। परमप्रभु यावे आ राज्य डा, अरु थमा सुइक्बपुकी नु आ खिं डा मुर बाक्नीनी। एफिसी ३:६; हिब्रू १२:२२-२३ 20 मिनु ख्रीस्त आ सोइश्शो नु साइ डा परमप्रभु यावे आ लोव पाइबपुकी जग खोदेशो दुम्तेक्म। गोपुकी चहिं मेको तारी सेल्शो खिं

खोदेशो ननी। ख्रीस्त येसु मेको खिं डा डोंइती वोइशशो जग फुल्लु खोदेशो बाक्ब। मत्ती १६:१८; यसैया २८:१६; १पत्रुस २:४-६ मत्ती १६:१८ 21 मेको तारी फुल्लु नेल्ल प्रोव्रसीशा, परमप्रभु यावे आ खिं दुम्चा कली बारना बारन लाइब। 22 मिनु गेपुकी यो परमप्रभु यावे आ सोक्तीम पतीके परमप्रभु यावे आ खिं बाक्नीनी।

3

पावलम अरु आन कली पशो गेय

1 मिनु गो पावल अर्को रागी डा मुर इन कली ख्रीस्त येसु आ लोव्र शेंतीके साडलोम पाइक्साक्यी। फिलिप्पी १:७, १३ 2 परमप्रभु यावेमी “अर्को मुर आन कली आं शिशी आ पर्वम शेंदो” दे आं कली गेय पाइब सेलती। गेपुकीम एको लोव्र नेंशो बाक्नी माइ, दे मिन्नुड। गलाती २:७ 3 दोपा परमप्रभु यावेमी आ खुइशशो लोव्र आं कली तुइक्पदा, मोपा डोंइतीन इन कली इचइक्का ब्रेक्ने थुम्शो बाक्ती। एफिसी १:९-१०; गलाती १:१२ 4 मिनु गेपुकीमी मेको पढेनीनु, ख्रीस्त आ पर्वम खुइशशो लोव्र डा गेय दोपा पवा, दे आं तुइशशो लोव्र रुप्ने चाप्नीनी। 5 मुल परमप्रभु यावे आ सोक्तीमी येसु ख्रीस्त आ सोइशशो नु परमप्रभु यावे आ लोव्र पाइब आन कली परमप्रभु यावे आ खुइशशो मार बाक्बा, दे शेंताकडमी। डोंइती डा मुरपुकीमी चहिं मतुइशशो बाक्तेक्म। कलस्सी १:२६ 6 मिनु मेको खुइशशो लोव्र मार बाक्ब देशा हना, अर्को रागी डा मुरपुकी यो इस्राएली नु खाल का डा दुम्शा, अडस ताइब बाक्नीम। मेको नेल्ल रां का नम। ग्येरपाइक्ब लोव्रमी मार देब देशा हना, ख्रीस्त येसु कली थमा सुइशशा, मेकोपुकी यो परमप्रभु यावे आ कबल ताइब बाक्नीम। एफिसी ३:१३, १८-१९; प्रेरित १५:७-९

7 मोपा अर्को रागी डा मुर आन कली ग्येरपाइक्ब लोव्र शेंचा, दे शेंब सेलती। परमप्रभु यावे आ सक्तिम पतीके आ शिशी मोशा गेपु। 8 गो परमप्रभु यावे आ मुर नेल्ल आन क्येडा आइक्च बाक्नुड। मिनु परमप्रभु यावेमी आ शिशी रे आं कली “अर्को रागी डा मुर आन कली ख्रीस्त आ शिशी गिश ठेयब बाक्बा तुइक्पाइक्मी” दे शेंब सेलती। १कोरिन्थी १५:९-१०; गलाती १:१६; एफिसी १:७ 9 मिनु मारेइ मारेइ सेल्ब परमप्रभु यावेमी रागी सेल्शो रे खुइशशा वोइशशो नेल्ल आन कली तपाइक्चा, दे कोंइब सेलती। एफिसी १:९-१०; रोमी १६:२५-२६; कलस्सी १:१६ 10 मारदे आं कली मोदेशो सेलती देशा हना, येसु ख्रीस्त कली थमा सुइक्बपुकीमी परमप्रभु यावे आ मिम्शो मार बाक्बा, मेको स्वर्गम बाक्ब हुकुम नु अधिकार पाइब आन कली तुइक्पदमेक्ल, दे आं कली कोंइब सेलती। १पत्रुस १:१२ 11 मेको परमप्रभु यावे आ गेना हना यो मिम्शो लोव्र बाक्त। मेको मुल इं प्रभु ख्रीस्त येसु रे खाप्शो बाक्त। 12 मोपा येसु ख्रीस्त कली थमा सुइक्तीकेमी गोपुकी महिंथु, इं कली दाक्ब, दे तुइशशा, परमप्रभु यावे आ नेक्था जाक्दीत्नय। रोमी ५:२ 13 इन पर्वम गो श्येत जशो बाक्नुड। मेको इन कली रिम्शो दुम्ब। मोपतीके आं कली श्येत जशो तशा महिनीन। कलस्सी १:२४

14 मोदेशो पा गो इं आफ परमप्रभु यावे आ डोंइती बाप्शा, पोक्च थेक्शा, इन कली मिम्शा पुंइशा बाक्नुड। 15 परमप्रभु यावे सरीड नु रागीम बाक्ब नेल्ल आन आफ बाक्ब। 16 मिनु गोमी परमप्रभु यावे कली “इन शुश छेडछेड नु सक्तिम, एफिसस डा थमा सुइक्ब आन थुं बोल्यो सेलीन। मिनु इन सोक्त आन थुंमी बाक्मेनु, महिब दुम्नीम। एफिसी १:७; एफिसी ६:१०; २कोरिन्थी ४:१६ 17 मोपा थमा सुइक्तीके ख्रीस्त मेको आन थुंमी बाक्ब। मिनु ‘येसु ख्रीस्तमी आं कली दाक्ब’ दे शाक्श ग्रुक्शो रवा खोदेशो पा इन दाक्तीकेमी खुम्शो मुरपुकी सेलीन। यूहन्ना १४:२३; कलस्सी २:७ 18 मो दुम्मेनु, मेकोपुकी नु नेल्ल थमा सुइक्बपुकीमी येसु ख्रीस्त आ मुर आन कली दाक्तीके गिश ब्रेम्शो, गिश दुइशशो, गिश लाइशशो नु गिश लुक्च लशो बाक्मे, मेको नेल्ल रुप्तीक थुं गेने। 19 ख्रीस्त आ दाक्तीके गिश ठेयब बाक्बा, मेको रुप्ने मचाप्चा डा बाक्त हना यो, मेको आन कली रुप्पतीन। मिनु परमप्रभु यावे, गे दोपा मारेइ मारेइमी गाप्शो बाक्नीनी, मोपा मेको आन कली यो इन सक्तिमी प्रिंदीन। कलस्सी २:२-३ 20 गे नेल्ल आन क्येडा ठेयब सक्ति पाइशशो बाक्नीनी। मोपतीके इन सक्ति रे आंइ पुंइशो नु मिम्शो क्येडा यो शुश गेने चाप्नीनी। 21 मिनु थमा सुइक्ब आंइ दातेमी येसु ख्रीस्त आ नेंमी नेल्ल पाला डा मुरपुकीमी इन कली गेना हना यो ठेयब सेल्नीकी, आमन” दे इन पर्वम पुंइनुड।

4

ख्रीस्तमी पपाइशशो गेय

1 गो प्रभु आ पर्वम ग्याइक्चा पुंइसीब, इन कली अरेनुड। गेपुकी परमप्रभु यावे आ ब्रेशशो दुम्शो बाक्नीनी। मोपतीके परमप्रभु यावे कली शिरशो गेय पने। 2 गेपुकी ब्रेम्शो दुम्शा, सुइ नु मचुरथु, रिम्शो पा बाक्कीन। मुर आन कली फाल्शा,

मेकोपुकी नु रिम्शो पा दाक्मुने। कलस्सी ३:१२-१३ ३ मिनु दोपा परमप्रभु यावे आ सोक्तीमी थुं का सेल्बा, मोपा थुं का दुम्शा दुशा बाक्कीन। कलस्सी ३:१५; फिलिप्पी २:२ ४ दोपा रां नु सोक्त का बाक्नीसी, मोपा थुं का दुमीन। गे नेल्ल इन आस कान बाक्ब। मोपा ब्रेत्चा पुंडसाक्नी। रोमी १२:५ ५ मोपा प्रभु का, थमा सुइक्तीक का नु ब्वाक्कुमी खुम्शा गुंडचा यो का ला बाक्ब। १कोरिन्थी ८:६ ६ मिनु नेल्ल इं आफ परमप्रभु यावे यो का ला बाक्ब। मेको नेल्ल आन क्येडा ठेयब बाक्ब। नेल्ल पतीकेमी नु नेल्ल आन आगाम बाक्ब। १कोरिन्थी १२:६

७ इं कली नेल्ल शिशी गेशो बाक्ब। मेको ख्रीस्तमी “आं गेय पचा कली गिश माल्बा” दे मो गेशो बाक्ब। रोमी १२:३-६; १कोरिन्थी १२:१ ८ मिनु मार ब्रेक्शो बाक्त देंशा हना “मेको इर परमप्रभु यावे आ बाक्तीक लमेनु, चोक्सीशो शुश आन कली लाइक्तु। मिनु मुर आन कली गेय पतीक सक्ति गेप्टु” दे ब्रेक्शो बाक्ब। भजन संग्रह ६८:१९; कलस्सी २:१५ ९ मिनु इर लचा देंशो, मार रुम्सीब देंशा हना, मेको डोंइती रागी आगा तोंइसीशो बाक्ब, दे रुम्सीब। यूहन्ना ३:१३ १० मिनु मेको रागी आगा तोंइसीब सरीड क्येडा ता लाइब यो बाक्ब। मोपा मेकोमी मारेइ मारेइ खाप्टु।

११ मिनु येसु ख्रीस्तम मुर आन कली गेशो गेय मार बाक्ब देंशा हना, का निक्शी आ सोइश्शो दुम्नीम, का निक्शी परमप्रभु यावे आ लोव्र पाइब दुम्नीम, का निक्शी ग्येरपाइक्ब लोव्र नेंपाइक्ब दुम्नीम, का निक्शी थमा सुइक्ब आन कली कोव्रब नु शेंब दुम्नीम। १कोरिन्थी १२:२८; प्रेरित २१:८ १२ मेको गेय मार कली बाक्ब देंशा हना, परमप्रभु यावे आ मुर आन थमा सुइक्तीके बारपाइक्चा कली बाक्ब। थमा सुइक्ब आन गुम्तीक, ख्रीस्त आ रां दुम्शा, मेकेर डा मुर बोल्यो सेल्चा कली गेशो गेय बाक्ब। १कोरिन्थी १४:२६; १पत्रुस २:५ १३ मोपा गो नेल्ल थमा सुइश्शा, का दुम्तीके परमप्रभु यावे आ तौ कली तुइक्ब दुम्नय। मिनु मोदेंशो पा गोपुकी आइक्च आल ममाइ, कोल्शा चोक्शो मुर दुम्शा, ख्रीस्त दोदेंशो बाक्मे, मोदेंशो दुम्नय। १४ गोपुकीम आल खोदेंशो पा मुर आन शेंशो हेंथे लोव्र थमा सुइक्चा मदुम्नय। दूली शेंबपुकीमी निप्स खाप्शा, मुर आन कली जोल पा फश लोव्र शेंशा, दूली लां खोइक्पाइक्नीम। १कोरिन्थी १४:२०; हिब्रू १३:९; याकूब १:६ १५ गोपुकी चहिं मुर आन कली दाक्शा, थमा शेंतीक लोव्र शेंशा, मारेइ मारेइमी इं पिया ख्रीस्त खोदेंशो दुम्नय। एफिसी १:२२; एफिसी ५:२३; कलस्सी १:१८ १६ मोपा येसु ख्रीस्त पिया दुम्तीके रां नेल्ल का खोदेंशो पा गारपाइक्ब। थमा सुइक्बपुकीमी ठीक गेय पाम्तेक्म हना, मेको रां बारना बारन लशा, थमा सुइक्बपुकी दाक्मुइनीम। कलस्सी २:१९

माइत नु नक मुर

१७ परमप्रभु यावे कली मतुइक्ब मुरपुकी जाम्शा लाइब गेय ला मिम्शा पाइनीम। मिनु गोपुकी मुल रे मेको आन खोदेंशो मपने, दे प्रभु आ नेंमी इन कली रिम्शो पा अरेनुड। रोमी १:२१-२४ १८ मेको आन थुं फुल्लु खोदेंशो पा खकटा दुम्तीके परमप्रभु यावे कली मतुइक्ब बाक्तेक्म। मोपतीके मेकोपुकी छिडछिडमी बाक्शो खोदेंशो पा परमप्रभु यावे कली रुम्ने मचाप्नीम। मिनु मोपा परमप्रभु यावे रे डोन बाक्नीम। एफिसी २:१२ १९ मेकोपुकी रिम्शो मुर दुम्शा बाक्चा ताइश्शा, आन दला दाक्स पा, ग्रांग्रा दिचा डा गेय नेल्ल शुश दाक्नीम। २० गोपुकी चहिं ख्रीस्त कली तुइश्शा, मोदेंशो मशेंसीनी। २१ थमा पा येसु ख्रीस्त आ पर्वम लोव्र नेंतीनी। मिनु येसु आ थमा लोव्र तुइश्शो बाक्तीनी। २२ मोपतीके इन डोंइती डा ग्रांग्रा दिचा डा दला दाक्स पाइब माइत थुं डा मुर दुम्शा बाक्चा ताइक्तीने। मारदे हना मेकोम इन कली खतम सेल्ब। कलस्सी ३:९-१०; रोमी ८:१३; गलाती ६:८ २३ मिनु इन थुंमी बाक्शो माइत सोक्त नक सेल्चा गेने। रोमी १२:२ २४ परमप्रभु यावे आ थुं खोदेंशो पा थमा पा ठीक पतीकेमी परमप्रभु यावे आ मुर दुम्शा बाक्कीन। उत्पत्ती १:२६-२७

नक मुरुमी पचा माल्शो गेय

२५ मारदे हना गो नेल्ल रां का नय, मुर आन कली जोल पचा ताइक्तीने। थमा लोव्र ला पने। जकरिया ८:१६ २६ गाइक्ताक्नी हना, पाप मपने। मिनु नां रिक्चा क्येडा डोंइती इन गाइक्चा थुमीने। भजन संग्रह ४:४; याकूब १:१९-२० २७ मोपा सैतान कली गेय पचा मगेने। २८ खुइ पाइबमी लेंशा खुइ मपथु, ठीक गेय पचा माल्ब। मिनु मेकोमी रिम्शो गेय पवानु, श्येत जाइब आन कली यो वारच पने चाप्ब। प्रस्थान २०:१५; १थिस्सलोनिकी ४:१ १ २९ गोपुकी नना ओल लोव्र काइ मपने। मुर आन कली रिम्शो दुम्ब नु गारचा डा लोव्र ला पने। मुरपुकीमी इन रिम्शो लोव्र नेन्मेनु, परमप्रभु यावे आ शिशी रुम्मेक्ल। एफिसी ५:४; कलस्सी ४:६ ३० परमप्रभु यावे आ सोक्त कली थुं मखाइक्पतीन। मारदे हना गोपुकी परमप्रभु यावे आ बाक्तीके मजाक्दीन्नी सम्म परमप्रभु यावे आ सोक्तीमी छाप थोक्सीशो बाक्नीनी। यसैया ६३:१०; एफिसी १:१३-१४ ३१ मिनु ईख कुरचा, चुरचा, गाइक्चा, ग्रीचा, मरिम्शो लोव्र पचा नु मरिम्शो पचा नेल्ल

ताइक्तीने। कलस्सी ३:८ 32 मिनु रिम्शो पा कोत्रमुने। दोपा परमप्रभु यावेमी ख्रीस्त मिम्शा, इन कली माफ गेवा, मोपा गेपुकी यो माफ गेमुने। मत्ती ६:१४; मत्ती १८:२२-३५; कलस्सी ३:१३

5

छेडछेडम ब्रोंडशो मुर

1 गेपुकी परमप्रभु यावे आ दाक्शो तमी तौ दुम्तीके मेकोमी दोदेशो पवा, मोदेशो पने। लूका ६:३६ 2 मिनु येसु ख्रीस्तमी इं कली दाक्शो खोदेशो पा दाक्मुने। मेकोमी दोपा दाक्ताक्व देशा हना, आंम कली ममिम्थु, ब्रोंडशो रिना पाइशो धूप नु क्योरशा चदेशो खोदेशो पा, इं पाप क्याम्चा कली बेक्शा, परमप्रभु यावे कली जिम्मा गेंसाक्व। 3 मोपतीके गेपुकी परमप्रभु यावे आ मुर दुम्शा, इन दातेमी तेल्लेम पचा, ग्रांग्रा दिचा डा गेय पचा नु शिम पचा आ पर्बम लोत्र सम्म यो मपने। मेको परमप्रभु यावे आ मुर आन कली रिम्शो दुम्ब। कलस्सी ३:५ 4 गेपुकी मुने दोक्चा डा हेथे लोत्र नु मूर्ख लोत्र पचा इन कली मगारब। मेको आ पा डा परमप्रभु यावे कली “गे आंइ कली रिम्शो पाइतीनी” देंचा माल्नीनी। एफिसी ४:२९ 5 तेल्लेम पाइब, ग्रांग्रा दिचा डा गेय पाइब नु शिम पाइबपुकी ख्रीस्त नु परमप्रभु यावे आ राज्यमी ओत्रचा मताइनीम, दे रिम्शो पा तुइक्चा माल्नीनी। मेको नेल्ल मूर्ति पूजा पचा खोदेशो बाक्ब। १कोरिन्थी ६:९-१०; प्रकाश २१:८; प्रकाश २२:१५ 6 सुइ मुरुमी इन कली फश लोत्र पा, हेथे लां खोइक्पाइक्चा मगेने। मारदे हना परमप्रभु यावे आ कली मटीब आन कली तशा गाइक्ब। कलस्सी ३:६

7 मिनु गेपुकी मोदेशो मुर नु वारच्चु मदुमीन। 8 गेपुकी यो डोंइती छिडछिड डा गेय पाइब बाक्तीनी। मुल चहिं प्रभु कली थमा सुइशशा, छेडछेड डा गेय पाइब दुम्तीनी। मोपतीके गेपुकी छेडछेड डा तमी तौ खोदेशो दुम्शा बाक्कीन। एफिसी २:१; १पत्रुस २:९; मत्ती ५:१४; यूहन्ना १२:३६; १थिस्सलोनिकी ५:५ 9 छेडछेड डा फल दोदेशो बाक्ब देशा हना, नेल्ल शिशी पतीकेमी, ठीक पतीकेमी नु थमा पतीकेमी बाक्ब। गलाती ५:२२; फिलिप्पी १:११ 10 मिनु गेपुकीमी प्रभु आ दाक्शो मार बाक्बा, मेको तुइक्चा माल्नीनी। रोमी १२:२; फिलिप्पी १:१०

11 छिडछिड डा गेयमी काइ फल मथिंसीब। मोदेशो गेय पाइबपुकी नु मबाक्कीन। मेको गेय यो मपने। तन्न मेको गेय मरिम्शो बाक्ब, दे कोइदीन। 12 मिनु मेको आन खुइशशा पशो आ पर्बम लोत्र पचा यो मुने बाक्ब। रोमी १:२४ 13 तन्न मेको खुइशशा पशो गेय छेडछेडमी तांइसीब। 14 मोपतीके “ए निन्द्रा पाइब, बोक्को। मिनु बेक्शो रे सेंसीशा बाक्को। मो पवीनु, ख्रीस्तमी इ कली आ छेडछेड गेब” देशो बाक्ब। यूहन्ना ३:२०-२१; रोमी १३:११; यसैया ६०:१; यूहन्ना ८:१२ 15 मोपतीके होस पा बाक्कीन। मतुइक्ब ममाइ, तुइक्ब मुर दुम्शा बाक्कीन। मत्ती १०:१६; कलस्सी ४:५ 16 मुरपुकीमी मरिम्शो गेय पना पन बाक्तेक्म हना यो, गेपुकीमी नेल्ल नाक्त रिम्शो गेय पने। 17 मोपतीके गेपुकी मूर्ख मदुमीन, प्रभु आ दाक्शो मार बाक्मे मेको रुपीन। 18 राकसी शांबुमी मदुक्कीन। मारदे हना दुक्ब मुरपुकी ग्येत्थ मलाइनीम। तन्न गेपुकी परमप्रभु यावे आ सोक्तीम ब्रीशो दुमीन। लूका २१:२४ 19 परमप्रभु यावे आ लोत्र डा कुम्सो, परमप्रभु यावे कली ठेयब सेल्ब कुम्सो नु परमप्रभु यावे आ सोक्तीम इन कली शेंशो कुम्सो पने। मोपा इन थुं बार पमुशा, प्रभु कली कुम्सो पना पन बाक्कीन। भजन संग्रह ३३:२-३; कलस्सी ३:१६ 20 मिनु गेपुकीमी मार दुम्त हना यो, गेना हना यो इं आफ परमप्रभु यावे कली “गे रिम्शो पाइतीनी” दे प्रभु येसु ख्रीस्त आ नेमी देंचा माल्नीनी। थिस्सलोनिकी ५:१८

थमा सुइक्ब आन कली लोत्र

21 गेपुकी ख्रीस्त कली मान पा हिंशा बिम्मुने। १पत्रुस ५:५ 22 गे मीश मुरपुकी, प्रभु कली टिशो खोदेशो पा आंम वोंडश कली यो टिने। उत्पत्ती ३:१६; तिमोथी २:११-१२; तीतस २:५ 23 मारदे हना वोंडश मुर मीश मुर आन पिया बाक्नीम। मिनु ख्रीस्त थमा सुइक्ब आन पिया बाक्ब। थमा सुइक्बपुकी ख्रीस्त आ रां बाक्नीम। मिनु येसु ख्रीस्त थमा सुइक्ब आन कली पाप रे प्रोंडब बाक्ब। १कोरिन्थी ११:३; एफिसी १:२२-२३ 24 दोपा थमा सुइक्बपुकीमी ख्रीस्त कली टीनीमी, मोपा मीश मुरपुकीमी आंम वोंडश आ देशो नेल्ल टिचा माल्नीमी।

25 गे वोंडश मुरपुकी, आंम मीश कली दाक्तीने। दोपा ख्रीस्तमी थमा सुइक्ब आन कली दाक्शा, मेको आन कली पाप रे प्रोंडचा, दे आंम रां जिम्मा गेवा, मोपा वोंडश मुरुमी आंम मीश कली दाक्चा माल्नीमी। 26 मारदे ख्रीस्तमी मो पाप्तु देशा हना, थमा सुइक्बपुकी परमप्रभु यावे आ डोंइती शिरशो मुर दुम्मल, दे मो पाप्तु। डोंइती ख्रीस्तमी मेको आन कली लोत्र रे पा चिक्शो खोदेशो पाप्तु। तीतस ३:५; हिब्रू १०:२२ 27 मोदेशो पा थमा सुइशशा, छेडछेड पाइशो

मुरपुकी आंम कली वोइशो बाक्त। मेकोपुकी मारेइ मलुम्सीशो, मरोम्सीशो, थम दारशो नु परमप्रभु यावे आ मुर दुम्शा, दोस मताइब मुरपुकी बाक्नीमी। २कोरिन्थी ११:२; कलस्सी १:२२ 28 मेको खोदेशो पा वोइश मुरपुकीमी आंम मीश कली “आंम रां बाक्ब” दे मेको कली दाक्चा माल्नीमी। सु आंम मीश कली दाक्बा, मेकोमी आंम कली यो दाक्ब। 29 सुइमी आंम रां कली खेदा मपाइनीम, थुल्शा रिम्शो पाइनीम। ख्रीस्तमी यो थमा सुइक्ब आन कली मोदेशो पाइब। एफिसी १:२३ 30 मिनु गोपुकी आ रां डा गुइ खोइल बाक्नय। 31 मो दुम्तीके वोइश मुरुमी आ आम आफ आस कली प्रोइब। मिनु आ मीश नु काथा बाक्ब। मेको निक्शी रां का दुम्नीसी। उत्पत्ती २:२४ 32 मेको आ खुइशो अर्थ ठेयब बाक्ब। मिनु मार बाक्ब देशा हना, गो ख्रीस्त नु थमा सुइक्ब आन पबर्म लोत्र पाइनुड। 33 मार दुम्त हना यो, गे नेल्लेमी आंम मीश कली आंम कली दाक्शो खोदेशो पा दाक्तीन। मीश मुरपुकीमी चहिं आंम वोइश कली मान पा हिक्चा माल्नीमी।

6

1 गे आलपुकी, प्रभु कली मिम्शा, इन आम आफ आन देशो टिने। मारदे हना मेको इन कली रिम्शो बाक्ब। मर्कूस ७:१-१३ 2 मिनु गे इन आम आफ कली मान पने। मेको डोंइती डा आसीक पाइशो अरेतीक लोत्र बाक्ब। प्रस्थान २०:१२ 3 मेको आसीक मार बाक्ब देशा हना “गे मो पाइतीनी हना, इन कली रिम्शो दुम्ब। मिनु गे शुश बर्स ब्रोंइचा ताइनीनी” दे ब्रेक्शो बाक्ब। ब्यवस्था ५:१६

4 गे आफपुकी, इन आल आन कली मगाइक्पतीन। तन्न मेको आन कली रिम्शो थुल्शा कोल्पतीन। मिनु मेको आन कली शेशा, प्रभु सु बाक्बा मेको तुइक्पतीन। ब्यवस्था ६:२०-२५

5 गे वाइलीम वाइलपुकी, इन रागी डा होत्रप कली टिने। दोपा टिचा माल्नीनी देशा हना, गोपुकी ख्रीस्त कली टिशो खोदेशो पा, मेको आन क्येडा हिंशा खिंखि पा, थुं का पा रिम्शो गेय पने। तिमोथी ६:१२; तीतस २:९-१०; १पत्रुस २:१८ 6 होत्रपमी इन कली गेय पशो कोव्रतेक्म हना यो, मकोव्रतेक्म हना यो, ठीक पा गेय पने। गोपुकीमी मुर कली ग्येरपाइक्चा ममाइ, ख्रीस्त आ वाइलीम वाइल दुम्शा, इन थुं नेल्लेमी परमप्रभु यावे आ दाक्शो पने। 7 मो पनीनु, गोपुकीमी मुर आन कली ममाइ, प्रभु कली रिम्शो थुंमी गेय पाइनीनी। 8 मिनु मुरुमी दोपा रिम्शो पाइबा, मेको खोदेशो पा प्रभु रे ताइब, दे तुइक्चा माल्नीनी। प्रभुमी वाइलीम वाइल नु ठेयब मुर आन कली खाल का डा पा कोव्रब। २कोरिन्थी ५:१०

9 गे होत्रपपुकी, इन वाइलीम वाइल आन कली प्रभुम पशो खोदेशो पा पने। हिंच कोइचा प्रोनीन। मारदे हना मेको आन के नु इन के प्रभु स्वर्गमी बाक्ब। मिनु प्रभुमी मुर नेल्ल आन कली उइक्थ मिम्ब।

परमप्रभु आ गेशो या

10 मिनु आं नोले डा लोत्र, प्रभु कली तुइशशा सक्ति पाइशो मुर दुमीन। मोपा प्रभु आ सक्तिमी बोल्यो दुम्शा बाक्कीन। एफिसी ३:१६; १कोरिन्थी १६:१३; २तिमोथी २:१; १यूहन्ना २:१४ 11 मिनु परमप्रभु यावे आ गेशो या नेल्ल लतीन। सैतानमी आ मरिम्शो थुंमी इन कली खतम सेल्चा माल्तु हना, गोपुकी परमप्रभु यावे आ गेशो यामी ग्रानीनी। 12 गोपुकी मुर नु लडाइ मपाइनय। हुकुम पाइबपुकी, अधिकार पाइबपुकी नु रागी कली मुल छिडछिडमी गेय पाइब वोल नु लडाइ पाइनय। मेको स्वर्गम बाक्ब सैतान आ गेय पाइबपुकी बाक्नीम। एफिसी २:२; लूका २२:३१ 13 मोपतीके परमप्रभु यावे आ गेशो या नेल्ल लतीन। मेकोमी ला मरिम्शो नाक्त ग्राशा राप्ने चाप्नीनी।

14 गोपुकी थमा शेंतीकेमी किप्शुर किप्शो खोदेशो पा राप्शा बाक्कीन। मिनु ठीक दुम्तीकेमी पीतल के भोटो फेक्शो खोदेशो पा बाक्कीन। लूका १२:३५; १पत्रुस १:१३; १थिस्सलोनिकी ५:८ 15 परमप्रभु यावे नु दुपाइक्ब ग्येरपाइक्ब लोत्र पा, जुत्ता मुइशो खोदेशो पा बाक्कीन। 16 मिनु नेल्ल क्येडा ठेयब या येसु ख्रीस्त कली थमा सुइक्तीके तेक्तीक खोदेशो पा इन डोंइती वोतीन। सैतानमी आप्शो ब्रशो ब्रा कली मेकोमी तेक्ने चाप्नीनी। १पत्रुस ५:९; १यूहन्ना ५:४ 17 मिनु येसु ख्रीस्तम इन कली पाप रे प्रोइशो तुइक्तीक पीतल के ताक्की खोदेशो पा गुम्सीने। मिनु परमप्रभु यावे आ लोत्र लतीन। मेको चहिं परमप्रभु यावे आ सोक्त डा तरवार बाक्ब। १थिस्सलोनिकी ५:८; हिब्रू ४:१२

18 मिनु गोपुकीमी गेना हना यो परमप्रभु यावे आ सोक्तीमी पतीके परमप्रभु यावे नु लोत्र पशा पुनीन। पुंइचा मदथु, परमप्रभु यावे आ मुर नेल्ल आन पबर्म पुनीन। 19 आं पबर्म यो पुनीन। आं कली मिम्शा, मार पुनीन देशा हना, येसु ख्रीस्त आ पबर्म डोंइती खुइशो ग्येरपाइक्ब लोत्र मुल गो महिंथु, शेंने चबुल, दे पुनीन। कलस्सी ४:३; २थिस्सलोनिकी ३:१;

प्रेरित ४:२९ 20 गो मेको लोत्र शेंचा कली साडलोम फ्रेंशा सोइशशो मुर दुम्ती। गेपुकीमी आं पर्बम “महिंथु शेंदल” दे परमप्रभु यावे कली पुनीने। मोपा महिंथु, लोत्र पचा परमप्रभु यावे आ दाक्शो बाक्ब। २कोरिन्थी ५:२०; प्रेरित २८:३१

नोले डा लोत्र

21 मिनु गो दोपा बाक्डा, मार पडा मेको नेल्ल प्रभु आ रिम्शो गेय पाइब, इं दाक्शो थमा सुइक्ब लोकब तिखीकसमी इन कली देंब। प्रेरित २०:४; कलस्सी ४:७-८; २तिमोथी ४:१२; तीतस ३:१२ 22 गोपुकी दोपा बाक्का तुइक्पाइक्चा नु इन थुं बारपाइक्चा कली इन बाक्तीके सोइक्ताक्ड।

23 मिनु इं आफ परमप्रभु यावे नु प्रभु येसु ख्रीस्तमी इन कली थुं नाइशशा बाक्चा गेम्सेक्ल। 24 सु सुमी इं प्रभु येसु ख्रीस्त कली गेना हना यो दाक्नीमी, मेको नेल्लेमी शिशी तामेक्ल।

फिलिप्पी

ब्रेक्ब मुर: पावलमी एको चिठी ब्रेक्शो बाक्ब।

गेना ब्रेक्शो: एको चिठी ६३ ए. डी. नुप्ची ना कि ६४ ए. डी. गोची ना ब्रेक्शो मिम्नीम। एको चिठी ब्रेक्ची ना पावलमी “जेल्खान रे प्रोंइचा पुंइसीनुड” दे आस पाप्तु।

मार ब्रेक्शो: पावलमी जेल्खानम यो ग्येरपाइक्ब लोत्र शेंब। थमा सुइक्बपुकीमी श्येत जाम्तेक्म हना यो, येसु ख्रीस्त कली मप्रोंइचा। थमा सुइक्बपुकीमी दूली शेंब आन पर्बम होस पचा माल्नीम। प्रभु आ पशो मिम्शा, ग्येरसीचा माल्नीम। पावलमी फिलिप्पी आन गुइ रे क्येट ताप्तु। मेको आ पर्बम “रिम्शो पाइब बाक्नीनी” दे ब्रेक्शो बाक्ब।

डोंइती डा लोत्र

1 पावल नु तिमोथी, गो निक्शी ख्रीस्त येसु आ वाइल नस्कु। फिलिप्पी सहरम बाक्शो ख्रीस्त येसु कली थमा सुइक्ब नेल्ल इन कली, थमा सुइक्ब आन कली कोत्रब नु गुम्तीके डा गेय पाइब इन कली चिठी ब्रेक्ताक्ड। प्रेरित १६:३

2 इं आफ परमप्रभु यावे नु प्रभु येसु ख्रीस्तमी इन कली शिशी पा थुं नाइक्चा गेम्सेक्ल।

पावल आ प्रार्थना

3 गो इन कली मिम्शा, आं परमप्रभु यावे कली “गे रिम्शो पाइतीनी” देंनुड। रोमी १:८; १कोरिन्थी १:४ 4 गो परमप्रभु यावे नु लोत्र पडानु, गेना हना यो नेल्ल इन कली मिम्शा, ग्येरशा पाइनुड। 5 डोंइती रे मुल सम्म ग्येरपाइक्ब लोत्र पचा कली आं कली वारच पाइतीनी। 6 इन आगामी रिम्शो गेय गोइबमी येसु ख्रीस्त आ जाक्ची ना सम्म थुम्ब, दे तुइक्नुड। फिलिप्पी २:१३; १कोरिन्थी १:८ 7 नेल्ल इन पर्बम मोदेशो मिम्चा ठीक बाक्ब। मारदे हना गो इन कली शुश दाक्नुड। आं जेल्खानमी चोक्चा पुंइसीशो, निसाफ पची ना नु ग्येरपाइक्ब लोत्र शेंची ना गो इन कली मिम्नुड। गो नेल्ल खाल का डा शिशी ताइब बाक्नय। 8 ख्रीस्त येसुमी आं कली दाक्पाइक्तीके थुं गेतीके गो इन कली गुम्चा शुश दाक्ताक्ड, परमप्रभु यावेमी मेको तुइक्ब।

9 आं प्रार्थना मार बाक्ब देशा हना, इन दाक्चा शुश बारशा, रिम्शो नु मरिम्शो मार बाक्बा से रुप्ने चाप्नील, दे पुंइशा, परमप्रभु यावे नु लोत्र पचा बाक्ब। फिलेमोन ६ 10 मोपा गे नेल्ल क्येडा रिम्शो मार में, दे तुइश्शा, ख्रीस्त आ नाक्ती पाप मपाइब नु दोस मताइब दुम्नीनी। रोमी १२:२; एफिसी ५:१०; १थिस्सलोनिकी ५:२३ 11 गेपुकी येसु ख्रीस्तमी पपाइश्शो ठीक पतीकेमी ब्रीशो बाक्तीनी हना, परमप्रभु यावे सक्ति पाइश्शो नु ठेयब बाक्ब, दे तुंइसीब। एफिसी ५:९

पावलमी पशो लोत्र

12 आं लोकबपुकी, आं कली दुम्शो श्येतमी ग्येरपाइक्ब लोत्र ब्रपाइक्तु। १तिमोथी २:९ 13 हुकुम पाइब आ खिं डा मुर नु अरु नेल्लेमी गो ख्रीस्त कली थमा सुइश्शो आ पर्बम जेल्खानम बाक्ती, दे तुइक्ताक्म। फिलिप्पी ४:२२ 14 मिनु प्रभु कली थमा सुइक्ब लोकब लोत्र शोमी आं कली जेल्खानमी बाक्शो तशा, प्रभु कली थमा सुइक्तीक बारपा महिंथु, परमप्रभु यावे आ लोत्र पाइनीम।

15 का निक्शीमी गेहे पशा, नेल्ल क्येडा ठेयब नड, दे ख्रीस्त आ पर्बम शेंनीम। का निक्शीमी चहिं रिम्शो थुं पा शेंनीम। 16 मोपा शेंबपुकीमी आं कली दाक्शा, गो परमप्रभु यावे आ ग्येरपाइक्ब लोत्र पतीके एकेर बाक्नुड, दे तुइक्नीम। 17 गेहे पा ख्रीस्त आ लोत्र शेंबपुकीम चहिं “गो नेल्ल क्येडा ठेयब नड” दे रिम्शो थुं मपथु, आं कली जेल्खानम श्येत तेम्चा मिम्नीम। 18 मिनु मार? ठेयब लेशशा हना यो, थमा पा हना यो, ख्रीस्त आ पर्बम लोत्र पाम्तेक्म हना, गो शुश ग्येरसीनुड। फिलिप्पी २:१७-१८

19 इन परमप्रभु यावे कली पुंइतीके नु येसु ख्रीस्त आ सोक्तीम आं कली वारच पतीके गो एको श्येत रे ब्रोंइनुड, दे तुइक्नुड। २कोरिन्थी १:११ 20 गो काइ मुने मदोक्नुड, दे तुइश्शा, आस पाइनुड। मिनु काइ महिंब दुम्शा, ब्रोंइती हना यो, साइक्तीमी हना यो, मुरपुकीमी गेना हना यो ख्रीस्त कली ठेयब सेल्मेक्ल, देंनुड। 21 मारदे हना ब्रोंइडानु, ख्रीस्त कली ब्रोंइनुड, साइक्तीमी हना यो, ग्रानुड। गलाती २:२० 22 गो ब्रोंइती हना, ख्रीस्त आ गेय पाइनुड। तन्न तेको गेय योत्रनुडा मेको मतुइक्नुड। 23 गो निम्फा आस दातेमी बाक्नुड। मेकेर रे लशा, ख्रीस्त नु बाक्चा आं दाक्शो बाक्ब। मारदे हना मेको शुश रिम्शो बाक्ब। २कोरिन्थी ५:८ 24 गो ब्रोंइती हना, इन कली शुश रिम्शो दुम्ब। 25 मोदेंब दुम्ब, दे

तुइशशा, इन थमा सुइक्चा नु ग्येरपाइक्तीके बारल, दे गो गेपुकी नु बाक्नुड, दे तुइक्नुड। फिलिप्पी २:२४ 26 मारदे हना गो इन कली लेशा गुम्थ जाक्नुड, गेपुकीमी आं जाक्शो आ पबर्म ख्रीस्त येसु कली ठेयब सेल्नीनी।

थमा सुइक्ब श्येत जाइनीम

27 गे इन नाक्त किंत किंत डा पतीकेमी ख्रीस्त आ ग्येरपाइक्ब लोत्र कली शिरशो दुम्शा बाक्कीन। गो गेपुकी नु बाक्ती हना यो, मबाक्ती हना यो, इन सोक्त का दुम्शा, इन थुं का दुम्शा, ग्येरपाइक्ब लोत्र डा थमा सुइक्तीके गेय पा वारच पमुने। 28 इन कली श्येत गेब आन कली तशा काइ महिनीन। मेकोन मेको आन कली ब्रुतीक चिनु बाक्ब। इन कली चहिं ब्रोंइतीक चिनु दुम्ब। मेको परमप्रभु यावे रे दुम्ब। २थिस्सलोनिकी १:५ 29 ख्रीस्त कली थमा सुइक्चा ला इन कली गेशो ममाइ, तन्न मेको आ पबर्म श्येत जचा यो गेशो बाक्ब। 30 मुल आं श्येत जशो खोदेशो पा, गेपुकी यो श्येत जाइनीनी। प्रेरित १६:२२

2

ख्रीस्त खोदेशो दुमीन

1 ख्रीस्त आ पबर्म इन दातेमी थुं बारपाइक्तीके, दाक्शा वारच पाइब, दे थुं नाइक्तीके, थमा सुइशशा थुं का दुम्तीके, दाक्मुतीके नु शिशी पतीके बाक्तेक्म हना, 2 गेपुकी खाल का डा दुम्शा, उइक्थ उइक्थ पा दाक्मुशा, नेल्ल गारशा थुं का दुम्शा, आं कली शुश ग्येरपाइक्नीनी। 3 गेपुकी ठेयब लेशशा “गो ठेयब नड” दे मिम्शा, काइ गेय मपने। ब्रेम्शो थुंमी “मेको मुर आं क्येडा ठेयब बाक्ब” दे मिम्तीन। गलाती ५:२६; रोमी १२:१० 4 गेपुकी का का पा नेल्लेमी आंम दाक्शो ला ममिम्थु, अरु मुर आन दाक्शो “मार बाक्मे” मेको यो मिम्तीन। १कोरिन्थी १०:२४; १कोरिन्थी १३:५ 5 ख्रीस्त येसु नु बाक्शो थुं इन दातेमी कोंइदीन। 6 ख्रीस्त येसु परमप्रभु यावे नु उइक्थ दुम्शो बाक्त हना यो “परमप्रभु यावे नु उइक्थ दुम्ती” दे ममिम्थु, यूहन्ना १:१२; यूहन्ना १७:५ 7 मेको नेल्ल प्रोंइशा, वाइल खोदेशो दुम्शा, मुर दुम्शा जरमेसाक्व। यसैया ५३:३; मत्ती २०:२८; २कोरिन्थी ८:९; हिब्रू २:१४,१७ 8 मिनु मुर दुम्शा, साइक्चा पुंइसीचा सम्म परमप्रभु यावे कली टिशा, शीम क्याइशशा साइक्चा पुंइसीशा, आ ब्रेम्शो थुं कोंइताक्व। लूका १४:११; हिब्रू १२:२; हिब्रू ५:८ 9 मोपतीके परमप्रभु यावेमी मेको कली नेल्ल क्येडा ठेयब सेल्शा, आ नें यो अरु आन क्येडा ठेयब सेल्लु। प्रेरित २:३३; एफिसी १:२१; हिब्रू १:३-४ 10 येसु आ नें नेंशा, स्वर्गम बाक्ब, रागीम नु रागी आगाम बाक्ब नेल्लेमी बाप्शा, पोक्च थेक्चा मालनीम। यसैया ४५:२३; यूहन्ना ५:२३; प्रकाश ५:१२-१३ 11 मिनु नेल्लेमी “येसु ख्रीस्त प्रभु बाक्ब” दे परमप्रभु यावे, इन आफ कली ठेयब सेल्चा मालनीम। प्रकाश ५:१३

परमप्रभु यावे आ आलपुकी

12 आं दाक्शो लोक्बपुकी, गेपुकीमी नेल्ल नाक्त आं देशो टीतीनी। गो बाक्डानु ला ममाइ, गो मबाक्डानु यो मेको क्येडा शुश रिम्शो पने। गेपुकी हिंशा ख्रिंख्रि पा इन पाप रे ब्रोंइतीक गेय पने। १पत्रुस १:१७ 13 मारदे हना परमप्रभु यावेमी इन थुंमी गेय पाइब। मार गेय पाइब देशा हना, आ दाक्शो पचा, दे इन कली दाक्ब थुं गेशा, गेय पपाइक्ब। फिलिप्पी १:६

14 गेपुकीमी सुंइच मपथु, दाल्गीर मपथु, गेय पने। 15 मोपा दोस गेचा मपुंइसीब, परमप्रभु यावे आ रिम्शो आल दुम्नीनी। मरिम्शो नु दूली पाइब मुर आन दातेमी स्वर्ग डा छेडछेड खोदेशो दुम्नीनी। फिलिप्पी १:१०; मत्ती ५:१४; एफिसी ५:८-९ 16 मोपा ब्रोंइचा गेब लोत्र मप्रोंइब दुम्नीनी। मिनु ख्रीस्त आ जाक्ची ना गो मो मगाक्ड, मो गेय यो मपड, दे ग्येरशा बाक्चा तडल। २कोरिन्थी १:१४; १थिस्सलोनिकी २:१९ 17 गो इन थमा सुइक्चा आ पबर्म गेय पा, साइक्चा पुंइसाक्यी हना यो, ग्येरसीनुड। गे नेल्ल नु ग्येरशा बाक्नुड। २तिमोथी ४:६ 18 मोपा गेपुकी यो ग्येरसीने। मिनु गो नेल्ल ग्येरसय। फिलिप्पी ४:४

तिमोथी नु इपाफ्रोडीटस

19 प्रभु येसुमी तिमोथी कली इन कली गुम्थ सोइक्चा गेपु हना, ब्रा सोइक्नुड। इन पबर्म लोत्र नेंशा, गो यो ग्येरसीनुड। 20 मारदे हना मेको खोदेशो अरु मबाक्नीम। “गेपुकी दोपा बाक्नी माइ” दे थमा पा शुश मिम्शा, सुर्ता पापुतु। १कोरिन्थी १६:१० 21 नेल्लेमी आंम आंम दाक्शो ला मिम्शा, पना पन बाक्नीमी। येसु ख्रीस्त आ दाक्शा मिम्शो चहिं मपाइनीम। २तिमोथी ४:१०,१६ 22 गेपुकीमी तिमोथी कली तुइक्नीनी। दोपा तौमी आ आफ नु गेय पाइबा, मोपा मेको गो नु परमप्रभु यावे आ ग्येरपाइक्ब लोत्र शेंथ गाक्त। 23 मोपतीके आं कली मार मार दुम्बा, मेको तुइक्तु नोले

गो मेको कली इन बाक्तीक ब्रा सोइक्नुड, दे आस पाता। 24 प्रभुमी आं कली एकेर रे प्रोंइब, दे थमा सुइक्नुड। मिनु गो यो इक्का नाक्त नोले जाक्नुड। फिलिप्पी १:२५

25 इन सोइश्शो आं कली वारच पाइब आं लोकब इपाफ्रोडीटस कली लेशशा सोइक्नुड। मेकोमी गो नु गेय पाप्तु। गो नु काथा गाक्शा, परमप्रभु यावे आ लोत्र शेंताक्व। फिलिप्पी ४:१८ 26 मेकोमी नेल्ल इन कली शुश मिम्ताक्व। मारदे हना गेपुकीमी “मेको रोइ पाप्तु” देशो नेतीनी ने। मोपतीके शुश सुर्ता पाप्तु। 27 इपाफ्रोडीटस थमा पा बेक्चा डा रोइ पाप्तु। तन्न परमप्रभु यावेमी मेको कली शिशी पाइक्नु। मेको कली ला ममाइ, आं कली यो शिशी पाइक्ती। मोपतीके गो शुश श्येत मजड। 28 मेको कली इन बाक्तीके सोइक्चा दाक्नुड। गेपुकी मेको कली लेशशा जाक्शो तशा, ग्येरनीनी। मो दुम्मेनु, आं हेल्शो थुं यो सोपी दुम्ब। 29 गेपुकीमी प्रभु आ नेमी मेको कली रिम्शो पने, ग्येरसीने। मोदेशो मुर कली ठेयब सेलीन। १कोरिन्थी १६:१६ 30 मेकोमी ख्रीस्त आ गेय पशा, आंम कली ममिम्थु, इन पा डा आं कली वारच पथ जाक्मेनु, रोइ पा हेरा बेक्त।

3

पावलम आ पबर्म पशो लोत्र

1 आं दाक्शो लोकबपुकी आं नोले डा लोत्र मार बाक्ब देशा हना, प्रभु नु बाक्शा ग्येरसीने। मोदेशो लोत्र गो इन कली ब्रेक्ना ब्रेक्न बाक्ती हना यो, श्येत ममिम्नुड। मेको इन कली बोल्यो दुम्चा कली बाक्ब। फिलिप्पी २:१८; फिलिप्पी ४:४

2 कुचुम खोदेशो मुर आन क्येडा होस पा बाक्कीन। मरिम्शो गेय पाइब आन कली तशा, होस पा बाक्कीन। खोइक्तीक चिनु खोइक्चा माल्ब देंब, आन क्येडा यो होस पा बाक्कीन। प्रकाश २२:१५; गलाती ५:१२ 3 मारदे हना गोपुकी थमा खोइक्तीक चिनु डा मुर बाक्नय। गोपुकीमी परमप्रभु यावे आ सोक्त आ पतीकेमी खुम्की पा बाप्शा, परमप्रभु यावे कली गेय पशा, ख्रीस्त येसु आ पतीकेमी ग्येरसय। मुर आ पतीकेमी थमा मसुइय्य। रोमी २:२९ 4 गो मुर आन पतीके कली थमा सुइक्ने चाप्नुड। मुरपुकीमी आन पतीकेमी थमा सुइक्ने चाप्नीमी, दे मिम्नीमी। मोदेंब दुम्त हना, गो यो मेको आन क्येडा शुश चाप्नुड। २कोरिन्थी ११:१८, २२ 5 गो ८ नाक्त डा आल बाक्डानु, खोइक्तीक चिनु ताता। गो इस्राएली नड। गो बेन्यामीन आ थर डा मुर नड। हिबू मुर रे जरमेशो, हिबू नड। परमप्रभु यावे आ अरेशो पशा, फरिसी दुम्ती। २तिमोथी १:३; प्रेरित २६:५ 6 गो थमा सुइक्ब आन कली खेदा पाता। परमप्रभु यावे आ अरेशो लोत्र टिशा, ठीक पाता, दे मिम्शा, दोस मताइब दुम्ती, देती। प्रेरित ८:३ 7 तन्न गो ख्रीस्त कली तुइश्शा, आंम कली ठेयब सेल्सीतीके नेल्ल ग्येरशा प्रोंइता। मती १३:४४-४६ 8 थमा पा, गो आं डोंइती डा पशो जाम्शा लाइब बाक्ब, दे तुइक्ताक्ड। मारदे हना आं प्रभु येसु ख्रीस्त कली तुइक्चा नेल्ल क्येडा ठेयब बाक्ब। मोपतीके मेको आ पबर्म आं पशो नेल्ल ताइश्शा, प्रांग्रा दिचा डा बाक्ब, दे तुइक्ताक्ड। मारदे हना गो ख्रीस्त नु बाक्ब मुर दुम्ती। 9 मोपा आ मुर दुम्शा, परमप्रभु यावे आ अरेशो लोत्र डा आंम ठीक पतीके मबाक्थु, ख्रीस्त कली थमा सुइक्तीकेमी ठीक दुम्तीके बाक्ब। मेको ठीक दुम्तीके परमप्रभु यावेमी गेशो थमा सुइक्तीके रे ला बाक्ब। रोमी ३:२२ 10 आं दाक्शो मार बाक्त देशा हना, गो येसु ख्रीस्त कली तुइक्ने चबुल। आ सेंतीक सक्ति गो नु बाक्ल। दोपा श्येत जशा, साइक्चा पुंइसीशो बाक्मे, मोपा गो यो मोदेशो दुम्डल। रोमी ६:३-५; रोमी ८:१७; गलाती ६:१७ 11 दुम्ने चाप्ब हना, गो यो बेक्शो रे सेंसीने चबुल, देती।

पावल आ माल्शो गेय

12 मुल सम्म गो मेको नेल्ल मतड। मिनु ठीक मडुम्ड। तन्न मेको आं के दुम्ल, दे शुश गेय पाइनुड। मारदे हना ख्रीस्त येसुम आं कली आ मुर सेलती। कलस्सी १:२९; १तिमोथी ६:१२; प्रेरित ९:३-६ 13 आं लोकबपुकी, मुल सम्म गो नेल्ल मतड। तन्न गो मुल मार पाइनुड देशा हना, आं डोंइती पशो नेल्ल प्रेंशा, मुल पचा माल्शो मार बाक्मे, मेकोन शुश पाइनुड। लूका ९:६२ 14 परमप्रभु यावेमी ख्रीस्त येसु आ नेमी आ बाक्तीके रे इनाम गेचा कली मार देमे, मेकोन शुश पाइनुड। १कोरिन्थी ९:२४

15 इं दातेमी सु सु रुम्ने चाप्ब बाक्नी, मेकोमी आं खोदेशो पा मिम्तीन। गेपुकीमी आं खोदेशो पा ममिम्ताक्नी हना, परमप्रभु यावेमी इन कली तुइक्पदल। 16 गोपुकीम मार रुब्बा, मेकोन पय।

स्वर्ग डा मुर

17 आं दाक्शो लोकबपुकी, गेपुकी आं खोदेशो दुमीने। आंइ खोदेशो पा गेय पाइब आन कली कोव्रशा, मेको आन खोदेशो पने। १कोरिन्थी ११:१ 18 गो इन कली का निक्शी मुर आन पर्वम लोव्र पाता। मुल आं थुं खाइशशा, डाक्शा लोव्र पाइनुड। मारदे हना मेकोपुकी ख्रीस्त आ जोरी सत्रु दुम्शा, आ बेक्शो आ पर्वम मारेइ ममिन्नीम। १कोरिन्थी १:२३; गलाती ६:१२ 19 नोले मेकोपुकी जाम्शा लाइनीम। आन कोव्रज कली परमप्रभु यावे क्येडा ठेयब बाक्ब, दे मुने पचा डा गेयमी आंम कली ठेयब सेल्सीशा, आन थुंमी रागी डा माल्शो ला मिन्नीम। रोमी १६:१८ 20 तन्न इं बाक्तीक स्वर्गम बाक्ब। मारदे हना गो स्वर्ग डा मुर नय। मेकेर रे इं पाप रे प्रोइब प्रभु येसु ख्रीस्त जाक्ब, दे रिम्नय। एफिसी २:६; कलस्सी ३:१; हिब्रू १२:२२; तीतस २:१३ 21 मेकोमी इं बेक्चशो रां आ सक्ति पाइशशो रां खोदेशो सेल्ब। मेको आ सक्तिमी नेल्ल आन कली आ डोंइती खुम्की पा बाप्पाइक्ब। १कोरिन्थी १५:४९; २कोरिन्थी ५:१; १यूहन्ना २:३

4

थुं का डा दुमीन

1 मोपतीके आं दाक्शो लोकबपुकी, प्रभु कली थमा सुइशशा, खोइल थेक्शा बाक्कीन। गो इन कली दाक्शा शुश मिम्नुड। गेपुकीम आं कली ग्येरपाइशशा, आं ग्रातीक सिरपेच खोदेशो दुम्तीनी। २कोरिन्थी १:१४; १थिस्सलोनिकी २:१९-२०

2 इयोदीया नु सुन्तुके “प्रभु कली थमा सुइशशा थुं का दुमीस” देंती। 3 मिनु गो नु गेय पाइब वारच, इ कली “मेको मीश मुर निक्शी आस कली वारच पावो” देंती। मारदे हना मेको निक्शीमी गो नु काथ काथा ग्येरपाइक्ब लोव्र शेंतीक गेय पाम्ताक्से। क्लेमेन्त नु अर्को वारच आन कली यो वारच पाम्ताक्से। मेको नेल्ल आन नें ब्रोंइतीक किताबमी ब्रेक्शो बाक्ब। लूका १०:२०

परमप्रभुमी गेशो थुं नाइक्तीक

4 प्रभु नु बाक्शा गेना हना यो ग्येरसीन। गो लेंशा “ग्येरसीने” देंनुड। फिलिप्पी ३:१; २कोरिन्थी १३:११; १थिस्सलोनिकी ५:१६ 5 इन रिम्शो पतीके मुर नेल्ल आन कली कोंइदीने। प्रभु जाक्चशो बाक्ब। तीतस ३:२ 6 सुर्ता मपने। परमप्रभु यावे नु लोव्र पा, इन माल्शो पुंइशा “गे रिम्शो पाइब बाक्नीनी” दे परमप्रभु यावे कली देनीन। मत्ती ६:२५-३४; १पत्रुस ५:७ 7 परमप्रभु यावे आ गेशो थुं नाइक्तीके रुम्ने मचाप्चा डा ठेयब बाक्ब। मेको थुं नाइक्तीके इन थुं नु इन मिम्शो ख्रीस्त येसु नु बाक्ब। यूहन्ना १४:२७; कलस्सी ३:१५

8 आं लोकबपुकी, आं नेल्ल क्येडा नोले डा लोव्र मार बाक्ब देंशा हना, तेको थमा बाक्बा, तेको शिरशो बाक्बा, तेको ठीक बाक्बा, तेको ग्रांग्रा मदिशो बाक्बा, तेको दाक्चा डा बाक्बा, तेको रिम्शो लोव्र बाक्बा, तेको नेल्ल क्येडा रिम्शो नु दोस गेचा मपुंइसीब बाक्बा, तेको “रिम्शो पाइब” दे माइक्चा पुंइसीब बाक्बा, मेको आ पर्वम मिम्तीन। 9 गो इन कली मार शेंदु, गे मार रुम्नी, मार नेंनी, आं कली मार पशो तनी, मेकोन पने। मो पाइतीनी हना, इन थुं नाइक्चा गेब परमप्रभु यावे गेपुकी नु बाक्ब।

गेचा नु ताक्चा आ पर्वम

10 गो प्रभु नु बाक्शा शुश ग्येरसीनुड। मारदे हना शुश नाक्त नोले गे आं कली लेंशा मिम्ताक्नी। गेपुकीमी आं कली नेल्ल नाक्त थमा पा मिम्शा बाक्तीनी। तन्न डोंइती मारेइ सोइक्ने मचाप्शो बाक्तीनी। मुल चहिं सोइक्ताक्यीनी। 11 गो श्येत जचा आ पर्वम लोव्र मपाइनुड। मार दुम्त हना यो, ग्येरसीशा बाक्चा, दे शेंसीशो नड। १तिमोथी ६:६ 12 पुडग दुम्चा नु शोंप पाइशशो दुम्चा, दोपा बाक्मे, गो मेको निम्फा तुइक्नुड। गो गेना हना यो रूशा बाक्चा नु शोव्रलु बेक्शा बाक्चा, निम्फा शेंसाक्यी। मोपा शुश बाक्त हना यो, काइ मबाक्त हना यो आं कली ठीक दुम्ब। २कोरिन्थी ६:१० 13 आं कली सक्ति गेब आ नेंमी गो नेल्ल पने चाप्नुड। २कोरिन्थी १२:१०

14 दोदेब दुम्त हना यो, गेपुकीम आं कली वारच पशा रिम्शो पाइतीनी। 15 ग्येरपाइक्ब लोव्र शेंचा डोंइती मासीडोनीया रागी प्रोइशा लडा नोले, सुइमी आं कली वारच मपामे, गे फिलिप्पीपुकीम ला पाइतीनी। गेपुकीम आं शेंशो ताइतीनी, मिनु इन वारच पशो गो ताता। २कोरिन्थी ११:९ 16 थिस्सलोनिकी सहरमी बाक्डानु यो, गे निक्शी खेयप वारच पा क्येट सोइक्ताक्यीनी। 17 इन गेशो क्येट ममिम्नुड, तन्न परमप्रभु यावेमी इन मो पशो तशा, इन कली रिम्शो पाइब। गो मोदेशो तचा दाक्नुड। 18 गो मार मार माल्डा, आं माल्शो क्येडा शुश ताता। इपाफ्रोडीटसमी इन सोइशशो क्येट गेती। मेको ब्रोंवशो रिना पाइशशो परमप्रभु यावे कली चढ़ेशो खोदेशो बाक्ब।

परमप्रभु यावे इन मो पशो तशा ग्येरसाक्व। फिलिप्पी २:२५ 19 मिनु आं परमप्रभु यावेमी इन माल्शो नेल्ल आ स्वर्ग डा बाक्तीक येसु ख्रीस्त आ पतीक रे शुश गोब। 20 इं आफ परमप्रभु यावे कली गेना हना यो ठेयब सेल्य। आमेन।

नोले डा लोव

21 ख्रीस्त येसुमी बाक्शो थमा सुइक्ब नेल्ल आन कली “रिम्शो बाक्कीन” मतीन। गो नु बाक्ब लोकबपुकीमी “रिम्शो बाक्कीन” देतेक्म। 22 सिजर आ खिं डा नु अरु थमा सुइक्ब नेल्लेमी यो इन कली “रिम्शो बाक्कीन” देतेक्म। फिलिप्पी १:१३ 23 प्रभु येसु ख्रीस्त आ शिशी गेपुकी नु बाक्ल।

कलस्सी

ब्रेक्ब मुर: एको चिठी पावलमी ब्रेक्शो बाक्ब।

गेना ब्रेक्शो: पावल रोम सहरम ग्याइक्चा पुंडसीशा ६२ ए. डी. थुम्ची ना कि ६३ ए. डी. गोची ना ब्रेक्शो बाक्ब।

मारदे ब्रेक्शो:

१. येसु ख्रीस्त प्रभु बाक्ब। कलस्सी १:१३-२९

२. थमा सुइक्ब आन गुम्तीक खिं दोदेशो दुम्चा माल्ब। कलस्सी २:१-२३

३. थमा सुइक्ब दोपा बाक्चा माल्नीमी नु नोले डा लोत्र। कलस्सी ३:१-४,६ नु ४:१८ सम्म

डोंइती डा लोत्र

१ गो परमप्रभु यावे आ दाक्शो पा, ख्रीस्त येसु आ सोइश्शो पावल नड। इं लोकब तिमोथी गो नु बाक्ब।

२ गो कलस्से सहर डा परमप्रभु यावे कली थमा सुइक्ब नु ख्रीस्तमी बाक्शो लोकब इन कली चिठी ब्रेक्ताक्ड। इं आफ परमप्रभु यावेमी इन कली शिशी पा थुं नाइक्चा गेवल।

कलस्सी आन पर्बम प्रार्थना

३ गो निक्शीमी इन पर्बम प्रार्थना पस्कुनु, इं प्रभु येसु ख्रीस्त आ आफ परमप्रभु यावे कली “गे रिम्शो पाइतीनी” देंस्कु। ४ मारदे हना गेपुकी ख्रीस्त येसु कली थमा सुइक्तीनी। मिनु थमा सुइक्ब नेल्ल आन कली दाक्नीनी, देशो नेंतस्कु। ५ स्वर्गमी इन कली रिम्शो दुम्ब, दे तुइक्ताक्नी। गेपुकीमी डोंइती रे थमा लोत्र पशो नेंतीनी। मेकोन ग्येरपाइक्ब लोत्र बाक्ब। १पत्रुस १:३-४ ६ इन सहर नु नेल्ल अरु सहर डा मुरपुकीमी यो मेको ग्येरपाइक्ब लोत्र नेंतेक्म। इन दातेमी दोदेशो पा बारशा लमे, मोदेशो पा रागी नेल्लेमी बारना बारन लत। गेपुकीमी मेको लोत्र नेंशा, परमप्रभु यावे आ शिशी थमा पा रुप्नी नाक्त रेन मेको लोत्र बारना बारन लत।

७ इपाफ्रास आंस दाक्शो लोकब, गो निक्शी नु गेय पाइब। मेको रिम्शो पा ख्रीस्त आ लोत्र इन कली शेंब दुम्त। कलस्सी ४:१२; फिलेमोन २३ ८ मेकोमी आंस कली गे परमप्रभु यावे आ सोक्तीम पतीके मुर आन कली दाक्नीनी, दे इन पर्बम तुइक्पाइक्तस्की।

९ मिनु मेको लोत्र नेंस्कु रे इन कली मिम्शा, प्रार्थना पना पन बाक्तस्कु। मार प्रार्थना पाइतस्कु देशा हना “कलस्सीपुकीमी इन दाक्शो मार बाक्बा, मेको तुइक्तमेक्ल। परमप्रभु यावे, इन सोक्त डा तुइक्तीके नु रुप्तीके शुश तामेक्ल। एफिसी १:१५-१७ १० इन डोंइती शिरशो मुर दुम्मल। आन पशो नेल्लेमी इन कली ग्येरपदमेक्ल। रिम्शो पामेनु, इन कली तुइक्तीके आन थुंमी बारना बारन लल। एफिसी ४:१; फिलिप्पी १:२७ ११ इन छेडछेड डा सक्ति खोदेशो पा मेको आन कली सक्ति पाइश्शो, बोल्यो सेलीन। मिनु सक्ति पाइश्शो बोल्यो दुम्शा, मारेइ मारेइ फाल्ने चाप्नीम” दे प्रार्थना पाइतस्कु। १२ इं आफ, परमप्रभु यावे कली “गे रिम्शो पाइब बाक्नीनी” देनीन। मारदे हना इन कली थमा सुइक्ब आन छेडछेडमी बाक्चा गेपुतु। एफिसी १:११; १पत्रुस १:४ १३ मेकोमी इं कली छिडछिड डा राज्य डा अधिकार रे गुंइशा, आ दाक्शो तौ आ राज्यमी ओंइताक्व। कलस्सी २:१५ १४ मेकोमी इं कली मरिम्शो रे प्रोंइशा, इं पाप क्याम्ताक्व। एफिसी १:७

येसु डोंइती डा बाक्ब

१५ सुइमी तने मचाप्शो परमप्रभु यावे खोदेशो येसु ख्रीस्त रागी सेल्चा डोंइती रेन बाक्त। हिब्रू १:३; प्रकाश ३:१४ १६ सरीड नु रागीमी बाक्ब, तांडसीब नु मतांडसीब नेल्ल, पिपपुकी, मान पचा पुंडसीबपुकी, हुकुम पाइबपुकी, अधिकार पाइब नेल्ल नु मार मार सेल्शो बाक्मा, मेको नेल्ल येसु ख्रीस्तमी आंम कली सेल्लु। यूहन्ना १:३,१०; हिब्रू १:२ १७ मोपा मेको नेल्ल आन क्येडा डोंइती डा बाक्ब। मिनु नेल्ल आन कली बाक्चा गेब यो बाक्ब। १८ थमा सुइक्बपुकी रां का बाक्तेक्म हना, येसु ख्रीस्त मेको रां आ पिया बाक्ब। मेको नेल्ल आन क्येडा डोंइती डा दुम्शा, डोंइती बेक्शो रे सेंसीब यो बाक्ब। मोपा नेल्ल आन क्येडा ठेयब बाक्ब। एफिसी १:२२; प्रेरित २६:२३; १कोरिन्थी १५:२०; प्रकाश १:५

१९ मिनु परमप्रभु यावेमी “आं सक्ति नेल्ल मेको आगामी बाक्शो दाक्नुड” दे ग्येरसाक्व। २कोरिन्थी ५:१०; कलस्सी २:९; यूहन्ना १:१६; एफिसी १:२३ २० परमप्रभु यावेमी येसु ख्रीस्त रेन मारेइ मारेइ आन कली आ नु गारपाइक्तु।

सरीड नु रागीम बाक्शो नेल्ल आन कली, शीम केप्शा कांटी थोक्शा साइक्चा पुंडसीशा, आ हुशेमी आ नु गारपाइक्तु।
१यूहन्ना २:२

परमप्रभु आ नेक्था दुम्पाइश्शो

21 डोंइती गेपुकी परमप्रभु यावे क्येडा डोन दुम्शा, इन थुंमी मेको कली ममिथु, मरिम्शो पना पन बाक्तीनी। एफिसी २:१२-१३; एफिसी ४:१८; रोमी ५:१० 22 मुल येसु ख्रीस्तमी आ रां साइक्चा गेशा, इन कली परमप्रभु यावे आ मुर दुम्पाइक्तु। मोपा इन कली दोस मताइब, काइ हेंथे मपाइब, परमप्रभु यावे आ मुर सेल्शा, आ डोंइती राप्पाइक्तु। एफिसी ५:२७ 23 गेपुकीमी थमा सुइक्ना सुइक्न बाक्शा, नोले मशोंइसीथु खोइल थेक्शा, इन नेंशो ग्येरपाइक्ब लोव्र मप्रोंइथु बाक्तीनी हना, मोदेशोन लीनीनी। मुल मेको ग्येरपाइक्ब लोव्र नेल्ल मुर आन कली नेंपाइश्शो बाक्त। गो पावल, मेको लोव्र शेंब दुम्ती।

पावल आ श्येत नु गेय

24 मुल गो इन पबर्म श्येत जाता हना यो, ग्येरसाक्यी। मारदे हना आं रांमी ख्रीस्त आ लीशो श्येत थुम्पाइक्नुड। ख्रीस्त आ लीशो श्येत थमा सुइक्ब आन पबर्म बाक्ब। मेकोपुकी ख्रीस्त आ रां बाक्नीम। एफिसी ३:१३; २तिमोथी २:१० 25 परमप्रभु यावे आ पतीकेमी मेको आन कली शेंब दुम्ती। परमप्रभु यावेमी आ लोव्र नेल्ल मेको आन कली शेंतीक गेय गेती। मोपा आ लोव्र खाप्चा कली शेंब सेल्टी। 26 साइ डोंइती रे परमप्रभु यावे आ मिम्शो खुइश्शो बाक्त। मुल चहिं मेको आ मुर आन कली कोंइशो बाक्त। रोमी १६:२५; एफिसी ३:३-६ 27 परमप्रभु यावेमी मेको आन कली “आं डोंइती खुइश्शो लोव्र अर्को रागी डा मुर आन कली गिश रिम्शो, गिश ठेयब बाक्ब” दे तुइक्पाइक्तु। मेको खुइश्शो लोव्र मार बाक्ब देंशा हना, ख्रीस्त इन आगामी बाक्ब। मिनु इन कली परमप्रभु यावे आ छेडछेडम बाक्चा गेब आस यो ख्रीस्तम बाक्ब। १तिमोथी १:१ 28 गेपुकीमी येसु ख्रीस्त सु बाक्बा, मार पाइबा, दे शेंनीकी। मुर नेल्ल आन कली “होस पा बाक्कीन” दे यो शेंनीकी। मोपा गेपुकीमी मुर आन कली का का पा ख्रीस्त कली थमा पा तुइक्ब सेल्शा, परमप्रभु यावे आ डोंइती राप्पाइक्चा दाक्नीकी। 29 मोपतीके गो बोल पा शुश गेय पाइनुड। येसु ख्रीस्तमी आं कली मोदेशो पा आ सक्तिमी गेय पपाइक्ब।

2

दूली शेंब क्येडा होस पने

1 गो इन पबर्म, लाओडीसीया सहर डा थमा सुइक्ब आन पबर्म नु का निक्शी अरु आं कली गेनायो मताइब मुर आन पबर्म गिश श्येत जडा, मेको नेल्ल इन कली तुइक्पाइक्चा दाक्नुड। 2 मेकोपुकी दाक्मुशा आन थुं बारपदमेक्ल। थमा पा रुप्तीके गिश ठेयब बाक्बा, परमप्रभु यावेमी ख्रीस्त आ पबर्म खुइश्शो लोव्र मार बाक्बा, मेको नेल्ल रुप्मेक्ल। 3 रुप्तीके तुइक्तीके नेल्ल ख्रीस्त आगाम खुइश्शो बाक्नीम। १कोरिन्थी १:२४, ३० 4 मारदे इन कली मो देंती देंशा हना, जोल पा शेंब जाक्शा, शुश मिलो शिलो लोव्र पशा, दूली शेंने मचाप्मेक्ल, दे मो देंती। रोमी १६:१८ 5 गो इन नेक्था मबाक्ती हना यो, आं थुंमी गेपुकी नु बाक्नुड। इन रिम्शो पशो नु ख्रीस्त कली बोल्यो पा थमा सुइश्शो तशा ग्येरसाक्यी। १कोरिन्थी १४:४०

नेल्ल ख्रीस्तम बाक्ब

6 गेपुकी दोपा डोंइती प्रभु ख्रीस्त येसु कली ओव्रचा गेनी, मोपा मेको नु बाक्कीन। 7 खप आगामी शाक्श थोक्शो रवा खोदेशो पा, ख्रीस्त आगा डा बोल्यो मुर दुम्शा बाक्कीन। दोपा शेंसीनी, मोपा बोल्यो पा थमा सुइश्शा, परमप्रभु यावे कली “गे रिम्शो पाइतीनी” दे शुश देंना देंन बाक्कीन। एफिसी ३:१७

8 मिनु गेपुकी दूली लोव्र शेंब आन नोले मखोतीन। मेकोपुकीमी इन कली मुर आन मिम्तीके नु फश लोव्र पशा, मुर आन रिती थिती ला शेंनीमी। मेको रागी रागी डा मुर आन थुं डा बाक्ब, ख्रीस्त के ममाइ। 9 मारदे हना परमप्रभु यावे आ सक्ति नेल्ल ख्रीस्तम बाक्ब। यूहन्ना १:१४-१६ 10 गेपुकी मेको नु बाक्शा, आ ब्रोंइतीक सक्तिम ब्रीशो मुर दुम्तीनी। मेको नेल्ल हुकुम पाइब नु नेल्ल अधिकार पाइब आन पिया बाक्ब। एफिसी १:२१ 11 मेको आ पशोमी खोइक्तीक चिनु पाइश्शो खोदेशो दुम्तीनी। मेको खोइक्तीक चिनु मुरुमी खोइश्शो ममाइ, गेपुकी ख्रीस्त कली थमा सुइश्शा, इन मरिम्शो पशो ताइश्शो इन खोइक्तीक चिनु दुम्त। रोमी २:२९; रोमी ६:५; १पत्रुस ३:२१ 12 मिनु गेपुकी ब्वाक्कुम खुम्शा गुंइचा पुंडसीनीनु, मेको नु बेक्शा थिम्शो दुम्तीनी। परमप्रभु यावे आ पतीके कली थमा सुइक्तीके

मेको नु बेक्शो रे सेंशो यो बाक्नीनी। रोमी ६:४; कलस्सी ३:१ 13 डोंइती गेपुकी मरिम्शो पाइब दुम्शा, खोइक्तीक चिनु इन रांमी मखोइक्थु, बेक्शो मुर खोदेशो बाक्तीनी। परमप्रभु यावेमी इं मरिम्शो पतीके नेल्ल क्याम्शा, इं कली येसु ख्रीस्त नु ब्रोंइपाइक्तु। एफिसी २:१,५ 14 नेल्ल गेचा चिक्शो दोस नु सजाइ ब्रेक्शो कागज लाइशशा, कांटी थोक्शा साइक्तीक शीम वोइक्तु। एफिसी २:१५ 15 मेकोमी हुकुम पाइब नु अधिकार पाइब आन कली आन या रोइशशा फ्रुम्तीमी। मोदेशो पा ग्राशा, नेल्ल आन कली कोंइताक्व। परमप्रभु यावे येसु ख्रीस्त आ पशो तशा शुश ग्येरसाक्व। कलस्सी १:१३; एफिसी ४:८ 16 मोदेशो दुम्शा इन कली मार मार जचा तूचा दुम्बा, मार मार जचा तूचा मदुम्बा, मार मार चाड मानेचा, तेको औंसी ठेयब सेल्चा, तेक तेको नाइक्तीक नाक्ती ठेयब सेल्चा देंब मुर आन लोव्र मनेनीन। रोमी १४:१-१२ 17 मेको दुम्चा चिक्शो आ वांकु ला बाक्नीम। थमा सुइक्तीक रां चहिं ख्रीस्त के बाक्ब। हिब्रू ८:५; हिब्रू १०:१ 18 सुइमी इन कली “मतुइक्ब मुर ननी” देंचा मगेने। मेकोपुकीमी आंम मिम्शो पशो बाक्नीम, स्वर्ग डा गेय पाइब आन कली सेउ पचा माल्नीनी, दे शेंनीमी। “गो डोमु खोदेशो पा ततीके तुइक्ताक्व” देंनीमी। मेको मुरपुकी मो ठेयब लेशशा बाक्शा, आन मिम्शो ला शेंनीम। 19 मेकोपुकी पिया नु मबाक्शो बाक्नीम। मेको पियामी रां कली थुल्ला थुल्लन बाक्मेनु, नाडी नु रुशेम बोइक्पाइशशा, परमप्रभु यावेमी मेको रां कली कोल्पाइक्ब। एफिसी ४:१५-१६

20 गेपुकी ख्रीस्त नु बेक्तीनी हना, रागी डा थोव्रक नेल्ल इन कली आइक्च बाक्ब। मिनु मारदे गेपुकी रागी डा मुर खोदेशो पा पाइनीनी? मारदे गेपुकी रिती थिती पचा टीनीनी? गलाती ४:९-१० 21 मेकोपुकीमी “मेको थिचा मदुम्ब, थाम्चा मदुम्ब, पचा मदुम्ब” देंनीम। 22 मेको शेंबपुकीमी गेय पना पन जाम्ब थोव्रक आन पर्वम लोव्र पाइनीम। मेको लोव्र मुर आन मिम्शो लोव्र ला ममाइ डा? मत्ती १५:९ 23 मिनु मेको रिती थिती पचा, शुश धर्म पचा नु मुर आन माल्शो मपथु, थमा पा जोक्ब तुइक्ब नु ब्रेम्शो दुम्खु पाइनीम। तन्न मोदेशो पतीकेमी मुर आ मरिम्शो पतीके तेक्ने मचाप्ब। १तिमोथी ४:३; रोमी १३:१४

3

माइत नु नक मुर

1 गेपुकी ख्रीस्त नु सेंसीशो बाक्तीनी हना, स्वर्गमी बाक्ब दोपा बाक्मा, मेको मालीन। मेकेर ख्रीस्त परमप्रभु यावे आ ग्युरा गे निश्शो बाक्ब। कलस्सी २:१२ 2 इन थुंमी स्वर्गम बाक्ब कली मिम्तीन। रागी डा थोव्रक ममिम्तीन। मत्ती ६:३३ 3 मारदे हना गे बेक्तीनी। इन थुं ख्रीस्त नु परमप्रभु यावेमी खुइशशा वोइशशो बाक्ब। रोमी ६:२ 4 इं कली ब्रोंइचा गेब ख्रीस्त गूत हना, गे यो मेको नु परमप्रभु यावे आ छेड्छेड डा बाक्तीकेमी गूनीनी। १कोरिन्थी १५:४३ 5 मोपतीके इन आगामी बाक्शो माइत रागी डा थुं कली सतीन। रागी डा मुर आन थुंमी मार बाक्ब देंशा हना, हेंथे पचा, मार मार ग्रांग्रा दिचा डा गेय पचा, आंम दला दाक्स पचा, मरिम्शो मिम्तीके नु शिम दुम्तीके बाक्ब। शिम दुम्तीके चहिं मूर्ति पूजा पचा खोदेशो बाक्ब। एफिसी ५:३ 6 परमप्रभु यावे मोदेशो पाइब मटीब मुर आन पर्वम शुश गाइक्ब। एफिसी ५:६ 7 गेपुकी यो डोंइती मोदेशो पना पन बाक्तीनी। 8 मुल चहिं मेको नेल्ल ताइक्तीन। गाइक्चा, चुरचा, मरिम्शो पचा, अरु आन पर्वम मरिम्शो लोव्र पचा, ओल ओल लोव्र पचा ताइक्तीने। एफिसी ४:२९, ३१ 9 गेपुकी जोल मपमुने। मारदे हना, गे डोंइती डा पतीक नेल्ल ताइक्ताक्नी। एफिसी ४:२२-२५ 10 रिम्शो पाइब नक मुर दुमीन। परमप्रभु यावेमी इन थुं आ थुं खोदेशो पा नक सेल्ना सेल्न बाक्ब। मारदे मो पाइब देंशा हना, आंम कली नेल्ल तुइक्पाइक्चा कली मोदेशो पाइब। एफिसी ४:२४; उत्पत्ती १:२६-२७ 11 मुल रे ग्रीक नु यहूदी खोइक्तीक चिनु खोइक्पांइसीशो नु मखोइक्पांइसीशो मुरपुकी उइक्थ उइक्थ दुम्तेक्म। रागी रागी डा मरुप्चा डा लोव्र पाइबपुकी, ब्वाकी मुरपुकी, वाइलीम वाइलपुकी नु ठेयब मुर उइक्थ उइक्थ दुम्तेक्म। ख्रीस्त नेल्ल क्येडा ठेयब बाक्ब। मिनु नेल्ल आन आगामी बाक्ब। गलाती ३:२८

12 गेपुकी परमप्रभु यावे आ योव्रशो, आंम आ दाक्शो मुर दुम्तीनी। मोपतीके शिशी पचा, रिम्शो पमुचा, ब्रेम्शो थुं पाइशशो, ठेयब मलेत्थु टीब नु फाल्ब मुर दुमीने। 13 का निक्शीमी दोस गेचा पुंइसाक्म हना, फाल्मुशा, माफ गेमुशा बाक्कीन। प्रभुमी दोपा इन कली माफ गेवा, मोपा माफ गेमुने। एफिसी ४:२; मत्ती ६:१४; एफिसी ४:३२ 14 मेको नेल्ल पा इन नेल्ल क्येडा ठेयब गेय दाक्मुचा बाक्ब। मारदे हना मेकोम नेल्ल इन कली थुं का डा सेल्ब। रोमी १३:८, १० 15 ख्रीस्त आ थुं इन थुंम नाइशशा हुकुम पचा गेने। गेपुकी रां का डा दुम्चा कली योव्रसीशो बाक्नीनी। गेपुकीमी प्रभु कली “गे रिम्शो पाइब बाक्नीनी” दे शुश देनीन। फिलिप्पी ४:७; १कोरिन्थी १२:१३, २७; एफिसी ४:३-४ 16 ख्रीस्त आ लोव्र खोत ब्रेक्शा वोतीन। गेपुकीमी शुश तुइशशा, शेंमुशा थुं बारपमुने। परमप्रभु यावे आ लोव्र डा कुम्सो, परमप्रभु

यावे कली “गे ठेयब बाक्नीनी” दे पशो कुम्सो नु परमप्रभु यावे आ सोक्तीमी इन कली शेंशो कुम्सोमी “गे रिम्शो पाइब बाक्नीनी” दे इन थुंमी परमप्रभु यावे कली कुम्सो पने। एफिसी ५:१९ 17 मार मार लोवपुकी, गेयपुकी, मारेड मारेड पनीनु, नेल्ल प्रभु येसु आ नेंमी पने। इं आफ परमप्रभु यावे कली “गे रिम्शो पाइतीनी” दे येसु आ नेंमी देनीन। १कोरिन्थी १०:३१

थमा सुइक्ब दोपा बाक्चा

- 18 गे मीश मुरपुकी, आंम वोंइश आ देशो लोव टिने। मो पाइतीनी हना, प्रभु नु गारशो मुर दुम्नीनी। १पत्रुस ३:७
 19 गे वोंइश मुरपुकी, आंम मीश कली दाक्शा, काइ श्येत मगेने।
 20 गे आलपुकी, इन आंम आफ कली नेल्लेम टिने। मो पाइतीनी हना, प्रभु ग्येरब।
 21 गे आल आन आफपुकी यो, इन आल आन कली रिम्शो पने। काइ श्येत मगेने। श्येत गेतीनी हना, आन थुं जिकब।
 22 वाइलीम वाइलपुकी, इन ठेयब मुरुमी मार मार देंनीमी, मेको नेल्ल टिचा माल्नीनी। इन ठेयब मुरुमी कोवतेक्म हना यो, मकोवतेक्म हना यो, थुं का पशा, प्रभु कली मान पा हिनीन। 23 इन गेय मार बाक्त हना यो, इन थुं नेल्लेमी मुर आन कली ममाइ, प्रभु कली गेय पने। 24 गे प्रभु आ गुइ रे इनाम ताइब बाक्नीनी, दे तुइक्नीनी। मेकोन मिम्ना मिम्न गेय पने। गेपुकी प्रभु ख्रीस्त कली गेय पाइब बाक्नीनी। 25 मरिम्शो पाइबपुकीम मरिम्शो पतीके कुल मकोवथु निसाफ पचा पुंइसीनीम। रोमी २:११

4

1 गे ठेयब मुरपुकी, इन के यो ठेयब होवप का स्वर्गम बाक्ब, दे तुइश्शा, इन वाइलीम वाइल आन कली ठीक पा आन माल्शो थोवक गेने। लेवी २५:४३, ५३

प्रार्थना पचा मप्रोंइचा

- 2 गेपुकीमी प्रार्थना पचा मप्रोंइथु, पना पन बाक्कीन। परमप्रभु यावे कली “गे रिम्शो पाइब बाक्नीनी” देंचा मप्रेंदीन। रोमी १२:१२; १थिस्सलोनिकी ५:१७ 3 गेपुकीमी आंइ कली यो मिम्शा प्रार्थना पने। परमप्रभु यावेमी आंइ कली ख्रीस्त आ खुइश्शो लोव शुश मुर आन डोंइती शेंने चाप्मेक्ल, दे पुनीन। मेको लोव शेंतीके गो ग्याइक्चा पुंइसाक्की। रोमी १५:३०; एफिसी ६:१९; २थिस्सलोनिकी ३:१; १कोरिन्थी १६:९; कलस्सी १:२६-२७ 4 रिम्शो रुप्चा डा लोव पने चाप्मेक्ल, दे यो पुनीन।
 5 गेपुकी थमा मसुइक्ब आन डोंइती रिम्शो जोक्शा तुइश्शा गेय पने। लोव पचा तनीनु, रिम्शो पा लोव पने। एफिसी ५:१५-१६; १थिस्सलोनिकी ४:१२ 6 इन पशो लोव हिक्सी डाम्शो खोदेशो दुम्ल। इन कली हिल्लो पाइब नेल्ल आन कली दोपा लोव लेत्चा, दे तुइक्चा माल्नीनी। मर्कूस ९:५०; एफिसी ४:२९

नोले डा लोव

7 आं पर्वमी मार मार दुम्मे, मेको नेल्ल तिखीकसमी इन कली देंब। मेको इं दाक्शो लोक्ब बाक्ब। दीगो पा गेय पाइब नु आं खोदेशो प्रभु आ वाइल बाक्ब। 8 गोपुकी दोपा बाक्नीकी, दे इन कली शोवचा नु इन थुं बारपाइक्चा कली मेको कली इन बाक्तीके सोइक्ताक्ड। एफिसी ६:२१-२२ 9 इं दाक्शो नु रिम्शो पाइब लोक्ब, ओनेसीमस मेको नु जाक्ब। मेको इन मुरुन बाक्ब। एक मार मार दुम्मे, मेको निक्शीमी इन कली देंनीसी। फिलेमोन १०

10 गो नु ग्याइक्चा पुंइसीब वारच अरीस्तारकसमी इन कली “रिम्शो बाक्कीन” दे आं कली ब्रेक्पाइक्ती। बारनाबास आ लोक्ब मर्कूसमी यो इन कली “रिम्शो बाक्कीन” देंत। मेको जाक्मेनु, रिम्शो पा बाक्चा गेने। मेको आ पर्वम इन कली डोंइती तुइक्पाइक्तन्नी। प्रेरित १९:२९; प्रेरित २७:२; प्रेरित १२:१२, २५ 11 येसु माइश्शो याइनी नें पाइश्शो युस्तसमी यो इन कली “रिम्शो बाक्कीन” देंत। परमप्रभु यावे आ राज्य डा गेय पाइब आं वारचपुकी मेको सां ला खोइक्तीक चिनु पाइश्शो यहूदी बाक्नीम। मेकोपुकीमी आं कली वारच पाइश्शा, आं थुं नाइक्चा गेतीमी। 12 ख्रीस्त येसु आ गेय पाइब इन मुर इपाफ्रासमी इन कली “रिम्शो बाक्कीन” देंत। मेकोमी इन कली मिम्शा, परमप्रभु यावे कली “कलस्सी आन कली रुप्तीक थुं गेशा, इन दाक्शो नेल्ल तुइक्तमेक्ल” दे पुंइना पुंइन बाक्ब। कलस्सी १:७; फिलेमोन २३ 13 इन कली, लाओडीसीया नु हिरापोलीस डा थमा सुइक्ब आन कली शुश गेय पाप्तु, दे गो इन कली तुइक्पाइक्ता। प्रकाश ११:१; प्रकाश ३:१४ 14 इं दाक्शो डाक्टर लूका नु डेमासमी यो इन कली “रिम्शो बाक्कीन” देंताक्स। 15 लाओडीसीया सहर डा लोक्ब आन कली नु नुम्फा माइश्शो आ खिंमी गुम्ब थमा सुइक्ब आन कली यो

गोमी “रिम्शो बाक्कीन” देंत ने, दे मतीन। 16 मिनु एको चिठी इन गुम्तीकेमी पढेने थुम्शा, लाओडीसीया सहर डा थमा सुइक्ब आन गुम्तीकेमी यो पढेचा गेने। लाओडीसीया डा थमा सुइक्ब आन कली ब्रेक्शो चिठी गेपुकीमी पढेने।

17 गेपुकीमी अरकीप्पस कली “प्रभुमी इ कली गेशो शेंतीक गेय नेल्ल रिम्शो पावो” दे मतीन। फिलेमोन २

18 गो पावलमी इन कली “रिम्शो बाक्कीन” दे आंमा ब्रेक्ताक्ड। गो ग्याइक्चा पुंइसीशो बाक्नुड, दे मप्रेंदीन। परमप्रभु यावे आ शिशी गे नु लील। १कोरिन्थी १६:२१; गलाती ६:११; २थिस्सलोनिकी ३:१७

१ थिस्सलोनिकी

ब्रेक्ब मुर: एको चिठी पावल थिस्सलोनिकी आन कली आ डोंइती ब्रेक्शो चिठी बाक्ब।

गेना ब्रेक्शो: पावल निक्शी खेयप रागी रागी लशा, कोरिन्थ सहरम बाक्शा, एको चिठी ५३ ए. डी. मेको बर्स डा डोंइती डा महिनाम ब्रेक्शो बाक्ब।

मार ब्रेक्शो:

१. पावलमी श्येत जाइब नक थमा सुइक्ब आन थुं बारपाइक्तु।
२. पावलमी थमा सुइक्ब आन कली प्रभु कली शिरशो गेय पचा आ पबर्म अरेब।
३. पावलमी येसु ख्रीस्त दोपा लेशशा जाक्बा, मेको शेंब। मारदे हना दूली शेंब गुम्तीकेम जाक्शा, मुर आन थुं क्याल्लेक्म।

डोंइती डा लोत्र

1 गो पावल नड। सिल्वानस नु तिमोथी यो गो नु बाक्नीस। गो इं आफ परमप्रभु यावे नु इं प्रभु येसु ख्रीस्त कली थमा सुइक्ब थिस्सलोनिकी सहर डा इन कली चिठी ब्रेक्ताक्ड। येसु ख्रीस्तमी इन कली शिशी पा इन थुं नाइक्चा गेवल। प्रेरित १५:४०; प्रेरित १६:१-३, १९; प्रेरित १७:१-९; २थिस्सलोनिकी १:१

थिस्सलोनिकी डा थमा सुइक्ब

2 गोपुकी प्रार्थना पकानु, परमप्रभु यावे कली “गे थिस्सलोनिकी सहर डा थमा सुइक्ब नेल्ल आन रिम्शो पाइतीनी” दे गेना हना यो देंनीकी। 3 गोपुकी इं आफ परमप्रभु यावे आ डोंइती इन थमा सुइक्तीके डा गेय, दाक्चा डा गेय नु इं प्रभु येसु ख्रीस्त कली आस पतीके मिम्ना मिम्न बाक्नीकी। १ कोरिन्थी १३:१३ 4 आंइ थमा सुइक्ब लोकबपुकी, परमप्रभु यावेमी इन कली दाक्शा योत्रतु, दे तुइक्नीकी। 5 मारदे हना इन कली शेंशो ग्येरपाइक्ब लोत्र पचा ला मशेंदक, सक्ति यो ताइतीनी। परमप्रभु यावे आ सोक्तीमी आंइ कली शुश तुइक्तीक थुं गेशा प्रिंताक्व। गोपुकी दोदेशो मुर बाक्नीकी, दे गोपुकी नु बाक्शा कोंइताक्क। मिनु गे तुइक्ताक्नी। १ कोरिन्थी २:५ 6 गोपुकी आंइ खोदेशो नु प्रभु खोदेशो पाइब दुम्तीनी। मारदे हना गोपुकी शुश श्येत जशा, परमप्रभु यावे आ लोत्र नेंतीनी। मिनु परमप्रभु यावे आ सोक्तीमी इन थुं ग्येरपाइक्तु। २थिस्सलोनिकी ३:७ 7 मोपा गोपुकी मासीडोनीया नु आकाया रागी डा थमा सुइक्ब आन कली रिम्शो कोंइतीक दुम्तीनी। 8 डोंइती गोपुकी प्रभु आ लोत्र मासीडोनीया नु आकाया रागी डा मुर आन कली शेंताक्नी। मेको आन कली ला ममाइ, नेल्ल अर्को रागी डा मुरपुकीमी यो इन परमप्रभु यावे थमा सुइक्तीके तुइक्ताक्म। मोपतीके गो मेकेर शेंचा ममाल्नीकी। रोमी १:८ 9 मेकोपुकीमी इं पबर्म लोत्र पाम्तेक्म। मार लोत्र पाम्तेक्म देंशा हना, थिस्सलोनिकी सहर डा मुरपुकीमी आंइ कली मिश रिम्शो ब्राम्तेक्म। मिनु गोपुकी इन मूर्ति कली प्रोंइशा, परमप्रभु यावे कली थमा सुइक्ब दुम्शा, ब्रोंइशा बाक्ब, थमा परमप्रभु यावे आ गेय पाइब दुम्तीनी। प्रेरित १४:१५; १ कोरिन्थी १२:२ 10 मिनु बेक्शो रे सेंशो परमप्रभु यावे आ तौ लेंशा सरीड रे यीब, दे रिम्शा बाक्तीनी। येसुमी इं कली परमप्रभु यावे आ गाइक्चा रे प्रोंइब। तीतस २:१३

2

पावल आ गेय

1 आंइ लोकबपुकी, इन कली गुम्चा मोशा मदुम्शो बाक्त, दे तुइक्नीनी। 2 गोपुकी डोंइती फिलिप्पी सहरमी श्येत जशा, मुरपुकीमी आंइ कली शुक्शी पाम्तेक्म, दे तुइक्नीनी। शुश शुक्शी पाम्तेक्म हना यो, परमप्रभु यावेमी आंइ कली वारच पाइब, दे थमा सुइक्शा, परमप्रभु यावे आ ग्येरपाइक्ब लोत्र इन कली शेंताक्क। प्रेरित १६:२०-२४; प्रेरित १७:१-५ 3 गोपुकीमी इन कली मुरुम पशो जोल रे मशेंदक। ठेयब दुम्कल, दे ममिम्तक। २ कोरिन्थी ४:२; २ कोरिन्थी ११:७; यूहन्ना ५:४४ 4 परमप्रभु यावेमी आंइ कली ग्येरपाइक्ब लोत्र शेंचा, दे शेंब सेल्लतीकी। मोपतीके गोपुकी मुर आन दाक्शो लोत्र मशेंथु, परमप्रभु यावे आ दाक्शो लोत्र शेंशा गाक्तक। मेकोमी आंइ थुं कली नाक्शा कोत्रब। गलाती १:१० 5 गो इन कली मिलो शिलो मपक, दे तुइक्नीनी। इन क्येट ताइनीकी कों, दे मिम्शा मशेंदक, मेको परमप्रभु यावेमी तुइक्ब। मती १२:४०; प्रेरित २०:३३ 6 गे नु अरु मुरपुकीमी आंइ कली ठेयब सेलीन, दे मशेंदक। 7 गोपुकी ख्रीस्त आ सोइश्शो दुम्शा, इन गुइ रे मार मार ताक्चा ठीक दुम वा। तन्न गो आल कली दूध तुंइब ममा खोदेशो पा,

इन कली कोव्रतक। 8 गोपुकीमी इन कली शुश दाक्शा, परमप्रभु यावे आ ग्येरपाइक्ब लोव्र शेंचा ला ममाइ, तन्न शेंचा आ पर्बम बेक्चा माल्तक हना यो, बेक्नीकी। २कोरिन्थी १२:१५

9 आंइ लोकबपुकी, गे नु बाक्शा, शुश गेय पाइतक, दे तुइक्नीनी। गोपुकीमी परमप्रभु यावे आ ग्येरपाइक्ब लोव्र शेंदकानु, इन कली श्येत मगेचा, दे नाक्दो नाक्त गेय पाइतक। प्रेरित १८:३; प्रेरित २०:३३-३४; १कोरिन्थी ४:१२; २थिस्सलोनिकी ३:८ 10 गो ठीक, रिम्शो नु परमप्रभु यावे आ गेय ला पाइतक। परमप्रभु यावेमी मेको तुइक्ब। मिनु गे थमा सुइक्बमी यो तुइक्नीनी।

11 मिनु गोपुकीमी आल आन कली रिम्शो अरेब आफ खोदेशो पा इन कली अरेतक। इन थुं बारपाइशशा 12 “परमप्रभु यावे आ मुर दुम्शा, मेको आ डोंइती शिरशो दुम्शा बाक्कीन” दे इन कली पन कि पन, दे शेंशा शुश अरेतक। परमप्रभु यावेमी इन कली आंम राज्य नु आ छेडछेडमी बाक्चा गेचा कली ब्रेण्ब। एफिसी ४:१-२; फिलिप्पी १:२७

थिस्सलोनिकी आन श्येत

13 गोपुकीमी आंइ शेंशो परमप्रभु यावे आ लोव्र नेंशा, मुर आ लोव्र ममाइ, थमा पा परमप्रभु यावे आ लोव्र बाक्ब, दे तुइक्ताक्नी। थमा सुइशशा मेको लोव्रमी इन थुंमी गेय पना पन बाक्ब। मो दुम्मेनु, गोपुकीमी परमप्रभु यावे कली “गे थिस्सलोनिकी डा मुर आन कली रिम्शो पाइतीनी” देंना देंन बाक्नीकी। गलाती १:११-१२ 14 आंइ लोकबपुकी, गे यहूदीया डा परमप्रभु यावे आ गुम्तीक डा ख्रीस्त येसुमी बाक्ब थमा सुइक्ब खोदेशो दुम्तीनी। मारदे हना यहूदीया डा मुरपुकीमी आंम रागी डा थमा सुइक्ब आन कली श्येत गेशो खोदेशो पा, इन रागी डा मुरपुकीमी यो इन कली श्येत गेम्तेक्म। प्रेरित ८:१; प्रेरित १७:५-६

15 यहूदीया डा मुरपुकीमी प्रभु येसु कली नु परमप्रभु यावे आ लोव्र पाइब आन कली साइशशा, आंइ कली खेरतेक्म। मेकोपुकीमी मोपा परमप्रभु यावे कली मग्येरपदेम, मुर नेल्ल आन कली श्येत गेम्तेक्म। प्रेरित २:२३; मत्ती २३:३७; प्रेरित ७:५२ 16 दोपा श्येत गेम्तेक्म देंशा हना, रागी रागी डा मुर आन कली पाप रे ब्रोंइचा ताइनीम, दे आंइ कली लोव्र पचा मगेम। मोदेशो पा यहूदीम आन पाप गेना हना यो तेम्ना तेम्न बाक्नीम। मोपतीके परमप्रभु यावेमी मेको आन कली चुरशा सजाइ गेब। मत्ती २१:३२-३३

17 आंइ लोकबपुकी, गोपुकी नु मबाक्थु, गोपुकी रोइक्च खोदेशो दुम्तक। इन बाक्तीकेमी जाक्चा मतथु, इन कली शुश मिम्शा गुम गुम दाक्तक। 18 गो इन कली गुम गुम दाक्बमी गो पावल चहिं शुश पिचा दाक्शो बाक्ती। तन्न सैतानमी आंइ कली गुम्थ पिचा मगेव। 19 इं प्रभु येसु आ यिची ना गे आंइ आस पतीके, ग्येरतीके नु सिरपेच खोदेशो बाक्नीनी। फिलिप्पी २:१६; फिलिप्पी ४:१ 20 इन कली तशा, ग्येरशा आंइ नें बोरपाइक्नीकी।

3

तिमोथी लशा लेशशो

1 मोपतीके गो इन कली श्येत जशो तशा, फाल्ने मचाप्क। गो निक्शी एथेन्स सहरम बाक्स्कु, दे सल्ला पाइतक। प्रेरित १७:१४-१६ 2 गो निक्शीमी आंस लोकब, गो नु परमप्रभु यावे आ गेय पाइब, ख्रीस्त आ ग्येरपाइक्ब लोव्र शेंब, तिमोथी कली इन थमा सुइक्तीक बारपाइक्चा नु इन कली अरेचा कली सोइक्ताक्स्कु। प्रेरित १६:१-३ 3 सुइमी श्येत जशा थमा सुइक्चा मप्रोन्मेक्ल। मारदे हना गोपुकीमी श्येत जचा माल्नय, दे तुइक्नीनी। प्रेरित १४:२२; एफिसी ३:१३; हिब्रू १०:३९; २तिमोथी ३:१२ 4 डोंइती रे गो नु बाक्नीनु “श्येत जचा माल्नय” दे शेंताक्क। मुल आंइ शेंशो दुम्त। मेको यो तुइक्नीनी। 5 गो इन कली श्येत जशो तशा फाल्ने मचबु। मोपतीके तिमोथी कली इन थमा सुइक्तीक दोपा बाक्म, दे तुइक्चा कली कोव्रथ सोइक्ताक्ड। मुर आन कली पाप पपाइक्बमी इन कली बिग्रेवा कों, आंइ पशो गेय यो मोशा लम कों, दे गो हिंती। फिलिप्पी २:१६

6 मिनु तिमोथी इन कली गुम्थ पिशा, लेशशा जाक्त। मेकोमी इन थमा सुइक्तीके नु इन दाक्तीके रिम्शो बाक्ब। गोपुकी आंइ कली गेना हना यो शुश मिम्नीनी, गोपुकी खोदेशो पा आंइ कली गुम्चा दाक्नीनी, दे तिमोथीमी आंस कली देंत। प्रेरित १८:५ 7 आंइ लोकबपुकी, गोपुकी शुश श्येत जाइतक हना यो, इन थमा सुइक्तीक आ पर्बम लोव्र नेंशा ग्येरसाक्क। 8 मारदे हना गे प्रभु कली मप्रोंइब बाक्नीनी, दे तुइशशा, गोपुकी डोंइती रोइ पशा, मुल चहिं साशा ब्रोंइशो मुर खोदेशो बाक्नीकी। 9 गो परमप्रभु यावे आ डोंइती “गे थिस्सलोनिकी सहर डा थमा सुइक्ब आन कली रिम्शो पाइतीनी” दे शुश ग्येरशा, परमप्रभु यावे कली ठेयब सेल्नीकी।

10 मिनु नाकदो नाक्त गोपुकी परमप्रभु यावे कली “थिस्सलोनिकी सहर डा थमा सुइक्ब आन कली गुम्थ सोइक्तीन। मुल सम्म मशेंथु लीशो लोत्र शेंथ सोइक्तीन” दे पुंइना पुंइन बाक्नीकी। 11 इं आफ परमप्रभु यावे नु इं प्रभु येसुमी आंइ कली गोपुकी नु गुम्चा गेम्सेक्ल। 12 गोपुकीमी इन कली शुश दाक्शो खोदेशो पा प्रभुमी इन दाक्चा शुश बारपाइशशा, दाक्मुचा नु अरु आन कली यो दाक्ब दुमीन। 13 मोपा प्रभु येसु आ मुर नु जाक्ची ना इन थमा सुइक्तीक थुं बारपाइशशा, दोस गेचा मपुंइसीब, इं आफ परमप्रभु यावे आ डोंइती रिम्शो सेलल। १कोरिन्थी १:८; फिलिप्पी १:१०

4

परमप्रभु कली ग्येरपतीन

1 मिनु आंइ नोले डा लोत्र, आं लोक्बपुकी, प्रभु येसु आ नेमी इन कली शुश शेंतीक नु अरेतीक लोत्र पाइनीकी। गोपुकी आंइ कली दोपा बाक्शो तनी, मोपा बाक्शा, परमप्रभु यावे कली ग्येरपतीन। गोपुकी मेको क्येडा यो शुश रिम्शो पने। 2 गोपुकीमी प्रभु येसु आ नेमी इन कली मार अरेतीक लोत्र गेका, मेको गे तुइक्नीनी। 3 परमप्रभु यावे आ दाक्शो मार बाक्ब देशा हना, मरिम्शो मपचा नु ग्रांग्रा दिशो गेय रे डोन बाक्चा बाक्ब। 4 गे नेल्ल आंम मीश नु बाक्शा, हेंथे मगाक्थु, मान तचा कली शिरशो दुम्शा बाक्कीन। 5 अर्को रागी डा परमप्रभु यावे कली मतुइक्ब मुरपुकीमी खोदेशो पा ग्रांग्रा दिचा डा गेयमी मबाक्कीन। 6 सुइ वोंइश मुरुम आ लोक्ब कली मोदेशो पा श्येत मगेवल। मारदे हना प्रभुमी मोदेशो पाइब आन कली क्येक्क लेप्ब, दे डोंइती रे इन कली शेंताक्क। लेवी १९:११ 7 परमप्रभु यावेमी इं कली ग्रांग्रा दिचा डा गेय पचा कली मयोव्रड। पाप रे डोन बाक्चा कली योव्रतु। 8 मोपतीके सुमी मेको लोत्र मटीबा, मेकोमी मुर आ लोत्र मटीब ममाइ, परमप्रभु यावे कली मटीब बाक्ब। परमप्रभु यावेमी इन कली आ सोक्त गेब। लूका १०:१६

9 थमा सुइक्ब लोक्ब आन दाक्मुतीके आ पबर्म सुइ मुरुमी इन कली ब्रेक्चा ममाल्ब। मारदे हना परमप्रभु यावेमी इन कली दाक्मुचा माल्नीनी, दे आंमान शेंशो बाक्त। यूहन्ना १३:३४; लेवी १९:१८ 10 मिनु गोपुकी थमा पा मासीडोनीया रागी डा लोक्ब नेल्ल आन कली दाक्नीनी। गोपुकीमी मेको क्येडा यो दाक्तीन, दे इन कली अरेनीकी। 11 गोपुकी दुशा बाक्कीन। आंम खिं डा गेय ला मिम्तीने। आंमान गेय पना पन बाक्कीन। मेको इन कली अरेतीक लोत्र पाइतक। १थिस्सलोनिकी २:९; एफिसी ४:२८; २थिस्सलोनिकी ३:८,१२ 12 मो पाइतीनी हना, अरु मुरपुकीमी इन कली ठेयब सेल्लनीम। मिनु सुइ के मारेइ ममाल्नीनी। कलस्सी ४:५

येसु यिचा आ पबर्म

13 आंइ लोक्बपुकी, बेक्शो मुर आ पबर्म रागी रागी डा मुरपुकीमी हिशेक शुश पाइनीम। मारदे हना मेको आन के आस मबाक्ब। गोपुकी चहिं मतुइक्ब खोदेशो पा, बेक्शो इन वारच आन पबर्म थुं खाइक्पाइशशा मबाक्कीन। १कोरिन्थी १५:२०; एफिसी २:१२ 14 गोपुकी येसु बेक्शा सेंसाक्क, दे थमा सुइक्तय हना, परमप्रभु यावेमी येसु आ पतीकेमी बेक्शो मुर आन कली सेंशा चाक्ब। रोमी १४:९; १कोरिन्थी १५:३,९,१२ 15 मिनु गोपुकीमी इन कली प्रभु आ लोत्र रे “प्रभु आ यिचा सम्म बाक्बपुकी बेक्शो वारच आन क्येडा डोंइती प्रभु कली गुम्चा मताइनय” दे तुइक्पाइक्नीकी। मती १६:२८; मती २४:३०-३१; १कोरिन्थी १५:५१-५२; यूहन्ना १७:२४ 16 मारदे हना प्रभुमी आ मुर आन कली “कुन” दे ब्रेत्तानु, नेल्ल क्येडा ठेयब परमप्रभु यावे आ स्वर्ग डा गेय पाइबमी यो ब्रेप्ब। परमप्रभु यावे आ तुराही ताप्शो नेनीम। मेना प्रभु सरीड रे यीब। ख्रीस्त कली थमा सुइशशा बेक्शो मुरपुकी डोंइती सेंसीनीम। 17 नोले ब्रोंइशा लीशो गोपुकी मेको नु गोस्सुमी क्युक्सीशा, मेकोपुकी नु लाइनय। मेकोपुकी नु सरीडमी देल्ला बाक्शा, प्रभु कली गुम्नय। मोदेशो पा गोपुकी गेना हना यो प्रभु नु काथा बाक्चा ताइनय। यूहन्ना १२:२६ 18 मोपतीके मेको लोत्र पा थुं बारपाइक्मुने।

5

प्रभु आ नाक्त

1 आंइ लोक्बपुकी “गिश बर्स लीबा, गेना सम्म रिम्चा” दे इन कली ब्रेक्चा ममाल्नीकी। मती २४:३६ 2 मारदे हना गोपुकी प्रभु आ नाक्त खुइ खोदेशो पा जाक्ब, दे तुइक्नीनी। मती २४:४२-४४; २पत्रुस ३:१०; प्रकाश ३:३; प्रकाश १६:१५ 3 मेना मुरुमी “दुशा बाक्नय, मारेइ मदुम्ब” देंतेक्म हना यो, आल कुरशो मीश मुर आल थिचा रोइ गेना पाइबा मतुइक्ब। मोदेशो खोदेशो पा मुरपुकी मब्रोंइचा डा पा श्येत जाइनीम। येरमीया ६:१४; मती २४:३९ 4 गे लोक्बपुकी चहिं छिडछिडम मबाक्नीनी। मेको नाक्त खुइ जाक्शो खोदेशो पा इन कली महिंपाइक्ब। 5 मारदे हना

गे नेल्ल छेडछेड नु नाक्त डा मुर बाक्नीनी। गोपुकी नाक्दो नु छिडछिड डा मुर मनय। रोमी १३:१२; एफिसी ५:९ 6 मोपतीके अरु खोदेशो पा गो मइप्य, सासीशा “प्रभु यीब” दे मिम्ना मिम्न बाक्य। १पत्रुस ५:८ 7 इण्बपुकी नाक्दो इप्नीम, दुक्बपुकी नाक्दो दुक्शा बाक्नीम। 8 तन्न गोपुकी नाक्त डा मुर दुम्शा “प्रभु यीब” दे मिम्ना मिम्न बाक्शा, परमप्रभु यावे आ या डा पीतल के भोटो खोदेशो पा, थमा सुइक्तीके नु दाक्तीके फेक्शा बाक्य। पीतल के ताकी गुप्शो खोदेशो पा पाप रे प्रोंइशो बाक्नुड, दे तुइश्शा आस पय। एफिसी ६:१४-१७ 9 मारदे हना परमप्रभु यावे इं पबर्म मगाइक्ब। प्रभु येसु ख्रीस्त आ पतीके पाप रे ब्रोंइब सेल्लु। 10 मेको इं पबर्म साइक्चा पुंइसाक्व। मो दुम्तीके गोपुकी इप्तय हना यो, मइप्तय हना यो, मेको नु ब्रोंइचा ताइनय। रोमी १४:८-९ 11 मोपतीके अरेपमुशा, इन थुं बारपमुने। गोपुकी मोदेशो पना पन यो बाक्तीनी। हिब्रू ३:१३

नोले डा लोव

12 आंइ लोकबपुकी, इन कली शेंब नु लां कोइशा, अरेब आन कली रिम्शो पने, दे माइक्नीकी। १कोरिन्थी १६:१८ 13 मेकोपुकी नु शुश दाक्मुशा बाक्कीन। मारदे हना प्रभु आ गेय पाइब बाक्नीमी।

14 आंइ लोकबपुकी, गेय मपाइब आन कली अरेपने। हिंब मुर आन थुं बारपतीन। मचाण्ब आन कली वारच पने। नेल्ल आन कली फाल्शा बाक्कीन। २थिस्सलोनिकी ३:१५ 15 मुरुमी इन कली मरिम्शो पाम्तेक्म हना, गोपुकी मेको आन कली मरिम्शो मपने। रिम्शो पमुचा माल्नीनी। अरु आन कली यो रिम्शो पने। हितोपदेस २०:२२; रोमी १२:१७,२१; १पत्रुस ३:९ 16 मिनु गेना हना यो ग्येरसीन। फिलिप्पी ४:४ 17 प्रार्थना पना पन बाक्कीन। लूका १८:१-८; रोमी १२:१२; एफिसी ६:१८; कलस्सी ४:२ 18 मार दुम्त हना यो, परमप्रभु यावे कली “गे रिम्शो पाइब बाक्नीनी” देनीन। मारदे हना मेको परमप्रभु यावे आ दाक्शो बाक्ब। ख्रीस्त येसु आ नोले खोइक्ब मेको गेना हना यो देंचा माल्नीम। एफिसी ५:२०

19 परमप्रभु यावे आ सोक्त कली मकाप्तीन। १कोरिन्थी १४:१,३९ 20 परमप्रभु यावेमी तुइक्पाइश्शो लोव पचा गेन। 21 तन्न परमप्रभु यावे आ लोव नु गारबा देय मगारबा, दे नाक्शा कोवडीन। गारत हना, मप्रेदीने। 22 नेल्ल ग्रॉग्रा दिचा डा गेय क्येडा डोन बाक्कीन।

23 थुं नाइक्पाइक्ब परमप्रभु यावेमी इन कली थम रिम्शो सेलल। इन सोक्त, थुं नु रां इं प्रभु येसु ख्रीस्त मयिम सम्म रिम्शो नु दोस मताइब दुम्शा बाक्मल। 24 इन कली ब्रेण्ब इन कली देंशो पाइब बाक्ब। मेकोमी थमा पाइब। १कोरिन्थी १:९; २थिस्सलोनिकी ३:३ 25 आंइ लोकबपुकी, आंइ पबर्म परमप्रभु यावे कली पुनीन। 26 लोकब नेल्ल आन कली प्रभु आ नेमी मुम्मुशा आसीक गेने। 27 प्रभु आ नेमी एको चिठी लोकब नेल्ल आन कली पढेशा नेपतीन। 28 इं प्रभु येसु ख्रीस्त आ शिशी गोपुकी नु लील।

२ थिस्सलोनिकी

ब्रेक्ब मुर: एको चिठी पावल थिस्सलोनिकी आन कली आ नोले ब्रेक्शो चिठी बाक्ब।

गेना ब्रेक्शो: थिस्सलोनिकी डा थमा सुइक्ब आन कली डोंइती ब्रेक्शो चिठीम ब्रेक्शो खोदेंशो बाक्तेक्म। पावल सिल्वानस नु तिमोथी बाक्शो कोरिन्थ सहरम बाक्शो बाक्त। मोपतीके एको चिठी ५३ ए. डी. डा बर्स डा नोले डा महिनाम ब्रेक्शो बाक्ब, दे मिम्नीम।

मार ब्रेक्शो: डोंइती डा चिठीम नोले थिस्सलोनिकी डा थमा सुइक्बम रिम्शो पाम्तेक्म हना यो, का निक्शी चहिं हेंथे पाम्तेक्म। मुल पावलमी गुम्तीक डा शेंब कली थमा सुइक्ब आन कली गेय रिम्शो पचा कली ठीक सेल्चा माल्ब, दे ब्रेक्शो बाक्ब।

डोंइती डा लोव

1 गो पावल नड। सिल्वानस नु तिमोथी यो गो नु बाक्नीस। गो इं आफ परमप्रभु यावे नु प्रभु येसु ख्रीस्त कली थमा सुइक्ब थिस्सलोनिकी सहर डा इन कली चिठी ब्रेक्ताक्ड। १थिस्सलोनिकी १:१ 2 इं आफ, परमप्रभु यावे नु प्रभु येसु ख्रीस्तमी इन कली शिशी पा, इन थुं नाइश्शा बाक्चा गेम्सेक्ल।

श्येतम खोइल थेक्शा बाक्शो

3 आंइ लोकबपुकी, इन कली मिम्शा, परमप्रभु यावे कली “गे रिम्शो पाइब बाक्नीनी” देंचा ठीक बाक्ब। मारदे हना इन थमा सुइक्तीके हु बारशा, इन दाक्मुतीक यो बारना बारन लाइब। १थिस्सलोनिकी १:२-३ 4 मोदेंशो दुम्शा, गेपुकी खेदा पचा पुंइसीशा, श्येत फाल्शोमी खोइल थेक्शा थमा सुइक्ब बाक्नीनी, दे गोपुकीमी परमप्रभु यावे कली थमा सुइक्ब आन गुम्तीकेमी इन पबर्म ग्येरशो लोव पाइनीकी। २कोरिन्थी ७:४ 5 गेपुकी परमप्रभु यावे आ राज्यम शिरशो मुर दुम्तीनी। मिनु मेको राज्य आ पबर्म श्येत जाइनीनी। परमप्रभु यावेमी इन कली श्येत जचा गेपु हना यो, ठीक निसाफ पाइब बाक्ब। फिलिप्पी १:२८

निसाफ पची नाक्त

6 परमप्रभु यावेमी थमा पा इन कली श्येत गेब आन कली क्येक्क लेप्ब। रोमी १२:१९; प्रकाश १८:६-७ 7 गे श्येत जाइब इन कली नु आंइ कली इं थुं नाइक्चा गेब। गेना थुं नाइक्चा गेब देशा हना, प्रभु येसु नु आ सक्ति पाइश्शो स्वर्ग डा गेय पाइबपुकी सरीड रे ग्रीची ना इं थुं नाइक्चा गेब। मत्ती १६:२७; मत्ती २५:३१-४६; १थिस्सलोनिकी ४:१६ 8 मेको नु हुरुर पा ब्रशो मी सरीड रे यीब। प्रभुमी परमप्रभु यावे कली मतुइक्ब नु आ ग्येरपाइक्ब लोव मटीब आन कली क्येक्क लेप्ब। रोमी २:८ 9 मेको मुरपुकी गेना हना यो साम्सीशो दुम्शा, प्रभु आ कुल मताइनीम। आ सक्ति डा छेडछेड यो मताइनीम। 10 थमा सुइक्बपुकी चहिं आ जाक्ची नाक्त आ नें ठेयब सेल्शा, थमा सुइक्ब नेल्लेमी आ छेडछेड तशा छक लाक्नीम। मारदे हना गेपुकी आंइ शेंशो लोव थमा सुइक्तीनी।

11 मोपतीके गो इन पबर्म प्रार्थना पना पन बाक्नीकी। परमप्रभु यावेमी इन कली ब्रेश्शा, आ ब्रेश्शो शिरशो सेलल, दे गोपुकीमी गेना हना यो, पुंइना पुंइन बाक्नीकी। इन रिम्शो पतीके नु इन थमा सुइश्शो डा गेय आ सक्तिमी पपदल। 12 मो दुम्शा, इं प्रभु येसु आ नें इन पबर्म ठेयब सेल्नीम। गेपुकी आ मुर दुम्शा, मान ताइनीनी। मेको इं परमप्रभु यावे नु प्रभु येसु ख्रीस्त आस शिशी डा गेय बाक्ब।

2

येसु ख्रीस्त यिचा आ पबर्म

1 आंइ लोकबपुकी, इं प्रभु येसु ख्रीस्त यिशा, गोपुकी नु गुम्चा आ पबर्ममी १थिस्सलोनिकी ४:१३-१७ 2 इन थुं मक्कन। सोक्तीमी कोंइताक्व देंखु पाइनीम। आंइ ब्रेक्शो चिठी जाक्त, देंखु पाइबमी “प्रभु आ नाक्त जाक्शा नुप्त” दे लोव पाम्तेक्म हना यो, थमा मसुतीन। २पत्रुस ३:१५-१६ 3 इन कली दूली शेंतीके शेंब आन कली थमा मसुतीन। मारदे हना प्रभु येसु ख्रीस्त आ नाक्त जाक्चा क्येडा डोंइती परमप्रभु यावे कली मटिथु नेल्ल क्येडा मरिम्शो पाइब का गूब। मेको कली जाम्शा लाइब आ तौ यो देंनीम। १तिमोथी ४:१; १यूहन्ना २:१८ 4 मेकोमी “मानेचा डा मारेड मबा” देंब। परमप्रभु यावे नु मानेचा डा थोव्रक आन क्येडा आंम कली ठेयब सेल्शा, परमप्रभु यावे आ खिंमी निश्शा

“गो का ला परमप्रभु यावे नड” देंब। दानीएल ११:३६; मत्ती २४:१५ 5 गेपुकी नु बाकडानु, इन कली मोदेशो लोव्र पाता। गेपुकी आं शेशो ममिम्नीनी? 6 मेको नेल्ल क्येडा मरिम्शो पाइब कली तेक्ब कली तुइक्नीनी। मेको तेक्बमी मेको कली देंशो ना ला गूचा गेब। 7 आ मरिम्शो गेय चहिं मुल बाकब। तन्न मतांडसीब। तेक्ब मयाक्से सम्म मेको गूने मचापब। 8 नेल्ल क्येडा मरिम्शो पाइब गूचा तवा नोले, प्रभु येसुमी आ जाक्शो नु आ मुइश्शोमी साइक्ब। यसैया ११:४; प्रकाश १९:१५, २० 9 मेको नेल्ल क्येडा मरिम्शो पाइबम चहिं सैतान आ सक्ति तशा, चिन्ड नु छक लाक्चा डा गेय पखु पाइब। मत्ती २४:२४; प्रकाश १३:११-१४ 10 जाम्शा लाइब आन कली जोल शेंब। मारदे हना मेकोपुकीमी थमा शेंतीक नेंचा मदाक्तेम। मिनु पाप रे ब्रोंइतीक ताक्चा मदाक्तेम। 11 परमप्रभु यावेमी मेको आन कली दूली शेंतीक थमा सुइक्पाइक्ब। २तिमोथी ४:४ 12 दूली शेंतीक थमा सुइक्बपुकी जाम्शा लाइनीम। मारदे हना थमा लोव्र थमा मसुइक्थु, मदुम्शो गेय दाक्ताक्मे।

थमा शेंतीकेमी बाक्चा

13 प्रभु आ दाक्शो लोकबपुकी, गोपुकीमी गेना हना यो इन कली मिम्शा, परमप्रभु यावे कली “गे रिम्शो पाइब बाक्नीनी” देंनीकी। मारदे हना परमप्रभु यावेमी इन कली डोंइती रे आ मुर दुम्नीम, दे योव्रतु। दोपा आ मुर दुम्नीनी देंशा हना, परमप्रभु यावे आ सोक्तीमी इन कली पाप रे डोन वोइश्शा, थमा शेंतीके थमा सुइक्पाइक्तु। रोमी ८:३०

14 गोपुकीमी इन कली ग्येरपाइक्ब लोव्र पकानु, मेकोमी इं प्रभु येसु ख्रीस्त आ छेडछेड पाइश्शो मुर दुम्मल, दे इन कली ब्रेत्ताक्ब। 15 आंइ लोकबपुकी, खोइल थेक्शा बाक्कीन। आंइ शेंशो मप्रोनीन। गो शोव्रम शेंशो नु चिठीम ब्रेक्शा शेंशो मप्रोनीन। २थिस्सलोनिकी ३:६ 16 इं प्रभु येसु ख्रीस्त नु इं आफ परमप्रभु यावे आस शिशीमी इं कली दाक्शा, गेना हना यो थुं बारपाइश्शा, रिम्शो आस गेम्ताक्स। 17 इन थुं बारपाइश्शा, इन कली रिम्शो गेय नु रिम्शो लोव्र पचा गेम्सेक्ल।

3

पावलमी प्रार्थना पुंइशो

1 मिनु आंइ लोकबपुकी, आंइ कली मिम्शा, प्रार्थना पने। आंइ पर्वम परमप्रभु यावे कली मार पुंइचा देंशा हना, इन दातेमी खोदेशो पा, प्रभु आ लोव्र तेइ तेइ साव सुव ब्रशा लल। एफिसी ६:१८-१९; कलस्सी ४:३; १थिस्सलोनिकी ५:२५ 2 गोपुकी दूली पाइब नु मरिम्शो मुर रे ब्रोंइचा तकल, दे प्रार्थना पने। मारदे हना मेकोपुकी थमा मसुइक्ब बाक्नीमी। 3 प्रभुमी चहिं इन कली दाक्शा मप्रोंइब। इन थुं बारपाइक्ब। मरिम्शो रे डोन वोइश्शा, इन कली कोव्रब। १थिस्सलोनिकी ५:२४; यूहन्ना १५:१७ 4 गोपुकीमी इन कली मार देंका, मेको पना पन बाक्शा, नोले यो पाइनीनी। प्रभुमी इन कली वारच पाइब, दे तुइक्नीकी। २कोरिन्थी ७:१६; गलाती ५:१० 5 प्रभुमी इन कली परमप्रभु यावे आ दाक्तीके नु ख्रीस्त आ फाल्तीक रूप्पदल।

गेय मपथु मबाक्चा

6 आंइ लोकबपुकी, गोपुकीमी इं प्रभु येसु ख्रीस्त आ नेमी इन कली मार देंनीकी देंशा हना, गेपुकी नु बाक्शो लोकब सु सुम गेय पचा मदाक्थु बाक्मा, मोदेशो पा आंइ शेंशो मटीमे, मेको नु काइ मबाक्कीन। २थिस्सलोनिकी २:१५; मत्ती १८:१७; रोमी १६:१७ 7 गेपुकी दोपा आंइ खोदेशो दुम्चा माल्नीनी, मेको आंमा तुइक्नीनी। इन दातेमी बाक्कानु, शुश गेय पाइतक। १थिस्सलोनिकी १:६ 8 सुइ आन के मोश मजक। गोपुकीमी नाक्दो नाक्त मदेंथु, सुइ कली श्येत मगेचा, दे गेय पना पन बाक्तक। १थिस्सलोनिकी २:९ 9 मोश जचा अधिकार बाक्त हना यो, दोपा रिम्शो पचा इन कली कोंइचा, दे मोदेशो पाइतक। मत्ती १०:१०; प्रेरित २०:३५; फिलिप्पी ३:१७ 10 गोपुकीमी “सुमी गेय मपाइबा, मेकोमी जचा मतवल” दे डोंइती रे गेपुकी नु बाक्शा देंतक। 11 इन दातेमी का निक्शीमी काइ गेय मपथु, हिरशा गाक्शा मो बाक्नीम, देंशो नेंतक। 12 गोपुकीमी मोदेशो मुर आन कली प्रभु येसु ख्रीस्त आ नेमी “रिम्शो गेय पने। आंम आंम जचा थोव्रक जशा बाक्कीन” दे अरेनीकी। १थिस्सलोनिकी ४:११ 13 आंइ लोकबपुकी, रिम्शो गेय पचा कली गेनायो मदने। गलाती ६:९

14 मिनु सु सुमी आंइ ब्रेक्शो लोव्र मटीमे, मेको आन कली तुइश्शा वोतीन। मिनु मेकोपुकी नु मबाक्कीन। मोदेशो पशो तशा, मेको मुरपुकी मुने दोक्नीम। 15 मोदेशो पशा यो, मेको मुर कली जोरी सत्रु खोदेशो पा ममिम्तीन। थमा सुइक्ब लोकब कली खोदेशो अर्ती गेने। १थिस्सलोनिकी ५:१४

नोले डा लोव

16 थुं नाइक्चा गेब प्रभुमी दोदेशो बाक्तीनी हना यो, इन कली गेना हना यो थुं नाइक्चा गेवल। प्रभु गेपुकी नेल्ल नु बाक्ल। यूहन्ना १४:२७ 17 गो पावलमी एको चिठी आंमान ब्रेक्ताक्ड। तेको चिठी ब्रेक्ताक्ड हना यो, ओदेंब ब्रेक्नुड, दे तुइक्नीनी। १कोरिन्थी १६:२१; गलाती ६:११; कलस्सी ४:१८ 18 इं प्रभु येसु ख्रीस्त आ शिशी गेपुकी नेल्ल नु लील।

१ तिमोथी

ब्रेक्ब मुर: एको चिठी पावलमी तिमोथी कली डोंइती ब्रेक्शो बाक्त।

गेना ब्रेक्शो: तिमोथीम पावल नु गेय पवा बाक्त। मेकोमी थिस्सलोनिकी सहर डा थमा सुइक्ब आन कली शेंशो बाक्त। पावलमी मेको कली अर्को सहरम यो शेंथ सोइक्ता बाक्त। पावलमी एको चिठी गेना ब्रेक्शो बाक्मे, मेको बर्स मदेशो बाक्त।

मारदे ब्रेक्शो: शेंतीक लोव्र तिमोथी १:१-२

१. ठीक शेंतीके मार बाक्ब तिमोथी १:३-२०

२. गुम्तीक खिं डा मुर दोपा बाक्चा माल्नीम तिमोथी २:१ - तिमोथी ३:१६

३. रिम्शो थमा सुइक्तीके मार बाक्ब तिमोथी ४:१-११

४. मुर आन कली मार शेंचा माल्ब तिमोथी ४:१२ - ६:२

५. धर्म पतीके शोर गाक्शो बाक्ब तिमोथी ६:३-२१ नेल्ल जम्मा पा गे येसु ख्रीस्त आ पबर्म ला शेंदो। आंम पतीके होस पावो।

डोंइती डा लोव्र

१ ख्रीस्त आ सोइश्शो गो पावल नड। इं कली पाप रे प्रोंइब परमप्रभु यावेमी “ख्रीस्त येसु आ सोइश्शो दुमो” दे माइक्ती। इं कली ब्रोंइचा गेनुड, दे कबल पाइब ख्रीस्त येसुमी यो मोन माइक्ती। कलस्सी १:२७

२ गे थमा सुइक्ब, आं दाक्शो तौ खोदेशो तिमोथी, इ कली चिठी ब्रेक्ताक्ड। इं आफ परमप्रभु यावे नु प्रभु येसु ख्रीस्त आस दाक्चा गे नु बाक्ल। आस शिशीमी इ कली थुं नाइश्शा बाक्चा गेम्सेक्ल। प्रेरित १६:१-२; तीतस १:४

दूली शेंब आन पबर्म ब्रेक्शो

३ गो मासीडोनीया रागी लडानु, गे एफिसस सहरम बाक्को। मेकेर मुर का निक्शीमी दूली लोव्र शेंनीम। मोदेशो मशेंदीन, दे अरेवो। प्रेरित २०:३ ४ मेकोपुकीमी मुरुमी सेल्शो लाइश्शो कथा नु किकी पिपी आन पबर्म शेंना शेंन बाक्नीम। मोदेशो शेंतीके काम मलाप्चा डा बाक्शा, परमप्रभु यावे आ शेंशो थमा सुइक्तीके मबारपाइक्ब। १तिमोथी ४:७ ५ इं शेंतीके चहिं रिम्शो थुं, रिम्शो थुं डा मिम्तीके नु रिम्शो थमा सुइक्तीके रे जाक्शो शुश दाक्मुचा आ पबर्म बाक्ब। मती २२:३७-४०; रोमी १३:१०; गलाती ५:६ ६ का निक्शीमी मेको शेंतीक प्रोंइशा, शोर गाक्शो लोव्र पाइनीम। १तिमोथी ६:४, २० ७ मेकोपुकीमी परमप्रभु यावे आ अरेशो लोव्र शेंब दुम्चा दाक्नीम, तन्न आंम देशो लोव्र नु आंम शेंशो आंमान मरुप्ब बाक्नीम।

८ परमप्रभु यावे आ अरेशो लोव्र ठीक पाइब आन कली रिम्शो दुम्ब, दे गो तुइक्नय। रोमी ७:१२ ९ ठीक पाइब आन कली मब्रेक्शो बाक्ब, दे यो तुइक्नय। तन्न परमप्रभु यावे आ अरेशो लोव्र मपाइब, मटीब, परमप्रभु कली ममिम्ब नु मरिम्शो पाइब आन कली ब्रेक्शो बाक्ब। परमप्रभु यावे रे डोन बाक्ब, रागी कली ला मिम्ब, आम आफ कली साइक्ब, आंम ममा कली साइक्ब नु मुर आन कली साइक्ब आन कली ब्रेक्शो बाक्ब। १कोरिन्थी ६:९-११ १० तेल्लेम पाइब, ग्रांग्रा दिचा डा गेय पाइब, मुर आन कली खुइ पा लेयब, जोल पाइब, जोल पा कसम जाइब नु आन गेय परमप्रभु यावे आ शेंशो नु मगारब मुर आन कली ब्रेक्शो बाक्ब। ११ मेको थमा शेंतीके नु नेल्ल आसीक पाइश्शो परमप्रभु यावे आ ग्येरपाइक्ब लोव्र शेंब सेलती।

परमप्रभु आ दाक्तीक ठेयब बाक्ब

१२ एको लोव्र शेंचा कली बोल गेब इं प्रभु ख्रीस्त येसु कली “गे रिम्शो पाइब बाक्नीनी” देंनुड। मारदे हना ख्रीस्त येसुमी आं पबर्म “थमा सुइक्चा डा मुर बाक्ब” दे आ गेय पाइब सेलती। प्रेरित ९:१५; १कोरिन्थी १५:९-१०; गलाती १:१३-१६ १३ डोंइती गो मेको कली शुक्शी पाइब, श्येत गेब नु शुश मरिम्शो पाइब बाक्ती। तन्न मतुइक्ब नु थमा मसुइक्ब बाक्तीके परमप्रभु यावे आ शिशी ताता। १४ इं प्रभुमी आ दाक्शो थमा सुइक्तीके नु दाक्तीके थुं ब्रीशा, क्युप्चा डा पा गेती। मेको निम्फा ख्रीस्त येसु नु बाक्नीस। १५ मरिम्शो पाइब आन कली नरक रे प्रोंइचा, दे ख्रीस्त येसु रागीम जाक्त। एको लोव्र थमा बाक्ब नु थमा सुइक्चा माल्शो बाक्ब। गो नेल्ल क्येडा मरिम्शो पाइब नड। लूका १९:१० १६ गो परमप्रभु यावे आ शिशी मारदे ताता देंशा हना, गो नेल्ल क्येडा मरिम्शो पाइब दुम्ती हना यो, येसु ख्रीस्त आ

फाल्तीक सक्ति कोंइचा, दे शिशी ताता। मेको कोंइतीके नोले थमा सुइक्ब नु गेना हना यो, परमप्रभु यावे नु बाक्चा ताइब आन कली बाक्ब। 17 गेना हना यो मबेक्थु बाक्ब पिप कली सुइमी तने मचाप्नीम। मेको कांडीक परमप्रभु, परमप्रभु यावे बाक्ब। गेना हना यो मान ताक्चा नु छेडछेड मेको केन बाक्ब। आमेन।

18 आं तौ तिमोथी, परमप्रभु यावेमी इ पर्वम पशो लोव्र तुइक्पाइक्ती। मेको लोव्र इ कली मिम्पाइक्नुड। मेको लोव्र मिम्शा ग्राने चाप्नेवे। १ तिमोथी ४:१४; १ तिमोथी ६:१२; यहूदा ३ 19 थमा सुइक्तीके नु इ थुं डा रिम्शो मिम्तीके टिशा बाक्को। आन थुं डा रिम्शो मिम्तीके कली मटीब का निक्शीमी थमा सुइक्चा प्रोंइतेक्म। १ तिमोथी ३:९; १ तिमोथी ६:१० 20 मेको आन दातेमी हीमेनेयस नु अलेक्जन्डर बाक्नीसी। परमप्रभु यावे आ पर्वम मरिम्शो लोव्र मपचा, दे शेंचा कली, गो मेको आस कली सैतान आ गुइमी जिम्मा गेतासी। २ तिमोथी २:१७; १ कोरिन्थी ५:५

2

थमा सुइक्ब आन पुंडशो

1 आं के नेल्ल क्येडा ठेयब अरेशो लोव्र मार बाक्ब देंशा हना, परमप्रभु यावे नु बाक्शा, मेको नु लोव्र पचा नु नेल्ल मुर आन पर्वम पुंडना पुंडन बाक्चा माल्नय। मेको आन पर्वम “गे मेको आन कली रिम्शो पाइतीनी” दे परमप्रभु यावे कली ठेयब सेल्चा माल्नय। 2 पिप नु सरकार डा ठेयब अधिकार पाइश्शो मुर आन पर्वम यो मोदेशो पुंडतीक लोव्र पचा माल्नय। मो पा गो रिम्शो, थुं नाइश्शा, इं गेयमी परमप्रभु यावे कली मिम्चा, दाक्चा नु नेल्ल गेयमी ठीक दुम्शा बाक्च। 3 मोदेशो मरिम्शो गेय प्रोंइब परमप्रभु यावे आ डोंइती रिम्शो नु दाक्चा डा बाक्ब। 4 परमप्रभु यावेमी नेल्ल मुर आन कली मरिम्शो गेय रे प्रोंइश्शा, थमा लोव्र तुइक्पाइक्चा दाक्ब। इजीकीएल १८:२३; रोमी ११:३२; २ पत्रुस ३:९ 5 परमप्रभु यावे का ला बाक्ब। मेको नु मुर आन कली गारपाइक्चा कली येसु ख्रीस्त रागीम जाक्शा, मुर दुम्शो यो का ला बाक्ब। हिब्रू ९:१५ 6 मेकोमी मुर नेल्ल आन कली पाप रे प्रोंइचा, दे आंम कली जिम्मा गेप्टु। एको लोव्र मेना रे शेंचा गोम्तेक्म। गलाती १:४; गलाती २:२०; तीतस २:१४ 7 मोपतीके परमप्रभु यावेमी एको लोव्र शेंब नु ख्रीस्त आ सोइश्शो सेल्टी। गो जोल मपथु, थमा लोव्र पाइनुड। इस्राएली आन कली ममाइ, तन्न रागी रागी डा मुर आन कली थमा सुइक्तीके आ पर्वम शेंब नु थमा लोव्र शेंब सेल्टी। २ तिमोथी १:११; गलाती २:७-८

थमा सुइक्ब आन कली शेंशो

8 तेइ तेइ डा वोंइश मुरपुकीमी प्रार्थना पचा माल्नीम। परमप्रभु यावे कली थुं नेल्लेम थमा सुइक्ब गे गुइ पोक्शा, मगाइक्ब नु मजीब दुम्शा, परमप्रभु यावे नु लोव्र पशो तचा दाक्नुड। 9 मीश मुरपुकी यो ठीक पा फेक्शा, गेय पचा डोंइती मिम्शा, रिम्शो बाक्चा माल्नीम। मोपा चांमी मार मार वोइश्शा लामा प्रोव्रशा, सुन मोती नु शुश क्येट लाइब वामी मग्योम्समल। १ पत्रुस ३:३-५ 10 परमप्रभु यावे कली मिम्ब मीश मुर रिम्शो पतीकेमी “गो परमप्रभु यावे कली दाक्ब नड” दे कोंइनीम। १ तिमोथी ५:१० 11 मीश मुरपुकीमी टीब दुम्शा, रिम्शो पा नेंशा शेंसमल। एफिसी ५:२२ 12 वोंइश मुर आन कली शेंतीक अधिकार मीश मुर आन कली मगेनुडमी। मेकोपुकी सिक्सी पा बाक्मल। १ कोरिन्थी १४:३४; उत्पत्ती ३:१६ 13 डोंइती आदम, नोले हव्वा सेल्शो बाक्त। 14 आदम डोंइती हेंथे मगाक्शो बाक्त। मीश मुर चहिं मिक्च सिल्चा पुंडसीशा, परमप्रभु यावे कली मटीब दुम्शो बाक्त। उत्पत्ती ३:६ 15 मो हना यो मीश मुरपुकी रागीम आल जरमेसे डा मेरे ब्रोंइचा ताइनीम। तन्न मेकोपुकी थमा सुइक्ब दुम्शा, दाक्मुशा, परमप्रभु यावे आ मुर दुम्शा नु ठेयब मलेत्थु बाक्चा माल्नीम। १ तिमोथी ५:१४; तीतस २:४-५

3

थमा सुइक्ब आन कली कोव्रब शेंशो

1 सुमी थमा सुइक्ब आन कली कोव्रब दुम्चा दाक्बा, मेको ठेयब नु रिम्शो गेय माल्ब बाक्ब। एको लोव्र थमा बाक्ब। प्रेरित २०:२८; तीतस १:५-९ 2 थमा सुइक्ब आन कली कोव्रब काइ दोस गेचा मपुंडसीशो बाक्चा माल्ब। मीश का के ला वोंइश बाक्चा माल्ब। गेय पचा डोंइती मिम्ब, आ गेय नेल्ल कली रिम्शो पाइब, मुर आन कली बास गेब नु रिम्शो शेंब बाक्चा माल्ब। 3 राकसी शांबु तूशा दुक्ब नु तुप्ब मुर थमा सुइक्ब आन कली कोव्रब दुम्ने मचाप्ब। थमा सुइक्ब आन कली कोव्रब रिम्शो थुं पाइश्शो बाक्चा माल्ब। जिचा पोक्ब नु क्येट शुश दाक्बमी एको गेय पने मचाप्ब।

4 आंम खिं डा मुर आन कली रिम्शो कोव्रब बाक्चा माल्ब। आंम आलपुकी टीब नु मुर नु रिम्शो पाइब बाक्चा माल्नीम। 5 मारदे हना आंम खिं डा मुर आन कली रिम्शो कोव्रने मचाप्ब बाक्त हना, दोपा परमप्रभु यावे आ खिं डा मुर आन कली कोव्रने चाप्बा डा? 6 थमा सुइक्चा नक गोशो मुर थमा सुइक्ब आन कली कोव्रब दुम्ने मचाप्ब। मारदे हना मेको बोरशा ठेयब लेशो दुम्ब। मिनु सैतानमी मेको कली रेशशा, खतम सेल्ब। 7 थमा मसुइक्बपुकीमी यो थमा सुइक्ब आन कली कोव्रब आ पर्वम रिम्शो लोव्र पचा माल्नीम। मोदेशो मदुम्त हना, दोस गेचा पुंइसीब। मिनु सैतान आ ग्याइलीम रेप्ब।

गुम्तीकेम गेय पाइब आन कली शेंशो

8 थमा सुइक्ब आन गुम्तीक खिं डा गेय पाइबपुकी यो रिम्शो मुर बाक्चा माल्नीम। लोव्र क्याल्ब, शुश राकसी शांबु तूब नु क्येट ला मिम्बमी मोदेशो गेय पने मचाप्नीम। प्रेरित ६:३; फिलिप्पी १:१ 9 मेकोपुकीमी रिम्शो थुंमी थमा सुइश्शा, मेकेर डा खुइश्शो लोव्र मिम्ने चाप्ब दुम्चा माल्नीम। १तिमोथी १:२९ 10 डोंइती गे मेको आन थुं कोव्रचा माल्नेवे। मिनु शुश रिम्शो पाइब बाक्ब, दे तुइश्शा ला थमा सुइक्ब आन गुम्तीके खिंमी गेय पचा कली वोइक्ने चाप्नेवे।

11 आ मीश यो रिम्शो बाक्शा, डुलेथ मगाक्थु, गेय पचा डोंइती मिम्ब बाक्चा माल्ब। मेको आ गेय नेल्ले रिम्शो पा पचा माल्ब। तीतस २:३ 12 थमा सुइक्ब आन गुम्तीके खिंमी गेय पाइब मीश का आ वोइश्श दुम्चा माल्ब। मेकोमी आ आल नु आंम खिं डा मुर नेल्ल आन कली रिम्शो पा कोव्रब दुम्चा माल्ब। 13 मोदेशो पाइबमी थमा सुइक्ब आन गुम्तीकेमी आंम कली रिम्शो नें सेल्नीमी। ख्रीस्त येसु कली आंम थमा सुइक्तीके शुश बारपाइक्नीमी।

थमा सुइक्तीके आ खुइश्शो लोव्र

14 गो इ कली रीब पा गुम्नुड, दे आस पाइनुड। मिनु इ कली ओदेशो अरेतीक लोव्र मारदे ब्रेक्ताकड देंशा हना, 15 गो नोले दुम्ती हना, परमप्रभु यावे आ खिं डा मुरपुकी दोपा बाक्चा माल्नीमी, मेको तुइक्तमेक्ल। मेकोपुकी ब्रोइचा गेब परमप्रभु यावे आ गुम्तीक खिं डा मुर बाक्नीम। मेको थमा लोव्र डा थाम नु बोल्यो हिरशो गारो खोदेशो बाक्नीम। एफिसी २:१९-२२ 16 इ परमप्रभु यावे कली थमा सुइक्तीके थम खुइश्शो बाक्ब। मेको मार बाक्ब देंशा हना “मेको मुर दुम्शा, रागीमी जरमेसाक्ब। परमप्रभु यावे आ सोक्तीमी ‘परमप्रभु यावे आ तौ बाक्ब’ दे सांकछी गेप्तु। परमप्रभु यावे आ स्वर्ग डा गेय पाइबपुकीमी मेको कली ताम्तेक्म। आ नें मार बाक्बा, दे रागी रागी डा मुर आन कली शेंताक्मे। रागी रागी डा मुरपुकीमी मेको कली थमा सुइक्तेक्म। मिनु मेको परमप्रभु यावे आ छेडछेडमी लाइक्चा पुंइसाक्ब” देंशो बाक्ब। यूहन्ना १:१४; रोमी १:४; प्रेरित २८:२८; मर्कूस १६:१९; एफिसी १:२०-२१

4

दूली शेंब आन शेंतीक

1 परमप्रभु यावे आ सोक्तीमी “नोले डा नाक्तीम का निक्शी थमा सुइक्बपुकीमी थमा सुइक्चा प्रोंइनीम। मेको मुरपुकीमी हेंथे लां कोइब नु जोल पाइब वोल आन शेंशो नेंनीम” देंत। मत्ती २४:२४; २थिस्सलोनिकी २:३; २तिमोथी ३:१; २पत्रुस ३:३; १यूहन्ना २:१८; यहूदा १८ 2 मेको मुर आन थुं डा मिम्तीके खतम दुम्ब। मिनु जोल शेंनीम। 3 मेकोमी “ग्युंभे पचा मदुम्ब, का निक्शी थोव्रक जचा मदुम्ब” दे शेंनीमी। परमप्रभु यावेमी थमा सुइक्ब आन कली सेल्शा गेशो मेको जचा थोव्रक “गे रिम्शो पाइब बाक्नीनी” दे जचा ब्वचा दुम्ब। उत्पत्ती ९:३; १कोरिन्थी १०:३०-३१; कलस्सी २:२३ 4 तन्न परमप्रभु यावे आ सेल्शो नेल्ल रिम्शो बाक्ब। मुरुमी परमप्रभु यावे कली “गे रिम्शो पाइतीनी” दे नेल्ल जचा ब्वचा दुम्ब। उत्पत्ती १:३१; मत्ती १५:११; प्रेरित १०:१५ 5 मारदे हना परमप्रभु यावे आ लोव्र नु प्रार्थनामी मेको नेल्ल परमप्रभु यावे आ गेशोन बाक्ब, दे तुंइसीब।

तिमोथी आ गेय

6 गे एको लोव्र थमा सुइक्ब लोक्ब आन कली शेंताक्वी हना, ख्रीस्त येसु आ रिम्शो गेय पाइब दुम्नेवे। गे थमा सुइक्तीक डा लोव्र नु रिम्शो शेंतीके तुइक्ना तुइक्न आ नोले खोइक्नेवे। २तिमोथी २:१५ 7 तन्न मुरुमी सेल्शो नु मरिम्शो कथापुकी मनेनो। परमप्रभु यावे कली मिम्शा दाक्शा बाक्को। १तिमोथी ६:२०; २तिमोथी २:१६, २३; २तिमोथी ४:४; तीतस १:१४; तीतस ३:९ 8 रां कली रिम्शो पतीके इक्का ला रिम्शो बाक्ब। परमप्रभु यावे कली मिम्शा दाक्तीके नेल्ल क्येडा रिम्शो बाक्ब। मारदे हना मुल कली रिम्शो बाक्ब नु गेना हना यो परमप्रभु यावे नु बाक्चा कली नोले यो रिम्शो बाक्ब। १तिमोथी ६:६ 9 एको देंशो लोव्र थमा बाक्ब नु नेल्ल थमा सुइक्चा माल्शो बाक्ब। 10 एको लोव्र शेंशा

श्येत जशा, शेंतीक गेय पाइनय। मारदे हना ब्रोंइचा गेब परमप्रभु यावे कली आस पाइनय। मेको नेल्ल मुर आन कली प्रोंइब बाक्ब। मोपा थमा सुइक्बपुकी पाप रे ब्रोंइचा ताइनीम।

11 एको लोव्र अरेशा शेंदो। 12 गे ठिटा बाक्ते हना यो, लोव्र पतीकेमी, मुर नु गेय पतीकेमी, दाक्तीकेमी, थमा सुइक्तीकेमी नु ग्रांग्रा मदिशोमी थमा सुइक्ब नेल्ल आन कली कोंइतीक दुमो। मिनु तोक्शो लोव्र पचा मगेमी। तीतस २:१५; २तिमोथी २:२२ 13 गो मजाक्डा सम्म मुर आन कली परमप्रभु यावे आ लोव्र पढेशा, नेंपाइक्ना पाइक्न नु शेंना शेंन बाक्को। 14 थमा सुइक्ब आन शेंब खाल्पापुकीमी इ पिया तारी गुइ वोइशशा, परमप्रभु यावेमी तुइक्पाइशो लोव्र पशा, इ कली गेय पतीके सक्ति गेशो बाक्त। मेको गेय रिम्शो पा पावो। १तिमोथी १:१८; १तिमोथी ५:२२; प्रेरित ६:६; प्रेरित ८:१७; २तिमोथी १:६ 15 मोपा बाक्को। मेको इ पशो तशा, नेल्लेमी इ थमा सुइक्तीके बारशो तामेक्ल। 16 आम कली नु इ शेंतीके कली रिम्शो पा होस पावो। मोदेशो पा, गे आम इ कली नु इ लोव्र नेंब आन कली श्येत रे प्रोंइनेवे। रोमी ११:१४

5

मुर नेल्ल आन कली रिम्शो पावो

1 शेंब खाल्पा आन कली महुइक्तो, तन्न आम आफ कली खोदेशो पा लोव्र पावो। ठिटा वोंइश मुर आन कली लोक्ब खोदेशो मिम्तो। लेवी १९:३२; तीतस २:२ 2 मीश मुर आन कली इम्मा खोदेशो मिम्तो। ठिटी आन कली समी खोदेशो मिम्तो। मोपा नेल्ले रिम्शो पावो।

वोंइश बेक्शो मीश मुर आन पर्बम

3 आन वोंइश बेक्शो रिम्शो पाइब मीश मुर आन कली ठेयब सेलो। 4 आन वोंइश बेक्शो मीश मुर आ तमी तौ, चच युइ बाक्तेक्म हना, मेकोपुकीम आम खिं डा मुर आन कली रिम्शो गेय पा कोंइचा माल्नीम। आम आफ आस कली रिम्शो पचा माल्नीम। मेको परमप्रभु यावे आ डोंइती शुश रिम्शो बाक्ब। 5 आ वोंइश बेक्शो मीश मुर रिम्शो बाक्त हना, परमप्रभु यावे कली ला मिम्ब। मेकोमी नाक्दो नाक्त प्रार्थना पा पुंइना पुंइन बाक्ब। लूका २:३७ 6 आ दला दाक्स पाइब चहिं सेस बाक्त हना यो, बेक्शो खोदेशो दुम्ब। 7 एको लोव्र शेंदीमी। मेकोपुकी दोस गेचा मपुंइसीब दुम्मल। 8 सुमी आ खिं डा मुर आन कली मकोव्रबा, मेको आ थमा सुइक्तीके जाम्शा लशा, थमा मसुइक्ब आन क्येडा यो मरिम्शो दुम्ब। मत्ती १५:५-६

9 वोंइश बेक्शो मीश मुर ६० बर्स दुम्ने थुम्शा ला, वारच पचा कली आ नें ब्रेक्सीब। मेको वोंइश का आ मीश ला दुम्चा माल्ब। 10 आ तमी तौ रिम्शो पा कोल्पाइशशा, मुर आन कली बास बाक्चा गेशा, थमा सुइक्ब आन खोइली चिक्शा, श्येत जाइब आन कली वारच पशा, नेल्लेमी रिम्शो पना पन बाक्ब, दे मुरपुकीमी तुइशो मीश मुर आ नें ला ब्रेक्सीब। हिब्रू १३:२; यूहन्ना १३:१४ 11 वोंइश बेक्शो ठिटी मीश मुर आन कली वारच पचा कली आन नें मब्रेक्चा। मारदे हना आन दला दाक्स पा ख्रीस्त कली प्रेंताक्म हना, ग्युंवे पचा ला मिम्नीम। 12 मिनु आन डोंइती देशो प्रोंइशा, दोस ताइब दुम्नीम। 13 मेकोपुकी मुर आन खिं खिं हिरथ लाइनीम। अल्सी ला ममाइ, मदेंचा डा लोव्र यो शुश पाइनीम। 14 मोपतीके वोंइश बेक्शो ठिटी मीश मुरपुकीमी ग्युंवे पा, आल थिशा, आन खिं डा गेय पामेक्ल। मो पाम्तेक्म हना, मरिम्शो पा गाक्चा मताइनीम। अरुमी यो थमा सुइक्ब आन पर्बम मरिम्शो लोव्र पचा मताइनीम। १तिमोथी २:१५; १कोरिन्थी ७:९ 15 का निक्शीमी सैतान कली खोइक्चा गोम्तेक्म। 16 थमा सुइक्ब आन खिंमी वोंइश बेक्शो मीश मुरपुकी बाक्तेक्म हना, मेको आन कली वारच पामेक्ल। मिनु ग्रुम्तीके कली श्येत मदुम्थु, वोंइश बेक्शा, का ला लीशो मीश मुर आन कली वारच पचा ताइब। प्रेरित ६:१

ग्रुम्तीके डा गेय पाइब

17 ग्रुम्तीके खिंमी श्येत पा लोव्र पाइब नु शेंब खाल्पा आन कली निक्शी खेयप मान पा क्येट गेचा माल्नीम। प्रेरित १४:२३; रोमी १२:८ 18 परमप्रभु यावे आ लोव्रमी “ब्यफ कली दांइ पपाइशोनु, फुडला मपाइक्चा” मिनु “गेय पाइब आन गाल्च ताइब बाक्नीम” दे ब्रेक्शो बाक्ब। ब्यवस्था २५:४; १कोरिन्थी ९:९; लूका १०:७ 19 मुर कामी ग्रुम्तीक डा शेंब खाल्पा कली दोस गेपुतु हना, सांकछी निक्शी सां मबाक्थु, थमा मसुतो। ब्यवस्था १९:१५; मत्ती १८:१६ 20 सु मरिम्शो पना पन बाक्मे, मेको कली थमा सुइक्ब आन डोंइती हुइक्तो। मिनु मेको नेंब नेल्लेमी मरिम्शो पचा हिंनीम। गलाती २:१४; मत्ती १८:१५-१७ 21 परमप्रभु यावे, ख्रीस्त येसु नु योव्रशो परमप्रभु यावे आ स्वर्ग डा गेय पाइब आन

डोंइती “मुर आन कुल मकोवथु, आं देंशो नेल्ल पावो” दे इ कली अरेनुड। मुर आन कुल कोवशा, मारेइ मपावो। 22 मुर आन कली ब्रो थिशा, आन तार गुइ वोइशशा, प्रार्थना मपावो। मुर आन मरिम्शो पतीकेमी मगरो। मरिम्शो रे डोन बाक्को। १तिमोथी ४:१४

23 डोंइती डा खोदेशो पा ब्वाक्कु ला मतूडो। इ कोवज रोइ पतीके इच्का अडगुर शांबु ब्वाइशशा तूडो।

24 मुर का निक्शी आन मरिम्शो पशो तुंडसीब। सजाइ ताइनीम, दे यो तुंडसीब। का निक्शी आन मरिम्शो पशो चहिं नोले ला तुंडसीब। 25 मोपा मुर का निक्शी आन रिम्शो पशो मतुंडसाक्व हना यो, खुइशशा लीने मचाप्नीम।

6

वाइलीम वाइल आन पबर्म शेंशो

1 वाइलीम वाइल नेल्लेमी आन होवप मान ताक्चा शिरशो बाक्नीम, दे मिम्चा माल्नीम। मोपा मुरपुकीमी परमप्रभु यावे आ नें नु आ शेंतीके आइक्च मसेल्नीम। एफिसी ६:५; तीतस २:९-१० 2 सु सु आन होवप थमा सुइक्ब बाक्मा, मेको आन पबर्म “थमा सुइक्ब लोकब दुम्शा, मान गेचा ममाल्नुड” दे ममिम्तमेक्ल। मेकोपुकीमी डोंइती क्येडा रिम्शो पचा माल्नीमी, दे मतो। मारदे हना मेको आन गेय गेब थमा सुइक्ब नु दाक्शो मुर दुम्त। मोदेशो पचा शुश शेंदो। फिलेमोन १६

तिमोथी नु थमा सुइक्ब आन कली अरेशो

3 सुमी अरु शेंतीक शेंबा, मेकोमी इं प्रभु येसु ख्रीस्त आ थमा लोव नु आ शेंतीके नु मगारचा डा शेंब। मेको आं देंशो थमा लोव चहिं परमप्रभु यावे कली मिम्ब नु दाक्ब थुं रे बाक्ब। २तिमोथी १:१३ 4 मेको अरु लोव शेंब ठेयब लेशशो मारेइ मजोक्ब बाक्नीम। आन लोव ला आ तार पशा, जिचा पोक्चा माल्नीम। मेकोपुकीमी गेहे पाइब, जीब, मरिम्शो लोव पाइब नु मरिम्शो मिम्ब सेल्नीम। २तिमोथी २:१४; तीतस ३:१०-११ 5 मेकोपुकीमी मुर आन दातेमी जिचा पोक्नीम। आन थुं गशो खोदेशो दुम्शा, थमा लोव रुप्ने मचाप्नीम। परमप्रभु यावे कली मिम्चा, दाक्चा क्येट चेम्तीके बाक्ब, दे मिम्नीम। 6 परमप्रभु यावे कली बोल्यो थमा सुइक्चा चहिं थुं नाइक्तीक बाक्ब। १तिमोथी ४:८; मत्ती ६:२५-३४; फिलिप्पी ४:११-१२; हिब्रू १३:५ 7 मारदे हना गोपुकीम जरमेशोनु, मारेइ पने मचाक्नय। बेक्शोनु यो मारेइ मलाइक्नय। अय्युब १:२१; भजन संग्रह ४९:१८; उपदेसक ५:१४ 8 जचा फेक्चा गाप्त हना, ग्येरसय। हितोपदेस ३०:८ 9 तन्न सु सु शुश क्येट थीब दुम्चा दाक्नीमी, मेको आन थुं थाम्चा पुंडसीशा, ग्याइलीम रेशशो खोदेशो पा, निप्स मपाइशशो नु श्येत जाइब दुम्नीम। आंम कली खतम सेल्सीशो बाक्नीम। हितोपदेस २८:२२; मत्ती १३:२२ 10 क्येट कली दाक्ब मरिम्शो आन क्येडा यो मरिम्शो बाक्ब। मोपा क्येट दाक्ब का निक्शीमी थमा सुइक्तीके प्रोंइशा, आंम थुं कली तूशो खोदेशो पा शुश खाइक्पाइक्तेक्म। एफिसी ५:५; १तिमोथी १:१९

11 मोपतीके गे परमप्रभु यावे आ मुर दुम्शा, मेको नेल्ल रे डोन बाक्को। ठीक पतीके, परमप्रभु यावे कली मिम्शा दाक्चा, थमा सुइक्चा, मुर आन कली दाक्चा, थमा सुइक्चा मप्रोंइचा नु ब्रेम्शो दुम्चा ला मिम्तो। २तिमोथी ३:१७; २तिमोथी २:२२ 12 थमा सुइशशा ग्राडो। “गेना हना यो परमप्रभु यावे नु बाक्ब दुम्ती” दे मिम्तो। गे शुश मुर आन डोंइती इ थमा सुइशशा आ पबर्म रिम्शो लोव पाप्तीवी। मेना गे गेना हना यो ब्रोंइशा बाक्चा ताइब, दे ब्रेत्चा पुंडसीशो बाक्ते। १तिमोथी १:१८; १कोरिन्थी ९:२५-२६; २तिमोथी ४:७; १तिमोथी ४:१४; हिब्रू ३:१ 13 नेल्ल आन कली ब्रोंइचा गेब परमप्रभु यावे नु ख्रीस्त येसु पन्तीयस पिलातस कली रिम्शो सांकळी गेब बाक्त। गो इ कली परमप्रभु यावे नु ख्रीस्त येसु आस डोंइती अरेनुड। यूहन्ना १८:३६-३७; प्रकाश १:५ 14 मार अरेनुड देंशा हना, इं प्रभु येसु ख्रीस्त मजाक्म सम्म गे मेको आ शेंशो लोव मखाल्थु शेंदीमी। मिनु सुइमी दोस गेचा मतामेक्ल। 15 येसु ख्रीस्त जाक्मेनु, नेल्ल आसीक तशा, नेल्ल सक्ति पाइशशो पिप आन पिप नु प्रभु आन प्रभु दुम्शा जाक्त। ब्यवस्था १०:१७; प्रकाश १७:१४ 16 मेको ला गेनायो मबेक्ब। सुइ आन कोवने मचाप्चा डा पा छेडछेडमी बाक्ब। सुइमी मेको कली गेनायो मताम। तने यो मचाप्नीमी। मेको मान तशा नेल्ल क्येडा सक्ति पाइशशो बाक्ब। आमेन। प्रस्थान ३३:२०; यूहन्ना १:१८

शुश थीब आन कली अरेशो

17 गे मुल शुश क्येट थीब आन कली “ठेयब लेशशो मदुमीन। जाम्शा लाइब शोंप कली आस मपथु, परमप्रभु यावे कली आस पने। मारदे हना परमप्रभु यावेमी इं कली शुश तेम्शा गेब। आ गेशो तशा ग्येरसीन” दे माइक्मी। भजन संग्रह ६२:११; लूका १२:१५-२१ 18 मेकोपुकीमी रिम्शो गेय पतीकेमी गेनायो मनुप्ब शोंप पाइशशो दुम्मल। हाइशशा दुम्शा,

मुर आन कली गेब दुम्चा माल्नीम। 19 मो पाम्तेक्म हना, नोले रिम्शो दुम्नीम। बोल्यो जग खोदेशो पा, गेना हना यो ब्रोंइशा बाक्चा ताइब दुम्नीम। मेको ला थमा ब्रोंइचा बाक्ब। मत्ती ६:२०; लूका १६:९

नोले डा लोत्र

20 तिमोथी, इ कली शेंशो लोत्र रिम्शो पा पावो। जाम्शा लाइब लोत्र नु जिचा पोक्तीक लोत्र, तुइक्ब थुं रे पीब देंखु पाइनीम। मेको रे डोन बाक्को। २तिमोथी १:१२-१४; १तिमोथी ४:७ 21 मारदे हना का निक्शीमी मोदेशो लोत्र मिम्शा पशा, आन थमा सुइक्तीके जाम्शा लत। परमप्रभु यावे आ शिशी गे नु लील। १तिमोथी १:६; २तिमोथी २:१८

२ तिमोथी

ब्रेक्ब मुर: एको चिठी पावलमी तिमोथी कली नोले ब्रेक्शो बाक्ब।

गेना ब्रेक्शो: पावलमी रोम सहरम लेंशा चोकचा पुंइसीतीकेमी ब्रेक्शो बाक्ब।

मारदे ब्रेक्शो: पावलमी आंम पर्वम शुश ब्रेक्ब। मेकोमी तिमोथी आ थमा सुइक्तीके कली बारपाइशशा नु गुम्तीक डा मुर यो रिम्शो सेल्चा दाक्ब। “दूली शेंब आन पर्वम होस पा बाक्कीन” दे यो लोत्र पाइब। मेको चिठी गुम्तीक कली शेंतीक बाक्ब।

डोंइती डा लोत्र

1 गो परमप्रभु यावे आ दाक्शो ख्रीस्त येसु आ सोइशशो पावल नड। डोंइती परमप्रभु यावेमी “ख्रीस्त येसुमी गेना हना यो ब्रोंइशा बाक्तीक बाक्ब” दे आ लोत्र खाप्शो बाक्ब। 2 एको चिठी आं दाक्शो तौ तिमोथी, इ कली ब्रेक्ताक्ड। इं आफ परमप्रभु यावे नु इं प्रभु येसु ख्रीस्त आस दाक्चा गे नु लील। मेको आस शिशीमी इ कली थुं नाइशशा बाक्चा गेम्सेक्ल।

ग्येरपाइक्ब लोत्र आ पर्वम ब्रेक्शो

3 गो परमप्रभु यावे कली “गे रिम्शो पाइब बाक्नीनी” दे गेय पाइनुड। आं के किकी पिपी यो मोदेशो पशो बाक्तेक्म। आं प्रार्थनामी इ कली गेना हना यो मिम्नुड। फिलिप्पी ३:५; प्रेरित २३:१; प्रेरित २४:१६ 4 गो इ डाक्शो मिम्शा, नाक्दो नाक्ती इ कली गुम्चा दे मिम्नुड। मेकोमी आं कली ग्येरपाइक्ब। २तिमोथी ४:९ 5 इ रिम्शो थमा सुइक्तीके मिम्नुड। मोदेशो थमा सुइक्तीके डोंइती इ बगे लोइसमी, नोले इम्मा युनीसमी बाक्शो बाक्ब। मुल थमा पा इ आगाम बाक्ब। गो मेको तुइक्नुड। प्रेरित १६:१-३ 6 मोपतीके गो इ कली आं गुइ इ तारी वोदुनु, परमप्रभु यावेमी इ कली मार मार गेवा, मेको लेंशा मी खोदेशो पा ब्रपतो, दे फ्रुकपाइक्बनन। १तिमोथी ४:१४ 7 मारदे हना परमप्रभु यावेमी इं कली हिंब थुं मगेव। तन्न सक्ति पाइशशो, दाक्पाइक्ब नु गेय पचा डोंइती मिम्पाइक्ब थुं गेपुतु। रोमी ८:१५ 8 इं प्रभु आ पर्वम लोत्र पचा मुने मपावो। गो प्रभु आ पर्वम जेल्खानम बाक्शो आं पर्वम यो मुने मपावो। तन्न ग्येरपाइक्ब लोत्र आ पर्वम परमप्रभु यावे आ सक्तिमी श्येत फलो। रोमी १:१६; पत्रुस ४:१६ 9 परमप्रभु यावेमी सैतान रे प्रोंइशा “आं मुर नम” दे ब्रेत्ताक्ब। इं रिम्शो पतीके कोव्रशा ममाइ, आ माल्शो नु शुश डोंइती रे ख्रीस्त येसुमी इं कली गेशो दाक्तीके आ पर्वम ब्रेत्ताक्ब। तीतस ३:५ 10 मुल इं कली पाप रे प्रोंइब येसु ख्रीस्त कली रागीम सोइशशा, मुर नेल्ल आन कली तपाइक्तु। ख्रीस्त येसुमी बेक्तीक कली ग्राशा, ब्रोंइतीके नु गेना हना या ब्रोंइशा बाक्शा, परमप्रभु यावे आ ग्येरपाइक्ब लोत्र आ पतीकेमी छेडछेडमी वोइशशो खोदेशो पा तुइक्पाइक्तु। १कोरिन्थी १५:५५-५७; हिब्रू २:१४ 11 मेको ग्येरपाइक्ब लोत्र तुइक्पाइक्चा, दे गो लोत्र पाइब, ख्रीस्त आ सोइशशो नु शेंब दुम्ती। १तिमोथी २:७ 12 मोपतीके गो यो श्येत जाइनुड। तन्न गो मुने मपाइनुड, मारदे हना सु कली थमा सुइक्नुडा मेको तुइक्नुड। मेकोमी आं कली मबेक्डा सम्म कोव्रने चाप्ब, दे यो तुइक्नुड। 13 थमा लोत्र कली खोतो। मेको ख्रीस्त येसुमी बाक्शो थमा सुइक्तीके नु दाक्तीके बाक्ब। गे आं लोत्र रे तुइक्नेवे। 14 इं आगामी बाक्शो परमप्रभु यावे आ सोक्तीमी इ कली तुइक्पाइशशा थमा शेंतीके कली खोतो।

15 नेल्ल एसीया डा मुरपुकीमी आं कली प्रोंइतीमी दे तुइक्नेवे। मेको आन दातेमी फीगेलस नु हेरमोगेनेस बाक्नीसी। २तिमोथी ४:१६ 16 प्रभुमी ओनेसीफरस आ खिं डा मुर आन कली शिशी पवल। मारदे हना साडलोम पाइशशो बाक्डानु, ओनेसीफरस आं पर्वम मुने मपथु, आं कली शुश रिम्शो पापुतु। २तिमोथी ४:१९ 17 मेकोमी रोम सहर जाक्दीशशा, आं कली शुश माल्शा थित्ती। 18 प्रभुमी मेको कली आ निसाफ पतीक नाक्तीमी शिशी पवल। मेकोमी एफिसस सहरमी शुश गेय पापुतु, दे यो तुइक्नेवे।

2

श्येत फाल्चा माल्नीम

1 आं तौ, गे ख्रीस्त येसुमी बाक्शो शिशी मिम्शा, बोल्यो दुम्शा बाक्को। एफिसी ६:१० 2 गो शुश मुर आन डोंइती इ कली नेंपाइशशो लोत्र रिम्शो थमा सुइक्ब आन कली शेंदीमी। मेकोपुकीमी यो अरु आन कली शेंने चाप्नीम। 3 ख्रीस्त येसु आ रिम्शो सिपाही खोदेशो दुम्शा, श्येत फलो। २तिमोथी १:८; २तिमोथी ४:५ 4 लडाइ पाइब सिपाहीपुकीमी खिं

डा गेय मपाइनीम। मारदे हना आन ठेयब मुरपुकीम देशो ला पाइनीमी। 5 दोरतीक दोरबमी हेंथे पा दोरत हना, ग्राने मचापब। २तिमोथी ४:८; १कोरिन्थी ९:२४-२७ 6 सुमी रूम शुश गेय पाइबा, मेको आ बाली नाली आ डोंइती डा जाइब दुम्चा माल्ब। 7 आं देशो नेल्ल मिम्तो। मारदे हना प्रभुमी नेल्ल कली रुप्तीक थुं गेब।

8 येसु ख्रीस्त कली मिम्तो। मेको दाऊद आ खिं रे जाक्शा, बेक्शो रे सेंसाक्व। आं शेंशो ग्येरपाइक्ब लोव्र मेकोन बाक्ब। १कोरिन्थी १५:४,२०; रोमी १:३ 9 मेको ग्येरपाइक्ब लोव्र शेंतीके, गो मरिम्शो पाइब खोदेशो पा साडलोम पाइक्चा पुंडसीशा श्येत जाइनुड। तन्न परमप्रभु यावे आ लोव्र दा मपाइसीशो बाक्ब। फिलिप्पी १:१२-१४ 10 मोपतीके गो योव्रशो मुर आन कली मिम्शा, श्येत नेल्ल फाल्नुड। मोपा मेकोपुकीमी ख्रीस्त येसुमी पाप रे प्रोंइशो दुम्शा, गेना हना यो परमप्रभु यावे आ छेडछेडमी ब्रोंइशा बाक्चा तामेक्ल। कलस्सी १:२४ 11 मुरुमी मेको लोव्र कली थमा सुइक्ने चाप्नीम “गोपुकी मेको नु बेक्तय हना यो, मेको नु ब्रोंइनय। २कोरिन्थी ४:११ 12 गोपुकीमी श्येत फाल्तय हना, मेको नु हुकुम पाइनय। गोपुकीमी ‘मेको कली मतुइक्नुड’ देंतय हना, मेकोमी यो ‘मतुइक्नुड’ देंब। मत्ती १०:३३ 13 गोपुकीमी थमा सुइक्चा प्रोंइतय हना यो, मेकोमी मप्रोंइब। मारदे हना ‘गो परमप्रभु यावे आ तौ मनड’ देंने मचापब” देंत। गन्ती २३:१९; भजन संग्रह ८९:३१-३४; रोमी ३:३-४; तीतस १:२

मजिचा दे शेंशो

14 एको लोव्र मेको आन कली फुकपाइक्मी। परमप्रभु यावे आ डोंइती मेको आन कली “लोव्र आ पर्बम मजिने” दे माइक्मी। मारदे हना मेको मरिम्शो दुम्ब, नेंबपुकी यो वाम ग्याम दुम्नीम। १तिमोथी ६:४; तीतस ३:९ 15 गे परमप्रभु यावे आ डोंइती रिम्शो गेय पाइब दुम्चा कली बल पावो। थमा शेंतीके रिम्शो पा शेंचा कली काइ मुने पचा ममाल्नेवे। १तिमोथी ४:६; तीतस २:७-८ 16 जाम्शा लाइब लोव्र पाइब रे डोन बाक्को। मारदे हना मेकोपुकीमी मुर आन कली परमप्रभु यावे रे डोन दुम्पाइक्नीम। १तिमोथी ४:७ 17 मेको आन लोव्र राक्शो गार खोदेशो बाक्ब। हीमेनेयस नु फिलेतस मेको आन दातेमी बाक्नीस। १तिमोथी १:२० 18 मेको निक्शीमी थमा शेंतीक प्रोंइशा, मुर आन सेंचा नुष्शो बाक्त दे शेंनीस। मोपा का निक्शी आन थमा सुइक्तीके बेक्पाइक्ताक्से। 19 तन्न परमप्रभु यावे आ थमा शेंतीके मब्रेत्चा डा जग खोदेशो बाक्ब। प्रभुमी आ मुर आन कली तुइक्ब। मिनु प्रभु कली तुइक्ब मुरपुकी मरिम्शो पचा रे डोन बाक्चा माल्नीम। मेको थोव्रशो छाप खोदेशो बाक्ब। गन्ती १६:५; मत्ती ७:२२-२३; यूहन्ना १०:१४,२७

20 ठेयब खिंमी सुन नु चांदी के बोसपुकी ला ममाइ, तन्न शी नु खप के यो बाक्नीम। का निक्शी रिम्शो गेय कली बाक्नीम, का निक्शी मरिम्शो गेय कली बाक्नीम। 21 सु आ मरिम्शो पशो शोव्रशा माफ ताइबा, मेको रिम्शो गेय डा बोस खोदेशो दुम्ब। आ होव्रप कली जिम्मा गेंसीशो नु मेको रिम्शो गेय पचा कली रिम्शो बाक्ब।

22 ठिटी ठिटा आन दला दाक्स रे डोन बाक्को। रिम्शो थुंमी प्रभु कली लोव्र पाइबपुकी नु गारशा, ठीक पचा, थमा सुइक्चा, दाक्चा नु थुं नाइक्चा ला मिम्तो। १तिमोथी ४:१२; १तिमोथी ६:११; हिब्रू १२:१४ 23 हिक्सी मडाम्शो लोव्र पाइब नु काम मलाप्या डा लोव्र पा जितीके रे डोन बाक्को। मेको जिचा पोक्ब ला बाक्नीम दे तुइक्नेवे। १तिमोथी ४:७ 24 प्रभु आ गेय पाइबमी जिचा मदुम्ब। नेल्ल आन कली रिम्शो पाइब दुम्चा माल्ब। रुप्पाइशशा शेंबमी मुर आन मरिम्शो पतीके फाल्चा माल्ब। तीतस १:७-९ 25 जिचा पोक्ब आन कली रिम्शो लोव्रमी ठीक सेल्चा माल्ब। परमप्रभु यावेमी मेको आन कली आ गे लेप्पाइशशा, थमा शेंतीके तुइक्पाइक्ब कों? 26 सैतानमी मेको आन कली ग्याइशशा, आ दाक्शो पपदानु, मेको रे प्रोक्मल।

3

नोले डा नाक्त दोदेशो बाक्नीम

1 नोले डा नाक्त हिंचा डा श्येत दुम्ब। गे मेको तुइक्चा माल्नेवे। १तिमोथी ४:१ 2 मारदे हना मुरपुकीमी आंम कली ला दाक्नीम। क्येट कली शुश दाक्नीम। ठेयब लेशशा, अरु नेल्ल आन कली दिप्नीम। मरिम्शो लोव्र पाइनीम। आम आफ कली मटिथु “गे रिम्शो पाइतीनी” गेनायो मदेंथु, पापम ग्रुम्शा बाक्नीम। 3 आंम खिं डा मुर आन कली मदाक्नीम। ईख कुरनीम, मरिम्शो लोव्र पाइनीम। आंम रां नु शोव्र चलेस मजोक्नीम। जिचा पोक्नीम। रिम्शो मारेइ मदाक्नीम। 4 मुर आन कली श्येतम खुम्नीम। चुइशशा गेय पाइनीम। “गो जोक्नुड” दे बोरशा, मुर आन लोव्र मनेंनीम। आंम दला दाक्स ला पाइनीम। परमप्रभु यावे कली मदाक्नीम। 5 मोदेशो मुरुमी परमप्रभु यावे कली मिम्शा दाक्चा देंखु पाइनीम। तन्न आन आगामी सक्ति मबाक्तीके कोंइनीम। मेकोपुकी नु डोन बाक्को। मत्ती ७:१५-२१; तीतस १:१६ 6 मेको आन दातेमी का निक्शीमी आन दला दाक्स पा पापम ग्रुम्शो नु आंम कली चलेस मजोक्ब मीश मुर आन खिं

ओव्रशा, लोव्र नेंपाइक्नीम। 7 मेको मीश मुरपुकीमी सु आन लोव्र नेंतेक्म हना यो, थमा शेंतीक गेनायो रुम्ने मचाप्नीम। 8 दोपा यन्नस नु याम्ब्रेस माइशो मुर निक्शीमी मोसा कली “इ गेय ठीक मबाक्ब” देंसा, मोपा मेको मुरपुकीमी यो थमा शेंतीके कली “ठीक मबाक्ब” देंनीम। आन थुं मूर्ख गेयम ब्रीशो दुम्शा, थमा सुइक्तीके प्रोइशो बाक्नीम। प्रस्थान ७:११, २२ 9 तन्न मोदेशो दूली शेंबपुकीमी शुश गेय पचा मताइनीम। मारदे हना यन्नस नु यम्ब्रेस आस कली खोदेशो पा, मुरपुकीमी “गशो बाक्नीम” दे तुइक्नीम।

पावल आ श्येत

10 मिनु गे आं शेंतीके, आं गेय पतीके “मार पाइनुड” दे आं मिम्तीके, आं थमा सुइक्तीके, आं फाल्तीके, आं दाक्तीके नु थमा सुइक्तीके मप्रोइशो ताप्तीवी। 11 आं कली खेदा पशो, आं श्येत जशो यो ताप्तीवी। एन्टीओक, आइकोनीयम नु लिस्त्रा सहरमी गो दोदेशो श्येत जडा, दोपा खेदा पशो नेल्ल फलु, मेको नेल्ल ताप्तीवी। तन्न प्रभुमी मेको नेल्ल रे प्रोइती। प्रेरित १३:१३-१४:२२; भजन संग्रह ३४:२०

12 सु सु ख्रीस्त येसुमी परमप्रभु यावे कली मिम्शा, दाक्शा ब्रोंइनीमी, मेकोपुकी खेदा पचा पुंइसीनीम। मत्ती १६:२४; प्रेरित १४:२२; १थिस्सलोनिकी ३:३ 13 मरिम्शो नु ग्रान्गा दिचा डा मुरपुकीमी “मुर आन मिक्च सिल्नीक” दे मिम्तमेनु, डोंइती डा क्येडा मरिम्शो दुम्शा, आंमान आन मिक्च सिल्चा पुंइसीनीम। १तिमोथी ४:१

परमप्रभु यावे आ लोव्र

14 मिनु गे मार शेंसे, मेको “ठीक बाक्ब” दे थमा सुइशशा, पना पन बाक्को। मारदे हना गे सु नु शेंसे मेको तुइक्नेवे। 15 गे आल रे ना परमप्रभु यावे आ लोव्र तुइशशा बाक्नेवे। मेको लोव्रमी ख्रीस्त येसु कली थमा सुइशशा “दोपा पाप रे प्रोइचा” दे इ कली शेंने चापब। यूहन्ना ५:३९ 16 परमप्रभु यावेमी मेको लोव्र नेल्ल गेशो बाक्त। मेको शेंचा कली, हुइक्चा कली, रिम्शो सेल्चा कली नु थमा सुइक्तीक ठीक सेल्चा कली बाक्ब। २पत्रुस १:१९-२१ 17 परमप्रभु यावेमी आ मुरपुकीमी नेल्ल गेय रिम्शो पामेक्ल दे एको लोव्र तुइक्पाइशशा बाक्त। १तिमोथी ६:११

4

बेक्चा सम्म थमा सुइक्चा मप्रोइचा

1 गो इ कली ख्रीस्त येसु नु परमप्रभु यावे आस डोंइती मार देंनुड देंशा हना, येसु ख्रीस्त आ राज्य जाची ना बेक्शो नु ब्रोंइशो मुर आन कली निसाफ पाइब बाक्ब। मेको आ जाक्चा नु राज्य पचा मिम्शा १पत्रुस ४:५ 2 “परमप्रभु यावे आ लोव्र पावो। नेंचा दाक्ताक्म हना यो, मदाक्ताक्म हना यो, शेंदीमी। मरिम्शो पाइब आन कली लोव्र पावो। मुर आन कली ‘ठीक पचा’ दे शेंदो। आन थुं बारपतो। नेल्ल आन कली फाल्शा, रिम्शो शेंदो। प्रेरित २०:२०, ३१ 3 मारदे हना इक्का नोले थमा शेंतीक नेंचा काइ मदाक्नीम। आंम दला दाक्स पा अर्को लोव्र कली नोफा दाइशशा, आंम कली शेंबपुकी तेलनीम। १तोमोथी ४:- 4 मेना थमा शेंतीक प्रोइशा, मुर आन सेल्शो कथा नेंनीम। १तिमोथी ४:७; २थिस्सलोनिकी २:११ 5 गे चहिं मार पाप्तीवी हना यो, मिम्ना मिम्न गेय पावो, श्येत फलो, ग्येरपाइक्ब लोव्र शेंदो। इ कली गेशो गेय नेल्ल पावो” दे माइक्नन। २तिमोथी २:३

6 मारदे हना गो चढेशो खोदेशो दुम्शा, आं लची ना जाक्त। फिलिप्पी २:१७ 7 गो थमा सुइशशा ग्राती। दाम पशो खोदेशो पा ग्राती। थमा सुइक्चा मप्रोइथु बाक्ती। १कोरिन्थी ९:२५; १तिमोथी ६:१२; प्रेरित २०:२४; फिलिप्पी ३:१४ 8 मुल रे ठीक पतीके डा सिरपेच गुप्चा दे आं कली वोइशशा बाक्त। प्रभु ठीक निसाफ पाइब बाक्ब। मेकोमी आं कली आ नाक्तीम सिरपेच गेब। आं कली ला ममाइ, सु सुमी आ जाक्शो दाक्नीमी, मेको आन कली यो गेब। २तिमोथी २:५; १पत्रुस ५:४; याकूब १:१२; प्रकाश २:१०; मत्ती २५:२१

पावल नु आ नु गेय पाइबपुकी

9 आं कली रीब पा ग्रुमथ जाक्को। २तिमोथी १:४ 10 मारदे हना डेमासमी रागी डा गेय दाक्शा, आं कली प्रोइती। मिनु थिस्सलोनिकी सहर लत। क्रेसेन्स गलातीया नु तीतस डाल्मातीया रागी लाम्ताक्स। कलस्सी ४:७, १०, १४ 11 लूका ला गो नु बाक्ब। मर्कूस कली गे पिशशा पिवो। मारदे हना मेको आं कली वारच पाइब बाक्ब। प्रेरित १५:३७; कलस्सी ४:१० 12 तिखीकस कली एफिसस सहरम सोइक्ताक्ड। एफिसी ६:२१ 13 त्रोआस सहरमी कारपस आ खिंमी फेक्तीक वा का प्रोइता। मेको चाक्को। किताब नु कागजपुकी यो चाक्मी।

14 अलेक्जन्डर तांबा तुप्तीलमी शुश श्येत गेती। प्रभुमी मेको आ गेय तशा, सजाइ गेब। १तिमोथी १:२० 15 गे यो मेको नु होस पा बाक्को। इं शेंतीके आ पबर्म शुश जिचा पोक्तु।

16 डोंइती डा आं मुददाम सुइमी आं कली वारच मपाम। नेल्लेमी प्रोंइतीमी। परमप्रभु यावेमी मेको आन कली सजाइ मगेवल। २तिमोथी १:१५ 17 तन्न प्रभु गो नु बाक्शा, अर्को रागी डा मुर आन कली परमप्रभु यावे आ लोव्र नेल्ल शेंचा सक्ति गेती। मोपा आं कली गुप्स रे प्रोंइती। प्रेरित २३:११; प्रेरित २७:२३ 18 प्रभुमी आं कली आ स्वर्ग डा राज्य लचा, दे नेल्ल श्येत रे प्रोंइब। मेको कली गेना हना यो मान पय। आमेन।

नोले डा लोव्र

19 प्रिस्कीला, अक्वीला नु ओनेसीफरस आ खिं डा मुर नेल्ल आन कली “रिम्शो बाक्कीन” देनो। प्रेरित १८:२; २तिमोथी १:१६ 20 इरास्तस कोरिन्थ सहरम बाक्ब। त्रौफीमस रोइ पवानु, गो मिलेटस सहरमी लाइशशा वोइक्ता। प्रेरित १९:२२; प्रेरित २०:४ 21 हिउंद क्येडा डोंइती आं कली गुम्थ रीब पा जाक्को। युबुलसमी इ कली “रिम्शो बाक्को” देशो बाक्ब। पुडेन्स, लिनस, क्लौदीया नु थमा सुइक्ब लोकब नेल्लेमी यो मो देंतेक्म। 22 प्रभु गे नु बाक्ल। आ शिशी गे नु लील।

तीतस

ब्रेक्ब मुर: एको चिठी पावलमी आ नु गेय पाइब तीतस कली ब्रेक्शो बाक्त।

गेना ब्रेक्शो: पावल रोम सहर डा जेल्खान रे प्रॉइचा पुंडसे नोले क्रेट टापु लमाक्त। मेकेर मुर आन कली शेंचा कली तीतस कली वोइशो बाक्त। एको चिठी ६५ ए. डी.मी तीतस कली ब्रेक्शो बाक्त।

मारदे ब्रेक्शो:

१. थमा सुइक्ब आन शेंब दोदेशो दुम्चा माल्नीमी।
२. थमा सुइक्ब आन कली शेंतीके रिम्शो दुम्चा माल्नीमी।
हुकुम पाइब आन कली टिचा माल्नीमी।
दूली शेंब आन पर्बम होस पचा माल्नीमी।

डोंइती डा लोव

१ गो परमप्रभु यावे आ वाइल नु येसु ख्रीस्त आ सोइशो, थमा सुइक्ब पावल नड। परमप्रभु यावे आ योवशो मुर आन कली थमा सुइक्चा आ पर्बम शेंतीक नु मेको तुइशो रे रिम्शो गेय पचा माल्ब, दे शेंब दुम्ती। २ मोदेशो दुम्मेनु, गो नेल्ल गेना हना यो परमप्रभु यावे नु बाक्शा ब्रॉइनय, दे आस पाइनय। २तिमोथी २:१३ ३ आ दाक्शो ना मुर आन कली आ लोव तुइक्पाइक्तु। दोपा तुइक्पाइक्तु देशा हना, इं मरिम्शो गेय रे प्रॉइब परमप्रभु यावेम “आं लोव शेंदीमी” देंत। एफिसी १:९-१० ४ तीतस, एको चिठी इ कली ब्रेक्ताक्ड। गो निक्शी इस के थमा सुइक्तीक का दुम्शा, गे आं तौ खोदेशो दुम्ते। इं आफ परमप्रभु यावे नु इं पाप रे प्रॉइब येसु ख्रीस्तमी इ कली शिशी नु थुं नाइक्चा गेम्सेक्ल। १तिमोथी १:२

थमा सुइक्ब आन कली कोवब

५ गो इ कली क्रेट टापुमी मारदे वोइक्तन देशा हना “गे थमा सुइक्ब आन दातेमी ठीक मदुम्शो गेय ठीक पपतो। मिनु सहर सहर डा ग्रुम्तीकेमी शेंब खाल्पापुकी वोतो” दे इ कली अरेतन। प्रेरित १४:२३ ६ मिनु ग्रुम्तीक खिं डा शेंब खाल्पापुकी सु सु दुम्ने चाप्नीमी देशा हना, काइ दोस गेचा मपुंडसीब नु मीश का ला पाइशो वोइश मुर बाक्चा माल्ब। मेको आ तमी तौ थमा सुइक्ब बाक्चा माल्नीमी। हेंथे गाक्ब नु मटीब आल आन आफ ग्रुम्तीक खिं डा शेंब खाल्पा दुम्ने मचाप्नीमी। १तिमोथी ३:१-७ ७ मोदेशो थमा सुइक्ब आन कली कोवब परमप्रभु यावे आ खिं डा गेय पाइब दुम्शा, दोस गेचा मपुंडसीब बाक्चा माल्ब। मिनु ठेयब लेशो, शुश गाइक्ब, राकसी शांबु तूशा दुक्ब, चुरशा गुइ प्रॉइब नु शिम मुरुम मेको गेय पने मचाप्नीमी। १कोरिन्थी ४:१; २तिमोथी २:२४ ८ थमा सुइक्ब आन कली कोवब चहिं बास गेब, रिम्शो गेय दाक्ब, रिम्शो नु मरिम्शो तुइक्ब, ठीक गेय पाइब, थमा पा परमप्रभु आ गेय पाइब नु आंम रां चलेस जोक्ब मुर बाक्चा माल्नीमी। ९ मोदेशो पाइब मुर परमप्रभु यावे आ लोव डा शेंतीक तुइशो पचा माल्नीमी। मोपा मेकोपुकीमी थमा सुइक्ब आन कली रिम्शो शेंशा, अरेने चाप्नीमी। मिनु परमप्रभु यावे आ लोव दूली शेंब आन कली यो रिम्शो सेलने चाप्नीमी।

दूली शेंब आन पर्बम

१० परमप्रभु यावे आ शेंशो लोव मटीबपुकी शुश बाक्नीमी। शोर गाक्शो लोव पाइब नु हेंथे लां शेंब बाक्नीमी। मेको शुश खोइक्तीक चिनु पाइशो इस्त्राएली बाक्नीमी। ११ मोदेशो मुर आन कली ब्वालेइ पपाइक्चा माल्नीमी। मारदे हना खिं खिं डा मुर नेल्ल आन कली जिपाइक्नीमी। मिनु क्येट चेम्चा कली शेंनीमी। १२ क्रेट टापु डा शुश जोक्ब मुरुमी आंम मुर आन पर्बम मार लोव पवा बाक्त देशा हना, मेकोमी “क्रेट डा मुरपुकी गेना हना यो जोल पाइब, मरिम्शो पाइब जन्तु, शुश जाइब ब्वाइब नु अल्सी अल्से बाक्नीमी” दे लोव पवा बाक्त। १३ मेको आ देशो थमा बाक्ब। मोपतीके गे मेको आन कली शुश अरेवो। मोपा ला आन थमा सुइक्तीके ठीक दुम्ने चाप्ब। २तिमोथी ४:२ १४ मिनु थमा सुइक्बपुकीमी यहूदी आन कथा नु मुरुम सेल्शो अरेशो लोव नेंचा मदुम्ब। मेको थमा लां प्रॉइब बाक्नीमी। १तिमोथी ४:७; २तिमोथी ४:४ १५ रिम्शो मुर आन कली मारेइ मारेइ रिम्शो बाक्ब। ग्रांग्रा दिचा डा मुर नु थमा मसुइक्ब आन कली चहिं मारेइ मारेइ रिम्शो मबाक्ब। मेको आन थुं नु मिम्तीके मरिम्शो बाक्ब। मत्ती १५:११; रोमी १४:२०

16 मिनु मेकोपुकीमी “गो परमप्रभु यावे कली तुइक्नुड” देखु पाइनीमी। तन्न आन पतीकेमी मतुइक्ब बाक्नीम, दे तुंडसीब। मोपा मेकोपुकी ग्रांघ्रा दिचा डा मुर बाक्नीम। मिनु मटीब दुम्शा, रिम्शो गेय यो पने मचाप्नीम। २तिमोथी ३:५

2

गुम्तीकेमी दोपा बाक्चा

1 गे चहिं येसु ख्रीस्त आ ठीक लोव् रिम्शो पा मुर आन कली शेंदीमी। २तिमोथी १:१३ 2 गे खाल्पा आन कली मार शेंचा माल्नेवे देशा हना, रिम्शो मिम्ने चाप्ब, मान पाइक्चा शिरशो मुर, गेय पचा क्येडा डोंइती मिम्ब, आन थमा सुइक्चा, आन दाक्चा नु आन फाल्चा डा सक्ति ठीक दुम्शा बाक्चा माल्नीम, दे शेंचा माल्नेवे। १तिमोथी ५:१

3 मिनु खाल्पी आन कली मार शेंचा माल्नेवे देशा हना, खाल्पीपुकी रिम्शो थमा सुइक्ब दुम्चा माल्नीम। हेंथे लोव् पचा मदुम्ब। शुश शांबु तूचा मदुम्ब। खाल्पीपुकी रिम्शो गेय शेंब दुम्चा माल्नीमी। 4 मोदेशो पा खाल्पीपुकीमी आन क्येडा आल मीश मुर आन कली आन वोंइश नु आन आल आन कली दाक्चा माल्ब, दे शेंचा माल्नीम। 5 गेय पचा क्येडा डोंइती मिम्चा, आंम वोंइश नु ला बाक्चा, खिं डा गेय रिम्शो पचा, मुर नु रिम्शो दुम्चा, आंम वोंइश कली टिचा, दे शेंचा माल्नीम। मोदेशो पाम्तेक्म हना, मुरपुकीमी परमप्रभु यावे आ लोव् आ पर्वम मरिम्शो लोव् मपाइनीमी। एफिसी ५:२२

6 मोदेशो पा गे इ क्येडा आल वोंइश मुर आन कली “गेय पचा क्येडा डोंइती मिम्चा माल्ब” दे शेंचा माल्नेवे।

7 मिनु नेल्ल क्येडा ठेयब मार बाक्ब देशा हना, गे रिम्शो गेय पशा, थमा सुइक्बपुकी दोदेशो मुर बाक्नीमी, दे कोंइचा माल्नेवे। मिनु मुर आन कली शेंदीनु, हेंथे लोव् मपथु, रिम्शो शेंतीक शेंचा माल्नेवे। २तिमोथी २:१५; १पत्रुस २:१५; १तिमोथी ४:१२; १पत्रुस ५:२ 8 गे रिम्शो लोव् शेंताक्वी हना, सुइमी इ कली दोस गेने मचाप्नीम। मिनु इ कली मदाक्बमी यो इ पर्वम मारेइ मरिम्शो लोव् पचा मताइनीम। मिनु आन मुने दोक्नीम।

9 मिनु वाइलीम वाइल आन कली मार शेंचा माल्नेवे देशा हना, आंम ठेयब मुर आन लोव् टिचा माल्नीम। आन गेय रिम्शो पा आन ठेयब मुर आन कली ग्येरपाइक्चा माल्नीम। आन ठेयब मुरुमी लोव् पामेनु, मेकोपुकीम जोप पचा मदुम्नीमी। एफिसी ६:५-६१; तिमोथी ६:१-२; १पत्रुस २:१८ 10 खुइ पचा मदुम्ब, नेल्ल गेयमी थम रिम्शो पाइब दुम्चा माल्नीम। मोदेशो रिम्शो गेय पा इ कली पाप रे प्रोंइब परमप्रभु यावे आ शेंतीके रिम्शो लोव् बाक्ब, दे कोंइनीमी। मेको शेंचा माल्नेवे।

परमप्रभु यावे आ शिशी

11 परमप्रभु यावे आ शिशी मुर नेल्ल आन कली पाप रे प्रोंइचा कली तपांडसाक्व। तीतस ३:४ 12 मोदेशो शिशीमी इ कली परमप्रभु यावे कली मगारचा डा गेय नु रागी रागी डा मुर आन पतीके आ पर्वम मोदेशो मपचा, दे शेंब। मिनु मुल गेय पचा क्येडा डोंइती मिम्चा, ठीक गेय पचा नु रागीम बाक्शा, परमप्रभु यावे कली मान पा हिंचा, दे शेंब। 13 मोदेशो दुम्शा, मान ताइब परमप्रभु यावे नु इ कली पाप रे प्रोंइब येसु ख्रीस्त आ छेडछेड गूब, दे गो आस पशा रिम्नय। १कोरिन्थी १:७; फिलिप्पी ३:२०; १थिस्सलोनिकी १:१० 14 येसु ख्रीस्तम आंम कली काइ ममिम्थु, साइक्चा पुंडसाक्व। मारदे साइक्चा पुंडसाक्व देशा हना, इ कली मटितीके रे प्रोंइचा कली साइक्चा पुंडसाक्व। मिनु इ कली परमप्रभु यावे आ योव्शो मुर सेल्चा नु इ कली शुश रिम्शो गेय पपाइक्चा कली आंम कली साइक्चा, दे जिम्मा गेसाक्व। गलाती १:४; १तिमोथी २:६; प्रस्थान १९:५; एफिसी २:१० 15 मेको लोव् शेंदीमी। मिनु गे अधिकार पाइश्शो दुम्शा, मुर आन कली अरेवो। मिनु मुरपुकीमी “एको ठिटामी आंइ कली शेंने मचाप्ब” देंचा मपुंडसो। १तिमोथी ४:१२

3

रागीम दोपा बाक्चा माल्नीमी

1 मिनु गेमी हुकुम पाइब नु सरकार डा अधिकार पाइश्शो मुर आन कली टिचा, दे थमा सुइक्ब आन कली मिम्पतो। थमा सुइक्बपुकी टीब मुर दुम्चा माल्नीम। मिनु मार मार रिम्शो गेय बाक्मे, मेको पचा माल्नीम। रोमी १३:१; १पत्रुस २:१३ 2 मिनु सुइ आन पर्वम काइ शुक्शी मपचा, जिचा मपोक्चा, मुर आन कली रिम्शो पा फाल्चा, ठेयब मलेत्थु, मुर आन कली वारच पचा माल्नीम। फिलिप्पी ४:५ 3 डोंइती गो मरुप्ब बाक्तय। परमप्रभु यावे कली मटीब बाक्तय, हेंथे गाक्ब, मार मार दाक्तय, मेको दला दाक्स पाइब बाक्तय। ग्रांघ्रा दिचा डा गेय पाइब बाक्तय। गो मरिम्शो पा गेहे पाइतय। मिनु गोपुकी काइ मदाक्मुय। १कोरिन्थी ६:११; एफिसी २:२; एफिसी ५:८; १पत्रुस ४:३

4 तन्न पाप रे प्रोंइब परमप्रभु यावे आ रिम्शो पतीके, आ दाक्तीके नु शिशी जाक्त। तीतस २:११ 5 मेकोमी इं कली मरिम्शो गेय रे प्रोंइतु। इं पशो ठीक गेय तशा मप्रोन, तन्न आ शिशीमी इं कली प्रोंइतु। दोपा पाप रे प्रोंइतु देशा हना, इं कली मरिम्शो गेय रे चिक्शो खोदेशो पा, आ सोक्त आ पशोमी नक मुर सेल्लु। योएल ३:१; २तिमोथी १:९; यूहन्ना ३:५; एफिसी ५:२६ 6 मिनु परमप्रभु यावेमी आ सोक्त इं तारी मोइक्तु। दोपा मोइक्तु देशा हना, इं पाप रे प्रोंइब येसु खीस्त आ पतीकेमी मोइक्तु। 7 मोदेशो पा, परमप्रभु यावे आ शिशी आ पतीकेम इं कली ठीक सेल्लु। मिनु परमप्रभु यावे नु बाक्चा शिरशो दुम्तय। परमप्रभु यावे नु गेना हना यो बाक्चा कली आस पा बाक्तय। रोमी ३:२६ 8 एको लोव्र थमा बाक्ब। मिनु एको लोव्र शुश शेंदो। मोदेशो पा शेंताक्वी हना, परमप्रभु यावे कली थमा सुइक्ब दुम्शो मुरपुकी रिम्शो गेय पचा कली होस पा बाक्नीम। आं देशो शेंतीके मुर आन कली रिम्शो नु गारचा डा बाक्ब।

9 मिनु गे मूर्ख खोदेशो पा हिल्लो पतीके, यहूदी आन बडसावली डा शेंतीके नु अरेतीक लोव्र रे सेल्लो पतीके आ पबर्म गाइक्पाइक्ब नु जिचा पोक्ब रे डोन बाक्को। मारदे हना मेको शोर गाक्शो नु जाम्शा लाइब बाक्नीम। १तिमोथी १:४; १तिमोथी ४:७; २तिमोथी २:१४ 10 गे मोदेशो दूली शेंब आन कली खेयप निक्शी सम्म लोव्र पावो। मेकोम मटिप्तु हना, मेको रे डोन बाक्को। २यूहन्ना १०; मत्ती १८:१५-१७ 11 मोदेशो मुर नेल्ल दूली नु मरिम्शो पाइब दुम्शा, आन मरिम्शो पतीकेमी आंम कली खतम सेल्ल बाक्नीम, दे तुइक्नेवे। १तिमोथी ६:४-५

नोले डा लोव्र

12 गो अरतीमास हना यो, तिखीकस हना यो इ कली गुम्चा कली सोइक्ताक्ड हना, गे आं कली गुम्चा कली निकोपोलीस सहर पिवो। मारदे हना गो हिउंदमी मेकेर बाक्चा कली मिम्ताक्ड। एफिसी ६:२१ 13 मिनु गे चीनास माइशो वोकील नु आपोल्लोस आस कली रीब पा सोइक्तीम्सी। मेको निक्शीम मार मार माल्नीसी, मेको आस कली गेम्सी। प्रेरित १८:२४; १कोरिन्थी ३:५-६ 14 मिनु इं मुरपुकीमी यो रिम्शो गेय पचा कली शेंसीचा माल्नीमी। मोपा शुश श्येत जाइब आन कली वारच पशा, फल सिप्ब रवा खोदेशो दुम्नीम। तीतस २:१४; मत्ती ७:१९

15 गो नु बाक्बपुकी नेल्लेमी इ कली “रिम्शो बाक्को” दे ब्रेक्पाइक्तीमी। आंइ कली दाक्ब थमा सुइक्ब नेल्ल आन कली “रिम्शो बाक्कीन” ने माइक्मी। परमप्रभु यावे आ शिशी गे नेल्ल नु लील।

फिलेमोन

ब्रेक्ब मुर: एको चिठी पावलमी फिलेमोन कली ब्रेक्शो बाक्ब।

गेना ब्रेक्शो: पावल रोम सहर डा जेल्खानम बाक्शा ६२ ए. डी. नुप्ची ना कि ६३ ए. डी. गोची ना ब्रेक्शो बाक्ब।

मारदे ब्रेक्शो: एको चिठीमी ठेयब शेंतीके मबाक्ब। फिलेमोन आ वाइल ओनेसीमस प्रोक्शो बाक्त। मेकोमी पावल कली रोम सहरम गुम्शा, थमा सुइक्ब दुम्शा, मुल आ होवप आ खिं लेत्चा चिक्शो बाक्त। एफिसी नु कलस्सी कली चिठी कुरबपुकीम एको चिठी यो चाक्शो बाक्तेक्म। फिलेमोन आ खिं यो कलस्से सहरम बाक्त।

डोंइती डा लोव

1 ख्रीस्त येसु आ नेमी जेल्खानम चोक्चा पुंइसीशो पावल नु इं लोक्ब तिमोथी गो निक्शीमी एको चिठी ब्रेक्ताक्स्कु। एको चिठी सु सु इन कली ब्रेक्ताक्स्कु देंशा हना, गो नु गारशा गेय पाइब इं दाक्शो फिलेमोन, एफिसी ३:१ 2 इं समी आप्पीया, पल्टन कामी बाक्शा गाक्शो खोदेशो दुम्शो अरकीप्पस नु फिलेमोन आ खिंमी देल्ब थमा सुइक्ब नेल्ल इन कली ब्रेक्ताक्स्कु। कलस्सी ४:१७ 3 इं आफ, परमप्रभु यावे नु प्रभु येसु ख्रीस्तमी इन कली शिशी पा इन थुं नाइश्शा बाक्चा गेम्सेकल।

प्रार्थना पशो

4 आं दाक्शो लोक्ब फिलेमोन, गो इ पबर्म प्रार्थना पडानु “फिलेमोन कली रिम्शो पपाइक्तीनी” दे परमप्रभु यावे कली ठेयब सेल्लुड। 5 मारदे हना गे थमा सुइक्ब नेल्ल आन कली शुश दाक्शो नु इ येसु ख्रीस्त कली थमा सुइश्शो आ पबर्म नेता। 6 इ थमा सुइश्शोमी रिम्शो गेय शुश पाइनेवे। मिनु दोपा रिम्शो गेय पवी, मोपान परमप्रभु यावेमी ख्रीस्त कली तुइक्तीके बारना बारन लपदल, दे प्रार्थना पाइनुड। फिलिप्पी १:९ 7 आं लोक्ब, इ पशोमी थमा सुइक्ब शुश आन थुं नाइक्चा ताम्तेक्म। शुश आन थुं बारना बारन लत। इ कली मोदेशो रिम्शो पशो तशा, गो यो आं थुं नाइश्शा ग्येरसाक्यी। २कोरिन्थी ७:४

इम्चीली लोव देशो

8 गो ख्रीस्त आ नें आ पबर्म इ कली मारेइ अरेतीक अधिकार तशो नड। 9 तन्न गे मुर आन कली दाक्शा शिशी पाइनेवे, आं देशो यो टीनेवे, दे तुइश्शा, अधिकार कोंइचा ममाल्दी। गो ख्रीस्त येसु आ पबर्म जेल्खानम चोक्चा पुंइसीशो खाल्पा पावलमी इ कली इम्चीली लोव का माइक्नन। 10 जेल्खानम बाक्डानु, ओनेसीमस कली गुम्ता। मेकोमी थमा सुदा रे आं दाक्शो तौ दुम्त। गो थमा पोबु दुम्तस्कु। कलस्सी ४:९; १कोरिन्थी ४:१५; गलाती ४:१९ 11 साइ इ खिंमी बाक्मेनु, आ गेय रिम्शो मपथु, शोर गाक्शो बाक्माक्त। मुल आं कली शुश वारच पाइक्ती। मुल डा मेरे इ थुं नुपाइक्चा डा गेय पाइब, दे तुइश्शा, इ खिं लेशशा सोइक्ताक्ड। 12 मेको कली सोइश्शो ला ममाइ, पावलन जाक्शो मिम्तो। 13 ख्रीस्त आ लोव शेंशो आ पबर्म जेल्खानम चोक्सीशा बाक्डानु, ओनेसीमस इ पा डा आं वारच सेल्चा थुं पाता। फिलिप्पी २:३० 14 गेमी गेय पपाइश्शा वोतो, दे मदेने सम्म मवोदु देंशा, सोइक्ताक्ड। वारच पाइय्यीनी मदेंथु, वारच पाइतीनी हना, गो ग्येरसीनुड। २कोरिन्थी ९:७

15 ओनेसीमस इ खिं रे प्रोक्शा, नाक्त का निक्शी गाक्शो रिम्शोन दुम्त। मारदे हना येसु ख्रीस्त आ लोव रुप्शा, गेना हना यो इ खिंम बाक्ब दुम्त। 16 मुल डा मेरे मेको कली वाइल ममिम्थु, आंम क्यी का डा लोक्ब मिम्तो। प्रभु आ नेमी यो लोक्ब मिम्तो। मिनु मोदेशो लोक्ब दुम्शोनु, गेनायो मब्रासीब। १तिमोथी ६:२ 17 मोपतीके वारच मिम्ताक्यी हना, आं कली ब्रशो खोदेशो पा ओनेसीमस कली ब्रावो। 18 साइ इ कली मरिम्शो पशो बाक्त हना यो, इ कली मेकोमी मारेइ थाप्चा माल्शो बाक्त हना यो, मेको नेल्ल गो गारपाइक्नुड। 19 एको लोव गो पावलमी आंम आं गुइमी ब्रेक्ताक्ड। लोव थोक्शा, मार थाप्चा माल्शो बाक्मे, मेको नेल्ल थाप्नुड। तन्न गोमी साइ इ कली वारच पशो यो मिम्चा माल्नेवे, दे इन कली देंनुड। 20 आं दाक्शो लोक्ब, प्रभु आ नेमी गो निक्शी वोबु दुम्शा बाक्स। ख्रीस्त आ दाक्शो पा आं थुं बारपा ग्येरपाइय्यी। 21 गे आं लोव नेंशा टिशा, आं देशो क्येडा यो शुश रिम्शो पाइनेवे, दे तुइश्शा, एको लोव ब्रेक्ताक्न।

नोले डा लोव

22 इ खिंमी इप्तीक बाक्तीक बास फिक्शा वोतो, मारदे हना गेपुकीमी “पावल जेल्खान रे गूचा तवल” दे प्रार्थना पाइनीनी, दे तुइश्शा, गूचा ताइनुड, दे आस पा बाक्ती। फिलिप्पी १:२५; फिलिप्पी २:२४

23 ख्रीस्त येसु आ नैमी जेल्खानमी काथा बाक्ब इपाफ्रासमी इन कली “रिम्शो बाक्कीन” देंत। कलस्सी १:७; कलस्सी ४:१०-१४ 24 गो नु काथा गाक्ब येसु आ लोव्र शेंब मर्कूस, अरीस्तारकस, डेमास नु लूकामी यो इन कली “रिम्शो बाक्कीन” देंतेक्म।

25 प्रभु येसु ख्रीस्त आ शिशी इन थुंमी लील।

हिब्रू

ब्रेक्ब मुर: एको किताब पावलम ब्रेक्शो बाक्ब, दे शुश मुरुम मिन्नीम। तन्न का निक्शीमी लूका, का निक्शीम बारनाबास, का निक्शीम आपोल्लोस आ ब्रेक्शो बाक्ब, देंनीम। साइ डा जोक्ब तुइक्बमी “हिब्रू किताब सुमी ब्रेक्शो बाक्बा, परमप्रभु यावेम ला तुइक्ब” दे ब्रेक्ताक्म।

गेना ब्रेक्शो: एको किताबमी यरूसलेम सहर खतम दुम्शो आ पर्बम मारेइ मब्रेक्शो बाक्त। मारदे हना तिमोथी आ पर्बम लोव्र ब्रेक्शो बाक्ब। मिनु तिमोथी ८१ ए. डी. रोमी सिजर दोमीतीयन आ सासनमी थमा सुइक्चा आ पर्बम साइक्चा पुंइसीशो बाक्त। मोपतीके ६३ नु ७० ए. डी. रोम रे ब्रेक्शो बाक्ब, देंनीम।

मार ब्रेक्शो:

१. एको किताब डा शेंतीक लोव्र: परमप्रभु यावे आ लोव्र पाइब क्येडा येसु ख्रीस्त ठेयब बाक्ब।
परमप्रभु यावे आ स्वर्ग डा गेय पाइब क्येडा येसु ख्रीस्त ठेयब बाक्ब।
मोसा क्येडा येसु ख्रीस्त ठेयब बाक्ब।
हारून क्येडा येसु ख्रीस्त ठेयब बाक्ब।
मेलकीसेदेक नक खाल डा चढ़ेब बाक्ब।
२. एको किताब डा पतीक लोव्र:
मुर नेल्ल नु दुशा बाक्चा।
थमा सुइक्ब लोकब आन कली दाक्चा मप्रोनीन।

डोंइती डा लोव्र

१ साइ नेसी परमप्रभु यावेमी आ लोव्र पाइब आन कली मार मार पपाइशशा नु कोइशा, इं किकी पिपी नु लोव्र पाइबाक्माक्त। २ नोले डा नाक्ती आ तौ रे पा इं कली लोव्र पाप्तु। आ तौ कली नेल्ल अधिकार गेशो बाक्त। सरीड नु रागी नेल्ल आ तौ रे पा सेला बाक्त। भजन संग्रह २:८; यूहन्ना १:३; कलस्सी १:१६ ३ आ तौ आ आफ आ सक्ति नु छेडछेड बाक्ब। मिनु आ सक्ति डा लोव्र पतीकेमी नेल्ल आन कली कोव्रना कोव्रन बाक्ब। मेकोमी पाप क्याम्तीक गेय पने थुम्शा, नेल्ल क्येडा ठेयब मान ताइब आ ग्युरा गे निश्शो बाक्ब।

स्वर्ग डा गेय पाइब नु येसु

४ परमप्रभु यावे आ स्वर्ग डा गेय पाइब आन क्येडा आ तौ ठेयब बाक्ब। मिनु मेको आन क्येडा ठेयब नें तशो बाक्ब। १ पत्रुस ३:२२; फिलिप्पी २:९ ५ परमप्रभु यावेमी आ स्वर्ग डा गेय पाइब सु कली चहिं “गो इ कली थितन। मोपतीके गे आं तौ नवे” देंम डा? मिनु “गो मेको आ आफ दुम्नुड, मेको चहिं आं तौ दुम्ब” देंम डा? भजन संग्रह २:७; २सामुएल ७:१४ ६ आ डोंइती जरमेशो तौ कली रागीम सोइक्तानु “आं स्वर्ग डा गेय पाइब नेल्लेमी मेको कली मान पा ठेयब सेल्मेक्ल” देंत। भजन संग्रह ९७:७; रोमी ८:२९ ७ परमप्रभु यावेमी आ स्वर्ग डा गेय पाइब आन पर्बम “आं स्वर्ग डा गेय पाइब आन कली फश नु ब्रशो मी सेल्लुड” देंत। भजन संग्रह १०४:४ ८ तन्न आ तौ आ पर्बम “इन राज्य पचा गेना हना यो लीब। इन राज्य डा राज दन्ड ठीक निसाफ पतीके राज दन्ड बाक्ब। ९ ठीक गेय पतीके दाक्नीनी। मरिम्शो पतीके मदाक्नीनी। मोपतीके परमप्रभु, इन परमप्रभु यावेमी इन पियामी तेल खेक्शा ग्येरपाइक्तु। इन वारच आन क्येडा इन कली ठेयब सेल्लु” देंत। भजन संग्रह ४५:६-७ १० अरु लोव्रमी यो “प्रभु, गे नेल्ल क्येडा डोंइती रागी डा जग वोइक्तीनी। मिनु सरीड इन गुइ डा गेय बाक्ब। ११ मो हना यो मेको नेल्ल मलीनीम। गे चहिं गेना हना यो बाक्नीनी। सेल्लोपुकी माइत वा खोदेशो पा जेक्शा लाइनीम। १२ फेक्तीक वा मुक्शो खोदेशो पा, मेको आन कली मुक्नीनी। वा फाइशो खोदेशो पा, मेकोपुकी फांइसीनीम। गे चहिं गेनायो मफांइसीथु गेना हना यो बाक्नीनी” देंत। भजन संग्रह १०२:२५-२७ १३ परमप्रभु यावेमी आ स्वर्ग डा गेय पाइब सु कली “इ जोरी सत्रु आन कली इ खोइल आगामी मवोदुमी सम्म आं ग्युरा गे बाक्को, देंम डा? भजन संग्रह ११०:१ १४ मेको गेय पाइब सोक्त मनमी डा? मिनु आन पाप क्याम्चा पुंइसीब आन कली वारच पथ सोइशो मनमी डा?” देंत। भजन संग्रह ३४:८; भजन संग्रह ९१:११-१२

2

नेंशो लोत्र थुंम वोइक्चा माल्ब

1 इं नेंशो लोत्र थुंमी वोइक्चा माल्ब। थुंमी मवोइक्तय हना, मेको लोत्र साम्नय। 2 परमप्रभु यावे आ स्वर्ग डा गेय पाइबपुकीम तुइक्पाइश्शो लोत्र थमा दुम्त। मिनु सु सुमी मेको आन लोत्र मटीमे, मेकोपुकीमी सजाइ ताम्तेक्म। प्रेरित ७:५३; गलाती ३:१९ 3 पाप आ सजाइ रे ब्रोंइतीक ठेयब गेय कली ममिम्ताक्य हना, दोपा सजाइ रे ब्रोंइने चापनया डा? मेको ठेयब गेय डोंइती प्रभुमी तुइक्पाइश्शो बाक्त। मिनु आ लोत्र नेंबपुकीमी “थमा बाक्ब” दे तुइक्पाइश्शो बाक्तेक्म। हिब्रू १०:२९; हिब्रू १२:२५ 4 परमप्रभु यावेमी पपाइश्शो चिन्ड नु छक लाक्चा डा गेय, सक्ति पाइश्शो शुश गेय नु परमप्रभु यावेमी आ दाक्शो पा योत्रशा आ सोक्तीमी मुर आन कली पपाइश्शो गेय, मेको सांफा सांकछी बाक्नीम। मर्कूस १६:२०; २कोरिन्थी १२:१२; १कोरिन्थी १२:४-११; प्रेरित २:१-१३; प्रेरित १०:४४-४५

ख्रीस्त सेंसीशा नेल्ल क्येडा ठेयब दुम्शो

5 इं देंशो लोत्र मार बाक्ब देंशा हना, पाप रे प्रोंइचा नु नोले जाक्ब परमप्रभु यावे आ राज्य चहिं परमप्रभु यावेमी आ स्वर्ग डा गेय पाइब आन गुइमी जिम्मा मगेशो बाक्ब। 6 परमप्रभु यावे आ लोत्र पाइब कामी “मुर आइक्च बाक्त हना यो, मेको कली मिम्नीनी। रागीम जरमेशो मुर आन कली मारदे कोवनीनी? 7 मेको कली इन स्वर्ग डा गेय पाइब क्येडा इच्छी आइक्च सेल्शा वोइक्तीनी। नोले मान पाइक्चा पुंइसीतीके सिरपेच गुप्चा गेशा, सक्ति पाइश्शो सेल्लतीनी। 8 मिनु मारेइ मारेइ मेको आ अधिकारम गेतीनी” दे ब्रेक्शो बाक्त। परमप्रभु यावेमी आ गुइमी मारेइ मारेइ जिम्मा गेशा अधिकार गेपुतु देंशो लोत्रमी मार रुम्सीब देंशा हना, मेको नेल्ल कोवब बाक्ब, दे रुम्सीब। तन्न गो मुल सम्म मोदेंशो अधिकार पाइब बाक्ब, दे मरुप्नय। भजन संग्रह ८:४-६ 9 गोपुकीमी येसु कली मान पाइक्चा पुंइसीतीके, छेडछेड डा सिरपेच गुप्शो नु सक्ति पाइश्शो दुम्शो ताइतय। रागीम बाक्मेनु, परमप्रभु यावे आ स्वर्ग डा गेय पाइब क्येडा इच्छी आइक्च दुम्शो बाक्त। मारदे हना परमप्रभु यावेमी मुर नेल्ल आन कली शिशी पाइनुड, दे कोंइचा कली मुर आन पबर्म श्येत जपाइश्शा बेक्चा गेपुतु। फिलिप्पी २:८-९

10 नेल्ल सेल्ब नु नेल्ल आन कली ब्रोंइतीक सोक्त गेबमी शुश मुर आन कली आन पाप रे प्रोंइतु। मेको प्रोंइब कली शुश श्येत जपाइश्शा, पाको सेल्लतु। हिब्रू १२:२ 11 पाप रे प्रोंइब नु पाप रे ब्रोंइब नेल्ल खिं का डा मुर दुम्तेक्म। मोपतीके पाप रे प्रोंइबमी पाप रे ब्रोंइब आन कली आ लोकबपुकी देंचा मुने मपाइब। यूहन्ना १७:१९; मर्कूस ३:३४-३५; यूहन्ना २०:१७ 12 मेकोमी “गो आं लोकब आन कली इन नें तुइक्पाइक्नुडमी। थमा सुइक्ब आन दातेमी इन कली ठेयब सेल्शा कुम्सो पाइनुड” देंत। भजन संग्रह २२:२२ 13 मिनु लेंशा “गो मेको कली थमा सुइक्नुड” दे ब्रेक्शो बाक्त। मिनु चिनु लेंशा “नेनीन, परमप्रभु यावेमी आं कली गेशो तमी तौ, गो नेल्ल काथा बाक्नीकी” देंत। यसैया ८:१६-१७ 14 तमी तौ हुश नु रुश के जोल्शो नम। मोपतीके येसु ख्रीस्त मेकोपुकी नु खाल का डा पा हुश नु रुश के दुम्त। बेक्पाइक्ब सक्ति पाइश्शो कली खतम पोक्चा कली आंमन बेक्त। २तिमोथी १:१०; १यूहन्ना ३:८ 15 मारदे हना बेक्पाइक्ब सक्ति पाइश्शो सैतान कली ग्राचा नु मबेक्म सम्म बेक्चा हिंब मुर आन कली हिंचा रे प्रोंइचा कली मो पापुतु। 16 परमप्रभु यावे आ स्वर्ग डा गेय पाइब आन कली ममाइ। अब्राहाम आ खिं डा मुर आन पबर्म मोदेंशो पशो बाक्त। 17 मोपतीके मेको आ लोकब खोदेंशो दुम्चा माल्ताक्व। मोपा परमप्रभु यावे आ गेय पा मुर आन पाप क्याम्चा कली शिशी पाइब नु गेनायो आ दाक्चा मप्रोंइब ठेयब चढेब दुम्त। फिलिप्पी २:७ 18 मारदे हना आ यो शुश श्येत जशा, थुं थाम्चा पुंइसाक्व। मोपा आन थुं थाम्चा पुंइसीशा, श्येत जाइब आन कली वारच पने चापब। हिब्रू ४:१५

3

मोसा क्येडा ख्रीस्त ठेयब बाक्ब

1 मोपतीके परमप्रभु यावे आ मुर, आं लोकबपुकी, गे यो स्वर्ग रे ब्रेत्चा पुंइसीशो बाक्नीनी। सोइश्शो, दे नें वोइक्चा पुंइसीशो नु इं थमा सुइक्तीक डा नेल्ल क्येडा ठेयब चढेब येसु कली मिम्तीने। हिब्रू ४:१४ 2 दोपा मोसामी परमप्रभु यावे आ खिंमी रिम्शो गेय पवा, मोपा येसुमी यो आंम कली योत्रब आ डोंइती रिम्शो पा आ देंशो पापुतु। गन्ती १२:७ 3 दोपा खिं क्येडा खिं सेल्ब शुश मान पाइक्चा पुंइसीबा, मोपा मोसा क्येडा येसु शुश मान पाइक्चा पुंइसीशो बाक्ब। 4 खिं नेल्ल मुरुम सेल्शो बाक्नीम। तन्न मारेइ मारेइ सेल्ब चहिं परमप्रभु यावे बाक्ब। 5 नोले तुइक्पाइक्तीक लोत्र आ पबर्म सांकछी दुम्चा कली मोसा परमप्रभु यावे आ खिंमी थम रिम्शो गेय पाइब दुम्त। 6 ख्रीस्तम चहिं परमप्रभु

यावे आ खिंमी आ तौ दुम्शा, रिम्शो गेय पाप्तु। मिनु गो मेको कली आस पा थमा सुइक्चा मप्रोंइतय हना, गो आ खिं बाक्नय। एफिसी २:१९; १पत्रुस २:५

परमप्रभु कली टीब दुमीन

7 परमप्रभु यावे आ सोक्तीमी मार देंत देंशा हना “मुलाक्ती आं लोव्र नेंतीनी हना, हिब्रू ४:७ 8 साइ नेसी इन किकी पिपी गोरशो रागीम गाक्शा, नाक्चा पुंडसमानु, पशो खोदेशो इन थुं खकटा पा मटीब मदुमीन। प्रस्थान १७:७; गन्ती २०:२-५ 9 इन किकी पिपीम ४० बर्स सम्म आं ठेयब गेय तशा यो, आं थुं थाम्ना थाम्न बाक्तेक्म। 10 मोपतीके मेको आन कली तशा, आं थुं जिक्त। मिनु गो ‘मेकोपुकी गेना हना यो हेंथे गाक्नीम। आं लां मतुइक्नीम’ देंती। 11 मिनु गो चुरशा ‘मेकोपुकी गेनायो आं राज्य ओव्रशा थुं नाइक्चा मताइनीम’ दे कसम जशा देंती” देंत। भजन संग्रह ९५:७-११; हिब्रू ४:३; गन्ती १४:२१-२३ 12 आं लोकबपुकी, होस पांडसीने। मारदे हना मरिम्शो नु थमा मसुइक्तीक थुंमी गेना हना यो ब्रोंइशा बाक्ब परमप्रभु यावे रे सुइ इन कली फ्राशा मलदल। 13 पापम इं थुं क्याल्शा मटीब मदुम्यल, दे मुलाक्त् रेन नाक्त् किंत किंत अर्ती गेमुने। १थिस्सलोनिकी ५:११ 14 इं डोंइती नाक्त् डा थमा सुइक्तीके नोले सम्म मप्रोंइतय हना, गो ख्रीस्त नु थुं का डा दुम्शा बाक्नय। हिब्रू ६:११ 15 डोंइती “मुलाक्ती आं लोव्र नेंतीनी हना, इं किकी पिपीम मटिशो खोदेशो पा इन थुं खकटा पा मटीब मदुमीन” देंशो बाक्ब। 16 नेंशा यो मटीब सु नमी? मोसाम इजीप्त रे गुंडशा पिश्रशोपुकी मनमी डा? 17 सु सुमी ४० बर्स सम्म परमप्रभु यावे आ थुं जिक्तमे? मेको पाप पाइबपुकी मनमी डा? मेको गोरशो रागीमी बेक्शो बाक्तेक्म। गन्ती १४:२९; १कोरिन्थी १०:१० 18 परमप्रभु यावेमी आ लोव्र मटीब आन पबर्म “मेकोपुकी गेनायो आं राज्य ओव्रशा थुं नाइक्चा मताइनीम” दे कसम जशो मबाक्बा डा? 19 मोपतीके परमप्रभु यावे आ लोव्र कली थमा मसुइक्तीकेन आ राज्य ओव्रशा नाइक्चा मतामे बाक्त्, दे रुप्नय।

4

परमप्रभु आ मुर थुं नाइक्चा ताइनीम

1 मोपतीके होस पांडसय, थुं नाइक्चा ताइनीनी देंशो लोव्र मुल यो लीशो बाक्तीके, होस पा बाक्त्। मारदे हना सु सुमी आ लोव्र मटीमे, मेको ओव्रचा मताइनीम। 2 थमा पा, इं कली यो मेको आन कली खोदेशो पा परमप्रभु यावे आ लोव्र नेंपाइशो बाक्त्। तन्न इं किकी पिपी आन कली नेंपाइशो लोव्र शोर गाक्शो दुम्त्। मारदे हना नेंबपुकीमी थमा मसुइक्त् मटिशो बाक्तेक्म। 3 गो थमा सुइक्बपुकी चहिं थुं नाइक्चा ताइनय। परमप्रभु यावेमी “गो चुरशा, मेको आन कली गेनायो थुं नाइक्चा मगेनुडमी, दे कसम जाता” देंशो बाक्त् हना यो, आ राज्यमी नाइशशा बाक्तीके वोइक्ने थुम्शो बाक्त्। हिब्रू ३:११ 4 परमप्रभु यावेमी रागी मारेइ मारेइ सेल्शा, ७ नाक्त् आ पबर्म “परमप्रभु यावेमी नेल्ल सेल्ने थुम्शा, ७ नाक्तीमी नाइक्से बाक्त्” दे ब्रेक्शो बाक्ब। उत्पत्ती २:२ 5 मिनु लेंशा लोव्र का चहिं “मेको आन कली गेनायो आं राज्य ओव्रशा, नाइक्चा मगेनुडमी” दे ब्रेक्शो बाक्ब।

6 मो हना यो का निक्शी ओव्रचा ताइनीम। तन्न आ लोव्र डोंइती डा नेंबपुकीमी मटिथु, ओव्रचा मतामे बाक्त्। 7 मोपतीके अर्को नाक्त् का वोइक्ब। नाप्खे देंशो लोव्र “मुलाक्ती आ लोव्र नेंतीनी हना, इन थुं खकटा पा मटीब मदुमीन” दे शुश बर्स नोले दाऊद कली ब्रेक्पाइशो बाक्त्माक्त्। हिब्रू ३:७ 8 यहोसुमी मेको आन कली नाइक्तीकेम चाक्दीन्ने चाप्शो हना, मेकोमी मो देंचा ममाल वा। ब्यवस्था ३१:७; यहोसु २२:४ 9 मोपतीके परमप्रभु यावे आ मुर आन कली नाइक्तीक नाक्त् का बाक्ब, दे तुइक्नय। 10 मिनु सुमी परमप्रभु यावे आ नाइक्तीके ताइबा, मेको परमप्रभु यावे खोदेशो पा आ गेय रे नाइक्चा ताइब। प्रकाश १४:१३

11 मोपतीके सुइमी परमप्रभु यावे आ लोव्र मटिथु जाम्शा मलमल। गो नेल्ले नाइक्चा ततीकेमी ओव्रचा माल्य। हिब्रू ३:१६-१९ 12 मारदे हना परमप्रभु यावे आ लोव्र ब्रोंइतीक सक्ति पाइशो, गेय पाइब नु निम्फा पटटी हेश्शो तरवार क्येडा हेश्शो बाक्ब। मेकोमी श्ये नु रुश, सोक्त् नु थुं तिल्लब। मिनु मिम्तीके नु थुं डा लोव्र नेल्ल नाक्ने चाप्ब। प्रकाश २:१२; येरमीया २३:२९ 13 मेको आ डोंइती सुइमी मारेइ खुइक्ने मचाप्नीम। नेल्लेमी पशो नु मिम्शो मेको आ डोंइती तांडसीब।

ख्रीस्त नेल्ल क्येडा ठेयब चढेब दुम्शो

14 तन्न गो इं के ठेयब चढेब का बाक्ब। मेको स्वर्ग लाक्शा लाइब, परमप्रभु यावे आ तौ, येसु बाक्ब। इं थमा सुइक्तीके बोल्यो सेल्शा, गेनायो मप्रोंइय। हिब्रू ३:१; हिब्रू ९:११,१२; हिब्रू १०:२३ 15 मारदे हना इं नेल्ल क्येडा ठेयब

चढेबमी इं चाप्तीक नु मचाप्तीक दोदेशो बाक्बा, नेल्ल तुइक्ब। गोपुकी इं थुं थाम्चा पुंडसीशो खोदेशो पा, आ यो थुं थाम्चा पुंडसाक्ब। तन्न थुं थाम्चा पुंडसाक्ब हना यो, पाप मपव। हिब्रू २:१८; यूहन्ना ८:४६ 16 मोपतीके इं कली मार मार माल्यानु, वारच पपांडसीशा, माफ नु शिशी तचा कली परमप्रभु यावे आ डोंइती महिंथु, थुं बारपा जाक्दीय्य। रोमी ३:२५; रोमी ५:२

5

ख्रीस्त नु मेल्लीसेदेक

1 ठेयब चढेबपुकी मुर आन दाते रे योत्रचा पुंडसीशो बाक्नीम। परमप्रभु यावे नु मुर आन कली गारपाइक्चा, दे मेकोपुकीमी मुर आन पाप क्याम्चा कली परमप्रभु यावे कली भेटी नु मार मार चढेनीम। 2 मेकोमी मतुइक्ब नु मरिम्शो लां गाक्ब आन कली शिशी पने चाप्ब। मारदे हना मेको आंमन यो मोदेशो बाक्ब। 3 मोपतीके मुर आन पबर्म चढेशो खोदेशो पा आंमा आन मरिम्शो पशो क्याम्चा कली आं यो चढेचा माल्नीम। लेवी ९:७ 4 मोदेशो चढेब आंमन दुम्ने मचाप्नीम। हारून योत्रचा पुंडसीशो खोदेशो पा परमप्रभु यावेमी मेको आन कली योत्रब। प्रस्थान २८:१ 5 मोदेशो पा ख्रीस्त आंमन ठेयब चढेब सेल्सीशो ममाइ “मुलाक्ती गो इ कली थीतन, गे आं तौ नवे” देबमी योत्रतु। भजन संग्रह २:७ 6 मिनु लेंशा “गे गेना हना यो मेल्लीसेदेक आ खाल डा चढेब दुम्ते” देंत। भजन संग्रह ११०:४; हिब्रू ६:२०

7 येसु मुर दुम्शा, रागीम बाक्मेनु, प्रेक्कु तोक्शा गोंगों पा डाक्शा आ कली बेक्शो रे सेब कली पुना बाक्त। परमप्रभु यावे कली मान पा हिंशा, मुर आन पबर्म पुना बाक्त। मिनु आ पुंडशो तवा बाक्त। मत्ती २६:३९-४६ 8 तौ दुम्शा यो श्येत जतीक रे पा टिचा शेंसे बाक्त। फिलिप्पी २:८ 9 मेको पाको दुम नोले आ कली टीब आन कली गेना हना यो श्येत रे प्रोंइशा बाक्चा गेब दुम्माक्त। 10 मिनु परमप्रभु यावेमी मेको कली मेल्लीसेदेक आ खाल डा ठेयब चढेब वोइशो बाक्त। हिब्रू ७:-

लोत्र रूप्व दुमीने

11 ठेयब चढेब सेल्शा वोइक्चा पुंडसीशो आ पबर्म मुल यो इन कली शुश शेंचा लीशो बाक्ब। इन नोफा थांइशो बाक्ब। मोपतीके मेको आ अर्थ दोपा रूप्पाइक्चा ननी? 12 मुल गेपुकी अरु आन कली शेंब दुम्चा माल्शो ननी। तन्न इन कली कका परमप्रभु यावे आ डोंइती डा लोत्र लेंशा शेंचा माल्ताक्नी। मुल खमे जाइब खोदेशो दुम्चा माल्शो ननी। तन्न दूध तूब आल खोदेशो बाक्नीनी। १कोरिन्थी ३:१-३; १पत्रुस २:२ 13 दूध तूब आल खोदेशो दुम्शा, बाक्बपुकीम परमप्रभु यावे आ ठीक लोत्र शुश रूप्ने मचाप्नीम। एफिसी ४:१४ 14 पाको दुम्शो आन कली चहिं खमे गेंसीब। मेकोपुकीमी परमप्रभु यावे आ गेय पना पन मार रिम्शो बाक्मे, मार मरिम्शो मेको तुइक्नीम।

6

डोंइती शेंशो लोत्र लेंशा मशेंचा

1 मोपतीके ख्रीस्त आ पबर्म शेंचा माल्शो लोत्र लेंशा मशेंचा। में क्येडा लाक्शा पाको दुम्य। डोंइती शेंचा माल्शो लोत्र चहिं मार बाक्ब देशा हना, मरिम्शो गेय पचा प्रोंइशा, आन थुं परमप्रभु यावे गे लेत्चा, परमप्रभु यावे कली थमा सुइक्चा, ब्वाक्कुम खुम्शा गुंडपांडसीचा, 2 मार मार चिक्चा शेंतीके, मुर आन तारी गुड वोइक्चा, बेक्शो रे सेंसीशा ब्रोंइचा नु गेना हना यो निसाफ पचा आ पबर्म लोत्र बाक्ब। 3 परमप्रभु यावेमी आंइ कली मोदेशो शेंचा गेपु हना, गो शेंनीकी। 4 मारदे हना डोंइती शेंतीक लोत्र रूप्शा, परमप्रभु यावे आ छेडछेड तशा, आ सक्ति तशा, परमप्रभु यावे आ सोक्तीम ब्रीशा, 5 परमप्रभु यावे आ लोत्र डा शिशी रूप्शा नु मेको जाक्चशो आ राज्य डा सक्ति आन कली लेंशा शेंचा शोर गाक्शो बाक्ब। मारदे हना सुम मेको नेल्ल तशा यो, हिब्रू १०:२६-२९; २पत्रुस २:२० 6 मुल मेको नेल्ल ताइक्ताक्म हना, मेको आन कली डोंइती खोदेशो पा लेंशा नक पा वोइक्ने मचाप्सीब। मारदे हना आन पशोमी परमप्रभु यावे आ तौ कली लेंशा शीम केप्शा कांटी थोक्शा क्याइशो मुने तोक्नीम। 7 माल्शो रेउ यिमेनु, खुम्ब आ माल्शो बाली नाली तापु हना, परमप्रभु यावेमी मेको रू कली आसीक गेब। 8 माल्शो रेउ यिशा यो चू नु सुवा ला वात हना, मेको रू शोर गाक्शा, सराप राइब। मिनु मी सुइशो क्रोइक्चा पुंडसीब।

परमप्रभुमी आ लोत्र खाप्ब

9 आंइ दाक्शो लोक्बपुकी, गोपुकीमी ओदेशो लोत्र पाइतक हना यो, इन कली तशा, गो पाप रे ब्रोंइचा तशो ननी, दे थमा सुइक्नीकी। 10 मारदे हना परमप्रभु यावे आ नेमी अरु थमा सुइक्ब आन कली वारच पा रिम्शो पाइतीनी। मुल यो रिम्शो पाइतीनी। मिनु मेकोमी इन रिम्शो पशो गेनायो मप्रेंब। हिब्रू १०:३२-३४ 11 गो नेल्लेमी नेल्ल क्येडा नोले सम्म “परमप्रभु यावे आ देशो नेल्ल जाक्दीप्ब” दे थमा सुइक्चा मप्रोंइतीक सक्ति तने, दे मिम्नीकी। हिब्रू ३:१४; फिलिप्पी १:६ 12 मचाप्नुड देंब मदुमीने। “आ देशो जाक्दीप्ब” दे आ थोक्शा पशो लोत्र थमा सुइक्ब खोदेशो पने। मेकोपुकीमी फालशा, थमा सुइश्शा, परमप्रभु यावे आ देशो जाक्दीश्शो ताइनीम।

13 परमप्रभु यावेमी अब्राहाम कली लोत्र गेवानु, आ क्येडा ठेयब सुइ मबाक्तीके आंम आ नें थिशा कसम जशा 14 “इ कली थमा पा आसीक गेनन। इ खिं डा मुर सोशा बोशा, शुश दुम्शा नेल्ल रागीम ब्रीपाइक्नुडमी” देशो बाक्त। उत्पत्ती २२:१६-१७ 15 मिनु अब्राहाममी शुश बर्स सम्म रिम्शा बाक्शा, परमप्रभु यावे आ देशो नेल्ल लोत्र गाप्शो ताप्तु। 16 मुरपुकीमी यो कसम जामेनु, आन क्येडा ठेयब आ नें थिशा कसम जाइनीम। कसम जशोमी आन लोत्र थमान सेल्नीम। प्रस्थान २२:१० 17 मोपतीके परमप्रभु यावेमी “आं गेशो लोत्र गेनायो मफाइक्नुड” दे आ गेशो लोत्र ताइब आन कली रूप्पाइक्चा, दे कसम जशा, आ लोत्र थोक्ता बाक्त। 18 मिनु परमप्रभु यावेमी गेनायो जोल मपाइब, आ गेशो लोत्र नु आ कसम जशो, एको निक्शी गेनायो मफांइसीनीस दे तुइश्शा, गो सजाइ तचा रे प्रोंइचा पुंइसीबपुकी इं डोंइती वोइश्शो आस तचा कली इं थुं बारपाइक्चा ताइनय। 19 मेको आस चहिं इं थुं ग्येत्थ लुक्च पचा मगेब ग्याइक्तीके खोदेशो बाक्ब। मेको आस नेल्ल क्येडा आगा डा चोत्रखो कोठा डा फारतीक वा आगा बाक्ब। लेवी १६:२,१२ 20 येसु मेल्कीसेदेक आ खाल डा ठेयब चढेब नु इं कली लां कोंइब दुम्शा, नेल्ल क्येडा डोंइती मेकेर ओवदीश्शो बाक्ब। हिब्रू ५:६

7

ख्रीस्त मेल्कीसेदेक आ खाल डा बाक्ब

1 मेको मेल्कीसेदेक सालेम डा पिप नु नेल्ल क्येडा ठेयब परमप्रभु यावे आ चढेब बाक्माक्त। अब्राहाममी आ जोरी सत्रु दुम्शो पिप आन कली ग्राशा साइश्शा डा मिन लेम्मेनु, मेको मेल्कीसेदेकमी अब्राहाम कली गुमथ लशा, आसीक गेवा बाक्त। उत्पत्ती १४:१८-२० 2 मिनु अब्राहाममी मेको कली आ ग्राशा चाक्शो थोत्रक १० भागमी भाग का गेवा बाक्त। मेको आ नें मार रुम्सीब देशा हना, ठीक निसाफ पाइब पिप नु सालेम डा पिप, दे रुम्सीब। सालेम देशो चहिं थुं नाइश्शा बाक्तीके बाक्ब। 3 मेको आ आम आफ नु आ किकी पिपी मबाक्नीम। गेना जरमेसे, गेना बेक्मे, दे मतुंइसीब। तन्न परमप्रभु यावे आ तौ खोदेशो बाक्शा, गेना हना यो परमप्रभु यावे कली चढेब दुम्शा बाक्ब। यूहन्ना ७:२७

4 मेको गिश ठेयब बाक्ब, दे मिम्तीन। मारदे हना इं ठेयब किकी अब्राहाममी आ ग्राशा चाक्शो रिम्शो थोत्रक १० भागमी भाग का मान पा गेचा पुंइसे बाक्त। 5 लेवी आ खिं डा मुर चढेब दुम्शा, इस्राएली आन लोक्ब रे पा १० भागमी भाग का का पोक्बाक्तेक्म। मेको आन पतीके बाक्ब। लेवी आ खिं डा नु इस्राएली नेल्ल अब्राहाम आ खिं डा मुर नम। गन्ती १८:२१ 6 मेल्कीसेदेक लेवी नु इस्राएली जात डा मबाक्त हना यो, अब्राहाम रे पा १० भागमी भाग का गेचा पुंइसे बाक्त। मिनु परमप्रभु यावे आ गेशो लोत्र ताइब अब्राहाम कली आसीक गेवा बाक्त। 7 ठेयबमी आइक्च कली आसीक गेब, दे नेल्लेमी तुइक्नय। 8 मेको बेक्शा लाइब लेवी आ थर डा चढेबपुकीमी १० भाग डा भाग का ताइब दुम्शो बाक्नीम। तन्न गेना हना यो ब्रोंइशो बाक्ब देंचा पुंइसीबमी यो १० भाग डा भाग का तवा बाक्त। 9 अब्राहाम आ पतीकेमी लेवीपुकी १० भागमी भाग का ताइब दुम्शो बाक्नीम हना यो, डोंइती गेब यो दुम्शो बाक्मा बाक्त। 10 मारदे हना मेल्कीसेदेकमी अब्राहाम कली गुमानु, लेवीपुकी अब्राहाम आ रांमी बाक्शो बाक्मा बाक्त। मिनु अब्राहाम रे पा १० भागमी भाग का गेब दुम्मा बाक्त, दे तुइक्नय।

मेल्कीसेदेक आ खाल डा चढेब

11 लेवी आ खाल डा चढेबपुकीमी परमप्रभु यावे आ अरेशो लोत्र यो ताम्तेक्म। मेको आन पशोमी मुर आन कली पाको सेल्ने चाप्शो नम हना, हारून आ खाल डा ममाइ मेल्कीसेदेक आ खाल डा चढेब का वोइक्चा ममाल वा। 12 चढेब आन खाल फांइसाक्व हना, मेको अरेशो लोत्र यो फांइसीब। 13 सु आ पर्वम मेको लोत्र ब्रेक्शो बाक्मे, मेको गेनायो चढेतीक गेय मपाइब थर डा बाक्माक्त। 14 इं प्रभु यहूदा थर डा बाक्माक्त, दे गो नेल्लेमी तुइक्नय। यहूदा थर डा मुरपुकीम गेनायो चढेतीक गेय मपशो बाक्मा बाक्त। इं किकी पिपी मोसामी यहूदा थर डा मुर चढेब बाक्नीम, दे

गेनायो मदेंमाक्त। उत्पत्ती ४९:१०; मत्ती १:१-३ 15 चढेब आन खाल फांइसे बाक्त, दे थमा पा तुइक्नय। मारदे हना मेलकीसेदेक खोदेशो पा मेको चढेब सेल्चा पुंइसाक्व। 16 मेको आ किकी पिपी आन थर रे चढेब मदुम्शो बाक्व। तन्न गेनायो जाम्शा मलाइब सक्ति रे पा चढेब दुम्शो बाक्व। 17 मारदे हना मेको आ पर्बम “मेलकीसेदेक आ खाल डा गेना हना यो चढेब दुम्ते” देशो बाक्व। भजन संग्रह ११०:४; हिब्रू ५:६ 18 डोंइती अरेशो लोत्रमी पाप क्याम्ने मचाप्ब। मिनु सुइ आन कली पाको सेल्ने मचाप्ब। मोपतीके ताइक्चा माल्ताक्व। 19 मिनु मेको आ पा डा नेल्ल क्येडा रिम्शो नक आस वोइश्शो बाक्त। मेको आस रे पा परमप्रभु यावे आ नेक्था जाक्दीन्ने चाप्नय। 20 परमप्रभु यावेमी मेको आस गेवानु, कसम जशा गेशो बाक्त। डोंइती चढेबपुकी कसम मजथु चढेब दुम्शो बाक्मा बाक्त। 21 तन्न मेकोमी कसम जशा “परमप्रभुमी कसम जशो बाक्व। मिनु आ थुं मफाइक्व। गे गेना हना यो चढेब दुम्ते” दे माइक्चा पुंइसीशो बाक्त। भजन संग्रह ११०:४ 22 मो माइक्चा पुंइसीतीके येसु डोंइती पशो कबल क्येडा, नोले पशो रिम्शो कबल डा लोत्र खाप्ब दुम्शो बाक्त। हिब्रू ८:६; हिब्रू १२:२४

23 डोंइती डा चढेबपुकी गेना हना यो ब्रोंइशा बाक्ने मचाप्तीके, शुश चढेबपुकी दुम्चा माल्मा बाक्त। गिश बेक्मा, मिश योत्रशा वोइक्चा माल्मा बाक्त। 24 येसु चहिं गेना हना यो ब्रोंइशा बाक्तीके गेना हना यो चढेब दुम्शा बाक्शो बाक्व। 25 मोदुम्तीके येसु रे पा परमप्रभु यावे आ डोंइती जाक्दीश्शो आन कली येसुमी गेना हना यो वारच पने चाप्ब। मारदे हना मेको आन पर्बम गेना हना यो परमप्रभु यावे आ डोंइती बाक्शा पुंइशो बाक्व। रोमी ८:३४; १यूहन्ना २:१

26 इं ठेयब चढेब दोदेशो माल्शो बाक्त देशा हना, पाप रे डोन बाक्शो, दोस मताइब, रिम्शो थुं पाइश्शो, पापी रे दिल्ला बाक्शो, स्वर्गमी नेल्ल क्येडा ठेयब सेल्चा पुंइसीशो माल्शो बाक्त। 27 अरु चढेबपुकीमी नाक्त कित्त कित्त डोंइती आन पशो पाप, नोले मुर आन पशो पाप क्याम्चा कली चढेशो खोदेशो पा आं पचा ममाल्द। कालेमीन आ रां चढेशा, मुर नेल्ल आन पाप क्याम्ने थुम्तु। लेवी ९:७; लेवी १६:६, १५ 28 परमप्रभु यावे आ अरेशो लोत्रमी पाको मदुम्शो मुर आन कली योत्रशा चढेब सेल्बाक्त। परमप्रभु यावे आ अरेशो लोत्र तुइश्शो शुश बर्स नोले कसम जशो लोत्रमी गेना हना यो पाको बाक्शो आ तौ कली ठेयब चढेब सेल्शा वोइश्शो बाक्त।

8

नक कबल डा चढेब

1 मुल सम्म पशो लोत्रमी नेल्ल क्येडा तुइक्चा माल्शो लोत्र मार बाक्व देशा हना, इं के ठेयब चढेब स्वर्गम बाक्व। मेको नेल्ल क्येडा ठेयब मान पाइक्चा पुंइसीब आ ठेयब नित्तीके आ ग्युरा गे बाक्शो बाक्व। हिब्रू ४:१४ 2 मुरपुकीमी सेल्शो ममाइ, परमप्रभु यावेमी सेल्शो थमा डा ताम्बुमी गेय पाइब दुम्शो बाक्व। 3 ठेयब चढेब नेल्ले भेटी नु चोशा चढेचा कली योत्रचा पुंइसीशो बाक्नीम। मोपतीके मेको ठेयब चढेबमी यो मारेइ थोत्रक चढेचा माल्ब। 4 रागीम बाक्शो हना, ठेयब चढेब दुम्ने मचाप्ब वा। मारदे हना परमप्रभु यावे आ अरेशो लोत्रमी ब्रेक्शो खोदेशो पा चढेब शुश बाक्नीम। 5 मेकोपुकीमी स्वर्ग डा ताम्बु आ वांकुमी गेय पाइनीम। मोसामी ताम्बु सेल्चा गोवानु “डांडामी बाक्डेनु, इ कली कोंइशो खोदेशो सेलो” दे परमप्रभु यावे रे माइक्चा पुंइसे बाक्त। प्रस्थान २५:४०; कलस्सी २:१७ 6 मेको चढेबपुकीमी पशो गेय क्येडा ख्रीस्त आ पशो गेय रिम्शो कबल डा बाक्व। मारदे हना डोंइती पशो कबल क्येडा नोले पशो रिम्शो कबल डा लोत्र खाप्ब दुम्शो बाक्त। मेको नोले पशो कबल डोंइती गेशो लोत्र क्येडा रिम्शो लोत्रमी फ्रेशो बाक्व। हिब्रू ७:२२ 7 डोंइती पशो कबल डा लोत्रमी पाको सेल्शो हना, नक कबल पचा ममाल वा। 8 परमप्रभुम आ थुं मनुथु, इस्राएली आन कली “नेनीने, प्रभुमी ‘काबु इस्राएल आ खिं नु यहूदा आ खिं डा मुरपुकी नु नक कबल का पाइनुड। हिब्रू १०:१६-१७ 9 मेको आन किकी पिपी आन कली पशो कबल खोदेशो ममाइ। मेको किकी पिपी आन कली गुडमी ग्याइश्शा, इजीप्त रागी रे ग्रुंइशा लां कोंइदु नु कबल पा नाता सेल्तामी। तन्न मेकोपुकीमी नाता खोइक्तेक्म। मोपतीके गो यो मेको आन कली प्रोंइशा ममिम्तुमी’ दे परमप्रभुमी देंब। प्रस्थान १९:५-६ 10 मेको कबल मार बाक्व देशा हना, गो आं अरेशो लोत्र मेको आन मिम्तीकेम वोइश्शा, आन थुंम ब्रेक्नुड। मिनु गो मेको आन परमप्रभु यावे दुम्नुड। मिनु मेकोपुकी आं मुर दुम्नीम। 11 सुइमी आ लोक्ब नु आ वारच कली ‘परमप्रभु यावे कली तुइक्तीन’ दे शेंमुचा ममाल्नीम। मारदे हना आल रे खूशो सम्म डा नेल्लेमी आं कली तुइक्नीम। 12 मेको आन कली शिशी पा, आन पशो पाप नेल्ल क्याम्शा गेनुडमी। मेको आन मरिम्शो पशो गेनायो ममिम्नुड” देंमाक्त। येरमीया ३१:३१-३४ 13 नक कबल आ पर्बम लोत्र पा डोंइती डा कबल कली माइत सेल्तु। मुल डा मेरे ममाल्शो नु माइत दुम्शो नेल्ल जाम्शा लचशो बाक्व। रोमी १०:४

9

ख्रीस्त खेयप का चदेशो

1 डोंइती डा कबलमी ठेयब सेल्चा कली अरेशो लोव्र नु रागीम परमप्रभु यावे आ बाक्तीक बाक्शो बाक्माक्त। प्रस्थान २५:३१; प्रस्थान २५:२३; प्रस्थान २५:३० 2 मिनू ताम्बु का सेल्शो बाक्माक्त। आगामी कोठा निकशी पाइशशो बाक्माक्त। डोंइती डा कोठाम बत्ती दातीक दियारी का, टेबल का नु परमप्रभु यावे आ डोंइती वोइशशो कोंइतीक शोब्ले बाक्माक्त। मेको आ नोले चोव्रखो कोठा, दे नें वोइशशो बाक्माक्त। 3 फारतीक वा आ आगा नेल्ल क्येडा चोव्रखो कोठा बाक्शो बाक्माक्त। 4 थम चोव्रखो कोठामी सुन के सेल्शो धूप चोतीक नु परमप्रभु यावे आ कबल पशो सुनमी गिल्शो सन्दोस बाक्माक्त। मेको कबल पशो सन्दोसमी मार वोइशशो बाक्माक्त देंशा हना, मन्ना कुर पशो सुन के बोस, हारून आ कोच्वा दापशो कोक्के नु परमप्रभु यावेमी फुल्लुमी मुशा ब्रेक्शा वोइशशो अरेशो लोव्र मेको आगाम बाक्माक्त। प्रस्थान १६:३३; प्रस्थान २५:१०-२२; गन्ती १७:२३-२५ 5 सन्दोस आ तारी करूब निकशी वोइशशो बाक्तेकम। मेको निकशीमी “परमप्रभु यावे एकेर बाक्ब” दे आ शिशी पतीक कली वांकु गेशा वोइक्तेकम। मेको नेल्ल आन पर्वम मुल का का पा शेंने मचाप्नुड। 6 मोदेशो ताम्बुमी चढ़ेबपुकीमी नाक्त किंत किंत ओव्रशा, परमप्रभु यावे कली आन पचा माल्शो गेय पाम्तेकम। गन्ती १८:३-४ 7 थम चोव्रखो कोठामी चहिं बर्समी खेयप का नेल्ल क्येडा ठेयब चढ़ेबमी हुश लाइशशा चढ़ेथ ओव्रबाक्माक्त। आ पशो नु अरु आन पशो पाप क्याम्चा कली मेको हुश चढ़ेबाक्माक्त। प्रस्थान ३०:३०; लेवी १६:२१४, १५ 8 डोंइती डा कोठा बाक्मेनु, मुरपुकी थम चोव्रखो कोठामी ओव्रचा मताइनीम, दे परमप्रभु यावे आ सोक्तीम रुप्पाइक्ब। हिब्रू १०:२० 9 मेको मुल कली कोंइतीक का बाक्ब। मेकोमी मार कोंइब देंशा हना, भेटी नु चोशा चदेशोमी मुर आन कली पाको सेल्ने मचाप्ब। हिब्रू ७:१९; हिब्रू १०:१-२ 10 मेको पतीके जचा थोव्रक, तूचा थोव्रक, चिकचा नु चढ़ेचा आ पर्वम बाक्नीम। मेको नेल्ल मुर आन मिम्शो शोर गाक्शो गेय बाक्नीम। नक लोव्र मजाकम सम्म मेको माइत लोव्र टिशा पामेक्ल, दे वोइशशो बाक्माक्त। लेवी ११:-; गन्ती १९:-

ख्रीस्तमी स्वर्ग डा ताम्बुमी गेय पशो

11 रागी डा ममाइ, मुर आन गुइमी सेल्शो क्येडा ठेयब नु रिम्शो स्वर्ग डा ताम्बुमी ख्रीस्त ठेयब चढ़ेब दुम्शा, गेय पाइब। 12 बाछा, बोका आन हुश चदेशो ममाइ। कालेमीन स्वर्ग डा थम चोव्रखो कोठाम ओव्रदीशशा, आ हुश चढ़ेपुतु। मो पशोमी पाप रे प्रोंइतीक गेय गेना हना यो कली पने थुम्तु, मारेइ पचा मली। 13 बोका, ब्यफ आन हुश चढ़ेशा, आन श्ये चोशो डा पुलु फ्रशा, मुर आन रां चोव्रखो सेल्ने चाप्ब हना, गन्ती १९:२, ९, १७ 14 ख्रीस्त आ हुशेमी मेको क्येडा इं पशो जाम्शा लतीक गेय रे चोव्रखो सेल्ने चाप्ब। गेपुकी ब्रोंइशा बाक्ब परमप्रभु यावे आ गेय पचा कली ख्रीस्त गेना हना यो बाक्शो सोक्तीम पतीके मारेइ मरिम्शो मपथु, परमप्रभु यावे आ डोंइती आंम कली चढ़ेवा बाक्त। १पत्रुस १:१८-१९; १यूहन्ना १:७; प्रकाश १:५; हिब्रू १:३ 15 मोपतीके मेको नक कबल डा गारपाइक्ब बाक्ब। मोपा ब्रेशोपुकी आन गेना हना यो लीब शोंप तामेक्ल। मारदे हना ख्रीस्त बेक्त। मिनू मेको आन डोंइती डा कबलम पशो पाप यो क्याम्साक्व। हिब्रू १२:२४; १तिमोथी २:५

हुश जारशोमी कबल खाप्शो

16 मिनू “गो बेक्डा नोले गेनुड” दे कागज ब्रेक्बमी आ पशो कबल बेकम नोले ला खाप्ब। 17 ब्रेक्पाइक्ब मबेकम सम्म आ ब्रेक्पाइशशो खाप्ने मचाप्ब। बेकम नोले ला खाप्ब। 18 डोंइती पशो कबल यो हुश जारशोमी गाप्शो बाक्माक्त। 19 मोसामी मुर आन कली परमप्रभु यावे आ शेंशो अरेशो लोव्र नेंपाइक्ने थुम्शा, बाछा नु बोका आन हुश नु ब्वाक्कु क्याल्शा, हिसोप के सेल्शो ब्राक्सु कली लल ऊनमी फ्रेंशा, परमप्रभु यावे आ अरेशो लोव्र डा किताब नु मुर नेल्ल आन कली बुइक्तीमी बाक्त। गन्ती १९:६ 20 मिनू मेकोमी “परमप्रभु यावेमी इन कली पशो कबल एको हुशेमी खाप्तु” दे तुइक्पाइक्मी बाक्त। प्रस्थान २४:८ 21 मिनू मोपा थुम्शा, मुर आन कली खोदेशो पा ताम्बु नु ताम्बुमी वोइशशो बोसपुकीमी यो बुइक्ता बाक्त। लेवी ८:१५ 22 थमा पा परमप्रभु यावे आ अरेशो लोव्र ब्रेक्शो खोदेशो पा मारेइ मारेइ चोव्रखो सेल्चा कली हुश बुइक्चा माल्दा बाक्त। हुश मजारथु, पाप मक्याम्सीब, दे रुप्नय। लेवी १७:११

ख्रीस्तमी आ हुश चदेशो

23 रागी डा मोदेशो थोव्रक कली चोव्रखो सेल्चा कली मोदेशो माल्ताक्व हना, स्वर्गम बाक्शो कली चोव्रखो सेल्चा कली मेको क्येडा रिम्शो चढेचा माल्ताक्व। 24 मारदे हना ख्रीस्त मुरपुकीम सेल्शो ताम्बुमी मओव्र। मेको स्वर्गम बाक्ब ताम्बु आ खोदेशो ला बाक्त। तन्न मेको स्वर्गम ओव्रत। मुल मेकोम परमप्रभु यावे आ डोंइती आंइ पर्वम पुंडब। हिब्रू ७:२५; १यूहन्ना २:१ 25 ख्रीस्तमी आंम कली शुश खेयप चढेचा ममाल्द। नेल्ल क्येडा ठेयब चढेब चहिं बर्स बर्सम आंम हुश ममाइ, मार मार आन हुश कुरशा मेको नेल्ल क्येडा चोव्रखो कोठा ओव्रचा माल्दा बाक्त। 26 ख्रीस्त मोदेशो बाक्शो हना, रागी सेल्चा रे मुल सम्म शुश खेयप श्येत जचा माल्द वा। तन्न मेकोमी रागी नुप्ची ना खेयप का पाप क्याम्चा कली आंम कली चढेवा बाक्त। १कोरिन्थी १०:११; गलाती ४:४; हिब्रू १:३ 27 दोपा मुर खेयप का बेक्चा माल्नीमी नु मेको बेक्शा, निसाफ पचा पुंडसीनीम। उत्पत्ती ३:१९ 28 मोपा ख्रीस्त शुश मुर आन पाप क्याम्चा कली खेयप का आ हुश चढेप्टु। मिनु लेंशा जाक्ब। पाप क्याम्थ चहिं मजाक्ब। तन्न मेको कली थमा सुइशशा रिम्शा बाक्ब आन कली श्येत रे प्रोंइचा कली जाक्ब। हिब्रू १०:११,१२,१४

10

1 मेको साइ डा परमप्रभु यावे आ अरेशो लोव्र जाक्चशो रिम्शो लोव्र आ वांकु ला बाक्ब। मेको डोंइती डा लोव्र थमा पा पाप क्याम्तीके मबा। मिनु मेको लोव्र टिशा बर्स बर्समी चढेम्तेक्म हना यो, परमप्रभु यावे आ नेक्था जाक्ब मुर आन कली पाको सेल्ने मचाप्ब। हिब्रू ८:५ 2 मिनु परमप्रभु यावे कली मान पाइबपुकी खेयप का पाको दुम्तेक्म हना, चढेबमी मारदे लेंशा चढेचा माल्बा डा। मुर पाको दुम्तेक्म हना, लेंशा चढेचा माल्बा डा? 3 तन्न मेको चढेशोमी बर्स बर्समी पाप मिम्पाइक्ब, गेनायो मप्रेंसीब। लेवी १६:३४ 4 मारदे हना ब्यफ नु बोका आन हुशेम पाप क्याम्ने मजाप्ब, दे तुइक्तय।

5 मोपतीके ख्रीस्त रागीम जाक्मेनु, मेकोमी “गे चढेतीक नु भेटी ममाल्नी। तन्न गे आं कली मुर आ रां का सेल्तीनी। 6 गे चोशा चढेतीके नु पाप आ पर्वम चढेतीके मदाक्तीनी। 7 मिनु ‘परमप्रभु यावे, गो इन दाक्शो पथ रागीम जाक्ती। आं पर्वम डोंइती ब्रेक्शो लोव्र खाप्ता’ दे ब्रेक्शो बाक्ब” देंत। भजन संग्रह ४०:७-९ 8 मिनु मेकोमी “गे मार मार चढेशो, भेटी नु चोशा चढेतीक नु पाप आ पर्वम चढेशो मदाक्तीनी। तन्न मेको आ अरेशो लोव्र टिशा चढेशो ला बाक्नीम” देंत। 9 मेकोमी तेम्शा “रागीमी इन दाक्शो गेय पाइनुड, देंशा, साइ रे डा आन पशो प्रोंइपाइशशा, नक लां कोंइताक्व। 10 मिनु गोपुकी येसु ख्रीस्त आ रां चढेशोमी गेना हना यो परमप्रभु यावे आ मुर दुम्तय” दे रुब्य। यूहन्ना १७:१९

11 नाक्त किंत किंत चढेबपुकीमी ताम्बुमी गेय पा चढेना चढेन बाक्तेक्म हना यो पाप मक्याम्सीब। प्रस्थान २९:३८ 12 तन्न ख्रीस्तमी चहिं आ रां चढेशोमी पाप क्याम्तीक गेय पने थुम्तु। मिनु गेना हना यो परमप्रभु यावे आ ग्युरा गे निरशो बाक्ब। 13 आ जोरी सत्रु आन कली खोइल आगाम मवोदा सम्म रिम्शा बाक्शो बाक्ब। भजन संग्रह ११०:१ 14 खेयप का आ रां चढेशोमी गेना हना यो परमप्रभु यावे नु काथा बाक्चा ताइब आन कली पाको सेल्तीमी। 15 परमप्रभु यावे आ सोक्तीमी इं कली “एको लोव्र थमा बाक्ब” दे साइ डा लोव्र मिम्पाइशशा यो तुइक्पाइक्ब। 16 मेकोमी “नोले मेकोपुकी नु नक कबल का सेल्नुड। आं लोव्र मेको आन कली आन कोव्रजम वोइक्पाइशशा, आन थुंमी ब्रेक्शा गेनायो मप्रेंब सेल्नुडमी। हिब्रू ८:१० 17 गो मेको आन पशो पाप प्रेंशा गेनायो ममिम्नुड” देंशो बाक्ब। येरमीया ३१:३३-३४ 18 मोपतीके पाप क्याम्से नोले गेनायो चढेचा ममाल्ब, दे तुइक्नय। हिब्रू ८:१२

ठेयब थुं पशा आस पा बाक्ब

19 आं दाक्शो लोक्बपुकी, येसु आ हुशेमी परमप्रभु यावे आ डोंइती जाक्दीत्चा ताइनय, दे तुइक्नय। मत्ती २७:५१; रोमी ५:२ 20 मारदे हना आ रां चढेशा, फारशो वा खाक्शा, नक ब्रोंइतीक लां सेल्तु। हिब्रू ९:८ 21 मिनु परमप्रभु यावे आ खिं डा ठेयब चढेब दुम्त। 22 मोपतीके रिम्शो थुं पा, रिम्शो थमा सुइक्ब दुम्शा, पाप नेल्ल क्याम्चा पुंडसीशो तुइशशा नु इं रां रिम्शो ब्वाक्कुम चिक्शा ग्येरशा परमप्रभु यावे आ नेक्था जाक्दीय्य। हिब्रू ४:१६; एफिसी ५:२६; १पत्रुस ३:२१ 23 ठेयब थुं पशा आस पा बाक्ब। मारदे हना लोव्र गेबमी मेको लोव्र दोपा यो खाप्ब, दे तुइक्नय। हिब्रू ४:१४ 24 दाक्मुशा, रिम्शो गेय पा वारच पमुशा अरेपमुने। 25 थमा सुइक्ब आन गुम्तीके लशा, लोव्र नेंचा मप्रोनीन। का निक्शी लचा मदाक्ब दुम्शो बाक्तेक्म। मोपतीके “लचा माल्ब” देंचा मप्रोनीन। येसु ख्रीस्त लेंशा जाक्चशो बाक्ब, दे मप्रेंथु बाक्कीन। हिब्रू ३:१३; रोमी १३:११-१२

नोले शोंइसीशो मदुम्य

26 मिनु मुल मार देंनुड देंशा हना, ख्रीस्तम सेल्शो नक लां तुइश्शा यो मेको लां मखोइक्नुड देंतय हना, मोदेशो चहिं नेल्ल क्येडा ठेयब पाप बाक्ब। मेको पाप चहिं मारेइ चढेशोमी मक्याम्सीथु लीशा बाक्ब। हिब्रू ६:४-८; गन्ती १५:३०
 27 नक लां मखोइक्ब आन कली मारेइ आस मलीब। परमप्रभु यावे कली मटीबपुकी मीम खतम सेल्चा पुंडसीनीम। नक लां मखोइक्बपुकी यो मोपा खतम दुम्नीम। 28 साइ परमप्रभु यावे आ अरेशो लोव्र मटीब आन कली सांकछी निक्शी सां आन लोव्र नेशा, दोस गेशा, काइ शिशी मपथु साइक्बाक्मा बाक्त। ब्यवस्था १७:६ 29 मिनु परमप्रभु यावे आ तौ कली खोइलीम दिम्ब, शुश सजाइ गेशा साइक्चा पुंडसाक्म, दे तुइक्नय। डोंइती आंम कली पाको सेल्शो नक कबल डा हुश आ पबर्म शुक्शी पा “हुश नेल्ल कांइचीक बाक्ब, मार अर्को लोव्र बाक्बा डा?” देंनीम। परमप्रभु यावे आ सोक्ती आ पबर्म यो शुक्शी पाइनीम। मोदेशो पाइबपुकी शुश सजाइ गेचा मपुंडसीनीमी डा? हिब्रू २:३; हिब्रू १२:२५ 30 मोदेशो पाइब आन कली सजाइ गेब कली तुइश्शो बाक्नय। आं चहिं लोव्र कामी “क्येक्क लेत्तीक गेय आं के बाक्ब। मिनु गो पाइनुड” देंब। मिनु लेंशा “परमप्रभुमी आ मुर आन कली निसाफ पाइब” देंब। ब्यवस्था ३२:३५-३६ 31 मोपतीके ब्रोंइशा बाक्ब परमप्रभु यावे आ गुइ रे पा सजाइ गेचा पुंडसीचा चहिं नेल्ल क्येडा हिंचा डा बाक्ब, दे तुइक्नय। हिब्रू १२:२९

32 साइ इन थुंमी छेडछेड दुम्शा, थमा सुइक्ब दुम्नीनु, मार दुम्मे, मेको मुल यो मिम्तीने। मार दुम्त देंशा हना, शुश श्येत जाइतीनी हना यो, फाल्शा बाक्तीनी। हिब्रू ६:४ 33 इन कली मुर आन कुल शुक्शी पा श्येत गेमेनु, फाल्तीनी। अरु आन कली श्येत जशो तनीनु, मेकोपुकी नु थुं का दुम्शा, मेको आन श्येत यो फाल्तीनी। १कोरिन्थी ४:९ 34 जेल्खानम चोक्शा वोइश्शो आन कली शिशी पा ग्रुम्थ लाइतीनी। मिनु गे यो श्येत जाइतीनी। इन बाक्शो शोप रोइश्शा लदमेनु, गेमी “इं के गेनायो मजाम्ब शोप बाक्ब” दे तुइश्शा, लाइक्चा गेशा ग्येरसीशा बाक्तीनी। मत्ती ६:२०; मत्ती १९:२१, २६ 35 मोपतीके मुल यो आस पचा मप्रोनीन, इनाम ताइनय, दे तुइश्शा, इन थुं बारपतीने। 36 गे फाल्तीक सक्ति माल्नीनी। परमप्रभु यावे आ दाक्शो गेय पना पन बाक्कीन। मिनु आ गेनुड देंशो थोव्रक ताइनीनी। लूका २१:१९; याकूब ५:७ 37 मार ब्रेक्शो बाक्ब देंशा हना, लोव्र कामी “‘गो जाक्नुड’ देंबमी मजाक्थु मप्रोंइब, देश पा यो मबाक्ब। 38 आं ठीक पाइब मुरपुकीमी आं कली थमा सुइश्शा, ब्रोंइशा बाक्नीम। नोले शोंइसाक्म हना, मेको आन कली तशा मग्येरनुड” दे ब्रेक्शो बाक्ब। हबकुक २:३-४; रोमी १:१७ 39 तन्न नोले शोंइसीशा खतम दुम्चा पुंडसीब मदुम्नय। गेना हना यो परमप्रभु यावे नु बाक्चा ताइनय, दे थमा सुइश्शा बाक्नय। १थिस्सलोनिकी ३:३

11

माइत कबल डा थमा सुइक्तीके

1 थमा सुइक्चा चहिं मार बाक्ब देंशा हना, आस पशो थमा दुम्शो तांइसीब नु इं मिक्चीम मतशो थोव्रकी बाक्नीम, दे मिम्चा बाक्ब। मिनु बाक्नीमी यो। मेको मोदेशो मिम्चा कली थमा सुइक्चा देंसीब। २कोरिन्थी ५:७ 2 मोपा थमा सुइश्शोमी इं किकी पिपीपुकी ठीक दुम्मा बाक्त। 3 गोपुकीमी यो मोपा इं थमा सुइश्शोमी सरीड रागी नेल्ल दुम्मेनु, मिक्चीम तशो थोव्रकी के सेल्शो मनम, तन्न परमप्रभु यावेमी “दुमीन” देंशो लोव्रमी दुम्शो बाक्नीम, दे तुइक्नय। उत्पत्ती १:१-२,४

किकी पिपीपुकीमी थमा सुइश्शो

4 काइन नु हाबील निम्फामी परमप्रभु यावे कली भेटी चढेम्सेनु, काइन क्येडा हाबील आ चढेशो रिम्शो बाक्माक्त। मारदे हना हाबीलमी परमप्रभु यावे कली थमा सुइक्बाक्माक्त। मिनु हाबील आ चढेशो ताक्शा, परमप्रभु यावेमी “हाबीलमी थमा सुइक्ती। मोपतीके ठीक दुम्पाइक्ता” दे कोइताक्व। हाबील बेक्शा लशा, मिश बर्स दुम्शा यो आ थमा सुइश्शो आ पबर्म चहिं मुल सम्म लोव्र पना पन बाक्नय। उत्पत्ती ४:३-४ 5 हानोकमी परमप्रभु यावे कली थमा सुइक्बाक्माक्त। मोपतीके आ मबेक्थु सेसीन, परमप्रभु यावे नु लशा बाक्चा तवा बाक्त। हानोक रागीम बाक्मेनु, परमप्रभु यावे आ देंशो टिशा, आ थुं नुपाइश्शो बाक्माक्त, दे तुइक्नय। हिब्रू लोव्रमी हानोक कली एनोक बाक्ब। उत्पत्ती ५:२४ 6 थमा मसुइक्थु मेको आ थुं नुपाइक्ने मजाप्व। परमप्रभु यावे आ नेक्था जाक्दीन्ने यो मजाप्व। मेको बाक्ब, दे थमा सुइक्चा माल्ब। मिनु मेको बाक्ब, दे थमा सुइक्बपुकीम मेको कली माल्नीम। मिनु आ कली माल्ब आन कली तपांइसीब। 7 नोआह यो थमा सुइक्ब बाक्माक्त। यावेमी मेको कली “नोले ओदेशो दुम्ब” मदानु, मेको लोव्र थमा सुइश्शा टिशा, ठेयब डोंगा सेल्शा, आ खिं डा मुर आन कली ओंइशा, बेक्चा मगेथु प्रोंइमी बाक्त। नोआहमी

मो पशो तशा यो अरुमी थमा मसुदमे बाक्त। मिनु आन थमा मसुइक्तीके दोसी दुम्शा, नेल्ल बेक्चा माल्मा बाक्त। नोआह चहिं थमा सुइश्शोमी ब्रोंडचा तांडसीब, दे कोंडब दुम्माक्त। उत्पत्ती ६:८-९, १३-२२

8 अब्राहाममी यो परमप्रभु यावे आ लोव्र थमा सुइक्बाक्माक्त। यावेमी “इ कली नोले गेनुड देशो रागी कोंडनन। मोपतीके एकेर रे लावो” देंमेनु, अब्राहाममी परमप्रभु यावे आ देशो टिशा, ते लचा मतुइक्थु, यो मलेत्चा डा पा मेको रागी प्रोंडशा गाक्माक्त। उत्पत्ती १२:- २१:- 9 मिनु थमा सुइश्शा कोंडशो रागीम जाक्दीश्शा, परमप्रभु यावे आ गेशो लोव्र ताइब आ तौ इसहाक, आ चच याकूब नु काथा बाक्शा, अर्को रागी डा मुर खोदेशो पा खिं मसेल्थु ताम्बु कीशा बाक्माक्त। 10 सरीड नु रागी कली सेल्ब परमप्रभु यावेमी दुशा ग्येरशा बाक्तीक सहर यो सेल्ब बाक्ब। अब्राहाममी मेको सहर कली रिम्शो बाक्माक्त।

11 थमा सुइश्शोमी अब्राहाम आ मीश सारा आल मथीब थारी बाक्शा यो, आल थीब दुम्माक्त। मारदे हना लोव्र गेब परमप्रभु यावेमी आ लोव्र दोपा यो खाप्ब, दे थमा सुइश्शो बाक्माक्त। 12 मेना अब्राहाम आल मथीब खाल्पा बाक्माक्त हना यो, नोले आ खिं डा मुर सोरुल खोदेशो पा शुश दुम्शा, हिक्ने मचाप्चा डा दुम्मा बाक्त।

13 अब्राहाम नु आ खिं डा मुरपुकीमी परमप्रभु यावेमी गेशो लोव्र थमा सुइश्शा बेक्मा बाक्त। मेको लोव्र गाप्शो मतथु, डोन रे तशा मजाक्दीत्थु, बेक्मा बाक्त। मेकोपुकीमी “इं रागी मजाक्दीत्थु, अर्को आन रागीम बाक्तय” देशो बाक्मा बाक्त। उत्पत्ती २३:४; उत्पत्ती ४७:९; १इतिहास २९:१५ 14 मो देंमानु “आंइ रागी माल्शा गाक्तक” दे तुइक्पाइक्नीम। 15 मेकोपुकीमी आन गूशा लशो रागी मिम्ताक्म हना, लेश्शा लम वा। 16 तन्न गूशा लशो रागी क्येडा रिम्शो बाक्तीके परमप्रभु यावेमी गेब, दे तुइश्शा, परमप्रभु यावे गे लमा बाक्त। मिनु परमप्रभु यावे मेको आन परमप्रभु यावे दुम्चा मुने मपाइब। मेको आन कली बाक्तीके सहर का सेल्शा वोइश्शो बाक्ब।

17 अब्राहाममी आ थुं थाम्चा पुंडसीशा थमा सुइश्शा, आ तौ इसहाक कली चढेवा बाक्त। इसहाक अब्राहाम आ कांडचीक तौ बाक्माक्त। मेको रे पा परमप्रभु यावे आ गेशो लोव्र थमा दुम्चा माल्शो बाक्माक्त। उत्पत्ती २२:१-१९; याकूब २:२१ 18 मारदे हना परमप्रभु यावेमी अब्राहाम कली “इसहाक रे पा इ चच युइ रागीम लीनीम” दे लोव्र गेशो बाक्माक्त। उत्पत्ती २१:१२ 19 अब्राहाममी “आं तौ बेक्त हना यो, परमप्रभु यावेमी बेक्शो रे सेने चाप्ब” दे मिम्ता बाक्त। परमप्रभुमी अब्राहाम आ मिम्शो तुइश्शा, आ तौ कली मसाइक्पाइक्थु लेत्ता बाक्त।

20 इसहाकमी परमप्रभु यावे आ देशो नोले दुम्ब लोव्र थमा सुइश्शा, आ तौ याकूब नु एसाव आस कली आसीक गेम्सी बाक्त। उत्पत्ती २७:१-४०; उत्पत्ती ४८:- ५०:- 21 याकूबमी थमा सुइश्शा, आ बेक्ची ना कोक्केमी आ पिया तिव्शा, परमप्रभु यावे कली ठेयब सेल्शा, योसेफ आ तौ आस कली आसीक गेम्सी बाक्त। उत्पत्ती ४७:३१ 22 मिनु नोले योसेफमी यो आ बेक्ची जाक्त, दे तुइश्शा डा मिन “इस्त्राएलीपुकी इजीप्त रे गूशा गाक्नीम” दे परमप्रभु यावे आ देशो लोव्र मिम्शा, आ मुर आन कली “गे लेन्नीनु, आं रुश यो लाइश्शा लने” दे माइक्मी बाक्त। मारदे हना आ यो “परमप्रभु यावे आ देशो जाक्दीप्ब” दे थमा सुइश्शो बाक्माक्त।

23 मोसा जरमेसेनु, आम आफोमी थमा सुइश्शा “परमप्रभु यावेमी एको आल कली ब्रोंडपाइक्ने चाप्ब। मोपतीके एको इश दारशो आल कली मसाइक्चा” देशा, पिप आ हुकुम मटिथु महिथु, आस तौ मोसा कली महिना सां सम्म खुइश्शा वोदसे बाक्त। प्रस्थान २:१२, १४ 24 मिनु मोसा मोपा कोल्शा ठेयब दुम्शा, परमप्रभु यावे कली थमा सुइश्शा, मार पवा बाक्त देशा हना “मुल डा मेरे फाराओ आ तमी आ तौ मदुम्नुड, आं मुर नु लाइनुड” दे लमाक्त। 25 पापीपुकी नु काथा बाक्शा, सुख जचा क्येडा परमप्रभु यावे आ मुर नु बाक्शा, श्येत जशा बाक्चा योव्रतु। 26 मारदे हना इजीप्त डा शोंप नु मान तशा यो मारेइ मसुइक्थु “खीस्तमी श्येत जशो खोदेशो पा श्येत जचा थमा डा शोंप नु मान बाक्ब, दे मिम्ताक्व। मिनु नोले इनाम यो तांडसीब” दे तुइश्शा थमा सुइश्शो बाक्माक्त। 27 “मतांडसीब परमप्रभु यावे कली मिक्चीम तशो खोदेब पा आं नेक्थान ताइनुड” दे थमा सुइश्शा, पिपी गाइश्शो तशा यो महिथु, इस्त्राएली आन कली इजीप्त रे गुंइशा लाइक्मी बाक्त। 28 इजीप्त रे गुंइचा डोंइती पास्सा चाड डा भोज जपाइक्मी बाक्त। मारदे हना “तेको खिं डा लाप्चो आ पियामी हुश ब्रुइश्शो बाक्मे, मेकेर परमप्रभु यावे आ स्वर्ग डा गेय पाइबमी जेठा तौ कली मसाइक्ब” दे परमप्रभु यावे आ लोव्र थमा सुइश्शा, हुश ब्रुइक्पाइक्मी बाक्त। 29 मिनु थमा सुइश्शोमी लल समुन्द्रम सोव्रशो लां दुम्माक्त। मिनु खोइल का यो मजित्थु शोक्समा बाक्त। मेको आन नोले खोइश्शा खेदा पाइब इजीप्त डा मुरपुकी चहिं समुन्द्रमी गुम्शा बेक्मा बाक्त।

30 परमप्रभु यावे आ देशो लोत्र थमा सुइशशा, यरीको सहर ७ नाक्त सम्म हिरसमा बाक्त। मिनु ७ नाक्त गारो नेल्ल ब्रेम्मा बाक्त। यहोसु २:-; ६:१-२५ 31 डोंइती राहाब तेल्लेममी मोसाम सोइशशो क्यारी पाइब आन कली जतीक बाक्तीक गेशा मान पशो बाक्माक्त। मिनु आन देशो लोत्र थमा सुइक्तीके मटीब नेल्ल नु मबेक्थु, ब्रोंइचा तवा बाक्त। याकूब २:२५

32 में डा लाकशा मार देनुडा? मारदे हना मोदेशो थमा सुइक्ब शुश बाक्नीम। गिदोन, बाराक, साम्सोन, येफता, दाऊद, सामुएल नु परमप्रभु यावे आ लोत्र पाइब नेल्ल आन पशो मिम्पाइक्तन्नी हना, आं लोत्र गेनायो मनुप्ब। न्यायाधीस ६:११-८:३२; न्यायाधीस ४:४-२४; न्यायाधीस १३:१-१६, ३१; न्यायाधीस ११:१-१२, ७; १सामुएल १७:-; दानीएल ६:- 33 मोदेशो थमा सुइक्बपुकीमी मार पामे बाक्त देशा हना, कोइमी लडाइ पा ग्राशा, रागी आंम के सेल्मे बाक्त। कोइमी श्येत जाइब आन कली वारच पामे बाक्त। कोइमी डोंइती देशो लोत्र थमा दुम्शो तामे बाक्त। गुप्स आन शोत्र रे यो ब्रोंइमा बाक्त। 34 मीम हुम्चा पुंडसीशा यो मबेक्मा बाक्त। तरवारमी क्योरचामेनु यो ब्रोंइमा बाक्त। मारेइ पने मचाप्ब बाक्मा बाक्त हना यो, पने चाप्ब दुम्मा बाक्त। लडाइ पामेनु यो ठेयब थुं पाइशशो दुम्शा, आन जोरी सत्रु आन कली फ्रुशा खेरमे बाक्त। 35 मीश मुरपुकीमी आन तौ बेक्शा लशा, बेक्शो रे सेंसीशो तामे बाक्त। मिनु मेको आलपुकी एको रागीम ब्रोंइमा बाक्त। कोइमी “बेक्शा नोले बेक्शो रे सेंसीशा गेनायो मबेक्सीब, ग्येरशा बाक्चा तांडसीब” दे थमा सुइशशा, श्येत जशा यो फालशा बाक्मा बाक्त। शुश श्येत जशा तुप्चा पुंडसमा बाक्त हना यो “थमा सुइक्चा प्रोंइनीकी” दे मदेमा बाक्त। “थमा सुइक्चा प्रोंइनीकी” देशो नम हना, प्रोंइशा सोइक्तेम वा। “थमा सुइक्चा मप्रोंइनीकी” देशोमी श्येत जना जन साइक्चा पुंडसमा बाक्त। १राजा १७:१७-२४; २राजा ४:८-३७; 36 का निकशी शुक्शी लोत्र पा कोराम युक्शा, गुइ खोइली साडलोम पाइशशा, जेल्लखानम चोक्शा वोइक्चा पुंडसमा बाक्त। १राजा २२:२७; येरमीया २०:१-३; येरमीया ३७:११-१६ 37 फुल्लु आप्शा साइक्चा पुंडसमा बाक्त, आरामी रिक्शा साइक्चा पुंडसमा बाक्त, तरवारम क्योरशा साइक्चा पुंडसमा बाक्त। २इतिहास २४:२१ 38 तेइ बाक्चा मतथु, जचा फेक्चा मतथु, भेडा नु क्यारश आन कुशुल फेक्शा, एर ओंथ हिरना हिरन गोरशो रागी रोंगुमी प्रोक्शा, पुक्खीमी खुइक्ना खुइक्न बाक्मा बाक्त। मोपा श्येत जाइब आन कली एको रागीमी बाक्शा ब्रोंइचा मगारब। मारदे हना रिम्शो मुर बाक्नीम। एको रागी चहिं मरिम्शो बाक्ब। 39 मेको नेल्ले थमा सुइशशा, परमप्रभु यावे आ डोंइती ठीक दुम्मा बाक्त। परमप्रभु यावे आ गेशो लोत्र चहिं गाप्शो मतामे बाक्त। हिब्रू ११:४-५ 40 मारदे हना परमप्रभु यावेमी इं पबंम शुश रिम्शो मिम्शो बाक्मा बाक्त। मिनु मेकोपुकी यो गोपुकी नु रिम्शो दुम्मल। मेको नक लां रे पा पाको मसेल। मेको आन कली नु इं कली काथा वोइशशो बाक्ब, दे रुब्य।

12

येसु कली थमा सुइशशो

1 साइ थमा सुइक्बपुकी शुश बाक्मा बाक्त। मेकोपुकीमी इं कली कोव्रना कोव्रन बाक्नीम। मोपतीके दोरब मुर खोदेशो पा, इं कली तेक्ब नु खोल्ने चाप्बपुकी तिल्ला, पापमी इं खोइली फ्रेंचा मगेथु, दोरय। १कोरिन्थी ९:२४ 2 थमा सुइक्तीक लां कोइशा, पाको सेल्ब येसु कली मिम्तय। मेकोमी शीम केप्शा कांटी थोक्शा क्याइशशा साइक्चा पुंडसीचा आ पबंम, मुने आ पबंम मारेइ ममिम्ता बाक्त। नोले मान पा ग्येरसीशा बाक्चा ताइनुड, दे मिम्ता बाक्त। मिनु मुल परमप्रभु यावे आ ग्युरा गे निशशो बाक्ब। हिब्रू ५:८-९; फिलिप्पी २:८-१० 3 येसु रागीम बाक्मेनु, पापीपुकीमी शुक्शी पा खेदा पा शुश मरिम्शो पाम्तेक्म हना यो, मेको नेल्ल फाल्तु। मेको आ श्येत फाल्शो मिम्तीने। मेको मिम्ताक्नी हना, इन थुं बारनीनी। लांमी गाक्शा दशो खोदेशो मदुम्नीनी। मत्ती २६:६७; लूका २:३४ 4 पाप नु लडाइ पा मुल सम्म हुश जुइक्थी मदुम्नी।

परमप्रभुमी इं कली कोव्रब

5 तमी तौ आन कली अर्ती गेशो खोदेशो पा इन कली डोंइती गेशो अर्ती प्रेंदीनी माइ, दे मिम्पाइक्नन्नी। ओदें ब्रेक्शो बाक्ब “आं तौ, परमप्रभुमी इं कली शेंदानु, शेंसो। इं कली श्येत जपदानु ‘फाल्ने मचबु’ मदेनो। मेको कली सोपी ममिम्तो। 6 परमप्रभुमी सु कली दाक्बा, मेको कली सजाइ गेब। सु कली आ तौ मिम्बा, मेको कली तुप्ब” दे ब्रेक्शो बाक्ब। हितोपदेस ३:११-१२; प्रकाश ३:१९ 7 श्येत गेचा पुंडसीनीनु, परमप्रभु यावेमी शेंताक्की, दे मिम्तीने। आफोमी आल कली पशो खोदेशो पा, परमप्रभु यावेमी इन कली पाइब। आफोमी शेंचा मपुंडसीब तौ बाक्बा डा? 8 आल नेल्ले शेंचा पुंडसीनीम। परमप्रभु यावेमी इन कली मशेंताक्व हना, आ तमी तौ मननी। आफ मपाइशशो बाक्नीनी। 9 एको

रागी डा इं आफोमी इं कली तुप्तेकम हना यो, मेको आन कली मान पा आन लोव्र टीतय। मिनु गेना हना यो आ नु काथा बाक्चा कली स्वर्ग डा आफ आ देशो टिचा ममालनया डा? 10 इं आफपुकीमी इं कली आन मिम्स पा नाक्ती का निक्शी सम्म शेंताकम। स्वर्ग डा आफोमी चहिं इं कली रिम्शो थुं पाइश्शो सेल्चा दाक्ब। पाप रे डोन बाक्शो आ खोदेशो दुम्शो तचा दाक्ब। मोपतीके इं कली शेंब। 11 मोदेशो पा शेंचा पुंइसीयानु, मग्येरनय। श्येत जाइनय। श्येत फालने चाप्बपुकी ठीक दुम्नीम, आन थुं नाइक्चा ताइनीम, दे रुब्य। २कोरिन्थी ४:१७-१८

12 मोपतीके श्येत जाइतीनी हना यो, लांमी गाक्शा दशो खोदेशो मदुमीन, इन गुइ खोइल सेस दुम्शा गाक्कीन। 13 लां ब्रेम्शो सेल्शा, रिम्शो पा थेक्शा गाक्कीन। सुइ दशा, खोइली खाइश्शा, आन पोक्च मबुइक्ल। रिम्शो पा गाक्शा, आन दशो सामल। हितोपदेस ४:२६-२७ 14 मुर नेल्ल नु दुशा गारशा बाक्कीने। पाप रे डोन बाक्शा, रिम्शो थुं पशा गेय पा कोंइदीने। मो पाइतीनी हना, प्रभु नु काथा बाक्चा ताइनीनी। रोमी १२:१८; २तिमोथी २:२२ 15 अर्ती गेमुशा वारच पमुशा बाक्कीने। सुइ परमप्रभु यावे आ शिशी मताइब मदुम्ल। सुइमी थुं चोशा दुशा बाक्ब आन कली फ्राशा, मुर आन कली मरिम्शो मसेलल। ब्यवस्था २९:१७ 16 सुइ एसाव खोदेशो मरिम्शो मदुम्ल। एसावमी काले आ कोव्रज प्रिंचा कली डोंइती जरमेशो तौमी तचा डा शोप नु आसीक आ लोक्ब कली प्रोना बाक्त। उत्पत्ती २५:३३-३४ 17 नोले आस आफोमी अडस योक्गानु, एसावमी डोंइती जरमेशो तौ आ तचा डा अडस गेयीनी, दे डाक्ना डाक्न पुंइशा यो आ आफ आ थुं लेप्पाइक्ने मचबा बाक्त। मिनु परमप्रभु यावे आ डोंइती आ नें मलीमाक्त, दे नेल्लेमी तुइक्नीनी। उत्पत्ती २७:३०-४०

रिम्शो राज्य ओव्रचा ताइनय

18 साइ इं किकी पिपीपुकीमी परमप्रभु यावे कली गुम्शो खोदेशो पा मगुम्नीनी। मेकोपुकीमी गुइमी थिचा डा डांडामी मी ब्रशा तामे बाक्त। मिनु छिडछिड दुम्शा क्येर गोस्स बोक्शा, फश गिवार पा बुंबु पवा बाक्त। गे मेक सम्म मजाक्शो बाक्नीनी। प्रस्थान १९:१२, १६, १८; ब्यवस्था ४:११ 19 मिनु तुराही ताप्शो ठेयब रेयके खोदेब पा परमप्रभु यावे आ लोव्र नेन्मे बाक्त। मेको लोव्र नेने मचाप्थु “मुल डा मेरे ओं देब लोव्र मपचा” दे थम हिंशा पुन्मे बाक्त। प्रस्थान २०:१९ 20 मेकोपुकीमी नेने मचाप्शो लोव्र “एको डांडा थीब बस्तु जन्तु बाक्त हना यो, मेको कली फुल्लु आप्शा साइक्चा माल्ब” देशो लोव्र बाक्माक्त। प्रस्थान १९:१३ 21 मोदेशो हिंचा डा दुम्शो तशा, मोसामी “हिंशा खिंखि पाता” देमाक्त। ब्यवस्था ९:१९ 22 तन्न गे सियोन डांडाम ब्रोंइशा बाक्ब परमप्रभु यावेमी स्वर्गम सेल्शो यरूसलेम सहर जाक्दीश्शा बाक्चा ताइनीनी। मेकेर परमप्रभु यावे आ स्वर्ग डा गेय पाइब बाक्नीम। गलाती ४:२६; एफिसी २:६; फिलिप्पी ३:२०; प्रकाश २१:२; प्रकाश ५:११ 23 आन नें स्वर्गम ब्रेक्चा पुंइसीशा, इन क्येडा डोंइती जाक्दीश्शा, पाप रे ब्रोंइशा ग्येरशा बाक्चा ताइबपुकी बाक्नीम। परमप्रभु यावेमी मुर नेल्ल आन कली निसाफ पाइब आ नेक्था बाक्नीम। लूका १०:२० 24 नक कबल खाप्ब येसु बाक्ब। मिनु येसु आ जारशो हुश यो बाक्ब। मेको हुश हाबील आ हुश खोदेशो ममाइ। हाबील आ हुशेमी “आं कली साइक्ब सजाइ गेचा पुंइसमल” देब। येसु आ हुशेम चहिं “मेको आन पाप नेल्ल क्याम्शा, सजाइ जचा रे प्रोंइतामी” देब। हिब्रू ९:१५; उत्पत्ती ४:१०

25 होस पांइसीने। इन कली लोव्र पाइब कली इन ची मकोंइदीने। इं किकी पिपीपुकीमी मुर आ देशो मटीमे बाक्त। मिनु सजाइ गेचा पुंइसमा बाक्त। गोपुकी स्वर्ग रे लोव्र पाइब कली इं ची कोंइताक्य हना, सजाइ मतथु ब्रोंइनया डा? हिब्रू २:२; हिब्रू १०:२८-२९ 26 परमप्रभु यावेमी लोव्र पवानु, खिनु कुशो खोदेब पा रागी नेल्ले हिम्से बाक्त। मुल इं कली मार लोव्र पाइब देशा हना “मुल यो लेंशा काले रागी ला ममाइ, सरीड यो हिम्नुड” देब। हगौ २:६ 27 “मुल यो लेंशा काले हिम्नुड” देशो लोव्र रे मार रुम्सीब देशा हना, हिम्सीबपुकी सेल्चा पुंइसीशो बाक्नीम। मिनु फाइक्चा पुंइसीनीम। महिम्सीबपुकी चहिं लीनीम, दे रुम्सीब। 28 मोपतीके गेनायो महिम्सीब राज्य ओव्रचा ताइनय, दे तुइश्शा, परमप्रभु यावे कली मान पा ठेयब सेल्ना सेल्न “गे रिम्शो पाइब बाक्नीनी” देशा, ग्येरशा आ दाक्शो गेय पना पन बाक्य। 29 इं परमप्रभु यावे नेल्ल खतम सेल्ब मी खोदेशो बाक्ब। हिब्रू १०:३१; ब्यवस्था ४:२४

13

रिम्शो गेय कोंइदीने

1 लोक्ब खोदेशो पा दाक्मुशा गारशा बाक्कीन। यूहन्ना १३:३४; २पत्रुस १:७ 2 इन खिंम जाक्ब सुइ आन कली जचा बाक्चा गेचा मप्रोनीन। मोपा गेशोमी का निक्शीमी आन मतुइक्थु परमप्रभु यावे आ स्वर्ग डा गेय पाइब आन कली मान पचा ताम्तेकम। रोमी १२:१३; १पत्रुस ४:९; ३यूहन्ना ५-८; उत्पत्ती १८:२-३; उत्पत्ती १९:२-३ 3 जेल्खानम

चोक्चा पुंडसीशो आन कली काथा बाक्शो मिम्शा वारच पने। श्येत गेचा पुंडसीब आन कली तशा, आंम श्येत जशो खोदेशो मिम्तीने। मती २५:३६

4 गे नेल्लेमी “ग्युंबे पशो रिम्शो बाक्ब” दे मिम्तीने। मुर आ मीश नु मुरु आ वोंडश मडम्मल। मीश वोंडश आस नाता खोइक्ब नु तेल्लेम आन कली परमप्रभु यावेमी निसाफ पाइब। 5 क्येट चेम्चा गे इन थुं महिरदीने। गेपुकी नु मार मार बाक्मा, मेको मोशोमीन इन थुं नाइशशा बाक्कीन। मारदे हना मेकोमी “गे नु बाक्नुड, मिनु गेनायो मप्रोंइनन” देंब। यहोसु १:५; १तिमोथी ६:६ 6 प्रभु आ देशो तुइशशा “प्रभुमी आं कली कोव्रशा, वारच पाइब। मुरपुकीमी मार पने चाप्नीमी डा? मारेइ पने मचाप्नीम। मोपतीके महिंथु बाक्ती” दे ठेयब थुं पा बाक्क्य। भजन संग्रह ११८:६

इन थुं दूली शेंब गे महिरदीने

7 इन कली परमप्रभु यावे आ लोव्र शेंब आन पशो मिम्तीने। मेकोपुकी बेक्ची सम्म थमा सुइक्चा मप्रोनेम। मेको आन पशो खोदेशो पने। 8 साइ डोंइती, मुल नु गेना हना यो येसु ख्रीस्त मफांडसीथु बाक्ब, दे तुइक्तीन। यसैया ४१:४; १कोरिन्थी ३:११; प्रकाश १:१७-१८; प्रकाश २२:१३ 9 मुल सम्म मनेशो नु दूली शेंब लोव्रमी इन थुं क्याल्चा मगेने। परमप्रभु यावे आ शिशीमी रिम्शो थुं पाइशशा दुम्तय, दे गेनायो मप्रेंदीने। चोव्रखो जशोमी ठीक थुं मसेल्ब, दे रुपीने। एफिसी ४:१४; २कोरिन्थी १:२१; रोमी १४:१७; १तिमोथी ४:८ 10 गुडमी सेल्शो ताम्बुम गेय पाइबपुकीमी येसु आ भोज जचा मताइनीम। 11 साइ ठेयब चढेबमी पाप क्याम्चा कली बस्तु भाव क्योरशा, थम चोव्रखो कोठाम ओव्रशा हुश चढेम्तेक्म। श्ये चहिं गुंडशा, मुर मबाक्तीकेम लाइशशा चोम्तेक्म। मिनु सुइमी मेको श्ये ब्वचा मताम। लेवी १६:२७ 12 मोपतीके मुर आन पाप क्याम्चा कली येसु कली सहर रे गुंडशा, श्येत जपाइक्तेक्म। येसुमी मुर आंम के सेल्चा कली आ हुश चढेपुतु। मती २१:३९; यूहन्ना १९:१७ 13 आ मुर दुम्शा, मेको मेर गूशा, आ नु काथा बाक्शा, आ बुदी शुक्शी पाइक्चा पुंडसाक्क्य। हिब्रू ११:२६; हिब्रू १२:२ 14 एको रागीमी गेना हना यो बाक्चा मताइनय। जाक्चशो सहर कली रिम्शा बाक्नीकी। हिब्रू ११:१०; हिब्रू १२:२२ 15 येसु रे पा परमप्रभु यावे कली मान पा ठेयब सेल्ना सेल्न बाक्क्य। मेको यो इं शोव्र डा भेटी बाक्ब। भजन संग्रह ५०: १४, २३; होसे १४:३ 16 अरु आन कली रिम्शो पने। मथीब मचाप्ब आन कली मार माल्दा, मेको गेचा मप्रेंदीने। मिनु परमप्रभु यावेमी इन कली मोदेब रिम्शो पशो तशा ग्येरब। 17 इन कली शेंब आन लोव्र नेंशा टिने। मेकोपुकीमी “परमप्रभु यावे आ डोंइती जिम्मा ब्राइनुड” दे तुइशशा इन कली शेंनीमी, कोव्रनीम। शेंब आन लोव्र टीतीनी हना, मेकोपुकीमी ग्येरशा शेंनीम। इन कली मटिशो तशा चहिं, आन थुं हेल्शो दुम्शा, शेंचा ब्रीनीम, मिनु इन कली यो मरिम्शो दुम्ब। १थिस्सलोनिकी ५:१२; इजीकीएल ३:१७-१९

आंइ कली प्रार्थना पने

18 आंइ पबर्म परमप्रभु यावे कली पुंडना पुंडन बाक्कीने। मारेइ दोस ताइब मदुम्क, दे आंइ थुं नाइशशा बाक्नीकी। मारेइ पाइतक हना यो, रिम्शो पय, दे थुं फ्रेशा बाक्कतक। रोमी १५:३०; २कोरिन्थी १:११-१२ 19 “ग्रुम्चा तयल” दे परमप्रभु यावे कली पुंडचा मप्रोनीन।

आसीक गेशो

20 नेल्ल क्येडा ठेयब भेडा गोठला, इं प्रभु येसुमी आ हुशेम गेना हना यो लीब कबल खापुतु। दुशा बाक्चा गेब परमप्रभु यावेमी मेको कली बेक्शो रे सेंताक्व। यूहन्ना १०:११; १पत्रुस २:२५ 21 परमप्रभु यावेमी येसु ख्रीस्त रे पा इन थुं रिम्शो सेलल, आ दाक्शो गेय पपदल, आ कली ग्येरपाइक्ब सेलल। येसु ख्रीस्त कली गेना हना यो ठेयब सेल्य। आमन। आमन आ अर्थ “गो यो मेकोन मिम्नुड” बाक्ब।

नोले डा लोव्र

22 आं दाक्शो लोक्बपुकी, इन कली आं ब्रेक्शो थुं बारपाइक्तीक लोव्र शुश मब्रेक्तु। रिम्शो पा रुप्चा माल्नीनी। 23 नेनीने, इं लोक्ब तिमोथी कली जेल्खान रे प्रोंइतेक्म। आं गाक्चा क्येडा डोंइती एक जाक्त हना, इन कली ग्रुम्थ पीनस्कु। 24 शेंब नु थमा सुइक्ब नेल्ल इन कली “रिम्शो बाक्कीन” देंती। इटाली डा थमा सुइक्ब लोक्बपुकीमी यो इन कली “रिम्शो बाक्कीन” देंतेक्म। 25 प्रभु आ शिशी गेपुकी नु लील।

याकूब

ब्रेक्ब मुर: एको चिठी ब्रेक्ब याकूब बाक्ब। मेको येसु आ लोकब बाक्त। गलाती १:१९ मेको यरूसलेम डा थमा सुइक्ब आन शेंब दुम्त। गलाती २:१; प्रेरित १५:१३-२१ मेको ६२ ए. डी.म फुल्लु आप्शा साइक्चा पुंइसाक्ब।

गेना ब्रेक्शो: एको किताब ४४ ए. डी. रे ५० ए. डी. दातेमी ब्रेक्शो बाक्त।

मारदे ब्रेक्शो: येसु ख्रीस्त कली थमा सुइक्तीके मुर आन पशो गेयमी तांडसीब, दे रुप्पाइक्चा कली ब्रेक्शो बाक्ब। थमा सुइक्ब आन पतीके मार बाक्ब, दे शेंतीके बाक्ब।

डोंइती डा लोव

1 गो, याकूब, परमप्रभु यावे नु प्रभु येसु ख्रीस्त आस वाइल नड। गो ब्रशा बाक्शो १२ थर डा यहूदी इन कली नमो पाइनुड। गे रिम्शो बाक्कीन।

थमा सुइक्तीके दोपा ठीक दुम्बा

2 आं लोकबपुकी, इन थमा सुइक्तीके ठीक बाक्म कों, मबाक्म, दे थुं थाम्चा पुंइसाक्नी हना, ग्येरसीने। रोमी ५:३-५; १पत्रुस ४:१३ 3 मारदे हना इन थमा सुइक्चा ठीक बाक्त हना, गेपुकी खोइली थेक्शा शुश फाल्ब दुम्नीनी। 4 येसु ख्रीस्त कली थमा सुइक्शा, खोइली थेक्शा बाक्शोमी परमप्रभु यावे आ डोंइती इन कली ठीक सेल्ब। मोपा परमप्रभु यावे नु बाक्चा कली थम रिम्शो नु ठीक दुम्शा, अरु मारेइ ममाल्नीनी।

5 तुइक्ब थुं माल्तीनी हना, गेपुकीमी परमप्रभु यावे कली “गो तुइक्ब थुं माल्नुड” दे पुनीन। परमप्रभु यावेमी मगाइक्थु, शुश तुइक्ब थुं गेब। याकूब ३:१५; हितोपदेस २:३-६ 6 परमप्रभु कली पुंइनीनु “आं पुंइशो गेब” दे थमा सुइक्शा पुनीन। “तुइक्ब थुं गेबा कों, मगेबा” दे थमा मसुइक्ब मुर खोदेशो पा मपुनीन। मोदेशो मुर फशेम नेप्शो समुन्द्र डा व्वाक्कु खोदेशो बाक्ब। मर्कूस ११:२४; १तिमोथी २:८ 7 मोदेशो मुरुम मारेइ मताइब। 8 थुं निक्शी पाइक्शो मुर आ थुं कामी परमप्रभु यावे आ लां खोइक्ब, थुं कामी मुर आन लां खोइक्ब।

पुडग नु क्येट थीब मुर

9 मिनु इन दातेमी सुइ पुडग थमा सुइक्ब लोकब बाक्त हना, मेकोमी “परमप्रभु यावेमी आं कली ठेयब मुर सेलती” दे ग्येरसेक्ल। याकूब २:५ 10 मेकेर थमा सुइक्ब क्येट थीब मुर बाक्त हना, मेकोमी “गो परमप्रभु यावे आ डोंइती पुंइब दुम्शा, आं पुंइशो गेब” दे ग्येरसेक्ल। क्येट थीब मुर बोइक्शो फू बेक्शो खोदेशो पा सोल बेक्नीम। १तिमोथी ६:१७; १पत्रुस १:२४ 11 नां दाप्शा डा मिन शुश हुप्तानु, घांस नेल्ल सोल सुल बेक्नीम। मिनु आन फू सफा नेल्ल हेम्नीम। मोपा आ दारस जाम्ब। मेको खोदेशो पा क्येट थीब मुर यो आ गेय पस डा पस बेक्नीम। यसैया ४०:६-७

ब्रोंइतीक सिरपेच

12 सु इन दातेमी आ थमा सुइक्तीके ठीक बाक्म कों, मबाक्म देय थुं थाम्चा पुंइसीशा फाल्ने चाप्बा, मेको मुर ग्येरसेक्ल। मेको थुं थाम्तीके ठीक दुम्त हना, मेको मुरुमी ब्रोंइतीक सिरपेच ताइब। परमप्रभु यावेमी “सुम आं कली दाक्बा, मेकोमी ब्रोंइतीक सिरपेच ताइब” दे लोव पशो बाक्ब। २तिमोथी ४:८ 13 पाप पचा चिक्शो मुरुमी “परमप्रभु यावेमी आं कली पाप पपाइक्चा चिक्ताक्ब” दे गेनायो देंचा मडुम्ब। मारदे हना सुइमी परमप्रभु यावे कली थुं नाक्शा, पाप पपाइक्ने मचाप्ब। आं यो सुइ कली पाप मपपाइक्ब। 14 मुरपुकीमी दोपा पाप पाइनीम देंशा हना, आंम दला दाक्स पा पाप पाइनीम। उत्पत्ती ३:६; रोमी ७:७-८ 15 मोपा दला दाक्स पामेनु, पाप गूब। मेको पाप बारने थुमानु, मेको मुर नरकम लाइनीम। मेको पाप पतीके बाक्ब। रोमी ७:१० 16 आं दाक्शो थमा सुइक्ब लोकबपुकी, दूली लां मखोतीन।

17 हाइक्शो नु रिम्शो ठीक मिम्तीके थुं नेल्ल परमप्रभु यावे रे जाक्ब। मिनु परमप्रभु यावे छेडछेड कली सेल्ब बाक्ब। मोपतीके परमप्रभु यावे छेडछेडमी बाक्ब। छिडछिड डा गेय काइ मपाइब। आ थुं यो मफांइसीब। मत्ती ७:११; १यूहन्ना १:५ 18 परमप्रभु यावेमी इं कली आ थमा लोव पतीकेमी नक जरमेशो मुर सेल्लु। मोदेशो पा डोंइती सिक्शो फल खोदेशो पा आ मुर दुम्तय। यूहन्ना १:१३; १पत्रुस १:१:२३

परमप्रभु आ लोव नेंशा पचा

19 आं दाक्शो लोकबपुकी, मार तुइक्चा माल्नीनी देशा हना, गेपुकी नेंस डा नेंस बाक्कीन। शुश मब्वाक्कीन। शुश मचुरीन। हितोपदेस २९:२०; उपदेसक ५:१-२; उपदेसक ७:९ 20 चुरब मुरुमी परमप्रभु आ ठीक पतीके मपाइब। 21 मोपतीके ग्रांग्रा दिचा डा गेय नु काइ मरिम्शो पतीके नेल्ल प्रोनीन। गे ठेयब मलेत्थु, इन थुमी वोइशो परमप्रभु यावे आ अरेशो लोव्र टिने। मोपा गेपुकी परमप्रभु यावे आ अरेशो लोव्र टिनीनु, मेको लोव्रमी इन कली नरक रे प्रोइने चाप्ब। १पत्रुस २:१

22 गेपुकी परमप्रभु यावे आ लोव्र नेनीन। नेंचा ला ममाइ, मार मार देशो बाक्मे, मेको यो पचा माल्नीनी। गेपुकीमी मेको लोव्र नेंशा मपाइतीनी हना, जोल पांडसीनीनी। मत्ती ७:२१; रोमी २:१३ 23 सु परमप्रभु यावेमी देशो लोव्र नेंशा मपाइबा, मेको ऐना कोव्रब मुर खोदेशो बाक्ब। 24 मेको मुरुमी ऐना कोव्रशा, आ कुल दोदेशो तांडसे, मेको यु प्रेंब। 25 सुमी इन कली प्रोइने चाप्ब परमप्रभु यावे आ ठीक पतीके अरेशो लोव्र नेनीमी, नेंचा ला ममाइ पना पन यो बाक्नीमी, मेको मुर आन पतीकेमी आसीक ताइनीम। याकूब २:१२; रोमी ८:२; यूहन्ना १३:१७

26 सुमी “गो थमा सुइक्ब नड” दे मिम्बा, तन्न हेंथे ब्वाक्बा, मेको मुर जोल पाइब बाक्ब। मिनु आ थमा सुइक्तीके मोशा दुम्ब। १पत्रुस ३:१० 27 मखाल्थु ठीक पा थमा सुइक्तीके दोदेशो बाक्ब देशा हना, रोम रोइक्च नु वोंइश बेक्शो मीश मुर श्येत जामेनु, वारच पचा नु थमा मसुइक्ब पाप पाइब आन खोदेशो पाप काइ मपचा, मेको इं आफ, परमप्रभु यावे आ डोंइती ठीक पा थमा सुइक्तीके बाक्ब।

2

गुम्तीकेमी कुल मकोव्रमुने

1 आं लोकबपुकी, इं प्रभु येसु ख्रीस्त कली थमा सुइक्नीनी। मेको छेडछेड डा प्रभु बाक्ब। मोपतीके गेपुकी यो मुर आन कुल मकोव्रडीन। 2 थम दारशो वा फेक्शो नु सुन के औंठी पांडशो मुर का नु जेक्शो वा फेक्शो पुडग मुर का इन गुम्तीक खिंमी जाक्ताक्स हना, 3 मेको दारशो वा फेक्शो कली कोव्रशा “हजुर, मेकेर निस्सीने” दे लोव्र पशा, पुडग कली चहिं “हयु उइ राप्शा बाक्को। आं खोइल आ नेक्था निस्सो” दे माइक्तीनी हना, 4 गे इन दातेमी आइक्च नु ठेयब तिल्लीनी। मोदेशो पनीनु, मरिम्शो निसाफ मपनी डा? 5 आं लोकबपुकी, नेनीन, परमप्रभु यावेमी रागी डा पुडग आन कली शुश थमा सुदमेक्ल, दे मयोव्रडा डा? मिनु परमप्रभु यावे कली दाक्ब नेल्ल आ राज्य ओव्रचा ताइनीम मदेम डा? १कोरिन्थी १:२६; १कोरिन्थी ११:२२; लूका १२:२१ 6 गे चहिं पुडग आन कली दिप्नीनी। मेको शुश क्येट थीब मुरपुकी इन कली श्येत गेब मुर मनमी डा? मेकोपुकीमी इन कली अडडाम मचाक्दीत्नीमी डा? 7 येसु ख्रीस्त आ नें आ पर्वम शुक्शी लोव्र मपाइनीमी डा? १पत्रुस ४:१४

दाक्मुने

8 परमप्रभु यावे आ राज्य डा अरेशो लोव्रम मार ब्रेक्शो बाक्ब देशा हना “अरु आन कली आंम इन कली दाक्शो खोदेशो पा दाक्तीन” दे ब्रेक्शो बाक्ब। मो पाइतीनी हना, गेपुकी रिम्शो पाइनीनी। लेवी १९:१८ 9 तन्न गेपुकीमी थमा सुइक्ब का कली ठेयब सेल्शा, अरु आन कली आइक्च सेल्तीनी हना, गे पाप पाइनीनी। मिनु परमप्रभु यावे आ अरेशो लोव्र मटीब दुम्नीनी। ब्यवस्था १:१७ 10 मुर कामी परमप्रभु यावे आ अरेशो लोव्र नेल्ल पशा, का चहिं मपाप्तु हना, लोव्र नेल्ल मटीब खोदेशो दुम्ब। मत्ती ५:१९ 11 परमप्रभु यावेमी “मीश वोंइश आस नाता मखोइक्चा” दे ब्रेक्शो बाक्ब। मिनु “मुर मसाइक्चा” दे यो ब्रेक्शो बाक्ब। तेल्लेम मपथु, तन्न मुर आन कली साइक्तीनी हना, गेपुकी परमप्रभु यावे आ अरेशो लोव्र मटीब पापी दुम्नीनी। प्रस्थान २०:१३-१४ 12 परमप्रभु यावेमी इन कली पाप रे ब्रोंइतीक लां कोंइशा, निसाफ पाइब। मेको मिम्शा, गेय पने। 13 शिशी मपाइबपुकीमी निसाफ पची नाक्त शिशी मताइनीम। निसाफ क्येडा शिशी ठेयब बाक्ब। मत्ती ५:७; मत्ती १८:३०, ३४; मत्ती २५:४०, ४६

थमा सुइक्चा नु टिचा

रोमी ३:२१-३१; मत्ती ७:२१

14 आं लोकबपुकी, मुर कामी “गो थमा सुइक्नुड” दे परमप्रभु यावे आ अरेशो लोव्र नु गारब गेय मपाप्तु हना, आ थमा सुइक्शोमी मेको कली पाप रे प्रोइने चाप्बा डा? मत्ती ७:२१ 15 मिनु लोकब का के जचा फेक्चा मबाक्त हना, 16 मेको कली “थुं नाइशशा बाक्को। परमप्रभुमी इ कली फेक्तीक गेवल। जचा गेवल” देशा, गे मेको कली आ माल्शो

मारेइ मगेतीनी हना, इन थमा सुइक्तीके शोर गाक्शो बाक्ब। १यूहन्ना ३:१८ 17 इन थमा सुइक्तीकेमी गेय मपाप्तु हना, मेको थमा सुइक्तीके बेक्शो बाक्ब।

18 मुर का निक्शीमी “गे थमा सुइक्ब दुम्तीनी। गो चहिं परमप्रभु यावे आ गेय पाइब दुम्तक। मोपतीके इन थमा सुइश्शो कोइदीन। इन गेय कोइचा ममाल्नीनी। गो यो आंइ पशो गेय रे आंइ थमा सुइक्तीके कोइनीकी” देने चाप्नीम। गलाती ५:६ 19 गेपुकी परमप्रभु यावे का ला बाक्ब, दे थमा सुइक्नीनी। मोपा रिम्शो पाइनीनी। वोलपुकीमी यो मेको थमा सुइश्शा हिंशा खिंखि पाइनीम। 20 गे दूली पाइबपुकी, गेय मपथु थमा सुइक्तीके शोर गाक्शो बाक्ब, मेको तुइक्तीन।

थमा सुइक्चा मार बाक्बा?

21 मिनु इं किकी अब्राहाममी आ तौ इसहाक परमप्रभु यावे कली चढेचा, दे परमप्रभु यावे आ डोंइती ठीक गेय पाइब दुम्माक्त। उत्पत्ती २२:१-१९; हिब्रू ११:१७; रोमी ४:२-३ 22 आ थमा सुइक्तीके नु आ गेय काथ काथा पवा बाक्त। मोपा आ थमा सुइक्तीके आ गेयमी ठीक दुम्शो बाक्माक्त। 23 मिनु अब्राहाम आ पर्बम ब्रेक्शो लोव्र ठीक दुम्माक्त। मार ब्रेक्शो बाक्त देंशा हना “अब्राहाममी परमप्रभु यावे कली थमा सुदा बाक्त। मेको थमा सुइश्शोमी अब्राहाम कली ठीक सेला बाक्त” दे ब्रेक्शो बाक्त। मिनु मुरपुकीमी अब्राहाम कली “परमप्रभु यावे आ वारच” दे याइनी नें वोदमे बाक्त। उत्पत्ती १५:६; यसैया ४१:८ 24 मुरुमी थमा सुइक्चा ला ममाइ, आन गेयमी यो ठीक दुम्नीम, दे गेपुकी रुप्ने मचाप्नीनी डा?

25 अब्राहाम खोदेशो पा राहाब माइश्शो तेल्लेम मीश मुरुमी यो थमा सुइक्ब दुम्शा, आ पशो गेयमी ठीक दुम्माक्त। दोदेंब गेय पवा बाक्त देंशा हना, इस्राएल डा मुर निक्शी आस कली अरु लां कोइशा, सोइक्ता बाक्त। हिब्रू ११:३१; यहोसु २:- 26 मिनु दोपा सोक्त मपाइश्शो मुर बेक्शो बाक्बा, मोपा थमा सुइक्बमी थमा सुइश्शो गेय मपाप्तु हना, आ थमा सुइक्तीके बेक्शो बाक्ब।

3

मुर आ शोव्रमी दोपा पाप पाइबा

1 आं लोकबपुकी, शुश शेंब मुर मदुमीन। मारदे हना परमप्रभुमी मेको शेंसीब आन क्येडा शेंब आन कली शुश कोव्रशा, आन लोव्र नेंशा, निसाफ पाइब। 2 गो नेल्लेमी शुश गलती पाइनय। सुमी लोव्र पवानु, काइ गलती मपाइबा, मेकोमी रांम मपचा डा गेय यो मपाइब। मेको मुर थम रिम्शो बाक्ब।

3 गोपुकीमी शारा बिप्पाइक्चा कली लगम पाइक्नय। मोपा मेको शारा आ रां नेल्ल चलेने चाप्नय। 4 जहाज यो मिम्तीन। दोदेशो ठेयब बाक्त हना यो, दोदेशो ठेयब फशेमी मेको कली गाक्पाइश्शो बाक्त हना यो, चलेबमी मेको कली इम्चीली थोव्रकमी चलेशो बाक्ब। मिनु ते लाइक्चा दाक्ता, मेकेर लाइक्ने चाप्ब। 5 मेको इम्चीली चलेतीके खोदेशो मुर आ लें बाक्ब। मुर आ लेंमी ठेयब लोव्र पाइब। मेको लें आइक्च बाक्त हना यो, ठेयब मरिम्शो पने चाप्ब। इम्चीली मीम ठेयब ब्वाकी क्रोइक्ने चाप्ब।

6 मुर आ लें मी खोदेशो बाक्ब। मेकोमी रां नेल्ल मरिम्शो सेल्ब। मेकोमी मरिम्शो लोव्र पशा, रां कली पापी सेल्ब। रागी नेल्ल कली क्रोइक्ब। आंमा यो नरकमी ग्रोइक्ब। हितोपदेस १६:२७; मत्ती १२:३६-३७; मत्ती १५:११,१८ 7 मुरपुकीमी बस्तु भाव, जन्तु, चिक्बी नेल्ल आन कली शेंने चाप्नीम। मिनु मेको आन कली शेंताक्म हना यो, 8 आंम आन लें कली शेंने मचाप्नीम। मुरुमी आन लेंमी मरिम्शो पाइनीम। दोपा ओश्येर जशा, मुर बेक्नीमी, मोपान लें यो मुर कली साइक्ने चाप्चा डा ओश्येरमी ब्रीशो बाक्ब। 9 गोपुकीमी प्रभु नु आ आफ कली “गे ठेयब नसी” दे लोव्र पाइनय। मिनु परमप्रभु यावेमी आ खोदेशो सेल्शो मुर आन कली सराप पाइनय। भजन संग्रह १४१:३; उत्पत्ती १:२६-२७ 10 मोपा शोव्र कामी आसीक लोव्र नु सराप लोव्र पाइनीम। आं लोकबपुकी, मो पचा मदुम्ब। एफिसी ४:२९ 11 ब्वाक्कु बुक्तीक का रे कशो नु ब्रोव्रशो ब्वाक्कु कालेमी यीबा डा? 12 आं लोकबपुकी, फोव्रशी रवामी तेल रवा आ फल मसिप्ब। अडगुर रवामी फोव्रशी मसिप्ब। मेको खोदेशो पा हिक्सी डाम्शो ब्वाक्कु रे ब्रोव्रशो ब्वाक्कु ग्रूने मचाप्ब।

इन गेय तेको लां रे जाक्बा?

13 मिनु इन दातेमी सु निप्स पाइश्शो नु रुप्तीक थुं पाइश्शो मुर बाक्मा, मेकोमी आ गेय रे पा आ ब्रेम्तीके रुप्तीक थुं रे जाक्ब, दे कोइदल। 14 गे अरु मुर आन थोव्रक वाल्तीक नु आंम कली ला मिम्तीक थुं बाक्त हना, ठेयब लेशशा,

थमा शेंतीके कली जोल मसेलीन माइ? मबाक्कीन। 15 ओदेंशो मिम्तीके परमप्रभु आ गेशो रुप्तीक थुं मबाक्ब। तन्न मुर आन थुं रे नु सैतान रे जाक्ब। याकूब १:५ 16 मुरुमी मुर आन के थोत्रक वाल्चा नु आंम कली ठेयब सेल्चा ला मिम्ताक्व हना, मेको मुरुमी मरिम्शो गेय नु अरु पाप यो पना पन बाक्ब। 17 परमप्रभुमी गेशो निप्स पाइश्शो थुंमी मुर कली ग्रांग्रा दिचा डा गेय मपपाइक्ब। सुइ नु मजिपाइक्ब। ब्रेम्शो सेल्ब। गाइश्शो फाल्पाइक्ब। शुश शिशी पपाइक्ब। रिम्शो गेय पपाइक्ब। कुल कोत्रशा, गेय मपपाइक्ब। जोल मपपाइक्ब। 18 थुं नाइश्शा बाक्ब मुरपुकी ठीक गेय पशा, मुरपुकी नु दुशा गारशा बाक्नीमी। मेको परमप्रभु यावे आ गेशो ठीक पतीकेमी बाक्ब। फिलिप्पी १:११; मत्ती ५:९

4

मुर आन दला दाक्स

1 इन दातेमी जिचा खेचा ते रे जाक्बा? गे इन दला दाक्स आ पबर्म जीनीनी, ममाइ? 2 गेपुकी मारेइ मारेइ माल्नीनी, तन्न मताइनीनी। मोपतीके मुर आन थुं जिक्शा, साइक्नीनी। मिनु अरु आन के मार मार तशा वाल्नीनी, तन्न मताइनीनी। मोपतीके जीनीनी। गेपुकी परमप्रभु यावे कली मपुंडनीनी। मोपतीके मताइनीनी। गलाती ५:१५ 3 गेपुकीमी पुंडतीनी हना यो, मारेइ मताइनीनी। मारदे हना आंम दला दाक्स पचा कली ला पुंडनीनी। मोपतीके इन पुंडशो मताइनीनी। 4 गे परमप्रभु यावे आ लां प्रोंइशा हेंथे गाक्बपुकी, गे थमा मसुइक्ब आन वारच बाक्तीनी हना, परमप्रभु यावे आ जोरी सत्रु दुम्नीनी। सु थमा मसुइक्ब आन वारच दुम्चा माल्बा, मेको परमप्रभु यावे नु जोरी सत्रु दुम्ब। लूका ६:२६; रोमी ८:७; १यूहन्ना २:१५

5 परमप्रभु यावेमी ब्रेक्पाइश्शो लोत्रमी “परमप्रभु यावेमी आ सोक्त इं रांमी वोइक्तु। तन्न मुरुमी दला दाक्स पशो तशा, मेकोमी शुश रुश पाइब” दे यो ब्रेक्पाइश्शो बाक्ब। 6 तन्न परमप्रभु यावेमी मेको क्येडा शुश शिशी पाइब। मिनु “गो ठेयब लेशशो मुर आन कली शिशी मपाइनुड। ब्रेम्शो, ठेयब मलेशशो मुर आन कली ला शिशी पाइनुड” दे ब्रेक्पाइश्शो बाक्ब। अय्युब २२:२९; हितोपदेस ३:३४; मत्ती २३:१२; १पत्रुस ५:५

7 गेपुकी परमप्रभु यावेमी देंशो लोत्र टिने। सैतान रे डोन बाक्कीन। मो पाइतीनी हना, सैतानमी इन कली प्रोंइब। मत्ती २३:१२; १पत्रुस ५:८-९ 8 परमप्रभु यावे आ नेक्था लने। मो पाइतीनी हना, मेको इन नेक्था जाक्ब। गे पापीपुकी “आंइ पाप क्याम्दीने” देंशा, माफ पुनीने। थुं निक्शी पाइश्शो मुरपुकी, इन थुं परमप्रभु यावे गे लेशशा, थुं का दुमीने। जकरिया १:३; यसैया १:१६ 9 मिनु सुर्ता पने। रोंका पा डाक्कीने। इन रिच्चा आ पा डा रोंका पने। इन ग्येरचा आ पा डा सुर्ता पने। 10 प्रभु येसु आ डोंइती आइक्च दुम्शा, ब्रेम्शो दुमीन। मिनु परमप्रभु यावेमी इन कली ठेयब सेल्ब।

परमप्रभु निसाफ पाइब बाक्ब

11 आं लोकबपुकी, शुक्शी लोत्र मपमुने। सुम लोकब आ पबर्म शुक्शी लोत्र पाइबा, दोस गेबा, मेकोमी परमप्रभु यावे आ अरेशो लोत्र मटीब। मेकोमी परमप्रभु यावे आ अरेशो लोत्र क्येडा “गो जोक्ब तुइक्ब नड” दे मिम्शा, निसाफ पाइब खोदेंशो दुम्ब। “परमप्रभु यावे आ अरेशो लोत्र रिम्शो देय मरिम्शो” दे लोत्र पाइब यो दुम्ब। मोपा गे परमप्रभु यावे आ अरेशो लोत्र मपाइब दुम्शा, निसाफ पाइब दुम्तीनी। 12 परमप्रभु यावे अरेशो लोत्र गेब नु निसाफ पाइब बाक्ब। परमप्रभु यावेमी ला पाप रे प्रोंइने नु नरकम सोइक्ने चाप्ब। इन नेक्था बाक्ब आन कली मोपा नाक्ब, सु ननी डा? मत्ती ७:१; रोमी १४:४ 13 गेपुकीमी मार लोत्र पाइनीनी देंशा हना “दीसा नित्थी सहरम लशा, बर्स का सम्म बाक्ब। मिनु शुश क्येट चेम्य” दे मिम्शा लोत्र पाइनीनी। हितोपदेस २७:१ 14 दीसा नित्थी मार दुम्बा, ब्रोंइनीनी कों, बेक्नीनी कों मारेइ मतुइक्नीनी। इन गिंम मार में? मेको गोस्स खोदेंशो बाक्ब, इच्का का ला लीशा, जाम्ब। लूका १२:२० 15 गे मार देंचा माल्शो ननी देंशा हना “गेपुकी ब्रोंइतय हना, प्रभुम आंइ मिम्शो दाक्ताक्व हना, गो आंइ मिम्शो गेय पाइनय” दे लोत्र पचा माल्नीनी। प्रेरित १८:२१; १कोरिन्थी ४:१९ 16 गेपुकी चहिं ठेयब लेशशा, आंम थुं डा लोत्र पाइतीनी। मोदेंशो ठेयब लेशशा बाक्चा मरिम्शो दुम्ब। 17 सु रिम्शो गेय पस जोक्बा तुइक्बा, तन्न मपाइबा, मेको कली मरिम्शो दुम्ब। लूका १२:४७

5

क्येट थीब आन कली हुइश्शो

1 नेनीन, गे क्येट शुश थीब मुरपुकी, डाक्कीन। रोंका पने। मारदे हना गे नोले श्येत जाइब दुम्नीनी। लूका ६:२४-२५ 2 इन बाक्शो शोंप नेल्ल राक्शो दुम्तेक्मे। इन वासी नेल्ल तुम्बुम नेक्तेक्म। मत्ती ६:१९ 3 इन सुन चांदी नेल्ल खिया

जोशो बाकब। मेको खियामी इन कली “मरिम्शो मुर” दे कोइब। सुन चांदी कली खिया जोशो खोदेशो पा इन रां कली मीम दाकब। गे क्येट शुश हेंताकनी। 4 इन रूम गेय पाइब आन गाल्च मुल सम्म जोल पा मगेनी। मेको खेतला आन कली मगेशो गाल्चम आ मुर नेल्ल आन परमप्रभु यावे नु लोव पापु। मिनु मेकोमी मेको खेतला आन पुंइशो लोव नेने थुम्तु। ब्यवस्था २४:१४-१५ 5 गेपुकी रागीमी दुक्चा, जचा, ब्वचामी शुश शोप पाइशो दुम्शा, ग्येरशा बाक्तीनी। मिनु क्योरची नाक्त कली थुल्शा दोम्पाइशो खोदेशो पा गेपुकी निसाफ पची नाक्ती ठेयब सजाइ ताइब दुम्नीनी। लूका १६:१९-२५ 6 गेपुकीमी रिम्शो गेय पाइब मुर आन कली दोस गेशा साइक्तीनी। मेकोपुकीम ब्वालेइ पा, मारेइ लोव मलेत्तेम। याकूब २:६

प्रभु जाक्चा चिक्शो बाकब

7 मिनु आं दाक्शो लोकबपुकी, नेनीने, रूमी गेय पाइब मुरुमी मेको आ खुम्शो बाली नाली मीब, दे आ थुं नाइशशा, हिंउद नु बर्खा रिम्शो खोदेशो पा प्रभु आ जाक्चा रिम्दीन। लूका २१:१९; हिब्रू १०:३६ 8 थुं नाइशशा बाक्कीन। मारदे हना प्रभु जाक्चा चिक्शो बाकब। मोपतीके प्रभु कली टिचा मप्रोंइथु बाक्कीन। 9 आं दाक्शो लोकबपुकी, गेपुकीमी अरु थमा सुइक्ब आन पबर्म गन गन मपने। मो पाइतीनी हना, निसाफ पचा पुंइसीनी। नेनीन इन निसाफ पाइब जाक्चान चिक्शो बाकब।

10 आं दाक्शो लोकबपुकी, साइ डा परमप्रभु यावे आ लोव पाइबपुकीमी परमप्रभु यावेमी देशो लोव पशा, शुश श्येत जशा यो फाल्शा, परमप्रभु यावे कली मप्रोंइथु बाक्शो बाक्तेक्म। मिनु मेको आन खोदेशो पा बाक्कीन। मत्ती ५:१२ 11 नेनीने, मेको परमप्रभु यावे कली मप्रोंइब आन पबर्म “ग्येरशो मुर दुम्तेक्म” दे लोव पाइनीकी। अय्युब माइशो मुर का श्येत जशा यो, परमप्रभु यावे कली काइ मप्रोंइथु, बाक्शो बाक्त। गेपुकी मेको आ कथा नेंतीनी। परमप्रभु यावेमी मारदे अय्युब कली मेको शुश श्येत जचा गेवा, तुइक्ताकनी। परमप्रभु यावेमी गिश लेम्शा शिशी पाइबा, मेको ताइतीनी। इं कली आ लेम्शो नु आ शिशी कोइताक्व। अय्युब १:२१; अय्युब ४२:१०-१६

कसम जचा आ पबर्म लोव

12 आं लोकबपुकी, आं नेल्ल क्येडा ठेयब अरेतीक लोव मार बाकब देशा हना, कसम मजने। सरीड कोवशा, खप थिशा, चुक्ब थिशा कसम मजने। इन देशो लोव दुम्ब हना “दुम्ब” मदुम्ब हना “मदुम्ब” देनीन। गे जोल पाइतीनी हना, गे निसाफ पचा पुंइसीनी। मत्ती ५:३४-३७

रोइ पाइब आन कली लोव

13 इन दातेमी सु सु श्येत जामे, मेकोमी परमप्रभु यावे नु लोव पामेक्ल। सु सु ग्येरशो बाक्मा, मेकोपुकीमी “परमप्रभु यावे नेल्ल क्येडा ठेयब बाकब” दे कुम्सो पामेक्ल। भजन संग्रह ५०:१५; कलस्सी ३:१६ 14 इन दातेमी सु रोइ पाइबा, मेकोमी ग्रुम्तीके डा शेंब खाल्पा आन कली ब्रेत्चा माल्ब। मेकोपुकीमी रोइ पाइब आन तारी गुइ वोइशशा, प्रभु आ नेमी तेल खेक्शा, परमप्रभु यावे कली पुंइचा माल्नीम। मर्कूस ६:१३ 15 मोदेशो थमा सुइशशा पुंइशोमी मेको रोइ पाइब मुर साब। मेको रोइ पाइबमी पाप पशो बाक्त हना, मेको यो क्याम्सीब। मर्कूस १६:१८ 16 मोपतीके रोइ सापाइक्चा कली इन पशो पाप शोत्रमुशा, प्रभु नु लोव पमुने। ठीक थमा सुइक्ब आन पुंइशो लोवमी ठेयब गेय पाइब। प्रेरित १२:५ 17 एलीया इं खोदेशो मुर का बाक्माक्त। मेकोमी परमप्रभु यावे कली “रेउ यिचा मगेने” दे शुश पुना बाक्त। मिनु बर्स सां ६ महिना सम्म रागीम काइ रेउ मयिमाक्त। १राजा १७:१; लूका ४:२५ 18 नोले मेकोमी “रेउ यिपतीन” दे पुना बाक्त। मिनु नोले रेउ यिशा, बाली नाली वामा बाक्त। १राजा १८:४१-४५

नोले डा लोव

19 आं दाक्शो लोकबपुकी, इन दाते डा मुर का थमा लां रे डोन लत हना, अर्को थमा सुइक्बमी मेको कली आ पशो पाप रुप्पाइशशा, परमप्रभु यावे आ लां गे लेप्पाइक्तु हना, गलाती ६:१ 20 मेको मुरुमी मेको मटीब मुर कली बेक्चा रे प्रोंइब। मिनु मेको के शुश पाप बाक्त हना यो, क्याम्सीब, दे मेकोमी तुइक्चा माल्ब। भजन संग्रह ५१:१५; हितोपदेस १०:१२; १पत्रुस ४:८

१ पत्रुस

ब्रेक्ब मुर: एको चिठी येसु आ शेंसीब पत्रुसमी इस्राएली मदुमशो मुर आन कली ब्रेक्बो बाक्त।

गेना ब्रेक्बो: एको चिठी ६४ ए. डी. नोले ब्रेक्बो बाक्त। मेना रोम सहर डा मुरपुकीमी थमा सुइक्ब आन कली शुश खेदा पा, साइक्चा गोत्रमे बाक्त। रोम सहर कली यो बेबीलोन यो देंनीम। १पत्रुस ५:१३

मार ब्रेक्बो: पत्रुसमी थमा सुइक्ब आन कली “बोल्यो दुमीन। थमा सुइक्बपुकीमी श्येत जचा माल्नीम” दे ब्रेक्बो बाक्त।

डोंइती डा लोत्र

1 गो येसु ख्रीस्त आ सोइशशो पत्रुस नड। एको चिठी पोन्टस, गलातीया, कापाडोसीया, एसीया नु बिथीनीया रागीम ब्रशा बाक्बो इस्राएल रागी डा थमा सुइक्ब, इन कली ब्रेक्ताक्नी। हिब्रू १३:१४ 2 इं आफ परमप्रभु यावेमी इन कली योत्रशा, आ मुर दुम्नीम देंत। मिनु आ सोक्तीमी इन कली येसु ख्रीस्त कली टीब सेल्लु। आ हुशेमी चोत्रखो सेल्लु। परमप्रभु यावे आ गेशो शिशी नु थुं नाइक्तीके डोंइती क्येडा मुल गे नु शुश बाक्ल। रोमी ८:२९

ब्रोंइचा आ पर्बम शेंशो

3 इं प्रभु येसु ख्रीस्त आ आफ नेल्ल आसीक पाइशशो बाक्ब, दे गो मान पय। मेको आ शुश शिशी पतीके नु येसु ख्रीस्त बेक्बो रे सेंसीशोमी इं कली ब्रोंइशा बाक्तीक आस गेशा, नक जरमेशो मुर सेल्लु। कलस्सी १:५ 4 मिनु इं कली स्वर्गमी जाम्शा मलाइब, काइ मबिग्रेब नु गेना हना यो लीब शोंप वोइशशो बाक्ब। कलस्सी १:१२ 5 परमप्रभु यावे आ सक्तिमी इं कली कोत्रब। गो पाप रे ब्रोंइशो मुर बाक्नय, दे थमा सुइक्नय। मेको नेल्ल नोले डा नाक्तीमी कोंइब। यूहन्ना १०:२८ 6 गे मेको तुइशशा, ग्येरनीनी। मुल इक्का नाक्त सम्म थुं थाम्चा कली मार मार श्येत जाइनीनी। १पत्रुस ५:१०; २कोरिन्थी ४:१७ 7 मारदे श्येत जाइनीनी देशा हना, इन थमा सुइशशो थमा कों, जोल कों, दे नाक्चा कली श्येत जाइनीनी। मोपा श्येत जाइतीनी हना, इन थमा सुइक्तीके मीम याप्पाइशशो सुन क्येडा शुश क्येट लाइब दुम्ब। मिनु येसु ख्रीस्त आ यिची ना ठेयब सेल्लीक, छेडछेड नु मान पतीक दुम्ब। हितोपदेस १७:३, यसैया ४८:१० 8 गे मेको कली मताइतीनी हना यो, दाक्नीनी। मेको कली मुल सम्म मतथु यो, थमा सुइक्तीनी। गे गिश ग्येरना ग्येरन बाक्बो बाक्नीनी, देंने मचाप्नीनी। यूहन्ना २०:२९; २कोरिन्थी ५:७ 9 इन थमा सुइक्तीकेमी पाप रे ब्रोंइचा ताइनीनी।

10 साइ डोंइती परमप्रभु यावे आ लोत्र पाइबपुकीमी गे शिशी ताइब दुम्नीनी, दे लोत्र पशो बाक्तेक्म। मिनु पाप रे ब्रोंइतीके तुइक्चा कली शुश माल्शो बाक्तेक्म। लूका १०:२४ 11 मेकोपुकीमी आन आगामी बाक्बो ख्रीस्त आ सोक्त कली “पाप रे प्रोंइब सु बाक्मे, गेना जाक्बा?” दे हिल्लो पामे बाक्त। मोदेशो पा माल्ना माल्न ख्रीस्त आ श्येत जचा नु छेडछेडम लचा आ पर्बमी नोले दुम्ब लोत्र पामे बाक्त। भजन संग्रह २२:-, यसैया ५२:१३- ५३:१२ 12 मेकोपुकीमी आन पाला डा मुर आन कली ला लोत्र मपामे। नोले डा मुर, इन कली यो लोत्र पा शेंदमे बाक्त। इन कली दोपा शेंदमे बाक्त देशा हना, परमप्रभु यावेमी आ सोक्त स्वर्ग रे सोइशशो बाक्त। मेको आ पतीकेमी शेंबपुकीमी इन कली ग्येरपाइक्ब लोत्र शेंताक्म। परमप्रभु यावे आ स्वर्ग डा गेय पाइबपुकीम यो मेको तचा तुइक्चा दाक्नीम। एफिसी ३:१०

परमप्रभु आ मुर दिमशो

13 मोपतीके इन थुं फ्रेंदीन। गेय पचा डोंइती मिम्तीन। येसु ख्रीस्त जाक्मेनु, इन कली शिशी पाइब, दे आस पा बाक्कीन। लूका १२:३५-३६ 14 मुल टीब आल खोदेशो पा इन डोंइती मतुइक्थु पशो मरिमशो पचा क्येडा डोन बाक्कीन। रोमी १२:२ 15 इन कली ब्रेक्ब, येसु ख्रीस्त दोदेशो बाक्मे, गे यो मोदेशो दुमशा बाक्कीन। 16 परमप्रभु यावे आ ब्रेक्पाइशशो लोत्रमी “गेपुकी आं कली ला ठेयब सेलीन। मारदे हना गो का ला इन परमप्रभु नड” दे ब्रेक्बो बाक्ब। लेवी १९:२

17 गेपुकीमी परमप्रभु यावे कली “इं आफ” दे पुंइना पुंइन बाक्नीनी। मेकोमी मुर आन कुल मकोत्रथु, आन पशो कोत्रशा, निसाफ पाइब। मोपतीके गे रागीमी बाक्नीनु, पाप पचा हिनीन। रोमी २:११; फिलिप्पी २:१२ 18 इन किकी पिपी रे “गो नरक लाइब बाक्नीकी” दे तुइक्नीनी। मुल गे नरक लतीक लां रे प्रोंइचा पुंइसीशो बाक्तीनी। दोपा प्रोंइचा पुंइसीशो बाक्तीनी देशा हना, जाम्शा लाइब सुन नु चांदी थाप्शा ममाइ, १कोरिन्थी ६:२०; १कोरिन्थी ७:२३; १पत्रुस

४:३ 19 येसु ख्रीस्तमी मारेइ मदुम्शो पाठा बुद पा आंम हुश शाइक्पाइशशा इन कली नरक रे प्रोंइतु। हिब्रू ९:१४; यसैया ५३:७; यूहन्ना १:२९

20 परमप्रभु यावेमी रागी सेल्चा क्येडा डोंइती “येसु ख्रीस्त पाप रे प्रोंइब दुम्ब” दे मिम्शो बाक्माक्त। मेको रागी नुप्ची ना इन पर्वम तुइक्पाइशो बाक्त। रोमी १६:२५-२६ 21 गे येसु ख्रीस्त आ पतीके परमप्रभु यावे कली थमा सुइक्नीनी। मेकोमी येसु ख्रीस्त कली बेक्शो रे सेंपाइशशा, छेडछेडम वोइक्तु। मोपतीके गे “परमप्रभु यावेमी इं कली कोव्रब” दे थमा सुइशशा आस पने। 22 दोपा येसु ख्रीस्त आ देशो टिशा, थमा गेय पा पाप रे डोन बाक्नी, मोपा गे लोकब आन कली यो थमा पा दाक्नीनी। गे थमा सुइक्बपुकी इन थुं नेल्लेमी थमा पा दाक्मुने। 23 गे नक जरमेशो खोदेशो बाक्नीनी। जाम्शा लाइब ममाइ। गेनायो मजाम्ब दुम्तीनी। मेकोन ब्रोंइचा गेब नु गेना हना यो लीब परमप्रभु यावे आ लोव्र बाक्ब। यूहन्ना १:१३; याकूब १:१-१८ 24 परमप्रभु यावे आ देशो लोव्र मार बाक्त देशा हना, रागी डा मुर नेल्ल घांस खोदेशो बाक्नीम। मेको आन दारस बोइशशा फू खोदेशो बाक्ब। आ घांस सोव्रब, मिनु फू यो हेम्ब। याकूब १:१०-११ 25 तन्न परमप्रभु यावे आ देशो लोव्र गेना हना यो लीब। मेको आ ग्येरपाइक्ब लोव्र बाक्ब। मिनु शेंबपुकीमी मेको इन कली शेंताक्मे। यसैया ४०:६-८

2

परमप्रभु आ योव्रशो मुर

1 मोपतीके गे नेल्ल मरिम्शो पचा, मुर आन कली मरिम्शो लोव्र पतीक नु गाइक्तीके ताइक्तीन। मिनु जोल पतीके, गेहे पतीके नु मुर आन लोव्र कुरशा गाक्चा नेल्ल ताइक्तीन। याकूब १:२ 2 नक थिशो आलम दूध तूचा माल्शो खोदेशो पा, गे यो परमप्रभु यावे आ लोव्र तुइक्चा मालीन। गे मोदेशो पाइतीनी हना, इन पाप रे ब्रोंइशो थुं बारना बारन लाइब। हिब्रू ५:१२-१३; मत्ती १८:३ 3 मारदे हना गेमी परमप्रभु रिम्शो पाइब बाक्ब, दे तुइक्नीनी। भजन संग्रह ३४:१०

4 येसु ख्रीस्त ब्रोंइचा गेब फुल्लु बाक्ब। मेको आ नेक्था लने। मुरपुकीमी मेको कली ममाल्शो फुल्लु खोदेशो पा ताइक्ताक्म। तन्न परमप्रभु यावेमी “मेको कली योव्रशो नु नेल्ल क्येडा दाक्शो बाक्ब” दे मिम्ब। भजन संग्रह ११८:२२; यसैया ८:१४-१५; मत्ती २१:४२ 5 मिनु गे यो ब्रोंइचा गेब फुल्लु खोदेशो बाक्नीनी। मोपतीके परमप्रभु यावे आ सोक्तीम सेल्शो खिं डा फुल्लु दुमीन। परमप्रभु यावे आ डोंइती राण्व मुर दुमीन। आ सोक्त डा चढेतीक गेय पा बाक्कीन। येसु ख्रीस्त आ पतीके परमप्रभु यावेमी इन पशो ताक्ब। एफिसी २:२१-२२; हिब्रू ३:६; रोमी १२:१ 6 मारदे हना परमप्रभु यावे आ लोव्रमी मार ब्रेक्शो बाक्ब देशा हना “नेनीन, गो सियोन डांडामी फुल्लु का वोइक्नुड। मेको सुर डा फुल्लु दुम्शा, योव्रसीशा नु दाक्सीशा बाक्ब। सु सुमी मेको कली थमा सुदमे, मेको मुर मुने दोक्चा ममाल्नीम” दे ब्रेक्शो बाक्ब। यसैया २८:१६ 7 मोपतीके थमा सुइक्बपुकीमी मेको कली दाक्नीम। तन्न थमा मसुइक्ब खिं सेल्बपुकीमी मेको फुल्लु कली ताइशो बाक्तेक्म। तन्न मेको सुर डा फुल्लु दुम्त। 8 मिनु लेंशा “मेको फुल्लुमी मुर आन कली दाइल पपाइक्ब। मेको ठेयब फुल्लुमी मुर आन कली थिप्पाइक्ब” दे ब्रेक्शो बाक्ब। मुरपुकीमी परमप्रभु यावे आ लोव्र मटितीके दाइल पांडसीनीम, दे डोंइती मेको आ पर्वम देशो बाक्ब। भजन संग्रह ११८:२२; यसैया ८:१४; रोमी ९:३३; लूका २:३४

9 तन्न गे परमप्रभु यावे आ योव्रशो मुर दुम्तीके, आ राज्य डा चढेब परमप्रभु यावे आ रागी डा मुर दुम्तीनी। मारदे मोदेशो दुम्तीनी देशा हना, परमप्रभु यावेमी इन कली रिम्शो पशा, छिडछिड रे ग्रुंइशा, आंम आ छक लाक्चा डा छेडछेडमी वोइशो बाक्त। मिनु अरु नेल्ल आन कली शेंचा, दे मोदेशो दुम्तीनी। प्रस्थान १९:६; यसैया ४३:२१; प्रकाश १:६; ब्यवस्था ४:२०; ब्यवस्था ७:६; एफिसी ५:८ 10 डोंइती गे परमप्रभु यावे आ मुर मबाक्नी। मुल परमप्रभु यावे आ मुर दुम्तीनी। डोंइती गे परमप्रभु यावे आ शिशी मतशो बाक्तीनी। तन्न मुल परमप्रभु यावे आ शिशी ताइब दुम्तीनी। होसे २:२५; रोमी ९:२४-२६

थमा सुइक्ब दोपा बाक्चा माल्नीमी

11 आं दाक्शो लोकबपुकी, गो इन कली इन थुं बारपाइक्तीक लोव्र पाइनुड। गो रागीम बाक्थानु, रागी डा पौना खोदेशो बाक्नय। मोपतीके इन दला दाक्स पा रागी डा मुर खोदेशो मपने। ग्रान्गा दिचा डा गेय रे डोन बाक्कीन। मारदे हना मोदेशो गेय इन थमा सुइक्तीक थुं नु जीब। भजन संग्रह ३९:१३ 12 थमा मसुइक्ब आन दातेमी रिम्शो पने। मेकोपुकीमी इन पर्वम “मरिम्शो पाइब बाक्नीम” दे मरिम्शो लोव्र पाम्तेक्म हना यो, इन रिम्शो पतीक तशा, परमप्रभु यावे नु ग्रुम्ची ना मेकोपुकीमी परमप्रभु यावे कली ठेयब सेल्मेक्ल। मत्ती ५:१६

13 प्रभु आ पबर्म सरकारमी अधिकार गेशो मुर आन कली टिने। पिप नेल्ल क्येडा ठेयब बाक्ब। मोपतीके टिचा माल्नीनी। रोमी १३:१-७; तीतस ३:१ 14 मिनु आ वोइश्शो ठेयब मुर आन कली यो टिचा माल्नीनी। मेकोपुकी मरिम्शो पाइब आन कली सजाइ गेचा नु रिम्शो पाइब आन कली “गे रिम्शो पाइतीनी” देंचा कली वोइश्शो बाक्नीम। 15 परमप्रभु यावे आ दाक्शो मार बाक्ब देंशा हना, इन रिम्शो पतीकेमी मतुइक्ब नु निप्स मपाइश्शो आन कली सिक्सी पपतीन। १पत्रुस ३:१६; तीतस २:८ 16 पाप रे प्रोंइचा पुंडसीशो मुर दुम्शा बाक्कीन। “पाप रे ब्रोंइचा ताइनुड” दे मिम्शा मरिम्शो मपने। परमप्रभु यावे आ वाइलीम वाइल दुम्शा बाक्कीन। गलाती ५:१३; २पत्रुस २:१९ 17 मुर नेल्ल आन कली मान पने। थमा सुइक्ब आन कली दाक्तीने। परमप्रभु यावे कली मान पा हिनीन, पिप कली मान पने। रोमी १२:१०; हितोपदेस २४:२१

येसु आ श्येत जशो कोंइतीके

18 गे खिं डा गेय पाइबपुकी, इन होव्रप क्येडा हिंशा टिने। रिम्शो पाइब होव्रप कली ला ममाइ, मरिम्शो होव्रप कली यो टिचा माल्नीनी। एफिसी ६:५; तीतस २:९ 19 इन होव्रपमी इन कली बित्चीम श्येत गेम्तेक्म हना यो, गे परमप्रभु यावे कली मिम्शा, श्येत फाल्शा बाक्कीन। मेको परमप्रभु यावे आ दाक्शो बाक्ब। 20 गे मरिम्शो पशा, तुप्चा पुंडसीनीनु, मेको फाल्शा बाक्तीनी हना, मार रिम्शो पनी डा? रिम्शो पशा यो, श्येत गेचा पुंडसीशा, फाल्शा बाक्तीनी हना, परमप्रभु यावे आ दाक्शो पाइनीनी। १पत्रुस ३:१४; मत्ती ५:१० 21 मोदेशो पचा, दे योव्रशो ननी। ख्रीस्त यो इन पबर्म श्येत जशा, इन कली कोंइतीक दुम्त। मोपतीके गे आ खोदेशो पचा माल्नीनी। १पत्रुस ३:१८; मत्ती १६:२४ 22 मेकोमी काइ पाप मपवो। जोल यो मपवो। यूहन्ना ८:४६; यसैया ५२:९ 23 मुरपुकीमी मेको कली शुक्शी लोव्र पाम्तेक्म हना यो, मेको आन कली लोव्र मलेत्त। मिनु श्येत जशा यो, मुर आन कली हिंच मकोंइद। तन्न ठीक पा निसाफ पाइब कली जिम्मा गेंसाक्ब। 24 मेको इं पाप क्याम्चा कली शीमी क्येप्शा कांटी थोक्शा साइक्चा पुंडसाक्ब। इं पाप पतीक थुं साइक्चा नु इं ठीक पतीक थुं प्रोंइचा, दे साइक्चा पुंडसाक्ब। मोपा मेको आ कांटी थोक्शो गारपुकीमी गे साशा ठीक दुम्तीनी। १यूहन्ना ३:५; गलाती ३:१३; रोमी ६:८,११ 25 डोंइती गे हेंथे गाक्ब भेडा खोदेशो बाक्तीनी। तन्न मुल इन गोठला नु इन थुं कोव्रब आ नेक्था लेशशा जाक्तीनी। यसैया ५३:६; यूहन्ना १०:१२

3

मीश वोंइश कली अरेतीक लोव्र

1 गे मीश मुरपुकी, आंम वोंइश आ देशो टिने। का निक्शी वोंइश मुरपुकी परमप्रभु यावे आ लोव्र मटीब बाक्तेक्म हना यो, आ मीश आ रिम्शो पशो तशा, लोव्र मपथु यो, थमा सुइक्ब दुम्नीम। एफिसी ५:२२; १कोरिन्थी ७:१६ 2 इन मान पशो नु इन पाप रे डोन बाक्शो तशा, मोदेशो पाइनीम। 3 रिम्शो पतीक मार बाक्ब देंशा हना, जाम्शा लाइब नोस पचा, चांमी मार मार चुंडसीचा, सुन पांइचा नु शुश क्येट लाइब वा फेक्चा ममाइ, यसैया ३:१८-२३; १तिमोथी २:९ 4 मुर आन थुंमी खुइश्शो जाम्शा मलाइब पांइतीके बाक्ब। मेको मार बाक्ब देंशा हना, ब्रेम्शो नु सिक्सी पा बाक्तीक थुं बाक्ब। मेको परमप्रभु यावे आ डोंइती शुश रिम्शो बाक्ब। 5 साइ डोंइती पाप रे डोन बाक्शो मीश मुरपुकीम परमप्रभु यावे कली आस पा आंम वोंइश कली टिशो बाक्तेक्म। 6 सारामी अब्राहाम कली मान पा टिशो बाक्त। मिनु मुल गे यो ठीक गेय पशा, श्येत जचा महिंथु, मेको आ तमी खोदेशो दुम्तीनी। उत्पत्ती १८:१२

7 गे वोंइश मुरपुकी, आंम मीश नु रिम्शो पा बाक्कीने। मीश मुरपुकी वोंइश मुर खोदेशो पा बोल्यो मबाक्नीम, दे तुइक्नीनी। मेको मिम्शा, इन मीश कली मान पने। मारदे हना गे निम्फा परमप्रभु यावे आ शिशी ताइब बाक्नीसी। मो पाइतीनी हना, इन पुंडशो लोव्र परमप्रभु यावे आ डोंइती मतेक्सीब। १कोरिन्थी ७:५; एफिसी ५:२५

थमा सुइक्ब आन कली अरेशो

8 मिनु नोले गे नेल्ल थुं का डा दुम्शा, मुर आन कली दाक्शा, इन लोक्ब नु दाक्मुने। ब्रेम्शो थुं पाइश्शो मुर दुमीन। 9 इन कली मरिम्शो पाइब आन कली मरिम्शो मपने। इन कली शुक्शी लोव्र पाइब आन कली शुक्शी लोव्र मपने, आसीक गेने। मारदे हना गे आसीक ताइब दुम्चा कली योव्रशो बाक्नीनी। १थिस्सलोनिकी ५:१५ 10 मिनु परमप्रभु यावे आ लोव्रमी “सु सु ब्रोंइचा नु रिम्शो बाक्चा दाक्नीमी, मेकोमी शुक्शी लोव्र मपने। सुइ आन कली जोल मपने। मुर नु दुशा बाक्कीन। याक्ब १:२६ 11 मरिम्शो पचा प्रोंइशा, ठीक गेय ला पने। 12 मारदे हना परमप्रभु यावेमी ठीक

पाइब आन कली कोवब। आन पुंइशो लोव नेंचा कली आ नोफा दाइकब। तन्न मरिम्शो पाइब आन कली मकोवब, आन पुंइशो लोव यो मनैब” दे ब्रेकशो बाकब। भजन संग्रह ३४:१३-१७

येसु ख्रीस्त नेल्ल आन क्येडा ठेयब बाकब

13 गे ठीक गेय ला पाइतीनी हना, सुम इन कली श्येत गेबा डा? 14 ठीक पशा यो मोशा श्येत जाइतीनी हना, आसीक ताइब दुम्नीनी। इन कली श्येत गेब कली महिनीन। इन थुंमी ग्येत्थ लुकच मदुमीन। १पत्रुस २:२०; मत्ती ५:१० 15 तन्न इन थुंमी “ख्रीस्त ला प्रभु बाकब” दे मेको कली ठेयब सेलीन। गे गेना हना यो “इन थमा सुइक्तीके मार में” दे हिल्लो पाइब आन कली लोव लेत्चा ठीक दुम्शा बाककीन। ब्रेम्शो थुंमी रिम्शो लोव पा लोव लेत्तीने। १पत्रुस २:२१-१४ 16 इन थुं डा मिम्तीक कली पाप रे डोन वोतीन। इन कली शुक्शी पाइबपुकी ख्रीस्त आ नेंमी रिम्शो पशो तशा, मुने दोकमल। १पत्रुस ४:६ 17 मरिम्शो पशा श्येत जचा क्येडा ठीक पशा, श्येत जचा परमप्रभु यावे आ दाकशो बाकब। 18 मारदे हना ख्रीस्त यो मुर नेल्ल आन पाप क्याम्चा कली साइकचा पुंइसाकव। ठीक पाइबमी ठीक मपाइब आन श्येत जाप्टु। मो पशा इं कली परमप्रभु यावे आ बाक्तीक चाक्दीपब। मोपतीके साइकचा पुंइसीशा यो, सेंचा पुंइसाकव। 19 नोले मेको आ सोकत लशा, जेल्खानमी बाकशो सोकत आन कली लोव पाप्टु। 20 मेको सु बाक्तेकम देंशा हना, साइ डोंइती नोआहमी ठेयब डोंगा सेलानु, परमप्रभु यावेमी रिम्ना रिम्न बाकशो बाकत। तन्न परमप्रभु यावे कली काइ मटीब, नोआह आ पाला डा बेकशो मुर बाक्तेकम। ८ जना मुर चहिं नोआह आ सेल्शो डोंगामी बाक्शा, ब्वाक्कु रे ब्रोंइचा ताम्तेकम। उत्पत्ती ७:७; २पत्रुस २:५ 21 ब्वाक्कुमी खुम्शा गुंइतीके मेको नु गारचा डा बाकब। मेकोमी इन कली मुल प्रोंइब। इन रां चिकचा ममाइ, तन्न इन थुं डा मिम्तीके रिम्शो दुम्ल, दे परमप्रभु यावे कली पुंइतीके बाकब। मेको नेल्ल येसु ख्रीस्त आ सेंसीशो रे जाकब। एफिसी ५:२६; हिब्रू १०:२२ 22 मेको स्वर्ग लशा, परमप्रभु यावे आ ग्युरा गे बाकब। परमप्रभु यावे आ स्वर्ग डा गेय पाइबपुकी, अधिकार तशोपुकी नु सक्ति पाइशो नेल्लेमी मेको आ देंशो टीनीम। एफिसी १:२०-२१

4

थमा सुइक्ब श्येत जचा माल्नीम

1 दोपा ख्रीस्त रागीम बाक्शा, श्येत जवा, मोपा गो नेल्ल श्येत जचा मालनय, दे मिम्तीन। सु सु रागीमी श्येत जाइनीमी, मेको मरिम्शो पतीक कली प्रोंइने थुम्शो बाक्नीम। 2 मिनु गे रागीमी बाक्नी सम्म इन दला दाक्स मपथु, परमप्रभु यावे आ दाकशो पने। 3 डोंइती परमप्रभु यावे कली मतुइक्थु मारेइ मारेइ पाइतीनी, मुल मेको गाप्ट। थमा मसुइक्बपुकीमी मार पाइनीम देंशा हना, महिब दुम्शा आन दला दाक्स पाइनीम। दुक्शा बाक्नीम, शुश जशा तूशा बाक्नीम नु ग्रांरा दिचा डा मूर्ति पूजा पाइनीम। एफिसी २:२-३; तीतस ३:३ 4 गे चहिं मुल मेको आन पशो खोदेंशो मपाइनीनी। मोपतीके मेकोपुकी छक लाक्नीम। मिनु इन पर्वम शुक्शी पाइनीम। 5 तन्न मेकोपुकीमी बेकशो नु ब्रोंइशो मुर आन कली निसाफ पाइब आ डोंइती मेको आ पर्वम लोव पचा माल्नीम। २तिमोथी ४:१ 6 मोपतीके बेकशो मुर आन कली यो परमप्रभु यावे आ ग्येरपाइक्ब लोव शेंशो बाकत। परमप्रभु यावे खोदेंशो पा सोक्तीम ब्रोंइचा तामेक्ल, दे रागीमी बाक्मानु, निसाफ पचा पुंइसाकम। १पत्रुस ३:१९

परमप्रभु आ पपाइशो गेय

7 रागी नु रागीमी बाक्शो मारेइ मारेइ नुप्चा चिकशो बाक्तेकम। मोपतीके इन गेय पचा डोंइती मिम्शा नु आंम रां कली अरेशा प्रार्थना पने। १कोरिन्थी १०:११; १यूहन्ना २:१८ 8 नेल्ल क्येडा ठेयब मार बाकब देंशा हना, शुश दाक्मुचा बाकब। मारदे हना दाक्मुतीकेमी शुश पाप यो ग्याम्ब। हितोपदेस १०:१२; याकूब ५:२० 9 मगाइक्थु बास गेमुने। 10 परमप्रभु यावेमी इन कली गेय का का पपाइशो बाकत। मोदेंशो पा वारच पमुने। परमप्रभु यावेमी गेशो गेय रिम्शो पने। 11 सुमी लोव पाइबा, मेकोमी परमप्रभु यावे आ खुइशो लोव पवल। सुमी गेय पाइबा, मेकोमी परमप्रभु यावे आ गेशो सक्तिमी पवल। मोपा नेल्लेमी येसु ख्रीस्त आ नेंमी परमप्रभु यावे कली ठेयब सेल्मेक्ल। मेको छेडछेडमी बाक्शा, गेना हना यो सक्ति पाइशो बाकब। आमेन। रोमी १२:७

थमा सुइक्ब आन श्येत

12 मिनु आं दाकशो लोक्बपुकी, इन कली थुं थाम्चा डा श्येत शुश दुम्त हना, महिनीन। मेको मारेइ ममाइ। इन थमा सुइक्तीके नाक्चा कली बाकब। १पत्रुस १:६-७ 13 गे ख्रीस्त आ श्येत जशो खोदेंशो पा श्येत जाइतीनी हना, ग्येरसीने।

मारदे हना आ छेडछेड पा जाक्ची ना शुश ग्येरनीनी। प्रेरित ५:४१; याकूब १:२; रोमी ८:१७ 14 ख्रीस्त आ नेमी श्येत जाइतीनी हना, आसीक ताइब दुम्नीनी। मारदे हना छेडछेड डा परमप्रभु यावे आ सोक्त गे नु बाक्ब। मत्ती ५:११; एफिसी १:१३ 15 गेपुकी मुर कली साइक्ब, खुइ पाइब, ग्रांघा दिचा डा गेय पाइब नु अरु आन कली ग्येतथ लुक्च सेल्शा, सजाइ तपाइक्ब खोदेशो मदुमीन। 16 तन्न गे थमा सुइक्ब दुम्शा, श्येत जाइतीनी हना, मुने मपने। येसु ख्रीस्त आ नेमी परमप्रभु यावे कली ठेयब सेलीन। फिलिप्पी १:२० 17 निसाफ पची ना दुम्चशो बाक्त। परमप्रभु यावे आ खिं डा मुर डोंइती निसाफ पचा पुंइसीनीम। मिनु गो डोंइती डा बाक्तय हना, ग्येरपाइक्ब लोत्र थमा मसुइक्ब आन कली दोदेब दुम्बा? येरमीया २५:२९; इजीकीएल ९:६ 18 मिनु ठीक पाइब मुरपुकी हेरा ब्रोंइचा मताइब दुम्तेक्म हना, थमा मसुइक्ब नु मरिम्शो पाइबपुकी दोदेशो दुम्नीमी? हितोपदेस ११:३१ 19 मोपतीके परमप्रभु यावेमी सु कली श्येत जचा गेबा, मेकोपुकीमी ठीक गेय पशा, आंम थुं परमप्रभु यावे कली जिम्मा गेमेक्ल। परमप्रभु यावेमी आ मुर आन कली गेनायो मप्रोंइब। भजन संग्रह ३१:६

5

खाल्पा नु ठिटा आन कली अरेशो

1 गो इन खोदेशो खाल्पा नड। गो थमा सुइक्ब आन दातेमी बाक्शो शेंब खाल्पा इन कली अर्ती गेनुड। गो ख्रीस्त आ श्येत जशो तशो नड। मुल गो जाक्चशो छेडछेड डा मुर यो दुम्ती। २यूहन्ना :१; मत्ती २६:३७,६९; रोमी ८:१७
2 इन कली मार अर्ती गेनुड देशो हना, गे परमप्रभु यावे आ योत्रशो मुर आन गोठला खोदेशो दुम्शा, मेको आन कली रिम्शो पा कोव्रडीन। इन थुंमी “आं मदाक्शो गेय बाक्ब” दे मिम्शा ममाइ, तन्न “गो मेको गेय दाक्नुड” दे ग्येरशा पने। “क्येट चेम्नुड” दे मिम्शा ममाइ, तन्न रिम्शो शेंतीके गेय शुश पने। यूहन्ना २१:१६; प्रेरित २०:२८; १तिमोथी ३:२-७
3 “गो परमप्रभु यावे आ योत्रशो मुर आन कली हुकुम पाइब दुम्ती” दे ममाइ, तन्न मेको दोदेब दुम्चा माल्नीमी, इन पशो गेयमी कोंइदीन। इजीकीएल ३४:२-४; २कोरिन्थी १:२४; तीतस २:७ 4 नेल्ल क्येडा ठेयब गोठला जाक्मेनु, गे गेना हना यो लीब परमप्रभु यावे आ छेडछेड डा सिरपेच ताइनीनी। हिब्रू १३:२०; १कोरिन्थी ९:२५; २तिमोथी ४:८ 5 मिनु गे ठिटापुकी, शेंब खाल्पा आन देशो लोत्र टिने। गे नेल्ल ब्रेम्शो थुं पाइशो दुम्शा, गेय पमुने। मारदे हना परमप्रभु यावेमी ठेयब लेशो मुर आन कली मकोव्रब, ब्रेम्शो थुं पाइशो मुर आन कली ला शिशी पाइब। एफिसी ५:२१; अय्युब २२:२९; हितोपदेस ३:३४; मत्ती २३:१२; याकूब ४:६

6 मोपतीके गेपुकीमी “नेल्ल सक्ति परमप्रभु यावे केन बाक्ब” दे आ देशो लोत्र ब्रेम्शो थुंमी ठीक पा टिने। मो पाइतीनी हना, परमप्रभु यावेमी आ मिम्ची ना इन कली ठेयब सेल्ब। याकूब ४:६ 7 गेपुकीमी “मार जाइनीकी? मार तूनीकी? मार फेक्नीकी? मार दुम्नीकी?” दे हिंशा, सुर्ता पचा ममाल्नीनी। मारदे हना परमप्रभु यावेमी इन कली कोव्रब। भजन संग्रह ५५:२१; मत्ती ६:२५; फिलिप्पी ४:६ 8 गेय पचा डोंइती मिम्तीन। होस पा बाक्कीन। मारदे हना इन कली मदाक्ब सैतानमी शोत्रलु बेक्शो गुप्स खोदेशो पा “सु कली ब्वाइनुडा” दे माल्ना माल्न गाक्ब। १थिस्सलोनिकी ५:६; लूका २२:३१; २कोरिन्थी २:११ 9 गेपुकीमी थमा सुइशशा “गो सैतान कली तुइक्नुड” दे मेको कली काइ मटिने। रागी नेल्ल डा थमा सुइक्ब लोकबपुकीम मोदेशो श्येत जाइनीम दे तुइक्नीनी।

पत्रुस आ गेशो आसीक

10 मिनु का निक्शी नाक्त श्येत जनी नोले नेल्ल शिशी पाइब परमप्रभु यावेमी “गेना हना यो छेडछेडमी बाक्चा गेनुडमी” दे ख्रीस्त आ नेमी इन कली ब्रेशो बाक्त। मेकोमी इन कली आ राज्यम गारचा डा सक्ति पाइशो नु ठीक सेल्ब। १पत्रुस १:६ 11 मेको गेना हना यो नेल्ल क्येडा ठेयब बाक्ब। आमेन।

नोले डा लोत्र

12 गो सिल्वानस थमा सुइक्ब लोकब बाक्ब, दे मिम्शा, आं ब्रेक्शो आइक्च चिठी मेको नु सोइक्ताक्ड। गो इन कली परमप्रभु यावे आ थमा शिशी मार बाक्मे, मेको शेंताक्न्नी। मिनु गे मेको तुइशशा, थमा सुइक्चा मप्रोंइथु बाक्कीन। प्रेरित १५:२२ 13 इन खोदेशो बेबीलोनम बाक्शो योत्रशोपुकीमी यो इन कली “रिम्शो बाक्कीन” दे आं कली ब्रेक्पाइक्तीमी। मिनु आं तौ मर्कूसमी यो मो देंत। २तिमोथी ४:११ 14 गे दाक्मुशा, प्रभु आ नेमी मुम्मुने। परमप्रभु यावेमी ख्रीस्तम बाक्शो नेल्ल इन कली थुं नाइक्चा गेवल।

२ पत्रुस

ब्रेक्ब मुर: पत्रुसमी एको चिठी थमा सुइक्ब आन कली नोले ब्रेक्शो बाक्त।

गेना ब्रेक्शो: एको चिठी डोंइती डा क्येडा इच्का नोले ६४-६५ ए. डी.मी मेर ब्रेक्शो बाक्त।

मार ब्रेक्शो: पत्रुसमी थमा सुइक्ब आन कली परमप्रभु यावे आ लोव पाइब आन ब्रेक्शो लोव तुइश्शा नु होस पा बाक्कीन, दे अरेशो बाक्त। मारदे हना मेको आन दाते रे दूली शेंब बोक्तेक्म। मेको दूली शेंबपुकी दोदेशो बाक्नीमदेशा हना,

१. प्रभु येसु ख्रीस्त परमप्रभु यावे आ तौ मबाक्ब।
२. क्येट शुश दाक्ब बाक्नीम।
३. मरिम्शो पचा मुने मपाइनीम।
४. नक नु बोल्यो मदुम्शो थमा सुइक्ब आन कली हेंथे लां कोंइनीम।

डोंइती डा लोव

1 गो येसु ख्रीस्त आ वाइल नु आ सोइश्शो, सिमोन पत्रुस नड। इं परमप्रभु यावे नु पाप रे प्रोंइब येसु ख्रीस्त रे पा ठीक दुम्तय, दे थमा सुइश्शा, थुं का दुम्तय। मोपतीके इन कली एको चिठी ब्रेक्ताक्ड। 2 परमप्रभु यावे नु प्रभु येसु कली तुइक्तीकेमी शिशी नु इन थुं नाइक्तीके बारना बारन लल।

थमा सुइक्चा नु गेय गारचा माल्ब

3 परमप्रभु यावे आ सक्तिमी ब्रोंइचा नु परमप्रभु यावे आ डोंइती बाक्चा कली मार मार माल्या, मेको नेल्ल इं कली गो गेप्टु। दोपा गेप्टु देशा हना, मेको कली तुइक्तीके गेप्टु। आ छेडछेडमी बाक्चा नु आ पतीके नेल्ल पचा कली योव्रतु। १ पत्रुस २:४ 4 मोपा आ नेल्ल क्येडा ठेयब थोक्शा पशो लोव गेप्टु। मेको तुइश्शा, गेपुकी रागी डा मुर आन दला दाक्स पतीके रे ब्रोंइशा, प्रोक्ने चाप्नीनी। मोपा गेपुकी परमप्रभु यावे आ पशो खोदेशो पाइब दुम्नीनी। 5 मोपतीके गे इन थमा सुइक्तीके नु इन पशो गेय गारचा माल्ब। इन पशो गेय नु “परमप्रभु यावे आ दाक्शो मार बाक्मे?” दे तुइक्चा माल्नीनी। गलाती ५:६, २२ 6 इन तुइक्तीकेमी आंमा अरेसीचा माल्नीनी। आंमा कली अरेसीतीके, पपाइक्तीके नु थमा सुइक्तीके मप्रोंइनुड, दे खोइली थेक्शा बाक्चा माल्नीनी। इन खोइली थेक्शा बाक्तीकेमी परमप्रभु यावे खोदेशो पा गेय पने। 7 परमप्रभु यावे खोदेशो पा गेय पशा, थमा सुइक्ब आन कली आंम इन लोक्ब खोदेशो पचा माल्नीनी। लोक्ब खोदेशो पा दाक्चा माल्नीनी। गलाती ६:१० 8 गेपुकी मोदेशो शुश पाइतीनी हना, इं प्रभु येसु ख्रीस्त कली तुइक्तीकेमी रिम्शो पा शुश फल सिश्शो खोदेशो दुम्ब। 9 सुम मोदेशो मपाइबा, मेको ब्रा ब्रा पा ताइब बाक्ब। मेको मुर आ डोंइती पशो पाप क्याम्शो बाक्ब, दे प्रेंशो बाक्ब। १यूहन्ना २:९, ११ 10 मोपतीके आं लोक्बपुकी, गेपुकीमी “गो ब्रेश्शो नु योव्रशो मुर बाक्नीकी” दे गेना हना यो मिम्चा माल्नीनी। मो पाइतीनी हना, गे गेनायो नोले मशोंइसीनीनी। 11 मिनु नोले पाप रे प्रोंइब इं प्रभु येसु ख्रीस्तमी इन कली आ गेना हना यो लीब राज्यमी रिम्शो पा ओव्रचा गेब।

12 मोपतीके गो इन कली नेल्ल नाक्ती मोदेशो मिम्पाइक्नुड। गेपुकी मेको तुइश्शा नु थमा शेंतीके पाइब दुम्तीनी हना यो, गो इन कली मिम्पाइक्नुड। 13 गो ब्रोंइडा सम्म इन कली मिम्पाइक्चा रिम्शो बाक्ब, दे मिम्नुड। २कोरिन्थी ५:१ 14 इं प्रभु येसु ख्रीस्तमी “गे शुश नाक्त मलीनेवे” दे कोंइताक्यी। यूहन्ना २१:१८-१९ 15 मिनु आं लचा नोले गे नेल्ल नाक्ती आं शेंशो मिम्ने चाप्नीनी, दे शुश गेय पना पन बाक्नुड।

छिडछिडम ब्रशो बत्ती

16 गोपुकीमी इन कली इं प्रभु येसु ख्रीस्त आ सक्ति नु आ रागीम जाक्शो आ पर्बम मुर आन सेल्शो कथा मशेंदक। तन्न गोपुकीमी “येसु ख्रीस्त नेल्ल क्येडा ठेयब बाक्ब” दे आंम आंइ मिक्चीम ताइतक। 17 इं आफ परमप्रभु यावेमी मेको कली मान पशा, आ छेडछेड तपाइश्शा “मेको आं दाक्शो तौ बाक्ब। मेको कली तशा, गो ग्येरसाक्यी” देशो सेंदा छेडछेड रे गूत। मत्ती १७:५ 18 गोपुकीमी मेको सेंदा सरीड रे नेंतक। मारदे हना गोपुकी मेको नु परमप्रभु यावे आ डांडाम बाक्शो नकी। 19 मिनु गोपुकीमी साइ डा परमप्रभु यावे आ लोव पाइब आन पशो लोव मुल रिम्शो पा रुप्तक। गे यो परमप्रभु यावे आ साइ डा लोव पाइब आन ब्रेक्शो लोव रुप्चा नु तुइक्चा कली छिडछिडमी ब्रशो बत्ती खोदेशो पा होस पा बाक्कीन। मिनु नोले इन थुंमी सुक्कुर सोरुल खोदेशो पा छेडछेड दुम्नीनु, आन ब्रेक्शो नेल्ल

रुप्नीनी। भजन संग्रह ११९:१०५ 20 गेपुकी डोंइती मार रुप्चा माल्नीनी देशा हना, परमप्रभु यावे आ साइ डा लोव्र पाइब आन ब्रेक्शो लोव्र मुर आन मिम्शो लोव्र ममाइ, 21 मुर आन थुं रे मपीब। तन्न परमप्रभु यावे आ सोक्तीम आ मुर आन कली सुम्शा, परमप्रभु यावे आ लोव्र ब्रेक्पाइशो बाक्ब, दे रुप्चा माल्नीनी। १तिमोथी ३:१६-१७

2

दूली शेंबपुकी येहूदा ३-१९

1 साइ डोंइती परमप्रभु यावे आ लोव्र जोल पा दूली शेंबपुकी बाक्मा बाक्त। मुल मोदेशो जोल पा शेंबपुकी इन गुम्तीक खिंमी यो जाक्नीमी। मेकोपुकीमी खुइशोमी खतम सेल्ब शेंतीके शेंनीमी। प्रभुमी मेको आन कली ग्याप्शा यो, मेकोपुकी “गो मेको कली मतुइक्नुड” दे जाम्शा लाइब बाक्नीम। मत्ती २४:११; १तिमोथी ४:१ 2 शुशेमी आन शेंशो नेंशा, हेंथे पा दला दाक्स यो पाइनीम। मुरपुकीमी मेको आन कली तशा थमा लां कली शुक्शी लोव्र पाइनीम। 3 मेको आन शीम पतीकेमी इन कली दूली लोव्र पा, इन क्येट योल्नीम। मेकोपुकी डोंइती रे नरक लचा चिक्शो बाक्नीम।

4 का निक्शी परमप्रभु यावे आ स्वर्ग डा गेय पाइबपुकी यो पाप पतीके शिशी मतामे। परमप्रभु यावेमी मेको आन कली नरकमी ताइशशा, नेल्ल क्येडा मरिम्शो बाक्तीकेमी सोइक्ताक्मी। मिनु निसाफ पची नाक्त सम्म छिडछिडमी चोक्शा वोइक्तीमी। 5 मिनु परमप्रभु यावेमी साइ डा मुर आन कली शिशी मपथु, नोआह ला ठीक पाइब बाक्तीके मेको नु अरु ७ जना आन कली ला श्येत रे प्रोंइतीमी। मेना परमप्रभु यावेमी रागी नेल्ल ब्वाक्कुमी ब्रीपाइशशा, आ कली मटीब आन कली साइशशा बाक्त। उत्पत्ती ८:१८; १पत्रुस ३:२०; २पत्रुस ३:६ 6 परमप्रभु यावेमी सोदोम नु गोमोररा माइशशा सहर निक्शी कली मीम क्रोइशशा, पुलु सेल्शो बाक्त। मेको मटीब आन कली कोइतीक चिनु बाक्त। उत्पत्ती १९:२४-२५ 7 परमप्रभु यावेमी ठीक पाइब लोत माइशशा मुर कली श्येत रे प्रोंइशो बाक्त। लोतमी पाप पाइब आन कली तशा, आ थुं शुश मनुशो बाक्त। 8 मारदे हना मेको ठीक पाइबमी नाक्त किंत किंत आन ग्रांग्रा दिचा डा गेय तशा नु नेंशा, आ ठीक मिम्तीक थुं शुश खाइशशा बाक्त। 9 परमप्रभु यावेमी चहिं आंम कली टीब मुर आन कली “दोपा थुं थाम्चा डा श्येत रे गुंइनुडा” दे तुइक्ब। मिनु ठीक मपाइब आन कली सजाइ गेचा कली निसाफ पची नाक्त सम्म वोइक्ब। १कोरिन्थी १०:१३ 10 मिनु सु सु आन दला दाक्स नु ग्रांग्रा दिचा डा गेय पाइनीमी नु अधिकार गेशो आन कली मटीनीमी, मेकोपुकीमी नेल्ल क्येडा शुश सजाइ ताइनीम। मोदेशो जोल पा शेंब काइ महिंब दुम्शा, ठेयब लेशशा, थमा सुइक्ब आन कली शुक्शी पचा महिंनीम। 11 तन्न परमप्रभु यावे आ स्वर्ग डा गेय पाइबपुकी मेको आन क्येडा ठेयब नु सक्ति पाइशशा बाक्तेक्म हना यो, मेको जोल पा शेंब आन कली प्रभु आ डोंइती दोस मगेनीम। 12 मेको दूली शेंब ममिम्ब ग्याइक्चा नु साइक्चा पुंइसीचा कली जरमेशो बस्तु भाव खोदेशो पा, आन तुइशशा ला पाइनीम। मेकोपुकीम काइ मरुप्नीम। तन्न शुक्शी पाइनीम। मिनु बस्तु भाव खोदेशो पा खतम दुम्नीम। 13 आन मरिम्शो पशो आ पर्बम मरिम्शो पाइक्चा पुंइसीनीम। नाक्तीम आन दला दाक्स पशा ग्येरशा बाक्नीमी। गेपुकी नु भोज जशा, मुने दोक्चा डा पा इन गुम्तीक खिं मरिम्शो लुम्सीशो सेल्ब बाक्नीम। 14 मेकोपुकीमी मुर आन मीश तशा वाल्नीम। पाप पचा गेनायो “मोक्ल” मदेंनीम। सक्ति मपाइशशा थमा सुइक्ब आन कली लेम्शा, आंम दूली लां खोइक्पाइक्नीमी। मेकोपुकी शीम बाक्नीम। मिनु सराप रशो मुर बाक्नीम। 15 ठीक लां प्रोंइशा, हेंथे गाक्शा, बेओर आ तौ बालाम माइशशा मुर खोदेशो दुम्तेक्म। बालाममी मार पशो बाक्त देशा हना, मरिम्शो गेय पतीके रे ताक्शो क्येट शुश दाक्शो बाक्त। गन्ती २२:७-३५ 16 मेकोमी मरिम्शो मिम्शा पचा चिक्तानु, हुइक्चा पुंइसे बाक्त। दोपा हुइक्चा पुंइसे बाक्त देशा हना, मब्वाक्ब गधामी मुर आ सेंदामी लोव्र पवा बाक्त। मिनु परमप्रभु यावे आ लोव्र पाइब कली मेको आ मरिम्शो गेय रे तेक्गा बाक्त। 17 मेको दूली शेंबपुकी ब्वाक्कु मयीब धारा नु फशेम बेरपाइशशा गोस्स खोदेशो बाक्नीम। मेको नेल्ल क्येडा छिडछिड डा बाक्तीकेमी वोइक्चा पुंइसीनीम। 18 मेकोपुकीमी हेंथे लोव्र पा पाप रे प्रोंइचा पुंइसीशो नक थमा सुइक्ब दुम्शो मुर आन कली आन हेंथे पतीके ग्रांग्रा दिचा डा गेय पपाइक्नीम। 19 मेकोपुकीमी “गे पाप रे प्रोंइशो मुर बाक्नीनी” दे लोव्र पाइनीम। तन्न ग्रांग्रा दिचा डा गेय आन वाइल बाक्नीम। मार मारमी मुर आन कली ग्राबा, मेको आन वाइल दुम्नीम। गलाती ५:१३; १पत्रुस २:१६ 20 मुरपुकी इं प्रभु येसु ख्रीस्त कली तुइक्तीकेमी रागी रागी डा मुर आन पाप रे ब्रोंइशो बाक्तेक्म हना, मेको लेंशा पापमी मुर कली ग्रात हना, मेको पाप आ वाइल दुम्नीम। मेको आन कली डोंइती डा दुम्तीके क्येडा नोले शुश मरिम्शो दुम वा। मत्ती १२:४५ 21 मुरपुकीमी ठीक लां गाक्चा तुइशशा यो, मेको डोंइती रे पाप रे डोन बाक्चा, दे परमप्रभु यावे आ अरेशो लोव्र प्रोंइशा, पापम लेत्तेक्म हना, मेको तुइक्चा

क्येडा गेनायो मतुइशशो हना रिम्शो दुम वा। लूका १२:४७-४८ 22 मिनु मुर आन देंतीक लोव्र “कुचुममी आ मेशो लेंशा जाइब।” मिनु “पोव्र कली गिश चिक्शा हना यो, लेंशा ग्राम्गामी गुम्दीब” देंशो लोव्र थमा बाक्ब। हितोपदेस २६:११

3

येसु आ जाक्की नाक्त

1 आं दाक्शो लोकबपुकी, गो इन कली चिठी निक्शी ब्रेक्ताक्ड। गो एको चिठी निक्शीमी इन थुमी मिम्पाइशशा फ्रुकपाइक्ता। २पत्रुस १:१३ 2 इन कली मार फ्रुकपाइक्चा दाक्ताक्ड देंशा हना, परमप्रभु यावे आ साइ डा लोव्र पाइब आन ब्रेक्शो लोव्र फ्रुकपाइक्चा दाक्ताक्ड। पाप रे प्रॉइब प्रभु आ अरेशो लोव्र इन कली मिम्पाइक्चा दाक्ताक्ड। इन शेंबपुकीमी इन कली शेंताक्मे। 3 नोले डा नाक्त शुक्शी पाइबपुकी जाक्नीमी, दे तुइक्चा माल्नीनी। मेकोपुकीमी शुक्शी पा, आंम दला दाक्स पाइनीम। १तिमोथी ४:१; यहूदा:१८ 4 मेकोपुकीमी “लेंशा जाक्नुड देंब, ते जाक्मे? इं किकी पिपी बेक्शो बाक्तेक्म। रागी सेल्चा रे ओदेंशो बाक्त” देंनीमी। यसैया ५:१९; इजीकीएल १२:२२; मत्ती २४:२८ 5 मेको शुक्शी पाइबपुकीमी “डोंइती परमप्रभु यावेमी लोव्र पशा, सरीड कली मसेल। रागी नु ब्वाक्कु यो मफ्रादीम्सी” दे शेंनीम। मत्ती २४:३८; उत्पत्ती १:२,६,९; भजन संग्रह २४:२ 6 मेना रागी नु मुर नेल्ल आन कली ब्वाक्कुमी खुम्शा सदा बाक्त। २पत्रुस २:५; उत्पत्ती ७:२१ 7 मुल सम्म बाक्ब सरीड नु रागी कली “बाक्ल” दे परमप्रभु यावेमी खाल का डा लोव्र पशा, वोदा बाक्त। परमप्रभु यावेमी रागी नु मटीब मुर नेल्ल आन कली मीम क्रोइक्चा, दे निसाफ पची नाक्त सम्म कली वोइशशो बाक्त।

8 मिनु आं दाक्शो लोकबपुकी, प्रभु कली नाक्त का हजार का बर्स खोदेंशो बाक्ब। मिनु हजार का बर्स नाक्त का खोदेंशो बाक्ब। भजन संग्रह ९०:४ 9 प्रभुम आ देंशो लोव्र ठीक पा पाइब। तन्न का निक्शी मुरपुकीमी “प्रभुम आ देंशो मपाइब। नोले ला जाक्ब” देंनीम। तन्न प्रभुमी “सुइ जाम्शा मलमल। आं गे लेम्मल” दे रिम्ब। हबकुक् २:३; १तिमोथी २:४ 10 प्रभु जाक्मेनु, खुइ जाक्शो खोदेंशो पा जाक्ब। मेना सरीड ठेयब रेयके पा जाम्ब। मारेइ मारेइ ग्रोइशशा नुप्नीम। रागी नु रागीम बाक्शो मारेइ मारेइ मीम खतम दुम्नीम। १थिस्सलोनिकी ५:२-३; मत्ती २४:२९; प्रकाश २०:११; यसैया २४:१९

11 मोदेंशो दुम्मेनु, नेल्ल मीम ग्रोइशशा, मारेइ मलीब। मोपतीके गेपुकी परमप्रभु यावे कली थमा सुइशशा, आ देंशो लोव्र टिशा, पाप रे डोन बाक्शा, परमप्रभु आ नेक्था बाक्चा माल्नीनी। 12 गेपुकी परमप्रभु यावे आ नाक्त जाक्ब, दे रिम्शा नु गेना दुम्बा, दे मिम्स डा मिम्स बाक्चा माल्नीनी। मारदे हना मेना सरीड नेल्ल मीम ग्रोइशशा नुप्ब। मार मार बाक्मे, मेको नेल्ल मीम ग्रोइशशा नुप्नीम। 13 तन्न आ डोंइती देंशो “नक सरीड नु नक रागी सेल्लुड। मेकेर नेल्ल रिम्शो नु ठीक ला पाइनीम” देंशो लोव्र रिम्नय। यसैया ६५:१७; प्रकाश २१:१; प्रकाश २१:२७

14 आं दाक्शो लोकबपुकी, मोदेंशो रिम्शा, गल्ती मपाइब नु दोस मताइब दुम्चा कली शुश गेय पने। परमप्रभु यावेमी इन कली मोदेंशो पशो नु थुं नाइशशा बाक्शो गुम्चा दाक्ब। १कोरिन्थी १:७-८ 15 प्रभु आ रिम्ना रिम्न बाक्तीके मुर आन कली पाप रे प्रॉइचा बाक्ब, दे मिम्तीन। इं दाक्शो लोकब पावलमी आं खोदेंशो पा, इन कली आ तशो तुइक्तीकेमी चिठी ब्रेक्ताक्व। रोमी २:४ 16 मेको आ पर्वम आ चिठी नेल्लेमी लोव्र पाइब। पावल आ ब्रेक्शो लोव्र का निक्शी रुप्चा कली श्येत बाक्ब। मजोक्ब नु थमा मसुइक्ब मुरपुकीमी मेको दूली शेंनीम। परमप्रभु यावे आ ब्रेक्पाइशशो अरु लोव्र यो दूली शेंनीम। मोपा आंमा जाम्शा लाइब दुम्नीम।

नोले डा लोव्र

17 मोपतीके आं दाक्शो लोकबपुकी, गे मेको डोंइती रे तुइशशा, होस पा बाक्कीन। मोपा मबाक्तीनी हना, गेपुकी दूली शेंब आन दूली शेंतीके खोइशशा, इन थमा सुइक्तीके साम्नीनी। 18 तन्न इं प्रभु, इं कली पाप रे प्रॉइब येसु ख्रीस्त आ शिशी नु मेको कली तुइक्तीकेम बारना बारन लल। मेको कली मुल नु गेना हना यो ठेयब सेल्य। आमैन।

१ यूहन्ना

ब्रेक्ब मुर: एको चिठी येसु आ शेंसीब, यूहन्नाम डोंइती ब्रेक्शो बाक्ब। चिठी ब्रेक्ची ना मेको खाल्पा दुम्शो बाक्त।
गेना ब्रेक्शो: एको चिठी गेना ब्रेक्शो बाक्मे, ठीक पा मतुइक्नीम। दूली शेंबपुकी १०० ए. डी. क्येडा डोंइती जाक्शो बाक्तेक्म। मेको आन पर्बम लोत्र ब्रेक्शो बाक्ब। मोपतीके मेना ब्रेक्शो बाक्ब, दे मिम्सीब।

मार ब्रेक्शो:

१. ठीक पा थमा सुइश्शो कोंइतीके यूहन्ना १:५-२:२७
२. परमप्रभु यावे आ मुर दुम्शो दोपा तुंइसीबा यूहन्ना २:२८-४:२१

थमा सुइक्ब आन कली ठेयब शेंतीके

१ नेल्ल क्येडा डोंइती रे बाक्शो, सु बाक्त देंशा हना, ब्रोंइचा गेब लोत्र माइश्शो बाक्त। गोपुकीमी मेको आ लोत्र नेंतक। आंइ मिक्चीमी ताइतक। आंइ मिक्चीमी कोव्रतक। आंइ गुइमी थीतक। यूहन्ना १:१; यूहन्ना १:१४; यूहन्ना १:४ २ मेको ब्रोंइचा गेब लोत्र माइश्शो रागीमी तपांइसीचा पुंइसाक्व। मिनु गो मेको कली ताइतक। मोपतीके गोपुकीमी मेको आ लोत्र शेंनीकी। मिनु इन कली यो गेना हना यो, इं आफ नु बाक्चा आ पर्बम शेंनीकी। मेको गेना हना यो ब्रोंइशा बाक्तीक माइश्शो डोंइती आ आफ परमप्रभु यावे नु बाक्त। मिनु परमप्रभुमी मेको आंइ कली कोंइताक्व। ३ मिनु आंइ तशो नु नेंशो इन कली शेंनीकी। मारदे हना गो नेल्ल थुं का डा दुम्यल। मिनु गो नेल्ल इं आफ परमप्रभु यावे नु आ तौ येसु ख्रीस्त नु थुं का डा बाक्नय। ४ गो नेल्ल इं थुं ग्येरसीशा बाक्च, दे एको चिठी ब्रेक्शा, इन कली सोइक्ताक्क। १ यूहन्ना ५:१३; यूहन्ना १५:११; यूहन्ना १६:२४

परमप्रभु छेडछेड बाक्ब

५ मेकोमी आंइ कली नेंपाइश्शो लोत्र इन कली शेंनीकी। मार लोत्र शेंनीकी देंशा हना, परमप्रभु यावे छेडछेड बाक्ब। मिनु मेको नु छिडछिड काइ मबाक्ब। याकूब १:१७ ६ गोपुकीमी छिडछिडम गाक्शा यो “परमप्रभु यावे नु थुं का डा बाक्नय” देंतय हना, जोल्फे दुम्यनय। थमा गेय मपाइनय। १ यूहन्ना २:४ ७ मेको छेडछेडमी बाक्शो खोदेंशो पा, गो छेडछेडमी गाक्तय हना, अर्को थमा सुइक्बपुकी नु थुं का डा दुम्यनय। मिनु आ तौ येसु आ हुशेमी इं मरिम्शो पशो नेल्ल क्याम्ब। हिब्रू ९:१४; प्रकाश १:५ ८ गोपुकीमी “मरिम्शो काइ मपक” देंतय हना, इं आंमा मिक्च सिल्शो बाक्नय। इं थुं आगामी थमा मबाक्ब। ९ गोपुकीमी “मरिम्शो पाइतक” देंतय हना, इं मरिम्शो पतीके क्याम्शा, इं कली शेक्ब। मारदे हना मेको आ देंशो पाइब नु ठीक पाइब बाक्ब। भजन संग्रह ३२:३-५; हितोपदेस २८:१३ १० गोपुकीमी “मरिम्शो काइ मपक” देंतय हना, मेको कली जोल्फे सेलनय। मिनु आ देंशो लोत्र इं थुंमी मलीब। रोमी ३:१०-१८

2

पाप रे प्रोंइब येसु ख्रीस्त बाक्ब

१ मिनु आं आलपुकी, इन कली मारदे ब्रेक्ताक्ड देंशा हना, गो इन कली “मरिम्शो मपने” देंचा कली ब्रेक्ताक्ड। मिनु थमा सुइक्ब कामी पाप पाप्तु हना, मेको आ पर्बम आ आफ कली पुंइब का बाक्ब। मेको पुंइब सु बाक्ब देंशा हना, मेको नेल्ल ठीक पाइब येसु ख्रीस्त बाक्ब। २ दोपा नेल्ल ठीक पाप्तु देंशा हना, मरिम्शो पाइब आन बेक्तीकेमी साइक्चा पुंइसाक्व। इं पाप कली ला ममाइ, तन्न रागी नेल्ल डा मुर आन पाप क्याम्चा कली यो साइक्चा पुंइसाक्व। १ यूहन्ना ४:१०; कलस्सी १:२०; यूहन्ना ११:५१-५२ ३ मिनु गोपुकी येसु ख्रीस्त आ मुर दुम्शो, दोपा तुइक्नय देंशा हना, परमप्रभु यावे आ अरेशो लोत्र पना पन बाक्तीके येसु ख्रीस्त कली थमा पा तुइक्नय। ४ मिनु सुमी “गो येसु ख्रीस्त आ मुर दुम्शा, मेको तुइक्नुड” देंबा, तन्न आ अरेशो लोत्र मटीबा, मेको जोल्फे बाक्ब। मोदेंशो मुर आगामी परमप्रभु आ थमा पतीके मबाक्ब। ५ सु चहिं आ देंशो लोत्र पना पन बाक्बा, मेको मुरुमी परमप्रभु यावे कली थमा पा दाक्ब। मोदेंशो दुम्शो मुरुमी “गो येसु ख्रीस्त आ मुर दुम्ती” दे तुइक्ब। यूहन्ना १४:२१-२३ ६ मिनु सुमी “गो येसु ख्रीस्त नु बाक्नुड” देंबा, मेको येसु ख्रीस्त खोदेंशो दुम्चा माल्ब। यूहन्ना १३:१५; १ पत्रुस २:२१-२३

थमा सुइक्ब आन दाक्मुशो

7 आं दाक्शो थमा सुइक्ब लोकबपुकी, गो इन कली नक अरेशो लोव्र मब्रेक्तु। एको अरेशो लोव्र माइत बाक्ब। गेपुकी मेको डोंइती रे पाइनीनी। मिनु गे मेको माइत अरेशो लोव्र नेशो बाक्तीनी। यूहन्ना ११:३४; २यूहन्ना :५ 8 मिनु मेको ब्रेक्शा यो गो इन कली नक अरेशो लोव्र ब्रेक्नुड। मारदे हना मेको नक अरेशो लोव्र येसु ख्रीस्तमी खाप्तु। मिनु गेपुकी यो पाइनीनी। गो मेको मारदे ब्रेक्ताक्ड देशा हना, मुल छिडछिड जाम्ना जाम्न लाइब। मिनु थमा छेडछेड बारना बारन बाक्ब। यूहन्ना ८:१२; रोमी १३:१२ 9 मिनु सुमी “गो परमप्रभु यावे आ छेडछेडमी बाक्नुड” देबा, तन्न आ लोकब आन कली मदाक्बा, मेको छेडछेडमी ममाइ, छिडछिडमी बाक्ब। १यूहन्ना ४:२० 10 सु चहिं आ थमा सुइक्ब लोकब आन कली दाक्बा, मेको छेडछेडमी गाक्ना गाक्न बाक्ब। मोदेशो दुम्शो मुरुमी मरिम्शो गेय मपाइब। 11 सु चहिं आ लोकब आन कली मदाक्बा, मेको मुर छिडछिडमी गाक्ब। मिनु ते लाइबा मतुइक्ब। छिडछिडमी मेको कली मिक्च मताइब सेल्ब।

रागी नु रागी डा थोव्रक

12 आं दाक्शो तमी तौपुकी, गो इन कली मारदे ब्रेक्ना ब्रेक्न बाक्ती देशा हना, इन पशो मरिम्शो नेल्ल येसु ख्रीस्त आ नेमी क्याम्सीशो बाक्त। मोपतीके गो इन कली ब्रेक्ना ब्रेक्न बाक्ती। 13 आम आफपुकी, गो इन कली मारदे ब्रेक्ना ब्रेक्न बाक्ती देशा हना, गे मेको डोंइती रे बाक्ब कली तुइक्नीनी। मोपतीके गो इन कली ब्रेक्ना ब्रेक्न बाक्ती। ठेयब वोंइश आलपुकी, गो इन कली मारदे ब्रेक्ना ब्रेक्न बाक्ती देशा हना, गे सैतान कली ग्रातीनी। मोपतीके गो इन कली ब्रेक्ना ब्रेक्न बाक्ती। मिनु आं तमी तौपुकी, गो इन कली मारदे ब्रेक्ताक्ड देशा हना, गे इं आफ परमप्रभु यावे कली तुइक्नीनी। मोपतीके गो इन कली ब्रेक्ताक्ड। यूहन्ना १:१ 14 मिनु आं आलपुकी, गो इन कली मारदे ब्रेक्ताक्ड देशा हना, गे इं आफ कली तुइक्नीनी। गो आम आफ इन कली मारदे ब्रेक्ताक्ड देशा हना, गे डोंइती रे बाक्ब कली तुइक्ब बाक्नीनी। गो ठेयब वोंइश आल इन कली मारदे ब्रेक्ताक्ड देशा हना, गेपुकी बोल्यो दुम्तीनी। गे परमप्रभु यावे आ लोव्र इन थुंमी वोइशशा, सैतान कली ग्रातीनी। मोपतीके गो इन कली ब्रेक्ताक्ड। एफिसी ६:१०; 15 गेपुकी रागी नु रागी डा थोव्रक कली मदाक्तीन। सु चहिं रागी कली दाक्बा, मेको आ थुंमी इं आफ, परमप्रभु यावे आ दाक्शो मबाक्ब। याक्ब ४:४ 16 मिनु रागीमी मार बाक्ब देशा हना, मेको मुर आन रांमी मार मार पचा दाक्नीमी, मेकोन पाइनीमी। मेको आन मिक्चीमी मार मार कोव्रचा दाक्नीमी, मेकोन कोव्रथ लाइनीम। आन शुश शोंप आ पर्बम ठेयब लेत्तीके इं आफ परमप्रभु यावे रे ममाइ, रागी डा मुर आन पतीके बाक्ब। 17 मिनु रागी नु रागी डा मुर आन दाक्शो नेल्ल जाम्ब। सु चहिं परमप्रभु यावे आ देशो पाइबा, मेको मुर गेना हना यो ब्रोंइशा बाक्ब।

दूली शेंब जाक्तेक्म

18 आं तमी तौपुकी, रागी जाम्चशो बाक्ब। दोपा तुइक्ताक्य देशा हना, ख्रीस्त आ पर्बम दूली शेंब का जाक्ब, दे डोंइती रे तुइशशो ननी। ख्रीस्त आ पर्बम दूली शेंब शुश जाक्तेक्म। मोपतीके रागी जाम्चशो बाक्त, दे तुइक्ताक्य। १पत्रुस ४:७; मत्ती २४:२४; २थिस्सलोनिकी २:३-४ 19 मेको दूली शेंबपुकी इं दाते रे गूतेक्म। मेकोपुकी चहिं इं खोदेशो पा येसु ख्रीस्त कली थमा सुइक्ब मनम। इं खोदेशो पा येसु ख्रीस्त कली थमा सुइक्ब नम हना, गोपुकी नु काथा बाक्म वा। तन्न इं दाते रे गूशा लाम्तेक्म। मिनु इं खोदेशो पा येसु ख्रीस्त कली थमा सुइक्ब मनम, दे तुइसीब। प्रेरित २०:३०; १कोरिन्थी ११:१९ 20 येसु ख्रीस्तमी इन कली परमप्रभु यावे आ सोक्त गेप्तु। मोपतीके नेल्ल तुइक्नीनी। 21 इन कली एको लोव्र मारदे ब्रेक्ताक्ड देशा हना “गे मतुइक्ब ननी” दे ममिन्नुड। थमा लोव्र तुइक्नीनी। मिनु मेको इन तुइशशो थमा लोव्र क्येडा जोक्ब सेल्चा, दे ब्रेक्ताक्ड। थमा शेंतीकेमी येसु ख्रीस्त आ पर्बम जोल मबाक्ब। 22 दूली शेंबमी मार शेंब देशा हना “येसु ख्रीस्त परमप्रभु यावे आ सोइशशो ममाइ। परमप्रभु यावे नु आ तौ पोबु मनसी” दे शेंब। मेको ख्रीस्त आ पर्बम दूली लोव्र शेंब बाक्ब। 23 सु सुमी “येसु ख्रीस्त परमप्रभु यावे आ तौ ममाइ” दे शेंनीमी, मेको इं आफ परमप्रभु यावे नु थुं का डा मबाक्नीम। सु सुमी चहिं “येसु ख्रीस्त परमप्रभु यावे आ तौ बाक्ब” दे शेंनीमी, मेको इं आफ, परमप्रभु यावे नु थुं का डा बाक्नीम। यूहन्ना ५:२३; १यूहन्ना ४:१५ 24 मिनु इन डोंइती रे नेशो शेंतीके मिम्शा बाक्कीन। इन डोंइती रे नेशो शेंतीके मिम्शा बाक्तीनी हना, गेपुकी इं आफ, परमप्रभु यावे नु आ तौ नु थुं का डा दुम्शा बाक्नीनी। 25 परमप्रभु यावेमी “गो इन कली गेना हना यो ब्रोंइशा बाक्चा गेनुड” देशो बाक्ब।

26 मुर का निक्शीमी इन कली दूली शेंनीमी। मोपतीके गो इन कली एको लोव्र ब्रेक्ताक्ड। 27 येसु ख्रीस्तमी इन कली परमप्रभु यावे आ सोक्त गेप्तु। मिनु मेको गेपुकी नु बाक्ब। मेको परमप्रभु यावे आ सोक्त गेपुकी नु बाक्मेनु, अर्को शेंब ममाल्नीनी। परमप्रभु यावे आ सोक्तीमी इन कली नेल्ल शेंना शेंन बाक्ब। मेको आ शेंशो थमा बाक्तीके

जोल मदुम्ब। मेकोमी डोंइती इन कली शेंशो टिशा, मेको नु थुं का डा दुम्शा, बाक्कीन। यूहन्ना १६:१३; २कोरिन्थी १:२१-२२; येरमीया ३१:३४

28 आं तमी तौपुकी, येसु ख्रीस्त नु थुं का डा दुम्शा बाक्कीन। मेको यिमेनु, गोपुकी महिंब दुम्ने चाप्यल। मेको आ डोंइती मुने मदोक्यल। 29 “येसु ख्रीस्त नेल्ल ठीक पाइब बाक्ब” दे तुइक्ताक्नी हना, सु सुम ठीक पाइनीमी, मेको नेल्ल परमप्रभु आ आलपुकी नमी, दे तुइक्नीनी। १यूहन्ना ३:७-१०

3

परमप्रभु आ आल दुम्शो

1 इं आफोमी इं कली शुश दाक्शा “परमप्रभु यावे आ तमी तौ” दे नें वोइशशो बाक्त। मिनु गोपुकी आ तमी तौ दुम्तय। मोपतीके रागी डा मुरपुकीमी इं कली मतुइक्नीम। मारदे मतुइक्नीम देंशा हना, मेकोपुकीमी येसु ख्रीस्त कली यो मतुइक्नीम। यूहन्ना १:१२; यूहन्ना १६:३ 2 आं दाक्शो लोकबपुकी, मुल गोपुकी परमप्रभु यावे आ आल दुम्तय। नोले गो दोदेशो दुम्नया, मारेइ मतुइक्नय। मिनु येसु ख्रीस्त ग्रूमेनु, गोपुकी मेको खोदेशो दुम्नय। दोपा मेको खोदेशो दुम्नय देंशा हना, गोपुकी मेको कली दोदेशो बाक्मे, दे तशा, मेको खोदेशो दुम्नय। रोमी ८:१७; फिलिप्पी ३:२१; कलस्सी ३:४ 3 मिनु सु मेको आ मग्रूम सम्म रिम्शा बाक्बा, मेको येसु ख्रीस्त पाप रे डोन बाक्शो खोदेशो पा, मेको यो पाप रे डोन बाक्ब।

4 मिनु सुम मरिम्शो पाइबा, मेकोमी परमप्रभु यावे आ अरेशो लोव्र मटीब। मरिम्शो मार बाक्ब देंशा हना, परमप्रभु यावे आ अरेशो लोव्र मटिचा मरिम्शो बाक्ब। 5 मरिम्शो क्याम्चा कली येसु ख्रीस्त जाक्त, दे तुइक्नीनी। मिनु मेकोमी काइ मरिम्शो मपवा। यसैया ५३:४-६; यूहन्ना १:२९; १ पत्रुस २:२४; यसैया ५३:९; यूहन्ना ८:४६ 6 सु चहिं मेको नु थुं का डा दुम्शा बाक्बा, मेकोमी मरिम्शो मपाइब। सुम चहिं मरिम्शो पना पन बाक्बा, मेको येसु ख्रीस्त नु थुं का डा मदुम्थु, मेको कली मतुइक्ब। रोमी ६:११,१४

7 आं आइक्च आलपुकी, दूली लोव्र शेंब आन लोव्र मनेनीन। सुम ठीक गेय पाइबा, मेको मुर यो येसु ख्रीस्त खोदेशो पा ठीक पाइब बाक्ब। १यूहन्ना २:२९ 8 सु चहिं मरिम्शो पना पन बाक्बा, मेको मुर सैतान रे जाक्शो बाक्ब। मारदे हना सैतान डोंइती रे मरिम्शो पना पन बाक्शो बाक्ब। मोपतीके परमप्रभु यावे आ तौ सैतान आ गेय थुम्चा कली रागीमी जाक्त। यूहन्ना ८:४४ 9 परमप्रभु यावे आ आलपुकीमी पाप मपाइनीम। मारदे पाप मपाइनीम देंशा हना, परमप्रभु आ थुं मेको आन थुंमी बाक्ब। मोपतीके परमप्रभु आ आलपुकीम पाप मपाइनीम। १यूहन्ना ५:१८ 10 मिनु तेको मुर परमप्रभु यावे आ आल बाक्नीमी नु तेको मुर सैतान आ आल बाक्नीमी, दे तुंइसीब। दोपा तुंइसीब देंशा हना, सु सु ठीक गेय मपाइनीमी नु आ लोकब आन कली मदाक्नीमी, मेको परमप्रभु यावे आ आल मनमी। मेको सैतान आ आल बाक्नीम। यूहन्ना ५:१८ 11 मिनु इन डोंइती रे नेशो लोव्र मार बाक्त देंशा हना, गोपुकी दाक्मुचा माल्नय। यूहन्ना १३:३४ 12 काइन खोदेशो दुम्चा मदुम्ब। काइनमी सैतान आ मुर दुम्शा, आ लोकब कली सदा बाक्त। काइनमी आ लोकब कली मारदे सदा बाक्त देंशा हना, आ थुं डा गेय मरिम्शो बाक्माक्त। आ लोकब आ गेय चहिं परमप्रभु यावे आ डोंइती ठीक बाक्माक्त। उत्पत्ती ४:८

13 आं लोकबपुकी, रागी डा मुरपुकीमी इन कली मदाक्थु श्येत गेमेनु, छक मलाक्कीन। मत्ती ५:११; यूहन्ना १५:१८-१९ 14 गोपुकी बेक्तीक राज्य रे पा, ब्रोंइतीक राज्यमी बाक्नय। दोपा तुइक्नय देंशा हना, थमा सुइक्ब लोकब आन कली दाक्नय। सुम चहिं मदाक्बा, मेको बेक्तीक राज्यमी बाक्ब। यूहन्ना ५:२४ 15 सुम थमा सुइक्ब लोकब आन कली मदाक्बा, मेको मुर साइक्ब बाक्ब। मिनु सुम थमा सुइक्ब लोकब आन कली साइक्बा, मेको गेना हना यो ब्रोंइशा बाक्चा मताइब, दे तुइक्नीनी। मत्ती ५:२१-२२ 16 मिनु लोकब आन कली दाक्चा, दोपा तुंइसीब देंशा हना, येसु ख्रीस्त इं कली दाक्शा, साइक्चा पुंइसाक्व। मिनु गोपुकीमी यो लोकब आन कली दाक्चा माल्नय। थमा सुइक्ब लोकब आन कली मबेक्क्या सम्म वारच पचा माल्नय। यूहन्ना १५:१३ 17 सुमी शुश शोंप थिशा यो, लोकब आन कली श्येत जशो तशा “गो मारेइ मगेनुड” दे मिम्बा, मेको मुर आ थुं रे परमप्रभु यावे आ गेशो दाक्तीक सक्ति यो जाम्शा लाइब। ब्यवस्था १५:७; १यूहन्ना ४:२० 18 आं आइक्च आलपुकी, गोपुकी दाक्मुय। मिनु “इ कली दाक्नुड” दे लोव्र पशा ममाइ, तन्न पतीकेमी दाक्मुचा माल्नय। याकूब २:१५-१६

19 गोपुकी थमा पा दाक्शा, गेय पाइतय हना, इं थुंमी “थमा लां खोइक्ब नय” दे थमा पा तुइक्नय। 20 मिनु इं थुंमी इं कली दोस गेप्टु हना, इं थुं क्येडा परमप्रभु यावे ठेयब बाक्ब। मिनु मेकोमी नेल्ल तुइक्ब। लूका १५:२०-२२ 21 आं

दाक्शो लोकबपुकी, इं थुंमी इं कली दोस मगेप्टु हना, गोपुकी महिंथु, परमप्रभु यावे आ डोंइती जाक्दीत्नय। 22 मिनु गो महिंथु पुंडितय हना, इं पुंडिशो गेब। मारदे हना गोपुकी आ अरेशो लोत्र पशा, आ दाक्शो पाइनय। मर्कूस ११:२४ 23 मिनु आ अरेशो लोत्र मार बाक्ब देशा हना, परमप्रभु यावे आ सोइश्शो येसु ख्रीस्त कली थमा सुइक्चा नु इं दातेमी दाक्मुचा इं कली अरेशो लोत्र बाक्ब। यूहन्ना ६:२९; यूहन्ना १५:१७ 24 सुमी आ अरेशो लोत्र पाइबा, येसु नु थुं का डा बाक्ब। मिनु येसु यो मेको मुर नु थुं का डा बाक्ब। परमप्रभु यावे नु गोपुकी थुं का डा दुम्तय, दे दोपा तुइक्नय देशा हना, मेकोमी गेशो सोक्तीमी शेंशो रे तुइक्नय। १यूहन्ना ४:१३; रोमी ८:९

4

थमा नु जोल दोपा तुइसीबा?

1 आं दाक्शो लोकबपुकी, शेंबपुकीमी शेंदमेनु, गोपुकीमी परमप्रभु यावे रे पा शेंनीमी देय मशेंनीमी मेको रूपीन। मारदे हना रागीमी शुश दूली पा, परमप्रभु यावे आ लोत्र पाइब बाक्नीम। मत्ती ७:१५ 2 परमप्रभु यावे आ सोक्त आ शेंतीके दोपा तुइसीब देशा हना, सुमी “येसु ख्रीस्त परमप्रभु यावे आ सोइक्तीके रागीम जाक्त” देंबा, मेको मुर परमप्रभु यावे नु थुं का डा बाक्ब। 3 सुम चहिं “येसु परमप्रभु यावे आ सोइश्शो ममाइ” दे शेंबा, मेको परमप्रभु यावे नु थुं का डा मबाक्ब। मेको येसु आ पर्वम दूली शेंब बाक्ब। येसु आ पर्वम दूली शेंथ जाक्ब, दे नेंतीनी। मिनु मेको मुल रागीमी बाक्ब।

4 आं आइक्च आलपुकी, गोपुकी परमप्रभु यावे नु थुं का डा दुम्शा, मेको रागीमी बाक्ब दूली शेंब आन कली ग्रातीनी। मारदे हना रागी डा मुर आन थुंमी बाक्शो दूली शेंब सोक्त क्येडा इन थुंमी बाक्ब परमप्रभु यावे आ सोक्त ठेयब बाक्ब। 5 मेको येसु ख्रीस्त आ पर्वम दूली शेंबपुकी रागी डा मुर बाक्नीम। मोपतीके आन शेंतीके परमप्रभु यावे के ममाइ, रागी डा बाक्ब। मिनु रागी डा मुरपुकी मेको आन शेंशो दाक्नीमी। यूहन्ना १५:१९ 6 गोपुकी चहिं परमप्रभु यावे नु थुं का डा बाक्नय। सुमी परमप्रभु यावे कली तुइक्बा, मेकोमी आंइ शेंशो टीब। सु चहिं परमप्रभु यावे नु थुं का डा मबाक्बा, मेकोम आंइ शेंशो मटीब। मोपा थमा बाक्बा देय दूली शेंतीक बाक्बा, दे तुइक्ने चाप्नय। यूहन्ना ८:४७; १कोरिन्थी १४:३७

परमप्रभुमी दाक्मुपाइक्ब

7 आं दाक्शो लोकबपुकी, दाक्मुय। मारदे हना परमप्रभु यावेमी थमा सुइक्ब आन कली दाक्मुपाइक्ब। सुमी दाक्बा, मेको परमप्रभु यावे आ आल दुम्शा, परमप्रभु यावे कली तुइक्ब। 8 सुम चहिं मदाक्बा, मेकोमी परमप्रभु यावे कली मतुइक्ब। मारदे हना परमप्रभु यावे दाक्ब बाक्ब। 9 परमप्रभु यावेमी दोपा आ दाक्चा कोइताक्व देशा हना, आ का ला तौ रागीमी सोइक्ताक्व। मिनु आ तौ साइक्चा पुंडसीतीके इं कली गेना हना यो ब्रोंइशा बाक्चा गेप्टु। यूहन्ना ३:१६ 10 मिनु परमप्रभु यावे आ दाक्चा मार बाक्ब देशा हना, गोपुकी डोंइती परमप्रभु यावे कली काइ मदाक्ताक्व हना यो, परमप्रभु यावेमी इं कली दाक्ताक्व। गिश दाक्ताक्व देशा हना, आंम तौ कली साइक्चा पुंडसीब पपाइक्चा कली रागीमी सोइक्ताक्व। इं कली मरिम्शो गेय नु सैतान आ राज्य रे प्रोंइचा, दे साइक्चा पुंडसीचा कली रागीमी सोइक्ताक्व।

11 आं दाक्शो लोकबपुकी, परमप्रभु यावेमी इं कली दोपा दाक्ता, मोपा गोपुकी यो दाक्मुचा माल्नय। 12 मुरपुकीम परमप्रभु यावे कली गेनायो मतामे। तन्न गोपुकी दाक्मुयानु, परमप्रभु यावे इं नु थुं का दुम्त। मिनु परमप्रभु यावे आ दाक्तीक इं थुंमी लीब। यूहन्ना १:१८ 13 परमप्रभु यावेमी इं कली आ सोक्त गेप्टु। मोपतीके गो परमप्रभु यावे नु थुं का डा दुम्नय नु मेको गो नु थुं का डा दुम्शो तुइक्नय। 14 मिनु गोपुकी परमप्रभु यावेमी आ तौ रागीमी सोइश्शो ताइतक। गोपुकीमी “इं आफ, परमप्रभुमी आ तौ कली मुर आन कली पाप रे प्रोंइचा, दे रागीमी सोइक्ताक्व” दे शेंना शेंन बाक्नीकी। यूहन्ना ३:१७ 15 सुमी “येसु परमप्रभु यावे आ तौ बाक्ब” देंबा, मेको परमप्रभु यावे नु थुं का डा बाक्ब। मिनु परमप्रभु यावे यो मेको नु थुं का डा बाक्ब। १यूहन्ना ५:५ 16 मोपतीके गोपुकी “परमप्रभु यावेमी इं कली दाक्ब” दे तुइश्शा थमा सुइक्नय। परमप्रभु यावेमी मुर आन कली दाक्ब। सुमी दाक्ना दाक्न बाक्बा, मेको परमप्रभु यावे नु थुं का डा बाक्ब। परमप्रभु यावे यो मेको नु थुं का डा बाक्ब।

17 दोपा मुर आन कली दाक्चा रिम्शो दुम्त देशा हना, गोपुकी परमप्रभु यावे आ निसाफ पची नाक्त महिनय। मारदे हना गोपुकी परमप्रभु यावे नु थुं का डा दुम्शा, रागीमी बाक्नय। १यूहन्ना २:२८ 18 मिनु दाक्ना दाक्न बाक्तय हना, महिनय। मारदे हना मुरपुकी सजाइ तशा हिंनीम। मिनु सु हिंबा, मेको आ दाक्शो शुश बाक्ब। 19 गोपुकी चहिं परमप्रभु

यावे कली मारदे दाक्नय देशा हना, मेकोमी डोंइती इं कली शुश दाक्ताक्व। 20 सुमी चहिं “गो परमप्रभु यावे कली दाक्नुड” देंबा, मिनु थमा सुइक्व लोकब आन कली काइ मदाक्बा, मेको मुर आ देशो लोव्र यो जोल बाक्ब। मारदे हना सुमी आ नु बाक्शो लोकब आन कली मदाक्बा, मेकोमी मुर आन मतशो परमप्रभु यावे कली दोपा दाक्ने चाप्बा डा? मचाप्ब। १यूहन्ना ३:१७ 21 मिनु परमप्रभु यावेमी इं कली अरेशो लोव्र मार बाक्त देशा हना “सुमी परमप्रभु यावे कली दाक्बा, मेकोमी थमा सुइक्व आन कली यो दाक्चा माल्ब” दे शेशो बाक्त। मर्कूस १२:२९-३१

5

थमा सुइक्व सक्ति पाइशो बाक्नीम

1 मिनु सुमी “येसु परमप्रभु यावे आ सोइशो ख्रीस्त बाक्ब” दे थमा सुइक्बा, मेको मुर परमप्रभु यावे आ आल बाक्ब। मिनु सुमी आफ कली दाक्बा, मेकोमी आ आल कली यो दाक्ब। 2 गोपुकी थमा पा परमप्रभु यावे आ आल आन कली दाक्नय, दे दोपा तुइक्नय देशा हना, परमप्रभु यावे कली दाक्नय। मिनु आ अरेशो लोव्र टीनय। 3 गोपुकीमी “परमप्रभु यावे कली दाक्नय” देंतय हना, आ अरेशो लोव्र टिशा पाइनय। आ देशो लोव्र टिशा पचा श्येत ममाइ। यूहन्ना १४:१५, २३, २४; मत्ती ११:३० 4 मिनु परमप्रभु यावे आ आलपुकीमी रागी डा मुर आन दाक्शो गेय कली ग्रानीम। दोपा ग्रानीम देशा हना, येसु ख्रीस्त कली थमा सुइक्चा मप्रोंइथु ग्रानीम। यूहन्ना १६:३३; १कोरिन्थी १५:५७ 5 सु सुमी ग्रानीम देशा हना “येसु परमप्रभु यावे आ तौ बाक्ब” दे थमा सुइक्बमी ग्रानीम। १यूहन्ना ४:४

परमप्रभु आ तौ आ सांकछी

6 मिनु येसु ख्रीस्त ब्वाक्कु नु हुश रे जाक्त। ब्वाक्कु रे ला ममाइ, तन्न ब्वाक्कु नु हुश रे जाक्त। १यूहन्ना ४:२; मर्कूस १:९; यूहन्ना १९:३४-३५ 7 परमप्रभु यावे आ सोक्त मेको आ सांकछी बाक्ब। मारदे हना परमप्रभु यावे आ सोक्तीम थमा लोव्र ला पाइब। यूहन्ना १:३३ 8 मोपा सांकछी सां बाक्नीम। का परमप्रभु यावे आ सोक्त बाक्ब, का ब्वाक्कु रे जरमेतीके बाक्ब नु का मुर आन मरिम्शो पतीके आ पर्बम येसु साइक्चा पुंइसीशो डा हुश बाक्ब। मिनु मेको सांफा गारनीमी। 9 गोपुकी मुर आन सांकछी नेशा थमा सुइक्नय। परमप्रभु यावे आ सांकछी मुर आन सांकछी क्येडा ठेयब बाक्ब। मिनु परमप्रभु यावेमी आ तौ येसु ख्रीस्त आ पर्बम मेको सांकछी गेप्टु।

10 सु परमप्रभु यावे आ तौ कली थमा सुइक्बा, मेको मुर आ थुमी सांकछी लीब। सु चहिं परमप्रभु यावे कली थमा मसुइक्बा, मेकोमी “परमप्रभु यावे जोल्फ बाक्ब” देंब। मारदे हना “आं तौ बाक्ब” दे परमप्रभु यावेमी देशो थमा मसुइक्ब। यूहन्ना ३:३२-३४; रोमी ८:१६ 11 मिनु मेको आ सांकछी मार बाक्ब देशा हना, परमप्रभु यावेमी इं कली गेना हना यो ब्रोंइशा बाक्तीक गेप्टु। मोदेशो ब्रोंइशा बाक्तीक आ तौमी पतीके बाक्ब। 12 सु मेको आ तौ नु बाक्बा, मेको गेना हना यो ब्रोंइशा बाक्चा ताइब। सु चहिं परमप्रभु यावे आ तौ नु मबाक्बा, मेको गेना हना यो ब्रोंइशा बाक्चा मताइब। 13 मिनु गोपुकी परमप्रभु यावे आ तौ आ नें कली थमा सुइक्नीनी। मोपतीके गेना हना यो ब्रोंइशा बाक्चा ताइब बाक्नीनी, दे गो इन कली तुइक्पाइक्चा कली ब्रेक्ताक्ड। यूहन्ना २०:३१

परमप्रभु कली पुंइतीक लोव्र

14 मिनु मेको कली थमा सुइशोमी इं पुंइशो आ दाक्शो बाक्त हना, मार पुंइतय हना यो, इं कली नेशा गेब। यूहन्ना १४:१३ 15 गोपुकीमी इं मार मार पुंइशो नेब, दे तुइक्ताक्व हना, इं पुंइशो यो गेब, दे तुइक्नय। 16 मिनु सुमी आ लोकब मबेक्चा डा सजाइ तचा डा पा मरिम्शो पशो ताइबा, मिनु आ लोकब आ पर्बम पुंइबा, मेको मुर आ पुंइशो परमप्रभु यावेमी गेब। मेको थमा सुइक्ब लोकब गेना हना यो ब्रोंइशा बाक्चा ताइब। तन्न बेक्चा डा मरिम्शो पतीक यो बाक्बा, मोदेशो मरिम्शो पाइब कली पुंइचा ममाल्ब, दे इन कली देंनुड। मर्कूस ३:२८-३० 17 परमप्रभु यावे कली मगारचा डा गेय नेल्ल मरिम्शो बाक्नीम। तन्न कोइ मरिम्शो पतीके क्याम्चा डा बाक्नीम।

येसु ख्रीस्त नु बाक्बपुकी

18 मिनु “सु परमप्रभु यावे रे जरमेशो बाक्मे, मेको मुरुम मरिम्शो मपाइब। मारदे हना परमप्रभु यावे रे जरमेशो आन कली येसु ख्रीस्तमी कोव्रब। मिनु सैतानमी मेको आन कली मथीब” दे तुइक्नय। १यूहन्ना ३:९; यूहन्ना १७:१५ 19 मिनु गोपुकीमी “गोपुकी परमप्रभु यावे आ मुर नय” तन्न सैतानमी नेल्ल रागी डा मुर आन कली हुकुम पाइब, दे तुइक्नय। गलाती १:४ 20 मिनु परमप्रभु यावे आ तौमी इं कली रुप्तीक थुं गेप्टु, दे तुइक्नय। मेको रुप्तीक थुंमी

थमा पतीके कली तुइक्नय। गोपुकी मेको थमा पाइब नु थुं का डा बाक्नय। मोपा आ तौ येसु ख्रीस्त नु यो थुं का डा बाक्नय। मेको थमा परमप्रभु यावे नु गेना हना यो ब्रोंइशा बाक्तीक बाक्ब। यूहन्ना १७:३

नोले डा लोव

21 मोपतीके “आं आइक्च आलपुकी, मूर्ति रे डोन बाक्कीन” दे इन कली ब्रेक्शा अरेतन्नी। १कोरिन्थी १०:१४

२ यूहन्ना

ब्रेक्ब मुर: यूहन्नामी आंम कली खाल्पा देशा, एको चिठी थमा सुइक्ब आन कली नोले ब्रेक्शो बाक्ब।

गेना ब्रेक्शो: डोंइती डा चिठी खोदेशो पा १०० ए. डी. नुप्या क्येडा डोंइती मीश मुर, दे खुइशो नें वोइशो, थमा सुइक्ब आन गुम्तीके कली ब्रेक्शो चिठी बाक्ब।

मार ब्रेक्शो: परमप्रभु यावे कली दाक्तीक कोंइतीके आ देशो टिचा बाक्ब। दूली शेंब आन पर्बम यो लोत्र बाक्ब।

डोंइती डा लोत्र

1 गो येसु ख्रीस्त कली थमा सुइक्ब आन शेंब खाल्पामी आ योत्रशो मीश मुर नु आ आल इन कली चिठी ब्रेक्ताक्नी। गो इन कली थमा पा दाक्नन्नी। गो ला ममाइ, सु सुम परमप्रभु यावे आ पर्बम थमा शेंतीके तुइक्तमे, मेकोपुकीमी यो इन कली दाक्नीमी। ३ यूहन्ना : १ 2 मारदे हना परमप्रभु यावे आ थमा शेंतीके इं थुंम बाक्ब, मेको गेना हना यो लीब।

3 मिनु इं आफ, परमप्रभु यावे नु आ तौ येसु ख्रीस्तमी इं कली शिशी नु थुं नाइशशा बाक्चा गेम्सेक्ल। परमप्रभु यावे आ थमा शेंतीके नु आ गेशो दाक्मुचा यो गोपुकी नु बाक्ल।

थमा लां खोइक्चा नु दाक्चा

4 गो इन आल आन दाते डा का निक्शी थमा लां खोइक्ब तशा, शुश ग्येरसीनुड। मारदे हना इं आफोमी इं कली मोदेशो अरेशो लोत्र गेशो बाक्ब। 5 मिनु गोमी “गोपुकी दाक्मुय” दे मीश मुर इन कली देशो नक अरेशो लोत्र मब्रेक्नुड। तन्न साइ डोंइती रे दाक्मुचा, दे अरेशो लोत्र बाक्शो बाक्ब। १ यूहन्ना २:७ 6 मिनु आ अरेशो लोत्र पचा दाक्चा बाक्ब। मेको इन डोंइती रे नेशो अरेशो लोत्र बाक्ब। मेको अरेशो पने।

दूली शेंब आन पर्बम शेंशो

7 मिनु मुल रागीमी शुश मुर आन कली मरिम्शो लां कोंइब जोल्फेपुकी जाक्तेक्म। मेको मुरपुकीमी “येसु ख्रीस्त मुर दुम्शा रागीमी मजरमेसे” दे शेंनीम। मेको मोदेशो शेंब चहिं जोल्फे नु नेल्ल क्येडा मरिम्शो पाइब बाक्नीम। १ यूहन्ना २:१८; १ यूहन्ना ४:१-३ 8 गोपुकी मार कली गेय पनी, मेको मुल यो पना पन बाक्कीन। मो पाइतीनी हना, ठेयब इनाम ताइनीनी। गलाती ४:११ 9 सुम चहिं ख्रीस्त आ थमा शेंतीके लोत्र प्रोंइबा, मेको परमप्रभु यावे नु थुं का मबाक्ब। सुम चहिं ख्रीस्त आ थमा शेंतीक लोत्र मप्रोंइबा, मेको आफ नु तौ निम्फा नु थुं का डा बाक्ब। १ यूहन्ना २:२३

10 सुइ मुर इन बाक्तीके जाक्शा, थमा शेंतीके लोत्र मपाप्तु हना, मेको कली खिं ओत्रचा मगेने। मिनु मेको कली “रिम्शो बाक्को” दे यो मदेनीन। २ थिस्सलोनिकी ३:६ 11 मारदे हना सुमी मेको मोदेशो मुर कली “रिम्शो बाक्कीन” देबा, मेकोमी मेको आ दूली शेंतीके नु आ मरिम्शो गेय यो पाइब।

नोले डा लोत्र

12 मिनु गोमी इन कली शुश ब्रेक्चा माल्ती हना यो, कागज नु मसीम मब्रेक्नुड, इन कलीन गुम्थ जाक्नुड। मिनु कोत्रमुशा लोत्र पाइनय, दे आस पाइनुड। मोपा गुम्तय हना, शुश ग्येरनय। ३ यूहन्ना : १३ 13 इन योत्रशो समी आ तमी तौपुकीमी यो इन कली “रिम्शो बाक्कीन” दे ब्रेक्पाइक्तीमी।

३ यूहन्ना

ब्रेक्ब मुर: यूहन्ना आ नेल्ल क्येडा नोले ब्रेक्शो चिठी बाक्ब।

गेना ब्रेक्शो: एको चिठी १०० ए. डी. क्येडा डोंइती ब्रेक्शो बाक्ब।

मार ब्रेक्शो: थमा शेंशो कोंइतीके नु दाक्चा मप्रोंइतीक आ पर्बम ब्रेक्शो लोव्र बाक्ब।

डोंइती डा लोव्र

1 गो येसु ख्रीस्त कली थमा सुइक्ब आन शेंब खाल्पामी, आं थमा पा दाक्शो गायस इ कली एको चिठी ब्रेक्ताक्ड। २ यूहन्ना : १ 2 आं दाक्शो लोकब, इ जचा बाक्चा नेल्ल रिम्शो बाक्ब। इ थमा सुइक्तीके रिम्शो बाक्ब, दे गो तुइक्नुड। 3 मिनु इ बाक्तीके रे जाक्ब थमा सुइक्बपुकीमी “गायस रिम्शो पा येसु ख्रीस्त आ पर्बम थमा लां खोइक्ब” दे शेंताक्यीमी। मेको नेंनुनु, गो शुश ग्येरसाक्यी। २ यूहन्ना : ४ 4 आं आलपुकी येसु ख्रीस्त आ पर्बम थमा लां खोइक्नीम देंशो नेंनुनु, आं कली नेल्ल क्येडा ग्येरपाइक्ब।

गायसमी जाक्चा गेशो

5 आं दाक्शो लोकब, गे येसु ख्रीस्त कली थमा सुइक्ब आन कली वारच पाइतीनी, मोपा रिम्शो गेय पाइतीनी। मोदेंशो गेय अर्को सहर डा येसु ख्रीस्त कली थमा सुइक्ब आन कली पाइतीनी, मेको थम रिम्शो बाक्ब। 6 इ खिंमी जाक्शा बाक्शा, थमा सुइक्बपुकीमी “गायसमी थमा सुइक्ब आन कली शुश दाक्शा, खिंमी बाक्चा गेप्टु” दे आंइ ग्रुम्तीकेमी नेंपाइक्तेक्म। मिनु गे मोपा येसु ख्रीस्त कली थमा सुइक्ब आन कली खिंमी बाक्चा गेचा ला ममाइ, तन्न आन लची ना मेकोपुकीमी मार मार मालनीमी, मेको नेल्ल परमप्रभु यावेमी खोदेंशो पा गेशा सोइक्ताक्नी हना, गे रिम्शो दुम्नीनी। तीतस ३:१३ 7 मारदे हना मेकोपुकी येसु ख्रीस्त आ पर्बम शेंथ लाइनीम। मिनु थमा मसुइक्बपुकी रे मारेइ मलाइक्नीम। १ कोरिन्थी ९:१२ 8 मिनु गोपुकीमी मोदेंशो मुर आन कली रिम्शो पा वारच पचा मालनय। मो पयानु, गोपुकी मेकोपुकी नु गारशा, गेय पना पन बाक्नय। हिब्रू १३:२

ठेयब लेशो शेंब आ पर्बम

9 गो इन ग्रुम्तीके डा थमा सुइक्ब आन कली ब्रेक्ताक्डमी। तन्न डियोत्रीफसमी आंम कली ठेयब सेल्शा, गोपुकी आंइ कली मदाक्ब। 10 मिनु गो मेकेर जाक्शा, मेको आ पशो गेय आ पर्बम लोव्र पाइनुड। मेकोम मार पाइब देंशा हना, आं कली श्येत गेचा, दे आं पर्बम काइ मरिम्शो लोव्र पना पन गाक्ब। मिनु मेको ला ममाइ, आं सोइश्शो लोकब आन कली जाक्चा मगेव। सु चहिं मेको आन कली जाक्चा गेचा दाक्बा, डियोत्रीफसमी मेको कली “जाक्चा गेचा मदुम्ब” देंब। मिनु मेकोपुकी आ देंशो मटिम्तेक्म हना, मेको आन कली थमा सुइक्ब आन ग्रुम्तीके रे तिल्ब।

11 आं दाक्शो थमा सुइक्ब लोकब, मरिम्शो मुर आन तस मखोतो। तन्न रिम्शो मुर आन तस खोतो। सु रिम्शो गेय पाइबा, मेको परमप्रभु यावे आ मुर बाक्ब। सु चहिं मरिम्शो पाइबा, मेको परमप्रभु यावे कली मतुइक्ब बाक्ब।

12 मिनु थमा सुइक्ब नेल्लेमी “देमेत्रीयस रिम्शो थमा सुइक्ब बाक्ब” दे तुइश्शा देंनीम। मिनु मेको आ थमा लां खोइक्तीकेमी, येसु ख्रीस्त नु थुं का बाक्ब, दे कोंइब। गो यो मेको आ पर्बम “देमेत्रीयस रिम्शो मुर बाक्ब” दे सांकछी गेनुड। गो जोल मपाइनुड, दे तुइक्नेवे।

नोले डा लोव्र

13 गो इ कली शुश ब्रेक्चा मालती हना यो, गो मसी नु कलममी मब्रेक्नुड। २ यूहन्ना : १२ 14 तन्न इ कली ग्रुम्थ जाक्चा कली आस पाइनुड। मिनु ग्रुम्शा कोव्रमुशा लोव्र पाइनस। 15 इ थुं नाइश्शा बाक्ब। आं वारचपुकीमी यो “गे रिम्शो बाक्कीन” दे आं कली ब्रेक्पाइक्तीमी। गे अरु थमा सुइक्ब वारच आन कली यो “रिम्शो बाक्कीने” दे का का पा आन नें थिशा, माइक्मी।

यहूदा

ब्रेक्ब मुर: एको चिठी याकूब आ लोकब यहूदाम ब्रेक्शो बाक्ब। आंम कली “येसु आ वाइल” देंब। डोंइती थमा मसुइक्ब बाक्शा, नोले थमा सुइक्ब दुम्त। प्रेरित १:१४

गेना ब्रेक्शो: एको चिठी ६६ ए. डी. नु ६८ ए. डी. दातेमी ब्रेक्शो बाक्ब। थमा सुइक्बपुकीमी येसु आ सोइश्शो मुर आन कली आंमन तशो बाक्तेक्म।

मारदे ब्रेक्शो: एको चिठी रिम्शो थमा सुइक्चा आ पर्वम ब्रेक्शो बाक्ब।

१. डोंइती डा लोत्र यहूदा १:१-२
२. दूली शेंब आन पर्वम लोत्र यहूदा १:३-१३
३. दूली शेंब सजाइ ताइनीम यहूदा १:१४-२६
४. थमा सुइक्तीके बोल्यो दुम्चा माल्ब नु नोले डा लोत्र यहूदा १:१७-२५

डोंइती डा लोत्र

1 गो याकूब आ लोकब यहूदा नड। गो येसु ख्रीस्त आ वाइल दुम्ती। परमप्रभु यावे, इं आफ आ दाक्शो नु येसु ख्रीस्त कली योत्रशा वोइश्शो मुर, इन कली ब्रेक्ताक्ड। मती १३:५५ 2 परमप्रभु यावे आ दाक्तीके, थुं नाइक्तीके नु दाक्मुतीके गेपुकी नु शुश बाक्ल।

दूली शेंब आन पर्वम शेंशो २पत्रुस २:-

3 आं दाक्शो लोकबपुकी, गो इन कली इं पाप रे प्रोंइतीक आ पर्वम ब्रेक्चा दाक्ती। थमा सुइक्तीके आ पर्वम दोपा गेय पचा, दे इन कली शेंचा दाक्ताक्ड। मेको थमा सुइक्तीक पाप रे डोन बाक्ब आन कली डोंइती रे शेंने थुम्शो बाक्त। १तिमोथी १:१८ 4 तन्न का निक्शी निसाफ पाइक्चा पुंइसीबपुकीमी “थमा सुइक्ब बाक्नीक” देंखु पा, थमा सुइक्ब आन गुम्तीकेमी बाक्नीम। मेकोपुकीमी परमप्रभु यावे कली मटिथु “परमप्रभु यावेमी शिशी पाइब” दे मिम्शा, आंम दला दाक्स पना पन बाक्नीम। मिनु इं होत्रप, प्रभु येसु ख्रीस्त आ पर्वम “परमप्रभु यावे आ तौ ममाइ” देंनीम। 5 गेपुकी डोंइती रे “दोपा ठीक पा थमा सुइक्चा” दे नेल्ल शेंसीशो बाक्तीनी हना यो, गो इन कली लेंशा मेको शेंशो लोत्र मिम्पाइक्चा दाक्नुड। मार मिम्पाइक्चा दाक्नुड देंशा हना, परमप्रभु यावेमी आ मुर आन कली इजीप्त रागी रे प्रोंइपाइश्शा, तन्न नोले मेको थमा मसुइक्ब आन कली सदा बाक्त। गन्ती १४:३५; १कोरिन्थी १०:५ 6 परमप्रभु यावे आ स्वर्ग डा गेय पाइब का निक्शीमी परमप्रभु यावे कली मटिथु आन बाक्तीके प्रोंइतेक्म। परमप्रभु यावेमी मेको आन कली ठेयब निसाफ पची नाक्त सम्म गेना हना यो मप्रोंइचा डा पा साडलोमी पाइश्शा, नेल्ल क्येडा मरिम्शो बाक्तीक छिडछिडमी वोइश्शो बाक्ब। उत्पत्ती ६:२-४ 7 सोदोम, गोमोररा नु आस एर ओंथ बाक्शो सहर डा मुरपुकीमी आन खोदेशो पा ग्रांग्रा दिचा डा नु मपचा डा दूली गेय पशो बाक्तेक्म। परमप्रभुमी मेको आन कली कोइतीक दुम्पाइक्चा कली गेना हना यो ब्रशो मीमी सजाइ गेशो बाक्त। उत्पत्ती १९:१,४-११ 8 मोदेशो तुइश्शा यो मेको थमा सुइक्नीकी देंखु पाइबपुकीमी आंम मिम्तीके पशा, आंम रां कली ग्रांग्रा दिचा डा सेल्लेक्म। मिनु अधिकार पाइब आन कली मटिथु, स्वर्गम बाक्ब आन पर्वम शुक्शी पाइनीम। 9 परमप्रभु यावे आ नेल्ल क्येडा ठेयब स्वर्ग डा गेय पाइब मिकाएलमी चहिं सैतान कली मोसा आ बेक्शो रां आ पर्वम लोत्र पशा “परमप्रभुमी इ कली हुइक्ब” दे आंमा शुक्शी पा निसाफ पचा हिंमाक्त। दानीएल १२:१; जकरिया ३:२ 10 मेको मुरपुकी चहिं आन मतुइश्शो नेल्ल आन पर्वम शुक्शी पाइनीम। मिनु मिम्तीक मपाइश्शो बस्तु भाव आन तुइश्शोमी खोदेशो पाइनीम। मिनु मेको पशा, खतम सेल्चा पुंइसीनीम। 11 मेको आन पर्वम आबी। काइन खोदेशो दुम्शो बाक्तेक्म। बालाम बुदी परमप्रभु यावे कली मटिथु, क्येट आ पर्वम दूली गेय पाइनीम। मिनु कोराह माइश्शो मुर खोदेशो पा जाम्शा लाइनीम। उत्पत्ती ४:८; गन्ती ३१:१६; गन्ती १६:- 12 मेकोपुकी इन गुम्मुशो भोजमी जाक्शा, दाइल पपाइक्ब फुल्लु खोदेशो पा बाक्नीमी। आंम दातेम ग्येरपमुइनीम, तन्न महिंथु आंम कोत्रज ला प्रिनीम। मेको रेउ मपाइश्शो फशेम बेरशो गोस्स खोदेशो बाक्नीम। फल सिल्ची ना फल मसिप्ब रवा खोदेशो बाक्नीम। शाक्श दुल्शो रवा खोदेशो पा, निक्शी खेयप बेक्शो बाक्नीम। १कोरिन्थी ११:२१ 13 मेको समुन्द्र

डा ठेयब हिंचा डा छाल खोदेशो बाक्नीम। आंम मुने डा बोग्यो गुंडनीम। दोक्शो सोरुल खोदेशो बाक्नीम। मेको आन कली नेल्ल क्येडा मरिम्शो छिडछिड डा बाक्तीके वोइश्शो बाक्ब। यसैया ५७:२०

14 मिनु आदम रे ७ पाला नोले डा हनोक माइश्शो मुर का बाक्त। मेकोमी मोदेशो मुर आ पर्वम परमप्रभु यावेमी तुइक्पाइश्शो लोव्र पवा बाक्त। मेकोमी “नेनीन, प्रभु नु आ योव्रशो हजार हजार जाक्तेक्म। हनोक कली हिबू लोव्रमी एनोक देंनीम। उत्पत्ती ५:२१ 15 परमप्रभु यावे कली मटीब नेल्ल आन कली आन थमा मसुइक्तीकेमी पशो मटितीके तपाइक्नीम। परमप्रभु यावे रे डोन बाक्ब पापीपुकीम परमप्रभु यावे कली मार मार मरिम्शो लोव्र पामे, मेको आन कली निसाफ पशा, सजाइ गेचा, दे जाक्तेक्म” दे लोव्र पवा बाक्त। 16 मेकोपुकी गन गन पाइब बाक्नीम। मेकोपुकीमी “गो श्येत जना जन बाक्नुड” दे गेनायो मग्येरथु, आन दला दाक्स पना पन बाक्नीम। ठेयब लोव्र पा, ठेयब लेशो मुर बाक्नीम। मेकोपुकीमी आंम कली ठेयब सेल्सीचा कली मुर आन कुल कोव्रनीम।

बोल्यो थमा सुइक्ब दुमीन

17 आं दाक्शो लोकबपुकी, इं प्रभु येसु ख्रीस्त आ सोइश्शोपुकीमी डोंइती देंशो लोव्र ति फ्रुक्शा मिम्चा माल्नीनी। 18 मेकोपुकीमी इन कली “मेको नोले डा नाक्त शुक्शी लोव्र पाइनीम। परमप्रभु यावे कली मटिथु, आंम दला दाक्स पाइनीम” देंतेक्म। १तिमोथी ४:१; २पत्रुस ३:३ 19 मेकोपुकीम मुर आन कली ब्रापाइक्नीम। परमप्रभु यावे कली ममिम्थु, परमप्रभु यावे आ सोक्त मपाइश्शो बाक्नीम। १कोरिन्थी २:१४

परमप्रभु कली ठेयब सेल्चा

20 आं दाक्शो लोकबपुकी, इन रिम्शो थमा सुइक्तीके बारपतीन। परमप्रभु यावे आ सोक्तीमी प्रार्थना पने। कलस्सी २:७; १थिस्सलोनिकी ५:११ 21 परमप्रभु यावेम इन कली दाक्ब, दे मिम्ना मिम्न बाक्कीन। इं प्रभु येसु ख्रीस्तमी इन कली दाक्शा, शिशी पशा, इन कली गेना हना यो परमप्रभु यावे नु बाक्चा गेब, दे रिम्शा बाक्कीन। 22 का निक्शी थमा सुइक्ने मचाप्शो मुर आन कली ठीक पा थमा सुइक्तीके शेंदीन। 23 का निक्शी कली मी रे फो फु गुंडशो खोदेशो पा प्रोनीन। का निक्शी कली शिशी पने, तन्न आन ग्रांग्रा दिचा डा पाप क्येडा हिंशा, आन लुम्सीशो वासी यो मथिने। याकूब ५:९; प्रकाश ३:४

नोले डा लोव्र

24 येसु ख्रीस्तमी इन कली पाप मपाइब सेल्ने चाप्ब। इन कली दोस मताइब सेल्शा, ग्येरसीशा, परमप्रभु यावे आ छेडछेड आ डोंइती राप्पाइक्ने चाप्ब। १थिस्सलोनिकी ५:२३ 25 परमप्रभु यावे का ला बाक्ब। मेकोमी इं प्रभु येसु ख्रीस्त आ पतीकेमी इं कली पाप रे प्रोंइतु। नेल्ल छेडछेड पाइश्शो, नेल्ल क्येडा ठेयब दुम्तीके, नेल्ल सक्ति नु नेल्ल अधिकार मेको केन बाक्ब। मेको डोंइती बाक्त। मुल यो बाक्ब। मिनु गेना हना यो बाक्ब। आमेन।

प्रकाश

ब्रेक्ब मुर: एको किताब येसु आ शेंसीब यूहन्ना आ ब्रेक्शो बाक्ब। थमा सुइक्ब आन गुम्तीके डा इतिहासम मोदेशो ब्रेक्शो बाक्ब।

गेना ब्रेक्शो: इरेनेयुस, थमा सुइक्ब आन इतिहास ब्रेक्बमी “प्रकाश सासन पाइब दोमीतीयन आ सासन पशो नुप्ची ना ब्रेक्शो बाक्ब” देंब। मेको १४-१५ ए. डी. मेर बाक्ब।

मार ब्रेक्शो:

१. प्रभु येसु ख्रीस्त नु मेको कली थमा सुइक्ब आन गुम्तीके। प्रकाश १:- ३:-
२. प्रभु येसु ख्रीस्त नु रागी रागी डा मुर प्रकाश ४:-; - ११:१४
३. सैतान नु थमा सुइक्ब आन जोरी सत्रु प्रकाश ११:१५; - १४:२०
४. थमा सुइक्ब आन जोरी सत्रु बुशो प्रकाश १५:१; - १९:२१
५. येसु ख्रीस्त नु आ राज्य प्रकाश २०:१; - २२:२१

डोंइती डा लोव

१ परमप्रभु यावेमी येसु ख्रीस्त कली “मार मार दुमचा चिकता, आ रागी डा वाइलीम वाइलपुकीमी तुइक्तमेक्ल” दे कोंइताक्व। मिनु येसु ख्रीस्तमी आ स्वर्ग डा गेय पाइब कली आ वाइल यूहन्ना आ बाक्तीके सोइक्ताक्व। मारदे सोइक्ताक्व देंशा हना, मेको दुमचशो लोव शेंथ सोइक्ताक्व। २ मिनु गो, यूहन्नामी, परमप्रभु यावे आ लोव नेंता, येसु ख्रीस्त आ पशो ताता। मिनु मेको नेल्ल आन सांकछी दुम्ती। ३ मिनु सु सुमी परमप्रभु यावेमी तुइक्पाइशो एको किताब डा लोव पढेनीमी, नेंनीमी नु टीनीमी, मेको आसीक रशो नु ग्येरसीशो मुर दुम्नीम। मारदे हना मेको लोव दुमचशो बाक्ब। १यूहन्ना १:१-२; यूहन्ना २१:२४; प्रकाश २२:१०

एसीया डा गुम्तीके कली चिठी

४ गो यूहन्नामी एसीया डा येसु ख्रीस्त कली थमा सुइक्ब ७ ओटा सहर डा थमा सुइक्ब आन गुम्तीके डा शेंब आन कली चिठी ब्रेक्ताक्ड। मिनु मुल बाक्ब, डोंइती बाक्शो, नोले यो जाक्बमी नु परमप्रभु यावे आ ठेयब नित्तीके आ डोंइती बाक्ब ७ ओटा ठाउं डा परमप्रभु यावे आ सोक्तीमी इन कली “शिशो तशा नु थुं नाइशशा बाक्चा तामेक्ल” देंताक्स। प्रस्थान ३:१४-१५; प्रकाश ३:१; प्रकाश ५:६ ५ मिनु येसु ख्रीस्तमी यो मो देंत। मिनु मेको सु बाक्ब देंशा हना, परमप्रभु यावे आ देशो थमा पाइब सांकछी नु नेल्ल क्येडा डोंइती बेक्शो रे सेंसीशो नु रागी डा पिप आन कली सासन पाइब बाक्ब। येसु ख्रीस्तमी इं कली दाक्शा, आ हुशेमी इं पाप रे प्रोंइतु। प्रकाश ३:१४; यूहन्ना १८:३७; १तिमोथी ६:१३ ६ इं कली परमप्रभु यावे, आ आफ आ राज्य डा मुर सेल्शा, परमप्रभु यावे आ डोंइती राप्ब सेल्लतु। मोपतीके आ छेडछेड नु सक्ति गेना हना यो बाक्ल, आमेन। प्रकाश ५:१०; प्रस्थान १९:६; १पत्रुस २:५,९ ७ मिनु येसु ख्रीस्त लेशशा, दोपा यीबा देंशा हना, सरीड रे गोस्सुमी गिल्लीशा यीब। मिनु मुर नेल्लेमी मेको कली यिन यिन पशो ताइनीम। मेको कली साइक्पाइक्बपुकीमी यो ताइनीम। मिनु थर थर डा मुरपुकीम मेको कली तशा, रोंका पा डाक्नीम। एको थमा लोव बाक्ब। आमेन। मत्ती २४:३०; जकरिया १२:१०; यूहन्ना १९:३७

८ परमप्रभु यावे मुल बाक्ब, डोंइती यो बाक्शो बाक्ब। मिनु नोले यो जाक्ब। नेल्ल सक्ति पाइशो परमप्रभु यावेमी “गो आल्फा नु ओमेगा नड” देंत। आल्फा नु ओमेगा माइशो ग्रीक लोवमी डोंइती नु नोले डा अच्छेर बाक्नीस। प्रकाश २१:६; यसैया ४१:४; प्रकाश ४:८

येसुमी यूहन्ना कली पपाइशो गेय

९ मिनु गो इन लोक्ब यूहन्ना, येसु ख्रीस्त कली थमा सुइक्ब नड। गो इन बुदी श्येत जशो परमप्रभु यावे आ राज्य डा मुर यो नड। मोपतीके श्येत जशा, इन खोदेशो पा येसु ख्रीस्त कली रिम्शा बाक्नुड। गो येसु आ सांकछी दुम्ती। मिनु परमप्रभु यावे आ लोव शेंताक्ड। मोपतीके मुरुमी आं कली पात्मोस माइशो टापुमी लाइशशा प्रोंइतीमी। १० मिनु गो परमप्रभु यावे आ नाक्त परमप्रभु यावे आ सोक्तीम बाक्ती। मिनु आं नोले तुराही ताप्शो खोदेशो ठेयब सेंदा नेंता। ११ मेको सेंदामी आं कली “मार मार ताइनेवे, मेको नेल्ल कागजम ब्रेक्तो। मिनु ब्रेक्शा डा मिन, एसीया डा ७ ओटा सहर डा येसु ख्रीस्त कली थमा सुइक्ब आन गुम्तीके डा मुर आन कली सोइक्तो। मेको ७ ओटा सहर चहिं एफिसस,

स्मिरना पेरगामोम, थिआटीरा, सारडीस, फिलाडेलफीया नु लाओडीसीया नम” देंत। 12 मिनु गो नु लोव पाइब कली कोवडु, दे बिर लेत्ती। लेशशा कोवडुनु, ७ ओटा सुन के दियारीम बत्ती ब्रशो ताता। 13 मेको ७ ओटा दियारी आन दातेमी मुर का बाक्शो खोदेशो ताता। मेको मुर दोदेशो तांडसाक्व देशा हना, खोइली सम्म लाइशो वा फेक्शो नु सुन के किप्तीके कुचुमी किप्शो बाक्त। प्रकाश २:१; दानीएल ७:१३ 14 मेको आ पिया नु आ चां बुश ऊन नु फुं खोदेशो बुश तांडसाक्व। आ मिक्च हुरुर पा ब्रशो मी खोदेशो तांडसाक्व। प्रकाश २:१८; प्रकाश १९:१२ 15 आ खोइली याप्पाइशशा टल्केशो कांसा खोदेशो तांडसाक्व। मिनु आ सेंदा ठेयब खोला आन रेयके खोदेशो नेंसाक्व। 16 मिनु मेको आ ग्युरा गुइमी ७ ओटा सोरुल शेशो बाक्त। मिनु निम्फा गे क्योरतीक पाइशो हेशो तरवार का आ शोव रे गूत। मिनु आ कुल नाक्त डा नां खोदेशो पा कोवने मचाप्चा डा तांडसाक्व।

17 मिनु गोमी मेको मोदेशो तडानु, बेक्शो मुर खोदेब पा मेको आ खोइलीम गोल्ती। मिनु मेकोमी चहिं आ ग्युरा गुइ आं तारी वोइशशा “महिनो, गो नेल्ल क्येडा डोंइती नु नेल्ल क्येडा नोले डा नड। दानीएल ८:१८ 18 ब्रोंइशा बाक्ब नड। गो बेक्शा यो, लेंशा मबेक्चा डा पा ब्रोंइती। मिनु नरक नु बेक्शा लशो मुर आन बाक्तीक डा रोक्तीक सांचो गो नु बाक्ब। 19 गे मार मार तवी, मेको ब्रेक्तो। गे मार ब्रेक्चा माल्नेवे देशा हना, मुल मार बाक्बा, नोले मार दुम्बा, मेको नेल्ल ब्रेक्तो।

20 मिनु आं ग्युरा गुइमी बाक्शो ७ ओटा सोरुल नु ७ ओटा खपीम बाक्शो सुन के दियारी आ खुइशो अर्थ मार बाक्ब देशा हना, मेको आं गुइमी तशो ७ ओटा सोरुलपुकी मेको एसीया डा ७ ओटा सहर डा थमा सुइक्ब आन ग्रुम्तीके डा शेंब नम। मेको ७ ओटा दियारी चहिं मेको एसीया डा ७ ओटा सहर डा थमा सुइक्ब आन ग्रुम्तीके डा मुर नम” दे माइक्ती।

2

एफिसस कली चिठी

1 मिनु येसु ख्रीस्तमी आं कली एफिसस सहर डा थमा सुइक्ब आन शेंब कली ब्रेक्पाइक्ती। एको आ ग्युरा गुइमी ७ ओटा सोरुल नु ७ ओटा सुन के दियारी आन दातेमी हिरब आ लोव बाक्ब। प्रेरित १८:१९ 2 मेकोमी “गो इन पशो गेय, इन फाल्शो श्येत नेल्ल तुइक्नुड। मिनु गे मरिम्शो मुर आन कली फाल्ने मचाप्नीनी। मिनु गे सोइशो, आं लोव शेंब दुम्बु पाइब मुर आन कली नाक्शा, जोल्फे बाक्नीम, दे तुइक्नीनी। १यूहन्ना ४:१ 3 गे फाल्शा, आं कली थमा सुइक्तीनी। मोपा थमा सुइक्चा मदथु, आं पबर्म श्येत फाल्नीनी, दे गो तुइक्नुड। १तिमोथी ५:१२ 4 तन्न गो इन कली लोव का पचा माल्नुड। मार लोव पचा माल्नुड देशा हना, डोंइती गे आं कली थमा पा दाक्ताक्नी। मुल चहिं डोंइती डा खोदेशो पा दाक्चा प्रोंइतीनी। 5 इन डोंइती डा आं कली दाक्शो मिम्तीने। इन थुं आं गे लेत्तीने। मिनु इन डोंइती डा पशो गेय पने। गे मेको दाक्चा डा गेय मपाइतीनी हना, गो इन बाक्तीके जाक्शा, इन दियारी आ बाक्तीके रे तिल्नुड। 6 तन्न इन गेय का रिम्शो बाक्ब। गेपुकी निकोलाइटन आन शेंतीके डा गेय ग्रांग्रा दीनीनी। गो यो ग्रांग्रा दीनुड। भजन संग्रह १३९:२१ 7 परमप्रभु यावे आ सोक्तीमी थमा सुइक्ब मुर आन कली शेंशो लोव सु सुमी नेंने चाप्नीमी, मेकोमी नेन्मेक्ल। सु सुमी सैतान कली ग्रानीमी, मेको आन कली परमप्रभु यावे आ रूमी बाक्ब ब्रोंइतीक रवा आ फल ब्वचा गेनुड” दे ब्रेक्पाइक्ती। प्रकाश २२:२; उत्पत्ती २:९

स्मिरना कली चिठी

8 मिनु येसु ख्रीस्तमी आं कली स्मिरना सहर डा थमा सुइक्ब आन शेंब कली ब्रेक्पाइक्ती। मेकोमी “गो नेल्ल क्येडा डोंइती नु नेल्ल क्येडा नोले नड। गो बेक्शा यो ब्रोंइती” देंत। प्रकाश १:११; प्रकाश १:१८ 9 मेकोमी “गो इन श्येत जशो तुइक्नुड। गे थमा पा प्रुडग बाक्नीनी, दे गो तुइक्नुड। तन्न गे इन थुंम शोप पाइशो बाक्नीनी, दे यो तुइक्नुड। मरिम्शो लोव पाइब सु सु नमी देशा हना ‘यहूदी नकी’ देंखु पाइबपुकी सैतानमी शेंशो मुर नम। याक्ब २:५; प्रकाश ३:९ 10 मिनु मुल इन कली श्येत दुम्चाप्तु। तन्न महिनीने। नेनीन, मुल दियाबलस सैतानमी गे का निक्शी इन कली थुं थाम्चा कली जेल्खानम चोक्पाइक्ब। गे १० नाक्त सम्म ला श्येत जाइनीनी। साइक्चाम्तेक्म हना यो, फाल्शा थमा सुइक्चा मप्रोनीन। मो पाइतीनी हना, गो इन कली गेना हना यो ब्रोंइशा बाक्तीक सिरपेच गेनुड। मती १०:१९, २८; प्रकाश ३:११; २तिमोथी ४:८ 11 परमप्रभु यावे आ सोक्तीमी थमा सुइक्ब मुर आन कली शेंशो लोव सु सुमी नेंने चाप्नीमी, मेकोमी नेन्मेक्ल। सु सुमी सैतान कली ग्रानीमी, मेको निक्शी खेयप बेक्चा ममाल्नीम। मिनु परमप्रभु यावेमी गेशो सजाइ यो मताइनीम” दे ब्रेक्पाइक्ती। प्रकाश २०:१४

पेरगामोम कली चिठी

12 मिनु येसु ख्रीस्तमी आं कली पेरगामोम सहर डा थमा सुइक्ब आन शेंब कली ब्रेक्पाइक्ती। आ शोव रे निम्फा गे क्योरतीक पाइश्शो हेश्शो तरवार पाइश्शोमी 13 “इन बाक्तीक सहरम सैतान आ नित्तीके बाक्ब, दे गो तुइक्नुड। गेपुकीमी ‘गो येसु ख्रीस्त आ मुर नकी’ दे आं कली थमा सुइक्चा मप्रोंइनी। मिनु इन सहरम सैतान आ नित्तीके बाक्मेनु, अन्टीपास माइश्शो आं कली मप्रोंइथु, थमा सुइक्ब नु आं लोव्र शेंब बाक्त। मिनु मुरुमी मेको कली सैतान आ बाक्तीकेमी बाक्शा, साइक्तेक्म हना यो, गे आं कली थमा सुइक्चा मप्रोंइनी। 14 तन्न गो इन कली लोव्र का पचा माल्नुड। मार लोव्र पचा माल्नुड देंशो हना, गे का निक्शीमी मरिम्शो गेय पाइतीनी। इन ग्रुम्तीके डा का निक्शीमी बालाम माइश्शो मुर आ शेंशो थमा सुइक्नीमी। बालाममी मार शेंताक्व देंशा हना, डोंइती बालाक माइश्शो पिप कली इस्त्राएल जात डा वोंइश मुर आन कली खतम सेल्लु। दोपा खतम सेल्लु देंशा हना, चढ़ेशो थोव्रक ब्वपाइक्तु। मिनु तेल्लेम पपाइक्तु। गन्ती ३१:१६; २पत्रुस २:१५; यहूदा :११ 15 मिनु गे इन ग्रुम्तीकेमी निकोलाइटन आन शेंशो लोव्र का निक्शीमी थमा सुइक्नीमी। 16 मोपतीके इन थुं गो आं गे लेत्तीन। मलेत्ताक्नी हना, गो इन ग्रुम्तीकेमी रीब पा जाक्नुड। मिनु आं शोव्र डा तरवारमी मेको नु लडाइ पाइनुड। 17 परमप्रभु यावे आ सोक्तीमी थमा सुइक्ब मुर आन कली शेंशो लोव्र सु सुमी नेंने चाप्नीमी, मेकोमी नेन्मेक्ल। मिनु सु सुमी सैतान कली ग्रानीमी, मेको आन कली खुइश्शा वोइश्शो मन्ना शोब्ले गेनुड। मिनु गोमी मेको ग्राब आन कली बुश हीरा का का गेनुड। मेको बुश हीरा तार हीरा ताइब आन नक नें ब्रेक्शो बाक्ब। मेको नें हीरा ताइबमी ला तुइक्नीम। अर्को मुरुमी चहिं मतुइक्नीम” दे ब्रेक्पाइक्ती। भजन संग्रह ७८:२४; यसैया ६२:२

थिआटीरा कली चिठी

18 मिनु परमप्रभु यावे आ तौमी आं कली थिआटीरा सहर डा थमा सुइक्ब आन शेंब कली ब्रेक्पाइक्ती। एको आ मिक्च हुरु पा ब्रशो मी खोदेंशो तांइसीशो नु आ खोइली याप्पाइश्शो टल्केशो कांसा खोदेंशो तांइसीशो आ लोव्र बाक्ब। प्रेरित १६:१४; प्रकाश १:१४-१५ 19 मेकोमी “गो इन पशो गेय तुइक्नुड। इन आं कली दाक्शो, इन थमा सुइश्शो, इन थमा सुइक्ब आन कली पशो गेय नु इन श्येत फाल्शो तुइक्नुड। गे डोंइती क्येडा शुश गेय पाइनीनी। 20 तन्न इन कली लोव्र का पचा माल्नुड। मार लोव्र पचा माल्नुड देंशा हना, गे इजेबेल माइश्शो मीश मुर कली इन ग्रुम्तीकेमी बाक्चा गेतीनी। इजेबेलमी ‘गो परमप्रभु यावेमी तुइक्पाइश्शो लोव्र पाइब नड’ देंखु पा, आं गेय पाइब आन कली मरिम्शो पचा शेंताक्मी। मार मरिम्शो पचा शेंताक्मी देंशा हना, तेल्लेम पचा नु मूर्ति कली चढ़ेशो थोव्रक जचा ब्वचा दुम्ब, दे शेंताक्मी। २राजा ९:२२ 21 गोमी मेको कली ‘इ थुं आं गे लेत्तो। इ तेल्लेम पचा ताइक्तो’ दे रिम्ताक्ड। मेकोमी आ थुं गो आं गे लेत्चा नु आ तेल्लेम पचा ताइक्ने मबीस। 22 मिनु गो मेको कली रोइ पपाइक्नुड। मिनु मेको नु तेल्लेम पाइब आन तेल्लेम पचा प्रोंइशा, गो आं गे लेत्ने मबिस्साक्म हना, मेको आन कली यो ठेयब श्येत गेनुडमी। 23 आ आल आन कली मुर साइक्ब रोइम साइक्नुडमी। मेको आन श्येत जशा, बेक्शो तशा ‘गोम पाप्तु’ दे थमा सुइक्ब नेल्लेमी तुइक्नीमी। मिनु थमा सुइक्ब आन ग्रुम्तीके डा मुर नेल्लेमी ‘येसु ख्रीस्तमी मुर आन थुं नु आन पशो तुइक्ब। मिनु नोले दोपा पामे, मोपा गेब’ दे तुइक्नीम। भजन संग्रह ७:१०; येरमीया १७:१० 24 तन्न थिआटीरा डा थमा सुइक्ब आन ग्रुम्तीकेमी इजेबेल आ शेंशो मपाइबपुकी यो बाक्नीम। मेकोपुकीमी इजेबेल आ शेंसीब बुदी सैतान आ ठेयब गेय यो मतुइक्नीम। मिनु आं कली रिम्शो पा थमा सुइक्ब आन कली अर्को श्येत मगेनुड। 25 गे इन तुइश्शो गो मजाक्डा सम्म पना पन बाक्कीन। प्रकाश ३:११ 26 सु सुमी सैतान कली ग्रानीमी, मेकोमी बेक्ची ना सम्म आं गेय पाइनीमी, गो मेको आन कली रागी रागी डा मुर आन कली सासन पतीके सक्ति गेनुड। 27 मिनु मेकोपुकीमी खप के ग्योब आन कली फलाम के कोक्केमी चोंइटा चोंइटा पशो बुद पा रागी डा मुर आन कली सासन पाइनीम। गो यो मोदेंशो सक्ति आं आफ रे तशो नड। भजन संग्रह २:८-९ 28 मिनु गोमी मेको सैतान कली ग्राब आन कली सुनी डा सुक्कुर सोरुल गेनुड। 29 परमप्रभु यावे आ सोक्तीमी थमा सुइक्ब मुर आन कली शेंशो लोव्र सु सुमी नेंने चाप्नीमी, मेकोमी नेन्मेक्ल” दे ब्रेक्पाइक्ती।

3

सारडीस कली चिठी

1 मिनु येसु ख्रीस्तमी आं कली सारडीस सहर डा थमा सुइक्ब आन शेंब कली ब्रेक्पाइक्ती। एको ७ ओटा ठाउं डा परमप्रभु यावे आ सोक्त नु ७ ओटा सोरुल नु बाक्ब आ लोव्र बाक्ब। मेकोमी “गो इन पशो गेय तुइक्नुड। गेपुकीमी

चहिं 'गो ख्रीस्त कली थमा सुइशशा, ब्रोंइशा बाक्नीकी' देंनीनी। तन्न इन थमा सुइक्तीके बेक्शो खोदेंब पा इप्शो बाक्ब। प्रकाश १:४ 2 मोपतीके सेंशा बोक्कीन। इन बेक्चा चिक्शो थमा सुइक्तीके बारपतीन। गोमी इन गेय ताता। मेको इन गेय आं परमप्रभु यावे कली मगारनीम। लूका २२:३२ 3 मिनु इन तशो नु इन नेंशो मिम्तीन। मेको कली मप्रेंथु, इन थुं गो आं गे लेत्तीन। गे मो मपाइतीनी हना, गो खुइ खोदेंशो पा इन बाक्तीकेमी जाक्नुड। मिनु गो गेना जाक्नुडा, गे मतुइक्नीनी। १थिस्सलोनिकी ५:२ 4 मिनु सारडीस सहर डा थमा सुइक्ब आन गुम्तीकेमी का निक्शी रिम्शो पा थमा सुइक्ब यो बाक्नीम। मेकोपुकीमी पाप मपाम, मोपा आन वा मलुम्सीशो बाक्ब। मारदे हना मेको आन नाक्त किंत डा गेय परमप्रभु यावे कली गारब। मोपतीके मेकोपुकी गो नु बुश वा फेक्शा, हिरचा शिरनीम। यहूदा :२३ 5 सु सुमी सैतान कली ग्रानीमी, मेको आन कली मोपा बुश वा फेक्चा गेनुड। मिनु मेको आन नें परमप्रभु यावे नु ब्रोंइचा ताइब आन नें ब्रेक्शो किताब रे मक्याम्नुड। गोमी आं आफ नु आ स्वर्ग डा गेय पाइब आन डोंइती 'मेको आं मुर नम' देंनुड। प्रकाश ७:१३; लूका १०:२०; मत्ती १०:३२ 6 परमप्रभु यावे आ सोक्तीमी थमा सुइक्ब आन कली शेंशो लोव सु सुम नेंने चाप्नीमी, मेकोमी नेन्मेक्ल" दे ब्रेक्पाइक्ती।

फिलाडेल्फीया कली चिठी

7 मिनु येसु ख्रीस्तमी आं कली फिलाडेल्फीया सहर डा थमा सुइक्ब आन शेंब कली ब्रेक्पाइक्ती। मेको परमप्रभु यावे आ तौ, थमा पा पाप रे प्रोंइब, दाऊद आ राज्य डा सांचो थीबमी लाप्चो रोक्गा डा मेरे सुइमी चोक्ने मचाप्नीम। मिनु चोक्गा डा मेरे सुइमी रोक्ने मचाप्नीमी। यसैया २२:२२ 8 मेकोमी "गो इन पशो गेय तुइक्नुड। गे इन सक्ति आइक्च बाक्त हना यो, आं देंशो टीतीनी। मिनु गेपुकीमी 'येसु ख्रीस्त कली मतुइक्नुड' दे गेनायो मदेनी। मोपतीके गो इन कली लाप्चो रोक्शा वोइक्ता। मेको सुइमी चोक्ने मचाप्नीम। 9 मिनु इन गुम्तीकेमी का निक्शीमी 'यहूदी नकी' दे जोल पाइनीम। मेकोपुकी चहिं सैतान आ शेंशो मुर बाक्नीम। नेनीन, गो मेको आन कली इन खोइलीमी बाप्शा सेउ पपाइक्नुड। गोमी इन कली दाक्नुड, दे मेको आन कली तुइक्पाइक्नुड। प्रकाश २:९; यसैया ४९:२३; यसैया ६०:१४ 10 मिनु गे शुश श्येत फाल्शा, आं देंशो लोव मप्रोंइनी। मोपतीके रागी नेल्ल डा मुर आन थुं थाम्चा कली जाक्शो श्येत रे प्रोंइनन्नी। प्रकाश १४:१२; मत्ती ६:१३ 11 मिनु गो फ्रा लेशशा यीनुड। थमा सुइक्चा मप्रोनीन। मोपा बाक्तीनी हना, सुइमी इन सिरपेच रोइक्ने मचाप्नीम। प्रकाश २:१० 12 सु सुमी सैतान कली ग्रानीमी, गोमी मेको आन कली आं परमप्रभु यावे आ खिं डा थाम खोदेंशो बोल्यो सेल्लुड। मिनु मेको गेना हना यो परमप्रभु यावे आ खिंमी बाक्नीम। मिनु मेको मुर आन तारी आं परमप्रभु यावे आ नें, आं परमप्रभु यावे आ सहर आ नें नु आं नक नें ब्रेक्नुड। आं परमप्रभु यावे आ सहर चहिं नक यरूसलेम माइशो बाक्ब। मेको नक यरूसलेम आं परमप्रभु यावे आ बाक्तीक स्वर्ग रे यीब। प्रकाश १४:१; प्रकाश २१:२ 13 परमप्रभु यावे आ सोक्तीमी थमा सुइक्ब आन कली शेंशो लोव सु सुमी नेंने चाप्नीमी, मेकोमी नेन्मेक्ल" दे ब्रेक्पाइक्ती।

लाओडीसीया कली चिठी

14 मिनु येसु ख्रीस्तमी आं कली लाओडीसीया सहर डा थमा सुइक्ब आन शेंब कली ब्रेक्पाइक्ती। एको आमैन माइशो, दीगो पाइब परमप्रभु यावे आ सांकछी नु रागी नु मारेइ मारेइ सेल्ब आ लोव बाक्ब। कलस्सी २:१; कलस्सी ४:१३; २कोरिन्थी १:२०; प्रकाश १:५; कलस्सी १:१५ 15 मेकोमी "गो इन पशो गेय तुइक्नुड। इन थमा सुइक्चा सिक्स यो ममाइ, होश यो ममाइ, कि सिक्स कि होश दुम्शो हना, रिम्शो दुम वा। 16 तन्न इन थमा सुइक्तीके गाम्चा चिक्शो बाक्ब। मोपतीके गो इन कली तेशा ताइक्नुड। 17 मिनु गेपुकीमी 'आंइ के शुश शोंप बाक्ब। गो शोंप पाइशो नकी। गो मारेइ ममाल्नीकी' देंनीनी। तन्न गो इन कली श्येत जाइब नु पुडग, मिक्च मताइब नु हेरा शिप्रा गाक्शा पुंइब खोदेंशो दुम्शो ताता। १कोरिन्थी ३:१८; १कोरिन्थी ४:८ 18 मोपतीके गो इन कली लोव का पाइनुड, मार लोव पाइनुड देंशा हना, गे शोंप पाइशो दुम्चा कली आं सुन ग्यापीन। मेको सुन याप्पाइशो बाक्ब। मेको ग्याप्तीनी हना, गे शोंप पाइशो दुम्नीनी। मिनु फेक्चा कली बुश वा ग्यापीन। मेको ग्याप्तीनी हना, मुने मदोक्नीनी। मिनु इन मिक्च, सापाइक्चा कली मिक्चीम खेक्तीके ग्यापीन। ग्याप्शा खेक्साक्नी हना, गे ताइनीनी। 19 गो आं दाक्शो मुर आन कली आन मरिम्शो पतीके कोइनुड। नोले गो मेको आन कली श्येत गेशा, आल खोदेंशो पा शेंनुड। इन थुं गो आं गे लेत्तीन। इन थमा सुइक्तीके बारपतीन। हितोपदेस ३:१२; १कोरिन्थी ११:३२; हिब्रू १२:६ 20 नेनीन, गो लाडगाम जाक्शा 'बाक्नी?' दे ब्रेक्नुड। सु सुमी आं सेंदा नेंशा 'ओवडीन' देंनीमी, गो मेको नु बाक्थ ओवनुड। मिनु मेको नु काथा बाक्शा, खमे जाइनुड। यूहन्ना १४:२३ 21 सु सुमी सैतान कली ग्रानीमी, मेको आन कली आं ठेयब नित्तीकेमी

निप्पाइक्नुड। गो डोंइती ग्राती। मोपा गो आं आफ आ ठेयब नित्तीकेमी आफ नु निस्साकयी। मत्ती १९:२८ 22 परमप्रभु यावे आ सोक्तीमी थमा सुइक्ब आन कली शेंशो लोत्र सु सुमी नेने चाप्नीमी, मेकोमी नेन्मेक्ल” दे ब्रेक्पाइक्ती।

4

परमप्रभु कली पशो कुम्सो

1 मिनु नोले सरीड गे कोव्रता। मिनु मेकेर लाप्चो का रोकशा वोइश्शो ताता। मिनु डोंइती आं नेंशो तुराही ताप्शो खोदेंशो ठेयब सेंदा लेंशा नेंता। मेको सेंदामी “एक कुवो। नोले मार दुम्बा, गो इ कली कोंइनन” दे माइक्ती। प्रकाश १:१० 2 मिनु गो परमप्रभु यावे आ सोक्तीमी ब्रीती। स्वर्गमी ठेयब नित्तीके वोइश्शो ताता। मेको ठेयब नित्तीकेमी का निश्शो ताता। भजन संग्रह ४७:९; यसैया ६:१; इजीकीएल १:२६-२८ 3 मेको ठेयब नित्तीके बुश नु लल टल्केशो हीरा खोदेंशो तांइसाक्व। मेको ठेयब नित्तीके आ एर ओंथ वाक्श दाप्शो ताता। मेको वाक्श गिग हीरा खोदेंशो तांइसाक्व। 4 मिनु ठेयब नित्तीके आ एर ओंथ २४ ओटा आइक्च नित्तीकपुकी बाक्तेक्म। मेको नित्तीकपुकीमी बुश वा फेक्शो नु आन पियामी सुन के सिरपेच गुप्शो २४ जना शेंब खाल्पा निश्शो बाक्तेक्म। प्रस्थान १९:१६; प्रकाश १:४ 5 मिनु मेको नित्तीक रे चिला दाप्शो तांइसाक्व। मिनु बुंबु पशो रेयके नु सेंदापुकी नेंसाक्व। मिनु ठेयब नित्तीक आ डोंइती ७ ओटा ब्रशो तोव्रशी बाक्तेक्म। मेको ७ ओटा तोव्रशी चहिं परमप्रभु यावे आ ७ ठाउंम बाक्शो सोक्त बाक्तेक्म। प्रस्थान १९:१६ 6 मिनु नित्तीक आ डोंइती समुन्द्र खोदेंशो दिंम का बाक्त। मेको दिंम सिसा खोदेंब टल्केशो तांइसाक्व। मिनु मेको ठेयब नित्तीके आ एर ओंथ आन रां नेल्ले शुश मिक्च पाइश्शो ४ ओटा सेस जन्तु बाक्तेक्म। इजीकीएल १:५, १०, २२ 7 मेको सेस जन्तुपुकी दोदेंब तांइसाक्म देंशा हना, डोंइती डा जन्तु गुप्स खोदेंशो तांइसाक्व, अर्को सेस जन्तु बोहोर खोदेंशो तांइसाक्व। नोले डा सेस जन्तु आ कुल मुर के खोदेंशो तांइसाक्व। मिनु नेल्ल क्येडा नोले डा सेस जन्तु बेरशो ककाकुली खोदेंशो तांइसाक्व। इजीकीएल १०:१४ 8 मिनु मेको सेस जन्तु ६, ६ ओटा फ्रां पाइश्शो बाक्तेक्मे। मेको आन फ्रां नेल्ल नु आन रां नेल्लेमी मिक्च पाइश्शो बाक्तेक्म। मिनु मेकोपुकी नाक्दो नाक्त परमप्रभु यावे कली कुम्सो पना पन बाक्बाक्तेक्म। मार कुम्सो पाइबाक्तेक्म देंशा हना, “परमप्रभु यावे, गे का ला परमप्रभु ननी। गे नेल्ल सक्ति पाइश्शो बाक्नीनी। गे डोंइती बाक्शो बाक्तीनी। मुल यो बाक्नीनी। मिनु नोले यो जाक्नीनी” दे कुम्सो पना पन बाक्बाक्तेक्म। यसैया ६:२-३; प्रस्थान ३:१४ 9 मोपा मेको ४ ओटा सेस जन्तुम गेना हना यो ब्रोंइशा बाक्ब ठेयब नित्तीकेमी निप्ब कली “गे छेडछेड, मान ताइब नु रिम्शो पाइब बाक्नीनी” देंमानु, 10 मेको २४ जना शेंब खाल्पामी मेको ठेयब नित्तीकेमी निप्ब आ डोंइती आन पोक्च थेक्शा सेउ पाम्तेक्म। मिनु गेना हना यो ब्रोंइशा बाक्ब कली मान पाम्तेक्म। मिनु मेकोपुकीमी आन सिरपेच पुइश्शा, मेको ठेयब नित्तीकेमी निप्ब आ डोंइती वोइश्शा 11 “गे प्रभु, आंइ परमप्रभु यावे ननी। गे सक्ति पाइश्शा, छेडछेडम बाक्शा, मान ताइब बाक्नीनी। मारदे हना गे मारेइ मारेइ सेल्लतीनी, मोपा इन दाक्शा सेल्लो मुल सम्म बाक्ब” दे कुम्सो पना पन बाक्तेक्म।

5

छाप थोक्शो कागज

1 मिनु गो मेको ठेयब नित्तीकेमी निप्ब आ ग्युरा गुइमी ओल्शो कागज का शेंशो ताता। मेको कागजम निम्फा गे ब्रेक्शो बाक्त। मिनु मेको कागज ७ ओटा छाप थोक्शा, प्राक्ने मचाप्चा डा सेल्लो बाक्त। प्रकाश ४:३; इजीकीएल २:१-१० 2 मिनु गो सक्ति पाइश्शो परमप्रभु यावे आ स्वर्ग डा गेय पाइब का ताता। मेकोमी ठेयब सेंदामी “सुमी मेको ७ ओटा छाप पुइश्शा, कागज प्राक्ने चाप्बा?” दे हिल्लो पाप्तु। 3 मिनु स्वर्गमी, रागीमी नु रागी आगाम बाक्बपुकीमी सुइमी मेको कागज प्राक्ने मचबेम, कोव्रने यो मचबेम। 4 मोपतीके गो शुश डाक्ती। मारदे हना सुइमी मेको कागज प्राक्ने मचबेम, कोव्रने यो मचबेम। 5 मिनु मेको शेंब खाल्पा कामी आं कली “मडाक्को। मेको गुप्स, यहूदा आ थर डा पिप दाऊद आ खिं डा बाक्ब। मेकोमी सैतान कली ग्रात। मोपा मेको कागज डा ७ ओटा छाप पुइश्शा प्राक्ने चाप्ब” देंत। उत्पत्ती ४९:९-१०; यसैया ११:१

पाठा कली नक कुम्सो पशो

6 मिनु गोमी ठेयब नित्तीके, ४ ओटा सेस जन्तु नु शेंब खाल्पा आन दातेमी क्योरशो पाठा खोदेंशो पा दोक राप्शो ताता। मेको पाठा के ७ ओटा ग्रोत्र नु ७ ओटा मिक्च बाक्त। मेको मिक्च चहिं परमप्रभु यावेमी रागी रागीमी सोइश्शो परमप्रभु यावे आ ७ ओटा सोक्त बाक्तेक्म। यसैया ५३:७; यूहन्ना १:२९ 7 मिनु मेको पाठामी मेको ठेयब नित्तीकेम

निष्ब आ ग्युरा गुइ रे मेको कागज ताक्तु। 8 मोपा ताक्गानु, सेस जन्तु नु शेंब खाल्पापुकी पाठा आ डोंइती पोक्च थेक्शा बाप्तेक्म। मेकोपुकीमी ठेयब ताप्तीके नु सुन के थनौरो कुरशो बाक्तेक्म। मिनु सुन के थनौरो चहिं धूपमी ब्रीशो बाक्तेक्म। मेको धूपमी ब्रीशो थनौरो चहिं थमा सुइक्ब मुर आन मान पशो नु पुंइशो लोत्र बाक्तेक्म। 9 मिनु मेकोपुकीमी पाठा कली नक कुम्सो का पाम्तेक्म। मार नक कुम्सो पाम्तेक्म देशा हना “मेको कागज ताक्ने नु प्राक्ने चाप्ब, गे का ला ननी। मारदे हना गे मुर आन कली परमप्रभु यावे आ नेक्था बाक्पाइक्चा कली ग्याप्तीनी। दोपा ग्याप्तीनी देशा हना, साइक्चा पुंइसीशा, इन हुश शाइशशा ग्याप्तीनी। मिनु गे मार मुर ग्याप्तीनी देशा हना, नेल्ल थर रे, नेल्ले लोत्र रे, नेल्ल जात रे नु नेल्ल रागी रे मुरपुकी ग्याप्तीनी। भजन संग्रह ३३:३ 10 मिनु गे मेको आन कली परमप्रभु यावे आ राज्य डा पिप नु आ डोंइती राप्ब सेल्टीनी। मिनु रागी नेल्ल कली सासन पाइब यो सेल्टीनी” दे कुम्सो पाम्तेक्म। प्रकाश १:६; प्रस्थान १९:६

पाठा कली मान पशो

11 मिनु मेको ठेयब नित्तीके गे कोत्रना कोत्रन बाक्डानु, सेस जन्तु नु शेंब खाल्पा आन एर ओंथ शुश परमप्रभु यावे आ स्वर्ग डा गेय पाइब आन सेंदा नेंता। मिनु मेकोपुकी गिश बाक्तेक्म देशा हना, हजार हजार, लाख लाख बाक्तेक्म। हिबू १२:२२ 12 मिनु मेकोपुकीमी “मेको साइक्चा पुंइसीशो पाठा का ला सक्ति पाइशो, शोप पाइशो, जोक्तीक तुइक्तीक, बोल, मान, छेडछेड नु रिम्शो पाइब बाक्नीनी देंचा शिरशो बाक्ब” दे ठेयब सेंदामी देंतेक्म। १इतिहास २९:११; फिलिप्पी २:९-१०

शुश मुरुम मान पशो

13 मिनु स्वर्गमी बाक्ब, रागी नु रागी आगाम बाक्ब, समुन्द्र तारी नु आगाम बाक्ब नेल्लेमी “गेना हना यो ठेयब नित्तीकेमी निष्ब नु पाठा कली गे रिम्शो पाइब बाक्नीनी, मान, छेडछेड ताइब नु सासन पाइब बाक्नीनी” देशो नेंता। 14 मिनु मेको ४ ओटा सेस जन्तुमी “आमेन” देंतेक्म। मिनु मेको खाल्पापुकीमी बाप्शा सेउ पाम्तेक्म।

6

पाठामी छाप प्राक्शो

1 मिनु मेको पाठामी मेको कागज रे ७ ओटा छाप रे का प्राक्शो ताता। मिनु सेस जन्तु कामी बुंबु पशो खोदेशो पा “पिवो” दे ब्रेशो नेंता। 2 मिनु गो बुश शारा का ताता। मेको शारा डोइक्बमी लिब्रा कुरशो बाक्त। मेको कली सिरपेच गेशो बाक्त। मिनु मेको ग्राना ग्रान गाक्त। जकरिया ६:१-८

3 मिनु पाठामी मेको लीशो ६ ओटा छाप रे का प्राक्गानु, अर्को सेस जन्तुमी “पिवो” दे ब्रेशो नेंता। 4 मिनु गो अर्को शारा का ताता। मेको शारा चहिं शुश लल बाक्त। मिनु शारा डोइक्ब कली रागी डा मुर आन दुशा बाक्तीके नेल्ल रोइक्चा कली नु मुर क्योरमुपाइक्चा कली ठेयब चुक्ब गेशो बाक्त।

5 मिनु पाठामी मेको लीशो ५ ओटा छाप रे का प्राक्गानु, अर्को सेस जन्तुमी “पिवो” दे ब्रेशो नेंता। मिनु गो क्येर शारा का ताता। मेको शारा डोइक्बमी तुला का ग्याइशो बाक्त। 6 मिनु गो मेको ४ ओटा सेस जन्तु आन दातेमी सेंदा कामी “काबु डा गेय कली माना निक्शी चेरब फस गाल्च माल्ताक्व। मिनु काबु डा गेय कली माना सां क्योव्रज फस गाल्च माल्ताक्व। तेल नु अडगुर शांबु कली चहिं मारेइ मपचा” देशो नेंता।

7 मिनु पाठामी ४ ओटा लीशो छाप रे का प्राक्गानु, नोले डा सेस जन्तुमी “पिवो” देशो नेंता। 8 मिनु गो हौ शारा का ताता। मिनु मेको शारा डोइक्ब आ नें चहिं साइक्पाइक्ब नु बेक्पाइक्ब बाक्त। मिनु रागी डा बेक्शो मुरपुकीमी मेको आ नोले खोइक्तेक्म। मिनु मेको कली रागी डा ४ भाग डा भाग का मुर आन कली साइक्पाइक्चा, दे अधिकार गेशो बाक्त। दोपा साइक्पाइक्चा गेशो बाक्त देशा हना, कोइ आन कली तरवारम साइक्पाइक्चा, कोइ आन कली अन्कालम बेक्पाइक्चा, कोइ आन कली मुर साइक्ब रोइ पा बेक्पाइक्चा नु कोइ आन कली जन्तुमी साइक्पाइक्चा, दे अधिकार गेशो बाक्त। इजीकीएल १४:२१

9 मिनु पाठामी मेको लीशो छाप सां रे का प्राक्गानु, गो चढ़ेतीके आगाम शुश मुर आन कली ताता। मेकोपुकी परमप्रभु यावे आ लोत्र टिचा कली नु अर्को आन कली येसु ख्रीस्त परमप्रभु यावे आ तौ बाक्ब, दे शेंचा आ पर्बम साइक्चा पुंइसीशो मुर बाक्तेक्म। 10 मिनु मेकोपुकीमी ठेयब सेंदामी “परमप्रभु, गे का ला परमप्रभु नु थमा पा नेल्ल आन कली सासन पाइब बाक्नीनी। गेना आंइ कली साइक्ब आन कली निसाफ पाइनीनी? गेना रागीम बाक्ब आन कली क्येक्क लेत्नीनी?” देंतेक्म। 11 मिनु परमप्रभु यावे आ स्वर्ग डा गेय पाइबमी मेको आन कली बुश वा का का

फेक्चा कली गेप्लु। मिनु मेकोमी मेको आन कली “इच्का रिम्दीन, अर्को इन खोदेशो पा येसु आ गेय पाइब नु अर्को थमा सुइक्ब लोकब इन बुदी साइक्चा पुंडसीमा सम्म रिम्दीन” देंत।

12 मिनु पाठामी मेको लीशो छाप निक्शी रे का प्राक्गानु, ठेयब खिनु कुत। मिनु नां कुंखी खोदेशो क्येर दुम्त। तास्ला चहिं हुश खोदेशो लल दुम्त। यसैया २४:२१-२३; योएल ३:३-४; मत्ती २४:२९ 13 मिनु ठेयब फशेमी फोवशी आ ममीशो गेडा तोक्शो खोदेब पा सरीड डा सोरुलपुकी रागीमी दोक्तेक्म। 14 मिनु सरीड ओल्शो कागज खोदेशो पा लाक्तु। डांडा, टापु नेल्ल याक्साक्म। यसैया ३४:४ 15 मेना रागी डा पिपपुकी नु ठेयब मुरपुकी, फौज डा कप्तानपुकी, शोप पाइशो नु बोल्यो मुरपुकी, वाइलीम वाइल नु मुर नेल्ल पहाड डा सेरथे फुल्लु नु पुक्खीमी खुंडसाक्म। यसैया २:१०,१९ 16 मिनु पहाड नु सेरथे फुल्लु कली “गो आंड कली सुम्की। मेको ठेयब नित्तीकेमी निप्ब नु पाठा आस गाइक्चा रे आंड कली खुइक्तीकी। लूका २३:३० 17 मारदे हना मेको आस गाइक्ची नाक्त जाक्त। सुइ मेको आस डोंइती राप्ने मचाप्नीम” दे ठेयब सेंदामी ग्रीतेक्म। आमोस ५:१८; रोमी २:५; मलाकी ३:२

7

इस्त्राएली छाप थोक्सीशो

1 मिनु नोले गो ४ जना परमप्रभु यावे आ स्वर्ग डा गेय पाइबपुकी रागी डा ४ कुनामी राप्शो तातामी। मेकोपुकी रवा आ सफा काइ यो महिम्पाइक्चा, रागी नु समुन्द्रमी फश मपपाइक्चा कली राप्शो बाक्तेक्म। दानीएल ७:२ 2 मिनु अर्को परमप्रभु यावे आ स्वर्ग डा गेय पाइब का नां दाप्तीके रे कुशो ताता। मिनु गेना हना यो ब्रोंडब परमप्रभु यावे आ छाप मेको नु बाक्शो बाक्त। मेकोमी रागी नु समुन्द्र बिग्रेचा कली अधिकार तशो ४ जना परमप्रभु यावे आ स्वर्ग डा गेय पाइब आन कली ठेयब सेंदामी 3 “गोपुकीमी आंड परमप्रभु यावे आ वाइलीम वाइल आन कुप्फीमी छाप मथोक्शो सम्म रागी, समुन्द्र नु रवा आन कली मबिग्रेने” देंत। प्रकाश ९:४; इजीकीएल ९:४,६ 4 मिनु गिश मुरपुकी छाप थोक्चा पुंडसीशो बाक्तेक्म देंशा हना, इस्त्राएली आन १२ थर डा लाख का ४४ हजार मुर छाप थोक्चा पुंडसीशो बाक्तेक्म। मिनु इस्त्राएली आन थर डा तेको तेको बाक्तेक्म देंशा हना, प्रकाश १४:१,३

5 यहूदा आ थर रे १२ हजार,

रूबेन आ थर रे १२ हजार,

गाद आ थर रे १२ हजार,

6 आशेर आ थर रे १२ हजार,
नाप्ताली आ थर रे १२ हजार,

मनस्से आ थर रे १२ हजार,

7 सिमियोन आ थर रे १२ हजार,

लेवी आ थर रे १२ हजार,

इस्साकार आ थर रे १२ हजार,

8 जबूलून आ थर रे १२ हजार,

योसेफ आ थर रे १२ हजार नु

बेन्यामीन आ थर रे १२ हजार मुरपुकी छाप थोक्चा पुंडसीशो बाक्तेक्म।

अर्को रागी डा मुर

9 मिनु नोले हिक्ने मचाप्चा डा पा रागी रागी नेल्ल डा, जात नेल्ल डा, थर नेल्ल डा मुर नेल्ल नु लोव नेल्ल डा मुर ठेयब नित्तीकेमी निप्ब नु पाठा आस डोंइती राप्शो तातामी। मेकोपुकीम बुश वा फेक्शो बाक्तेक्म। मिनु आन गुइमी खजूर रवा आ राशी शेशो तातामी। 10 मिनु मेकोपुकीमी परमप्रभु यावे नु पाठा आस कली “मेको ठेयब नित्तीकेमी निप्ब आंड परमप्रभु यावे नु पाठामी ला पाप रे प्रोंइने चाप्नीस” दे ठेयब सेंदामी ग्रीतेक्म। 11 मिनु परमप्रभु यावे आ स्वर्ग डा गेय पाइब नेल्ले, ठेयब नित्तीके, शेंब खाल्पा नु मेको ४ ओटा सेस जन्तु आन एर ओंथ बाक्तेक्म। मिनु मेको नेल्लेमी ठेयब नित्तीकेमी निश्शो परमप्रभु यावे आ डोंइती खुम्की पा बाप्शा, परमप्रभु यावे कली मान पाप्तेक्म। 12 मेकोपुकीमी “आमेन। नेल्ल आसीक गेचा नु छेडछेड, जोक्ब तुइक्ब थुं, रिम्शो पाइब, मान सक्ति नु सासन पतीके नेल्ल गेना हना यो आंड परमप्रभु यावे केन बाक्ल। आमेन” दे नेल्लेमी देंतेक्म।

13 मिनु मेको शेंब खाल्पा कामी आं कली “मेको बुश वा फेक्शो मुरपुकी सु नमी? ते रे जाक्मा?” दे हिल्लो पती।

14 मिनु गोमी “हजुर, गो मतुइक्नुड, गे तुइक्नीनी” देती। मिनु मेको खाल्पामी “मेकोपुकी ठेयब श्येत रे जाक्तेक्म। मिनु मेको आन मरिम्शो पतीके लुम्सीशो वा पाठा आ हुशेमी मुरतीके बुश दुम्त। मत्ती २४:२१; प्रकाश १२:११

15 मो दुम्तीके मेकोपुकी परमप्रभु यावे आ ठेयब नित्तीके आ डोंइती बाक्नीम। मिनु नाक्दो नाक्त परमप्रभु यावे आ खिंमी परमप्रभु यावे कली गेय पाइनीम। मिनु ठेयब नित्तीकेमी निम्बमी मेकोपुकी नु बाक्शा, मेको आन कली कोव्रब। 16 मुल मेकोपुकी लेंशा शोव्रलु मबेक्नीम। तूतू मदाक्नीम। नां नु अर्को रापमी मेको आन कली गेनायो मनाप्व। यसैया ४९:१०

17 मारदे हना मेको ठेयब नित्तीके आ दातेमी बाक्शो पाठामी मेको आन कली कोव्रशा, गोठला पाइब। मिनु मेकोमी मेको आन कली ब्रोंइचा गेब ब्वाक्कु बुक्तीके कोंइब। मोपा परमप्रभु यावेमी मेको आन प्रेक्कु फिक्ब” देत। भजन संग्रह २३:२; प्रकाश २१:४; यसैया २५:८

8

पाठामी नोले डा छाप प्राक्शो

1 मिनु पाठामी ७ ओटा छाप रे नेल्ल क्येडा नोले डा छाप प्राक्गानु, आधा घन्टा सम्म स्वर्गमी सिक्सी पा काइ रेयके मपाम। हबकुक् २:२० 2 मिनु नोले गो ७ जना परमप्रभु यावे आ स्वर्ग डा गेय पाइबपुकी परमप्रभु यावे आ डोंइती राप्शो तातामी। मिनु मेकोपुकीमी तुराही का का ताक्तेक्म। मत्ती २४:३१

3 मिनु अर्को परमप्रभु यावे आ गेय पाइब का जाक्शा, चढ़ेतीक आ नेक्था राप्त। मेकोमी सुन के थनौरो कुरशो ताता। मिनु मेकोमी शुश धूप ताक्तु। मार पचा कली ताक्तु देंशा हना, थमा सुइक्ब आन परमप्रभु यावे कली मान पशो नु पुंइशो लोव्र सुन के चढ़ेतीकेमी ब्वाइक्चा कली ताक्तु। 4 मिनु परमप्रभु यावे कली मान पा पुंइशो लोव्र नु मेको धूप आ कुन परमप्रभु यावे आ स्वर्ग डा गेय पाइब आ गुइ डा थनौरो रे परमप्रभु यावे आ डोंइती लत। 5 मिनु नोले मेको परमप्रभु यावे आ स्वर्ग डा गेय पाइबमी धूप चढ़ेतीके डा मी लाइशशा, मेको थनौरोमी कुर पाप्तु। मिनु रागीमी ताइक्ताक्व। मिनु रागीमी बुंबु पाप्तु, शुश रेयके पाप्तु। चिला पा खिनु कुत। इजीकीएल १०:२

डोंइती डा ४ ओटा तुराही

6 मिनु मेको ७ ओटा तुराही शेयब परमप्रभु यावे आ स्वर्ग डा गेय पाइबपुकीमी तुराही ताप्चा चिक्ताक्म। 7 मिनु डोंइती डा तुराही शेयब परमप्रभु यावे आ स्वर्ग डा गेय पाइबमी ताप्तु। मोपा तबानु, सरीड रे रागी तारी हुश ब्वांइसीशो मुप्स नु मी यित। मिनु रागी के भाग सां डा भाग का, रवा आन भाग सां डा भाग का नु घांस नेल्ल दुप्शा नेक्तु। प्रस्थान ९:२३-२६

8 मिनु लीशो ६ जना परमप्रभु यावे आ स्वर्ग डा गेय पाइब कामी तुराही ताप्तु। मोपा तबानु, ठेयब मी ब्रशो डांडा खोदेशो समुन्द्रमी ताइशो ताता। प्रस्थान ७:२०-२१ 9 मिनु समुन्द्र के भाग सां डा भाग का हुश दुम्त। मेकेर बाक्ब जन्तु नु डांइपुकी भाग सां डा भाग का बेक्तेक्म। मिनु जाजपुकी भाग सां डा भाग का खतम दुम्तेक्म।

10 मिनु लीशो ५ जना परमप्रभु यावे आ स्वर्ग डा गेय पाइब कामी तुराही ताप्तु। मिनु सरीड रे मी ब्रशो रांको खोदेशो ठेयब सोरुल खोला इनार नु ब्वाक्कु बुक्तीके डा भाग सां डा भाग का तार दोक्त। यसैया १४:१२ 11 मेको सोरुल आ नें कशो बाक्त। तेकेर मेको सोरुल दोक्मे, मेकेर डा ब्वाक्कु कशो दुम्त। मिनु शुश मुरपुकी मेको कशो दुम्शो ब्वाक्कु तूशा बेक्तेक्म।

12 मिनु लीशो ४ जना परमप्रभु यावे आ स्वर्ग डा गेय पाइब डा कामी तुराही ताप्तु। मिनु नां तास्ला नु सोरुल आन भाग सां डा भाग का खतम दुम्तेक्म। मोपा छेडछेड डा भाग सां डा भाग का छिडछिड दुम्त। नाक्त डा भाग सां डा भाग का यो छिडछिड दुम्त। मिनु नाक्दो डा भाग सां डा भाग का यो छिडछिड दुम्त। प्रकाश ६:१२; प्रस्थान १०:२१

13 मिनु नोले ककाकुली का सरीडमी बेरशो ताता। मेकोमी ठेयब सेंदामी “मुल परमप्रभु यावे आ स्वर्ग डा गेय पाइब सांमी तुराही ताप्चा लीतेक्म। मेको आन ताप्शो रेयकेमी रागी डा मुर आन कली थम हिंचा डा दुम्चाप्तु। आबी आबी, तुराही ग्रीशोमी रागी डा मुरपुकी शुश श्येत जाइनीम” दे ग्रीशो नेंता।

9

लीशो तुराही सां डा निक्शी

1 मिनु लीशो ३ जना परमप्रभु यावे आ स्वर्ग डा गेय पाइब कामी तुराही ताप्तु। मिनु गोमी सोरुल का सरीड रे दोक्शो ताता। मेको सोरुलमी ठेयब दुइश्शो, पुं मपाइश्शो ढोडोडगा डा लाप्चो रोक्तीके सांचो ताक्तु। 2 मिनु मेकोमी ठेयब दुइश्शो पुं मपाइश्शो ढोडोडगा डा लाप्चो रोक्गानु, कुन गूत। मेको कुन ठेयब मी आ कुन खोदेंब तांडसाक्व। मेको कुन गूमेनु, नां नु सरीड छिडछिड दुम्त। योएल २:२, १० 3 मिनु मेको कुन रे माले खोदेशो रागीमी गूतेक्म। मेको आन सक्ति रागी डा बिच्छी आन के खोदेशो बाक्त। 4 मिनु मेको आन कली “मेको रागी डा घांस नु रवा डा सफा मबिग्रेने, परमप्रभु यावे आ छाप कुप्फीमी मथोक्शो मुर आन कली ला श्येत गेने। प्रकाश ७:३ 5 मिनु मेको आन कली मसतीन, तन्न ५ महिना सम्म श्येत गेने” देशो नेंता। मेको श्येत चहिं बिच्छीमी मुर आन कली क्राइश्शो खोदेशो बाक्व। 6 मिनु मोदेशो दुम्मेनु, मुरपुकी बेक्चा दाक्नीम। तन्न बेक्ने मचाप्नीम। प्रकाश ६:३६

7 मिनु मेको माले आन रां दोदेशो तांडसाक्म देशा हना, लडाइ पचा कली ठीक पा वोइश्शो शारा खोदेशो तांडसाक्म। मेकोपुकी सुन के सिरपेच खोदेशो गुप्शो बाक्तेक्म। 8 मेको आन चां मीश मुर आन चां खोदेशो बाक्त। मेको आन खुइ गुप्स आन खुइ खोदेशो बाक्त। 9 मेको आन कुचु डा फेक्तीके फलाम के खोदेशो बाक्त। मिनु मेको आन बेरशो रेयके चहिं शुश शारामी बग्गी कीशा, लडाइ पथ लशो रेयके खोदेशो नेंसाक्व। 10 मेको आन मीलुमी बिच्छी के खोदेशो फूरो बाक्त। मेको आन श्येत गेतीके या बाक्त। मिनु मुर आन कली ५ महिना सम्म श्येत गेचा अधिकार तशो बाक्तेक्म। 11 मेको आन के पिप का बाक्त। मेको पिप सु बाक्त देशा हना, दुइश्शो, पुं मपाइश्शो ढोडोडगा डा गेय पाइब बाक्त। मेको पिप आ नें हिबू लोव्रमी अब्बादोन नु ग्रीक लोव्रमी अपोल्लीयोन देंनीम। मेको निम्फा आस अर्थ चहिं खतम पाइब बाक्व। 12 डोंइती डा हिंचा डा श्येत नुप्त। मिनु अर्को हिंचा डा श्येत निक्शी बाक्नीस।

13 मिनु लीशो निक्शी परमप्रभु यावे आ स्वर्ग डा गेय पाइब कामी तुराही ताप्तु। मिनु गो परमप्रभु यावे आ डोंइती वोइश्शो सुन के सेल्शो चढेतीके आ ४ सुर रे सेंदा गूशो नेंता। प्रकाश ८:३; प्रस्थान ३९:१-३ 14 मेको सेंदामी मेको तुराही ताप्ब परमप्रभु यावे आ स्वर्ग डा गेय पाइब कली “युफ्रेटीस माइश्शो ठेयब खोला आ नेक्थाम पाइश्शो ४ जना सैतान आ गेय पाइब आन कली प्रोंइमी” देशो नेंता। प्रकाश १६:१२ 15 मिनु मेको परमप्रभु यावे आ स्वर्ग डा गेय पाइबमी मेको आन कली प्रोंइतु। मेकोपुकी डोंइती मारदे पाइश्शा वोइश्शो बाक्तेक्म देशा हना, परमप्रभु आ देशो घन्टा, नाक्त, महिना नु बर्स नेल्ल रागी डा मुरपुकी भाग सां डा भाग का साइक्चा, दे ठीक पा वोइश्शो बाक्तेक्म। प्रकाश ८:-

16 मिनु गोमी “शारा डोइश्शो लडाइ पाइबपुकी २० करोड बाक्नीम” देशो नेंता। 17 मिनु मेको शारा नु शारा डोइक्बपुकी दोदेशो तातामी देशा हना, मेको शारा डोइक्ब आन कुचुमी पीतल के फेक्तीके फेक्शो तातामी। मेको फेक्तीके मी खोदेशो लल गिम गिम नु हौ ताता। मेको शारा आन पिया गुप्स आ पिया खोदेशो ताता। मिनु आन शोव्र रे मी, कुन नु गन्धक गूत। 18 मिनु मेको मी, कुन नु गन्धक रे मुरपुकी भाग सां डा भाग का बेक्तेक्मे। 19 मिनु मेको शारा आन मीलु चहिं बुस्स आ पिया खोदेशो तांडसाक्म। मोपतीके मेको शारा आन बोल शोव्र नु मीलुमी बाक्त। मिनु शोव्र नु मीलुमी मुर आन कली श्येत गेम्तेक्म।

20 मिनु मबेक्थु लीशो मुरपुकीमी मेको आन मरिम्शो पचा मप्रोनेम। मार मरिम्शो पाम्तेक्म देशा हना, वोल नु देवी देवता आन कली खुम्की पा सेउ पाम्तेक्म। मताइब, मनेंब, मगाक्ब सुन, चांदी, कांसा, फुल्लु नु शी के सेल्शो मूर्ति आन कली खुम्की पा सेउ पाम्तेक्म। प्रकाश १६:९ 21 मिनु मेकोपुकीमी मुर साइक्चा, टुना मुना पचा, चिन्ता बाक्चा, तेल्लेम पचा नु खुइ पचा मप्रोनेम। मिनु आन थुं यो परमप्रभु यावे गे मलेत्तेम।

10

यूहन्नाम इम्चीली किताब जशो

1 मिनु नोले गोमी सक्ति पाइश्शो परमप्रभु यावे आ स्वर्ग डा गेय पाइब का गोस्सुमी गिल्सीशा, रागीमी यिशो ताता। मेको आ पियामी वाक्श दाप्शो बाक्त। मिनु मेको आ कुल नां खोदेशो नु आ खोइली हुरुर पा ब्रशो मी के थाम खोदेशो तांडसाक्व। 2 आ गुइमी इम्चीली प्राक्शो किताब शेशो बाक्त। मेको आ ग्युरा खोइली समुन्द्र तार नु आ पेरा खोइली चहिं रागी तार थेक्शा राप्त। 3 मेकोमी गुप्स खोदेशो पा ठेयब सेंदामी ग्रीत। मोपा ग्रीमेनु, ७ ओटा बुंबुमी रेयके पाम्तेक्म। भजन संग्रह २९:३-९ 4 मेको ७ ओटा बुंबु आ लोव्र बेक्चाडानु, सरीड रे सेंदा कामी “मेको ७ ओटा बुंबु आन लोव्र मब्रेक्तो, मुर आन कली मशेंदो” देशो नेंता। दानीएल १२:४, ९

5 मिनु डोंइती तशो परमप्रभु यावे आ स्वर्ग डा गेय पाइब ठेयब समुन्द्र नु रागीम खोइली थेक्बमी कसम जचा कली आ ग्युरा गुड सरीड गे पोक्तु। 6 मिनु मेकोमी दोपा कसम जाप्टु देशा हना, गेना हना यो ब्रोंइशा बाक्ब, सरीड नु सरीडम बाक्ब नेल्ल सेल्ब, रागी नु रागीम बाक्ब नेल्ल सेल्ब, समुन्द्र नु समुन्द्रम बाक्ब नेल्ल सेल्ब, परमप्रभु यावे आ नैमी “मुल देश मपचा” दे कसम जाप्टु। दानीएल १२:७ 7 मिनु मेको आ कसम जशो लोत्र मार बाक्त देशा हना “नेल्ल क्येडा नोले डा परमप्रभु यावे आ स्वर्ग डा गेय पाइबमी तुराही तबानु, परमप्रभु यावेमी आ लोत्र पाइब आन कली ‘मुल रिम्ची ना नुप्त’ दे डोंइती रे मशेंशो परमप्रभु यावे आ खुइशो लोत्र मुल दुम्चाप्टु” दे कसम जाप्टु। प्रकाश ११:१५; प्रेरित ३:२१

8 मिनु मेको आं नेशो स्वर्ग डा सेंदामी आं कली लेंशा “लावो, मेको रागी नु समुन्द्र तार राप्शो परमप्रभु यावे आ स्वर्ग डा गेय पाइब आ गुडमी बाक्शो किताब ताक्को” देशो नेंता। 9 मिनु गो मेको परमप्रभु यावे आ स्वर्ग डा गेय पाइब आ नेक्था लती। मिनु गोमी मेको कली “मेको इम्चीली किताब गेयीनी” देंती। मेकोमी “ताक्को। मिनु जावो। इ शोत्रमी खुदो खोदेशो पा ब्रोत्रब। मिनु इ कोत्रजमी चहिं काइब” दे माइक्ती। इजीकीएल ३:१-३ 10 मिनु गो मेको इम्चीली किताब परमप्रभु यावे आ स्वर्ग डा गेय पाइब आ गुड रे ताक्शा डा मिन जाता। आं शोत्रमी खुदो खोदेशो जिज दुम्त। दाक्गुनु चहिं आं कोत्रज कत। 11 मिनु लोत्र पाइब कामी आं कली “गे लेंशा शुश मुरपुकी, शुश रागी, शुश लोत्र डा मुर नु शुश पिप आन डोंइती परमप्रभु यावे आ लोत्र नेंपाइक्चा माल्नेवे” देशो नेंता। येरमीया १:९-१०

11

यूहन्नाम पुक्तीक ताक्शो

1 मिनु परमप्रभु यावे आ स्वर्ग डा गेय पाइब कामी पुक्तीक का गेती। मेकोमी आं कली “लो, बोक्को। परमप्रभु यावे आ खिं नु चढेतीके पुक्को। परमप्रभु यावे आ खिं आगाम सेउ पाइब आन कली हिक्को। इजीकीएल ४०:३; जकरिया ३:५-६; इजीकीएल ४२:२० 2 मिनु परमप्रभु यावे आ खिं डा लाडगा रागी रागी डा मुर आन कली गेशो बाक्त। मेको मपुक्को। मेकोपुकीमी परमप्रभु यावे आ योत्रशो सहर ४२ महिना सम्म खोइलीमी दिप्शा ताइशशा बिग्रेनीम” देंत। लूका २१:२४

परमप्रभु आ सांकछी निक्शी

3 मिनु नोले गो परमप्रभु यावेमी आ सांकछी निक्शी आस कली मार लोत्र पशो नेंता देशा हना “गे आं लोत्र पाइब दुम्नीसी। गो इस कली आं लोत्र पचा कली सक्ति गेनुड। गे निक्शीमी अरन्डी फेक्शा, हजार का सहे निक्शी ६० नाक्त सम्म आं लोत्र पाइनीसी” दे परमप्रभु यावेमी आ सांकछी निक्शी आस कली लोत्र पशो नेंता। प्रकाश १२:६

4 मिनु मेको सांकछी तेल रवा निक्शी नु दियारी निक्शी खोदेशो दुम्शा, रागी डा प्रभु आ डोंइती बाक्नीस। जकरिया ४:३, ११-१४ 5 सु सुमी मेको निक्शी आस कली बिग्रेचा माल्नीमी, मेको साइक्चा पुंइसीनीम। दोपा साइक्चा पुंइसीनीम देशा हना, मेको आस शोत्र रे मी गूशा, मेको साइक्चा पुंइसीनीम। 6 मेको निक्शीमी परमप्रभु यावे आ लोत्र पाम्सेनु, रेउ मयिपाइक्ने चाप्नीस। मेकोमी ब्वाक्कु के हुश सेल्ने चाप्नीस। मिनु रागी कली मार श्येत गेचा दाक्तसे, मेकोन पने चाप्नीस। गिश खेयप मो पचा दाक्तसे, मिश खेयप यो पने चाप्नीस। १राजा १७:१; प्रस्थान ७:१९-२० 7 मिनु मेको निक्शीमी परमप्रभु यावे आ लोत्र थुम्से नोले, मेको पुं मपाइशो ढोडोडगा रे ठेयब जन्तु कुशा, मेको निक्शी नु राम्शी पा ग्रात। ग्राशा डा मिन मेको आस कली साइक्तु। प्रकाश १३:३; प्रकाश १३:७ 8 मेको आस बेक्शो रां चहिं ठेयब सहर डा लांमी लीताक्से। मेको ठेयब सहर आ खुइशो नें चहिं सोदोम नु इजीप्त माइशो बाक्त। मेको ठेयब सहरमी मुरपुकीमी मेको आस प्रभु कली शीम कांटी थोक्शा साइशो बाक्तेक्म। 9 मिनु थर नेल्ल डा, जात नेल्ल डा, आंम आंम लोत्र पाइब नु रागी रागी डा मुर नेल्लेमी मेको आस बेक्शो रां नाक्त सां नु आधा मेकेर बाक्त। मुरपुकीमी मेको आस कली तुरसुमी वोइक्चा मगेमे। 10 मारदे हना मेको परमप्रभु यावे आ लोत्र पाइब निक्शीमी रागीम बाक्ब आन कली शुश श्येत गेतीके, रागीम बाक्बपुकीमी मेको आस कली साइशो तशा, शुश ग्येरशा, मार मार गेमुम्तेक्म।

11 मिनु नाक्त सां नु आधा नोले परमप्रभु यावे आ ब्रोंइचा गेब सोक्त मेको आस बेक्शो रांमी ओत्रत। मिनु मेको निक्शी छुल छाल बोक्शा राप्ताक्स। मिनु रागी रागी डा मुरपुकीमी मेको आस कली तशा थाम्पा हिंतेक्म। 12 मिनु सरीड रे ठेयब सेंदामी मेको निक्शी आस कली “एक कुस” देशो नेंताक्स। मिनु गोस्सुमी गिल्सीशा, इर सरीड लाम्ताक्से। मेको आस जोरी सत्रुपुकीमी मेको आस कली सरीड गे लशो ताम्तेक्म। 13 मिनु मेको निक्शी लसानु, ठेयब खिनु कुत। मेको सहर डा १० भाग डा भाग का ब्रेतत। मिनु ७ हजार मुर मेको खिनुमी बेक्तेक्म। मेको लीशो

मुरपुकी चहिं क्युल क्युल पा हिंशा, स्वर्ग डा परमप्रभु यावे कली मान पाम्तेक्म। 14 हिंचा डा श्येत निक्शी नुप्शा, नोले डा हिंचा डा श्येत जाक्चाप्तु। प्रकाश ९:१२

नेल्ल क्येडा नोले डा तुराही

15 मिनु मेको नोले डा परमप्रभु यावे आ स्वर्ग डा गेय पाइबमी आ तुराही ताप्तु। मिनु स्वर्गमी ठेयब सेंदापुकी नेता। मेकोपुकीमी “आंइ परमप्रभु नु आ ख्रीस्तमी रागी नेल्ल कली सासन पाइब दुम्ताक्से। मिनु गेना हना यो सासन पना पन बाक्नीसी” देशो नेता। 16 मिनु परमप्रभु यावे आ डोंइती मेको २४ जना शेंब खाल्पा आन नित्तीकेमी निश्शा, परमप्रभु यावे आ डोंइती खुम्की पा बाप्शा मान पाम्तेक्म। प्रकाश ४:४,१० 17 मिनु मेकोपुकीमी “परमप्रभु यावे, गे नेल्ल सक्ति पाइश्शो परमप्रभु बाक्नीनी। गे मुल बाक्नीनी, डोंइती यो बाक्तीनी। इन ठेयब सक्तिमी सासन पचा गोइतीनी। 18 मिनु रागी रागी डा मुरपुकी गाइक्ताक्म। मिनु मेको आन पबर्म गाइक्ताक्नी। बेक्शो मुर आन कली निसाफ पची ना दुम्त। मिनु इन लोव्र पाइब, इन नोले खोइक्ब, इन नें कली मान पा हिंब, आइक्च नु ठेयब मुर नेल्ल आन कली इनाम गेची ना दुम्त। मिनु गे रागी कली बिग्रेब मुर आन कली बिग्रेथ जाक्तीनी” दे परमप्रभु यावे कली देंतेक्म। भजन संग्रह २:३ 19 मिनु परमप्रभु यावे आ स्वर्ग डा खिं रोक्साक्व। मिनु मेको कबल पशो सन्दोस परमप्रभु यावे आ खिंम तांइसाक्व। मिनु चिला पाप्तु। शुश रेयके नु बुंबु पशो नेंसाक्व। खिनु यो कुत। मिनु ठेयब मुप्स यित। प्रकाश १५:५

12

आल थिचा चिक्शो मीश मुर

1 मिनु गो सरीडमी ठेयब चिन्ड का ताता। मेको चिन्ड दोदेंब बाक्त देशा हना, मीश मुर का नां फेक्सीशा, तास्ला तारी राप्शो बाक्त। मेको आ पियामी १२ ओटा सोरुल के सिरपेच गुप्शो बाक्त। 2 मिनु मेकोमी कोव्रज कुरशो बाक्त। मोपतीके सुत्केरी रोइम श्येत जशा, आल थिचा कली ग्रीशो बाक्त।

3 मिनु गो सरीडमी अर्को चिन्ड का ताता। मेको चिन्ड दोदेंब बाक्त देशा हना, ठेयब लल बुस्स का बाक्त। मेको बुस्स के ७ ओटा पिया नु १० ओटा ग्रोव्र बाक्तेक्म। आ ७ ओटा पियामी ७ ओटा मुकुट गुप्शो बाक्त। 4 मेको आ मीलुमी सरीड डा सोरुल भाग सां डा भाग का कीशा, रागीमी तोक्तीमी। मिनु मेको ठेयब बुस्स मेको आल थिचशो मीश मुर आ डोंइती राप्शा, आ आल ब्वचा कली रिम्शा बाक्त। दानीएल ८:१० 5 मिनु मेको मीश मुरुमी वोंइश आल का थित। मेको वोंइश आल नोले रागी डा मुर आन कली फलाम के कोक्केमी सासन पाइब दुम्ब। मिनु परमप्रभु यावे आ स्वर्ग डा गेय पाइबपुकीमी मेको वोंइश आल कली परमप्रभु यावे आ ठेयब नित्तीकेम लाइश्शा वोइक्तेक्म। भजन संग्रह २:९ 6 मिनु मेको मीश मुर आल थिशा नोले गोरशो रागीमी प्रोक्त। मेकेर परमप्रभु यावेमी बाक्तीके ठीक पशो बाक्त। मिनु मेको कली हजार का सहे निक्शी ६० नाक्त थुल्लेक्म। प्रकाश ११:३

7 मिनु नोले स्वर्गमी परमप्रभु यावे आ ठेयब स्वर्ग डा गेय पाइब मिकाएल माइश्शो नु आ गेय पाइबपुकी गारशा, ठेयब बुस्स नु आ गेय पाइबपुकी नु लडाइ पथ लाम्तेक्म। 8 मिनु ठेयब बुस्स आ गेय पाइबपुकी लडाइ पा बुम्तेक्म। मिनु नोले मेको ठेयब बुस्स नु आ गेय पाइबपुकीमी स्वर्गमी बाक्तीक मथिदेम। उत्पत्ती ३:१

9 मिनु मेको ठेयब बुस्स आ नें मार बाक्त देशा हना, माइत बुस्स, दियाबलस, सैतान बाक्त। मिनु मेको रागी रागी नेल्ल डा मुर आन कली पाप पपाइक्चा कली रागीमी तोक्चा पुंइसीशो बाक्त। मिनु मेको आ गेय पाइबपुकी यो रागीमी तोक्चा पुंइसीशो बाक्तेक्म। प्रकाश २०:२; उत्पत्ती ३:१; लूका १०:१८ 10 मिनु गो सरीडमी ठेयब सेंदा का नेता। मिनु मेको सेंदामी “मुल थमा सुइक्ब आन कली आन पाप रे ब्रोंइतीके जाक्ने थुम्तु। आंइ परमप्रभु यावे आ सक्ति तांइसाक्व नु आ ख्रीस्त आ अधिकार जाक्त। मारदे हना थमा सुइक्ब आन कली दोस गेब रागीमी तोक्चा पुंइसाक्व। मेकोमी नाक्दो नाक्त इं परमप्रभु यावे आ डोंइती आंइ लोक्ब आन कली दोस गेशो बाक्त। प्रकाश ११:१५

11 मिनु थमा सुइक्बपुकीमी सैतान कली ग्राशो बाक्तेक्म। दोपा सैतान कली ग्राशो बाक्तेक्म देशा हना, पाठा आ हुश चढ़ेशोमी नु आन सांकछी आन पतीके सैतान कली ग्राशो बाक्तेक्म। मेकोपुकीमी आंम कली ममिम्थु, येसु ख्रीस्त आ पबर्म साइक्चा पुंइसीचा यो महिंम। प्रकाश ७:१४; प्रकाश ६:९ 12 मोपतीके स्वर्ग नु स्वर्गमी बाक्ब नेल्ल ग्येरसीन। तन्न रागी नु समुन्द्रम श्येत दुम्चाप्तु। मारदे हना सैतान थाम्पा गाइश्शा, रागी नु समुन्द्रम यित। मारदे गाइक्ताक्व देशा हना, मुल आ गेय पचा शुश नाक्त मली, दे तुइक्ताक्व” देशो नेता। 13 मिनु मेको ठेयब बुस्सुम आंम कली रागीमी तोक्शो तशा, मेको वोंइश आल थीब मीश मुर कली “साइक्नुड” दे खेदा पाप्तु। 14 मिनु मेको मीश मुरुमी ठेयब

ककाकुली आ फ्रां निक्शी ताक्तु। मारदे ताक्तु देशा हना, मेको ठेयब बुस्स रे ब्रोंडशा, गोरशो रागीमी बेरशा, प्रोकचा कली ताक्तु। मेको गोरशो रागीमी परमप्रभु यावेमी आ दाक्ची ना सम्म मेकेर थुल्शो बाक्त। 15 मिनु मेको ठेयब बुस्सुमी “मेको मीश मुर कली योल्दल” दे आ शोव रे खोला खोदेशो पा शुश ब्वाक्कु गुंडताक्व। 16 रागीमी चहिं मेको मीश मुर कली वारच पाप्तु। दोपा वारच पाप्तु देशा हना, रागी आ शोव पाक्शा, मेको ठेयब बुस्स आ शोव रे गूशो खोला कली दाक्तु। 17 मिनु मेको ठेयब बुस्सुमी मीश मुर प्रोकशो तशा, गाइशशा, मेको मीश मुर आ चच युइ नु राम्शी पथ लत। आ चच युइ चहिं सु नम देशा हना, परमप्रभु यावे आ शेंशो लोव टीब नु येसु कली थमा सुइशशा, आ लोव पाइब नम। 18 मिनु मेको ठेयब बुस्स समुन्द्र आ नेक्था राप्शा, रिम्शा बाक्त।

13

समुन्द्र रे गूशो जन्तु

1 मिनु गो समुन्द्र रे ७ ओटा पिया नु १० ओटा ग्रोव पाइशशो जन्तु का गूशो ताता। मेको आ १० ओटा ग्रोवमी १० ओटा मुकुट गुप्शो बाक्तेक्म। आ पियापुकीमी चहिं परमप्रभु कली शुक्शी पाइब नें ब्रेक्शो बाक्तेक्म। दानीएल ७:३-७
2 मिनु आं तशो जन्तु जोइ खोदेशो बाक्त। आ खोइल चहिं वां के खोदेशो बाक्त। आ शोव गुप्स आ शोव खोदेशो बाक्त। मिनु मेको ठेयब बुस्सुमी आ सक्ति आ नित्तीके नु आ ठेयब अधिकार मेको जन्तु कली गेप्तु।

3 मिनु मेको जन्तु आ ७ ओटा पिया डा का साइक्चा डा पा क्योरशो खोदेशो ताता। तन्न आ ठेयब गार साशो बाक्त। मिनु रागी रागी डा मुर नेल्ल मेको जन्तु तशा, छक लाक्शा, आ नोले खोइक्तेक्म। 4 ठेयब बुस्सुमी मेको जन्तु कली आ अधिकार गेतीके मुर नेल्लेमी ठेयब बुस्स कली खुम्की पा सेउ पाम्तेक्म। मिनु मेको जन्तु कली यो खुम्की पा “एको जन्तु खोदेशो ठेयब सु बाक्मे? सु एको नु जिशा ग्राने चाप्बा?” दे सेउ पाम्तेक्म।

5 मिनु मेको जन्तु कली ठेयब लेशशा, ब्वाक्चा नु परमप्रभु आ पबर्म मरिम्शो लोव पचा कली शोव गेशो बाक्त। मेको कली ४२ महिना सम्म सासन पचा कली अधिकार गेशो बाक्त। प्रकाश ११:२ 6 मेकोमी परमप्रभु यावे कली मरिम्शो लोव पाप्तु। मिनु मेकोमी आ नें आ पबर्म, आ बाक्तीके आ पबर्म नु आ बाक्तीकेमी बाक्ब आन पबर्म यो मरिम्शो लोव पाप्तु। 7 मेकोमी परमप्रभु यावे आ योव्रशो मुरपुकी नु लडाइ पशा, ग्राचा कली अधिकार तशो बाक्त। मिनु मेको कली जात नेल्ल, मुर नेल्ल, आंम आंम लोव पाइब नु रागी रागी डा मुर नेल्ल आन कली सासन पतीके अधिकार यो गेशो बाक्त। प्रकाश ११:७; दानीएल ७:२१ 8 मिनु सु सु आन नें क्योरशो पाठा आ ब्रोंडतीक किताबमी मब्रेक्शो बाक्मे, मेकोपुकीमी मेको जन्तु कली खुम्की पा सेउ पाइनीम। मेको किताब रागी सेल्चा क्येडा डोंडती रे बाक्त। 9 सु सुमी परमप्रभु यावे आ लोव नेंशा, रुम्ने चाप्नीमी, मेकोमी नेन्मेक्ल। 10 सु जेल्खानमी लचा योव्रसीशो बाक्मे, मेको जेल्खानमी लचा माल्ब। तन्न सुमी तरवारमी साइक्बा, मेको तरवारमी साइक्चा पुंडसीब। मिनु परमप्रभु यावे आ योव्रशो मुरपुकीमी श्येत फाल्शो “परमप्रभु यावेमी तुइक्ब” दे थमा सुइशशा बाक्चा माल्नीम। उत्पत्ती ९:६; मत्ती २६:५२; प्रकाश १४:१२

खप रे गूशो जन्तु

11 मिनु गो खप रे अर्को जन्तु का गूशो ताता। मेको के पाठा के खोदेशो ग्रोव निक्शी बाक्त। मिनु मेकोमी ठेयब बुस्स खोदेशो पा लोव पाइबाक्त। 12 डोंडती डा जन्तु नु बाक्शा, मेको डोंडती डा जन्तु आ अधिकार यो पाइक्बाक्त। मिनु मेकोमी रागी डा मुर नेल्ल आन कली डोंडती डा जन्तु कली सेउ पपाइक्बाक्त। मेको डोंडती डा जन्तु चहिं तेको बाक्त देशा हना, आ बेक्चा डा गार साशो जन्तु बाक्त। 13 मिनु मेको नोले डा जन्तुमी ठेयब छक लाक्चा डा गेय पाप्तु। मार छक लाक्चा डा गेय पाप्तु देशा हना, मेकोमी मुर आन डोंडती सरीड रे मी यिपाइक्तु। मत्ती २४:२४; २थिस्सलोनिकी २:९ 14 मेकोमी डोंडती डा जन्तु नु बाक्शा, आ पशो छक लाक्चा डा गेयमी मुर आन कली “परमप्रभु आ सक्ति पाइशशो नड” दे जोल पा छक लाक्चा डा गेय पशा, मुर आन कली पाप पपाइक्तु। मार पाप पपाइक्तु देशा हना, मेकोमी रागी डा मुर आन कली “गार पाइशशो जन्तु आ मूर्ति सेल्चा” दे शेंताक्मी। 15 मिनु मेकोमी जन्तु आ मूर्ति कली ब्रोंडचा सोक्त गेचा अधिकार यो तशो बाक्त। मिनु मेकोमी सोक्त गेवानु, मेको ब्रोंडतीक सोक्त पाइशशो मूर्ति लोव पचा गोप्तु। मिनु मेको जन्तुमी मूर्ति आ डोंडती खुम्की पा सेउ मपाइब मुर आन कली साइक्पाइक्तु। 16 मिनु मेको जन्तुम मार अर्को गेय पाप्तु देशा हना, मेकोमी ठेयब नु आइक्च, शोप पाइशशो नु पुडग, वाइलीम वाइल नु मुर नेल्ल आन कली कि ग्युरा गुइमी कि कुप्फीमी चिन्ड वोइक्पाइक्तु। प्रकाश १९:२० 17 मिनु सु सु चिन्ड मपाइशशो

बाक्मा, मेकोपुकीमी मारेइ ग्याप्ने नु लेयने मचबेम। मिनु मेको चिन्ड कि जन्तु आ नें कि आ हिक्तीक चिन्ड बाक्त। 18 मेको जन्तु आ नें आ हिक्तीक चिन्ड आ अर्थ मार बाक्मे, दे तुइक्चा कली जोक्ब तुइक्ब थुं माल्ब। जोक्ब मुरुमी जन्तु आ हिक्तीक चिन्ड तुइक्ब, मारदे हना मेको मुर आ हिक्तीक नु गारब। मेको हिक्तीक चिन्ड ६ सहे ६६ बाक्ब। प्रकाश १५:२

14

लाख का ४४ हजार मुर

1 मिनु नोले गो मेको पाठा सियोन डांडामी राप्शो ताता। मिनु लाख का ४४ हजार मुर पाठा नु बाक्तेक्म। मेको आन कुप्फीमी येसु नु आ आफ आ नें ब्रेक्सीशो बाक्त। प्रकाश ७:४; प्रकाश ३:१२ 2 मिनु गो स्वर्ग रे सेंदा का नेता। मेको सेंदा दोदेंशो बाक्त देंशा हना, शुश ब्वाक्कु आ रेयके नु ठेयब बुंबु पशो रेयके खोदेंशो नेता। तन्न शुश मुरपुकीमी ठेयब तार पाइशो ताप्तीके ताप्शो रेयके बाक्त। प्रकाश १:१५

3 मिनु मेको ठेयब ताप्तीके ताप्बपुकीमी ठेयब नित्तीक आ डोंइती, मेको ४ ओटा सेस जन्तु नु शेंब खाल्पा आन डोंइती नक कुम्सो का पाम्तेक्म। मेको कुम्सो सुइमी शेंसीने मचबेम। तन्न मेको लाख का ४४ हजार मुरुम ला मेको कुम्सो शेंसीने चाप्तेक्म। 4 मिनु मेको मुरपुकी रागी डा पाप रे डोन बाक्शो बाक्तेक्म। मिनु मेकोपुकी पाठा तेक तेक लमे, मेक मेक लाइबाक्तेक्म। मेकोपुकी रागी डा मुर आन दाते रे गुंइशा, परमप्रभु यावे नु पाठा आस डोंइती डा योव्रसीशो मुर बाक्तेक्म। १कोरिन्थी ७:१,८ 5 मिनु मेकोपुकीमी काइ जोल मपशो बाक्तेक्म। मारदे हना पाप मपाइबपुकी बाक्तेक्म।

स्वर्ग डा गेय पाइब सां आन लोव्र

6 मिनु स्वर्ग आ दातेमी गो परमप्रभु यावे आ स्वर्ग डा गेय पाइब का बेरशो ताता। मेको रागीमी लीशो मुर आन कली गेना हना यो पाप रे प्रोंइब जाक्त, दे ग्येरपाइक्ब लोव्र शेंथ यित। मेको नेल्ल रागी डा, नेल्ल जात डा, नेल्ल लोव्र पाइब नु शुश मुर आन कली शेंथ यित। 7 मिनु मेकोमी ठेयब सेंदामी “परमप्रभु यावेमी सरीड, रागी, समुन्द्र नु ब्वाक्कु बुक्तीके नेल्ल सेल्लतु। मोपतीके इन पोक्च थेक्शा, परमप्रभु यावे कली मान पा हिनीन। मेको कली ठेयब सेलीन। मिनु ‘गे नेल्ल सेल्लब ननी’ देंशा मान पने। मारदे हना मेको आ निसाफ पची ना दुम्त” देंत।

8 मिनु परमप्रभु यावे आ स्वर्ग डा गेय पाइब अर्को कामी मेको डोंइती डा आ नोले खोइशशा, मेकोमी “बेबीलोन माइशो ठेयब सहर खतम दुम्त। मारदे हना मेकोमी डोंइती नेल्ल रागी डा मुर आन कली पाप पपाइक्तु। रागी डा मुरपुकी बेबीलोन आ पबंम परमप्रभु यावे आ गाइशो ताम्तेक्म” देंत। प्रकाश १८:५; यसैया २१:९; येरमीया २५:१५-१६; येरमीया ५१:७

9 मिनु सां आन दाते डा परमप्रभु यावे आ स्वर्ग डा गेय पाइबमी अर्को निक्शी आस नोले खोइशशा, ठेयब सेंदामी “सु सुमी मेको जन्तु नु आ मूर्ति कली सेउ पाइनीमी, मेको आन कुप्फीमी कि ग्युरा गुइमी चिन्ड वोइक्पाइक्नीमी, प्रकाश १३:१२-१७ 10 मेको आन कली तशा, परमप्रभु यावे शुश गाइक्ब। मिनु मेको मुरपुकीमी आ गाइशो तचा माल्नीम। दोपा परमप्रभु आ गाइशो तचा माल्नीम देंशा हना, पाप रे डोन बाक्ब परमप्रभु यावे आ स्वर्ग डा गेय पाइब नु पाठा आस डोंइती मेको मुरपुकी हुरुर पा ब्रशो मी नु गन्धकम श्येत जचा माल्नीम। भजन संग्रह ७५:७ 11 मेको मी आ कुन गेनायो मकाप्ब। मेको जन्तु नु जन्तु आ मूर्ति कली सेउ पाइबपुकी नु जन्तु आ नें आ चिन्ड वोइक्पाइक्बपुकी नाक्दो नाक्ती श्येत जना जन बाक्नीम” देंत।

12 मेना रागीमी परमप्रभु यावे आ योव्रशो थमा सुइक्बपुकीमी श्येत फाल्चा माल्नीम। मारदे हना मेकोपुकीमी परमप्रभु यावे आ अरेशो लोव्र पाइनीम। मिनु येसु कली थमा सुइक्नीम। प्रकाश १३:१० 13 मिनु गो स्वर्ग रे सेंदा का नेता। मेकोमी “मुल रे सु सु प्रभु कली थमा सुइशशा बेक्नीमी, मेकोपुकी ग्येरसमल। मेको लोव्र ब्रेक्तो” देंत। मिनु परमप्रभु यावे आ सोक्तीमी “थमा, मेको मुरपुकी ग्येरसीशो बाक्नीम। मारदे हना मेकोपुकीमी रागीमी परमप्रभु यावे आ गेय पशा नाइक्नीम। मिनु परमप्रभु यावेमी आन गेय तुइशशा, आन तचा डा गेब” देंत। फिलिप्पी १:२३; यसैया ५७:२; हिब्रू ४:३०; १तिमोथी ५:२४-२५

थमा मसुइक्ब आन कली निसाफ

14 मिनु नोले गो बुश गोस्स का ताता। मिनु मेको गोस्स तारी मुर का निशो खोदेंशो ताता। मेको आ पियामी सुन के सिरपेच गुप्शा डा मिन आ गुइमी हेशो गुये का ग्याइशो ताता। दानीएल ७:१३; मर्कूस १३:२६ 15 मिनु गो अर्को

परमप्रभु यावे आ स्वर्ग डा गेय पाइब कली परमप्रभु यावे आ खिं रे गूशो ताता। मिनु मेकोमी गोस्स तार बाक्ब कली ठेयब सेंदामी “रागी डा बाली मीशो बाक्त। मुल रिक्ची ना दुम्त। मिनु मुल रिक्चा गोवो” देंत। योएल ४:१३; मत्ती १३:३९ 16 मिनु गोस्सुमी निप्बमी गुये शेशा, रागी कली मीशो बाली खोदेंशो पा रिक्तु।

17 मिनु गो अर्को परमप्रभु यावे आ स्वर्ग डा गेय पाइब कली परमप्रभु यावे आ खिं रे गूशो ताता। मेको नु यो हेश्शो गुये का बाक्त। 18 मिनु नोले अर्को परमप्रभु यावे आ स्वर्ग डा गेय पाइब का धूप चढेतीके रे गूशो ताता। मेकोमी मी कली अधिकार पाइबाक्त। मेकोमी ठेयब सेंदामी हेश्शो गुये शेषब कली “रागी अडगुर रू खोदेंशो पा मीशो बाक्त। मोपतीके गुयेमी फल सेक्चा गोवो” देंशो नेंता। 19 मिनु परमप्रभु यावे आ स्वर्ग डा गेय पाइबमी आ गुयेमी रागी कली फल सेक्शो खोदेंशो पा सेक्तु। सेक्शा खुप्शा, परमप्रभु यावे आ ठेयब फल कोलमी वोइक्तु। मेको कोल चहिं मार बाक्त देंशा हना, परमप्रभु यावे आ गाइक्चा बाक्त। 20 मिनु खाक्तीके सहर रे डोन बाक्त। खाक्मेनु, मेको कोल रे रस खोदेंशो पा हुश शांडसाक्व। मिनु मेको हुश १६ हजार स्तादीयोन डोन दोक राप्शो शारा आ शोत्र सम्म लत। स्तादीयोन का १८५ मिटर बाक्ब। यसैया ६३:३

15

लाख का ४४ हजार मुर

1 मिनु गो स्वर्गमी अर्को ठेयब नु छक लाक्चा डा चिन्ड ताता। मेको चिन्ड दोदेंशो बाक्त देंशा हना, ७ जना परमप्रभु यावे आ स्वर्ग डा गेय पाइबपुकीमी ७ ओटा श्येत गेचशो बाक्तेक्म। मिनु मेको श्येतपुकी नोले डा बाक्तेक्म। मारदे हना मेको आन नोले परमप्रभु आ गाइक्चा नुप्ब। प्रकाश १६:१

2 मिनु गो सिसा नु मी ब्वाइश्शो दोम्ली खोदेंशो दिंम का ताता। मेको दिंममी मुरपुकीम परमप्रभु यावे आ गेशो ठेयब ताप्तीके शेशा, राप्शो तातामी। मेको मुरपुकी चहिं सु बाक्तेक्म देंशा हना, मेकोपुकीमी मेको जन्तु कली ग्राशो बाक्तेक्मे। दोपा ग्रातेक्म देंशा हना, जन्तु नु जन्तु आ मूर्ति कली सेउ मपामे नु आ नें आ हिक्तीके चिन्ड यो मवोइक्पाइक्सीशो बाक्तेक्मे। प्रकाश ४:६ 3 मिनु परमप्रभु यावे आ वाइल मोसा नु पाठा आ कुम्सो पाम्तेक्म। मिनु मेको कुम्सोम मार लोत्र बाक्त देंशा हना “परमप्रभु यावे, गे नेल्ल सक्ति पाइश्शो परमप्रभु बाक्नीनी। इन गेय ठेयब नु छक लाक्चा बाक्नीमी। गे इन लां नेल्ल ठीक नु थमा बाक्नीमी। गे गेना हना यो पिप बाक्नीनी। प्रस्थान १५:१,११; येरमीया १०:६-७; ब्यवस्था ३२:४; भजन संग्रह १४५:१७ 4 नेल्लेमी इन कली मान पा हिंशा इन नें ठेयब सेल्लनीमी। मारदे हना गे ला परमप्रभु बाक्नीनी। रागी रागी डा मुर नेल्ले इन डोंइती जाक्शा, पोक्च थेक्शा, खुम्की पा बाप्नीमी। मारदे हना इन निसाफ पतीके नेल्लेमी ताम्तेक्म” देंशो कुम्सो आ लोत्र बाक्त। भजन संग्रह ८६:९; येरमीया १६:१९-२१

गाइश्शो डा ७ ओटा डप्का

5 मिनु नोले गो स्वर्गमी परमप्रभु यावे आ खिं रोक्शो ताता। प्रकाश ११:१९ 6 मेकेर रे मेको ७ जना श्येत गेब परमप्रभु यावे आ स्वर्ग डा गेय पाइबपुकी गूतेक्म। मेकोपुकी रिम्शो टल्केशो बुश वा फेक्शा, सुन के पेटी किप्शो बाक्तेक्म। 7 मिनु मेको ४ ओटा सेस जन्तु डा कामी मेको ७ जना परमप्रभु यावे आ स्वर्ग डा गेय पाइब आन कली ७ ओटा सुन के डप्का गेप्तु। मेको सुन के डप्का गेना हना यो ब्रोंइशा बाक्ब परमप्रभु यावे आ गाइक्चामी ब्रीशो बाक्तेक्म। प्रकाश ४:६-८; प्रकाश १४:१० 8 मिनु परमप्रभु यावे आ खिं परमप्रभु आ छेडछेड नु सक्ति डा कुनमी ब्रीशो बाक्त। मिनु परमप्रभु यावे आ ७ जना स्वर्ग डा गेय पाइबपुकीमी श्येत मगेमे सम्म सुइ परमप्रभु यावे आ खिं ओवने मचाप्बाक्तेक्म। यसैया ६:४; प्रस्थान ४०:३४; १राजा ८:१-११; इजीकीएल ४४:४

16

मेको ७ ओटा श्येत

1 मिनु नोले गो परमप्रभु यावे आ खिं रे ठेयब सेंदा का नेंता। मेको सेंदामी परमप्रभु यावे आ ७ जना स्वर्ग डा गेय पाइब आन कली “लने। परमप्रभु आ गाइक्चामी ब्रीशो ७ ओटा डप्का रागीमी मोतीन” देंत।

2 मिनु डोंइती डा परमप्रभु यावे आ स्वर्ग डा गेय पाइबमी आ कुरशो डप्का रागी तार मोइक्तु। मिनु मेकोमी मोदानु, ठेयब जन्तु आ चिन्ड वोंइसीब नु आ मूर्ति कली सेउ पाइबपुकी मरिम्शो पा खाइक्ब गार मुम्तेक्म। प्रस्थान ९:१०-११

3 मिनु अर्को परमप्रभु यावे आ स्वर्ग डा गेय पाइबमी आ कुरशो डप्का समुन्द्र तार मोइक्तु। मिनु मेकोमी मोदानु, समुन्द्र डा ब्वाक्कु क्योरशो मुर आन हुश खोदेंशो दुम्त। मिनु समुन्द्र डा सेस जन्तु नु डांइ नेल्ल बेक्तेक्म।

4 मिनू लेंशा अर्को परमप्रभु यावे आ स्वर्ग डा गेय पाइबमी आ डप्का खोला नु ब्वाक्कु बुक्तीके तार मोइक्तु। मिनू मेकोमी मोदानु, मेको ब्वाक्कु हुश दुम्त। प्रस्थान ७:१७-२१ 5 मिनू ब्वाक्कु कली कोव्रब परमप्रभु यावे आ स्वर्ग डा गेय पाइबमी परमप्रभु यावे कली “इन मुर आन कली पशो निसाफ ठीक बाक्ब। गे मुल बाक्नीनी। मिनू गे डोंइती यो बाक्तीनी। गे का ला परमप्रभु बाक्नीनी। 6 रागी डा मुरपुकीमी इन योव्रशो मुर नु इन लोव्र पाइब आन कली क्योरशा, आन हुश शाइक्पाइशशा साइक्तेकम। मिनू गे मेको रागी डा मुर आन कली हुश तूपाइक्तीनी। मार पामे, मेको ताम्तेकम” देशो नेंता।

7 मिनू गोमी मेको धूप चढेतीके रे सेंदा कामी लोव्र पशो नेंता। मेकोमी “परमप्रभु यावे, गे नेल्ल सक्ति पाइशशो परमप्रभु बाक्नीनी। मारेइ मारेइ पने चाप्नीनी। इन पशो निसाफ थमा नु ठीक बाक्नीमी” देशो नेंता। प्रकाश ९:१३; प्रकाश ६:१०-११

8 मिनू लेंशा अर्को परमप्रभु यावे आ स्वर्ग डा गेय पाइबमी आ कुरशो डप्का नां तार मोइक्तु। मिनू मेकोमी मोदानु, नांमी मुर आन कली मीम खोदेशो पा क्रोइक्चा गोप्तु। 9 मोपा शुश होशेमी मुरपुकी दुप्शा, श्येत जाम्तेकम। मिनू दुप्शो आ पर्वम परमप्रभु यावे आ नें कली सराप पाम्तेकम। मारदे हना मेकोमी श्येत गोप्तु। मिनू मेको मुर आन थुं परमप्रभु यावे गे मलेत्तेम। परमप्रभु यावे कली मान यो मपाम।

10 मिनू लेंशा अर्को परमप्रभु यावे आ स्वर्ग डा गेय पाइबमी मेको आ कुरशो डप्का ठेयब जन्तु आ नित्तीकेमी मोइक्तु। मिनू मेकोमी मोदानु, मेको ठेयब जन्तु आ राज्यमी छिडछिड दुम्त। मिनू मुरपुकीम शुश श्येत जाम्तेकम।

11 मोपतीके स्वर्ग डा परमप्रभु कली सराप पाम्तेकम। मारदे हना मेकोमी ठेयब मरिम्शो गार दुम्पाइशशा, श्येत गोप्तु। तन्न आन मरिम्शो पचा मप्रोनेम।

12 मिनू लेंशा अर्को परमप्रभु यावे आ स्वर्ग डा गेय पाइबमी आ कुरशो डप्का युफ्रेटीस माइशशो ठेयब खोलामी मोइक्तु। मिनू मेकोमी मोदानु, खोला डा ब्वाक्कु सोव्रत। मारदे सोव्रत देशा हना, नां दाप्तीके रे पीब पिप आन लां ठीक पचा कली सोव्रत। यसैया ११:१५-१६ 13 मिनू गो ठेयब बुस्स, ठेयब जन्तु नु जोल पा परमप्रभु यावे आ लोव्र पाइब आन शोव्र रे क्रुक्कु खोदेशो वोला सां गूशो तातामी। प्रकाश १२:३ 14 मेकोपुकी छक लाक्चा डा चिन्ड कोइब सैतान आ गेय पाइब वोला बाक्तेकम। मिनू मेकोपुकीमी परमप्रभु यावे, नेल्ल सक्ति पाइशशो परमप्रभु आ ठेयब नाक्तीमी नु लडाइ पचा कली रागी रागी डा पिप आन कली ब्रथ लाम्तेकम। मो दुम्मेनु, येसुमी मुर आन कली 15 “नेनीन, गो खुइ खोदेब पा जाक्नुड। सु थमा सुइशशा मइथु सेंशा, ठीक दुम्शा बाक्मे, मेको ग्येरसेक्ल। तन्न सु पाप पाइबा, मेको शिप्रा गाक्ब मुर खोदेब पा मुने दोक्ब” दे येसुमी माइक्तीमी। १थिस्सलोनिकी ५:२ 16 मिनू मेको वोला सांमी रागी रागी डा पिप ब्रथ लशा, जाक्शा, हिब्रू लोव्रमी आरमागेडोन माइशशो रागीमी खुम्साक्म।

17 मिनू नोले डा परमप्रभु यावे आ स्वर्ग डा गेय पाइबमी आ कुरशो डप्का फशेमी मोइक्तु। मिनू मेकोमी मोदानु, परमप्रभु यावे आ खिं रे नु आ नित्तीक रे ठेयब सेंदा कामी “मुल नुप्त” देशो नेंता। 18 मिनू चिला, ठेयब रेयके, बुंबु पशा, ठेयब खिनु कुत। मुरपुकी रागीमी बाक्मानु, मोमो ठेयब खिनु गेनायो मकुशो बाक्माक्त। 19 मिनू मेको ठेयब सहर सां दुम्त। रागी रागी डा सहरपुकी ब्रेत्तेकम। मिनू परमप्रभु यावेमी बेबीलोन ठेयब सहर कली फ्रुक्तु। मारदे फ्रुक्तु देशा हना, मेको मुर आन पाप तशा “गो सजाइ गेनुडमी” दे गाइशशा फ्रुक्तु। प्रकाश १४:८-१० 20 मेना टापु नेल्ल ब्वाक्कुमी सुम्साक्म, डांडापुकी ब्रेशशा, दिंम दुम्तेकम। प्रकाश ६:१४ 21 मिनू मुर आन बाक्तीकेमी शुश मुप्स यित। मेको मुप्स टलेन्ट का सम्म हेल्लशो बाक्तेकम। मिनू मेको मुप्स मुर तार दोक्मेनु, मुरपुकी मेको मुप्स तशा, परमप्रभु यावे कली सराप पाम्तेकम। मारदे हना मेको मुप्सीम रागीमी बाक्ब मुर आन कली शुश हिंचा डा श्येत गोप्तु। टलेन्ट ३५ किलो कोदेशो बाक्ब। प्रस्थान ९:२३

17

ठेयब तेल्लेम कली सजाइ

1 नोले गो परमप्रभु यावे आ स्वर्ग डा गेय पाइब का ताता। मेको सु बाक्त देशा हना, मेको डोंइती डा ७ जना श्येतमी ब्रीशो डप्का कुरबपुकी डा का बाक्त। मिनू मेकोमी “एके पिवो, गो इ कली ब्वाक्कु तार बाक्ब ठेयब तेल्लेम कली गेशो सजाइ कोइनन। प्रकाश १५:१ 2 रागी रागी डा पिपपुकीमी मेको नु तेल्लेम पाम्तेकम। मिनू मेको आन तेल्लेम पशो तशा, रागी रागी डा मुरपुकीमी यो मोदेशो पाम्तेकम” दे आं कली देंत।

3 मिनू मेकोमी आं कली परमप्रभु यावे आ सोक्तीमी बाक्शा, मुर मबाक्तीकेमी लाइक्ती। मिनू गो मीश मुर का लल जन्तु तारी निशशो ताता। मेको जन्तु दोदेशो तांइसाक्व देशा हना, आ रां नेल्ल परमप्रभु यावे कली मरिम्शो लोव्र

ब्रेक्शा वोइशो बाक्त। मेको ७ ओटा पिया नु १० ओटा ग्रोव पाइशो बाक्त। 4 मिनु मेको मीश मुर दोदेशो तांडसाक्व देशा हना, पिप आन फेक्शो खोदेशो वा नु लल वा फेक्शो बाक्त। सुन, हीरा नु मोती पांइशो बाक्त। मेकोमी सुन के कचौरा कुरशो बाक्त। मेको कचौरा आ तेल्लेम पतीके, ग्रांग्रा दिचा डा नु मरिम्शो गेयमी ब्रीशो बाक्त। येरमीया ५१:७ 5 मिनु मेको आ कुप्फीमी खुइशो लोवमी आ नें ब्रेक्शो बाक्त। मार ब्रेक्शो बाक्त देशा हना “बेबीलोन ठेयब सहर, तेल्लेमपुकी नु नेल्ल रागी रागी डा ग्रांग्रा दिचा डा आन ममा” दे ब्रेक्शो बाक्त। 6 मिनु गो मेको मीश मुर कली परमप्रभु यावे आ योवशो मुर नु येसु आ सांकछी आन हुशेमी दुक्शो ताता। मेको कली तडानु, गो शुश छक लाक्ती। प्रकाश १८:२४ 7 परमप्रभु यावे आ स्वर्ग डा गेय पाइबमी चहिं आं कली “गे मारदे छक लाक्डे? मेको मीश मुर नु मेको आ डोइशो ७ ओटा पिया नु १० ओटा ग्रोव पाइशो जन्तु आस खुइशो लोव गो इ कली शेनुड। 8 इ तशो जन्तु डोंइती बाक्त, मुल चहिं मबा। तन्न नोले पुं मपाइशो ढोडोडगा रे कुशा खतम दुम्ब। रागी सेल्चा रे डा ब्रोंइतीक किताबमी आन नें मब्रेक्शो मुरपुकी चहिं मेको जन्तु तशा छक लाक्नीम। मारदे हना मेको जन्तु डोंइती बाक्त, मुल मबा, नोले जाक्ब।

9 रुप्ब मुर आन कली एको तुइक्तीके लोव बाक्ब। मेको ७ ओटा पिया ७ ओटा डांडा नम। मेको मीश मुर मेको डांडा तार निप्ब। प्रकाश १३:१८ 10 मिनु मेको ७ ओटा डांडापुकी ७ ओटा पिप यो नम। मेको रे ५ ओटा बेक्शा लाक्तेक्म। मिनु कामी सासन पना पन बाक्ब। अर्को लीशो का चहिं मुल सम्म मजाक्शो बाक्त। मिनु नोले जाक्शा डा मिन, छिन का ला सासन पाइब। 11 मिनु मेको डोंइती बाक्शो नु मुल मबाक्शो जन्तु चहिं मेको अर्को ७ ओटा पिप आन नोले जाक्शो बाक्ब। मिनु नोले जाक्शो यो, मेको ७ ओटा रे जाक्ब। मिनु मेको नरक लाइब।

12 मिनु मेको इ तशो १० ओटा ग्रोव चहिं मुल सम्म सासन पचा मतशो १० जना पिप नम। मिनु मेको आन कली नु ठेयब जन्तु कली घन्टा का पिप आन अधिकार गेशो बाक्ब। प्रकाश १३:१ 13 मेको १० जना पिप थुं का दुम्शा, आन सक्ति नु अधिकार ठेयब जन्तु कली गेनीम। 14 मोदेशो दुम्मेनु, मेकोपुकी पाठा नु लडाइ पाइनीम। मिनु लडाइमी पाठा ग्राब। मारदे पाठा ग्राब देशा हना, मेको पाठा प्रभु आन प्रभु नु पिप आन पिप बाक्ब। मिनु मेको नु बाक्शोपुकी आ ब्रेशो नु योवशो मुरपुकी बाक्नीमी। मेको नु बाक्बपुकी आ ब्रेशो नु योवशो दीगो पाइब यो बाक्नीमी” दे आं कली देंत। प्रकाश १९:१६; प्रकाश १९:१४

15 मिनु मेको परमप्रभु यावे आ स्वर्ग डा गेय पाइबमी लेंशा “तेल्लेम आ नेक्था डा शुश ब्वाक्कु, मार बाक्ब देशा हना, मेको मुरपुकी नम। मिनु मेको शुश मुर आन हुल, रागी रागी डा मुर नु शुश लोव ब्वाक्ब मुर बाक्नीम। यसैया ८:७; येरमीया ४७:२

16 मेको इ तशो १० ओटा ग्रोव नु मेको ठेयब जन्तु मेको तेल्लेम आ जोरी सत्रु दुम्नीम। मेको कली श्येत गेशा, आ फेक्शो वा प्रुइक्नीम। मिनु आ श्ये ब्वाइनीम। मिनु आ लीशो नेल्ले मीम चोइनीम। 17 मारदे मोदेशो पाइनीम देशा हना, परमप्रभु यावेमी आ देशो थमा दुम्पाइक्चा कली मेको आन थुं का दुम्पाइक्तीमी। मिनु मोपा मेको १० जना पिपमी राज्य नु सक्ति ठेयब जन्तु कली गेनीम। परमप्रभु यावे आ लोव खाप्चा कली मोदेशो दुम्ब। 18 मिनु इ तशो मीश मुर चहिं ठेयब सहर बाक्ब। मेको रागी रागी डा पिप आन कली सासन पाइब बाक्ब” दे शेंताक्यी। प्रकाश १८:१०

18

बेबीलोन सहर नुप्त

1 मिनु नोले गो शुश अधिकार पाइशो परमप्रभु यावे आ स्वर्ग डा गेय पाइब का सरीड रे यिशो ताता। मेको आ टल्केशोमी रागी नेल्ल छेडछेड दुम्त। इजीकीएल ४३:२ 2 मिनु मेकोमी ठेयब सेंदामी “मेको ठेयब बेबीलोन सहर ब्रेशशा नुप्त। मेको ब्रेशो सहर चोल आन बाक्तीके जेल्लखान दुम्त। मेको ग्रांग्रा दिचा डा चिक्ब आन जेल्लखान दुम्त। प्रकाश १४:८; येरमीया १५:३९ 3 मारदे मेको सहर मोदेशो दुम्त देशा हना, रागी रागी डा मुर नेल्लेमी आ ग्रांग्रा दिचा डा गेय शेंसीशा मोदेशो पाम्तेक्म। मिनु रागी रागी डा पिपपुकीमी यो मोदेशो पाम्तेक्म। मिनु रागी रागी डा ग्याप्ब लेयबपुकी मेको सहर डा शुश थोवक रे शोंप पाइशो दुम्तेक्म” देंत। यसैया ५१:७; नाहुम ३:४ 4 मिनु नोले स्वर्ग रे अर्को सेंदा का नेंता। मेको सेंदामी “आं मुरपुकी, मेको सहर रे गूशा पिने। मेकेर रे मगूतीनी हना, गे मेकोपुकी खोदेशो मरिम्शो पाइनीनी। मोपा मरिम्शो पाइतीनी हना, मेको खोदेशो पा सजाइ ताइनीनी। यसैया ४८:२०; येरमीया ५०:८; येरमीया ५१:६, ४५; २कोरिन्थी ६:१७ 5 मेको आन मरिम्शो पशो देल्शा, सरीड सम्म जाक्शो बाक्त। मिनु परमप्रभुमी मेको आन मरिम्शो पशो मिम्शो बाक्त। उत्पत्ती १८:२०-२१; येरमीया ५१:९ 6 मिनु गे इन कली गेशो श्येत मेको कली

लेत्तीन। श्येत का ला ममाइ, निक्शी खेयप श्येत गेने। इन कली गेशो श्येत निक्शी खेयप गेचा ठीक दुम्ब। भजन संग्रह १३७:८; येरमीया ५०:१५, २९; २थिस्सलोनिकी १:६ 7 मिनु आम कली गिश ठेयब सेला, मिश श्येत गेशा, सुर्ता नु रोंका पपतीन। मिनु मेकोमी आ थुंमी चहिं 'गो पिपीम नड। गो वोंइश बेक्शो मीश मुर मनड। मोपतीके गो सुर्ता गेनायो मपाइनुड' देंब। यसैया ४७:७-९ 8 मोपा मोमो ठेयब लेशो लोत्र पतीके, काबु मेको कली श्येत दुम्ब। मेको कली मार श्येत दुम्ब देंशा हना, मेको सहरमी मुर साइक्ब रोड जाक्ब, मिनु रोंका पाइनीम, अन्काल यो दुम्ब। मिनु मेको सहर मीम दुप्शा पुलु दुम्ब। मेको श्येत नेल्ल मारदे दुम्ब देंशा हना, मेको आन कली निसाफ पाइब परमप्रभु यावे सक्ति पाइशो बाक्ब" देंशो नेंता।

मुरपुकी बेबीलोन तशा डाक्शो

9 मिनु रागी रागी डा पिपपुकी मेको नु तेल्लेम पांम्तेक्म। मेको आ शोंप यो दाक्शो बाक्तेक्म। मोपतीके मेकोपुकी ग्रीडशो सहर कली तशा, रोंका पा डाक्नीम। 10 मिनु मेको आ श्येत तशा हिंशा, डोन रे कोत्रबपुकीमी "आबी, आबी, मेको ठेयब बेबीलोन माइशो सहर गिश दारशो सेल्शो बाक्त। मुल चहिं घन्टा कामी इ निसाफ दुम्त" देंनीम। येरमीया ५१:८ 11 मिनु रागी रागी डा ग्याप्ब लेयबपुकी मेको सहर तशा, डाक्शा रोंका पाइनीम। मारदे डाक्शा रोंका पाइनीम देंशा हना, मेको आन लेयचा डा थोत्रक सुइमी मग्याप्नीम। 12 आन लेयचा डा थोत्रक मार बाक्त देंशा हना, सुन, चांदी, हीरा, मोती, शुश क्येट लाइब सुती वा, प्याजी रड डा वा, रेसम वा, लल वा, ब्रोत्रशो रिना पाइशो शी, हात्ती आन खुइ शुश क्येट लाइब शी, कांसा, फलाम नु दारशो फुल्लु रे सेल्शो थोत्रकपुकी बाक्तेक्म। 13 मिनु सिन्कौली, चां खेक्तीक तेल, मस्ला, ब्रोत्रशो रिना पाइब तेल, धूप, अडगुर शांबु, जचा तेल, थम रिम्शो फस, चेरब, बी ब्यफ, भेडा, शारा, बग्गी नु वाइलीम वाइल मेको मुर आन लेयतीक थोत्रकपुकी बाक्तेक्म। 14 मिनु मेको ग्याप्ब लेयबपुकीमी मेको सहर कली "इन दाक्शो ब्रोत्रशो फल फुल जांम्तेक्म। इन ग्योम्सीचा, इन शोंप पाइशो दुम्चा नेल्ल गेनायो मथित्चा डा पा जांम्शा लांम्तेक्म" देंतेक्म। 15 मिनु मेको सहर रे शोंप पाइशो ग्याप्ब लेयबपुकी सहर रे डोन बाक्शा, मेको सहर कली गेशो सजाइ तशा हिंतेक्म। मिनु मेकोपुकीमी डाक्शा रोंका पशा,

16 "आबी आबी, मेको ठेयब सहर, मेको सहर डा मुरपुकी शुश क्येट लाइब सुती वा, प्याजी नु लल रड डा वा फेक्शो बाक्तेक्म। मिनु मेकोपुकीम शुश सुन, हीरा नु मोती पांइशो बाक्तेक्म। प्रकाश १७:४ 17 तन्न मुल घन्टा कामी मेको सहर डा शोंपपुकी खतम दुम्तेक्म" देंतेक्म। मिनु डोंगा चलेबपुकी, डोंगामी गेय पाइबपुकी नु डोंगामी डोइशशा ग्याप्ब लेयब मुर नेल्ल सहर रे डोन राप्शा, इजीकीएल २७:२७-३६ 18 सहर दुप्शो कुन तशा "मेरे सहर खोदेब ठेयब अर्को मबा" दे ग्रीतेक्म। 19 मिनु मेकोपुकी सुर्ता पशा, रोंका पा डाक्तेक्म। मेकोपुकीमी "आबी आबी, मेरे ठेयब सहर। मेरे सहर डा डोंगा आन होत्रपपुकी मेरे सहरमी मार मार लेयशा, शोंप पाइशो दुम्शो बाक्तेक्म। तन्न घन्टा कामी मेरे सहर जांम्शा लत। 20 मिनु स्वर्गमी बाक्ब नेल्ले ग्येरसीने। परमप्रभु यावे आ योत्रशोपुकी, ख्रीस्त आ सोइशशोपुकी नु परमप्रभु यावे आ लोत्र पाइबपुकी ग्येरसीने। मारदे हना, परमप्रभु यावेमी इन कली गेशो श्येत आ पर्बम मेको कली सजाइ गेप्टु" देंशो नेंता। येरमीया ५१:४८

बेबीलोन सहर मथिंसीब

21 मिनु बोल्यो परमप्रभु यावे आ स्वर्ग डा गेय पाइबमी ठेयब यात खोदेशो फुल्लु का क्युक्तु। मिनु मेको फुल्लु कली समुन्द्रमी ताइक्ताक्व। मेको परमप्रभु यावे आ स्वर्ग डा गेय पाइबमी "मेको फुल्लु खोदेशो पा ठेयब बेबीलोन सहर ताइक्चा पुंइसीब। मोपतीके मेको सहर गेनायो मथिंसीब। येरमीया ५१:६३-६४ 22 मिनु मेको ठेयब सहर दोपा नुप्ब देंशा हना, ठेयब ताप्तीके ताप्शो, कुम्सो पशो मुराली ताप्शो नु तुराही ताप्शो मेकेर लेंशा मनेंसीब। मिनु मार मार सेल्ब सीप पाइशो मुरपुकी मेकेर लेंशा मथिंसीब। यात हिल्शो आ रेयके मेकेर का यो लेंशा मनेंसीब। यसैया २४:८; इजीकीएल २६:१३ 23 मेकेर बत्ती दाशो हाम्सो का यो लेंशा मतांइसीब। मेकेर ग्युम्ले नु ग्युम्ली आस सेंदा लेंशा मनेंसीब। मारदे मोदेशो दुम्ब देंशा हना, रागी डा ठेयब मुर ग्याप्ब लेयबपुकी बाक्तेक्म। मेकोपुकीमी मेको आन टुना मुनामी रागी नेल्ल डा मुर आन कली दूली लां खोइक्पाइक्तेक्म। येरमीया २५:१०; यसैया २३:८ 24 मिनु मेको सहर डा मुरपुकीमी परमप्रभु यावे आ लोत्र पाइबपुकी नु परमप्रभु यावे आ योत्रशो मुर आन कली साइशो बाक्तेक्म। नेल्ल रागी डा सु सु मुर साइशो बाक्मा, मेको सहरमी साइशो बाक्तेक्मे" दे परमप्रभु यावे आ स्वर्ग डा गेय पाइबमी देंत। प्रकाश ६:१०; प्रकाश १७:६

19

पाठा आ ग्युंवे

1 मिनु नोले गो स्वर्गमी शुश मुरपुकीम कुम्सो पशो ठेयब रेयके खोदेशो नेता। मिनु मेकोपुकीमी “हाल्लेलया, आंइ परमप्रभु ला मुर आन कली पाप रे प्रॉइब बाक्ब। छेडछेड नु सक्ति नेल्ल आंइ परमप्रभु यावे केन बाक्ब। 2 मारदे हना परमप्रभु यावे आ पशो निसाफ थमा नु ठीक बाक्ब। मिनु परमप्रभु यावेमी रागी नेल्ल डा मुर आन कली खतम सेल्ब तेल्लेम कली ठीक पा सजाइ गेप्टु। मेको तेल्लेममी शुश परमप्रभु यावे आ वाइलीम वाइल आन कली साइक्तीके, मुल मेको कली क्येक्क लेत्ताक्व” दे ग्रीशो नेता। प्रकाश ६:३०; ब्यवस्था ३२:४३ 3 मिनु मेको स्वर्गमी बाक्बपुकीमी लेंशा “हाल्लेलया, मेको सहर दुप्शो आ कुन गेनायो मनुप्यु कुइब” देतेक्म।

4 मिनु मेको २४ जना शेंब खाल्पा नु ४ ओटा सेस जन्तुपुकीमी आ ठेयब नित्तीकेमी निश्शो परमप्रभु यावे कली खुम्की पा बाप्शा सेउ पाप्तेक्म। मिनु मेकोपुकीमी “आमेन, हाल्लेलया” देतेक्म। प्रकाश ४:४; प्रकाश ५:३१; प्रकाश ४:६; भजन संग्रह १०६:४८ 5 मिनु परमप्रभु यावे आ नित्तीक रे सेंदा का ग्रीशो नेता। मेको सेंदामी “परमप्रभु यावे आ वाइलीम वाइल, परमप्रभु यावे कली मान पा हिंब आइक्च नु ठेयब मुर नेल्लेमी ‘आंइ परमप्रभु यावे नेल्ल क्येडा ठेयब बाक्ब’ देनीन” देशो नेता।

6 मिनु नोले गो शुश मुर आन सेंदा ठेयब खोला आ रेयके नु ठेयब बुंबु आ रेयके खोदेशो पा नेता। मिनु मेको सेंदामी “हाल्लेलया, प्रभु, नेल्ल सक्ति पाइश्शो आंइ परमप्रभु यावे नेल्ल सासन पाइब बाक्ब। 7 गो नेल्ल ग्येरसय। गो नेल्लेमी ‘इन सक्ति नेल्ल क्येडा ठेयब बाक्ब’ देंय। गो नेल्लेमी परमप्रभु यावे कली मान पय। मारदे हना पाठा आ ग्युंवे दुम्चशो बाक्त। मिनु आ ग्युम्लीम आंम कली ग्योम्सीशा, ठीक दुम्शो बाक्त। प्रकाश २१:९ 8 मेको ग्युम्ली कली सुती के रिम्शो बुश टल्केशो वा फेक्चा कली गेशो बाक्त” देशो नेता। मिनु मेको सुती के रिम्शो वा मार बाक्ब देशा हना, परमप्रभु यावे आ योत्रशो आन ठीक पतीके बाक्ब। यसैया ६१:१० 9 मेको परमप्रभु यावे आ स्वर्ग डा गेय पाइबमी आं कली “एको लोत्र ब्रेक्तो। पाठा आ ग्युंवे जचा कली ब्रेत्चा पुंइसीबपुकी ग्येरसीशो मुरपुकी बाक्नीम” दे माइक्ती। मिनु मेकोमी लेंशा आं कली “मेको थमा पा परमप्रभु आ लोत्र बाक्ब” दे माइक्ती। लूका १४:१५ 10 मिनु नोले गो मेको परमप्रभु यावे आ स्वर्ग डा गेय पाइब कली सेउ पचा कली आ खोइलीमी बाप्ती। मेकोमी चहिं आं कली “मपावो। गो गे नु इ लोक्बपुकी खोदेशो येसु आ लोत्र पाइब, परमप्रभु यावे आ वाइल नड। परमप्रभु यावे कली मान पावो। मारदे हना येसु आ लोत्र पाइबपुकीम परमप्रभु यावेमी तुइक्पाइश्शो लोत्र ला पाइनीम” दे माइक्ती। प्रकाश २२:८-९

बुश शारा डोइक्ब

11 मिनु नोले गो स्वर्ग रोकसीशा, बुश शारा का ताता। मेको शारा तार डोइक्ब का बाक्त। मेको शारा डोइक्ब सु बाक्त देशा हना, दीगो नु थमा पाइब माइश्शो बाक्त। मेको घूस मताक्थु ठीक पा निसाफ पाइब बाक्त। लडाइ पाइब यो बाक्त। मत्ती २४:३०; प्रकाश ३:३४; यसैया ११:४-५

12 मिनु मेको दोदेब तांइसाक्व देशा हना, मेको आ मिक्च हुरुर पा ब्रशो मी खोदेशो तांइसाक्व। आ पियामी शुश मुकुटपुकी बाक्तेक्म। मिनु मेको तारी नें का ब्रेक्शो बाक्त। मेको नें सुइमी मतुइक्नीम। मेकोम ला तुइक्ब। प्रकाश १:३४; प्रकाश ३:१२ 13 मिनु मेकोमी हुशेमी खुम्शो वा फेक्शो बाक्त। आ नें परमप्रभु यावे आ लोत्र माइश्शो बाक्त। यसैया ६३:१-३; यूहन्ना १:१ 14 मिनु स्वर्ग डा फौजपुकी बुश शारा डोइश्शा, मेको आ नोले खोइश्शो बाक्तेक्म। मेको शारा डोइक्बपुकी रिम्शो बुश सुती के वा फेक्शो बाक्तेक्म। प्रकाश १७:३४ 15 मिनु मेको डोंइती डा बुश शारा डोइक्ब आ शोत्र रे रागी रागी डा मुर आन कली साइक्चा कली हेश्शो तरवार का ग्रीत। मिनु मेकोमी फलाम के कोक्केमी मेको आन कली सासन पाइब, नेल्ल सक्ति पाइश्शो परमप्रभु यावे आ गाइक्चा डा कोल खोइलीमी दिम्ब। भजन संग्रह २:९; प्रकाश १४:१९-२० 16 मिनु मेको डोंइती डा शारा डोइक्ब आ वा नु आ फिलामी नें का ब्रेक्शो बाक्त। मार नें ब्रेक्शो बाक्त देशा हना, पिप आन पिप नु प्रभु आन प्रभु, दे ब्रेक्शो बाक्त। प्रकाश १:५; १तिमोथी ६:१५

ठेयब जन्तु नु जोल पाइब

17 मिनु नोले गो परमप्रभु यावे आ स्वर्ग डा गेय पाइब का नांमी राप्शो ताता। मेकोमी शुश ग्येत्य सरीडमी बेरब चिक्ब आन कली ठेयब सेंदामी “परमप्रभु यावे आ गेशो ब्वचा कली खुम्सीशा यिने। इजीकीएल ३९:४, १७-२०

18 मार ब्वचा कली यिने देशा हना, पिपी, कप्तान, बोल्यो मुर, शारा, शारा डोइक्ब, वाइलीम वाइल, आइक्च नु ठेयब मुर नेल्ल आन श्ये ब्वचा कली यिने” दे ग्रीशा माइक्तीमी।

19 मिनु गो ठेयब जन्तु नु रागी डा पिप आन फौजपुकी मेको डोंइती डा बुश शारा डोइक्ब नु आ फौजपुकी नु लडाइ पचा कली खुम्सीशो ताता। प्रकाश १६:१४,१६ 20 मोपा मेकोपुकी लडाइ पामेनु, मेको ठेयब जन्तु नु जोल पा परमप्रभु यावे आ लोत्र पखु पाइब आस कली ग्याइक्ताक्म। परमप्रभु यावे आ लोत्र पखु पाइब चहिं ठेयब जन्तु नु बाक्शा, छक लाक्चा डा गेय पाइब बाक्ता। मोपा मेको ठेयब जन्तु नु आ मूर्ति कली पूजा पाइब नु आ चिन्ड वोइक्ब आन कली मरिम्शो लां शेंशा खोइक्पदा बाक्ता। मिनु मेको निक्शी सेसीन गन्धक नु ठेयब मी ब्रतीकेमी हुम्चा पुंइसाक्स। प्रकाश १३:११-१७; २थिस्सलोनिकी २:८ 21 मिनु लीशो मेको आस फौजपुकी चहिं मेको बुश शारा डोइक्ब आ शोत्र रे ग्रीशो तरवारमी साइक्चा पुंइसाक्म। मिनु चिक्बपुकी मेको नेल्ल आन श्ये ब्वशा रूतेक्म।

20

सैतान कली पाइशो

1 मिनु नोले गो परमप्रभु यावे आ स्वर्ग डा गेय पाइब स्वर्ग रे पुं मपाइशो ढोडोडगा डा सांचो नु ठेयब साडलो शेशा, यिशो ताता। प्रकाश ९:१ 2 मिनु मेकोमी ठेयब बुस्स कली ग्याइशशा पाइक्ताक्व। मेको ठेयब बुस्स आ नें मार बाक्ता देशा हना, साइ डोंइती डा बुस्स, दियाबलस नु सैतान मेको आ नें बाक्ता। मिनु मेको परमप्रभु यावे आ स्वर्ग डा गेय पाइबमी मेको कली हजार का बर्स सम्म पाइक्ताक्व। दियाबलस आ देशो “मुर आन कली खाल्ब” बाक्ब। प्रकाश १२:९ 3 मिनु रागी रागी डा मुर आन कली मरिम्शो लां मकोइदल, दे मेको कली पुं मपाइशो ढोडोडगामी तोक्तु। मिनु परमप्रभु यावे आ स्वर्ग डा गेय पाइबमी मेको एफिसस ढोडोडगा चोक्शा, सांचो पाइशशा, छाप थोक्ताक्व। मोपा मेको ठेयब बुस्स कली हजार का बर्स सम्म चोक्ता। मिनु हजार का बर्स नोले मेको छिन का कली प्रोंइचा पुंइसीब।

हजार का बर्स डा सासन

4 मिनु नोले गो नित्तीकपुकी ताता। मेको नित्तीकपुकीमी मुर निशो बाक्तेक्म। परमप्रभु यावेमी मेको आन कली निसाफ पचा गेप्टु। मिनु नोले गो येसु कली थमा सुइशशा, आ लोत्र नु परमप्रभु यावे आ लोत्र पतीके आन पिया खोइक्चा पुंइसीब आन कली तातामी। मेकोपुकीमी ठेयब जन्तु नु मेको आ मूर्ति कली पूजा मपामे बाक्ता। मिनु मेको ठेयब जन्तु आ छाप आन कुप्फीम नु आन गुइमी यो वोइक्चा मबिस्समा बाक्ता। मिनु मेको लेंशा ब्रोंइशा, ख्रीस्त नु हजार का बर्स सम्म सासन पाम्तेक्म। प्रकाश ३:२१; मत्ती १९:२८; १कोरिन्थी ६:२ 5 मिनु अर्को लीशो मुरपुकी चहिं हजार का बर्स नोले ला सेंसीनीम। मेको डोंइती डा सेंसीतीके बाक्ब। १थिस्सलोनिकी ४:१६ 6 मिनु सु सु डोंइती बेक्शो रे सेंसीनीमी, मेको ग्येरशो नु परमप्रभु यावे आ योत्रशो मुरपुकी बाक्नीम। मेको लेंशा मबेक्नीम। मेकोपुकीमी लेंशा बेक्चा मताइनीम। परमप्रभु यावे नु ख्रीस्त आस डोंइती बाक्नीमी। मिनु हजार का बर्स सम्म ख्रीस्त नु सासन पाइनीम।

नेल्ल क्येडा नोले डा लडाइ

7 मिनु मेको हजार का बर्स नोले सैतान पुं मपाइशो ढोडोडगा रे प्रोंइचा पुंइसाक्व। 8 मोपा ग्रीशा, रागी नेल्ल डा मुर आन कली परमप्रभु यावे कली मटिथु, हेंथे गाक्पाइक्तु। हेंथे गाक्बपुकी चहिं गोग नु मागोग माइशो डा मुरपुकी देंनीम। मिनु सैतानमी हिक्ने मचाप्चा डा मुर आन कली लडाइ पचा कली खुप्ताक्व। इजीकीएल ३८:२ 9 मिनु सैतान आ फौजपुकी रागी नेल्ल साप्शा, लडाइ पथ जाक्तेक्म। मेकोपुकीमी येसु ख्रीस्त कली थमा सुइक्ब, परमप्रभु यावे आ योत्रशो आन बाक्तीके नु परमप्रभु यावे आ दाक्शो सहर कली पुम्ताक्म। तन्न स्वर्ग रे मी दोक्शा, मेको पुम्ब नेल्ल आन कली नेक्तीमी।

10 मिनु मुर आन कली मरिम्शो लां शेंब दियाबलस गन्धक रे हरुर पा ब्रशो मी ब्रतीकेमी हुम्चा पुंइसाक्व। मेकेर ठेयब जन्तु नु जोल पा परमप्रभु यावे आ लोत्र पखु पाइब यो बाक्ताक्स। मिनु मेकेर बाक्बपुकी नाक्दो नाक्ती गेना हना यो श्येत गेचा पुंइसीनीम। प्रकाश १९:२०

ठेयब बुश नित्तीके

11 मिनु नोले गो ठेयब बुश नित्तीके का नु मेकेर निप्ब कली ताता। रागी नु स्वर्ग मेको कली तशा प्रोक्ताक्स। मिनु मेको आस कली बाक्तीके मबा। मत्ती २५:३१-४६; २पत्रुस ३:७,१०,१२ 12 गो ठेयब बुश नित्तीके आ डोंइती

ठेयब नु आइक्च बेक्शो मुरपुकी राप्शो तातामी। किताबपुकी प्राक्शो बाक्तेक्म। मिनु गो अर्को किताब का यो प्राक्शो ताता। मेको ब्रोंडतीक किताब बाक्त। मिनु मेको ठेयब बुश नित्तीके आ डोंडती राप्शो बेक्शो मुर आन निसाफ पचा पुंडसीनीम। दोपा निसाफ पचा पुंडसीनीम देशा हना, मेकोपुकीमी रागीमी बाक्मानु, मार मार पामे, मेको किताबमी ब्रेक्शो पढेशा, निसाफ पचा पुंडसीनीम। यूहन्ना ५:२८-२९; दानीएल ७:१०

13 मेको ठेयब बुश नित्तीके आ डोंडती राप्शो बेक्शो मुरपुकी ते रे जाक्तेक्म देशा हना, समुन्द्रमी बेक्शो मुरपुकी समुन्द्र रे जाक्तेक्म। बेक्पाइक्ब आ बेक्पाइश्शो नु बेक्शो आन बाक्तीके रे जाक्तेक्म। मिनु मेको नेल्ल रागीमी बाक्मानु, मार मार पामे, मेको निसाफ पचा पुंडसाक्म। 14 बेक्पाइक्ब नु बेक्शो आन बाक्तीके हुरुर पा ब्रशो मी ब्रतीकेमी हुम्चा पुंडसाक्म। मेको हुरुर पा ब्रशो मीमी हुम्सीशो मार बाक्त देशा हना, मेको निक्शी खेयप बेक्चा डा मेको नोले डा बेक्चा बाक्त। १कोरिन्थी १५:२६, ५५ 15 सु सु आन नें ब्रोंडतीक किताबमी मब्रेक्शो बाक्मे, मेको हुरुर पा ब्रशो मीमी हुम्चा पुंडसाक्म।

21

नक यरूसलेम

1 नोले गो नक सरीड नु नक रागी ताता। डोंडती डा सरीड, डोंडती डा रागी नु समुन्द्र जाम्तेक्म। यसैया ६५:१७; २पत्रुस ३:१३ 2 परमप्रभु यावे आ सहर नक यरूसलेम माइश्शो परमप्रभु यावे आ बाक्तीके रे यिना यिन पाइश्शो ताता। मेको सहर ग्युम्ले कली ग्युम्चशो ग्युम्ली खोदेशो दुम्शा, ग्योम्सीशा यिशो बाक्त। गलाती ४:२६; हिब्रू १२:२२; प्रकाश १९:७-८ 3 मिनु गो ठेयब नित्तीके रे ठेयब सेंदा का गूशो नेंता। मेकोमी “कोवडीन, परमप्रभु यावे आ बाक्तीकेमी मुरपुकी यो बाक्नीम। परमप्रभु यावे मुरपुकी नु बाक्ब। मेकोपुकी परमप्रभु यावे आ मुर बाक्नीम। मिनु परमप्रभु यावे आ मुरपुकी नु बाक्ब। प्रस्थान २९:४३५; येरमीया ७:२३ 4 परमप्रभु यावेमी मेको मुर आन कली लेम्शा, आन प्रेक्कु फिक्ब। मुल रे मुरपुकी मबेक्नीम। मोपतीके रोंका मपाइनीमी, मडाक्नीमी, श्येत यो मजाइनीम। मारदे हना डोंडती मार मार बाक्मा, मेको नेल्ल नुप्तेक्म” दे ठेयब सेंदामी देशो नेंता। प्रकाश ७:१७; यसैया २५:८; यसैया ३५:१०; यसैया ६५:३९

5 मेको ठेयब नित्तीकेमी निप्बमी “नेनीन, गो नेल्ल नक सेल्लुडमी” देंत। मिनु नोले मेकोमी आं कली “मेको लोव ठीक नु थमा बाक्ब। मोपतीके ब्रेक्तो” देंत। 6 मिनु मेकोमी लेंशा आं कली “गो आल्फा नु ओमेगा नड। नेल्ल क्येडा डोंडती नु नेल्ल क्येडा नोले डा गो नड। सु सुमी तूतू दाक्नीमी, मेको आन कली ब्रोंडचा गेब ब्वाक्कु बुक्तीक रे मोशा तूचा गेनुड। प्रकाश १:८; प्रकाश २२:१३ 7 सु सुमी सैतान कली ग्रानीमी, मेकोम आं देशो नेल्ल ताइनीम। मिनु गो मेको ग्राब आन परमप्रभु यावे दुम्नुड। मेकोपुकी चहिं आं तमी तौ दुम्नीम। 8 तन्न मुर तशा हिंबपुकी, परमप्रभु यावे कली थमा मसुइक्बपुकी, पापमी ग्युम्शोपुकी, मुर आन कली साइक्बपुकी, तेल्लेम पाइबपुकी, तुना मुना पाइबपुकी, देवी देवता आन कली पूजा पाइबपुकी, नु जोल पाइबपुकी नेल्ल गन्धक रे हुरुर पा ब्रशो मीमी हुम्चा पुंडसीनीम। मिनु मेको नोले डा बेक्तीक बाक्ब” दे माइक्ती।

9 मिनु नोले गो परमप्रभु यावे आ स्वर्ग डा गेय पाइब का जाक्शो ताता। मेको सु बाक्त देशा हना, डोंडती डा ७ जना श्येतमी ब्रीशो डप्का कुरबपुकी डा का बाक्त। मेकोमी आं कली “एके पिवो, गो इ कली ग्युम्ली कोंडनुड। मेको ग्युम्ली पाठा आ मीश बाक्ब” दे माइक्ती। 10 मेकोमी आं कली परमप्रभु यावे आ सोक्तीमी बाक्शा, ठेयब डांडा तार लाइक्ती। मिनु मेकेर आं कली परमप्रभु यावे आ बाक्तीके रे यिना यिन पाइश्शो परमप्रभु यावे आ योव्रशो यरूसलेम माइश्शो सहर कोंडताक्यी।

11 मिनु मेको सहर दोदेशो तांडसाक्व देशा हना, परमप्रभु यावे आ छेडछेड नु सक्ति पाइश्शो बाक्त। मिनु परमप्रभु यावे आ छेडछेड नेल्ल क्येडा रिम्शो टल्केशो बुश यास्पेर माइश्शो हीरा खोदेशो तांडसाक्व।

12 मिनु मेको सहर दोपा सेल्लो बाक्त देशा हना, मेको सहर आ एर ओंथ ठेयब गारो प्रोव्रशो बाक्त। मिनु मेको गारोमी १२ ओटा ठेयब लाप्चोपुकी बाक्तेक्म। मिनु १२ जना परमप्रभु यावे आ स्वर्ग डा गेय पाइबपुकी मेको लाप्चो का कामी बाक्शो बाक्तेक्म। इस्राएल आ १२ जना तौ आन नें नु थर मेको लाप्चो का कामी ब्रेक्शो बाक्तेक्म। 13 मिनु मेको लाप्चोपुकी ते ते बाक्तेक्म देशा हना, पूर्वम लाप्चो सां बाक्तेक्म। उत्तरम लाप्चो सां बाक्तेक्म। दक्खिनम लाप्चो सां बाक्तेक्म। पच्छिमम लाप्चो सां बाक्तेक्म। 14 मिनु मेको सहर डा गारोमी १२ ओटा जग बाक्तेक्म। मेको जगमी पाठा आ सोइश्शो १२ जना आन नें ब्रेक्शो बाक्तेक्म।

15 मिनु गो नु लोत्र पाइबमी मेको सहर, लाप्चो नु गारो पुक्चा कली सुन के पुक्तीके का कुरशो बाक्त। 16 मिनु मेकोमी मेको सहर कली पुक्तु। मेको सहर ४ पाटे चारै सुर बराबर दुइश्शो १२ हजार स्तादीयोन बाक्त। आ ग्येत्य गे यो मोशोन दुइश्शो बाक्त। स्तादीयोन का १८५ मिटर बाक्ब।

17 मिनु मेकोमी सहर आ गारो पुक्गानु, सहे का ४४ कुबीत ब्रेम्शो बाक्त। मेको परमप्रभु यावे आ स्वर्ग डा गेय पाइब आ पुक्तीके मुर आन पुक्तीके खोदेशो बाक्त। कुबीत का गज का खोदेशो, ०.५ मिटर बाक्ब। 18 मेको गारो बुश टल्केशो हीरा के सेल्शो बाक्त। मेको सहर चहिं सिसा खोदेशो मारेइ मब्वाइश्शो सुन के बाक्त। 19 मिनु गारो आ जग नेल्ल खाल डा हीरापुकीम ग्योम्शो बाक्तेक्म।

डोंइती डा जग सरीड खोदेशो नीलो यस्पेर माइश्शो हीरामी ग्योम्शो बाक्त। मेको आ नोले डा जग साफ़ीर माइश्शो हीरामी ग्योम्शो बाक्त। मेको आ नोले डा जग बुश कल्केदोन माइश्शो हीरामी ग्योम्शो बाक्त। मेको आ नोले डा जग गिगी स्मारग्द माइश्शो हीरामी ग्योम्शो बाक्त। 20 मेको आ नोले डा जग सुन्तला रड डा सारदोनीक्स माइश्शो हीरामी ग्योम्शो बाक्त। मेको आ नोले डा जग लल सारदीस माइश्शो हीरामी ग्योम्शो बाक्त। मेको आ नोले डा जग हौ नु गिगी ब्वाइश्शो क्रीसोलीथ माइश्शो हीरामी ग्योम्शो बाक्त। मेको आ नोले डा जग सुन रड डा बेरील माइश्शो हीरामी ग्योम्शो बाक्त। मेको आ नोले डा जग शुश हौ तोपास माइश्शो हीरामी ग्योम्शो बाक्त। मेको आ नोले डा जग गिगी क्रीसोप्रास माइश्शो हीरामी ग्योम्शो बाक्त। मेको आ नोले डा जग लल नु नीलो ब्वाइश्शो हीयाचीन्त माइश्शो हीरामी ग्योम्शो बाक्त। मिनु नेल्ल क्येडा नोले डा जग प्याजी रड डा आमेथीस्त माइश्शो हीरामी ग्योम्शो बाक्त।

21 मिनु मेको १२ ओटा लाप्चो चहिं १२ ओटा मोती के सेल्शो बाक्तेक्म। लाप्चो का मोती काम सेल्शो बाक्त। मिनु मेको सहर डा लांपुकी सिसा खोदेशो मारेइ मब्वाइश्शो सुन के बाक्तेक्म।

22 मिनु गो मेको सहरमी परमप्रभु यावे आ खिं मतड। मारदे हना परमप्रभु यावे, नेल्ल सक्ति पाइश्शो परमप्रभु नु पाठा आंमान मेकेर बाक्नीस। 23 मिनु मेको सहरमी नां नु तास्ला दाप्चा ममाल्ब। मारदे हना परमप्रभु यावे आ छेडछेड नेल्ल सहरमी दाप्ब। पाठा मुर आन कली छेडछेड गेब बत्ती बाक्ब। यसैया ६०:३,५,११,१९,२० 24 मिनु रागी रागी डा मुरपुकी मेको सहर डा छेडछेडमी बाक्नीम। मिनु रागी रागी डा पिप आन शोंप नु दारस मेकेर चाक्नीम। 25 मेको सहर डा लाप्चोपुकी गेना हना यो रोक्शो बाक्नीम। मारदे हना मेकेर गेनायो नाक्दो मदुम्ब। जकरिया १४:७ 26 मिनु रागी रागी डा मुरपुकीमी आन शोंप नु दारस मेको सहरमी चाक्नीमी। 27 मिनु जाम्शा लाइबपुकी, प्रांग्रा दिचा डा गेय पाइबपुकी नु जोल पाइबपुकी चहिं मेको सहरमी ओत्रचा मताइनीम। पाठा आ ब्रोंइतीक किताबमी नें ब्रेक्शोपुकी ला ओत्रचा ताइनीम।

22

ब्रोंइचा गेब खोला

1 मिनु परमप्रभु यावे आ स्वर्ग डा गेय पाइबमी ब्रोंइचा गेब खोला कोंइताक्यी। मेको खोला टल्केशो सिसा खोदेशो तांइसाक्व। मिनु मेको खोला परमप्रभु यावे नु पाठा आस ठेयब नित्तीके रे गूशा, इजीकीएल ४७:१-१२; जकरिया १४:८; उत्पती २:९-१० 2 सहर डा लां आ दाते रे पा शाइश्शो बाक्त। मेको खोला ओंथ हांबु नु आइक्की हांबुमी ब्रोंइचा गेब रवा बाक्शो बाक्तेक्म। मेको ब्रोंइचा गेब रवापुकीमी १२ किसिम डा फल सिप्बाक्तेक्म। महिनामी खेयप का सिबाक्तेक्म। मेको ब्रोंइचा गेब रवा आ सफा रागी रागी डा मुर आन कली सापाइक्चा कली बाक्तेक्म। 3 मिनु मेको सहरमी सराप रशो काइ मबाक्नीम। मारदे हना परमप्रभु यावे नु पाठा आस ठेयब नित्तीके मेकेर बाक्ब। मिनु परमप्रभु यावे आ वाइलपुकीमी परमप्रभु यावे कली गेय पाइनीम। यहोसु ७:११-१३ 4 मेकोपुकीमी परमप्रभु यावे आ कुल ताइनीम। मेको आन कुप्फीमी परमप्रभु यावे आ नें ब्रेक्शो बाक्ब। प्रकाश ३:१२ 5 मेको सहरमी गेनायो नाक्दो मदुम्ब। मिनु मेको सहरमी बाक्ब आन कली बत्ती नु नां आ छेडछेड यो ममाल्नीम। मारदे हना परमप्रभु, परमप्रभु यावे मेको आन छेडछेड बाक्ब। मिनु मेकोपुकीमी गेना हना यो सासन पाइनीम।

एको किताब आ पर्बम

6 मिनु मेकोमी आं कली “एको लोत्र नेल्ल थमा बाक्ब। मोपतीके थमा सुइक्ने चाप्नीम। परमप्रभु यावे आ लोत्र पाइब आन सोक्त डा प्रभु बाक्ब। मोपतीके आ वाइलीम वाइल आन कली आ स्वर्ग डा गेय पाइब का सोइक्ताक्व। मारदे सोइक्ताक्व देंशा हना, दुम्चशो लोत्र शेंथ सोइक्ताक्व। आमेन। प्रकाश १:१ 7 मिनु नेनीन, गो फ्रा लेशशा जाक्नुड” दे माइक्ती। सु सुमी एको किताबमी ब्रेक्शो लोत्र नेंशा पाइनीमी, मेको ग्येरसीशो मुर बाक्नीम।

8 गो यूहन्ना नड। एको लोव्र नेंता नु मार दुमचशो बाक्मे, मेको नेल्ल ताता। मिनु आं कली कोंइब परमप्रभु यावे आ स्वर्ग डा गेय पाइब कली सेउ पचा कली आ खोइलीमी बाप्ती। 9 मेकोमी चहिं आं कली “मपावो, गो परमप्रभु यावे आ लोव्र पाइब इ लोक्बपुकी नु एको किताबमी ब्रेक्शो लोव्र पाइबपुकी खोदेशो परमप्रभु यावे आ वाइल नड। परमप्रभु यावे आ डोंइती बाप्शा मान पावो” दे माइक्ती। 10 मिनु मेकोमी आं कली “एको किताबमी ब्रेक्शो लोव्र दुमचाप्तु। मोपतीके खुइश्शा मवोतो, पढेशा नेंपाइक्मी। प्रकाश १०:४; प्रकाश १:३ 11 सु सुमी पाप पाइनीमी, मेको पामेक्ल। सु सु ग्रांरा दिचा डा बाक्मा, मेको मोदेंन बाक्मल। सु सु चहिं ठीक पाइब बाक्नीमी, मेको ठीक पा बाक्मल। सु सु प्रभु आ मुर बाक्मा, मेको मोदेंशोन बाक्मल” दे परमप्रभु यावे आ स्वर्ग डा गेय पाइबमी देंत। दानीएल १२:१०

12 मिनु नोले येसुमी “नेनो, गो फ्रा लेशशा जाक्नुड। मिनु जाक्शा, मुर नेल्ल आन कली आन पशो खोदेशो पा गेनुड। मेको आन गेय दोपा पामे, मोपा गेनुड। 13 गो आल्फा नु ओमेगा नड। नेल्ल क्येडा डोंइती डा नु नेल्ल क्येडा नोले डा नड। गोइब नु थुम्ब यो गो नड। प्रकाश १:८; हिब्रू १३:८ 14 ग्येरसीशो मुर सु सु बाक्नीम देंशा हना, सु सुमी आन वा मुरमे, मेको आन कली ब्रोंइचा गेब रवा आ फल ब्वचा गेनुड। मिनु मेको मुरपुकी मेको सहर डा लाप्चो रे ओव्रचा ताइनीम। प्रकाश ७:१४ 15 सु सुमी चहिं टुना मुना पाइनीमी, तेल्लेम पाइनीमी, मुर साइक्नीमी, मूर्ति नु फुल्लु कली सेउ पाइनीमी। जोल पना पन बाक्नीमी। मेको कुचुम खोदेशो पा सहर रे लाडगा बाक्नीमी” देंत। प्रकाश २१:८,२७; १कोरिन्थी ६:९-१०

16 मिनु येसुमी “गो येसु नड। गो दाऊद पिपी क्येडा डोंइती बाक्ती। मिनु आ चच युइ यो नड। गो टल्केशो सुक्कुर सोरुल यो नड। गो परमप्रभु यावे आ स्वर्ग डा गेय पाइब कली थमा सुइक्ब आन गुम्तीकेमी शेंथ सोइक्ताक्ड” देंत। यसैया ११:१०; लूका १:७८

17 मिनु परमप्रभु यावे आ सोक्त नु ग्युम्लीमी मुर आन कली “पिने” देंनीस। मिनु सु सुमी मेको लोव्र नेंनीमी, मेकोमी यो “पिने” देंमल। सु सु तूत दाक्नी, पिने। मिनु ब्रोंइचा गेब ब्वाक्कु मोशा तूडीन। यसैया ५५:१; यूहन्ना ७:३७

नोले डा लोव्र

18 सु सुमी एको किताबम ब्रेक्शो परमप्रभु यावेम तुइक्पाइश्शो लोव्र नेंनीमी, मेको आन कली गो लोव्र का पाइनुड, मार लोव्र पाइनुड देंशा हना, सु सुमी एको लोव्रमी अर्को लोव्र तेम्नीमी, मेको सजाइ ताइनीमी। मार सजाइ ताइनीमी देंशा हना, परमप्रभु यावेमी एको किताबमी ब्रेक्शो श्येत मोदेशो मुर आन कली गेब। ब्यवस्था ४:२ 19 सु सुमी परमप्रभु यावेमी तुइक्पाइश्शो एको किताबम ब्रेक्शो लोव्र खोइक्नीमी, मेको यो सजाइ ताइनीम। मार सजाइ ताइनीम देंशा हना, परमप्रभु यावेमी मोदेशो मुर आन कली ब्रोंइचा गेब रवा आ फल ब्वचा मगेब। मिनु मेको मुरपुकी परमप्रभु यावे आ योव्रशो यरूसलेम सहरम ओव्रचा यो मताइनीम।

20 मिनु एको लोव्र पाइबमी “आमेन, गो फ्रा लेशशा यीनुड” देंत। मिनु थमा सुइक्बपुकीमी “आमेन, प्रभु येसु जाक्कीन” देंतेक्म। १कोरिन्थी १६:२२ 21 प्रभु येसु आ शिशी नेल्ल नु बाक्ल।